

LEABHRAICHEAN

AN

T-SEANN TIOMNAIDH

AGUS AN

TIOMNAIDH NUAIDH;

AIR AN TARRUING

O NA CEUD CHANAINIBH

CHUM

GAELIC ALBANNAICH.

LONDON:

PRINTED FOR THE BRITISH AND FOREIGN BIBLE SOCIETY,

INSTITUTED IN THE YEAR 1804:

(FROM THE 12TH EDITION PUBLISHED IN EDINBURGH IN 1826.) *From the 12th 1826*

By R. Watts, Crown Court, Temple Bar.

M DCCC XXIX.

LEABHRAICHEAN

AN

T-SEANN-TIOMNAIDH.

| | Caib. | | Caib. |
|---|-------|------------------------|-------|
| GENESIS; <i>anns am bheil</i> | 50 | Ecclesiastes | 12 |
| Ecsodus | 40 | Dàn Sholaimh | 8 |
| Lebhiticus | 27 | Isaiah | 66 |
| Aireamh | 36 | Ieremiah | 52 |
| Deuteronomi | 34 | Tuireadh | 5 |
| Iosua | 24 | Eseciel | 48 |
| Breitheamhna | 21 | Daniel | 12 |
| Rut | 4 | Hosea | 14 |
| I. Samuel | 31 | Joel | 3 |
| II. Samuel | 24 | Amos | 9 |
| I. Rìgh | 22 | Obadiah | 1 |
| II. Rìgh | 25 | Ionah | 4 |
| I. Eachdraidh | 29 | Micah | 7 |
| II. Eachdraidh | 36 | Nahum | 3 |
| Esra | 10 | Habacuc | 3 |
| Nehemiah | 13 | Sephaniah | 3 |
| Ester | 10 | Hagai | 2 |
| Iob | 42 | Sechariah | 14 |
| Sailm | 150 | Malachi | 4 |
| Gnàth-fhocal | 31 | | |

LEABHRAICHEAN

AN

TIOMNAIDH-NUAIDH.

| | Caib. | | Caib. |
|--|-------|---|-------|
| SOISGEUL Mhata, <i>anns am bheil</i> | 28 | II. Litir Phoil chum nan Te-salonianach | 3 |
| Soisgeul Mharcuis | 16 | I. Timoteuis | 6 |
| Soisgeul Lucais | 24 | II. Timoteuis | 4 |
| Soisgeul Eoin | 21 | Tituis | 3 |
| Gnìomhara nan Abstol | 28 | Philemoin | 1 |
| Litir Phoil chum nan Romhanach | 16 | Eabhruidheach | 13 |
| I. Corintianach | 16 | Litir Sheumais | 5 |
| II. Corintianach | 13 | Litir I. Pheadair | 5 |
| Galatianach | 6 | Litir II. Pheadair | 3 |
| Ephesianach | 6 | Litir I. Eoin | 5 |
| Philipianach | 4 | Litir II. Eoin | 1 |
| Colosianach | 4 | Litir III. Eoin | 1 |
| I. Litir Phoil chum nan Tsalonianach | 5 | Litir Iudais | 1 |
| | | Taisbeanadh Eoin | 22 |

CEUD LEABHAR MHAOIS,

D' AN AINM

GENESIS.

CAIB. I.

1 Cruthachadh nan nèamh agus na talmhainn, 3 An t-soluis, 14 Na grèine, na gealaich, agus nan reult, 20 Eisg agus eunlaith, 24 Spréidh agus bheathaichean eile na talmhainn, 30 agus cruthachadh an duine ann an coslas Dé.

SAN toiseach chruthaich Dia¹ na nèamhan agus an talamh.

2 Agus bha 'n talamh gun dealbh² agus falamh³; agus bha dorchadas air⁴ aghaidh na doimhne⁵; agus bha Spiorad Dé a' gluasad⁶ air aghaidh nan uisgeachan.

3 Agus thubhairt⁷ Dia, Biodh solus ann: agus bha solus ann.

4 Agus chunnaic⁸ Dia an solus, gu⁹ 'n robh¹⁰ e maith¹¹: agus chuir Dia dealachadh eadar an solus, agus an dorchadas.

5 Agus dh'ainmich Dia an solus Là¹², agus an dorchadas dh'ainmich e Oidhche: agus b' iad am feasgar agus a' mhaduinn an ceud là.

6 Agus thubhairt Dia, Biodh athar¹³ am meadhon nan uisgeachan, agus cuireadh e dealachadh eadar uisgeachan agus uisgeacha.

7 Agus rinn Dia an t-athar, agus chuir e dealachadh eadar na h-uisgeachan a bha fuidh 'n athar, agus na h-uisgeachan a bha os ceann¹⁴ an athair: agus bha e mar sin.

8 Agus dh'ainmich Dia an t-athar Nèamh: agus b' iad am feasgar agus a' mhaduinn an dara là¹⁵.

9 Agus thubhairt Dia, Cruinnichear na h-uisgeachan a ta fuidh nèamh a dh'aon àite, agus leigear ris an tìr thioram¹⁶: agus bha e mar sin.

10 Agus dh'ainmich Dia an tìr thioram Talamh, agus cruinneachadh nan uisgeacha dh'ainmich e Fàirgeachan¹⁷: agus chunnaic Dia gu 'n robh e maith.

11 Agus thubhairt Dia, Thugadh an talamh a mach feur, luibh a ghineas siol,

craobh-mheas a bheir a mach meas¹⁸ a réir a gnè¹⁹, aig am bheil a siol²⁰ innte féin air an talamh: agus bha e mar sin.

12 Agus thug an talamh a mach feur, luibh a ghineas siol a réir a gnè, agus craobh a bheir a mach meas, aig am bheil a siol innte féin a réir a gnè: agus chunnaic Dia gu 'n robh e maith.

13 Agus b' iad am feasgar agus a' mhaduinn an treas là.

14 Agus thubhairt Dia, Biodh soluis²¹ ann an speuraibh nèimh a chur dealachaidh eadar an là agus an oidhche, agus bitheadhiad air son chomharan²², agus air son aimsirean, agus airson làithean²³, agus bhliadhnachan.

15 Agus biodh iad mar sholusaibh²⁴ ann an speuraibh nèimh, a thoirt soluis air an talamh²⁵: agus bha e mar sin.

16 Agus rinn Dia dà sholus mhòr, an solus a's mò a riaghladh an latha²⁶, agus an solus a's lugha a riaghladh na h-oidhche: agus na reultan²⁷.

17 Agus shuidhich Dia iad ann an speuraibh nèimh, a thoirt²⁸ soluis air an talamh,

18 Agus a riaghladh san là, agus an oidhche²⁹, agus a chur dealachaidh eadar an solus agus an dorchadas: agus chunnaic Dia gu 'n robh e maith.

19 Agus b' iad am feasgar agus a' mhaduinn an ceathramh là.

20 Agus thubhairt Dia, Thugadh na h-uisgeachan a mach gu pailt an creutair gluasadach anns am bheil beatha³⁰, agus biodh eunlaith ag itealaich³¹ os ceann na talmhainn air aghaidh speuran nèimh³².

21 Agus chruthaich Dia muca-mara³³ mòra, agus gach uile chreutair beò a ghluaisas, a thug na h-uisgeachan a mach gu pailt a réir an gnè, agus gach eun iteagach³⁴ a réir a gnè: agus chunnaic Dia gu 'n robh e maith.

¹ an t-Uile-chumhachdach. ² gun chumadh, gun dreach. ³ fàs; fulamh. Eir. ⁴ er; ar. Eir.

⁵ an aigein. ⁶ a' gur gu caomh. ⁷ thuir; a dubhairt. Eir. ⁸ chomhairc. Eir.

⁹ go. Eir. ¹⁰ ro; raibh. Eir. ¹¹ maith. ¹² ghoir Dia do'n t-solus Latha. ¹³ aidhear, tor-

mailt, speuran. ¹⁴ os cionn. ¹⁵ agus bha am feasgar ann, agus bha a' mhaduinn ann, an dara là.

¹⁶ an talamh thioram, an àir thioram. ¹⁷ Marama, Cuan'a. ¹⁸ a thilgeas meas; air

am fas meas. ¹⁹ cineil, seòrsa. ²⁰ fras, ros. ²¹ lèchraim. ²² mar chomharthan.

²³ làithe. ²⁴ air son sholusan, nan lèchranabhl. ²⁵ a shuillseachadh na talmhainn. ²⁶ là, lè.

²⁷ reannaga, rionnagan. ²⁸ a thabhairt. ²⁹ a riaghladh an latha agus na h-oidhche. ³⁰ anam beò. Eabh. ³¹ agus cunlaich a dh'iteal-

aicheas. ³² ann an speuraibh nèimh. ³³ m'la. Eir. ³⁴ sgiathach, sgiathnuch.

GENESIS, I. II.

22 Agus bheannaich Dia iad, ag ràdh, Siòlaichibh, agus fàsaibh lionmhor, agus lionaibh na h-uisgeachan anns na fairgibh, agus fàsadh an eunlaith lionmhor air an talamh.

23 Agus b'iad am feasgar agus a' mhaduinn an cùigeadh là.

24 Agus thubhairt Dia, Thugadh na talamh a mach an crentair beò a réir a ghnè, spréidh, agus gach nì a shnàigeas¹, agus beathaiche² na talmhainn a réir an ghnè: agus bha e mar sin.

25 Agus rinn Dia beathaiche na talmhainn a réir an ghnè, agus an spréidh a réir an ghnè, agus gach nì a shnàigeas air an talamh a réir a ghnè: agus chunnaic Dia gu'n robh e maith.

26 Agus thubhairt Dia, Deanamaid duine 'nar dealbh³ féin, a réir ar coslais féin, agus biodh uachdaranachd aca os ceann éisg na mara, agus os ceann eunlaith nan speur⁴, agus os ceann na spréidhe, agus os ceann na talmhainn uile, agus os ceann gach nì a shnàigeas a ta snàigeadh air an talamh.

27 Agus chruthaich Dia an duine 'na dhealbh féin; ann an dealbh Dhé chruthaich se e: firionnach agus boirionnach⁵ chruthaich e iad.

28 Agus bheannaich Dia iad, agus thubhairt Dia riu, Siòlaichibh, agus fàsaibh lionmhor, agus lionaibh an talamh, agus ceamnsaichibh e; agus biodh uachdaranachd agaibh os ceann éisg na mara, agus os ceann eunlaith nan speur, agus os ceann gach nì beò a ghluaiseas air an talamh.

29 Agus thubhairt Dia, Feuch, thug mi dhuibh gach luibh a ghineas siol, a ta air aghaidh na talmhainn uile, agus gach craobh anns am bheil meas craobhe a ghineas siol; dhuibhse bithidh e mar bhiadh⁶.

30 Agus do uile bheathaichibh⁷ na talmhainn, agus do uile eunlaith nan speur, agus do gach nì a shnàigeas air an talamh, anns am bheil beatha⁸, thug mi gach luibh ghorm⁹ mar bhiadh: agus bha e mar sin.

31 Agus chunnaic Dia gach nì a rinn e, agus, feuch, bha e ro mhaith. Agus b'iad am feasgar agus a' mhaduinn an seathadh¹⁰ là.

CAIB. II.

1 An seachdamh là air a naomhachadh. 8 Gàradh Edein. 17 Craobh eòlais a' mhaith agus an uile. 21 Cruthachadh na mnà agus orduchadh a' phòsaidh.

AGUS chrìochnaich eadh na nèamhan agus an talamh, agus an sluagh uile.

¹ chrìbas; shnàigheas, shnàmmas. Eir.
² fàilth-bheathaiche. ³ iontaigh, cruth.
⁴ nòm, an athair. ⁵ fear agus bean, firionn agus bainionn. ⁶ air son bith. ⁷ gach uile bheathach. ⁸ anam beò. Eabh. ⁹ ghlas.
¹⁰ seiseadh. Eir. ¹¹ rinn e tàmh.
¹² Iehobhah, Eabh. ¹³ Agus gach uile phreas

2 Agus chrìochnaich Dia air an t-seachdamh là 'obair a rinn e; agus ghabh e fois¹¹ air an t-seachdamh là o' 'obair uile a rinn e.

3 Agus bheannaich Dia an t-seachdamh là, agus naomhaich se e: do bhrìgh gur ann air a ghabh e fois o' 'obair uile, a chruthaich Dia agus a rinn e.

4 Is iad so ginealaich nan nèamh agus na talmhainn, 'nuair a chruthaich eadh iad, san là an d'rinn an Tighearna¹² Dia an talamh agus na nèamhan.

5 Agus cha robh uile phreasan na macharach fathast anns an talamh, agus cha d'fhàs fathast uile lusan na macharach¹³; do bhrìgh nach d'thug an Tighearna Dia air uisge frasadh¹⁴ air an talamh, agus cha robh duine ann a shaoithreachadh na talmhainn.

6 Ach chaidh ceò suas o'n talamh, agus dh'uisgich e aghaidh na talmhainn uile.

7 Agus dhealbh an Tighearna Dia an duine do dhuslach na talmhainn: agus shéid e ann an cuineinibh¹⁵ a shroine anail na beatha; agus dh'fhàs an duine 'na anam beò.

8 Agus shuidhich¹⁶ an Tighearna Dia gàradh¹⁷ ann an Eden san àird an ear, agus chuir e an sin an duine a dhealbh e.

9 Agus thug an Tighearna Dia air gach uile chraoibh fàs as an talamh a ta taitneach do'n t-sealladh, agus maith a chum bidh: craobh na beatha mar an ceudna ann am meadhon a' ghàraidh, agus craobh eòlais a' mhaith agus an uile.

10 Agus chaidh amhainn¹⁸ a mach á h-Eden a dh'uisgeachadh a ghàraidh; agus as a sin roinneadh i, agus dh'fhàs i 'na ceithir cheannaibh¹⁹.

11 Is e ainm na ceud aimhne Pison; so i a ta cuartachadh tìre Chabhilah uile, far am bheil òr.

12 Agus a ta òr na tìre sin maith: an sin²⁰ a ta bdellium agus a' chlach onics.

13 Agus is e ainm na dara aimhne Gihon: is i sin a ta cuartachadh tìre Chuis²¹ uile.

14 Agus is e ainm na treas aimhne Hecel: is i sin a tha dol do'n taoibh an ear do Asiria. Agus is i a' cheathramh amhainn Euphrates.

15 Agus ghabh an Tighearna Dia an duine agus chuir se e ann an gàradh Edein, g'a shaoithreachadh²² agus g'a ghleidheadh.

16 Agus dh'àithn an Tighearna Dia do'n duine, ag ràdh, Do gach uile chraoibh sa' ghàradh feudaidh tu itheadh ghr saor:

17 Ach do chraoibh eòlais²³ a' mhaith agus an uile, cha'n ith thu dh'i sin: oir

na macharach mun robh e anns an talamh, agus gach uile lus na macharach mun d'fhàs e. ¹⁴ sileadh.
¹⁵ pollaibh, pollaraibh, coimhleanaibh.
¹⁶ phlamdaich, dheasaich. ¹⁷ lios. ¹⁸ abhainn.
¹⁹ as sin sgaoil i, agus dh'fhàs i 'na ceithir meuraibh.
²⁰ ann an sin. ²¹ Arabia; Ethiopia. Sasg.
²² dheasachadh. ²³ fhios.

GENESIS, II. III.

anns an là a dh'itheas tu dlhith, gu cinn-teach bàsaichidh tu.

18 Agus thubhairt an Tighearna Dia, Cha¹ 'n'eil e maith gu'm biodh an duine 'na aonar: Ni mi dha còmhnaidh² d'a réir féin³.

19 Agus dhealbh an Tighearna Dia as an talamh, uile bheathaiche na macharach, agus uile eunlaith nan speur, agus thug e iad a chum Adhaimh, a dh'fhaicinn cionnas a dh'ainmicheadh e iad: agus ge b'e ainm a thug Adhamh air gach creutair beò⁴, b'e sin a b'ainm dha.

20 Agus thug Adhamh ainmean do'n spréidh uile, agus do eunlaith nan speur, agus do uile bheathaichibh na macharach: ach do Adhamh cha d'fhuaradh còmhnaidh d'a réir féin.

21 Agus thug an Tighearna Dia air codal trom tuiteam air Adhamh, agus choidil e: agus ghabh e h-aon d'a ainsibh, agus dhùin e an fheoil suas 'na h-àit.

22 Agus thog⁵ an Tighearna Dia an aisne a thug e o'n duine suas 'na mnaoi, agus thug e i chum an duine.

23 Agus thubhairt Adhamh, So a nis⁶ cnàimh do m' chnàmhaibh, agus feoil do m' fheoil-sa: goirear bean⁷ dith, do bhrìgh gur ann as an duine⁸ a thugadh i.

24 Air an aobhar⁹ sin fàgaidh fear 'ath-air agus a mhàthair, agus dlùth-leanaidh se r'a mhnai: agus bithidh iad 'nan aon fheoil.

25 Agus bha iad le chéile lomnochd, an duine agus a bhean; agus cha robh nàire orra.

CAIB. III.

1 Cealg na nathrach. 6 Peacadh an duine, 15 agus gealladh saorsa Dé trid shìl na mnà.

ANIS bha an nathair¹⁰ ni bu sheolta¹¹ na h-aon do bheathaichibh na macharach a rinn an Tighearna Dia; agus thubhairt i ris a' mhnai, Seadh, an dubhairt Dia, Cha 'n'ith sibh do gach craoibh sa' ghàradh?

2 Agus thubhairt a' bhean ris an nathair, Do mheas craobhan a' ghàraidh feudaidd sinn itheadh:

3 Ach do mheas na craoibhe a ta ann am meadhon a' ghàraidh, thubhairt Dia, Cha'n ith sibh dheth, agus cha bhean sibh ris, a chum nach faigh¹² sibh bàs.

4 Agus thubhairt an nathair ris a' mhnai, Gu cinn-teach cha 'n' fhaigh sibh bàs.

5 Oir a ta fios aig Dia, san là a dh'itheas sibh dheth, gu'm fosglar bhur¹³ suilean,

agus gu'm bi sibh mar dhée, fiosrach air maith agus air olc.

6 Agus chunnaic a' bhean gu'n robh a' chraobh maith a chum bidh, agus gu'n robh i taitneach do 'n t-shùil¹⁴, agus 'na craobhr'a miannachadh a dheanamh neach glic; agus ghabh i d'a meas agus dh'ith i, agus thug i mar an ceudna d'a fear maille rithe, agus dh'ith e.

7 Agus dh'fhosglaigh an sùilean le chéile, agus dh'aithnich iad gu'n robh iad lomnochd; agus dh' fhuair iad duilleach croinn-fhùge r'a chéile, agus rinn iad dhoibh féin aprain¹⁵.

8 Agus chual¹⁶ iad guth an Tighearna Dé ag imeachd¹⁶ sa' ghàradh, am fionnfhuair-eachd an là: agus dh'fholaich Adhamh agus a bhean iad fèin o ghnùis an Tighearna Dé am measg chraobhan a' ghàraidh.

9 Agus dh'éigh¹⁷ an Tighearna Dia air Adhamh, agus thubhairt e ris, C'ait am bheil thu?

10 Agus thubhairt e, Chuala, mi do ghuth sa' ghàradh, agus bha eagal orm a chionn gu'n robh mi lomnochd¹⁸, agus dh'fholaich mi mi féin.

11 Agus thubhairt e, Cò dh'innis dhuit gu'n robh thu lomnochd? An d'ith thu do'n chraoibh, a dh'aithn mise dhuit gun itheadh dhith?

12 Agus thubhairt an duine, A' bhean a thug thu gu bhi maille rium, thug ise dhomh do'n chraoibh, agus dh'ith mi.

13 Agus thubhairt an Tighearna Dia ris a' mhnai, Ciod e so a rinn thu¹⁹? agus thubhairt a' bhean, Mheall an nathair mi, agus dh'ith mi.

14 Agus thubhairt an Tighearna Dia ris an nathair, A chionn gu'n d' rinn thu so, tha thu mallaichte thar gach ainmhidh²⁰, agus thar uile bheathaiche na macharach: air do bhroinn imichidh tu, agus duslach²¹ ithidh tu uile làithean²² do bheatha.

15 Agus cuiridh mi naimhdeas eadar thusa agus a' bhean, agus eadar do shìol-sa agus a sìol-sa: bruthaidh esan²³ do cheann, agus bruthaidh tusa a shàil-san.

16 Ris a' mhnai thubhairt e, Meudaichidh mi gu mòr do dhoilgheas agus do thoircheas; am péin beiridh tu clann, agus ri t'fhear bithidh do thogradh²⁴, agus bithidh uachdaranachd aige ort²⁵.

17 Agus ri h-Adhamh thubhairt e, Do bhrìgh gu'n d'éisidh thu ri guth do mhnà, agus gu'n d'ith thu do'n chraoibh a

¹ Cho. ² congnamh. Eir. ³ a bhios iomchuidh dha, cosmhuil ris féin. ⁴ thug e iad a dh'ionnsuidh Adhaimh, a dh'fhaicinn ciod a ghoireadh e dhiubh: agus ge b'e air bith a ghoir Adhamh do gach uile creutair beò. ⁵ rinn. ⁶ a nois. Eir. ⁷ isha. Eabh. ⁸ ish. Eabh. ⁹ adhbhar. ¹⁰ aithir. ¹¹ inleachdaiche, raideile, shit-

eile, charaiche, chuibheartaiche. ¹² an t-eagal gu'm fuigh. ¹³ ur. ¹⁴ na sùilbhi. ¹⁵ criosan. Eabh. ¹⁶ a' spaisdeireachd, a' sràid-imeachd. ¹⁷ ghoir, ghairm, ghlaodh. ¹⁸ a chionn mi bhi rùisgte. ¹⁹ Gu dè so a rinn thu? ²⁰ spréidh. ²¹ àir. ²² làithe, làthachan. ²³ escan, eisean. ²⁴ iartus. ²⁵ os do cheann.

GENESIS, III. IV.

dh'athn mise dhuit, ag ràdh, Cha'n ith thu dhith, *tha'n* talamh mallachte air do shon; ann an doilgheas ithidh tu dheth uile làithean do bheatha.

18 Agus droighionn agus chuarain¹ bheir e mach dhuit, agus ithidh tu luibh na macharach.

19 Am fallus² do ghnùise ithidh tu aran, gus am pill thu dh' ionnsuidh na talmhainn³; oir aisde thugadh thu: oir is duslach thu, agus gu duslach pillidh tu.

20 Agus thug Adhamh Eubha mar ainm air a mnaoi, do bhrìgh gu'm b'i màthair nan uile bheò.

21 Agus rinn an Tighearna Dia do Adhamh agus d'a mnaoi, còtaichean croicinn, agus chòmdaich e iad⁴.

22 Agus thubhairt an Tighearna Dia, Feuch, a ta'n duine air fàs mar aon dhinn *fèin*, fìosrach air maith agus olc. Agus a nis air eagal gu'n sineadh e mach a làmh, agus gu'n gabhadh e mar an ceudna do chraoibh na beatha, agus gu'n itheadh e, agus gu'm biodh e beò gu sìorruidh:

23 Air an aobhar sin, chuir an Tighearna Dia a mach e à gàradh Edein, a shaoithreachadhna talmhainn, as an d'thugadh e.

24 Agus dh'fhògair e mach an duine; agus shuidhich e san taobh an ear do ghàradh Edein Cheruban⁵, agus claidheamh lasarach⁶, a bha tionndadh air gach làimh, a ghleidheadh⁷ slighe craoibhe na beatha.

CAIB. IV.

1 Breith Chain agus Abeil. 8 Mortadh Abeil. 11 Mallachadh Chain. 19 Lamech agus a dhà mnaoi.

AGUS dh'athnich Adhamh a bhean Eubha, agus dh'fhàs i torrach⁸, agus rug i Cain, agus thubhairt i, Fhuair mi duine o'n Tighearna.

2 Agus a ris rug i a bhràthair Abel: agus bha Abel 'na bhuachaille chaorach, ach bha Cain 'na threabhaiche fearainn⁹.

3 Agus tharladh¹⁰ an ceann làithean àraidh¹¹, gu'n d'thug Cain do thoradh an fhearainn tabhartas¹² do'n Tighearna.

4 Agus thug Abel mar an ceudna do cheud-ghinibh a thréid, agus d'an saill: agus bha meas aig an Tighearna air Àbel agus air a thabhartas:

5 Ach air Cain, agus air a thabhartas, cha robh meas aige. Agus bha Cain fuidh throm fheirg¹³, agus thuit a ghnùis¹⁴.

6 Agus thubhairt an Tighearna ri Cain, C'ar son a tha fearg ort? agus c'ar son a

thuit do ghnùis?

7 Ma ni thu gu maith, nach gabhar riut? agus mur dean thu gu maith, aig an dorus *tha* peacadh 'ua luidhe. Agus riutsa bithidh a thogradh, agus bithidh uach-daranachd agad air.

8 Agus labhair Cain ri h-Abel¹⁵ a bhràthair: agus 'nuair a bha iad sa' mhachair¹⁶, dh'èirich Cain suas an aghaidh Abeil a bhràthar, agus mharbh se e.

9 Agus thubhairt an Tighearna ri Cain, C'ait' am bheil Abel do bhràthair? Agus thubhairt esan, Cha'n 'eil fhios agam¹⁷. Am mise fear-gleidhidh mo bhràthar?

10 Agus thubhairt esan, Ciod a rinn thu? *Tha* guth fola do bhràthar ag éigheach riumsa o'n talamh.

11 Agus a nis *tha* thu mallachte o'n talamh, a dh'fhosgail a bheul a ghabhail fola do bhràthar o d'làimh.

12 'Nuair a shaoithricheas tu an talamh, cha toir¹⁸ e dhuit á so suas a neart. A' t'fhògarach agus a' t'fhear-fuadain bithidh¹⁹ tu air an talamh.

13 Agus thubhairt Cain ris an Tighearna, Is mò mo pheanas na gur urrainn mi ghluan²⁰.

14 Feuch, dh'fhògair thu mi mach, an diugh, bhàrr aghaidh na talmhainn: agus o d' ghnùis-sa folaichear mi, agus bithidh mi a'm'fhògarach agus a'm'fhear-fuadain air an talamh; agus tarlaidh gach neach a gheibh mi²¹, gu marbh e mi.

15 Agus thubhairt an Tighearna ris, Uime sin ge b'e air bith a mharbhas Cain, nithear a sheachd uiread do dhìoghaltas air²². Agus chuir an Tighearna comhara air Cain, a chum ge b'e neach a gheibheadh e nach marbhadh se e.

16 Agus chaidh Cain a mach á làthair an Tighearna, agus ghabh e còmhnuidh ann an tìr Nod an taobh an ear do Eden²³.

17 Agus dh'athnich Cain a bhean, agus dh'fhàs i torrach, agus rug i Enoch: agus thog e baile²⁴, agus ghoir e ainm a' bhaile a réir ainme a mhic, Enoch.

18 Agus rugadh do Enoch Irad; agus ghin Irad Mehuiael; agus ghin Mehuiael Metusael; agus ghin Metusael Lamech.

19 Agus ghabh Lamech dha féin dà mnaoi: b'e ainm a h-aon diubh Adah, agus ainm na mnà eile Sillah.

20 Agus ghin Adah Iabal: b'esan athair na droinge²⁵ a ta gabhail còmhnuidh am bùthaibh²⁶, agus na droinge aig am bheil spréidh.

¹ oighionnach; foghannain. Eir. ² follus.

³ àire. ⁴ dh'eudaich e iad, chuir e trusgan orra.

⁵ Cherubim. Eabh. ⁶ lasartha. ⁷ choimhead.

⁸ thorraicheadh i, dh'fhàs i leatromach.

⁹ talmhainn. ¹⁰ thachair; bha e. Eabh.

¹¹ àraid. ¹² tiodhlac, ofrail. ¹³ làn feirge.

¹⁴ luidh gruaim air. ¹⁵ bha focail eadar Cain agus Abeil. ¹⁶ san fhaiche, sa' mhaigh.

¹⁷ Cha'n aithne dhomh, cha'n fhiosrach mi.

¹⁸ cha doir, cha tabhair. ¹⁹ biadh. Eir.

²⁰ Is mò mo choir na gu'm feudar a laghadh dhomh. ²¹ dh'amais as orm.

²² nithear dìoghaltas seachd shìllte air.

²³ san àird an ear o Eden.

²⁴ cathair.

²⁵ muinntir, dream. ²⁶ bothagaibh, pàillunaibh.

GENESIS, IV. V.

21 Agus b'e ainm a bhràthar Iubal: b'e-san athair nan uile a laimhsicheas clàrsach agus organ.

22 Agus Sillah, rug ise mar an ceudna Tubalcain, fear-teagaisg gach uile fhir-eird ann an ùmha¹ agus an iarunn: agus b'i piuthar Thubalcain, Naamah.

23 Agus thubhairt Lamech r'a mhnàibh, Adah agus Sillah, Cluinnibh mo ghuth, a mhnà Lameich, éisdibh ri m' chainnt: oir mharbh mi duine a chum mo lotaidh, agus ogannach a chum mo chiuraidh².

24 Ma dhòlar Cain a sheachd uiread, gu deimhin *dìolar* Lamech a sheachd-deug agus a trì fichead uiread.

25 Agus dh'aithnich Adhamh a ris a bhean, agus rug i mac, agus thug i Set³ mar ainm air; oir dh'òrduich Dia, *thubhairt i*, dhomhsa sliochd eile an àite Abeil, a mharbh Cain.

26 Agus do Shet féin mar an ceudna rugadh mac, agus thug e Enos mar ainm air: an sin thòisich daoine ri gairm air ainm an Tighearna.

CAIB. V.

1 *Ginealach, beatha, agus bàs nam prìomh-aithriche, o Adhamh gu Noah.* 24 *Diadhaidheachd Enoch, agus a ghabhail suas do fhlaithheanas.*

IS san là an do chruthaich Dia an duine, ann an coslas Dé rinn se e.

2 Firionnach agus boirionnach chruthaich e iad; agus bheannaich e iad, agus thug e Adhamh⁴ mar ainm orra, san là an do chruthaich ead iad.

3 Agus bha Adhamh beò ceud agus deich bliadhna fichead, agus ghlin e *mac* na choslas féin, a réir iomhaigh féin⁵: agus thug e Set mar ainm air.

4 Agus b'i ad làithean Adhaimh an déigh dha Set a ghintinn⁶, ochd ceud bliadhna: agus ghlin e mic agus nigheana.

5 Agus b'i ad uile làithean Adhaimh bha e beò, naoi cend agus deich bliadhna fichead; agus fhuair e bàs.

6 Agus bha Set beò ceud agus cùig bliadhna, agus ghlin e Enos.

7 Agus bha Set beò, an déigh dha Enos a ghintinn, ochd ceud agus seachd bliadhna, agus ghlin e mic agus nigheana.

8 Agus b'i ad uile làithean Shet naoi ceud agus dà bhliadhna dheug; agus fhuair e bàs.

9 Agus bha Enos beò ceithir fichead bliadhna agus a deich, agus ghine Cainan.

10 Agus bha Enos beò, an déigh dha Cainan a ghintinn, ochd ceud agus cùig bliadhna deug, agus ghlin e mic agus nigheana.

11 Agus b' iad uile làithean Enos naoi

ceud agus cùig bliadhna; agus fhuair e bàs.

12 Agus bha Cainan beò deich bliadhna agus trì fichead, agus ghlin e Mahalaleel.

13 Agus bha Cainan beò, an déigh dha Mahalaleel a ghintinn, ochd ceud agus da fhichead bliadhna, agus ghlin e mic agus nigheana.

14 Agus b'i ad uile làithean Chainain naoi ceud agus deich bliadhna; agus fhuair e bàs.

15 Agus bha Mahalaleel beò cùig bliadhna agus trì fichead, agus ghlin e Iared.

16 Agus bha Mahalaleel beò, an déigh dha Iared a ghintinn, ochd ceud agus deich bliadhna fichead, agus ghlin e mic agus nigheana.

17 Agus b'i ad uile làithean Mhahaleel ochd ceud, ceithir fichead, agus cùig bliadhna deug; agus fhuair e bàs.

18 Agus bha Iared beò ceud agus trì fichead agus dà bhliadhna, agus ghlin e Enoch.

19 Agus bha Iared beò, an déigh dha Enoch a ghintinn, ochd ceud bliadhna, agus ghlin e mic agus nigheana.

20 Agus b' iad uile làithean Iareid naoi ceud, trì fichead, agus dà bhliadhna; agus fhuair e bàs.

21 Agus bha Enoch beò trì fichead agus cùig bliadhna, agus ghlin e Metuselah.

22 Agus ghluais Enoch maille ri Dia, an déigh dha Metuselah a ghintinn, trì cheud bliadhna, agus ghlin e mic agus nigheana.

23 Agus b' iad uile làithean Enoch trì cheud agus trì fichead, agus cùig bliadhna.

24 Agus ghluais Enoch maille ri Dia, agus cha robh e ann, oir thug Dia leis e.

25 Agus bha Metuselah beò ceud agus ceithir fichead, agus seachd bliadhna agus ghlin e Lamech.

26 Agus bha Metuselah beò, an déigh dha Lamech a ghintinn, seachd ceud, ceithir fichead, agus dà bhliadhna, agus ghlin e mic agus nigheana.

27 Agus b' iad uile làithean Mhetuselah naoi ceud agus trì fichead agus naoi bliadhna; agus fhuair e bàs.

28 Agus bha Lamech beò ceud agus ceithir fichead agus dà bhliadhna, agus ghlin e mac.

29 Agus thug e Noah mar ainm air, ag ràdh, Bheir an tì so *féin* sòlas dhuinne thaobh ar n-oibre agus saothreach ar làmh, a thaobh na talmhainn a mhallaich an Tighearna.

30 Agus bha Lamech beò, an déigh dha Noah a ghintinn, cùig ceud, ceithir fichead, agus cùig bliadhna deug; agus ghlin e mic agus nigheana.

¹ prais.

³ Seth. Eabh.

² dhochair.

⁴ duine.

⁵ na dhealbh, 'na chruth féin.

⁶ ghineamhuinn. Eir.

GENESIS, VI. VII.

31 Agus b' iad uile làithean Lameich, seachd ceud agus trì fichead agus seachd bliadhna-deug; agus fhuair e bàs.

32 Agus bha Noah cuig ceud bliadhna dh'aois: agus ghin Noah Sem, Ham, agus Iaphet.

CAIB. VI.

1 *Truailleadhead a' chinne-daoine, a bhrosnach Dia gu an sgrìos le tuit, saor o Noah agus a theaghlach.* 14 *An àire air a h-orduchadh.*

AGUS 'nuair a thòisich daoine ri fàs lionmhor air aghaidh na talmhainn, agus a rugadh nigheana dhoibh,

2 Agus a chunnaic mic Dhé nigheana dhaoine¹, gu'n robh iad sgiamhach, ghabh iad dhoibh féin mnàid do gach uile a rògh-naich iad.

3 Agus thubhairt an Tighearna, Cha bhi mo Spiorad a' strì ris an duine a ghnàth², do bhrìgh gur feoil a mhàin e³: gidheadh bithidh a làithean ceud agus fichead bliadhna.

4 Bha famhairean⁴ air an talamh 'sna laithibh sin; agus mar an ceudna 'na dhéigh sin, 'nuair a thàinig mic Dhé a steach a chum nigheana dhaoine, agus a rug iad clann dhoibh, dh'fhàs iad sin 'nan daoineibh treuna, a bha o shean 'nan daoineibh ainmeil.

5 Agus chunnaic an Tighearna gu'm bu mhòr aingidheadh an duine air an talamh, agus gu'n robh uile bhreithneachadh smuaintean a chridhe a mhàin olc gach aon là⁵.

6 Agus b'aithreach leis an Tighearna gu'n d' rinn e an duine air an talamh, agus thog e doilgheas⁶ da 'na chridhe.

7 Agus thubhairt an Tighearna, Sgrìosaidd mi an duine, a chruthaich mi, bhàrr aghaidh na talmhainn, araon duine agus ainmhidh, agus an creutair a shnàigeas, agus eunlaith nan peur; oir is aithreach leam gu'n d' rinn mi iad.

8 Ach fhuair Noah deadh-ghean⁷ ann an suilb an Tighearna.

9 Is iad so ginealach Noah: Bha Noah 'na dhuine cothromach⁸, agus iomlan 'na linn⁹; agus ghluais Noah maille ri¹⁰ Dia.

10 Agus ghin Noah triuir mhac, Sem, Ham, agus Iaphet.

11 Agus bha 'n talamh truailldh am fianuis Dé, agus lionadh an talamh le foirneart.

12 Agus dh'amhairc Dia air an talamh, agus, feuch, bha e truailldh; oir thruaill gach uile fheoil a slighe air an talamh.

13 Agus thubhairt Dia ri Noah, Thàinig crìoch gach uile fheòla a'm' fhianuis; oir tha'n talamh air a lionadh le foirneart d'an trid-san¹¹: agus, feuch, sgrìosaidd mise iad maille ris an talamh.

14 Dean dhuit féin àirc do fhiodh ghoph-er; seòmraichean ni thu san àirc¹², agus còmhdaichidh tu i a stigh agus a muigh le pic.

15 Agus so a' chumachd air an dean thu i: Tri cheud làmh-choille¹³ fad na h-àirce, leth-cheud làmh-choille a leud, agus deich 'ar fhichead¹⁴ làmh-choille a h-àirde.

16 Uimeag¹⁵ ni thu do'n àirc, agus an làmh-choille crìochnaichidh tu i 'na mullach¹⁶; agus dorus na h-àirce cuiridh tu 'na taobh: le lobhtaibh ìochdarach, meadh-onach¹⁷, agus uachdarach¹⁸ ni thu i.

17 Agus, feuch, bheir mise, eadhon mise, dile uisgeachan air an talamh, a sgrìos gach uile fheòla, anns am bheil anail na beatha fuidh¹⁹ nèamh: agus gheibh gach ni a ta air an talamh bàs.

18 Ach daingnichidh mi mo choimh-cheangal²⁰ riutsa: agus thèid thu a steach do'n àirc, thu féin, agus do mhic, agus do bhean, agus mnàid²¹ do mhac maille riut.

19 Agus do gach uile ni beò do'n uile fheoil, dithis do gach seòrsa²² bheir thu steach do'n àirc, gu'n gleidheadh beò maille riut: fìrionn agus boirionn²³ bithidh iad.

20 Do'n eunlaith a réir an gnè, agus do'n spréidh a réir an gnè, agus do gach ni a shnàigeas air an talamh a réir a ghnè: thèid dithis do gach seòrsa steach a t' ionnsuidh, gu'n gleidheadh beò.

21 Agus gabh thusa dhuit do gach uile bhijadh a dh'ithear, agus cruinnichidh tu a t' ionnsuidh e; agus bithidh e dhuitse agus dhoibhsan air son beathachaidh²⁴.

22 Mar so rinn Noah; a réir gach ni a dh'àithn Dia dha, mar sin rinn e.

CAIB. VII.

1 *Chaidh Noah agus gach creutair a bha maille ris a steach do'n àirc.* 10 *Toiseach agus éiridh na dile.* 24 *Mhair i ceud agus leth-cheud là.*

AGUS thubhairt an Tighearna ri Noah, Rach thusa²⁵, agus do thigh uile, a steach do'n àirc; oir thusa chunnaic mi cothromach a'm' fhianuis sa' ghinealach so²⁶.

2 Do gach uile ainmhidh glan gabhaidh tu dhuit 'nan seachdaibh, am fìrionn agus a bhoirionn; agus do ainmhidhibh nach 'eil glan 'nan dithisibh²⁷, am fìrionn agus a bhoirionn:

¹ chunnaic mic nan daoine cumhachdach nigheana dhaoine' isle. ² ghnà. ³ gur feoil esan mar an ceudna.

⁴ fuamhairean, curaidhean, athaich.

⁵ an còmhnuidh, daonan. ⁶ cràdh, mulad.

⁷ fàbhor. ⁸ ceart, ionruic. ⁹ na ghinealachachibh.

¹⁰ ye. ¹¹ le h-urchoid leo-san.

¹² na seòmraichibh beaga ni thu an àirc.

¹³ bann-làmh.

¹⁴ deich thar fhichead.

¹⁵ Fuimeag. Eir.

¹⁶ os cionn.

¹⁷ dara.

¹⁸ treas. ¹⁹ fo.

²⁰ mo chunradh, mo chùmhant.

²¹ mnathan.

²² seòrta.

²³ bainionn.

²⁴ air son bidh, mar lòn. ²⁵ Theirig thusa, gabh thusa. ²⁶ san linn so. ²⁷ 'nan caraidibh.

3 Mar an ceudna do eunlaith nan speur 'nan seachdaibh, fìrionn agus boirionn, a ghleidheadh sìl beò air aghaidh na talmhainn uile:

4 Oir fathast seachd làithean, agus bheir mise air uisge teachd air an talamh dà fhichead là agus dà fhichead oidhche; agus sgrìosaibh mi¹ gach dùil bheò a rinn mi, bhàrr aghaidh na talmhainn.

5 Agus rinn Noah a réir gach nì a dh'àithn an Tighearna dha.

6 Agus bha Noah sè ceud bliadhna dh'aois, 'nuair a bha an dìle² uisgeachan air an talamh.

7 Agus chaidh Noah steach, agus a mhic, agus a bhean, agus mnà a mhac maille ris, do'n àirc, air son uisgeacha na dìle.

8 Do ainmhidhibh glan, agus do ainmhidh nach 'eil glan, agus do eunlaith, agus do gach nì a shnàigeas air an talamh,

9 Chaidh dithis agus dithis³ a steach a dh'ionnsuidh Noah do'n àirc, fìrionn agus boirionn, a réir mar a dh'àithn Dia do Noah.

10 Agus an déigh sheachd làithean bha uisgeacha na dìle air an talamh.

11 Anns an t-seachdhadh ceud bliadhna dh'aois Noah, san dara mìos, san t-seachdamh latha deug do'n mhìos, san là sin féin bhriseadh suas uile thobraiche na doimhne mòire, agus bha tuil-dhorsa⁴ nan nèamh air am fosgladh.

12 Agus bha'n t-uisge air an talamh dà fhichead là agus dà fhichead oidhche.

13 Sa' cheart là sin féin⁵ chaidh Noah, agus Sem, agus Ham, agus Iaphet, mic Noah, agus bean Noah, agus triùir bhan a mhac maille riu, a steach do'n àirc;

14 Iad féin, agus gach uile bheathach a réir a ghnè, agus an spréidh uile a réir an gnè, agus gach creutair a shnàigeas a ta snàigeadh air an talamh a réir a ghnè, agus an eunlaith uile a réir an gnè, gach eun do gach seòrsa.

15 Agus chaidh⁶ iad a steach a chum Noah do'n àirc, a lion dithis agus dithis, do gach uile fheoil, anns am bheil anail na beatha.

16 Agus iadsan a chaidh a steach, fìrionn agus boirionn chaidh iad a steach do gach uile fheoil, mar a dh'àithn Dia dha: agus dhruid an Tighearna stigh e.

17 Agus bha 'n dìle⁷ dà fhichead là air an talamh, agus mheudaicheadh na h-uisgeachan, agus ghiùlain iad an àirc, agus thogadh suas i os ceann na talmhainn.

18 Agus bhuadhaich na h-uisgeachan, agus mheudaicheadh iad gu h-anabarrach air an talamh; agus shiubhail⁸ an àirc air aghaidh nan uisgeachan.

19 Agus bhuadhaich na h-uisgeacha gu

ro anabarrach air an talamh; agus chòmh-daicheadh ua beanntan àrda uile, a bha fuaidh na nìamhaibh gu léir.

20 Chuig làmh-choille deug air àirde bhuaidhaich na h-uisgeachan: agus chòmh-daicheadh na beanntan.

21 Agus dh'eug⁹ gach uile fheoil a bha gluasad air an talamh, araon do eunlaith, agus do spréidh, agus do bheathaichibh, agus do gach nì a shnàigeas a ta snàigeadh air an talamh, agus gach uile dluine.

22 Gach nì aig an robh anail na beatha ann an cuineibh a shròine, do na h-uile a bha air an talamh thioram, dh'eug iad.

23 Agus sgrìosadh gach uile dhùil a bha air aghaidh na talmhainn, araon duine agus ainmhidh¹⁰, agus an creutair a shnàigeas, agus eunlaith nan speur; agus sgrìosadh iad bhàrr na talmhainn, agus dh'fhàgadh a mhàin Noah, agus na bha maille ris san àirc.

24 Agus bhuadhaich na h-uisgeachan os ceann na talmhainn ceud agus leth-cheud là.

CAIB. VIII.

1 Throgh na h-uisgeachan. 4 Stad an àirc air beanntaibh Ararait. 15 A réir àithne Dhè chaidh Noah mach as an àirc; 20 thog e altair, agus dh'ìobair e iobairtean-loisgte.

A GUS chuimhnich Dia air Noah, agus gach nì beò, agus gach uile spréidh a bha maille ris san àirc, agus thug Dia air gaoith dol thairis air an talamh, agus throagh na h-uisgeachan.

2 Agus dhruidheadh suas tobraiche na doimhne, agus tuil-dhorsa nan nèamh; agus choisgeadh an t-uisge o na nèamhaibh¹⁰.

3 Agus phill na h-uisgeachan a ghnàth¹¹ bhàrr na talmhainn: agus throagh na h-uisgeachan an déigh ceud agus leth-cheud là.

4 Agus stad an àirc anns an t-seachdamh mìos, air an t-seachdamh là deug do'n mhìos, air beanntaibh Ararait.

5 Agus throagh na h-uisgeachan a ghnàth agus an deicheamh mìos: Anns an deicheamh mìos, air a' cheud là do'n mhìos, chunncas mullaich nam beann.

6 Agus an ceann dà fhichead là, dh'fhosgail Noah inneag na h-àirce a rinn e.

7 Agus chuir e mach fitheach, a chaidh a mach a' dol air 'ais agus air 'aghaidh, agus an do thiormaicheadh na h-uisgeacha bhàrr na talmhainn.

8 Mar an ceudna chuir e mach columan uaithe, a dh'fhàicinn¹² an do throagh na h-uisgeacha bhàrr aghaidh na talmhainn.

9 Ach cha d'fhuair an columan fois do bhonn a choisge, agus phill e d'a ionnsuidh

¹ dhubhaidh mi as.

² dilinn, tuil.

³ a lion dithis agus dithis.

⁴ inneaga.

Ann an corp an là sin féin. Eabh.

⁶ chuaidh. Eir.

⁷ dh'fhalbh, dh'imich.

⁸ bhàsaich.

⁹ eadar dluine agus ainmhidh.

¹⁰ bha'n t-uisge o na nèamhaibh air a chosgadh.

¹¹ gun stad, a' dol air ais agus air aghaidh. Eabh.

¹² dh'fhaicsinn.

do'n àirc, do bhrìgh gu'n robh na h-uiscachan air aghaidh na talmhainn uile. An sin chuir e mach a làmh, agus rug e air, agus thug e stigh e d'a ionnsuidh do'n àirc.

10 Agus dh'fhan e fathast seachd làithean¹ eile, agus a ris chuir e mach an columan o'n àirc.

11 Agus thàinig an columan d'a ionnsuidh san fhcasgar, agus, feuch, duilleag craoibh ola, a spionadh leis, aige 'na ghob: agus dh'aithnich Noah gu'n do throagh na h-uiscgacha bhàrr na talmhainn.

12 Agus dh'fhan e fathast seachd làithean eile, agus chuir e mach an columan; agus cha do phill e ris d'a ionnsuidh ni's mò.

13 Agus anns an t-seathadh ceud bliadhna agus a h-aon, anns a' cheud mhìos, anns a' cheud là do'n mhìos, thiormaich-eadh na h-uiscgacha suas bhàrr na talmhainn: agus bhuin Noah air falbh còmh-dachadh na h-àirce, agus dh'amhairc e, agus, feuch, bha aghaidh na talmhainn tioram.

14 Agus san dara mìos, san t-seachdamh là thar fhichead do'n mhìos, bha an talamh air tiormachadh.

15 Agus labhair Dia ri Noah, ag ràdh,

16 Rach a mach as an àirc, thu fèin, agus do bhean, agus do mhic, agus mnàì do mhac maille riut.

17 Thoir a mach leat gach ni beò a ta maille riut, do gach uile fheoil, do eunlaith, agus do spréidh, agus do gach uile ni a shnàigeas² a ta snàigeadh air an talamh, chum as gu'n siolaich iad³ air an talamh, agus gu'm bi iad torthach, agus gu'm fàs iad lionmhor air an talamh.

18 Agus chaidh Noah a mach, agus a mhic, agus a bhean, agus mnàì a mhac maille ris:

19 Chaidh gach uile bheathach, gach ni a shnàigeas, agus gach eun, gach ni a ghluaiseas air an talamh, a réir an cineil⁴, a mach as an àirc.

20 Agus thog Noah altair do'n Tighearn, agus ghabh e do gach ainmhidh glan, agus do gach eun glan, agus thug e suas⁵ tabhartais-loisgte air an altair.

21 Agus dh'fhairic an Tighearna fàile cùbhraidh⁶; agus thubhairt an Tighearna 'na chridhe, Cha mhallaich mi ris an talamh ni's mò air son an duine; oir a ta smuainte cridhe⁷ an duine olc o 'òige; ni mò a sgriosas mi tuille gach ni beò, mar a rinn mi.

22 Am feadh a mhaireas an talamh⁸, cha sguir àm an t-sìl-chur agus foghar, agus fuachd agus teas, agus samhradh agus geamhradh, agus là agus oidheche.

CAIB. IX.

1 Bheannaich Dia Noah. 8 Dhaingnich e a choimhcheangal ris fèin agus r'a shliochd, le comhara a' bhogha-shroise. 20 Thòisich Noah air a bhli 'na threabhaiche, agus shuidhich e fion-lìos. 22 Cionta a mhic Ham. 28 Aois agus bàs Noah.

AGUS bheannaich Dia Noah agus a mhic, agus thubhairt e riu, Siolaichibh, agus fàsaibh lionmhor, agus lionaibh an talamh.

2 Agus bithidh bhur n-eagal agus bhur fiamh-sa air uile bheathaichibh na talmhainn, agus air uile eunlaith nanspeur, air gach ni a ghluaiseas air an talamh, agus air uile iasgaibh na mara; d'ur làimh-sa tha iad air an tabhairt.

3 Bithidh gach ni gluasadach a ta beò, dhuibh mar bhiadh⁹; amhuil mar an luibh ghorm thug mi dhuibh na h-uile nithe.

4 Ach feoil maille r'a beatha¹⁰, eadhon a fuil, cha'n ith sibh.

5 Agus gu deimhin fuil bhur beatha-sa iarraidh mise; air làimh gach beathaich iarraidh mi i, agus air làimh an duine; air làimh bràthar gach duine iarraidh mi beatha an duine.

6 Ge b'e dhòirteas fuil duine, le duine dòirtear 'fhuil-san; oir ann an dealbh¹¹ Dhé rinn e an duine.

7 Agus bithibh-sa siolmhor, agus fàsaibh lionmhor, ginibh air an talamh, agus fàsaibh lionmhor ann.

8 Agus labhair Dia ri Noah, agus r'a mhic maille ris, ag ràdh,

9 Agus mise, feuch, daingnichidh mi mo choimhcheangal ribhse, agus ri'r sliochd 'nur déigh.

10 Agus ris gach uile chreutair beò a ta maille ribh, do eunlaith, do spréidh, agus do uile bheathaichibh na talmhainn maille ribh, o gach uile a ta dol a mach as an àirc, gu uile bheathaichibh na talmhainn.

11 Agus daingnichidh mi mo choimhcheangal ribh, agus cha sgriosar gach uile fheoil tuille le h-uiscigibh na dilé: agus cha bhi dile ann ni's mò a sgrios na talmhainn.

12 Agus thubhairt Dia, So comhara a' choimhcheangail a tha mi toirt eadar mise agus sibhse, agus gach creutair beò a ta maille ribh, air feadh ghinealachacha siorruidh¹².

13 Mo bhogha cuiridh mi¹³ anns an neul, agus bithidh e na chomhara coimhcheangail eadar mise agus an talamh.

14 Agus tarlaidh, 'nuair a bheir mi neul os ceann na talmhainn, gu'm faicear am bogha anns an neul.

15 Agus cuimhnichidh mi mo choimh-

¹ làethe, lathachan. ² shnàgus. ³ gluais iad, snàig iad. ⁴ a réir an seòrsan. ⁵ dh'ofraì, thathrge e. ⁶ bhol an Tighearna boladh cùbhraidh. ⁷ croidhe. Eir. ⁸ Rè uile làithean na tal-

mhainn. Eabh. ⁹ chum bith. ¹⁰ a h-anan. ¹¹ ionhaigh, coslas. ¹² o linn gu linn. ¹³ chuir mi. Eabh.

cheangal, a *ta* eadar mise agus sibhse, agus gach creutair beò do'n uile fheoil; agus cha'n fhàs nì's mò na h-uisgeacha 'nan dìle a sgrios gach uile fheòla.

16 Agus bithidh am bogha anns an neul, agus amhaircidh mi air, chum as gu'n cuimhnich mi 'n coimhcheangal sìorruidh eadar Dia agus gach creutair beò do'n uile fheoil, a *ta* air an talamh.

17 Agus thubhairt Dia ri Noah, So comhara a' choimhcheangail, a dhaingnich mi eadar mi féin agus gach uile fheoil a *ta* air an talamh.

18 Agus b'iad mic Noah a chaidh mach as an àire, Sem, agus Ham, agus Iaphet: agus b'e Ham athair Chanaain.

19 *Is iad* sin triuir mhac Noah: agus leo sin lionadh an talamh uile.

20 Agus thòisich Noah air a *bhi*' na fhear-saoithreach¹ na talmhainn, agus shuidhich e fion-gharadh².

21 Agus dh'òl e do'n fhion, agus bha e air mhisg³, agus bha e lomnochd a stigh 'na bhùth.

22 Agus chunnaic Ham, athair Chanaain, nochd⁴ 'athar, agus dh' innis e d'a dhà bhràthair a muigh.

23 Agus ghabh Sem agus Iaphet brat, agus chuir iad le chéile air an guailnibh e, agus chaidh iad an comhair an cuil, agus chòmhdaich iad nochd an athar; agus *bha* an aghaidhean air an ais, agus cha'n fhac' iad nochd an athar.

24 Agus dhùisg Noah o 'fhion, agus thug e ciod a rinn a mhac a b'òige air.

25 Agus thubhairt e, Mallaichte *gu'n robh* Canaan; 'na sheirbhiseach nan seirbhiseach bithidh e d'a bhràithribh.

26 Agus thubhairt e, Beannaichte *gu'n robh* Tighearna Dia Sheim; agus bithidh Canaan 'na sheirbhiseach dha⁵.

27 Ni Dia Iaphet farsuing⁶, agus còmhnuichidh e ann am bùthaibh Sheim; agus bithidh Canaan 'na sheirbhiseach dha⁷.

28 Agus bha Noah beò an deigh na dìle trì cheud agus leth-cheud bliadhna.

29 Agus b'iad uile laithean Noah naoi ceud agus leth-cheud bliadhna: agus fhuair e bàs.

CAIB. X.

1 *Ginealaich* Noah. 2 *Mic Iapheit*. 6^o *Mic Ham*.
15 *Sliochd Chanaain*. 21 *Mic Sheim*.

ANIS *is iad* sin ginealaich mhac Noah; A Sem, Ham, agus Iaphet: agus rugadh dhoibh mic an deigh na dìle.

2 Mic Iapheit; Gomer, agus Magog, agus Madai, agus Iabhan, agus Tubal, agus Mesech, agus Tiras.

3 Agus mic Ghomeir; Ascenas, agus Riphath, agus Togarmah.

4 Agus mic Iabhain; Elisa, agus Tarsis, Citim, agus Dodanim.

5 Leo sin roinneadh eileana 'nan cinn-each 'nan tìrìbh féin, gach aon a réir a theanga, a réir an teaghlaichean, 'nan cinneachaibh⁸.

6 Agus mic Ham; Cus agus Misraim, agus Phut, agus Canaan.

7 Agus mic Chuis; Seba, agus Habbilah, agus Sabtah, agus Raamah, agus Sabtecha: agus mic Raamah; Seba, agus Dedan.

8 Agus ghin Cus Nimrod: thòisich esan air a bhi cumhachdach san talamh.

9 Bha e 'na shealgair cumhachdach an làthair an Tighearn: Uime sin theirear, Amhuil mar Nimrod an sealgair cumhachdach an làthair an Tighearna.

10 Agus b'e toiseach a rioghachd Babel, agus Erech, agus Acad, agus Calneh, ann an tìr Shinair.

11 As an tìr sin chaidh a mach Asur, agus thog e Ninebheh, agus baile Rehobot, agus Calah.

12 Agus Resen eadar Ninebheh agus Calah: *is* baile mòr sin.

13 Agus ghin Misraim Ludim, agus Anamim, agus Lehabim, agus Naphtuhim,

14 Agus Patrusim, agus Casluhim, (o'n d' thàinig a mach Philistim,) agus Caph-torim.

15 Agus ghin Canaan Sidon a cheud-ghin agus Het,

16 Agus an Iebusach, agus an t-Amorach, agus an Girgasach,

17 Agus an t-Ibheach, agus an t-Harcach, agus an Sineach,

18 Agus an t-Arbhadach, agus an Semarach, agus an t-Hamatach: agus 'na dhéigh sin sgaoileadh a mach teaghlaichean nan Canaanach.

19 Agus bha crìoch nan Canaanach o Shidon, mar a thig thu gu Gerar gu ruig Gadsa, mar a théid thu gu Sodom agus Gomorrah, agus Admah, agus Seboim, gu ruig Lasa.

20 *Is iad* sin mic Ham, a réir an teaghlaichean, a réir an teanganna, 'nan tìrìbh, agus 'nan cinneachaibh.

21 Agus do Shem féin mar an ceudna, athair chloinn Ebeir uile, bràthair Iapheit bu shine, rugadh *clann*.

22 Clann Sheim; Elam, agus Asur, agus Arphacsad, agus Lud, agus Aram.

23 Agus clann Aram; Uds, agus Hul, agus Geter, agus Mas.

24 Agus ghin Arphacsad Salah, agus ghin Salah Eber.

25 Agus do h-Eber rugadh dithis mhac: b'e ainm aoin diubh Peleg, oir 'na làithibhsan roinneadh an talamh; agus ainm a bhràthar, Ioctan.

26 Agus ghin Ioctan Almodad, agus Seleph, agus Hadsarmabhet, agus Ierah,

27 Agus Hadoram, agus Udsal, agus Diclah.

¹ threabhaiche.

² fion-tìos.

³ mheisg

⁴ lomnochduidh.

⁵ dhoibh. Eabh.

⁶ leudaichidh.

⁷ dhoibh. Eabh.

⁸ dùchannaibh.

28 Agus Obal, agus Abimael, agus Seba,
29 Agus Ophir, agus Habbilah, agus
Iobab : *b' iad* sin uile mic Ioctain.

30 Agus bha'n àite-còmhnuidh o Mhesa,
mar a théid thu gu Sephar, beinn san àird
an ear.

31 *Is iad* sin mic Sheim, a réir an teagh-
laichean, a réir an teanganna, 'nan tìrìbh,
a réir an cinneacha.

32 *Is iad* sin teaghlaiichean mhac Noah,
a réir an ginealach, 'nan cinneachaibh :
agus leo sin roinneadh na cinnich anns an
talamh an déigh na dìle.

CAIB. XI.

1 *Aon chainnt air an talamh.* 3 *Tùr Bhabeil.*
10 *Ginealach Sheim.* 27 *Ginealach Therah,*
athar Abraim. 31 *Turus Therah o Ur gu Haran,*
agus a bhàs.

AGUS bha'n talamh uile *dh'*aon teang-
aidh, agus ua h-aon fhocail' *aig*
gach neach.

2 Agus 'nuair a bha iad air an turus o'n
àird an ear, fhuair iad còmhuard ann an
talamh Shinair agus ghabh iad còmhnuidh
an sin.

3 Agus thubhairt iad gach aon ri chéile,
Thigibh, deana maid clacha creadha²,
agus làn-loisgeamaid³ iad: Agus bha
chlach chreadha aca air son cloiche,
agus bha làthach⁴ aca air son mor-
teir⁵.

4 Agus thubhairt iad, Thigibh, togamaid
dhuinn féin baile, agus túr, aig am bi a
mhullach *a' ruigheachd* gu nèamh⁶, agus
deana maid dhuinn féin ainm, air eagal
gu'n sgaoilear⁷ o chéile sinn air aghaidh
na talmhainn uile.

5 Agus thàinig an Tighearna a nuas a
dh'fhaicinn a' bhaile, agus an túr, a thog
clann nan daoine.

6 Agus thubhairt an Tighearn, Feuch,
is aon sluagh a t'ann, agus aon teanga ac'
uile; agus thòisich iad air so a dheanamh:
agus a nis cha bhacar dhiubh ni air bith,
a smuainich⁸ iad a dheanamh.

7 Thigibh, rachamaid sìos, agus cuiream-
aid an cainnt an sin thar a chéile⁹, chum
as nach tuig iad cainnt a chéile.

8 Mar sin sgaoil an Tighearn iad uaithe
sin air aghaidh na talmhainn uile: agus
sguir iad do thogail a' bhaile.

9 Uime sin thugadh Babel mar ainm air,
do bhrìgh, ann an sin, gu'n do chuir an Tigh-
earna thar a chéile cainnt na talmhainn
uile: agus uaithe sin sgaoil an Tighearn
iad air aghaidh na talmhainn uile.

10 *Is iad* sin ginealach Sheim: *Bha*
Sem ceud bliadhna dh'aois, agus ghin e
Arphacsad dà bhliadhna an déigh na dìle.

11 Agus bha Sem beò, an déigh dha Ar-

phacsad a ghintinn, cùig ceud bliadhna;
agus ghin e mic agus nigheanan.

12 Agus bha Arphacsad beò cùig bliadh-
na deug 'ar fhichead¹⁰, agus ghin e
Salah.

13 Agus bha Arphacsad beò, an déigh
dha Salah a ghintinn, ceithir cheud agus
tri bliadhna; agus ghin e mic agus nigh-
eanan.

14 Agus bha Salah beò deich bliadhna
fichead, agus ghin e Eber.

15 Agus bha Salah beò, an déigh dha
Eber a ghintinn, ceithir cheud agus tri
bliadhna; agus ghin e mic agus nigh-
eanan.

16 Agus bha Eber beò ceithir bliadhna
deug 'ar fhichead, agus ghin e Peleg.

17 Agus bha Eber beò, an déigh dha
Peleg a ghintinn, ceithir cheud agus deich
bliadhna fichead; agus ghin e mic agus
nigheanan.

18 Agus bha Peleg beò deich bliadhna
fichead; agus ghin e Reu.

19 Agus bha Peleg beò, an déigh dha
Reu a ghintinn, dà cheud agus naoi bliadh-
na; agus ghin e mic agus nigheanan.

20 Agus bha Reu beò dà bhliadhna
dheug 'ar fhichead; agus ghin e Serug.

21 Agus bha Reu beò, an déigh dha
Serug a ghintinn, dà cheud agus seachd
bliadhna; agus ghin e mic agus nigheanan.

22 Agus bha Serug beò deich bliadhna
fichead; agus ghin e Nahor.

23 Agus bha Serug beò, an déigh dha
Nahor a ghintinn, dà cheud bliadhna;
agus ghin e mic agus nigheanan.

24 Agus bha Nahor beò naoi bliadhna
fichead; agus ghin e Terah.

25 Agus bha Nahor beò, an déigh dha
Terah a ghintinn, ceud agus naoi bliadh-
na deug, agus ghin e mic agus nigheanan.

26 Agus bha Terah beò deich is trì fich-
ead bliadhna; agus ghin e Abram, Nahor,
agus Haran.

27 A nis *is iad* sin ginealach Therah:
ghin Terah Abram, Nahor, agus Haran;
agus ghin Haran Lot.

28 Agus fhuair Haran bàs roimh Ther-
ah athair, san tìr anns an d' rugadh e,
ann an Ur nan Caldeach.

29 Agus ghabh Abram agus Nahor mnà
dhoibh féin: *B'e* ainm mnà Abraim, Sarai;
agus ainm mnà Nahoir, Milcah, nighean
Haran, athar Milcah, agus athar Ischah.

30 Ach bha Sarai neo-thorrach¹¹; cha
robh duine cloinne aice.

31 Agus ghabh Terah Abram a mhac,
agus Lot mac Haran mac a mhic, agus
Sarai a bhan-chliamhuinn, bean Abraim a
mhic; agus chaidh iad a mach maille ri

¹ chainnt.

² bricks. Sasg.

³ deadh-loisgeamaid.

⁴ làthach cosmhuil ri

pic, pic-talmhainn.

⁵ ceangail.

⁶ aig am bi a mhullach àrd anns an athar.

⁷ sgapar.

⁸ bheachdaich.

⁹ air ainmreidh.

¹⁰ thar fhichead.

¹¹ searg; aimrid. Eir.

á h-Ur nan Caldeach, gu dol do thír Chanaain: agus thàinig iad gu Haran, agus ghabh iad còmhnuidh an sin.

32 Agus b' iad làithean Terah dà cheud agus cùig bliadhna: agus fhuair Terah bàs ann an Haran.

CAIB. XII.

1 Gealladh Dhé do Abram a thaobh Chrìosd.

4 Dh'imich Abram maille r'a mhnaoi agus ri Lot do Chanaan; ach a chionn gu'n robh gorta mhòr san tìr sin, chaidh e sìos do'n Eiphit. 14 Thug Pharaoh rìgh na h-Eiphit Sarai uaithe; ach an uair a thug e gu'm bì a bhean i, leig e air falbh iad le chèile.

A GUS thubhairt an Tighearna ri h-Abram, Rach¹ a mach á d' dhùthaich, agus o d' dhislibh, agus á tigh t'athar, do'n tìr a nochdas² mise dhuit.

2 Agus ni mi thu a' d' chinneach mòr³, agus beannaichidh mi thu, agus ni mi t'ainm mòr: agus bithidh tu a' d' bheannaichadh.

3 Agus beannaichidh mi iadsan a bheannaicheas thu, agus iadsan a mhallai cheas thu mallaichidh mi; agus annad-sa beannaichear uile theaghaiche na talmhainn.

4 Agus dh'imich Abram, mar a labhair an Tighearna ris, agus chaidh Lot maille ris: agus bha Abram cùig bliadhna deug is trì fichead a dh'aois 'nuair a chaidh e mach á Haran.

5 Agus ghabh Abram Sarai a bhean, agus Lot mac a bhràthar, agus am maoin uile a chrùinnich iad⁴, agus na h-anaman a fhuair iad ann an Haran, agus chaidh iad a mach gu dol do thír Chanaain; agus thàinig iad do thír Chanaain.

6 Agus chaidh Abram air 'aghaidh san fhearann gu àite Shicheim, gu còmharn⁵ Mhoreh. Agus bha 'n Canaanach an sin san tìr.

7 Agus dh'fhoillsich an Tighearn e féin⁶ do Abram, agus thubhairt e, Do d'shlìochd-sa bheir mise am fearann so: agus thog e 'n sin altair do'n Tighearn, a dh'fhoillsicheadh dha.

8 Agus chaidh e as a sin gu sliabh air an taobh an ear do Bhetel, agus shuidhich e a bhùth, agus Betel aige air an taobh an iar, agus Hai air an taobh an ear: agus thog e 'n sin altair do'n Tighearn, agus ghairm e air ainm an Tighearna.⁸

9 Agus dh'imich Abram, a' sir-dhol air 'aghaidh mu dheas⁹.

10 Agus bha gorta san tìr: agus chaidh Abram sìos do'n Eiphit, gu bhì air chuairt an sin, do bhrìgh gu'n robh a' ghorta mòr san tìr.

11 Agus 'nuair a bha e dlùth do dhol a stigh do'n Eiphit thubhairt e ri Sarai a

bhean, Feuch a nis, tha fios agam gur bean mhaiseach¹⁰ thusa ri amharc ort:

12 Uime sin, 'nuair a chi na h-Eiphitich thu, their iad, So a bhean; agus marbhaidh iad mise, ach gleidhidh iad thusa beò.

13 Abair, guidheam ort, gur tu mo phiuthar, chum gu'n éirich gu maith dhomh air do sgàth-sa; agus bithidh m' anam beò air do shon-sa.

14 Agus 'nuair a thàinig Abram do'n Eiphit, chunnaic na h-Eiphitich a' bhean, gu'n robh i ro mhaiseach.

15 Chunnaic mar an ceudna ceannard-an¹¹ Pharaoh i, agus mhol iad i do Pharaoh: agus thugadh a steach a' bhean do thigh Pharaoh.

16 Agus bhuin e gu maith ri h-Abram air a sgàth-sa: agus bha aige caoraich, agus daimh, agus asail fhìrionn, agus òglaich, agus banoglaich, agus asail bhoirionn, agus càmhail.

17 Agus bhuail an Tighearna Pharaoh agus a thigh le plàighibh mòra, air son Sharai mnà Abram.

18 Agus ghairm¹² Pharaoh air Abram, agus thubhairt e, Ciod so a rinn thu orm? c'ar son nach d'innis thu dhomh gu'm bì i so do bhean?

19 C'ar son a thubhairt thu, 'Sì mo phiuthar i? Mar sin dh'fheudainn a gabhail a m' ionnsuidh mar mhnaoi: a nis ma ta, feuch do bhean; gabh i, agus b' i gimeachd¹³.

20 Agus thug Pharaoh àithne d' a dhaoineibh m' a thimchioll; agus chuir iad air falbh e féin, agus a bhean, agus gach ni a bh' aige.

CAIB XIII.

1 Phìll Abram as an Eiphit. 7 Dhealaich e ri Lot.

14 Dh'ath-nuadhaich Dia a ghealladh do Abram, agus d'a shìochd.

A GUS chaidh Abram suas às an Eiphit, e féin, agus a bhean, agus gach ni a bh' aige, agus Lot maille ris, do'n taobh mu dheas.

2 Agus bha Abram ro shaoibhir¹² ann an spréidh, ann an airgid, agus ann an òr.

3 Agus dh'imich e 'na thurusaidh o'n taobh mu dheas eadhon gu Betel, gu ruig an t-àit anns an robh a bhùth an toiseach, eadar Betel agus Hai;

4 Gu àite na h-altarach a rinn e'n sin air tùs: agus ghairm Abram ann sin air ainm an Tighearna.

5 Agus bha mar an ceudna aig Lot, a dh'imich maille ri h-Abram, caoraich, agus crodh, agus bùthan¹³.

6 Agus cha robh am fearann comasach air an giùlan¹⁴ gu còmhnuidh a ghabhail cuideachd; oir bha am maoin mòr, agus

¹ Imich, falbh.

² dh'fheuchas.

³ ni mise fìne mòr dh'ot.

⁴ chionnhaich iad.

⁵ darag.

⁶ thaisbean an Tighearn

e féin; chunncas an Tighearn. Eabh.

⁷ ja dheas, san àirde deas.

⁸ sgiamhach.

⁹ maillean, prionnsaidh.

¹⁰ ghuir, ghlaodh.

¹¹ imich romhad.

¹² ro shaidhbhir, ro bheartach.

¹³ bùithean.

¹⁴ an iomchar.

cha b'urrainn¹ iad còmhnuidh ghabhail cuideachd².

7 Agus bha comhstri eadar buachaill-ean³ spréidhe Abraim, agus buachaill-ean spréidhe Lot: agus bha 'n Canaanach agus an Peridseach san àm sin a chòmhnuidh san tìr.

8 Agus thubhairt Abram ri Lot, Na bitheadh, guidheam ort, comhstri eadar mise agus thusa, agus eadar mo bhuachaill-ean agus do bhuachaill-ean-sa; oir is bràithre sinn.

9 Nach 'eil an tìr uile romhad? Dealaich, guidheam ort, riumsa: ma ghabhas tu dh'ionnsuidh na làimhe clìthe, an sin théid mise dh'ionnsuidh na làimhe deise; agus ma théid thu dh'ionnsuidh na làimhe deise, an sin gabhaidh mise dh'ionnsuidh na làimhe clìthe.

10 Agus thog Lot suas a shùilean, agus chunnaic e còmhnaid Iordain uile, gu'n robh e gu léir air 'uisgeachadh gu maith, mun do sgrios an Tighearna Sodom agus Gomorrah, eadhon mar ghàradh an Tighearna, cosmhuil ri talamh na h-Eìphit, mar a thig thu gu Soar.

11 Agus thagh Lot dha féin còmhnaid Iordain uile; agus ghabh Lot a thurus o'n àird an ear, agus dhealaich na càird-ean ri chéile⁴.

12 Ghabh Abram còmhnuidh ann an tìr Chanaain, agus ghabh Lot còmhnuidh am bailtibh a' chòmhnaid, agus shuidhich e a bhùth aig Sodom.

13 Ach bha daoine Shodoim aingidh, agus 'nam peacaich am fianuis an Tighearna gu ro mhòr.

14 Agus thubhairt an Tighearna ri h-Abram, an déigh do Lot dealachadh ris, Tog a nis suas do shùilean, agus amhairc o'n àit anus am bheil thu, gu tuath, agus gu deas, agus gus an àird an ear, agus an iar:

15 Oir an fearann uile a ta thu a' faicinn, dhuitse bheir mi e, agus do d' shliochd gu bràth.

16 Agus nì mi do shliochd mar dhuslach na talmhainn; ionnas ma bhios e'n comas do dhuine duslach na talmhainn àireamh, an sin gu'n àirmhear do shliochd-sa mar an ceudna.

17 Eirich, imich air feadh an fhearainn, 'na fhad, agus 'na leud, oir dhuitse bheir mi e.

18 Agus dh' atharraich Abram a bhùth, agus thàinig e, agus ghabh e còmhnuidh ann an còmhnaid Mhamre⁵, a tha ann an Hebron; agus thog e'n sin altair do'n Tighearna.

CAIB. XIV.

1 Cath nan ceithir rìgh ri cùig. 12 Rinneadh Lot 'na phrìosanach; 14 ach shaoradh e le Abram. 18 Bheannaich Melchisedec Abram.

A GUS tharladh ann an làithibh Amra-phheil rìgh Shinair, Arioich rìgh Elasaìr, Chedorlaomeir rìgh Elaim, agus Thidail rìgh nan ciunneach⁶.

2 Gu'n d' rinn iad sin cogadh ri Bera rìgh Shodoim, agus ri Bìrsa rìgh Ghomorrah, Sinab rìgh Admah, agus Semeber rìgh Sheboim, agus rìgh Bhela, eadhon Shoaìr.

3 Chaidh iad sin uile ann an comhbhoinn ri chéile ann an gleann Shidim, a tha nis 'na fhaìrge shalainn.

4 Dà bhliadhna dheug rinn iad seirbhis do Chedorlaomer, agus anns an treas bliadhna deug rinn iad ceannairc⁷.

5 Agus anns a' cheathramh bliadhna deug thàinig Cedorlaomer, agus na rìgh-rean a bha maille ris, agus bhuail iad na Rephaímich ann an Asterot Carnaim, agus na Susímich ann an Ham, agus na h-Emímich ann an Sabbeh Ciriataim.

6 Agus na Horich 'nan sliabh Seir, gu ruig El-paran⁸, a tha làimh ris an fhàsach.

7 Agus phill iad, agus thàinig iad gu Hennispat, eadhon Cades, agus bhuail iad dùthaich nan Amaleeach uile, agus mar an ceudna na h-Amoraich, a bha còmhnuidh ann an Haseson Tamar.

8 Agus chaidh rìgh Shodoim a mach, agus rìgh Ghomorrah, agus rìgh Admah, agus rìgh Sheboim, agus rìgh Bhela, (eadhon Shoaìr,) agus chuir iad cath⁹ riu ann an gleann Shidim;

9 Ri Cedorlaomer rìgh Elaim, agus ri Tidal rìgh nan Cinneach, agus ri h-Amraphel rìgh Shinair, agus ri h-Arioich rìgh Elasaìr; ceithir rìghre ri cùig.

10 Agus bha gleann Shidim làn do shlochdaibh làthaich¹⁰; agus theich rìgh Shodoim, agus rìgh Ghomorrah, agus thuit iad an sin; agus iadsan a mhair¹¹, theich iad do'n t-sliabh.

11 Agus thug iad leo uile mhaoin Shodoim agus Ghomorrah, agus am biadh uile, agus dh'imich iad.

12 Agus thug iad leo Lot, mac bràthar Abraim (a bha còmhnuidh ann an Sodom,) agus a mhaoin, agus dh'imich iad.

13 Agus thàinig a h-aon a chaidh as, agus dh'innis e do Abram an t-Eabhruidheach, a bha còmhnuidh ann an còmhnaid Mhamre an Amoraich, bràthar Escoil, agus bràthar Aneir: agus bha iad sin ann an comh-bhoinn ri h-Abram.

¹ ionnas nach b'urradh.

² san aon àite.

³ aodhairean.

⁴ dhealaicheadh.

iad gach fear o a bhràthair. Eabh.

⁵ aig daragaibh Mhamre. Eabh.

⁶ fineach, dùchanna.

⁷ ar a mach.

⁸ còmhnaid Pharaìn.

⁹ blàr.

¹⁰ pic-talmhainn.

¹¹ iadsan a dh' fhàgadh.

14 Agus 'nuair a chuala Abram gu'n do ghlacadh a bhràthair 'na phrìosanach, dh'armaich e a *sheirbhisich* iunnsaichte¹, a rugadh 'na thigh féin, tri cheud agus ochd-deug; agus lean e iad gu Dan.

15 Agus roinn se e féin 'nan aghaidh san oidhche, e féin agus a sheirbhisich, agus bhuaile iad, agus lean e iad² gu Hoba, a ta air an làimh chli do Dhamascus.

16 Agus thug e air ais a' mhaoin uile agus mar an ceudna thug e air ais a bhràthair Lot, agus a mhaoin agus mar an ceudna na mnà, agus an sluagh.

17 Agus chaidh rìgh Shodcim a mach 'na choinneamh, an dèigh dha pilltinn o mharbhadh Chedorlaomeir, agus uan rìgh a bha maille ris, aig gleann Shabheh, eadhon gleann an rìgh.

18 Agus thug Melchisedec rìgh Shaleim a mach aran agus fìon: agus b'esan sagart an Dé a's ro-àirde.

19 Agus bheannaich se e, agus thubhairt e, Beannaichte gu'n robh Abram o'n Dia a's ro-àirde, sealbhadair nèimh agus na talmhainn.

20 Agus beannaichte gu'n robh an Dia a's ro-àirde, a thug thairis do naimhde do d'làimh. Agus thug e dha deachamh do gach ni.

21 Agus thubhairt rìgh Shodoim ri h-Abram, Thoir dhomhsa na daoine³, agus gabh a' mhaoin dhuit féin.

22 Agus thubhairt Abram ri rìgh Shodoim, Thog mi mo làmh suas ris an Tighearn, an Dia a's ro-àirde, Sealbhadair nèimh agus na talmhainn.

23 Nach gabh mi o shnàthainn eadhon gu h-éill bròige, agus nach gabh mi bheag a dh'aon ni a's leatsa, chum as nach abair thu, Rinn mi Abram beartach:

24 Saor a mhàin o na dh'ith⁴ na h-òganaich, agus o chuibhrionn⁵ nan daoine a chaidh maille rium, Aner, Escol, agus Mamre; gabhadh iadsan an cuibh-rionn⁶.

CAIB. XV

1 Tha Dia a' toirt misnich agus sòlta a dh' Abram.
4 Tha e a' gealltainn dha oighre, agus sìochd ro-Rionmhor. 6 Tha Abram air fhàireanachadh tre chreidimh, &c.

AN dèigh nan nithe sin thàinig focal an Tighearna gu h-Abram ann an taisbeanadh⁷, ag ràdh, Na biodh eagal ort, A braim: Is mise do sgiath, agus do dhuais ro mhòr.

2 Agus thubhairt Abram, A Thighearna Dhé, ciod a bheir thu dhomh, is mi 'g imeachd⁸ gun chloinn, agus gur e Elie-

ser so o Dhamascus fear-riaghlaidh⁹ mo thighe?

3 Agus thubhairt Abram, Feuch, dhomhsa cha d'thug thu sìochd¹⁰ air bith; agus, feuch, is e neach a rugadh a'm' thigh a's oighre orm.

4 Agus, feuch, thàinig focal an Tighearna d'a ionnsuidh, ag ràdh, Cha bhi e so 'na oighre ort; ach esan a thig a mach á t'innibh¹¹ féin, bithidh e 'na oighre ort.

5 Agus thug e leis a mach e, agus thubhairt e, Amhaire a nis suas gu nèamh, agus air na reulta, ma's urrainn thu'n oir eamh: Agus thubhairt e ris, Mar so bithidh do shliochd.

6 Agus chreid e anns an Tighearna; agus mheas e sin dha mar ionracas¹².

7 Agus thubhairt e ris, Is mise an Tighearn a thug a mach thusa á h-Ur nan Caldeach, a thoirt dhuit an fhearainn so, chum a shealbhadh mar oighre.

8 Agus thubhairt esan, A Thighearna Dhé, cia leis a bhios fios agam gu'n sealbh-aich mi e?

9 Agus thubhairt e ris, Gabh dhomhsa agh thri bliadhna dh'aois, agus gabhar¹³ thri bliadhna dh'aois, agus reithe thri bliadhna dh'aois, agus turtur, agus columan òg.

10 Agus ghabh e dha féin iad sin uile, agus roinn e iad sa' mheadhon, agus chuir e gach aon do na mìribh fa chomhair a leth-bhreac; ach cha do roinn e na h-eoin.

11 Agus 'nuair a thàinig an eunlaith a nuas air na cairbhean¹⁴, dh'fhuadaich Abram air falbh iad.

12 Agus 'nuair a bha ghrian a' dol fuidh¹⁵, thuit codal trom air Abram; agus, feuch, thuit uamhann dorchadais mhoir air.

13 Agus thubhairt e ri h-Abram, Biodh fios gu cinnteach agad, gu'm bi do shliochd 'nan coigrich ann an dùthaich nach leo féin; agus ni iad seirbhis dhoibh, agus buinidh iad gu cruaidh¹⁶ riu ceithir cheud bliadhna.

14 Agus, mar an ceudna, air a' chinneach sin d'an dean iad seirbhis, bheir mise breth: agus 'na dhéigh sin thig iad a mach le maoin mhoir.

15 Agus théid thusa dh'ionnsuidh t'aithriche an sìth; adhlacair¹⁷ thu an deadh shean aois.

16 Ach anns a' cheathramh linn thig iad an so air an ais, oir cha'n 'eil aingidheachd nan Amorach fathast iomlan¹⁸.

17 Agus nuair a bha ghrian air dol fuidh, bha dorchadas ann; agus, feuch, àmhuinn¹⁹ dheataich agus leus teine²⁰, a chaidh eadar nam mìribh sin.

¹ fhòghlumta. ² ruaig e, chaidh e'n tòir orra.
³ na h-anamanna. Eabh.
⁴ Ach a mhàin o na dh'ith. ⁵ chuid.
⁶ an roinn féin. ⁷ foillseachadh, sealladh.
⁸ sìubhal. ⁹ sìubhard.
¹⁰ stol, gineal. ¹¹ á d'leasraidh.

¹² fhàicantachd. ¹³ gabhar bheirionn.
¹⁴ ciosaichibh. ¹⁵ dol fodha. ¹⁶ buinidh iad gu h-òle, sàraichidh, pianaidh. ¹⁷ sìodhlacair
¹⁸ fathast làn, air teachd fathast gu h-àirde.
¹⁹ fuirneis. ²⁰ lòchran loisgeach no teinteach.

18 Air an là sin féin rinn an Tighearna coimhcheangal ri h-Abram, ag ràdh, Do d' shliochda thug mi am fearann so, o amhainn na h-Eiphit, gu ruig an amhainn mhor, amhainn Euphrates.

19 Na Cenich, agus na Cenidsich, agus na Cadmonaich.

20 Agus na Hitich, agus na Peridsich, agus na Rephaimich.

21 Agus na h-Amoraich, agus na Canaanaich, agus na Girsasaich, agus na Iebusaich.

CAIB. XVI.

1 *Tha Sarai a' toirt Hagair a banoglaich a dh'Abram mar mhnai. 4 'Nuair a rinn i tàir air a bana-mhaighstir, bhuin ise gu cruaidh rithe, agus theich i air falbh. 9 Thug aingeal an Tighearn air a h-ais i, &c.*

ANIS cha d'rug Sarai, bean Abraim clann da; agus bha banoglach Eiphiteach aice, d'am b'ainm Hagar.

2 Agus thubhairt Sarai ri h-Abram, Feuch a nis, chum an Tighearna mi o *chlann* a bhreith: rach a steach, guidheam ort, a dh'ionnsuidh mo bhanoglaich; theagamh¹ gu'm faigh mi clann leatha-sa. Agus dh'éisd Abram ri guth Sharai.

3 Agus ghabh Sarai, bean Abraim, Hagar a' bhan-Eiphiteach, a banoglach féin, an déigh do Abram còmhnuidh ghabhail deich bliadhna ann an tìr Chanaain, agus thug si i d'a fear Abram, gu bhì aige mar mhnai.

4 Agus chaidh esan a steach gu Hagar, agus dh'fhàs i torrach: agus 'nuair a chunnaic i gu'n d'fhàs i torrach, bha a bana-mhaighstir tàireil² na sùilbh.

5 Agus thubhairt Sarai ri h-Abram, *Biodh m'eucoir ortsa*: thug mi mo bhanoglach do d' uchd³; agus 'nuair a chunnaic i gu'n d'fhàs i torrach, bha mise tàireil² na sùilbh: Gu'n d' thugadh an Tighearna breth eadar mise agus thusa.

6 Ach thubhairt Abram ri Sarai, Feuch, *a ta* do bhanoglach a' d' làimh féin, dean rithe mar is àill leat³. Agus anuair a bhuin Sarai gu cruaidh rithe, theich i o' ghnùis.

7 Agus fhuair aingeal an Tighearn i làimh ri tobar uisge san fhàsach, làimh ris an tobar 'san t-slighe gu Sur.

8 Agus thubhairt e, A Hagar, a bhanoglach Sharai, cia as a thàinig thu, agus c'ait tha thu dol? Agus thubhairt ise, Tha mi a' teicheadh o ghnùis Sharai mo bhana-mhaighstir.

9 Agus thubhairt aingeal an Tighearna rithe, *Pilladh' ionnsuidh do bhana-mhaighstir*, agus ùmhlaich thu féin f'a làimh.

10 Agus thubhairt aingeal an Tighearna rithe, Meudaichidh mise gu mòr do shliochd, agus cha'n àirmhear e thaobh lìonmhoireachd.

11 Agus thubhairt aingeal an Tighearna rithe, Feuch, *tha* thutorrach, agus beiridh tu mac, agus bheir thu Ismael mar ainm air, do bhrìgh gu'n d'éisd an Tighearna ri t'anshocair⁴.

12 Agus bithidh e'na dhuine fiadhaich; *bithidh* a làmh an aghaidh gach *duine*, agus làmh gach *duine*' na aghaidh-san: agus am fianuis a bhràithrean uile gabhaidh e còmhnuidh.

13 Agus ghoir i ainm an Tighearn a labhair rithe, Thusa Dhé *a ta* 'g am fhaicinn; oir thubhairt i, An e gu'n robh agams', ann an so mar an ceudna, sùil ris an Tì sin a ta 'gam fhaicinn?

14 Uime sin ghoir i do'n tobar, Beer-lahairoi; feuch, *a ta* eadar Cades agus Bered.

15 Agus rug Hagar mac do Abram: agus thug Abram Ismael mar ainm air a mhac, a rug Hagar.

16 Agus bha Abram ceithir fichead agus sè bliadhna dh'aois, 'nuair a rug Hagar Ismael do Abram.

CAIB. XVII.

1 *Còimhcheangal Dè ri Abram air 'athnuadhachadh, agus 'ainm air 'atharrachadh gu Abraham. 9 An timchioll ghearradh air 'orduchadh. 16 Isaac air a ghealltainn.*

AGUS 'nuair a bha Abram ceithir fichead agus naoi bliadhna deug a dh'aois, dh'fhoillsich an Tighearn e féin da, agus thubhairt e ris, *Is* mise 'n Dia uile-chumhachdach; gluais thusa a'm' fhianuis, agus bi iomlan⁵.

2 Agus ni mi mo choimcheangal eadar mise agus thusa, agus meudaichidh mi thu gu h-anabarrach.

3 Agus thuit Abram air 'eudan⁶; agus labhair an Tighearna ris, ag ràdh,

4 Do m' thaobhsa⁷, feuch, *a ta* mo choimcheangal riut-sa, agus bithidh tu a' t' athair mhòrain chinneach⁸:

5 Agus ni'n toirear á so a mach Abram mar ainm ort, ach bithidh Abraham agad mar ainm; oir rinn mi thu a' t' athair mhòrain chinneach.

6 Agus ni mi thu ro shìolmhor, agus ni mi dhìot cinnich, agus thig rìghrean a mach asad.

7 Agus daingnichidh mi mo choimcheangal eadar mise agus thusa, agus do shliochd a'd' dhéigh, 'nan ginealachaihb, mar choimcheangal sìorruidh, gu bhì a'm' Dhia dhuitse, agus do d' shliochd a'd' dhéigh.

8 Agus bheir mi dhuitse, agus do d' shliochd a'd' dhéigh, am fearann anns am bheil thu a'd' choigreach⁹, tìr Chanaain uile, mar sheilbh shìorruidh; agus bithidh mise a'm' Dhia dhoibh.

9 Agus thubhairt Dia ri h-Abraham,

¹ feudaich e bhi.

² asgail.

³ mar is maith leat, mar a chùhear dhuit.

⁴ ri d' thrioblaid.

⁵ foirfe, dìongmhalla.

⁶ aodaim, aghaidh.

⁷ air mo shon-sa.

⁸ fhineacha.

⁹ fearann do chuairte.

Coinhaidh tu uime sin mo choimhcheangal, thuféin, agus do shliochd a'd' dhéigh, nan ginealachaihbh.

10 So mo choimhcheangal, a choimhdeas¹ sibh, eadar mise agus sibhse, agus do shliochd a'd' dhéigh; Gu'n timchiollghearrar gach leanabh mic² 'nur measg.

11 Agus timchiollghearraidh sibh feoil bhuir roimh chroicinn³, agus bithidh e 'na chomhar⁴ a' choimhcheangail eadar mise agus sibhse.

12 Agus am mac⁵ 'nur measg a bhios ochd làithean a dh'aois, timchiollghearrar e, gach leanabh mic⁶ 'nur ginealachaihbh, esan a bheir san tigh, no cheannachar le h-airgiod o choigreach air bith, nach 'eill do d'shliochd-sa.

13 Timchiollghearrar gu cinnteach esan a bheir a'd' thigh, agus esan a cheannachar le t'airgiod: agus bithidh mo choimhcheangal⁷ 'nur feoil-sa mar choimhcheangal siorruidh.

14 Agus an leanabh mic neo-thimchiollghearrta, aig nach timchiollghearrar feoil a roimh-chroicinn, gearrar an t-anam sin a mach o' shluagh: bhris e mo choimhcheangal.

15 Agus thubhairt Dia ri h-Abraham, A thaobh Sharaì do mhnà, cha tòir thu Saraì mar ainm oirre⁸, oir is e Sarah a h-ainm.

16 Agus beannaichidh mis⁹ i, agus bheir mi dhuit mar an ceudna mac uaithe¹⁰; seadh, beannaichidh mi i, agus bithidh i 'na màthair chinneach; thig¹¹ rìghrean phoibeach¹² uaithe.

17 An sin thuit Abraham air 'aghaidh, agus rinn e gàire; agus thubhairt e 'na chridhe, Am beirear mac dhasan a ta ceud bliadhna dh'aois? Agus am beir Sarah, a ta deich agus ceithir fichead bliadhna dh'aois, mac?

18 Agus thubhairt Abraham ri Dia, O gu maireadh Ismael beò a't' fhianuis!

19 Agus thubhairt Dia, Gu cinnteach beiridh do bhean Sarah mac dhuit; agus bheir thu Isaac mar ainm air: agus daingnichidh mise mo choimhcheangal ris mar choimhcheangal siorruidh agus r'a shliochd¹³ 'na dhéigh.

20 Agus a thaobh Ismaeil, chuala mi thu: Feuch, bheannaich mi e, agus ni mi sìolmhor e, agus cuiridh mi 'n lìomhoireachd e gu h-anabarrach. Dà cheannard deug ginidh e, agus ni mi e 'na chinneach mòr.

21 Ach mo choimhcheangal daingnichidh mi ri h-Isaac, a bheireas Sarah dhuit san àm so anns an ath bhliadhna.

22 Agus sguir e bhi labhairt ris¹⁴; agus chaidh Dia suas o Abraham.

23 Agus ghabh Abraham Ismael a mhac, agus iadsan uile a rugadh 'na thigh, agus iadsan uile a cheannachadh le t'airgiod-san, gach firionnach am measg dhaoine tìghe Abraham; agus timchiollghearr e feoil an roimh-chroicinn anns a' cheart là sin féin, mar a thubhairt Dia ris.

24 Agus bha Abraham ceithir fichead agus naoi bliadhna deug a dh'aois, nuair a thimchiollghearradh dha feoil a roimh-chroicinn.

25 Agus bha Ismael a mhac trì bliadhna deug a dh'aois, nuair a thimchiollghearradh dha feoil a roimh-chroicinn.

26 Anns a' cheart là sin féin thimchiollghearradh Abraham, agus Ismael a mhac.

27 Agus thimchiollghearradh maille ris uile dhaoine a thighe, a rugadh 'na thigh agus iadsan a cheannachadh le h-airgiod o mhac coigrich¹⁵.

CAIB. XVIII.

1 Tha Abraham a' toirt aoidheachd do thriuir ainge.

17 Tha sgrìos Shodoim air 'fhoillseachadh dha.

23 Tha e' deamam eadar-guidhe air a shon.

AGUS dh'fhoillsich an Tighearn e féin da ann an còmharnad Mhamre¹, agus e 'na shuidhe an dorus a' bhùtha ann an teas an là.

2 Agus thog e suas a shùilean, agus dh'amhairc e, agus, feuch, bha triuir dhaoine a' seasamh làimh ris; agus nuair a chunnaic e iad, ruith e 'nan coinneamh o dhorusa² bhùtha, agus chrom seeféingulàr,

3 Agus thubhairt e, Mo thighearna, ma fhuair mi nis deadh-ghean a'd' shùilibh¹⁰, guidheam ort, na rach seachad air do sheirbhiseach.

4 Thugar an so, guidheam oirbh, beagan uisge, agus ionnlaidibh¹¹ bhuir cosan¹², agus leigibh bhuir n-anail fo 'n chraoibh;

5 Agus bheir mise an so greim arain, agus neartaichibh bhuir cridhe: an déigh sin imichidh sibh roimhibh, oir is ann uime sin a thàinig sibh a dh'ionnsuidh bhuir seirbhisich. Agus thubhairt iadsan, Dean eadhon mar a thubhairt thu.

6 Agus ghreas Abraham¹³ do'n bhùth a dh'ionnsuidh Sharah, agus thubhairt e, Dean cabhag¹⁴, taòisinn¹⁵ trì miosairean do mhin phlùr, agus dean arain¹⁶ air lic an teintein¹⁷.

7 Agus ruith Abraham a dh'ionnsuidh a' chruidh¹⁸, agus ghabh e laogh maoth agus maith, agus thug e dh'òganach e, agus rinn e deifir¹⁹ g'a dheasachadh.

8 Agus ghabh e im agus bainne, agus an laogh a dheasaich e, agus chuir e air am beulaobh iad; agus sheas e làimh rfu fo 'n chraoibh, agus dh'ith iad.

¹ ghleidheas.

² roimh-chraicinn.

³ orra; uirre. Eir.

⁴ uaipe.

⁵ bithidh.

⁶ shìogh.

⁷ bhi caint ris, còmhradh ris.

⁸ o choigreach.

⁹ aig daragaibh Mhamre.

¹⁰ a' t' fhianuis.

¹¹ nigibh.

¹² casan.

¹³ rinn Abraham cabhag.

¹⁴ deifrich.

¹⁵ fuin.

¹⁶ breacagan.

¹⁷ leachd

an teallaich.

¹⁸ do'n bhuir.

¹⁹ cabhag.

9 Agus thubhairt iad ris, C'ait *am bheil* Sarah do bhean? Agus thubhairt esan, Feuch, anns a' bhùth.

10 Agus thubhairt e, Gu cinnteach pillidh mi t'ionnsuidh a réir àm¹ na beatha, agus, feuch, *bithidh* mac aig Sarah do bhean. Agus chuala Sarah sin ann an dorus a' bhùtha, a *bha* air a chùl.

11 A nis *bha* Abraham agus Sarah sean, agus air dol air an aghaidh gu maith ann an aois: agus sguir Sarah a bhi réir dòigh nam ban.

12 Uime sin rinn Sarah gàire innte féin, ag ràdh, An déigh dhomhsa fàs aosda, am bi subhachas² agam, agus gu bheil mo thighearn aosda mar an ceudna?

13 Agus thubhairt an Tighearna ri h-Abraham, C'ar son a rinn Sarah gàire, ag ràdh, 'N e gu'm beir nise gu cinnteach *leanabh*, agus mi aosmhor?

14 Am bheil ni air bith do-dheanta³ do 'n Tighearna? San àm *shuidhichte* pillidh mi a t' ionnsuidh, a réir àm ua beatha, agus *bithidh* mac aig Sarah.

15 An sin dh'àicheadh⁴ Sarah, ag ràdh, Cha d' rinu mi gàire: oir bha eagal oirre. Agus thubhairt esan Ni h-eadh, oir rinn thu gàire.

16 Agus dh'éirich na daoine as a sin, agus dh'amhairc iad rathad Shodoim⁵: agus chaidh Abraham maille riu g'an cur air an t-slighe⁶.

17 Agus thubhairt an Tighearn, An ceil mi air Abraham an ni sin a ta mi gus a dheanamh;

18 Agus gu'm fàs Abraham gu cinnteach 'na chinncach mòr agus cumhachdach, agus gu'm beannuichear annsan uile chinnich na talmhainn?

19 Oir is aithne dhomh e, gu'n toir⁷ e àithne d'a chloinn, agus d'a theaghlach 'na dhéigh, agus gleidhidh iadsan slighe an Tighearna, a' dcanamh⁸ ceartais agus breitheanais; chum as gu'n toir an Tighearn air Abraham an ni sin a labhair e m'a thimchioll.

20 Agus thubhairt an Tighearn, Do bhrìgh gu bheil glaoth Shodoim agus Ghomorrah mòr, agus do bhrìgh gu bheil am peacadh air 'autromachadh gu h-ana-barrach⁹;

21 Théid mi sìos a nis, agus chi mi ma rinn iad gu léir¹⁰ a réir a' ghlaoidh, a thàinig a m' ionnsuidh; agus mar do rinn, bithidh fios agam.

22 Agus thionndaidh na daoine an aghaidh as a sin, agus ghabh iad an t-slighe gu Sodom; ach Sheas Abraham fathast an làthair an Tighearna.

23 Agus thàinig Abraham am fagus¹¹ agus thubhairt e, An sgrios thusa mar an ceudna an t-ionracan¹² maille ris an aingidh¹³?

24 Ma's e's gu bheil leth-cheud ionracan an taobh a stigh dò'n bhaile, an sgrios thu mar an ceudna, agus nach caomhain thu 'n t-àit airson an leth-cheud ionracan a ta ann.

25 Gu ma fada robh e uaitse a dheanamh air an dòigh so, an t-ionracan a mharbhadh maille ris an aingidh, ionnus gu'm bi an t-ionracan mar an t-aingidh: gu ma fada robh sin uaitse. Nach dean Breith-eamh na talmhainn uile ceartas?

26 Agus thubhairt an Tighearn, Ma gheibh mi ann an Sodom leth-cheud ionracan an taobh a stigh dò'n bhaile, au sin caomhnaidh mi an t' àit uile air an sgàth-san¹⁴.

27 Agus fhreagair Abraham, agus thubhairt e, Feuch a nis, ghabh mi orm féin labhairt ri m' Thighearna¹⁵, agus gun an-nam ach duslach agus luaithe¹⁶.

28 Ma's e's gu'm bi cuigear¹⁷ a dh'uir-easbhuidh air an leth-cheud ionracan, an sgrios thu'm baile uile air son *easbhuidh*¹⁸ chuigear? Agus thubhairt e, Cha sgrios mi ma gheibh mi 'n sin cuig¹⁹ agus dà fhichead.

29 Agus labhair c ris a ris, agus thubhairt e, Ma's e's gu'm faighear²⁰ an sin dà fhichead? Agus thubhairt e, Cha dean mi e air sgàth dhà fhichead.

30 Agus thubhairt e ris, Och! na biodh fearg air mo Thighearn, agus labhraidh mi: Ma's e's gu'm faighear an sin deich 'ar fhichead? Agus thubhairt e, Cha dean mi e, ma gheibh mi 'n sin deich 'ar fhichead.

31 Agus thubhairt e, Feuch a nis, ghabh mi orm féin labhairt ri m' Thighearn: Ma's e's gu'm faighear fichead an sin? Agus thubhairt e, Cha sgrios mi e air son fhichead.

32 Agus thubhairt e, Och! na biodh fearg air mo Thighearn, agus labhraidh mi mhàin an aon uair so: Ma's e's gu'm faighear deichnear an sin? Agus thubhairt e, Cha sgrios mi e air sgàth deichnear.

33 Agus dh'imich an Tighearn roimhe, 'nuair a sguir e do labhairt ri h-Abraham: agus phill Abraham g'a àite féin.

CAIB. XIX.

1 Tha Lot a' toirt aoidheachd do dhà aingeal. 24 Sodom agus Gomorrah air an sgrios. 26 Peanas mnà Lot. 31 Cionta a dh'ithis nighean.

A GUS thàinig dà aingal do Shodom, a san fheasgar, agus bha Lot 'na shuidhe ann an geata Shodoim: agus 'nuair a chuinn-

1 ainsir. 2 toil-inntinn. 3 cruaidh.
4 dh'àicheun; dh'ob: sheun. Eir.
5 gu Sodom. 6 a thoirt coimhid. ach d'hoibh.
7 gu'n doir. 8 a dheanamh. 9 gu mdr.
10 d'a àireadh. 11 am fogus. 12 am fireann.

13 maille ris a' chiontach. 14 air an son-san.
15 ris an Tighearna. 16 luath.
17 cuigear, còigear. 18 dìth. 19 còig.
20 fuighear.

aic Lot iad, dh'éirich suas¹ nan coinneamh, agus chrom se e féin air 'aghaidh gu lár¹.

2 Agus thubhairt e, Feuch a nis, mo thighearnan, tionndaidhibh a steach², guidheam oirbh, do thigh bhuir seirbhisich, agus fanaibh rè na h-oidhche, agus ionnlaidibh bhuir cosan, agus éiridh sibh gu moch, agus théid sibh air bhuir turus³. Agus thubhairt iad, Nì h-eadh, ach fanaidh sinn air an t-sràid ré na h-oidhche.

3 Agus choimh-éigniche iad, agus thionndaidh iad d'a ionnsuidh, agus chaidh iad a steach d'a thigh: agus rinn e cuirm⁴ dhoibh, agus dheasaich e aran neo-ghoir-tichte⁵, agus dh'ith iad.

4 Ach mu'n deachaidh iad a luidhe, chuairtich⁶ daoine a' bhaile an tigh, eadhon daoine Shodoim, araan sean agus òg, an sluagh uile o gach cearna.

5 Agus ghairm iad air Lot, agus thubhairt iad ris, C'ait am bheil na daoine a thàinig a t' ionnsuidh an nochd! Thoir a mach iad d'ar n-ionnsuidh, chum as gu'n aithnich sinn iad.

6 Agus chaidh Lot a mach d'an ionnsuidh air an dorus, agus dhruid e 'n dorus 'na dhéigh.

7 Agus thubhairt e, Na deanaibh, guidheam oirbh, mo bhràithre, gnìomh cho olc.

8 Feuch a nis, tha agam dithis nighean do nach b'aithne fear; leigibh leam, guidheam oirbh, an toirt a mach d'ur ionnsuidh, agus deanaibh riu mar is àill leibh⁷: a mhàin air na daoineibh so na deanaibh a bheag, oir is ann a chum na criche so a thàinig iad fuidh sgàile mo thighe-sa.

9 Agus thubhairt iadsan, Seas air t'ais. Agus thubhairt iad a ris, Thàinig am fear so 'na aonar air chuairt, agus is àill leis a bhi 'na bhreitheamh: a nis buimhidh sinne riutsa nì's miosa na riu-san. Agus rinn iad éigin⁸ mhòr air an duine, eadhon air Lot, agus thàinig iad am fagus a bhriseadh an dorus.

10 Ach chuir na daoine mach an làmh, agus thug iad Lot a steach d'an ionnsuidh do'n tigh, agus dhùin⁹ iad an dorus.

11 Agus bhuail iad na daoine, a bha aig dorus an tigh, le doille, eadar bheag agus mhòr¹⁰; ionnus¹¹ gu 'n do sgìthich iad iad féin ag iarraidh an dorus.

12 Agus thubhairt na daoine ri Lot, Cò tuilleadh a th'agad an so? Do chliamh-nin, agus do mhic, agus do nigheanan, agus ge b'e ni a ta agad sa' bhaile, thoir a mach iad as an àite so:

13 Oir tha sinne gus an t-àite so a sgrios, do bhrìgh gu bheil an glaoth air fàs mòr an làthair an Tighearna; agus chuir an Tighearn sinne g'a sgrios¹².

14 Agus chaidh Lot a mach, agus labhair e r'a chleamhnaibh, a phòs a nigheanan¹³, agus thubhairt e, Eiribh, rachaibh a mach as an àite so, oir tha'n Tighearn gus am baile so a sgrios: Ach bha e mar neach a bha ri fanoid ann an sùilbha a chleamhnan.

15 Agus 'nuair a dh'éirich a' mhaduinn, an sin ghreas na h-aingil Lot, ag ràdh, Eirich, gabh do bhean, agus do dhithis nighean a ta'n so, air eagal gu'n sgriosar thu ann an aingidheachd a' bhaile.

16 Agus 'nuair a bha e a' deanamh moille, an sin rug na daoine air làimh air, agus air làimh air a mhnaoi, agus air làimh air a dhithis nighean; air do'n Tighearna bhi trèaireach dha: agus thug iad a mach e, agus chuir iad e 'na taobha muigh do'n bhaile.

17 Agus 'nuair a thug iad a mach iad, thubhairt e, Teich air son t'anama; na seall a'd' dhéigh, agus na stad sa' chòmhnard uile¹⁴: teich do'n t-sliabh, air eagal gu millear thu.

18 Agus thubhairt Lot riu, Och! ni h-ann mar sin, mo thighearna.

19 Feuch a nis, fhuair do sheirbhiseach deadh-ghèana a'd' shùilbha, agus mheudaich thu do thròcair, a nochd thu dhomhsa le m'anam a theasairginn: agus cha'n urrainn mise dol as do'n t-sliabh, air eagal gu'n tig¹⁵ olc éigin orm, agus gu'm faigh mi bàs.

20 Feuch a nis, tha 'm baile ud am fagus gu teicheadh d'a ionnsuidh, agus e beag; leigear dhomh a nis teicheadh an sud, (nach beag e?) agus bithidh m'anam beò.

21 Agus thubhairt e ris, Feuch, gabh mi ri t'athchuinge san nì so mar an ceudna nach sgrios mi 'm baile so, mu'n do labh-air thu.

22 Greas ort, teich an sud, oir cha'n urrainn mi ni air bith a dheanamh gus an téid thu'n sud: uime sin thugadh Soar mar ainm air a' bhaile.

23 Bha ghrian air éirigh air an talamh, 'nuair a chaidh Lot a steach do Shoar,

24 An sin thug an Tighearn air pronnusc agus teine frasadh air Sodom agus air Gomorrah, a nuas o'n Tighearn as na nèamhan.

25 Agus sgrios e na bailte sin, agus an còmhnaidh uile, agus uile luchd-àiteachaidh nam bailtean, agus na dh'fhàs air an talamh.

26 Ach sheall a bhean 'na déigh o' chu-laobh, agus dh'fhàs i 'na carragh¹⁶ salainn.

27 Agus chaidh Abraham suas moch sa' mhaduinn do'n àit anns an do sheas e an làthair an Tighearna.

28 Agus sheall e air Sodom agus Gomorrah, agus air fearann a' chòmhnaird uile¹⁷,

¹ le 'aghaidh ris an lár. ² teannaibh a steach.

³ sliغه. Eabh. ⁴ cuilm, féisd.

⁵ neo-ghheurachte, gun bheirm, gun laibhin.

⁶ dh'iadh. ⁷ mar is maith leibh. ⁸ spairn.

⁹ dhruid. ¹⁰ o'n bheag gus a' mhòr. Eabh.

¹¹ air chor agus. ¹² g' an sgrios.

¹³ a ghabh a nigheana. ¹⁴ na fan sa' chòmhnard

idir. ¹⁵ gu'm beir. ¹⁶ pillar. Sasg.

¹⁷ air aghaidh Shodoim agus Gheomorrah, agus air

aghaidh fearainn a' chòmhnaird uile.

agus chunnaic e, agus, feuch, chaidh deat-
ach na tìre suas mar dheatach àmhuinn¹.

29 Agus an uair a sgrios Dia bailtean a'
còmhnaid, an sin chuimhnich Dia air
Abraham, agus chuire mach Lot á meadh-
on an léir-sgrios, 'nuair a sgrios e na bailt-
ean anns an robh Lot 'na còmhnuidh.

30 Agus chaidh Lot suas á Soar, agus
ghabh e còmhnuidh san t-sliabh, agus a
dhithis nighean maille ris; oir bha eagal
air còmhnuidh ghabhail ann an Soar:
agus ghabh e còmhnuidh ann an uaimh,
e féin agus a dhithis nighean.

31 Agus thubhairt an té bu shine ris an
té a b' òige, *Tha* ar n-athair sean, agus cha
'n *eil* fear air an talamh gu teachd a steach
d' ar n-ionnsuidh a réir gnàtha² na tal-
mhaim uile.

32 Thig, thugamaid air ar n-athair fìon
òl, agus luidheamaid maille ris, chum as
gu'n gléidh sinn sliochd³ o ar n-athair.

33 Agus thug iad air an athair fìon òl air
an oidhche sin: agus chaidh an té bu shine
steach, agus luidh⁴ i maille ri m' athair;
agus cha do mhothaich e 'nuair a luidh i
sios, no 'nuair a dh'éirich i.

34 Agus air an là-màireach⁵ thubhairt
an té bu shine ris an té a b' òige, Feuch,
luidh mise an raoir⁶ maille ri m' athair;
thugamaid air fìon òl an nochd mar an
ceudna, agus theirig-sa steach, agus luidh
maille ris, chum as gu'n gléidh sinn sliochd
o ar n-athair.

35 Agus thug iad air an athair fìon òl
air an oidhche sin mar an ceudna: agus
dh'éirich an té a b' òige, agus luidh i maille
ris, agus cha do mhothaich e 'nuair a luidh
i sios, no 'nuair a dh'éirich i.

36 Mar so bha dithis nighean Lot torrach
aig an athair.

37 Agus rug an té bu shine mac, agus
thug i Moab mar ainm air: *is* esan athair
nam Moabach gus an là'n diugh.

38 Agus an té a b' òige, rug ise mar an
ceudna mac, agus thug i Ben-ammi mar
ainm air: *is* esan athair chloinn Ammoin
gus an là'n diugh.

CAIB. XX.

1 *Tha Abraham ag àicheadh a mhà Sarah, agus
Abimelech 'g a gabhail d'a ionnsuidh féin.* 6 *Ach
air faotainn rabhaidh o Dhia ann an aising, tha
e 'ga toirt air a h-ais da.*

A GUS dh'imich Abraham as a sin do'n
tìr mu dheas, agus ghabh e còmh-
nuidh eadar Cades agus Sur; agus bha e
air chuairt ann an Gerar.

2 Agus thubhairt Abraham mu Sarah
a bhean, 'Si mo phiuthar i: Agus chuir
Abimelech rìgh Gherair teachdaire uaith,
agus ghabh e Sarah.

3 Agus thàinig Dia gu Abimelech ann
an aising⁷ san oidhche, agus thubhairt e
ris, Feuch, *is duine* marbh thu air sou na
mnà a ghabh thu; oir *is* bean duine *eile* i.

4 Ach cha d'thàinig Abimelech am fagus
d'i⁸, agus thubhairt e, A Thighearna, am
marbh thu mar an ceudna cinneach ion-
ruic?

5 Nach d' thubhairt esan riumsa, 'Si mo
phiuthar i? agus thubhairt ise, eadhon ise
féin, 'Se mo bhràthair e: ann an treibhdhir-
eas mo chridhe, agus ann an neo-chionta
mo làmh rinn mi so.

6 Agus thubhairt Dia ris ann an aising,
Seadh, tha fios agam gur ann an treibhdhir-
eas do chridhe a rinn thu so, agus chum
mise mar an ceudna thu o pheacachadh
a'm' aghaidh: uime sin cha do leig mi
leat beantainn rithe.

7 A nis ma ta, thoir air a h-ais⁹ do'n
duine a bhean; oir *is* fàidh e, agus ni e
urnuigh air do shon, agus bithidh tu beò:
ach mur toir thu air a h-ais i, biodh fios
agad gu'm faigh thu bàs gu cinnteach,
thu féin agus gach uile a's leat.

8 Uime sin dh'éirich Abimelech moch sa'
mhaduinn, agus ghairm e a sheirbhishich
uile, agus dh'aithris¹⁰ e na nithe sin uile
'nan éisdeachd; agus bha eagal mòr air
na daoine¹¹.

9 An sin ghairm Abimelech air Abra-
ham, agus thubhairt e ris, Ciod so a rinn
thu oirn? agus ciod an eucoir¹² a rinn
mise ort, gu'n d'thug thu ormsa, agus air
mo rioghachd peacadh mòr? rinn thu
gnìomharan ormsa, nach bu chòir a dhean-
amh.

10 Agus thubhairt Abimelech ri h-Abra-
ham, Ciod a chunnaic thu, gu'n d'rinn thu
an ni so?

11 Agus thubhairt Abraham, A chionn
gu'n d'thubhairt mi¹³ *annam féin*, Gu
cinnteach cha 'n *eil* eagal an Tighearna
san ionad so; agus marbhaidh iad mi air
son mo mhnà.

12 Agus gidheadh *is* i gu deimhin mo
phiuthar, nighean m'athar i, ach cha'n i
nighean mo mhàthar; agus bha i agam
mar mhnàoi.

13 Agus 'nuair a thug Dia orm dol air
m'aineol¹⁴ o thigh m'athar, an sin thubh-
airt mi rithe¹⁵, 'Se so do chaoimhneas a
nochdas tu dhomhsa; Anns gach àite d'an
tig¹⁶ sinn, abair mu m' thimchioll, 'Se mo
bhràthair e.

14 Agus ghabh Abimelech caoraich,
agus buar¹⁷, agus òglach, agus banog-
lach¹⁸, agus thug e iad a dh' Abraham,
agus thug e air a h-ais dha Sarah a bhean.

15 Agus thubhairt Abimelech, Feuch,

¹ fuirneis.

² cleachda, cor, modh.

³ siol.

⁴ laidh. ⁵ air a' mhàireach. ⁶ an réir, an reidhr.

⁷ bradar.

⁸ na còir.

⁹ aig.

¹⁰ dh'innis.

¹¹ dh'oilltich na daoine.

¹² a' choire, an cron. ¹³ gu'n do smuainich, gu'n
do shaoil mi. ¹⁴ air choigric.

¹⁵ ria.

¹⁶ an dig.

¹⁷ crodh, daimh.

¹⁸ seirbhishich agus ban-seirbhishich.

tha m'fhearann fa d' chomhair; gabh còmhnuidh far a taitneach leat.

16 Agus ri Sarah thubhairt e, Feuch, thug mi mìle *bonn* airgid do d' bhràthair: feuch, *tha* e dhuitse¹ na chòmhdachadh sùl do gach uile a *ta* maille riut, agus maille ris gach uile: mar so fhuair i achmhasan².

17 Agus rinn Abraham urnuigh ri Dia; agus leighis Dia Abimelech, agus a bhean, agus a bhan-oglaich, agus rug iad *clann*.

18 Oir dhruid³ an Tighearna suas gach bolg ann an teaghlach Abimeleich, air son Sarah mnà Abraham.

CAIB XXI.

1 *Rugadh agus thimchioll-ghearradh Isaac.* 9 *Hagar agus a mac Ismael air an cur air falbh.* 22 *Coimhcheangal eadar Abimelech agus Abraham.*

AGUS dh'amhairc an Tighearn air Sarah⁴ mar a thubhairt e; agus rinn an Tighearna do Sarah mar a labhair e:

2 Oir dh'fhàs Sarah torrach, agus rug i mac do Abraham 'na shean aois, san àm shuidhichte mu'n do labhair Dia ris.

3 Agus thug Abraham Isaac mar ainm air a mhac a rugadh dha, a rug Sarah dha.

4 Agus thimchioll-ghearr Abraham Isaac a mhac, 'nuair a bha e ochd làithean a dh'aois, mar dh'àithn Dia dha.

5 Agus bha Abraham ceud bliadhna dh'aois, 'nuair a rugadh a mhac Isaac dha.

6 Agus thubhairt Sarah, Thug Dia orm gàire dheanamh: agus gach neach a chluinneas, ni e gàire maille rium.

7 Agus thubhairt i, Cò a theireadh ri h-Abraham, gu'n d'thugadh Sarah cìoch do chloinn? oir rug mi mac *dha* 'na shean aois.

8 Agus dh'fhàs an leanabh, agus chuir eadh bhàrr na cìche e⁵: Agus rinn Abraham cuirm mhòr san là an do chuireadh Isaac bhàrr na cìche.

9 Agus chunnaic Sarah mac Hagair na ban-Eiphitich, a rug i dh'Abraham, ri fanoid.

10 Uime sin thubhairt i ri h-Abraham, Tilg a mach a' bhan-tràill⁶ so, agus a mac; oir cha bhi mac na ban-tràille so 'na oighre maille ri m' mhac-sa, *eadhon* ri h-Isaac.

11 Agus bha an ni ro dhoilgheasach ann an sùilbh Abraham, air son a mhic.

12 Agus thubhairt Dia ri h-Abraham, Na biodh e doilgheasach a d' shùilbh air son an òganaich, agus air son do bhan-tràille: a thaobh gach ni a thubhairt Sarah riut, èisd r'a guth; oir is ann an Isaac a dh'ainmichear⁷ dhuitse sliochd.

13 Agus, mar an ceudna, do mhac na

ban-tràille ni mise cinneach, do bhrìgh gur e do shliochd-sa e.

14 Agus dh'éirich Abraham suas gu moch sa' mhaduinn, agus ghabh e aran, agus searrag⁸ uisge, agus thug e *sin* do Hagar, agus chuir e air a gualainn e, agus an leanabh; agus chuir e air falbh i: agus dh'imich i, agus chaidh i air seacharan am fàsach Bheer-seba.

15 Agus chaitheadh⁹ an t-uisge o'n t-searraig; agus thilg i an leanabh fuidh aon do na preasaibh¹⁰.

16 Agus dh'fhalbh i, agus shuidh i sìos f'a chomhair, tamull maith uaith, muthim-chioll urchuir saighde: oir thubhairt i, Na faiceam bàs an leinibh. Agus shuidh i f'a chomhair, agus thog i suas a guth, agus ghuiil i.

17 Agus chuala Dia guth an òganaich, agus gairm aingeal Dé air Hagar o nèamh, agus thubhairt e rithe, Ciod a *tha teachd* riut, a Hagar? Na biodh eagal ort; oir chuala Dia guth an òganaich far am *bheil* e.

18 Eirich, tog suas an t-òganach, agus gabh greim¹¹ a d' làimh dheth, oir ni mise na chinneach mòr e.

19 Agus dh'fhosgail Dia a sùilean, agus chunnaic i tobar uisge; agus chaidh i, agus lion i an t-searrag le h-uisge, agus thug i deoch do'n òganach.

20 Agus bha Dia leis an òganach, agus dh'fhàs e suas: agus ghabh e còmhnuidh san fhàsach, agus bha e 'na fhear-bogha.

21 Agus ghabh e còmhnuidh am fàsach Pharam: agus ghabh a mhàthair bean da á tìr na h-Eiphit.

22 Agus san àm sin féin labhair Abimelech, agus Phichol àrd cheannard a shluaigh, ri h-Abraham, ag ràdh, *Tha* Dia leat anns gach ni a *ta* thu a' deanamh.

23 A nis uime sin mionnach dhomhsa air Dia, nach buin thu gu fealltach riumsa¹², no ri m' mhac, no ri mac mo mhic; *ach* a réir a' chaoimhneis a rinn mi riut, ni thusa riumsa, agus ris an tìr anns an robh thu air chuairt.

24 Agus thubhairt Abraham, Bheir mi mo mhionnach.

25 Agus thug Abraham achmhasan do Abimelech air son tobair uisge, a thlug seirrbhis Abimelech a mach le h-ainn-eart¹³.

26 Agus thubhairt Abimelech, Cha b'fhiosrach mise cò rinn an gnìomh so: cha d'innis thu féin domh, agus cha mhò a chuala mi bheag m'a thimchioll ach an diugh¹⁴.

27 Agus ghabh Abraham caoraich agus crodh, agus thug e iad do Abimelech: agus rinn iad le chèile coimhcheangal.

¹ bithidh so dhuitse. ² chronaicheadh i. ³ dhruid gu daingeann. ⁴ dh'fhiosrach, chuitm-nich an Tighearn air Sarah. ⁵ chuireadh air dìol e. ⁶ a' bhan-tràill, a bhean dhaor. ⁷ ghoirear.

⁸ soirre, buideal. ⁹ theirig. ¹⁰ craobhaibh. ¹¹ glac. ¹² nach dean thu feall ormsa. ¹³ le foirneart, leis an làimh làidir. ¹⁴ agus an diugh.

28 Agus chuir Abraham seachd uain bhoirionn do'n treud air leth leo féin.

29 Agus thubhairt Abimelech ri h-Abraham, Ciod iad na seachd uain bhoirionn sin, a chuir thu air leth leo féin?

30 Agus thubhairt e, Oir gabhaidh tu na seachd uain bhoirionn sin o m' làimh; chum gu'm bi iad 'nam fianuis dhomhsa gu'n do chladhaich mi an tobar so.

31 Uime sin, thug e Beer-seba mar ainm air an àite sin, do bhrìgh an sin gu'n d'thug iad an mionnan le chèile.

32 Mar so riun iad coimhcheangal aig Beer-seba: an sin dh'éirich Abimelech suas, agus Phichol àrd cheannard a shluaigh, agus phill iad do thìr nam Philisteach.

33 Agus shuidhich Abraham doire¹ chraobh aig Beer-seba, agus ghairm e 'n sin air ainm an Tighearn, an Dé shìorruidh.

34 Agus bhia Abraham air chuairt ann an tìr nam Philisteach mòran do làithibh.

CAIB. XXII.

1 *Aithne air a tabhairt a dh' Abraham gu'n iobradh e a mhac Isaac. 3 Tha e a' toirt dearbhadh air a chreidimh agus air àmhlachd. 13 Reithe air 'iobradh an àit Isaac*

A GUS an déigh nan nithe sin dhearbh² Dia Abraham, agus thubhairt e ris, Abraham, Agus thubhairt e, Feuch, *tha mi 'n so.*

2 Agus thubhairt esan, Gabh a nis do mhac, t'aon *mhac* Isaac, a's ionmhuinn leat, agus rach do thìr Mhoriah³, agus thoir suas an sin e mar thabhartas-loisgte⁴ air aon do na beanntaibh a dh'innseas mise dhuit.

3 Agus dh'éirich Abraham gu moch sa' mhaduinn, agus dh'ighimich e 'asal⁵, agus ghabh e dithis d'a òganaich⁶ maille ris, agus a mhac Isaac; agus sgoilt e fiodh airson an tabhartais-loisgte, agus dh'éirich e suas, agus chaidh e do 'n àit a dh'innis Dia dha.

4 A nis air an treas là thog Abraham suas a shùilean, agus chunnaic e an t-àite fada uait.

5 Agus thubhairt Abraham r'a òganaich, Fanaibh-se an so maille ris an asal, agus théid mise agus an gille⁷ gu ruige⁸ sud, agus ni sinn aoradh⁹, agus thig sinn a ris¹⁰ d'ur n-ionnsuidh.

6 Agus ghabh Abraham fiodh¹¹ an tabhartais-loisgte, agus chuir se e air muin a mhic Isaac; agus ghabh e 'na làimh an teine, agus an sgian: agus dh'imich iad le chèile cuideachd.

7 Agus labhair Isaac r'a athair Abraham,

agus thubhairt e, Athair: agus thubhairt esan, Feuch, *tha mi 'n so*, a mhic. Agus thubhairt e, Feuch an teine agus am fiodh; ach c'ait am bheil an t-uan air son tabhartais-loisgte?

8 Agus thubhairt Abraham, Gheibh Dia, a mhic, uan dha féin¹² air son tabhartais-loisgte: Mar sin dh'imich iad cuideachd le chèile.

9 Agus thàinig iad do'n àit a dh'innis Dia dha, agus thog Abraham altair an sin, agus chuir¹³ e 'm fiodh an òrdugh; agus cheangail e a mhac Isaac, agus chuir e air an altair e air uachdar an fhiodha.

10 Agus shin Abraham a mach a làmh, agus glabh e an sgian a mharbhadh a mhic.

11 Agus ghlaodh¹⁴ aingeal an Tighearna ris o nèamh, agus thubhairt e, Abraham, Abraham. Agus thubhairt esan, Feuch, *tha mi 'n so.*

12 Agus thubhairt e, Na leag do làmh air a' ghille, agus na dean ni sam bith air: oir a nis tha mi fiosrach gu bheil eagal Dé ort, do bhrìgh nach do chum thu do mhac, *eadhon* t'aon *mhac* uamsa.

13 Agus thog Abraham suas a shùilean, agus dh'anihairc e, agus, feuch, reithe air a chùlaobh¹⁵ an sàs ann an preas¹⁶ air 'adhaircean: agus chaidh Abraham, agus glabh e an reithe, agus thug e suas e mar thabhartas-loisgte an àit a mhic.

14 Agus thug Abraham Jehobhah-Ireah mar ainm air an àite sin: mar a theirear *gus* an là'n diugh, Ann an sliabh an Tighearna chithear e¹⁷.

15 Agus ghlaodh aingeal an Tighearna ri h-Abraham an dara uair o nèamh.

16 Agus thubhairt e, Orm féin mhionnaich mi, arsa' an Tighearn, a chionn gu'n d'rinn thu an ni so, agus nach do chum thu *uam* do mhac *eadhon* t'aon *mhac*;

17 Gu'm beannaich mi thu gu mòr¹⁸, agus gu'n dean mi do shliochd ro-lionmhor *eadhon* mar reulta nèimh, agus mar an gaineamh¹⁹, a *ta* air tràigh na fairge: agus sealbhaichidh do shliochd geatadh an naimhdean;

18 Agus beannaichear am ad shliochd-sa uile chinnich na talmhainn, a chionn gu'n d' éisd thu ri m' ghuth.

19 Mar sin phill Abraham a dh'ionnsuidh òganacha; agus dh'éirich iad suas, agus chaidh iad cuideachd gu Beer-seba: agus ghabh Abraham comhnuidh aig Beer-seba.

20 Agus an déigh nan nithe sin dh'innseadh do Abraham, ag ràdh, Feuch, rug Milcah mar an ceudna mic²⁰ do d' bhràthair Nahor,

¹ badan coille.

² dh'fheuch.

³ thoir ort tìr Mhoriah.

⁴ cfraile loisgte.

⁵ chuir e diollaid air 'asal.

⁶ a dhà òganach.

⁷ an leanabh-gille.

⁸ gu nuig.

⁹ adhradh. ¹⁰ pillidh sinn.

¹¹ connadh.

¹² Chi Dia, a mhic, air son uain dha féin. Eabh.

¹³ leag.

¹⁴ ghairm.

¹⁵ a chùl-thaobh.

¹⁶ an casir-dhris.

¹⁷ San t-sliabh chi

an Tighearna. ¹⁸ Le beannachadh gu'm beannaich mi thu. Eabh.

¹⁹ a'ghaineamh, a'ghainmheach.

²⁰ clann.

21 Hus a cheud-ghin, agus Buds a bhràthair, agus Cemucl athair Aram,

22 Agus Chesed, agus Hadso, agus Pildas, agus Idlaph, agus Betuel.

23 Agus ghin Betuel Rebecah: an ochdnar sin rug Milcah do Nahor, bràthair Abraham.

24 Agus a leannan¹, d'am b'ainm Reumah, rug ise mar an ceudna Tebah, agus Gaham agus Tahas, agus Maachah.

CAIB. XXIII.

1 Aois agus bàs Sarah. 3 Achadh agus uaimh Mhachpelah air an ceannach, 19 far an d'adhlacadh Sarah.

AGUS bha Sarah beò ceud agus seachd bliadhna fichead²; b'iad so bliadhna beatha Sarah.

2 Agus fhuair Sarah bàs ann an Ciriatarba; 'se sin Hebron ann an tìr Chanaain: Agus thàinig Abraham a dheanamh tuiridh³ air son Sarah, agus a chaidh⁴ air a son.

3 Agus dh'èirich Abraham suas o làthair a mhairbh, agus labhair e ri mic Het, ag ràdh,

4 Is coigreach agus fear-cuairt mise maille ribh: thugaibh dhomh sealbh àit-adhlaic⁵ maille ribh, agus gu'n adhlaic mi mo mharbh as mo shealladh⁶.

5 Agus fhreagair mic Het Abraham, ag ràdh ris,

6 Eisd ruinne, mo thighearna: is uachdaran⁷ cumhachdach thusa 'nar measg-ne; ann an roghainn⁸ ar n'èiteachan-adhlaic adhlaic do mharbh: cha chum duine 'nar measg-ne 'ait-adhlaic uait, gu d' mharbh adhlac ann⁹.

7 Agus dh'èirich Abraham suas, agus chrom se e fèin do mhuinntir na tìre, eadhon do mhic Het.

8 Agus labhair e riu, ag ràdh, Ma's àill leibh¹⁰ gu'n adhlaicinn mo mharbh as mo shealladh, éisdibh rium, agus labhraibh air mo shon¹¹ ri h-Ephron mac Shohair;

9 Chum as gu'n toir¹² e dhomh uaimh Mhacpelah a ta aige, a ta ann an crìch 'achaidh¹³; air son uiread airgid 's is fiù¹⁴ i, thugadh e dhomh i mar sheilbh àit-adhlaic 'nur measg-sa.

10 Agus bha Ephron 'na chòmhnuidh am measg chloinne Het. Agus fhreagair Ephron an t-Hiteach Abraham ann an éisdeachd cloinne Het, eadhon gach neach a chaidh steach air geatadh a bhaile-san, ag ràdh,

11 Na biodh e mar sin¹⁵, mo thighearna, éisd rium: an t-achadh bheir mi dhuit, agus an uaimh a ta ann, bheir mi dhuit i;

¹ a choimhleabach. ² bha Sarah ceud agus seachd bliadhna fichead a dh'aois. ³ bròin.

⁴ a ghul, a chaoineadh. ⁵ tvama.

⁶ á m' làthair. ⁷ prionnsadh.

⁸ roghadh. ⁹ cha bhac duine 'nar measg-ne dh'et do mharbh aithlac 'na àit-adhlaic.

ann an làthair mhac mo dhaoine bheir mi dhuit i: adhlaic do mhairbh.

12 Agus chrom Abraham e fèin sìos an làthair muinntir na tìre.

13 Agus labhair e ri h-Ephron, ann an éisdeachd muinntir na tìre ag ràdh, Ach ma bheir thu seachd i, guidheam ort, éisd rium: bheir mi dhuit airgid air son an achaidh, gabh uam e, agus adhlaicidh mi mo mharbh an sin.

14 Agus fhreagair Ephron Abraham, ag ràdh ris,

15 Mo thighearna, éisd rium: is fiù an t-achadh ceithir cheud secel airgid; ciod sin eadar mise agus thusa? uime sin adhlaic do mhairbh.

16 Agus dh'èisd Abraham ri h-Ephron, agus thomhais Abraham do Ephron an t-airgid, a dh'aimeich e ann an éisdeachd mhac Het, ceithir cheud secel airgid, a ghabhas an ceannaiche¹⁶.

17 Agus rinneadh achadh Ephroin, a bha ann am Machpelah, a bha fa chomhair Mhamre, an t-achadh, agus an uaimh a bh' ann, agus gach craobh a bha san achadh, a bha 'na chrìch uile mu'n cuairt,

18 Daingean do Abraham mar sheilbh, ann an làthair cloinne Het, am fianuis gach neach a chaidh steach air geatadh a bhaile-san.

19 Agus an déigh sin dh'adhlaic Abraham Sarah a bhean, ann an uaimh achaidh Mhachpelah, fa chomhair Mhamre: is e sin Hebron ann an tìr Chanaain.

20 Agus rinneadh an t-achadh, agus an uaimh a ta ann, daingean do Abraham, mar sheilbh àit-adhlaic, le mic Het.

CAIB. XXIV.

1 Chuir Abraham uait a sheirbhiseach a dh'fhaotainn mna d' a mhac Isaac. 50 Fhuair e Rebecah. 63 Choinnich Isaac i.

AGUS bha Abraham sean, agus air teachd gu h-aois mhòir¹⁷, agus bheannaich an Tighearn Abraham anns na h-uile nithibh.

2 Agus thubhairt Abraham r'a sheirbhiseach bu shine 'na thigh, aig an robh riaghladh gach ni a bh'aige, Cuir, guidheam ort, do làmh fo m' shliasaid.

3 Agus bheir mi ort mionnachadh air an Tighearna, Dia nheimh, agus Dia na talmhainn¹⁸, nach gabh thu bean do m' mhac do nigheanaibh nan Canaanach, am measg am bheil mise a'm' chòmhnuidh:

4 Ach théid thu do m' dhùthaich féin, agus a chum mo luchd-dàimh¹⁹, agus gabhaidh tu bean do m' mhac Isaac.

5 Agus thubhairt an seirbhiseach ris,

¹⁰ ma's e 'ur toil. ¹¹ guidhibh, deanaibh maoidhean a mo leth. ¹² gu'n doir. ¹³ fhearainn, a roain.

¹⁴ fiach. ¹⁵ Ni h-cadh. ¹⁶ marsanta.

¹⁷ air dol air 'aghaidh gu maith am bliadhnaibh.

¹⁸ an talmhainn. ¹⁹ mo dhùilean.

Ma's e 's nach bi a' bhean toileach air mis' a leantuin do'n tìr so, an éigin dhomh do mhac a thoirt air 'ais a ris do'n tìr as an d'thàinig thu?

6 Agus thubhairt Abraham ris, Thoir an ro-aire' nach toir thu mo mhac an sin a ris'.

7 An Tighearna, Dia nèimh, a thug mise o thigh m'athar, agus o thigh mo dhilsean, agus a labhair rium, agus a mhionnaich dhomh, ag ràdh, Do d' shliochd bheir mi am fearann so; cuiridh esan 'aingear féin romhad, agus gabhaidh tu bean do m' mhac as a sin.

8 Agus mur bi a' bhean toileach air thusa a leantuin, an sin bithidh tu saor o m' mhionnaibh so: a mhàin na toir mo mhac an sin a ris.

9 Agus chuir an seirbhiseach a làmh fo shliasaid Abraham a mhaighstir, agus mhionnaich e dha thaobh an nì sin.

10 Agus ghabh an seirbhiseach deich càmhail do chàmhail a mhaighstir, agus dh'fhalbh e; *oir bha* maoin a mhaighstir uile aige f'a làimh³: Agus dh'éirich e, agus chaidh e gu Mesopotamia, gu baile Nahor.

11 Agus thug e air na càmhail an glùn a lùbadh an taobh a muigh⁴ do'n blaile, làimh ri tobar uisge, mu thràth feasgair, *eadhon* mu'n àm an téid⁵ mnà a mach a tharruing uisge.

12 Agus thubhairt e, O Tighearna, Dhé mo mhaighstir Abraham, deonaich gu'n soirbhich leamsa an diugh⁶, agus nochd caoimheas do m' mhaighstir Abraham.

13 Feuch, *tha* mi m' sheasamh an so làimh ris an tobar uisge, agus thig nigh-eana muinntir⁷ a' bhaile mach a tharruing uisge.

14 Agus tachaireadh e⁸, a' nìhaighdean ris an abair mise, Leig sìos, guidheam ort, do shoitheach, chum's gu'n òl mi; agus their ise, Ol, agus bheir mise deoch do d' chàmhail mar an ceudna: *gu ma h-i*⁹ sin féin a dh'òrduich thu do d' sheirbhiseach Isaac; agus le sin bithidh fios agam gu'n do nochd thu caoimheas do m' mhaighstir.

15 Agus mun do sguir e do labhairt, feuch, thàinig Rebekah a mach, a rugadh do Bhetuel, mac Mhilcah, mnà Nahor, bràthar Abraham; agus a soitheach air a gualainn.

16 Agus bha a' chailin ro mhaiseach ri

amharc oirre, òigh; agus cha b' aithne do f'hear riamh i: agus chaidh i sìos do'n tobar, agus lìon i a soitheach, agus thàinig i nìos.

17 Agus ruith an seirbhiseach 'na coinn-camh¹⁰, agus thubhairt e, Leig dhomh, guidheam ort, beagan uisge' òl as do shoitheach¹¹.

18 Agus thubhairt i, Ol, mo thighearna: agus ghreas i oirre¹², agus leig i sìos a soitheach air a làimh, agus thug i dha deoch.

19 Agus an dèigh dli' i deoch a thoirt da, thubhairt i, Tairngidh mi uisge air son do chàmhail mar an ceudna, gus an sguir iad a dh'òl.

20 Agus ghreas i oirre, agus dh'fhalbh mhuich¹³ i a soitheach san amar, agus ruith i a ris do'n tobar a tharruing uisge; agus tharruing i air son a chàmhail uile.

21 Agus bha'n duine ag amharc le h-iongantans oirre, agus a' fantuin' na thosd¹⁴, a dli' f'heuchainn an d'thug, do nach d'thug, an Tighearna air a thurus¹⁵ soirbheachadh leis.

22 Agus 'nuair a sguir na càmhail a dh'òl, an sin ghabh an duine cluas-fhàinne òir, san robh leth seceil a chudthrom, agus dà làmh-fhail¹⁶ air son a làmh, san robh deich seceil òir a chudthrom.

23 Agus thubhairt e, Cò d'an nighean thu? innis dhomh, guidheam ort; am bheil ann an tigh t'athar àite dhuinn gu tàmh¹⁷ a ghabhail ann?

24 Agus thubhairt i ris, Is mise nighean Bhetueil, mhic Mhilcah, a rug i do Nahor.

25 Thubhairt i ris mar an ceudna, *Tha* againne aron connlach¹⁸, agus innlinn¹⁹ gu leòr, agus àite gu tàmh a ghabhail ann.

26 Agus chrom an duine e féin sìos, agus rinn e aoradh do'n Tighearna.

27 Agus thubhairt e, Beannaichte gu robh an Tighearna, Dia mo mhaighstir Abraham, nach do bhuin a thròcair agus 'fhìrinn o m' mhaighstir²⁰: air dhomhsa bhi san t-slighe, stiùir²¹ an Tighearna mi gu tigh bhràithre mo mhaighstir.

28 Agus ruith a' mhaighdean, agus dh'innis i na nìlie-sa do mhuinntir tighe a mthar.

29 Agus bha bràthair aig Rebekah, d'am b'ainm Laban: agus ruith Laban a dh'ionnsuidh an duine a mach chum an tobar.

30 Agus 'nuair a chunnaic e a' chluas-fhàinne, agus na làmh-fhàilean air làmhan a pheathar, agus 'nuair a chual' e briathra

¹ Bi air do ro-fhaicill. ² a rìst.
³ agus thug e leis cuid do uile mhaoin a mhaighstir 'na làimh. ⁴ a mach.
⁵ an dèid. ⁶ cum, guidheam ort, coinneamh riumsa 'n diugh. ⁷ dhaoine. ⁸ tarladh e, thigeadh e gu crìch; bithheadh e. Eabh.
⁹ gum bu h-i. ¹⁰ 'na còdhail.
¹¹ Caisg m' toladh, guidheam ort, le beagan uisge'.

as do shoitheach. ¹² rinn i deifir, no cabhag.
¹³ dh'fholamhuich. ¹⁴ bha'n duine 'na thosd, ag amharc oirre le h-iongantans. ¹⁵ a shlighe.
¹⁶ bracelets. Sasg. ¹⁷ aoidheachd.
¹⁸ fodar. ¹⁹ biadh sprèidhe.
²⁰ nach d'fhàg mo mhaighstir as eugmhais a thròcair agus 'fhìrinn. ²¹ thredraich.

Rebecah a pheathar, ag ràdh, Mar so labhair an duine rium; an sin thàinig e dh'ionnsuidh an duine, agus, feuch, sheas e làimh ris na càmhail aig an tobar.

31 Agus thubhairt e, Thig a steach, thusa ta beannaichte o'n Tighearna; c'uime sheasas tu a muigh? oir dh'ulluich¹ mise an tigh, agus àite do na càmhail.

32 Agus thàinig an duine do'n tigh, agus dh'fhuasgail e na càmhail, agus thug e seachad connlach agus innlinn air son nan càmhail, agus uisge a dh'ionnadh a chos, agus cosan nan daoine a bha maille ris.

33 Agus chuireadh *biadh* air a bheulaobh gu itheadh: ach thubhairt e, Cha 'nith mi, gus an innis mi mo ghnothuch. Agus thubhairt esan, Labhair romhad.

34 Agus thubhairt e, *Is* mise seirbhiseach Abraham;

35 Agus bheannaich an Tighearna mo mhaighstir gu mòr, agus tha é air fàs cumhachdach: agus thug e dhia caoraich, agus crodh, agus airgiod, agus òr, agus òglaich agus banoglaich, agus càmhail agus asail;

36 Agus rug Sarah, bean mo mhaighstir, mac do m' mhaighstir 'na sean aois: agus thug e dhasan gach nì a *bh'* aige²;

37 Agus thug mo mhaighstir ormsa mo mhionnan a thoirt, ag ràdh, Cha ghabh thu bean do m' mhac do nigheanaibh nan Canaanach, muinntir a tha mise a chòmhnuidh 'nam fearann:

38 Ach thèid thu dh'ionnsuidh tighe m'athar, agus a dh'ionnsuidh mo dhilsean, agus gabhaidh tu bean do m' mhac.

39 Agus thubhairt mi ri m' mhaighstir, Theaganh nach lean a' bhean mi:

40 Agus thubhairt esan rium, Cuiridh an Tighearn, an làthair an do ghluais mise, a'ingeal féin leat, agus soirbhichidh e do thurus; agus gabhaidh tu bean do m' mhac o m' dhilsibh, agus o thig m'athar.

41 An sin bithidh tu saor o m' mhionnaibh-sa, 'nuair a-thig thu chum mo dhilsean; agus mur toir iad dhuibh *bean*, an sin bithidh tu saor o m' mhionnaibh.

42 Agus thàinig mi'n dugh chum an tobar, agus thubhairt mi, O Tighearna, Dhé mo mhaighstir Abraham, ma shoirbhicheas tu nis mo thurus air am bheil mi 'g imeachd;

43 Feuch, tha mi m' sheasamh làimh ris an tobar uisge; agus 'nuair a thig a' mhaighdean³ a mach a tharruing uisge, agus a their mi ri the, Thoir dhomh, guidheam ort, beagan uisge ri òlas do shoitheach;

44 Agus a their ise rium, Ol thu féin, agus tairgidh mise mar an ceudna do d'chàmhal: *gu ma h-i* sin féin a' bhean a dh'ord-uich⁴ an Tighearna do mhac mo mhaighstir.

45 Agus mun do sguir⁵ mi do labhairt

a'm' chridhe, feuch, thàinig Rebecah a mach, agus a soitheach air a gualainn; agus chaidh i sìos do'n tobar, agus tharruing i uisge: Agus thubhairt mi ri the, Thoir dhomh deoch, guidheam ort:

46 Agus ghreas i oirre, agus leig i sìos a soitheach o' *gualainn*, agus thubhairt i, Ol, agus bheir mi deoch do d' chàmhal mar an ceudna: agus dh' òl mi, agus thug i air na càmhail òl mar an ceudna.

47 Agus dh'fhiosraich⁶ mi dhith, agus thubhairt mi, Cò d'an nighean thusa? Agus thubhairt ise, *Is* mi nighean Bhetueil, mhic Nahoir, a rug Milcah dha: Agus chuir mi a'chluas-fhàinne air a h-aghaidh, agus na làmh-fhailean air a làmhan.

48 Agus chrom mi sìos mo cheann, agus rinn mi aoradh do'n Tighearna, agus bheannaich mi an Tighearna, Dia mo mhaighstir Abraham, a threòraich mi san t-slighe cheart⁷, a ghabhail nigliinn bràthar mo mhaighstir d'a mhac.

49 Agus a nis, ma bhuineas sibh gu caoimhneil agus gu fìrinneach ri m' mhaighstir, innsibh dhomh; chum as gu'n tionndaidh mi dh'ionnsuidh na làimhe deise, no na làimhe clithe.

50 An sin fhreagair Laban agus Betuel, agus thubhairt iad, 'Sann o'n Tighearna thàinig an nì so: cha'u urrainn sinne olc no maith a ràdh riut.

51 Feuch, *tha* Rebecah a'd làthair, gabh i, agus imich; agus biodh i 'na mnaoi aig mac do mhaighstir, mar a labhair an Tighearna.

52 Agus 'nuair a chuala seirbhiseach Abraham am briathra, chrom se e féin⁸ gu làr do'n Tighearna.

53 Agus thug an seirbhiseach a làthair seudan⁹ airgid agus seudan òir, agus eudach, agus thug e *iad* do Rebecah: thug e mar an ceudna nithe luachmhor¹⁰ d'a bràthair agus d'a màthair.

54 Agus dh'ith iad, agus dh'òl iad, e féin agus na daoine a bha maille ris, agus dh'fhan iad rè na h-oidhche: agus dh'éirich iad sa' mhaduinn; agus thubhairt esan, Cuiribh air falbh mi dh'ionnsuidh mo mhaighstir.

55 Agus thubhairt a bràthair agus a màthair, Fanadh a' mhaighdean maille ruinne air a'chuid a's lugha deich làithean; 'na dhéigh sin falbhaidh i.

56 Agus thubhairt e riu, Na cuiribh moille orm, oir shoirbhich an Tighearna mo thurus: cuiribh air falbh mi, chum gu'n téid mi dh'ionnsuidh mo mhaighstir.

57 Agus thubhairt iad, Gairmidh sinn air a' mhaighdinn, agus fiosraichidh sinn d'a beul féin.

58 Agus ghairm iad air Rebecah, agus

¹ dh'ullamhuich, dheasaich. ² gach nì ta aige. ³ a chailin. ⁴ a chomharach a mach.

⁵ suil do sguir. Eir. ⁶ dh'fhèdraich, dh'fhaoine.

eachd, dh'fharaid. ⁷ air slighe na fìrrin. Eabh.

⁸ rinn e aoradh. ⁹ soitheachan. Eabh.

¹⁰ priscil.

thubhairt iad rithe, An téid thu leis an duine so? Agus thubhairt i, Théid.

59 Agus chuir iad air falbh Rebecah, am piuthar, agus a banaltrum, agus seirbhiseach Abraham, agus a dhaoine.

60 Agus bheannaich iad Rebecah, agus thubhairt iad rithe, 'S tu ar piuthar, bi-sa a'd' *mhàthair* mhlte do mhuillionaibh; agus sealbhaicheadh do shliochd geata na muinntir sin le 'm fuathach iad.

61 Agus dh'éirich Rebecah, agus a maighdeanan, agus mharcaich iad air na càmhail, agus lean iad an duine: agus ghabh an seirbhiseach Rebecah, agus dh'fhalbh e roimhe.

62 Agus bha Isaac a' teachd o shlighe an tobar Lahai-roi; oir bha e chòmh-nuidh san tìr mu dhèas.

63 Agus chaidh Isaac a mach a bheachd-smuaineachadh san fhàiche¹ air feasgar: agus thog e suas a shùilean, agus chunnaic e, agus, feuch, *bha* na càmhail a' tighinn².

64 Agus thog Rebecah suas a sùilean, agus 'nuair a chunnaic i Isaac, theiring i³ bhàrr a' càmhail.

65 Agus thubhairt i ris an t-seirbhiseach, Cò e'n duine so a *ta* sràid-imeachd san fhàiche g' ar coinneachadh? Agus thubhairt an seirbhiseach, 'S e mo mhaighstir a th'ann: an sin ghabh i gnùis-bhrat⁴, agus chòmhdaich si i féin.

66 Agus dh'innis an seirbhiseach do Isaac na h-uile nithe a rinn e.

67 Agus thug Isaac i do bhùth Sarah a mhàthar, agus ghabh e Rebecah, agus bha i aige 'na mnaoi: agus ghràdhach e i: agus fhuair Isaac sòlas an déigh bàis a mhàthar.

CAIB. XXV.

1 Mic Abraham le Ceturah: 7 Aois Abraham agus a bhàs. 12 Ginealaich Ismaeil. 24 Rugadh do Isaac Esau agus Jacob. 29 Reic Esau a chòir-bhreithe.

AN sin ghabh Abraham bean a rís, d'am b' ainm Ceturah.

2 Agus rug i dha Simran, agus Iocsan, agus Medan, agus Midian, agus Isbac, agus Suah.

3 Agus ghin Iocsan Seba, agus Dedan. Agus b' iad mic Dhedain Asurim, agus Letusim, agus Leumim.

4 Agus mic Mhidiain; Ephra, agus Ephraim, agus Hanoth, agus Abidath, agus Eldaah: b' iad sin uile mic Cheturah.

5 Agus thug Abraham gach *ni* a bh' aige do Isaac.

6 Ach do mhic nan leannan a *bha* aig Abraham, thug Abraham tiodhlacan⁵; agus chuir e air falbh iad o 'mhac Isaac, 'nuair a bha e féin fathast beò, do'n taobh an ear⁶, do thìr na h-àirde 'n ear.

7 Agus *is iad* so làithean bhliadhnacha beatha Abraham a bha e beò; ceud agus trì fichead, agus cùig bliadhna deug.

8 An sin thug Abraham suas an deò⁷, agus fhuair e bàs ann an deadh shean aois, 'na sheann duine, agus làn do *bhliadh-naibh*; agus chruinnicheadh e chum a mhuinntir.

9 Agus dh'adhlaic a mhic Isaac agus Ismael e ann an uaimh Mhachpelah, ann an achadh Ephroin, mhic Shoir an Hitich, a *ta* fa chomhair Mhamre;

10 An t-achadh a cheannaich Abraham o mhic Het: ann an sin dh'adhlaicheadh Abraham, agus Sarah a bhean.

11 Agus an déigh bàis Abraham, bheannaich Dia Isaac a mhac: agus ghabh Isaac còmhnuidh làimh ri tobar Lahai-roi.

12 A nis *is iad* sin ginealaich Ismaeil, mhic Abraham, a rug Hagar a' bhan-Eiphiteach, banoglach Sarah, do Abraham.

13 Agus *is iad* sin ainmean mhac Ismaeil, 'nan ainmean aibh, a réir an ginealach: ceud-ghlin Ismaeil, Nebaiot; agus Cedar agus Adbeel, agus Mibsam,

14 Agus Misma, agus Dumah, agus Masa, 15 Hadar, agus Tema, Ietur, Naphis, agus Cedemah.

16 *Is iad* sin mic Ismaeil, agus *is iad* sin an ainmean 'nam bailtibh, agus 'nan daingneachaibh⁸; dà cheannard deug a réir am fineacha.

17 Agus *is iad* sin bliadhnacha beatha Ismaeil, ceud agus seachd bliadhna deug 'ar fhichead: agus thug e suas an deò, agus dh'eug e, agus chruinnicheadh e chum a mhuinntir.

18 Agus ghabh iad còmhnuidh o Habbilah gu ruig Sur, a *ta* fa chomhair na h-Eiphit, mar a théid thu gu h-Asiria. An làthair a bhràithrean uile fhuair e bàs.

19 Agus *is iad* sin ginealaich Isaac, mhic Abraham: Ghlin Abraham Isaac.

20 Agus bha Isaac dà fhichead bliadhna dh'aois 'nuair a ghabh e Rebecah, nigean Bhetueil, an t-Siriaich o Phadan-aram, piuthar Labain an t-Siriaich, dha féin 'na mnaoi.

21 Agus ghuidh⁹ Isaac an Tighearna air son a mhnà, a chionn gu'n robh i neothorrach: agus dh'éisd an Tighearna ris, agus dh'fhàs Rebecah a bhean torrach.

22 Agus bha a' chlann a' coimh-ghleac-adh¹⁰ an taobh a stigh dhi: agus thubhairt ise, *Ma ta chùis* mar sin, c'ar son a *tha* mi mar so? Agus chaidh i a dh'fhiosrachadh¹¹ do'n Tighearna.

23 Agus thubhairt an Tighearna rithe, *Tha* dà chinneach a'd' bholg, agus bitidh

¹ sa' mhagh, sa mhachair.

² a' teachd.

³ thàinig i nuas.

⁴ sgàile air son a h-cudain.

⁵ gibhtean.

⁶ an oir.

⁷ an enail.

⁸ caistealaibh.

⁹ dh'athcuingich.

¹⁰ a' gleachdadh no strì ri chèile.

¹¹ a dh'fheirich.

dà shluagh air an sgaradh o t'innibh: agus bithidh aon shluagh dhiùbh son¹ streise na 'n shluagh eile; agus mi esan a's sine² seirbhhis dhasan a's oige³.

24 Agus nuair a choimhlionadh a làith-ean gu bi air a h-aisead⁴, feuch, bha leth-aona⁵ na bolg.

25 Agus thàinig an ceud-ghin a mach dearg, is e uile mar fhalluinn mholaich: agus thug iad Esau mar ainm air.

26 Agus 'na dhèigh sin thàinig a bhràthair a mach, agus greim aig a làimh do shàil Esau: agus thugadh Jacob mar ainm air: agus bha Isaac tri fichead bliadhna dh'aois, nuair a rugadh iad.

27 Agus dh'fhàs na gillea⁶: agus bha Esau 'na shealgair seolta. 'na dhear mach-araich: agus bha Jacob 'na dhuine coimhlionta⁷, a gabhail còmhnuidh am bùthaibh.

28 Agus ghràdhaich Isaac Esau⁸, a chionn gu'n d'ith e d'a shithinn⁹: ach ghràdhaich Rebecah Jacob.

29 Agus bhruidh Jacob brochan: agus thàinig Esau o'n mhachair, agus e fann¹⁰.

30 Agus thubhairt Esau ri Jacob, Leig dhomh itheadh, guidheam ort, do'n bhròch-an dhearg sin féin: oir tha mi fann: uime sin thugadh Edom mar ainm air.

31 Agus thubhairt Jacob, Reic rium an duigh do chòir-bhreithe¹¹.

32 Agus thubhairt Esau, Feuch, tha mi dìth¹² do'n bhàs: agus ciod an tairbhe e tha sa' chòir-bhreithe so dhomhsa?

33 Agus thubhairt Jacob, Mionnaich dhomhsa an duigh: agus mhionnaich e dha: agus reic e a chòir-bhreithe ri Jacob.

34 An sin thug Jacob do Esau aran, agus brochan do ghall-pheasair¹³: agus dh'ith e, agus dh'òl e, agus dh'èirich e, agus dh'fhalbh e roimhe: mar so rinn Esau dmeas air a chòir-bhreithe.

CAIB. XXVI.

1 Chaidh Isaac do Gherar, agus bheannachadh Dia e.
2 Rinn Abimelech coimhcheangal ris aig Beer-seba.

AGUS bha gorta san tìr a bharrachd¹⁴ air a's¹⁵ cheud ghorta a bha ann an làithibh Abraham: agus chaidh Isaac gu Abimelech rìgh nam Philisteach, do Gherar.

2 Agus dh'fhoillsich an Tighearn e fèin dha agus thubhairt e, Na rach sios do'n Eiphit: gabh còmhnuidh anns an tìr a dh'inneas mise dhuit.

3 Bi air chuairt san tìr so, agus bithidh mise maille riut, agus beannaichidh mi thu: oir dhuitse, agus do d' shliochd, bheir mise na dùthchanna sin uile, agus coimhlionaidh mi na mionnan a mhionnaich mi do t'athair Abraham:

4 Agus bheir mi air do shliochd fàs

tionnhor mar reulte nèimh, agus bheir mi do d' shliochd na dùthchanna sin uile: agus beannaichear ann ad shliochd-se uile chinnich na talmhainn:

5 Do bhrìgh gu'n d'èisd Abraham ri m'ghuth, agus gu'n do ghlèidh e m'iarrrus¹⁶, m' àikheanta, m'orduighean, agus mo lagh-anna¹⁷.

6 Agus ghabh Isaac còmhnuidh ann an Gherar.

7 Agus dh'fhiosraich daoine an àite d'keth m'a mhnai: agus thubhairt e, 'Si mo phiuthar i: oir bha eagal air a ràdh, 'Si mo bhean i: air eagal, ar's esau, gu'm marbhadh daoine an àite mi air son Rebecah, do bhrìgh gu'n robh i maiseach ri amharc oirre.

8 Agus nuair a bha e aimsir fhad an sin, sheall Abimelech rìgh nam Philisteach a mach air uinneig, agus chunnaic e, agus, feuch, bha Isaac a' sìupradh r'a mhnai Rebecah.

9 Agus ghairm Abimelech air Isaac, agus thubhairt e, Feuch, gu cinnteach 's i do bhean i: agus cionnus a thubhairt thu, 'Si mo phiuthar i? agus thubhairt Isaac ris, A chionn gu'n d' thubhairt mi, Air eagal gu'm bàsaich mi air a son.

10 Agus thubhairt Abimelech, Ciod e so a rinn thu oirn? dh'fheudadh a h-aon do'n t-shluagh luidhe le d' mhnai, agus bheireadh tu cionta oirne.

11 Agus thug Abimelech àithne d'a shluagh uile, ag ràdh, Esan e bheanas ris an duine so, no r'a mhnai, gu cinnteach cuirear gu bàs e.

12 An sin shìol-chuir Isaac san tìr sin, agus fhuair e sa' bhliadhna sin fèin a' cheud uiread 's a' chuir e, agus bheannaich an Tighearn e.

13 Agus dh'fhàs an duine mòr, agus chaidh e air aghaidh, agus dh'fhàs e gu an robh e ro mhòr:

14 Oir bha aige sealbh chaorach, agus sealbh cruaidh, agus mòran sheirbhiseach¹⁸. Agus ghabh na Philistich farnad ris.

15 Agus dhruin na Philistich suas na tobair uile a chladhaich seirbhiseich 'athar ann an làithibh Abraham 'athar, agus lion iad le h-ùir iad.

16 Agus thubhairt Abimelech ri h-Isaac, Imich uainne: oir is cumhachdaiche thu gu mòr na sinne.

17 Agus dh'imich Isaac as a sin, agus shuidhich e a bhùth ann an gleann Gherair, agus ghabh e còmhnuidh an sin.

18 Agus chladhaich Isaac a ris na tobair uisge, a chladhaicheadh ann an làithibh Abraham 'athar: oir dhruin na Philistich suas iad an dèigh bàis Abraham: agus

1 a's mh. 2 a's lugha. 3 làithean a tuairidh; làithe a tuairidhe. Eir. 4 dìth is naoidheanna. 5 na h-èigeanich. 6 àireach, gu'n bh. 7 bu toigh le h-Isaac Esau, b'ionnuiden le h-Isaac Esau.

8 d'a sìol. 9 agus e air a char, e fàilligreach. 10 do chòir crad-bhreithe. 11 d'fh. 12 leantail. Saag. 13 a thuille. 14 sa'earail. 15 na rannachan. 16 mòr-mheannair.

thug e ainmean orra a réir nan ainm a thug¹ athair orra.

19 Agus chladhaich seirbhisich Isaaic sa² ghleann, agus fhuair iad an sin tobar fíor-uisge.

20 Agus rinn buachaillean Gherair consachadh³ ri buachaillean Isaaic, ag ràdh, *Is leinne an t-uisge*: agus thug e Esec mar ainm air an tobar, a chionn gu'n d'rinn iad consachadh ris.

21 Agus chladhaich iad tobar eile, agus rinn iad consachadh uime sin cuideachd: agus thug e Sitnah mar ainm air.

22 Agus chaidh e imrich as a sin, agus chladhaich e tobar eile; agus cha d'rinn iad consachadh uime sin: agus thug e Rehobot mar ainm air; agus thubhairt e, Oir thug an Tighearn a nis farsaingeachd dhuinn; agus fàsaidh sinn lionmhor⁴ san ri.

23 Agus chaidh e suas as a sin gu Beer-seba.

24 Agus dh'fhoillsich an Tighearn e féin da san oidhche sin féin, agus thubhairt e, *Is mise Dia Abraham t'athar*; na biodh eagal ort, oir a ta mise maille riut, agus beannaichidh mi thu, agus ni mi do shliochd lionmhor air sgàth mo sheirbhisich Abraham.

25 Agus thog e altair an sin, agus ghairm e air ainm an Tighearn, agus shuidhich e an sin a bhùth: agus chladhaich seirbhisich Isaaic tobar an sin.

26 An sin chaidh Abimelech d'a ionnsuidh o Gherar, agus a charaid Ahudsat, agus Pichol àrd cheannard a shluaigh⁵.

27 Agus thubhairt Isaac riut, C'ar son a thàinig sibh a m'ionnsuidh, agus gu bheil fuath agaibh dhomh, agus gu'n do chuir sibh uaibh mi?

28 Agus thubhairt iadsan, Chunnaic sinn gu cinnteach gu'n robh an Tighearna leat; agus thubhairt sinn, Biodh a nis mionnan eadarunn, *eadhon* eadar sinne agus thusa, agus deanamaid coimhcheangal riut;

29 Nach dean thu oirne cron sam bith, mar nach do bhean sinne riutsa, agus mar nach do rinn sinn ni sam bith ort ach maith, agus a chuir sinn uainn thu an sìth: Tha thusa nis air do bheannachadh leis an Tighearna.

30 Agus rinn e dhoibh cuirm, agus dh'ith agus dh'òl iad.

31 Agus dh'éirich iad gu moch sa⁶ mhaduinn, agus mhionnaich iad d'a chéile: agus chuir Isaac air falbh iad, agus dh'imich iad uaith an sìth.

32 Agus air an là sin féin thàinig seirbhisich Isaaic, agus dh'innis iad dha mu thimchioll an tobair a chladhaich iad, agus thubhairt iad ris, Fhuair sinn uisge.

33 Agus thug e Seba mar ainm air: uime sin *is e* Beer-seba ainm a' bhaile sin, agus an là'n diugh.

34 Agus blia Esau dà fhichead bliadhna

dh'aois; agus ghabh e mar mhnaoi Iudit, nighean Bheeri an Hitich, agus Basemat nighean Eloin an Hitich:

35 Agus bha iad sin⁷ nam briseadh-cridhe⁸ do Isaac agus do Rebecah.

CAIB. XXVII.

1 *Chuir Isaac Esau a shealg sithinn. 18 Le sedladh Rebecah thàinig Jacob a dh'ionnsuidh athar le biadh blusda an riochd Esau, agus fhuair e a bheannachadh. 41 Thug Esau fuath do Jacob, agus bhagair e a mharbhadh.*

A GUS 'nuair a bha Isaac air fàs sean, agus a bha a shùilean dall, air chor as nach faiceadh e, ghairm e air Esau a mhac bushine, agus thubhairt e ris, A mhic: agus thubhairt esan ris, Feuch, *tha mi 'n so*.

2 Agus thubhairt esan, Feuch a nis, tha mise sean; cha 'n'eil fios agam air latha mo bhàis.

3 Agus a nis, guidheam ort, gabh t'airm, do bholg-shaighead agus do bhogha, agus falbh a mach do'n mhachair, agus sealg dhomh sithinn;

4 Agus dean dhomh biadh blasda, mar is ionmhuinn⁹ leam, agus thoir a m' ionnsuidh e, agus gu'n ith mi; chum as gu'm beannaich m'anam thu mun faigh mi bàs.

5 Agus chuala Rebecah an uair a labhair Isaac r'a mhac Esau: agus chaidh Esau do'n mhachair a shealg sithinn, gu toirt d'a ionnsuidh.

6 Agus labhair Rebecah r'a mac Jacob, ag ràdh, Feuch, chuala mi t'athair a' labhair ri h-Esau do bhràthair, ag ràdh,

7 Thoir a m' ionnsuidh sithinn, agus dean biadh blasda dhomh, agus gu'n ith mi, agus gu'm beannaich mi thu an làthair an Tighearna, roimh mo bhàs.

8 A nis uime sin, a mhic, éisd ri m' ghuth, a réir an ni a ta mi ag àithneadh dhuist.

9 Falbh a nis a dh'ionnsuidh an treuda, agus thoir a m'ionnsuidh o sin dà dheadh mheann do na gabhraibh; agus ni mise iad 'nam biadh blasda air son t'athar, mar is ionmhuinn leis:

10 Agus bheir thu dh'ionnsuidh t'athar e, agus gu'n ith e, chum as gu'm beannaich e thu roimh a bhàs.

11 Agus thubhairt Jacob ri Rebecah a mhàthair, Feuch, *tha* Esau mo bhràthair¹⁰ na dhuine molach, agus mise a m' dhuine lom.

12 Ma 's e s' gu'n laimhsich m'athair mi, an sin measar mi leis¹¹ mar neach leis am b' àill a mhealladh¹²; agus bheir mi mallachadh orm féin, agus cha bheannachadh.

13 Agus thubhairt a mhàthair ris, Ormsa *bitheadh* do mhallachadh, a mhic; a mhàin éisd ri m' ghuth, agus falbh, thoir a m' ionnsuidh iad.

14 Agus dh'fhalbh e, agus ghlac e iad, agus thug e iad a dh'ionnsuidh a mhàthar:

¹ comhstri.

² siolmhor.

³ armaillte.

⁶ Feudaidh e bi. ⁷ bitheadh mi 'na shùilb. Eabh.

⁴ mulad intinn.

⁵ toigh.

⁸ mar m'calltair.

agus rinn a mhàthair biadh blasda, mar a b' ionnmuinn le 'athair.

15 Agus ghabh Rebecah eudach taitneach Esau a mic bu shine, a bh' aice san tigh; agus chuir i e air Iacob a mac a b' òige.

16 Agus chuir i croicne mheann nan gabhar air a làmhnan, agus air luime a mhùneil.

17 Agus thug i am biadh blasda, agus an t-aran a dheasaich i, do làimh a mic Iacoib.

18 Agus thàinig e dh' ionnsuidh 'athair, agus thubhairt e, Athair: agus thubhairt esan, Feuch, *tha mi 'n so*; cò thusa, a mhic?

19 Agus thubhairt Iacob r'a athair, *Is mise Esau* do cheud-ghin; rinn mi mar a dh' iarr thu orm: éirich, guidheam ort, suidh agus ith do m' shithinn, chum as gu'm beannaich t'anam mi.

20 Agus thubhairt Isaac r'a mhac, Cionnus a fhuair thu i cho luath, a mhic? agus thubhairt esan, A chionn gu'n do chuir an Tighearna do Dhia a m' rathad i.

21 Agus thubhairt Isaac ri Iacob, Thig am fagus a nis, agus gu'n laimhsich mi thu, a mhic, an tusa féin mo mhac Esau, no nach tu.

22 Agus chaidh Iacob am fagus d'a athair Isaac, agus laimhsich se e; agus thubhairt e, 'Se 'n guth guth Iacoib, ach *is iad* na làmhnan làmhnan Esau.

23 Agus cha d'aithnich se e, a chionn gu'n robh a làmhnan molach, mar làmhnan Esau a bhràthar: mar sin bheannaich se e.

24 Agus thubhairt e, An tusa féin mo mhac Esau? agus thubhairt esan, *Is mi*.

25 Agus thubhairt e, Thoir am fagus domh e, agus ithidh mi do shithinn mo mhic, chum as gu'm beannaich m'anam thu. Agus thug e 'm fagus da e, agus dh'ith e; agus thug e d'a ionnsuidh fion, agus dh'òl e.

26 Agus thubhairt 'athair Isaac ris, Thig am fagus a nis, agus pòg mi, a mhic.

27 Agus thàinig e 'm fagus, agus phòg se e: agus dh'fhairich² e boladh 'eudaich; agus bheannaich se e, agus thubhairt e, Feuch, *tha* faile mo mhic mar fhàile fearainn³, a bheannaich an Tighearna.

28 Uime sin, gu'n tugadh Dia dhuit do dh'ruich⁴ nèimh, agus do reamhrachd⁵ na talmhainn, agus pailteas arbhair agus fìona.

29 Deanadh slòigh seirbhis dhuit, agus strìochdadh cinnich⁶ dhuit; bi d' uachdaran air do bhràithribh, agus cromadh mic do mhàthar sìos duit; mallaichte gu'n robh gach neach a mhallaicheas thu, agus beannaichte gu'n robh gach neach a bheannaicheadh tu.

30 Agus cho luath agus a sguir Isaac do bheannachadh Iacoib, 'nuair bu ghann a bha Iacob air dol a mach fathast á

làthair Isaac 'athar, thàinig a bhràthair Esau o 'sheilg.

31 Agus rinn esan mar an ceudna biadh blasda, agus thug e dh' ionnsuidh 'athair e; agus thubhairt e r'a athair, Eireadh m'athair, agus itheadh e do shithinn a mhic, chum gu'm beannaich t'anam mi.

32 Agus thubhairt Isaac 'athair ris, Cò thusa? agus thubhairt esan, *Is mi* do mhac, do cheud-ghin, Esau.

33 Agus chrìothnaich Isaac le ball-chrith anabarraig, agus thubhairt e, Cò, c' àite 'm bheil esan a ghlac⁷ sithionn, agus a thug i m' ionnsuidh, agus dh'ith mi do n' iomlan mun d' thàinig thusa? agus bheannaich mi e, seadh *agus* beannaichte bithidh e.

34 'Nuair a chual⁸ Esau briathran 'athair, ghlaodh e le glaoth mòr, agus ro-shearbh; agus thubhairt e r'a athair, Beannaich mise, *eadhon* mise mar an ceudna, O athair.

35 Agus thubhairt e, Thàinig do bhràthair le ceilg, agus thug e leis do bheannachadh.

36 Agus thubhairt esan, Nach ceart a thugadh Iacob mar ainm air? oir thàinig e fodham⁹ an dà uair so: thug e leis mo chòir-bhreithe; agus, feuch, a nis thug e leis mo bheannachadh. Agus thubhairt e, Nach do ghléidh thu domh-sa beannachadh?

37 Agus fhreagair Isaac, agus thubhairt e ri h-Esau, Feuch, rinn mi e 'na uachdaran ort, agus a bhràithrean uile thug mi dha mar sheirbhisich; agus le h-arbhar agus le fìon chum mi suas e: agus dhuitse cìod a nis a ni mi, a mhic?

38 Agus thubhairt Esau r'a athair, Nach 'eil agad ach aon bheannachadh, athair? beannaich mise, *eadhon* mise mar an ceudna, O athair. Agus thog Esau suas a ghuth, agus ghuil e.

39 Agus fhreagair Isaac 'athair, agus thubhairt e ris, Feuch, ann an reamhrachd na talmhainn bithidh do chòmhnuidh, agus ann an drùchd nèimh o'n àirde.

40 Agus le d' chladheamh¹⁰ thig thu beò, agus do d' bhràthair ni thu seirbhis: agus 'nuair a bhios an uachdaranachd agad, an sin brisidh tu a chuing o d' mhùineil.

41 Agus dh'fhuathaich Esau Iacob air son a' bheannachaidh leis an do bheannaich 'athair e: agus thubhairt Esau 'na chridhe, Tha làithean a' bhròin air son m'athar am fagus, agus an sin marbhaidh mi mo bhràthair Iacob.

42 Agus dh'innseadh do Rebecah briathran Esau a mic bu shine, agus chuir i teachdaire uaithe¹⁰, agus ghairm i air Iacob a mac a b' òige, agus thubhairt i ris, Feuch, *tha* do bhràthair Esau toirt comhfhurtachd dha féin a' d' thaobh-sa, a' cur roimhe do mharbhadh.

43 A nis uime sin, a mhic, éisd ri m'

1 mar a thubhairt thu rium. Eabh. 2 bhol, bhoitreach. 3 achaidh. 4 do dhealt.

5 do shail, do shult. 6 fncachan. 7 shealg.

8 fudham, fu m' làimh.

10 chuir i fìos uaipe.

9 le a' chloidheamh.

ghuth; agus éirich, teich a dh'ionnsuidh mo bhráthar Labain do Haran.

44 Agus fanaidh tu maille ris beagan do láithibh, gus an tionndaidh¹ fraoch feirge² do bhráthar;

45 Gus an tionndaidh corruich do bhráthar uait, agus gu'n d'chluimhnich e na rinn thu air: an sin cuiridh mise *fios*, agus bheir mi as a sin thu. C'ar son a chaillinn le chéile sibh ann an aon là?

46 Agus thubhairt Rebecah ri h-Isaac, Tha mi sgith do m' bheatha air son nigh-eana Het: ma ghabhas Iacob bean do nigheanaibh Het, mar iadsad *a ta* do nigh-eanaibh na dùthcha, ciod am maith a ni mo bheatha dhomh-sa?

CAIB. XXVIII.

1 *Bheannaich Isaac Iacob, agus chuir se e do Phadan-aram.* 11 *Aisling Iacob.* 18 *Clach Bheteil.* 20 *Bòid Iacob.*

A GUS ghairm Isaac air Iacob, agus a bheannaich se e, agus dh'aitlin e dha, agus thubhairt e ris, Cha ghabh thu bean do nigheanaibh Chanaain.

2 Éirich, imich do Phadan-aram, do thigh Bhetueil athar do mbàthar, agus gabh dhuit féin as a sin bean do nigh-eanaibh Labain, bráthar do mbàthar.

3 Agus gu beannaicheadh Dia uile-chumhachdach thu, agus gu deanadh e sìolmhor thu, agus gu tugadh e ort fàs lìonmhor, air chor as gu'm bi thu a'd' chomh-chruinneachadh chinneach³:

4 Agus gu tugadh e dhuit beannachadh Abraham, dhuitse, agus do d' shliochd maille riut; chum gu'n seallbhaich thu am fearann anns am bheil thu a'd' choigreach, a thug Dia do Abraham.

5 Agus chuir Isaac air falbh Iacob, agus chaidh e do Phadan-aram, gu Laban, mac Bhetueil an t-Siriaich, bráthair Rebecah, màthar Iacob agus Esau.

6 Nuair a chunnaic Esau gu'n do bheannaich Isaac Iacob, agus gu'n do chuir e air falbh e do Phadan-aram, a ghabhail mnà dha féin as a sin; agus nuair a bheannaich se e, gu'n d' thug e àithne dha, ag ràdh, Cha ghabh thu bean do nigh-eanaibh Chanaain;

7 Agus gu'n d'éisid Iacob⁴ r'a athair, agus r'a mhàthair, agus gu'n deachaidh e do Phadan-aram;

8 Agus an uair a chunnaic Esau nach do thaitinn nigheana Chanaain r'a athair Isaac,

9 An sin chaidh Esau dh'ionnsuidh Ismaeil, agus ghabh e Mahalat nighean Ismaeil mhic Abraham, piuthar Nebaioit

dha féin mar mhnai a thuilleadh air na mnàibh a bh'aige.

10 Agus chaidh Iacob a mach o Bheer-seba, agus chaidh e gu Haran.

11 Agus thachair⁵ e air àite *àraidh*, agus dh'fhan e 'u sin an oidhche sin, a chionn gu'n robh a' ghrian air luidhe: agus ghabh e *h-aon* do chlachailh an àite sin, agus chuir e fo a cheann⁶ i, agus luidh e sìos san àite sin a chodal.

12 Agus bhruadair e; agus, feuch, fàradh air a chur suas air an talamh, agus a bhàrr⁷ a' ruigheachd gu nèamh: agus, feuch, aingil Dé a' dol suas agus a' teachd a nuas air.

13 Agus, feuch, sheas an Tighearna os a cheann, agus thubhairt e, Is mise an Tighearn Dia Abraham t'athar, agus Dia Isaac: am fearann air am bheil thu do luidhe, bheir mise dhuit e, agus do d' shliochd.

14 Agus bithidh do shliochd mar dhuslach na talmhainn; agus sgaoilidh tu mach a dh'ionnsuidh na h-àird' an iar, agus na h-àird' an ear, agus a dh'ionnsuidh na h-àirde tuath agus na h-àirde deas: agus beannaichear annad-san uile theaghlacha na talmhainn, agus ann ad shliochd.

15 Agus, feuch, *tha* mise maille riut, agus gleidhidh mi thu anns gach àit d' an téid thu, agus bheir mi ris thu dh'ionnsuidh na tìre so; oir cha tréig mi thu, gus an dean mi an *ni sin* a labhair mi riut.

16 Agus dhùisg Iacob as a chodal, agus thubhairt e, Gu cinnteach tha 'n Tighearn san àite so, agus cha robh fios agam *air*.

17 Agus bha eagal air e, agus thubhairt e, Cia h-uamhasach⁸ an t-ionad⁹ so! cha 'n àite air bith so ach tigh Dhé, agus *is* e so geata nèimh.

18 Agus dh'éirich Iacob gu moch sa' mhaduinn, agus ghabh e a' chlach a chuir e fo a cheann, agus chuir e suas 'na car-ragh¹⁰ i, agus dhòirt e oladh air a mullach.

19 Agus thug e Bet-el mar ainm air an àite sin: ach b' e Luds ainm a' bhaile sin air tùs.

20 Agus bhòidich Iacob bòid¹¹, ag ràdh, Ma bhios Dia leam, agus *ma* ghleidheas e mi air an t-slighe sin air am bheil mi 'g imeachd¹², agus *ma* bheir e dhomh aran r'a itheadh, agus cudach r'a chur umam;

21 Agus gu'n tig mi ris an sìth a dh'ionnsuidh tìghe m'athar; an sin bithidh an Tighearn agam 'na Dhia.

22 Agus bithidh a' chlach¹³ so, a chuir mi suas 'na carragh, 'na tigh aig Dia: agus do gach ni a bheir thu dhomh, bheir mi gu cinnteach an deachamh dhuit.

¹ traogh.

² lasan feirge.

³ a' d' ionadaidh phoibleach.

⁴ gu'n d' thug

Iacob géill.

⁵ thàinig, theiring.

⁶ na cluasraig.

⁷ chann. Eabh.

⁸ eagalach, oillteil. ⁹ àite. ¹⁰ post, prop Saeg.

¹¹ mhòidich Iacob mòid.

¹² triall.

¹³ a' chloch.

CAIB. XXIX.

1 *Thàinig Iacob gu tobar Harain, 13 agus thug Laban aoidheachd dha. 18 Gheall Iacob seirbhìs sheachd bliadhna do Laban air son a nighinn Racheil; 23 fhuair e Leah 'na h-àit; ach a ris phòs e Rachel mar an ceudna.*

AN sin dh'imich Iacob air a thurus, agus chaidh e do dhùthaich dhaoine na h-àirde 'n ear.

2 Agus dh'amhairc e, agus, feuch, tobar sa' mhachair, agus, feuch, *bha* 'n sin tri treuda chaorach 'nan luidhe làimh ris; oir as an tobar sin thug iad uisge do na treudaibh: agus *bha* clach mhòr air beul an tobair.

3 Agus chruinnicheadh adh'ionnsuidh sin na treudan uile; agus charuich iad a' chlach bhàrr beoil² an tobair, agus thug iad uisge do na caoraich, agus chuir iad a' chlach a ris air beul an tobair 'na h-àite fèin.

4 Agus thubhairt Iacob riu, Mo bhràithre, cia as a *thàinig* sibh? Agus thubhairt iadsan, O Haran *thàinig* sinne.

5 Agus thubhairt e riu, An aithne dhuibh Laban mac Nahor? Agus thubhairt iadsan, Is aithne dhuinn.

6 Agus thubhairt e riu, Am *bheil* e gu maith? Agus thubhairt iadsan, *Tha* e gu maith: agus, feuch, a *ta* Rachel a nigh-ean a' tighinn leis na caoraich.

7 Agus thubhairt e, Feuch, 'se fathast aird' an latha a *t'ann*, agus cha *d'thàinig idir* àm cruinneachadh na sprèidhe: thugaibhse uisge do na caoraich, agus rachaidh *agus* ionaltraibh iad.

8 Agus thubhairt iad, Cha'n urradh sinn, gus an cruinnichear na treudan uile an ceann a chèile, agus gus an caruichear a' chlach bhàrr beoil an tobair; an sin bheir sinn uisge do na caoraich.

9 Agus am feadh a *bha* e fathast a' labhairt riu, thàinig Rachel le caoraich a h-athar; oir b'i a *bha* 'gan gleidheadh³.

10 Agus an uair a chunnaic Iacob Rachel nighean Labain bràthar a mhàthar, agus caoraich Labain bràthar a mhàthar, an sin chaidh Iacob am fagus, agus charuich e a' chlach bhàrr beoil an tobair, agus thug e uisge do chaoraich Labain bràthar a mhàthar.

11 Agus phòg Iacob Rachel, agus thog e suas a ghuth agus ghuih e.

12 Agus dh'innis Iacob do Rachel gu'm *b'e* bràthair a h-athar e, agus gu'm *b'e* mac Rebecah e: agus ruith i, agus dh'innis i d'a h-athair.

13 Agus 'nuair a chuala Laban sgeula Iacob mhic a pheathar, an sin ruith e 'na choinneamh, agus ghabh e 'na ghlaicabhe, agus phòg se e, agus thug e d'a thigh e:

agus dh'innis e do Laban na nithe sin uile.

14 Agus thubhairt Laban ris, Gu cinnteach is tu mo chnàimh agus m'fheoil: agus dh'fhan e maille ris rè mìos.

15 Agus thubhairt Laban ri Iacob, A chionn gur tu mo bhràthair, am buin e dhuit seirbhìs a dheanamh dhomh a nasgaidh? innis dhomh ciod e do thuarasdal⁴.

16 Agus *bha* aig Laban dìthis nigheana: *b'e* ainm na té bu shine Leah, agus ainm na té a b'òige Rachel.

17 Agus *bha* sùilean Leah anmhunn, ach *bha* Rachel maiseach 'na dealbh agus sgiamhach 'na gnùis⁵.

18 Agus *bha* gràdh aig Iacob air Rachel, agus thubhairt e, Nì mi seirbhìs dhuit seachd bliadhna air son Racheil do nighinn a's òige.

19 Agus thubhairt Laban, Is fearr dhomh a toirt duitse na gu'n tugainn i do dhuine sam bith eile: fan maille rium.

20 Agus rinn Iacob seirbhìs air son Rachel seachd bliadhna; agus *bha* iad 'na shùilbh mar bheagan do làithibh⁶, a thaobh a' ghràidh a bh'aige oirre.

21 Agus thubhairt Iacob ri Laban, Thoir dhomh mo bhean, (oir choimhlionadh mi làithean,) a chum gu'n téid mi steach d'a h-ionnsuidh.

22 Agus chruinnich Laban cuideachd daoine an àit uile, agus rinn e cuirm.

23 Agus san fheasgar ghabh e Leah a nighean, agus thug e d'a ionnsuidh i; agus chaidh e steach d'a h-ionnsuidh.

24 Agus thug Laban d'a nighinn Leah, Silpah a bhanoglach fèin, mar bhanoglaich.

25 Agus sa' mhaduinn, feuch, *b'i* Leah *bh'ann*: agus thubhairt e ri Laban, Ciod e so a rinn thu orm? Nach ann air son Racheil a rinn mi seirbhìs dhuit? agus c'ar son a mheall thu mi?

26 Agus thubhairt Laban, Cha 'n fheud e bhì mar sin 'nar dùthaich-ne⁷, an té a's òige thoirt seachd roimh an té a's sine⁸.

27 Coimhlion a seachduin-sa, agus bheir sinn dhuit ise mar an ceudna, air son na seirbhìs a nì thu maille rium fathast rè sheachd bliadhna eile.

28 Agus rinn Iacob mar sin, agus choimhlion e a seachduin; agus thug e dha Rachel a nighean mar an ceudna 'na mnaoi.

29 Agus thug Laban do Rachel a nigh-ean, Bilhah a bhanoglach fèin, dh'ise mar bhanoglaich.

30 Agus chaidh e steach cuideachd a dh'ionnsuidh Racheil, agus ghràdhaich e mar an ceudna Rachel nì's mo na Leah, agus rinn e seirbhìs maille ris fathast seachd bliadhna eile.

31 Agus 'nuair a chunnaic an Tighearna

¹ choruich. Eir.

² béil.

³ g am biadhadh.

⁴ ciod an tuarasdal a bhios

duit.

⁵ maiseach ri amharc oirre.

⁶ mar a' choimhlion latha.

⁷ nar n'-àite-ne.

⁸ roimh'n cheud-ghin.

gu'n d' thugadh fuath do Leah, dh'fhosg-
aile a bolg: ach *bha* Rachel gun chlànn¹.

32 Ach dh'fhàs Leah torrach, agus rug i
mac, agus thug i Reuben mar ainm air: oir
thubhairt i, Gu deimhin dh'amhairc an
Tighearna air m' àmhghar², a nis uime
sin gràdhaidhidh m'fhear mi.

33 Agus dh'fhàs i torrach a ris, agus rug
i mac, agus thubhairt i, A chionn gu'n
cuala 'n Tighearna gu'n robh mi air
m'fhuathachadh, uime sin thug e dhomh
am mac so cuideachd: agus thug i Si-
meon mar ainm air.

34 Agus dh'fhàs i torrach a ris, agus rug
i mac; agus thubhairt i, A nis anns an uair
so, dlùth-leanaidh m'fhearrum, do bhrìgh
gu'n d'rug mi dha triuir mhac: uime sin
thug i Lebhi mar ainm air.

35 Agus dh'fhàs i torrach a ris, agus rug
i mac; agus thubhairt i, A nis molaidh mi
an Tighearna: uime sin, thug i Iudah mar
ainm air. Agus sguir i do bhreith *cloinne*.

CAIB. XXX.

1 *Thug Rachel a banoglach Bilhah do Iacob mar
mhnaoi, agus rug i Dan agus Naphtali. 9 Thug
Leah dha a banoglach Silpah mar mhnaoi, agus
rug i Gad agus Aser. 22 Rug Rachel Ioseph.
25 Rinn Laban coimh-cheangal nuadh ri Iacob.*

AGUS an uair a chunnaic Rachel nach
a' d'rug i clann do Iacob, bha farmad
aig Rachel r'a piuthair, agus thubhairt i,
Iacob, Thoir dhomh clann, no gheibh mi
bàs.

2 Agus las corruich Iacoib ri Rachel,
agus thubhairt e, Am bheil mis' an àite
Dhé, a chum uait toradh na bronn?

3 Agus thubhairt i, Feuch, mo bhanog-
lach Bilhah, theirig³ a steach d'a h-ionn-
suidh, agus beiridh i air mo ghluinibh,
agus bithidh agam-sa mar an ceudna
clann d'a trid-san.

4 Agus thug i dha Bilhah a banoglach
mar mhnaoi; agus chaidh Iacob a steach
d'a h-ionnsuidh.

5 Agus dh'fhàs Bilhah torrach, agus rug
i mac do Iacob.

6 Agus thubhairt Rachel, Thug Dia
breth orm, agus dh'éisid e mar an ceudna
ri m' ghuth, agus thug e dhomh mac:
uime sin thug i Dan mar ainm air.

7 Agus dh'fhàs Bilhah banoglach Rach-
eil torrach a ris, agus rug i do Iacob an
dara mac⁴.

8 Agus thubhairt Rachel, Le mòr-ghleac
ghleac mi ri m' phiuthair, agus thug mi
buidh: agus thug i Naphtali mar ainm
air.

9 'Nuair a chunnaic Leah gu'n do sguir i
do bhreith *cloinne*, ghabh i Silpah a banog-
lach, agus thug i do Iacob mar mhnaoi i.

10 Agus rug Silpah, banogiach Leah,
mac do Iacob.

11 Agus thubhairt Leah, Tha sonas⁵ air
teachd: agus thug i Gad mar ainm air.

12 Agus rug Silpah, banoglach Leah,
an dara mac do Iacob.

13 Agus thubhairt Leah, Is sona mi, oir
goiridh na nigheana mise beannaichte:
agus thug i Aser mar ainm air.

14 Agus chaidh Reuben a *mach* ann an
làithibh fogharaidh a' chruithneachd, agus
fhuair e mandraga⁶ sa' mhachair, agus
thug e iad chum a mhàthar Leah. An
sin thubhairt Rachel ri Leah, Thoir dhomh,
guidheam ort, *cuid* do mhandragaibh do
mhic.

15 Agus thubhairt i rithe, Am beag a'
chùis gu'n d'thug thu m'fhear uam, agus
am b'aill leat mandraga mo mhic a thoirt
leat mar an ceudna? Agus thubhairt
Rachel, Uime sin luidhidh e leats' an
nochd air son mandraga do mhic.

16 Agus thàinig Iacob o'n mhachair san
fheasgar, agus chaidh Leah mach 'na
choinneamh, agus thubhairt i, Thig thu
steach a m' ionnsuidhse, oir gu deimhin
cheannaich⁷ mi thu le mandragaibh mo
mhic: Agus luidh e leatha air an oidhech
sin.

17 Agus dh'éisid Dia ri Leah, agus
dh'fhàs i torrach, agus rug i do Iacob an
cuigeadh mac.

18 Agus thubhairt Leah, Thug Dia
dhomh mo dhuais, a chionn gu'n d'thug
mi mo bhanoglach do m'fhear: agus
thug i Isachar mar ainm air.

19 Agus dh'fhàs Leah torrach a ris, agus
rug i do Iacob an seathadh mac.

20 Agus thubhairt Leah, Dheònaich Dia
dhomh deadh chuibhrionn⁸: a nis gabh-
aidh m'fhear còmhnuidh maille rium, a
chionn gu'n d'rug mi dha seathnar mhac;
agus thug i Sebulun mar ainm air.

21 Agus 'na dhéigh sin rug i nighean,
agus thug i Dinah mar ainm oirre.

22 Agus chuimhnich Dia air Rachel,
agus dh'éisid Dia rithe, agus dh'fhosgail
e a bolg.

23 Agus dh'fhàs i torrach, agus rug i
mac; agus thubhairt i, Thug Dia air
falbh mo mhi-chliu.

24 Agus thug i Ioseph mar ainm air, ag-
ràdh, Bheir an Tighearna dhomh fathast
mac eile.

25 Agus 'nuair a rug Rachel Ioseph, an
sin thubhairt Iacob ri Laban, Leig air
falbh mi, chum gu'n téid mi do m' àite,
agus do m'dhùthaich féin.

26 Thoir *dhomh* mo mhnàì, agus mo
chlànn, air son an d'rinn mi seirbhis duit,

¹ neo-thorrach.

³ rach, gabh.

cuideachd.

² mo thrioblaid, m' an-shocair.

⁴ mac eile.

⁵ buidheann.

⁶ àbhla beaga cùbhraidh agus

blasda, a bha fàs ann an Siria agus Judea.

⁷ thararsdalaich.

shona.

⁸ Dhèdnaich Dia dhomh asaid

agus gu'm falbh mi; oir is aithne dhuit mo sheirbhis a rinn mi dhuit.

27 Agus thubhairt Laban ris, Guidheam ort, ma fhuair mi deadh-ghean a'd' shuilibh, *fuirich*: oir dh'fhòghluim mi o' m' fhiosrachadh féin gu'n do bheannaich an Tighearna mi air do sgàth-sa.

28 Agus thubhairt e, Ainmich do thuarasdal dhomh, agus bheir mi dhuit e.

29 Agus thubhairt e ris, Tha fios agad cionnus a rinn mi seirbhis dhuit, agus cionnus a bha do spréidh agam:

30 Oir is beag a bh'agad mun d' thàinig mi, agus a nis tha e air fàs 'na mhòran; agus bheannaich Dia thu an lorg mo *teachd-sa*; agus a nis, c'uin a ni mi mar an ceudna air son mo thighe féin?

31 Agus thubhairt e, Ciod a bheir mi dhuit? Agus thubhairt Iacob, Cha toir thu ni sam bith dhomh: ma ni thu an ni so rium, ionaltraidh mi ris, agus gleidhidh mi do threud.

32 Théid mise troimh do threud uile an diugh, ag atharrachadh as a sin gach spréidhe a ta breac agus ballach, agus gach spréidhe a ta dubh-dhonn am measg nan caorach, agus ballach agus breac am measg nan gabhar: agus is e so mo thuarasdal.

33 Agus freagraidh air mo shonsa m'ion-racas san àm ri teachd¹, 'nuair a thig e mar mo thuarasdal² a'd' làthair-sa: gach aon nach bi breac agus ballach am measg nan gabhar, agus dubh-dhonn am measg nan caorach, *measar* e mar ni bradach agam-sa.

34 Agus thubhairt Laban, Feuch, b'fhearr leam gu'm bitheadh e réir t'fhocail.

35 Agus dh'atharraich e air an là sin féin na gabhair fhìrionn a bha stiallach agus ballach, agus na gabhair bhoirionn uile a bha breac agus ballach, agus gach aon air an robh gile, agus gach aon a bha dubh-dhonn³ am measg nan caorach, agus thug e *iad* do làmhnan a mhac.

36 Agus chuir e astar thri làithean eadar e féin agus Iacob: agus bheathaich⁴ Iacob a chuid eile do threudaibh Labain.

37 Agus ghabh Iacob dha féin slatan glasa do'n chritheam, agus do'n chall-dainn, agus do chraoibh nan geannm-chnò; agus rùisg e annta stialla geala, agus leig e ris an geal a *bha* sna slataibh.

38 Agus chuir e ua slatan a rùisg e anns na claisibh, anns na h-amair uisge, far an d'thàinig⁵ na treudan a dh'òl, fa chomhair nan treud, chum as gu'm fàsadh iad torrach an uair a thigeadh iad a dh'òl.

39 Agus dh'fhàs na treudan torrach fa chomhair nan slat, agus rug iad spréidh stiallach, bhreac agus bhallach.

40 Agus thearbaidh Iacob na h-uain,

agus chuir e aghaidh nan treud rìusan a bha stiallach, agus gach *beathach a bha* dubh-dhonn ann an treudaibh Labain, agus chuir e a threudan féin air leth, agus cha do chuir e iad làimh ri treudaibh Labain.

41 Agus ge b'e uair a dh'fhàs an spréidh bu treise torrach, chuir Iacob na slata fa chomhair sùl na spréidhe anns na claisibh, chum gu'm fàsadh iad torrach a réir nan slat⁶.

42 Ach 'nuair a bha'n spréidh annhunn, cha do chuir e ann *iad*: mar sin bu le Laban iadsan a b'annhuinne, agus le Iacob iadsan bu treise.

43 Agus dh'fhàs an duine ro shaoibhir; agus bha mòran spréidhe aige, agus ban-oglaich agus òglaich, agus càmhail, agus asail.

CAIB. XXXI.

1 *Theich Iacob air falbh gu h-uaigneach o Laban gu dol do thir Chanaain.* 22 *Lean Laban e.* 44 *Rinn iad coimhcheangal ri chèile aig Galeed.*

A GUS chual⁷ e briathramhac Labain, ag ràdh, Thug Iacob leis gach ni a bh' aig ar n-athair, agus o'n *ni sin bu le ar n-athair-ne* fhuair e dha féin a' mhòrachd so uile. 2 Agus chumhaic Iacob gnùis Labain, agus, feuch, cha robh i leis mar a *bha i* roimhe sin⁸.

3 Agus thubhairt an Tighearna ri Iacob, Pill gu dùthaich t'aithriche, agus a dh'ionnsuidh do dhilsean; agus bithidh mise maille riut.

4 Agus chuir Iacob *teachdaire* uaith, agus ghairm e Rachel agus Leah do'n mhachair a dh'ionnsuidh a threuda.

5 Agus thubhairt e riut, Tha mi faicinn gnùise bhuir n-athar, nach 'eil i leam mar a *bha i* roimhe: ach bha Dia m'athar maille riumsa.

6 Agus tha fios agaibh féin, le m' uile dhìchioll gu'n d'rinn mi seirbhis do'r n-athair.

7 Gidheadh mheall bhuir n-athair mi, agus mhùth⁹ e mo thuarasdal deich uairean: ach cha do leig Dia leis cron a dheanamh orm.

8 Ma thubhairt e mar so, Bithidh an *spréidh* bhreac 'nan tuarasdal agad, an sin rug an spréidh uile *àl* breac: agus ma thubhairt e mar so, Bithidh an *spréidh* stiallach 'nan tuarasdal agad, an sin rug an *spréidh* uile *àl* stiallach.

9 Mar so thug Dia air falbh spréidh bhuir n-athar, agus thug e dhomhsa *iad*.

10 Agus 'nuair a dh'fhàs an spréidh torrach, thog mi suas mo shùilean, agus chunnaic mi ann an aising, agus, feuch, *bha* na reitheachan, a bha reitheadh na spréidhe⁹, stiallach, breac agus gris-fhionn.

11 Agus thubhairt aingeal an Tighearna

¹ air an là màireach, Eabh.

² 'nuair a thig thu air mo thuarasdal.

³ ciar.

⁴ dh'ionaltair.

⁵ 'nuair a thàinig.

⁶ am measg nan slat.

dé. Eabh.

⁷ n dè's air a bhò 'n

⁸ dh'atharraich.

⁹ leum air an

spréidh.

riunn ann an aisling, A Iacob: agus thubhairt mise, *Tha mi 'n so*.

12 Agus thubhairt esan, Tog suas a nis do shùilean, agus faic na reitheachan uile, a tha reitheadh na spréidhe, *gu bheil iad* stiallach, breac agus grís-fhionn: oir chunnaic mise gach ni a rinn Laban ort.

13 Is mise Dia Bheteil, far an d'ung thu 'n carragh, far an do bhòidich thu dhomhsa bòid: a nis éirich, imich a mach as an tìr so, agus pill gu tìr do dhilsean.

14 Agus fhreagair Rachel agus Leah, agus thubhairt iad ris, Am *bheil* fathast cuibhrionn no oighbreachd air bith againne ann an tigh ar n-athar?

15 Nach 'eil sinn air ar meas leis mar choigrich? oir reic e sinn, agus struidh e mar an ceudna gu tur ar n-airgid.

16 Oir an saoihbreas *sin* uile a thug Dia o'r n-athair, is leinn féin, agus le'r cloinn e: a nis uime sin, gach ni a thubhairt Dia riutsa, dean e.

17 An sin dh'éirich Iacob suas, agus chuir e a mhic agus a mhnai air càmhalaibh;

18 Agus thug e leis a spréidh uile, agus a mhaoin uile a fhuair e, spréidh a chosnaidh, a fhuair e am Padan-aram, gu dol a dh'ionnsuidh Isaic 'athar gu tìr Chanaain.

19 Agus chaidh Laban a lomaire¹ a chaoarach; agus ghoid Rachel na dealbhan² *bu* le a h-athair.

20 Agus ghoid Iacob air falbh gun fhios do Laban an Siriach, a chionn nach d'innis e dha gu'n robh e *gu* teicheadh.

21 Agus theich e leis gach ni a bh' aige; agus dh'éirich e suas, agus chaidh e thar an amhaoin, agus chuir e 'aghaidh ri sliabh Ghilead.

22 Agus dh'innseadh do Laban, air an treas là, gu'n do theich Iacob.

23 Agus thug e a bhràithre leis, agus lean se e astar sheachd làithean, agus rug e air ann an sliabh Ghilead.

24 Agus thàinig Dia gu Laban an Siriach ann an aisling san oidhche, agus thubhairt e ris, Thoir an aire nach labhair thu ri Iacob aon chuid maith no olc.

25 An sin rug Laban air Iacob. A nis shuidhich Iacob a bhùth san t-sliabh, agus shuidhich Laban maille r'a bhràithribh ann an sliabh Ghilead.

26 Agus thubhairt Laban ri Iacob, Ciod so a rinn thu, gu'n do ghoid thu air falbh gun fhios domh, agus gu'n d'ug thu leat mo nigheana, mar bhraighdean³ a thugadh a mach leis a' chlaidheamh?

27 C'ar son a theich thu air falbh gu h-uaigneach, agus a ghoid thu uam agus nach d'innis thu domh, agus gu'n cuirinn air falbh thu le subhachas, agus le h-òran-aibh, le tiompan, agus le clàrsaich?

28 Agus nach do leag thu leam mo mhic

agus mo nigheanan a phògadh? a nis is amadeach a fhuara tu le *so* a dheanamh.

29 Tha e'n comas mo làimhe-sa cron a dheanamh ort: ach labhair Dia t'athar rium an raoir, ag ràdh, Thoir an aire, nach labhair thu ri Iacob aon chuid maith no olc.

30 Agus a nis, ged a b'éigin duit falbh, a chionn gu'n robh thu gu ro mhòr an geall air tigh t'athar, *gidheadh* c'ar son a ghoid thu mo dhée?

31 Agus fhreagair Iacob, agus thubhairt e ri Laban, A chionn gu'n robh eagal orm: oir thubhairt mi, Theagamh gu'n tugadh tu uam do nigheana le h-ainneart.

32 Ge b'e neach aig am faigh thu do dhée, na maireadh e beò: an làthair ar bràithre faic ciod a th' agam a *bhuineas* duit, agus gabh thugadh⁴ e: oir cha robh fhios aig Iacob gu'n do ghoid Rachel iad.

33 Agus chaidh Laban a steach do bhùth Iacob, agus do bhùth Leah, agus do bhùth an dà bhanoglaich; ach cha d'fhuair e *iad*. An sin chaidh e mach a bhùth Leah, agus chaidh e steach do bhùth Rachel.

34 A nis ghoid Rachel na dealbhan, agus chuir i iad ann an acfium⁵ a' chàmhail, agus shuidh i orra: agus rannsaich Laban am bhùth uile, ach cha d'fhuair e *iad*.

35 Agus thubhairt i r'a h-athair, Na cuir-eadh e corruich air mo thighearna nach urrainn mi éirigh suas a't' fhianuis, oir *tha* orm a réir gnatha nam ban: agus rannsaich e, ach cha d'fhuair e na dealbhan.

36 Agus bha fearg air Iacob, agus throid e ri Laban: agus fhreagair Iacob, agus thubhairt e ri Laban, Ciod i mo choire, agus ciod mo pheacadh, gu'n robh thu cho dian air mo thòir?

37 An déigh dhuit m'airneis uile a rann-sachadh, ciod a fhuair thu dh'uire airneis do thighe? cuir an so e an làthair mo bhràithre-sa agus do bhràithre féin, agus gu'n tabhair iad bretheadarunn' nardithis.

38 A nis fichead bliadhna *bha* mi maille riut; cha do thilg do chaoarach an uain, no do ghabhair am minn, agus reitheachan do theudha cha d'ith mi.

39 An sin sin a reubadh *le fiadh-bheath-aichibh* cha d'ug mi a t' ionnsuidh; ghiul-ain mi féin a chall: o m' làimh-sa dh'iarr thu e, *co ac'* a ghoideadh e san latha, no ghoideadh e san oidhche.

40 Mar so bha mi; san là chlaoidh an teas mi, agus an reotha san oidhche; agus dhealaich mo chodal ri m' shùilibh.

41 Mar so *bha* mi fichead bliadhna a d' thigh: ceithir bliadhna deng rinn mi seirbhis duit air son do dhithis nigheana, agus sé bliadhna air son do spréidhe; agus mhùth thu mo thuarasdal deich uairean.

42 Mur bhitheadh gu'n robh Dia m'athar, Dia Abraham, agus eagal Isaic maille

¹ a rùsgadh.

³ chiomaich.

² ìomhaighcan.

⁴ chugad.

⁵ fasair, uidheam.

rium, gu cinnteach chuireadh tu nis air falbh m'falamh: chunnaic Dia m'àmhghar agus saothair mo làmh, agus chronaich e *thu* 'n raoir.

43 Agus fhreagair Laban, agus thubhairt e ri Iacob. Na nigheana *so is iad* mo nigh-eana-sa iad, agus a' chlann *so* mo chlann-sa, agus an spréidh *so* mo spréidh-sa; agus gach ni a *tha* thu a' faicinn, is leamsa e: agus ciod a dh'fheudas mi dheanamh an diugh ri m'nigheanaibh so, no r'an cloinn a rug iad?

44 A nis uime sin thig-sa, deanamaid coimhcheangal, mise agus thusa; agus bith-eadh e mar fhianuis eadar mise agus thusa.

45 Agus ghabh Iacob clach, agus chuir e suas i mar charragh.

46 Agus thubhairt Iacob r'a bhràithribh, Cruinnichibh clachan: agus ghabh iad clachan, agus rinn iad carn, agus dh'ith iad an sin air a' charn.

47 Agus thug Laban mar ainm air Iegar-sahaduta: ach thug Iacob mar ainm air Galeed.

48 Agus thubhairt Laban, *Tha* 'n carn so 'na fhianuis eadar mise agus thusa an diugh. Uime sin thugadh Galeed mar ainm air;

49 Agus Midspah; oir thubhairt e, Deanadh an Tighearna faire eadar mise agus thusa, 'nuair a bhitheas sinn á làthair a chéile.

50 Ma bhuineas tu gu cruaidh ri m' nigh-eanaibh, no ma ghabhas tu mnà *eile* thuill-eadh air mo nigheanaibh-sa, cha 'n *eil* duine sam bith maille ruinn; feuch, *tha* Dia 'na fhianuis eadar mis' agus thusa.

51 Agus thubhairt Laban ri Iacob, Faic an carn so, agus faic an carragh so, a shuidhich mi eadar mis' agus thusa.

52 *Bitheadh* an carn so 'na fhianuis, agus *bitheadh* an carragh so 'na fhianuis, nach téid mise a t' ionnsuidh-sa thara' charn so, agus nach tig thus' a m' ionnsuidh-sa thara' charn so, agus a' charragh so, gu cron.

53 Gu'n tugadh Dia Abraham, agus Dia Nahoir, Dia an athar, bretheadarunn. Agus mhinnaich Iacob air eagal 'athar Isaaic.

54 An sin thug Iacob suas lobairtean san t-sliabh, agus ghairm e air a bhràithribh a dh'itheadh arain: agus dh'ith iad aran, agus dh'fhan iad rè na h-oidhche san t-sliabh.

55 Agus dh'éirich Laban suas moch sa' mhaduinn, agus phòg e a mhic agus a nigheanan, agus bheannaich e iad, agus dh'fhalbh e: agus phill Laban g'a àite féin.

CAIB. XXXII.

1 Chunnaic Iacob aingle aig Mahanaim. 3 Chuir e teachdairean gu Esau. 7 Bha eagal air gu'n tig-eadh e 'na aghaidh, agus rinn e urnuigh ris an Tighearn gu'n saoradh e uaithe e. 13 Chuir, e tiòdhlac d'a ionnsuidh. 24 Ghleac e ri aingeal aig Peniel, agus thugadh Israel mar ainm air.

A GUS dh'imich Iacob air a shlighe, agus choinnich aingil Dhé e.

2 Agus thubhairt Iacob, 'nuair a chunnaic e iad, *Is* e so feachd Dhé: agus thug e Mahanaim mar ainm air an àite sin.

3 Agus chuir Iacob teachdairean roimhe gu h-Esau a bhràthair, gu fearann Sheir, dùthaich Edoim.

4 Agus dh'àithn e dhoibh, ag ràdh, Mar so their sibh ri m' thighearn Esau, Mar so thubhairt do sheirbhiseach Iacob, Bha mi air chuairt maille ri Laban, agus dh'fhan mi *maille ris* gus a nis.

5 Agus tha agam buar, agus asail, treudan, agus òglaich, agus banoglaich; agus chuir mi dh'innsadh do m' thighearna, chum gu'm faighinn deadh-ghean a'd' shùilibh.

6 Agus phill na teachdairean gu Iacob, ag ràdh, Thàinig sinn a dh'ionnsuidh do bhràthar Esau, agus mar an ceudna tha e teachd a'd' chòdhail, agus ceithir cheud fear maille ris.

7 Agus bha Iacob fo eagal mòr, agus ann an airc; agus roinn e 'n sluagh a bha maille ris, agus na treudan, agus an crodh, agus na càmhail 'nan dà bhuidhinn;

8 Agus thubhairt e, Ma thig Esau gu h-aon do na buidhneibh, agus gu'm buail e i, an sin théid a' bhuidheann a dh'fhanas as *uaithe*.

9 Agus thubhairt Iacob, O Dhé m'athar Abraham, agus a Dhé m'athar Isaaic, a Thighearn a thubhairt rium, Pìll gu d' dhùthaich, agus gu d' dhilsean, agus ni mi maith dhuit:

10 Cha 'n airidh mi air a' chuid a's lugha do na tròcairibh *sin* uile, no do'n fhìrinn *sin* uile, a nochd thu do d'sheirbhiseach; oir le m' luirg thàinig mi thar an Iordan so, agus tha mi nis a'm' dhà bhuidhinn.

11 Saor mi, guidheam ort, o làmh mo bhràthar, o làmh Esau: oir tha eagal orm roimhe, gu'n tig e, agus gu'm buail e mi, agus a' mhàthair maille ris a' chloinn.

12 Agus thubhairt thu, Gu cinnteach ni mi maith dhuit, agus ni mi do shìochd mar ghaineamh na faire, nach feudar àireamh a thaobh lìonmhoireachd.

13 Agus dh'fhan e au sin san oidhche sin féin, agus ghabh e do na thàinig g'a làimh tiòdhlac air son Esau a bhràthar;

14 Dà cheud gabhar agus fichead boc, dà cheud caora agus fichead reithe.

15 Deich càmhail fhichead bhainne le 'n searraich, dà fhichead bò agus deich tairbh, fichead asal bhoirinn agus deich searraich.

16 Agus thug e *iad* do làimh a sheirbhis-each, gach iomain leatha féin; agus thubhairt e r'a sheirbhisich, Imichibh romham, agus cuiribh dealachadh eadar iomain agus iomain.

17 Agus dh'àithn e dhasan a bh'air thoiseach, ag ràdh, 'Nuair a choinnicheas mo

bhràthair Esau thu, agus a dh'fheòraicheas edhiot, ag ràdh, Co leis thu, agus c'ait a tha thu dol? agus co leis iad sin a tha romhad?

18 An sin their thusa, *Buinidh iad* do d'sheirbhiseach Iacob; is tiodhlac ath'ann, a chuireadh a dh'ionnsuidh mo thighearn Esau: agus, feuch, mar an ceudna *tha* e féin 'nar déigh.

19 Agus dh'aitn e mar sin do'n dara *seirbhiseach*, agus do'n treas, agus dhoibhsan uile a bha leantuinn nan iomain, ag ràdh, Air an dòigh so labhraidh sibh ri h-Esau, 'nuair a gheibh sibh e.

20 Agus their sibh cuideachd, Feuch, *Tha* do sheirbhiseach Iacob 'nar déigh-ne: oir thubhairt e, Ni mi réidh¹ e leis an tiodhlac a théid romham, agus an déigh sin chi mi a ghnùis; theagamh gu'n gabh e rium.

21 Mar sin chaidh an tiodhlac thairis roimhe: agus dh'fhan e féin an oidhche sin sa' cluideachd.

22 Agus dh'éirich e suas san oidhche sin, agus ghabh e a dhà mhnaoi, agus a dhà bhanoglaich, agus 'aon mhac deug, agus chaidh e thairis air àth Iaboic.

23 Agus ghabh e iad, agus chuir e thairis air an t-sruth iad, agus chuir e thairis na bh'aige.

24 Agus dh'fhan Iacob 'na aonar; agus ghleac duine ris, gu ruig briseadh na faire.

25 Agus 'nuair a chunnaic e nach do bhuadhaich e air, an sin bhean e ri lag a shléisde; agus chaidh lag sléisde Iacob as an alt 'nuair a bha e a' gleac² ris.

26 Agus thubhairt e, Leig air falbh mi, oir tha'n fhàir a' briseadh: agus thubhairt esan, Cha leig mi air falbh thu, mur beannaich thu mi.

27 Agus thubhairt e ris, Ciod is ainm dhuit? agus thubhairt e, Iacob.

28 Agus thubhairt esan, Cha ghoircar³ Iacob nì's mò riut mar ainm, ach Israel: oir bha cumhachd agad mar uachdaran ri Dia, agus ri daoineibh, agus thug thu buaidh.

29 Agus dh'fhiosraich Iacob *dheth*, agus thubhairt e, Innis *dhomh*, guidheam ort, t'ainm: agus thubhairt esan, C'ar son a tha thu a' farraid m'ainme. Agus bheannaich e an sin e.

30 Agus thug Iacob Peniel mar ainm air an àite: oir chunnaic mi Dia aghaidh ri h-aghaidh, agus thearnadh m' anam.

31 Agus dh'éirich a' ghrian air, 'nuair a chaidh e seach Penuel, agus *bha* e bacach air a shliasaid.

32 Uime sin cha'n ith clann Israel do'n fhéith a chrup, a *ta* air lag na sléisde, gus an là'n diugh; a chionn gu'n do bhean e ri lag sléisde Iacob san fhéith a chrup.

1 Caoimhneas Iacob agus Esau d'a chéile 'nuair a choinnich iad. 18 Aig Salem cheunnaich Iacob achadh, agus thog e altair.

AGUS thog Iacob suas a shùilean, agus dh'amhairc e, agus, feuch, *bha* Esau a' teachd, agus maille ris ceithir cheud fear. Agus roinn e a' chlann do Leah, agus do Rachel, agus do'n dà bhanoglaich.

2 Agus chuir e na banoglaich agus an clann air thoiseach, agus Leah agus a clann 'nan déigh, agus Rachel agus Ioseph air dheireadh.

3 Agus chaidh e féin air 'aghaidh rompa, agus chrom se e féin gu làr seachd uairean, gus an d'thàinig e dluth d'a bhràthair.

4 Agus ruith Esau 'na choinneamh, agus ghabh e 'na ghleacaibh e, agus thuit e air a mhuineal, agus phòg se e: agus ghuid iad.

5 Agus thog e suas a shùilean, agus chunnaic e na mnà agus a' chlann; agus thubhairt e, Cò iad sin a *ta* maille riut? agus thubhairt esan, A' chlann a thug Dia gu gràsmhor do d'sheirbhiseach.

6 An sin thàinig na banoglaich am fagus, iad féin agus an clann, agus chrom siad iad féin.

7 Agus thàinig Leah cuideachd am fagus maille r'a cloinn, agus chrom siad iad féin; agus an déigh sin thàinig Ioseph am fagus agus Rachel, agus chrom siad iad féin.

8 Agus thubhairt e, Ciod is *ciall* duit leis an iomain so uile, a choinnich mi? Agus thubhairt esan, Gu deadh-ghean fhaghail ann an sùilibh mo thighearna.

9 Agus thubhairt Esau, Tha agamsa pailteas, a bhràthair; gléidh dhuit féin na bheil agad.

10 Agus thubhairt Iacob, Ni h-eadh, guidheam ort, ma fhuair mi nis deadh-ghean a'd' shùilibh, an sin gabh mo thiodhlac o m' làimh: oir uime sin chunnaic mi do ghnùis, mar gu'm fàicinn gnùis Dé, agus thaitinn mi riut.

11 Gabh, guidheam ort, mo bheannachadh a thugadh a d' ionnsuidh, do bhrìgh gu'n do bhuin Dia gu toirbheartach rium, agus gu bheil agam mòr phailteas: agus rinn e ro earail air, agus ghabh se e.

12 Agus thubhairt e, Gabhamaid ar turas, agus biomaid ag imeachd, agus théid mise maille riut⁴.

13 Agus thubhairt e ris, Tha fios aig mo thighearna gu *bheil* a' chlann maoth, agus na treudan agus an fheadail a *ta* maille rium, trom le h-àl; agus ma dh'iomainear iad gu dian aon latha, gheibh an treud uile bàs.

14 Rachadh, guidheam ort, mo thighearna seachd roimh a sheirbhiseach: agus gabhaidh mise ant-slighe gusocrach, a réir mar a bhios an spréidh a *ta* romham, agus

¹ ciùin

² ag spairn.

³ cha'n abrar.

⁴ romhad.

a' chlànn, comasach air fhulang, gus an tig mi dh'ionnsuidh mo thighearna gu Seir.

15 Agus thubhairt Esau, Leig leam a nis *cuid* do'n mhuinntir a *ta* maille rium fhàgail marriut¹: Agus thubhairt esan, C'ar son sin? faigheam-sa deadh-ghean an suilibh mo thighearna.

16 Mar sin phill Esau san là sin féin air a shlighe gu Seir.

17 Agus dh'imich Jacob gu Sucot, agus thog e dha féin tigh, agus rinn e bothain d'a spréidh: air an aobhar sin thugadh Sucot mar ainm air an àite.

18 Agus thàinig Jacob do Shalem, baile Shechem *a ta* ann an tìr Chanaain, 'nuair a thàinig e o Phadan-aram; agus shuidh-ich e a bhùth fa chomhair a' bhaile.

19 Agus cheannaich e bhì fearainn, far an do shuidhich e² a mhùr, o làimh chloinne Hamoirathar Shechem, air cheud bonn airgid³.

20 Agus chuir e suas altair an sin, agus thug e Eel-Elohe-Israel mar ainm oirre.

CAIB XXXIV.

1 Thruaileadh Dinah nighean Leah. 20 Thimchioll-ghearradh muinntir Shechem; 25 Mharbhadh iad le mic Iacoib, 27 agus chreachadh am baile.

AGUS chaidh Dinah nighean Leah, a rug i do Jacob, a mach a dh'fhaicinn nigheana na tire.

2 Agus 'nuair a chunnaic Sechem mac Hamoir an Ibhich, uachdaran na tire i, ghabh e i, agus luidh e leatha, agus thruaill e i⁴.

3 Agus dhlùth-lean 'anam ri Dinah nighean Iacoib, agus ghràdhaich e a' ghruag-ach⁵, agus labhair e gu caomh ris a' ghruagaich.

4 Agus labhair Sechem ri Hamor 'athair, ag ràdh, Faigh dhomh-sa a' ghruagach so mar mhnai.

5 Agus chuala Jacob gu'n do thruaill e Dinah a nighean. Nis (bha a mhic maille r'a spréidh sa' mhachair,) agus bha Iacob 'na thosd gus an d'thàinig iad.

6 Agus chaidh Hamor athair Shechem a mach a dh'ionnsuidh Iacoib, a labhairt ris.

7 Agus thàinig mic Iacoib o'n mhachair 'nuair a chual' iad e, agus bha na daoine doilich agus bha fearg mhòr orra; a chionn gu'n d'rinn e amaideachd ann an Israel, ann an luidhe le nighean Iacoib, ni nach bu chòir a dheanamh.

8 Agus labhair Hamor riu, ag ràdh, Tha anam mo mhic Shechem an ro gheall air bhuir nighinn: thugaibh dha i, guidheam oirbh, mar mhnai.

9 Agus deanaibh ceanglaiche-posaidh⁶ ruinne; bhuir nigheana-sa thugaibh dhuinne, agus ar nigheana-ne gabhaidh sibh dhuibh-se.

10 Agus maille ruinne gabhaidh sibh còmhuidh: agus bithidh an tìr roimh; gabhaibh còmhuidh, agus deanaibh reic agus ceannachd innte, agus faighibh sealbh innte.

11 Agus thubhairt Sechem r'a h-athair, agus r'a bràithribh, Faigheam deadh-ghean 'nur suilibh: agus ge b'e ni a their sibh rium, bheir mi dhuibh.

12 Air a mheud 's gu'n dean sibh an dubharaidh⁷ orm, agus an tiodhlac, bheir mi dhuibh eadhon mar a their sibh rium: a mhàin thugaibh dhomh a' ghruagach mar mhnai.

13 Agus fhreagair mic Iacoib Sechem agus Hamor 'athair le ceilg, agus labhair iad, (a chionn gu'n do thruaill e Dinah am piuthar.)

14 Agus thubhairt iad riu, Cha 'n fheud sinne an ni so dheanamh, ar piuthar a thoirt do dhuine neo-thimchioll-ghearrta; oir bhiodh sin 'na mhasladh dhuinne.

15 Ach an so aontaichidh sinn leibh; ma bhios sibhse mar *a ta* sinne, gu'n timchioll-ghearrar gach frionnach 'nur measg:

16 An sin bheir sinne ar nigheana dhuibhse, agus bhuir nigheana-sa gabhaidh sinn dhuinne, agus gabhaidh sinn còmhuidh maille ribh, agus bithidh sinn 'nar n-aon sluagh.

17 Ach mur éisd sibh ruinne, sibh a bhi air bhuir timchioll-ghearradh, an sin gabhaidh sinne ar nighean, agus falbhaidh sinn.

18 Agus thaitinn am briathra ri Hamor, agus ri Sechem mac Hamoir.

19 Agus cha do chuir an t-òganach dàil anns an ni a dheanamh, a chionn gu'n robh tlachd aige ann an nighinn Iacoib: agus bha e ni b'urramaiche na tigh 'athar uile.

20 Agus thàinig Hamor, agus Sechem a mhac gu geatadh am baile, agus labhair iad ri daoineibh am baile, ag ràdh,

21 *Tha* na daoine so sìochail maille ruinn, air an aobhar sin gabhadh iad còmhuidh san tìr, agus deanadh iad reic agus ceannachd innte; thaobh an fhearainn, feuch, *thae* farsaing ni's leòr dhoibh: an nigheana-sa gabhaidh sinne dhuinne mar mhnai, agus ar nigheana-ne bheir sinne dhoibhsan.

22 A mhàin anns an ni so aontaichidh na daoine leinn, gu còmhuidh ghabhail maille ruinn, gu bhi 'nar n-aon sluagh, ma thimchioll-ghearrar gach frionnach againne, mar *a ta* iadsan air an timchioll-ghearradh.

23 Nach leinne an spréidh, agus am maoin, agus an ainmhidhean uile? a mhàin aontaicheamaid leo, agus gabhadh iad còmhuidh maille ruinn.

24 Agus dh'éisd gach neach a chaidh mach air geatadh a bhaile ri Hamor agus ri Sechem a mhac: agus thimchioll-ghearr-

¹ maille riut, agad.

³ cheud uan.

² sgaoil.

⁴ dh'istich e i.

⁵ an nigheanag.

⁷ dowry. Sasg.

⁶ cleamhnas.

adh gach firionnach, iadsan uile a chaidh mach air gcatadh a bhaile.

25 Agus air an treas là, 'nuair a bha iad air an cràdh, an sin ghabh dithis do mhic Iacob, Simeon agus Lebhi, bràithre Dhinah, gach fear aca a chlaidheamh, agus thàinig iad air a' bhaile gu dàna; agus mharbh iad gach firionnach.

26 Agus mharbh iad Hamor agus Sechem a mhac le faobhar a' chlaidheimh, agus thug iad Dinah á tigh Shechem, agus chaidh iad a mach.

27 Thàinig mic Iacob air na mairbh, agus chreach iad am baile, a chionn gu'n do thruaill iad am piuthair.

28 An caoraich, agus am buar, agus an asail, agus na *bha* sa' bhaile, agus na *bha* san fhearann, thog iad:

29 Agus am maoin uile, agus an clann bheag uile, agus am mnàid thug iad leo an daorsadh¹, agus thog iad sa' chreich eadhon gach ni a *bha* stigh.

30 Agus thubhairt Iacob ri Simeon agus ri Lebhi, Chuir sibh trioblaid² orm le m' dheanamh gràineil³ am measg luchd-àit-eachaidh na tìre, am measg nan Canaanach, agus nam Peridseach: agus air dhomhsa bhi gan⁴ an àireamh, cruinnichidh siad iad féin cuideachd a' m' agbaidh, agus marbhadh iad mi; agus cuirear as domh, agus do m' thigh.

31 Agus thubhairt iad, Am bu chòir dha buntainn ri 'r piuthair-ne mar ristriopaich?

CAIB. XXXV.

1 Thàinig Iacob gu Betel, far an do thog e altair do Dhia. 9 Tha e air a bheannachadh. 16 Bàs Rachel, 23 Mic Iacob. 28 Aois Isaia, a bàs, agus 'adhlac.

A GUS thubhairt Dia ri Iacob, Eirich, a' imich suas gu Betel, agus gabh còmh-nuidh an sin; agus dean an sin altair do Dhia, a dh'fhoillsich e féin duit an uair a theich thu o ghnùis Esau do bhràthar.

2 Agus thubhairt Iacob r'a theaghlach, agus riu-san uile a *bha* maille ris, Cuiribh uaibh na diathan coimheach a *ta* 'nur measg, agus bithibh glan, agus mùthaibh⁵ bhur n-eudach:

3 Agus éireamaid, agus rachamaid suas gu Betel; agus ni mise an sin altair do Dhia, a dh'éisd rium an là mo chruaidh-chais, agus a *bha* maille rium san t-slighe air an deachaidh mi.

4 Agus thug iad do Iacob na diathan coimheach uile a *bha* 'nan làimh, agus an cluas-fhàinnean a *bha* 'nan clusaibh; agus dh'fholach Iacob iad fuidh'n daraig a *bha* làimh ri Sechem.

5 Agus dh'imich iad: agus *bha* eagal⁶ Dhé air na bailtibh a *bha* mu'n cuairt orra,

agus cha d'rinn iad tòireachd air mic Iacob.

6 Mar sin thàinig Iacob gu Luds, a *ta* an tìr Chanaain, eadhon Betel, e féin agus an sluagh uile a *bha* maille ris.

7 Agus thog e 'n sin altair, agus thug e Elbetel mar ainm air an àit; do bhrìgh ann an sin gu'n d'fhoillsich Dia e féin dha, 'nuair a theich e o ghnùis a bhràthar.

8 Ach fhuair Deborah banaltrum⁷ Rebecah bàs, agus dh'adhlacaidh i fuidh Bhetel, fuidh dharaig: agus thugadh Alon-bacut mar ainm air.

9 Agus dh'fhoillsich Dia e féin do Iacob a ris, an uair a thàinig e á Padan-aram; agus bheannaich se e.

10 Agus thubhairt Dia ris, 'Se Iacob a's ainm dhuit; cha'n ainmichear thu Iacob ni's mò, ach 'se Israel a bhios 'na ainm ort: agus thug e Israel mar ainm air.

11 Agus thubhairt Dia ris, *Is* mise Dia uile-chumhachdach; bi sìolmhor agus fàs lìonmhor: thig cinneach agus coimhthional chinneach uait, agus thig rìghrean a mach á d'leasruidh.

12 Agus am fearann a thug mi dh' Abraham agus a dh' Isaac, dhuitse bheir mi e; agus do d' shliochd a'd' dhéigh bheir mi am fearann.

13 Agus chaidh Dia suas uaith san àit an do labhair e ris.

14 Agus chuir Iacob suas carragh⁸ san àit an do labhair e ris, carragh cloiche, agus dhòirt e tabhartas-dìbhe air, agus dhòirt e oladh air.

15 Agus thug Iacob Betel mar ainm air an àite far an do labhair Dia ris

16 Agus dh'imich iad o Bhetel, agus cha robh ach astar beag aca ri teachd gu h-Ephrat: agus thàinig tinneas cloinne air Rachel, agus *bha* saothair chruaidh oirre.

17 Agus 'nuair a *bha* i an cruaidh-shaothair, an sin thubhairt a' bhean-ghlùine rithe, Na biodh eagal ort, oir *bithidh* am mac so agad cuideachd.

18 Agus 'nuair a *bha* h-anam a' dealachadh rithe, (oir fhuair i bàs,) thug i Benoni mar ainm air: ach dh'ainmich 'athair e Beniamin.

19 Agus fhuair Rachel bàs, agus dh'adhlacaidh i san t-slighe gu h-Ephrat, eadhon Bethlehem.

20 Agus chuir Iacob suas carragh air a h-uaigh: *is* e so carragh uaighe Rachel agus an là'n diugh.

21 Agus ghabh Israel a thurus, agus shuidhich e a bhùth an taobh thall do thùr Edeir.

22 Agus 'nuair a *bha* Israel a chòmh-nuidh san tìr sin, chaidh Reuben, agus luidh e le Bilhah leannan⁹ 'athar: agus

¹ am braighdeanas.

³ fuathach.

⁵ atharraichibh.

² amlisg.

⁴ tearc, beag.

⁶ uamhunn, oilt.

⁷ muime.

⁹ coimhleabach.

⁸ pillar. Sasg.

chual Israel *sin*. A nis bha dà mhac deug aig Iacob.

23 Mic Leah; Reuben ceud-ghin Iacoib, agus Simeon, agus Lebhi, agus Iudah, agus Isachar, agus Sebulun.

24 Mic Racheil: Ioseph, agus Benjamin.

25 Agus mic Bhilhah, banoglaich Racheil; Dan, agus Naphthali.

26 Agus mic Shilpah, banoglaich Leah; Gad agus Aser. *Is* iad sin mic Iacoib, a rugadh dha am Padan-aram.

27 Agus thàinig Iacob chum Isaic 'athar do Mhamre, gu baile Arbah, eadhon Hebron far an robh Abraham agus Isaac air chuairt.

28 Agus b'iad làithean Isaic ceud bliadhna 's ceithir fichead.

29 Agus thug Isaac suas an deò, agus dh'eug e, agus chruinnicheadh e chum a mhuinntir féin, agus e 'na sheann-duine, agus làn do làithibh. Agus dh'adhlaic a mhic Esau agus Iacob e.

CAIB. XXXVI.

1 *Triuir bhan Esau.* 9 *A ghinealaich ann an sliabh Sheir.* 15 *Na cinn-fheadhna a thàinig o 'mhic.*

AGUS *is* iad sin ginealaich Esau, eadhon Edoim.

2 Ghabh Esau a mhnà do nigheanaibh Chanaain; Adah nighean Eloin an Hìthich, agus Aholibamah nighean Anah, nighinn Shibeoin an Hìbhich;

3 Agus Basemat nighean Ismaeil, piuthar Nebaioit.

4 Agus rug Adah do Esau Eliphais; agus rug Basemat Reuel.

5 Agus rug Aholibamah Ieus, agus Iaa-lam, agus Corah: *Is* iad sin mic Esau, a rugadh dha ann an tìr Chanaain.

6 Agus ghabh Esau a mhnà, agus a mhic, agus a nigheana, agus uile mhuinntir a thighe, agus a spréidh, agus 'ainmhidhean uile, agus a mhaoin uile, a fhuair e ann an tìr Chanaain; agus chaidh e do thìr *eile* o ghnùis a bhràthar Iacoib.

7 Oir bha 'n saobhbheas ni bu mhò na gu'm feudadh iad còmhnuidh a ghabhail cuideachd; agus cha b'urrainn an tìr anns an robh iad 'nan coigrich. an giùlan air son an spréidhe.

8 Mar so ghabh Esau còmhnuidh ann an sliabh Sheir; *is* e Esau Edom.

9 Agus *is* iad sin ginealaich Esau, athar nan Edomach, ann an sliabh Sheir:

10 *Is* iad sin ainmeanna mhac Esau; Eliphais mac Adah mnà Esau, Reuel mac Bhasemait mnà Esau.

11 Agus b'iad mic Eliphais Teman, Omar, Sepho, agus Gatam, agus Cenas.

12 Agus bha Timna 'na leannan aig Eliphais, mac Esau; agus rug i do Eliphais Amalec: b'iad sin mic Adah, mnà Esau.

13 Agus *is* iad sin mic Reueil; Nahat, agus Serah, Samah, agus Midsah: b'iad sin mic Bhasemait, mnà Esau.

14 Agus b'iad sin mic Aholibamah, nighinn Anah, nighinn Shibeoin, mnà Esau: agus rug i do Esau Ieus, agus Iaa-lam, agus Corah.

15 B'iad sin ciunn-fheadhna mhac Esau: mic Eliphais, ceud-ghin Esau, ceann-fheadhna Teman, ceann-fheadhna Omar, ceann-fheadhna Sepho, ceann-fheadhna Cenas,

16 Ceann-fheadhna Corah, ceann-fheadhna Gatam, agus ceann-fheadhna Amalec: *is* iad sin na cinn-fheadhna a thàinig o Eliphais, ann an tìr Edoim: b'iad sin mic Adah.

17 Agus *is* iad sin mic Reueil, mhic Esau; ceann-fheadhna Nahat, ceann-fheadhna Serah, ceann-fheadhna Samah, ceann-fheadhna Midsah. *Is* iad sin na cinn-fheadhna a thàinig o Reuel, ann an tìr Edoim: *is* iad sin mic Bhasemait, mnà Esau.

18 Agus *is* iad sin mic Aholibamah, mnà Esau; ceann-fheadhna Ieus, ceann-fheadhna Iaa-lam, ceann-fheadhna Corah; b'iad sin na cinn-fheadhna a thàinig o Aholibamah nighinn Anah, mnà Esau.

19 *Is* iad sin mic Esau, eadhon Edoim; agus *is* iad sin an cinn-fheadhna.

20 *Is* iad sin mic Sheir an Horich, luchd-àiteachadh na tìre; Lotan, agus Sobal, agus Sibeon, agus Anah,

21 Agus Dison, agus Edser, agus Disan; *is* iad sin cinn-fheadhna nan Horach, cloinne Sheir, ann an tìr Edoim.

22 Agus b'iad clann Lotain Hori, agus Heman: agus b'i Timnah piuthar Lotain.

23 Agus b'iad sin clann Shobail; Albhan, agus Manahat, agus Ebal, Sepho, agus Onam.

24 Agus b'iad sin clann Shibeoin; araon Aiah, agus Anah: b'e so an t-Anah, a fhuair a mach na muileidean¹ san fhàsach, an uair a bha e 'g ionaltradh asal Shibeoin 'athar.

25 Agus b'iad sin clann Anah; Dison, agus Aholibamah nighean Anah.

26 Agus b'iad sin clann Dhisoin; Hemandan, agus Esban, agus Itran, agus Cheran.

27 B'iad sin clann Edseir; Bilhan, agus Saabhan, agus Achan.

28 B'iad sinn clann Dhisain; Uds, agus Aran.

29 B'iad sin cinn-fheadhna nan Horach; ceann-fheadhna Lotan, ceann-fheadhna Sobal, ceann-fheadhna Sibeon, ceann-fheadhna Anah,

30 Ceann-fheadhna Dison, ceann-fheadhna Edser, ceann-fheadhna Disan: *is* iad sin na cinn-fheadhna a thàinig o Hori, am mcasg an ceann-fheadhna-san ann an tìr Sheir.

31 Agus *is* iad sin na rìghrean a rìghlich ann an tìr Edoim, mun do rìghich rìgh sam bith air cloinn Israeil.

32 Agus rìghich ann an Edom Belah

¹ mules. Sasg.

mac Bheoir ; agus *b'e* ainm a bhaile Dinhabah.

33 Agus dh'eug Belah, agus rìghich Iobab mac Sherah o Bhosrah 'na àite.

34 Agus dh'eug Iobab, agus rìghich Husam o thìr Themani 'na àite.

35 Agus dh'eug Husam, agus rìghich Hadad mac Bhaidai, a bhuail Midian am fearann Mhoab, 'na àite : agus *b'e* ainm a bhaile Abhit.

36 Agus dh'eug Hadad, agus rìghich Samlah o Mhasrecah 'na àite.

37 Agus dh'eug Samlah, agus rìghich Saul o Rhehobot, *laimh ris* an amhainn, 'na àite.

38 Agus dh'eug Saul, agus rìghich Baalhanan mac Achboir 'na àite.

39 Agus dh'eug Baalhanan mac Achboir, agus rìghich Hadar 'na àite : agus *b'e* ainm a bhaile Pau ; agus ainm a mhnà Mehetabel, nighean Mhatreid, nighinn Mhedsaib.

40 Agus *is* iad sin ainmeanna nan ceann-feadhna a *thàinig* o Esau, a réir an teaghlachan, a réir an àiteachan, 'uan ainmibh ; ceann-feadhna Timnah, ceann-feadhna Albah, ceann-feadhna Ietet,

41 Ceann-feadhna Aholibamah, ceann-feadhna Elah, ceann-feadhna Pinon,

42 Ceann feadhna Cenas, ceann-feadhna Teman, ceann-feadhna Mibsar,

43 Ceann-feadhna Magdiel, ceann-feadhna Iram : *is* iad sin cinn-fheadhna Edoim, a réir an àiteachan-còmhnuidh, ann an tìr an seilbh ; *is* esan Esau, athair nan Edomach.

CAIB. XXXVII.

1 Dh' fhuathaichheadh Ioseph le a bhràithribh. 5 A dh' aising. 18 Chuir a bhràithrean an comhairle ri chèile gus a mharbhadh ; ach shaor Reuben e.

36 Reiceadh e ri Potiphar san Eipht.

AGUS ghabh Iacob còmhnuidh san tìr anns an robh 'athair 'na choigreach, ann an tìr Chanaain.

2 *Is* iad so ginealaich Iacob : 'Nuair a bhla Ioseph seachd bliadhna deug a dh'aois, bha e a' buachailleadh an treud maille r'a bhràithribh, agus *bha* 'n t-òganach maille ri mic Bhilhadh, agus maille ri mic Shilpah, mnà 'athar ; agus thug Ioseph an droch thuairesgeul-san a dh'ionnsuidh 'athar.

3 Agus bu docha le h-Israel Ioseph na 'mhic uile, a chionn gu'm *b'e* mac a shean aois e : agus rinn e dha còta dh'iomadh dath¹.

4 Agus 'nuair a chunnaic a bhràithre gu'm bu docha le 'athair e na bhràithrean uile, dh'fhuathaich iad e, agus cha b'urrainn iad labhairt ris gu sìochail².

5 Agus chunnaic Ioseph aisling³, agus dh'innis e d'a bhràithribh *i*, agus dh'fhuathaich iad e fathast nì's mò.

6 Agus thubhairt e riu, Eisidibh, guidheam oirbh, ris an aisling so a chunnaic mi.

7 Oir, feuch, *bha* sin a' ceangal sguab san achadh, agus, feuch, dh'èirich mo sguabsa suas, agus sheas i gu dìreach ; agus, feuch, sheas bhuir sguaban-sa mu'n cuairt oirre, agus rinn iad ùmhlachd do m' sguab-sa.

8 Agus thubhairt a bhràithre ris, Am bi thusa gun amharas a'd rìgh oirme ? Ambi agad d'a rìeadh tighearnas oirme ? Agus dh'fhuathaich iad e fathast nì's mò air son 'aislingean, agus air son a bhriathran.

9 Agus chunnaic e fathast aisling eile, agus dh'innis e d'a bhràithribh *i*, agus thubhairt e, Feuch, chunnaic mi aisling eile ; agus, feuch, rinna' ghrian agus a' ghealach, agus an aon reul deug, ùmhlachd dhomh.

10 Agus dh'innis e d'a athair *i*, agus d'a bhràithribh : agus thug 'athair achmhasan da, agus thubhairt e ris, Ciod i an aisling so a chunnaic thu ? An e gu'n tig d'a rìeadh mise, agus do mhàthair, agus do bhràithre, chum sinn féin a chromadh sìos duitse gu làr ?

11 Agus bha farmad aig a bhràithribh ris ; ach thug 'athair fa'near a' chainnt.

12 Agus chaidh a bhràithrean a dh'ionaltradh treud an athar do Sechem.

13 Agus thubhairt Israel ri Ioseph, Nach 'eil do bhràithrean ag ionaltradh an treud ann an Sechem ? Thig, agus cuiridh mi thu d'an ionnsuidh. Agus thubhairt e ris, Tha mise an so.

14 Agus thubhairt e ris, Imich, guidheam ort, faic am bheil do bhràithrean gu maith, agus am bheil an treud gu maith ; agus thoir fios a m' ionnsuidh a ris. Mar sin chuir e mach e á gleann Hebroin, agus thàinig e gu Sechem.

15 Agus fhuair duine àraidh e, agus, feuch, *bha* e air seacharan sa' mhachair : agus dh'fheòraich an duine dheth, ag ràdh, Ciod a tha thu 'g iarraidh ?

16 Agus thubhairt e, Tha mi 'g iarraidh mo bhràithrean : innis dhomh, guidheam ort, c'àit am bheil iad ag ionaltradh an treud.

17 Agus thubhairt an duine, Dh'fhalbh iad á so : oir chuala mi iad ag ràdh, Rachamaid gu Dotan. Agus chaidh Ioseph an dèigh a bhràithrean, agus fhuair e iad ann an Dotan.

18 Agus 'nuair a chunnaic iad e fada uatha, eadhon mun d'thàinig e am fagus doibh, chuir iad an comhairle ri chèile 'na aghaidh, gus a mharbhadh.

19 Agus thubhairt iad r'a chèile, Feuch, tha an t-aislingiche so a' teachd.

20 Thigibh a nis ma ta, agus marbhamaid e, agus tilgeamaid e ann an slochd éigin ; agus thoir sinn, Chuir droch bhéist éigin as da : agus chì sinn ciod gus an tig 'aislingean.

21 Agus chuala Reuben so, agus shaor

¹ dh'iomadh nìr.

² sìochail.

³ bhrùadair Ioseph brùadar

e as au làimh e, agus thubhairt e, Na cuireamaid gu bàs e.

22 Agus thubhairt Reuben riu, Na dòirtibh fuil; tilgibh e san t-slochd so, a *ta* san fhàsach, agus làmh na cuiribh air; a chum as gu'n saoradh e as an làimh e, agus gu'n aisgeadh e a ris d'a athair e.

23 Agus 'nuair a thàinig Ioseph a dh'ionnsuidh a bhràithrean, an sin bhuin iad do Ioseph a chòta, còta nan *iomadh* dath, a *bha* air.

24 Agus ghabh iad e, agus thilg iad e ann an slochd; agus bha 'n slochd falaml, gun uisge ann.

25 Agus shuidh iad sìos a dh'itheadh arain; agus thog iad suas an sùilean agus dh'amhairc iad, agus, feuch, *bha* cuideachd do chloinn Ismaeil a' teachd o Ghilead, le'n càmhalan a' giùlan spiosraidh, agus iochslàint¹, agus mirr, a' dol gus an toirt sìos do'n Eiphit.

26 Agus thubhairt Iudah r'a bhràithribh, Ciod an tairbhe a *bhios ann dhuinne*, ma mharbhas sinn ar bràthair, agus ma cheileas sinn 'fhuil?

27 Thigibh, agus reiceamaid e ris na h-Ismaelich, agus na cuireamaid làmh air; oir *is e* ar dearbh-bhràthair e, agus ar feoil: agus dh'èisd a bhràithre ris.

28 An sin chaidh Midianaich seachad, ceannaichean; agus tharruing iad agus thog iad suas Ioseph as an t-slochd, agus reic iad Ioseph ris na h-Ismaelich air fich-ead *bonn* airgid. Agus thug iadsan Ioseph do'u Eiphit.

29 Agus phill Reuben a dh'ionnsuidh an t-sluichd; agus, feuch, cha *robh* Ioseph san t-slochd: agus reub² e 'eudach.

30 Agus phill e dh'ionnsuidh a bhràithrean, agus thubhairt e, Cha'n *eil* an leanabh ann; agus mise, c'ait an tèid mi?

31 Agus ghabh iad còta Ioseph, agus mharbh iad meann do na gabhraibh, agus thum iad an còta san fhuil.

32 Agus chuir iad uatha còta nan *iomadh* dath, agus thug iad e dh'ionnsuidh an athar; agus thubhairt iad, Fhuair sinne so: aithnich a nis an e so còta do mhic, no nach e.

33 Agus dh'aithnich se e, agus thubhairt e, Còta mo mhic; chuir droch bhéisd as da: tha Ioseph gun teagamh air a reubadh as a chéile.

34 Agus reub Iacob 'eudach, agus chuir e eudach-saic air a leasruidh, agus rinn e bròn air son a mhic rè mòrain làithean.

35 Agus dh'èirich a mhic uile, agus a nigheanan uile suas, a thoirt sòlais da; ach dhiùlt esan sòlas a ghabhail; agus thubhairt e, Oir théid mi sìos do 'n uaigh a chum mo mhic ri bròn. Mar so rinn 'athair caoidh air a shon.

36 Agus reic na Midianaich e san Eiphit ri Potiphar, oifigeach le Pharaoh, ceannard an fhreiceadain³.

CAIB. XXXVIII.

1 *Ghin Iudah Er, Onan, agus Selah.* 6 *Phòs Er Tamar.* 8 *Cionta agus bàs Onain.* 11 *Dh' fhan Tamar ri Selah.*

AGUS an àm sin féin chaidh Iudal sìos a o' bhràithribh, agus thionndaidh e steach a dh'ionnsuidh Adulamaich àraidh, d'am b'ainm Hirah.

2 Agus chunnaic Iudah an sin nighean Canaanaich àraidh, d'am b'ainm Suah: agus ghabh e i, agus chaidh e steach d'a h-ionnsuidh.

3 Agus dh'fhàs i torrach, agus rug i mac: agus thug e Er mar ainm air.

4 Agus dh'fhàs i torrach a ris, agus rug i mac; agus thug i Onan mar ainm air.

5 Agus dh'fhàs i torrach fathast, agus rug i mac; agus thug i Selah mar ainm air: agus bha esan ann an Chedsib, an uair a rug i e.

6 Agus ghabh Iudah bean do Er a cheudghin, d' am b'ainm Tamar.

7 Agus bha Er, ceud-ghin Iudah, aingidh ann an sealladh an Tighearna; agus mharbh an Tighearn e.

8 Agus thubhairt Iudah ri li-Onan, Falbh a steach a dh'ionnsuidh mnà do bhràthar, agus pòs i, agus tog suas sliochd do d' bhràthair.

9 Agus bha fios aig Onan nach b'ann leis féin a bhiodh an sliochd; agus 'nuair a chaidh e steach a dh'ionnsuidh mnà a bhràthar, dhòirt e air a' bhlàr e, chum nach tugadh e sliochd d'a bhràthair.

10 Agus bha an ui a rinn e olc ann an sealladh an Tighearna: uime sin mharbh e esan mar an ceudna.

11 An sin thubhairt Iudah ri Tamar mnaoi a mhic, Fan a'd' bhantraich ann an tigh t'athar, gus am fàs mo mhac Selah suas; oir thubhairt e, Air eagal gu'm faigheadh esan bàs mar an ceudna, mar a *fhuair* a bhràithrean. Agus dh'fhalbh Tamar, agus dh'fhan i 'n tigh a h-athar.

12 Agus ùine fhada 'n déigh sin fhuair nighean Shuah, bean Iudah, bàs: agus thog Iudah a mhisneach, agus chaidh e suas a dh'ionnsuidh luchd-lomairt⁴ a chaorach, e féin agus a charaid Hirah an t-Adulamaich, gu Timnat.

13 Agus dh'innseadh do Thamar, ag ràdh, Feuch, tha t'athair-céile a' dol suas gu Timnat a lomairt a chaorach.

14 Agus chuir i a culaidh bantraich dhith, agus chòmlaich si i féin le gnùis-bhrat, agus phaisg si i féin, agus shuidh i ann an ionad follaisach, a *ta* làimh ris an t-slighe gu Timnat: oir chumaidh i gu'n

¹ *balm.* Sasg. ² *shrachd.* ³ *ceannard u shaighdearan, caiptein a' gheard.*

⁴ *luchd-bearraidh.*

d'fhàs Selah suas, agus nach d'thugadh i dha mar mhnaoi.

15 'Nuair a chunnaic Iudah i, shaoil e gu'm bu striopach i, a chionn gu'n do chòmhdaich i a h-eudan.

16 Agus thionndaidh e d'a h-ionnsuidh air an t-slighe, agus thubhairt e, Leig leam, guidheam ort, teachd a steach a t'ionnsuidh; oir cha robh fhios aige gu'm b'i bean a mhic i: agus thubhairt i, Ciod a bheir thu dhomh, a chum as gu'n tig thu steach a m' ionnsuidh?

17 Agus thubhairt esan, Cuiridh mi meann¹ a t'ionnsuidh o'n treud: agus thubhairt ise, An toir thu geall dhomh gus an cuir thu m' ionnsuidh e?

18 Agus thubhairt e, Ciod an geall a bheir mi dhuit? Agus thubhairt ise, Do sheula, agus do làmh-fhailean, agus do lorg a ta ann ad làimh: agus thug e dhi iad, agus chaidh e steach d'a h-ionnsuidh, agus rinneadh i torrach leis.

19 Agus dh'éirich i, agus dh'fhalbh i roimpe, agus chuir i seachad a gnùis-bhrat uath², agus chuir i a culaidh-bantraich oirre.

20 Agus chuir Iudah am meann le làimh a charaid an Adulamaich, chum as gu'm faigheadh e 'n geall o làimh na mnà: ach cha d'fhuair e i.

21 An sin dh'fheòraich e do dhaoineibh an àite sin, ag ràdh, C'ait am bheil an striopach a bha gu follaiseach ri taobh na slighe³? Agus thubhairt iadsan, Cha robh striopach sam bith an so.

22 Agus phill e dh'ionnsuidh Iudah, agus thubhairt e, Cha d'fhuair mi i: agus mar an ceudna thubhairt daoine an àite, Cha robh striopach sam bith an so.

23 Agus thubhairt Iudah, Gabhadh i dh'i féin e, air eagal gu maslaichear sinn: feuch chuir mi am meann so d'a h-ionnsuidh, agus cha d'fhuair thu i.

24 Agus beul ri tri mìosa an déigh sin, dh'innseadh do Iudah, ag ràdh, Rinn Tamar bean do mhic striopachas; agus, feuch, cuideachd, tha i torrach le striopachas. Agus thubhairt Iudah, Thugaibh a mach i, agus loisgear i.

25 'Nuair a thugadha mach i, chuir i fios a dh'ionnsuidh a-h-athar-céile, ag ràdh, Aig an fhear d'am buin iad sin tha mise leth-tromach: agus thubhairt i, Faic, guidheam ort, cia leis an seula, agus na làmh-fhailean, agus an lorg so.

26 Agus ghabh Iudah riu, agus thubhairt e, Bha i ni bu cheirte na mise, a chionn nach d'thug mi i do Shelah mo mhac: agus cha robh aithne aige oirre ni's mò.

27 Agus an uair a bha i ri saothair chloinne, feuch, bha leth-aona 'na bōlg.

28 Agus an uair a bha i ri saothair, chuir a h-aon diubh mach a làmh: agus rug a'

bhean-ghluine air a làimh, agus cheangail i snàthainnscarlaid oirre, ag ràdh, Thàinig e so a mach an toiseach.

29 Agus 'nuair a tharruing e a làmh air ais, feuch, thàinig a bhràthair a mach; agus thubhairt ise, Cionnus a bhris thu mach? *bithheadh* am briseadh so ortsa: Uime sin thugadh Phares mar ainm air.

30 Agus an déigh sin thàinig a bhràthair a mach, aig an robh an snàthainn scarlaid air a làimh; agus thugadh Sarah mar ainm air.

CAIB. XXXIX.

I Rinn Potiphar Ioseph 'na fhear-riaghlaidh air a thigh. 8 A gheamnuidheachd. 19 Chuireadh am prìosan e; 21 ach bha an Tighearna maille ris, agus nochd fear-gleididh a' phrìosain a dheadh run da.

AGUS thugadh Ioseph sìos do'n Eiphit; agus cheannaich Potiphar, oifigeach le Pharaoh, ceannard an fhreiceadain, Eiphiteach, e o làimh nan Ismaelach, a thug sìos an sin e.

2 Agus bha 'n Tighearna maille ri Ioseph, agus bha e 'na dhuine leis an do shoirbheach gach ni; agus bha e 'n tigh a mhaighstir an Eiphitich.

3 Agus chunnaic a mhaighstir gu 'n robh an Tighearna maille ris, agus gu'n d' thug an Tighearn air gach ni a rinn e soirbheachadh 'na làimh.

4 Agus fhuair Ioseph deadh-ghean 'na shealladh, agus rinn e seirbhis da: agus rinn e 'na fhear-riaghlaidh air a thigh, agus gach ni a bh'aige chuir e fuidh 'laimh.

5 Agus o'n àm sin féin san d' rinn se e 'na fhear-riaghlaidh air a thigh, agus air gach ni a bh'aige, bheannaich an Tighearna tigh an Eiphitich air sgàth Ioseph: agus bha beannachadh an Tighearn air gach ni a bh'aige, anns an tigh, agus anns a' mhachair.

6 Agus dh'fhàg e gach ni a bh'aige an làimh Ioseph, agus cha b'fhios da aon ni a bh'aige, saor o'n arana a bha e 'g itheadh: agus bha Ioseph 'na dhuine maiseach, agus sgiamhach san aghaidh.

7 Agus an déigh nan nithe sin leag bean a mhaighstir a suilean air Ioseph, agus thubhairt i, Luidh leamsa.

8 Agus dhiùlt esan, agus thubhairt e ri mnaoi a mhaighstir, Feuch, cha 'n 'eil fios aig mo mhaighstir ciod a tha maille rium san tigh, agus gach ni a th'aige chuir e fuidh m' làmh-sa.

9 Cha 'n 'eil neach san tigh so a's mò na mise; agus cha do chum e uam ni sam bith ach thusa, a chionn gur tu a bhean: cionnus uime sin a ni mise an t-olc mòr so, agus a pheacaicheas mi an aghaidh Dhé?

10 Agus thachair e, 'nuair a labhair i ri Ioseph o là, gu là, nach éisdeadh esan rithe, gu luidhe latha, no bhi maille rithe.

¹ meann do na gabhraibh. Eabh.

² uaire, uairche.

³ an ròid.

11 Agus thachair e, air latha àraidh, gu'n deachaidh esan a steach do 'n tigh a dheanadh 'oibre fèin, agus cha robh a h-aon do dhaoibh an tighe an sin a stigh.

12 Agus rug i air air 'eudach-uachdair, ag ràdh, Luidh leamsa: agus dh'fhàg e 'eudach-uachdair 'na làimh, agus theich e, agus thàr e mach.

13 Agus an uair a chunnaic ise gu 'n d'fhàg e 'eudach-uachdair 'na làimh, agus gu 'n do theich e mach,

14 An sin ghairm i air daoibh a tighe, agus labhair i riu, ag ràdh, Faicibh, thug e steach d'ar n-ionnsuidh Eabhruidheach g'ar maslachadh: thàinig e steach a m' ionnsuidhs' a luidhe leam, agus ghlaodh mise le guth àrd:

15 Agus 'nuair a chual' e gu'n do thog mi suas mo ghuth, agus gu'n do ghlaodh mi, an sin dh'fhàg e 'eudach-uachdair maille rium, agus theich e, agus chaidh e mach.

16 Agus thaisg i 'eudach-uachdair làimh rihe, agus an d'thàinig a thighearna dhachaidh.

17 Agus labhair i ris a réir nam briathra so, ag ràdh, Thàinig an seirbhiseach Eabhruidheach, a thug thu d'ar n-ionnsuidh, a steach a m' ionnsuidh-sa gu m' mhaslachadh;

18 Agus an uair a thog mise suas mo ghuth agus a ghlaodh mi, an sin dh'fhàg e 'eudach-uachdair maille rium, agus theich e mach.

19 Agus 'nuair a chual' a mhaighstir briathran a mhnà, a labhair i ris, ag ràdh, Air an dòigh so rinn do sheirbhiseach orm; an sin las 'fhearg suas.

20 Agus ghabh maighstir Ioseph e, agus chuir e sa' phriosan e, far an robh prìosanaich an rìgh ceangailte: agus bha e an sin sa' phriosan.

21 Ach bha 'n Tighearna maille ri Ioseph, agus nochd e trócair dha, agus thug e dha deadh-ghean ann an suilibh fhir-gleidhidh a' phriosain.

22 Agus chuir fear-gleidhidh a' phriosain fuidh làimh Ioseph na prìosanaich uile a bha sa' phriosan; agus gach ni a rinn iad an sin, b' esan a rinn e.

23 Cha d' amhairc fear-gleidhidh a' phriosain air ni sam bith a bha fuidh 'làimh, a chionn gu'n robh an Tighearna maille ris; agus an nì sin a rinn e thug an Tighearna air soirbheachadh leis.

CAIB. XL.

1 Thilgeadh an prìosan àrd bhuidealair, agus àrd fhuineadair rìgh na h-Eiphit. 4 Chuir ceannard an fhreiceadain an cùram air Ioseph. 5 Dh'eadar-mhìnich e an aislingean dhoibh.

A Gus an déigh nan nithe sin, chuir 'bhuidealair rìgh na h-Eiphit, agus 'fhuineadair, fearg air an tighearna, rìgh na h-Eiphit.

2 Agus bha corruich mhòr air Pharaoh ri dithis d'a sheirbhisich, ris an àrd bhuidealair, agus ris an àrd fhuineadair.

3 Agus chuir e 'n làimh³ iad ann an tìgh ceannard an fhreiceadain sa' phriosan, far an robh Ioseph ceangailte.

4 Agus chuir ceannard an fhreiceadain an cùram air Ioseph, agus fhritheil e dhoibh; agus dh'fhan iad tamull⁴ ann an làimh.

5 Agus chunnaic iad aisling le chéile, gach fear *aca* 'aisling fèin san aon oidhche, gach fear a réir eadar-mhìneachaidh 'aislinge; am buidealair agus fhuineadair rìgh na h-Eiphit, a bha ceangailte sa' phriosan.

6 Agus thàinig Ioseph a steach d'an ionnsuidh sa' mhaduinn, agus dh'amhairc e orra, agus, feuch, *bha* iad dubhach.

7 Agus dh'fheòraich e do sheirbhisich Pharaoh, a bha 'n làimh maille ris ann an tìgh a thighearna, ag ràdh, C'ar son a tha bhuir gnùis *co* mhuladach an diugh?

8 Agus thubhairt iad ris, Chunnaic sinn aisling, agus cha 'n 'eil neach againn a dh'eadar-mhìnich eas i. Agus thubhairt Ioseph riu, Nach ann o Dhia *tha* gach eadar-mhìneachadh? innsibh dhomhs' iad, guidheam oirbh.

9 Agus dh'innis an t-àrd bhuidealair 'aisling do Ioseph, agus thubhairt e ris, A'm' aisling-sa, feuch, *bha* fionain fa m' chomhair.

10 Agus air an fhìonain *bha* trì meanglain⁵; agus *bha* i mar gu'm biodh i a' briseadh a mach, agus thàinig i fuidh a làn bhlàth, agus thug a bagaidean dearcan abuich uatha.

11 Agus *bha* cupan Pharaoh a'm' làimh; agus ghabh mi na fion-dhearcan, agus dh'fhaig mi iad an cupan Pharaoh, agus thug mi 'n cupan do làimh Pharaoh.

12 Agus thubhairt Ioseph ris, 'Se so a h-eadar-mhìneachadh: Na trì meanglain, is trì làithean iad.

13 Eadhon an ceann trì làithean togaidh Pharaoh suas do cheann, agus bheir e ris gu t'àite fèin thu; agus bheir thu cupan Pharaoh 'na làimh, mar a b' àbhuist duit roimhe, 'nuair a bha thu a'd' bhuidealair aige.

14 Ach cuimhnich thusa ormsa 'nuair a dh'éireas gu maith dhuit, agus dean, guidheam ort, caoimhneas domh; agus dean iomradh orm ri Pharaoh, agus thoir a mach mi as an Tìgh so:

15 Oir, gu deimhin, ghoidheadh air falbh mi á tìr nan Eabhruidheach, agus mar an ceudna, an so cha d'rinn mi nì sam bith gu 'n cuirte san t-slochd mi.

16 'Nuair a chunnaic an t-àrd fhuineadair gu'n d'eadar-mhìnich e gu maith, thubhairt e ri Ioseph, *Bha* mise mar an

¹ shalùian, a chòta.

² a mhagadh eirnn.

³ ann an daingneach.

⁴ seal.

⁵ geuga.

ceudna a'm' aisling, agus, feuch, *bha* tri bascaidean geala air mo cheann :

17 Agus anns a' bhascaid a b'airde *bha* do gach seòrsa bidh air son Pharaoh do dheasachadh an fhuineadair; agus dh'ith an eunlaith iad a mach as a' bhascaid air mo cheann.

18 Agus fhreagair Ioseph, agus thubhairt e, *Is* e so a h-eadar-mhìneachadh¹: Na tri bascaidean, *is* tri làithean iad.

19 An ceann thri làithean togaidh Pharaoh suas do cheann dhìot, agus crochaidh e thu air crann, agus ithidh an eunlaith t'fheoil dhìot.

20 Agus air an treas là, comh-ainm lathabreithe Pharaoh, rinn e cuirm d'a sheirbhisich uile: agus thog e suas ceann an àrd bhuidealair, agus ceann an àrd fhuineadair am measg a sheirbhiseach.

21 Agus thug e an t-àrd bhuidealair a chum a bhuidealaireachd a ris; agus thug e 'n cupan do làimh Pharaoh:

22 Ach chroch e 'n t-àrd fhuineadair, mar a dh'eadar-mhìnich Ioseph dhoibh.

23 Gidheadh, cha do chuimhnich an t-àrd bhuidealair air Ioseph, ach dhì-chuimhnich se e.

CAIB. XLI.

4 Dà aisling Pharaoh. 25 Dh'eadar-mhìnich Ioseph iad. 33 Thug e comhairle do Pharaoh. 38 Rinn-eadh e 'na wachdaran air tìr na h-Eiphit. 56 Bha gorta air agaidh na talmhainn uile.

AGUS an ceann dà bhliadhna iomlan chunnaic Pharaoh aisling; agus, feuch, sheas e làimh ris an amhainn:

2 Agus, feuch, thàinig a nìos as an amhainn seachd bà, sgiamhach r'am faicinn, agus reamhar am feoil; agus bha iad ag ionaltradh ann am min-fheur².

3 Agus, feuch, thàinig seachd bà eile nìos 'nan déigh as an amhainn, granda r'am faicinn, agus caol 'nam feoil: agus sheas iad làimh ris na bà *eile*, air bruaich na h-aimhne.

4 Agus dh'ith na bà a *bha* granda r'am faicinn agus caol 'nam feoil suas na seachd bà sgiamhacha agus reamhra. Mar sin dhùisg Pharaoh.

5 Agus choidil, agus chunnaic e aisling an dara uair: agus, feuch, dh'éirich suas seachd diasan arbhair air aon choimleir, reachdmhor agus maith.

6 Agus, feuch, dh'fhàs suas 'nan déigh seachd diasa caola, agus air an seargadh leis à ghaoith an ear.

7 Agus shluig na seachd diasa caola suas na seachd diasa reachdmhor agus làn: agus dhùisg Pharaoh, agus, feuch, b' aisling a *bh' ann*.

8 Agus sa' mhaduinn bha a spiorad air a bhuaireadh³; agus chuir e *fios* uath, agus ghairme uile dhruidhean na h-Eiphit, agus a daoine glic uile: agus dh'innis Pharaoh

'aisling dhoibh; ach cha *robh* neach ann a dh'eadar-mhìnicheadh iad do Pharaoh.

9 An sin labhair an t-àrd bhuidealair ri Pharaoh, ag ràdh, An diugh tha mis' a' cuimhneachadh mo lochdan⁴.

10 Bha fearg air Pharaoh r'a sheirbhisich, agus chuir e mise an làimh ann an tìgh ceannair an fhreiceadair, *araon* mise, agus an t-àrd fhuineadair.

11 Agus chunnaic sinn aisling san aon oidhche, mis' agus esan: chunnaic *gach* fear *againn* aisling a réir eadar-mhìneachaidh 'aislinge.

12 Agus *bha* 'n sin maille ruinn òganach Eabhruidheach, seirbhiseach do cheannard an fhreiceadain; agus dh'innis sinn da, agus dh'eadar-mhìnich e dhuinn ar n-aislingean: do *gach* fear againn a réir 'aislinge dh'eadar-mhìnich e.

13 Agus mar a dh'eadar-mhìnich e dhuinn, mar sin bha e: mise chuir e ris ann am àite agus esan chroch e.

14 Agus chuir Pharaoh *teachdair* uath, agus ghairm e Ioseph, agus thug iad le cabhaig a mach as an t-slochd e: agus bhearr se *e fèin*, agus mhùthe 'eudach, agus thàinig e steach a dh'ionnsuidh Pharaoh.

15 Agus thubhairt Pharaoh ri Ioseph, Chunnaic mi aisling, agus cha 'n'eil neach ann a dh'eadar-mhìnicheas i: agus chuala mi air a ràdh mu d'fhìchìoll-sa, 'nuair a chluinneas tu aisling, gur aithne dhuit a h-eadar-mhìneachadh.

16 Agus fhreagair Ioseph Pharaoh, ag ràdh, Cha 'n'eil e annamsa: bheir Dia freagradh sìthe do Pharaoh.

17 Agus thubhairt Pharaoh ri Ioseph, A'm' aisling, feuch, sheas mi air bruaich na h-aimhne:

18 Agus, feuch, thàinig a nìos as an amhainn seachd bà, reamhar am feoil, agus sgiamhach ann an cruth; agus bha iad ag ionaltradh ann am min-fheur;

19 Agus, feuch, thàinig seachd bà eile nìos 'nan déigh, bochd agus ro ghranda, agus caol am feoil: cha 'n fhaca mi 'u samhail *riamh* ann an uile thìr na h-Eiphit air olcas.

20 Agus dh'ith na bà caola agus granda suas na ceud seachd bà reamhra.

21 Agus 'nuair a dh'ith iad suas iad, cha'n aithnichte *orra* gu'n d'ith siad iad; ach *bha* iad granda r'am faicinn, mar an toiseach. An sin dhùisg mi.

22 Agus chunnaic mi a'm' aisling; agus, feuch, thàinig a nìos seachd diasan air aon choimleir, làn agus maith:

23 Agus, feuch, dh'fhàs suas 'uan déigh seachd diasan, air an crìonadh, caol, agus seargta leis a' ghaoith an ear;

24 Agus shluig na diasa caola suas na seachd diasa maith: agus dh'innis mi so do na druìdhibh; ach cha *robh* neach

¹ brìgh.
42

² liav, lòn, miadan.

³ air a chràdh.

⁴ mo choir.

ann a b'urraimn a' chùis fhoillseachadh dhomh.

25 Agus thubhairt Ioseph ri Pharaoh, Aisling Pharaoh, is aon i: an ni sin a ta Dia gus a dheanamh, dh'fhoillsich e do Pharaoh.

26 Na seachd bà maithe, is seachd bliadhna iad; agus na seachd diasa maithe, is seachd bliadhna iad: is aon an aisling.

27 Agus na seachd bà caola agus granda a thàinig a nios 'nan déigh, is seachd bliadhna iad; agus na seachd diasa fàs¹, seargta leis a' ghaoith an ear, bithidh iad 'nan seachd bliadhna gorta.

28 So an ni a thubhairt mi ri Pharaoh: An ni a ta Dia gus a dheanamh, nochd e do Pharaoh.

29 Feuch, tha seachd bliadhna mòr-phailteis a' teachd air feadh thìre na h-Eiphit uile:

30 Agus éiridh seachd bliadhna gorta suas 'nan déigh, agus dì-chuimhnichear am pailteas uile an tìr na h-Eiphit; agus claidhidh a' ghorta an tìr.

31 Agus cha'n aithnichear am pailteas anns an tìr, air son na gorta a leanas: oir bithidh i ro throm.

32 Agus a thaobh gu'n do dhùblaich-eadh an aisling do Pharaoh dà uair, tha sin a chionn gu bheil an ni air a shuidh-eachadh le Dia; agus bheir Dia ann an aithghearradh gu crìch e.

33 Anis uime sin, amhairceadh Pharaoh a mach air son duine a tha tuigseach agus glic, agus cuireadh e os ceann tìre na h-Eiphit e.

34 Deanadh Pharaoh so, agus orduich-eadh e luchd-riaghlaidh os ceann na tìre, agus togadh iad an cùigeadh cuid do thoradh tìre na h-Eiphit sna seachd bliadhnaibh pailteis.

35 Agus cruinnicheadh iad uile bhiadh nam bliadhna maithe sin ri teachd, agus taisgeadh iad suas arbhar fuidh làimh Pharaoh, agus gleidheadh iad biadh sua bailtibh.

36 Agus bithidh am biadh sin 'na thaisgeach do'n tìr, fa chomhair nan seachd bliadhna gorta a bhitheas ann an tìr na h-Eiphit; chum as nach téid as do'n tìr leis a' ghorta.

37 Agus bha a' chomhairle maith² ann an sùilbh Pharaoh, agus ann an sùilbh a sheirbhiseach uile.

38 Agus thubhairt Pharaoh r'a sheirbhiseich, Am bheil e 'n comas duinn a leithid so do dhuine fhaotainn, anns am bheil spiorad Dhé?

39 Agus thubhairt Pharaoh ri Ioseph, A thaobh gu'n d'fhoillsich Dia so uile dhuit, cha 'n'eil neach ann cho tuigseach agus cho glic riut féin.

40 Bithidh tu os ceann mo thighe-sa, agus a réir t'fhocail bithidh mo shluagh uile air an riaghladh: a mhàin san righ-chaitir bithidh mise ni's mò na thu.

41 Agus thubhairt Pharaoh ri Ioseph, Faic, chuir mi thu os ceann uile thìre na h-Eiphit.

42 Agus thug Pharaoh 'fhàinne bhàrr a làimhe, agus chuir e air làimh Ioseph e; agus sgeadaich se e ann an trusan do lion-eudach³ grimm, agus chuire slabhruidh òir m'a mhuineal.

43 Agus thug e air marcachd san dara carbad a bh'aige féin: agus ghlaodh iad roimhe, Lùbaibh an glùn⁴; agus rinn se e 'na uachdaran air tìr na h-Eiphit uile.

44 Agus thubhairt Pharaoh ri Ioseph, Is mise Pharaoh, agus as t'eugmhais-sa cha tog duine suas a làmh no a chos ann an tìr na h-Eiphit uile.

45 Agus thug Pharaoh Saphnat-paaneah mar ainm air Ioseph; agus thug e dha Asenat nighean Photipherah sagairt Oin mar mhnai: agus chaidh Ioseph a mach air feadh uile thìre na h-Eiphit.

46 Agus bha Ioseph deich bliadhna fichead a dh'aois an uair a sheas e 'm fianuis Pharaoh righ na h-Eiphit: agus chaidh Ioseph a mach o làthair Pharaoh, agus chaidh e troimh⁵ thìr na h-Eiphit uile.

47 Agus thug an talamh a mach anns na seachd bliadhnaibh pailteis 'na ghlacaidibh.

48 Agus chruinnich e r'a chéile uile bhiadh nan seachd bliadhna, a bha an tìr na h-Eiphit; agus thaisg e suas biadh sna bailtibh: biadh fearainn gach baile, a bha mu'n cuairt air, thaisg e suas ann.

49 Agus chuir Ioseph r'a chéile siol mar ghaineamh na fairge, ro mhòran, gus an do sguir e d'a àireamh: oir bha e gun àireamh.

50 Agus do Ioseph rugadh dithis mhac mun d'thàinig bliadhnacha na gorta, a rug Asenat dha, nighean Photipherah, sagairt Oin.

51 Agus thug Ioseph Manaseh mar ainm air a' cheud-ghin; oir thug Dia orm, ars' esan, mo shaothair uile dhìchuimhneachadh, agus tigh m'athar uile.

52 Agus air an dara mac thug e Ephraim mar ainm; oir thug Dia orm, ars' esan, a bhi siolmhor ann an tìr m'amhghair.

53 Agus chrìochnuicheadh seachd bliadhna a' phailteis a bha ann an tìr na h-Eiphit.

54 Agus thòisich seachd bliadhna na gorta ri teachd, mar a thubhairt Ioseph: agus bha a' ghorta anns na dùthchannaibh

¹ fulamh, caocha.

² bha an nì math.

³ anart.

⁴ Athair chaoimh.

⁵ roimh, irid. Eir.

uile : ach ann an uile thùr na h-Eiphit bha aran.

55 Agus an uair a bha tìr na h-Eiphit uile ann an uireasbhuidh, an sin ghlaodh an sluagh ri Pharaoh air son arain : agus thubhairt Pharaoh ris na h-Eiphitich uile, Ruigibh Ioseph ; *an nì sin* a their e ruibh, deanaibh.

56 Agus bha a' ghorta air aghaidh na talmhainn uile : agus dh'fhosgail Ioseph na tighean-taisg¹ uile, agus reic e ris na h-Eiphitich : agus bhuadhaich a' ghorta² ann an tìr na h-Eiphit.

57 Agus thàinig gach dùthaich do'n Eiphit a dh'ionnsuidh Ioseph a cheannach *bìdh* ; oir bhuadhaich a' ghorta anns gach dùthaich.

CAIB. XLII.

1 *Chuir Iacob a dheicheadear mhac do'n Eiphit a cheannach sìl. 17 Thilg Ioseph am prìosan iad mar luchd-bratha ; ach air a' chumha gu'm fagadh iad Simeon, agus gu'm pilleadh iad a ris le'm bràthair a b'òige, leigeadh as iad.*

ANIS an uair a chunnaic Iacob gu'n robh sìol³ san Eiphit, thubhairt e r'a mhic, C'ar son a ta sibh ag amharc air a chéile?

2 Agus thubhairt e, Feuch, chuala mi gu bheil sìol san Eiphit ; rachaibh sìos an sin, agus ceannaichibh dhuinn as a sin, chum as gu'm bi sinn beò, agus nach faigh sinn bàs.

3 Agus chaidh deicheadear bhràithrean Ioseph sìos a cheannach sìl san Eiphit.

4 Ach cha do chuir Iacob Benjamin bràthair Ioseph maille r'a bhràithribh : oir thubhairt e, Air eagal gu'n éirich olc⁴ dha.

5 Agus thàinig mic Israeil a cheannach *sìl* am measg na muinntir a thàinig : oir bha a' ghorta ann an tìr Chanaain.

6 Agus bha Ioseph 'na uachdaran air an tìr : *B'* esan a bha a' reiceadh ri sluagh na tìre uile. Agus thàinig bràithrean Ioseph, agus chrom siad iad féin sìos da, *le'n* aghaidh gu làr.

7 Agus chunnaic Ioseph a bhràithrean, agus dh'aithnich e iad, ach rinn se e féin 'na choigreach dhoibh, agus labhair e gu coimheach riu ; agus thubhairt e riu, Cia as a thàinig sibhse ? Agus thubhairt iadsan ris, A tìr Chanaain a cheannach bìdh.

8 Agus dh'aithnich Ioseph a bhràithrean, ach cha d'aithnich iadsan esan.

9 Agus chuimhuich Ioseph air na h-aislingibh a chunnaic e mu'n timchioll, agus thubhairt e riu, *Is* luchd-bratha⁵ sibh ; a dh'fhaicinn lomnochdaidh na tìre thàinig sibh.

10 Agus thubhairt iad ris, Cha *sinn*, mo thighearna, ach is ann a thàinig dosheirbhisich a cheannach bìdh :

11 *Is* mic ann duine sinne uile, *is* daoine fìrinneach sinn ; cha luchd-bratha do sheirbhisich.

12 Agus thubhairt esan riu, Nì h-eadh, ach is ann a dh'fhaicinn lomnochdaidh na tìre thàinig sibh.

13 Agus thubhairt iad, *Is* dà bhràthair dheug do sheirbhisich, mic aon duine ann an tìr Chanaain ; agus, feuch, *tha'm fear* a's òig' an diugh maille r'ar n-athair, agus *tha* h-aon nach maireann⁶.

14 Agus thubhairt Ioseph riu, So an nì a thubhairt mi ribh, ag ràdh, *Is* luchd-bratha sibh.

15 Mar so dearbhar sibh ; mar is beò Pharaoh, cha téid sibh a mach á so, mur tig bhuir bràthair a's òige an so.

16 Cuiribh uaibh fear agaibh, agus thugadh e leis bhuir bràthair, agus gleidhear sibhse am prìosan⁷, chum as gu'n dearbhar bhuir briathran, am *bheil no nach 'eil* fìrinn annaibh : no mar is beò Pharaoh, gu cinnteach *is* luchd-bratha sibh.

17 Agus chuir e 'm prìosan iad uile rè thri làithean.

18 Agus thubhairt Ioseph riu air an treas là, Deanaibh so, agus bithibh beò : *oir* tha eagal Dé ormsa.

19 Ma's daoine fìrinneach sibh, fàgar aon d'ur bràithribh ceangailte an tigh bhuir prìosain : agus imichibh-sa, thugaibh leibh sìol air son gorta bhuir teaghlachan.

20 Ach thugaibh bhuir bràthair a's òige a m' ionnsuidh ; mar sin dearbhar bhuir briathran⁸, agus cha 'n fhaigh sibh bàs. Agus rinn iad mar sin.

21 Agus thubhairt iad r'a chéile, *Tha* sinn gu deimlin ciontach a thaobh ar bràthar, do bhrìgh gu'm faca sinn cràdh 'anama, 'nuair a ghuidh e oirnn, agus nach d'éisd sinn ris : uime sin thàinig an aire' so oirnn.

22 Agus fhreagair Reuben iad, ag ràdh, Nach do labhair mise ribh, ag ràdh, Na peacaichibh an aghaidh an leimibh ? agus cha d'éisd sibh : Uime sin, feuch, mar au ceudna tha 'fhuil air a h-iarraidh *oirnn*.

23 Agus cha robh fhios aca-san gu'n robh Ioseph 'gan tuigsinn ; oir *bha* eadar-theangair eatorra.

24 Agus thionndaidh se e féin uatha, agus ghuil e ; agus phill e ris d'an ionnsuidh, agus labhair e riu, agus thug e Simeon uatha, agus cheangail se e fa chomh-air an sùl.

25 An sin dh'àithn Ioseph an saic a lionadh le sìol, agus airgid gach duine a chur air ais 'na shac, agus biadh a thoirt

¹ tighean-sdòir, taisgeachan. ² dh'fhàs a' ghorta gear. ³ gràn, arbhar. ⁴ dosgaich, sgiorradh, tubaist. ⁵ luchd-rannachaidh.

⁶ nach 'eil ann. ⁷ ceanglar sibhse. Eabh ⁸ fìrinnichear bhuir briathran. ⁹ cruaidh-chàs.

doibh air son na slighe: agus is ann mar so a rinn e riu.

26 Agus thog iad an sìol air an asalaibh, agus dh'imich iad á sin.

27 Agus an uair a dh'fhosgail fear dhiubh a shac, a thoirt bidh d'a asal san tigh-òsda, chunnaic e¹ airgid; oir, feuch, bha e am beul a shaic.

28 Agus thubhairt e r'a bhràithribh, Thugadh airais m'airgid-sa; agus, feuch, tha e cadhon a'm' shac. Agus dh'fhàilnich an cridhe, agus bha eagal orra, ag ràdh gach fear r'a chéile, Ciod e so a rinn Dia oirnn?

29 Agus thàinig iad a chum Iacoib an athar, do thìr Chanaain, agus dh'inns iad dha gach ni a thachair dhoibh, ag ràdh,

30 Labhair an duine a ta 'na uachdaran air an tìr ruinn gu coimheach, agus ghabh e sinn mar luchd-bratha air an dùthaich.

31 Agus thubhairt sinn ris, *Is daoine fìrinneach sinne*; cha luchd-bratha idir sinn:

32 *Is dà bhràthair dheug sinn*, mic ar n-athar; *tha aon mhac nach maireann*, agus tha 'm mac a's òige 'n diugh maille r'ar n-athair an tìr Chanaain.

33 Agus thubhairt an duine, uachdaran na tìre ruinn, Mar so aithnichidh mi gur daoine fìrinneach sibh; fàgaibh aon d'ur bràithribh maille riumsa, agus gabhaibh biadh air son gorta bhur teaghlachan, agus bithibh ag imeachd:

34 Agus thugaibh bhur bràthair a's òige a m'ionnsuidh; an sin bithidh fios agam nach luchd-bratha sibh, *ach gur daoine fìrinneach sibh: mar sin* bheir mise bhur bràthair dhuibh, agus ni sibh ceannachd san tìr.

35 Agus an uair a thaomaich iad an saic, feuch, bha ceanglachan airgid gach duine 'na shac féin, agus an uair a chunnaic iad féin agus an athair na ceanglachain airgid, bha eagal orra.

36 Agus thubhairt Iacob an athair riu, Thug sibh uamsa mo chlann: Ioseph cha mhaireann, agus Simeon cha mhaireann, agus Benjamin bheir sibh air falbh: n'aghaidh-sa tha na nithe sin uile.

37 Agus labhair Reuben r'a athair, ag ràdh, Cuir gu bàs mo dhithis mhac, mur toir mi a t'ionnsuidh e: thoir thairis do m' làimhs² e, agus bheir mise a t'ionnsuidh a ris e.

38 Agus thubhairt e, Cha téid mo mhac sìos maille ribh; oir tha a bhràthair marbh, agus dh'fhàgadh esan 'na anar: ma thachras olc dha san t-slighe air an téid sibh, an sin bheir sibh sìos m'fhalt liath le bròn do'n uaigh.

¹ *Le comhairle Iudah leig Iacob le Benjamin dol do'n Eiphit. 13 Thugadh bràithrean Ioseph a dh'ionnsuidh a thighe. 26 Ghabh e gu h-aidheil riu, agus dh'ith agus dh'òl iad maille ris.*

A GUS bha a' ghorta ro mhòr san tìr. 2 Agus an uair a dh'ith iad suas an sìol a thug iad as an Eiphit, thubhairt an athair riu, Rachaibh a ris, ceannaichibh dhuinn beagan bidh.

3 Agus labhair Iudah ris, ag ràdh, Thug an duine dearbh-chinntè dhuinn, ag ràdh, Cha'n fhaic sibh mo ghnùis-sa, mur bi bhur bràthair maille ribh.

4 Ma chuireas tu ar bràthair maille ruinn, théid sinn sìos, agus ceannaichidh sinn biadh dhuist;

5 Ach mur cuir thu leinn e, cha téid sinn sìos: oir thubhairt an duine ruinn, Cha'n fhaic sibh mo ghnùis, mur bi bhur bràthair maille ribh.

6 Agus thubhairt Israel, C'ar son a bhuin sibh cho olc rium, agus gu'n d'inns sibh do'n duine gu'n robh bràthair tuilleadh agaibh?

7 Agus thubhairt iad, Dh'fhiosraich an duine dhinn gu teann m'ar timchioll féin, agus mu thimchioll ar càirdean, ag ràdh, Am bheil bhur n-athair fathast beò? am bheil bràthair eile agaibh? Agus dh'innis sinne dha a réir brìgh nam briathar sin: Am b'urrainn sinne fios a bhi againn gu cinnteach gu'n abradh e, Thugaibh bhur bràthair a nuas?

8 Agus thubhairt Iudah ri h-Israel 'athair, Cuir an t-òganach maille riumsa, agus éiridh sinn, agus imichidh sinn, a chum as gu'm bi sinn beò agus nach faigh sinn bàs, araon sinne, agus thu féin, agus mar an ceudna ar clann bheag.

9 Bithidh mise a'm' urras air a shon; o m' làimh-sa iarraidh tu e: mur toir mise a t'ionnsuidh, agus mur cuir mi a'd' làthair e, an sin biodh a' choire gu bràth orm¹.

10 Oir mur bitheamaid air deanamh moille, gu cinnteach bha sinn a nis air pilltinn air ar n-ais an dara uair so.

11 Agus thubhairt Israel an athair riu, Ma dh'fheumas a' chùis a bhi mar sin a nis, deanaibh so; gabhaibh do'n toradh² a's fearr san tìr 'nur soithichibh³, agus thugaibh sìos tiodhlac do'n duine; beagan ioc-shlaint, agus beagan meala, spiosraidh, agus mirr, cnòthan⁴, agus almoine:

12 Agus thugaibh leibh airgid dùbailte⁵ 'nur làimh, agus an t-airgid a thugadh air ais am beul bhur sac, thugaibh air ais e 'nur làimh; theagamh gur mearachd a bh'ann.

13 Gabhaibh mar an ceudna bhur bràthair; agus éiribh, rachaibh a ris a dh'ionnsuidh an duine.

¹ bitheam-sa fuidh 'n choir'-iomchar gu bràth.
² do'n mheas. ³ soirichibh.

⁴ cnuthan.

⁵ dà-fhillte.

14 Agus gu'n tugadh Dia uile-chumhachdach trocair dhuibh an làthair an duine chum as gu'n leig e air falbh leibh bhur bràthair eile, agus Benjamin: ach ma chaill mise *mo chlann*, chaill mi iad.

15 Agus ghabh na daoine an tiodhlac sin, agus thug iad leo airgid dubailte 'nan làimh, agus Benjamin; agus dh'éirich iad, agus chaidh iad sìos do'n Eiphit, agus sheas iad an làthair Ioseiph.

16 Agus an uair a chunnaic Ioseiph Benjamin maille riu, thubhairt e ri fear-riaghlaidh a thighe, Thoir na daoine sin dachaidh, agus marbh, agus deasaich; oir maille riumsa ithidh na daoine sin air mheadhon-là.

17 Agus rinn an duine mar a dh'iarr Ioseiph; agus thug e na daoine do thigh Ioseiph.

18 Agus bha eagal air na daoine, chionn gu'n d'thugadh iad do thigh Ioseiph, agus thubhairt iad, 'S ann air son an airgid, a chuireadh air ais 'nar sacaibh a' cheud uair, a thugadh a stigh sinn; chum gu faigh e cion-fàth 'nar n-aghaidh, agus gu'n tuit e oirnn¹, agus gu'n gabh e sinn mar thràilleann², agus ar n-asail.

19 Agus thàinig iad am fagus do fhear-riaghlaidh tighe Ioseiph, agus labhair iad ris aig dorus an tighe.

20 Agus thubhairt iad, O mo thighearna, thàinig sinn da rirradh a nuas an toiseach a cheannach bìdh.

21 Agus an uair a thàinig sinn do'n tigh òsda, agus a dh'fhosgail sinn ar saic, fench, *bha* airgid gach fir am beul a shaic, ar n-airgid 'na làn chothrom: agus thug sinn air ais leinn e 'nar làimh.

22 Agus airgid eile thug sinn a nuas leinn 'nar làimh a cheannach bìdh: cha 'n eil fhios againn cò chuir ar n-airgid 'nar sacaibh.

23 Agus thubhairt e, Sith *gu robh* dhuibh, na biodh eagal oirbh: thug bhur Dia féin, agus Dia bhur n-athar ionmhas duibh 'nur sacaibh: fhuair mise bhur n-airgid. Agus thug e Simeon a mach d'an ionnsuidh.

24 Agus thug an duine na daoine steach do thigh Ioseiph, agus thug e uisge *dhoibh*, agus nigh iad an cosan³, agus thug e biadh d'an asalaibh.

25 Agus dh'ulluich iad an tiodhlac an coinneamh do Ioseiph teachd aig meadhon-là; oir chual⁴ iad gu'n robh iad gu aran itheadh an sin.

26 Agus an uair a thàinig Ioseiph dhachaidh⁴ thug iad d'a ionnsuidh an tiodhlac, a bha 'nan làimh, do'n tigh: agus chrom siad iad féin dha gu làr.

27 Agus dh'fheoraich e 'n robh iad gu maith, agus thubhairt e, Am bheil bhur

n-athair, an seann duine mu'n do labhair sibh, gu maith? Am *bheil* e fathast beò?

28 Agus thubhairt iadsan, *Tha* do sheirbhiseach ar n-athair-ne gu maith; *tha* e fathast beò: agus chrom siad iad féin sìos, agus rinn iad ùmhlachd.

29 Agus thog e suas a shùilean, agus chunnaic e Benjamin a bhràthair, mac a mhàthar, agus thubhairt e, An e so bhur bràthair a's òige, mu'n do labhair sibh rium? Agus thubhairt e, Gu'n robh Dia gràsmhor dhuit, a mhic.

30 Agus rinn Ioseiph cabhag, oir bha a chridhe a' tiomachadh r'a bhràthair; agus dh'iarr e àit anns an guileadh e; agus chaidh e steach d'a sheomar, agus ghul e 'n sin.

31 Agus nigh e 'eudan, agus chaidh e mach, agus chum e air féin, agus thubhairt e, Cuiribh sìos aran.

32 Agus chuir iad sìos dhasan leis féin, agus dhoibhsan leo féin, agus do na h-Eiphitich, a dh'ith maille ris, leo féin; a chionn nach feudadh na h-Eiphitich aran itheadh maille ris na h-Eabhruidhich; oir *is* gràineileachd sin do na h-Eiphitich.

33 Agus shuidh iad sìos 'na làthair, an ceud-ghin a réir a chòir-bhreithe⁵, agus am fear a b'òige a réir⁶ òige: agus ghabh na daoine iongantach *gach* fear r'a chéile.

34 Agus ghabh esan, agus chuir e cuibhriannon o' làthair féin d'an ionnsuidh: ach rinn e cuibhrionn Bheniamin cuig uairean ni bu mhò na cuid a h-aoin aca-san. Agus dh'òl iad, agus bha iad subhach⁶ maille ris.

CAIB. XLIV.

1 Innleachd Ioseiph a chumail Bheniamin. 12 Fhuair adh cupan airgid Ioseiph am beul saic Bheniamin. 18 Athchuinge iriosal Iudah.

A GUS dh'àithn e do fhear-riaghlaidh⁷ a thighe, ag ràdh, Lion saic nau daoine le siol, a' mheud's is urrainn iad a ghiùlan, agus cuir airgid *gach* duine am beul a shaic.

2 Agus cuir mo chupans', an cupan airgid, am beul saic an fhir a's òige, agus airgid a shìl: agus rinn e a réir an fhocail a labhair Ioseiph.

3 Co luath 's a bha mhaduinn soilleir, chuireadh na daoine air falbh, iad féin agus an asail.

4 Agus an uair a chaidh iad a mach as a' bhaile, agus gun iad *fathast* fad o làimh, thubhairt Ioseiph ri fear-riaghlaidh a thighe, Eirich, lean na daoine; agus an uair a bheireas tu orra, abair riu, C'ar son a dh'òl sibh olc an éiric maith⁸?

¹ gu'n leum, gu'm buail e oirnn.

² mar dhaoine daor.

³ casan.

⁴ dhathigh.

⁵ a cheirt-breithe. Eir.

⁶ croidhail.

⁷ stiùbhard.

⁸ olc air son maith.

5 Nach e so *an cupan* as am bheil mo thighearn ag òl? agus leis am bheil e da rìreadh a' deanamh fiosachd? is olc a fhuaradh sibh so a dheanamh.

6 Agus rug e orra, agus labhair e riu na briathra ceudna.

7 Agus thubhairt iad ris, C'ar son a labhras mo thighearna na briathra so? nar leigeadh Dia gu'n deanadh do sheirbhisich a réir an nì so.

8 Feuch, an t-airgiod a fhuair sinn am beul ar sac, thug sinn a rìs a t'ionnsuidh á tìr Chanaain; cionnus, uime sin, a ghoid-eamaid airgiod no òr á tigh do thighearna?

9 Cia b'e *air bith* do d'sheirbhisich aig am faighear e, cuirear gu bas esan, agus bithidh sinne mar an ceudna 'nar tràillean aig mo thighearn.

10 Agus thubhairt e, A nis ma ta *bith-eadh* e réir bhur briathar: bithidh esan aig am faighear e 'na sheirbhiseach agamsa; agus bithidh sibhse neo-choireach.

11 An sin thug iad a nuas, gu grad, *gach* duine a shac féin gu làr, agus dh'fhosgail *gach* duine a shac.

12 Agus rannsaich esan, *agus* thòisich¹ e aig an fhear bu shine, agus sguir e aig an fhear a b'òige: agus fhuaradh an cupan ann an sac Bheniamin.

13 An sin reub iad an eudach, agus chuir *gach* duine a shac air 'asail, agus phill iad do'n bhaile.

14 Agus thàinig Iudah, agus a bhràithrean do thigh Ioseiph (oir *bha* e fathast an sin) agus thuith iad sìos 'na fhianuis air an làr.

15 Agus thubhairt Ioseiph riu, Ciod e an gnìomh so a rinn sibh? nach robh fhios agaibh gur aithne do m' leithid-se do dhuine da rìreadh fiosachd a dheanamh?

16 Agus thubhairt Iudah, Ciod a their sinn ri m' thighearna? cionnus a labhras sinn? no cionnus a ghlanas sinn sinn féin? fhuair Dia a mach aingidheachd do sheirbhiseach; feuch, *tha* sinne 'nar seirbhisich do m' thighearn araon sinne, agus esan mar an ceudna aig² an d'fhuaradh an cupan.

17 Agus thubhairt e, Nar leigeadh Dia gu'n deanainn-se so: ach an duine aig an d'fhuaradh an cupan, bithidh esan 'na sheirbhiseach agam-sa; agus d'ur taobh-sa, rachaibh suas an sìth a dh'ionnsuidh bhur n-athar.

18 An sin thàinig Iudah am fagus da, agus thubhairt e, Och mo thighearna, leig le d' sheirbhiseach, guidheam ort, focal a labhairt ann an clusaibh mo thighearn, agus na lasadh t'fhearg an aghaidh do sheirbhisich: oir is amhuil thusa agus Pharaoh.

19 Dh'fheòraich mo thighearna d'a sheir-

bhisich, ag ràdh, Am bheil athair agaibh, no bràthair?

20 Agus thubhairt sinn ri m' thighearna, Tha athair againn, seann duine, agus leanabh a shean aois, maothran: agus tha 'bhràthair marbh, agus dh'fhàgadh esan 'na aonar do *chloinn* a mhàthar, agus tha gràdh aig 'athair air.

21 Agus thubhairt thu ri d' sheirbhisich, Thugaibh a nuas e do m' ionnsuidhs³, a chum as gu'n socruich mi mo shùilean air.

22 Agus thubhairt sinne ri m' thighearna, Cha'n fheud an leanabh 'athair fhàgail: oir nam fàgadh e 'athair, gheibheadh 'athair bàs.

23 Agus thubhairt thusa ri d' sheirbhisich, Mur tig bhur bràthair a's òige nuas maille ribh, cha'n fhaic sibh m'aghaidh-sa nì's mò.

24 Agus an uair a chaidh sinne suas a dh'ionnsuidh do sheirbhisich, m'athar, dh'innis sinn da focal mo thighearna.

25 Agus thubhairt ar n-athair, Rachaibh a ris, ceannaichibh dhuinn beagan bidh.

26 Agus thubhairt sinne, Cha'n fheud sinn dol sìos: ma bhios ar bràthair a's òige maille ruinn, an sin théid sinn sìos; oir cha'u fheud sinn aghaidh an duine fhaicinn, mur bi ar bhràthair a's òige maille ruinn.

27 Agus thubhairt do sheirbhiseach m' athair ruinn, Tha fhios agaibh gu'n do rug mo bhean dithis *mhac* dhomh.

28 Agus chaidh aon *diubh* a mach uam, agus thubhairt mi, Gu cinnteach reubadh 'na bhoighdibh e; agus cha'n fhaic mi o sin e.

29 Agus ma bheir sibh *am mac* so uam mar an ceudna, agus gu'n tig tubaist air, bheir sibh sìos m'fhalt liath le bròn do'n uaigh.

30 A nis uime sin, an uair a thig mise a dh'ionnsuidh do sheirbhisich m'athar, gun an leanabh maille ruinn; (do bhrìgh gu bheil 'anam-sa ceangailte ann an anam an leinibh;)

31 Tarlaidh, 'nuair a chi e nach 'eil an leanabh *maille ruinn*, gu'm faigh e bàs: agus bheir do sheirbhiseach sìos falt liath do sheirbhisich ar n-athar le bròn do'n uaigh.

32 Oir chaidh do sheirbhiseach an urras air son an leinibh do m'athair, ag ràdh, Mur toir mi a t' ionnsuidh e, an sin bithidh mi fo choire aig m'athair gu bràth.

33 A nis uime sin, guidheam ort, leig le d' sheirbhiseach fantuinn an àit an leinibh, a'm thràil dol m' thighearn; agus leig leis an leanabh dol suas maille r'a bhràithribh.

34 Oir cionnus a théid mise suas a dh'ionnsuidh m'athar, agus gun an leanabh maille rium? air eagal gu faic mi 'n t-olc a thig air m'athair.

¹ thòsaich.

² 'na làimh. Eabh.

CAIB. XLV.

1 Rinn Ioseph e féin aithnichte d'a bhráithribh; thug e comhfhurtachd doibh, agus chuir e fíos leo air athair. 21 Thug e dhoibh carbadan agus ion air son na slighe. 27 'Nuair a phill iad, agus a dh'innis iad do d' Jacob, dh'ath-bheothaich a spiorad.

AGUS cha b'urrainn Ioseph cumail air féin 'nan láthair-san uile a sheas lámh ris; agus ghlaodh e, Cuiribh gach duine mach uam: agus cha do sheas duine sam bith maille ris, an uair a rinn Ioseph e féin aithnichte d'a bhráithribh.

2 Agus ghuil e gu h-àrd: agus chuala na h-Eiphitich, agus tigla Pharaoh e.

3 Agus thubhairt Ioseph r'a bhráithribh, *Is mise Ioseph*; am bheil m'athair fathast beò? agus cha b'urrainn a bhráithrean a fhreagairt; oir bha eagal orra roimh a lathair-san.

4 Agus thubhairt Ioseph r'a bhráithribh, Thigibh am fagus domh, guidheam oirbh; agus thainig iad am fagus: Agus thubhairt esan, *Is mise Ioseph* bhur bráthair, a reic sibhse do'n Eiphit.

5 Agus a nis na biodh doilgheas oirbh, no corruich agaibh ribh féin, a chionn gu'n do reic sibh mise an so¹; oir chuir Dia roimhibh mi, gu sibhse a ghleidheadh beò:

6 Oir rè an dà bhliadhna-sa bha a' ghorta san tìr, agus tha fathast cuig bliadhna ri teachd, anns nach bi aon chuid treabhadh no foghar.

7 Agus chuir Dia mise roimhibh, a ghleidheadh dhuibhse iarmaid² air thalamh, agus a thearnadh bhur beatha le fuasgladh mòr.

8 A nis uime sin, cha sibhse a chuir mise an so, ach Dia; agus rinn e mi a'm' athair do Pharaoh, agus a'm' thighearn os ceann a thighe uile, agus a'm' uachdaran anu tìr na h-Eiphit uile.

9 Deanaibh cabhag, agus rachaibh suas a chum m'athar, agus abraibh ris, Mar so thubhairt do mhac Ioseph, Rinn Dia mise a'm' uachdaran air an Eiphit uile; thig a nuas a m' ionnsuidh, na dean moille:

10 Agus gabhaidh tu còmhnuidh am fearann Ghosein, agus bithidh tu 'm fagus dhomhsa, thu féin, agus do chlann agus clann do chloinne agus do threudan, agus do bhuar³, agus gach ni a ta agad.

11 Agus beathaichidh mise thu 'n sin, (oir fathast bithidh cuig bliadhna gorta ann,) air eagal gu'n tig thu féin, agus do theaghlach, agus gach ni a ta agad, gu bochdainn.

12 Agus, feuch, tha bhur sùilean a' faicinn, agus sùilean mo bhráthar Bheniamin, gur e mo bheul féin a tha labhairt ribh.

13 Agus innsidh sibh do m'athair mo glhòir-sa uile san Eiplit, agus gach ni a chunnaic sibh; agus ni sibh cabhag, agus bheir sibh a nuas m'athair an so.

14 Agus thuit e air muineal⁴ a bhráthar Bheniamin, agus ghuil e; agus ghuil Beniamin air a muineal-san.

15 Phòg e, mar an ceudna, a bhráithrean uile, agus ghuil e os an ceann: agus 'na dhéigh sin rinn a bhráithrean cainnt ris.

16 Agus chualas iomradh so ann an tigh Pharaoh, ag ràdh, Tha bráithrean Ioseph air teachd: agus thaitinn e gu maith ri Pharaoh, agus r'a sheirbhisich.

17 Agus thubhairt Pharaoh ri Ioseph, Abair ri d' bhráithribh, Deanaibh so; sacaichibh bhur n-ainmhidhean, agus imichibh, rachaibh do thìr Chanaain.

18 Agus thugaibh leibh bhur n-athair, agus bhur teaghlach, agus thigibh a m' ionnsuidh-se, agus bheir mise dhuibh maith tìre na h-Eiphit; ithidh sibh reamhrachd na tìre.

19 A nis thugadh àithne dhuit; deanaibh-se mar so: thugaibh leibh a tìr na h-Eiphit carbadan air son bhur cloinne bige, agus bhur ban, agus thugaibh bhur n-athair leibh, agus thigibh.

20 Agus na biodh suim agaibh d'ur n-airneis-thighe; oir is leibhse maith tìre na h-Eiphit uile.

21 Agus rinn clann Israeil mar sin: agus thug Ioseph dhoibh carbadan a réir ordugh Pharaoh; agus thug e dhoibh lòn⁵ air son na slighe.

22 Thug e dhoibh uile, do gach aon diubh fa leth, culaidhean eudaich⁶; ach do Bheniamin thug e tri cheud bonn airgid, agus cuig culaidhean eudaich.

23 Agus chuir e dh'ionnsuidh 'athar mar so; deich asail a' giùlan do nithibh maith e na h-Eiphit, agus deich asail bhoirionn a' giùlan sil, agus arain, agus lòn d'an athair air son na slighe.

24 Mar sin chuir e a bhráithrean air falbh, agus dh'imich iad: agus thubhairt e riu, Feuchaibh nach cuir sibh a mach air a chéile air an t-slighe.

25 Agus chaidh iad suas as an Eiplit, agus thainig iad gu tìr Chanaain a dh'ionnsuidh Iacob an athar.

26 Agus dh'innis iad da, ag ràdh, Tha Ioseph fathast beò, agus tha e 'na uachdaran air tìr na h-Eiphit uile. Agus dh'fhannaich⁷ cridhe Iacob, oir cha do chreid e iad.

27 Agus dh'innis iad da uile bhriathran Ioseph, a labhair e riu: Agus an uair a chunnaic e na carbadan a chuir Ioseph g'a giùlan, dh'ath-bheothaich spiorad Iacob an athar.

¹ do'n dùthaich so.

² slíochd.

³ chreidh.

⁴ leum e mu mhuineal.

⁵ biadh.

⁶ atharrachadh culaidh. Eabh.

⁷ lagadh, lagaich.

GENESIS, XLV. XLVI.

28 Agus thubhairt Israel, *Is leòr e; tha* Ioseph mo mhac fathast beò: thèid mi agus chi mi e mum faigh mi bàs.

CAIB. XLVI.

1 *Thug Dia misneach agus sòlas do Jacob aig Beer-seba. 5 O sin chaidh e fèin agus a theaghlach do'n Eiphit. 29 Choisnich Ioseph e. 31 Shèd e d'a bhràithribh ciod a theireadh iad ri Pharaoh.*

AGUS dh'imich Israel maille ris gach ni a bh'aige, agus thàinig e gu Beer-seba, agus thug e suas iobairtean do Dhia 'athar Isaac.

2 Agus labhair Dia ri h-Israel ann an taisbeanaihb¹ na h-oidhche, agus thubhairt e, A Iacoib, a Iacoib: Agus thubhairt esan, *Tha mi 'n so.*

3 Agus thubhairt e, *Is mise Dia*, Dia t'athar: na biodh eagal ort dol sìos do'n Eiphit; oir ni mise a'd' chinneach mòr thu an sin.

4 Thèid mise maille riut sìos do'n Eiphit; agus bheir mi mar an ceudna gu cinnteach a nìos thu *rìs*: agus cuiridh Ioseph a làmh air do shùilbhb.

5 Agus dh'èirich Jacob suas o Bheer-seba: agus thug mic Israeil leo Jacob an athair, agus an clann bheag, agus am mnà, anns na carbadaibh a chuir Pharaoh g'a ghiulan.

6 Agus ghabh iad an spréidh, agus am maoin, a fhuair iad ann an tìr Chanaain, agus thàinig iad do'n Eiphit, Jacob agus a shliochd uile maille ris;

7 A mhic, agus mic a mhac maille ris, a nigheanan, agus nigheanan a mhac, agus a shliochd uile thug e maille ris do'n Eiphit.

8 Agus *is* iad so ainmeanna chloinn Israeil, a thàinig do'n Eiphit, Jacob agus a mhic: Reuben, ceud-ghin Iacob.

9 Agus mic Reubein; Hanoch, agus Phallu, agus Hesron, agus Carmi.

10 Agus mic Shimeoin; Iemuel, agus Iamin, agus Ohad, agus Iachin, agus Sohar, agus Saul mac Ban-chanaanaich.

11 Agus mic Lebhi; Gerson, Cohat, agus Merari.

12 Agus mic Iudah; Er, agus Onan, agus Selah, agus Phares, agus Serah: ach fhuair Er agus Onan bàs ann an tìr Chanaain. Agus b'iad mic Phareis, Hesron, agus Hamul.

13 Agus mic Isachair; Tola, agus Phubhah, agus Iob, agus Simron.

14 Agus mic Shébuluin; Séred, agus Elon, agus Iahleel.

15 *Is* iad sin mic Leah, a rug i do Jacob am Padan-aram, maille r'a nighinn Dinah: *b'iad* uile anaman a mhac agus a nigheana tri-deug² ar fhichead.

16 Agus mic Ghaid; Siphion, agus

Hagai, Suni, agus Esbon, Heri, agus Arodi, agus Areli.

17 Agus mic Aseir; Imnah, agus Isuah, agus Isui, agus Beriah, agus Serah am piuthar. Agus mic Bheriah; Heber, agus Malchiel.

18 *Is* iad sin mic Shilpah, a thug Laban d'a nighinn Leah; agus rug i iad sin do Jacob, *eadhon* sè anamanna deug.

19 Mic Racheil mnà Iacoib; Ioseph, agus Benjamin.

20 Agus rugadh do Ioseph ann an tìr na h-Eiphit, Manaseh agus Ephraim, a rug Asenat nighean Photipherah sagairt Oin dha.

21 Agus *b'iad* mic Bheniamin; Belah, agus Becher, agus Asbel, Gera, agus Naaman, Ehi, agus Ros, Mupim, agus Hupim, agus Ard.

22 *Is* iad sin mic Racheil, a rugadh do Iacob: na h-anaman uile, ceithir-deug.

23 Agus mic Dhain; Husim.

24 Agus mic Naphtali; Iahseel, agus Guni, agus Ieser, agus Sillem.

25 *Is* iad sin mic Bhilhah, a thug Laban d'a nighinn Rachel, a rug i do Iacob: na h-anaman uile, seachdnar.

26 Na h-anaman uile a thàinig le Iacob do'n Eiphit, a thàinig a mach as a leasruidh, a thuilleadh air mnaibh mhac Iacoib; *b'iad* na h-anamanna *so* uile tri fichead³ s a sè.

27 Agus mic Ioseph a rugadh dha san Eiphit, *bu dhà anam iad*: uile anamanna thighe Iacoib, a thàinig do'n Eiphit, *bu* tri fichead⁴ s a deich iad.

28 Agus chuir e Iudah roimhe gu Ioseph, chum as gu'n tugadh e fios dha *teachd* na làthair ann an Gosen⁵; agus thàinig iad gu fearann Ghosein.

29 Agus bheartaich Ioseph a charbad, agus chaidh e suas an coimeamh Israeil 'athar gu Gosen; agus nochd se e fèin da, agus thuit e air a mhuineal, agus ghuil e air a mhuineal rè tamuill.

30 Agus thubhairt Israel ri Ioseph, Faigheams' a nis bàs, o chunnaic mi do ghnùis, do bhrìgh gu *bheil* thu fathast beò.

31 Agus thubhairt Ioseph r'a bhràithribh, agus ri teaghlach 'athar, Thèid mise suas, agus cuiridh mi 'n cèill do Pharaoh, agus their mi ris, Tha mo bhràithrean, agus teaghlach m'athar, a *bha* ann an tìr Chanaain, air teachd a m' ionnsuidh:

32 Agus *is* buachaillean⁶ na daoine, oir bu luchd-spréidhe⁷ iad; agus thug iad leo an treudan, agus am feudail⁸, agus gach ni a *bh'* aca.

33 Agus tarlaidh 'nuair a ghairmeas Pharaoh oirbh, agus a their e, Ciod *is* ceird duibh?

¹ seallaihb, aistlingibh.
² e air aghaidh e gu Gosen.

³ chum gu'n seòladh

⁴ aodhairean.

⁵ àirich.

⁶ am buar, an tàin.

34 Gu'n abair sibhse, Bu luchd-spréidhe do sheirbhisich o'r n-òige eadhon gus a nis, siun féin *agus* mar an ceudna ar n-aithriche; chum as gu'n gabh sibh còmhuidh ann am fearann Ghosein, oir is gràineileachd do na h-Eiphitich gach buachaille spréidhe.

CAIB. XLVII.

1 *Thug Ioseph cuignear d'a bhràithribh agus 'athair an làthair Pharaoh.* 11 *Shuidhich e iad ann an tìr Rameisei, agus bheathaich 'e iad.* 28 *Aois la-coib: 29 mhiannaich Ioseph dha gu'n adhlacaidh se e maille r'a aithrichibh.*

AN sin thàinig Ioseph agus dh'innis e do Pharaoh, agus thubhairt e, Thàinig m'athair agus mo bhràithrean, agus an treudan, agus am feudail, agus gach nì a bh' aca, a mach a tìr Chanaain; agus, feuch, *tha* iad ann am fearann Ghosein.

2 Agus ghabh e cuignear d'a bhràithribh, agus chuir e 'n làthair Pharaoh iad.

3 Agus thubhairt Pharaoh r'a bhràithribh, Ciod is ceird dhuibh? Agus thubhairt iadsan ri Pharaoh, *Is* buachaillean do sheirbhisich, siun féin agus ar n-aithriche.

4 Thubhairt iad mar an ceudna ri Pharaoh, 'S ann gu bhì air chuairt anns an tìr a thàinig sinn, oir cha 'n eil feur aig do sheirbhisich d'an spréidh, do bhrìgh gu bheil a' ghorta mòr ann an tìr Chanaain: a nis uime sin, guidheamaid ort, leig le d' sheirbhisich còmhuidh a ghabhail am fearann Ghosein.

5 Agus labhair Pharaoh ri Ioseph, ag ràdh, thàinig t'athair agus do bhràithrean a t' ionnsuidh:

6 Tha tìr na h-Eiphit romhad; anns a' chuid a's fearr do'n fhearann thoir air t'athair agus do bhràithribh còmhuidh a ghabhail; gabhadh iad còmhuidh am fearann Ghosein; agus ma's aithne dhuit gu bheil 'nam measg daoine comasach¹, nì thu iad 'nan àrd bhuachaillibh air mo spréidh-sa.

7 Agus thug Ioseph Iacob 'athair a stigh, agus chuir e'n làthair Pharaoh e; agus bheannaich Iacob Pharaoh.

8 Agus thubhairt Pharaoh ri Iacob, Ciod is aois dhuit?

9 Agus thubhairt Iacob ri Pharaoh, 'S iad làithean bhliadhnacha mo chuairte² ceud agus deich bliadhna fichead: bu tearc agus olc làithean bhliadhnacha mo bheatha, agus cha d'ràinig iad làithean bhliadhnacha beatha m' aithriche ann an làithibh an cuairte-san.

10 Agus bheannaich Iacob Pharaoh, agus chaidh e mach a làthair Pharaoh.

11 Agus shuidhich Ioseph 'athair, agus a bhràithrean, agus thug e dhoibh sealbh ann an tìr na h-Eiphit, anns a' chuid a's fearr do'n fhearann, ann am fearann Ra-

meseis, mar a dh'àithn Pharaoh.

12 Agus bheathaich Ioseph 'athair, agus a bhràithrean, agus uile theaghlach 'athair le h-aran, a réir an cloinne.

13 Agus cha robh aran anns an tìr uile; oir bha a' ghorta ro mhòr, air chor as gu'n robh tìr na h-Eiphit, agus tìr Chanaain uile fann³ leis a' ghorta.

14 Agus chruinnich Ioseph an t-airgid uile a fhuaradh ann an tìr na h-Eiphit, agus ann an tìr Chanaain, air son a' bhìdh a cheannaich iad: agus thug Ioseph an t-airgid do thigh Pharaoh.

15 Agus an uair a theirg airgid ann an tìr na h-Eiphit, agus ann an tìr Chanaain, thàinig na h-Eiphitich uile gu Ioseph, ag ràdh, Thoir dhuinn aran c'ar son a gheibheamaid bàs a'd' làthair? oir theirg ar n-airgid.

16 Agus thubhairt Ioseph, Thugaibh seachad bhur spréidh, agus bheir mise dhuibh air son bhur spréidhe, ma theirg airgid ar dhuibh.

17 Agus thug iad an spréidh gu Ioseph: agus thug Ioseph dhoibh aran air son each, agus air son nan caorach, agus air son a' chruidh, agus air son nan asal; agus bheathaich e iad le h-aran, air son an spréidhe uile, air a' bhliadhna sin.

18 'Nuair a chrìochnaich eadh a' bhliadhnach sin, thàinig iad d'a ionnsuidh air an dara bliadhna, agus thubhairt iad ris, Cha cheil sinne air mo thighearna gu'n do chaitheadh ar n-airgid; tha mar an ceudna ar treudan spréidh aig mo thighearna; cha d'fhàgadh ann an sealladh mo thighearna ach ar cuirp, agus ar fearann.

19 C'ar son a gheibh sinn bàs fà chomhair do shùl, araon sinne agus ar fearann? Ceannaich sinne agus ar fearann air son arain, agus bìthidh sinne agus ar fearann 'nar seirbhisich do Pharaoh: agus thoir dhuinn sìol, chum as gu'm bì sinn beò, agus nach faigh sinn bàs, agus nach bì am fearann 'na fhàsach.

20 Agus cheannaich Ioseph fearann na h-Eiphit uile do Pharaoh; oir rcic na h-Eiphitich gach duine 'fhearann féin, a chionn gu'n do bhuadhaich a' ghorta orra: mar sin bu le Pharaoh an talamh.

21 Agus a thaobh an t-sluaigh, chuir e air imrich iad⁴, do bhailtibh o aon cheann chrìocha na h-Eiphit, eadhon gu ruig an ceann eile dhith?

22 A mhàin fearann nan sagart cha do cheannaich e; oir dh'orduicheadh cuibh-rionn do na sagartaibh le Pharaoh, agus dh'ith iad an cuibh-rionn a thug Pharaoh dhoibh: uime sin cha do reic iad am fearann.

23 Agus thubhairt Ioseph ris ant-sluaigh,

¹ tapaidh. ² m'eilthire. ³ lag, anflann.

⁴ chuir e imrich iad, dh'atharraich e iad.

Feuch, cheannaich mi sibh an diugh, agus bhuir fearann do Pharaoh ; feuch, *so* siol duibh, agus cuiribh am fearann.

24 Agus tarlaidh¹, do na chinneas gu'n toir sibh an cuigeadh *cuid* do Pharaoh, agus bithidh agaibh fèin ceithir earrannan³, air son sìl an fhearainn, agus air son bhuir bidh, agus air son muinntir bhuir teaghlacha, agus air son bidh d'ur cloinn bhig.

25 Agus thubhairt iadsan, Ghléidh thu beò sinn: faigheamaid deadh-ghean ann an sealladh mo thighearna, agus bithidh sinn 'nar seirbhìsich do Pharaoh.

26 Agus rinn Ioseph sin 'na lagh gus an là 'n diugh air feadh fhearainn na h-Eiphit, gu'm bitheadh aig Pharaoh an cuigeadh *cuid*; saor a mhàin o fhearann nan sagart, nach bu le Pharaoh.

27 Agus ghabh Israel còmhnuidh ann an tìr na h-Eiphit, ann an talamh Ghosein; agus bha seallbh aca ann, agus shìolaich iad, agus dh'fhàs iad ro-lionmhor.

28 Agus bha Jacob beò ann an tìr na h-Eiphit seachd bliadhna deug; agus b'iad bliadhna beatha Iacob uile ceud agus dà fhichead agus seachd bliadhna.

29 Agus dhlùthaich an t-àm anns am b'éigin do Israel bàs fhaotainn: agus ghairm e air a mhac Ioseph, agus thubhairt e ris, Ma fhuair mi nis deadh-ghean a'd' shealladh, cuir, guidheam ort, do làimh fuidh m'léis³, agus buin gu caoimhneil agus gu fìrinneach rium; na h-adhlaic mi, guidheam ort, san Eiphit.

30 Ach luidhidh mi maille ri m' aithrichibh, agus giùlainidh tu mi mach as an Eiphit, agus adhlaicidh tu mi 'nan àit adhlaic-san. Agus thubhairt esan, Nì mi mar a thubhairt thu.

31 Agus thubhairt e, Mionnaich dhomh: agus m'ionnaich e dha. Agus chrom Israel e fèin air ceann-adhairt na leapach.

CAIB. XLVIII.

1 *Chaidh Ioseph a dh'fhaicinn 'athar, agus e tinn.*
15 *Bheannaich Jacob e fèin agus a dhithis mhac, Ephraim agus Manashe.* 21 *Ròimh-innis e gu'm pilleadh iad a ris gu Canaan.*

AGUS an dèigh nan nithe sin, dh'innis *neach* do Ioseph, Feuch, *tha* t'athair tinn: agus thug e leis a dhà mhac, Manashe agus Ephraim.

2 Agus dh'innis *neach* do Jacob, agus thubhairt e, Feuch, tha do mhac Ioseph a' teachd a t'ionnsuidh: agus neartaich Israel e fèin, agus shuidh e air an leabaidh.

3 Agus thubhairt Iacob ri Ioseph, Dh'fhoillsich Dia uile-chumhachdach e fèin dhomhsa aig Luds ann an tìr Chanaain, agus bheannaich e mi.

4 Agus thubhairt e rium, Feuch, nì mise

siolmhor agus lionmhor thu, agus nì mi thu a'd' choimhthional chinneach¹, agus bheir mi am fearann so do d'shliochd a'd' dhéigh mar sheilbh shiorruidh.

5 Agus a nis do dhithis mhac, Ephraim agus Manashe, a rugadh dhuit ann an tìr na h-Eiphit, mun d'thàinig mis' a t' ionnsuidh do'n Eiphit, *is* leamsa iad: mar Reuben agus Shimeon, bithidh iad leamsa.

6 Agus bithidh do shliochd, a ghineas tu 'nan déigh, leat fèin; a réir ainme am bràithre goirear iad 'nan seilbh fèin.

7 Agus air mo shonsa dheth, 'nuair a thàinig mi o Phadan, fhuair Rachel bàs agam ann an tìr Chanaain, air an t-slighe, 'nuair nach *robh* fathast ach astar goirid ri teachd gu h-Ephrat: agus dh'adhlaic mi 'n sin i air an t-slighe gu h-Ephrat; 's e sin Betlehem.

8 Agus chunnaic Israel mic Ioseph, agus thubhairt e, Cò iad sin?

9 Agus thubhairt Ioseph r'a athair, 'S *iad* mo mhic-sa iad, a thug Dia dhomh an so: agus thubhairt e, Thoir a m' ionnsuidh iad, guidheam ort, agus beannaichidh mi iad.

10 Agus bha sùilean Israeil trom le h-aois, air chor nach bu léir dha *gu maith*: agus thug e 'm fagus da iad, agus phòg e iad, agus ghabh e 'na ghlacaibh iad.

11 Agus thubhairt Israel ri Ioseph, Cha do shaoil mi gu'm faicinn do ghnùis, agus, feuch, nochd Dia dhomh mar an ceudna do shliochd.

12 Agus thug Ioseph a mach iad o eadar a ghlùinean, agus chrom se e fèin le 'aghaidh gu làr.

13 Agus ghabh Ioseph iad le chéile, Ephraim 'na làimh dheis o làimh chli Israeil, agus Manashe 'na làimh chli o làimh dheis Israeil; agus thug e 'm fagus da *iad*.

14 Agus shìn Israel a mach a làmh dheas, agus chuir e *i* air ceann Ephraim, am *mac* a b'òige, agus a làmh chli air ceann Manashe: stùir e a làmh gu seòlta; oir b'e Manashe an ceud-ghin.

15 Agus bheannaich e Ioseph, agus thubhairt e, Gu'n deanadh Dia, an làth-air an do ghluais m' aithriche Abraham agus Isaac, an Dia a bheathaich mi rè mo bheatha uile gus an là'n diugh,

16 An t-aingeal a shaor mi o gach ole, na leinibh a bheannachadh, agus ainmichear m'ainmsa orra, agus ainm m' aithriche Abraham agus Isaac: agus mar iasg *na mara* fàsadh iad lionmhor am meadhon na talmhainn.

17 Agus an uair a chunnaic Ioseph gu'n do chuir 'athair a làmh dheas air ceann Ephraim, cha do thaitinn e ris: agus chum e suas làmh 'athar, a chum a

¹ tachairidh.
51

² codacha.

³ shliasaid.

⁴ sluagh.

h-atharrachadh o' cheann Ephraim gu ceann Mhanaseh.

18 Agus thubhairt Ioseph r'a athair, Ni h-ann mar sin, athair: oir is e so an ceud-ghin; cuir do làmh dheas air a cheann.

19 Agus dhiult 'athair, agus thubhairt e, Tha fhios agam, a mhic, tha fhios agam; bithidh esan cuideachd 'na shluagh, agus fàsaidh e mar an ceudna mòr: ach gu deimhin bithidh a bhràthair a's òige nì's mò na e, agus bithidh a shliochd 'nam mòran¹ chinneach.

20 Agus bheannaich e iad air an là sin, ag ràdh, Annadsa beannaichidh Israel ag ràdh, Gu deanadh Dia thu mar Ephraim, agus mar Mhanaseh: agus chuir e Ephraim roimh Mhanaseh.

21 Agus thubhairt Israel ri Ioseph, Feuch, a taims' a' faotainn a' bhàis; ach bithidh Dia maille ribhse, agus bheir e ris sibh gu dùthaich bhuir n-aithriche.

22 Agus thug mise dhuit aon chuid-roinne thar do bhràithrean a' bhuin mi mach á làimh an Amoraich le m' chlàidheamh agus le m' bhogha.

CAIB. XLIX.

1 *Ghairm Iacob a mhic cuideachd, agus bheannaich e iad. 29 Dh'àithn e dhoibh gu'n adhlacaidh iad e ann an tìr Chanaan. 33 A bhàs.*

AGUS ghairm Iacob air a mhic, agus thubhairt e, Cruinnichibh sibh féin an ceann a chéile, chum as gu'n innis mi dhuibh ciod a tharlas dhuibh sna làithibh deireannach.

2 Cruinnichibh sibh féin an ceann a chéile, agus cluinnibh, a mhaca Iacoib, agus éisdibh ri Israel bhuir n-athair.

3 A Reubein, is tu mo cheud-ghin, mo theise, agus toiseach mo neirt, oirdheirceas² àrd-inbhe³, agus oirdheirceas cumhachd.

4 Neo-sheasmhach⁴ mar uisge, cha toir thu barrachd, do bhrìgh gu'n deachaidh tu suas do leabaidh t'athar; an sin thruaill thu i; chaidh e suas do m' uirigh.

5 Is bràithre Simeon, agus Lebhi: tha innil aingidheachd 'nan àitibh-còmh-nuidh⁵.

6 'Nan dìomhaireachd⁶ na tigeadh m'an-amsa: r'an coimhthional na bitheadh m' noir-sa air a h-aonadh: oir 'nan corruich mharbh iad duine, agus 'nam féin-thoil leag iad sìos balla.

7 Mallaichte gu'n robh an corruich, oir bha i garg; agus am fearg, oir bha i an-ìochdmhor: roinnidh mi iad ann an Iacob, agus sgaoilidh⁷ mi iad ann an Israel.

8 A Iudah, molaidh do bhràithrean thu-sa; bithidh do làmh am muineal do naimh-

de: cromaidh clann t'athar iad féin sìos a'd' làthair.

9 Is cuilean leòmhain Iudah; o'n chobh-artaich⁸, a mhic, chaidh thu suas; chrom se e féin sìos, chrùb e mar leòmhain, agus mar sheann leòmhain; cò dhùisgeas suas e.

10 Cha dealaich an t-slat-rioghail ri Iudah, no lagh-thabhartair o eadar a chosa, agus an tig Sìloh, agus dhasan géillidh na slòigh⁹.

11 A' ceangal a shearraich ris an fhion-ain, agus loth¹⁰ asail ris an fhionainthaghta; nìgh e 'eudach am fion, agus a thrusgan am fuil nam fion-dhearc.

12 Bithidh a shùilean nì's deirge na fion, agus 'fhiacta nì's gile na bainne¹⁰.

13 Gabhaidh Sebulun còmhnuidh aig caladh a' chuain, agus bithidh e air son calaidh long; agus bithidh¹¹ 'eirthir¹¹ gu ruig Sidon.

14 Is asal làidir Isachar, a' crùbadh sìos eadar dhà eallaich¹².

15 Agus chunnaic e gu'm bu mhaith an nì fois, agus gu'n robh am fearann taitneach; agus chrom e a ghuala gu iomchar, agus rinneadh e 'na sheirbhiseach do chis.

16 Bheir Dan breth air a shluagh, mar aon do threubhaibh Israel.

17 Bithidh Dan 'na nathair air an ròd, 'na nathair-nimhe air an t-slighe, a theumas sàiltean an eich, air chor as gu'n tuit a mharcaran an coinneamh a chùil.

18 Ri d' shlàinte dh'fheith mise, O Thighearna.

19 Gad, bheir buidheann buaidh air: ach bheir esan buaidh na dheireadh.

20 A mach á h-Aser bithidh 'aran-san reamhar, agus bheir e uaith sògh rìoghail.

21 Is eilid air a leigeadh fuasgailte Naphtali; bheir e focail thaitneach uaith.

22 Is geug thorthach Ioseph, geug thorthach làimh ri tobar, aig am bheil a meanglain a' sgaoileadh thar a' bhalla.

23 Chràidh na fir-bhogha gu geur e, agus thilg iad air, agus dh'fhuathaich iad e.

24 Ach dh'fhan a bhogha 'na neart, agus rinneadh gairdean¹³ a làmh làidir le làmh-aibh Dé chumhachdaich Iacoib; (uaith sin tha 'm buachaille, clach Israel:.)

25 Eadon le Dia t'athar, a nì còmh-nadh leat, agus leis an Uile-chumhachdach, a bheannaicheas thu le beannachdaibh nèimh o 'n àirde, beannachdaibh na doimhne shìos, beannachdaibh nan cìoch, agus na bronn.

26 Thug beannachda t'athar barrachd air beannachdaibh mo shinnseara, gu ruig foir-iomall¹⁴ nan sliabh sìorruidh; bithidh

¹ iomadaidh.

² barrachd.

³ mòrachd.

⁴ Atmhòr. Eabh.

⁵ is innil foirneirt an comhairlean aingidh r'a chéile.

⁶ diubhras.

⁷ sgapaidh.

⁸ o'n chreic.

⁹ d'a iomsuidh-san bithidh cruinneachadh nam pobul.

¹⁰ Bithidh a shùilean dearg le fion agus 'fhiacta geal le bainne.

¹¹ iomall.

¹² nallaich.

¹³ rìgheach.

¹⁴ miam, dèigh. Eabh.

iad air ceann Ioseph, agus air mullach a chinn-san a sgaradh o' bhràithribh.

27 Nì Benjamin fiadhach mar mhadadh-allauidh: sa' mhaduinn ithidh e a' chobh-artach¹, agus san fheasgar roinnidh e a' chreach.

28 Is iad sin uile dà threubh dheug Israeil: agus is e so an nì a labhair an athair riu, agus bheannaich e iad; gach aon ac' a réir a bheannachaidh, bheannaich e iad.

29 Agus dh'àithn e dhoibh, agus thubhairt e riu, Cruinnichear mise chum mo dhaoine: adhlacibh mi maille ri m'athairichibh san uaimh a ta ann an achadh Ephroin an Hiteach;

30 San uaimh a ta ann an achadh Mhachpelah, a ta fa chomhair Mhamre, ann an tìr Chanaain, a cheannaich Abraham maille ris an achadh o Ephron an t-Hiteach, mar sheilbh àit-adhlac.

31 (An sin dh'adlaic iad Abraham agus Sarah a bhean; an sin dh'adhlac iad Isaac agus Rebecah a bhean; agus an sin dh'adhlac mise Leah.)

32 Cheannaicheadh an t-achadh, agus an uaimh a ta ann, o chloinn Het.

33 Agus an uair a chrìochnaich Iacob àitheantan a thoirt d'a mhic, chruinnich e a chosan suas do'n leabaidh, agus chaochail² e, agus chruinnicheadh e chum a dhaoine.

CAIB. L.

1 Bròn air son bàis Iacob. 7 Adhlac. 24 Roimhinis Ioseph d'a bhràithribh, gu'n d' thugadh Dia a mach iad as an Eiphit gu tìr an aithriche. 26 A bhàs.

AGUS thuit Ioseph air aghaidh 'athar, agus ghuil e air, agus phòg se e.

2 Agus dh'àithn Ioseph d'a sheirbhiseich na léighean³ spìosraidh a chur⁴ air corp 'athar; agus chuir na léighean spìosraidh air Israel.

3 Agus choimhlionadh air a shon dà fhichead là, (oir mar so coimhlionar làithean na muinntir sin air an cuirear spìosraidh); agus rinn na h-Eiphitich bròn air a shon deich is trì fichead là.

4 Agus an uair a chaidh làithean a bhròin thairis, labhair Ioseph ri teaghlach Pharaoh, ag ràdh, A nis ma fhuair mi deadh-ghean 'nur suilibh, labhraibh, guidheam oirbh, ann an cluasaibh Pharaoh, ag ràdh,

5 Ghabh m'athair mionnan diom, ag ràdh, Feuch, a ta mise a' faghail a' bhàis⁵: a m'uaighachladhaich mi dhomh féin ann an tìr Chanaain, an sin adhlacaidh tu mi. A nis uime sin leig dhomh dol suas, guidheam ort, agus m'athair adhlac, agus thig mi ris.

6 Agus thubhairt Pharaoh, Falbh suas, agus adhlac t'athair, a réir mar a ghabh e mionnan diot.

7 Agus chaidh Ioseph suas a dh'adhlac 'athar: agus maille ris chaidh seirbhiseich Pharaoh suas uile, seanairean a thighe, agus uile sheanairean thìre na h-Eiphit,

8 Agus teaghlach Ioseph uile, agus a bhràithrean, agus teaghlach 'athar: a mhàin dh'fhàg iad an clann bheag, agus an caoraich, agus am buar⁶, ann an tìr Ghosein.

9 Agus chaidh suas maille ris, araon carbadan agus marc-shluagh: agus bha a' chuideachd ro mhòr.

10 Agus thàinig iad gu h-urrlar-bualaidh Ataid, a tha' n taobh thall do Jordan; agus rinn iad bròn an sin le caoidh mhoir agus ro-chràitich⁷: agus rinn e bròn air son 'athar seachd làithean.

11 Agus an uair a chunnaic luchd-àit-eachaidh na tìre, na Canaanaich, am bròn ann an urrlar Ataid, thubhairt iad, Is doilgheasach am bròn so do na h-Eiphitich; uime sin thugadh Abel-misraim mar ainm air, a tha 'n taobh thall do Jordan.

12 Agus rinn a mhic dha mar a dh'àithn e dhoibh:

13 Oir ghiùlain a mhic e do thìr Chanaain, agus dh'adhlac iad e ann an uaimh achaidh Mhachpelah, a cheannaich Abraham maille ris an achadh mar sheilbh àit-adhlac, o Ephron an t-Hiteach, fa chomhair Mhamre.

14 Agus phill Ioseph do'n Eiphit, e féin agus a bhràithrean, agus iadsan uile a chaidh suas maille ris a dh'adhlac 'athar, an dèigh dha 'athair adhlac.

15 Agus an uair a chunnaic bràithrean Ioseph gu'n d'fhuair an athair bàs, thubhairt iad, Theagamh gu'n toir Ioseph fuath dhuinn, agus gu'n diol e gu cimt-each oirnn an t-olc sin uile a rinn sinn air.

16 Agus chuir iad teachdairean gu Ioseph, ag ràdh, Dh'àithn t'athair mun d'fhuair e bàs, ag ràdh,

17 Mar so their sibh ri Ioseph, Maith⁸, guidheam ort a nis, eucoir⁹ do bhràithrean, agus am peacadh, do bhrìgh gu'n d' rinn iad olc ort: agus a nis, guidheam ort, maith eucoir sheirbhiseach Dhé t'athar. Agus ghuil Ioseph an uair a labhair iad ris.

18 Agus chaidh a bhràithre mar an cendna, agus thuit iad sìos 'ua làthair, agus thubhairt iad, Feuch, is seirbhiseich dhuit sinn.

19 Agus thubhairt Ioseph riu, Na biodh

¹ am fiadhach. ² dh'eug. ³ lighichean. ⁴ embalm. Sasg. ⁵ tha mise dlùth do'n bhàs.

⁶ crodh. ⁷ ro ghoirt. ⁸ Math, lagh. ⁹ cu-coir.

eagal oirbh: oir *am bheil* mise an àite Dhé?

20 Agus d' ur taobhsa, shònraich¹ sibh olc a'm' aghaidh; *ach* shònraich Dia sin a chum maith, a chum, mar air an là 'n diugh, gu'n teanadh e mòr-shluagh beò.

21 A nis uime sin na biodh eagal oirbh: altrumaidd² mise sibh, agus bhuir clann bheag. Agus thug e comhfhurtachd dhoibh, agus labhair e gu caoimhneil riu.

22 Agus ghabh Ioseph còmhnuidh san Eiphit, e féin agus teaghlach 'athar: agus bha Ioseph beò ceud agus deich bliadhna.

23 Agus chunnaic Ioseph clanu Ephraim, do'n treas *ginealach*: thogadh suas mar

an ceudna clann Mhachir, mhic Mhanaseh, air glùinibh Ioseph.

24 Agus thubhairt Ioseph r'a bhràithribh. *A ta* mise a' faghail a' bhàis, ach amhaireidh Dia gu cinnteach oirbhse³, agus bheir e mach sibh as an fhearann so, do'n fhearann a mhionnaich e do Abraham, do Isaac, agus do Jacob.

25 Agus ghabh Ioseph mionnan do chloinn Israeil, ag ràdh, Amhaireidh Dia gu cinnteach oirbhse, agus giùlainidh sibh mo chnàmhnan-sa suas as a so.

26 Agus fhuair Ioseph bàs, agus e ceud agus deich bliadhna dh'aois: agus chuir iad spioraidh air, agus chuireadh ann an ciste-mhairbh e san Eiphit.

¹ dhealbha, smuainich.

² àraichidh.

³ fosraichidh Dia gu cinnteach sibhse.

DARA LEABHAR MHAOIS

D' AN AINM

ECSODUS.

CAIB. I.

1 *Clann Israeil a' fàs lionmhor.* 8 *Tha ad air an sàruchadh le rìgh ùr air an Eiphit.* 15 *Diadhaidheachd nam ban-glùine.*

ANIS is iad so ainmeanna chloinn Israeil, a thàinig do'n Eiphit: thàinig gach duine agus a theaghlach maille ri Jacob:

2 Reuben, Simeon, Lebhi, agus Iudah,

3 Isachar, Sebulun, agus Benjamin,

4 Dan, agus Naphtali, Gad, agus Aser.

5 Agus na h-anaman uile a thàinig a mach a leasruidh Iacòb, bu deich agus trì fichead anam iad; oir bha Ioseph san Eiphit a *cheana*.

6 Agus fhuair Ioseph bàs, agus a bhràithrean uile, agus an *ginealach*¹ sin uile.

7 Agus bha clann Israeil sìolmhor, agus dh'fhàs iad gu mòr, agus rinneadh lionmhor iad, agus chinn² iad ro chumhachdach; agus fionadh an tìr leo.

8 A nis dh'éirich rìgh ùr air an Eiphit, do nach b'aithne Ioseph.

9 Agus thubhairt e r'a shluagh, Feuch, tha slugh chloinn Israeil nì's lionmhoire agus nì's cumhachdaiche na sinne.

10 Thigibh, buineamaid gu seòlta³: air eagal gu'm fàs iad lionmhor, agus gu'n tachair e, 'nuair a dh'éireas cogadh, gu'n gabh iadsan mar an ceudna le'r naimh-dibh-ne, agus gu'n cog iad⁴, 'narn-aghaidh, agus gu'n téid iad a mach as an tìr.

11 Uime sin chuir iad maighstirean-oibre⁵ orra, chum an sàruchadh le'n

eallachaibh⁶. Agus thog iad bailtean-iomhais⁷ do Pharaoh, Pitom agus Ramesses.

12 Ach mar is mò a shàruich siad iad, 's ann is mò a rinneadh iadsan lionmhor agus a dh'fhàs iad. Agus bha iad fuigh dhoilgheas⁸ air son chloinn Israeil.

13 Agus thug na h-Eiphitich air cloinn Israeil seirbhis a dheanamh le cruadhas⁹.

14 Agus rinn iad am beatha searbh dhoibh le daorsa chruaidh, ann am moirtear, agus ann an clachaibh-creadha, agus anns gach gnè oibre sa' mhachair: *bha* an obair uile, anns an d' thug iad orra obair a dheanamh, le cruadhas.

15 Agus labhair rìgh na h-Eiphit ri mnaibh-glùine nan Eabhruidheach, (*b'e* ainm aoin diubh Siphrah, agus ainm na té eile Puah:)

16 Agus thubhairt e, 'Nuair a nì sibh guìomh muà-glùine do na mnaibh Eabhruidheach, agus a chì sibh iad air na tòlaibh¹⁰; ma's mac a *bhios ann*, an sin marbaidh sibh e, ach ma's nighean a *bhios ann*, bithidh i beò.

17 Ach bha eagal Dé air na mnaibh-glùine, agus cha d'rinn iad mar a dh'àithn rìgh na h-Eiphit dhoibh, ach ghléidh iad a' chlanm mhac beò.

18 Agus ghairm rìgh na h-Eiphit air na mnaibh-glùine, agus thubhairt e riu, C'ar son a rinn sibh an nì so, agus a ghléidh sibh a' chlanm mhac beò?

19 Agus thubhairt na mnathan-glùine ri Pharaoh, A chionn nach 'eil na mnà

¹ an t-àl. ² dh'fhàs. ³ glie. ⁴ gu'n dean iad cogadh. ⁵ cinn oibre. ⁶ uallachaibh, eiribh.

⁷ baille-stòir. ⁸ imcheist. ⁹ an-ìochd, peingilteachd. ¹⁰ suidheachanaibh, caithreachibh.

Eabhruidheach mar na mnà Eiphiteach: oir *tha* iad féin beothail¹, agus air an aisead mu'n tig na mnathan-glúine a steach d'an ionnsuidh.

20 Uime sin, bhuin Dia gu maith ris na mnaibh-glúine: agus rinneadh an sluagh lionmhor, agus dh'fhàs iad ro chumhachdach.

21 Agus a chionn gu'n robh eagal Dé air na mnaibh-glúine, rinn e tighean dhoibh.

22 Agus thug Pharaoh àithne² d'a shluagh uile, ag ràdh, Gach mac a bheirear, tilgidh sibh san amhainn; agus gach nighean gleidhidh sibh beò.

CAIB. II.

1 *Maois air a bhreith, agus air a chur ann an cobhan am measg na cuilce, aig bruaich na h-aimhne. 5 Fhuaradh e, agus dh'altrumadh e le nighinn Pharaoh.*

AGUS chaidh duine do thigh Lebhi, agus ghabh e nighean do Leblu³ na mnàoi.

2 Agus dh'fhàs a' bhean torrach, agus rug i mac: agus an uair a chunnaic i gu'n robh e 'na leanabh tlachdmhor, dh'fholaic i e rè trì mìosa.

3 Agus an uair nach b'urrainn i 'fholach ni b'fhaide, ghabh i dha cobhan cuilce⁴, agus chuir i thairis⁵ e le làthaich agus le pic⁶, agus chuir i an leanabh ann; agus chuir i e sa' chuile aig bruaich na h-aimhne.

4 Agus sheas a phiuthar am fad *uaith*, a dh'fhaicinn ciod a dheanta ris.

5 Agus thàinig nighean Pharaoh a nuas g'a nigheadh féin san amhainn, agus bha a maighdeanan ag imeachd ri taobh na h-aimhne; agus an uair a chunnaic i 'n cobhan am measg na cuilce, chuir i a banoglach g'a thoirt d'a h-ionnsuidh.

6 Agus an uair a dh'fhosgail i e, chunnaic i 'n leanabh: agus, feuch, ghuil an naoidhean. Agus ghabh i truas ris, agus thubhairt i, *Is aon* so do chloinn nan Eabhruidheach.

7 An sin thubhairt a phiuthar ri nighean Pharaoh, An téid mise, agus an gairm mi dhuit banaltrum do na mnaibh Eabhruidheach, a chum as gu'n altrum i 'n leanabh dhuit?

8 Agus thubhairt nighean Pharaoh rithe, Falbh. Agus chaidh a' mhaighdean, agus ghairm i màthair an leinibh.

9 Agus thubhairt nighean Pharaoh rithe, Thoir an leanabh so leat, agus altrum dhomhsa e, agus bheir mi dhuit do thuarasdal. Agus ghabh a' bhean an leanabh, agus dh'altrum i e.

10 Agus dh'fhàs an leanabh, agus thug i e dh'ionnsuidh nighinn Pharaoh, agus bha e 'na mhac dh'i. Agus thug i Maois

mar ainm air: agus thubhairt i, A chionn as an uisge gu'n do tharruing mi mach e.

11 Agus tharladh anns na làithibh sin, an uair a dh'fhàs Maois suas, gu'n deachaidh e mach a dh'ionnsuidh a bhràithrean, agus gu'n d'amhaire e air an eallachaibh: agus chunnaic e Eiphiteach a' bualadh Eabhruidhich, aoin d'a bhràithribh.

12 Agus dh'amhaire e an taobh so agus an taobh ud, agus an uair a chunnaic e nach robh aon duine am, mharbh e an t-Eiphiteach, agus dh'fholaich e sa' ghaiueamh e.

13 Agus an uair a chaidh e mach an dara⁷ là, feuch, *bha* dithis do na h-Eabhruidhich a' strì r'a chéile; agu thubhairt e ris-san a rinn an eucoir, C'ar son a bhuailas tu do choimhearsnach?⁸

14 Agus thubhairt e, Cò rinn thusa a d' uachdaran agus a d' bhreitheamh oirne? am miann leat mise a mharbhadh, mar a mharbh thu 'n t-Eiphiteach? agus ghabh Maois eagal, agus thubhairt e, Gu cinnteach tha an ni so aithnichte.

15 A nis an uair a chuala Pharaoh an ni so, dh'iarr e Maois a mharbhadh, ach theich Maois o aghaidh Pharaoh, agus ghabh e còmhnuidh ann an tìr Mhidiain; agus shuidh e sìos làimh ri tobar.

16 A nis bha aig sagart Mhidiain seachd-nar nighean: agus thàinig iad agus tharruing iad *uisge*, agus lion iad na h-amair a thoirt uisge do threud an athar.

17 Agus thàinig na buachaillean agus dh'fhuadaich iad air falbh iad: ach sheas Maois suas agus chuidich e leo, agus thug e uisge d'an treud.

18 Agus an uair a thàinig iad gu Reuel an athair, thubhairt e, Cionnus a thàinig sibh co luath an diugh?

19 Agus thubhairt iad, Shaor Eiphiteach sinn á làimh nam buachaillean, agus mar an ceudna tharruing e uisge gu leòr dhuinn, agus thug e uisge do'n treud.

20 Agus thubhairt esan r'a nigheanaibh, Agus c'ait *am bheil e*? C'ar son a dh'fhàg sibh an duine? Gairmibh air, a chum's gu'n ith e aran.

21 Agus bha Maois toileach còmhnuidh a ghabhail maille ris an duine; agus thug e Siporah a nighean do Mhaois *na mnàoi*.

22 Agus rug i mac *dha*, agus thug e Gersom mar ainm air: oir thubhairt e, Bha mi m' choigreach ann an tìr aineoil⁸.

23 Agus tharladh an ceann mòrain làithean, gu'n d'fhuair rìgh na h-Eiphit bàs, agus bha clann Israeil ag osnaich air sou an daorsa, agus ghlaodh iad; agus thàinig an glaoth suas gu Dia, air son na daorsa.

24 Agus cluala Dia an osnaich, agus

¹ teòma. ² sparradh. ³ ciste luacharach.

⁴ chòmhdach, shliob, spùirt i. ⁵ bigh.

⁶ darna.

⁷ chompanach.

⁸ ann an dùthaich choimhich.

chuimhnich Dia a choimh-cheangal ri h-Abraham, ri Isaac, agus ri Iacob.

25 Agus dh'amhaire Dia air cloinn Israeil, agus dh'fhiosraich e iad.

CAIB. III.

1 *Bha Maois a' gleidheadh treud Tetro 'athar-céile.*
2 *Dh'fhoillsicheadh aingeal an Tighearna dha ann an lasair theine á meadhon pris.* 7 *Chuireadh e leis an Tighearna a thoirt cloinn Israeil a mach as an Eiphit.* 14 *A theachdaireachd dhoibh.*

ANIS bha Maois a' gleidheadh treud Ietro 'athar-céile, sagairt Mhidiaín: agus thug e'n treud gu taobh cuil an fhasaich, agus thàinig e gu sliabh Dhé, gu Horeb.

2 Agus dh'fhoillsicheadh aingeal an Tighearna dha ann an lasair theine á meadhon pris; agus dh'amhaire e, agus, feuch, bha am preas a' lasadh le teine, ach cha robh am preas air a losgadh.

3 Agus thubhairt Maois, Tionndaidh mi nis a leth-taobh, agus chi mi an sealladh mòr so, c'ar son nach 'eil am preas air a losgadh.

4 Agus an uair a chunnaic an Tighearna gu'n do thionndaidh e a leth-taobh a dh'fhaicinn sin, ghairm Dia air á meadhon a' phris, agus thubhairt e, A Mhaois, a Mhaois. Agus thubhairt esan, *Tha mi 'n so.*

5 Agus thubhairt e, Na tig am fagus an so; cuir dhìot do bhròga bhàrr do chos, oir an t-àite air am bheil thu a' d' sheasamh, is talamh naomh e.

6 Thubhairt e mar an ceudna, *Is mise Dia 'athar, Dia Abraham, Dia Isaac, agus Dia Iacob.* Agus dh'fholaic Maois aghaidh; oir bha eagal air amharc air Dia.

7 Agus thubhairt an Tighearna, Chunnaic mi gu cinnteach àmhghar mo shluaigh a *ta* san Eiphit, agus chuala mi 'n glaoth airson am maighstirean-oibre: oir is aithne dhomh an doilghcas.

8 Agus thàinig mi nuas g'an saoradh á làimh nan Eiphiteach, agus g'an toirt suas a mach as an fhearann sin, gu fearann maith agus farsuing, gu fearann a *ta* sruthadh le bainne agus le mil; gu àite nan Canaanach, agus nan Hiteach, agus nan Amorach, agus nam Peridseach, agus nan Hibheach, agus nam Iebusach.

9 A nis uime sin, feuch, tha glaoth chloinn Israeil air teachd a m'ionnsuidh-sa: agus mar an ceudna chunnaic mi am fòir-eigin¹ leis am bheil na h-Eiphitich 'g am fòireigneadh.

10 Agus a nis thig, agus cuiridh mi thu dh'ionnsuidh Pharaoh, a chum as gu'n toir thu mach mo shluaigh clann Israeil as an Eiphit.

11 Agus thubhairt Maois ri Dia, Cò mise, gu'n rachainn a dh'ionnsuidh Pharaoh, agus gu'n tugainn a mach clann Israeil as an Eiphit?

12 Agus thubhairt e, Bithidh mise gu cinnteach leat; agus bithidh so 'na chomharadh dhuit, gu'n do chuir mise uam thu: 'nuair a bheir thu mach an sluagh as an Eiphit, ni sibh aoradh do Dhia air an t-sliabh so.

13 Agus thubhairt Maois ri Dia, Feuch, an uair a thig mi dh'ionnsuidh cloinn Israeil, agus a their mi riu, Chuir Dia bhur n-aithriche mise do 'ur n-ionnsuidh; agus a their iad rium, Ciod is ainm dha? Ciod a their mi riu?

14 Agus thubhairt Dia ri Maois, **IS MI AN TI A'S MI:** agus thubhairt e, Mar so their thu ri cloinn Israeil, Chuir **IS MI** mise do 'ur n-ionnsuidh.

15 Agus thubhairt Dia thuilleadh air so ri Maois, Mar so their thu ri cloinn Israeil, Chuir an Tighearna Dia bhur n-aithriche, Dia Abraham, Dia Isaac, agus Dia Iacob, mise d'ur n-ionnsuidh: 's e so m'ainm a chaoidh²; agus is e so mo chuimhneachan do gach uile ghinealach.

16 Imich agus cruinnich r'a chéile seanairean Israeil, agus abair riu, Dh'fhoillsich an Tighearna Dia bhur n-aithrichean e féin dhomh-sa, Dia Abraham, Isaac, agus Iacob, ag ràdh, Gu cinnteach dh'amhaire mi oirbh, agus *chunnaic mi* an ni a rinn-eadh oirbh san Eiphit.

17 Agus thubhairt mi, Bheir mi suas sibh á h-àmhghar na h-Eiphit, gu fearann nan Canaanach, agus nan Hiteach, agus nan Amorach, agus nam Peridseach, agus nan Hibheach, agus nan Iebusach, gu fearann a *ta* sruthadh le bainne agus le mil.

18 Agus éisdidh iadsan ri d' ghuth; agus théid thu féin, agus seanairean Israeil, gu righ na h-Eiphit, agus their sibh ris, Choinnich an Tighearna Dia nan Eabh-ruidheach sinne: agus a nis leig dluinn, guidheamaid ort, dol astar thri làithean do'n fhàsach chum as gu'n ìobair sinn³ do'n Tighearn ar Dia.

19 Agus is deimhin leam nach leig righ na h-Eiphit leibh imeachd, cha leig *eadhon*, le làimh làidir⁴.

20 Agus sinidh mis' a mach mo làmh, agus buailidh mi 'n Eiphit le m' iongantasan uile, a ni mi 'na meadhon: agus an déigh sin leigidh e dhuibh imeachd.

21 Agus bheir mise do'n t-sluaigh so deadh-ghean⁵ ann an sealladh nan Eiphit-each: agus tarlaidh, 'nuair a dh'fhalbhas sibh nach falbh sibh falamh;

22 Ach iarraidh gach bean⁶ o 'ban-choimhearsnaich, agus o'n mhnaoi a bhios

¹ fòirneart, ainneart.

² chaoidhich.

³ gu'n toir sinn ìobairt.

⁴ ach le làimh làidir.

⁵ fàbhor.

⁶ iarraidh gach bean an tasachd, no'n coingheall.

air aoidheaclid 'na tigh, seudan¹ airgid, agus seudan òir, agus eudach : agus cuiridh sibh *iad* air bhuir mic, agus air bhuir nigh-eanaibh; agus creachaidh sibh na h-Eiphitich².

CAIB. IV.

1 *Slat Mhaois air a tionndadh 'na nathair.* 6 *A làmh lobhrach.* 21 *Teachdaireachd an Tighearna chum Pharaoh.*

AGUS fhreagair Maois, agus thubhairt e, Ach, feuch, cha chreid iad mi, ni mo dh'éisdeas iad ri m' ghuth: oir their iad, Cha do thaisbein³ an Tighearna e féin dhuit.

2 Agus thubhairt an Tighearna ris, Ciod sin ann do làimh? Agus thubhairt esan, Slat.

3 Agus thubhairt e, Tilg air an làr i; agus thilg e air an làr i, agus rinneadh i 'na nathair: agus theich Maois roimpe.

4 Agus thubhairt an Tighearna ri Maois, Cuir a mach do làmh, agus glac air a h-earr⁴ i. Agus chuir e mach a làmh, agus rug e oirre, agus rinneadh slat dh'i 'na làimh,

5 Chum as gu'n creid iad gu'n d'fhoillsich an Tighearna Dia an aithriche, Dia Abraham, Dia Isaac, agus Dia Iacoib, e féin dhuit.

6 Agus thubhairt an Tighearna a thuilleadh air so ris, Cuir a nis do làmh a'd' bhroilleach; agus chuir e a làmh 'na bhroilleach: agus an uair a thug e mach i, feuch, bha a làmh lobhrach mar sheachda.

7 Agus thubhairt e, Cuir do làmh a ris a'd' bhroilleach; agus chuir e a làmh a ris 'na bhroilleach, agus thug e mach a bhroilleach i, agus, feuch, dh' iompaicheadh⁵ i mar a' chuid eile d'a fheoil.

8 Agus tarlaidh, mur creid iad thu, agus mur éisd iad ri guth a' cheud chomharaidh, gu'n creid iad guth a' chomharaidh dheireannaich.

9 Agus tarlaidh, mur creid iad mar an ceudna an dà chomharadh sin, agus mur éisd iad ri d' ghuth, gu'n gabh thu *cuid* a dh' uisge na h-aimhne, agus gu'n dòirt thu air an *talamh* thioram e: agus fàsaidh an t-uisge a bheir thu as an amhainn 'na fhuil air an *talamh* thioram.

10 Agus thubhairt Maois ris an Tighearna, O mo Tighearna, cha duine deas-chainnteach mi, aon chuid roimhe so⁶, no o'n àm san do labhair thusa ri d' sheirbhiseach: do bhrìgh gu'm bheil mi mall ann an cainnt, agus mall ann an teangaidh.

11 Agus thubhairt an Tighearna ris, Cò a rinn beul an duine? no cò a rinn am balbh, no'm bodhar, no'n ti a chi, no'n dall? Nach mise an Tighearna?

12 A nis uime sin imich, agus bithidh mise le d' bheul, agus teagaisgidh mi dhuit ciod a their thu.

13 Agus thubhairt e, O mo Thighearna, cuir, guidheam ort, le làimh an ti a chuireas tu⁷.

14 Agus lascorruich an Tighearna an aghaidh Mhaois, agus thubhairt e, Nach e Aaron an Lebhithreach do bhràthair? tha fhios agam gu'n labhair esan gu maith. Agus mar an ceudna, feuch, tha e teaclid a mach a'd' choinneamh: agus an uair a chi e thu, bithidh e subhach 'na chridhe.

15 Agus labhraidh tusa ris, agus cuiridh tu focail 'na bheul: agus bithidh mise le d' bheul, agus le 'bheul-san, agus teagaisgidh mi dhuibh ciod a ni sibh.

16 Agus labhraidh esan air do shonsa ris an t-sluagh: agus bithidh esan, bithidh *eadhon* esan dhuit an àite beoil, agus bithidh tusa dhasan an àite Dhié.

17 Agus gabhaidh tu an t-slat so ann do làimh, leis an dean thu comharan.

18 Agus dh'imich Maois agus phill e gu Ietro 'athair-céile, agus thubhairt e ris, Théid mi nis, agus pillidh mi chum mo bhràithrean a ta san Eiphit, agus chi mi am bheil iad fathast beò. Agus thubhairt Ietro ri Maois, Imich an sìth.

19 Agus thubhairt an Tighearna ri Maois ann am Midian, Imich, pill do'n Eiphit: oir tha na daoine sin uile marbh a bhla 'g iarraidh t' anama.

20 Agus ghabh Maois a bhean, agus a mhic, agus chuir e iad air asail, agus phill e do thir na h-Eiphit. Agus ghabh Maois slat Dhé 'na làimh.

21 Agus thubhairt an Tighearna ri Maois, An uair a dh'imicheas tu chum pilltinu do'n Eiphit, thoir an aire⁸ gu'n dean thu na h-iongantais sin uile, a chuir mise ann ad làimh, am fianuis Pharaoh: ach cruaidhichidh mise a chridhe, agus cha leig e leis an t-sluagh imeachd.

22 Agus their thu ri Pharaoh, Mar so tha'n Tighearna ag ràdh, 'S e Israel mo mhac, mo cheud-ghin.

23 Agus tha mi ag ràdh riut, Leig le m' mhac imeachd, a chum as gu'n dean e seirbhis dhomh; agus ma dhùiltas tu leigeadh⁹ leis imeachd: feuch, marbhaidh mise do mhac-sa, *eadhon* do cheud-ghin.

24 Agus tarlaidh air an t-slighe san tigh-òsda¹⁰, gu'n do choinnich an Tighearna e, agus gu'n d'iarr e a mharbhadh.

25 An sin ghabh Siporach clach *gheurr*, agus thimchioll-ghearr i roimh-chroicinn a mic, agus thilg i aig a chosaibh e, agus thubhairt i, Gu cinnteach is fear-pòsda fuileachdach dhomhsa thu.

26 Agus leig e uatha e: an sin thubhairt

¹ soithichean. Eabh.

² an Eiphit.

³ Cha d'fhoillsich.

⁴ carball.

⁵ thionndaidheadh.

⁶ o'n dé no'n là roimhe sin.

⁷ a chi thu iomchuidh a chur.

⁸ faic.

⁹ leigeil.

¹⁰ tigh-tàimh.

1, *Is fear-pòsda fuileachdach thu air son an timchioll-ghearraidh.*

27 Agus thubhairt an Tighearna ri h-Aaron, Imich an coinneamh Mhaois do'n fhàsach. Agus dh'imich e, agus choinnich se e ann an sliabh Dhé, agus phòg se e.

28 Agus dh'inis Mhaois a dh'Aaron uile bhriathran an Tighearna, a chuir uaith e, agus na comharan uile a dh'àithn e dha.

29 Agus chaidh Maois agus Aaron, agus chruinnich iad seanairean chloinn Israeil uile.

30 Agus labhair Aaron na briathran uile a labhair an Tighearna ri Mhaois, agus rinn ena comharan ann an sealladh an t-sluaigh.

31 Agus chreid an sluagh: agus an uair a chual¹ iad gu'n d'amhaire an Tighearna air cloinn Israeil, agus gu'm fac e anàmghar, an sin chrom iad an cinn, agus rinn iad aoradh.

CAIB. V.

1 *Tha Pharaoh a' diùltadh cead do chloinn Israeil dol gu féil a chumail do'n Tighearna anns an fhàsach.* 6 *Dh'àithn e obair nà bu truite a chur orra.*

AGUS 'na dhéigh sin chaidh Maois agus Aaron a steach, agus thubhairt iad ri Pharaoh, Mar so tha'n Tighearna Dia Israeil ag ràdh, Leig le m' shluagh imeachd, a chum as gu'n gléidh¹ iad féil² dhomhsa san fhàsach.

2 Agus thubhairt Pharaoh, Cò e an Tighearna, gu'n éisdinn-sa r'a ghuth a leigeadh le h-Israel imeachd? Cha 'n aithne dhomhs' an Tighearna, agus mar an ceudna cha leig mi le h-Israel imeachd.

3 Agus thubhairt iad, Dh' fhoillsich Dia nan Éabhruidheach e féin dhuinne³: leig leinn, guidheamaid ort, dol astar thri làithean do'n fhàsach, a chum as gu'n iobar sinn do'n Tighearna ar Dia, air eagal gu'm buail e sinn⁴ le plàigh, no leis a' chlaidheamh.

4 Agus thubhairt rìgh na h-Eiphit riu, C'ar son a ta sibhse, a Mhaois agus Aaron, a' toirt air an t-sluagh sgur o'n oibribh? Rachaibh a chum bhur n-eallacha.

5 Agus thubhairt Pharaoh, Feuch, a ta sluagh na tìre a nis lìonmhor, agus tha sibhse a' toirt orra bhi 'nan tàmh o'n eallachaibh.

6 Agus dh' àithin Pharaoh air an là sin féin do mhaighstiribh-oibre an t-sluaigh, agus d'an luchd-riaghlaidh⁵, ag ràdh,

7 Cha toir sibh conlach tuilleadh do'n t-sluagh a dheanamh chlacha-creadha mar roimheso: rachadh iad agus cruinnicheadh iad conlach dhoibh féin.

8 Agus cuiridh sibh orra àireamh nan clacha-creadha a rinn iad roimhe: cha leig sibh sìos a bheag dheth, oir tha iad dìomh-

anach; uime sin tha iad ag éigheach, ag ràdh, Rachamaid agus iobramaid d'ar Dia.

9 Cuirear an obair nìs truite air na daoine, chum as gu'n saoraich iad innte: agus na h-earbadh iad á briathraibh dìomhain.

10 Agus chaidh maighstirean-oibre an t-sluaigh a mach, agus an luchd-riaghlaidh, agus labhair iad ris an t-sluagh, ag ràdh, Mar so tha Pharaoh ag ràdh, Cha toir mi dhuibh conlach.

11 Rachaibh, gabhaibh dhuibh féin coulach far am feud sibh a faotainn: gidheadh cha leigear sìos a bheag do'r n-obair.

12 Uime sin sgaoileadh⁶ an sluagh air feadh tìre na h-Eiphit uile, a chruinneachadh asbhuain⁷ an àite conlach.

13 Agus chuir na maighstirean-oibre thuige⁸ iad, ag ràdh, Coimhlionaibh blur n-oibre cumta lathail⁹, mar an uair a thugadh conlach dhuibh.

14 Agus bhuaileadh¹⁰ luchd-riaghlaidh chloinn Israeil a chuir maighstirean-oibre Pharaoh os an ceann, agus dh'fhiosraicheadh dhuibh, C'ar son nach do choimhlion sibh bhur n-obair chumta ann an deanamh chlacha-creadha, araon an dé agus an diugh, mar a rinn sibh roimhe?

15 An sin thàinig luchd-riaghlaidh chloinn Israeil, agus ghlaodh iad ri Pharaoh, ag ràdh, C'ar son a bhuineas tu air an dòigh so ri d' sheirbhisich?

16 Cha 'n' eil conlach air a toirt do d' sheirbhisich, agus 'se their iad ruinn, Deanaibh clacha-creadha: agus, feuch, a ta do sheirbhisich air am bualadh; ach is ann aig do shluagh féin a ta choire.

17 Ach thubhairt esan, Tha sibh dìomh-anach, tha sibh dìomhanach: uime sin their sibh, Rachamaid agus iobramaid do'n Tighearna.

18 Uime sin imichibh a nis, deanaibh obair; oir cha toirear conlach dhuibh, agus bheir sibh uaibh làn àireamh nan clacha-creadha.

19 Agus chunnaic luchd-riaghlaidh chloinn Israeil gu'm bu chruaidh an càs anns an robh iad, agus e air a ràdh riu, Cha bheagaich sibh dad d'ur clachaihh-creadha, do'n obair dhligheach lathail.

20 Agus choinnich iad Maois agus Aaron, a sheas air an t-slighe¹¹, nuair a thàinig iad a mach o Pharaoh.

21 Agus thubhairt iad riu, Gu'n amhaire-eadh Dia oirrh, agus gu'n tugadh e breth, do bhrìgh gu'n d' rinn sibh ar fàile gràineil an làthair Pharaoh¹², agus an làthair a sheirbhiseach, a' cur claidheimh 'nan làimh a chum sinne a mharbhadh.

22 Agus phill Maois a dh'ionnsuidh an

¹ cum, dean.

² fleadh, féisd, cuir.

³ ghairm Dia nan Éabhruidheach oirne. Eabh.

⁴ tuit e oirnn, coinnich e sinn.

⁵ an luchd-stùraidh, an griobhan, an maoir.

⁶ sgapadh.

⁷ bunain, stailenich.

⁸ chuige.

⁹ gnothuch an là 'na là.

¹⁰ ghabhadh air.

¹¹ 'nan coinneamh. Eabh.

¹² ann an sùilbh Pharaoh. Eabh.

Tighearn, agus thubhairt e, A Tighearna, c'ar son a bhuin thu cho ole ris an t-sluagh so? c'ar son a chuir thu uait mi?

23 Oir o'n àm a thàinig mi gu Pharaoh a labhairt ann ad ainm, rinn e ole do'n t-sluagh so; agus cha do shaor thu idir do shluagh.

CAIB. VI.

1 Tha Dia ag ùrachadh a gheallaidh do Mhaois le ainm Iehobhah. 14 Ginealach Reubein. 15 Shimeoin, 16 agus Lebhi, o'n d' thàinig Maois agus Aaron.

A N sin thubhairt an Tighearna ri Maois, An sin chi thu ciod a ni mi ri Pharaoh: oir le làimh làidir leigidh e leo imeachd, agus le làimh làidir fuadaichidh e mach as a dhiùthaich iad.

2 Agus labhair Dia ri Maois, agus thubhairt e ris, Is mise an Tighearn.

3 Agus dh'fhoillsich mi mi féin do Abraham, do Isaac, agus do Iacob, le ainm an Dé uile-chumhachdaich, ach le m'ainm Iehobhah cha robh mi aithnichte dhoibh.

4 Agus mar an ceudna dhainnich mi mo choimhcheangal¹ riu, gu'n tugainn dhoibh tìr Chanaan, tìr an cuairte, anns an robh iad 'nan coigrich.

5 Agus mar an ceudna chuala mi osnaich chloinn Israeil, a ta na h-Eiphitich a cumail ann an daorsa: agus chuimhnich mi mo choimhcheangal.

6 Uime sin, abair ri cloinn Israeil, Is mise an Tighearn, agus bheir mi sibh a mach o bhi fo eallachaibh nan Eiphiteach, agus saoraidh mi sibh o'n daorsa: agus fuasglaidh mi sibh le gàirdean sint² a mach, agus le breitheanasaihb mòra.

7 Agus gabhaidh mi sibh dhomh féin mar shluagh, agus bithidh mi dhuibh a'm³ Dhia: agus bithidh fios agaibh gur mise an Tighearna bhuir Dia, a ta 'g ur toirt-sa² mach o bhi fo eallachaibh nan Eiphiteach.

8 Agus bheir mi steach sibh a dh'ionnsuidh an fhearainn a mhionnaich mi gu'n tugainn e do Abraham, do Isaac, agus do Iacob; agus bheir mi e dhuibhse mar oighreachd: Is mise an Tighearna.

9 Agus labhair Maois mar sin ri cloinn Israeil: ach cha d'éisd iad ri Maois, trid chràidh spioraid, agus trid chruaidh dhaorsa.

10 Agus labhair an Tighearna ri Maois, ag ràdh,

11 Imich a steach, labhair ri Pharaoh righ na h-Eiphit, e a leigeadh do chloinn Israeil dol a mach as a dhùthaich.

12 Agus labhair Maois an làthair an Tighearn, ag ràdh, Feuch, cha d'éisd clann Israeil rium; cionnus ma ta dh'éisdeas Pharaoh riumsa, aig am bheil mo bhilean neo-thiomhail-ghearrta?

13 Agus labhair an Tighearna ri Maois,

agus ri h-Aaron, agus thug e dhoibh àithne³ a chum cloinn Israeil, agus a chum Pharaoh righ na h-Eiphit, clann Israeil a thoirt a mach á tìr na h-Eiphit.

14 Is iad sin ceannardan thighean an aithriche: mic Reubein ceud-ghlin Israeil; Hanoah, agus Pallu, Hesron, agus Carmi: is iad sin teaghlaichean Reubein.

15 Agus mic Shimeoin; Gemuel, agus Iamin, agus Ohad, agus Iachin, agus Sohar, agus Saul mac Ban-chanaanach: is iad sin teaghlaichean Shimeoin.

16 Agus is iad sin ainmeanna mhac Lebhi, a réir an ginealach: Gerson, agus Cohat, agus Merari: agus b'iad bliadhnacha beatha Lebhi ceud agus seachd bliadhna deug 'ar fhichead.

17 Mic Gherosin; Libni, agus Simi, a réir an teaghlaichean.

18 Agus mic Chohait; Amram, agus Idhar, agus Hebron, agus Udsiel: agus b'iad bliadhnacha beatha Chohait ceud agus tri bliadhna deug 'ar fhichead.

19 Agus mic Mherari; Mahali agus Musi: is iad sin teaghlaichean Lebhi, a réir an ginealach.

20 Agus ghabh Amram Iochebed piuthar-athar dha féin 'na mnaoi; agus rug i dha Aaron agus Maois: agus b'iad bliadhnacha beatha Amram ceud agus seachd bliadhna deug 'ar fhichead.

21 Agus mic Idshair; Corah, agus Nepheg, agus Sichri.

22 Agus mic Udsiel; Misael, agus Elaphan, agus Sitri.

23 Agus ghabh Aaron Eliseba nighean Aminadaib, piuthar Naosin, dha féin 'na mnaoi; agus rug i dha Nadab agus Abihu, Eleasar agus Itamar.

24 Agus mic Chorah; Asir, agus Elcanah, agus Abiasaph: is iad sin teaghlaichean nan Corhach.

25 Agus ghabh Eleasar mac Aaron, aon donigheanaibh Phuticil dha féin 'na mnaoi; agus rug i dha Phinehas: is iad sin ceannardan aithriche nan Lebhitheach, a réir an teaghlaichean.

26 Is iad so an t-Aaron agus am Maois ud, ris an d'thubhairt an Tighearna, Thugaibh a mach clann Israeil á tìr na h-Eiphit, a réir an slògh⁴.

27 Is iad so iadsan a labhair ri Pharaoh, righ na h-Eiphit, a chum clann Israeil a thoirt a mach as an Eiphit: is iad so am Maois agus an t-Aaron ud.

28 Agus tharladh, san là air an do labhair an Tighearna ri Maois ann an tìr na h-Eiphit,

29 Gu'n do labhair an Tighearna ri Maois, ag ràdh, Is mise an Tighearna: labhair thusa ri Pharaoh righ na h-Eiphit gach ni a their mi riut.

¹ mo chùmhnannt.

² 'g'ur tabhairt-sa.

³ ordugh.

⁴ a réir an armailtean.

30 Agus thubhairt Maois an làthair an Tighearna, Feuch, *a ta* mise neo-thimchioll-ghearra a m' bhlilbh, agus cionnus a dh'éisdeas Pharaoh rium?

CAIB. VII.

1 Chuireadh Maois a dh'ionnsuidh Pharaoh. 10 Rinn-eadh slat Aaron 'na nathair. 13 Chruaidhicheadh cridhe Pharaoh. 20 Uisge na h-aimhne air a thionndadh gu fuil.

AGUS thubhairt an Tighearna ri Maois, Feuch, rinn mi thu a'd' dhia do Pharaoh: agus bithidh do bhràthair Aaron 'na fhàidh agad.

2 Labhraidh tusa gach *ni* a dh'àithreas mise dhuit: agus labhraidh Aaron do bhràthair ri Pharaoh, esan a chur cloinn Israeil a mach as a thir.

3 Agus cruaidhichidh mise cridhe Pharaoh, agus ni mi mo chomharan agus m'iongantasan¹ lionnhor ann an tìr na h-Eiphit.

4 Ach cha 'n éisd Pharaoh ribh, agus leagaidh mise mo làmh air an Eiphit, agus bheir mi mach m'armailtean, agus mo shluagh clann Israeil, a tìr na h-Eiphit, le breitheanasaihb mòra.

5 Agus bithidh fios aig na h-Eiphitich gur mise an Tighearna, 'nuair a shìneas mi mach mo làmh air an Eiphit, agus a bheir mi mach clann Israeil o *bhi*' nam measg.

6 Agus rinn Maois agus Aaron mar a dh'àithn an Tighearna dhoibh, mar sin rinn iad.

7 Agus *bha* Maois ceithir fichead bliadhna dh'aois, agus Aaron ceithir fichead agus trì bliadhna dh'aois, an uair a labhair iad ri Pharaoh.

8 Agus labhair an Tighearna ri Maois, agus ri h-Aaron, ag ràdh,

9 'Nuair a labhras Pharaoh ribh, ag ràdh, Nochdaibh iongantas² air bhuir son féin; an sin their thu ri h-Aaron, Gabh do shlat, agus tilg sìos *i* an làthair Pharaoh, agus fasaidh *i* 'na nathair.

10 Agus chaidh Maois agus Aaron a steach a dh'ionnsuidh Pharaoh, agus rinn iad mar sin, mar a dh'àithn an Tighearna: agus thilg Aaron sìos a shlat an làthair Pharaoh, agus an làthair a sheirbhiseach, agus rinneadh *i* 'na nathair.

11 An sin ghairm Pharaoh mar an ceudna air na daoine glìce, agus air an luchd-fiosachd: agus rinn mar an ceudna druidhean³ na h-Eiphit mar sin le'n druidheachdaibh:

12 Oir thilg iad sìos gach duine a shlat, agus rinneadh iad 'nan nathraichibh: ach shluig slat Aaron suas an slatan-sa.

13 Agus chruaidhicheadh cridhe Pharaoh, air chor as nach d'éisd e riu; mar a thubhairt an Tighearna.

14 Agus thubhairt an Tighearna ri Maois, Chruaidhicheadh cridhe Pharaoh, tha e diùltadh leigeadh leis an t-sluagh falbh.

15 Imich-sa dh'ionnsuidh Pharaoh sa' mhaduinn, feuch, tha e dol a mach a dh'ionnsuidh an uisge, agus seasaidh tu 'na choinneamh air bruaich na h-aimhne⁴; agus an t-slat a thionndaidheadh 'na nathair, gabhaidh tu a'd' làimh.

16 Agus their thu ris, Chuir an Tighearna Dia nan Eabhruidheach mise a t'ionnsuidh, ag ràdh, Leig le m'shlugh imeachd, a chum as gu'n dean iad seirbhis dhomhsa san fhàsach: agus, feuch, gus a so cha b' àill-leat éisdeachd.

17 Mar so tha'n Tighearna ag ràdh, Ann an so aithnichidh tu gur mise an Tighearna: feuch, buailidh mi leis an t-slat a *ta* m' làimh, na h-uisgeachan a *ta* san amhainn, agus tionndaidhear iad gu fuil.

18 Agus gheibh an t-iasg a *ta* san amhainn bàs, agus lobhaidh an amhainn; agus bithidh gràin air na h-Eiphitich uisge òl as an amhainn.

19 Agus labhair an Tighearna ri Maois, Abair ri h-Aaron, Gabh do shlat, agus sin a mach do làmh air uisgibh na h-Eiphit, air an aimhnibh, air an sruthaibh, agus air an locaibh, agus air uile chomh-chruinneachadh an uisgeacha, chum as gu'm fàs iad 'nam fuil: agus bithidh fuil air feadh tìre na h-Eiphit uile, araon ann an *soithichibh* fiodha, agus ann an *soithichibh* cloiche.

20 Agus rinn Maois agus Aaron mar sin, a réir mar a dh'àithn an Tighearna, agus thog e suas an t-slat, agus bhuail e na h-uisgeachan a *bha* san amhainn, ann an sealladh Pharaoh, agus ann an sealladh a sheirbhiseach: agus thionndaidheadh na h-uisgeachan uile a *bha* san amhainn, gu fuil.

21 Agus fhuair an t-iasg a *bha* san amhainn bàs: agus lobh an amhainn, agus cha b' urrainn na h-Eiphitich uisge òl as an amhainn; agus bha'n fhuil ann an tìr na h-Eiphit uile.

22 Agus rinn druidhean na h-Eiphit mar sin le'n druidheachdaibh: agus chruaidhicheadh cridhe Pharaoh, agus cha d'éisd e riu mar a thubhairt an Tighearna.

23 Agus phill Pharaoh, agus chaidh e d'a thigh: agus cha do shocraich e a chridhe air so cuideachd.

24 Agus chladhaich na h-Eiphitich uile timchioll na h-aimhne air son uisge r'a òl: oir cha b' urrainn⁵ iad òl a dh'uisge na h-aimhne.

25 Agus choimhlionadh seachd làithean an déigh do'n Tighearna an amhainn a bhualadh.

¹ mo mhìorbhuilean.² Taisbeinibh mìorbhuil.³ draoidhean.⁴ seasaidh tus' air bruaich

na h-aimhne air cheann dha teachd.

⁵ cha b' urradh.

CAIB. VIII.

2 *Losgainn air an cur do'n Eiphit.* 16 *An duslach a' fàs 'na mhialaibh.* 20 *Sgaoth chuireag air feadh na tìre.* 32 *Chruaidich Pharaoh a chridhe.*

AGUS thubhairt an Tighearna ri Maois, Falbh a dh'ionnsuidh Pharaoh, agus abair ris, Mar so tha 'n Tighearna ag ràdh, Leig le m' shluagh imeachd, a chum as gu'n dean iad seirbhis dhomh.

2 Agus ma dhiùltas tu 'n leigeadh air falbh, feuch, bualidh mi do chrìochan uile le losgannaibh :

3 Agus brùchdaidh an amhainn a mach losgainn, agus théid iad suas, agus thig iad a steach do d' thigh, agus do d' sheòmar-leapach, agus air uachdar do leapach¹, agus do thigh do sheirbhiseach, agus air do shluagh, agus do d' àmhuinnibh, agus do d' amaraibh-fuinidh².

4 Agus théid na losgainn suas ort féin, agus air do shluagh, agus air do sheirbhisich uile.

5 Agus thubhairt an Tighearna ri Maois, Abair ri h-Aaron, Sin a mach do làmh le d' shlaic os ceann nan airmhnichean, os ceann nan allt, agus os ceann nan lochan; agus thoir air na losgannaibh dol suas air talamh na h-Eiphit.

6 Agus shìn Aaron a mach a làmh os ceann uisgeacha na h-Eiphit; agus chaidh na losgainn suas, agus chòmhdaich³ iad talamh na h-Eiphit,

7 Agus rinn na druidhean mar sin le 'n druidheachdaibh, agus thug iad suas losgainn air talamh na h-Eiphit.

8 An sin ghairm Pharaoh air Maois agus air Aaron, agus thubhairt e, Guidhibh air an Tighearna gu'n toir e air falbh na losgainn uam féin, agus o m' shluagh; agus leigidh mise leis an t-sluagh imeachd, a chum as gu'n òbair iad do'n Tighearna.

9 Agus thubhairt Maois ri Pharaoh, Dean uail tharum: c'uin a ghuidheas mi air do shon, agus air son do sheirbhiseach, agus air son do shluaigh, gu'n cuirear as do na losgannaibh uait féin, agus o d' thighibh; air chor agus gu mair⁴ iad a mhàin san amhainn?

10 Agus thubhairt esan, Am màireach. Agus thubhairt e, *Bithheadh* e a réir t'fhocail; a chum as gu'm bi fios agad nach 'eil neach ann cosmhuil ris an Tighearna ar Dia.

11 Agus falbhaidh na losgainn uait féin, agus o d' thighibh, agus o d' sheirbhisich, agus o d' shluagh; a mhàin san amhainn mairidh iad.

12 Agus chaidh Maois agus Aaron a mach o Pharaoh; agus dh'éigh⁵ Maois ris an Tighearna a thaobh nan losgann, a thug e 'n aghaidh Pharaoh.

13 Agus rinn an Tighearna a réir focail Mhaois: agus bhasaich na losgainn as na tighibh, as na bailtibh, agus as na mach-raichibh.

14 Agus chruinnich iad r'a chéile 'nan dùnaibh iad; agus lobh an tìr⁶.

15 Ach an uair a chunnaic Pharaoh gu'n robh fois ann, chruaidhich e a chridhe, agus cha d'éisd e riu, mar a thubhairt an Tighearna.

16 Agus thubhairt an Tighearna ri Maois, Abair ri h-Aaron, Sin a mach do shlat, agus buail duslach⁷ na talmhainn, a chum gu'm fàs e 'na mhialaibh air feadh tìre na h-Eiphit uile.

17 Agus rinn iad mar sin; oir shìn Aaron a mach a làmh le 'shlaic, agus bhuail e duslach na talmhainn, agus rinneadh e 'na mhialaibh air duine agus air airmh-idh⁸: rinneadh uile dhuslach na talmhainn 'na mhialaibh air feadh tìre na h-Eiphit uile.

18 Agus rinn na druidhean mar sin le'n druidheachdaibh a thoirt a mach mhial, ach cha b'urrainn iad: agus bha mialan air duine agus air airmh-idh.

19 An sin thubhairt na druidhean ri Pharaoh, 'S e meur Dhé a th'ann: agus chruaidhich eadhbaidh Pharaoh, agus cha d'éisd e riu; mar a thubhairt an Tighearna.

20 Agus thubhairt an Tighearna ri Maois, Eirich suas gu moch sa' mhaduinn, agus seas an làthair Pharaoh, (feuch, tha e teachd a mach a dh'ionnsuidh an uisge) agus abair ris, Mar so tha 'n Tighearna ag ràdh, Leig le m' shluagh imeachd, a chum as gu'n dean iad seirbhis dhomh.

21 Ach mur leig thu le m' shluagh imeachd, feuch, cuiridh mi sgaoth chuireag⁹ ort féin, agus air do sheirbhisich, agus air do shluagh, agus ann ad thighibh: agus lionar tighean nan Eiphiteach leis an sgaoth chuireag, agus mar an ceudna an talamh air *am bheil* iad.

22 Agus cuiridh mi air leth, air an là sin féin, fearann Ghosein, anns am bheil mo shluagh a chòmhnuidh, air chor as nach bi cuileagan sam bith an sin; a chum as gu'm bi fios agad gur mise an Tighearna am meadhon na talmhainn.

23 Agus cuiridh mi dealachadh eadar mo shluagh-sa agus do shluagh-sa: air an là màireach bithidh an comharadh so.

24 Agus rinn an Tighearna mar sin: agus thàinig sgaoth anabarrach¹⁰ chuireag do thigh Pharaoh, agus do thighibh a sheirbhiseach, agus do thigh na h-Eiphit uile: thruailleadh an talamh a thaobh nan cuileag.

25 Agus ghairm Pharaoh air Maois agus

do'n tìr. 7 luaithe.

an airmh-idh. Eabh.

10 dhòlasach.

8 ann an duine agus ann an airmh-idh.

9 iomadh gnè chuireag.

1 do leapa. 2 do d' scàilbhidh-fuinidh.

3 chuibhig, dh'fholaidh.

4 gu'm fan, gu'm

fàgar iad. 5 ghlaodh. 6 dh'fhàs droch fhaile

air Aaron, agus thubhairt e, Rachaibh, òbraibh d'ur Dia san tìr.

26 Agus thubhairt Maois, Cha 'n'eil e iomchuidh¹ sinn a dheanamh mar sin; oir òbraidh sinn gràineileachd nan Eiphiteach do'n Tighearn ar Dia. Feuch, an òbair sinne gràineileachd nan Eiphiteach fa chomhair an sùl, agus nach clach iad sinn?

27 Théid sinn astar thri làithean do'n fhàsach, agus òbraidh sinn do'n Tighearn ar Dia, mar a dh'àithneas e dhuinn.

28 Agus thubhairt Pharaoh, Leigidh mi dhuibh imeachd, a chum as gu'n òbairsibh do'n Tighearna bhur Dia san fhàsach; ach na rachaibh ro fhad air astar: guidhibh air mo shonsa.

29 Agus thubhairt Maois, Feuch, théid mise mach uait, agus guidhidh mi air an Tighearna gu'm falbh na cuileagan o Pharaoh, o 'sheirbhisich, agus o 'shluagh, am màireach: ach na buineadh Pharaoh gu cealgach tuilleadh, ann an diùltadh leigeadh do'n t-sluagh dol a dh'òbradh do'n Tighearn.

30 Agus chaidh Maois a mach o Pharaoh, agus ghuidh e air an Tighearn.

31 Agus rinn an Tighearn a réir focail Mhaois; agus chuir e air falbh na cuileagan o Pharaoh, o 'sheirbhisich, agus o 'shluagh: cha d'fhan a h-aon.

32 Agus chruaidhich Pharaoh a chridhe air an àm so mar an ceudna, agus cha do leig e leis an t-sluagh imeachd.

CAIB. IX.

1 *Plàigh mhòr air an spréidh.* 8 *Neasgaid ghràin-eil air duine agus air ainmhidh.* 22 *Clach-mheall-ain mhillteach san tìr.*

AGUS thubhairt an Tighearna ri Maois, Falbh a steach a dh'ionnsuidh Pharaoh, agus innis da, Mar so tha'n Tighearna Dia nan Eabhruideach ag ràdh, Leig le m' shluagh imeachd, a chum as gu'n dean iad seirbhis dhomh:

2 Oir ma dhiùltas tu leigeadh leo imeachd, agus gu'n cum thu iad fathast,

3 Feuch, bithidh làmh an Tighearn air do spréidh a ta sa' mhachair, air na h-eich, air na h-asail, air na càmbail, air a' chrodh, agus air na caoraich: *bithidh* plàigh² ro mhòr ann.

4 Agus cuiridh an Tighearna dealachadh eadar spréidh Israeil, agus spréidh na h-Eiphit: agus cha'n fhaigh a bheag bàs a dh'aon ni a's le cloimn Israeil.

5 Agus shuidhich an Tighearn àm, ag ràdh, Am màireach ni an Tighearn an ni so san tìr.

6 Agus rinn an Tighearn an ni sin air an là màireach, agus fhuair spréidh na h-Eiphit uile bàs: ach do spréidh chloimn Israeil cha d'fhuair a h-aon bàs.

7 Agus chuir Pharaoh *teachdaire* uath,

agus, feuch, cha robh eadhon a h-aon do spréidh nan Israeleach marbh. Agus chruaidhich eadhadh cridhe Pharaoh, agus cha do leig e an t-sluagh air falbh.

8 Agus thubhairt an Tighearna ri Maois, agus ri h-Aaron, Gabhaibh dhuibh féin làn bhur glac³ do luaith an teallaich⁴, agus crathadh Maois i ri nèamh ann an sealladh Pharaoh.

9 Agus bithidh i 'na duslach mìn air feadh tìre na h-Eiphit uile, agus bithidh i 'na neasgaid a' briseadh a mach 'na bolgaibh air duine, agus air ainmhidh, air feadh tìre na h-Eiphit uile.

10 Agus ghabh iad luath an teallaich, agus sheas iad an làthair Pharaoh, agus chrath Maois i ri nèamh: agus rinneadh i 'na neasgaid a' briseadh a mach 'na bolgaibh air duine, agus air ainmhidh.

11 Agus cha b'urrainn na druidhean seasamh an làthair Mhaois air son na neasgaid; oir bha an neasgaid air na druidhibh, agus air an h-Eiphitich uile.

12 Agus chruaidhich an Tighearna cridhe Pharaoh, agus cha d'èisd e riu; mar a labhair an Tighearna ri Maois.

13 Agus thubhairt an Tighearna, ri Maois, Eirich suas gu moch sa' mhaduinn, agus seas an làthair Pharaoh, agus abair ris, Mar so tha'n Tighearna Dia nan Eabhruideach ag ràdh, Leig le m' shluagh imeachd, a chum as gu'n dean iad seirbhis dhomh.

14 Oir air an àm so cuiridh mise mo phlàighean uile air do chridhe-sa, agus air do sheirbhisich, agus air do shluagh; a chum as gu'm bi fios agad nach 'eil neach ann cosmhuil riumsa san talamh uile.

15 Oir a nis smidh mi mach mo làmh, agus buailidh mi thu féin agus do shluagh le plàigh; agus gearraras thu o'n talamh.

16 Agus gu deimhin air son so thog mi suas thu, a chum as gu'n nochdaim annad mo chumhachd, agus gu'm biodh m'ainm iomraideach⁵ san domhan uile.

17 Am bheil thu fathast 'g ad àrdachadh féin an aghaidh mo shluagh, air chor as nach leig thu leo imeachd?

18 Feuch, mu'n àm so màireach, bheir mise air cloich-mheallain ro mhòir⁶ frasadh a nuas, nach robh a samhul san Eiphit, o'n là san do leagadh a bunachur⁷ eadhon gus a nis.

19 Uime sin a nis cuir fios uait, agus cruinnich do spréidh, agus gach ni a ta agadsa' mhachair; oir air gach duine agus ainmhidh a gheibhear sa' mhachair, agus nach cruinnichear dhachaidh, thig a' chlach-mheallain a nuas, agus gheibh iad bàs.

20 An ti a ghabh eagall roimh fhocal an Tighearna measg sheirbhiseach Pharaoh,

¹ iomchubhaidh.

² eucail mharbhtach.

³ blur dorn.

⁴ fàirneis, àmhuinn.

⁵ air fhoillseachadh, air a chraobh-sgaoileadh.

⁶ ro chràitich, ro mhilltich. ⁷ bunadh, stéidh.

thug e air a sheirbhisich agus air a spréidh teicheadh do na tighibh.

21 Agus esan nach do ghabh suim do fhocal an Tighearna, dh'fhag e a sheirbhisich agus a spréidh sa' mhachair.

22 Agus thubhairt an Tighearna ri Maois, Sin a mach do làmh gu nعام, chum as gu'm bi clach-mheallain ann an tìr na h-Eiphit uile, air duine, agus air ainmhidh, agus air uile luibh na macharach ann an tìr na h-Eiphit.

23 Agus shìn Maois a mach a shlat gu nعام; agus rinn an Tighearna tairneanach agus clach-mheallain, agus ruith teinathair air uachdar na talmhainn; agus fhras an Tighearna clach-mheallain air tìr na h-Eiphit.

24 Mar so bha clach-mheallain ann, agus teine measgta leis a' chloich-mheallain ro mhòr, aig nach robh a samhail ann an tìr na h-Eiphit uile, o rinneadh dùthaich dhith.

25 Agus bhuail a' chlach-mheallain air feadh tìre na h-Eiphit uile gach *ni* a *bha* sa' mhachair, aràon duine agus ainmhidh: agus bhuail a' chlach-mheallain uile luibh na macharach, agus bhlris i uile chraobha na macharach.

26 Amhàinannantir Ghosein, far an robh clann Israeil, cha robh clach-mheallain.

27 Agus chuir Pharaoh *teachdaire* uaith, agus ghairm e air Maois agus air Aaron, agus thubhairt e riu, Pheacaich mi an uair so: *tha'n* Tighearna ceart, agus mise agus mo shluagh aingidh.

28 Guidhibh¹ air an Tighearn (oir *is* leòr e) nach bi tairneanach anabarrach¹ agus clach-mheallain ann *ni's mò*; agus leigidh mise leibh falbh, agus cha'n fhan sibh *ni's* faide.

29 Agus thubhairt Maois ris, Coluath's a théid mise mach as a' bhaile, sinidh mi mo làmhnan a mach a chum an Tighearn: *agus* sguiridh an tairneanach, agus cha bhi a' chlach-mheallain ann *ni's mò*; chum as gu'm bi fios agad gur leis an Tighearn an talamh.

30 Ach air do shonsa, agus air son do sheirbhiseach, tha fhios agam nach bi eagal oirbh fathast roimh an Tighearna Dia.

31 Agus bhuailleadh an lìon agus an t-còrna; oir *bha'n* t-còrna fo dhéis, agus an lìon fo fhrois².

32 Ach cha do bhuailleadh an cruithneachd agus an seagal: oir cha robh iad air fàs suas.

33 Agus chaidh Maois a mach o Pharaoh as a' bhaile, agus shìne mach a làmh a chum an Tighearn; agus sguir an tairneanach agus a' chlach-mheallain, agus cha do dhòirteadh an t-uisge air an talamh.

34 Agus anuair a chumnaic Pharaoh gu'n

do sguir an t-nisge, agus a' chlach-mheallain, agus an tairneanach, pheacaich e fathast mar an ceudna, agus chruaidhich e a chridhe, e féin agus a sheirbhisich.

35 Agus chruaidhich eadhadh cridhe Pharaoh, agus cha do leig e clann Israeil air falbh, mar a labhair an Tighearna le Maois.

CATB. X.

12 *Plàigh nan locuist*, 21 *agus tiugh-dhorchadais*.
27 *Chruaidhich eadhadh cridhe Pharaoh*.

A GUS thubhairt an Tighearna ri Maois, Imich a steach gu Pharaoh; oir chruaidhich mi a chridhe, agus cridhte a sheirbhiseach, a chum gu nochdainn iad sin mo chomharan 'na làthair:

2 Agus gu'n innseadh tu ann an cluas-aibh do mhic, agus mic do mhic, na nithean a dh'oibrich mi san Eiphit, agus mo chomharan a rinn mi 'nam measg; agus gu'm bi fios agaibh gur mise an Tighearn.

3 Agus chaidh Maois agus Aaron a steach gu Pharaoh, agus thubhairt iad ris, Mar so tha'n Tighearna Dia nan Eabhruidheach ag ràdh, Cia fhada dhiùltas tu thu féin isleachadh a'm làthair-sa? Leig le m' shluagh imeachd, agus gu'n dean iad seirbhis dhomh:

4 Ach ma dhiùltas tu leigeadh le m' shluagh imeachd, feuch, bheir mise am màireach na locuist a steach do d' chrìoch-aibh.

5 Agus còmhdaichidh iad aghaidh na talmhainn, air chor as nach urrainn neach an talamh fhaicinn: agus ithidh iad fuigheal an nì sin a théid as³, a dh'fhanas agaibh o'n chloich-mheallain, agus ithidh iad gach craobh a ta fàs dhuibh as a' mhachair.

6 Agus lìonaidh iad do thighean, agus tighean do sheirbhiseach uile, agus tighean nan Eiphiteach uile; nì nach faca aon chuid t'aithriche, no aithriche t'aithrichean, o'n là a bha iad air an talamh gus an là'n diugh. Agus phill se e féin, agus chaidh e mach o Pharaoh.

7 Agus thubhairt seirbhisich Pharaoh ris, Cia fhada bhios an duine so 'na ribe dhuinne? Leig leis na daoine falbh, chum gu'n dean iad seirbhis do'n Tighearn an Dia: nach 'eil fhios agad fathast gu bheil an Eiphit air a milleadh?

8 Agus thugadh Maois agus Aaron a ris gu Pharaoh: agus thubhairt e riu, Rach-aibh, deanaibh seirbhis do'n Tighearna bhur Dia: *ach* cò iad a théid?

9 Agus thubhairt Maois, Le'r n-òigridh agus le'r daoineibh aosmhor théid sinne; le'r mic agus le'r nigheanaibh, le'r treudaibh agus le'r buar théid sinn; oir *is éigin* duinn féill a chumail do'n Tighearn.

10 Agus thubhairt e riu, Gu robh an Tighearna mar sin maille ribh, mar a leig-

¹ *guthanna Dhé*. Eabh.

² *ros*.

³ *a theàruinnear*.

eas mise leibh féin agus le'r cloinn bhig imeachd: amhaircibh, oir *tha* olc roimhbh.

11 Ni h-ann mar sin: imichibh a nis, sibhse a ta 'nur daoinibh, agus deanaibh seirbhís do'n Tighearn, oir *is e* so an ní a dh'iarr sibh: Agus dh'fhuadaicheadh a mach iad á làthair Pharaoh.

12 Agus thubhairt an Tighearna ri Maois, Sin a mach do lámh thar tìr na h-Eiphit air son nan locust, a chum as gu'n tig iad suas air tìr na h-Eiphit, agus gu'n ith iad uile luibh na talmhainn, *eadhon* gach ní a dh'fhàg a' chlach-mheallain.

13 Agus shìn Maois a mach a shlat thar tìr na h-Eiphit, agus thug an Tighearna gaith an ear air an tìr rè an là sin uile, agus rè na h-oidhche uile: agus sa' mhaduinn thug a' ghaoth an ear a steach na locuist.

14 Agus chaidh na locuist suas thar tìr na h-Eiphit uile, agus dh'fhan iad ann an crìochaibh na h-Eiphit uile, gu ro dhiùbhalach¹; rompa cha robh riamh an leithide do locuist, agus 'nan déigh cha bhí an leithidean.

15 Oir chòmhdaich iad aghaidh na talmhainn uile, air chor as gu'n do dhorchaicheadh an talamh; agus dh'ith iad uile luibh na talmhainn, agus uile mheas nan craobh, a dh'fhàg a' chlach-mheallain: agus cha d'fhàgadh ní sam bith glas sna craobhaibh, no ann an luibh na macharach ann an tìr na h-Eiphit uile.

16 An sin ghairm Pharaoh air Maois agus air Aaron le cabhaig, agus thubhairt e, Pheacaich mi an aghaidh an Tighearna bhur Dé, agus 'nur n-aghaidh-sa.

17 An nis uime sin maith, guidheam ort, mo pheacadh a mhàin an uair so, agus guidhibh air an Tighearna bhur Dia gu'n toir e air falbh uam a mhàin am bàs so.

18 Agus chaidh e mach o Pharaoh, agus ghuidh e air an Tighearn.

19 Agus thionndaidh an Tighearna gaith an iar ro làidir, a thug air falbh na locuist, agus a thilg iad sa' mhuir ruaidh: cha d'fhan aon locust ann an crìochaibh na h-Eiphit uile.

20 Ach chruaidhich an Tighearna cridhe Pharaoh, agus cha do leig e air falbh clann Israel.

21 Agus thubhairt an Tighearna ri Maois, Sin a mach do lámh gu nèamh, agus bithidh dorchadas air feadh tìre na h-Eiphit, eadhon dorchadas a dh'fheudar a laimhseachadh.

22 Agus shìn Maois a mach a lámh gu nèamh: agus bha tiugh-dhorchadas² ann an tìr na h-Eiphit uile rè thrì làithean.

23 Cha'n fhaca h-aon diubh a chéile, ni mò a dh'éirich neach o 'àite rè thrì làith-

ean: ach bha aig cloinn Israeil uile solus 'nan àitibh-còmhnuidh.

24 Agus ghairm Pharaoh air Maois, agus thubhairt e, Rachaihbhe, deanaibh seirbhís do'n Tighearn; a mhàin fauadh bhur treudan agus bhur buar: rachadh bhur clann bheag mar an ceudna maille ribh.

25 Agus thubhairt Maois, Feumaidh tu, mar an ceudna, iobairtean a thoir duinn, agus tabhartais-loisgte, chum as gu'n iobair sinn do'n Tighearn ar Dia.

26 Agus, mar an ceudna, théid ar spréidh maille ruinn; cha 'n fhàgar ionga 'nar déigh³, oir is éigin duinn gabhail diubh gu seirbhís a dheanamh do'n Tighearn ar Dia; agus cha 'n 'eil fhios againn cia leis a ní sinn seirbhís do'n Tighearna, agus an tig sinn an sin.

27 Ach chruaidhich an Tighearna cridhe Pharaoh, agus cha leigeadh e leo imeachd.

28 Agus thubhairt Pharaoh ris, Imich a mach uam; thoir an aire dhuit féin, na faic m'aghaidh nì's mò; oir san là sin anns am faic thu m' aghaidh, gheibh thu bàs.

29 Agus thubhairt Maois, Labhair thu gu maith; cha'n fhaic mi t'aghaidh nì's mò.

CÀIB. XI.

1 *Iarrtus Dhé do na Israelich gu'n gabhadh iad seudan òir agus airgid o'n coimhearsnach. 4 Tha Maois a' toirt fios do Pharaoh gu'm faigheadh gach ceud-ghin son Eiphit bàs.*

AGSUS thubhairt an Tighearna ri Maois, Bheir mi aon phlàigh fathast air Pharaoh, agus air an Eiphit; an déigh sin leigidh e leibh imeachd as a so: an uair a leigeas e leibh imeachd, gu cinnteach fuadaichidh e mach as a so sibh gu h-ìomlan.

2 Labhair a nis ann an chuasaibh an t-sluaigh, agus iarradh gach duine o 'choimhearsnach, agus gach bean o 'banchoimhearsnach, seudan airgid, agus seudan òir.

3 Agus thug an Tighearna deadh-ghean do'u t-sluaigh ann an sùilibh nan Eiphiteach: Mar an ceudna, *bha* 'n duine Maois ro mhòr ann an tìr na h-Eiphit, ann an sùilibh sheirbhiseach Pharaoh, agus ann an sùilibh an t-sluaigh.

4 Agus thubhairt Maois, Mar so tha'n Tighearn ag ràdh, Mu mheadhon-oidhche théid mi mach do mheadhon na h-Eiphit.

5 Agus gheibh gach ceud-ghin ann an tìr na h-Eiphit bàs, o cheud-ghin Pharaoh, a ta 'na shuidhe air a righ-chaitheir, eadhon gu ceud-ghin na ban-tràille⁴ a ta air cùl a' mhuilinn, agus uile cheud-ghin nan ainmhidhean.

¹ ro mhilleach.

² dall-dhorchadas.

³ cha'n fhàgar speir 'nar déigh. ⁴ na ban-seirbhisich.

6 Agus bithidh éigheach¹ mhòr ann an tìr na h-Eiphit uile, nach robh riamh a leithid ann, nì mò bhitheas a leithid ann tuilleadh.

7 Ach an aghaidh aoìn do chloinn Israeil cha charuich² madadh a theanga, aon chuid an aghaidh duine no ainmhidh; chum as gu'm bì fios agaibh cionnus a chuireas an Tighearna dealachadh eadar na h-Eiphitich agus Israel.

8 Agus thig iad sin do sheirbhisich uile sìos a m' ionnsuidh-sa, agus cromaidh siad iad féin domh, ag ràdh, Imich a mach, agus an sluagh uile a ta 'gad lean-tuinn; agus an déigh sin théid mi mach: agus chaidh e mach o Pharaoh ann an corruich mhòir.

9 Agus thubhairt an Tighearna ri Maois, Cha'n éisd Pharaoh ribh, a chum as gu meudaichear m'iongantais³ ann an tìr na h-Eiphit.

10 Agus rinn Maois agus Aaron na h-iongantais sin uile am fianuis Pharaoh: agus chruaidhich an Tighearna cridhe Pharaoh, agus cha do leig e le cloinn Israeil imeachd as a dhùthaich.

CAIB. XII.

3 A' chàisg air a h-àithneadh. 29 Gach ceud-ghin ann an tìr na h-Eiphit air a mharbhadh. 31 Na Israeilich air am fògradh as an tìr. 43 Ordugh na càisge.

AGUS labhair an Tighearna ri Maois agus ri h-Aaron ann an tìr na h-Eiphit, ag ràdh,

2 Bithidh am mìos so dhuibh 'na thoiseach nam mìos: bithidh e dhuibh 'na cheud mhios na bliadhna.

3 Labhraibh-sa ri coimhthional Israeil uile, ag ràdh, Air an deicheamh là do'n mhìos so gabhaidh iad dhoibh féin gach duine uan, a réir tighe an aithriche, uan air son tighe.

4 Agus ma bhios an teaghlach ro bheag air son uain, an sin ghabhaidh esan agus a choimhearsnach a's faigse d'a thigh e, a réir àireimh nan anamanna; gach duine, a réir 'itheannaich, àirmhear leibh air son an uain.

5 Bithidh bhur n-uan gun ghaoid⁴, fìrionn, bliadhna dh'aois⁵; as na caoraich no as na gabhraibh gabhaidh sibh e.

6 Agus gleidhidh sibh a stigh e, gu ruig an ceathramh là deug do'n mhìos so: agus marbhaidh comh-chruinneachadh iomlan chloinn Israeil e san fheasgar⁶.

7 Agus gabhaidh iad do'n fhuil, agus cuiridh iad i air an dà ursainn, agus air ard-dorus nau tighean, anns an ith iad e.

8 Agus ithidh iad an fheoil san oidhech

sin féin ròiste le teine, agus aran neo-ghoirtichte⁷; maille ri luibhbh searbha ithidh iad e.

9 Na h-ithibh a bheag dheth amh, no idir air a bhruicheadh⁸ ann an uisge, ach ròiste le teine: a cheann maille r'a chos-aibh, agus maille r'a ghrealaich⁹.

10 Agus cha'n fhàg sibh a bheag dheth gu maduinn: agus na dh'fhàgar dheth gu maduinn, loisgidh sibh le teine.

11 Agus mar so ithidh sibh e; le'r leas-ruich crioslaichte, bhur brògan air bhur cosaibh, agus bhur lorg¹⁰ 'nur làimh: agus ithidh sibh e le cabhaig; is i càisg¹¹ an Tighearn a th'ann.

12 Oir théid mise troimh¹² thìrna h-Eiphit air an oidhech so, agus buailidh mi gach ceud-ghin ann an tìr na h-Eiphit, araon duine agus ainmhidh: agus an aghaidh dhée nan Eiphiteach uile cuiridh mi breitheanas an gnìomh; is mise an Tigh-earn.

13 Agus bithidh an fhuil dhuibh mar chomharadh air na tighibh anns am bheil sibh; agus an uair a chi mise an fhuil, théid mi thairis oirbh, agus cha bhi a' phlàigh oirbh a chum bhur milleadh 'nuair a bhuaileas mi tìr na h-Eiphit¹³.

14 Agus bithidh an là so dhuibh mar chuimhneachan; agus gleidhidh sibh e 'na là-féille¹⁴ do'n Tighearn air feadh bhur ginealach; le h-ordugh sìorruidh gleidhidh sibh e.

15 Seachd làithean ithidh sibh aran neo-ghoirtichte; air a' cheud là féin cuiridh sibh taois ghoirt a mach as bhur tighibh; oir gach neach a dh'itheas aran goirtichte, o'n cheud là gus an t-seachdamh là, gearrar an t-anam sin as o Israel.

16 Agus air a' cheud là bithidh agaibh comh-ghairm naomha, agus air an t-seachdamh là bithidh agaibh comh-ghairm naomha: obair sam bith cha deanar orra, saor o na dh'ithear leis gach neach; sin a mhaìn nithear leibh.

17 Agus cumaidh sibh féil an arain neo-ghoirtichte; oir air an là sin féin¹⁵ thug mise mach bhur sloigh¹⁶ a tìr na h-Eiphit; uime sin coimhididh sibh an là so 'nur ginealachuibh, le h-ordugh sìorruidh.

18 Sa' cheud mhìos, air a' cheathramh là deug do'n mhìos san fheasgar, ithidh sibh aran neo-ghoirtichte, gu ruig an ceud là 'ar fhichead do'n mhìos san fheasgar.

19 Ré sheachd làithean cha'n fhaighear taois ghoirt 'nur tighibh; oir ge b'e neach a dh'itheas aran goirtichte, gearrar an t-anam sin féin as o choimhthional Israeil,

¹ éigh, cubha, glaothaich. ² cha ghluais. ³ mo mhòrbhluilean. ⁴ gun aineamh, fallain. ⁵ bliadhna. ⁶ eadar an dà fheasgar. Eabh. ⁷ gun luibhbh. ⁸ bruitheadh.

⁹ innibh. ¹⁰ bata. ¹¹ dol thairis. Eabh. ¹² air feadh; tre. Eir. ¹³ nuair a bhuaileas mi ann an tìr na h-Eiphit. Eabh. ¹⁴ là féide. ¹⁵ ann an corp an là sin. Eabh. ¹⁶ armaitlean.

co dhiubh¹ is coigreach e, no neach a rugadh san tìr.

20 Nì air bith goirtichte cha'n ith sibh : 'nur n-àibh-còmlnuidh uile ithidh sibh aran neo-ghoirtichte.

21 An sin ghairm Maois air seanairéan Israeil uile, agus thubhairt e riu, Tairngibh a mach, agus gabhaibh dhuibh féin uan, a réir bhuir teaghlaichean, agus marbhaibh a' chàisg.

22 Agus gabhaidh sibh bad hìsoip, agus tumaidh sibh e san fhuil a ta san t-soitheach, agus beanaidh sibh do'n àrd-dorus, agus do'n dà ursainn, leis an fhuil a ta san t-soitheach: agus cha téid a h-aon agaibh a mach air dorus a thighe gu ruig a' mhaduinn.

23 Agus théid an Tighearna thairis a bhualadh nan Eiphiteach; agus an uair a chi e 'n fhuil air an àrd-dorus, agus air an dà ursainn, théid an Tighearna thairis air an dorus, agus cha léig e leis a' mhillteir teachd a steach d'ur tighibh gu' bualadh.

24 Agus gleidhidh sibh an nì so mar ordugh dhuibh féin, agus d'ur mic², gu sìorruidh.

25 Agus tarlaidh, 'nuair a théid sibh a steach do'n fhearann a bheir an Tighearna dhuibh, a réir mar a gheall e, gu'n gléidh sibh an t-seirbhis so.

26 Agus tarlaidh, 'nuair a their bhuir clann rìbh, Ciod is ciall dhuibh leis an t-seirbhis so?

27 Gu'n abair sibh, So ìobairt càisge an Tighearn, a chaidh thairis air tighibh chloinn Israeil san Eiphit, 'nuair a bhuail e na h-Eiphitich, agus a shaor e ar tigh-ean-ne. Agus chrom an sluagh iad féin, agus rinn iad aoradh.

28 Agus dh'fhalbh clann Israeil, agus rinn iad mar so; mar a dh'àithn an Tighearna do Mhaois agus do Aaron, mar sin rinn iad.

29 Agus air meadhon na h-oidhche sin féin bhuail an Tighearna gach ceud-ghin ann an tìr na h-Eiphit, o cheud-ghin Pharaoh a shuidh air a rìgh-chaitheir, gu ceud-ghin a' chiomaich³ a bha ann an slochd a' phriosain⁴; agus gach ceud-ghin ainmhidh.

30 Agus dh'éirich Pharaoh san oidhche, e féin agus a sheirbhiseich uile, agus na h-Eiphitich uile; agus bha éigheach mhòr san Eiphit: oir cha robh tigh anns nach robh neach marbh.

31 Agus ghairm e air Maois agus air Aaron san oidhche, agus thubhairt e, Eiribh, rachaibh a mach á meadhon mo shluaigh, aràon sibhse agus clann Israeil :

agus rachaibh, deanaibh seirbhis do'n Tighearna, mar a thubhairt sibh.

32 Thugaibh leibh mar an ceudna bhuir treudan, agus bhuir buar, mar a thubhairt sibh, agus imichibh: agus beannaichibh mise mar an ceudna.

33 Agus thug na h-Eiphitich dian-sparradh⁵ do'n t-sluagh, a chum gu'n cuireadh iad le cabhaig a mach as an tìr iad; oir thubhairt iad, Is daoine marbha sinn gu léir.

34 Agus ghabh an sluagh an taois mun do ghoirticheadh i, an amaran-fuinidh ceangailte 'nan eudach air an guailibh.

35 Agus rinn clann Israeil a réir focail Mhaois: agus dh'iarr iad o na h-Eiphitich seudan airgid, agus seudan òir, agus eudach.

36 Agus thug an Tighearna deadh-ghean do'n t-sluagh ann an sùilibh nan Eiphiteach, agus thug iad an coingheall⁶ dhoibh: agus chreach iad na h-Eiphitich.

37 Agus dh'imich clann Israeil o Rameses gu Sucot, mu thimchioll sè ceud mìle fear d'an cois, a thuilleadh air cloinn.

38 Agus mar an ceudna chaidh iomadaidh do shluagh eile⁷ suas maille riu, agus treudan, agus buar, ro mhòran spréidhe⁸.

39 Agus dh'fhuin iad do'n taois a thugadh a mach as an Eiphit breacaga neo-ghoirtichte, oir cha do ghoirticheadh i; do bhrìgh gu'n d'fhuadaicheadh iad a mach as an Eiphit, agus nach b'urrainn iad fuireach, agus mar an ceudna nach do dheasaich iad biadh dhoibh féin.

40 A nis b'i aimsir cuairte chloinn Israeil, a bha iad a chòmhnuidh san Eiphit, ceithir cheud agus deich bliadhna fichead.

41 Agus aig ceann nan ceithir cheud agus nan deich bliadhna thar fluchead, air an là sin féin chaidh slògh an Tighearn uile mach á tìr na h-Eiphit.

42 Is oidhche so gu bhi air a coimhead⁹ gu h-àraidh do'n Tighearn, air son an toirt-san a mach á tìr na h-Eiphit: so an oidhche sin gu bhi air a coimhead do'n Tighearna le cloinn Israeil uile 'nan ginealachaidh.

43 Agus thubhairt an Tighearna ri Maois agus ri h-Aaron, So ordugh na càisge cha'n ith coigreach¹⁰ sam bith e dhith.

44 Agus gach seirbhiseach duine, a cheannaicheadh le h-airgid, an uair a thimchioll-ghearras tu e, an sin ithidh e dhith.

45 Cha'n ith coigreach, no seirbhiseach tuarasdail dhith.

46 Ann an aon tigh ithear i: cha ghiùlain thu bheag do'n fheoil a mach as an

¹ co ac'. ² dhuil féin agus do d'mhic. Eabh.

³ a' bhràighde; the captive. Sasg. ⁴ na gaintir.

⁵ geur-impidh. ⁶ iasad.

⁷ cumasg mòr sluagh.

⁸ ro-mhòran nì.

⁹ cumail, gleidheadh.

¹⁰ mac coigrich. Eabh.

tigh; ni mò a bhriseas sibh cnàimh dhith.

47 Nì coimhthional Israeil uile sin.

48 Agus an uair a bhios coigreach air chuairt maille riut, agus a chumas e a' chàisg do'n Tighearna, timchioll-ghearrar gach friomach aige, agus an sin thigeadh e am fagus g' a cumail, agus bithidh e mar neach a rugadh san tìr: ach cha'n ith neach sam bith neo-thimchioll-ghearrta dhith.

49 Bithidh an t-aon lagh aige-san a rugadh san tìr, agus aig a' choigreach a ta air chuairt 'nur measg.

50 Mar so rinn clann Israeil uile; mar a dh'àithn an Tighearna do Mhaois agus do Aaron, mar sin rinn iad.

51 Agus, air an là sin féin, thug an Tighearna mach clann Israeil á tìr na h-Eiphit, a réir an slògh¹.

CAIB. XIII.

1 *Gach ceud-ghin air a naomhachadh do'n Tighearna.*

3 *Dh'orduicheadh cuimhne na càisge. 21 Clann Israeil air an treòrachadh le Dia air an slighe le meall neoil san là, agus le meall teine san oidheche.*

A Gus labhair an Tighearna ri Maois, ag ràdh.

2 Naomhaich dhomhsa gach ceud-ghin, ge b'e air bith a dh'fhosgla a' bhrù² am measg chloinn Israeil, eadar dhuine agus ainmhidh; is leamsa e.

3 Agus thubhairt Maois ris an t-sluagh, Cuimhnichibh an là so, air an d'fhàinig sibh a mach as an Eiphit, á tigh na daorsa; oir le làimh thréin thug an Tighearna a mach sibh as a sin: agus cha'n ithear³ aran goirtichte.

4 Air an là 'n diugh thàinig sibh a mach, am mìos Abib.

5 Agus an uair a bheir an Tighearna steach thu do thìr nan Canaanach, agus nan Hiteach, agus nan Amorach, agus nan Hibheach, agus nan Iebusach, a mhionnaich e do d' aithrichibh gu'n tugadh e dhuit, fearann a's sruthadh le bainne agus le mil, an sin coimhididh tu an t-seirbhis so anns a' mhìos so.

6 Seachd làithean ithidh tu aran neo-goirtichte agus air an t-seachdamh là bithidh féill⁴ do'n Tighearna.

7 Ithear aran neo-goirtichte seachd làithean; agus cha'n fhaicear aran goirtichte agad, agus nì mò a chlithear taois ghoirt agad ann ad chriochaibh uile.

8 Agus innsidh tu do d' mhac san là sin, ag ràdh, *Nithear so* air sgàth an nì sin a rinn an Tighearna dhomhsa, 'nuair a thàinig mi mach as an Eiphit.

9 Agus bithidh e dhuit mar chomharadh air do làimh, agus mar chuimhneachan eadar do shùilibh, a chum gu'm bi lagh

an Tighearna ann ad bheul; oir le làimh thréin thug an Tighearna mach thu as an Eiphit.

10 Air an aobhar sin coimhididh⁵ tu an t-ordugh so 'na thràth⁶ féin o bhliadhna gu bliadhna.

11 Agus an uair a bheir an Tighearna steach thu do thìr nan Canaanach mar a mhionnaich e dhuitse, agus do d' aithrichibh, agus a bheir e dhuit e,

12 An sin cuiridh tu air leth do'n Tighearna gach nì a dh'fhosgla a' bhrù, agus gach ceud-ghin a thig o ainmhidh a's leatsa; *buinidh iadsan a ta frionn 'nam measg* do'n Tighearna.

13 Agus gach ceud-ghin asail fuasgailidh tu le h-uann; agus mur fuasgail thu e, an sin brisidh tu 'amhach: agus gach ceud-ghin duine am measg do chloinne fuasgailidh tu.

14 Agus an uair a dh'fhèoraicheas do mhac dhìot san aimsir ri teachd, ag ràdh, Ciod e so? an sin their thu ris, Le làimh thréin thug an Tighearna mach sinn as an Eiphit, á tigh na daorsa:

15 Agus an uair a chruaidhich Pharaoh e féin, agus nach b'àill leis ar leigeadh air falbh, an sin mharbh an Tighearna gach ceud-ghin ann an tìr na h-Eiphit, araon ceud-ghin duine, agus ceud-ghin ainmhidh; air an aobhar sin, iobraidh mi do'n Tighearna gach nì a dh'fhosgla a' bhrù, *ma' s* frionnaich *iad*, ach uile cheud-ghin mo chloinne fuasgailidh mi.

16 Agus bithidh e mar chomharadh air do làimh, agus mar eudanan eadar do shùilibh; oir le làimh thréin thug an Tighearna a mach sinn as an Eiphit.

17 Agus eadhon an uair a leig Pharaoh do'n t-sluagh imeachd, cha do threòrach⁷ Dia iad *air* slighe tìre nam Philisteach, ged *a bha* sin aithghearr; oir thubhairt Dia, Air eagal gu'm bi aithreachas air an t-sluagh an uair a chi iad cogadh, agus gu'm pill iad do'n Eiphit.

18 Ach threòrach Dia an sluagh mu'n cuairt, air slighe fàsaich na mara ruaidhe: agus chaidh clann Israeil suas an ordugh catha á tìr na h-Eiphit.

19 Agus thug Maois cnàmhan⁸ Ioseiph leis: oir ghabh e mionnan teann do chloinn Israeil, ag ràdh, Gu cinnteach amhaireidh Dia oirbhe, agus bheir sibh suas mo chnàmhan leibh as a so.

20 Agus dh'imich iad o Shucot, agus champaich iad ann an Etam, ann an iomall an fhàsaich.

21 Agus chaidh an Tighearna rompa san là ann am meall⁹ neoil, a chum an treòrachadh air an t-slighe, agus san oidheche ann am meall teine, a thoirt soluis

¹ an armaithean.

² a' mhachlag; womb. Sasg.

³ cha'n ithear.

⁴ féisd.

⁵ gleidhidh.

⁶ àm.

⁷ cha d' thug.

⁸ cnàmhean.

⁹ stac, baideal; pillar. Sasg.

doibh; gu ìneachd a là agus a dh'oidhche.
22 Cha d' thug e air falbh an meall neoil san là, no 'm meall teine san oidhche, á làthair an t-sluaigh.

CAIB. XIV.

1 Chaidh Pharaoh an tòir air cloinn Israeil.
10 Rinn iadsan gearan an aghaidh Mhaois.
13 Thug esan comh-fhurtachd dhoibh. 21 Chaidh iad troimh 'n mhuir ruaidh. Bhàthadh na h-Eiphitich.

A GUS labhair an Tighearna ri Maois, ag ràdh.

2 Labhair ri cloinn Israeil, gu 'm pill iad, agus gu'n campaich iad fa chomhair Pihahiroit, eadar Migdol agus an fhairge, fa chomhair Bhaal-sephoin; fa choinneamh-san campaichidh sibh làimh ris an fhairge.

3 Oir their Pharaoh mu chloinn Israeil, Tha iad air seachran¹ san tùr, dh'iadh am fàsach mu'n timchioll.

4 Agus cruaidhichidh mise cridhe Pharaoh, agus théid e air an tòir, agus gheibh mise glòir a thaobh Pharaoh, agus a shlòigh uile; agus bithidh fios aig na h-Eiphitich gur mise an Tighearn. Agus rinn iad mar sin.

5 Agus dh'innsadh do rìgh na h-Eiphit gu'n do theich an sluagh: agus thionndaidh cridhe Pharaoh, agus a sheirbhis-each an aghaidh an t-sluaigh, agus thubhairt iad, Cìod e so a rinn sinn, gu'n do leig sinn le h-Israel ìneachd as ar seirbhis?

6 Agus bheartaich¹ e a charbad, agus thug e a shluagh maille ris;

7 Agus thug e leis sè ceud carbad taghta, agus uile charbadan na h-Eiphit, agus ceannardan orra uile.

8 Agus chruaidhich an Tighearna cridhe Pharaoh rìgh na h-Eiphit, agus lean e air tòir chloinn Israeil: agus chaidh clann Israeil a mach le làimh àird.

9 Ach chaidh na h-Eiphitich air an tòir (eich agus carbadan Pharaoh, agus a mharc-shluagh, agus 'armailt uile,) agus rug iad orra, agus iad a' campachadh làimh ris an fhairge, làimh ri Pihahiroit, fa chomhair Bhaal-sephoin.

10 Agus an uair a thàinig Pharaoh am fagus, thog clann Israeil suas an sùilean, agus, feuch, bha na h-Eiphitich air an tòir, agus bha eagal mòr orra: agus dh'èigh clann Israeil ris an Tighearn.

11 Agus thubhairt iad ri Maois, An ann a chionn nach robh uaighean san Eiplùt, a thug thu leat sinn gu bàs fhaghail san fhàsach? C'ar son a rinn thu so oirnn ar tabhairt a mach as an Eiphit?

12 Nach e so am focal a labhair sinn riut san Eiphit, ag ràdh, Leig leinn seirbhis a dheanamh do na h-Eiphitich? Oir b'fhearr dhuinn seirbhis a dheanamh do

na h-Eiphitich na bàs fhaghail san fhàsach.

13 Agus thubhairt Maois ris an t-sluagh, Na biodh eagal oirbh, seasaihb, agus faicibh slàinte an Tighearn, a dh'oibrich-eas e dhuibh an diugh; oir na h-Eiphitich a chunnaic sibh an diugh, cha'n fhaic sibh iad a chaidh tuilleadh.

14 Cogaidh an Tighearn³ air bhuir son, agus fanaidh sibhse 'nur tosd.

15 Agus thubhairt an Tighearn ri Maois, C'ar son a ta thu 'g éigheach riumsa? Abair ri cloinn Israeil dol air an aghaidh:

16 Ach tog-sa suas do shlat, agus sin a mach do làmh os ceann na fairge, agus sgoilt i; agus théid clann Israeil a steach am meadhon na fairge air *talamh* tioram.

17 Agus cruaidhichidh mise, eadhon mise, cridhe nan Eiphiteach, agus théid iad a steach 'nan déigh: agus gheibh mise glòir a thaobh Pharaoh, agus a thaobh a shlòigh uile, a thaobh a charbadan, agus a thaobh a mharc-shluagh.

18 Agus bithidh fios aig na h-Eiphitich gur mise an Tighearna, 'nuair a gheibh mi glòir a thaobh Pharaoh, a thaobh a charbadan, agus a thaobh a mharc-shluagh.

19 Agus dh'fhalbh aingeal an Tighearn a chaidh roimh champ Israeil, agus dh'imich e 'nan déigh; agus dh'fhalbh am meall neoil o 'm beulaobh, agus sheas e air an cùlaobh.

20 Agus thàinig e eadar camp nan Eiphiteach agus camp Israeil, agus bha e 'na neul, agus 'na dhorchadas dhoibh sud, ach shoillsich e 'n oidhche dhoibh so, air chor as nach d'thàinig a h-aon diubh am fagus d'a chéile rè na h-oidhche.

21 Agus shìn Maois a mach a làmh os ceann na fairge, agus thug an Tighearn air an fhairge dol air a h-ais le gaoth làidir o 'n ear, rè na h-oidhche sin, agus rinn e 'n fhairge 'na *talamh* tioram, agus roinneadh na h-uisgeachan.

22 Agus chaidh clann Israeil a steach am meadhon na fairge air *talamh* tioram, agus bha na h-uisgeacha 'nam balla dhoibh air an làimh dheis, agus air an làimh chlì.

23 Agus lean na h-Eiphitich, agus chaidh iad a steach 'nan déigh gu meadhon na fairge, eadhon eich Pharaoh uile, a charbadan, agus a mharc-shluagh.

24 Agus ann am faire na maidne dh'amhairc an Tighearn air sluagh nan Eiphiteach, troimh⁴ 'n mheall theine agus neoil; agus chlaoidh e armailt nan Eiphiteach.

25 Agus thug e air falbh rothan an carbad, air chor as gu'n do tharuingeadh iad gu trom. Agus thubhairt na h-Eiphitich, Teicheadmaid á làthair Israeil, oir

¹ air an amladh.

² dh'ullaich.

³ Nì an Tighearna cogadh.

⁴ trid. Ein.

tha 'n Tighearna a' cogadh leo-san an aghaidh nan Eiphiteach.

26 Agus thubhairt an Tighearna ri Maois, Sin a mach do làmh os ceann na fairge, chum gu'n tig na h-uisgeachan air an ais air na h-Eiphitich, air an car-badaibh, agus air am marc-shluagh.

27 Agus shin Maois a mach a làmh os ceann na fairge, agus phill an fhairge g'a ceart, an uair a shoillsich a' mhaduinn; agus theich na h-Eiphitich 'na h-aghaidh; agus chuir an Tighearna na h-Eiphitich fodha¹ am meadhon na fairge.

28 Agus phill na h-uisgeachan, agus dh'fhòlaich iad na carbad, agus am marc-shluagh, agus armait Pharaoh² uile, a thàinig san fhairge 'nan déigh: cha d'fhàgadh uiread 's a h-aon diubh.

29 Ach dh'imich clann Israel air *talamh* tioram am meadhon na fairge, agus bha na h-uisgeacha 'nam balla dhoibh air an làmh dheis, agus air an làmh chlì.

30 Mar so shaor an Tighearna Israel, air an là sin, á làimh nan Eiphiteach: agus chunnaic Israel na h-Eiphitich marbh air traigh na fairge.

31 Agus chunnaic Israel an obair³ mhòr sin a rinn an Tighearna air na h-Eiphitich, agus bha eagalan Tighearnair ant-sluagh, agus chreid iad an Tighearna, agus Maois a sheirbhiseach.

CAIB. XV.

1 *Laoidh Mhaois.* 22 *Tha'n sluagh a dh'ith uisge.* 23 *Rinneadh uisgeacha searbh Mharah mìlis dhoibh.* 27 *Thàinig iad gu h-Eitim.*

AN sin chàn⁴ Maois agus clann Israel an laoidh⁵ so do'n Tighearn, agus labhair iad, ag ràdh, Canaidh mise do'n Tighearna, oir thug e buaidh gu glòrmhor; ant-each agus a mharcach thilg e san fhairge.

2 'S e 'n Tighearna mo neart, agus mo dhàn⁶, agus tha e 'na shlàinte dhomh: is esan mo Dhia-sa, agus ni mi àite-còmhnuidh dha; Dia m'athar, agus àrdaichidh mi e.

3 Is fear-cogaidh an Tighearna; 'se an Tighearna a's ainm dhia.

4 Carbadan Pharaoh, agus 'armait thilg esan fhairge; agus tha rogha a cheannard-an air am bàthadh san fhairge ruaidh⁷.

5 Dh'fhòlaich na doimhneachdan iad; chaidh iad sìos do'n aigean mar chloich.

6 Rinneadh do dheas làmh, O Thighearna, glòrmhor ann an cumhachd; bliris do dheas làmh, O Thighearna, an nàmhaid 'na bhloighdibh.

7 Agus ann am meud t'òirdheircis

¹ thilg e iad bun os-ceann. ² do armait Pharaoh. Eabh. ³ làmh. Eabh. ⁴ sheinn.

⁵ òran. ⁶ m'òran. ⁷ mar chluich. ⁸ dh'ith i suas, chuir i as doibh. Eabh. ⁹ mar chruaich, mar mhicall.

chlaoidh thu iadsan a dh'éirich suas a' d' aghaidh; chuir thu t'fhearg a mach, loisg i suas⁸ iad mar asbluain.

8 Agus le anail do shròine chruinnich-eadh na h-uisgeacha; sheas na tuitte suas mar thor⁹, chruaidhich¹⁰ na doimhneachdan am meadhon na fairge.

9 Thubhairt an nàmhaid, Leanaidh mi, beiridh mi orra, roinnidh mi a' chreach: sàsuichear mo mhiann orra; rùsgidh mi mo chlaidheamh, sgriosaidh mo làmh iad¹¹.

10 Shéid thu le d' ghaoith, chòmhdaich an fhairge iad, chaidh iad fodha mar luaidh anns na h-uisgeachaibh làidir.

11 Cò 's cosmhul riuts' am measg nan Dé¹², a Thighearna? Cò *tha* cosmhul riut, glòrmhor ann an naomhachd, uamhsach¹³ ann am moladh¹⁴, a' deanamh mìlte iongantach?

12 Shin thu mach do dheas làmh; shluig an talamh suas iad.

13 Threòraich thu ann ad thròcair an sluagh so a shaor thu; thug thu iad ann ad neart a chum àite-còmhnuidh do naomhachd.

14 'Nuair a chluinneas na cinnich, bithidh eagail orra; thig doilgheas air luchd-àiteachaidh Phalestina.

15 An sin bithidh uamhann air cinnfheadhna¹⁵ Edoim, thig geilt-chrith air daoine treuna Mhoab; leagaidh air falbh luchd-àiteachaidh Chanaain uile.

16 Tuitidh uamhann agus eagail orra, le meud do ghairdein bithidh iad tosdach mar chloich, agus an téid do shluagh thairis, a Thighearna, agus an téid an sluagh so thairis, a cheannaich thu.

17 Bheir thu steach iad, agus suidhichidh tu iad ann an sliabh¹⁶ t' oighreachd-sa, anns an àit a rinn thu dhuit féin, a Thighearna, chum còmhnuidh a ghabhail ann, *san* ionad-naomha, a Thighearna, a dhaingnich do làmh-sa.

18 Rìghichidh an Tighearna gu saoghal nan saoghal.

19 Oir chaidh eich Pharaoh a steach le 'charbadaibh, agus le 'mharc-shluagh, san fhairge, agus thug an Tighearna uisgeacha na fairge air an ais orra; ach dh'imich clann Israel air *talamh* tioram am meadhon na fairge.

20 Agus ghlac Miriam a' bhan-fhàil, piuthar Aaron, tiompan 'na làmh; agus chaidh na mnathan uile mach 'na déigh le tiompanaibh agus le dannsa¹⁷.

21 Agus fhreagair Miriam iad, Canaibh do'n Tighearna, oir thug e buaidh gu glòr-

¹⁰ dhaingnichheadh. ¹¹ sealtbhaichidh mo làmh iad mar oighreachd, bithidh tighearnas aig mo làmh orra. Eabh. ¹² measg nan cumhachdach. ¹³ a' d' chùis eagail, urramach. ¹⁴ am molaibh. ¹⁵ ceannardua. ¹⁶ ann am béinn. ¹⁷ le fadagaibh.

mhor; an t-each agus a mharcach thilg e san fhaighe.

22 Mar sin thug Maois Israel o'n mhuir ruaidh, agus chaidh iad a mach gu fàsach Shuir, agus dh'imich iad trì làithean san fhàsach, agus cha d'fhuair iad uisge.

23 Agus an uair a thàinig iad gu Marah, cha b' urrainn iad uisgeacha Mharah òl, oir bha iad searbh; uime sin thugadh Marah mar ainm air.

24 Agus rinn an sluagh gearan¹ an aghaidh Mhaois, ag ràdh, Ciod a dh'òlas sinn?

25 Agus dh'éigh esan ris an Tighearn, agus nochd an Tighearna fiodh² dha, agus thilg e sna h-uisgeachaibh e, agus rinneadh na h-uisgeacha milis: ann an sin rinn e lagh agus orudh dhoibh, agus ann an sin dhearbhadh e iad;

26 Agus thubhairt e, Ma dh'éisdeas tu gu dùrachdach ri guth an Tighearna do Dhé, agus ma ni thu an ni sin a ta ceart 'na shealladh, agus ma bheir thu 'n aire d'a àitheantaibh, agus ma ghleidheas tu a reachdan³ uile, aon do na h-eucailibh⁴ a chuir mi air na h-Eiphitich, cha chuir mi ortsa; oir is mise an Tighearn a shlànuicheas thu.

27 Agus thàinig iad gu h-Elìm far an robh dà thobar dheug uisge, agus deich agus trì fichead crann⁵ pailme; agus champaich iad⁶ an sin làimh ris na h-uisgeachaibh.

CAIB. XVI.

1 Rinn clann Israeil gearan an aghaidh Mhaois agus Aaroin, a chionn gu'n robh iad gu'n bhiadh. 12 Chuireadh gearra-geòirt d'an iomsuidh, 14 agus mana. 16 Riaghailtean m'a thimchioll.

AGUS dh'fhalbh iad o Elim, agus thàinig coimhthional chloinn Israeil uile gu fàsach Shin a ta eadar Elim agus Sinai, air a' chùigeadh là deug do'n dara mìos an déigh dhoibh teachd a mach á tìr na h-Eiphit.

2 Agus rinn coimhthional chloinn Israeil uile gearan an aghaidh Mhaois agus Aaroin san fhàsach.

3 Agus thubhairt clann Israeil ri u, B'fhearr gu'm faigheamaid bàs le làimh an Tighearn ann an tìr na h-Eiphit, an uair a bha sinn 'nar suidhe làimh ris na poitibh feòla, agus an uair a dh'ith sinn aran gu'r sàth; oir thug sibh a mach sinn do'n fhàsach so, a mharbhadh a' choimhthionail so uile le h-oeras.

4 An sin thubhairt an Tighearna ri Maois, Feuch, frasaidd mise dhuibh aran o nèamh, agus theid an sluagh a mach, agus cruinnichidh iad cuibhrionn gach là air an là sin féin, a chum as gu'n dearbh

mi iad, co ac' a ghluaiseas iad ann am' lagh, no nach ghluais.

5 Agus air an t-seathadh là ulluichidh iad an *ni sin* a bheir iad a steach, agus bithidh e dhà uibhir agus a chruinnicheas iad gach là *eile*.

6 Agus thubhairt Maois agus Aaron ri cloinn Israeil uile, Mu fheasgar, an sin bithidh fios agaibh gu'n d' thug an Tighearn a mach sibh á tìr na h-Eiphit:

7 Agus sa' mhaduinn, an sin chì sibh glòir an Tighearn; do bhrìgh gu bheil e a' cluinntinn bhur gearain an aghaidh an Tighearn: Agus ciod sinne, gu bheil sibh a' deanamh gearain 'nar n-aghaidh?

8 Agus thubhairt Maois, *Bithidh a' chùis mar so* 'nuair a bheir an Tighearna dhuibh san fheasgar feoil r'a h-ithedh, agus aran sa' mhaduinn gu'r sàth; do bhrìgh gu bheil an Tighearn a' cluinntinn bhur gearain a ta sibh a' deanamh 'na aghaidh: Agus ciod sinne? cha'n ann 'nar n-aghaidh-ne *tha* bhur gearan, ach an aghaidh an Tighearna.

9 Agus thubhairt Maois ri h-Aaron, Abair ri coimhthional chloinn Israeil uile, Thigibh am fasus an làthair an Tighearn, oir chual' e bhur gearan.

10 Agus an uair a labhair Aaron ri coimhthional chloinn Israeil uile, dh'amhairc iad a dh'iomnsuidh an fhàsaich, agus, feuch, dh'fhoillsicheadh glòir an Tighearn ann an neul.

11 Agus labhair an Tighearna ri Maois, ag ràdh,

12 Chuala mi gearan chloinn Israeil; labhair ri u, ag ràdh, Mu fheasgar ithidh sibh feoil, agus sa' mhaduinn sàsuichear sibh le h-aran: agus bithidh fios agaibh gur mise an Tighearna bhur Dia.

13 Agus an uair a bha 'm feasgar ann, an sin thàinig na gearra-geòirt⁸ a nìos, agus chòmhdaich iad an camp; agus anns a' mhaduinn bha 'n drùchd 'na luidhe mu thimchioll a' chaimp.

14 Agus an uair a dh'éirich an drùchd a bha 'na luidhe suas, feuch, bha air aghaidh an fhàsaich 'n beag cruinn, beag mar an liath-reodh air an talamh.

15 Agus an uair a chunnaic clann Israeil e, thubhairt iad gach aon r'a chèile, Mana⁹: oir cha robh fhios aca ciod e. Agus thubhairt Maois ri u, So an t-aran a thug an Tighearna dhuibh r'a itheadh.

16 So an ni a dh'àithn an Tighearna, Cruinnichibh dheth gach duine a réir 'itheannaich, omer do gach neach a réir àireimh bhur n-anamanna, gabhadh gach duine agaibh air an son-san a ta 'na bhùth.

17 Agus rinn clann Israeil mar sin, agus

¹ monmhor, duarman.

² craobh.

³ orduighean, 'àitheantan.

⁴ euslaintibh.

⁵ craobh. ⁶ shuidhich iad am pùbail, thàmh iad.

⁷ ann mo. ⁸ quails. Sasg. ⁹ Ciod e so? Eabh.

chruinnich iad, cuid ni bu mhò, agus cuid ni bu lugha¹.

18 Agus an uair a thomhais iad e le li-omer, cha robh a bheag thairis aige-san a chruinnich ni bu mhò, agus air-san a chruinnich ni bu lugha, cha robh uireasbhuidh: chruinnich *gach* duine a réir 'ith-eannaich.

19 Agus thubhairt Maois riu, Na fàgadh duine sam bith dheth gu madainn.

20 Gidheadh cha d'èisd iad ri Maois, ach dh'fhàg cuid diubh dheth gu maduinn, agus ghlin e cnuimhean, agus lobh e: Agus bha corruich air Maois riu.

21 Agus chruinnich iad e air gach maduinn, gach duine a réir 'itheannaich; agus an uair a dh'fhàs a' ghrian teth, leaghadh e.

22 Agus air an t-seathadh là chruinnich iad a dhà uiread arain, dà omer air son *gach* aoin: agus thàinig uachdarain a' choimhthionail uile, agus dh'innis iad sin do Mhaois.

23 Agus thubhairt e riu, So an ni a labhair an Tighearn, *Bithidh* fois na sàbaid naomha do'n Tighearn am màireach: a' mheud¹ 's a tha sibh gu fhineadh, fuinibh an diugh, agus a' mheud² 's a tha sibh gu bhrùicheadh, brùiclibh; agus gach ni a bhios thairis, tairisibh suas dhuibh féin gu maduinn.

24 Agus thaisg iad suas e gu maduinn, mar a dh'àithn Maois; agus cha do lobh e, ni mò a bha cnuimh sam bith ann.

25 Agus thubhairt Maois, Ithibh sin an diugh, oir tha sàbaid ann an diugh do'n Tighearn; an diugh cha'n fhaigh sibh e sa' mhachair.

26 Sè làithean cruinnichidh sibh e, ach air an t-seachdamh là *bithidh* an t-sàbaid; cha bhi e ann air an là sin.

27 Agus tharladh air an t-seachdamh là gu'n deachaidh *cuid* do'n t-sluagh a mach g'a chruinneachadh, agus cha d'fhuair iad a bheag.

28 Agus thubhairt an Tighearna ri Maois, Cia fhad a dhiùltas sibh m'aitheanta-sana choimhead², agus mo reachdan.

29 Faicibh, do bhrìgh gu'n d'thug an Tighearna dhuibh an t-sàbaid, air an aobhar sin tha e a' tabhairt³ dhuibh air an t-seachdadh là aran dhà là: fanaibh, *gach* duine 'na àite féin; na rachadh duine sam bith a mach as 'àite air an t-seachdamh là.

30 Mar sin ghabh an sluagh fois air an t-seachdamh là.

31 Agus thug tigh Israeil Mana mar ainm air; agus bha e mar fhrois corian-

deir, geal, agus a bhlas mar abhlain⁴ air an deanamh le mil.

32 Agus thubhairt Maois, So an ni a dh'àithn an Tighearna, Lion omer dheth gu bhi air a ghleidheadh air son blur ginealach, chum gu faic iad an t-aran leis do bheathaich mi sibh san fhàsach, an uair a thug mi mach sibh á tìr na h-Eiphit.

33 Agus thubhairt Maois ri h-Aaron, Gabh soitheach⁵, agus cuir ann làn omeir do Mhana⁶, agus taisg e an làthair an Tighearna, gu bhi air a ghleidheadh air son bhur ginealach.

34 Mar a dh'àithn an Tighearna do Mhaois, mar sin thaisg Aaron e an làthair na Fianuis, gu bhi air a ghleidheadh.

35 Agus dh'ith clann Israeil am Mana dà fhichead bliadhna, gus an d'thàinig iad gu tìr àitichte: dh'ith iad am Mana, gus an d'thàinig iad gu crìch tìre Chananaan.

36 A nis is e omer an deicheamh *cuid* do ephah.

CAIB. XVII.

1 An sluagh ri gearan air son dìth uisge aig Rephidim. 5 Chuireadh Maois do'n charraig ann an Horeb, as an d'thàinig uisge mach. 8 Thugadh buaidh air Amalec.

A GUS dh'imich coimhthional chloinn Israeil uile o fhàsach Shin, a réir an turusan, mar a dh'àithn an Tighearn, agus champaich iad ann an Rephidim; agus cha robh uisge ann do'n t-sluagh ri òl.

2 Uime sin rinn an sluagh consachadh⁷ ri Maois, agus thubhairt iad, Thoir⁸ dhuinn uisge chum as gu'n òl sinn. Agus thubhairt Maois riu, C'ar son a ta sibh a' consachadh riumsa? C'ar son a bhros-naicheas sibh⁹ an Tighearn?

3 Agus mhiannaich an sluagh uisge¹⁰ ann an sin; agus rinn an sluagh gearan an aghaidh Mhaois, agus thubhairt iad, C'ar son so a thug thu mios sinn as an Eiphit, a chum sinn féin a mharbhadh, agus ar clann, agus ar spréidh le tart?

4 Agus dh'éigh Maois ris an Tighearna, ag ràdh, Cìod a ni sinn ris an t-sluagh so? is beag nach 'eil iad g' am chlachadh.

5 Agus thubhairt an Tighearna ri Maois, Imich roimh 'n t-sluagh, agus thoir leat *cuid* do sheanairibh Israeil; agus do shlat leis an do bhual thu an amhaib, gabh a' d' làimh, agus bi g' imeachd:

6 Feuch, seasaidh mise romhad an sin, air a' charraig ann an Horeb, agus buailidh tusa a' charraig, agus thig uisge mach aisde, a chum gu'n òl an sluagh. Agus rinn Maois mar sin ann an sealladh sheanairian Israeil.

¹ bu lagha. ² a ghleidheadh. ³ a' toirt.

⁴ bhreacagan. ⁵ poit. ⁶ Man. Eabh.

⁷ throid an sluagh. ⁸ Tabhair.

⁹ dhearbhas sibh, bhuaireas sibh, chuireas sibh cathachadh air.

¹⁰ bha tart uisge air an t-sluagh.

7 Agus thug e mar ainm air an àite Masah agus Meribah, air son consachaidh¹ chloinn Israeil, agus do bhrìgh gu'n do bhrònuich² iad an Tighearn, ag ràdh, Am bheil an Tighearna 'nar measg, no nach 'eil?

8 An sin thàinig Amalec, agus chog e ri h-Israel ann an Rephidim.

9 Agus thubhairt Maois ri Iosua, Tagh a mach dhuinn daoine, agus falbh a mach, cog ri h-Amalec: am màireach seasaidh mise air mullach an t-sléibh, agus slat Dhé a'm' làimh.

10 Agus rinn Iosua mar a thubhairt Maois ris, agus chog e ri h-Amalec. Agus claidh Maois, Aaron, agus Hur, suas gu mullach an t-sléibh.

11 Agus an uair a thog Maois suas a làmh, an sin bhuadhaich Israel, agus an uair a leag e sìos a làmh, bhuadhaich Amalec.

12 Ach bha làmhan Mhaois trom, agus ghabh iad clach, agus chuir iad fuidhe *i*, agus shuidh e oirre: agus chum Aaron agus Hur suas a làmhan, fear *dhiubh* air aon taobh, agus fear air an taobh eile: agus bha a làmhan seasmhach gu luidhe³ na gréine.

13 Agus chlaoidh Iosua Amalec agus a dhaoine le faobhar a' chlaidheimh.

14 Agus thubhairt an Tighearna ri Maois, Sgrìobh so *mar* chuimhneachan ann an leabhar, agus aithris e ann an cluasaibh Iosua; oir dubhaidh mise as gu tur cuimhne Amaleic o *bhi* fo⁴ nèamh.

15 Agus thog Maois altair, agus thug e Iehobhah-Nisi mar ainm oirre;

16 Oir thubhairt e, do bhrìgh gu'n do mhionnaich an Tighearna, *gu'm bi* cogadh aig⁵ an Tighearna ri h-Amalec o linn gu linn.

CAIB. XVIII.

1 Thug Ietro a bhean agus a dhithis mhac a dh'ionnsuidh Mhaois. 7 Thug Maois aoidheachd dha, 13 agus ghabh e a chomhairle.

NUAIR a chuala Ietro, sagart Mhidiaim, athair-céile Mhaois, gach ni a rinn Dia air son Mhaois, agus air son Israeil a shluaigh, gu'n d'thug an Tighearn a mach Israel as an Eiphit;

2 An sin thug Ietro, athair-céile Mhaois, leis Siporah bean Mhaois, an déigh dha a cur air a h-ais.

3 Agus a dithis mhac, d'am b' ainm do h-aon diubh Gersom, (oir thubhairt e, A'm' choigreach bha mi ann an tìr choimlich:)

4 Agus b'e ainm an fhir eile Elieser, (oir rinn Dia m'athar, thubhairt e, còmh-

nadh rium, agus shaor e mi o chlaidheamh Pharaoh.)

5 Agus thàinig Ietro, athair-céile Mhaois, agus a mhic, agus a bhean, a dh'ionnsuidh Mhaois do'n fhàsach, far an do champaich e aig sliabh Dhé.

6 Agus thubhairt e ri Maois *Tha* mise d'athair-céile Ietro, air teachd a'd' ionnsuidh, agus do bhean, agus a dithis mhac maille rithe.

7 Agus chaidh Maois a mach an coinn-eamh 'athar-céile, agus rium e ùmhlachd⁶ dha, agus phòg se e, agus dh'altaich iad beatha a chéile⁷: agus thàinig iad a steach do'n bhùth.

8 Agus dh'innis Maois d'a athair-céile gach *ni* a rinn an Tighearn air Pharaoh, agus air na h-Eiphitich air sgàth Israeil, gach saothair⁸ a thàinig orra air an t-slighe, agus *cionnus* a shaor an Tighearn iad.

9 Agus rinn Ietro gairdeachas á leth a' mhaith sin uile a rinn an Tighearna do Israel, a shaor e á làimh nan Eiphiteach.

10 Agus thubhairt Ietro, Beannaichte gu robh an Tighearn, a shaor sibh á làimh nan Eiphiteach, agus á làimh Pharaoh, a shaor an sluagh o *bhi* fo làimh nan Eiphiteach.

11 A nis, tha fios agam gur mò an Tighearna na na h-uile dhée; oir anns an nì sin anns an do rinn iad gu h-uairbhlach, *bha esan* os an ceann.

12 Agus ghabh Ietro, athair-céile Mhaois, tabhartas-loisgte agus iobairtean do Dhia: agus thàinig Aaron, agus uile sheanairan Israeil, a dh'itheadh arain maille ri athair-céile Mhaois an làthair Dhé.

13 A nis air an là màireach shuidh Maois gu breth a thoirt air an t-sluagh; agus sheas an sluagh làimh ri Maois o mhaduinn gu feasgar.

14 Agus an uair a chunnaic athair-céile Mhaois gach *ni* a rinn e ris an t-sluagh, thubhairt e, Ciod e an nì so a tha thu deanamh ris an t-sluagh? C'ar son a ta thusa a'd' shuidhe a'd' aonar, agus a ta'n sluagh uile a' seasmh làimh riut o mhaduinn gu feasgar?

15 Agus thubhairt Maois r'a athair-céile, Do bhrìgh gu'n tig an sluagh a m' ionnsuidh a dh'fhiosrachadh o Dhia.

16 'Nuair a bhios cùis aca, thig iad a m' ionnsuidh, agus bheir mi breth eadar duine agus duine, agus nochdaidh mi *dhoibh* orduighean Dhé, agus a laghamna.

17 Agus thubhairt athair-céile Mhaois ris, Cha mhaith an nì a ta thu deanamh.

18 Caithidh⁹ tu as gu tur, araon thu fèin, agus an sluagh so a ta maille riut,

¹ gcur-chainnt, comhstri. ² gu'n d'fheuch, gu'n do dhearbha. Eabh. ³ dol fodha, dol fuidhe.

⁴ fuidh.

⁵ gu'n cathaich.

⁶ chrom se e fèin. Eabh. ⁷ dh'fheadraich iad mu leis a chéile, ghabh iad sgeula mu shlàinte a chéile.

⁸ dragh.

⁹ Seargaidh.

oir a *ta* an ni so ro throm air do shon; cha'n 'eil e 'n comas duit a dheanamh a'd' aonar.

19 A nis ma ta éisd ri m' ghuth, bheir mi comhairl' ort, agus bithidh Dia maille riut: bi-sa air son an t-sluaigh an làthair Dhé, agus bheir thuna cuisean a dh'ionnsuidh Dhé:

20 Agus teagaisgidh tu dhoibh na h-orduighean agus na laghanna, agus nochdaidh tu dhoibh an t-slighe air an còir dhoibh imeachd, agus an obair a's còir dhoibh a dheanamh.

21 Agus taghaidh tu mach as an t-sluagh uile, daoine foghainteach¹, air am bi eagal Dé, daoine firinneach, a dh'fhuathaicheas sannt; agus cuiridh tu iad os an ceann 'nan uachdaranaibh² mhillte, 'nan uachdaranaibh cheuda, 'nan uachdaranaibh leth-cheuda, agus 'nan uachdaranaibh dheichnear.

22 Agus bheir iad breth air an t-sluagh anns gach àm; ach gach cùis mhòr bheir iad a d' ionnsuidh-sa, agus air gach cùis bhig bheir iad féin breth: mar sin bithidh e ni's eutruime dhuitse, agus iomcharaidh iadsan *an eallach* maille riut.

23 Mu ni thu an ni so, agus gu'n àithn Dia sin dhuit, an sin is urrainn thu seasamh ris, agus mar an ceudna théid an sluagh so uile d'an àite féin an sìth.

24 A nis dh'éisd Maois ri guth 'atharcéile, agus rinn e gach ni a thubhairt e.

25 Agus thagh Maois daoine foghainteach a mach á h-Israel uile, agus rinn e iad 'nan ceannardaibh air an t-sluagh; 'nan uachdaranaibh mhillte, 'nan uachdaranaibh cheuda, 'nan uachdaranaibh leth-cheuda, agus 'nan uachdaranaibh dheichnear.

26 Agus thug iad breth air an t-sluagh anns gach àm: na cuisean cruaidh thug iad a dh'ionnsuidh Mhaois, ach air gach cùis bhig thug iad féin breth.

27 Agus leig Maois le 'athair-céile imeachd; agus dh'fhalbh e roimhe d'a thír féin.

CAIB. XIX.

1 Thàinig an sluagh gu fàsach Shinai. 3 Teachd-airreachd Dhé do'n t-sluagh á sliabh Shinai. 8 Am freagradh. 12 Cha'n fheudadh neach air bith beantuinn ris an t-sliabh.

ANNS an treas mìos an déigh do chloinn Israel teachd a mach á tìr na h-Eiphit, san là sin féin thàinig iad gu fàsach Shinai.

2 Oir dh'imich iad o Rephidim, agus thàinig iad gu fàsach Shinai, agus champaich iad san fhàsach; agus champaich Israel ann an sin fa chomhair an t-sleibh³.

3 Agus chaidh Maois suas a dh'ionn-

suidh Dhé, agus ghairm an Tighearn air as an t-sliabh, agus ràdh, Mar so their thu ri tigh Iacoib, agus innsidh tu do chloinn Israel:

4 Chumnaic sibh na rinn mi ris na h-Eiphitich, agus *cionnus* a ghiùlain mi sibhse mar air sgiathaibh iolairean, agus a thug mi a m' ionusuidh féin sibh.

5 A nis ma ta, ma dh'éisdeas sibh da rìreadh ri m' ghuth, agus ma ghleidheas sibh mo choimhcheangal, an sin bithidh sibh dhomhsa 'nur n-ionmhas sònraichte⁴ os ceann nan uile shluagh: oir is leamsa an talamh uile.

6 Agus bithidh sibh dhomhsa 'nur rioghachd shagart, agus 'nur cinneach naomha. Is iad sin na briathran a labhras tu ri cloinn Israel.

7 Agus thàinig Maois agus ghairm e air seanairibh an t-sluaigh, agus chuir e rompa na briathra sin uile a dh'àithn an Tighearna dha:

8 Agus fhreagair an sluagh uile le h-aon ghuth, agus thubhairt iad, Gach ni a labhair an Tighearna, ni sinne. Agus thug Maois air ais briathran an t-sluaigh a dh'ionnsuidh an Tighearna.

9 Agus thubhairt an Tighearna ri Maois, Feuch, thig mise a d' ionnsuidh ann an neul tigh, a chum gu'n cluinn an sluagh an uair a labhras mi riut, agus mar an ceudna gu'n creid iad thu gu sìorruidh. Agus dh'innis Maois briathran an t-sluaigh do'n Tighearn.

10 Agus thubhairt an Tighearna ri Maois, Imich a dh'ionnsuidh an t-sluaigh, agus naomhaich iad an diugh, agus am màireach, agus nigheadh iad an eudach,

11 Agus bitheadh iad deas air cheann an treas là⁵; oir air an treas là thig an Tighearn a nuas ann an sealladh an t-sluaigh uile air sliabh Shinai.

12 Agus suidhichidh tu crìochan do'n t-sluagh mu'n cuairt, agus ràdh, Thugaibh an aire dhuibh féin, *nach* téid sibh suas do'n t-sliabh, agus *nach* bean sibh r'a iomall: gach neach a bheanas ris an t-sliabh, gu cinnteach cuirear gu bàs e.

13 Cha bhean làmh ris; oir gu deimhin clachar e, no sathar sleagh troimhe⁶: ma's ainmhidh no duine e, cha mhair e beò. 'Nuair a shéideas an trompaid⁷ ré uin' fhada, thig iadsan a nìs do'n t-sliabh.

14 Agus chaidh Maois sìos o'n t-sliabh a dh'ionnsuidh an t-sluaigh, agus naomhaich e 'n sluagh, agus nigh iad an eudach.

15 Agus thubhairt e ris an t-sluagh, Bithibh deas air cheann an treas là: na tigibh am fagus d'ur mnaibh.

16 Agus an uair a thàinig an treas là, anns a' mhaduinn bha tairneanaich agus dealanaich ann, agus neul tigh air an

¹ comasach.

² 'nan riaghladaraibh.

³ fa chomhair na beinne. ⁴ seilbh àraidh.

⁵ an coinneamh an treas là.

⁶ trid Eir.

⁷ an adharc; an stoc. Eir.

ECSODUS, XIX. XX.

t-sliabh, agus fuaime na trompaid ro àrd: agus chrìochnaich an sluagh uile a *bha sa'* champ.

17 Agus thug Maois an sluagh a mach as a' champ an coinneamh Dhé, agus sheas iad aig ìochdar an t-sléibh¹.

18 Agus bha sliabh Shinaì uile fo dheataich, do bhrìgh gu'n d'fhàinig an Tighearn a nuas air ann an teine; agus dh'èirich a dheatach suas mar dheataich àmhuinn², agus chrìochnaich an sliabh uile gu mòr.

19 Agus an uair a bha fuaime na trompaid a' dol a mach, agus a' fàs ro làidir, an sin labhair Maois, agus fhreagair Dia e le guth.

20 Agus thàinig an Tighearn a nuas air sliabh Shinaì, air mullach an t-sléibh: agus ghairm an Tighearna Maois *suas* gu mullach an t-sléibh, agus chaidh Maois suas.

21 Agus thubhairt an Tighearna ri Maois, Imich sìos, thoir àithne do'n t-sluagh³, air eagal gu'm bris iad a steach a dh'ionnsuidh an Tighearn a dh'amharc, agus gu'n tuit mòran diubh.

22 Agus mar an ceudna, na sagairt a thig am fagus do'n Tighearna, naomhaicheadh iad iad féin, air eagal gu'm bris an Tighearn a mach orra⁴.

23 Agus thubhairt Maois ris an Tighearna, Cha 'n 'eil e 'n comas do'n t-sluagh teachd a nìos do shliabh Shinaì; oir thug thu àithne dhuinn, ag ràdh, Cuir crìochan mu'n t-sliabh, agus naomhaich e.

24 Agus thubhairt an Tighearna ris, Imich romhad, falbh sìos, agus thig a nìos thu féin, agus Aaron maille riut; ach na briseadh na sagartan agus an sluagh a steach, gu teachd a nìos a dh'ionnsuidh an Tighearn, air eagal gu'm bris e mach orra.

25 Agus chaidh Maois sìos a dh'ionnsuidh an t-sluaigh, agus labhair e riu.

CAIB. XX.

1 *Na deich àitheantan.* 28 *Eagal air an t-sluagh.*

22 *Iodhol-aoradh air a thoirmeasg.*

AGUS labhair Dia na briathra so uile, ag ràdh,

2 *Is mise an Tighearna do Dhia a thug a mach thu á tìr na h-Eiphit, á tigh na daorsa.*

3 Na biodh dée sam bith eile agad a'm' làthair-sa.

4 Na dean dhuìt féin *dealbh* snaidhte⁵ no coslas sam bith a *dh' aon ni*, a *ta* sna nèamhaibh shuas, no air an talamh shios⁶, no sna h-uisgeachaibh fuidh 'n talamh.

5 Na crom thu féin sìos doibh, agus na dean seirbhis doibh: oir mise an Tighearna do Dhia, *is* Dia eudmhor mi, a' leantuinn aingidheachd nan aithrichean air

a' chloinn, air an treas⁷, agus air a' cheathramh *gincalach* dhiubhsan a dh'fhuathaicheas mi;

6 Agus a' nochdadh tròcair do mhiltibh dhiubhsan a ghràdhaicheas mi, agus a choimhideas m' àitheantan.

7 Na tabhair⁸ ainm an Tighearna do Dhé an diomhanas; oir chamheas an Tighearna neòchiontach *esan* a bheir 'ainm an diomhanas.

8 Cuimhnich là na sàbaid a naomhachadh.

9 Sè làithean saothraichidh tu, agus ni thu t'obair uile,

10 Ach *air an t-seachdamh là tha* sàbaid an Tighearna⁹ do Dhé: *air an là sin* na dean obair sam bith, thu féin, no do mhac, no do nighean, d'òglach, no do bhanoglach, no d' ainmhidh, no do choigreach a *ta* 'n taobh a stigh do d' gheataibh¹⁰:

11 Oir ann an sè làitheibh rinn an Tighearna na nèamhan agus an talamh, an fhaire, agus gach ni a *ta* amta; agus ghabh e fois air an t-seachdamh là: air an aobhar sin, bheannaich an Tighearna là na sàbaid, agus naomhaich se e.

12 Tabhair onoir do t'athair, agus do d' mhàthair; a chum gu'm bi do làithean buan air an fhearann a *tha* 'n Tighearna do Dhia a' toirt dhuit.

13 Na dean mortadh.

14 Na dean adhaltrannas.

15 Na dean gadachd.

16 Na tabhair fianuis bhréige an aghaidh do choimhearsnaich.

17 Na sanntaich tigh do choimhearsnaich; na sanntaich bean do choimhearsnaich, no 'òglach, no 'bhanoglach, no 'dhamh¹¹, no 'asal, no aon ni a's le do choimhearsnach.

18 Agus mhothaich¹², an sluagh uile na tairneanaich, agus na dealanaich, agus fuaime na trompaid, agus an sliabh fo dheataich¹³: agus an uair a chunnaic an sluagh *sin*, ghluais iad, agus sheas iad fad o làimh¹⁴.

19 Agus thubhairt iad ri Maois, Labhair thusa ruinn, agus éisdidh sinn: ach na labhradh Dia ruinn, air eagal gu'm faigh sinn bàs.

20 Agus thubhairt Maois ris an t-sluagh, Na biodh eagal oirbh, oir is ann a chum bhur dearbhadh a thàinig Dia, agus a chum gu'm bi 'eagal-san oirbh¹⁵, air choir as nach peacaich sibh.

21 Agus sheas an sluagh fad o làimh, agus thàinig Maois am fagus do'n dorchadas, fair an robh Dia.

22 Agus thubhairt an Tighearna ri Maois, Mar so their thu ri cloinn Israeil,

¹ aig bun na beinne.

² fuirneis, teallaich.

³ carail do'n t-sluagh. ⁴ gu'n sgrios an Tighearn iad.

⁵ iomhaigh snaidhte, ghràbhalla.

⁶ a bhos. ⁷ agus an treas. ⁸ Na toir.

⁹ do'n Tighearn. Eabh.

¹⁰ dhorasaidh.

¹¹ tharbh. Eabh.

¹² chunnaic. Eabh.

¹³ ag smùidrich.

¹⁴ fad as, fad air astar.

¹⁵ air bhur gnàis. Eabh.

Chunnaic sibh gu'n do labhair mi ribh o nèamh.

23 Cha dean sibh maille riumsa diathan airgid, agus diathan òir cha dean sibh dhuibh féin.

24 Altair do thalamh ni thu dhomhsa, agus iobraidh tu oirre do thabhartaish-loisgte, agus do thabhartaish-sith, do chaorach, agus do dhaimh¹: anns gach àite san toir mise fa'near gu'n cuimhnichear m'ainm, thig mi a d' ionnsuidh, agus beannaichidh mi thu.

25 Agus ma ni thu altair chloiche dhomh, cha tog thu i le cloich shnaidhte; oir ma thogas tu d'inneal-snaidhidh suas oirre, truaillidh tu i.

26 Ni mò théid thu suas air ceumaibh a dh'ionnsuidh m' altarach, a chum nach leigear ris do lomnochduidh² oirre.

CAIB. XXI.

1 *Laghanna a thaobh òglacha agus bhanoglach.*

14 *a thaobh an ti a mharbhas duine le ceilg,*

17 *agus a mhallaicheas 'athair no 'mhàthair, &c.*

ANIS is iad so na breitheanais a chuir-
eas tu rompa.

2 Ma cheannaicheas tu òglach³ Eabh-ruidheach, sè bliadhna ni e seirbhis; agus san t seachdamh théid e mach saor a nas-guidh.

3 Ma s'ann a mhàin leis féin a thàinig e steach, leis féin théid e mach; ma bha bean aige, théid mar an ceudna a bhean a mach maille ris.

4 Ma thug a mhaighstir bean dha, agus gu'n d'rug i dha mic no nigheana; bithidh a' bhean agus a clann aig a mhaighstir, agus théid esan a mach leis féin.

5 Ach ma their an t-òglach gu cinnteach, Is toigh leam mo mhaighstir⁴, mo bhean, agus mo chlann, cha téid mi mach saor:

6 An sin bheir a mhaighstir e chum nam breitheamh; bheir e mar an ceudnachum an doruis e, no chum ursainn an doruis, agus tollaidh a mhaighstir a chluas le minidh, agus ni e seirbhis dha gu bràth.

7 Agus ma reiceas⁵ duine a nighean gu bhí 'na banoglaich⁶, cha téid i mach mar a théid na h-òglach.

8 Mur taitinn i r'a maignstir, a rinn ceangal-pòsaidh rithe, an sin bheir e fa'near gu'm fuasgailear i: ri cinneach coimheach cha bhí comas aige a reiceadh, do bhrìgh gun do bhuin e gu cealgach rithe.

9 Agus ma cheangail e r'a mhac i, a réir modh nan nighean ni e rithe.

10 Ma ghabhas e bean eile dha féin, a biadh, a h-eudach, agus a dlìghe-pòsaidh⁷, cha lughdaich e⁸.

11 Agus mur dean e na trì *nithe* sin rithe, an sin théid i mach saor gun airgid.

12 Esan a bhuaileas duine, air chor as gu'm bàsaich e, gu cinnteach cuirear gu bàs e.

13 Agus mur do luìdh duine am plaid⁹, ach gu'n d'thug Dia thairis g'a làimh¹⁰ e, an sin sònruichidh¹¹ mis àite dhuìt d'an teich e.

14 Ach ma thig duine gu dàna air a choimhearsnach, gu 'mharbhadh le ceilg, o m' altair bheir thu e, a chum gu'm bàsaich e.

15 Agus esan a bhuaileas 'athair, no a mhàthair, gu cinnteach cuirear gu bàs e.

16 Agus esan a ghoideas duine, agus a reiceas e, no ma gheibhear 'na làimh e, gu cinnteach cuirear gu bàs e.

17 Agus esan a mhallaicheas 'athair no a mhàthair, gu cinnteach cuirear gu bàs e.

18 Agus ma ni daoine comhstrì, agus gu'm buail duine a choimhearsnach le cloich, no le 'dhorn, agus nach faigh e bàs, ach gu'n gabh e a leaba:

19 Ma dh'éireas e, agus gu'n siubhail e mach air a luirg, an sin saorar esan a bhuail e; a mhàin diolaidh e air son call 'uine, agus bheir e fa'near a leigheas gu h-iomlan.

20 Agus ma bhuaileas duine 'òglach, no 'bhanoglach le slait, agus gu'm bàsaich e fo 'làimh, diolar air gu deimhin:

21 Ach ma mhaireas a beò¹² là no dà là, cha diolar air; oir is e 'airgid e.

22 Agus ma ni daoine comhstrì, agus gu'm buail iad bean thorrach, agus gu'n dealaich i r'a cloinn, ach nach faigh i bàs¹³; cuirear gu cinnteach ùbhlair a, a réir mar a chuireas fear na mnà air, agus bheir e seachad mar a dh'orduicheas na breitheamhna¹⁴.

23 Ach ma gheibh i bàs, an sin bheir thu anam air son anama,

24 Suil air son sùla, fiacail air son fiacla, làmh air son làimhe, cos air son coise,

25 Losgadh air son losgaidh, lot¹⁵ air son lotaidh, buille air son buille.

26 Agus ma bhuaileas duine suil 'òglach, no suil a bhanoglaich, agus gu mill e i, leigidh e as saor e air son a shùla.

27 Agus ma chuireas e fiacail á 'òglach, no fiacail as a bhanoglaich, leigidh e as saor e air son 'fhiacla.

28 Agus ma reubas damh¹⁶ duine no bean le 'adhair, agus gu'm faigh e bàs, gu cinnteach clach an damh, agus cha 'n ithear 'fheoil; ach bithidh sealbhadair an daimh neo-chiontach.

¹ do bhuar. ² do dhìomhaireachd.

³ seirbhisach, tràill, daorsanach. ⁴ Tha gràdh agam air mo mhaighstir. ⁵ chreiceas.

⁶ ban-tràill. ⁷ dubharaidh; dowry. Sasg.

⁸ cha chuir e 'n lughad. ⁹ mur robh duine a'

feitheamh fath.

¹⁰ dh'ionnsuidh a làimhe.

¹¹ sònruichidh, suidhichidh, orduichidh.

¹² na shcasas e ris.

¹³ nach tig beud' na lorg.

¹⁴ breitheachan.

¹⁵ cneadh.

¹⁶ tarbh. Eabh.

29 Ach ma ghnàthaich an damh sàthadh¹⁷ le 'adhaircibh san aimsir roimhe sin, agus gu'n do dhearbhadh sin d'a shealbhadair, agus nach do ghléidh e stigh e, agus gu'n do mharbh e duine no bean, clachar an damh, agus cuirear mar an ceudna a shealbhadair gu bàs.

30 Ma chuirear *airgiod*-réitich air, an sin bheir e mar éiric 'anama ge b'e ni a chuirear air.

31 Ma's mac a reub e le 'adhairc, no ma's nighean a reub e, a réir a' bhreitheanaís so nìthear ris.

32 Ma reubas an damh òglach no banoglach, bheir e deich secel 'ar fhichead airgid d'am maighstir, agus clachar an damh.

33 Agus ma dh'fhosglas duine slochd, no ma chladhaicheas duine slochd, agus nach còmhdaich se e, agus gu'n tuit damh no asal ann:

34 Ni esan d' am buin an slochd suas an calldach, bheir e airgid d'an sealbhadair, agus is leis féin am *beathach* marbh.

35 Agus ma reubas damh neach air bith damh neach eile, agus gu'm faigh e bàs, an sin reicidh iad an damh beò, agus roinnidh iad an t-airgid a *fhuaradh* air a shon, agus roinnidh iad mar an ceudna an damh marbh.

36 No ma bha fhios gu'n do ghnàthaich an damh sàthadh le 'adhaircibh san aimsir roimhe sin, agus nach do ghléidh a shealbhadair a stigh e, gu cinnteach iocaidh e damh air son daimh, agus is leis féin am marbh.

CAIB. XXII.

1 *Laghanna a thaobh gadachd*, 5 a thaobh coimh-leasachaidh air son gach gnè choire, 16 a thaobh diolanaís, &c.

MA ghoideas duine damh no caora, agus gu marbh se e, no gu'n reic se e, diolaidh e² cùig daimh air son an daimh, agus ceithir caoraich air son na caorach.

2 Ma gheibhear gaduiche a' briseadh a stigh, agus gu'm buailear e, agus gu'm faigh e bàs, cha *dòrtear* fuil air a shon:

3 Ma bhios a' ghrianair éirigh air, *dòrtear* fuil air a shon. Ni esan a *ghoideas* dioladh iomlan³: mur bi ni sam bith aige, an sin reicear e air son a ghadachd.

4 Ma gheibhear gu cinnteach a' mheirle⁴ 'na làmh beò, ma's damh e, no asal, no caora; diolaidh e dubailt⁵ e.

5 Ma bheir duine fa'near gu'n ithear suas fearann no fhion-lios⁶, agus gu'n cuir e' ainmhidh *ann*, agus gu'm biadhar e ann

am fearann duine eile; do'n chuid a's fearr d'a fhearann féin, agus do'n chuid a's fearr d'a fhion-lios féin, ni e dioladh⁷.

6 Ma bhriseas teine a mach, agus gu'n tachair e air droighinn⁸, agus gu'n loisgear na cruachan arbhar, no 'n t-arbhar 'na sheasamh, no'n t-achadh⁹; ni esan a rinn an losgadh gu cinnteach dioladh.

7 Ma bheir duine d'a choimhearsnach airgid, no airneis, g'a ghleidheadh, agus gu'n goidear a tigh an duine e; ma gheibhear an gaduiche, diolaidh e dubailt¹⁰ e.

8 Mur faighear an gaduiche, an sin théid maighstir an tìghe a dh'ionnsuidh nam breitheamh, a dh'fheuchainn co ac' a shin e mach a làmh gu cuid a choimhearsnaich.

9 Airson gach gnè choire, air son daimh, air son asail, air son caorach, air son eud-aich, air son gach ni a chaidh a chall, a *their neach eile* gur leis féin; an làthair nam breitheamh thig cùis gach aoin diubh: *esan* a dhiteas na breitheamhna, diolaidh e dubailt d'a choimhearsnach.

10 Ma bheir duine d'a choimhearsnach asal, no damh, no caora, no ainmhidh sam bith g'a ghleidheadh, agus gu'm faigh e bàs, no gu'n ciurrar e, no gu'n iominear air falbh e, gun neach air bith g'a fhaicinn;

11 An sin bithidh mionnan an Tighearn eatorra le chéile, nach do shin e a làmh gu cuid a choimhearsnaich: agus gabhaidh a shealbhadair sin uaith, agus cha dean esan dioladh.

12 Agus ma ghoideadh uaith e, diolaidh e d'a shealbhadair.

13 Ma reubadh as a chéile e, thugadh e leis mar fhanuis e; air son an ni sin a chaidh reubadh, cha diol e.

14 Agus ma dh'iarras¹⁰ duine ni an coingheall¹¹ o' choimhearsnach, agus gu'n ciurrar e, no gu'm faigh e bàs, gun a shealbhadair a *bhi* mailleir; gu cinnteach diolaidh e.

15 Ach ma bhios a shealbhadair maille ris, cha diol e; ma's ni air son tuarasdail¹² e, thàinig e air son a thuarasdail.

16 Agus ma mheallas duine maighdean, nach 'eil fuidh cheangal-pòsaidh, agus gu'n luidh e leatha, gu cinnteach gabhaidh e i dha féin 'na mnaoi.

17 Ma dhiùltas a h-athair gu tur a tabhairt da, diolaidh e airgid a réir tochraidh nam maighdean¹³.

18 Cha leig thu le ban-fhiosaiche¹⁴ bhi beò.

19 Ge b'e neach a luidheas le h-ainmhidh, gu cinnteach cuirear gu bàs e.

¹ ma bha'n damh gunaidheach, ma b'abhuisd da purradh. ² bheir e uaith, aisgidh e, cuiridh e.

³ oir bu chòir dha dioladh iomlan a dheanamh.

⁴ an ni sin a ghoid e.

⁵ fion-ghàraidh.

⁶ dà-shillte.

⁷ coimhleasachadh.

⁸ gu'm faigh e droightonn. Eabh. ⁹ an raon.

¹⁰ ma ghabhas.

¹¹ air iasachd.

¹² luach-snoithreach. ¹³ a réir crodh nan òigh.

¹⁴ buidsich, ban-bhuidraich.

20 Esan a dh'ìobras do dhéibh *sambith*, nach do'n Tighearn a mhàin, gearrar as e.

21 Air coigreach cha chuir thu doilgheas, nì mò a nì thu foirneart air; oir bha sibh féin 'nur coigreach ann an tìr na h-Eiphit.

22 Ri bantraich¹ sam bith, no dilleachdan², cha bhuin sibh gu cruaidh.

23 Ma bhuineas tu air chor sam bith gu cruaidh riu, agus gu'n glaoth iad idir riumsa, éisdidh mise gu cinnteach r'an glaoth.

24 Agus lasaidh mo chorruidh suas, agus marbhaidh mi sibh leis a' chlaidheamh; agus bithidh bhuirmhàir nam bantraichibh, agus bhuir clann 'nan dilleachdain.

25 Ma bheir thu airgid an coingheall do neach air bith do m' shluaigh-sa a ta bochd làimh riut, cha bhi thu dha mar neach a chuireas airgid air riadh³; cha chuir thu riadh air.

26 Ma ghabhas tu idir eudach do choimhearsnaich ann an geall, mu dhòl fodha na gréine bheir thu air ais dha e:

27 Oir is e sin a chòmhach a mhàin, is e 'eudach d'a chroicinn e; ciod anns an coidil e? agus an uair a dh'éigheas e rium, éisdidh mise; oir a ta mi tròcaireach.

28 Air breitheamhnaibh⁴ cha labhair thu olc, agus uachdaran do shluaigh cha chàin⁵ thu.

29 Ceud-thoradh d'fhearainn, agus d'fhion-lios, gun dàil bheir thu seachad: ceud-ghùn do mhac bheir thu dhomhsa.

30 Mar sin nì thu ri d' chroth, agus ri d' chaoraich: seachd làithean bithidh e maille r'a mhàthair, air an ochdamh là bheir thu dhomhsa e.

31 Agus bithidh sibh 'nur daoine naomha dhomhsa, agus feoil sam bith a reubadh le fìadh-bheathaichibh sa' mhachair, cha'n ith sibh: chum nan con tilgidh sibh i.

CAIB. XXIII.

1 Laghanna a thaobh tuairesgeil no fìanuis bhréige, 12 a thaobh latha na sàbaid, &c. 22 Beannachadh air a ghealltuinn dhoibhsan a choimhideas reachd Dhé.

CHA tog thu tuairesgeul⁶ bréige: na cuir do làmh maille ris an aingidh gu bhi d'fìanuis air an encoir.

2 Cha lean thu a' mhòr-chuideachd a dh'ionnsuidh an uile, agus cha labhair⁷ thu ann an cùis, gu claoanadh an déigh a' mhòrain, chum breth fhiaradh.

3 Agus ri duine bochd cha bhi thu bàigh-eil⁸ na chùis.

4 Ma thachaireas tu air damh do nàmhaid, no 'asal a' dol air seacharan⁹, bheir thu gu cinnteach air ais e d'a ionnsuidh.

5 Ma chi thu asal duine aig am bheil fuath dhuit a' luidhe fo h-eallaich, agus gu'n smuainich thu air fantuinn o chòmh-nadh a dheanamh rithe, nì thu gu cinnteach còmh-nadh rithe.

6 Cha chlaon¹⁰ thu breth do bhochd 'na chùis.

7 O chùis bhréige cum thu féin am fad; agus an neòchiontach agus an t-ionraic na marbh: oir cha 'n fhìreanaich mise an t-aingidh.

8 Agus tiodhlac¹¹ cha ghabh thu; oir dallaidh tiodhlac na daoine glìce, agus claoaidh e briathra nan daoine ionraic.

9 Agus air coigreach na dean foirneart: oir is aithne dhuibh inntinn¹² coigreach, do bhrìgh gu'n robh sibh féin 'nur coigreach ann an tìr na h-Eiphit.

10 Agus sè bliadhna cuiridh tu t'fhearann, agus cruinnichidh tu stigh a thoradh¹³.

11 Ach air an t-seachdamh fàgaidh tu mach¹⁴, e, agus leigidh tu leis luidhe 'na thàmh, a chum gu'n ith bochdan do shluaigh, agus na dh'fhàgas iadsan, gu'n ith beathaiche na macharach e. Air a' mhodh cheudna nì thu ri d'fhion-lios, agus ri d' lios-olaidh.

12 Sè làithean nì thu t'obair, agus air an t-seachdamh là gabhaidh tu fois; a chum gu faigh do dhamh agus d'asal fois, agus gu faigh mac do bhanoglaich agus an coigreach an anail.

13 Agus a thaobh nan uile nithe a labh-air mi ribh, bithidh faicilleach; agus air ainm dhiathan eile na luaidhibh¹⁵: na cluinnear as bhuir beul e.

14 Tri uaire cumaidh tu féill dhomhsa sa' bhliadhna.

15 Féill an arain neo-ghoirtichte cumaidh tu: seachd làithean ithidh tu aran neo-ghoirtichte, mar a dh'aithn mi dhuit, san am shuidhichte do'n mhìos Abib; oir anns a' mhìos sin thàinig thu mach as an Eiphit: agus cha tig neach air bith a'm' làthair-sa falamh:

16 Agus féill an fhogharaidh, ceud-thoraidh do shaoithreach, a chuir thu san fhearann: agus féill a' chruinneachaidh¹⁶ aig deireadh na bliadhna, 'nuair a chruinniceas tu stigh toradh do shaoithreach as an fhearann.

17 Tri uairean sa' bhliadhna nochdar gach fìrionn agad an làthair an Tigh-earna Dé.

18 Cha toir thu seachad¹⁷ fuil m' iobairt-sa le h-aran goirtichte, nì mò dh'fhan-as¹⁸ saill m' iobairt gu maduinn.

19 Toiseach ceud-thoraidh d'fhearainn bheir thu do thigh an Tighcarna do Dhé.

¹ bain-treabhaich.

² leanabh gun athair.

³ ocar. ⁴ déibh. Eabh.

⁵ cha mhallach.

⁶ iomradh.

⁷ fhrèagair. Eabh.

⁸ cha nochd thu iochd, cha 'n uith thu leis, cha ghabh thu leis.

⁹ air faontradh.

¹⁰ Cha'n fhiar.

¹¹ tiodhlacadh, gihht.

¹² cridhe.

¹³ a bhàrr.

¹⁴ fàs.

¹⁵ na deanaibh iomradh.

¹⁶ an tarragha, a' chròdhaidh.

¹⁷ cha taig thu.

¹⁸ dh'fhàgar.

Cha bhruidh thu meann ann am bainne a mhàthar.

20 Feuch, cuiridh mise aingeal romhad, gu d' choimhead san t-slighe, agus gu d' thabhairt a steach do'n àit a dh'ulluich mi.

21 Bi faicilleach¹ 'na làthair, agus éisd r'a ghuth; na cuir 'na aghaidh²: oir cha lagh e bhur cionta; oir a ta m'ainm ann-san.

22 Ach ma dh'éisdeas tu da rìreadh r'a ghuth, agus ma ni thu gach ni a labhras mise, an sin bithidh mi a'm' nàmhaid do d' nàmhaid-sa³, agus claidhidh mi iad-san a chlaoidheas thu:

23 Oir théid m' aingeal romhad, agus bheir e steach thu chum nan Amorach, agus nan Hiteach, agus nam Peridseach, agus nan Canaanach, nan Hibheach agus nan Iebusach; agus gearraidh mi as iad.

24 Cha chrom thu thu féin sìos d'an déibh, agus cha dean thu seirbhis doibh, ni mò a ni thu a réir an oibre: ach sgriosaidh tu gu tur iad, agus brisidh tu an dealbhan nam bloighdibh.

25 Agus ni sibh seirbhis do'n Tighearna bhur Dia, agus beannaichidh esan t'aran, agus t-uisge, agus cuiridh mi euslaint air falbh o'r measg.

26 Cha tilg ni sam bith 'àl, ni mò a bhios e seasg a'd' thìr: àireamh dolàithean còmhlonaidh mise.

27 Cuiridh mi m' eagal romhad, agus sgriosaidh mi an sluagh uile dh'ionnsuidh an téid thu, agus bheir mi air do naimh-dibh gu léir an cùl a thionndadh riut.

28 Agus cuiridh mise cearnabhain⁴ romhad, agus fògraidh iad a mach an t-Hibheach, an Canaanach, agus an t-Hiteach, as do làthair.

29 Cha tilg mi mach iad as do làthair ann an aon bhliadhna, air eagal gu'm bi m' fearann air fhàsachadh, agus gu'm fàs fiadh-bheathaiche na macharach lìonmhor a'd' aghaidh.

30 A lìon beag is beag⁵ tilgidh mi mach iad as do làthair, agus an sìolaich thu, agus gu'n sealbhaich thu am fearann.

31 Agus suidhidh mi do chriochan o'n mhuir ruaidh eadhon gu ruig fairge nam Philisteach⁶, agus o'n fhàsach gu ruig an amhainn⁷: oir bheir mi thairis 'nur làimh luchd-àiteachaidh na tìre; agus tilgidh tu mach iad as do làthair.

32 Cha dean thu riu-san, no r'an déibh còimcheangal sam bith.

33 Cha ghabh iad còmhnuidh a'd' thìr, air eagal gu'n toir iad ort peacachadh a'm' aghaidh-sa le seirbhis a dheanamh d'an déibh; agus gu'm bi sin 'na rìbe dhuith.

CAIB. XXIV.

1 Chaidh Maois suas do'n t-sliabh. 3 Gheall an sluagh gu'n d' thugadh iad géill do fhocal an Tighearna. 16 Glòir Dhé air a foillseachadh.

AGUS thubhairt e ri Maois, Thig a nìos a dh'ionnsuidh an Tighearna, thu féin agus Aaron, Nadab agus Abihu, agus tri fichead 'sa deich do sheanairibh Israeil: agus ni sibh aoradh fad o làmh⁸.

2 Agus thig Maois 'na aonar am fagus do'n Tighearna; ach cha tig iadsan am fagus, ni mò théid an sluagh suas maille ris.

3 Agus thàinig Maois agus dh'innis e do'n t-sluagh briathran an Tighearna uile, agus na breitheanais uile: agus fhreagair an sluagh gu léir le h-aon ghuth, agus thubhairt iad, Gach ni a labhair an Tighearna, ni sinne.

4 Agus sgrìobh Maois briathran an Tighearna uile, agus dh'èirich e gu moch sa' mhaduinn, agus thog e altair fuidh 'n t-sliabh, agus dà charragh⁹ dheug a réir dà thréibh dheug Israeil.

5 Agus chuir e uaidh òganaich do chloinn Israeil, agus thug iad suas tabhartais-loisgte, agus dh'ìobair iad ìobairte-sith do dhaimh do'n Tighearna.

6 Agus ghabh Maois leth na fola, agus chuir e ann an cuachaibh i; agus leth na fola chrath e air an altair.

7 Agus ghabh e leabhar a' choimhcheangail, agus leugh e ann an éisdeachd an t-sluaigh; agus thubhairt iadsan, Gach ni a labhair an Tighearna, ni sinne, agus bheir sinn géill.

8 Agus ghabh Maois an fhuil, agus chrath e i air an t-sluagh, agus thubhairt e, Feuch, fuil a' choimhcheangail a rinn an Tighearna ribh a thaobh nam briathra sin uile.

9 Agus chaidh Maois suas agus Aaron, Nadab agus Abihu, agus tri fichead 'sa deich do sheanairibh Israeil.

10 Agus chunnaic iad Dia Israeil: agus fuidh a chosaibh bha mar gu'm biodh obair¹⁰ do chloich shaphir, agus mar na nèamha féin¹¹ ann an soille.

11 Agus air maithibh¹² chloinn Israeil cha do chuir e a làmh: agus chunnaic iad Dia, agus dh'ith iad agus dh'òl iad.

12 Agus thubhairt an Tighearna ri Maois, Thig a nìos a m' ionnsuidh-sa do'n t-sliabh, agus bi 'n sin: agus bheir mise dhuith clàir chloiche, agus lagh, agus na h-àitheantan a sgrìobh mi, chum iad-san a theagasg.

13 Agus dh'èirich Maois suas, agus Iosua 'oglach: agus chaidh Maois suas do shliabh Dhé.

¹ Thoir an aire dhuith féin. ² na brosnuidh e, na cuir corruich air. ³ bithidh mi m' eascairid do d' eascairidh. ⁴ conaichean, beachan-each mòra; horns. Sasg. ⁵ A chuid, a chuid; a bheagan, a

bheagan. ⁶ Philistineach. ⁷ Euphrates. ⁸ fad as. ⁹ stac. ¹⁰ obair làir, obair shnàidhte. ¹¹ mar chorp nan nèamh. Eabh. ¹² air uaislibh, daoine mòra.

14 Agus thubhairt e ris na seanairibh, Fanaibh-sa ruinn an so, gus am pill sinn d'ur n-ionnsuidh: Agus, feuch, *a ta* Aaron agus Hur maille ribh: esan aig am bi cuis sam bith, thigeadh e d'an ionnsuidhsan.

15 Agus chaidh Maois suas do'n t-sliabh, agus chòmhdaich neul an sliabh.

16 Agus chòmhnuich glòir an Tighearn¹ air sliabh Shinaì, agus chòmhdaich an neul e sé làithean: Agus dh'éigh e ri Maois air an t-seachdamh là á meadhon an neoil.

17 Agus bha foillseachadh² glòire an Tighearna mar theine dian-loisgeach air mullach an t-sléibh, ann an sùilibh chloinn Israeil.

18 Agus chaidh Maois a steach am meadhon an neoil, agus chaidh e suas do'n t-sliabh: agus bha Maois san t-sliabh dà fhichead là agus dà fhichead oidheche.

CAIB. XXV.

1 Tabhartais air son a' phàilliuin. 10 Cumadh na h-àirce. 17 A' chaithir-thròcair.

A GUS labhair an Tighearna ri Maois, ag ràdh,

2 Labhair ri cloinn Israeil, gu'n toir iad a m' ionnsuidh tabhartas: o gach duine a bheir seachad gu toileach e le 'chridhe, gabhaidh sibh mo thabhartas.

3 Agus is e so an tabhartas a ghabhas sibh uatha; òr, agus airgiod, agus umha³,

4 Agus gorm, agus corcur⁴, agus scar-laid, agus anart⁵ grinn, agus *fionnadh* ghabhar,

5 Agus croicne reitheachan air an dath dearg, agus croicne bhroc, agus fiodh sitim,

6 Oladh chum soluis, spìosraidh chum oladh-ungaidh, agus a chum tùise deadh-bhlolaidh,

7 Clachan onics, agus clachan ri 'n cur anns an ephoid, agus san uchd-éididh.

8 Agus ni iad dhomh *ionad* naomha, agus gabhaidh mise còmhnuidh 'nam measg.

9 A réir gach ni a leigeas mise dhuit fhaicinn, *a réir* samhlaidh⁶ a' phàilliuin, agus samhlaidh 'airneis uile, eadhon mar sin ni sibh.

10 Agus ni iad àirc⁷ do fhiodh sitim: dà làmh-choille gu leth⁸ a fad, agus làmh-choille gu leth a leud, agus làmh-choille gu leth a h-àirde.

11 Agus còmhdaichidh tu thairis i le h-òr fìor-ghlan, a stigh agus a muigh còmhdaichidh tu thairis i; agus ni thu oirre coron⁹ òir mu'n cuairt.

12 Agus ni¹⁰ thu air a son ceithir failbheagan òir, agus cuiridh tu *iad* air a ceithir oisinnibh; agus *bithidh* dà fhaillbheig air aon taobh dhi, agus dà fhaillbheig air an taobh eile dhi.

13 Agus ni thu bataichean¹¹ do fhiodh sitim, agus còmhdaichidh tu thairis iad le h-òr.

14 Agus cuiridh tu na bataichean anns na failbheagaibh air taobhan na h-àirce, chum an àirc a ghiùlan leo.

15 Ann am failbheagaibh na h-àirce bithidh na bataichean: cha ghluaisear uaithe¹² iad.

16 Agus cuiridh tu san àirc an Fhianuis¹³ a bheir mise dhuit.

17 Agus ni thu caithir-thròcair¹⁴ a dh'òr fìor-ghlan; dà làmh-choille gu leth a fad, agus làmh-choille gu leth a leud.

18 Agus ni thu dà cherub òir: a dh'obair bhualte ni thu iad, aig dà cheann na caithir-thròcair.

19 Agus ni thu aon cherub aig aon cheann, agus cerub eile aig a' cheann eile do'n chaithir-thròcair: ni sibh na ceruban aig a dà cheann.

20 Agus bithidh na ceruban a' sìneadh a mach *an* sgiathan gu h-àrd, a' còmh-dachadh na caithir-thròcair le'n sgiath-aibh, agus an aghaidhean¹⁵ r'a chéile: ris a' chaithir-thròcair bithidh aghaidhean nan cerub.

21 Agus cuiridh tu a' chaithir-thròcair suas air an àirc, agus anns an àirc cuiridh tu an Fhianuis a bheir mise dhuit.

22 Agus còinnichidh mise thu an sin, agus labhraidh mi riut o uachdar na caithir-thròcair, o eadar an dà cherub a *ta* air àirc na Fianuis, a thaobh gach *ni* a dh'àithneas mi dhuit do chloinn Israeil.

23 Agus ni thu bòrd do fhiodh sitim; dà làmh-choille 'fhad, agus làmh-choille a leud, agus làmh-choille gu leth 'àirde.

24 Agus còmhdaichidh tu thairis e le h-òr fìor-ghlan, agus ni thu dha coron òir mu'n cuairt.

25 Agus ni thu dha iomall¹⁶ do leud boise mu'n cuairt, agus ni thu coron òir d'a iomall mu'n cuairt.

26 Agus ni thu dha ceithir failbheagan òir, agus cuiridh tu na failbheagan air na ceithir oisinnibh a *ta* aig a cheithir chos-aibh.

27 Fa chomhair an iomaill bithidh na failbheagan, chum àitean do na bataichibh, gus am bòrd a ghiùlan.

28 Agus ni thu na bataichean do fhiodh sitim, agus còmhdaichidh tu thairis iad le h-òr, agus giùlainear am bord leo.

¹ ghabh glòir an Tighearna còmhnuidh.

² sealladh, cosamhlachd.

³ purpur.

⁴ deilbh, cumaidh, saimpleir, coslais.

⁵ còhlan, ciste.

⁶ unga, prais.

⁷ lion-eudach.

⁸ dà làmh-choille agus

leth làmh-choille.

⁹ tilgidh, leaghaidh.

¹⁰ uaipe.

¹¹ uachdar, còmhdach na h-àirce; suidhe-thròcair.

¹² an eudanan.

¹³ cròin, fleasg.

¹⁴ lunnan, maidean.

¹⁵ an Teistear.

¹⁶ imeall, fòir.

29 Agus ni thu a mhiasan¹, agus a thuiseirean², agus a cluachan³, agus a chopain, leis an toirear seachad⁴ iobairt-dibhe; a dh'òr fìor-ghlan ni thu iad.

30 Agus cuiridh tu air a' bhòrd aran taisbeanta romhams' an còmhnuidh.

31 Agus ni thu coinnleir a dh'òr fìor-ghlan; a dh'obair bhualten nìthean coinnleir. Bithidh a chos, agus a mheoir⁵, a chopain, a chnapan⁶, agus a bhlàthan, do'n obair cheudna.

32 Agus thig sè meoir a mach as a thaobhan; tri meoir a' choinnleir à h-aon taobh dheth, agus tri meoir a' choinnleir as an taobh eile dheth.

33 Tri copain air an deanamh cosmhuil ri almonaibh ann an aon mheur, *maille ri* cnap agus blàth; agus tri copain air an deanamh cosmhuil ri almonaibh anns a' mheur eile, *maille ri* cnap agus blàth; mar sin anns na sè meoir a thug a mach as a' choinnleir.

34 Agus annsa' choinnleir *bithidh* ceithir chopain air an deanamh cosmhuil ri almonaibh, *maille ri* 'n cnapaibh agus am blàthaibh.

35 Agus *bithidh* cnap fo dhà mheur dheth, agus cnap fo dhà mheur dheth, agus cnap fo dhà mheur dheth; *mar sin* do na sè meoir a thig a mach as a' choinnleir.

36 Bithidh an cnap agus am meoir do'n obair cheudna: *bithidh* e uile 'na aon obair bhualte do òr fìor-ghlan.

37 Agus ni thu dha seachd lòchrain: agus cuirear suas⁷ a lòchrain, a chum gu'n toir iad solus thall fa chomhair.

38 Agus *bithidh* a chlobhachan, agus a smàl-shoithichean a dh'òr fìor-ghlan.

39 Do thalann a dh'òr fìor-ghlan nìthean e, *maille ris* na soithichibh sin uile.

40 Agus feuch gu'n dean thu *iad* a réir an t-samhlaidh, a chaidh leigeadh dhuith fhaicinn san t-sliabh.

CAIB. XXVI.

1 Deich cùirteinean a' phàilliuin. 31 Am brat air son na h-àirce.

A GUS ni thu am pàilliuin le deich cùirt-einibh a dh' anart grinn toinnte, agus do ghorm, agus do chorcur, agus do scarlaid: *maille ri* cerubaibh a dh' obair ealanta⁸ ni thu iad.

2 Fad aon chùirtein ochd làmhha-coille thar fhichead, agus leud aon chùirtein, ceithir làmhha-coille: an t-aon tomhas do na cùirteinibh uile.

3 Bithidh cuig cùirteinean air an ceangal gach aon r'a chéile; agus na cuig cùirteinean eile air an ceangal gach aon r'a cheile.

4 Agus ni thu lùban do ghorm air foir aon chùirtein, o'n iomall anns a' choimh-

cheangal: agus, air a' mhodh cheudna, ni thu am foir a' chùirtein a's fhaide mach, ann an coimhcheangal an dara aoin.

5 Leth-cheud lùb ni thu ann an aon chùirtein, agus leth-cheud lùb ni thu am foir a' chùirtein a' ta ann an coimhcheangal an dara aoin; a chum's gu'n gabh na lùban greim d'a chéile.

6 Agus ni thu leth-cheud cromag⁹ òir, agus ceanglaidh tu na cùirteinean r'a chéile leis na cromagaibh: agus bithidh e 'na aon phàilliuin.

7 Agus ni thu cùirteine do fhionnadh ghabhar gu bhì 'nan còmhdaigh air a' phàilliuin: aon chùirtein deug ni thu dhiubh.

8 Fad aon chùirtein deich làmhha-coille thar fhichead, agus leud aon chùirtein ceithir làmhha-coille: *bithidh* an t-aon chùirtein deug uile dh'aon tomhas.

9 Agus cuiridh tu ri chéile cuig cùirteine leo féin, agus sè cùirteine leo féin, agus dublaichidh tu an seathadh cùirtein air taobh beoil a' bhùtha.

10 Agus ni thu leth-cheud lùb air foir an aon chùirtein a's fhaide mach sa' choimhcheangal, agus leth-cheud lùb air foir a' chùirtein a tha coimhcheangal an dara aoin.

11 Agus ni thu leth-cheud cromag a dh' umha, agus cuiridh tu na cromagan anns na lùbaibh, agus cuiridh tu am bùth r'a chéile, air chor as gu'm bi e 'na aon.

12 Agus am fuigheall a dh'fhàgar do chùirteinibh a' bhùtha, leth a' chùirtein a dh'fhàgar, crochar e thar taobh cùil a' phàilliuin.

13 Agus làmh-choille air an taobh so, agus làmh-choille air an taobh eile do na dh'fhàgadh air am fad do chùirteinibh a' bhùtha, crochar e thar taobhan a' phàilliuin, air an taobh so, agus air an taobh eile, g'a chòmhdachadh.

14 Agus ni thu còmhdaich air son a' bhùtha do chroicnibh¹⁰ reitheachan air an dath dearg, agus còmhdaich do chroicnibh bhroc os a cheann.

15 Agus ni thu buird air son a' phàilliuin do fhiodh sitim, 'nan seasamh:

16 Deich làmhha-coille fad buird, agus làmh-choille gu leth leud aon bhuird.

17 *Bithidh* dà làmh aig aon bhòrd, air an cur an ordugh fa chomhair a chéile; mar so ni thu do uile bhòrdaibh a' phàilliuin.

18 Agus ni thu na buird air son a' phàilliuin, fichead bòrd air an taobh deas, ris an àirde deas.

19 Agus ni thu dà fhichead cos¹¹ airgid, fuidh 'n fhichead bòrd: dà chois fuidh aon bhòrd a réir a dhà làimh, agus dà chois fuidh bhòrd eile a réir a dhà làimh.

¹ shoithichean.

² liaghan, ladair, spàinean.

³ a sgàlan. ⁴ an taomar a mach; an còmhdaichear.

⁵ a mheanglain.

⁶ a mhill.

⁷ lasar.

⁸ innleachdaich.

⁹ clasp.

¹⁰ chraicnibh.

¹¹ bonn, pulag, socait.

20 Agus air son an dara taoibh do'n phàilliuin air an taobh tuath, fichead bòrd;
21 Agus an dà fhichead cos *a dh'* airgiod, dà chois fuidh aon bhòrd, agus dà chois fuidh bhòrd eile.

22 Agus air son taobhan a' phàilliuin air an làimh an iar, ni thu sè buird.

23 Agus ni thu dà bhòrd air son oisinn-ean a' phàilliuin san dà thaobh.

24 Agus bithidh iad air an coimhcheangal fuidhe, agus mar an ceudna bithidh iad air an coimhcheangal os a cheann ri aon fhailbheig: mar so nìthear dhoibh le chéile; bithidh iad air son an dà oisinn.

25 Agus bithidh ochd buird ann, agus an cosan *a dh'* airgiod, sè cosa deug; dà chois fuidh aon bhòrd, agus dà chois fuidh bhòrd eile.

26 Agus ni thu croinn do fhiodh sìtim; cùig air son nam bòrd air aon taobh do'n phàilliuin.

27 Agus cùig croinn air son nam bòrd air an taobh eile do'n phàilliuin, agus cùig croinn air son bhòrd taobh a' phàilliuin air son an dà thaobh an iar.

28 Agus ruigidh an crann meadhonach ann am meadhon nam bòrd o cheann gu ceann.

29 Agus còmhdaichidh tu thairis¹ na buird le h-òr, agus ni thu am failbheagan *a dh'*òr mar àiteachan do na crannaibh: agus còmhdaichidh tu thairis na croinn le h-òr.

30 Agus togaidh tu suas am pàilliuin a rèir a shamhlaidh², a nochdadh dhuìt san t-sliabh.

31 Agus ni thu brat *do ghorm*, agus *do chorcur*, agus *do scarlaid*, agus *a dh'*anart grinn³ toinnte: a dh'obair ealanta nìthear e, le cerubaibh.

32 Agus crochaidh tu e air ceithir puist *do fhiodh sìtim*, air an còmhdachadh thairis le h-òr: agus *bithidh* an cromagan *a dh'*òr, air na ceithir bonnaibh⁴ airgid.

33 Agus crochaidh tu suas am brat fuidh na cromagaibh, agus bheir thu steach ann an sin àire na Fianuis, an taobh a stigh do'n bhrat: agus roinnidh am brat dhuibhsan eadar an *t-ionad* naomha agus an *t-ionad* ro naomha.

34 Agus cuiridh tu a' chaithir-thròcair air àire na Fianuis, san *ionad* ro naomha.

35 Agus cuiridh tu am bòrd an leth muigh do'n bhrat, agus an coimhleir fa chomhair a' bhuird air taobh deas a' phàilliuin: agus cuiridh tu am bòrd air an taobh tuath.

36 Agus ni thu còmhdach⁵ air son doruis a' bhùtha, *do ghorm*, agus *do chorcur*, agus *do scarlaid*, agus *do anart grinn* toinnte, oibrichte le h-obair ghrèise⁶.

37 Agus ni thu air son a' chòmhdaich cùig puist⁷ *do fhiodh sìtim*, agus còmhdaichidh tu thairis iad le h-òr, agus *bithidh* an cromagan *a dh'*òr, agus tilgidh tu air an son cùig buinn umha⁸.

CAIB. XXVII.

1 *Altair na h-ìobairt-luisgte, agus a soithichean.*
7 *Cùirt a' phàilliuin.* 20 *Oladh fhìor-ghlan a' chroinn-olaidh air a toirt air son solais.*

A GUS ni thu altair do fhiodh sìtim; cùig làmhha-coille air fad, agus cùig làmhha-coille air leud; bithidh an altair ceithir-chearnach, agus a h-àirde trì làmhha-coille.

2 Agus ni thu a h-adhaircean⁹ air a ceithir oisinnibh: bithidh a h-adhaircean do'n nì cheudna: agus còmhdaichidh tu thairis i le h-umha.

3 Agus ni thu a h-aighnean a ghabhail a luatha, agus a sluasaidean, agus a cuachan¹⁰, agus a greimichean, agus a h-aighnean-teine: a soithichean uile ni thu *a dh'*umha.

4 Agus ni thu dh'i cliath do lìon-obair umha: agus ni thu air an lìon ceithir failbheagan umha air a cheithir oisinnibh.

5 Agus cuiridh tu e fuidh chuairt na h-altarach gu h-ìosal, agus bithidh an lìon gu ruig meadhon na h-altarach.

6 Agus ni thu bataichean¹¹ do'n altair, bataichean *do fhiodh sìtim*, agus còmhdaichidh tu thairis iad le h-umha.

7 Agus cuirear na bataichean anns na failbheagaibh, agus bithidh na bataichean air dà thaobh na h-altarach g'a giùlan.

8 Fàs le bòrdaibh ni thu i; mar a nochdadh dhuìt san t-sliabh, mar sin nìthear i.

9 Agus ni thu cùirt a' phàilliuin air an taobh deas, ri deas: *bithidh* cùirteinean air son na cùirte do anart grinn toinnte; ceud làmh-coille am fad, air aon taobh.

10 Agus *bithidh* a fichead post, agus am fichead bonn *a dh'*umha: *bithidh* cromagan nam post, agus an cuairteagan, *a dh'*airgid.

11 Agus mar an ceudna air an taobh tuath air fad, *bithidh* cùirteine ceud làmh-coille air fad, agus a fichead post, agus am fichead bonn *a dh'*umha; cromagan nam post, agus an cuairteagan, *a dh'*airgid.

12 Agus air leud na cùirte air an taobh an iar, *bithidh* cùirteine do leth-cheud làmh-coille: am puist deich, agus am buinn deich.

13 Agus *bithidh* leud na cùirte air an taobh an ear, ris an àird an ear, leth-cheud làmh-coille.

14 Agus *bithidh* na cùirteinean air aon

¹ cuiridh tu thairis.

³ caol, mìn, finealta.

⁵ brat.

² a chumachd.

⁴ bunaitibh.

⁶ obair snàthaide.

⁷ trostain.

¹⁰ soithichean-crathaidh.

⁸ praise.

⁹ aoiricean.

¹¹ lunnan.

taobh cùig làmh-choille deug: am puist tri, agus am buinn tri.

15 Agus air an taobh eile *bithidh* a cùirteine cùig *làmh-choille* deug: am puist tri, agus am buinn tri.

16 Agus air son geata na cùirte *bithidh* brat a dh'fhichead làmh-choille, *do ghorm*, agus *do choreur*, agus *do scarlaid*, agus *a dh'anart* grinn toinnte, oibrichte le h-obair shnàthlaide: am puist ceithir, agus am buinn ceithir.

17 *Bithidh* na puist uile timchìoll na cùirte air an ceangal mu'n cuairt¹ le h-airgiod: *bithidh* an cromagan a dh'airgiod, agus am buinn *a dh'umha*.

18 Fad na cùirte ceud làmh-choille, agus a leud leth-cheud *làmh-choille* sgach àite, agus *a h-àirde* cùig làmh-choille, *a dh'anart* grinn toinnte; agus am buinn *a dh'umha*.

19 *Bithidh* uile shoithichean a' phàill-iuin, 'na sheirbhis uile, agus a phinneachan uile, agus pinneacha na cùirte uile *do umha*.

20 Agus àithnidh tu do chloinn Israeil, gu'n toir iad a t'ionnsuidh oladh fhìorghlan a' chroinn-olaidh, brùite air son an t-solais, a thoirt air an lòchran² lasadh an còmhuidh.

21 Ann am bùth a' choimhthionail an taobh a muigh do'n bhrat, a *ta fa* chomhair na Fianuis, orduichidh Aaron e, agus a mhic, o fheasgar gu maduinn an làthair an Tighearna: *bithidh e* na reachd sìorruidh d'an ginealachaihb, à leth chloinn Israeil.

CAIB. XXVIII.

1 *Chuireadh Aaron agus a mhic air leth air son dreuchd an t-sagairt.* 6 *An ephod.* 30 *An Urim agus an Tumim, &c.*

A GUS gabh a t'ionnsuidh Aaron do mhràthair, agus a mhic maille ris, o mheasg chloinn Israeil, a chum gu frithheil e dhomhsa ann an dreuchd an t-sagairt, *eadhon* Aaron, Nadab agus Abihu, Eleasar agus Itamar, mic Aaroin.

2 Agus ni thu éididh³ naomha do d' bhràthair Aaron, air son glòire, agus air son maise.

3 Agus labhairidh tu riu-san uile *a ta* glie an cridhe, a lion mise le spiorad a' ghliocais; agus ni iad éididh Aaroin, g'a choisreagadh, a chum gu frithheil e dhomhsa ann an dreuchd an t-sagairt.

4 Agus so an éididh a ni iad; uchd-éididh, agus ephod, agus falluinn, agus còta iomadh-dathach⁴, crùn-sagairt, agus crios: agus ni iad éididh naomha air son Aaroin do bhràthar, agus air son a mhac, a chum gu frithheil e dhomhsa ann an

dreuchd an t-sagairt.

5 Agus gabhaidh iad òr, agus gorm, agus corcur, agus scarlaid, agus anart grinn.

6 Agus ni iad an ephod *do òr*, *do ghorm*, agus *do choreur*, agus *do scarlaid*, agus *do anart* grinn toinnte, le h-obair ealanta.

7 *Bithidh* an dà mhr-guailne⁵ aice cean-gailte r'a chèile aig a dà fhoir; agus *mar sin* cuirear ri chèile i.

8 Agus bithidh crios rìomhach⁶ na h-ephoid a *ta* air a h-uachdar, a réir a h-oibre féin, do'n *ni* cheudna⁷ *eadhon do òr*, *do ghorm*, agus *do choreur*, agus *do scarlaid*, agus *a dh'* anart grinn toinnte.

9 Agus gabhaidh tu dà chloich onics, agus gearraidh tu orra ainmeanna chloinn Israeil.

10 Sè d'an ainmibh air aon chloich, agus sè ainmeanna chàich air a' chloich eile⁸, a réir an sinead⁹.

11 Le h-obair gearradair an cloich¹⁰, le gearradh seulaidh, gearraidh tu an dà chloich, le ainmibh chloinn Israeil: bheir thu fa'near an ceangal¹¹ ann am failibh òir¹².

12 Agus cuiridh tu an dà chloich air guailnibh na h-ephoid, *mar chlach* cuimhneachain do chloinn Israeil. Agus giùlainidh Aaron an ainmean ann an làthair an Tighearna air a dhà ghualainn, mar chuimhneachan.

13 Agus ni thu failean òir;

14 Agus dà shlabhruidh *a dh'* òr fhìorghlan aig na cinn: ni thu iad *a dh'* obair fhighte, agus ceanglaidh tu na slabhruidhean fichte ris na failean:

15 Agus ni thu uchd-éididh a' bhreith-eanais le h-obair ealanta; a réir oibre na h-ephoid ni thu i: *do òr*, *do ghorm*, agus *do choreur*, agus *do scarlaid*, agus *a dh'* anart grinn toinnte ni thu i.

16 Ceithir-chearnach bithidh i, agus dà fhille¹³; réis a fad, agus réis a leud.

17 Agus cuiridh tu innte suidheachadh chlach¹⁴, *eadhon* ceithir sreathan¹⁵ chlach; *a' cheud* sreath, sardius, topas, agus carbuncle: *so a'* cheud sreath.

18 Agus an dara sreath; emerald, saphir, agus daoimein¹⁶.

19 Agus an treas sreath; ligur, agat, agus ametist.

20 Agus an ceathramh sreath; beril, agus onics, agus iasper: ceanglar iad le h-òr 'nan suidheachadh.

21 Agus bithidh na clachan le ainmibh chloinn Israeil, a dhà-dheug, a réir an ainmeanna; *le gearradh seulaidh*, bithidh gach aon aca le h-ainm féin a réir an dà thréibh dheug.

¹ cuairtiche. ² lampa. ³ eudaichean.

⁴ do obair ghrèise, rìomhach, ainneamh.

⁵ dà ghuaileachan, dà chlàr-guailne.

⁶ crios ainneamh; obair ealanta. Eabh.

⁷ do'n stubh cheudna. ⁸ air an darna cloich.

⁹ a réir an breith; a réir an ginealach. Eabh.

¹⁰ clach-shnàidheadair. ¹¹ an cur, an suidheachadh.

¹² fàinnean, foirean òir.

¹³ air a dàblachadh.

¹⁴ àlach chloch.

¹⁵ sreudan. ¹⁶ diamond. Sasg.

22 Agus nì thu air an uchd-éididh slabh-ruidhean aig na cinn *a dh'* obair fhighte¹, *a dh'* òr fìor-ghlan.

23 Agus nì thu air an uchd-éididh dà fhàinne òir, agus cuiridh tu 'n dà fhàinne air dà cheann na h-uchd-éididh.

24 Agus cuiridh tu 'n dà *shlabhruidh* fhighte òir san dà fhàinne *a ta* air cinn na h-uchd-éididh.

25 Agus dà cheann *eile* na dà *shlabhruidh* fhighte daingnichidh tu anns an dà fhail, agus cuiridh tu *iad* air mìribh-guailne na h-ephoid air a beulaobh.

26 Agus nì thu dà fhàinne òir, agus cuiridh tu *iad* air dà cheann na h-uchd-éididh san fhoir sin dith, a *ta* aig taobh na h-ephoid a stigh.

27 Agus nì thu dà fhàinne *eile* do òr, agus cuiridh tu *iad* air dà thaobh na h-ephoid fuidhpe, làimh r'a cuid-thoisich, fa chomhair a' choimhcheangail *eile*, os ceann crios rìomhach na h-ephoid.

28 Agus ceanglaidh iad an uchd-éididh leis a fàinnibh, ri fàinnibh na h-ephoid le h-éill² ghuirm, chum as gu'm bi i os ceann crios rìomhach na h-ephoid, agus nach fuasglar an uchd-éididh o'n ephoid.

29 Agus giùlainidh Aaron ainmeanna chloinn Israeil ann an uchd-éididh a' bhreitheanais, air a chridhe, 'nuair a théid e steach do'n *ionad* naomha, mar chuimhneachan ann an làthair an Tighearn a ghnàth.

30 Agus cuiridh tu ann an uchd-éididh a' bhreitheanais, an Urim, agus an Tumim; agus bithidh iad air cridhe Aaron, an uair a théid e steach an làthair an Tighearn: agus giùlainidh Aaron breitheanas chloinn Israeil air a chridhe, ann an làthair an Tighearn an còmhnuidh.

31 Agus nì thu falluinn na h-ephoid uile do ghorm.

32 Agus bithidh toll³ 'na mullach, 'na meadhon³: bithidh foir⁴ aice timchioll a tuill a dh'obair fhighte, mar tholl lùirich-mhàillich, a chum as nach reubar i.

33 Agus *gu h-ìosal*, air a h-ìomall, nì thu pomgranata do ghorm, agus do chorcur, agus do scarlaid, air a h-ìomall mu'n cuairt: agus cluig òireatorra mu'n cuairt.

34 Clag òir agus pomgranat, clag òir agus pomgranat, air ìomall na falluinn mu'n cuairt.

35 Agus bithidh i air Aaron gu frith-ealadh: agus cluinnear a fuaim, an uair a théid e steach do'n *ionad* naomh an làthair an Tighearn, agus an uair a thig e mach, a chum nach bàsaich e.

36 Agus nì thu leac⁵ *a dh'* òr fìor-ghlan, agus gearraidh tu oirre, *cosmhuil ri gearr-*

adh seulaidh, NAOMHACHD DO'N TIGHEARNA.

37 Agus cuiridh tu i air éill ghuirm, agus bithidh i air a' chrùn-shagairt: air taobh beoil a' chrùn-shagairt bithidh i.

38 Agus bithidh i air clàr eudain Aaron, agus giùlainidh Aaron cionta nan nithe naomha, a choisrigeas clann Israeil 'nan tiodhlacaibh naomha uile: agus bithidh i air clàr 'eudain an còmhnuidh, a chum as gu'm bi iad taitneach an làthair an Tighearn.

39 Agus nì thu 'n còta le h-obair ghréise a dh'anart grinn, agus nì thu 'n crùn-sagairt a dh'anart grinn, agus nì thu 'n crios a dh'obair snàthaide.

40 Agus do mhic Aaron nì thu còtaichean, agus nì thu dhoibh criosan, agus boineidean nì thu dhoibh, air son gloire agus air son maise.

41 Agus cuiridh tu iad air Aaron do bhràthair, agus air a mhic maille ris: agus ungaidh tu iad, agus coisrigidh tu iad, agus naomhaichidh tu iad; agus frithheilidh iad dhomhsa ann an dreuchd an t-sagairt.

42 Agus nì thu dhoibh briogais anairt a dh'fholach an nochd⁶: o'n leasruidh eadhon gus an sléisdean ruigidh iad.

43 Agus bithidh iad air Aaron, agus air a mhic, an uair a thig iad a stigh do phàillium a' choimhthionail, no 'nuair a thig iad ann fagus do'n altair, a flrith-ealadh san *ionad* naomha; chum as nach giùlain iad aingidheachd, agus nach faigh iad bàs: *bithidh e* 'na reachd sìorruidh dha féin, agus d'a shliochd 'na dhéigh.

CAIB. XXIX.

1 An iobairt, &c. aig coisreagadh nan sagart.

38 An iobairt-loisgte bhith-bhuan.

AGUS so an nì a nì thu riu chum an coisreagadh, gu frithealadh dhomhsa ann an dreuchd an t-sagairt: Gabh aon tarbh òg, agus dà reithe gun ghaoid⁷.

2 Agus aran neo-ghoirtichte, agus breacagan neo-ghoirtichte, coimhmeasgta le h-oladh, agus gearragan⁸ neo-ghoirtichte, ungta le h-oladh: do phlùr⁹ a' chruithneachd nì thu iad.

3 Agus cuiridh tu iad ann an aon bhaseaid, agus bheir thu iad leat sa' bhaseaid, maille ris an tarbh òg agus an dà reithe.

4 Agus bheir thu Aaron agus a mhic gu dorus pàillium a' choimhthionail, agus ionnlaidh¹⁰ tu iad le h-uisge.

5 Agus gabhaidh tu an éididh, agus cuiridh tu an còta air Aaron, agus falluinn na h-ephoid, agus an ephod, agus an uchd-éididh, agus crioslaichidh¹¹ tu e le crios rìomhach na h-ephoid.

¹ thoinnte. ² cordail; lace Sasg.

³ toll a mullaich 'na meadhon. ⁴ oir.

⁵ clàr, bonn; blàth. Eabh. ⁶ an lannochduidh.

⁷ gun glò, gun aineamh.

⁸ abhlain; wafers. Sasg.

⁹ mhin.

¹⁰ nighidh. ¹¹ criosraichidh.

6 Agus cuiridh tu an crùn-sagairt air a cheann, agus an crùn naomhaira¹ chrùn-shagairt.

7 Agus gabhaidh tu 'n oladh-ungaidh, agus dòirtidh tu air a cheann i, agus ungaidh tu e.

8 Agus bheir thu leat a mhic, agus cuiridh tu còtaichean orra.

9 Agus crioslaichidh tu iad le criosaibh, (Aaron agus a mhic) agus cuiridh tu na boineidean orra: agus is leo-san dreuchd an t-sagairt le reachd bith-bhuan: agus coisrigidh tu Aaron agus a mhic.

10 Agus bheir thu fa'near an tarbh a thoirt gu beulaobh pàilliuin a' choimhthionail: agus cuiridh Aaron agus a mhic làmhan air ceann an tairbh.

11 Agus marbhaidh tu an tarbh an làthair an Tighearna, làimh ri dorus pàilliuin a' choimhthionail.

12 Agus gabhaidh tu do fhuil an tairbh, agus cuiridh tu i air adhaircibh na h-altarach le d' mheur, agus dòirtidh tu 'n fhuil uile aig bun na h-altarach.

13 Agus gabhaidh tu 'n t-saill uile a ta còmh-dachadh a' mhionaich, agus an scairt *ata* os ceann nan àinean¹, agus an dà àra², agus an t-saill a *ta* orra, agus loisgidh tu *iad* air an altair.

14 Ach feoil an tairbh agus a sheice³, agus 'aolach loisgidh tu le teine an taobh a muigh do'n champ: *is tabhartas-peacaidh* e.

15 Gabhaidh tu mar an ceudna aon reithe, agus cuiridh Aaron agus a mhic an làmhan air ceann an reithe.

16 Agus marbhaidh tu an reithe, agus gabhaidh tu 'fhuil, agus crathaidh tu i mu'n cuairt air an altair.

17 Agus gearraidh tu an reithe 'na mhiribh, agus nighidh tu a mhionach, agus a chosan, agus cuiridh tu *iad* air a mhiribh, agus air a cheann.

18 Agus loisgidh tu an reithe uile air an altair; *is* tabhartas-loisgte e do'n Tighearna; fàile cubhraidh, tabhartas air a thoirt suas le teine do'n Tighearna.

19 Agus gabhaidh tu an reithe eile, agus cuiridh Aaron agus a mhic an làmhan air ceann an reithe.

20 An sin marbhaidh tu an reithe, agus gabhaidh tu d'a fhuil, agus cuiridh tu i air bàrr cluaise *deis* Aaroin, agus air bàrr cluaise deis a mhac, agus air ordaig⁴ an làimhe deise, agus air ordaig an coise deise; agus crathaidh tu an fhuil air an altair mu'n cuairt.

21 Agus gabhaidh tu do'n fhuil a *ta* air an altair, agus do'n oladh-ungaidh, agus crathaidh tu *iad* air Aaron, agus air 'éididh, agus air a mhic, agus air 'éididh a mhac

maille ris: agus coisrigear e féin, agus 'éididh, agus a mhic, agus 'éididh a mhac maille ris.

22 Mar an ceudna, gabhaidh tu do'n reithe an t-saill, agus bun an earbail, agus an t-saill a ta còmh-dachadh a' mhionaich, agus scairt nan àinean, agus an dà àra, agus an t-saill a *ta* orra, agus an slinnean deas; oir *is* reithe coisreagaidh e.

23 Agus aon bhuilonn⁵ arain, agus aon bhreacag arain le h-oladh, agus aon ghearrag à bascaid an arain neo-ghoirtichte a *ta* 'n làthair an Tighearna.

24 Agus cuiridh tu *iad* uile ann an làmh-an Aaroin, agus ann an làmhan a mhac; agus luaisgidh tu⁶ iad mar thabhartas-luaisgte an làthair an Tighearna.

25 Agus gabhaidh tu iad bhàrr an làmh, agus loisgidh tu *iad* air an altair mar thabhartas-loisgte, chum fàile chùbhraidh an làthair an Tighearna: *is* tabhartas e air a thoirt suas le teine do'n Tighearna.

26 Agus gabhaidh tu an t-uchd o reithe coisreagaidh Aaroin, agus luaisgidh tu e mar thabhartas-luaisgte an làthair an Tighearna: agus bithidh sin agad-sa mar chuibhrionn.

27 Agus naomhaichidh tu uchd an tabhartais-luaisgte agus slinnean an tabhartais-thogta, a chaidh luasgadh, agus a thogail suas do reithe a' choisreagaidh, *eadhon do'n ni sin a's* le h-Aaron, agus do'n ni sin a *bhuineas* d'a mhic.

28 Agus bithidh e le h-Aaron⁷ agus le 'mhic le reachd bith-bhuan o chloinn Israeil; oir *is* tabhartas-togta e: agus bithidh e 'na thabhartas-togta o chloinn Israeil do iobairtibh an tabhartas-sith, *eadhon* an tabhartas-togta do'n Tighearna.

29 Agus is le mic Aaroin 'éididh naomhasan 'na dhéigh, gu bhì air an ungadh iunte, agus gu bhì air an coisreagadh innte.

30 Seachd làithean cuiridh esan d'a mhic air i, a bhios 'na shagart 'na àit, a théid a stigh do phàilliuin a' choimhthionail, a fhrithealadh san *ionad* naomha.

31 Agus gabhaidh tu reithe a' choisreagaidh, agus bruichidh tu 'fheoil san *ionad* naomha.

32 Agus ithidh Aaron agus a mhic feoil an reithe, agus an t-aran a ta sa' bhascaid, aig dorus pàilliuin a' choimhthionail.

33 Agus ithidh iad na nithe sin leis an d'rinneadh an réite⁸, chum an coisreagadh agus an naomhachadh: ach cha 'n ith coigreach *dhuibh*, do blurigh gu *bheil* iad naomha.

34 Agus ma dh'fhuàgar a bheag a dh'fheoil a' choisreagaidh, no bheag do'n

¹ àe, grùan.

² àrainn.

³ a sheiche.

⁴ ardoig.

⁵ mhuilonn.

⁶ crathaidh tu a null agus a nall.

a dh' Aaron.

⁷ buinidh e

⁸ réidhte.

aran, gus a' mhaduinn, an sin loisgidh tu am fuigheall¹ le teine: cha 'n ihear c, do bhrìgh gu *bheil* e naomha.

35 Agus nì thu mar so ri h-Aaron, agus r'a mhic, a réir nan uile *nithe* á dh'àithn mise dluith: seachd làithean coisrigidh tu iad.

36 Agus bheir thu seachad gach là tarbh òg *mar* thabhartas-peacaidh, chum réite²: agus glanaidh tu an altair, an uair a nì thu réite air a son, agus ungaidh tu i chum a naomhachadh.

37 Seachd làithean nì thu réite air son na h-altarach, agus naomhaichidh tu i; agus bithidh i 'na h-altair ro naomha: gach nì a bheanas ris an altair, naomhaichear e.

38 Agus so an nì a bheir thu seachad air an altair: dà uan a dh'aois bliadhna, o là gu là an còmhnuidh.

39 Aon uan bheir thu seachad sa' mhaduinn, agus an t-uan eile bheir thu seachad mu fheasgar.

40 Agus maille ris an aon uan, an deicheamh cuid do phlùr min³ measgta leis a' cheathramh cuid do hin a dh'oladh bhrùite; agus an ceathramh cuid do hin a dh'fhion, *mar* thabhartas-dìbhe.

41 Agus an t-uan eile bheir thu seachad mu fheasgar, agus nì thu ris a réir tabhartais bìdh na maidne, agus a réir a tabhartais dìbhe, mar fhàile cùbhraidh, tabhartas air a thoirt suas le teine do'n Tighearna.

42 *Bithidh* so 'na thabhartas-loisgte bithbhuan⁴ air feadh bhuir ginealach, aig dorus pàilliuin a' choimhthionail an làthair an Tighearna, far an coinnich mise sibh, a labhairt riut-sa an sin.

43 Agus an sin coinnichidh mise clann Israeil, agus naomhaichear *am pàilliuin* le m' ghloir.

44 Agus naomhaichidh mi pàilliuin a' choimhthionail, agus an altair: naomhaichidh mi, mar an ceudna, Aaron agus a mhic, gu friithealadhdhomh ann andreuchd an t-sagairt.

45 Agus gabhaidh mi còmhnuidh am measg chloinn Israeil, agus bithidh mi am' Dhia aca.

46 Agus bithidh fios aca gur mise an Tighearn an Dia, a thug a mach iad à tìr na h-Eiphit, a chum 's gu'n gabh mi còmhnuidh 'nam measg: *Is* mise an Tighearn an Dia.

CAIB. XXX.

1 *Altair na tùise.* 11 *Eiric gach duine air son 'anam.* 22 *An oladh-ungaidh naomha.* 34 *Am boltrachan cùbhraidh.*

AGUS nì thu altair a losgadh tùise oirre: do fhiodh sìtim nì thu i:

2 Làmh-choille a fad, agus làmh-choille a leud (ceithir-chearnach bithidh i,) agus dà làmh-choille a h-àirde; *bithidh* a h-adhaircean do'n *mì* cheudna.

3 Agus còmhdaichidh tu thairis i le h-òr fìor-ghlan, a mullach, agus a taobhan⁵ mu'n cuairt, agus a h-adhaircean: agus nì thu dh'i coron òir mu'n cuairt.

4 Agus dà fhailbheig òir nì thu dh'i fuidh a coron: aig a dà oisinn nì thu *iad*, air a dà thaobh: agus bithidh iad air son àit-eachan do na bataichibh chum a giùlan leo.

5 Agus nì thu na bataichean *do* fhiodh sìtim, agus còmhdaichidh tu thairis iad le h-òr.

6 Agus cuiridh tu i fa chomhair an roinn-bhrat, a ta làimh ri àire na Fianuis; air beulaobh na caithir-thròcair, a *ta* os ceann na Fianuis, far an coinnich mise thu.

7 Agus loisgidh Aaron tùis chùbhraidh oirre gach maduinn: an uair a dheasaicheas e na lòchraim, loisgidh e tùis oirre.

8 Agus an uair a lasas Aaron na lòchraim mu fheasgar, loisgidh e tùis oirre; tùis bhith-bhuan an làthair an Tighearn, air feadh blur ginealach.

9 Cha loisg sibh tùis choimheach sam bith oirre, no iobairt-loisgte, no tabhartas-bidh; nì mò dhòirteas sibh tabhartas-dìbhe oirre.

10 Agus nì Aaron réite air a h-adhaircibh aon uair sa' bhliadhna, le fuil iobairt-pheacaidh na réite: aon uair sa' bhliadhna nì e réite oirre, air feadh bhuir ginealach: tha i ro naomha do'n Tighearn.

11 Agus labhair an Tighearna ri Maois, ag ràdh.

12 'Nuair a ghabhas tu cunutas chloinn Israeil a réir an àireimh, an sin bheir gach duine dhuibh éiric air son 'anam do'n Tighearna, 'nuair a dh'àirmheas tu iad; a chum nach bi plàigh 'nam measg, an uair a dh'àirmheas tu iad.

13 So bheir iad uatha, gach aon a théid seachad 'nam measg-san a dh'àirmhear; leth seceil, a réir seceil an *ionaid* naoimh ('s e seceil fichead geralh) leth seceil mar thabhartas do'n Tighearna.

14 Bheir gach aon a théid seachad 'nam measg-san a dh'àirmhear, o fhichead bliadhna dh'aois agus os a cheann, tabhartas do'n Tighearna.

15 Cha toir an saoi bhir tuilleadh, agus cha toir am bochd nì's lugha na leth seceil, an uair a bheir *iad* tabhartas do'n Tighearn, a dheanamh réite air son bhuir n-anamanna.

16 Agus gabhaidh tu airgid do réite o chloinn Israeil, agus cuiridh tu air leth⁶ e fa chomhair seirbhis pàilliuin a' choimhthionail; agus bithidh e 'na chuimh-

¹ fuighealach.

² gu sìr-thachadh.

³ do mhin mhin a' chruithneachd. ⁴ 'na ghnàth-

ofrail loisgte.

⁵ a h-uachdar agus a sliosán.

⁶ orduichidh tu, builicidh tu.

neachan do chloinn Israeil an làthair an Tighearn, a dheanamh reite air son bhuir n-anamanna.

17 Agus labhair an Tighearna ri Maois, ag ràdh,

18 Ni thu mar an ceudna soitheach-ionnlaid *a dh'umha*, agus a chos *a dh'umha*, chum ionnlaid: agus cuiridh tu e eadar pàilliu a' choimhthionail agus an altair, agus cuiridh tu uisge ann.

19 Agus ionnlaididh Aaron agus a mhic an làmhán, agus an cosan as.

20 'Nuair a théid iad a steach do phàilliu a' choimhthionail ionnlaididh siad iad féin le h-uisge, chum as nach faigh iad bàs; no 'nuair a thig iad am fagus do'n altair a fhrithéaladh, a losgadh tabhartais a bheirear suas le teine do'n Tighearn.

21 Agus ionnlaididh iad an làmhán agus an cosan, a chum as nach faigh iad bàs: agus bithidh e 'na ordugh bith-bhuan dhoibh, *eadhon* dha féin agus d'a shliochd air feadh an ginealach.

22 Agus labhair an Tighearna ri Maois, ag ràdh,

23 Gabh-sa dhuit féin, mar an ceudna, spìosraidh thaghta do mhiir fìor-ghlan, cuig ceud *secel*, agus do chanal cùbhraidh a leth uiread, *eadhon* dà cheud agus leth-cheud *secel* agus do chalamus cùbhraidh da cheud agus leth-cheud *secel*.

24 Agus do chasia cuig ceud *secel*, a réir seceil an *ionaid* naomh, agus hìn do oladh a' chroinn-olaidh.

25 Agus ni thu dheth oladh-ungaidh naomha, oladh-ungaidh coimhmeasgta réir ealadhain an léigh¹; bithidh i 'na h-oladh-ungaidh naomha.

26 Agus ungaidh tu pàilliu a' choimhthionail leatha, agus àire na Fianuis,

27 Agus am bòrd agus a shoithichean uile, agus an coimleir agus a shoithichean, agus altair na tùise,

28 Agus altair na h-ìobairt-loisgte agus a soithichean uile, agus an soitheach-ionnlaid agus a chos.

29 Agus naomhaichidh tu iad, a chum as gu'm b' iad ro naomha: ge b'e ni a bheanas ri, bithidh e naomha.

30 Agus ungaidh tu Aaron agus a mhic, agus coisrigidh tu iad, gu fhrithéaladh dhomhsa ann an dreuchd an t-sagairt.

31 Agus labhraidh tu ri cloinn Israeil, ag ràdh, Bithidh i so 'na h-oladh-ungaidh naomha dhomhsa, air feadh bhuir ginealach.

32 Air feoil duine cha dòirtear i, ni mò a ni sibh a leithid, a réir a measgaidh: *a ta* i naomha, agus naomha bithidh i dhuibh.

33 Ge b'e neach a mheasgaidh *ni* cosmhuil rithe, agus ge b'e neach a chuireas *a bheag* dlùth air coigreach, gu deimhin gearrar as

o shluagh e.

34 Agus thubhairt an Tighearna ri Maois, Gabh dhuit spìosraidh cùbhraidh, stacte, agus onicha, agus galbanum; spìosraidh cùbhraidh maille ri tùis' fìor-ghloin: do gach aon diubh bithidh an t-aon tomhas.

35 Agus ni thu boltrachan deth, air a dheanamh suas a réir ealadhain an léigh, coimhmeasgta, fìor-ghlan, naomha.

36 Agus bruthaidh tu *cuid* deth ro mhìn, agus cuiridh tu *cuid* deth fa chomhair na Fianuis ann am pàilliu a' choimhthionail, far an coinnich mise thu: ro naomha bithidh e dhuibh.

37 Agus am boltrachan a ni thu, cha dean sibh a *leithid* duibh féin, a réir a mheasgaidh: bithidh e dhuitse naomha do'n Tighearna.

38 Ge b'e neach a ni a choslas, a ghabhail fàile uaithe, gearrar as o 'shluagh e.

CAIB. XXXI.

1 Besaleel agus Aholiab air an gairm a dh'ionnsuidh oibre a' phàilliuin. 12 An t-sàbaid gu bhith air a coimhead naomha. 18 Dà chlàr na Fianuis air an labhairt do Mhaois.

A Gus labhair an Tighearna ri Maois, ag ràdh,

2 Feuch, ghairm mi air ainm Besaleel mac Uri, mhic Hur, do thréibh Iudah;

3 Agus lion mi e le spiorad Dhé, ann an gliocas, agus ann an tuigse, agus ann an eòlas, agus anns gach uile ghnè oibre.

4 A dhealbhadh² oibre ealanta, a dh'oibreachadh ann an òr, agus ann an airgid, agus ann an umha,

5 Agus ann an gearradh chlach a chum an ceangal, agus ann an gearradh fiodha, a dh'oibreachadh anns gach uile ghnè oibre.

6 Agus mise, feuch, thug mi seachad maille ris Aholiab mac Ahisamaich, do thréibh Dhain; agus ann an cridhe gach neach a ta glic-chridheach chur mi gliocas, agus ni iad gach ni a dh'aithe mi dhuit;

7 Pàilliu a' choimhthionail, agus àire na Fianuis, agus a' chaithir-thròcair a *ta* oirre, agus uile uidheam³ a' phàilliuin.

8 Agus am bòrd agus 'uidheam, agus an coimleir fìor-ghlan le 'uidheam uile, agus altair na tùise,

9 Agus altair na h-ìobairt-loisgte le h-uidheam uile, agus an soitheach-ionnlaid agus a chos,

10 Agus éididh⁴ na seirbhis, agus éididh naomha air son Aaroin an t-sagairt, agus éididh a chuid mac, gu fhrithéaladh ann an dreuchd an t-sagairt,

11 Agus an oladh-ungaidh, agus tùis cùbhraidh air son an *ionaid* naomh; a réir nan uile *nithe* a dh'aithe mi dhuit, ni iad.

¹ seòltach an Iusragain.

² a thùr.

³ airneis.

⁴ eudach.

12 Agus labhair an Tighearna ri Maois, ag ràdh,

13 Labhair thusa mar an ceudna ri cloinn Israeil, ag ràdh, Gu deimhin coimhididh¹ sibh mo shàbaidean: oir is comharadh sin eadar mise agus sibhse, air feadh bhur ginealach; chum as gu'm bi fios agaibh gur mise an Tighearna, a naomhaicheas sibh.

14 Coimhididh sibh uime sin an t-sàbaid; oir a ta i naomha dhuibh. E san a thruaill-eas² i, cuirear gu cinnteach gu bàs e; oir gach neach a ni obair oirre, gearrar an t-anam sin as o mheasg a shluaigh.

15 Sè làithean feudar obair a dheanamh, ach san t-seachdamh tha sàbaid fhois, naomha do'n Tighearna: gach neach a ni obair air là na sàbaid, cuirear gu cinnteach gu bàs e.

16 Uime sin coimhididh clann Israeil an t-sàbaid, a ghleidheadh na sàbaid air feadh an ginealach, mar choimhcheangal³ sìorruidh.

17 Eadar mise agus clann Israeil is comharadh i a chaoidh; oir ann an sè làithibh rinn an Tighearna na nèamhan agus an talamh, agus air an t-seachdamh là sguir e, agus ghabh e fois.

18 Agus thug e do Mhaois, an uair a sguir e do labhairt ris air sliabh Sinai, dà chlàr na Fianuis, clàir chloiche, sgriobhta le meur Dhé.

CAIB. XXXII.

1 Thug an sluagh air Aaron laogh leaghta a dheanamh. 19 Las corruich Mhaois, agus bhris e clàir an lagha. 30 Rinn e urnuigh ri Dia air son an t-sluaigh.

AGUS an uair a chunnaic an sluagh gu'n d'rinn Maois moille am an teachd a nuas as an t-sliabh, chruinnich iad iad féin gu h-Aaron, agus thubhairt iad ris, Eirich suas, dean dhuinn dée a théid romhainn; oir a thaobh a' Mhaois so, an duine a thug a nìos sinn á tìr na h-Eiphit, cha 'n' eil fhios againn ciod a thàinig air⁴.

2 Agus thubhairt Aaron riu, Brisibh⁵ dhibh na chuas-fhailean òir a ta ann an cluasaibh bhur ban, bhur mac, agus bhur nigheana, agus thugaibh a m' ionnsuidhse iad.

3 Agus bhris an sluagh uile dhiubh na chuas-fhailean òir a bha 'nan cluasaibh, agus thug iad gu h-Aaron iad.

4 Agus ghabh e iad as an làimh; agus chum se e le inneal-gearraidh⁶, an déigh dha laogh leaghta dheanamh dheth, agus thubhairt iad, Sin do dhée, O Israeil, a thug a nìos thu á tìr na h-Eiphit.

5 Agus an uair a chumnaic Aaron e, thog e altair fa 'chomhair, agus thug Aaron

gairm, agus thubhairt e, Is là féile⁷ am maireach do'n Tighearna.

6 Agus dh'éirich iad suas gu moch air an là maireach⁸, agus thug iad suas tabhartais-loisgte, agus thug iad leo tabhartais-sith: agus shuidh an sluagh sìos a dh'itheadh agus a dh'òl, agus dh'éirich iad suas gu sùgradh⁹.

7 Agus thubhairt an Tighearna ri Maois, Imich, falbh sìos; oir thruaill do shluaigh, a thug thu mach á tìr na h-Eiphit, iad féin.

8 Chlaon iad gu grad o'n t-slighe a dh'àithn mise dhoibh: rinn iad dhoibh féin laogh leaghta; agus rinn iad aoradh dha, agus thug iad suas iobairtean dha, agus thubhairt iad, Sin do dhée, O Israeil, a thug a nìos thu á tìr na h-Eiphit.

9 Agus thubhairt an Tighearna ri Maois, Chunnaic mise an sluagh so, agus feuch, is sluagh rag-mhuinealach¹⁰ iad.

10 A nìs uime sin leig leam, agus lasaidh mo chorruich 'nan aghaidh, agus claoidhidh mi iad: agus ni mi dhìotsa cinneach mòr.

11 Agus ghuidh Maois air an Tighearna a Dhia, agus thubhairt e, C'ar son, a Thighearna, a ta do chorruich a' lasadh an aghaidh do shluaigh, a thug thu mach á tìr na h-Eiphit le cumhachd mòr, agus le làimh thréin?

12 C'ar son a labhradh na h-Eiphitich, ag ràdh, Le droch rùn thug e mach iad, a chum am marbhadh sna beamtaibh, agus an claoidh bhàrr aghaidh na talmhainn? Pill o d' chorruich ghairg, agus gabh aithreachas do'n olc so an aghaidh do shluaigh.

13 Cuimhnich air Abraham, Isaac, agus Israel, do sheirbhisich, d'an d'thug thu miannan ort féin, agus r'an d'thubhairt thu, Ni mi bhur sìochd lionnhar mar reulta nèimh, agus am fearann so uile mu'n do labhair mi, bheir mi d'ur sìochd-sa, agus sealbhaichidh iad e gu sìorruidh.

14 Agus ghabh an Tighearna aithreachas do'n olc a thubhairt e gu'n deanadh e air a shluaigh.

15 Agus thionndaidh Maois, agus chaidh e sìos as an t-sliabh, agus dà chlàr na Fianuis 'na làimh: bha na clàir sgriobhta air an dà thaobh; air an taobh so, agus air an taobh ud eile bha iad sgriobhta.

16 Agus b'iad na clàir obair Dhé, agus b'e 'n sgriobhadh sgriobhadh Dhé, gearrta air na clàraibh.

17 Agus chuala Iosua toirm an t-sluaigh an uair a rinn iad gàir¹¹, agus thubhairt e ri Maois, Tha toirm chogaidh sa' champ.

18 Agus thubhairt e, Cha'n e guth dhaoine a' deanamh gàir air son na buadha, cha

¹ gleidhidh. ² mhì-naomhaicheas.

³ chumradh, clàmhnan. ⁴ ciod is cor dha.

⁵ Brisibh. ⁶ inneal-dualaidh.

⁷ féisde, cuirme. ⁸ an làr na mhàireach.

⁹ mircadh, cluiche, cleasachd.

¹⁰ cruaidh-mhuinealach. ¹¹ iolach.

mhò *is e* guth *dhaoine* ag éigheach a chionn gu'n d'thugadh buaidh orra, *ach* toirm luchd-gabhail ciùil a ta mi a' cluimtinn.

19 Agus co luath 'sa thàinig e 'm fagus do'n champ, chumnaic e 'n laogh, agus an dannsa: agus las corruich Mhaois, agus thilg e ua clàir as a làimh, agus bhris e iad aig bun an t-sléibh.

20 Agus ghabh e 'n laogh a rinn iad, agus loisg e san teine e, agus mhéil e gu smùr¹ e, agus chrath e air an uisge e, agus thug e air cloimn Israeil òl *dheh*.

21 Agus thubhairt Maois ri h-Aaron, Ciod a rinn an sluagh so ort, gu'n d'thug thu peacadh co mhòr orra?

22 Agus thubhairt Aaron, Na lasadh fearg mo thighearna: is aithne dhuit an sluagh, gu'm bheil iad *so-aomaidh* a dh'ionnsuidh an uile.

23 Oir thubhairt iad rium, Dean dhuinn dée, a théid romhainn; oir a thaobh a' Mhaois so, an duine a thug a mach sinn á tir na h-Eiphit, cha 'n fhios duinn ciod a thàinig air.

24 Agus thubhairt mi riù, Gach neach aig am bheil a bheag a dh'òr, briseadh c dheth e: agus thug iad dhomh e, agus thilg mi san teine e, agus thàinig a mach an laogh so.

25 Agus an uair a chumnaic Maois gu'n robh an sluagh rùisgte², (oir rùisg Aaron iad a chum an nàire am measg an naimh-dean,)

26 An sin sheas Maois ann an geata³ a' chaimp, agus thubhairt e, Cò tha leis an Tighearn? *thigeadh* e m'ionnsuidh-sa. Agus chruinnich mic Lebhi uile d'a ionnsuidh.

27 Agus thubhairt e riù, Mar so tha 'n Tighearna Dia Israeil ag ràdh, Cuireadh gach duine agaibh a chlaidheamh air a léis⁴, agus rachaibh a steach agus a mach o gheata gu geata air feadh a' chaimp, agus marbhadh gach duine agaibh a bhràthair, agus gach duine a chompanach, agus gach duine a choimhearsnach.

28 Agus rinn clann Lebhi a réir focail Mhaois: agus thuit do'n t-sluagh san là sin mu thimchioll trì mìle fear.

29 Oir thubhairt Maois, Coisrigibh sibh féin an diugh do'n Tighearn, eadhon gach duine air a mhac, agus air a bhràthair; a chum as gu'm builich⁵ e oirbh beannachadh air an là 'n diugh.

30 Agus air an là màireach thubhairt Maois ris an t-sluagh, Pheacaich sibh peacadh mòr: agus a nis théid mise suas a dh'ionnsuidh an Tighearn, a dh'fheuchainn an dean mi réite air son bhuir peacaidh.

31 Agus phill Maois a dh'ionnsuidh an Tighearn, agus thubhairt e, Och! pheacaich an sluagh so peacadh mòr, agus rinn iad dhoibh féin diathan òir:

32 Gidheadh a nis, ma's toil leat, maith dhoibh am peacadh; ach mur *maith*, dubh mise, guidheam ort, a mach as do leabhar a sgrìobh thu.

33 Agus thubhairt an Tighearna ri Maois, Ge b'e a pheacaich a'm aghaidh, esan dubhaidh mi mach as mo leabhar.

34 Uime sin a nis imich, treòraich⁶ an sluagh a chum an *ionaid* mu'n do labhair mi riut; feuch, théid m'aingear romhad: gidheadh, san là am fiosraich mi, leanaidh mi am peacadh orra.

35 Agus chlaoidh⁷ an Tighearn an sluagh, a chionn gu'n d'rinn iad an laogh⁸, a rinn Aaron.

CAIB. XXXIII.

1 *Dhiùlt an Tighearna dol leis an t-sluagh.* 9 *Labhair e ri Maois.* 18 *Ghuidh esan air Dia gu'm fuillsicheadh e a ghloir dha.*

AGUS thubhairt an Tighearna ri Maois, Imich, falbh suas as a so, thu féin agus an sluagh a thug thu mach á tir na h-Eiphit, a dh'ionnsuidh na tìre a mhionnach mi do Abraham, do Isaac, agus do Jacob, ag ràdh, Do d' shliochd-sa bheir mi i:

2 Agus cuiridh mi aingear romhad; agus fuadaichidh mi mach an Canaanach, an t-Amorach, agus an t-Hiteach, agus am Peridseach, agus an t-Hibheach, agus an Iebusach;

3 A dh'ionnsuidh fearainn a ta sruthadh le bainne agus mil: oir cha téid mi suas a' dheasg⁹, oir is sluagh rag-mhuinealach thu; air eagal gu'n claidh mi thu san t-slighe.

4 Agus an uair a chual¹⁰ an sluagh an droch sgeul so, rinn iad bròn; agus cha do chuir duine sam bith air a bhrèaghadh¹⁰.

5 Oir thubhairt an Tighearna ri Maois, Abair ri cloimn Israeil, Is sluagh rag-mhuinealach sibh: ann am platha¹¹ théid mi suas 'nur measg, agus claidhidh mi sibh: a nis uime sin, cuiribh dhìbh bhuir brèaghadh, a chum as gu'm bi fios agam ciod a ni mi ribh.

6 Agus rùisg clann Israeil am brèaghadh dhiubh làimh ri sliabh Horeb.

7 Agus ghabh Maois am pàillium¹², agus shuidhich e 'n taobh a mach do'n champ e, fad o'n champ, agus thug e pàillium a' choimhthionail mar àinn air. Agus 'na lorg sin, chaidh gach neach a bha 'g iarraidh an Tighearn a mach do phàillium a' choimhthionail, a bha 'n taobh a muigh do'n champ.

8 Agus an uair a chaidh Maois a mach

¹ *fidar.*

² *lommochd.*

³ *dorus.*

⁴ *a leth-taobh.*

⁵ *gu'm bàruig.*

⁶ *thoir leat.*

⁷ *bhuail. Eabh.*

⁸ *air son an aoraidh a rinn*

⁹ *eadach*

¹⁰ *eadach*

¹¹ *mionaid, tiota, athghaoraid.*

¹² *bùth. Eabh.*

do'n phaillium, dh'éirich an sluagh gu léir suas, agus sheas gach duine aig doras a bhùtha, agus dh'amhairc iad an déigh Mhaois, gus an deachaidh e stigh do'n phàillium.

9 Agus an uair a chaidh Maois a stigh do'n phàillium, thàinig am meall¹ neoil a nuas, agus sheas e aig doras a' phàillium, agus labhair an Tighearna ri Maois.

10 Agus chunnaic an sluagh uile am meall neoil 'na sheasamh aig doras a' phàillium: agus dh'éirich an sluagh uile suas, agus rinn iad aoradh, gach duine ann an doras a bhùtha.

11 Agus labhair an Tighearna ri Maois aghlaidh ri h-aghlaidh, mar a labhras duine r'a charaid. Agus phill e ris do'n champ; ach cha deachaidh a sheirbhiseach Iosua, mac Nuin, duine òg, a mach as a' phàillium.

12 Agus thubhairt Maois ris an Tighearna, Feuch, a ta thu 'g ràdh rium, Thoir suas an sluagh so; agus cha d'thug thu fios domh co chuireas tu maille rium. Gidheadh thubhairt thu, Is aithne dhomh thu air t'ainm, agus mar an ceudna fhuair thu deadh-ghean a'm' shùilbh².

13 A nis uime sin, guidheam ort, ma fhuair mi deadh-ghean a'd' shùilbh, nochd dhomh do shlighe, a chum as gu'm bi aithne agam ort, agus gu'm faigh mi deadh-ghean a'd' shùilbh agus meas³ gur e 'n cinneach so do shluagh-sa.

14 Agus thubhairt e, Théid mo làthair-eachd⁴ leat, agus bheir mi fois dhuit.

15 Agus thubhairt e ris, Mur téid do làthaireachd maille ruinn, na toir suas sinn á so:

16 Oir ciod e leis an aithnichear ann an so, gu'n d'fhuair mise agus do shluagh deadh-ghean a'd' shùilbh? Nach ann le d' dhol maille ruinn? Mar so dealaichear sinn, mise agus do shluagh, o gach uile shluagh a ta air aghaidh na talmhainn.

17 Agus thubhairt an Tighearna ri Maois, An ni so mar an ceudna a thubhairt thu, ni mise; oir fhuair thu deadh-ghean a'm' shùilbh, agus is aithne dhomh thu air t'ainm.

18 Agus thubhairt esan, Foillsich dhomh, guidheam ort, do ghlòir.

19 Agus thubhairt e, Bheir mi air mo mhaithreas uile dol seach a'd' làthair⁵, agus gairmidh mi ainm an TIGHEARN a'd' fhiamuis; agus bithidh mi gràsmhor dhàsan d'am bi mi gràsmhor, agus nochdaidh mi tròcair dhàsan d'an nochd mi tròcair.

20 Agus thubhairt e, Cha'n fheud thu m'aghaidhs' fhaicinn; oir cha 'n fhaic

duine air bith mise, agus e beò⁶.

21 Agus thubhairt an Tighearna, Feuch, tha àite làimh rium, agus seasaidh tusa air carraig⁷:

22 Agus an uair a bhios mo ghlòir a' dol seachad, an sin cuiridh mi thu ann an sgoltadh do'n charraig, agus còmhdaichidh mi le m' làimh thu gus an téid mi seachad.

23 Agus bheir mi air falbh mo làmh, agus chi thu mo chùlaobh: ach cha'n fhaic ear m'aghaidh.

CAIB. XXXIV.

1 Dh'ath-muadhaicheadh clàir an lagha. 5 Ghairmeadh air ainm an Tighearna. 10 Rinn Dia còimheangal r'a shluagh.

AGUS thubhairt an Tighearna ri Maois, Snaidh dhuit féin dà chlàr chloiche cosmhuil ris na ceud chlàir; agus sgrìobhaidh mis' air na clàir sin na fòcail a bha air na ceud chlàir a bhris thu.

2 Agus bi deas⁸ sa' mhaduinn, agus thig a nìs sa' mhaduinn do shliabh Shinaì, agus nochd thu féin an sin dhomhs' air mullach an t-slàibh.

3 Agus na tigeadh duine sam bith a nìs maille riut, agus na faicear duine san t-sliabh uile, agus na h-ionaltradh na treudan no'm buar⁹ fa chomhair an t-slàibh sin.

4 Agus shnaidh e dà chlàr chloiche, cosmhuil ris na ceud chlàir; agus dh'éirich Maois suas gu moch sa' mhaduinn, agus chaidh e suas do shliabh Shinaì, mar a dh'aithn an Tighearna dha, agus thug e leis 'na làimh an dà chlàr chloiche.

5 Agus thàinig an Tighearna nuas ann an neul, agus sheas e maille ris an sin; agus ghairm e air ainm an Tighearna.

6 Agus chaidh an Tighearna seachad¹⁰ fa 'chomhair, agus ghairm e, an TIGHEARN, AN TIGHEARN DIA, iochdmhor agus gràsmhor, fad-fhulangach, agus pailt' ann an caoimhneas¹¹ agus am firinn.

7 A' gleidheadh tròcair do mhiltibh, a' maitheadh¹² aingidheachd agus eusaontais, agus peacaidh, agus nach saor air aon dòigh an ciontach; a' leantuin aingidheachd nan aithrichean air a' chloinn, agus air cloinn na cloinne, air an treas¹³ agus air a' cheathramh ginealach.

8 Agus rinn Maois deifir¹⁴, agus chrom e a cheann ri làr, agus rinn e aoradh.

9 Agus thubhairt e, Ma fhuair mi nis deadh-ghean a'd' shùilbh, O Tighearna, rachadh mo Thighcarna, guidheam ort, 'nar measg, (oir is sluagh rag-mhuinealach iad), agus maith dhuinn ar n-aingidheachd

¹ column, pillar. Sasg.

² tainneachd a'm' shealladh.

³ faic. Eabh.

⁴ m'aghaidh. Eabh.

⁵ gabhail seach romhad.

⁶ cha'n urrainn

duin' air bith mise fhaicinn, agus a bhi beò.

⁷ air a' chreig sin.

⁸ ullamh.

⁹ na caorach, no 'n crodh.

¹⁰ seach.

¹¹ tròcair.

¹² a' maitheamh; a' toirt air falbh

aingidheachd. Eabh.

¹³ gu ruig an treas.

¹⁴ eabhag.

agus ar peacadh, agus gabh sinn mar t'òighreachd féin.

10 Agus thubhairt e, Feuch, ni mise coimhcheangal; ann an làthair do shluaigh uile ni mi nithe iongantach, nithe nach d'rinneadh an leithid air an talamh uile, no ann an aon chinneach: agus chi an sluagh uile, am measg *am bheil* thu, obair an Tighearn: oir *is* ni uamhasach a ni mise riut.

11 Coimhid thusa an uir a *tha* mi 'g àithneadh dhuit an diugh: Feuch, fuad- aichidh mi mach¹ romhad an t-Amorach, agus an Canaanach, agus an t-Hiteach, agus am Peridseach, agus an t-Hibheach, agus an Iebusach.

12 Thoir an aire dhuit féin, air eagal gu'n dean thu coimhcheangal ri luchd- àiteachaidh na tìre d'am bheil thu dol, air eagal gu'm bi e 'na ribeadh a'd' mheadhon:

13 Ach sgriosaidh sibh an altairean, agus brisidh sibh an dealbhan, agus gearraidh sibh sìos an doireachan².

14 Oir cha dean thu aoradh do dhia sam bith eile; oir an Tighearna, d'an ainm Eudmhor, *is* Dia eudmhor e:

15 Air eagal gu'n dean thu coimhchean- gal ri luchd-àiteachaidh na tìre, agus gu'n téid iad le striopachas an déigh an diathan, agus gu'n toir iad iobairt d'an déibh, agus gu'n toir *neach* cuireadh dhuit, agus gu'n ith thu d'a iobairt;

16 Agus gu'n gabh thu d'an nighean- aibh do d' mhic, agus gu'n téid an nigh- eana le striopachas an déigh an diathan³, agus gu'n toir iad air do mhic dol le striopachas an déigh an diathan.

17 Cha dean thu dhuit féin diathan leaghta.

18 Féill⁴ an arain neo-ghoirtichte cum- aidd tu: seachd làithean ithidh tu aran neo-ghoirtichte, mar a dh'àithn mi dhuit ann an àm a' mhìos Abib⁵; oir anns a' mhìos Abib thàinig thu mach as an Eiphit.

19 Gach *ni* a dh'fhosglaas a' bhrù⁶ *is* leams' e; agus gach ceud-ghin am measg do spréidhe, *ma's ann* do'n bhuar⁷ no do na coraich e, a *bhios* firionn.

20 Ach ceud-ghin asail fuasglaidh tu le h-uair; agus mur fuasglaidh tu e, an sin brisidh tu amhach⁸. Uile ceud-ghin do mhac fuasglaidh tu; agus cha nochdar⁹ a h-aon a'm' làthair-sa falamh.

21 Sè làithean ni thu obair, ach air an t-seachdamh là gabhaidh tu fois: ann an àm an treabhaidh agus anns an fhoghar gabhaidh tu fois.

22 Agus cumaidh tu féill nan seachdain,

a' cheud toraidh do fhoghar a' chruith- neachd, agus féill a' chròdhaidh¹⁰ ann an deireadh na bliadhna.

23 Tri uairean sa' bhliadhna nochdar do mhic uile an làthair an Tighearna Iehobhah, Dé Israeil:

24 Oir tilgidh mi mach na cinnich romh- ad, agus ni mi do chrìocha ni's farsuinge; agus cha mhìannaich duine sam bith t'fhearann, an uair a théid thu suas g'ad nochdadh féin am fianuis an Tighearna do Dhé, tri uairean sa' bhliadhna.

25 Cha 'n iobairt thu fuil m'ìobairt-sa le taois ghoirt, cha mhò a dh'fhàgar gu maduinn iobairt féill na càisge.

26 Toiseach ceud-thoraidh t'fhearainn bheir thu do thigh an Tighearna do Dhé. Cha bhrùich thu meann am bainne a mhàthar.

27 Agus thubhairt an Tighearna ri Maois, Sgrìobh thusa na focail so: oir a réir brìgh nam focal so rinn mise coimh- cheangal riut féin agus ri h-Israel.

28 Agus bha e 'n sin maille ris an Tigh- earna dà fhichead là agus dà fhichead oidhche; cha d'ith e aran, ni mò dh'òl e uisge: agus sgrìobh e air ua clàir focail a' choimhcheangail, na deich àith- eantan.

29 Agus an uair a thàinig Maois a muas o shliabh Shinai, (le dà chlàr na Fianuis ann an làimh Mhaois, an uair a thàinig e muas o'n t-sliabh) cha robh fios aig Maois gu'n do dhealraich croiciomn' aghaidh, am feadh 'sa bha e còmhradh ris.

30 Agus dh'amhaire Aaron agus clann Israeil uile air Maois; agus, feuch, dheal- raich croiciomn' aghaidh, agus bha eagal orra teachd am fagus da.

31 Agus ghairm Maois orra; agus phill Aaron agus uachdarain a' choimhthionail uile d'a ionsuidh; agus rinn Maois còmh- radh riut.

32 Agus 'na dhéigh sin thàinig clann Israeil uile am fagus da; agus dh'àithn e dhoibh na h-uile *nithe* a labhair an Tighearna ris ann an sliabh Shinai.

33 Agus sguir Maois a labhairt riu; agus chuir e gnùis-bhrat¹¹ air 'a ghaidh.

34 Ach an uair a chaidh Maois a steach an làthair an Tighearna a labhairt ris, thug e 'n gnùis-bhrat deth, gus an d'thàinig e mach. Agus thàinig e mach, agus labh- air e ri cloimn Israeil *an ni sin* a dh'àith- neadh dha.

35 Agus chumnaic clann Israeil aghaidh Mhaois, gu'n do dhealraich croiciomn' agh- aidh Mhaois: agus chuir Maois an gnùis- bhrat air 'a ghaidh a ris, gus an deachaidh e stigh a labhairt ris.

¹ tilgidh mi mach.

³ dèc.

⁵ mìos a' cheud-thoraidh.

² badan-coille.

⁴ fèisd, fèadh, cuir.

⁶ a' mhachlag.

⁷ chròdh.

⁸ a' mhùineal.

⁹ taisbeanar.

¹⁰ fèisd a' chruinneachaidh, cuir an deire-tharruing.

¹¹ còmh-dach; veil. Sasg.

CAIB. XXXV.

1 *Tha'n t-sàbaid gu bhì air a coimhead naomha.*
 4 *Saor-thabhartais air son a' phàilliuin.* 20 *Thug an sluagh gu toileach seachad iad.*

AGUS chruinnich Maois coimhthional chloinn Israeil uile r'a chéile, agus thubhairt e riù, Sìn na nithe¹ a dh'àithn an Tighearna gu'n deanadh sibh iad.

2 Sè làithean nìthear obair, ach bithidh an seachdamh là dhuibh 'na là naomha, 'na shàbaid thàimh do'n Tighearna: ge b'e neach a nì obair air, cuirreag gu bàs e.

3 Cha'n fhadaidh sibh teine sam bith air feadh bhur n-àiteacha-còmhnuidh air là na sàbaid.

4 Agus labhair Maois ri coimhthional chloinn Israeil uile, ag ràdh, So an nì a dh'àithn an Tighearna, ag ràdh,

5 Togaibh 'nur measg tabhartas do'n Tighearna: gach neach aig am bheil cridhe toileach, thugadh e leis e, tabhartas do'n Tighearna; òr, agus airgiod, agus umha,

6 Agus gorm, agus corcur, agus scarlaid, agus anart grinn, agus *fionnadh* ghabhar,

7 Agus croicne reitheachan air an dath dearg, agus croicne bhroc, agus fiodh sitim.

8 Agus oladh air son soluis, agus spìosraidh air son oladh-ungaidh, agus air son tùise cùbhraidh,

9 Agus clachan onics, agus clachan a chum an ceangal, air son na h-ephoid, agus air son na h-uchd-éididh.

10 Agus thigeadh gach duine glic-chridheach 'nur measg, agus deanadh e gach nì a dh'àithn an Tighearna;

11 Am pàilliuin, a bhùth, agus a chòmhdach, a chromagan, agus a bhuird, a chroinn, a phuist, agus a bhuinn;

12 An àirc agus a bataichean, a' chaithir-thròcair agus roinn-bhrat a' chòmhdach;

13 Am bòrd agus a bhataichean, agus a shoitheichean uile, agus an t-aran tais-beanta²;

14 Agus an coinnleira chum an t-soluis, agus uidheam, agus a lòchrain, maille ri oladh chum an t-soluis;

15 Agus altair na tùise, agus a bataichean, agus an oladh-ungaidh, agus an tùis chùbhraidh, agus an cùrtein air son doruis a' phàilliuin³;

16 Altair na h-ìobairt-loisgte agus a cliath umha⁴, a bataichean, agus a soitheichean uile, an soitheach-ionnlaid agus a chos;

17 Cùrteinean na cùirte, a puist agus a buinn, agus cùrtein air son doruis na cùirte.

18 Pinneachan⁵ a' phàilliuin, agus pinn-eachan na cùirte, agus an cuird;

19 Eìdidh an fhrithealaidh, a fhrithealadh san ionad naomh; an éididh naomha air son Aaroin an t-sagairt, agus éididh air son a chuid mac, a fhrithealadh ann an dreuchd an t-sagairt.

20 Agus dh'fhalbh coimhthional chloinn Israeil uile à làthair Mhaois.

21 Agus thàinig iad, gach duine a dhùisg a chridhe suas, agus gach duine a rinn a chridhe toileach, agus thug iad leo tabhartas an Tighearna air son oibre pàilliuin a' choimhthional, agus air son a sheirbhìs uile, agus air son na h-éididh naomha.

22 Agus thàinig iad, araon⁶ fir agus mnàì, a mhead's aig an robh cridhe toileach, agus thug iad leo bràistean⁷ agus cluas-fhailean, agus fàinneachan, agus criosa muineil⁸, agus uidheam òir⁹: agus gach fear a thug seachad, *thug e seachad* tabhartas òir do'n Tighearna.

23 Agus gach fear aig an d'fhuaradh gorm, agus corcur, agus scarlaid, agus anart grinn, agus *fionnadh* ghabhar, agus croicne dearg reitheachan, agus croicne bhroc, thog iad leo iad.

24 Gach duine a thug seachad tabhartas airgid agus umha, thug e leis tabhartas an Tighearna: agus gach duine aig an d'fhuaradh fiodh sitim chum oibre sam bith do'n t-seirbhìs, thug e leis e.

25 Agus shnìomh na mnàì uile a bha glic-chridheach le'n làmhnan, agus thug iad leo an nì a shnìomh iad, an gorm, agus an corcur, an scarlaid, agus an t-anart grinn.

26 Agus na mnàì uile a dhùisg an cridhe suas ann an gliocas, shnìomh iad *fionnadh* ghabhar.

27 Agus thug na h-uachdarain leo clachan onics, agus clacha chum an ceangal, air son na h-ephoid, agus air son na h-uchd-éididh;

28 Agus spìosraidh, agus oladh air son an t-soluis, agus air son na h-oladh-ungaidh, agus air son na tùise cùbhraidh.

29 Thug clann Israeil tabhartas toileach a dh'ionnsuidh an Tighearna, gach fear agus bean a rinn an cridhe toileach a thoirt a chum gach gnè oibre, a dh'àithn an Tighearna dheanamh le làimh Mhaois.

30 Agus thubhairt Maois ri cloinn Israeil, Faicibh, ghairm an Tighearna air ainm Besaleel mac Uri, mhic Hur, do thréibh Iudah:

31 Agus lìon se e le spiorad Dhé, ann an gliocas, ann an tuigse, agus ann an eòlas, agus anns gach gnè oibre;

32 Agus a dhealbhadh¹⁰ oibre ealanta, a dh'obreachadh ann an òr, agus ann an airgiod, agus ann an umha.

¹ briathra.² aran na Fianuis.³ brat an doruis air son doruis a' phàilliuin. Eabh.⁴ criathar praise.⁵ tairnean, seannann.⁶ an dà chuid.⁸ paidirein.¹⁰ a chumadh.⁷ dealgan.⁹ seudan òir gu lèir.

33 Agus ann an gearradh chlach chum *an ceangal*, agus ann an snaidheadh fiodha, a dheanamh gnè sam bith a dh'obair ealanta.

34 Agus chuir e 'na chridhe gu'n teagaisgeadh e, e féin agus Aholiab mac Ahisamaich do thréibh Dhain.

35 Lìon e iadsan le gliocas cridhe, a dh'oibreachadh gach gnè oibre, *oibre* a ghearradair, agus an oibriche ealanta, agus an oibriche le snàthaid ann an gorm, agus ann an corcur, ann an scarlaid, agus ann an anart grinn, agus an fhlightheadair, a nì obair sam bith, agus a dhealbhas obair ealanta.

CAIB. XXXVI.

1 *Thugadh na tabhartais do'n luchd-oibre.* 6 *Thoir-misgeadh do'n t-sluagh tuilleadh a thoirt leo.* 8 *Kinneadh cùirteinean agus buird air son a' phàilliuin.*

AGUS dh'oibrich Besaleel agus Aholiab, agus gach duine glic-chridheach d'an d'thug an Tighearna gliocas agus tur¹, a thuigsinn cionnus a dheanadh iad gach gnè oibre air son seirbhis an *ionaid* naoimh, a réir gach nì a dh'àithn an Tighearn.

2 Agus ghairm Maois air Besaleel, agus air Aholiab, agus air gach duine glic-chridheach, d'an d'thug an Tighearna gliocas 'na chridhe, *eadhon* gach aon a dhùisg a chridhe suas, gu teachd a chum na h-oibre g'a deanamh.

3 Agus ghabh iad o Mhaois na tabhartasan uile a thug clann Israeil leo chum oibre seirbhis an *ionaid* naoimh, g'a deanamh. Agus thug iad fathast d'a ionnsuidh saor-thabhartasan gach aon mhad-uinn.

4 Agus thàinig na daoine glic uile, a rinn uil' obair an *ionaid* naoimh, gach duine ac' o 'bair féin a *bha* iad a' deanamh;

5 Agus labhair iad ri Maois, ag ràdh, Tha 'n sluagh a' toirt leo tuilleadh gu mòr na uis leòr, a chum scribhis na h-oibre a dh'àithn an Tighearn a dheanamh.

6 Agus dh'àithn Maois, agus thugadh gairm air feadh a' chaimp, ag ràdh, Na deanadh fear no bean sam bith tuilleadh oibre air son tabhartais an *ionaid* naoimh. Mar sin thoirmisgeadh² do'n t-sluagh *nì sam bith a thoirt leo*.

7 Oir bu leòr an t-uidheam³ a bh'aca air son na h-oibre uile, g'a deanamh, agus bu tuilleadh 's nì bu leòr e.

8 Agus rinn gach duine glic-chridheach 'nam measg-san a dh'oibrich obair a' phàilliuin⁴, deich cùirteine do anart grinn toinnte, agus *do ghorm*, agus *do chorcur*,

agus *do scarlaid*; *le cerubaibh* a dh'obair ealanta rinn e iad:

9 Fad aon chùirtein ochd làmhha-coille thar fhichead, agus leud aon chùirtein ceithir làmhha-coille: na cùirteinean uile dh'aon tomhas.

10 Agus cheangail e cùig cùirteine gach aon r'a chéile: agus na cùig cùirteinean *eile* cheangail e gach aon r'a chéile.

11 Agus rinn e lùban do ghorm air foir aon chùirtein, o'n iomall sa' choimhcheangal; air a' mhodh cheudna rinn e ann am foir a' chùirtein *eile's* faide mach, ann an coimhcheangal an dara *aoin*.

12 Leth-cheud lùb rinn e ann an aon chùirtein, agus leth-cheud lùb rinn e ann an iomall a' chùirtein a *bha* ann an coimhcheangal an dara *aoin*; cheangail na lùban aon chùirtein ri cùirtein eile⁵.

13 Agus rinn e leth-cheud cromag òir, agus choimhcheangail e na cùirteinean aon ri h-aon leis an cromagaibh. Mar sin rinneadh e 'na aon phàilliuin.

14 Agus rinn e cùirteine do *fhionnadh* ghabhar, air son a' bhùtha os ceann a' phàilliuin⁶; aon chùirtein deug rinn e dhiubh:

15 *B'e* fad aon chùirtein deich làmhha-coille thar fhichead, agus ceithir làmhha-coille leud aon chùirtein; *bha'n* t-aon chùirtein deug a dh'aon tomhas.

16 Agus choimhcheangail e cùig cùirteine leo féin, agus sè cùirteine leo féin.

17 Agus rinn e leth-cheud lùb air an fhoir a b' fhaide mach do'n chùirtein sa' choimhcheangal, agus leth-cheud lùb rinn e air foir a' chùirtein a tha coimhcheangal an dara *aoin*.

18 Agus rinn e leth-cheud cromag a *dh'*umha, a cheangal a' bhùtha r'a chéile, chum as gu'm biodh e 'na aon.

19 Agus rinn e còmhach do'n bhùth, do chroicnibh reitheachan air an dath dearg, agus còmhach do chroicnibh bhroc os a cheann.

20 Agus rinn e buird do'n phàilliuin do fhìodh sìtim, 'nan seasamh:

21 Deich làmhha-coille fad bùird, agus làmh-choille gu leth leud aon bhùird.

22 *Bha* dà làimh⁷ aig aon bhòrd, air an cur an ordugh, aon fa chomhair aoin⁸: mar so rinn e ri bùird a phàilliuin uile.

23 Agus rinn e buird do'n phàilliuin: fhichead bòrd air son an taoibh dheas, ris an àirde deas.

24 Agus dà fhichead cos⁹ airgid rinn e fuidh 'n fhichead bòrd: dà chois fuidh aon bhòrd a réir¹⁰ a dhà làimh, agus dà chois fuidh bhòrd eile a réir a dhà làimh.

25 Agus air son taoibh eile a' phàilliuin a

¹ *tuigse.*² *bhacadh.*³ *stubb; obair.* Eabh.⁴ *a' phubuilt.*⁵ *bha na lùban fa chomhair a chéile.* Eabh.⁶ *gu bhi 'nan còmhach air a' phàilliuin.*⁷ *tharsannain; tenons.* Sarg.⁸ *gach aon co**fhad o chéile.*⁹ *cas, pulag.*¹⁰ *airson.*

ta ris an àirde tuath, rinn e fichead bòrd, 26 Agus an dà fhichead cos a dh'airgiod: dà chois fuidh aon bhòrd, agus dà chois fuidh bhòrd eile.

27 Agus air son taobhan a' phàilliuin ris an àird an iar, rinn e sè buird.

28 Agus rinn e dà bhòrd air son oisinn-ean a' phàilliuin san dà thaobh.

29 Agus bha iad air an ceangal ri chèile fuidhe, agus mar an ceudna bha iad air an coimhcheangal aig a' cheann ri h-aon fhailbheig: mar so rinn e riu le chèile san dà oisinn.

30 Agus bha ochd buird ann, agus an cosan a dh'airgiod, *eadhon* sè cosa deug: dà chois fuidh gach bòrd.

31 Agus rinn e croinn do fhiodh sitim, cùig air son bhòrd aon taoibh do'n phàilliuin.

32 Agus cùig croinn air son bhòrd an taoibh eile do'n phàilliuin, agus cùig croinn air son bhòrd a' phàilliuin a chum nan taobh a *ta* ris an àird an iar.

33 Agus thug e air a' chrann mheadhonach dol troimh¹ na bùird o cheann gu ceann.

34 Agus chòmhdach e thairis na bùird le h-òr, agus rinn e'm failbheagan a *dh'òr gu bhi* 'nan àitibh do na croinn, agus chòmhdach e thairis na croinn le h-òr.

35 Agus rinn e roinn-bhrat do ghorm, agus do chorcur, agus do scarlaid, agus do anart grunn toinnte; a dh'obair ealanta rinn se e, le cerubaibh.

36 Agus rinn e dha ceithirpuist do fhiodh sitim, agus chòmhdach e thairis iad le h-òr: *bha* 'n cromagan a *dh'òr*, agus thilg² e dhoibh ceithir buinn airgid.

37 Agus rinn e air son doruis a' bhùtha³ brat⁴ do ghorm, agus do chorcur, agus do scarlaid, agus do anart grunn toinnte, dh'obair shnàthaide:

38 Agus a chùig puist le 'n cromagaibh: agus chòmhdach e thairis an cinn, agus an cuairteagan le h-òr: ach *bha* 'n cùig buinn a dh'umha.

CAIB. XXXVII.

1 An àirc. 6 Caithir-thròcair le cerubaibh. 10 Am bòrd le 'shoithichibh. 17 An coinnleir òir. 25 Alt-air na tùise. 29 An oladh-ungaidh.

A GUS rinn Besaleel an àirc do fhiodh sitim; dà làimh-choille gu leth a fad, agus làmh-choille gu leth a leud, agus làmh-choille gu leth a h-àirde:

2 Agus chòmhdach e thairis i le h-òr fìor-ghlan, a stigh agus a muigh; agus rinn e coron òir dh'i mu'n cuairt.

3 Agus thilg e dh'i ceithir failbheagan òir, *gu bhi* air a ceithir oisinnibh: eadhon dà fhailbheig air aon taobh dh'i, agus dà fhailbheig air aon taobh eile dh'i.

4 Agus rinn e bataichean do fhiodh sitim, agus chòmhdach e thairis iad le h-òr.

5 Agus chuir e na bataichean anns na failbheagaibh air taobhan ua h-àirce, chum an àirc a ghiùlan.

6 Agus rinn e caithir thròcair a *dh'òr* fìor-ghlan: dà làimh-choille gu leth a fad, agus làmh-choille gu leth a leud.

7 Agus rinn e dà cherub a *dh'òr*, buailte mach á h-aon mhìr rinn e iad, aig dà cheann na caithir-thròcair;

8 Aon cherub aig a' cheann air an taobh so, agus cerub eile aig a' cheann air an taobh ud: a mach as a' chaithir-thròcair rinn e na ceruban aig a dà cheann.

9 Agus bha na ceruban a' sgaioleadh an sgiathan gu h-àrd, a' còmhdachadh le 'n sgiathaibh os ceann na caithir-thròcair, agus an aghaidhean⁵ r'a chèile; ris a' chaithir-thròcair bha aghaidhean nan cerub.

10 Agus rinn e 'm bòrd do fhiodh sitim: dà làimh-choille 'fhad, agus làmh-choille a leud, agus làmh-choille gu leth 'àirde.

11 Agus chòmhdach e thairis e le h-òr fìor-ghlan, agus rinn e dha coron òir mu'n cuairt.

12 Mar an ceudna rinn e dha iomall do leud boise mu'n cuairt; agus rinn e coron òir d'a iomall mu'n cuairt.

13 Agus thilg e dha ceithir failbheagan òir, agus chuir e na failbheagan air na ceithir oisinnibh e *bha* aig a' cheithir chosaibh.

14 Thall fa chomhair an iomaill bha na failbheagan, na h-àiteachan do na bataicheibh gus am bòrd a ghiùlan.

15 Agus rinn e na bataichean do fhiodh sitim, agus chòmhdach e thairis iad le h-òr, gus am bòrd a ghiùlan.

16 Agus rinn e na soithichean a *bha* air a' bhòrd, a mliasan, agus a thùiseirean, agus a' chopain, agus a chuachan leis an toirear seachad tabhartas-dìbhe, a *dh'òr* fìor-ghlan.

17 Agus rinn e 'n coinnleir a *dh'òr* fìor-ghlan; a *dh'obair* bhuailte rinn e 'n coinnleir: *bha* a chos, agus a mheur⁶, a chopain, a chnapan, agus a bhlàthan, do'n *ni* cheudna.

18 Agus sè meoir a' dol a mach as a thaobhan: trì meoir a' choinnleir á h-aon taobh dheth, agus trì meoir a' choinnleir as an taobh eile dheth.

19 Tri copain air an deanamh cosmhuil ri almonaibh ann an aon mheur, *maille* ri cnap agus blàth; agus tri copain air an deanamh cosmhuil ri almonaibh ann am meur eile, *maille* ri cnap agus blàth: mar sin anns na sè meoir a' dol a mach as a' choinnleir.

¹ roimh; tre, trid. Eir.

² rinn.

³ a' phàilliuin, a' phubhuill.

⁴ còmhdach, cùirtein.

⁵ aghainean.

⁶ mlianglan.

20 Agus anns a' choimhleir *bha* ceithir copain air an deanamh cosmhuil ri almonaibh, *maille* r'a chnaip agus a bhlàthan.

21 Agus cnap fuidh dhà mheur dheth, agus cnap fuidh dhà mheur dheth, agus cnap fuidh dhà mheur dheth, a réir nan se meur a' dol a mach as.

22 Bha 'n cnaip agus am meoir do'n *ni* cheudna: b'aon obair bhualte a dh'òr fìor-ghlan an t-iomlan deth.

23 Agus rinn e a sheachd lòchrain, agus a smàladairean¹, agus a smàl-shoithichean, a dh'òr fìor-ghlan.

24 Do thàlam òir fhìor-ghloin rinn se e, agus a shoithichean uile.

25 Agus rinn e altair na tùise do fhiodh sitim; làmh-choille a fad, agus làmh-choille a leud, (*bha* i ceithir-chearnach,) agus dà làmh-choille a h-àirde; *bha* a h-adhaircean do'n *ni* cheudna.

26 Agus chòmhdach e thairis i le h-òr fìor-ghlan, a mullach, agus a taobhan mu'n cuairt, agus a h-adhaircean; agus rinn e coron òir dh'i mu'n cuairt.

27 Agus rinn e dà fhailbheig òir dh'i fuidh a coron, aig² a dà oisinn, air a dà thaobh, *gu bhi* 'nan àitibh do na bataichibh chum a giùlan leo.

28 Agus rinn e na bataichean do fhiodh sitim, agus chòmhdach e thairis iad le h-òr.

29 Agus rinn e an oladh-ungaidd naomh, agus an tùis fhìor-ghlan do spioraidh chùbhraidh, a réir oibre an léigh³.

CAIB. XXXVIII.

1 Altair na h-ìobairt-loisgte. 8 An soitheach-ionnlaid umha. 9 A' chùirt. 24 Tomhas an òir a chuireadh am feum san obair.

AGUS rinn e altair na h-ìobairt-loisgte do fhiodh sitim: cùig làmh-choille a fad, agus cùig làmh-choille a leud, (*bha* i ceithir-chearnach,) agus trì làmh-choille a h-àirde.

2 Agus rinn e a h-adhaircean air a ceithir oisinnibh: *bha* a h-adhaircean do'n *ni* cheudna; agus chòmhdach e thairis i le h-umha.

3 Agus rinn e uile shoithichean na h-altarach, na h-aighnean⁴, agus na sluasaid-ean, agus na cuachan, agus na greimichean, agus na h-aighnean teine: a soithichean uile rinn e a dh'umha.

4 Agus rinn e do'n altair cliath do lìon-obair umha, f'a cuairt gu h-òsal, gu ruig a meadhon.

5 Agus thilg e ceithir failbheagan do cheithir oisinnibh⁵ na cléith umha, *gu bhi* 'nan àitibh do na bataichibh.

6 Agus rinn e na bataichean do fhiodh sitim, agus chòmhdach e thairis iad le h-umha.

7 Agus chuir e na bataichean anns na failbheagaibh air taobhan na h-altarach, chum a giùlan leo: fàs le bòrdaibh rinn e i.

8 Agus rinn e an soitheach-ionnlaid a dh'umha, agus a chos a dh'umha, do sgàth-anaibh *nam ban*, a chruinnich 'nam buidh-nibh aig dorus pàilliuin a' choimhthionail⁶.

9 Agus rinn e a' chùirt air an taobh mu dheas, ris an àirde deas: *bha* cùirteinean na cùirte do anart grinn toinnte, ceud làmh-choille *air fad*;

10 Am puist fichead, agus am buinn umha fichead; *bha* cromagan nam post agus an cuairteagan a dh'airgiod.

11 Agus air an taobh mu thuath, *bha* na cùirteine do cheud làmh-choille; am puist fichead, agus am buinn umha fichead; cromagan nam post, agus an cuairteagan⁷ a dh'airgiod.

12 Agus air an taobh an iar *bha* cùirteine do leth-cheud làmh-choille; am puist deich, agus am buinn deich: cromagan nam post agus an cuairteagan a dh'airgiod.

13 Agus air an taobh an ear ris an àird an ear, leth-cheud làmh-choille.

14 *Bha* cùirteinean aon taobh do'n gheata cùig làmh-choille deug; am puist trì, agus am buinn trì.

15 Agus air son an taobh eile do gheata na cùirte, air an làimh so agus air an làimh ud, *bha* cùirteine do chùig làmh-choille deug; am puist trì, agus am buinn trì.

16 *Bha* cùirteinean na cùirte uile mu'n cuairt a dh'anart grinn toinnte.

17 Agus *bha* buinn nam post a dh'umha; cromagan nam post, agus an cuairteagan a dh'airgiod, agus còmhdach an ceann a dh'airgiod; agus *bha* uile phuist na cùirte air an ceangal mu'n cuairt⁸ le h-àirde.

18 Agus *bha* 'm brat air son geata na cùirte 'na obair shnàthaid do ghorm, agus do chorcur, agus do scarlaid, agus do anart grinn toinnte: agus b'e fichead làmh-choille fhad, agus b'e àirde san leud cùig làmh-choille, a' coimh-fhreagairt do chùirteuibh na cùirte:

19 Agus am puist ceithir, agus am buinn umha ceithir; an cromagan a dh'airgiod, agus còmhdach an ceann, agus an cuairteagan a dh'airgiod.

20 Agus *bha* uile phinneachan a' phàilliuin, agus na cùirte mu'n cuairt a dh'umha.

21 Is e sin àireamh *nithe* a' phàilliuin, pàilliuin na Fianuis, mar a dh' àirmheadh iad, a réir àithne Mhaois, air son seirbhis nan Lebhitheach, le làimh Itamair, mhic Aaroin an t-sagairt.

22 Agus rinn Besalcel mac Uri, mhic

¹ a chlobhachan.

² ag.

³ an ollaidh, an

⁴ coirteachan, poitean.

⁵ chinn.

⁶ a bha cruinneachadh, a

chruinnich aig dorus bùtha a' choimhthionail. Fabh.

⁷ stioman.

⁸ cuairtiche, stomaichte.

Shur, do thréibh Iudai, gach *ni* a dh'áithn an Tighearna do Mhaois;

23 Agus maille ris Aholiab, mac Ahisam-aich, do thréibh Dhain, gearradair, agus oibriche ealanta, agus fear oibre gréise¹ ann an gorm, agus ann an corcur, agus ann an scarlaid, agus ann an anart grinn.

24 B'e 'n t-òr uile a chuireadh am feum 'n son obair, ann an uil' obair an *ionaid* naoimh, eadhon òr an tabhartais, naoi tàlanna fichead, agus seachd ceud agus deich secel 'ar fhichead, a réir seceil an *ionaid* naoimh.

25 Agus b'e airgid na muinntir a dh'àirmheadh do'n choimhthional, ceud tàlann, agus mìle agus seachd ceud agus cuig secel deug agus trì fichead, a réir seceil an *ionaid* naoimh.

26 Becah air son gach fir, 's e *sin* leth seceil, a réir seceil an *ionaid* naoimh, air son gach aon a chaidh gu bhi air an àir-eamh, o fhichead bliadh'n a dh'aois agus os a cheann, airson shè ceud mìle agus trì mìle agus cuig ceud agus leth-cheud fear.

27 Agus do'n cheud tàlann airgid thilg-eadh buinn an *ionaid* naoimh, agus buinn an roinn-bhrait; ceud bonn do'n cheud tàlann, tàlann do gach bonn.

28 Agus do'n mhìle agus sheachd ceud agus a' cuig secel deug agus trì fichead, rinn e cromagan do na puist, agus chòmh-daich e 'n cinn, agus chuir e cuairteagan mu'n timchioll³.

29 Agus b'e umha an tabhartais deich agus trì fichead tàlann, agus dà mhìle agus ceithir cheud secel.

30 Agus rinn e le *sin* na buinn do dhorus pàilluin a' choimhthionail, agus an altair umha, agus a' chliath umha aice, agus soithichean na h-altarach uile,

31 Agus buinn na cùirte mu'n cuairt, agus buinn geata na cùirte, agus uile phinn-eachan a' phàilluin, agus uile phinn-eachan na cùirte mu'n cuairt.

CAIB. XXXIX.

1 Eudach na seirbhìs, agus an t-eudach naomha. 2 An ephod. 8 An uchd-éididh. 22 Faluinn na h-ephoid. 27 Na còtaichean, an crùn-sagairt, agus an crios a dh'anart grinn. 30 Leac a' chrùin naoimh. 43 Dh'umhaire Mhaois air an obair uile, agus thàitinn i ris.

A GUS do'n ghloirm, agus do'n chorcur, agus do'n scarlaid, rinn iad éididh⁴ frithealaidh, gu frithealadh san *ionad* naoimh, agus rinn iad éididh naomh do Aaron; mar a dh'áithn an Tighearna do Mhaois.

2 Agus rinn e 'n ephod do òr, do ghorm, agus do chorcur, agus do scarlaid, agus do anart grinn toinnte.

3 Agus bhuail iad a mach an t-òr 'na leacaibh⁵ ana, agus ghearr iad e 'na shnàithnibh⁶, a chum oibreachadh am measg a' ghuirm, agus am measg a' chorcur, agus am measg na scarlaid, agus am measg an anairt ghrinn le h-obair ealanta.

4 Rinn iad mìrean-guailne dh'i, ceangailte ri chéile⁷ air a dà fhoir: *mar sin* chuireadh ri chéile i.

5 Agus bha crios rionnach na h-ephoid a bha air a h-uachdar, do'n *ni* cheudna, a réir a h-oibre féin; eadhon do òr, do ghorm, agus do chorcur, agus do scarlaid, agus do anart grinn toinnte: mar a dh'áithn an Tighearna do Mhaois.

6 Agus dh'oibrich iad clachan onics ceangailte ann am failibh òir, air an gearradh le gearradh seulaidh, le ainmibh chloinn Israeil orra.

7 Agus chuir e iad air guailnibh na h-ephoid, *gu bhi* 'nan clacha cuimhneachain do chloinn Israeil; mar a dh'áithn an Tighearna do Mhaois.

8 Agus rinn e 'n uchd-éididh le h-obair ealanta a réir oibre⁸ na h-ephoid, do òr, do ghorm, agus do chorcur, agus do scarlaid, agus do anart grinn toinnte.

9 Bha i ceithir-cheamach; rinn iad an uchd-éididh dà-fhillte: réis a fad, agus réis a leud; bha i dà-fhillte.

10 Agus chuir iad imte ceithir sreathan chlach: a' cheud sreath, sardius, topas, agus carbuncle: so a' cheud sreath.

11 Agus an dara sreath, emerald, saphir, agus daoimein.

12 Agus an treas sreath, ligur, agat, agus ametist.

13 Agus an ceathramh sreath, beril, onics, agus iasper: bha iad air an ceangal ann am failibh òir 'nan suidheachadh⁹.

14 Agus bha na clachan a réir ainmeanna chloinn Israeil, a dhà-deug a réir an ainmeanna, le gearradh seulaidh, gach aon aca le h-ainm féin, a réir an dà thréibh dheug.

15 Agus rinn iad air an uchd-éididh slabhruidhean aig na cinn, a dh'obair shnìomhta dh'òr fìor-ghlan.

16 Agus rinn iad dà fhail òir, agus dà fhàinne òir: agus chuir iad an dà fhàinne air dà cheann na h-uchd-éididh.

17 Agus chuir iad an dà slabhruidh shnìomhta san dà fhàinne air cinn na h-uchd-éididh.

18 Agus dhainnich iad dà cheann na dà slabhruidh shnìomhta san dà fhail, agus chuir siad iad m'irribh-guailne na h-ephoid, air a beulaobh.

19 Agus rinn iad dà fhàinne òir, agus

¹ gréisear; embroiderer. Sasg. ² a chaitheadh.

³ sìmich e iad.

⁵ lannaibh.

⁴ trusgan, aodaichean.

⁶ theudaibh.

⁷ g'a ceangal ri chéile.

⁸ cosmhuil ri obair.

⁹ dànadh, cur.

chuir siad iad air dà cheann na h-uchd-éididh, air an iomall dìth, a *bha* air taobh na h-ephoid a stigh.

20 Agus rinn iad dà fhàinne òir *eile*, agus chuir siad iad air dà thaobh na h-ephoid gu h-ìosal, leth ris a' chuid bheoil dìth fa chomhair a' choimhcheangail *eile*, os ceann crìos rìomhach na h-ephoid.

21 Agus cheangail iad an uchd-éididh leis a fàinnibh ri fàinnibh na h-ephoid le h-éill ghurm, a chum gu'm bitheadh i os ceann crìos rìomhach na h-ephoid, agus nach biodh an uchd-éididh air a fuasgladh o'n ephoid; mar a dh'àithn an Tighearna do Mhaois.

22 Agus rinn e falluinn na h-ephoid a dh'obair fhlighte, uile do ghorm.

23 Agus *bha* toll am meadhan na falluinn, mar tholl Iùirich-mhàillich, *agus* foir¹ timchioll a tuill, a chum nach reub-tadh i.

24 Agus rinn iad air iomallaibh na falluinn pomgranata do ghorm, agus do chorcur, *agus do scarlaid, agus do anart* toinnte.

25 Agus rinn iad cluig a dh'òr fìor-ghlan, agus chuir iad na cluig eadar na pomgranatan, air iomall na falluinn mu'n cuairt eadar na pomgranata:

26 Clag agus pomgranat, clag agus pomgranat, air iomall na falluinn mu'n cuairt, a fhrithealadh *innte*; mar a dh'àithn an Tighearna do Mhaois.

27 Agus rinn iad còtaichean a dh'anart grinn, a dh'obair fhlighte, air son Aaroin agus a chuid mac,

28 Agus crùn-sagairt a dh'anart grinn, agus boineidean sgiamhach a dh'anart grinn, agus briogais anart a dh'anart grinn toinnte,

29 Agus crìos do anart grinn toinnte, agus do ghorm, agus do choreur, agus do scarlaid, a dh'obair shnàthaide; mar a dh'àithn an Tighearna do Mhaois.

30 Agus rinn iad leac² a' chrùin naoimh a dh'òr fìor-ghlan, agus sgrìobh iad oirre sgrìobhadh, *cosmhùil ri gearradh seulaidh, NAOMHACHD DO'N TIGHEARNA*.

31 Agus cheangail iad rithe iall do ghorm, g'a daingneachadh air a' chrùn gu h-àrd; mar a dh'àithn an Tighearna do Mhaois.

32 Mar so chrìochnaichheadh uil' obair pàilliuin bùtha a' choimhthionail³; agus rinn clann Israeil a réir gach *ni* a dh'àithn an Tighearna do Mhaois; mar sin rinn iad.

33 Agus thug iad am pàilliuin gu Maois, am bùth, agus a'airneis uile, a chromagan,

a bhuird, a chroinn, agus a phuist, agus a bhuinn;

34 Agus an còmhach do chroicnibh reitheachan air an dath dearg, agus an còmhach do chroicnibh bhroc, agus brat a' chòmhdach;

35 Airc na Fianuis, agus a bataichean, agus a' chaitir-thròcair;

36 Am bòrd *agus* a shoitichean uile, agus an t-aran taisbeanta;

37 An coinnleir fìor-ghlan *agus* a lòch-rain, *eadhon* a lòch-rain gu bhì air an cur ann an ordugh, agus a shoitichean uile agus an oladh a chum soluis;

38 Agus an altair òir, agus an oladh-ungaidh, agus an tuis chubhradh, agus am brat air son doruis a' phàilliuin;

39 An altair umha, agus a cliath umha, a bataichean, agus a soitichean uile, an soitheach-ionnlaid agus a chos;

40 Cùirteinean na cùirte, a puist, agus a buinn, agus am brat⁴ air son geata na cùirte, a cùird, agus a pinneachan⁵, agus uile shoitichean seirbhis a' phàilliuin, air son bùtha a' choimhthionail;

41 Eudach an fhrithealaidh⁶ gu frithealadh san *ionad* naomh, an t-eudach naomh air son Aaroin an t-sagairt, agus eudach a chuid mac, a fhrithealadh ann an dreuchd an t-sagairt.

42 A réir gach *ni* a dh'àithn an Tighearna do Mhaois, mar sin rinn clann Israeil an obair uile.

43 Agus dh'amhaire Maois air an obair uile, agus feuch, rinn iad i mar a dh'àithn an Tighearna, eadhon mar sin rinn iad i: agus bheannaich Maois iad.

CAIB. XL.

1 Thugadh àithne do Mhaois gu'n cuireadh e suas pàilliuin bùtha a' choimhthionail, agus gu'n na'mhaichheadh se e. 16 Rinn Maois gach *ni* a dh'àithn an Tighearna dha. 34 Chòmhdach neul bùth a' choimhthionail.

A GUS labhair an Tighearna ri Maois, ag ràdh,

2 Air a' cheud là do'n cheud mhìos cuiridh tu suas pàilliuin bùtha a' choimhthionail.

3 Agus cuiridh tu ann àire na Fianuis, agus folaichidh tu 'n àire leis an roinn-bhrat.

4 Agus bheir thu stigh am bòrd, agus cuiridh tu 'n ordugh na nìthe a ta gu bhì air an cur an ordugh air; agus bheir thu stigh an coinnleir, agus lasaidh tu a lòch-rain.

5 Agus suidhicidh tu 'n altair òir a ta chum na tìise fa chomhair àirce na Fianuis, agus cuiridh tu brat an doruis ris a' phàilliuin.

¹ iomall, bann.

² fleasg, blàth.

³ uil' obair pàilliuin, eadhon bùtha a' chomh-

chruinnich.

⁴ croch-bhrat.

⁵ tairnean.

⁶ Trusgan na seirbhis.

6 Agus suidhichidh tu altair n h-ìobairt-loisgte fa chomhair doruis pàilliuin bùtha a' choimhthionail.

7 Agus suidhichidh tu 'n soitheach-ionnlaid eadar bùth a' choimhthionail agus an altair, agus cuiridh tu uisge ann.

8 Agus cuiridh tu suas a' chùirt mu'n cuairt, agus crochaidh tu suas am brat aig geata na cùirte.

9 Agus ghabhaidh tu an oladh-ungaidh, agus ungaidh tu am pàilliuin, agus gach ni a ta ann, agus naomhaichidh tu e, agus a shoithichean uile: agus bithidh e naomh.

10 Agus ungaidh tu altair na h-ìobairt-loisgte, agus a soitheichean uile, agus naomhaichidh tu an altair: agus bithidh an altair ro naomha.

11 Agus ungaidh tu an soitheach ionnlaid agus a chos, agus naomhaichidh tu e.

12 Agus bheir thu Aaron agus a mhic gu doruis bùtha a' choimhthionail¹, agus ionnlaididh tu iad le h-uisge.

13 Agus cuiridh tu air Aaron an t-eudach naomha², agus ungaidh tu e, agus naomhaichidh tu e; agus frithèilidh e dhomhsa ann an dreuchd an t-sagairt.

14 Agus bheir thu leat a mhic, agus cuiridh tu còtaichean orra.

15 Agus ungaidh tu iad, mar a dh'ung thu 'n athair, agus frithèilidh³ iad dhomhsa ann an dreuchd an t-sagairt; oir bithidh gu deimhin an ungadh-san dhoibh a chum sagartachd sìorruidh air feadh an gin-ealach.

16 Agus rinn Maois a réir gach ni a dh'àithn an Tighearna dha: mar sin rinn e.

17 Agus b'annus a' cheud mhìos, san dara bliadhna, air a' cheud là do'n mhìos, a chuireadh suas am pàilliuin.

18 Agus chuir Maois suas am pàilliuin agus dhaingnich e a bhuinn, agus chuir e suas a bhuird, agus chuir e stigh a chroinn, agus thog e suas a phuist.

19 Agus sgaoil e mach am bùth os ceann a' phàilliuin, agus chuir e còmhdach a' bhùtha air os a cheann; mar a dh'àithn an Tighearna do Mhaois.

20 Agus ghabh e agus chuir e an Fhianuis⁴ anns an àire, agus chuir e na bataichean air an àire, agus chuir e a' chaithir-thròcair air an àire os a ceann.

21 Agus thug e 'n àire a stigh do'n phàilliuin, agus chuir e suas brata' chòmhdach, agus chòmhdach e àire na Fianuis; mar a dh'àithn an Tighearna do Mhaois.

22 Agus chuir e 'm bòrd ann am bùth a' choimhthionail air taobh a' phàilliuin

mu thuath, an taobh a muigh do'n roinn-bhrat.

23 Agus chuir e 'n t-aran ann an ordugh air, ann an làthair an Tighearna; mar a dh'àithn an Tighearna do Mhaois.

24 Agus chuir e 'n coinnleir ann am bùth a' choimhthionail, thall fa chomhair a' bhuird, air taobh a' phàilliuin ris an àirde deas.

25 Agus las e na lòchraim ann an làthair an Tighearna; mar a dh'àithn an Tighearna do Mhaois.

26 Agus chuir e 'n altair òir ann am bùth a' choimhthionail, air beulaobh an roinn-bhrat.

27 Agus loisg e tùis chùbhraidh oirre; mar a dh'àithn an Tighearna do Mhaois.

28 Agus chuir e suas am brat⁵ aig doruis a' phàilliuin.

29 Agus chuir e altair na h-ìobairt-loisgte làimh ri doruis pàilliuin bùtha a' choimhthionail, agus thug e suas oirre an òbairt-loisgte, agus an tabhartas-bìdh; mar a dh'àithn an Tighearna do Mhaois.

30 Agus chuir e 'n soitheach-ionnlaid eadar bùth a' choimhthionail agus an altair, agus chuir e uisge ann, a dh'ionnlaid leis.

31 Agus dh'ionnlaid Maois, agus Aaron, agus a mhic, an làmhan agus an cosan aige.

32 An uair a bhà iad gu dol a stigh do bhùth a' choimhthionail, agus gu teachd am fagus do'n altair, dh'ionnlaid siad iad féin, mar a dh'àithn an Tighearna do Mhaois.

33 Agus chuir e suas a' chùirt timchioll a' phàilliuin agus na h-altarach, agus chuir e suas brat geata na cùirte: mar sin chrìochnaich Maois an obair.

34 An sin chòmhdach neul bùth a' choimhthionail, agus lìon glòir an Tighearna am pàilliuin.

35 Agus cha b'urrainn Maois dol a stigh do bhùth a' choimhthionail, a chionn gu'n do ghabh an neul còmhnuidh air, agus gu'n do lìon glòir an Tighearna am pàilliuin.

36 Agus an uair a dh'éirich an neul suas o mhullach a' phàilliuin, chaidh clann Israeil air an aghaidh 'nan uile thurusaibh:

37 Ach mur d'éirich an neul suas, an sin cha do thrìall iad gus an là san d'éirich e suas:

38 Oir bha neul an Tighearna air a' phàilliuin san là, agus bha teine air san oidheche, ann an sealladh thighe Israeil uile, air feadh an uile thurusan.

¹ pàilliuin à' choimhthionail. ² an trusgan, a' chulaidh naomha. ³ chum gu frithèil.

⁴ an Teistean.

⁵ an còmhdach.

LEBHITICUS.

CAIB. I.

3 Iobairtean-loisgte do'n bhuar, 18 do na treudaibh, 14 agus do eunaibh.

AGUS ghairm an Tighearn air Maois, agus labhair e ris á pàillion a' choimhthionail¹, ag ràdh,

2 Labhair ri cloinn Israeil, agus abair riu, Ma bheir duine *sambith* agaibh tabhartas a dh'ionnsuidh an Tighearna, bheir sibh bhur tabhartas do'n sprèidh, *eadhon* do'n bhuar agus do'n treud.

3 Ma *bhios* a thabhartas do'n bhuar 'na iobairt-loisgte², thugadh e seachad *beathach*, fìrionn gun ghaoid: aig doras pàilliuin a' choimhthionail bheir e seachad e d'ashaor thoil féin, an làthair an Tighearn.

4 Agus cuiridh e a làmh air ceann na h-iobairt-loisgte; agus gabhar air a shon i, a dheanamh réite air a shon.

5 Agus marbhaidh e 'n tarbh òg³ an làthair an Tighearn: agus bheir na sagairt, mic Aaroin, leo an fhuil, agus crathaidh iad an fhuil mu'n cuairt air an altair, a *ta* aig doras pàilliuin a' choimhthionail.

6 Agus fionnadh e an iobairt-loisgte, agus gearraidh e i 'na mhiribh⁴.

7 Agus cuiridh mic Aaroin an t-sagairt teine air an altair, agus leagaidh iad fiodh⁵ ann an ordugh air an teine.

8 Agus leagaidh na sagairt, mic Aaroin, na mirean, an ceann, agus an t-saill, ann an ordugh air an fhiodh a *ta* air an teine, a *tha* air an altair.

9 Ach a mhionach⁶ agus a chosan nighidh e ann an uisge: agus loisgidh an sagart an t-iomlan⁷ air an altair, mar iobairt-loisgte, tabhartas a bheirear suas le teine, a dh'fhàile cùbhraidh⁸ do'n Tighearn.

10 Agus ma's ann do na treudaibh a *bhios* a thabhartas, *eadhon* do na caoraich, no do na gabhraibh, chum iobairt-loisgte; 'na *bheathach* fìrionn gun ghaoid bheir e leis e.

11 Agus marbhaidh se e aig taobh na h-altarach mu thuath ann an làthair an Tighearn: agus crathaidh na sagairt, mic Aaroin, 'fhuil air an altair mu'n cuairt.

12 Agus gearraidh e 'na mhiribh e, maille r'a cheann agus r'a shaill; agus cuiridh an sagart iad ann an ordugh air an fhiodh a *ta* air an teine, a *tha* air an altair.

13 Ach nighidh e am mionach agus na cosan le h-uisge; agus bheir an sagart leis an t-iomlan, agus loisgidh e air an altair e, mar iobairt-loisgte, tabhartas a

bheirear suas le teine, a dh'fhàile cùbhraidh do'n Tighearn.

14 Agus ma's ann do eunaibh a *bhios* a thabhartas do'n Tighearna *chum* iobairt-loisgte, an sin bheir e a thabhartas do thurturaibh, no do cholumanaibh òga.

15 Agus bheir an sagart e chum na h-altarach, agus sniomhaidh⁹ e a cheann deth, agus loisgidh e air an altair e; agus fàisgear a mach 'fhuil air taobh na h-altarach.

16 Agus spionaidh¹⁰ e a gheuban as maille r'a chlàimh¹¹, agus tilgidh e làimh ris an altair e, air an taobh an ear, a dh'àite na luathar.

17 Agus sgoiltidh e maille r'a sgiathairibh e, *ach* cha roinn e o chéile e: agus loisgidh an sagart e air an altair, air an fhiodh a *ta* air an teine, mar iobairt-loisgte, tabhartas a bheirear suas le teine, a dh'fhàile cùbhraidh do'n Tighearn.

CAIB. II.

1 An tabhartas-bidh do phlùr mìn maille ri h-oladh agus ri tìis. 12 Tabhartas ceud-thoraidh gach bliadhna. 13 Bheirear seachad gach tabhartas-bidh le salann.

AGUS an uair a bheir neach air bith idh a thabhartas do phlùr mìn: agus dòirtidh e oladh air, agus cuiridh e tuis air:

2 Agus bheir se e gu mic Aaroin, na sagartan, agus gabhaidh e as làn a dhùirn d'a phlùr, agus d'a oladh, maille r'a thùis uile; agus loisgidh an sagart a chuimhneachan air an altair, *gu bhì* 'na thabhartas air a thoirt suas le teine, a dh'fhàile cùbhraidh do'n Tighearn.

3 Agus fuigheall an tabhartais-bhidh, *is* le Aaron agus le 'mhic e: *is* ni ro naomha e do thabhartasaibh an Tighearn air an toirt suas le teine.

4 Agus ma bheir thu seachad tabhartas-bidh air a dheasachadh¹² san àmhuinn, *is* breacagan neo-ghoirtichte do phlùr mìn measgta le h-oladh a *bhios* ann, no dearnagan¹³ neo-ghoirtichte, ungta le h-oladh.

5 Agus ma's tabhartas-bidh air a dheasachadh ann an agham a *bhios* a' d' thabhartas, bithidh e do phlùr mìn neo-ghoirtichte, measgta le h-oladh.

6 Roinnidh tu e 'na mhiribh, agus dòirtidh tu oladh air: *is* tabhartas-bidh a t'ann.

7 Agus ma *bhios* do thabhartas 'na

¹ bith a' choimhthionail. ² chum iobairt-loisgte.

³ gamhuinn.

⁴ 'na bloighdibh.

⁸ do bholadh cùbhraidh.

¹⁰ reubaidh

¹² bruichte.

⁹ spionaidh.

¹¹ iteagan.

¹³ gearragan; wafers. Sasg.

⁵ a guraalach.

⁷ na h-uile.

thabhartas-bidh o' naghann-ròstaidh, nìth-ear e do phlùir mìn le h-oladh.

8 Agus bheir thu 'n tabhartas-bidh, a nìthear do na nìthibh so, chum an Tighearn: agus an uair a thaisbeanar¹ do'n t-sagart e, bheir se e chum na h-altarach.

9 Agus gabhaidh an sagart as an tabhartas-bhidh cuimhneachan dheth, agus loisgidh se e air an altair: *is* tabhartas a *th'ann* air a thoirt suas le teine, a dh'fhàile cùbhraidh do'n Tighearn.

10 Agus an ni a dh'fhàgar do'n tabhartas-bhidh, *is* le Aaron agus le 'mhic e; *tha e* 'na ni ro naomha do thabhartais an Tighearn air an toirt suas le teine.

11 Cha deanar tabhartas-bidh sam bith, a bheir sibh a dh'ionnsuidh an Tighearn, le taois ghoirt; oir cha loisg sibh a bheag do thaois ghoirt, no do mhill, ann an tabhartais an Tighearn a bheirear suas le teine.

12 A thaobh tabhartais a' cheud toraidh, bheir sibh seachad e do'n Tighearn: ach cha loisgear air an altair e chum fàile cùbhraidh.

13 Agus gach tabhartas-bidh a bheir thu leat, nì thu blasda le salann: cha mhò a leigear le te salann coimhcheangail do Dhé bhi dh'easbhuidh air do thabhartas-bidh: le d' thabhartais uile bheir thu seachad salann.

14 Agus ma bheir thu seachad tabhartas-bidh do d' cheud-thoradh do'n Tighearn, bheir thu seachad mar an tabhartas-bidh do d' cheud-thoradh, diasa glasa do arbhar cruaidhichte leis an teine, *eadhon* siol buailte as na diasaidh ùra².

15 Agus cuiridh tu oladh air, agus leagaidh tu tùis air: *is* tabhartas-bidh e.

16 Agus loisgidh an sagart a chuimhneachan, cuid d'a arbhar buailte, agus cuid d'a oladh, maille r'a thùis uile: *is* tabhartas e a bheirear suas le teine do'n Tighearn.

CAIB. III.

1 An tabhartas-sith do'n bhuar, 6 do'n treud, 7 uan, 12 no gabhar, gu'n ghaoid.

AGUS ma bhios a thabhartas a chum iobairt tabhartasan-sith, ma's ann do'n bhuar a bheir e seachad e, ma's firionn no boirionn e, bheir e seachad e gu'n ghaoid an làthair an Tighearn.

2 Agus cuiridh e a làmh air ceann a thabhartais, agus marbhaidh se e aig doras pàilliuin a' choimhthionail: agus crathaidh mic Aaroin, na sagartan, an fhuil air an altair mu'n cuairt.

3 Agus bheir e seachad do iobairt nan tabhartas-sith, tabhartas a bheirear suas le teine do'n Tighearn: an t-saill a *ta*

còmhdachadh a' mhìonaich, agus an t-saill uile a *th'*air a' mhìonach,

4 Agus an dà àra, agus an t-saill a *ta* orra, a *ta* air an loch-'léin, agus an sgairt a *ta* os ceann nan àinean; maille ris na h-airnibh, bheir e air falbh i.

5 Agus loisgidh mic Aaroin e air an altair, air an iobairt-loisgte, a *ta* air an fhiodh a *th'*air an teine: *is* tabhartas e a bheirear suas le teine, a dh'fhàile cùbhraidh do'n Tighearn.

6 Agus ma's ann do'n treud a bhios a thabhartas chum iobairt tabhartasan-sith do'n Tighearn, firionn no boirionn; bheir e seachad e gun ghaoid.

7 Ma bheir e seachad uan mar a thabhartas, bheir e seachad e an làthair an Tighearn.

8 Agus cuiridh e a làmh air ceann a thabhartais, agus marbhaidh se e fa chomhair pàilliuin a' choimhthionail: agus crathaidh mic Aaroin fhuil air an altair mu'n cuairt.

9 Agus bheir e seachad *cuid* do iobairt nan tabhartas-sith, mar thabhartas a bheirear suas le teine do'n Tighearn; a shaill *agus* an t-earball uile, teann air a' chnàimh-dhroma bheir e air falbh e; agus an t-saill a *ta* còmhdachadh a' mhìonaich, agus an t-saill uile a *ta* air a' mhìonach.

10 Agus an dà àra, agus an t-saill a *ta* orra, a *ta* làmh ris an loch-'léin, agus an sgairt os ceann nan àinean; maille ris na h-airnibh, bheir e air falbh i.

11 Agus loisgidh an sagart e air an altair; *is e* biadh an tabhartais a bheirear suas le teine do'n Tighearn.

12 Agus ma's gabhar a *bhios* 'na thabhartas, bheir e seachad i an làthair an Tighearn.

13 Agus cuiridh e a làmh air a ceann, agus marbhaidh e i fa chomhair pàilliuin a' choimhthionail: agus crathaidh mic Aaroin a fuil air an altair mu'n cuairt.

14 Agus bheir e seachad dhith a thabhartas, *eadhon* tabhartas a bheirear suas le teine do'n Tighearn: an t-saill a *tha* còmhdachadh a' mhìonaich, agus an t-saill uile a *ta* air a' mhìonach,

15 Agus an dà àra, agus an t-saill a *ta* orra, a *tha* làmh ris an loch-'léin, agus an sgairt os ceann nan àinean; maille ris na h-airnibh, bheir e air falbh i.

16 Agus loisgidh an sagart iad air an altair: *is iad* biadh an tabhartais a bheirear suas le teine, chum fàile cùbhraidh. An t-saill uile *is* leis an Tighearn.

17 *Bithidh e* 'na reachd³ bith-bhuan do'r ginealachaidh air feadh bhuir n' àiteacha-còmhnuidh uile, nach ith sibh saill no fuil sam bith.

¹ nochdar.

² làna.

³ ordugh, legh.

CAIB. IV.

1 An ìobairt-pheacaidh aineolais, 3 air son an t-sagairt, 13 air son a' choimhthionail, 22 air son uachdaran, 27 agus air son an t-sluaigh.

AGS labhair an Tighearna ri Maois, ag ràdh,

2 Labhair ri cloinn Israeil, ag ràdh, Ma pheacaicheas anam trid aineolais¹ anaghaidh aoin sam bith a dh' àitheantaibh an Tighearn, (*a thaobh* nithe nach bu chòir a dheanamh,) agus gu'n dean e *ni* an aghaidh aoin diubh;

3 Ma pheacaicheas an sagart a chaidh ungadh, a réir peacaidh an t-sluaigh; an sin thugadh e air son a pheacaidh a pheacaidh e, tarbh òg gun ghaoid a dh'ionnsuidh an Tighearna chum iobairt-pheacaidh.

4 Agus bheir e an tarbh gu dorus pàilliuin a' choimhthionail an làthair an Tighearn; agus cuiridh e a làmh air ceann an tairbh, agus marbhaidh e 'n tarbh an làthair an Tighearn.

5 Agus gabhaidh an sagart a chaidh ungadh *cuid* do fhuil an tairbh, agus bheir e i gu pàilliuin a' choimhthionail.

6 Agus tumaidh an sagart a mheur san fhuil, agus crathaidh e *cuid* do'n fhuil seachd uairean an làthair an Tighearna, fa chomhair roinn-bhrait an *ionaid* naoimh.

7 Agus cuiridh an sagart *cuid* do'n fhuil air adhaircibh altarach na tùise cùbhraidh am fianuis an Tighearn, a *ta* ann am pàilliuin a' choimhthionail; agus dòirtidh e fuil an tairbh uile aig bun altarach na h-iobairt-loisgte, a *ta aig* dorus pàilliuin a' choimhthionail.

8 Agus uile shailt tairbh na h-iobairt-pheacaidh bheir e air falbh uaith; an t-saill a *ta* còmhachadh a' mhionach, agus an t-saill uile a *ta* air a' mhionach.

9 Agus an dà àra, agus an t-saill a *ta* orra, a *tha* làimh ris an loch-²lèin², agus an sgairt os ceann nan àinean; maille ris na h-airnibh bheir e' air falbh i,

10 Mar a thugadh air falbh i o tharbh iobairt nan tabhartas-sith; agus loisgidh an sagart iad air altair na h-iobairt-loisgte.

11 Agus seice³ an tairbh, agus fheoil uile, maille r'a cheann, agus maille r'a chosan, agus a mhionach, agus a ghaorr⁴,

12 Eadhon an tarbh gu h-ionlangiùlainidh e mach an taobh a muigh do'n champ gu h-ionad glan, far an dòrtear⁵ a mach an luath, agus loisgidh e air an fhiodh e le teine: far an dòrtear a mach an luath, loisgear e.

13 Agus ma pheacaicheas coimhthional Israeil uile trid aineolais, agus gu bheil an nì foilichte o shùilibh a' chomhchruinnich, agus gu'n d'rim iad *ni-eigin*⁶ an *agaidh*

aoin sam bith a dh' àitheantaibh an Tighearn, a *thaobh nithe* nach bu chòir a dheanamh, agus gu bheil iad ciontach;

14 An uair a bhios am peacadh, a pheacaich iad 'na aghaidh, aithnichte, an sin bheir an comhchruinneach seachad tarbh òg air son a' pheacaidh, agus bheir iad e fa chomhair pàilliuin a' choimhthionail.

15 Agus cuiridh seanairean a' choimhthionail an làmh air ceann an tairbh an làthair an Tighearn; agus marbhar an tarbh an làthair an Tighearn.

16 Agus bheir an sagart a chaidh ungadh *cuid* do fhuil an tairbh gu pàilliuin a' choimhthionail.

17 Agus tumaidh an sagart a mheur ann an *cuid* do'n fhuil, agus crathaidh e i seachd uairean an làthair an Tighearna, fa chomhair an roinn-bhrait.

18 Agus cuiridh e *cuid* do'n fhuil air adhaircibh na h-altarach a *ta* am fianuis an Tighearn, a *ta* ann am pàilliuin a' choimhthionail, agus dòirtidh e mach an fhuil uile aig bun altarach na h-iobairt-loisgte, a *ta aig* dorus pàilliuin a' choimhthionail.

19 Agus bheir e air falbh a shailt uile uaith, agus loisgidh e i air an altair.

20 Agus ni e ris an tarbh mar a rinn e ri tarbh na h-iobairt-pheacaidh, mar sin ni e ris: agus ni an sagart réite air an son, agus bheirear maithneas dhoibh.

21 Agus bheir e mach an tarbh an taobh a muigh do'n champ, agus loisgidh se e mar a loisg e 'n ceud tarbh: *is* iobairt-pheacaidh e air son a' chomhchruinnich.

22 'Nuair a pheacaicheas uachdaran, agus a ni e *ni-eigin* trid aineolais an aghaidh aoin sam bith a dh' àitheantaibh an Tighearn a Dhé, a *thaobh nithe* nach bu chòir a dheanamh, agus gu bheil e ciontach: 23 Ma thig a peacadh, a pheacaich e, g'a fhios; bheir e leis *mar* a thabhartas meann do na gabhraibh *beathach* frionn gun ghaoid.

24 Agus cuiridh⁷ e a làmh air ceann a' mhinn, agus marbhaidh se e san ionad anns am marbh iad an iobairt-loisgte⁸ ann an làthair an Tighearn: *is* iobairt-pheacaidh e.

25 Agus gabhaidh an sagart *cuid* do fhuil na h-iobairt-pheacaidh le 'mheur, agus cuiridh e i air adhaircibh altarach na h-iobairt-loisgte, agus dòirtidh e mach a fuil aig bun altarach na h-iobairt-loisgte.

26 Agus loisgidh e a saill uile air an altair, mar a *loisgear* saill iobairt nan tabhartas-sith: agus nì an sagart réite air a shon a thaobh a pheacaidh, agus maith-ear dha e.

27 Agus ma pheacaicheas aon neach do

¹ ann an aineolas. Eabh. ² a' bhlian.

³ seiche, craicinn.

⁴ aolach.

⁵ tilgear.

⁶ ni-'gin.

⁷ leagaidh,

⁸ tabhartas-loisgte, ofrail-loisgte.

LEBHITICUS, IV. V.

shluagh na dùthcha¹ tríd aineolais, an uair a ta e 'deanamh *ni-eigin* an *aghaidh* aoin sam bith a dh'àitheantaibh an Tighearn, a *thaobh nìthe* nach bu chòir a dheanamh, agus gu bheil e ciontach:

28 Ma thig a pheacaidh, a pheacaich e g'a fhios; an sin bheir e leis *mar* a thabhartas meann do na gabhraibh, *beathach* boirionn gun ghaoid, air son a pheacaidh a pheacaich e.

29 Agus cuiridh e a làmh air ceann na h-ìobairt-pheacaidh, agus marbhaidh e an ìobairt-pheacaidh ann an ionad na h-ìobairt-loisgte.

30 Agus gabhaidh an sagart *cuid* d'a fuil le 'mheur, agus cuiridh e *i* air adhaircibh altarach na h-ìobairt-loisgte, agus dòirtidh e mach a fuil uile aig bun na h-altarach.

31 Agus bheir e aise da saill uile, mar a bheirear an t-saill á h-ìobairt nan tabhartas-sith; agus loisgidh an sagart *i* air an altair, a chum fàile chùbhraidh do'n Tighearn: agus ni an sagart réite air a shon, agus bheirear maitheanas dha.

32 Agus mha bheir e leis uan mar a thabhartas air son peacaidh, bheir e leis *uan* boirionn gun ghaoid.

33 Agus cuiridh e a làmh air ceann an tabhartais pheacaidh², agus marbhaidh se e mar ìobairt-pheacaidh san ionad anns am marbh iad an ìobairt-loisgte.

34 Agus gabhaidh an sagart *cuid* do fhuil na h-ìobairt-pheacaidh le 'mheur, agus cuiridh e *i* air adhaircibh altarach na h-ìobairt-loisgte, agus dòirtidh e mach a fuil uile aig bun na h-altarach.

35 Agus bheir e aise da saill uile, mar a bheirear air falbh saill an uain o ìobairt nan tabhartas-sith; agus loisgidh an sagart iad air an altair, a réir nan tabhartas a bheirear suas le teine do'n Tighearn: agus ni an sagart réite air a shon a thaobh a pheacaidh a rinn e, agus maithear dha e.

CAIB. V.

1 *A thaobh an ti a cheileas 'edlas, 2 mu neach a bheanas ri ni sam bith neòghlan, 4 no a bheir mionnan. 14 An ìobairt-eusaontais air son peacaidh ann an nìthibh naomha an Tighearn, 17 agus air son pheacanna aineolais.*

A GUS ma pheacaicheas anam, agus gu'n cuinn e guth mionnachaidh³, agus *gur* fianuis e, a chummaic no is fiosrach air a' chùis, mur cuir e 'n céill *i*, an sin giùlainidh e a chionta:

2 No ma bheanas anam ri ni sam bith neòghlan, ma's cairbh⁴ fiadh-bheathaich neòghloin e, no cairbh spréidhe neòghloin, no cairbh ni neòghloin a shnáigear⁵, agus e an-fhiosrach air; bithidh esan mar an ceudna neòghlan, agus ciontach:

3 No ma bheanas e ri neòghloine duine, ge b'e air bith an neòghloime leis an sal-aichear duine, agus gu bheil e an-fhiosrach air; an uair is fios da e, an sin bithidh e ciontach:

4 No ma mhionmaicheas anam⁶, ag ràdh le 'bhilibh gu'n dean e olc, no gu'n dean e maith, ge b'e air bith e a labhras duine le mionnaibh, agus gu bheil e an-fhiosrach air; an uair is fios da e, an sin bithidh e ciontach ann an aon diubhl sin.

5 Agus tachraidh, 'nuair a bhios e ciontach do aon do na *nìthibh* sin, gu'n aidich⁷ e gu'n do pheacaich e san *ni* sin.

6 Agus bheir e leis 'ìobairt-eusaontais a dh'ionnsuidh an Tighearn air son a pheacaidh a pheacaich e, *beathach* boirionn o'n treud, uan, no meann o na gabhraibh, mar ìobairt-pheacaidh: agus ni an sagart réite air a shon a thaobh a pheacaidh.

7 Agus mur urrainn e uan a thoirt leis, an sin bheir e leis air son a choire a rinn e, dà thurtur, no dà choluman òg, a dh'ionnsuidh an Tighearna; fear a chum ìobairt-pheacaidh, agus am fear eile chum ìobairt-loisgte.

8 Agus bheir e iad a dh'ionnsuidh an t-sagairt, agus bheir esan seachad *am fear* a *ta* chum na h-ìobairt-pheacaidh air tùs, agus snìomhaidh e a cheann o' amhaich⁸, ach cha sgar e o chéile *iad*.

9 Agus crathaidh e *cuid* do fhuil na h-ìobairt-pheacaidh air taobh na h-altarach, agus fàisgear a' chuid eile do'n fhuil a mach aig bun na h-altarach: *is* ìobairt-pheacaidh *i*.

10 Agus bheir e seachad an dara *eun* mar ìobairt-loisgte, a réir a' ghnàtha: agus ni an sagart réite air a shon a thaobh a pheacaidh a pheacaich e, agus maithear dha e.

11 Ach mur urrainn e dà thurtur, no dà choluman òg a thoirt leis; an sin bheir esan a pheacaich leis, mar a thabhartas, an deicheamh cuid do ephah do phlùr mìn, mar thabhartas-peacaidh: cha chuir e oladh air, ni mò a chuireas e tùis air, oir *is* tabhartas-peacaidh e.

12 An sin bheir e chum an t-sagairt e, agus gabhaidh an sagart làn a dhùirn deth, *eadhon* cuimhneachan deth, agus loisgidh e air an altair e, a réir nan tabhartas a bheirear suas le teine do'n Tighearn: *is* tabhartas-peacaidh e.

13 Agus ni an sagart réite air a shon, a thaobh a pheacaidh a pheacaich e ann an aon diubhl sin, agus maithear dha e: agus bithidh *am fùigheall* leis an t-sagart, mar thabhartas-bidh.

14 Agus labhair an Tighearna ri Maois, ag ràdh,

¹ do'n tua'-cheatharn, do'n phobull chumanta.

² an tabhartais air son peacaidh.

³ guth mionnan.

⁴ closach.

⁵ a shnágas, a chrùbas.

⁶ ma bheir neach mionnan.

⁷ aidmheich.

⁸ 'mhuineal.



LEBHITICUS, V. VI.

15 Ma ni anam coire, agus gu'm peacach e trid aineolais ann an nithibh naomha an Tighearn; an sin bheir e air son a choire dh'ionnsuidh an Tighearna, reithe gun ghaoid o na treudaibh, a réir do mheas le secelibh airgid, a réir seceil an *ionaid* naoimh, chum iobairt-eusaontais.

16 Agus air son an lochd a rinn e san ni naomha ni e coimhleasachadh, agus cuiridh e ris an cuigeadh cuid, agus bheir e do'n t-sagart e: agus ni an sagart réite air a shon le reithe na h-iobairt-eusaontais, agus maithear dha e.

17 Agus ma pheacaicheas anam, agus gu'n dean e aon do na nithibh sin thoirmisgeadh le àitheantaibh an Tighearna bhi air an deanamh; ged nach b'fhios da e, gidheadh a ta e ciontach, agus giùlainidh e a'gingidheachd¹.

18 Agus bheir e leis reithe gun ghaoid o'n treud, a réir do mheas, chum iobairt-eusaontais, a dh'ionnsuidh an t-sagairt; agus ni an sagart réite air a shon a thaobh 'aineolais, leis an dcachaidh e air seacharan² agus gun fhios aig *air*; agus maithear dha e.

19 *Is* iobairt-eusaontais a th'ann; chiontaich e gu deimhin an aghaidh an Tighearna.

CAIB. VI.

1 Na h-iobairtean-eusaontais air son pheacanna a rinneadh le daoineibh le 'm fìos. 19 An tabhartas a bheir seachad nuair a dh'ungar sagart.

AGUS labhair an Tighearna ri Maois, ag ràdh,

2 Ma pheacaicheas anam, agus gu'n dean e eusaontas an aghaidh an Tighearn, agus gu'n dean e breug d'a choimhearsnach a thaobh an ni a thugadh dha r'a ghleidheadh, no ann an companas, no thaobh an ni a thugadh air falbh le h-ainneart, no ma mheall e a choimhearsnach;

3 No ma fhuair e an ni sin a chailleadh, agus gu'n d'rinn e breug uime, agus gu'n d'thug e miannan eithich³; ann an aon ni dhiubh sin uile a ni duine, a' peacachadh anna:

4 An sin tachraidh, a chionn gu'n do pheacach e, agus gu bheil e ciontach, gu'n toir e air ais⁴ an ni sin a thug e air falbh le h-ainneart, no an ni sin a fhuair e gu mealltach, no an ni sin a thugadh dha r'a ghleidheadh, no a chailleadh agus a fhuair e,

5 No ni sara bith m'an d'thug e miannan eithich; bheir e air ais e san iomlan, agus cuiridh e 'n cuigeadh cuid a thuilleadh ris, agus bheir e dha-san e d'am buin e, ann an la 'iobairt-eusaontais.

6 Agus bheir e leis 'iobairt-eusaontais chum an Tighearna, reithe gun ghaoid o'n treud, a réir do mheas, mar iobairt-eusaontais, a dh'ionnsuidh an t-sagairt.

7 Agus ni an sagart réite air a shon an làthair an Tighearn: agus gheibh e maitheanas a thaobh gach ni dhiubh sin uile a rinn e, a' ciontachadh anna⁵.

8 Agus labhair an Tighearna ri Maois, ag ràdh,

9 Thoir àithne do Aaron agus d'a mhic, ag ràdh, *Is e* so lagh na h-iobairt-loisgte: (*Is i* 'n iobairt-loisgte i, air son an losgaidh air an altair air feadh na h-oidheche uile gu maduinn, agus bithidh teine na h-altarach a' losgadh innte;)

10 Agus cuiridh an sagart trusgan⁶ anair uime, agus cuiridh e briogais anair air 'fheoil, agus togaidh e suas an luath a loisg an teine leis an iobairt-loisgte air an altair, agus cuiridh e i làimh ris an altair.

11 Agus cuiridh e a thrusgan dheth, agus cuiridh e trusgan eile uime, agus giùlainidh e 'n luath a mach an taobh a muigh do'n champ, gu h-ionad glan.

12 Agus bithidh an teine air an altair a' losgadh innte; cha chuirear as e: agus loisgidh an sagart fiodh oirre gach maduinn, agus cuiridh e an iobairt-loisgte ann an ordugh oirre, agus loisgidh e oirre saill nan iobairte-sith.

13 Bithidh an teine a' lasadh air an altair an còmhnuidl: cha téid e idir as.

14 Agus *is e* so lagh an tabhartas-bhìdh: Bheir mic Aaron e an làthair an Tighearna, fa chomhair na h-altarach.

15 Agus gabhaidh e làn a dhùim dheth, do phlùr an tabhartas-bhìdh, agus d'a oladh, agus an tùis uile a *ta* air an tabhartas-bhìdh, agus loisgidh e air an altair e, chum fàile chùbhraidh, eadhon cuimhneachan dheth do'n Tighearn.

16 Agus ithidh Aaron agus a mhic am fuigheall: maille ri aran neo-ghoirtichte ithear e san ionad naomh; ann an cùirt pàilluin a' choimhthionail ithidh iad e.

17 Cha'n fhuinear e le taois ghoirt: thug mi *dhoibh e mar* an cuibhrionn do m' thabhartasaibh air an toirt suas le teine: *tha e* ro naomha, mar an iobairt-pheacaidh, agus mar an iobairt-eusaontais.

18 Ithidh gach firionnach am measg chloinn Aaron dheth: *bithidh e* na reachd sìorruidh air feadh bhur ginealach a thaobh tabhartasan an Tighearn air an toirt suas le teine: bithidh gach neach a bheanas riu naomh.

19 Agus labhair an Tighearna ri Maois, ag ràdh,

20 *Is e* so tabhartas Aaron, agus a chuid mac, a bheir iad seachad do'n

¹ a chionta, a choire.

³ miannan gu breugach.

² am nearachd.

⁴ aisg e.

⁵ air an d'fhuaradh ciontach e.

⁶ èididh, eudach, culaidh.

Tighearna, san là a dh'ungar e; an deicheamh cuid do ephai do phlùr mìn mar thabhartas-bidh an còmhnuidh¹, a leth sa' mhaduinn, agus a leth san fheasgar.

21 Ann an aghann² nìthear e le h-oladh, agus an uair a bhios e fuinte, bheir thu stigh e: agus na mirean fuinte d'on tabhartas-bhìdh bheir thu seachad a chum fàile chùbhraidh do'n Tighearn.

22 Agus bheir an sagart d'a mhic, a dh'ungadh 'na àite, seachad e: is reachd sìorruidh e do'n Tighearn; loisgear gu h-iomlan e.

23 Oir loisgear gach tabhartas-bidh air son an t-sagairt gu h-iomlan: cha'n ith-eare e.

24 Agus labhair an Tighearna ri Maois, ag ràdh,

25 Labhair ri h-Aaron agus r'a mhic, ag ràdh, Is e so lagh na h-ìobairt-pheacaidh: san ionad anns am marbhar an ìobairt-loisgte, bithidh an ìobairt-pheacaidh air a marbhadh am fianuis an Tighearn: tha i ro naomh.

26 Ithidh an sagart i, a bheir seachad i air son peacaidh: anns an ionad naomh ithear i, ann an cùirt pàilliuin a' choimhthionail.

27 Ge b'e ni a bheanas r'a feoil, bithidh e naomh; agus an uair a chrathar a bheag d'a fuil air eudach sam bith, nìghidh tu an ni air an do chrathadh i anns an ionad naomh.

28 Agus bithidh an soitheach creadha anns an do bhrùicheadh i air a bhriseadh; ach ma bhrùicheadh i ann an coireadh umha³, glanar agus nighear⁴ e ann an uisge.

29 Ithidh na firionnaich uile am measg nan sagart dhith: tha i ro naomh.

30 Ach cha 'n ithear ìobairt-pheacaidh sam bith, d'an d'thugadh a bheag do'n fhuil a steach do phàilliuin a' choimhthionail, a dheanamh réite san ionad naomh: loisgear san teine i.

CAIB. VII.

1 Lagh na h-ìobairt-eusaontais, 11 agus lagh ìobairt nan tabhartas-sith. 22 An t-saill, 26 agus an fhuil, air an toirmeasg.

AGUS is e so lagh na h-ìobairt-eusaontais: tha i ro naomh.

2 Anns an ionad sam marbh iad an ìobairt-loisgte, marbhaidh iad an ìobairt-eusaontais; agus crathaidh e a fuil air an altair mu'n cuairt.

3 Agus bheir e seachad dhith a saill uile: an t-earball⁵, agus an t-saill a ta còmhdachadh a' mhìonaich,

4 Agus an dà àra, agus an t-saill a ta orra, a ta làimh ris an loch-'léin agus an scairt a ta os ceann nan àinean⁶; maille

ris na h-airuibh, bheir e air falbh i.

5 Agus loisgidh an sagart iad air an altair, mar thabhartas a bheirear suas le teine do'n Tighearn: is ìobairt-eusaontais i.

6 Ithidh gach firionnach am measg nan sagart dhith: san ionad naomh ithear i; tha i ro naomh.

7 Mar an ìobairt-pheacaidh, is amluil sin an ìobairt-eusaontais: is aon lagh dhoibh: leis an t-sagart a ni réite leatha, bithidh i.

8 Agus an sagart a bheir seachad ìobairt-loisgte duine sam bith, is leis an t-sagart so croicinn na h-ìobairt-loisgte a thug e seachad.

9 Agus buinidh an tabhartas-bidh uile a dh'fhuinear ann an àmhuin, agus gach ni a dheasaichear ann an aghann-ròstaidh, agus ann am mèis⁷, do'n t-sagart a bheir seachad e.

10 Agus bithidh gach tabhartas-bidh measgta le h-oladh, agus tioram, le mic Aaroinuile, leis gach aon uiread r'a chéile.

11 Agus is e so lagh ìobairt nan tabhartas-sith, a bheir e seachad do'n Tighearna:

12 Ma's ann mar bhreith-buidheachais a bheir e seachad i, an sin bheir e seachad, maille ris an ìobairt-bhuidheachais, breacagan neo-ghoirtichte, measgta le h-oladh, agus dearnagan neo-ghoirtichte, ungta le h-oladh, agus breacagan measgta le h-oladh, do phlùr mìn, air a ròstadh.

13 A thuilleadh air na breacagaibh, bheir e seachad mar thabhartas, aran goirtichte, maille ri ìobairt-buidheachais a thabhartasan-sith.

14 Agus dh'i sin bheir e seachad aon as an tabhartas iomlan, mar thabhartas-togta do'n Tighearn, agus bithidh e leis an t-sagart a chrathas fuil nan tabhartas-sith.

15 Agus ithear feoil ìobairt a thabhartasan-sith air son breith-buidheachais, san là sin féin anns an toir e seachad i; cha 'n fhàg e bheag dhith gu maduinn.

16 Ach ma's boid, no tabhartas deònach ìobairt a thabhartais, san là sin féin anns an toir e seachad ìobairt, ithear i; agus air an là maireach, mar an ceudna, ithear a fuigheall.

17 Ach loisgear le teine fuigheall feòla na h-ìobairt air an treas là.

18 Agus ma dh'ithear idir a bheag do fheoil ìobairt a thabhartasan-sith air an treas là, cha ghabhar i, ni mò a mheasar i dha-san a bheir seachad i: bithidh i 'na gràineileachd, agus an t-anam a dh'itheas dhith giùlainidh e 'aingidheachd.

19 Agus an fheoil a bheanas ri ni sam bith neòghlan, cha'n ithear i; loisgear i

¹ bith-bhuan, daonan. ² aigheann.

³ preis unga. ⁴ schar agus glan-nighear.

⁵ bun an earbail.

⁷ aigheann.

⁶ os cionn a' gh'ùthain.

le teine: agus a thaobh na fhèla, gach neach a bhios glan, ithidh e dhith.

20 Ach an t-anam a dh'itheas do fheoil iobairt nan tabhartas-sith, a *bhuineas* do'n Tighearn, agus a neòghloine air, gearrar eadhon an t-anam sin as o' shluagh.

21 Agus an t-anam a bheanas ri *ni* sam bith neòghlan, ri neòghloine duine, no ri ainmhidh neòghlan, no ri gràineileachd neòghloin sam bith, agus a dh'itheas do fheoil iobairt nan tabhartas-sith a *bhuineas* do'n Tighearna, gearrar eadhon an t-anam sin as o' shluagh¹.

22 Agus labhair an Tighearna ri Maois, ag ràdh,

23 Labhair ri cloinn Israeil, ag ràdh, Saill sam bith daimh, no caorach, no gaibhre, cha 'n ith sibh.

24 Agus feudar saill ainmhidh a gheibh bàs leis féin², agus saill an ainmhidh sin a reubar le fiadh-bheathaichibh, a ghnàth-achadh gu feum sam bith eile; ach cha'n ith sibh idir dhith:

25 Oir ge b'e dh'itheas saill o'n ainmhidh sin d'an toir daoine seachad iobairt a loisgear le teine do'n Tighearna, gearrar eadhon an t-anam sin a dh'itheas *dhith* as o' shluagh.

26 Agus cha'n ith sibh gnè sam bith fola, ma's ann do eunaibh no do ainmhidh, ann an aon air bith d'ur-nàiteachaibh-còmhnuidh.

27 Gach anam a dh'itheas gnè sam bith fola, gearrar eadhon an t-anam sin as o' shluagh.

28 Agus labhair an Tighearna ri Maois, ag ràdh;

29 Labhair ri cloinn Israeil, ag ràdh, Esan a bheir seachad iobairt a thabhartasan-sith do'n Tighearna, bheir e leis a thabhartas a dh'ionnsuidh an Tighearna, do iobairt a thabhartasan-sith.

30 Bheir a làmhnan féin leo tabhartasan an Tighearn a bheirear suas le teine; an t-saill maille ris an uchd, so bheir e leis, a chum gu'n luaisgear an t-uchd *mar* thabhartas-luaisgte an làthair an Tighearn.

31 Agus loisgidh an sagart an t-saill air an altair: ach bithidh an t-uchd le Aaron agus le 'mhic.

32 Agus an sliinnean deas bheir sibh do'n t-sagart *mar* thabhartas-togta, do iobairtibh bhur tabhartasan-sith.

33 Aige-san do mhic Aaron a bheir suas fuil nan tabhartas-sith, agus an t-saill, bithidh an sliinnean deas mar a chuibhrionn.

34 Oir ghabh mi an t-uchd luaisgte agus an sliinnean togta o chloinn Israeil, do iobairtibh an tabhartasan-sith, agus thug mi iad do Aaron an sagart, agus d'a mhic, le reachd siorruidh o mheasg chloinn Israeil.

35 *Is* e so *cuibhrionn* ungaidh Aaron, agus ungaidh a chuid mac, do thabhartas-ibh an Tighearn a bheirear suas le teine, san là anns an d'thug e a làthair iad a fhrithealadh do'n Tighearn ann an dreuchd an t-sagairt;

36 A dh'àithn an Tighearn a thoirt dhoibh o chloinn Israeil, san là anns an d'ung e iad, le reachd siorruidh air feadh an ginealach.

37 *Is* e so lagh na h-iobairt-loisgte, an tabhartas-bhìdh, agus na h-iobairt-pheacaidh, agus na h-iobairt-eusaontais, agus nan coisreagadh, agus iobairt nan tabhartas-sith,

38 A dh'àithn an Tighearna do Mhaois ann an sliabh Shinaì, san là anns an d'àithn e do chloinn Israeil an tabhartasan a thoirt seachad do'n Tighearn, ann am fàsach Shinaì.

CAIB. VIII.

1 *Choisrig Maois Aaron agus a mhic.* 14 *An iobairt-pheacaidh.* 18 *An iobairt-loisgte.* 22 *Reithe a' choisreagaidh.* 31 *Aite agus àm an coisreagaidh.*

A GUS labhair an Tighearna ri Maois, ag ràdh,

2 Thoir leat Aaron agus a mhic maille ris, agus an trusgan³ *naomh*, agus an oladh-ungaidh, agus tarbh mar an iobairt-pheacaidh, agus dà reithe, agus bascaid do aran neo-ghoirtichte.

3 Agus cruinnich an coimhthional uile an ceann a chèile gu dorus pàilliuin a' choimhthionail.

4 Agus rinn Maois mar a dh'àithn an Tighearn dha; agus chruinnicheadh an coimhthional r'a chèile gu dorus pàilliuin a' choimhthionail.

5 Agus thubhairt Maois ris a' choimhthional, *Is* e so an ni a dh'àithn an Tighearn a dheanamh.

6 Agus thug Maois Aaron agus a mhic leis, agus dh'ionnlaid e iad le h-uisge.

7 Agus chuir e air an còta, agus chrioslaich se e leis a' chrios, agus dh'eudaich se e leis an fhalluinn, agus chuir e 'n ephod air, agus chrioslaich se e le crios riomhaich na h-ephod, agus cheangail e ris i leis.

8 Agus chuir e 'n uchd-éididh air; agus chuir e anns an uchd-éididh an Urim agus an Tumim.

9 Agus chuir e 'n crùn-sagairt air a cheann; mar an ceudna air a' chrùn-sagairt, *eadhon* air a' chuid-beoil deth chuir e 'n leac òir, an crùn naomh, mar a dh'àithn an Tighearna do Mhaois.

10 Agus ghabh Maois an oladh-ungaidh, agus dh'ung e 'm pàilliuin, agus gach *ni* a *bha* ann, agus naomhaich e iad.

11 Agus chrath e *cuid* dhith air an altair seachd nairean, agus dh'ung e 'n altair,

¹ *bho 'na phobull.*

² *saill cairbh.*

³ *éididh.*

agus a soithichean uile aaron¹ an soith-each-ionnlaid agus a chos, a chum an naomhachadh.

12 Agus dhòirt e do'n oladh ungaidh air ceann Aaroin, agus dh'ung se c, chum a naomhachadh.

13 Agus thug Maois mic Aaroin leis, agus chuir e còtaichean orra, agus chrioslaich e iad le criosaibh, agus chuir e boineidean orra, mar a dh'àithn an Tighearna do Mhaois.

14 Agus thug e leis an tarbh air son na h-iobairt-pheacaidh, agus chuir Aaron agus a mhic an làmhan air ceann an tairbh air son na h-iobairt-pheacaidh.

15 Agus marbh se e; agus ghabh Maois an fhuil, agus chuir e i air adhaireibh na h-altarach mu'n cuairt le'mheur, agus ghlan e'n altair; agus dhòirt e'n fhuil aig bun na h-altarach, agus naomlaich e i, a dheanamh réite oirre.

16 Agus ghabh e'n ìgh uile a bha air a' mhionach, agus an seairt os ceann nan àinean, agus an dà àra, agus an ìgh; agus loisg Maois iad air an altair.

17 Ach an tarbh agus a sheice, agus f'heoil, agus a'olach², loisg e le teine an taobh a muigh do'n champ, mar a dh'àithn an Tighearna do Mhaois.

18 Agus thug e leis an reithe air son na h-iobairt-loisgte: agus chuir Aaron agus a mhic an làmhan air ceann an reithe.

19 Agus mharbh se e; agus chrath Maois an fhuil air an altair mu'n cuairt.

20 Agus ghearr e'n reithe'na m'ùiribh; agus loisg Maois an ceann, agus na mìrean, agus an t-saill.

21 Agus nìgh e am mionach agus na cosan ann an uisge; agus loisg Maois an reithe uile air an altair: b'iobairt-loisgte e, chum fàile chùbhraidh: tabhartas air a thoirt suas le teine do'n Tighearna, mar a dh'àithn an Tighearna do Mhaois.

22 Agus thug e leis an reithe eile, reithe a' choisreagaidh: agus chuir Aaron agus a mhic an làmhan air ceann an reithe.

23 Agus mharbh se e; agus ghabh Maois cuid d'a fhuil, agus chuir e i air bàrr cluaise deise Aaroin, agus air ordaig a làimhe deise, agus air ordaig a choisreagaidh.

24 Agus thug e leis mic Aaroin, agus chuir Maois cuid do'n fhuil air bàrr an cluaise deise, agus air ordaig an làimhe deise, agus air ordaig an coise deise³: agus chrath Maois an fhuil air an altair mu'n cuairt.

25 Agus ghabh e'n t-saill, agus an t-earball, agus an ìgh uile a bha air a' mhionach, agus an seairt os ceann nan àinean, agus an dà àra⁴ agus an ìgh, agus

an slinnean deas.

26 Agus á bascaid an arain neo-ghoirichte, a bha an làthair an Tighearna, ghabh e aon bhreacag neo-ghoirichte, agus aon bhreacag do aran le h-oladh, agus aon dearnagan⁵, agus chuir e iad air an t-saill, agus air an t-slinnean deas:

27 Agus chuir e'n t-ìomlan air làmhan Aaroin, agus air làmhan a chuid mac⁶, agus luaig e iad mar thabhartas-luaisgte an làthair an Tighearna.

28 Agus ghabh Maois iad bhàrr an làmh, agus loisg e iad air an altair os ceann na h-iobairt-loisgte; bu tabhartas-coisreagaidh iad a chum fàile chubhraidh; tabhartas air a thoirt suas le teine do'n Tighearna.

29 Agus ghabh Maois an t-uchd, agus luaig se e mar thabhartas-luaisgte an làthair an Tighearna: b'e cuibhrionn Mhaois e do reithe a' choisreagaidh; mar a dh'àithn an Tighearna do Mhaois.

30 Agus ghabh Maois cuid do'n oladh-ungaidh, agus do'n fhuil a bha air an altair, agus chrath e air Aaron i; air eudach, agus air a mhic, agus air eudach a mhac maille ris: agus naombaich e Aaron, agus eudach, agus a mhic, agus eudach a mhac maille ris.

31 Agus thubhairt Maois ri h-Aaron, agus r'a mhic, Bruichibh an fheoil aig doras pàilliuin a' choimhthionail, agus ann an sin ithibh i leis an aran a ta ann am bascaid a' choisreagaidh⁷, mar a dh'àithn mise, ag radh, Ithidh Aaron agus a mhic i.

32 Agus an nì sin a dh'fhàgar do'n fheoil agus do'n aran, loisgidh sibh le teine.

33 Agus air doras pàilliuin a' choimhthionail cha téid sibh a mach r'è sheachd làithean, gus am bi làithean bhur coisreagaidh air an crìochnachadh⁸: oir r'è sheachd làithean coisrigidh e sibh.

34 Mar a rinn e'n diugh, mar sin dh'àitlin an Tighearna bhi deanta, a dheanamh réite air bhur son.

35 Uime sin, aig doras pàilliuin a' choimhthionail fanaidh sibh a là agus a dh'oidhche, r'è sheachd làithean, agus coimhididh⁹ sibh freasdal¹⁰ an Tighearna, chum nach faigh sibh bàs: oir is ann mar sin a thugadh àithne dhomhsa.

36 Agus rinn Aaron agus a mhic na h-uile nithe a dh'àithn an Tighearna le làimh Mhaois.

CAIB. IX.

1, 8 Iobairt-pheacaidh agus iobairt-loisgte Aaroin air a shon fèin, agus air son an t-sluaigh. 23 An sluagh air am beannachadh. 24 Thàinig teine mach o'n Tighearna air an altair.

A GUS air an ochdamh là ghairm Mhaois air Aaron agus air a mhic, agus

¹ an dà chuid.

² inneir, a ghaorr.

³ air ordaigibh an làmh deasa, agus air ordaigibh an cosa deasa.

⁴ an dà àrainn.

⁵ abhan; wafer. Sasg.

⁶ air làmhan a mhac.

⁷ nan nithe coisrigte.

⁸ gus an là anns an

crìochnaich làithean bhur coisreagaidh. Eabh.

⁹ gleidhidh.

¹⁰ ciaram, ordugh.

air seanairibh Israeil;

2 Agus thubhairt e ri h-Aaron, Gabh dhuit féin laogh òg chum iobart-pheacaidh, agus reithe chum iobairt-loisgte, gun ghaoid, agus thoir seachad *iad* an làthair an Tighearn.

3 Agus labhraidh tu ri cloinn Israeil, ag ràdh, Gabhaibh-se meann dona gabhraibh chum iobairt-pheacaidh; agus laogh, agus uan, *le chèile* do'n cheud bhliadhna¹, gun ghaoid, a chum iobairt-loisgte;

4 Mar an ceudna tarbh agus reithe, mar thabhartasan-sith, a chum an iobradh an làthair an Tighearn; agus tabhartas-bidh measgta le h-oladh: oir an diugh foillsichidh an Tighearn e féin dhuibh.

5 Agus thug iad *an ni sin* a dh'àithn Maois gu beulaobh pàilliuin a' choimhthionail: agus thàinig an coimhthional uile am fagus, agus sheas iad an làthair an Tighearn.

6 Agus thubhairt Maois, *Is* e so an ni a dh'àithn an Tighearna gu'n deanadh sibh: agus foillsichear glòir an Tighearna dhuibh.

7 Agus thubhairt Maois ri h-Aaron, Imich a dh'ionnsuidh na h-altarach, agus iobairt iobairt-pheacaidh, agus t'ìobairt-loisgte, agus dean reite air do shon féin, agus air son an t-sluaigh: agus thoir suas tabhartas an t-sluaigh, agus dean reite air an son, mar a dh'àithn an Tighearna.

8 Chaidh Aaron uime sin a dh'ionnsuidh na h-altarach, agus mharbhb e laogh na h-ìobairt-pheacaidh, a *bha* air a shon féin.

9 Agus thug mic Aaron an fhuil d'a ionnsuidh; agus thum² e a mheur san fhuil, agus chuir e air adhaircibh na h-altarach i, agus dhòirt e mach an fhuil aig bun na h-altarach.

10 Ach an t-saill agus na h-airnean, agus an scairt os ceann àinean na h-ìobairt-pheacaidh, loisg e air an altair, mar a dh'àithn an Tighearna do Mhaois.

11 Agus an fheoil agus an t-seice loisg e le teine, an taobh a muigh do'n champ.

12 Agus mharbh e 'n iobairt-loisgte; agus thug mic Aaron an fhuil d'a ionnsuidh, agus chrath e i air an altair mu'n cuairt.

13 Agus thug iad an iobairt-loisgte d'a ionnsuidh, maille r'a miribh, agus an ceann; agus loisg e *iad* air an altair.

14 Agus nigh e am mionach agus na cosan, agus loisg e *iad* air an iobairt-loisgte air an altair.

15 Agus thug e leis tabhartas an t-sluaigh, agus ghabh e meann na h-ìobairt-pheacaidh³ a *bha* air son an t-sluaigh, agus mharbh se e, agus thug e suas e air son peacaidh, mar a' cheud iobairt.

16 Agus thug e leis an iobairt-loisgte, agus dh'ìobair e i do réir a' ghnàtha⁴.

17 Agus thug e leis an tabhartas-bidh, agus lion e a dhorn as, agus loisg e air an altair e, a thuilleadh air iobairt-loisgte na maidne.

18 Mharbh e mar an ceudna an tarbh, agus an reithe, mar iobairt nan tabhartasan-sith, a *bha* air son an t-sluaigh; agus thug mic Aaron d'a ionnsuidh an fhuil, agus chrath e i air an altair mu'n cuairt.

19 Agus saill an tairbh, agus earball an reithe, agus an *ni sin* a ta còmhdachadh a' mhìonaich, agus na h-airnean, agus an scairt os ceann nan àinean.

20 Agus chuir iad an t-saill air na h-uchdaibh, agus loisg e 'n t-saill air an altair.

21 Agus na h-uchdan agus an slinnean deas luaig Aaron mar thabhartas-luaisgte an làthair an Tighearna, mar a dh'àithn Maois.

22 Agus thog Aaron suas a làmh chum an t-sluaigh, agus bheannaich e iad; agus thàinig e nuas o iobradh na h-ìobairt-pheacaidh, agus na h-ìobairt-loisgte, agus nan iobairtean-sith.

23 Agus chaidh Maois agus Aaron a steach do phàilliuin a' choimhthionail, agus thàinig iad a mach, agus bheannaich iad an sluagh: agus dh'fhoillsicheadh glòir an Tighearna do'n t-sluaigh uile.

24 Agus thàinig teine a mach o làthair an Tighearn, agus loisg e air an altair an iobairt-loisgte, agus an t-saill: agus chunn-aic an sluagh uile e, agus rinn iad gàir, agus thuit iad air an aghaidh.

CAIB. X.

1 Nadab agus Abihu air an losgadh. 8 Fion air a thoirmeasg do na sàgairt, an uair a rachadh iad a steach do bhùth a' choimhthionail, &c.

AGUS ghabh Nadab agus Abihu, mic Aaron, gach fear diubh a thùseir⁵, agus chuir iad teine ann, agus chuir iad tùis air, agus thug iad suas am fianuis an Tighearna teine coimheach, nach d'àithn e dhoibh.

2 Agus chaidh teine mach o làthair an Tighearn, agus loisg e suas⁶ iad, agus fhuair iad bàs an làthair an Tighearn.

3 An sin thubhairt Maois ri h-Aaron, *Is* e so *an ni* a labhair an Tighearn, ag ràdh, Aunta-san a thig am fagus dhomh naomhaichear mise, agus an làthair an t-sluaigh uile glòraichear mi. Agus dh'fhan Aaron 'na thosd.

4 Agus ghairm Maois air Misael agus air Elsaphan, mic Udsieil, bràthar athar Aaron, agus thubhairt e riu, Thigibh am fagus, giùlainibh bhuir bràithrean o fhian-

¹ bliadhna dh'aois.

² thom, bhog.

³ a' ghabhar a bha 'na h-ìobairt-pheacaidh.

⁴ a reir an orduigh, mar bu chòir.

⁵ a shoithrach-tùise. ⁶ dh'ith e suas. Eabh.

uis an *ionaid* naoimh a mach as a' champ.

5 Agus chaidh iad am fagus, agus ghiùlain iad 'nan còtaichibh iad a mach as a' champ, mar a thubhairt Maois.

6 Agus thubhairt Maois ri h-Aaron, agus ri h-Eleasar, agus ri h-Itamar, a mhic, Na rùisgibh bhur cinn, agus na reubaibh bhur n-eudach, air eagal gu'm faigh sibh bàs, agus air eagal gu'n tig fearg air an t-sluagh uile: ach deanadh bhur bràithre, tigh Israeil uile, tuireadh¹ air son an losgaidh a las an Tighearn.

7 Agus cha téid sibh a mach air doras pàilliuin a' choimhthionail, air eagal gu'm faigh sibh bàs: oir a *ta* oladh-ungaidh an Tighearn oirbh. Agus rinn iad a réir focail Mhaois.

8 Agus labhair an Tighearna ri h-Aaron, ag ràdh,

9 Na h-èl fìon no deoch làidir², thu féin, no do mhic maille riut, an uair a théid sibh a steach do phàilliuin a' choimhthionail, air eagal gu'm faigh sibh bàs: *bithidh e* 'na reachd bith-bhuan air feadh bhur ginealach.

10 Agus a chum gu'n cuir sibh eadar-dhealachadh eadar naomha agus mi-naomha, agus eadar neòghlan agus glan;

11 Agus a chum gu'n teagaisg sibh do chloinn Israeil na h-orduighean³ uile a labhair an Tighearna riu le làimh Mhaois.

12 Agus labhair Maois ri h-Aaron, agus ri h-Eleasar, agus ri h-Itamar, a mhic a dh'fhan beò, Gabhaibh an tabhartas-bidh a dh'fhàgadh do thabhartasaibh an Tighearn air an toirt suas le teine, agus ithibh e gun ghoirteachadh làimh ris an altair; oir a *ta* e ro naomha.

13 Agus ithidh sibh e san ionad naomh, a chionn *gur* e do dhlighe e⁴, agus dlighe do mhac, do thabhartasaibh an Tighearn air an toirt suas le teine: oir is ann mar sin a dh'àithneadh dhomhsa.

14 Agus an t-uchd luaisgte agus an slinnean togta ithidh sibh ann an ionad glan; thu féin, agus do mhic, agus do nigheana maille riut: oir is iad do dhlighe iad, agus dlighe do mhac, a thugadh dhoibh á iobairtibh tabhartasan-sìth chloinn Israeil.

15 An slinnean togta, agus an t-uchd luaisgte, maille ris na tabhartasaibh air an toirt suas le teine do'n t-saill, bheir iad leogus a luasgadh mar thabhartas-luaisgte an làthair an Tighearn; agus is leats⁵ e, agus le d' mhic maille riut, le reachd bith-bhuan, mar a dh'àithn an Tighearn.

16 Agus dh'iarr Maois gu dichioillach meanna h-iobairt-pheacaidh, agus, feuch, loisgeadh e: agus bha fearg aige ri

h-Eleasar agus ri h-Itamar, mic Aaron, a dh'fhàgadh beò, ag ràdh,

17 C'ar son nach d'ith sibh an iobairt-pheacaidh san ionad naomh, do bhrìgh gu bheil i ro naomh, agus thug *Dia* dhuibh i a ghiùlan aingidheachd a' choimhthionail, a dheanamh réite air an son am fianuis an Tighearn?

18 Feuch, cha d'thugadh a fuil a steach an taobh a stigh do'n *ionad* naomh: bu chòir dhuibh gu deimhin a h-itheadh san *ionad* naomh, mar a dh'àithn mise.

19 Agus thubhairt Aaron ri Maois, Feuch, an diugh thug iad suas an iobairt-pheacaidh, agus an iobairt-loisgte, an làthair an Tighearn; agus thachair an leithidean sin do nithibh dhomhsa; agus nam bithinn air itheadh na h-iobairt-pheacaidh an diugh, an gablita rithe an làthair an Tighearn?

20 Agus an uair a chuala Maois sin, bha e toilichte.

CAIB. XI.

1, 4 Mu bheathaichibh glan, 13 agus mu bheathaichibh neòghlan.

AGS labhair an Tighearna ri Maois, agus ri h-Aaron, ag ràdh riu,

2 Labhraibh ri cloinn Israeil, ag ràdh, *Is iad* so na beathaichean a dh'itheas sibh do na h-uile ainmhidhibh a *ta* air an talamh.

3 Gach aon a roinneas an ionga⁶, agus a sgoilteas an ladhar⁶, agus a chnàmhas⁷ a' chùr, am measg nan ainmhidh, sin ithidh sibh.

4 Ach iad so cha'n ith sibh, dhiubhsan a chnàmhas a' chùr, no dhiubhsan a roinneas an ionga: *mar* an càmhal, a chionn ged a chnàmh e a' chùr, nach roinn e an ionga⁸; neòghlan *tha* e dhuibh.

5 Agus an coinean, a chionn ged a chnàmh e a' chùr, nach roinn e an ionga; neòghlan *tha* e dhuibh.

6 Agus a' mhaigheach⁹, a chionn ged a chnàmh i a' chùr, nach roinn i an ionga; neòghlan *tha* i dhuibh.

7 Agus a' mhuc, a chionn ged a roinn i an ionga, agus ged a sgoilt i an ladhar, gidheadh nach cnàmh i a' chùr; neòghlan *tha* i dhuibh.

8 D'am feoil cha'n ith sibh, agus r'an cairbh¹⁰ cha bhean sibh; neòghlan *tha* iad dhuibh.

9 Iad so ithidh sibh, dhiubhsan uile a *ta* sna h-uisgeachaibh: gach *ni* air am bheil itean¹¹ agus lannan anns na h-uisgeachaibh, anns na cuantaibh¹², agus anns na h-aimh-nichibh, iad sin ithidh sibh.

10 Agus gach *ni* air nach 'eil itean no lannan anns na cuantaibh, agus anns na

¹ còaidh. ² làdair. ³ stàtuist, àitheantan.

⁴ chùr. ⁵ crodhan. ⁶ a sgoilteas sgoltadh

nan iongan. Eabh. ⁷ chagnas. Eir.

⁸ a chionn gu'n cnàmh e a' chùr, ach nach roinn

e'n ionga. ⁹ a' mhoigheach, an gearr-fhiadh.

¹⁰ closach, conablach, corp marbh.

¹¹ sgiathan; cìteach. Eir. ¹² faigibh.

h-aimhnichibh, dogach *ni* a ghluaisneas sna h-uisgeachaibh, agus do gach ni beò¹, a *ta* sna h-uisgeachaibh; 'nan gràineileachd *bithidh* iad dhuibh:

11 Eadhon 'nan gràineileachd bithidh iad dhuibh: d'am feoil cha'n ith sibh, agus d'an cairbh gabhaidh sibh gràin.

12 Gach *ni* air nach 'eil itean no lannan anns na h-uisgeachaibh, 'na ghràineileachd *bithidh* sin dhuibh.

13 Agus dhuibh so gabhaidh sibh gràin am measg nan eun²; cha'n ithear iad, 'nan gràineileachd *tha* iad: an iolair³, agus an cnaimh-bhristeach⁴, agus an iolair-uisge⁵,

14 Agus am fang⁶, agus an clamhan⁷ a réir a ghnè;

15 Gach fiteach a réir a ghnè;

16 Agus a' chailleach-oidliche⁸, agus an t-seabhag-oidhe⁹, agus a' chuach¹⁰, agus an t-seabhag¹¹ a réir a ghnè,

17 Agus a' chailleach-oidliche bheag¹², agus an scarbh¹³, agus a' chailleach-oidliche mhòr¹⁴,

18 Agus an eala¹⁵, agus am pelican, agus an iolair-fhionn¹⁶,

19 Agus a' chorra-bhàn, agus a' chorra-ghlach¹⁷ a réir a ghnè, agus an t-adharcan-luachrach¹⁸, agus an ialtag.

20 *Bithidh* gach ni snàigeach a dh'iteal-icheas¹⁹, agus a dh'imicheas air cheithir *chosan*, 'na ghràineileachd dhuibh.

21 Ach iad so feudaidd sibh itheadh, do gach ni snàigeach²⁰ a dh'itealicheas, agus a dh'imicheas air cheithir *chosan*, aig am bheil luirgnean os ceann a throidhean²¹, gu leum leo air an talamh.

22 Eadhon iad so dhuibh feudaidd sibh itheadh: an locust a réir a ghnè, agus an locust maol a réir a ghnè, agus an daol²² a réir a ghnè, agus an leumnach-uaine²³ a réir a ghnè.

23 Ach *bithidh* gach ni eile snàigeach a dh'itealicheas, aig am bheil ceithir *chosan*, 'na gràineileachd dhuibh.

24 Agus air an son sin bithidh sibh neòghlan: gach neach a bheanas r'an cairbh, bithidh e neòghlan gu feasgar.

25 Agus ge b'e air bith a ghiùlaineas a bheag d'an cairbh, nighidh e 'eudach, agus bithidh e neòghlan gu feasgar.

26 Bithidh *cairbh* gach ainmhidh a roinneas an ionga, agus nach sgoilt an ladin, agus nach cnàmh a' chùir, neòghlan dhuibh: gach neach a bheanas riu, bith-

idh e neòghlan.

27 Agus ge b'e air bith a dh'imicheas air a mhàgaibh, am measg nan uile bheathaichean a dh'imicheas air cheithir *chosan*, *bithidh* e neòghlan dhuibh; gach neach a bheanas r'an cairbh bithidh e neòghlan gu feasgar.

28 Agus esan ghiùlaineas an cairbh, nighidh e 'eudach, agus bithidh e neòghlan gu feasgar; neòghlan *tha* iad dhuibh.

29 Agus *bithidh* iad so neòghlan dhuibh am measg nan nithe snàigeach a shnàigeas air an talamh: an neas²⁴, agus an luch, agus an crocodile²⁵ a réir a ghnè,

30 Agus am firead²⁶, agus an camoleon²⁷, agus an dearc-luachrach²⁸, agus an t-seilch eag²⁹, agus am fann³⁰.

31 *Tha* iad sin neòghlan dhuibh 'nam measg-sa uile a shnàigeas: gach neach a bheanas riu, 'nuair a bhios iad marbh, bithidh e neòghlan gu feasgar.

32 Agus gach ni air an tuit *ah-aon* diubh, 'nuair a bhios e marbh, bithidh e neòghlan; co dhuibh is soitheach fiodha sam bith e, no eudach, no croicionn, no sac: feumaidh gach soitheach anns an deanar obair sam bith, a bhi air a chur ann an uisge, agus bithidh e neòghlan gu feasgar; an sin bithidh e glan.

33 Agus a *thaobh* gach soitheach creadha, anns an tuit a *h-aon* diubh, bithidh gach ni a *ta* ann neòghlan; agus brisidh sibh e.

34 Do gach uile bhiadh a dh'ithear, bithidh *am biadh* sin air an tig uisge, neòghlan; agus bithidh gach deoch a dh'òlar ann an soitheach sam bith, neòghlan.

35 Agus bithidh gach *ni* air an tuit a bheag d'an cairbh, neòghlan; *ma's* am fuinn e, no coireach³¹, brisear sìos iad: neòghlan *tha* iad, agus neòghlan bithidh iad dhuibh.

36 Gidheadh bithidh fuanan no tobar³² anns am bi pailteas uisge, glan: ach bithidh an ni sin a bheanas r'an cairbh, neòghlan.

37 Agus ma thuiteas a bheag d'an cairbh air siol-cuir sam bith, a bhios r'a chur, *bithidh* e glan.

38 Ach ma chuirear uisge *sam bith* air an t-sìol, agus gu'n tuit a bheag d'an cairbh air, neòghlan *bithidh* e dhuibh.

39 Agus ma bhàsaicheas ainmhidh sam bith d'am feud sibh itheadh, bithidh esan a bheanas r'a chairbh neòghlan gu feasgar.

¹ anam beò Eabhl.

² eunlaith.

³ am fireun.

⁴ iolair mhòr na mara; ossifrage. Sasg. peres. Eabhl.

⁵ an t-iasgair cairneach; ghadisniah. Eabhl.

⁶ preacan ingneach, preacan criosach. Eir. vul-

ture. Sasg. doah. Eabhl. ⁷ kite. Sasg. aiah. Eabhl.

⁸ a' chomhachag. ⁹ tachmas. Eabhl.

¹⁰ a' chuthag; shachaph. Eabhl. ¹¹ an t-seabhag.

¹² coos. Eabhl. ¹³ shalach. Eabhl.

¹⁴ ianshuph. Eabhl. ¹⁵ tinshemeth. Eabhl. ¹⁶ iolair-

thimchiollach; gier-eagle. Sasg. racham. Eabhl.

¹⁷ a' chùrr; anaph. Eabhl.

¹⁸ upupa; ducipath. Eabhl.

¹⁹ gach creutair sgiathach a ghluaisneas.

²⁰ snàigeach. Eir.

²¹ throighean, spàgan.

²² salegham. Eabhl.

²³ am fioman fcoir;

chagab. Eabhl. ²⁴ an nas, an easag; choled. Eabhl.

²⁵ uilebheist an fhàsaich; land-crocodile. Sasg.

tzab. Eabhl. ²⁶ ferret. Sasg. anakah. Eabhl.

²⁷ coach. Eabhl.

²⁸ letaah. Eabhl.

²⁹ comct. Eabhl.

³⁰ tinshemeth. Eabhl.

³¹ àitean air son phoitcan no phrèiseun.

³² tiobar

s'leachd.

40 Agus esan a dh'itheas d'a chairbh, nighidh e 'eudach, agus bithidh e neòghlan gu feasgar: esan mar an ceudna a ghiùlain-eas a' chairbh, nighidh e 'eudach, agus bithidh e neòghlan gu feasgar.

41 Agus *bithidh* gach nì snàigeach a shnàigeas air an talamh, 'na ghràineil-eachd: cha'n ithear e.

42 Gach nì a dh'ìmicheas air a' bhroinn, agus gach nì a dh'ìmicheas air cheithir *chosan*, no ge b'e air bith aig am bheil tuilleadh chosan am measg nan uile nithe snàigeach a shnàigeas air an talamh; cha'n ith sibh iad, oir *is* gràineil-eachd iad.

43 Cha dean sibh sibh féin gràineil le nì snàigeach sam bith a shnàigeas, cha mhò nì sibh sibh féin neòghlan leo, air chor is gu'n truaillear sibh leo.

44 Oir *is* mise an Tighearna bhur Dia: naomhaichidh sibh air an aobhar sin sibh féin, agus bithidh sibh naomha; oir *a ta* mise naomha: agus cha truail sibh sibh féin¹ le nì snàigeach sam bith a shnàigeas air an talamh.

45 Oir *is* mise an Tighearna a thug sibhse a mach á tìr na h-Eiphit, gu bhì am Dhia agaibh; bithidh sibhse uime sin naomha, oir *a ta* mise naomha.

46 *Is e* so lagh nan ainmhidh, agus nan eunlaith, agus gach dùil² bheò a ghluaisaies anns na h-uisgeachaibh, agus gach dùil a shnàigeas air an talamh:

47 Achur dealachaidheadar an neòghlan agus an glan, agus eadar am beathach a dh'fheudar itheadh, agus am beathach nach feudar itheadh.

CAIB. XII.

1 *Nedghloine bhan an dèigh breith cloinne*, 6 agus an ìobairtean.

AGUS labhair an Tighearna ri Maois, a ag ràdh,

2 Labhair ri cloinn Israeil, a ag ràdh, Ma dh'fhàsas bean torrach, agus gu'm beir i mac, an sin bithidh i neòghlan seachd làithean; a réir làithean a dealachaidh air son a h-annmhunneachd³ bithidh i neòghlan.

3 Agus air an ochdamh là timchioll-ghearrar feoil a roimh-chroicinn.

4 Agus fanaidh i an sin trì làithe deug 'ar fhichead ann am fuil a glanaidh: cha bhean i ri nì naomha sam bith, agus cha tig i steach do'n ionad naomha, gus an coimhlionar làithean a glanaidh.

5 Ach ma bheireas i leanabh nighinn, an sin bithidh i neòghlan dà sheachdain, mar 'na dealachadh: agus fanaidh i ann am fuil a glanaidh trì fichead agus sè làithean.

6 Agus an uair a choimhlionar làithean a glanaidh air son mic, no air son nighinn, bheir i uan do'n cheud bhliadhna chum ìobairt-loisgte, agus cùman òg, no *eun*

turtuir chum ìobairt-pheacaidh, gu dorus pàilliun a' choimhthionail, a dh'ionnsuidh an t-sagairt:

7 Agus bheir e seachad e an làthair an Tighearna, agus nì e réite air a son, agus glanar i o ruith⁴ a fola, *Is e* so an lagh air a son-sa a bheireas mac no nighean.

8 Agus mur urrainn i uan a thoirt leatha, an sin bheir i leatha dà thurtur, no dà choluman òg; fear dhiubh chum ìobairt-loisgte, agus am fear eile chum ìobairt-pheacaidh; agus nì an sagart réite air a son, agus bithidh i glan.

CAIB. XIII.

1 *Na riaghailtean agus na comharan leis an aithnich an sagart plàigh na luibhre.*

AGUS labhair an Tighearna ri Maois agus ri h-Aaron, a ag ràdh,

2 'Nuair a bhios aig duine ann an croicinn 'fheòla atadh, no guirein⁵, no ball⁶ soilleir, agus gu'm bi e ann an croicinn 'fheòla *cosmhuil* ri plàigh luibhre; an sin bheirear e gu h-Aaron an sagart, no gu h-aon d'a mhic, na sagartan.

3 Agus amhaircidh an sagart air a' phlàigh ann an croicinn 'fheòla; agus *an uair* a bhios am fionnadh sa' phlàigh air tionndadh⁷ gu bànn, agus *a bhios* a' phlàigh r'a faicinn nì's doimhne na croicinn 'fheòla; *is* plàigh luibhre a th'ann: agus amhaircidh an sagart air, agus gairmidh e⁸ neòghlan e.

4 Ach ma *tha* am ball soilleir ann an croicinn 'fheòla bànn, agus gun e bhì r'a fhaicinn nì's doimhne na 'n croicinn, agus gun 'fhionnadh bhì air tionndadh gu bànn; an sin druididh an sagart a stigh *esan air am bheil* a' phlàigh seachd làithean.

5 Agus amhaircidh an sagart air, air an t-seachdamh là; agus, feuch, *ma* tha phlàigh 'na shealladh air stad, *agus* gun a' phlàigh bhì sgaoileadh sa' chroicinn; an sin druididh an sagart a stigh e seachd làithean eile.

6 Agus amhaircidh an sagart air a rìs air an t-seachdamh là, agus, feuch, *ma bhios* a' phlàigh càil-éigin⁹ dorcha, agus nach 'eil a' phlàigh air sgaoileadh sa' chroicinn, gairmidh an sagart glan e: *cha'n eil* ann *ach* guirein; agus nighidh e 'eudach, agus bithidh e glan.

7 Ach ma sgaoil an guirein gu mòr a mach sa' chroicinn, an dèigh dha bhì air 'fhaicinn leis an t-sagart a chum a ghlanaidh; chithear e rìs leis an t-sagart.

8 Agus amhaircidh an sagart air, agus, feuch, *ma* tha 'n guirein air sgaoileadh sa' chroicinn, an siu gairmidh an sagart e neòghlan: *is* luibhre *a th' ann*.

9 An uair a bhios plàigh luibhre air duine, an sin bheirear e chum an t-sagairt:

¹ bhar n-anamanna. Eabh.

² creutair.

³ laigse.

⁴ ruidh, dhòrtadh.

⁵ scab.

⁶ leus, ⁷ iompachadh, atharrachadh, caochladh.

⁸ cuiridh e 'n céill.

⁹ ni-eigin, raod-eigin.

10 Agus amhaircidh an sagart air: agus, feuch, *ma tha* atadh bànsa' chroic-ionn, agus gu'n do thionndaidh e am fionnadh gu bà, agus *gu'm bheil* feoil bheò dhearg san atadh,

11 Is seann luibhre a th'ann, ann an croic-ionn 'fheòla; agus gairmidh an sagart e neòghlan, agus cha druid e stigh e, oir *tha* e neòghlan.

12 Agus ma bhriseas luibhre gu mòr a mach sa' chroic-ionn, agus gu'n còmh-daich¹ an luibhre croic-ionn an *neach air am bheil* a' phlàigh uile o' cheann gu 'throidh, ge b'e ball air an amhaire an sagart;

13 An sin bheir an sagart fa' near: agus, feuch, *ma* còmhdaich an luibhre 'fheoil uile, gairmidh e *esan* glan air *am bheil* a' phlàigh: thionndaidheadh e uile gu bà; *tha* e glan.

14 Ach an uair a bhios feoil dhearg r'a faicinn air, bithidh e neòghlan.

15 Agus amhaircidh an sagart air an fheoil dhearg, agus gairmidh e neòghlan e; oir *tha* 'n fheoil dhearg neòghlan: *is* luibhre a th'ann.

16 Ach ma thig an fheoil dhearg air a h-ais a ris, agus gu'n tionndaidhear gu bà i, thig e chum an t-sagairt,

17 Agus amhaircidh an sagart air: agus, feuch, *ma tha* phlàigh air tionndadh gu bà, an sin gairmidh an sagart *esan* glan air *am bheil* a' phlàigh: *tha* e glan.

18 An fheoil mar an ceudna anns an robh, *eadhon* 'na croic-ionn, neascaid, agus a leighiseadh,

19 Agus aig am bheil ann an àite na neascaid atadh bà, no ball soilleir bà, càileigin dearg, nochdar² do'n t-sagart e;

20 Agus ma 'se 'nuair a chi an sagart e, feuch, gu bheil e r'a fhaicinn ni's doimhne na'n croic-ionn, agus 'fionnadh air a thionndadh gu bà; gairmidh an sagart neòghlan e: *is* plàigh luibhre a *th'ann* air briseadh a mach anns an neascaid.

21 Ach ma dh'amhairceas an sagart air, agus, feuch, *nach* 'eil fionnadh bà air bith ann, agus gun e ni's doimhne na'n croic-ionn, ach càil-eigin dorch; an sin druididh an sagart a stigh e seachd làithean.

22 Agus ma tha e air sgaoileadh a mach gu mòr sa' chroic-ionn, an sin gairmidh an sagart e neòghlan; *is* plàigh a th'ann.

23 Ach ma tha'm ball soilleir air stad 'ua àite, gun e air sgaoileadh, *is* neascaid loisgeach a th'ann; agus gairmidh an sagart glan e.

24 No *ma bhios* feoil air bith ann, aig am bheil 'na croic-ionn losgadh teth, agus gu'm bi anns an *fheoil* bheò a ta losgadh

ball bà soilleir, càil-eigin dearg, no bà;

25 An sin amhaircidh an sagart air: agus, feuch, *ma tha* 'ni fionnadh anns a' bhall shoilleir air tionndadh gu bà, agus e r'a fhaicinn ni's doimhne na'n croic-ionn; *is* luibhre a th'ann air briseadh a mach anns an losgadh: uime sin gairmidh an sagart neòghlan e; *is* plàigh luibhre a th'ann.

26 Ach ma dh'amhairceas an sagart air, agus, feuch, *nach* 'eil fionnadh bà air bith air a' bhall shoilleir, agus nach 'eil e ni's doimhne na'n croic-ionn *eile*, ach *gu bheil* e càil-eigin dorch; an sin druididh an sagart a stigh e seachd làithean.

27 Agus amhaircidh an sagart air, air an t-seachdamh là, agus ma tha e air sgaoileadh a mach gu mòr sa' chroic-ionn, an sin gairmidh an sagart neòghlan e; *is* plàigh luibhre a th'ann.

28 Agus ma tha 'm ball soilleir air stad 'na àite, gun e air sgaoileadh sa' chroic-ionn, ach e càil-eigin dorch; *is* atadh o'n losgadh a th'ann, agus gairmidh an sagart glan e; oir *is* leannachadh³ a th'ann o'n losgadh.

29 Ma tha aig duine no mnaoi plàigh air a' cheann, no air an fheusaig;

30 An sin amhaircidh an sagart air a' phlàigh: agus, feuch, *ma tha* i r'a faicinn na's doimhne na'n croic-ionn, agus fionnadh tana buidhe innte; an sin gairmidh an sagart neòghlan e: *is* càrr tioram a th'ann, *eadhon* luibhre air a' cheann, no air an fheusaig.

31 Agus ma dh'amhairceas an sagart air plàigh a' charra, agus, feuch, *nach* 'eil i r'a faicinn ni's doimhne na'n croic-ionn, agus nach 'eil fionnadh dubh sam bith innte; an sin druididh an sagart a stigh *esan* air *am bheil* plàigh a' charra, seachd làithean.

32 Agus amhaircidh an sagart air a' phlàigh air an t-seachdamh là, agus, feuch, mur 'eil an càrr air sgaoileadh, agus nach 'eil fionnadh buidhe sam bith ann, agus nach 'eil an càrr r'a fhaicinn ni's doimhne na'n croic-ionn;

33 An sin bearrar⁴ e, ach an càrr cha bhearr e; agus druididh an sagart a stigh *esan* air *am bheil* an càrr, seachd làithean eile.

34 Agus air an t-seachdamh là, amhaircidh an sagart air a' chàrr: agus, feuch, mur 'eil an càrr air sgaoileadh sa' chroic-ionn, no r'a fhaicinn ni's doimhne na'n croic-ionn; an sin gairmidh an sagart glan e: agus nighidh e 'eudach, agus bithidh e glan.

35 Ach ma tha an càrr air sgaoileadh gu mòr sa' chroic-ionn an déigh⁵ a ghlanaidh;

¹ cuibhrig, folaich.

² feuchar, taisbeanar.

³ feargachadh, lasadh, teas.

⁵ an déis.

⁴ lomar.

36 An sin amhaircìdh an sagart air, agus, feuch, ma tha an càrr air sgaoileadh sa' chroicinn, cha 'n iarr an sagart fionnadh buidhe: *tha* e neòghlan.

37 Ach ma tha an càrr 'na shealladh air stad, agus *ma tha* fionnadh dubh air fàs suas ann, leighiseadh¹ an càrr, tha e glan: agus gairmidh an sagart glan e.

38 Ma bhios, mar an ceudna, aig duine no aig mnaoi, ann an croicinn am feòla, buill shoilleir, *eadhon* buill bhàna shoilleir;

39 An sin amhaircìdh an sagart: agus, feuch, ma tha na buill shoilleir ann an croicinn am feòla odhar-bhàn², is leus³ teas e air fàs sa' chroicinn: *tha* e glan.

40 Agus an duine aig am bheil a cheann air faileadh, *tha* e maol: *gidheadh tha* e glan.

41 Agus esan aig am bheil 'fholt air faileadh do'n chuid sin d'a cheann tha leth r'a eudan, *tha* e maol-bhathaiseach; *gidheadh tha* e glan.

42 Agus ma tha 'na cheann maol, no 'na bhathais mhaol creuchd bhàn càil-eigin dearg; is luibhre a th'ann air fàs suas 'ua cheann maol, no 'na bhathais mhaol.

43 An sin amhaircìdh an sagart air; agus, feuch, *ma tha* atadh no creuchda bàn-dhearg 'na mhaol-cheann, no 'na mhaol-bhathais, mar a nochdar an luibhre ann an croicinn na feòla;

44 Is duine lobhrach e, *tha* e neòghlan: gairmidh an sagart e neòghlan gu h-iomlan; *tha* a' phlàigh 'na cheann.

45 Agus an lobhar air *am bheil* a' phlàigh, reubar 'eudach, agus bithidh a cheann lomnochd, agus cuiridh e folach air a bhil⁴ uachdaraich, agus gladhaidh e, Neòghlan, neòghlan,

46 Rè nan uile làithean *a bhios* a' phlàigh air, bithidh e salach; *tha* e neòghlan: gabhaidh e comhnuidh 'na aonar; an taobh a muigh do'n champ *bithidh* 'ionad tàimh.

47 An t-eudach mar an ceudna anns am bheil plàigh na luibhre, ma's eudach olla e, na ma's eudach lìn e.

48 Ma's ann *a tha* i san dlùth, no san inneach⁵, do lìon no dh' olainn, ma's ann an croicinn, no ann an ni sam bith deanta do chroicinn:

49 Agus ma tha phlàigh uaine no dearg⁶ san eudach, no sa' chroicinn, aon chuid san dlùth no san inneach, no ann an ni sam bith deanta do chroicinn; is plàigh luibhre a th'ann agus feuchar⁷ i do'n t-sagart.

50 Agus amhaircìdh an sagart air a' phlàigh agus druididh e stigh *an ni anns am bheil* a' phlàigh seachd làithean.

51 Agus amhaircìdh e air a' phlàigh air

an t-seachdamh là: ma tha phlàigh air sgaoileadh san eudach, aon chuid san dlùth no san inneach, no ann an croicinn, *no* ann an obair sam bith deanta do chroicinn; is luibhre chnàmhanach a' phlàigh: *tha* e neòghlan.

52 Loisgidh e uime sin an t-eudach, ma's dlùth no inneach, ann an olainn no ann an lìon, no ni air bith deanta do chroicinn, anns a' bheil a' phlàigh: oir is luibhre chnàmhanach a th'ann; loisgear e san teine.

53 Agus ma dh'amhairceas an sagart, agus, feuch, nach 'eil a' phlàigh air sgaoileadh san eudach, aon chuid san dlùth, no san inneach, no ann an ni sam bith deanta do chroicinn;

54 An sin àithnidh an sagart dhoibh an ni anns a' bheil a' phlàigh a nigheadh, agus druididh e stigh e seachd làithean eile.

55 Agus amhaircìdh an sagart air a' phlàigh an dèigh a nigheadh: agus, feuch, mur do mhùth a' phlàigh a dath, agus mur do sgaoil a' phlàigh, *tha* e neòghlan; loisgidh tu san teine e: is cnàmhan an leth stigh e, *ma's* lom a stigh no muigh e.

56 Agus ma dh'amhairceas an sagart, agus, feuch, *gu bheil* a' phlàigh càil-eigin dorcha an dèigh a nigheadh; an sin reubaidh e as an eudach i, no as a' chroicinn, no as an dlùth, no as an inneach.

57 Agus ma tha i r'a faicinn fathast san eudach, aon chuid san dlùth, no san inneach, no ann an ni air bith deanta do chroicinn; is plàigh sgaoilteach a th'ann: loisgidh tu le teine an ni anns a' bheil a' phlàigh.

58 Agus an t-eudach, ma's dlùth, no inneach e, no ni air bith deanta do chroicinn, a nigheas tu, ma chaidh a' phlàigh asda, an sin nighear e an dara uair, agus bithidh e glan.

59 Is e so lagh plàigh na luibhre ann an eudach olla no lìn, anns an dlùth, no anns an inneach, no ann an ni sam bith deanta do chroicinn, chum a ghairm glan, no 'ghairm neòghlan.

CAIB. XIV.

1 An lagh agus na h-àbairtean leis an glanar an lobhar. 33 Comharan luibhre ann an tigh: 48 mar a ghlannar an tigh sin.

A GUS labhair an Tighearna ri Maois, ag ràdh,

2 Bithidh so 'na lagh do'n lobhar, ann an là a ghlanaidh: Bheirear e chum an t-sagart;

3 Agus théid an sagart a mach as a' champ; agus amhaircìdh an sagart, agus feuch, *ma* leighiseadh plàigh na luibhre anns an lobhar:

¹ do leighiseadh.

² dorch bhàn.

³ pucoid.

⁴ lip.

⁵ sa' chur.

⁶ ro uaine no ro dhcarg. Eabh.

⁷ nochdar.

4 An sin àithnadh an sagart gu'n gabhar air a shon-san a tha gu bhi air a ghlanadh, dà eun bheò ghlàn, agus fiodh seudair, agus scarlaid, agus hiosop.

5 Agus àithnadh an sagart gu marbhar aon do na h-eunaibh ann an soithleach creadha, os ceann uisge ruith¹.

6 A thaobh an eoin bheò, gabhaidh se e, agus am fiodh seudair, agus an scarlaid, agus an hiosop, agus tumaidh e iad agus an t-eun beò, ann am fuil an eoina mharbhadh os ceann an uisge ruith.

7 Agus crathaidh e air-san a ta gubhi air a ghlanadh o'n luibhre, seachd uairean, agus gairmidh e glàn e, agus leigidh e as an t-eun beò air aghaidh na macharach.

8 Agus nighidh esan a ta gu bhi air a ghlanadh eudach, agus bearraidh e dheth fhionnadh uile, agus nighidh se e féin ann an uisge, chum gu'm bi e glàn: agus 'na dhéigh sin thig e steach do'n champ, agus fanaidh e mach as a' bhùth seachd làithean.

9 Ach air an t-seachdamh là, bearraidh e uile fholt a chinn, agus 'fheusag, agus mailghean a shùl, eadhon 'fhionnadh uile bearraidhe dheth: agus nighidh e eudach, nighidh e mar an ceudna 'fheoil ann an uisge, agus bithidh e glàn.

10 Agus, air an ochdamh là, gabhaidh e dà uan fhirionn gun ghaoid, agus aon uan boirionn do'n cheud bhliadhna gun ghaoid, agus tri deich earrannan² do phlùr mìn mar thabhartas-bidh, measgta le h-oladh, agus aon log³ olaidh.

11 Agus nochdaidh⁴ an sagart a ni glàn e, an duine a ta r'a ghlanadh, agus na nithe sin an làthair an Tighearn, aig doras pàilliuin a' choimhthionail:

12 Agus gabhaidh an sagart aon uan firionn, agus bheir e seachad e mar iobairt-eusaontais, agus an log olaidh, agus luaisgidh e iad mar thabhartas-luaisgte am fianuis an Tighearn.

13 Agus marbhaidh e 'n t-uan anns an àite sam marbh e 'n iobairt-pheacaidh agus an iobairt-loisgte, anns an ionad naomh; oir mar is leis an t-sagart an iobairt-pheacaidh, is amhuil sin an iobairt-eusaontais: tha i ro naomh.

14 Agus gabhaidh an sagart cuid do fhuil na h-iobairt-eusaontais, agus cuiridh an sagart i air bàrr chuaise deise an neach a ta r'a ghlanadh, agus air ordaig a làimhe deise, agus air ordaig a choise deise.

15 Agus gabhaidh an sagart cuid do'n log olaidh, agus dòirtidh e i ann an glaic a làimhe clithe féin.

16 Agus tumaidh an sagart a mheur deas san oladh a ta 'na làimh chli, agus crathaidh e cuid do'n oladh le 'mheur, seachd

uairean an làthair an Tighearn.

17 Agus do'n chuid eile do'n oladh a ta 'na làimh, cuiridh an sagart air bàrr chuaise deise an neach a ta r'a ghlanadh, agus air ordaig a làimhe deise, agus air ordaig a choise deise, air fuil na h-iobairt-eusaontais.

18 Agus fuigheall na h-olaidh, a ta 'n làimh an t-sagairt, dòirtidh e air ceann an neach a ta r'a ghlanadh: agus ni an sagart réite air a shon am fianuis an Tighearn.

19 Agus iobraidh an sagart an iobairt-pheacaidh, agus ni e réite air a shon-san a ta r'a ghlanadh o' neòghloine, agus 'na dhéigh sin marbhaidh e 'n iobairt-loisgte.

20 Agus bheir an sagart seachd an iobairt-loisgte, agus an tabhartas-bidh air an altair: agus ni an sagart réite air a shon, agus bithidh e glàn.

21 Agus ma tha e bochd, agus nach urrainn e an uiread sin fhaghail⁵; an sin gabhaidh e aon uan chum iobairt-eusaontais gu bhi air a luasgadh, a dheanamh réite air a shon, agus aon deicheamh earrann⁶ do phlùr mìn measgta le h-oladh, mar thabhartas-bidh, agus log olaidh;

22 Agus dà thurtur, no dà choluman òg, mar is urrainn e⁷ fhaghail; agus bithidh fear dhiubh 'na iobairt-pheacaidh, agus am fear eile 'na iobairt-loisgte.

23 Agus bheir e iad air an ochdamh là, air son a ghlanaidh, chum an t-sagairt, gu doras pàilliuin a' choimhthionail an làthair an Tighearn.

24 Agus gabhaidh an sagart uan na h-iobairt-eusaontais, agus an log olaidh, agus luaisgidh an sagart iad mar thabhartas-luaisgte an làthair an Tighearn.

25 Agus marbhaidh e uan na h-iobairt-eusaontais, agus gabhaidh an sagart cuid do fhuil na h-iobairt-eusaontais, agus cuiridh e i air bàrr chuaise deise an fhir a ta r'a ghlanadh, agus air ordaig a làimhe deise, agus air ordaig a choise deise.

26 Agus dòirtidh an sagart cuid do'n oladh ann an glaic a làimhe clithe féin.

27 Agus crathaidh an sagart le 'mheur deas cuid do'n oladh a ta 'na làimh chli seachd uairean am fianuis an Tighearn.

28 Agus cuiridh an sagart cuid do'n oladh a ta 'na làimh, air bàrr chuaise deise an fhir a ta r'a ghlanadh, agus air ordaig a làimhe deise, agus air ordaig a choise deise, air ionad fola na h-iobairt-eusaontais.

29 Agus a' chuid eile do'n oladh a ta an làimh an t-sagairt, cuiridh e air ceann an fhir a ta r'a ghlanadh, a dheanamh réite air a shon am fianuis an Tighearn.

30 Agus iobraidh e fear do na turtuir, no do na columain òga, mar is urrainn e fhaghail;

¹ ruith uisge, fìor-uisge; uisge beò. Eabh.

² codacha. ³ tomhas tri cheithreanna pinnne shasgonaich. ⁴ taisbeanaidh.

⁵ fhaigheil, fhaotainn.

⁶ cuid.

⁷ mar a thig leis; ni air an ruig a làmh. Eabh.

31 *Eadhon* an nì is urrainn e fhaghail, fear mar ìobairt-phleacaidh, agus am fear eile mar ìobairt-loisgte, maille ris an tabhartas-blùdh. Agus nì an sagart rèite air a shon-san a ta r'a ghlanadh, am fianuis an Tighearn.

32 So lagh an *fhìr* anns a' *bheil* plàigh na luibhre, neach nach ruig a làmh air an *nì sin a bhuineas d'a ghlanadh*.

33 Agus labhair an Tighearna ri Maois, agus ri h-Aaron, ag ràdh,

34 An uair a thig sibh do thìr Chanaain, a bheir mise dhuibh mar sheilbh, agus a chluireas mi plàigh luibhre ann an tigh fearainn blur seilbhe;

35 Agus gu'n tig esan d'am buin an tigh agus gu'n innis e do'n t-sagart, ag ràdh, A réir mo bharail-sa tha mar gu'm bu phlàigh *luibhre* san tigh :

36 An sin àithnidh an sagart dhoibh an tigh fhalmhachadh¹ mun téid an sagart a stigh ann a dh'fhaicinn na plàigh; chum nach deanar gach nì a *tha* san tigh neòghlan: agus 'na dhéigh sin, théid an sagart a steach a dh'fhaicinn an tigh.

37 Agus amhaircidh e air a' phlàigh, agus, feuch, *ma bhios* a' phlàigh ann am ballaibh an tighe, le stiallaibh domhain², càileigin uaine no dearga, a *tha* r'am faicinn³ nì's isle na 'm balla:

38 An sin théid an sagart a mach as an tigh gu dorus an tighe, agus bheir e fa'near an tigh a dhùnadh suas seachd làithean.

39 Agus thig an sagart a ris air an t-seachdamh là, agus amhaircidh e: agus, feuch, *ma bhios* a' phlàigh air sgaoileadh ann am ballaibh an tighe;

40 An sin àithnidh an sagart iad a thoirt air falbh nan clach, anns a' *bheil* a' phlàigh, agus tilgidh iad ann an àite neòghlan iad ann taobh a mach do'n bhaile.

41 Agus bheir e fa'near an tigh a sgrìobadh air an taobh a stigh mu'n cuairt, agus tilgidh⁴ iad a mach an duslach a sgrìobas iad deth, an taobh a muigh do'n bhaile gu àite neòghlan.

42 Agus gabhaidh iad clachan eile, agus cuiridh iad ann an àite nan clach ud *iad*; agus gabhaidh e criadh⁵ eile, agus còmhdaichidh e thairis⁶ an tigh *leatha*.

43 Agus ma thig a' phlàigh a ris, agus *ma* bhriseas i mach san tigh, an déigh dha na clachan a thoirt air falbh, agus an déigh dha an tigh a sgrìobadh, agus an déigh *dha* a còmhhdachadh thairis *le creidh*;

44 An sin thig an sagart agus amhaircidh e, agus, feuch, ma tha phlàigh air sgaoileadh san tigh, *is* luibhre chnàmhain i san tigh; *tha* e neòghlan.

45 Agus brisidh e sìos an tigh, a chlach-

an, agus 'fhiodh, agus criadh an tighe uile: agus bheir e fa'near an giùlan a mach as a' bhaile gu h-ionad neòghlan.

46 Agus bithidh esan a théid a stigh do'n tigh rè na h-ùine a dhruidear suas e, neòghlan gu feasgar.

47 Agus nighidh esan a luidheas anns an tigh 'eudach: agus nighidh esan a dh'itheas anns an tigh 'eudach.

48 Agus ma théid an sagart a stigh, agus gu'n amhair e *air*, agus, feuch, nach do sgaoil a' phlàigh san tigh, an déigh an tigh a còmhhdachadh thairis; an sin gairmidh an sagart an tigh glan, a chionn gu'n do leighiseadh a' phlàigh.

49 Agus gabhaidh e chum an tigh a ghlanadh dà eun, agus fiodh seudair, agus scarlaid, agus hiosop.

50 Agus marbhaidh e fear do na h-eunaibh ann an soitheach creadha, os ceann uisge ruith.

51 Agus gabhaidh e am fiodh seudair, agus an hiosop, agus an scarlaid, agus an t-eun beò, agus tumaidh e iad ann am fuil an eoin a chaidh mharbhadh, agus anns an uisge ruith; agus crathaidh e air an tigh seachd uairean.

52 Agus glanaidh e an tigh le fuil an eoin, agus leis an uisge ruith, agus leis an eun bheò, agus leis an fhiódh sheudair, agus leis an hiosop, agus leis an scarlaid.

53 Ach leigidh e as an t-eun beò an taobh a mach do'n bhaile, air aghaidh na macharach, agus nì e rèite air son an tighe: agus bithidh e glan.

54 So an lagh air son gach gnè do phlàigh luibhre, agus do charr,

55 Agus air son luibhre eudaich, agus air son tighe,

56 Agus air son ataidh, agus air son guirein, agus air son buill shoilleir;

57 A theagasg: c'uin a *bhios* e neòghlan, agus c'uin a *bhios* e glan: *is* e so lagh na luibhre.

CAIB. XV.

1, 19 *Neò-ghloine le siltichibh*: 13, 28 *Mar a ghlanar iad*.

A GUS labhair an Tighearna ri Maois, agus ri h-Aaron, ag ràdh,

2 Labhraibh ri cloinn Israeil, agus abraibh riu, 'Nuair a bhios aig duine sam bith silteach o' fheoil, air son a shiltich *bithidh* e neòghlan.

3 Agus is e so a neòghloine 'na shilteach: ma shileas 'fheoil a mach a sìleadh, no ma dhuinear 'fheoil suas o shilteach, *is* e so a neòghloine.

4 Gach leabadh air an luidh esan air am bheil silteach, bithidh i neòghlan: agus gach nì air an suidh e, bithidh e neòghlan.

5 Agus gach neach a bheanas r'a leab-

¹ fhàgail *falamh*.

² san amharc.

³ claisichte.

⁴ dòirtidh. Eabh.

⁵ làthach, *creuch*; mortar. Sasg.

⁶ spairtich; plaister. Sasg.

aith, nighidh e 'eudach, agus ionnlaididh se *e fèin* ann an uisge, agus bithidh e neòghlan gu feasgar.

6 Agus esan a shuidheas air ni *sam bith* air an do shuidh neach air am bheil silteach, nighidh e 'eudach, agus ionnlaididh se *e fèin* ann an uisge, agus bithidh e neòghlan gu feasgar.

7 Agus esan a bheanas ri feoil neach air am bheil silteach, nighidh e 'eudach, agus ionnlaididh se *e fèin* ann an uisge, agus bithidh e neòghlan gu feasgar.

8 Agus ma thilgeas esan air am bheil silteach smugaidh aisan a ta glan, an sin nighidh e 'eudach, agus ionnlaididh se *e fèin* ann an uisge, agus bithidh e neòghlan gu feasgar.

9 Agus gach diollaid air am marcaich esan air am bheil silteach, bithidh i neòghlan.

10 Agus gach neach a bheanas ri ni sam bith a bha fuidhe, bithidh e neòghlan gu feasgar: agus esan a ghiùlainneas a *h-aon air bith do* na nithibh sin, nighidh e 'eudach, agus ionnlaididh se *e fèin* ann an uisge, agus bithidh e neòghlan gu feasgar.

11 Agus gach neach ris am bean esan air am bheil silteach, agus nach d'ionnlaid a làmhann ann an uisge, nighidh e 'eudach, agus ionnlaididh se *e fèin* ann an uisge, agus bithidh e neòghlan gu feasgar.

12 Agus an soitheach creadh ris am bean esan air am bheil silteach, brisear e; agus gach soitheach fiodha, nighear ann an uisge e.

13 Agus an uair a ghlanar esan air am bheil silteach o'shuiteach, an sin àirmhidh e dha fèin seachd làithean air son a ghlanaidh, agus nighidh e 'eudach, agus ionnlaididh e 'fheoil ann an uisge ruith, agus bithidh e glan.

14 Agus air an ochdamh là gabhaidh e dha fèin dà thurtur, no dà choluman òg, agus thig e an làthair an Tighearna, gu dorus pàilluin a' choimhthionail, agus bheir e iad do'n t-sagart.

15 Agus iobraidh¹ an sagart iad, aon diubh mar iobairt-pheacaidh, agus an t-aon eile mar iobairt-loisgte; agus ni an sagart rèite air a shon an làthair an Tighearna a thaobh a shilteach.

16 Agus ma dh'fhalbhas a shìol-gin o dhuine sam bith, an sin nighidh e 'fheoil uile ann an uisge, agus bithidh e neòghlan gu feasgar.

17 Agus gach eudach, agus gach croic-ionn air am bi an sìol-gin, nighear e ann an uisge, agus bithidh e neòghlan gu feasgar,

18 Mar an ceudna, a' bhean leis an luidh

fear le sìol-gin, nighidh iad *araon iad fèin* ann an uisge, agus bithidh iad neòghlan gu feasgar.

19 Agus an uair a bhios silteach air mnaoi, agus gur fuil a bhios 'na silteach 'na feoil, seachd làithean cuirear air leth i; agus gach neach a bheanas rithe, bithidh e neòghlan gu feasgar.

20 Agus gach ni air an luidh i 'nuair a chuirear air leth i, bithidh e neòghlan: gach ni mar an ceudna air an suidh i, bithidh e neòghlan.

21 Agus gach neach a bheanas r'a leabaidh nighidh e 'eudach, agus ionnlaididh se *e fèin* ann an uisge, agus bithidh e neòghlan gu feasgar.

22 Agus gach neach a bheanas ri ni sam bith air an do shuidh i, nighidh e 'eudach, agus ionnlaididh se *e fèin* ann an uisge, agus bithidh e neòghlan gu feasgar.

23 Agus ma bhios e air a leabaidh, no air ni sam bith air an suidh i, 'nuair a bheanas e ris, bithidh e neòghlan gu feasgar.

24 Agus ma luidheas fear sam bith maille rithe, agus gu'm bi a fuil-mios air, bithidh e neòghlan seachd làithean, agus bithidh gach leabadh air an luidh e neòghlan.

25 Agus an uair a bhios a silteach fola air mnaoi mòran do làithibh, cha 'n ann an àm a dealachaidh, no ma shileas e an déigh *am* a dealachaidh, bithidh uile làithean silidh a neòghloine mar làithean a dealachaidh: bithidh i neòghlan.

26 Gach leabadh air an luidh i rè uile làithean a siltich, bithidh i dh'i mar leabaidh a dealachaidh: agus gach ni air an suidh i, bithidh e neòghlan, a réir neòghloine a dealachaidh.

27 Agus gach neach a bheanas ris na nithibh sin, bithidh e neòghlan; agus nighidh e 'eudach, agus ionnlaididh se *e fèin* ann an uisge, agus bithidh e neòghlan gu feasgar.

28 Ach ma ghlanar i o 'silteach, an sin àirmhidh i dh'i fèin seachd làithean, agus an déigh sin bithidh i glan:

29 Agus air an ochdamh là gabhaidh i dh'i fèin dà thurtur, no dà choluman òg, agus bheir i iad a dh'ionnsuidh an t-sagairt, gu dorus pàilluin a' choimhthionail:

30 Agus iobraidh an sagart aon diubh mar iobairt-pheacaidh, agus an t-aon eile mar iobairt-loisgte; agus ni an sagart rèite air a shon an làthair an Tighearna, air son siltich a neòghloine.

31 Mar so dealaidhidh sibh clann Israel o'n neòghloine, chum as nach bàsaich iad 'nan neòghloine, 'nuair a thruaill² iad mo phàilluin-sa a ta 'nam measg.

32 Is e so lagh an fhir air am bheil silt-

¹ ni. Eabh.

² mhi-naomhaicheas.

each, agus an *fhìr* sin aig an téid a shìol uaithe, agus a shalaichear leis;

33 Agus na *mnà* a bhios gu tinn ann an àm a dealachaidh, agus an neach sin air am bi silteach, an *fhìr*, agus na *mnà*, agus an duine *sin* a luideas leatha-sa a ta neòghlan.

CAIB. XVI.

11 *Iobairt-pheacaidh an àrd-shagairt.* 20 *Am boc-gaibhre a leigeadh as beo.* 29 *Féill a' ghlan-cidh.*

AGUS labhair an Tighearna ri Maois an déigh bàis dhithis mhac Aaron, an uair a thug iad seachad tabhartas an làthair an Tighearna, agus a bhàsaich iad:

2 Agus thubhairt an Tighearna ri Maois, Labhair ri h-Aaron do bhràthair, a chum nach téid e anns gach àm a steach do'n *ionad* naomh an taobh a stigh do'n roinn-bhrat, an làthair na caithir-thròcair, a *ta* air an àire; a chum nach bàsaich e: oir foillsichidh¹ mise mi féin ann an neul air a' chaithir-thròcair.

3 Mar so théid Aaron a steach do'n *ionad* naomh: le tarbh òg chum iobairt-pheacaidh, agus reithe chum iobairt-loisgte.

4 An còta anairt naomha cuiridh e air, agus bithidh na brigisean anairt aige air² fheoil, agus leis a' chrìos anairt crìos-laichidh se e féin, agus cuiridh e an crùn-anairt air: *is* éididh naomha iad sin: air an aobhar sin ionnlaididh e³ fheoil ann an uisge, agus cuiridh e air iad.

5 Agus o choimhthional chloinn Israeil gabhaidh e dà bhoc⁴ o na gabhraibh chum iobairt-pheacaidh, agus aon reithe chum iobairt-loisgte.

6 Agus bheir Aaron seachad tarbh na h-iobairt-pheacaidh a *bhios* air a shon féin: agus ni e réite air a shon féin, agus air son a thighe.

7 Agus gabhaidh e an dà bhoc-gaibhre, agus nochdaidh e iad an làthair an Tighearna, aig dorus pàilliuin a' choimhthionail.

8 Agus tilgidh Aaron croim⁵ air an dà bhoc; aon chrann air son an Tighearna, agus crann eile air son a' bhuic a théid as.

9 Agus bheir Aaron leis am boc air an do thuit an crann air son an Tighearna, agus iobraidh se e mar iobairt-pheacaidh.

10 Ach am boc air an do thuit an crann gu'n leigeadh as e, nochdar beò e an làthair an Tighearna, gu réite a dheanamh leis, chum a leigeadh as saor do'n fhàsach.

11 Agus bheir Aaron leis tarbh na h-iobairt-pheacaidh, a *bhios* air a shon féin, agus ni e réite air a shon féin, agus air son a thighe; agus marbhaidh e tarbh na h-iobairt-pheacaidh, a *bhios* air a shon féin.

12 Agus gabhaidh e tuisear làn a dh'eibh-

libh teime o'n altair an làthair an Tighearna, agus làn a ghlac do thùis dheadhbholaidh pròmta gu mìn, agus bheir e⁶ na taobh a stigh do'n roinn-bhrat e.

13 Agus cuiridh e an tùis air an teine an làthair an Tighearna, chum gu'n còmhdaich neul na tùise a' chaithir-thròcair, a *ta* air an Fhianuis, agus nach faigh e bàs.

14 Agus gabhaidh e do fhuil an tairbh, agus crathaidh e i le 'mheur air a' chaithir-thròcair chum na h-àird an ear: agus fa chomhair na caithir-thròcair crathaidh e do'n fhuil seachd uairean le 'mheur.

15 An sin marbhaidh e boc-gaibhre na h-iobairt-pheacaidh a *bhios* air son an t-sluaigh, agus bheir e 'fhuil an taobh a stigh do'n roinn-bhrat, agus ni e r'a fhuil-san mar a rinn e ri fuil an tairbh, agus crathaidh e i air a' chaithir-thròcair, agus fa chomhair na caithir-thròcair.

16 Agus ni e réite air son an *ionaid* naoimh thaobh neòghloine chloinn Israeil, agus a thaobh an seachrana⁷ nam peacannaibh gu léir: agus mar so ni e air son pàilliuin a' choimhthionail a ta chòmh-nuidh maille riu, ann am meadhon an neòghloine.

17 Agus duine sam bith cha bhi ann am pàilliuin a' choimhthionail, an uair a théid e dheanamh réite san *ionad* naomh, gus an tig e mach, agus gu bheil e air deanamh réite air a shon féin, agus air son a thighe⁸, agus air son uile choimhthionail Israeil.

18 Agus théid e mach a dh'ionnsuidh na h-altarach a *ta* m fianuis an Tighearna, agus ni e réite air a son; agus gabhaidh e do fhuil an tairbh, agus do fhuil a' bhuic agus cuiridh e i air adhaireibh na h-altarach mu'n cuairt.

19 Agus crathaidh e oirre do'n fhuil le 'mheur seachd uairean, agus glanaidh e i, agus naomhaichidh e i o neòghloine chloinn Israeil.

20 Agus an uair a bhios e air deanamh réite⁶ air son an *ionaid* naoimh, agus air son pàilliuin a' choimhthionail, agus air son na h-altarach, bheir e leis am boc-gaibhre beò:

21 Agus cuiridh Aaron a dhà làimh air ceann a' bhuic bheò, agus aoidichidh e os a cheann uile lochdan chloinn Israeil, agus an uile sheachrana⁷ nam peacannaibh gu léir, agus cuiridh e iad air ceann a' bhuic, agus cuiridh e iad air falbh e lc làimh duine ionchuidh do'n fhàsach.

22 Agus giùlainidh am boc-gaibhre air féin an lochdang gu léir gu fearann air leth⁸: agus leigidh e air falbh am boc san fhàsach.

23 Agus théid Aaron a steach do phàilliuin a' choimhthionail, agus cuiridh e dieth an éididh anairt, a chuir e air an uair a

¹ taisbeanaidh.

² dà mheann.

³ cranncheur.

⁴ susaontais.

⁵ a theaghlach.

⁶ nuair a chuiras e erioch air réite dhean-

amh, Eabh. ⁷ cu-earta. ⁸ gu fearann neo-àitichte.

chaidh e steach do'n *ionad* naomh, agus fàgaidh e 'n sin i.

24 Agus ionnlaididh e 'fheoil ann an uisge san *ionad* naomh, agus cuiridh e air 'éididh, agus thig e mach, agus òbraidh e 'òbairt-loisgte féin, agus òbairt-loisgte an t-sluaigh; agus ni e réite air a shon féin, agus air son an t-sluaigh.

25 Agus saill na h-òbairt-pheacaidh loisgidh e air an altair.

26 Agus esan a leig as am boc-gaibhre mar bhoc saor, nighidh e 'eudach, agus ionnlaididh e 'fheoil ann an uisge; agus 'na dhéigh sin théid e do'n champ.

27 Agus an tarbh air son na h-òbairt-pheacaidh, agus am boc-gaibhre air son na h-òbairt-pheacaidh, d'an d'thugadh am fuil a steach a chum réite a dheanamh san *ionad* naomh, bheirear a mach iad an taobh a muigh do'n champ; agus loisgidh iad san teine an croicnean, agus am feoil, agus an aolach.

28 Agus esan a loisgeas iad, nighidh e 'eudach, agus ionnlaididh e 'fheoil ann an uisge, agus 'na dhéigh sin théid e do'n champ.

29 Agus bithidh so dhuibh 'na ordugh gu sìorruidh: Anns an t-seachdamh mìos, air an deicheamh là do'n mhìos, irioslaichidh¹ sibh bhur n-anaman, agus obair sam bith cha dean sibh, *aon chuid* esan a tha do mhuinntir bhur dùthcha féin, no 'n coigreach a ta air chuairt 'nur measg;

30 Oir air an là sin ni an sagart réite air bhur son, chum bhur glanaidh: o bhur peacannaibh gu léir an làthair an Tighearn glanar sibh.

31 *Bithidh* e 'na shàbaid tàimh dhuibh, agus irioslaichidh sibh bhur n-anaman, le ordugh sìorruidh.

32 Agus ni an sagart a dh'ungas e, agus a choisrigeas e gu frithealadh ann an àit 'athar, an réite: agus cuiridh e air an éididh anairt, *eadhon* an trusgan naomh.

33 Agus ni e réite air son an ònaid ro naoimh, agus air son pàilliuin a' choimhthionail, agus air son na h-altarach ni e réite; mar an ceudna air son nan sagart, agus air son uile shluaigh a' choimhthionail ni e réite.

34 Agus bithidh so dhuibh 'na ordugh sìorruidh, chum réite a dheanamh air son chloinn Israeil, as leth am peacanna gu léir aon uair sa' bhliadhna. Agus rinn e mar a dh'àithn an Tighearna do Mhaois.

CAIB. XVII.

1 *Mu'n ionad anns an còir òbairtean òbraidh.*
10 *Cha'n fheadar fuil itheadh,* 15 *no feòil a reubadh le fiadh-bheathaichibh.*

AGUS labhair an Tighearna ri Maois, ag ràdh,

2 Labhair ri h-Aaron, agus r'a mhic,

agus ri cloinn Israeil uile, agus abair riu, So an ni a dh'àithn an Tighearna, ag ràdh,

3 Ge b'e duine air bith do thigh Israeil, a mharbhas tarbh, no uan, no gabhar anns a' champ, no mharbhas e mach as a' champ,

4 Agus nach toir e gu dorus pàilliuin a' choimhthionail, gu tabhartas a thoirt seachad do'n Tighearna air beulaobh² pàilliuin an Tighearna, cuirear fuil as leth an duine sin, dhòirt e fuil; agus gearrar as an duine sin o mheasg a shluaigh:

5 Chum as gu'n toir clann Israeil an òbairtean, a dh'ìobras iad a muigh sa' mhachair³, eadhon gu'n toir iad a chum an Tighearna iad, gu dorus pàilliuin a' choimhthionail a dh'ionnsuidh an t-sagairt, agus gu'n òbair iad mar òbairtean-sith iad do'n Tighearna.

6 Agus crathaidh an sagart an fhuil air altair an Tighearna, aig dorus pàilliuin a' choimhthionail, agus loisgidh e 'n t-saill a chum fàile chùbhraidh do'n Tighearna.

7 Agus cha 'n òbair iad ni's mò an òbairtean do dhiabhlaibh, an déigh an deachaidh iad le strìopachas: Bithidh so 'na reachd dhoibh gu sìorruidh air feadh an ginealach.

8 Agus their thu riu, Ge b'e duine air bith do thigh Israeil, no do na coigrich a bhios air chuairt 'nur measg, a bheir seachad tabhartas-loisgte no òbairt,

9 Agus nach toir e gu dorus pàilliuin a' choimhthionail, a chum 'òbradh do'n Tighearna; gearrar eadhon an duine sin as o mheasg a shluaigh.

10 Agus ge b'e duine do thigh Israeil no do na coigrich a ta air chuairt 'nur measg, a dh'itheas gnè sam bith fola; cuiridh mise mo ghluais an aghaidh an anama sin a dh'itheas fuil, agus gearradh mi as e o mheasg a shluaigh.

11 Oir tha beatha na feòla san fhuil, agus thug mi dhuibh i air an altair, a dheanamh réite air son bhur n-anamanna: oir is i 'n fhuil a ni réite air son an anama.

12 Uime sin thubhairt mi ri cloinn Israeil, Cha 'n ith anam sam bith agaibh fuil, ni mò a dh'itheas an coigreach a bhios air chuairt 'nur measg.

13 Agus ge b'e duine air bith do chloinn Israeil, no do na coigrich a bhios air chuairt 'nur measg, a ni sealg agus a ghilacas beathach no eun a dh'fheadar itheadh; dòirtidh e mach 'fhuil, agus còmhdaichidh⁴ e le duslach i.

14 Oir is i beatha gach uile fheòla a fuil; *tha* i air son beatha dh'i: uime sin thubhairt mi ri cloinn Israeil, Cha 'n ith sibh fuil feòla sam bith; oir is i beatha gach feòla a fuil: gach neach a dh'itheas i gearrar as e.

¹ cràdhaidh. Eabh.

² fa chomhair.

³ air aghaidh an fhearainn. Eabh. ⁴ folchaidh.

15 Agus gach anam a dh'itheas an ni a bhàsaicheas *dheth féin*, no a reubadh le *fiadh-bheathaichibh*, (ma's neach c a rugadh 'nur tìr féin, no coigreach) nighidh e 'eudach, agus ionnlaididh se e *féin* ann an uisge, agus bithidh e neòghlan gu feasgar; an sin bithidh e glan.

16 Ach mur nigh se e, agus mur ionnlaid e 'theoil, an sin giùlainidh e 'aingidh-eachd.

CAIB. XVIII.

6 Mu phòsadh mi-laghail. 19 Mu anamiannaibh gràineil.

AGUS labhair an Tighearna ri Maois, ag ràdh.

2 Labhair ri cloinn Israeil, agus abair riu, *Is mise an Tighearna bhuir Dia*.

3 A réir ghnìomhara tìre na h-Eiphit ams an robh sibh a chòmhnuidh, cha dean sibh; agus a réir ghnìomhara tìre Chanaain agus *am bheil* mise 'gur tabhairt, cha dean sibh; ni mò a ghluaiseas sibh 'nan ord-uighibh.

4 Ni sibh mo bhreitheanais, agus gleidhidh sibh m'orduighen, gu gluasad annta: *Is mise an Tighearna bhuir Dia*.

5 Uime sin gleidhidh sibh mo reachdan agus mo bhreitheanais; nithe ma ni duine, bithidh e beò annta: *Is mise an Tighearna*.

6 Cha tig a h-aon agaibh am fagus a dh'aon neach a ta dlùth dha ann an dàimh, a chum a nàire a leigeadh ris: *Is mise an Tighearna*.

7 Nochd' t'athar, no nochd do mhàthar cha leig thu ris: *is i* do mhàthair i, cha leig thu ris a nochd.

8 Nochd mnà t'athar cha leig thu ris: *is e* nochd t'athar e.

9 Nochd do pheathar, nighinn t'athar, no nighinn do mhàthar, co dhiubh a rugadh i aig an tigh, no 'rugadh a mach i, *eadhon* an nochd-san cha leig thu ris.

10 Nochd nighinn do mhic, no nighinn do nighinn, *eadhon* an nochd-san cha leig thu ris: oir *is e* an nochd-san do nochd féin.

11 Nochd niglìnn mnà t'athar, a ghineadh le t'athair, (*is i* do phiuthar i) cha leig thu ris a nochd-sa.

12 Cha leig thu ris nochd peathar t'athar: *is i* banacharaid ro dhileas t'athar i.

13 Cha leig thu ris nochd peathar do mhàthar: oir *is i* banacharaid ro dhileas do mhàthar i.

14 Cha leig thu ris nochd bràthar t'athar, cha tig thu 'm fagus d'a mhnaoi: *is i* bean bhràthar t'athar i.

15 Cha leig thu ris nochd do bhana-chleamhna; *is i* bean do mhic i, cha leig thu ris a nochd.

16 Cha leig thu ris nochd mnà do bhràthar: *is e* nochd do bhràthar e.

17 Cha leig thu ris nochd mnà agus a h-ighinn², ni mò a ghabhas tu nighean a mic, no nighean a h-ighinn, a chum a nochd a leigeadh ris; oir *is iad* a bana-chairdean dhleas iad: *is aingidheachd e*.

18 Ni mò a ghabhas tu bean maille r'a piuthair, a chum a buaireadh³, a leigeadh ris a nochd, a thuilleadh air an té cile, am feadh is beò i.

19 Mar an ceudna cha tig thu 'm fagus do mhnaoi a leigeadh ris a nochd, an uair a chuirear air leth i air son a neòghloine.

20 Agus cha luidh thu gu collaidh le mnaoi do choimhearsnaich, a chum thu féin a thruailleadh leatha.

21 Agus cha leig thu le neach air bith do d'shliochd dol troimh 'n *teine* do Mholech, ni mò a mhi-naomhaicheas tu ainm do Dhe: *Is mise an Tighearna*.

22 Cha luidh thu le frionnach mar le boirionnach: *is gràineileachd e*.

23 Ni mò a luidheas tu le h-ainmhidh sam bith gu d' thruailleadh féin leis; ni mò a sheasas bean sam bith roimh ainmhidh gu luidhe sios da: *is amhludh⁶ e*.

24 Na truaillich sibh féin ann an aon sam bith do na nithibh sin: oir ams na nithibh sin uile thruaill na cinnich *sin* iad féin, a thilgeas mise mach roimhibh.

25 Agus shalaicheadh am fearann: uime sin leanaidh mi 'aingidheachd air, agus sgeithidh am fearann féin a mach a luchd-àiteachaidh.

26 Uime sin, gleidhidh sibh moreachdan agus mo bhreitheanais, agus cha dean sibh *aon air bith* do na gràineileachdaibh sin; *aon chuid* neach air bith d'ur cinneach féin, no coigreach a bhios air chuairt 'nur measg:

27 (Oir na gràineileachda sin uile rinn daoine na dùthcha, a *bha* roimhibh, agus tha 'm fearann air a thruailleadh.)

28 Chum nach sgeith am fearann sibhse mach mar an ceudna, 'nuair a thruailleas sibh e, mar a sgeith e mach na cinnich a *bha* roimhibh.

29 Oir ge b'e neach a ni h-aon air bith do na gràineileachdaibh ud, eadhon na h-anaman a ni *iad*, gearrar as iad o mheasg an sluagh.

30 Uime sin gleidhidh sibh m'orduighen, a chum nach dean sibh *aon air bith* do na gnàthannaibh gràineil ud, a rinn-eachd roimhibh, agus nach truaillich sibh sibh féin annta: *Is mise an Tighearna bhuir Dia*.

CAIB. XIX.

Laghanna àraidh air am m'neachadh.

AGUS labhair an Tighearna ri Maois, ag ràdh,

2 Labhair ri coimhthional chloinn Israeil uile, agus abair riu, Bithibh naomha:

¹ lomnochduidh, nàire.

² inghinn.

³ brosnuchadh, cràdh. ⁴ aimlis; confusion. Sasg.

oir a ta mise an Tighearna bhur Dia naomh.

3 Bitheadh eagail bhur màthar agus bhur n-athar air gach duine agaibh, agus gleidhibh mo shàbaidean: *Is* mise an Tighearna bhur Dia.

4 Na rachaibh a thaobh gu h-ìodhol-aibh, agus na deanaibh diathan¹ leaghta dhuibh féin: *Is* mise an Tighearna bhur Dia.

5 Agus ma dh'ìobras sibh ìobairt thabh-artasan-sith do'n Tighearn, ìobraidh sibh i d'ur toil féin.

6 San là sin féin anns an ìobair sibh i ithear i, agus air an là màireach: agus ma mhaireas a bheag dh'i gus an treas là, loisgear san teine e;

7 Agus ma dh'ithear e idir air an treas là, *is* gràineil e; cha ghabhar e.

8 Uime sin gach neach a dh'itheas e, giùlainidh e 'aingidheachd, a chionn gu'n do mhi-naomhaich e ni coisrigte an Tighearn: agus gearrar an t-anam sin as o 'shluagh.

9 Agus an uair a bhuaineas sibh foghar bhur fearainn, cha bhuain thu gu buileach oisinnan t'achaidh, ni mò a chruinnicheas tu dìoghlui² t'fhogharaidh.

10 Agus cha tur-lom thu t'fhion-lios³, ni mò a chruinnicheas tu uile fhion-dheara t'fhion-lios; do'n bhochd agus do'n choigreach fàgaidh tu iad: *Is* mise an Tighearna bhur Dia.

11 Cha ghoid sibh, ni mò a ni sibh breug⁴, no mheallas aon agaibh a chéile.

12 Agus cha mhionnaich sibh air m'ainmsa gu breugach, ni mò a mhi-naomhaicheas tu ainm do Dhé: *Is* mise an Tighearn.

13 Cha dean thu foirneart⁵ air do choimhearsnach, ni mò a ni thu reubainn air; cha'n fhan duais an fhir-thuasadail maille riùr nè na h-oidhche gu maduinn.

14 Cha mhallail⁶ thu 'm bodhar, agus roimh 'n dall cha chuir thu ceap-tuislidh, ach bithidh cagal do Dhé ort; *Is* mise an Tighearn.

15 Cha dean sibh eucoir sam bith ann am breitheanas; cha bhi suim agad do ghnùis⁷ an duine bhochd, mi mò a bheir thu urram do ghnùis an duine chumhachdach; ann an ceartas bheir thu breth air do choimhearsnach.

16 Cha téid thu mu'n cuairt mar fhear tuailis⁸ am measg do shluaigh; ni mò a sheasas tu an aghaidh fola do choimhearsnach: *Is* mise an Tighearn.

17 Cha bhi fuath agad do d' bhràthair ann ad chridhe: air gach aon chor cron aichidh tu do choimhearsnach, agus cha'n

fhluigh thu peacadh air.

18 Cha dean thu dìoghaltas, ni mò bhios falachd⁹ agad ri cloinn do shluaigh, acli gràdhaidh tu do choimhearsnach mar thu féin: *Is* mise an Tighearn.

19 Gleidhidh sibh mo reachda: Cha leig thu le d' spréidh sìolachadh le gnè eile¹⁰; Cha chluir thu t'fhearann le sìol measgta: ni mò a chuirear umad eudach measgta do olainn agus do lion.

20 Agus ge b'e neach a luidheas gu collaidh le mnaoi a ta 'na ban-tràill fuidh cheangal-pòsaidh aig fear, agus nach d'fhuasgladh idir, ni mò a thugadh saorsa dh'i, sgiursair i: cha chuirear gu bàs iad, a chionn nach robh i saor.

21 Agus bheir e 'ìobairt-eusaontais do'n Tighearn, gu dorus pàilliuin a' choimh-thionail, eadhon reithe mar ìobairt-eusaontais.

22 Agus ni an sagart réite air a shon le reithe na h-ìobairt-eusaontais an làthair an Tighearn, air son a pheacaidh a rinn e; agus maithear dha a pheacadh a rinn e.

23 Agus an uair a thig sibh do'n fhearann, agus a shuidhicheas sibh gach gnè chraobh air son bìdh, an sin measaidh sibh an toradh mar ni neo-thimchioll-ghearrta: tri bliadhna bithidh e dhuibh mar ni neo-thimchioll-ghearrta: cha'n ithear dheth.

24 Ach air a' cheathramh bliadhna bithidh a thoradh uile naomha, chum cliù do'n Tighearn.

25 Agus air a' chùigeachd bliadhna ithidh sibh d'a thoradh, chum as gu'n toir e a chinneas¹⁰ duibh: *Is* mise an Tighearna bhur Dia.

26 Cha'n ith sibh ni sam bith leis an fhuil: ni mò a ghnàthaicheas sibh druidh-eachd¹¹, no sheallas sibh air amannaibh¹².

27 Cha bhearr sibh mu'n cuairt oisinn-eann bhur ceann, ni mò a mhillas tu oisinn-eann t'fheusaig.

28 Cha dean sibh gearradh sam bith 'nur feoil air son nam marbh, ni mò a chuireas sibh comharadh sam bith oirbh: *Is* mise an Tighearn.

29 Na truaill do nighean, a thoirt oirre bhi 'na strìopaich; a chum as nach toir-eann am fearann gu strìopachas agus nach lionar an dùthaich le h-aingidheachd.

30 Gleidhidh sibh mo shàbaidean, agus bheir sibh urram do m'ionad naomh: *Is* mise an Tighearn.

31 Na biodh suim agaibh dhuibh-san aig am bheil leannain-shith¹³, agus na h-iarraibh a dh'ionnsuidh luchd-fiosachd, gu bhi air bhur truaillleadh leo: *Is* mise an Tighearna bhur Dia.

¹ dée. ² seasgana. ³ cha lom thu gu buileach t'fhion-ghàradh. ⁴ a dh'àicheadhas sibh. Eabh.

⁵ eucoir, feall, cea'g. ⁶ phearsa. ⁷ fhear cùl-chàineadh, fhear innseadh sgeoil.

⁸ mì-run.

⁹ fhàs.

¹² manaibh.

⁹ le seòrsaibh eagsamhail.

¹¹ fiosachd.

¹³ spiorada fàistneachd.

32 An làthair a' chinn léith éiridh tu suas, agus bheir thu urram do ghnùis an duine aosda, agus bithidh eagal do Dhé ort: *Is* mise an Tighearn.

33 Agus ma bhios coigreach air chuairt maille riut 'nur tìr, cha bhuin sibh gu cruaidh ris.

34 Mar neach a rugadh 'nur measg bithidh dhuibhse an coigreach a ta air chuairt maille ribh, agus gràdhaidhidh tu e mar thu féin; oir bha sibh féin 'nur coigrich ann an tìr na h-Eiphit: *Is* mise an Tighearna bhur Dia.

35 Cha dean sibh eucoir sam bith ann am breitheanas, ann an slait-thomhais, ann an cudthrom, no ann an tomhas.

36 Meidhean cearta¹, clacha-tomhais cearta, ephah cheart, agus hin cheart bithidh agaibh: *Is* mise an Tighearna bhur Dia, a thug sibhse mach á tìr na h-Eiphit.

37 Uime sin gleidhidh sibh mo reachd-an uile, agus mo bhreitheanas uile, agus ni sibh iad: *Is* mise an Tighearn.

CAIB. XX.

1 *Mu shliochd a thabhairt do Mholech.* 6 *Mu mhuintir aig am bheil leannain-shith.* 9 *Mu neach a mhallaicheas 'athair no 'mhàthair, &c.*

AGUS labhair an Tighearna ri Maois, ag ràdh,

2 A ris, their thu ri cloinn Israeil, Ge b'e air bith e do chloinn Israeil, no do na coigrich a ta air chuairt ann an Israeil, a bheir a bheag d'a shliochd do Mholech, cuirear gu cinnteach gu bàs e, clachaidh sluagh na dùthcha e le clachaibh.

3 Agus cuiridh mise mo ghnùis an aghaidh an duine sin, agus gearraidh mi as e o mheasg a shluaigh; a chionn gu'n d'thug e d'a shliochd do Mholech, a shairachadh m'ionaid naoimh-sa, agus a thruaillleadh m'ainme naoimh.

4 Agus ma dh'fholaicheas sluagh na dùthcha air chor sam bith an sùilean o'n duine sin, an uair a bheir e d'a shliochd do Mholech, agus nach marbh iad e;

5 An sin cuiridh mise mo ghnùis an aghaidh an duine sin, agus an aghaidh a theaghlaich, agus gearraidh mi as e, agus iadsan uile a théid le strìopachas 'na dhéigh, a dheanamh strìopachais le Mholech, o mheasg an sluaigh.

6 Agus an t-anam a théid a thaobh a dh'ionnsuidh muinntir aig am bheil leannain-shith, agus a dh'ionnsuidh luchd fiosachd, gu dol le strìopachas 'nan déigh, cuiridh mise mo ghnùis an aghaidh an anama sin, agus gearraidh mi as e o mheasg a shluaigh.

7 Naomhaichibh sibh féin uime sin, agus bithibh naomha: oir *is* mise an Tighearna bhur Dia.

8 Agus gleidhidh sibh mo reachdan, agus ni sibh iad: *Is* mise an Tighearn a naomhaicheas sibh.

9 Oir gach neach a mhallaicheas 'athair no 'mhàthair, cuirear gu cinnteach gu bàs e: mhallaich e 'athair no 'mhàthair; *bithidh* 'fhuil air féin.

10 Agus an duine a ni adhaltrannas ri mnaoi fir *eile*, *eadhon esan* a ni adhaltrannas ri mnaoi a choimhearsnaich, cuirear an t-adhaltranach agus a' bhan-adhaltranach gu cinnteach gu bàs.

11 Agus an duine a luidheas le mnaoi 'athar, leig e ris nochd 'athar: cuirear gu cinnteach le chéile gu bàs iad; *bithidh* am fuil orra féin.

12 Agus ma luidheas duine le mnaoi a mhic, cuirear gu deimhin le chéile gu bàs iad: dh'oibrich iad ambluadh²: *bithidh* am fuil orra féin.

13 Mar an ceudna ma luidheas duine le fear, mar a luidheas e le mnaoi, rinn iad le chéile gràineileachd: cuirear gu cinnteach gu bàs iad; *bithidh* am fuil orra féin.

14 Agus ma ghabhas duine d'a ionnsuidh bean agus a màthair, *is* aingidheachd e: loisgear le teine iad, eadhon esan agus iadsan: a chum nach bi aingidheachd 'nur measg.

15 Agus ma luidheas duine le h-ainmhidh, cuirear gu cinnteach gu bàs e: agus marbhaidh sibh an t-ainmhidh.

16 Agus ma thig bean am fagus a dh'ainmhidh sam bith, agus gu'n luidh i sìos da, marbhaidh tu a' bhean agus an t-ainmhidh: cuirear gu cinnteach gu bàs iad; *bithidh* am fuil orra féin.

17 Agus ma ghabhas duine a phiuthar, nighean 'athar, no nighean a mhàthar, agus gu'm faic e a nochd, agus gu'm faic ise a nochd-san; *is* ni maslach³ e; agus gearraras iad ann an sealladh an sluaigh⁴: leig e ris nochd a pheathar, giùlainidh e aingidheachd.

18 Agus ma luidheas duine le mnaoi agus a tinneas oirre, agus gu'n leig e ris a nochd, leig e ris a tobar, agus leig ise ris tobar a fola; agus gearrar as le chéile iad o mheasg an sluaigh.

19 Agus cha leig thu ris nochd peathar do mhàthar, no peathar t'athar; oir tha e a' rùsgadh 'fheola féin: giùlainidh iad an aingidheachd.

20 Agus ma luidheas duine le mnaoi bhràthar 'athar, leig e ris nochd bhràthar 'athar: giùlainidh iad am peacadh; gheibh iad bàs gun chloinn.

21 Agus ma ghabhas duine bean a bhràthar, *is* ni neòghlan e: leig e ris nochd a bhràthar; bithidh iad gun chloinn.

¹ *Tuimheasan firineach.* ² *aimlisg, casordugh.*

³ *aingidh.* ⁴ *ann an sùilibh mhac an sluaigh.* Eabh.

22 Uime sin gleidhidh sibh mo reachdan uile, agus mo bhreitheanais uile, agus ni sibh iad; a chum nach dean am fearann, g'am bheil mi¹ gur tabhairt gu còmhuidh a ghabhail ann, bhur sgeith a mach.

23 Agus cha ghluais sibh ann an gnàth-annaibh¹ nan cinneach a *ta* mise a' tilgeadh a mach roimhibh: oir rinn iadsan na nithe sin uile, agus uime sin ghabh mi gràin duibh.

24 Ach thubhairt mi ribhse, Sealbhaichidh sibh am fearann, agus bheir mi dhuibh e chum a shealbhadh, fearann a ta sruthadh le bainne agus le mil: *Is* mise an Tighearna bhur Dia, a dhealaich sibhse o gach sluagh *eile*.

25 Cuiridh sibh uime sin eadar-dhealachadh eadar bheathaichibh glana agus neòghlan, agus eadar eunlaith neòghlan agus ghlan; agus cha dean sibh bhur n-anamanna gràineil le beathach no le h-eun, no le gnè air bith *do ni beò* a shnàigeas air an talamh, a sgar mise uaibh mar neòghlan.

26 Agus bithidh sibh naomha dhomhsa: oir *a ta* mise an Tighearna naomh, agus dhealaich mi sibhse o gach sluagh *eile*, chum as gu'm bu leam *féin* sibh.

27 Bean no duine, mar an ceudna, aig am bheil leannan-sìth, no 'bhios ri fiosachd, cuirear gu deimhin gu bàs iad: clachaidh iad le clachaibh iad; *bithidh* am fuil orra féin.

CAIB. XXI.

Mu ghiùlan nan sagart a thaobh nam marbh, agus mu'm pòsadh.

A GUS thubhairt an Tighearna ri Maois, Labhair ris na sagairt, mic Aaroin, agus abair riu, Air son nam marbh cha salaichear neach sam bith *dhìbh* am measg a shluaigh.

2 Ach air son a dhilsean², a ta 'm fagus da, *eadhon* air son a mhàthar, agus air son 'athar, agus air son a mhic, agus air son a nighiun, agus air son a bhràthar,

3 Agus air son a pheathar a ta 'na h-òigh, a *ta* 'm fagus da, aig nach robh fear-pòsa; air a sonsa feudaidh e bhi air a shalachadh.

4 *Ach* cha salaich se e féin, *air bhi dha* 'nadhuine urramach³ am measg a shluaigh, gu 'thruailleadh féin.

5 Cha dean iad maile air an ceann⁴, agus cha bhearr iad oisinn am feusaig, ni mò a ni iad gearradh 'nam feoil;

6 Bithidh iad naomha d'an Dia, agus cha truail iad ainm an Dé: oir tha iad a' toirt seachad tabhartais an Tighearna a bheir suas le teine, *agus* arain an Dé: uime sin bithidh iad naomha.

7 Cha ghabhiad bean a ta 'na strìopaich,

nomi-naomha⁵; ni mò a ghabhas iad bean a chuireadh air falbh o 'fear: oir *tha* e naomha d'a Dhia.

8 Uime sin naomhaichidh tu e, oir tha e a' toirt seachad arain do Dhé; bithidh e naomha dhuit: oir *tha* mise an Tighearna naomh, a *ta* 'gur naomhachadh.

9 Agus ma thruaill eas nìgean sagairt air bith i féin le strìopachas a dheanamh, tha i a' truailleadh a h-athar: loisgear le teine i.

10 Agus esan a tha 'na àrd-shagart o mheasg a bhràithrean, neach a dhòirteadh an oladh naomh air a cheann, agus a choisrigeadh a chur na h-éididh⁶ uime, cha rùisg e a cheann, ni mò a reubas e 'eudach,

11 Ni mò a théid e steach a dh'ionnsuidh cuirp mhairbh sam bith: air son 'athar no air son a mhàthar cha salaich se e féin.

12 Agus as an ionad naomh cha téid e mach, ni mò a thruaill eas e ionad naomh a Dhé; oir *a ta* crùn oladh-ungaidh a Dhé air: *Is* mise an Tighearna.

13 Agus gabhaidh e bean 'na maighdeanas.

14 Bantrach no bean a chuireadh air falbh o 'fear, no bean mhi-naomha, no strìopach; iad sin cha ghabh e: ach òigh d'a shluaigh féin gabhaidh e 'na mnaoi.

15 Agus cha truaille a shliochdam measg a shluaigh: oir *a ta* mise an Tighearna 'ga naomhachadh.

16 Agus labhair an Tighearna ri Maois, ag ràdh.

17 Labhair ri h-Aaron, ag ràdh, Ge b'e air bith e do d' shliochd 'nan ginealach-aibh, anns am bi gaoid⁷ *sam bith*, na tigeadh e am fagus a thoirt seachad arain a Dhé:

18 Oir ge b'e air bith duine anns *am bi* gaoid, cha tig e 'm fagus: duine dall, no bacach, no aig am bheil sròn leachdach, no ni sam bith thuilleadh air a' chòir.

19 No duine aig am bi cos bhriste no làmh bhriste.

20 No crotach, no 'na throich, no aig am bheil leus⁸ air a shùil, no air am bheil càrr⁹, no cloimh¹⁰, no aig am bheil a chlochan brùite:

21 Cha tig duine sam bith do shliochd Aaroin an t-sagairt, anns am bheil gaoid, am fagus a thoirt seachad tabhartasan an Tighearna a bheir suas le teine: *tha* gaoid ann, cha tig e 'm fagus a thoirt seachad arain a Dhé.

22 Ithidh e aran a Dhé, *araon* do'n *aran* ro naomh, agus naomh.

23 Ach an taobh a steach do'n roinn-bhrat cha téid e, ni mò thig e 'm fagus do'n altair, a chionn gu *bheil* gaoid ann; a chum nach truail e m' ionaid naomha:

¹ reachdaibh, orduighibh. Eabh.

² shèdla

féin. Eabh. ³ na àrd-dhuine. ⁴ Cha mhaolaich iad an ceann le spionadh an gruaige.

⁵ air a truailleadh.

⁶ an trusgan naomh.

⁷ ciurrann, aineamh.

⁸ ball geal.

⁹ tachas

bioram : scurv. Sasg.

¹⁰ sgrìobach; am feàlan.

oir a ta mise an Tighearna 'gan naomhachadh.

24 Agus dh'innis Maois so do Aaron, agus d'a mhic, agus do chloinn Israeil uile.

CAIB. XXII.

Feumaidh an sagart air am bi neòghloine sam bith, fantuinn o nithibh naomha, &c.

AGUS labhair an Tighearna ri Maois, ag ràdh,

2 Labhair ri h-Aaron, agus r'a mhic, iad 'gansgaradh féin o nithibh naomha chloinn Israeil, agus gun iad a thoirt easonoir do' m'ainm naomh-sa, agus na nithibh sin a naomhaicheas iad dhomh: *Is* mise an Tighearn.

3 Abair riu, Ge b'e air bith e d'ur sliochd uile an measg bhur ginealach, a théid a dh'ionnsuidh nan nithe naomha, a naomhaicheas clann Israeil do'n Tighearn, agus a neòghloine air, gearrar as an t-anam sin as mo làthair: *Is* mise an Tighearn.

4 Ge b'e air bith an duine do shliochd Aaron a ta 'na lobhar, no air am bheil silteach², cha 'n ith e do na nithibh naomha, gus am bi e glan. Agus ge b'e bheanas ri ni air bith a ta neòghlan leis a' mharbh, no duine aig am bheil a shìol a' dol uaith;

5 No ge b'e bheanas ri ni air bith a shnàigeas, leis an deantar neòghlan e, no ri duine o'm faigh e neòghloine, ge b'e air bith neòghloine a bhios air;

6 An t-anam a bheanas ri h-aon air bith d'an leithidibh sin, bithidh e neòghlan gu feasgar, agus cha 'n ith e do na nithibh naomha, mur nigh e 'fheoil le h-uisge.

7 Agus an uair a théid a' ghrian sìos, bithidh e glan, agus an déigh sin ithidh e do na nithibh naomha, a chionn gur e a bhiadh e.

8 An ni sin a bhàsaicheas leis féin, no a reubar le *fiadh-bheathaichibh*, cha 'n ith e 'ga shalachadh féin leis: *Is* mise an Tighearn.

9 Gleidhidh iad uime sin m'òrdugh³, air eagal gu'n giùlain iad peacadh air a shon, agus uime sin gu'm faigh iad bàs, ma thruailleas iad e: Tha mise an Tighearna 'gan naomhachadh.

10 Cha 'n ith coigreach sam bith do'n ni naomh: cha 'n ith fear-cuairt⁴ an t-sagairt, no seirbhiseach tuarasdail do'n ni naomh.

11 Ach ma cheannaicheas an sagart duine le 'airgiod, ithidh e dheth, agus esan a rugadh 'na thigh; ithidh iad d'a bhiadh.

12 Agus ma bhios nighean an t-sagairt *pòda* ri coigreach, cha 'n fheadh i itheadh do thabhartas nan nithe naomha.

13 Ach ma bhios nighean an t-sagairt 'na bantraich, no dealaichte r'a fear, agus gun sliochd aice, agus i air pillinn gu tigh a h-athar, mar 'na h-òige, ithidh i do bhiadh h-athar; ach cha 'n ith coigreach sam bith dheth.

14 Agus ma dh'itheas duine do'n ni naomh gun fhios da, an sin cuiridh e an cuigeadh *cuid* deth ris, agus bheir e do'n t sagart e, *maile ris* an uì naomha.

15 Agus cha truaill iad nithe naomha chloinn Israeil, a bheir iad suas do'n Tighearn;

16 Ni mò a leigeas iad leo cionta an eusaontais a ghiùlan an uair a dh'ithcas iad an nithe naomha: oir a ta mise an Tighearna 'gan naomhachadh.

17 Agus labhair an Tighearna ri Maois, ag ràdh,

18 Labhair ri h-Aaron agus r'a mhic, agus ri cloinn Israeil uile, agus abair riu, Ge b'e air bith e do thigh Israeil, no do na coigrich ann an Israel, a bheir seachad a thabhartas air son a bhòidean uile, no air son a shaor-thabhartasan uile, a bheir iad seachad do'n Tighearna chum iobairt-loisgte;

19 *Bheir sibh seachad* d'ur toil féin *beathach* firiom gun ghaoid do'n bhuar, do na caoraich, no do na gabhraibh.

20 *Ach* ge b'e air bith ni anns am bi gaoid, *sin* cha toir sibh seachad: oir cha ghabhar air bhuar son e.

21 Agus ge b'e air bith e a bheir seachad iobairt thabhartasan-sìth do'n Tighearn, a choimhlionadh a bhòide, mar thabhartas saor-thoile, do'n bhuar, no do na caoraich⁵, bithidh e iomlan, a chum as gu'n gabhar ris: cha bhi gaoid sam bith ann.

22 Dall, no briste, no ciuramach, uo air am bi fliodh⁶, no càrr⁷, no cloimh, cha toir sibh seachad iad sin do'n Tighearn, ni mò a bheir sibh tabhartas dhiubh a bheirear suas le teime air an altair do'n Tighearn.

23 Aon chuid tarbh no uan aig am bi ni sam bith tha a' chòir, no dh'uireasbhuidh 'na bhallaibh, sin feudaidh tu toirt seachad *màr* shaor thabhartas; ach air son bòide⁸ cha ghabhar ris.

24 Ni sam bith a ta brùite, no promta, no reubta⁹, uo gearrta, cha toir sibh seachad do'n Tighearn; agus cha 'n iobairt¹⁰ sibh e 'nur tìr.

25 Agus o làmh coigrich cha toir sibh seachad aran bhuar Dé do h-aon diubh sin; a chionn *gu'm bheil* an truaillidheachd anna, *agus gu'm bheil* gaoidean anna: cha ghabhar riu air bhuar son.

26 Agus labhair an Tighearna ri Maois, ag ràdh,

¹ a thruailleadh.

² ereuchd shilteach.

³ m'fhàire.

⁴ eil-thìreach, aoidhe, aithnichinn.

⁵ do'n mheanbh spréidh.

⁶ foinne; wenn. Sasg.

⁷ scurry. Sasg.

⁸ mòide.

⁹ briste.

¹⁰ cha cànan.

27 'Nuair a bheirear tarbh, no caora, no gabhar, an sin bithidh e seachd làithean fuidh 'mhàthair; agus o'n ochdamh là agus á sin suas, gabhar ris mar thabhartas a bheirear suas le teine do'n Tighearn.

28 Agus *ma's* bò na caora *abhios ann*, cha mharbh sibh i féin agus a h-àl san aon là.

29 Agus an uair a dh'òbras sibh iobairt-bhuidheachais do'n Tighearn, iobraidh sibh i d'ur toil féin.

30 Air an là sin féin ithear suas i, cha 'n fhàg sibh a bheag dhith gu maduinn: *Is* mise an Tighearn.

31 Air an aobhar sin, gleidhidh sibh m'àitheantan, agus nì sibh iad: *Is* mise an Tighearn.

32 Agus cha truaill sibh m'ainm naomhasa, agus bithidh mi air mo naomhachadh am measg chloinn Israeil: *Is* mise an Tighearn a ta 'gur naomhachadh,

33 A thug a mach sibh á tìr na h-Eiphit gu bhì a'm' Dhia agaibh: *Is* mise an Tighearn.

CAIB. XXIII.

1 *Mu làithibh-féille an Tighearn.* 22 *Fàgar diogluim san fhearann air son nam bochd.*
26 *Mu latha na rèite.*

A GUS labhair an Tighearna ri Maois, ag ràdh,

2 Labhair ri cloinn Israeil, agus abair riu, *A thaobh* féillean¹ an Tighearn, a ghairmeas sibh *a bhi* 'nan comhghairmibh naomha, *is* iad *eadhon* sin m'fhéillean-sa.

3 Sè làithean nithear obair, ach san t-seachdamh là *bithidh* sàbaid fhoise, comhghairm naomh: obair sam bith cha dean sibh *air: is* e sàbaid an Tighearn e 'nur n-àiteachaibh-còmhnuidh uile.

4 *Is* iad sin féillean an Tighearn, *eadhon* comhghairmean naomha, a ghairmeas sibh 'nan amannaibh féin:

5 Anns a' cheud mhios, air a' cheathramh là deug do'n mhìos air feasgar, *bithidh* càisg an Tighearn.

6 Agus air a' chùigeadh là dheug do'n mhìos sin féin *bithidh* féill an arain neo-ghoirtichte do'n Tighearn: seachd làithean ithidh sibh aran neo-ghoirtichte.

7 Air a' cheud là bithidh comhghairm naomh agaibh: obair thràilleil² sam bith cha dean sibh *air*.

8 Ach bheir sibh seachad tabhartas a bheirear suas le teine do'n Tighearna seachd làithean: air an t-seachdamh là *bithidh* comhghairm naomh; obair thràilleil sam bith cha dean sibh *air*.

9 Agus labhair an Tighearna ri Maois, ag ràdh,

10 Labhair ri cloinn Israeil, agus abair riu, 'Nuair a thig sibh a dh'ionnsuidh an fhearainn a bheir mise dhuibh, agus a bhuaineas sibh 'fhoghar, an sin bheir sibh

sguab do cheud thoradh bhur fogharaidh dh'ionnsuidh an t-sagairt:

11 Agus luaisgidh e 'n sguab an làthair an Tighearna, chum gu'n gabhar rithe air bhur son: air an là màireach an déigh na sàbaid luaisgidh an sagart i.

12 Agus iobraidh sibh air an là sin, an uair a luaisgeas sibh an sguab, uan firionn gun ghaoid, do'n cheud bhliadhna, mar iobairt-loisgte do'n Tighearn.

13 Agus *is e a* thabhartas-bidh dà dheicheamh earrann do phlùr mìn measgta le h-òladh, tabhartas a bheirear suas le teine do'n Tighearn, *chum* fàile chùbhraidh: agus *bithidh* a thabhartas-dìbhe do fhìon, an ceathramh *cuid* do hin.

14 Agus cha'n ith sibh aran, no gràn cruaidhichte, no diasa glasa, gus an là sin féin anns an toir sibh tabhartas a chum bhur Dé: *bithidh e* 'na reachd bith-bhuan air feadh bhur ginealach, 'nur n-àiteach-aibh-còmhnuidh uile:

15 Agus àirmhidh sibh dhuibh féin o'n là màireach an déigh na sàbaid, o'n là san d' thug sibh leibh sguab an tabhartais-luaisgte: bithidh seachd sàbaidean iomlan ann:

16 Eadhon gus an là màireach an déigh na seachdamh sàbaid, àirmhidh sibh leth-cheud là, agus bheir sibh seachad nuadh thabhartas-bidh do'n Tighearn.

17 Bheir sibh leibh as bhur n-àiteach-aibh-còmhnuidh dà bhuillion³ luaisgte, do dhà dheicheamh earrann; bithidh iad do phlùr mìn; fuinear iad le taois ghoirt; *bithidh iad* 'nan ceud thoradh do'n Tighearn.

18 Agus bheir sibh seachad maille ris an aran seachd uain gun ghaoid, do'n cheud bhliadhna, agus aon tarbh òg, agus dà reithe: bithidh iad 'nan iobairt-loisgte do'n Tighearn, maille r'an tabhartas-bidh, agus an tabhartas-dìbhe, *eadhon* tabhartas a bheirear suas le teine, a dh'fhàile chùbhraidh do'n Tighearn.

19 An sin iobraidh sibh aon mheann do na gabhraibh mar iobairt-phacaidh, agus dà uan do'n cheud bhliadhna mar iobairt-tnabhartasan-sìth.

20 Agus luaisgidh an sagart iad maille ri aran a' cheud toraidh, *mar* thabhartas-luaisgte an làthair an Tighearna, maille ris an dà uan: bithidh iad naomha do'n Tighearn chum an t-sagairt.

21 Agus gairmidh sibh air an là sin féin, *a chum gu'm bi e* 'na chomhghairm naomh dhuibh: obair thràilleil sam bith cha dean sibh *air: Bithidh e* 'na reachd siorruidh 'nur n-àiteachaibh-còmhnuidh uile air feadh bhur ginealach,

22 Agus an uair a bhuaineas sibh foghar⁴ bhur fearainn, cha ghearr thu gu buil-each oisinnan t'achaidh 'nuair a bhuain-

¹ féisdean, làithean féille.

² shaoithreachail.

³ mhuillion.

⁴ foghara.

eas tu, ni mò a thionailas tu dioghluim t'fhogharaidh: fàgaidh tu iad do'n bhochd agus do'n choigreach; *Is* mise an Tighearna bhur Dia.

23 Agus labhair an Tighearna ri Maois, ag ràdh,

24 Labhair ri cloinn Israeil ag ràdh, San t-seachdamh mìos air a' cheud là do'n mhios, bithidh sàbaid agaibh, cuimhneachan shéideadh thrompaidean¹, comhghairm naomh.

25 Obair thràilleil sam bith cha dean sibh *air*; ach bheir sibh seachad tabhartas a bheirear suas le teine do'n Tighearn.

26 Agus labhair an Tighearna ri Maois, ag ràdh,

27 Mar an ceudna air an deicheamh là do'n t-seachdamh mìos so *bithidh* là réite; bithidh e 'na chomhghairm naomh dhuibh, agus cràdhaidh sibh bhur n-anam-an², agus bheir sibh seachad tabhartas a bheirear suas le teine do'n Tighearn.

28 Agus obair sam bith cha dean sibh air an là cheudna; oir *is* là réite e, a dheanamh réite air bhur son an làthair an Tighearna bhur Dé.

29 Oir ge b'e anam nach bi fo chràdh san là sin féin, gearr as e o mheasg a shluaigh.

30 Agus gach anam a ni obair sam bith air an là cheudna, an t-anam sin féin sgriosaidh mise o mheasg a shluaigh.

31 Obair sam bith cha dean sibh: *bithidh e* 'na reachd siorruidh air feadh bhur ginealacha, 'nur n-àiteachaibh còmhnuidh uile.

32 *Bithidh e* dhuibh 'na shàbaid fhoise, agus cràdhaidh sibh bhur n-anam air an naothadh là do'n mhios air feasgar: o fheasgar gu feasgar cumaidh sibh bhur sàbaid.

33 Agus labhair an Tighearna ri Maois, ag ràdh,

34 Labhair ri cloinn Israeil, ag ràdh, Air a' chùigeadh là deug do'n t-seachdamh mìos so *bithidh* féil nam pàillion³ re sheachd làithean do'n Tighearn.

35 Air a' cheud là *bithidh* comhghairm naomh: obair thràilleil sam bith cha dean sibh *air*.

36 Seachd làithean bheir sibh seachad tabhartas a bheirear suas le teine do'n Tighearn: air an ochdamh là bithidh comhghairm naomh agaibh, agus bheir sibh seachad tabhartas a bheirear suas le teine do'n Tighearn; is àrd-choimhthional e; obair thràilleil sam bith cha dean sibh *air*.

37 *Is* iad sin feilean an Tighearn, a ghairmeas sibh *gu bhi* 'nan comhghairmibh

naomha, a thoirt seachad tabhartais a bheirear suas le teine do'n Tighearna, tabhartas-loisgte, agus tabhartas-bidh, iobair, agus tabhartasan-dibhe, gach ni air a là féin;

38 A thuilleadh air sàbaidibh an Tighearn, agus a thuilleadh air bhur tiodhlac-aibh, agus a thuilleadh air bhur bòidibh uile, agus a thuilleadh air bhur saor-thabh-artais uile, a bheir sibh do'n Tighearn.

39 Mar an ceudna air a' chùigeadh là deug do'n t-seachdamh mìos, an uair a chruinnicheas sibh a stigh toradh an fhearna, cumaidh sibh féil do'n Tighearna seachd làithean: air a' cheud là *bithidh* sàbaid⁴, agus air an ochdamh là *bithidh* sàbaid.

40 Agus gabhaidh sibh dhuibh *féin* air a' cheud là meas⁵ chraobh àluinn, geugan chrann-pailme, agus geugan chraobh tiugha, agus seileach an t-srutha; agus ni sibh gairdeachas an làthair an Tighearna bhur Dé seachd làithean.

41 Agus cumaidh sibh e 'na fhéil do'n Tighearna seachd làithean sa' bhliadhna: *bithidh e* 'na reachd siorruidh air feadh bhur ginealacha; cumaidh sibh e san t-seachdamh mìos.

42 Ann am pàillunaibh⁶ gabhaidh sibh còmhnuidh seachd làithean; gabhaidh gach aon a rugadh 'na Israelach còmhnuidh ann am pàillunaibh;

43 Chum gu'm bi fios aig bhur ginealach gu'n d'thug mise air cloinn Israeil còmhnuidh ghabhail ann am pàillunaibh, 'nuair a thug mi mach iad áitir na h-Eiphit: *Is* mise an Tighearna bhur Dia.

44 Agus chuir Maois an céill do chloinn Israeil féilean an Tighearna.

CAIB. XXIV.

1 *Mu'n oladh air son nan lòchran.* 13 *Mu pheanas gach neach a mhallaicheas Dia,* 17 *no bhios ciontach do mhortadh.* 18 *Mu choimhleasachadh.*

A GUS labhair an Tighearna ri Maois, ag ràdh,

2 Aithn do chloinn Israeil iad a thoirt a t'ionnsuidh oladh fìor-ghlan a' chroinn-olaidh, bruite air son an t-soluis, a thoirt air na lòchrain lasadh an còmhnuidh.

3 An taobh a muigh do bhrat na Fianuis, ann am pàilluna' choimhthionail, orduichidh Aaron e o fheasgar gu maduinn, an làthair an Tighearn an còmhnuidh: *bithidh e* 'na reachd siorruidh air feadh bhur ginealacha.

4 Orduichidh e na lòchrain air a' choimhleir fìor-ghlan an làthair an Tighearn an còmhnuidh.

5 Agus gabhaidh tu plùr mìn, agus fuinidh tu dà bhreacaig dheug dheth: dà

¹ stoc, adharc. ² cuiridh sibh bhur n-anamanna fo àmhgar. ³ féisd nam bùth.

⁴ fois, tàmh. Eabh. ⁶ bùthaibh.

⁵ meanglain.

dheicheadh earrann bithidh ann an aon bhreacaig.

6 Agus suidhichidh tu iad ann an dà sreath, sè ann an sreath, air a' bhòrd fhior-ghlan an làthair an Tighearn.

7 Agus cuiridh tu tùis fhior-ghlan air gach sreath, chum gu'm bi i air an aran mar chuimhneachan, *eadhon* tabhartas a bheirear suas le teine do'n Tighearn.

8 Gach aon latha sàbaid cuiridh e 'n ordugh e an làthair an Tighearn an comhnuidh, *air a gabhail* o chloinn Israeil le coimhcheangal sìorruidh.

9 Agus is le Aaron agus a mhic e, agus ithidh iad e san ionad naomh; oir *a ta* e ro naomh dha, do thabhartasaibh an Tighearn a bheirear suas le teine, le reachd¹ bith-bhuan.

10 Agus chaidh mac Ban-Israelich, aig an *robh* Eiphiteach 'na athair, a mach am measg chloinn Israeil: agus bha mac na Ban-Israelich agus duine do Israel a' comhstri sa' champ.

11 Agus mhaslaich² mac na Ban-Israelich ainm an *Tighearn*, agus mhallaich e: agus thug iad gu Maois e, (agus *b'e* ainm a mhàthar Selomit, nighean Dhibri, do thréibh Dhan;)

12 Agus chuir iad an làimh³ e, chum gu'n nochdtadh dhoibh inntinn an Tighearn.

13 Agus labhair an Tighearn ri Maois, ag ràdh,

14 Thoir a mach esan a mhallaich an taobh a muigh do'n champ, agus cuireadh iadsan uile a chual⁴ e an làmhau air a cheann, agus clachadh an comhchruinn-each uile e.

15 Agus labhraidh tu ri cloinn Israeil, ag ràdh, Ge b'e neach a mhallaicheas a Dhia, giùlainidh e a pheacaidh.

16 Agus esan a mhaslaicheas ainm an Tighearna, cuirear gu cimteach gu bàs e; clachaidh gu deimhin an comhchruinneach uile e: an coigreach co mhaith agus esan a rugadh san dùthaich, 'nuair a mhaslaicheas e ainm an *Tighearna*, cuirear gu bàs e.

17 Agus esan a mharbhas duine sam bith, cuirear gun teagamh gu bàs e.

18 Agus esan a mharbhas ainmhidh, ni e dioladh air a shon; ainmhidh air son ainmhidh.

19 Agus ma bheir duine ciurram air a choimhearsnach, mar a rinn e, mar sin nithear air:

20 Briseadh⁴ air son brisidh, sùil air son sùla, fiacail air son fiacla; mar a thug e ciurram air duine, mar sin nithear air.

21 Agus esan a mharbhas ainmhidh,

diolaidh se⁵ e: agus an neach a mharbhas duine, cuirear gu bàs e.

22 Bithidh an t-aon ghnè lagh agaibh co mhaith air son a' choigrich, agus air son neach do mhuinntir bhur dùthcha féin: oir is mise an Tighearna bhur Dia.

23 Agus labhair Maois ri cloinn Israeil, iad a thoirt leo esan a mhallaich, an taobh a muigh do'n champ, agus a chlachadh le clachaibh⁶: agus rinn clann Israeil mar a dh'àithn an Tighearna do Mhaois.

CAIB. XXV.

8 Mu bhliadhna na Iubile, no an Fhuasglaidh. 14 Mu fhòirneart, 35 Agus mu thrucant as thaobh nam bochd.

A GUS labhair an Tighearna ri Maois

1 Ann an sliabh Shinaì, ag ràdh,
2 Labhair ri cloinn Israeil, agus abair riu, 'Nuair a thig sibh chum na tìre a bheir mise dhuibh, an sin gleidhidh an tìr sàbaid do'n Tighearn.

3 Sè bliadhna cuiridh tu t'fhearann⁷, agus sè bliadhna bearraidh⁸, tu t'fhion-lios, agus cruinnichidh tu stigh a thoradh.

4 Ach anns an t-seachdamh bliadhna bithidh sàbaid fhoise do'n tìr, sàbaid do'n Tighearn: t'fhearann cha chuir thu, agus t'fhion-lios cha bhearr thu.

5 An nì sin a dh'fhàsas dheth féin do t'fhoghar, cha bhuaith thu, agus fion-dhearca t'fhionain⁹, neo-dheasaichte cha chruinnich thu: 'na bliadhna fhoise bithidh i do'n tìr.

6 Agus bithidh sàbaid na tìre¹⁰, na biadh dhuibh: dhuith féin, agus do d'òglach, agus do d' bhanoglaich, agus do d'fheartuarasdail, agus do d'choigreach a ta air chuairt maille riut:

7 Agus do d'spréidh, agus do'n *fhìadhbheathach* a *ta* ann ad fhearann; bithidh a cinneas uile chum bith.

8 Agus àirmhidh tu dhuith féin seachd sàbaidean do bhliadhnaibh, seachd uairean seachd bliadhna; agus bithidh ùine uan seachd sàbaidean do bhliadhnaibh dhuith 'na naoi bliadhna's dà fhichead.

9 An sin bheir thu fa'near trompaid na Iubile a shéideadh san t-seachdamh mìos, air an deicheadh là do'n mhìos: ann an là na réite bheir sibh fa'near an trompaid a shéideadh air feadh bhur tìre uile.

10 Agus naomhaichidh sibh an deicheadh bliadhna's dà fhichead, agus gairmidh sibh saorsa air feadh na dùthcha, d'a luchd-àiteachaidh uile: bithidh i 'na Iubile dhuibh, agus pillidh sibh gach duine chum a sheilbhe féin, agus pillidh gach duine agaibh g'a theaghlach féin.

11 Bithidh an deicheadh bliadhna sin agus dà fhichead 'na Iubile dhuibh; cha

¹ lagh, ordugh.

² dh'ainnich. Eabh.

³ ann an gaintir, am priosun.

⁴ Briseadh.

⁵ bheir e air ais. Eabh.

⁶ a chloachadh le

clochaibh.

⁷ sìol-chuiridh tu t'achadh.

⁸ deasaichidh.

⁹ do chraoibh-fìona; t'fhuineamh-ain. Eir.

¹⁰ toradh sàbaid na tìre.

chuir sibh *sìol*, ni mò a bhuaineas sibh an ni a dh'fhàsas dheth fèin innte, ni mò a thionailas sibh *dearcan fìona* innte do d' fhionain neo-dheasaichte:

12 Oir is Iubile i, bithidh i naomh dhuibh; ithidh sibh a cinneas as an fhear-ann.

13 Ann am bliadhna na Iubile so pillidh gach duine agaibh a dh'ionnsuidh a sheilbhe fèin.

14 Agus ma reiceas tu bheag ri d' choimhearsnach, no ma cheannaicheas tu *bheag* o làimh do choimhearsnach; cha dean sibh eucoir¹ air a chéile.

15 A réir àireimh nam bliadhna an déigh na Iubile ceannaichidh tu o d' choimhearsnach, agus a réir àireimh bliadhna nan toradh reicidh e riut.

16 A réir lìonmhoireachd nam bliadhna meudaichidh tu a luach, agus a réir teirid nam bliadhna beagaichidh tu a luach: oir a réir àireimh *bhliadhna* nan toradh tha e a' reiceadh riut.

17 Agus cha dean sibh eucoir air a chéile: ach bithidh eagal do Dhé ort; oir is mise an Tighearna bhur Dia.

18 Uime sin ni sibh mo reachdan, agus gleidhidh sibh mo bhreitheanaid, agus ni sibh iad; agus gabhaidh sibh còmhnuidh san tìr ann an tèaruinteachd².

19 Agus bheir am fearann a mach a thoradh, agus ithidh sibh bhur sàth, agus gabhaidh sibh còmhnuidh ann gu tèaruinte.

20 Agus ma their sibh, Ciod a dh'itheas sinn air an t-seachdamh bliadhna? feuch, cha chuir sinn *sìol*, ni mò a chrùinnicheas sinn ar toradh;

21 An sin àithnidh mise mo bheannachadh oirbh san t-seathadh bliadhna, agus bheir i mach toradh air son thri bliadhna.

22 Agus cuiridh sibh air an ochdamh bliadhna, agus ithidh sibh *fathast* do'n t-seann toradh gus an naothadh bliadhna; gus an tig a toradh a stigh, ithidh sibh do'n t-seann toradh.

23 Cha reicear am fearann gu bràth; oir is leamsa am fearann: oir is coigrich agus luchd-cuairt sibhse maille rium.

24 Agus ann am fearann bhur seilbhe uile, bheir sibh saorsa³ do'n fhearann.

25 Ma dh'fhàs do bhràthair bochd, agus gu'n do reic e *cuid* d'a sheilbh, agus ma thig a h-aon air bith d'a dhillsibh g'a fhuasgladh, an sin fhuasglaidh e an ni a reic a bhràthair.

26 Agus mur 'eil aig an duine neach g'a fhuasgladh, agus gur urrainn e fèin fhuasgladh;

27 An sin àirmheadh e bliadhnan a reicidh, agus thugadh e air ais an ni a ta

thairis do'n duine ris an do reic se e, a chum's gu'm pill⁴ e dh'ionnsuidh a sheilbhe fèin.

28 Agus mur urrainn e *sin* a thoirt air ais da, an sin fanaidh an ni sin a reiceadh ann an làimh an neach a cheannaich e, gu bliadhna na Iubile: agus anns an⁵ Iubile théid e mach, agus pillidh e chum a sheilbhe.

29 Agus ma reiceas duine tigh-còmhnuidh ann am baile cuairtiche le balla, an sin feudaidh e 'fhuasgladh an taobh a stigh do bhliadhn' iomlain an déigh a reiceadh: *an taobh a stigh do bhliadhn'* iomlain feudaidh e 'fhuasgladh.

30 Agus mur fhuasglar e gus an coimh-lionar bliadhn' iomlan, an sin daingnich-e ar tigh, a *tha* 'n taobh a stigh do'n bhaile cuairtiche le balla, gu bràth dhasan a cheannaich e, air feadh a ghinealach: cha téid e mach san Iubile.

31 Ach measar tighean nam bailtean nach 'eil cuairtiche le balla, mar fhearann na tìre: feudar am fhuasgladh, agus théid iad a mach san Iubile.

32 Gidheadh, bailtean nan Lebhith-each agus tighean bhailtean an seilbhe, feudaidh na Lebhithich am fhuasgladh uair sam bith.

33 Agus ma cheannaicheas duine o na Lebhithich, an sin théid an tigh a reiceadh, agus baile a sheilbhe, mach san Iubile: oir is iad tighean bhailtean nan Lebhith-each an sealbh am measg chloinn Israeil.

34 Ach cha'n fheudar am fearann a tha'n taobh a muigh d'am bailtibh a reiceadh, oir is e sin an sealbh mhair-eannach⁶.

35 Agus ma dh'fhàsas do bhràthair bochd, agus gu'n téid e dhéigh-làimh agad, an sin fhuasglaidh⁷ tu air: *seadh*, *ged is* coigreach nò fear-cuairte e; agus bithidh e beò maille riut.

36 Na gabh riadh uaith, no tuille 's a thug thu dha⁸: ach biodh eagal do Dhé ort, a chum's gu'm feud do bhràthair a bhi beò maille riut.

37 T'airgid cha toir thu dha air riadh, agus air son buannachd cha toir thu dha do bhaidh.

38 Is mise an Tighearna bhur Dia, a thug a mach sibh á tìr na h-Eiphit, a thoirt dhuibh tìre Chanaain, agus a bhi a'm' Dhia agaibh.

39 Agus ma dh'fhàs do bhràthair a ta làimh riut bochd, agus gu'n do reiceadh riut e; cha toir thu air seirbhis a dhean-amh mar thràill:

40 Mar sheirbhiseach tuarsadail, agus mar fhear-cuairte, bithidh e maille riut;

¹ fòirneart.

² tèaruntachd.

³ fhuasgladh.

⁴ till.

⁵ ann san.

⁶ bhuan, sìlthorruidh.

⁷ cabhairidh, fòiridh.

⁸ teachd a mach, fàs.

gu bliadhna na Iubile ni e seirbhis dhuit.

41 Agus *an sin* imichidh e uait, e féin agus a chlann maille ris, agus pillidh e chum a theaghlach féin, agus a chum seilbhe¹ aithriche pillidh e:

42 Oir *is* iadsan mo sheirbhisich, a thug mi mach á tìr na h-Eiphit: cha reicear iad mar thràillibh.

43 Cha ghnàthaich thu uachdaranachd¹ os a cheann le h-an-ìochd, ach bithidh eagal do Dhé ort.

44 Agus *bithidh* do thràillean, agus do bhàn-tràillean, a bhios agad, do na cinnich a ta m'ur timchioll; uatha-san ceannaichidh sibh tràillean agus ban-tràillean.

45 Agus a thuilleadh air so, o chloinn nan coigreach a ta air chuairt² 'nur measg, uathasan ceannaichidh sibh, agus o'n teaghlachibh a ta maille ribh, a ghin iad 'nur fearann: agus bithidh iad 'nan seilbh dhuibh.

46 Agus gabhaidh sibh iad mar oighreachd d'ur cloinn 'nur deigh, a chum *an* sealbhadh mar oighreachd; bithidh iad dhuibh 'nan tràillibh a chaidh: ach os ceann bhur bràithre, cloinn Israeil *eadhon* os ceann a chéile cha ghnàthaich sibh uachdaranachd² le h-an-ìochd.

47 Agus ma dh'fhàsas fear cuairte no coigreach saoi bhir³ làimh riut, agus ma dh'fhàsas do bhràthair làimh ris bochd, agus gu'n reic se e féin ris a' choigreach, ris an fhear-chuairte a tha maille riut, no ri gineal teaghlach a' choigrich:

48 An deigh a reiceadh, feudar⁴ 'fhuasgladh a ris; feudaiddh aon d'a bhràithribh 'fhuasgladh;

49 Feudaiddh aon chuid bràthair 'athar, no mac bhràthar 'athar 'fhuasgladh, no feudaiddh aon neach a tha dlùth an dàimh dha d'a theaghlach féin 'fhuasgladh; no ma's urrainn e, feudaiddh se e féin 'fhuasgladh.

50 Agus ni e cumntas ris-san a cheannich e o'n bhliadhna anns an do reiceadh ris e, gu bliadhna na Iubile: agus bithidh luach a reicidh a réir àireimh nam bliadhna, a réir aimsir seirbhisich tuarasdail bithidh e dha.

51 Ma bhios fathast mòran bhliadhnacha *ri teachd*, d'an réir sin bheir e a ris⁴ luach 'fhuasglaidh, an airgid air son an do cheannaicheadh e.

52 Agus mur 'eil ri teachd ach beagan bhliadhnacha gu bliadhna na Iubile, an sin ni e cumntas ris, agus a réir a bliadhnacha bheir e dha a ris luach 'fhuasglaidh.

53 Mar sheirbhiseach *a ta* air thuarasd-

al o bhliadhna gu bliadhna bithidh e maille ris: cha ghnàthaichear uachdaranachd os a cheann le h-an-ìochd ann ad shealladh-sa.

54 Agus mur fuasglar e anns *na bliadhnai bh* sin, an sin théid e mach ann am bliadhna na Iubile, e féin agus a chlann maille ris.

55 Oir dhomhsa tha clann Israeil 'nan seirbhisich; *is* iadsan mo sheirbhisich, a thug mi mach á tìr na h-Eiphit: Is mise an Tighearna bhur Dia.

CAIB. XXVI.

1 *Mu ìodhol-aoradh.* 3 *Beannachadh air a ghealltainn.* 14 *Mallachadh air a bhagairt.*

CHA dean sibh dhuibh féin ìodholan⁵ no *coslas* snaidhte, agus cha chuir sibh suas ìomhaigh⁶ dhuibh féin, ni mò shuidhicheas sibh dealbh-cloiche 'nur fearann, gu cromadh sìos da; oir *is* mise an Tighearna bhur Dia.

2 Gleidhidh sibh mo shàbaidean, agus bheir sibh urram do m'ionad naomh: *Is* mise an Tighearn.

3 Ma ghluaiseas sibh a m' reachdaibh, agus ma ghleidheas sibh m'àitheantan; agus *ma* ni sibh iad;

4 An sin bheir mise dhuibh uisge⁷ 'na àm féin, agus bheir am fearann a mach a thoradh, agus bheir craobhan na macharach am meas uatha.

5 Agus ruigidh bhur bualadh an fion-fhoghar, agus ruigidh *bhur* fion-fhoghar àm an t-sil-chur, agus ithidh sibh bhur n-aran gu⁸ sàth, agus gabhaidh sibh còmhnuidh gu téaruinte 'nur tìr.

6 Agus bheir mise sìth san tìr, agus luidhidh sibh sìos, agus cha chuir neach sam bith eagal *oirbh*: agus sgriosaidh⁸ mi droch bheathaichean as an dùthaich, agus cha téid an claidheamh tre bhur fearann.

7 Agus ruaigidh sibh bhur naimhdean, agus tuitidh iad roimhibh leis a' chlaidheamh.

8 Agus cuiridh cùigear dhibh an ruaig air ceud, agus cuiridh ceud dhibh an ruaig air deich mìle: agus tuitidh bhur naimhdean roimhibh leis a' chlaidheamh.

9 Oir amhaircidh mise *oirbh*⁹, agus ni mi sìolmhor sibh, agus bheir mi *oirbh* fàs lionmhor, agus daingnichidh mi mo chloimheangal ribh.

10 Agus ithidh sibh an seann *lòn*, agus bheir sibh a mach an seann *lòn* air son an *lòin* nomha¹⁰.

11 Agus suidhichidh mi mo phàillion 'nur measg: agus cha bhi gràin aig m'anam dhibh.

¹ Cha riaghlach thu. ² riaghladh, tighearnas, maighstireachd. ³ beartach. ⁴ aisgidh e.

⁵ dealbhan, cuspairean-aoraidh faoin.

⁶ standing image, statue. Sasg.

⁷ frasachd.

⁸ fàsaichidh, dìthichidh, fuadaichidh.

⁹ bithidh spéis agamsa dhuibh.

¹⁰ nuadha.

12 Agus imichidh mi 'nur measg, agus bithidh mi a'm' Dhia dhuibh, agus bithidh sibhse 'nur sluagh dhomhsa.

13 Is mise an Tighearna bhur Dia a thug sibhse a mach á tìr na h-Eiphit, a chum nach bitheadh sibh 'nur tràillibh aca; agus bhris mi cuibhreach¹ bhur cuinge, agus thug mi oirbh imeachd dìreach.

14 Ach mur éisd sibh rium, agus mur dean sibh na h-àitheanta sin uile;

15 Agus ma nì sibh tàir air mo reachdaibh, no ma ghabhas bhur n-anam gràin do m'bhreitheanais, air choras nach dean sibh m'àitheanta uile, *ach* gu'm bris sibh mo choimhcheangal;

16 Nì mise mar an ceudna so ribhse; orduichidh mi oirbh uamhas, caitheamh, agus fiabhrus loisgeach, a chaitheas na suilean, agus a bheir cràdh do'n chridhe: agus cuiridh sibh bhur siol ann an diomhanas, oir ithidh bhur naimhdean e.

17 Agus cuiridh mise mo ghnuis 'nur n-aghaidh, agus marbhar sibh an làthair bhur naimhdean: agus rioghachidh a' mhuinntir air am beag sibh oirbh, agus teichidh sibh an uair nach bi neach an tòir oirbh.

18 Agus mur éisd sibh rium fathast air a shon so uile, an sin nì mi peanas oirbh seachd uairean nì's mò air son bhur peacanna.

19 Agus brisidh mi uabhar bhur cumhachd; agus nì mi bhur n-èamha mar iarunn, agus bhur talamh mar umha²:

20 Agus caithear bhur spionnadh ann an diomhanas; oir cha tòir bhur fearann fhàs uath, nì mò a bheir craobhan na tìre am meas uatha.

21 Agus ma théid sibh a'm' aghaidh, agus nach éisd sibh rium; bheir mi seachd uairean tuille phlàighean oirbh, a réir bhur peacanna.

22 Cuiridh mi mar an ceudna fiadhbheathaichean na macharach 'nur measg, a bheir uaibh bhur clann, agus a chuireas as d'ur spréidh, agus a nì sibh tearc ann an àireamh, agus bithidh bhur rathaide³ mòra fàs.

23 Agus mur leasaichear leamsa sibh leis na *nithibh* sin, ach gu'n téid sibh a'm' aghaidh;

24 An sin théid mise mar an ceudna 'nur n-aghaidh-sa, agus nì mi peanas oirbh seachd uairean fathast air son bhur peacanna.

25 Agus bheir mi claidheamh oirbh, a dhìolas cuis-ghearrain mo choimhcheangail; agus an uair a chruinnichear sibh an ceann a chéile an taobh a stigh d'ur bailtibh, cuiridh mi a' phlàigh 'nur measg;

agus bheirear thairis sibh do làimh naimhdean.

26 An uair a bhriseas mise lorg bhur n-aran, fùinidh deich mnàì bhur n-aran ann an aon àmhuinn, agus bheir iad air ais *dhuibh* bhur n-aran air a thomhas, agus ithidhsibh agus chabhaisibh sàthach.

27 Agus mur éisd sibh air son so uile rium, ach gu'n téid sibh a'm' aghaidh;

28 An sin théid mise 'nur n-aghaidh-sa mar an ceudna ann am fraoch feirge; agus smachdaichidh mise, eadhon mise, seachd uairean sibh air son bhur peacanna.

29 Agus ithidh sibh feoil bhur mac, agus feoil bhur nigheana ithidh sibh.

30 Agus cuiridh mise as d'ur n-ionad-aibh àrda, agus gearraidh mi sìos bhur dealbhan, agus tilgidh mi bhur colannan⁴ air colannaibh bhur n-ìodholan, agus gabhaidh m'anam gràin dhibh.

31 Agus cuiridh mi bhur bailtean fàs, agus bheir mi lom-sgrìob air⁵ bhur n-ionada naomha, agus cha ghabh mi fàile bhur boltraich chùbhraidh⁶.

32 Agus bheir mi lom-sgrìob air an fhearann; agus bithidh ìoghnadh⁷ air bhur naimhdibh a ghabhas còmhnuidh ann, mu'n nì sin.

33 Agus sgapaidh mi sibh am measg nan cinneach agus tairngidh⁸ mi claidheamh 'nur dèigh; agus bithidh bhur fearann creachta, agus bhur bailtean fàs.

34 An sin mealaidh am fearann a shàbaid-ean, am fad's a luidheas e fàs, agus a bhios sibhse ann am fearann bhur naimhdean; eadhon an sin gabhaidh am fearann fois, agus mealaidh e a shàbaid-ean.

35 Am fad's a luidheas am fearann fàs, bithidh fois aige; do bhrìgh nach robh fois aige 'nur sàbaidibh-sa, 'nuair a ghabh sibh còmhnuidh ann⁹.

36 Agus orra-san a dh'fhàgar beò dhibh, cuiridh mise laigse¹⁰ 'nan cridheachaibh ann an dùthchaibh an naimhdean; agus cuiridh fnaim duilleig air chrith iad air theicheadh; agus teichidh iad, mar gu'm biodh iad a' teicheadh o'n chlaidheamh; agus tuitidh iad an uair nach bi neach an tòir orra.

37 Agus tuitidh iad air muin a chéile, mar gu'm b'ann roimh 'n chlaidheamh, 'nuair nach bi neach an tòir orra; agus cha bhì neart agaibh gu seasamh roimh bhur naimhdibh.

38 Agus théid as duibh am measg nan cinneach, agus ithidh talamh bhur naimhdean suas sibh.

39 Agus iadsan a dh'fhàgar dhibh, seargaidh iad as 'nan aingidhachd ann an dùthchaibh bhur naimhdean; agus

¹ bannan.

² unga.

³ ròide.

⁴ cuirp.

⁵ sgriosaidh mi, fàsaichidh mi.

⁶ bhlasda.

⁷ uamhann.

⁸ ràisgidh.

⁹ air. Eabh.

¹⁰ laigc.

mar an ceudna, ann an euceartaibh an aithriche seargaidh iad as maille riu.

40 Ma dh'aidicheas iad an aingidheachd féin, agus aingidheachd an aithriche, a réir an eusaontais a rinn iad a'm' aghaidh, agus mar an ceudna gu'n do ghluais iad a'm' aghaidh;

41 Agus gu'n do ghluais mise mar an ceudna 'nan aghaidh-san, agus gu'n d'thug mi iad do dhùthaich an naimhdean; ma bhios an sin an cridhe neo-thimchioll-gheartta air 'irioslachadh¹, *air chor as gu'n gabh iad ri peanas an aingidheachd*;

42 An sin cuimhnichidh mise mo choimhcheangal ri Iacob, agus mar an ceudna mo choimhcheangal ri h-Isaac, agus mar an ceudna mo choimhcheangal ri h-Abraham cuimhnichidh mi; agus cuimhnichidh mi am fearann.

43 Tréigear mar an ceudna am fearann leo, agus mealaidd e a shàbaidean, am feadh 's a ta e 'na luidhe fàs as an eugmhais; agus gabhaidh iad ri peanas an aingidheachd; a chionn, eadhon a chionn gu'n d'rinn iad tàir air mo bhreitheanaid, agus a chionn gu'n do ghabh an anam gràin, do m' reachdaibh.

44 Agus gidheadh air a shon so uile, 'nuair a bhios iad ann an naimhdean, cha tilg mi uam iad, ni mò a ghabhas mi gràin diubh, g'an sgrios gu tur, *agus a bhriseadh mo choimhcheangail riu: oir is mise an Tighearn an Dia*.

45 Ach air an sgàth-san cuimhnichidh mi coimhcheangal an sinnsirean, a thug mi mach á tìr na h-Eiphit, ann an sealladh nan cinneach, a chum gu'm bithinn a'm' Dhia aca: *Is mise an Tighearn*.

46 *Is iad sin na h-orduighean, agus na breitheanaid, agus na reachdan, a rinn an Tighearn eadar e féin agus clann Israeil ann an sliabh Shinai, le làimh Mhaois.*

CAIB. XXVII.

1 Mu bhòidibh. 28 Cha'n fhuasglar ni sam bith coisrigte. 30 Buinidh uile dheachamh an fhearainn do'n Tighearn.

AGUS labhair an Tighearna ri Maois, ag ràdh,

2 Labhair ri cloinn Israeil, agus abair riu, 'Nuair a bheir duine bòid àraidh², *buinidh na h-anamanna³ do'n Tighearn, a réir do mheas*:

3 Agus bithidh do mheas, air an fhìrionnach o fhichead bliadhna dh'aois, eadhon gu trì fichead bliadhna dh'aois; bithidh eadhon do mheas leth-cheud secel airgid, a réir seceil an ionaid naomh.

4 Agus ma's boirionnach a bhios ann, an sin bithidh do mheas deich seceil 'ar fhichead.

5 Agus ma's gille o chùig bliadhna

dh'aois, eadhon gu fichead bliadhna dh'aois, a bhios ann, an sin bithidh do mheas air son an fhìrionnach fichead secel, agus air son a' bhoirionnach deich secel.

6 Agus ma's ann o mhìos a dh'aois, eadhon gu cùig bliadhna dh'aois, an sin bithidh do mheas air son an fhìrionnach cùig seceil airgid, agus air son a' bhoirionnach bithidh do mheas trì seceil airgid.

7 Agus ma's ann a bhios e o thri fichead bliadhna dh'aois agus os a cheann, ma's fìrionnach e, an sin bithidh do mheas cùig seceil deug, agus air son boirionnach deich seceil.

8 Ach ma bhios e ni's bochda na do mheas, an sin nochdaidh se e féin an làthair an t-sagairt, agus measaidh an sagart e: a réir a chomais-san a thug a' bhòid, measaidh an sagart e.

9 Agus ma's ainmhidh e, d'an toir daoine tabhartas a dh'ionnsuidh an Tighearna, bithidh gach ni a bheir duine d'an leithidibh sin do'n Tighearn, naomh.

10 Cha mhùth⁴ se e, ni mò a mhalairticheas se e, maith air son uile, no olc air son maith: a'ch ma mhalairticheas e, air chor sam bith, ainmhidh air son ainmhidh, an sin bithidh e féin, agus an ni a fhuaradh⁵ na mhalairt, naomh.

11 Agus ma's ainmhidh neòghlan sam bith e, do nach toir iad seachad tabhartas do'n Tighearn, an sin nochdaidh e 'n t-ainmhidh an làthair an t-sagairt:

12 Agus measaidh an sagart e, ma's maith no olc e; mar a mheasas tusa a bhios a' d' shagart e, mar sin bithidh e.

13 Ach ma dh'fhuasglas e air chor sam bith e, an sin cuireadh e an cùigeadh cuid deth ri d' mheas-sa.

14 Agus an uair a choisrigeas duine a thigh, *gu bhi* naomh do'n Tighearn, an sin measaidh an sagart e, ma's maith no olc e: mar a mheasas an sagart e, mar sin seasaidh e.

15 Agus ma dh'fhuasglas esan a choisrig e, a thigh, an sin cuiridh e au cùigeadh cuid a dh'airgiod do mheas-sa ris, agus bithidh e leis.

16 Agus ma choisrigeas duine do'n Tighearn cuid do fhearann a sheilbh, an sin bithidh do mheas a réir a shil⁶: *meas-ar* homer do shìol eòrna aig leth-cheud secel airgid.

17 Ma choisrigeas e 'fhearann o bhliadhna na Iubile, a réir do mheas seasaidh e.

18 Ach ma choisrigeas e 'fhearann an dèigh na Iubile, an sin àirmhidh⁶ an sagart an t-airgiod da a réir nam bliadhna⁷ a ta ri teachd⁷, eadhon gu bliadhna na Iubile, agus leigear sin sìos do d' mheas.

¹ 'irioslachadh.

² shònraichte.

³ pearsanna.

⁴ Cha'n atharraich, cha

chaochail.

⁵ churachd.

⁶ cunntaidh.

⁷ a mhaireas.

AIREAMH, I.

19 Agus ma dh'fhuasglas am fear a choisrig am fearann e air chor sam bith, an sin cuiridh e an cùigeadh *cuid* a dh'airgid do mheas-sa ris, agus daing-nichear dha e.

20 Agus mur fuasgail e 'm fearann, no ma reic e 'm fearann ri duine eile, cha 'n fhuasglar ni's mò e.

21 Ach bithidh am fearann, an uair a thèid e mach san Iubile, naomh do'n Tighearn, mar fhearann coisrigte¹: buinidh a shealbh do'n t-sagart.

22 Ach ma choisrigeas *duine* do'n Tighearn fearann a cheannaich e, nach ann do fhearann a sheilbh;

23 An sin àirmhidh an sagart dha luach do mheas, *eadhon* gu bliadhna na Iubile, agus bheir e seachad do mheas *féin* san là sin, mar ni naomh do'n Tighearn.

24 Ann am bliadhna na Iubile pillidh am fearann d'a ionnsuidh-san o'n do cheannaicheadh e, *eadhon* d'a ionnsuidh-san d'am *buineadh* sealbh an fhearainn.

25 Agus bithidh do mheas-sa uile a réir seceil an ionaid naoimh; bithidh fichead gerah san t-secel.

26 Ach ceud-ghin nan ainmhidh, bu chòir a bhi 'na cheud-ghin do'n Tighearn, cha choisrig duine air bith sin, co dhiubh *is* tarbh, no caora e: *is* leis an Tighearn e.

27 Ach ma's ann do bheathach neòghlan

e, an sin fuasglaidh se e a réir do mheas-sa, agus cuiridh e an cùigeadh *cuid* deth ris; no mur fuasglar e, an sin reicear e a réir do mheas.

28 Gidheadh, cha reicear agus cha 'n fhuasglar ni sam bith coisrigte a choisrigeas duine do'n Tighearn, do gach ni a ta aige, araon do dhuine agus do ainmhidh, agus do fhearann a sheilbh: tha gach ni coisrigte ro naomh do'n Tighearn.

29 Cha 'n fhuasglar ni sam bith coisrigte, a choisrigear le daoineibh: *ach* cuirear gu cinnteach gu bàs e.

30 Agus uile dheachamh an fhearainn, *ma's ann* do shìol an fhearainn, no do mheas na craoibhe, *is* leis an Tighearn e; *tha e* naomha do'n Tighearn.

31 Agus ma dh'fhuasglas duine idir a bheag d'a dheachamh, cuiridh e an cùigeadh *cuid* deth ris.

32 Agus a thaobh uile dheachaimh a' chruidh, no an treuda, *eadhon* gach ni air bith a dh'imicheas fo'n t-slait; bithidh an deachamh dheth naomha do'n Tighearn.

33 Cha ramnsaich e am bi e maith no olc, ni mò a mhalairticheas se e: agus ma mhalairticheas e idir e, an sin bithidh an dà chuid e féin agus a mhalairt naomh; cha'n fhuasglar e.

34 *Is* iad sin na h-àitheantan a dh'àithn an Tighearna do Mhaois, air son chloinn Israeil ann an sliabh Shinai.

¹ air a chur air leth.

AIREAMH.

CAIB. I.

1, 17 Na fir uile ann an Israel a b'urraim dol a mach gu cogadh air an àireamh, 47 saor o na Lebhithean.

A GUS labhair an Tighearna ri Maois ann am fàsach Shinai, ann am pàillium a' choimhthionail, air a' cheud là do'n dara mìos, san dara bliadhna an déigh dhoibh teachd a mach à tìr na h-Eiphit, ag ràdh,

2 Gabhaibh *àireamh*¹ cheann comh-chruinnich chloinn Israeil uile, a réir² an teaghlachan, a réir tighe an aithriche, maille ri àireamh an ainmeanna, gach fir ionnach a réir an ceann:

3 O fhichead bliadhna dh'aois, agus os a cheann, gach aon a's urraim dol a mach gu cogadh ann an Israel; àirmhidh tusa agus Aaron iad a réir am buidhnean³.

4 Agus maille ribhse bithidh duine do gach uile thréibh: gach aon diubh 'na cheann tighe 'aithriche.

5 Agus *is* iad so ainmeanna nan daoine

a sheàsas maille ribh: Do thréibh Reuben; Elisur mac Shedeuir.

6 Do Shimeon; Selumiel mac Shurisadai.

7 Do Iudah; Nahson mac Aminadaih.

8 Do Isachar; Nataneel mac Shuair.

9 Do Shebulun; Eliab mac Heloin.

10 Do chloinn Ioseph; do Ephraim, Elisama mac Amihuid; do Mhanaseh, Gamaliel mac Phedahsuir.

11 Do Bheniamin; Abidan mac Ghid-eoni.

12 Do Dhan; Ahieser mac Amisadai.

13 Do Aser; Pagiel mac Ocrain.

14 Do Ghad; Eliasaph mac Dheueil.

15 Do Naphtali; Ahira mac Enain.

16 B' iad sin *daoin'* ainmeil⁴ a' comh-chruinnich, cinn-fheadhna treubhan an aithriche, ceannardan mhlitean ann an Israel.

17 Agus ghabh Maois agus Aaron na daoine sin, a ghairmeadh air an ainmibh.

18 Agus thionail iad an comhchruinn-

each uile an ceann a chéile air a' cheud là do'n dara mìos, agus chuir iad an céill an ginealach a réir an teaghlaichean, a réir tighe an aithriche, a réir àireimh¹ nan ainmean, o fhichead bliadhna dh'aois agus thairis, a réir an ceann.

19 Mar a dh'àithn an Tighearna do Mhaois, mar sin dh'àireamh e iad am am fàsach Shinai.

20 Agus bha clann Reubein, a' mhic bu shìne a bh'aig Israel, a réir an ginealach a, a réir an teaghlaichean, a réir tighe an aithriche, a réir àireimh nan ainmean, a réir an ceann, gach fìrionnach o fhichead bliadhna dh'aois agus os a cheann, gach aon a b'urrainn dol a mach gu cogadh;

21 Bha iadsan a dh'àirmheadh dhiubh, *eadhon* do thréibh Reubein, 'nan dà fhichead agus sè mìle agus cùig ceud.

22 Do chloinn Shimeoin, a réir an ginealach a, a réir an teaghlaichean, a réir tighe an aithriche, iadsan a chaidh àireamh dhiubh, a réir àireimh nan ainmean, a réir an ceann, gach fìrionnach o fhichead bliadhna dh'aois agus os a cheann, gach aon a b'urrainn dol a mach gu cogadh;

23 B' iadsan a chaidh àireamh dhiubh, *eadhon* do thréibh Shimeoin, leth-cheud agus naoi mìle agus trì cheud.

24 Do chloinn Ghad, a réir an ginealach a, a réir an teaghlaichean, a réir tighe an aithriche, a réir àireimh nan ainmean, o fhichead bliadhna dh'aois agus os a cheann, gach aon a b'urrainn dol a mach gu cogadh;

25 B' iadsan a chaidh àireamh dhiubh, *eadhon* do thréibh Ghad, dà fhichead agus cùig mìle agus sè ceud agus leth-cheud.

26 Do chloinn Iudah, a réir an ginealach a, a réir an teaghlaichean, a réir tighe an aithriche, a réir àireimh nan ainmean, o fhichead bliadhna dh'aois agus os a cheann, gach aon a b'urrainn dol a mach gu cogadh;

27 B' iadsan a chaidh àireamh dhiubh, *eadhon* do thréibh Iudah, trì fichead agus ceithir mìle deug agus sè ceud.

28 Do chloinn Isachair, a réir an ginealach a, a réir an teaghlaichean, a réir tighe an aithriche, a réir àireimh nan ainmean, o fhichead bliadhna dh'aois agus os a cheann, gach aon a b'urrainn dol a mach gu cogadh;

29 B' iadsan a chaidh àireamh dhiubh, *eadhon* do thréibh Isachair, leth-cheud agus ceithir mìle agus ceithir cheud.

30 Do chloinn Shebuluin, a réir an ginealach a, a réir an teaghlaichean, a réir tighe an aithriche, a réir àireimh nan ainmean, o fhichead bliadhna dh'aois agus

os a cheann, gach aon a b'urrainn dol a mach gu cogadh;

31 B' iadsan a chaidh àireamh dhiubh, *eadhon* do thréibh Shebuluin, leth-cheud agus seachd mìle agus ceithir cheud.

32 Do chloinn Ioseph, *eadhon* do chloinn Ephraim, a réir an ginealach a, a réir an teaghlaichean, a réir tighe an aithriche, a réir àireimh nan ainmean, o fhichead bliadhna dh'aois agus os a cheann, gach aon a b'urrainn dol a mach gu cogadh;

33 B' iadsan a chaidh àireamh dhiubh, *eadhon* do thréibh Ephraim, dà fhichead mìle agus cùig ceud.

34 Do chloinn Mhanaseh, a réir an ginealach a, a réir an teaghlaichean, a réir tighe an aithriche, a réir àireimh nan ainmean, o fhichead bliadhna dh'aois agus os a cheann, gach aon a b'urrainn dol a mach gu cogadh;

35 B' iadsan a chaidh àireamh dhiubh, *eadhon* do thréibh Mhanaseh, dà mhìle dheug 'ar fhichead agus dà cheud.

36 Do chloinn Bheniamin a réir an ginealach a, a réir an teaghlaichean, a réir tighe an aithriche, a réir àireimh nan ainmean, o fhichead bliadhna dh'aois agus os a cheann, gach aon a b'urrainn dol a mach gu cogadh;

37 B' iadsan a chaidh àireamh dhiubh, *eadhon* do thréibh Bheniamin, cùig mìle deug 'ar fhichead agus ceithir cheud.

38 Do chloinn Dhan, a réir an ginealach a, a réir an teaghlaichean, a réir tighe an aithriche, a réir àireimh nan ainmean, o fhichead bliadhna dh'aois agus os a cheann, gach aon a b'urrainn dol a mach gu cogadh;

39 B' iadsan a chaidh àireamh dhiubh, *eadhon* do thréibh Dhan, trì fichead agus dà mhìle agus seachd ceud.

40 Do chloinn Aseir, a réir an ginealach a, a réir an teaghlaichean, a réir tighe an aithriche, a réir àireimh nan ainmean, o fhichead bliadhna dh'aois agus os a cheann, gach aon a b'urrainn dol a mach gu cogadh;

41 B' iadsan a chaidh àireamh dhiubh, *eadhon* do thréibh Aseir, aon mhìle agus dà fhichead agus cùig ceud.

42 Do chloinn Naphtali, a réir an ginealach a, a réir an teaghlaichean, a réir tighe an aithriche, a réir àireimh nan ainmean o fhichead bliadhna dh'aois agus os a cheann, gach aon a b'urrainn dol a mach gu cogadh;

43 B' iadsan a chaidh àireamh dhiubh, *eadhon* do thréibh Naphtali, trì mìle deug agus dà fhichead agus ceithir cheud.

44 Sin iadsan a chaidh àireamh, a dh'àireamh Maois agus Aaron, agus ceannardan Israeil, *eadhon* dà fhear dheug: bha gach fear dhiubh air son tighe aithriche.

45 Mar sin bha iadsan uile a chaidh

¹ ann an àireamh. Eabh.

àireamh do chloinn Israeil, a réir tighe an aithriche, o fhichead bliadhna dh'aois agus os a cheann, gach aon a b'urrainn dol a mach gu cogadh ann an Israel;

46 Eadhon iadsan uile a chaidh àireamh, b' iad sè ceud mìle agus trì mìle agus cùig ceud agus leth-cheud.

47 Ach cha deachaidh na Lebhithich, a réir tréibh an aithriche, àireamh 'nam measg:

48 Oir labhair an Tighearna ri Maois, ag ràdh,

49 A mhàin cha'n àireamh thu treubh Lebhì, nì mò a ghabhas tu an *cunntas* cheann am measg chloinn Israeil:

50 Ach orduichidh tu na Lebhithich os ceann pàilliuin na Fianuis, agus os ceann a shoithichean uile, agus os ceann nan uile nithe a *bhuineas* da: giùlainidh iad am pàilliuin, agus a shoithichean uile; agus fritheilidh iad da, agusampaichidh iad mu'n cuairt air a' pàilliuin.

51 Agus an uair a bhios am pàilliuin gu dol air 'aghaidh, leagaidh na Lebhithich a nuas e: agus an uair a bhios am pàilliuin r'a shuidheachadh, togaidh na Lebhithich suas e: agus cuirear an coigreach a thigh am fagus gu bàs.

52 Agus suidhichidh clann Israeil am bùthan, gach duine làimh r'a chuideachd¹ féin, agus gach duine làimh r'a bhrataich féin, air feadh an armailtean².

53 Agus suidhichidh na Lebhithich am bùthan mu'n cuairt air pàilliuin na Fianuis; a chum's nach bi corruich air comh-chruinneach chloinn Israeil, agus gleidhidh³ na Lebhithich cùram pàilliuin na Fianuis.

54 Agus rinn clann Israeil a réir nan uile nithe a dh'àithn an Tighearna do Mhaois; mar sin rinn iad.

CAIB. II.

Suidheachadh nan treubh 'nam bùthaibh.

AGUS labhair an Tighearna ri Maois, agus ri h-Aaron, ag ràdh,

2 Suidhichidh gach duine do chloinn Israeil làimh r'a brataich féin, maille ri suaichiontas⁴ tighe an aithriche: fad as mu'n cuairt air pàilliuin a' choimhthionail suidhichidh iad.

3 Agus air taobh na h-àirde 'n ear, leth ri éirigh na gréine, suidhichidh luchd brataich chaimp Iudah, a réir an armailtean: agus *bithidh* Nahson mac Aminadaib 'na cheannard⁵ air cloinn Iudah.

4 Agus b'iad 'armailt-san, eadhon iadsan a chaidh àireamh dhiubh, trì fichead agus ceithir mìle deug agus sè ceud.

5 Agus am fagus da suidhichidh treubh Isachair: agus *bithidh* Nataneel mac Shuair 'na cheannard air cloinn Isachair.

6 Agus b'iad 'armailt-san, agus iadsan

a chaidh àireamh dhith, leth-cheud agus ceithir mìle agus ceithir cheud.

7 An sin treubh Shebuluin: agus *bithidh* Eliab mac Heloin 'na cheannard air cloinn Shebuluin.

8 Agus b'iad 'armailt-san, agus iadsan a chaidh àireamh dhith, leth-cheud agus seachd mìle agus ceithir cheud.

9 Na h-uile a chaidh àireamh ann an camp Iudah, b'iad ceud mìle agus ceithir fichead mìle agus sè mìle agus ceithir cheud, a réir an armailtean: théid iad so a mach air thùs.

10 Air taobh na h-àirde deas *bithidh* bratach chaimp Reubein, a réir an armailtean: agus 'na cheannard air cloinn Reubein *bithidh* Elisur mac Shedeuir.

11 Agus b'iad 'armailt-san, agus iadsan a chaidh àireamh dhith, dà fhichead agus sè mìle agus cùig ceud.

12 Agus làimh ris suidhichidh treubh Shimeoin; agus *bithidh* Selumiel mac Shurisadai 'na cheannard air cloinn Shimeoin.

13 Agus b'iad 'armailt-san, agus iadsan a chaidh àireamh dhith, leth-cheud agus naoi mìle agus trì cheud.

14 An sin treubh Ghad: agus 'na cheannard air mic Ghad, *bithidh* Eliasaph mac Reueil.

15 Agus b'iad 'armailt-san, agus iadsan a chaidh àireamh dhiubh, dà fhichead agus cùig mìle agus sè ceud agus leth-cheud.

16 Na h-uile a chaidh àireamh ann an camp Reubein, b'iad ceud mìle agus leth-cheud, agus aon mhìle, agus ceithir cheud agus leth-cheud, a réir an armailtean: agus théid iadsan a mach san dara ordugh⁶.

17 An sin théid pàilliuin a' choimhthionail air 'aghaidh, maille ri camp nan Lebhithich am meadhon a' chaimp: mar a champaicheas iad, mar sin théid iad air an aghaidh, gach duine 'na àite féin, làimh r'am brataichibh.

18 Air taobh na h-àirde 'n iar *bithidh* bratach chaimp Ephraim, a réir an armailtean: agus *bithidh* Elisama mac Amihuid 'na cheannard air mic Ephraim.

19 Agus b'iad 'armailt-san, agus iadsan a chaidh àireamh dhiubh, dà fhichead mìle agus cùig ceud.

20 Agus làimh ris-san *bithidh* treubh Mhanaseh: agus *bithidh* Gamaliel mac Phedahsuir 'na cheannard air cloinn Mhanaseh.

21 Agus b'iad 'armailt-san, agus iadsan a chaidh àireamh dhiubh, dà mhìle dheug 'ar fhichead agus dà cheud.

22 An sin treubh Bheniamin: agus *bithidh* Abidan mac Ghideon 'na cheannard air mic Bheniamin.

¹ *champ*. Eabh. ² *slòigh*. ³ *coimhididh*.

⁴ *suaithantas*. ⁵ *chaiptein*. ⁶ *san dara h-àite*.

23 Agus b'iad 'armailt-san, agus iadsan a chaidh àireamh dhiubh, cùig mìle deug 'ar fhichead agus ceithir cheud.

24 B' iadsan uile a dh'àirmheadh do champ Ephraim, ceud mìle, agus ochd mìle agus ceud a réir an armailtean: agus théid iadsan air an aghaidh san treas ordugh.

25 Bithidh bratach chaimp Dhan air taobh na h-àirde tuath a réir an armailtean: agus bithidh Ahieser mac Amisadai 'na cheannard air chloinn Dhan.

26 Agus b'iad 'armailt-san, agus iadsan a chaidh àireamh dhiubh, trì fichead agus dà mhìle agus seachd ceud.

27 Agus làimh ris campaichidh treubh Aseir: agus bithidh Pagiel mac Ocraim 'na cheannard air cloinn Aseir.

28 Agus b'iad 'armailt-san, agus iadsan a chaidh àireamh dhiubh, dà fhichead agus aon mhìle agus cùig ceud.

29 An sin treubh Naphtali: agus bithidh Ahira mac Enain 'na cheannard air cloinn Naphtali.

30 Agus b'iad 'armailt-san, agus iadsan a chaidh àireamh dhiubh, leth-cheud agus trì mìle agus ceithir cheud.

31 B' iadsan uile a chaidh àireamh ann an camp Dhan, ceud mìle, agus leth-cheud agus seachd mìle agus sè ceud: Imichidh iadsan fa dheireadh le 'm brataichibh.

32 Is iad sin iadsan a dh'àirmheadh do chloinn Israeil, a réir tighe an aithriche: b' iadsan uile a chaidh àireamh do na camp, a réir an armailtean, sè ceud mìle, agus trì mìle agus cùig ceud agus leth-cheud.

33 Ach cha d'àirmheadh na Lebhithich ann measg chloinn Israeil, mar a dh'àithn an Tighearna do Mhaois.

34 Agus rinn clann Israeil a réir gach ni a dh'àithn an Tighearna do Mhaois: mar sinampaich iad làimh r'am brataichibh, agus mar sin chaidh iad air an aghaidh, gach aon a réir an teaghlaichean, a réir tighe an aithriche.

CAIB. III.

1 Ginealach Aaroin agus Mhaois. 3 Frithealadh agus àireamh nan Lebhithich.

IS iad so mar an ceudna ginealach Aaroin agus Mhaois, san là anns an do labhair an Tighearna ri Maois ann an sliabh Shinaì.

2 Agus is iad so ainmean mhac Aaroin; Nadab an ceud-ghin, agus Abihu, Eleasar, agus Itamar.

3 Is iad sin ainmeanna mhac Aaroin, na sagairt a dh'ungadh, a choisrig e gu frith-ealadh ann an dreuchd an t-sagairt.

4 Agus fhuair Nadab agus Abihu bàs an làthair an Tighearna, 'nuair a thug iad

suas teine coimheach an làthair an Tigh-earn, ann am fàsach Shinaì, agus cha robh clann aca: agus fhrithheil Eleasar agus Itamar ann an dreuchd an t-sagairt, ann an sealladh Aaroin an athar.

5 Agus labhair an Tighearna ri Maois, ag ràdh,

6 Thoir treubh Lebhi am fagus, agus taisbein iad an làthair Aaroin an t-sagairt, a chum gu'm fritheil iad dha.

7 Agus gleidhidh iad a chùram-san, agus curama 'choimhthionail uile, air beul-aobl pàilliuin a' choimhthionail, a dheanamh seirbhis¹ a' phàilliuin.

8 Agus gleidhidh iad uile shoithichean² pàilliuin a' choimhthionail, agus cùram chloinn Israeil, a dheanamh seirbhis a' phàilliuin.

9 Agus blèir thu na Lebhithich do Aaron, agus d'a mhic: tha iad air an tabhairt da gu h-iomlan a mach á cloinn Israeil.

10 Agus orduichidh tu Aaron agus a mhic, agus feithidh iadsan air dreuchd an t-sagairt: agus cuirear an coigreach a thig am fagus gu bàs.

11 Agus labhair an Tighearna ri Maois, ag ràdh,

12 Agus mise, feuch, ghabh mi na Lebhithich o mheasg chloinn Israeil, an àit a' cheud-ghin uile a dh'fhosgla a' bhru am measg chloinn Israeil: agus is leamsa na Lebhithich;

13 A chionn gur leamsa gach uile cheud-ghin; oir air an là anns an do bhuail mi gach ceud-ghin ann an tìr na h-Eiphit, naomhaich mi dhomh féin gach ceud-ghin ann an Israel, eadar dhuine agus ainmhidh; is leamsa iad: Is mise an Tighearn.

14 Agus labhair an Tighearna ri Maois ann am fàsach Shinaì, ag ràdh,

15 Aireamh clann Lebhi a réir tighe an aithriche, a réir an teaghlaichean: gach firionnach o mhios a dh'aois agus os a cheann àirmhidh tu iad.

16 Agus dh'àireamh Maois iad a réir focail an Tighearna, mar a thugadh àithne dha.

17 Agus b'iad so mic Lebhi a réir an ainmean; Gerson, agus Cohat, agus Merari.

18 Agus is iad so ainmean mhac Ghersein a réir an teaghlaichean; Libni agus Simeì.

19 Agus mic Cohait a réir an teaghlaichean; Amram, agus Idsar, Hebron, agus Udsiel.

20 Agus mic Mherari a réir an teaghlaichean; Mahli, agus Musi: is iad sin teaghlaichean nan Lebhithich, a réir tighe an aithriche.

¹ frithealaidh.

² airneis.

21 O Gherson *bha* teaghlach Libni, agus teaghlach Shimei: *is* iad sin teaghlaichean nan Gersonach.

22 Iadsan a chaidh àireamh dhiubh, a réir àireimh nam firionnach uile, o mhios a dh'aois agus os a cheann, *eadhon* iadsan a chaidh àireamh dhiubh, *b'iad* scachd mìle agus cùig ceud.

23 Suidhichidh teaghlaichean nan Gersonach air cùlaobh a' phàilliuin air taobh na h-àirde 'n iar.

24 Agus *bithidh* Eliasaph mac Laeil, 'na cheann tighe athar nan Gersonach.

25 Agus air cùram¹ mhac Ghersoin, ann am pàilliuin² a' choimhthionail, *bithidh* am pàilliuin, agus am bùth, a chòmhdach, agus am brat air son doruis pàilliuin a' choimhthionail.

26 Agus cùirtean na cùirte, agus am brat air son doruis na cùirte, a ta làimh ris a' phàilliuin, agus làimh ris an altair mu'n cuairt, agus a cùird, air son a seirbhhis uile.

27 Agus o Chohat *bha* teaghlach nan Amramach, agus teaghlach nan Idseharach, agus teaghlach nan Hebronach, agus teaghlach nan Udsielach: *is* iad sin teaghlaichean nan Cohatach.

28 Ann an àireamh nam firionnach uile o mhios a dh'aois agus os a cheann, *bha* ochd mìle agus sè ceud, a bha gleidheadh cùraim³ an ionaid naoimh.

29 Suidhichidh teaghlaichean mhac Chohat an taobh a' phàilliuin mu dheas.

30 Agus *bithidh* Elisaphan mac Udsieil 'na cheann tighe athar theaghlaichean nan Cohatach.

31 Agus air an cùram-san *bithidh* an àir, agus am bòrd, agus an coinnleir, agus na h-altairean, agus soithichean an ionaid naoimh, leis am fritheil iad, agus am brat, agus a sheirbhhis uile.

32 Agus *bithidh* Eleasar, mac Aaroin an t-sagairt, 'na cheannard air ccamardaibh⁴ nan Lebhitheach, agus *bithidh* sùil aig orrasan a bhios a' gleidheadh cùraim an ionaid naoimh.

33 O Mherari *bha* teaghlach nam Mahlach, agus teaghlach nam Musitheach: *is* iad sin teaghlaichean Mherari.

34 Agus iadsan a chaidh àireamh dhiubh, a réir àireimh nam firionnach uile, o mhios a dh'aois agus os a cheann, *b'iad* sè mìle agus dà cheud.

35 Agus *b'e* Suriel mac Abihail ceann tighe athar theaghlaichean Mherari; suidhichidh iadsan air taobh a' phàilliuin mu thuath.

36 Agus *fa* choimhead agus cùram mhac Mherari *bithidh* buird a' phàilliuin, agus a chroinn, agus a phuist, agus a bhuinn, agus a shoithichean uile, agus gach ni a

fhritheileas da,

37 Agus puist na cùirte mu'n cuairt, agus am buinn, agus am pinneachan, agus an cùird.

38 Ach iadsan a champaicheas air beulaobh a' phàilliuin air taobh na h-àirde 'n ear, *eadhon* air beulaobh pàilliuin a' choimhthionail leth ri éirigh na gréine, *is iad* Maois, agus Aaron, agus a mhic, a' gleidheadh cùraim an ionaid naoimh, air son cùraim chloinn Israeil; agus cuir ear an coigreach a thig am fagus gu bàs.

39 Iadsan uile a chaidh àireamh do na Lebhithich, a dh'àireamh Maois [agus Aaron] a réir àithne an Tighearn, a réir an teaghlaichean, na firionnach uile o mhios a dh'aois agus os a cheann, *b'iad* dà mhìle thar fhichead.

40 Agus thubhairt an Tighearna ri Maois, Àireamh gach ceud-ghin *a ta* 'na fhirionnach do chloinn Israeil o mhios a dh'aois agus os a cheann, agus gabh àireamh an ainmean.

41 Agus gabhaidh tu na Lebhithich dhomhsa (*Is* mise an Tighearn) an àite nan ceud-ghin uile am measg chloinn Israeil; agus spréidh nan Lebhithich an àite nan ceud-ghin uile am measg spréidhe chloinn Israeil.

42 Agus dh'àireamh Maois, mar a dh'àithn an Tighearna dha, gach ceud-ghin am measg chloinn Israeil.

43 Agus gach ceud-ghin *a bha* 'na fhirionnach, a réir àireimh nan ainmean, o mhios a dh'aois agus os a cheann, dhiubhsan a chaidh àireamh dhiubh, *b' iad* dà mhìle thar fhichead dà cheud agus trì fichead agus tri-deug.

44 Agus labhair an Tighearna ri Maois, ag ràdh,

45 Gabh na Lebhithich an àite nan ceud-ghin uile am measg chloinn Israeil, agus spréidh nan Lebhithich an àite an spréidhe-san, agus bithidh na Lebhithich leamsa: *Is* mise an Tighearn.

46 Agus air an son-san a ta gu bli air am fuasgladh do'n dà cheud agus an trì fichead agus an tri-deug, do cheud-ghin chloinn Israeil, a tha nì's lìonmhoire na na Lebhithich;

47 Gabhaidh tu eadhon cùig seceil am fear air an ceann; a réir seceil an ionaid naoimh gabhaidh tu *iad: is e* 'n seceil fichead gerah.

48 Agus bheir thu 'n t-airgiod, leis am fuasglar an t-àireamh còrr dhiubh, do Aaron agus d'a mhic.

49 Agus ghabh Maois an t-airgiod fuasglaidh uatha-san a bha thuilleadh orra-san a dh'fhuasgladh leis na Lebhithich.

50 O cheud-ghin chloinn Israeil ghabh e an t-airgiod: mìle trì cheud agus trì

¹ *fa* choimhead.

² *bùth*. Eabh.

³ *a' gleidheadh faire*. ⁴ *uaislibh, daoine urromach*.

fichead agus cùig *seceil*, a réir seceil an ionaid naomh.

51 Agus thug Maois airgid do na muinntir sin a dh'fhuasgladh, do Aaron, agus d'a mhic, a réir focail an Tighearna, mar a dh'àithn an Tighearna do Mhaois.

CAIB. IV.

1 Aois agus àm frith-ealaidh nan Lebhith-each.

17 Dreuchd nan sagart.

AGUS labhair an Tighearna ri Maois, agus ri h-Aaron, ag ràdh,

2 Gabh àireamh mhac Chohait o mheasg mhac Lebhi, a réir an teaghlaichean, a réir tighe an aithriche;

3 O dheich bliadhna fichead a dh'aois agus os a cheann, eadhon gu leth-cheud bliadhna dh'aois, gach neach a théid a steach do'n armailt, a dheanamh na h-oibre ann am pàillium a' choimhthionail.

4 Soan t-seirbhais a bhios aig mic Chohait, ann am pàillium a' choimhthionail, *mu thimchioll* nan nithe ro naomha.

5 Agus an uair a bhios an camp gu dol air 'aghaidh¹, thig Aaron agus a mhic, agus bheir iad a nuas brat a' chomhdaich, agus comhdaichidh iad àire na Fianuis leis;

6 Agus cuiridh iad oirre an còmh-dachadh do chroicnibh bhroc, agus sgaoilidh iad os a ceann eudach uile do ghorm, agus cuiridh iad a bataichean innte.

7 Agus air bòrd arain na Fianuis sgaoilidh iad eudach do ghorm, agus cuiridh iad air na miasan², agus na tùiseirean³, agus na copain⁴, agus na cuachan leis an toirear seachad tabhartas-dibhe⁵; agus bithidh an t-aran an còmhnuidh air.

8 Agus sgaoilidh iad orra eudach scar-laid, agus comhdaichidh iad sin le còmh-dachadh do chroicnibh bhroc, agus cuiridh iad a bhataichean ann.

9 Agus gabhaidh iad eudach do ghorm, agus comhdaichidh iad coinnleir an t-soluis, agus a lòchrain, agus a chlobhachan⁶, agus a smàl-shoithichean, agus a shoithichean-olaidh uile, leis am fritheil iad da.

10 Agus cuiridh iad e *fén*, agus a shoithichean uile, ann an còmh-dachadh do chroicnibh bhroc, agus cuiridh iad air lunn e.

11 Agus air an altair òir sgaoilidh iad eudach do ghorm, agus comhdaichidh iad i le còmh-dachadh do chroicnibh bhroc, agus cuiridh iad *rithe* a bataichean.

12 Agus gabhaidh iad na h-innill fhrith-ealaidh uile leis am fritheil iad san ionad naomh, agus cuiridh iad ann an eudach do ghorm *iad*, agus comhdaichidh iad le còmh-dachadh do chroicnibh bhroc iad, agus cuiridh iad air lunn *iad*.

13 Agus bheir iad air falbh an luath o'n altair, agus sgaoilidh iad eudach corcuir⁷ oirre;

14 Agus cuiridh iad oirre a soithichean uile, leis am fritheil iad m'a timchioll, *eadhon* na tùiseirean⁸, na greimichean-feòla, agus na sluasaidean, agus na cuachan⁹, soithichean na h-altarach uile; agus sgaoilidh iad oirre còmh-dachadh do chroicnibh bhroc, agus cuiridh iad *rithe* a bataichean.

15 Agus crìochnaichidh Aaron agus a mhic còmh-dachadh an ionaid naomh, agus uile shoithichean an ionaid naomh, 'nuair a bhios an camp gu dol air 'aghaidh; agus an déigh sin thig mic Chohait g'an giùlan: ach cha bhean iad ri ni naomha *sam bith*, air eagal gu'm bàsaich iad. *Is* iad na *nithe* sin eallach mhac Chohait ann am pàillium a' choimhthionail.

16 Agus do dhreuchd Eleasair, mhic Aaron an t-sagairt *buinidh* an oladh chum an t-soluis, agus an tùis chùbhraidh, agus an tabhartas-bidh lathail, agus an oladh-ungaidh, agus cùram¹⁰ a' phàillium uile, agus nan uile nithe a *ta* ann, san ionad naomha, agus 'na shoithichibh.

17 Agus labhair an Tighearna ri Maois, agus ri h-Aaron, ag ràdh,

18 Na gearraibh as treubh theaghlaichean nan Cohatach o mheasg nan Lebhith-each.

19 Ach so ni sibh riu, chum gu'm bi iad beò agu nach bàsaich iad, an uair a thig iad am fagus do na nithibh ro naomha; théid Aaron agus a mhic a steach, agus orduichidh siad iad gach aon d'a sheirbhais *fén*, agus d'a eallaich.

20 Ach cha téid iad a steach a dh'fhaicinn an uair a chòmhdaichear na nithe naomha, air eagal gu'm faigh iad bàs.

21 Agus labhair an Tighearna ri Maois, ag ràdh,

22 Gabh mar an ceudna àireamh mhac Ghersoin, a réir tighe an aithriche, a réir an teaghlaichean:

23 O dheich bliadhna fichead a dh'aois agus os a cheann, gu leth-cheud bliadhna dh'aois àirmhidh tu iad; gach neach a théid a steach a dheanamh na h-oibre ann am pàillium a' choimhthionail.

24 *Is* i so seirbhais theaghlaichean nan Gersonach, seirbhais a dheanamh, agus eallach a ghiulan¹¹.

25 Agus giùlainidh iad cùirteinean a' phàillium, agus pàillium a' choimhthionail, a còmh-dach, agus an còmh-dach do chroicnibh bhroc, a ta shuas thairis air,

¹ r' a atharrachadh.

² soithichean.

³ liaghan, spàinean.

⁴ cupain.

⁵ na còmhdaichean g'a còmh-dachadh.

⁶ a theanchairean.

⁷ purpuir.

⁸ tùis-shoithichean.

⁹ soithichean-crathaidh.

¹⁰ sùil-bheachd.

¹¹ air son uallach.

agus brat doruis pàilliuin a' choimhthionail,

26 Agus cùirteinean na cùirte, agus brat doruis geata na cùirte, a *ta* làimh ris a' phàilliuin, agus ris an altair mu'n cuairt, agus an cùird, agus innil an frithealaidh uile, agus gach nì a rinneadh air an son: mar so nì iad seirbhis.

27 A réir focail Aaroin agus a mhac bithidh uile sheirbhis mhac nan Gersonach, 'nan eallachaibh uile, agus 'nan seirbhis uile: agus orduichidh sibh dhoibh mar an cùram an eallachan uile.

28 *Is i* so seirbhis theaghlaichean mhac Ghersoin, ann am pàilliuin a' choimhthionail; agus *bithidh* an cùram fuidh làimh Itamair mhic Aaroin an t-sagairt.

29 A thaobh mhac Mherari, àirmhidh tu iad a réir an teaghlaichean, a réir tighe an aithriche:

30 O dheich bliadhna fichead a dh'aois agus os a cheann, eadhon gu leth-cheud bliadhna dh'aois, àirmhidh tu iad, gach aon a théid a steach do'n t-seirbhis, a dheanamh oibre pàilliuin a' choimhthionail.

31 Agus *is e* so cùram an eallaich, a réir an seirbhis uile ann am pàilliuin a' choimhthionail; bùird a' phàilliuin, agus a chroimn, agus a phuist, agus a bhuin,

32 Agus puist na cùirte mu'n cuairt, agus am buinn, agus am pinneachan¹, agus an cuird, maille r'an innealaibh uile, agus maille r'an seirbhis uile; agus air an ainm àirmhidh sibh innil cùram an eallaich.

33 *Is i* so seirbhis theaghlaichean mhac Mherari, a réir an seirbhis uile ann am pàilliuin a' choimhthionail, fuidh làimh Itamair mhic Aaroin an t-sagairt.

34 Agus dh'àireamh Maois agus Aaron agus ceannardan a' chomhchruinnich mic nan Cohatach, a réir an teaghlaichean, agus a réir tighe an aithriche:

35 O dheich bliadhna fichead a dh'aois agus os a cheann, eadhon gu leth-cheud bliadhna dh'aois, gach aon a théid a steach do'n t-seirbhis, chum oibre ann am pàilliuin a' choimhthionail.

36 Agus iadsan a chaidh àireamh dhiubh, a réir an teaghlaichean, b'iad dà mhìle seachd ceud agus leth-cheud.

37 B'iad so iadsan a chaidh àireamh do theaghlaichibh nan Cohatach, gach neach a dh'fheadadh seirbhis a deanamh ann am pàilliuin a' choimhthionail, a dh'àireamh Maois agus Aaron, a réir àithne an Tighearna le làimh Mhaois.

38 Agus iadsan a chaidh àireamh do mhic Ghersoin, a réir an teaghlaichean, agus a réir tighe an aithriche:

39 O dheich bliadhna fichead a dh'aois

agus os a cheann, eadhon gu leth-cheud bliadhna dh'aois, gach aon a théid a steach do'n t-seirbhis, a chum oibre ann am pàilliuin a' choimhthionail;

40 Eadhon iadsan a chaidh àireamh dhiubh, a réir an teaghlaichean, a réir tighe an aithriche, b'iad dà mhìle agus sè ceud agus deich 'ar fhichead.

41 So iadsan a chaidh àireamh do theaghlaichibh mhac Ghersoin, do gach neach a dh'fheadadh seirbhis a dheanamh ann am pàilliuin a' choimhthionail a dh'àireamh Maois agus Aaron a réir àithne an Tighearna.

42 Agus iadsan a chaidh àireamh do theaghlaichibh mhac Mherari a réir an teaghlaichean, a réir tighe an aithriche;

43 O dheich bliadhna fichead a dh'aois agus os a cheann, eadhon gu leth-cheud bliadhna dh'aois, gach aon a théid a stigh do'n t-seirbhis, chum oibre ann am pàilliuin a' choimhthionail;

44 Eadhon iadsan a chaidh àireamh dhiubh, a réir an teaghlaichean, b'iad trì mìle agus dà cheud.

45 So iadsan a chaidh àireamh do theaghlaichibh mhac Mherari, a dh'àireamh Maois agus Aaron, a réir focail an Tighearna le làimh Mhaois.

46 Iadsan uile a chaidh àireamh do na Lebhitich, a dh'àireamh Maois agus Aaron, agus ceannardan Israeil, a réir an teaghlaichean, agus a réir tighe an aithriche;

47 O dheich bliadhna fichead a dh'aois agus os a cheann, eadhon gu leth-cheud bliadhna dh'aois, gach aon a thàinig a dheanamh seirbhis an fhrithealaidh, agus seirbhis na h-eallaich ann am pàilliuin a' choimhthionail;

48 Eadhon iadsan a chaidh àireamh dhiubh b'iad ochd mìle agus cùig ceud agus ceithir fichead.

49 A réir àithne an Tighearna dh'àirmheadh iad le làimh Mhaois, gach aon a réir a sheirbhis, agus a réir 'eallaich: mar so dh'àirmheadh iad leis, mar a dh'àithn an Tighearna do Mhaois.

CAIB. V.

1 *An coimh-leasachadh air son eucorach. 11 Dèuch-ainm èudaich.*

A GUS labhair an Tighearna ri Maois, ag ràdh,

2 Aithn do chloimn Israeil, iad a chur a mach as a' champ gach lobhar, agus gach neach air am bheil silteach, agus gach neach a ta air a shalachadh leis a' mharbh:

3 Aaron firionnach agus boirionnach cuiridh sibh a mach, an taobh a muigh do'n champ cuiridh sibh iad; a chum as nach truail iad an campan, anns am bheil mise gabhail còmhuidh.

4 Agus rinn clann Israeil mar so, agus chuir iad a mach iad an taobh a muigh

¹ *tairnean, tairgean.*

do'n cluamp; mar a labhair an Tighearna ri Maois, mar sin rinn clann Israeil.

5 Agus labhair an Tighearna ri Maois, ag ràdh,

6 Abair ri cloinn Israeil, An uair a nì fear no bean peacadh air bith a nì daoine, a dheanamh eusaontais¹ an aghaidh an Tighearn, agus gu'm bheil an t-anam sin ciontach;

7 An sin aidichidh iad am peacadh a rinn iad: agus nì e coimh-leasachadh² air son 'eucorach³ san iomlan, agus cuiridh e an cuigeadh *cuid* deth ris, agus bheir e *sin dhasan* air an d'rinn e 'n eucor.

8 Ach mur bi aig an duine caraid sam bith⁴ gucoimh-leasachadh a thoirt dasaneucoir, thugar an coimh-leasachadh a nìthear do'n Tighearn air son na h-eucorach, do'n t-sagart; a thuilleadh air reithe na rèite, leis an deanar rèite air a shon.

9 Agus gach tabhartas donithibh naomha chloinn Israeil uile, a bheir iad chum an t-sagairt, is leis-san iad.

10 Agus nithe coisrigte gach duine, is leis-san iad: ge b'e nì a bheir duine sam bith do'n t-sagart, is leis e.

11 Agus labhair an Tighearna ri Maois, ag ràdh,

12 Labhair ri cloinn Israeil, agus abair riu, Ma théid bean fir sam bith a thaobh, agus gu'n ciontaich i 'na aghaidh,

13 Agus gu'n luidh fear gu collaidh leatha, agus gu'm bi sin folaichte o shùil-ibh a fir-phòsda, agus gu'm bi e ceilte⁵, agus gu'm bi i air a thruailladh, agus nach bi fianuis sam bith 'na h-aghaidh, agus gun i air a glacadh *sa' chùis*.

14 Agus gu'n tig spiorad èud air, agus gu'm bheil e 'g èudach air a' mhnaoi, agus gu'n do thruailladh i; no ma thàinig spiorad èud air, agus gu'm bheil e èudmhor m'a' mhnaoi, agus nach do thruailladh i:

15 An sin bheir an duine a bhean a dh'ionnsuidh an t-sagairt, agus bheir e leis a tabhartas air a son, an deicheamh *cuid* a dh'ephah do mhin eorna; cha dòirt e oladh air, nì mò a chuircas e tùis air, oir is tabhartas èudaich⁶ a t'ann, tabhartas cuimhneachain, a' toirt aingidheachd ann an cuimhne.

16 Agus bheir an sagart am fagus i, agus cuiridh e i an làthair an Tighearn.

17 Agus gabhaidh an sagart uisge naomh ann an soitheach creadha, agus gabhaidh an sagart *cuid* do'n duslach⁷ a bhios air ùrlar a' phàilliuin, agus cuiridh e san uisge e.

18 Agus cuiridh an sagart a' bhean ann an làthair an Tighearn, agus rùisgidh e ceann na mnà, agus cuiridh e'n tabhartas

cuimhneachain 'na làmhaidh, eadhon an tabhartas èudaich; agus bithidh aig an t-sagart 'na làmh an t-uisge searbh a mhallaicheas.

19 Agus gabhaidh an sagart mionnan dhith, agus their e ris a' mhnaoi, Mur do luidh fear sam bith leat, agus mur deachaidh tu thaobh gu neòghloine *maille ri neach eile* an àite t'fhir-phòsda, bi-sa saor o an uisge shearbh so a mhallaicheas:

20 Ach ma chaidh thu thaobh *gu neach eile* an àite t'fhir-phòsda, agus gu'n do thruailladh thu, agus gu'n do luidh fear eile leat a thuilleadh air t'fhir-phòsda;

21 An sin gabhaidh an sagart mionnan mallachaidh do'n mhnaoi, agus their an sagart ris a' mhnaoi, Gu'n deanadh an Tighearn a'd' mhallachadh agus a'd' mionnan thu am measg do shluaigh, 'nuair a bheir an Tighearn air do shliasaid⁸ lobhadh, agus air do bhroinn atadh;

22 Agus théid an t-uisge so a mhallaichcas a stigh a'd' innibh⁹, a thoirt air do bhroinn atadh, agus air do shliasaid lobhadh: Agus their a' bhean, Amen, amen.

23 Agus sgrìobhaidh an sagart na mallachdan sin ann an leabhar, agus dubhaidh e mach *iad* leis an nisge shearbh;

24 Agus bheir e air a' mhnaoi an t-uisge searbh a bheir am mallachadh, òl: agus théid an t-uisge a mhallaicheas a steach innte, *agus fàsaidh* e searbh.

25 An sin gabhaidh an sagart an tabhartas èudaich a' làmh na mnà, agus luaisgidh e 'n tabhartas an làthair an Tighearn, agus bheir e scachd e air an altair.

26 Agus gabhaidh an sagart làn glaise do'n tabhartas, *eadhon* a cuimhneachan, agus loisgidh e air an altair e, agus an deigh sin bheir e air a' mhnaoi an t-uisge òl.

27 Agus an uair a bheir e oirre an t-uisge òl, an sin tarlaidh ma thruailladh i, agus ma rinn i coire an aghaidh a fir-phòsda, gu'n téid an t-uisge a mhallaicheas a steach innte, *agus fàsaidh* e searbh, agus ataidh a brù, agus lobhaidh a shliasaid: agus bithidh a' bhean 'na mallachadh ain measg a sluaigh.

28 Agus mur do thruailladh a' bhean, ach gu'm bheil i glan; an sin bithidh i saor, agus fàsaidh i torrach.

29 Is e so lagh nan èud, an uair a théid bean a thaobh *gu fear eile* an àit a fir-phòsda, agus a thruaillair i;

30 No 'nuair a thig spiorad èud air fear, agus a tha e èudmhor m'a' mhnaoi, agus a chuireas e a' bhean an làthair an Tighearn, agus a chuireas an sagart an gnòimh oirre an lagh so uile;

¹ euceirt. ² dìoladh, éiric.

⁴ dìoghaltair. Eabh.

³ a chionta.

⁵ am folach.

⁶ an offering of jealousy. Sasg.

⁸ leas.

⁷ luathre.

⁹ mhinach.

31 Ansin bithidh an duine saor o'n chionta, agus giùlainidh a' bhean so a cionta.

CAIB. VI.

1 *Lagh nan Nasarach.* 22 *Modh beannachaidh chloinn Israeil.*

AGUS labhair an Tighearna ri Maois, ag ràdh,

2 Labhair ri cloinn Israeil, agus abair riu, 'Nuair a dhealaicheas aon chuid bean no fear *iad féin* a bhòideachadh bòide Nasaraich, a chum *iad féin* a dhealachadh do'n Tighearn;

3 O fhion, agus o dhìbh làidir sgaraidh se e *féin*; fion-geur fiona, no fion-geur dìbhe làidir cha'n òl e, ni mò a dh'òlas e bheag do shùgh nam fion-dhearcan, ni mò a dh'itheas e fion-dhearcan ùr no tioram.

4 Uile làithean a dhealachaidh cha'n ith e bheag a nithear do'n chràibh-fhiona, o na h-eiteanaibh gus am plaosg.

5 Uile làithean bòide a dhealachaidh, cha tig ealtainn air a cheann: gus an coimhlionar na làithean anns an dealaich se e *féin* do'n Tighearn, bithidh e naomh; agus leigidh e le ciabhaibh gruaige a chinn fàs.

6 Sna làithibh sin uile anns an dealaich se e *féin* do'n Tighearn, cha tig e 'm fagus do chorp¹ marbh sam bith,

7 Cha dean se e *féin* neòghlan air son 'athar, no air son a mhàthar, air son a bhràthar, no air son a pheathar, an uair a gheibh iad bàs; do bhrìgh gu *bheil* coisreagadh a Dhé air a cheann.

8 Uile làithean a dhealachaidh *tha* e naomha do'n Tighearn.

9 Agus ma gheibh duine gu h-obann bàs làimh ris, agus gu'n do shalaich e ceann a choisreagaidh; an sin bearraidh² e a cheann ann an là a ghlanaidh, air an t-seachdamh là bearraidh se e.

10 Agus air an ochdamh là bheir e dà thurtur³, no dà choluman òg; a dh'ionnsuidh an t-sagairt, gu dorus pàilliuin a' choimhthionail.

11 Agus ìobraidh an sagart fear diubh mar ìobairt-pheacaidh, agus am fear eile mar ìobairt-loisgte, agus ni e réite air a shon, do bhrìgh gu'n do pheacaich e thaobh a' mhairbh, agus naomhaichidh e a cheann san là sin féin.

12 Agus coisrigidh e do'n Tighearna làithean a dhealachaidh, agus bheir e leis uan do'n cheud bhliadhna chum ìobairt-eusaontais: ach bithidh na làithean a chaidh seachad caillte, do bhrìgh gu'n do shalaicheadh a dhealachadh.

13 Agus *is* e so lagh an Nasaraich: 'Nuair a choimhlionar làithean a dhealachaidh, bheirear e⁴ gu dorus pàilliuin a' choimhthionail:

14 Agus bheir e seachad a thabhartas

do'n Tighearn, aca uan fìrionn do'n cheud bhliadhna gun ghaoid a chum ìobairt-loisgte, agus aon uan boirionn do'n cheud bhliadhna gun ghaoid a chum ìobairt-pheacaidh, agus aon reithe gun ghaoid a chum ìobairt-shith;

15 Agus bascaid do aran neo-ghoirtichte, breacagan do phlùr mìn measgta le h-cladh, agus dearnagana do aran neo-ghoirtichte ungta le h-oladh, agus an tabhartas-bidh, agus an tabhartasan-dìbhe.

16 Agus bheir an sagart *iad* an làthair an Tighearn, agus ìobraidh e 'ìobairt-pheacaidh, agus 'ìobairt-loisgte.

17 Agus ìobraidh e 'n reithe mar ìobairt thabhartasan-sith do'n Tighearna, maille ris a' bhascaid do aran neo-ghoirtichte: bheir an sagart seachad mar an ceudna a thabhartas-bidh, agus a thabhartas-dìbhe.

18 Agus bearraidh an Nasarach ceann a dhealachaidh, aig dorus pàilliuin a' choimhthionail; agus gabhaidh e gruag cinn a dhealachaidh, agus cuiridh e *i* san teine a *ta* fuidh ìobairt nan tabhartasan-sith.

19 Agus gabhaidh an sagart slinnean brùch an reithe, agus aon bhreacag neo-ghoirtichte a' bhascaid, agus aon dearnagan⁵ neo-ghoirtichte; agus cuiridh e *iad* air làmhaibh an Nasaraich, an déigh do *ghruaig* a dhealachaidh bhi air a bearradh.

20 Agus luaisgidh an sagart *iad* mar thabhartas-luaisgte an làthair an Tighearna; *tha* so naomha do'n t-sagart maille ris an uchd luaisgte, agus *maille* ris an t-slinnean thogta: agus an déigh sin feudaidh an Nasarach fion òl.

21 *Is* e so lagh an Nasaraich, a thug bòid, agus *lagh* a thabhartais do'n Tighearn air son a dhealachaidh, a thuilleadh air na gheibh a làmh: a réir a bhòide a bhòidich e, mar sin is éigin da dheanamh, a réir lagha a dhealachaidh.

22 Agus labhair an Tighearna ri Maois, ag ràdh,

23 Labhair ri h-Aaron agus r'a mhic, ag ràdh, air a' mhodh so beannaichidh sibh clann Israeil, ag ràdh riu,

24 Gu'm beannaicheadh an Tighearna thu, agus gu'n gleidheadh e thu:

25 Gu'n tugadh an Tighearn air a'ghaidh dealrachadh ort, agus bitheadh e gràsmhor dhuit.

26 Gu'n togadh an Tighearna suas a ghnùis ort, agus gu'n tugadh e sìth dhuit.

27 Agus cuiridh iad m'ainm air cloinn Israeil, agus beannaichidh mise iad.

CAIB. VII.

2, 10 *Tabhartais cheannardan Israeil.* 89 *Labhair Dia ri Maois.*

AGUS tharladh air an là anns an do chuir Maois suas am pàilliuin gu

¹ sgaradh.

² cholann.

³ lomaidh.

⁴ fhearan. Eir.

⁵ bheir se e.

⁶ abhlann.

h-ìomlan, agus san d'ung se e, agus san do naomhaich se e, agus 'uidheam¹ uile, arao² an altair agus a soithichean uile, agus san d'ung e iad, agus san do naomhaich e iad;

2 Gu'n d'thug ceannardan³ Israeil, cinn tighe an aithriche, (eadhon ceannardan nan treubh, a bha os ceann na muinntir a chaidh àireamh) seachad tabhartas:

3 Agus thug iad an tabhartas an làthair an Tighearna, sè feunan còmhdaichte, agus dà dhamh dheug: feun⁴ air son dithis do na ceannardaibh, agus damh air son gach fir dhiubh, agus thug iad air beulaobh a' phàilliùin iad.

4 Agus labhair an Tighearna ri Maois, ag ràdh,

5 Gabh uatha iad, a chum gu'm bi iad a dheanamh seirbhis pàilliùin a' choimh-thionail; agus bheir thu iad do na Lebhithich, do gach fear a réir a sheirbhis.

6 Agus ghabh Maois na feunan agus na daimh, agus thug e do na Lebhithich iad.

7 Dà fheun agus ceithir daimh thug e do mhic Ghersoin, a réir an seirbhis⁵.

8 Agus ceithir feuman agus ochd daimh thug e do mhic Mherari, a réir an seirbhis, fuidh làimh Itamair mhic Aaroin an t-sagairt.

9 Ach do mhic Chohait cha d' thug e h-aon air bith; a chionn gu'm b' i seirbhis an ionaid naoimh a bhuineadh dhoibhsan, gu'n giùlaineadh iad air an guallibh.

10 Agus thug na ceannardan seachad tabhartas a chum coisreagaidh na h-altarach, air an là anns an d'ungadh i; thug eadhon na ceannardan seachad an tabhartas air beulaobh na h-altarach.

11 Agus thubhairt an Tighearna ri Maois, Bheir gach ceannard seachad a tabhartas air a là féin, chum coisreagaidh na h-altarach.

12 Agus esan a thug seachad a tabhartas air a' cheud là, b'e Nahson mac Aminadaib, do thréibh Iudah.

13 Agus b'e a tabhartas aon mhias⁶ airgid, d'am bu chudthrom ceud agus deich seceil 'ar fhichead, aon chuach⁷ airgid do dheich agus trì fichead secel, a réir seceil an ionaid naoimh, iad le chéile làn do phlùr mìn measgta le h-oladh, chum tabhartais-bidh:

14 Aon spàin do dheich seceil òir, làn do thùis:

15 Aon tarbh òg, aon reithe, aon uan do'n cheud bhliadhna, chum ìobairt-loisgte:

16 Aon mheann do na gabhraibh chum ìobairt-pheacaidh:

17 Agus a chum ìobairt nan tabhartas-sith, dà tharbh, cùig reitheachan, cùig buic-ghaibhre, cùig uain do'n cheud

bhliadhna. B'e so tabhartas Nahsoin mhic Aminadaib.

18 Air an dara là thug Nataneel mac Shuair, ceannard Isachair, seachad tabhartas.

19 Thug e seachad mara thabhartas aon mhias airgid, d'am bu chudthrom ceud agus deich seceil 'ar fhichead, aon chuach airgid do dheich agus trì fichead secel, a réir seceil an ionaid naoimh, iad le chéile làn do phlùr mìn measgta le h-oladh, chum tabhartais-bidh:

20 Aon spàin òir do dheich seceil, làn do thùis:

21 Aon tarbh òg, aon reithe, aon uan do'n cheud bhliadhna, chum ìobairt-loisgte:

22 Aon mheann do na gabhraibh chum ìobairt-pheacaidh:

23 Agus a chum ìobairt nan tabhartas-sith, dà tharbh, cùig reitheachan, cùig buic-ghaibhre, cùig uain do'n cheud bhliadhna. B'e so tabhartas Nataneil mhic Shuair.

24 Air an treas là thug Eliab mac Heloin, ceannard chloinn Shebuluin, seachad tabhartas.

25 B'e a tabhartas-sana aon mhias airgid, d'am bu chudthrom ceud agus deich seceil 'ar fhichead, aon chuach airgid do dheich agus trì fichead secel, a réir seceil an ionaid naoimh, iad le chéile làn do phlùr mìn measgta le h-oladh, chum tabhartais-bidh:

26 Aon spàin òir do dheich seceil, làn do thùis:

27 Aon tarbh òg, aon reithe, aon uan do'n cheud bhliadhna, chum ìobairt-loisgte:

28 Aon mheann do na gabhraibh chum ìobairt-pheacaidh:

29 Agus a chum ìobairt nan tabhartas-sith, dà tharbh, cùig reitheachan, cùig buic-ghaibhre, cùig uain do'n cheud bhliadhna. B'e so tabhartas Eliab mhic Heloin.

30 Air a' cheathramh là thug Elisur mac Shedeuir, ceannard chloinn Reubein, seachad tabhartas.

31 B'e a tabhartas aon mhias airgid do cheud agus deich seceil 'ar fhichead, aon chuach airgid do dheich agus trì fichead secel, a réir seceil an ionaid naoimh, iad le chéile làn do phlùr mìn measgta le h-oladh, chum tabhartais-bidh:

32 Aon spàin òir do dheich seceil, làn do thùis:

33 Aon tarbh òg, aon reithe, aon uan do'n cheud bhliadhna, chum ìobairt-loisgte:

34 Aon mheann do na gabhraibh chum ìobairt-pheacaidh:

35 Agus a chum ìobairt nan tabhartas-

¹ imil, a soithichean.

² agus. Eabh.

³ cinn-sheadhna, maithean.

⁴ waggon. Sasg.

⁵ am frithealaidh, am foghnaidh.

⁶ chlàr.

⁷ chopan, soitheach-crathaidh.

sith, dà tharbh, cùig reitheachan, cùig buic-ghaibhre, cùig uain do'n cheud bhliadhna. *B'e so tabhartas Elisuir mhic Shedeuir.*

36 Air a' chùigeadh là *thug* Selumiel mac Shurisadai, ceannard chloinn Shim-eoin, *seachad tabhartas.*

37 *B'e a thabhartas-san aon mhias airgid, d'am bu chudthrom ceud agus deich seceil 'ar fhichead, aon chuach airgid do dheich agus trì fichead secel, a réir seceil an ionaid naoimh, iad le chéile làn do phlùr mìn measgta le h-oladh, chum tabhartais-bidh:*

38 Aon spàin òir do dheich *seceil*, làn do thùis:

39 Aon tarbh òg, aon reithe, aon uan do'n cheud bhliadhna, chum ìobairt-loisgte:

40 Aon mheann do na gabhraibh chum ìobairt-pheacaidh:

41 Agus a chum ìobairt nan tabhartas-sith, dà tharbh, cùig reitheachan, cùig buic-ghaibhre, cùig uain do'n cheud bhliadhna. *B'e so tabhartas Shelumiel mhic Shurisadai.*

42 Air an t-seathadh là *thug* Eliasaph mac Dheuil, ceannard chloinn Ghad, *seachad tabhartas.*

43 *B'e a thabhartas-sana aon mhias airgid, d'am bu chudthrom ceud agus deich seceil 'ar fhichead, aon chuach airgid do dheich agus trì fichead secel, a réir seceil an ionaid naoimh, iad le chéile làn do phlùr mìn measgta le h-oladh, chum tabhartais-bidh:*

44 Aon spàin òir do dheich *seceil*, làn do thùis:

45 Aon tarbh òg, aon reithe, aon uan do'n cheud bhliadhna, chum ìobairt-loisgte:

46 Aon mheann do na gabhraibh chum ìobairt-pheacaidh:

47 Agus a chum ìobairt nan tabhartas-sith, dà tharbh, cùig reitheachan, cùig buic-ghaibhre, cùig uain do'n cheud bhliadhna. *B'e so tabhartas Eliaiph mhic Dheuil.*

48 Air an t-seachdamh là *thug* Elisama mac Amihuid, ceannard chloinn Ephraim, *seachad tabhartas.*

49 *B'e a thabhartas-san aon mhias airgid, d'am bu chudthrom ceud agus deich seceil 'ar fhichead, aon chuach airgid do dheich agus trì fichead secel, a réir seceil an ionaid naoimh, iad le chéile làn do phlùr mìn measgta le h-oladh, chum tabhartais-bidh:*

50 Aon spàin òir do dheich *seceil*, làn do thùis:

51 Aon tarbh òg, aon reithe, aon uan do'n cheud bhliadhna, chum ìobairt-loisgte:

52 Aon mheann do na gabhraibh chum ìobairt-pheacaidh:

53 Agus a chum ìobairt nan tabhartas-sith, dà tharbh, cùig reitheachan, cùig buic-ghaibhre, cùig uain do'n cheud bhliadhna. *B'e so tabhartas Elisama*

mhic Amihuid.

54 Air an ochdamh là *thug* Gamaliel mac Phedahsuir, ceannard chloinn Mhanaseh, *seachad tabhartas.*

55 *B'e a thabhartas-san aon mhias airgid do cheud agus deich seceil 'ar fhichead, aon chuach airgid do dheich agus trì fichead secel, a réir seceil an ionaid naoimh, iad le chéile làn do phlùr mìn measgta le h-oladh, chum tabhartais-bidh:*

56 Aon spàin òir do dheich *seceil*, làn do thùis:

57 Aon tarbh òg, aon reithe, aon uan do'n cheud bhliadhna, chum ìobairt-loisgte:

58 Aon mheann do na gabhraibh chum ìobairt-pheacaidh:

59 Agus a chum ìobairt nan tabhartas-sith, dà tharbh, cùig reitheachan, cùig buic-ghaibhre, cùig uain do'n cheud bhliadhna. *B'e so tabhartas Ghamalieil mhic Phedahsuir.*

60 Air an naothadh là *thug* Abidan mac Ghideoni, ceannard chloinn Bheniamin, *seachad tabhartas.*

61 *B'e a thabhartas-sana aon mhias airgid, d'am bu chudthrom ceud agus deich seceil 'ar fhichead, aon chuach airgid do dheich agus trì fichead secel, a réir seceil an ionaid naoimh, iad le chéile làn do phlùr mìn measgta le h-oladh, chum tabhartais-bidh:*

62 Aon spàin òir do dheich *seceil*, làn do thùis:

63 Aon tarbh òg, aon reithe, aon uan do'n cheud bhliadhna, chum ìobairt-loisgte:

64 Aon mheann do na gabhraibh chum ìobairt-pheacaidh:

65 Agus a chum ìobairt nan tabhartas-sith, dà tharbh, cùig reitheachan, cùig buic-ghaibhre, cùig uain do'n cheud bhliadhna. *B'e so tabhartas Abidain mhic Ghideoni.*

66 Air an deicheamh là *thug* Ahieser mac Amisadai, ceannard chloinn Dhan, *seachad tabhartas.*

67 *B'e a thabhartas-san aon mhias airgid, d'am bu chudthrom ceud agus deich seceil 'ar fhichead, aon chuach airgid do dheich agus trì fichead secel, a réir seceil an ionaid naoimh, iad le chéile làn do phlùr mìn measgta le h-oladh, chum tabhartais-bidh:*

68 Aon spàin òir do dheich *seceil*, làn do thùis:

69 Aon tarbh òg, aon reithe, aon uan do'n cheud bhliadhna, chum ìobairt-loisgte:

70 Aon mheann do na gabhraibh chum ìobairt-pheacaidh:

71 Agus a chum ìobairt nan tabhartas-sith, dà tharbh, cùig reitheachan, cùig buic-ghaibhre, cùig uain do'n cheud bhliadhna. *B'e so tabhartas Ahieser mhic Amisadai.*

72 Air an aon là deug *thug* Pagiel mac Ocrain, ceannard chloinn Aseir, *seachad tabhartas.*

73 *B'e* a thabhartas-san aon mhias airgid, d'am bu chudthrom ceud agus deich *seceil* 'ar fhichead, aon chuach airgid do dheich agus trì fichead secel, a réir seceil an ionaid naoimh, iad le chéile làn do phlùr mín measgta le h-oladh, chum tabhartais-bidh:

74 Aon spàin òir do dheich *seceil*, làn do thùis:

75 Aon tarbh òg, aon reithe, aon uan do'n cheud bhliadhna, chum ìobairt-loisgte:

76 Aon mheann do na gabhraibh chum ìobairt-pheacaidh:

77 Agus a chum ìobairt nan tabhartas-sìth, dà tharbh, cuig reitheachan, cuig buic-ghaibhre, cuig uain do'n cheud bhliadhna. *B'e* so tabhartas Phagieil mhic Ocrain.

78 Air an dara là dheug *thug* Ahira mac Enain, ceannard chloinn Naphitali, *seachad* tabhartas.

79 *B'e* a thabhartas-san aon mhias airgid, d'am bu chudthrom ceud agus deich *seceil* 'ar fhichead, aon chuach airgid do dheich agus trì fichead secel, a réir seceil an ionaid naoimh, iad le chéile làn do phlùr mín measgta le h-oladh, chum tabhartais-bidh:

80 Aon spàin òir do dheich *seceil*, làn do thùis:

81 Aon tarbh òg, aon reithe, aon uan do'n cheud bhliadhna, chum ìobairt-loisgte:

82 Aon mheann do na gabhraibh chum ìobairt-pheacaidh:

83 Agus a chum ìobairt nan tabhartas-sìth, dà tharbh, cuig reitheachan, cuig buic-ghaibhre, cuig uain do'n cheud bhliadhna. *B'e* so tabhartas Ahira mhic Enain.

84 *B'e* so coisreagadh na h-altarach (san là anns an d'ungadh i) le ceannardaibh Israeil: dà mhias dheug airgid, dà chuach dheug airgid, dà spàin dheug òir:

85 *B'e cudthrom* gach meise airgid ceud agus deich *seceil* 'ar fhichead, agus gach cuachaiche deich agus trì fichead: *B'e cudthrom* nan soithichean airgid uile, dà mhìle agus ceithir cheud *seceil*, a réir seceil an ionaid naoimh.

86 *Bha* dà spàin dheug òir ann, làn do thùis, cudthrom gach aon fa leth deich seceil, a réir seceil an ionaid naoimh: *b'e* òr nan spàinean uile ceud agus fichead secel.

87 *B'iad* na tairbh uile chum ìobairt-loisgte dà tharbh dheug, na reitheachan a dhà-dheug, na h-uain do'n cheud bhliadhna dhà-dheug, maille r'an tabhartas-bidh: agus na minn do na gabhraibh chum ìobairt-pheacaidh a dhà-dheug.

88 Agus *b'iad* na tairbh uile, chum ìobairt nan tabhartas-sìth, ceithir tairbh 'ar fhichead, na reitheachan trì fichead, na buic-gaibhre trì fichead, na h-uain do'n cheud

bhliadhna trì fichead. *B'e* so coisreagadh na h-altarach, an déigh dh'i bhi air a h-ungadh.

89 Agus an uair a chaidh Maois a steach do phaillion a' choimhthionail, a labhair ris¹: an sin chual' e guth *aoin* a' labhairt ris o uachdar na caithir-thròcair a *bha* os ceann àirce na Fianuis, o eadar an dà cheurub; agus labhair e ris.

CAIB. VIII.

1 *Mar a lasadh na lòchrain.* 5 *Coisreagadh nan Lebhithich: 23 an aois agus am am frithéalaidh.*

A GUS labhair an Tighearna ri Maois, ag ràdh,

2 Labhair ri h-Aaron, agus abair ris, 'Nuair a lasas tu na lòchrain, bheir na seachd lòchrain solus uatha thall fa chomhair a' choinnleir.

3 Agus rinn Aaron mar sin; las e a lòchrain thall fa chomhair a' choinnleir; mar a dh'àithn an Tighearna do Mhaois.

4 Agus *b'e* so obair a' choinnleir: *bha* e dh'òr buailte gu ruig a chos, gu ruig a bhlàthan *bha* e dh'obair bhualte: a réir an t-samhlaidh a nochd an Tighearna do Mhaois, mar sin rinn e 'n coinnleir.

5 Agus labhair an Tighearna ri Maois, ag ràdh,

6 Gabh na Lebhithich o mheasg chloinn Israeil, agus glan iad.

7 Agus mar so nì thu riu, chum an glanadh: crath uisge glanaidh orra, agus thugadh iad ealtainn thar² am feoil uile, agus nigheadh iad an eudach, agus *mar sin* deanadh iad glan iad féin.

8 An sin gabhadh iad tarbh òg maille r'a thabhartas-bidh, *eadhon* plùr mín measgta le h-oladh, agus gabhaidh tu tarbh òg eile chum ìobairt-pheacaidh.

9 Agus bheir thu na Lebhithich air beulaobh pàilliuin a' choimhthionail: agus cruinnichidh tu coimhthional chloinn Israeil uile an ceann chéile:

10 Agus bheir thu na Lebhithich an làthair an Tighearn, agus cuiridh clann Israeil an làmhan air na Lebhithich:

11 Agus luaisgidh Aaron na Lebhithich ann an làthair an Tighearn, *mar* thabhartas-luaisgte o chloinn Israeil; a chum gu'n dean iad seirbhis an Tighearn.

12 Agus cuiridh na Lebhithich an làmhan air cinn nan tarbh; agus ìobraidh tu h-aon *diubh mar* ìobairt-pheacaidh, agus am fear eile *mar* ìobairt-loisgte do'n Tighearn, a dheanamh réite air son nan Lebhithich.

13 Agus cuiridh tu na Lebhithich an làthair Aaron, agus an làthair a mhac, agus luaisgidh tu iad *mar* thabhartas-luaisgte do'n Tighearn.

14 Mar so sgaraidh tu na Lebhithich o mheasg chloinn Israeil; agus bithidh na Lebhithich leamsa.

¹ ri Dia.

² bearradh iad.

15 Agus 'na dhéigh sin théid na Lebhithich a steach a dheanamh seirbhis pàilliuin a' choimhthionail; agus ghlanaidh tu iad, agus luaisgidh tu iad *mar* thabhartas-luaisgte:

16 Oir thugadh dhomhsa gu h-iomlan iad o mheasg chloinn Israeil; an àite gach aon a dh'fhosgla a' bhrù, *eadhon an àite* ceud-ghin chloinn Israeil uile, ghabh mi dhomh féin iad.

17 Oir is leamsa uile cheud-ghin chloinn Israeil, *araon* duine agus ainmhidh: san là air an do bhuail mi gach ceud-ghin ann an tìr na h-Eiphit, naomhaich mi iad dhomh féin.

18 Agus ghabh mi na Lebhithich an àit uile cheud-ghin chloinn Israeil.

19 Agus thug mi na Lebhithich mar thiodhlac do Aaron, agus d'a mhic, o mheasg chloinn Israeil, a dheanamh seirbhis chloinn Israeil ann am pàilliuin a' choimhthionail, agus a dheanamh réite air son chloinn Israeil; a chum as nach bi plàigh sam bith ann measg chloinn Israeil, an uair a thig clann Israeil am fagus do'n ionad naomh.

20 Agus rinn Maois agus Aaron, agus comhchruinneach chloinn Israeil uile, ris na Lebhithich a réir gach nì a dh'àithn an Tighearna do Mhaois a thaobh nan Lebhithich, mar sin rinn clann Israeil riu.

21 Agus ghlanaidh na Lebhithich agus nigh iad an eudach; agus thug Aaron suas¹ iad *mar* thabhartas an làthair an Tighearna; agus rinn Aaron réite air an son a chum an glanadh.

22 Agus an déigh sin chaidh na Lebhithich a steach, a dheanamh an seirbhis ann am pàilliuin a' choimhthionail, an làthair Aroin agus an làthair a mhac: mar a dh'àithn an Tighearna do Mhaois a thaobh nan Lebhithich, mar sin rinn iad riu.

23 Agus labhair an Tighearna ri Maois, ag ràdh,

24 *Is e so an nì a bhuineas* do na Lebhithich: o chùig bliadhna fichead a dh'aois, agus os a cheann, théid iad a steach a dh'fheithiamh air seirbhis pàilliuin a' choimhthionail:

25 Agus o aois leth-cheud bliadhna sguiridh iad a dh'fheithiamh air a sheirbhis, agus cha dean iad seirbhis nì 's mò.

26 Ach fritheilidh iad maille r'am bràithribh ann am pàilliuin a' choimhthionail a ghleidheadh a' chùraim, agus cha dean iad seirbhis sam bith *eile*. Mar so nì thu ris na Lebhithich a thaobh an cùraim.

CAIB. IX.

1 *A' chàisg air a h-orduchadh.* 15 *Thredraich neul a bha air a' pàilliuin clann Israeil air an turas.*

AGUS labhair an Tighearna ri Maois ann am fàsach Shinai, sa' cheud

mhios do'n dara bliadhna an déigh dhoibh teachd a mach a' tìr na h-Eiphit, ag ràdh,

2 Cumadh, mar an ceudna, clann Israeil a' chàisg 'na h-àm suidhichte féin.

3 Sa' cheathramh là deug do'n mhios so, air feasgar², cumaidh sibh i' na h-àm suidhichte féin, a réir a h-orduighean uile, agus a réir a deas-ghnàthan uile, cumaidh sibh i.

4 Agus labhair Maois ri cloinn Israeil, iad a chumail na càisge.

5 Agus chum iad a' chàisg air a' cheathramh là deug do'n cheud mhios air feasgar, ann am fàsach Shinai: a réir gach nì a dh'àithn an Tighearna do Mhaois, mar sin rinn clann Israeil.

6 Agus bha daoine àraidh a shalaicheadh le corp duine mhairbh, air chor as nach b'urrainn iad a' chàisg a chumail air an là sin; agus thàinig iad an làthair Mhaois, agus an làthair Aroin air an là sin.

7 Agus thubhairt na daoine sin ris, *Tha sinne air ar salachadh le corp duine mhairbh: c'ar son a chumar air ar n-ais sinn, a chum as nach feud sinn tabhartas an Tighearna a thoirt seachad 'na àm suidhichte féin ann measg chloinn Israeil?*

8 Agus thubhairt Maois riu, Seasaihb *an sin*, agus cluinidh mise ciod a dh'àithneas an Tighearna d'ur taobh.

9 Agus labhair an Tighearna ri Maois, ag ràdh,

10 Labhair ri cloinn Israeil, ag ràdh, Ma bhios duine sam bith dhihbh, no d'ur sliochd, air a shalachadh le corp marbh, no *ma bhios e* air thuras fad air astar, gidheadh cumaidh e a' chàisg do'n Tighearna.

11 Sa' cheathramh là deug do'n dara mios air feasgar cumaidh iad i: le h-aran neo-ghoirtichte, agus le *lusaibh* searbhaitidh iad i.

12 Cha 'n fhàg iad a bheag dhith gu maduinn, nì mò a bhriseas iad cnàimh dhith: a réir uile orduighean na càisge cumaidh iad i.

13 Ach an duine a *ta* glan, agus nach 'eil air thuras, agus a dhearmadas a' chàisg a chumail; gearrar eadhon an t-anam sin féin as o' shluagh, a chionn nach d'thug e seachad tabhartas an Tighearna 'na àm suidhichte: giùlainidh an duine sin a pheacadh.

14 Agus ma bhios coigreach air chuairt 'nur measg, agus gu'n cum e a' chàisg do'n Tighearna, a réir orduigh na càisge, agus a réir a gnàtha, mar sin nì e: bithidh aon ordugh agaibh araon air son a' choigrich, agus air a shon-san a rugadh san tìr.

15 Agus air an là anns an do thogadh suas am pàilliuin, chòmhdaich an neul am pàilliuin, *eadhon* bùth na Fianuis; agus

¹ dh'efrail.

² cadar an dà fheasgar. Eabh.

airfeasgar bha air a' phàillium mar gu'm bu choslas¹ teine gus a' mhaduinn.

16 Mar sin bha e ghnàth: chòmhaich an neul e *san là*, agus coslas teine san oidhche.

17 Agus an uair a thogadh an neul suas o'n phàillium, an sin gun dàil ghabh clann Israeil an turus: agus san ionad anns an do stad an neul, ann an sin champaich clann Israeil.

18 Air àithne an Tighearna ghabh clann Israeil an turus, agus air àithne an Tighearna champaich iad: am feadh 's a dh'fhan an neul, air a' phàillium, dh'fhan iad 'nam bùthaibh.

19 Agus an uair a dh'fhan an neul air a' phàillium mòran do làithibh, an sin ghléidh clann Israeil freasdal² an Tighearna, agus cha d'imich iad.

20 Agus an uair a bha an neul beagan do làithibh air a' phàillium, a réir àithne an Tighearna dh'fhan iad 'nam bùthaibh, agus a réir àithne an Tighearna ghabh iad an turus.

21 Agus an uair a dh'fhan an neul o fheasgar gu maduinn, agus a thogadh an neul suas sa' mhaduinn, an sin ghabh iad an turus: ma b'ann san là no san oidhch' a thogadh an neul suas, ghabh iad an turus.

22 No co *dhuibh a b'ann* dà là, no mìos, no bliadhna, dh'fhan an neul air a' phàillium, a' fuireach air, dh'fhan clann Israeil 'nam bùthaibh, agus cha d'imich iad: ach an uair a thogadh suas e, ghabh iad an turus³.

23 A réir àithne an Tighearna dh'fhan iad 'nam bùthaibh, agus a réir àithne an Tighearna ghabh iad an turus: ghléidh iad freasdal an Tighearna a réir àithne an Tighearna le làimh Mhaois.

CAIB. X.

1 Mar a ghnàthaicheadh na trompaidean. 33 Beannachadh Mhaois an uair a bha 'n àire gu dol air a h-aghaidh, agus an uair a stad i.

A GUS labhair an Tighearna ri Maois, ag ràdh,

2 Dean dhuìt féin dà thrompaid airgid; a dh'aon mhir ni thu iad; agus gnàthaichidh tu iad a ghairm a' choimhthionail, agus a chum turuis⁴ nan camp.

3 Agus an uair a shéideas iad leo, cruinnichidh an coimhthionail uile iad féin a t'ionnsuidh aig dorus pàillium a' choimhthionail.

4 Agus mur séid iad *ach* le h-aon *trompaid*, an sin cruinnichidh na ceannardan a ta 'nan cinn-fheadhna air mhìtibh Israeil, iad féin a t'ionnsuidh.

5 'Nuair a shéideas sibh caismeachd⁵,

an sin théid na campan a ta 'nan luidhe air taobh na h-àirde 'n ear air an aghaidh.

6 'Nuair a shéideas sibh caismeachd an dara uair, an sin théid na campan a ta 'nan luidhe air taobh na h-àirde deas air an aghaidh: séididh iad caismeachd a chum an turusan,

7 Ach an uair a tha 'n coimhthional gu bhi air a chruinneachadh an ceann a cléile, séididh sibh, ach cha séid sibh caismeachd.

8 Agus séididh mic Aaroin, na sagartan, leis na trompaidibh; agus bithidh iad dhuibh⁶ mar reachd siorruidh air feadh bhur ginealach.

9 Agus ma théid sibh gu cogadh 'nur dùthaich an aghaidh an nàmhaid a ta deanamh foirmeart oirbh, an sin séididh sibh caismeachd leis na trompaidibh; agus cuimhnichear sibh an làthair an Tighearna bhur Dé, agus saorar sibh o bhur naimh-dibh.

10 Mar an ceudna ann an là bhur subhachais, agus 'nur n-àrd làithibh féille, agus ann an toiseach bhur mìosan, séididh sibh leis na trompaidibh os ceann bhur n-ìobairte-loisgte, agus os ceann òbairte bhur tabhartasan-sìth; agus bithidh iad dhuibh mar chuimhneachan an làthair bhur Dé: *Is mise* an Tighearna bhur Dia.

11 Agus tharladh, air an fhicheadamh là do'n dara mìos, san dara bliadhna, gu'n do thogadh suas an neul o uachdar pàillium na Fianuis.

12 Agus ghabh clann Israeil an turusan á fàsach Shinai; agus stad an neul ann am fàsach Pharaìn.

13 Agus ghabh iad air tùs an turus, a réir àithne an Tighearna le làimh Mhaois.

14 Sa' cheud àite dh'imich bratach chaimp chloinn Iudah, a réir an armailtean; agus air ceann a shlòigh *bha* Nahson mac Amiudaidh.

15 Agus air ceann slòigh thréibh chloinn Isachair *bha* Nataneel mac Shuair.

16 Agus air ceann slòigh thréibh chloinn Shebuluin *bha* Eliab mac Heibon.

17 Agus thugadh a nuas am pàillium; agus chaidh mic Ghersoin, agus mic Mherari air an aghaidh, a' giùlan a' phàillium.

18 Agus ghluais bratach chaimp Reubein air a h-aghaidh, a réir an armailtean: agus air ceann a shlòigh *bha* Elisur mac Shedeuir.

19 Agus air ceann slòigh thréibh chloinn Shimeoin *bha* Selumiel mac Shurisadai.

20 Agus air ceann slòigh thréibh chloinn Ghad *bha* Eliasaph mac Dheueil.

21 Agus chaidh na Cohataich air an aghaidh, a' giùlan an ionaid naoimh, agus

¹ chosamhla.

² cùram, earbsadh.

³ thrìall iad.

⁴ gluasad.

⁵ cath-shluaim.

⁶ bithidh e dhuibh.

chuireadh suas am pàillium air cheann doibh teachd.

22 Agus ghluais bratach chaimp chloinn Ephraim air a h-aghaidh, a réir an armailtean: agus air ceann a shlòigh *bha* Elisama mac Amihuid.

23 Agus air ceann slòigh thréibh chloinn Mhanaseh *bha* Gamaliel mac Phedahsuir.

24 Agus air ceann slòigh thréibh chloinn Bheniamin *bha* Abidan mac Ghideon.

25 Agus chaidh bratach thréibh chloinn Dhan air a h-aghaidh, *a bha* air deireadh nan camp uile air feadh an slòigh: agus air ceann a shlòigh *bha* Ahieser unac Amisadai.

26 Agus air ceann slòigh thréibh chloinn Aseir *bha* Pagiel mac Ocrain.

27 Agus air ceann slòigh thréibh chloinn Naphtali *bha* Ahira mac Enai.

28 *B'* iad sin turusan chloinn Israeil, a réir an armailtean, 'nuair a ghluais iad air an aghaidh.

29 Agus thubhairt Maois ri Hobab, mac Raguel a' Mhidianaich, athar-céile Mhaois, Tha sinn air ar turus a chum an àite mu'n dubhairt Dia, Bheir mi dhuibh e: thig thusa maille rinn, agus ni sinn maith dhuit; oir labhair an Tighearna maith a thaobh Israeil.

30 Agus thubhairt e ris, Cha téid mi maille ribh; ach imichidh mi chum mo dhùthcha féin, agus a chum mo dhilsean¹ féin.

31 Agus thubhairt e, Na fàgsinn, guidheam ort; oir tha fhios agad cionnus a champaicheas sinn anns an fhàsach, agus bithidh tu dhuinn an àite shùl².

32 Agus tarlaidh, ma théid thu maille rinn, seadh, tarlaidh, ge b'e maith a ni Dia dhuinne, gu'n dean sinne am maith ceudna dhuitse.

33 Agus dh'imich iad oshliabh³ an Tighearna astar thri làithean: agus chaidh àire coimhcheangail an Tighearna rompa astar thri làithean, a rannsachadh a mach àite-tàimh dhoibh.

34 Agus *bha* neul an Tighearna orra san là, 'nuair a chaidh iad a mach as a' champ.

35 Agus tharladh, 'nuair a bha 'n àire gu dol air a h-aghaidh, gu'n dubhairt Maois, Eirich suas, a Tighearna, agus biodh do naimhdean air an sgapadh, agus teicheadh a' mhuinntir leis am fuathach thu romhad.

36 Agus an uair a stad i, thubhairt e, Pill, a Tighearna, chum nam mìlte⁴ do mhùltibh Israeil.

CAIB. XI.

4 *Tha'n sluagh a' talach nach robh aca ach am mana mar bhiaidh.* 16 *Tha trì fichead 'sa deich seanair air an orduchadh gu bhli 'nan luchd-*

¹ mo chinnich. ² cionnus a champaich sinn anns an fhàsach, agus bha thu dhuinne an àite shùl. ³ bheinn. ⁴ nan deich mìlte. Eabh. ⁵ mhùchaidh. ⁶ miann. ⁷ an sluagh measgta.

riaghlaidh os an ceann. 34 *Gearra-goirt air an tabhairt dhoibh am feirg.*

A GUS an uair a rinn an sluagh gearan, mhi-thaitim e ris an Tighearna: agus chual' an Tighearna e; agus las 'fhearg; agus loisg teine an Tighearna 'nam measg, agus chuir e as doibhsan a bha 'n iomall a' chaimp:

2 Agus ghlaodh an sluagh ri Maois: agus an uair a rinn Maois urnuigh ris an Tighearna, choisgeadh⁵ an teine.

3 Agus thug e Taberah mar ainm air an àite sin; a chionn gu'n do loisg teine an Tighearna 'nam measg.

4 Agus ghlac ciocras⁶ an cumasg sluaigh⁷ a bha 'nam measg: agus ghuil mar an ceudna clann Israeil a ris, agus thubhairt iad, Cò bheir dhuinn feoil r'a h-iththead?

5 Is cuimhne leimn an t-iasg a dh'ith sinn san Eiphit gu saor⁸; na cularain⁹, agus na mealbhucan¹⁰, agus na léicis, agus na h-uimeinean, agus an creamh¹¹:

6 Ach a nis *tha* ar n-anam air tiormachadh; cha' n'eil ni air bith againn; ach am mana so, 'nar sealladh.

7 Agus bha am mana cosmluil ri frois coriandeir, agus a dhath mar dhath bdellium.

8 Chaidh an sluagh mu'n cuairt, agus thionail iad e agus mheil¹² iad e ann am muilnibh, no phronn iad e ann am mort-air¹³, agus bhruich iad e ann an aighnibh, agus rinn iad breacagan detli: agus bha 'bhlas mar bhlas olaidh ùir.

9 Agus an uair a thuit an drùchd¹⁴ air a' champ san oidheche, thuit am mana air.

10 An sin chuala Maois an sluagh a' gul air feadh an teaghlailichean, gach duine ann an dorus a bhùthia: agus las fearg an Tighearna gu mòr; bha Maois mar an ceudna diomach¹⁵.

11 Agus thubhairt Maois ris an Tighearna, C'ar son a bhùin thu gu h-olc ri d' sheirbhiseach? agus c'ar son nach d'fhuair mi deadh-ghean¹⁶ a d' shealladh, gu'n do leag thu eireadh¹⁷ an t-sluaigh so uile orm?

12 Am mise a ghin an sluagh so uile? an ann domh a rugadh iad, gu'n abradh tu rium, Giùlain a d' uchd iad (mar a ghiùl-aineas oid'-altruim leannabh na cìche) chum an fhearainn a mhionnaich thu d'an aithrichibh?

13 Cìo as a gheibhinn-sa feoil gu tabhairt do'n t-sluagh so uile? oir tha iad a' gul rium, ag ràdh, Thoir dhuinn feoil, a chum as gu'n ith sinn?

14 Cla'n urrainn mise cudthrom an t-sluaigh so uile a ghiùlan a'm' aonar, a chionn gu bheil e ro thruam air mo shon.

⁸ a nasgaidh. ⁹ cucumbers. Sasg. ¹⁰ melons. Sasg. ¹¹ garlick. Sasg. ¹² bhleath. ¹³ bràth-spiòraidh. ¹⁴ drùchd. ¹⁵ diom-buidheach. ¹⁶ fàbhor. ¹⁷ callach, cudthrom.

15 Agus ma blùineas tu rium mar so, marbh mi, guidheam ort, as an làimh, ma fhuair mi deadh-ghean, a'd' shealladh; agus na faiceam mo thruaighe.

16 Agus thubhairt an Tighearna ri Maois, Cruinnich dìomhsa deich agus tri fichead fear do sheanairibh Israeil, muinntir a's aithne dhuit a bhi 'nan seanairibh an t-sluaigh, agus 'nan luchd-riaghlaidh os an ceann; agus thoir iad gu pàillion a' choimhthionail, chum gu'n seas iad an sin maille riut.

17 Agus thig mise nuas agus labhraidh mi riut an sin: agus gabhaidh mi do'n spiorad a ta ortsa, agus cuiridh mi orra-san e; agus giùlainidh iad eallach an t-sluaigh maille riut, a chum as nach giùlain thu féin e a'd' aonar.

18 Agus abair ris an t-sluaigh, Naomhaichibh sibh féin air cheann an là maireach, agus ithidh sibh feoil (oir ghuil sibh ann an éisdeachd¹ an Tighearn, ag ràdh, Cò bheir dhuinn feoil r'a h-itheadh? oir bu mhaith ar cor san Eiphit) uime sin bheir an Tighearna feoil dhuibh, agus ithidh sibh.

19 Cha'n ith sibh aon là, no dà là, no cùig làithean, no deich làithean, no fichead là,

20 Ach eadhon mìos iomlan, gus an tig i mach á cuinneibh bhur sròn, agus gu'm bi i gràineil duibh; a chionn gu'n d'rinn sibh tair air an Tighearna a ta 'nur measg, agus gu'n do ghuil sibh 'na làthair, ag ràdh, C'ar son a thàinig sinn a mach as an Eiphit?

21 Agus thubhairt Maois, Tha'n sluagh am measg am bheil mise, 'nan sè ceud mìle coisiche; agus thubhairt thu, Bheir mi dhoibh feoil, chum gu'n ith iad rè mìosa iomlain:

22 Am marbhar na caoraich agus am buar dhoibh, chum an sàsachadh? no an cruinnichear iasg na mara uile r'a chéile dhoibh, chum an sàsachadh.

23 Agus thubhairt an Tighearna ri Maois, Am bheil làmh an Tighearn air fàs goirid? chi thusa nis an tig no nach tig m'fhocal gu crìch dhuit.

24 Agus chaidh Maois a mach, agus dh'innis e do'n t-sluaigh focail an Tighearn, agus chruinnich e an deich agus an tri fichead do sheanairibh an t-sluaigh, agus thug e orra seasamh mu thimchioll a' phàilliuin.

25 Agus thàinig an Tighearna a nuas ann an neul, agus labhair e ris, agus ghabh e do'n spiorad a bha air, agus thug se e do'n deich agus an tri fichead seanair: agus tharladh, an uair a ghabh an spiorad còmhnuidh orra, gu'n d'rinn iad fàidheadaireachd, agus nach do sguir iad².

26 Ach dh'fhan dithis do na daoineibh sa' champ; b'e ainm aoin diubh Eldad, agus ainm an fhir eile Medad: agus ghabh an spiorad còmhnuidh orra, (agus bha iad dhiubhsan a chaidh a sgrìobhadh, ach cha deachaidh iad a mach do'n phàillion) agus rinn iad fàidheadaireachd sa' champ.

27 Agus ruith òganaich, agus dh'innis e do Mhaois, agus thubhairt e, Tha Eldad agus Medad ri fàidheadaireachd sa' champ.

28 Agus fhreagair Iosua mac Nuin, seirbhis each Mhaois, aon d'a òganaich, agus thubhairt e, Mo thighearn, a Mhaois, bac iad.

29 Agus thubhairt Maois ris, Am bheil farmad ort air mo shon-sa? Is e mo ghuidhe ri Dia gu'm biodh sluagh an Tighearn uile 'nam fàidhibh, agus gu'n cuireadh an Tighearn a spiorad orra!

30 Agus chaidh Maois do'n champ, e féin agus seanairean Israeil.

31 Agus chaidh gaoth a mach o'n Tighearn, agus thug i gearra-goirt³ o'n fhaire, agus leig i leo tuiteam làimh ris a' champ, mar astar là air an taobh so, agus mar astar là air an taobh eile, mu'n cuairt air a' champ, agus mar dhà làimh-choille air àirde, air aghaidh na talmhainn.

32 Agus sheas an sluagh suas air an là sin uile, agus air an oidhche sin uile, agus air an là a b'fhaisge uile, agus thionail na gearra-goirt: esan bu lugha a thionail, thionail e deich homeir, agus sgaoil iad gu farsuing doibh féin iad mu thimchioll a' chaimp.

33 'Nuair a bha 'n fheoil fathast eadar am fiacra, mun do chagnadh i, las fearg an Tighearn an aghaidh an t-sluaigh, agus bhuail an Tighearn an sluagh le plàigh ro mhòir.

34 Agus thug e Cìbrot-hataabhah mar ainm air an àite sin; a chionn ann an sin gu'n d'adhlaic iadan sluaga a mhiannaich.

35 Agus dh'imich an sluagh o Chìbrot-hataabhah gu Haserot: agus dh'fhan iad ann an Haserot.

CAIB. XII.

1 Ceannaire Mhìriam agus Aaron an aghaidh Mhaois air a cronachadh. 10 Luibhre Mhìriam.

AGUS labhair Miriam agus Aaron an aghaidh Mhaois air son na mnà o Etiopia, a phòs e: oir bha e air pòsadh mnà o Etiopia.

2 Agus thubhairt iad, An do labhair an Tighearna da rìreadh le Maois a mhàn? nach do labhair e mar an ceudna leinne? agus chual' an Tighearn e.

3 (A nis bha 'n duine Maois ro chiùin⁴, thar nan uile dhaoine a bha air aghaidh na talmhainn.)

¹ ann an eluasaidh. Eabh.

² nach d'rinn ni

b'fhaide.

³ quails. Sasg.

⁴ ro shèimh.

4 Agus labhair an Tighearna gu grad ri Maois, agus ri h-Aaron, agus ri Miriam, Thigibh a mach sibhse 'nur triuir gu pàilliuin a' choimhthionail. Agus thàinig iad 'nan triuir a mach.

5 Agus thàinig an Tighearna nuas ann am meall neoil, agus sheas e ann an dorus a' phàilliuin, agus ghairm e air Aaron agus Miriam: agus thàinig iad le chèile mach.

6 Agus thubhairt e, Eisdibh a nis ri m' bhriathraibh-sa: Ma tha fàidh 'nur measg, ni mise an Tighearna mi féin aithnichte dha ann an taisbeanadh¹, agus labhraidh mi ris ann am brudar.

7 Cha 'n 'eil mo sheirbhiseach Maois mar sin, a tha firinneach² ann am thigh uile.

8 Beul ri beul labhraidh mi ris-sau, eadhon gu soilleir, agus cha 'n ann am briathraibh dorch, agus chi c coslas an Tighearna: c'ar son ma ta nach robh eagall oirbh labhairt an aghaidh mo sheirbhisich Mhaois?

9 Agus las fearg an Tighearna 'nan aghaidh, agus dh'fhalbh c.

10 Agus dh'fhalbh an neul bhàrr a' phàilliuin, agus, feuch, rinneadh Miriam na lobhar, geal mar shneachda: agus dh'ambairc Aaron air Miriam, agus, feuch, bha i 'na lobhar.

11 Agus thubhairt Aaron ri Maois, Och! mo thighearna, guidheam ort, na cuir am peacadh as ar leth³, leis an d'rinn sinn gu h-amaideach, agus leis an do pheacaich sinn.

12 Na biodh i mar aon marbh, d'am bheil an fheoil air a leth-chaitheamh, 'nuair a thig e mach à broinn a mhàthar.

13 Agus ghlaodh Maois ris an Tighearn, ag ràdh, Leighis i nis, O Dhé, guidheam ort.

14 Agus thubhairt an Tighearna ri Maois, Nan tilgeadh a h-athair ach smugaid 'na h-eudan, nach bu chòir dh'i bhi fo nàire seachd làithean? druidear a mach o'n champ i rè sheachd làithean, agus 'na dhéigh sin gabhar a steach i ris.

15 Agus dhruideadh Miriam a mach o'n champ seachd làithean: agus cha do ghabh an sluagh an turus, gus an d'thugadh Miriam a steach a ris.

16 Agus 'na dhéigh sin dh'imich an sluagh o Haserot, agus champaich iad ann am fasach Pharaìn.

CAIB. XIII.

1 Luchd-rannsachaidh tìre Chanaain. 17 Seòlannu air an tabhairt dhoibh. 21 Na rinn iad: 26 an aithris.

AGUS labhair an Tighearna ri Maois, ag ràdh,

2 Cuir daoine uait, a chum gu'n ranns-

aich iad tìr Chanaain, a bheir mise do chloinn Israeil; as gach uile thréibh d'an aithrichibh cuiridh sibh duine, gach aon *diubh* 'na cheannard 'nan measg.

3 Agus cluir Maois iad o fhàsach Pharaìn, a réir àithne an Tighearna: bu cheannardan na daoine sin uile air cloinn Israeil.

4 Agus is iad so an ainmeanna: Do thréibh Reubein, Samua mac Shacuir.

5 Do thréibh Shimeoin, Saphat mac Hori.

6 Do thréibh Iudah, Caleb mac Iephuneh.

7 Do thréibh Isachair, Igal mac Ioseph.

8 Do thréibh Ephraim, Hosea mac Nuin.

9 Do thréibh Bheniamin, Palti mac Raphu.

10 Do thréibh Shebuluìn, Gadìel mac Shodi.

11 Do thréibh Ioseph, eadhon, do thréibh Mhanaseh, Gadì mac Shusi.

12 Do thréibh Dhau, Amiel mac Ghecmali.

13 Do thréibh Aseir, Setur mac Mhi-chaeil.

14 Do thréibh Naphtali, Nahbi mac Uopsi.

15 Do thréibh Ghad, Geuel mac Mhachi.

16 Is iad sin ainmeanna nan daoine a chuir Maois a ghabhail beachd air an fhearann: Agus thug Maois Iehosua mar ainm air Hosea, mac Nuin.

17 Agus chuir Maois iad a ghabhail beachd air talamh Chanaain, agus thubhairt e riu, Rachaibh suas *san t-slighe* so mu dheas, agus gabhaibh suas a chum na beinne;

18 Agus faicibh am fearann, ciod e, agus an sluagh a ta 'nan còmhnuidh ann, am *bheil* iad làidir no amhunn, tearc no lìonmhor;

19 Agus ciod e am fearann anns am bheil iad a chòmhnuidh, am *bheil* e maith no olc; agus ciod iad na bailtean anns am *bheil* iad 'nan còmhnuidh, an ann am bùthaibh, no ann an daingneachaibh⁴ làidir;

20 Agus ciod e an talamh⁵, am *bheil* e reamhar no bochd⁶, am bheil coille ann no nach 'eil. Agus biodh agaibh deadh mhisneach, agus thugaibh leibh do thoradh an fhearainn. (A nis b'e 'n t-àm nan ceud dhearca-fìona abuibh).

21 Mar sin chaidh iad suas, agus ranns-aich iad am fearann o fhàsach Shìn gu Rehob, mar a thèid daoine gu Hamat.

22 Agus chaidh iad suas mu dheas, agus thàinig iad gu Hebron, far an robh Ahiman, Sesai, agus Talmái, mic Anaic. (A nis thogadh Hebron seachd bliadhna roimh Shoaìn san Eiphit.)

23 Agus thàinig iad gu sruth⁷ Escoil,

¹ foillseachadh, taibhse. ² tairis, àileas.

³ na leig, na càirich am peacadh oirnn.

⁴ àitibh daingnichte.

⁶ truagh, caol

⁵ fonn, fearann.

⁷ srath, gleann.

agus ghearr iad sìos as a sin geug le aon bhagaide fhlion-dhearc, agus ghiùlain iad i eadar dhithis air luing: agus *thug iad* leo do na pomgranataibh, agus do na figibh.

24 Thugadh sruth Escoil mar ainm air an àite sin, air son a' bhagaide fhlion-dhearc an ghearr clann Israeil sìos as a sin.

25 Agus plùill iad o rannsachadh an fhearainn an déigh dhà fhichead là.

26 Agus dlh'imich iad, agus thàinig iad gu Maois, agus gu h-Aaron, agus gu comhchruinneach chloinn Israeil uile, gu fàsach Pharain, gu Cades; agus thug iad leo fios d'an ionnsuidh, agus a dh'ionnsuidh a' chomhchruinnich uile, agus dh'fheuch iad dhoibh toradh na tìre.

27 Agus dlh'innis iad dha, agus thubhairt iad, Thàinig sinne a dh'ionnsuidh an fhearainn gus an do chuir thu sinn, agus gu deimhin tha e a' sruthadh le bainne agus le mil; agus *is e* so a thoradh.

28 Gidheadh, *tha 'n* sluagh làidir a tha 'nan còmhnuidh san fhearann, agus *tha* na bailtean air an cuairteachadh le ball-achaibh, agus ro mhòr: agus os bàrr, chunnaic sinn clann Anaic an sin.

29 Tha na h-Amaleich 'nan còmhnuidh am fearann na h-àirde deas; agus *tha* na Hitich, agus na Iebusach, agus na h-Amoraich, 'nan còmhnuidh sna beanntaibh; agus *tha* na Cananaich 'nan còmhnuidh làimh ris an fhairste, agus ri taobh Iordain.

30 Agus chiùinich² Caleb an sluagh an làthair Mhaois, agus thubhairt e, Rachamaid suas a dh'aon fheachd, agus sealbhaicheamaid e; oir is urrainn sinn gu cinnteach a cheannsachadh³.

31 Ach thubhairt na daoine a chaidh suas maille ris, Cha 'n urrainn sinn dol suas an aghaidh an t-sluaigh; oir *is* treise iad na sinne.

32 Agus thug iad droch sgeul⁴ air an fhearann a rannsaich iad gu cloinn Israeil, ag ràdh, Am fearann troimh 'n deachaidh sinne g'a rannsachadh, *is* fearann e a tha 'g itheadh suas a luchd-àiteachaidh, agus an sluagh uile a chunnaic sinn ann, *is* daoine iad do mheudachd mhòir⁵.

33 Agus chunnaic sinn na fahairean⁶ an sin, mic Anaic, a thàinig o na fahairean; agus bha sinne 'nar sealladh fèin mar fhionnain-feoir⁷, agus bha sinn mar sin 'nan sealladh-san.

CAIB. XIV.

¹ Tha 'n sluagh ri gearan 'nuair a chual' iad aithris an luchd-rannsaichidh. 29 Chronaich an Tighearn iad.

AGUS thog an comhchruinneach uile suas an guth, agus ghlaodh iad; agus

ghuil an sluagh air an oidhche sin.

2 Agus rium clann Israeil uile gearan an aghaidh Mhaois, agus an aghaidh Aaron; agus thubhairt an comhchruinneach uile riu, Och nach d'fhuair sinn bàs ann an tìr na h-Eiphit, no nach d'fhuair sinn bàs ann an fhàsach so!

3 Agus c'ar son a thug an Tighearna sinn do'n fhearann so, a thuiteam leis a' chlaidheamh, a chum gu'm biodh ar nnaì agus ar clann bheag 'nan cobhart-aich⁸? nach b'fhearr dhuinn pillinn do'n Eiphit?

4 Agus thubhairt iad gach fear r'a chéile⁹, Deanamaid dhuinn fèin ceannard, agus pilleamaid do'n Eiphit.

5 An sin thuit Maois agus Aaron air an aghaidh an làthair coimhthionail comhchruinnich chloinn Israeil uile.

6 Agus reub Iosua mac Nuin, agus Caleb mac Iephuneh, a bha dhiubhsan a rannsaich am fearann, an eudach.

7 Agus labhair iad ri cuideachd chloinn Israeil uile, ag ràdh, Am fearann a chaidh sinne troimhe g'a rannsachadh, *is* fearann ro mhaith e.

8 Ma tha tlachd aig an Tighearn annainn, an sin bheir e sinn a dh'ionnsuidh an fhearainn so, agus bheir e dhuinn e; fearann a tha sruthadh le mil agus le bainne.

9 A mhàin na deanaibh ceannairc¹⁰ an aghaidh an Tighearn, agus na biodh eagall sluaigh an fhearainn oirbh; oir *is* aran duinn iad: dh'fhalbh an dìon uatha, agus *tha 'n* Tighearna maille ruinne; na biodh eagall oirbh rompa.

10 Ach dlh'iarr an comhchruinneach uile an clachadh le clachaibh. Agus dh'fhoillsichadh glòir an Tighearn ann am pàillinn a' choimhthionail, an làthair chloinn Israeil uile.

11 Agus thubhairt an Tighearna ri Maois, Cia fhad a bhrosnaicheas an sluagh so mi? agus cia fhad a bhitheas e mun creid iad mi, air son nan comharan uile a nochd¹¹ mi 'nam measg?

12 Buailidh mi iad leis a' phlàigh, agus fògraiddh mi iad¹², agus ni mi thusa a'd' chinneach ni's mò, agus ni's cumhachdaiche na iadsan.

13 Agus thubhairt Maois ris an Tighearn, An sin cluinidh na h-Eiphitich e, (oir thug thusa nìs an sluagh so le d'chumhachd o bhi 'nam measg¹³.)

14 Agus innsidh iad e do luchd-àiteachaidh an fhearainn so: oirchual' iad gu bheil thusa, a Tighearn, am measg an t-sluaigh so; gu bheil thusa, a Tighearn, air t-fhaic-

¹ nochd. ² shìthich, chaisg. ³ oir gu cinnteach buadhaichidh sinn air. ⁴ tuairesgeul. ⁵ daoine garbha, mòr 'nam pearsa. ⁶ h-athaich. ⁷ leumnaich-uaine. ⁸ 'nan creich.

⁹ r'a bhràthair. Eabh. ¹⁰ ar a mach. ¹¹ rinn. Eabh. ¹² arfuntaichidh mi iad; bheir mi an oighreachd dhiubh. Eabh. ¹³ as meadhan an d' thug thu nìs an sluagh so le d' chumhachd.

inn aghaidh ri h-aghaidh; agus *gu bheil* do neul a' seasamh os an ceann; agus *gu bheil* thu ag imeachd rompa, ann am meall neoil san là, agus ann am meall teine san oidhche.

15 A nis, *ma* mharbhas tu an sluagh so *uile* mar aon duine, an sin labhairidh na cinnich a chual¹ iomradh ort, ag ràdh,

16 A chionn nach b'urrainn an Tighearn an sluagh so thoirt do'n fhearann a mhionnaich e dhoibh, uime sin mharbh e iad san fhàsach.

17 Agus a nis, guidheam ort, biodh cumhachd mo Thighearna mòr, a réir mar a labhair thu, ag ràdh,

18 *Tha* 'n Tighearna fad-fhulangach, agus mòr-thròcaireach, a' toirt maithheanas ann an aingidheachd, agus *ann an* eusaontas, agus air chor sam bith nach saor¹ *an ciontach*; a' leantuinn aingidheachd nan aithriche air a' chloinn, air an treas, agus air a' cheathramh *ginealach*.

19 Maith, guidheam ort, aingidheachd an t-sluaigh so, a réir meud do thròcair, agus a réir mar a thug thu maithheanas do'n t-sluagh so o'n Eiphit gus a nis.

20 Agus thubhairt an Tighearna, Mhaith mi, a réir t'fhocail:

21 Ach co fhìor 's a ta mi beò, lìonar an talamh uile le glòir an Tighearn.

22 Oir na daoine sin uile a chunnaic mo ghlòir, agus mo chomharan² a rinn mi san Eiphit, agus anns an fhàsach, agus a bhuair mi nis na deich uairean so, agus nach d'éisd ri m' ghluith;

23 Gu cinnteach cha'n fhaic iadsan am fearann a mhionnaich mi d'an aithrichibh, ni mò a chi neach air bith dhiubhsan a broснаich mi e:

24 Ach mo sheirbhiseach Caleb, a chionn gu'n robh aige-san spiorad eile maille ris, agus gu'n do lean e mi gu h-iomlan, esan bheir mi do'n fhearann d'a chaidh e; agus sealbhaichidh a shliochd e.

25 (A nis bha na h-Amalecich, agus na Cananaich 'nan còmhnuidh sa' ghleann.) Am màireach pillibh, agus rachaibh do'n fhàsach, air slighe na mara ruaidhe.

26 Agus labhair an Tighearna ri Maois, agus ri h-Aaron, ag ràdh,

27 Cia fhad a *ghlùlaineas* mi leis an droch chomhchruinneach so, a *tha* ri gearan a'm' aghaidh? chuala mi gearain chloinn Israeil; leis *am bheil* iad ri gearan a'm' aghaidh.

28 Abair riu, Co fhìor 's a ta mi beò, ars'an Tighearna, mar a' abhair sibh a'm' éisdeachd³, mar sin ni mi ribh.

29 San fhàsach so tuitidh bhur colannan: agus a' mheud 's a chaidh àireamh dhiubh, a réir bhur n-àireimh iomlain, o fhichead

bliadhna dh'aois agus os a cheann, a rinn gearan a'm' aghaidh,

30 Gun amharus sam bith cha tig sibh a steach do'n fhearann a mhiomaich mise gu'n tugainn oirbh còmhnuidh a ghabhail ann, saor o Chaleb mac Iephuneh, agus Iosua mac Nuin.

31 Ach bhur clann bheag, a thubhairt sibh a bhiodh 'nan cobhartaich, iadsan bheir mi steach, agus gabhaidh iad eòlas air an fhearann air an d'rinn sibhse tàir.

32 Agus air bhur son-sa dheth, tuitidh bhur colannan⁴ anns an fhàsach so.

33 Agus bithidh bhur clann air seacharan san fhàsach dà fhichead bliadhna, agus giùlainidh iad bhur strìopachais, gus an caithear bhur colannan san fhàsach.

34 A réir àireimh nan làithean anns an do rannsaich sibh am fearann, *eadhon* dà fhichead là, (gach là air son bliadhna) giùlainidh sibh bhur n-euceartan, eadhon dà fhichead bliadhna, agus bithidh fios agaibh air mo bhriseadh-geallaidh-sa.

35 Thubhairt mise an Tighearn *e*, agus gu cinnteach ni mi e do'n chomhchruinneach olc so uile, a chruinnich a'm' aghaidh. anns an fhàsach so claidhear iad, agus an sin gheibh iad bàs.

36 Agus na daoine a chuir Maois a rannsachadh an fhearainn, a phill, agus a thug air a' chomhchruinneach uile gearan a dheanamh 'na aghaidh, le droch sgeul⁵ a thoirt seachad air an fhearann,

37 Fluair eadhon na daoine sin, a thug seachad droch sgeul air an fhearann, bàs leis a' phlàigh an làthair an Tighearn.

38 Ach do na daoineibh sin a chaidh a rannsachadh an fhearainn, mhair Iosua mac Nuin, agus Caleb mac Iephuneh beò.

39 Agus dh'innis Maois na briathra sin do chloinn Israeil uile: agus rinn an sluagh caoidh mhòr.

40 Agus dh'éirich iad gu moch sa' mhaduinn, agus chaidh iad suas⁶ gu mullach an t-sléibh, ag ràdh, Feuch, *tha* sinne *an so*, agus theid sinn suas do'n àit a gheall an Tighearn; oir pheacaich sinn.

41 Agus thubhairt Maois, C'ar son a nis a tha sibh a' breisadh àithne an Tighearn? ach cha soirblich *an nì so leibh*.

42 Na rachaibh suas, oir *cha 'n 'eil* an Tighearna 'nur measg; a chum as nach buaillear sibh an làthair bhur naimhde.

43 Oir *tha* na h-Amalecich agus na Cananaich an sin roimhibh, agus tuitidh sibh leis a' chladhreamh: a chionn gu'n do chlaon sibh o'n Tighearn, uime sin cha bhi an Tighearna maille ribh.

44 Ach ghabh iad do dhàndas orra dol suas gu mullach an t-sléibh: gidheadh

¹ glan.

² mo mhiorbhuilean

³ a'm' chluasaibh. Eabh.

⁴ cuirp mharbha, ciosaichean.

⁵ tuailcas.

⁶ b'aill leo dol suas.

cha deachaidh àire coimhcheangail an Tighearna, no Maois, a mach as a' champ.

45 An sin thàinig na h-Amaleicich a nuas, agus na Canaanach, a bha 'nan còmhnuidh san t-sliabh sin, agus bhuail siad iad, agus chuir iad an ruaig orra, eadhon gu Hormah.

CAIB. XV.

1 *Lagh tabhartasan àraidh.* 32 *Chlachadh gu bàs fear-brisidh na sàbaid.*

AGUS labhair an Tighearna ri Maois, ag ràdh,

2 Labhair ri cloinn Israeil, agus abair riu, 'Nuair a thig sibh a chum fearainn bhur n-àiteacha còmhnuidh, a tha mise a' tabhairt dhuibh,

3 Agus a bheir sibh suas tabhartas le teine do'n Tighearna, tabhartas-loisgte no ìobairt, gu bòid a choimhlionadh, no mar thabhartas saor-thoile, no 'nur u-àrd fhéillibh¹, a dheanamh faile chùbhraidh do'n Tighearna, do'n spréidh no do'n treud.

4 An sin bheir esan a bheir seachad a thabhartas do'n Tighearna, seachad tabhartas-bidh do'n deicheamh cuid do phlùr, measgta maille ris a' cheathramh cuid do hin olaidh.

5 Agus bheir thu seachad² an ceathramh cuid do hin fìona mar thabhartas-dibhe, maille ris an tabhartas-loisgte no'n ìobairt, air son aon uain.

6 No air son reithe, bheir thu seachad mar thabhartas bidh, dà dheicheamh cuid do phlùr, measgta leis an treas cuid do hin olaidh.

7 Agus a chum tabhartais-dibhe, bheir thu seachad an treas cuid do hin fìona, chum faile chùbhraidh do'n Tighearna.

8 Agus an uair a bheir thu seachad tarbh òg mar ìobairt-loisgte, no mar ìobairt gu bòid a choimhlionadh, no mar ìobairt-shith do'n Tighearna,

9 An sin bheir³ maille ris an tarbh òg, tabhartas-bidh do thri deich codaichibh do phlùr, measgta le leth hin olaidh.

10 Agus bheir thu seachad a chum tabhartais-dibhe leth hin fìona, chum tabhartais a bheir suas le teine, dh'fhàile cùbhraidh do'n Tighearna.

11 Mar so nìhear air son aon tairbh, no air son aon reithe, no air son uain, no minn.

12 A réir au àireimh a bheir sibh seachad, mar siu ni sibh do gach aon, a réir an àireimh.

13 Gach neach a rugadh san dùthaich, ni e na nìthe sin air a' mhodh so, anu an tabhartas a thoirt seachad a bheir suas le teine, dh'fhàile cùbhraidh do'n Tighearna.

14 Agus ma bhios coigreach air chuairt maille ribh, no cò air bith e bhios 'nur measg 'nur ginealachaihbh, agus gu'n toir

e seachad tabhartas a bheir suas le teine, dh'fhàile cùbhraidh do'n Tighearna; mar a ni sibhse, mar sin ni esan.

15 *Bithidh* aon reachd dhuibhse a ta do'n chomhchruinneach, agus mar an ceudna do'n choigreach a ta air chuairt maille ribh, reachd sìorruidh 'nur ginealachaihbh: mar a ta sibhse, mar sin bithidh an coigreach an làthair an Tighearna.

16 Aon lagh, agus aon mhodh, bithidh agaibhse, agus aig a' choigreach a ta air chuairt maille ribh.

17 Agus labhair an Tighearna ri Maois, ag ràdh,

18 Labhair ri cloinn Israeil, agus abair riu, 'Nuair a théid sibh a steach do'n fhearann d'am bheil mise 'gur tabhairt,

19 An sin tarlaidh, 'nuair a dh'itheas sibh a dh'aran an fhearainn, gu'n toir sibh suas tabhartas-togta do'n Tighearna.

20 Bheir sibh suas breacag do'n cheud chuid d'ur taois, mar thabhartas-togta; mar a thogas sibh tabhartas-togta an urlair-bhualaidh, mar sin togaidh sibh i.

21 Do'n cheud chuid d'ur taois bheir sibh do'n Tighearna tabhartas-togta, 'nur ginealachaihbh.

22 Agus ma rinn sibh mearachd, agus nach do ghléidh⁴ sibh na h-àiteanta sin uile a labhair an Tighearna ri Maois,

23 Eadhon gach ni a dh'àithn an Tighearna dhuibh le làimh Mhaois, o'n là sin anns an d'thug an Tighearna àithne do Mhaois, agus o sin suas air feadh bhur ginealacha;

24 An sin tarlaidh, ma rinneadh ni sam bith ann an aineolas, gun fhios do'n chomhchruinneach, gu'n toir an comhchruinneach uile seachad aon tarbh òg a chum ìobairt-loisgte, chum faile chùbhraidh do'n Tighearna, maille r'a thabhartas-bidh, agus a thabhartas-dibhe, a réir a' ghnàtha, agus aon mheann dona gabhraibh chum ìobairt-pheacaidh.

25 Agus ni an sagart réite air son comhchruinnich chloinn Israeil uile, agus maithhear dhoibh e, oir is aineolas a t'ann: agus bheir iad leo an tabhartas, ìobairt a bheir suas le teine do'n Tighearna, agus an ìobairt-pheacaidh an làthair an Tighearna, air son an aineolais.

26 Agus maithhear e do chomhchruinneach chloinn Israeil uile, agus do'n choigreach a ta air chuairt 'nam measg; do bhrìgh, gu'n robh an sluagh uile ann an aineolas.

27 Agus ma pheacaicheas anam sam bith trid aineolais, an sin bheir e leis gabhar do'n cheud bhliadhna chum ìobairt-pheacaidh.

28 Agus ni an sagart réite air son an anama a pheacaichas gu h-aineolach, an

¹ fhéisdibh sònruichte.

² ulluichidh tu, ni

thu. Eabh.

³ bheir e. Eabh.

⁴ rinn. Eabh.

uair a pheacaicheas e le h-aineolas an làthair an Tighearn, a dheanamh réite air a shon; agus maithear dha e.

29 Bithidh aon lagh agaibh air a shonsan a pheacaicheas tríd aineolais, *araon air* a shonsan a rugadh am measg chloinn Israeil, agus air son a' choigrich a ta air chuairt 'nam measg.

30 Ach an t-anam a ni bheag gu h-andana¹, (*co dhiubh* a rugadh e san tìr, no's coigreach e) tha esan a' toirt easuraim do'n Tighearn; agus gearrar an t-anam sin as o mheasg a shluaigh.

31 Do bhrìgh gu'n d'rinne e tàir air focal an Tighearn, agus gu'n do bhris e 'àithne, gearrar an t-anam sin as gu tur: *bithidh* 'aingidheachd air féin.

32 Agus an uair a bha clann Israeil san fhàsach, fhuair iad duine a' tional mhaid-ean² air là na sàbaid.

33 Agus thug iadsan a fhuair e a' tional mhaidean a dh'ionnsuidh Mhaois e, agus a dh'ionnsuidh Aaroin, agus a dh'ionnsuidh a' chomhchruinneach uile.

34 Agus chuir iad an làimh e, a chionn nach d'innseadh ciod bu chòir a dheanamh ris.

35 Agus thubhairt an Tighearna ri Maois, Cuirear an duine gu cinnteach gu bàs; clachaidh an comhchruinneach uile e le clachaibh an taobh a muigh do'n champ.

36 Agus thug an comhchruinneach uile mach as a' champ e, agus chlach iad e le clachaibh, agus fhuair e bàs; mar a dh'àithn an Tighearna do Mhaois.

37 Agus labhair an Tighearna ri Maois, ag ràdh,

38 Labhair ri cloinn Israeil, agus abair riu, iad a dheanamh fàbhra³ dhoibh féin air iomallaibh an eudaich air feadh an ginealach, agus iad a chur air fàbhra nan iomall iall⁴ do ghorm.

39 Agus bithidh e dhuibh mar fhàbhra, agus amhaircidh sibh air, a chum gu'n cuimhnich sibh uile àitheantan an Tighearn, agus gu'n dean sibh iad; agus nach iarr sibh an déigh bhuir cridhe agus bhuir sùl féin, nithe a's àbhaist duibh dol 'nan déigh le h-ana-miann⁵:

40 A chum gu'n cuimhnich, agus gu'n dean sibh m'aitheantan uile, agus gu'm bi sibh naomha d'ur Dia.

41 Is mise an Tighearna bhuir Dia, a thug a mach sibh á tìr na-Eiphit, gu bhi a'm Dhia dhuibh: Is mise an Tighearna bhuir Dia.

CAIB. XVI.

1 Ceannaire Chorah, Dhatain, agus Abiraim.

31 Shluig an talamh suas iad.

A GUS ghabh Corah mac Idsair, mhic Chohait, mhic Lebhi, agus Datan

agus Abiram mic Eliaib, agus On mac Pheleith, mic Reubein, *daoine*:

2 Agus dh'éirich iad suas an làthair Mhaois⁶, maille ri daoin' àraidh do chloinn Israeil, dà cheud, agus leth-cheud, ceannard do'n choimhthional, inbheach⁷ sa' chomhchruinneach, daoine iomraideach⁸.

3 Agus chruinnich siad iad féin an ceann a chéile an aghaidh Mhaois agus an aghaidh Aaroin, agus thubhairt iad riu, *Tha sibh a' gabhail* tuille's a chòir oirbh féin, do bhrìgh gu bheil an comhchruinneach uile naomha gach aon diubh, agus *tha* 'n Tighearna 'nam measg: c'ar son uime sin a tha sibh 'gur togail féin suas os ceann comhchruinnich an Tighearn?

4 Agus an uair a chuala Maois e, thuit e air 'aghaidh:

5 Agus labhair e ri Corah, agus r'a chuideachd uile, ag ràdh, Eadhon am màireach nochdaidh an Tighearna cò iad a's leis, agus *cò a ta* naomh, agus bheir e air teachd am fagus da: bheir e eadhon air-san a ròghnaich e, teachd am fagus da.

6 Deanaibh-se so; gabhaibh dhuibh féin tùiseirean. Corah, agus a chuideachd uile;

7 Agus cuiribh teine annta, agus cuiribh tùis orra an làthair an Tighearn air an là màireach: agus an duine sin a ròghnaicheas an Tighearna, *bithidh* esan naomb. *Tha sibh a' gabhail* tuille's a chòir oirbh féin, sibhse a mhaca Lebhi.

8 Agus thubhairt Maois ri Corah, Eisdibh, guidheam oirbh, sibhse a mhaca Lebhi:

9 An ni beag e 'nur *barail-sa*, gu'n do sgar Dia Israeil sibh o chomhchruinneach Israeil gu'r toirt am fagus da féin, a dheanamh seirbhis pàilliun an Tighearn, agus a sheasamh am fianuis a' chomhchruinneach, a fhrithealadh dhoibh?

10 Agus thug e thus⁹ am fagus da féin, agus do bhràithrean uile mic Lebhi maille riut; agus am bheil sibh ag iarraidh na sagartachd mar an ceudna?

11 Air an aobhar sin *tha* thusa, agus do chuideachd uile, air bhuir cruinneachadh an ceann a chéile an aghaidh an Tighearn: agus a *thaobh* Aaroin, ciod e, gu bheil sibh ri gearan 'na aghaidh-san?

12 Agus chuir Maois *teachdairean uaithe* a ghairm Dhatain agus Abiraim mhac Eliaib, a thubhairt, Cha téid sinn suas.

13 An ni beag e gu'n d'thug thu nios sinn á talamh a tha sruthadh le bainne agus le mil, gu'r marbhadh san fhàsach, mur dean thu thu féin gu h-iomlan a'd' uachdaran os ar ceann?

14 A thuilleadh air so, cha d'thug thu sinn gu fearann a ta sruthadh le mil agus le bainne, ni mò thug thu dhuinn oighreachd mhacharach agus fhìon-liosan: an

¹ le làimh àird. Eabh.

² fiodha, connaidh.

⁵ striopachas.

⁶ an aghaidh Mhaois.

³ fringes. Sarg.

⁴ ribein, snàthainn.

⁷ gairmte. Eabh.

⁸ ainmeil.

cuir thu mach sùilean nan daoine sin? cia téid sinne suas.

15 Agus bha Maois ro dhiomach, agus thubhairt e ris an Tighearna, Na biodh meas agad d'an tabhartas; cha do ghabh mise aon asal uatha, ni mò a rinn mi cron air a h-aon diubh.

16 Agus thubhairt Maois ri Corah, Bi thusa agus do chuideachd uile an làthair an Tighearn, thusa, agus iadsan, agus Aaron am màireach:

17 Agus gabhaibh gach duine a thùiseir, agus cuiribh tùis annta, agus thugaibh an làthair an Tighearna gach duine a thùiseir, dà cheud agus leth-cheud tùiseir; thusa mar an ceudna, agus Aaron, gach aon *dhiubh* a thùiseir.

18 Agus ghabh gach duine *dhiubh* a thùiseir, agus chuir iad teine annta, agus chuir iad tùis orra, agus sheas iad ann an dorus pàilliuin a' chomhthionail maille ri Maois agus ri h-Aaron.

19 Agus chruinnich Corah an comhchruinneach uile 'nan aghaidh gu dorus pàilliuin a' chomhthionail: agus thais-beineadh glòir an Tighearna do'n comhchruinneach uile.

20 Agus labhair an Tighearna ri Maois, agus ri h-Aaron, ag ràdh,

21 Sgaraibh sibh féin o mheasg a' chomhchruinnich so, agus sgriosaidh mi iad mar ann am priobadh na sula¹.

22 Agus thuit iad air an aghaidh, agus thubhairt iad, O Dhé, a Dhé spiorad gach uile fhèola, am peacaich aon duine, agus am bi fearg agad ris a' chomhchruinneach uile?

23 Agus labhair an Tighearna ri Maois, ag ràdh,

24 Labhair ris a' chomhchruinneach, ag ràdh, Rachaibh suas o thimchioll pàilliuin Chorah, Dhatain agus Abiraim.

25 Agus dh'éirich Maois suas, agus chaidh e dh'ionnsuidh Dhatain agus Abiraim; agus lean seanairean Israeil e.

26 Agus labhair e ris a' chomhchruinneach, ag ràdh, Sgaraibh sibh féin, guidheam oirbh, o bhùthaibh nan daoine aingidh ud, agus na beanaibh ri ni sam bith a's leo, air eagal gu'n sgriosar sibh 'nam peacannaibh uile.

27 Mar sin chaidh iad suas o phàilliuin Chorah, Dhatain, agus Abiraim, air gach taobh: agus thàinig Datan agus Abiram a mach, agus sheas iad ann an dorus am bùthan, agus am mnà, agus am mic, agus an clann bheag.

28 Agus thubhairt Maois, Le so bithidh fios agaibh gu'n do chuir an Tighearna mise a dheanamh nan oibre sin uile; oir cha *d'rinneadh* mi iad as mo cheann féin².

29 Ma gheibh na daoine sin bàs mar na

h-uile dhaoine eile, uo ma dh'fhiosraichear iad a réir fiosrachaidh nan uile dhaoine, *an sin* cha do chuir an Tighearn mise *uaith*.

30 Ach ma ni an Tighearna gnìomh nuadh, agus gu'm fosgail an talamh a bheul, agus gu'n sluig e suas iad maille ris gach ni a's leo, agus gu'n téid iad sìos beò do'n t-slochd; an sin tuigidh sibh gu'n do bhrosnaich na daoine sin an Tighearn.

31 Agus tharladh, an uair a sguir e do labhairt nam briathra sin uile, gu'n do sgoilt an talamh a *bha* fodhpa³ o chéile:

32 Agus dh'fhosgail an talamh a bheul, agus shluig e suas iad, agus an tighean, agus na daoine uile a *bhuin* do Chorah, agus *am* maoin uile.

33 Chaidh iad féin, agus gach ni a *bhuin* doibh, beò sìos do'n t-slochd, agus dhruid an talamh orra: agus chaidh as doibh o mheasg a' chomhchruinnich.

34 Agus theich Israel uile a *bha* mu'n timchioll, r'an glaoth; oir thubhairt iad, Air eagal gu'n sluig an talamh sinne suas *mar an ceudna*.

35 Agus thàinig teine a mach o'n Tighearn, agus loisg e 'n dà cheud agus an lethcheud fear a thug seachad tùis.

36 Agus labhair an Tighearna ri Maois, ag ràdh,

37 Labhair ri h-Eleasar mac Aaroin an sagart, e thogail suas nan tùiseirean á meadhon an losgaidh, agus sgap thusa an teine an sud; oir tha iad coisrigte,

38 Tùiseirean nam peacach ud an aghaidh an anama féin; agus deanadh iad dhiubh leacan leathan *mar* chòmhdach do'n altair: oir thug iad seachad iad an làthair an Tighearn, air an aobhar sin tha iad coisrigte; agus bithidh iad 'nan comharadh do chloinn Israeil.

39 Agus ghabh Eleasar an sagart na tùiseirean umha, leis an d'thug iadsan a chaidh losgadh seachad tabhartas; agus rinneadh iad 'nan *leacaibh* leathan *mar* chòmhdach do'n altair.

40 *Gu bhi* 'nan cuimhneachan do chloinn Israeil, air chor as nach tig coigreach, nach *'eil* do shliochd Aaroin, am fagus a losgadh tùise an làthair an Tighearna; chum as nach bi e mar Chorah, agus mar a chuideachd; mar a thubhairt an Tighearna ris le làimh Mhaois.

41 Ach air an là màireach, rinn comhchruinneach chloinn Israeil uile gearan an aghaidh Mhaois agus an aghaidh Aaroin, ag ràdh, Mharbh sibh sluagh an Tighearna.

42 Agus tharladh, an uair a chruinnicheadh an comhchruinneach an aghaidh Mhaois agus an aghaidh Aaroin, gu'n do

¹ ann am platha.

² o ri'chridhe féin. Eabh.

³ fodha.

sheall iad air pàilliuin a' choimhthionail : agus, feuch, chòmhdaich an neul e, agus dh'fhoillsicheadh glòir an Tighearn.

43 Agus thàinig Maois agus Aaron gu beulaobh pàilliuin a' choimhthionail.

44 Agus labhair an Tighearna ri Maois, ag ràdh,

45 Rachaidh suas o mheasg a' chomh-chruinnich so, agus sgrìosaidd mi iad mar ann am prìobadh na sùla : agus thuit iad air an eudannaibh.

46 Agus thubhairt Maois ri h-Aaron, Glac tùiseir, agus cuir teine ann bhàrr na h-altarach, agus cuir tùis air, agus imich gu grad a dh'ionnsuidh a' chomhchruinnich, agus dean rèite air an son ; oir chaidh fearg a mach o'n Tighearn¹ : thòisich a' phlàigh.

47 Agus ghlac Aaron e, mar a dh'àithn Maois, agus ruith e gu meadhon a' chomhchruinnich ; agus, feuch, bha phlàigh air tòiseachadh am measg an t-sluaigh : agus chuir e tùis air, agus rinn e rèite air son an t-sluaigh.

48 Agus sheas e eadar na mairbh agus na beotha, agus choisgeadh a' phlàigh.

49 Agus bhàsaich sa' phlàigh ceithir mìle deug agus seachd ceud, a thuilleadh orra-san a bhàsaich an aobhar Chorah.

50 Agus phill Aaron a dh'ionnsuidh Mhaois, gu dorus pàilliuin a' choimhthionail : agus choisgeadh a' phlàigh.

CAIB. XVII.

1 *Slat Aaron fo bhlàth : 10 tha i air a gleidheadh mar chomharadh an aghaidh nan ceannairceach.*

A GUS labhair an Tighearna ri Maois, ag ràdh,

2 Labhair ri cloinn Israeil, agus gabh slat o gach aon aca, a réir tighe an aithriche, o'n ceannardaibh uile, a réir tighe an aithriche, dà shlait deug : sgrìobh ainm gach duine air a shlait féin.

3 Agus sgrìobhaidh tu ainm Aaron air slait Lebhi : oir *bithidh* aon slat air son cinn tighe an aithriche.

4 Agus cuiridh tu suas iad ann am pàilliuin a' choimhthionail, an làthair na Fianuis, far an coinnich mise thu.

5 Agus tarlaidh, *gu'n* tig slat an duine a thaghas mise fo bhlàth² ; agus bheir mi air gearrain chloinn Israeil sgrù uam, leis am bheil iad ri gearan 'nur n-aghaidh-sa.

6 Agus labhair Maois ri cloinn Israeil agus thug gach aon d'an ceannardaibh dha slat am fear, aon air son gach ceannaird, a réir tighe an aithriche, *eadhon* dà shlait deug : agus *bha* slat Aaron am measg an slat.

7 Agus chuir Maois suas na slatan an làthair an Tighearn, ann am pàilliuin na Fianuis.

8 Agus air an là màireach chaidh Maois a steach do phàilliuin na Fianuis ; agus, feuch, bha slat Aaron, air son tighe Lebhi, air briseadh a mach, agus air cur maoth dhuille aisde, agus air teachd fo bhlàth, agus air giùlan almona.

9 Agus thug Maois a mach na slatan uile o làthair an Tighearna gu cloinn Israeil uile ; agus dh'amhairc iad orra, agus ghabh gach duine a shlat féin.

10 Agus thubhairt an Tighearna ri Maois, Thoir slat Aaron a ris an làthair na Fianuis, gu bhi air a gleidheadh mar chomharadh an aghaidh nan ceannairceach ; agus bheir thu air falbh gu tur an gearain uamsa, chum nach bàsaich iad.

11 Agus rinn Maois *mar sin* : mar a dh'àithn an Tighearna dha, mar sin rinn e.

12 Agus labhair clann Israeil ri Maois, ag ràdh, Feuch, tha sinn a' bàsachadh, théid as duinn, théid as duinn uile.

13 Ge b'e air bith a thig am fagus do phàilliuin an Tighearna, gheibh e bàs ; an claidhear sinn le bàsachadh ?

CAIB. XVIII.

1 *Cùram nan sagart. 6 Frithealadh nan Lebhitheach. 8 Cuibhrionn nan sagart, 21 agus nan Lebhitheach. 25 Mu'n tabhartas-thogta.*

A GUS thubhairt an Tighearna ri h-Aaron, Giùlainidh tusa agus do mhic, agus tigh t'athar maille riut, euceart³ an ionaid naoimh ; agus giùlainidh tusa agus do mhic maille riut euceart bhur sagartachd.

2 Agus do bhràithre mar an ceudna do thréibh Lebhi, tréibh t'athar, bheir thu leat maille riut, chum gu'n ceanglar riut iad, agus gu'm fritheil iad dhuìt : ach *fritheilidh* tusa agus do mhic maille riut air beulaobh pàilliuin na Fianuis.

3 Agus gleidhidh iad do chùram-sa, agus cùram a' phàilliuin uile : a mhàin cha tig iad am fagus do shoithichibh an ionaid naoimh agus do'n altair, a chum nach faigh aon chuid iadsan no sibhse bàs.

4 Agus ceanglar riut iad, agus gleidhidh iad cùram pàilliuin a' choimhthionail, air son uile sheirbhis a' phàilliuin : agus cha tig coigreach am fagus duibh.

5 Agus gleidhidh sibh cùram an ionaid naoimh, agus cùram na h-altarach ; a chum nach bi fearg ni's mò air cloinn Israeil.

6 Agus mise, feuch, thug mi bhur bràithre na Lebhitich o mheasg chloinn Israeil : dhuibhse thugadh iad *mar* thabhartas do'n Tighearn, a dheanamh seirbhis pàilliuin a' choimhthionail.

7 Uime sin gleidhidh tusa, agus do mhic maille riut, bhur sagartachd anns gach

¹ o ghnùis an Tighearn. Eabh. ² gu'm bris slat

an duine a thaghas mise mach,

³ peacanna.

ni a *bhuineas* do'n altair, agus an taobh a stigh do'n roinn-bhrat, agus ni sibh seirbluis: thug mi *dhuibh* bhur sagart-achd, *mar* sheirbhhis tabhartais; agus cuirear an coigreach a thig am fagus gu bàs.

8 Agus labhair an Tighearna ri h-Aaron, Feuch, thug mi dhuit mar an ceudna cùram mo thabhartasan-togta, do uile nithibh coisrigte chloinn Israeil; dhuitse thug mi iad, air son an ungaidh, agus do d' mhic le reachd siorruidh.

9 Bithidh so leatsa do na nithibh ro naomha, a *ghleidheadh* o'n teine: gach tabhartas leo-san gach tabhartas-bìdh leo, agus gach iobairt-pheacaidh leo, agus gach iobairt-eusaontais leo, a bheir iad dhomhsa, bithidh e ro naomha dhuitse, agus do d' mhic.

10 San ionad ro naomh ithidh tu e, ithidh gach firionnach e: bithidh e naomh dhuitse.

11 Agus *is* leat so; tabhartas-togta an tabhartais, maille ri uile thabhartasan-luaisgte chloinn Israeil: thug mi dhuitse iad, agus do d' mhic, agus do d' nigh-eanaibh maille riut, le reachd siorruidh: gach neach a tha glan a'd thigh, ithidh e dheth.

12 A' chuid a's fearr¹ uile do'n oladh, agus a' chuid a's fearr uile do'n fhion, agus do'n chruithneachd, an ceud thoradh leo-san a bheir iad seachad do'n Tighearna, iad sin thug mi dhuit.

13 Gach ni a's luaithe bhios abuich 'nam fearann, a bheir iad chum an Tighearna, bithidh e leatsa; gach aon a ta glan a'd thigh, ithidh e dheth.

14 Gach ni a choisrigear ann an Israeil, bithidh e leatsa.

15 Gach ni a dh'fhosglaas a' bhrù do gach feoil, a bheir iad a dh'ionnsuidh an Tighearna, *ma's ann* do dhuine, no dh'ainmhidh, bithidh e leatsa: gidheadh gu cinnteach fuasglaidh tu ceud-ghin duine, agus ceud-ghin an ainmhidh neò-ghloin fuasglaidh tu.

16 Agus iadsan a dh'fhuasglar, o mhòs a dh'aois fuasglaidh tu *iad* a réir do mheas, air son aigrid chùig seceilean, a réir seceil an ionaid naoimh: *is e 'n secel* fichead gerah.

17 Ach ceud-ghin boim², no ceud-ghin caorach, no ceud-ghin gaibhre, cha'n fhuasgail thu; *tha* iad naomha: crathaidh tu am fuil air an altair, agus loisgidh tu 'n saill *mar* thabhartas a bheirear suas le teine, chum faile chùbhraidh do'n Tighearna.

18 Agus bithidh am feoil leatsa, mar a bhitheas an t-uchd luaisgte agus an sliimean deas leat.

19 Uile thabhartasan-togta nan nithe naomha, a bheir clann Israeil seachad do'n Tighearna, thug mi dhuitse, agus do d' mhic, agus do d' nigh-eanaibh maille riut, le reachd siorruidh: *is* coimhcheangal salainn e gu bràth an làthair an Tighearna, dhuitse agus do d' shliochd maille riut.

20 Agus labhair an Tighearna ri h-Aaron, 'Nam fearann cha bhi oighreachd agad, ni mò bhios roinn agad 'nam measg: *is* mise do roinn-sa agus t'oighreachd am measg chloinn Israeil.

21 Agus, feuch, do chloinn Lebhi thug mi an deachamh uile ann an Israel mar oighreachd, air son an seirbhhis a ni iad, *eadhon* seirbhhis pàilliuin a' choimhthionail.

22 Agus cha 'n fheud clann Israeil o so suas teachd am fagus do phàilliuin a' choimhthionail, air eagal gu'n giùlain iad peacadh, agus gu'm faigh iad bàs.

23 Ach ni na Lebhitich seirbhhis pàilliuin a' choimhthionail, agus giùlainidh iad an cionta: *bithidh e* 'na reachd siorruidh air feadh bhur ginealach, nach bi oighreachd sam bith aca am measg chloinn Israeil.

24 Ach deachamh chloinn Israeil a bheir iad seachad *mar* thabhartas-togta do'n Tighearna, thug mi do na Lebhitich mar oighreachd: uime sin thubhairt mi riu, Am measg chloinn Israeil cha bhi oighreachd aca.

25 Agus labhair an Tighearna ri Maois, ag ràdh,

26 Mar so labhair ris na Lebhitich, agus abair riu, 'Nuair a thogas sibh o chloinn Israeil an deachamh a thug mise dhuibh uatha mar bhur n-oighreachd, an sin bheir sibh suas tabhartas-togta dheth do'n Tighearna, *eadhon* an deicheamh cuid do'n deachamh.

27 Agus measar an tabhartas-togta so dhuibh, mar *gu'm b'e* arbhar an urlair-bhualaidh, agus mar làine amar-bruthaidh an fhìona.

28 Mar so mar an ceudna bheir sibh seachad tabhartas-togta do'n Tighearna, d'ur n-uile dheachamh a thogas sibh o chloinn Israeil; agus bheir sibh dheth tabhartas-togta an Tighearna do Aaron an sagart.

29 As bhur n-uile thiodhlacaibh, bheir sibh seachad uile thabhartas-togta an Tighearna do'n chuid a's fearr dheth uile, *eadhon* a' chuid sin deth a tha coisrigte.

30 Uime sin their thu riu, 'Nuair a thogas sibh suas uaith a' chuid a's fearr dheth, an sin measar e do na Lebhitich mar thoradh³ an urlair-bhualaidh, agus mar thoradh amar-bruthaidh an fhìona.

¹ Smior, reamhrachd. Eabh.

² botha.

³ fhàs, phiseach.

31 Agus ithidh sibh e anns gach àite, sibh féin agus bhur teaghlaichean: oir is e bhur duais air son bhur seirbhis ann am pàillium a' choinmhlhionail.

32 Agus cha ghiùlain sibh peacadh sam bith air a shon, an uair a thogas sibh suas as a' chuid a's fearr dheth: ni mò a thruaill eas sibh nithe naomha chloinn Israeil, air eagal gu'm faigh sibh bàs.

CAIB. XIX.

1 An t-uisge dealachaidh: 11 mar a ghnàthaicheadh e chum iadsan a bha neòghlan a ghlanadh.

A GUS labhair an Tighearna ri Maois, agus ri h-Aaron, ag ràdh,

2 Is e so ordugh an lagha a dh'àithn an Tighearn, ag ràdh, Labhair ri cloinn Israeil, iad a thoirt a d'ionnsuidh agh ruadh gun ghaoid¹, air nach 'eil smal, agus nach robh riamh fuidh chuing.

3 Agus bheir sibh i dh'ionnsuidh Eleasair an t-sagairt: agus bheirear i² an taobh a muigh do'n champ, agus marbhar i 'na flianus.

4 Agus gabhaidh Eleasar an sagart cuid d'a fuil le 'mheur, agus crathaidh e cuid d'a fuil dìreach fa chomhair pàillium a' choinmhlhionail seachd uairean.

5 Agus loisgidh neach an t-agh 'na shealladh: a seice, agus a feoil, agus a fuil, maille r'a h-aolach, loisgidh e.

6 Agus gabhaidh an sagart fiodh seudair, agus hiosop, agus scarlaid, agus tilgidh e sin am meadhon losgaidh an aighe.

7 An sin nighidh an sagart³ eudach, agus ionmlaididh⁴ e 'fheoil ann an uisge, agus an deigh sin thig e seach do'n champ, agus bithidh an sagart neòghlan gu feasgar.

8 Agus nighidh esan a loisg i⁵ eudach ann an uisge, agus ionmlaididh e 'fheoil ann an uisge, agus bithidh e neòghlan gu feasgar.

9 Agus cruinnichidh duine a ta glan luath an aighe, agus taisgidh e i⁶ 'n taobh a muigh do'n champ ann an àite glan: agus gleidhear i air son comhchruinnich chloinn Israeil, mar uisge dealachaidh: is glanadh air son peacaidh i.

10 Agus nighidh esan a thionaileas luath an aighe eudach, agus bithidh e neòghlan gu feasgar: agus bithidh e do chloinn Israeil, agus do'n choigreach a th'air chuairt 'nam measg, 'na reachd sìorruidh.

11 Esan a bheanas ri corp duine mhairbh sam bith, bithidh e neòghlan seachd làithean.

12 Glanaidh se e féin leis air an treas là, agus air an t-seachdamh là bithidh e glan: ach mur glan se e féin air an treas là, an s'n air an t-seachdamh là cha bhi e glan.

13 Ge b'e neach a bheanas ri corp duine sam bith a ta marbh, agus nach glan e féin, tha e a' truaillleadh pàillium an Tighearn; agus gearrar an t-anam sin as o Israel: a chionn nach do chrathadh an t-uisge dealachaidh air, bithidhe neòghlan; tha a neòghloine fathast air.

14 Is e so an lagh, an uair a bhàsaicheas duine ann am bùth: Gach neach a thig a stigh do'n bhùth, agus gach neach a tha sa' bhùth, bithidh iad neòghlan seachd làithean.

15 Agus gach soitheach fosgailte aig nach 'eil comhdach ceangailte air, tha e neòghlan.

16 Agus ge b'e bheanas ri neach a mharbhadh le claidheamh sa' mhachair⁴, no ri corp marbh, no ri cnàimh duine, no ri h-uaigh, bithidh e neòghlan seachd làithean.

17 Agus air son an duine neòghloin gabhaidh iad do luaith an aighe, a loisgeadh air son glanaidh peacaidh, agus cuiridh iad uisge ruith oirre ann an soitheach.

18 Agus gabhaidh duine glan hiosop, agus tumaidh e san uisge e, agus crathaidh e air a' bhùth e, agus air an soitheachibh uile, agus air a' mhuinntir a bha 'n sin, agus a'rsan a bhean ri cnàimh, no ri neach a mharbhadh, no ri aon marbh, no ri h-uaigh:

19 Agus crathaidh an duine glan air an neòghlan air an treas là, agus air an t-seachdamh là; agus glanaidh se e féin air an t-seachdamh là, agus nighidh e eudach, agus ionmlaididh se e féin ann an uisge, agus bithidh e glan air feasgar⁵.

20 Ach an duine a bhios neòghlan, agus nach glan e féin, gearrar an t-anam sin as o mheasg a' chomhchruinnich, a chionn gu'n do thruaill e ionad naomh an Tighearn: cha do chrathadh uisge dealachaidh air; tha e neòghlan.

21 Agus bithidh e 'na reachd sìorruidh dhoibh, gu'n nigh esan a chrathas an t-uisge dealachaidh eudach, agus bithidh esan a bheanas ris an uisge dealachaidh neòghlan gu feasgar.

22 Agus ge b'e ni ris am bean an duine neòghlan, bithidh e neòghlan: agus an t-anam a bheanas ris, bithidh e neòghlan gu feasgar.

CAIB. XX.

1 Bàs Mhìriam. 7 Thug Maois uisge do'n t-sluagh as a' charraig. 22 Bàs Aaron.

A N sin thàinig clann Israeil, eadhon an comhchruinneach uile gu fàsach Shin, anns a' cheud mhòis: agus dh'fhàh⁶ an sluagh ann an Cades; agus fhuair

¹ fallain.

² bheir e i. Eabh.

³ ionnailidh.

⁴ air aghaidh na macharach.

⁵ san fheasgar.

⁶ chòimhnuich.

Miriam bàs an sin, agus dh'adhlacaidh an sin i.

2 Agus cha robh uisge ann do'n choimhthional: agus chruinnich siad iad féin an aghaidh Mhaois agus an aghaidh Aaron.

3 Agus throid an sluagh ri Maois, agus labhair iad, ag ràdh, B'fhearr gu'm bith-eamaid air faghail bàis an uair a bhàsaich ar bràithrean an làthair an Tighearn!

4 Agus c'ar son a thug sibh a nìos comh-chruinneach an Tighearna do'n fhàsach so, gu bàs fhaghail an sin, sinn féin agus ar spréidh?

5 Agus c'ar son a thug sibh oirne teachd a nìos as an Eiphit, g'ar toirt a steach do'n droch àite so? cha'n àite sil e, no fhigis, no chrann-fìona, no phomgranata; ni mò *ta* uisge ann r'a òl.

6 Agus chaidh Maois agus Aaron o làthair a' chomhchruinnich gu dorus pàilliuin a' choimhthional, agus thuit iad air an aghaidh; agus dh'fhoillsicheadh glòir an Tighearna dhoibh.

7 Agus labhair an Tighearna ri Maois, ag ràdh,

8 Gabh an t-slat, agus cruinnich thus' an coimhthional an ceann a chéile, thu féin agus Aaron do bhràthair, agus labhair ris a' charraig fa chomhair an sùl, agus bheir i seachad a h-uisge; agus bheir thusa mach uisge dhoibh as a' charraig, agus bheir thu deoch do'n choimhthional, agus d'an spréidh.

9 Agus ghabh Maois an t-slat o làthair an Tighearna, mar a dh'àithn e dha.

10 Agus chruinnich Maois agus Aaron an comhchruinneach an ceann a chéile fa chomhair na carraige, agus thubhairt e riu, Eisdibh a nis, a luchd-ceannaire; as a' charraig so am feum sinne uisge thoirt duibh?

11 Agus thog Maois suas a làmh, agus bhuail e a' charraig le 'shlaith dà uair; agus thàinig an t-uisge mach gu pailt: agus dh'òl an comhchruinneach, agus an spréidh.

12 Agus labhair an Tighearna ri Maois agus ri h-Aaron, A chionn nach do chreid sibh mi, chum mo naomhachadh ann an sùilbh chloinn Israeil, uime sin cha toir sibh a steach an comhchruinneach so do'n fhearrann a thug mise dhoibh.

13 *Is* e so uisge Mheribah, a chionn gu'n d'rinn clann Israeil strì ris an Tighearn, agus naomhaicheadh e annta.

14 Agus chuir Maois teachdairean o Chades gu rìgh Edom, Mar so tha do bhràthair Israeil ag ràdh, Tha fios agad air an t-saothair sin uile a thàinig oirne;

15 Mar a chaidh ar n-aithriche sìos do'n Eiphit, agus a ghabh sinn còmhnuidh san

Eiphit aimsir fhada¹; agus bhuin na h-Eiphitich gu h-òlc ruime, agus r'ar n-aithrichibh.

16 Agus an uair a ghlaodh sinn ris an Tighearna, chual' e ar guth, agus chuir e aingeal uaithe, agus thug e mach sinn as an Eiphit; agus, feuch, *tha* sinn ann an Cades, baile sa' chuid a's iomallaiche do d' chrìch.

17 Leig leinn, guidheam ort, dol troimh do dhùthaich: cha téid sinn troimh achadh sam bith, no troimh fhion-lios, ni mò dh'òlas sinn uisge nan tobar; imichidh sinn air rathad mòr an rìgh, cha tionndaidh sinn a dh'ionnsuidh na làimhe deise, no na làimhe clìthe, gus an téid sinn seach do chrìochan.

18 Agus thubhairt Edom ris, Cha téid thu seachad orm², air eagal leis a' chlaidheamh gu'n tig mi mach a't' aghaidh.

19 Agus thubhairt clann Israeil ris, Imichidh sinn air an rathad mhòr; agus ma dh'òlas mi féin agus mo spréidh do d' uisge bheir mi luach air a shon: a mhàin gun tuille *dheanamh*, théid mi troimhe do m' chois.

20 Agus thubhairt e, Cha téid thu troimhe. Agus thàinig Edom a mach 'na aghaidh le mòr-shluagh, agus le làimh thréin.

21 Mar so dhiùlt Edom do Israel comas dol troimh a chrìch: uime sin thionndaidh Israel uaithe.

22 Agus ghabh clann Israeil, *eadhon* an comhchruinneach uile, an turas o Chades, agus thàinig iad gu sliabh Hor.

23 Agus labhair an Tighearna ri Maois agus ri h-Aaron ann an sliabh Hor, làimh ri crìch fearainn Edom, ag ràdh,

24 Cruinnichear Aaron a chum a shluaigh; oir cha téid e steach do'n fhearrann a thug mise do chloinn Israeil, a chionn gu'n robh sibh ceannaireach an aghaidh m'fhocail-sa aig uisge Mheribah.

25 Gabh Aaron agus Eleasar a mhac, agus thoir suas iad gu sliabh Hor.

26 Agus buin 'eudach do Aaron, agus cuir air a mhac Eleasar e: agus cruinnichear Aaron a *chum a mhuinntir*, agus gheibh e bàs an sin.

27 Agus rinn Maois mar a dh'àithn an Tighearn: agus chaidh iad suas gu sliabh Hor, ann an sealladh a' chomhchruinnich uile.

28 Agus bhuin Maois 'eudach do Aaron, agus chuir e air Eleasar a mhac e; agus fhuair Aaron bàs an sin air mullach an t-sléibh: agus thàinig Maois agus Eleasar a nuas o'n t-sliabh.

29 Agus an uair a chunnaic an comhchruinneach uile gu'n d'fhuair Aaron bàs,

¹ iomadh là. Eabh.

² troimh mo chrìoch.

rinn iad bròn air son Aaroin deich làithean 'ar fhichead, eadhon tigh Israeil uile.

CAIB. XXI.

1 *Sgrios clann Israeil na Canaanach. 4 Lotadh iad le nathraichibh loisgeach. 7 Dh'aidich iad am peccadail, agus leighis eadh iad le amharc air nathair umha. 21 Thug iad buaidhair Sihon agus air Og.*

A GUS an uair a chuala rìgh Arad an Canaanach, a bha chòmhnuidh san àirde deas, gu'n d'fhàinig Israeil air slighe an luchd-brathaidh, an sin chog e 'n aghaidh Israeil, agus rinn e cuid diubh 'nan ciomaich¹.

2 Agus bhòidich Israeil bòid² do'n Tighearn, agus thubhairt iad, Ma bheir thu da rìreadh an sluagh so thairis d'ar làimh, an sin sgriosaidh sinn gu tur am bailtean³.

3 Agus dh'éisid an Tighearna ri guth Israeil, agus thug e na Canaanach suas doibh: agus sgrios iad gu tur iad féin agus am bailtean: agus thug iad Horma mar ainm air an àite.

4 Agus ghabh iad an turas o shliabh Hor, air slighe na mara ruaidhe, a dhol mu'n cuairt air tìr Edoim; agus bha anam an t-sluaigh fuidh mhi-mhisnich san t-slighe⁴.

5 Agus labhair an sluagh an aghaidh Dhé, agus an aghaidh Mhaois, C'ar son a thug sibh a nìos sinn as an Eiphit, gu bàs fhaghail san fhàsach? oir cha 'n 'eil aran, no uisge ann, agus tha ar n-anam a' gabhail gràn do'n aran eutrom so.

6 Agus chuir an Tighearna nathraichean loisgeach⁵ am measg an t-sluaigh; agus lot⁶ iad an sluagh, agus fhuair mòr-shluagh do Israel bàs.

7 Uime sin thàinig an sluagh a dh'ionnsuidh Mhaois, agus thubhairt iad, Pheacaich sinn, oir labhair sinn an aghaidh an Tighearn, agus a' t' aghaidh-sa; guidh air an Tighearna gu'n toir e air falbh uainn na nathraichean. Agus ghuidh Mhaois air son an t-sluaigh.

8 Agus thubhairt an Tighearna ri Mhaois, Dean dhuist féin nathair loisgeach, agus cuir i air crann; agus tarlaidh, gach neach a lotar, an uair a dh'amhairceas e oirre, gu mair e beò.

9 Agus rinn Mhaois nathair umha, agus chuir e air crann i: agus tharladh, ma lot nathair duine sam bith, agus gu'n d'amhairc e air an nathair umha, gu'n d'fhan e beò.

10 Agus chaidh clann Israeil air an aghaidh, agus champaich iad ann an Obot.

11 Agus ghabh iad an turas o Obot, agus champaich iad aig Iie-abarim san fhàsach a ta fa chomhair Mhaoib, leth ri éirigh na gréine.

12 Uaith sin dh'imich iad, agus champaich iad ann an gleann Shareid.

13 O sin dh'imich iad, agus champaich iad air an taobh eile do Arnon, a ta san fhàsach a tha teachd a mach á crìochaibh nan Amorach: oir is e Arnon crìoch Mhaoib, eadar Moab agus na h-Amoraich.

14 Uime sin innsear ann an leabhar chog-anna an Tighearn, Ciod a rinn e' sa' mhuir ruaidh, agus ann an sruthaibh Arnoin,

15 Agus aig ruith nan sruth a tha dol sìos gu àite-còmhnuidh Ar, agus a' luidhe air crìch Mhaoib.

16 Agus o sin chaidh iad gu Beer: is e sin an tobar mu'n do labhair an Tighearna ri Mhaois, Cruinnich an sluagh r'a chéile, agus bheir mise uisge dhoibh.

17 An sin chan⁸ Israeil an laoidh so, Sruth a nìos, O thobair; canaibhse dha:

18 Chladhaich na h-uachdarain an tobar, chladhaich uaislean an t-sluaigh e, le seòl-adh fhir thubhairt an lagha, le 'n lorgaibh. Agus o'n fhàsach chaidh iad gu Matana;

19 Agus o Mhatana gu Nahaliel; agus o Nahaliel gu Bamot;

20 Agus o Bhamot sa' ghleann a ta ann an dùthaich Mhaoib, gu mullach Phisgah, a ta 'g amharc ri Iesimon.

21 Agus chuir Israeil teachdairean gu Sihon rìgh nan Amorach, ag ràdh,

22 Leig dhomh dol troimh d'fhearann; cha tionndaidh sinn a dh'ionnsuidh raoin no dh'ionnsuidh fion-lios sam bith⁹; cha'n òl sinn uisgeachan an tobair: rathad an rìgh gabhaidh sinn, gus an téid sinn seachad air do chrìch.

23 Agus cha leigeadh Sihon le Israel dol troimh a chrìch: agus chruinnich Sihon a shluagh uile r'a chéile, agus chaidh e mach an aghaidh Israeil do'n fhàsach: agus thàinig e gu Iahas, agus chog e 'n aghaidh Israeil.

24 Agus bhuail Israeil e le faobhar a' chlaideimh, agus ghabh e sealbh air 'fhearann o Arnon gu Iaboc, eadhon gu cloinn Amoin: oir bha crìoch chloinn Amoin làidir.

25 Agus ghlac Israel na bailte mòra¹⁰ sin uile: agus ghabh Israel còmhnuidh ann am bailtibh mòra nan Amorach uile, ann an Hesbon, agus 'na bhailtibh beaga uile;

26 Oir b'e Hesbon baile mòr Shihoin rìgh nan Amorach, a chog an aghaidh rìgh Mhaoib a bh'ann roimhe sin, agus a bhuin 'fhearann uile as a làimh, eadhon gu h-Arnon.

27 Uime sin their iadsan, a labhras ann an gnàth-fhoclaibh, Thigibh do Hesbon; biodh baile mòr Shihoin air a thogail agus air a dheasachadh i:

¹ priosanaich.

² mòid.

³ an cathraichean.

⁴ air son na slighe.

⁵ nathraiche teine.

⁶ theum.

⁷ Vaheb. Eabh.

⁸ sheinn.

⁹ chum nam machairean no chum nam fion-ghàradh.

¹⁰ cathraiche.

28 Oir chaidh teine mach á Hesbon, las-
aíro bhaile mòr Shihoin; loisge Ar Mhoai-
b, agus tighearnan ionadan árdar Arnoin.

29 Mo thruaigh thu, a Mhoai! thàinig
sgrios ort, O shluagh Chemois! thug e
mhic a chaidh as, agus a nigheanan, am
braighdeanas¹ do Shihon rìgh nan Amor-
ach.

30 Thilg sinn saighdean orra; chaidh as
do Hesbon eadhon gu Dìbon, agus dh'fhà-
sach sinn iad eadhon gu Nopha, a tha
ruigheachd gu Medeba.

31 Mar so ghabh Israel còmhnuidh ann
am fearann nan Amorach.

32 Agus chuir Maois daoine uaith a
ghabhail beachd air Iaser, agus ghlac iad
a bhailean, agus dh'fhògair iad a mach
na h-Amoraich a bha 'n sin.

33 Agus phill iad agus chaidh iad suas
air slighe Bhasain: agus chaidh Og rìgh
Bhasain a mach 'nan aghaidh, e fèin, agus
a shluagh uile, gu cath aig Edrei.

34 Agus thubhairt an Tighearna ri
Maois, Na gabh eagal roimhe; oir do d'
làimh-sa thug mi thairis e fèin, agus a
shluagh uile, agus 'fhearann; agus nì thu
air mar a rinn thu air Sihon rìgh nan
Amorach, a bha còmhnuidh aig Hesbon.

35 Mar sin bluaill iad e fèin agus a mhic,
agus a shluagh uile, gus nach d'fhàgadh
aon beò aige: agus ghabh iad sealbh air
'fhearann.

CAIB. XXII.

1 *Dhùilt Balaam air ceud iartus Bhalaic teachd d'a
ionnsuidh; ach an uair a chuir e ath-theachdair-
ean d'a ionnsuidh, dh'imich e air a thurus:
28 labhair 'asal ris air a shlighe.*

A GUS chaidh clann Israeil air an agh-
aidh, agus champaich iad ann an
còmhnrdaibh Mhoai, air an taobh so do
Jordan làimh ri Iericho.

2 Agus chunnaic Balac mac Shipoir gach
nì a rinn Israel air na h-Amoraich.

3 Agus bha eagal ro mhòr air Moab
roimh 'n t-sluagh, a chionn gu'n robh iad
lìonmhor; agus bha Moab ann an teinn a
thaobh chloinn Israeil.

4 Agus thubhairt Moab ri seanairibh
Mhidiain, A nis imlichidh a' chuideachd²
so suas gach nì a ta mu'r tìmechioll, mar
a dh'imlicheas an damh suas fear na
macharach. Agus bha Balac mac Shipoir
'na rìgh air na Moabaich san àm sin.

5 Chuir e teachdairan uime sin gu Ba-
laam mac Bheoir, gu Petor, a ta làimh ri
amhainn dùthcha cloinne a shluaigh, g'a
ghairm, ag ràdh, Feuch, tha sluagh air
teachd a mach as an Eiphit: feuch, tha
iad a' còmhachadh aghaidh³ na tal-
mhainn, agus tha iad 'nan còmhnuidh thall
fa m' chomhair.

6 Thig a nis uime sin, guidheam ort,
mallaich dhomhs' an sluagh so, oir tha iad
tuilleadh 's cumhachdach air mo shon:
theagamh gur urrainn mi am bualadh,
agus gu'm fuadaich mi iad a mach as an
dùthaich; oir tha fios agam gu'm bheil
esan a bheannaicheas tusa, beannaichte,
agus esan a mhallaicheas tu, mallaichte.

7 Agus dh'imich seanairean Mhoai
agus seanairean Mhidiain, le duais na
druidheachd⁴ nan làimh; agus thàinig
iad gu Balaam, agus dh'innis iad dha
briathra Bhalaic.

8 Agus thubhairt e riu, Fanaibh an so
an nochd, agus bheir mise fios⁵ duibh a
ris, a réir mar a labhras an Tighearna
rium. Agus dh'fhan ceannardan Mhoai
maille ri Balaam.

9 Agusthàinig an Tighearna gu Balaam,
agus thubhairt e, Cò iad na daoine so
maille riut?

10 Agus thubhairt Balaam ri Dia, Chuir
Balac mac Shipoir, rìgh Mhoai, teachd-
aire a m' ionnsuidh, ag ràdh,

11 Feuch, tha sluagh air teachd a mach
as an Eiphit, a ta còmhachadh aghaidh
na talmhainn: thig a nis, mallaich dhomh
iad; theagamh gur urrainn mi buaidh
thoirt orra, agus gu'm fuadaich mi mach
iad.

12 Agus thubhairt Dia ri Balaam, Cha
téid thu maille riu; cha mhallaich thu 'n
sluagh; oir tha iad beannaichte.

13 Agus dh'éirich Balaam sa' mhaduinn,
agus thubhairt e ri ceannardaibh Bhalaic,
Imichibh d'ur dùthaich fèin; oir tha 'n
Tighearna a' dùltadh cead a thoirt dhomh-
sa dol maille ribh.

14 Agus dh'éirich ceannardan Mhoai
suas, agus chaidh iad a dh'ionnsuidh
Bhalaic, agus thubhairt iad, Tha Balaam
a' dùltadh teachd maille ruinn.

15 Agus chuir Balac uaith a ris ceann-
ardan bu lìonmhoire⁶, agus a b'urrmaiche
na iadsan.

16 Agus thàinig iad gu Balaam, agus
thubhairt iad ris, Mar so tha Balac, mac
Shipoir, ag ràdh, Na bacadh nì sam bith
thu, guidheam ort, o theachd a m' ionn-
suidh;

17 Oir àrdaichidh mi thu gu h-inbhe ro
mhòir, agus ge b'e nì a their thu rium, nì
mi e: thig uime sin, guidheam ort, mall-
aich dhomh an sluagh so.

18 Agus fhreagair Balaam, agus thubh-
airt e ri seirbhisich Bhalaic, Ged a bheir-
eadh Balac dhomhsa làn a thighe a dh'air-
giod agus a dh'òr, cha 'n fheudainn dol
thar focal an Tighearna mo Dhé, a dhean-
amh bheag no mhòr.

19 A nis uime sin, guidheam oirbh,

¹ ann an daorsa, 'nan ciomach.

² an còmhachadh. ³ sùla. Eabh.

⁴ fiosachd.

⁵ freagradh.

⁶ maille bu liutha.

fanaibhse mar an ceudna an so an nochd, a chum gu'm bi fios agam ciod tuilleadh a their an Tighearna rium.

20 Agus thàinig Dia dh'ionnsuidh Bhalaaime san oidhche, agus thubhairt e ris, Ma thig¹ na daoine gu d' ghairm, éirich suas, agus imich maille ri: gidheadh am focal a their mise riut, sin ni thu.

21 Agus dh'éirich Balaam suas sa' mhadainn, agus chuir e diollaid air 'asal, agus chaidh e maille ri ceannardaibh Mhoab.

22 Agus las corruich Dhé a chionn gu'n d'imich e; agus sheas aingeal an Tighearna san t-slighe mar eascairid² na aghaidh. A nis bha e marachd air 'asal féin, agus a dhà òglach maille ris.

23 Agus chunnaic an asal aingeal an Tighearna 'na sheasamh san t-slighe, agus a chlaidheamh tairngte 'na làimh: agus thionndaidh an asal a leth taobh as an t-slighe, agus chaidh i air feadhan fhearainn; agus bhuail Balaam an asal, g'a tionndadh dh'ionnsuidh na slighe.

24 Agus sheas aingeal an Tighearna ann an cos-cheum nam fion-lios: bha balla air an taobh so, agus balla air an taobh ud.

25 Agus an uair a chunnaic an asal aingeal an Tighearna, theannaich si i féin ris a' bhalla; agus bhuail e ris i.

26 Agus a ris chaidh aingeal an Tighearna seachad, agus sheas e ann an àite cumhann, far nach robh slighe gu tionndadh aon chuid a chum na làimhe deise no clithe.

27 Agus an uair a chunnaic an asal aingeal an Tighearna, luidh³ i sìos fuidh Bhalaaime: agus las corruich Bhalaaime, agus bhuail e 'n asal le bata.

28 Agus dh'fhosgail an Tighearna beul na h-asail, agus thubhairt i ri Balaam, Ciod a rinn mise ort, gu'n do bhuail thu mi na tri uairean so?

29 Agus thubhairt Balaam ris an asal, A chionn gu'n d'rinn thu fanaid orm: b'fhearr leam gu'm biodh claidheamh a'm' làimh, oir a nis mharbhainn thu.

30 Agus thubhairt an asal ri Balaam, Nach mise t'asal féin, air an do mharcaich thu riamh o bu leat mi, gus an là 'n diugh? am b' àbhaist domh riamh a dheanaim mar so riut? Agus thubhairt e, Cha b' àbhaist.

31 An sin dh'fhosgail an Tighearna sùilean Bhalaaime, agus chunnaic e aingeal an Tighearna 'na sheasamh san t-slighe, agus a chlaidheamh tairngte 'na làimh; agus chrom e sìos a cheann, agus thuit e sìos air 'aghaidh.

32 Agus thubhairt aingeal an Tighearna ris, C'ar son a bhuail thu t'asal na tri uairean so? Feuch, chaidh mi mach gu bhi a'm' eascairid duit, a chionn gu'm bheil do shlighe fiar a'm' fhianuis.

33 Agus chunnaic an asal mi, agus thionndaidh i uam na tri uairean so: mur bitheadh i air tionndadh uam, gu cinnteach bha mi nis eadhon air do mharbhadh-sa, agus air a gleidheadh-sa beò.

34 Agus thubhairt Balaam ri aingeal an Tighearna, Pheacaich mi; oir cha robh fios agam gu'n do sheas thu san t-slighe a'm' aghaidh: a nis uime sin, ma's mi-thaitneach leat e⁴, pillidh mi air m'ais a ris.

35 Agus thubhairt aingeal an Tighearna ri Balaam, Imich leis na daoineibh; ach a mhàin am focal a labhras mise riut, sin labhraidh tusa. Mar sin chaidh Balaam le ceannardaibh Bhalaaime.

36 Agus an uair a chuala Balac gu'n d'fhàinig Balaam, chaidh e mach 'na choinneamh gu baile do Mhoab, a tha làimh ri comh-chrich Armoine, a tha sa' chrich a's faide mach.

37 Agus thubhairt Balac ri Balaam, Nach do chuir mise gu cinnteach fios a t'ionnsuidh g'ad ghairm? C'ar son nach d'fhàinig thu a m' ionnsuidh? Nach 'eil mise gu deimhin comasach air d'ardachadh gu h-inbhe.

38 Agus thubhairt Balaam ri Balac, Feuch, tha mi air teachd a t'ionnsuidh: am bheil agam a nis cumhachd idir nì sam bith a ràdh? Am focal a chuireas Dia a'm' bheul, sin labhraidh mi.

39 Agus chaidh Balaam maille ri Balac, agus thàinig iad gu Ciriathusot.

40 Agus dh'ìobair Balac dainn agus caoraich, agus chuir e fios a dh'ionnsuidh Bhalaaime, agus a dh'ionnsuidh nan ceannard a bha maille ris.

41 Agus air an là màireach, ghabh Balac Balaam, agus thug e suas e gu àitibh àrda Bhaile, a chum gu faicheadh e o sin a' chuid a b'iomallaiche do'n t-sluagh.

CAIB. XXIII.

1, 14, 28 Iobairtean Bhalaaime. 7, 18 Cosamhlachdan Bhalaaime.

AGUS thubhairt Balaam ri Balac, Tog dhomh an so seachd altairean, agus ulluigh dhomh an so seachd tairbli òga, agus seachd reitheachan.

2 Agus rinn Balac mar a thubhairt Balaam; agus dh'ìobair Balac agus Balaam air gach altair tarbh òg agus reithe.

3 Agus thubhairt Balaam ri Balac, Seas làimh ri dh'ìobair-loisgte, agus imichidh mise; theagamh gu'n tìgan Tighearna a'm' choinneamh: agus ge b'e ni a nochdas⁵ e dhomh, iunsidh mi dhuit. Agus chaidh e gu h-iouad àrd.

4 Agus choinnich Dia Balaam, agus thubhairt Balaam ris, Dheasaich mi seachd altairean, agus dh'ìobair mi air gach altair tarbh òg agus reithe.

5 Agus chuir an Tighearna focal ann

¹ O thàinig. ² gu cur 'na aghaidh. ³ thuit.

⁴ ma's olc ann do shùilibh. Eabh. ⁵ dh'fhoillsicheas.

am beul Bhalaaim, agus thubhairt e, Pill a dh'ionnsuidh Bhalaic, agus mar so labhairadh tu.

6 Agus phill e d'a ionnsuidh, agus, feuch, sheas e làimh r'a ìobairt-loisgte, e féin, agus ceannardan Mhoib uile.

7 Agus thog e suas a chosamhlachd¹, agus thubhairt e, Thug Balac righ Mhoib nise á h-Aram, o bheanntaibh na h-àird² an ear, ag ràdh, Thig, mallaich dhomhsa Iacob; agus thig, thoir dùbhlán do Israel³.

8 Cionnus a mhallaicheas mi esan nach do mhallaich Dia? agus cionnus a bheir mi dùbhlán dhasan do nach d'thug an Tighearn dùbhlán?

9 Oir o mhullach nan creag tha mi 'ga fhaicinn, agus o na sléibhtibh tha mi 'g amharc air: feuch, gabhaidh an sluagh comhnuidh air leth, agus cha mheasar iad am measg nan cinneach.

10 Co dh'àirmheas duslach Iacoib, no àireamh na ceathramh cuid do Israel? Faigheam-sa bàs an ionracain⁴, agus bith-eadh mo chrìoch dheireannach cosmhuil r'a chrìch-san!

11 Agus thubhairt Balac ri Balaam, Ciod e so a rinn thu orm? a mhallachadh mo naimhdean thug mi thu, agus feuch, da rìreadh bheannaich thu iad⁵.

12 Agus fhreagair agus thubhairt e, An ni sin a chuir an Tighearn a'm' bheul, nach feum mis' an aire thoirt a labhairt?

13 Agus thubhairt Balac ris, Thig, guidheam ort, maille rium gu h-àit eile, o'm faic thu iad: cha 'n fhaic thu ach a' chuid a's iomallaiche dhiubh, agus cha 'n fhaic thu iad uile; agus mallaich dhomh as a sin iad.

14 Agus thug e gu fearann Shophim e, gu mullach Phisgah⁶, agus thog e seachd altairean, agus dh'ìobair e tarbh òg agus reithe air gach altair.

15 Agus thubhairt e ri Balac, Seas an so làimh ri d'ìobairt-loisgte, gus an coinnich mis' an Tighearn an sud.

16 Agus choinnich an Tighearn Balaam, agus chuir e focal 'na bheul, agus thubhairt e, Imich a ris a dh'ionnsuidh Bhalaic, agus abair mar so.

17 Agus an uair a thàinig e d'a ionnsuidh, feuch sheas e làimh r'a ìobairt-loisgte, agus ceannardan Mhoib maille ris. Agus thubhairt Balac ris, Ciod a labhair an Tighearn?

18 Agus thog e suas a chosamhlachd, agus thubhairt e, Eirich suas, a Bhalaic, agus cluinn; éisd riumsa, thus' a mhic Shipoir:

19 Cha duine Dia, gu'n deanadh e breug; no mac duine, gu'n gabhadh e aithreachas: an dubhairt e, agus nach dean e? agus an do

labhair e, agus nach colmhlion se e?

20 Feuch, fhuair mi àithne beannach-adh; agus bheannaich esan, agus cha'n urrainn mise 'atharrachadh.

21 Cha d'thug e fa'near euceart ann an Iacob, agus cha'n fhac e cealg ann an Israel: tha'n Tighearn a Dhia leis, agus caithream righ 'nam measg.

22 Thug Dia mach iad as an Eiphit; tha aige amhuil neart an aon-adharcaich⁷.

23 Gu cinnteach cha 'n'eil draidheachd an aghaidh Iacoib, ni mò ta fiosachd an aghaidh Israel: a réir na h-aimsir so theirear mu Iacob, agus mu Israel, Ciod a dh'òibrich Dia!

24 Feuch, éiridh an sluagh suas mar leòmhán mòr, agus mar leòmhán òg togaidh e suas e féin: cha luidh e sìos gus an ith e a' chreach, agus gus an òl e fuil nam marbh.

25 Agus thubhairt Balac ri Balaam, Na dean aon chuid am mallachadh idir, no'm beannachadh idir.

26 Ach ffreagair Balaam agus thubhairt e ri Balac, Nach d'innis mi dhuit, ag ràdh, Gach ni a labhras an Tighearna, sin is éigin domhs' a dheanamh?

27 Agus thubhairt Balac ri Balaam, Thig, guidheam ort, bheir mi thu gu h-ionad eile; theagamh gur toil le Dia⁸ thu 'g an mallachadh dhomh as a sin.

28 Agus thug Balac Balaam gu mullach Pheoir, a tha 'g amharc ri Iesimon.

29 Agus thubhairt Balaam ri Balac, Tog dhomh an so seachd altairean, agus ulluich dhomh an so seachd tairbh òga, agus seachd reitheachan.

30 Agus rinn Balac mar a thubhairt Balaam, agus dh'ìobair e tarbh agus reithe air gach altair.

CAIB. XXIV.

1 Fàisneachd Bhalaaim a thoobh soirbheis Israel.
15 Mu rcul Iacoib, &c. 20 Mu sgrios nan Amaleceach.

AGUS an uair a chunnaic Balaam gu'm bu toil leis an Tighearn Israel a bheannachadh, cha deachaidh e, mar air uairibh eile, a dh'iarraidh manaidhean⁹, ach chuir e aghaidh ris an fhàsach.

2 Agus thog Balaam suas a shùilean, agus chunnaic e Israel a' fantuinn 'nam bùthaibh a réir an treubhan, agus thàinig spiorad Dhé air.

3 Agus thog e suas a chosamhlachd, agus thubhairt e, Thubhairt Balaam mac Bheoir, agus thubhairt an duine aig an robh a shùilean dùinte;

4 Thubhairt esan, a chuala briathra Dhé, a chunnaic taisbeanadh¹⁰ an Uile-chumhachdaich, a' tuiteam agus a shùilean air am fosgladh¹⁰:

¹ parable. Sasg.
ionracan. Eabh.
thu iad. Eabh.

² càin Israel.

⁴ le beannachadh bheannaich
beinne. ⁶ reem. Eabh.

³ nan

unicorn. Sasg.

Dhé. Eabh.
sealladh.

⁷ gu'm bi e ceart ann an sùilibh

⁸ chum fiosachd, draidheachd.

¹⁰ a shùilean dùinte.

5 Cia àluinn do bhùthan, O Iacoib! do phàilliuana, O Israeil!

6 Mar na gleannta tha iad sìnte mach, mar liosan¹ ri taobh airmhne, mar chraobhan fiodh-alois² a shuidhich an Tighearna, mar chraobhan seudair làimh ris na h-uisgeachaidh.

7 Sruthaidh an t-uisge mach as a shoithichibh, agus *bithidh* a shliochd ann am mòran uisgeachan, agus bithidh a rìgh nì's àirde na Agag, agus àrdaichear a rìoghachd.

8 Thug Dia mach as an Eiphit e; tha aige amhuil neart an aon-adharcaich: ithidh e suas na cinnich a naimhdean, agus brisidh e 'n cnàmhan, agus le 'shaighdibh troimh-loitaidh e iad.

9 Chrùb e, luidh e sìos mar leòmhann, agus mar leòmhann mòr: cò dhùisgeas suas e? *Is* beannaichte gach neach a bheannaicheas thusa, agus is mallaichte gach neach a mballaicheas thu.

10 Agus las corruich Bhalac an aghaidh Bhalaim, agus bhuail e 'bhasan air a chèile: agus thubhairt Balac ri Balaam. A mballachadh mo naimhdean ghairm mi thu, agus, feuch, da rìreadh bheannaich thu *iad* na trì uairean so.

11 Uime sin teich a nise do d' àite féin: shaoil mi t'àrdachadh gu h-inbhe mhòir, ach, feuch, chum an Tighearna air t'ais thu o inbhe.

12 Agus thubhairt Balaam ri Balac, Nach do labhair mi eadhon ri d' theachdairibh, a chuir thu a'm' ionnsuidh, ag ràdh,

13 Ged a bheireadh Balac dhomhsa làn a thighe dh'airgiod agus a dh'òr, cha b'urrainn mi dol thar àithne an Tighearna, a dheanamh maith no uile o m'inntinn féin: *ach* ge b'e ni a their an Tighearna, sin labhraidh mise?

14 Agus a nis, feuch, tha mi dol a dh'ionnsuidh mo dhaoine féin: thig *uime sin*, bheir mi rabhadh³ dhuit, ciod a ni 'n sluagh so air do shluagh-sa anns na làithibh deireannach.

15 Agus thog e suas a chosamhlachd, agus thubhairt e, Thubhairt Balaam mac Bheoir, agus thubhairt an duine aig an robh a shùilean dùinte;

16 Thubhairt esan a chuala briathra Dhé, agus d'an aithne eòlas an Ti a's ro-àirde, a chunnaic taisbeanadh an Uile-chumhachdaich, a' tuiteam agus a shùilean air am fosgladh:

17 Chi mi e, ach ni h-ann a nis; amhaircidh mi air, ach ni h-ann am fagus: thig reul⁴ a mach à Iacob, agus éiridh slat rìoghail á h-Israel, agus buailidh i ois-innean Mhoib, agus cuiridh i as do chloinn Shet uile.

18 Agus bithidh Edom 'na sheilbh, bith-

idh Seir mar an ceudna 'na sheilbh aig a naimhdibh: agus ni Israel gaisge.

19 A mach à Iacob thig esan a bhios 'na uachdaran, agus sgrìosaidh e'n ti a mhair-eas do'n bhaile mhòr.

20 Agus an uair a dh'amhairc e air Amalec, thog e suas a chosamhlachd, agus thubhairt e, Tùs nan cinneach Amalec, ach *is* e dheireadh *bhi* air a sgrìos gu sìorruidh.

21 Agus dh'amhairc e air na Cenich; agus thog e suas a chosamhlachd, agus thubhairt e, Is làidir t-àite-còmhnuidh, agus tha thu cur do nid ann an carraig:

22 Gidheadh, fàsaichear na Cenich, agus an toir Asur leis thu ann am braighdeanas.

23 Agus thog e suas a chosamhlachd, agus thubhairt e, Mo thruaigh! cò bhios beò 'nuair a ni Dia so?

24 Agus *thig* longan o iomall⁵ Chitim, agus ni iad olc air Asur, agus ni iad olc air Eber, agus sgrìosair esan mar an ceudna gu bràth.

25 Agus dh'éirich Balaam suas, agus dh'fhalbh e, agus phill e d'a àite féin: agus dh'fhalbh Balac mar an ceudna air a shlighe féin.

CAIB. XXV.

1 *Sirìopachas agus ìodhol-aoradh chloinn Israeil.*
6 *Simri agus Cosbi air cm mairbhadh.*

A GUS dh'fhan Israel ann an Sitim, agus thòisich an sluagh air strìopachas a dheanamh le nigheanaibh Mhoib.

2 Agus ghairm iad an sluagh gu ìobairtibh an diathan: agus dh'ith an sluagh, agus chrom iad sìos d'an diathaibh.

3 Agus cheangail Israel e féin ri Baal-peor: agus las corruich an Tighearna an aghaidh Israeil.

4 Agus thubhairt an Tighearna ri Maois, Glac cinn-fheadhna an t-sluaigh uile, agus croch suas iad an làthair an Tighearna fa chomhair na gréine, chum gu'm pill corruich ghar an Tighearna o Israel.

5 Agus thubhairt Maois ri breitheamhaibh Israeil, Marbhaibh gach aon agaibh a dhaoine, a cheangail iad féin ri Baal-peor.

6 Agus, feuch, thàinig fear do chloinn Israeil, agus thug e chum a bhràithre Ban-mhidianach, ann an sealladh Mhois, agus ann an sealladh comhchrùnich chloinn Israeil uile, agus iad a' gul aig dorus pàilliuin a' choimhthionail.

7 Agus an uair a chunnaic Phinehas mac Eleasair, mhic Aaroin an t-sagairt e, dh'éirich e suas o mheasg a' choimhchrùnich, agus ghabh e sleagh 'na làimh;

8 Agus chaidh e 'n déigh an duine do Israeil a steach do'n bhùth, agus throimh-lot

¹ ghàraichean. ² phàilliuana. ³ fios, sanas.

⁴ reult.

⁵ o làimh. Eabh.

e iad¹ le chéile, an duine do Israel, agus a' bhean troimh a broinn: mar sin choisg-eadh a' phlèigh o chloinn Israeil.

9 Agus bhàsaich sa' phlèigh ceithir mìle thar fhichead.

10 Agus labhair an Tighearna ri Maois, ag ràdh,

11 Phil Phinehas mac Eleasair, mhic Aaroin ant-sagairt, mochorruic air falbh o chloinn Israeil, an uair a bha e èudmhor² as mo leth 'nam measg, air chor as nach do chuir mi as do chloinn Israeil a'm' èud.

12 Air an aobhar sin abair, Feuch, bheir mise dha mo choimhcheangal³ sìthe.

13 Agus bithidh e aige, agus aig a shliochd 'na dhéigh, eadhon coimhcheangal sagartachd shìorruidh; a chionn gu'n robh e èudmhor as leth a Dhé, agus gu'n d'rinn e réite air son chloinn Israeil.

14 A nis b'e ainm an Israelich a mharbhadh, eadhon a mharbhadh maille ris a' Bhian-mhidianaich, Simri mac Shalu, ceannard prìomh⁴ thighe am measg nan Simeonach.

15 Agus b'e ainm na Ban-mhidianaich a mharbhadh, Cosbi nighean Shur; bu cheann cinnich e, agus do phrìomh thigh ann am Midian.

16 Agus labhair an Tighearna ri Maois, ag ràdh,

17 Buin gu naimhdeil ris⁵ na Midianaich, agus buailibh iad:

18 Oirtha iadsan a' buntuinn gu naimhdeil ribhse le'n as-innleachdaibh, leis an do mheall iad sibh ann an aobhar⁶ Pheoir, agus ann an aobhar Chosbi, nighinn ceannard do Mhidian, am peathar, a mharbhadh ann an là na plèighe ann an aobhar Pheoir⁷.

CAIB. XXVI.

1 Clann Israeil air an àireamh an dara uair. 52 Am fearam gu bhà air a roinn doibh le crannchur. 64 Caleb agus Iosua mhàin beò do na dh' àirmheadh air tìs.

AGUS tharladh an déigh na plèighe, agus gu'n do labhair an Tighearna ri Maois, agus ri Eleasar mac Aaroin an t-sagairt, ag ràdh,

2 Gabhaibh àireamh comhchruinnich chloinn Israeil uile, o fhichead bliadhna dh'aois agus os a cheann, trid thighe an aithriche, iadsan uile a's urrainn dol a mach gu cogadh ann an Israel.

3 Agus labhair Maois agus Eleasar an sagart riu ann an còmhnradaibh⁸ Mhoiib, làimh ri Iordan am fagus do Iericho, ag ràdh,

4 Gabhaibh àireamh an t-sluaigh, o fhichead bliadhna dh'aois agus os a cheann; mar a dh'àithn an Tighearna do Mhois agus do chloinn Israeil, a chaidh

a mach à tìr na h-Eiphit.

5 Reuben, am mac bu shline aig Israel: clann Reuben: Hanoch, o'm bheil teaghlach nan Hanochach: o Phalu, teaghlach nam Paluthach:

6 O Hesron, teaghlach nan Hesronach: o Charmi, teaghlach nan Carmach.

7 Is iad sin teaghlaichean nan Reubenach: agus b'iadsan a chaidh àireamh dhiubh, dà fhichead agus trì mìle agus seachd ceud agus deich⁹ ar fhichead.

8 Agus mic Phalu; Eliab.

9 Agus mic Eliab; Nemuel, agus Datan, agus Abiram. Is iad so an Datan agus an t-Abiram a bha ainmeil sa' chomhchruimeach, a rinn strì an aghaidh Mhois agus an aghaidh Aaroin ann an cuideachd Chorah, 'nuair a rinn iad strì an aghaidh an Tighearn;

10 Agus dh'fhosgail an talamh a bheul, agus shluig e suas iad maille ri Corah, 'nuair a bhàsaich a' chuideachd sin, an uair a loisg an teine suas dà cheud agus leth-cheud fear: agus rinneadh iad 'nan combaradh⁹.

11 Gidheadh, cha do bhàsaich clann Chorah.

12 Mic Shimeoin, a réir an teaghlaichean: o Nemuel, teaghlach nan Nemuelach: o Iamin, teaghlach nan Iamineach: o Iachin, teaghlach nan Iachineach:

13 O Sherah, teaghlach nan Sarhach: o Shaul, teaghlach nan Saulach.

14 Is iad sin teaghlaichean nan Simeonach, fichead agus dà mhìle agus dà cheud.

15 Clann Ghad, a réir an teaghlaichean: o Shephon, teaghlach nan Sephonach: o Hagi, teaghlach nan Hagitheach: o Shuni, teaghlach nan Sunitheach:

16 O Osni, teaghlach nan Osnitheach: o Eri, teaghlach nan Eritheach:

17 O Arod, teaghlach nan Arodach: o Areli, teaghlach nan Arelitheach:

18 Is iad sin teaghlaichean chloinn Ghad, a réir na dh' àirmheadh dhiubh, dà fhichead mìle agus cùig ceud.

19 B'iad mic Iudah, Er agus Onan: agus fhuair Er agus Onan bàs ann an tìr Chanaain.

20 Agus b'iad mic Iudah, a réir an teaghlaichean; o Shelah, teaghlach nan Selanach: o Pharets, teaghlach nam Pharetsach: o Sherah teaghlach nan Sarhach:

21 Agus b'iad mic Pharets; o Hesron, teaghlach nan Hesronach: o Hamul teaghlach nan Hamulach.

22 Is iad sin teaghlaichean Iudah, a réir na dh' àirmheadh dhiubh, trì fichead agus sè mìle deug agus cùig ceud.

¹ shàth e trid iad.

³ chùmhnannt.

² teas-ghràdhach.

⁴ ceud, àrd.

⁵ Teannaich. Eabh.

⁶ cùis.

⁸ réileanaibh.

⁷ air son Pheoir.

⁹ ball-sampuill.

23 Do mhic Isachair, a réir an teaghlach: o Tholah, teaghlach nan Tolach: o Phua, teaghlach nam Punach:

24 O Iasub, teaghlach nan Iasubach: o Shimron, teaghlach nan Simronach.

25 *Is* iad sin teaghlaichean Isachair, a réir na chaidh àireamh dhiubh, tri fichead agus ceithir mìle agus trì cheud.

26 Do mhic Shebuluin, a réir an teaghlaichean: o Shered, teaghlach nan Sardach: o Elon, teaghlach nan Elonach: o Iahleel, teaghlach nan Iahleleach.

27 *Is* iad sin teaghlaichean nan Sebulunach, a réir na chaidh àireamh dhiubh, tri fichead mìle agus cùig cheud.

28 *B'iad* mic Ioseiph, a réir an teaghlaichean, Manaseh agus Ephraim.

29 Do mhic Mhanaseh: o Mhachir, teaghlach nam Machireach; agus ghin Machir Gilead: o Ghilead *thàinig* teaghlach nan Gileadach.

30 *Is* iad so mic Ghilead: o Ieser, teaghlach nan Iesereach: o Helec, teaghlach nan Heleceach:

31 Agus o Asriel, teaghlach nan Asrieach: agus o Shechem, teaghlach nan Sechemeach:

32 Agus o Shemida, teaghlach nan Semideach: agus o Hephher, teaghlach nan Hephereach.

33 Agus cha robh aig Selophehad mac Shepheir mic sam bith, ach nigheanan: agus *b'iad* ainmean nigheana Shelopheaid, Mahla, agus Noah, Hoglah, Milcah, agus Tirsah.

34 *Is* iad sin teaghlaichean Mhanaseh, agus iadsan a chaidh àireamh dhiubh, leth-cheud agus dà mhìle agus seachd ceud.

35 *Is* iad so mic Ephraim, a réir an teaghlaichean: o Shutelah, teaghlach nan Suteleach: o Bhecher, teaghlach nan Bechereach: o Thahan, teaghlach nan Tahanach.

36 Agus *is* iad so mic Shutelah: o Eran, teaghlach nan Eranach.

37 *Is* iad sin teaghlaichean mhac Ephraim, a réir na chaidh àireamh dhiubh, dà mhìle dheug: 'ar fhichead agus cùig cheud. *Is* iad sin mic Ioseiph a réir an teaghlaichean.

38 Mic Bheniamin, a réir an teaghlaichean: o Bhelah, teaghlach nam Belach: o Asbel, teaghlach nam Asbealach: o Ahiram, teaghlach nan Ahiramach:

39 O Shupham, teaghlach nan Suphamach: o Hupham, teaghlach nan Huphamach.

40 Agus *b'iad* mic Bhelah Ard agus Naaman: o *Ard*, teaghlach nan Ardach: agus o Naaman, teaghlach nan Naamanach.

41 *Is* iad sin mic Bheniamin, a réir an teaghlaichean: agus *b'iadsan* a chaidh

àireamh dhiubh, dà fhichead agus cùig mìle agus sè ceud.

42 *Is* iad so mic Dhan, a réir an teaghlaichean: o Shuham, teaghlach nan Suhmach. *Is* iad so teaghlaichean Dhan, a réir an teaghlaichean.

43 *B'iad* teaghlaichean nan Suhmach uile, a réir na chaidh àireamh dhiubh, tri fichead agus ceithir mìle agus ceithir cheud.

44 Do chloinn Aseir, a réir an teaghlaichean: o Imna, teaghlach nan Imnathach: o Iesui, teaghlach nan Iesuiteach: o Bheriah, teaghlach nam Beritheach.

45 Do mhic Bheriah: o Heber, teaghlach nan Hebereach: o Mhalchiel, teaghlach nam Malchieleach.

46 Agus *b'e* ainm nighiunn Aseir, Sarah.

47 *Is* iad sin teaghlaichean mhac Aseir, a réir na chaidh àireamh dhiubh, leth-cheud agus trì mìle agus ceithir cheud.

48 Do mhic Naphtali, a réir an teaghlaichean: o Iahseel, teaghlach nan Iahseeleach: o Ghuni, teaghlach nan Gunitheach:

49 O Ieser, teaghlach, nan Iesereach: o Shillem, teaghlach nan Sillemeach.

50 *Is* iad sin teaghlaichean Naphtali, a réir an teaghlaichean: agus *b'iadsan* a dh'àirmheadh dhiubh, dà fhichead agus cùig mìle agus ceithir cheud.

51 *B'iad* sin iadsan a dh'àirmheadh do chloinn Israeil, sè ceud mìle agus aon mhìle seachd ceud agus deich 'ar fhichead.

52 Agus labhair an Tighearna ri Maois, ag ràdh,

53 Dhoibh sin roinnear am fearann mar oighreachd, a réir àireimh nan ainm.

54 Do mhòran bheir thu ni's mò dh'oighreachd, agus do bheagan bheir thu ni's lugha dh'oighreachd: bheirear 'oighreachd féin do gach aon, a réir an àireimh.

55 Gidheadh, roinnear am fearann le crannchur: a réir ainmeanna threubhan an aithriche gheibh iad an oighreachd.

56 A réir a' chrannchuir roimear a shealbh eadar mhòran agus bheagan.

57 Agus *is* iad so iadsan a dh'àirmheadh do na Lebhitich, a réir an teaghlaichean: o Gherson, teaghlach nan Gersonach: o Chohat, teaghlach nan Cohatach: o Mherari, teaghlach nan Meraritheach.

58 *Is* iad so teaghlaichean nan Lebhitheach: teaghlach nan Libnitheach, teaghlach nan Hebronach, teaghlach nam Mahlahach, teaghlach nam Muisitheach, teaghlach nan Corahach: agus ghin Cohat Amram.

59 Agus *b'e* ainm mnà Amraim Iochbed, nighean Lebhi, a rug a màthair do Lebhi san Eiphit: agus rug i do Amram, Aaron, agus Maois, agus Miriam am piuthar.

60 Agus do Aaron rugadh Nadab, agus Abihu, Eleasar agus Itamar.

61 Agus fhuair Nadab agus Abihu bàs, an uair a thug iad suas teine coimleach an làthair an Tighearn.

62 Agus b'iadsan a chaidh àireamh dhiubh, fichead agus trì mìle, fìrionnaich uile o mhos a dh'aois agus os a cheann; oir cha d'àirmheadh iad am measg chloinn Israeil, a chionn nach d'thugadh oighreachd dhoibh am measg chloinn Israeil.

63 Is iad sin iadsan a chaidh àireamh le Maois agus Eleasar an sagart, a dh'àireamh clann Israeil ann an còmh-nardaibh Mhoais, làimh ri Iordan *am fagus do Iericho*.

64 Ach 'nam measg sin cha robh aon duine dhiubhsan a dh'àireamh Maois agus Aaron an sagart, an uair a dh'àireamh iad clann Israeil ann am fàsach Shìnai:

65 Oir thubhairt an Tighearn umpasan, Gheibh iad gu deimhin bàs anns an fhàsach. Agus cha d'fhàgadh duine dhiubh, saor o Chaleb mac Iephuneh, agus Iosua mac Nuin.

CAIB. XXVII.

1 *An lagh a thaoibh oighreachdan chloinn Israeil.*

12 *Fhuair Maois fos a bhàis, 15 agus ghuidh e air an Tighearn gu'n cuireadh e duine ion-chuidh os ceann a' chomhchruinnich 'na àite: 18 dh'orduich esan dha Iosua mac Nuin a ghabhail, agus a chur air leth chum na crìche sin.*

AN sin thàinig nigheana Shelophehaid, mhic Hepheir, mhic Ghilead, mhic Mhachir, mhic Mhanaseh do theaghlachibh Mhanaseh mhic Ioseph: agus is iad so ainmean a nigheana, Mahlah, Noah, agus Hoglah, agus Milcah, agus Tirsah.

2 Agus sheas iad an làthair Mhoais, agus an làthair Eleasair an t-sagairt, agus an làthair nan ceannard, agus a' chomhchruinnich uile, làimh ri dorus pàill-iuin a' choimhthionail, ag ràdh,

3 Dh'eug ar n-athair anns an fhàsach, agus cha robh e ann an cuideachd na muinntir a chruinnich iad fèin r'a chéile an aghaidh an Tighearn ann an cuideachd Chorah, ach dh'eug e 'na pheacadh féin; agus cha robh mic sam bith aige.

4 C'ar son a chaillear ainm ar n-athar o mheasg a theaghlach a chionn nach 'eil mac aige? Thugaibh dhuinn *uime sin* sealbh am measg bhràithrean ar n-athar.

5 Agus thug Maois an cùis an làthair an Tighearn.

6 Agus labhair an Tighearna ri Maois, ag ràdh,

7 Labhair nigheana Shelophehaid gu ceart: bheir thu dhoibh gu cinnteach sealbh oighreachd am measg bhràithrean an athar; agus bheir thu fa'near gu'n

tig oighreachd an athar d'an ionnsuidh.

8 Agus labhraidh tu ri cloinn Israeil ag ràdh, Ma gheibh duine bàs, agus gun mhaic aige, an sin bheir sibh fa'near, gu'n tig 'oighreachd-san chum a nighinn.

9 Agus mur bi nighean aige, an sin bheir sibh 'oighreachd d'a bhràithribh.

10 Agus mur bi bràithrean aige, an sin bheir sibh 'oighreachd do bhràithribh 'athar.

11 Agus mur bi bràithrean aig 'athair, an sin bheir sibh 'oighreachd d'a fhear-dàimh¹ a's faigse dha d'a theaghlach, agus seallbaichidh e i: agus bithidh e do chloinn Israeil 'na reachd² breitheanais, mar a dh'àithn an Tighearna do Mhoais.

12 Agus thubhairt an Tighearna ri Maois, Imich suas do'n t-sliabh so Abarim, agus gabh sealladh do'n fhearann a thug mise do chloinn Israeil.

13 Agus an uair a chì thu e, cruinnich ear thusa mar an ceudna clum do dhaoine, mar a chruinnich eadh Aaron do bhràithair,

14 A chionn gu'n d'rinn sibh ceannairc an aghaidh n'àithne-sa ann am fàsach Shìn, ann an comhstri a' chomhchruinnich, agus nach do naomhaich sibh mi³ aig an uisge ann an sealladh an sùl: is e sin uisge Mheribah ann an Cades, ann am fàsach Shìn.

15 Agus labhair Maois ris an Tighearn, ag ràdh,

16 Cuireadh an Tighearna⁴, Dia spiorad na h-uile fheòla, duine os ceann a' chomhchruinnich,

17 A théid a mach rompa, agus a thig a steach rompa, agus a threòraicheas a muigh iad, agus a bheir a stigh iad; a chum nach bi comhchruinneach an Tighearna mar chaoraich aig nach 'eil buachaill.

18 Agus thubhairt an Tighearna ri Maois, Gabh a t'ionnsuidh Iosua mac Nuin, duine anns *am bheil* an spiorad, agus cuir do làmh air.

19 Agus cuir e an làthair Eleasair an t-sagairt, agus an làthair a' chomhchruinnich uile; agus thoir àithne dha 'nam fianuis.

20 Agus cuiridh tu *cuid* do t'urram air, a chum gu'm bi comhchruinneach chloinn Israeil uile ùmhal dha⁵.

21 Agus seasaidh e'n làthair Eleasair an t-sagairt, a dh'iarraas *comhairl'* air a shon, a réir breitheanais na h-Urim an làthair an Tighearn: air 'fhocal-san théid iad a mach, agus air 'fhocal thig iad a steach, e féin, agus clann Israeil uile maille ris, eadhon an comhchruinneach uile.

¹ d'a fheoil. Eabh.

² lagh, ordugh.

³ chum mo naomhachadh.

⁴ Ichobab. Eabh.

⁵ cuiridh tu do t' onoir air, chum gu'n éisd comhchruinneach chloinn Israeil uile ris.

22 Agus rinn Maois mar a dh'àithn an Tighearna dha; agus ghabh e Iosua, agus chuir e 'n làthair Eleasair an t-sagairt e, agus an làthair a' chomhchruinnich uile.

23 Agus chuir e a làmh air, agus thug e àithne dha, mar a labhair an Tighearna le làmh Mhaois.

CAIB. XXVIII.

Mu thabhartasan agus ìobairtean àraidh, gu bhì air an toirt seachad 'nan àm suidhichte.

AGUS labhair an Tighearna ri Maois, ag ràdh,

2 Aithn do chloinn Israeil, agus abair riu, Mo thabhartas, agus m'aran air son m'ìobairtean a bheirear suas le teine *chum* fàile chùbhraidh dhomh, bheir sibh an aire gu'n toir sibh seachad dhomhsa 'nan àm iomchuidh féin.

3 Agus their thu riu, *Is* e so an tabhartas a bheirear suas le teine, a bheir sibh seachad do'n Tighearna; dà uan do'n cheud bhliadhna gun ghaoid gach là, *chum* ìobairt-loisgte ghnàthaichte.

4 Aon uan bheir thu seachad sa' mhaduinn, agus an t-uan eile bheir thu seachad air feasgar;

5 Agus an deiceamh earrann do ephah phlùir mar thabhartas-bidh, measgta leis a' cheathramh earrann do hin a dh'oladh bhùite.

6 *Is* ìobairt-loisgte ghnàthaichte a t'ann, a dh'orduicheadh ann an sliabh Shinaì chum fàile chùbhraidh, ìobairt a bheirear suas le teine do'n Tighearn.

7 Agus *is* i a tabhartas-dìbhe an ceathramh earrann do hin air son aon uain: anns an ionad naomh bheir thu fa' near fion làidir a dhòrtadh do'n Tighearna mar thabhartas-dìbhe.

8 Agus an t-uan eile bheir thu seachad air feasgar: mar thabhartas-bidh na maidne, agus mar a tabhartas-dìbhe, bheir thu seachad e, ìobairt e bheirear suas le teine, a dh'fhàile chùbhraidh do'n Tighearn.

9 Agus air là na sàbaid, dà uan do'n cheud bhliadhna gun ghaoid, agus dà dheiceamh earrann phlùir measgta le h-oladh mar thabhartas-bidh, agus a tabhartas-dìbhe¹.

10 *Is* e so ìobairt-loisgte gach sàbaid, a thuilleadh air an ìobairt-loisgte ghnàthaichte, agus a tabhartas-dìbhe.

11 Agus ann an toiseach bhur mìos bheir sibh seachad *chum* ìobairt-loisgte do'n Tighearna, dà tharbh òg, agus aon reithe, seachd uain do'n cheud bhliadhna gun ghaoid,

12 Agus trì deiceamh earranna phlùir measgta le h-oladh mar thabhartas-bidh air son gach tairbh, agus dà dheiceamh

earrann phlùir measgta le h-oladh mar thabhartas-bidh air son gach reithe;

13 Agus aon deiceamh earrann phlùir air leth measgta le h-oladh mar thabhartas-bidh air son gach uain, *chum* ìobairt-loisgte deadh fhàile, ìobairt a bheirear suas le teine do'n Tighearn.

14 Agus mar an tabhartais-dìbhe bithidh leth hin do fhion air son tairbh, agus an treas earrann do hin airson reithe, agus an ceathramh earrann do hin air son uain: *is* i so ìobairt-loisgte gach mìosa air feadh mhìosan na bliadhna.

15 Agus iobrar aon mheann do na gabhairbh mar ìobairt-pheacaidh do'n Tighearn, a thuilleadh air an ìobairt-loisgte ghnàthaichte, agus a tabhartas-dìbhe.

16 Agus air a' cheathramh là deug do'n cheud mhios *tha* càisg² an Tighearn.

17 Agus air a' chùigeadh là deug do'n mhios so *tha* 'n fhéill: seachd làithean ithear aran neo-ghoirtichte.

18 Air a' cheud là *bithidh* comhghairm naomh; obair thràilleil³ sam bith cha dean sibh air:

19 Ach bheir sibh seachad a *chum* ìobairt a bheirear suas le teine, mar ìobairt-loisgte do'n Tighearna, dà tharbh òg, agus aon reithe, agus seachd uain do'n cheud bhliadhna: gun ghaoid bithidh iad duibh.

20 Agus bithidh an tabhartas-bidh do phlùir measgta le h-oladh: trì deiceamh earranna bheir sibh seachad air son tairbh, agus dà dheiceamh earrann air son reithe.

21 Deiceamh earrann air leth bheir thu seachad air son gach uain, air feadh nan seachd uan:

22 Agus aon bhoc-gaibhre *chum* ìobairt-pheacaidh, a dheanamh réite air bhur son.

23 Iobraidh sibh iad sin a thuilleadh air an ìobairt-loisgte sa' mhaduinn, a *tha* mar ìobairt-loisgte ghnàthaichte.

24 Mar so bheir sibh seachad⁴ gach là air feadh nan seachd làithean, biadh na h-ìobairt a bheirear suas le teine, *chum* fàile chùbhraidh do'n Tighearn: bheirear seachad e thuilleadh air an ìobairt-loisgte ghnàthaichte, agus a tabhartas-dìbhe.

25 Agus air an t-seachdamh là bithidh comhghairm naomh agaibh; obair thràilleil sam bith cha dean sibh air.

26 Mar an ceudna air là nan ceud thoradh, nuair a bheir sibh seachad tabhartas-bidh nuadh⁵ do'n Tighearn, aig ceann bhur seachduinean, bithidh comhghairm naomh agaibh; obair thràilleil sam bith cha dean sibh:

27 Ach bheir sibh seachad mar ìobairt-loisgte, *chum* fàile chùbhraidh do'n Tighearn, dà tharbh òg, aon reithe, seachd uain do'n cheud bhliadhna;

28 Agus an tabhartas-bidh do phlùir

¹ deoch-ofrail.² gabhail-thairis.³ shaoithreachail.⁴ ni sibh. Eabh.⁵ nomha.

measgta le h-oladh, tri deicheamh earrann-an air son gach tairbh, dà dheicheamh earrann air son gach reithe,

29 Deicheamh earrann air leth air son gach uain, air feadh nan seachd uan;

30 Agus aon mheann¹ do na gabhraibh, a dheanamh réite air bhur son.

31 Iobairdh sibh iad a thuilleadh air an iobairt-loisgte ghnáthaichte, agus a tabhartas-bidh, (gun ghaoid bithidh iad duibh,) agus an tabhartasan-dibhe.

CAIB. XXIX.

1 An iobairt-loisgte gu bhí air a toirt seachad air latha séididh nan trompaid, 7 air latha crádhaidh an anamanna, 12 agus air ochd láithibh féille nam páillium.

Agus anns an t-seachdamh míos, air a' cheud lá do'n mhíos, bithidh comhghairm naomh agaibh; obair thráilleil sam bith cha dean sibh: is lá séididh nan trompaid dhuibh e.

2 Agus bheir sibh seachad mar iobairt-loisgte, chum fáile chùbhraidh do'n Tighearn, aon tarbh òg, aon reithe, agus seachd uain do'n cheud bhliadhna gun ghaoid:

3 Agus bithidh an tabhartas-bidh do phlùr measgta le h-oladh, tri deicheamh earrannan air son tairbh, agus dà dheicheamh earrann air son reithe,

4 Agus aon deicheamh earrann air son gach uain, air feadh nan seachd uan;

5 Agus aon mheann do na gabhraibh chum iobairt-pheacaidh, a dheanamh réite air bhur son:

6 A thuilleadh air iobairt-loisgte a' mhíosa, agus a tabhartas-bidh, agus an iobairt-loisgte ghnáthaichte, agus a tabhartas-bidh, agus an tabhartasan-dibhe, a réir an gnátha, chum fáile chùbhraidh, iobairt a bheirear suas le teine do'n Tighearn.

7 Agus bithidh agaibh air an deicheamh lá do'n t-seachdamh míos so comhghairm naomh: agus crádhaidh sibh bhur n-anamanna: obair sam bith cha dean sibh air.

8 Ach bheir sibh seachad chum iobairt-loisgte do'n Tighearn a dh'fháile cùbhraidh, aon tarbh òg, aon reithe, agus seachd uain do'n cheud bhliadhna; gun ghaoid bithidh iad duibh.

9 Agus bithidh an tabhartas-bidh do phlùr measgta le h-oladh, tri deicheamh earrannan air son gach tairbh, agus dà dheicheamh earrann air son gach reithe,

10 Deicheamh earrann air leth air son gach uain, air feadh nan seachd uan;

11 Aon mheann do na gabhraibh chum iobairt-pheacaidh, a thuilleadh air iobairt-pheacaidh na réite, agus an iobairt-loisgte ghnáthaichte, agus a tabhartas-bidh, agus

an tabhartasan-dibhe.

12 Agus air a' chùigeadh là deug do'n t-seachdamh míos, bithidh comhghairm naomh agaibh; obair thráilleil sam bith cha dean sibh; agus gleidhidh sibh féill do'n Tighearn seachd láithean.

13 Agus bheir sibh seachad chum iobairt-loisgte, iobairt a bheirear suas le teine, a dh'fháile cùbhraidh² do'n Tighearn, tri tairbh dheug òga, dà reithe, agus ceithir uain deug do'n cheud bhliadhna; gun ghaoid bithidh iad.

14 Agus bithidh an tabhartas-bidh do phlùr measgta le h-oladh, tri deicheamh earrannan air son gach tairbh do na tri tairbh dheug, dà dheicheamh earrann air son gach reithe do'n dà reithe,

15 Agus deicheamh earrann air leth air son gach uain do na ceithir uain deug;

16 Agus aon mheann do na gabhraibh chum iobairt-pheacaidh, a thuilleadh air an iobairt-loisgte ghnáthaichte, a tabhartas-bidh, agus a tabhartas-dibhe.

17 Agus air an dara lá bheir sibh seachad dà tharbh dheug òg, dà reithe, ceithir uain deug do'n cheud bhliadhna gun ghaoid:

18 Agus bithidh an tabhartas-bidh, agus an tabhartasan-dibhe air son nan tarbh, air son nan reitheachan, agus air son nan uan, a réir an àireimh, a réir a' ghnátha;

19 Agus aon mheann do na gabhraibh chum iobairt-pheacaidh, a thuilleadh air an iobairt-loisgte ghnáthaichte, agus a tabhartas-bidh, agus an tabhartasan-dibhe.

20 Agus air an treas lá aon tarbh deug, dà reithe, ceithir uain deug do'n cheud bhliadhna gun ghaoid:

21 Agus bithidh an tabhartas-bidh, agus an tabhartasan-dibhe, air son nan tarbh, air son nan reitheachan, agus air son nan uan, a réir an àireimh, a réir a' ghnátha;

22 Agus aon bhoc-gaibhre chum iobairt-pheacaidh, a thuilleadh air an iobairt-loisgte ghnáthaichte, agus a tabhartas-bidh, agus a tabhartas-dibhe.

23 Agus air a' cheathramh lá deich tairbh, dà reithe, agus ceithir uain deug do'n cheud bhliadhna gun ghaoid:

24 Bithidh an tabhartas-bidh, agus an tabhartasan-dibhe, air son nan tarbh, air son nan reitheachan, agus air son nan uan, a réir an àireimh, a réir a' ghnátha;

25 Agus aon mheann do na gabhraibh chum iobairt-pheacaidh, a thuilleadh air an iobairt-loisgte ghnáthaichte, a tabhartas-bidh, agus a tabhartas-dibhe.

26 Agus air a' chùigeadh lá naoi tairbh, dà reithe, agus ceithir uain deug do'n cheud bhliadhna gun ghaoid:

27 Agus bithidh an tabhartas-bidh, agus an tabhartasan-dibhe, air son nan tarbh,

¹ bhoc òg.

² cùmhraidh.

air son nan reitheachan, agus air son nan uan, a réir an àireimh, a réir a' ghnàtha;

25 Agus aon bhoc-gaibhre *chum* ìobairt-pheacaidh, a thuilleadh air an ìobairt-loisgte ghnàthaichte, agus a tabhartas-bidh, agus a tabhartas-dibhe.

29 Agus air an t-seathadh là ochd tairbh, dà reithe, agus ceithir uain deug do'n cheud bhliadhna gun ghaoid:

30 Agus *bithidh* an tabhartas-bidh, agus an tabhartasan-dibhe, air son nan tarbh, air son nan reitheachan, agus air son nan uan, a réir an àireimh, a réir a' ghnàtha;

31 Agus aon bhoc-gaibhre *chum* ìobairt-pheacaidh, a thuilleadh air an ìobairt-loisgte ghnàthaichte, a tabhartas-bidh, agus a tabhartas-dibhe.

32 Agus air an t-seachdamh là, seachd tairbh, dà reithe, agus ceithir uain deug do'n cheud bhliadhna gun ghaoid:

33 Agus *bithidh* an tabhartas-bidh, agus an tabhartasan-dibhe, air son nan tarbh, air son nan reitheachan, agus air son nan uan, a réir an àireimh, a réir a' ghnàtha;

34 Agus aon bhoc-gaibhre *chum* ìobairt-pheacaidh, a thuilleadh air an ìobairt-loisgte ghnàthaichte, a tabhartas-bidh, agus a tabhartas-dibhe.

35 Agus air an ochdamh là bithidh àrd-choimhthional agaibh: obair thràilleil sam bith cha dean sibh air:

36 Ach bheir sibh seachd *chum* ìobairt-loisgte, ìobairt a bheirear suas le teine, a dh'fhàile cùbhraidh do'n Tighearn, aon tarbh, aon reithe, seachd uain do'n cheud bhliadhna gun ghaoid:

37 *Bithidh* an tabhartas-bidh, agus an tabhartasan-dibhe, air son an tairbh, air son an reithe, agus air son nan uan, a réir an àireimh, a réir a' ghnàtha;

38 Agus aon bhoc-gaibhre *chum* ìobairt-pheacaidh, a thuilleadh air an ìobairt-loisgte ghnàthaichte, agus a tabhartas-bidh, agus a tabhartas-dibhe.

39 Na *nithe* sin ni sibh do'n Tighearna 'nur féillibh suidhichte¹, thuilleadh air bhur bòidibh, agus bhur tabhartasan saor-thoile, air son bhur n-ìobairtean-loisgte, agus air son bhur tabhartasan-bidh, agus air son bhur tabhartasan-dibhe, agus air son bhur tabhartasan-sith.

40 Agus dh'innis Maois do chloinn Israeil a réir gach ni a dh'àithn an Tighearna do Mhaois.

CAIB. XXX.

1 *Cha'n fheud* bòidean a bhi air am briseadh. 9 *Mu* bhòid bantraich, agus mnà a dhealaicheadh *r'a* fear-pòsda.

AGUS labhair Maois ri ceannardan nan treubh a thaobh chloinn Israeil², ag ràdh, Is e so an ni a dh'àithn an Tighearn.

2 Ma bhòidicheas duine bòid do'n Tighearn, no ma mhionnaicheas e mionnan a cheangal 'anama le ceangal³, cha bhris⁴ e 'fhocal; a réir gach ni a thig a mach as a bheul, ni e.

3 Mar an ceudna, ma bhòidicheas bean bòid do'n Tighearn, agus gu'n ceangail si *i féin* le ceangal, agus *i* ann an tigh a h-athar 'na h-òige;

4 Agus gu'n cluinn a h-athair a bòid, agus a ceangal leis an do cheangail i h-anam, agus gu'm fan a h-athair 'na thosd rithe, an sin seasaidh a bòidean uile, agus seasaidh gach ceangal leis an do cheangail i a h-anam.

5 Ach na chuireas a h-athair 'na h-aghaidh san là anns an cluinn e, cha seas aon d'a bòidibh, no d'a ceanglaichibh, leis an do cheangail i a h-anam; agus maithidh an Tighearna dh'i, a chionn gu'n do chuir a h-athair 'na h-aghaidh⁵.

6 Agus ma bha idir fear-pòsda aice 'nuair a bha bòidean oirre, no 'nuair a labhair i ni as a beul, leis an do cheangail i a h-anam,

7 Agus gu'n cual' a fear e, agus gu'n d'fhan e 'na thosd rithe san là anns an cual' e i; an sin seasaidh a bòidean, agus seasaidh a ceanglaichean leis an do cheangail i a h-anam.

8 Ach ma chuireas a fear-pòsda 'na h-aghaidh san là anns an cluinn e i, an sin bheir e gu neò-bhrigh a bòid a bhòidich i, agus an ni a labhair i le 'bilibh, leis an do cheangail i a h-anam; agus bheir an Tighearna maithneas dh'i.

9 Ach gach bòid bantraich, agus mnà dealaichte, leis an do cheangail i a h-anam, seasaidh i 'na h-aghaidh.

10 Agus ma bhòidich i ann an tigh a fir, no ma cheangail i a h-anam le ceangal maille ri mionnaibh,

11 Agus gu'n cual' a fear e, agus gu'n d'fhan e 'na thosd rithe, agus nach do chuir e 'na h-aghaidh; an sin seasaidh a bòidean uile, agus seasaidh gach ceangal leis an do cheangail i a h-anam.

12 Ach ma chuir a fear gu tur air chùl iad⁶ san là anns an cual' e iad, an sin ge b'e ni a thàinig a mach as a beul a thaobh a bòidean, no thaobh ceangail a h-anama, cha seas e; chuir a fear air chùl iad, agus bheir an Tighearna maithneas dh'i.

13 Na bòidean, agus na mionnan sin uile a cheanglas a chum an t-anam a chràdh, feudaidh a fear an daingneachadh, no feudaidh a fear an cur air chùl.

14 Ach ma dh'fhanas a fear gu tur 'na thosd rithe, o là gu là; an sin tha e a' daingneachadh a bòidean uile, no a ceanglaichean uile, a ta oirre: tha e g'an

¹ òrdùichte ² cinn-fheadhna threubh chloinn Israeil. ³ le cuibhreach, bann. ⁴ truaill.

⁵ gu'n d'thug a h-athair a bòid gu neò-bhrigh.

⁶ rinn a fear faoin iad, thug e gu neò-bhrigh iad.

deanamh seasmhach, a chionn gu'n d'fhan e 'na thosd rithe san là anns an cual' e iad.

15 Ach ma chuireas e air chor sam bith air chùl iad, an déigh dha 'n cluinntinn; an sin giùlainidh e a h-aingidheachd-san.

16 Is iad sin na reaclan a dh'àithn an Tighearna do Mhaois, eadar duine agus a bhean, eadar athair agus a nighean, agus i fathast 'na h-òighe ann an tigh a h-athar.

CAIB. XXXI.

1 Chreachadh na Midianaich, agus mharbhadh Balaam. 14 Bha corruich aig Maois ris na ceannardaibh, a chionn gu'n do ghléidh iad na mnàì beò.

A GUS labhair an Tighearna ri Maois, ag ràdh,

2 Diol clann Israeil' air na Midianaich; 'na dhéigh sin cruinnichear chum do dhaoine thu.

3 Agus labhair Maois ris an t-sluagh, ag ràdh, Rachadh cuid dibh fo'n armaibh chum a' chogaidh, agus imicheadh iad a chogadh an aghaidh nam Midianach, agus dioladh iad an Tighearna air Midian.

4 Cuiridh sibh mìle do gach tréibh, air feadh uile threubhan Israeil, chum a' chogaidh.

5 Mar sin thugadh a mach á mìltibh Israeil, mìle do gach tréibh, dà mhìle dheug armaichte chum cogaidh.

6 Agus chuir Maois iad a chum a' chogaidh, mìle do gach tréibh, iadsan agus Phinehas mac Eleasair an t-sagairt, a chum a' chogaidh, leis na h-innealaibh naomha 'na làimh, agus na trompaidean gu séideadh.

7 Agus chog iad an aghaidh nam Midianach, mar a dh'àithn an Tighearna do Mhaois; agus mharbh iad na firionnaich uile.

8 Agus mharbh iad rìghrean Mhidiain, a thuilleadh air a' chuid eile dhiubh a mharbhadh; eadhon Ebhi, agus Recem, agus Sur, agus Hur, agus Reba, cuig rìghrean Mhidiain: Balaam mac Bheoir mar an ceudna mharbh iad leis a' chlàidheamh.

9 Agus thug clann Israeil leo mnàì Mhidiain 'nam braighdibh, agus an clann bheag, agus thug iad leo creach an spréidh uile, agus an treudan uile, agus am maoin uile.

10 Agus loisg iad am bailtean uile anns an robh iad a chòmhnuidh, agus an dùin² uile le teine.

11 Agus thug iad leo a' chreach uile, agus an cobhartach³ uile, eadar dhaoine agus ainmhidhean.

12 Agus thug iad na braighdean⁴, agus a' chreach, agus an cobhartach, gu Maois agus Eleasar an sagart, agus gu comh-chruinneach chloinn Israeil, a chum a'

chaimp aig còmhnradaibh Mhaois, a ta làimh ri Iordan am fagus do Iericho.

13 Agus chaidh Maois agus Eleasar an sagart, agus ceannardan a' chomhchruinnich uile mach 'nan coinneamh, an taobh a muigh do'n champ.

14 Agus bha corruich air Maois ri luchd-riaghlaidh an t-sluaigh, ris na ceannardaibh air mhiltibh, agus na ceannardaibh air cheudaibh, a thàinig o'n chogadh.

15 Agus thubhairt Maois riu, An do ghléidh sibh na mnàì uile beò?

16 Feuch, thug iad sin air cloinn Israeil, le comhairle Bhalaam, peacachadh an aghaidh an Tighearna ann an aobhar Pheoir; agus bha plàigh air feadh comh-chruinnich an Tighearna.

17 A nis uime sin, marbhaibh gach firionnach am measg na cloinne bige, agus marbhaibh gach bean d'am b'aithne fear le luidhe leis.

18 Ach a' chlann bhan uile do nach b'aithne fear le luidhe leis, gleidhibh beò dhuibh féin.

19 Agus fanaibh-se an taobh a muigh do'n champ seachd làithean: ge b'e mharbh neach air bith, agus ge b'e bhean ri neach a mharbhadh, glanaibh sibh féin, agus bhur braighdean air an treas là, agus air an t-seachdamh là;

20 Agus glanaibh bhur n-eudach uile agus gach ni rinneadh do chroicibh, agus gach obair do fhionnadh ghabhar, agus gach ni a rinneadh do fhiodh.

21 Agus thubhairt Eleasar an sagart ris na fir-chogaidh a chaidh a mach a dh'ionnsuidh a' chatha, Is e so ordugh an lagha a dh'àithn an Tighearna do Mhaois:

22 A mhàin an t-òr, agus an t-airgiod, an t-umha, an t-iarunn, an staoin, agus an luaidh,

23 Gach ni a dh'fhuilgeas an teine, bheir sibh fa'near e dhol troimh 'n teine, agus glanar e; gidheadh le uisge an sgaraidh glanar e: agus gach ni nach fulaing an teine, bheir sibh fa'near e dhol troimh 'n uisge.

24 Agus nighidh sibh bhur n-eudach air an t-seachdamh là, agus bithidh sibh glan, agus 'na dhéigh sin thig sibh a stigh do'n champ.

25 Agus labhair an Tighearna ri Maois, ag ràdh,

26 Gabh àireamh na creich a thogadh, eadar dluine agus ainmhidh, thu féin, agus Eleasar an sagart, agus prìomh-aithriche a' chomhchruinnich;

27 Agus roinn a' chreach 'na dà earrainn; eadar a' mhuinntir a ghabh an cogadh orra féin, a chaidh mach do'n chath, agus eadar an comhchruinneach uile:

¹ Thoir aicheahkail chloinn Israeil a mach.

² an caistealan, an dàingnichean.

³ a' chobhartach.

⁴ cìomhaich, prìosanaich.

28 Agus tog cis¹ do'n Tighearn o na fir-chogaidh, a chaidh mach do'n chath: aon anam á cuig ceud, *araon* do na daoinibh, agus do'n bhuar, agus do na h-asail, agus do na caoraich.

29 Gabh *e* as an leth-san, agus thoir *e* do Eleasar an sagart, *mar* thabhartas-togta do'n Tighearn.

30 Agus á leth chloinn Israeil, gabhaidh tu aon chuibhrionn á leth-cheud, do na daoinibh, do'n bhuar, do na h-asail, agus do na treudaibh, do gach ainmhidh, agus bheir thu iad do na Lebhithich, a tha gleidheadh cùraim pàilliuin an Tighearn.

31 Agus rinn Maois agus Eleasar an sagart mara dh'àithn an Tighearn do Mhaois.

32 Agus b'e an cobhartach, *eadhon* a' chuid eile do'n chreich a ghlac na fir-chogaidh, sè ceud mìle, agus deich is trì fhichead mìle, agus cuig mìle caora,

33 Agus trì fichead agus dà mhìle dheug bò,

34 Agus trì fichead agus aon mhìle asal,

35 Agus dà mhìle dheug 'ar fhichead anam san iomlan, do mhnai bh do nach b'àithne fear le luidhe leis.

36 Agus bha 'n leth bu chuibhrionn doibhsan a chaidh mach a chum a' chogaidh, ann an àireamh trì cheud mìle, agus seachd mìle deug 'ar fhichead agus cuig ceud caora;

37 Agus b'i cis an Tighearn do na caoraich sè ceud agus trì fichead agus cuig deug.

38 Agus *b'iad* am buar sè mìle deug 'ar fhichead: dhiubh so *b'i* cis an Tighearn trì fichead 's a dhà-dheug.

39 Agus *b'iad* na h-asail deich mìle thar fhichead agus cuig ceud: dhiubh so *b'i* cis an Tighearn trì fichead agus a h-aon.

40 Agus *b'iad* anama nan daoine² sè mìle deug: dhiubh so *b'i* cis an Tighearn dà anam dheug 'ar fhichead.

41 Agus thug Maois a' chis, *eadhon* tabhartas-togta an Tighearn, do Eleasar an sagart, mar a dh'àithn an Tighearn do Mhaois.

42 Agus do leth chloinn Israeil, a roinn Maois o'n luchd-chogaidh,

43 (A nis *b'i* 'n leth a *bhuineadh* do'n chomhchruinneach, trì cheud mìle, agus seachd mìle deug 'ar fhichead agus cuig ceud caora,

44 Agus sè mìle deug 'ar fhichead bò,

45 Agus deich mìle thar fhichead asal agus cuig ceud,

46 Agus sè mìle deug anam³,

47 Eadhon do'n leth a *bhuineadh* do chloinn Israeil, ghabh Maois aon chuibhrionn á leth-cheud eadar dhuine agus ainmhidh, agus thug e iad do na Le-

bhithich, a bha gleidheadh cùraim pàilliuin an Tighearn, mar a dh'àithn an Tighearn do Mhaois.

48 Agus thàinig an luchd-riaghlaidh a bha os ceann mhiltean an t-sluaigh, na ceannardan air mhiltibh, agus na ceannardan air cheudaibh, am fagus do Mhaois:

49 Agus thubhairt iad ri Maois, Ghabh do sheirbhisich àireamh nam fear-cogaidh a tha fo'r làimh, agus cha 'n'eil duine dhinn air chall.

50 Uime sin, thug sinn tabhartas a chum an Tighearn, gach fear na fhuair e do sheudaibh⁴ òir, *eadhon* slabhraidhean, agus usgraichean⁵, fàinnean, cluas-fhaillean, agus criosan, a dheanamh réite air son ar n-anaman an làthair an Tighearn.

51 Agus ghabh Maois agus Eleasar an sagart an t-òr uatha, uile 'na sheudaibh oibrichte.

52 Agus b'e òr an tabhartais uile a thug iad seachad do'n Tighearn, o na ceannardaibh air mhiltibh, agus o na ceannardaibh air cheudaibh, sè mìle deug, seachd ceud agus leth-cheud secel.

53 (Oir ghabh na fir-chogaidh cobhartach, gach duine dha féin.)

54 Agus ghabh Maois agus Eleasar an sagart an t-òr o na ceannardaibh air mhiltibh, agus air cheudaibh, agus thug iad e gu pàillium a' choimhthionail, mar chuimhneachan do chloinn Israeil an làthair an Tighearn.

CAIB. XXXII.

Dh'iarr clann Reubein agus clann Ghad sealbh san fhearann air an taobh an ear do Iordan.

ANIS bha aig cloinn Reubein agus cloinn Ghad ro mhòran spréidhe: agus an uair a chunnaic iad fearann Iaseir, agus fearann Ghilead, feuch, *bha* 'n t-àite 'na àite spréidhe:

2 Agus thàinig clann Ghad, agus clann Reubein, agus labhair iad ri Maois, agus ri Eleasar an sagart, agus ri uachdaran-aibh a chomhchruinnich, ag ràdh,

3 Atarot, agus Dibon, agus Iaser, agus Nimrah, agus Hesbon, agus Elealeh, agus Sebam, agus Nebo, agus Beon:

4 *Eadhon* an dùthaich a bhuail an Tighearn na roimh chomhchruinneach Israeil, is fearanne air son spréidhe, agus tha spréidh aig do sheirbhisich.

5 Uime sin, ars' iadsan, ma fhuair sinn deadh-ghean⁶ a'd' shealladh, thugar am fearann so do d' sheirbhisich mar sheilbh agus na toir sinn a null thar Iordan.

6 Agus thubhairt Maois ri cloinn Ghad, agus ri cloinn Reubein, An téid bhur bràithrean gu cogadh, agus an suidhsibhse an so?

¹ cuibhrionn.

² nam pearsanna.

³ anamanna dhaoine. Eabh. persons. Sasg.

⁴ innil, uidheam.

bracelets. Sasg.

⁵ làmh-fhaillean;

⁶ fabhor.

7 Agus c'ar son a bheir sibh mi-mhisneach do ehiridhe chloinn Israeil, a dhòla null do'n fhearann a thug an Tighearna dhoibh?

8 Mar so rinn bhur n-aithriche, 'nuair a chuir mi iad o Chades-barnea a dh'amharca na tìre :

9 'Nuair a chaidh iad suas gu gleann Escoil, agus a chunnaic iad am fearann, thug iad mi-mhisneach do ehiridhe chloinn Israeil, a chum nach rachadh iad a steach do'n fhearann a thug an Tighearna dhoibh.

10 Agus las corruich an Tighearna san àm sin féin, agus mhionnaich e, ag ràdh,

11 Gu cinnteach cha 'n fhaic a h-aon do na daoineibh a thàinig a nìos as an Eiphit, o fhichead bliadhna dh'aois agus os a cheann, am fearann a mhionnaich mi do Abraham, do Isaae, agus do Jacob, a chionn nach do lean iad mi gu h-ìomlan ;

12 Saor o Chaleb mac Iephuneh an Censeach, agus Iosua mac Nuin : oir lean iadsan an Tighearna gu h-ìomlan.

13 Agus las corruich an Tighearna an aghaidh Israeil, agus ehuir e air seacharan¹ iad san fhàsach dà fhichead bliadhna, gus an deachaidh as do'n ghinealach sin uile a rinn olc an sealladh an Tighearna.

14 Agus, feuch, tha sibhe air éirigh suas an àite bhur n-aithriche, gineal dhroch dhaoine, a mheudachadh fathast mòr-chorruich an Tighearna ri h-Israel.

15 Oir ma thionndaidheas sibh air falbh o 'leantuinn-san fàgaidh e fathast uair eile san fhàsach iad, agus sgrìosaibh sibh an sluagh so uile.

16 Agus thàinig iad am fagus da, agus thubhairt iad, Togaidh sinn mainnrean ehaorach an so d'ar spréidh, agus bailtean² d'ar cloinn bhig :

17 Ach théid sinn féin deas-armaichte roimh chloinn Israeil, gus an toir sinn iad d'an àite; agus ni ar clann bheag còmh-nuidh sna bailtibh daingnichte air sgàth³ luchd-àiteachaidh na tìre.

18 Cha phill sinn d'ar tighibh, gus an sealbhaich clann Israeil gaeh duine dhiubh 'oighreachd féin :

19 Oir cha sealbhaich sinne maille riusan an taobh eile do Iordan, no thall o sin ; a chionn gu'n do thuit ar n-oighreachd dhuinne air an taobh so do Iordan a làimh na h-àird' an ear.

20 Agus thubhairt Maois riu, Ma ni sibh an nì so, ma théid sibh fo'r⁴ n-armaibh roimh an Tighearna gu eogadh,

21 Agus gu'n téid sibh uile armaichte thar Iordan roimh an Tighearna, gus am fuadaich e mach a naimhdean as a làthair.

22 Agus gu'n ceannsaichear⁵ am fearann am fianuis an Tighearna ; 'na dhéigh sin

pillidh sibh, agus bithidh sibh neò-choir-each an làthair an Tighearna, agus an làthair Israeil, agus bithidh am fearann so 'na sheilbh agaibh am fianuis an Tighearna.

23 Ach mur dean sibh mar so, feuch, pheacaich sibh an aghaidh an Tighearna ; agus bithibh cinnteach gu'm faigh bhur peacadh a mach sibh.

24 Togaibh bailtean d'ur cloinn bhig, agus mainnrean d'ur eaoirach ; agus dean-aibh an nì a chaidh mach as bhur beul.

25 Agus labhair clann Ghad agus clann Reubein ri Maois, ag ràdh, Nì do sheirbhisich mar a ta mo Thighearna ag àithneadh.

26 Bithidh ar clann bheag, ar mnà, ar treudan agus ar spréidh uile an sin ann am bailtibh Ghilead :

27 Ach théid do sheirbhisich thairis, gach fear dhiubh armaichte chum cogaidh, roimh an Tighearna gu cath, mar a tha mo thighearna ag ràdh.

28 Agus thug Maois àithne d'an taobh do Eleasar an sagart, agus do Iosua mac Nuin, agus do phrìomh-aithrichibh⁶ threubha chloinn Israeil :

29 Agus thubhairt Maois riu, Ma théid clann Ghad, agus clann Reubein a null maille ribh thar Iordan, gach fear dhiubh armaichte gu cath an làthair an Tighearna, agus gu'n ceannsaichear an tìr roimhibh⁷, an sin bheir sibh dhoibh fearann Ghilead mar sheilbh :

30 Ach mur téid iad thairis maille ribh armaichte, bithidh seilbh aca 'nur measg féin ann an tìr Chanaain.

31 Agus fhreagair clann Ghad, agus clann Reubein, ag ràdh, Mar a thubhairt an Tighearna ri d' sheirbhisich, mar sin ni sinne.

32 Théid sinn a null armaichte roimh an Tighearna do thìr Chanaain, a chum gu'm bi sealbh ar n-oighreachd againn air an taobh so do Iordan.

33 Agus thug Maois dhoibh, eadhon do chloinn Ghad, agus do ehloinn Reubein, agus do leth thréibh Mhanaseh, mic Ioseiph, rioghaehd Shihoin rìgh nan Amoraich, agus riogachd Og rìgh Bhasain, an tìr maille r'a bailtibh anns na eriochaibh, eadhon bailte na dùthcha mu'n euairt.

34 Agus thog clann Ghad Dibon, agus Atarot, agus Aroer.

35 Agus Atrot, Sophan, agus Iaser, agus Iogbehah,

36 Agus Bet-nimrah, agus Bet-haran, bailte daingnichte ; agus mainnrean air son ehaorach.

37 Agus thog clann Reubein Hesbon, agus Elealeh, agus Ciriataim,

¹ ionroll, allaban.

³ o aghaidh. Eabh.

² caithriche.

⁴ fuidh bhur.

⁵ ciosnaichear.

⁷ romhaibh.

⁶ aithreachaibh.

38 Agus Nebo, agus Baal-meon, (air d'an ainmean a bhi air an atharrachadh,) agus Sibmah: agus thug iad ainmean eile do na bailtibh a thog iad.

39 Agus chaidh clann Mhachir, mhic Mhanaseh, do Ghilead, agus ghlac iad e, agus chuir iad á seilbh an t-Amorach a bha ann.

40 Agus thug Maois Gilead do Mhachir mac Mhanasch; agus ghabh e còmhnuidh ann.

41 Agus chaidh I aer mac Mhanaseh, agus ghlac e a bhailte beaga, agus thug e Aabhoti air mar ainm orra.

42 Agus chaidh Nobah agus ghlac e Cenat, agus a bhailte beaga, agus thug e Nobah mar ainm air, a réir a' ainme féin.

CAIB. XXXIII.

1 *Turusan chloinn Israeil anns an fhàsach. 50 Na Cananaich agus an dealbhan agus an coslais leaghta uile air an sgrìos.*

IS iad so turusan chloinn Israeil, a chaidh mach á tìr na h-Eiphit, a réir an armaithean¹, fuidh làimh Mhaois agus Aaron.

2 Agus sgrìobh Maois an dol a mach a réir an turusan, air àithne an Tighearn: agus is iad so an turusan, a réir an dol a mach.

3 Agus dh'imich iad o Rameses anns a' cheud mhìos, air a' chùigeadh là deug do'n cheud mhìos: air an là màireach an déigh na càisege chaidh clann Israeil a mach le làimh àird ann an sealladh nan Eiphiteach uile.

4 (Oir dh'adhlaic na h-Eiphitich an ceud-ghin uile, a bhuail an Tighearn 'nam measg: air an diathan mar an ceudna chuir an Tighearna breitheanas an gnìomh.)

5 Agus dh'imich clann Israeil² o Rameses, agus champaich iad ann an Sucot.

6 Agus dh'imich iad o Shucot, agus champaich iad ann an Etam, a tha ann an iomall an fhàsaich.

7 Agus dh'imich iad o Etam, agus phill iad a ris gu Pihahiroth, a ta fa chomhair Bhaal-sephoin: agus champaich iad fa chomhair Mhigdol.

8 Agus dh'imich iad o chomhair Pihahiroth, agus chaidh iad troimh mheadhon na fairge do'n fhàsach, agus dh'imich iad astar thri làithean ann am fàsach Etam, agus champaich iad ann am Marah.

9 Agus dh'imich iad o Mliàrah, agus thàinig iad gu h-Elim: agus ann an Elim bha dà thobar³ dheug uisge, agus deich agus trì fichead craobh phailme: agus champaich iad an sin.

10 Agus dh'imich iad o Elim, agus champaich iad làimh ris a' mhuir ruaidh.

11 Agus dh'imich iad ann a' mhuir ruaidh, agus champaich iad ann am fàsach Shin.

12 Agus dh'imich iad á fàsach Shìin, agus champaich iad ann an Dophcah.

13 Agus dh'imich iad o Dhophcah, agus champaich iad ann an Alus.

14 Agus dh'imich iad o Alus, agus champaich iad ann an Replidim, far nach robh uisge aig an t-sluagh r'a òl.

15 Agus dh'imich iad o Replidim, agus champaich iad ann am fàsach Shinai.

16 Agus dh'imich iad o fhàsach Shinai, agus champaich iad ann an Cibrot-hata-abhah.

17 Agus dh'imich iad o Chibrot-hata-abhah, agus champaich iad ann an Haserot.

18 Agus dh'imich iad o Haserot, agus champaich iad ann an Ritmah.

19 Agus dh'imich iad o Ritmah, agus champaich iad ann an Rimon-pares.

20 Agus dh'imich iad o Rimon-pares, agus champaich iad ann an Libnah.

21 Agus dh'imich iad o Libnah, agus champaich iad ann an Risah.

22 Agus dh'imich iad o Risah, agus champaich iad ann an Chelatah.

23 Agus dh'imich iad o Chelatah, agus champaich iad ann an sliabh Shapher.

24 Agus dh'imich iad o sliabh Shapher, agus champaich iad ann an Haradah.

25 Agus dh'imich iad o Haradah, agus champaich iad ann am Machelot.

26 Agus dh'imich iad o Machelot, agus champaich iad ann an Tahat.

27 Agus dh'imich iad o Thahat, agus champaich iad ann an Tarah.

28 Agus dh'imich iad o Tharah, agus champaich iad ann am Mitah.

29 Agus dh'imich iad o Mhitah, agus champaich iad ann an Hasmonah.

30 Agus dh'imich iad o Hasmonah, agus champaich iad ann am Moserot.

31 Agus dh'imich iad o Mhoserot, agus champaich iad ann am Bene-iaacan.

32 Agus dh'imich iad o Bhene-iaacan, agus champaich iad ann an Hor-hagidgad.

33 Agus dh'imich iad o Hor-hagidgad, agus champaich iad ann an Iot-batah.

34 Agus dh'imich iad o Iot-batah, agus champaich iad ann an Ebronah.

35 Agus dh'imich iad o Ebronah, agus champaich iad ann an Esion-gaber.

36 Agus dh'imich iad o Esion-gaber, agus champaich iad ann am fàsach Shìin: is e so Cades.

37 Agus dh'imich iad o Chades, agus champaich iad ann an sliabh Hor, ann an iomall fearainn Edoim.

38 Agus chaidh Aaron an sagart suas gu sliabh Hor, air àithne an Tighearn, agus fhuair e bàs an sin, anns an dà fhichead-amh bliadhna an déigh do chloinn Israeil

¹ le'n armaitibh. ² thriall, ghabh clann Israeil

an turus.

³ shùil. Eabh.

teachd a mach á tìr na h-Eiphit, air a' cheud là do'n chùigeadh mìos.

39 Agus bha Aaron ceud agus fichead agus trì bliadhna dh'aois, an uair a dh'eug e ann an sliabh Hor.

40 Agus chuala rìgh Arad an Canaanach (a bha chòmhnuidh san àirde deas ann an tìr Chanaan) mu theachd chloinn Israeil.

41 Agus dh'imich iad o shliabh Hor, agus champaich iad ann an Salmonah.

42 Agus dh'imich iad o Shalmonah, agus champaich iad ann am Punon.

43 Agus dh'imich iad o Phunon, agus champaich iad ann an Obot.

44 Agus dh'imich iad o Obot, agus champaich iad ann an Iie-abarim, ann an crìch Mhoàib.

45 Agus dh'imich iad o Iim, agus champaich iad ann an Dìbon-gad.

46 Agus dh'imich iad o Dhibon-gad, agus champaich iad ann an Almon-diblataim.

47 Agus dh'imich iad o Almon-diblataim, agus champaich iad ann an sléibhtibh Abarim, fa chomhair Nebo.

48 Agus dh'imich iad o shléibhtibh Abarim, agus champaich iad ann an còmhnrdaibh Mhoàib, làimh ri Iordan *am fagus* do Iericho.

49 Agus champaich iad làimh ri Iordan, o Bhè-iesimot *eadhon* gu Àbel-sitim, ann an còmhnrdaibh Mhoàib.

50 Agus labhair an Tighearna ri Maois ann an còmhnrdaibh Mhoàib, làimh ri Iordan *am fagus* do Iericho, ag ràdh,

51 Labhair ri cloinn Israeil, agus abair riu, 'Nuair a théid sibh a null thar Iordan, do thìr Chanaan;

52 An sin fògraidh sibh a mach uile luchd-àiteachaidh na tìre as bhur fianuis, agus cuiridh sibh as d'an dealbhan uile, agus sgriosaidh sibh an coslais¹ leaghta uile, agus fàsaichidh sibh² an ionadan àrda uile.

53 Agus cuiridh sibh á seilbh *luchd-àiteachaidh* an fhearainn, agus ni sibh còmhnuidh ann: oir thug mise dhuibh am fearann r'a shealbhachadh.

54 Agus roinnidh sibh am fearann le crannchur mar oighreachd am measg bhur teaghlachan: dhoibhsan a's lìon-mhoire bheir sibh an oighreachd a's mò, agus dhoibhsan a's teirce bheir sibh an oighreachd a's lugha: bithidh *oighreachd* gach duine san àit anns an tuit a chrannchur; a réir treubha bhur n-aithriche sealbhaichidh sibh.

55 Ach mur fògair sibh a mach luchd-àiteachaidh an fhearainn as bhur fianuis, an sin bithidh iadsan diubh d'an leig sibh fuireach, 'nan scolbaibh³ 'nur suilean,

agus 'nam bioraibh 'nur taobhan, agus cuiridh iad campar oirbh⁴ san fhearann anns am bi sibh a chòmhnuidh.

56 Os bàrr tarlaidh, mar a smuainich mi a dheanamh riu-san, *gu'n* dean mi ribhse.

CAIB. XXXIV.

1 *Criochan fearainn Chanaan.* 16 *Ainmean nan daoine a bha gu a roinn mar oighreachd.*

AGUS labhair an Tighearna ri Maois, ag ràdh,

2 Aithn do chloinn Israeil, agus abair riu, 'Nuair a thig sibh do thalamh Chanaan, (*is e so am fearann a thuiteas oirbh mar oighreachd, eadhon fearann Chanaan maille r'a chriochaibh.*)

3 An sin bithidh bhur cearn⁵ deas o fhàsach Shin, leth ri crìch Edoim, agus is i bhur crìoch mu dheas fìor iomall na fairge saillte a làimh na h-àird' an ear.

4 Agus pillidh bhur crìoch o'n taobh mu dheas gu dìreadh Acarabim, agus théid i air a h-aghaidh gu Sìn; agus bithidh a dol a mach o'n taobh mu dheas gu Cades-barnea, agus gabhaidh i roimpe gu Hasar-adar, agus théid i air a h-aghaidh gu h-Asmon:

5 Agus bheir a' chrìoch cuairt o Asmon gu amhainn na h-Eiphit, agus bithidh a dol a mach aig an fhaireg.

6 Agus *a thaobh* na crìch' an iar, bithidh agaibh eadhon an fhaireg mhòr *mar* chrìch: bithidh *a' chrìoch* so 'na crìch dhuibh air an làimh an iar.

7 Agus is i so bhur crìoch air an làimh mu thuath: o'n fhaireg mhòr comharaichidh sibh dhuibh féin gu sliabh Hor.

8 O shliabh Hor comharaichidh sibh *bhur crìoch* gu dol a stigh Hamait; agus bithidh dol a mach na crìche gu Sedad.

9 Agus gabhaidh *bhur* crìoch roimpe gu Siphron, agus bithidh a dol a mach aig Hasarenan; is i so bhur crìoch mu thuath.

10 Agus comharaichidh sibh bhur crìoch air an taobh an ear o Hasar-enan gu Sepham.

11 Agus théid a' chrìoch sìos o Shepham gu Riblah, air an taobh an ear do Ain; agus théid a' chrìoch sìos, agus ruigidh i gu taobh fairge Chineret a làimh na h-àird' an ear.

12 Agus théid a' chrìoch sìos gu Iordan, agus bithidh a dol a mach aig a' mhuir shailte: is e so bhur fearann le 'chrìoch-aibh mu'n cuairt.

13 Agus dh'àithn Maois do chloinn Israeil, ag ràdh, *Is e so am fearann a shealbhaicheas sibh le crannchur, a dh'àithn an Tighearna thoirt do ua naoi treubhan, agus do'n leth thréibh.*

14 Oir thuair treubh chloinn Reubein an *oighreachd*, a réir tìghe an aithriche, agus

¹ iomhaighean, dreachan, riochdan.

² tìgidh sibh sìos. ³ dealgaibh, gathaibh.

⁴ bithidh iad 'nan naimhdean duibh.

⁵ cearna, oisinn.

treubh chloinn Ghad a réir tighe an aithriche; agus fhuair leth thréibh Mhanaseh an oighreachd.

15 Fhuair an dà threubh agus an leth thréibh an oighreachd air an taobh so do Iordan *am fagus* do Iericho, a làimh na h-àird¹ an ear, leth ri éirigh na gréine.

16 Agus labhair an Tighearna ri Maois, ag ràdh,

17 *Is iad* so ainmeanna nan daoine a roinneas am fearann duibh: Eleasar an sagart, agus Iosua mac Nuin.

18 Agus gabhaidh sibh aon cheannard do gach tréibh, a roinn an fhearann mar oighreachd.

19 Agus *is iad* so ainmeanna nan daoine: Do thréibh Iudah, Caleb mac Iephuneh.

20 Agus do thréibh chloinn Shimeoin, Semuel mac Amihuid.

21 Do thréibh Bheniamin, Elidad mac Chisloin.

22 Agus ceannard tréibhe chloinn Dhan, Buci mac Iogli.

23 Ceannard chloinn Ioseiph, air son tréibhe chloinn Mhanaseh, Haniel mac Ephoid.

24 Agus ceannard tréibhe chloinn Ephraim, Cemuel mac Shiphtain.

25 Agus ceannard tréibhe chloinn Shebuluin, Elisaphan mac Pharnaich.

26 Agus ceannard tréibhe chloinn Isachair, Paltiel mac Asain.

27 Agus ceannard tréibhe chloinn Aseir, Ahihud mac Shelomi.

28 Agus ceannard tréibhe chloinn Naph-tali, Pedahel mac Amihuid.

29 *Is iad* sin iadsan d'an d'àithn an Tighearn an oighreachd a roinn do chloinn Israeil ann an ùr Chanaain.

CAIB. XXXV.

1 *Ochd agus dà fhichead baile air an toirt do na Lebhitich; 6 Sè bailte dhiubh chum dèidin.*

9 *Na laghanna a thaobh mortaidh.*

A GUS labhair an Tighearna ri Maois ann an còmhnrdaibh Mhoais, làimh ri Iordan *am fagus* do Iericho, ag ràdh,

2 Aithn do chloinn Israeil, iad a thabhairt do na Lebhitich, do oighreachd an seilbh, bailte¹ gu còmhnuidh a ghabhail ann: agus bheir sibh mar an ceudna do na Lebhitich fearann comh-roinn² d'am bailtibh mu'n cuairt orra.

3 Agus bithidh na bailtean aca gu còmhnuidh a ghabhail ann, agus bithidh am fearann comh-roinn air son an spréidhe, agus air son am maoin, agus air son an ainmhidhean uile.

4 Agus *ruigidh* fearann comh-roinn nam bailtean, a bheir sibh do na Lebhitich, a mach o bhalla a' bhaile, mìle làmh-choille mu'n cuairt.

5 Agus tomhaisidh sibh o'n leth a muigh do'n bhaile air an taobh an ear dà mhìle làmh-choille, agus air an taobh mu dheas dà mhìle làmh-choille, agus air an taobh an iar dà mhìle làmh-choille, agus air an taobh mu thuath dà mhìle làmh-choille; agus *bithidh* am baile sa' mheadhon: bithidh so dhoibh 'na fhearann comh-roinn d'am bailtibh.

6 Agus am measg nam bailtean a bheir sibh do na Lebhitich, bithidh sè bailte chum dèidin³, a dh'orduicheas sibh air a shon-san a mharbhas duine, chum gu'n teich e an sin: agus riu-san cuiridh sibh dà bhaile 's dà fhichead.

7 Mar so *is iad* na bailte sin uile a bheir sibh do na Lebhitich, ochd agus dà fhichead baile: iad sin *bheir sibh seachad* agus am fearann comh-roinn.

8 Agus *bithidh* na bailtean a bheir sibh seachad do sheilbh chloinn Israeil: uatha-san aig *am bheil* mòran, bheir sibh mòran; ach uatha-san aig *am bheil* beagan, bheir sibh beagan: bheir gach aon d'a bhailtibh do na Lebhitich, a réir 'oighreachd a ta e a' sealblachadh.

9 Agus labhair an Tighearna ri Maois, ag ràdh,

10 Labhair ri chloinn Israeil, agus abair riu, 'Nuair a bhios sibh air teachd thar Iordan do thùr Chanaain.

11 An sin orduichidh sibh dhuibh féin bailte, gu bhi 'nam bailtibh dèidin dhuibh, a chum gu'n teich am marbhaiche an sin, a mharbhas neach an ain-fhios⁴.

12 Agus bithidh iad duibh 'nam bailtibh a chum dèidin o'n dioghaltair⁵; a chum nach bàsaich esan a mharbhas duine, agus an seas e an làthair a' chomhchruinnich ann am breitheanas.

13 Agus do na bailtibh sin a bheir sibh seachad, bithidh sè bailtean agaibh a chum dèidin.

14 Bheir sibh seachad tri bailtean air an taobh so do Iordan, agus tri bailte bheir sibh seachad ann an tìr Chanaain, a bhios 'nam bailtibh dèidin.

15 Bithidh na sè bailte sin 'nan dèidin, *araon* do chloinn Israeil, agus do'n choigreach, agus dhasan a bhios air chuairt 'nam measg; a chum gu'n teich gach neach an sin, a mharbhas duine gu fhios.

16 Agus ma bhuaileas se e le h-inneal iaruin, (air chor as gu'm bàsaich e,) *is* mortair e: cuirear gu cinnteach am mortair gu bàs.

17 Agus ma bhuaileas se e le clach a thilgeadh (a dh'fheudas a bhàs a thoirt,) agus gu'm bàsaich e, *is* mortair e: cuirear gu cinnteach am mortair gu bàs.

18 No *ma* bhuaileas se e le làmh-bhall⁶

¹ caithriche.
chroibhtean.

² iomallan fearainn, bail'-
³ comruich, girt.

⁴ am mearachd.
⁵ làmh-arm.

⁶ o fhear na folachd.

fiodha (a dh'fheudas a bhàs a thoirt,) agus gu'm faigh e bàs, *is* mortair e: cuirear gu cinnteach am mortair gu bàs.

19 Marbhaidh dìoghaltair na fola a féin am mortair: an uair a choinnicheas e¹, marbhaidh se e.

20 Ach ma bheir e urchuir dha tre fhuath², no ma thilgeas e *ni sam bith* air am plaid-luidhe³, air chor as gu'm faigh e bàs;

21 No ma bhuaileas se e le a làimh ann an naimhdeas, air chor as gu'm faigh e bàs; cuirear esan a bhuail e gun teagamh gu bàs; *oir is* mortair e: marbhaidh dìoghaltair na fola am mortair, an uair a choinnicheas se e.

22 Ach ma thug e urchuir dha gu h-obann gun naimhdeas, no ma thilg e *ni sam bith* air gun phlaid-luidhe;

23 No le cloich sam bith, a dh'fheudas bàs duine a thabhairt, gun e⁴ g a fhaicinn, agus gu'n do thilg e air i, air chor as gu'm faigh e bàs, agus nach bu namhaid da e, agus nach d'iarr e a chron;

24 An sin bheir an comhchrinneach breth eadar am marbhaiche agus dìoghaltair na fola, a réir nam breitheanas sin:

25 Agus saoraidh an comhchrinneach am marbhaiche à làimh dìoghaltair na fola, agus cuiridh an comhchrinneach air ais⁴ e do bhaile a dhèidin, gus an do theich e: agus fanaidh e ann gu bàs an àrd-shagairt, a dh'ungadh leis an oladh naomh.

26 Ach ma thig am marbhaiche uair air bith an taobh a mach do chrìch baile a dhèidin, gus an do theich e;

27 Agus gu'm faigh dìoghaltair na fola e an taobh a mach do chrìochaibh baile a dhèidin, agus gu'm marbh dìoghaltair na fola am marbhaiche; cha bhi e ciontach do fhuil:

28 A chionn gu'm bu chòir dha fuireach ann am baile a dhèidin gu bàs an àrd-shagairt: ach an déigh bàis an àrd-shagairt, pillidh am marbhaiche gu fearann a sheilbhe féin.

29 Agus bithidh na *nithe* sin 'nan reachd breitheanas dhuibh, air feadh bhurginealach, 'nur n-àitibh-còmhnuidh uile.

30 Ge b'e mharbhas neach sam bith, cuirear am mortair gu bàs le beul⁵ fhianuisean: ach cha toir aon fhianuis teistean an aghaidh neach sam bith a *chum a chur* gu bàs.

31 Agus cha ghabh sibh éiric sam bith air son anama mortair, a tha ciontach do bhàs, ach cuirear gu cinnteach gu bàs e.

32 Agus cha ghabh sibh éiric sam bith air a shon-san a theich do bhaile a dhèidin, a chum gu'n tigeadh e ris a ghabhail

còmhnuidh san fhearann, gu bàs an t-sagairt.

33 Mar sin cha truaill sibh am fearann anns am *bheil* sibh; oir truaillidh fuilam fearann, agus cha n'eil e 'n comas am fearann a ghlanadh do'n fhuil a dhòirt-eadh ann, ach le fuil an ti a dhòirt i.

34 Na salaichibh, uime sin, am fearann anns am bi sibh a còmhnuidh, anns am bheil mise a'm' còmhnuidh: a chionn gu bheil mise an Tighearn a'm' còmhnuidh am meadhon chloinn Israeil.

CAIB. XXXVI.

Nigheana chloinn Israeil aig an robh oighreachd, gu pòsadh 'nan tréibh féin.

AGUS thàinig prìomh-aithriche theaghlach chloinn Ghilead, mhic Mhachir, mhic Mhanaseh, do theaghlachibh mhac Ioseph, am fagus, agus labhair iad an làthair Mhaois, agus an làthair nan ceannard, *eadhon* prìomh-aithriche chloinn Israeil;

2 Agus thubhairt iad, Dh'àithn an Tighearna do m' thighearn am fearann a thoirt mar oighreachd le crannchur do chloinn Israeil, agus dh'àithneadh do m' thighearna leis an Tighearn, oighreachd ar bràthar Shelophehaid a thoirt d'a nigh-eanaibh.

3 Agus ma phòsar iad ri h-aon do mhic nan treubh *eile* do chloinn Israeil, an sin bheirear an oighreachd-san o oighreachd ar n-aithriche, agus cuirear i ri oighreachd na tréibhe d'an gabhar iad: mar sin bheirear i o chrannchur ar n-oighreachd-ne.

4 Agus an uair a bhios an iubile⁶ ann do chloinn Israeil, an sin cuirear an oighreachd ri oighreachd na tréibhe gus an do ghabhadh iad: mar sin bheirear an oighreachd-san air falbh o oighreachd thréibhe ar n-aithriche.

5 Agus dh'àithn Maois do chloinn Israeil, a réir focail an Tighearn, ag ràdh, Is ceart a labhair treubh mhac Ioseph.

6 *Is* e so an ni a dh'àithn an Tighearna thaobh nigheana Shelophehaid, ag ràdh, Pòsadh iad an neach a's àill leo; a mhàin ri teaghlach thréibhe an aithriche pòsaidh iad.

7 Mar sin cha'n atharraich oighreachd chloinn Israeil o thréibh gu tréibh: oir dlùth-leanaidh gach duine do chloinn Israeil ri oighreachd thréibhe 'aithriche.

8 Agus bithidh gach nighean, a shealbhaicheas oighreachd ann an tréibh sam bith do chloinn Israeil, 'na mnaoi aig aon do theaghlach thréibhe a h-athar, a chum gu meal claim Israeil, gach duine dhuibh, oighreachd 'aithriche.

9 Nì mò dh'atharraicheas an oighreachd

¹ thachaireas e air.

² o ghalltanas.

³ le fàth-fheitheamh, le rùn mealltach.

⁴ ais-iocaidh an comhchrinneach.

⁵ o bhriathraibh.

⁶ bliadhna mhaithreasais

o aon tréibh gu tréibh eile; a' dhùth-leanaidh gach duine do threubhaibh chloinn Israeil r'a oighreachd féin.

10 Eadhon mar a dh'àithn an Tighearna do Mhaois, mar sin rinn nigheana Shelopheaid:

11 Oir phòsadh Mahlah, Tirsah, agus Hoglah, agus Milcah, agus Noah, nigheana Shelopheaid ri mic bhràthar an athar.

12 Phòsadh iad ri fir do theaghlachibh mhac Mhanaseh mhic Ioseiph, agus dh'fhan an oighreachd ann an tréibh teaghlach an athar.

13 Is iad sin na h-àitheantan, agus na breitheanais, a dh'àithn an Tighearna le làimh Mhaois, do chloinn Israeil ann an còmhnradaibh Mhaoib, làimh ri Iordan an fagus do Iericho.

DEUTERONOMI.

CAIB. I.

1 *Ath-aithris le Maois air na thachair do chloinn Israeil anns an fhàsach.* 34 *Geur-smachdachadh an Tighearna dhoibh air son am mi-chreidimh.*

IS iad so na briathran a labhair Maois ri h-Israel uile, air an taobh so do Iordan san fhàsach, anns a' chòmhnaidh fa chomhair na mara *ruaidhe*, eadar Paran, agus Tophel, agus Laban, agus Haserot, agus Disahab.

2 (*Tha asdar aon là deug o Horeb, rathad sléibh Sheir, gu Cades-barnea.*)

3 Agus anns an dà fhicheadamh bliadhna, anns an aon mhios deug, air a' cheud là do'n mhìos, labhair Maois ri cloinn Israeil, a réir nan uile *nithe* a dh'àithn an Tighearna dha d'an taobh;

4 An déigh dha Sihon rìgh nan Amorach a mharbhadh, a bha chòmhnuidh ann an Hesbon, agus Og rìgh Bhasain, a bha chòmhnuidh aig Astarot ann an Edrei,

5 Air an taobh so do Iordan, ann an tìr Mhaoib, thòisich Maois air an lagh so chur an cèill, ag ràdh,

6 Labhair an Tighearna ar Dia ruinn ann an Horeb, ag ràdh, Ghabh sibh còmhnuidh fada gu leòr san t-sliabh so:

7 Pillibh agus gabhaibh bhuir turus, agus rachaibh a chum sléibh nan Amorach, agus a chum nan *ionadan* uile am fagus da anns a' chòmhnaidh¹, anns a' mhonadh, agus anns an t-srath, agus mu dheas, agus ri taobh na fairge, gu fearann an Canaanach, agus gu Lebanon, a dh'ionnsuidh na h-aimhne mòire, aimhne Euphrates.

8 Feuch, chuir mi 'n tìr roimhibh; rachaibh a steach, agus sealbhaichibh am fearann a mhiannaich an Tighearna d'ur n-aithrichibh, Abraham, Isaac, agus Iacob, gu'n tugadh e dhoibh e, agus d'an sliochd 'nan déigh.

9 Agus labhair mi ribh san àm sin, ag ràdh, Cha 'n urrainn mise bhuir giùlan a'm' aonar:

10 Rinn an Tighearna bhuir Dia lionmhor sibh, agus, feuch, *tha* sibh an diugh mar reulta nèimh a thaobh lionmhoireachd.

11 (Gu deanadh an Tighearna, Dia bhuir n-aithriche sibh mìle uair nì's lionmhoire na *tha* sibh, agus gu'm beannaicheadh e sibh, mar a gheall e dhuibh!)

12 Cionnus is urrainn mise leam féin bhuir dragh a ghiùlan, agus bhuir n-eallach, agus bhuir comhstri?

13 Gabhaibh-se dhuibh féin daoine glic agus tuigseach², agus aithnichte 'nur treubhaibh, agus nì mise iad 'nan ceannardaibh oirbh.

14 Agus fhreagair sibh mi, agus thubhairt sibh, *Tha* an nì a labhair thu maith *dhuinne* r'a dheanamh.

15 Agus ghabh mi cinn bhuir treubhan, daoine glic, agus aithnichte, agus rinn mi iad 'nan ceannardaibh oirbh, 'nan uachdaranaibh mhillte, agus 'nan uachdaranaibh cheuda, agus 'nan uachdaranaibh leth-cheuda, agus 'nan uachdaranaibh dheichnear, agus 'nan luchd-riaghlaidh am measg bhuir treubhan.

16 Agus dh'àithn mi d'ur breitheamhaibh san àm sin, ag ràdh, Eisdibh ris na *cùisean* a bhios eadar bhuir bràithrean, agus thugaibh breth cheart eadar gach duine agus a bhràthair, agus an coigreach *ata* maille ris.

17 Cha bhi suim agaibh do neach seach a cheile ann am breitheanas; ris a' bheag éisdidh sibh co mhaith is ris a' mhòr; cha bhi athadh³ oirbh roimh ghnùis duine, oir is le Dia a' bhreth: agus a' chùis a bhios ro chruaidh oirbh, bheir sibh a m' ionnsuidh-se, agus éisdidh mise rithe.

18 Agus dh'àithn mi dhuibh san àm sin na h-uile nithe bu chòir dhuibh a dheanamh.

19 Agus an uair a dh'fhalbh sinn o Horeb, chaidh sinn troimh an fhàsach mhòr agus uamhasach sin uile, a chunnaic sibh air slighe sléibh nan Amorach, a réir mar

¹ anns an fhàsach. ² maithean, àrd-dhaoine.

³ coghl.

a dh'àithn an Tighearn ar Dia dhuinn; agus thàinig sinn gu Cades-barnea.

20 Agus thubhairt mi ribh, Tha sibh air teachd gu sliabh nan Amorach, a tha 'n Tighearn ar Dia a' tabhairt dhuinn.

21 Feuch, chùir an Tighearna do Dhia am fearann romhad, imich suas, sealbhaich e, a réir mar a thubhairt an Tighearna Dia t'aithriche riut; na biodh eagal ort, agus na biodh faicheadas¹ ort.

22 Agus thàinig sibh am fagus domhsa, gach aon agaibh, agus thubhairt sibh, Cuireamaid daoine romhainn, agus rannsaicheadh iad a mach dhuinn am fearann, agus thugadh iad fios d'ar n-ionnsuidh a ris ciod an t-slighe air an téid sinn suas, agus ciod na bailte gus an tig sinn.

23 Agus thaitinn a' chainnt rium gu maith; agus ghabh mi dà fhear dheug dhibh, aon fhear as gach tréibh.

24 Agus thionndaidh iad, agus chaidh iad suas do'n t-sliabh, agus thàinig iad gu gleann Escoil, agus rannsaich iad a mach e.

25 Agus ghabh iad 'nan làimh do thoradh an fhearainn, agus thug iad a nuas e d'ar n-ionnsuidh-ne, agus thug iad fios duinn a ris, agus thubhairt iad, Is maith am fearann a tha 'n Tighearn ar Dia a' tabhairt dhuinn.

26 Gidheadh, cha b'àill leibh² dol suas, ach chuir sibh³ an aghaidh àithne an Tighearna bhur Dé.

27 Agus rinn sibh gearan 'nur bùthaibh, agus thubhairt sibh, A chionn gu'm b'fhuathach leis an Tighearna sinn, thug e mach sinn á tìr na h-Eiphit, gu'r toirt thairis do làimh nan Amorach, a chur as duinn.

28 C'àit an téid sinn suas? Chuir ar bràithrean ar cridhe fuidh mhi-mhisnich, ag ràdh, Tha 'n sluagh nì's mò agus nì's àirde na sinne; tha na bailtean mòra, agus daingichte suas gu nèamh, agus os barr⁴, chunnaic sinn mic nan Anacach an sin.

29 An sin thubhairt mi ribh, Na biodh geilt oirbh, no eagal rompa.

30 An Tighearna bhur Dia, a tha dol roimhibh, cogaidh esan air bhur son, a réir nan uile nithe a rinn e air bhur son san Eiphit fa chomhair bhur sùl.

31 Agus anns an fhàsach, far am faca tu cionnus a ghiùlain an Tighearna do Dhia thu, mar a ghiùlaineas duine a mhac, san t-slighe sin uile air an deachaidh sibh, gus an d'thàinig sibh do'n àite so.

32 Gidheadh san nì so cha do chreid sibh an Tighearn bhur Dia,

33 A dh'imich roimhibh san t-slighe, a

rannsaich a mach àite dhuibh gus ar bùthan a shuidheachadh ann, ann an teine san oidhche, a nochdadh dhuibh ciod an t-slighe air an imicheadh sibh, agus ann an neul san là.

34 Agus chual' an Tighearna fuaim bhur briathran, agus bha corruich air, agus mhionnaich e, ag ràdh,

35 Gu cinnteach cha'n fhaic a h-aon do dhaoibh⁵ a' ginealach uile so am fearann maith sin, a mhionnaich mise gu'n tugainn d'ur n-aithrichibh.

36 Saor o Chaleb mac Iephune; chli esan e, agus dhasan bheir mi am fearann air an do shaltair e, agus d'a chloinn, a chionn gu'n do lean e 'n Tighearna gu h-iomlan.

37 Mar an ceudna, bha fearg air an Tighearna riumsa air bhur sgàth, ag ràdh, Cha téid thusa féin a steach an sin.

38 Ach Iosua mac Nuin, a tha 'na sheasamh a' d' làthair, théid esan a steach an sin. Thoir misneach dha; oir bheir e air Israel a shealbhachadh.

39 Agus bhur leanbana⁶ a thubhairt sibh gu'm biodh iad 'nan creich, agus bhur clann⁷, aig nach robh san là ud eòlas air maith seach ole, théid iadsan a steach an sin, agus dhoibhsan bheir mi e, agus sealbhaichidh iad e.

40 Ach air bhur sonsa, pillibh, agus gabhaibh bhur turas do'n fhàsach, air slighe na mara ruaidhe.

41 An sin fhreagair sibh agus thubhairt sibh rium, Pheacaich sinn an aghaidh an Tighearn, théid sinn suas agus cogaidh sinn, a réir nan uile nithe a dh'àithn an Tighearn ar Dia dhuinn. Agus chrìoslaich sibh oirbh gach fear agaibh 'airm chogaidh, agus bha sibh ullamh gu dol suas do'n t-sliabh.

42 Agus thubhairt an Tighearna rium, Abair riu, Na rachaibh suas, agus na cogaibh, oir cha 'n'èil mise 'nur measg; air eagal gu'm buailear⁸ sibh an làthair bhur naimhdean.

43 Mar so labhair mi ribh, agus cha'n éisdeadh sibh, ach rinn sibh ceannaire an aghaidh àithne an Tighearn; agus chaidh sibh gu h-an-dàna suas do'n t-sliabh.

44 Agus thàinig na h-Amoraich, a bha chòmhnuidh san t-sliabh sin, a mach 'nur n-aghaidh, agus ruaig iad sibh mar a nì beachan, agus chuir iad as dhuibh ann an Seir, eadhon gu Hormah.

45 Agus phill sibh, agus ghùil sibh an làthair an Tighearn; ach cha 'n éisdeadh an Tighearna ri'r guth, agus cha tugadh e cluas duibh.

46 Mar sin dh'fhan sibh ann an Cades

¹ mhi-mhisneach.

² cha bu toil leibh.

³ sheas sibh a mach, rinn sibh ar' a mach.

⁴ a bhàrr air sin.

⁵ do dhaoibh sin. Eabh.

⁶ clann bheag.

⁷ mic. Eabh.

⁸ gu'n leagar.

mòran làithean, a réir nan làithean a dh'fhan sibh *an sin*.

CAIB. II.

1 *Mu chloinn Esau, 9 mu na Moabaich, 16 agus mu na h-Amonaich. 24 Sion an t-Amorach agus a shluagh uile air an sgrìos.*

AN sin phill sinn, agus ghabh sinn ar turas do'n fhàsach, air slighe na mara ruaidhe, mar a labhair an Tighearna riumsa; agus chuairtich sinn sliabh Sheir mòran làithean.

2 Agus labhair an Tighearna rium, ag ràdh,

3 Chuairtich sibh an sliabh so fada gu leòr: pillibh ri tuath.

4 Agus àithn thusa do'n t-sluagh, ag ràdh, *Tha* sibh gu dol troimh chrich bhur bràithre cloinn Esau, a ta chòmhnuidh ann an Seir, agus bithidh eagal orra roimhibh: ach thugaibh aire mhaith dhuibh féin.

5 Na beanaibh riu¹; oir cha toir mi *bheag* d'am fearann duibh, *cha toir* uir-eas as leud troidhe: a chionn gu'n d'thug mi sliabh Sheir a dh'Esau mar sheilbh.

6 Ceannaichidh sibh biadh uatha le h-airgiod, a chum gu'n ith sibh; agus mar an ceudna, ceannaichidh sibh uisge uatha le h-airgiod, a chum gu'n òl sibh.

7 Oir bheannaich an Tighearna do Dhia thu ann an uile oibribh do làimhe: is aithne dha do thrìall troimh 'n fhàsach mhòr so: rè an dà fhichead bhliadhna so *bha* 'n Tighearna do Dhia maille riut, cha robh uireasbhuidh ni sam bith ort.

8 Agus an uair a chaidh sinn seachad o'r bràithribh cloinn Esau, a bha chòmhnuidh ann an Seir, trid shlighe a' chòmh-naird o Elat, agus o Esion-gaber, phill sinn, agus chaidh sinn seachad air slighe fàsaich Mhoaidb.

9 Agus thubhairt an Tighearna rium, Na buin gu naimhdeil ris na Moabaich², agus na dean strì riu ann an cath: oir cha toir mi dhuìt a *bheag* d'am fearann mar sheilbh, a chionn gu'n d'thug mi Ar do chloinn Lot mar sheilbh.

10 Bha na h-Emich roimhe a chòmh-nuidh ann, sluagh mòr, agus lionmhor, agus àrd mar na h-Anacaich;

11 A mheasadh mar an ceudna 'nam famhairean³ mar na h-Anacaich, ach thug na Maobaich Emich mar ainm orra.

12 Bha, mar an ceudna, na Horaich a chòmhnuidh roimhe sin ann an Seir; ach thàinig clann Esau 'nan déigh, agus chuir iad as doibh an sealladh, agus ghabh iad còmhnuidh 'nan àite, mar a rinn Israel ri fearann a sheilbh-sau, a thug an Tighearna dhoibh.

13 A nis éiribh suas, *thubhairt mise*,

agus rachaibh thar sruth Shereid; agus chaidh sinn thar sruth Shereid.

14 Agus b'i 'n ùin' anns an d'thàinig sinn o Chades-barnea, gus an deachaidh sinn thar sruth Shereid, oclid bliadhna deug thar fhichead; gus an robh ginealach an t-sluaigh-chogaidh uile air an caitheamh a mach o mheasg an t-sloigh⁴, mar a mhionnaich an Tighearna dhoibh.

15 Oir, da rìreadh, bhia làmh an Tighearna 'nan aghaidh, gu'n sgrìos o mheasg an t-sloigh, gus an do chlaoidheadh iad.

16 Agus tharladh, 'nuair a bha na fir-chogaidh uile air an claidh, agus air bàsachadh o mheasg an t-sluaigh,

17 Gu'n do labhair an Tighearna rium, ag ràdh,

18 Tha thu gu dol thairis an diugh troimh Ar, crìoch Mhoaidb.

19 Agus *an uair* a thig thu 'm fagus thall fa chomhair chloinn Amoin, na buin gu naimhdeil riu, ni mò a bheanas tu riu: oir cha toir mi dhuìt sealbh sam bith do fhearann chloinn Amoin, a chionn gu'n d'thug mi e do chloinn Lot mar sheilbh.

20 (Mheasadh sin mar an ceudna 'na fhearann fhamhairean; ghabh famhairean còmhnuidh ann san t-sean aimsir, agus thug na h-Amonaich Samsumaich mar ainm orra,

21 Sluagh mòr agus lionmhor, agus àrd mar na h-Anacaich; ach sgrìos an Tighearna iad rompa, agus thàinig iad 'nan déigh agus ghabh iad còmhnuidh 'nan àite:

22 Mar a rinn e ri cloinn Esau a bha chòmhnuidh ann an Seir, an uair a sgrìos e na Horaich rompa; agus thàinig iad 'nan déigh, agus ghabh iad còmhnuidh 'nan àite, eadhon gus an là 'n diugh:

23 Agus na Habhaich a bha chòmhnuidh ann an Haserim, *eadhon* gu Hadsah, sgrìos na Caphtoraich a thàinig a mach á Caphtor iad, agus ghabh iad còmhnuidh 'nan àite.

24 Eiribh suas, gabhaibh bhur turas, agus rachaibh thar sruth⁵ Arnoin: feuch, thug mi do d' làimh Sihon an t-Amorach, rìgh Hesboin, agus 'fhearann; tòisich air a shealbhachadh, agus dean strì ris ann an cath.

25 Air an là 'n diugh tòisichidh mi air t'uamhann-sa, agus t'eagal, a chur air na cinnich a ta fuidh nèamh uile, a chluinn-eas iomradh ort: agus crìochnaichidh iad, agus bithidh cradh⁶ orra a'd làthair.

26 Agus chuir mi teachdairean á fàsach Chedemoit gu Sihon rìgh Hesboin, le briathraibh sìth, ag ràdh,

27 Leig dhomh gabhail troimh t'fhearann: imichidh mi romham air an rathad mhòr, cha tionndaidh mi aon chuid a chum

¹ Na cogaibh riu. ² Na dean tuair-eigneadh air na Moabaich. ³ athaich, curaidhean.

⁴ a' chainp. Eabh.

⁵ amhainn.

⁶ àmhghar, ionghuin.

na làimhe deise, no chum na làimhe clithe.

28 Biadh air son airgid reicidh tu rium, a chum gu'n ith mi, agus uisge air son airgid bheir thu dhomh, a chum gu'n òl mi; a mhàin imichidh mi romham do m' chois.

29 (Mar a rinn clann Esau rium, a tha chòmhnuidh ann an Seir, agus na Moab-aich a tha chòmhnuidh ann an Ar) gus an téid mi thar Iordan, do'n fhearann a *tha* 'n Tighearn ar Dia a' toirt duinn.

30 Ach cha leigeadh Sihon Rìgh Hesboin leinn dol troimh *fhearann*: oir chruaidhich an Tighearna do Dhia a spiorad, agus rinn e a chridhe rag¹, a chum gu'n tugadh e thairis e do d' làimh, mar a *chùthear* air an là'n diugh.

31 Agus thubhairt an Tighearna rium, Feuch, thòisich mi air Sihon agus 'fhearann a thoirt thairis a'd' fhianuis: gabh sealbh², a chum gu'm bi 'fhearann agad mar oighreachd.

32 An sin thàinig Sihon a mach 'nar n-aghaidh, e féin, agus a shluagh uile, a chogadh aig Iahas.

33 Agus thug an Tighearn ar Dia thairis e romhainn, agus bhuail sinn e féin, agus a mhic, agus a shluagh uile.

34 Agus ghlac sinn a bhailtean³ uile san àm sin, agus sgrìos sinn gu tur fir, agus mnà, agus clann bheag gach baile; cha d'fhàg sinn a h-aon a làthair⁴:

35 A mhàin ghabh sinn duinn féin an spréidh mar chobhartach, agus creach nam bailtean a ghlac sinn.

36 O Aroer, a *ta* air bruaich shruth Arnoin, agus o'n bhaile a *ta* làimh ris an t-sruth, eadhon gu Gilead, cha robh aon bhaile tuille 's laidir air ar son: thug an Tighearn ar Dia *iad* uile thairis duinn.

37 A mhàin gu fearann chloinne Amoin cha d'thàinig thu, no gu àite sam bith *am fagus* do shruth⁵ Iaboic, no gus na bailtibh *am measg* nam beann, no gu *àite* sam bith a thoirmisg an Tighearn ar Dia dhuinn.

CAIB. III.

1 Bhudhaich clann Israèil air Og rìgh Bhasain.

12 Cranncur shliochd Reuben agus Ghad.

23 Ghuidh Maais dol a steach do fhearann Chanain; 27 ach fhuair e a mhàin sealladh dheth o mhuilach Phisgah.

AN sin phill sinn, agus chaidh sinn suas air an t-slighe gu Basan: agus thàinig Og rìgh Bhasain a mach 'nar n-aghaidh, e féin agus a shluagh uile, gu cath aig Edrei.

2 Agus thubhairt an Tighearna riumsa, Na biodh eagal ort roimhe: oir do d' làimh-sa bheir mise thairis e féin, agus a

shluagh uile, agus 'fhearann; agus ni thu ris mar a rinn thu ri Sihon rìgh nan Amorach, a bha chòmhnuidh aig Hesbon.

3 Mar sin thug an Tighearn ar Dia thairis d'ar làimh-ne mar an ceudna Og rìgh Bhasain, agus a shluagh uile: agus bhuail sinn e, gus nach d' fhàgadh a h-aon beò aige.

4 Agus ghlac sinn a bhailtean uile san àm sin; cha robh baile nach d' thug sinn uatha, tri fichead baile, dùthaich Argoib uile, rioghachd Og ann am Basan.

5 Bha na bailte sin uile air an daingneachadh le balla àrd, le geataibh agus le crannaibh, a thuilleadh air bailtibh gun bhalla, ro mhòran.

6 Agus sgrìos sinn gu tur iad, mar a rinn sinn air Sihon rìgh Hesboin, a' léir-sgrìos fhear, bhan, agus chloinne gach baile.

7 Ach ghabh sinn an spréidh uile, agus creach nam bailte mar chobhartach dhuinn féin.

8 Agus thug sinn, san àm sin, á làimh dà rìgh nan Amorach, am fearann a *ta* air an taobh so do Iordan, o shruth Arnoin gu slabh Hermoin:

9 (Thug na Sionaich Sirion mar ainm air Hermon: agus thug na h-Amoraich Senir mar ainm air:)

10 Bailtean a' chòmhnaidh⁶ uile, agus Gilead uile, agus Basan uile, gu Salcha agus Edrei, bailtibh rioghachd Og ann am Basan:

11 Oir bha Og rìgh Bhasain a mhàin a làthair do fhuigheall nam fамhairean; feuch, a leaba, *bu* leaba iaruin i: nach *'eil* i ann an Rabat chloinne Amoin? b'iad naoi làmhha-coille a fad, agus ceithir làmhha-coille a leud, a réir làmh-coille duine.

12 Agus am fearann so, a shealbhaich sinn san àm sin, o Aroer, a *ta* làimh ri sruth Arnoin, agus leth sléibh Ghilead, agus a bhailte, thug mi do na Reubenich, agus do na Gadaich.

13 Agus a' chuid eile do Ghilead, agus Basan uile, eadhon rioghachd Og, thug mi do leth thréibh Mhanaseh; dùthaich Argoib uile, maille ri Basan uile, d'an ainm⁷ fearann nam fамhairean.

14 Ghabh Iair, mac Mhanaseh, dùthaich Argoib uile gu crìochaibh Ghesuri, agus Mhaachati; agus thug e Basan-Habhot-Iair mar ainm oirre a réir 'ainme féin, gus an là'n diugh.

15 Agus thug mi Gilead do Mhachir.

16 Agus do na Reubenich, agus do na Gadaich, thug mi o Ghilead eadhon gu sruth Arnoin, leth a' ghlinne, agus an t-ìomall, eadhon gus an sruth Iaboc, crìoch chloinne Amoin:

¹ reasgach, do-lubaidh. ² tòisich, sealbhaich. Eabh.

³ a mhòr-bhailtean, a chathraichean. ⁴ beò.

⁵ amhainn.

⁶ a' chònaidh.

⁷ d'an goirear.

17 An còmhnaid mar an ceudna, agus Iordan, agus a chriochan, o Chineret, eadhon gu muir a' chòmhnaid, a' mhuir shailhte, fuidh Asdot-pisgah a làimh na h-àird' an ear.

18 Agus dh'àithn mi dhuibh san àm sin, ag ràdh, Thug an Tighearna bhur Dia dhuibh am fearann so¹ a shealbhachadh: thèid sibh a null fo'r n-armaibh roimh bhur bràithre clann Israeil, gach neach a ta foghainteach a chum cogaidh.

19 Ach fanaidh bhur mnà, agus bhur clann bheag, agus bhur sprèidh, (oir is aithne dhomh gu'm bheil mòran sprèidhe agaibh,) 'nur bailtibh a thug mi dhuibh,

20 Gus an toir an Tighearna fois d'ur bràithribh, co mhaith agus dhuibhse, agus gus an sealbhaich iadsan mar an ceudna am fearann a thug an Tighearna bhur Dia dhoibh an taobh thall do Iordan: agus an sin pillidh gach duine agaibh g'a sheilbh, a thug mi dhuibh.

21 Agus dh'àithn mi do Iosua san àm sin, ag ràdh, Chunnaic do shùile na h-uile nithe a rinn an Tighearna bhur Dia ris an dà rìgh sin: mar sin uì an Tighearna ris na rioghachdaibh uile gus am bheil thu dol.

22 Cha bhi eagal oirbh rompa: oir cogaidh an Tighearna bhur Dia e féin air bhur son.

23 Agus ghuidh mi air an Tighearna san àm sin, ag ràdh,

24 O Thighearna Dhé, thoisich thu air do mhlòrachd, agus do làmh chumhachdach a nochdadh do d' òglach: oir cò an Dia air nèamh no air talamh, a's urrainn a dheanamh a réir t'òibre-sa, agus a réir do chumhachd-sa?

25 Guidheam ort, leig dhomh dol thairis, agus am fearann maith sin fhaicinn a tha'n taobh thall do Iordan, an sliabh maith sin, agus Lebanon.

26 Ach bha fearg air an Tighearna rium air bhur son-sa, agus cha d'éisd e rium: agus thubhairt an Tighearna rium, Gu ma leòr leat e; na labhair nì's mò rium mu'n chùis so.

27 Falbh suas gu mullach Phisgah, agus tog suas do shùile ris an àird' an iar, agus ris an àirde tuath, agus ris an àirde deas, agus ris an àird an ear, agus amhaire le d' shùilibh¹; oir cha téid thu thar Iordan so.

28 Ach thoir àithne do Iosua, agus thoir misneach dha, agus neartaich e: oir thèid esan thairis roimh an t-sluagh so, agus bheir e orra am fearann sin a chi thusa, a shealbhachadh mar oiglhreachd.

29 Mar sin ghabh sinn còmhnuidh sa' ghleann thall fa chomhair Bhetpeoir.

CAIB. IV.

1 Earail chum ùmhhlachd do lagh Dhé. 41 Chuir Maois air leth trì bailte dìdein air an taobh an ear do Iordan.

ANIS uime sin éisd, O Israeil, ris na reachdaibh, agus ris na breitheanaibh, athamise a' teagasg dhuibh a dheanamh, a chum gu'm bi sibh beò, agus gu'n téid sibh a steach agus gu'n sealbhaich sibh am fearann a bheir an Tighearna Dia bhur n-aithriche dhuibh.

2 Cha chuir sibh a bheag ris an fhocal a tha mise ag àithneadh dhuibh, nì mò a bheir sibh nì sam bith uaith, a chum gu'n gléidh sibh àitheantan an Tighearna bhur Dé, a tha mise ag àithneadh dhuibh.

3 Chunnaic bhur sùile ciod a rinn an Tighearna thaobh Bhaal-peoir: oir na daoine sin uile a lean Baal-peor, sgrios an Tighearna bhur Dia iad as bhur measg.

4 Ach tha sibhse a lean ris an Tighearna bhur Dia, beò gach aon agaibh air an là'n diugh.

5 Feuch, theagaisg mi dhuibh reachdan agus breitheanaibh, eadhon mar a dh'àithn an Tighearna mo Dhia dhomh, a chum gu'n deanadh sibhse mar sin anns an fhearann gus am bheil sibh a' dol g'a shealbhachadh.

6 Uime sin gleidhibh agus deanaibh iad; oir is e so bhur gliocas agus bhur tuigse ann an sealladh nan cinneach, a chluinn-eas na reachda sin uile, agus a their, Gu cinnteach is sluagh glic agus tuigseach an cinneach mòr so.

7 Oir cia e an cinneach co mhòr, aig am bheil Dia am fagus doibh, mar a ta 'n Tighearn ar Dia-ne sna h-uile nithibh air son am bheil sinne a' guirm air?

8 Agus cia an cinneach co mhòr, aig am bheil reachdan agus breitheanaibh co cheart ris an lagh so uile, a tha mise a' cur roimhibh air an là'n diugh?

9 A mhàin thoir an aire dhuit féin, agus gléidh t'anam gu dìchiollach, air eagal² gu'n dìchuimhnich thu na nithe sin a chunnaic do shùilean, agus air eagal gu'n dealaich iad ri d' chridhe uile làithean do bheatha; ach teagaisg iad do d' mhic, agus do mhic do mhac:

10 Gu h-àraidh an là a sheas thu an làthair an Tighearna do Dhé ann an Horeb, an uair a thubhairt an Tighearna riumsa, Tionail thugam³ an sluagh r'a chéile, agus bheir mi orra mo bhriathran a chluinntinn, a chum gu foghlum iad eagal a ghabhail romham rè nan uile làithean a bhios iad beò air an talamh, agus gu'n teagaisg iad an clann.

11 Agus thàinig sibh am fagus, agus sheas sibh fuidh 'n t-sliabh⁴; agus bha

¹ seall, beachdaich air.

² an t-eagal.

³ chugam.

⁴ fuidh 'n bhèinn.

'n sliabh a' osgadh le teine gu meadhon nèimh, maille ri duibhre, neoil, agus dubh-dhorchadas.

12 Agus labhair an Tighearna ribh á meadhon an teine: chuala sibh guth nam briathran, ach coslas sam bith cha 'n fhaca sibh; a mhàin *chuala sibh guth*.

13 Agus chuir e 'n céill duibh a choimh-cheangal, a dh'àithn e dhuibh a choimh-lionadh, *eadhon* deich àitheantan; agus sgriobh e iad air dà chlàr choiche.

14 Agus dh'àithn an Tighearna dhomh-sa san àm sin, reachdan agus breitheanais a theagasg dhuibh, a chum gu'n deanadh sibh iad anns an fhearann a théid sibh a null g'a shealbhachadh.

15 Thugaibh uime sin an aire mhaith dhuibh féin, (oir cha 'n fhaca sibh gnè coslais sam bith anns an là *air* an do labhair an Tighearna ribh ann an Horeb, á meadhon an teine.)

16 Air eagal gu'n truaill sibh sibh féin, agus gu'n dean sibh dhuibh féin dealbh snaidhte, coslas riochd air bith, coslas fir no mnà.

17 Coslas ainmhidh sam bith a *tha* air an talamh, coslas eoin sgiathaich air bith a dh'itealaicheas san athar,

18 Coslas nì sam bith a shnaigeas air an làr, coslas éisg air bith a *tha* sna li-uisgibh fuidh'n talamh;

19 Agus air eagal gu'n tog thu suas do shùilean ri nèamh, agus an uair a chi thu a' ghrian, agus a' ghealach, agus na reultan, *eadhon* slòigh nèimh uile, gu'n tairn-gear thu gu cromadh sìos dhoibh, agus gu aoradh a dheanamh dhoibh, a roinn¹ an Tighearna do Dhia ris gach cinneach a ta fuidh nèamh uile.

20 Ach ghabh an Tighearna sibhse, agus thug e mach sibh as an àmhuinn iarunn, as an Eiphit, gu bhi 'nur sluagh air son oighreachd dha féin, mar air an là 'n diugh.

21 Agus bha fearg aig an Tighearna riumsa air bhur sonsa², agus mhionnaich e nach rachainn thar Iordan, agus nach rachainn a steach do'n fhearann mhaith sin a *tha* 'n Tighearna do Dhia a' tabhairt duit mar oighreachd.

22 Ach is éigin domh bàs fhaotainn san fhearann so, cha téid mi thar Iordan; ach théid sibhse null, agus sealbhaichidh sibh am fearann maith sin.

23 Thugaibh an aire dhuibh féin, air eag-al gu'n dhuimhnich sibh coimhcheang-al an Tighearna bhur Dé, a rinn e ribh, agus gu'n dean sibh dhuibh féin dealbh snaidhte, coslas *nì* air bith a thoirmisg an Tighearn do Dhia dhuith:

24 Oir is teine dian-loisgeach an Tigh-earna do Dhia; *is* Dia eudmhor e.

25 'Nuair a ghineas tu clann, agus clann cloinne, agus a dh'fhanas sibh fada san fhearann, agus a thruaill eas sibh *sibh féin*, agus a nì sibh dealbh snaidhte, coslas *nì* sam bith, agus a nì sibh olc ann an seall-adh an Tighearna do Dhé, agus a bhros-naicheas sibh e gu feirg;

26 Gairmeam nèamh agus talamh mar fhianuis 'nur n-aghaidh air an là 'n diugh, gu'n tig léir-sgrìos oirbh gu h-aithghearr as an fhearann a chum am bheil sibh dol thar Iordan g'a shealbhachadh: cha bhuanach sibh bhur làithean air, ach sgrìosar sibh gu tur.

27 Agus sgapaiddh an Tighearna sibh am measg nan cinneach, agus fàgar sibh tearc an àireamh am measg nan cinneach, far an toir an Tighearna sibh.

28 Agus an sin nì sibh seirbhis do dhiath-aibh, obair làmhha dhaoine, fiodh agus clach, nach faic, agus nach cluinn, agus nach ith, agus nach gabh faile.

29 Ach ma dh'iarras tu 'n Tighearna do Dhia as a sin, amaisidh tu air, ma dh'iarras tu e le d' uile chridhe, agus le d' uile anam.

30 'Nuair a bhios tu ann an àmhglar, agus a thig na nithe sin uile ort sna làithibh deireannach, ma philleas tu chum an Tighearna do Dhé, agus ma bhios tu ùmhál d'a ghuth;

31 (Oir *is* Dia tròcaireach an Tighearna do Dhia-sa,) cha tréig e thu, nì mò a sgrìosas e thu, no dhichuimhnicheas e coimhcheangal t'aithriche, a mhionnaich e dhoibh.

32 Oir fiosraich a nis do na làithibh a chaidh seachad, a bha romhad, o'n là air an do chruthaich Dia an duine air an talamh, agus *fiosraich* o aon iomall do nèamh gus an t-iomall eile, an robh riamh *nì sam bith* ann mar an nì mòr so, no'n cualas nì cosmhùil ris?

33 An cuala sluagh *sam bith* guth Dhé a' labhairt á meadhon an teine, mar a chuala tusa, agus an do mhair iad beò?

34 No 'n d'fheuch Dia³ ri dol gu cinneach a ghabhail da féin o mheasg cinnich *eile*, le deùchaimnibh⁴, le comharaibh, agus le h-iongantasaibh, agus le cogadh, agus le làimh chumhachdaich, agus le gairdean sìnte mach, agus le h-uamhasaibh mòra, a réir nan uile nithe a rinn an Tighearna bhur Dia air bhur son san Eiphit fa chomhair bhur sùl?

35 Dhuitse nochdadh e, chum gu'm biodh fios agad gur e 'n Tighearn *a's* Dia ann; cha 'n' *eil* ann ach e.

¹ a phàirtich, a thug.

² air son bhur

briathra-sa. Eabh.

³ Dia sam bith.

⁴ buairibh.

36 A nèamh thug e ort a ghuth a chluinn-tinn, a chum gu'n teagaisgeadh e thu; agus air talamh nochd e dhuit a theine mòr, agus chuala tu a bhriathran á meadhon an teine.

37 Agus a chionn gu'n do ghràdhaich e t'aithriche, uime sin thagh e an sliochd 'nan dèigh, agus thug e thusa mach 'na shealladh, le 'chumhachd mòr, as an Eiphit:

38 A dh'fhuadachadh a mach chinneach romhad, a's mò agus a's cumhachdaiche na thusa, g'ad thoirt-sa stigh a thahhairt dhuit am fearainn 'na oighreachd, mar air an là an diugh.

39 Biodh agad fios uime sin an diugh, agus thoir fa' near ann ad chridhe, gur e'n Tighearn a's Dia ann air nèamh shuas, agus air an talamh a bhos¹: cha 'n'eil ann ach e.

40 Gleidhidh tu uime sin a reachdan, agus 'àitheantan, a tha mise ag àithneadh dhuit an diugh, a chum gu'n éirich gu maith dhuit, agus do d'chloinn a'd' dhéigh, agus a chum gu 'm buanaich thu do làithean air an fhearann, a bheir an Tighearna do Dhia dhuit gu bràth.

41 An sin chuir Maois air leth trì bailtean air an taobh so do Iordan, leth ri éirigh na gréine;

42 A chum gu'n teicheadh am marhhaiche an sin, a mharh' a choimhearsnach gun fhios da, agus gun fhuath aige dha san aimsir a chaidh seachad: agus gu'n teicheadh e gu h-aon do na bailtibh sin, agus gu maireadh e heò:

43 Eadhon Beser san fhàsach, ann an dùthaich a' chòmhnaid², do na Reuhénich; agus Ramot ann an Gilead, do na Gadaich; agus Golan ann am Basan, do na Manasaich.

44 Agus is e so an lagh a chuir Maois roimh chloinn Israeil.

45 Is iad so na teisteis³, agus na reachdan, agus na breitheanais, a lahhair Maois ri cloinn Israeil, an uair a thàinig iad a mach an Eiphit,

46 Air an taobh so do Iordan sa' ghleann thall fa chomhair Bhet-peoir, ann am fearann Shihoin righ nan Amorach, a bha chòmhnuidh ann an Heshon, a hhuail Maois agus clann Israeil, an dèigh dhoihs teachd a mach as an Eiphit:

47 Agus sheallhaich iad 'fhearann, agus fearann Og righ Bhasain, dà righ nan Amorach, a bha air an taobh so do Iordan, leth ri éirigh na gréine;

48 O Aroer, a ta làimh ri hruaich sruth Arnoin, eadhon gu sliabh Shihoin, a's e Hermon,

49 Agus an còmhnaid uile air an taobh so do Iordan a làimh na h-àird' an ear, eadhon gu muir a' chòmhnaid, fuidh thobraichibh Phisgah.

CAIB. V.

1 Aithris a' choimhcheangail a rinn Dia ri cloinn Israeil ann an Horeb. 6 Na deich àitheantan. 23 Air iarrtas an t-sluaigh fhuair Maois an lagh o Dhia.

A GUS ghairm Maois air Israel uile, agus thuhhairt e riu, Eisd, O Israeil, ris na reachdaibh agus na breitheanais a lahhras mi 'nur cluasaibh air an là'n diugh, a chum gu fòghlum⁴ sibh iad, agus gu'n gléidh agus gu'n dean sibh iad.

2 Rinn an Tighearna ar Dia coimhcheangal⁵ ruinn ann an Horeb.

3 Cha d' rinn an Tighearn an coimhcheangal so r'ar n-aithrichibh, ach ruinne, eadhon ruinne a tha uile beò an so air an là'n diugh.

4 Aghaidh ri h-aghaidh labhair an Tighearna ribh san t-sliabh, á meadhon an teine,

5 (Sheas mise eadar an Tighearn agus sibhse san àm sin, a nochdadh dhuibh focail an Tighearn: oir bha eagal oirh roimh an teine, agus cha deachaidh sibh suas do'n t-sliabh.) ag ràdh,

6 Is mise an Tighearna do Dhia, a thug a mach thusa á tìr na h-Eiphit, á tigh na daorsa⁶.

7 Na biodh dée sam bith eile agad a'm' fhianuis.

8 Na dean dhuit féin dealhh snaidhte⁷, no coslas air bith a dh'aon ni a ta shuas air nèamh, no a ta shios air an talamh, no a ta sna h-uisgeachaibh fuidh 'n talamh.

9 Na crom thu féin sìos doimh, agus na dean seirbhis⁸ doibh: oir mise an Tighearna do Dhia, is Dia èudmhor mi, a' leantunn aingidheachd nan aithrichean air a' chloinn, agus air an treas agus air a' cheathramh ginealach dhiubhsan a dh'fhuathaicheas mi,

10 Agus a' deanamh⁹ tròcair do mhiltibh dhiubhsan a ghràdhaicheas mi, agus a ghleidheas m' àitheantan.

11 Na tahhair ainm an Tighearna do Dhé an diomhanas: oir cha mheas an Tighearna neo-chiontach esan a bheir ainm an diomhanas.

12 Thoir an aire là na sàbaid a naomhachadh¹⁰, mar a dh'àithn an Tighearn do Dhia dhuit.

13 Sè làithean saothraichidh tu, agus ni thu t'obair uile;

14 Ach air an t-seachdamh là tha sàbaid an Tighearna do Dhé: air an là so cha dean thu obair sam bith, thu féin, no do

¹ shios. ² anns an tìr réidh. ³ fianuisean.
⁴ gu'n ionnsuich. ⁵ cùmradh, cùmhnant.
⁶ tigh nan tràilleàn. ⁷ gearrta, gràbhailta.

⁸ aoradh. ⁹ a' nochdadh.
¹⁰ Coimhid là na sàbaid chum a naomhachadh.

mhac, no do nighean, no t'òglach, no do bhanoglach, no do dhamh, no t'asal, no aon air bith do d' spréidh, no do choigreach a *tha* 'n taobh a stigh do d' gheataibh; a chum gu'n gabh t'òglach agus do bhanoglach fois co mhaith riut féin.

15 Agus cuimhnich gu'n robh thu féin a'd' sheirbhiseach ann an tìr na h-Eiplùit, agus gu'n d'thug an Tighearna do Dhia mach as a sin thu, le làimh chumhachdaich agus le gairdean sinthe mach: uime sin dh'àithn an Tighearna do Dhia dhuit an t-sàbaid a choimhead¹.

16 Tabhair urram² do t'athair agus do d' mhàthair, mar a dh'àithn an Tighearna do Dhia dhuit; a chum gu'm buanaichear do làithean, agus gu'n éirich gu maith dhuit, san fhearann a bheir an Tighearna do Dhia dhuit.

17 Na dean mortadh.

18 Nì mò a nì thu adhaltrannas.

19 Nì mò a ghoideas tu.

20 Nì mò a bheir thu fianais bhréige an aghaidh do choimhearsnaich.

21 Nì mò a mhiannaicheas tu bean do choimhearsnaich, nì mò a shanntaicheas tu tigh do choimhearsnaich, 'fhearann, no 'òglach, no 'bhanoglach, no 'dhanh, no 'asal, no nì air bith a's le do choimhearsnach.

22 Na briathra sin labhair an Tighearna r'ur coimhthional uile san t-sliabh, á meadhan an teine, an neoil agus an dubh-diorchadais, le guth mòr; agus cha do chuir e tuilleadh ris: agus sgriobh e iad air dà chlàr chloiche, agus thug e dhomhsa iad.

23 Agus an uair a chuala sibh an guth á meadhan an dorchadais, agus an t-sléibh a' losgadh le teine³, an sin thàinig sibh an fagus domhsa, *eadhon* uile cheannardan bhur treubhan, agus bhur seanair-ean,

24 Agus thubhairt sibh, Feuch, dh'fhoillsich an Tighearn ar Dia dhuinn a ghlòir, agus a mhòrachd, agus chuala sinn a ghuth á meadhan an teine: chunnaic sinn an diugh gu'n labhair Dia ri duine, agus gu mair e beò.

25 A nis uime sin c'ar son a gheibheamaid bàs? oir loisgidh an teine mòr so sinn. Ma chluinneas sinn guth an Tighearn ar Dé tuilleadh, an sin bàsaichidh sinn.

26 Oir cò do'n uile fheoil a chuala guth an Dé bheò a' labhairt á meadhan an teine, mar a rinn sinn, agus a mhair beò?

27 Theirig-sa am fagus, agus éisd ris na h-uile nithibh a their an Tighearn ar Dia; agus labhair thusa rumne gach nì a their an Tighearn ar Dia riut, agus éisdidh sinn ris, agus nì sinn e.

28 Agus chual' an Tighearna guth blur briathra, 'nuair a labhair sibh rium: agus thubhairt an Tighearna rium, Chuala mi guth bhriathran an t-sluaigh so, a labhair iad riut: is maith a thubhairt iad gach nì a labhair iad.

29 O gu'm biodh an gnè cridhe so ann-ta, gu'm biodh m'eagals' orra, agus gu'n gleidheadh iad m'àitheantan uile a ghnàth, a chum gu'n éireadh gu maith dhoibh, agus d'an cloinn gu bràth!

30 Imich, abair riu, Rachaisibh d'ur bùthaisibh a ris.

31 Ach do d' thaobh-sa, seas an so làimh riumsa, agus labhairidh mi riut na h-àitheantan uile, agus na reachdan, agus na breitheanais, a theagaisgeas tu dhoibh, a chum as gu'n dean siad iad anns an fhearann a *tha* mise a' tabhairt dhoibh r'a shealbhachadh.

32 Bheir sibh an aire, uime sin, gu'n dean sibh mar a dh'àithn an Tighearna blur Dia dhuibh: cha chlaon sibh a thaobh a chum na làimhe deise no clìthe.

33 Anns gach slighe a dh'àithn an Tighearna bhur Dia dhuibh gluaisidh sibh, a chum gu'm bi sibh beò, agus gu'n éirich gu maith dhuibh, agus gu'm buanaich sibh bhur làithean anns an fhearann a shealbhaisibh.

CAIB. VI.

1 Is i ùmhhlachd do thoil Dhé crìoch an lagha.
3 Earail do'n t-sluagh chum na crìche so.

A NIS is iad so na h-àitheantan, na reachdan, agus na breitheanais, a dh'àithn an Tighearna bhur Dia a theag-asg dhuibh, a chum gu'n deanadh sibh iad san fhearann d'am bheil sibh a' dol g'a shealbhachadh:

2 A chum gu'm biodh eagal an Tighearna do Dhé ort, gu'n gleidheadh tu a reachdan uile, agus 'àitheantan, a *tha* mise ag àithneadh dhuit, thu féin, agus do mhac, agus mac do mhic, uile làithean do bheatha, agus a chum gu'm buanaichear do làithean.

3 Eisd uime sin, O Israeil, agus thoir an aire gu'n dean thu so, a chum gu'n éirich gu maith dhuit, agus gu'm fàs sibh ro lionmhor, mar a gheall an Tighearna Dia t'àithriche dhuit, ann am fearann a tha sruthadh le bainne agus mil.

4 Eisd, O Israeil: An Tighearn ar Dia-ne, is aon Tighearn e.

5 Agus gràdhaidhidh tu an Tighearna do Dhia le d' uile chridhe, agus le d' uile anam, agus le d' uile neart.

6 Agus bithidh na briathra so, a *tha* mi ag àithneadh dhuit an diugh, ann ad chridhe;

7 Agus teagaisgidh tu iad⁴ do d' chloinn,

¹ a dheanamh. Eabh.

² onoir.

³ oir bha a' bheinn a' losgadh le teine.

⁴ cuiridh tu 'n cèill iad gu minic.

agus labhraidh tu orra 'nuair a shuidheas tu a d' thigh, agus an uair a dh'imicheas tu air an t-slighe, agus an uair a luidheas tu sìos, agus an uair a dh'éireas tu suas.

8 Agus ceanglaiddh tu iad mar chomharadh air do làimh, agus bithidh iad mar eudanain eadar do shùilibh.

9 Agus sgrìobhaiddh tu iad air ursainnibh do thighe, agus air do gheataibh.

10 Agus an uair a bheir an Tighearna do Dhia thu do'n fhearann a mhionnaich e do d' aithrichibh, do Abraham, do Isaac, agus do Iacob, gu'n tugadh e dhuit bailtean mòra agus maithhe, nach do thog thu féin.

11 Agus tighean làn do gach nì maith nach do lìon thu, agus tobraiche cladh-aichte nach do chladhaich thu, fion-liosan agus liosan-olaidh nach do shuidhich¹ thu, 'nuair a dh'itheas tu agus a bhios tu air do shàsachadh;

12 *An sin* thoir an aire air eagal gu'n dìchuimhnich thu an Tighearn, a thug a mach thu á tìr na h-Eiphit, á tigh na daorsa.

13 Bithidh eagal an Tighearna do Dhé ort, agus nì thu seirbhis dha, agus mionnaichidh tu air 'ainm.

14 Cha téid sibh an déigh dhiathan² eile, do dhiathaibh an t-sluaigh a *tha* mu'u cuairt oirbh;

15 (Oir *tha* 'n 'Tighearna do Dhia 'ua Dhia eudmhor 'nur measg;) air eagal gu'n las fearg an Tighearna do Dhé a d' aghaidh, agus gu'n sgrios e thu o aghaidh na talmhainn.

16 Cha bhrosnaich³ sibh an Tighearna bhuir Dia, mar a bhrosnaich sibh e ann am Masah.

17 Gleidhidh sibh gu dìchiollach àith-eantan an Tighearna bhuir Dé, agus a theisteis, agus a reachdan, a dh'àitlin e dhuit.

18 Agus nì thu *an nì sin a ta* ceart agus maith ann an sealladh an Tighearn; a chum gu'n éirich gu maith dhuit, agus gu'n téid thu steach, agus gu'n sealbhaich thu am fearann maith a mhionnaich an Tighearna do d' aithrichibh;

19 A thilgeadh a mach do naimhdean uile romhad, mar a labhair an Tighearna.

20 'Nuair a dh'fhiosraicheas do mhac dhìot san aimsir ri teacld, ag ràdh, Cìod is chiall do na teistesaibh, agus do na reachdaibh, agus do na breitheanasaibh a dh'àithn an Tighearn ar Dia dhuibh?

21 An sin their thu ri d' mhac, Bha sinn 'nar tràillibh aig Pharaoh san Eiphit, agus thug an Tighearn a mach sinn as an Eiphit le làimh chumhachdaich.

22 Agus nochd an Tighearna comharan agus iongantasan mòra agus doilgheasach

san Eiphit, air Pharaoh, agus air a theaghlach uile, fa chomhair ar sùl;

23 Agus thug e mach sinn as a sin, a chum gu'n tugadh e sinn a stigh, a thoirt dhuinn an fhearann a mhionnaich e d'ar n-aithrichibh.

24 Agus dh'àithn an Tighearna dhuinn na reachda sin uile a dheanamh, eagal an Tighearn ar Dé bhi oirnn a chum ar maith a ghnàth, a chum gu'n gleidheadh e beò sinn, mar air an là'n diugh.

25 Agus bithidh e 'na fhùreantachd dhuinn, ma bheir sinn fa'near na h-àith-eantan so uile a dheanamh, an làthair an Tighearn ar Dé, mar a dh'àithn e dhuinn.

CAIB. VII.

1 *Uile chomh-chomunn ris na Cinnich air a thoirm-easg, 4 air eagal gu'n tairngeadh siad iad gu h-ìdholh-aozadh.*

'**N**UAIR a bheir an Tighearna do Dhia thu stigh do'n fhearann a chum am bheil thu dol g'a shealbhadh, agus a thilgeas e mach romhad mòran chinneach, na Hitich, agus na Girgasaich, agus na h-Amoraich, agus na Canaanaich, agus na Peridsich, agus na Hibhich, agus na Iebusaich, seachd cinnich a's mò agus a's cumhachdaiche na thusa;

2 Agus an uair a bheir an Tighearna do Dhia iad thairis a d' làthair, buailidh tu iad, agus cuiridh tu gu tur as doibh; cha dean thu coimhcheangal sam bith ri u, nì mò a nochdas tu tròcair dhoibh;

3 Nì mò a nì thu cleamhnas⁴ ri u: do nighean cha toir thu d'a mhac-san, nì mò a ghabhas tu a nighean-san do d' mhac-sa.

4 Oir tionndaidh iad do mhac o mise a leantunn, a chum gu'n dean iad seirbhis do dhiathaibh eile: mar sin lasaidh fearg an Tighearna 'nur n-aghaidh, agus sgriosaidh e thu gu h-obann.

5 Ach mar so buinidh sibh ri u: sgriosaidh sibh an altairean, agus brisidh sibh an dealbhan, agus gearraidh sibh sìos an doireachan, agus loisgidh sibh an coslais shnaidhte le teine.

6 Oir is sluagh naomha do'n Tighearna do Dhia thusa: thagh an Tighearna do Dhia thu gu bhi d' shluagh àraidh⁵ dha féin, os ceann gach sluaigh a *ta* air aghaidh na talmhainn.

7 Cha do ghràdhach an Tighearna sibh, nì mò a thagh e sibh, a chionn gu'n robh sibh nì bu lionmhoire na sluagh sam bith eile; (oir is sibh bu teirce do gach uile shluagh;)

8 Ach a chionn gu'n do ghradhach an Tighearna sibh, agus a chum gu'n gleidheadh e na mionnan a mhionnaich e d'ur n-aithrichibh, thug an Tighearna mach sibh le làimh chumhachdaich, agus shaor

¹ phlanndaich.

² dhée.

³ bhuair.

⁴ ceanglaiche-pòsaidh.

⁵ sùruichte.

e thu á tigh nan tràilleán, á làimh Pharaoh rìgh na h-Eìphit.

9 Biodh fios agad uime sin, an Tighearna do Dhia gur esan Dia, an Dia firinneach, a chumas coimhcheangal agus tròcair riu-san a ghràdhaicheas e, agus a ghlaidheas àitheantan, gu mìle ginealach;

10 Agus a dhiolas orra-san¹ a dh'fhuathaicheas e, r'an eudain, a chum an sgrios: cha dean e moille d'a thaobh-san aig am bheil fuath dha; dìolaidh e air r'a eudain.

11 Gleidhidh tu uime sin na h-àitheantan, agus na reachdan, agus na breitheanaid, a tha mi 'g àithneadh dhuit an diugh a dheanamh.

12 Uime sin, ma dh'éisdeas sibh ris na breitheanaid sin, agus ma choimhideas agus ma ni sibh iad, cumaidh an Tighearna do Dhia riutsa an coimhcheangal agus an tròcair a mhionnaich e do d' aithrichibh.

13 Agus gràdhaichidh e thu, agus beannaichidh e thu, agus ni e lìonmhor thu: mar an ceudna beannaichidh e toradh do bhronn, agus toradh t'fhearainn, t'arbhar, agus t'fhion, agus t'oladh, fàs do chruidh, agus treuda do chaorach, san fhearann a mhionnaich e do d' aithrichibh a thabhairt duit.

14 Bithidh tu beannaichte os ceann gach sluagh; cha bhi firionnach no boirionnach neo-thorrach 'nur measg, no measg bhur spréidhe.

15 Agus bheir an Tighearna uait gach eucail, agus cha chuir e ort h-aon air bith do dhroch ghalaraidh na h-Eìphit, a's aithne dhuit, ach cuiridh e iad orra-san uile le 'm fuathach thu.

16 Agus sgriosaidh tu an sluagh sin uile a bheir an Tighearna do Dhia *thairis* dhuit; cha ghabh do shùil truas riu: ni mò a ni thu seirbhis d'an diathaibh, oir *bithidh* sin 'na ribe dhuit.

17 Ma their thu ann ad chridhe, *Is* mò na cinnich sin na mise, cionnus is urrainn mise an cur á seilbh?

18 Cha bhi eagal ort rompa; *ach* cuimhnichidh tu gu maith ciod a rinn an Tighearna do Dhia ri Pharaoh, agus ris na h-Eìphitich uile;

19 Na deuchainnean mòra a chuimaic do shùilean, agus na comharan, agus na h-iongantais, agus an làmh chumhachdach, agus an gairdean sìnte mach, leis an d'thug an Tighearna do Dhia mach thu: mar sin ni an Tighearna do Dhia ris an t-sluagh uile roimh am bheil eagal ort.

20 Os bàrr, cuiridh an Tighearna do Dhia an consbeach² nam measg, gus am bi iadsan a dh'fhàgar, agus a dh'fhol-aicheas iad féin o d' ghnùis, air an sgrios.

21 Cha bhi uamhann ort rompa; oir *tha* 'n Tighearna do Dhia 'nur measg, Dia mòr, agus uamhasach.

22 Agus cuiridh an Tighearna do Dhia a mach na cinnich sin romhad a lìon beagain is beagain: cha 'n fheud thu an sgrios a dh'aon bheum, air eagal gu'm fàs fiadh-bheathaiche na macharach lìonmhor ort.

23 Ach bheir an Tighearna do Dhia iad thairis duit, agus sgriosaidh e iad le sgrios mòr, gus an cuirear as doibh.

24 Agus bheir e an rìghre thairis do d' làimh, agus sgriosaidh tu an ainm o bhi fhadh nàmh: cha seas duine sam bith a d' aghaidh, gus an cuir thu as doibh.

25 Dealbhan snaidhte an dèe loisgidh sibh le teine: cha mhiannaich thu 'n t-airgiod no 'n t-òr *a ta* orra³, ni mò ghabhas tu e dhuit féin, air eagal gu'n ribear thu leis: oir *is* gràineileachd e do'n Tighearna do Dhia.

26 Ni mò bheir thu gràineileachd do d' thigh, air eagal gu'm bi thu a d' ni mallaichte cosmhuil ris: *ach* bheir thu fuath iomlan da, agus gabhaidh tu gràin deth gu tur, oir *is* ni mallaichte e.

CAIB. VIII.

1 *Earrail do chloinn Israeil gu'n tugadh iad géill a dh'àitheantaibh Dé, agus nach dìchuimhnichidh iad a mhaitheas agus a fhreasdal d'an taobh.*

NA h-àitheantan uile a tha mi ag àithneadh dhuit an diugh, bheir sibh an aire gu'n dean sibh *iad*, a chum gu'm bi sibh beò, agus gu'm fàs sibh lìonmhor, agus gu'u téid sibh a stigh, agus gu'n sealbhaich sibh am fearann, a mhionnaich an Tighearna d'ur n-aithrichibh.

2 Agus cuimhnichidh tu an t-slighe sin uile air an do threòraich an Tighearna do Dhia thu rè an dà fhichead bhliadhna so anns an fhàsach, gu d'irioslachadh, gu d'dhearbhadh, a chum gu'm biodh fios⁴ ciod a bh'ann ad chridhe, an gleidheadh tu àitheantan, no nach gleidheadh.

3 Agus dh'irioslaich e thu, agus thug e ort ocras fhulang, agus bheathaich e thu le mana, (ni nach b'aithne dhuit féin, ni mò a b'aithne do d'aithrichibh e,) a chum gu'n tugadh e ort fios a bhi agad nach ann le h-aran a mhàin a bheathaichear duine, ach leis gach *focal* a thig a mach á beul an Tighearna bithidh duine beò.

4 Cha do chaitheadh t'eudach dhìot le h-aois⁵, ni mò a dh'at do chos rè an dà fhichead bhliadhna-sa.

5 Bheir thu mar an ceudna fa'near ann ad chridhe, mar a smachdaicheas duine a mhac, gur ann *mar sin* a tha 'n Tighearna do Dhia 'g ad smachdachadh-sa.

¹ a chu' t'icheas, a dh'ais-iocas dlioibhsan.

² ceannabhan, eirc-bheach; hornet; Sasg.

³ annta. eadh ris.

⁴ a dheanamh aithnichte, a leig-cha d' fhàs t' cudach sean art.

6 Uime sin gleidhidh tu àitheantan an Tighearna do Dhé, a chum gu'n gluais thu 'na shlighibh, agus gu'm bi 'eagal-san ort.

7 Oir tha'n Tighearna do Dhia 'gad thabhairt gu fearann maith, fearann shruthan uisgeacha, thobraichean, agus dhoimhneachdan a tha 'g éirigh suas air feadh ghleann agus air feadh bheann;

8 Fearann cruithneachd, agus eòrna, agus fhìonainean, agus chraobhan figis, agus phomgranat¹, fearann oladh na craobh-olaidh, agus meala;

9 Fearann anns an ith thu aran gun ghoinne, cha bhí uireasbhuidh nì sam bith ort ann; fearann aig *ambheil* a chlachan 'nan iarunn², agus as a bheanntaibh cladh-aichear umbha.

10 'Nuair a dh'itheas tu agus a shàsuichear thu, an sin beannaichidh tu an Tighearna do Dhia airson an fhearainn mhaith a thug e dhuit.

11 Thoir an aire nach dìchuimhnich thu an Tighearna do Dhia, air chor as nach gléidh thu 'àitheantan, agus a bhreitheanais, agus a reachdan, a *tha* mise ag àithneadh dhuit an diugh.

12 Air eagal, *an uair* a dh'itheas tu, agus a shàsuichear thu, agus a thogas tu tighèan maith, agus a chòmhuicheas tu *annta*;

13 Agus a dh'fhàsas do bhuar³ agus do chaorach, agus a mheudaichear t'airgid agus t'òr, agus a mheudaichear gach nì a ta agad;

14 Gu'm bi an sin do chridhe air a thogail suas, agus gu'n dìchuimhnich thu 'n Tighearna do Dhia, a thug a mach thu á tìr na h-Eiphit, *agus* á tigh na daorsa;

15 A threoraich thu troimh 'n fhàsach mhòr agus uamhasach sin, *far an robh* naithraichean loisgeach, agus scorpionna, agus ionada tartmhor, far nach *robh* uisge; a thug a mach dhuit uisge as a' charraig aillbhinn;

16 Abheathaich thu san fhàsach le mana, nach b'aithne do d' aithrichibh, a chum gu'n irioslaicheadh e thu, agus gu'n dearbhadh e thu, a dheanamh maith dhuit ann ad *làithibh* deireannach;

17 Agus gu'n abair thu ann ad chridhe, Fhuair mo chumhachd, agus neart mo làimhe, an saobhreas so dhomh.

18 Ach cuimhnichidh tu 'n Tighearna do Dhia: oir is esan a bheir comas dhuit beartas fhaghail, a chum gu'n daingnich e a choimhcheangal a mhionnaich e do d' aithrichibh, mar *air* an là'n diugh.

19 Agus tarlaidh, ma dhìchuimhnicheas tu air chor sam bith an Tighearna do Dhia, agus gu'n gluais thu an déigh

dhiathan eile, agus gu'n dean thu seirbhis doibh, agus gu'n dean thu aoradh dhoibh, tha mi a' toirt fianuis 'nur n-aghaidh an diugh, gu'n sgriosar gu tur sibh.

20 Mar na cinnich a tha 'n Tighearna a' sgrios roimh bhur gnùis, is amhuil sin a théid as duibhse: a chionn nach b'àill leibh bhì ùmhal do ghuth an Tighearna bhur Dé.

CAIB. IX.

Tha Moisi a' deanamh a dhìchill gu barail an t-sluaigh isleachadh a thaobh am fireantachd agus an ionracais féin, le'n ceannaire, an gearan, agus an eas-ùmhlaichd a chur an cuimhne dhoibh.

EISD, O Israeil: *tha* thu gu gabhail 'thar Iordan an diugh, gu dol a steach a shealbhachadh chinneach a's mò agus a's treise na thu féin, bailtean mòra agus daingichte suas gu nèamh;

2 Sluagh mòr agus àrd⁴, clann nan Anacach, a's aithne dhuit, agus *mu'n* cual' thu *air a radh*, Cò is urrainn seasamh roimh chloinn Anaic?

3 Uime sin tuig thusa an diugh, gur e 'n Tighearna do Dhia an tì a théid thairis romhad 'na theine caithteach⁵: cuiridh esan as doibh, agus cuiridh e sìos iad a'd' fhianuis: mar sin fògraidh tu mach iad, agus sgriosaidh tu iad gu grad, mar a thubhairt an Tighearna riut.

4 Na labhair ann ad chridhe, an déigh do'n Tighearna do Dhia an tilgeadh a mach romhad, ag ràdh, Air son m'fhìreantachd féin thug an Tighearna steach mi a shealbhachadh an fhearainn so; ach air son aingidheachd nan cinneach sin tha 'n Tighearna 'g am fògradh a mach o d' làthair.

5 Cha 'n ann air son t'fhìreantachd, no air son ionracais do chridhe, tha thu dol a shealbhachadh am fearainn: ach air son aingidheachd nan cinneach sin tha 'n Tighearna do Dhia 'g am fògradh a mach o d' làthair-sa, agus a chum gu'n coimhlion e 'm focal a mhionnaich an Tighearna do t'aithrichibh, Abraham, Isaac, agus Jacob.

6 Tuig, uime sin, nach ann air son t'fhìreantachd-sa a *tha'n* Tighearna do Dhia a' toirt duit an fhearainn mhaith so r'a shealbhachadh; oir is sluagh ragmhuinealach thu.

7 Cuimhnich, na dìchuimhnich cionnus a bhrosnaich thu 'n Tighearna do Dhia gu feirg san fhàsach: o'u là sau deachaidh tu mach á tìr na h-Eiphit, gus an d'thàinig sibh do'n àite so, bha sibh ceann-airceach an aghaidh an Tighearna.

8 Mar an ceudna ann an Horcb bhrosnaich sibh an Tighearna gu feirg, air chor

¹ ghran-abhal.
² chlàchaibh.

² aig an tairngear iarunn á
³ chrodh.

⁴ barrachdail.

⁵ dian-loisgeach.

as gu'n robh corruich air an Tighearna ribh, a chum blur sgrios.

9 'Nuair a chaidh mise suas do'n t-sliabh a ghabhail nan clàr chloiche, *eadhon* chlàr a' choimhcheangail a rinn an Tighearna ribh, an sin dh'fhan mi san t-sliabh dà fhichead là agus dà fhichead oidhche; cha d'ith mi aran, ni mò a dh'òl mi uisge:

10 Agus thug an Tighearna dhomh dà chlàr chloiche, sgriobhta le meur Dhé; agus orra *bha sgriobhta* réir nan uile bhriathran a labhair an Tighearna ribh san t-sliabh, á meadhon an teine, am an là a' chomhehrunnich.

11 Agus tharladh, an ceann dhà fhichead là agus dhà fhichead oidhche, *gu'n* d'thug an Tighearna dhomhs' an dà chlàr chloiche, *eadhon* clàr a' choimhcheangail.

12 Agus thubhairt an Tighearna rium, Eirich, imich sìos gu luath as a so; oir thruaill do shluagh a thug thu mach as an Eiphit *iad féin*; chlaon iad gu grad o'n t-slighe a dh'àithn mise dhoibh; rinn iad dhoibh féin dealbh leaghta.

13 A bhàrr air so, labhair an Tighearna rium, ag ràdh, Chunnac mi an sluagh so, agus, feuch, *is* sluagh rag-mhuinealach iad.

14 Leig dhomh, a chum gu'n sgrios mi iad, agus gu'n dubh mi mach an ainm o bli fuidh néamh; agus ni mi dhìotsa cinneach a's cumhachdaiche agus a's mò na iadsan.

15 Mar sin phill mi, agus thàinig mi nuas o'n t-sliabh, agus bha an sliabh a' losgadh le teine; agus bha dà chlàr a' choimhcheangail a'm' dhà làimh.

16 Agus dh'amhairc mi, agus, feuch, bha sibh air peacachadh¹ an aghaidh an Tighearna bhur Dé, rinn sibh laogh leaghta dhuibh féin: bha sibh air tionndadh a thaobh gu grad as an t-slighe a dh'àithn an Tighearna dhuibh.

17 Agus ghlac mi an dà chlàr, agus thilg mi as mo dhà làimh iad, agus bhris mi iad fa chomhair bhur sùl.

18 Agus thuit mi sìos² am fianuis an Tighearna, mar air tùs, dà fhichead là agus dà fhichead oidhche; cha d'ith mi aran, ni mò dh'òl mi uisge, air son bhur peacannan uile a pheacaich sibh, le olc a dheanainh am an sealladh an Tighearna, 'ga bhrosnachadh gu feirg.

19 (Oir bha eagal na feirge orm, agus na ro-chorruich leis an robh an Tighearna feargach 'nur n-aghaidh-sa chum bhur sgrios.) Ach dh'éisid an Tighearna rium san àm sin mar an ceudna.

20 Agus bha ro-fhearg air an Tighearna ri h-Aaron a chum a sgrios: agus rinn mi

urnuigh, mar an ceudna, air sou Aaron san àm sin féin.

21 Agus ghabh mi bhur peacadh, an laogh a rinn sibh, agus loisg mi e le teine, agus phronn mi e, *agus* mheil mi gu mùn e, *eadhon* gus an d'rinneadh mìn e mar dhuslach; agus thilg mi a dhuslach³ san t-sruth a thàinig a nuas o'n t-sliabh.

22 Agus aig Taberah, agus aig Masah, agus aig Cibrot-Hataabhah, bhrosnaich sibh an Tighearna gu feirg.

23 Mar an ceudna, 'nuair a chuir an Tighearna sibh o Chades-barnea, ag ràdh, Rachaibh suas, agus sealbhaichibh am fearann a thug mise dhuibh; an sin rinn sibh ceannaire an aghaidh àithne an Tighearna bhur Dé, agus cha do chreid sibh e, ni mò a dh'éisid sibh r'a ghuth.

24 Bha sibh ceannaireach an aghaidh an Tighearn, o'n là a b'àithne dhomhsa sibh.

25 Mar so, thuit mi sìos am fianuis an Tighearna dà fhichead là agus dà fhichead oidhche, mar a thuit mi sìos *air tùs*⁴; a chionn gu'n dubhairt an Tighearna gu'n sgriosadh e sibh.

26 Uime sin, rinn mi urnuigh ris an Tighearn, agus thubhairt mi, O Thighearna Dhé, na sgrios do shluagh féin, agus t'oghreachd, a shaoir thu trid do mhàrachd, a thug thu mach as an Eiphit le làimh chumhaichdaich.

27 Cuimhnich do sheirbhisich, Abraham, Isaac, agus Jacob; na h-amhairc air reasgachd an t-sluaigh so, no air an aingidheachd, no air am peacadh;

28 Air eagal gu'n abair am fearann as an d'thug thu mach sinn, A chionn nach b'urrainn an Tighearn an toirt a steach do'n fhearann a gheall e dhoibh, agus a chionn gu'n robh fuath aige dhoibh, thug e mach iad g'am marbhadh san fhàsach.

29 Gidheadh *is* iad do shluagh iad, agus t'oghreachd, a thug thu mach le d' thréin neart, agus le d' ghairdean sìnte mach.

CAIB. X.

1 *Matthias agus trècair Dhé air a nochdadh ie dà chlàr an Lagha ath-nuadhachadh.* 8 *Treubh Lebhi air a cur air leth, &c.*

SAN àm sin thubhairt an Tighearna rium, Snaidh dhuit féin dà chlàr chloiche cosmhuil ris na ceud ehlàir, agus thig a nìos a m' ionnsuidh-sa do'n t-sliabh⁵, agus dean dhuit àirc fhiodha.

2 Agus sgriobhaidh mise air na clàir na focail a bh'air na ceud ehlàir a bhris thu, agus euiridh tu iad san àirc.

3 Agus rinn mi àirc do fhiodh sitim, agus shnaidh mi dà chlàr chloiche eomhuil ris na ceud ehlàir, agus ehaidh mi

¹ bha sibh an dèigh peacachaidh.

² dh'istich mi mi féin, rinn mi aoradh.

³ smùr.

⁴ anns an d'istich mi mi féin.

⁵ do'n bheinn.

suas do'n t-sliabh, agus an dà chlàr a'm' làimh.

4 Agus sgrìobh e air na clàir a réir a' cheud sgrìobhaidh, na deich àitheantan, a labhair an Tighearna ribh san t-sliabh, á meadhon an teine, ann an là a' chomh-chruinnich: agus thug an Tighearn iad dhìomhasa.

5 Agus phill mise, agus thàinig mi nuas o'n t-sliabh, agus chuir mi na clàir san àirde a rinn mi, agus an sin tha iad, mar a dh'àithn an Tighearna dhomh.

6 Agus dh'imich clann Israeil o Bherot chloimn Iaacain gu Mosera: an sin fhuair Aaron bàs, agus dh'adhlacaidh e an sin; agus fhrithheil Eleasar a mhac ann an dreuchd an t-sagairt 'na àite.

7 As a sin dh'imich iad gu Gudgodah, agus o Ghudgodah gu Iotbat, fearann shruthan¹ uisge.

8 San àm sin chuir an Tighearn air leth treubh Lebhi, a ghlùlan àirde coimh-cheangail² an Tighearn, a sheasamh an làthair an Tighearna gu frithealadh dha, agus a bheannachadh 'na ainm, gus an là'n diugh.

9 Uime sin cha 'n eil aig Lebhi roinn no oighreachd maille r'a bhràithribh: is e 'n Tighearn a's oighreachd dha, a réir mar a gheall an Tighearn do Dhia dha.

10 Agus dh'fhan mi san t-sliabh, a réir na ceud uine³, dà fhichead là agus dà fhichead oidhche, agus dh'éis an Tighearna rium mar an ceudna san àm sin, agus cha bu toil leis an Tighearn thusa a sgrios.

11 Agus thubhairt an Tighearna rium, Eirich, imich roimh 'n t-sluagh, a chum gu'n téid iad a steach, agus gu'n sealbhaich iad am fearann, a mhionnaich mi d'an aithrichibh gu'n tugainn doibh.

12 Agus a nis, Israeil, ciod a tha 'n Tighearna do Dhia ag iarraidh ort, ach eagal an Tighearna do Dhé a bhí ort, gluasad 'na uile shlighibh, a ghràdhachadh, agus seirbhis a dheanamh do'n Tighearna do Dhia le d' uile chridhe, agus le d' uile anam;

13 Aitheantan an Tighearn a ghleidheadh, agus a reachdan, a tha mise ag àithneadh dhuit an diugh air son do leas?

14 Feuch, is leis an Tighearna do Dhia nèamh, agus nèamh nan nèamh, an talamh mar an ceudna, agus gach nì a ta ann.

15 A mhàin bha tlachd aig⁵ an Tighearn a' d' aithrichibh g'an gràdhachadh, agus thagh e 'u sliochd nan deigh, eadhon siblise os ceann gach sluagh, mar air an là'n diugh.

16 Timchioll-ghearraibh, uime sin,

roimhchroicionn bhur cridhe, agus na bithibh rag-mhuinealach ni's mò.

17 Oir an Tighearna bhur Dia, is esan Dia nan Dia, agus Tighearna nan Tighearna, Dia mòr, cumhachdach, agus uamhasach, aig nach 'eil bàigh ri neach seach a chéile, agus nach gabh duais⁶.

18 Tha e a' cur an gnìomh breitheanaise an dilleachdain agus na bantraich, agus is toigh leis an coigreach, a' toirt dha bidh agus eudaich.

19 Uime sin gràdhaichidh sibh an coigreach; oir bha sibh féin 'nur coigrich ann an tìr na h-Eiphit.

20 Bithidh eagal an Tighearna do Dhé ort; dhasan ni thu seirbhis, agus ris-san dlùth-leanaidh tu, agus air 'ainm mionnaichidh tu.

21 Is esan do chliù, agus is esan do Dhia, a rinn air do shon na nithe mòr agus uamhasach ud, a chunnaic do shùilean.

22 Le tri fichead agus deich anamanna⁶ chaidh t'aithriche sios do'n Eiphit; agus a nis rinn an Tighearna do Dhia thu mar reulta nèimh a thaobh lìonmhoireachd.

CAIB. XI.

1 Earail do'n t-sluagh gu géilleachdainn do lagh Dhé. 8 Dhoibh-san a bhios àmhlaid dha tha soch-
airean mòra air an gealltainn. 26 Tha beann-
achadh agus mallachadh air an cur fa'n comhair.

AIR an aobhar sin, gràdhaichidh tu 'n Tighearna do Dhia, agus gleidhidh tu a churam⁷, agus a reachdan, agus a bhreitheanaise, agus 'aitheantan a ghnàth.

2 Agus biodh fios agaibhse an diugh: oir ni 'n labhran r'ur cloimn do nach b'aithne, agus nach faca smachdachadh an Tighearna bhur Dé, a mhòrachd, a làmh chumhachdach, agus a ghairdean sìnte mach,

3 Agus a chomharan, agus a ghnìomharan, a rinn e ann am meadhon na h-Eiphit, ri Pharaoh rìgh na h-Eiphit, agus r'a fhearann uile;

4 Agus ciod a rinn e ri armaillt nan Eiphiteach, r'an eich, agus r'an carbad-aibh; cionnus a thug e air uisge na mara ruaidhe dol tharta 'nuair a bha iad an tòir oirbh, agus cionnus a sgrios an Tighearn iad gus an là'n diugh;

5 Agus ciod a rinn e dhuibhse san fhàsach, gus an d'thàinig sibh do'n àite so;

6 Agus ciod a rinn e ri Datan agus Abiram, mic Eliaib, mhic Reubein; cionnus a dh'fhosgail an talamh a bheil, agus a shluig e sìos iad, agus an teaghlaichean, agus am buthan, agus a' mhaoim uile a bha 'nan seilbh, am meadhon Israeil uile.

7 Ach chunnaic bhur sùilean-sa gnìomh-ara mòra an Tighearn uile, a rinn e.

¹ aìmhnichean.

³ àithcan. Eabh.

² cùnraidh.

⁶ ròghnuich.

⁵ ceannach.

⁶ pearsanna.

⁷ thaisgach, na dh'carb e riut.

8 Uime sin, gleidhidh sibh na h-àitheanta sin uile a *tha* mi ag àithneadh dhuibh air an là'n diugh, a chum gu'm bi sibh làidir, agus gu'n téid sibh a stigh agus gu'n sealbhaich sibh am fearann, gus am bheil sibh a' dol g'a shealbhachadh;

9 Agus gu'm buanaich sibh *bhur* làithean anns an fhearann a mhionnaich an Tighearna d'ur n-aithrichibh gu'n tugadh e dhoibh e, agus d'an sliochd, fearann a tha sruthadh le bainne agus mil.

10 Oir cha 'n'eil am fearann d'am bheil thu dol a stigh g'a shealbhachadh, mar fhearann na h-Eiphit, o'n d' thàinig sibh a mach, far an robh thu cur do shìl, agus g' a uisgeachadh le d' chois, mar lios lusan¹:

11 Ach am fearann gus am bheil sibh a' dol g'a shealbhachadh, is fearann bheann agus ghleann e: do fhrasachd² nèimh òlaidh e uisge:

12 Fearann d'am bheil an Tighearna do Dhia a' gabhail curaim; *tha* sùilean an Tighearna do Dhé air a ghnàth, o thoiseach na bliadhna eadhon gu deire³ na bliadhna.

13 Agus tarlaidh, ma dh'éisdeas sibh gu dùrachdach ri m' àitheantaibh⁴, a *tha* mi ag àithneadh dhuibh air an là'n diugh, an Tighearna bhur Dia a ghràdhachadh, agus seirbhis a dheanamh dha le'r n-uile cluridhe, agus le'r n-uile anam;

14 Gu'n toir mise *dhuibh* uisge bhur fearainn na àm féin, an ceud uisge, agus an t-uisge deireannach, agus cruinnichidh tu stigh t'arbhar, agus t'fhion, agus t'-oladh.

15 Agus cuiridh mi fear a'd' mhachair do d' spréidh, agus ithidh tu, agus sàsaichear thu.

16 Thugaibh an aire dhuibh féin, air eagal gu meallar bhur cridhe, agus gu'n claoon sibh a leth-taobh, agus gu'n dean sibh seirbhis do dhiathaibh eile, agus gu'n dean sibh aoradh dhoibh;

17 Agus gu'n las fearg an Tighearna 'nur n-aghaidh, agus gu'n druid e suas nèamh, air chor as nach bi uisge sam bith ann, agus nach toir am fearann a thoradh uaidh, agus gu'n sgriosar gu grad sibh as an fhearann mhaith a *tha* 'n Tighearna a' tabhairt duibh.

18 Uime sin taisgidh sibh suas iad so mo bhriathra 'nur cridhe, agus 'nur n-anam, agus ceanglaidh sibh iad mar chomharadh air bhur làimh; agus bithidh iad mar eudanaid eadar bhur sùilb.

19 Agus teagaisgidh sibh iad d'ur cloinn, a' labhairt orra 'nuair a shuidheas tu a'd' thigh, agus an uair a dh'imicheas tu air an t-slighe, agus an uair a luidh-

eas tu sìos, agus an uair a dh'éireas tu suas.

20 Agus sgrìobhaidh tu iad air ursainnean doruis do thighe, agus air do gheat-aibh:

21 A chum gu'm bi bhur làithean lìonmhor, agus làithean bhur cloinne, san fhearann a mhionnaich an Tighearna d'ur n-aithrichibh a thoirt doibh, mar làithean nèimh air an talamh.

22 Oir ma ghleidheas sibh gu dùrachdach na h-àitheanta so uile a *tha* mise ag àithneadh dhuibh a dheanamh, an Tighearna bhur Dia a ghràdhachadh, gluasad na uile shligheibh, agus dlùthleantuinn ris;

23 An sin tilgidh an Tighearna a mach na cinnich sin uile roimhibh, agus sealbhaidhidh sibh cinnich a's mò agus a's cumhachdaiche na sibh féin.

24 Gach àit air an saltair buinn bhur cos, is libhe: o'n fhàsach agus Lebanon, o'n amhainn, an amhainn Euphrates, eadhon gus an fhairge a's faide mach, bithidh bhur crìoch.

25 Cha seas duine 'nur n-aghaidh: air gach fearann air an saltair sibh, cuiridh an Tighearna bhur Dia eagal agus geilt-chrith roimhibh, a réir mar a thubhairt e ribh.

26 Feuch, *tha* mise a' cur fa'r comhair air an là'n diugh beannachadh agus mallachadh;

27 Beannachadh, ma bheir sibh géill⁴ a dh'àitheantaibh an Tighearna bhur Dé, a *tha* mi ag àithneadh dhuibh air an là'n diugh;

28 Agus mallachadh, mur toir sibh géill⁵ a dh'àitheantaibh an Tighearna bhur Dé, ach gu'n claoon sibh o'n t-slighe a *tha* mi ag àithneadh dhuibh an diugh, a dhol an déigh dhiathan eile, nach b'aithne dhuibh.

29 Agus tarlaidh, 'nuair a bheir an Tighearna do Dhia thu stigh do'n fhearann d'am bheil thu dol g'a shealbhachadh, gu'n cuir thu am beannachadh air sliabh Gheridsim, agus am mallachadh air sliabh Ebal.

30 Nach 'eùl iad air an taobh eile do Iordan, leth ri slighe dol fuidhe na gréine, ann an tìr nan Canaanach, a *tha* g' àiteachadh a' chòmhnaidh fa chomhair Ghilgail, làimh ri còmhnradaibh⁶ Mhoreh?

31 Oir théid sibh thar Iordan, a dhol a stigh a shealbhachadh an fhearainn a *tha* 'n Tighearna bhur Dia a' tabhairt duibh, agus sealbhaichidh sibh e, agus gabhaidh sibh còmhnuidh ann.

32 Agus bheir sibh an aire gu'n dean sibh na reachdan uile agus na breitheanaid, a thami cur roimhibh air an là'n diugh.

¹ mar ghàradh lus.
³ deireadh.

² fheurthuinn.
⁴ bhios sibh àmhail.

⁵ éisd sibh ri. Eabh. ⁶ réidhleibh; daragaibh.

CAIB. XII.

1 Aitean-uoraidh agus altairean nan iòdol gu bhi air an sgrios. 5 An t-ionad anns an deanar seirbhis do Dhia gu bhi air a choimhead naomha. 16, 23 Fuil air a toirmeasg.

IS iad so na reachdan agus na breith-eanaib a bheir sibhse fa'near gu'n dean sibh san fhearann a tha 'n Tighearna, Dia t'aithriche, a' toirt duit g'a shealbhachadh, uile làithean bhur beatha air an talamh.

2 Léir-sgrìosaidh sibh na h-àiteachan uile anns an d' rinn na cinnich a shealbhacheas sibh, seirbhis d'an diathaibh, air na beanntaibh àrda, agus air na cnocaibh, agus fuidh gach craoibh ghlàis.

3 Agus leagaidh sibh sìos an altairean, agus brisidh sibh an carraighean¹, agus loisgidh sibh an doireachan le teine, agus gearraidh sibh sìos dealbhan snaidhte an dèe, agus sgrìosaidh sibh an ainm a mach as an àite sin.

4 Cha dean sibh mar sin ris an Tighearna bhur Dia.

5 Ach a dh'ionnsuidh an àite a rògh-naicheas an Tighearna bhur Dia as bhur treubhaibh uile, chum 'ainm a chur an sin, eadhon a dh'ionnsuidh 'àite-còmh-nuidh-san iarraidh sibh, agus gu sin thig thu.

6 Agus bheir sibh gu sin bhur tabhartais-loisgte², agus bhur n-ìobairtean, agus bhur deachamh, agus tabhartais-thogta bhur làimhe, agus bhur bòidean, agus bhur saor-thabhartais, agus ceud-ghin bhur cruaidh agus bhur caorach.

7 Agus ithidh sibh an sin an làthair an Tighearna bhur Dé, agus ni sibh gairdeachas anns gach ni ris an cuir sibh bhur làmh, sibh féin agus bhur teaghlaichean, anns an do bheannaich an Tighearna do Dhia thu.

8 Cha dean sibh a réir nan uile nithe a tha sinn a' deanamh an so an diugh, gach duine an ni a tha ceart 'na shùilbh féin.

9 Oir cha d'fhàinig sibh fathast a dh'ionnsuidh na foise, agus a dh'ionnsuidh na h-oighreachd a tha 'n Tighearna bhur Dia a' tabhairt dhuibh.

10 Ach an uair a thèid sibh thar Iordan, agus a ghabhas sibh còmhnuidh san fhearann a bheir an Tighearna bhur Dia dhuibh r'a shealbhachadh, agus an uair a bheir e fois dhuibh o'r naimhdeibh uile mu'n cuairt, agus a ghabhas sibh còmhnuidh gu tèaruinte.

11 An sin bitidh àit ann a thaghas an Tighearna bhur Dia, a thoirt air 'ainm còmhnuidh a ghabhail ann: gu sin bheir sibh na h-uile nithe a tha mise ag àithneadh dhuibh; bhur tabhartais-loisgte,

agus bhur n-ìobairte, bhur deachamh, agus tabhartais-thogta bhur làimhe, agus taghadh bhur bòidean uile a bhòidicheas sibh do'n Tighearna.

12 Agus ni sibh gairdeachas an làthair an Tighearna bhur Dé, sibh féin, agus bhur mic, agus bhur nigheanan, agus bhur n-òglach, agus bhur banoglaich, agus an Lebhitheach a tha 'n taobh a stigh d'ur geataibh; do bhrìgh nach 'eil roinn no oighreachd aige maille ribh.

13 Thoir an aire dhuit féin, nach ìobair³ thu t'ìobairtean-loisgte anns gach àit a chi thu.

14 Ach anns an àit a thaghas an Tighearna as aon do d' threubhaibh, an sin ìobraidh tu t'ìobairtean-loisgte, agus an sin ni thu na h-uile nithe a tha mise ag àithneadh dhuit.

15 Gidheadh, feudaidd tu feoil a mharbhadh agus itheadh a'd' gheataibh uile, ge b'e ni air am bheil miann aig t'anam, a réir beannachaidh an Tighearna do Dhé a thug e dhuit: feudaidd an neòghlan agus an glan itheadh dheth; mar do'n bhoc-earba, agus do'n fhiadh.

16 A mhàin cha 'n ith sibh an fhuil; air an talamh dòirtidh sibh i mar uisge.

17 Cha 'n fheadh thu deachamh t'arbh-air itheadh an taobh a stigh do d' gheataibh no t'fhiona, no t'olaidh, no ceud-ghin do chruidh no do chaorach, no h-aon air bith do d' bhòidibh a bhòidicheas tu, no do shaor-thabhartais, no tabhartais-thogta do làimhe:

18 Ach an làthair an Tighearna do Dhé ithidh tu iad anns an àit a thaghas an Tighearna do Dhia, thu féin, agus do mhac, agus do nighean, agus t'òglach, agus do bhanoglach, agus an Lebhitheach a tha 'n taobh a stigh do d' gheataibh: agus ni thu gairdeachas an làthair an Tighearna do Dhé anns gach ni ris an cuir thu do làmhan.

19 Thoir an aire dhuit féin, nach tréig thu an Lebhitheach am feadh is beò thu air t'fhearann⁴.

20 'Nuair a leudaicheas an Tighearna do Dhia do chrìoch, mar a gheall e dhuit, agus a their thu, Ithidh mi feoil, (a chionn gu bheil t'anam a' miannachadh feoil itheadh,) a réir uile mhiann t'anama feudaidh tu feoil itheadh.

21 Ma bhios an t-àit a thagh an Tighearna do Dhia a chur 'ainme an sin, ro fhada uait; an sin marbhaidh tu do d'-bhuar, agus do d' threud, a thug an Tighearna dhuit, mar a dh'àithn mise dhuit, agus ithidh tu an taobh a stigh do d' gheataibh gach ni is miannach le t'anam.

¹ dealbhan-cloiche.² ofrailean-loisgte.³ ofrail, tiòdhlaid, tairg.⁴ rè do làithean uile air an talamh.

22 Eadhon mar a dh'ithear an ruadh-bhloc, agus an fiadh, mar sin ithidh tu e: ithidh an neòglulan agus an glan deth air an aon dòigh:

23 A mhlàin thoir an ro-aire nach ith thu 'n fhuil: oir is i 'n fhuil a' bheatha; agus cha 'n fheadh thu a' bheatha itheadh maille ris an fheoil.

24 Cha 'n ith thu i; air an talamh dòirtidh tu i mar uisge.

25 Cha 'n ith thu i, chum gu'n éirich gu maith dhuit, agus do d' chloinn a'd' dhéigh, 'nuair a ni thu *an nì a ta ceart ann an sùilbh an Tighearn*.

26 A mhlàin gabhaidh tu do nìthe naomha a tha agad, agus do bhòidean, agus thèid thu do'n àit a thaghas an Tighearn.

27 Agus iobairidh tu t'ìobairtean-loisgte, an fheoil agus an fhuil, air altair an Tighearna do Dhé; agus dòirtear a mach fuil t'ìobairtean air altair an Tighearna do Dhé, agus ithidh tu 'n fheoil.

28 Thoir an aire¹, agus éisd ris na briathraibh sin uile a *tha* mi ag àithneadh dhuit, a chum gu'n éirich gu maith dhuit féin, agus do d' chloinn a'd' dhéigh gu bràth, an uair a ni thu *an nì a tha* maith agus ceart ann an sùilbh an Tighearna do Dhé.

29 'Nuair a ghearras an Tighearna do Dhia as na cinnich romhad, a tha thu dol a steach an sud a chum an sealbhachadh, agus a thig thu 'nan àite, agus a ghabhas tu còmluidh 'nam fearann;

30 Thoir an aire dhuit féin nach ribear thu le'n leantuinn, an déigh dhoibh bhi air an sgrìos as do làthair, agus nach fiosraich thu mu thimchioll an dée, ag ràdh, Cionnus a rinn na cinnich sin seirbhis d'an diathaibh? ni mise mar sin mar an ceudna.

31 Cha dean thusa mar sin ris an Tighearna do Dhia: oir gach gràineileachd do'n Tighearn a's fuathach leis, rinn iad-san d'an diathaibh; oir eadhon am mic agus an nigheana loisg iad san teine d'an diathaibh.

32 Gach nì a *tha* mise ag àithneadh dhuibh, thugaibh an aire gu'n dean sibh e: cha chuir thu ris, ni mò bheir thu ni sam bith uait.

CAIB. XIII.

1 Clochar gu bàs iadsan a mheallas daoine gu dol an déigh dhiathan eile, 6 ged a robh iad fagus an dàimh dhuit. 12 Cha chaomhnar na bailtean anns am bi iodhol-còradh.

MA dh'éireas suas 'nur measg fàidh, no fear a chi aisling², agus gu'n toir e dhuit comharadh³ no iongantas,

2 Agus gu'n tig an comharadh no'n

t-iongantas gu crìch, air an do labhair e riut, ag ràdh, Rachamaid an déigh dhiathan eile, nach b'aithe dhuit, agus deanamaid seirbhis doibh:

3 Cha 'n éisd thu ri briathraibh an fàidh sin, no ris an fhear sin a chi aisling: oir tha 'n Tighearna bhuir Dia 'gur dearbhadh, a dh'fheuchainn am bheil sibh a' gràdhachadh an Tighearna bhuir Dé le'r n-uile chridhe, agus le'r n-uile anam.

4 An déigh an Tighearna bhuir Dé gluaisidh sibh, agus bithidh 'eagal-san oirbh, agus gleidhidh sibh 'aitheantan, agus éisdidh sibh r'a ghuth, agus ni sibh seirbhis da, agus dlùth-leanaidh sibh ris.

5 Agus cuirair am fàidh sin, no am fear sin a chi aisling, gu bàs; a chionn gu'n do labhair e chum sibhse chur air seacharan o'n Tighearna bhuir Dia, a thug a mach sibh á tìr na h-Eiphit, agus a dh'fhuasgail sibh á tigh na daorsa, chum t'iomain a mach⁴ as an t-slighe anns an d'aithean an Tighearna do Dhia dhuit imeachd; mar sin cuiridh tu air falbh an t-olc as do mheadhon⁵.

6 Ma chuireas do bhràthair, mac do mhàthar, no do mhaic féin, no do nighean, no bean-phòsda t'uchd, no do charaid, a *tha dhuit* mar t'anam, impidh ort ann an uaigneas, ag ràdh, Rachamaid agus deanamaid seirbhis do dhiathaibh eile, nach b'aithe dhuit féin, no do t'aithrichibh;

7 Eadhon do dhiathaibh nan cinneach a *tha* mu'n cuairt oirbh, am fagus duit, no fada uait, o'n dara ceann do'n talamh eadhon gus an ceann eile do'n talamh;

8 Cha 'n aontaich thu leis, ni mò a dh'éisdeas tu ris; ni mò a ghabhas do shùil truas ris, ni mò a chaomhnas no cheileas tu e:

9 Ach cuiridh tu gu cinnteach gu bàs e; bithidh do làmh féin an tús air g'a mharbhadh, agus an déigh sin làmh an t-sluaigh uile.

10 Agus clachaidh tu e le clachalbh, a chum gu'm bàsaich e; a chionn gu'n d'iarr e do tharruing⁶ o'n Tighearna do Dhia, a thug a mach thu á tìr na h-Eiphit, á tigh na daorsa.

11 Agus chuinnidh Israel uile, agus bithidh eagal orra, agus cha dean iad ni's mò a leithid so do ghnìomh aingidh 'nur measg.

12 Ma chluinneas tu ann an aon do d' bhailtibh, a thug an Tighearna do Dhia dhuit gu còmhuidh a ghabhail ann, *neach air bith* ag ràdh,

13 Chaidh daoine àraidh, clann Bheijail, a mach as bhuir measg, agus bhuair⁷ iad luchd-àiteachaidh am baile, ag ràdh,

¹ Gleidh.

² a bhruadaircas brúadar.

³ sain-fhios.

⁴ do chur air seacharan.

⁵ as bhuir measg.

⁶ do sgaradh, t'fhuadach.

⁷ tharruing, mheall.

Rachamaid agus deanamaid seirbhais do dhiathaibh eile, nach b'aithne dhuibh;

14 An sin fiosraichidh tu, agus rannsaichidh tu, agus feòraichidh tu gu dùrachdach; agus, feuch, *ma's* fìrinn *e*, agus gu'm bheil a' chiùis deirbhthe, *gu'n* do rinneadh a' ghràineileachd sin 'nur measg;

15 Gu cinnteach buailidh tu luchd-àiteachaidh a' bhaile sin le faobhar a' chlaidheimh, 'ga sgrios gu tur, agus gach ni a *ta* ann, agus a spréidh, le faobhar a' chlaidheimh.

16 Agus cruinnichidh tu a chreach¹ uile gu meadhan a shràide, agus loisgidh tu le teine am baile, agus a chreach uile gu h-ìomlan, air son an Tighearna do Dhé: agus bithidh e 'na thòrr² a chaoidh; cha togar suas e ni's mò.

17 Agus cha lean ri d' làimh-sa a bheag do'n ni mhallaichte; a chum gu'm pill an Tighearna o lasair 'fheirge, agus gu nochd e trócair dhuit, agus gu'n dean e iochd riut, agus gu'n toir e ort fàs lionmhor, mar a mhionnaich e do t'aithrichibh;

18 'Nuair a dh'éisdeas tu ri guth an Tighearna do Dhé, a ghleidheadh 'àith-eantan uile a *tha* mi ag àithneadh dhuit an diugh, a dheanamh an *ni a ta* ceart ann an sùilbh an Tighearna do Dhé.

CAIB. XIV.

1 *Cha ghearr agus cha lom clann Dé iad féin, an uair a ni iad bròn air son maibh.* 3 *Na beathaichean a dh'fheadar itheadh, agus nach feudar.*

IS sibhse clann an Tighearna bhur Dé: cha ghearr sibh sibh féin, ni mò a ni sibh lomadh *air bith* eadar bhur sùilean air son maibh:

2 Oir *is* sluagh naomha thu do'n Tighearna do Dhia, agus thagh an Tighearna thu gu bhi a'd' sluagh sònraichte dha féin, thar gach uile chinneach a *tha* air aghaidh na talmhainn.

3 Cha 'n ith thu ni gràineil sam bith.

4 Is iad so na beathaichean a dh'itheas sibh: an damh, a' chaora, agus a' ghabhar,

5 Am fiadh, agus an ruadh-bhoc, agus an dathais³, agus a' ghabhar fhiadh-aich, agus an t-earr-gheall⁴, agus an damh fiadhaich, agus an somer⁵.

6 Agus gach beathach a roinneas an ionga, agus a sgoilteas sgoltadh an dà ionga, agus a chnàmhas a' chìr am measg nan ainmhidhean, sin ithidh sibh.

7 Gidheadh, iad so cha 'n ith sibh dhiubhsan a chnàmhas a' chìr, no dhiubhsan a roinneas an ionga sgoilte, mar an càmhail, agus a' mhaigheach, agus an coinean; oir cnàmhaidh iad a' chìr, ach cha roinn iad an ionga: neòghlan *tha* iad dhuibh.

8 Agus a' mhuc, a chionn ged a roinn i

'n ionga, nach cnàmh i a' chìr, *tha* i neòghlan dhuibh: d'am feoil cha 'n ith sibh, agus r'an cairbh cha bhean sibh.

9 Iad so ithidh sibh dhiubhsan uile a *ta* sna h-uisgeachaibh: gach ni air am bheil itean agus lannan, ithidh sibh;

10 Agus gach ni air nach 'eil itean agus lannan, cha 'n ith sibh: *tha* e neòghlan dhuibh.

11 Gach eun glan ithidh sibh.

12 Ach *is* iad so *iadsan* do nach ith sibh: an iolair, agus an cnàimh-bhristeach, agus an iolar-uisge.

13 Agus an croman-gabhlach⁶, agus an clamhan, agus am fang⁷ a réir a ghnè,

14 Agus gach fitheach a réir a ghnè,

15 Agus a' chailleach-oidhche, agus an t-seabhag-oidhche, agus a' chuach, agus an t-seabhag a réir a ghnè,

16 Agus a' chailleach-oidhche bheag, agus a' chailleach-oidhche mhor, agus an eala,

17 Agus am pelican, agus an iolair-fhionn, agus an sgarbh,

18 Agus a' chorra-bhàn, agus a' chorrach, agus a réir a ghnè, agus an t-adharc-an-luachrach, agus an ialtag.

19 Agus *tha* gach ni snàigeach a dh'itealaicheas, neòghlan dhuibh: cha 'n ithear iad.

20 Gach eun glan ithidh sibh.

21 Cha 'n ith sibh ni sam bith a bhàsaicheas dheth féin⁸: bheir thu e do'n choigreach a *tha* 'n taobh a stigh do d' gheataibh⁹, chum gu'n ith se e, no reic e ris an eilthreach¹⁰: oir *is* sluagh naomha thu do'n Tighearna do Dhia. Cha bhruidh thu meann ann am bainne a mhàthar.

22 Bheir thu seachad gu ceart deachamh uile chinnis do shìl, a bheir am fearann uath o bhliadhna gu bliadhna.

23 Agus ithidh tu 'm fianuis an Tighearna do Dhé, san àit a thaghas e chum 'ainm a chur an sin, deachamh t'arbhair, t'fhìona, agus t'olaidh, agus ceud-ghin do chruidh, agus do chaorach; a chum gu fòghlum thu eagal an Tighearna do Dhé a bhi ort a ghnàth.

24 Agus ma bhios an t-slighe ro fhada dhuit, air chor as nach urrainn thu a ghiùlan, a chionn an t-àite bhi fada uait, a thaghas an Tighearna do Dhia a chur 'ainme an sin, an uair a bheannaicheas an Tighearna do Dhia thu;

25 An sin ni thu airgid *deth*, agus ceanglaidh tu suas an t-airgid a'd' làimh, agus théid thu chum an àit a thaghas an Tighearna do Dhia:

26 Agus bheir thu an t-airgid sin air son gach ni a mhiannaicheas t'anam, air

¹ spùinneadh. ² na charn. ³ buabhl; iachmur. Eabh. ⁴ pigarg; dishon. Eabh. ⁵ Ierassa; chamois. Sasg. ⁶ raah. Eabh.

⁷ daiah. Eabh. ⁸ cairbli sam bith. ⁹ a tha ann do gheataibh. ¹⁰ fear-dùthcha eile, allmharach, atharrach. ¹¹ cruidh.

son buair¹, no air son chaorach, no air son fiona, no air son dibhe làidir, no air son gach ni a mhiannaicheas t'anam: agus ithidh tu ansin an làthair an Tighearna do Dhé, agus ni thu gairdeachas, thu féin, agus do theaghlach.

27 Agus an Lebhiteach a *tha* 'n taobh a stigh do d' gheataibh, cha tréig thu e: oir cha 'n eil roinn no oighreachd aige maille riut.

28 Aig críoch thri bliadhna bheir thu mach uile dheachamh do chinnis air a' bhliadhna sin féin, agus taisgidh tu suas e an taobh a stigh do d' gheataibh:

29 Agus thig an Lebhiteach, (a chionn nach 'eil roinn no oighreachd aige maille riut), agus an coigreach, agus an dilleachdan, agus a' bhantrach, a *tha* 'n taobh a stigh do d' gheataibh, agus ithidh iad, agus sàsuichear iad; a chuim gu'm beannaich an Tighearna do Dhia thu ann an uile oibribh do làimhe a ni thu.

CAIB. XV.

1 An seachdamh bliadhna 'na bliadhna fuasglaidh do'n bhochd. 7 Bheirear dha air iasachd, agus buillichear air an ni a tha dh'easbhuidh air.

AN ceann gach seachd bliadhna ni thu fuasgladh.

2 Agus is e so modh an fhuasglaidh: Gach fear fiacha a bheir *ni sam bith* air iasachd¹ d'a choimhearsnach, fuasglaidh² se e; cha 'n iarr e air ais e o' choimhearsnach, no o' bhràthair, a chionn gu'n goirear fuasgladh an Tighearna dheth³.

3 O eilthreach feudaidh tu 'iarraidh air ais; ach *an ni* a's leat féin a ta aig do bhràthair, fuasglaidh do làmh e;

4 Ach a mhàin an uair nach bi⁴ uireasbhuidheach sam bith 'nur measg: oir beannaichidh an Tighearna gu mòr thu san fhearann a tha 'n Tighearna do Dhia a' toirt dhuit *mar* oighreachd, r'a shealbhachadh:

5 A mhàin ma dh'éisdeas tu gu dùrachdach ri guth an Tighearna do Dhé, a thoirt an aire gu'n dean thu na h-àitheantan so uile a *tha* mi 'g àithneadh dhuit air an là 'n diugh.

6 Oir beannaichidh an Tighearna do Dhia thu, mar a gheall e dhuit: agus bheir thu air iasachd do mhòran chinn-each, ach cha ghabh thu air iasachd; agus bithidh uachdaranachd agad air mòran chinneach, ach cha bhi uachdaranachd aca-san ort-sa.

7 Ma bhios 'nur measg duine bochd, aon do d' bhràthribh, an taobh a stigh aoin do d' gheataibh, ann ad fhearann a *tha* 'n Tighearna do Dhia a' tabhairt duit, cha chruaidhich thu do chridhe, ni mò a

dhruideas tu do làmh o d' bhràthair bochd,

8 Ach fosglaidh tu do làmh gu farsaing dha, agus gu cinnteach bheir thu air iasachd dhia ni's leòr air son 'fheuma, do'n ni a tha dh'easbhuidh air.

9 Thoir an aire nach bi smuain a'd' chridhe aingidh, ag ràdh, Tha 'n t-seachdamh bliadhna, bliadhna an fhuasglaidh, am fagus; agus gu'm bi do shùil olc an aghaidh do bhràthair bochd, agus nach toir thu bheag dha, agus gu'n glaoth e ris an Tighearna a't' aghaidh, agus gu'm bi e 'na pheacadh dhuit.

10 Bheir thu dha gu deimhin, agus cha bhi doilgheas air do chridhe 'nuair a bheir thu dha; a chionn air son an ni so gu'm beannaich an Tighearna do Dhia thu a't' oibribh uile, agus anns gach ni ris an cuir thu do làmh.

11 Oir cha bhi 'n tìr a chaoidh gun bhochd⁵: uime sin tha mi 'g àithneadh dhuit, ag ràdh, Fosglaidh tu do làmh gu farsaing do d' bhràthair, do d' bhochd, agus do d' uireasbhuidheach, a'd' dhùth-aich.

12 Ma reicear riut do bhràthair Eabhruidheach, no Ban-Eabhruidheach, agus gu'n dean e seirbhis duit sè bliadhna; an sin anns an t-seachdamh bliadhna leigidh tu leis dol saor uait.

13 Agus an uair a chuireas tu e mach saor uait, cha chuir thu air falbh e falamh:

14 Bheir thu dha gu pailt as do threud, agus a t'urlar, agus a t'fhion-amar; *as na nithibh sin* leis an do bheannaich an Tighearna do Dhia thu, bheir thu dha.

15 Agus cuimhnichidh tu gu'n robh thu féin a'd' thràill ann an tìr na h-Eiphit; agus shaor an Tighearna do Dhia thu: uime sin *tha* mi ag àithneadh so dhuit an diugh.

16 Ach ma their e riut, Cha'n fhalbh mi uait; (a chionn gur toigh leis thu agus do thigh, do bhrìgh gu bheil e gu maith agad:)

17 An sin gabbaidh tu minidh, agus cuiridh tu troimh a chluais e anns an doras, agus bithidh e 'na sheirbhiseach dhuit gu bràth: agus mar an ceudna ri d' bhanoglaich ni thu mar sin.

18 Na measar e cruaidh leat, an uair a chuireas tu uait saor e; oir bha e dà uair co mhaith *dhuitse* ri seirbhiseach tuarasdail, le seirbhis a dheanamh dhuit sè bliadhna: agus beannaichidh an Tighearna do Dhia thu anns gach ni a ni thu.

19 Gach ceud-ghin firionn a bheirear am measg do chruidh⁶, agus am measg do threud, naomhaichidh tu do'n Tighearna do Dhia: cha dean thu obair sam bith le

¹ an coingheall.

² mathaidh, saoraidh.

³ chionn gu'n abrar fuasgladh an Tighearna ris

⁴ A chuim nach bi

⁵ cha teirig,

cha'n fhàilingich am bochd a chaoidh as an tìr.

⁶ a thig a'd' chroddh.

ceud-ghin do bhoi¹, ni mò a lomas tu ceud-ghin do chaorach.

20 Am fianuis an Tighearna do Dhé ithidh tu e ; o bhliadhna gu bliadhna, san ionad a thaghas an Tighearn, thu féin agus do theaghlach.

21 Agus ma bhios gaoid *sam bith* ann, criùbaiche, no doille, no droch ghaoid sam bith, cha 'n iobair thu e do'n Tighearna do Dhia.

22 An taobh a stigh do d' gheataibh ithidh tu e ; *ithidh* an glan agus an neòghlan comh-ionnan *deth*, mar do'n ruadh-bhoc, agus mar do'n fhiadh.

23 A mhàin 'fhuil cha 'n ith thu : air an talamh dòirtidh tu i mar uisge.

CAIB. XVI.

1 *Féill na càisge, 9 nan seachduin, 13 nam pàillium.*
16 *Na tabhartais a bheirear seachad.* 18 *Mu bhreitheamhnaibh agus mu cheartas.* 21 *Doir-eachan agus ìomhaighean air an toirmeasg.*

COIMHID mìos Abib, agus cumaidh tu a' chàisg do'n Tighearna do Dhia: oir sa' mhios Abib thug an Tighearna do Dhia thu mach as an Eiphit san oidhche.

2 Uime sin iobraidh tu a' chàisg do'n Tighearna do Dhia, do'n treud agus do'n bhuair, san ionad a thaghas an Tighearna clumr 'ainm a chur an sin.

3 Cha'n ith thu aran goirtichte² sam bith leatha: seachd làithean ithidh tu aran neo-ghoirtichte leatha, *eadhon* aran àmhghair; (oir le cabhaig thàinig thu mach á tìr na h-Eiphit;) a chum gu cuimhnich thu 'n là air an d'thàinig thu mach á tìr na h-Eiphit, uile làithean do bheatha.

4 Agus clia'n fhaicear agad *aran* goirtichte a' d' chrìochaibh uile rè sheachd làithean: ni mò a mhaireas a *bheag* do'n fheoil a dh'ìobras tu air feasgar sa' cheud là, rè na h-oidhche gu maduinn.

5 Cha 'n fheud thu a' chàisg iobradh an taobh a stigh aoin air bith do d' gheataibh, a bheir an Tighearna do Dhia dhuit:

6 Acl aig an àit a thaghas an Tighearna do Dhia a chur 'ainme ann, an sin iobraidh tu a' chàisg air feasgar, aig dol fuidhe na gréine, san àm an d'thàinig thu mach as an Eiphit.

7 Agus roistidh agus ithidh tu *i* san àit a thaghas an Tighearna do Dhia: agus pillidh tu sa' mhaduinn, agus théid thu do d' bhùthaibh.

8 Sè làithean ithidh tu *aran* gun ghoirt-eachadh; agus air an t-seachdamh là *bithidh* àrd chomhchrinneach do'n Tighearna do Dhia: cha dean thu obair sam bith *air*.

9 Seachd seachduinean àirmhidh tu dhuit féin: o'n àm san tòisich thu air a' chorrann *a chur* san arbhar, tòisichidh tu air na

seachd seachduinean àireamh.

10 Agus cumaidh tu féill³ nan seachduin do'n Tighearna do Dhia, le tiodhlac saorthoil tabhartais do làimhe a bheir thu *seachad* a réir mar a bheannaich an Tighearna do Dhia thu.

11 Agus ni thu gairdeachas an làthair an Tighearna do Dhé, thu féin, agus do mhac, agus do nighean, agus t'òglach, agus do bhanoglach, agus an Lebbitheach a *tha* 'n taobh a stigh do d' gheataibh, agus an coigreach, agus an dilleachdan, agus a' bhantrach, a *tha* 'nur measg, san ionad a thaghas an Tighearna do Dhia a chur 'ainme ann.

12 Agus cuimhnichidh tu gu'n robh thu féin a' d' thràill san Eiphit: agus coimhididh tu, agus ni thu na reachdan so.

13 Cumaidh tu féill⁴ nam pàillium seachd làithean an déigh dhuit t'arbhar a chruinneachadh a stigh, agus t'fhòn.

14 Agus ni thu gairdeachas a' d' fhéill, thu féin, agus do mhac, agus do nighean, agus t'òglach, agus do bhanoglach, agus an Lebbitheach, agus an coigreach, agus an dilleachdan, agus a' bhantrach, a *tha* 'n taobh a stigh do d' gheataibh.

15 Seachd làithean cumaidh tu féill àraidh⁵ do'n Tighearna do Dhia, san ionad a thaghas an Tighearn: a chionn gu'm beannaich an Tighearna do Dhia thu a' d' chinneas uile, agus ann an oibribh do làmh uile; uime sin ni thu gu deimhin gairdeachas.

16 Tri uairean sa' bhliadhna taisbeinear⁶ t'fhirionnach uile an làthair an Tighearna do Dhé, san ionad a thaghas e; ann am féill an arain neo-ghoirtichte, agus ann am féill nan seachduin, agus ann am féill nam pàillium: agus cha taisbeinear iad an làthair an Tighearna falamh.

17 *Bheir* gach duine *seachad* mar is urrainn e, a réir beannachaidh an Tighearna do Dhé, a thug e dhuit.

18 Breitheamhnan, agus uachdarain ni thu dhuit féin, an taobh a stigh do d' gheataibh uile, a bheir an Tighearna do Dhia dhuit, air feadh do threubh: agus bheir iad breth air an t-sluagh le ceart bhreitheanas.

19 Cha dean thu breitheanas fhiaradh; cha bhi bàigh agad ri neach seach a chèile, ni mò a ghabhas tu tiodhlac⁷: oir dallaidh antiodhlac suile nan daoine glic, agus fiaraidh⁸ e briathra nan ionracan.

20 An ni sin a ta uile-cheart leanaidh tu, a chum gu'm bi thu beò, agus gu'n sealbhaidh thu 'm fearann a *tha* an Tighearna do Dhia a' tabhairt dhuit.

21 Cha suidhich thu dhuit féin doire⁹ chraobhan sam bith làimh ri altair an Tighearna do Dhé, a ni thu dhuit féin.

¹ bhòtha, mhairt. ² làbhainte. ³ féisd, cuirm. ⁴ féisd. ⁵ àrd, slonruichte.

⁶ nochdar. ⁷ gihlt. ⁸ truaillidh. ⁹ bad.

22 Ni mò a chuireas tu suas dhuit féin dealbh¹ *sam bith*, ni a's fuathach leis an Tighearna do Dhia.

CAIB. XVII.

1 *Feumaidh gach ni a dh'obrar a bhi fallain.*
2 *Cuirear luchd iodhol-aoraidh gu bàs.* 14 *Taghadh agus dèanadas ri gh.*

CHA 'n iobair thu do'n Tighearna do Dhia tarbh, no caora, anns am bheil gaoid, no mi-nhaise sam bith: oir is gràine-eileachd sin do'n Tighearna do Dhia.

2 Ma gheibhear 'nur measg, an taobh a stigh aon do d' gheataibh a bheir an Tighearna do Dhia dhuit, fear no bean a rinn aingidheachd ann an sùilbhan an Tighearna do Dhé, le 'choimhcheangal a bhriseadh,

3 Agus gu'n deachaidh e agus gu'n d' rinn e seirbhis do dhiathaibh eile, agus gu'n d' rinn e aoradh dhoibh, aon chuid do'n gliréin, no do'n ghealaich, no do uile armaill nèimh², nach d' àithn mise;

4 Agus gu'n d' innseadh dhuit e, agus gu'n cuala tu e, agus gu'n do ramsaich thu gu maith, agus, feuch, *gur fìor e, agus gu bheil a' chùis deirbhte, gu'n do rinneadh a' ghràine-eileachd sin ann an Israel;*

5 An sin bheir thu mach am fear sin no a' bhean sin, a rinn an ni aingidh sin, chum do gheatachan, *eadhon* am fear sin no a' bhean sin, agus clachaidh tu iad le clach-aibh gus am bàsaich iad.

6 Aig beul dà fhianuis, no thri fhianuis-ean, cuirear gu bàs esan a tha toillteanach air bàs: cha chuirear gu bàs e aig beul aon fhianuis.

7 Bithidh làmhnan nam fianuisean air an toiseach, g'a chur gu bàs; agus 'na dhéigh sin, làmhnan an t-sluaigh uile: mar sin cuiridh tu 'n t-olc air falbh o bhur measg.

8 Ma dh'éireas cùis a bhios ro chruaidh ort anu am breitheanas, eadar fuil agus fuil, eadar breth³ agus breth, agus eadar buille agus buille, *eadhon* cùisean conspoid an taobh a stigh do d' gheataibh; an sin éiridh tu, agus théid thu suas do'n ionad a thaghas an Tighearna do Dhia:

9 Agus thig thu chum nan sagart nan Lebhith-each, agus a chum a' bhreitheimh a bhios anns na làithibh sin, agus fiosraichidh tu; agus nochdaidh iad dhuit focal⁴ a' bhreitheanas:

10 Agus ni thu a réir na breithe a nochdas muinntir an àite sin (a thaghas an Tighearna) dhuit, agus bheir thu 'n aire gu'n dean thu a réir gach ni a theagaisgeas iad duit:

11 A réir breth an lagha a theagaisgeas iad duit, agus a réir a' bhreitheanas a

dh'innseas iad duit, ni thu: cha clàlon thu o'n bhreth a nochdas iad duit, a chum na làimhe deise no na làimhe clìthe.

12 Agus an duine a ni⁵ gu li-anndàna⁶, agus nach éisd ris an t-sagart, a sheasas gu frithealadh an sin an làthair an Tighearna do Dhé, no ris a' bhreitheamh, bàsaichidh eadhon an duine sin, agus cuiridh tu 'n t-olc air falbh o Israel.

13 Agus cluinidh an sluagh uile, agus bithidh eagal orra, agus cha dean iad gu h-anndàna ni's mò.

14 'Nuair a thig thu chum an fhearainn a bheir an Tighearna do Dhia dhuit, agus a shealbhaicheas tu e, agus a ghabhas tu còmhnuidh ann, agus a their thu, Cuiridh nù righ os mo cheann, mar na cinnich uile a *ta* mn' n cuairt orm:

15 Cuiridh tu, air gach aon chor, esan 'na righ os do cheann a thaghas an Tighearna do Dhia; *aon* o mheasg do bhràithre cuiridh tu 'na righ os do cheann: cha 'n fheud thu coigreach a chur os do cheann, nach 'eil 'na blràthair dhuit.

16 Ach cha chuir e eich an lìonmhoireachd dha féin, ni mo a bheir e air an t-sluaigh pilltinn do'n Eiphit, a chum gu'n cuir e eich an lìonmhoireachd: do bhrìgh gu'n dubhairt an Tighearna so ribh, Cha phill sibh á so a mach ni's mò air an t-slighe sin.

17 Ni mò a chuireas e mnàin an lìonmhoireachd dha féin, a chum nach clàon a chridhe air falbh; ni mò a mheudaicheas e gu mòr dha féin airgid agus òr.

18 Agus an uair a shuidheas e air rìgh-chaitir a rioghachd, an sin ath-sgrìobhaidh e dha féin an lagh so⁷ ann an leabhar, as an *leabhar sin a tha* 'n làthair nan sagart nan Lebhith-each.

19 Agus bithidh e aige, agus leughaidh e ann uile làithean a bheatha: chum gu fòghlum e eagal an Tighearna a Dhé a bhi air, uile bhriathran an lagha so a ghleiddheadh, agus na reachdan so, chum an deanamh:

20 A chum nach bi 'chridhe air a thogail suas os ceann a bhràithrean, agus nach clàon e o'n àithne chum na làimhe deise no na làimhe clìthe; air chor as gu'm buanaich e a làithean 'na rioghachd, e féin agus a chlann am meadhon Israel.

CAIB. XVIII.

1 *Is e 'n Tighearn oighreachd nan sagart agus nan Lebhith-each.* 15 *Éisdear ris an Fhàidh cosmhuil ri Maois, a bha Dia gus a thogail suas 'nam measg.*

CHA bli aig na sagartaibh na Lebhith-each, *eadhon* uile thrèibh Lebhi, roinn sam bith no oighreachd maille ri h-Israel:

¹ iomhaigh, coslas. ² do h-aon do shlògh nèimh. ³ tagartas, cùis-lagha. ⁴ binn.

⁵ ghiulaineas e féin. ⁶ dalma. ⁷ sgrìobhaidh e dha féin dublachadh an lagha so.

ithidh iad tabhartais an Tighearn a bheir ear suas le teine, agus 'oighreachd-san.

2 Uime sin cha bhi oighreachd sam bith aca am measg am bràithrean: is e'n Tighearna féin an oighreachd, mar a thubhairt e riu.

3 Agus is e so dlìghe nan sagart o'n t-sluagh, uatha-san a dh'ìobras lobairt, ma's tarbh no caora e; agus bheir iad do'n t-sagart an slinnean, agus na gialan, agus a' mhaodal.

4 Mar an ceudna ceud thoradh t'arbhair, t'fhiona, agus t'olaidh, agus ceud lomradh do chaorach bheir thu dha:

5 Oir thagh an Tighearna do Dhia e mach as do threubhaibh uile, gu seasamh chum frithealaidh ann an ainm an Tighearn, e féin agus a mhic gu bràth.

6 Agus ma thig Lebhitheach o h-aon do d' gheataibh a mach á h-Israel uile, far am bheil e air chuairt, agus ma thig e le uile thogradh 'inntinn do'n ionad a thaghas an Tighearn;

7 An sin frithéilidh e ann an ainm an Tighearna a Dhé, mar a bhràithrean uile na Lebhitich, a tha 'nan seasamh an sin an làthair an Tighearn.

8 Bithidh ac' uiread ri chéile r'a itheadh, a bhàrr air na thig air o reiceadh a chuid duine-cloinne.

9 'Nuair a thig thu do'n fhearann a tha 'n Tighearna do Dhia a' tabhairt duit, cha 'n fhòghlum thu dheanamh a réir gràineil-eachd nan cinneach sin.

10 Cha'n fhaighear 'nur measg *neach air bith* a bheir air a mhaic, no air a nighinn dol troimh 'n teine, no a ghnàthaicheas fiosachd, no speuradair², no fear-fàistineachd, no a ghnàthaicheas droch innleachdan³.

11 No seunadair⁴, no neach a dh'fhiosraicheas do leannan-sith⁵, no druith, no neach a dh'iarras eòlas o na mairbh.

12 Oir is gràineileachd do'n Tighearn iadsan uile a ni na nithe sin; agus air son nan gràineileachd sin, tha'n Tighearna do Dhia 'gam fuadachadh a mach roimhad.

13 Bithidh tusa coimhlionta maille ris an Tighearna do Dhia.

14 Oir dh'éisd na cinnich sin a shealbh-aicheas tusa ri speuradairean, agus ri fiosaichibh: ach air do shonsa, cha do leig an Tighearna do Dhia leat mar sin a dheanamh.

15 Togaidh an Tighearna do Dhia suas fàidh dhuith o d' mheadhon féin, o d' bhràithribh, cosmhuil riumsa; ris-san éisdidh sibh;

16 A réir nan uile nithe a dh'iarr thu o'n Tighearna do Dhia ann an Horeb, ann an là a' chomhechruinnich, ag ràdh, Na

cluinneam-sa ris guth an Tighearna mo Dhé, agus na faiceam an teine mòr so ni's mò, a chum nach bàsaich mi.

17 Agus thubhairt an Tighearna riumsa, Is maith a labhair iad an nì a labhair iad.

18 Togaidh mise suas fàidh dhoibh o mheasg am bràithre, cosmhuil riutsa, agus cuiridh mi mo bhriathra 'na bheul, agus labhraidh e riu gach ni a dh'àithneas mi dha.

19 Agus tarlaidh, an duine nach éisd ri m' bhriathraibh-se a labhras e a'm' ainm, iarraidh mi uaithe e:

20 Ach am fàidh aig am bi dhànadas focal a labhairt a'm' ainm, nach d'àithm mise dha a labhairt, no a labhras ann an ainm dhiathan eile, gu cinnteach bàsaichidh am fàidh sin.

21 Agus ma their thu ann ad chridhe, Cionnus a dh'àithnìcheas sinn am focal nach do labhair an Tighearn?

22 'Nuair a labhras fàidh ann an ainm an Tighearna, mur tachair an nì, agus mur tig e gu crìch, is e sin an nì nach do labhair an Tighearna; gu h-anndana labhair am fàidh e: cha bhi eagal ort roimhe.

CAIB. XIX.

1 Na baillean dèidein. 16 Peanas fànais bhrèige.

'NUAIR a ghearras an Tighearna do Dhia as na cinnich, aig an robh am fearann a tha 'n Tighearna do Dhia a' tabhairt duit, agus a thig thu 'nan àit, agus a ghabhas tu còmhnuidh 'nam bailtibh⁶, agus 'nan tighibh:

2 Cuiridh tu air leth dhuith féin tri bailtean am meadhon t'fhearainn, a bheir an Tighearna do Dhia dhuith r'a shealbhachadh.

3 Deasaichidh tu dhuith féin slighe, agus roinnidh tu crìoch t'fhearainn a bheir an Tighearna do Dhia dhuith r'a shealbhachadh, 'nan tri earrannaibh, a chum gu feud gach marbhaiche teicheadh an sin.

4 Agus is e so còr⁸ a' mharbhaiche, a theicheas an sin, a chum gu'm bi e beò: Ge b'e a mharbhas a choimhearsnach gun fhios da, do nach robh fuath aige roimhe⁹:

5 Mar a ta 'nuair a théid duine maille r'a choimhearsnach do'n choille a ghearradh fiodha, agus a bheir a làmh buille leis an tuaidh a ghearradh sìos na craoibhe, agus a leumas an ceann bhàrr na coise¹⁰, agus a thuiteas e air a choimhearsnach, air chor as gu'm bàsaich e; teichidh e chum aoin do na bailtibh sin, agus bithidh e beò:

6 Air eagal gu'n lean dioghaltair na fola am marbhaiche, am feadh 's a ta 'chridhe teth, agus gu'm beir e air, a chionn gu

¹ rùsgadh. ² mheasas aimsire nì's amhartan-
aiche na chéile. ³ buitseachas. ⁴ charmer. Sasg.

⁵ spiorad fiosachd. ⁶ cathraichibh. ⁷ iomall. ⁸ cùis.
⁹ an dé no air a' bhò n' dé. Eabh. ¹⁰ samhacha

bheil an t-slighe fada, agus gu marbh se e, ged nach robh e toillteanach air bàs, do bhrìgh nach robh fuath aige dha san àm a chaidh seachad.

7 Uime sin tha mi ag àithneadh dhuit, ag ràdh, Cuiridh tu air leth dhuit fèin tri bailtean.

8 Agus ma leudaicheas an Tighearna do Dhia do chrìoch, mar a mhionnaich e do t'aithrichibh, agus ma bheir e dhuit am fearann uile a gheall e thoirt do t'aithrichibh;

9 Ma bheir thu an aire na h-àitheantan sin uile a dheanamh, a tha mise ag àithneadh dhuit an diugh, an Tighearna do Dhia a ghràdhachadh, agus ghiasad a ghnàth 'na shlighibh; an sin cuiridh tu air leth dhuit fèin tri bailtean eile a thuilleadh air an tri sin;

10 A chum nach dòirtear fuil neo-chiontach a'd' fhearann, a bheir an Tighearna do Dhia dhuit mar oighreachd, agus nach bi mar sin fuil ort.

11 Ach ma tha aig duine sam bith fuath d'a choimhearsnach, agus gu'n luidh e 'm plaid air a shon¹, agus gu'n éirich e suas 'na aghaidh, agus gu'm buail e gu marbhtach e, air chor as gu'm faigh e bàs, agus gu'n teich e gu h-aon do na bailtibh sin;

12 An sin cuiridh seanairean a bhaile fèin *fios* uatha, agus bheir iad as a sin e, agus bheir iad thairis e do làimh dògh-altair na fola, a chum gu'm bàsaich e.

13 Cha ghabh do shùil truas ris: ach cuiridh tu air falbh *cionta* fola neo-chiontaich o Israèl, a chum gu'n éirich gu maith dhuit.

14 Cha'n atharraich thu crìoch *fearainn* do choimhearsnaich, a shuidhich na sinnsir a't' oighreachd a shealbhaicheas tu, anns an fhearann a bheir an Tighearna do Dhia dhuit r'a shealbhadh.

15 Cha 'n éirich aon fhianuis a *mhàin* suas an aghaidh duine air son eucorach sam bith, no air son peacaidh sam bith, ann am peacadh sam bith a pheacaicheas e: aig beul dà fhianuis, no aig beul thri fhianuisean daingnichear a' chùis.

16 Ma dh'éreas fianuis bhréige suas an aghaidh duine sam bith, a thoirt fianuis 'na aghaidh air an euceirt;

17 An siut seasaidh an dithis dhaoine aig am bheil an consachadh, am fianuis an Tighearn, an làthair nan sagart, agus nam breitheamhna a bhios anns na làithibh sin;

18 Agus ni na breitheamhna rannsachadh geur: agus, feuch, *ma's* fianuis bhréige an fhianuis, agus gu'n d'thug e fianuis bhréige an aghaidh a bhràthar,

19 An sin ui sibh ris, mar a shaoil esan

a dheanamh r'a bhràthair: mar sin cuiridh tu air falbh an t-olc as bhur measg.

20 Agus cluinidh iadsan a mhaireas agus bitluidh eagal orra, agus cha dean iad o sin a mach a shamhuil so do olc, 'nur measg.

21 Agus cha ghabh do shùil truas; *ach theid* anam air son anama, sùil air son sùla, fiacail air son fiacla, làmh air son làimhe, cos air son coise.

CAIB. XX.

1 Brosnachadh catha an t-sagairt do'n t-sluagh.

12 Mar a bhuinear ris na bailtibh a ghabhas no dhùiltas tairgsean sìthe. 16 Na baillean a bha gu bhli air an sgrios.

NUAIR a théid thu mach gu cath² an aghaidh do naimhdean, agus a cli thu eich agus carbaid, agus sluagh a's lionmhoire na thu fèin, na biodh eagal ort rompa: oir tha 'n Tighearna do Dhia maille riut, a thug a mach thu á tìr na h-Eiphit.

2 Agus an uair a dhlùthaicheas sibh ris a' chath, an sin thig an sagart am fagus, agus labhraidh e ris an t-sluagh,

3 Agus their e riu, Eisd, O Israeil, tha sibh an diugh a' dol gu cath an aghaidh bhur naimhdean: na biodh bhur cridhe fann, na biodh eagal oirbh, agus na crìoth-naichibh, agus na biodh uamhann oirbh air an son;

4 Oir tha 'n Tighearna bhur Dia a' dol maille ribh, a chogadh air bhur son an aghaidh bhur naimhdean, a chum bhur tearnadh.

5 Agus labhraidh an luchd-riaghlaidh ris an t-sluagh, ag ràdh, Cia am fear a thog tigh nomha³, agus nach do choisrig e? rachadh e agus pilleadh e chum a thighe, air eagal gu'm bàsaich e sa' chath, agus gu'n coisrig fear eile e.

6 Agus cia an duine a shuidhich fionlios, agus nach d'ith *fathast* dheth? rachadh esan mar an *ceudna*, agus pilleadh e g'a thigh, air eagal gu'm bàsaich e sa' chath, agus gu'n ith neach eile dheth.

7 Agus cia an duine a rinn ceangal-pòsaidh ri mnaoi, agus nach do ghabh *d'a ionnsuidh* i? rachadh e agus pilleadh e d'a thigh, air eagal gu'm bàsaich e sa' chath, agus gu'n gabh neach eile i *d'a ionnsuidh*.

8 Agus labhraidh an luchd-riaghlaidh, a bhàrr air sin, ris an t-sluagh, agus their iad, Cia an duine a ta gealtach, agus lag-chridheach? rachadh e agus pilleadh e d'a thigh, a chum nach dean e cridlie a bhràithre lag mar a chridhe fèin.

9 Agus tarlaidh, 'nuair a chuireas an luchd-riaghlaidh crìoch air labhairt ris an t-sluagh, gu'n cuir iad ceannardan air na

¹ gu'n caith e feoll air.

² cogadh.

³ nuadh.

h-armailtibh gus an sluagh a thoirt air an aghaidh¹.

10 'Nuair a thig thu 'm fagus do bhaile² gu cogadh 'na aghaidh, an sin gairmidh tu sith dha.

11 Agus tarlaidh, ma bheir e freagradh na sìthe dhuit, agus ma dh'fhosgla e dhuit, an sin tarlaidh, gu'm bi 'n sluagh uile a gheibhear ann fuidh chis dhuit, agus gu'n dean iad seirbhis dhuit.

12 Agus mur dean e sìth riut, ach gu'n cog e riut, an sin cuiridh tu gu cruaidh 'na aghaidh³.

13 Agus an uair a bheir an Tighearna do Dhia thairis do d' làimh e, buailidh tu gach firionnach ann le faobhar a' chlaidh-eimh:

14 Ach na mnà, agus a' chlann bheag, agus an spréidh, agus na h-uile nithe a tha sa' bhaile, eadhon a chreach uile, gabhaidh tu dhuit féin; agus ithidh tu creach do naimhdean, a thug an Tighearna do Dhia dhuit.

15 Mar so ni thu ris na bailtibh sin uile a tha ro fhada uait, nach 'eil do bhailtibh nan cinneach sin.

16 Ach do bhailtibh an t-sluaigh sin a tha 'n Tighearna do Dhia a' toirt duit mar oighreachd, cha ghléidh thu ni sam bith beò anns am bheil anail:

17 Ach sgriosaidh tu gu tur iad, eadhon na Hitich, agus na h-Amoraich, na Canaanaich, agus na Peridsich, na Hibhich, agus na Iebusaich, a réir mar a dh'áithn an Tighearna do Dhia dhuit:

18 A chum nach teagaisg iad duit a dheanamh a réir an uile ghràineileachd, a rinn iad d'an diathaibh; mar sin pheac-aicheadh sibh an aghaidh an Tighearna bhur Dé.

19 'Nuair a chuireas tu gu cruaidh an aghaidh⁴ baile rè ùine fhada, a' deanamh cogaidh 'na aghaidh chum a ghlacadh, cha chuir thu as d'a chraobhaibh le tuadh a bhualadh orra: oir feudaidh tu itheadh dhiubh, agus cha ghearr thu sìos iad, (oir is i craobh na macharach beatha duine) chum an gnàthachadh ann an cur an aghaidh a' bhaile.

20 A mhàin na craobhan a's aithne dhuit féin nach craobhan bìdh iad, sgriosaidh agus gearraidh tu sìos iad; agus togaidh tu daingnichean⁵ an aghaidh a' bhaile a chogas riut, gus an ceannsaich thu e⁶.

CAIB. XXI.

1 Mu mhortadh duine sa' mhachair, gun fhios co mharbh e. 10 O mheasg nam braidhdean dh'fheadadh fear bean a ghabhail dha féin.

15 Còir a' cheud-ghlin mhic. 18 Am mac reasgach gu bhli air a chlachadh gu bàs.

MA gheibhear neach air a mharbhadh san fhearann a bheir an Tighearna do Dhia dhuit r'a shealbhadh, 'na luidhe sa mhachair, agus gun fhios co mharbh e;

2 An sin thig do sheanairean agus do bhreitheamhan a mach, agus tomhaisidh iad a chum nam bailtean a tha mu'n cuairt aisans a mharbhadh:

3 Agus tarlaidh gu'n gabh am baile a's faigse do'n duine a mharbhadh, eadhon seanairean a' bhaile sin agh leis nach d'rinneadh obair, nach do tharruing riamh ann an cuing;

4 Agus bheir seanairean a' bhaile sin an t-agh sìos do ghleann garbh, nach do threabhadh agus nach do shìol-chuir-eadh, agus gearraidh iad an sin ambach⁷ an aighe dheth sa' ghleann;

5 Agus thig na sagairt mic Lebhi am fagus; (oir iadsan thagh an Tighearna do Dhia gu frithealadh dha féin, agus gu beannachadh ann an aium an Tighearna;) agus a réir am focail-san crìoch-naichear⁸ gach uile chonnsachadh, agus gach uile bhuille.

6 Agus nighidh uile sheanairean a' bhaile sin a's faigse do'n duine a mharbhadh, an làmhan os ceann an aighe d'an do ghearradh an amhach sa' ghleann;

7 Agus freagraidh iad agus their iad, Cha do dhòirt ar làmhan an fhuil so, ni mò a chunnaic ar sùilean i.

8 Bi tròcaireach, O Thighearna, do d' shluagh Israel, a shaor thu, agus na cuir fuil neò-chiontach á leth do shluaigh Israeil. Agus maithear an fhuil dhoibh.

9 Mar sin cuiridh tu air falbh cionta na fola neò-chiontaich o bhur measg, do bhrìgh gu'n dean thu an ni a ta ceart ann an suilbhe an Tighearna.

10 'Nuair a thèid thu mach gu cogadh an aghaidh do naimhdean, agus gu'n toir an Tighearna do Dhia thairis iad do d' làimh, agus gu'n dean thu braidhdean dhiubh,

11 Agus gu'm faic thu am measg nam braidhdean bean sgiamhach, agus gu bheil déigh agad oirre. agus gu'm bu mhaith leat agad i 'na mnaoi;

12 An sin bheir thu dhachaidh i do d' thigh, agus bearraidh i a ceann, agus bheir i dhith a h-inean;

13 Agus cuiridh i dlith a h-eudach braidhdeanais, agus fanaidh i a'd' thigh, agus ni i caoidh⁹ air son a h-athar agus a màthar mìos iomlan: agus an déigh sin

¹ gu'n àireamh ceannardan nan armailtean an sluagh fa leth. ² chathair.

³ cuiridh tu sèisde ris, dubhaidh is teannaidh tu e.

⁴ sèisde ri.

⁶ gus an glacar e.

⁸ bìthidh. Eabh.

⁵ dùin-chatha.

⁷ muineal.

⁹ caoinidh i.

théid thu steach d'a h-ionnsuidh, agus bithidh tu a't' fhear-pòda¹ aice, agus bithidh ise 'na mnaoi agad.

14 Ach mur bi tlachd agad innte, an sin leigidh tu leatha dol far an àill leatha, ach cha reic thu idir air airgiod i, ni mò a ni thu ain-tighearnas oirre², a chionn gu'n d'islich thu i.

15 Ma bhios aig duine dà mhnai, aon diubh gràdhach agus an aon eile fuathach, agus ma rug iad clann da, *araon* a' bhean gràdhach agus a' bhean fhuathach; agus ma's leis a' mhnai fhuathach e an ceud-ghin mic,

16 An sin tarlaidh, 'nuair a bheir e sealbh d'a mhic air *an nì* a ta aige, nach fheud e ceud-ghin a dheanamh do mhac na *mnà* gràdhach roimh mhac na *mnà* fuathach, *a's e da rìreadh* an ceud-ghin:

17 Ach gabhaidh e ri³ mac na *mnà* fuathach mar an ceud-ghin, le roinn dhùbailte a thoirt da do gach nì a ta aige; oir *is* esan toiseach a neirt, *is* leis còir a' cheud-ghin.

18 Ma bhios aig duine mac reasgach⁴ agus ceannairceach, nach géill do ghuth 'athar, no do ghuth a mhàthar, agus an uair a smachdaicheas iad e, nach éisd ri u:

19 An sin beiridh 'athair agus a mhàthair air, agus bheir iad a mach e gu sean-àirean a bhaile, agus gu geata 'àite féin;

20 Agus their iad ri seanairibh a bhaile, *Tha* ar mac so reasgach agus ceannairceach, cha toir e géill d'ar guth; *tha e* 'na gheòcair agus 'na mhisgeir.

21 Agus clachaidh uile dhaoine a bhaile e le clachaibh, a chum gu'm bàsaich e: mar sin cuiridh tu ole air falbh as blur measg, agus cluinnidh Israel uile, agus bithidh eagal orra.

22 Agus ma rinn duine peacadh a tha toillteanach air bàs, agus gu'm bi e r'a chur gu bàs, agus gu'n croch thu ri craoibh e:

23 Cha 'n fhan a chorp rè na h-oidheche air a' chraoibh, ach air gach aon chor adlaididh tu e air an là sin féin; (oir mallaichte le Dia *tha* esan a chrochadh: agus cha salaich thu t'fhearann, a *tha* 'n Tighearna do Dhia a' toirt duit mar oigh-reachd.

CAIB. XXII.

Mu chaoimhneas a nochdadh do bhràithribh, agus mu riaghailteibh àraidh eile.

NUAIR a chi thu damh do bhràthar, no a chaora dol air seacharan, cha'n fholaich thu thu féin uatha; bheir thu air gach aon chor air an ais iad a ris a

dh'ionnsuidh do bhràthar.

2 Agus mur bi do bhràthair làimh riut, no mur aithne dhuit e, an sin bheir thu e dh'ionnsuidh do thighe féin, agus bithidh e maille riut gus an iarr do bhràthair e, agus bheir thu air ais dha e.

3 Air a' mhodh cheudna ni thu r'a asal, agus mar so ni thu r'a eudach, agus mar so ni thu ris na h-uile nithibh caillte le d' bhràthair, a chaill e, agus a fhuair thusa: cha 'n fheud thu thu féin fholaich.

4 'Nuair a chi thu asal do bhràthar, no a dhamh a' tuiteam sìos air an t-slighe, cha'n fholaich thu thu féin uatha: gu cinnteach togaidh tu suas *iad* maille ris a ris.

5 Cha chaith bean an nì sin a's le fear, ni mò a chuireas fear uime eudach mnà: oir *is* gràineileachd do'n Tighearna do Dhia iadsan uile a ni so.

6 Ma tharlas do nead eoin a bli romhad san t-slighe ann an craoibh sam bith, no air làr, *ma's* eoin òga *iad*, no uibhean, agus a' mhàthair 'na suidhe air an àlach⁵, no air na h-uibhean, cha ghlac thu a' mhàthair maille ris an àlach:

7 Air gach aon chor leigidh tu leis a' mhàthair dol as, agus an t-àlach gabhaidh tu dhuit féin; a chum gu'n éirich gu maith dhuit, agus gu'm buanaich thu do làitlean.

8 'Nuair a thogas tu tigh nomha, an sin togaidh tu barr-bhalla d'a mhullach, a chum nach toir thu fuil air do thigh, ma thuiteas duine sam bith o sin.

9 Cha chuir thu t'fhion-lios le h-ìomadh guè *sìl*, air eagal gu'n truaillear toradh do shìl a chuir thu, agus meas t'fhion-lios.

10 Cha dean thu ar⁶ le damh agus le h-asal maille ri chèile.

11 Cha chuir thu umad eudach measgta, *mar* do olainn agus do lìon le chèile.

12 Ni thu dhuit féin fàbhran⁷ air ceithir cheithreanaibh t'eudaich leis an còmh-daich thu *féin*.

13 Ma ghabhas duine bean, agus gu'n téid e steach d'a h-ionnsuidh, agus gu'm fuathaich e i,

14 Agus gu'n toir e aobhar cainnte 'na h-aghaidh, agus gu'n tog e suas droch ainm oirre, agus gu'n abair e, Ghabh mi a' bhean so, agus an uair a thàinig mi d'a h-ionnsuidh, cha d'fhuair mi 'na maighdinn i:

15 An sin gabhaidh athair na h-ighinn⁸, agus a màthair, agus bheir iad a mach *comharan* maighdeanaibh na h-ighinn gu seanairibh a' bhaile anns a' gheata:

16 Agus their athair na h-ighinn ris na seanairibh, Thug mi mo nighean do'n

¹ 'na t'fhear-pòda.

² marsantachd dhith.

³ a' dh'ionnsuidh e gur e.

⁴ easimhal

⁵ na h-eunaibh òga, tseanaibh.

⁶ treabhadh.

⁷ faimean, oirean. ⁸ na nighinn; na h-inghin. Eir.

duine so 'na mnaoi, agus tha fuath aige dh'i;

17 Agus, feuch, thug e aobhar cainnte 'na h-aghaidh, ag ràdh, Cha d'fhuair mi do nighean 'na maighdinn; agus gidheadh is iad sin *comharan* maighdeanaich mo nighinn: agus sgaoilidh iad an t-eudach an làthair sheanairean a' bhaile.

18 Agus gabhaidh seanairean a' bhaile sin an duine, agus smachdaichidh iad e:

19 Agus cuiridh iad ùmhla cheud *secel* airgid air, agus bheir iad do athair na h-ighinn iad, a chionn gu'n do thog e droch ainm air òigh do *chloinn* Israeil; agus bithidh i 'na mnaoi aige: cha 'n fheud e a cur uaith r'a bheò.

20 Ach ma tha an uis do fìor, *agus* nach 'eil *comharan* maighdeanaich r'am faghail do'n nighinn;

21 An sin bheir iad a mach an nighean gu dorus tighe a h-athar, agus clachaidh daoine a baile i le clachaibh gus am bàsaich i; a chionn gu'n d'òibrich i amaideachd ann an Israel, le strìop-achas a dheanamh ann an tigh a h-athar: mar sin cuiridh tu air falbh olc as bhur measg.

22 Ma gheibhear duine a' luidhe le mnaoi a tha pòda ri fear, an sin cuirear gu bàs iad le chèile, an duine a luidh leis a' mhnai, agus a' bhean; mar sin cuiridh tu olc air falbh o Israel.

23 Ma tha nighean *agus* i 'na h-òigh, fuidh cheangal-pòsaidh aig fear, agus gu'm faigh duine i sa' bhaile, agus gu'n luidh e leatha;

24 An sin bheir sibh a mach iad le chèile gu geata a' bhaile sin, agus clachaidh sibh iad le clachaibh gus am bàsaich iad; an nighean, a chionn nach do ghlaodh i, *agus* i *bhi* sa' bhaile; agus am fear a chionn gu'n d'islich e bean a choimhearsnaich: mar sin cuiridh tu air falbh olc as bhur measg.

25 Ach ma gheibh fear sa' mhachair nighean a tha fuidh cheangal-pòsaidh, agus gu'n éignich an duine i, agus gu'n luidh e leatha, an sin cuirear a mhàin an duine a luidh leatha gu bàs.

26 Ach air an nighinn cha dean thu bheag sam bith; cha 'n eil san nighinn coire bàis: oir mar an uair a dh'éireas duine snas an aghaidh a choimhearsnaich, agus a nharbhas se e, mar sin a ta chùis so:

27 Oir fhuair e sa' mhachair i, *agus* dh'éigh an nighean a bha fuidh cheangal-pòsaidh, agus cha robh neach ann g'a teasairginn.

28 Ma gheibh duine nighean a tha 'na h-òigh, nach 'eil fuidh cheangal-pòsaidh, agus gu'n dean e greim oirre, agus

gu'n luidh e leatha, agus gu'm faighear iad;

29 An sin bheir am fear a luidh leatha do athair na h-ighinn leth-cheud *secel* airgid, agus bithidh i 'na mnaoi aige; a chionn gu'n d'islich e i, cha 'n fheud e a cur uaith r'a bheò.

30 Cha ghabh duine d'a ionnsuidh bean 'athar, ni mò a leigeas e ris còmhdaich-adh 'athar.

CAIB. XXIII.

1 Cò dh'fheudadh *agus* nach feudadh dol a s'each do choimhthional an Tighearna. 9 Neòghloine sa' champ gu bhi air a seachnadh.

CHA téid esan aig am bheil a chlochan air am bruthadh¹, no 'bhall dìomhair a ghearradh dheth, a steach do chomhchruinneach an Tighearna.

2 Cha téid fear diolain a steach do chomhchruinneach an Tighearna; eadhon gu ruig an deicheamh ginealach cha téid e steach do chomhchruinneach an Tighearna.

3 Cha téid Amonach no Moabach a steach do chomhchruinneach an Tighearna; eadhon gus an deicheamh ginealach cha téid iad a steach do chomhchruinneach an Tighearna a chaoidh;

4 A chionn nach do choinnich iad sibh le h-aran agus le h-uisge air an t-slighe, nuair a thàinig sibh a mach as an Eiplit, agus a chionn gu'n do thuarasdalaich iad a d' aghaidh Balaam mac Bheoir, o Phetor na Mesopotamia, chum do mhallachadh.

5 Gidheadh, cha 'n éisdeadh an Tighearna do Dhia ri Balaam; ach thionndaidh an Tighearna do Dhia dhuit am mallachadh gu beannachadh, a chionn gu'm bu toigh leis an Tighearna do Dhia thu.

6 Cha 'n iarr thu an sìth, no an sonas rè t'uile làithean gu bràth.

7 Cha ghabh thu gràin do Edomach, oir is e do bhràthair e: cha ghabh thu gràin do Eiphiteach, a chionn gu'n robh thu a d' choigreach 'na fhearann.

8 Théid a' chlann a ghinear leo-san, a steach do chomhchruinneach an Tighearna, 'nan treas ginealach.

9 Nuair a théid t'fheadh² a mach an aghaidh do naimhdean, an sin gléidh thu fèin o gach droch ni.

10 Ma bhios 'nur measg duine sam bith nach 'eil glan, a thacbh neòghloine a tharlas da san oidhche, an sin théid e mach as a' champ, cha tig e steach do mheadhon a' chaimp:

11 Ach an uair a bhios e dlùth do'n fheasgar, an sin niglidh se e fèin le h-uisge, agus an uair a théid a ghrian

¹ air an lotadh.

² t'armailt, do champa.

fodha¹, thig e steach do mheadhon a' chainp.

12 Bithidh agad àite mar an ceudna an taobh a muigh do'n champ, far an téid thu mach.

13 Agus bithidh pleadhag² agad air do chrìos³, agus an uair a shuidheas tu a muigh, cladhaichidh tu leatha, agus tionndaidh tu air t'ais, agus folaichidh tu an nì a thig uait.

14 Oir tha 'n Tighearna do Dhia ag imeachd am meadhon do chainp, chum do shaoradh, agus a chum do naimhdean a thoirt thairis romhad: uime sin bithidh do champ naomha, chum nach faic e nì sam bith neòghlan annad, agus nach pill e air falbh uait.

15 Cha toir thu suas d'a mhaighstir an seirbhiseach a chaidh as⁴ a t' ionnsuidh o 'mhaighstir.

16 Maille riut gabhaidh e còmhnuidh 'nur measg, anns an àit a thaghas e, an taobh a stigh aoin do d' gheataibh far an taitnìche leis: cha dean thu foirneart air.

17 Cha bhi striopach air bith do nigh-eanaibh Israeil, nì mò bhios Sodomach do mhacaibh Israeil.

18 Cha toir thu tuarasdal striopaich, no luach coin, do thigh an Tighearna do Dhé air son bòid sam bith; oir tha iad sin eadhon le chèile 'nan gràineileachd do'n Tighearna do Dhia.

19 Cha toir thu nì sam bith an coingheall⁵ do d' bhràthair air riadh⁶; riadh airgid, riadh bidh, riadh nì sam bith a bheirear an coingheall air riadh.

20 Do choigreach feudaidh tu nì a thoirt an coingheall air riadh, ach do d' bhràthair cha toir thu nì sam bith an coingheall air riadh; a chum gu'm beannaich an Tighearna do Dhia thu anns gach uirìs an cuir thu do làmh, san fhearann d'am bheil thu dol g'a shealbhadh.

21 'Nuair a bheir thu bòid do'n Tighearna do Dhia, cha dean thu moille 'na h-ìocadh: oir gu cinnteach iarraidh an Tighearna do Dhia uait i; agus bhiodh e 'na pheacadh dhuit.

22 Ach ma dh'fhanas tu gun bhòid a thabhairt, cha bhi e 'na pheacadh dhuit⁷.

23 An nì sin a chaidh mach as do bhlìbh, coimhididh agus coimhlionaidh tu; a réir mar a bhòididh thu do'n Tighearna do Dhia, eadhon tabhartas saor-thoile, a gheall thu le d' bheul.

24 'Nuair a théid thu steach do fhìon-lìos do choimhearsnaich, an sin feudaidh tu fion-dhearcan itheadh mar is miann leat, eadhon do 'shàth; ach cha chuir thu bheag a d' shoitheach.

25 'Nuair a théid thu steach a dh'arbhar do choimhearsnaich, an sin feudaidh tu na diasan a spionadh le d' làimh; ach corran cha chuir thu ann an arbhar do choimhearsnaich.

CAIB. XXIV.

1 Mu litir-dhealaich do mnaoi-phòsda. 6, 10 Mu gheall. 7 Mu ghaduiche dhaoine. 8 Mu phlàigh na luibhre. 14 Tuarasdal seirbhiseich gu bhì air ìocadh sam là air am bì e dligeach. 17 Mu cheartas.

'N UAIR a ghabhas fear bean agus a phòsas e i, agus gu'n tachair nach faigh i deadh-ghean 'na shùilb, a chionn gu'n d'fhuair e neòghloine éigin innte; an sin sgriobhadh e litir-dhealaich⁸ dh'i, agus thugadh e 'na làimh i, agus cuireadh e mach as a thigh i.

2 Agus an uair a dh'fhalbhas i mach as a thigh, feudaidh i dol agus a bhì 'na mnaoi aig fear eile.

3 Agus ma dh'fhuathaicheas am fear-pòsda ma dheireadh so i, agus gu'n sgriobh e litir-dhealaich dh'i, agus gu'n toir e 'na làimh i, agus gu'n cuir e mach as a thigh i; no ma gheibh am fear ma dheireadh bàs, a ghabh i 'na mnaoi dha féin;

4 Cha 'n fheud a ceud fhear-pòsda a chuir uath i, a gabhail a ris gu bhì 'na mnaoi dha, an déigh dh'i bhì air a truailleadh; oir is gràineileachd sin an làthair an Tighearn: agus cha toir thu air an fhearann⁹ peacadhadh, a tha 'n Tighearna do Dhia a' toirt duit mar oighreachd.

5 'Nuair a ghabhas duine bean nuadh, cha téid e mach gu cogadh, nì mò a chuirear cùram gnothuich sam bith air: fanaidh e saor aig a thigh féin aon bhliadhna, agus bheir e subhachas d'a mnaoi a ghabh e.

6 Cha ghabh duine sam bith a' chlach-mhuilinn iochdarach no uachdarach mar gheall: oir tha e gabhail anama duine mar gheall.

7 Ma gheibhear duine a' goideadh aoin neach d'a bhràithribh do chloinn Israeil, agus ma nì e ain-tighearnas air¹⁰, no ma reiceas se e; an sin cuirear gu bàs an gaduiche sin; agus cuiridh tu olc air falbh as bhr meag.

8 Thoir an aire, ann am plàigh na luibhre, gu'n toir thu fa'near gu dùrachdach, agus gu'n dean thu a réir nan uile nìthe a theagaisgeas na sagartan na Lebhithich dhuibh: a réir mar a dh'àithn mi dhoibh, bheir sibh fa'near gu'u dean sibh.

9 Cuimhnich cìod a rinn an Tighearna do Dhia ri Miriam air an t-slighe, an

¹ fuidhe.

² air do bhall-airm.

³ iasachd.

⁴ suasaid.

⁵ theich.

⁶ ann-riadh, ocar.

⁷ annad. Eabh.

⁸ sluaigh an fhearainn.

leis.

⁹ litir-dhealachaidh.

¹⁰ ma nì e marsantachd

déigh dhuibh teachd a mach as an Eiphit.

10 'Nuair a bheir thu do d' choinhears-nach ni sam bith an coingheall, cha téid thu teachd d'a thigh a ghabhail a ghill.

11 A mach seasaidh tu, agus bheir an duine d'am bheil thu toirt an coingheall, an geall a mach dhuith.

12 Agus ma bhios duine bochd, cha choidil thu le 'gheall.

13 Air gach aon chor bheir thu air ais¹ dha 'n geall a ris, 'nuair a théid a' ghrian fodha, chum gu'n coidil e 'na eudach féin, agus gu'm beannaich e thu: agus bithidh so 'na ionracas dhuith an làthair an Tighearna do Dhé.

14 Cha dean thu foinneart air seirbhis-each tuarasdail a tha bochd agus uireas-bhuidheach, *co dhiubh a tha e* do d' bhràithribh, no do d' choigrich, *a tha ann* a t' fhearann an taobh a stigh do d' gheataibh.

15 Air a là bheir thu *dha* a thuasdal, agus cha téid a' ghrian sìos air, oir *tha e* bochd, agus a' suidheachadh a chridhe air; air eagal gu'n glaoth e a t' aghaidh ris an Tighearn, agus gu'm bi e 'na pheacadh dhuith.

16 Cha chuirear na h-aithriche gu bàs air son na cloinne, ni mò a chuirear a' chlann gu bàs air son nan aithriche: cuirear gach duine gu bàs air son a pheacadh féin.

17 Cha chlaon² thu breitheanas a' choigrich, no an dilleachdain, ni mò a ghabhas tu eudach bantraich mar gheall.

18 Ach cuimhnichidh tu gu'n robh thu féin a d' thràill an Eiphit, agus *gu'n do* shaor an Tighearna do Dhia thu as a sin: uime sin *tha mi ag* àithneadh dhuith an ni so a dheanamh.

19 'Nuair a bhuaineas tu³ t'fhoghar a d' achiadh, agus a dhichuimhnicheas tu sguab san achadh, cha phill thu g'a togail: air son a' choigrich, air son an dilleachdain, agus air son na bantraich bithidh i; a chum gu'm beannaich an Tighearna do Dhia thu ann an uile oibribh do làmh.

20 'Nuair a chrathas tu do chrann-oladh, cha téid thu thairis air na geugaibh a ris: air son a' choigrich, air son an dilleachdain, agus air son na bantraich bithidh e.

21 'Nuair a chruinnicheas tu fion-dhearcan t'fhion-lios, cha ghlan thu gu buileach a d' dhéigh e: air son a' choigrich, air son an dilleachdain, agus air son na bantraich bithidh e.

22 Agus cuimhnichidh tu gu'n robh thu a d' thràill⁴ ann an tìr na h-Eiphit: uime sin *tha mi ag* àithneadh dhuith an ni so a dheanamh.

1 *Mu smachdachadh a' chiontaich.* 4 *Cha chuirear ceanga! air beul an daimh an uair a tha e saltairt an arbhair.* 5 *Mushàol a thogail suas do bhràthair.* 11 *Mu'n mhaol gun nàire.* 13 *Mu chothromaibh ceart.* 17 *Mu léir-sgrìos Amaleic.*

MA bhios comnsachadh eadar dhaoine, agus gu'n tig iad gu breitheanas, a chum as gu'n toir na breitheamhna breth orra⁵; an sin saoraidh iad an t-ionracan, agus dithidh iad⁶ an ciontach.

2 Agus tarlaidh, ma 's airidh an duine aingidh bhi air a bhualadh, gu'n toir am breitheamh air luidhe sìos, agus a bhi air a bhualadh 'na làthair, a réir a choire, ann an àireamh àraidh *do bhuillibh*.

3 Dà fhichead buille bheir e dha: cha téid e thairis, air eagal nan rachaidh e thairis, agus gu'm buileadhl se e os an ceann sin le mòran bhuillibh, an sin gu'm biodh do bhràthair tàireil a d' shùilb.

4 Cha chuir thu ceangal air beul an daimh an uair a tha e saltairt⁷ an arbhair.

5 'Nuair a ghabhas bràithrean comh-nuidh maille ri chèile, agus gu'm faigh aon diubh bàs, agus gun duine cloinne aige, cha phòs bean a' mhairbh a mach ri coigreach: théid a bràthair-céile teachd d'a h-ionnsuidh, agus gabhaidh e dha féin i 'na mnaoi, agus ni e dlige⁸ bràthar-céile rithe⁹.

6 Agus éiridh an ceud-ghin mic a bheir-eas i, suas ann an ainm a bhràthar a ta marbh, a chum nach dubhar a mach 'ainm á h-Israel.

7 Agus mur toil leis an duine bean a bhràthar a ghabhail, an sin théid bean a bhràthar suas do'n gheata chum nan seanairean, agus their i, Tha mo bhràthair-céile a' diultadh ainm a thogail suas d'a bhràthair ann an Israel, cha 'n àill leis dlige bràthar-céile a dheanamh rium.

8 An sin gairmidh seanairean a' bhaile air, agus labhraidh iad ris: agus *ma* sheasas e *mach*, agus gu'n abair e, Cha 'n àill leam a gabhail;

9 An sin thig bean a bhràthar d'a ionnsuidh an làthair nan seanairean, agus fuasglaidh i a bhròg bharr a choise, agus tilgidh i smugaid¹⁰ na eudain, agus freagraidh agus their i, Mar so nìthear ris an duine nach tog suas tigh a bhràthar.

10 Agus goirear 'ainm ann an Israel, Tigh an fhir aig am bheil a bhròg fuasgailte.

11 'Nuair a bhios daoine ri comhstri cuideaclid, neach ri neach eile, agus gu'n tig bean aoin diubh am fagus a dh'fhuasgladh a fir-pòda á làimh an fhir a tha 'ga bhualadh, agus gu'n sìn i mach a làmh,

¹ *ais-iocaidh tu.*

² *Cha'n fhiar.*

⁵ *cattorra.*

⁶ *fagaidh iad shìos.*

⁷ *bualadh.*

³ *ghearras tu sìos.*

⁴ *a d' dhuine daor.*

⁸ *dileasdanas.*

⁹ *ria.*

agus gu'n gabh i greim air a bhuill diomhair;

12 An sin gearraidh tu dhith a làmh; cha ghabh do shùil truas *rithe*.

13 Cha bhi agad ann ad mhàla¹ *aon* chothrom² agus cothrom *eile*; *cothrom* mòr agus beag.

14 Cha bhi agad ann ad thigh *aon* soitheach³, agus soitheach *eile* tomhais; *soitheach* mòr agus beag.

15 Cothrom iomlan agus ceart bithidh agad, soitheach-tomhais iomlan agus ceart bithidh agad; a chum gu'm buanaichear do làithean anns an fhearann a *tha* 'n Tighearna do Dhia a' tabhairt duit.

16 Oir *tha* iadsan uile a ni na nithe sin, iadsan uile a ni gu h-eucorach, 'nan gràine-eileachd do'n Tighearna do Dhia.

17 Cuimhnich ciod a rinn Amalec ort san t-slighe, 'nuair a thàinig sibh a mach as an Eiphit,

18 Cionnus a choimnich e thusan t-slighe, agus a bhuail e chuid bu deireanaiche dhiot, *eadhon* iadsan uile a *bha* lag a' d' dhéigh, an uair a *bha* thu fann agus sgith, agus nach robh eagal Dé air.

19 Uime sin an uair a bheir an Tighearna do Dhia fois duit o d' naimhaidh uile mu'n cuairt, anns an fhearann a bheir an Tighearna do Dhia dhuit màr oighreachd r'a shealbhachadh, dubhaidh tu as cuimhne Amaleic o *bhi* fuidh nèamh; cha dìchuimhnich thu e.

CAIB. XXVI.

1 *Aideachadh an ti a thug seachad do'n t-sagart bascaid le ceud thoradh an fhearainn.* 12 *Mu dheachamh na treas bliadhna.* 16 *An coimheachangal eadar Dia agus a shluagh.*

A GUS an uair a théid thu stigh do'n fhearann a *tha* 'n Tighearna do Dhia a' toirt dhuit mar oighreachd, agus a shealbhacheas tu e, agus a ghabhas tu comhnuidh ann,

2 An sin gabhaidh tu do'n cheud chuid do uile thoradh na talmhainn, a bheir thu leat do t'fhearann a *tha* 'n Tighearna do Dhia a' tabhairt duit, agus cuiridh tu ann am bascaid *e*, agus théid thu chum an àite a thaghas an Tighearna do Dhia, a chur 'aime an sin.

3 Agus théid thu dh'ionnsuidh an t-sagairt a bhios anns na làithibh sin, agus their thu ris, Tha mi ag aideachadh air an là 'n diugh do'n Tighearna do Dhia, gu'n d'thàinig mi do'n dùthaich a mhionnaich an Tighearna d'ar n-aithrichibh gu'n tugadh e dhuinn.

4 Agus gabhaidh an sagart a' bhascaid as do làimh, agus cuiridh e sìos i air beulaobh altarach an Tighearna do Dhé.

5 Agus freagraidh tu agus their thu an

làthair an Tighearna do Dhé, Bu Shirian ach air sheòl a bhi caillte m'athair, agus chaidh e sìos do'n Eiphit, agus bha e air chuairt an sin le beagan cuideachd, agus dh'fhàs e 'n sin 'na chinneach mòr, cumhachdach, agus lìonmhor.

6 Agus bhuin na h-Eiphitich gu h-òle ruinn¹, agus shàraich iad sinn, agus chuir iad daorsa chruaidh oirnn.

7 Agus ghlaodh sinn ris an Tighearna, Dia ar n-aithriche, agus dh'éisd an Tighearna r'ar guth, agus dh'amhairc e air ar n-àmhghar, agus ar saothair, agus ar fòirneart:

8 Agus thug an Tighearna mach sinn as an Eiphit le làimh chumhachdaich, agus le gairdean sìnte mach, agus le h-uamhlann mòr, agus le comharaibh, agus le h-iongautasaibh:

9 Agus thug e sinn do'n àite so, agus thug e dhuinn am fearann so, fearann a tha sruthadh le bainne agus mìl.

10 Agus a nis, feuch, thug mi leam ceud thoradh an fhearainn a thug thusa, a Tighearna, dhomh. Agus cuiridh tu e am fianuis an Tighearna do Dhé, agus ni thu aoradh⁵ am fianuis an Tighearna do Dhé.

11 Agus ni thu gairdeachas anns gach *ni* maith a thug an Tighearna do Dhia dhuit, agus do d' thigh, thu féin, agus an Lebbhitheach, agus an coigreach a *bhios* 'nur measg.

12 'Nuair a chuireas tu crìoch air deachamh a thoirt seachad, *cadhon* uile dheachamh do chinneis⁶ air an treas bliadhna, bliadhna an deachaimh, agus a bheir thu e do'n Lebbhitheach, do'n choigreach, do'n dilleachdan, agus do'n bhantraich, a chum gu'n ith iad an taobh a stigh do d' gheataibh agus gu'n sàsuichear iad:

13 An sin their thu am fianuis an Tighearna do Dhé, Thug mi leam na nithe naomha as *mo* thigh, agus mar an ceudna thug mi iad do'n Lebbhitheach, agus do'n choigreach, do'n dilleachdan, agus do'n bhantraich, a réir t'àitheantan uile a dh'àithn thu dhomh: cha do bhris mi h-*aon* do t'àitheantaibh, ni mò a dhìchuimhnich mi *iad*.

14 Cha d'ith mi *bheag* dhiubh a'm' bhròn, ni mò a ghabh mi *bheag* dhiubh gu *feum* neòghlan *sam bith*, ni mò a thug mi *bheag* dhiubh air son a' mhairbh: dh'éisd mi ri guth an Tighearna mo Dhé; rinn mi a réir nan uile nithe a dh'àithn thu dhomh.

15 Amhairc a nuas o ionad-còmhnuidh do naomhachd, o nèamh, agus beannaich do shluagh Israel, agus am fearann a thug thu dhuinn, mar a mhionnaich thu

¹ *bhaig*. ² *chlach*. Eabh. ³ *ceathar*-tomhais; *ephah*. Eabh. ⁴ *reinn*.

⁵ *adhrath*.

⁶ *phisich*, *fhàis*.

d'ar n-aithrichibh, fearann a tha sruthadh le bainne agus mil.

16 Air an là'n diugh dh'àithn an Tighearna do Dhia dhuit na reachdan agus na breitheanais sin a dheanamh: uime sin còmhaidhidh agus nì thu iad le d' uile chrìdhe agus le d' uile anam.

17 Rinn thu roghainn¹ an diugh do'n Tighearna gu bhi 'na Dhia dhuit, agus gu gluasad 'na shligheibh, agus gu 'reachdan a ghleidheadh, agus 'àitheantan, agus a bhreitheanais, agus gu éisdeachd r'a ghuth.

18 Agus thagh² an Tighearna thusa an diugh gu bhi a'd' shluagh sònraichte dha fèin, mar a gheall³ e dhuit, agus a chum gu'n gleidheadh tu 'àitheantan uile;

19 Agus a chum gu'n deanadh e àrd thu os ceann nan uile chimeach a rinn e, ann an cliu, agus ann an ainm, agus ann an urram; agus a chum gu'm bitheadh tu a'd' shluagh naomha do'n Tighearna do Dhia, mar a labhair e.

CAIB. XXVII.

1 *Dh'àithn Maois do'n t-sluagh an lagh a sgrìobhadh air clachaibh mòra; agus altair a thogail suas do chlachaibh slàna.* 11 *Mu bheannachdaibh agus mu mhallachdaibh.*

AGH dh'àithn Maois agus seanairean Israeil do'n t-sluagh, ag ràdh, Gleidhibh na h-àitheantan uile a tha mi ag àithneadh dhuibh an diugh.

2 Agus tarlaidh, air an là anns an téid sibh thar Iordan do'n fhearann a bheir an Tighearna do Dhia dhuit, gu'n cuir thu suas dhuit fèin clacha mòra, agus còmhdaichidh tu thairis le h-aol iad.

3 Agus sgrìobhaidh tu orra uile, bhriathran an lagha so, 'nuair a théid thu thairis, a chum gu'n téid thu steach do'n fhearann a bheir an Tighearna do Dhia dhuit, fearann a tha sruthadh le bainne agus le mil; mar a gheall an Tighearna Dia t'aithriche dhuit.

4 Uime sin an uair a théid sibh thar Iordan, cuiridh sibh suas na clachan sin, a tha mi ag àithneadh dhuibh air an là'n diugh, ann an sliabh Ebail, agus còmhdaichidh tu thairis le h-aol iad.

5 Agus an sin togaidh tu suas altair do'n Tighearna do Dhia, altair do chlachaibh: cha tog thu suas *inneal iarum sam bith* orra.

6 Do chlachaibh slàna togaidh tu altair an Tighearna do Dhé, agus bheir thu suas oirre iobairte-loisgte do'n Tighearna do Dhia.

7 Agus iobraidh tu iobairte-sìth, agus ithidh tu 'n sin, agus nì thu gairdeachas an làthair an Tighearna do Dhé.

8 Agus sgrìobhaidh tu air na clachaibh

uile bhriathran an lagha so gu ro shoilleir.

9 Agus labhair Maois, agus na sagartan na Lebhithich, ri h-Israel uile, ag ràdh, Thoir an aire, agus éisd, O Israeil; air an là'n diugh rinneadh thu a'd' shluagh⁴ do'n Tighearna do Dhia.

10 Uime sin éisdidh tu ri guth an Tighearna do Dhé, agus nì thu 'àitheantan, agus a reachdan, a tha mi ag àithneadh dhuit air an là'n diugh.

11 Agus dh'àithn Maois do'n t-sluagh air an là sin fèin, ag ràdh,

12 Seasaidh iad so air sliabh Gheridsim a bheannachadh an t-sluaigh, 'nuair a théid sibh thar Iordan; Simeon, agus Lebhi, agus Iudah, agus Isachar, agus Ioseph, agus Benjamin.

13 Agus seasaidh iad so air sliabh Ebail a mhallachadh: Reuben, Gad, agus Aser, agus Sebulun, Dan, agus Naphtali.

14 Agus labhairidh na Lebhithich, agus their iad ri daoineibh Israeil uile le guth àrd.

15 Mallaichte *gu robh* an duine a nì dealbh snaidhte⁵ no leaghta, gràineileachd do'n Tighearn, obair làmh an fhir-cheird, agus a chuireas e ann an *ionad* dìomhair: agus freagraidh an sluagh uile, agus their iad, Amen.

16 Mallaichte *gu robh* esan a nì tàir air 'athair no air a mhàthair: agus their an sluagh uile, Amen.

17 Mallaichte *gu robh* esan a dh'atharraicheas crìoch⁶ fearainn a choimhearsnaich⁷: agus their an sluagh uile, Amen.

18 Mallaichte *gu robh* esan a chuireas an dall air seacharan san t-slighe: agus their an sluagh uile, Amen.

19 Mallaichte *gu robh* esan a chlaonas breitheanas a' choigrich, an dilleachdain, agus na bantraich: agus their an sluagh uile, Amen.

20 Mallaichte *gu robh* esan a luidheas le mnaoi' athar, a chiom gu bheil e a' leigeadh ris còmhdaich' athar: agus their an sluagh uile, Amen.

21 Mallaichte *gu robh* esan a luidheas le h-ainmhidh sam bith: agus their an sluagh uile, Amen.

22 Mallaichte *gu robh* esan a luidheas le 'phiuthar, nighean' athar, no nighean a mhàthar: agus their an sluagh uile, Amen.

23 Mallaichte *gu robh* esan a luidheas le 'mhàthair-chéile: agus their an sluagh uile, Amen.

24 Mallaichte *gu robh* esan a bhuaileas a choimhearsnach gu h-uaigneach⁸: agus their an sluagh uile, Amen.

25 Mallaichte *gu robh* esan a ghabhas duais⁹ air son duine neo-chiontach a

¹ dh'aidich thu.

³ labhair, Eabh.

² ròghnuich.

⁴ nad phobull.

⁵ ionmhaigh ghrùbhalla.

⁷ a nàbuidh.

⁶ comhara; teòran. Eir.

⁸ am feill.

⁹ ceannach.

mharbhadh¹: agus their an sluagh uile, Amen.

26 Mallaichte *gu robh* esan nach daingnich uile bhriathran an lagha so chum an deanamh: agus their an sluagh uile, Amen.

CAIB. XXVIII.

1 *Beannachdan air an gealltainn dhoibhsan a bhios ùmhail do lagh Dhé.* 15 *Mallachdan dhoibhsan a bhios eas-ùmhail.*

AGUS tarlaidh, ma dh'éisdeas tu gu dùrachdach ri guth an Tighearna do Dhé, a choimhead agus a dheanamh 'àitheantan uile, a *tha* mi ag àithneadh dhuit air an là'n diugh, gu'n cuir an Tighearna do Dhia suas thu os ceann uile chinneacha na talmhainn.

2 Agus thig na beannachdan so uile ort, agus beiridh iad ort, ma dh'éisdeas tu ri guth an Tighearna do Dhé.

3 Beannaichte *bithidh* tu sa' bhaile, agus beannaichte *bithidh* tu sa' mhachair.

4 Beannaichte *bithidh* toradh do chuirp, agus toradh t'fhearainn, agus toradh do spréidhe, fàs do chruidh², agus treuda do chaorach.

5 Beannaichte *bithidh* do bhascaid agus do chuibhrionn³.

6 Beannaichte *bithidh* tu 'nuair a thig thu stigh, agus beannaichte *bithidh* tu 'nuair a théid thu mach.

7 Bheir an Tighearna fa'near gu'm bi do naimhdean, a dh'éireas suas a't' aghaidh, air am bualadh roimh do ghluais: thig iad a mach a't' aghaidh air aon slighe, agus teichidh iad romhad air seachd slighibh.

8 Aithnidh an Tighearna am beannachadh ort a'd' thighibh-tasgaidh⁴, agus anns gach ni ris an cuir thu do làmh; agus beannaichidh e thu san fhearann a bheir an Tighearna do Dhia dhuit.

9 Daingnichidh an Tighearna thu a'd' shluagh naomha dhia féin, mar a mhionnaich e dhuit, ma ghleidheas tu àitheantan an Tighearna do Dhé, agus *ma* ghluaiseas tu 'na shlighibh.

10 Agus chi uile chinneach na talmhainn gu'n goirear ainm an Tighearn ort, agus bithidh eagal orra romhad.

11 Agus ni an Tighearna saoiibhr⁵ thu ann am maoin, ann an toradh do chuirp, agus ann an toradh do spréidhe, agus ann an toradh do talmhainn, anns an talamh a mhionnaich an Tighearna do t'aithrichibh a thabhairt duit.

12 Fosglaidh an Tighearna dhuit a dheadh ionnhas⁶, na nèamhan a thoirt uisge do t'fhearann 'na àm, agus a bheannachadh uile oibre do làimhe; agus

bheir thu 'n iasachd⁷ do mhòran chinneach, agus cha ghabh thu 'n iasachd.

13 Agus ni an Tighearna an ceann dhìot, agus ni e an t-earball⁸; agus bithidh tu mhàin an uachdar, agus cha bhi thu 'n iochdar; ma dh'éisdeas tu ri àithcantaibh an Tighearna do Dhé, a *tha* mi ag àithneadh dhuit air an là'n diugh, gu'n coimhead agus gu'n dean *thu iad*.

14 Agus cha téid thu thaobh o aon air bith do na briathraibh a *tha* mi ag àithneadh dhuit an diugh, a chum na làimhe deise no chum na làimhe clìthe, a dhol an dèigh dhiathan eile a dheanamh seirbhis doibh.

15 Ach tarlaidh, mur éisd thu ri guth an Tighearna do Dhé, a thoirt fa'near gu'n dean⁹ thu 'àitheantan agus a reachdan uile, a *tha* mi ag àithneadh dhuit an diugh, gu'n tig na mallachdan so uile ort, agus gu'm beir iad ort.

16 Mallaichte *bithidh* tu sa' bhaile, agus mallaichte *bithidh* tu sa' mhachair.

17 Mallaichte *bithidh* do bhascaid agus do chuibhrionn.

18 Mallaichte *bithidh* toradh do chuirp, agus toradh t'fhearainn, fàs do chruidh¹⁰, agus treudan do chaorach.

19 Mallaichte *bithidh* tu 'nuair a thig thu stigh, agus mallaichte *bithidh* tu 'nuair a théid thu mach.

20 Cuiridh an Tighearna ort mallachadh, mi-shuaimhneas¹¹, agus achmbasan, anns gach ni ris an cuir thu do làmh gu' dheanamh, gus an sgriosar thu, agus gus an téid as duit gu h-obann, air son aingidheachd do ghniomhara leis an do thréig thu mise.

21 Bheir an Tighearna air a' phlàigh leantuinn riut, gus an claidh e thu bhàrr an fhearainn, d'am bheil thu dol a steach g'a shealbhadh.

22 Buailidh an Tighearna thu le caith-eamh¹² agus le fiabhras¹³, agus le h-ain teas, agus le h-àrd-losgadh, agus leis a' chlaidheamh, agus le seargadh¹⁴, agus le fuar-dhealt¹⁵; agus leanaidh iad thu gus an téid as duit.

23 Agus bithidh do speuran a *ta* os do cheann 'nan umha¹⁶, agus an talamh a *ta* fodhad 'na iarumh.

24 Ni an Tighearna uisge t'fhearainn 'na luaithre agus 'na dhuslach: o nèamh thig e nuas ort, gus an sgriosar thu.

25 Bheir an Tighearna fa'near gu'm buailear thu air beulaobh do naimhdean: théid thu mach air aon slighe¹⁷ 'nan aghaidh, agus teichidh tu rompa air seachd slighibh; agus atharraichear thu chum uile rioghachda na talmhainn.

¹ air son fuil ned-chiontach a dhòrtadh.

² do bhò. ³ stòr. ⁴ thighibh stòir, shaibhlibh.

⁵ pailt. ⁶ thaisgeach.

⁷ coingheall.

⁸ iorball. ⁹ gu'n coimhlean. ¹⁰ àl do bhò.

¹¹ carraid. ¹² èitich. ¹³ teasaich, cuartaich.

¹⁴ gaisceadh, losgadh-dealanaich. ¹⁵ crith-reodh.

¹⁶ prais. ¹⁷ ròd, rathad.

DEUTERONOMI, XXVIII.

26 Agus bithidh do chlosach¹ 'na biadh aig uile eunlaith an athair, agus aig beatha-aichibh na talmhainn, agus cha 'n fhuad-aich duine sam bith air falbh iad.

27 Buailidh an Tighearn thu le neasgaid na h-Eiphit, agus le rùith fola², agus le càrr, agus le cloin³, do nach bi e'n comas do leigheas.

28 Buailidh an Tighearn thu le cuthach, agus do doille, agus le h-uamhann cridhe.

29 Agus smeuraichidh tu⁴ mu mheadh-on-là, mar a smeuraicheas an dall san dorchadas, agus cha soirbhich leat a'd' shligibh: agus bithidh tu mhàin fuidh fhoirneart, agus air do chreachadh a ghuath, agus cha teasairg duine sam bith thu.

30 Nì thu ceangal-pòsaidh⁵ ri mnaoi, agus luidhidh fear eile leatha: togaidh tu tigh, agus cha ghabh thu còmhnuidh ann: suidhichidh tu fion-lios, agus cha tionail thu 'fhion-dhearc.

31 Marbhar do dhamh fa chomhair do shùl, agus cha'n ith thu dheth: bheirear air falbh t'asal a dh'aideoin as do làth-air, agus cha toirear air a h-ais⁶ dhuit i: bheirear do chaoraich do d' naimhdbhl, agus cha bli neach agad a bheir uatha iad.

32 Bheirear do mhic agus do nigheana do shluagh eile, agus chì do shùilean, agus fàilnichidh iad le fadal air an son⁷ rè an là: agus cha bhi neart sam bith a'd' làimh.

33 Toradh t'fhearainn, agus do shaoth-air uile, ithidh cinneach suas, nach b'aithne dhuit; agus bithidh tu mhàin fuidh fhoirneart agus air do bhruthadh an còmhnuidh:

34 Air chor as gu'm bi thu air mhi-chéill, air son seallaidh do shùl a chi thu.

35 Buailidh an Tighearn thu sna glùinibh, agus anns na cosaibh, le neasgaid chràitich nach gabh leigheas, o bhonn do chois gu mullach do chinn.

36 Bheir an Tighearn thu féin, agus do rìgh a chuireas tu os do cheann, gu cinneach nach b'aithne aon chuid duit féin no dot'aithrichibh; agus an sin nì thu seirbhis do dhiathaibh eile, do fliodh agus do chloich.

37 Agus bithidh tu a't' uamhas⁸, a'd' shamhladh⁹, agus a'd' leth-fhocal¹⁰, am measg nan uile chinneach gus an treòraich an Tighearn thu.

38 Bheir thu mòran sìl a mach do'n fhearann, ach is beag a chruinnicheas tu stigh: oir ithidh an locust suas e.

39 Suidhichidh tu fion-lios an agus deas-aichidh tu iad, ach cha'n òl thu do'n fhion, nì mò a chruinnicheas tu na dearc-an: oir ithidh a chnuimh iad.

40 Bithidh croinn-oladh air feadh do chrìochan uile, ach cha 'n ung thu thu féin leis an oladh: oir tilgidh do chram-oladh a thoradh.

41 Gnidh tu mic agus nigheanan, ach cha mheal thu iad; oir théid iad am braigh-deanas.

42 Do chraobhan uile agus toradh t'fhearainn, millidh¹¹ an locust.

43 Eiridh an coigreach a tha 'nur measg suas gu ro àrd os do cheann; agus thig thusa nuas gu ro ìosal.

44 Bheir e 'n iasachd duit, agus cha toir thusa an iasachd dha: bithidh esan 'na cheann, agus bithidh tusa a'd' earball.

45 Agus thig na mallachdan sin uile ort, agus leanaidh¹² iad thu, agus beiridh iad ort, gus an sgriosar thu; a chionn nach d'éisid thu ri guth an Tighearna do Dhé, a ghleidheadh àitheantan agus a reachdan a dh'àithn e dhuit.

46 Agus bithidh iad ort mar chomhar agus mar iongantas, agus air do shliochd a chaoidh.

47 A chionn nach d'rinn thu seirbhis do'n Tighearna do Dhia le gairdeachas, agus le subhachas cridhe, air son pailteis nan uile nìthe;

48 Uime sin nì thu seirbhis do d' naimhdbhl, a chuireas an Tighearn a't' aghaidh, ann an ocra, agus ann an tart, agus ann an lomnochdaidh, agus ann an uireasbhuidh nan uile nìthe: agus cuiridhe cuing iarunn air do mhuineal, gus an cuir e as duit.

49 Bheir an Tighearn cinneach a't' aghaidh o ionad fad o làimh, o iomall na talmhainn, mar an iolair air iteig; cinneach uach tuig thu 'n cainnt;

50 Cinneach aig am bheil aghaidh bhorb¹³, nach toir urram do ghnais an aosmhoir, agus nach deau iochd ris an òg.

51 Agus ithidh e toradh do spréidhe, agus toradh t'fhearainn, gus an sgriosar thu: neach nach fàg agad arbhar, fion, no oladh, fàs do chruidh, no treudan do chaorach, gus an cuir e as duit.

52 Agus teannaichidh e thu¹⁴ ann ad gheataibh uile, gus am breisear sìos¹⁵ do bhallachan àrda agus daingniche, ann an robh do dhòigh, air feadh t'fhearainn uile; agus teannaichidh e thu ann ad gheataibh, air feadh t'fhearainn uile a thug an Tighearna do Dhia dhuit.

53 Agus ithidh tu toradh do chuip féin,

¹ do chairbh, do chorp marbh.

rhòids. Sasg.

² claimh. Eir.

³ iarraidh tu fo làimh.

⁴ cha 'n ais-ìcar.

⁵ uamhann.

⁶ réiteachadh-pòsaidh.

⁷ le deigh orra.

⁸ ghuath-fhocal.

⁹ fhor-fhocal, ath-dhàn, flurth-ainm.

¹⁰ sealbhaichidh.

¹¹ ruagaidh.

¹² gharg.

¹³ cuiridh e sìds riut, suidhidh e umad, cuairtichidh e thu.

¹⁴ an tuit sìos.

¹⁵ an tuit sìos.

feoil do mhac agus do nigheanan, a thug an Tighearna do Dhia dhuit, anns a chogadh, agus anns an teinn¹, leis an teannaich do naimhdean thu :

54 *Air chor as an duine a ta maoth* ² n'ur measg, agus ro shòghar², gu'm bi a shùil olc a thaobh a bhràthar, agus a thaobh muà 'uchd féin, agus a thaobh iarmaid³ a chloinne a dh'fhàgas e :

55 Air chor as nach toir e do h-aon diubh a bheag do fheoil a chloinne a dh'itheas e ; a chiomn nach fàgar a bheag aige sa' chogadh⁴, agus anns an teinn, leis an teannaich do naimhdean thu a' d' gheataibh uile.

56 A' b' bhean mhaoth agus shòghar ⁵ n'ur measg, nach dùraigeadh bonna coise a chur air an talamh a thaobh muir⁵ agus maothalachd⁶, bithidh a sùil olc a thaobh fir-pòsda a h-uchd, agus a thaobh a mic, agus a thaobh a h-ighinn,

57 Agus a thaobh a mhaothrain a thig a mach o eadar a cosaibh, agus a thaobh a cloinne a bheireas i : oir ithidh i iad a dh'uireasbhuidh nan uile *nithe* an diomhaireachd anns a' chogadh, agus anns an teinn, leis an teannaich do naimhdean thu a' d' gheataibh.

58 Mur toir thu an aire uile bhriathran an lagha so a dheanamh, a tha sgrìobhta san leabhar so, a chum gu'm bi eagal an aium ghlòrmhoir agus uamhasaich so ort, **AN TIGHEARNA DO DHIA ;**

59 An sin ni an Tighearna do phlàighean iongantach, agus plàighean do shliochd, eadhon plàighean mòra agus maireannach, agus eucailean cràiteach agus fadalach.

60 A bhàrr air so, bheir e ort uile ghalaran na h-Eiphit, roimh an robh eagal ort ; agus leanaidh iad riut.

61 Mar an ceudna gach tinneas, agus gach plàigh, nach 'eil sgrìobhta ann an leabhar an lagha so, iad sin bheir a Tighearn ort, gus an sgrìosar thu.

62 Agus fàgar sibh tearc ann an àireamh, an àite gu'n robh sibh mar reulta nèimh au lionmhoireachd ; a chiomn nach d'éisd thu ri guth an Tighearna do Dhé.

63 Agus tarlaidh, mar a rinn an Tighearna gairdeachas os bhuir ceann a dheanamh maith dhuibh, agus gu'r deanamh lionmhor, mar sin gu'n dean an Tighearna gairdeachas os bhuir ceann gu'r sgrìos, agus gu'r toirt gu neo-ni ; agus spionar sibh as an fhearnam d'am bheil thu a' dol g'a shealbhachadh.

64 Agus sgapaidh an Tighearn thu am measg nan uile chinneach, o'n dara ceann do'n talamh eadhon gus an ceann eile do'n talamh ; agus an sin ni thu seirbhis do

dhiathaibh eile, nach b'aithne *aon chuid* duit féin no do t'aithrichibh, eadhon do fhìodh agus do chloich.

65 Agus am measg nan cinneach sin cha'n fhaigh thu suaimhneas sam bith, ni mò bhios fòis aig bonn do chois : ach bheir an Tighearna dhuit an sin cridhe gealtach, agus fàilneachadh shùil, agus doilgheas⁷inntinn.

66 Agus bithidh do bheatha crochta ann an amharus⁸ fa d' chomhair ; agus bithidh eagal ort a là agus a dh'oidhche, agus cha bhi cinnte air bith agad do d' bheatha.

67 Sa' mhaduinn their thu, Och ! nach b'e 'm feasgar e ; agus san fheasgar their thu, Och ! nach b'i a mhaduinn e ; air son eagail do chridhe leis am bi eagal ort, agus air son seallaidh do shùil a chi thu.

68 Agus bheir an Tighearna ris thu do'n Eiphit ann an longaibh, air an t-slighe mu'n dubhairt mi riut, Cha 'n fhaic thu ris i tuilleadh : agus an sin reicear sibh ri'r naimhdeibh mar thràillean agus mar bhan-tràillean, agus cha bhi neach ann gu'r ceannach.

CAIB. XXIX.

2 *Earail do chloinn Israeil an coimhcheangal ri Dia a choimhead.* 29 Buinidh nithe diomhair do'n Tighearn.

IS iad sin briathran a' choimhcheangail a dh'aitm an Tighearna do Mhaois a dheanamh ri cloinn Israeil, ann an tìr Mhaois, a thuilleadh air a' choimhcheangal a rinn e riu ann an Horeb.

2 Agus thug Maois gairm do Israel uile, agus thubhairt e riu, Chunnaic sibh gach ni a rinn an Tighearna fa chomhair bhuir sùl ann an tìr na h-Eiphit, ri Pharaoh, agus r'a sheirbhisich uile, agus r'a fhearnan uile ;

3 Na deuchainnean⁹ mòra a chunnaic do shùilean, na comharan agus na h-iongantasan mòra sin ;

4 Gidheadh cha d' thug an Tighearna dhuibh cridhe a thuigsinn¹⁰, agus sùilean a dh' fhaicinn, agus cuasan a chluinntinn, gus an là'n diugh.

5 Agus thèoraich mise sibh dà fhichead bliadhna san fhàsach : cha do chaitheadh bhuir n-eudach dhibh le h-aois¹¹, agus cha do chaitheadh do bhròg le h-aois bhàrr do chois.

6 Cha d'ith sibh aran, ni mò dh'òl sibh fion, no deoch làidir ; a chum gu'm biodh fios agaibh gur mise an Tighearna bhuir Dia.

7 Agus an uair a thàinig sibh do'n àite so, thàinig Sihon rìgh Hesboin, agus Og rìgh Bhasaim, a mach 'nar n-aghaidh chum catha, agus bhuail sinn iad.

¹ teanntachd, cumhainge. ² delicate, luxurious. Sasg. ³ fuigheall. ⁴ san t-éisd. ⁵ grimies, sògh. ⁶ maothachd. ⁷ bròn, dubhachas.

⁸ an teagamh. ⁹ dearbhan, buaireanna. ¹⁰ a mhothachadh. ¹¹ cha d'fhàs bhuir n-eudach sean umaibh.

8 Agus ghlac sinn am fearann, agus thug sinn e mar oighreachd do na Reubenich, agus do na Gadaich, agus do leth thréibh Mhanaseh.

9 Gleidhibh uime sin briathran a' choimhcheangail so, agus deanaibh iad, a chum gu soirbhich leibh anns gach ní a ní sibh.

10 Tha sibh uile 'nur seasamh an diugh an làthair an Tighearna bhuir Dé; ceannardan bhuir treubha¹, bhuir seanairean, agus bhuir luchd-riaghlaidh, fir Israeil uile,

11 Bhuir clann bheag, bhuir mnàì, agus do choigreach a tha ann ad champ o fhear-gearraidh t'fhiodha gu fear-tarruing t'uisge;

12 A chum gu'n rachadh tu ann an coimhcheangal ris an Tighearna do Dhia, agus 'na mhionnaibh-san, a tha 'n Tighearna do Dhia a' deanamh riut air an là 'n diugh:

13 A chum gu'n daingnich e thu an diugh mar shluagh dha féin, agus gu'm bi esan dhuitse 'na Dhia, mar a thubhairt e riut, agus mar a mhionnaich e do t'aithrichibh, do Abraham, do Isaac, agus do Iacob.

14 Agus cha'n ann ribhse mhàin a tha mise a' deanamh a' choimhcheangail so, agus nam mionna so:

15 Ach ris-san a tha 'n so maille ruinn 'na sheasamh an diugh an làthair an Tighearna ar Dé. agus mar an ceudna ris-san nach 'eil an so maille ruinn an diugh:

16 (Oir is aithne dhuibh cinneus a bha sinn a chòmhnuidh ann an tìr na h-Eiphit, agus cinneus a thàinig sinn troimh mheadhon nan cinneach air an deachaidh sibh seachad;

17 Agus chumnaic sibh an gràineileachdan, agus an ìodholan², fiodh agus clach, airgid agus òr, a bha 'nam measg:)

18 Air eagal gu'm biodh 'nur measg fear, no bean, no teaghlach, no treubh, a chlaon-as a chridhe air falbh an diugh o'n Tighearna ar Dia, a dhol a dheanamh seirbhìs do dhiaithaibh nan cinneach sin; air eagal gu'm biodh 'nur measg freumh a bheir uaidh mar thoradh nimh³ agus searbhas⁴,

19 Agus an uair a chluinneas e briathran a mhallachaidh so, an sin gu'm beannaich se e féin 'na chridhe, ag ràdh, Bithidh sìth agam, ged a ghluais mi ann an anamian⁵ mo chridhe féin, a chur misge ri pathadh:

20 Cha chaoimhain an Tighearna e, ach an sin cuiridh fearg an Tighearna, agus 'eud, smùid diùbh an aghaidh an duine sin, agus luidhidh gach mallachadh air a tha sgrìobhta san leabhar so, agus dubhaidh an Tighearna mach a' ainm o bhi fuidh nèamh.

21 Agus sgaraidh an Tighearna e chum uile, a mach a treubhaibh Israeil uile, a réir uile mhallachdan a' choimhcheangail, a tha sgrìobhta ann an leabhar an lagha so:

22 Air chor as gu'n abair an ginealach ri teachd, bhuir clann a dh'éireas suas 'nur déigh, agus an coigreach a thig o thìr fad o làimh, 'nuair a chi iad plàighean an fhearainn sin, agus 'eucaille an leig an Tighearna air;

23 Agus gu bheil a thalamh uile 'na phronnag, agus 'na shalann, agus 'na losgadh, nach 'eil e air a chur, no toirt toraidh⁶ uaidh, agus nach 'eil feur sam bith a' fàs ann. cosmhuil ri sgrios Shodoim agus Ghomorrah. Admah agus Sheboim, a sgrios an Tighearna 'na fheirg, agus 'na chorruich;

24 Their eadhon na h-uile chinnich, C'ar son a bhuin an Tighearna mar so ris an fhearann so? Ciod is ciall do theas na corr- uiche mòire so?

25 An sin their daoine, A chionn gu'n do thréig iad coimhcheangal an Tighearna Dé an aithriche a rinn e riut, 'nuair a thug e mach iad a tìr na h-Eiphit.

26 Oir chaidh iad agus rinn iad seirbhìs do dhiaithaibh eile, agus rinn iad aoradh⁷ dhoibh, dée nach b'aithne dhoibh, agus nach d'thug esan doibh⁸.

27 Agus las corruich an Tighearna an aghaidh an fhearainn so, a thoirt nam mallachdan sin uile air a tha sgrìobhta san leabhar so.

28 Agus spion an Tighearna a mach iad as am fearann ann am feirg, agus ann an corruich, agus ann an lasan⁹ ro mhòr, agus thilg e iad do dhùthaich eile, mar air an là 'n diugh.

29 Buinidh na nithe dìomhair do'n Tighearna ar Dia, ach na nithe a ta foillsichte dhuinne, agus d'ar cloinu a chaidh, a chum gu'n dean sinn uile bhriathran an lagha so.

CAIB. XXX.

1 Maitheas agus trècàir air an gealltainn dhoibhsan a bheir géill a dh'aitheantaibh an Tighearna. 13 Beatha agus bàs air an cur fa'n comhair.

AGUS an uair a thig na nithe so uile A ort, am beannachadh agus am mallachadh, a chuir mise romhad, agus a chuimhnichas tu orra am measg uan cinneach uile chum an d'fhogair an Tighearna do Dhia thu,

2 Agus a philleas tu dh'ionnsuidh an Tighearna do Dhé, agus a bheir thu géill d'a ghuth, a réir nan uile nithe a tha mise ag àithneadh dhuit air an là 'n diugh, thu féin agus do chlaun, le t'uile chridhe, agus le t'uile anam;

¹ bhuir cinn-sheadhna agus bhuir treubha.

² diathan bréige. ³ neimh, puinsein, domblas.

⁴ lùrmaid.

⁵ aingidheachd, smuaintibh.

⁶ cinneis.

⁷ shleuchd iad. ⁸ nach do bhuilich a bheag orra.

⁹ fracch feirge.

3 An sin bheir an Tighearna do Dhia air ais do bhraighdeanas, agus ni e iochd riut, agus pillidh e agus cruinnichidh e thu as na h-uile chlinnich a chum an do sgap an Tighearna do Dhia thu.

4 Mà dh'fhògradh *neach* agad gus a' *chuid* a's iomallaiche do nèamh, as a sin cruinnichidh an Tighearna do Dhia thu, agus as a sin bheir e thu :

5 Agus bheir an Tighearna do Dhia thu do'n fhearann a shealbhaich t'aithriche, agus sealbhaichidh tu e ; agus ni e maith dhuìt, agus bheir e ort fàs lionmhor os ceann t'aithriche.

6 Agus timchioll-ghearraidh an Tighearna do Dhia do chridhe, agus chridhe do shliochd, a ghràdhachadh an Tighearna do Dhé le t'uile chridhe, agus le t'uile anam, a chum gu'm bi thu beò.

7 Agus cuiridh an Tighearna do Dhia na mallachdan sin uile air do naimhdibh, agus orra-san aig am bheil fuath dhuìt, a rinn geir-leanmhuinn ort.

8 Agus pillidh tu agus bheir thu géill do ghuth an Tighearna, agus ni thu 'aith-eantan uile a tha mise ag àithneadh dhuìt an diugh.

9 Agus ni an Tighearna do Dhia pàilt thu ann an uile obair do làimhe, ann an toradh do chuirp, agus ann an toradh do spréidhe, agus ann an toradh t'fhearainn, a chum maith : oir ni an Tighearna ris gairdeachas os do cheann chum maith, mar a rinn e gairdeachas os ceann t'aithriche ;

10 Ma dh'éisdeas tu ri guth an Tighearna do Dhé, a ghleidheadh 'aith-eantan, agus a reachdan, a tha sgrìobhta ann an leabhar an lagha so, *agus* ma philleas tu chum an Tighearna do Dhé le t'uile chridhe, agus le t'uile anam.

11 Oir an àithne so a *tha* mise ag àithneadh dhuìt an diugh, cha 'n *eil* i 'm folach ort, ni mò a *ta* i fada uait.

12 Cha 'n *eil* i sna nèamhaibh, air chor as gu'n abradh tu, Cò théid suas air ar son do na nèamhaibh, agus a bheir i d'ar n-ionnsuidh, a chum gu'n chuinn sinn i, agus gu'n dean sinn i ?

13 Ni mò a *tha* i 'n taobh thall do'n fhaire, air chor as gu'n abradh tu, Cò théid a null air ar son thar an fhaire, agus a bheir i d'ar n-ionnsuidh a chum gu'n chuinn sinn i, agus gu'n dean sinn i ?

14 Ach *tha* 'm focal ro fhagus duit, ann do bheul, agus ann do chridhe, chum gu'n dean thu e.

15 Feuch, chuir mi romhad an diugh beatha agus maith, agus bàs agus olc ;

16 A mhead gu bheil mi ag àithneadh dhuìt an diugh an Tighearna do Dhia a ghràdhachadh, gluasad 'nashligibh, agus 'aith-eantan a ghleidheadh, agus a reachdan, agus a bhreitheanais, a chum gu'm

bi thu beò, agus gu'm fàs thu lionmhor, agus gu'm beannaich an Tighearna do Dhia thu san fhearann d'am bheil thu dol g'a shealbhadh.

17 Ach ma thionndaidheas do chridhe air falbh agus nach éisd thu, ach gu'n tairngear air falbh thu, agus gu'n dean thu aoradh do dhiathaibh eile, agus gu'n dean thu seirbhis dhoibh ;

18 Tha mi ag innseadh dhuibh air an là'n diugh, gu'n sgriosar gu cinnteach sibh, *agus* nach buanaich sibh bhur làithean air an fhearann, d'am bheil thu dol thar Iordan, gu gabhail a steach g'a shealbhadh.

19 Tha mi a' gairm nan nèamh agus na talmhainn mar fhianuisean 'nur n-aghaidh air an là'n diugh, gu'n do chuir mi beatha agus bàs f'ar comhair, beannachadh agus mallachadh : uirne sin ròghnuich beatha, chum gu'm bi thu féin agus do shliochd beò :

20 A chum gu'n gràdhaich thu'n Tighearna do Dhia, *agus* gu'n toir thu géill d' a ghuth, agus gu'n lean thu ris : (oir *is* esan do bheatha, agus fad do làithean ;) a chum gu'n gabh thu còmhnuidh san fhearann a mhionnaich an Tighearna do t'aithrichibh, do Abraham, do Isaac, agus do Iacob, gu'n tugadh e dhoibh.

CAIB. XXXI.

1 *Thug Maois misneach do Iosua agus do'n t-sluagh.*
9 *Thug e 'n lagh do na sagartaibh, agus dh'àithn e dhoibh aig ceann gach seachd bliadhna a leughadh an éisdeachd an t-sluaigh.* 19 *Thug Dia laoidh do Mhaois mar fhianuis 'nan aghaidh.*

A GUS chaidh Maois agus labhair e na briathra so ri h-Israel uile.

2 Agus thubhairt e riu, *Tha* mise ceud agus fichead bliadhna dh'aois air an là'n diugh ; cha 'n urrainn mi tuilleadh dol a mach agus teachd a steach : agus thubhairt an Tighearna rium, Cha téid thu thar an Iordan so.

3 Théid an Tighearna do Dhia e féin a null romhad ; sgriosaidh esan na cinnich sin o d' làthair, agus sealbhaichidh tu iad : *agus* théid Iosua null romhad, mar a thubhairt an Tighearna.

4 Agus ni an Tighearna riu mar a rinn e ri Sihon, agus ri h-Og, rìghre nan Amorach, agus ri fearann na muinntir sin a sgrios e.

5 Agus bheir an Tighearna thairis iad roimh bhur gnùis, a chum gu'n dean sibh riu a réir gach àithne a dh'àithn mise dhuibh.

6 Bitlùbh làidir, agus biodh deadh mhisneach agaibh, na biodh eagal oirbh, agus na gabhaibh geilt rompa : oir *is* e'n Tighearna do Dhia e féin a théid leat ; cha dìbir e thu, ni mò a thréigeas e thu.

7 Agus ghairm Maois air Iosua, agus thubhairt e ris ann an sealladh Israeil

uile, Bi làidir, agus biodh deadh mhisneach agad: oir is tusa a théid a stigh leis ant-sluagh so do'n fhearanna mhionnaich an Tighearna d'an aithrichibh gu'n tugadh e dhoibh; agus bheir thu orra a shealbhadh mar oighreachd.

8 Agus théid an Tighearna e féin romhad; bithidh esan maille riut, cha dibir e thu, ní mò a thréigean e thu: na gabh eagal, agus na biodh geilt ort.

9 Agus sgrìobh Maois an lagh so, agus thug se e do na sagartaibh mic Lebhi, a tha giùlan àirce coimhcheangail an Tighearna, agus do sheanairibh Israeil uile.

10 Agus dh'àithn Maois dhoibh, ag ràdh, Aig ceann *gach* seachd bliadhna, ann an àm òrduichte bliadhna an fhuasglaidh, aig féill nam pàillium,

11 'Nuair a thig Israeil uile g' an taisbeanadh féin an làthair an Tighearna do Dhé, san ionad a thaghas e; leughaidh tu 'n lagh so an làthair Israeil uile 'nan éisd-eachd.

12 Cruinnich an sluagh r'a chéile, fir, agus mnà, agus clann, agus do choigreach a *tha* 'n taobh a stigh do d' gheataibh, a chum gu'n cluinn iad, agus gu'm foghlum iad, agus gu'm bi eagal an Tighearna bhur Dé orra, agus gu'n toir iad fa' near uile bhriathran an lagha so a dheanamh;

13 Agus gu'n chuinn an clann do nach b'aithne *bheag*, agus gu foghlum iad eagal an Tighearna bhur Dé a bh' orra, am fad's is beò dhuibh san fhearann d'am bheil sibh dol thar Jordan g'a shealbhadh.

14 Agus thubhairt an Tighearna ri Maois, Feuch, tha do làithean a' dlùthachadh anns am feum thu bàs fhaghail: gairm air Iosua, agus nochdaibh sibh féin ann am pàillium a' choimhthionail, a chum gu'n toir mise àithne dha. Agus chaidh Maois agus Iosua, agus nochd siad iad féin ann am pàillium a' choimhthionail.

15 Agus dh'fhoillsich an Tighearna e féin sa' phàillium ann am meall¹ neoil: agus sheas am meall neoil os ceann doruis a' phàillium.

16 Agus thubhairt an Tighearna ri Maois, Feuch, coididh tusa maille ri t'aithrichibh; agus éiridh an sluagh so suas, agus théid iad le striopachas an déigh dhiathan na tìre coimhich sin d'am bheil iad a' dol a steach gu *fantuinn* na meadhon, agus tréigidh iad mise, agus brisidh iad mo choimhcheangal a rinn mi ri u.

17 Agus lasaidh mo chorruich 'nan aghaidh san là sin, agus tréigidh mi iad, agus folaichidh mi mo ghnùis uatha, agus ithear suas iad, agus thig mòran olc agus àmhgharan² orra, air chor as gu'n abair iad san là sin, Nach ann a chionn nach

'eil ar Dia 'nar measg a thàinig na h-uile so oirn?

18 Agus gu cinnteach folaichidh mise mo ghnùis san là sin, air son gach uile a dh'oibrich iad, a chionn gu'n do thionndaidh iad an déigh dhiathan eile.

19 A nis uime sin sgrìobhaibh-se dhuibh féin an laoidh³ so, agus teagaisgibh i do chloinn Israeil: cuir i 'nam beul, a chum gu'm bi 'n laoidh so mar fhianuis dhomhsa an aghaidh chloinn Israeil.

20 Oir an uair a bheir mi stigh iad do'n fhearann a mhionnaich mi d'an aithrichibh, a tha sruthadh le bainne agus le mil, agus a dh'itheas iad agus a shàsuichear iad, agus a dh'fhàsas iad reamhar; an sin tionndaidh iad gu diathan eile, agus ni iad seirbhais doibh, agus brosnuichidh iad mi, agus brisidh iad mo choimhcheangal.

21 Agus tarlaidh, an uair a thig mòran olc agus àmhgharan orra, gu'n labhair⁴ an laoidh so mar fhianuis 'nan aghaidh; oir cha d'cluinnibhear i á beul an sliochd: oir is aithne dhomh an smuaintean a tha iad a' dealbh an diugh *féin*, mun d'thug mi steach iad do'n fhearann a mhionnaich mi.

22 Sgrìobh uime sin Maois an laoidh so air an là sin féin, agus teagaisg e i do chloinn Israeil.

23 Agus dh'àithn e do Iosua mac Nuin, agus thubhairt e, Bi làidir, agus biodh deadh mhisneach agad: oir bheir thu clann Israeil do'n fhearann a mhionnaich mi dhoibh; agus bithidh mise maille riut.

24 Agus an uair a chuir Maois crìoch air sgrìobhadh bhriathran an lagha so ann an leabhar, gus an do chrìochnaich eadh iad,

25 An sin dh'àithn Maois do na Lebhithich, a tha giùlan àirce coimhcheangail an Tighearna, ag ràdh,

26 Gabhaibh leabhar an lagha so, agus cuiribh e aig taobh àirce coimhcheangail an Tighearna bhur Dé, chum gu'm bi e 'n sin mar fhianuis a't' aghaidh.

27 Oir is aithne dhomh do channaire, agus do mhuineal rag: feuch, am feadh 's a ta mi fathast beò maille ribh an diugh, bha sibh ceannaireach an aghaidh an Tighearna; agus cia's mò na sin a *bhitheas sibh* an déigh mo bhàis?

28 Cruinnichibh a' m' ionnsnidh seanaire bhur treubhan uile, agus bhur luchd-riaghlaidh, a chum gu'n labhair mi 'nan clusaibh na briathra so, agus gu'n gairm mi na nèamhan agus an talamh mar fhianuis an aghaidh.

29 Oir tha fhios agam, an déigh mo bhàis gu'n truail sibh *sibh féin* gu tur, agus gu'n téid sibh a thaobh o'n t-slighe

¹ stuadh. ² thrioblaidhean, theanntachdan.

³ òran.

⁴ freagair.

a dh'àithn mi dhuibh; agus thig olc oirbh anns na làitheibh deireannach, a chionn gu'n dean sibh olc ann an sealladh an Tighearna, 'ga bhrosnachadh gu feirg le h-obair bhur làmh.

30 Agus labhair Maois ann an cluasaibh uile chomhchruinnich Israeil briathra na laoidhe so, gus an do chrìochnaicheadh iad.

CAIB. XXXII.

1 *Laoidh Mhaois.* 46 *Tha e a' toirt earail do'n t-shluagh, gu'n socraicheadh iad an cridhe air na nithibh a bha air an cur an cèill dhoibh innte.*

CLUINNIBH, O a nèamhan, agus labhraidh mi; agus éisdeadh an talamh ri briathraibh¹ mo bheoil.

2 Silidh mar an t-uisge mo theagasg, tuitidh mar an drùchd mo chainnt; mar mhìn-uisge air an lus mhaoth, agus mar fhrasan air an fheur;

3 A chionn gu'm foillsich mi,² ainm an Tighearna: thugaibh-se mòrachd d'ar Dia-ne.

4 *Is esan a' charraig, tha 'obair iomlan; oir is breitheanas a shlighean uile: Dia na firinn, agus gun eucoir, cothromach agus ceart tha esan.*

4 Thruaill siad iad fèin, cha 'n e an smail smala chloinne-san: *is ginealach coirbte*³ agus fiar iad.

6 An ann mar so a dh'ìocas sibh⁴ do'n Tighearn, O a shluagh amaideach agus gun chéill? nach esan t'athair a cheannaich thu? nach d'rimn e thu, agus nach do dhaingnich e thu?

7 Cuimhnich na làithean o chian, thoir fa'near bliadhna nà iomadh ginealach: fiosraich dot'athair, agus nochdaidh⁵ e dhuit; do d' sheanairibh, agus innsidh iad dhuit.

8 'Nuair a roinn an Tì a's ro-àirde do na cinnich an oighreachd, an uair a sgar e mic Adhaimh o *chéile*, shuidhich e crìochan nan sluagh a réir àireimh chloinn Israeil:

9 Oir *is e* 'shluagh cuibhrionn an Tigh-earn; *is e* Iacob crannchur 'oighreachd-san.

10 Fhuair e ann am fearann fàs e, eadhon ann am fàsach falamh *làn* ulfhartaich⁶: thèoraich e mu'n cuairt e, theagaisg se e, ghléidh e mar ubhal a shùla e.

11 Mar a charaicheas⁷ iolar suas a nead, a dh'itealaicheas i os ceann⁸ a h-àlaich, a sgaoileas i mach a sgiathan, a ghabhas i iad, a ghiùlaineas i iad air a sgiathaibh;

12 *Mar sin* thèoraich an Tighearna 'na

aonar esan, agus cha robh Dia coigreach maille ris.

13 Thug e air marcachd air àitibh àrda na talmhainn, a chum gu'n itheadh e toradh an fhearainn, agus thug e air mil a dheothal⁹ as a' charraig, agus oladh as a' charraig aibhinn;

14 Im cruiddh, agus bainne chaorach, maille ri 'saill uan agus reitheachan do shìol¹⁰ Bhasain, agus ghabhar, maille ri reamhrachd airnean a' chruithneachd; agus dh'òl thu fuil fhìor-ghlan nam fion-dhearc.

15 Ach dh'fhàs Iesurun reamhar, agus bhreab e; tha thu air cinntinn reamhar, tha thu air fàs tiugh, tha thu còmhdaichte *le saill*: an sin thréig e an Dia a rinn e, agus rinn e dìmeas air carraig a shlàinte.

16 Bhrosnaich iad e gu h-eud le *diathaibh* eile¹¹, le gràineileachdaibh chuir iad corruich air.

17 Dh'ìobair iad do dheamhnaibh cha 'n ann do Dhia; do dhiathaibh nach b'aithne dhoibh, do *dhiathaibh* nuadh a dh'ùr-éirich suas, roimh nach robh eagal air bhur n-aithrichibh.

18 Air a' charraig a ghin thu tha thu mi-chuimhneachail, agus tha thu dearmadach air an Dia a dhealbha thu.

19 Agus an uair a chunnaic an Tigh-earn e, ghabh e gràin *diubh*¹², air son brosnachaidh a mhac agus a nigheana.

20 Agus thubhairt e, Fòlaichidh mi mo ghnùis uatha, chì mi cìod *is* crìoch dhoibh: oir *is* ginealach ro choirbte¹³ iad, clann anns nach 'eil creidimh.

21 Rinn iad eudmhor mise¹⁴ leis an *ni* nach Dia, bhrosnaich¹⁵ iad mi gu feirg le 'n diomhanais. agus ni mise eudmhor iadsan leo-san nach 'eil 'nan sluagh, brosnachidh mi iad gu feirg le cinneach amaideach.

22 Oir tha teine air fhadadh a'm' fheirg, agus loisgidh e gu h-ifrinn iochdraich¹⁶, agus cuiridh e as do'¹⁷ 'n talamh le 'thoradh, agus cuiridh e ri theine bun-aite nam beann.

23 Carnaidh mi suas uile¹⁸ orra, mo shaighdean caithidh mi orra.

24 Claidhear¹⁹ iad le h-ocras²⁰, agus cuirear as doibh le teas loisgeach, agus le sgrios searbh: fìaclan fhiadh-bheathaiche mar an ceudna cuiridh mi orra, maille ri nimh nathraichean an duslaich.

25 O'n leth a muigh sgriosaidh an claidheamh, agus o'n leth a stigh uamhann, araon an t-òig-fhear agus an òigh, an crìochran agus fear na gruaige léithe.

¹ éisd, O thalamh, ri briathraibh. ² cuir mi an cèill, gairm mi air. ³ aingidh. ⁴ An e so an éiric a bheir sibh? ⁵ taisbeanaidh. ⁶ fàsach uamhora gun àiteach. ⁷ ghléidheas, ghabhas iolar crum a' nead. ⁸ a' luidheas i gu cuomh air. ⁹ shùghadh. ¹⁰ shìochd.

¹¹ coimheach. ¹² rinn e tàir orra. ¹³ ro chrosta. ¹⁴ Dhùisg iad gu h-eud mise. ¹⁵ phrosnaich. ¹⁶ gusan doimhne a's iochdraiche. ¹⁷ ithidh e suas. ¹⁸ dòrainnean. ¹⁹ Loisgear. ²⁰ gortadh.

26 Thubhairt mi, Sgapaidd mi iad gu cùiltibh, bheir mi air an cuimhne sgur o mheasg dhaoine:

27 Mur bhitheadh gu'n robh eagal orm roimh chorruih an nàmhaid, air eagal gu'n giùlainheadh an eascairdean iad féin gu mi-chubhaidh, air eagal gu'n abradh iad, *Is i ar làmh àrd-ne¹*, agus cha 'n e an Tighearn a rinn so uile.

28 *Or is cinneach gun chomhairle iad, ni mò a tha tuigse ann.*

29 O gu'm biodh iad glic, *gu'n tuigheadh iad so, gu'n tugadh iad fa'near an crìoch dheireannach¹*.

30 Cionnus a chuireadh a h-aon ruaig air mìle, agus a chuireadh dithis deich mìle air theicheadh, mur biodh an carraig air au reiceadh, agus mur biodh an Tighearn air an druicheadh suas?

31 Oir mar ar carraig-ne cha 'n 'eil an carraig-san, air bhi d'ar naimhdibh féin 'nam breitheamhnaibh.

32 Oir do fhìonain Shodoim *tha 'm fionain-san*, agus do mhacharaibh Ghomorra: *is fion-dhearcan mharbhtach²* am fion dhearcan, *tha 'm bagaidean searbh:*

33 *Is e nimh nan dràgon am fion*, agus puinsion³ an-ìochdmhor nan nathraichean nimhe⁴.

34 Nach 'eil so air a thasgaidh suas agam, air a sheulachadh a'm ionmhasaibh?

35 Dhomhsa *buinidh* dìoghaltas, agus luagheachd; ri h-uine sleamhnaichidh an cos: oir *tha là an sgrìos am fagus*, agus *tha na nithe a thig orra a' deanamh deifir.*

36 Oir bheir an Tighearna breth air a shluagh, agus gabhaidh e aithreachas a thaobh a sheirbhiseacha, 'nuair a chi e gu'n d'fhalbh an neart, agus nach 'eil neach dhiubh air a dhruicheadh suas, no air fhàgail⁵.

37 Agus their e, *C'àit am bheil an diathan, a' charraig as an d'earb iad.*

38 A dh'ith saill an ìobairtean, a dh'òl fion an tabhartais-dibhe? éireadh iad suas, agus cuidicheadh iad leibh; bith-eadh iad dhiubh 'nan didean.

39 Faicibh a nis gur mise, *eadhon* mise e, agus nach 'eil Dia sam bith maille riom: marbhaidh mi, agus beothaichidh mi; iotaidh mi, agus leighisidh mi: agus cha 'n'eil neach ann a shaoras as mo làimh.

40 Oir togaidh mi suas mo làmh gu nàmh, agus their mi, *Is beò mise gu sìorruidh.*

41 Ma gheuraicheas mi mo chlaidheamh lasarach⁶, agus ma ni mo làmh greim air

breitheanas, iotaidh mi dìoghaltas do m' naimhdibh, agus bheir mi luagheachd dhoibhsan aig am bheil fuath orm.

42 Cuiridh mi air mhisg mo shaighdean le fuil, agus itidh mi chlaidheamh suas feoil; *eadhon* le fuil nam marbh, agus nam braighdean, o thoiseach nan dìoghaltas air an nàmhaid.

43 Deanaibh gairdeachas, O chinn-eacha, *maille r'a shluagh-san*: oir dìolaidh e fuil a sheirbhiseach, agus ni e dìoghaltas air 'eascairidh, agus bithidh e trócaireach d'a thir, agus d'a shluagh féin.

44 Agus thàinig Maois, agus labhair e uile bhriathra na laoidh so ann an éisd-eachd an t-sluaigh, e féin agus Hosea mac Nuin.

45 Agus chuir Maois crìoch air na briathra sin uile a labhairt ri h-Israel uile.

46 Agus thubhairt e riu, Socraichibh bhur cridhe air na focail uile air am bheil mise a' toirt fianuis 'nur measg air an là'n diugh, a dh'àithneas sibh d'ur cloinn a choimhead, a chum gu'n dean iad uile bhriathran an lagha so.

47 Oir cha ni diomhain e dhuibh, a chionn gur e bhur beatha e; agus leis an ni so buanaichidh sibh *bhur* làithean san fhearann a tha sibh a' dol a null thar Jordan g'a shealbhadh.

48 Agus labhair an Tighearna ri Maois san là sin féin, ag ràdh,

49 Imich suas do'n bheinn so Abarim, do shliabh Nebo, a *tha ann an tìr Mheab, a tha fa chomhair Iericho*, agus gabh sealladh do thìr Chauaain, a *tha mi a' toirt do chloinn Israel mar sheilbh;*

50 Agus gheibh thu bàs san t-sliabh d'an téid thu suas, agus cruinnicheadh thu chum do dhaoine; mar a fhuair Aaron do bhràthair bàs ann an sliabh Hor, agus a chruinnicheadh e chum a dhaoine:

51 A chionn gu'n do chiontaich sibh a'm' aghaidh-sa am measg chloinn Israel, aig uisgeachaibh Mheribah-Cades, ann am fàsach Shin; do bhrìgh nach do naomhaich sibh mi am meadhon chloinn Israel.

52 Gidheadh chi thu am fearann fa d' chomhair; ach cha téid thu steach do'n fhearann a *tha* mi tabhairt do chloinn Israel.

CAIB. XXXIII.

1 *Morachd Dhé.* 6 *Beannachadh an dà theubh dheug.*

A GUS *is e* so am beannachadh leis an clann Israel roimh a bhàs.

2 Agus thubhairt e, Thàinig an Tighearn o Shinaì, agus dh'éirich e suas dhoibh

¹ Tha ar làmh àrd.

² nimhe, domblais.

³ nimh, gath.

⁴ asp.

⁵ a làthair.

⁶ dealrach, òbththa.

⁷ duine. Eabh.

o Sheir; dhealraich e mach o shliabh Pharain, agus thàinig e le deich mìle do naomh: o' dheas làimh *chaidh* lagh teine mach dhoibh.

3 Seadh, ghràdhaich e 'n sluagh; *tha* a naomh uile a'd' làimh: agus shuidh iad sìos aig do chosaibh; gheibh *gach neach* do dh' bhrìathraibh.

4 Dh' àithn Maois lagh dhuinn, *mar* oighreachd do chomhchruinneach Iacuib.

5 Agus bha e 'na rìgh ann an Iesurun, an uair a chruinnich ceannardan¹ an t-sluaigh agus treubhan Israel an ceann a chéile.

6 Biodh Reuben beò, agus na faigh-eadh e bàs; agus bitheadh a dhaoine *lionmhor* an àireamh.

7 Agus *is* e so *beannachadh* Iudah: agus thubhairt e, Eisd, a Thighearna, ri guth Iudah, agus thoir e chum a shluaigh: biodh a làmhan foghainteach dha, agus bi-sa a'd' chòmhnadh² *aige* o 'naimh-dibh.

8 Agus mu Lebhi thubhairt e, *Biodh* do Thumim agus t'Urim aig t'aon naomh, a dhearbhu thu aig Masah, ris an d' rinn thu strì aig uisgeachaibh Mheribah;

9 A thubhairt r'a athair agus r'a mhàthair, Cha 'n fhaca mi e; agus cha do ghabh e³ r'a bhràithribh, agus cha d'aithnich e a chlann féin: oir choimhid iad t'fhocail, agus ghléidh iad do choimh-cheangal.

10 Teagaisgidh iad do bhreitheanas do Iacob, agus do lagh do Israel: cuiridh iad tuisfa d' chomhair, agus làn iob-airt-loisgte air t'altair.

11 Beannaich, O Thighearna, a mhaoin⁴, agus gabh ri obair a làmh: buail troimh leasraidh na muinntir a dh'éireas 'na aghaidh, agus na muinntir le 'm fuathach e, chum nach éirich iad a ris.

12 Mu Bheniamin thubhairt e, Gabhaidh aon gràdhach an Tighearna còmh-nuidh ann an tèaruinteachd làimh ris; agus còmhdaichidh an Tighearna e rè an là uile, agus gabhaidh e còmhnuidh eadar a ghuailibh.

13 Agus mu Ioseph thubhairt e, Beannaichte o'n Tighearna *gu robh* 'fhearann, a thaobh nithe luachmhor nèimh, a thaobh an drùchd, agus a thaobh na doimhne tha 'na luidhe shìos,

14 Agus a thaobh nan toradh luachmhor a *bheirear* a mach leis a' ghréin, agus a thaobh nan nithe luachmhor a chuirear a mach leis gach mìos⁵,

15 Agus a thaobh prìomh⁶ nithe nam

beann aosda⁷, agus a thaobh nithe luachmhor nan sliabh sìorruidh.

16 Agus a thaobh nithe luachmhor na talmhainn, agus a làin, agus deadh-ghean an Tì sin a bha chòmhnuidh sa' phreas: thigeadh *am beannachd* air ceann Ioseph, agus air mullach a chinu-san a sgaradh o 'bhràithribh.

17 Mar cheud-ghin a thairbh *tha* a sgèimh⁸, agus *mar* adhaircean nan aon-adharcach⁹ *tha* 'adhaircean-sa: leo so purraidh¹⁰ e 'n sluagh le chéile, gu h-ìomallaibh na talmhainn: agus *is* iad so deich mìltean Ephraim, agus *is* iad so mìltean Mhanaseh.

18 Agus mu Shebulum thubhairt e, Dean gairdeachas, a Shebuluin, a'd' dhol a mach; agus Isachair, a'd' bhùth-aibh.

19 Gairmidh iad an sluagh a chum na beinne; an sin iobraidh iad iobairtean, ionracais: oir pailteas nan cuan sùgaidh¹¹ iad suas, agus ionmhais fholaichte na gaineimh.

20 Agus mu Ghad thubhairt e, Beannaichte *gu robh* esan a leudaicheas¹² Gad: mar leòmhann tha e gabhail còmhnuidh, agus reubaidh e 'n gairdean maille ri mullach a' chinn.

21 Agus dheasaich e a' cheud chuid dha féin, a chionn an sin, *ann an* cuibhrionn an lagh-thabhartaigh, gu'n do shuidhich-eadh e; agus thàinig e *maille ri* ceannardaibh an t-sluaigh; ceartas an Tighearna chuir e 'n gnìomh, agus a bhreithe-eanaid ri h-Israel.

22 Agus mu Dhan thubhairt e, *Is* cuilean leòmhain Dan: leumaidh e o Bhasan.

23 Agus mu Naphtali thubhairt e, O Naphtali, sàsuichte le deadh-ghean, agus làn do bheannachadh an Tighearna, sealbhaich thusa an àird' an iar agus an àirde deas.

24 Agus mu Aser thubhairt e, *Biodh* Aser beannaichte le cloinn; biodh e taitneach d'a bhràithribh, agus tumadh¹³ e a chos ann an oladh.

25 *Bithidh* do bhrògan 'nan iarunn agus 'nan umha¹⁴; agus mar do làitlean *is amhluidh* bhios do neart¹⁵.

26 Cha 'n'eil neach cosmhuil ri Dia Iesuruin, a *tha* marcachd air nèamh a'd' chòmhnadh, agus 'na mhòrachd¹⁶ air na speuraibh.

27 *Is* e 'n Dia bith-bhuan do thearmunn, agus fuidhe *tha* na gairdeana sìorruidh: agus fuadaichidh e mach an nàmhaid romhad, agus their e, Cuir as *da*.

¹ cinn. Eabh.

² chongnamh. Eir.

³ cha d'aicidh e 'bhràithrean.

⁴ a neart, a shluagh.

⁵ leis a' ghealaich.

⁶ ceud, àrd.

⁷ beannan an àirde 'n ear. Eabh.

⁸ a ghloir, a mhaise.

⁹ an t-sròn-adharcach;

Rhinoceros. Sasg.

¹⁰ sàthaidh.

¹¹ sùghaidh, deothalaidh.

¹² dh'fharsaingicheas.

¹³ tomadh, bogadh.

¹⁴ Bithidh iarunn

agus umha fo d' chosaibh; bithidh do chroinn no do ghlasan a dh'iarunn agus a dh'umha.

¹⁵ do shith.

¹⁶ oirdheirceas.

28 An sin gabhaidh Israel còmhuidh gu tèaruinte¹ na aonar: *bithidh* tobar la-coib air fearann arbhair agus fiona; mar an ceudna silidh a nèamha nuas drùchd.

29 *Is* sonadh thu, O Israeil: cò *tha* cosmhuil riut, O shluagh, a shaoradh leis an Tighearna, sgiath do chòmlmadh, agus neach is e claidheamh do mhòrachd? agus gheibhear do naimhde 'nam breug-airibh dhuit, agus saltraidh tu air an àit-ibh àrda.

CAIB. XXXIV.

1 O shliabh Nebo fhuair Maois sealladh do thìr Chanaain. 5 A bhàs agus 'adhlac. 7 'Aois. 8 An tuireadh air a shon. 10 A chliù.

AGUS chaidh Maois suas o chòml-nardaibh Mhoib gu sliabh Nebo, gu mullach Phisgah¹, a *tha* thall fa chomhair Iericho: agus nochd an Tighearna dha fearann Ghilead uile gu Dan,

2 Agus Naphtali uile, agus tìr Ephraim, agus Mhanaseh, agus tìr Iudah uile, gu ruig an fhaireg a's faide mach,

3 Agus an taobh deas, agus còmhnaidh glinne Iericho, baile nan craobh pailm, gu ruig Soar.

4 Agus thubhairt an Tighearna ris, *Is* e so ann fearann a mhionnaich mi do Abraham, do Isaac, agus do Jacob, ag ràdh, Do d' shliochd-sa bheir mi e: thug mi ortsa 'fhaicinn le d' shùilibh, ach d' a ionnsuidh cha téid thu thairis.

¹ na beinne. Eabh.

² robh a shùil dall.

5 Agus fhuair Maois, òglach an Tighearna, bàs an sin, ann am fearann Mhoib, a réir focail an Tighearna.

6 Agus dh'adhlac e ann an gleann e, ann am fearann Mhoib, thall fa chomhair Bhet-peoir: ach cha 'n aithne do dhuine sam bith 'uaigh gus an là'n diugh.

7 Agus *bha* Maois ceud agus fichead bliadhna dh'aois an uair a fhuair e bàs: cha d'fhàilnich a shùil², ni mò a thréig a neart e³.

8 Agus ghuil clann Israeil air son Mhaois ann an còmhnairdaibh Mhoib deich làithean 'ar fhichead: mar so chrìochnaiceadh làithean a' ghuil agus a' bhròin air son Mhaois.

9 Agus *bha* Iosua mac Nuin làn do spiorad a' ghliocais; oir chuir Maois a làmhnan air: agus dh'èisd clann Israeil ris, agus rinn iad mar a dh'àithn an Tighearna do Mhaois.

10 Agus cha d'èirich fàidh o sin ann an Israel cosmhuil ri Maois, neach a b' aithne do'n Tighearna aghaidh ri h-aghaidh;

11 Anns na h-uile chomharaibh, agus iongantasaibh a chuir an Tighearna e a dheanamh ann an tìr na h-Eiphit, air Pharaoh⁴, agus air a sheirbhisich uile, agus air 'fhearann uile,

12 Agus anns an làimh chumhachdaich sin uile, agus anns an uamhas mhòr uile, a dh'oibrich Maois ann an sealladh Israeil uile.

³ lùghdaicheadh a chàil. ⁴ an aghaidh Pharaoh.

IOSUA.

CAIB. I.

1 Dh'orduich an Tighearna Iosua an àite Mhaois. 5, 7 Gheall e bhì maille ris: 8 thug e riaghailtean dha a thaobh a ghiùlain

ANIS, an deigh bàis Mhaois, òglach an Tighearna, labhair an Tighearna ri Iosua, mac Nuin, fear-frithealaidh Mhaois, ag ràdh,

2 Tha m'òglach Maois marbh: a nis uime sin éirich, gabh thairis air Iordan so, thu féin, agus an sluagh so uile, dh'ionnsuidh na tìre a tha mise a' tabhairt dhoibh, *eadhon* do chloinn Israeil.

3 Gach ionad air an saltair bonn bhur coise, sin thug mi dhuibh, mar a' thubhairt mi ri Maois.

4 O'n fhàsach, agus Lebanon so, eadhon gus an amhainn mhòir, amhainn Euphrates, tìr nan Hiteach uile, agus gus an fhaireg mhòir, leth ri dol fuidhe na gréine, bithidh 'na chrìch dhuibh.

5 Cha'n urrainn duine sam bith seasamh

a' d' aghaidh uile làithean do bheatha. Mar a bha mi le Maois, *mar sin* bithidh mi leatsa: cha dèir mi thu, agus cha tréig mi thu.

6 Bì làidir, agus ro mhisneachail; oir do'n t-sluagh so roinnidh tu mar oighreachd an tìr a mhionnaich mi d'an aithrichibh¹ a thabhairt doibh.

7 A mhàin bi-sa làidir agus ro misneachail, a chum gu'n toir thu 'n aire gu'n dean thu a réir an lagha uile a dh'àithn m'òglach Maois dhuit: na tionndaidh uaith dh'ionnsuidh na làimhe deise no dh'ionnsuidh na làimhe clìthe, a chum gu'n soirbhich leat anns gach àite d'an téid thu.

8 Cha téid leabhar an lagha so as do bheul; ach beachd-smuainichidh tu air a là agus a dh'oidheche, chum gu'n toir thu 'n aire gu'n dean thu a réir gach *nì a ta*

¹ aithreachaibh.

sgriobhta ann: oir an sin bheir thu air do shlighe soirbheachadh leat, agus an sin ni thu gu glic¹.

9 Nach d'àithn mise dhuit? Bi làidir agus ro mhisneachail; na bi fo eagal, agus na biodh faichteas ort: oir *tha 'n Tighearna do Dhia* leat anns gach *ionad* d'an téid thu.

10 An sin dh'àithn Iosua doluchd-riaghlaidh an t-sluaigh, ag ràdh,

11 Rachaibh troimh'n champ, agus àithnibh do'n t-sluaigh, ag ràdh, Deasaichibh dhuibh féin lòn; oir an ceann thri làithean théid sibh thar Iordan so, a dhol a stigh a shealbhachadh na tíre a *tha 'n Tighearna* bhur Dia a' toirt duibh r'a sealbhachadh.

12 Agus ris na Reubenich, agus ris na Gadaich, agus ri leth thréibh Mhanaseh, labhair Iosua, ag ràdh,

13 Cuimhnichibh am focal a dh'àithn Maois oglach an Tighearna dhuibh, ag ràdh, Thug an Tighearna bhur Dia fois duibh, agus thug e dhuibh an tìr so.

14 Fanaidh bhur mnàì, bhur clann bheag, agus bhur spréidh, san tìr a thug Maois dhuibh air an taobh so do Iordan; ach théid sibh féin thairis fo'r n-armaibh roimh bhur bràithrean, sibhse uile a tha treun ann an neart, agus cuidichidh sibh leo;

15 Gus an toir an Tighearna fois d'ur bràithribh, mar a *thug e* dhuibhse, agus gu'n sealbhaich iadsan mar an ceudna an tìr a *tha 'n Tighearna* bhur Dia a' tabhairt doibh: an sin pillidh sibh gu tìr bhur seilbhe, agus sealbhaichidh sibh i, *eadhon an tìr* a thug Maois oglach an Tighearna dhuibh air an taobh so do Iordan, leth ri éirigh na gréine.

16 Agus fhreagair iad Iosua, ag ràdh, Na h-uile *nithe* a dh'àithn thu dhuinne, ni sinn; agus ge b'e taobh a chuireas tu sinn, théid sinn.

17 A réir mar a dh'éisd sinn ri Maois anns na h-uile *nithibh*, mar sin éisdidh sinn riutsa: a mhàin biodh an Tighearna do Dhia maille riut, mar a bha e maille ri Maois.

18 Gach duine a chuireas an aghaidh t'àithne, agus nach éisd ri d' bhrìathraibh, anns na h-uile *nithibh* a dh'àithneas tu dha, cuirear gu bàs e: a mhàin bi làidir, agus ro mhisneachail.

CAIB. II.

1 *Thug Rahab aoidheachd do'n dithis dhaoine a thàinig á Sitim a rannsachadh na tíre.* 8 *An coimheangal eadar ise agus iadsan.*

AGUS chuir Iosua mac Nuin a mach á Sitim dithis dhaoine a rannsachadh a mach gu h-uaigneach, ag ràdh, Imichibh, rannsaichibh a mach an tìr, agus Iericho:

agus dh'imich iad, agus chaidh iad a steach do thigh striopaich, d'am b'ainm Rahab, agus luidh iad an sin.

2 Agus dh'innseadh do rìgh Iericho, ag ràdh, Feuch, thàinig daoine an so an nochd, do chloinn Israeil, a rannsachadh a mach na tíre.

3 Agus chuir rìgh Iericho *teachdaire* gu Rahab, ag ràdh, Thoir a mach na daoine a thàinig a t'ionnsuidh, a chaidh steach do d' thigh: oir is ann a rannsachadh a mach na tíre uile a thàinig iad.

4 Agus ghabh a' bhean an dithis dhaoine, agus dh'fholaich i iad, agus thubhairt i mar so, Thàinig gun amharus daoine a m' ionnsuidh, ach cha robh fhios agam cia as a thàinig iad:

5 Agus thachair *mu àm* druididh a' gheata¹ nuair a bha e dorcha, gu'n deachaidh na daoine mach: c'ait a ghabh na daoine, cha'n fhios domh: leanaibh gu luath air an tòir, oir beiridh sibh orra.

6 Ach bha i air an toirt suas gu mullach an tighe, agus air am folach le cuiseagaibh an lìn, a leag i an ordugh air mullach an tighe.

7 Agus lean na daoine air an tòir san t-slighe gu Iordan, gu ruig² na h-àthanna agus co luath as a chaidh a' mhuinntir a bh'air an tòir a mach, dhruid iad an geata.

8 Agus mun robh iad air luidhe sìos, chaidh i suas d'an ionnsuidh air mullach an tighe;

9 Agus thubhairt i ris na daoineibh, Tha fios agam gu bheil an Tighearna air toirt duibh na tíre, agus gu bheil bhuir n-uamhas air tuiteam oirne, agus gu bheil luchd-àiteachaidh na tíre uile air leaghadh as le h-eagal³ roimhibh:

10 Oir chuala sinne cionnus a thiormaich an Tighearna suas uisge na mara ruaidhe roimhibh, nuair a thàinig sibh a mach as an Eiphit; agus ciod a rinn sibh air dà rìgh nan Amorach, a bh'air an taobh eile do Iordan, Sihon agus Og, a sgrios sibh gu tur.

11 Agus co luath as a chuala sinne *na nithe sin*, leagh ar cridheachan, agus cha d'fhan tuilleadh a bheag do mhisiuch ann an duine sam bith air bhur sonsa: oir an Tighearna bhur Dia, is esan Dia anns na nèamhaibh shuas, agus air an talamh bhos⁴.

12 A nis uime sin guidheam oirbh, mìonnaichibh dhomh air an Tighearna, a chionn gu'n do nochd mi caoimhneas dhuibh, gu'n nochd sibhse mar an ceudna caoimhneas do thigh m'athar-sa, agus gu'n toir sibh dhomh comhara cinnteach⁵;

13 Agus gu'n gléidh sibh beò m'athair, agus mo mhàthair, agus mo bhràithrean,

¹ éiridh gu maith dhuit.

² gu nuig.

³ air fannachadh.

⁴ sìos.

⁵ firinn. Eabh.

agus mo pheathraichean, agus na h-uile a ta aca, agus gu'n saor sibh ar n-anamanna¹ o'n bhàs.

14 Agus fhreagair na daoine i, Ar n-anam-ne air bhur son-sa gu bàs, mur foillsich sibh an gnothuch so againn. Agus tarlaidh, nuair a bheir an Tighearna dhuinn an tìr, gu'm buin sinn gu caoimhneil agus gu fìrinneach riutsa.

15 An sin leig i sìos iad air cord troimh² 'n uinneig: oir bha a tigh air balla a' bhaile³, agus bha i chòmhnuidh air a' bhalla.

16 Agus thubhairt i riu, Thugaibh am monadh⁴ oirbh, air eagal gu'n coinnich an luchd tòrachd sibh; agus folaichibh sibh fèin an sin trì làithean, gus am bi'n luchd tòrachd air pilltinn, agus an déigh sin feudaidh sibh imeachd air bhur slighe.

17 Agus thubhairt na daoine rithe⁵, Bithidh sinne neò-chiontach a thaobh iad so domhionnan a thug thu oirnn a mhionnachadh.

18 Feuch, 'nuair a thig sinn do'n tìr, ceanglaidh tu an stiom⁶ so do shnàth scarlaist anns an uinneig troimh an do leig thu sìos sinn: agus bheir thu t'athair, agus do mhàthair, agus do bhràithrean, agus teaghlach t'athar uile, dhachaidh a t'ionnsuidh.

19 Agus tarlaidh, ge b'e neach a théid a mach air dorsaibh do thighe do'n t-sràid, gu'm bi 'fhuil air a cheann fèin, agus bithidh sinne neò-chiontach: agus ge b'e neach a bhios maille riut anns an tigh, bithidh 'fhuil air ar ceann-ne, ma bheanas làmh ris.

20 Agus ma dh'fhoillsicheas tu an gnothuch so againn, an sin bithidh sinne saor o d' mhionnaibh a thug thu oirnn a mhionnachadh.

21 Agus thubhairt ise, A réir bhur briathra, mar sin bithidh e. Agus chuir i air falbh iad, agus dh'imich iad: agus cheangail i an stiom scarlaist anns an uinneig.

22 Agus dh'fhalbh iad, agus thàinig iad do'n mhonadh, agus dh'fhan iad an sin trì làithean, gus an do phill an luchd tòrachd. Agus dh'iarr an luchd tòrachd iad air feadh na slighe uile, ach cha d'fhuair siad iad.

23 Mar sin phill an dithis dhaoine, agus chaidh iad sìos o'n mhonadh, agus chaidh iad thairis, agus thàinig iad gu Iosua mac Nuin, agus dh'innis iad da gach ni a thachair dhoibh.

24 Agus thubhairt iad ri Iosua, Gu fìrinneach thug an Tighearna thairis d'ar làmh am fearann uile: oir tha eadhon luchd-àiteachaidh na tìre uile air leaghadh as fa'd comhair.

1 Thàinig Iosua gu Iordan. 7 Thug Dia misneach dha, 9 agus thug esan misneach do'n t-sluagh.

AGUS dh'èirich Iosua gu moch sa' mhaduinn; agus dh'imich iad o Shitim, agus thàinig iad gu Iordan, e fèin agus clann Israeil uile, agus ghabh iad tàmh an sin mun deachaidh iad thairis.

2 Agus an ceann trì làithean, chaidh an luchd-riaghlaidh troimh 'n champ⁷;

3 Agus dh'àithn iad do'n t-sluagh, ag ràdh, 'Nuair a chisibh àirc coimhcheangail an Tighearna bhur Dé, agus na sagairt na Lebhithich 'ga giùlan, an sin gluaisidh sibh o'r n-àit, agus théid sibh 'na déigh.

4 Gidheadh bithidh astar eadar sibh agus i, mu thimchioll dà mhìle làmh-choille do thomhas: na tigibh am fagus di, a chum gu'm bi fios na slighe agaibh air am feum sibh imeachd; oir cha doghabh sibh riamh roimhe an rathad so.

5 Agus thubhairt Iosua ris an t-sluagh, Naomhaichibh sibh fèin; oir am màireach ni 'n Tighearna nìthe iongantach 'nur measg.

6 Agus labhair Iosua ris na sagartaibh, ag ràdh, Togaibh suas àirc a' choimhcheangail, agus rachaibh thairis roimh 'n t-sluagh. Agus thog iad suas àirc a' choimhcheangail agus chaidh iad roimh 'n t-sluagh.

7 Agus thubhairt an Tighearna ri Iosua, An diugh tòisichidh mi air thusa dheanamh mòr ann an sealladh Israeil uile, a chum gu'm bi fios aca, mar a bha mi le Maois, gu'm bi mi leatsa.

8 Agus bheir thu àithne do na sagartaibh a tha giùlan àirc a' choimhcheangail, ag ràdh, 'Nuair a bhios sibh air teachd gu foir uisge Iordain, ann an Iordan seasaibh sibh.

9 Agus thubhairt Iosua ri cloinn Israeil, Thigibh an so, agus èisidh ri briathraibh an Tighearna bhur Dé.

10 Agus thubhairt Iosua, Le so bithidh fios agaibh gu bheil an Dia beò 'nur measg, agus gu'm fuadaich e gun teagamh a mach roimhibh na Canaanaich, agus na Hìtich, agus na Hìbhich, agus na Peridsich, agus na Girsasach, agus na h-Amoraich, agus na Iebusaich.

11 Feuch, tha àirc coimhcheangail Tighearna na talmhainn uile a' dol thairis roimhibh do Iordan.

12 A nis uime sin gabhaibh dà fhear dheug á treubhan Israeil, fear as gach tréibh.

13 Agus co luath 'sa shocraicheas na sagairt a ta giùlan àirc an Tighearna, Tighearna na talmhainn uile, buinn an cos ann an uisgeachaibh Iordain, bithidh uisgeachan Iordan air an sgaradh o na h-uisgeachaibh a thig a ngus o'n àirde; agus seasaibh iad 'nan torr.

¹ beatha. ² trid. ³ na cathrach. ⁴ a' bheinn.

⁵ ria.

⁶ cordan.

⁷ tre'n fheachd.

14 Agus an uair a dh'fhalbh an sluagh o'm bùthaibh, gu dol thar Iordan, agus na sagairt a' giùlain àirce a' choimhcheangail roimh 'n t-sluagh;

15 Agus an uair a bha iadsan a ghiùlain an àirce air teachd gu Iordan, agus a bha cosa nan sagarta a ghiùlain an àirce air an tumadhann an foiran uisge, (oir tha Iordan a' sruthadh thar a bruachan uile rè an fhogaraidh uile,)

16 An sin sheas na h-uisgeachan a thàinig a nuas o'n àirde, agus dh'éirich iad suas 'nan torr rofhuad o'n bhaile Adam, a ta làimh ri Saretan: agus theirig iadsan a chaidh sìos rathad mara a' chòmhnaird, eadhon na mara salainn, agus ghearradh as iad; agus chaidh an sluagh thairis dìreach fa chomhair Iericho.

17 Agus sheas na sagairt, a ghiùlain àirce coimhcheangail an Tighearna gu daingean¹ air talamh tioram am meadhon Iordain, agus chaidh na h-Israelich uile thairis air talamh tioram gus an robh an sluagh uile air dol thar Iordan².

CAIB. IV.

1 *Dà chloich dheug air an toirt mar chuimhneachan à meadhon àimhne Iordain: 9 dà chloich dheug eile air an cur suas 'na meadhon. 19 Chaidh an sluagh thairis.*

A GUS an uair a bha 'n sluagh uile air dol thar Iordan, an sin labhair an Tighearna ri Iosua, ag ràdh,

2 Gabhaibh dhuibh féin dà fhear dheug as an t-sluagh, duine as gach tréibh;

3 Agus àithnibh dhoibh, ag ràdh, Thugaibh leibh o so á meadhon Iordain, as an àit anns an do sheas cosa nan sagart gu daingean, dà chloich dheug; agus bheir sibh iad thairis leibh, agus cuiridh sibh iad anns an àite-tàmh anns an gabh sibh fois an nochd.

4 An sin ghairm Iosua air an dà fhear dheug, a dheasaich e á cloinn Israeil, fear as gach tréibh.

5 Agus thubhairt Iosua riu, Rachaidh thairis roimh àirce an Tighearna bhur Dégu meadhon Iordain, agus togadh gach fear dhibh clach air a ghualainn, a réir àireimh threubha chloinn Israeil.

6 A chum gu'm bi so 'na chomhara 'nùr measg, a chum 'nuair a dh'fhiosraicheas bhur clannsan àm ri teachd³, ag ràdh, Ciod is ciall duihb leis na clachaibh so?

7 An sin gu'm freagair sibh iad, Gu'n robh uisgeachan Iordain air an sgaradh o chéile roimh àirce coimhcheangail an Tighearna; 'nuair a chaidh i thar Iordan, gu'n robh uisgeachan Iordain air an sgaradh o chéile: agus bithidh na clachan so 'nan cuimhneachan do chloinn Israeil gu bràth.

8 Agus rinn clann Israeil amhuil mar a dh' àithn Iosua, agus thog iad suas dà

chloich dheug á meadhon Iordain, mar a labhair an Tighearna ri Iosua, a réir àireimh threubha chloinn Israeil, agus ghiùlain iad leo thairis iad do'n àit anns an do ghabh iad tàmh, agus chuir iad sìos an sin iad.

9 Agus chuir Iosua suas dà chloich dheug am meadhon Iordain, san ionad anns an do sheas cosa nan sagart a ghiùlain àirce a' choimhcheangail: agus tha iad an sin gus an là'n diugh.

10 Oir sheas na sagairt a ghiùlain an àirce am meadhon Iordain, gus an do chrìochnaich eadh gach ni a dh' àithn an Tighearna do Iosua a labhairt ris an t-sluagh, a réir nan uile nithe a dh' àithn Maois do Iosua: agus rinn an sluagh cabhag, agus chaidh iad thairis.

11 Agus an uair a bhla 'n sluagh uile air dol thairis, an sin chaidh àirce an Tighearna thairis, agus na sagairt, an làthair an t-sluaigh.

12 Agus chaidh clann Reubein, agus clann Ghlad, agus leth thréibh Mhanaseh, thairis fo'n armaibh roimh chloinn Israeil, mar a labhair Maois riu:

13 Chaidh thairis mu thimchioll dà fhichead mìle, deas air son cogaidh, an làthair an Tighearna gu cath, do chòmhnardaibh Iericho.

14 Air an là sin dh'àrdaich an Tighearna Iosua ann an sealladh Israeil uile, agus bha eagal orra roimhe, mar a bha eagal orra roimh Mhaois, uile làithean a bheatha.

15 Agus labhair an Tighearna ri Iosua, ag ràdh,

16 Aithn do na sagartaibh a tha giùlan àirce na Fianuis, iad a theachd a nìos á Iordan.

17 Agus dh' àithn Iosua do na sagartaibh, ag ràdh, Thigibh a nìos á Iordan.

18 Agus an uair a bha na sagairt a ghiùlain àirce coimhcheangail an Tighearna air teachd a nìos á meadhon Iordain, agus a bha buinn chos nan sagart air an togail suas air an talamh thioram, an sin phill uisgeachan Iordain d'an àite féin, agus chaidh iad thar a bruachan uile, mar a rinn iad roimhe.

19 Agus thàinig an sluagh a nìos á Iordan air an deicheamh là do'n cheud mhìos, agus champaich iad ann an Gilgal, san iomall a làimh na h-àirde 'n ear do Iericho.

20 Agus an dà chloich dheug sin, a thug iad a mach á Iordan, chuir Iosua suas ann an Gilgal.

21 Agus labhair e ri cloinn Israeil, ag ràdh, 'Nuair a dh'fhiosraicheas bhur clann d'an aithrichibh san àm ri teachd, ag ràdh, Ciod is ciall do na clachaibh so?

22 An sin bheir sibh fios d'ur cloinn, ag

¹ deas. ² gus an do chuir an sluagh uile crìoch air dol thar Iordan. Eabh. ³ am màireach. Eabh.

ràdh, Thàinig Israel thar Iordan so air talamh tioram.

23 Oir thiormaich an Tighearna bhur Dia suas uisgeachan Iordain roimhìbh-se, gus an deachaidh sibh thairis, mar a rinn an Tighearna bhur Dia air a' mhuir ruaidh, a thiormaich e suas romhainn, gus an robh sinn air dol thairis;

24 A chum gu'n aithnich sluagh na talmhainn uile làmh an Tighearna, gu bheil i cumhachdach: a chum gu'm bi eagal an Tighearna bhur Dé oirbh am feasd¹.

CAIB. V.

1 *Ghabh na Canaanach eagal. 2 An timchioll-ghearradh air 'ath-orduchadh. 10 Chumadh a' chàisg aig Gilgal. 13 Làmh ri Iericho chumnaic Iosua aingal.*

AGUS an uair a chual' uile rìghre nan Amorach, a bh' air an taobh thall do Iordan a làmh na h-àirde 'n iar, agus uile rìghre nan Canaanach, a bha làmh ris an fhairge, gu'n do thiormaich an Tighearna suas uisgeachan Iordain roimh chloinn Israeil, gus an deachaidh sinn thairis, leagh an cridhe, agus cha robh spiorad tuilleadh ann, air son chloinn Israeil.

2 Anns an àm sin thubhairt an Tighearna ri Iosua, Dean duit féin sgeinean geura², agus timchioll-ghearr clann Israeil a ris an dara uair.

3 Agus rinn Iosua dha féin sgeinean geura, agus thimchioll-ghearr e clann Israeil aig cnoc nan roimh-chroicinn.

4 Agus is e so an t-aobhar mu'n do thimchioll-ghearr Iosua: Fhuair an sluagh uile a thàinig a mach as an Eiphit, a bha 'nam firionnaich, eadhon na fir-chogaidh uile, bàs anns an fhàsach air an t-slighe, an déigh dhoibh teachd a mach as an Eiphit.

5 A nis bha 'n sluagh uile a thàinig a mach, air an timchioll-ghearradh; ach an sluagh uile a rugadh san fhàsach air an t-slighe, 'nuair a thàinig iad a mach as an Eiphit, iadsan cha do thimchioll-ghearr iad.

6 Oir dh'imich clann Israeil anns an fhàsach dà fhichead bliadhna, gus an deachaidh as³ do'n luchd-cogaidh uile a thàinig a mach as an Eiphit, a chionn nach d'thug iad géill do ghuth an Tighearna: d'an do mhionnaich an Tighearna nach nochdadh e dhoibh am fearann, a mhionnaich an Tighearna d'an aithrichibh gu'n tugadh e dhuinn, fearann a tha sruthadh le bainne agus le mil.

7 Agus an clann-san, a thog e suas 'nan àit, iadsan thimchioll-ghearr Iosua: oir bha iad neo-thimchioll-ghearrta, a chionn nach do thimchioll-ghearradh iad air an t-slighe.

8 Agus an uair a bha 'n sluagh uile air

an timchioll-ghearradh, dh'fhan iad 'nan àitibh anns a' champ, gus an robh iad slàn.

9 Agus thubhairt an Tighearna ri Iosua, Air an là 'n diugh bhuin mi air falbh uaibh masladh na h-Eiphit: uime sin thugadh Gilgal mar ainm air an àite sin gus an là 'n diugh.

10 Agus champaich clann Israeil ann an Gilgal, agus chum iad a' chàisg, air a' cheathramh là deug do'n mhios anns an fheasgar, ann an comhnardaibh Iericho.

11 Agus dh'ith iad do shean bhàrr⁴ an fhearainn air an là màireach an déigh na càisge, breacagan neo-ghoirtichte, agus sìol cruaidhichte air an là sin féin.

12 Agus guir am mana air an là màireach an déigh dhoibh itheadh do shean bhàrr an fhearainn; ni mò a bha mana tuilleadh aig cloinn Israeil, ach dh'ith iad do thoradh fearainn Chanaan air a' bhliadhna sin.

13 Agus an uair a bha Iosua làmh ri Iericho, thog e suas a shùilean agus dh'amahair e, agus, feuch, sheas duine thall fa 'chomhair, agus a chladheamh ruisgte 'na làmh: agus chaidh Iosua d'a ionnsuidh, agus thubhairt e ris, An ann leinne a tha thu, no le'r n-eascairidibh?

14 Agus thubhairt e, Cha 'n ann: ach mar cheannard slòigh an Tighearna tha mi a nis air teachd. Agus thuit Iosua air 'aghaidh air an talamh, agus rinn e aoradh, agus thubhairt e ris, Ciod a tha mo thighearn ag ràdh r'a sheirbhiseach?

15 Agus thubhairt ceannard slòigh an Tighearna ri Iosua, Fuasgail do bhròg bhàrr do chois, oir tha 'n t-ionad air am bheil thu a'd' sheasamh, naomh. Agus rinn Iosua mar sin.

CAIB. VI.

1 *Dhruideadh Iericho suas. 20 Thuit a bhalla. 22 Shuairadh Rahab agus a dèilean.*

ANIS bha Iericho air a dhruideadh suas gu teann, roimh chloinn Israeil; cha deachaidh neach air bith a mach, agus cha d'thàinig neach air bith a stigh.

2 Agus thubhairt an Tighearna ri Iosua, Feuch, thug mi do d' làmh Iericho, agus a rìgh, agus na daoine treun ann an neart.

3 Agus cuairtichidh sibh am baile, sibhse fheara-cogaidh uile, agus théid sibh mu thimchioll a' bhaile aon uair: mar so ni thu air sè làithibh.

4 Agus giùlainidh seachd sagairt roimh an àire seachd trompaidean a dh'adhaircibh reitheachan: agus air an t-seachdamh là théid sibh mu thimchioll a' bhaile seachd uairean, agus séididh na sagairt leis na trompaidibh.

5 Agus an uair a ni iad, fuaim fhada le

¹ gach là. Eabh. cruaidh. Eabh.

² sgeinean do chlocaibh do chaitheadh, do bhàsaich.

⁴ arìthar, sìol, toradh.

adhaircibh nan reitheachan, agus an uair a chluinneas sibh fuaim na trompaid, an sin éighidh an sluagh uile le h-ìolaich mhòir, agus tuitidh balla a' bhaile sìos o' bhunadh, agus théid an sluagh suas gach duine dìreach roimhe.

6 Agus ghairm Iosua mac Nuin air na sagartaibh, agus thubhairt e riu, Togaibh suas àire a' choimhcheangail, agus giùl-aineadh seachd sagairt seachd trompaid-ean a dh'adhaircibh reitheachan roimh àire an Tighearn.

7 Agus thubhairt e ris an t-sluagh, Gabhaibh air bhuir n-aghaidh, agus cuairtichibh am baile, agus gabhadh esan a tha fo armaibh air aghaidh roimh àire an Tighearn.

8 Agus an uair a labhair Iosua ris an t-sluagh, ghabh na seachd sagairt, a' giùl-an sheachd trompaid-ean a dh'adhaircibh reitheachan, air an aghaidh roimh 'n Tighearn, agus shéid iad leis na trompaidibh; agus lean àire coimhcheangail an Tighearn iad.

9 Agus chaidh na daoine armaichte roimh na sagartaibh a shéid leis na trompaidibh, agus thàinig a' chuid eile do'n t-sluagh¹ an déigh na h-àirce, na sagartan a' gabhail air an aghaidh, agus a' séideadh leis na trompaidibh.

10 Agus dh'àithn Iosua do'n t-sluagh, ag ràdh, Cha dean sibh ìolach, agus cha dean sibh fuaim sam bith le'r guth, ni mò théid focal sam bith a mach as bhuir beul, gus an là anns an abair mise ribh, Deanaibh ìolach; an sin ni sibh ìolach.

11 Mar sin chuairtich àire an Tighearn am baile, a' dol m' a thimchioll aon uair: agus thàinig iad do'n champ, agus ghabh iad tàmh anns a' champ.

12 Agus dh'éirich Iosua gu moch sa' mhaduinn, agus thog na sagairt suas àire an Tighearn.

13 Agus dh'imich air an aghaidh a ghnàth seachd sagairt, a' giùlan sheachd trompaid-ean a dh'adhaircibh reitheachan roimh àire an Tighearn, agus shéid iad leis na trompaidibh: agus dh'imich an sluagh armaichte rompa, ach thàinig a' chuid eile do'n t-sluagh an déigh àirce an Tighearn, na sagairt a' gabhail air an aghaidh, agus a' séideadh leis na trompaidibh.

14 Agus air an dara là chuairtich iad am baile aon uair, agus phill iad do'n champ: mar so rinn iad air se làithibh.

15 Agus air an t-seachdamh là dh'éirich iad gu moch mu bhriseadh na fàire², agus chuairtich iad am baile air an dòigh cheudna, seachd uairean: a mhàin air an là sin chuairtich iad am baile seachd uairean.

16 Agus air an t-seachdamh uair shéid na sagairt leis na trompaidibh, agus thubhairt Iosua ris an t-sluagh, Deanaibh ìolach; oir thug an Tighearna dhuibh am baile.

17 Agus bithidh am baile mallaichte, e féin agus gach ni a th' ann, do'n Tighearn: a mhàin bithidh Rahab an striopach beò, i féin agus iadsan uile a tha maille rithe san tigh, a chionn gu'n d'fholaich i na teachdairean a chuir sinn uainn.

18 Agus sibhse, air gach aon chor gleidhibh sibh féin o'n ni mhallaichte, air eagail gu'n dean sibh sibh féin mallaichte, 'n uair a gabhas sibh do'n ni mhallaichte, agus gu'n dean sibh camp Israeil 'na mhallachadh, agus gu'n cuir sibh e fuidh bhuaireas³.

19 Ach tha 'n t-airgid uile, agus an t-òr, agus na soithichean umha agus iarunn, coisrigte do'n Tighearna: thig iad a steach do ionnhas⁴ an Tighearn.

20 Agus rinn an sluagh ìolach an uair a shéid na sagairt leis na trompaidibh: agus an uair a chual' an sluagh fuaim na trompaid, agus a dh'éigh an sluagh le h-ìolaich mhòir, an sin thuit am balla sìos gu làr; agus chaidh an sluagh suas do'n bhaile, gach duine dìreach roimhe, agus ghlac iad am baile.

21 Agus léir-sgrìos iad gach ni a bha sa' bhaile, eadar fhear agus bhean, òg agus shean, agus dh'ann, agus chaora, agus asal, le faobhar a' chlaidheimh.

22 Ach ris an dithis fhear a rannsaich a mach an tìr thubhairt Iosua, Rachaibh a steach do thigh na striopach, agus thugaibh a mach as a sin a' bhean, agus gach ni a th'aice, mar a mhionnaich sibh dhi.

23 Agus chaidh na h-òganaich a bha 'nan luchd-rannsachaidh⁵ a stigh, agus thug iad a mach Rahab, agus a h-athair, agus a màthair, agus a bràithrean, agus gach ni a bh'aice; agus thug iad a mach a dilsen uile, agus chuir iad an taobh a muigh do champ Israeil iad.

24 Agus loisg iad am baile le teine, agus gach ni a bh' ann: a mhàin an t-airgid, agus an t-òr, agus na soithichean umha agus iarunn, chuir iad ann an ionnhas tighe an Tighearn.

25 Agus ghléidh Iosua Rahab an striopach beò, agus teaghlach a h-athar, agus gach ni a bh'aice: agus tha i 'na comhnuidh ann an Israel gus an là 'n diugh, a chionn gu'n d'fholaich i na teachdairean a chuir Iosua a rannsachadh a mach Iericho.

26 Agus chuir Iosua fuidh mhionnaibh iad san àm sin, ag ràdh, Mallaichte gu robh an duine an làthair an Tighearn, a

¹ iadsan a bh' air dheireadh. searhanaich an là.

² chamhanaich, ³ mhi-shuaimhneas.

⁴ thaisgeach.

⁵ luchd-brathaidh.

dh'éireas agus a thogas am baile so Iericho : 'na cheud-ghlin leagaidh e a bhun-achar, agus 'na *mhaic* a's òige cuiridh e suas a gheatacha.

27 Mar so bha'n Tighearna maille ri Iosua, agus sgaoileadh 'iomradh-san air feadh na tìre uile.

CAIB. VII.

1 Chuireadh an ruaig air cloinn Israeil aig Ai. 6 Gearan Iosua. 10 Nochd an Tighearna dha ciod a bhineadh dha a dheanamh. 19 Aidmheil Achain.

ACH rinn clann Israeil cionta san ni mhallaichte : oir ghabh Achan mac Charmi, mhic Shabdi, mhic Sherah, do thréibh Iudah, *cuid* do'n ni mhallaichte : agus las fearg an Tighearn an aghaidh chloinn Israeil.

2 Agus chuir Iosua daoine o Iericho gu h-Ai, a *tha* làimh ri Bet-abhen, air an taobh an ear do Bhet-el, agus labhair e riu, ag ràdh, Rachaibh suas, agus ranns-aichibh a mach an tìr. Agus chaidh na daoine suas, agus ransaich iad a mach Ai.

3 Agus phill iad gu Iosua, agus thubhairt iad ris, Na rachadh an sluagh uile suas ; ach rachadh mu thimchioll dà mhìle no trì mìle fear suas, agus buail-eadh iad Ai : na toir air an t-sluagh uile saothreachadh an sin ; oir *cha 'n'èil ann* duibh *ach* beagan.

4 Agus chaidh suas an sin do'n t-sluagh mu thimchioll trì mìle fear ; agus theich iad roimh fhèara Ai.

5 Agus bhuail ri Ai dhiubh mu thimchioll sè ri dheug thar fhichead : oir chuir iad an ruaig orra o chomhair a' gheata *eadhon* gu Sebarim, agus bhuail iad san dol sios iad ; uime sin leagh cridhe an t-sluaigh, agus dh'fhàs e mar uisge.

6 Agus reub Iosua 'eudach, agus thuit e gu làr air 'aghaidh roimh àire an Tighearna, gu tràth feasgair, e féin agus seanairean Israeil, agus chuir iad duslach air an cinn.

7 Agus thubhairt Iosua, Och ! a Thighearna Dhé, c'ar son a thug thu idir an sluagh so thar Iordan, g'ar toirt thairis do làimh nan Amorach, a chum ar sgrios ? O b'fhearr gu'm biomaid toilichte, agus gu'm biomaid air gabhail còmhnuidh air an taobh eile do Iordan !

8 O Thighearna, ciod a their mi 'nuair a thionndaidheas Israel an cùl r'an naimhdaibh ?

9 Oir cluinidh na Canaanaich, agus uile luchd-àiteachaidh na tìre, agus iadhaidh iad mu'n cuairt oimn, agus gearraidh iad as ar n-aoinm o'n talamh : agus ciod a ni thu ri d'aoinm thò ?

10 Agus thubhairt an Tighearna ri Io-

sua, Eirich suas ; c'ar son a luidheas tu mar so air t'aghaidh ?

11 Pheacaich Israel, agus bhris iad mar an ceudna mo choimhcheangal a dh'àithn mi dhoibh ; oir ghabh iad eadhon do'n ni mhallaichte, agus mar an ceudna ghoid iad, agus mar an ceudna cheil' iad, agus chuir iad eadhon am measg an airneis féin e.

12 Uime sin cha b'urrainn clann Israeil seasamh roimh an naimhdean, *ach* thionndaidh iad an cùl r'an naimhdaibh, a chionn gu'n robh iad mallaichte. Cha bhi mise maille ribh tuille, mur sgrios sibh an ni mallaichte as bhur measg.

13 Eirich suas, naomhaich an sluagh, agus abair, Naomhaichibh sibh féin air son an là maireach ; oir mar so tha an Tighearna Dia Israeil ag ràdh, *Tha* ni mallaichte a'd' mheadhon, O Israeil : cha'n urrainn thu seasamh roimh do naimhdaibh, gus an cuir sibh air falbh an ni mallaichte as bhur measg.

14 Anns a' mhaduinn, uime sin, bheirear cuideachd sibh a réir bhur treubhan : agus an treubh a ghabhas an Tighearna, thig i a réir a teaghlachan ; agus thig an teaghlach a ghabhas an Tighearn, a réir a thighean ; agus thig an tigh a ghabhas an Tighearn, a lìon fear is fear.

15 Agus esan a ghlacar leis an ni mhall-aichte, loisgear le teine e féin agus gach *ni* a *th'aige* ; a chionn gu'n do bhris e coimhcheangal an Tighearn, agus gu'n d'rinn e amaideachd² ann an Israel.

16 Uime sin dh'éirich Iosua gu moch sa' mhaduinn, agus thug e leis Israel a réir an treubhan ; agus ghabhadh treubh Iudah.

17 Agus thug e leis teaghlach Iudah ; agus ghabh e teaghlach nan Sarhitheach : agus thug e leis teaghlach nan Sarhith-each a lìon fear is fear ; agus ghabhadh Sabdi.

18 Agus thug e leis a thigh, a lìon fear agus fear ; agus ghabhadh Achan mac Charmi, mhic Shabdi, mhic Sherah, do thréibh Iudah.

19 Agus thubhairt Iosua ri Achan, A mhic, thoir, guidheam ort, glòir do'n Tighearna Dia Israeil, agus dean aidmheil da ; agus innis domh a nis ciod a rinn thu, na folaich uam e.

20 Agus fhreagair Achan Iosua, agus thubhairt e, Gu deimhin, pheacaich mi an aghaidh an Tighearna Dé Israeil, agus mar so agus mar so rinn mi.

21 'Nuair a chunnaic mi am measg na creiche earradh³ bhreagha Bhabilonach, agus dà cheud secel airgid, agus geinn òir anns an robh leth-cheud secel do chud-throm, an sin shanntaich mi iad, agus

¹ dh'àicheadh iad.

² lochd.

³ trusan, culaidh, falluing.

ghabh mi iad; agus, feuch, *tha* iad fol-aichte san talamh am meadhon mo bhùtha, agus an t-airgiod fuidhe.

22 Mar sin chuir Iosua teachdairean uath, agus ruith iad do'n bhùth, agus, feuch, *bha e* folichte 'na bhùth, agus an t-airgiod fuidhe.

23 Agus thug iad *leo* iad á meadhon a' bhùtha, agus thug iad gu Iosua iad, agus gu clann Israeil uile, agus sgaol¹ iad a mach iad am fianuis an Tighearnu.

24 Agus ghabh Iosua agus Israel uile maille ris, Achan mac Sherah, agus an t-airgiod, agus an earradh, agus an geinn òir, agus a mhic, agus a nigheanan, agus a dhaimh, agus 'asail, agus a chaoraich, agus a bhùth, agus gach *ni a bh'* aige; agus thug iad do ghleam Achoir iad.

25 Agus thubhairt Iosua, C'ar son a chuir thu dragh oirn? cuiridh an Tighearna dragh ortsa an diugh. Agus chlach clann Israeil uile e le clachaibh, agus loisg iad le teine iad, an dèigh dhoibh an clachadh le clachaibh.

26 Agus thog iad suas carn mòr chlach air a mhuin gus an là'n diugh: Agus phill an Tighearn o ghairge a chorroich: uime sin thugadh gleann Achoir mar ainm air an àite sin, gus an là'n diugh.

CAIB. VIII.

1 Thug an Tighearna mìseach do Iosua. 3 An dòigh air an do ghladh baile Ai. 29 Chrochadh a rìgh. 30 Thug Iosua altair do Dhia. 32 Sgrìobh e an lagh air clachaibh, agus leugh e a bhriathran uile.

A GUS thubhairt an Tighearna ri Iosua, Na gabh eagal, agus na bi fo gheilt; gabh an sluagh cogaidh uile maille riut, agus éirich, imich suas gu h-Ai: feuch, thug mi thairis do d' làimh rìgh Ai, agus a shluagh, agus a bhaile, agus 'fhearann.

2 Agus ni thu ri h-Ai agus r'a rìgh, mar a rinn thu ri Iericho, agus r'a rìgh: a mhàin a chreach, agus a sprèidh, gabhaidh sibh mar chobhartach dhuibh féin. Cuir *daoine* ann am feall-fholach² an aghaidh a' bhaile air a chùlaobh.

3 Agus dh'éirich Iosua agus an sluagh cogaidh uile, a dhol suas an aghaidh Ai: agus thagh Iosua mach deich mìle fichead a dh'fhearaihb treun ann an neart, agus chuir e air falbh iad san oidhche.

4 Agus dh'àithn e dhoibh, ag ràdh, Feuch, ni sibh feall-fholach an aghaidh a' bhaile, *eadhon* air cùl a' bhaile: na rachaidh ro fhad o'n bhaile, ach bithibh uile deas:

5 Agus théid mise, agus an sluagh uile a *tha* maille rium, dlùth do'n bhaile: agus an uair a thig iad a mach 'nar coinneamh, mar air tús, teichidh sinne rompa.

6 (Oir thig iad a mach 'nar déigh) gus an tarruing sinn iad o'n bhaile: oir their iad, *Tha* iad a' teicheadh romhainn, mar air tús: uime sin teichidh sinne rompa.

7 An sin éiridh sibhse o'n fheall-fholach, agus glacadh sibh am baile: oir bheir an Tighearna bhur Dia 'nur làimh e.

8 Agus an uair a ghlasas sibh am baile, cuiridh sibh am baile ri theine: a réir àithne an Tighearna ni sibh. Feuch, dh'àithn mise dhuibh.

9 Uime sin chuir Iosua mach iad; agus dh'fhalbh iad a dheanamh feall-fholach, agus dh'fhan iad eadar Bet-el agus Ai, air an taobh an iar a dh'Ai: ach dh'fhan Iosua an oidhche sin am measg an t-sluaigh.

10 Agus dh'éirich Iosua gu moch sa' mhaduinn, agus dh'àireamh e'n sluagh³, agus chaidh e suas, e féin agus seanair-ean Israeil, roimh 'n t-sluagh gu h-Ai.

11 Agus chaidh an sluagh cogaidh uile suas, a *bha* maille ris, agus chaidh iad am fagus, agus thàinig iad fa chomhair a' bhaile, agus champaich iad air an taobh mu thuath do Ai: a nis *bha* gleann eadar iad agus Ai.

12 Agus ghabh e mu thimchioll chùig mìle fear, agus chuir e iad a dheanamh feall-fholach eadar Bet-el agus Ai, air an taobh an iar do'n bhaile.

13 Agus an uair a shuidhich iad an sluagh, *eadhon* am feachd uile a *bh'* air an taobh mu thuath do'n bhaile, agus an luchd feall-fholach air an taobh an iar do'n bhaile, chaidh Iosua san oidhche sin do mheadhon a' ghlinne.

14 Agus an uair a chunnaic rìgh Ai sin, rinn iad cabhag agus dh'éirich iad gu moch; agus chaidh fir a' bhaile a mach gu cath an aghaidh Israeil, e féin agus a shluagh uile, ann an àm suidhichte, fa chomhair a' chomhnaird: ach cha robh fhios aige gu'n robh luchd feall-fholach 'na aghaidh air cùl a' bhaile.

15 Agus rinn Iosua agus Israel uile mar gu'm buailte iad rompa, agus theich iad rathad an fhàisach.

16 Agus ghairmeadh an sluagh uile a *bha* ann an Ai⁴ an ceann a chéile gu dol air an tòir, agus chaidh iad air tòir Iosua, agus thairngadh o'n bhaile iad.

17 Agus cha d'fhàgadh duine ann an Ai, no ann am Bet-el, nach deachaidh a mach an dèigh Israeil: agus dh'fhàg iad am baile fosgailte, agus chaidh iad air tòir Israeil.

18 Agus thubhairt an Tighearna ri Iosua, Sin a mach an t-sleagh a *tha* 'n ad làimh rathad Ai; oir bheir mise a'd' làimh⁵ e. Agus slùin Iosua mach an

¹ chuir.

² plaid-luidhe.

³ ghabh e beachd do'n t-sluagh.

⁴ anns a' bhaile.

⁵ 'n ad làimh.

t-sleaghl a bh'aige 'na làimh, a dh'ionnsuidh a' bhaile.

19 Agus dh'éirich na daoine a bha ris an fheall-fholach gu grad as an àit, agus ruith iad co luath 'sa shìne mach a làmh: agus chaidh iad a stigh do'n bhaile, agus ghlac iad e, agus rinn iad cabhag, agus chuir iad am baile ri theine.

20 Agus an uair a sheall fir Ai 'nan déigh, chunnaic iad, agus, feuch, chaidh deatach a' bhaile suas gu nàmh, agus cha robh comas aca teicheadh an taobh so no'n taobh ud: agus thionndaidh an sluagh a theich do'n fhàsach, air an ais air an luchd-tòrachd.

21 Agus an uair a chunnaic Iosua agus Israel uile gu'n do ghlac luchd na feall-fholach am baile, agus gu'n deachaidh deatach a' bhaile suas, an sin phill iad, agus bhuail iad fir Ai.

22 Agus chaidh iadsan a mach as a' bhaile 'nan aghaidh; mar sin bha iad am meadhon Israeil, cuid air an taobh so, agus cuid air an taobh ud: agus bhuail siad iad, gus nach d'fhàgadh aon diubh beò, no aon gu dol as.

23 Agus ghlac iad rìgh Ai beò, agus thug iad e gu Iosua.

24 Agus an uair a chuir Israel crìoch air uile luchd-àiteachaidh¹ Ai a mharbhadh, anns a' mhachair, anns an fhàsach d'an do chuir iad an ruaig orra, agus an uair a thuit iad uile le faobhar a' chlaidheimh, gus an do chuireadh as doibh, an sin phill na h-Israelich uile gu h-Ai agus bhuail iad e le faobhar a' chlaidheimh.

25 Agus bha ann dhiubhsan uile a thuit air an là sin, eadar fheara agus mhnà, dà mhile dheug, eadhon muinntir Ai uile:

26 Oir cha do tharruing Iosua a làmh air a h-ais, a shìne mach leis an t-sleaghl, gus an do léir-sgrìos e luchd-àiteachaidh Ai uile.

27 A mhàin spréidh agus creach a' bhaile sin ghabh Israel mar chobhartach dhoibh féin, a réir focail an Tighearn a dh'àithn e do Iosua.

28 Agus loisg Iosua Ai, agus rinn e 'na chàm e gu bràth, 'na fhàsach gus an là 'n diugh.

29 Agus rìgh Ai chroch e air crann gu àm an fheasgair: agus mu dhol fuidhe na gréine dh'àithn Iosua, agus thug iad a nuas a chorp o'n chrann, agus thilg iad e aig dol a stigh geata a' bhaile, agus thog iad air carn mòr chlach, a tha làthair gus an là 'n diugh.

30 An sin thog Iosua altair do'n Tighearna Dia Israeil air sliabh Ebail,

31 Mar a dh'àithn Maois, òglach an Tighearna, do chloinn Israeil, a réir mar

a ta e sgrìobhta ann an leabhar lagha Mhaois, altair do chlachaibh slàna, air nach do thog duine sam bith suas iarunn; agus thug iad suas oirre iobairtean-loisgte do'n Tighearn, agus dh'ìobair iad tabhartais-shìth.

32 Agus sgrìobh e 'n sin air na clachaibh dùblachadh lagha Mhaois, a sgrìobh e an làthair chloinn Israeil.

33 Agus sheas Israel uile, agus an sean-airean, agus an luchd-riaghlaidh, agus am breitheamhna, air an taobh so do'n àire, agus air an taobh ud, an làthair nan sagart nan Lebhitheach, a ghiulan àirc coimhcheangail an Tighearn, an coigreach co mhaith ris-san a rugadh 'nam measg; leth dhiubh thall fa chomhair sléibh Gheridsim, agus leth dhiubh thall fa chomhair sléibh Ebail: mar a dh'àithn Maois, òglach an Tighearna, chum sluagh Israeil a bheannachadh air tùs².

34 Agus an déigh sin leugh³ e uile bhriathran an lagha, na beannachdan agus na mallachdan, a réir nan uile *nithe a ta* sgrìobhta ann an leabhar an lagha.

35 Cha robh focal do na h-uile *nithibh* a dh'àithn Maois, nach do leugh Iosua an làthair comhchrùinnich Israeil uile, agus nam ban, agus na cloinne bige, agus nan coigreach a bha fantuinn 'nam measg.

CAIB. IX.

1 Rinn na rìghrean coimhcheangal an aghaidh Israeil. 3 Cealg nan Gibeonach. 20 Rinneadh tràillean dhiubh.

A GUS an uair a chuala na rìghrean uile a bh'air an taobh so do Iordan, anns na beanntaibh, agus anns a' chòmh-nard, agus ann an uile oirthir⁴ na fairge mòire thall fa chomhair Lebanoin, an Hiteach, agus an t-Amorach, an Canaanach, am Peridseach, an Hibheach, agus an Iebusach so;

2 Chruinnich iad an ceann a chéile a chogadh ri Iosua, agus ri h-Israel, le aon rùn.

3 Agus an uair a chuala luchd-àiteachaidh Ghibeoin cìod a rinn Iosua ri Iericho, agus ri h-Ai;

4 Rinn iadsan mar an ceudna gu seòlta, agus chaidh iad agus leig iad orra gu'm bu teachdairean iad, agus ghabh iad seann saic air an asalaibh, agus fion-shearragan⁵ a bha sean agus reubta, agus ceangailte suas,

5 Agus brògan a bha sean agus càirichte air an cosaibh, agus sean eudach orra; agus bha aran an lòn uile tioram agus liath.

6 Agus chaidh iad a dh'ionnsuidh Iosua do'n champ gu Gilgal, agus thubhairt iad ris, agus ri fir Israeil, Thàinig sinne o

¹ luchd-còmhnuidh.

Maois roimhe, a chum gum beannaicheadh iad

² mar a dh'àithn

sluagh Israeil.

⁴ shìtos.

³ dh'éigh Eabh.

⁵ fion-bhuideil.

dhùthaich fad as; a nis uime sin dean-
aibh coimhcheangal ruinn.

7 Agus thubhairt fir Israeil ris na Hibh-
ich, Theagamh gu bheil sibh a chòmhnuidh
'nar measg, agus cionnus a dh'-
fheudas sinne coimhcheangal a dheanamh
ribh?

8 Agus thubhairt iad ri Iosua, *Is* sinne
do sheirbhisich. Agus thubhairt Iosua
riu, Cò sibh? agus cia as a thàinig sibh?

9 Agus thubhairt iad ris, O dhuthaich
ro fhad air astar thàinig do sheirbhisich,
air sgàth ainme an Tighearna do Dhé:
oir chuala sinn 'iomradh-san, agus gach
nì a rinn e san Eiphit,

10 Agus gach *nì* a rinn e ri dà rìgh nan
Amorach, a *bha* 'n taobh thall do Iordan,
ri Sihon rìgh Heshboin, agus ri h-Og rìgh
Bhasain, a *bha* aig Astarot;

11 Uime sin labhair ar seanairean agus
uile luchd-àiteachaidh ar dùthcha ruinn,
ag ràdh, Gabhaibh lòn 'nur làimh air son
an turuis, agus rachaibh 'nan coinueamh,
agus abraibh riu, *Is* sinne bhur seirbh-
isich: agus a nis deanaibh coimhcheangal
ruinn.

12 An t-aran so againn ghabh sinn teth
air son ar lòn a mach as ar tighibh, san
là anns an d'thàinig sinn a mach gu dol
d'ur n-ionnsuidh-sa; ach a nis, feuch, tha
e tioram, agus liath:

13 Agus na searragan fiona so a lòn
sinn, *bha iad* nuadh¹, agus, feuch, tha
iad reubta: agus tha ar n-eudach so agus
ar brègan air fàs sean, le ro fhad na
slighe.

14 Agus ghabh na daoine d'am biadh,
agus cha d'iarr iad *comhairle* o bheul an
Tighearn.

15 Agus rinn Iosua sìth riu, agus rinn e
coimhcheangal riu, a leigeil leo bhì beò:
agus mhionnaich uachdarain a' chomh-
chruinnich dhoibh.

16 Agus thachair an ceann thri làithean,
an déigh dhoibh coimhcheangal a dhean-
amh riu, gu'n cual' iad gu'm b'iad an
coimhearsnach iad, agus gu'n robh iad a
chòmhnuidh 'nam measg.

17 Agus chaidh clann Israeil air an agh-
aidh, agus thàinig iad a dh'ionnsuidh am
bailtean² air an treas là: a nis *b'iad* am
bailte Gibeon, agus Chephirah, agus
Beerot, agus Ciriati-earim.

18 Agus cha do bhuail clann Israeil iad
a chionn gu'n do mhionnaich uachdarain
a' chomhchruinnich dhoibh air an Tighe-
arna Dia Israeil. Agus rinn an comh-
chruinneach uile gearan³ an aghaidh nan
uachdaran.

19 Ach thubhairt na h-uachdarain uile
ris a' chomhchruinneach uile, Mhionnaich
sinn dhoibh air an Tighearna Dia Israeil;

agus uime sin cha 'n fheud sinn bean-
tuinn riu.

20 So nì sinn riu; leigidh sinn eadhon
leo a bhì beò, a chum nach bi fearg *Dhé*
'nar n-aghaidh, air son nam mionnan a
mhionnaich sinn dhoibh.

21 Agus thubhairt na h-uachdarain riu,
Leigibh leo bhì beò; ach biodh iad 'nan
luchd-gearraidh fiodha, agus 'nan luchd-
tarruing uisge do'n chomhchruinneach
uile, mar a gheall na h-uachdarain
dhoibh.

22 Agus ghairm Iosua orra, agus labhair
e riu, ag ràdh, C'ar son a mheall sibh sinn,
ag ràdh, *Tha* sinn ro fhada uaibh, an uair
a tha sibh a chòmhnuidh 'nar measg;

23 A nis uime sin *tha* sibh mallaichte,
agus cha saorar neach air bith dhibh o
bhi 'nur tràillibh, agus 'nur luchd-gearr-
aidh fiodha, agus 'nur luchd-tarruing
uisge air son tighe mo Dhé.

24 Agus flireachair iad Iosua, agus thubh-
airt iad, Do bhrìgh gu'n d'innseadh gu
cinnteach do d' sheirbhisich cionnus a
dh'àithn an Tighearna do Dhia d'a òg-
lach Maois am fearann uile a thoirt
duibh, agus luchd-àiteachaidh na tìre uile
a sgrios roimhibh, uime sin bha eagal
mòr ar n-anama oirmn roimhibh, agus
rinn sinn an nì so.

25 Agus a nis, feuch, *tha* sinn a'd'
làimh: mar a mheasar maith agus ceart
leatsa a dheanamh ruinn, dean.

26 Agus mar so rinn e riu, agus shaor e
iad á làimh chloinn Israeil; agus cha do
mharbh siad iad.

27 Agus rinn Iosua iad san là sin féin
'nan luchd-gearraidh fiodha, agus 'nan
luchd-tarruing uisge do'n chomhchruinn-
each, agus do altair an Tighearn, eadhon
agus an là 'n diugh, anns an ionad a rògh-
naicheadh.

CAIB. X.

1 *Chog cùig rìghrean nan Amorach an aghaidh
baile Ghibeoin.* 9 Shaor Iosua e. 12 *Air focal
Iosua sheas a' ghrian agus a' ghealach sna speur-
aibh.*

A GUS an uair a chual' Adonisedec
a rìgh Ierusalem gu'n do ghlac Iosua
Ai, agus gu'n do léir-sgrìos se e; mar a
rinn e ri Iericho agus r'a rìgh, mar sin
gu'n d'rinn e ri h-Ai agus r'a rìgh; agus
gu'n d'rinn luchd-àiteachaidh Ghibeoin
sith ri h-Israel, agus gu'n robh iad 'nam
measg;

2 Ghabh iad eagal mòr, do bhrìgh gu'm
bu bhaile mòr Gibeon, mar aon do na
bailtibh ròghail, agus do bhrìgh gu'm *bu*
mhò e na Ai, agus gu'n robh a dhaoine
uile treun.

3 Uime sin chuir Adonisedec, rìgh Ie-
rusaleim, *fios* gu Hoham rìgh Hebroin,

¹ nomha.

² caithrichean, bailtean cuairtiche

le balla.

³ duarman, monmhor; murmur. Sasg.

agus gu Piram rìgh Iarmuit, agus gu Iaphia rìgh Lachis, agus gu Debir rìgh Eglain, ag ràdh,

4 Thigibh a nìos a m'ionnsuidh-sa, agus cuidichibh leam, a chum gu'm buail sinn Gibeon: oir rinn e sìth ri Iosua, agus ri cloinn Israeil.

5 Uime sin chruinnich cùig rìghre nan Amorach, rìgh Ierusalem, rìgh Hebroin, rìgh Iarmuit, rìgh Lachis, rìgh Eglain, iad féin an ceann a chéile, agus chaidh iad suas, iad féin agus an sloigh uile, agus champaich iad fa chomhair Ghibeoin, agus chog iad 'na aghaidh.

6 Agus chuir fir Ghibeoin *fios* gu Iosua, do'n champ gu Gilgal, ag ràdh, Na deanadh do làmh moille o d' sheirbhisich: thig a nìos d'ar n-ionnsuidh gu grad, agus saor sinn, agus cuidich leinn: oir tha rìghre nan Amorach uile a tha 'nan còmhnuidh sna beanntaibh, air cruinn-eachadh ri chéile 'nar n-aghaidh.

7 Agus chaidh Iosua suas o Ghilgal, e féin agus an sluagh cogaidh uile maille ris, agus na fir threuna uile.

8 Agus thubhairt an Tighearna ri Iosua, Na gabh eagal rompa; oir thug mise thairis do d' làimh iad: cha seas duine dhiubh romhad.

9 Uime sin thàinig Iosua orra gu h-obann: rè na h-oidhche chaidh e suas o Ghilgal.

10 Agus chlaoidh an Tighearna iad roimh Israel, agus mharbh¹ e iad le h-àr² mòr aig Gibeon, agus chuir e'n ruaig orra rathad uchdaich Bhet-horoin, agus bhuaile iad gu Hasecah, agus gu Macedah.

11 Agus an uair a bha iad a' teicheadh roimh Israel, agus iad air leathad Bhet-horoin, thilg an Tighearna clacha mòra orra nuas o nèamh gu Hasecah, agus fhuair iad bàs: bu lionmhoire iadsan a bhàsaich leis na clacha-meallain, na *iad-san* a mharbh clann Israeil leis a' chlaoidh-eamh.

12 An sin labhair Iosua ris an Tighearna, san là anns an d'thug an Tighearna suas na h-Amoraich roimh chloinn Israeil, agus thubhairt e'm fianuis Israeil, A ghrian, air Gibeon stad, agus thusa, a ghealach, air gleann Aialoin.

13 Agus stad a' ghrian, agus sheas a' ghealach, gus an do dhiol an sluagh iad féin air an naimhdibh. Nach *'eil* so sgrìobhta ann an leabhar Iaseir? Agus stad a' ghrian am meadhon nèimh, agus cha d'rinn i cabhag gu dol fuidhe mu thimchioll là iomlain.

14 Agus cha robh là *sam bith* cosmhuil ris an là sin, roimhe no 'na dhéigh, anns an d'éisd an Tighearna ri guth duine; oir chog an Tighearna air son Israeil.

[15 Agus phill Iosua, agus Israel uile maille ris, do'n champ gu Gilgal:]

16 Ach theich na cùig rìghrean ud, agus dh'fholaich siad iad féin ann an uaimh ann am Macedah.

17 Agus dh'innseadh do Iosua, ag ràdh, Fhuaradh na cùig rìghre folaichte ann an uaimh ann am Macedah.

18 Agus thubhairt Iosua, Caruichibh clacha mòra air beul na h-uamha, agus cuiribh daoine làimh rithe g'an gleidheadh.

19 Agus na stadaibh-se, *ach* rachaibh air tòir bhur naimhdean, agus buailibh iadsan a's deireannaiche dhiubh, na leigibh leo dol a stigh d'am bailtibh; oir thug an Tighearna bhur Dia iad thairis d'ur làimh.

20 Agus an uair a chuir Iosua agus clann Israeil crìoch air am marbhadh le h-àr ro mhòr, gus an do chuireadh as doibh, chaidh a' chuid a mhair dhiubh a steach do na bailtibh daingnichte.

21 Agus phill an sluagh uile do'n champ gu Iosua aig Macedah ann an sìth: cha do ghluais neach a theanga an aghaidh duine sam bith do chloinn Israeil.

22 An sin thubhairt Iosua, Fosglaihb beul 'na h-uamha, agus thugaibh a mach a m' ionnsuidh na cùig rìghrean ud as an uaimh.

23 Agus rinn iad mar sin, agus thug iad a mach na cùig rìghrean ud d'a ionnsuidh as an uaimh, rìgh Ierusalem, rìgh Hebroin, rìgh Iarmuit, rìgh Lachis, agus rìgh Eglain.

24 Agus an uair a thug iad a mach na rìghre sin gu Iosua, ghairm Iosua air fearaibh Israeil uile, agus thubhairt e ri ceannardaibh nam fear-cogaidh a chaidh maille ris, Thigibh am fagus, cuiribh bhur cosan air muinealaibh nan rìgh sin. Agus thàinig iad am fagus, agus chuir iad an cosan air am muinealaibh.

25 Agus thubhairt Iosua riu, Na biodh eagal oirbh agus na bithibh fuidh gheil, bithibh làidir agus biodh deadh mhisneach agaibh; oir mar so ni'n Tighearna ri'r naimhdibh uile ris am bheil sibh a' cogadh.

26 Agus an déigh sin bhuaile Iosua iad, agus mharbh e iad, agus chroch e iad air cùig crannaibh: agus bha iad an crochadh air na crannaibh gu feasgar.

27 Agus an àm dol fuidhe³ na gréine d' àithn Iosua, agus thug iad a nuas iad o na crannaibh, agus thilg siad iad san uaimh anns an d'fholaich siad iad féin, agus chuir iad clacha mòra am beul na h-uamha, a tha làthair gus a' cheart là so.

28 Agus air an là sin féin ghlac Iosua

¹ bhuaile.
221

² mharbhadh.

³ fodha.

Macedah, agus bhuail se e le faobhar a' chlaidheimh, agus a rìgh sgrios e gu tur, iadsan agus gach anam a *bh'* ann; cha d'fhàg e neach air bith beò: agus rinn e ri rìgh Mhacedah, mar a rinn e ri rìgh Iericho.

29 An sin chaidh Iosua, agus Israel uile maille ris, thairis o Mhacedah gu Libnah, agus chog e 'na aghaidh Libnah.

30 Agus thug an Tighearna thairis e mar an ceudna, agus a rìgh, do làimh Israeil, agus bhuail se e le faobhar a' chlaidheimh, agus na h-anaman uile a *bha* ann: cha d'fhàg e neach air bith beò ann, ach rinn e r'a rìgh, mar a rinn e ri rìgh Iericho.

31 Agus chaidh Iosua, agus Israel uile maille ris, thairis o Libnah gu Lachis, agus champaich e 'na aghaidh, agus chog e 'na aghaidh.

32 Agus thug an Tighearna thairis Lachis do làimh Israeil, agus ghlac se e air an dara là, agus bhuail se e le faobhar a' chlaidheimh, agus gach anam a *bha* ann, a réir nan uile *nithe* a rinn e air Libnah.

33 An sin thàinig Horam rìgh Gheseir a nìos a chuideachadh Lachis; agus bhuail Iosua e agus a shluagh, gus nach d'fhàg e h-aon air bith beò aige.

34 Agus chaidh Iosua agus Israel uile maille ris, o Lachis gu h-Eglon, agus champaich iad 'na aghaidh, agus chog iad 'na aghaidh:

35 Agus ghlac iad e air an là sin féin, agus bhuail iad e le faobhar a' chlaidheimh, agus gach anam a *bha* ann sgrios e gu tur san là sin, a réir nan uile *nithe* a rinn e ri Lachis.

36 Agus chaidh Iosua, agus Israel uile maille ris, suas o Eglon gu Hebron, agus chog iad 'na aghaidh:

37 Agus ghlac iad e, agus bhuail iad e le faobhar a' chlaidheimh, agus a rìgh, agus a bhailean uile, agus gach anam a *bha* ann: cha d'fhàg e h-aon air bith beò, a réir nan uile *nithe* a rinn e ri h-Eglon, ach sgrios e gu tur e, agus gach anam a *bha* ann.

38 Agus phill Iosua, agus Israel uile maille ris, gu Debir, agus chog e 'na aghaidh:

39 Agus ghlac se e, agus a rìgh, agus a bhailean uile, agus bhuail siad iad le faobhar a' chlaidheimh, agus léir-sgrios iad gach anam a *bha* ann; cha d'fhàg e h-aon air bith beò: mar a rinne ri Hebron, mar sin rinn e ri Debir, agus r'a rìgh: agus mar a rinn e ri Libnah, agus r'a rìgh.

40 Agus bhuail Iosua tìr nam beann uile, agus na h-àirde deas, agus a' chòm-

naird, agus nan tobar, agus an rìghrean uile: cha d'fhàg e h-aon air bith beò, ach léir-sgrios e gach neach anns an robh anail, mar a dh'àithn an Tighearna Dia Israeil.

41 Agus bhuail Iosua iad o Chades-barnea gu ruig Gasa, agus tìr Ghosein uile gu ruig Gibeon.

42 Agus na rìghre sin uile, agus am fearann, ghlac Iosua dh'aon tarruing¹, do bhrìgh gu'n do chog an Tighearna Dia Israeil air son Israeil.

43 Agus phill Iosua, agus Israel uile maille ris, do'n champ gu Gilgal.

CAIB. XI.

1 *Aig uisgeachaibh Mheroim thugadh buaidh air rìghrith a dh'èirich suas an aghaidh Israeil.*
10 *Ghlacadh agus loisgeadh Hasor.* 21 *Ghearradh as na h-Anacaich.*

A GUS an uair a chuala Iabin rìgh *Hasor na nithe sin*, chuir e *fios* gu Iobab rìgh Mhadoin, agus gu rìgh Shimroin, agus gu rìgh Achsaiph.

2 Agus a dh'ionnsuidh nan rìgh a *bha* mu thuath anns na beanntaibh, agus anns a' chòmhnard mu dheas do Chinerot, agus anns a' ghleann, agus ann an crìoch-aibh Dhoir, air an làimh an iar;

3 *Agus a dh'ionnsuidh a' Chanaanaich* air an làimh an ear agus an làimh an iar, agus a dh'ionnsuidh an Amoraich, agus an Hìtich, agus a' Pheridsich, agus an Iebusaich anns na beanntaibh, agus a dh'ionnsuidh an Hibhich fuidh Hermon, ann an tìr Mhispeh.

4 Agus chaidh iad a mach, iad féin agus am feachd uile maille ri u, sluagh lìonmhor, eadhon mar a' ghaineamh a *ta* air tràigh na fairge thaobh lìonmhoireachd, le h-eachaibh agus carbadaibh ro lìonmhor.

5 Agus an uair a bha na rìghre sin uile air coinneachadh a chéile, thàinig iad agus champaich iad cuideachd aig uisgeachaibh Mheroim, a chogadh an aghaidh Israeil.

6 Agus thubhairt an Tighearna ri Iosua, Na biodh eagal ort rompa; oir am màireach, mu'n àm so, bheir mise suas iad uile marbh am fianuis Israeil: gearraidh tu iosgaidean² an each, agus loisgidh tu an carbadan le teine.

7 Agus thàinig Iosua, agus an sluagh cogaidh uile maille ris, orra aig uisgeachaibh Mheroim gu h-obann, agus bhuail iad orra.

8 Agus thug an Tighearna thairis iad do làimh Israeil, a bhuail iad, agus a chuir an ruaig orra gu Sidon mòr, agus gu Misrephot-maim, agus gu còmhnard Mhispeh air an làimh an ear, agus bhuail

¹ san aon àm.

² easgaidean.

siad iad, gus nach d'fhàg iad aon diubh beò.

9 Agus rinn Iosua riu mar a dh'iarr an Tighearn air: ghearr e iosgaidean an each, agus loisg e 'u carbadan le teine.

10 Agus phill Iosua san àm sin air aís, agus ghlac e Hasor, agus bhuail e a rìgh leis a' chlàidheamh: oir b'e Hasor roimhe sin ceann nan rìoghachda sin uile.

11 Agus bhuail iad na h-anaman uile a bha ann le faobhar a' chlàidheimh 'g an léir-sgrìos: cha d'fhàgadh aon anns an robh anail; agus loisg e Hasor le teine.

12 Agus uile bhailte nan rìgh sin, agus an rìghrean uile ghlac Iosua, agus bhuail e iad le faobhar a' chlàidheimh, agus sgrìos e gu tur iad, mar a dh'àithn Maois, òglach an Tighearn.

13 Ach a thaobh nam bailte sin uile a sheas a ghnàth 'nan neart¹, cha do loisg Israel aon diubh sin, saor o Hasor a mhàin; sin loisg Iosua.

14 Agus uile chreach nam bailte sin, agus an spréidh, ghabh clann Israeil mar chobhartach dhoibh féin; ach bhuail iad gach duine le faobhar a' chlàidheimh, gus an do chuir iad as doibh; cha d'fhàg iad neach air bith anns an robh anail.

15 Mar a dh'àithn an Tighearna d'a òglach Maois, mar sin dh'àithn Maois do Iosua, agus mar sin rinn Iosua: cha d'fhàg e ni gun deanamh do na h-uile a dh'àithn an Tighearna do Mhaois.

16 Mar sin ghlac Iosua am fearann sin uile, na sléibhteann, agus an tìr mu dheas uile, agus fearann Ghosein uile, agus an gleann, agus an còmharnard, agus sliabh Israeil, agus a ghleann;

17 O shliabh Halaic, a tha dol suas gu Seir, eadhon gu Baal-gad ann an gleann Lebanoin, fuidh shliabh Hermoin: agus an rìghrean uile ghlac e, agus bhuail e iad, agus mharbh e iad.

18 Rè ùine fhada² rinn Iosua cogadh ris na rìghribh sin uile.

19 Cha robh baile mòr³ air bith a rinn sìth ri cloinn Israeil, saor o na Hibhich, luchd-àiteachaidh Ghìbeoin; càch uile ghlac iad ann an cath.

20 Oir b'ann o'n Tighearn a bha e an cridheachan a chruadhachadh, chum gu'n tìgeadh iad an aghaidh Israeil ann an cath, a chum gu'n sgrìosadh e iad gu tur, agus nach biodh iochd sam bith air a nochdadh dhoibh, ach gu'n cuireadh e as doibh, mar a dh'àithn an Tighearna do Mhaois.

21 Agus anns an àm sin thàinig Iosua, agus ghearr e as na h-Anacaich⁴ o na sléibhtibh, o Hebron, o Dhebir, o Anab, agus o bheanntaibh Iudah uile, agus o

bheanntaibh Israeil uile: sgrìos Iosua gu tur iad le am bailtibh.

22 Cha d'fhàgadh aon do na h-Anacaich ann am fearann chloinn Israeil: a mhàin ann an Gasah, ann an Gat, agus ann an Asdod, dh'fhàgadh iad.

23 Mar sin ghlac Iosua an tìr uile, a réir nan uile a thubhairt an Tighearna ri Maois, agus thug Iosua i mar oighreachd do chloinn Israeil, ann an earrannaibh a réir an treubhan. Agus fhuair an tìr fois o chogadh.

CAIB. XII.

1 An dà rìgh a bhuail Maois an taobh an ear do Jordan. 7 Aon rìgh deug thar fhichead air an buaidh le Iosua air an taobh an iar do Jordan.

ANIS is iad so rìghrean an fhearainn a bhuail clann Israeil; agus shealbhaich iad am fearann air taobh eile Iordain leth ri éirigh na gréine, o shruth⁵ Arnoin gu sliabh Hermoin, agus an còmharnard uile air an làimh an ear.

2 Sihon rìgh nan Amoraich, a bha chòml-nuidh ann an Hesbon, agus a riaghalach o Aroer, a tha air bruaich sruth Arnoin, agus o mheadhon an t-srutha, agus leth Ghilead eadhon gus an sruth Iaboc, crìoch chloinn Amoin:

3 Agus an còmharnard gu muir Chìneroit a làimh na h-àirde 'u ear, agus gu muir a' chòmhnaidh, eadhon a' mhuir shalainn a làimh na h-àirde 'n ear, an t-slighe gu Bet-iesimot; agus o'n àirde deas, fuidh Asdot-pisgah.

4 Agus crìoch Og rìgh Bhasain, a bha dh'iarmaid nam fahairean⁶ a bha chòml-nuidh ann an Astarot, agus ann an Edrei,

5 Agus a rìghaich ann an sliabh Hermoin, agus ann an Salcah, agus ann an Basan uile, gu crìch nan Gesurach agus nam Maachatach, agus leth Ghilead, crìoch Shihoin rìgh Hesbein.

6 Iadsan bhuail Maois, òglach an Tighearn, agus clann Israeil; agus thug Maois, òglach an Tighearn, e mar sheilbh do na Reubenich, agus do na Gadaich, agus do leth-thrèibh Mhanaseh.

7 Agus is iad so rìghre na tìre a bhuail Iosua agus clann Israeil air an taobh so do Jordan air an làimh an iar, o Bhaal-gad ann an gleann Lebanoin, eadhon gu sliabh Halaic, a tha dol suas gu Seir; a thug Iosua do treubhan Israeil mar sheilbh, a réir an roinnean:

8 Anns na beanntaibh, agus anns na gleanntaibh, agus anns na còmharnaidh, agus anns na tobraichibh, agus anns an fhasach, agus anns an tìr mu dheas: na Hitich, na h-Amoraich, agus na Canaan-aich, na Pèidsich, na Hibhich, agus na Iebusaich.

¹ a sheas air an dùn, air an enoc. Eabh.

² iomadh là. Eabh. ³ cathair, baile cuartichtiche

le balla.

⁴ clann Anaic.

⁵ amhainn.

⁶ fomhairean, athach.

9 Rìgh Iericho, aon; rìgh Ai, a *tha* làimh ri Bet-el, aon;

10 Rìgh Ierusalem, aon; rìgh Hebroin, aon;

11 Rìgh Iarmuit, aon; rìgh Lachis aon;

12 Rìgh Egloin, aon; rìgh Gheseir, aon;

13 Rìgh Dhebir, aon; rìgh Ghedeir, aon;

14 Rìgh Hormah, aon; rìgh Araid aon;

15 Rìgh Libnah, aon; rìgh Adulaim, aon;

16 Rìgh Mhacedah, aon; rìgh Bhet-eil, aon;

17 Rìgh Thapuah, aon; rìgh Hepheir, aon;

18 Rìgh Apheic, aon; rìgh Lasaroin, aon;

19 Rìgh Mhadoin, aon; rìgh Hasoir, aon;

20 Rìgh Shimron-meroin, aon; rìgh Achsaiph, aon;

21 Rìgh Thaanaich, aon; rìgh Mhegido, aon;

22 Rìgh Chedeis, aon; rìgh Iocneaim o Charnel, aon;

23 Rìgh Dhoir, ann an crìch Dhoir, aon; rìgh Chinneacha Ghilgail, aon;

24 Rìgh Thirsah, aon; na rìghrean uile, deich thar fhlichead agus aon.

CAIB. XIII.

1 *Criochan an shearainn air nach d' thugadh fathast buaidh.* 14, 33 *Is iad iobairtean an Tighearn oighreachd nan Lebhitheach.* 22 *Mharbhadh Balaam.*

A NIS bha Iosua sean agus air teachd air aghaidh ann am bliadhnaibh¹; agus thubhairt an Tighearna ris, Tha thusa sean agus air teachd air t' aghaidh am bliadhnaibh, agus tha fathast ro mhòran fearainn r'a shealbhachadh.

2 *Is e so am fearann a tha fathast a làthair; uile chriocha nam Philisteach, agus Gesuri uile,*

3 O Shihar, a *ta* fa chomhair na h-Eiphit, eadhon gu crìch Eeroim nu thuath, a mheasar do'n Chanaanach: cùig tigh-eannan nam Philisteach; na Gasataich, agus na h-Asdodaich, na h-Escalonaich, na Gitich, agus na h-Ecronaich, agus na Habhaich:

4 O'n taobh mu dheàs, uile fhearrann nan Canaanach, agus Mearah a *ta* làimh ris na Sidonaich, gu Aphec, gu crìch nan Amorach;

5 Agus fearann nan Gibleach, agus Lebanon uile leth ri éirigh na gréine, o Bhaal-gad fuidh shliabh Hermoin, gu ruig an dol a stigh do Hamat;

6 Uile luchd-àiteachaidh nam beann o Lebanon gu Misrephot-maim, agus na Sidonaich uile, iadsan fògraidh mi mach

roimh chloinn Israeil; a mhàin roinn e le crannchur do na h-Israelich mar oighreachd, mar a dh'àithn mise dhuìt.

7 A nis uime sin, roinn am fearann so mar oighreachd do na naoi treubhan, agus do leth-thrèibh Mhanaseh;

8 Maille ris an leth-thrèibh eile fhuair na Reubenich agus na Gadaich an oighreachd-san a thug Maois doibh, an taobh thall do Iordan a làimh na h-àirde 'n ear, eadhon mar a thug Maois, òglach an Tighearna, dhoibh:

9 O Aroer, a *ta* air bruaich sruth² Arnoin, agus am baile³ a *tha* ann am meadhon an t-srutha, agus còmhnaid Mhedebah uile gu Dibon;

10 Agus uile bhailte Shihoin, rìgh nan Amorach, a rìghaich ann an Hesbon, gu crìch chloinn Amoin;

11 Agus Gilead, agus crìoch nan Gesurach, agus nam Maachatach, agus sliabh Hermoin uile, agus Basan uile gu Salcah;

12 Uile rìoghachd Og ann am Basan, a rìghaich ann an Astarot agus ann an Edrei, a mhair do iarmad⁴ nam famhair-ean: oir iad sin bhuail Maois, agus dh'fhògair e mach iad.

13 Gidheadh, cha d'fhògair clann Israeil a mach na Gesurach, no na Maachataich; ach tha na Gesurach agus na Maachataich 'nan còmhnaidh am measg nan Israeleach gus an là 'n diugh.

14 A mhàin do thrèibh Lebhi cha d' thug e oighreachd sam bith; is iad iobairtean an Tighearna Dé Israeil a bheirear suas le teine, an oighreachd-san, mar a thubhairt e riu.

15 Agus thug Maois do thrèibh chloinn Reubein oighreachd a réir an teaghlach-ean:

16 Agus bha 'n crìoch o Aroer a *ta* air bruaich sruth Arnoin, agus am baile a *tha* ann am meadhon an t-srutha, agus an còmhnaid uile gu⁵ Medebah:

17 Hesbon, agus a bhailtean uile a *tha* sa' chòmhnaid; Dibon, agus Bamot-baal, agus Bet-baal-meon,

18 Agus Iahasa, agus Cedemot, agus Mephaat,

19 Agus Ciriataim, agus Sibmah, agus Saretsahar ann an sliabh a' ghlinne,

20 Agus Bet-peor, agus Asdod-pisgah, agus Bet-iesimot.

21 Agus uile bhailtean a' chòmhnaid, agus uile rìoghachd Shihoin rìgh nan Amorach, a rìghaich ann an Hesbon, a bhuail Maois maille ri ceannardaibh Mhidiain, Ebhi, agus Recem, agus Sur, agus Hur, agus Rebah, cinn-fheadhna Shihoin, a bha chòmhnaidh san tìr.

22 Balaam mar an ceudna, mac Bheoir, am fiosaiche⁶, mharbh clann Israeil leis

¹ làithibh. Eabh.

² aimhne.

³ a' chaithir.

⁴ fhuigheal.

⁵ làimh ri.

⁶ fear-fàistineachd.

a' chlàidhcamh 'nam measg-san a mharbhadh leo.

23 Agus b'i crìoch chloinn Reubein, Iordan agus a crìoch-san. B'i sin oighreachd chloinn Reubein a rèir an teaghlachd, na bailte mòra' agus am bailte beaga.²

24 Agus thug Maois oighreachd do thréibh Ghad, eadhon do chloinn Ghad a rèir an teaghlachd.

25 Agus b'i an crìoch Iaser, agus uile bhailte Ghilead, agus leth fearainn chloinn Amoin, gu Aroer a ta fa chomhair Rabah :

26 Agus o Hesbon gu Ramat-nhispeh, agus Betonim ; agus o Mhahanaim gu crìch Dhebir ;

27 Agus anns a' ghleann, Betaram, agus Bet-nimrah, agus Sucot, agus Saphon, a' chuid eile do rìoghachd Shihoin rìgh Hesbon, Iordan agus a crìoch, eadhon gu foir' fairge Chineret, air taobh eile Iordain a làimh na h-àirde 'n ear.

28 B'i sin oighreachd chloinn Ghad, a rèir an teaghlachd, na bailte mòra agus am bailte beaga.

29 Agus thug Maois oighreachd do leth-thréibh Mhanaseh : agus b'i so sealbh leth-thréibh chloinn Mhanaseh, a rèir an teaghlachd :

30 Agus bha 'n crìoch o Mhahanaim, Basan uile, uile rìoghachd Og rìgh Bhasain, agus uile bhailtean Iair, a ta ann am Basan, trì fichead baile mòr :

31 Agus leth Ghilead, agus Astarot, agus Edrei, bailte rìoghachd Og ann am Basan, bhuin iad do chloinn Mhachir mhic Mhanaseh, eadhon do leth chloinn Mhachir, a rèir an teaghlachd.

32 Is iad sin na dùchanna a roinn Maois mar oighreachd ann an còmhnaidh Mhoab, air an taobh eile do Iordan làimh ri Iericho, air an taobh an ear.

33 Ach do thréibh Lebhi cha d'thug Maois oighreachd : b'e 'n Tighearna Dia Israeil e féin an oighreachd-san, mar a thubhairt e riu.

CAIB. XIV.

1 Thugadh an oighreachd le crannchur do na naoi treubhan agus an leth-thréibh. 6 Fhuair Caleb Hebron.

A GUS is iad so na dùchanna a fhuair clann Israeil mar oighreachd ann an tìr Chanaan, a roinn Eleasar an sagart, agus Iosua mac Nuin, agus cinn-fheadhna aithriche threubha chloinn Israeil mar oighreachd dhoibh.

2 Le crannchur bha an oighreachd, mar a dh'àithn an Tighearna le làimh Mhaois, do na naoi treubhan agus an leth-thréibh.

3 Oir bha Maois air tabhairt oighreachd do dhà thréibh, agus do leth-thréibh, air an taobh eile do Iordan : ach do na

Lebhithich cha d'thug e oighreachd sam bith 'nam measg.

4 Oir bha clann Ioseiph 'nan dà thréibh, Manaseh agus Ephraim : uime sin cha d'thug iad roinn sam bith do na Lebhithich san fhearann, saor o bhaitibh gu còmhuidh ghabhail anna, maille r'am fearann còmhroinn d'an spréidh, agus d'am inoin.

5 Mar a dh'àithn an Tighearna do Mhaois, mar sin rinn clann Israeil, agus roinn iad am fearann.

6 An sin thàinig clann Iudah gu Iosua ann an Gilgal ; agus thubhairt Caleb mac Iephuneh an Ceniseach ris, Tha fios agad air an ni a thubhairt an Tighearna ri Maois, òglach Dhé, a m' thaobhs' agus a d' thaobh féin, ann an Cades-barnea.

7 Dà fhichead bliadhna dh'aois bha mise 'nuair a chuir Maois, òglach Dhé, mi o Chades-barnea, a rannsachadh a mach an fhearainn ; agus thug mi air ais fios d'a ionnsuidh, mar a bha e ann am chridhe.

8 Gidheadh, thug mo bhràithrean a chaidh suas maille rium, air cridhe an t-shuaigh leaghadh : ach lean mise gu h-iomlan an Tighearna mo Dhia.

9 Agus mhionnaich Maois air an là sin, ag ràdh, Gu cinnteach bithidh ann fearann air an do shaltar do chos, agad féin mar oighreachd, agus aig do chloinn gu bràth ; a chionn gu'n do lean thu gu h-iomlan an Tighearna mo Dhia.

10 Agus a nis, feuch, glhléidh an Tighearna mi beò, mar a thubhairt e, na cùig agus an dà fhichead bliadhna so, eadhon o labhair an Tighearna am focal so ri Maois, am feadh a dh'imich clann Israeil anns an fhàsach ; agus a nis, feuch, tha mi 'n diugh ceithir fichead agus cùig bliadhna dh'aois.

11 Fathast tha mi co làidir an diugh as a bha mi san là anns an do chuir Maois uaith mi : mar a bha mo neart an sin, mar sin tha mo neart a nis, chum cogaidh, agus a dhol a mach, agus a theachd a steach.

12 A nis uime sin thoir dhomh a' bheinn so, mu'n do labhair an Tighearna san là ud ; (oir chuala tu san là ud cionnus a bha na h-Anacach an sin, agus gu'n robh a bailte mòr agus daingichte) : ma tharlas gu'm bi 'n Tighearna leam, an sin fògraidh mi mach iad, mar a thubhairt an Tighearna.

13 Agus bhannaich Iosua e, agus thug e do Chaleb, mac Iephuneh, Hebron mar oighreachd.

14 Rinnadh uime sin Hebron 'na oighreachd do Chaleb, mac Iephuneh, an Ceniseach, gus an là 'u diugh ; a chionn

¹ caithriche, bailte daingichte.

² frith-bhailte.

³ oir.

gu'n do lean e gu h-ìomlan an Tighearna Dia Israeil.

15 Agus *b'e* ainm Hebroin roimhe Ciriatarba; *bha'n t-Arba* so 'na dhuine mòr am measg nan Anacach. Agus bha fois aig an tìr o chogaidh.

CAIB. XV.

1 *Crìocha crannchuir chloinn Iudah.* 13 *Roinn Chaleib.* 16 *Treubhantas agus duais Otniel.* 18 *Athchuinge Achsah.*

B'E so uime sin crannchur tréibhe chloinn Iudah a réir an teaghlaichean, eadhon gu crìch Edoim, gu fàsach Shìn ri deas o'n chuid a's fhaide mach do'n iomall dheas.

2 Agus bha 'n crìoch mu dheas o thràigh na mara salainn, o 'n luib¹ a tha 'g amharc ri deas.

3 Agus chaidh i mach a dh'ionnsuidh an taoibh mu dheas gu h-uchdaich² Acrabim, agus ghabh i air a h-aghaidh gu Sin, agus chaidh i suas air an taobh mu dheas gu Cades-barnea, agus chaidh i air a h-aghaidh gu Hesron, agus chaidh i suas gu h-Adar, agus ghabh i mu'n cuairt gu Carcaa.

4 *Uaith sin* ghabh i dh'ionnsuidh Asmoin, agus chaidh i mach gu amhainn na h-Eiphit, agus bha dol a mach na crìche sin aig a' mhuir: bithidh so agaibh 'na crìch³ mu dheas.

5 Agus *b'i* a' chrìoch an ear a' mhuir shalainn, eadhon gu ceann Iordain: agus *bha a'* chrìoch air an taobh mu thuath o luib na mara, aig a' chuid a b'fhaide mach do Iordan.

6 Agus chaidh a' chrìoch suas gu Bethloglah, agus ghabh i air a h-aghaidh air an taobh mu thuath do Bhet-arabah; agus chaidh a' chrìoch suas gu cloich Bhohain mhic Reubein.

7 Agus chaidh a' chrìoch suas gu Debir o ghleann Achoir, agus ri tuath ag amhare ri Gilgal, a *ta* fa chomhair uchdaich Adumim, a *ta* airtaobh deas na h-aimhne. agus chaidh a' chrìoch thairis gu uisgeachaidh En-semeis, agus bha a dol a mach aig En-rogel.

8 Agus chaidh a' chrìoch suas gu gleann mhic Hinoim, gu taobh deas an Ieusaich; (*is e sin* Ierusalem:) agus chaidh a' chrìoch suas gu mullach na beinne, a *tha* roimh ghleann Hinoim, air an làimh an iar, a *ta* aig ceann glinne nam fahairean ri tuath.

9 Agus thairngeadh⁴ a' chrìoch o mhuillach an t-sleibh gu tobar uisge Nephtoah, agus chaidh i mach gu bailtibh sléibh Ephroin, agus thairngeadh a' chrìoch gu Baalah; (*is e sin* Ciriatarim.)

10 Agus chaidh a' chrìoch mu 'n cuairt

o Bhaalah air an làimh an iar gu sliabh Sheir, agus ghabh i thairis gu taobh sléibh Iearim, (*is e sin* Chesalon,) air an taobh mu thuath, agus chaidh i sìos gu Betsemes, agus ghabh i air a h-aghaidh gu Timnah:

11 Agus chaidh a' chrìoch a mach gu taobh Eceroin ri tuath; agus thairngeadh a' chrìoch gu Sicon, agus ghabh i thairis air sliabh Bhaalah, agus chaidh i mach gu Iabneel; agus bha dol a mach na crìche aig a' mhuir.

12 Agus *bha a'* chrìoch an iar gus an fhairge mhòir, agus a *h-oirthir*⁵: *b'i sin* crìoch chloinn Iudah mu'n cuairt, a réir an teaghlaichean.

13 Agus do Chaleb, mac Iephuneh, thug e roinn am measg chloinn Iudah, a réir àithne an Tighearna do Iosua, eadhon baile Arbah, athar Anaic: (*is e sin* Hebron.)

14 Agus dh'fhògair Caleb a mach as a sin triùir mhac Anaic, Sesai, agus Ahiman, agus Talmai, clann Anaic.

15 Agus chaidh e suas o sin gu luchd-àiteachaidh Dhebir: agus *b'e* ainm Dhebir roimhe Ciriat-sepher.

16 Agus thubhairt Caleb, Esan a bhuail-eas Ciriat-sepher, agus a ghlasas e, dhasan bheir mi Achsah mo nighean 'na mnaoi.

17 Agus ghlac Otniel, mac Chenais, bràthar Chaleib e; agus thlug e dha Achsah a nighean 'na mnaoi.

18 Agus tharladh, 'nuair a thàinig i *d'a ionnsuidh*, gu'n do bhrosnuich i e gu achadh iarraidh air a h-athair: agus theirinn i bhàrra *a* h-asail; agus thubhairt Caleb rithe, Ciod a *b'èill* leat?

19 Agus fhreagair ise, Thoir dhomh beannachadh; oir thug thu dhomh fearann mu dheas, thoir dhomh mar an ceudna tobair uisge; agus thug e dhi na tobair uachdarach, agus na tobair ìochdarach.

20 *B'i sin* oighreachd tréibhe chloinn Iudah, a réir an teaghlaichean.

21 Agus b'iad na bailtean a b'fhaide mach, le tréibh chloinn Iudah, leth ri crìch Edoim mu dheas, Cabseel, agus Eder, agus Iagur,

22 Agus Cinah, agus Dimonah, agus Adadah,

23 Agus Cedec, agus Hasor, agus Itnan,

24 Siph, agus Telem, agus Bealot,

25 Agus Hasor, Hadatah, agus Ceriot, agus Hesron, (*is e sin* Hasor.)

26 Amam, agus Sema, agus Moladah,

27 Agus Hasar-gadah, agus Hesmon, agus Bet-palet,

28 Agus Hasar-sual, agus Beerseba, agus Bis-iotiah,

29 Baalah, agus Iim, agus Asem,

¹ teanga. Eabh. ² dìreadh; Maaleh. Eabh.

³ *b'i so bu* chrìoch dhoibh.

⁴ chomharachaidh.

⁵ eirthir.

30 Agus Eltolad, agus Chesil, agus Hormah,
 31 Agus Siclag, agus Madmanah, agus Sansanah,
 32 Agus Lebaot, agus Silhim, agus Ain, agus Rimon: b'iad na mòr-bhailtean¹ uile naoi thar fhichead, maille r'am bailtibh beaga.
 33 Agus anns a' chòmhnard, Estaol, agus Soreah, agus Asnah,
 34 Agus Sanoah, agus Enganim, Tapuah, agus Enam,
 35 Iarmut, agus Adulam, Sochoh, agus Asecah,
 36 Agus Saraim, agus Aditaim, agus Gederah, agus Gederotaim; ceithir mòr-bhailte deug le'm bailtibh beaga.
 37 Senan, agus Hadasah, agus Migdal-gad,
 38 Agus Dilean, agus Mispheh, agus Ioc-teel,
 39 Lachis, agus Boscath, agus Eglon,
 40 Agus Cabon, agus Lahmas, agus Citlis,
 41 Agus Gederot, Bet-dagon, agus Naamah, agus Macedah; sè mòr-bhailte deug le'm bailtibh beaga.
 42 Libnah, agus Eter, agus Asan,
 43 Agus Iiphtah, agus Asnah, agus Nesib,
 44 Agus Ceilah, agus Aclisib, agus Maresah; naoi bailte mòra le'm bailtibh beaga.
 45 Ecron le 'bhailtibh a's mò², agus a bhailtibh beaga.
 46 O Ecron, eadhon gus an fhaighe, iad-san uile a bha làimh ri Asdod, le'm bailtibh beaga.
 47 Asdod le 'bhailtibh a's mò agus a bhailtibh beaga, Gasah le 'bhailtibh a's mò agus a bhailtibh beaga, gu amhainn na h-Eiphit, agus an fhaighe mhòir, eadhon a crìch.
 48 Agus anns na beanntaibh, Samir, agus Iatir, agus Socoh,
 49 Agus Danah, agus Cariat-sanah, eadhon Debir,
 50 Agus Anab, agus Estemoh, agus Anim,
 51 Agus Gosen, agus Holon, agus Giloh; aon mhòr-bhaile deug le'm bailtibh beaga.
 52 Arab, agus Dumah, agus Esean,
 53 Agus Ianum, agus Bet-tapuah, agus Aphecah,
 54 Agus Humtah, agus Cariat-arbah, (is e sin Hebron,) agus Sior; naoi bailte mòra le'm bailtibh beaga.
 55 Maon, Carmel, agus Siph, agus Iutah,
 56 Agus Iesreel, agus Iocdeam, agus Sanoah,

57 Cain, Gibeah, agus Timnah; deich bailte mòra le'm bailtibh beaga.
 58 Halhul, Bet-sur agus Gedor,
 59 Agus Maarat, agus Betanot, agus Eltecon; sè bailte mòra le'm bailtibh beaga.
 60 Cariat-baal, (is e sin Cariat-earim,) agus Rahab; dà bhaile mòr le'm bailtibh beaga.
 61 San fhàsach, Bet-arabah, Midin, agus Secacah,
 62 Agus Nibsan, agus baile an t-salainn³, agus En-gedi; sè bailte mòra le'm bailtibh beaga.
 63 A thaobh nan Ieubasach luchd-àiteachaidh Ierusalem, cha b'urrainn clann Iudah am fògradh a mach: ach tha na Ieubasaich 'nan còmhnuidh maille ri cloinn Iudah ann an Ierusalem gus an là'n diugh.

CAIB. XVI.

1 Crannchur chloinn Ioseiph. 5 Crìoch oighreachd Ephraim.

AGUS chaidh⁴ crannchur chloinn Ioseiph a mach o Iordan làimh ri Iericho gu uisgeachaibh Iericho air an làimh an ear, dh'ionnsuidh an fhàsaich a' dol suas o Iericho gu sliabh Bhet-eil.
 2 Agus tha e dol a mach o Bhet-el gu Lnds agus a' gabhail seachad gu crìochaibh Archi gu Atarot,
 3 Agus a' gabhail sìos a làimh na h-àirde 'n iar gu crìch Iaphleti, gu crìch Bhet-horon iochdaraich, agus gu Geser: agus tha a dhol a mach aig an fhaighe.
 4 Mar sin ghabh clann Ioseiph, Manaseh, agus Ephraim, an oighreachd.
 5 Agus bha crìoch chloinn Ephraim, a réir an teaghlachian, mar so: b'i eadhon crìoch an oighreachd air an làimh an ear Atarot-adar, gu Bet-horon uachdarach:
 6 Agus chaidh a' crìoch a mach a dh'ionnsuidh na fairge, gu Michmetah air an taobh mn thuath; agus chaidh a' chrìoch mu 'n cuairt a làimh na h-àirde 'n ear gu Taanot-siloh, agus ghabh i seachad air an taobh an ear gu Ianolah:
 7 Agus chaidh i sìos o Ianolah gu Atarot, agus gu Naarat, agus thàinig i gu Iericho, agus chaidh i mach aig Iordan.
 8 Chaidh a' chrìoch a mach o Thapuah a làimh na h-àirde 'n iar gu sruth⁵ Chanah: agus bha a dol a mach aig an fhaighe. B'i sin oighreachd tréibhe chloinn Ephraim, a réir an teaghlachian.
 9 Agus bha na bailtean mòra a chuir eadh air leth do chloinn Ephraim, am measg oighreachd chloinn Mhanaseh, na bailtean mòra uile le'm bailtibh beaga.
 10 Agus cha d'fhògair iad a mach na Canaanaich a bha còmhnuidh ann an

¹ caithriche, bailte daingnichte.

² a nigheana. Eabh.

³ Air-mele. Eabh.

⁴ thuit.

⁵ amhainn.

Geser: ach tha na Canaanaich 'nan còmh-nuidh ann measg nan Ephraimeach gus an là 'n diugh; agus tha iad a' deanamh seirbhis dhoibh fuidh chis.

CAIB. XVII.

1 Crannchur trèibhe Mhanaseh: 7 a chrìoch. 12 Cha d'fhògradh na Canaanaich a mach. 14 Fhuair clann Ioseph crannchur eile.

BHA mar an ceudna crannchur aig trèibh Mhanaseh, (oir b'esan ceudghin Ioseph,) eadhon aig Machir ceudghin Mhanaseh, athair Ghilead; a chionn gu'm b'fhear cogaidh e: uime sin bha Gilead agus Basan aige.

2 Bha mar an ceudna crannchur aig a' chuid eile do chloinn Mhanaseh a réir an teaghlachan; aig cloinn Abieser, agus aig cloinn Heleic, agus aig cloinn Asreil, agus aig cloinn Shecheim, agus aig cloinn Hepheir, agus aig cloinn Shemida: b'iad sin clann-mhac Mhanaseh, mhic Ioseph, a réir an teaghlachan.

3 Ach aig Selophehad mac Hepheir, mhic Ghilead, mhic Mhachir, mhic Mhanaseh, cha robh mic, ach nigheanan: agus is iad so ainmean a nigheana, Mahlah, agus Noah, Hoglah, Milcah, agus Tirsah.

4 Agus thàinig iad ann fagus an làthair Eleasair an t-sagairt, agus an làthair Iosua mhic Nuin, agus an làthair nan uachdaran, ag ràdh, Dh'àitlin an Tighearna do Mhaois oighreachd a thoirt duinne am measg ar bràithrean: uime sin a réir àithne an Tighearna, thug e dhoibh oighreachd am measg bhràithrean an athar.

5 Agus thuit air Manaseh deich cuibh-rionnan, thuilleadh air fearann Ghilead, agus Bhasain, a bh'air an taobh eile do Iordan;

6 A chionn gu'n robh aig nigheana Mhanaseh oighreachd am measg a chuid mac; agus bha fearann Ghilead aig a' chuid eile do mhacaibh Mhanaseh.

7 Agus bha crìoch Mhanaseh o Aser gu Michmetah, a tha fa chomhair Shecheim, agus chaidh a' chrìoch air a h-aghaidh air an làimh dheis gu luchd-àiteachaidh Entapuah.

8 A nis bha aig Manaseh fearann Thapuah: ach Tapuah air crìch Mhanaseh bu le cloinn Ephraim.

9 Agus chaidh a' chrìoch sìos gu sru h' Chanah mu dheas do'n t-sruth: bha bailte sin Ephraim ann measg bhailte Mhanaseh; bha mar an ceudna crìoch Mhanaseh air an taobh mu thuath do'n t-sruth, agus bha a dol a mach aig an fhairege.

10 An taobh mu dheas bu le Ephraim, agus an taobh mu thuath bu le Manaseh, agus b'i an fhairege a chrìoch, agus chloinn iad a chèile ann an Aser air an taobh mu thuath, agus ann an Isachar

air an taobh an ear.

11 Agus bha aig Manaseh ann an Isachar agus ann an Aser, Bet-sean agus a bhailtean, agus Ibleam agus a bhailtean, agus luchd-àiteachaidh Dhoir agus a bhailtean, agus luchd-àiteachaidh Endoir agus a bhailtean, agus luchd-àiteachaidh Thaanaich agus a bhailtean, agus luchd-àiteachaidh Mhegido agus a bhailtean; eadhon tri dùchanna.

12 Gidheadh cha b'urrainn clann Mhanaseh luchd-àiteachaidh nam bailte sin fhògradh a mach; ach b'àill leis na Canaanaich còmhnuidh ghabhail san tìr sin.

13 Gidheadh tharladh, 'nuair a dh'fhàs clann Israeil làidir, gu'n do chuir iad na Canaanaich fuidh chis; ach cha d'fhògair iad gu tur a mach iad.

14 Agus labhair clann Ioseph ri Iosua, ag ràdh, C'ar son nach d'thug thu dhomhsa ach aon chrannchur agus aon chuibh-rionn r'an sealbhachadh, agus gur sluagh mòr mi, agus gu'n do bheannaich an Tighearna mi gus a so?

15 Agus fhreagair Iosua iad, Ma's sluagh mòr thu, imich suas do'n choilltich, agus gearr sìos² dhuit féin àit an sin ann am fearann nam Peridseach, agus nam fahairean, ma tha sliabh Ephraim ro chumhainn duit.

16 Agus thubhairt clann Ioseph, Cha leòr an sliabh dhuinne: agus tha aig na Canaanaich uile a tha còmhruidh ann am fearann a' ghliune, carbadan iarium, an dà chuid aca-san a tha ann am Bet-sean agus 'na bhailtibh, agus aca-san a tha ann an gleann Iesreeil.

17 Agus labhair Iosua ri tigh Ioseph, ri h-Ephraim, agus ri Manaseh, ag ràdh, Is sluagh mòr thu, agus tha cumhachd nòr agad; cha bhi agad aon chrannchur a mhaìn.

18 Ach bithidh an sliabh agad-sa, oir is coille e; agus gearraidh tu sìos i: agus bithidh a dhol a mach agad: oir fògradh tu machna Canaanaich, ged a tha carbadan iarium aca, agus ged a tha iad làidir.

CAIB. XVIII.

1 Chuireadh suas bùth a' choimhthionail aig Siloh.

2 Roinneadh a' chuid eile do'n fhearann 'na sheachd earannaibh.

AGS cruinnich coimhthional chloinn Israeil uile an ceann a chèile aig Siloh, agus chuir iad suas pàillium a' choimhthional an sin, agus cheannsaich-eadh an tìr rompa.

2 Agus bha fathast am measg chloinn Israeil seachd treubha, nach d'fhuair an oighreachd.

3 Agus thubhairt Iosua ri cloinn Israeil, Cia fhad a tha sibh mall a dhol a shealbh-

¹ amhainn.

² réitich.

achadh an fhearainn, a thug an Tighearna Dia bhur n-à'chrìche dhuibh?

4 Thugaibh a mach *d'homh-sa* as bhur measg trìuir dhaoine as *gach* tréibh; agus cuiridh mi uam iad, agus éiridh iad, agus théid iad troimh 'n fhearann, agus tairngidh¹ iad e a réir an oighreachd-san, agus thig iad a m' ionnsuidhs' a *ris*.

5 Agus roinnidh iad e 'na sheachd earrannaibh: fanaidh Iudah 'na chrìch féin air an taobh mu dheas, agus fanaidh tigh Ioseiph 'na chrìch féin air an taobh mu thuath.

6 Uime sin tairngidh sibh am fearann 'na sheachd earrannaibh, agus bheir sibh an *tarruing*² an so a m' ionnsuidhse, chum gu'n tilg mi croinn air bhur son an so an làthair an Tighearn ar Dé.

7 Ach cha 'n'eil aig na Lebhitheach roinn sam bith 'nur measg, oir *is* i sagartachd an Tighearn, an oighreachd-san: agus fhair Gad, agus Reuben, agus leth-thréibh Mhanashe, an oighreachd-san an taobh thall do Iordan air an làimh an ear a thug Maois, oglach an Tighearna, dhoibh.

8 Agus dh'éirich na daoine, agus dh'fhalbh iad: agus dh'àithn Iosua dhoibhsan a chaidh a tharruing an fhearann, ag ràdh, Imichibh, agus rachaibh troimh 'n fhearann, agus tairngibh e, agus thigibh a ris a m' ionnsuidh-se, chum gu'n tilg mi an so croinn air bhur son, an làthair an Tighearn ann an Siloh.

9 Agus dh'imich na daoine, agus chaidh iad troimh 'n fhearann, agus tharruing iad e a réir a bhailte 'na sheachd earrannaibh, ann an leabhar, agus thàinig iad gu Iosua do'n champ aig Siloh.

10 Agus thilg Iosua croinn air an son ann an Siloh, an làthair an Tighearn: agus an sin roinn Iosua am fearann do chloinn Israèl, a réir an roinnean.

11 Agus thàinig crannchur tréibhe chloinn Bheniamin a mach a réir an teaghlachan: agus cha'dh crìoch an crannchur a mach eadar clann Iudah agus clann Ioseiph.

12 Agus bha 'n crìoch air an taobh mu thuath o Iordan: agus chaidh a' chrìoch suas gu taobh Iericho air an taobh mu thuath, agus chaidh i suas troimh 'n mhonadh a làimh na h-àirde 'n iar, agus bha a dol a mach aig fàsach Bhet-abhen.

13 Agus chaidh a' chrìoch thairis o sin gu Luds, gu taobh Luds, (*is e sin Bet-el*), ri deas, agus chaidh a' chrìoch sìos gu Atarot-adar, am fagus do'n t-sliabh a tha air an taobh dheas do Bhet-horon iochd-arach.

14 Agus thairngeadh a' chrìoch o sin, agus chuairtich i oisinn na mara ri deas, o'n t-sliabh a tha fa chomhair Bhet-horoin

ri deas: agus bha a dol a mach aig Ciriabbaal, (*is e sin Ciriatic-icarim*), baile le cloinn Iudah. B'i sin a' chearna an iar.

15 Agus bha a' chearna mu dheas o cheann Chiriatic-icarim, agus chaidh a' chrìoch a mach air an làimh an iar, agus ghabh i mach gu tobar uisgeacha Neph-oah.

16 Agus chaidh a' chrìoch sìos gu ceann na beinne, a tha fa chomhair glinne mhic Hinoim, a tha ann an gleann nam famhair-eann air an taobh mu thuath, agus chaidh i sìos gu gleann Hinoim, gu taobh Iebusi air an làimh dheis, agus ghabh i sìos gu En-rogel.

17 Agus thairngeadh i o'n taobh mu thuath, agus ghabh i air a h-aghaidh gu En-semes, agus chaidh i mach a dh'ionnsuidh Ghe'ilot, a ta thall fa chomhair uchdaich Adumim, agus ghabh i sìos gu cloich Bhohain mhic Reubin,

18 Agus ghabh i air a h-aghaidh chum na taoibh thall fa chomhair Arabah mu thuath, agus chaidh i sìos gu Arabah;

19 Agus ghabh i' chrìoch thairis gu taobh Bhet-hoglah mu thuath; agus bha dol a mach na crìche aig an lu' b mu thuath do'n mhuir shalaim, aig ceann Iordain mu dheas. B'i sin a' chrìoch mu dheas.

20 Agus b'i Iordan a chrìoch air an làimh an ear. B'i sin oighreachd chloinn Bheriamin, le a crìochaibh mu'n cuairt, a réir an teaghlachan.

21 A nis b'iad bailtean mòra³ tréibhe chloinn Bheniamin, a réir an teaghlachan, Iericho, agus Bet-hoglah, agus gleann Ches-sis,

22 Agus Bet-arabah, agus Semaraim, agus Bet-el,

23 Agus Abhim, agus Parah, agus Ophrah,

24 Agus Chephar-haamonai, agus Ophni, agus Gabah; dà mhòr-bhaile dheug le'm bailtibh beaga.

25 Gibeon, agus Ramah, agus Becrot,

26 Agus Misphe, agus Chephirah, agus Mosah,

27 Agus Rechem, agus Irpeel, agus Taralah,

28 Agus Selah, Eleph, agus Iebusi, (*is e sin Ierusalem*), Gibeat, agus Ciriatic; ceithir mòr-bhaile deug le'm bailtibh beaga. B'i sin oighreachd chloinn Bheniamin, a réir an teaghlachan.

CAIB. XIX.

1 Crannchur Shimcoim, 10 Shebulain, 17 Isachair, 24 Aseir, 32 Naphtali, 40 Dhaìn. 49 Thug clann Israèl oighreachd do Iosua 'nam measg.

AGUS thàinig an dara crannchur a mach do Shimeon, eadhon do thréibh chloinn Shimcoim, a réir an teaghlachan:

¹ sgrìobhadh no comharaichidh iad sìos.

² an samhladh, an coslas.

³ caithriche.

agus bha 'n oighreachd-san am meadhon oighreachd chloinn Iudah.

2 Agus bha aca 'nan oighreachd, Beer-sebah, agus Sebah, agus Moladah,

3 Agus Hasar-sual, agus Balah, agus Asem,

4 Agus Eltolad, agus Betul, agus Horman,

5 Agus Siclag, agus Bet-marcabot, agus Hasar-susah,

6 Agus Bet-Iebaot, agus Saruhen; trì mòr-bhailte deug agus am bailte beaga.

7 Ain, Remon, agus Eter, agus Asan; ceithir bailte mòra le'm bailtibh beaga.

8 Agus na bailtean beaga uile a bha mu thimchioll nam bailte mòra sin, gu Balat-beer-ramat, mu dheas. B'i sin oighreachd tréibhe chloinn Shimeoin, a réir an teaghlaichean.

9 A mach á crannchur chloinn Iudah bha oighreachd chloinn Shimeoin: oir bha cuibhrionn chloinn Iudah ro mhòr dhoibh; uime sin bha aig cloinn Shimeoin an oighreachd ann am meadhon an oighreachd-san.

10 Agus thàinig an treas crannchur a mach air son chloinn Shebuluin, a réir an teaghlaichean: agus bha crìoch an oighreachd-san gu Sarid.

11 Agus chaidh an crìochsuas a dh'ionnsuidh na fairge, agus Maralah, agus ràinig i gu Dabaset, agus ràinig i gu ruig an sruth a tha fa chomhair Iocneaim,

12 Agus phill i o Shared a làimh na h-àirde 'n ear, leth ri éirigh na gréine, gu crìch Chislot-taboir: agus an sin tha i dol a mach gu Dabarat, agus a' dol suas gu Iaphia,

13 Agus o sin a' gabhail thairis air an làimh an ear gu Gitah-hepher, gu Itah-casin, agus a' dol a mach gu Remon-metoar gu Neah;

14 Agus tha a' chrìoch a' dol mu'n cuairt mu thuath gu Hanaton: agus tha a dol a mach aum an gleann Iiphtah-el;

15 Agus Catat, agus Nahalal, agus Simron, agus Idalah, agus Bet-lehem; dà mhòr-bhaile dheug le'm bailtibh beaga.

16 B'i sin oighreachd chloinn Shebuluin, a réir an teaghlaichean, na bailte mòra sin le'm bailtibh beaga.

17 Thàinig an ceathramh crannchur a mach do Isachar, air son chloinn Isachair, a réir an teaghlaichean.

18 Agus b'i an crìoch Iesreel, agus Chesulot, agus Sunem,

19 Agus Hapharim, agus Sihon, agus Anaharat,

20 Agus Rabit, agus Cision, agus Abes,

21 Agus Remet, agus Enganim, agus Enhadah, agus Bet-pases;

22 Agus tha a' chrìoch a' ruigheachd gu

Tabor, agus Sahasimah, agus Bet-semes, agus bha dol a mach an crìche aig Iordan; sè mòr-bhailte deug le'm bailtibh beaga.

23 B'i sin oighreachd tréibhe chloinn Isachair, a réir an teaghlaichean, na bailte mòra agus am bailte beaga.

24 Agus thàinig an cuigeamh crannchur a mach do thréibh chloinn Aseir, a réir an teaghlaichean.

25 Agus b'i an crìoch Helcat, agus Hali, agus Beten, agus Achsaph,

26 Agus Alamelech, agus Amad, agus Miseal; agus tha i a' ruigheachd gu Carmel air an làimh an iar, agus gu Sihor-libnat,

27 Agus a' pilltinn leth ri éirigh na gréine gu Bet-dagon, agus a' ruigheachd gu Sebulun, agus gu gleann Iiphtah-el, leth ris an taobh mu thuath do Bhet-emec, agus Neiel, agus a' dol a mach gu Cabul air an làimh chli,

28 Agus Hebron, agus Rehob, agus Hamon, agus Canah, eadhon gu Sidon mòr;

29 Agus an sin tha a' chrìoch a' pilltinn gu Ramah, agus gus am mòr-bhaile daingichte¹ Tirus, agus tha a' chrìoch a' pilltinn gu Hosah; agus tha a dol a mach aig an fhairge o'n oirthir² gu Achsib;

30 Umah mar an ceudna, agus Aphec, agus Rehob; dà mhòr-bhaile thar fhichead le 'm bailtibh beaga.

31 Is i sin oighreachd tréibhe chloinn Aseir, a réir an teaghlaichean, na bailte mòra sin le 'm bailtibh beaga.

32 Thàinig an seathadh crannchur a mach do chloinn Naphtali, eadhon do chloinn Naphtali, a réir an teaghlaichean.

33 Agus bha 'n crìoch o Heleph, o Alon gu Sahananim, agus Adami, Neece, agus Iabneel, gu Lacum; agus bha a dol a mach gu Iordan.

34 Agus an sin tha a' chrìoch a' pilltinn an iar gu Asnot-tabor, agus a' dol a mach o sin gu Hucoc, agus tha i a' ruigheachd gu Sebulun air an taobh mu dheas, agus a' ruigheachd gu Aser air an taobh an iar, agus gu bruaichibh Iordain³ leth ri éirigh na gréine.

35 Agus 's iad na mòr-bhailte daingichte Sidim, Ser, agus Hamat, Racat, agus Cineret,

36 Agus Adamah, agus Ramah, agus Hasor,

37 Agus Cedec, agus Edrei, agus Enhazor,

38 Agus Iron, agus Migdalel, Horem, agus Bet-ianat, agus Bet-semes; naoi mòr-bhailte deug le'm bailtibh beaga.

39 Is i sin oighreachd tréibhe chloinn Naphtali, a réir an teaghlaichean, na bailte mòra agus am bailte beaga.

40 Agus thàinig an seachdamh crannchur

¹ a' chaithir làidir.

² eirthir.

³ gu Iudah air Iordan.

a mach do thréibh chloinn Dhain, a réir an teaghlachéan.

41 Agus b'i críoch an oighreachd Sora, agus Estaol, agus Ir-semes,

42 Agus Saalabin, agus Aialon, agus Ietlah,

43 Agus Elon, agus Timnatah, agus Ecron,

44 Agus Elteceh, agus Gibeton, agus Baalat,

45 Agus Iehud, agus Bene-berac, agus Gatrimon,

46 Agus Me-iarcon, agus Racon, maille ris a' chrìch fa chomhair Iapho.

47 Agus chaidh críoch chloinn Dhain a mach *ro ghann* doibh: uime sin chaidh clann Dhain suas agus chog iad an aghaidh Leseim, agus ghlac iad e, agus bhuail iad e le faobhar a' chlaidheimh, agus shealbhaich iad e, agus ghabh iad còmhnuidh ann, agus thug iad Dan a dh'ainm air Lesem, a réir ainme an athar Dan.

48 *Is i* sin oighreachd tréibhe chloinn Dhain, a réir an teaghlachéan, na bailte mòra sin le 'm bailtibh beaga.

49 'Nuair a chuir iad críoch air an fhearann a roinn mar oighreachd a réir an críocha, thug clann Israeil oighreachd do Iosua mac Nuin, 'nam measg:

50 A réir focail an Tighearna, thug iad da am baile a dh'iarr e, *eadhon* Timnaterah ann an sliabh Ephraim, agus thog e am baile, agus ghabh e còmhnuidh ann.

51 *Is iad* sin na h-oighreachdan a roinn Eleasar an sagart, agus Iosua mac Nuin, agus cinn aithriche threubha chloinn Israeil, mar oighreachd le crannchur, ann an Siloh an làthair an Tighearna, agus doras pàilluin a' choimhthionail. Mar sin chuir iad críoch air an fhearann a roinn.

CAIB. XX.

1 *A réir àithne Dhé do Iosua,*, 7 chuir clann Israeil air leth *se bailte dèidin.*

AGUS labhair an Tighearna ri Iosua, ag ràdh,

2 Labhair ri cloinn Israeil, ag ràdh, Sònraichibh dhuibh féin bailte dèidin, mu'n do labhair mi ribh le làimh Mhaois;

3 A chum gu'n teich am marbhaiche a mharbhas neach ann an aineolas *agus* gun fhios da, an sin; agus bithidh iad 'nan dèidin duibh o dhìoghaltair na fola.

4 Agus an uair a sheasas esan a theicheas a dh'ionnsuidh aoin do na bailtibh sin, aig dol a stigh geata a' bhaile, agus a chuir-eas e a chuìs an céill ann an chuasaibh sheanairean a' bhaile sin, gabhaidh iad a steach e do'n bhaile d'an ionnsuidh, agus bheir iad àite dha chum gu'n gabh e còmhnuidh 'nam measg.

5 Agus an uair a theid dìoghaltair na fola an tòir air, an sin cha tòir iad suas am marbhaiche d'a làimh; a chiom gu'n do bhuail e 'choimhearsnach gun fhios

da, agus gun fhuath aige dha san aimsir roimhe sin.

6 Agus gabhaidh e còmhnuidh sa' bhaile sin, gus an seas e an làthair a' chomh-chruinnich chum breitheanais, *agus* gu bàs an àrd-shagairt a bhios anns na làithibh sin: an sin pillidh am marbhaiche, agus thig e d'a bhaile féin, agus d'a thigh féin, do'n bhaile o'n do theich e.

7 Agus chuir iad air leth Cedès ann an Galilee ann an sliabh Naphtali, agus Sechèm ann an sliabh Ephraim, agus Ciriatarba (eadon Hebron) ann an sliabh Iudah.

8 Agus air taobh eile Iordain, làimh ri Iericho air an làimh an car, shònruich iad Beser anns an fhàsach air a chòmhnard á tréibh Reuben, agus Ramot ann an Gilead á tréibh Ghad, agus Golan ann am Basan á tréibh Mhanaseh.

9 B'iad sin na bailtean a shònraicheadh air son chloinn Israeil uile, agus air son a' choigrich a tha air chuairt 'nam measg, a chum ge b'e mharbhadh neach ann an aineolas, gu'n teicheadh e an sin, agus nach bàsaicheadh e le làimh dìoghaltair na fola, gus an seasadh e an làthair a' chomhchruinnich.

CAIB. XXI.

1 *Thugadh ocd bailtean agus dà fhichead le crannchur as na treubhan eile do na Lebhitich.*
43 *Thug an Tighearna fois do chloinn Israeil.*

AN sin thàinig cinn aithriche nan Lebhitheach am fagus do Eleasar an sagart, agus do Iosua mac Nuin, agus do cheannaibh aithriche threubhan chloinn Israeil;

2 Agus labhair iad ri uig Siloh ann an tìr Chanaain, ag ràdh, Dh'àithn an Tighearna le làimh Mhaois, bailtean a thoirt duinn gu còmhnuidh ghabhail annta, le'm fearann comh-roinn d'ar spréidh.

3 Agus thug clann Israeil do na Lebhitich, as an oighreachd, air àithne an Tighearna, na bailte so agus am fearann comh-roinn.

4 Agus thàinig an crannchur a mach air son theaghlachéan nan Cohatach; agus bha aig cloinn Aaron an t-sagairt, *a bha* do na Lebhitich, le crannchur á tréibh Iudah, agus á tréibh Shimeoin, agus á tréibh Bheniamin, trì bailte deug.

5 Agus *bha* aig a' chuid eile do chloinn Cohait le crannchur á teaghlachibh tréibh Ephraim, agus á tréibh Dhain, agus á leth-thréibh Mhanaseh, deich bailtean.

6 Agus *bha* aig cloinn Ghersein le crannchur, á teaghlachibh tréibh Isachair, agus á tréibh Aseir, agus á tréibh Naphtali, agus á leth-thréibh Mhanaseh ann am Basan, trì bailte deug.

7 *Bha* aig cloinn Mherari, a réir an teaghlachéan, á tréibh Reuben, agus á tréibh Ghad, agus á tréibh Shebuluin, dà bhaile dheug.

8 Agus thug clann Israeil le crannchur do na Leblithich na bailte sin le'm fearann comh-roinn, mar a dh'àithn an Tigh-earna le làimh Mhaois.

9 Agus thug iad a mach á tréibh chloinn Iudah, agus á tréibh chloinn Shimeoin, na bailte so a tha air an ainmeachadh,

10 A bha aig cloinn Aaroin do theaghlachibh nan Coliatach *muinntir a bha* do chloinn Lebhi: (oir bu leo-san an ceud chrannchur.)

11 Agus thug iad dhoibh mòr-bhaile Arba, athar Anaic, (eadhon Hebron) ann an sliabh Iudah, maille r'a fhearann comh-roinn mu'n cuairt a'.

12 Ach fearann a' mhòr-bhaile, agus a bhailte beaga, thug iad do Chaleb mac Iephuneh mar a sheilbh.

13 Mar so thug iad do chloinn Aaroin an t-sagairt, Hebron maille r'a fhearann comh-roinn, *gu bhi* 'ua bhaile didein do'n mharbhaiche, agus Libnah le 'fhearann comh-roinn.

14 Agus Iatir le 'fhearann comh-roinn, agus Estemoah le 'fhearann comh-roinn,

15 Agus Holon le 'fhearann comh-roinn, agus Decbir le 'fhearann comh-roinn.

16 Agus Ain le 'fhearann comh-roinn, agus Iutah, le 'fhearann comh-roinn, agus Bet-semes le 'fhearann comh-roinn: naoi bailtean as an da thréibh sin.

17 Agus á tréibh Bheniamin, Gibeon le 'fhearann comh-roinn, Gebah le 'fhearann comh-roinn,

18 Anatot le 'fhearann comh-roinn, agus Almon le 'fhearann comh-roinn: ceithir bailte.

19 *B'iad* uile bhailte chloinn Aaroin nan sagart, tri bailte deug le'm fearann comh-roinn.

20 Agus bha aig teaghlaichibh chloinn Chohait, na Lebhithich, a mhair do chloinn Chohait, eadhon aca-san, bailtean an crannchuir á tréibh Ephraim.

21 Oir thug iad dhoibh Sechem le 'fhearann comh-roinn ann an sliabh Ephraim, *gu bhi* 'na bhaile didein do'n mharbhaiche; agus Geser le 'fhearann comh-roinn.

22 Agus Cibsaim le 'fhearann comh-roinn, agus Bet-horon le 'fhearann comh-roinn; ceithir bailtean.

23 Agus á tréibh Dhain, Elteceh le 'fhearann comh-roinn, Gibeton le 'fhearann comh-roinn,

24 Aialon le 'fhearann comh-roinn, Gatrimon le 'fhearann comh-roinn; ceithir bailtean.

25 Agus á leth-thréibh Mhanaseh, Taanach le 'fhearann comh-roinn, agus Gatrimon le 'fhearann comh-roinn; da bhaile.

26 *B'iad* na bailtean uile le'm fearann comh-roinn deich, air son theaghlaichean chloinn Chohait a mhair *gun an oigh-*

reachd fhaghail.

27 Agus do chloinn Ghersoin, do theaghlachibh nan Leblitheach, á leth *eile* thréibh Mhanaseh, *thug iad* Golan ann am Basan le 'fhearann comh-roinn, *gu bhi* 'na bhaile didein do'n mharbhaiche, agus Bees-terah le 'fhearann comh-roinn: dà bhaile.

28 Agus á tréibh Isachair, Cison le 'fhearann comh-roinn, Dabareh le 'fhearann comh-roinn,

29 Iarmut le 'fhearann comh-roinn, Enganim le 'fhearann comh-roinn: ceithir bailtean.

30 Agus á tréibh Aseir, Misal le 'fhearann comh-roinn, Abdon le 'fhearann comh-roinn.

31 Helcat le 'fhearann comh-roinn, agus Rehob le 'fhearann comh-roinn; ceithir bailtean.

32 Agus á tréibh Naphtali, Cedes ann an Galilee le 'fhearann comh-roinn, *gu bhi* 'na bhaile didein do'n mharbhaiche; agus Hamotdor le 'fhearann comh-roinn, agus Cartan le 'fhearann comh-roinn; tri bailtean.

33 *B'iad* uile bhailte nan Gersonach a réir an teaghlaichean, tri bailte deug le'm fearann comh-roinn.

34 Agus do theaghlaichibh chloinn Mherari, a' chuid eile do na Lebhithich, á tréibh Shebuluin, Iocneam le 'fhearann comh-roinn, agus Cartah le 'fhearann comh-roinn.

35 Dimnah le 'fhearann comh-roinn, Nahalal le 'fhearann comh-roinn; ceithir bailtean.

36 Agus á tréibh Reubcin, Beser le 'fhearann comh-roinn, agus Iahasah le 'fhearann comh-roinn.

37 Cedemot le 'fhearann comh-roinn, agus Mephaat le 'fhearann comh-roinn; ceithir bailtean.

38 Agus á tréibh Ghad, Ramot ann an Gilead le 'fhearann comh-roinn, *gu bhi* 'na bhaile didein do'n mharbhaiche; agus Mahanaim le 'fhearann comh-roinn,

39 Hesbon le 'fhearann comh-roinn, Iaser le 'fhearann comh-roinn: ceithir bailte san iomlan.

40 Mar sin b'iad na bailtean uile air son chloinn Mherari, a réir an teaghlaichean, a mhair do theaghlaichibh nan Leblitheach, a réir an crannchuir, dà bhaile dheug.

41 *B'iad* uile bhailtean nan Lebhithich, an taobh a stigh do sheilbh chloinn Israeil, ochd bailtean agus dà fhìchad le'm fearann comh-roinn.

42 Bha na bailte sin gach aon le'm fearann comh-roinn mu'n timchioll: mar so *bha* na bailte sin uile.

43 Agus thug an Tighearna do Israel am fearann uile a mhionnaich e thoir d'an aithrichibh; agus shealbhaich iad e, agus ghabh iad còmhnuidh ann.

44 Agus thug an Tighearna dhoibh fois mu'n cuairt, a réir nan uile *nithe* a mhionnaich e d'an aithrichibh; agus cha do sheas duine d'an naimhdeibh uile rompa; thug an Tighearna thairis an naimhdean uile d'an làimh.

45 Cha d'fhàilnich¹ a' bheag do gach nì maith a labhair an Tighearna ri tigh Israeil: thàinig an t-iomlan gu crìch.

CAIB. XXII.

1 *An da thréibh agus an leth-thréibh air an cur d'am bùthaibh: 10 thog iad altair na fianuis' nan turas, &c.*

AN sin ghairm Iosua na Reubenich, agus na Gadaich, agus leth-thréibh Mhanaseh,

2 Agus thubhairt e riu, Ghléidh sibh na h-uile *nithe* a dh'àithn Maois òglach an Tighearna dhuibh, agus thug sibh géill do m' ghuth-sa anns na h-uile *nithibh* a dh'àithn mi dhuibh.

3 Cha d'fhàg sibh bhur bràithre rè mhòran do làithibh gus an là'n diugh, ach ghléidh sibh cùram àithne an Tighearna bhur Dé.

4 Agus a nis thug an Tighearna bhur Dia fois d'ur bràithribh, mar a gheall e dhoibh: a nis uime sin pillibh, agus rachaibh d'ur pàill'unaibh, agus gu fearann bhur seilbhe, a thug Maois, òglach an Tighearna, dhuibh air an taobh thall do Iordan.

5 Ach thugaibh ro aire gu'n coimhlion² sibh an àithne agus an lagh, a dh'àithn Maois, òglach an Tighearna, dhuibh, gràdh a thoir do'n Tighearna bhur Dia, agus gluasad na uile shligheibh, agus àith-cantan a gbleidheadh, agus dlùth-leantuin ris, agus seirbhis a dheanamh dha le'r n-uile chrìdhe, agus le'r n-uile anam.

6 Mar sin bheannaich Iosua iad, agus chuir e air falbh iad: agus chaith iad d'am pàill'unaibh.

7 A nis do *aon* leth-thréibh Mhanaseh, thug Maois *sealbh* ann am Basan: ach do'n leth-thréibh eile dhuibh thug Iosua *sealbh* ann measg am bràithrean air an taobh so do Iordan air an làimh an iar. Agus cuideachd, an uair a chuir Iosua air falbh iad d'am pàill'unaibh, an sin bheannaich e iad,

8 Agus labhair e riu, ag ràdh, Le mòr shaoibhreas pillibh d'ur pàill'unaibh, agus le ro mhòran spréidhe, le h-airgid, agus le h-òr, agus le h-umha, agus le h-iarann, agus le ro mhòran eudaich; roinnibh creach bhur naimhde r'ur bràithribh.

9 Agus phill clann Reubein, agus clann Ghad, agus leth-thréibh Mhanaseh, agus

dh'fhalbh iad o chloinn Israeil á Siloh, a tha ann an tìr Chanaain, gu dol do thìr Ghilead, gu fearann an seilbhe, a shealbhaich iad, a réir focail an Tighearna le làimh Mhaois.

10 Agus an uair a thàinig iad gu crìoch-aibh Iordain, a tha ann an tìr Chanaain, thog clann Reubein, agus clann Ghad, agus leth-thréibh Mhanaseh altair an sin làimh ri Iordan, altair mhòr ri amharc oirre.

11 Agus chuala clann Israeil air a ràdh, Feuch, thog clann Reubein, agus clann Ghad, agus leth-thréibh Mhanaseh, altair thall fa chomhair tìre Chanaain, ann an crìochaibh Iordain, far an d'fhàinig clann Israeil thairis.

12 Agus an uair a chuala clann Israeil so, chruinnich coimhthional chloinn Israeil uile iad fén an ceann a chèile aig Siloh, gu dol suas a chogadh 'nan aghaidh.

13 Agus chuir clann Israeil a dh'ionnsuidh cloinn Reubein, agus a dh'ionnsuidh cloinn Ghad, agus gu leth-thréibh Mhanaseh, do thìr Ghilead, Phinehas mac Eleasair an t-sagairt;

14 Agus deich ceannardan³ maille ris, ceannard do gach prìomh-thigh⁴, air feadh uile threubhan Israeil, agus b'e gach fear dhuibh ceann tìghe an aithriche, air feadh mhìltean Israeil.

15 Agus thàinig iad gu cloinn Reubein, agus gu cloinn Ghad, agus gu leth-thréibh Mhanaseh, gu tìr Ghilead, agus labhair iad riu, ag ràdh,

16 Mar so tha comhchruinneach an Tighearn uile ag ràdh, Cìod e an cionta so a rinn sibh an aghaidh Dé Israeil, pìlltinn air falbh an diugh o leantuin ann an Tighearna, le altair a thogail dhuibh fén, chum ceannaire a dheanamh an diugh an aghaidh an Tighearn?

17 An ro bheag dhuinn cionta Phcoir, o nach 'eil sinn air ar glanadh gus an là'n diugh, (agus *air son* an robh plàigh ann an comhchruinneach an Tighearn.)

18 Ach gu'm pilleadh sibh air falbh an diugh o'n Tighearn a leantuin? agus tarlaidh, do bhrìgh gubheil sibh a deanamh ceannaire an diugh an aghaidh an Tighearn, am màireach gu'n las 'thearg an aghaidh uile comhchruinnich Israeil.

19 Gidheadh, ma tha fearann bhur seilbhe neòghlan, rachaibh thairis a dh'fhearann seilbhe an Tighearn, far am bheil pàill'unaibh an Tighearn a chòmhnuidh, agus gabhaibh sealbh 'nar measg-re: ach na deanaibh ceannaire an aghaidh an Tighearn, no ceannaire 'nar a-ghaidh-ne, le altair a thogail daibh fén, a thuilleadh air altair an Tighearn ar Dé.

20 Nach d'rinn Achan mac Snerah cionta san nì mha'laichte, agus thuit fearg

¹ do thuit. Eabh.

² dean. Eabh.

³ uachdarain.

⁴ as gach tigh àrd-athar.

air uile chomhchrúinneach Israeil? agus cha b'e 'n duine sin 'na aonar a bhàsaich 'na chionta.

21 An sin fhreagair clann Reubein, agus clann Ghad, agus leth-thréibh Mhanaseh, agus thubhairt iad ri ceannardaibh mhíltean Israeil,

22 Aig an Tighearna Dia nan dée, aig an Tighearna Dia nan dée e féin a ta fios, agus aig Israel bithidh fios, ma's ann an ceannairc, no ann an eusaontas an aghaidh an Tighearna, (*ma's ann*, na saor sinn an diugh,)

23 A thog sinne dhuinn féin altair, gu pilltinn air falbh o'n Tighearna a leantuinn, no ma's ann a thoirt suas oirre iobairt-loisgte, no tabhartais-bìdh, no ma's ann a thoirt suas oirre iobairtean thabhartasasithe, an sin agradh an Tighearna féin e;

24 Agus mur ann air eagal an ní so a rinn sinn e, ag ràdh, Anns an àm ri teachd dh'fheudadh bhur clann-sa labhairt ri 'r cloinn-ne, ag ràdh, Ciod bhur gnothuchsa ris an Tighearna Dia Israeil?

25 Oir rinn an Tighearna Iordan 'na crìch eadar sinne agus sibhse, a chlann Reubein, agus a chlann Ghad; cha 'n'eil agaibhse cuibhrionn air bith san Tighearna: mar so bheir bhur clann-sa air ar cloinn-ne sgur do eagal an Tighearna a bhí orra.

26 Uime sin thubhairt sinn, Gabhamaid a nis mu altair a thogail dhuinn féin, cha 'n ann air son tabhartais-loisgte, no air son iobairt;

27 Ach a chum gu'm bi i 'na fianuis eadar sinne agus sibhse, agus ar sliochd 'nar déigh, a chum gu'n dean sinn seirbhis an Tighearna 'na làthair le'r tabhartais-loisgte, agus le'r n-iobairtibh, agus le'r tabhartais-sith, a chum nach abair bhur clann-sa r'ar cloinn-ne san àm ri teachd, Cha 'n'eil cuibhrionn agaibh san Tighearna.

28 Uime sin thubhairt sinn, gu'n tachair e, 'nuair a their iad so ruinne, no r'ar sliochd san àm ri teachd, gu'm bi againn ri ràdh a ris, Faicibh samhladh altair an Tighearna, a rinn ar n-aithriche, cha 'n ann air son thabhartasan-loisgte, no air son iobairtean; ach ¹ is fianuis i eadar sinne agus sibhse.

29 Gu ma fada robh e uainne ceannairc a dheanamh an aghaidh an Tighearna, agus pilltinn an diugh o leantuinn an Tighearna, le altair a thogail air son thabhartasan-loisgte, air son thabhartasan-bìdh, no air son iobairtean, seach altair an Tighearna ar Dé, a tha air beulaobh a phàilliuin.

30 Agus an uair a chuala Phinehas an sagart, agus ceannardan a' chomhchrúinnich, agus cinn mhíltean Israeil a bha maille ris, na briathran a labhair clann Reubein,

agus clann Ghad, agus clann Mhanaseh, thaitinn e riu.

31 Agus thubhairt Phinehas mac Eleasair an t-sagairt ri cloinn Reubein, agus ri cloinn Ghad, agus ri cloinn Mhanaseh, An diugh tha fhios againn gu'm bheil an Tighearna 'nar measg, a chionn nach d'rinn sibh an cionta so an aghaidh an Tighearna: a nis shaor sibh clann Israeil á làimh an Tighearna.

32 Agus phill Phinehas mac Eleasair an t-sagairt, agus na ceannardan, o chloinn Reubein, agus o chloinn Ghad, á tìr Ghillead gu tìr Chanaain, gu cloinn Israeil, agus thug iad fios d'an ionnsuidh a ris.

33 Agus thaitinn a' chùis ri cloinn Israeil, agus bheannaich clann Israeil Dia, agus cha robh rùn aca dol² suas 'nan aghaidh gu cath, a sgrios na tìre aims an robh clann Reubein agus Ghad 'nan còmluidh.

34 Agus thug clann Reubein, agus clann Ghad Ed mar ainm air an altair: oir bithidh i 'na fianuis eadarunn, gur e'n Tighearna a's Dia ann.

CAIB. XXIII.

Thug Iosua, roimh a bhàs, earail do chloinn Israeil gu lagh Dhé a choimhead gu cùramach.

AGUS an ceann ùine fhada, an déigh do'n Tighearna fois a thoirt do Israel o'n naimhaidibh uile mu'n cuairt, dh'fhàs Iosua sean, agus thàinig e air 'aghaidh ann am bliadhnaibh.

2 Agus ghairm Iosua d'a ionnsuidh Israeil uile, an seanairean, agus an ceannardan, agus am breitheamhna, agus an luchd-riaghlaidh, agus thubhairt e riu, Tha mise sean, agus air teachd air m'aghaidh ann am bliadhnaibh:

3 Agus chunnaic sibh gach ní a rinn an Tighearna bhur Dia ris na cinnich sin uile air bhur sonsa; oir is e 'n Tighearna bhur Dia e féin a chog air bhur son.

4 Faicibh, roimh mì dhuibh le crannchur na cinnich sin a mhaireas, gu bhí 'nan oighreachd d'ur treubhan, o Iordan, maille ris na cinnich uile a ghearr mi as, eadhon gus an fhairge mhòir air an taobh an iar.

5 Agus an Tighearna bhur Dia, fuadaichidh esan iad as bhur fianuis, agus iomainidh e iad a mach as bhur sealladh; agus sealbhaichidh sibh am fearann, mar a gheall an Tighearna bhur Dia dhuibh.

6 Bithibh-se uime sin ro mhisneachail a ghleidheadh agus a dheanamh nan uile nithe a ta sgrìobhta ann an leabhar lagha Mhaois, a chum nach pill sibh a leth-taobh uaith, a dh'ionnsuidh na làimhe deise, no dh'ionnsuidh na làimhe clìthe;

7 A chum nach tig sibh air feadh nan cinneach sin, nan cinneach sin a mhaireas 'nur measg, agus nach luadh sibh ainm an dée, agus nach unionnaich sibh orra,

¹ oir.

² cha dubhairt iad gu'n rachadh iad Eabh.

agus nach dean sibh seirbhis dhoibh, agus nach crom sibh sibh féin doibh:

8 Ach dlùth-leanaibh ris an Tighearna bhur Dia, mar a rinn sibh gus aulà'n diugh.

9 Oir dh'fhuadaich an Tighearna a mach as bhur fianuis cinnich mhòr agus threun: ach d'ur taobh-sa, cha b'urraim duine sam bith seasamh roimhibh gus an là'n diugh.

10 Cuiridh aon fhear dhibh an teich-eadh air mìle: oir is e'n Tighearna bhur Dia e féin a chogas air bhur son, mar a gheall e dhuibh.

11 Thugaibh, uime sin, aire mhaith dhuibh féin, gu'n gràdhach sibh an Tighearna bhur Dia.

12 No ma théid sibh air chor sam bith air bhur n-ais, agus ma leanas sibh ri fuigheall nan cinneach sin eadhon nan cinneach sin a mhaireas 'nur measg, agus ma nì sibh cleamhnas riut, agus ma théid sibh a steach d'an ionnsuidh, agus iadsan d'ur n-ionnsuidh-sa:

13 Biodh fios cimteach agaibh, nach fuadaich an Tighearna bhur Dia tuilleadh aon air bith do na cinnich sin a mach roimhibh; ach bithidh iad dhuibh 'nan ribe, agus 'nan ceap-tuislidh, agus 'nan sgiursadh, 'nur taobhan, agus 'nam bioraibh 'nur suilbhi, gus an téid as duibh bhàrr an fhearainn mhaith so a thug an Tighearna bhur Dia dhuibh.

14 Agus, feuch, a *ta* mise an diugh a' dol air slighe na talmhainn uile, agus tha fhios agaibh féin 'nur n-uile chridhe, agus 'nur n-uile anam, nach d'fhàilnich aon ni do na nithibh maithé sin uile a labhair an Tighearna bhur Dia d'ur taobh; thàinig iad gu léir gu crìch dhuibhse, cha d'fhàilnich aon ni dhuibh.

15 Uime sin tarlaidh, mar a thàinig na h-uile nithe maithé oirbh, a gheall an Tighearna bhur Dia dhuibh, mar sin gu'n toir an Tighearn oirbh na h-uile nithe ole, gus an sgrios e sibh bhàrr an fhearainn mhaith so a thug an Tighearna bhur Dia dhuibh.

16 Nuair a bhriseas sibh coimhcheangal an Tighearna bhur Dé, a dh'àithn e dhuibh, agus a théid sibh, agus a nì sibh seirbhis do dhiathaibh eile, agus a chromas sibh sibh féin doibh; an sin lasaidh fearg an Tighearna 'nur n-aghaidh, agus théid as duibh gu grad bhàrr an fhearainn mhaith a thug e dhuibh.

CAIB. XXIV.

1 Chruinnich Iosua treubhan Israeil gu Sechem.
2 Dh'àithris e tiodhlacan Dé: 14 dh'athnuadh-
aich e coimhcheangal eadar Dia agus iad.

AGUS chruinnich Iosua treubhan Israeil uile gu Sechem, agus ghairm e air seannairibh Israeil, agus air an ceann-

ardaibh, agus air am breitheamhnaibh, agus air an luchd-riaghlaidh; agus nochd siad iad féin am fianuis Dé.

2 Agus thubhairt Iosua ris an-t-sluagh uile, Mar so tha 'n Tighearna Dia Israeil ag ràdh, Air taobh thall na h-aimhne¹, anns an t-sean aimsir, chòmhnuich bhur n-aithriche, eadhon Terah, athair Abraham, agus athair Nachoir: agus rinn iad seirbhis do dhiathaibh eile.

3 Agus thug mi bhur n-athair Abraham o thaobh thall na h-aimhne, agus threòrach mi e troimh thìr Chanaain uile, agus rinn mi a shliochd lionmhor, agus thug mi dha Isaac.

4 Agus thug mi do Isaac, Iacob agus Esau: agus thug mi do Esau slabh Sheir 'a shealbhachadh; ach chaidh Iacob agus a chlann sìos do'n Eiphit.

5 Chuir mi Maois mar an ceudna agus Aaron a mach, agus bhuail mi an Eiphit, a réir an nì sin a rinn mi 'na meadhan: agus an déigh sin thug mi sibhse mach.

6 Agus thug mi bhur n-aithriche as an Eiphit: agus thàinig sibh a dh'ionnsuidh na fàirge; agus lean na h-Eiphitich bhur n-aithriche le carbadaibh agus marcshluaigh gus a' mhuir ruaidh.

7 Agus an uair a ghlaodh iad ris an Tighearna, chuir e dorchain eadarsibhse agus na h-Eiphitich, agus thug e a' mhuir orrasan, agus dh'fholaich e iad; agus chunnaic bhur sùile ciod a rinn mi san Eiphit: agus ghabh sibh còmhmuidh san fhasach ùine fhada.

8 Agus thug mi sibh do fhearamn nan Amoraich, a bha còmhmuidh air an taobh thall do Iordan; agus chog iad riibh: agus thug mi thairis iad d'ur làimh, agus shealbhaich sibh am fearann: oir sgrios mise iad as bhur fianuis.

9 An sin dh'érich Balac mac Shipoir, rìgh Mhoab, agus chog e 'n aghaidh Israeil, agus chuir e fios, agus ghairm e Balaam mac Bheoir, chum sibhse a mhallachadh.

10 Ach cha 'n éisdinn-sa ri Balaam; uime sin da rìreadh bheannaich e sibh: mar sin shaor mi sibh as a làimh.

11 Agus chaidh sibh thar Iordan, agus thàinig sibh gu Iericho: agus chog fir Iericho 'nur n-aghaidh, na h-Amoraich, agus na Peridsich, agus na Canaanaich, agus na Hìtich, agus na Gircasaich, na Hìbhich, agus na Iebusaich; agus thug mi thairis iad d'ur làimh.

12 Agus chuir mi a' chonnas beach² roimhibh, a dh'fhuadaich iad a mach as bhur fianuis, eadhon dà rìgh nan Amoraich; ach cha 'n ann le d' chlàidheamh, no le d' bhogha.

13 Agus thug mi dhuibh fearann anns nach do shaothraich sibh, agus bailte nach do thog sibh, agus ghabh sibh còmh-

¹ an t-srutha. -

² an ceannabhan; hornet. Sasg.

muidh annta; do fhìon-liosaibh agus do liosaibh-olaidh nach do shuidhich sibh, tha sibh ag itheadh.

14 A nis uime sin biodh eagal an Tighearn oirbh, agus deanaibh seirbhis dha ann an treibhdhreas agus am fìrinn, agus cuiribh uaibh na dée d'an d'rinn bhuir n-aithriche seirbhis air taobh thall na h-aimhne, agus anns an Eiphit, agus deanaibh seirbhis do'n Tighearn.

15 Agus ma mheasare oile leibh seirbhis a dheanamh do'n Tighearna, roghnaichibh an diugh cò d'an dean sibh seirbhis; an ann do na diathaibh d'an d'rinn bhuir n-aithriche seirbhis, a bh'air taobh thall na h-aimhne, no do dhiathaibh nan Amoraich, muinntir a tha sibh a chòmhnuidh 'nan tìr: ach air mo shon-sa, agus air son mo thighe, ni sinne seirbhis do'n Tighearn.

16 Agus fhreaga'r an sluagh, agus thubhairt iad, Gu ma fada robh e uainne an Tighearn a thréigsinn, gu seirbhis a dheanamh do dhiathaibh eile;

17 Oir an Tighearna ar Dia, is esan a thug a nìos sinne, agus ar n-aithrichean á tìr na h-Eiphit, á tigh na daorsa, agus a rinn na comharan mòra sin 'nar sealladh, agus a ghhléidh sinn anns an uile shlighe air an d'imich sinn, agus am measg nan uile shlògh trid an deachaidh sinn:

18 Agus dh'fhògair an Tighearn a mach romhainn na slòigh uile, eadhon na h-Amoraich a bha chòmhnuidh san tìr; uime sin ni sinne mar an ceudna seirbhis do'n Tighearn, oir is esan ar Dia.

19 Agus thubhairt Iosua ris an t-sluagh, Cha'n urrainn sibh seirbhis a dheanamh do'n Tighearn; oir is Dia ro naomh e; is Dia eudmhor e; cha lagh e bhuir n-eus-aontais, no bhuir peacanna.

20 Ma thrèigear sibh an Tighearn, agus ma ni sibh seirbhis do dhiathaibh coimheach¹, an sin pillidh e agus ni e oile oirbh, agus claidhidh e sibh, an déigh dha maith a dheanamh dhuibh:

21 Agus thubhairt an sluagh ri Iosua, Nì h-eadh, ach ni sinne seirbhis do'n Tighearn.

22 Agus thubhairt Iosua ris an t-sluagh,

Is fianuiscan sibh 'nur n-aghaidh féin, gu'n do thagh sibh dhuibh féin an Tighearna, gu seirbhis a dheanamh dha. Agus thubhairt iad, Is fianuiscan sinn.

23 A nis uime sin cuiribh air falbh (*ars' esan*) na diathan coimheach a ta 'nur measg, agus aomaibh bhuir cridhe ris an Tighearna Dia Israeil.

24 Agus thubhairt an sluagh ri Iosua, Do'n Tighearn ar Dia ni sinn seirbhis, agus r'a ghuthsan éisd:dh sinn.

25 Mar sin rinn Iosua coimheangal ris an t-sluagh air an là sin: agus shuidhich e dhoibh reachd, agus riaghailt ann an Sechem.

26 Agus sgrìobh Iosua na briathra so ann an leabhar lagha Dhé. agus ghabh e clach mhòr, agus chuir e suas i an sin fuidh dharaig, a bha làimh ri ionad naomh an Tighearna.

27 Agus thubhairt Iosua ris an t-sluagh uile, Feuch, bithidh a' chlach so 'na fianuis duinn: oir chual' i uile bhriathran an Tighearn a labhair e ruinn: bithidh i uime sin 'na fianuis 'nur n-aghaidh-sa, air eagal gu'n àicheadh sibh bhuir Dia.

28 Agus leig Iosua leis an t-sluagh im-eachd, gach duine d'a oighreachd féin.

29 Agus an déigh nan n'the sin, fhuair Iosua mac Nuin, óglach an Tighearna, bàs, agus e ceud agus deich bliadhna dh'aois.

30 Agus dh'adhlaic iad e ann an crìch oighreachd féin ann an Timnat-serah, a tha ann an sliabh Ephraim, air an taobh mu thuath do shliabh Ghaais.

31 Agus rinn Israeil seirbhis do'n Tighearn uile làithean Iosua, agus uile làithean nan seanair a mhair beò an déigh Iosua, agus d'am b'aithne uile oibre an Tighearn, a rinn e air son Israeil.

32 Agus dh'adhlaic iad cnàmhan Ioseiph, a thug clann Israeil a nìos as an Eiphit, ann an Sechem, ann am mìr fearainn a cheannaich Iacob o mhacaibh Hamoir, athar Shechem, air son ceud bonn airgid; agus bha e 'ua oighreachd aig cloinn Ioseiph.

33 Agus fhuair Eleasar mac Aaroin bàs, agus dh'adhlaic iad e ann an sliabh le Phinehas a mhaic, a thugadh dha ann an sliabh Ephraim.

¹ do dhiathaibh dùcha eile, do dhiathaibh choigreach.

BREITHEAMHNA.

CAIB. I.

1 Chaidh Iudah agus Simeon suas a chogadh an aghaidh nan Canaanach. 6 Lean iad, agus ghlac iad Andoni-besec. 8 Ghlacadh Ierusalem, 10 agus Hebron.

ANIS an déigh bàis Iosua, dh'fhiosraich¹ clann Israeil do'n Tighearn,

ag ràdh, Cò a théid suas air ar son an aghaidh nan Canaanach air ùis, a chogadh 'nan aghaidh?

2 Agus thubhairt an Tighearna, Théid Iudah suas: feuch, thug mi 'n tìr thairis d'a làimh.

3 Agus thubhairt Iudah ri Simeon a bhràthair, Thig a nìos maille riumsa do

¹ dh'fhiosraich.

m' chrannchur, a chum gu'n cog sinn an aghaidh nan Canaanach, agus theid mise mar an cendna maille riutsa do d' chrannchur-sa. Agus chaidh Simeon maille ris.

4 Agus chaidh Iudah suas; agus thug an Tighearna na Canaanach, agus na Peridsich, thairis d'an làimh; agus mharbh iad duibh ann am Besec deich mìle fear.

5 Agus fhuair iad Adoni-besec ann am Besec; agus chog iad 'na aghaidh, agus bhuail iad na Canaanach agus na Peridsich.

6 Ach theich Adoni-besec, agus lean iad e, agus ghlac iad e, agus ghearr iad dheth ordagan a làmh agus a chos.

7 Agus thubhairt Adoni-besec, Thionail tri fichead agus deich rìghrean, aig an robh ordagan an làmh agus an cos air an gearradh dhiubh, *am biadh* fuidh m' bhord-sa: mar a rinn mi, mar sin dhiol Dia orm. Agus thug iad e guh-Ierusalem, agus fhuair e bàs an sin.

8 A nis chog clann Iudah an aghaidh Ierusalem, agus ghlac iad e, agus bhuail iad e le faobhar a' chlaidheimh, agus chuir iad am baile ri theime.

9 Agus an dèigh sin, chaidh clann Iudah sìos a chogadh an aghaidh nan Canaanach, a bha chòmhnuidh sa' mhonadh, agus anns an àirde deas, agus anns a' chòmhnard.

10 Agus chaidh Iudah an aghaidh nan Canaanach a bha chòmhnuidh ann an Hebron, (a nis b'e ainm Hebron roimhe Ciri-at-arba;) agus mharbh iad Sesai, agus Abimam, agus Talmai.

11 Agus á sin chaidh e an aghaidh luchd-àiteachaidh Dhebir: (agus b'e ainm Dhebir roimhe Ciri-at-sephier:

12 Agus thubhairt Caleb, Esan a bhuail-eas Ciri-at-sepher, agus a ghlacas e, dhasan bheir mi Achsah mo nighean 'na mnaoi.

13 Agus ghlac Otniel mac Chenais bràthar a b'òige Chaleib e: agus thug e dha Achsah a nighean 'na mnaoi.

14 Agus an uair a thàinig i d'a ionnsuidh, bhrosnaich i e gu achadh iarraidh o h-athair: agus theirinn i bhàrr a h-asail: agus thubhairt Caleb rithe, Ciod is àill leat?

15 Agus thubhairt i ris, Thoir dhomh beannachadh: oir thug thu dhomh fearann ri deas¹; thoir dhomh mar an cendna tobair uisge. Agus thug Caleb dh'i na tobair uachdarach, agus na tobair ìochdarach.

16 Agus chaidh clann a' Chenich, athar-cèile Mhaois, suas á baile nan craobh-pailme, maille ri cloinn Iudah, do fhàsach Iudah, a tha air an taobh mu dheas do Arad; agus chaidh iad agus ghabh iad còmhnuidh am measg an t-sluaigh.

17 Agus chaidh Iudah maille ri Simeon a bhràthair, agus bhuail iad na Canaanach a bha 'nan còmhnuidh ann an Sephat, agus sgrios iad gu tur e: (agus thugadh Hormah mar ainm air a' bhaile:)

18 Agus ghlac Iudah Gasa agus a chrìochan, agus Ascelon agus a chrìochan, agus Ecron agus a chrìochan.

19 Agus bha'n Tighearna maille ri Iudah; agus ghabh e sealbh air a' mhonadh, ach cha b'urrainn e luchd-àiteachaidh an t-sratha fhògradh a mach, a chionn gu'n robh carbad iaruirinn aca.

20 Agus thug iad Hebron do Chaleb, mar a thubhairt Maois: agus dh'fhuadach e as a sin triuir² mhac Anaic.

21 Agus cha do chuir clann Bheniamin a mach na Ieusaich a bha 'nan còmhnuidh ann an Ierusalem; ach tha na Ieusaich 'nan còmhnuidh maille ri cloinn Bheniamin ann an Ierusalem gus an là'n diugh.

22 Agus chaidh tigh Ioseiph mar an cendna suas an aghaidh Bnet-eil: agus bha'n Tighearna maille ri u.

23 Agus chuir tigh Ioseiph daoine a rannsachadh a mach Bhet-eil: (a nis b'e ainm a' bhaile roimhe Luds.)

24 Agus chunnaic an luchd-bratha duine a' teachd a mach as a' bhaile, agus thubhairt iad ris, Fench dhuinn, guidheama'd ort, an rathad a stigh do'n bhaile, agus nochdaidh sinn tròcair dhuit.

25 Agus an uair a dh'fheuch e dhoibh an rathad a stigh do'n bhaile, bhuail iad am baile le faobhar a' chlaidheimh: ach leig iad air falbh an duine agus a theaghlach uile.

26 Agus chaidh an duine do fhearann nan Hiteach, agus thog e baile, agus thug e Luds mar ainm air: is e so 'ainm gus an là'n diugh.

27 Cha mhò a dh'fhògair Manaseh a mach luchd-àiteachaidh Bhet-seain agus a bhaile, no Phaanaich agus a bhaile, no luchd-àiteachaidh Dnoir agus a bhaile, no luchd-àiteachaidh Ibleaim agus a bhaile, no luchd-àiteachaidh Mhegido agus a bhaile: ach b'àill leis na Canaanach còmhnuidh a ghabhail san fhearann sin.

28 Agus tharladh, an uair a dh'fhàs Israel làidir, gu'n do chuir iad na Canaanach fuidh chis; ach cha d'fhuadaich iad gu buileach a mach iad.

29 Cna mhò a dh'fhuadaich Ephraim a mach na Canaanach a bha chòmhnuidh ann an Geser: ach ghabh na Canaanach còmhnuidh 'nam measg ann an Geser.

30 Cha mhò a dh'fhuadaich Sebulam a mach luchd-àiteachaidh Chitroin, no luchd-àiteachaidh Nahaloil: ach ghabh

¹ fearann tioram, leth.

² triuir.

na Canaanaich còmhnuidh 'nam measg, agus bha iad fuidh chis *dhoibh*.

31 Cha mhò a dh'fhuadaich Aser a mach luchd-àiteachaidh Acho, no luchd-àiteachaidh Shidoin, no Achlaib, no Achsib, no Helbah, no Aphic, no Rehoib:

32 Ach ghabh na h-Aserich còmhnuidh am measg nan Canaanach, luchd-àiteachaidh na tìre; oir cha d'fhuadaich iad a mach iad.

33 Cha mhò a dh'fhuadaich Naphtali a mach luchd-àiteachaidh Bhet-semeis, no luchd-àiteachaidh Bhet-anait; ach ghabh e còmhnuidh am measg nan Canaanach, luchd-àiteachaidh na tìre: gidheadh bha luchd-àiteachaidh Bhet-semeis agus Bhet-anait fuidh chis doibh.

34 Agus dh'èignich na h-Amoraich clann Dhaim do'n t-sliabh: oir cha leigeadh iad leo teachd a nuas do'n ghleann.

35 Ach b' àill leis na h-Amoraich còmhnuidh a ghabhail am an sliabh Hereis ann an Aialon, agus ann an Saalbim: gidheadh bhuaidhaich làmh tighe Ioseiph, agus bha iad fuidh chis doibh.

36 Agus *bha* crìoch nan Amorach o uchdaich Acrabim, o'n charraig, agus suas o sin.

CAIB. II.

1 *Chronaich aingeal an sluagh aig Bochim.*

10 *Aingidheadh a' ghinealach an dèigh Iosua.*

AGUS thàinig aingeal an Tighearna a nìos o Ghilgal gu Bochim, agus thubhairt e, Thug mi nìos sibh as an Eiphit, agus thug mi steach sibh do'n fhearann a mhionnaich mi d'ur n-aithrichibh; agus thubhairt mi, Cha bhris mi mo choimhcheangal ribh gu bràth.

2 Agus cha dean sibh coimhcheangal sam bith ri luchd-àiteachaidh na tìre so; tilgidh sibh sìos an altairean: ach cha d'fhug sibh géill do m' ghuth: c'ar son a rinn sibh so?

3 Uime sin mar an ceudna thubhairt mi, Cha'n fhuadaich mi mach iad roimhibh; ach bithidh iad mar *bhiora* 'nur taobhan, agus bithidh an dèe 'nan rìbe dhuibh.

4 Agus an uair a labhair aingeal an Tighearna na briathra sin ri cloinn Israeil uile, thog an sluagh suas an guth, agus ghuil iad.

5 Agus ghairm iad ainm an àite sin Bochim: agus dh'ìobair iad an sin do'n Tighearn.

6 Agus an uair a leig Iosua leis an t-sluagh imeachd, chaidh clann Israeil gach duine d'a oighreachd a ghabhail seilbhe air an fhearann.

7 Agus rinn an sluagh seirbhis do'n Tighearna rè uile làithean Iosua, agus uile làithean nan seanair a mhair beò an dèigh Iosua, a chunnaich uile oibre mòra an

Tighearna, a rinn e air son Israeil.

8 Agus fhuair Iosua mac Nuin, òglach an Tighearna, bàs, agus e ceud agus deich bliadhna dh'aois.

9 Agus dh'adhlac iad e ann an crìch 'oighreachd féin ann an Timnat-heres, ann an sliabh Ephraim, air an taobh mu thuath do shliabh Ghaais.

10 Agus chruinnicheadh mar an ceudna an ginealach sin uile chum an aithriche: agus dh'èirich ginealach eile suas 'nan dèigh, do nach b'aithne an Tighearna, no na h-oibre a rinn e air son Israeil.

11 Agus rinn clann Israeil olc ann an sealladh an Tighearna, agus rinn iad seirbhis do Bhaalim.

12 Agus thréig iad an Tighearna Dia an aithriche, a thug a mach iad á tìr na h-Eiphit, agus lean iad diathan eile, do dhiathaibh an t-sluaigh a *bha* mu'n cuairt orra, agus chrom siad iad féin sìos doibh, agus bhrosnaich iad an Tighearna gu corr-uich.

13 Agus thréig iad an Tighearna, agus rinn iad seirbhis do Bhaal agus do Astarot.

14 Agus las corr-uich an Tighearna an aghaidh Israeil, agus thug e thairis iad do làimh chreachadairean a chreach iad, agus reic e iad do làimh an naimhdean mu'n cuairt, air chor as nach b'urrainn iad ni b'fhaide seasamh an làthair an naimhde.

15 Ge b'e taobh a chaidh iad a mach, bha làmh an Tighearna 'nan aghaidh chum uile, mar a thubhairt an Tighearna, agus mar a mhionnaich an Tighearna dhoibh: agus bha iad ann an teinn ro mhòir.

16 Gidheadh thog an Tighearna suas breitheamhna, a shaor iad á làimh na muinntir sin a chreach iad.

17 Gidheadh cha'n éisdeadh iad r'am breitheamhnaibh, ach chaidh iad le strìopachas an dèigh dhiathan eile, agus chrom siad iad féin doibh: phill iad gu grad as an t-slighe anns an d'imich an aithriche, a' toirt géill a dh'àitheantaibh an Tighearna: cha d'rinn iadsan mar sin.

18 Agus an uair a thog an Tighearna suas doibh breitheamhna, an sin bha 'n Tighearna leis a' bhreitheamh, agus shaor e iad á làimh an naimhde, rè uile làithean a' bhreitheamh: oir ghabh an Tighearna truas *diubh* air son an òsuaich o làthair¹ na muinntir sin a rinn ainneart orra, agus a shàraich iad².

19 Agus an uair a bha 'm breitheamh marbh, phill iad, agus thruaill siad iad féin nìs mò na 'n aithriche, ann an leant-uinn dhiathan eile, gu seirbhis a dhèanamh dhoibh, agus gu cromadh sìos doibh; cha do sguir iad o'n gnìomharaibh féin, no o'n slighe eas-ùmhail.

¹ air son.

² a theannaich iad. Eabh.

20 Agus las fearg an Tighearn an aghaidh Israeil; agus thubhairt e, A chionn gu'n do bhris an sluagh so mo choimhcheangal a dh'àithn mi d'an aithrichibh, agus nach d'éis iad ri m' ghuth,

21 Cha chuir mise mar an ceudna, á so suas, duine sam bith a mach roimpe, do na cinnich a dh'fhàg Iosua 'nuair a fhuair e bàs;

22 Chum leo-san gu'n dearbh mi Israel, an gléidh iad slighe an Tighearn, a dh'im-eachd innte, mar a ghléidh an aithrichean i, no nach gléidh.

23 Uime sin dh'fhàg an Tighearna na cinnich sin, gun am fuadachadh a mach gu grad; agus cha d'thug e thairis iad do làimh Iosua.

CAIB. III.

1 Na cinnich a dh'fhàgadh chum clann Israeil a dhearbhadh. 5 Le còmhnuidh a ghabhail 'nam measg, thairnneadh iad gu h-olc a dheanamh ann an sealladh an Tighearn.

ANIS is iad so na cinnich a dh'fhàg an Tighearn a dhearbhadh Israeil leo; (eadhon a mheud do Israel do nach b'aithne cogaidh Chanaain uile;

2 A mhàin a chum gu'm b'aithne do ghinealaich chloinn Israeil cogadh iunusachadh dhoibh, air bheag sam bith dhoibhsan do nach b'aithne a bheag dheth roimhe;)

3 Eadhon cùig tighearnan nam Philisteach, agus na Canaanach uile, agus na Sidonaich, agus na Hibhich a bha còmhnuidh ann an sliabh Lebanon, o shliabh Bhaal-hermoim gu dol a stigh Hamait.

4 Agus bha iad gu Israel a dhearbhadh leo, a dh'aithneachadh an éisdeadh iad ri àitheantaibh an Tighearn, a dh'àithn e d'an aithrichibh le làimh Mhaois.

5 Agus ghabh clann Israeil còmhnuidh am measg nan Canaanach, nan Hiteach, agus nan Amorach, agus nam Peridseach, agus nan Hibheach, agus nam Iebusach:

6 Agus ghabh iad an nigheana gu bhi 'nam mnaibh aca, agus thug iad an nigh-eana féin d'am macaibh-san; agus rinn iad seirbhis d'an diathaibh.

7 Agus rinn clann Israeil olc ann an sùilbh an Tighearn, agus dhi-chuimhnich iad an Tighearn an Dia, agus rinn iad seirbhis do Bhaalim, agus do Astarot¹.

8 Uime sin, las fearg an Tighearn an aghaidh Israeil, agus reic e iad do làimh Chusan-risataim righ Mhesopotamia: agus rinn clann Israeil seirbhis do Chusan-risataim ochd bliadhna.

9 Agus an uair a ghlaodh clann Israeil ris an Tighearna, thog an Tighearna suas fear-saoraidh do chloinn Israeil, a shaor iad, eadhon Otniel mac Chenais, bràthar

a b'òige Chaleib.

10 Agus bha spiorad an Tighearn air, agus thug e breth air Israel, agus chaidh e mach a chogadh: agus thug an Tighearna thairis d'a làimh Cusan-risataim righ Mhesopotamia; agus bhuadhaich a làmh an aghaidh Chusan-risataim.

11 Agus bha fois aig an tìr rè dhà fhichead bliadhna: agus fhuair Otniel mac Chenais bàs.

12 Agus rinn clann Israeil olc a ris ann an sùilbh an Tighearn: agus neartaich an Tighearn Eglon righ Mhoib an aghaidh Israeil, a chionn gu'n d'rinn iad olc ann an sùilbh an Tighearn.

13 Agus chrùinnich e d'a ionnsuidh clann Amoin, agus Amalec, agus chaidh e agus bhuail e Israel, agus shealbhaich iad baile² nan craobh-pailme.

14 Agus rinn clann Israeil seirbhis do Eglon righ Mhoib ochd bliadhna deug.

15 Ach an uair a ghlaodh clann Israeil ris an Tighearna, thog an Tighearna suas doibh fear-saoraidh, Ehud mac Ghera, Benamineach, duine ciotach³: agus leis-san chuir clann Israeil tiodhlac gu h-Eglon righ Mhoib.

16 Ach rinn Ehud dha féin claidheamh, aig an robh dà fhaobhar, làmh-choille air fad; agus cheangail se e fuidh 'eudach, air a shliasaid dheis.

17 Agus thug e 'n tiodhlac gu h-Eglon righ Mhoib: agus bha Eglon 'na dhuine ro reamhar.

18 Agus an uair a chuir e crìoch air an tiodhlac a thoirt seachad, chuir e air falbh an sluagh a ghlùlain an tiodhlac.

19 Ach phill e féin a ris o na clach-shloc-aibh⁴ a bha làimh ri Gilgal, agus thubhairt e, Tha gnothuch uaigneach agam riut, O a righ. Agus thubhairt esan, Bi d' thosd. Agus chaidh iadsan uile a sheas làimh ris a mach uaith.

20 Agus chaidh Ehud a steach d'a ionnsuidh; agus bha e 'na shuidhe ann an seòmar-samhraidh⁵, a bh'aige dha féin a mhàin: agus thubhairt Ehud, Tha teachd-aireachd agam o Dhia a d' ionnsuidh. Agus dh'èirich e suas as a chathair.

21 Agus chuir Ehud a mach a làmh chlì, agus thug e 'n claidheamh o 'shliasaid dheis, agus slàth e 'na bhroinn e.

22 Agus chaidh an dorn-chur a stigh mar an ceudna an déigh na loinne, agus dhùin an t-saill air an loinn; oir cha do tharruing e 'n claidheamh⁶ as a bhroinn: agus thàinig an salchar a mach.

23 An sin claidh Ehud a mach troimh 'n rhor-dhorus⁷, agus dhùin e dorsan an t-seòmair air, agus ghlaic e iad.

24 'Nuair a chaidh e mach, thàinig a

¹ do na doireachaibh.

² cathair.

³ clì-làmhach.

⁴ quarries. Sasg.

⁵ fionnfhuairreachd. ⁶ air chor as nach b' urrainn e 'n claidheamh a tharruing.

⁷ porch. Sasg.

sheirbhisich; agus an uair a ehunnaic iad, feuch, gu'n robh dorsan an t-seòmair glaiste, thubhairt iad, Gu cinnteach *tha* e còmhdaichadh a chos 'na sheòmar-samhraidh.

25 Agus dh'fheith iad gus an robh nàire orra: agus, feuch, cha d'fhosgail e dorsan an t-seòmair; uime sin ghabh iad iuchair, agus dh'fhosgail siad *iad*: agus, feuch, *bha* 'n tighearn air tuiteam sìos marbh air an talamh.

26 Agus chaidh Ehud as, an uair a bha iadsan fuidh amhladh¹; agus chaidh e seachad air na elach-shlocaibh, agus chaidh e as gu Seirat.

27 Agus an uair a bha e air teachd, shéid e trompaid ann an sliabh Ephraim, agus chaidh clann Israeil sìos maille ris o'n t-sliabh, agus esan rompa.

28 Agus thubhairt e riu, Leanaibh mise; oir thug an Tighearna bhur naimhde na Moabaich thairis d'ur làimh. Agus chaidh iad sìos 'na dhéigh, agus ghlae iad àthanna Iordain leth ri Moab, agus ehe do leig iad duine thairis.

29 Agus mharbh iad do Mhoab, san àm sin, mu thimchioll deich mìle fear, sult-mhòr² uile, agus 'nan daoinibh gaisgeil uile: agus eha deachaidh duine air bith as.

30 Mar sin cheannsaicheadh Moab air an là sin fuidh làimh Israeil. Agus bha fois aig an tìr ceithir fichead bliadhna.

31 Agus 'na dhéigh-san bha Samgar mac Anaìt, a mharbh do na Philistich sè eud fear le lairg-iomain³ dhamh: agus shaor esan Israel mar an ceudna.

CAIB. IV.

1 Shaor Deborah agus Barac clann Israeil o Iabin agus o Shisera. 18 Mharbh Iael Sisera.

AGUS rinn clann Israeil oile a ris ann an sùlibh an Tighearna, 'nàir a bha Ehud marbh.

2 Agus reic an Tighearn iad do làimh Iabin rìgh Chanaain, a rìghieh ann an Hasor; agus b'e ceannard a shluaigh Sisera, a bha chòmhluidh ann an Haroset nan einneach.

3 Agus ghlaodh clann Israeil ris an Tighearn: oir bha naoi ceud carbad iar-uinn aige; agus rinn e ainneart air cloinn Israeil gu ro mhòr rè fhichead bliadhna.

4 Agus thug Deborah ban-fhàidh, bean Lapidot, breth air Israel san àm sin.

5 Agus *bha* i chòmhluidh fuidh eraoibh-phailme Dheborah, eadar Ramah agus Bet-el, ann an sliabh Ephraim: agus chaidh clann Israeil suas d'a h-ionnsuidh air son breitheanais.

6 Agus ehuir i *fios*, agus ghairm i Barac, mac Abinoaim, a mach a Cedès-naph-

tali, agus thubhairt i ris, Nach d'àithn an Tighearna Dia Israeil, *ag ràdh*, Imich, agus tarruing gu sliabh Thaboir, agus thoir leat deich mìle fear do chloinn Naph-tali, agus do chloinn Shebuluin?

7 Agus tairngidh mis' a t'ionnsuidh gu sruth Chisoin, Sisera ceannard armailte Iabin, le 'charbadaibh, agus a mhòr shluaigh; agus bheir mi thairis e do d' làimh.

8 Agus thubhairt Barac rithe, Ma théid thusa leam, an sin théid mi; ach mur téid thu leam, eha téid.

9 Agus thubhairt i, Gu cinnteach théid mi leat: gidheadh cha bhì 'n turas a ghabhas tu chum do chlà; oir do làimh mnà reicidh an Tighearna Sisera. Agus dh'éirich Deborah, agus chaidh i maille ri Barac gu Cedès.

10 Agus ghairm Barac Sebulun agus Naphtali gu Cedès; agus chaidh e suas d'a chois *le* deich mìle fear¹: agus chaidh Deborah suas maille ris.

11 A nis sgar Heber an Ceneach, *a bha* do chloinn Hobab, athar-céile Mhao's, e féin o na Cénich, agus shuidhich² e a bhùth gu ruig còmharn Shanaim, *a tha* làimh ri Cedès.

12 Agus dh'innis iad do Shisera gu'n deachaidh Barac mac Abinoaim suas gu sliabh Thaboir.

13 Agus chruinnich Sisera r'a chéile a charbaid uile, *eadhon* naoi ceud carbad iar-uinn, agus an sluaigh uile *a bha* maille ris, o Haroset nan einneach, gu sruth Chisoin.

14 Agus thubhairt Deborah ri Barac, Eirich; oir *is* e so an là san d'thug an Tighearna Sisera thairis do d' làimh: nach 'eil an Tighearna air dol a mach romhad? Agus chaidh Barac sìos o sliabh Thaboir, agus deich mìle fear 'na dhéigh.

15 Agus sgrios an Tighearna Sisera, agus a charbadan uile, agus a shluaigh uile, le faobhar a' chlaidheimh roimh Bharac: agus theirinn Sisera sìos o 'charbad, agus theich e as d'a chois.

16 Ach lean Barac an déigh nan carbad, agus an déigh an t-sluaigh, gu Haroset nan einneach: agus thuit sluaigh Shisera uile le faobhar a' chlaidheimh: eha d'fhàdadh uiread as a h-aon *diubh*.

17 Gidheadh theich Sisera d'a chois gu bùth Iael, mnà Hebeir a' Chenieh; oir *bha* sìth eadar Iabin rìgh Hasoir agus tigh Hebeir a' Chenieh.

18 Agus chaidh Iael a mach an coinn-eam¹ Shisera, agus thubhairt i ris, Tionndaidh a steach, mo thighearna, tionndaidh a steach a m' ionnsuidhse; na biodh eagal ort. Agus an uair a thionn-

¹ a' fuireach.

² saoi-bhir.

³ slait-iomain, bior-greasaidh.

⁴ chaidh e suas le deich mìle fear aig a chois.

⁵ shin, sgavil. Eabh.

daidh e steach d'a h-ionnsuidh do'n bhùth, chòmhaich i e le brat¹.

19 Agus thubhairt e rithe, Thoir dhomh, guidheam ort, beagan uisge r'a òl, oir tha tart² orm: agus dh'fhosgail i searrag bhainne, agus thug i deoch dha, agus chòmhaich i e.

20 A ris thubhairt e rithe, Seas am an dorus a' bhutha, agus ma thig duine agus gu'm feòraich e dhìot, agus gu'n abair e, Am bheil duine sam bith an so? an sin their thusa, Cha'n eil.

21 An sin ghabh Iael, bean Hebeir, tarrann³ do'n phàillinn, agus ghlac i ord 'na làimh, agus chaidh i gu sàmhach a steach d'a ionnsuidh, agus bhuail i 'n tarrann 'na leth-cheann, agus shàth i san talamh i; (oir bha e trom 'na chodal agus sgìth:) agus fhuair e bàs.

22 Agus, feuch, an nair a bha Barac an tòir air Sisera, thàinig Iael a mach 'na choinneamh, agus thubhairt i ris, Thig, agus feuchaidh mise dhuìt am fear a tha thu 'g iarraidh. Agus an uair a chaidh e steach d'a bhùth, feuch, bha Sisera 'na luidhe marbh, agus an tarrann 'na leth-cheann.

23 Mar sin cheannsaich Dia air an là sin Iabin rìgh Chanaain am fianuis chloinn Israeil.

24 Agus shoirbhich le làimh chloinn Israeil, agus bha i trom⁴ air Iabin rìgh Chanaain, gus an do chuir iad as do Iabin rìgh Chanaain.

CAIB. V.

Oran Dheborah agus Bharaic.

AGUS chan Deborah, agus Barac mac Abinoaim, air an là sin, ag ràdh,

2 A chionn gu'n do ghabh Israel dioghaltas, a chionn gu'n do thairig an sluagh iad féin gu toileach, molaibh-se an Tighearna.

3 Eisdibh, a rìghre: thugaibh aire, a cheannarda; canaidh mise, mise féin, do'n Tighearna; canaidh mi do'n Tighearna Dia Israeil.

4 A Thighearna, 'nuair a chaidh thu mach á Seir, 'nuair a shiubhail thu mach á tìr Edoim, chrìochnaich an talamh, agus shìl na neamha; shìl na neoil mar an ceudna uisge.

5 Leagh na sléibhteann o làthair an Tighearna, Sinai sin féin o làthair an Tighearna Dé Israeil.

6 Ann an làithibh Shamgair mhic Anaìt, ann an làithibh Iael, bha na rathaide mòra gun tathuich, agus dh'imich an luchd turuis air rathaidibh seachranach.

7 Sguir luchd-àiteachaidh nam bailtean ann an Israel, sguir iad gus an d'éirich

mise Deborah, gus an d'éirich mise a'm' mhàthair ann an Israel.

8 Thagh iad dée nuadha; an sin bha cogadh amas na geataibh: an robh sgiath no sleagh ri'm faicinn am measg dhà fhichead mhìle ann an Israel?

9 Tha mo chridhe le uachdaranaibh Israeil, a thairg iad féin gu toileach am measg an t-sluaigh. Beannaichibh an Tighearna.

10 Sibhse a ta marcachd air asalaibh geala, sibhse a ta 'nur suidhe am breitheanas, agus a' siubhal an ròid, labbraibh.

11 Iadsan a tha air an saoradh⁵ fhuaim nam fear-bogha ann an ionadaibh tarruing an uisge, an sin airisidh iad gnìomhara cothromach an Tighearna, eadhon na gnìomhara cothromach a thaobh luchd-àiteachaidh a bhailtean ann an Israel: an sin théid sluagh an Tighearna sìos a dh'ionnsuidh nan geatacha.

12 Duisg, duisg, a Dheborah: dùisg, dùisg; can òran: éirich, a Bharaic, agus thoir do bhruid⁶ am braighdeanas, thusa a mhic Abinoaim.

13 An sin thug e air-san a mhaireas tighearnas a bhi aige air na h-uaislibh am measg an t-sluaigh: thug an Tighearna ormsa tighearnas a bhi agam os ceann nan cumhachdach.

14 A h-Ephraim bha freumh dhiubh an aghaidh Amaleic; a'd' dhéigh-sa, a Bheniamin, am measg do shluaigh: á Machir thàinig a nuas lagh-thabhartair-eann, agus á Sebulun iadsan a laimhsicheas peann an sgrìobhair.

15 Agus bha ceannardan Isachair le Deborah, eadhon Isachar, agus mar an ceudna Barac: do'n gleann chuireadh esan sìos d'a chois. Air son roinnean Reubein bha smuaintean mòra cridhe.

16 C'ar son a dh'fhuirich thu am measg chrò nan caorach, a chluinntinn mèilich nan treud? Air son roinnean Reubein bha smuaintean⁶ mòra cridhe.

17 Dh'fhan Gilead an taobh thall do Jordan: agus c'ar son a dh'fhuirich Dan ann an longaibh? dh'fhan Aser air traigh⁷ na fairge, agus 'na bhearnaibh ghabh e còmhnuidh.

18 Bu shluaigh Sebulun agus Naphtali, a chuir an anaman ann an cinnart gu bàs ann an àitibh àrda an fhearainn.

19 Thàinig na rìghrean agus chog iad; an sin chog rìghre Chanaain ann an Taanach làimh ri uisgibh Mhegido; cha do ghabh iad buannachd air bith airgid.

20 O nèamh chog na reultan; o'n sligheannaibh àrda chog iad an aghaidh Shisera.

21 Sguab sruth Chisoin air falbh iad, an

¹ falluing.

² pathadh.

³ tarrang.

⁴ bha i cruaidh. Eabh.

⁵ do bhraighdeanas.

⁶ rannsachadh.

⁷ ann an càladh.

seann sruth sin, sruth Chisoin. O m'anam, shaltair thu sìos neart.

22 An sin bhruthadh iongana nan each le leumnaich, leumnaich an *aona* cumhachdach.

23 Mallaichibh-se Meros, (thubhairt ain-geal an Tighearna;) mallaichibh gu mòr a luchd-àiteachaidh; a chionn nach d'fhàinig iad gu còmhnaidh¹ an Tighearna, gu còmhnaidh an Tighearna an aghaidh nan cumhachdach.

24 Beannaichte os ceann bhan bithidh Iael bean Hebeir a' Chenich; beannaichte bithidh i os ceann bhan anns a' bhùth.

25 Dh'iarr e uisge, thug i *dha* bainne; ann an soitheach uasal thug i a làthair im.

26 Chuir i a làmh² ris an tarrainn, a làmh dheas ri ord nan oibrichean: agus leis an ord bhuaill³ i Sisera; bhuaill i a cheann, agus lot i, agus shàth i troimh a leth-cheann.

27 Aig a cosaibh chrom e, thuit e, luidh e sìos: aig a cosaibh chrom e, thuit e; far an do chrom e, an sin thuit e sìos marbh.

28 A mach air ùinneig dh'amhaire màthair Shisera, agus ghlaodh i troimh 'n chléith⁴, C'ar son a ta 'charbad co fhad a' teachd? c'ar son a ta rothan a charbaid a' deanamh moille?

29 Fhregair a bain-tighearnan glic i, seadh, thug i freagradh dhi féin.

30 Nach d'fhuair iad, *nach* 'eil iad a' roinn na creiche? maighdean *no* dhà do gach fear? creach iomadh-dathach do Shisera, creach iomadh-dathach a dh'obair snàthaidhe, iomadh-dathach a dh'obair snàthaide air gach taobh, air son mhuinealan *na muinntir sin* a ghlacas a' chreach.

31 Mar sin rachadh as do d' naimhdibh uile, a Thighearna: ach *biodh* iadsan leis an ionmhuinn e mar a' ghrian an uair a théid i mach 'na neart. Agus bha fois aig an tìr rè dhà fhichead bliadhna.

CAIB. VI.

1 *Air sgàth am peucaidh shàruicheadh clann Israeil le Midian.* 8 Chuireadh fàidh d'an ionnsuidh, a thug achmhasan dhoibh. 11 Chuir aingeal an Tighearna Gideon g'an saoradh.

AGUS rinn clann Israeil olc ann an a sùilibh an Tighearna; agus thug an Tighearna thairis iad do làimh Mhidiain rè sheachd bliadhna.

2 Agus bhuadhaich làimh Mhidiain an aghaidh Israeil: agus air sgàth nam Midianach rinn clann Israeil dhoibh féin na sluic a *tha* sna beanntaibh, agus na h-uamhan, agus na daingnichean làidir.

3 Agus thachair, an uair a chuir clann Israeil *siol*, gu'n d'fhàinig na Midianaich a nìos, agus na h-Amaleich, agus clann na h-àird⁵ an ear, fhàinig eadhon iadsan

a nìos 'nan aghaidh;

4 Agus champaich iad 'nan aghaidh, agus mhill iad toradh na talmhainn, agus an tig thu gu Gasa: agus cha d'fhàg iad teachdan-tìr sam bith do Israel, aon chuid caora, no bò, no asal.

5 Oir fhàinig iad a nìos le'n spréidh, agus am bùthaibh, agus fhàinig iad nar na locuist air lìonmhoireachd; oir bha 'n dà chuid iad féin agus an càmhail gun àireamh: agus chaidh iad a steach do'n tìr a chum a milleadh.

6 Agus thugadh Israel gu bochdainn ro mhòir leis na Midianaich; agus ghlaodh clann Israeil ris an Tighearna.

7 Agus an uair a ghlaodh clann Israeil ris an Tighearna air son nam Midianach,

8 Chuir an Tighearna fàidh dh'ionnsuidh chloinn Israeil, agus thubhairt e riut, Mar so tha'n Tighearna Dia Israeil ag ràdh, Thug mi nìos sibh o'n Eiphit, agus thug mi mach sibh á tigh na daorsa;

9 Agus shaor mi sibh á làimh nan Eiphit-each, agus á làimh nan uile a rinn foirmeart oirbh, agus dh'fhuadaich mi mach iad roimhibh, agus thug mi dhuibh am fearann:

10 Agus thubhairt mi ribh, *Is* mise an Tighearna bhur Dia; na biodh eagal dhée nan Amorach oirbh, muinntir a *tha* sibh a chòmhnuidh 'nam fearann: ach cha d'éisid sibh ri m' ghuth.

11 Agus fhàinig aingeal an Tighearna, agus shuidh e fuaidh dharaig a *bha* ann an Ophrah, a *bhuin* do Ioas an t-Abi-esrach: agus *bha* a mhac Gideon a' bualadh arbhair ann an⁶ amar bruthaidh an fhìona, gu 'fholach o na Midianaich.

12 Agus dh'fhoillsich aingeal an Tighearna e féin da, agus thubhairt e ris, *Tha'n* Tighearna maille riut, a dhuine thréin ann an neart.

13 Agus thubhairt Gideon ris, Och mo thighearna, ma tha'n Tighearna maille ruinn, c'ar son a fhàinig souile oirnn? agus c'ait am bheil a mhoirbhuilean uile a dh'innis ar n-aithriche dhuiinn, ag ràdh, Nach d'fhuair an Tighearna sinn a nìos o'n Eiphit? ach anis thréig an Tighearna sinn, agus thug e thairis sinn do làimh nam Midianach.

14 Agus dh'amhaire an Tighearna air, agus thubhairt e, Imich ann do neart so, agus saoraidh tu Israel o làimh nan Midianach: nach do chuir mise *uam* thu?

15 Agus thubhairt e ris, Och mo Thighearna, cia leis a shaoras mise Israel? feuch, *tha* mo theaghlach bochd ann am Manaseh, agus *is* mise a's lugha ann an tigh m'athar.

16 Agus thubhairt an Tighearna ris, Gu cinnteach bithidh mise maille riut, agus

¹ congnamh. Eir. ² a làmh chli. ³ bhrùth.

⁴ lattice. Sasg.

⁵ làimh ri.

bnaillidh tu na Midianaich mar aon duine.

17 Agus thubhairt e ris, Ma fhuair mi nis deadh-ghean a'd' shùilb, an sin nochd comhara dhomh gur tusa a ta labhairt rium.

18 Na falbh á so, guidheam ort, gus an tig mi a d' ionnsuidh, agus gun toir mi mach mo thiodhlac, agus gu'n cuir mi a'd' làthair e. Agus thubhairt e, Fanaidh mi gus an tig thu a ris.

19 Agus chaidh Gideon a stigh, agus dheasaich e meann do na gabhraibh, agus ephah phlùir¹ na bhreacagaibh neo-ghoirtichte: an fheoil chuir e ann am bascaid, agus an sùgh chuir e ann am poit, agus thug e mach iad d'a ionnsuidh fuidh 'n daraig, agus chuir e² na làthair iad³.

20 Agus thubhairt aingeal Dé ris, Gabh an fheoil, agus na breacagan neo-ghoirtichte, agus cuir iad air a' charraig so, agus taom a mach an sùgh. Agus rinn e mar sin.

21 An sin chuir aingeal an Tighearna mach bàrr a' bhata a bha 'na làimh, agus bhean e ris an fheoil, agus ris na breacagaibh neo-ghoirtichte; agus dh'éirich teine suas as a' charraig, agus loisg e 'n fheoil, agus na breacagan neo-ghoirtichte. An sin chaidh aingeal an Tighearnas a shealladh.

22 Agus an uair a thuig Gideon gu'm b'e aingeal an Tighearn a bh'ann, thubhairt Gideon, Och, a Thighearna Dhé! a chionn gu'm faca mi aingeal an Tighearn aghaidh ri h-aghaidh.

23 Agus thubhairt an Tighearna ris, Sìth dhuit; na biodh eagal ort: cha 'n fhaigh thu bàs.

24 Agus thog Gideon altair an sin do'n Tighearn, agus thug e Iehobhah-salom mar ainm oirre: gus an là'n diugh tha i fathast ann an Ophrah nan Abi-esrach.

25 Agus air an oidhche sin féin thubhairt an Tighearna ris, Gabh an tarbh òg aig t'athair, agus an dara tarbh a tha seachd bliadhna dh'aois, agus tilg sios altair Bhaail a th'aig t'athair, agus gearr sios an doire a tha làimh rithe;

26 Agus tog altair do'n Tighearna do Dhia air mullach na carraige so, ann an ordugh³, agus gabh an dara tarbh, agus thoir suas iobairt-loisgte le fiodh an doire a ghearras tu sios.

27 An sin ghabh Gideon deichnear dhaoine d'a sheirbhisich, agus rinn e mar a thubhairt an Tighearna ris: agus tharladh, a chionn gu'n robh eagal teaghlach 'athair air, agus dhaoine a' bhaile, air chor as nach b'urrainn e d'heanamh san là, gu'n d'rinn e san oidhche e.

28 Agus an uair a dh'éirich daoine a bhaile gu moch anns a' mhaduinn, feuch,

bha altair Bhaail air a tilgeadh sios, agus bha 'n doire a bha làimh rithe air a ghearradh sios, agus bha'n dara tarbh air iobradh air an altair a thogadh.

29 Agus thubhairt iad gach aon r'a chéile, Co a rinn an ni so? agus an uair a dh'fhiosraich agus a rannsaich iad, thubhairt iad, Is e Gideon mach loais a rinn an ni so.

30 An sin thubhairt daoine a' bhaile ri loas, Thoir a mach do mhac, a chum gu'm bàsaich e; a chionn gu'n do thilg e sios altair Bhaail, agus gu'n do ghearr e sios an doire a bha làimh rithe.

31 Agus thubhairt loas riusan uile a sheas 'na aghaidh, An tagair sibh air son Bhaail? an saor sibh e? esan a thagras air a shon, cuirear gu bàs e, am feadh is i mhaduinn a tha fathast ann: ma's dia e, tagradh e air a shon féin, a chionn gu'n do thilgeadh sios 'altair.

32 Uime sin, air an là sin féin thug e Ierubaal mar ainm air, ag ràdh, Tagradh Baal 'na aghaidh, a chionn gu'n do thilgeadh sios 'altair.

33 An sin bha na Midianaich uile, agus na h-Amaleich, agus clann na h-àirde 'n ear air cruinnicheadh r'a chéile, agus chaidh iad a null, agus champaich iad ann an gleann Iesreeil.

34 Ach thàinig spiorad an Tighearn air Gideon, agus sheid e trompaid, agus ghairm e Abieser 'na dhéigh.

35 Agus chuir e teachdairean air feadh Mhanaseh uile, a chruinnicheadh mar an ceudna 'na dhéigh: agus chuir e teachdairean gu h-Aser, agus gu Sebulun, agus gu Naphtali; agus thàinig iad a nìos 'nan coinneamh.

36 Agus thubhairt Gideon ri Dia, Ma shaoras tu Israel le m' laimh-sa, mar a thubhairt thu,

37 Feuch, cuiridh mi lomradh olla air an urlar-bhualaidh; agus mabhios andrùchd air an lomradh a mhàin, agus tiormachd air an talamh uile, an sin bitidh fios agam gu'n saor thu Israel le m' làimh, mar a thubhairt thu.

38 Agus bha e mar sin: oir dh'éirich e gu moch air an là maireach, agus theann e 'n lomradh cuideachd, agus dh'fhàisg e 'n drùchd as an lomradh, làn cuaiche dh'uisge.

39 Agus thubhairt Gideon ri Dia, Na biodh do chorroich teth a'm aghaidh, agus labhaird mi a mhàin an aon uair so: leig dhomh dearbhadh, guidheam ort, an uair so a mhàin leis an lomradh; bitheadh a nis tiormachd air an lomradh a mhàin, agus air an talamh uile bitheadh drùchd.

40 Agus rinn Dia mar sin air an oidhche sin: agus bha tiormachd air an lomradh

¹ mine.

² thairg e dha iad.

³ anns an ionad slànraichte.

a mhàin, agus air an talamh uile bha drùchd.

CAIB. VII.

1 *Armait Ghideoin*: 9 *Thugadh misneach dha le h-aisling, agus a h-eadar-mhìneachadh*. 16 *Ghlacadh Oreb agus Seeb*

AN sin dh'éirich Ierubaal, (eadhon Gideon), agus an sluagh uile a *bha* maille ris, suas gu moch, agus champaich iad làimh ri tobar Haroid: agus bha feachd nam Midianach air an taobh mu thuath dhiubh, làimh ri sliabh Mhoreh, anns a' ghleann.

2 Agus thubhairt an Tighearna ri Gideon, *Tha 'u* sluagh a tha maille riut tuille 's lion-mhor gu mise a thoirt nam Midianach 'nan làimh, air eagal gu'n deanadh Israel uail a'm' aghaidh, ag ràdh, Shaor mò làmh féin mi.

3 Agus a nis uime sin gairm ann an cluasaibh an t-sluaigh, ag ràdh, Ge b'e neach air am bheil eagal agus geilt, pill-eadh e, agus imicheadh e gu moch o shliabh Ghilead. Agus phill do'n t-sluaigh dà mhìle thar fhichead, agus dh'fhan deich mìle.

4 Agus thubhairt an Tighearna ri Gideon, *Tha'n* sluagh fathast *tuille 's* lion-mhor; thoir sios iad a dh'ionnsuidh an uisge, agus dearbhaidh mise dhuit iad an sin: agus tarlaidh, ge b'e fear mu'n abair mise riut, Théid am fear so maille riut, gu'n téid esan maille riut; agus ge b'e fear mu'n abair mi riut, Cha téid am fear so maille riut, nach téid esan ann.

5 Mar sin thug e sios an sluagh a dh'ionnsuidh an uisge: agus thubhairt an Tighearna ri Gideon, Gach aon a dh'imlicheas¹ an t-uisge le 'theangaidh, mar a dh'imlicheas cù, cuiridh tu esan air leth; mar an ceudna gach aon a chromas sios air a ghlùinibh a dh'òl.

6 Agus b'e àireamh na muinntir a dh'imlich, *a' cur* an làimhe r'am beul, tri cheud fear: ach chrom a' chuid eile uile do'n t-sluaigh sios air an glùinibh a dh'òl uisge.

7 Agus thubhairt an Tighearna ri Gideon, Leis an tri cheud fear so a dh'imlich, saoraidh mise sibh, agus bheir mi na Midianaich thairis do d' làimh: agus rachadh am mòr-shluaigh uile, gach duine d'a àite féin.

8 Agus ghabh an sluagh lòn 'nan làimh, agus an trompaidean: agus gach fear eile do Israel chuir e air falbh, gach aon d'a bhùth, agus ghléidh e an tri cheud fear so. Agus bha sluagh Mhidiain fuidhe anns a' ghleann.

9 Agus air an oidhche sin féin thubhairt an Tighearna ris, Eiribh, falbh sios a

dh'ionnsuidh an fheachd, oir thug mise thairis e do d' làimh.

10 Ach ma ta eagal ort dol sìos, falbh-sa agus Phurah t'òglach sìos a dh'ionnsuidh an fheachd:

11 Agus cluinidh tu ciod a their iad; agus 'na dhéigh sin neartaichear do làmh-an, agus théid thu sìos a dh'ionnsuidh an fheachd. An sin chaidh e sìos maille ri Phurah 'òglach, gu taobh a muigh nan daoine armaichte a *bha* san fheachd.

12 Agus bha na Midianaich, agus na h-Amaleich, agus clann na h-àird' an ear uile 'nan luidhe sa' ghleann mar na locuist air lionmhoireachd; agus *bha* an càmhail gun àireamh, mar a' ghaineamh a *tha* air tràigh na fairge air lionmhoireachd.

13 Agus an uair a thàinig Gideon, feuch, *bha* duine ag innseadh aislinge d'a chompanach, agus thubhairt e, Feuch, chunnaic mi aisling, agus, feuch, thàinig breacag a dh'aran eorna car air char a stigh do champ Mhidiain, agus thàinig i gu bùth, agus bhuail i e, agus thuit e, agus thilg i bun os ceann e, agus thuit am bùth sìos.

14 Agus fhreagair a chompanach, agus thubhairt e, Cha ni sam bith so ach claidheamh Ghideoin mhic Ioais, duine do Israel: thug Dia thairis d'a làimh-san Midian, agus an sluagh uile.

15 Agus an uair a chuala Gideon aithris na h-aislinge, agus a h-eadar-mhìneachadh, rinn e aoradh; agus phill e gu feachd Israeil, agus thubhairt e, Eiribh, oir thug an Tighearna thairis d'ur làimh feachd Mhidiain.

16 Agus roinn e 'n tri cheud fear 'nan tri chuideachdaibh, agus chuir e trompaid ann an làimh gach aoin diubh, maille ri soithichibh falamh, agus lòchranaibh anns na soithichibh.

17 Agus thubhairt e riu, Amhaircibh ormsa, agus deanaibh-se mar an ceudna: agus, feuch, an uair a thig mi gu taobh a mach a' chaimp, tarlaidh, mar a ni mise, mar sin gu'n dean sibhse.

18 'Nuair a shéideas mise le trompaid, mi féin agus iadsan uile a *tha* maille riun, an sin séidibh-se na trompaidean mar an ceudna mu thimchioll a' chaimp uile, agus abraibh, *Claidheamh* an Tighearna agus Ghideoin.

19 Mar sin thàinig Gideon agus an ceud fear a *bha* maille ris, gu taobh a mach a' chaimp, ann an toiseach na faire meadhonaich; agus cha robh iad ach air ùr-shuidheachadh na faire: agus shéid iad na trompaidean, agus bhris iad na soithichean a *bha* 'nan làimh.

20 Agus shéid na tri chuideachdan na trompaidean, agus bhris iad na soithichean, agus chum iad na lòchrain 'nan làimh chli, agus na trompaidean 'nan làimh dheis

¹ a ligheas. Eir.

gu séideadh *leo*: agus ghlaodh iad, Claidheamh an Tighearn agus Ghideoin.

21 Agus sheas iad gach duine 'na àite féin mu thimchioll a' chaimp: agus bhriseadh¹ am feachd uile, agus ghlaodh iad, agus theich iad.

22 Agus shéid an tri cheud na trompaid-ean, agus chuir an Tighearna claidheamh gach duine an aghaidh a chompanaich, eadhon air feadh an fheachd uile; agus theich an sluagh gu Betsitah ann an Sere-rat, agus gu crìch Abeil-mheholah, làimh ri Tabat.

23 Agus chruinnicheadh fir Israeil r'a cheile á Naphtali, agus á h-Aser, agus á Manaseh uile, agus chaidh iad air tòir nam Midianach.

24 Agus chuir Gideon teachdairean air feadh sléibh Ephraim uile, ag ràdh, Thigibh a nuas an aghaidh nam Midianach, agus glacaibh rompa na h-uisgeacha gu Bet-barah agus Iordan. An sin chruinnicheadh fir Ephraim uile ri chéile, agus ghlac iad na h-uisgeacha gu Bet-barah agus Iordan.

25 Agus ghlac iad dà cheannard nam Midianach, Oreb agus Seeb; agus mharbh iad Oreb air carraig Oreib, agus Seeb, mharbh iad aig amar-bruthaidh fìona Sheeib, agus chaidh iad air tòir Mhidiain, agus thug iad cinn Oreib agus Sheeib gu Gideon air an taobh eile do Iordan.

CAIB. VIII.

1 Shìothaicheadh fir Ephraim. 10 Ghlacadh Seba agus Salmuna. 33 Iodhol-aoradh chloinn Israeil.

AGUS thubhairt fir Ephraim ris, Ciod e an ni so a rinn thu oirn, nach do ghairm thu oirn an uair a chaidh thu a chogadh an aghaidh nam Midianach? agus throid iad ris gu geur.

2 Agus thubhairt e riu, Ciod a nis a rinn mise mar a rinn sibhse? Nach fearr dioghlum² fhìon-dhearcan Ephraim na fìon-fhoghar Abieseir?

3 Thug Dia thairis d'ur làimh ceannardan Mhidiain, Oreb agus Seeb: agus ciod a b'urrainn mis' a dheanamh mar a rinn sibhse? An sin thraogh am fearg ris, an uair a thubhairt e sin.

4 Agus thàinig Gideon gu Iordan, agus chaidh e thairis, e féin, agus an tri cheud fear a bha maille ris, sgìth, gidheadh air an tòir.

5 Agus thubhairt e ri fir Shucoit, Thugaibh, guidheam oirbh, buillinnean arain do'n t-sluagh a tha gam leantuinn³; oir tha iad sgìth, agus tha mi air tòir Sheba agus Shalmuna, rìghre Mhidiain.

6 Agus thubhairt ceannardan Shucoit, Am bheil làmhan Sheba agus Shalmuna nis ann ad làimh, gu'n tugamaid aran do

d'armailt?

7 Agus thubhairt Gideon, Uime sin an uair a bheir an Tighearna Seba agus Salmuna thairis do m' làimh, an sin reubaidh mi bhur feoil le sgiathach an fhàsaich, agus le drisibh.

8 Agus chaidh e suas á sin gu Penueil, agus labhair e rìusan air a' mhodh cheudna: agus fhreagair daoine Phenueil e, mar a fhreagair daoine Shucoit.

9 Agus labhair e cuideachd ri daoinibh Phenueil, ag ràdh, 'Nuair a thig mi a ris ann an sìth, brisidh mi sìos an tùr so.

10 A nis bha Seba agus Salmuna ann an Carcor, agus an slòigh maille riu, mu thimchioll cùig mìle deug fear, an t-ìomlan a dh'fhàgadh do shlòigh cloinne na h-àird' an ear uile: oir thuit ceud agus fichead mìle fear a tharruing claidheamh.

11 Agus chaidh Gideon suas air slighe na muinntir a tha 'nan còmhnuidh ann am bùthaibh, air an làimh an ear do Nobah, agus do Iogbehah, agus bhuail e'n sluagh: oir bha 'n sluagh gun umhaill.

12 Agus an uair a theich Seba agus Salmuna, chaidh e air an tòir, agus ghlac e dà rìgh Mhidiain, Seba agus Salmuna, agus chuir e geilt air an t-sluagh uile.

13 Agus phill Gideon mac Ioais o'n chath roimh éirigh na gréine⁴,

14 Agus ghlac e òig-fhear do dhaoineibh Shucoit, agus dh'fhiosraich e dheth: agus sgrìobh e dha ainmean cheannardan Shucoit, agus a sheanairean, tri fichead agus seachd ri dheug.

15 Agus thàinig e gu fir Shucoit, agus thubhairt e, Feuchaibh, Seba agus Salmuna a thilg sibh suas orm, ag ràdh, Am bheil làmhan Sheba agus Shalmuna nis a'd' làimh, gu'n tugamaid aran do d' dhaoineibh a tha sgìth?

16 Agus ghlac e seanairean a' bhaile, agus ghabh e sgiathach an fhàsaich, agus drisean, agus leo so reub⁵ e fir Shucoit.

17 Agus leag e sìos tùr Phenueil, agus mharbh e fir a' bhaile.

18 An sin thubhairt e ri Seba agus ri Salmuna, Ciod a' ghnè dhaoine a mharbh sibh ann an Taber? Agus fhreagair iad, Mar a ta thusa, is amhuil a bha iadsan; gach aon cosmhuil ri cloinn rìgh.

19 Agus thubhairt e, B'iad sin mo bhràithrean-sa, mic mo mhàthar: mar is beò an Tighearna, nan gleidheadh sibh beò iadsan, cha mharbhainn sibhse.

20 Agus thubhairt e ri Ieter a cheudghin, Eirich, marbh iad: ach cha do tharruing an t-òganach a chladheamh; oir bha eagal air, a chionn gu'n robh e fathast 'na òganach.

21 An sin thubhairt Seba agus Salmuna, Eirich féin, agus buail oirn: oir mar an

¹ ruith. ² gleanig. Sasg. ³ aig mo chois. Eabh. 245

⁴ Hares. Eabh.

⁵ smachdaich, theagaisg.

duine, *tha* a neart. Agus dh'éirich Gideon, agus mharbhl e Seba agus Salmuna, agus thug e leis na h-usgraichean a bh'air amhaichibh an càmhalan.

22 An sin thubhairt fir Israeil ri Gideon, Bi-sa a'd' uachdaran oirnn, thu féin, agus do mhac, agus mac do mhic mar an ceudna; oir shaor thu sinn á làimh Mhid-iain.

23 Agus thubhairt Gideon riu, Cha bhi mis' a'm' uachdaran oirbh, ni mò a bhios mo mhac 'na uachdaran oirbh; bithidh an Tighearn 'na uachdaran oirbh.

24 Agus thubhairt Gideon riu, Dh'iarr-ainn aon athchuinge oirbh, gu'n tugadh gach duine dhìbh cluas-fhàinnean a chreiche dhomh: (oir bha cluas-fhàinnean òir aca, a chionn gu'm b' Ismaelich iad.)

25 Agus fhreagair iad, Bheir sinne gu toileach *dhuil* iad. Agus sgaol iad eudach, agus thùg iad an sin, gach duine cluas-fhàinnean a chreiche.

26 Agus b'e cothrom nan cluas-fhàinnean òir a dh'iarr e mìle agus seachd ceud *secl* òir, a thuilleadh air usgraichibh, agus cluigeinibh, agus eudach corcuir a bh'air righribh Mhidian, agus a thuilleadh air na slabhraidhibh a bh'air amhaichibh an càmhalan.

27 Agus rinn Gideon ephod dheth, agus chuir e i 'na bhaile féin, *eadhon* ann an Ophrah; agus chaidh Israel uile an sin le striopachas 'na déigh; agus rinneadh *sin* 'na ribe do Ghideon agus d'a thigh.

28 Mar so chiosnaicheadh Midian roimh chloinn Israeil, agus cha do thog iad an ceann tuilleadh: agus bha fois aig an tìr rè dhà fhichead bliadhna ann an làithibh Ghideoin.

29 Agus chaidh Ierubaal mac Ioais, agus ghabh e còmhnuidh 'na thigh féin.

30 Agus bha aig Gideon deichneair agus trì fichead mac a thàinig o' leasraidh féin; oir bha mòran bhan aige.

31 Agus a choimhleabach¹ a bha ann an Sechem, rug ise mar an ceudna mac dha, air an d'thug e Abimelech mar ainm.

32 Agus fhuair Gideon mac Ioais bàs ann an deadh shean aois, agus dh'adhlacaidh e ann an uaigh Ioais 'athar, ann an Ophrah nan Abiesrach.

33 Agus co-luath 'sa fhuair Gideon bàs, phill clann Israeil a ris, agus chaidh iad le striopachas an déigh Bhaalim, agus rinn iad Baal-berit 'na dhia dhoibh féin.

34 Agus cha do chuimhnich clann Israeil an Tighearn an Dia, a shaor iad á làimh an naimhdean uile air gach taobh:

35 Ni mò a nochd iad caomhneas do thigh Ierubaal, *eadhon* Ghideoin, a réir a' mhaithéis *sin* uile a nochd e do Israel.

CAIB. IX.

1 Rinneadh Abimelech 'na righ. 7 Thug Iotam, le cosmhalachd, achmhasan do mhaithéan Shechein, agus roimh-innis e an sgrios.

A GUS chaidh Abimelech mac Ierubaal do Shechem, gu bràithribh a mhàthar, agus labhair e riu, agus ri teaghlach tighe 'athar a mhàthar uile, ag ràdh,

2 Labhraibh, guidheam oirbh, ann an clusaibh mhaithéan² Shechein uile, Cia dhiubh is fearr dhuibh trì fichead agus deichneair fhear (*eadhon* mic Ierubaal uile) a blii 'nan uachdaran oirbh, no aon fhear a bhi 'na uachdaran oirbh? cuimh-nichibh mar an ceudna gur mise blur cnàimh agus bhur feoil.

3 Agus labhair bràithrean a mhàthar uime ann an clusaibh mhaithéan Shechein uile na briathra sin uile: agus dh'aom an cridheachan an déigh Abimelech; oir thubhairt iad, Is e ar bràthar e.

4 Agus thug iad dha trì fichead agus deich *buinn* airgid á tigh Bhaail-berit; leis an do thuarasdalaich Abimelech daoine faoin³ agus eutrom, a lean e.

5 Agus chaidh e gu tigh 'athar ann an Ophrah, agus mharbh e a bhràithre, mic Ierubaal, *eadhon* deichneair agus trì fichead fear, air aon chloich: gidheadh, dh'fhàgadh Iotam am mac a b'òige aig Ierubaal; oir dh'fholaich se e féin.

6 Agus chrùinnich maithean Shechein uile r'a chéile, agus tigh Mhilo uile, agus claidh iad agus rinn iad Abimelech 'na righ, làimh ri còmhnaidh⁴ a' charraigh⁵ a bha ann an Sechem.

7 Agus an uair a dh'innis iad so do Iotam, chaidh e agus sheas e air mullach sléibh Gheridsim, agus thog e suas a ghuth, agus ghlaodh e, agus thubhairt e riu, Eisdibh riumsa, sibhs e a mhaithéan Shechein, a chum gu'n éisd Dia ribhs e.

8 Chaidh na craobhan a mach air àm àraidh a dh'ungadh righ os an ceann féin, agus thubhairt iad ris a' chrann-olaidh, Bi-sa a'd' righ oirnn.

9 Ach thubhairt an crann-olaidh riu, Am fàgainn-se mo reamhrachd, leis am bheil iad leam-sa toirt urrainn do Dhia agus do dhuine, agus an rachainn gu bhi air m'ardachadh⁶ os ceann nan craobh?

10 Agus thubhairt na craobhan ris a' chrann-fhige, Thig-sa, agus bi d' righ oirnn.

11 Ach thubhairt an crann-fige riu, Am fàgainn-se mo mhillseachd, agus mo dheadh mheas, agus an rachainn gu bhi air m'ardachadh os ceann nan craobh?

12 Agus thubhairt na craobhan ris an fhionain⁷, Thig-sa, agus bi d' righ oirnn.

13 Agus thubhairt an fhionain riu, Am

¹ leannan. ² dhaoine, luchd-àiteachaidh.

³ fulan. Eabh. ⁴ daraig, doire.

⁵ an fhreiccadin.

⁶ gu mì féin a chrath-adh. Eabh.

⁷ ris a' chrann-fhionn.

fàgaimn-se m'fhion, a tha toirt subhachais do Dhia agus do dhuine, agus an rachainn gu bhì air m'àrdachadh os ceann nan craobh?

14 An sin thubhairt na craobhan uile ris an dris¹, Thig-sa, agus bi d' rìgh oirnn.

15 Agus thubhairt an dris ris na craobhan, Ma's e is da rìreadh gu'n ung sibh mise a'm' rìgh oirbh, thligibh, cuiribh bhur dòchas² a'm' sgàile-sa: agus mur *dean sibh so*, thigeadh teine mach as an dris, agus loisgeadh e seudair³ Lebanoin.

16 A nis uime sin, ma rinn sibh gu frinneach agus gu tréibhdhireach an uair a rinn sibh Abimelech 'na rìgh, agus ma bhuin sibh gu maith ri Ierubaal agus r'a thigh, agus ma rinn sibh ris a réir toillteanais a làmh;

17 (Oir chog m'athair-sa air bhur son, agus chluir e 'anam ann an cunnart mòr, agus shaor e sibh á làimh Mhidiain;

18 Agus tha sibh air éirigh suas an aghaidh tighe m'athar-sa an diugh, agus mharbh sibh a mhic, tri fichead agus deichnear fhear, air aon chloich, agus rinn sibh Abimelech, mac a bhanoglaich, 'na rìgh os ceann mhaithéan Shechem, a chionn gur e bhur bràthair e:)

19 Uime sin, ma bhuin sibh gu frinneach agus gu tréibhdhireach ri Ierubaal agus r'a thigh an diugh, deanaibh gairdeachas ann an Abimelech, agus deanadh esan mar an ceudna gairdeachas annaibh-se;

20 Ach mur *do rinn sibh mar sin*, thigeadh teine a mach o Abimelech, agus loisgeadh e maithean Shechem, agus tigh Mhilo; agus thigeadh teine a mach o mhaithibh Shechem, agus o thigh Mhilo, agus loisgeadh e Abimelech.

21 Agus ruith Iotam air falbh, agus theich e, agus chaidh e gu Beer, agus ghabh e còmhnuidh an sin, air eagal Abimelech a bhràthar.

22 Agus rìghich Abimelech trì bliadhna air Israel,

23 Agus chuir Dia droch spiorad eadar Abimelech agus maithean Shechem; agus bhuin maithean Shechem gu fealltach ri Abimelech:

24 A chum gu'n tigeadh an ainneart⁴ a rinneadh air deichnear agus tri fichead mac Ierubaal, agus gu'n luidheadh am fuil air Abimelech an bràthair, a mharbh iad; agus air maithibh Shechem, a neartaich a làmhan ann am marbhadh a bhràithrean.

25 Agus chuir maithean Shechem luchd feall-fholach air a shon air mullaichibh nam beann, agus rinn iad reubainn air gach neach a chaidh seachad orra san

t-slighe sin: agus dh'innseadh sin do Abimelech.

26 Agus thàinig Gaal mac Ebeid agus a bhràithrean, agus chaidh iad thairis gu Sechem: agus chuir maithean Shechem an dòchas ann.

27 Agus chaidh iad a mach do'n fhearann, agus chruinnich iad toradh am fionlios, agus bhrùth iad na fion-dhearc, agus rinn iad gairdeachas⁵, agus chaidh iad a steach do thigh an dè, agus dh'ith agus dh'òl iad, agus mhallaich iad Abimelech.

28 Agus thubhairt Gaal mac Ebeid, Cò e Abimelech, agus cò e Sechem, gu'n deanamaid-ne seirbhis da? nach e mac Ierubaal e, agus Sebul teannard a shlòigh? deanaibh seirbhis do dhaoineibh Hamoir athar Shechem; oir c'ar son a dheanamaid seirbhis dhasan?

29 Agus b'e mo ghuidhe gu'n tugtadh an sluagh so do m' làimh -sa! an sin dh'atharraichinn Abimelech. Agus thubhairt e ri Abimelech, Meudaich t'armailt, agus thig a mach.

30 Agus an uair a chuala Sebul, uachdaran a' bhaile, briathra Ghaail mhic Ebeid, las a chorruich.

31 Agus chuir e teachdairean gu Abimelech os ìosal, ag ràdh, Feuch, thàinig Gaal mac Ebeid, agus a bhràithre, do Shechem; agus, feuch, *tha* iad a' teannachadh a' bhaile a'd' aghaidh.

32 A nis uime sin, éirich suas san oidhe, thu féin agus an sluagh a *ta* maille riut, agus dean feall-fholach anns an fhearann:

33 Agus anns a' mhaduinn mu éirigh na gréine, éiridh tu gu moch, agus bheir thu ionnsuidh air a' bhaile: agus, feuch, *'nuair* a thig e féin agus an sluagh a *tha* maille ris a mach a'd' aghaidh, an sin ni thu orra mar a bhios a'd' chomas⁶.

34 Agus dh'éirich Abimelech suas, agus an sluagh uile a *bha* maille ris, san oidhe, agus rinn iad feall-fholach an aghaidh Shechem, 'nan ceithir chuideachdaibh.

35 Agus chaidh Gaal mac Ebeid a mach, agus sheas e ann an dol a stigh geata a' bhaile. Agus dh'éirich Abimelech, agus an sluagh a *bha* maille ris, o'n fheall-fholach.

36 Agus an uair a chunnaic Gaal an sluagh, thubhairt e ri Sebul, Feuch, *tha* sluagh a' teachd a nuas o mhullach nam beann. Agus thubhairt Sebul ris, *Tha* thu faicinn sgàile nam beann mar dhaoine.

37 Agus labhair Gaal a ris, agus thubhairt e, Feuch, *tha* sluagh a' teachd a nuas

¹ droighinn; atad. Eabh.

² earbsadh, muinghin.

³ ceudair.

⁴ an t-ain-ìochd.

⁵ cantaireachd; elulim. Eabh.

⁶ mar a gheibh do làmh. Eabh.

o mheadhon na tìre, agus *tha* cuideachd eile a' teachd air an aghaidh rathad còmhnaidh¹ Mhehonenim.

38 An sin thubhairt Sebul ris, C'ait a nis *am bheil* do bheil, leis an dubhairt thu, Cò e Abimelech, gu'n deanamaid seirbhis da? nach e so an sluagh air an d'rinn thu tair? falbh a mach, guidheam ort a nis, agus cog riu.

39 Agus chaidh Gaal a mach roimh mhaithéan Shechem, agus chog e ri Abimelech.

40 Agus chuir Abimelech an ruaig air, agus theich e roimhe; agus thuit mòran a chaidh leònadh, *eadhon* gu ruig dol a stigh a' gheata.

41 Agus ghabh Abimelech còmhnuidh ann an Arumah: agus dh'fhuadaich Sebul a mach Gaal agus a bhràithrean, a chum nach gabhadh iad còmhnuidh ann an Sechem.

42 Agus air an là màireach chaidh an sluagh a mach do'n mhachair; agus dh'innis iad *sin* do Abimelech.

43 Agus ghabh e'n sluagh, agus roinn e iad 'nan trì chuideachdaibh, agus rinn e feall-fholach sa' mhachair, agus dh'amhairc e, agus, feuch, *bha*'n sluagh air dol a mach as a' bhaile; agus dh'éirich e 'nan aghaidh, agus bhuaill e iad.

44 Agus thug Abimelech agus a' chuideachd a *bha* maille ris ionnsuidh, agus sheas iad ann an dol a stigh geata a' bhaile; agus thug an dà chuideachd eile ionnsuidh orra-san uile a *bha* sa' mhachair, agus bhuaill siad iad.

45 Agus chog Abimelech an aghaidh a' bhaile rè an là sin; agus ghlac e 'm baile, agus mharbh e 'n sluagh a *bh'*ann, agus leag e sìos am baile, agus chuir e le salann e.

46 Agus an uair a chual' uile mhuinntir² tìr Shechem *sin*, chaidh iad a steach do dhaingneach tighe an dé Bherit.

47 Agus dh'innseadh do Abimelech, gu'n robh uile mhuinntir tìr Shechem air cruinneachadh r'a chéile.

48 Agus chaidh Abimelech suas gu sliabh Shalmoin, e féin agus an sluagh uile a *bha* maille ris; agus ghlac Abimelech tuagh 'na làimh, agus ghearr e sìos geug o na craobhan, agus ghabh e i, agus chuir e air a ghualainn i, agus thubhairt e ris an t-sluagh a *bha* maille ris, An uì a chunnaic sibh mise a' deanamh, greasaibh, deanaibh mar a *rinn* mise.

49 Agus ghearr mar an ceudna an sluagh uile sìos gach duine a gheug, agus lean iad Abimelech, agus chuir iad ris an daingneach *iad*, agus chuir iad an daingneach ri theine orra: mar sin fhuair

daoine tìr Shechem bàs uile mar an ceudna, mu thimchioll mìle fear agus bean.

50 An sin chaidh Abimelech gu Tebes, agus champaich e 'n aghaidh Thebeis, agus ghlac se e.

51 Ach bha tìr làidir ann am meadhon a' bhaile, agus gu sin theich na fir agus na mnà uile, agus muintir a' bhaile uile, agus dhùin iad orra féin e, agus chaidh iad suas air mullach an tìr.

52 Agus thàinig Abimelech gu ruig an tìr, agus chog e 'na aghaidh, agus dhlùthaich e ri dorus an tìr a chum a losgadh le teine.

53 Agus thilg bean àraidh mìr do chloich-mhuilinn air ceann Abimelech, agus bhris i a chlaiginn.

54 An sin ghairm e gu luath air an òganach a bha 'g iomchar 'arm, agus thubhairt e ris, Tarruing do chlaidheamh, agus marbh mi, air eagal gu'n abair iad umam, Mharbh bean e. Agus shàth an t-òganach aige troimhe e, agus fhuair e bàs.

55 Agus an uair a chunnaic fir Israeil gu'n d'fhuair Abimelech bàs, dh'imich iad *gach* fear d'a àite féin.

56 Agus dhiol Dia olc Abimelech, a rinn e air 'athair, le 'thri fichead agus a dheichnear bhràithrean a mharbhadh.

57 Agus uile olc dhaoine Shechem dhiol Dia air an ceann féin: agus thàinig orra mallachadh Iotaim mhic Ierubail.

CAIB. X.

1 *Thug Tola breth air Israel. 7 Rinn na Philistich agus na h-Amonaich foirneart air Israel. 10 Dh'aidich iad am peacadh; 15 ghabh iad aithreachas, agus shaor Dia iad.*

A GUS dh'éirich an déigh Abimelech, a shaoradh Israeil, Tola mac Phuah, mhic Dhodo, duine do Isachar; agus *bha* e còmhnuidh ann an Samir, ann an sliabh Ephraim.

2 Agus thug e breth air Israel tri bliadhna fichead: agus fhuair e bàs, agus dh'adhlaiseadh e ann an Samir.

3 Agus 'na dhéigh-san dh'éirich Iair, Gileadach, agus thug e breth air Israel dà bhliadhna thar fhichead.

4 Agus bha deich thar fhichead mac aige, a mharcaich air deich thar fhichead asal òg; agus *bha* deich thar fhichead baile aca, air an d'thugadh Habhot-jair mar ainm gu ruig an là'n diugh, a *tha* ann an tìr Ghilead.

5 Agus fhuair Iair bàs, agus dh'adhlaiseadh e ann an Camon.

6 Agus rinn clann Israeil a ris olc ann an sùilibh an Tighearn, agus rinn iad seirbhis do Bhaalim, agus do Astarot, agus do dhéibh Shiria, agus do dhéibh Shidoim, agus do dhéibh Mhoab, agus do dhéibh chloimh Ainoim, agus do dhéibh

¹ daraige.

² dhaoine.

nam Philisteach; agus thréig iad an Tigh-eam, agus cha d'rinn iad seirbhís dha.

7 Agus las fearg an Tighearna an aghaidh Israeil, agus thug e thairis¹ iad do làimh nam Philisteach, agus do làimh chloinn Amoin.

8 Agus chlaoidh agus rinn iad² foirneart air cloinn Israeil anns an àm sin rè ochd bliadhna deug, air cloinn Israeil uile a bh'air an taobh eile do Iordan, ann an tìr nan Amorach, a tha ann an Gilead.

9 Agus chaidh clann Amoin thar Iordan a chogadh mar an ceudna an aghaidh Iudah, agus an aghaidh Bheniamin, agus an aghaidh tìge Ephraim; agus bha Israel ann an teanntachd ro mhòir.

10 Agus ghlaodh clann Israeil ris an Tighearn, ag ràdh, Pheacaich sinn a'd' aghaidh, an dà chuid a chionn gu'n do thréig sinn ar Dia, agus gu'n d'rinn sinn seirbhís do Bhaalim.

11 Agus thubhairt an Tighearna ri cloinn Israeil, Nach do shaor mise sibh o na h-Eiphitich, agus o na h-Amorach, o chloinn Amoin, agus o na Philistich?

12 Rinn mar an ceudna na Sidonaich, agus na h-Amaleich, agus na Maonaich³ foirneart oirbh, agus ghlaodh sibh riumsa, agus shaor mi sibh as an làimh.

13 Gidheadh thréig sibh mi, agus rinn sibh seirbhís do dhìathaidh eile: uime sin cha saor mi sibh nì's mò.

14 Rachaibh agus gairmibh air na déibh a ròghnuich sibh: saoradh iad sibh ann an àm bhur teanntachd.

15 Agus thubhairt clann Israeil ris an Tighearna, Pheacaich sinn; dean-sa ruinn a réir gach nì a ta maith a'd' shùilbh; a uhaìn saor sinn, gùdheamaid ort, air an là'n diugh.

16 Agus chuir iad air falbh na diathan coimheach as am measg, agus rinn iad seirbhís do'n Tighearn: agus bha doilgheas air 'anam air son truaighe Israeil.

17 An sin ghairmeadh clann Amoin cuideachd, agus champaich iad ann an Gilead: agus chruinnich clann Israeil iad féin an ceann a chéile, agus champaich iad ann am Mispheh.

18 Agus thubhairt an comhchruinneach⁴, uachdarain Ghilead, gach aon ri chéile, Cia am fear sin a thòisicheas ri cogadh an aghaidh chloinn Amoin? bithidh esan 'na cheann air uile luchd-àiteachaidh Ghilead.

CAIB. XI.

1 Coimhcheangal Iephtah ri seanairibh Ghilead: 29 a bhòid; 34 choimhiltion e a bhòid air a nighinn.

ANIS bha Iephtah an Gileadach treun ann an neart, agus bu mhaic striopaich e: agus ghin Gilead Iephtah.

2 Agus rug bean Ghilead mic dha; agus dh'fhàs mic a mhàna suas, agus thilg iad a mach Iephtah, agus thubhairt iad ris, Cha'n fhaigh thu oighreachd ann an tìgh ar n-athar-ne, oir is mac mnà coimhich⁵ thu.

3 An sin theich Iephtah o 'bhràithribh⁶, agus ghabh e còmhnuidh ann an tìr Thoib: agus chruinnicheadh daoine faoin gu Iephtah, agus chaidh iad a mach maille ris.

4 Agus an ceann làithean àraidh, chog clann Amoin ri h-Israel.

5 Agus an uair a chog clann Amoin ri h-Israel, chaidh seanairean Ghilead a thoirt Iephtah á tìr Thoib:

6 Agus thubhairt iad ri Iephtah, Thig agus bi a'd' cheannard oirnn, agus cogaidh sinn an aghaidh chloinn Amoin.

7 Agus thubhairt Iephtah ri seanairibh Ghilead, Nach d'fhuathaich sibh mi, agus nach do thilg sibh a mach mi á tìgh m'athar? agus c'ar son a thàinig sibh a m'ionnsuidh a nis, an uair a tha sibh ann an teanntachd?

8 Agus thubhairt seanairean Ghilead ri Iephtah, Uime sin phill sinu a nis a d'ionnsuidh, a chum gu'n téid thu maille ruinn, agus gu'n cog thu 'n aghaidh chloinn Amoin, agus gu'm bi thu a'd' cheann oirnn, eadhon air uile luchd-àiteachaidh Ghilead.

9 Agus thubhairt Iephtah ri seanairibh Ghilead, Ma bheir sibh air m'ais mi a chogadh an aghaidh chloinn Amoin, agus gu'n toir an Tighearna thairis iad a m'fhianuis, am bi mise a m' cheann oirbh?

10 Agus thubhairt seanairean Ghilead ri Iephtah, Bitheadh an Tighearna 'na fhianuis eadaruiun, gu'n dean sinne mar sin, a réir t'fhocail.

11 Agus chaidh Iephtah maille ri seanairibh Ghilead, agus rinn an sluagh⁷ e 'na cheann orra, agus 'na cheannard. Agus labhair Iephtah a bhriathran uile an làthair an Tighearn ann am Mispheh.

12 Agus chuir Iephtah teachdairean a dh'ionnsuidh rìgh chloinn Amoin, ag ràdh, Ciod e do ghnothuch-sa rium-sa, gu'n d'thàinig thu a m' aghaidh a chogadh ann am thìr?

13 Agus thubhairt rìgh chloinn Amoin ri teachdairibh Iephtah, A chionn gu'n do ghlac Israel m'fhearann an uair a thàinig iad a nìs as an Eiphit, o Arnon gu ruig Iaboc, agus gu ruig Iordan: a nis uime sin thoir thusa air ais e⁸ ann an sìth.

14 Agus chuir Iephtah a ris teachdairean a dh'ionnsuidh rìgh chloinn Amoin;

15 Agus thubhairt e ris, Mar so tha Iephtah ag ràdh, Cha do ghlac Israel

¹ reic e. Eabhl.

³ Canaanach.

² clann Amoin.

⁴ sluagh. Eabhl.

⁵ mac màthar eile. ⁶ o ghnùis a bhràithrean. Eabhl.

⁷ an comhchruinneach.

⁸ tad. Eabhl.

fearann Mhoib, no fearann chloinn Amoin:

16 Ach an uair a thàinig Israe¹ a nìos as an Eiphit, agus a ghluais iad troimh 'n fhàsach gu ruig a' mhuir ruadh, agus a thàinig iad gu Cades;

17 An sin chuir Israel teachdairean gu rìgh Edoim, ag ràdh, Leig dhuinn, guidheamaid ort, dol troimh t'fhearann: ach cha'n èisdeadh rìgh Edoim. Agus mar an ceudna chuir iad teachdairean gu rìgh Mhoib: ach cha d'aontaich e: agus dh'fhan Israel ann an Cades.

18 An sin ghluais iad troimh 'n fhàsach, agus chuairtich iad tìr Edoim, agus tìr Mhoib, agus thàinig iad o thaobh na h-àirde 'n ear do thìr Mhoib, agus champaich iad air an taobh eile do Arnon, ach cha d'thàinig iad an taobh a stigh do chrich Mhoib; oir b'e Arnon crìoch Mhoib.

19 Agus chuir Israel teachdairean gu Sihon rìgh nan Amorach, rìgh Hesboim; agus thubhairt Israel ris, Leig dhuinn, guidheamaid ort, gabhail troimh t'fhearann do'r n-àite fèin.

20 Ach cha d'earb Sihon ri h-Israel gabhail troimh a chrich: ach chruinnich Sihon a shluagh uile cuideachd, agus champaich iad ann an Iahas; agus chog e ri h-Israel.

21 Agus thug an Tighearna Dia Israel Sihon agus a shluagh uile thairis do làimh Israeil, agus bhuail siad iad: agus shealbhaich Israel uile fhearann nan Amorach, luchd-àiteachaidh na tìre sin.

22 Agus shealbhaich iad uile chrìocha nan Amorach, o Arnon gu ruig Iaboc, agus o'n fhàsach gu ruig Iordan.

23 Agus a nis thig an Tighearna Dia Israeil a mach na h-Amoraich á fianuis a shluaigh Israeil, agus am bu chòir dhuitse dol 'nan seilbh-san?

24 An ni sin a bheir do dhia Chemos dhuit r'a shealbhachadh, nach sealbhaich thusa e? agus ge b'e neach a thilg an Tighearn ar Dia-ne mach romhainn, 'na sheilbh-san théid sinne.

25 Agus a nis am bheil thusa ni's fearr na Balac, mac Shipoir, rìgh Mhoib? an do rinn esan riamh strì ri h-Israel, agus an do chog e riamh 'nan aghaidh?

26 'Nuair a ghabh Israel còmhnuidh ann an Hesbon agus 'na bhailtibh, agus ann an Aroer agus 'na bhailtibh, agus anns na bailtibh uile a tha làimh ri Arnon, rè thri ceud bliadhna? agus c'ar son nach do bhuin sibh air an ais iad anns an àm sin?

27 Uime sin cha do pheacaich mise a'd' aghaidh, ach tha thusa a' deanamh eucoir

ornusa¹ le cogadh a'm' aghaidh: thugadh an Tighearn am Breitheamh breth an diugh eadar clann Israeil agus clann Amoin.

28 Gidheadh cha d'éisd rìgh chloinn Amoin ri briathraibh Iephtah, a chuir e d'a ionnsuidh.

29 Agus thàinig spiorad an Tighearn air Iephtah; agus chaidh e thairis gu Gilead agus Manaseh, agus o sin chaidh e thairis gu Mispheh Ghilead, agus o Mhispeh Ghilead chaidh e thairis gu cloinn Amoin.

30 Agus bhòidich Iephtah bòid² do'n Tighearn, agus thubhairt e, Ma bheir thu gu cinnteach clann Amoin thairis do m' làimh,

31 An sin tarlaidh, ge b'e ni a thig a mach á dorsaibh mo thighe a'm' choinneamh, 'nuair a philleas mi ann an sìth o chloinn Amoin, gu cinnteach gur leis an Tighearn e, agus³ iobraidh mi e dha 'na iobairt-loisgte⁴.

32 Agus chaidh Iephtah thairis gu cloinn Amoin a chogadh 'nan aghaidh; agus thug an Tighearna thairis iad d'a làimh.

33 Agus bhuail e iad o Aroer, eadhon gu an tig thu gu Minit, fichead baile⁵, agus gu còmharn nad fion-lios, le àr⁶ ro mhor. Mar so dh'ìrosalachadh clann Amoin am fianuis chloinn Israeil.

34 Agus thàinig Iephtah gu Mispheh d'a thigh, agus, feuch, thàinig a nighean a mach 'na choinneamh le tiompanaibh agus le damnsaibh, agus b'i 'aon leanabh cloinne i: cha robh aige mac no nighean ach i.

35 Agus an uair a chunnaic e i, reub e 'eudach, agus thubhairt e, Och, mo nighean! is roosal a leag thu mi, agus is aon thu dhiubh-san a ta 'gam chlaoidh: oir dh'fhosgail mi mo bheul do'n Tighearn, agus cha'n fhead mi dol air m'ais.

36 Agus thubhairt ise ris, Athair, ma dh'fhosgail thu do bheul do'n Tighearna, dean riumsa a réir an ni a thàinig a mach as do bheul, o rinn an Tighearna dìogh-altas air do shonsa air do naimhdibh, eadhon air cloinn Amoin.

37 Agus thubhairt i r'a athair, Deanar an ni so air mo shonsa: Leigear leam dà mhios a chum gu'n imich mi suas agus sìos air na beanntaibh, agus gu'n dean mi caoidh air son m'òigheachd, mi fèin agus mo bhan-chompanacha.

38 Agus thubhairt e, Imich. Agus leig e air falbh i ré dà mhios: agus chaidh i maille r'a ban-chompanachaibh, agus rinn i caoidh air son a h-òigheachd air na beanntaibh.

39 Agus ann ceann dà mhios, phill i

¹ a' buntainn gu h-òle riumsa. Eabh. ² mòid.

³ no. ⁴ bheir mi suas e mar iobairt-loisgte.

⁵ caithir, baile cuairtiche le balla.

⁶ marbhadh.

dh'ionnsuidh a li-athar, agus rinn e rithe a réir a bhòide a bhòidich e: agus cha rebh aithne aice air fear. Agus bha e 'na ghnàth ann an Israel,

40 Gu'n rachadh nigheana Israeil o bhliadhna gu bliadhna a dheanamh caoidh air son 'nighinn Iephtah, a' Ghileadaich, ceithir làithean sa' bhliadhna.

CAIB. XII.

1 Rinn na Ephraimich comhstri ri Iephtah agus ris na Gileadaich. 4 Chog iadsan 'nan aghaidh, agus mharbh iad mòran diubh. 7 Fhuair Iephtah bàs.

AGUS chruinnicheadh fir Ephraim an ceann a chéile, agus chaidh iad thairis mu thuath², agus thubhairt iad ri Iephtah, C'ar son a chaidh thu thairis a chogadh an aghaidh chloinn Amoin, agus nach do ghairm thu oirne gu dol maille riut? loisgidh sinn do thigh ort le teine.

2 Agus thubhairt Iephtah riu, Bha agam-sa agus aig mo shluagh comhstri mhòr ri cloinn Amoin; agus an uair a ghairm mi oirbh, cha do shaor sibh mi as an làimh.

3 Agus an uair a chunnaic mi nach do shaor sibh³ mi, chuir mi m'anam a'm' làimh, agus chaidh mi a null⁴ an aghaidh chloinn Amoin, agus thug an Tighearna thairis iad do m' làimh: c'ar son ma ta tha sibh air teachd a nìs a m' ionnsuidhs' an diugh, a chogadh a'm' aghaidh?

4 An sin chruinnich Iephtah cuideachd fir Ghilead uile, agus chog e ri h-Ephraim: agus bhuail fir Ghilead Ephraim, a chionn gu'n dubhairt iad, Is luchd-fuadain do Ephraim, sibhse a Ghileadacha, am measg Ephraim agus am measg Mhanashe.

5 Agus ghlac na Gileadaich àthanna Iordain air na Ephraimich: agus an uair a thubhairt na h-Ephraimich sin a chaidh as, Leig dhomh dol thairis, thubhairt fir Ghilead ris, An Ephraimeach thu? Ma thubhairt esan, Cha 'n eadh;

6 An sin thubhairt iadsan ris, Abair a nis Schiboleth; agus thubhairt esan Siboleth: oir cha b'urraim e a ràdh mar sin⁵. An sin ghabh iad e, agus mharbh iad e aig àthannaibh Iordain; agus thuit anns an àm sin do na h-Ephraimich a dhà agus dà fhichead mìle.

7 Agus thug Iephtah breth air Israel se bliadhna: an sin fhuair Iephtah an Gileadach bàs, agus dh'adhlaicheadh e ann an aon do bhailtibh⁶ Ghilead.

8 Agus 'na dhéigh-san thug Ibsan o Bhetlehem breth air Israel.

9 Agus bha deich thar fhichead mac aige, agus deich thar fhichead nighean, a chuir e mach uath, agus ghabh e deich

thar fhichead nighean a stigh d'a ionnsuidh air son a mhac. Agus thug e breth air Israel seachd bliadhna.

10 Agus fhuair Ibsan bàs, agus dh'adhlaicheadh e ann am Bet-lehem.

11 Agus 'na dhéigh-san thug Elon, an Sebulonach, breth air Israel: agus thug e breth air Israel deich bliadhna.

12 Agus fhuair Elon an Sebulonach bàs, agus dh'adhlaicheadh e ann an Aialon, ann an tìr Shebuloin.

13 Agus ua dhéigh-san thug Abdon mac Hileil, Piratonach, breth air Israel.

14 Agus bha dà fhichead mac aige, agus deich thar fhichead mac a mhac, a mharcaich air deich agus trì fichead asal òg: agus thug e breth air Israel ochd bliadhna.

15 Agus fhuair Abdon mac Hileil am Piratonach bàs, agus dh'adhlaicheadh e ann am Piraton, ann an tìr Ephraim, ann an sliabh nan Amaleceach.

CAIB. XIII.

1 Thugadh clann Israeil thairis do làimh nam Philisteach. 2, 8 Dh'fhoillsich aingeal an Tighearn e féin do mhnaoi Mhanoah, agus d'a fear. 19 Iob-air-loisgte Mhanoah. 24 Rugadh Samson.

AGUS rinn clann Israeil olc a ris ann an suilbhan Tighearn; agus thug an Tighearna thairis iad do làimh nam Philisteach dà fhichead bliadhna.

2 Agus bha duine àraidh do Shorah, do theaghlach nan Danach, d'am b'ainm Manoah agus bha a bhean neo-thorrach, agus cha d'rug i clann.

3 Agus dh'fhoillsich aingeal an Tighearn e féin do'n mhnaoi⁷, agus thubhairt e rithe, Feuch a nis, tha thu neo-thorrach, agus cha d'rug thu fathast clann; ach ginidh tu, agus beiridh tu mac.

4 A nis ma ta thoir an aire, guidheam ort, agus na h-òl fion no deoch làidir, agus na h-ith nì air bith neòghlan:

5 Oir, feuch, ginidh tu, agus beiridh tu mac; agus cha tig ealtainn sam bith air a cheann: oir bithidh an leanabh 'na Nasarach do Dhia o'n bhroinn; agus tòisichidh e air Israel a shaoradh á làimh nam Philisteach.

6 Agus thàinig a' bhean agus dh'innis i d'a fear, ag ràdh, Thàinig òglach⁸ Dhé a m'ionnsuidh, agus a ghnùis mar ghnùis aingil Dé, ro uamhasach: ach cha d'fheòraich mi dheth cia as a bha e, agus cha d'innis e dhomh 'ainm.

7 Ach thubhairt e rium, Feuch, ginidh tu, agus beiridh tu mac; agus a nis na h-òl fion no deoch làidir, agus na h-ith nì air bith neòghlan: oir bithidh an lean-

¹ a thoirt comhshluartachd do. ² gu Sephon.

³ thu. Eabh. ⁴ a nunn; a nonn. Eir.

⁵ gu ceart. ⁶ ann am baile.

⁷ chunnacas aingeal an Tighearna leis a' mhnaoi. Eabh.

⁸ duine. Eabh.

abh 'na Nasarach do Dhia o'n bhroinn gu là a bhàis.

8 An sin ghuidh Manoah air an Tighearna, agus thubhairt e, O mo Thighearna, thigeadh, guidheam ort, òglach Dhé a chuir thu uait a ris d'ar n-ionnsuidh, agus teagaisgeadh e dhuinn ciod a ni sinn ris an leanabh a bheirear.

9 Agus dh'éisd Dia ri guth Mhanoah; agus thàinig aingeal Dhé a ris a dh'ionnsuidh na mnà, agus i 'na suidhe anns an achadh: ach cha robh Manoah a fear maille rithe.

10 Agus rinn a' bhean cabhag, agus ruith i, agus dh'innis i d'a fear, agus thubhairt i ris, Feuch, chunnaic mi an duine a thàinig a m' ionnsuidh air an là roimhe.

11 Agus dh'éirich Manoah, agus chaidh e 'u déigh a mhnà, agus thàinig e dh'ionnsuidh an duine, agus thubhairt e ris, An tusa an duine a labhair ris a' mhnaoi? Agus thubhairt esan, Is mi.

12 Agus thubhairt Manoah, A nis thigeadh do bhriathra gu crìch: cionnus a dh'orduicheas sinn mu'n leanabh, agus ciod a ni sinn ris?

13 Agus thubhairt aingeal an Tighearna ri Manoah, O gach *ni* a thubhairt mise ris a' mhnaoi coimhheadh¹ si i féin.

14 Do *ni* sam bith a thig o'n chrann-fhìona na h-itheadh i, agus fìon no deoch làidir na h-òladh i, agus *ni* sam bith neòghlan na h-itheadh i: gach *ni* a dh'àithn mise dh'i, coimhheadh i.

15 Agus thubhairt Manoah ri aingeal an Tighearna, Leig dhuinn, guidheamaid ort, do ghleidheadh, agus deasaichidh sinn fa d' chomhair meann do na gabhraibh.

16 Agus thubhairt aingeal an Tighearna ri Manoah, Ged ghléidh thu mi, cha'n ith mi do t'aran; agus ma bheir thu suas ìobairt-loisgte, do'n Tighearna bheir thu suas i: oir cha robh fios aig Manoah gu'm b'e aingeal an Tighearna e.

17 Agus thubhairt Manoah ri aingeal an Tighearna, Ciod is ainm dhuit; a chum 'nuair a thig do bhriathra gu crìch, gu'n toir sinn urram dhuit?

18 Agus thubhairt aingeal an Tighearna ris, C'ar son a tha thu mar so a' fiosrachadh a thaobh m'ainme-sa, agus gu bheil e diomhair?²

19 Agus ghabh Manoah meann do na gabhraibh, maille ri tabhartas-bidh, agus dh'ìobairt se e air carraig do'n Tighearna: agus b'iongantach an *ni* a rinn an *t-aing-eal*, agus Manoah agus a bhean ag amharc air:

20 Oir an uair a dh'éirich an lasair bhàrr na h-altarach suas gu nèamh, chaidh

aingeal an Tighearna suas ann an lasair na h-altarach: agus an uair a chunnaic Manoah agus a bhean *sin*, thuit iad air an aghaidh a dh'ionnsuidh na talmhainn.

21 (Ach cha d'fhoillsich aingeal an Tighearna e féin tuilleadh do Mhanoah agus d'a mhnaoi.) An sin bha fios aig Manoah gu'm b'e aingeal an Tighearna e.

22 Agus thubhairt Manoah r' a mhnaoi, Gu cinnteach gheibh sinn bàs oir chunnaic sinn Dia.

23 Ach thubhairt a bhean ris, Nam bu toil leis an Tighearna ar marbhadh, cha ghabhadh e o'r làimh ìobairt-loisgte agus tabhartas-bidh, agus cha nochdadh e dhuinn na *nithe* so uile, agus mar air an àm so, cha chuireadh e 'n céill duinn a leithid so do *nithibh*.

24 Agus rug a' bhean leanabh, agus thug i Samson mar ainm air: agus dh'fhàs an leanabh, agus bheannaich an Tighearna e.

25 Agus thòisich spiorad an Tighearna r'a bhrosnachadh air uairibh ann an camp Dhain, eadar Sorah agus Estaol.

CAIB. XIV.

1 *Dh'iarr Samson bean do na Philistich. 10 A chuir-m bainne agus a thiomhseachan. 19 Mharbh e deich 'ar fhichead Philisteach, agus bhuin e diubh an eudach. 28 Thugadh a bhean do shear eile.*

A GUS chaidh Samson sìos gu Timnat; agus chunnaic e bean ann an Timnat do nigheanaibh nam Philisteach.

2 Agus thàinig e nìos, agus dh'innis e d'a athair agus d'a mhàthair, agus thubhairt e, Chunnaic mi bean ann an Timnat do nigheanaibh nam Philisteach: agus a nis faighibh i dhomhsa 'na mnaoi.

3 An sin thubhairt 'athair agus a mhàthair ris, Nach 'eil bean air bith am measg nigheana do bhràithre, no am measg mo shluaigh uile, gu'n rachadh tu a ghabhail mnà do na Philistich neo-thimchioll-ghearrta? Agus thubhairt Samson r' a athair, Faigh dhomh i; oir tha i taitneach³ a m' shùilbh.

4 Ach cha robh fhios aig 'athair agus a mhàthair gu'm b'ann o'n Tighearna *bha* e, gu'n d'iarr e fàth an aghaidh nam Philisteach: oir anns an àm sin bha uachdaranachd aig na Philistich os ceann Israeil.

5 Uime sin chaidh Samson sìos, agus 'athair agus a mhàthair, gu Timnat, agus thàinig iad gu fìon-lìosaibh Thimnait: agus, feuch, *bha* leòmhann òg a' beuchdaich 'na aghaidh.

6 Agus thàinig spiorad an Tighearna air gu treun, agus reub se e mar a reubadh e meann, agus cha robh ni air bith 'na làimh:

¹ gleidheadh.² iongantach. Eabh.³ dìrcach, ceart. Eabh.

ach cha d'innis e d'a athair no d'a mhàthair ciod a rinn e.

7 Agus chaidh e sìos, agus labhair e ris a' mhnaoi; agus bha i taitneach ann an suilibh Shamsoin.

8 Agus an déigh làithean àraidh, phill e chum a gabhail, agus chaidh e a leth-taobh a dh'fhaicinn ciosaich an leòmhain; agus, feuch, *bha* sgaoth bheach ann an ciosaich an leòmhain, agus mil.

9 Agus ghabh e dhith 'na làmhaidh, agus chaidh e air 'aghaidh ag itheadh, agus thàinig e dh'ionnsuidh 'athar agus a mhàthar, agus thug e dhoibh, agus dh'ith iad: ach cha d'innis e dhoibh gu'm b'ann ù ciosaich an leòmhain a thug e a' mhil.

10 Agus chaidh 'athair sìos a dh'ionnsuidh na mnà: agus rinn Samson an sin cuirm¹; oir mar sin bu ghnàth leis na daoineibh òga a dheanamh.

11 Agus an uair a chunnaic iad e, thug iad deich thar fhichead companach gu bhi maille ris.

12 Agus thubhairt Samson riu, Cuiridh mi nis toimhseachan a mach dhuibh: ma chuireas sibh gu cinnteach an céill domh e an taobh a stigh do sheachd làithibh na cuirme, agus gu'm faigh sibh a mach e, an sin bheir mise dhuibh deich thar fhichead brat-lìn²; agus deich thar fhichead culaidh eudaich:

13 Ach mur urrainn sibh a chur an céill domh, an sin bheir sibhse dhomh-sa deich thar fhichead brat-lìn, agus deich thar fhichead culaidh eudaich. Agus thubhairt iad ris, Cuir a mach do toimhseachan, agus gu'n cluinn sinn e.

14 Agus thubhairt esan riu, As an *fhear* a dh'itheas thàinig a mach biadh, agus as an *fhear* gharg³ thàinig a mach millsead. Agus cha b'urraim iad an toimhseachan fhuasgladh ann an trì làithibh.

15 Agus air an t-seachdamh là thubhairt iad ri mnàoi Shamsoin, Meall t'fhear, a chum gu'n innis e dhuinn⁴ an toimhseachan, air eagal gu'n loisg sinn thu féin agus tigh t'athar le teine: an ann gu sealbh a ghabhail anns na bheil againn a ghairm thu oirm? nach ann?

16 Agus ghuil bean Shamsoin 'na fhianuis, agus thubhairt i, Tha mhàin fuath agad orm, agus cha 'n'eil gràdh agad domh: chuir thu mach toimhseachan do chloinn mo shluaigh⁵ agus cha d'innis thu dhomh-sa e. Agus thubhairt esan rithe, Feuch, cha d'innis mi e do m'athair no do'm mhàthair, agus an innis mi dhuitse e?

17 Agus ghuil i 'na làthair rè nan seachd làithean a bha chuir m'aca: agus air an t-seachdamh là dh'innis e dh'i, a chionn gu'n do chuir i gu teann ris: agus dh'

innis ise an toimhseachan do chloinn a sluaigh.

18 Agus thubhairt daoine a' bhaile ris air an t-seachdamh là, roimh luidhe na gréine, Ciod is mise na mil, agus ciod is gairge⁶ na leòmhain? Agus thubhairt esan riu, Mur bitheadh sibh air treabhaidh⁷ le m'agh-sa⁸, cha'n fhaigheadh sibh a mach mo toimhseachan.

19 Agus thàinig spiorad an Tighearn air gu treun, agus chaidh e sìos gu Ascelon, agus mharbh e dhiubh deich thar fhichead fear, agus ghabh e am faobh⁹, agus thug e culaidhean eudaich dhoibhsan a dh'fhuasgail an toimhseachan: agus las 'fhearg, agus chaidh e suas gu tigh 'athar.

20 Ach thugadh¹⁰ bean Shamsoin d'a chompanach, a bha mar charaid aige.

CAIB. XV.

1 Dhiultadh a bhean do Shamson. 3 Loisg e arbhar nam Philisteach. 9 Cheaxgladh e le fir Iudah, agus thugadh thairis e do na Philistich.

14 Mharbh e le cnàimh-peircell mìle fear.

AGUS an déigh làithean àraidh, ann an àm fogharaidh a' chruithneachd, chaidh Samson a dh'fhaicinn a mhna le meann do na gabhraibh; agus thubhairt e, Théd mi stigh a dh'ionnsuidh mo mhna do'n t-seòmar. Ach cha leigeadh a h-athair leis dol a stigh.

2 Agus thubhairt a h-athair, Gu deimhin shaoil mi gu'n d'fhuataich thu gu tur i, agus thug mi i do' d' chompanach: nach 'eil a piuthar a's òige nì's maisiche na i? bitheadh i nis agad 'na h-àite.

3 Agus thubhairt Samson mu'n timchioll, Anis bithidh mi nì's neo-chiontaiche na na Philistich, ged ni mi olc orra.

4 Agus chaidh Samson, agus ghlac e trì cheud sionnach, agus ghabh e leusan-teine, agus thionndaidh e earball ri h-earball, agus chuir e leus teine anns a' mheadhon eadar dà earball.

5 Agus an uair a chuir e na leusan ri theine, leig e air falbh iad am measg arbhair nam Philisteach, agus loisg e 'n dà chuid na h-adagan agus mar an ceudna an t-arbhar a bha 'na sheasamh, maille ris na fion-liosaibh agus ris na liosaibh-olaidh.

6 An sin thubhairt na Philistich, Cò rinn so? Agus dh'innseadh dhoibh, Samson cliamhuin an Timnataich, a chionn gu'n do ghabh esan a bhean, agus gu'n d'thug e i d'a chompanach. Agus chaidh na Philistich suas, agus loisg iad i féin agus a h-athair le teine.

7 Agus thubhairt Samson riu, Ge do rinn sibh mar so, gidheadh diolaidh mise mi féin oirbh, agus 'na dhéigh sin sguridh mi.

¹ feisd rè sheachd làithean.

³ làidir.

⁴ dhuit.

² tèine-lìn.

⁵ mo dhaoine.

⁶ làidire.

⁷ air ar.

⁹ le m' cholpaich-sa.

⁸ an éididh, an creach.

¹⁰ bha. Eabh.

8 Agus bhuail e iad cos gu leis¹ le h-àr mòr: agus chaidh e sìos agus ghabh e còmhnuidh ann an uaimh² carraige Etaim.

9 Agus chaidh na Philistich suas, agus champaich iad ann an Iudah, agus sgaoil iad iad fèin ann an Lehi.

10 Agus thubhairt fir Iudah, C'ar son a thàinig sibh a nìos 'nar n-aghaidh-ne? Agus thubhairt iadsan, A cheangal Shamsoin thàinig sinn a nìos, a dheanamh air mar a rinn esan oirnne.

11 Uime sin chaidh trì mìle fear do Iudah sìos gu uaimh carraige Etaim, agus thubhairt iad ri Samson, Nach 'eil fhios agad gu *bheil* na Philistich 'nan uachd-arain oirnne? agus ciod e so a rinn thu oirnne? agus thubhairt esan riu, Mar a rinn iadsan ormsa, mar sin rinn mise orra-san.

12 Agus thubhairt iad ris, A chum thusa a cheangal tha sinn air teachd a nuas, a chum gu'n toir sinn thairis thu do làimh nam Philisteach. Agus thubhairt Samson riu, Thugaibh bhuir mionnan dhomh, nach buail sibh fèin orm.

13 Agus fhreagair iad e, ag ràdh, Cha *bhuail*: ach ceanglaidh sinn thu gu teann, agus bheir sinn thairis thu d'an làimh, ach gu cinnteach cha mharbh sinn thu. Agus cheangail iad e le dà chord nomha, agus thug iad a nìos e o'n charraig.

14 Agus an uair a thàinig e gu Lehi, rinn na Philistich iolach a' *dol*'na choinneamh: agus thàinig spiorad an Tighearn àir gu treun, agus dh'fhàs na cuird a *bha* air a ghairdeanaibh mar lion a loisgeadh le teine, agus dh'fhuasgladh a cheanglaichean bhàrr a làmh.

15 Agus fhuair e cnàimh-peircill³ ùr asail, agus chuir e mach a làmh, agus ghlac se e, agus bhuail e leis mìle fear.

16 Agus thubhairt Samson, Le cnàimh-peircill asail, dùn air dhùn⁴, le cnàimh-peircill asail mharbh mi mìle fear.

17 Agus an uair a sguir e do labhairt, thilg e 'n cnàimh-peircill as a làmh, agus dh'ainmich e 'n t-àite sin Ramat-lehi.

18 Agus bha tart mòr air, agus ghairm e air an Tighearn, agus thubhairt e, Thug thu an t-saorsa mhòr so do làimh do sheirbhisich: agus a nis an faigh mi bàs le tart, agus an tuit mi ann an làimh nam neo-thimchioll-ghearrta?

19 Agus sgoilt Dia lag⁵ a *bha* ann an Lehi⁶, agus thàinig uisge as; agus dh'òl e, agus thàinig a spiorad a ris, agus dh'ath-bheothaicheadh e: uime sin thug e En-hacore mar ainm air, a *tha* ann an Lehi gu ruig an là 'n diugh.

20 Agus thug e breth air Israel ann an làithibh nam Philisteach fichead bliadhna.

CAIB. XVI.

- 1 Thug Samson leis còmhlaichean geata Ghasa.
4 Mheall Delilah e, 15 agus thugadh buaidh air.
21 Chuir na Philistich a mach a shùilean.

AGUS chaidh Samson gu Gasa, agus chunnaic e an sin strìopach, agus chaidh e stigh d'a h-ionnsuidh.

2 Agus dh'innseadh do na Gasaich, ag ràdh, Thàinig Samson an so. Agus chuairtich iad e, agus rinn iad feall-fholach air a shon rè na h-oidhche ann an geata a' bhaile, agus bha iad tosdach⁷ rè na h-oidhche, ag ràdh, 'Nuair a thig solus na maidne, marbhaidh sinn e.

3 Agus luidh Samson gu meadhon-oidhche, agus dh'éirich e mu mheadhon-oidhche, agus ghabh e còmhlaichean geata a' bhaile, agus an dà phost, agus thug e leis iad maille ris na crannaibh, agus chuir e air a ghuaillibh iad, agus thug e suas iad gu mullach sléibhe a *tha* fa chomhair Hebroin.

4 Agus 'na dhéigh sin ghràdhaich e bean ann an gleann Shoreic, d'am b'ainm Delilah.

5 Agus chaidh tighearnan nam Philisteach suas d'a h-ionnsuidh, agus thubhairt iad rithe, Meall e, agus faic c'ait *am bheil* a neart mòr a' *luidhe*, agus cionnus a bhuaidhaicheas sinn air, air chor as gu'n ceangail sinn e chum a cheannsachadh⁸; agus bheir sinn dhuìt, gach aon againn, mìle agus ceud *bonn* airgid.

6 Agus thubhairt Delilah ri Samson, Innis dhomh, guidheam ort, c'ait *am bheil* do neart mòr a' *luidhe*, agus cionnus a dh'fheudas tu bhi air do cheangal chum do cheannsachadh.

7 Agus thubhairt Samson rithe, Ma cheanglas iad mi le seachd goid ùra nach do thiormaicheadh, an sin bithidh mi amhunn, agus bithidh mi mar dhuine eile.

8 An sin thug tighearnan nam Philisteach suas d'a h-ionnsuidh seachd goid ùra nach do thiormaicheadh, agus cheangail i e leo.

9 (A nis *bha* daoine ri feall-fholach a' fantuinn maille rithe anns an t-seòmar.) Agus thubhairt i ris, Na Philistich ort, a Shamsoin. Agus bhris e na goid, mar a bhrisear snàthainn ascaid⁹ an uair a bheanas e ri teine¹⁰: agus cha d' fhuaras fios a neirt.

10 Agus thubhairt Delilah ri Samson, Feuch, mheall thu mi, agus dh'innis thu dhomh breugan: a nis iunis dhomh, guidheam ort, cionnus a dh'fheudas tu bhi air do cheangal.

11 Agus thubhairt esan rithe, Ma cheang-

¹ cos air leis.

² air mullach.

⁶ anns a' ghial.

⁷ sàmhach.

³ cnàimh-géil.
asail chlaoidh mi iad.

⁴ le cnàimh-peircill

⁸ a phianadh, a chlaoidh.

⁹ barraich.

⁵ àite falamh.

¹⁰ a ghabhas e faile an teine.

Eabh.

las iad mi gu teann le cordaibh ùra nach do ghnàthaicheadh riamh, an sin bithidh mi anmhunn, agus bithidh mi mar dhuine eile.

12 Agus ghabh Delilah cuird ùra, agus cheangail i e leo, agus thubhairt i ris, Na Philistich ort, a Shamsoin. (Agus *bha* luchd feall-fholach a' fantuinn anns an t-seòmar.) Agus bhris e iad bhàrr a ghairdeana mar shnàthainn.

13 Agus thubhairt Delilah ri Samson, Gu ruige so mheall thu mi, agus dh'innis thu dhomh breugan: innis dhomh cionnus a dh'fheudas tu bhi air do cheangal. Agus thubhairt esan rithe, Ma dh'fhigh-eas tu seachd duail¹ mo chinn maille ris an eige.

14 Agus dhaingnich i iad leis a' phinne², agus thubhairt i ris, Na Philistich ort, a Shamsoin. Agus mhosgail e as a chodal, agus thug e air falbh leis pinne na garm-ainn agus an eige.

15 Agus thubhairt ise ris, Cionnus is urrainn thu a ràdh, Tha gràdh agam dhuit, an uair nach 'eil do chridhe leam? na tri uairean so mheall thu mi, agus cha d'innis thu dhomh c'ait *am bheil* do neart mòr *a' luidhe*.

16 Agus an uair a chuir i gu teann ris gach aon là le a briathraibh, agus a choimh-éignich i e, bha 'anam air a chràdh gu bàs.

17 An sin dh'innis e dh'i a chridhe uile, agus thubhairt e rithe, Ealtainn cha d'thàinig riamh air mo cheann; oir *bu* Nasarach do Dhia mi o bhroinn mo mhàthar: ma bhearrar mi, an sin falbhaidh mo neart nam, agus fàsaidh mi anmhunn, agus bithidh mi mar gach duine eile.

18 Agus an uair a chunnaic Delilah g'un d'innis e dh'i a chridhe uile, chuir i fios, agus ghairm i air tighearnaibh nam Philisteach, ag ràdh, Thigibh a nìos an aon uair so, oir dh'innis e dhomh a chridhe uile. An sin thàinig tighearnan nam Philisteach a nìos d'a h-ionnsuidh, agus thug iad airgid a nìos 'nan làimh.

19 Agus thug i air codal air a glùinibh; agus ghairm i air fear, agus thug i air seachd duail a chinn a bhearradh dheth; agus thòisich i air a cheanussachadh, agus dh'fhalbh a neart uath.

20 Agus thubhairt i, Na Philistich ort, a Shamsoin. Agus mhosgail e as a chodal, agus thubhairt e, Théid mi mach, mar air uairibh eile, agus crathaidh mi mi féin: oir cha robh fhios aige gu'n d'imich an Tighearn uath.

21 Ach ghlac na Philistich e, agus chuir iad a mach a shùilean; agus thug iad sìos e gu Gasa, agus cheangail iad e le

geimhlìbh umha, agus bha e a' bleth ann an tigh a' phriosain³.

22 Gidheadh thòisich folt a chinn air fàs a ris, an déigh dha bhi air a bhearradh.

23 Agus chruinnich tighearnan nam Philisteach iad féin an ceann a chéile a dh'ìobradh ìobairte mòire d'an dia Dagon, agus a dheanamh gairdeachais: oir thubhairt iad, Thug ar dia thairis Samson ar nàmhaid d'ar làimh.

24 Agus an uair a chunnaic an sluagh e, mhol iad an dia: oir thubhairt iad, Thug ar dia thairis d'ar làimh ar nàmhaid, agus fear-millidh ar dùthcha, a mharbh mòran dhinn.

25 Agus an uair a bha'n cridheacha subhach, thubhairt iad, Gairmibh air Samson, a chum gu'n dean e fearas-chuideachd⁴ dhuinn. Agus ghairm iad air Samson á tigh a' phriosain; agus rinn e fearas-chuideachd 'nan làthair: agus chuir iad e eadar na puist.

26 Agus thubhairt Samson ris an òganach a ghabh greim d' a làimh, Leig dhomh na puist a làimhseachadh air am bheil an tigh 'na sheasamh, a chum gu'n leig mi mo thaic riu.

27 A nis bha'n tigh làn dhaoine agus bhan; agus *bha* uile thighearnan nam Philisteach an sin: agus *bha* air mullach an tighe mu thimcheall tri mìle fear agus bean, a bha 'g amharc an uair a rinn Samson fearas-chuideachd.

28 Agus ghairm Samson air an Tighearn, agus thubhairt e, O Tighearna Dhé, cuimhnich orm, guidheam ort, agus neartaich mi, guidheam ort, a mha'n aon uair so, O Dhé, a chum gu'm bi mi dìolta dh'aon tarraing air na Philistich air son mo dhà shùl.

29 Agus ghabh Samson greim do'n da phost mheadhonach air an robh an tigh 'na sheasamh, agus ris an robh e 'n taic, do h-aon *diubh* le a làimh dheis, agus do 'n aon eile le a làimh chlì.

30 Agus thubhairt Samson, Faigheam bàs⁵ maille ris na Philistich. Agus chrom se e féin⁶ le uile neart; agus thuit an tigh air na tighearnaibh, agus air an t-sluagh uile a *bha* ann: agus bha na maibh a mharbh e aig a bhàs ni bu lionmhoire na *iadsan* a mharbh e 'na bheatha.

31 Agus chaidh a bhràithrean agus tigh 'athar uile sìos, agus ghabh iad e, agus thug iad suas e, agus dh'adhlaic iad e eadar Sorah agus Estaol, ann an àit-adhlaic Mhanoah 'athar: agus thug e breth air Israel fichead bliadhna.

CAIB. XVII.

1 Thug Micah air ais d'a mhàthair an t-airgid a ghoideadh, agus rinn i dealbh snaidhte agus dealbh

¹ ciabhan.

² tarraim.

³ ann an tigh nan daoine ceangailte. Eabh.

⁴ spòrs, sìgradh. ⁵ Bàsaicheadh m'anam. Eabh.

⁶ tharruing e sìos na puist.

leaghta dheth. 7 Thuarasda'ich Micah Le-
bhitheach gu bhi 'na shagart aige.

AGUS bha duine do shliabh Ephraim,
d'am b'ainm Micah.

2 Agus thubhairt e r'a mhàthair, Am
mìle agus an ceud *secel* airgid, a thugadh
air falbh uait, mu'n do mhallaich thu,
agus mu'n do labhair thu cuideachd ann
am chluasaibh-sa, feuch, *tha* 'n t-airgid
agam-sa; ghabh mise e. Agus thubh-
airt a mhàthair, Gu ma beannaichte thusa
o'n Tighearn, a mhic.

3 Agus an uair a thug e air ais am mìle
agus an ceud *secel* airgid d'a mhàthair,
thubhairt a mhàthair, Naomlaich mi gu
h-iomlan¹ an t-airgid do'n Tighearn o
m' làimh air son mo mhic, a dheanamh
deilbh snaidhte, agus deilbh leaghta: a
nis ma ta bheir mi air ais dhuit e.

4 Agus thug e air ais an t-airgid d'a
mhàthair; agus ghabh a mhàthair dà
cheud *secel* airgid, agus thug i iad do'n
òr-cheard, agus rinn esan dhiubh dealbh
snaidhte agus dealbh leaghta: agus bha
iad ann an tigh Mhìcah.

5 Agus *bha* aig an duine Micah tigh
dhiathan², agus rinn e ephod, agus tera-
phim, agus choisrig³ e aon d'a mhic, agus
bha e aige 'na shagart.

6 Anns na làithibh sin cha *robh* rìgh air
bith ann an Israel: rinn *gach* fear an *ni*
sin a *bha* ceart 'na shùilibh fèin.

7 Agus bha òganach o Bhet-lehem Iu-
dah, do theaghlach Iudah, a *bha* 'na Le-
bhitheach, agus bha e air chuairt an sin.

8 Agus dh'imich an duine as a' bhaile o
Bhet-lehem Iudah, a dhol air chuairt far
am faigheadh e *àit*: agus thàinig e gu
sliabh Ephraim, gu tigh Mhìcah, a' dol
air aghaidh air a thurus.

9 Agus thubhairt Micah ris, Cia as a
tha thu air teachd? Agus thubhairt esan
ris, *Is* Lebhitheach mise o Bhet-lehem Iu-
dah, agus *tha* mi a' triall air chuairt far
am faigh mi *àite*.

10 Agus thubhairt Micah ris, Fan maille
rìumsa, agus bi dhomhsa a d' athair agus
a d' shagart, agus bheir mi dhuit deich
secel airgid sa' bhliadhna⁴ agus culaidh
eudaich, agus do bhiadh. Agus chaidh
an Lebhitheach a stigh.

11 Agus bha'n Lebhitheach toilichte
còmhnuidh ghabhail maille ris an duine,
agus bha'n t-òganach dha mar aon d'a
mhic.

12 Agus choisrig Micah an Lebhitheach;
agus bha 'n t-òganach aige 'na shagart,
agus bha e ann an tigh Mhìcah.

13 Agus thubhairt Micah, A nis tha fios
agam gu'n dean an Tighearna maith

dhomh, a chionn gu bheil Lebhitheach
agam 'na shagart.

CAIB. XVIII.

1 Chuir na Danaich cùigear fhear a dh'iarraidh
oighreachd dhoibh fèin. 21 Ghlac iad Lais.

ANNS na làithibh sin cha *robh* rìgh
air bith ann an Israel: agus anns na
làithibh sin dh'ìarr treubh⁵ nan Danach
dhoibh fèin oighreachd anns an gabhadh
iad còmhnuidh; oir gu ruig an là sin cha
do thuit an oighreachd uile orra am
measg threubhan Israel.

2 Agus chuir clann Dhain cùigear d' an
teaghlach o'n crìochaibh, daoine treun, o
Shorah agus o Estaol, a ghabhail beachd
air an tìr, agus g'a rannsachadh a mach;
agus thubhairt iad riu, Imichibh, ranns-
aichibh a mach an tìr. Agus thàinig iad
gu sliabh Ephraim, gu tigh Mhìcah, agus
dh'fhan iad an sin rè na h-oidhche.

3 An uair a *bha* iad aig tigh Mhìcah,
dh'aithnich iad guth an òganaich, an Le-
bhithich; agus thionndaidh iad a stigh an
sin, agus thubhairt iad ris, Cò thug an so
thu? agus ciod a *tha* thu deanamh an so?
agus ciod a *th'*agad an so?

4 Agus thubhairt esan riu, Mar so agus
mar so rinn Micah rium, agus thuasdal-
aich e mi, agus tha mi aige a m' shagart.

5 Agus thubhairt iad ris, Iarr comhairle,
guidheamaid ort, air Dia, chum gu'm bi
fios againn an soirbheich leinn 'nar slighe
air am bheil sinn ag imeachd.

6 Agus thubhairt an sagart riu, Imich-
ibh an sìth: an làthair an Tighearna *tha*
bhur slighe, air am bheil sibh ag imeachd.

7 Agus dh'imich an cùigear fhear, agus
thàinig iad gu Lais, agus chunnaic iad an
sluagh a *bha* ann, a' gabhail còmhnuidh
gun umbaill, a réir gnàtha nan Sionach,
sàmhach agus neo-umhailleach⁶; agus
cha *robh* uachdaran air bith anns an tìr,
a chuireadh gu nàire iad ann an *ni* air
bith: agus *bha* iad fada o na Sionaich,
agus cha robh gnotluach aca ri duine air
bith.

8 Agus thàinig iad a dh'ionnsuidh am
bràithrean gu Sorah agus Estaol; agus
thubhairt am bràithrean riu, Ciod a *tha*
sibh ag ràdh?

9 Agus thubhairt iad, Eirihh agus rach-
amaid suas 'nan aghaidh: oir chunnaic
sinne an tìr, agus, feuch, *tha* i ro mhàith:
agus am bheil sibhe 'nur tàmh⁷? na
bithibh leasg gu imeachd, agus gu dol a
steach a shealbhachadh na tìre.

10 'Nuair a théid sibh, thig sibh a steach
a dh'ionnsuidh sluaigh neo-umhaillich,
agus do thìr ro fharsaing; oir thug Dia

¹ Le naomhachadh naomhaich mi. Eabh.

² tigh do Dhia. ³ lion e làmh. Eabh.

⁴ an ceann làithean. Eabh. ⁵ fìne.

⁶ an sluagh a bha ann, baile a bha fantuinn
neo-umhailleach a réir gnàtha nan Sionach,
sàmhach agus neo-umhailleach. ⁷ 'nur tosd. Eabh.

thairis d'ur làimh i; àit anns nach ¹*eil* uireasbhuidh nì air bith a *th'* air an talamh.

11 Agus chaidh á sin do theaghlach nan Danach, á Sorah agus á Estaol, sè ceud fear, crioslaichte le innealaibh cogaidh.

12 Agus chaidh iad suas, agus champ-aich iad ann an Ciriad-earim, ann an Iudah: uime sin thugadh Mahaneh-dan mar ainm air an àite sin gu ruig an là'n diugh; feuch, *tha e* air cùlaobh Chiriad-earim.

13 Agus chaidh iad seachad o sin gu sliabh Ephraim, agus thàinig iad gu tigh Mhìcah.

14 An sin fhreagair an cùgear fhear a chaidh a ghabhail beachd air tìr Lais, agus thubhairt iad r'am bràithribh, Am bheil fhios agaibh gu bheil anns na tighibh sin ephod, agus teraphim, agus dealbh snaidhte, agus dealbh leaghta? a nis ma ta smuainichibh ciod a ni sibh.

15 Agus thionndaidh iad gus a sin, agus thàinig iad gu tigh an òganaich, an Lebhithich, *eadhon* gu tigh Mhìcah, agus chuir iad fàilte air.

16 Agus sheas an sè ceud fear crioslaichte le innealaibh cogaidh, a *bha* do chloinn Dhain, aig dol a steach a' gheata.

17 Agus chaidh an cùgear fhear suas a chaidh ghabhail beachd air an tìr, agus thàinig iad a stigh an sin, agus ghabh iad an dealbh snaidhte, agus an ephod, agus an teraphim, agus an dealbh leaghta: agus sheas an sagart aig dol a stigh a' gheata, agus an sè ceud fear a *bha* crioslaichte le innealaibh cogaidh.

18 Agus an uair a chaidh iad sin a steach do thigh Mhìcah, agus a ghabh iad an dealbh snaidhte, an ephod, agus an teraphim, agus an dealbh leaghta, an sin thubhairt an sagart riu, Ciod a *tha* sibh a' deanamh?

19 Agus thubhairt iadsan ris, Bi d' thosd, cuir do làmh air do bheul, agus falbh maille ruine, agus bi dhuinn a' d' athair agus a' d' shagart: am fearr dhuit a bhi d' shagart do thigh aoin duine, na thu bhi d' shagart do thréibh agus do theaghlach ann an Israel?

20 Agus bha cridhe an t-sagairt subhach; agus ghabh e'n ephod, agus an teraphim, agus an dealbh snaidhte, agus chaidh e ann am meadhon an t-sluaigh.

21 Agus thionndaidh iad, agus dh'imich iad, agus chuir iad a' chlann bheag, agus an spréidh, agus gach nì trom² rompa.

22 Agus an uair a bha iad astar fada o thigh Mhìcah, chruinnich na fir a *bh'* anns na tighibh a *bha* làimh ri tigh Mhìcah iad féin an ceann a chéile, agus chaidh iad air tòir² chloinn Dhain.

23 Agus ghlaodh iad ri cloinn Dhain:

agus thionndaidh iadsan an aghaidh, agus thubhairt iad ri Mìcah, Ciod a *tha teachd* riut, gu bheil thu teachd le leithid so do chuideachd?³

24 Agus thubhairt esan, Mo dhiathan a rinn mi thug sibh leibh, agus an sagart, agus dh'fhalbh sibh roimhibh; agus ciod a th'agamsa tuilleadh? agus ciod e so a tha sibh ag ràdh rium, Ciod a *tha teachd* riut?

25 Agus thubhairt clann Dhain ris, Na cluinnear do ghuth 'nar measg, air eagal gu'm buail daoine feargach 'nan spiorad ort, agus gu'n caill thu t'anam féin, agus anama do theaghlach.

26 Agus dh'imich clann Dhain air an slighe; agus an uair a chunnajc Mìcah gu'n *robh* iad tuilleadh's làidir air a shon, thionndaidh e agus phill e d'a thigh.

27 Agus ghabh iad na *nithe* a rinn Mìcah, agus an sagart a bh'aige, agus thàinig iad gu Lais, a dh'ionnsuidh sluaigh a *bha* samhach agus neo-umhailleach: agus bhuail siad iad le faobhar a' chlaidheimh, agus loisg iad am baile le teine.

28 Agus cha *robh* fear-saoraidh ann, a chionn gu'n *robh* e fada o Shidon, agus nach *robh* gnothuch aca ri duine *sam bith*; agus *bha* e anns a' ghleam a *tha* làimh ri Bet-rehob: agus thog iad baile, agus ghabh iad còmhuidh ann;

29 Agus thug iad Dan mar ainm air a' bhaile, a réir ainme Dhain an athar, a rugadh do Israel: gidheadh *b'e* Lais ainm a' bhaile an toiseach.

30 Agus chuir clann Dhain suas dhoibh féin an dealbh snaidhte: agus bha Ionatan mac Ghersoim, mhic Mhanaseh, e féin agus a mhic, 'nan sagartaibh do thréibh Dhain, gu ruig là braidheanais na tìre.

31 Agus chuir iad suas dhoibh féin dealbh snaidhte Mhìcah, a rinn e, rè na h-uine a bha tigh Dhé ann an Siloh.

CAIB. XIX.

1 Chaidh Lebhithach gu Bet-lehem a thoirt dhachaidh a mhnà. 16 Thug seann duine aoidheachd dha aig Gibeah. 22 Mhì-ghnàthaich daoine Ghibeah a choimhleabach.

AGUS anns na làithibh sin, an uair nach *robh* rìgh air bith ann an Israel, bha Lebhithach àraidh air chuairt air taobh sléibh Ephraim, a ghabh d'a ionnsuidh coimhleabach o Bheth-lehem Iudah.

2 Agus rinn a choimhleabach siùrtachd 'na aghaidh, agus dh'fhalbh i uaith gu tigh a h-athar gu Bet-lehem Iudah, agus bha i 'n sin ceithir mìosan iomlan.

3 Agus dh'éirich a fear, agus chaidh e 'na dèigh, a chum gu'n labhradh e r'a cridhe, agus gu'n tugadh e air a h-ais i; agus 'òganach⁴ maille ris, agus dà asal:

¹ luachmhor.

² rug iad air.

³ gu bheil thu air do chruinneachadh. Eabh.

⁴ a òganach.

agus thug i steach e do thigh a h-athar; agus an uair a chunnaic athair na h-ighinn¹ e, chaidh e le gairdeachas² na choinneamh.

4 Agus ghléidh athair-céile, athair na h-ighinn e, agus dh'fhan e maille ris trì làithean: agus dh'ith agus dh'òl iad, agus dh'fhan iad rè na h-oidheche an sin.

5 Agus air a' cheathramh là, nuair a dh'éirich iad gu moch anns a' mhaduinn, dh'éirich esan suas gu imeachd: agus thubhairt athair na h-ighinn r'a chliamhuin, Neartaich do chridhe le greim arain, agus na dhéigh sin inichidh sibh.

6 Agus shuidh iad sìos le chéile, agus dh'ith iad cuideachd, agus dh'òl iad: oir thubhairt athair na h-ighinn ris an duine, Bi toilichte, guidheam ort, agus fan rè na h-oidheche, agus bitheadh do chridhe subhach.

7 Agus an uair a dh'éirich an duine suas gu imeachd, rinn 'athair-céile dian-earail air; uime sin dh'fhan e 'n sin an oidheche sin a ris.

8 Agus dh'éirich e gu moch anns a' mhaduinn air a' chùigeadh là gu imeachd: agus thubhairt athair na h-ighinn, Neartaich do chridhe, guidheam ort. Agus dh'fhan iad gu déigh mheadhon-là³, agus dh'ith iad le chéile.

9 Agus an uair a dh'éirich an duine suas gu imeachd, e féin, agus a choimhleabach, agus 'òganach, thubhairt 'athair-céile, athair na h-ighinn ris, Feuch, a nis tha 'n là a' tarruing gu feasgar, fanaibh, guidheam ort, rè na h-oidheche: feuch, tha 'n là a' dlùthachadh r'a chrich, fan an so rè na h-oidheche, agus bitheadh do chridhe subhach; agus am maireach éiridh sibh gu moch a chum bhur turuis⁴, agus théid thu dhachaidh.

10 Ach cha b' àill leis an duine fantuinn an oidheche sin, ach dh'éirich e suas agus dh'imich e, agus thàinig e air aghaidh fa chomhair Iebuis, (is e sin Ierusalem:) agus bha maille ris dà asal le 'n diallaidibh; bha mar an ceudna a choimhleabach maille ris.

11 Agus an uair a bha iad làimh ri Iebus, chaitheadh an là gu mòr; agus thubhairt an t-òganach r'a mhaighstir, Thig, guidheam ort, agus tionndaidhmid a stigh do bhaile so nan Iebusach, agus fanamaid rè na h-oidheche ann.

12 Agus thubhairt a mhaighstir ris, Cha tionndaidh sinn a stigh an so gu baile coigrich, nach 'eil do chloinn Israeil, ach gabhaidh sinn thairis gu Gibeah.

13 Agus thubhairt e r'a òganach, Thig, agus tairngeamaid am fagus do aon do na h-àitibh sin gu fantuinn rè na h-oidheche,

ann an Gibeah, no ann an Ramah.

14 Agus ghabh iad thairis, agus dh'imich iad; agus chaidh a' ghrian sìos orra làimh ri Gibeah, a bhuineas do Bheniamin.

15 Agus thionndaidh iad a leth-taobh an sin, gu dol a stigh a dh'fhanuinn rè na h-oidheche ann an Gibeah: agus an uair a chaidh e stigh, shuidh e sìos ann an sràid a' bhaile; oir cha robh duine sam bith a ghabh iad d'a thigh gu fantuinn rè na h-oidheche.

16 Agus, feuch, thàinig seann duine o 'obair a mach as an fhearrann mu fheasgar, a bha mar an ceudna o shliabh Ephraim, agus bha e air chuart ann an Gibeah; ach bu Bheniaminich daoine an àite.

17 Agus an uair a thog e suas a shùilean, chunnaic e duine a bha air thurus ann an sràid a' bhaile: agus thubhairt an seann duine, C'ait a tha thu dol? agus cia as a tha thu air teachd?

18 Agus thubhairt e ris, Tha sinn a' gabhail thairis o Bhet-lehem Iudah dh'ionnsuidh taoibh sléibh Ephraim, as am bheil mise: agus chaidh mi do Bhet-lehem Iudah, ach tha mi nis a' dol gu tigh an Tighearn; agus cha 'n eil duine air bith ann a ghabhas mi d'a thigh.

19 Gidheadh, tha 'n dà chuid fodar agus innlinn ann air son ar n-asal, agus tha mar an ceudna aran agus sìon ann air mo shon-sa, agus air son do bhanoglaich, agus air son an òganaich a tha maille ri d' sheirbhisich: cha 'n eil easbhuidh⁵ ni air bith oirnn.

20 Agus thubhairt an seann duine, Sith gu robh maille riut: gidheadh, biodh t'easbhuidh gu léir ormsa; a mhàin na fan anns an t-sràid rè na h-oidheche.

21 Agus thug e steach e d'a thigh, agus thug e innlinn do na h-asalaibh: agus nìgh iad an cosan, agus dh'ith agus dh'òl iad.

22 Ach an uair a bha iad a' deanamh an cridhe subhach, feuch, chuairtich daoine a' bhaile, daoine bu mhic do Bheilial, an tigh mu'n cuairt, agus bhual iad aig an dorus, agus labhair iad ri mairgistir an tighe, an seann duine, ag ràdh, Thoir a mach an duine a thàinig a dh'ionnsuidh do thighe, a chum gu'n aithnich sinn e.

23 Agus chaidh an duine, mairgistir an tighe, mach d'an ionnsuidh, agus thubhairt e riu, Na deanaibh, mo bhràithre, na deanaibh, guidheam oirbh, cho ole; an déigh do'n duine so teachd a dh'ionnsuidh mo thighe-sa, na deanaibh an ni gràineil² so.

24 Feuch, mo nighean, mairghean, agus a choimhleabach, iadsan bheir mi mach a nis, agus islichibh-se iad, agus deanaibh riu

¹ h-ighinn, cailin. ² rinn e gairdeachas. Eabh.

³ gus an do thionndaidh an là. Eabh.

⁴ slighe.

⁵ uircasbhuidh, dìlh.

⁶ aingidh, amaideach.

an *ni sin a ta* maith 'nur sùilbh : ach air an duine so na deanaibh ni cho gráineil.

25 Ach cha'n éisdeadh na daoine ris : agus rug an duine air a choimhleabach, agus thug e mach i d'an ionnsuidh ; agus dh'aithnich iad i, agus mhi-ghnáthaich iad i ré na h-oidhche gu maduinn : agus aig briseadh na faire leig iad air falbh i.

26 Agus thàinig a' bhean ann an scarthanaich¹ an là, agus thuit i sìos aig dorus tighe an duine, far *an robh* a tighearna, gus an robh solus ann.

27 Agus dh'éirich a tighearn anns a' mhaduinn, agus dh'fhosgail e dorus an tighe, agus chaidh e mach gu imeachd air a shlighe : agus, feuch, blà a' bhean a choimhleabach air tuiteam sìos aig dorus an tighe, agus a làmhau air an stairsnich.

28 Agus thubhairt e rithe, Eirich, agus imieheamaid ; ach cha d'thug i freagradh air bith. Agus ghabh e i air asail, agus dh'éirich an duine suas, agus chaidh e d'a àite féin.

29 Agus an uair a thàinig e d'a thigh, ghabh e sgian, agus rug e air a choimhleabach, agus roinn e i, maille r'a cnaimh-ibh, 'na dà mhòr dheug, agus chuir e i gu uile chrìochaibh Israeil.

30 Agus thubhairt gach neach a chunn- aic e, Cha d'rinneadh agus cha'n fhacas *ni air bith* cosmhuil ri so, o'n là anns an d'thàinig clann Israeil a nìos á tìr na h-Eiphit gus an là'n diugh : beachdaich-ibh² air, gabhaibh comhairle, agus labh- raibh.

CAIB. XX.

1 *Ann an coimhthional an t-sluaigh chuir an Le- bhitheach an cèill an eucòir a rinneadh air.*
8 *Shonruich clann Israeil air dol suas gu cath an aghaidh Ghibeah.* 29 *Sgrìosadh na Beniaminich.*

AN sin chaidh clann Israeil uile mach, agus chruinnicheadh an coimhthional ri chèile mar aon duine, o Dhan gu Beer-seba, agus o thìr Ghilead, a dh'ionnsuidh an Tighearna gu Mispheh.

2 Agus nochd prìomh-dhaoine³ an t-sluaigh uile, *eadhon* treubhan Israeil uile, iad féin ann an coimhthional sluaigh Dhé, ceithir cheud mìle coisiche a tharruing claidheamh.

3 (A nis chuala clann Bheniamin gu'n deachaidh clann Israeil suas gu Mispheh.) Agus thubhairt clann Israeil, Inisibh cionnus a bha'n t-olc so ?

4 Agus fhreagair an Lebhitheach, fear ua mnà a mharbhadh, agus thubhairt e, Gu Gibeah a *bhuineas* do Bheniamin thàinig mise agus mo choimhleabach, gu fantuinn ann ré na h-oidhche :

5 Agus dh'éirich fir Ghibeah a'm' aghaidh, agus chuairtich iad an tigh mu'n

cuairt orm anns an oidhche : mi féin b'àill leo a mharbhadh, agus air mo choimhleabach rinn iad éigin, agus tha i marbh.

6 Agus rug mi air mo choimhleabach, agus ghearr mi i 'na mìribh, agus chuir mi i air feadh uile fhearainn oighreachd Israeil : oir rinn iad cionta agus gràineil-eachd ann an Israeil.

7 Feuch, *is* clann Israeil sibh uile ; thug- aibh seachad an so bhur focal agus bhur comhairle.

8 Agus dh'éirich an sluagh uile mar aon duine, ag ràdh, Cha téid neach air bith dhinn d'a bhùth, agus cha tionndaidh neach air bith dhinn a steach d'a thigh :

9 Ach a nis so an ni a ni sinn ri Gibeah : *théid sinn suas* le crannchur 'na aghaidh.

10 Agus gabhaidh sinn deich fir as a' cheud air feadh uile treubhan Israeil, agus ceud as a' mhìle, agus mìle as na deich mìle, a thoirt lòn a dh'ionnsuidh an t'sluaigh, a chum gu'n dean *iad*, an uair a thig iad gu Gibeah Bheniamin, a réir na gràineileachd uile a rinn iadsan ann an Israeil.

11 Mar sin chruinnicheadh fir Israeil uile an aghaidh a' bhaile, ceangailte ri chèile mar aon duine.

12 Agus chuir treubhan Israeil daoine air feadh uile thréibhe Bheniamin, ag ràdh, Ciod é an t-olc so a rinneadh 'nur measg ?

13 A nis ma ta thugaibh thairis *dhuinn* na daoine, clann Bheliail, a *tha* ann an Gibeah, a chum gu'n cuir sinn gu bàs iad, agus gu'n cuir sinn air falbh olc o Israeil. Ach cha 'n éisdeadh clann Bheniamin ri guth am bràithre cloinn Israeil :

14 Ach chruinnich clann Bheniamin iad féin an ceann a chèile as na bailtibh gu Gibeah, chum dol a mach gu cath an aghaidh chloinn Israeil.

15 Agus dh'àirmheadh clann Bheniamin anns an àm⁴ sin as na bailtibh, sé mìle thar fluichead fear a tharruing claidheamh, a bhàrr air luchd-àiteachaidh Ghibeah.

16 Dh'àirmheadh seachd ceud fear taghta am measg an t-sluaigh so uile, seachd ceud fear taghta cli-làmhach⁵ : thilgeadh gach aon diùbh so clach a crann-tàbhuilt air *leud* ròineige, agus cha mhearachd- aicheadh e.

17 Agus dh'àirmheadh clann Israeil air leth o Bheniamin, ceithir cheud mìle fear a tharruing claidheamh : b'fhir chogaidh iad so uile.

18 Agus dh'éirich clann Israeil, agus chaidh iad suas gu tigh Dhé⁶, agus dh'fhiosraich iad do⁷ Dhia, agus thubhairt iad, Cò dhinn a théid suas air tùs gu cath an aghaidh chloinn Bheniamin ? agus

¹ camhanaich ; dawn. Sasg. ² cuiribh bhur eridhe air. ³ maithean ; uaislean. ⁴ là. Eabh.

⁵ cearr-làmhach.

⁶ Bet-el. Eabh.

⁷ dh'iarr iad comhairle air.

thubhairt an Tighearna, *Théid* Iudah suas air tús.

19 Agus dh'éirich clann Israeil anns a' mhaduinn, agus champaich iad an aghaidh Ghibeah.

20 Agus chaidh fir Israeil a mach gu cath an aghaidh Bheniamin; agus chuir fir Israeil iad féin ann an ordugh catha 'nan aghaidh aig Gibeah.

21 Agus thàinig clann Bheniamin a mach á Gibeah, agus sgrios iad sìos gu làr do chloinn Israeil air an là sin, dà mhìle thar fhichead fear.

22 Agus ghabh an sluagh, fir Israeil, misneach dhoibh féin, agus chuir iad a ris an cath ann an ordugh, far an do chuir siad iad féin an ordugh air a' cheud là.

23 (Agus chaidh clann Israeil suas, agus ghuil iad am fianuis an Tighearna gu feasgar, agus dh'fhiosraich iad do'n Tighearn, ag ràdh, An téid mi suas a ris gu cath an aghaidh chloinn Bheniamin mo bhràthar? Agus thubhairt an Tighearna, Rachaibh suas 'na aghaidh.)

24 Agus thàinig clann Israeil am fagus an aghaidh chloinn Bheniamin an dara là.

25 Agus chaidh Benjamin a mach 'nan aghaidh á Gibeah an dara là, agus sgrios iad do chloinn Israeil a ris ochd mìle deug fear sìos gu làr; tharruing iad so uile claidheamh.

26 Agus chaidh clann Israeil uile agus an sluagh uile suas, agus thàinig iad gu tigh Dhé, agus ghuil iad, agus shuidh iad an sin am fianuis an Tighearn, agus throisg iad air an là sin gu feasgar, agus dh'ìobair iad ìobairte-loisgte agus ìobairte-sìth¹ am fianuis an Tighearn.

27 Agus dh'fhiosraich clann Israeil do'n Tighearn, (oir *bha* àire coimhcheangail Dé an sin anns na làithibh sin;

28 Agus sheas Phinehas, mac Eleasair, mhic Aaroin, 'na làthair anns na làithibh sin,) ag ràdh, An téid mi fathast a ris a mach gu cath an aghaidh chloinn Bheniamin mo bhràthar, no an sguir mi? Agus thubhairt an Tighearna, Rachaibh suas; oir am màireach bheir mise thairis iad do d' làimh.

29 Agus chuir Israel luchd feall-fholach mu'n cuairt air Gibeah.

30 Agus chaidh clann Israeil suas an aghaidh chloinn Bheniamin air an treas là, agus chuir siad iad féin ann an ordugh catha an aghaidh Ghibeah, mar air uairibh eile.

31 Agus chaidh clann Bheniamin a mach an aghaidh an t-sluaigh, agus thairngeadh air falbh iad o'n bhaile; agus thòisich iad air *cuid* do'n t-sluaigh a bhuadalh agus a mharbhadh, mar air uairibh eile, anns na rathaidibh mòra, d'am bheil aon a' dol

suas gu tigh Dhé, agus aon gu Gibeah anns an fhearann, mu thimchioll deich fir fhichead do Israel.

32 Agus thubhairt clann Bheniamin, *Tha* iad air am bualadh sìos romhainn, mar air tús. Ach thubhairt clann Israeil, Teicheamaid, agus tairngeamaid iad o'n bhaile gu ruig na rathaidibh mòra.

33 Agus dh'éirich clann Israeil uile suas as an àit, agus chuir siad iad féin ann an ordugh catha ann am Baal-tamar: agus thàinig luchd feall-fholach Israeil a mach as an àitibh, *eadhon* ouchdaich² Ghibeah.

34 Agus thàinig an aghaidh Ghibeah deich mìle fear taghta mach á h-Israel uile, agus bha'n cath cruaidh: ach cha robh fhios aca gu'n robh ole am fagus doibh.

35 Agus bhual an Tighearna Benjamin am fianuis Israeil: agus sgrios clann Israeil do Bheniamin air an là sin, cùig mìle fichead agus ceud fear; tharruing iad so uile claidheamh.

36 Agus chunnaic clann Bheniamin gu'n do bhuaileadh iad: oir thug fir Israeil àite do na Benjaminich, a chionn gu'n d' earb iad ris an luchd feall-fholach a shuidhich iad làimh ri Gibeah.

37 Agus rinn an luchd feall-fholach cabhag, agus ruith iad a stigh air Gibeah; agus tharruing an luchd feall-fholach air an aghaidh, agus bhual iad am baile uile le faobhar a' chlaidheimh.

38 A nis bha comhara³ suidhichte eadar fir Israeil agus an luchd feall-fholach, gu'n tugadh iad air lasair mhòir le deataich éirigh suas as a' bhaile.

39 Agus an uair a chaidh fir Israeil air an ais anns a' chath, thòisich Benjamin air fir Israeil a bhualadh, agus mharbhl iad diubh mu thimchioll deich thar fhichead fear; oir thubhairt iad, Gu cinnteach tha iad air am bualadh sìos romhainn, mar anns a' cheud chath.

40 Agus an uair a thòisich an lasair air éirigh suas as a' bhaile, maille ri meall⁴ deataich dh'amhairc na Benjaminich air an cùlaobh, agus, feuch, dh'éirich deatach a' bhaile suas gu nèamh.

41 Agus an uair a phill fir Israeil a ris, bha uamhas air fir Bheniamin; oir chunnaic iad gu'n robh ole air teachd orra.

42 Uime sin thionndaidh iad an aghaidh am fianuis chloinn Israeil ri slighe an fhàsaich; ach rug an cath orra: Agus iadsan a thàinig a mach as na bailtibh sgrios iad 'nam meadhon.

43 Chuairtich iad na Benjaminich air gach taobh, ruag siad iad, shaltair iad orra gunsbairn thall fa chomhair Ghibeah, leth ri éirigh na gréine.

44 Agus thuit do Bheniamin ochd mìle

¹ tabhartasa-sìth.

² á lóintil; maaleh no

maarch. Eabh.

³ àm.

⁴ pillar. Sasg.

deug fear; iad uile 'nan daoineibh treuna.

45 Agus phill iad, agus theich iad a dh'ionnsuidh an fhàsaich gu carraig Rimoin; agus dh'òghluim iad diubh air na rathaidibh mòra cuig mìle fear; agus lean iad gu cruaidh iad gu ruig Gidom, agus mharbh iad dhiubh dà mhìle fear.

46 Agus b'iadsan uile a thuit do Bheniamin air an là sin, cuig mìle thar fhichead fear a tharruing claidheamh; iad uile nan daoineibh treuna.

47 Ach phill sè ceud fear, agus theich iad do'n fhàsach gu carraig Rimoin, agus dh'fhan iad ann an carraig Rimoin ceithir mìosan.

48 Agus phill clann Israeil air an ais air cloinn Bheniamin, agus bhuail siad iad le faobhar a' chlaidheimh, aràon daoine gach baile, agus an spréidh, agus gach nì air bith a fhuaradh ann: mar an ceudua chuir iad ri theine na bailtean uile d'an d'fhàinig iad.

CAIB. XXI.

1 Rinn an sluagh caidh air son sgrìos nam Beniamineach. 16 Thug iad comhairle dhoibhsan diubh a mhair beò, mnà a' ghlacadh dhoibh féin do nigh-eanaibh Shiloh, 'nuair a thigeadh iad a mach a dhannsaadh.

ANIS mhionnaich fir Israeil ann an Mispheh, ag ràdh, Cha toir fear air bith againn a nighean do Bheniamin 'na mnaoi.

2 Agus thàinig an sluagh gu tigh Dhé, agus dh'fhan iad an sin gu feasgar am fànuis Dhé, agus thog iad suas an guth, agus ghuil iad gu goirt;

3 Agus thubhairt iad, C'arson, O Thighearna Dhé Israel, a thàinig an nì so gu crìch ann an Israel, gu'm biodh an diugh aon treubh a dh'easbhuidh air Israel?

4 Agus air an là màireach dh'éirich an sluagh gu moch, agus thog iad an sin alt-air, agus dh'ìobair iad ìobairte-loisgte agus ìobairte-sith.

5 Agus thubhairt clann Israeil, Cò am measg uile treubhan Israeil, nach dh'fhàinig a nìs maille ris a' choimhthional a dh'ionnsuidh an Tighearna? oir rinn iad mionnan mòra mu thimchioll-san nach tigeadh a nìs a dh'ionnsuidh an Tighearna gu Mispheh, ag ràdh, Cuirear gu cinnteach gu bàs e.

6 Agus ghabh clann Israeil aithreachas a thaobh Bheniamin an bràthar, agus thubhairt iad, Ghearradh air falbh an diugh aon treubh o Israel.

7 Cionnus a nì sinn air son bhan dhoibhsan a mhair, agus gu'n do mhionnaich sinn air an Tighearna, nach toir sinn dhoibh d'ar nigheanaibh mar mhnaibh?

8 Agus thubhairt iad, Cia an aon do threubhaibh Israeil, nach d'fhàinig a nìs a dh'ionnsuidh an Tighearna gu Mispheh? agus, feuch, cha d'fhàinig duine do'n champ o Iabes-ghilead a dh'ionnsuidh a' choimhthional.

9 Oir dh'àirmheadh an sluagh, agus, feuch, cha robh neach air bith an sin do luchd-àiteachaidh Iabes-ghilead.

10 Agus chuir an coimhthional an sin dà mhìle dheug fear dhiubhsan bu tréine, agus dh'àithn iad dhoibh, ag ràdh, Falbhaibh agus buailibh luchd-àiteachaidh Iabes-ghilead le faobhar a' chlaidheimh, maille ris na mnaibh agus ris a' chloinn.

11 Agus so an nì a nì sibh, Sgrìosaidh sibh gu tur gach firionnach, agus gach bean a luidh le firionnach.

12 Agus fhuair iad am measg luchd-àiteachaidh Iabes-ghilead ceithir cheud maighdean òg, aig nach robh aithne air fear le luidhe le firionnach sam bith: agus thug iad do'n champ iad gu Siloh, a tha ann an tìr Chanaain.

13 Agus chuir an coimhthional uile daoine uatha, agus labhair iad ri cloinn Bheniamin a bha ann an carraig Rimoin, agus ghairm iad orra ann an sìth.

14 Agus thàinig Beniamin a ris anns an àm sin; agus thug iad dhoibh mnà a' ghléidh iad beò do mhnaibh Iabes-ghilead: gidheadh cha d'fhuair iad na bu leòr mar sin.

15 Agus ghabh an sluagh aithreachas a thaobh Bheniamin, a chionn gu'n d'rinn an Tighearna briseadh ann an treubhan Israeil.

16 Agus thubhairt seanairean a' choimhthional, Cionnus a nì sinn air son bhan dhoibhsan a mhair, oir sgrìosadh na mnà mach á Beniamin?

17 Agus thubhairt iad, Tha oighreachd ann air an son-san a chaidh as do Bheniamin: agus cha sgrìosar treubh á h-Israel.

18 Gidheadh, cha'n fheud sinn mnà a thoirt doibh d'ar nigheanaibh féin; oir mhionnaich clann Israeil, ag ràdh, Mall-aichte gu robh esan a bheir bean do Bheniamin.

19 An sin thubhairt iad, Feuch, tha féill' an Tighearna ann an Siloh gach bliadhna, anns an àit a tha air an taobh mu thuath do Bhet-el, air an taobh an ear do'n rathad mhòr a tha dol suas o Bhet-el gu Sechem, agus air an taobh mu dheas do Lebonah.

20 Uime sin dh'àithn iad do chloinn Bheniamin, ag ràdh, Falbhaibh, agus deanaibh feall-fholach anns na fion-liosaibh;

21 Agus seallaibh, agus, feuch, ma thig nigheana Shiloh a mach a dhannsaadh ann an dannsaibh, an sin thigibh-sa mach as

na fion-liosaibh, agus glacaibh gach fear dhìbl a bhean do nigheanaibh Shiloh, agus rachaibh gu tìr Bheniamin.

22 Agus tarlaidh, 'nuair a thig an aithriche no am bràithre d'ar n-ionnsuidh ne a dheanamh gearain, gu'n abair sinne riu, Bithibh bàigheil riu air ar soin-ne, a chionn nach do ghléidh¹ sinn do gach fear a bhean anns a' chogadh; oir cha d'thug sibhse dhoibh anns an àm so, air chor as gu'm biodh sibh ciontach.

23 Agus rinn clann Bheniamin mar sin, agus ghabh iad mnà dhoibh féin a réir

an aireimh, dhiubhsan a bha dannsadh, a ghlac iad; agus chaidh iad agus phill iad a dh'ionnsuidh an oighreachd, agus thog iad suas na bailtean, agus ghabh iad còmhnuidh anna.

24 Agus dh'imich clann Isracil as a sin san àm sin, gach duine a dh'ionnsuidh a thréibhe, agus a dh'ionnsuidh a theaghlach, agus chaidh iad a mach as a sin gach duine a dh'ionnsuidh 'oighreachd féin.

25 Anns na làithibh sin cha robh rìgh air bith ann an Israel: rinn gach duine an nì sin a bha ceart 'na shùilibh féin.

¹ ghabh. Eabh.

RUT.

CAIB. I.

1 Chaidh Elimelech agus a theaghlach gu bhì air chuairt ann am Moab, air son na gorta a bha ann an tìr Iudah. 6 An déigh a bhàis, phill a bhean Naomi dhachaidh, maille r'a ban-chliamhuin Rut.

ANIS rì linn nam breitheamhna¹, bha a gorta san tìr: agus chaidh duine àraidh do Bhet-lehem Iudah gu bhì air chuairt ann am fearann Mhoab, e féin agus a bhean, agus a dhithis mhac.

2 Agus b'e ainm an duine Elimelech, agus ainm a mhnà Naomi, agus ainm a dhithis mhac Mahlon agus Chilion, Ephrataich do Bhet-lehem Iudah: agus thàinig iad gu fearann Mhoab, agus dh'fhan² iad an sin.

3 Agus fhuair Elimelech fear Naomi bàs; agus dh'fhàgadh ise agus a dithis mhac.

4 Agus ghabh iad dhoibh féin mnà do na Ban-mhoabaich: be ainm aoìn diubh Orpah, agus ainm na mnà eile Rut: agus ghabh iad còmhnuidh an sin mu thimchioll deich bliadhna.

5 Agus fhuair mar an ceudna Mahlon agus Chilion le chèile bàs; agus dh'fhàgadh a' bhean as eugmhais a dithis mhac, agus as eugmhais a fir.

6 Agus dh'érich i suas maille r'a ban-chliamhuinibh³, a chum gu'm pilleadh i o fhearann Mhoab: oir chual⁴ i ann am fearann Mhoab, gu'n d'amhairc an Tighearn air a shluagh le aran a thabhairt doibh.

7 Uime sin chaidh i mach as an àite san robh i, agus a dà bhan-chliamhuin maille rithe; agus dh'imich iad air an t-slighe gu dol air an ais do thìr Iudah.

8 Agus thubhairt Naomi r'a dà bhan-

chliamhuin, Falbhaibh, pilleadh gach aon agaibh do thigh a màthar: gu'm buineadh an Tighearna gu caoimhneil ribh, mar a bhuin sibhse riutha-san nach maireann⁵, agus riumsa.

9 Gu'n tugadh an Tighearna dhuibh gu'm faigh sibh fois, gach aon dhiubh ann an tigh a fir. An sin phòg i iad: agus thog iad suas an guth, agus ghuil iad.

10 Agus thubhairt iad rithe, Gu cinn-teach maille riutsa pillidh sinne dh'ionnsuidh do shluaigh.

11 Agus thubhairt Naomi, Pillibh, mo nigheana; c'ar son a théid sibh maille riumsa; am bheil fathast mic agam-sa a'm' innibh⁶, gu bhì agaibh 'nam fir?

12 Pillibh, mo nigheana; imichibh; oir tha mise tuille's sean gu fear a bhì agam: nan abrainn, Tha dòchas agam, nam biodh fear agam eadhon an nochd, agus mar an ceudna gu'm beirinn mic,

13 Am feitheadh sibh riu gus an cinn-eadh iad? am fanadh sibh air an son gun fhìr a bhì agaibh? na deanaibh sin, mo nigheana; oir tha mi ro dhoilich air blur sonsa, gu'n deachaidh làmh an Tighearn a mach a'm' aghaidh-sa.

14 Agus thog iad suas an guth, agus ghuil iad a rìs: agus phòg Orpah a màthair-chéile, ach dhlùth-lean Rut rithe.

15 Agus thubhairt i, Feuch, tha do phiuthar-chéile air pilltim a dh'ionnsuidh a shuaigh, agus a dh'ionnsuidh a diathan⁶; pill thusa 'n déigh do pheathar-chéile.

16 Agus thubhairt Rut, Na h-narr orm t'fhàgail, no pilltim o bhì 'gad leantuinn: oir ge b'e taobh a théid thusa, théid mise; agus far an gabh thusa tàmh, gabhaidh

¹ anns na làithibh anns an d'thug na breitheamhna breth. Eabh.

² bha. Eabh.

³ mnàibh a dà mhac.

⁵ a'm' bhroinn.

⁴ ris na mairbh. Eabh.

⁶ dée.

mise tàmh: *is e do shluagh-sa moshluagh-sa*, agus do Dhia-sa mo Dhia-sa.

17 Far am faigh thusa bàs, gheibh mise bàs, agus an sin adhlacair mi. Gu'n deanadh an Tighearna mar sin ormsa, agus tuille mar an ceudna, *ma* chuireas ach am bàs dealachadh eadar mise agus thusa.

18 'Nuair a chunnaic i gu'n robh i suidhichte¹ air dol maille rithe, an sin sgair i do labhairt rithe.

19 Agus dh'imich iad le chéile gus an dh'thàinig iad gu Bet-lehem. Agus an uair a bha iad air teachd gu Bet-lehem, ghluaisheadh am baile uile mu'n timchioll, agus thubhairt iad, An i so Naomi?

20 Agus thubhairt ise riu, Na h-abraibh Naomi rium: abraibh Mara rium; oir bhuin an t-Uile-chumhachdach gu ro gheur rium.

21 Chaidh mi mach làn, agus thug an Tighearna air m'ais mi falamh. C'ar son ma ta their sibh Naomi rium, agus gu'n d'thug an Tighearna fianuis a'm' aghaidh, agus gu'n do chuir an t-Uile-chumhachdach fo àmhghar mi?

22 Mar sin phill Naomi, agus Rut a' Bhan-mhoabach, bean a mic, maille rithe, a phill à fearann Mhoab: agus thàinig iad gu Bet-lehem ann an toiseach na buain eorna².

CAIB. II.

1 Chaidh Rut a dhìoghlum ann an achadh Bhoais
4 Chuir esan eolas oirre, 8 agus nochd e caomhneas dhi.

Agus bha aig Naomi caraid a thaobh a fir, duine cumhachdach aig an robh mòr-bheartas, do theaghlach Elim-eleish, agus b'e a'ainm Boas.

2 Agus thubhairt Rut a' Bhan-mhoabach ri Naomi, Leig dhomh a nis dol do'n achadh, agus diasan arbhair a dhìoghlum³ an déigh an tì sin, aig am faigh mi deadh-ghean⁴ na shùilb. Agus thubhairt i rithe, Falbh, mo nighean.

3 Agus dh'fhalbh i, agus thàinig i, agus dhìoghlum i san achadh an déigh nam buanaichean; agus thachair dhi dol air earrann do'n achadh bu le Boas, a bha do theaghlach Elim-eleish.

4 Agus, feuch, thàinig Boas o Bhet-lehem, agus thubhairt e ris na buanaichibh, Gu robh an Tighearna maille ribh: agus thubhairt iadsan ris, Gu'm beannaicheadh an Tighearna thusa.

5 An sin thubhairt Boas r'a òglach a chuireadh os ceann nam buanaichean, Cò leis an òg-bhean⁵ so?

6 Agus fhreagair an t-òglach a chuir-eadh os ceann nam buanaichean, agus

thubhairt e, *Is i* so an òg-bhean Mhoabach, a thàinig air a h-ais maille ri Naomi à fearann Mhoab:

7 Agus thubhairt ise, Guidheam ort, leig dhomh dìoghlum, agus tional am measg nan sguab an déigh nam buanaichean: agus thàinig i, agus dh'fhuirich i eadhon o'n mhaduinn gus a nis, gu'n d'fhan i tamull beag a stigh.

8 An sin thubhairt Boas ri Rut, Nach chunn thu, mo nighean? Na gabh a dhìoghlum ann an achadh eile, agus na falbh à so, ach fan an so làimh ri m'ghruagaichibh-sa.

9 Bitheadh do shùilean air an achadh a bhuaineas iad, agus falbh thusa 'nan déigh. Nach d'àithn mise do na h-òg-anaich gun bheantuin riut? agus an uair a bhios iotadh⁶ ort, falbh a dh'ionnsuidh nan soithichean, agus òl do'n uisge a tharruing na h-òganaich.

10 An sin thuit i air a h-aghlaidh, agus chrom si i féin gu làr, agus thubhairt i ris, C'ar son a fhuair mi deadh-ghean a'd' shùilb, gu'n cuireadh tu eòlas orm, agus mi a'm' choigreach?

11 Agus fhreagair Boas, agus thubhairt e rithe, Dh'innseadh gu h-iomlan dhomh-sa gach nì a rinn thu do d' mhàthair-chéile an déigh bàis t'fhir, agus mar a dh'fhàg thu t'athair agus do mhàthair, agus an tìr anns an d'rugadh tu, agus a tha thu air teachd a dh'ionnsuidh sluaigh nach b'àithne dhuit roimhe so.

12 Gu'n dioladh an Tighearna do shaothair, agus gu robh do dhuais iomlan o'n Tighearna Dia Israeil, fuidh a sgiathaibh an d'thàinig thu a chur do dhòchais⁷.

13 Agus thubhairt ise, Faigheam deadh-ghean a'd' shùilb, mo Tighearna, do bhrìgh gu'n d'thug thu sòlas dhomh, agus gu'n do labhair thu gu caomhneil ri d' bhanoglaich⁸, ged nach 'eil mi cosmhuil ri h-aon do d' ghruagaichibh-sa.

14 Agus thubhairt Boas rithe, Aig am bìdh thig thusa an so, agus ith do'n aran, agus tun do ghreim anns an fhìu-gheur, Agus shuidh i ri taobh nam buanaichean: agus shin e dhi siol cruaidhichte, agus dh'ith i, agus shàsuicheadh i, agus dh'fhàg i fuigheall.

15 Agus an uair a dh'érich i suas gu dìoghlum, dh'àithn Boas d'a òganaich, ag ràdh, Eadhon am measg nan sguab dìoghlumeadh i, agus na cuiribh naire oirre⁹.

16 Agus cuideachd leigibh d'ur deoin le cuid do na dlaghaibh¹⁰ tuiteam air a son, agus fàgaibh iad a chum gu'n dìoghlum i iad, agus na tugaibh achmhasan dhi.

17 Mar sin dhìoghlum i san achadh gu

¹ leagta.

² fogharaidh an eorna.

³ a thional.

⁴ caomhneas.

⁵ cailin.

⁶ tart, puthadh.

⁷ t'earbsaidh.

⁸ gu'n do labhair thu ri cridhe do bhanoglaich. Eabh.

⁹ na maslaichibh i.

¹⁰ glacaidibh.

feasgar, agus bhuail i as na dhìoghlum i; agus bha ann mu thimchioll ephah eorna.

18 Agus thog i suas e, agus chaidh i do'n bhaile, agus chunnaic a màthair-chéile na dhìoghlum i; agus chuir i a làthair, agus thug i dhi na dh'fhàg i, an dèigh dhi bhì sàsichte.

19 Agus thubhairt a màthair chéile rithe, C'ait an do dhìoghlum thu'n diugh? agus c'ait an do shaothraich thu? beannaichte gu robh an tì a chuir eòlas ort. Agus dh'innis i d'a màthair-chéile co aig a shaothraich i, agus thubhairt i, *Is* e ainm an duine aig an do shaothraich mi'n diugh, Boas.

20 Agus thubhairt Naomi r'a ban-chliamhuin, Beannaichte gu robh esan o'n Tighearna, nach do leig dheth a caoimhneas do na beòthaibh, agus do na marbhaibh. Agus thubhairt Naomi rithe, *Tha* 'n duine dlùth an dàimh dhuinn; is aon e d'ar dìlsibh a's faigse¹.

21 Agus thubhairt Rut a' Bhan-mhoabach, Mar an ceudna thubhairt e riumsa, Làimh ri m'òganaich-sa fanaidh tu, gus an crìochnaich iad m'fhoghar uile.

22 Agus thubhairt Naomi ri Rut a ban-chliamhuin, *Is* fearr dhuìt, mo nighean, dol a mach maille r'a ghrugaichibh, a chum nach coinnich iad thu ann an achadh sam bith eile.

23 Dli'fhan i uime sin làimh ri grugaichibh Bhoais a dhìoghlum, gus an do chrìochnaich eadh foghar² an eorna, agus foghar a' chrìochnaich; agus ghabh i còmhnuidh maille r'a màthair-chéile.

CAIB. III.

1 *Air comhairle Naomi, 5 chaidh Rut agus luidh i aig cosaibh Bhoais. 13 Gheall Boas gu'n deanadh e rithe dlighe fir-dàimh.*

AN sin thubhairt Naomi a màthair-chéile rithe, Mo nighean, nach iarr mise suaimhneas dhuitse, chum gu'n éirich gu maith dhuìt?

2 Agus a nis nach 'eil Boas d'ar dìlsibh, maille r'a ghrugaichibh an robh thu? Feuch, *bithidh* e a' fasnadh eorna an nochd air an urlar-bhualaidh.

3 Uime sin nìgh thu féin, agus ung thu féin, agus cuir do thrusan ort, agus gabh sìos do'n urlar-bhualaidh: *ach* na dean thu féin aithnichte³ do'n duine, gus an sguir e dh'itheadh agus a dh'òl.

4 Agus an uair a luidheas e sìos, bheir thu fa'near an t-àit anns an luidh e, agus theid thu agus rùisgidh tu a chosan, agus luidhidh tu sìos; agus innsidh e dhuìt ciod a ni thu.

5 Agus thubhairt i rithe, Gach *ni* a tha

thu ag ràdh rium, ni mise.

6 Agus chaidh i sìos do'n urlar-bhualaidh, agus rinn i a réir gach *ni* a dh'àithn a màthair-chéile dhi.

7 Agus an uair a dh'ith agus a dh'òl Boas, agus a bha a chridhe subhach, chaidh e a luidhe sìos aig ceann an dùin arbhair: agus thàinig i gu sàmhach, agus rùisg i a chosan, agus luidh i sìos.

8 Agus an uair a bha e mu mheadhonoidhche, bha eagall air an duine, agus thionndaidh se e féin; agus, feuch, bean 'na luidhe aig a chosaibh.

9 Agus thubhairt e, Cò thusa? Agus fhreagair i, *Is* mise Rut do bhanoglach: sgaoil uime sin iomall t'eudaich air do bhanoglaich, oir *is* fear-dàimh⁴ thu.

10 Agus thubhairt e, Beannaichte gu robh thusa o'n Tighearna, mo nighean; nochd thu tuille caoimhneis mu dheireadh na an toiseach, do bhrìgh nach deachaidh tu 'n dèigh òigfheara, bochd no beartach.

11 Agus a nis, mo nighean, na biodh eagall ort; gach *ni* a tha thu ag iarraidh, ni mi dhuìt; oir tha fios aig uile bhaile mo shluaigh gur bean shubhailceach⁵ thu.

12 Agus a nis tha e fìor gur fear-dàimh dhuìt mise; gidheadh tha fear-dàimh a's faigse dhuìt na mi.

13 Fan an nochd, agus anns a' mhaduinn ma ni e riut dlighe fir-dàimh⁶, *tha sin* gu maith, deanadh e dlighe fir-dàimh; ach mur bi e toileach dlighe fir-dàimh a dheanamh riut, an sin ni mise dlighe fir-dàimh riut, *mar* is beò an Tighearna: luidh sìos gu maduinn.

14 Agus luidh i sìos aig a chosaibh gu maduinn: agus dh'éirich i mu'n robh e 'n comas do dhuine duin' eile aithneachadh. Agus thubhairt e, Na biodh fios aig neach air bith gu'n d'thàinig bean a steach do'n urlar-bhualaidh.

15 Mar an ceudna thubhairt e, Thoir an so am brat a *tha agad* umad, agus cum e. Agus chum i e, agus thomhais e sè *toimhsean* eorna, agus chuir e oirre iad; agus chaidh i a steach do'n bhaile.

16 Agus an uair a thàinig i dh'ionnsuidh a màthair-chéile, thubhairt i, Cò thusa, mo nighean? agus dh'innis i dhi gach *ni* a rinn an duine dhi.

17 Agus thubhairt i, Na sè *toimhsean* eorna so thug e dhomh; oir thubhairt e rium, Na imich falamh a dh'ionnsuidh do mhàthar-chéile.

18 Agus thubhairt ise, Fuirich, mo nighean, gus am bi fios agad cionnus a dh'éireas do'n chùis: oir cha bhì an duine

¹ d'ar luchd-fuasglaidh. Eabh. ² foghlamar. Eir.

³ na nochd, na feuch, na leig ris thu féin.

⁴ gus an d'ar dìlsibh; fear-fuasglaidh. Eabh.

⁵ aig am bheil deadh bheusan.

⁶ ma dh'fhuasgaileas e thu. Eabh.

aig fois gus an crìochuaich e 'n gnothuch an diugh.

CAIB. IV.

1 *Ghairm Boas air an fhear-dàimh a b'fhaigse, chum gu'm fuasgladh e fearann Elimelech.*
6 *Dh'iuil esan 'fhuasgladh.* 13 *Phòs Boas Rut.*
17 *Rug ise Obed, scan-athair Dhaibhidh.*

AN sin chaidh Boas suas a dh'ionn-suidh a' gheata, agus shuidh e sìos an sin : agus, feuch, bha 'm fear-dàimh mu'n do labhair Boas a' dol seachad, agus thubhairt e ris, Ho, a leithid so a dh'fhear ! thig a leth-taobh, suidh sìos an so. Agus thàinig e a leth-taobh, agus shuidh e sìos.

2 Agus ghabh e deichnear dhaoine do sheanairibh a' bhaile, agus thubhairt e, Suidhibh sìos an so. Agus shuidh iad sìos.

3 Agus thubhairt e ris an fhear-dàimh, Tha Naomi, a thàinig air a h-ais á fearann Mhoib, gu earrann do'n achadh bu le ar bràthair Elimelech reiceadh.

4 Agus smuinich mi air fios a thoirt duit, ag ràdh, Ceannaich e am fianuis an luchd-àiteachaidh, agus am fianuis sheanairean mo shluaigh : ma dh'fhuasgail-eas tu e, fuasgail e ; ach murr fuasgail thu e, innis dhomh, a chum gu'm bi fios agam : oir cha 'n'eil neach air bith ann gu 'fhuasgladh ach thusa, agus mise a'd' dhéigh-sa. Agus thubhairt esan, Fuasgailidh mise e.

5 An sin thubhairt Boas, San là anns an ceannaich thu 'n t-achadh o làimh Naomi, feumaidh tu cuideachd a cheannach o Rut a' Bhan-mhoabach, bean a' mhairbh, a thogail suas ainme a' mhairbh air 'oighreachd-san.

6 Agus thubhairt am fear-dàimh, Cha 'n fheud mi 'fhuasgladh dhomh féin, air eagal gu mill mi m' oighreachd féin : fuasgail thusa mo chòir dhuìt féin, oir cha 'n fheud mise a fuasgladh.

7 A nis b'e so o shean¹ an gnàth ann an Israel a thaobh fuasglaidh, agus a thaobh iomlaid², a dhaingneachadh gach *ni* : chuireadh duine dheth a bhròg, agus bheireadh e d'a choimhearsnach *i* : agus bha so mar fhianuis ann an Israel.

8 Uime sin thubhairt am fear-dàimh ri Boas, Ceannaich air do shon féin e : agus chuir e dheth a bhròg.

9 Agus thubhairt Boas ris na seanairibh, agus ris an t-sluaigh uile, *Is* fianuisean

sibhse an diugh, gu'n do cheannaich mise gach *ni* bu le Elimelech, agus gach *ni* bu le Chilion, agus le Mahlon, o làimh Naomi.

10 Agus mar an ceudna Rut a' Bhan-mhoabach, bean Mhahloin, cheannaich mi dhomh féin gu bhì 'na mnaoi agam, a thogail suas ainme a' mhairbh air 'oighreachd, a chum nach gearrar as ainm a' mhairbh á meadhon a bhràithrean, agus o gheata 'àite féin : *is* fianuisean sibhse an diugh.

11 Agus thubhairt au sluaigh uile a *bha* sa' gheata, agus na seanairean *Is* fianuisean sinn : gu'n deanadh an Tighearn a' bhean a tha teachd a dh'ionnsuidh do thighe, mar Rachel agus mar Leah, a thog suas le chéile tigh Israel : agus dean thusa gu cubhaidh³ ann an Ephratah, agus bi cliuiteach ann am Bethlehem ;

12 Agus bitheadh do thigh mar thigh Phareis, (a rug Tamar do Iudah,) do'n t-sliochd a bheir an Tighearna dhuìt o'n mhnai oig so.

13 Agus ghabh Boas Rut, agus bha i aige 'na mnaoi : agus chaidh e stigh d'a h-ionnsuidh, agus thug an Tighearna toirreachas dhi, agus rug i mac.

14 Agus thubhairt na mnai ri Naomi, Beannaichte gu robh an Tighearna nach d'fhàg thusa an diugh gun fhear-dàimh, a chum gu'm bi 'ainm cliuiteach⁴ ann an Israel.

15 Agus bithidh e dhuìt 'na fhear ath-nuadhachaidh do bheatha⁵, agus 'na fhear-altruim do shean aois : oir is i do bhan-chliamhuin, aig am bheil gràdh dhuìt, a's fearr dhuìt na seachd mic, a rug e.

16 Agus ghabh Naomi an leanabh, agus chuir i 'na h-uchd e, agus bha i 'na ban-altrum aige.

17 Agus thug na ban-choimhearsnaich ainm air, ag ràdh, Rugadh mac do Naomi ; agus thug iad Obed mar ainm air : *Is* esan athair Iese, athar Dhaibhidh.

18 A nis *is* iad so ginealaich Phareis : Ghin Phares Hesron,

19 Agus ghin Hesron Ram, agus ghin Ram Aminadab,

20 Agus ghin Aminadab Nahson, agus ghin Nahson Salmon,

21 Agus ghin Salmon Boas, agus ghin Boas Obed,

22 Agus ghin Obed Iese, agus ghin Iese Daibhidh.

¹ roimh.

² malairt.

³ feartail, buadhar.

⁴ gu'n goirear 'ainm. Eabh.

⁵ 'na fhear-aisig t'anama. Eabh.

CEUD LEABHAR SHAMUEIL,

D'AN AINM, AIR MHODH EILE,

CEUD LEABHAR NAN RIGH.

CAIB. I.

1 *Elcanah agus a dhà mhnaoi.* 9 *Urnuigh Hanah.*
20 *Rugadh Samuel.*

ANIS bha duine àraidh o Ramataim-sophim, o shliabh Ephraim, agus *b'è* 'ainm Elcanah, mac Ierohaim, mhic Elihu mhic Thohu, mhic Shuph, Ephratach.

2 Agus bha dithis bhan aige: ainm mnà dhiubh Hanah, agus ainm na mnà eile Peninah. Agus aig Peninah bha clann, acli aig Hanah cha robh clann.

3 Agus thàinig an duine so nìos as a bhaile gach bliadhna¹, a dheanamh aoraidh agus a dh'ìobradh do Thighearna nan sluagh ann an Siloh: agus *bha* dà mhac Eli, Hoplmi agus Phinehas, sagart-an an Tighearn, an sin.

4 Agus an uair a thàinig an t-àm anns an d'ìobair Elcanah, thug e d'a mhnaoi Peninah, agus d'a mic uile agus d'a nigh-eanaibh, cuibhrionnan.

5 Ach do Hanah thug e cuibhrionn dhù-bailte²; oir ghràdhach e Hanah: ach dhruid an Tighearn a brù.

6 Agus bhrosnaich a h-eascaraid i mar an ceudna gu feirg, a thoirt oirre gearan a dheanamh³, a chionn gu'n do dhruid an Tighearn a brù.

7 Agus mar sin rinn e gach bliadhna, nuair a thàinig i nìos do thigh an Tighearna, mar sin bhrosnaich si i. Uime sin ghuil i, agus cha'n itheadh i.

8 An sin thubhairt Elcanah a fear rithe, A Hanah, c'ar son a tha thu a' gul⁴? agus c'ar son nach 'eil thu ag itheadh? agus c'ar son a tha do chridhe air a chràdh? nach fèarr mise dhuit na deich mic?

9 Agus dh'èirich Hanah suas an déigh dhoibh itheadh ann an Siloh, agus an déigh dhoibh òl: (a nis bha Eli an sagart 'na shuidhe air caitlir làimh ri ursainn ann an teampull an Tighearn:)

10 Agus bha i air a cràdh 'na h-anam, agus rinn i urnuigh ris an Tighearn, agus ghuil i gu goirt.

11 Agus bhòidich i bòid, agus thubhairt i, O Thighearna nan sluagh, ma dh'amb-airceas tu da rìreadh air àmhghar do bhan-oglaich, agus gu'n cuimhnich thu orm, agus nach dìchuimhnich thu do bhanoglach, ach gu'n toir thu do d' bhanoglaich, leanabh gille, an sin bheir mi e do'n Tighearna rè uile làithean a bheatha,

agus cha téid ealtainn air a cheann.

12 Agus an uair a bhuanaich i ri h-ur-nuigh an làthair an Tighearna, thug Eli fa'near a beul.

13 A nis bha Hanah a' labhairt 'na cridhe; bha a bilean a mhàin a' ghlasad, ach cha chualas a guth: uime sin shaoil Eli gu'n robh i air mhisg.

14 Agus thubhairt Eli rithe, Cia fad a bhios tu air mhisg? cuir air falbh t'fhìon uait.

15 Agus fhreagair Hanah agus thubhairt i, Nì h-eadh, mò thighearn; is bean mise a tha tuirseach a'm' spiorad; aon chuid fìon no deoch làidir cha d'òl mi, ach dhoirt mi mach m'anam an làthair an Tighearna.

16 Na meas do bhanoglach mar nighean do Bhelial: oir is ann á ro mheid mo ghearrain agus mo dhoilgheis a labhair mi gus a nis.

17 An sin fhreagair Eli agus thubhairt e, Imich an sìth: agus gu'n tugadh Dia Israeil dhuit t'iarrtus a dh'iarr thu air.

18 Agus thubhairt ise, Faigheadh do bhanoglach deadh-ghean a d' shùilb. Agus dh'imich a' bhean roimpe, agus dh'ith i, agus cha robh a gnùis ni b'fhaide dubhach.

19 Agus dh'èirich iad gu moch anns a' mhaduinn, agus rinn iad aoradh an làthair an Tighearn, agus phill iad, agus thàinig iad a dh'ionnsuidh an tìghe gu Ramah: agus dh'aithnich Elcanah a bhean Hanah, agus chuimhnich an Tighearn oirre.

20 Uime sin tharladh, an uair a thàinig an t-àm mu'n cuairt, an déigh do Hanah fàs torrach, gu'n d'rug i mac; agus thug i Samuel mar ainm air, *ag ràdh*, Do bhrìgh gu'n d'iarr mi e air an Tighearn.

21 Agus chaidh an duine Elcanah, agus a thigh uile, suas a dh'ìobradh do'n Tighearna na h-ìobairt bliadhnail, agus a choimhlionadh a bhòide.

22 Agus cha deachaidh Hanah suas: oir thubhairt i r'a fear, *Cha téid mise suas* gus an cuirear an leanabh bhàrr na cìche, agus an sin bheir mi leam e, chum gu'n tais-beanar e am fianuis an Tighearn, agus gu'm fan e 'n sin gu bràth.

23 Agus thubhairt Elcanah a fear rithe, Dean mar is maith leat; fan gus an cuir thu bhàrr na cìche e; a mhàin daingnich-

¹ o làithibh gu làithibh. Eabh.

² thaitneach.

³ 'ga cur fo champer.

⁴ a' gal.

eadh an Tighearn 'fhocal. Agus dh'fhan a' bhcan, agus thug i crìoch d'a leanabh, agus an do chuir i bhàrr na cìche e.

24 Agus an uair a chuir i bhàrr na cìche e, thug i suas leatha e, maille ri tri-bliadh-nach tairbh¹, agus aon ephah do mhin mhìn², agus searrag fhìona, agus thug i e do thigh an Tighearn ann an Siloh: agus bha 'n leanabh òg.

25 Agus mharbh iad an tarbh, agus thug iad an leanabh a dh'ionnsuidh Eli.

26 Agus thubhairt i, Mo thighearna, mar is beò t'anam, mo thighearn, is mis' a' bhean a sheas làimh riut an so, a' deanamh urnuigh ris an Tighearn.

27 Air son an leinibh so rinn mi urnuigh; agus thug an Tighearna dhomh m'iarrtus a dh'iarra mi air:

28 Agus uinne sin thug mi seachad gu saor e³ do'n Tighearna: rè uile làithean a bheatha thugadh seachad e⁴ do'n Tighearn. Agus rinn e aoradh do'n Tighearn an sin.

CAIB. II.

1 *Laoidh Hanah.* 12 *Aingidheachd mhac Eli.*

18 *Fhrithheil Samuel an làthair an Tighearna.*

27 *Fàistneachd an aghaidh tighe Eli.*

AGSUS rinn Hanah urnuigh, agus thubhairt i, Tha mo chridhe a' deanamh gàirdeachais anns an Tighearna; dh'àrd-achadh m'adharc anns an Tighearna; rinneadh mo bheul farsaing os ceann mo naimhde, do bhrìgh gu bheil mi aoibhneach ann do shlàinte-sa.

2 Cha 'n'eil neach air bith naomha mar an Tighearn; oir cha 'n'eil neach ann ach thu, agus cha 'n'eil carraig ann mar ar Dia-ne.

3 Na labhraibh ni's mò cho ro uaibhreach; na tigeadh àrdan⁵ a mach as bhuir beul; oir is Dia eòlais an Tighearn, agus leisean tha gnìomharan air an cothromachadh⁶.

4 Tha boghanna nan daoine treuna air am briseadh, agus tha iadsan a thuislich air an crìoslachadh le neart.

5 *Iadsan a bha làn*, air son arain thuar-asdalaich siad iad féin; agus *iadsan a bha ocrach*, sguir iad *do bhi mar sin*: ise a bha roimhe neo-thorrach, rug i seachdhar; agus ise aig an robh mòran cloinne, dh'fhàs i fann.

6 'Se 'n Tighearn a mharbhas agus a bheothaicheas: bheir e sìos a dh'ionnsuidh na h-uaighe, agus bheir e nìos.

7 'Se 'n Tighearn a nì bochd, agus a nì beartach: leagaidh e sìos, agus togaidh e suas.

8 Togaidh e 'm bochd o'n duslach; o'n òtrach togaidh e suas am feumach, g'an

cur 'nan suidhe maille ri uachdaranaibh⁷, agus a thoirt orra caithir glòire a shealbhadh; oir is leis an Tighearna bunaite na talmhainn, agus shuidhich e an domhan orra.

9 Cosan a naomh gleidhidh e, agus bithidh na h-aingidh tosdach ann an dorchadas; oir le neart cha bhuadhaich duine sam bith.

10 Brisear 'nam bloighdibh eascairdean an Tighearn: as na nèamhaibh nì e tairneanach orra: bheir an Tighearna breth air crìochaibh na talmhainn; agus bheir e neart d'a rìgh, agus àrdaichidh e adharc 'Aoin ungta féin.

11 Agus dh'imich Elcanah gu Ramah d'a thigh; agus fhrithheil an leanabh do'n Tighearn am fianuis Eli an t-sagairt.

12 A nis bu mhic do Bhelial mic Eli; cha b'àithne dhoibh an Tighearn.

13 Agus b'e gnàth nan sagart leis an t-sluagh, an uair a dh'ìobradh duine sam bith ìobairt, gu'n tigeadh òglach an t-sagairt, an uair a bha 'n fheoil 'ga bruicheadh, agus greimiche-feòla thri meur 'na làimh;

14 Agus bhuailleadh e san aghann e, no sa' choire bheag, no sa' choire mhòr, no sa' phoit; gach nì a bheireadh an greimiche-feòla suas, ghabhadh an sagart air a shon féin: mar sin rinn iad ann an Siloh, ris na h-Israelich uile a thàinig an sin.

15 Mar an ceudna mun loisgeadh iad an t-saill, tigeadh òglach an t-sagairt, agus theireadh e ris an duine a dh'ìobairt. Thoir feoil g'a ròstadh do'n t-sagart: oir cha ghabh e uait feoil bhrùich, ach amh.

16 Agus nan abradh duine sam bith ris, Na dearmadadh iad an t-saill a losgadh air ball, agus an sin gabh dhuìt féin mar is miann le t'anam; an sin fhreagradh e, *Ni h-eadh*, ach bheir thu *dhomh* a nis; agus mur tabhair, gabhaidh mi a dh'aindeoin.

17 Uime sin bha peacadh nan òganach ro mhòr ann fianuis an Tighearn; oir rinn daoine tarceis air ìobairt an Tighearn.

18 Ach fhrithheil Samuel an làthair an Tighearn, agus e 'na leanabh, air a chrìoslachadh le ephod do lion-eudach.

19 Agus rinn a mhàthair dha cota beag, agus thug i d'a ionnsuidh e o bhliadhna gu bliadhna, 'nuair a chaidh i suas maille r'a fear a dh'ìobradh na h-ìobairt bliadhnail.

20 Agus bheannaich Eli Elcanah, agus a bhean, agus thubhairt e, Gu'n tugadh an Tighearna dhuìt sliochd o'n mhnaoi so, air son an tiodhlaic a thug i seachad⁸

¹ maille ri tri tairbh òga. ² do phlùr, do mhin chruithneachd. ³ thug mi 'n coingheall e.

⁴ dh'iarraidh e, bheirear an coingheall e.

⁵ seann nithe.

⁶ cha stiùrar gnìomhara as

⁷ eugmhais-san.

⁸ naislìbh.

⁸ air son an iarrtuais a dh'iarra i, air son a' choin-ghill a thugadh no thug thu.

do'n Tighearn. Agus chaidh iad d'an àite fèin.

21 Agus dh'amhaire an Tighearn air Hanah, agus dh'fhàs i torrach, agus rug i trì mic, agus dà nighinn. Agus dh'fhàs an leanabh Samuel suas an fianuis an Tighearn.

22 A nis bha Eli ro shean, agus chual' e gach nì a rinn a mhic ri h-Israel uile, agus cionnus a luidh iad leis na mnaibh a chruinnich aig dorus pàilliuin a' choimh-thionail.

23 Agus thubhairt e riu, C'ar son a tha sibh a' deanamh a leithid so do nithibh? oir tha mi a' cluinntinn a thaobh bhrur droch ghniomhara o'n t-sluagh so uile.

24 Na *deanaibh mar so*, mo mhic: oir cha sgeul maith a tha mi a' cluinntinn, gu bheil sibh a' toirt air sluagh an Tighearna dol air seacharan¹.

25 Ma pheacaicheas duine an aghaidh duin' eile, bheir am breitheamh² breth air³: ach ma pheacaicheas duine an aghaidh an Tighearna, cò a ghuidheas air a shon? gidheadh cha d'èisd iadsan ri guth an athar, do bhrìgh gu'm bu toil leis an Tighearn am marbhadh.

26 (Agus dh'fhàs an leanabh Samuel suas, agus bha e taitneach araon do'n Tighearn, agus do dhaoibh.)

27 Agus thàinig duine⁴ le Dia dh'ionnsuidh Eli, agus thubhairt e ris, Mar so tha'n Tighearn ag ràdh, An d'fhoillsich mise gu soilleir mi fèin do thigh t'athar, an uair a bha iad san Eiphit, ann an tigh Pharaoh?

28 Agus an do thagh mi e á treubhaibh Israel uile *gu bhi*⁵ na shagart agam, a dh'ìobradh⁶ air m'altair, a losgadh tuis, a dh'iomchar ephoid a'm⁷ fhianuis? agus an d'thug mi do thigh t'athar na tabhartasan uile a bheirear suas le teine le cloinn Israel.

29 C'ar son a tha sibh a' deanamh tàir air⁸ m'ìobairt, agus air mo thabhartas a dh'àithn mi *ann am àite-còmhnuidh*, agus a tha thu a' toirt urram do d' mhic os mo cheamhsa, gu sibh fèin a dheanamh reamhar le roghadh⁹ uile thabhartasa mo shluaigh Israel?

30 Uime sin tha'n Tighearna Dia Israel ag ràdh, Thubhairt mi gu deimhin, *gu'n* gluaiseadh do thigh-sa agus tigh t'athar a'm¹⁰ fhianuis gu bràth: ach a nis tha'n Tighearn ag ràdh, Gu ma fada sin uamsa; oir dhoibhsan a bheir urram dhomhsa bheir mise urram, agus iadsan a ni tàir ormsa, is beag am meas a bhitheas dhiubh.

31 Feuch, *tha* na làithean a' teachd anns an gearr mi dhòt do ghàirdean, agus gàirdean tighe t'athar, air chor as nach bi seann duine a'd' thigh.

32 Agus chì thu nànhaid⁸ *ann am àite-còmhnuidh-sa* anns an uile shaoibhreas a bheir *Dia* do Israel: agus cha bhi seann duine a'd' thigh-sa gu bràth.

33 Agus an duine sin agad nach gearr mi as o m' altair, *bithidh e* a chlaoidh do shùl, agus a chràdh do chridhe: agus bàsaichidh uile glhineal⁹ do thighe ann an tréin' an neart¹⁰.

34 Agus *bithidh* so 'na chomhara dhuit, a thig air do dhithis mhiac, air Hophni agus Phinehas, ann an aon là bàsaichidh iad le chèile.

35 Agus togaidh mi suas dhomh fèin sagart dileas, a ni mar a *tha e* ann am chridhe, agus ann am inntinn; agus togaidh mi dha tigh seasmhach¹¹, agus imichidh e am fianuis m' Aoin uigta gu bràth.

36 Agus tarlaidh gu'n tig gach neach a dh'fhàgar a'd' thigh a chromadh sìos da air son m' airgid, agus greim arain; agus their e, Cuir mi guidheam ort, ann an aon do dhreuchdaibh nan sagart, a chum gu'n ith mi greim arain.

CAIB. III.

1 Dh' fhoillsicheadh focal an Tighearna do Shamuel.

11 Chuir Dia an cèill do Shamuel an sgrìos a bha gu teachd air tigh Eli.

A GUS fhrithheil an leanabh Samuel do'n Tighearn am fianuis Eli: agus bha focal an Tighearna luachmhor anns na làithibh sin; cha robh taisbean follaiseach ann.

2 Agus tharladh anns an àm sin, an uair a bha Eli 'na luidhe 'na àite; (agus thòisich a shùilean air fàilneachadh¹²: cha b'urram e faicinn *gu maith*;))

3 Agus mun deachaidh lòchran Dhé as, an uair a bha Samuel 'na luidhe ann an teampull an Tighearna, far an robh àire Dhé;

4 Gu'n do ghairm an Tighearn air Samuel; agus fhreagair esan, *Tha mi 'n so*.

5 Agus ruith e dh'ionnsuidh Eli, agus thubhairt e, *Tha mi 'n so*, oir ghairm thu orm. Agus thubhairt esan, Cha do ghairm mise ort; pill, luidh sìos. Agus dh'fhalbh e agus luidh e sìos.

6 Agus ghairm an Tighearn a ris air Samuel. Agus dh'èirich Samuel, agus chaidh e dh'ionnsuidh Eli, agus thubhairt e, *Tha mi 'n so*, oir ghairm thu orm. Agus fhreagair esan, Cha do ghairm mise ort, a mhic; pill, luidh sìos.

¹ claoadh, dol a leth-taobh, peacachadh.

² Dia; Elohim. Eabh. ³ guidhidh daoine ri Dia as a leth. ⁴ òglach. ⁵ gu dol suas.

⁶ a' breabadh an aghaidh. Eabh.

⁷ toiseach. Eabh.

⁸ chì thu le doilgheas agus farnad neach eile. ⁹ shliochd, fhàs.

¹⁰ nan daoibh.

¹¹ cinnteach.

¹² chaidh air a léirsinn.

I. SAMUEL, III. IV.

7 An nis cha b'aithne do Shamuel fathast an Tighearn, agus cha d'fhoillsich-eadh focal an Tighearna fathast da.

8 Agus ghairm an Tighearna fathast air Samuel an treas uair. Agus dh'éirich e, agus chaidh e dh'ionnsuidh Eli, agus thubhairt e, *Tha mi 'n so*, oir ghairm thu orm. Agus thuig Eli gu'm b'e 'n Tighearn a ghairm air an leanabh.

9 Uime sin thubhairt Eli ri Samuel, Falbh, luidh sìos; agus ma ghairmeas e ort, an sin their thu, Labhair, a Thighearn, oir *tha* do sheirbhiseach a' cluinntinn. Agus dh'fhalbh Samuel, agus luidh e sìos 'na àite féin.

10 Agus thàinig an Tighearn, agus sheas e, agus ghairm e mar air na h-uairibh eile, A Shamueil, a Shamueil. An sin fhreagair Samuel, Labhair, oir *tha* do sheirbhiseach a' cluinntinn.

11 Agus thubhairt an Tighearna ri Samuel, Feuch, ni mi ni ann an Israel, a ni gaoid' ann an dà chluais gach neach a chluinneas e.

12 Anns an là sin, coimhlionaidh² mi an aghaidh Eli na *nithe sin* uile a labhair mi mu thimchioll a thighe: tòisichidh mi agus crìochnaichidh mi.

13 Oir dh'innis mi dha gu'n toir mi breth air a thigh gu bràth, air son na h-aingidheachd air am bheil e fiosrach; a chionn gu'n d'thug a mhic maslachd dhomhsa³, agus nach do chaisg⁴ esan iad.

14 Agus uime sin mhionnaich mi do thigh Eli, nach glanar as aingidheachd tìghe Eli le h-iobairt, no le tabhartas gu bràth.

15 Agus luidh Samuel gu maduinn, agus dh'fhosgail e dorsan tìghe an Tighearn: agus bha eagal air Samuel an taisbean innseadh do Eli.

16 An sin ghairm Eli air Samuel, agus thubhairt e, A Shamueil a mhic. Agus thubhairt esan, *Tha mi 'n so*.

17 Agus thubhairt e, Ciod an ni a chaidh ràdh⁵, riut? na ceil ormsa e, guidheam ort: gu'n deanadh Dia mar sin riut, agus tuilleadh mar an ceudna, ma cheileas tu *uir bith* orm, do gach ni a chaidh ràdh riut.

18 Agus dh'innis Samuel dha na h-uile nìthe, agus cha do cheil e *ni sam* bith air. Agus thubhairt esan, *Is e 'n Tighearn a th'ann*; an ni sin a ta maith 'na shùilibh ni e.

19 Agus dh'fhàs Samuel suas, agus bha 'n Tighearna maille ris, agus cha do leig e do h-aon air bith d'a fhoclaibh tuit-eam a dh'ionnsuidh an làir.

20 Agus bha fios aig Israel uile, o Dhan

gu ruig Beer-seba, gu'n d'orduicheadh⁶ Samuel 'na fhàidh do'n Tighearn.

21 Agus thaisbeineadh an Tighearn a ris ann an Siloh; oir dh'fhoillsich an Tighearn e féin do Shamuel ann an Siloh, le focal an Tighearna.

CAIB. IV.

1 *Bhuailleadh clann Israeil roimh na Philistich.*
11 *Ghlacadh àire Dhe, agus mharbhadh Hophni agus Phinehas.* 18 *Bàs Eli.*

AGUS thàinig focal Shamueil a dh'ionnsuidh Israeil uile. A nis chaidh Israeil a mach an aghaidh nam Philisteach gu cath, agus champaich iad làimh ri Ebeneser: agus champaich na Philistich ann an Aphec.

2 Agus tharruing na Philistich iad féin suas an ordugh blàir an aghaidh Israeil: agus chuireadh an cath, agus bhuailleadh Israel roimh na Philistich: agus mharbh iad anns a' chath sa' mhachair mu thimchioll ceithir mìle fear.

3 Agus an uair a thàinig an sluagh do'n champ, thubhairt seanairan Israeil, C'ar son a bhuail an Tighearna sinn an diugh an làthair nam Philisteach? Thugamaid d'arn-ionnsuidh¹ Siloh àire coimhcheangail an Tighearna, chum 'nuair a thig i 'nar measg gu'n saor i sinn á làimh ar namhde.

4 Agus chuir an sluagh *daoine* gu Siloh, a chum gu'n tugadh iad á sin àire coimhcheangail Tighearna nan sluagh, a tha chòmhluaidh *eadar* na Cheruban: agus bha dithis mhac Eli, Hophni agus Phinehas, an sin maille ri àire coimhcheangail Dé.

5 Agus an uair a thàinig àire coimhcheangail an Tighearna do'n champ, dh'éigh Israel uile le h-iolaich⁷ mhòir, agus fhreagair an talamh do'n fhuaim.

6 Agus chuala na Philistich fuaim na h-iolaich, agus thubhairt iad, Ciod *is ciall* do fhuaim na h-iolaiche mòire so ann an camp nan Eabhruidheach? Agus thuig iad gu'n robh àire an Tighearn air teachd do'n champ.

7 Agus bha eagal air na Philistich, oir thubhairt iad, Tha diathan⁸ air teachd do'n champ: agus thubhairt iad, Mo thruaighe sinne! oir cha robh a leithid so do ni riamh roimhe ann:

8 Mo thruaighe sinne! cò a shaoras sinn á làimh nan diathan cumhachdacha sin? *is* iad sin na diathan a bhuail na h-Eiphitch léis gach plàigh, agus a *rinn nìthe iongantach anns* an fhàsach.

9 Bithibh làidir, agus bithibh fearail, O sibhse Philisteacha, a chum nach bi sibh 'nur tràillibh aig na h-Eabhruidhich, mar

¹ fuaim. ² dùisgidh. ³ gu d'rinn a mhic iad
féin mallachte. ⁴ choisg, thoirmisg.

⁵ a thubhairt an Tighearna.
⁶ do dhàinguicheadh. ⁷ gair. ⁸ Dia.

I. SAMUEL, IV. V.

a bha iadsan 'nan tràillean agaibhse: bithibh ma ta fearail, agus cogaibh.

10 Agus chog na Philistich; agus bhuail eadh Israel, agus theich gach duine dhiubh a dh'ionnsuidh a bhùtha: agus bha àr ro mhòr ann; oir thuit do Israel deich mìle fichead coisiche.

11 Agus ghlacadh àirc Dhé; agus fhuair dithis mhac Eli, Hophni agus Phinehas, bàs.

12 Agus ruith duine do Bhenjamin a mach as an armailt¹, agus thàinig e gu Siloh air an là sin féin, agus 'eudach air a reubadh², agus duslach air a cheann.

13 Agus an uair a thàinig e, fench, bha Eli 'na shuidhe air caithir làimh ris an t-slighe, a' coimhead³: oir bha a chridhe air chrith air son àirc Dhé. Agus an uair a thàinig an duine do'n bhaile, agus a dh'innis se e, dh'éigh am baile uile.

14 Agus an uair a chual' Eli fuaim na h-éighich, thubhairt e, Cìod is ciall do fhuaim na conghairis so? agus rinn an duine cabhag, agus thàinig e, agus dh'innis e do Eli.

15 A nis bha Eli ochd bliadhna deug agus ceithir fichead a dh'aois; agus bha a shùilean mall⁴, air chor as nach faiceadh e gu maith.

16 Agus thubhairt an duine ri Eli, *Is mise esan a thàinig a mach as an armailt*, agus theich mise 'n diugh as an armailt. Agus thubhairt esan, Cìod a thachair, a mhic?

17 Agus fhreagair an teachdair agus thubhairt e, Theich Israel roimh na Philistich, agus mar an ceudna bha àr mòr am measg an t-sluaigh, agus mar an ceudna tha do dhithis mhac Hophni agus Phinehas marbh, agus ghlacadh àirc Dhé.

18 Agus an uair a dh'ainmich e àirc Dhé, thuit e bhàrr na cathrach an comhair a chiùil làimh ris a' gheata, agus bhriseadh 'ambach, agus fhuair e bàs; oir bha e 'na sheamh duine, agus trom. Agus thug e breth air Israel dà fhichead bliadhna.

19 Agus bha a bhan-chliamhuin, bean Phinehas, torrach, *dliuth* do bhi air a h-aisead⁵: agus an uair a chual' i 'n sgeul gu'n do ghlacadh àirc Dhé, agus gu'n robh a h-athair-céile marbh, agus a fear, chrom si i féin, agus rug i *mac*; oir thàinig a saothair-chloimne oirre.

20 Agus mu àin a bàis, thubhairt na mnàì a bha seasamh làimh rithe, Na biodh eagal ort, oir rug thu mac. Ach cha do fhreagair ise, ni mò a thug i fa'near e.

21 Agus thug i Ichabod mar ainm air an leanabh, ag ràdh, Dh'fhalbh a' ghloir

o Israel: (do bhrìgh gu'n do ghlacadh àirc Dhé, agus air son a h-athar-céile agus a fir:)

22 Agus thubhairt i, Dh'fhalbh a' ghloir o Israel; oir ghlacadh àirc Dhé.

CAIB. V.

1 Chuir na Philistich àirc Dhé ann an tigh Dhagoin ann an Asdod. 6 Bhuail an Tighearna muinntir Asdoid le neasgaidean fola. 8 Thug na Philistich àirc Dhé gu Gat, agus á sin gu Hecon.

A GUS ghabh na Philistich àirc Dhé, agus thug iad leo i o Ebeneser gu Asdod.

2 An sin ghabh na Philistich àirc Dhé, agus thug iad i do thigh Dhagoin, agus shuidhich iad i làimh ri Dagon.

3 Agus an uair a dh'éirich muinntir Asdoid gu moch air an là màireach, feuch, bha Dagon air tuiteam air 'aghaidh dh'ionnsuidh an làir fa chomhair àirc an Tighearn: agus ghabh iad Dagon, agus chuir iad a ris e na àite féin.

4 Agus an uair a dh'éirich iad gu moch sa' mhaduinn air an là màireach, feuch, bha Dagon air tuiteam air 'aghaidh dh'ionnsuidh an làir fa chomhair àirc an Tighearn: agus bha ceann Dhagoin, agus dà bhois a làmh air an gearradh dheth aig an stairsnich: dh'fhagadh a mhàin com Dhagoin aige.

5 Uime sin cha saltair sagairt Dhagoin, no neach air bith a théid a steach do thigh Dhagoin, air stairsnich Dhagoin ann an Asdod, gus an là 'n diugh.

6 Ach bha làmh an Tighearna trom air muinntir Asdoid, agus sgrios⁶ e iad, agus bhuail e iad le neasgaidean fola⁷, eadhon Asdod agus a chrìochan.

7 Agus an uair a chumnaic daoine Asdoid gu'n robh e mar sin, thubhairt iad, Cha'n fhan àirc Dhé Israeil maille ruinne; oir tha a làmh trom⁸ oirm, agus air Dagon ar Dia.

8 Uime sin chuir iad *fios* uatha, agus chruinnich iad uile thighearnan⁹ nam Philisteach d'an ionnsuidh, agus thubhairt iad, Cìod a ni sinn ri àirc Dhé Israeil? Agus fhreagair iadsan, Thugar àirc Dhé Israeil mu'n cuairt gu Gat. Agus thug iad mu'n cuairt àirc Dhé Israeil *gu Gat*.

9 Agus an uair a thug iad mu'n cuairt i, bha làmh an Tighearn an aghaidh a' bhaile le sgrios ro mhor, agus bhuail e daome a' bhaile eadar bheag agus mhòr; agus bha neasgaidean fola aca 'nan àitibh dhìomhair.

10 Uime sin chuir iad air falbh àirc Dhé gu Hecon; agus an uair a bha àirc Dhé air teachd gu Hecon, dh'éigh na Heconach, ag ràdh, Thug iad mu'n cuairt d'ar n-ionnsuidh-ne àirc Dhé Is-

¹ as a' chath.

² shrachdadh.

³ a' faire.

⁴ rag, trom; / sheas a shùilean. Eabh.

⁵ asaid.

⁶ dh'fhàsaich.

⁷ hemorrhoids. Sasg.

⁸ cruaidh.

⁹ uachdarana.

raeil, gu sinn fein a mharbhadh, agus ar sluagh.

11 Uime sin chuir iad *fios* uatha, agus chruinnich iad uile thighearnan nam Philisteach, agus thubhairt iad, Cuiribh air falbh àirc Dhé Israeil, agus rachadh i air a h-ais d'a h-àite féin, a chum nach marbh i sinn féin agus ar sluagh: oir bha sgrios bàis anns a' bhaile uile; bha làmh Dhé ro throm an sin.

12 Agus na daoine nach do bhàsaich, bhuailleadh iad le neasgaidean fola; agus chaidh éigheach¹ a' bhaile suas gu nèamh.

CAIB. VI.

1 Chuir na Philistich àirc Dhé air feun nomha, agus ghiulain iad i gu Bet-semes. 17 An tabhartas a thug iad seachad. 19 Bhuail Dia daoine Bhet-semeis a chionn gu'n do sheall iad air an àirc.

AGUS bha àirc an Tighearn ann am fearann nam Philisteach seachd mìosan.

2 Agus ghairm na Philistich air na sagartaibh, agus air na fiosaichibh, ag ràdh, Ciod a ni sinn ri àirc an Tighearna? thugaibh fios duinn cionnus a chuireas sinn air falbh i d'a h-àite féin.

3 Agus thubhairt iadsan, Ma chuireas sibh air falbh àirc Dhé Israeil, na cuiribh uaibh falamhi; ach air gach uile chor locaibh² dha tabhartas-eusaontais: an sin slànùichear sibh, agus bithidh fios agaibh c'ar son nach do phill a làmh uaibh.

4 An sin thubhairt iad, Ciod an tabhartas-eusaontais a dh'ìocas sinn da? Agus fhreagair iadsan, Cùig neasgaidean òir, agus cùig luchaidh òir, a *rèir* àireimh thighearnan nam Philisteach; oir *bha* aon phlàigh oirbh uile, agus air bhur tigh-earnaibh.

5 Uime sin ni sibh dealbhan bhur neasgaidean, agus dealbhan bhur luchaidh, a tha milleadh na tìre; agus bheir sibh glòir do Dhia Israeil: theagamh gu'n eutromaich e a làmh dhibh, agus do bhur diathaibh, agus do bhur tìr.

6 C'ar son uime sin a chruaidhicheas sibh bhur cridhe, mar a chruaidhich na h-Eiphitich agus Pharaoh an cridhe? an uair a rinnt e gu h-iongantach 'nam measg, nach do leig iad an sluagh air falbh, agus dh'imich iad?

7 A nis uime sin deanaibh feun nomha³, agus gabhaibh dà mhart-bhainne, air nach deachaidh cuing; agus ceanglaidh sibh na mairt ris an fheun, agus bheir sibh an laogh dhachaidh uatha.

8 Agus gabhaidh sibh àirc an Tighearn, agus cuiridh sibh i air an fheun; agus cuiridh sibh na seudan òir, a dh'ìocas sibh dha mar thabhartas-eusaontais, ann

an cobhan⁴ r'a taobh; agus cuiridh sibh air falbh i, a chum gu'n imich i.

9 Agus chi sibh, ma théid i suas rathad a criche féin gu Bet-semes, *an sin* rinn e an t-olc mòr so oirnn: ach mur *téid*, an sin bithidh fios againn nach i a làmh-san a bhuail sinn; is tuiteamas a thàinig oirnn.

10 Agus rinn na daoine mar sin; agus ghabh iad dà mhart-bhainne, agus cheangail iad ris an fheun iad, agus dhruid⁵ iad an laogh a stigh.

11 Agus chuir iad àirc an Tighearn air an fheun, agus an cobhan leis na luchaidh òir, agus dealbhan an neasgaidean fola.

12 Agus ghabh na mairt an rathad dìreach gu slighe Bhet-semeis; air an rathad mhòr dh'imich iad, a' geumnaich mar a dh'imich iad, agus cha do thionndaidh iad a leth-taobh a dh'ionnsuidh na làimhe deise no na làimhe clithe; agus chaidh thighearnan nam Philisteach 'nan déigh gu crich Bhet-semeis.

13 Agus *bha muinntir* Bhet-semeis a' buain an cruithneachd anns a ghleann; agus thog iad suas an suilean, agus chunnaic iad an àirc, agus rinn iad gàird-eachas 'nuair a chunnaic iad i.

14 Agus thàinig am feun gu achadh Iosua a' Bhet-semesich agus sheas e 'n sin, far an robh clach mhòr? agus sgoilt iad fiodh an fheuna, agus thug iad suas na mairt 'nan iobairt-loisgte do'n Tighearn.

15 Agus thug na Lebhitich sìos àirc an Tighearn agus an cobhan a *bha* maille rithe, anns an robh na seudan òir, agus chuir iad air a' chloich mhòir iad: agus thug daoine Bhet-semeis suas tabhartais-loisgte, agus dh'ìobair iad iobairte san là sin féin do'n Tighearn.

16 Agus an uair a chunnaic cùig tigh-earnan nam Philisteach e, phill iad gu Hecron san là sin féin.

17 Agus is iad so ua neasgaidean òir, a dh'ìoc na Philistich mar thabhartas-eusaontais do'n Tighearn: air son Asdoir aon, air son Ghasa aon, air son Asceloin aon, air son Ghat aon, air son Hecroin aon:

18 Agus na luchaidh òir, a *rèir* àireimh uile bhailte nam Philisteach, a *bhuineadh* do na cùig tighearnaibh, arzon bhailte daingnichte agus bhailte gun bhalla, eadhon gu ruig a' chlach mhòr, air an do chuir iad sìos àirc an Tighearna, *clach a tha làthair* gus an là 'n diugh ann an achadh Iosua a' Bhet-semesich.

19 Ach bhuail e daoine Bhet-semeis, a chionn gu'n do sheall iad air àirc an Tighearna; bhuail e eadhon do'n t-sluagh trì fichead agus deichnear fhcar⁶: agus rinn

¹ glaoth.

² thugaibh air ais.

³ cairt nuadh.

⁴ ciste.

⁵ ghleith.

⁶ trì fichead agus deichnear fhcar, agus leth-cheud mìle fear.

an sluagh caoidh, do bhrìgh gu'n do bhuail an Tighearna *cuid* do'n t-sluagh le plàigh¹ mhòir.

20 Agus thubhairt daoine Bhet-semeis, Cò is urrainn seasamh an làthair an Tighearna Dé naoinh so? agus cia dh'ionnsuidh a théid i² suas uainne?

21 Agus chuir iad teachdairean a dh'ionnsuidh luchd-àiteachaidh Chiriat-earim, ag ràdh, Thug na Philistich air a h-ais àirc an Tighearna; thigibh a nuas, thugaibh suas i d'ur n-ionnsuidh.

CAIB. VII.

¹ *Thug daoine Chiriat-earim an àire gu Gibeah, agus naomhaich iad Eliasar mac Abinadaib g'a ghlèidheadh. 18 Bhuaileadh na Philistich roimh chloinn Israeil.*

A GUS thàinig daoine Chiriat-earim, agus thug iad suas àirc an Tighearn, agus thug iad a teach i do thigh Abinadaib ann an Gibeah³, agus naomhaich iad a mhac Eliasar, a ghlèidheadh àirc an Tighearn.

2 Agus tharladh, o'n là a dh'fhan an àirc ann an Ciriart-earim, gu'n robh an aimsir fad; (oir bha fichead bliadhna ann;) agus rinn tigh Israeil uile caoidh an déigh an Tighearn.

3 Agus labhair Samuel ri uile thigh Israeil, ag ràdh, Ma philleas sibh a dh'ionnsuidh an Tighearna le'r n-uile chridhe, *an sin* cuiribh air falbh na diathan coimheach as bhur measg, *Baalim* agus Astarot: agus ulluichibh bhur cridhe a chum an Tighearn, agus deanaibh seirbhis dhasan a mhàin, agus saoraidh e sibh á làimh nam Philisteach.

4 An sin chuir clann Israeil air falbh Baalim agus Astarot, agus rinn iad seirbhis do'n Tighearn a mhàin.

5 Agus thubhairt Samuel, Cruinnichibh Israel uile gu Misphe, agus ni mise ur-nuigh air bhur son ris an Tighearn.

6 Agus chruinnich iad an ceann a chéile gu Misphe, agus tharruing iad uisge, agus dhòirt iad a mach e an làthair an Tighearn, agus throisg iad air an là sin, agus thubhairt iad an sin, Pheacaich sinn an aghaidh an Tighearn. Agus thug Samuel breth air cloinn Israeil ann am Misphe.

7 Agus chuala na Philistich gu'n robh clann Israeil air cruinneachadh an ceann a chéile gu Misphe, agus chaidh tighearnan nam Philisteach suas an aghaidh Israeil; agus an uair a chuala clann Israeil e, bha eagal orra roimh na Philistich.

8 Agus thubhairt clann Israeil ri Samuel, Na sguir do ghlaodhaich ris an Tighearn ar Dia air ar son, a chum gu'n saor e sinn

á làimh nam Philisteach.

9 Agus ghabh Samuel uan deothail⁴ agus thug e suas e uile mar iobairt-loisgte do'n Tighearn; agus ghlaodh Samuel ris an Tighearn air son Israeil, agus chual⁵ an Tighearn e.

10 Agus an uair a bha Samuel a' toirt suas na h-iobairt-loisgte, tharruing na Philistich am fagus gu cath an aghaidh Israeil: ach rinn an Tighearna tairnean-ach le fuaim⁶ mhòir san là sin air na Philistich, agus chlaoidh e iad: agus bhuaileadh iad roimh Israel.

11 Agus chaidh ri Israeil a mach à Misphe, agus ruiga⁶ iad na Philistich, agus bhuail siad iad, agus an d'thàinig iad fuidh Bhet-car.

12 An sin ghabh Samuel clach, agus shuidhich e i eadar Misphe agus Sen; agus thug e Ebeneser⁷ mar ainm oirre, agus thubhairt e, Gu ruige so chuidich an Tighearna leinn.

13 Agus dh'riosaicheadh⁸ na Philistich, agus cha d'thàinig iad tuille gu crìch Israeil: agus bha làmh au Tighearn an aghaidh nam Philisteach uile làithean Shamueil.

14 Agus thugadh na bailtean a ghlac na Philistich o Israel, air an ais do Israel, o Hebron eadhon gu Gat; agus shaor Israel an crìochan á làimh nam Philisteach; agus bha sìth eadar Israel agus na h-Amoraich.

15 Agus thug Samuel breth air Israel ré uile làithean a bheatha.

16 Agus chaidh e o bhliadhna gu bliadhna mu'n cuairt gu Bet-el, agus Gilgal, agus Misphe, agus thug e breth air Israel anns na h-àitibh sin uile.

17 Agus bha⁹ theachd air ais gu Ramah; oir an sin bha a thigh; agus an sin thug e breth air Israel, agus an sin thog e altair do'n Tighearna.

CAIB. VIII.

¹ *Dh'iarr seanairean Israeil rìgh gu breth a thoirt orra. 6 Mhì-thaitinn an nì so ri Samuel; 9 ach dh'orduich Dia dha eisdeachd r'an guth, agus fìos a thoirt doibh air seòl an rìgh a rìoglaicheas os an ceann.*

A NIS an uair a bha Samuel aosda, a chuir e a mhic¹⁰ nam breitheamhnaibh os ceann Israeil.

2 Agus b'e ainm a cheud-ghin mic Ioel, agus ainm a dhara mic Abiah: bha iad nam breitheamhnaibh ann am Beer-seba.

3 Agus cha do ghluais a mhic na shligheibh-san, ach chlaon iad an déigh tairbhe⁹, agus ghabh iad duais¹⁰, agus dh'fhiar iad breitheanas.

4 An sin chruinnich uile sheanairean Israeil iad féin an ceann a chéile, agus

¹ àr, sgrios.

³ anns a' chnoc.

⁵ torainn.

² i. e. an airc.

⁴ bainne. Eabh.

⁶ lean.

⁷ i. e. clach a' chuideachaidh. ⁸ cheannsaicheadh.

⁹ samht.

¹⁰ tiodhlacan.

thàinig iad a dh'ionnsuidh Shamueil gu Ramah.

5 Agus thubhairt iad ris, Feuch, tha thu-sa air fàs aosda, agus cha 'n eil do mhic a' gluasad ann ad shligheibh: a nis ma ta dean dhuinne righ gu breth a thoirt oirnn, mar na cinnich uile.

6 Ach mhi-thaitionn an ni ri Samuel¹, an uair a thubhairt iad, Thoir dhuinn righ gu breth a thoirt oirnn: agus rinn Samuel urnuigh ris an Tighearn.

7 Agus thubhairt an Tighearna ri Samuel, Eisd ri guth an t-sluaigh anns gach ni a their iad riut: oir riut-sa cha do chuir iad cùl, ach rium-sa chuir iad cùl, a chum nach rìoghaichinn os an ceann.

8 A réir nan uile oibre a rinn iad o'n là anns an d'thug mi nìos iad as an Eiphit, gu ruig an là'n diugh, leis an do thréig iad mi, agus an d'rinn iad seirbhìs do dhiathaibh eile, mar so tha iad a' deànamh mar an ceudna riutsa.

9 A nis uime sin éisd r'an guth: gidheadh bheir thu gu cinnteach fianuis 'nan aghaidh, agus cuiridh tu 'n céill dhoibh lagh² an righ a rìoghaicheas os an ceann.

10 Agus dh'innis Samuel uile bhriathran an Tighearna do'n t-sluaigh, a bha 'g iarraidh righ air.

11 Agus thubhairt e, So mar a bhitheas lagh an righ a rìoghaicheas os bhur ceann: Gabhaidh e bhur mic, agus orduichidh e dha féin iad³ a chum a charbadan, agus gu bhi 'nam maraich aige, agus gu ruith roimh a charbadaibh;

12 Agus gu'n cur 'nan ceannardaibh dha féin air mhiltibh, agus 'nan ceannardaibh air leth-cheudaibh, agus a dh'ar 'fhearainn³, agus a bhuaibh 'fhogharaidh, agus a dheanannh innil cogaidh air a shon, agus innil air son a charbadan.

13 Agus gabhaidh e bhur nigheana a dheanannh olaidh ungaidh cùbhraidh, agus gu bhi 'nam ban-chòcairibh, agus 'nam ban-fhuineadairibh.

14 Agus gabhaidh e bhur n-achaidh, agus bhur fion-lìosan, agus bhur lìosan-olaidh, eadhon a' chuid a's fearr dhiubh, agus bheir e iad⁴ a' òglachaibh.

15 Agus gabhaidh e an deachamh d'ur sìol, agus d'ur fion-lìosaibh, agus bheir e d'a luchd-dreuchd e, agus d'a òglachibh.

16 Agus gabhaidh e bhur n-òglach-sa, agus bhur banoglaich, agus na h-òganaich a's fearr agaibh, agus bhur n-asail, agus cuiridh e chum 'oibre féin iad.

17 Gabhaidh e an deachamh d'ur caorach: agus bithidh sibh 'nur seirbhìsich aige.

18 Agus glaothaidh sibh a mach san là sin o làthair bhur righ a thagh sibh dhuibh

féin; agus cha'n éisd an Tighearna ribh san là sin.

19 Gidheadh, dhiùlt an sluaigh éisdeachd ri guth Shamueil, agus thubhairt iad, Ni h-eadh; ach bithidh righ againne os ar ceann:

20 Agus bithidh sinne mar an ceudna mar na cinnich uile, agus bheir ar righ breth oirnn, agus théid e mach romhainn, agus cuiridh⁴ e ar cathan.

21 Agus chuala Samuel uile bhriathran an t-sluaigh, agus dh'aithris e iad ann an cluasaibh an Tighearn.

22 Agus thubhairt an Tighearna ri Samuel, Eisd r'an guth, agus dean righ dhoibh. Agus thubhairt Samuel ri fir Israeil, Rachaibh gach duine dhiubh d'a bhaile féin.

CAIB. IX.

1 Chailleadh asail Chis, agus chaidh Saul a mhac g'an iarraidh. 6 Air comhairle 'òganaich thàinig e a dh'ionnsuidh Shamueil a dh'fhiosrachadh a shlighe. 22 Thug Samuel cuireadh dha chum na cuirme anns an ionad àrd.

AGUS bha duine do Bheniamin, d'am b'ainm Cis, mac Abieil, mhic Sheroir, mhic Bhechorait, mhic Aphiah, Beniaminich, duine treun ann an neart.

2 Agus bha mac aige, d'am b'ainm Saul, roghadh òig-fhir, agus e tlachdmhor⁵; agus cha robh an measg chloinn Israeil fear bu tlachdmhoire na e: o 'ghuaillibh agus o sin suas b'airde e na 'n sluaigh uile.

3 Agus chailleadh asail Chis, athlar Shaul; agus thubhairt Cis r'a mhac Saul. Thoir leat a nis aon do na h-òganaich, agus éirich, falbh, iarr na h-asail.

4 Agus chaidh e troimh mhonadh Ephraim, agus chaidh e troimh thìr Shalisa, ach cha d'fhuair siad iad: an sin chaidh e⁶ troimh thìr Shalim, agus cha robh iad an sin: agus chaidh e troimh thìr nam Beniamineach, ach cha d'fhuair iad.

5 Agus an uair a thàinig iad gu tìr Shuph, thubhairt Saul r'a òganach a bha maille ris, Thig agus pillcamaid, air eagal gu'n leig m'athair dheth a chùram mu na h-asail, agus gu'm bi smuaisean air m'ar timchioll-ne.

6 Agus thubhairt esan ris, Feuch a nis, tha duine le Dia anns a' bhaile so, agus is duine urramach e; thig gach ni a their e gu cinnteach gu crìch: a nis ma ta rachamaid an sin; theagamh gu'n innis e dhuinn ar slighe, air an coir dhuinn gluasad.

7 An sin thubhairt Saul r'a òganach, Ach, feuch, ma théid sinn, ciod a bheir sinn a dh'ionnsuidh òglach⁷ Dhé? oir chaitheadh an t-aran 'nar soithichibh, agus

¹ bha an ni ole ann an sùilibh Shamueil.

² riaghailt, seòl.

³ chum a threabhadh.

⁴ cogaidh.

⁶ iad.

⁵ maith, àluinn.

⁷ duine. Rabb.

cha 'n'èil tiodhlac ann ri thoirt a dh'ionnsuidh òglach Dhé: ciod ma ta a ni sinn?

8 Agus fhreagair an t-òganach Saul a ris, agus thubhairt e, Feuch, tha agam an so a' m' làimh an ceathramh cuid do shecel airgid: *sin* bheir mi do òglach Dhé, agus innsidh e dhuinn ar slighe.

9 (O shean¹ ann an Israel, an uair a rachadh duine a dh'fhiosrachadh do Dhia, mar so labhradh e, Thigibh, agus rachamaid a dh'ionnsuidh an fhir-sheallaidh²: oir esan ris an *abrar* a nis fàidh, o shean theirte fear-seallaidh ris.)

10 An sin thubhairt Saul r'a òganach, Is maith a labhair thu; thig, imicheamaid: agus dh'imich iad do'n bhaile, far an robh òglach Dhé.

11 Agus an uair a chaidh iad suas uchdach a' bhaile, fhuair iad gruagaichean a' dol a mach a tharruing uisge, agus thubhairt iad riu, Am bheil am fear-seallaidh an so?

12 Agus fhreagair iadsan iad, agus thubhairt iad, Tha; feuch, *tha e* roimhibh³: deanaibh cabhag⁴ a nis, oir an diugh tha e air teachd do'n bhaile; oir *tha* iobairt aig an t-sluagh an diugh anns an ionad àrd.

13 An uair a théid sibh a steach do'n bhaile, air ball gheibh sibh e, mun téid e suas do'n ionad àrd a dh'itheadh: oir cha 'n ith an sluagh gus an tig e, a chionn gu'm beannaich e an iobairt, agus an déigh sin ithidh iadsan a chuireadh. A nis uime sin rachaibh suas, oir mu'n àm so gheibh sibh e.

14 Agus chaidh iad suas do'n bhaile: agus an uair a bha iad a' dol a steach gu meadhon a' bhaile, feuch, thàinig Samuel a mach 'nan coinneamh, gu dol suas do'n ionad àrd.

15 A nis dh'innis⁵ an Tighearn ann an cluais Shamuel, là mun d'thàinig Saul, ag ràdh,

16 Mu'n àm so am maireach cuiridh mi a d'ionnsuidh duine á tìr Bheniamin, agus ungaidh tu e 'na cheannard air mo shluagh Israel, agus saoraidh e mo shluagh á làimh nam Philisteach; oir dh'amhairc mi air mo shluagh, a chionn gu'n d'thàinig an glaoch a m' ionnsuidh.

17 Agus an uair a chunnaic Samuel Saul, thubhairt an Tighearna ris, Feuch an duine mu'n do labhair mi riut: rioghaichidh esan os ceann mo shluaigh.

18 An sin thàinig Saul am fagus do Shamuel anns a' gheata⁶, agus thubhairt e, Innis dhomh, guidheam ort, c'àit am bheil tigh an fhir-sheallaidh?

19 Agus fhreagair Samuel Saul, agus

thubhairt e, Is mise am fear-seallaidh: gabh suas romham do'n ionad àrd, agus ithidh sibh⁷ maille riumsa an diugh; agus leigidh mi leat falbh sa' mhaduinn, agus gach ni a ta ann ad chridhe innsidh mi dhuit.

20 Agus a thaobh nan asal agad a chaill-eadh o cheann tri làithean, na suidhich t'intinn orra, oir fhuaradh iad: agus cò air am bheil uile dhéigh Israeil⁸? nach ann ortsa, agus air uile thigh t'athar?

21 Agus fhreagair Saul agus thubhairt e, Nach Beniamineach mise do'n treubh as lugha ann an Israel? agus nach e mo theaghlach a's lugha do uile theaghlachibh tréibhe Bheniamin? c'ar son uime sin a tha thu labhairt riumsa air an dòigh so?

22 Agus ghabh Samuel Saul agus òganach, agus thug e steach iad do'n t-seòmarchuirm, agus thug e àite-suidhe dhoibh aig ceann-toisich nan daoine a chaidh chuireadh, agus iad mu thimchioll deich fir fhichead.

23 Agus thubhairt Samuel ris a' chòcaire, Thoir dhomh a' chuibhrionn a thug mi dhuit mu'n dubhairt mi riut, Cuir làimh riut i.

24 Agus thog an còcaire an slinnean, agus an ni a bha air, agus chuir e fa chonhàir Shaul e, agus thubhairt Samuel, Feuch, cuir an ni sin a dh'fhàgadh air do bheulaobh, agus ith; oir dh'ionnsuidh an àm so ghleidheadh dhuit e, o thubhairt mi, Thug mi cuireadh do'n t-sluagh. Agus dh'ith Saul maille ri Samuel air an là sin.

25 Agus an uair a thàinig iad a nuas o'n ionad àrd do'n bhaile, labhair Samuel ri Saul air mullach an tighe.

26 Agus dh'éirich iad gu moch; agus mu bhriseadh na fàire, ghairm Samuel air Saul gu mullach an tighe, ag ràdh, Eirich, a chun gu'n leig mi air falbh thu. Agus dh'éirich Saul, agus chaidh iad a mach le chéile, e féin agus Samuel.

27 Agus an uair a bha iad a' dol sìos gu iomall a' bhaile, thubhairt Samuel ri Saul, Abair ris an òganach dol air aghaidh romhainn, (agus chaidh e air aghaidh,) ach seas thusa tamull, agus cuiridh mi 'n céill dhuit focal Dé.

CAIB. X.

1 Dh'ung Samuel Saul, agus neartaich se e le tri comharaibh. 10 Thuirling spiorad Dhé air Saul agus rinn e fàidheadhoireachd. 17 Shonraicheadh e gu bhì 'na rìgh os ceann Israeil.

AN sin ghabh Samuel corn⁹ oladh, agus dhóirt e air a cheann e, agus phòg se e, agus thubhairt e, Nach ann a

¹ Roimhe.

² an fheuchadair.

³ romhad. Eabh.

⁴ dean cabhag. Eabh.

⁵ thaisbean, dh'fhoillsich. Eabh.

⁶ am meadhon a' bhaile.

⁷ tu.

⁸ d'am buine uile nithe taitneach Israeil.

⁹ gloin.

chionn gu'n d'ung an Tighearn thu *gubhi* d'cheannard air 'oighreachd féin?

2 'Nuair a dh'imicheas tu 'n diugh uam-sa, an sin gheibh thu dithis dhaoine làimh ri uaigh Racheil, ann an crìch Bheniamin ann an Selsah: agus their iad riut, Fhuaradh na h-asail a chaidh thu a dh'iarraidh; agus, feuch, leig t'athair dheth cùram nan asal, agus tha smuaisean air mu'r tim-chioll-sa, ag ràdh, Ciod a ni mi air son mo mhic?

3 An sin théid thu air t'aghaidh as a sin, agus thig thu dh'ionnsuidh còmluaird¹ Thaboir, agus coinnichidh tu 'n sin triuir dhaoine a' dol suas a dh'ionnsuidh Dhé gu Bet-el, aon *diubh* a' giùlan thri meann, agus aon *eile* a' giùlan thri buillinnean arain, agus aon *eile* a' giùlan searraig fhiona.

4 Agus cuiridh iad fàilte ort, agus bheir iad dhuit dà *bhuilinn* arain, agus gabhaidh tu as an làimh *iad*.

5 'Na dhéigh sin thig thu gu cnoc Dhé, far am *bheil* freiceadam nam Philisteach: agus tarlaidh, 'nuair a thig thu an sin do'n bhaile, gu'n coinnich thu cuideachd fhàidhean a' teachd a nuas o'n ionad àrd, le saltair, agus tiompan, agus pìob, agus clàrsach rompa, agus iad ri fàidheadoir-eachd:

6 Agus tuirlingidh² spiorad an Tighearn ort, agus ni thu fàidheadoireachd maille ri-u-san, agus tionndaidhear³ thu a'd' dhuine eile.

7 Agus an uair a thig na comharan sin ort, ni thu mar a fhreagras a' chùis duit⁴, oir *bithidh* Dia maille riut.

8 Agus théid thu sìos romham-sa gu Gilgal; agus, feuch, théid mise sìos a d' ionnsuidh, a thoirt suas thabhartas-loisgte, agus a dh'ìobradh ìobairtean thabhartas-sith; seachd làithean fanaidh tu, gus an tig mise a d' ionnsuidh, agus gu'n toir mi fios dhuit ciod a ni thu.

9 Agus an uair a thionndaidh e a chùl gu falbh o Shamuel, thug Dia dha cridhe eile; agus thàinig na comharan sin uile gu crìch air an là sin féin.

10 Agus thàinig e o sin⁵ do'n chnoc; agus, feuch, choinnich cuideachd fhàidhean e; agus thuirling spiorad Dhé air, agus rinn e fàidheadoireachd 'nam measg.

11 A nis an uair a chunnaic iadsan uile a ghabh eòlas air roimhe, feuch, gu'n d'rinn e fàidheadoireachd maille ris na fàidhibh, an sin thubhairt an sluagh gach aon ri chéile, Ciod e so thàinig air mac Chis? Am *bheil* Saul cuideachd am measg nam fàidhean?

12 Agus fhreagair duine as an àite sin, agus thubhairt e, Ach cò e an athair⁶? uime sin bha e 'na ghnàth-fhocal, Am

bheil Saul cuideachd am measg nam fàidhean?

13 Agus an uair a chuir e crìoch air fàidheadoireachd a dheanamh, thàinig e do'n ionad àrd.

14 Agus thubhairt bràthair-athar Shaul ris, agus r'a òganach, C'àite chaidh sibh? agus thubhairt esan⁷, A dh'iarraidh nan asal: agus an uair a chunnaic sinn nach *robh* iad *r'am faghail*, thàinig sinn gu Samuel.

15 Agus thubhairt bràthair-athar Shaul, Innis dhomh, guidheam ort, ciod a thubhairt Samuel ribh.

16 Agus thubhairt Saul ri bràthair-athar, Dh'innis e dhuinn gu cinnteach gu'n d'fhuaradh na h-asail; ach a thaobh na rìoghachd, cha d'innis e dha ciod a thubhairt Samuel.

17 Agus ghairm Samuel an sluagh r'a chéile a dh'ionnsuidh an Tighearna gu Misphe;

18 Agus thubhairt e ri cloinn Israeil, mar so tha 'n Tighearna Dia Israeil ag ràdh, Thug mi nìos Israel as an Eiphit, agus shaor mi sibh á làimh nan Eiphiteach, agus á làimh nan rìoghachdan uile, a bha deanamh aimeirt oirbh.

19 Gidheadh chuir sibhse an diugh cùl ri'r Dia, esan a shaor sibh o bhuir n-uile agus bhuir teanntachdaibh gu léir; agus thubhairt sibh, Ni h-eadh, ach cuiridh tu rìgh os ar ceann. A nis uime sin, nochdaibh sibh féin am fianuis an Tighearn a réir bhuir treubhan, agus a réir bhuir mìltean.

20 Agus an uair a thug Samuel air uile threubhan Israeil teachd am fagus, ghabhadh⁸ treubh Bheniamin.

21 Agus an uair a thug e air tréibh Bheniamin teachd am fagus a réir an teaghlach, ghabhadh teaghlach Mhatri: agus an uair a thug e air teaghlach Mhatri teachd am fagus a lion fear agus fear, ghabhadh Saul mac Chis: agus an uair a dh'iarr iad e, cha d'fhuaradh e.

22 Uime sin dh'fhiosraich iad fathast do'n Tighearn, an tigeadh an duine fathast an sin; agus fhreagair an Tighearna, Feuch, dh'fholaich se e féin am measg na h-airmeis.

23 Agus ruith iad, agus thug iad á sin e: agus an uair a sheas e am meadhon an t-sluaigh, bha e ni b' àirde na 'n sluagh uile, o' ghuaillibh agus o sin suas.

24 Agus thubhairt Samuel ris an t-sluagh uile, Am faic sibh esan a thagh an Tighearna, nach 'eil *neach* cosmhuil ris am measg an t-sluaigh uile? agus rinn an sluagh uile iolach⁹, agus thubhairt iad, Gu ma fada bèò an rìgh.

¹ doire. ² thig. ³ ionpaichear.

⁴ an nì sin a gheibh do làimh. Eabh.

⁵ iad an sin.

⁶ cò e 'athair?

⁷ iadsan.

⁸ i. e. le crannchur.

⁹ gair.

I. SAMUEL, X. XI. XII.

25 An sin dh'innis Samuel do'n t-sluagh lagh¹ na rìoghachd, agus sgriobh e ann an leabhar e, agus thaisg e suas am fianuis an Tighearn e: agus leig Samuel an sluagh uile air falbh, gach duine d'a thigh.

26 Agus chaidh Saul mar an ceudna dhachaidh gu Gibeah, agus chaidh maille ris daoine treun, aig an do bhean Dia r'an cridhe.

27 Ach thubhairt mic Bheliail, Cionnus a shaoras am fear so sinn? agus rinn iad dìmeas air, agus cha d'thug iad tidhlae sam bith d'a ionnsuidh: aeh dh'fhan esan 'na thosd.

CAIB. XI.

1 *Champaich Nahas an t-Amonach an aghaidh Iabeis-ghilead. 4 Chuir luchd-muinntir an àite sin teachdairean a dh'ionnsuidh Shaul a dh'iarraidh còmhnaidh. 7 Chruinnich esan sluagh Israeil ri chèile, agus bhuail e na h-Amonaich. 14 Dh'athnuadh-aicheadh a rìoghachd ann an Gilgal.*

AN sin chaidh Nahas an t-Amonach a suas, agus champaich e an aghaidh Iabeis-ghilead: agus thubhairt uile dhaoine Iabeis ri Nahas, Dean coimheangal ruinn, agus ni sinne seirbhis dhuit.

2 Agus fhreagair Nahas an t-Amonach iad, Air a' chumha so ni mi coimheangal ribh, gu'n spion mi mach gach suil dheas agaibh, agus gu'n cuir mi am mas-ladh² so air Israel uile.

3 Agus thubhairt seanairean Iabeis ris, Thoir dhuinn dàil sheachd làithean, a ehum gu'n cuir sinn teachdairean gu uile chrìochaibh Israeil; agus mur bi neach sam bith gu'r saoradh, an sin theid sinn a mach a d'ionnsuidh.

4 An sin thàinig na teachdairean gu Gibeah Shaul, agus dh'innis iad an sgeul ann an clusaibh an t-sluaigh: agus thog an sluagh uile suas an guth, agus ghuil iad.

Agus, Feuch, thàinig Saul an déigh a' bhuair as a' mhaclair; agus thubhairt Saul, Ciod a thàinig air an t-sluagh, gu bheil iad a' gul? agus dh'innis iad da sgeul dhaoine Iabeis.

6 Agus thuirling spiorad Dhé air Saul an uair a chual' e an sgeul sin, agus lasadh 'fhearg gu mòr.

7 Agus ghabh e cuing dhamh, agus ghearr e sìos 'nam miribh iad, agus chuir e iad air feadh uile chrìochan Israeil le làimh theachdairean, ag ràdh, Ge b'e nach tig a mach an déigh Shaul, agus an déigh Shamueil, mar son ithear r'a dhaimh: agus thuit eagal an Tighearn air an t-sluagh, agus thàinig iad a mach mar aon duine³.

8 Agus an uair a dh'àireamh e iad ann

am Besec, bha ann do chloinn Israeil trì cheud mìle, agus do fhir Iudah deich mìle fichead.

9 Agus thubhairt iad ris na teachdairibh a thàinig, Mar so their sibh ri fir Iabeis-ghilead, Am màireach, an uair a dh'fhàsas a' ghrian teth, bithidh cabhair⁴ agaibh. Agus thàinig na teachdairean, agus dh'innis iad sin do fhir Iabeis; agus bha aoibhneas orra.

10 Uime sin thubhairt fir Iabeis⁵, Am màireach theid sinn a mach d'ur n'ionnsuidh, agus ni sibh ruinn a réir gach ni a's àill leibh⁶.

11 Agus air an là màireach chuir Saul an sluagh 'nan trì buidhnibh; agus thàinig iad gu meadhan an fheachd ann am faire na maidne, agus bhuail iad na h-Amonaich gus an d'fhàs an latha teth: agus sgapadh iadsan a mhair, air chor as nach d'fhàgadh dithis diubh cuideachd.

12 Agus thubhairt an sluagh ri Samuel, Cò a thubhairt, Cha⁷ righich Saul os ar ceann? thugaibh an so na daoine a chum gu'n cuir sinn gu bàs iad.

13 Agus thubhairt Saul, Cha ehuirear duine gu bàs air au là so; oir an diugh dh'oibrich an Tighearna saorsa ann an Israeil.

14 An sin thubhairt Samuel ris an t-sluagh, Thigibh, agus rachamaid do Ghilgal, agus ath-nuadhaicheadh ann sin an rìoghachd.

15 Agus chaidh an sluagh uile gu Gilgal, agus rinn iad Saul an sin 'na rìgh am fianuis an Tighearn ann an Gilgal; agus dh'ìobair iad an sin iobairtean thabharta-sa-sith am fianuis an Tighearn: agus rinn Saul an sin agus fir Israeil uile gairdeachas mòr.

CAIB. XII.

1 *Dh'aidich an sluagh neo-chiontas Shamueil. 6 Chuir esan an cèill doibh na nithe iongantach a rinn Dia air an son, agus an eas-ùimhlachd dhasan le rìgh iarraidh dhoibh fèin.*

AGUS thubhairt Samuel ri h-Israel uile, Feuch, dh'èisd mi r'guth anns gach ni a thubhairt sibh rium, agus rinn mi rìgh os bhur ceann.

2 Agus a nis, feuch, tha'n rìgh ag imeachd roimhlìbh⁸: agus tha mise aosmhor agus ceannilath, agus, feuch, tha mo mhic maille ribh⁹: agus ghluais mise⁹ 'nur fianuis o m' oige gus an là 'n diugh.

3 Feuch, tha mi 'n so; thugaibh fianuis a'm' aghaidh an làthair an Tighearn agus an làthair 'Aoin ungta: cò esan o'n d'thug mi a dhamh? agus cò esan o'n d'thug mi 'asal? agus cò esan air an d'rinn mi feall? cò esan air an d'rinn mi ainneart?

¹ riaghailt, seòl.

² spid.

³ le aon rùn.

⁴ còmhmadh, saorsa.

⁵ fir Iabeis ri Nahas rìgh

⁶ a bhios maith 'nur suilìbh.

⁷ An.

⁸ 'na cheannard oirbh.

⁹ chaith mi mo bheatha.

agus cò esan o làimh an do ghabh mi duais a chum mo shùilean a dhalladh leatha? agus aisgidh mi¹ dhuibh.

4 Agus thubhairt iadsan, Cha d'rinn thu feall oirne, ni mò a rinn thu ainneart oirn, ni mò a ghabh thu ni air bith o làimh aoin duine.

5 Agus thubhairt e riu, Tha 'n Tighearna 'na fhianuis 'nur n-aghaidh, agus tha 'Aon ungta 'na fhianuis an diugh, nach d'fhuair sibh a'm² làimh-sa ni sam bith. Agus fhreagair iadsan *Tha e 'na fhianuis*.

6 Agus thubhairt Samuel ris an t-sluagh, *Is e 'n Tighearn a thog suas³ Maois agus Aaron*, agus a thug bhur n-aithriche mios á tìr na h-Eiphit.

7 A nis uime sin seasaibh, a chum gu'n toir mi breth oirbh⁴ an làthair an Tighearn, a thaobh uile ghnìomhara ceart an Tighearn, a rinn e dhuibhse agus do bhur n-aithrichibh.

8 An uair a thàinig Jacob a steach do'n Eiphit, agus a ghlaodh bhur n-aithriche ris an Tighearna, an sin chuir an Tighearna *d'an ionnsuidh* Maois agus Aaron, a thug bhur n-aithriche mach as an Eiphit, agus a thug orra còmhnuidh ghabhail anns an àite so.

9 Agus an uair a dhìchuimhnich iad an Tighearn an Dia, thug e thairis iad do làimh Shisera, ceannaird armailte Hasoir, agus do làimh nam Philisteach, agus do làimh rìgh Mhoib; agus chog iad 'nan aghaidh.

10 Agus ghlaodh iad ris an Tighearn, agus thubhairt iad, Pheacaich sinn, do bhrìgh gu'n do thréig sinn an Tighearn, agus gu'n d'rinn sinn seirbhis do Bhaalim agus Astarot; ach a nis saor sinn á làimh ar naimhdean, agus ni sinn seirbhis dhuit.

11 Agus chuir an Tighearn uaidh Ierubaal, agus Barac⁵, agus Iephtah, agus Samuel⁶, agus shaor e sibh á làimh bhur naimhdean air gach taobh, agus ghabh sibh còmhnuidh gu tèaruinte.

12 Agus an uair a chunnaic sibh gu'n d'thàinig Nahas rìgh chloinn Amoin 'nur n-aghaidh, thubhairt sibh riumsa, Ni h-eadh, ach rioghaichidh rìgh os ar ceann: an uair a b'e an Tighearna bhur Dia bhur rìgh.

13 A nis uime sin feuch an rìgh a thagh sibh, agus a dh'iarr sibh: agus, feuch, chuir an Tighearna rìgh os bhur ceann.

14 Ma bhios eagal an Tighearn oirbh, agus ma ni sibh seirbhis dha, agus ma dh'èisdeas sibh r'a ghuth, agus nach dean sibh ceannairc an aghaidh àithne an Tighearn⁷, an sin bithidh sibh féin tèar-

uinte⁸, agus mar an ceudna an rìgh a rioghaicheas os bhur ceann an déigh an Tighearna bhur Dé⁹.

15 Ach mur éisd sibh ri guth an Tighearn, agus gu'n dean sibh ceannairc an aghaidh àithne an Tighearn, an sin bithidh làmh an Tighearna 'nur n-aghaidh-sa, mar a bha i 'n aghaidh bhur n-aithriche.

16 A nis uime sin seasaibh agus faicibh an ni mòr so, a ni an Tighearna fa chomhair bhur sùl.

17 Nach 'eil foghar a' chruithneachd ann an diugh? gairmidh mise air an Tighearn, agus cuiridh e *nuas* tairneanach agus uisge; a chum gu'n tuisg agus gu'm faic sibh gu bheil bhur n-olc mòr, a rinn sibh ann an sealladh an Tighearna, le rìgh iarraidh dhuibh féin.

18 Agus ghairm Samuel air an Tighearn: agus chuir an Tighearn a nuas tairneanach agus uisge air an là sin: agus ghabh an sluagh uile eagal mòr roimh an Tighearn, agus roimh Shamuel.

19 Agus thubhairt an sluagh uile ri Samuel, Dean urnuigh air son do sheirbhisich ris an Tighearna do Dhia, a chum nach bàsaich sinn: oir chuir sinn r'ar peacannaibh uile an t-olc so, rìgh iarraidh dhuihn féin.

20 Agus thubhairt Samuel ris an t-sluagh, Na biodh eagal oirbh: (rinn sibh an t-olc so uile: gidheadh na tionndaidhibh a thaobh o'n Tighearn a leantuinn, ach deanaibh seirbhis do'n Tighearn le'r n-uile chridhe:)

21 Agus na tionndaidhibh a thaobh an déigh *nithe* faoin⁹, nach bi chum tairbhe dhuibh, agus nach saor sibh; oir is faoin-eas¹⁰ iad:)

22 Oir cha tréig an Tighearn a shluagh, air sgàth a mhòir àinne féin; do bhrìgh gu'm bu toil leis an Tighearna bhur deanamh 'nur sluagh dha féin.

23 Ach air mo shon-sa, nar leigeadh Dia gu'm peacaichinn an aghaidh an Tighearna, le sgur do urnuigh a dheanamh air bhur son: ach teagaisgidh mi dhuibh an t-slighe mhaith agus cheart.

24 A mhàin biodh eagal an Tighearn oirbh, agus deanaibh seirbhis dha ann am fìrinn le bhur n-uile chridhe: oir faicibh cia mòr na nithe a rinn e air bhur son.

25 Ach ma bhuanacheas sibh ann an droch dheanadas, sgrìosar arann sibh féin agus bhur rìgh.

CAIB. XIII.

1 Bhual Ionatan freiceadan nam Philisteach ann an Gèba. 5 Chruinnicheadh iadsan an ceann a chèile ann am Michmas gu cogadh ri Israel. 6 Teanntachd nan Israelach. 9 Thug Saul suas

¹ bheir mi air ais.

² a chruithnich, a rinn.

³ gu'n tagair, gu'n reusanach mi ribh.

⁴ Bedan.

⁵ Samson.

⁶ nach brosnach sibh an Tighearna gu fèirg.

⁷ bed. Eabh. ⁸ an déigh do'n Tighearna bhur Dia bhi 'na rìgh agaibh. ⁹ dhiahtan brèige. ¹⁰ neo-ni.

I. SAMUEL, XIII.

ìobairt-loisgte. 11 *Chronaich Samuel* e. 17 *Chuir na Philistich a mach trì cuideachdan do luchd-criche.*

BHA Saul deich bliadhna fichead a dh'aois an uair a thòisich e air rìoghachadh; agus rìghich e dà bliadhna os ceann Israeil.

2 An sin thagh Saul dha féin trì mìle fear do Israel; d'an robh dà mhìle maille ri Saul ann am Michmas, agus ann an sliabh Bhet-eil, agus bha mìle maille ri Ionatan ann an Gibeah Bheniamin: agus a' chuid eile do'n t-sluagh chuir e gach duine dhiubh dh'ionnsuidh a bhùtha.

3 Agus bhuaill Ionatan freiceadan nam Philisteach a bha ann an Geba¹; agus chuala na Philistich sin: agus shéid Saul an trompaid air feadh na tìre uile, ag ràdh, Cluinneadh na h-Eabhruidhich.

4 Agus chual' Israel uile iomradh gu'n do bhuaill Saul freiceadan nam Philisteach, agus mar an ceudna gu'n robh Israel air am meas gràineil leis na Philistich: agus ghairmeadh an sluagh an ceann a chèile an déigh Shaul gu Gilgal.

5 Agus chruinnicheadh na Philistich an ceann a chèile gu cogadh ri h-Israel, deich mìle fichead carbad², agus sè mìle marcach, agus sluagh mar a' ghaincann a ta air tràigh na fairge thaobh lìonmhoir-eachd: agus thàinig iad a nìos, agus champaich iad ann am Michmas, a làimh na h-àirde 'n ear o Bhet-abhen.

6 An uair a chunnaic fir Israeil gu'n robh iad ann an teanntachd, a chionn gu'n do dh'fhàich an armailte³ riu, an sin dh'fhòlaich an sluagh iad féin ann an uamhaibh, agus ann an droighnich⁴, agus ann an creagaibh, agus ann an daingneachaibh⁵, agus ann an slochdaibh.

7 Agus chaidh cuid do na h-Eabhruidhich thar⁶ Iordan gu tìr Ghad, agus Ghilead: ach bha Saul fathast ann an Gilgal, agus bha'n sluagh 'na dhéigh uile air chrith.

8 Agus dh'fheith e seachd làithean, gu ruig an t-àm àraidh a shuidhich⁷ Samuel: ach cha d'fhàinig Samuel gu Gilgal: agus sgapadh an sluagh uaith.

9 Agus thubhairt Saul, Thugaibh am' ionnsuidh an so iobairt-loisgte, agus tabhartasan-sith. Agus thug e suas an iobairt-loisgte.

10 Agus co luath as a chuir e crìoch air an iobairt-loisgte a thoirt suas, feuch, thàinig Samuel; agus chaidh Saul a mach 'na choinneamh a chum gu'm beannaicheadh e dha.

11 Agus thubhairt Samuel, Ciod a rinn

thu? Agus fhreagair Saul, A chionn gu'm faca mi gu'n robh an sluagh air an sgapadh uam, agus nach d'fhàinig thu an taobh a stigh do'n àm shuidhichte, agus gu'n do chruinnich na Philistich iad féin an ceann a chèile gu Michmas;

12 Uime sin thubhairt mi, A nis thig na Philistich a nuas orm gu Gilgal, agus cha do chuir mi athchuinge dh'ionnsuidh an Tighearna: rinn mi éigin uime sin orm féin⁸, agus thug mi suas an iobairt-loisgte.

13 Agus thubhairt Samuel ri Saul, Rinn thu gu h-amaideach: cha do ghléidh thu àithne an Tighearna do Dhé, a dh'àithn e dhuit; oir a nis dhaingnicheadh an Tighearna do rìoghachd air Israel gu bràth.

14 Ach a nis cha seas do rìoghachd: dh'iarr an Tighearna dha féin duine a réir a chridhe féin, agus dh'àithn an Tighearna dha bhi 'na cheannard air a shluagh, a chionn nach do ghléidh thusa an nì a dh'àithn an Tighearna dhuit.

15 Agus dh'éirich Samuel⁹, agus chaidh e suas o Ghilgal gu Gibeah Bheniamin: agus dh'àireamh Saul an sluagh a bha làthair¹⁰ maille ris, nu thimchioll se ceud fear.

16 Agus dh'fhan Saul, agus a mhac Ionatan, agus an sluagh a bha làthair maille riu, ann an Gibeah Bheniamin: ach champaich na Philistich ann am Michmas.

17 Agus thàinig an luchd-millidh¹¹ a mach à camp nam Philisteach 'nan trì cuideachdaibh: thionndaidh aon chuideachd dhiubh do 'n t-slighe dh'ionnsuidh Ophrah, gu tìr Shaul:

18 Agus thionndaidh cuideachd eile do'n t-slighe dh'ionnsuidh Bhet-horoin: agus thionndaidh cuideachd eile do shlighe na crìche, a tha 'g amharc ri gleann Sheboim, a dh'ionnsuidh an fhàsaich.

19 A nis cha d'fhuaradh gobha ann an tìr Israeil uile: (oir thubhairt na Philistich, Air eagal gu'n dean na h-Eabhruidhich dhoibh féin claidhean no sleaghan:)

20 Uimesin chaidh 'na h-Israelich uile sìos a dh'ionnsuidh nam Philisteach, gach duine a gheurachadh a shuic, agus a chaibe, agus a thuaighe, agus a phicaid.

21 Gidheadh bha eìghe¹² aca air son nam picaidean, agus air son nan soc, agus air son nan trì-mheurach¹³, agus air son nan tuaghan, agus a gheurachadh nam bior.

22 Mar sin thachair e ann an là a' chatha, nach d'fhuaradh aon chuid

¹ Gibeah.

² sluagh an naimhdean.

³ ùraibh, ionadaibh àrda.

⁴ thubhairt. Eabh.

⁵ trì mìle carbad.

⁶ dislaimibh.

⁷ thair, thairis air.

⁸ ghabh mi misneach.

⁹ Saul.

¹⁰ luchd-criche.

¹¹ nan gabhal; forks, tridents. Sasg.

¹² a fhuaradh. Eabh.

¹³ liobhan; file. Sasg.

claidhcamh no sleagh ann an làimh neach sam bith do'n t-sluagh, a *bha* maille ri Saul agus Ionatan: ach fhuaradh aig Saul agus aig a mhac Ionatan.

23 Agus chaidh freiceadan nam Philisteach a mach gu bealach¹ Mhichmais.

CAIB. XIV.

1 *Bhuail Ionatan agus fear iomchair 'arm freiceadan nam Philisteach. 17 Thàinig Saul agus 'fheachd a dh'ionnsuidh a' chatha. 21 Chuir e an sluagh fo mhionnaibh nach itheadh iad biadh gu feargar, a chum gu'n diolar e air a naimhdeibh. 27 Shaoradh Ionatan leis an t-sluagh.*

ANIS air là àraidh thubhairt Ionatan mac Shuail ris an òganach a dh'iomchair² 'arm, Thig, agus rachamaid thairis gu freiceadan nam Philisteach, a tha air an taobh thall: ach cha d'innis e d'a athair.

2 Agus dh'fhan Saul anns a' chuid a b'fhaide mach do Ghibeah, fuidh chraoibh pòmgranait, a *tha* ann am Migron: agus *bha* 'n sluagh a *bha* maille ris nuu thimchioll s' ceud fear.

3 Agus *bha* Ahiah mac Ahituibh, bhràthar Ichaboid, mhic Phinehais, mhic Eli sagairt an Tighearn ann an Siloh, ag iomchar ephoid. Ach cha robh fios aig an t-sluagh gu'n d'fhalbh Ionatan.

4 Agus eadar na bealaichean, air an d'iarr Ionatan dol thairis a dh'ionnsuidh freiceadain nam Philisteach, *bha* creag gheur³ air aon taobh, agus creag gheur air an taobh eile; agus *b'e* ainm creige dhiubh Boses, agus ainm na creige eile Seneh.

5 Bha suidheachadh creige dhiubh o thuath⁴ fa chomhair Mhichmais, agus suidheachadh na creige eile o dheas fa chomhair Ghibeah.

6 Agus thubhairt Ionatan ris an òganach a dh'iomchair 'arm, Thig, agus rachamaid thairis a dh'ionnsuidh freiceadain nan daoine neo-thimchioll-gheartha ud: theagamh gu'n oibrich an Tighearn air ar son: oir cha 'n *eil* bacadh air an Tighearna saoradh le mòran no le beagan.

7 Agus thubhairt fear iomchair 'arm ris, Dean gach *ni* a th'ann ad chridhe; tionndaidh thu fèin⁵; feuch, *tha* mise maille riut a réir do chridhe.

8 An sin thubhairt Ionatan, Feuch, théid sinn thairis a dh'ionnsuidh nan daoine ud, agus nochdaidh sinn sinn fèin doibh.

9 Ma their iad mar so ruinn, Fanaibh gus an tig sinn d'ur n-ionnsuidh; an sin seasaidh sinn 'nar n-àite, agus cha téid sinn suas d'an ionnsuidh.

10 Agus ma their iad mar so, Thigibh a nìos d'ar n-ionnsuidh-ne; an sin théid

sinn suas, oir thug an Tighearna thairis iad d'ar làimh: agus *bithidh* so 'na chomh-ara dhuinn.

11 Agus nochd iad le chéile iad fèin do fheiceadan nam Philisteach: agus thubhairt na Philistich, Feuch, *tha* na h-Eabhruidhich a' teachd a mach as na tollaibh⁶, anns an d'fholaich siad iad fèin.

12 Agus fhreagair fir an fheiceadain Ionatan agus fear iomchair 'arm, agus thubhairt iad, Thigibh a nìos d'ar n-ionnsuidh-ne, agus nochdaidh sinne dhuibh ni. Agus thubhairt Ionatan ri fear iomchair 'arm, Thig a nìos a'm' dhéigh; oir thug an Tighearna thairis iad do làimh Israeil.

13 Agus chaidh⁷ Ionatan suas air a làmhann agus air a chosan, agus fear iomchair 'arm 'na dhéigh: agus thuit iad roimh Ionatan; agus mharbh fear iomchair 'arm 'na dhéigh.

14 Agus bha an ceud àr sin a rinn Ionatan agus fear iomchair 'arm, mu thimchioll fichead fear, an taobh a stigh mar gu'm b'ann do leth-acair fhearainn, a *dh'fheadh* cuing *dhamh ar ann an là*.

15 Agus bha ball-chrith anns an fheachd, sa' mhachair, agus am measg an t-sluaigh uile: bha crith mar an ceudna air an fheiceadan agus air an luchd-millidh fèin, agus chrìochnaich an talamh; agus bha i 'na crith ro mhòir⁸.

16 Agus dh'amhairc luchd-faire Shauil ann an Gibeah Bheniamin; agus, feuch, leagh am mòr-shluagh as, agus dh'fhalbh iad a' bualadh sìos⁹ a *chéile*.

17 An sin thubhairt Saul ris an t-sluagh a *bha* maille ris, Gabhaibh àireamh a nis, agus faicibh cò a dh'fhalbh uainn. Agus an uair a dh'àireamh iad, feuch, cha robh Ionatan agus fear iomchair 'arm an sin.

18 Agus thubhairt Saul ri Ahiah, Thoir an so àire Dhé; oir bha àire Dhé san àm sin maille ri cloinn Israeil.

19 Agus an uair a bha Saul a' labhairt ris an t-sagart, chaidh a' chonghair a bha ann am feachd nam Philisteach air a h-aghaidh, agus mheudaich i; agus thubhairt Saul ris an t-sagart, Tarruing air a h-ais do làmh.

20 Agus chruinnich Saul agus an sluagh uile a *bha* maille ris iad fèin an ceann a chéile, agus thàinig iad a dh'ionnsuidh a' chatha; agus, feuch, bha claidheamh gach fir an aghaidh a choimhearsnaich, agus *bha* amhluaidh¹⁰ ro mhòr ann.

21 Agus na h-Eabhruidhich a bha maille ris na Philistich roimhe sin, a chaidh suas maille riu do'n champ o'n tìr mu'n-cuairt,

¹ slighe chumhainn; dol thairis. Eabh.

² ghùlain. ³ scor chreige; fìacail chreige. Eabh.

⁴ bha aghaidh aoin charrage ri tuath.

⁵ imich ge b'e taobh is miann leat.

⁶ còsaibh, frògaibh.

⁷ streap, dhìr.

⁸ 'na crith Dhé. Eabh. ⁹ an so agus an sin.

¹⁰ dioghbhail, sgrios.

I. SAMUEL, XIV.

thionndaidh iadsan mar an ceudna gu bhli leis na h-Israelich, a *bha* maille ri Saul agus Ionatan.

22 Agus an uair a chuala na fir sin uile do Israel, a dh'fholaich iad féin ann an sliabh Ephraim, gu'n do theich na Philistich, dhlùth-lean iadsan mar an ceudna 'nan déigh anns a' chath.

23 Mar sin shaor an Tighearn Israel air an là sin: agus chaidh an cath thairis gu Bet-abhen.

24 Agus thàinig fir Israeil am fagus¹ air an là sin, agus chuir Saul an sluagh fo mhionnaibh, ag ràdh, Mallaichte gu *robh* am fear a dh'itheas biadh² gu feasgar, a chum gu'n diolar mi air mo naimhdibh: agus cha do bhlais neach air bith do'n t-sluagh biadh.

25 Agus thàinig an sluagh uile³ gu coille, agus bha mìl air aghaidh na macharach.

26 Agus an uair a thàinig an sluagh do'n choille, feuch, shìl a' mhìl sìos; ach cha do chuir duine sam bith a làmh a dh'ionnsuidh a bheoil; oir bha eagal nam mionnan air an t-sluagh.

27 Ach cha chuala Ionatan an uair a chuir 'athair an sluagh fuidh na mionnaibh: uime sin shìl e mach bàrr na slait a *bha* 'na làimh, agus thum e i ann an cìr mheala, agus chuir⁴ e a làmh gu 'bheul, agus shoillsicheadh⁵ a shùilean.

28 An sin fhreagair fear do'n t-sluagh, agus thubhairt e, Chuir t'athair an sluagh fuidh mhionnaibh team, ag ràdh, Mallaichte *gu robh* an duine a dh'itheas biadh an diugh. Agus bha'n sluagh air fannachadh.

29 An sin thubhairt Ionatan, Chuir m'athair an tìr fo bhuaireas: faicibh, guidheam oirbh, cionnus a ta mo shùilean air an soillseachadh, do bhrìgh gu'n do bhlais mi beagan do 'u mhìl so.

30 Cia mò gu mòr, nam biodh an sluagh air itheadh gu saor an diugh do chreich an naimhdean, a fhuair iad? oir nach bith-eadh a nis àr ni bu mhò am measg nam Philisteach?

31 Agus bhuail iad air an là sin na Philistich o Mhichmas gu Aialon: agus bha 'n sluagh air fannachadh gu mòr.

32 Agus leum an sluagh air a' chreich, agus ghabh iad caoraich, agus buar, agus laoigh, agus mharbh iad air an talamh iad: agus dh'ith an sluagh iad leis an fhuil.

33 Agus dh'innis iad do Shaul, ag radh, Feuch, tha'n sluagh a' peacachadh an aghaidh an Tighearna, le itheadh maille

ris an fhuil⁶. Agus thubhairt esan, Pheac aich sibh: caruichibh a m' ionnsuidh an diugh clach mhòr⁷.

34 Agus thubhairt Saul, Sgaoilibh sibh féin am measg an t-sluaigh, agus abraibh riu, Thugaibh a m' ionnsuidh an so gach duine a mhart⁸, agus gach duine a chaora, agus marbhaibh iad an so agus ithibh; agus na peacaichibh an aghaidh an Tighearna le itheadh maille ris an fhuil. Agus thug an sluagh uile gach duine a mhart leis⁹ air an oidheche sin, agus mharbh iad an sin iad.

35 Agus thog Saul altair do'n Tighearna; B'i sin, a' cheud altair a thog e¹⁰ do'n Tighearn.

36 Agus thubhairt Saul, Rachamaid sìos an déigh nam Philisteach san oidheche, agus creaclamaid iad gu solus na maidne, agus na fàgamaid fear dhiubh. Agus thubhairt iadsan, Dean gach ni a's maith leat¹¹. An sin thubhairt an sagart, Thigeamaid am fagus an so dh'ionnsuidh Dhe.

37 Agus dh'iarr Saul comhairle air Dia, An téid mi sìos an déigh nam Philisteach? an toir thu thairis iad do làimh Israeil? ach cha do fhreagair se e air an là sin.

38 Agus thubhairt Saul, Thigibh am fagus an so, sibhse uile mhaith¹² an t-sluaigh, agus biodh fios agaibh, agus faicibh, c'àit an robh am peacadh so an diugh.

39 Oir mar is beò an Tighearn, a shaor Israel, ged robh e ann mo mhac Ionatan, gu cinnteach gheibh e bàs. Ach cha do fhreagair duine e do'n t-sluagh uile.

40 An sin thubhairt e ri h-Israel uile, Bithibh-se air aon taobh, agus bithidh mise agus mo mhac Ionatan air an taobh eile. Agus thubhairt an sluagh ri Saul, Dean an ni a's maith leat.

41 Uime sin thubhairt Saul ris an Tighearna Dia Israeil, Thoir seachad *crann-chur* cothromach¹³. Agus ghabhadh Saul agus Ionatan; ach chaidh an sluagh as.

42 Agus thubhairt Saul, Tilgibh *crann-chur* eadar mise agus mo mhac Ionatan. Agus ghabhadh Ionatan.

43 An sin thubhairt Saul ri Ionatan, Innis dhomh ciod a rinn thu. Agus dh'innis Ionatan da, agus thubhairt e, Gu deimhin le bàrr na slait a *bha* a'm' làimh, bhlais mi beagan meala; agus, feuch, am faigh mi bàs?

44 Agus thubhairt Saul, Gu'n deanadh Dia mar sin, agus tuille mar an ceudna: oir gu cinnteach gheibh thu bàs, a Ionatan¹⁴.

¹ bha fir Israeil ann an airc.

² aran. Eabh.

³ uile sluagh na tìre. ⁴ phill, thionndaidh. Eabh.

⁵ chunnaic.

⁶ air an fhuil.

Eabh.

⁷ i. e. chum altarach.

⁸ a tharbh.

⁹ 'na làimh. Eabh.

¹⁰ I sin thòisich e 'a togail

mar altair. Eabh.

¹¹ a'd' shùilb. Eabh.

¹² oisinnnean.

¹³ Tumim. Eabh.

¹⁴ bàsaichidh Ionatan.

45 Agus thubhairt an sluagh ri Saul, Am faigh Ionatan bàs, a dh'òibrich an t-saorsa mhòr so ann an Israel? Nar leigeadh Dia: *mar* is beò an Tighearna, cha tuit *aon ròineag*¹ do fholt a chinu gu làr; oir maille ri Dia dh'òibrich e an diugh. Uime sin shaor an sluagh Ionatan, agus cha d'fhuair e bàs.

46 An sin chaidh Saul suas o leantuinn nam Philisteach: agus dh'fhalbh na Philistich d'an àite féin.

47 Agus ghabh Saul an ròghachd os ceann Israeil, agus chog e air gach làmh an aghaidh a naimhde gu léir, an aghaidh Mhoaiùb, agus an aghaidh chloinn Amoin, agus an aghaidh Edoim, agus an aghaidh rìghre Shobah, agus an aghaidh nam Philisteach: agus ge b'e taobh a thionndaidh e, chlaoidh e *iad*².

48 Agus thog e sluagh, agus bhuail e na h-Amalecich, agus shaor e Israel á làmh na muinntir a bha 'gam milleadh³.

49 A nis b'iad mic Shaul Ionatan, agus Isui, agus Melchisua: agus b'iad so ainmean a dhithis nighean; ainm na ceudghin Merab, agus ainm na h-ighinn a b'òige Michal.

50 Agus b'e ainm mnà Shaul Ahinoam, nighean Ahimahais: agus b'e ainm ceannaird a shluaigh Abner mac Neir, bràthair-athar Shaul.

51 Agus b'e Cis athair Shaul: agus b'e Ner athair Abneir, mac Abieil.

52 Agus blia cogadh dian an aghaidh nam Philisteach rè uile lùithean Shaul: agus an uair a chitheadh Saul fear làidir sam bith no fear treun sam bith, ghabhadh⁴ e d'a ionnsuidh e.

CAIB. XV.

1 Chuireadh Saul a sgrios Amaleic. 6 Nochd e caoimheas do na Cenic. 7 Bhuail na h-Amalecich, ach chaomhain e na caoraich agus am buar.

10 Air son 'eas-ùmhachd bha corruich air Dia 'na aghaidh, agus chuir e cùl ris o bhi 'na rìgh. 32 Mharbh Samuel Agag.

AGUS thubhairt Samuel ri Saul, Chuir an Tighearna mi gu thusa ungadh a'd' rìgh os ceann a shluaigh, os ceann Israeil: a nis uime sin éisd ri briathraibh⁵ an Tighearna.

2 Mar so tha Tighearna nan sluagh, ag ràdh, Is cuimhne leam⁶ ciod a rinn na h-Amalecich air na h-Israelich, cionnus a chuir iad 'nan aghaidh san t-slighe, 'nuair a thàinig iad a nìos as an Eiphit.

3 A nis falbh, agus buail na h-Amalecich, agus sgrios⁷ gu tur gach *ni a th'*aca, agus na caomhain iad; ach marbh araon fear agus bean, leanabh agus cìochran⁸, damh agus caora, càmhail agus asal.

4 Agus chruinnich Saul an sluagh an ceann a chéile, agus dh'àireamh e iad ann an Telaim, dà cheud mìle coisiche, agus deich mìle fear do Iudah.

5 Agus thàinig Saul gu baile le Amalec, agus rinn e feall-fholach anns a' ghleann⁹.

6 Agus thubhairt Saul ris na Cenic, Falbhaibh, imichibh á so, rachaibh sìos o mheasg nan Amaleceach, air eagal gu'n sgrios mi sibh maille ri u: oir nochd sibhse caoimheas do chloinn Israeil uile 'nuair a thàinig iad a nìos as an Eiphit. Uime sin dh'imich na Cenic o mheasg nan Amaleceach.

7 Agus bhuail Saul na h-Amalecich o Habbilah *gus* an tig thu gu Sur, a *tha* fa chomhair na h-Eiphit.

8 Agus ghluh e Ágag rìgh nan Amaleceach beò, agus sgrios e 'n sluagh uile le faobhar a' chlaidheimh.

9 Agus chaomhain Saul agus an sluagh Agag, agus a' chuid a b'fhearr do na caoraich, agus do'n bhuar, agus do na *beathaichibh* reamhra, agus do na h-uan-aibh, agus do gach *ni a bha* maith, agus cha b'àill leo an sgrios gu tur; ach gach *ni a bha* tàireil agus suarrach¹⁰, sin sgrios iad gu tur.

10 An sin thàinig focal an Tighearna dh'ionnsuidh Shamuel, ag ràdh,

11 Is aithreach leam gu'n d'rinn mi Saul 'na rìgh; oir thionndaidh e air ais o m' leantuinn, agus cha do choimhlion e m'aitheantan¹¹. Agus chuir sin doilgheas air Samuel, agus ghlaodh e ris an Tighearna rè na h-oidhche.

12 Agus an uair a dh'éirich Samuel gu moch a choinneachadh Shaul sa' mhaduinn, dh'innseadh do Shamuel, ag ràdh, Thàinig Saul gu Carmel, agus, feuch, chuir e suas dha féin clach-chuimhneachain¹², agus dh'imich e mu'n cuairt, agus ghabh e air aghaidh, agus chaidh e sìos gu Gilgal.

13 Agus thàinig Samuel gu Saul; agus thubhairt Saul ris, Beannaichte *gu'n robh* thusa o'n Tighearna; choimhlion mis' àithne an Tighearna.

14 Agus thubhairt Samuel, Ciod is *ciall* ma ta do mhéilich nan caorach so ann am chluasaibh, agus do gheumnaich a chruidh a tha mi a' cluinntinn?

15 Agus thubhairt Saul, o na h-Amalecich thug siad iad; oir chaomhain an sluagh a' chuid a b'fhearr do na caoraich, agus do'n bhuar, a chum *an* iobradh do'n Tighearna do Dhia; agus a' chuid cile sgrios sinn gu tur.

16 An sin thubhairt Samuel ri Saul, Fuirich¹³, agus innsidh mi dhuìt ciod a

¹ fhuiltean. ² bhuin e ri u mar dhaoine ciontach.

³ gam fasachadh, 'gan aitheachadh.

⁴ chruinnicheadh. Eabh.

⁵ guth bhriathran. Eabh. ⁶ Tha e ann am bheachd.

⁷ sgriosuibh. Eabh.

⁸ naoidhean na cìche.

⁹ agus chaidh e sìos do'n ghleann.

¹⁰ seargta.

¹¹ mo bhriathran. Eabh.

¹² àite; lann. Eabh.

¹³ Leig dhomh.

I. SAMUEL, XV. XVI.

thubhairt an Tighearna rium¹ an nochd. Agus thubhairt e ris, Abair romhad.

17 Agus thubhairt Samuel, An uair a bha thu beaga² d' shùilibh féin nach d' rinn-eadh thu a' d' cheann air treubhaibh Israeil? agus dh'ung an Tighearna thu a' d' rìgh os ceann Israeil.

18 Agus chuir an Tighearna thu air thurus, agus thubhairt e, Falbh, agus sgrios gu tur na peacaich na h-Amalecich, agus cog 'nan aghaidh gus an cuir thu³ as doibh.

19 C'ar son ma ta nach d' éisd thu ri guth an Tighearna, ach a leum thu air a' chreich⁴, agus a rinn thu olc ann an suilibh an Tighearna?

20 Agus thubhairt Saul ri Samuel, Seadh, dh' éisd mi ri guth an Tighearna, agus dh' imich mi air an t-slighe air an do chuir an Tighearna mi, agus thug mi leam Agag, rìgh Amaleic, agus sgrios mi gu tur na h-Amalecich:

21 Ach ghabh an sluagh do'n chreich, caoraich agus buar, toiseach⁵ nan nìthe bu chòir a bhi air an sgrios gu tur, a chum an iobradh do'n Tighearna do Dhia ann an Gilgal.

22 Agus thubhairt Samuel, Am bheil tlachd aig an Tighearna ann an tabhartas-aibh-loisgte agus an iobairtibh, mar ann an ùmhlaich do ghuth an Tighearna? Feuch, is fearr ùmhlaich na iobairt, agus aire a thabhairt na saill reitheachan.

23 Oir mar pheacadh na druidheachd *tha* ceamairc, agus mar aingidheachd iodhol-aoraidh⁶ *tha* rag-mhuineileachd⁷: a chionn gu'n do chuir thusa cùl ri⁸ focal an Tighearna, chuir esan mar an ceudna cùl riutsa o bhi d' rìgh.

24 Agus thubhairt Saul ri Samuel, Pheacaich mi, oir bhris mi àithne an Tighearna, agus do bhrìathra-sa; a chionn gu'n robh eagal orm roimh 'n t-sluagh agus gu'n d' éisd mi r'an guth.

25 A nis uime sin, guidheam, ort lagh mo pheacadh, agus pill maille rium, a chum gu'n dean mi aoradh do'n Tighearna.

26 Agus thubhairt Samuel ri Saul, Cha phill mi maille riut; oir chuir thu cùl ri focal an Tighearna, agus chuir an Tighearna cùl riutsa o bli d' rìgh air Israeil.

27 Agus an uair a thionndaidh Samuel mu'n cuairt gu falbh, rug e air foir 'fhalluinne, agus reubadh i.

28 Agus thubhairt Samuel ris, Reub an Tighearna rìoghachd Israeil dhìot-sa an diugh, agus thug e i do d' choimhearsnach, a' s fearr na thusa.

29 Agus mar an ceudna cha dean Neart⁹ Israeil breug, agus cha ghabh e aith-

reachas: oir cha duine e gu'n gabhadh e aithreachas.

30 An sin thubhairt e, Pheacaich mi; gidheadh a nis thoir urram dhomh, guidheam ort, am fianuis sheanairean mo shluaigh, agus am fianuis Israeil, agus pill maille rium, a chum gu'n dean mi aoradh do'n Tighearna do Dhia.

31 Agus phill Samuel an déigh Shaul; agus rinn Saul aoradh do'n Tighearna.

32 An sin thubhairt Samuel, Thugaibh an so a m' ionnsuidh-sa Agag rìgh nan Amaleceach: agus thàinig Agag d'a ionnsuidh gu suilbhir¹⁰. Agus thubhairt Agag, Gu cinnteach chaidh searbhas¹¹ a bhàis seachad.

33 Agus thubhairt Samuel, Mar a rinn do chlaidheamh-sa mnàigun chlann¹², mar sin bithidh do mhàthair gun chlann am measg bhan. Agus thug Samuel fa' near Agag a ghearradh sìos 'na mhiribh am fianuis an Tighearna ann an Gilgal.

34 An sin dh' imich Samuel gu Ramah; agus chaidh Saul suas d'a thigh gu Gibeah Shaul.

35 Agus cha d' thàinig Samuel tuilleadh a dh' fhaicinn Shaul gu latha a bhàis; gidheadh, rinn Samuel bròn air son Shaul: agus b'aithreach leis an Tighearna gu'n d' rinn e Saul 'na rìgh air Israeil.

CAIB. XVI.

1 Chaidh Samuel gu Bet-lehem, agus dh' ung e Daibhidh mac Iese. 14 Chuir droch spiorad o'n Tighearna dragh air Saul. 19 Thugadh Daibhidh 'na lathair.

A GUS thubhairt an Tighearna ri Samuel, Cia fhad a ni thu bròn air son Shaul, agus gu'n do chuir mise cùl ris o rìoghachadh os ceann Israeil? lion do chorn¹¹ le h-oladh, agus falbh, cuiridh mise thu gu Iese am Bet-lehemeach; oir fhuair mi mach¹² am measg a chuid mac rìgh dhomh féin.

2 Agus thubhairt Samuel, Cionnus a dh' fhalbhas mi? oir cluinidh Saul, agus marbhadh e mi. Agus thubhairt an Tighearna, Thoir agh leat, agus abair, A dh' iobradh do'n Tighearna thàinig mi.

3 Agus gairm air Iese dh' ionnsuidh na h-iobairte, agus bheir mise fios dhuit ciod a ni thu: agus ungaidh tu dhomhsa esan a dh' ainmicheas mi dhuit.

4 Agus rinn Samuel an ni sin a labhair an Tighearna, agus thàinig e gu Bet-lehem: agus chrìochnaich seanairean a' bhaile r'a theachd, agus thubhairt iad, An ann an sìth a tha thu teachd?

5 Agus thubhairt esan, Ann an sìth: a dh' iobradh do'n Tighearna thàinig mi:

¹ sibh. ² a thionndaidh thu dh' ionnsuidh na creiche. ³ roghadh. ⁴ aingidheachd agus iodhol-aoradh. ⁵ reasgachd. ⁶ gu'n d' rinn thu dìmeas air. ⁷ Buaidh, Aon sìorruidh.

⁸ o gheimhlibh. ⁹ searbhadas, seirbhe. ¹⁰ chloinn. ¹¹ t' adhare. ¹² chunnaic mi. Eabh.

naomhaichibh sibh féin, agus thigibh maille rium a dh'ionnsuidh na h-ìobairte. Agus naomhaich e Iese agus a mhic, agus ghairm e iad a dh'ionnsuidh na h-ìobairte.

6 Agus an uair a thàinig iad, dh'amhairc e air Eliab, agus thubhairt e, Gu cinnteach am fianuis an Tighearna *tha* 'aon ungtasan.

7 Ach thubhairt an Tighearna ri Samuel, Na h-amhairc air a ghnùis, no air àirde a phearsa, a chionn gu'n do chuir mise cùl ris; oir cha'n *fhaic an Tighearna*¹ mar a chi duine; oir amhaircidh an duine air coslas an taobh a muigh², ach amhaircidh an Tighearna steach air a' chridhe.

8 An sin ghairm Iese air Abinadab, agus thug e air gabhail seachad fa chomhair Shamueil: agus thubhairt e, Ni mò a thagh an Tighearna *e* so.

9 An sin thug Iese air Samah dol seachad: agus thubhairt e, Ni mò a thagh an Tighearna *e* so.

10 An sin thug Iese air seachdnar d'a mhic dol seachad fa chomhair Shamueil: agus thubhairt Samuel ri Iese, Cha do thagh an Tighearna *iad* so.

11 Agus thubhairt Samuel ri Iese, Am bheil d' mhic uile an so? Agus thubhairt esan, Dh'fhàgadh fathast *am mac* a's òige, agus, feuch, *tha e* ag ionaltradh³ nan caorach. Agus thubhairt Samuel ri Iese, Cuir *fios air*, agus thoir an so e; oir cha suidh sinn sios⁴ gus an tig e 'n so.

12 Agus chuir e *fios air*, agus thug e steach e: a nis *bha e* ruiteach, agus sgiamhach 'na ghnùis⁵, agus maiseach ri amharc air. Agus thubhairt an Tighearna, Eirich, ung e; oir *is e* so esan.

13 Agus ghabh Samuel an corn oladh, agus dh'ung se e am measg a bhràithrean: agus thuirling spiorad an Tighearna air Daibhidh, o'n là sin a mach. Agus dh'éirich Samuel, agus chaidh e gu Ramah.

14 Ach dh'fhalbh spiorad an Tighearna o Shaul, agus chuir droch spiorad o'n Tighearna buaireas⁶ air.

15 Agus thubhairt seirbhisich Shaul ris, Feuch a nis, *tha* droch spiorad o Dhia a' cur buaireas ort.

16 Thugadh a nis ar tighearn àithne do d' sheirbhisich *a tha* ann ad fhianuis, gu'n iarr iad a mach duine a chluicheas⁷ gu h-ealanta air clàrsaich: agus an uair a bhios an droch spiorad o Dhia ort, an sin cluichidh esan le a làimh, agus bithidh tusa gu maith,

17 Agus thubhairt Saul r'a sheirbhisich,

Faighibh a nis dhomh duine a chluicheas gu maith, agus thugaibh a m' ionnsuidh *e*.

18 An sin fhreagair aon do na h-òglaich, agus thubhairt e, Feuch, chunnaic mi mac le Iese am Bet-lehemeach, a chluicheas gu h-ealanta⁸, agus *a tha* treun ann an neart, agus 'na fhear cogaidh, agus glic ann an gnothuichibh⁹, agus na dhuine maiseach; agus *tha 'n* Tighearna maille ris.

19 Uime sin chuir Saul teachdairean a dh'ionnsuidh Iese, agus thubhairt e, Cuir a m' ionnsuidh Daibhidh do mhac, a *tha* maille ris na caorach.

20 Agus ghabh Iese asal *luchdaichte le h-aran*¹⁰, agus searrag fhiona, agus meann do na gabhraibh, agus chuire *iad* le làimh Dhaibhidh a mhic a dh'ionnsuidh Shaul.

21 Agus thàinig Daibhidh a dh'ionnsuidh Shaul, agus sheas e 'na fhianuis; agus ghràdhach e gu mòr e, agus bha e aige 'na fhear iomchair 'arm.

22 Agus chuir Saul *teachdaire* dh'ionnsuidh Iese, ag ràdh, Seasadh, guidheam ort, Daibhidh a m' fhianuis; oir fhuair e deadh-ghean a m' shùilibh¹¹.

23 Agus an uair a bha'n droch spiorad o Dhia air Saul, an sin ghabh Daibhidh clàrsach, agus chluich e le a làimh: agus bha fois¹² aig Saul, agus bha e gu maith; oir dh'fhalbh an droch spiorad uath.

CAIB. XVII.

1 Chruinnicheadh slòigh nam Philisteach an ceann a chèile gu cath an aghaidh Israeil. 4 Thug Goliath dùbhlàn do chloinn Israeil. 38 Mharbh Daibhidh e.

ANIS chruinnich na Philistich an slòigh an ceann a chèile gu cath, agus chruinnicheadh iad aig Sochoh, a *bhuineas* do Iudah; agus champaich iad eadar Sochoh agus Asecah, ann an Ephesdamim¹³.

2 Agus chruinnicheadh Saul agus fir Israeil an ceann a chèile, agus champaich iad ann an gleann Elah¹⁴, agus chuir iad an cath an ordugh¹⁵, an aghaidh nam Philisteach.

3 Agus shleas na Philistich air sliabh air aon taobh, agus sheas Israel air sliabh air an taobh eile: agus *bha* gleann eatorra.

4 Agus thàinig curaidh¹⁶ a mach a camp nam Philisteach, d'am b'ainm Goliath o Ghat, *anns an robh* sè¹⁷ làmhan-coille agus réis air àirde.

5 Agus *bha* clogaid¹⁸ umha air a cheann, agus *bha e* air 'éideadh le lùirich mhàilich¹⁹: agus b'e cothrom na lùiriche cùig mìle sceil umha.

¹ oir cha'n fhaic mise. ² air a' ghnùis; air na shùilibh. Eabh. ³ a' biadhadh, a' gleidheadh.

⁴ i. e. mu'n cuairt air a' bhòrd.

⁵ shùilean àluinn aige. Eabh. ⁶ dragh, uamhann.

⁷ sheinneas. ⁸ a tha eòlach air cluicheadh.

⁹ am focal, an comhairle. ¹⁰ homer arain.

¹¹ is tainneach leam e. ¹² féith, anail, lasachadh.

¹³ ann an crìch Dhamain. ¹⁴ gleann an daraich.

¹⁵ eagar. ¹⁶ fear-còmlraig. ¹⁷ ceithir.

¹⁸ ceann-bheirt. ¹⁹ lùirich lannaich. Eabh.

I. SAMUEL, XVII.

6 Agus *bha* coisbheirt¹ umha air a chosaibh, agus targaid² umha eadar a ghuaillibh.

7 Agus *bha* crann a shleagha mar gharmain³ figheadair; agus *bha ann an* ceann a shleagha sè ceud secel iarunn: agus *bha fear* a' giùlan sgéithe ag imeachd roimhe.

8 Agus sheas e, agus ghlaodh e ri slòigh⁴ Israeil, agus thubhairt e ri, C'ar son a tha sibh a' teachd a mach gu'r cath a chur an ordugh? Nach Philisteach mise, agus *nach* seirbhisich sibhse do Shaul? taghaibh dhuibh féin fear, agus thigeadh e nuas a m' ionnsuidh-sa.

9 Ma's urrainn e còmhrag riumsa, agus *ma* mharbhas e mi, an sin bithidh sinne 'nar seirbhisich agaibhse; ach ma bheir mise buaidh air-san, agus gu marbh mi e, an sin bithidh sibhse 'nur seirbhisich againne, agus ni sibh seirbhis dhuinn.

10 Agus thubhairt am Philisteach, Tha mi a' toirt dùbhlain do shlòigh Israeil an diugh; faighibh dhomhsa fear, a chum gu'n dean sinn còmhrag ri chèile.

11 An uair a chuala Saul agus Israel uile bhrìathra sin an Philistich, bha iad fo uamhas, agus fo eagal mòr.

12 A nis *b'e* Daibhidh mac an Ephrat- aich sin o Bhet-lehem Iudah, d'am b'ainm Iese; agus *bha* ochnar mhac aige; agus bha an duine ann an làithibh Shaul 'na sheann duine, air teachd air aghaidh ann an aois⁵.

13 Agus dh'imich an triuir mhac bu sline aig Iese, agus chaidh iad an déigh Shaul a chum a' chogaidh; agus *b'iad* ainmean a thriuir mhac a chaidh dh'ionnsuidh a' chogaidh, Eliab an ceud-ghin, agus 'na dheigh-san Abinadab, agus an treas *mac* Samah.

14 Agus *b'e* Daibhidh am *mac* a b'òige: agus chaidh an triuir bu shine an déigh Shaul.

15 Ach dh'fhalbh Daibhidh agus phill e o Shaul, a dh'ionaltradh chaorach athar ann am Bet-lehem.

16 Agus tharruing am Philisteach am fagus sa' mhaduinn agus mu fheasgar, agus nochd se e féin dà fhichead là.

17 Agus thubhairt Iese ri Daibhidh a mhac, Gabh a nis air son do bhràithrean ephah do'n *t-sìol* chruaidhiche so, agus na deich builnnean so, agus ruith do'n champ a dh'ionnsuidh do bhràithrean;

18 Agus giùlain na deich mulchagan càise so dh'ionnsuidh ceannaird am mile-san, agus seall cionnus a tha do bhràithrean, agus gabh an geall.

19 A nis *bha* Saul, agus iadsan, agus fir

Israel uile ann an gleann Elah, a' cogadh ris na Philistich.

20 Agus dh'éirich Daibhidh gu moch sa' mhaduinn, agus dh'fhàg e na caoraich aig fear-gleidhidh, agus thug e leis, agus dh'imich, e, mar a dh'àithn Iese dha; agus thàinig e do'n chlais-bhlàir⁶ an uair a bha 'n armait a' dol a mach a dh'ionnsuidh a' chatha, agus a rinn iad iolach a chum a' chatha:

21 Oir chuir Israel agus na Philistich iad féin an ordugh catha, armait an aghaidh armait.

22 Agus dh'fhàg Daibhidh an t-uidheam⁷ a chuir e dheth ann an làimh fir-gleidhidh an uidheam, agus ruith e dh'ionnsuidh na h-armait, agus thàinig e, agus chuir e fàilt air a bhràithribh.

23 Agus an uair a bha e a' labhairt ri, feuch, thàinig an curaidh d'am b'ainm Goliath, am Philisteach o Ghat, a nìos á armait⁸ nam Philisteach, agus labhair e a réir nam briathra ceudna: agus chuala Daibhidh iad.

24 Agus an uair a chunnaic fir Israeil uile an duine, theich iad roimhe, agus bha eagal mòr orra.

25 Agus thubhairt fir Israeil⁹, Am faca sibh am fear so a tha air teachd a nìos? gu cinnteach *is ann* a thoirt dùbhlain do Israel¹⁰ a tha e air teachd a nìos: agus ge b'e fear a mharbhas e, ni an rìgh saoi bhir e le mòr shaoibhreas, agus bheir e dha a nighean, agus ni e tigh athar saor ann an Israel.

26 Agus thubhairt Daibhidh ris na daoineibh a sheas làimh ris, ag ràdh, Ciod a nithear do'n duine a mharbhas am Philisteach so, agus a bheir air falbh am masladh o Israel? oir cò e am Philisteach neo-thioncliolli-ghearta so, gu'n tugadh e dùbhlain do armaitibh an Dé bheò?

27 Agus fhreagair an sluagh e air an dòigh so ag ràdh, Mar so nithear do'n duine a mharbhas e.

28 Agus chuala Eliab a bhràthair bu shine, nuair a labhair e ris na daoineibh: agus las fearg Eliab an aghaidh Daibhidh, agus thubhairt e, C'ar son a thàinig thu nuas an so? agus cò aig a dh'fhàg thu am beagan chaorach sin anns an fhàsach? tha mi fiosrach air t-uabhar agus olcas do chridhe; oir is ann a dh'fhaicinn a' chatha a thàinig thu nuas.

29 Agus thubhairt Daibhidh, Ciod a rinn mi a nis? nach briathran iad¹¹?

30 Agus thionndaidh e uaithsan a dh'ionnsuidh fir eile, agus labhair e air an dòigh cheudna: agus fhreagair an sluagh e a ris a réir na ceud dòigh.

¹ eudanain.

² sgiath.

³ shail.

⁴ armaitibh; sreathaibh. Eabh.

⁵ am measg dhaoinne.

⁶ chlais-dhionaidh, daing-

neach; trench. Sasg.

⁷ na thug e leis.

⁸ slòigh.

⁹ duine do Israel.

¹⁰ amhaslachadh Israeil.

¹¹ nach eil aobhar ann?

31 Agus an uair a chualas na briathran a labhair Daibhidh, dh'aithris iad am fianuis Shaul *iad*: agus chuir e fios air¹.

32 Agus thubhairt Daibhidh ri Saul, Na fannaicheadh cridhe duine sam bith air a shon-san: théid do sheirbhiseach agus cogaidh e ris an Philisteach so.

33 Agus thubhairt Saul ri Daibhidh, Cha'n urrainn thusa dol an aghaidh an Philistich so a chogadh ris: oir *cha 'n'eil* annad-sa *ach* òganach, agus *tha* esan 'na fhear cogaidh o'òige.

34 Agus thubhairt Daibhidh ri Saul, Bha do sheirbhiseach ag ionalttradh chaorach 'athar, agus thàinig leòmhán, agus math-ghamhuin, agus thug e uan as an treud:

35 Agus chaidh mi mach 'na dhéigh, agus bhuail mi e, agus shaor mi as a bheul e. Agus an uair a dh'éirich e a'm' aghaidh, rug mi air fheusaig *air*, agus bhuail mi e, agus mharbh mi e.

36 Araon an leòmhán agus am math-ghamhuin mharbh do sheirbhiseach: agus bithidh am Philisteach neo-thimchioll-gheartta so mar aon diubhsan, do bhrìgh gu'n d'thug e dùbhlán do armaitibh an Dé bheò.

37 Mar an ceudna thubhairt Daibhidh, An Tighearn a shaor mise á màg² an leòmhain, agus á màg a' mhath-ghamhuin, saoraidh esan mi á làimh an Philistich so. Agus thubhairt Saul ri Daibhidh, Falbh, agus gu robh an Tighearna maille riut.

38 Agus chuir Saul 'éididh féin air Daibhidh, agus chuir e clogaidumha air a cheann; mar an ceudna chuir e liùreach air.

39 Agus chrìoslaich Daibhidh a chlaidheamh air uachdar 'éididh, agus b'àill leis³ imeachd, oir cha do chleachd e *iad*: agus thubhairt Daibhidh ri Saul, Cha'n urrainn mi imeachd leo so, oir cha do chleachd mi *iad*. Agus chuir Dhaibhidh dheth *iad*.

40 Agus ghabh e a bhata 'na làimh, agus thagh e dha féin cùig clacha mìne o'n t-sruth, agus chuir e iad ann am màla buachaille⁴ a *bha* aige, eadhon ann am sporan, agus *bha* a chrann-tàbhuill 'na làimh: agus tharruing e 'm fagus do'n Philisteach.

41 Agus thàinig am Philisteach air aghaidh agus tharruing e 'm fagus do Dhaibhidh; agus fear iomchair a sgéithe roimhe.

42 Agus an uair a dh'amhaire am Philisteach agus a chunnaic e Dhaibhidh, rinn e dimeas air, a chionn gu'n robh e 'na òganach, agus ruiteach, agus sgiamhach

'na ghnùis.

43 Agus thubhairt am Philisteach ri Daibhidh, An cù mise, gu'n tigeadh tu a m' ionnsuidh le bataibh? agus mhallaich am Philisteach Daibhidh ann an *ainm* a dhée⁵.

44 Agus thubhairt am Philisteach ri Daibhidh, Thig a m' ionnsuidh-sa, agus bheir mi t'fheoil do eunlaith an athair, agus do bheathaichibh na macharach.

45 An sin thubhairt Daibhidh ris an Philisteach, *Tha* thusa a' teachid a m' ionnsuidh-sa le claidheamh, agus le sleagh, agus le sgéith; *ach tha* mise a' teachd a d' ionnsuidh-sa ann an ainm Thighearna nan sluagh, Dhé armailtean Israeil, d'an d'thug thusa dùbhlán.

46 Air an là 'n diugh bheir an Tighearna thairis thu do m' làimh-sa, agus buailidh mi thu, agus buinidh mi dhìot do cheann, agus bheir mi ciosaichean fheadh nam Philisteach air an là 'n diugh do eunlaith an athair, agus do fliadh-bheathaichibh na talmhainn; a chum gu'm bi fios aig an talamh uile gu bheil Dia ann an Israel⁶.

47 Agus bithidh fios aig a' choimhthionail so uile, nach ann le claidheamh no le sleagh a shaoras an Tighearn: oir *is* leis an Tighearn an cath, agus bheir e sibhse d'ar làimh-ne.

48 Agus an uair a dh'éirich am Philisteach, agus a thàinig e agus a tharruing e 'm fagus an coinneamh Dhaibhidh, an sin rinn Daibhidh cabhag, agus ruith e dh'ionnsuidh ua h-armailt an coinneamh an Philistich.

49 Agus chuir Daibhidh a làmh 'na mhàla, agus ghabh e as a sin clach, agus thilg e as a chrann-tàbhuill, agus bhuail e 'm Philisteach an clàr 'eudain: agus chaidh a' chlach a' stigh⁷ ann an clàr eudain, agus thuit e air 'aghaidh dh'ionnsuidh an làir.

50 Mar sin thug Daibhidh buaidh air an Philisteach le crann-tàbhuill agus le cloich; agus bhuail e 'm Philisteach, agus mharbh se e: ach cha robh claidheamh ann an làimh Dhaibhidh.

51 Uime sin ruith Daibhidh agus sheas e air an Philisteach, agus ghlac e a chlaidheamh agus tharruing e as a thruaill e, agus mharbh se e, agus ghearr e dheth a cheann leis. Agus an uair a chunnaic na Philistich gu'n robh an gaisgeach marbh, theich iad.

52 Agus dh'éirich fir Israeil agus Iudah, agus rinn iad iolach, agus chaidh iad air tòir nam Philisteach, gu'an t-ig thu gu gleann, agus gu geataichibh Ecroin: agus thuit iadsan a bha leònta do na Philistich air an

¹ ghabh se e. Eabh.

³ dh'fheuch c ri.

² cròdh; làimh. Eabh.

⁴ aodhaire.

⁵ le'dhiaithaibh.

⁷ an sàs.

⁶ aig Israel.

t-slighe gu Saraim, eadhon gu ruig Gat, agus gu ruig Ecron.

53 Agus phill clann Israeil o ruagadh nam Philisteach, agus chreach iad an camp¹.

54 Agus ghabh Daibhidh ceann an Philistich, agus thug e leis e gu h-Ierusalem: ach chuir e 'armachd 'na bhùth.

55 Agus an uair a chunnaic Saul Daibhidh a' dol a mach an aghaidh an Philistich, thubhairt e ri Abner ceannard an t-sluaigh, Abner, cò d'am mac an t-òganach so? Agus thubhairt Abner, Mar is beò t'anam, O a rìgh, cha 'n'eil fhios agam.

56 Agus thubhairt an rìgh, Feòraich² thusa cò d'am mac an t-òganach so.

57 Agus an uair a phill Daibhidh o mharbhadh an Philistich, ghabh Abner e, agus thug e am fianuis Shaul e le ceann an Philistich 'na làimh.

58 Agus thubhairt Saul ris, Cò d'am mac thu, òganach? Agus fhreagair Daibhidh, is mi mac do sheirbhisich Iese, a' Bhet-Ichemich.

CAIB. XVIII.

1 Ghràdhach Ionatan Daibhidh. 10 Dh'fhuath-
aich Saul e, agus dh'iarr e a mharbhadh. 22 Thug
e Michal a nighean dha 'na mnaoi.

A GUS tharladh an uair a chuir e chrioch air labhairt ri Saul, gu'n do cheangladh anam Ionatan ri anam Dhaibhidh, agus ghràdhach Ionatan e mar 'anam féin.

2 Agus ghabh Saul d' a ionnsuidh e air an là sin, agus cha do lcig e leis pilltinn ni's mò gu tigh 'athar.

3 An sin rinn Ionatan agus Daibhidh coimheangal, do bhrìgh gu'n do ghràdh-
aich se e mar 'anam féin.

4 Agus chuir Ionatan dheth féin an fhalluin³ a bh' air, agus thug e do Dhaibhidh i, agus 'éididh eadhon gu' chlaidheamh, agus gu' bhogha, agus gu' chrios.

5 Agus chaidh Daibhidh mach gach taobh a chuir Saul e, agus ghiùlain se e féin gu glic: agus chuir Saul e os ceann nam fear cogaidh; agus bha e taitneach ann an suilibh an t-sluaigh uile, agus mar an ceudna ann an suilibh sheirbhiseach Shaul.

6 Agus an uair a bha iad a' teachd, an déigh do Daibhidh pilltinn o mharbhadh an Philistich, thàinig na mnà a mach á uile bhailtibh Israeil, a' seinn agus a' dannsadh an coinneamh rìgh Shaul, le tiompanaibh, le gairdeachas, agus le h-innealaibh ciuil tri-theudach.

7 Agus fhreagair na mnà a chéile an uair a bha iad a' seinn, agus thubhairt iad,

Mharbh Saul a mhlitean, agus Daibhidh a dheich mltèan.

8 Agus bha Saul ro fheargach, agus mhi-thaitinn an ràdh sin ris⁴; agus thubhairt e, Thug iad do Dhaibhidh deich mltèan, agus dhomhsa cha d'thug iad ach mltèan: agus ciod tuille dh'fheudas bhi aige ach an rioghachd?

9 Agus chum Saul sùil⁵ air Daibhidh o'n là sin agus o sin a mach.

10 Agus air an là màireach thàinig an droch spiorad o Dhia air Saul, agus rinn e fàidheadoireachd⁶ ann am meadhan an tighe; agus chluich⁷ Daibhidh le a làimh, mar air uairibh⁸ eile: agus bha sleagh ann an làimh Shaul.

11 Agus thilg Saul an t-sleagh, agus thubhairt e, Buailidh mi Daibhidh leatha gu ruig am balla: ach tharruing Daibhidh as a làthair dà uair.

12 Agus bha eagal air Saul roimh Dhaibhidh⁹, do bhrìgh gu'n robh an Tighearna maille ris, agus gu'n d'imich e o Shaul.

13 Uime sin chuir Saul air falbh uaith e, agus rinn e 'na cheannard dha féin os ceann mìle e; agus chaidh e mach, agus thàinig e stigh roimh 'n t-sluaigh¹⁰.

14 Agus ghiùlain Daibhidh e féin gu glic 'na shligheibh uile; agus bha 'n Tighearna maille ris.

15 Agus an uair a chunnaic Saul gu'n do ghiùlain se e féin gu ro ghlic, bha eagal air roimhe.

16 Ach ghràdhach Israel uile agus Iudah Daibhidh, do bhrìgh gu'n deachaidh e mach agus gu'n d' thàinig e stigh rompa.

17 Agus thubhairt Saul ri Daibhidh, Feuch, mo nighean a's sine Merab, ise bheir mi dhuìt 'na mnaoi: a mhàin bi thusa gaisgeil air mo shon-sa, agus cuir cathan an Tighearn: oir thubhairt Saul, Na biodh mo làmh-sa air, ach biodh làmh nam Philisteach air.

18 Agus thubhairt Daibhidh ri Saul, Cò mise? agus ciod i mo bheatha, no teaghlach m'athar¹¹ ann an Israel, gu'm bithium a'm' chliamhuin aig an rìgh?

19 Ach anns an àm sam bu chòir do Mherab nighean Shaul a bhi air a tabhairt do Dhaibhidh, thugadh i do Adriel am Meholatach 'na mnaoi.

20 Agus ghràdhach Michal, nighean Shaul, Daibhidh; agus dh'innis iad sin do Shaul, agus thaitinn an ni ris¹².

21 Agus thubhairt Saul, Bheir mi dha i, a chum gu'm bi i dha 'na ribeadh, agus gu'm bi làmh nam Philisteach 'na aghaidh. Uime sin thubhairt Saul ri Daibh-

¹ am bùthan.

² Fiosraich.

³ trusgan. ⁴ bha 'n ràdh sin olc 'na shùilb. Eabh.

⁵ sheall Saul gu mì-runach. ⁶ bha e air boile.

⁷ bhual. ⁸ làithibh.

⁹ roimh gl'nnis Dhaibhidh. Eabh.

¹⁰ air ceann an t-sluaigh.

¹¹ ciod i beatha teaghlach m'athar.

¹² bha an nì ccart 'na shùilb. Eabh.

idh, Le aon do'n dithis bithidh tu a'd' chliamhuin agams' an diugh.

22 Agus dh'àithn Saul d'a sheirbhisich, ag ràdh, Labhairibh ri Daibhidh an uaigheas, ag ràdh, Feuch, tha tlachd aig an rìgh annad, agus tha gràdh aig a sheirbhisich uile dhuit: a nis uime sin bi-sa a'd' chliamhuin aig an rìgh.

23 Agus labhair seirbhisich Shaul na briathra so ann an cluasaibh Dhaibhidh: agus thubhairt Daibhidh, An ni faoin 'nur suilbh-sa bhi ann an cleamhnas ri rìgh, agus nach 'eil annam-sa ach duine bochd, agus fo dhimeas?

24 Agus dh'innis seirbhisich Shaul dha, ag ràdh, Air an dòigh so labhair Daibhidh.

25 Agus thubhairt Saul, Mar so their sibh ri Daibhidh, Cha 'n'eil an rìgh ag iarraidh dubharaidh¹ sam bith, ach ceud roimh-chroicinn do na Philistich, gu bhi dìolta air naimhdbh an rìgh. Ach shaoil Saul gu'n tugadh e air Daibhidh tuiteam le làimh nam Philisteach.

26 Agus an uair a dh'innis a sheirbhisich do Dhaibhidh na briathra sin, thaitinn e ri Daibhidh a bhi 'na chliamhuin aig an rìgh: agus cha do chrochnaicheadh² na làithean.

27 Uime sin dh'éirich Daibhidh, agus dh'imich e féin agus a dhaoine, agus mharbh e do na Philistich dà cheud fear; agus thug Daibhidh leis an roimh-chroicinn, agus thug iad 'nan làn àireamh iad do'n rìgh, a chum gu'm biodh e 'na chliamhuin aig an rìgh: agus thug Saul dha Michal a nighean 'na mnaoi.

28 Agus chunnaic Saul, agus bha fios aige gu'n robh an Tighearna maille ri Daibhidh, agus gu'n do ghràdhaich Michal nighean Shaul e.

29 Agus bha fathast an tuilleadh eagain air Saul roimh Dhaibhidh; agus bha Saul 'na nàmhaid do Dhaibhidh an còmhnuidh.

30 An sin chaidh ceannardan nam Philisteach a mach: agus an déigh dhoibh dol a mach, ghluilain Daibhidh e féin ni bu ghlice na uile sheirbhisich Shaul: agus bha 'ainm ro urramach.

CAIB. XIX.

1 Dh'innis Ionatan do Dhaibhidh gu'n robh 'athair ag iarraidh a mharbhadh. 11 Chuir Saul teachdairean a dh'ionnsuidh a thighe g' a chur gu bàs. 12 Leig Michal sìos troimh uinneig e agus theich e dh'ionnsuidh Shamuel gu Ramah.

A GUS labhair Saul r'a mhac Ionatan, agus r'a sheirbhisich uile, iad a mharbhadh Dhaibhidh.

2 Ach bha tlachd mòr aig Ionatan mac Shaul ann an Daibhidh: agus dh'innis

Ionatan do Dhaibhidh, ag ràdh, Tha m'athair Saul ag iarraidh do mharbhadh; a nis uime sin, guidheam ort, thoir an aire dhuit féin sa' mhaduinn, agus fan ann an àite dìomhair, agus folaich thu féin.

3 Agus theid mise mach, agus seasaidh mi làimh ri m'athair sa' mhachair anns am bi thu, agus labhairidh mi mu d' thimchioll ri m'athair; agus an ni a chi mi, sin innsidh mi dhuit³.

4 Agus labhair Ionatan maith mu Dhaibhidh r'a athair Saul, agus thubhairt e ris, Na peacaicheadh an rìgh an aghaidh a sheirbhisich, an aghaidh Dhaibhidh; do bhrìgh nach do pheacaich esan a'd' aghaidh-sa, agus do bhrìgh gu'n robh⁴ oibre do d' thaobh-sa ro mhaith:

5 Oir chuir e 'anam⁴ 'na làimh, agus mharbh e am Philisteach; agus dh' oibrich an Tighearna saorsa mhòr air son Israeil uile: chunnaic thu e agus rinn thu gairdeachas: e'ar son ma ta a pheacaicheas tu an aghaidh fola neo-chiontaich, le Daibhidh a mharbhadh gun aobhar?

6 Agus dh' éisd Saul ri guth Ionatan; agus mhionnaich Saul, Mar is beò an Tighearna, cha mharbhar e.

7 Agus ghairm Ionatan air Daibhidh, agus chuir Ionatan an céill dha na briathra sin uile: agus thug Ionatan Daibhidh a dh'ionnsuidh Shaul, agus bha e 'na fhianuis mar a bha e roimhe.

8 Agus bha cogadh a ris ann: agus chaidh Daibhidh a mach, agus chog e ris na Philistich, agus bhuail e iad le h-àr mòr; agus theich iad roimhe.

9 Agus bha'n droch spiorad o'n Tighearna air Saul, an uair a shuidh e 'na thigh, agus a shleagh 'na làimh: agus chluich Daibhidh le a làimh.

10 Agus dh' iarr Saul Daibhidh a bhualadh gu ruig am balla leis an t-sleagh; ach tharruing e air falbh á làthair Shaul, agus bhuail e'n t-sleagh a stigh sa' bhalla: agus theich Daibhidh, agus chaidh e as air an o'dhe sin.

11 Agus chuir Saul teachdairean⁵ a dh' ionnsuidh tighe Dhaibhidh, g'a choimhead⁶ agus g'a mharbhadh sa' mhaduinn: agus dh'innis Michal a bhean do Dhaibhidh, e, ag ràdh, Mur teasaig thu t'anam an nochd, am maireach cuirear gu bàs thu.

12 Agus leig Michal sìos Daibhidh troimh uinneig: agus dh' fhalbh e, agus theich e, agus chaidh e as.

13 Agus ghabh Michal dealbh, agus chuir i san leabaidh e, agus chuir i adhartan⁷ do fhionnadh ghabhar f'a cheann, agus chòmhdaich i le eudach e.

¹ crodh.

² choimhlionadh.

³ chì mi cìod a tha 'na chridhe, no their e, agus innsidh mi dhuit. Eabh.

⁴ a bheatha.

⁵ navir.

⁶ fhaireadh.

⁷ chuasag; cebir. Eabh.

14 Agus an uair a chuir Saul teachdair-ean a ghlacadh Dhaibhidh, thubhairt i, *Tha e tinn.*

15 Agus chuir Saul na teachdair-ean a ris a dh'fhaicinn Dhaibhidh, ag ràdh, Thugaibh a nìs san leabaidh a m' ionnsuidhs' e, a chum gu marbh mi e.

16 Agus an uair a thàinig na teachdair-ean a stigh, feuch, *bha* dealbh anns an leabaidh, agus adhartan do *fhionnadh* ghabhar f'a cheann.

17 Agus thubhairt Saul ri Michal, C'ar son a mheall thu mi mar so, agus a chuir thu air falbh mo nàmhaid, air chor as gu'n deachaidh e as? Agus fhreagair Michal Saul, Thubhairt e rium, Leig dhomh imeachd; c'ar son a mharbhaim thu?

18 Agus theich Daibhidh, agus chaidh e as, agus thàinig e dh'ionnsuidh Shamueil gu Ramah, agus dh'innis e dha gach *ni* a rinn Saul ris: agus dh'imich esan agus Samuel, agus ghabh iad còmhnuidh ann an Naiot.

19 Agus dh'innseadh do Shaul, ag ràdh, Feuch, *tha* Daibhidh aig Naiot ann an Ramah.

20 Agus chuir Saul teachdair-ean a ghlacadh Dhaibhidh: agus an uair a chunnaic iad cuideachd¹ nam fàidhean ri fàidheadoireachd, agus Samuel 'na sheasamh *mar* air a shuidheachadh os an ceann, bha spiorad Dhé air teachdairibh Shaul, agus rinn iadsan fàidheadoireachd mar an ceudna.

21 Agus an uair a dh'innseadh *sin* do Shaul, chuir e uaithe mar an ceudna teachdair-ean eile, agus rinn iadsan cuideachd² fàidheadoireachd. Agus chuir Saul teachdair-ean a ris an treas uair, agus rinn iadsan cuideachd fàidheadoireachd.

22 An sin chaidh e féin mar an ceudna gu Ramah, agus thàinig e gu tobar mòr a *tha* ann an Sechu, agus dh'fheòraich e, agus thubhairt e, C'ait *Samuel* agus Daibhidh? agus thubhairt *aon*, Feuch, *tha* iad aig Naiot ann an Ramah.

23 Agus chaidh e 'n sin gu Naiot ann an Ramah: agus bha spiorad Dhé air-san mar an ceudna, agus chaidh e air aghaidh agus rinn e fàidheadoireachd, agus an d'thàinig e gu Naiot ann an Ramah.

24 Agus chuir esan cuideachd 'endach dheth, agus rinn e fàidheadoireachd ann fianuis Shamueil air an dòigh cheudna: agus luidh³ e sìos lomnochd rè an là sin agus rè na h-oidhche. Uime sin their iad, Am *bheil* Saul mar an ceudna am measg nam fàidhean?

CAIB. XX.

1 Dh'athnuadhaidh Daibhidh agus Ionatan an coimhcheangal a bha eatorra. 24 Dh'iarr Saul Ionatan a mharbhadh, a chionn gu'n do leig e Daibhidh air falbh. 35 Dh'innis Ionatan a chunnart do Dhaibhidh; 41 agus dhealaich iad.

A GUS theich Daibhidh o Naiot ann an Ramah, agus thàinig e, agus thubhairt e am fianuis Ionatan, Ciod a rinn mi? ciod i m'euceart⁴, agus ciod e mo pheacadh am fianuis t'athar, gu bheil e g iarraidh m'anama?

2 Agus thubhairt esan ris, Nar leigeadh Dia; cha'n fhaigh thu bàs: feuch, cha dean m'athair ni air bith mòr no beag, nach foillsich e dhomh-sa; agus c'ar son a dh'fholaicheadh m'athair uamsa an ni so? cha *bhi* e mar sin.

3 Agus mhionnaich Daibhidh cuideachd, agus thubhairt e, Tha gu cinnteach fios aig t'athair gu'n d'fhuair mise deadh-ghean a'd' shùilb, agus their e, Na biodh fios aig Ionatan air so, air eagal gu'm bi doilgheas air: ach gu deimhin *mar* is beò an Tighearn, agus *mar* is beò t'anam, cha 'n *eil* ach ceum eadar mise agus am bàs.

4 An sin thubhairt Ionatan ri Daibhidh, Ge b'e ni a dh'iarras t'anam, eadhon *sin* ni mise dhuit.

5 Agus thubhairt Daibhidh ri Ionatan, Feuch, *tha* a' ghealach nuadh ann am màireach, agus bu chòir dhomh-sa suidhe maille ris an rìgh gu biadh; ach leig air falbh mi, a chum gu'm folaidh mi mi féin anns a mhachair gu feasgar an treas *là*.

6 Ma dh'ionndraineas t'athair idir mi⁵, an sin their thu, Dh'iarr Daibhidh gu dùrachdach *cead* ormsa gu ruith do Bhet-lehem a bhaile féin; oir *tha* iobairt bhliadhnail⁶ an sin air son an teaghlach uile.

7 Ma their e mar so, *Ro* mhaith; *bithidh* sìth aig do sheirbhiseach: ach ma bhios fearg ro mhòr air, *an sin* bi cinnteach gu bheil olc air a shonrachadh leis⁷.

8 Uime sin buinidh tu gu caoimhneil ri d' sheirbhiseach; oir thug thu air do sheirbhiseach coimhcheangal an Tighearna dleanamh riut: gidheadh, ma tha olc annamsa, marbh féin mi; oir c'ar son a bheireadh tu mi dh'ionnsuidh t'athar?

9 Agus thubhairt Ionatan, Gu ma fada sin uait; oir ma bhitheas fios gu cinnteach agamsa gu bheil olc air a shonrachadh le m'athair gu teachd orts, an sin nach innis mise dhuit e?

10 An sin thubhairt Daibhidh ri Ionatan, Cò dh'innseas dhomh, ma fhreagras t'athair thu gu garg?

11 Agus thubhairt Ionatan ri Daibhidh,

¹ comh-chruinneachadh. ² mar an ceudna.

³ thuit. Eabh.

⁴ lochd.

⁶ Ma nìothaicheas t'athair mi air falbh.

⁶ laithean. Eabh.

⁷ gu bheil e cur roimhe an uile; gu bheil olc air a choimhleadh leis. Eabh.

Thig, agus rachamaid a mach do'n mhachair. Agus chaidh iad a mach le chéile do'n mhachair.

12 Agus thubhairt Ionatan ri Daibhidh, *Gu'n deanadh an Tighearna Dia Israeil*¹, an uair a dh'fhidreas mi m'athair² mu'n àm so am màireach, no air an treas là, agus, feuch, *ma bhios maith ann* a thaobh Dhaibhidh, agus nach cuir mi an sin *fios* a d' ionnsuidh-sa, agus nach foillsich mi dhuit e;

13 Gu'n deanadh an Tighearna marsin, agus nì's ro mhò ri Ionatan: ach ma's toil le m'athair olc a *dheanamh* ort, an sin foillsichidh mi dhuit e, agus cuiridh mi air falbh thu, agus imichidh tu an sìth; agus gu robh an Tighearna maille riut, mar a bha e maille ri m'athair-sa.

14 Agus cha'n e mhàin, ma bhios³ mi fathast beò, gu'n nochd thu dhomh caoimhneas an Tighearna, chum nach faigh mi bàs:

15 Ach *cuideachd* cha ghearr thu as do chaoimhneas o m' thigh gu bràth: cha ghearr, eadhon an uair a ghearras an Tighearn as naimhdean Dhaibhidh, gach aon diubh bhàrr aghaidh na talmhainn.

16 Mar sin rinn Ionatan *coimhcheangal* ri tigh Dhaibhidh, *ag ràdh*, Gu'n agradh an Tighearn e eadhon o làimh naimhde Dhaibhidh.

17 Agus thug Ionatan air Daibhidh mionnachadh a ris, a chionn gu'n do ghràdhaich se e: oir ghràdhaich se e mar a ghràdhaich e 'anam féin.

18 An sin thubhairt Ionatan ris, Am màireach *tha a' ghealach* nuadh *ann*; agus ionndrainear thu, a chionn gu'm bi d' àite-suidhe falamh.

19 Agus an uair a dh'fhanas tu gus an treas là, théid thu sìos gu grad, agus thig thu dh'ionnsuidh an àite anns an d'fholaich thu thu féin, an uair a bha'n gnothuch⁴ an làimh, agus fanaidh tu aig a' chloich Esel.

20 Agus tilgidh mise trì saighdean r'a taobh, mar gu'n tilginn air comhara.

21 Agus, feuch, cuiridh mi òganach uam, *ag ràdh*, Falbh, faigh a mach na saighdean. Ma their mi gu cinnteach ris an òganach, Feuch, *tha* na saighdean air an taobh so dhìot, gabh iad⁵; an sin thig thusa: oir *tha sìth ann* dhuit, agus cha 'n eil olc sam bith, mar is beò an Tigh-earn.

22 Ach ma their mi mar so ris an òganach, Feuch, *tha* na saighdean air an taobh thall dìot; imich thusa, oir chuir an Tigh-earn air falbh thu.

23 Agus a thaobh a' ghnòthuich mu'n do labhair mise agus thusa, feuch, gu

robh an Tighearn eadar mise agus thusa gu bràth.

24 Uime sin dh'fholaich Daibhidh e féin anns a' mhachair: agus an uair a thàinig a' ghealach nuadh, shuidh an rìgh sìos gu biadh itheadh.

25 Agus shuidh an rìgh air a chaithir féin, mar air uairibh eile, eadhon air caithir làimh ris a' bhalla: agus dh'érich Ionatan, agus shuidh Abner ri taobh Shaul: agus bha àite Dhaibhidh falamh.

26 Gidheadh, cha do labhair Saul a' bheag sam bith air an là sin: oir thubhairt e leis féin⁶, Thàinig nì-eigin air, cha 'n eil e glan; gu cinnteach cha 'n eil e glan.

27 Agus thachair air an là màireach, an dara là do'n mhìos, gu'n robh àite Dhaibhidh falamh: agus thubhairt Saul r'a mhac Ionatan, C'ar son nach d' thàinig mac Iese gu biadh, aon chuid an dé no'n diugh?

28 Agus fhreagair Ionatan Saul, Dh'iarr Daibhidh gu dùrachdach *cead* ormsa dol do Bhet-lehem:

29 Agus thubhairt e, Leig air falbh mi, guidheam ort, oir *tha* ìobairt aig ar teaghlach anns a' bhaile; agus dh'àithn mo bhràthair dhomh a *bhi'n sin*: agus a nis ma fhuair mi deadh-ghean a'd' shùilbh, leig dhomh imeaclid, guidheam ort, agus mo bhràithrean fhaicinn: uime sin cha d' thàinig e gu bord an rìgh.

30 An sin las fearg Shaul an aghaidh Ionatan, agus thubhairt e ris, A mhic na mnà crosta ceannaircigh⁷, nach 'eil fhios agamsa gu'n do thagh thu mac Iese chum do mhaslaidh⁸ féin, agus a chum maslaidh lonnochduigh do mhàthar?

31 Oir co fhad 'sa bhios mac Iese beò air an talamh, cha daingnichear thusa, no do rioghachd: uime sin a nis cuir *fios* air, agus thoir a m' ionnsuidh e, oir gu cinnteach gheibh e bàs⁹.

32 Agus fhreagair Ionatan 'athair Saul, agus thubhairt e, C'ar son a chuirear gu bàs e? ciod a rinn e?

33 Agus thilg Saul sleagh air, chum a bhualadh: le sin bha fios aig Ionatan gu'n robh e suidhichte le 'athair Daibhidh a chur gu bàs.

34 Uime sin dh'érich Ionatan o'n bhorid ann am feirg ro mhòir, agus cha d'ith e biadh sam bith air an dara là do'n mhìos: oir bha e fo dhòighneas air son Dhaibhidh, a chionn gu'n d' thug 'athair maslaidh dha.

35 Agus anns a' mhaduinn chaidh Ionatan a mach do'n mhachair aig an àm a shuidhicheadh ri Daibhidh, agus òganach beag maille ris.

¹ O Thighearna Dhé Israeil! Tha'n Tighearna Dia Israeil 'na fhianuis. ² rannsaicheas mi m'athair, nì mi dìchioll air inntinn m'athair fhaotainn a mach. ³ am f'adh a ta. ⁴ ann an là a'

ghnòthuich. Eabh. ⁵ gabh e. Eabh. ⁶ shaoil e. ⁷ A mhic chrosta na ceannaircse. ⁸ t'amluadh. ⁹ is mac do'n bhàs e. Eabh.

I. SAMUEL, XX, XXI.

36 Agus thubhairt e r'a òganach, Ruith, faigh a nisa mach na saighdean a thilg mi. Agus an uair a ruith an t-òganach, thilg e saighid thairis air.

37 Agus an uair a thàinig an t-òganach gu àite na saighde a thilg Ionatan, ghlaodh Ionatan an déigh an òganaich, agus thubhairt e, Nach 'eil an t-saighid air do thaobh thall?

38 Ghlaodh Ionatan mar an ceudna an déigh an òganaich, Luathaich, dean cabhag, na stad. Agus thionail òganach Ionatain suas na saighdean, agus thàinig e dh'ionnsuidh a mhaighstir.

39 Ach cha robh fios aig an òganach air ni sam bith; bha fios a mhàin aig Daibhidh agus Ionatan air a' chùis.

40 Agus thug Ionatan 'armachd d'a òganach, agus thubhairt e ris, Falbh, thoir do'n bhaile iad.

41 Agus co luath 'sa dh'fhalbh an t-òganach, dh'éirich Daibhidh á èite mu dheas, agus thuit e air 'aghaidh dh'ionnsuidh na talmhainn, agus chrom se e fèin trì uairean: agus phòg iad a chéile, agus ghuil iad le chéile; ach ghuil¹ Daibhidh ni bu mhò.

42 Agus thubhairt Ionatan ri Daibhidh, Imich an sìth, do blùrigh gu'n do mhionnaich sinn le chéile ann an ainm an Tighearn, ag ràdh, Gu robh an Tighearn eadar mise agus thusa, agus eadar mo shliochd-sa agus do shliochd-sa gu bràth. Agus dh'éirich e agus dh'imich e: agus chaidh Ionatan do'n bhaile.

CAIB. XXI.

1 *Fhuair Daibhidh aran coisrigte o Ahimelech.*
8 *Ghabh e claidheamh Gholiath, agus theich e gu Gat.* 10 *Aig Gat leig e air fèin a bhi air a' chuthach.*

AN sin thàinig Daibhidh gu Nob, a dh'ionnsuidh Ahimelech an t-sagairt: agus bha eagal air Ahimelech ag coinn-eachladh Daibhidh, agus thubhairt e ris, C'ar son a tha thu a' d' aonar, agus nach 'eil duine sam bith maille riut?

2 Agus thubhairt Daibhidh ri Ahimelech an sagart, Dh'àithn an rìgh gnothuch dhomhsa, agus thubhairt e rium, Na biodh fios aig duine sam bith a thaobh a' ghnòthuich mu'm bheil mise 'gad chur uam, agus a dh'àithn mi dhuit: agus dh'orduich mi² do m' òganaich dol a dh'ionnsuidh a leithid so agus a leithid sud a dh'àite.

3 A nis uime sin ciod a tha fo d' làimh? thoir dhomh cùig builinnean arain a'm' làimh, no ge b'e ni a tha làthair.

4 Agus fhreagair an sagart Daibhidh,

agus thubhairt e, Cha 'n'eil aran coitcheann³ sam bith fo m' làimh, ach tha aran coisrigte⁴ ann; ma ghlèidh na h-òganaich iad fèin air bheag sam bith o mhnaibh.

5 Agus fhreagair Daibhidh an sagart, agus thubhairt e ris, Gu deimhin chumadh mnàì uainne na trì làithe so, o thàinig mise mach, agus tha⁵ soithiche nan òganach naomha; agus tha 'n t-aran coitcheann air chor, eadhon ged naomhaicheadh e an diugh anns an t-soitheach⁶.

6 Uime sin thug an sagart dha aran naomh; oir cha robh aran sam bith an sin ach aran na fianuis⁷, a thugadh à fianuis an Tighearna, gu aran teth a chur sìos anns an là san d'thugadh air falbh e.

7 A nis bha duine àraidh do sheirbhisich Shaul an sin air an là sin, air a chumail an làthair an Tighearn; agus b'e ainm Doeg, Edomach, am fear a b' àirde do na buachaillibh a bhuineadh do Shaul.

8 Agus thubhairt Daibhidh ri Ahimelech, Agus nach 'eil an so fo d' làimh sleagh no claidheamh? oir cha d'thug mi aon chuid mo chlaidheamh no m'airm eile leam, a chionn gu'n robh gnothuch an rìgh cabhagach.

9 Agus thubhairt an sagart, Claidheamh Gholiath an Philistich, a mharbh thu ann an gleann Elah, feuch, tha e 'n so paisgte ann an eudach air cùlaobh na h-Ephod: ma ghabhas tu sin dhuit fèin, gabh e; oir cha 'n'eil claidheamh sam bith eile ach e an so. Agus thubhairt Daibhidh, Cha 'n'eil a leithid eile ann, thoir dhomh e.

10 Agus dh'éirich Daibhidh, agus theich e air an là sin à fianuis Shaul, agus chaidh e gu Achis rìgh Ghat.

11 Agus thubhairt seirbhisich Achis ris, Nach e so Daibhidh rìgh na tìre? nach ann m'a thimchioll-san a chan iad le chéile⁸ ann an dannaibh, ag ràdh, Mharbh Saul a mhlètan, agus Daibhidh a dheich mìltean?

12 Agus thaisg Daibhidh suas na briathra sin 'na chridhe, agus bha eagal mòr air roimh Achis rìgh Ghat.

13 Agus dh'atharraich e a ghiùlan 'nam fianuis, agus leig e air fèin a bhi air a' chuthach 'nan làmhaibh, agus scriob e air comhlaichibh⁹ a gheata, agus leig e le 'shileadh tuiteam sìos air 'fheusaibh.

14 An sin thubhairt Achis r'a seirbhisich, Feuch, chi sibh gu bheil an duine air a' chuthach: c'ar son ma ta thug sibh a m' ionnsuidhs' e?

15 Am bheil feum agamsa air daoimibh air a' chuthach, gu'n tugadh sibh am fear so gu bhi air a' chuthach a'm' làthair? an tig am fear so a steach do m' thigh-sa?

¹ gus an do ghuil. Eabh. ² thug mi fios. Eabh. ³ cumanta. ⁴ naomhaichte. ⁵ bha.

⁶ agus na bha neòghloine sam bith air an t-slighe,

gidheadh gu cinnteach an diugh bithidh na soithichean glan. ⁷ aran taisbeanta. ⁸ fhreagair iad a chéile. ⁹ dorsaibh.

CAIB. XXII.

1 *Chaidh a luchd-dàimh agus sluagh eile a dh'ionnsuidh Dhaibhidh gu Adulam.* 6 *Gearan Shaul an aghaidh a sheirbhiseach.* 11 *Dh'orduich e Ahimelech agus sagairt an Tighearn a chur gu bàs.* 20 *Thèich Abiatar.*

DH'IMICH Daibhidh air an aobhar sin as a sin, agus chaidh e as gu uaimh Adulaim: agus an uair a chual' a bhrùthrean agus tigh 'athar uile e, chaidh iad sìos an sin d'a ionnsuidh.

2 Agus chruinnich d'a ionnsuidh gach duine a bha'n teanntachd, agus gach duine a bha fo fhìachaibh, agus gach duine a bha fuidh smuairin¹ 'na inntinn; agus bha e 'na cheannard orra: agus bha maille ris mu thimchioll ceithir cheud fear.

3 Agus chaidh Daibhidh as a sin gu Misphe Mhoaid, agus thubhairt e ri rìgh Mhoaid, Thigeadh, guidheam ort, m'athair agus mo mhàthair a mach, agus bitheadh iad maille ribh, gus am bi fios agam ciod a ni Dia air mo shon.

4 Agus thug e iad am fianuis rìgh Mhoaid; agus dh'fhan iad maille ris rè nan làithean uile a bha Daibhidh anns an daingneach.

5 Agus thubhairt am fàidh Gad ri Daibhidh, Na fan anns an daingneach; falbh, agus imich romhad gu tì Iudah. An sin dh'fhalbh Daibhidh, agus thàinig e gu coillteach Hareit.

6 Agus chuala Saul gu'm facas² Daibhidh, agus na daoine a bha maille ris, (a nis dh'fhan Saul ann an Gibeah fuidh chraoibh ann an Ramah, agus a shleagh 'na làimh, agus a sheirbhiseach uile 'nan seasamh làimh ris,)

7 Agus thubhairt Saul r'a sheirbhiseach a sheas làimh ris, Eisdibh a nis, a Bheniamineacha; eadhon dhuibh-se uile an toir mac Iese achanna agus fion-liosan, agus an dean e sibh uile 'nur ceannardaibh air mhiltibh, agus 'nur ceannardaibh air cheudaibh;

8 Gu'n deachaidh sibh uile ann an comhbhoinn³ a'm' aghaidh-sa, agus nach 'eil neach ann a chuireas an céill domh gu bheil mo mhac air deanamh coimhcheangail ri mac Iese; agus nach 'eil neach agaibh a tha doilich air mo shon, no chuireas an céill domh gu'n do dhùisg mo mhac mo sheirbhiseach a'm' aghaidh, a dheanamh feall-fholach, mar air an là 'n diugh?

9 An sin fhreagair Doeg an t-Edomach, (a bha 'na sheasamh maille ri seirbhiseach Shaul⁴), agus thubhairt e, Chunnaic mi mac Iese a' teachd gu Nob, a dh'ionnsuidh Ahimelech mhic Ahituib.

10 Agus dh'fhiosraich e air a shon do'n Tighearn, agus thug e biadh dha, agus thug e dha claidheamh Gholiath an Philistich.

11 An sin chuir an rìgh fios air Ahimelech an sagart, mac Ahituib, agus tigh 'athar uile na sagairt a bha ann an Nob: agus thàinig iad uile dh'ionnsuidh an rìgh.

12 Agus thubhairt Saul, Eisd a nis, a mhic Ahituib. Agus fhreagair 'esan, Tha mi 'n so, mo thighearn.

13 Agus thubhairt Saul ris, C'ar son a chaidh sibh ann an comhbhoinn a'm' aghaidh sa, thusa agus mac Iese, do bhrìgh gu'n d'thug thu dha aran agus claidheamh, agus gu'n d'fhiosraich thu do Dhia air a shon, a chum gu'n éireadh e suas a'm' aghaidh, a dheanamh feall-fholach, mar air an là 'n diugh.

14 An sin fhreagair Ahimelech an rìgh, agus thubhairt e, Agus cò am measg do sheirbhiseach uile a tha cò firinneach ri Daibhidh, a tha 'na chliamhuin aig an rìgh, agus a dh'imicheas air t'iarrtus, agus a tha urramach ann ad thigh?

15 An do thòisich mi air an là sin⁵ air Dia fhiosrachadh air a shon? gu ma fada sin uam: na cuireadh an rìgh ni sam bith as leth a sheirbhiseach, no as leth tighe m'athar uile; oir cha robh fios aig do sheirbhiseach air ni sam bith dheth so uile, beag no mòr.

16 Agus thubhairt an rìgh, Gu cinnteach gheibh thu bàs, Ahimelech, thu féin agus uile thigh t'athar.

17 Agus thubhairt an rìgh ris na gillibhruith a sheas làimh ris, Tionndaidhibh agus marbhaibh sagartan an Tighearn; a chionn gu bheil mar an ceudna an làimh san maille ri Daibhidh, agus a chionn gu'n robh fios aca gu'n do theich e, agus nach do chuir iad an céill domhsa e. Ach cha b'àill le seirbhiseach an rìgh an làmh a shineadh a mach gu bualadh air sagartaibh an Tighearn.

18 Agus thubhairt an rìgh ri Doeg, Tionndaidh thusa, agus buail air na sagartaibh. Agus thionndaidh Doeg an t-Edomach, agus bhuail e air na sagartaibh; agus mharb e air an là sin ceithir fichead agus chùig fir a dh'iomchair ephod do òn-eudach⁶.

19 Agus bhuail e Nob baile nan sagart le faobhar a' chlaidheimh, eadar fhear agus bhean, leanabh agus chiochran, agus dhamh, agus asal, agus chaora, le faobhar a' chlaidheimh.

20 Agus chaidh aon do mhic Ahimelech mhic Ahituib as, d'am b'ainm Abiatar, agus theich e 'n déigh Dhaibhidh.

¹ neo-thoilichte; searbh. Eabh. ² gu'n d' aithnicheadh. Eabh. ³ gu'n d' rinn sibh uile ceannaire, chuir sibh uile bhuir comhairle ri chèile.

⁴ a chuireadh os ceann sheirbhiseach Shaul. ⁵ an diugh. ⁶ anart.

I. SAMUEL, XXII. XXIII.

21 Agus dh'innis Abiatar do Dhaibhidh gu'n do mharbh Saul sagartan an Tigh-earn.

22 Agus thubhairt Daibhidh ri Abiatar, Bha fios agam air an là anns an robh Doeg an t-Edomach an sin, gu cinnteach gu'n innseadh e do Shaul: is mise b'aobhar *bàis* gach neach do thigh t'athar.

23 Fan thusa maille riumsa; na biodh eagal ort: oir esan a dh'iarras m'anamsa, iarraidh e t'anam-sa: ach maille riumsa *bithidh* tu fuidh dhidean.

CAIB. XXIII.

1 *Chog na Philistich an aghaidh Cheilah.* 5 *Bhuail Daibhidh iad.* 9 *Dh'innseadh dha gu'n robh Saul a' teachd air a thòir gu Ceilah.* 13 *Theich e gu Siph.* 19 *Thug na Siphich fios do Shaul gu'n robh e a' gabhail comhuaidh maille riu, agus gheall iad a thoirt thairis d'a làimh.*

AN sin dh'innis iad do Dhaibhidh, ag ràdh, Feuch, *tha* na Philistich a' cogadh an aghaidh Cheilah, agus *tha* iad a' creachadh nan urlar-bualaidh.

2 Uime sin dh'fhiosraich Daibhidh do'n Tighearn, ag ràdh, An téid mise, agus am buail mi na Philistich sin? Agus thubhairt an Tighearn ri Daibhidh, Falbh, agus buail na Philistich, agus saor Ceilah.

3 Agus thubhairt daoine Dhaibhidh ris, Feuch, *tha* eagal oirmne an so ann an Iudah; cia mò gu mòr ma ta, ma théid sinn gu Ceilah an aghaidh armailtean nam Philisteach?

4 An sin dh'fhiosraich Daibhidh a ris do'n Tighearn. Agus fhreagair an Tigh-carn e, agus thubhairt e, Eirich, falbh sios gu Ceilah; oir bheir mise na Philistich thairis do d' làimh.

5 Agus chaidh Daibhidh agus a dhaoine gu Ceilah, agus chog e 'n aghaidh nam Philisteach, agus thug e leis an spréidh, agus bhuail e iad le h-àr mòr; mar sin shaoir Daibhidh luchd-àiteachaidh Cheilah.

6 (A nis an aghaidh a theich Abiatar mac Ahimelech a dh'ionnsuidh Dhaibhidh gu Ceilah, chaidh e sìos le ephod 'na làimh.)

7 Agus dh'innseadh do Shaul gu'n d'fhàinig Daibhidh gu Ceilah; agus thubhairt Saul, Thug Dia thairis do m' làimh e: oir dhruideadh a stigh e le dol a steach do bhaile gheatachan agus chrann.

8 Agus ghairm Saul an sluagh uile chum cogaidh, a dhol sìos gu Ceilah a chuairteachadh¹ Dhaibhidh agus a dhaoine.

9 Agus bha fios aig Daibhidh gu robh Saul gu diomhair a' dealbhadh uile 'na aghaidh; agus thubhairt e ri Abiatar an sagart, Thoir an so an ephod.

10 Agus thubhairt Daibhidh, A Thigh-

earna Dhé Israeil, chuala do sheirbhiseach gu cinnteach gu *bheil* Saul ag iarraidh teachd gu Ceilah, a sgrios a' bhaile air mo shon-sa.

11 An toir luchd-àiteachaidh² Cheilah mise thairis d'a làimh? an tig Saul a nuas mar a chuala do sheirbhiseach? A Thighearna Dhé Israeil, guidheam ort, innis do d' sheirbhiseach. Agus thubhairt an Tighearna, Thig e nuas.

12 An sin thubhairt Daibhidh, An toir luchd-àiteachaidh Cheilah mise agus mo dhaoine thairis do làimh Shaul? Agus thubhairt an Tighearna, Bheir iad thairis *thu*.

13 An sin dh'éirich Daibhidh agus a dhaoine, a bha mu thimchioll sè ceud, agus chaidh iad a mach á Ceilah, agus dh'imich iad an taobh a dh'fhendadh iad imeachd³. Agus dh'innseadh do Shaul gu'n deachaidh Daibhidh as á Ceilah, agus leig e dheth dol a mach.

14 Agus dh'fhan Daibhidh anns an fhàsach ann an daingneachaibh làidir, agus dh'fhan e ann an sliabh am fàsach Shiph: agus dh'iarr Saul e gach aon là, ach cha d'fhug Dia thairis d'a làimh e.

15 Agus chunnaic Daibhidh gu robh Saul air dol a mach a dh'iarraidh anama; agus bha Daibhidh ann am fàsach Shiph ann an coille.

16 Agus dh'éirich Ionatan mac Shaul, agus chaidh e dh'ionnsuidh Dhaibhidh do'n choille, agus neartaich e a làmh ann an Dia.

17 Agus thubhairt e ris, Na biodh eagal ort; air cha'n fhaigh làmh Shaul m'athar-sa *thu*, agus rioghaichidh tu os ceann Israeil, agus is mise a's faigse bhios dhuìt; agus cuideachd *tha* fios aig m'athair Saul air sin.

18 Agus rinn iadsan nan dithis coimheangal am fianuis an Tighearn: agus dh'fhan Daibhidh anns a' choille, agus dh'imich Ionatan d' a thigh féin.

19 An sin chaidh na Siphich suas a dh'ionnsuidh Shaul gu Gibeah, ag ràdh, Nach 'eil Daibhidh' ga fhòlach féin maille ruinne ann an daingneachaibh sa' choille, ann an sliabh Hachilah, a tha air an taobh deas do Iesimon?

20 A nis uime sin, a réir uile mhiann t'anama, O a rìgh, thig da rìreadh a nuas, agus is i ar cuid-ne a thoirt thairis do làimh an rìgh.

21 Agus thubhairt Saul, Beannaichte gu robh sibhse o'n Tighearn, oir ghabh sibh truas rium.

22 Imichibh, guidheam oirbh, ulluichibh fathast, agus biodh fios agaibh, agus faicibh 'àit anns an gnàth leis a bhi⁴,

¹ a theannachadh. Eabh.

² daoine.

³ dh'imich iad an taobh a dh'imich iad. Eabh.

⁴ anns am bheil a chos.

agus cò a chunnaic an sin e: oir dh'inn-seadh dhomh gu bheil e deanamh gu ro sheòlta.

23 Faicibh ma ta, agus biodh fios agaibh air gach àite-folaich anns am bheil e 'ga fhòlach fèin, agus thigibh a m'ionnsuidh a ris le *fios* cinnteach, agus thèid mise maille ribh: agus an sin, ma bhitheas e anns an tìr, rannsaichidh mise mach e air feadh uile mhlèan Iudah.

24 Agus dh'èirich iad, agus chaidh iad gu Siph roimh Shaul: ach *bha* Daibhidh agus a dhaoine ann am fàsach Mhaoin, anns a' chòmhnard air an taobh deas do Iesimon.

25 Agus chaidh Saul agus a dhaoine g'a iarraidh; agus dh'innis iad *sin* do Dhaibhidh: uime sin thàinig e nuas gu carraig, agus dh'fhan e ann am fàsach Mhaoin. Agus an uair a chuala Saul *sin*, chaidh e air tòir Dhaibhidh ann am fàsach Mhaoin.

26 Agus chaidh Saul air an taobh so do'n t-sliabh, agus Daibhidh agus a dhaoine air an taobh eile do'n t-sliabh: agus rinn Daibhidh cabhag gu imeachd air falbh roimhe Shaul¹: oir chuairtich Saul agus a dhaoine Daibhidh agus a dhaoine, chum an glacadh.

27 Ach thàinig teachdair a dh'ionnsuidh Shaul, ag ràdh, Sean cabhag agus thig; oir bhris na Philistich a stigh air an tìr.

28 Uime sin phill Saul o dhol air tòir Dhaibhidh, agus chaidh e an aghaidh nam Philisteach: air an aobhar sin thug iad Selah-hamah-leco² mar ainm air an àite sin.

29 Agus chaidh Daibhidh suas as a sin, agus ghabh e còmhnuidh ann an daingneachaibh làidir Engedi.

CAIB. XXIV.

1 Ann an uaimh Engedi ghearr Daibhidh air falbh iomall falluinne Shaul. 8 Dh'fheuch e so do Shaul mar chomhar air 'ionracas. 16 Dh'aidich Saul a chionta: 21 ghabh e mionnan do Dhaibhidh, agus phill e.

A GUS an uair a bha Saul air pilltinn o leantuin nam Philisteach, dh'inn-seadh dha, ag ràdh, Feuch, *tha* Daibhidh ann am fàsach Engedi.

2 An sin ghabh Saul trì mìle fear taghta á h-Israel uile, agus chaidh e dh'iarraidh Dhaibhidh agus a dhaoine air aghaidh chreag nan fiadh-ghabhar.

3 Agus thàinig e dh'ionnsuidh mainnir-ea³ nan caorach làimh ris an t-slighe, far an robh uaimh: agus chaidh Saul a steach a chòmhdachadh a chos: agus dh'fhan Daibhidh agus a dhaoine ann an taobhan na h-uamha.

4 Agus thubhairt daoine Dhaibhidh ris,

Feuch, an là mu'n d'thubhairt an Tighearna riut, Feuch, bheir mi thairis do nàmhaid do d' làimh, a chum gu'n dean thu ris mar is àill leat. An sin dh'èirich Daibhidh, agus ghearr e air falbh iomall falluinne Shaul os ìosal.

5 Agus 'na dhéigh sin bhuail cridhe Dhaibhidh e, a chionn gu'n do ghearr e air falbh iomall *falluinne* Shaul.

6 Agus thubhairt e r'a dhaoineibh, Nar leigeadh Dia gu'n deannain-se an nì so ri m' thighearn, aon ungta an Tighearna, mò làmh a shìneadh a mach 'na aghaidh, o's e aon ungta an Tighearna e.

7 Agus choisg Daibhidh a dhaoine leis na briathraibh sin, agus cha do leig e leo éirigh an aghaidh Shaul. Ach dh'èirich Saul suas as an uaimh, agus dh'imich e air a shlighe.

8 Agus dh'èirich Daibhidh suas an déigh sin, agus chaidh e mach as an uaimh, agus ghlaodh e 'n déigh Shaul, ag ràdh, Mo thighearn, a rìgh. Agus an uair a dh'amhairc Saul 'na dhéigh, chrom Daibhidh e fèin air 'aghaidh dh'ionnsuidh na talmhainn, agus rinn e ùmhlachd⁴.

9 Agus thubhairt Daibhidh ri Saul, C'ar son a tha thu ag éisdeachd ri briathraibh dhaoine, ag ràdh, Feuch, tha Daibhidh ag iarraidh do chron?

10 Feuch, air an là 'n diugh chunnaic do shùilean cionnus a thug an Tighearna thairis thu an diugh do m' làimh anns an uaimh: agus dh'iarr *cuid* orm do mharbhadh, ach chaomhain mo shùil thu, agus thubhairt mi, Cha chuir mi mò làmh a mach an aghaidh mo thighearn; oir is e aon ungta an Tighearna e.

11 Agus faic, O athair, eadhon faic iomall t'falluinne a'm' làimh: do bhrìgh an uair a ghearr mi air falbh iomall t'falluinne, nach do mharbh mi thu, biodh fios agad agus faic nach 'eil aon chuid olc no eusaontas⁵ a'm' làimh, agus nach do pheacaich mi a'd' aghaidh; gidheadh tha thu a' sealg air m'anam, a chum a ghlacadh.

12 Gu'n tugadh an Tighearna breth eadar mise agus thusa, agus gu'n dioladh an Tighearna mise ort: ach cha bhi mò làmh-sa ort.

13 Mar a their gnàth-fhocal nan sean-fhear, O na h-aingidh thig aingidheachd: ach cha bhi mò làmh-sa ort.

14 Cò an déigh an d'thàinig rìgh Israeil a mach? cò air am bheil thu 'n tòir? an déigh coin mhairbh, an déigh deargainne.

15 Uime sin bitheadh an Tighearna 'na bhreitheamh, agus thugadh e breth eadar mise agus thusa, agus faicheadh e, agus tagradh e mo chùis, agus saoradh e mi as do làimh.

¹ air eagal Shaul.

² i. e. creag nan sgaradh.

³ chro. ⁴ chrom se e fèin. ⁵ eu-ceart, aingidheachd.

16 Agus an uair a chuir Daibhidh crìoch air na briathra sin a labhairt ri Saul, an sin thubhairt Saul, An e so do ghuth, a mhic, a Dhaibhidh? Agus thog Saul suas a ghuth, agus ghuil e.

17 Agus thubhairt e ri Daibhidh, Is tusa a's firinniche na mise; oir dhiol thusa maith dhomhsa, ach dhiol mise olc dhuitse.

18 Agus nochd thu an diugh cionnus a bhuin thu gu maith rium; do bhrìgh, an uair a thug an Tighearna thairis mi do d' làimh, nach do mharbh thu mi.

19 Oir an uair a gheibh duine a nàmhaid, an leig e as gu maith¹ e? uime sin gu'n dìoladh an Tighearna maith dhuitse air son na rinn thu dhomhsa an diugh.

20 Agus a nis, feuch, tha fios agam gu'm bi thu gu cinnteach a'd' rìgh, agus gu'n daingnichear rioghachd Israeil a'd' làimh:

21 Uime sin mionnaich dhomhsa air an Tighearna, nach gearr thu as mo shliochd a'm' dhéigh, agus nach sgrios thu m'ainm a' tigh m'athar.

22 Agus mhionnaich Daibhidh do Shaul: agus chaidh Saul dhachaidh; ach chaidh Daibhidh agus a dhaoine suas do'n daingneach.

CAIB. XXV.

1 *Fhuair Samuel bàs. 4 Bhrosnaich Nabal Daibhidh le iargallas. 18 Shiochaich Abigail e. 36 Bàs Nabail. 39 Ghabh Daibhidh Abigail agus Ahinoam gu bh' nam mnaibh aige. 44 Thugadh Michail, bean Dhaibhidh, do Phalti.*

AGUS fhuair Samuel bàs; agus chruinnich na h-Israelich uile an ceann a chèile, agus rinn iad caoidh air a shon, agus dh'adhlac iad e 'na thigh ann an Ramah. Agus dh'éirich Daibhidh, agus chaidh e sìos gu fàsach Pharain.

2 Agus bha duine ann am Maon, aig an robh a shealbh² ann an Carmel; agus bha 'n duine ro mhòr, agus bha trì mìle caora aige, agus mìle gabhar: agus bha e a' lomairt³ a chaorach ann an Carmel.

3 A nis b'e ainm an duine Nabal, agus ainm a mhnà Abigail; agus bha i 'na mnaoi aig an robh deadh thuigse, agus maiseach 'na dealbh; ach bha 'n duine iargalta⁴, agus olc 'na ghnìomharaibh; agus bha e do thigh Chaleib⁵.

4 Agus chuala Daibhidh san fhàsach gu'n robh Nabal a' lomairt a chaorach.

5 Agus chuir Daibhidh uaith deichnear òganach; agus thubhairt Daibhidh ris na h-òganaich, Gabhaibh suas gu Carmel, agus rachaibh a dh'ionnsuidh Nabail, agus cuiribh fàilte air a'm' ainm-sa.

6 Agus mar so their sibh, Slàn gu robh

thu⁶: agus sìth gu robh dhuit féin, agus sìth do d'thìgh, agus sìth do gach nì a th'agad.

7 Agus a nis chuala mi gu bheil luchd-lomairt chaorach agad: a nis do bhuachailllean-sa, a bha maille ruinn, cha d'rinn sinn cron orra, nì mò a dh'ionndraineadh⁷ nì sam bith leo rè na h-aimsira bha iad ann an Carmel.

8 Feòraich do d' òganaich, agus innsidh iad dhuit: faigheadh ma ta na h-òganaich deadh-ghean a'd' shùilb, oir air là maith⁸ thàinig sinn: thoir, guidheam ort, do d'sheirbhisich, agus do d' mhac Daibhidh, ge b'e nì a thig a dh'ionnsuidh do làimhe⁹.

9 Agus an uair a thàinig òganaich Daibhidh, labhair iad ri Nabail a réir nam briathra sin uile ann an ainm Dhaibhidh, agus bha iad 'nan tosd¹⁰.

10 Agus fhreagair Nabail seirbhisich Daibhidh, agus thubhairt e, Cò e Daibhidh? agus cò e mac Iese? is lìonmhor seirbhisich sna làithibh so a tha briseadh air falbh gach duine dhiubh o 'mhaighstir.

11 An gabh mise ma ta m'aran, agus m'uisge, agus m'fheoil a mharbh mi air son mo luchd-lomairt, agus an tabhair mi e do dhaoineibh nach aithne dhomh cia as a tha iad?

12 Uime sin thionndaidh òganaich Daibhidh air an slighe, agus phill iad, agus thàinig iad agus dh'innis iad dha do réir nam briathra sin uile.

13 Agus thubhairt Daibhidh r'a dhaoineibh, Cuiribh gach duine a chladheamh air. Agus chuir gach duine dhiubh a chladheamh air; agus chuir Daibhidh mar an ceudna a chladheamh air: agus chaidh suas an déigh Dhaibhidh mu thimchioll ceithir cheud fear, agus dh'fhan dà cheud maille ris an airneis.

14 Ach dh'innis fear do na h-òganaich do Abigail bean Nabail, ag ràdh, Feuch, chuir Daibhidh teachdairean asan fhàsach a chur fàilte air ar maighstir, agus thug e anacaint dhoibh.

15 Ach bha na daoine ro mhaith ruinn, agus cha d' rinneadh cron oirnn, nì mò a dh'ionndrain¹¹ sinn nì sam bith rè na h-aimsir a bha¹² sinn maille riu, 'nuair a bha sinn san fhearann.

16 Bha iad 'nam balla dhuinn araon a dh'oidheche agus a là, rè na h-aimsir a bha sinn maille riu ag ionaltradh nan caorach.

17 A nis, air an aobhar sin biodh fios agad agus smuainich ciod a nì thu; oir

¹ air slighe mhaith. Eabh. ² a nì, a spréidh; 'chair. Eabh. ³ rùsgadh.

⁴ ainmeinich; cruaidh. Eabh. ⁵ bu Chaleib e. Eabh. ⁶ mar so their

sibh ris-san a tha beò ann an saobhbheas.

⁷ chailleadh. ⁸ subhach.

⁹ gheibh do làmh. Eabh. ¹⁰ sguir iad, stad iad. ¹¹ chaill. ¹² a ghluais. Eabh.

shonraicheadh olc an aghaidh ar maighstir, agus an aghaidh a thighe uile : agus is mac do Bhelial esan, air chor as nach feud *neach* labhair ris.

18 An sin rinn Abigail cabhag, agus ghabh i dà cheud *builinn* arain, agus dà shearrag fhìona, agus cùig caoraich air an deasachadh, agus cùig toimhsean do shìol cruaidhichte¹, agus ceud багаide² do fhìon-dhearcaibh tiormaichte, agus dà cheud meall do fhigibh; agus chuir i air asalaibh *iad*.

19 Agus thubhairt i r'a h-òganaich, Rachaibh air bhur n-aghaidh romham : feuch, *tha* mi teachd 'nur dèigh : ach cha d'innis i *sin* d'a fear Nabal.

20 Agus an uair a bha i a' marcachd air an asail, agus a' teachd a nuas ann am fasgath an t-sléibh, feuch, thàinig Daibhidh agus a dhaoine a nuas 'na còdhail; agus choinnich i *iad*.

21 A nis thubhairt Daibhidh, Gu cinnteach is ann gu dìomhain a ghléidh mise gach *ni* a bh'aig an *fhèar* so san fhàsach, air chor as nach d'ionndraineadh ni air bith do gach *ni* a *bhuineadh* dha; oir dhiol esan olc dhomhsa an éiric maith.

22 Gu'n deanadh Dia mar sin ri naimh-dibh Dhaibhidh, agus tuille mar an ceudna, ma dh'fhàgas mise dhiubhsan uile a *tha* aige gu ruig a' mhaduinn, aon air bith a ni uisge ri balla.

23 Agus an uair a chunnaic Abigail Daibhidh, rinn i cabhag agus theirinn i bhàrr na h-asail, agus thuit i sìos air a h-aghaidh am fianuis Dhaibhidh, agus chroim si i féin gu làr.

24 Agus thuit i aig a chosaibh, agus thubhairt i, Ormsa, *eadhon* ormsa mo thighearna, *bitheadh* an cionta so, agus labhradh, guidheam ort, do bhanoglach ann ad éisdeachd, agus cluinn briathra do bhanoglach.

25 Na tugadh mo thighearna, guidheam ort, fa'near an duine so³ le Belial, eadhon Nabal; oir a réir 'ainme, mar sin *tha e* : *is e* Nabal⁴ 'ainm, agus *tha* amaideachd maille ris: ach cha'n fhaca mise, do bhanoglach, òganaich mo thighearn, a chuir thu uait.

26 A nis uime sin, mo thighearna, *mar* is beò an Tighearn, agus *mar* is beò t'anam, a chionn gu'n do chum an Tighearn thusa o theachd a dhòrtadh fola, agus o thu féin a dhioladh le d' làimh féin; a nis uime sin mar Nabal bitheadh do naimhdean, agus iadsan a dh'iarraas olc do m' thighearn.

27 Agus a nis am beannachadh⁵ so, a thug do bhanoglach a dh'ionnsuidh mo

thighearna, thugar e eadhon do na h-òganaich a tha siubhal an cois⁶ mo thighearna.

28 Maith, guidheam ort, cionta do bianoglaich; oir ni an Tighearna gu cinnteach tigh seasmhach do m' thighearna do bhrìgh gu bheil mo thighearn a' cur cathan an Tighearn, agus nach d'fhuaradh olc annad o *thùs* do làithean.

29 Gidheadh dh'éirich duine gu dol air do thoir, agus a dh'iarraidh t'anama : ach bithidh anam mo thighearn air a cheangal suas ann an ceanglachan na beatha aig an Tighearna do Dhia; agus anaman do naimhdean, iadsan tilgidh e mach, *mar* á meadhon croinn-tàbhuilt⁷.

30 Agus an uair a ni an Tighearna do m' thighearn a réir gach maith a labhair e mu d' thimchioll, agus a dh'orduicheas e thu a'd' uachdaran os ceann Israeil;

31 Cha bhi so chum doilgheis⁸ dhuit, no chum oibheim cridhe do m' thighearna, gu'n do dhòirt thu fuil gun aobhar, agus gu'n do dhiol mo thighearn e féin: ach an uair a bhuineas an Tighearna gu maith ri m' thighearn, an sin cuimhnich air do bhanoglach.

32 Agus thubhairt Daibhidh ri Abigail, Beannaichte *gu robh* an Tighearna Dia Israeil, a chuir thusa an diugh a'm' choinneamh-sa:

33 Agus beannaichte *gu robh* do chomhairle, agus beannaichte *gu robh* thu féin, a chum mise an diugh o theachd a dhòrtadh fola, agus o mi féin a dhioladh le m' làimh féin.

34 Oir gu deimhin, *mar* is beò an Tighearna Dia Israeil, a chum mis' o chron a dheanamh ort, mur bitheadh tu air deanaibh cabhaig, agus air teachd a'm' choinneamh, gu cinnteach cha'n fhàga do Nabal gu solus na maidne neach sam bith a ni uisge ri balla.

35 Uime sin ghabh Daibhidh as a làimh na thug i d'a ionnsuidh, agus thubhairt e rithe, Gabh suas ann an sìth a dh'ionnsuidh do thighe: faic, dh'éisd mi ri d' ghuth, agus ghabh mi ri d' ghnùis.

36 Agus thàinig Abigail a dh'ionnsuidh Nabail; agus, feuch, *bha* cuirm aige 'na thigh mar chuirn rìgh; agus *bha* cridhe Nabail subhach an taobh a stigh dheth, oir *bha* e gu mòr air mhisg: uime sin cha d'innis i dha a bheag no mhòr, gu solus na maidne.

37 Ach anns a' mhaduinn, an uair a chaidh am fion á Nabal⁹, agus a dh'innis a bhean dha na nithe sin, bhàsaich a chridhe an taobh a stigh dheth, agus bha e mar chloich.

¹ do glhràn gradain.

² badan; triopall. Eir.

³ Na cuireadh mo thighearn a chridhe air an duine so. Eabh.

⁴ i. e. amadan.

⁵ an tiodhlac.

⁶ a' leantainn.

⁷ á meadhon glaise croinn-tàbhuilt. Eabh.

⁸ tuislidh. ⁹ an uair a thàinig Nabal gu 'chèill.

38 Agus mu thimchioll deich làithean 'na dhéigh sin bhuaill an Tighearna Nabal, agus fhuair e bàs.

39 Agus an uair a chuala Daibhidh gu'n d'fhuair Nabal bàs, thubhairt e, Beannaichte *gu robh* an Tighearna a thagair cùis mo mhaslaidh o làimh Nabal, agus a chum a sheirbhiseach o olc: oir thionndaidh an Tighearna aingidheachd Nabail air a cleann féin. Agus chuir Daibhidh teachdairean uatha, agus labhair e ri Abigail, a chum a gabhail dha féin 'na mnaoi.

40 Agus an uair a thàinig seirbhisich Dhaibhidh a dh'ionnsuidh Abigail gu Carmel, labhair iad rithe, ag ràdh, Chuir Daibhidh sinn a d' ionnsuidh a chum do gabhail thuige¹ a d' mnaoi.

41 Agus dh'éirich i, agus chrom si i féin air a h-aghaidh dh'ionnsuidh na talmhainn, agus thubhairt i, Feuch, bitheadh do bhanoglach 'na h-innilt² a nigheadh chos sheirbhiseach mo thighearn.

42 Agus rinn Abigail cabhag, agus dh'éirich i, agus mharcaich i air asail, agus cuignear ghruagach aice ag imeachd 'na déigh; agus lean i teachdairean Dhaibhidh, agus bha i 'na mnaoi aige.

43 Ghabh Daibhidh cuideachd Ahinoam o Iesreel; agus bha iad mar an ceudna le chéile 'nam mnaibh aige.

44 Oir thug Saul a nighean Michal, bean Dhaibhidh, do Phalti mac Lais, a bha do Ghalim.

CAIB. XXVI.

1 Chaidh Saul gu Hachilah air tòir Dhaibhidh. 5 Thàinig Daibhidh do'n chlais-bhlàir far an robh Saul 'na luidhe, agus thug e air falbh a shleagh agus a shoitheach-uisge. 13 Thug Daibhidh achmhasan do Abner. 21 Dh'aidich Saul a pheacadh.

AGUS thàinig na Siphich a dh'ionnsuidh Shaul, gu Gibeah, ag ràdh, Nach 'eil Daibhidh 'ga fholach féin ann an sliabh Hachilah fa chomhair Iesimoin?

2 An sin dh'éirich Saul, agus chaidh e sìos gu fàsach Shiph, agus maille ris trì mìle fear taghta do Israel, a dh'iarraidh Dhaibhidh ann am fàsach Shiph.

3 Agus champaich Saul ann an sliabh Hachilah, a tha fa chomhair Iesimoin air an t-slighe: ach dh'fhan Daibhidh anns an fàsach, agus chunnaic e gu'n d'thàinig Saul 'na dhéigh do'n fhàsach.

4 Uime sin chuir Daibhidh mach luchd-ramsaichaidh, agus thuig e gu'n d'thàinig Saul da rìreadh.

5 Agus dh'éirich Daibhidh, agus thàinig e dh'ionnsuidh an àite anns an do champaich Saul; agus chunnaic Daibhidh an t-àit anns an robh Saul 'na luidhe, agus Abner mac Neir, ceannard 'armailte:

agus luidh Saul an taobh a stigh do'n chlais-bhlàir³, agus champaich an sluagh m'a thimchioll.

6 An sin fhreagair Daibhidh, agus thubhairt e ri Ahimelech an Hiteach, agus ri Abisai, mac Sheruah, bràthair Ioaib, ag ràdh, Cò théid sìos maille riumsa dh'ionnsuidh Shaul do'n champ? Agus thubhairt Abisai, Théid mise sìos maille riut.

7 Uime sin thàinig Daibhidh agus Abisai dh'ionnsuidh an t-sluaigh san oidhe; agus, feuch, luidh Saul 'na chodal an taobh a stigh do'n chlais-bhlàir, agus a shleagh sàthta san talamh aig a cheann-adhairt: ach luidh Abner agus an sluagh mu'n cuairt àir.

8 An sin thubhairt Abisai ri Daibhidh, Thug Dia thairis do nàmhaid an diugh do d' làimh: a nis uime sin, leig lean a bhualadh, guidheam ort, leis an t-sleagh a dh'ionnsuidh na talmhainn aon uair, agus cha bhuail mi e an dara uair.

9 Agus thubhairt Daibhidh ri Abisai, Na marbh e; oir cò a shineas a mach a làmh an aghaidh aoine uingta an Tighearn, agus a bhios neo-chiontach?

10 Thubhairt Daibhidh mar an ceudna, Mar is beò an Tighearna, buailidh an Tighearn e, no thig a là anns am faigh e bàs, no théid e sìos do'n chath agus tuitidh e.

11 Nar leigeadh an Tighearna gu'n sin-innse mach mo làmh an aghaidh aoine uingta an Tighearn: ach a nis gabh, guidheam ort, an t-sleagh a tha aig a cheann-adhairt, agus an soitheach-uisge, agus biomaid ag imeachd.

12 Agus ghabh Daibhidh an t-sleagh agus an soitheach-uisge o cheann-adhairt Shaul, agus dh'imich iad rompa, agus cha robh neach ann a chunnaic sin, no aig an robh fios air, no a mhosgail; oir bha iad uile 'nan codal, do bhrìgh gu'n do thuit codal trom o'n Tighearn orra.

13 An sin chaidh Daibhidh thairis do'n taobh eile, agus sheas e air mullach sléibh fad as, le astar mòr eatorra.

14 Agus ghlaodh Daibhidh ris an t-sluagh, agus ri Abner mac Neir, ag ràdh, Nach freagair thu, Abneir? Agus fhreagair Abner, agus thubhairt e, Cò thusa, a tha glaothaich ris an rìgh?

15 Agus thubhairt Daibhidh ri Abner, Nach fear treun thusa? agus cò a's cosmhuil riut ann an Israel? c'ar son ma ta nach do choimhid thu do thighearn an rìgh? oir thàinig aon do'n t-sluagh a steach a mharbhadh an rìgh do thighearna.

16 Cha 'n'eil an ni so maith a rinn thu: mar is beò an Tighearna, tha sibh a'

¹ chuige. Eir.
296

² 'na seirbhisich.

³ an taobh a stigh do chuairt nan carbad.

toillinn a' bhàis¹, do bhrìgh nach do ghléidh sibh bhuir maighstir, aon ungta an Tighearn: agus a nis faic c'ait am bheil sleagh an rìgh, agus an soitheach-uige, a bha aig a cheann-adhairt?

17 Agus dh'aithnich Saul guth Dhaibhidh, agus thubhairt e, An e so do ghuthsa, a mhic, a Dhaibhidh? agus thubhairt Daibhidh, *Is e mo ghuth-sa a th'ann*, mo thighearn, a rìgh.

18 Agus thubhairt e, C'ar son a tha mo thighearn air tòir a sheirbhisich? oir ciod a rinn mi? no ciod an t-olc a th'ann am làimh?

19 A nis uime sin, guidheam ort, éisd-eadh mo thighearn an rìgh ri briathraibh a sheirbhisich: ma's e an Tighearn a bhrosnuich thu a'm' aghaidh, gabhaidh e tabhartas²: ach ma's iad clann nan daoine, malllaichte tha iad am fianuis an Tighearn; oir dh'fhuadaich iad mise mach an diugh o fhantuinn ann an oighreachd an Tighearn, ag ràdh, Falbh, dean seirbhis do dhiathaibh eile.

20 A nis ma ta, na tuiteadh m'fhuil a dh'ionnsuidh na talmhainn ann am fianuis an Tighearn; oir thàinig rìgh Israeil a mach a dh'iarraidh deargainne, mar a ruageas fear cearc-choille³ anns na beanntaibh.

21 An sin thubhairt Saul, Pheacaich mi: pill, a mhic, a Dhaibhidh, oir cha dean mi cron ort tuiteadh, a chionn gu'n robh m'anam luachmhor a'd' shùilb an diugh: feuch, rinn mi gu h-amaideach, agus chaidh mi air seacharan gu ro mhòr.

22 Agus fhreagair Daibhidh agus thubhairt e, Feuch, sleagh an rìgh: agus thigeadh aon do na h-òganaich a nall agus gabhadh e i.

23 Agus iocadh an Tighearna do gach neach a réir 'ionracais agus fhireantachd: oir thug an Tighearna thairis thu an diugh do m' làimhsa, ach cha b'aill leam mo làmh a shineadh a mach an aghaidh aoin ungta an Tighearn.

24 Agus, feuch, mar a mheasadh t'anam-sa gu mòr leamsa an diugh, mar sin bith-eadh m'anam-sa air a mheas gu mòr leis an Tighearn, agus saoradh e mi as gach gabhadh.

25 Agus thubhairt Saul ri Daibhidh, Beannaichte gu robh thusa, a mhic, a Dhaibhidh: an dà chuid ni thu *nithe* mòra, agus mar an ceudna bheir thu gu cinnteach buaidh. Agus dh'imich Daibhidh air a shlighe, agus phill Saul do 'àite féin.

1 *Chuàla Saul gu'n do theich Daibhidh a dh'ionnsuidh rìgh Ghat, agus cha d'iarr e tuille air a shon.* 5 *Thug Achis Siclag do Dhaibhidh 8 Bhuaill Daibhidh na Gesuraich, &c.*

A GUS thubhairt Daibhidh 'na chridhe, A nis tuitidh mi là éigin an làimh Shaul⁴: cha 'n'eil ni air bith a's fear dhomh na mi dhol as gu luath do dhùthaich nam Philisteach, a chum gu'n leig Saul dheth⁵ mise iarraidh ni's mò ann an crìch air bith do Israel, agus gu'n téid mi as o' làimh.

2 Agus dh'éirich Daibhidh, agus chaidh e thairis agus an sè ceud fear a bha maille ris, a dh'ionnsuidh Achis mhic Mhaoich, rìgh Ghat.

3 Agus ghabh Daibhidh còmhnuidh maille ri Achis ann an Gat, e féin agus a dhaoine, gach fear le 'theaghlach, Daibhidh agus a dhà mhnaoi, Ahinoam a' Bhan-iesreeleach, agus Abigail a' Bhan-charmeleach, bean Nabail.

4 Agus dh'innseadh do Shaul gu'n do theich Daibhidh gu Gat; agus cha d'iarr e ni's mò air a shon.

5 Agus thubhairt Daibhidh ri Achis, Ma fhuair mi nis deadh-ghean a'd' shùilb, thugar dhomh àit ann am baile éigin san dùthaich, a chum gu'n gabh mi còmhnuidh an sin: oir c'ar son a ghabhadh do sheirbhiseach còmhnuidh anns a' bhaile rioghail maille riutsa?

6 An sin thug Achis dha Siclag air an là sin: uime sin buinidh Siclag do rìgh-rìbh Iudah gus an là 'n diugh.

7 Agus b'e fad na h-aimsir⁶ a dh'fhan Daibhidh ann an dùthaich nam Philisteach, bliadhna iomlan⁷ agus ceithir mìosan.

8 Agus chaidh Daibhidh agus a dhaoine suas, agus bhris iad a stigh air na Gesuraich⁸, agus na Geserich, agus na h-Amalecich: oir b'iadsan o shean luchd-àiteachaidh na tìre, mar a théid thu gu Sur, eadhon gu tìr na h-Eiphit.

9 Agus bhuail Daibhidh an tìr, agus cha d'fhàg e fear no bean beò; agus thug e leis na caoraich, agus am buar, agus na h-asail, agus na càmhail, agus an t-eudach; agus phill e, agus thàinig e gu Achis.

10 Agus thubhairt Achis, C'ait an do bhris sibh a stigh an diugh? Agus thubhairt Daibhidh, Air an taobh deas do Iudah, agus air an taobh deas do na Ierahmeelich, agus air an taobh deas do na Cenich.

11 Agus fear no bean cha do leig Daibh-

¹ is mic do'n bhàs sibh. Eabh.

² gabhaidh e faile tabhartais. Eabh.

³ cearc-thomain; core. Eabh.

⁴ cuirear gu bàs mi là éigin le làimh Shaul.

⁵ gu'n caill Saul a dhòchas a'm' thaobh-sa.

⁶ àireamh nan làithean. Eabh.

⁷ làithean. Eabh.

⁸ chaidh iad a chreachadh nan Gesurach.

I. SAMUEL, XXVII. XXVIII.

idh as beò, a thoirt *sgeula* gu Gat, ag ràdh, Air eagal gu'n innseadh iad oirn, ag ràdh, Mar so rinn Daibhidh. Agus mar so bha a sheòl rè na h-aimsir a dh'fhan e ann an dùthaich nam Philisteach.

12 Agus chreid Achis Daibhidh, ag ràdh, Thug e air a shluagh Israel gràin mhòr a ghabhail deth: uime sin bitheadh e na sheirbhiseach agam-sa gu bràth.

CAIB. XXVIII.

1 *Chruinnicheadh na Philistich an ceann a chèile aig Sunem. 5 Bha cagal air Saul rompa, agus chaidh e dh'ionnsuidh mnà ann an Endor aig an robh leannan-sith. 11 Air 'iarrtus thog i Samuel a nìos dha. 15 Dh'innis Samuel do Shaul gu'n tuiteadh e fèin agus Israel an làimh an naimh-dean.*

AGUS anns na làithibh sin chruinnich na Philistich an armaithean an ceann a chèile chum cogaidh, a chur catha ri h-Israel: agus thubhairt Achis ri Daibhidh, Biodh fios gu cinnteach agad gu'n tèid thu mach maille riumsa chum catha, thu fèin agus do dhaoine.

2 Agus thubhairt Daibhidh ri Achis, Gu deimhin bithidh fios agad ciod a nì do sheirbhiseach. Agus thubhairt Achis ri Daibhidh, Uime sin nì mi fear-gleidhidh mo chinn diot gu bràth.

3 A nis fhuair Samuel bàs, agus rinn Israel uile caoidh air a shon, agus dh'adhlac iad e ann an Ramah na bhaile fèin: agus chuir Saul air falbh iadsan aig an robh leannan-sith, agus na fiosaichean, as an tìr.

4 Agus chruinnicheadh na Philistich an ceann a chèile, agus thàinig iad agus champaich iad ann an Sunem: agus chruinnich Saul Israel uile an ceann a chèile, agus champaich iad ann an Gilboa.

5 Agus an uair a chunnaic Saul feachd nam Philisteach, bha cagal air, agus chrìochnaich a chridhe gu mòr.

6 Agus an uair a dh'fhiosraich Saul do'n Tighearna, cha do fhreagair an Tighearn e, aon chuid le aislingibh, no le Urim, no le fàidhibh.

7 An sin thubhairt Saul r'a sheirblisich, Iarraibh dhomh-sa bean aig am bheil leannan-sith, agus thèid mi d'a h-ionnsuidh, agus fiosraichidh mi dhith. Agus thubhairt a sheirbhisich ris, Feuch, *tha* bean aig am bheil leannan-sith ann an Endor.

8 Agus chuir Saul e fèin ann an riochd eile, agus chuir e air eudach eile agus dh'imich e, agus dithis dhaoine maille ris, agus thàinig iad a dh'ionnsuidh na mnà anns an oidhche; agus thubhairt e, Dean

fiosachd¹ dhomh-sa, guidheam ort, leis an leannan-shith, agus tog suas dhomh esan a dh'ainmicheas mi dhuit.

9 Agus thubhairt a' bhean ris, Feuch, *tha* fios agad ciod a rinn Saul, cionnus a ghearr e as iadsan aig an robh leannan-sith, agus na fiosaichean, as an tìr: c'ar son ma ta a tha thu a' leagadh ribidh air son m'anama, chum mo chur gu bàs?

10 Agus mhinnaich Saul dhi air an Tighearn, cha ràdh, *Mar* is beò an Tighearna, cha tachair olc sam bith dhuit air son an nì so.

11 An sin thubhairt a' bhean, Cò thogas mi nìos dhuit? Agus thubhairt esan, Tog a nìos dhomh Samuel.

12 Agus an uair a chunnaic a' bhean Samuel, ghlaodh i le guth àrd; agus labhair a' bhean ri Saul, ag ràdh, C'ar son a mheall thu mi? oir is tu Saul.

13 Agus thubhairt an rìgh rithe, Na biodh eagal ort: oir ciod a chunnaic thu? Agus thubhairt a' bhean ri Saul, Chunnaic mi diathan a' teachd a nìos as an talamh.

14 Agus thubhairt e rithe, Ciod e a choslas? Agus thubhairt ise, *Tha* seann duine air teachd a nìos, agus e còmh-daichte le falluinn². Agus dh'aithnich Saul gu'm h'e Samuel a bh'ann, agus chrom se e fèin air aghaidh dh'ionnsuidh na talmhainn, agus rinn e ùmhlachd *dha*.

15 Agus thubhairt Samuel ri Saul, C'ar son a chuir thu dragh orm, le m' thoirt a nìos? Agus fhreagair Saul, Tha mi ann an teanntachd mhòir; oir tha na Philistich a' cogadh a'm' aghaidh, agus dhealaich Dia rium, agus cha 'n'eil e toirt freagraidh dhomh n'is mò, aon chuid le fàidhibh no le aislingibh: uime sin ghairm mi orts a gu fios a thoirt domh ciod a nì mi.

16 An sin thubhairt Samuel, C'ar son ma ta a tha thu a' fiosrachadh dliom-sa, agus gu'n do dhealaich an Tighearna riut, agus gu bheil e *nìs* air fàs 'na nàmhaid duit³?

17 Agus rinn an Tighearna dha, mar a labhair e tromham-sa⁴; oir reub an Tighearn an rìoghachd as do làimh, agus thug e i do d' choimhearsnach, do Dhaibhidh.

18 Do bhrìgh nach d'éisd thu ri guth an Tighearn, agus nach do chuir thu an gnìomh a chorruich gharb an aghaidh Amaleic; uime sin rinn an Tighearn an nì so riut air an là 'n diugh.

19 Agus bheir an Tighearna mar an ceudna Israel maille riutsa thairis do làimh nam Philisteach: agus am màireach *bithidh* tusa agus do mhic maille

¹ fàisteachd.

² agus falluinn uime.

³ gu bheil e nìs maille ri d' choimhearsnach.

⁴ le m' làimh-sa. Eabh.

riumsa: bheir an Tighearna mar an ceudna feachd Israeil thairis do làimh nam Philisteach.

20 An sin air ball thuit Saul sìnte air an talamh, agus bha e fo eagal ro mhòr air son bhriathra Shamueil, agus cha robh neart air bith ann; oir cha d'ìth e aran rè an latha, no rè na h-oidhe sin.

21 Agus thàinig a' bhean a dh'ionnsuidh Shaul, agus chunnaic i gu'n robh e fo uamhann mòr, agus thubhairt i ris, Feuch, thug do bhanoglach gèill do' d' ghuth, agus chuir mi m'anam a'm làimh, agus dh'èisd mi ri d' bhriathraibh a labhair thu rium:

22 A nis uime sin, guidheam ort, éisd thusa mar an ceudna ri guth do bhanog-laich, agus cuirream greim arain fa d' chomhair, agus ith e, agus bithidh neart agad, an uair a dh'imicheas tu air do shlighe.

23 Ach dhiùlt esan, agus thubhairt e, Cha'n ith mi: ach choimh-éignich a sheirbhisich agus mar an ceudna a' bhean e; agus dh'èisd e r'an guth: agus dh'éirich e o'n talamh, agus shuidh e air an leabaidh.

24 Agus bha aig a' mhnaoi laogh biadhtha san tigh, agus rinn i cabhag, agus mharbh i e; agus ghabh i min mhin², agus dh'fhuin si i, agus rinn i aran neo-ghoirt-ichte dhith:

25 Agus chuir i iad fa chomhair Shaul, agus fa chomhair a sheirbhiseach, agus dh'ìth iad: an sin dh'éirich iad suas, agus dh'imich iad air an oidheche sin féin.

CAIB. XXIX.

1 Bha fearg air ceannardaibh nam Philisteach do bhrìgh gu'n d'thug Achis Daibhidh maille ris.
6 Chuir Achis air falbh e.

ANIS chruinnich na Philistich am feachd uile gu Aphec: agus champ-aich na h-Israelich làimh ri tobar, a th'ann an Iesreel.

2 Agus chaidh tighearnan nam Philisteach air an aghaidh 'nan ceudaibh agus 'nam mìtibh: ach chaidh Daibhidh agus a dhaoine air an aghaidh 'nan deireadh maille ri Achis.

3 An sin thubhairt ceannardan nam Philisteach, Ciod a tha na h-Eabhruidhich sin a' deanamh an so? Agus thubhairt Achis ri ceannardaibh nam Philisteach, Nach e so Daibhidh seirbhiseach Shaul rìgh Israeil, a bha maille riumsa na làithean so, no na bliadhnan so, agus cha d'fhuair mi cron sam bith ann o'n là anns an d' thàinig e a m' ionnsuidh gus an là 'n diugh?

4 Agus bha fearg air ceannardaibh nam Philisteach ris; agus thubhairt ceannardan nam Philisteach ris, Thoir air an

fhear so pilltinn, a chum gu'n téid e ris d'a àit a dh'orduich thu dha, agus na rachadh e sìos maille ruinne do'n chath, air eagal gu'm bi e 'na namhaid againn sa' chath: oir cia leis a dheanadh e a réite r'a mhaighstir? nach ann le cinn nan daoine sin?

5 Nach e so Daibhidh, mu'n do chan iad le chéile³ ann an dannsaibh, ag ràdh, Mharbh Saul a mhiltean, agus Daibhidh a dheich mìltean?

6 An sin ghairm Achis air Daibhidh, agus thubhairt e ris, Gu deimhin, mar is beò an Tighearna, bha thu dìreach, agus is taitneach a'm sùilibh-sa do dhol a mach agus do theachd a steach maille rium anns a' champ; oir cha d'fhuair mi olc annad, o'n là anns an d' thàinig thu a m'ionnsuidh gus an là 'n diugh: gidheadh, ann an sùilibh nan tighearnan cha'n 'eil thu taitneach.

7 A nis ma ta pill, agus imich ann an sìth, a chum nach dean thu *ni a ta* olc ann an sùilibh thighearnan nam Philisteach.

8 Agus thubhairt Daibhidh ri Achis, Ach ciod a rinn mi, agus ciod a fhuair thu ann do sheirbhiseach o'n *cheud* là a bha mi maille riut gu ruig an là 'n diugh, nach feud mi dol a chogadh an aghaidh naimhdean mo thighearn an rìgh?

9 Agus fhreagair Achis agus thubhairt e ri Daibhidh, Tha fios agam gu bheil thu maith; ann am sùilibh-sa *tha thu* mar aingeal Dé: gidheadh, thubhairt tighearnan nam Philisteach, Cha téid e suas maille ruinne do'n chath.

10 A nis ma ta éirich gu moch sa' mhaduinn maille ri seirbhisich do mhaighstir, a thàinig maille riut; agus cò luath 'sa dh'éireas sibh sa' mhaduinn, agus a bhios solus agaibh, imichibh.

11 Uime sin rinn Daibhidh agus a dhaoine moch-eirigh chum gu'm falbh-adh iad anns a' mhaduinn, agus gu'm pilleadh iad gu tìr nam Philisteach; agus chaidh na Philistich suas gu Iesreel.

CAIB XXX.

1 Chreach na h-Amaleich Siciag. 9 Chaidh Daibhidh air an tòir: 16 bhuail e iad, agus shaor e gach ni a thug iad leo. 26 Chuir e tiodhlacan a dh'ionnsuidh a chairdean do chreich a naimh-dean.

AGUS an uair a bha Daibhidh agus a dhaoine air teachd gu Siciag air an treas là, bhris na h-Amaleich a stigh air an taobh deas, agus air Siciag; agus bhuail iad Siciag, agus loisg iad e le teine.

2 Agus thug iad leo 'nam braighdibh na mnà a bha ann: cha do mharbh iad neach air bith, aon chuid beag no mòr,

¹ dh'èisd do bhanoglach ri. Eabh.

² pùir; flour. Sasg.

³ fhreagair iad a chéile.

I. SAMUEL, XXX.

ach thug iad leo *iad*, agus dh'imich iad air an slighe.

3 Agus thàinig Daibhidh agus a dhaoine do'n bhaile, agus, feuch, *bha e* loisgte le teine; agus thugadh am mnà, agus am mic, agus an nigheana air falbh ann am braighdeanas.

4 An sin thog Daibhidh agus an sluagh a *bha* maille ris an guth, agus ghuil iad, gus nach *robh* neart anna gu gul ni b'fhaide.

5 Agus thugadh dà mhnaoi Dhaibhidh air falbh 'nam braighdibh, Ahinoam a' Bhan-icsreeleach, agus Abigail bean Nabail a' Charmelich.

6 Agus bha Daibhidh ann an teanntachd mhòir; oir labhair an sluagh mu a chlachadh, do bhrìgh gu'n robh anam an t-sluaigh uile air a chràdh, gach duine air son a chuid mac, agus air son a nigheana: ach ghabh Daibhidh misneach dha féin anns an Tighearn a Dhia.

7 Agus thubhairt Daibhidh ri Abiatar an sagart, mac Ahimelech, Thoir a m' ionnsuidh an so, guidheam ort, an ephod; agus thug Abiatar an ephod an sin a dh'ionnsuidh Daibhidh.

8 Agus dh'fhiosraich Daibhidh do'n Tighearn, ag ràdh, An téid mi air tòir na buidhne so? am beir mi orra? Agus fhreagair esan e, Falbh air an tòir; oir gu cinnteach beiridh tu orra, agus saoraidh tu an t-ìomlan.

9 Agus dh'imich Daibhidh, e féin agus an sè ceud fear a *bha* maille ris, agus thàinig iad gu ruig an sruth Besor, far an d'fhan iadsan a dh'fhàgadh 'nan déigh.

10 Agus chaidh Daibhidh air an tòir, e féin agus ceithir cheud fear: ach dh'fhan dà cheud fear 'nan déigh, a bha cho sgìth as nach b'urrainn iad dol thar an t-sruth Besor.

11 Agus fhuair iad Eiphiteach anns a' mhachair, agus thug iad e dh'ionnsuidh Dhaibhidh, agus thug iad dha aran, agus dh'ith e; agus thug iad air uisge òl;

12 Agus thug iad dha mìr do mheall¹ fhigean, agus dà bhagaide do *fhion-dhearcaibh* tiormaichte; agus an uair a dh'ith e, thàinig a spiorad a ris d'a ionnsuidh: oir cha d'ith e aran, agus cha d'òl e uisge rè trì làithean agus trì oidhchean.

13 Agus thubhairt Daibhidh ris, Co leis thu, agus cia as a *thàinig* thu? Agus thubhairt esan, *Is* òganach Eiphiteach mi, seirbhiseach do Àmaleceach; agus dh'fhàg mo mhaighstir mi, do bhrìgh gu'n robh mi tinn o cheann trì làithean.

14 Bhris sinn a steach air taobh deas nan Cereteach, agus air a' *chrìch* a *bhuin-*

ead do Iudah, agus air taobh deas Chaleib; agus loisg sinn Sielag le teine.

15 Agus thubhairt Daibhidh ris, An toir thu sìos mi dh'ionnsuidh na buidhne sin? Agus thubhairt esau, Mionnaich dhomh air Dia, nach marbh thu mi, agus nach toir thu thairis mi do làimh mo mhaighstir, agus bheir mi sìos thu dh'ionnsuidh na buidhne sin. *Agus m'ionnaich Daibhidh dha.*

16 Agus an uair a thug e sìos e, fench, sgaoileadh iad air aghaidh na tìre uile, ag itheadh agus ag òl, agus a' dannsadh, air son na creiche mòire uile a thug iad leo a tìr nam Philisteach, agus a tìr Iudah.

17 Agus bhuail Daibhidh iad o bhris eadh na fàire gu ruig feasgar an là màireach²; agus cha deachaidh duine dhiubh as, ach ceithir cheud òganach a mharcaich air càmhalaibh, agus a theich.

18 Agus shaor Daibhidh gach *ni* a thug na h-Àmaleich leo: agus shaor Daibhidh a dhà mhnaoi.

19 Agus cha robh *ni* air bith a dlùth orra³, aon chuid beag no mòr, mic no nigheana, no creach, no *ni* air bith a thug iad leo: bhuin Daibhidh gach *ni* air ais.

20 Agus ghabh Daibhidh an treud uile, agus am buar: *agus* dh'imich iad⁴ roimh an spréidh so, agus thubhairt iad, *Is i* so creach Dhaibhidh.

21 Agus thàinig Daibhidh a dh'ionnsuidh an dà cheud fear, a bha cho sgìth as nach b'urrainn iad Daibhidh a lean-tuinn, agus air an d'thug iad fantuinn aig an t-sruth Besor: agus chaidh iad a mach an coinneamh Dhaibhidh, agus an coinneamh au t-sluaigh a *bha* maille ris: agus an uair a thàinig Daibhidh am fagus do'n t-sluaigh, chuir e fàilt' orra⁵.

22 An sin fhreagair na droch dhaoine uile, agus *daoine* Bheliail, dhiubhsan a chaidh maille ri Daibhidh, agus thubhairt iad, Do bhrìgh nach deachaidh iad maille ruinne, cha toir sinn dhoibh a' *bheag* do'n chreich a shaor sinn, ach a mhàin do gach duine a bhean, agus a chlann, a chum gu'n toir iad leo *iad*, agus gu'n imich iad.

23 An sin thubhairt Daibhidh, Cha dean sibh mar sin, mo bhràithre, ris na thug an Tighearna dhuinn, a ghléidh⁶ sinn, agus a thug a' bhuidheann a thàinig 'nar n-aghaidh thairis d'ar làimh.

24 Agus cò a dh'èisdeas ribh sa' chùis so? acli mar chuibhrionn an tì a théid sìos do'n chath, mar sin *bithidh* cuibhrionn an tì a dh'fhanas maille ris an airneis; roinnidh iad air an aon dòigh.

25 Agus bha e mar sin o'n là sin a mach,

¹ bhreacaig.

² an là 'r na mhàireach.

³ cha d'ionndraineadh *ni* air bith leo.

⁴ an treud uile agus am buar a dh'iomain iad.

⁵ ghuidh e sìth dhoibh. Eabh. ⁶ dhìon, dhìidin.

gu'n d'rinn e 'na lagh e agus 'na riagh-aill aig Israel gus an là 'n diugh.

26 Agus an uair a thàinig Daibhidh gu Siciag chuir e *cuid* do'n chreich a dh'ionnsuidh sheanairean Iudah, *eadhon* a dh'ionnsuidh a chairdean, ag ràdh, Feuch, tiodhlac¹ dhuibh do chreich naimhdean an Tighearna:

27 Dhoibhsan a *bh'*ann am Bet-el, agus dhoibhsan a *bh'*ann an Ramot mu dheas, agus dhoibhsan a *bh'*ann air Iater,

28 Agus dhoibhsan a *bh'*ann an Aroer, agus dhoibhsan a *bh'*ann an Siphmot, agus dhoibhsan a *bh'*ann an Estemoa,

29 Agus dhoibhsan a *bh'*ann an Rachal, agus dhoibhsan a *bh'*ann am bailtibh nan Ierahmeeleach, agus dhoibhsan a *bh'*ann am bailtibh nan Ceneach.

30 Agus dhoibhsan a *bh'*ann an Hormah, agus dhoibhsan a *bh'*ann an Cor-asan, agus dhoibhsan a *bh'*ann an Atach,

31 Agus dhoibhsan a *bh'*ann an Hebron, agus do na h-àitibh sin uile anns am bu ghnàth le Daibhidh agus a dhaoine tath-uich².

CAIB. XXXI.

1 Bhuaill na Philistich fir Israeil, agus mharbh iad triuir mhac Shaul. 5 Mharbh Saul agus fear iomchair 'arm iad fèin. 10 Sparr na Philistich cuirp Shaul agus a chuid mac ri balla Bhet-sain. 12 Thug daoine Iabeis-ghilead air falbh iad, agus dh'adhlac siad iad.

ANIS chog na Philistich an aghaidh Israeil; agus theich fir Israeil o fhianuis nam Philisteach, agus thuit iad sìos marbh ann an sliabh Ghilboa.

2 Agus lean na Philistich Saul agus a mhic gu teann; agus bhuaill³ na Philistich Ionatan, agus Abinadab, agus Malchisua mic Shaul.

3 Agus dh'fhàs an cath cruaidh an aghaidh Shaul, agus bhuaill na fir-bhogha air⁴; agus lotadh gu mòr e leis na fir-bhogha.

4 An sin thubhairt Saul ri fear iomchair 'arm, Rùisg do chlaidheamh agus sàth tromham e, air eagal gu'n tig na daoine

neo-thinchioll-gheartha sin, agus gu'n sàth iad tromham, agus gu'n toir iad masladh dhomh⁵. Ach cha b'àill le fear iomchair 'arm sin a *dheanamh*, oir bha eagal mòr air: uime sin ghabh Saul claidheamh, agus thuit e air.

5 Agus an uair a chunnaic fear iomchair 'arm gu'n robh Saul marbh, thuit esan mar an ceudna air a chlaidheamh, agus fhuair e bàs maille ris.

6 Mar sin fhuair Saul bàs, agus a thriuir mhac, agus fear iomchair 'arm, agus a dhaoine uile air an là sin fèin maille ri chéile.

7 Agus an uair a chunnaic fir Israeil, a *bha* air taobh a' ghlinne, agus *iadsan* a *bh'*air an taobh so do Iordan, gu'n do theich fir Israeil, agus gu'n robh Saul agus a mhic marbh, thréig iad na bailtean, agus theich iad; agus thàinig na Philistich, agus ghabh iad còmhnuidh anna.

8 Agus air an là màireach, an uair a thàinig na Philistich a dh'fhaobhachadh uam marbh, fhuair iad Saul agus a thriuir mhac air tuiteam ann an sliabh Ghilboa.

9 Agus ghearr iad dheth a cheann, agus rùisg iad 'armachd dheth, agus chuir iad *fios* gu tìr nam Philisteach mu'n cuairt, g'a chur an céill ann an tigh an diathan-bréige, agus am measg an t-sluaigh.

10 Agus chuir iad 'armachd ann an tigh Astaroit: agus sparr iad a chorp ri balla Bhet-sain.

11 Agus an uair a chuala luchd-àiteachaidh Iabeis-ghilead an nì sin a rinn na Philistich ri Saul.

12 Dh'éirich na daoine treuna uile, agus dh'imich iad rè na h-oidhche, agus thug iad corp Shaul, agus cuirp a chuid mac, o bhalla Bhet-sain, agus thàinig iad gu Iabes, agus loisg iad an sin iad.

13 Agus ghabh iad an cnaimhean, agus dh'adhlac siad iad fuidh chraoibh ann an Iabes, agus thraisg iad seachd làithean.

¹ tiodhlacadh; beannachadh. Eabh. ² taothall.
³ mharbh. ⁴ fhuair na fir-bhogha e. Eabh.

⁵ gu'n dean iad fanaid orm.

DARA LEABHAR SHAMUEIL,

D' AN AINM, AIR MHODH EILE,

DARA LEABHAR NAN RIGH.

CAIB. I.

1 Mharbhadh an t-Amaleceach a dh'innis do Dhaibhidh gu'n do bhuaileadh clann Israeil, agus a thug fianuis 'na aghaidh fèin gu'n do mharbh e Saul. 17 Caidh Dhaibhidh air son Shaul agus air son Ionatan.

ANIS an déigh bàis Shaul, phill Daibhidh o àrnan Amaleceach, agus dh'fhan Daibhidh ann an Siciag dà latha.

2 Agus air an treas là, feuch, thàinig duine as a' champ o Shaul, agus 'eudach reubta, agus ùir air a cheann: agus an uair a thàinig e dh'ionnsuidh Dhaibhidh, thuit e air an talamh, agus rinu e ùmh-lachd.

3 Agus thubhairt Daibhidh ris, Cia as a tha thu air teachd? Agus thubhairt esan ris, A camp Israeil theich mi.

II. SAMUEL, I. II.

4 Agus thubhairt Daibhidh ris, Ciod a thachair? innis dhomh, guidheam ort. Agus fhreagair e, Theich an sluagh o'n chath, agus cuideachd tha mòran do'n t-sluagh air tuiteam agus marbh; agus mar an ceudna tha Saul agus a mhac Ionatan marbh.

5 Agus thubhairt Daibhidh ris an òganach a dh'innis dha, Cionnus a tha fios agad gu bheil Saul agus a mhac Ionatan marbh?

6 Agus thubhairt an t-òganach a dh'innis dha, Thachair dhomhsa bli air sliabh Ghilboa, agus, feuch, bha Saul a' leigeil a thaice r'a shleagh, agus, feuch, lean na carbadan agus am marc-shluagh gu dian 'na dhéigh.

7 Agus an uair a dh'amhairc e 'na dhéigh, chunnaic e mise, agus ghairm e orm: agus fhreagair mi, *Tha mi 'n so.*

8 Agus thubhairt e rium, Cò thusa? Agus fhreagair mise e, *Is Amaleceach mi.*

9 Thubhairt e rium a ris, Seas orm, guidheam ort, agus marbh mi: oir ghlac teanntachd mi, do bhrìgh gu *bheil* mo bheatha fathast gu h-iomlan annam.

10 Agus sheas mi air, agus mharbh mi e, a chionn gu'n robh fios agam nach biodh e beò an déigh dha tuiteam; agus ghabh mi 'n crùn a *bha* air a cheann, agus an làmh-fhàil a *bha* air a ghairdean, agus thug mi 'n so iad a dh'ionnsuidh mo thighearn.

11 An sin rug Daibhidh air 'eudach, agus reub se e, agus mar an ceudna na daoine uile a *bha* maille ris.

12 Agus rinn iad caoidh, agus ghul iad, agus thraisg iad gu feasgar, air son Shaul, agus air son a mhic Ionatain, agus air son sluagh an Tighearn, agus air son tighe Israeil, do bhrìgh gu'n do thuit iad leis a' chlaidheamh.

13 Agus thubhairt Daibhidh ris an òganach a dh'innis dha, Cia as duitse? Agus fhreagair esan, *Is mac coigrich, Amalecich mi.*

14 Agus thubhairt Daibhidh ris, Cionnus nach robh eagal ort do làmh a shineadh a mach amharbhadh¹ aoin ungta an Tighearn?

15 Agus ghairm Daibhidh air aon do na h-òganach, agus thubhairt e, Thig am fagus, agus leum air. Agus bhuail se e, agus fhuair e bàs.

16 Agus thubhairt Daibhidh ris, *Biodh* t'fhuil air do cheann féin, oir thug do bheul fianuis a' d' aghaidh, ag ràdh, Mharbh mi aon ungta an Tighearn.

17 Agus rinn Daibhidh caoidh leis a' chumhadh² so os ceann Shaul, agus os ceann a mhic Ionatain:

18 (Agus dh'àithn e gu'n iunnsaicheadh iad do chloinn Iudah *tilgeadh le bogha*³: feuch, *tha* e sgriobhta ann an leabhar Iaseir;)

19 O mhaise Israeil, air do lotadh air t'aitibh àrda! cionnus a thuit na cumhachdaich?

20 Na h-innsibh e ann an Gat, na cuiribh an céill e ann an sràidibh Asceloin; air eagal gu'm bi nigheana nam Philisteach aoihbheach, air eagal gu'n dean nigheana nan neo-thimchioll-ghearra luath-ghàire.

21 A shléibhte Ghilboa, na *biodh* drùchd no uisge oirbh; no *oirbhse*, achanna thabhartasa⁴; oir an sin thilgeadh gu tàireil air falbh sgiath nan cumhachdach, sgiath Shaul, mar nach *bitheadh* e ungta le h-oladh.

22 O fhuil nam marbh, o shail nam cumhachdach, cha do thionndaidh bogha Ionatain air ais; agus cha do phill claidheamh Shaul gu faoin⁵.

23 *Bha* Saul agus Ionatan gràdhach agus taitneach 'nam beatha, agus 'nam bàs cha do sgaradh iad: bu luaithe iad na iolairean, bu treise iad na leòmhain.

24 A nigheana Israeil, guilbh air son Shaul, a dh'eudaich sibh ann an scarlaid le aoihbheas⁶, a chuir òir-ghreus air bhur n-eudach.

25 Cionnus a thuit na cumhachdaich am meadhan a' chatha! O a Ionatain, air t'aitibh àrda mharbhadh *thu*!

26 *Tha* cràdh orm air do shon, mo bhràthair a Ionatain: ro thaitneach *bha* thu dhomhsa: b'iongantach do ghràdh dhomhsa, a' toirt barrachd air gràdh nam ban.

27 Cionnus a thuit na cumhachdaich, agus a chaidh as do airm a' chogaidh?

CAIB. II.

1 Chaidh Daibhidh suas gu Hebron, agus an sin rinneadh rìgh dheth os ceann Iudah. 8 Rinn Abner Isboset 'na rìgh air Israel. 17 Bhuail eadh Abner agus fir Israeil roimh sheirbhiseich Daibhidh.

AGUS 'na dhéigh so dh'fhiosraich Daibhidh do'n Tighearn, ag ràdh, An téid mi suas gu aon do bhaitibh Iudah? Agus thubhairt an Tighearna ris, Falbh suas. Agus thubhairt Daibhidh, C'ait a théid mi suas? Agus thubhairt esan, Gu Hebron.

2 Agus chaidh Daibhidh suas an sin, agus mar an ceudna a dhà mhnaoi, Ahinoam a' Bhan-iesreleach, agus Abigail bean Nabail a' Charmelich.

3 Agus a dhaoine a *bha* maille ris thug Daibhidh suas leis, gach fear le 'theagh-

¹ a mhilleadh, a sgrìos.

² tuireadh.

³ gu'n teagaisgeadh iad do chloinn Iudah an cumh-

adh so d' an ainm am bogha.

⁴ achanna tarbhach.

⁵ falamh.

⁶ maille ri nithibh taitneach.

II. SAMUEL, II.

lach: agus ghabh iad còmluaidh ann am bailtibh Hebron.

4 Agus thàinig daoine Iudah, agus dh'ung iad an sin Daibhidh¹ na rìgh os ceann tighe Iudah. Agus dh'innis iad do Dhaibhidh, ag ràdh, *B' iad* daoine Iabeis-ghilead a dh'adhlaic Saul.

5 Agus chuir Daibhidh teachdairean a dh'ionnsuidh dhaoine Iabeis-ghilead, agus thubhairt e riu, Beannaichte *gu robh sibh o'n Tighearn*, a thaobh gu'n do nochd sibh an caoimhneas do r' tighearna, do Shaul, agus gu'n d'adhlaic sibh e.

6 Agus a nis gu nochdadh an Tighearna caoimhneas dhuibhse, agus firinn: agus dìolaidd mise mar an ceudna ann maithreas so dhuibh, do bhrìgh gu'n d'rinn sibh an ni so.

7 A nis uime sin biodh bhuir làmhan air an neartachadh, agus bithibh gaisgeil, oir tha bhuir tighearna Saul marbh, agus mar an ceudna dh'ung tigh Iudah mise a m' rìgh os an ceann.

8 Ach ghabh Abner mac Neir, ceannard armailte Shaul, Isboset mac Shaul, agus thug e thairis e gu Mahanaim;

9 Agus rinn se e na rìgh air Gilead, agus air na h-Asuraich, agus air Iesreel, agus air Ephraim, agus air Benjamin, agus air Israel uile.

10 Dà fhichead bliadhna dh'aois *bha* Isboset mac Shaul an uair a thòisich e air riochachadh os ceann Israeil, agus rìghich e dà bhliadhna: ach lean tigh Iudah Daibhidh.

11 Agus b'e àireamh nan làithean a bha Daibhidh na rìgh ann an Hebron air tigh Iudah, seachd bliadhna agus sè mìosan.

12 Agus chaidh Abner mac Neir, agus seirbhìsich Isboseit mhic Shaul, a mach o Mahanaim gu Gibeon.

13 Agus chaidh Ioab mac Sheruah, agus seirbhìsich Dhaibhidh a mach, agus choinnich iad a chèile aig lochan Ghibeoin: agus shuidh iad sìos, iad so air aon taobh do'n lochan, agus iad sud air an taobh eile do'n lochan.

14 Agus thubhairt Abner ri Ioab, Eir-eadh na h-òganaich a nis, agus deanadh iad lùchleas¹ nar fianuis. Agus thubhairt Ioab, Eir-eadh iad.

15 An sin dh'éirich suas agus chaidh thairis dà fhear dheug an àireamh do Bheniamin, a *bhuineadh* do Isboset mac Shaul, agus dà fhear dheug do sheirbhìsich Dhaibhidh.

16 Agus rug gach fear dhiubh air ceann a chompanaich², agus *shàth e* a chlaiddheamh ann an leth-taobh a chompanaich, agus thuit iad sìos cuideachd: uime sin thugadh mar ainm air an àite sin Helcat-hasurim, a *tha* ann an Gibeon.

17 Agus bha cath ro chruaidh ann air an là sin; agus bhuailleadh Abner agus fir Israeil fa chomhair sheirbhìseach Dhaibhidh.

18 Agus bha trì mic Sheruah an sin, Ioab, agus Abisai, agus Asahel: agus *bha* Asahel co luath d'a chois ri boc earba na macharach.

19 Agus chaidh Asahel air tòir Abneir; agus cha do chlaon e na shiubhal a dh'ionnsuidh na làimhe deise no na làimhe clithe, o *dhol* an dèigh Abneir.

20 An sin dh'amhairc Abner na dhéigh, agus thubhairt e, An tusa Asahel? Agus fhreagair esan, *Is mi*.

21 Agus thubhairt Abner ris, Tionndaidh a dh'ionnsuidh do làimhe deise no dh'ionnsuidh do làimhe clithe, agus glac aon do na h-òganaich, agus gabh a d'ionnsuidh 'fhaobh³. Ach cha b'àill le Asahel tionndadh o esan a leantuinn.

22 Agus thubhairt Abner a ris ri Asahel, Tionndaidh o mise a leantuinn: c'ar son a bhuailinn thu gu làr? cionn as sin a thogainn suas m'aghaidh ri Ioab do bhràthair?

23 Gidheadh dhiùlt esan tionndadh; uime sin bhuail Abner e le earr na sleagha fuidh na chùigeadh *aisne*, agus thàinig an t-sleagh a mach air a chùlaobh; agus thuit e na sin, agus fhuair e bàs san àite sin féin: agus iadsan uile a thàinig a dh'ionnsuidh an àite anns an do thuit Asahel sìos agus anns an d'fhuair e bàs, dh'fhan iad nan seasamh.

24 Chaidh Ioab mar an ceudna agus Abisai air tòir Abneir: agus luidd a' ghrian an uair a thàinig iad gu sliabh Amah, a *tha* fa chomhair Ghiah, air slighe fàsaich Ghibeoin.

25 Agus chruinnich clann Bheniamin iad féin an ceann a chèile *gu dol* an dèigh Abneir, agus bha iad nan aon bhuidhinn, agus sheas iad air mullach cnoic.

26 An sin ghlaodh Abner ri Ioab, agus thubhairt e, An sgrìos an claidheamh gu bràth? nach 'eil fios agad gu'm bi searbhas ann fa dheireadh? cia fad a bhitheas e ma ta mu'n abair thu ris an t-sluagh pillinn o leantuinn am bràithrean?

27 Agus thubhairt Ioab, *Mar is* beò Dia, mur⁴ bitheadh tu air labhairt, gu deimhin an sin anns a' mhaduinn⁵ rachadh an sluagh suas, gach fear o leantuinn a bhràthair.

28 Uime sin shéid Ioab trompaid, agus stad an sluagh uile, agus cha deachaidh iad ni's mò air tòir Israeil, agus cha do chog iad ni's mò.

29 Agus dh'imich Abner agus a dhaoine air feadh a' chòmhnaidh rè na h-oidhche sin, agus chaidh iad thar Iordain, agus

¹ cluicheadh iad.

² choimh-ghleacair.

³ éideadh, 'armachd. ⁴ nam. ⁵ o'n mhaduinn. Eabh.

chaidh iad troimh Bhítron uile, agus thàinig iad gu Mahanaim.

30 Agus phill Ioab o *dhòl* an déigh Abneir; agus an uair a chruinnich e 'n sluagh uile an ceann a chéile, dh'ionndraineadh do sheirbhisich Dhaibhidh naoi fir dheug agus Asahel.

31 Ach bhuail seirbhisich Dhaibhidh do Bheniamin, agus do dhaoineibh Abneir, tri cheud agus tri fichead fear, a fhuair bàs.

32 Agus thog iad leo Asahel, agus dh'adhlaidh iad e ann an àit-adhlacaidh¹ athar, a *bha* ann am Bet-lehem: agus dh'imich Ioab agus a dhaoine rè na h-oidhche, agus thàinig iad gu Hebron mu bhriseadh na fàire.

CAIB. III.

1 *Rugadh séanar mhac do Dhaibhidh ann an Hebron. 6 Tha fearg air Abner ri Isboset, agus bhagair e an rìoghachd atharrachadh o thigh Shaul. 14 Chuir Daibhidh fios air Michal a mhnai. 22 Mharbh Ioab Abner. 28 Rinn Daibhidh caoidh air a shon.*

ANIS bha cogadh fada eadar tigh Shaul agus tigh Dhaibhidh: ach *bha* Daibhidh a' sìr-dhol air aghaidh ann an near, agus tigh Shaul a' sìr-dhol an laige.

2 Agus rugadh do Dhaibhidh mic ann an Hebron: agus b'e a cheud-ghin Amnon, ri Ahinoam a' Bhan-iesreeleach:

3 Agus a dhara *mac* Chilib, ri Abigail bean Nabail a' Charmelich: agus an treas *mac* Absalom, mac Mhaacah, nighinn Thalmi, rìgh Ghesuir:

4 Agus an ceathramh *mac* Adoniah, mac Hagit: agus an cùigeadh *mac* Sephatiah, mac Abitail:

5 Agus an seathadh *mac* Iteam, ri Eglah bean Dhaibhidh. Rugadh iad sin do Dhaibhidh ann an Hebron.

6 A nis an uair a bha cogadh eadar tigh Shaul agus tigh Dhaibhidh, rinn Abner e féin làidir ann an tigh Shaul.

7 Agus *bha* coimhleabach aig Saul, d'am b'ainm Rispah, nighean Aiah: agus thubhairt Isboset ri Abner, C'ar son a chaidh thu stigh a dh'ionnsuidh coimhleabaich m'athar?

8 An sin bha fearg mhòr air Abner air son bhriathran Isboset, agus thubhairt e, An ceann coin mise, a *bhuineas* do Iudah? tha mi a' nochdadh caomhneis an diugh¹ do thigh Shaul t'athar, d'a bhràithribh, agus d'a chaidibh, agus cha d'thug mi thairis thusa do làimh Dhaibhidh; gidheadh tha thusa a' cur coire as mo leth an diugh a thaobh na mnà so?

9 Mar sin gu'n deanadh Dia ri Abner, agus tuille mar an ceudna, mar a mhiomnaich an Tighearna do Dhaibhidh, mur dean mise eadhon mar sin ris-san;

10 An rìoghachd atharrachadh o thigh

Shaul, agus rìgh-chaitir Dhaibhidh a chur suas os ceann Israeil, agus os ceann Iudah, o Dhan eadhon gu Beersèba.

11 Agus cha b'urrainn e Abner a fhreagairt aon fhocal a ris, a chionn gu'n robh eagal air roimhe.

12 Agus chuir Abner teachdairean a dh'ionnsuidh Dhaibhidh 'na àite féin², ag ràdh, Cia leis an tìr? ag ràdh *mar an ceudna*, Dean do choimhcheangal riumsa, agus, feuch, *bithidh* mo làmh leat, gu Israel uile a thionndadh a d' ionnsuidh.

13 Agus thubhairt esan, *Ro mhaith*; ni mise coimhcheangal riut: ach aon ni *tha* mi ag iarraidh ort, eadhon, Nach faic thu mo ghnùis, mur toir thu leat air tùs Michal nighean Shaul, an uair a thig thu g'am fhaicinn.

14 Agus chuir Daibhidh teachdairean gu Isboset mac Shaul, ag ràdh, Tabhair *dhomh* mo blean Michal, a cheangail mi rium féin ann pòsadh air son ceud roimh-chroicinn do na Philistich.

15 Agus chuir Isboset *fios oirre*, agus thug e o a fear i, eadhon o Phaltiel mac Lais.

16 Agus dh'imich a fear maille rithe, a' gul 'na déigh gu Bahurim: an sin thubhairt Abner ris, Falbh, pill. Agus phill e.

17 Agus rinn Abner còmhraidh ri seann-airibh Israeil, ag ràdh, Anns an aimsir roimhe so dh'iarr sibh Daibhidh a *bhi* 'na rìgh os bhur ceann.

18 A nis ma ta deanaibh e; oir labhair an Tighearna mu Dhaibhidh, ag ràdh, Le làimh mo sheirbhisich Dhaibhidh saoraidh mi mo shluagh Israel á làimh nam Philisteach, agus á làimh an naimhdean uile.

19 Agus labhair Abner mar an ceudna ann an clusaibh Bheniamin: agus chaidh Abner mar an ceudna a labhairt ann an clusaibh Dhaibhidh ann an Hebron, gach ni a *bha* taitneach ann an sùilibh Israeil, agus ann an sùilibh tighe Bheniamin uile.

20 Agus thàinig Abner a dh'ionnsuidh Dhaibhidh gu Hebron, agus fichead fear maille ris: agus rinn Daibhidh cuirm do Abner agus do na daoineibh a *bha* maille ris.

21 Agus thubhairt Abner ri Daibhidh, Eiridh mi, agus falbhaidh mi, agus cruinnichidh mi Israel uile dh'ionnsuidh mo thighearn an rìgh, a chum gu'n dean iad coimhcheangal riut, agus gu'n rìghich thu os ceann gach ni a's miann le t'anam: agus chuir Daibhidh Abner air falbh, agus dh'imich e ann an sìth.

22 Agus, feuch, thàinig seirbhisich Dhaibhidh agus Ioab o *ruagadh* buidhne, agus thug iad creach mhòr leo: (ach cha *robh* Abner maille ri Daibhidh, ann an Hebron; oir chuir e air falbh e, agus dh'imich e ann an sìth.)

¹ a nochdas caomhneas an diugh an aghaidh Iudah.

² as a leth féin, air ball.

II. SAMUEL, III. IV.

23 Agus an uair a thàinig Iob agus an armailt uile a *bha* maille ris, dh'innis iad do Iob, ag ràdh. Thàinig Abner mac Neir a dh'ionnsuidh an rìgh, agus chuir e air falbh e, agus dh'imich e ann an sìth.

24 An sin thàinig Iob a dh'ionnsuidh an rìgh, agus thubhairt e, Cìod e a rinn thu? feuch, thàinig Abner a d'ionnsuidh; c'ar son so a chuir thu air falbh e, agus gun amharus dh'imich e?

25 Is aithne dhuit Abner mac Neir, gur ann gu d' mhealladh a thàinig e, agus gu fios fhaghail air do dhol a mach agus do theachd a steach, agus gu fios fhaghail air gach *ni* a *tha* thu a' deanamh.

26 Agus an uair a thàinig Iob a mach o Dhaibhidh, chnir e teachdairean an déigh Abneir, a thug air ais e o thobar Shirah: ach cha robh fios aig Daibhidh air.

27 Agus an uair a phill Abner gu Hebron, thug Iob e a leth-taobh anns a' gheata a labhairt ris ann an sìth¹; agus bhuail e 'n sin e fuidh 'n chùigeadh *aisne*, agus fhuair e bàs air son fola a bhràthar Asahel.

28 Agus 'na dhéigh sin an uair a chuala Daibhidh e, thubhairt e, *Tha* mise agus mo rìoghachd neò-chiontach an làthair an Tighearna gu bràth o fhuil Abneir mhic Neir.

29 Fanadh i air ceann Ioaib, agus air tigh 'athar uile, agus na bitheadh a dhith air tigh Ioaib neach air am bi sìlteach, no *bhios* 'na lobhar, no d'an éigin sìubhal le bata, no thuiteas air claidheamh, no air am bi easbhuidh arain.

30 Mar sin mharbh Iob agus a bhràthair Abisai Abner, a chionn gu'n do chuir esan gu bàs am bràthair Asahel aig Gibeon anns a' chath.

31 Agus thubhairt Daibhidh ri Iob, agus ris an t-sluagh uile a *bha* maille ris, Reubaibh bhur n-eudach, agus cuiribh saic-eudach umaibh, agus deanaibh caoidh roimh Abner. Agus lean rìgh Daibhidh *féin* an giùlan.

32 Agus dh' adhlaic iad Abner ann an Hebron: agus thog an rìgh suas a ghuth, agus ghuil e aig uaigh Abneir; agus ghuil an sluagh uile.

33 Agus rinn an rìgh caoidh os ceann Abneir, agus thubhairt e, An ann mar a bhàsaicheas amadan², a bhàsaich Abner?

34 Cha do cheangladh do làmhan, agus cha do chuireadh do chosan ann an geimhlìbh; mar a thuiteas duine roimh dhaoine aingidh, *mar sin* thuit thusa. Agus ghuil an sluagh uile a ris os a cheann.

35 Agus an uair a thàinig an sluagh uile a thoirt air Daibhidh biadh itheadh,

am feadh 'sa b' e 'n là fatuast a bh'ann, mhionnaich Daibhidh, ag ràdh, Mar sin gu deanadh Dia riumsa, agus tuille mar an ceudna, ma bhlaiseas mi aran no ni air bith eile, gus an téid a' ghrian fuidhe.

36 Agus thug an sluagh uile fa'near e, agus bha e taitneach 'nan sùilbh: mar a bha gach *ni* a rinn an rìgh taitneach ann an sùilbh an t-sluagh uile:

37 Oir thuig an sluagh uile agus Israel uile air an là sin, nach ann o'n rìgh a bha e Abner mac Neir a chur gu bàs.

38 Agus thubhairt an rìgh r'a sheirbhisich, Nach 'eil fhios agaibh gu'n do thuit uachdaran agus *duine* mòr an diugh ann an Israel?

39 Agus tha mise an diugh anmhunn³, ged⁴ *tha* mi ungta a'm' rìgh; agus tha na daoine sin, mic Sheruiah, ro chruaidh air mo shon: dlòidh an Tighearna do fhear deanamh an uile a réir 'aingidh-eachd.

CAIB. IV.

1 Mharbh Baanah agus Rechab Isboet, agus thug iad cheann a dh'ionnsuidh Dhaibhidh gu Hebron.
9 Dh'athn Daibhidh an cur gu bàs.

AGUS an uair a chuala mac Shauil gu'n d'fhuair Abner bàs ann an Hebron, dh'fhàs a làmhan fann, agus bha Israel uile fo bhuaireas.

2 Agus bha aig mac Shauil dithis fhear a *bha* 'nan ceannardaibh air buidhnibh; b'e ainm aoin drubh Baanah, agus ainm an fhir eile Rechab, mic Rimoin a' Bheerotaich, do chloinn Bheniamin: (oir mheasadh Beerot mar an ceudna do Bheniamin:

3 Agus theich na Beerotaich gu Gitaim, agus tha iad 'nan luchd-cuairt an sin gu rìgh an là 'n diugh:)

4 Agus bha aig Ionatan mac Shauil mac a *bha* bacach⁵, agus a bha cuig bliadhna dh'aois an uair a thàinig an sgeul mu Shaul agus Ionatan á Iesreel; agus thog a bhanaltrum leatha e, agus theich i: agus an uair a rinn i cabhag gu teicheadh, thuit esan, agus rinneadh bacach e; agus b'e 'ainm Mephiboset.

5 Agus dh'imich mic Rimoin a' Bheerotaich, Rechab agus Baanah, agus thàinig iad mu theas an là gu tigh Isboet, a bha 'na luidhe air leabaidh mu mheadhon-là.

6 Agus, feuch, thàinig iad air an aghaidh gu meadhon an tighe, *mar gu'm biodh iad* gu cruithneachd a thoirt leo, agus bhuail iad e fuidh 'n chùigeadh *aisne*: agus chaidh Rechab agus a bhràthair Baanah as:

7 Oir an uair a thàinig iad a steach do'n tigh, bha esan 'na luidhe air a leabaidh 'na sheòmar-codail, agus bhusil iad e,

¹ gu h-uaigneach.

² marbh. Eabh.

³ duine aingidh.

⁴ agus. Eabh.

⁵ ciurrmacach 'na chosaibh. Eabh.

agus mharbh iad e, agus chuir iad an ceann deth, agus thug iad leo a cheann, agus dh'imich iad rompa air slighe an fhàsaich¹ rè na h-oidhche.

8 Agus thug iad ceann Isbòseit a dh'ionnsuidh Dhaibhidh gu Hebron, agus thubhairt iad ris an rìgh, Feuch, ceann Isbòseit mhic Shaul do nàmhaid, a dh'iarra t'anam; agus thug an Tighearna do m' thighearn an rìgh dìoghaltas air an là 'n diugh air Saul agus air a shliochd.

9 Agus fhreagair Daibhidh Rechab agus Baanah a bhràthair, mic Rimoin a' Bheerotaich, agus thubhairt c' riù, *Mar is beò an Tighearn, a shaor m'anam as gach uile airc,*

10 An uair a dh'innis neach dhomh, ag ràdh, Feuch, tha Saul marbh, (agus e a meas gu'n robh e toirt deadh sgeoil leis,) rug mi air, agus mharbh mi e ann an Siclag, an uair a *shaoil* e gu'n tugainn luigheachd dha air son a sgeoil:

11 Nach mò gu mòr, an uair a mharbh daoine aingidh duine ionraic 'na thigh fèin air a leabaidh? agus a nis nach iarra mi 'fhuil-san air bhuir làimh-sa, agus nach toir mi bhàrr na talmhainn sibh?

12 Agus dh'àithn Daibhidh d'a ògan-aich, agus mharbh siad iad, agus ghearr iad dhiubh an làmhnan agus an cosan, agus chroch iad suas *iad* os ceann an tobair ann an Hebron; ach ghabh iad ceann Isbòseit, agus dh'adhlac iad e ann an àit-adhlacaidh Abneir ann an Hebron.

CAIB. V.

1 *Thàinig treubhan Israeil, a dh'ionnsuidh Dhaibhidh gu Hebron, agus dh'ung iad e 'na rìgh os an ceann.* 6 *Ghlac e Sion, agus ghabh e còmhnuidh ann.* 17 *Bhuail e na Philistich aig Baal-perasim, agus a ris aig craobhaibh nan smeur.*

AN sin thàinig uile treubhan Israeil a dh'ionnsuidh Dhaibhidh gu Hebron, agus labhair iad, ag ràdh, Feuch, *is sinne* do chnàimh agus t'fheoil.

2 Mar an ceudna roimhe so, 'nuair a bha Saul 'na rìgh os ar ceann, bu tusa an tì a threòraich a mach agus a thug a steach Israel: agus thubhairt an Tighearna riut, Beathaichidh tu mo shluagh Israel, agus bithidh tu a' d' cheannard air Israel.

3 Agus thàinig uile sheanairean Israeil a dh'ionnsuidh an rìgh gu Hebron, agus rinn rìgh Daibhidh coimheangal riù ann an Hebron am fianuis an Tighearn: agus dh'ung iad Daibhidh 'na rìgh air Israel.

4 *Bha* Daibhidh deich bliadhna fichead a dh'aois an uair a *thòisich* e air rìoghachadh; agus rìghich e dà fhichead bliadhna.

5 Ann an Hebron rìghich e os ceann Iudah seachd bliadhna agus sè mìosan;

agus ann an Ierusalem rìghich e trì bliadhna deug thar fhichead os ceann Israeil uile agus Iudah.

6 Agus dh'imich an rìgh agus a dhaoine gu h-Ierusalem, a dh'ionnsuidh nan Iebusach, luchd-àiteachaidh na tìre; a labhair ri Daibhidh, ag ràdh, Cha tig thu a steach an so mur toir thu air falbh na doill agus na bacaich; ag ràdh, Cha tig Daibhidh a steach an so.

7 Gidheadh, ghlac Daibhidh daingneach Shioin: *is e sin baile Dhaibhidh.*

8 Agus thubhairt Daibhidh air an là sin, Ge b'è neach a ruigeas a' chlais-uisge², agus a bhuailas na Iebusaich, agus na bacaich, agus na doill, aig am bheil fuath air anam Dhaibhidh, *bithidh esan 'na cheannard*: uime sin thubhairt iad, Cha tig an dall agus am bacach a steach do'n tigh.

9 Agus ghabh Daibhidh còmhnuidh anns an daingneach, agus dh'ainmich se e, Baile Dhaibhidh; agus thog Daibhidh *aitreabh* mu'n cuairt, o Mhìlo agus air an taobh a stigh.

10 Agus chaidh Daibhidh air 'aghaidh, a' fàs mòr; agus *bha* 'n Tighearna Dia nan sluagh maille ris.

11 Agus chuir Hiram rìgh Thiruis teachdairean a dh'ionnsuidh Dhaibhidh, agus fiodh seudair, agus saoir, agus clachairean; agus thog iad tigh do Dhaibhidh.

12 Agus thug Daibhidh gu'n do dhaingnich an Tighearn e 'na rìgh air Israel, agus gu'n d'ardaich e a rìoghachd air son a shluaigh Israeil.

13 Agus ghabh Daibhidh *dha fèin* tuille choimhleabach agus bhan á h-Ierusalem, an déigh dha teachd á Hebron: agus rugadh fathast mic agus nigheana do Dhaibhidh.

14 Agus *is* iad so an ainmean-san, a rugadh dha ann an Ierusalem; Samuah, agus Sobab, agus Natan, agus Solamh.

15 Agus Ibharr, agus Elisua, agus Nepheg, agus Iaphia.

16 Agus Elisama, agus Eliada, agus Eliphalet.

17 Ach an uair a chuala na Philistich gu'n d'ung iad Daibhidh 'na rìgh air Israel, thàinig na Philistich uile mòs a dh'iarraidh Dhaibhidh; agus chuala Daibhidh *sin*, agus chaidh e sìos do'n daingneach.

18 Agus thàinig na Philistich, agus sgaoil siad iad fèin ann an gleann Rephaim.

19 Agus dh'fhiosraich Daibhidh do'n Tighearn, ag ràdh, An téid mi suas a dh'ionnsuidh nam Philisteach? an toir thu thairis iad a' m' làimh? Agus thubhairt an Tighearna ri Daibhidh, Gabh suas;

¹ a' chòmhnaird.

² am feadan uisge.

oir gu cinn-teach bheir mi thairis na Philistich a' d' làimh.

20 Agus thàinig Daibhidh gu Baal-perasim, agus bhuail Daibhidh iad an sin, agus thubhairt e, Bhriis an Tighearn o chéile mo naimhdean a'm' fhianuis, mar bhriseadh uisgeachan. Uime sin thug e Baal-perasim mar ainm air an àite sin.

21 Agus dh'fhàg iad an sin an dcalbhan¹, agus loisg² Daibhidh agus a dhaoine iad.

22 Agus thàinig na Philistich a nìos a ris, agus sgaoil siad iad féin ann an gleann Rephaim.

23 Agus an uair a dh'fhiosraich Daibhidh do'n Tighearna, thubhairt e, Cha téid thu suas; ach gabh mu'n cuairt air an cùlaobh, agus thig orra fa chomhair chraobh nan smeur³.

24 Agus an uair a chluinneas tu fuaim siubhail ann am mullach⁴ chraobh nan smeur, an sin gluaisidh tu thu féin; oir an sin théid an Tighearna mach romhad, a bhuailad feachd nam Philisteach.

25 Agus rinn Daibhidh mar sin, mar a dh'àithn an Tighearna dha: agus bhuail e na Philistich o Gheba, gus an tig thu gu Gaser.

CAIB. VI.

1 Thug Daibhidh an àire o Chiriat-earim gu Sion.

6 Bhuail Dia Usah a chionn gu'n do ghabh e greim dhith. 16 Rinn Michal tàir air Daibhidh.

AGUS chruinnich Daibhidh fathast an a ceann a chéile fir thaghta Israeil uile, deich mìle fichead.

2 Agus dh'éirich Daibhidh, agus chaidh e, agus an sluagh uile a bha maille ris, o Bhaal Iudah, a thabhairt suas á sin àire Dhé, air an gairmeir ainm Thighearna nan sluagh, a ghabhas còmhuidh eadar na Cheruban.

3 Agus chuir iad àire Dhé air feun⁵ nomha, agus thug iad i á tigh Abinadaib a bha ann an Gibeah: agus dh'iomain Usah agus Ahio, mic Abinadaib, am feun nomha maille ri àire Dhé.

4 Agus dh'imich Ahio roimh 'n àire.

5 Agus chluich Daibhidh agus tigh Israeil uile am fianuis an Tighearn air gach inneal-ciùil do fhiodh gumhais, eadhon air clàrsaichibh, agus air saltairibh, agus air nabalaibh⁶, agus air tiompanaibh, agus air ciombalaibh.

6 Agus an uair a thàinig iad gu urlar-bualaidh Nachoin, chuir Usah a mach a làmh a dh'ionnsuidh àire Dhé, agus ghabh e greim dhith; oir chuir na daimh air chrith i.

7 Agus las corruich an Tighearn an aghaidh Usah, agus bhuail Dia an sin e air son a dhànadaib⁷; agus fhuair e bàs an sin làimh ri àire Dhé.

8 Agus bha doilgheas air Daibhidh⁸, do bhrìgh gu'n d'rinn an Tighearna briseadh air Usah: agus dh'aunmich e an t-àite sin Peres-usah gu ruig an là 'n diugh.

9 Agus bha eagal air Daibhidh roimh 'n Tighearn air an là sin, agus thubhairt e, Cionnus a thig àire an Tighearn a'm' ionnsuidh-sa?

10 Agus cha b'àill le Daibhidh àire an Tighearn a thionndadh d'a ionnsuidh féin gu baile Dhaibhidh: ach thug Daibhidh a leth-taobh i gu tigh Obed-edoim a' Ghithich.

11 Agus dh'fhan àire an Tighearn ann an tigh Obed-edoim a' Ghithich trì mìosan: agus bheannaich an Tighearn Obed-edom, agus a thigh uile.

12 Agus dh'innsadh do rìgh Daibhidh, ag ràdh, Bheannaich an Tighearna tigh Obed-edoim, agus gach ni a bhuineas da, air son àire Dhé. Uime sin dh'fhalbh Daibhidh, agus thug e nìos àire Dhé á tigh Obed-edoim gu baile Dhaibhidh, le gairdeachas.

13 Agus an uair a dh'imich iadsan a ghiùlain àire an Tighearna sè ceuman, dh'ìobair e tairbh agus beathaichean reamhra.

14 Agus dhanns Daibhidh le 'uile neart am fianuis an Tighearn, agus bha Daibhidh crioslaichte le ephod lin-eudaich.

15 Agus thug Daibhidh agus uile thigh Israeil a nìos àire an Tighearna le h-ìolaich, agus le fuaim trompaide.

16 Agus an uair a bha àire an Tighearn a' teachd a steach gu baile Dhaibhidh, dh'amhairc Michal nigean Shaul troimh uinneig, agus chunnaic i rìgh Daibhidh a' leumnaich agus a' dannsadh am fianuis an Tighearn, agus rinn i tàir air 'na cridhe.

17 Agus thug iad a steach àire an Tighearn, agus chuir iad suas i 'na h-àit, ann am meadhon a' phàilliuin a shuidhich Daibhidh air a son: agus thug Daibhidh suas iobairtean-loisgte am fianuis an Tighearn, agus iobairtean-sith.

18 Agus an uair a chuir Daibhidh crìoch air iobairtean-loisgte a thoirt suas, agus iobairtean-sith, bheannaich e an sluagh ann an ainm Thighearna nan sluagh.

19 Agus roinn e air an t-sluagh uile, eadhon air uile chomhchruinneachadh Israeil, eadar fheara agus mhnà, do gach neach breacag arain, agus mìr maith feola, agus copan⁹ fiona: agus dh'fhalbh an sluagh uile, gach neach d'a thigh féin.

20 Agus phill Daibhidh a bheannachadh a theaghlach: agus thàinig Michal nighean Shaul a mach an coinneamh Dhaibhidh, agus thubhairt i, Cia urramach¹⁰ a bha rìgh Israeil an diugh, a rùisg e féin

¹ an iòdholan. ² ghabh. ³ chraobh nam peur; bacaim. Eabh.

⁵ cairt, carbad.

⁴ ann an toiseach. ⁶ nebalim, Eabh.

timbrels. Sasg. mach a làmh.

⁹ soitheach.

⁷ a chionn gu'n do chuir e bha Daibhidh dìombach.

¹⁰ glòrmhor.

H. SAMUEL, VI. VII.

an diugh ann an sùilbhanoglach a sheirbluiscach, mar a rùisgeas aon do na daoineibh eutrom e féin¹!

21 Agus thubhairt Daibhidh ri Michal, *Is ann a bha e* am fianuis an Tighearn, a thagh mise roimh t'athair, agus roimh a thigh uile, chum m'orduchadh a'm' cheannard air sluagh an Tighearn, air Israel: uime sin chluich mise² am fianuis an Tighearn.

22 Agus bithidh mi fathast ni's tàireile na so, agus bithidh mi ìosal a'm' shùilbhan fèin; agus aig na banoglaich mu'n do labhair thu, aca-san gleibh mi urram.

23 Agus cha robh duine-cloinne aig Michal nighean Shaul gu là a bàis.

CAIB. VII.

1 *Thoir misg Natan do Dhaibhidh tigh a thogail do Dhia.* 12 *Gheall Dia dha sochairan agus beannachadh na shliochd.* 18 *Urnuigh agus buidheachas Dhaibhidh.*

AGUS an uair a shuidh an rìgh 'na thigh, agus a thug an Tighearna fois dha o a naimhaidibh uile mu'n cuairt,

2 Thubhairt an rìgh ri Natan am fàidh, Feuch a nis, tha mise a'm' chòmhnuidh ann an tigh seudair, ach tha àiré Dhé 'na còmhnuidh an taobh a stigh do chùirteinibh.

3 Agus thubhairt Natan ris an rìgh, Falbh, dean gach nì a ta ann ad chridhe; oir tha'n Tighearna maille riut.

4 Agus air an oidhe sin féin thàinig focal an Tighearna gu Natan, ag ràdh,

5 Falbh agus imis do m' òglach Daibhidh, Mar so tha'n Tighearn ag ràdh, An tog thusa tigh dhomh-sa, a chum gu'n gabhainn còmhnuidh ann?

6 Oir cha do ghabh mise còmhnuidh ann an tigh o'n là anns an d'thug mi nìos clann Israeil as an Eiphit, eadhon gus an là 'n diugh, ach bha mi ag ìneachd ann am bùth agus ann am pàillium.

7 Anns gach àit d'an d'imich mi maille ri cloinn Israeil uile, an do labhair mi focal ri h-aon air bith do bhreitheamhnaibh³ Israeil, d'an d'àithn mi mo shluagh Israel a bheathachadh, ag ràdh, C'ar son nach tog sibh dhomh-sa tigh seudair?

8 A nis uime sin, mar so their thu ri m' sheirbhiseach Daibhidh, Mar so tha Tighearna nan sluagh ag ràdh, Thug mise thu o mhainnir nan caorach, o bhi leantuinn nan caorach, gu bhi d' cheannard air mo shluagh, air Israel:

9 Agus bha mi maille riut anns gach àite d'an deachaidh tu, agus ghearr nì as do naimhdean uile o t'fhianuis, agus rinn mi dhuit aium mòr, mar aium uan daoine mòra a tha air an talamh.

10 (Agus orduichidh⁴ mi àit air son mo shluagh Israeil, agus suidhichidh mi iad, agus gabhaidh iad còmhnuidh 'nan àite féin, agus cha ghluaisear iad ni's mò: agus cha sàraich clann na h-aingidheachd iad tuille mar air tùs⁵,

11 Agus o'n àm anns an d'àithn mi breitheamhna bhi os ceann mo shluagh Israeil: agus bheir mi dhuit fois o d' naimhaidibh gu léir.) Mar an ceudna tha'n Tighearn ag innseadh dhuit, gu'n dean an Tighearna tigh dhuit.

12 Agus an uair a choimhlionar do làithean, agus a choidileas tu maille ri t'athrighibh, togaidh mi suas do shliochd a'd' dhéigh, a thig a mach á t'innubh; agus daingnichidh mi a rioghachd.

13 Togaidh esan tigh do m'ainmsa, agus daingnichidh mise rìgh-chaithir a rioghachd gu bràth.

14 Bithidh mi a'm' athair aige-san, agus bithidh esan 'na mhac agamsa: ma nì e aingidheachd, smachdaichidh mi e le slait dhaoine, agus le buillibh chloinn nan daoine:

15 Ach cha 'n imich mo thròcair air falbh uaith, mar a thug mi air falbh i o Shaul, a chuir mi air falbh o t'fhianuis-sa⁶.

16 Agus bithidh do thigh seasmhach, agus do rioghachd gu bràth a'm' fhianuis-sa⁶: bithidh do rìgh-chaithir daingean gu bràth.

17 A réir nam briathra so uile, agus a réir an taisbein⁷ so uile, mar sin labhair Natan ri Daibhidh.

18 An sin chaidh rìgh Daibhidh a stigh, agus shuidh e am fianuis an Tighearn, agus thubhairt e, Cò mise, O Thighearna Dhé? agus ciod e mo thigh, gu'n d'thug thu mi gu ruige so.

19 Agus bu bheag an nì so fathast a'd' shùilbhan-sa, a Thighearna Dhé: ach labhair thu mar an ceudna thaobh tìghe do sheirbhiseich rè aimsir fhada ri teachd: agus an e so gnàth duine, a Thighearna Dhé.

20 Agus ciod tuilleadh a dh'fheudas Daibhidh a ràdh riut? oir is aithne dhuit do sheirbhiseach, a Thighearna Dhé.

21 Air son t'fhocail, agus a réir do chridhe féin, rinn thu na nithe mòra so uile, a thoirt air do sheirbhiseach eòlas a ghabhail orra.

22 Uime sin a ta thu mòr, a Thighearna Dhé: oir cha 'n'eil neach ann cosmhuil riut, agus cha 'n'eil Dia ann ach thusa, a réir gach nì a chuala sinn le'r clusaibh.

23 Agus cia an cinneach air thalamh cosmhuil ri d' shluagh-sa, cosmhuil ri h-Israel, a chaidh Dia a shaoardh mar shluagh dha féin, agus a dheanamh ainme

¹ e féin gu beag-narach.

² threudhaibh.

³ rinn mi aobhneas.

⁴ dh'orduich.

⁵ mar a rinn iad roimhe.

⁶ a'd' fhianuis.

⁷ an t-scallaidh, an fhoillseachaidh.

dha féin, agus a dheanamh air son nithe mòra, agus uambasach, air son do thire, am fianuis do shluaigh a shaor thu dhuit féin as an Eiphit, o na cinneachaibh agus o'n diathaibh?

24 Oir dhaingnich thu dhuit féin do shluaigh Israel, *gu bhi* 'nan sluagh dhuit gu bràth; agus tha thusa, a Thighearn, a'd' Dhia aca.

25 Agus a nis, a Thighearna Dhé, am focal a labhair thu a thaobh do sheirbhiseach, agus a thaobh a thighe, dean seasmhach e gu bràth; agus dcan mar a thubhairt thu.

26 Agus ardaichear² t'ainm gu bràth, ag ràdh, *Is* e Tighearna nan sluagh a's Dia os ceann Israeil: agus bitheadh tigh do sheirbhiseach Dhaibhidh daingean a'd' fhianuis:

27 Oir dh'fhoillsich thusa, a Thighearna nan sluagh, a Dhé Israeil, do d' sheirbhiseach, ag ràdh, Togaidh mi tigh dhuit; uime sin fhuair do sheirbhiseach 'na chridhe an urnuigh so a dheanamh riut.

28 Agus a nis, a Thighearna Dhé, *is* tu féin Dia³, agus is iad do bhriathran an fhirinn; agus gheall thu am maithas so do d' sheirbhiseach:

29 A nis uime sin gu ma toil leat tigh do sheirbhiseach a bheannachadh, a chum gu mair e gu bràth a'd' fhianuis: oir labhair thusa e, a Thighearna Dhé, agus le d' bheannachadh beannaichear tigh do sheirbhiseach gu bràth.

CAIB. VIII.

1 Bhual Daibhidh na Philistich, agus thug e na Moabaich fo chis. 3 Bhual e Hadadeser agus na Sirianaich. 9 Chuir Toi a mhac le tiodhlacaibh d'a ionnsuidh. 11 Choisrig e iad do'n Tighearn. 14 Shuidhich e freiceadain ann an Edom.

A GUS an déigh so bhual Daibhidh na Philistich, agus cheannsaich⁴ e iad: agus ghlac Daibhidh Meteg-amah⁵ á làimh nam Philisteach.

2 Agus bhual e na Moabaich, agus thomhais e iad le cord⁶, 'gan tilgeadh sìos gu lár: eadhon le dà chord thomhais e a thabhairt bàis, agus le aon chord iomlan a ghleidheadh beò. Agus bha na Moabaich 'nan seirbhiseach aig Daibhidh, agus thug iad tiodhlaca leò.

3 Bhual Daibhidh mar an ceudna Hadadeser mac Rehoib, rìgh Shobah, 'nuair a chaidh e a chosnadh a chriche air a h-ais⁷ aig amhainn Euphrates.

4 Agus thug Daibhidh uaith mìle carbad, agus seachd ceud⁸ marcach, agus fichead mìle coisiche: agus ghearr Daibhidh speireacha *each* nan carbad uile, ach

dh'fhàg e dhfubh dìol cheud carbad.

5 Agus anuair a thàinig Sirianaich Dhamascuis a chuideachadh le Hadadeser rìgh Shobah, bhual Daibhidh do na Sirianaich dà mhìle thar fhichead fear.

6 An sin chuir Daibhidh freiceadain ann an Siria Dhamascuis: agus bha na Sirianaich 'nan seirbhiseach aig Daibhidh, agus thug iad leò tiodhlacan: agus ghléidh an Tighearna Daibhidh gach taobh a chaidh e.

7 Agus ghabh Daibhidh na sgiathan⁹ òir a bh'aig seirbhiseach Hadadeser, agus thug e iad gu h-Ierusalem.

8 Agus o Bhetah, agus o Bherotai, bailtibh Hadadeser, thug rìgh Daibhidh ro mhòran umha.

9 An uair a chuala Toi rìgh Hamait gu'n do bhual Daibhidh sluagh Hadadeser uile,

10 An sin chuir Toi a mhac Ioram gu rìgh Daibhidh, a chur fàilte air, agus g'a bheannachadh, a chionn gu'n do chog e ri Hadadeser, agus gu'n do bhual se e: (oir bha cogadh aig Hadadeser ri Toi¹⁰;) agus 'na làimh bha soithichean airgid, agus soithichean òir, agus soithichean umha.

11 Iad sin mar an ceudna choisrig¹¹ rìgh Daibhidh do'n Tighearna, maille ris an airgid agus ris an òr a choisrig e o ua h-uile cinneachaibh a cheannsaich e;

12 O Shiria, agus o Mhoab, agus o chloinn Amoin, agus o na Philistich, agus o Amalec, agus o chreich Hadadeser, mhic Rehoib, rìgh Shobah.

13 Agus fhuair¹² Daibhidh ainm *dha féin*, an uair a phill e o bhualadh nan Edomach¹³ ann an gleann an t-salainn, ochd mìle deug fear.

14 Agus chuir e freiceadain ann an Edom: air feadh Edoim uile chuir e freiceadain; agus bha na h-Edomaich uile 'nan seirbhiseach aig Daibhidh: agus ghléidh an Tighearna Daibhidh gach taobh a chaidh e.

15 Agus rìghich Daibhidh air Israel uile; agus rinn Daibhidh breitheanas agus ceartas d'a shluaigh uile.

16 Agus bha Ioab mac Sheruah os ceann na h-armailte; agus bha Iehosaphat mac Ahiluid 'na sheanachaidh¹⁴;

17 Agus bha Sadoc mac Ahituib, agus Ahimelech mac Abiatair 'nan sagartaibh; agus Seraiah 'na sgrìobhaiche;

18 Agus bha Benaiah mac Iehoiada os ceann nan Cereteach agus nam Peleteach: agus bha mic Dhaibhidh 'nan àrd uachd-aranaibh.

¹ bhur. ² mòraichear, deantar mòr. Eabh.

³ Is tusa an Dia sin.

⁴ dh'istich.

⁵ Gat agus a bhailte beaga. ⁶ snàithne-tomhais.

⁷ a shuidheachadh a làimhe. Eabh. ⁸ mìle.

⁹ targaidean.

an aghaidh Thoí. Eabh.

¹⁰ b'fhear cogaidh Hadadeser

¹¹ naomhaich.

¹² rinn. Eabh.

¹³ nan Sirianach.

¹⁴ eachdraiche.

II. SAMUEL, IX. X.

CAIB. IX.

1 *Chuir Daibhidh fios air Mephiboset, agus nochd e caoinhneas da air son 'athar Ionatan. 7 Dh'aisig e dha am fearann a bhuineadh do Shaul. 9 Dh'orduich e do Shiba a threabhadh air a shon.*

AGUS thubhairt Daibhidh, Am bheil fathast neach air bith a dh'fhàgadh do thigh Shaul, a chum gu nochd mi dha caoinhneas air son Ionatan?

2 Agus bha aig tigh Shaul seirbhiseach, d'am b'ainm Siba: agus an uair a ghairm iad e chum Dhaibhidh, thubhairt an righ ris, An tusa Siba? Agus thubhairt esan, *Is e do sheirbhiseach a th'ann.*

3 Agus thubhairt an righ, Nach 'eil fathast neach air bith do thigh Shaul, a chum gu nochd mi dha caoinhneas Dhé? Agus thubhairt Siba ris an righ, *Tha fathast mac aig Ionatan, a tha bacach¹.*

4 Agus thubhairt an righ ris, C'ait am bheil e? Agus thubhairt Siba ris an righ, Feuch, *tha e ann an tigh Mhachir, mhic Amiel, ann an Lodebar.*

5 Agus chuir righ Daibhidh fios air, agus thug se e a tigh Mhachir, mhic Amiel, o Lodebar.

6 A nis an uair a thàinig Mephiboset², mac Ionatan, mhic Shaul, a dh'ionnsuidh Dhaibhidh, thuit e air 'aghaidh, agus rinn e ùmhlachd. Agus thubhairt Daibhidh, **A** Mephiboset! Agus fhreagair esan, Feuch, do sheirbhiseach.

7 Agus thubhairt Daibhidh ris, Na biodh eagal ort; oir gu cinnteach nochdaidh mise dhuit caoinhneas air son 'athar Ionatan, agus aisgidh mi dhuit uile fhearann 'athar Shaul, agus ithidh tu aran aig mo bhòrd-sa an còmhnuidh.

8 Agus chom se e féin, agus thubhairt e, Cò e do sheirbhiseach, gu'n amhaireadh tusa air cù marbh, cosmhuil riumsa?

9 An sin ghairm an righ air Siba òglach Shaul, agus thubhairt e ris, Gach ni a bhuineadh do Shaul, agus d'a thigh uile, thug mi do mhac do mhaighstir.

10 Agus treabhaidh tusa am fearann air a shon, thu féin, agus do mhic, agus do sheirbhiseach, agus bheir thu a stigh *an toradh* a chum gu'm bi biadh aig mac do mhaighstir a dh'itheas e: ach ithidh Mephiboset mac do mhaighstir aran an còmhnuidh aig mo bhòrd-sa. A nis bha aig Siba cùig mic dheug agus fichead seirbhiseach.

11 An sin thubhairt Siba ris an righ, A réir gach ni a dh'àitinn mo thighearn an righ d'a sheirbhiseach, mar sin ni do sheirbhiseach: a thaobh Mephiboset, ithid esan aig a³ bhòrd-san, mar aon do mhic an righ.

12 Agus bha aig Mephiboset mac òg,

d'am b'ainm Micah: agus bha iadsan uile a ghabh còmhnuidh ann an tigh Shiba 'nan seirbhiseach do Mephiboset.

13 Agus chòmhnuich Mephiboset ann an Ierusalem; oir dh'ith e an còmhnuidh aig bord an righ: agus bha e bacach air a dhà chois.

CAIB. X.

1 *Bhuin Hanun gu h-òc ri teachdairibh Dhaibhidh.*

6 *Bhuail Ioab agus Abisai na h-Amonaich.*

15 *Cheannsaich Daibhidh na Sirianaich.*

AGUS 'na dhéigh so fhuair righ chloinn Amoin bàs, agus rìghich a mhac Hanun 'na àit.

2 An sin thubhairt Daibhidh, Nochdaidh mi caoinhneas do Hanun mac Nahais, mar a nochd 'athair-san caoinhneas dhomh-sa. Agus chuir Daibhidh uath a sheirbhiseach, a thoirt solais da air son 'athar. Agus thàinig seirbhiseach Daibhidh a steach do thigh chloinn Amoin.

3 Agus thubhairt ceannardan chloinn Amoin ri Hanun an tighearn, An saoil thu gur ann a chum urram a thabhairt do 'athair, a chuir Daibhidh a d' ionnsuidh luchd-solais? nach ann a rannsachadh a' bhaile, agus a ghabhail beachd air, agus g'a sgrios, a chuir Daibhidh a sheirbhiseach a d' ionnsuidh?

4 Uime sin ghlac Hanun seirbhiseach Daibhidh, agus bhearr e *dhiubh* leth am feusaig, agus ghearr e an eudach sa' mheadhon, gu ruig am màsan; agus chuir e air falbh iad.

5 Agus an uair a dh'imseadh sin do Dhaibhidh, chuir e daoine⁵ nan coinneamh, a chionn gu'n robh nàire mhòr air na daoinibh: agus thubhairt an righ, Fanaibh ann an Iericho gus am fàs bhuir feusag, agus an sin pillibh.

6 Agus an uair a chunnaic clann Amoin gu'n robh iad gràineil⁴ am fianuis Dhaibhidh, chuir clann Amoin *teachdairean* uatha, agus thuarasdalaich iad Sirianaich Bhet-rehoib, agus Sirianaich Shoba, fichead mìle coisiche⁶, agus o rìgh Mhaacah mìle fear, agus o Iob da mìle dheug fear.

7 Agus an uair a chuala Daibhidh sin, chuir e mach Ioab, agus uile shluagh nan daoine treuna.

8 Agus thàinig clann Amoin a mach, agus chuir iad an cath an ordugh aig dol a stigh a' gheata⁶: agus bha Sirianaich Shoba, agus Rehoib, agus Iostoib, agus Mhaacah, leo féin anns a' mhachair.

9 Agus an uair a chunnaic Ioab gu'n robh aghaidh a' chathais ris air a bheulaobh agus air a chùlaobh, thagh e mach *cuid* do uile *dhaoinibh* taghta Israeil, agus chuir e ann an ordugh catha *iad* an aghaidh nan Sirianaich:

¹ ciurramach 'na chosaibh. Eabh.

² Merib-baal. ³ mo. ⁴ breun.

⁵ fear-coise.

⁶ geata Mhedeba.

II. SAMUEL, X. XI.

10 Agus a' chuid eile do'n t-sluagh thug e thairis do làimh a bhràthar Abisai, a chum gu'n cuireadh e an ordugh *iad* an aghaidh chloinn Amoin.

11 Agus thubhairt e, Ma bhios na Sirianaich ni's treise na mise, an sin ni thusa còmhnaidh riumsa; ach ma bhios clann Amoin ni's treise na thusa an sin thig mise a dheanamh còmhnaidh riutsa.

12 Bi misneachail, agus biomaid gaisgeil air son ar sluagh, agus air son bhailean ar Dé; agus deanadh an Tighearn an *ni a ta* maith 'na shùilibh.

13 Agus thàinig Ioab am fagus, agus an sluagh a *bha* maille ris, gu cath an aghaidh nan Sirianach: agus theich iad roimhe.

14 Agus an uair a chunnaic clann Amoin gu'n do theich na Sirianaich, an sin theich iadsan mar an ceudna roimh Abisai, agus chaidh iad a steach do'n bhaile: agus phill Ioab o chloinn Amoin, agus thàinig e gu h-Ierusalem.

15 Agus an uair a chunnaic na Sirianaich gu'n do bhuailleadh iad roimh Israel, chruinnich siad iad féin an ceann a chèile.

16 Agus chuir Hadadeser¹ *fios uath*, agus thug e mach na Sirianaich a *bh'* air an taobh thall do'n amhainn, agus thàinig iad gu Helam; agus chaidh Sobach ceannard armailte Hadadeser rompa.

17 Agus an uair a dh'innseadh sin do Dhaibhidh, chruinnich e Israel uile an ceann a chèile, agus chaidh e thar Iordan, agus thàinig e gu Helam; agus chuir na Sirianaich iad féin an ordugh catha an aghaidh Dhaibhidh, agus chog iad ris.

18 Agus theich na Sirianaich roimh Israel; agus mharbh Daibhidh do na Sirianaich *fir* sheachd ceud carbad, agus dà fhichead mìle marcach; agus bhuail e Sobach ceannard an armailte, a fhuair bàs an sin.

19 Agus an uair a chunnaic na rìghrean uile, a *bha* 'nan seirbhisich aig Hadadeser, gu'n do bhuailleadh iad roimh Israel, rinn iad sìth ri h-Israel, agus rinn iad seirbhis dhoibh. Agus bha eagal air na Sirianaich còmhnaidh a dheanamh tuille ri cloinn Amoin.

CAIB. XI.

1 *Luidh Daibhidh le Batseba mnaoi Uriah an Hitich, agus dh'fhàs i torrach.* 14 *Chuireadh Uriah gu bàs.* 26 *Ghabh Daibhidh Batseba gu bhì 'na mnaoi aige.*

A GUS aig teachd mu'n cuairt² na bliadhna, mu'n àm anns an téid rìghrean a mach *gu cath*, chuir Daibhidh uath Ioab, agus a sheirbhisich maille ris, agus Israel uile, agus sgrios iad clann Amoin, agus theannaich iad³ Rabah: acli dh'fhan Daibhidh ann an Ierusalem.

2 Agus thachair e mu fheasgar, gu'n

d'éirich Daibhidh bhàrr a leapach, agus gu'n robh e a' spaisdearachd air mullach tighe an rìgh: agus o'n mhullach chunnaic e bean 'ga nigheadh féin: agus *bha* a' bhean ro mhaiseach ri sealltuinn oirre.

3 Agus chuir Daibhidh *fios*, agus dh'fheoraich e mu thimchioll na mnà: agus thubhairt *neach*, Nach i so Batseba uigh-ean Eliam, bean Uriah an Hitich.

4 Agus chuir Daibhidh uath teachdair-ean, agus ghabh e i; agus thàinig i stigh d'a ionnsuidh, agus luidh e leatha; (oir bha i air a glanadh o a neoghloine;) agus phill i d'a tigh féin.

5 Agus dh'fhàs a' bhean torrach, agus chuir i *fios* uaithe⁴, agus dh'innis i do Dhaibhidh, agus thubhairt i, *Tha* mi torrach.

6 Agus chuir Daibhidh *fios* uath gu Ioab, *ag ràdh*, Cuir a m' ionnsuidh Uriah an Hiteach. Agus chuir Ioab Uriah a dh'ionnsuidh Dhaibhidh.

7 Agus an uair a thàinig Uriah d'a ionnsuidh, dh'fheòraich Daibhidh *d'eth* cionnus a bha Ioab, agus cionnus a bha 'n sluagh, agus cionnus a chaidh an cogadh air aghaidh.

8 Agus thubhairt Daibhidh ri Uriah, Imich sios do d' thigh, agus nigh do chosan. Agus chaidh Uriah a mach á tigh an rìgh, agus chuireadh 'na dhéigh lòn *béidh* o'n rìgh.

9 Ach luidh⁵ Uriah aig dorus tighe an rìgh, maille ri uile sheirbhisich a thighearn, agus cha deachaidh e sios d'a thigh.

10 Agus an uair a dh'innis iad do Dhaibhidh, *ag ràdh*, Cha deachaidh Uriah sios d'a thigh, thubhairt Daibhidh ri Uriah, Nach ann o d' thurus a thàinig thu? c'ar son *ma ta* nach deachaidh tu sios do d' thigh?

11 Agus thubhairt Uriah ri Daibhidh, *Tha* 'n àirc, agus Israel, agus Iudah a' fantuinn am pàillunaibh; agus *tha* mo thighearn Ioab, agus sheirbhisich mo thighearn air campachadh air aghaidh na macharach; an téid mise *ma ta* a stigh do m' thigh, a dh'itheadh, agus a dh'òl, agus a luidhe le m' mhnaoi? *mar* is beò thusa, agus *mar* is beò t'anam, cha dean mi an ni so.

12 Agus thubhairt Daibhidh ri Uriah, Fan an so mar an ceudna an diugh, agus am màireach leigidh mi leat imeachd. Agus dh'fhan Uriah ann an Ierusalem an là sin, agus an là màireach.

13 Agus ghairm Daibhidh air, agus dh'ith agus dh'òl e 'na fhianuis, agus chuir e air mhìsg e; ach chaidh e mach mu fheasgar a luidhe 'na leabaidh maille ri seirbhisich a thighearn, agus d'a thigh féin cha deachaidh e sios.

¹ Hadadeser.

² ath-philleadh.

³ chog iad an aghaidh.

⁴ uaipe.

⁵ choidil.

II. SAMUEL, XI. XII.

14 Agus anns a' mhaduinn sgrìobh Daibhidh litir a dh'ionnsuidh Ioaib, agus chuir e i le làimh Uriaib.

15 Agus sgrìobh e anns an litir, ag ràdh, Cuiribh Uriaib mu choinneamh a' chatha a's déine, agus pillibh féin o' chùlaobh, a chum gu'm buailear e, agus gu'm faigh e bàs.

16 Agus an uair a ghabh Ioaib beachd air a' bhaile, dh'orduich e Uriaib a dh'ionnsuidh àite anns an robh fios aige gu'n robh daoine gaisgeil.

17 Agus chaidh fir a' bhaile a mach, agus chog iad ri Ioaib; agus thuit cuid do'n t-sluagh, do sheirbhiseich Dhaibhidh; agus fhuair Uriaib an Hiteach bàs mar an ceudna.

18 An sin chuir Ioaib fios uath, agus dh'innis e do Dhaibhidh gach ni a thachair sa' chath¹:

19 Agus dh'àithn e do'n teachdair, ag ràdh, An uair a chuireas tu crìoch air gach ni a thachair sa' chath innseadh do'n rìgh,

20 Agus ma thachaireas gu'n éirich fearg an rìgh, agus gu'n abair e riut, C'ar son a chaidh sibh teann air a' bhaile a chathachadh? nach robh fios agaibh gu'n tilgeadh iad o'n bhalla?

21 Cò a bhuail Abimelech mac Ierubeseit²? nach do thilg bean mìr do chloich-mhuilinn air o'n bhalla, air chor as gu'n d'fhuair e bàs ann an Tebes? c'ar son a chaidh sibh teann air a' bhalla? an sin their thusa, Tha do sheirbhiseach Uriaib an Hiteach marbh mar an ceudna.

22 Agus dh'imich an teachdair, agus thàinig agus dh'innis e do Dhaibhidh gach ni mu'n do chuir Ioaib air falbh e.

23 Agus thubhairt an teachdair ri Daibhidh, Gu deimhin bhuaidhaich na daoine oirn, agus thàinig iad a mach d'ar n-ionnsuidh sa' mhachair, agus chuir sinn an ruaig orra³ eadhon gu dol a stigh a' gheata.

24 Agus thilg na fir-bhogha air do sheirbhiseich o'n bhalla, agus tha cuid do sheirbhiseich an rìgh marbh, agus tha do sheirbhiseach Uriaib an Hiteach marbh mar an ceudna.

25 An sin thubhairt Daibhidh ris an teachdair, Mar so their thu ri Ioaib, Na biodh an nì so olc a'd' shùilb; oir cuiridh an claidheamh as do aon duine co mhaith as do dhuin' eile: dean do chath ni's treise an aghaidh a' bhaile, agus sgrìos e; agus thoir misneach dha.

26 Agus an uair a chuala bean Uriaib gu'n d'fhuair a fear Uriaib bàs, rinn i caoidh air son a fir.

27 Agus an uair a bha 'm bròn thairis, chuir Daibhidh fios oirre, agus thug e i dh'ionnsuidh a thighe, agus bha i 'na mnaoi aige, agus rug i mac dha: ach bha an nì a rinn Daibhidh olc ann an sùilb an Tighearna.

CAIB. XII.

1 Thug Natan achanasan do Dhaibhidh a chionn gu'n do mharb e Uriaib. 13 Dh'aicidh Daibhidh a pheacadh, agus fhuair e maitheanas. 24 Rugadh Solanb. 26 Ghlac Daibhidh Rabah.

A GUS chuir an Tighearna Natan a dh'ionnsuidh Dhaibhidh; agus an uair a thàinig e d'a ionnsuidh, thubhairt e ris, Bha dithis fhear ann an aon bhaile, fear dhiubh beartach, agus am fear eile bochd.

2 Aig an duine bheartach bha ro mhòran chaorach agus cruith:

3 Ach aig an duine bhochd cha robh ni sam bith ach aon uan beag boirionn, a cheannaich e, agus a bheathaich e: agus dh'fhàs e suas maille ris féin, agus maille r'a chloinn; dh'ith e d'a ghreim⁴ féin, agus dh'òl e as a chopan féin, agus luidh e 'na uchd, agus bha e dha mar nighinn.

4 Agus thàinig fear-turuis⁵ a dh'ionnsuidh an duine bheartaich, agus chaomhain e gabhail d'a chaoraich féin, agus d'a chrodh féin, a dheasachadh air son an fhuir-turuis a thàinig d'a ionnsuidh, ach ghabh e uan an duine bhochd, agus dheasaich se e do'n fhear a thàinig d'a ionnsuidh.

5 Agus las fearg Dhaibhidh an aghaidh an duine gu mòr; agus thubhairt e ri Natan, Mar is beò an Tighearna, gu cinnteach cuirear gu bàs⁶ am fear a rinn an nì so:

6 Agus dìolaidh e⁷ 'n t-uain ceithir uair-ean⁸, do bhrìgh gu'n d'rinu e an nì so, agus a chionn uach do chaomhain e⁹.

7 Agus thubhairt Natan ri Daibhidh, Is tusa an duine. Mar so tha'n Tighearna Dia Israeil ag ràdh, Dh'ung mise thu a'd' rìgh os ceann Israeil, agus shaor mi thu á làimh Shaul:

8 Agus thug mi dhuit tigh do mhaighstir, agus mnaid do mhaighstir ann ad uchd, agus thug mi dhuit tigh Israeil agus Iudah; agus nam bu bheag sin, bheirinn dhuit cuideachd an leithide so agus an leithide sud do nithibh.

9 Car son a rinn thu tair air àithne an Tighearna, le olc a dheanamh 'na fhianuis? Uriaib an Hiteach bhuail thu leis a' claidheamh, agus las bhean ghabh thu 'na mnaoi dhuit féin, agus esan mharbh thu le claidheamh chloinn Amoin.

10 A nis uime sin cha dealaich an claidh-

¹ uile bhriathra, no uile nithe a' chatha. Eabh.

² Ierubaail. ³ chuir sinn 'nan aghaidh; bha sinn orra. Eabh. ⁴ aran, bhiadh. ⁵ aoidhe.

⁶ tha e toillinn a' bhàis; is mac do'n bhàs e. Eabh.

⁷ aigidh e, bheir e air ais.

⁸ ceithir-fille.

⁹ nach robh iochd aige.

eamh ri d'thig gu bràth, do bhrìgh gu'n d'riun thu tair orm, agus gu'n do ghabh thu bean Uriah an Hìich gu bi 'na mnaoi dhuit fèin.

11 Mar so tha'n Tighearn ag ràdh, Feuch, togaidd mise suas olc ann ad aghaidh as do thig fèin: agus gabhaidh mi do mhnai fa chomhair do shùl, agus bheir mi *iad* do d' choimhearsnach, agus luidhidh e le d' mhaibh ann an sealladh na grèine so:

12 Oir rinn thusa e gu dìomhair; ach ni mise an ni so am fianuis Israeil uile, agus am fianuis na grèine.

13 Agus thubhairt Daibhidh ri Natan, Pheacaich mi an aghaidh an Tighearn. Agus thubhairt Natan ri Daibhidh, Mar an ceudna chuir an Tighearn air falbh do pheacadh¹: cha'n fhaigh thu bàs.

14 Gidheadh, a chionn leis a' ghnìomh so gu'n d'thug thu air naimhidh an Tighearn mòr-thair a dheanamh air, gheibh mar an ceudna am mac a rugadh dhuit gu cinnteach bàs.

15 Agus dh'fhalbh Natan d'a thigh fèin: agus bhuail an Tighearn an leanabh a rug bean Uriah do Dhaibhidh, agus bha e ro thinn.

16 Uime sin ghuidh Daibhidh air Dia air son an leinibh; agus thraisg Daibhidh, agus chaidh e stigh, agus luidh e ré na h-oidhe air an talamh.

17 Agus thàinig² seanairean a thighe d'a ionnsuidh, g'a thogail suas o'n talamh: ach cha b'àill leis, ni mò a dh'ith e aran maille ri u.

18 Agus air an t-seachdamh là fhuair an leanabh bàs; agus bha eagal air seirbhisich Dhaibhidh innseadh dha gu'n robh an leanabh marbh: oir thubhairt iad, Feuch, an uair a bha an leanabh fathast beò, labhair sinn ris, agus cha 'n éisdeadh e r'ar guth: cionnus ma ta, ma dh'innseas sinn dha gu bheil an leanabh marbh, a chràidheas se e fèin³?

19 Ach an uair a chunnaic Daibhidh gu'n robh a sheirbhisich ri cogarsaich, thuig Daibhidh gu'n robh an leanabh marbh: uime sin thubhairt Daibhidh r'a sheirbhisich, Am bheil an leanabh marbh? Agus thubhairt iadsan, Tha e marbh.

20 An sin dh'éirich Daibhidh o'n talamh, agus dh'ionnlaid agus dh'ung se e fèin, agus mhuith⁴ e 'eudach, agus chaidh e steach do thigh an Tighearn, agus rinn e aoradh: an sin thàinig e d'a thigh fèin, agus an uair a dh'iarr e, chuir iad aran fa chomhair, agus dh'ith e.

21 An sin thubhairt a sheirbhisich ris, Ciod e an ni so a rinn thu? air son an leinibh, an uair a bha e beò, thraisg thu

agus ghuil thu; ach an uair a dh'evg an leanabh, dh'éirich thu agus dh'ith thu aran.

22 Agus thubhairt esan, An uair a bha'n leanabh fathast beò, thraisg mi agus ghuil mi: oir thubhairt mi, Cò aig am bheil fios nach gabh Dia truas riom, agus nach mair an leanabh beò?

23 Ach a nis o fhuair e bàs, c'ar son a thraisginn? an urrainn mi a thabhairt air ais tuilleadh? théid mise d'a ionnsuidh-san, ach cha phill esan a m' ionnsuidh-sa.

24 Agus thug Daibhidh sòlas d'a mhnai Batseha, agus chaidh e steach d'a h-ionnsuidh, agus luidh e leatha: agus rug i mac, agus thug e Solamh mar ainm air; agus ghràdhaich an Tighearn e.

25 Agus chuir e *fios* le làimh an fhàidh Natan, agus thug e Iedidiah mar ainm air, air son an Tighearn.

26 Agus chog Ioab an aghaidh Rabah chloinn Amoin, agus ghlac e am baile rioghaile.

27 Agus chuir Ioab teachdairean a dh'ionnsuidh Dhaibhidh, agus thubhairt e, Chog mi an aghaidh Rabah, agus ghlac mi baile nan uisgeachan.

28 A nis uime sin crùnnich a' chuid eile do'n t-sluagh, agus campaich an aghaidh a' bhaile, agus glac e, air eagal gu'n glac mise am baile, agus gu'n toirear m'ainm fèin air.

29 Agus chrùnnich Daibhidh an sluagh uile cuideachd, agus chaidh e gu Rabah, agus chog e 'na aghaidh, agus ghlac se e.

30 Agus thug e crùn an rìgh bhàr a chinn, (agus b'e a chothrom⁵ talann òir, maille ris na clachaibh luachmhor⁶;) agus chuireadh e air ceann Dhaibhidh: agus thug e mach creach a' bhaile ann am mòr phailteas.

31 Agus thug e mach an sluagh a bha ann, agus chuir e *iad* fuidh shàbhan, agus fuidh innealan-bualaidh⁷ iaruin, agus fuidh thuaghan iaruin, agus thug e orra dol troimh àth nan clacha-creadha; agus mar so rinn e ri uile bhailtibh chloinn Amoin. Agus phill Daibhidh agus an sluagh uile gu h-Ierusalem.

CAIB. XIII.

1 Dh'éignich Amnon Tamar piuthar Absalom. 28 Mharbh Absalom Amnon, agus theich e do Ghesur. 39 Mhannaich Daibhidh an deigh Absalom.

A GUS thachair an déigh so, gu'n robh aig Absalom mac Dhaibhidh piuthar mhaiseach, d'am b'ainm Tamar; agus ghràdhaich Amnon mac Dhaibhidh i.

2 Agus bha Amnon ann an airc co mhòr, as gu'n d'fhàs e tinn air son a pheathar Tamar; oir b'òigh i, agus bha e cruaidh

¹ thug an Tighearn air do pheacadh dol thairis. Eabh.
² dh'éirich. Eabh. ³ a ni e olc. Eabh.

⁴ dh'atharraich.

⁶ priscil.

⁵ a luach, fhiach.

⁷ chliathan.

II. SAMUEL, XIII.

ann an sùilbha Amnoin ni sam bith a dheanamh oirre.

3 Ach bha aig Amnon caraaid, d'am b'ainm Ionadab, mac Shimeah, bràthar Dhaibhidh; agus bha Ionadab 'na dhuine ro sheolta¹.

4 Agus thubhairt e ris, C'ar son a tha thusa, agus gur mac d'on rìgh thu, tana² mar so o là gu là? nach innis thu dhomh-sa? Agus thubhairt Amnon ris, Tha gràdh agam air Tamar, piuthar mo bhràthar Absaloim.

5 Agus thubhairt Ionadab ris, Luidh sìos air do leabaidh, agus leig ort a bhi tinn; agus an uair a thig t'athair g'ad fhaicinn, their thu ris, Thigeadh, guidheam ort, mo phiuthar Tamar, agus thug-adh i biadh dhomh, agus deasaicheadh i am biadh a'm' fhianuis, a chum gu'n faic mi e, agus gu'n ith mi as a làimh e.

6 Agus luidh Amnon sìos, agus leig e air a bhi tinn; agus an uair a thàinig an rìgh g'a fhaicinn, thubhairt Amnon ris an rìgh, Thigeadh, guidheam ort, mo phiuthar Tamar, agus deanadh i dà bhreacaig a'm' fhianuis, a chum gu'n ith mi as a làimh.

7 An sin chuir Daibhidh fios dhachaidh a dh'ionnsuidh Thamair, ag ràdh, Imich a nis gu tigh do bhràthar Amnoin, agus deasaich dha biadh.

8 Agus chaidh Tamar do thigh a bràthar Amnoin, (agus bha esan 'na luidhe, agus ghabh i min mhìn, agus thaosinn³ si i, agus rinn i breacagan 'na fhianuis, agus bhruidh i na breacagan.

9 Agus ghabh i aghann, agus thaom i mach iad⁴ 'na fhianuis, ach dhiùlt esan itheadh. Agus thubhairt Amnon, Thug-aibh a mach gach duine uam; agus thug⁴ iad a mach gach duine uaith.

10 Agus thubhairt Amnon ri Tamar, Thoir am biadh a steach do'n t-seòmar, a chum gu'n ith mi as do làimh. Agus ghabh Tamar na breacagan a rinn i, agus thug i iad do'n t-seòmar a dh'ionnsuidh a bràthar Amnoin.

11 Agus an uair a thug i iad d'a ionnsuidh chum an itheadh, rug e oirre, agus thubhairt e rithe, Thig, luidh leam, a phiuthar.

12 Agus fhreagair i e, Ni h-eadh, a bhràthair, na h-èignich mi; oir cha chòir a leithid so a bhi air a dheanamh ann an Israel: na dean-sa an amaideachd so.

13 Agus mise, c'ait an cuir mi air falbh mo mhasladh? agus air do shonsa, bithidh tu mar aon do na h-amadanaibh⁵ ann an Israel: a nis uime sin labhair, guidheam ort. ris an rìgh; oir cha chum e uait mi.

14 Gidheadh, cha'n èisdeadh esan r'a guth; ach a chionn gu'm bu làidire e na ise, dh'èignich e i, agus luidh e leatha.

15 An sin dh'fhuathaich Amnon i le fuath ro mhòr, air chor as gu'm bu mhò am fuath leis an d'fhuathaich e i; na 'n gràdh leis an do ghràdhaich e i; agus thubhairt Amnon rithe, Eirich, bi 'g imeachd.

16 Agus thubhairt, ise ris, Na bitheadh e mar sin, abhràthair; oir is mò an t-olc so 'nam chur air falbh, na'n t-olc eile a rinn thu orm: ach cha'n èisdeadh esan rithe.

17 An sin ghairme air 'oglach a fhrith-eil dha, agus thubhairt e, Cuir a nis a' bhean so a mach uam, agus cuir an crann air an dorus 'na dèigh.

18 Agus bha trusgan⁶ iomadh-dathach oirre; oir le leithid so do dheise bha nigh-eanan an rìgh, a bha 'nan òighibh, air an sgeadachadh. An sin thug a sheirbhiseach a mach i, agus chrann e an dorus 'na dèigh.

19 Agus chuir Tamar luath air a ceann, agus reub i an trusgan iomadh-dathach a bha oirre, agus chuir i a làmh air a ceann, agus chaidh i air falbh a' glaothaich.

20 Agus thubhairt a bràthair Absalom rithe, An robh do bhràthair Amnon maille riut? ach a nis, a phiuthar, bi d' thosd; is e do bhràthair e; na cuireadh an ni so smuairan ort⁷. Agus dh'fhan Tamar gu h-aonaranach⁸ ann an tigh a bràthar Absaloim.

21 Ach an uair a chuala rìgh Daibhidh na nithe so uile, bha fearg ro mhòr air.

22 Agus cha do labhair Absalom ri Amnon aon chuid ole no maith: oir dh'fhuathaich Absalom Amnon, a chionn gu'n d'èignich e a phiuthar Tamar.

23 Agus thachair an dèigh dà bhliadhna ionlan, gu'n robh aig Absalom luchd-lomairt chaorach ann am Baal-hasor, a tha làimh ri Ephraim: agus thug Absalom cuireadh do mhic an rìgh uile.

24 Agus thàinig Absalom a dh'ionnsuidh an rìgh, agus thubhairt e, Feuch a nis, tha luchd-lomairt chaorach aig do sheirbhiseach; thigeadh, guidheam ort, an rìgh agus a sheirbhisich maille ri d' sheirbhiseach.

25 Agus thubhairt an rìgh ri Absalom, Ni h-eadh, a mhic, na rachamaid uile a nis, a chum nach bi sinn trom ort⁹. Agus chuir e impidh air: gidheadh cha b'ail leis imeachd, ach bheannaich se e.

26 An sin thubhairt Absalom, Mur thu thu fèin, thigeadh, guidheam ort, mo bhràthair Amnon maille ruinn. Agus thubhairt an rìgh, C'ar son a rachadh e maille riut?

¹ rò ghlic.

² a' dol as an t-sealladh.

³ dh'fhuin. ⁴ chaidh. ⁵ do na da-inibh aingidh.

⁶ còta.

⁷ na cuir do chridhe air an ni so. Eabh.

⁸ gu h-uaigneach, dubhach.

⁹ costail dhuit.

27 Ach chuir Absalom impidh air; agus leig e le Amnon agus mic an rìgh uile dol maille ris.

28 A nis dh'àithn Absalom d'a òglach-aibh, ag ràdh, Thugaibh fa'near a nis an uair a bhios cridhe Amnoin subhlach le fion, agus an uair a their mise ribh, Buailibh Amnon, an sin marbhaibh e. Na biodh eagal oirbh: nach d'àithn mise dhuibh? bithibh misneachail, agus bithibh treun.

29 Agus rinn òglaich Absaloim ri h-Amnon mar a dh'àithn Absalom: an sin dh'éirich mic an rìgh uile, agus chaidh gach fear dhuibh air a mhuileid, agus theich iad.

30 Agus an uair a bha iad air an t-slighe, thàinig sgeul a dh'ionnsuidh Dhaibhidh, ag ràdh, Bhual Absalom mic an rìgh uile, agus cha d'fhàgadh aon duibh beò.

31 An sin dh'éirich an rìgh, agus reub e eudach, agus luidh e air an talamh; agus sheas a sheirbhisich uile làimh ris le 'n eudach reubta.

32 Agus fhreagair Ionadab mac Shim-eah, bràthar Dhaibhidh, agus thubhairt e, Na smuainicheadh¹ mo thighearna gu'n do mharbh iad na h-òganaich uile, mic an rìgh; oir tha Amnon a mhàin marbh: oir le Absalom² shuidhicheadh an ni so, o'n là anns an d'éignich e a phiuthar Tamar.

33 Agus a nis na gabhadh mo thighearn an rìgh an ni thuige d'a chridhe, a' smuainicheadh gu bheil mic an rìgh nìle marbh; oir tha Amnon a mhàin marbh.

34 Ach theich Absalom: agus thog an t-òganach a bha gleidheadh na faire a shùilean, agus dh'amhair e, agus, feuch, bha mòran sluagh a' teachd air an t-slighe air a chùlaobh o thaobh an t-sleibh.

35 Agus thubhairt Ionadab ris an rìgh, Feuch, tha mic an rìgh a' teachd: a réir focail do sheirbhisich, mar sin tha e.

36 Agus co luath as a sguir e do labhairt, feuch, thàinig mic an rìgh, agus thog iad suas an guth agus ghul iad: agus ghul mar an ceudna an rìgh, agus a sheirbhisich uile, le gul ro mhòr.

37 Ach theich Absalom, agus chaidh e dh'ionnsuidh Thalmair, mhic Amihuid, rìgh Ghesuir: agus chuala Daibhidh sin, agus rinn e caoidh air son a mhic gach aon là.

38 Mar sin theich Absalom, agus chaidh e do Ghesur, agus bha e 'n sin trì bliadhna.

39 Agus mhiannaich anam rìgh Daibhidh dol a mach a dh'ionnsuidh Absa-

loim³: oir fhuair e comhshurtachd a thaobh bàis Amnoin.

CAIB. XIV.

1 Chuir Ioab fios air mnaoi ghlic o Thecoah, agus chuir e focail 'na beul a bhrosnachadh Dhaibhidh gu Absalom a thoirt dhachaidh. 23 Thug Ioab Absalom gu Ierusalem.

AGUS thuig Ioab, mac Sheruah, gu'n robh chridhe an rìgh air⁴ Absalom.

2 Agus chuir Ioab fios gu Tecoah, agus thug e as a sin bean ghlic, agus thubhairt e rithe, Leig ort a bhi ri bròn, guidheam ort, agus cuir ort a nis eudach bròn, agus na h-ung thu féin le h-oladh, ach bi mar mnaoi a tha nis fada ri bròn air son mairbh:

3 Agus théid thu a dh'ionnsuidh an rìgh, agus labhradh tu ris air an dòigh so. Agus chuir Ioab na focail 'na beul.

4 Agus thàinig a' bhean o Thecoah a dh'ionnsuidh an rìgh, agus thuit i air a h-aghaidh gu làr, agus rinn i ùmh-lachd, agus thubhairt i, Cabhair orm, a rìgh.

5 Agus thubhairt an rìgh rithe, Ciod a tha teachd riut? Agus fhreagair ise, Gu deimhin is bantrach⁵ ni; oir fhuair m'fhear bàs.

6 Agus bha aig do bhanoglaich dithis mhac, agus chuir iad a mach air a chéile san achadh, agus chla robh neach ann a chuireadh eatorra: agus bhuail fear dhuibh am fear eile, agus mharbh se e.

7 Agus, feuch, dh'éirich an teaghlach uile an aghaidh do bhanoglaich, agus thubhairt iad, Thoir seachd esan a bhuail a bhràthair, a chum gu 'm marbh sinn e air son anama a bhràthar a mharbh e, agus gu'm marbh sinn an t-òighre mar an ceudna: agus mar sin mùchaidh iad m'eibhleag a dh'fhàgadh, air chor as nach fàg iad aig m'fhear aon chuid ainm, no iarmad air aghaidh na talmhainn.

8 Agus thubhairt an rìgh ris a' mnaoi, Imich a dh'ionnsuidh do thighe, agus bheir mise àithne mu d' thimchioll.

9 Agus thubhairt a' bhean o Thecoah ris an rìgh, Ormsa, a thighearn, a rìgh, bitheadh am peacadh, agus air tigh m'athar; agus bitheadh an rìgh agus a rìgh-chaitir neo-chiontach.

10 Agus thubhairt an rìgh, Ge b'e neach a their ni sam bith riut, thoir a m' ionnsuidhs' e, agus cha bhean e riut ni's mò.

11 An sin thubhairt ise, Cuimhnicheadh, guidheam ort, an rìgh an Tighearna do Dhia, a chum nach bi dioghaltairean na fola lìonmhor gu sgrios, agus nach marbh iad mo mhac. Agus thubhairt esan, Mar is beò an Tighearn, cha tuit aon ròinneag⁶ do fholt do mhic gu làr.

¹ Na h-abradh. Eabh. ² le beul Absaloim. Eabh.
³ sguir rìgh Daibhidh do dhol air tòir Absaloim.

⁴ an aghaidh.
⁵ fhuilean.

⁶ baintreabhach.

II. SAMUEL, XIV.

12 An sin thubhairt a' bhean, Labh-radh, guidheam ort, do bhanoglach aon fhocal ri m' thighearn an rìgh. Agus thubhairt esan, Abair romhad.

13 Agus thubhairt a' bhean, C'ar son ma ta a smuainich thu a leithid so do nì an aghlaidh sluagh Dhé? oir tha'n rìgh a' labhairt an nì so mar neach a tha ciontach, a chionn nach 'eil an rìgh a' toirt fhògaraich air ais.

14 Oir bàsaichidh sinn gu deimhin, agus tha sinn mar uisge a dhòirteadh air an talamh, agus nach cruinnichear a ris: gidheadh cha'n àill le Dia beatha¹ a thoirt air falbh, ach smuainichidh e air meadhonaibh a chum nach fògair e fhògarach gu tur uath.

15 Agus a nis gu bheil mi air teachd a labhairt ri m' thighearn an rìgh mu'n nì so, is ann a chionn gu'n do chuir an sluagh eagal orm: agus thubhairt do bhanoglach, Labhraidh mi nis ris an rìgh: theagamh gu'n dean an rìgh iarrtus a bhanoglaich.

16 Oir éisdidh an rìgh, a shaoradh a bhanoglaich à làimh an duine, leis amb b'àill mi féin agus mo mhac a sgrios le chéile a mach a oighreachd Dhé.

17 An sin thubhairt do bhanoglach, Bithidh focal mo thighearn an rìgh a nis sòlasach: oir mar aingeal Dé, mar sin tha mo thighearn an rìgh, a thuigsinn maith agus uile: agus bithidh an Tigh-earna do Dhia maille riut.

18 Agus fhreagair an rìgh, agus thubhairt e ris a' mnaoi, Na ceil orm, guidheam ort, an nì a dh'fheòraicheas mi dhìot. Agus thubhairt a' bhean, Labh-radh a nis mo thighearn an rìgh.

19 Agus thubhairt an rìgh, Nach 'eil làmh Ioaib maille riut anns an nì so uile? Agus fhreagair a' bhean agus thubhairt i, Mar is beò t'anam, a thighearn, a rìgh, cha 'n'eil claonadh sam bith a dh'ionnsuidh na làimhe deise, no dh'ionnsuidh na làimhe clìthe, ann an nì air bith² a labhair mo thighearn an rìgh; oir do sheirbhiseach Ioaib, is esan a dh'iarr ormsa, agus is esan a chuir ann am beul do bhanoglaich na briathra so uile:

20 A thoirt mu'n cuairt a leithid so do chaint, rinn do sheirbhiseach Ioaib an nì so: agus tha mo thighearna glic, a réir glòiaich aingil Dé, a thuigsinn gach nì a ta air an talamh.

21 Agus thubhairt an rìgh ri Ioaib, Feuch a nis, rinn mi an nì so: imich ma ta, thoir air ais an t-òganach Absalom.

22 Agus thuit Ioaib air 'aghaidh gu làr, agus chrom se e féin, agus bheannaich e³

do'n rìgh: agus thubhairt Ioaib, An diugh tha fios aig do sheirbhiseach gu'n d'fhuair mi deadh-ghean a'd' shùilibh, mo thighearn, a rìgh; oir rinn an rìgh iarrtus a sheirbhisich.

23 Agus dh'éirich Ioaib agus chaidh e gu Gesur, agus thug e Absalom gu h-Ierusalem.

24 Agus thubhairt an rìgh, Pilleadh e dh'ionnsuidh a thighe féin, agus na faiceadh e mo ghnùis-sa. Agus phill Absalom a dh'ionnsuidh a thighe féin, agus cha 'n fhac e gnùis an rìgh.

25 Ach ann an Israel uile cha robh duine co mhaiseach ri Absalom: bha e ri mholadh gu mòr: o bhonn a chois gu ruig mullach a chinn cha robh smal air bith air.

26 Agus an uair a bhearr e folt a chinn, (oir b'ann aig ceann gach bliadhna⁴ a bhearr se e; a chionn gu'n robh e trom air, uime sin bhearr se e,) chothromaich e folt a chinn aig dà cheud secel, a réir tomhaiss⁵ an rìgh.

27 Agus rugadh do Absalom trì mic, agus aon nighean, d' am b'ainm Tamar: blià i 'na mnaoi sgrìamhaich 'na gnùis.

28 Agus ghabh Absalom comhnuidh ann an Ierusalem dà bhliadhna iomlan, agus cha'n fhac e gnùis an rìgh.

29 Uime sin chuir Absalom fios air Ioaib, a chum a chur a dh'ionnsuidh an rìgh; ach cha b'àill leis teachd d'a ionnsuidh: agus an uair a chuir e fios a ris an dara uair, cha b'àill leis teachd.

30 Uime sin thubhairt e r'a sheirbhisich, Faicibh achadh Ioaib làimh ri m'achadhsa⁶, agus eorna aig an sin; rachaibh, agus cuiribh ri theine e. Agus chuir seirbhisich Absalom an t-achadh ri theine.

31 An sin dh'éirich Ioaib, agus thàinig e dh'ionnsuidh Absalom d' a thigh, agus thubhairt e ris, C'ar son a chuir do sheirbhisich m' achadh ri theine?

32 Agus fhreagair Absalom Ioaib, Feuch, chuir mi fios a d'ionnsuidh, ag ràdh, Thig an so, agus cuiridh mi thu dh'ionnsuidh an rìgh, a ràdh, C'ar son a thàinig mi o Ghesur? bu mhaith dhomhsa gu'm bithinn fastach an sin: a nis ma ta faiceam gnùis an rìgh; agus ma tha eu-ceart sam bith annam, thugadh e fa'near mo mharbhadh.

33 Uime sin thàinig Ioaib a dh'ionnsuidh an rìgh, agus dh'innis e sin da: agus ghairm e air Absalom, agus thàinig e dh'ionnsuidh an rìgh, agus chrom se e féin air aghaidh gu làr am fianuis an rìgh; agus phòg an rìgh Absalom.

¹ anam.
sam bith tionndadh a dh'ionnsuidh na làimhe deise, no na làimhe clìthe, o nì air bith.

² cha'n fheud duine

³ thug e buidheachas.
gu làithibh. Eabh.

⁴ o cheann lài'hean
⁵ clòich. Eabh.

⁶ Faicibh cuibhrionn Ioaib aig mo làimh-sa. Eabh.

CAIB. XV.

1 *Ghoid Absalom cridheacha chloinn Israeil, agus rinn e ceannairc làidir an aghaidh Dhaibhidh.*
13 *Threich Doibhidh o Ierusalem.* 34 *Chuireadh Sadoe agus Abiatar air an ais leis an àire.*

AGUS an déigh so dh'ulluich¹ Absalom dha féin carbadan, agus eich, agus leth-cheud fear gu ruith roimhe.

2 Agus dh'éirich Absalom gu moch, agus sheas e làimh ri slioghe a' gheata: agus an uair a thigeadh neach air bith aig an robh comhstri² a dh'ionnsuidh an rìgh chum breitheanais, an sin ghairmeadh Absalom air, agus theireadh e, Ciod am baile as *am bheil* thu? Agus theireadh esan, O aon do threubhan Israeil *tha* do sheirbhiseach.

3 Agus theireadh Absalom ris, Feuch, *tha* t'fhocail maith agus ceart; ach cha 'n'eil neach air bith ann *air orduchadh* leis an rìgh gu éisdeachd riut.

4 Theireadh Absalom cuideachd, O nach robh mise air mo shuidheachadh a'm' bhreitheamh anns an tìr, a chum a m' ionnsuidh-sa gu'n tìgeadh gach duine aig am bheil comhstri no cùis-lagha, agus dheanainn ceartas dha!

5 Agus an uair a thigeadh duine sam bith am fagus *da* a dheanamh ùmhhlachd dha, chuireadh e mach a làmh, agus bheireadh e air, agus phògadh se e.

6 Agus air an dòigh so rinn Absalom ri Israeil uile a thàinig a chum breitheanais a dh'ionnsuidh an rìgh: agus ghoid Absalom cridheacha dhaoine Israeil:

7 Agus an ceann cheithir³ bliadhna thubhairt Absalom ris an rìgh, Leig dhomh imeachd, guidheam ort, agus mo bhòid a dhioladh a bhòidich mi do'n Tighearn ann an Hebron.

8 Oir bhòidich do sheirbhiseach bòid an uair a bha mi a'm' chòmhnuidh ann an Gesur ann an Siria, ag ràdh, Ma bheir an Tighearna mi gu dearbh a ris gu h-Ierusalem, an sin ni mi seirbhis do'n Tighearn.

9 Agus thubhairt an rìgh ris, Imich ann an sìth. Agus dh'éirich e, agus chaidh e gu Hebron.

10 Ach chuir Absalom luchd-bratha air feadh uile threubhan Israeil, ag ràdh, Co luath as a chluinneas sibh fuaim na trompaide, an sin ni mi seirbhis do'n Tighearn.

11 Agus maille ri Absalom chaidh dà cheud fear a mach á h-Ierusalem, a ghairmeadh, agus dh'imich iad ann an treibhdhìreas an *cridhe*, agus cha robh fios ri sam bith aca.

12 Agus chuir Absalom *fios* air Ahito-

phel an Gilonach, comhairliche Dhaibhidh, o a bhaile, *eadhon* o Ghiloh, an uair a bha e ag ìobradh ìobairtean: agus bha a' cheannairc làidir; oir bha'n sluagh a' sir-dhol an ìonmhoireachd maille ri Absalom.

13 Agus thàinig teachdair a dh'ionnsuidh Dhaibhidh, ag ràdh, Tha cridheacha fhear Israeil an déigh Absalom.

14 Agus thubhairt Daibhidh r'a sheirbhiseich uile a *bha* maille ris ann an Ierusalem, Eiribh, agus teicheamaid; oir *mur dean sinn sin*, cha bhi dol as againn o aghaidh Absalom; luathaichibh agus imichibh, air eagal gu'n dean e cabhag, agus gu'm beir e oirnn, agus gu'n tarruing e olc oirnn, agus gu'm buail e 'm baile le faobhar a' chlaindeimh.

15 Agus thubhairt seirbhiseich an rìgh ris an rìgh, A réir gach ni a's àill le m' thighearn⁴ an rìgh, feuch, *ni* do sheirbhiseich.

16 Agus chaidh an rìgh a mach, agus a theaghlach uile 'na dhéigh⁵: a mhàin dh'fhàg an rìgh deichnear bhan a *bha* 'nan còimhleabachaibh *aige*, a ghleidheadh an tìghe.

17 Agus chaidh an rìgh a mach, agus an sluagh uile 'na dhéigh, agus dh'flian iad ann an àit a bha fad as⁶.

18 Agus chaidh a sheirbhiseich uile thairis làimh ris; agus chaidh na Ceretich uile, agus na Peletich uile, agus na Gitich uile, sè ceud fear a thàinig 'na dhéigh o Ghat, thairis roimh an rìgh.

19 Agus thubhairt an rìgh ri Itai an Giteach, C'ar son a tha thusa mar an ceudna dol maille ruinne? pill gu d'ait, agus fan maille ris an rìgh; oir *is* coigreach thu, agus mar an ceudna fògarach o d' àite féin⁷.

20 An dé a mhàin thàinig thu, agus an diugh an toir mise ort dol air faonradh⁸ maille ruinne? oir théid mise an taobh a *tha* mi gu dol: pill thusa, agus thoir air an ais do bhràithrean leat; agus gu nochdadh an Tighearna dhuit tròcair agus firinn.

21 Agus fhreagair Itai an rìgh, agus thubhairt e, *Mar* is beò an Tighearn, agus *mar* is beò mo thighearn an rìgh, gu cinnteach ge b'e àit anns am bi mo thighearn an rìgh, ma's ann a chum bàis no chum beatha, eadhon an sin bithidh do sheirbhiseach.

22 An sin thubhairt Daibhidh ri Itai, Imich, agus gabh thairis. Agus chaidh Itai an Giteach thairis, agus a dhaoine uile, agus a' chlànn bheag uile a *bha* maille ris.

¹ rinn. Eabh. ² connsachadh, cùis-lagha.

³ dhà fhichead bliadhna, dhà fhichead là.

⁴ a roghnaicheadh, a dh'orduicheadh mo thighearn.

⁵ d'an cois.

⁶ Bet-morec. Eabh.

⁷ agus pillidh tu do d' àite féin.

⁸ dol sìos agus suas.

II. SAMUEL, XV. XVI.

23 Agus ghuil an tìr uile le guth àrd, agus chaidh an sluagh uile thairis; chaidh an rìgh cuideachd thairis air sruth Chid-roin, agus chaidh an sluagh uile thairis a làimh na slighe do'n fhàsach.

24 Agus, feuch, *bha* Sadoc mar an ceudna, agus na Lebhithich uile maille ris, a' giùlan àire coimhcheangail Dé, agus shuidhich iad¹ àire Dhé; agus chaidh Abiatar suas, gus an do sguir an sluagh uile do dhol a mach as a' bhaile.

25 Agus thubhairt an rìgh ri Sadoc, 'Thoir air a h-ais àire Dhé do'n bhaile: ma gheibh mi deadh-ghean ann an suilibh an Tighearna bheir e air m'ais mi, agus nochdaidh e dhomh e féin, agus 'àite-còmhutidh.

26 Ach ma their e mar so, Cha 'n 'eil tlachd agam annad; feuch, *tha* mise *an so*, deanadh e rium mar is maith leis.

27 Thubhairt an rìgh mar an ceudna ri Sadoc an sagart, Nach fear-seallaidh thusa²? pill do'n bhaile ann an sìth, agus Ahimaas do mhac féin, agus Ionatan mac Abiatar, bhur dithis mhac maille ribh.

28 Faicibh, fanaidh mise ann an còmh-nardaibh³ an fhàsaich, gus an tig focal uaihse a thoirt fios domh.

29 Uime sin thug Sadoc agus Abiatar àire Dhé a ris gu h-Ierusalem; agus dh'fhan iad an sin.

30 Agus chàidh Daibhidh suas ri uchdaich⁴ *sléibh* nan oladh, a' dol suas agus a' gul, agus a cheann còmhdaichte, agus e 'g imeachd cos-ruisgte: agus chòmhdaich an sluagh uile a *bha* maille ris, gach fear *dhiubh* a cheann, agus chaidh iad suas, ag imeachd agus a' gul.

31 Agus dh'innis *neach* do Dhaibhidh, ag ràdh, *Tha* Ahitophel am measg an luchd-ceannairc maille ri Absalom. Agus thubhairt Daibhidh, Tionndaidh, a Thighearna, guidheam ort, comhairle Ahitophel gu h-amaideachd.

32 Agus an uair a thàinig Daibhidh gu mullach *an t-sléibh*, far an d' rinn e aoradh do Dhia, feuch, thàinig Husai an t-Arcach 'na choinneamh, le 'chòta reubta, agus ùir air a cheann.

33 Agus thubhairt Daibhidh ris, Ma théid thu thairis maille riumsa, an sin bithidh tu a' d' eallaich orm.

34 Ach ma philleas tu do'n bhaile, agus ma their thu ri Absalom, Bithidh mise a'm' sheirbhiseach dhuit, a rìgh; *bu* sheirbhiseach do t'athair mi gu ruige so⁵, agus a nis *bithidh* mi mar an ceudna a'm' sheirbhiseach dhuitse; an sin bheir thu air mo shonsa comhairle Ahitophel gu neo-ni.

35 Agus nach 'eil maille riut an sin Sa-

doc agus Abiatar na sagairt? agus gach focal a chluinneas tu á tigh an rìgh, iun-sidh tu e do Shadoc agus do Abiatar na sagairt.

36 Feuch, *tha*'n sin maille riut an dithis mhac, Ahimaas *mac* Shadoic, agus Ionatan *mac* Abiatar: agus le'n làimh-san cuiridh sibh a m' ionnsuidh-sa gach focal a chluinneas sibh.

37 Uime sin thàinig Husai caraid Dhaibhidh do'n bhaile, agus thàinig Absalom gu h-Ierusalem.

CAIB. XVI.

1 *Le casaid bhréige fhuair Siba oighreachd a mhaighistir.* 5 *Mallaich Simeì Daibhidh.* 20 *Comhairle Ahitophel.*

AGS an uair a chaidh Daibhidh a beagan thar mullach *an t-sléibh*, feuch, *thàinig* Siba òglach Mhephiboset 'na choinneamh le dà asail air an diollaid-eachadh⁶, agus dà cheud buillion arain orra, agus ceud bagaide do fhion-dhearc-aibh tiormaichte; agus ceud do mheas samhraidh, agus searrag fhiona.

2 Agus thubhairt an rìgh ri Siba, Cìod *is ciall* duit leo sin? Agus thubhairt Siba, *Tha* na h-asail air son teaghlach an rìgh chum marcachd; agus an t-aran agus am meas samhraidh air son nan òganach chum *an* itheadh; agus am fion, a chum gu'n òl esan a bhios sgith⁷ anns an fhàsach.

3 Agus thubhairt an rìgh, Agus c'ait am bheil mac do mhaighistir? Agus thubhairt Siba ris an rìgh, Feuch, *tha* e fantuinn ann an Ierusalem: oir thubhairt e, An diugh aisgidh tigh Israeil dhomhsa rioghachd m' athar.

4 An sin thubhairt an rìgh ri Siba, Feuch, *is* leatsa gach *ni* a *bha* aig Mephiboset. Agus thubhairt Siba, Tha mi le mòr-ùnhlachd a' guidhe ort *gu'm* faigh mi deadh-ghean a'd' shùilb, a thighearna, a rìgh.

5 Agus an uair a thàinig rìgh Daibhidh gu Bahurim, feuch, á sin thàinig a mach duine do theaghlach tìghe Shaul, d'am b'ainm Semeì, mac Ghera: thàinig e mach, a' teachd air aghaidh agus a' mallachadh.

6 Agus thig e clachan air Daibhidh, agus air seirbhisich rìgh Daibhidh uile; agus *bha* 'n sluagh uile, agus na daoine treuna uile, air a làimh dheis agus air a làimh chli.

7 Agus mar so thubhairt Simeì an uair a mhallach se e, Thig a mach, thig a mach, thus' a dhuine fhuileachdaich, agus a dhuine le Belial:

8 Dhiol an Tighearna ortsa uile fhuil tìghe Shaul, an àit an do rìghich thu;

¹ leig iad sìos. ² Nach 'eil thu a' fuicinn?

³ ann am bealaichibh. ⁴ bruthach, dìreadh.

⁵ o cheann fada.

⁶ le'n acfuinn orra.

⁷ lag, fann.

II. SAMUEL, XVI. XVII.

agus thug an Tighearn an rìoghachd do làimh do mhic Absaloin: agus, feuch, *ghlacadh* thu ann ad olc féin, a chionn gur duine fuileachdach thu.

9 An sin thubhairt Abisai mac Sheruah ris an rìgh, C'ar son a mhallachdadh an cù marbhl so mo thighearn an rìgh? leig dhomh dol a null, guidheam ort, agus a cheann a thoirt deth.

10 Agus thubhairt an rìgh, Ciod e mo ghnòthuch-sa ribhse¹, a mhaca Sheruah? leigibh leis mallachadh, a chionn gu'n d'thubhairt an Tighearna ris, Mallaich Daibhidh: agus cò a their, C'ar son a rinn thu mar so?

11 Agus thubhairt Daibhidh ri Abisai, agus r'a sheirbhisich uile, Feuch, mo mhac, a thàinig a mach à m'innibh, ag iarraidh m'anama; agus cia mòr is mò a nis a dh'*fheudas* am Beniamineach so? Leigibh leis, agus mallaicheadh e, oir dh'iarr an Tighearn air.

12 Theagamh gu'n amhaire an Tighearn air m'àmhghar, agus gu'n diol an Tighearna dhomh maith air son a mhallachaidh air an là 'n diugh.

13 Agus an uair a dh'imich Daibhidh agus a dhaoine air an t-slighe, dh'imich Simei air slìos² an t-sléibh làimh ris³, a' dol air aghaidh agus a' mallachadh, agus thilg e clachan agus ùir air.

14 Agus thàinig an rìgh agus an sluagh uile a *bha* maille ris, sgith; agus leig iad an anail an sin.

15 Agus thàinig Absalom agus uile shluagh fhear Israeil, gu h-Ierusalem, agus Ahitophel maille ris.

16 Agus an uair a thàinig Husai an t-Arcach, caraid Dhaibhidh, a dh'ionnsuidh Absaloin, thubhairt Husai ri Absalom, Gu ma fada beò an rìgh, gu ma fada beò an rìgh.

17 Agus thubhairt Absalom ri Husai, An e so do chaoimhneas ri d'charaid? c'ar son nach deachaidh tu maille ri d'charaid?

18 Agus thubhairt Husai ri Absalom, Ni h-eadh; ach ge b'e neach a thaghas an Tighearn, agus an sluagh so, agus fir Israeil uile, leis-san bithidh mise, agus maille ris fanaidh mi.

19 Agus san dara àite, co dha a dheanaim seirbhis? nach ann an làthair a mhic? mar a rinn mi seirbhis ann an làthair t'athar, mar sin bithidh mi a'd' làthair-sa.

20 An sin thubhairt Absalom ri Ahitophel, Thugaibh comhairle 'nur measg ciod a ni sinn.

21 Agus thubhairt Ahitophel ri Absalom,

Gabh a stigh a dh'ionnsuidh choimhleab-ach t'athar, a dh'fhàg e a ghleidheadh an tighe; agus cluinnidh Israel uile gu bheil thu air fàs gràineil do t'athair, agus neartaichear làmhnan gach neach a *tha* maille riut.

22 Agus sgaol iad bùth do Absalom air mullach an tighe; agus chaidh Absalom a steach a dh'ionnsuidh choimhleabach 'athar ann an sealladh Israeil uile.

23 Agus *bha* comhairle Ahitophel a thug e seachad anns na làithibh sin, mar gu'm fiosraicheadh duine do fhocal Dhé: mar sin *bha* uile chomhairle Ahitophel, araon aig Daibhidh agus aig Absalom.

CAIB. XVII.

1 Dh'iarr Ahitophel dol air tòir Dhaibhidh.
15 Chuir Husai fios a dh'ionnsuidh Dhaibhidh os ìosal air gach nì a chomhairlich Ahitophel.
23 Chroch Ahitophel e féin. 25 Rinn Absalom Amasa 'na cheannard air an t-sluagh.

AGUS thubhairt Ahitophel ri Absalom, Leig dhomh a nis dà mhìle dheug fear a thaghadh a mach, agus éiridh mi, agus théid mi air tòir Dhaibhidh an nochd:

2 Agus thig mi air an uair a tha e sgith agus lag-làmhach, agus cuiridh mi eagal air: agus teichidh an sluagh uile a *tha* maille ris, agus buailidh mi an rìgh a mhàin.

3 Agus bheir mi air an ais an sluagh uile a t'ionnsuidh-sa: *tha* 'n duine a *tha* thu ag iarraidh mar gu'm pilleadh an t-ionlan: agus bithidh an sluagh uile ann an sìth.

4 Agus thaitinn a' chainnt ri Absalom⁴, agus ri seanairibh Israeil uile.

5 Agus thubhairt Absalom, Gairm a nis mar an ceudna air Husai an t-Arcach, agus cluinneamaid mar an ceudna ciod a their esan⁵.

6 Agus thàinig Husai a dh'ionnsuidh Absaloin, agus labhair Absalom ris, ag ràdh, Air an dòigh so labhair Ahitophel: an dean sinn a *réir* fhocail, no nach dean? labhair thusa.

7 Agus thubhairt Husai ri Absalom, Cha 'n'eil a' chomhairle a thug Ahitophel maith air an uair so.

8 Oir, arsa Husai, is aithne dhuit t'athair agus a dhaoine, gur *daoine* treun iad agus air am feargachadh 'nan spiorad⁶, mar mhath-ghamhuin o'n d'thugadh a cuileana anns a' mhachair: agus is fear-cogaidh⁷ t'athair, agus cha ghabh e tàmh maille ris an t-sluagh.

9 Feuch, tha e nis am folach ann an slochd éigin, no ann an àit éigin eile: agus tachairidh, an uair a thuiteas cuid diubh

¹ Ciod e dhomhsa agus dhuibhse. Eabh.

² taobh. ³ fa chomhair.

⁴ Tha am focal ceart ann an sùilibh Absaloin. Eabh.

⁵ ciod a tha 'na bheul-san. Eabh.

⁶ gurg 'nan inntinn. ⁷ fear deavita ri cogadh.

an toiseach, ge b'e neach a chluinneas e, gu'n abair e, Tha àr am measg an t-shuaigh a tha leantuinn Absalom.

10 Agus esan mar an ceudna a tha 'ua dhuine treun, aig am bheil a chridhe mar chridhe leòmhain, leaghaidh e gu tur: oir tha fios aig Israel uile gur duine treun t'athair, agus gur daoine treun iadsan a tha maille ris.

11 Air an aobhar sin is i mo chomhairle-sa, Gu'n cruinnichear Israel uile a t'ionnsuidh, o Dhan eadhon gu Beer-seba, mar a' ghaineamh a tha làimh ris an fhaire air lìonmhoireachd, agus gu'n téid thu féin¹ maille ri do'n chath.

12 Agus thig sinn air ge b'e àit am faighear e, agus tuitidh sinn air mar a thuiteas an drùchd air an talamh: agus cha'n fhàgar dheth féin, agus do na fir uile a tha maille ris, eadhon aon.

13 Agus ma théid e a steach do bhaile, an sin bheir fir Israeil uile cùird leo a dh'ionnsuidh a' bhaile sin, agus tairngidh sinn e do'n amhainn², agus nach fàgar an sin aon chlach bheag.

14 Agus thubhairt Absalom, agus fir Israeil uile, Is fearr comhairle Husai an Arcaich na comhairle Ahitopheil: oir dh'orduich an Tighearna comhairle mhaith Ahitopheil a thoirt gu nco-ni, a chum gu'n tugadh an Tighearn olc air Absalom.

15 An sin thubhairt Husai ri Sadoc agus ri Abiatar na sagairt, Mar so agus mar so chomhairlich Ahitophel Absalom agus seanairean Israeil; agus mar so agus mar so chomhairlich mise.

16 A nis uime sin cuiribh fios gu grad, agus innsibh do Dhaibhidh ag ràdh, Na fan an nochd ann an còmhnaidh an fhàsaich, ach gabh thairis gu luath, air eagal gu'n sluigear suas an rìgh, agus an sluagh uile a tha maille ris.

17 Agus dh'fhan Ionatan agus Ahimaas làimh ri En-rogel; (oir cha'n fheudadh iad a bhi air am faicinn a' dol a stigh do'n bhaile:) agus chaidh caillin agus dh'innis i dhoibh; agus chaidh iadsan agus dh'innis iad do rìgh Daibhidh.

18 Gidheadh chunnaic òganach iad, agus dh'innis e do Absalom: ach dh'imich iadsan le chèile gu luath, agus thàinig iad gu tigh duine ann am Bahurim, aig an robh tobar 'na chùirt³, agus chaidh iad sìos an sin.

19 Agus ghabh a' bhean còmhdaich agus sgaoil i e air beul an tobair, agus chuir i gràn meilte⁴ air; agus cha d'aithnicheadh an ni.

20 Agus an uair a thàinig seirbhisich Absalom a dh'ionnsuidh na mnà do'n

tigh, thubhairt iad, C'ait am bheil Ahimaas agus Ionatan? Agus thubhairt a' bhean riu, Chaidh iad thairis air an t-sruth-an uisge. Agus an uair a dh'iarr iad, agus uach d'fhuair iad, phill iad gu h-Ierusalem.

21 Agus an uair a dh'fhalbh iad, thàinig iadsan a nìos as an tobar, agus chaidh iad agus dh'innis iad do rìgh Daibhidh, agus thubhairt iad ri Daibhidh, Eiribh, agus rachaibh gu grad thar an uisge; oir mar so chomhairlich Ahitophel 'nurn-aghaidh-sa.

22 Agus dh'éirich Daibhidh, agus an sluagh uile a bha maille ris, agus chaidh iad thar Iordan gu solus na maidne, agus nach robh aon diubh nach deachaidh thar Iordan.

23 Agus an uair a chunnaic Ahitophel nach do ghabhadh a chomhairle, chuir e diollaid air 'asail, agus dh'éirich e, agus dh'imich e dh'ionnsuidh a thighe, d'a bhaile féin, agus thug e àitheanta d'a theaghlach⁵, agus chroch se e féin, agus fhuair e bàs, agus dh'adhlacaidh e ann an àit-adhlacaidh 'athar.

24 An sin thàinig Daibhidh gu Mahanaim: agus chaidh Absalom thar Iordan, c féin agus fir Israeil uile maille ris.

25 Agus rinn Absalom Amasa 'na cheannard air an t-sluagh an àit Ioaib: agus b'e Amasa mac duine, d'am b'ainm Itra Israeleach⁶, a chaidh a steach gu Abigail nighean Nafais, piuthar Shicruiah, màthar Ioaib.

26 Agus champaich Israel agus Absalom ann am fearann Glilead.

27 Agus an uair a thàinig Daibhidh gu Mahanaim, thug Sobi mac Nahais o Rabah chloinn Amoin, agus Machir mac Amieil o Lodebar, agus Barsillai an Gileadach o Rogelim,

28 Leapaichean, agus cuachan, agus soithichean creadha, agus cruithneachd, agus eorna, agus min mhin, agus gràn crnaidhichte, agus pònair⁷, agus gall-pheasair, agus peasair chruaidhichte,

29 Agus mil, agus im, agus caoraich, agus càise cruith air son Dhaibhidh, agus air son an t-sluaigh a bha maille ris, a chum an itheadh: oir thubhairt iad, Tha'n sluagh orach, agus sgèth, agus iotmhor⁸ anns an fhàsach.

CAIB. XVIII.

1 Chuir Daibhidh a mach 'armailt fo laimh Ioaib, Abisai, agus Itai, agus dh'orduich e dhoibh buinntinn gu mìn ri Absalom. 6 Bhuaileadh fir Israeil. 9 Mharbh Ioaib Absalom. 33 Rinn Daibhidh caoidh air a shon.

AGUS dh'àireamh Daibhidh an sluagh a bha maille ris, agus chuir e ceann-

¹ do ghnùis féin. Eabh.

³ loinn; court. Sasg.

² do'n t-sruth.

⁴ bléithe.

⁵ chuir e a theaghlach an ordugh.

⁶ Israeleach.

⁷ pàncir.

⁸ pàit-ach.

ardan mliùtean, agus ceannardan cheud-an os an ceann.

2 Agus chuir Daibhidh a mach trian do'n t-sluagh fuidh làimh Ioaib, agus trian fuidh làimh Abisai, mhic Sheruah bhràthar Ioaib, agus trian fuidh làimh Itai a' Ghitich: agus thubhairt an rìgh ris an t-sluagh, Gu deimhin théid mi féin mar an ceudna mach maille ribh.

3 Ach fhreagair an sluagh, Cha téid thu mach: oir ma theicheas sinne, cha ghabh iad suin dhinn¹; agus ma bhàsaicheas ar leth, cha ghabh iad suim dhinn; ach a nis *a ta thusa* mar dheich mìle dhinne: uime sin a nis *is* fearr gu'n deanadh tusa còmhnaidh² ruinn a mach as a' bhaile.

4 Agus thubhairt an rìgh riu, *An nì sin* a tha ceart 'nur sùilibh, nì mise. Agus sheas an rìgh làimh ris a' gheata, agus thàinig an sluagh uile a mach 'nan ceudaibh agus 'nam miltibh.

5 Agus dh'àithn an rìgh do Ioaib, agus do Abisai, agus do Itai, ag ràdh, *Buinibh* gu min air mo sgàth-sa ris an òganach, ri Absalom. Agus chual' an sluagh uile 'nuair a dh'àithn an rìgh do na ceannardaibh uile a thaobh Absaloim.

6 Agus chaidh an sluagh a mach do'n mhachair au aghaidh Israeil: agus bha'n cath ann an coille Ephraim.

7 Agus mharbhadh an sin sluagh Israeil roimh sheirbhìsich Dhaibhidh; agus bha'n sin air an là sin àr mòr fhichead mìle *fear*:

8 Oir bha'n cath an sin air sgaoileadh air aghaidh na tìre uile; agus chuir a' chòille as do thuilleadh sluaigh air an là sin na chuir an claidheamh.

9 Agus thachair Absalom air seirbhìsich Dhaibhidh; agus *bha* Absalom a' marcachd air muileid, agus chaidh a' mhuilcid a steach fuidh gheuga tiugha craoibhe mòire daraich, agus ghlacadh a cheann anns a' chraoibh dharaich, agus chrochadh e eadar nèamh agus talamh; agus dh'imich a' mhuileid a *bha* fuidhe roimpe.

10 Agus chummaic duine àraidh *so*, agus dh'innis e do Ioaib, agus thubhairt e, Feuch, chummaic mi Absalom crochta ann an craoibh dharaich.

11 Agus thubhairt Ioaib ris an duine a dh'innis dha, Agus, feuch, chummaic thu e, agus c'ar son nach do bhuail thu e 'n sin air gu làr³, agus bheirinn-se dhuit deich *seceil*, airgid⁴ agus crios?

12 Agus thubhairt an duine ri Ioaib,

Ged gheibhinn-se mìle *secel* airgid ann mo làimh, cha chuirinn mo làmh a mach an aghaidh mic an rìgh: oir 'nar n-éisdeachd dh'àithn an rìgh dhuitse, agus dō Abisai, agus do Itai, ag ràdh, Gleidhibh dhomh an t-òganach Absalom.

13 No dheanaim eucoir⁵ an aghaidh m'anama⁶ féin: oir cha 'n'èil ni air bith am folach air an rìgh, agus sheasadh tusa féin a'm' aghaidh.

14 An sin thubhairt Ioaib, Cha'n fheud mise fuireach mar so maille riut. Agus ghabh e trì gathan 'na làimh, agus shàth e iad an chridhe Absaloim, an uair a *bha* e fathast beò ann am meadhan' na craoibhe daraich.

15 Agus chuairtich deichnear òganach a *bha*⁷ g iomchar arm Ioaib, agus bhuail iad Absalom, agus mharbh iad e.

16 Agus shéid Ioaib an trompaid, agus phill an sluagh o ruagadh Israeil; oir chum Ioaib air an ais an sluagh.

17 Agus ghabh iad Absalom, agus thilg iad e ann an sloclid mòr anns a' chòille, agus chuir iad carn ro mhòr chlach air: agus theich Israel uile, gach fear a dh'ionnsuidh a bhùtha.

18 A nis ghabh Absalom, an uair bu bheò e, agus chuir e suas dha féin carragh, a *tha* ann an gleann an rìgh: oir thubhairt e, Cha 'n'èil mac agam a chumail m'ainme air chuimhne: agus thug e 'ainm féin air a' charragh; agus theirear ris gu ruig an là 'n diugh, Clach-chuimhneachain Absaloim⁸.

19 An sin thubhairt Ahimaas mac Shadoic, Leig dhomh ruith a nis, agus sgeul⁹ a thoirt a dh'ionnsuidh an rìgh, gu'n do shaor an Tighearn e á làimh a naimh-dean¹⁰.

20 Agus thubhairt Ioaib ris, Cha toir thu sgeul leat an diugh, ach bheir thu sgeul leat là eile: ach an diugh cha toir thu sgeul leat, a chionn gu bheil mac an rìgh marbh.

21 Agus thubhairt Ioaib ri Cusi, Falbh, innis do'n rìgh ciod a chummaic thu. Agus chrom Cusi e féin do Ioaib, agus ruith e.

22 An sin thubhairt Ahimaas mac Shadoic a ris ri Ioaib, Ach gidheadh¹¹, leig dhomhsa, guidheam ort, ruith mar an ceudna an dèigh Chusi. Agus thubhairt Ioaib, C'ar son a ruithheadh tusa, a mhic, agus nach d'fhuaradh sgeul sam bith dhuit¹²?

23 Ach gidheadh, *ars' esan*, leig dhomh ruith. Agus thubhairt e ris, Ruith. Agus

¹ cha chuir iad an cridhe oirnn. Eabh.

² congnamh. Eir. ³ c'ar son nach do bhuail thu e, agus nach do thilg thu e sìos gu làr.

⁴ agus bhiodh e mar fhìacha ormsa deich seceil airgid a thoirt duit. Eabh. ⁵ breug, cealg.

⁶ mo bheatha. ⁷ ann an cridhe. Eabh.

⁸ Aite; làmh. Eabh. ⁹ deach sgeul, teachd-airèachd mhaith. ¹⁰ gu'n do dliot an Tighearn e air a naimh-dhìbh.

¹¹ ciod air bith a thachairas. ¹² agus gun sgeul sam bith deas agad.

ruith Ahimaas rathad a' chòmhnaird, agus chaidh e seachad air Cusi.

24 Agus shuidh Daibhidh eadar an dà gheata : agus chaidh am fear-faire suas gu mullach a' gheata, air a' bhalla ; agus thog e suas a' shùilean, agus dh'amhairc e, agus, feuch, duine a' ruith 'na aonar.

25 Agus ghlaodh am fear-faire, agus dh'innis e do'n rìgh. Agus thubhairt an rìgh, Ma tha e 'na aonar, tha sgeul aige 'na bheul. Agus dh'imich e air aghaidh, agus thàinig e am fagus.

26 Agus chunnaic am fear-faire duine eile a' ruith ; agus ghlaodh am fear-faire ris an dorsair, agus thubhairt e, Feuch, tha duine eile a' ruith 'na aonar. Agus thubhairt an rìgh, Tha esan mar an ceudna a' toirt sgéil.

27 Agus thubhairt am fear-faire, Tha mi a' faicinn ruith a' cheud duine mar ruith Ahimaais, mhic Shadoic. Agus thubhairt an rìgh, Is duine maith esan, agus is ann le sgeul maith a tha e a' teachd.

28 Agus ghlaodh Ahimaas, agus thubhairt e ris an rìgh, Tha gach ni gu maith¹. Agus chrom se e féin sìos do'n rìgh air aghaidh dh'ionnsuidh na talmhainn, agus thubhairt e, Gu ma beannaichte an Tighearna do Dhia, a thug thairis na daoine a thog an làmhnan suas an aghaidh mo thighearn an rìgh.

29 Agus thubhairt an rìgh, Am bheil an t-òganach Absalom tèarainte ? Agus fhreagair Ahimaas, An uair a chuir Ioab air falbh seirbhiseach an rìgh, agus mise do sheirbhiseach², chunnaic mi buaireas mòr, ach cha robh fios agam ciod e.

30 Agus thubhairt an rìgh ris, Tionndaidh a leth-taobh, agus seas an so. Agus thionndaidh e a leth-taobh, agus sheas e.

31 Agus, feuch, thàinig Cusi ; agus thubhairt Cusi, Bheirear sgeul do m' thighearn, an rìgh, gu'n do shaor an Tighearn thusa an diugh à làimh nan uile³ a dh'èirich suas a' d' aghaidh.

32 Agus thubhairt an rìgh ri Cusi, Am bheil an t-òganach Absalom tèarainte ? Agus fhreagair Cusi, Gu robh naimhdean mo thighearn an rìgh, agus iadsan uile a dh'èirich suas a' d' aghaidh a dheanamh do chroin, mar a tha an t-òganach sin.

33 Agus ghluaiseadh an rìgh gu mòr⁴, agus chaidh e suas do'n t-seòmar os ceann a' gheata, agus ghul e : agus ag imeachd dha, thubhairt e mar so. A mhic Absalom ! a mhic, a mhic Absalom ! O nach mise féin a fhuair bàs air do shon, Absalom, a mhic, a mhic !

¹ Thug Ioab air Daibhidh sgar o bhròn a dheanamh air son Absalom. Dh'iarr na h-Israelich an rìgh a thoirt air ais. 16 Fhuair Simeì maithneas. 24 Ghabh Mephìbòset a leisgeul féin. 31 Phìll Barsillai o Dhaibhidh a leanuinn.

AGUS dh'innseadh do Ioab, Feuch, tha'n rìgh a' gul agus a' caoidh air son Absalom.

2 Agus bha a' bhuaidh air an là sin air a tionndadh gu caoidh do'n t-sluagh uile ; oir chual' an sluagh 'ga ràdh air an là sin, Tha 'n rìgh fo thuirse air son a mhic.

3 Agus ghoid an sluagh air an là sin a steach do'n bhaile, mar a ghoideas sluagh air falbh agus iad fo nàire, an uair a theicheas iad ann an cath.

4 Ach dh'fholaich an rìgh 'aghaidh, agus ghlaodh an rìgh le guth àrd, A mhic Absalom ! Absalom, a mhic, a mhic !

5 Agus thàinig Ioab a steach a dh'ionnsuidh an rìgh do'n tigh, agus thubhairt e, Chuir thu nàire an diugh air aghaidhibh do sheirbhiseach uile, a shaor t'anam an diugh, agus anaman do mhac, agus do nighean, agus anaman do bhànan, agus anaman do choimhleabach :

6 A chionn gu bheil gràdh agad dhoibhsan aig am bheil fuath dhuit, agus gu bheil fuath agad dhoibhsan aig am bheil gràdh dhuit : oir nochd thu an diugh nach 'eil suim agad do cheannardaibh, no do sheirbhisich : oir tha mi tuigsinn an diugh, nam biodh Absalom beò, agus nam bitheamaid-ne uile marbh an diugh, an sin gu'm bitheadh e ceart a' d' shùilibh.

7 A nis uime sin éirich, falbh a mach, agus labhair gu caoimhneil ri d' sheirbhisich⁵ : oir bheiream-sa mo mhionnan air an Tighearna, mur téid thu mach, nach fan duine maille riut an nochd : agus bithidh sin nì's miosa dhuit na gach olc a thàinig ort o t'òige gus a nis.

8 An sin dh'èirich an rìgh, agus shuidh e anns a' gheata. Agus dh'innis iad do'n t-sluagh uile, ag ràdh, Feuch, tha'n rìgh 'na shuidhe anns a' gheata : agus thàinig an sluagh uile am fianuis an rìgh. Agus theich Israel, gach fear a dh'ionnsuidh a bhùtha.

9 Agus bha'n sluagh uile ri connasachadh air feadh uile threubhan Israeil, ag ràdh, Theasairg an rìgh sinn à làimh ar naimhdean, agus shaor e sinn à làimh nam Philisteach, agus a nis tha e air teicheadh as an tìr roimh Absalom.

10 Agus fhuair Absalom, a dh'ung sinn os ar ceann, bàs anns a' chath : a nis ma ta c'ar son a tha sibh tosdach mu'n rìgh a thoirt air ais ?

¹ sth. Eabh. ² An uair a chuir seirbhiseach an rìgh Ioab air falbh do sheirbhiseach.

³ oir dh'iol an Tighearn thusa an diugh orra-san uile.

⁴ bha'n rìgh fo thuirse mhòir.

⁵ labhair ri cridhe do sheirbhiseach. Eabh.

11 Agus chuir rìgh Daibhidh *fios* gu Sàdoc agus gu Abiatar na sàgairt, ag ràdh, Labhraibh ri seanairibh Iudah, ag ràdh, C'ar son a tha sibhse air dheireadh a thoirt an rìgh air ais d'a thigh? (agus gu'n d'fhàinig cainnt Israeil uile dh'ionnsuidh an rìgh d'a thigh.)

12 *Is* sibhse mo bhràithrean, *is* sibh mo chnàmhan agus m'fheoil: c'ar son ma ta a tha sibh air dheireadh a thoirt an rìgh air ais?

13 Agus ri h-Amasa their sibh, Nach tusa mo chnàimh, agus m'fheoil? Mar sin gu'n deanadh Dia riumsa, agus tuilleadh mar an ceudna, mur bi thusa a'd' cheannard air an t-sluagh a'm' làthairs' an còmhnuidh an àit Ioaib.

14 Agus dh'aom e cridheacha fhear Iudah uile, mar *chridhe* aoin duine; *air chor as* gu'n do chuir iad *am fios so* dh'ionnsuidh an rìgh, Pìll féin, agus do sheirbhisich uile.

15 Uime sin phill an rìgh, agus thàinig e gu Iordan a dh'ionnsuidh an rìgh, agus an rìgh a thoirt thar Iordan.

16 Agus luathaich Simeì mac Ghera, Beniamineach, a bha o Bhahurim, agus thàinig e nuas maille ri fearaibh Iudah an coinneamh rìgh Daibhidh.

17 Agus *bha* mìle fear do Bheniamin maille ris, agus Siba òglach tìghe Shaul, agus a chùig mic dheug, agus 'fhichead seirbhiseach maille ris; agus chaidh iad thar Iordan roimh an rìgh.

18 Agus chaidh bàt-aisig a null¹ a thoirt teaghlach an rìgh thairis, agus a dheanamh an *ni* bu mhaith leis. Agus thuit Simeì mac Ghera, sìos am fianuis an rìgh, 'nuair a thàinig e thar Iordan;

19 Agus thubhairt e ris an rìgh, Na cuireadh mo thighearn eu-ceart as mo leth, agus na cuimhnich an *ni* a rinn do sheirbhiseach gu h-an-dligheach air an là anns an deachaidh mo thighearn an rìgh a mach á h-Ierusalem, air chor as gu'n gabhadh an rìgh g'a chridhe e.

20 Oir tha fios aig do sheirbhiseach gu'n do pheacaich mi: uime sin, feuch, thàinig mi an diugh an ceud duine do thigh Ioseph uile, a dhol sìos an coinneamh mo thigh-earn an rìgh.

21 Ach fhreagair Abisai mac Sheruiah, agus thubhairt e, Nach cuirear air a shon so Simeì gu bàs, a chionn gu'n do mhall-aich e *aon* ungta an Tighearn.

22 Agus thubhairt Daibhidh, Ciod e mo ghnothuch-sa ribhse, a mhaca Sheruiah, gu'm bitheadh sibh an diugh 'nur n-eascairdibh dhomh? an cuirear an diugh duine

sam bith gu bàs ann an Israel? oir nach 'eil fhios agam gu bheil mi an diugh a'm' rìgh os ceann Israeil?

23 Agus thubhairt an rìgh ri Simeì, Cha'n fhaigh thu bàs: agus mhionnaich an rìgh dha.

24 Agus thàinig Mephiboset, mac Shaul², a nuas an coinneamh an rìgh, agus cha do dheasaich³ e a chosan, agus cha do chuir e snas air⁴ 'fheusaig, agus cha do nigh e 'eudach o'n là anns an do thriall an rìgh, agus an là anns an d'fhàinig e ris ann an sìth.

25 Agus an uair a thàinig e gu h-Ierusalem an coinneamh an rìgh, an sin thubhairt an rìgh ris, C'ar son nach deachaidh tu maille riumsa, a Mephiboset?

26 Agus fhreagair esan, A thighearn, a rìgh, mheall mo sheirbhiseach mi: oir thubhairt do sheirbhiseach, Cuiridh mi diollaid dhomh féin air asail⁵, agus marc-aichidh mi oirre, agus théid mi dh'ionnsuidh an rìgh, a chionn gu bheil do sheirbhiseach bacach.

27 Agus chùil-chàin esan do sheirbhiseach ri m' thighearn an rìgh; ach *tha* mo thighearn an rìgh mar aingeal Dè: dean uime sin an *ni sin a ta* maille a'd' shùilibh.

28 Oir cha robh teaghlach m'athar uile ach 'nan daoinibh marbha⁶ am fianuis mo thighearn an rìgh; gidheadh chuir thu do sheirbhiseach 'nam measg-san a dh'ith aig do bhord féin: ciod ma ta a' chòir a th'agamsa tuilleadh air glaothaich nì's mò ris an rìgh?

29 Agus thubhairt an rìgh ris, C'ar son a labhras tu nì's mò mu d'ghnothuichibh? thubhairt mise, Roinnidh tusa agus Siba am fearann.

30 Agus thubhairt Mephiboset ris an rìgh, Seadh, gabhadh e an t-ìomlan, o thàinig mo thighearn an rìgh *a ris* ann an sìth d'a thigh féin.

31 Agus thàinig Barsillai an Gileadach a nuas o Rogelim, agus chaidh e thar Iordan maille ris an rìgh, chum a chur thar Iordan.

32 A nis *bha* Barsillai 'na dhuine ro shean, ceithir fichead bliadhna dh'aois: agus thug esan lòn do'n rìgh⁷ an uair a dh'fhan e ann am Mahanaim; oir *bu* duine ro mhòr e.

33 Agus thubhairt an rìgh ri Barsillai, Thigsa thairis maille rium, agus beathaichidh mi thu maille rium féin ann an Ierusalem.

34 Agus thubhairt Barsillai ris an rìgh, Cia fad a th'agam-sa ri bhi beò⁸, gu'n rachainn suas maille ris an rìgh gu h-Ierusalem?

¹ rinn iad gach ni deas. ² mac Ionatain, mhic Shaul. ³ cha do nigh. ⁴ dheasaich e.

⁵ Cuir diollaid dhomh air asail. ⁶ buailteach

do'n bhàs.

⁷ a labhras tu nì's mò do bhriathra?

⁸ beathaich esan an rìgh. ⁹ Cia lion iad làith-ean bhliadhnacha mo bheatha-sa. Eabh.

35 *Tha* mi an diugh ceithir fichead bliadhna dh'aois: an urrainn mise aithneachadh eadar maith agus olc? an urrainn do sheirbhiseach na dh'itheas no na dh'òlas mi a bhlasadh? an urrainn mise tuilleadh guth fhear agus bhan a sheinneas a chluinntinn? c'ar son ma ta a bhiodh do sheirbhiseach fathast na eire¹ air mo thighearn an righ?

36 Thèid do sheirbhiseach ré ùine bhig thar Iordan maille ris an righ: agus c'ar son a dhìoladh an righ sin dhomhsa le leithid so do luaigheachd?

37 Leig le d' sheirbhiseach, guidheam ort, pillinn air ais, a chum gu'm faigh mi bàs ann mo bhaile féin, làimh ri uaigh m'athar, agus mo mhàthar: ach, feuch, rachadh do sheirbhiseach Chimham thairis maille ri m' thighearn an righ, agus dean ris na *bhios* maith a'd' shùilibh.

38 Agus fhreagair an righ, Thèid Chimham thairis maille rium, agus ni mi dha na *bhios* maith a'd' shùilibh; agus ge b'e ni a dh'iarras tusa orm, ni mi e dhuit.

39 Agus chaidh an sluagh uile thar Iordan, agus chaidh an righ thairis: agus phòg an righ Barsillai, agus bheannaich se e; agus phill e d'a àite féin.

40 An sin chaidh an righ air aghaidh gu Gilgal, agus chaidh Chimham air aghaidh maille ris: agus thug sluagh Iudah uile thairis an righ, agus mar an ceudna leth sluaigh Israeil.

41 Agus, feuch, thàinig fir Israeil uile dh'ionnsuidh an righ, agus thubhairt iad ris an righ, C'ar son a ghoid ar bràithrean fir Iudah thu air falbh, agus a thug iad an righ agus a theaghlach, agus daoine Dhaibhidh uile maille ris thar Iordan?

42 Agus fhreagair fir Iudah uile fir Israeil, A chionn gu bheil an righ fagus an dàimh dhuinne: c'ar son ma ta a tha fearg oirbhe air son an ni so? an d'ith sinn a' bheag o'n righ? no'n d'thug e tiodhlac sam bith dhuinn?

43 Agus fhreagair fir Israeil fir Iudah, agus thubhairt iad, *Tha* deich earrannan² againne anns an righ, agus *tha* mar an ceudna tuilleadh *còir* againn ann an Daibhidh na *th'*agaibhse: c'ar son ma ta a rinn sibh tàir oirne? agus nach b'e ar gnothuch-ne an toiseach ar righ a thabhairt air ais³? Agus bu ghairge briathran fhear Iudah na briathran fhear Israeil.

CAIB. XX.

1 Rinn Seba agus fir Israeil ceannaire an aghaidh Dhaibhidh. 10 Mharbh Iob Amasa; 14 agus chaidh e air tòir Sheba gu Abel. 16 Shaor bean

ghlic am baile le ceann Sheba a thoirt do Iob. 23 Luchd-dreuchd Dhaibhidh.

AGUS thachair gu'n robh duine an sin le Belial, do'm b'ainm Seba, mac Bhichri, Beniamineach; agus shéid e trompaid, agus thubhairt e, Cha 'n'eil againne cuibhrionn sam bith ann an Daibhidh, agus cha 'n'eil oighreachd sam bith againn ann am mac Iese: gach fear a dh'ionnsuidh a bhùtha, O Israeil.

2 Agus chaidh gach duine do Israel suas o *bhi* 'n déigh Daibhidh, agus lean iad Seba mac Bhichri: ach dlùth-lean daoine Iudah r'an righ, o Iordan eadhon gu h-Ierusalem.

3 Agus thàinig Daibhidh d'a thigh ann an Ierusalem; agus ghabh an righ an deichnear bhan, a choimhleabacha, a dh'fhàg e a ghleidheadh an tighe, agus chuir e ann an gaintir⁴ iad, agus bheathaich e iad, ach cha deachaidh e stigh d'an ionnsuidh; agus bha iad air an druidealh suas gu là am bàis, a' caitheamh am beatha ann am bantrachas.

4 An sin thubhairt an righ ri Amasa, Cruinnich dhomhsa fir Iudah an ceann thri làithean, agus seas féin an so.

5 Agus dh'fhalbh Amasa a chruinneachadh *fhear* Iudah: ach dh'fhan e ni b'fhaide na'n t-àm suidhichte a shonraich csan dha.

6 Agus thubhairt Daibhidh ri Abisai, A nis ni Seba, mac Bhichri, tuille croin duinn na rinn Absalom: gabh thusa seirbhisich do thighearn, agus falbh air a thòir, air eagal gu'm faigh e dha féin bailte daingichte, agus gu'n téid e as uainn.

7 Agus chaidh a mach 'na dhéigh fir Iob, agus na Ceretich, agus na Peletich, agus na *fir* threuna uile: agus chaidh iad a mach a h-Ierusalem, a dhol air tòir Sheba, mhic Bhichri.

8 An uair a bha iad aig a' chloich mhòir a *tha* ann an Gibeon, thàinig Amasa rompa. Agus bha Iob crioslaichte le falluinn a chuir e nime, agus oirre sin crios le claidheamh ceangailte air a leis 'na thruaill; agus an uair a chaidh e air aghaidh, thuit e aiste.

9 Agus thubhairt Iob ri Amasa, Am *bheil* thu slàn, a bhràthair? Agus ghlac Iob le 'dheas làimh Amasa air 'fheusaig, a thabhairt pòige dha.

10 Ach cha d'thug Amasa fa'near an claidheamh a bha ann an làimh Iob: agus bhuail e leis e fuidh 'n chùigeadh *aisne*, agus leig e mach a mhionach a dh'ionnsuidh an làir, agus cha do bhuail e ris e; agus fhuair e bàs. Agus chaidh Iob, agus a bhràthair Abisai, air tòir Sheba, mhic Bhichri.

¹ callaich. ² cuibhriannon. ³ nach d'iarradh ar comhairle air tusa a thabhairt ar righ air ais.

⁴ priosan.

II. SAMUEL, XX. XXI.

11 Agus sheas fear do òganaich Ioaib làimh ris, agus thubhairt e, Esan leis an iomhuinn Ioaib, agus esan a *tha* le Daibhidh, leanadh e Ioaib.

12 Agus bha Amasa¹ ga aonairt² am fuil am meadhon an rathaid mhòir. Agus an uair a chunnaic an duine gu'n d'fhan an sluagh uile 'nan seasamh, dh'atharraich e Amasa o'n rathad mhòr do'n achadh, agus thilg e eudach air, an uair a chunnaic e gu'n d'fhan gach neach a thàinig làimh ris 'nan seasamh.

13 An uair a dh'atharraicheadh e o'n rathad mhòr, chaidh an sluagh uile air an aghaidh an déigh Ioaib, a dhol air tòir Sheba mhic Bhichri.

14 Agus chaidh e air feadh uile threubhan Israeil gu h-Abel-Bhetmaacah, agus na Berich uile: agus chruinnicheadh iad an ceann a chéile, agus chaidh iad mar an ceudna 'na dhéigh.

15 Agus thàinig iad, agus theannaich² iade, ann an Abel-Bhetmaacah, agus chuir iad suas tòrr³ an aghaidh a' bhaile, agus sheas e làimh ris a' bhalla⁴: agus rinn an sluagh uile a *bha* maille ri Ioaib an dìchioll air a' bhalla a leagadh sìos.

16 An sin ghlaodh bean ghlic a mach as a' bhaile, Eisdibh, éisdibh; abraibh, guidheam oirbh, ri Ioaib, Thig am fagus an so, agus labhraidh mi riut.

17 Agus an uair a thainig e'm fagus d'i, thubhairt a' bhean, An tu Ioaib? Agus fhreagair esan, *Is* mi. An sin thubhairt i ris, Eisd ri briathraibh do bhanoglaich. Agus fhreagair esan, Tha mi ag éisd-eachd.

18 An sin labhair i, ag ràdh, Gu cinnteach labhair iad an toiseach, ag ràdh, Gu deimhin iarraidh iad *sìth* air Abel: agus mar sin crìochnaichidh iad an *gnothuch*⁵.

19 *Is* aon mise dhiubhsan a *tha* sìochail agus firinncach⁶ ann an Israel: ach tha thusa ag iarraidh baile a sgrios, agus màthair ann an Israel. C'ar son a shluigear tu suas oighreachd an Tighearn?

20 Agus fhreagair Ioaib agus thubhairt e, Gu ma fada, fada sin uamsa, gu'n sluiginn suas, no gu'n sgriosainn.

21 Cha 'n ann mar sin a tha an gnothuch: ach thog duine do shliabh Ephraim, d'an ainm Seba mac Bhichri, a làmh suas an aghaidh an rìgh, an aghaidh Dhaibhidh: thugaibh esan a mhàin thairis, agus imichidh mi o'n bhaile. Agus thubhairt a' bhean ri Ioaib, Feuch, tilgear a cheann a d' ionnsuidh thar a' bhalla.

22 An sin chaidh a' bhean a dh'ionnsuidh an t-sluaigh uile 'na gliocas⁷: agus ghearr iad ceann Sheba mhic Bhichri dheth, agus thilg iad a mach e dh'ionnsuidh Ioaib: agus shéid e trompaid, agus chaidh iad air falbh o'n bhaile, gach fear a dh'ionnsuidh a bhùtha. Agus phill Ioaib do Ierusalem a dh'ionnsuidh an rìgh.

23 A nis bha Ioaib os ceann armailte Israeil uile: agus *bha* Benaiah mac Iehoiaida os ceann nan Cereteach, agus os ceann nam Peleteach:

24 Agus *bha* Adoram os ceann na cìse: agus *bha* Iehosaphat mac Ahiluid 'na sheanachaidh:

25 Agus *bha* Sebha 'na sgrìobhaiche: agus *b' iad* Sadoc agus Abiatar na sagairt:

26 Agus mar an ceudna bha Ira an Iair-each 'na àrd riaghlair⁸ aig Daibhidh.

CAIB. XXI.

1 *Sguir a' ghorta a bha san tìr 'nuair a chroch na Gibeonaich seachdnar do mhic Shaul. 12 Dh'adhlac Daibhidh cnàmhan Shaul agus Ionatain. 15 Chog seirbhisich Dhaibhidh an aghaidh nam Philisteach.*

A GUS bha gorta ann an làithibh Dhaibhidh, rè thri bliadhna, bliadhna 'n déigh bliadhna. Agus dh'fhiosraich Daibhidh do'n Tighearn⁹, agus fhreagair an Tighearn, *Is ann* air son Shaul, agus air son a thighe fhùileachdaich a *tha* i, a chionn gu'n do mharbh e na Gibeonaich.

2 Agus ghairm an rìgh air na Gibeonaich, agus thubhairt e riu: (a nis cha *robh* na Gibeonaich do chloinn Israeil, ach do iarmad¹⁰ nan Amorach; agus thug clann Israeil miannan doibh: agus dh'iarr Saul am marbladh, 'na eud¹¹ air son chloinn Israeil agus Iudah:)

3 Uime sin thubhairt Daibhidh ris na Gibeonaich, Ciod a ni mi air bhur son? agus cia leis a ni mian réite, a chum gu'm beannaich sibh oighreachd an Tighearn?

4 Agus thubhairt na Gibeonaich ris, Cha *bhi* againne airgid no òr o Shaul, no o a thigh¹²; agus air ar soinne cha mharbh thu duine sam bith ann an Israel. Agus thubhairt esan, *An ni* a their sibh, ni mise dhuibh¹³.

5 Agus fhreagair iad an rìgh, An duine chuir as duinn, agus a smuainich 'nar n-aghaidh sinn a bhi air ar sgrios, air chor as nach fanamaid ann an crìch air bith do Israel;

6 Thugar dhuinn seachdnar d'a mhic-san, agus crochaidh sinn suas iad do'n Tighearn, ann an Gibeah Shaul, a thagh

¹ aoineagran.

² besieged. Sasg.

³ dùn.

⁴ anns a' chlais.

⁵ labhair i, ag ràdh, Bu

ghnàth le labhairt san t-sean àmsir, ag ràdh, Gu deimhin iarraidh iad comhairle ann an Abel: agus mar sin crìochnaich iad a' chùis.

⁶ dileas.

⁷ agus labhair i 'na gliocas.

⁸ 'na àrd

uachdaran.

Iehobhah. Eabh.

¹¹ 'na theas-ghràdh.

¹² maille r'a thigh. Eabh.

¹³ Ciod ma ta a b'ail leibh gu'n deanainn-sa dhuibh?

⁹ dh'iarr Daibhidh gnùis

¹⁰ fluigheal: iarsma. Eir.

¹² maille ri Saul, no

¹³ Ciod ma ta a b'ail

II. SAMUEL, XXI. XXII.

an Tighearn. Agus thubhairt an rìgh, Bheir mi *dhuibh iad*.

7 Ach chaomhain an rìgh Mephiboset mac Ionatain, mhic Shaul, air son mhionnan an Tighearn a *bha* eatorra, eadar Daibhidh agus Ionatan mac Shaul.

8 Ach ghabh an rìgh dà mhac Rispah nighinn Aiah, a rug i do Shaul, Armoni agus Mephiboset; agus cùighear mhac Mheroib¹ niglinn Shaul, a rug i do Adriel mac Bharsillai a' Mheholataich;

9 Agus thug e thairis iad do làimh nan Gibeonach, agus chroch siad iad anns an t-sliabh am fianuis an Tighearn: agus thuit an t-seachdnar sin cuideachd, agus chuireadh gu bàs iad ann an ceud làithibh an fhogharaidh, ann an toiseach fogharaidh an eorna.

10 Agus ghabh Rispah nighean Aiah saic-eudach, agus sgaoil i dh'fèin e air a' charraig, o thoiseach an fhogharaidh gus an do shìl uisge orra o nèamh: agus cha do leig i le eunlaith an athair fois a ghabhail orra san là, no do fhiadh-bheathaichibh na macharach san oidheche.

11 Agus dh'innseadh do Dhaibhidh cìod a rinn Rispah, nighean Aiah, coimhleabach Shaul.

12 Agus dh'fhalbh, Daibhidh, agus thug e o dhaoineibh Iabeis-ghilead cnàmhan Shaul, agus cnàmhan a mhic Ionatain, a ghoid iad o shràid Bhet-sain, far an do chroch na Philistich iad, anns an là air an do mharbh na Philistich Saul ann an Gilboa:

13 Agus thug e nìos as a sin cnàmhan Shaul, agus cnàmhan Ionatain, a mhic: agus chruinnich iad cnàmhan na muinntir a chrochadh.

14 Agus dh'adhlaid iad cnàmhan Shaul, agus a mhic Ionatain, ann an tìr Bheniamin ann an Selah, ann an àit-adhlacaidh Chis'athar. Agus rinn iad gach nì a dh'èithn an rìgh: agus 'na dhéigh sin bha Dia réidh ris an tìr².

15 Agus bha cogadh aig na Philistich fathast ri Israel; agus chaidh Daibhidh sìos agus a sheirbhiseich maille ris, agus chog iad ris na Philistich; agus dh'fhàs Daibhidh sgith.

16 Agus thubhairt Isbi-benob³, a bha do shliochd an fhamhair, (agus aig am b'e cothrom cinn a shleagha trì cheud secel umha, agus e crioslaichte le crios⁴ nomha,) gu'm marbhadh e Daibhidh.

17 Ach rinn Abisai mac Sheruiah còmh-nadh ris, agus bhuail e am Philisteach, agus mharbh se e. An sin mhionnaich fir Dhaibhidh bha, ag ràdh, Cha téid thu mach ni's mò maille ruinne gu cath, chum

nach cuir thu as lòchran Israeil.

18 Agus 'na dhéigh so bha cath a ris ann an Gob⁵ ris na Philistich: an sin bhuail Sibechai an Husatach Saph⁶, a *bha* do shliochd an fhamhair.

19 Agus bha ris cath ann an Gob ris na Philistich: agus bhuail Elhanan mac Iareoregim Lahmi⁷ bràthair Gholiath a' Ghitich; agus *bha* crann a shleagha mar gharmain figheadair.

20 Agus bha fathast cath ann an Gat, far an robh fear do mheud *mhòir*, agus sè meoir aige air gach làimh, agus sè meoir air gach cois, ceithir thar fhichead an àireamh; agus rugadh esan mar an ceudna do'n fhamhair.

21 Agus an uair a thug e dùbhlàn⁸ do Israel, mharbh Ionatan, mac Shimeah, bràthar Dhaibhidh e.

22 Rugadh a' cheathrar sin do'n fhamhair ann an Gat, agus thuit *iad* le làimh Dhaibhidh, agus le làimh a sheirbhiseach.

CAIB. XXII.

1 *Laoidh bhuidheachais le Daibhidh do bhrìgh gu'n do shaor an Tighearn e à làimh a naimhdean.*

AGUS labhair Daibhidh ris an Tighearn briathra na laoidhe so, anns an là air an do shaor an Tighearn e à⁹ làimh a naimhdean uile, agus à làimh Shaul:

2 Agus thubhairt e, *Is e* 'n Tighearna mo charraig, agus mo dhaingneach, agus mo shlànuighear.

3 *Is e* Dia mo charraig; earbaidh mi as: mo sgiath agus adharc mo shlàinte, mo thùr àrd agus mo dhèan: m'fhearsaoraidh; o ainneart saoraidh tusa mi.

4 Gairmidh mi air an Tighearn, *a's* airidh air cliù; agus o m' naimhdeibh saorar mi.

5 Oir chuairtich tonnan a' bhàis mi: chuir tuilte dhroch dhaoine eagal orm.

6 Dh'iadh cuird¹⁰ ifrinn mu m' thimchioll: ghabh lontan¹¹ a' bhàis romham.

7 A'm' aire ghairm mi air an Tighearn, agus ri m' Dhia ghlaodh mi, agus chual¹² e o 'theampull mo ghuth, agus ràinig mo ghlaodh a chluasan.

8 Agus chrathadh agus chrìothnaich an talamh: ghluaiseadh bunaite nan nèamh¹² agus chrathadh iad, a chionn gu'n robh fearg air.

9 Chaidh deatach suas o 'shròin, agus loisg teine as a bheul: lasadh eibhlean leis.

10 Agus lùb e a nèamhan, agus thàinig e nuas; agus dorchadas fo 'chlosaibh.

11 Agus mharcaich e air cherub, agus chaidh e air iteig: agus dh'itealaich¹³ e air sgiathaibh na gaoithe.

12 Agus rinn e dorchadas 'na phàill-

¹ *Mhichail.* ² *dh'èisd Dia ri athcheuinge*
muinntir na tìre. ³ *shaoil Isbi-benob, chuir e*
rosair. ⁴ *claidheamh.* ⁵ *Gesar.* ⁶ *Sipoi.*
⁷ *mac Iure-oregim Bethlehemcach.* Faic I. Eachdr.

Caib. XX. r. 5. ⁸ *masladh.* ⁹ *as.*
¹⁰ *pianta.* ¹¹ *ribeacha.* ¹² *nam beam.*
¹³ *chunnacas.*

II. SAMUEL, XXII.

iunaibh m'a thimchioll, comh-chruinn-eachadh nan uisgeacha¹, neoil thiughan nan speur.

13 Leis an dealradh a bha fa 'chomhair lasadh eibhlean teine.

14 Rinn an Tighearna tairneanach o na nàmhaidh, agus leig an Tì a's àird² a ghuth a mach.

15 Agus chuir e mach saighdean, agus sgape iad; dealanach agus chlaoidh e iad³.

16 Agus leigeadh ris aigean na fairge, nochdadh bunaite an domhain, le achmhasan an Tighearna, le séideadh anaile a shròine.

17 Chuir e nuas o'n àird, ghlac e mi; tharruing e mi á mòran uisgeacha.

18 Shaor e mi o m' nàmhaid làidir, uathasan a dh'fhuathaich mi; oir bu treise iad na mise.

19 Ghabh iad romham ann an là m'àmhaighair: ach b'e 'n Tighearna mo chiùl-taice.

20 Agus thug e mach mi gu ionad farsaing: shaor e mi, a chionn gu'n do ghabh e tlachd annam.

21 Thug an Tighearna luaigheachd dhomh a réir m'ionracais: a réir gloine mo làmh dhìol e dhomh.

22 Oir ghléidh nì slighean an Tighearna, agus o m' Dhia clia do chlaon mi gu h-aingidh.

23 Oir bha a bhreitheanais uile a'm' fhianuis; agus a reachdan cha do chuir mi uam⁴.

24 Agus bha mi ionraic 'na fhianuis, agus ghléidh mi mi féin o m' aingidheachd⁵.

25 Uime sin dhìol an Tighearna dhomh a réir m'ionracais, a réir mo ghloine ann an sealladh a shùil.

26 Do'n duine thròcaireach nochdaidh tu thu féin thròcaireach, agus do'n duine ionraic nochdaidh tu thu féin ionraic.

27 Do'n duine ghlan nochdaidh tu thu féin glan, agus do'n duine reasgach nochdaidh tu thu féin reasgach.

28 Agus an sluagh a ta fo àmhghar saoraidh tu: ach a ta do shùilean an aghaidh nan uaibhreach; bheir thu nuas iad⁶.

29 Oir lasaidh tusa mo lòchran⁷, a Thighearna: agus soillsichidh an Tighearna mo dhorchadas.

30 Oir leatsa ruith mi troimh bhuidhinn: le m' Dhia leum mi thar balla.

31 A thaobh Dhé, tha a shlighe iomlan; tha focal an Tighearna air a dhearbhadh: is sgiath e dhoibhsan uile a chuireas an dòchas ann⁸.

32 Oir cò a's Dia ann ach an Tighearna?

agus cò a's carraig ann ach ar Dia-ne?

33 Is e Dia mo neart agus mo chumhachd⁹; agus tha e deanamh mo shlighe iomlan.

34 Tha e deanamh mo chos mar chosan eilde: agus air m' àitibh àrda socraichidh e mi.

35 Tha e 'g iunnsachadh mo làmh gu cath, air chor as gu'm brisear bogha umha le m' ghairdeinibh.

36 Agus thug thu dhomh sgiath do shlàinte: agus rinn do chaoimhneas mòr mi.

37 Rinn thu mo cheum farsaing fodham, air chor as nach do shleambnaich mo chosan.

38 Lean mi mo naimhdean, agus rug mi orra¹⁰; agus cha do phill mi air m'ais gus an do chuir mi as doibh.

39 Agus lot mi iad¹¹, agus cha 'n éirich iad; agus thuit iad fo m' chosaibh.

40 Oir chrìoslaich thu mi le neart chum catha: leag thu iadsan a dh'éirich suas a'm' aghaidh, sìos fodham,

41 Agus mo naimhde thug thu dhomh air mhuineal: iadsan a dh'fhuathaich mi, agus ghearr mi as iad.

42 Sheall iad, agus cha robh fear-saoraidh ann; eadhon a dh'ionnsuidh an Tighearna, ach cha do fhreagair e iad.

43 An sin mhin-phronn mi iad mar dhuslach na talmhainn; mar chlàbar na sràide bhrùth mi iad, leudaich mi a mach iad.

44 Agus shaor thu mi o chomhstri¹² mo shluaigh; ghléidh thu mi gu bhi 'm cheann¹³ air na cinnich: nì sluagh nach b'aithne dhomh seirbhis dhomh.

45 Stròchdaidh coigrich sìos dhomh¹⁴; co luath 'sa chluinneas iad, géillidh iad dhomh.

46 Seargaidh coigrich as, agus bithidh eagal orra a mach as an àitibh daingne.

47 Is beò an Tighearna, agus gu ma beannaichte mo charraig-sa: agus air 'ardachadh gu robh Dia, carraig mo shlàinte.

48 Is e Dia a nì dioghaltas air mo shon-sa, agus a chuireas sìos an sluagh fodham,

49 Agus a bheir a mach mi o m' naimhidh: agus os an ceann-san a dh'éirich suas a'm' aghaidh thog thu suas mi; o fhear an ainneirt shaor thu mi.

50 Uime sin clùthaichidh mi thu¹⁵ a Thighearna, am measg nan cinneach, agus do t'ainm seinnidh mi.

51 Bheir esan saorsa mòr d'a rìgh¹⁶, agus nochdaidh e trócair d'a aon ungta féin, do Dhaibhidh, agus d'a shliochd gu bràth.

¹ uisgeacha dorchas. ² chuir e gu h-amhluadh iad.

³ cha do dhealaich mi riu. ⁴ o m' pheacannaibh.

⁵ ach na shùilean àrda bheir thu nuas.

⁶ is tu mo lòchran. ⁷ a dh'earbas as.

⁸ a tha 'gam chrìoslachadh le neart.

⁹ sgrios mi iad. ¹⁰ chuir mi as doibh, agus lot mi iad.

¹¹ strìbh. ¹² nì thu mi a'm' cheann.

¹³ nì coigrich breug dhomh. Eabh.

¹⁴ aoidichidh mi dhuit, bheir mi buidheachas dhuit.

¹⁵ Is esan tìr slàinte a rìgh.

II. SAMUEL, XXIII.

CAIB. XXIII.

1 'Na bhriathraibh deireannach chuir Daibhidh an cèill sonas an duine ionraic, agus sgrios an aingidh. 8 Ainmean a dhaoine treun.

ANIS is iad so briathra deireannach Dhaibhidh. Thubhairt Daibhidh mac Iese, agus thubhairt an duine a chuir eadh suas gu h-àrd, aon ungta Dhé Iacuib, agus salmair binn Israeil;

2 Labhair spiorad an Tighearna tromham-sa, agus 'fhocal air mo theangaidh.

3 Thubhairt Dia Israeil, labhair carraig Israeil riumsa: *Bithidh* esan a riaghlas os ceann dhaoine ceart, a' riaghladh ann an eagal Dé:

4 Agus mar sholus na maidne 'nuair a dh'éireas a' ghrian¹, maidne gun neoil; mar am fear a' fàs as an talamh le dealradh an déigh uisge.

5 Ged nach 'eil mo thigh mar sin aig Dia, gidheadh rinn e coimhcheangal siorruidh riumsa, air a shuidheachadh anns gach nì, agus a choimhdear²: oir is e so mo shlàinte uile, agus mo mhian uile, ged nach 'eil e toirt air fàs.

6 Ach *bithidh mic* Bheliail uile mar dhroighionn a thilgear air falbh, a chionn nach glacar le làimh iad:

7 Ach am fear a bheanas riu, dìonar³ e le h-iarunn, agus le crann sleagha; agus le teine loisgear gu tur iad far am fàs iad⁴.

8 Is iad so ainmean nan daoine treuna a bha aig Daibhidh: Iasobeam, mac Hachmoni, 'na cheann air triuir; thog esan a shleagh an aghaidh thri ceud, a mharbhadh leis san aon àm⁵.

9 Agus 'na dhéigh-san bha Eleasar mac Dhodo an t-Ahohach, aon do'n triuir dhaoine treuna a bha maille ri Daibhidh, an uair a thug iad dùbhlán⁶ do na Philistich⁷ a chruinnicheadh an sin gu cath, agus a dh'imich fir Israeil rompa.

10 Dh'éirich esan agus bhuail e na Philistich gus an robh a làmh sgith, agus gu'n do lean a làmh ris a' chlaidheamh. Agus dh'oibrich an Tighearna saorsa mhòr air an là sin; agus phill an sluagh 'na dhéigh a mhàin a dh'fhaobhachadh⁸.

11 Agus 'na dhéigh-san bha Samah, mac Agee, an Hararach. Agus chruinnicheadh an Philistich 'nam buidhinn, far an robh mìr fearainn làn do ghall-pheasair: agus theich an sluagh roimh na Philistich.

12 Ach sheas esan am meadhon an fhear-

ainn, agus dhion se e, agus bhuail e na Philistich: agus dh'oibrich an Tighearna saorsa mhòr.

13 Agus chaidh triuir do na deich ceannarda fichead sìos, agus thàinig iad an àm an fhogharaidh a dh'ionnsuidh Dhaibhidh, do uaimh Adullaim: agus champaich buidheann nam Philisteach ann an gleann Rephaim.

14 Agus bha Daibhidh an sin ann an daingneach, agus bha freiceadan nam Philisteach an sin ann am Bet-lehem.

15 Agus mhiannaich Daibhidh, agus thubhairt e, O gu'n tugadh fear-éiginn dhomh deoch uisge o thobar Bhet-lehem, a tha làimh ris a' gheata!

16 Agus bhris an triuir dhaoine treuna stigh troimh fheachd nam Philisteach, agus tharruing iad uisge a tòbar Bhet-lehem, a bha làimh ris a' gheata, agus ghabh iad e, agus thug iad leo e dh'ionnsuidh Dhaibhidh: gidheadh cha b'àill leis òl deth, ach thom e mach e do'n Tighearn.

17 Agus thubhairt e, Gu ma fada uamsa, a Tighearna, so a dheanamh: an òlainn-se fuil nan daoine a chaidh ann an cunnart⁹ an anama? uime sin cha b'àill leis òl deth. Na nithe sin rinn an triuir dhaoine treuna.

18 Agus bha Abisai bràthair Ioaib, mac Sheruah, 'na cheann air triuir; agus thog e suas a shleagh an aghaidh thri ceud, a mharbh e; agus fhuair e ainm am measg thriuir.

19 Do'n triuir nach b'e a b'urrmaiche? uime sin bha e 'na cheannard orra: gidheadh, cha do ràinig e gu ruig a' cheud triuir.

20 Agus mharbh Benaiah mac Iehoiada, mhic duine ghaisgil, o Chabseel, a rinn mòran ghnìomhara, mharbh esan dithis fhear leòmhanta¹⁰ do Mhoab: chaidh e sìos mar an ceudna, agus mharbh e leòmhann ann am meadhon sluichd an àm sneachdaidh.

21 Agus mharbh e Eiphiteach, duine comharaichte¹¹: agus ann an làimh an Eiphitich bha sleagh; ach chaidh esan sìos d'a ionnsuidh le luirg, agus spion e 'n t-sleagh a làimh an Eiphitich agus mharbh e le 'shleagh féin e.

22 Na nithe sin rinn Benaiah mac Iehoiada; agus bha ainm aige am measg triuir dhaoine treuna.

23 Do'n triuir¹² b'e a b'urrmaiche, ach cha d'ràinig e gu ruig a' cheud triuir:

¹ Agus mar sholus na maidne éiridh Iehobha a' ghrian.

² cinnfeach.

³ Bonar. Eabh.

⁴ anns an àite cheudna;

'na àite-tajmh. Eabh.

⁵ Is iad so ainmean nan

daoine treuna a bha aig Daibhidh: an Tachmonach a shuidhe anns a' chaitheir, ceann nan ceannard: (b'e so Adino an t-Esnach:) thog e suas a shleagh an

aghaidh ochd ceud, a mharbh e san aon àm. Faic I. Eachdr. Caib. XI. r. 11.

⁶ masladh.

⁷ ann am Pas-damin. I. Eachdr. Caib. XI. r. 13.

⁸ chreachadh.

⁹ cunnart.

¹⁰ treun mar leòmhain.

¹¹ mòr, tlachdmhor,

¹² do'n deich thar fhichead.

agus chuir Daibhidh e os ceann a fhreic-eadain.

24 Bha Asahel bràthair Ioaib am measg an deich thar fhichead, Elhanan mac Dhodo o Bhet-lehem,

25 Samah an Harodach, Elica an Harodach,

26 Heles am Paltach, Ira mac Iceis an Tecoach,

27 Abieser an t-Antetotach, Mebunai an Husatach,

28 Salmon an t-Ahohach, Maharai an Netophatach,

29 Heleb mac Bhaanah, an Netophatach, Itai mac Ribai o Ghìbeah chloinn Bheniamin,

30 Benaiah am Piratonach, Hidai o shruthaibh Ghaais,

31 Abialbon an t-Arbatach, Asmabhet am Barhumach,

32 Eliahba an Saalbonach: do mhacaibh Iasein, Ionatan,

33 Samah an Hararach, Ahiam mac Sharair an Hararach,

34 Eliphelet mac Ahasbai, mhic a' Mhaachataich, Eliam mac Ahitopheil an Gilonach,

35 Hesrai an Carmeach, Paarai an t-Arbach,

36 Igal mac Natain o Shobah, Bani an Gadach,

37 Selec an t-Amonach, Naharai am Beerotach, fear iomchair arm Ioaib, mhic Sheruah,

38 Ira an t-Itreach, Gareb an t-Itreach.

39 Uriah an Hiteach: seachd deug thar fhichead uile.

CAIB. XXIV.

1 Chuir Daibhidh Ioaib a ghabhail àireimh Israeil.

13 Air son so tha plàigh am measg an t-sluaigh.

15 Bhàsaich deich agus trì fichead mìle fear leis a' plàigh. 18 Thog Daibhidh altair ann an urlar bualaidh Araunah.

A GUS a ris las fearg an Tighearn an aghaidh Israeil, agus bhrosnaich e¹ Daibhidh nan aghaidh, a ràdh, Falbh, gabh àireamh Israeil agus Iudah.

2 Oir thubhairt an rìgh ri Ioaib ceannard an t-sloigh, a bha maille ris, Imich a nis air feadh uile threubhan Israeil, o Dhan eadhon gu Beerseba, agus gabh² àireamh an t-sluaigh, a chum gu'm bi fios àireimh an t-sluaigh agam.

3 Agus thubhairt Ioaib ris an rìgh, A nis gu'n cuireadh an Tighearna do Dhia ris an t-sluaigh, (ge b'e ciod an t-àireamh a th'ann diubh,) fathast a' cheud uibhir, agus gu'm faicheadh sùilean mo thighearn an rìgh e: ach car son tha mo thighearn an rìgh a' gabhail tlachd anns an ni so?

4 Gidheadh, bhuadhaich focal an rìgh an aghaidh Ioaib, agus an aghaidh cheannardan an t-sloigh, agus chaidh Ioaib agus ceannardan an t-sloigh a mach á fianuis an rìgh, a ghabhail àireimh sluaigh Israeil.

5 Agus chaidh iad a null thar Iordan, agus champaich iad ann an Aroer, air taobh mu dheas a' bhaile, a tha ann am meadhon aimhne³ Ghad, agus leth ri Gaser:

6 An sin thàinig iad gu Gilead, agus gu fearann iochdarach⁴ Hodsì; agus thàinig iad gu Dan-iaan, agus mu'n cuairt ri Sidon,

7 Agus thàinig iad gu daingneach Thiruis, agus gu uile bhaithibh nan Hibheach, agus nan Canaanach; agus chaidh iad a mach do'n taobh mu dheas do Iudah, gu Beerseba.

8 Agus an uair a chaidh iad air feadh na tìre uile, thàinig iad gu h-Ierusalem an ceann naoi mìos agus fhichead là.

9 Agus thug Ioaib suas làn àireamh⁵ an t-sluaigh do'n rìgh: agus bha ann do Israel ochd ceud mìle fear gaisgeil a tharruing claidheamh, agus do shearaibh Iudah cùig ceud mìle fear.

10 Agus bhuail cridhe Dhaibhidh e, an dèigh dha'n sluaigh àireamh: agus thubhairt Daibhidh ris an Tighearna, Pheacaich mi gu mòr anns an ni a rinn mi: agus a nis, a Thighearna, guidheam ort, thoir air cionta do sheirbhisich dol seachad, oir rinn mi gu ro amaideach.

11 Agus dh'éirich Daibhidh anns a' mhaduinn, agus thàinig focal an Tighearna dh'ionnsuidh an fhàidh Ghad, fir-seallaidh Daibhidh, ag ràdh,

12 Falbh agus abair ri Daibhidh, Mar so tha'n Tighearna, ag ràdh, Tha mi cur thri nìthe fa d' chomhair: ròghnaich dhuit fèin ann diubh, a chum gu'n dean mi dhuit e.

13 Agus thàinig Gad a dh'ionnsuidh Dhaibhidh, agus dh'innis e dha, agus thubhairt e ris, An tig trì⁶ bliadhna gortaidh ort ann ad thir? no an teich thu trì mìosan roimh do naimhaidibh, agus iad an tòir ort? no am bi trì làithean plàigh ann ad thir? A nis smuainich, agus faic ciod a fhreagaireas mi dhasan a chuir uath mi.

14 Agus thubhairt Daibhidh ri Gad, Tha mi ann an teinn⁷ mhòir: tuiteamaid a nis ann an làimh an Tighearn, oir is lionmhor a thròcairean, ach ann an làimh duine na tuitean.

15 Agus chuir an Tighearna plàigh air Israel, o'n mhaduinn eadhon gu ruig an t-àm suidhichte⁸: agus bhàsaich do'n

¹ agus sheas Satan an aghaidh Israeil agus bhrosnaich e. 1. Eachdr. Caib. XXI. r. 1. ² gabhail.

³ srutha, glinne. ⁴ Tachtim. Eabh.

⁵ uibhir àireimh. ⁶ seachd. Faic I. Eachdr. Caib. XXI. r. 12. ⁷ teanntachd, aire.

⁸ àm a' chomh-chruinneachaidh.

II. SAMUEL, XXIV.

t-sluagh o Dhan gu Beer-seba, deich agus tri fichead mìle fear.

16 Agus an uair a chuir an t-aingeal a mach a làmh gu h-Ierusalem g'a sgrios, ghabh an Tighearn aithreachas a thaobh an uile, agus thubhairt e ris an aingeal a sgrios an sluagh, *Is leòr e*: cum a nis air do làmh. Agus bha aingeal an Tighearna làmh ri urlar-bualaidh Araunah an Iebusaich.

17 Agus labhair Daibhidh ris an Tighearna 'nuair a chunnaic e'n t-aingeal a bhuail an sluagh, agus thubhairt e, Feuch, is mise a pheacaich, agus is mise a rinn gu h-aingidh; ach na caoraich sin, ciod a rinn iad? bitheadh do làmh, guidheam ort, a'm' aghaidh-sa, agus an aghaidh tighe m'athar.

18 Agus thàinig Gad a dh'ionnsuidh Dhaibhidh air an là sin, agus thubhairt e ris, Gabh' suas, tog altair do'n Tighearn ann an urlar-bualaidh Araunah an Iebusaich.

19 Agus chaidh Daibhidh suas, a réir focail Ghad, mar a dh'àithn an Tighearn.

20 Agus dh'amhairc Araunah, agus chunnaic e'n rìgh agus a sheirbhisich a' teachd air an aghaidh d'a ionnsuidh: agus chaidh Araunah a mach, agus chrom se e féin do'n rìgh air 'aghaidh gu làr.

21 Agus thubhairt Araunah, C'ar son a thàinig mo thighearn an rìgh a dh'ionnsuidh a sheirbhisich? Agus thubhairt Daibhidh, a cheannach uait an urlair-bhualaidh, a thogail altarach do'n Tighearn, a chum gu'n caisgear a' phlàigh o'n t-sluagh.

22 Agus thubhairt Araunah ri Daibhidh, Gabhadh, agus ìobradh² mo thighearn an rìgh an *ni sin a bhios* maith 'na shùilbh: feuch, *tha buar an so* chum ìobairt-loisgte, agus innealan-bualaidh, agus acfuinn *eile* a bhuineas do'n bhuair air son connaidh.

23 Iad sin uile thug Araunah do'n rìgh³. Agus thubhairt Araunah ris an rìgh, Gu'n gabhadh an Tighearna do Dhia riut.

24 Agus thubhairt an rìgh ri Araunah, Nì h-eadh; ach gu deimhin ceannaichidh mi uait *iad* air luach; agus cha'n ìobairt mi ìobairte-loisgte do'n Tighearna mo Dhia do'n nì sin a gheibh mi a nasgaidh. Agus cheannaich Daibhidh an t-urlar-bualaidh, agus am buar, air leth-cheud secel airgid.

25 Agus thog Daibhidh an sin altair do'n Tighearn, agus dh'ìobairt e ìobairte-loisgte, agus ìobairte-sìth: agus bha'n Tighearna réidh ris an tìr, agus choisgeadh a' phlàigh o Israel.

¹ Rach.

² ofraileadh.

³ thug Araunah mar rìgh do'n rìgh.

CEUD LEABHAR NAN RIGH,

D' AN AINM, GU COITCHEANN,

TREAS LEABHAR NAN RIGH.

AIB. I.

1 Dh'eiridinn Abisag Daibhidh 'na shean aois.

5 Le còmhmadh Ioaib ghlac Adoniah an rìoghachd.

11 Chuir Natan Batseba dh'ionnsuidh Dhaibhidh gu fios a thoirt da mu'n chùis so. 38 Le ordugh Dhaibhidh dh'ung Sadoc agus Natan Solamh.

41 Theich Adoniah, &c.

ANIS bha rìgh Daibhidh sean, agus air teachd air aghaidh ann am bliadhnaibh: agus chòmhdaich iad e le h-eudach, gidheadh cha do ghabh e blàthas.

2 Uime sin thubhairt a sheirbhisich¹ ris, Iarradh iad do m' thighearn an rìgh gruagach a *ta* 'na h-òigh, agus seasadh i am fianuis an rìgh, agus eiridneadh i e, agus luidheadh i ann ad uchd, a chum gu'n gabh an tighearna mo rìgh blàthas.

3 Uime sin dh'iarr iad gruagach mhaiseach air feadh uile chrìoch Israeil, agus fhuair iad Abisag, Ban-sunamach, agus

thug iad i a dh'ionnsuidh an rìgh.

4 Agus bha a' ghruagach ro mhaiseach, agus dh'eiridinn i an rìgh, agus fhrithheil i dha; ach cha d'aithnich an rìgh i.

5 An sin dh'àrdaich Adoniah mac Hagit e féin, ag ràdh, Rìoghaichidh mise: agus dh'ulluich e dha féin carbaid, agus marcshluagh, agus leth-cheud fear a ruith roimhe.

6 Agus cha do chuir 'athair doilgheas² air uair sam bith³, ag ràdh, C'ar son a rinn thu mar so? Agus bha esan mar an ceudna ro mhaiseach 'na dhealb; agus rugadh e an déigh Absaloin.

7 Agus bha comhludadar⁴ aige ri Ioab mac Sheruah, agus ri Abiatar an sagart: agus a leantuinn Adoniah, rinn iad còmh-nadh ris.

8 Ach cha robh Sadoc an sagart, agus Benaiah mac Iehoiaha, agus Natan am fàidh, agus Simei, agus Rei, agus na fir

¹ a mhuinntir.

² mìothlachd.

³ o a làithibh. Eabh. ⁴ còmhradh; focail. Eabh.

I. RIGH, I.

threuna, a *bhuineadh* do Dhaibhidh, maille ri Adoniah.

9 Agus dh'ìobair Adoniah caoraich agus buar, agus *spréidh* reamhar làimh ri cloich Shohélet, a *tha* làimh ri Enrogei; agus thug e cuireadh d'a bhràithribh uile, mic an rìgh, agus do fhearaibh Iudah uile, seirbhisich an rìgh.

10 Ach do Natan am fàidh, agus do Bhenaiiah, agus do na fir threuna, agus do Sholamh a bhràthair, cha d'thug e cuireadh.

11 Uime sin labhair Natan ri Batseba màthair Sholaimh, ag ràdh, Nach cuala tu gu bheil Adoniah mac Hagit a' rioghachadh, agus cha 'n-eil fhios aig ar tigh-earna Daibhidh air?

12 A nis ma ta, leig dhomhsa, guidheam ort, comhairle a thabhairt ort, a chum gu'n saor thu t'anam féin, agus anam Sholaimh do mhic.

13 Inich, agus gabh a steach gu rìgh Daibhidh, agus abair ris, Nach d'thug thusa, mo thighearn, a rìgh, mionnan do d' bhanoglaich, ag ràdh, Gu deimhin rioghaichidh Solamh do mhac a'm' dhéigh-sa, agus suidhidh e air mo rìgh-chaithir-sa? c'ar son ma seadh a tha Adoniah a' rioghachadh?

14 Feuch, am feadh a bhios tusa fathast a' labhairt an sin ris an rìgh, thig mise mar an ceudna steach a'd' dhéigh¹, agus daingnichidh² mi do bhriathran.

15 Agus chaidh Batseba a steach a dh'ionnsuidh an rìgh, do'n t-seomar: agus bha'n rìgh ro shean; agus fhrithheil Abisag a' Bhan-sunamach do'n rìgh.

16 Agus chrom Batseba sìos³, agus rinn i ùmhlaichd do'n rìgh. Agus thubhairt an rìgh, Ciod a's àill leat?

17 Agus thubhairt ise ris, Mo thighearna, mhionnaich thu air an Tighearna do Dhia do d' bhanoglaich, ag ràdh, Gu cinnteach rioghaichidh Solamh do mhac a'm' dhéigh-sa, agus suidhidh e air mo rìgh-chaithir-sa:

18 Agus a nis, feuch, tha Adoniah a' rioghachadh, agus agad-sa, mo thighearn, a rìgh, cha 'n-eil fios air.

19 Agus dh'ìobair e buar, agus *spréidh* reamhar, agus caoraich gu lionmhor, agus thug e cuireadh do mhic an rìgh uile, agus do Abiatar an sagart, agus do Ioab ceannard an t-slàigh: ach do t'òglach Solamh cha d'thug e cuireadh.

20 Agus a nis mo thighearn, a rìgh, *tha* sùilean Israeil uile ort, a chum gu'n innseadh tu dhoibh cò a shuidheas air rìgh-chaithir mo thighearn an rìgh 'na dhéigh féin.

21 Oir, *mur innis*, tarlaidh 'nuair a

choidleas mo thighearn an rìgh maille r'a aithrichibh, gu'm measar mise agus mo mhac Solamh 'nar ciontaich.

22 Agus, feuch, am feadh a bha i fathast a' labhairt ris an rìgh, thàinig Natan am fàidh mar an ceudna a steach.

23 Agus dh'innis iad do'n rìgh, ag ràdh, Feuch, Natan am fàidh. Agus an uair a thàinig e steach am fianuis an rìgh, chrom se e féin do'n rìgh le 'aghaidh gu làr.

24 Agus thubhairt Natan, Mo thighearn, a rìgh, an d'thubhairt thusa, Rìgh-aichidh Adoniah a'm' dhéigh-sa, agus suidhidh esan air mo rìgh-chaithir?

25 Oir chaidh e sìos an diugh, agus dh'ìobair e buar, agus *spréidh* reamhar, agus caoraich gu lionmhor; agus thug e cuireadh do mhic an rìgh uile, agus do cheannardaibh an t-slàigh, agus do Abiatar an sagart; agus, feuch, *tha* iad ag itheadh agus ag òl 'na làthair, agus their iad, Gu ma fada beò an rìgh Adoniah.

26 Ach dhomhsa, *eadhon* dhomhsa do sheirbhiseach, agus do Shadoc an sagart, agus do Bhenaiiah mac Iehoiada, agus do t'òglach Solamh cha d'thug e cuireadh.

27 An ann le m' thighearn an rìgh a rinneadh an ni so, agus nach d'thug thu fios do d' sheirbhiseach cò a shuidheas air rìgh-chaithir mo thighearn an rìgh 'na dhéigh féin?

28 Agus fhreagair rìgh Daibhidh, agus thubhairt e, Gairmibh a m' ionnsuidh Batseba, Agus thàinig i an làthair an rìgh, agus sheas i am fianuis an rìgh.

29 Agus mhionnaich an rìgh, agus thubhairt e, *Mar* is beò an Tighearn, a shaor m'anam as gach airc⁴.

30 Amhuil mar a mhionnaich mi dhuit air an Tighearna Dia Israeil, ag ràdh, Gu deimhin rioghaichidh do mhac Solamh a'm' dhéigh-sa, agus suidhidh e air mo rìgh-chaithir a'm' àite; gu cinnteach is ann mar sin a ni mi an diugh.

31 An sin chrom Batseba sìos le h-aghaidh gu làr, agus rinn i ùmhlaichd do'n rìgh agus thubhairt i, Maireadh mo thighearna rìgh Daibhidh gu bràth.

32 Agus thubhairt rìgh Daibhidh, Gairmibh a m' ionnsuidh Sadoc an sagart, agus Natan am fàidh, agus Benaiah mac Iehoiada. Agus thàinig iad am fianuis an rìgh.

33 Agus thubhairt an rìgh riu, Thugaibh leibh seirbhisich bhur tighearn, agus thugaibh air Solamh mo mhac marcachd air mo mhuileid féin, agus thugaibh sìos e gu Gihon;

34 Agus ungadh Sadoc an sagart, agus Natan am fàidh, an sin e 'na rìgh air Is-

¹ a' d' dhiaigh.

² coimhleanaidh.

³ dh'iom Batseba a ceann.

⁴ teanntachd.

I. RIGH, I. II.

rael : agus séidibh se an trompaid¹, agus abraibh, Gu ma fada beò rìgh Solamh.

35 An sin thig sibh a nìos² na dhéigh, agus thig esan, agus suidhidh e air mo rìgh-chaithir-sa, agus rioghaichidh e a m' àite : agus dh'àithn mise e bhì³ na cheannard air Israel, agus air Iudah.

36 Agus fhreagair Benaiah mac Iehoiada a' rìgh, agus thubhairt e, Amen²: gu'n abradh an Tighearna Dia mo thighearna an rìgh mar sin *cuideachd*.

37 Mar a bha'n Tighearna maille ri m' thighearn an rìgh, gu ma h-amhluidh bhios e le Solamh, agus gu'n àrdaicheadh³ e a rìgh-chaithir thar rìgh-chaithir mo thighearna rìgh Daibhidh.

38 Agus chaidh Sadoc an sagart, agus Natan am fàidh, agus Benaiah mac Iehoiada, agus na Ceretich, agus na Peletich sìos, agus thug iad air Solamh marcachd air muileid rìgh Daibhidh; agus thug iad e gu Gihon.

39 Agus thug Sadoc an sagart corn⁴ oladh as a' phàillium, agus dh'ung e Solamh; agus shéid iad an trompaid, agus thubhairt an sluagh uile, Gu ma fada beò rìgh Solamh.

40 Agus thàinig an sluagh uile a nìos² na dhéigh, agus bha'n sluagh a' piobaireachd le piobaibh, agus a' deanamh gairdeachais le mòr-ghairdeachas, air chor as gu'n do reubadh an talamh le'm fuaim.

41 Agus chual' Adoniah, agus na h-aoidhean⁵ uile a bha maille ris e, 'nuair a sguir iad a dh'itheadh: agus an uair a chual' Ioab fuaim na trompaide, thubhairt e, C'ar son a tha fuaim so a' bhaile, agus e làn comhghàir⁶?

42 Agus am feadh a bha esan fathast a' labhairt, feuch, thàinig Ionatan mac Abiatar an t-sagart, agus thubhairt Adoniah ris, Thig a steach, oir is duine treun⁷ thu, agus bheir thu sgeul maith leat.

43 Agus fhreagair Ionatan, agus thubhairt e ri Adoniah, Gu deimhin rinn ar tighearna rìgh Daibhidh Solamh 'na rìgh.

44 Agus chuir an rìgh leis Sadoc an sagart, agus Natan am fàidh, agus Benaiah mac Iehoiada, agus na Ceretich, agus na Peletich; agus thug iad air marcachd air muileid an rìgh.

45 Agus dh'ung² Sadoc an sagart, agus Natan am fàidh, e 'na rìgh ann an Gihon: agus thàinig iad a nìos as a sin a' deanamh gairdeachais, air chor as gu bheil am baile ri comh-ghàir⁸: is i so an fhuaim a chuala sibh.

46 Agus mar an ceudna tha Solamh 'na shuidhe air caithir na rioghachd.

47 Agus os bàrr, thàinig seirbhisich an rìgh a bheannachadh ar tighearna rìgh Daibhidh, ag ràdh, Gu'n deanadh Dia ainm Sholaimh nì's fearr na t'ainmsa, agus gu'n àrdaicheadh e a rìgh-chaithir os ceann do rìgh-chaithir-sa: agus chrom an rìgh e féin air an leabaidh.

48 Agus cuideachd mar so thubhairt an rìgh, Gu ma beannaicht' an Tighearna Dia Israeil, a thug an diugh *duine* a shuidhe air mo rìgh-chaithir, agus mo shùilean féin⁹ ga fhaicinn.

49 Agus ghlac uamhas⁹ na h-aoidhean uile a bha maille ri Adoniah, agus dh'érich iad, agus dh'imich iad gach fear air a shlighe féin,

50 Agus bha eagal air Adoniah roimh Sholamh, agus dh'érich e, agus chaidh e, agus ghabh e greim do adharcaibh na h-altarach.

51 Agus dh'innsadh do Sholamh, ag ràdh, Feuch, tha eagal air Adoniah roimh rìgh Solamh, agus, feuch, ghabh e greim a dh'adharcaibh na h-altarach, ag ràdh, Thugadh rìgh Solamh a mhiannan dhomhsa an diugh, nach marbh e a sheirbhisich leis a' chlaidheamhl.

52 Agus thubhairt Solamh, Ma bhios e 'na dhuine maith¹⁰, cha tuit *roineag* d'a fholt gu làr; ach ma gheibhear olc ann, cuirear gu bàs e.

53 Agus chuir rìgh Solamh *fios air*, agus thug iad air teachd a nuas o'n altair, agus thàinig e agus chrom se e féin do rìgh Solamh. Agus thubhairt Solamh ris, Imich do d' thigh.

CAIB. II.

1 Thug Daibhidh àithean do Sholamh, agus fhuair e bàs. 12 Rìghich Solamh 'na àite. 23 Chuireadh Adoniah gu bàs. 26 Thig Solamh a mach Abiatar o bhì³ na shagart. 29 Mharbhadh Ioab aig adharcaibh na h-altarach.

ANIS thàinig làithean Dhaibhidh am fagus anns am faigheadh e bàs, agus dh'àithn e do Sholamh a mhac, ag ràdh,

2 Tha mise a' dol air slighe na talmhainn uile: bi thusa uime sin làidir, agus dean gu fearail:

3 Agus coimhid cùram an Tighearna do Dhé, a dh'imeachd 'na shligheibh, a ghleidheadh a reachdan, agus àitheantan, agus a bhreitheanas, agus a theisteis, mar a tha e sgrìobhta ann an lagh Mhaois, a chum gu'n soirbhich leat¹¹ anns gach nì a ni thu, agus anns gach *àite* d'an tionndaidh tu thu féin;

4 Chum gu'n daingnich an Tighearn 'fhocal féin, a labhair e a m' thaobh-sa, ag ràdh, Ma choimhideas do chlann an slighe, gu imeachd a m' fhianuis-sa ann am firinn, le'n uile chridhe, agus le'n uile

¹ adharc, stoc.

² Bitheadh e mar sin.

³ gu'm meudaicheadh.

⁴ adharc.

⁵ an luchd-cuiridh.

⁶ comhghàir.

⁷ gaisgeil,

foghainteach.

⁸ air a lionadh le fuaim.

⁹ uamhann.

¹⁰ subhlaicheadh, deadh-bheusach.

¹¹ gu'n dean thu gu glie.

anam, cha bhi (ars' esan) duine dh'easbhuidh ort¹ air righ-chaithir Israel.

5 Os barr, tha fhios agad ciod a rinn Ioab mac Sheruah ormsa, agus ciod a rinn e air dà cheamard slòigh Israel, air Abner mac Neir, agus air Amasa mac Ieter; oir mharbh e iad, agus dhòirt e fuil a' chogaidh anns an t-sith, agus chuir e fuil a' chogaidh air a chrìos a *bha* m'a leasraidh, agus air a' bhrògaibh a *bh'* air a chosaibh.

6 Dean thusa ma ta a réir do ghliocais, agus na leig le 'cheann liath dol sìos do'n uaigh ann an sith.

7 Ach nochd caoimhneas do mliacaibh Bharsillai a' Ghileadaich, agus bitheadh iad ann measg an dream a dh'itheas aig do bhord; oir is ann mar so a thàinig iad a m' ionnsuidh-sa 'nuair a theich mi roimh Absalom do bhràthair.

8 Agus, feuch, maille riut *tha* Simeì, mac Ghera, Beniamineach o Bhahurim, a mhallach mise le mallachadh geur, anns an là san deachaidh mi do Mhahanaim: ach thàinig e a nuas a'm choinneamh gu Iordan, agus mhionnaich mi dha air an Tighearn, ag ràdh, Cha chuir mi gu bàs leis a' chlaidheamh thu.

9 A nis ma ta na meas neo-chiontach e²: oir is duine glic thu, agus tha fhios agad ciod is còir dhuit a dheanamh ris; ach thoir a cheann liath sìos do'n uaigh le fuil.

10 An sin choidil Daibhidh maille r'a aithrichibh, agus dh'adhlaiceadh e ann an baile Dhaibhidh.

11 Agus *b'iad* na làithean a rìghich Daibhidh os ceann Israel dà fhichead bliadhna: ann an Hebron rìghich e seachd bliadhna, agus ann an Ierusalem rìghich e trì bliadhna deug thar fhichead.

12 An sin shuidh Solamh air righ-chaithir Dhaibhidh 'athar, agus dhaing-nicheadh a rioghachd gu mòr.

13 Agus thàinig Adoniah mac Hagit gu Batseba màthair Sholaimh; agus thubhairt i, An ann an sith a tha thu teachd? agus thubhairt esan, Ann an sith.

14 Thubhairt e os barr, Tha ni agam ri ràdh riut. Agus thubhairt ise, Abair romhad.

15 Agus thubhairt esan, Tha fhios agad gu'm bu leamsa an rioghachd, agus gu'n do chuir Israel uile an aghaidh orm, chum gu'n rioghaichinn: gidheadh, thionndaidheadh an rioghachd mu'n cuairt, agus fhuair mo bhràthair i; oir bu leis-san o'n Tighearn i.

16 Agus a nis, aon athcheuinge *tha* mi 'g iarraidh ort, na diùlt mi³. Agus thubhairt ise ris, Abair romhad.

17 Agus thubhairt esan, Labhair, guidheam ort, ri Solamh an righ, (oir cha diùlt e thusa,) gu'n tugadh e dhomh Abisag a' Bhansunamach 'na mnai.

18 Agus thubhairt Batseba, Ro mhaith, labhraidh mise air do shon ris an righ.

19 Chaidh Batseba uime sin a dh'ionnsuidh righ Solamh, a labhairt ris air son Adoniah. Agus dh'éirich an righ suas 'na coinneamh, agus chrom se e féin d'i, agus shuidh e air a righ-chaithir, agus thug e fa'near caithir⁴ a chur sìos do mhàthair an righ; agus shuidh i air a làimh dheis.

20 An sin thubhairt i, *Tha* mi 'g iarraidh aon athcheuinge bige ort, na diùlt mi, *guidheam* ort. Agus thubhairt an righ rithe, Iarr, a mhàthair, oir cha diùlt mi thu.

21 Agus thubhairt ise, Thugar Abisag a' Bhan-sunaniach do Adoniah do bhràthair 'na mnai.

22 Agus fhreagair righ Solamh, agus thubhairt e r'a mhàthair, Agus c'ar son a dh'iarras tu Abisag a' Bhan-sunamach do Adoniah? iarr dha an rioghachd mar an ceudna; (oir is e mo bhràthair a's sine e;) eadhon dha-san, agus do Abiatar an sagart, agus do Ioab mac Sheruah.

23 An sin mhionnaich righ Solamh air an Tighearn, ag ràdh, Gu'n deanadh Dia mar sin riumsa, agus tuilleadh mar an ceudna, mur ann an aghaidh 'anama⁵ féin a labhair Adoniah an focal so.

24 A nis uime sin, *mar* is beò an Tighearn, a dhaingnich mise, agus a chuir a'm' shuidhe mi air righ-chaithir Dhaibhidh m'athar, agus a rinn tigh dhomh, mar a labhair e⁶, cuirear Adoniah gu bàs an diugh.

25 Agus chuir righ Solamh le làimh Bhenaiah mhic Iehoiada, agus bluail⁷ e air, air chor as gu'n d'fhuair e bàs.

26 Agus ri Abiatar an sagart thubhairt an righ, Imich gu Anatot, a dh'ionnsuidh t'fhearainn féin, oir *tha* thu toiltinn a' bhàis⁸: ach an diugh cha mharbh mi thu, a chionn gu'n do ghiùlain thu àire an Tighearna Iehobhah an fianuis Dhaibhidh m'athar, agus a chionn gu'n d'fhuiling thu àmhghar anns gach ni san d'fhuiling m'athair àmhghar.

27 Mar so thilg Solamh a mach Abiatar o bhi 'na shagart do'n Tighearn, a choimhlionadh focail an Tighearn, a labhair e do thaobh tighe Eli ann an Siloh.

28 An sin thàinig tuairesgeul gu Ioab; (oir thionndaidh Ioab an dèigh Adoniah, ged⁹ nach do thionndaidh e 'n dèigh Absalom:) agus theich Ioab gu pàillium

¹ cha ghearrar as uait duine. Eabh. ² na leig as gun dioghaltas e. ³ na tabhair orm m'aghaidh thionndaidh uait. Eabh. ⁴ righ-chaithir.

⁵ a dheatha. ⁶ gheall e. ⁷ leum. ⁸ is duine buailteach do'n bhàs thu. ⁹ giodh. Eir.

I. RIGH, II. III.

an Tighearn, agus ghabh e greim a dh'-adharcaibh na h-altarach.

29 Agus dh'inneadh do rìgh Solamh gu'n do theich Iobab gu pàillium an Tighearn, agus gu'n robh e làimh ris an altair¹: an sin chuir Solamh uath Benaiah mac Iehoiada, ag ràdh, Falbh, buail air.

30 Agus thàinig Benaiah gu pàillium an Tighearn, agus thubhairt e ris, Mar so tha'n rìgh ag ràdh, Thig a mach. Agus thubhairt esan, Cha téid, ach gheibh mi bàs an so. Agus thug Benaiah sgeul air ais a dh'ionnsuidh an rìgh, ag ràdh, mar so labhair Iobab, agus mar so fhreagair e mi.

31 Agus thubhairt an rìgh ris, Dean mar a labhair e, agus buail air, agus adhlac e, a chum gu'n toir thu air falbh an fhuil neo-chiontach, a dhòirt Iobab, uamsa agus o thigh m'athar.

32 Agus pillidh² an Tighearna 'fhuil air a cheann féin, do bhrìgh gu'n do bhuail e air dithis dhaoine a b'ionraice agus a b'fhearr na e féin, agus gu'n do mharbh e leis a' chlaidheamh iad, gun fhios do m' athair Daibhidh, eadhon Abner mac Neir, ceannard slòigh Israeil, agus Amasa mac Ieter ceannard slòigh Iudah.

33 Pillidh uime sin am fuil-san air ceann Iobab, agus air ceann a shliochd gu bràth: ach aig Daibhidh, agus aig a shliochd, agus aig a thigh, agus aig a rìgh-chathir, bithidh sìth gu bràth o'n Tighearn.

34 Agus chaidh Benaiah mac Iehoiada suas, agus bhuail e air, agus mharbh se e: agus dh'adhlacaidh e 'na thigh féin anns an fhàsach.

35 Agus chuir an rìgh Benaiah mac Iehoiada 'na àit os ceann an t-slòigh: agus Sadoe an sagart chuir an rìgh an àit Abiatair.

36 Agus chuir an rìgh fios, agus ghairm e air Simeì, agus thubhairt e ris, Tog dhuit féin tigh ann an Ierusalem, agus gabh còmhnuidh an sin, agus na falbh a mach as a sin taobh sam bith³.

37 Oir tachairidh air an là anns an téid thu mach, agus an gabh thu thar sruth Chidroin, gu'm bi fios gu cinnteach agad gu'm faigh thu gu deimhin bàs: bithidh t'fhuil air do cheann féin.

38 Agus thubhairt Simeì ris an rìgh, Is maith an ràdh⁴: mar a labhair mo thigh-earn an rìgh, is amhluidh a nì do sheirbhisich. Agus ghabh Simeì còmhnuidh ann an Ierusalem mòran do làithibh.

39 Agus thachair an ceann thri bliadhna, gu'n do theich dà sheirbhisich le Simeì dh'ionnsuidh Achis, mhic Mhaachah, rìgh Ghat: agus dh'innis iad do Shimeì,

ag ràdh, Feuch, tha do sheirbhisich ann an Gat.

40 Agus dh'éirich Simeì, agus chuir e diollaid air 'asail⁵, agus chaidh e do Ghat a dh'ionnsuidh Achis, a dh'iarraidh a sheirbhisich: agus dh'fhalbh Simeì, agus thug e leis a sheirbhisich o Ghat.

41 Agus dh'inneadh do Sholamh gu'n deachaidh Simeì o Ierusalem gu Gat, agus gu'n d'thàinig e air ais.

42 Agus chuir an rìgh fios, agus ghairm e air Simeì, agus thubhairt e ris, Nach d'thug mise ortsa mionnachadh air an Tighearn, agus nach d'thug mi fianuis a' d' aghaidh, ag ràdh, Air an là anns an téid thu mach, agus am falbh thu taobh sam bith, biodh fios gu cinnteach agad gu'm faigh thu gu deimhin bàs? agus thubhairt thu rium, Is maith am focal a chuala mi.

43 C'ar son ma ta nach do ghléidh thu mionnan an Tighearn, agus an àithne a dh'àithn mise dhuit?

44 Thubhairt an rìgh cuideachd ri Simeì, Is aithne dhuit féin gach uile olc air am fiosrach do chridhe, a rinn thu air Daibhidh m'athairsa: uime sin phill⁶ an Tighearna t'olc air do cheann féin:

45 Ach bithidh rìgh Solamh beannaichte, agus bithidh rìgh-chathir Dhaibhidh daingean am fianuis an Tighearna gu bràth.

46 An sin dh'àithn an rìgh do Benaiah mac Iehoiada; agus chaidh e mach, agus bhuail e air, agus fhuair e bàs. Agus dh'aingnicheadh an rioghachd ann an làimh Sholaimh.

CAIB. III.

1 Ghabh Solamh nighean Pharaoh dha féin 'na mnaoi. 5 Thaisbean an Tighearn e féin do Sholamh ann an aistling agus dh'fheòrach e dheth cìod a b'àill leis e thabhairt da. 9 Ròghnaich esan gliocas. 11 Gheall Dia sin dha, maille ri saoihreas agus urram. 16 Thug e breth eadar dà strìopaich.

A GUS rinn Solamh cleamhnas ri Pharaoh aoh rìgh na h-Eiphit, agus ghabh e nighean Pharaoh, agus thug e i do bhaile Dhaibhidh, agus an do chuir e crìoch air a thigh féin a thogail, agus tigh an Tighearn, agus balla Ierusalem mu'n cuairt.

2 Ach⁷ dh'ìobair an sluagh air àitibh àrda⁸, do bhrìgh nach do thogadh tigh do ainm an Tighearna gus na làithibh sin.

3 Agus ghràdhaich Solamh an Tighearn, ag imeachd ann an orduighibh Dhaibhidh 'athar: ach⁹ ann an àitibh àrda dh'ìobair e agus loisg e tùis.

4 Agus chaidh an rìgh do Ghibeon a dh'ìobradh an sin, oir b'e sin am mòr àit

¹ agus, feuch, e làimh ris an altair. Eabh.

² diollaidh.

⁴ am focal.

³ a null no a nall. Eabh.

⁵ a asail.

⁶ pillidh.

⁸ air àrdaibh, tulaichibh.

⁷ A mhàin.

⁹ a mhàin.

àrd: mìle ìobairt-loisgte thug Solamh suas air an altair sin.

5 Ann an Gibeon thaisbein an Tighearn e féin do Sholamh¹ ann an aisling na h-oidhche; agus thubhairt Dia, Iarr cìod is àill leat mi thabhairt duit.

6 Agus thubhairt Solamh, Nochd² thu do t'òglach Daibhidh m'athair caoimhneas mòr, a réir mar a dh'imich e a'd' fhianuis ann am firinn, agus ann an ionracas, agus ann an tréibhdhìreas cridhe maille riut; agus ghléidh thu dha an caoimhneas mòr so, gu'n d'thug thu dha mac a shuidhe air a rìgh-chaithir, mar a tha e 'n diugh.

7 Agus a nis a Thighearna mo Dhia, rinn thu t'òglach 'na rìgh an àite Dhaibhidh m'athair; agus mise a'm' leanabh³ beag, do nach aithne dol a mach no teachd a steach.

8 Agus tha t'òglach am meadhon do shluaigh a thagh thu, sluagh lìonmhor, nach 'eil e 'n comas àireamh no mheas aig an lìonmhoireachd.

9 Thoir uime sin do t'òglach cridhe tuigseach a thoirt breth air do shluaigh, gu dealachadh chur⁴ eadar am maith agus an t-olc; oir cò a's urrainn breth a thabhairt air do shluaigh so a tha co mhòr?

10 Agus bha e 'na ni taitneach leis an Tighearna, gu'n d'iarr Solamh an ni so.

11 Agus thubhairt Dia ris, A chionn gu'n d'iarr thu an ni so, agus nach d'iarr thu dhuit féin saoghal fada⁵, agus nach d'iarr thu dhuit féin saobhbreas, agus nach d'iarr thu anam do naimhdean, ach gu'n d'iarr thu dhuit féin tuigse a dheanamh breitheanas.

12 Feuch, rinn mise a réir do bhriathra: feuch, thug mi dhuit cridhe glic agus tuigseach, air chor as nach robh neach air bith romhad cosmhuil riut, agus nach mò a dh'éireas a'd' dhéigh neach air bith cosmhuil riut.

13 Agus mar an ceudna, thug mi dhuit an ni nach d'iarr thu, arao⁶ saobhbreas agus cliù, air chor as nach bi duine cosmhuil riut am measg nan rìgh ré do laith-ean uile.

14 Agus ma dh'imicheas tu ann mo shlighibh-sa, a ghleidheadh mo reachdan, agus m'àiteantan, mar a dh'imich Daibhidh t'athair, an sin ni mi do làithean fada.

15 Agus mhosgail Solamh, agus, feuch, b'aisling a bh'ann: agus thàinig e gu h-Ierusalem, agus sheas e am fianuis àire coimhcheangail an Tighearn, agus thug e suas ìobairtean-loisgte, agus dh'ìobair e ìobairtean-sith, agus rinn e cuirm d'a

sheirbhisich uile.

16 An sin thàinig dithis bhan, a bha 'nan striopachaibh, a dh'ionnsuidh an rìgh, agus sheas iad 'na làthair.

17 Agus thubhairt bean diubh, O mo thighearna, tha mise agus a' bhean so a' gabhail còmhnuidh ann an aon tigh, agus dh'aiseadadh mise⁷ maille rithe san tigh.

18 Agus air an treas là 'n déigh dhomh-sa bhi air m' aisead, dh'aiseadadh a' bhean so mar an ceudna, agus bha sinn cuid-eachd; cha robh coigreach sam bith maille ruinn san tigh, ach sinn féin 'nar dithis anns an tigh.

19 Agus dh'eug mac na mnà so san oidhche, a chionn gu'n do luidh i air.

20 Agus dh'éirich i mu mheadhon-oidhche, agus thug i mo mhac-sa o m' thaobh, am feadh a bha do bhanoglach 'na codal, agus chuir i 'na luidhe e 'na h-uchd féin, agus chuir i a mac marbh féin 'na luidhe ann am uchd-sa.

21 Agus dh'éirich mi anns a' mhaduinn a thoirt cìche do m' mhac, agus, feuch, bha e marbh. Ach an uair a thug mi an aire dha sa' mhaduinn, feuch, cha b'e mo mhac-sa bh'ann, a rug mi.

22 Agus thubhairt a' bhean eile, Ni h-eadh; ach is e mo mhac-sa tha beò, agus is e do mhac-sa tha marbh: agus thubhairt ise⁸, Ni h-eadh; ach is e domhac-sa tha marbh, agus is e mo mhac-sa tha beò. Mar so labhair iad⁹ am fianuis an rìgh.

23 An sin thubhairt an rìgh, Tha i so ag ràdh, Is e so mo mhac-sa tha beò, agus is e do mhac-sa tha marbh: agus tha i sud ag ràdh, Ni h-eadh; ach is e do mhac-sa tha marbh, agus is e mo mhac-sa tha beò.

24 Agus thubhairt an rìgh, Thugaibh dhomh claidheamh. Agus thug iad claidheamh am fianuis an rìgh.

25 Agus thubhairt an rìgh, Roinnibh am mac beò 'na dhà leth¹⁰, agus thugaibh leth dh'aon mhnai¹¹, agus leth do'n mhnai eile.

26 An sin labhair a' bhean le'm bu leis am mac beò ris an rìgh, (oir theòdh a cridhe¹¹ r'a mac,) agus thubhairt i, O mo thighearna, thugaibh dh'ise an leanabh beò, agus na marbhaibh idir e: ach thubhairt a' bhean eile, Na biodh e agam-sa no agad-sa, ach roinnibh e.

27 An sin fhreagair an rìgh, agus thubhairt e, Thugaibh dh'ise an leanabh beò, agus na marbhaibh idir e: is ise a mhàthair.

28 Agus chual' Israel uile a' bhreth a thug an rìgh, agus bha eagal orra roimh

¹ chunneas an Tighearna le Solamh. Eabh.

² Rinn. Eabh. ³ òganach. ⁴ air chor as gu'n tuig, gu mothach e. ⁵ mòran làithean. Eabh.

⁶ an dà chuid.

⁸ i so. Eabh.

¹⁰ earrann.

⁷ dh'asaideadh, rug mi leanabh.

⁹ rinn iad comnsachadh.

¹¹ a h-innidh, a truns.

I. RIGH, III. IV.

an righ; oir chunnaic iad gu'n robh gliocas Dhé ann¹, a dheanamh breitheanais.

CAIB. IV.

1 Uachdarain Sholaimh. 28 Meud a rìoghachd, agus sonas a shluaigh. 22 A lòn air son aoin là. 29 A ghliocas, agus a sgrìobhadh.

AGUS bha rìgh Solamh 'na rìgh air Israel uile.

2 Agus is iad so na h-uachdarain² a bh'aige: Asariah mac Shadoic an t-sagairt:

3 Elihoreph agus Ahiah mic Shisa, sgrìobhaichean: Iehosaphat mac Ahiluid, an seanachaidh³:

4 Agus Benaiah mac Iehoiada air ceann an t-sloigh: agus Sadoc agus Abiatar, na sagairt:

5 Agus Asariah mac Natain os ceann an luchd-druchd⁴: agus Sabud mac Natain, an t-àrd fhear-dreuchd, 'na charaid⁵ aig an righ:

6 Agus Ahisar os ceann an teaghlach: agus Adoniram mac Abda os ceann na cise.

7 Agus bha aig Solamh dà fhear dheug dreuchd os ceann Israeil uile, a bheathaich an rìgh agus a theaghlach: rè a mhiosa féin sa' bhliadhna bha e mar fliachaibh air gach fear dhiubh a bheathachadhl.

8 Agus is iad so an ainmean: mac Huir ann an sliabh Ephraim:

9 Mac Dhecair ann am Macas, agus ann an Saalbim, agus ann am Bet-semes, agus ann an Elon, agus ann am Bet-hanan:

10 Mac Heseid ann an Arubot; aigè-san bha Sochoh, agus uile thìr Hepheir:

11 Mac Abinadaib, aig an robh uile thìr Dhoir; bha Taphat nighean Sholaimh aige 'na mnaoi:

12 Baanah mac Ahiluid; aige-san bha Taanach, agus Megido, agus Bet-sean uile, a tha làimh ri Sartanah sìos o Iesreel, o Bhet-sean gu Abel-meholah, gu ruig an taobh thall do Iocneam:

13 Mac Ghebeir ann an Ramot-gilead; dhasan bhuineadh bailtean Iair mhic Mhanaseh, a tha ann an Gilead; dhasan mar an ceudna bhuineadh tìr Argoib, a tha ann am Basan, trì fichcad baile mòr le ballachaibh agus le crannaibh umha:

14 Ahinadab mac Ido ann am Mahanaim:

15 Ahimaas ann an Naphtali; ghabh esan mar an ceudna Basmat nighean Sholaimh 'na mnaoi:

16 Baanah mac Husai ann an Aser, agus ann am Balot:

17 Iehosaphat mac Pharuah ann an Isachar:

18 Simeì mac Elah ann am Beniamin:

19 Geber mac Uri ann an tìr Ghilead, ann an tìr Sihoin rìgh nan Amorach, agus Og rìgh Bhasain; ag s b'esan an t-aon fhear-dreuchd a bha san tìr.

20 Bha Iudah agus Israel lionmhor, mar a' ghaineamh a tha ri taobh na fairge air lionmhoireachd, ag itheadh, agus ag òl, agus a' deanamh subhachais.

21 Agus rìghich Solamh os ceann nan rìoghachdan uile, o'n amhainn gu tìr nam Philisteach, agus gu ruig crìoch na h-Eiphit: thug iad leo tiodhlacan, agus rinn iad seirbhis do Sholamh rè uile làithean a bheatha.

22 Agus b'e lòn⁶ Sholaimh air son aoin là, deich tomhais⁷ fhìchead do mhìn mhìn⁸ chruithneachd, agus trì fichcad tomhas mine cìle,

23 Deich daimh bhiahdta, agus fichcad damh bhàrr an fheoir, agus ceud caora, a thuilleadh air féidh, agus ruadh-bhuic, agus dathais, agus eoin bhiahdta.

24 Oir bha uachdaranachd aige os ceann na tìre uile air an taobh so do'n amhainn, o Thiphsah eadhon gu Asah, os ceann nan rìgh uile air an taobh so do'n amhainn: agus bha sìth aige o gach taobh mu'n cuairt da.

25 Agus ghabh Iudah agus Israel còmh-nuidh gu tèaruinte, gach fear fo a chrann-fìona, agus fo a chrann-fìge féin, o Dhau eadhon gu Beer-seba, rè uile làithean Sholaimh.

26 Agus bha aig Solamh ceithir mìle⁹ prasaich each air son a charbad, agus dà mhìle dheug marcach.

27 Agus bheathaich an luchd-dreuchd sin rìgh Solamh, agus gach neach a thàinig gu bòrd rìgh Solamh, gach duine 'na mhìos féin: cha d'fhuiling iad nì air bitl a bhli dh'èasbhuidh.

28 Eorna mar an ceudna agus conlach do na h-eachaibh, agus do na dromedairibh, thug iad a dh'ionnsuidh an àit auns an robh an luchd-dreuchd, gach fear a réir 'orduigh féin.

29 Agus thug Dia gliocas do Sholamh, agus tuiqe ro mhòr, agus farsaingeachd cridhe mar a' ghaineamh a tha air tràigh na mara.

30 Agus bu mhò gliocas Sholaimh na gliocas uile chloinne na h-àird¹⁰ an ear, agus na uile ghliocas na h-Eiphit.

31 Agus bha e glic thar gach duine, thar Etan an t-Esrahach¹⁰, thar Heman, agus Chalcol, agus Darda, mic Mhaloìl¹¹: agus bha a chliù¹² anns gach dùthaich mu'n cuairt.

32 Agus labhair e trì mìle gnàth-fhocal;

¹ 'na chridhe.

² cùimhnicheoir. ³ fhrithheil do'n rìgh.

⁴ aran. Eabh.

⁵ ceannardan, prionnsaidh.

⁶ os ceann nan daoine a

⁷ 'na fhear-rùn.

⁸ cor. Eabh. measures. Sasg.

⁹ phlùr.

Eachdr. Caib. IX. r. 23.

Eachdr. Caib. II. r. 6.

¹⁰ ainn. Eabh.

¹¹ dà fhìchead mìle. Faic. II.

¹² mac Sherah. Faic. I.

¹³ luchd dàin.

agus b'e àireamh a dhàn mìle agus cùig.

33 Agus labhair e air craobhan, o'n chrann-seudair a tha ann an Lebanon, eadhon gu ruig an hisop a dh'fhàsas a mach as a' bhalla: labhair e mar an ceudna air ainmhidhìbh, agus air eunlaith, agus air nithibh a shnàigeas, agus air iasgaibh.

34 Agus thàinig cuid do na h-uile chinn-eachaibh a dh'éisdeachd ri gliocas Sholaimh, o uile rìghribh na talmhainn, a chual' iomradh a ghliocais.

CAIB. V.

1 Thug Solamh fios do Hiram gu'n robh e gu teampull a thogail do Dhia, agus dh'iarr e fiodh vaith air son na h-oibre. 7 Gheall Hiram da gu'n deanadh e uile thoil a thaobh an fhiodha. 13 Àireamh luchd-oibre Sholaimh.

A GUS chuir Hiram rìgh Thiruis¹ a sheirbhisich a dh'ionnsuidh Sholaimh, an uair a chual' e gu'n d'ungadh e 'na rìgh an àit² athar: oir bha spéis aig Hiram do Dhaibhidh rè 'uile làithean.

2 Agus chuir Solamh fios gu Hiram, ag ràdh,

3 Tha fhios agad cionnus nach b'urrainn m'athair Daibhidh tigh a thogail do ainm an Tighearn a Dhé, air son a' chogaidh leis an do chuairtich a naimhdean e, gus an do chuir an Tighearn iad fuidh bhounaibh a chos.

4 Ach a nis thug an Tighearna mo Dhia fois dhomhsa air gach taobh: cha 'n'eil nàmlaid air bith ann, no droch thuiteamas.

5 Agus, feuch, tha mi a' cur romham tigh a thogail do ainm an Tighearna mo Dhé, mar a labhair an Tighearn ri m'athair Daibhidh, ag ràdh, Do mhiac a chuir-eas mise a'd' àit air do rìgh-chaitir, togaidh esan tigh do m'ainm-sa.

6 A nis uime sin, àithn thusa gu'n gearr iad dhomhsa craobhan seudair² à Lebanon; agus bithidh mo sheirbhisich-sa maille ri d' sheirbhisich-sa: agus tuarasdail do sheirbhiseach bheir mise dhuit, a réir gach nì a dl'ainmicheas³ tu: oir tha fhios agad nach 'eil 'nar measgne duine d'an aithne fiodh a ghearradh, mar na Sidonaich.

7 Agus an uair a chuala Hiram briathra Sholaimh, bha aobhneas mòr air, agus thubhairt e, Gu ma beannaicht' an Tighearn an diugh, a thug do Dhaibhidh mac glic os ceann an t-sluaigh lìonmhoir so.

8 Agus chuir Hiram fios gu Solamh, ag ràdh, Chuala mi⁴ na nithe mu'n do chuir thu fios do m'ionnsuidh: nì mi d'uile thoil a thaobh nan craobh seudair agus a thaobh nan craobh giuthais.

9 Bheir mo sheirbhisich sìos iad o Le-

banon a dh'ionnsuidh na mara: agus cuiridh mi air falbh iad 'nan ràthaibh⁵ air muir, gu ruig an t-àit a shònraicheas tu dhomh, agus cuiridh mi air tìr⁶ iad an sin, agus bheir thusa leat iad; agus nì thu mo riar ann am biadh a thabhairt do m' theaghlach.

10 Mar sin thug Hiram do Sholamh fiodh seudair, agus fiodh giuthais, a réir 'uile thoil.

11 Agus thug Solamh do Hiram fichead mìle tomhas⁷ cruithneachd mar lòn d'a theaghlach, agus fichead tomhas do oladh fhuor-ghlòin: mar so thug Solamh do Hiram o bhliadhna gu bliadhna.

12 Agus thug an Tighearna gliocas do Sholamh, mar a gheall e dha⁸: agus bha sìth eadar Hiram agus Solamh, agus rinn iad coincheangal ri chèile.

13 Agus rinn rìgh Solamh togail dhaoine á h-Israel uile; agus b'i an togail deich mìle fichead fear.

14 Agus chuir e iad do Lebanon, deich mìle sa' mhìos mu'n seach: mìos bha iad ann an Lebanon, agus dà mhìos 'nan tighibh féin⁹: agus bha Adoniram air ceann na togail.

15 Agus bha aig Solamh deich agus trì fichead mìle fear-ionmhar eallaich, agus ceithir fichead mìle fear-gearraidh annis a' bheinn:

16 A thuilleadh air àrd luchd-dreuchd Sholaimh, a bha os ceann na h-oibre, trì mìle agus trì cheud¹⁰, aig an robh uachdaranachd air an t-sluaigh a bha deanamh na h-oibre.

17 Agus dh'àithn an rìgh, agus thug iad leo clacha mòra, clacha luachmhora, a shuidheachadh bunait an tighe, clacha snaidhte.

18 Agus shnaidh clachairean Sholaimh, agus clachairean Hiram, agus na gearradhairean-chlach¹¹ iad: mar sin rè thri bliadhna dheasaich iad fiodh agus clachan a thogail an tighe.

CAIB. VI.

1 Thog Solamh teampull do'n Tighearn. 11 Gealladh Dhé a thaobh an teampull. 23 Rinn Solamh dà cherub. 37 An aimsir a ghabh e a thogail an tighe.

A GUS [anns a' cheathramh ceud agus an ceathramh fichead bliadhna o theachd chloinn Israeil a mach á tìr na h-Eiphit,] anns a' cheathramh bliadhna [do rìoghachadh Sholaimh os ceann Israeil,] anns a' mhìos Siph, (is e sin an dara mìos,) thòisich e air tigh a thogail do'n Tighearn.

2 Agus an tigh a thog rìgh Solamh do'n Tighearna, b'iad trì fichead làn-mh-choille

¹ Thìor. ² ceudair. ³ their. Eabh.

⁴ Smuainich mì air. ⁵ 'nan snàmhaichean.

⁶ cuiridh mi o chéile. Eabh. ⁷ cor. Eabh.

⁸ mar a labhair e ris. Eabh.

⁹ gach fear 'na thigh féin. Eabh. ¹⁰ se ceud. II. Eachdr. Caib. II.

¹¹ gibelim. Eabh.

'fhad, agus fheadh làmh-choille a leud, agus deich thar fhichead làmh-choille àirde.

3 Agus an sgàth-thigh¹ air beulaobh teampuill an tighe, b'iad fheadh làmh-choille 'fhad, a réir leoid² an tighe; agus deich làmhan-coille a leud, air beulaobh an tighe.

4 Agus rinn e do'n tigh uinneagan soluis air an tarruing cumhainn.

5 Agus thog e ri³ balla an tighe seòmraiche mu'n cuairt, ri ballachaibh an tighe mu'n cuairt, araon an teampuill agus a' ghuth-àit⁴; agus rinn e frith-sheòmraiche mu'n cuairt.

6 Bha'n seòmar ìochdrach cùig làmh-an-coille air leud, agus an seòmar meadhonach sè làmhan-coille air leud, agus an treas seòmar seachd làmhan-coille air leud, oir thug e steach balla an tighe⁵ mu'n cuairt o'n taobh a muigh, air chor as uach rachadh na sailthean an greim ann am balla an tighe.

7 Agus an uair a bha'n tigh 'ga thogail, thogadh e do chlachaidh air an cunadh mun d'thugadh d'a ionnsuidh iad⁶; agus cha chualas ord no tuagh, no inueal iaruinns sam bith, anns an tigh, an uair a bha e 'ga thogail.

8 Bha dorus an t-seòmar mheadhonaich air taobh deas an tighe: agus air staidh-richibh sniomhain chaidh iad suas do'n t-seòmar mheadhonach, agus as an t-seòmar mheadhonach do'n treas seòmar.

9 Mar so thog e an tigh, agus chrìochnaich se e; agus chòmhdhaich e⁷ an tigh le sailthibh agus le clàraibh seudair.

10 Agus thog e seòmraiche ris an tigh uile, cùig làmhan-coille air àirde: agus leig iad an cudthrom air an tigh le fiodh seudair.

11 Agus thàinig focal an Tighearna gu Solamh, ag ràdh,

12 A thaobh an tighe so a tha thu a' togail, ma ghluaisas tu ann am reachdaibh-sa, agus ma chuireas tu mo bhrèitheanais an gnìomh, agus ma ghleidheas tu m'athèantan uile le gluasad anna: an sin còimhlionaidh⁸ mise m'fhocal duit, a labhair mi ri Daibhidh t'athair:

13 Agus gabhaidh mi còmhnuidh am meadhon chloinn Israeil, agus cha tréig mi mo shluagh Israeil.

14 Mar sin thog Solamh an tigh agus chrìochnaich se e.

15 Agus thog e ballachan an tighe air an taobh a stigh le clàraibh seudair, o urlar an tighe gu ruig mullach nam ballacha⁹ chòmhdhaich e iad le fiodh a stigh: agus

chòmhdhaich e urlar an tighe le clàraibh¹⁰ giuthais.

16 Agus thog e fheadh làmh-choille ri taobhan an tighe, le clàraibh seudair, o'n urlar gu ruig mullach nam ballachan; agus thog e dha iad air an taobh a stigh, eadhon do'n ghuth-àit, do'n ionad ro naomh.

17 Agus bha'n tigh, sin ri ràdh, an teampuill air a bheulaobh, dà fhichead làmh-choille air fad.

18 Agus bha seudair an tighe air an taobh a stigh gearrta¹¹ le cnapaibh, agus blàthaibh fòsgailte: bu sheudair an t-iomlan; cha robh clach r'a faicinn.

19 Agus dh'ulluich e an guth-àit anns an tigh a steach, a chur an sin àire coimhcheangail an Tighearna.

20 Agus ann an taobh-beoil a' ghuth-àit¹² bha fheadh làmh-choille air fad, agus fheadh làmh-choille air leud, agus fheadh làmh-choille air àirde: agus chòmhdhaich se e le h-òr fìor-ghlan: chòmhdhaich e cuideachd an altair le seudair.

21 Agus chòmhdhaich Solamh an tigh a steach le h-òr fìor-ghlan: agus rinn e balla-dealacaidh¹³ le slabhradhibh òir air beulaobh a' ghuth-àit, agus chòmhdhaich e le h-òr e.

22 Agus chòmhdhaich e an tigh uile le h-òr, gus an do chrìochnaicheadh an tigh uile: mar an ceudna an altair uile, a bha làimh ris a' ghuth-àit, chòmhdhaich e le h-òr.

23 Agus rinn e anns a' ghuth-àit dà cherub do chrann-olaidh, gach aon diubh deich làmhan-coille air àirde.

24 Agus bha cùig làmhan-coille ann an aon sgèith a' cheruib, agus cùig làmhan-coille ann an sgèith eile a' cheruib: bha deich làmhan-coille o bhàrr aoin sgèith aige gu bàrr a' sgèith eile.

25 Agus bha deich làmhan-coille anns a' cherub eile: bha'n t-aon tomlas agus an aon mhead anns an dà cherub.

26 B'e àirde aoin cheruib deich làmhan-coille, agus mar sin bha àirde a' cheruib eile.

27 Agus chuir e na cheruban anns an tigh a b'fhaide a steach; agus shin na cheruban an sgiathan a mach, air chlor as gu'n do bhean sgiath aoin cheruib ri aon bhalla, agus sgiath a' cheruib eile ris a' bhalla eile; agus bhean an sgiathan ri chéile ann an meadhon an tighe.

28 Agus chòmhdhaich e na cheruban le h-òr.

29 Agus bhreac e ballachan an tighe uile mu'n cuairt le dealbhaibh gearrta

¹ àilear, for-dhorus; porch. Sasg.

² air beulaobh. Eabh.

³ air.

⁴ àit an

Dé-fhreagraidh; dabir. Eabh. oracle. Sasg.

⁵ rinn e socairean cumhainn ann am balla an tighe.

⁶ do chloich iomlan, do chloich dheasaichte roimh

làimh.

⁷ chuir e ceann air.

⁸ dàingnichidh.

⁹ gu ruig ballacha cinn an tighe.

¹⁰ bòrdaibh.

¹¹ breacta, air a ghràbhaladh.

¹² anns a' chuid-thoisich do'n oracul.

¹³ lantaoir. Eir. partition. Sasg.

cheruban, agus chraobhan-pailme, agus bhlàth fosgailte¹, a stigh agus a muigh.

30 Agus urlar an tighe chomhdaich e le h-òr, a stigh agus a muigh.

31 Agus do dhorus a' ghuth-àit rinn e còmhlaichan do chrann-olaidh: *bha'n* t-àrd-dhorus agus na h-ursainnean cuig-oisneach.

32 *Bha'n* dà chòmhlaich mar an ceudna do chrann-olaidh; agus ghearr e orra dealbhan² cherub, agus chraobh-pailme, agus bhlàth fosgailte, agus chomhdaich e le h-òr *iad*: agus sgaoil e òr air na cheruban, agus air na craobhan-pailme.

33 Agus air an dòigh cheudna rinn e do dhorus an teampuill ursainnean do chrann-olaidh, ceithir-chearnach.

34 Agus *bha'n* dà chòmhlaich do fhiodh giuthais; *bha* dà dhuilleag aoin chomhlaich a' filleadh, agus dà dhuilleag a' chomhlaich eile a' filleadh.

35 Agus ghearr e orra cheruban, agus craobhan-pailme, agus blàthan-fosgailte: agus chomhdaich e *iad* le h-òr, cumta ris an obair ghearrta.

36 Agus thog e a' chùirt a stigh le tri sreathan³ do chlachaihb snaidhte, agus sreath do shailthibh seudair.

37 Anns a' cheathramh bliadhna shuidh-icheadh bunait tighe an Tighearn, anns a' mhìos Siph.

38 Agus aims an aon bhliadhna dheug, anns a' mhìos Bul, (*is* e sin an t-ochdamh mìos,) chrìochnaich eadh an tigh ann a earrannaibh uile, agus a rèir a chumaidh uile. Agus *bha* e seachd bliadhna 'ga thogail.

CAIB. VII.

1 *Thog Solamh tigh dha fèin*; 2 *tigh frithe Lebanon*; 8 *agus tigh do nighinn Pharaoh*. 15 *Obair nam post*; 23 *agus na mura leaghta*.

ACH *bha* Solamh tri bliadhna deug a' togail a thighe fèin, agus chrìochnaich e a thigh uile.

2 Thog e mar an ceudna tigh frithe⁴ Lebanon; ceud làmh-choille 'fhad, agus leth-cheud làmh-choille a leud, agus deich thar fhichead làmh-choille àirde; air ceithir⁵ sreathaibh do phuist seudair, agus sailthean seudair air na puist.

3 Agus chomhdaich e le seudar os a cheann air na sailthibh, *bha* air dà fhichead agus cuig puist, cuig-deug anns gach sreath.

4 Agus *bha* tri sreathan uinneag⁶ ann, agus solus fa chomhair soluis tri uairean.

5 Agus *bha* na dorsan uile agus na h-ursainnean ceithir-chearnach, maille ris na h-uinneagaibh: agus *bha* solus fa chomhair soluis tri uairean.

6 Agus rinn e sgàth-thigh do phuist; leth-cheud làmh-choille 'fhad, agus deich làmh-choille thar fhichead a leud; agus *bha'n* sgàth-thigh rompa sin; agus *bha* na puist eile agus na sailthean garbha rompa.

7 Rinn e, mar an ceudna, sgàth-thigh na righ-chaitheach far am biodh e a' tabhairt breth, *eadhon* sgàth-thigh a' bhreitheanais: agus chomhdaich e le seudar o aon taobh do'n urlar gu ruig an taobh eile.

8 Agus aig a thigh fèin anns an do chomhnuich e, *bha* cuirt⁷ eile an taobh a stigh do'n sgàth-thigh, a *bha* do'n obair cheudna. Rinn e cuideachd tigh do nighinn Pharaoh, a ghabh Solamh dha fèin 'na mnaoi, cosmhuil ris an sgàth-thigh so.

9 *Bha* iad sin uile do chlachaihb luachmhora, a rèir tomhais chlach snaidhte, air an gearradh⁸ le sàbhaibh a stigh agus a muigh, eadhon o'n bhunait gu ruig na clacha-mullaich⁹, agus *mar sin* air an taobh a mach gu ruig a' chùirt mhòr.

10 Agus *bha* a' bhunait do chlachaihb luachmhora, do chlachaihb mòra; clacha san robh deich làmh-choille, agus clacha san robh ochd làmh-choille.

11 Agus gu h-àrd *bha* clacha luachmhora, (a rèir tomhais chlach snaidhte,) agus seudair.

12 Agus aig a' chùirt mhòir mu'n cuairt *bha* tri sreathan do chlachaihb snaidhte, agus sreath do shailthibh seudair: air an dòigh cheudna aig cuirt a steach tighe an Tighearn, agus aig sgàth-thigh an tighe.

13 Agus chuir righ Solamh *fìos*, agus thug e Hiram o Thirus.

14 *Bu* mhac bantraich e do thréibh¹⁰ Naphtali, agus b'fhear o Thirus 'athair, ceard umha; agus *bha* e làn do ghliocas, agus do thuigse, agus do eòlas a dheanamh gach oibre ann an umha: agus thàinig e dh'ionnsuidh righ Solamh, agus rinn e obair uile.

15 Oir dhealbha e dà phost umha: ochd làmh-choille deug àirde gach puist dhiubh, agus chaidh suathainn anns an robh dà làmh-choille dheug mu'n cuairt air gach¹¹ post dhiubh.

16 Agus rinn e dà cheann do umha leaghta, chum an cur air mullach nam post: cuig làmh-choille àirde aoin chinn, agus cuig làmh-choille àirde a' chinn eile.

17 Lìonta do lìon-obair¹², stioman do obair shlabraidh, do na cinn a *bha* air mullach nam post: seachd do aon cheann, agus seachd do'n cheann eile.

¹ fosgladh bhlàthan. Eabh.

² gearradh.

³ breathan.

⁴ coille.

⁵ trì.

⁶ leusan, sholusan.

⁷ lann, lios.

⁸ sàbhadh.

⁹ clachan-iomchair.

¹⁰ do fhineadh, do chloinn.

¹¹ an dara. Eabh.

¹² do obair tharsuinn.

18 Agus rinn e pomgranatan, dà shreath¹ mu'n cuairt air aon lìon-obair, a chòmhdachadh nan ceann a *bha* air mullach nam post²: agus mar sin rinn e ris a' cheann eile.

19 Agus *bha* na cinn a *bh'*air mullach nam post do obair lili anns an sgàth-thigh, ceithir làmhan-coille.

20 Agus *bha* cinn³ air an dà phost mar an ceudna gu h-àrd, làimh ris a' bhalg a *bha* air an taobh thall do'n lìon-obair: agus *bha* dà cheud pomgranat ann, 'nan sreathaibh mu'n cuairt air a' cheann eile.

21 Agus chuir e suas na puist ann an sgàth-thigh an teampuill: agus chuir e suas am post deas, agus thug e Iachin mar ainm air; agus chuir e suas am post clì, agus thug e Boas mar ainm air.

22 Agus air mullach nam post *bha* obair lili: mar so chrìochnaich e obair nam post.

23 Agus rinn e muir leaghta, deich làmhan-coille o bhile⁴ gu bile; cruinn mu'n cuairt, agus cùig làmhan-coille a h-àirde: agus chuairtich snàthainn dheich làmhan-coille thar fhichead i air gach taobh.

24 Agus *bha* mill fuidh a bile 'ga cuairt-eachadh mu'n cuairt, deich anns an làmh-choille, a' dol mu thimchioll na mara: thilgeadh dà shreath mheall an uair a thilgeadh i féin.

25 Sheas i air dà dhamhl dheug, trì ag amharc gu tuath, agus trì ag amharc an iar⁵, agus trì ag amharc gu deas, agus trì ag amharc an ear⁶: agus *chuireadh* a' mhuir orra gu h-àrd, agus *bha* a' chuid dheiridh dhiubh uile a stigh.

26 Agus *bha* leud boise air tiughaid innte, agus *bha* a bile air a dheanamh mar bhile copain, le blàthaibh lili: chum i dà mhile bat.

27 Agus rinn e deich buinn⁷ umha: ceithir làmhan-coille fad gach⁸ buinn, agus ceithir làmhan-coille a leud, agus trì làmhan-coille 'àirde.

28 Agus *bha* obair nam bonn *air an dòigh* so: *bha* iomaill⁹ aca, agus *bha* na h-iomaill eadar na tàdhacha¹⁰.

29 Agus air na h-iomaill a *bha* eadar na tàdhacha *bha* leòmhain, daimh, agus cheruban: agus air na tàdhachaibh *bha* mar sin¹¹ gu h-àrd: agus fuidh na leòmhain agus na daimh *bha* ath-leasachadh a dh'-obair thana¹².

30 Agus *bha* ceithir rothan umha aig gach bonn, agus clàir¹³ umha; agus aig a' cheithir oisnibh *bha* guailne¹⁴: fuidh'n t-soitheach-ionnlaid *bha* guailne leaghta,

aig taobh gach ath-leasachaidh.

31 Agus *bha* a bheul an taobh a stigh do'n cheann, agus shuas, làmh-choille *air leud*: ach *bha* a bheut cruinn, a *rèir* oibre a' bhuinn, làmh-choille gu leth: agus mar an ceudna air a bheul *bha* gearraidhean¹⁵, agus an iomaill ceithir-chearnach, cha'n ann cruinn.

32 Agus *bha* ceithir rothan fuidh na h-iomallaibh; agus *bha* mulan¹⁶ nan roth an *greim* anns a' bhonn: agus *b'e* àirde gach rotha làmh-choille gu leth.

33 Agus *bha* obair nan roth cosmhail ri obair rotha carbaid: *bha* am mulan, agus an cìochan, agus an cuairsgeinean, agus an tarsanain uile leaghta.

34 Agus *bha* ceithir guailne ri ceithir oisnibh gach buinn; na guailne do'u bhonn féin.

35 Agus ann am mullach a' bhuinn, leth làmh-choille air àirde, *bha* cuairt mu thimchioll: agus air mullach a' bhuinn *bha* a làmhan¹⁷ agus 'iomaill dheth féin.

36 Agus air clàraibh a làmh, agus air 'iomallaibh, ghearr e cheruban, leòmhain, agus craobha-pailme, a *rèir* riochd gach aoin diubh, agus ath-leasachadh mu'n cuairt.

37 Mar so rinn e na deich buinn: an t-aon tilgeadh, an t-aon tomhas, an t-aon ghearradh¹⁸ aca uile.

38 Agus rinn e deich soitheachan-ionnlaid umha: chumadh¹⁹ gach soitheach-ionnlaid dhiubh dà fhichead bat: *bha* ceithir làmhan-coille anns gach soitheach ionnlaid: *chuireadh* aon soitheach-ionnlaid air gach aon do na deich buinn.

39 Agus chuir e cùig buinn air taobh²⁰ na làimhe deise do'n tigh, agus cùig air taobh na làimhe clithe dheth: agus chuir e a' mhuir air taobh na làimhe deise do'n tigh, a làimh na h-àirde 'n ear, fa chomhair na h-àirde deas.

40 Agus rinn Hiram na soitheachan-ionnlaid, agus na slusaidean, agus na cuachan: agus chuir Hiram crìoch air deanamh na h-oibre uile a rinn e do rìgh Solamh air son tighe an Tighearn:

41 An dà phost, agus dà chuairt²¹ nan ceann a *bh'*air mullach an dà phuist; agus an dà lìon-obair a chòmhdachadh dà chuairt nan ceann a *bh'*air mullach nam post:

42 Agus ceithir cheud pomgranat do'n dà lìon-obair: dà shreath phomgranat do gach lìon-obair, a chòmhdachadh dà chuairt nan ceann a *bh'*air na puist:

43 Agus na deich buinn, agus na deich soitheachan-ionnlaid air na buinn:

¹ na puist, agus dà shreath. ² air a' mhullach, maille ri pomgranataibh. ³ Bha pomgranatan aig na cinn.

⁴ fhoir. ⁵ siar. ⁶ sìor. ⁷ bunaitle. ⁸ aoin. Eabh. ⁹ foircan.

¹⁰ ceumann. ¹¹ bonn. ¹² obair shìnte.

¹³ lannan. ¹⁴ prùip, casan, buill-timchair.

¹⁵ gravings. Sasg. ¹⁶ aisélan; làmhan. Eabh.

¹⁷ tharsanain. ¹⁸ mheud.

¹⁹ ghabhadt. ²⁰ gualainn. Eabh.

²¹ soitheach cruinn.

44 Agus aon mhuir, agus dà dhàmh dheug fuidh 'n mhuir:

45 Agus na h-aighnean¹, agus na sluasaidean, agus na cuachan: agus ua soithiche sin uile a rinn Hiram do rìgh Solamh air son tighe an Tighearna, *bha iad* do umha lìobhta².

46 Ann an còmhnard Iordain thilg an rìgh iad, anns an talamh chreadha eadar Sucot agus Sartan.

47 Agus dh'fhàg Solamh na soithichean³ uile *gun chothromachadh*, air son an lionmhoireachd anbarraich; cha d'fhuaradh a mach⁴ cothrom an umha.

48 Agus rinn Solamh an t-uidheam⁵ uile a *bhuineadh* do thigh an Tighearna: an altair do òr, agus am bòrd, air an robh aran na fianuis, do òr:

49 Agus na còinnleirean, cùig air an làimh dheis, agus cùig air an làimh chlì, air beulaobh a' ghuth-àite, do òr fìor-ghlan; agus na blàthan, agus na lòchrain, agus na clobhachan⁶, do òr.

50 Agus na cuachan, agus na smàladair-ean, agus na copain, agus na spàinean, agus na tùiseirean, do òr fìor-ghlan: agus na lùdagan do òr, an dà chuid do dhors-aibh an tighe a steach, *eadhon* an *ionaid* ro naoimh, agus do dhors-aibh an tighe, *eadhon* an teampull.

51 Agus chrìochnaicheadh an obair uile a rinn rìgh Solamh air son tighe⁷ an Tighearna: agus thug Solamh a stigh nìthe naomhaichte⁸ Dhaibhidh 'athar; *eadhon* an t-airgid, agus an t-òr, agus an t-uidheam⁹, chuir e am measg ionmhais tighe an Tighearna.

CAIB. VIII.

1 Thug Solamh agus seanairean Israeil an àire suas do'n ionad naomh. 14 Bheannaich Solamh an coimhthional. 22 Rinn e urnuigh ri Dia. 62 Thug e seachad iobairtean thabhartasa-sith.

AN sin chruinnich Solamh seanairean A Israeil, agus cinn nan treubh uile, ceannardan aithriche chloinn Israeil, gu rìgh Solamh ann an Ierusalem, chum gu'n tugadh iad a nìs àire coimhcheangail an Tighearna, á baile Dhaibhidh: *is e sin Sion*.

2 Agus chruinnich fir Israeil uile iad fèin a dh'ionnsuidh rìgh Solaimh, air an fhéill¹⁰ ann am mìos Ètanim; *is e sin an seachdamh mìos*.

3 Agus thàinig uile sheanairean Israeil, agus thog na sagairt an àire.

4 Agus thug iad suas àire an Tighearna, agus pàilliu a' choimhthionail, agus an t-uidheam naomh uile a *bha sa'* phàilliu; *eadhon iad sin thug na sagairt agus na Lebhitich suas*.

5 Agus *bha* rìgh Solamh, agus coimhthional Israeil uile, a thionail d'a ionnsuidh, maille ris roimh an àire, ag iobradh chaorach, agus cruith, nach robh e'n comas àireamh, no mheas, a thaobh lionmhoireachd.

6 Agus thug na sagairt a steach àire coimhcheangail an Tighearna d'a h-àite fèin, do ghuth-àit an tighe, do'n *ionad* a's ro naomh, *eadhon* fuidh sgiathaibh nan cherub.

7 Oir sgaoil na cheruban a mach an sgiathan os ceann àite na h-àire, agus chòmhdaich na cheruban an àire, agus a lunnan¹¹ gu h-àrd.

8 Agus tharruing iad a mach na lunnan, air chor as gu'm faicte cinn nan lunn as an *ionad* naomh fa chomhair a' ghuth-àite, ach cha'n fhaicte a mach iad: agus tha iad an sin gu an là'n diugh.

9 Cha robh nì air bith anns an àire ach an dà chlàr chloiche, a chuir Maois an sin ann an Horeb, an uair a rinn an Tighearna *coimhcheangal* ri cloinn Israeil, ag teachd a mach dhoibh á tìr na h-Eiphit.

10 Agus an uair a thàinig na sagairt a mach as an *ionad* naomh, lion an neul tigh an Tighearna,

11 Air chor as nach b'urrainn na sagairt seasamh a fhrithealadh leis an neul: oir lion glòir an Tighearna tigh an Tighearna.

12 Ann sin thubhairt Solamh, Thubhairt an Tighearna gu'n gabhadh e còmhnuidh ann an dorchadas tiugh.

13 Gu dearbh thog mise tigh-còmhnuidh dhuit, àite deas¹² chum thu dh'fhantuinn ann gu bràth.

14 Agus thionndaidh an rìgh 'aghaidh, agus bheannaich e uile choimhthional Israeil: (agus uile choimhthional Israeil 'nan seasamh:)

15 Agus thubhairt e, Gu ma beannaichte an Tighearna Dia Israeil, a labhair le 'bheul fèin ri m'athair Daibhidh, agus a choimhlion e le 'làimh¹³, ag ràdh,

16 O'n là air an d'thug mi mo shluagh Israel a mach as an Eiphit, cha do thagh mi baile sam bith á uile threubhan¹⁴ Israeil a thogail tighe, chum gu'm biodh m'ainm an sin: ach thagh mi Daibhidh gu bhì os ceann mo shluagh Israeil.

17 Agus *bha* e ann an cridhe Dhaibhidh m'athar, tigh a thogail do ainm an Tighearna Dé Israeil.

18 Agus thubhairt an Tighearna ri Daibhidh m'athair, A chionn gu'n robh e ann do chridhe tigh a thogail do m'ainm-sa, is maith a rinn thu gu'n robh e ann do chridhe:

19 Gidheadh, cha tog thusa an tigh, ach

¹ poitean.

² dealrach, fìor-ghlan.

³ an t-uidheam.

⁴ cha dr'annsaicheadh.

⁵ an airneis, na soithiche.

⁶ tanchairean.

⁷ ann an tigh.

⁸ nìthe coisrigte.

⁹ na soithiche.

¹⁰ fhéist.

¹¹ bataichean.

¹² suidhichte.

¹³ le'chumhachd.

¹⁴ theoghlaichibh, fhineachaiibh.

do mhac a thig a mach as do leasraidh, togaidh esan an tigh do m'ainm-sa.

20 Agus choimhli¹ an Tighearna fhocal a labhair e; agus dh'éirich mise suas an àite Dhaibhidh m'athar, agus tha mi a'm shuidhe air righ-chaithir Israeil, mar a labhair² an Tighearna, agus thog mi tigh do ainm an Tighearna Dé Israeil.

21 Agus shuidhich m'in sin àite do'n àire, anns am bheil coimhcheangal an Tighearna, a rinn e r'ar n-aithrichibh, an uair a thug e mach iad á tir na h-Eiphit.

22 Agus sheas Solamh air beulaobh altair an Tighearna, ann an làthair uile choimhthionail Israeil, agus sgaoil e mach a làmhnan gu nèamh:

23 Agus thubhairt e, A Thighearna Dhé Israeil, cha 'n'eil Dia ann cosmhuil riutsa, anns na nèamhaibh shuas, no air an talamh a bhos³, a chumas coimhcheangal agus tròcair ri d' sheirbhiseach a ghluais-eas a'd'fhianuis le'n uile chridhe:

24 A chum ri t'òglach Daibhidh m'athair an nì a labhair thu ris; oir labhair thu le d' bheul, agus le d' làimh choimhli¹on thu, mar air an là'n diugh.

25 A nis uime sin, a Thighearna Dhé Israeil, cum ri t'òglach Daibhidh m'athair an nì a labhair thu ris, ag ràdh, Cha bhi duine dhith ort a'm'fhianuis-sa, a shuidheas air righ-chaithir Israeil; ma bheir a mhàin do chlann an aire d'an slighe, le gluasad a'm'fhianuis-sa, mar a ghluais thusa a'm'fhianuis.

26 Agus a nis, a Dhé Israeil, daingnich-ear⁴, guidheam ort, t'fhocal, a labhair thu ri t'òglach Daibhidh m'athair.

27 Ach an gabh Dia da rìreadh còmh-nuidh air an talamh⁵ feuch, cha chum na nèamhan agus nèamhan nan nèamh thusa; cia gu mòr as lugha na sin an tigh so a thog mise?

28 Gidheadh amhaire air⁶ urnuigh do sheirbhiseich, agus air athchuinge⁶, a Thighearna mo Dhia, a dh'éisdeachd ris a' ghlaodh agus ris an urnuigh, a tha do sheirbhiseach a' deanamh a'd'fhianuis an diugh:

29 A chum gu'm bi do shùilean fosga-ailte ris an tigh so a dh'oidhche agus a là; eadhon ris an àite mu'n dubhairt thu, Bitlúdh m'ainm an sin: a chum gu'n éisd thu ris an urnuigh a nì do sheirbhiseach a dh'ionnsuidh an àite so⁷.

30 Agus éisd thusa ri athchuinge do sheirbhiseich, agus do shluaigh Israeil, an uair a ni iad urnuigh a dh'ionnsuidh an àite so: agus éisd thusa o d' àite-còmh-nuidh, o na nèamhaibh⁸, agus an uair a

dh'éisdeas tu, maith⁹ dhoibh.

31 Ma pheacaicheas duine an aghaidh a choimhearsnaich, agus ma dh'iarras e miannan air, a' toirt air mionnachadh, agus gu'n tig na miannan air beulaobh t'altarach anns an tigh so;

32 An sin éisd thusa o na nèamhaibh, agus dean, agus thoir breth air do sheirbhiseich, a' dìteadh an aingidh, gu 'shlighe a thabhairt air a cheann féin; agus a' fir-eanachadh¹⁰ an fhèin, a thabhairt da a réir 'fhìreantachd¹¹.

33 An uair a bhuailear do shluaigh Is-rael an làthair an nàmhaid, a chionn gu'n do pheacaich iad a'd' aghaidh, agus a philleas iad riut, agus a dh'aidicheas iad t'ainm, agus a nì iad urnuigh, agus a ghuidheas iad ort anns an tigh so;

34 An sin éisd thusa o na nèamhaibh, agus maith peacadh do shluaigh Israeil, agus thoir a ris iad do'n fhearann a thug thu d'an aithrichibh.

35 An uair a dhruidear na nèamhan, agus nach bi uisge ann, a chionn gu'n do pheacaich iad a'd' aghaidh-sa, agus a nì iad urnuigh a dh'ionnsuidh an àite so, agus a dh'aidicheas iad t'ainm, agus a dh'iompaichear iad o'm peacadh, an uair a chuireas tu fuidh àmhghar iad;

36 An sin éisd thusa o na nèamhaibh, agus maith peacadh do sheirbhiseach, agus do shluaigh Israeil, a chum gu'n teagaisg thu dhoibh an t-slighe mhaith anns an còir dhoibh ghluasad, agus gu'n cuir thu uisge air t'fhearann, a thug thu do d' shluaigh mar oighreachd.

37 Ma bhios gorta anns an tìr, ma bhios plàigh ann, seargadh, fuar-dhealt¹², locuist, ma bhios burruis¹³ ann; ma theann-ai-cheas¹⁴ a nàmhaid e ann an tìr a bhaile, ciod air bith plàigh, ciod air bith euslaint a bhios ann:

38 Ge b'e urnuigh, ge b'e athchuinge a chuirear suas le duine sam bith, no le d' shluaigh Israel uile, ma bhios fios aig gach aon air plàigh a chridhe féin, agus ma sgaoileas e mach a làmhnan a dh'ionnsuidh an tighe so;

39 An sin éisd thusa o na nèamhaibh t'àite-còmhnuidh, agus maith, agus dean, agus thoir do gach duine a réir a shligh-ean uile, a tha fios agad air a chridhe; (oir is ann agadsa, agadsa mhàin a tha fios air cridheachaibh uile chloinn nan daoine:)

40 A chum gu'm bi eagal orra romhad-sa rè nan uile làithean a bhios iad beò anns an fhearann¹⁵, a thug thu d'ar n-aithrichibh.

¹ dhaingnich. Eabh.

² gheall.

³ shìos.

⁴ fìrinnichear. ⁵ b'iodh suim agad do.

⁶ aslach. ⁷ a làmh an àite so, anns an àite so.

⁸ ann ad àite-còmhnuidh, ann am fàiticheas.

⁹ lagh. ¹⁰ a' saoradh, glanadh. ¹¹ ionnacaas.

¹² crith-reodh, mill-cheo, earc-dhrùchd.

¹³ lus-chuach; caterpillar. Sasg. hasil. Eabh.

¹⁴ chumhainncheas, chuàrticheas.

¹⁵ air aghaidh an fhearainn. Eabh.

¹⁶ A thuill' air sin.

41 Os bàrr¹⁶, a thaobh coigrich nach *'eil* do¹ shluagh Israel, ach a thig à tìr chéin¹ air sgàth t'ainm-sa,

42 (Oir cluinidh iad mu t'ainm mòr-sa, agus mu d'làimh làidir, agus do ghairdean sìnte mach:) an uair a thig e agus a nì e urnuigh a dh'ionnsuidh an tighe so;

43 Eisd thusa o na nèamhaibh t-àite-còmhnuidh, agus dean a réir nan uile *nìthe* mu'n glaoth an coigreach riut: air chor as gu'm bì eòlas aig uile shlòigh na talmhainn air t-ainmsa, chum gu'm bì eagal orra romhad mar *a ta air* do shluagh Israel, agus gu'm bì fios aca gu bheil an tigh so a thog mise air 'ainmeachadh ort.

44 Ma théid do shluagh a mach a chogadh an aghaidh an naimhde, ge b'e rathad a chuireas tu iad, agus gu'n dean iad urnuigh ris an Tighearn a làimh² a' bhaile a ròghnaich thusa, agus an tighe a chuir mise suas do t'ainm;

45 An sin éisd thusa o na nèamhaibh r'an urnuigh agus r'an athchuinge, agus seas³ an còir.

46 Ma pheacaicheas iad a d' aghaidh, (oir cha *'n'eil* duine ann nach peacaich,) agus gu'n las t'fhearg⁴ nan aghaidh, agus gu'n toir thu thairis iad d'an naimhdibh, agus gu'n toir iad leo 'nam braighdibh iad do thìr an naimhdean, am fad no'm fagus;

47 *Gidheadh*, ma nì iad aithreachas 'nan cridhe⁴ anns an tìr d'an d'thugadh 'nam braighdibh iad, agus ma dh'iompaichear iad, agus ma ghuidheas iad ort ann an tìr na muinntir a thug leo 'nam braighdibh iad, ag ràdh, Pheacaich sinn, rinn⁵ sinn gu h-eucorach, rinn sinn gu h-aingidh;

48 *Agus mar so* ma philleas iad a d' ionnsuidh-sa le'n⁶ uile chridhe, agus le'n uile anam, ann an tìr an naimhdean, a thug leo 'nam braighdibh iad, agus *ma* nì iad urnuigh riutsa rathad an tìre féin, a thug thu d'an aithrichibh, *rathad* a' bhaile a ròghnaich thu, agus an tighe a thog mi do t'ainm;

49 An sin éisd thusa o na nèamhaibh, t'àite-còmhnuidh, r'an urnuigh agus r'an athchuinge, agus seas an còir,

50 Agus maith do d' shluagh a pheacaich a d' aghaidh, agus an eusaontais uile a rinn iad a d' aghaidh, agus faigh truas dhoibh an làthair na muinntir a thug leo 'nam braighdibh iad, a chum gu'n gabh iad truas ri u:

51 Oir *is iad* do shluagh-sa agus t'oighreachd iad, a thug thu mach as an Eiphit, à meadhon na h-àmhuinne iarum:

52 A chum gu'm bì do shùilean fosgailte ri athchuinge do sheirbhisich, agus ri

athchuinge do shluaigh Israeil, a dh'éisd-eachd riu anns gach uì mu'n gairm iad ort.

53 Oir dhealaich thu iad chum oighreachd dhuit féin o uile shluagh na talmhainn, mar a labhair thu le làimh Mhaois t'òglaich féin, an uair a thug thu ar n-aithriche mach as an Eiphit, a Thighearna Dhé.

54 Agus an uair a chuir Solamh crìoch air an urnuigh so uile a dheanamh ris an Tighearn, agus an athchuinge so, dh'éirich e o bheulaobh altarach an Tighearn, o e féin a lùbadh air a ghlùinibh, agus a làmhann sgaoilte dh'ionnsuidh nan nèamh:

55 Agus sheas e, agus bheannaich e uile choimhthional Israeil, le guth mòr, ag ràdh,

56 Gu ma beannaichte an Tighearn a thug suainhneas⁷ d'a shluagh Israel, a réir nan uile *nìthe* a labhair⁸ e: cha do thuit⁹ aon fhocal *gu làr* d'a bhriathraibh maithe uile, a labhair e le làimh Mhaois, 'òglaich féin.

57 Gu'n robh an Tighearn ar Dia maille ruinne, mar a bha e maille ri'r n-aithrichibh: na fàgadh e sinn, agus na tréigeadh e sinn;

58 A chum gu'n aom e ar cridhe thuige¹⁰ féin, a ghluasad 'na shlighibh uile, agus a ghleidheadh àithcantan, agus a reachd-an, agus a bhreitheanas, a dh'àithn e d'ar n-aithrichibh.

59 Agus gu'n robh na briathra so agam-sa, leis an do chuir mi suas athchuinge am fianuis an Tighearn, am fagus do'n Tighearn ar Dia a là agus a dh'oidhche, a chum gu'n seas e còir a sheirbhisich, agus còir a shluaigh Israeil, anns gach àm, mar a dh'iarras a' chùis¹¹:

60 A chum gu'm bì fios aig uile shluagh na talmhainn gur e'n Tighearn a's Dia ann, agus nach *'eil* ann ach e.

61 Bitheadh bhur cridhe uime sin iomlan leis an Tighearn ar Dia, a ghluasad 'na reachdaibh, agus a ghleidheadh àith-eantan, mar air an là'n diugh.

62 Agus dh'ìobair an rìgh, agus Israel uile maille ris, ìobairt am fianuis an Tighearn.

63 Agus dh'ìobair Solamh ìobairt thabh-artasa-sith, a dh'ìobair e do'n Tighearna, dà mhìle thar fhichead bò, agus ceud agus fichead mìle caora: mar sin choisrig¹² an rìgh, agus clann Israeil uile, tigh an Tighearn.

64 Air na là sin féin naomhaich an rìgh meadhon na cùirte a bh'air beulaobh tighe an Tighearn: oir thug e suas an sin ìobairte-loisgte, agus tabhartasa-bìdh, agus saill nan tabhartas-sith; a chionn

¹ fad as. ² a dh'ionnsuidh.
³ cum suas; dean. Eabh. ⁴ ma philleas iad
d'an cridhe. Eabh. ⁵ agus rinn. ⁶ nan. Eabh.

⁷ fois, tàmh. ⁸ gheall. ⁹ cha d'fhàilnich
¹⁰ chuige. ¹¹ gnothach gach là 'na làtha
féin. Eabh. ¹² naomhaich.

gu'n robh an altair umha a bha'm fianuis an Tighearna, ro bheag a ghabhail nan iobairt-loisgte, agus nan tabhartas-bidh, agus saill nan tabhartas-sith.

65 Agus chum Solamh anns an àm sin féill¹, agus Israel uile maille ris, coimh-thional mòr, o dhol a stigh Hamait gu ruig amhainn na h-Eiphit, am fianuis an Tighearna ar Dè, seachd làithean agus seachd làithean, eadhon ceithir là deug.

66 Air an ochdamh là leig e air falbh an sluagh: agus bheannaich iad an rìgh, agus chaidh iad a dh'ionnsuidh am bùth, subhach agus aoibhinn 'nan cridhe, air son a' mhaith uile a rinn an Tighearna do Dhaibhidh a sheirbhiseach agus d'a shluagh Israel.

CAIB. IX.

1 *Rinn Dia, an dara uair, coimheangal ri Solamh.*

11 *Thug Solamh fichead baile do Hiram air son a sheirbhis dha.* 20 *Rinneadh tràillean do na Canaanich.*

AGUS an uair a chuir Solamh crìoch air tigh an Tighearna, agus tigh an rìgh a thogail, agus uile mhiann Sholaimh bu taitneach leis a dheanamh,

2 Dh'fhoillsich an Tighearna e fèin do Sholamh an dara uair, mar a dh'fhoillsich se e fèin da ann an Gibeon.

3 Agus thubhairt an Tighearna ris, Chuala mi t'urnuigh agus t'atichuinge a chuir thu suas a'm' fianuis: naomhaich mi an tigh so a thog thu, a chur m'ainme an sin gu bràth; agus bithidh mo shùilean agus mo chridhe an sin gach là².

4 Agus ma ghluaiseas tusa ann am fianuis, mar a ghluais Daibhidh t'athair, ann an iomlaine cridhe, ann an ionracas, a dheanamh a réir nan uile nithe a dh'àithn mise dhuìt, agus gu'n gléidh thu mo reachdan agus mo bhreitheanaibh,

5 An sin daingnichidh mise caithir do rìoghachd air Israel gu bràth, mar a labhair mi ri Daibhidh t'athair, ag ràdh, Cha bli duine dhith ort air rìgh-caithir Israeil.

6 Ach ma thionndaidheas sibh da rìreadh o m' leantuinn-sa sibh fèin agus bhur clann, agus nach gléidh sibh m' àitheantan agus mo reachdan a chuir mi roimhibh, ach gu'm falbh sibh agus gu'n dean sibh seirbhis do dhiathaibh eile, agus gu'n sleuchd sibh³ dhoibh;

7 An sin gearraidh mise Israel as bhàrr aghaidh an fhearainn a thug mi dhoibh: agus an tigh so a naomhaich mi do m'ainm fèin, tilgidh mi as mo shealladh; agus bithidh Israel 'na ghnàth-fhocal, agus na leth-fhocal⁴ am measg nan uile shluagh:

8 Agus an tigh so a bha⁵ co àrd, gach neach a ghabhas seachad air, bithidh

iongnadh air, agus ni e sgeig⁶; agus their iad, C'ar son a rinn an Tighearna mar so ris an tìr so, agus ris an tigh so?

9 Agus freagraidh⁷ iad, A chionn gu'n do thréig iad an Tighearna an Dia, a thug a mach an aithriche á tìr na h-Eiphit, agus gu'n do ghabh iad d'an ionnsuidh⁸ diathan eile, agus gu'n do shleuchd iad dhoibh, agus gu'n do rinn iad seirbhis dhoibh; uime sin thu an Tighearna orra an t-olc so uile.

10 Agus an ceann fhichead bliadhna, anns an do thog Solamh an dà thigh, tigh an Tighearna agus tigh an rìgh,

11 *A chionn gu'n d'thug Hiram rìgh Thiruis seachad do Sholamh fiodh seud-air, agus fiodh giuthais, agus òr, gu 'uile thoil, an sin thug rìgh Solamh do Hiram fichead baile ann an tìr Ghalile.*

12 Agus thàinig Hiram a mach á Tirus a dh'fhaicinn nam bailtean a thug Solamh dha; ach cha do thaitinn iad ris.

13 Agus thubhairt e, Ciod iad na bailte sin a thug thu dhomh, a blurathair? Agus thugadh fearann Chabuil mar ainm orra gus an là'n diugh.

14 Agus chuir Hiram a dh'ionnsuidh an rìgh sè fichead tàlann òir.

15 Agus is e so aobhar na cìse a thog rìgh Solamh a thogail tìghe an Tighearna, agus a thighe fèin, agus Mhilo, agus balla Ierusalem, agus Hasoir, agus Mhegido, agus Gheseir.

16 Chaidh Pharaoh rìgh na h-Eiphit suas, agus ghlac e Geser, agus loisg se e le teine, agus mharbh e na Canaanach a bha chòmhnuidh sa' bhaile, agus thug se e mar thiodhlac d'a nighina, mnaoi Sholaimh.

17 Agus thog Solamh Geser, agus Bethoron iochdarach,

18 Agus Baalat, agus Tadmor san fhàsach, anns an tìr,

19 Agus na h-uile bhailte ionmhais a bh'aig Solamh, agus bailtean a charbad, agus bailtean a mharc-shluaigh, agus miann Sholaimh a mhiannaich e thogail ann an Ierusalem, agus ann an Lebanon, agus ann an tìr a thighearnaibh⁹ uile.

20 Agus an sluagh uile a dh'fhagadh beò do na h-Amoraich, do na Hitich, do na Peridsich, do na Hibich, agus do na Iebusaich, nach robh do chloinn Israeil,

21 An clann a dh'fhagadh 'nan dèigh san tìr, nach b'urraim clann Israeil a sgrios gu tur, dhiubhsan thog Solamh daor-chis gus an là'n diugh.

22 Ach do chloinn Israeil cha d'rinn Solamh tràill sam bith: ach bha iad 'nam fir-chogaidh, agus 'nan seirbhisich aige, agus 'nan uachdaranabhaibh, agus 'nan ceann-

¹ cuirm, féisd.

² an còmhnuidh.

³ crom sibh sìos. Eabh. ⁴ fhocal-fochaid. ⁵ tha.

⁶ feadaidh e; he will hiss. Sasg. ⁷ their. Eabh.

⁸ rinn iad grein air. ⁹ uachdaranachd.

ardaibh, agus 'nan riaghlairibh a charbad agus a mharc-shluaigh.

23 *B'iad* so uachdarain an luchd-dreuchd a *bha* os ceann oibre Sholaimh, cùig ceud agus leth-cheud, a riaghail os ceann an t-sluaigh a dh'oibrich san obair.

24 Ach chaidh nighean Pharaoh suas á baile Dhaibhidh d'a tigh féin, a thog *Solamh* dhi: an sin thog e Milo.

25 Agus dh'ìobair Solamh trì uaire sa bhliadhna iobairte-loisgte, agus iobairt-sìth air an altair a thog e do'n Tighearn, agus loisg e tùis air an altair a *bha*¹ 'm fianuis an Tighearn: agus chrìochnaich e 'n tigh.

26 Agus rinn rìgh Solamh loingear² ann an Èsion-geber, a *tha* làimh ri Elot, air tràigh na mara ruaidhe, ann an tìr Edoim.

27 Agus chuir Hiram anns an loingear³ 'òglaich féin, maraichean³ aig an robh eòlas na fairge, maille ri 'òglaich Sholaimh.

28 Agus thàinig iad gu h-Ophir, agus thug iad as a sin òr, ceithir cheud agus fichead tàlann, agus thug iad gu rìgh Solamh e.

CAIB. X.

1 *Ghabh ban-rìghinn Sheba iongantas ri gliocas Sholaimh.* 14 *Cothrom an òir a thàinig d'a ionnsuidh gach bliadhna.* 18 *A rìgh-chaitir.* 21 *A shoithlichean.* 26 *A charbaid agus a mharc-shluaigh.*

A GUS an uair a chuala ban-rìghinn⁴ Sheba cliu Sholaimh ann an ainm⁵ an Tighearna, thàinig i g'a dhearbhadh le ceisidibh cruaidhe⁶.

2 Agus thàinig i do h-Ierusalem le cuid-eachd ro mhòir, le càmhalaibh a' giùlan spìosraidh⁷, agus ro mhòran òir agus glacha luachmhor⁸: agus thàinig i dh'ionnsuidh Sholaimh, agus labhair i ris gach ni a *bha* 'na cridhe.

3 Agus mhinich Solamh dhi a briathran⁹ uile: cha robh ni *air bith* am folach air an rìgh nach do mhinich e dhi.

4 Agus an uair a chunnaic ban-rìghinn Sheba uile ghliocas Sholaimh, agus an tigh a thog e,

5 Agus biadh a bhuird, agus suidhe¹⁰ a sheirbhiseach, agus feitheamh a luchd-frithealaidh, agus an trusgan¹¹, agus a ghillean-cupain, agus a dhol suas air an deachaidh e suas gu¹² tigh an Tighearna, cha robh spiorad innte ni's mò.

6 Agus thubhairt i ris an rìgh, B'fhuir an t-ìomradh¹³ a chuala mise ann am thir féin air do ghnìomharaibh¹⁴, agus air do ghliocas.

7 Gidheadh, cha do chreid mi na briathra, agus an d'thàinig mi, agus gu'm faca mo shùilean féin e; agus, feuch, cha d'innseadh a leth dhomh: chaidh do ghliocas agus do shoirbheachadh thar¹⁵ an ìomradh a chuala mi.

8 *Is* sona do dhaoine, *is* sona iad so do sheirbhisich, a sheasas a'd' fhianuis an còmhnuidh, ag éisdeachd ri d' ghliocas.

9 Gu ma beannaichte an Tighearna do Dhia, a ghabh tlachd annad gu d' chur air rìgh-chaitir Israel: a chionn gu'm bheil gràdh aig an Tighearn do Israel gu bràth, uime sin rinn e thusa a'd' rìgh, a dheanamh breitheanais agus ceartais.

10 Agus thug i do'n rìgh sè fichead tàlann òir, agus ro mhòran do spìosraidh, agus clachan luachmhor: (cha d'thàinig riamh tuilleadh a leithid so do phailteas spìosraidh, as a thug ban-rìghinn Sheba do rìgh Solamh.

11 Agus mar an ceudna loingear¹⁶ Hiram a ghiùlain òr o Ophir, thug i o Ophir ro mhòran do fhiodh¹⁷ almuig, agus clacha luachmhor.

12 Agus rinn an rìgh do'n fhiodh almuig puist do thigh an Tighearn, agus do thigh an rìgh, clàrsaichean mar an ceudna agus saltairean do'n luchd-ciùil: cha d'thàinig a leithid so do fhiodh almuig, agus cha'n fhacas a leithid gus an là'n diugh.)

13 Agus thug rìgh Solamh do bhan-rìghinn Sheba a h-uile mhian a dh'iarr i, a thuilleadh air na thug e dhi a réir 'fhialaidheachd rioghail féin¹⁸: agus phill i, agus dh'fhalbh i d'a tìr, i féin agus a seirbhisich.

14 A nis b'e cothrom¹⁹ an òir a thàinig gu Solamh ann an aon bhliadhna, sè ceud, trì fichead, agus sè talannan òir;

15 A thuilleadh air na *fhuair* e o na ceannaichibh, agus o mhalairt²⁰ an luchd-spìosraidh, agus o uile rìghribh Arabia, agus o uachdaranaibh na tìre.

16 Agus rinn rìgh Solamh dà cheud sgiath do òr buailte²¹: sè ceud *secel* òir chuir e chum gach sgéithe.

17 Agus rinn e trì cheud targaid do òr buailte: trì puind òir chuir e chum gach targaide: agus chuir an rìgh iad ann an tigh frithe Lebanon.

18 Rinn an rìgh mar an ceudna rìgh-chaitir mhòr do fhliacalibh *elephant*, agus chòmhaich e i leis an òr bu ghloine.

19 *Bha* sè ceuman aig an rìgh-chaitir, agus *bha* mullach na rìgh-chaitreach cruinn o'cul: agus *bha* làmh an rìgh gach

¹ òirre-san a bha. ² long. ³ sciopairean.

⁴ ban-rìgh. ⁵ agus ainm. ⁶ toimheachanaibh.

⁷ nithe cùbhraidh. ⁸ feug. ⁹ ceisdean.

¹⁰ còmhnuidh. ¹¹ carradh, eudach.

¹² na h-iobairte-loisgte a dh'ìobair e ann.

¹³ B'fhirinn am focal. ¹⁴ do bhriathraibh, do

ràdhaidh. ¹⁵ chuir thu gliocas agus maith ris. Eabh.

¹⁶ long.

¹⁷ chrannalibh.

¹⁸ a réir làimhe rìgh Solaimh. Eabh.

¹⁹ cudthrom.

²⁰ cheannaigheachd, ghnòthuiclibh.

²¹ fìor-ghlan.

taobh do'n àite-shuidhe, agus dà leòmhann a' seasamh làimh ris na làmhann.

20 Agus shcas dà leòmhann dheug an sin air na sè ceumaibh, air an taobh so agus air an taobh ud: cha d'rinneadh a leithid ann an rìoghachd air bith eile.

21 Agus bha uile shoithichean òil rìgh Solaimh do òr, agus uile shoithiche tighe frithe Lebanoin do òr fìor-ghlan: cha robh aon diubh do airgid; cha robh meas air bith dheth ann an làithibh Sholaimh.

22 Oir bha loingeas Tharsis aig an rìgh air muir maille ri loingeas Hiram: aon uair anns na trì bliadhnaibh thàinig loingeas Tharsis, a' giùlan òir, agus airgid, fhiacal elephant, agus apa, agus pheucag¹.

23 Mar so thug rìgh Solamh barrachd air uile rìghribh an domhain ann an saoihbheas, agus ann an gliocas.

24 Agus dh'iarr an talamh uile teachd an làthair² Sholaimh, a dh'èisdeachd r'a ghliocas, a chuir Dia 'na chridhe.

25 Agus thug iad leo gach fear a thiodhlac; soithichean airgid agus soithichean òir, agus trusgana, agus airm, agus spioraidh, eich agus muileidean; cuibhrionn³ bliadhna anns gach bliadhna.

26 Agus chruinnich Solamh carbad agus marc-shluagh: agus bha mìle agus ceithir cheud carbad aige, agus dà mhìle dheug marcach; a chuir e ann am bailtibh nan carbad⁴, agus maille ris an rìgh ann an Ierusalem.

27 Agus thug an rìgh air airgid a bhi ann an Ierusalem mar chlachan, agus air na cramaibh seudair thug e bhi mar na croinn shìcomoir a tha anns an t-srath, air lìonmhoireachd.

28 Agus thugadh eich do Sholamh a mach as an Eiphit, agus snàth-lìn: ghabh ceannaichean an rìgh an snàth-lìn air luach.

29 Agus thàinig carbad a nìos agus chaidh e mach as an Eiphit air shè ceud secel airgid, agus each air cheud gu leth: agus mar sin do uile rìghribh nan Hiteach, agus do rìghribh Shiria, thug iadsan a mach iad le'n làimh.

CAIB. XI.

1 Chlaon mnàì Sholaimh a chridhe 'na shean aois an déigh dhiathan coimheach. 9 Bhagair Dia gu'n reubhadh e a rìoghachd uath. 14 Dhùisg an Tighearna naimhdean suas da. 43 A bhàs.

A GUS bha gaol aig rìgh Solamh air a mòran do mhuaibh coimheach⁵, a thuilleadh air nìghinn Pharaoh, Ban-mhoabaich, Ban-amonaich, Ban-edomach, Ban-shidonaich, agus Ban-bitich;

2 Do na cinneachaibh mu'n d' thubhairt an Tighearna ri cloinn Israeil, Cha téid

sibhse a steach d'an ionnsuidh-san, cha mhò a thig iadsan a steach d'ur n-ionnsuidh-sa; oir gu deimhin bheir iad air blur cridhe claonadh an déigh an dée: riu so dhlùth-lean Solamh ann an gaol.

3 Agus bha seachd ceud bean aige, mar bhan-rìghinnean, agus trì cheud coimhleabach: agus thug a mhnàì air a chridhe claonadh.

4 Oir thachair, ann an àm sean aois Sholaimh, gu'n do chlaon a mhnàì a chridhe an déigh dhiathan eile; agus cha robh a chridhe iomlan leis an Tighearna a Dhia, mar a bha cridhe Dhaibhidh 'athar.

5 Oir chaidh Solamh an déigh Astaroit ban-dé nan Sidonach, agus an déigh Mhilcoim gràineileachd nan Amonach.

6 Agus rinn Solamh òle ann an suilibh an Tighearna; agus cha do lean e gu coimhlionta an Tighearna, mar a rinn Daibhidh 'athair.

7 An sin thog Solamh ionad àrd do Chemos, gràineileachd Mhoab, anns an t-sliabh a tha mu choinneamh Ierusalem; agus do Mholech, gràineileachd chloinn Amoin.

8 Agus air an dòigh cheudna rinn e d'a mhnàibh coimheach uile, a loisg tùis agus a thug suas iobairt d'an diathaibh.

9 Agus bha fearg air an Tighearna ri Solamh, a chionn gu'n do chlaon a chridhe o'n Tighearna Dia Israeil, a dh'fhoillsich e féin dha dà uair,

10 Agus a dh'àithn dha a thaobh an nì so, nach rachadh e'n déigh dhiathan eile: ach cha do ghléidh esan an nì a dh'àithn an Tighearna.

11 Uime sin thubhairt an Tighearna ri Solamh, A chionn gu'n d'rinneadh so leat⁶, agus nach do ghléidh thu mo choimheangal-sa, agus mo reachdan a dh'àithn mi dhuit, gu deimhin reubaidh mise an rìoghachd uait, agus bheir mi do d' sheirbhiseach i.

12 Gidheadh ann ad làithibh-sa cha dean mi so, air sgàth Dhaibhidh t'athar: à làimh do mhie reubaidh mi i.

13 Ach cha reub mi an rìoghachd uile: bheir mi aon treubh⁷ do d' mhac air sgàth Dhaibhidh m'òglaich, agus air sgàth Ierusalem a thagh mi.

14 Agus dhùisg an Tighearna nàmhaid suas do Sholamh, Hadad an t-Edomach: bha e do'n t-sliochd rìoghail ann an Edom.

15 Oir an uair a bha Daibhidh ann an Edom, agus a chaidh Iob ceannard an t-sliogh suas a dh'adhlacadh nam marbh, an déigh dha gach fìrionnach ann an Edom a bhualachd,

16 (Oir dh'fhan Iob sè mìosan an sin,

¹ pheabh-eun.
guis. Eabh.

² dh'iarr an talamh uile
³ ni. Eabh.

⁴ air son charbad.

⁵ a bha 'nan coigrich.

riut. Eabh.

⁶ gu'n robh so maille
⁷ fhineadh.

agus Israel uile, gus an do ghearr e as gach firionnach ann an Edom.)

17 Theich Adad, e féin agus Edomaich àraidh do sheirbhisich 'athar maille ris, gu dol a stigh do'n Eiphit; agus Hadad fathast 'na leanaban òg.

18 Agus dh'éirich iad á Midian, agus thàinig iad gu Paran, agus thug iad daoine leo á Paran, agus thàinig iad do'n Eiphit, gu Pharaoh rìgh na h-Eiphit; agus thug esan dha tigh, agus dh'orduiche lòn dha, agus thug e fearann dha.

19 Agus fhuair Hadad deadh-ghean¹ mòr ann an sùilbh Pharaoh, air chor as gu'n d'thug e dha 'na mnaoi piuthar a mhnà féin, piuthar Thahpeneis na ban-righinn.

20 Agus rug piuthar Thahpeneis dha Genubat a mhac, a chuir Tahpenes bhàrr na cìche ann an tigh Pharaoh: agus bha Genubat ann an teaghlach Pharaoh am measg mhac Pharaoh.

21 Agus an uair a chuala Hadad san Eiphit gu'n do choidil² Daibhidh maille r'a aithrichibh, agus gu'n robh Ioab ceannard an t-sloigh marbh, thubhairt Hadad ri Pharaoh, Leig dhomh imeachd, a chum gu'n téid mi do m' rìgh féin.

22 Agus thubhairt Pharaoh ris, Ach ciod a tha dh'easbhuidh ort maille riumsa, gu'n iarradh tu, feuch, dol do d' thìr féin? Agus fhreagair esan, Cha 'n'eil nì air bith, gidheadh leig dhomh falbh air gach aon chor.

23 Agus dhùisg Dia suas nàmhaid eile dha, Reson mac Eliadah, a theich o Hadaraser³, rìgh Shobah, a thighearn.

24 Agus chrùinnich e daoine thuige⁴, agus bha e 'na cheannard air buidhinn, an uair a mharbh Daibhidh iadsan o Shobah: agus chaidh iad do Dhamascus, agus chòmhnuich iad ann, agus rinn iad e 'na rìgh⁵ ann an Damascus.

25 Agus bha e 'na nàmhaid do Israel rè uile làithean Sholaimh, a thuilleadh air an olc a rinn Hadad: agus dh'fhuathaich e Israel, agus rìghich e os ceann Edoim⁶.

26 Agus Ieroboam mac Nebait, Ephrat-ach o Shereda, seirbhiseach do Sholamh, (agus b'e ainm a mhàthar Seruah, ban-trach,) thog eadhon esan a làmh an aghaidh an rìgh.

27 Agus b'e so an t-aobhar mu'n do thog e a làmh an aghaidh an rìgh: Thog Solamh Milo, agus chàirich e bearnan⁷ bhaile Dhaibhidh 'athar.

28 Agus bha'n duine Ieroboam treun ann an neart: agus an uair a chunnaic Solamh gu'n robh an t-òganach deanadach, chuir se e os ceann uile luchd-giùlain uallach⁸ tighe Ioseiph.

29 Agus thachair anns an àmsin, air dol do Ieroboam a mach á h-Ierusalem, gu'n d'fhuair am fàidh Ahiah an Silonach e san t-slighe, agus e sgèadaichte le trusgan⁹ ùr: agus bha iad 'nan dithis leo féin anns a' mhachair.

30 Agus rug Ahiah air an trusgan ùr a bha air, agus reub e 'na dhà mhir dheug e.

31 Agus thubhairt e ri Ieroboam, Gabh dhuit féin deich mirean; oir mar so tha'n Tighearna Dia Israeil ag ràdh, Feuch, reubaidh mise an rìogliachd á làimh Sholaimh, agus bheir mi deich treubhan dhuitse:

32 (Ach bithidh aon treubh aige-san air sgàth Dhaibhidh m'òglaich, agus air sgàth Ierusalem, am baile a thagh mi á uile threubhan Israeil:)

33 Achionn gu'n do thréig iad mise, agus gu'n do shleuchd iad¹⁰ do Astarot ban-dia nan Sidonach, do Chemos dia nam Moabach, agus do Mhilcom dia chloinn Amoin, agus nach do ghluais iad ann am shligheibh-sa, a dheanamh an nì a ta ceart a'm' shùilbh, agus a ghleidheadh mo reachdan agus mo bhreitheanas, mar a rinn Daibhidh 'athair.

34 Gidheadh, cha toir mi'n rìoghachd uile as a làimh, ach nì mi e 'na uachdaran¹¹ rè uile làithean a bheatha, air sgàth Dhaibhidh m'òglaich, a thagh mi, a chionn gu'n do ghléidh e m'aitheantan agus mo reachdan.

35 Ach bheir mi'n rìoghachd á làimh a mhic, agus bheir mi dhuitse i, eadhon deich treubhan.

36 Agus d'a mhac-san bheir mi aon treubh, a chum gu'm bi lòchran aig Daibhidh m'òglach an còmhnuidh a'm' fhianuis ann an Ierusalem, am baile a thagh mi dhomh féin a chur m'ainme an sin.

37 Agus gabhaidh mi thusa, agus rìoghachidh tu a réir nan uile nìthe a mhiannaicheas t'anam, agus bithidh tu a'd' rìgh air Israel.

38 Agus ma dh'éisdeas tu ris na h-uile nìthibh a dh'aitheanas mise dhuit, agus gu'n gluais thu ann am shligheibh, agus gu'n dean thu an nì a ta ceart a'm' shùilbh, a ghleidheadh mo reachdan agus m'aitheantan, mar a rinn Daibhidh m'òglach; an sin bithidh mise maille riut, agus togaidh mi dhuit tigh daingean, mar a thog mi do Dhaibhidh, agus bheir mi Israel dhuit.

39 Agus cràdhaidh mi¹² sliochd Dhaibhidh air a shon so, ach cha'n ann gu bràth.

40 Uime sin dh'iarr Solamh Ieroboam a mharbhadh. Ach dh'éirich Ieroboam,

¹ bàigh.

² luidh.

³ Hadadser.

⁴ chuige.

⁵ rìghich iad.

⁶ Shìria.

⁷ dhùin e suas briseadh.

⁸ uile chùraim.

⁹ cudach-uachdair, fulluinn.

¹⁰ chrom siad iad

féin. Eabh.

¹¹ 'na cheannard, 'na phrionnsadh.

¹² cuiridh mi fo àmhghar.

I. RIGH, XI. XII.

agus theich e do'n Eiphit, a dh'ionnsuidh Shisaic righ na h-Eiphit, agus bha e san Eiphit gu bàs Sholaimh.

41 Agus a' chuid eile do ghnìomharaibh¹ Sholaimh, eadhon² na h-uile *nithe* a rinn e, agus a ghliocas, nach *'eil* iad sgriobhta ann an leabhar ghnìomhara Sholaimh?

42 Agus *b'i* an uine³ a rìghich Solamh ann an Ierusalem os ceann Israeil uile, dà fhlichead bliadhna.

43 Agus choidil⁴ Solamh maille r'a aithrichibh, agus dh'adhlaiceadh e ann am baile Dhaibhidh⁵ athar: agus rìghich Rehoboam a mhac 'na àit.

CAIB. XII.

1 *Chruinnich an Israelich aig Sechem gu Rehoboam a dheanamh 'na righ.* 16 *Rinn deich treubhan ceannaire 'na aghaidh, agus dh'ung iad Ieroboam gu bhì 'na righ os an ceann.* 26 *Chuir Ieroboam suas dà laogh òir ann am Bet-el agus ann an Dan.*

AGUS chaidh Rehoboam do Shechem: oir thàinig Israel uile gu Sechem gu 'dheanamh 'na righ.

2 Agus an uair a chuala Ieroboam, mac Nebait, a bha fathast anns an Eiphit *sin*, (far an do theich e o ghnùis rìgh Solaimh,) phill Ieroboam as an Eiphit⁵.

3 Agus chuir iad *fios* agus ghairm iad air: agus thàinig Ieroboam, agus comh-chruinneachadh Israeil uile, agus labhair iad ri Rehoboam, ag ràdh,

4 Dh'antromaich t'athair air cuingne, ach eutromaich thus' a nis seirbhis⁶ chruaidh t'athar, agus a chuing throm a chuir e oirnn, agus nì sinn seirbhis dhuit.

5 Agus thubhairt e riu, Falbhaibh fathast *gu ceann* thri làithean, an sin thigibh a ris a m'ionnsuidh. Agus dh'fhalbh an sluagh.

6 Agus chuir rìgh Rehoboam a chomhairle ris na seann daoineibh a sheas an làthair Sholaimh⁷ athar, an uair bu bheò e, ag ràdh, Cionnusa tha sibh a' comhairleachadh *dhomh* freagradh a thabhairt do'n t-sluagh so?

7 Agus labhair iadsan ris, ag ràdh, Ma bhios tusa an diugh a'd' sheirbhiseach aig an t-sluagh so, agus gu'n dean thu seirbhis dhoibh, agus gu'm freagair thu iad, agus gu'n labhair thu focail mhaithie riu, an sin bithidh iadsan agadsa 'nan seirbhisich gu bràth⁷.

8 Ach thréig esan comhairle nan seann daoine, a thug iad air; agus chuir e 'chomhairle ris na daoineibh òga a dh'fhàs suas maille ris *féin*, agus a sheas 'na làthair.

9 Agus thubhairt e riu, Ciod *a tha* sibhse a' comhairleachadh, a chum gu'n toir sinn

freagradh do'n t-sluagh so, a labhair rium, ag ràdh, Eutromaich a' chuing a chuir t'athair oirnn?

10 Agus labhair na daoine òga a dh'fhàs suas maille ris *féin* ris, ag ràdh, Mar so their thu ris an t-sluagh so a labhair riut, ag ràdh, Dh'antromaich t'athair air cuing-ne, ach eutromaich thusa dhunn *i*; mar so labhraidh tu riu, *Tha am meur* a's lugha agamsa nì's gairbhe na leasraidh m'athar.

11 Agus a nis chuir m'athair gun amharus oirbh cuing throm, ach cuiridh mise ri bhur cuing: smachdaich m'athair sibh le slataibh⁸, ach smachdaichidh mise sibh le scorpionaibh⁹.

12 Uime sin thàinig Ieroboam agus an sluagh uile gu Rehoboam air an treas là, mar a dh'àithn an rìgh, ag ràdh, Thigibh a m' ionnsuidh a ris air an treas là.

13 Agus fhreagair an rìgh an sluagh gu garbh; agus thréig e comhairle nan seann daoine a thug iad dha.

14 Agus labhair e riu a réir comhairle nan daoine òga, ag ràdh, Dh'antromaich m'athair bhur cuing, agus cuiridh mise ri bhur cuing: smachdaich m'athair sibh le slataibh, ach smachdaichidh mise sibh le scorpionaibh.

15 Mar so cha d'éisd an rìgh ris an t-sluagh; oir bha'n t-aobhar o'n Tighearna, chum gu'n coimhionadh e 'fhocal féin a labhair an Tighearna le làimh Ahiah an t-Silonaich ri Ieroboam mac Nebait.

16 Agus an uair a chunnaic Israel uile nach d'éisd an rìgh riu, fhreagair an sluagh an rìgh, ag ràdh, Ciod a' chuibhrionn *a th'* againne ann an Daibhidh? agus cha *'n eil* oighreachd againne ann am mac Iese: do d' bhùthaibh, O Israeil; a nis amhaire air do thigh féin, a Dhaibhidh. Agus dh'fhalbh Israel d'am bùthaibh.

17 Ach *a thaobh* chloinn Israeil a bha chòmhnuidh ann am bailtibh Iudah, rìghich Rehoboam os an ceann.

18 An sin chuir rìgh Rehoboam Adoram *d'an ionnsuidh* a bha os ceann na cise; agus chlach Israel uile e le clachaibh, agus fhuair e bàs: uime sin rinn rìgh Rehoboam cabhag gu dol suas¹⁰ d'a charbad, chum gu'n teicheadh e do h-Ierusalem.

19 Agus rinn Israel ceannaire an aghaidh tighe Dhaibhidh¹¹ agus an là'n diugh.

20 Agus an uair a chuala Israel uile gu'n d'thàinig Ieroboam a ris, chuir iad *fios*, agus ghairm iad air do'n chomh-chruinneachadh, agus rinn iad e 'na rìgh air Israel

¹ bhriathraibh.

² agus.

³ b'iad na

làithean. Eabh. ⁴ luidh. ⁵ agus chòmhnuidh

Ieroboam anns an Eiphit. Faic II' Eachdr. Caib.

X. r. 2. ⁶ tràillidheachd. ⁷ gach uile là. Eabh.

⁸ seùrsaibh.

⁹ le slataibh calgach cosmhuil ri scorpionaibh.

¹⁰ chaidh rìgh Rehoboam le 'uile neart suas.

¹¹ thréig, dhealaich Israel ri thigh Dhaibhidh.

uile: cha do lean *aon* tigh Dhaibhidh ach treubh Iudah a mhàin.

21 Agus an uair a thàinig Rehoboam gu h-Ierusalem, chruinnich e tigh Iudah uile, agus treubh Bheniamin, ceud agus ceithir fichead mìle fear taghta a bha deanta ri cogadh, a chogadh ri tigh Israeil, a thoirt na rìoghachd air a h-ais gu Rehoboam mac Sholaimh.

22 Ach thàinig focal Dé gu Semaiah duine le Dia, ag ràdh,

23 Labhair ri Rehoboam mac Sholaimh, rìgh Iudah, agus ri tigh Iudah agus Bheniamin-uile, agus ri fuigheall an t-sluaigh, ag ràdh,

24 Mar so tha'n Tighearn, ag ràdh, Na rachaibh suas, agus na cogaibh ri r'bràithribh cloinn Israeil: pillibh gach duine d'a thigh féin, oir is ann leamsa a rinneadh an ni so. Agus dh'éisd iad ri focal an Tighearn, agus phill iad gu imeachd a réir focail an Tighearn.

25 Agus thog Ieroboam Sechem ann an sliabh Ephraim, agus chòmhnuich e ann; agus chaidh e mach as a sin, agus thog e Penuel.

26 Agus thubhairt Ieroboam 'na chridhe, A nis pillidh an rìoghachd gu tigh Dhaibhidh:

27 Ma théid an sluagh sò suas a dheanamh iobairtean ann an tigh an Tighearn ann an Ierusalem, an sin pillidh cridhe an t-sluaigh so r'an tighearna, ri Rehoboam rìgh Iudah: agus marbhaidh iad mise, agus pillidh iad gu Rehoboam rìgh Iudah.

28 Uime sin ghabh an rìgh comhairle, agus rinn e dà laogh òir, agus thubhairt e riu, Is mòr oirbh dol suas gu h-Ierusalem: feuch do dhé, O Israeil, a thug a nios thu á tìr na h-Eiphit.

29 Agus shuidhich e aon *diubh* ann am Betel, agus an *laogh* eile chuir e ann an Dan.

30 Agus rinneadh an ni so 'na pheacadh: oir chaidh an sluagh a *shleuchdadh* an làthair aoin *diubh*, gu ruig Dan.

31 Agus rinn e tigh àitean àrda, agus rinn e sagairt do'n chuid a b'isle do'n t-sluaigh¹, nach robh do chloinn Lebhi.

32 Agus rinn Ieroboam féil² anns an ochdamh mìos, air a' chùigeadh là deug do'n mhìos, cosmhuil ris an fhéil a *bha* ann an Iudah, agus dh'ìobair e³ air an altair: mar sin rinn e ann am Bet-el, ag ìobradh do na laoghaibh a rinn e: agus shuidhich e ann am Bet-el sagairt nan àitean àrda a rinn e.

33 Agus dh'ìobair e air an altair a rinn e ann am Bet-el, air a' chùigeadh là deug do'n ochdamh mìos, anns a' mhìos air an do smuainich e 'na chridhe féin: agus

rinn e féil do chloinn Israeil, agus dh'ìobair e air an altair, agus loisg e tùis⁴.

CAIB. XIII.

1 Dh'éigh fàidh na h-altarach ann am Bet-el. A Shearg làmh Ieroboam, ach air iarrtus an fhàidh dh'aisigeadh dha i a rìs. 11 Bha am fàidh eas-ùmhail do fhocal Dé, agus marbhaidh e le leòmhán air an t-slighe. 26 Dh'adhlac sean fhàidh e.

AGS, feuch, thàinig duine le Dia á Iudah le focal an Tighearna gu Bet-el: agus *bha* Ieroboam 'na sheasamh làmh ris an altair, a losgadh tùise.

2 Agus dh'éigh e an aghaidh na h-altarach ann am focal an Tighearn, agus thubhairt e, O altair, altair! mar so thubhairt an Tighearna, Feuch, beirear mac do thigh Dhaibhidh, d'an ainm Iosiah, agus ìobraidh e ortsa sagairt nan àitean àrda a loisgeas tùis ort, agus loisgear cnàmha dhaoine ort.

3 Agus thug e air an là sin féin comhara seachad, ag ràdh, *Is e* so an comhara a labhair an Tighearna: Feuch, reubar an altair, agus dòirtear a mach an luath a *tha* oirre.

4 Agus an uair a chuala rìgh Ieroboam focal an duine le Dia, a dh'éigh e an aghaidh na h-altarach ann am Bet-el, slin e a làmh a mach o'n altair, ag ràdh, Beiribh air: agus shearg⁵ a làmh a shù e mach 'na aghaidh, air chor as nach b'urraim e a tabhairt air a h-ais thuige⁶.

5 Agus reubadh an altair, agus dhòirt-eadh an luath a mach o'n altair, a réir a' chomharaidh a thug an duine le Dia le focal an Tighearn.

6 Agus fhreagair an rìgh, agus thubhairt e ris an duine le Dia, Aslaich a nis gnùis an Tighearna do Dhé, agus dean urnuigh air mo shon, a chum gu'n aisigear mo làmh dhomh a ris. Agus dh'aslaich an duine le Dia gnùis an Tighearn, agus dh'aisigeadh làmh an rìgh dha a ris, agus bha i mar air tùs.

7 Agus thubhairt an rìgh ris an duine le Dia, Thig maille riumsa do m' thigh, agus neartaich thu féin: agus bheir mi tiodhlac dhuit.

8 Agus thubhairt an duine le Dia ris an rìgh, Ged bheireadh tu dhomhsa leth do thighe, cha rachainn a stigh maille riut, cha mhò a dh'ithinn aran, no dh'òlainn uisge anns an àite so:

9 Oir mar so dh'àithneadh dhomh-sa le focal an Tighearn, ag ràdh, Na h-ith aran, agus na h-òl uisge, agus na pill air an t-slighe air an d'thàinig thu.

10 Agus dh'fhalbh e air slighe eile, agus cha do phill e air an t-slighe air an d'thàinig e do Bhet-el.

¹ do dheireadh an t-sluaigh.² féisd.³ chaidh e suas.⁴ chaidh e suas air an altair, a losgadh tùise.⁵ thiorraich.⁶ chluige.

11 A nis bha sean fhàidh 'na chòmh-nuidh ann am Bet-el; agus thàinig a mhic, agus dh'innis iad da na h-oibre uile a rium an duine le Dia air an là sin ann am Bet-el: na briathran a labhair e ris an righ, iad so dh'innis iad mar an ceudna d'an athair.

12 Agus thubhairt an athair riu, Cia i an t-slighe air an d'fhalbh e? agus dh'fheuch¹ a mhic dha an t-slighe air an d'fhalbh an duine le Dia, a thàinig á Iudah.

13 Agus thubhairt e r'a mhic, Cuiribh diollaid dhomh air an asail. Agus chuir iad diollaid dha air an asail, agus mharc-aich e oirre.

14 Agus chaidh e'n déigh an duine le Dia, agus fhuair e 'na shuidhe e fuidh dharaig; agus thubhairt e ris, An tusa an duine le Dia, a thàinig á Iudah? Agus thubhairt esan, Is mi.

15 An sin thubhairt e ris, Thig maille riumsa do m' thigh, agus ith aran.

16 Agus thubhairt esan, Cha'n fhead mi pilltinn maille riut, no dol a steach maille riut: cha mhò a dh'itheas mi aran, no dh'òlas mi uisge maille riut anns an àite so:

17 Oir chaidh a ràdh rium le focal an Tighearna, Cha'n ith thu aran, agus cha'n òl thu uisge an sin; cha mhò philleas tu gu inneachd air an t-slighe air an d'thàinig thu.

18 Agus thubhairt e ris, Is fàidh mise mar'an ceudna mar thu féin, agus labhair aingeal rium le focal an Tighearn, ag ràdh, Thoir air ais leat e do d'thugh, a chum gu'n nith e aran, agus gu'n òl e uisge. Ach rinn e breug dha.

19 Agus phill e maille ris, agus dh'ith e aran 'na thigh, agus dh'òl e uisge.

20 Agus an uair a bha iad 'nan suidhe aig a' bhord, thàinig focal an Tighearn a dh'ionnsuidh an fhàidh a thug air ais e:

21 Agus ghlaodh e ris an duine le Dia a thàinig á Iudah, ag ràdh, Mar so tha'n Tighearn ag ràdh, A chionn gu'n robh thu eas-ùmhla do fhocal² an Tighearn, agus nach do ghleidh thu an àithne a dh'àithn an Tighearna do Dhia dhuit,

22 Ach gu'n do phill thu, agus gu'n d'ith thu aran, agus gu'n d'òl thu uisge anns an àite mu'n d'thubhairt e riut, Na h-ith aran, agus na h-òl uisge; cha téid do chorp³ a steach do uaigh t'aithriche.

23 Agus an déigh dha aran itheadh, agus an déigh dha òl, chuir e diollaid dha air an asail, eadhon do'n fhàidh a thug e air ais.

24 Agus an uair a dh'fhalbh e, thachair leòmhann air san t-slighe, agus mharbh se e; agus thilgeadh a chorp air an t-slighe, agus sheas an asal làimh ris: sheas an

leòmhann mar an ceudna làimh ris a' chorp. 25 Agus, feuch, bha daoine a' gabhail seachad, agus chunnaic iad an corp tilgte air an t-slighe, agus an leòmhann 'na sheas-amh làimh ris a' chorp: agus thàinig iad, agus dh'innis iad e anns a' bhaile, anns an robh an sean fhàidh 'na chòmhnuidh.

26 Agus an uair a chual' am fàidh a thug air ais e o'n t-slighe sin, thubhairt e, Is esan an duine le Dia, a bha eas-ùmhla do fhocal an Tighearn: uime sin thug an Tighearna thairis e do'n leòmhann, a reub e, agus a mharbh e, a réir focail an Tighearn, a labhair e ris.

27 Agus labhair e r'a mhic, ag ràdh, Cuiribh diollaid dhomh air an asail. Agus chuir iad diollaid oirre.

28 Agus dh'fhalbh e, agus fhuair e a chorp tilgte air an t-slighe, agus an asal agus an leòmhann 'nan seasamh làimh ris a' chorp: cha d'ith an leòmhann au corp; cha mhò a reub e an asal.

29 Agus thog am fàidh corp an duine le Dia, agus chuir e air an asail e, agus thug e air ais e: agus thàinig an sean fhàidh do'n bhaile⁴, gu caoidh a dheanamh, agus gu adhlacadh⁵.

30 Agus chuir e a chorp 'na uaigh féin; agus rinn iad caoidh os a cheann, ag ràdh, Mo thruaighe mo bhràthair!

31 Agus an déigh dha esan adhlacadh, labhair e r'a mhic, ag ràdh, 'Nuair a gheibh mise bàs, an sin adhlaicibh mi anns an uaigh anns am bheil an duine le Dia adhlaicte; làimh r'a chnàmhaibh-san cuiribh mo chnàmha-sa:

32 Oir gu deunhin thig e gu crìch an nì a dh'éigh e le focal an Tighearn an aghaidh na h-altarach ann am Bet-el, agus an aghaidh uile thighean nan àitean àrda, a tha ann am bailtibh Shamaria.

33 An déigh an nì so, cha do phill Iero-boam o' dhroch shlighe, ach rinn e a ris⁶ do'n chuid a b'isle do'n t-sluagh sagartan do na h-àitibh àrda: ge b'e leis am b'àill, choisrig se e, agus bha e 'na aon do shagartaibh nan àitean àrda.

34 Agus bha an nì so 'na pheacadh do thigh Ieroboaim, agus a chum a ghearradh as, agus a chum a sgrìos bhàrr aghaidh na talmhainn.

CAIB. XIV.

1 Chaidh bean Ieroboaim a dh'ionnsuidh an fhàidh Ahiah a dh'fhiosrachadh dheth a thaobh a mic. 5 Dh'innis Ahiah dhì am breithanas a bha gu teachd air tigh Ieroboaim. 21 Rìghachadh aingidh Rehoboaim. 25 Chreach Sisac Ierusalem. 29 Fhuair Rehoboam bàs, agus rìghich Abiam a mhac 'na àit.

ANNS an àm sin bha Abiah, mac Ieroboaim, gu tinn.

¹ oir chunnaic. ² bheil.

³ chlosach, mharbhan.

⁴ thàinig e do bhaile an t-sean fhàidh. ⁵ adhlac.

⁶ phill e agus rinn e. Eabh.

2 Agus thubhairt Ieroboam r'a mhnai, Éirich a nis, agus cuir thu féin ann an coslas eile¹, air chor as nach aithnigh iad gur tu bean Ieroboaim; agus imich do Shiloh: feuch, an sin *tha* Ahiah am faidh, a dh'innis dhomhsa *gu'm bithinn* a'm' righ air an t-sluagh so.

3 Agus thoir² leat a'd' làimh deich buil-innean, agus breacagan, agus soitheach meala, agus falbh d'a ionnsuidh: innsidh esan duit ciod a dh'éireas do'n leanabh.

4 Agus rinn bean Ieroboaim mar sin, agus dh'éirich i, agus chaidh i do Shiloh, agus thàinig i gu tigh Ahiah: ach cha b'urrainn Ahiah *ni* fhaicinn, oir dhorch-aicheadh³ a shùlean le aois.

5 Agus thubhairt an Tighearna ri Ahiah, Feuch, tha bean Ieroboaim a' teachd a dh'iarraidh ni ort a thaobh a mic, oir *tha* e gu tinn: mar so agus mar so labhraidh tu rithe⁴; oir tarlaidh⁵ 'nuair a thig i a steach, gu'n gabh i oirre féin *gur bean* eile i.

6 Agus tharladh, an uair a chual' Ahiah fuaim a cos⁶, agus i a' teachd a steach air an dorus, gu'n dubhairt e, Thig a steach, a bhean Ieroboaim: c'ar son a tha thu a' gabhail ort *gur bean* eile thu? ach chuireadh mise a d' ionnsuidh *le teachd-aireachd* chruaidh.

7 Falbh, innis do Ieroboam, Mar so tha'n Tighearna Dia Israel ag ràdh, A chionn gu'n d'ardaich mise thu á meadh-on an t-sluaigh, agus gu'n do chuir mi thu a d' cheannard air mo shluagh Israel,

8 Agus gu'n do reub mi an rìoghachd o thigh Dhaibhidh agus gu'n d'thug mi dhuitse i; agus *gidheadh* nach robh thu mar m'òglach Daibhidh, a ghléidh m' àith-eantan, agus a lean mi le 'uile chridhe, a dheanamh *an ni sin* a mhàin a *bha* ceart ann mo shùilibh-sa;

9 Ach gu'n d'rinn thu ole os ceann nan uile a bha romhad, agus gu'n deachaidh tu agus gu'n d'rinn thu dhuit féin diathan eile⁷, agus dealbhan leaghta, gu fearg a chur ormsa; agus gu'n do thilg thu mi air do chùlaobh:

10 Uime sin, feuch, bheir mise ole air tigh Ieroboaim, agus gearraidh mi as o Ieroboam esan a ni uisge ri balla, esan a dhruideadh a steach agus a dh'fhàgadh ann an Israel; agus bheir mi air falbh fuigheall tìghe Ieroboaim, mar a bheir neach air falbh aolach gus an teirig e.

11 Esan a gheibh bàs do Ieroboam anns a' bhaile, ithidh na madraidh e; agus esan a gheibh bàs anns a' mhachair, ithidh eunlaith an athair e: oir labhair an Tighearna e.

12 Uime sin éirich thusa, imich do d' thigh féin: an uair a théid do chosan⁸ a steach do'n bhaile, gheibh an leanabh bàs.

13 Agus ni Israel uile caoidh air a shon, agus adhlaidh iad e: oir théid esan a mhàin o Ieroboam a dh'ionnsuidh na h-uaigne; a chionn gu'n d'fhuaradh ann ni maith a thaobh an Tighearna Dé Is-raeil, aun an tigh Ieroboaim.

14 Os bàrr, togaidh an Tighearna suas dha féin righ air Israel, a ghearras as tigh Ieroboaim air an là sin: ach ciod? a nis féin.

15 Agus buailidh an Tighearna Israel, mar a ghluaisear cuile anns an uisge, agus spionaidh e Israel as an fhearann mhaith so, a thug e d'an aithrichibh, agus sgapaidh e iad air an taobh thall do'n amhainn; a chionn gu'n d'rinn iad an doireachan, a' cur feirge air an Tighearna.

16 Agus bheir e thairis Israel, air son pheacanna Ieroboaim, a pheacaich, agus a thug air Israel peacachadh.

17 Agus dh'éirich bean Ieroboaim, agus dh'imich i, agus thàinig i gu Tirsah: agus an uair a chaidh i steach air stairs-nich an tìghe, fhuair an leanabh bàs.

18 Agus dh'adhlaidh iad e, agus rinn Israel uile caoidh air a shon, a réir focail an Tighearna, a labhair e le làimh 'òglaich féin Ahiah an fhàidh.

19 Agus a' chuid eile do ghnìomharaibh Ieroboaim, mar a chog, agus mar a righ-ich e, feuch, *tha* iad sgrìobhta ann an leabhar eachdraidh⁹ rìghrean Israeil,

20 Agus b'iad na làithean a righich Ieroboam dà bhliadhna thar fhichead: agus choidil e maille r'a aithrichibh, agus righich Nadab a mhac 'na àit.

21 Agus righich Rehoboam mac Sholaimh ann an Iudah. *Bha* Rehoboam bliadhna agus dà fhichead a dh'aois an uair a thòisich e air rìoghachadh; agus righich e seachd bliadhna deug ann an Ierusalem, am baile a thagh an Tighearna á uile threubhan Israeil, a chur 'ainme an sin: agus b'e ainm a mhàthar Naamah, Ban-amonach.

22 Agus rinn Iudah ole ann an sùilibh an Tighearna, agus bhrosnaich iad e gu h-eud le'm peacannaibh, a rinn iad os ceann nan uile a rinn an aithriche:

23 Oir thog iadsan mar an ceudna àit-ean àrda dhoibh féin, agus dealbhan, agus doireachan, air gach cnoc àrd, agus fùidh gach craoibh uaine.

24 Agus bha mar an ceudna Sodomaich anns an tìr: rinn iadsan a réir uile ghràin-eileachda nan cinneach, a thilg an Tighearna a mach roimh chloinn Israeil.

¹ atharraich thu féin. Eabh.

² sheas. Eabh.

³ bithidh e. Eabh.

⁶ cas.

² beir.

⁴ ria.

⁷ còimheach.

⁸ do chos.

⁹ leabhar thràth-eachdraidh; leabhar fhocla làith-ean. Eabh. chronicles. Sasg.

25 Agus anns a' chùigeadh bliadhna do rìgh¹ Rehoboam, thàinig Sisac rìgh na h-Eìphit a nìos an aghaidh Ierusalem:

26 Agus thug e leis ionmhais tighe an Tighearn, agus ionmhais tighe an rìgh; bhuin e leis eadhon an t-ìomlan: agus thug e leis na sgiathan òir uile a rinn Solamh.

27 Agus rinn rìgh Rehoboam sgiathan umha 'nan àit, agus thug e thairis *iad gu làimh cheannard an fhreiceadain*² a ghléidh dorus tighe an rìgh.

28 Agus an uair a chaidh an rìgh a steach do thigh an Tighearna, dh'ìomchair am freiceadan iad, agus thug iad air an ais iad gu seòmar an fhreiceadain.

29 Agus a' chuid eile do ghnìomhar-aibh³ Rehoboam, agus na h-uile nithe a rinn e, nach 'eil iad sgrìobhta ann an leabhar eachdraidh rìghrean Iudah?

30 Agus bha cogadh eadar Rehoboam agus Ieroboam rè an làithean uile.

31 Agus choidil Rehoboam maille r'a aithrichibh, agus dh'adhlacaidh e maille r'a aithrichibh ann am baile Dhaibhidh: agus b'e ainm a mhàthar Naamah, Banamonach. Agus rìghich Abiam a mhac 'na àit.

CAIB. XV.

1 Rìoghachadh aingidh Abiam: 7 a bhàs: 8 rìghich Asa 'na dhèigh. 23 Fhuair Asa bàs, agus rìghich Jehosaphat 'na àit. 25 Rìoghachadh aingidh Nadab: 27 mharbhadh e le Baasa: 28 rìghich Baasa 'na dhèigh, agus choimhlin e fàistneachd Ahiath an aghaidh tighe Ieroboam.

ANIS anns an ochdamh bliadhna deug do rìgh Ieroboam mac Nebait, rìghich Abiam os ceann Iudah.

2 Trì bliadhna rìghich e ann an Ierusalem: agus b'e ainm a mhàthar Maachah, nighean Abisaloim.

3 Agus ghluais e ann an uile pleacaibh 'athar, a rinn e roimhe: agus cha robh a chridhe iomlan leis an Tighearn a Dhia, mar a bha cridhe Dhaibhidh 'athar.

4 Gidheadh, air sgàth Dhaibhidh thug an Tighearn a Dhia lòchran dha ann an Ierusalem, a chur a mhic suas 'na dhèigh, agus a dhaingneachadh Ierusalem:

5 A chionn gu'n d'rinn Daibhidh an *ni a bha* ceart ann an suilb an Tighearn, agus nach do chlaon e o na h-uile *nithibh* a dh'àithn e dha rè uile làithean a bheatha, ach a mhàin an cùis Uriah an Hitich.

6 Agus bha cogadh eadar Rehoboam agus Ieroboam rè uile làithean a bheatha.

7 A nis a' chuid eile do ghnìomhar-aibh⁴ Abiam, agus na h-uile *nithe* a rinn e, nach 'eil iad sgrìobhta ann an leabhar eachdraidh rìghrean Iudah? agus bha cogadh eadar Abiam agus Ieroboam.

8 Agus choidil Abiam maille r'a aithrichibh; agus dh'adhlac iad e ann am baile Dhaibhidh: agus rìghich Asa a mhac 'na àit.

9 Agus anns an fhicheadamh bliadhna do Ieroboam rìgh Israeil, rìghich Asa os ceann Iudah?

10 Agus bliadhna agus dà fhichead rìghich e ann an Ierusalem: agus b'e ainm a mhàthar Maachah, nighean Abisaloim.

11 Agus rinn Asa an *ni a bha* ceart ann an suilb an Tighearna, mar a rinn Daibhidh 'athair.

12 Agus dh'fhuadaich e na Sodomaich as an tìr, agus chuir e air falbh na dealbh-an uile a rinn 'aithriche.

13 Agus mar an ceudna Maachah a mhàthair, chuir e eadhon ise o *bhi* na ban-rìghinn, a chionn gu'n d'rinn i dealbh uamhasach ann an dòire: agus sgrìos Asa a dealbh uamhasach, agus loisg se e aig sruth Chidroin.

14 Ach cha do chluireadh as do⁵ na h-àitibh àrda: gidheadh, bha cridhe Asa iomlan leis an Tighearna rè a làithean uile.

15 Agus thug e steach na nithe a naomhaich 'athair, agus na nithe a naomhaich e féin, do thigh an Tighearn, airgid, agus òr, agus soithichean.

16 Agus bha cogadh eadar Asa agus Baasa rìgh Israeil, rè an làithean uile.

17 Agus chaidh Baasa rìgh Israeil suas an aghaidh Iudah, agus thog e Ramah, a chum nach leigeadh e le neach air bith dol a mach no teachd a steach gu Asa rìgh Iudah.

18 Agus ghabh Asa an t-airgid agus an t-òr uile a dh'fhàgadh ann an ionmhasaibh tighe an Tighearn, agus ann an ionmhasaibh tighe an rìgh, agus thug e iad an làimh a sheirbhiseach: agus chuir rìgh Asa iad gu Ben-hadad mac Thabrimoin, mhic Hesioin rìgh Shiria, a bha chòmhnuidh ann an Damascus, ag ràdh,

19 *Tha* coimhcheangal eadar mise agus thusa, agus eadar m'athair-sa agus t'athair-sa: feuch, chuir mi a d'ionnsuidh tiodhlac airgid agus òir; thig agus bris do choimhcheangal ri Baasa rìgh Israeil, a chum gu'm falbh e uam⁶.

20 Agus dh'èisd Ben-hadad ri rìgh Asa, agus chuir e ceannardan nan armaitean a bha aige, an aghaidh bhailean Israeil, agus bhual e Iion, agus Dan, agus Abellbet-maacah, agus Cinerot uile, maille ri tìr Naphtali uile.

21 Agus an uair a chuala Baasa *sin*, sguir e do thogail Ramah, agus ghabh e coimhnuidh ann an Tirsah.

22 An sin thug rìgh Asa gairm air feadh

¹ rìoghachadh.

² nan gilleam-ruith.

³ bhriathraibh, sgeul.

⁴ bhriathraibh.

⁵ cha do chuireadh air falbh, cha d'atharraich-eadh.

⁶ gu'n tog e dhìom.

Iudah uile, (cha robh neach air bith saor;) agus thug iad leo clacha Ramah, agus Thiodh, leis an do thog Baasa e; agus thog rìgh Asa leo Gebah Bheniamin, agus Mispah.

23 Agus a' chuid eile do uile ghnìomh-araibh¹ Asa, agus a neart uile, agus gach ni a rinn e, agus na bailtean a thog e, nach 'eil iad sgrìobhta ann an leabhar eachdraidh rìghrean Iudah? Gidheadh, an àm a shean aois bha eucaill 'na chosaibh.

24 Agus choidil Asa maille r'a aithrichibh, agus dh'adhlaicheadh e maille r'a aithrichibh ann am baile Dhaibhidh 'athar: agus rìghich a mhac Iehosaphat 'na àit.

25 Agus thòisich Nadab mac Ieroboaim air rìoghachadh os ceann Israeil anns an dara bliadhna do Asa rìgh Iudah: agus rìghich e os ceann Israeil dà bhliadhna.

26 Agus rinn e olc ann an sùilbhan Tighearn, agus ghluais e ann an slighe 'athar, agus 'na pheacadh leis an d'thug e air Israel peacachadh.

27 Agus rinn Baasa mac Ahiah, do thigh Isachair, ceannaire² 'na aghaidh: agus bhuail Baasa e làimh ri Gibeton, a bhuineas do na Philistich, an uair a bha Nadab agus Israel uile a' teannachadh³ Ghìbetoin.

28 Mar so mharbh Baasa e anns an treas bliadhna do Asa rìgh Iudah, agus rìghich e 'na àit.

29 Agus an uair a rìghich e, bhuail e tìgh Ieroboaim uile: cha d'fhàg e neach air bith anns an robh anail aig Ieroboaim, gus an do sgrios se e, a réir focail an Tighearn, a labhair e le làimh a sheirbh-ich Ahiah an t-Sìlonaich:

30 Air son pheacanna Ieroboaim a pheacaich e, agus leis an d'thug e air Israel peacachadh: air son a' bhrosnachaidh leis an do bhrosnaich e'n Tighearna Dia Israeil gu feirg.

31 Agus a' chuid eile do ghnìomharaibh Nadaib, agus na h-uile nithe a rinn e, nach 'eil iad sgrìobhta ann an leabhar eachdraidh rìghrean Israeil?

32 Agus bha cogadh eadar Asa agus Baasa rìgh Israeil rè an làithean uile.

33 Anns an treas bliadhna do Asa rìgh Iudah, thòisich Baasa mac Ahiah air rìoghachadh os ceann Israeil uile ann an Tirsah; agus rìghich e ceithir bliadhna fichead.

34 Agus rinn e olc ann an sùilbhan Tighearn, agus ghluais e ann an slighe Ieroboaim, agus 'na pheacadh leis an d'thug e air Israel peacachadh.

CAIB. XVI.

1 Fàistneachd Iehu an aghaidh tìghe Bhaasa.
5 Fhuair Baasa bàs, agus rìghich Elah 'na àit.

8 Mharbh Simri Elah. 18 Loisg Simri e fein 'nuair a theannaich Omri e ann an Tirsah.
22 Bhuadhaich Omri air Tibni. 27 Fhuair Omri bàs, agus rìghich Ahab 'na àit.

UIME sin thàinig focal an Tighearna gu Iehu mac Hanani an aghaidh Bhaasa, ag ràdh,

2 A chionn gu'n d'àrdaich mise thu o'n duslach, agus gu'n d'rinn mi thu a'd' cheannard air mo shluagh Israel, ach gu'n do ghluais thusa ann an slighe Ieroboaim, agus gu'n d'thug thu air mo shluagh Israel peacachadh, 'g am bhrosnachadh gu feirg le'm peacaibh:

3 Feuch, gearraidh mi as sliochd Bhaasa, agus sliochd a thighe; agus ni mi do thighsa mar thigh Ieroboaim mhic Neb-ait.

4 Esan a dh'eugas do Bhaasa anns a' bhaile ithidh na madraidh e; agus esan a dh'eugas leis anns an fhearann, ithidh eunlaith an athair⁴ e.

5 Agus a' chuid eile do ghnìomharaibh Bhaasa, agus na nithe a rinn e, agus a neart, nach 'eil iad sgrìobhta ann an leabhar eachdraidh rìghrean Israeil?

6 Agus choidil Baasa maille r'a aithrichibh, agus dh'adhlaicheadh e ann an Tirsah: agus rìghich Elah a mhac 'na àit.

7 Agus mar an ceudna le làimh an fhàidh Iehu mhic Hanani, thàinig focal an Tighearn an aghaidh Bhaasa, agus an aghaidh a thighe, air son an uile uile a rinn e ann an sùilbhan Tighearna, 'ga bhrosnachadh gu feirg le obair a làmh, gu bhi mar thigh Ieroboaim, agus a chionn gu'n do mharbh se e.

8 Anns an t-sèathadh bliadhna fichead do Asa rìgh Iudah, thòisich Elah mac Bhaasa air rìoghachadh os ceann Israeil ann an Tirsah; agus rìghich e dà bhliadhna.

9 Agus rinn a sheirbhiseach Simri, ceannard leth a charbad, ceannaire 'na aghaidh 'nuair a bha e ann an Tirsah, ag òl gus an robh e air mhisg ann an tìgh Arsah, a bha os ceann a thighe ann an Tirsah.

10 Agus chaidh Simri steach, agus bhuail se e, agus mharbh se e, anns an t-seachdamh bliadhna fichead do Asa rìgh Iudah agus rìghich e 'na àit.

11 Agus an uair a thòisich e air rìoghachadh, co luath as a shuidh e air a rìgh-chaitir, bhuail e tìgh Bhaasa uile: cha d'fhàg e neach air bith aige a d'eanadh uisge ri balla, d'a luchd-dàimh no d'a chairdbh.

12 Mar so sgrios Simri tìgh Bhaasa uile, a réir focail an Tighearn, a labhair e an aghaidh Bhaasa le làimh Iehu an fhàidh;

13 Air son uile pheacanna Bhaasa, agus pheacanna Elah a mhic, leis an do

¹ bhriathraibh.

² coimhchealg.

³ cuairteachadh, luidhe mu.

⁴ an aidheir.

pheacaich iad, agus leis an d'thug iad air Israel peacachadh, a' brosnachadh an Tighearna Dé Israeil gu feirg le'n dìomh-anasaibh.

14 Agus a' chuid eile do ghnìomharaibh Elah, agus na h-uile *nìthe* a rinn e, nach 'eil iad sgrìobhta ann an leabhar eachdraidh rìghrean Israeil?

15 Anns an t-seachdamh bliadhna fìchead do Asa rìgh Iudah, rìghich Simri seachd làithean ann an Tirsah: agus *bha* 'n sluagh air campachadh¹ an aghaidh Ghibeton, a *bhuineadh* do na Philistich.

16 Agus chual' an sluagh a *bha* air campachadh, 'ga ràdh, Rinn Simri ceann-air, agus mar an ceudna bhuail e'n rìgh: uime sin rinn Israel uile Omri, ceannard an t-sloigh, 'na rìgh air Israel an là sin fèin anns a' champ.

17 Agus chaidh Omri, agus Israel uile maille ris, suas o Ghibeton, agus theann-aich iad² Tirsah.

18 Agus an uair a chunnaic Simri gu'n do ghluacadh am baile, chaidh e steach do luchart tìghe an rìgh, agus loisg e tìgh an rìgh os a cheann fèin le teine, agus dh'èug e.

19 Air son a pheacanna leis an do pheacaich e, a' deanamh uile ann an sùilbhan an Tighearn, a' gluasad ann an slighe Ieroboam, agus 'na pheacadh a rinn e, ann an tabhairt air Israel peacachadh.

20 Agus a' chuid eile do ghnìomharaibh Shimri, agus a cheannairc a rinn e, nach 'eil iad sgrìobhta ann an leabhar eachdraidh rìghrean Israeil?

21 An sin roinneadh sluagh Israeil 'nan dà leth: lean leth an t-sluaigh Tibni mac Ghinait, gu 'dheanamh 'na rìgh; agus lean an leth eile Omri.

22 Ach bhuadhaich an sluagh a lean Omri air an t-sluagh a lean Tibni mac Ghinait: agus fhuair Tibni bàs, agus rìghich Omri.

23 Anns an aon bhliadhna deug thar fhìchead do Asa rìgh Iudah, thòisich Omri air rìoghachadh os ceann Israeil³; agus rìghich e dà bhliadhna dheug: ann an Tirsah rìghich e sè bhliadhna.

24 Agus cheannaich e sliabh Shamaria⁴ o Shemer air dhà thàlan airgid, agus thog e *aitreabh* air an t-sliabh, agus ghoir e ainm a' bhaile a thog e, a réir ainme Shemeir, sealbhadair sleibh Shamaria.

25 Ach rinn Omri olc ann an sùilbhan an Tighearn, agus rinn e ni's miosa na iadsan uile a bha roimhe:

26 Oir ghluais e ann an uile shlighe Ieroboaim mhic Nebait, agus 'na pheacadh leis an d'thug e air Israeil peacachadh, a'

brosnachadh an Tighearna Dé Israeil gu feirg le'n dìomh-anasaibh.

27 Agus a' chuid eile do ghnìomharaibh Omri, a rinn e, agus a neart a dh'fheuch e, nach 'eil iad sgrìobhta ann an leabhar eachdraidh rìghrean Israeil?

28 Agus chaidh Omri maille r'a aithrichibh, agus dh'adhlacaidh e ann an Samaria: agus rìghich Ahab a mhac 'na àit.

29 Agus thòisich Ahab mac Omri air rìoghachadh os ceann Israeil, anns an ochdamh bliadhna deug thar fhìchead do Asa rìgh Iudah: agus rìghich Ahab mac Omri os ceann Israeil ann an Samaria, dà bhliadhna thar fhìchead.

30 Agus rinn Ahab mac Omri olc ann an sùilbhan an Tighearn, os ceann nan uile a *bha* roimhe.

31 Agus mar gu'm bu ni faoin⁵ dhasan gluasad ann am peacaibh Ieroboaim mhic Nebait, ghabh e 'na mnaoi Iesebel, nigh-ean Etbaail, rìgh nan Sidonach, agus chaidh e agus rinn e seirbhis do Bhaal, agus shleuchd e dha.

32 Agus chuir e suas altair do Bhaal ann an tìgh Bhaail, a thog e ann an Samaria.

33 Agus rinn Ahab doire; agus rinn Ahab ni's mò a bhrosnachadh an Tighearna Dé Israeil gu feirg na uile rìghrean Israeil a bha roimhe.

34 'Na làithibh-san thog Hiel am Betel-each Iericho: ann an Abiram⁶ a cheudghin shuidhich e a bhunait, agus ann an Segub a mhac a b'òige chuir e suas a gheatachan, a réir focail an Tighearn, a labhair e le làimh Iosua mhic Nuin.

CAIB. XVII.

1 Fàisteachd an aghaidh Ahaib. 6 Bheathaich fithich am fàidh Eliah aig sruth Cherit. 8 'Nuair thiorraich an sruth chuir Dia e dh'ionnsuidh bantraich ann an Surephat. 17 Fhuair mac na bantraich bàs, agus dh'ath-bheothaich ead e a ris.

A GUS thubhairt Eliah an Tisbitheach, *A bha do luchd-àiteachaidh Ghilead⁷, ri Ahab, Mar* is beò an Tighearna Dia Israeil, an làthair am bheil mise a'm⁸ sheasamh, cha bhi sna bliadhnaibh so drùchd no uisge ann, ach a réir m'fhocail-sa.

2 Agus thàinig focal an Tighearna d'a ionnsuidh, ag ràdh,

3 Imich as a so, agus tionndaidh thu fèin a làimh na h-àirde 'n ear, agus folaich thu fèin aig sruth Cherit, a *tha* fa chomhair Iordain.

4 Agus òlaidh tu do'n t-sruth, agus dh'àithn mise do na fitheachaibh do bheathachadh an sin.

5 Agus dh'imich e, agus rinn e a réir focail an Tighearn; oir chaidh e, agus

¹ 'nan suidhe. ² shuidh iad mu'n cuairt air. ³ os ceann Israeil uile. ⁴ Someron. Eabh.

⁵ eutrom, suarach. ⁶ ann am bàs Abiram. ⁷ a bha o Thisbi Ghilead.

ghabh e còmhnuidh aig sruth Cherit, a *tha* fa choinhair Iordain.

6 Agus thug na fithich d'a ionnsuidh aran agus feoil sa' mhaduinn, agus aran agus feoil san fheasgar; agus dh'òl e as an t-sruth.

7 Ach an ceann tamuill¹ thiormaich an sruth, a chionn nach robh uisge anns an tìr.

8 Agus thàinig focal an Tighearna d'a ionnsuidh, ag ràdh,

9 Eirich, imich gu Sarephat, a's le Sidon, agus gabh còmhnuidh an sin: feuch, dh'àithn mise do mhnaoi *a ta* 'na bant-raich an sin do bheathachadh.

10 Agus dh'éirich e, agus chaidh e do Sharephat: agus an uair a thàinig e gu geata a' bhaile, feuch, bha a' bhantrach an sin a' tional bhioran²; agus ghairm e oirre, agus thubhairt e, Thoir a m' ionnsuidh, guidheam ort, beagan uisge ann an soitheach, a chum gu'n òl mi.

11 Agus an uair a bha i a' dol g'a thoirt leatha, ghlaodh e rithe, agus thubhairt e, Thoir a m' ionnsuidh, guidheam ort, greim arain a'd' làimh.

12 Agus thubhairt ise, *Mar* is beò an Tighearna do Dhia, cha 'n eil breacag agam, ach làn an duirn do mhin ann an soitheach³, agus beagan olaidh ann an corn⁴: agus, feuch, *tha* mi a' tional biorain no dhà, a chum gu'n téid mi steach, agus gu'n deasaich mi e dhomh féin agus do m' mhac, agus gu'n ith sinn e, agus gu'm faigh sinn bàs.

13 Agus thubhairt Eliah rithe, Na biodh eagail ort: falbh, dean a réir t'fhocail: ach dean dhomhsa dhiubh sin breacag bheag an toiseach, agus thoir a m' ionnsuidh i, agus dhuit féin agus do d' mhac deasaich⁵ 'na dhéigh sin.

14 Oir mar so tha'n Tighearna Dia Israeil ag ràdh, Cha chaithear an soitheach mine, agus cha teirig an corn olaidh, gus an là san cuir an Tighearn uisge air aghaidh na talmhainn.

15 Agus dh'fhalbh i, agus rinn i a réir focail Eliah: agus dh'ith ise, agus esan, agus a tigh rè mòrain do làithibh.

16 Cha do chaitheadh an soitheach mine, agus cha do theirig an corn olaidh, a réir focail an Tighearn, a labhair e le làimh Eliah.

17 Agus thachair an déigh nan nithe sin, gu'n d'fhàs mac na mnà, *eadhon* mnà an tìghe, gu tinn; agus bha a thinn-eas cho trom as nach d'fhàgadh anail ann.

18 Agus thubhairt i ri Eliah, Ciod e mo ghnòthuch-sa riut⁶, a dhuine le Dia? an

d'thàinig thu a m' ionnsuidh a chur mo pheacaidh an cuimhne, agus a mharbhadh mo mhic?

19 Agus thubhairt esan rithe, Thoir dhomhsa do mhac. Agus ghlac e as a h-uchd e, agus thug e suas e do sheòmar uachdarach⁷, anns an robh e féin a' fantuinn, agus chuir e 'na luidhe air a leabaidh féin e.

20 Agus dh'éigh e ris an Tighearn, agus thubhairt e, A Thighearna mo Dhia, an d'thug thu mar an ceudna olc air a' bhant-raich aig am bheil mi air aoidheachd⁸, le a mac a mharbhadh?

21 Agus shìn se e féin air an leanabh tri uairean, agus dh'éigh e ris an Tighearn, agus thubhairt e, A Thighearna mo Dhia, thigeadh, guidheam ort, anam an leinibh so a steach ann a ris.

22 Agus dh'éisd an Tighearna ri guth Eliah; agus thàinig anam an leinibh a steach ann a ris, agus dh'ath-bheothaich-eadh e.

23 Agus ghlac Eliah an leanabh, agus thug e sìos e as an t-seòmar uachdarach do'n tigh, agus thug e d'a mhàthair e: agus thubhairt Eliah, Feuch, tha do mhac beò.

24 Agus thubhairt a' bhean ri Eliah, A nis le so tha fios agam gur duine le Dia thu, agus gur firinn focal an Tighearn ann do bheul.

CAIB. XVIII.

1 Nochd Eliah e féin do Ahab, 18 agus thug e achmhasan dha air son a dhroch ghniomhara.

40 Mharbh e fàidhean Bhaail aig sruth Chisoìn.

41 Thug e fios do Ahab gu'n tìgeadh pailteas uisge air aghaidh na talmhainn.

AGUS an déigh mòrain do làithibh, thàinig focal an Tighearna gu Eliah anns an treas bliadhna, ag ràdh, Falbh, nochd⁹ thu féin do Ahab, agus bheir mise uisge air aghaidh na talmhainn.

2 Agus dh'fhalbh Eliah g'a nochdadh féin do Ahab: agus bha gorta mhòr ann an Samaria.

3 Agus ghairm Ahab air Obadiah, a bha os ceann a thìghe: (a nis bha eagail an Tighearna gu mòr air Obadiah:

4 Oir an uair a thug Iesebel fa'near fàidhean an Tighearn a ghearradh as, ghabh Obadiah ceud fàidh, agus dh'fhol-aich e iad 'nan leth-cheudaibh¹⁰ ann an uaimh, agus bheathaich e iad le h-aran agus uisge:)

5 Agus thubhairt Ahab ri Obadiah, Imich do'n tìr, a dh'ionnsuidh nan tobar uisge uile, agus a dh'ionnsuidh nan sruth uile, a dh'fheuchainn am faigh sinn feur a chum gu'n gléidh sinn ar n-eich, agus ar

¹ an ceann bliadhna; ceann làithean. Eabh.

² mhaidean, connaidh. ³ barail, cuinneig.

⁴ crùisgein. ⁵ dean.

⁶ Ciod dhomhsa agus dhuitse. Eabh. ⁷ lobhta.

⁸ maille ris am bheil mi air chuir. ⁹ taisbein, feuch. ¹⁰ a lìon leth-cheud agus leth-cheud.

muileidean beò, agus nach caill sinn an spréidh uile.

6 Agus roinn iad an t-*teatorra* gu dol troimpe: chaidh Ahab air aon slighe leis féin, agus chaidh Obadiah air slighe eile leis féin.

7 Agus an uair a bha Obadiah san t-slighe, feuch, thachair Eliah air: agus dh'athnìch se e, agus thuit e air 'aghaidh, agus thubhairt e, An tusa *tha'n* so, mo thighearn Eliah?

8 Agus thubhairt esan ris, *Is* mi: imich, innis do d' thighearna, Feuch, *tha* Eliah an so.

9 Agus thubhairt esan, Ciod am peacadh a rinn mi, gu'n tugadh tu do sheirbhiseach an làimh Ahaib, g'am mharbhadh?

10 *Mar* is beò an Tighearna do Dhia, cha 'n'eil cinneach no rioghachd, do nach do chuir mo thighearna g'ad iarraidh: agus an uair a thubhairt iad, Cha 'n'eil e n so, ghabh e mionnan do'n rioghachd agus do'n chinneach, nach d'fhuir e¹ thu.

11 Agus a nis *tha* thu ag ràdh, Imich, innis do d' thighearna, Feuch, *tha* Eliah an so.

12 Agus tacharaidh, an uair a dh'imich-eas mise nait, gu'n tog spiorad an Tighearna leis thusa far nach 'eil fhios agamsa; agus an uair a thig mise a dh'innseadh do Ahab, agus nach faigh e thu, gu'm mharbh e mise: gidheadh *tha* eagal an Tighearn ormsa do sheirbhiseach o m'òige.

13 Nach d'innseadh do m'tighearna ciod a rinn mi 'nuair a mharbh Iesebel fàidhean an Tighearna, mar a dh'fholaich mi ceud fear a dh'fhàidhibh an Tighearna, 'nan leth-cheudaibh ann an uaimh, agus a bheathaich mi iad le h-aran agus le h-uisge?

14 Agus a nis *tha* thu ag ràdh, Imich, innis do d' thighearna, Feuch, *tha* Eliah an so: agus marbhaidh e mi.

15 Agus thubhairt Eliah, *Mar* is beò Tighearna nan slògh, an làthair am bheil mi a'm' sheasamh, gu deimhin nochdaidh mi mi féin da an diugh.

16 Uime sin chaidh Obadiah an coinn-eamh Ahaib, agus dh'innis e dha: agus chaidh Ahab an coinneamh Eliah.

17 Agus an uair a chunnaic Ahab Eliah, thubhairt Ahab ris, An tusa esan a tha cur Israeil fo bhuaireas²?

18 Agus thubhairt esan, Cha mhise a chuir Israeil fo bhuaireas, ach thusa agus tigh t'athar, a thaobh gu'n do thréig sibh àith-eantan an Tighearn, agus gu'n do lean sibh³ Baalim.

19 A nis uime sin cuir *fios*, cruinnich a

m' ionnsuidh-sa Israel uile gu sliabh Char-meil, agus fàidhean Bhaail, ceithir cheud agus leth-cheud, agus fàidhean nan doire, ceithir cheud, a tha 'g itheadh aig bord Iesebeil.

20 Agus chuir Ahab *fios* a dh'ionnsuidh chloinn Israeil uile, agus chruinnich e na fàidhean an ceann a chéile gu sliabh Char-meil.

21 Agus thàinig Eliah dh'ionnsuidh an t-sluaigh uile, agus thubhairt e, Cia fhad a bhitheas sibh san iom-chomhairl' eadar dhà bharail? Ma's e'n Tighearn a's Dia ann, leanaibh e; ach ma's e Baal, lean-aibh esan. Ach cha do fhreagair an sluagh e aon fhocal.

22 An sin thubhairt Eliah ris an t-sluaigh, Dh'fhàgadh mise, eadhon mise a mhàin a'm' fhàidh leis an Tighearn; ach tha fàidhean Bhaail ceithir cheud agus leth-cheud fear⁴ an àireamh.

23 Thugadh iad dhuinne ma ta dà tharbh òg, agus taghadh iadsan dhoibh féin aon tarbh òg, agus gearradh iad 'na mhiribh e, agus cuireadh iad air connadh e; ach na cuireadh iad teine fuidhe: agus deasaichidh mise an tarbh òg eile, agus cuiridh mi air connadh e, ach cha chuir mi teine fuidhe.

24 An sin gairmibh-sa air ainm bhur dée féin, agus gairmidh mise air ainm an Tighearn⁵: agus an Dia a fhreagras le teine, bithidh esan 'na Dhia. Agus fhreagair an sluagh uile agus thubhairt iad, *Is* maith a labhair thu.

25 Agus thubhairt Eliah ri fàidhibh Bhaail, Taghaibh-sa dhuibh féin aon tarbh òg, agus deasaichibh an toiseach e, oir tha sibh lionmhor; agus gairmibh air ainm bhur dée, ach na cuiribh teine fuidhe.

26 Agus ghabh iad an tarbh òg a thug-adh dhoibh, agus dheasaich iad e, agus ghairm iad air ainm Bhaail o mhaduinn eadhon gu meadhon-là, ag ràdh, A Bhaail, éisd ruinne! Ach cha *robh* guth, no neach air bith a fhreagradh ann: agus leum iad air an altair a rinn iad⁶.

27 Agus an uair a bha e mu mheadhon-là, rinn Eliah fanoid orra, agus thubhairt e, Eighibh le guth àrd; oir *is* dia e: an dara cnid *tha* e a' beachd-smuaineach-adh⁷, no *tha* e air tòir, no *tha* e air thurus, no theagamh gu'm bheil e 'na chodal, agus gu'm feumar a dhùsgadh.

28 Agus dh'éigh iadsan le guth àrd, agus ghearr siad iad féin a réir an gnàtha le claidhibh⁷ agus le lannaibh, gus an do thaom an fhuil a mach orra.

29 Agus an uair a chaidh meadhon-là thairis, agus a rinn iad fàidheadaireachd gu àm toirt suas na h-iobairt-*fheasgair*,

¹ iad.³ thusa.² a' tuairgneadh Israeil.⁴ Iehobhah. Eabh.⁵ rinneadh.⁷ sgcanaibh.⁶ ri bruidhinn.

cha *robh* guth ann, no aon air bith a fhreagradh, no bheireadh fa'near iad.

30 Agus thubhairt Eliah ris an t-sluagh uile, Thigibh am fagus domh-sa. Agus thàinig an sluagh uile am fagus da; agus chàirich e altair an Tighearn a *bha* air a briseadh sìos.

31 Agus ghabh Eliah dà chloich dheug, a réir àireimh thruabh mhac Iacob, chum an d'thàinig focal an Tighearn, ag ràdh, Bithidh Israel mar ainm ort.

32 Agus thog e leis na clachaibh altair ann an ainm an Tighearn; agus rinn e clais co mhòr as gu'n cumadh i dà thomhas sìl, mu'n cuairt air an altair.

33 Agus shuidhich e'n connadh, agus ghearr e'n tarbh òg 'na mhiribh, agus chuir e air a' chonnadh e.

34 An sin thubhairt e, Lìonaibh ceithir soithichean le h-uisge, agus dòrtibh e air an iobairt-loisgte, agus air a' chonnadh. Agus thubhairt e, Deanaibh an dara h-uair e, agus rinn iad an dara h-uair e; agus thubhairt e, Deanaibh an treas uair e, agus rinn iad an treas uair e.

35 Agus chaidh an t-uisge mu'n cuairt air an altair; agus lion e mar an ceudna a' chlais le h-uisge.

36 Agus an àm toirt suas na h-iobairt-*fheasgair*, thàinig Eliah am fàidh am fagus, agus thubhairt e, A Thighearna Dhia Abraham, Isaac, agus Israel, biodh fhios an diugh gur tusa a's Dia ann an Israel, agus *gur* mise t'òglach, agus *gur* ann air t'fhocal-sa rinn mi na nithe so uile.

37 Eisd rium, A Thighearna, éisd rium; agus biodh fios aig an t-sluagh so gur tusa an Tighearna Dia, agus gu'n do phill thu an cridhe air ais a ris.

38 An sin thuit teine an Tighearn, agus chaith e¹ an iobairt-loisgte, agus an connadh, agus na clachan, agus an luathre; agus an t-uisge *bha* sa' chlais dh'imlich e suas.

39 Agus an uair a chunnaic an sluagh uile e, thuit iad air an aghaidh, agus thubhairt iad, *Is* e'n Tighearna féin a's Dia ann, *is* e'n Tighearna féin a's Dia ann.

40 Agus thubhairt Eliah riu, Glacaibh fàidhean Bhaail; na rachadh duine dhiubh as. Agus ghlac siad iad; agus thug Eliah sìos iad gu sruth Chisoin, agus mharbh e iad an sin.

41 Agus thubhairt Eliah ri Ahab, Eirich suas, ith agus òl; oir *tha* fuaim pailteis uisge ann.

42 Agus chaidh Ahab suas a dh'itheadh agus a dh'òl: agus chaidh Eliah suas gu mullach Charmeil, agus thilg se e féin sìos

air an talamh, agus chuir e 'aghaidh eadar a ghluinibh;

43 Agus thubhairt e r'a òglach, Falbh suas a nis, amhairc a dh'ionnsuidh na fairge. Agus chaidh esan suas, agus dh'amhairc e, agus thubhairt e, Cha 'n *eil* ni air bith ann. Agus thubhairt e, Falbh a ris seachd uairean.

44 Agus air an t-seachdamh uair thubhairt e, Feuch, *tha* neul beag cosmhuil ri bois² duine ag éirigh as an fhairege. Agus thubhairt e, Falbh suas, abair ri Ahab, Ulluich do *charbad*, agus gabh sìos, a chum nach bac an t-uisge thu.

45 Agus anns a' cheart àm sin, dhorch-aicheadh na speuran le neulaibh agus *bo* gaoith; agus bha uisge mòr ann. Agus mharcaich Ahab, agus chaidh e do Iesreel.

46 Agus bha làmh an Tighearn air Eliah; agus chrìoslaich e a leasraidh, agus ruith e roimh Ahab, agus an d'thàinig e do Iesreel³.

CAIB. XIX.

1 *Theich Eliah o làthair Iesebeil, agus thàinig e gu Beer-seba. 4 San fhàsach dh'iarr e dha féin bàs fhaghail; 5 ach rinn aingeal an Tighearn cabhair air. 9 Ann an Horeb dh'fhoillsich Dia e féin dha, agus chuir se e a dh'ungadh Hasaeil, Iehu, agus Elisa.*

A GUS dh'innis Ahab do Iesebel na h-uile *nithe* a rinn Eliah, agus cionnus a mharbh e na fàidhean uile leis a' chlàidheamh.

2 Agus chuir Iesebel teachdair a dh'ionnsuidh Eliah, ag ràdh, Mar sin deanadh na dée *riumsa*, agus tuilleadh mar an ceudna, mur dean⁴ mise mu'n am so am màireach t'anam-sa⁵ mar anam aoin diubhsan.

3 Agus bha eagal air, agus⁶ dh'éirich e, agus dh'fhalbh e air sgàth 'anama, agus thàinig e gu Beer-seba, a *bhuineas* do Iudah, agus dh'fhàg e⁷ òglach an sin.

4 Ach chaidh e féin astar latha⁷ do'n fhàsach, agus thàinig e agus shuidh e fuidh chraoibh aiteil, agus dh'iarr e dha féin⁸ bàs fhaghail⁹, agus thubhairt e, Is leòr e; a nis a Thighearna, thoir leat m'anam; oir cha'n fhearr mise na m'aithriche.

5 Agus an uair a luidh e agus a choidil e fuidh chraoibh aiteil, feuch an sin bhean aingeal ris, agus thubhairt e ris, Eirich, ith.

6 Agus dh'amhairc e, agus feuch, *bha* aig a cheann, breacag a bhrùicheadh air a' ghriosaich, agus soitheach uisge: agus dh'ith agus dh'òl e, agus luidh e sìos a ris.

7 Agus thàinig aingeal an Tighearn air ais an dara h-uair, agus bhean e ris, agus

¹ dh'ith e suas, loisg e.

² gu dol a steach Iesreel.

³ làimh.

⁴ cuir.

⁵ do bheatha-sa. ⁶ Agus an uair a chunnaic e sin.

⁷ là.

⁸ d'a anam. Eabh.

⁹ fhaotainn.

thubhairt e, Eirich, ith; oir tha'n turus mòr air do shon.

8 Agus dh'éirich esan, agus dh'ith agus dh'òl e, agus dh'ímich e ann an neart a' bhìdh sin dà fhichead là, agus dà fhichead oidhche, gu ruig Horeb sliabh Dhé.

9 Agus chaidh e steach an sin do uaimh, agus ghabh e tàmh innte; agus, feuch, thàinig focal an Tighearna d'a ionnsuidh, agus thubhairt e ris, Ciod e do ghnothuch an so, Eliah?

10 Agus thubhairt esan, Bha mi ro eudmhor air son an Tighearna Dé nan slògh: oir thréig clann Israeil do choimhcheangal, thilg iad sìos t'altairean, agus mharbh iad t'fhàidhean leis a' chlaidheamh; agus dh'fhàgadh mise a mhàin, agus tha iad ag iarraidh m'anama, chum a thoirt air falbh.

11 Agus thubhairt e, Falbh a mach, agus seas air an t-sliabh an làthair an Tighearn. Agus, feuch, ghabh an Tighearna seachad, agus reub gaoth mhòr agus làidir na beanntan, agus bhris i na creaga nam bloighdibh roimh an Tighearn, ach cha robh an Tighearn anns a' ghaoith; agus an déigh na gaoithe crith-thalmhainn, ach cha robh an Tighearn anns a' chrith-thalmhainn;

12 Agus an déigh na crith-thalmhainn teine, ach cha robh an Tighearn anns an teine; agus an déigh an teine guth ciuin caol.

13 Agus an uair a chuala Eliah e, chòmhdaich e 'aghaidh le 'fhalluinn, agus chaidh e mach, agus sheas e am beul na h-uamha; agus, feuch, thàinig guth d'a ionnsuidh, agus thubhairt e, Ciod e do ghnothuch an so, Eliah?

14 Agus thubhairt esan, Bha mi ro eudmhor air son an Tighearna Dé nan slògh: oir thréig clann Israeil do choimhcheangal, thilg iad sìos t'altairean, agus mharbh iad t'fhàidhean leis a' chlaidheamh; agus dh'fhàgadh mise a mhàin, agus tha iad ag iarraidh m'anama, chum a thoirt air falbh.

15 Agus thubhairt an Tighearna ris, Falbh, pill air do shlighe gu fàsach Dhamascuis: agus an uair a thig thu, ung Hasael 'na rìgh air Siria.

16 Agus Iehu mac Nimsi¹ ungaidh tu 'na rìgh air Israel: agus Elisa mac Shaphait o Abel-meholah ungaidh tu 'na fhàidh a'd' àite féin.

17 Agus tacharaidh, esan a théid as o chlaidheamh Hasaeil, gu marbh Iehu e; agus esan a théid as o chlaidheamh Iehu, gu marbh Elisa e.

18 Gidheadh dh'fhàg mi dhomh féin ann an Israel seachd mìle, na glùinean

uile nach do lùb iad féin do Bhaal, agus gach uile bheul nach d'thug pòg dha.

19 Agus dh'fhalbh e as a sin, agus fhuaire e Elisa mac Shaphait, agus e ag ar le dà chuing dheug dhamh roimhe, agus e féin leis an dara cuing deug: agus chaidh Eliah thairis d'a ionnsuidh², agus thilg e 'fhalluinn air.

20 Agus dh'fhàg esan na daimh, agus ruith e 'n déigh Eliah, agus thubhairt e, Leig dhomh, guidheam ort, m'athair agus mo mhàthair a phògadh, agus an sin leanaidh mi thu. Agus thubhairt esan ris, Falbh, pill; oir ciod a rinn mise ort?

21 Agus phill e uaith, agus ghabh e cuing dhamh, agus mharbh e iad, agus le acfuiun nan damh bhruidh e am feoil, agus thug e do'n t-sluagh i, agus dh'ith iad. An sin dh'éirich e, agus chaidh e'n déigh Eliah, agus fhritheil e dha.

CAIB. XX.

¹ Theannaich Ben-hadad agus na Sirianaich Samaria. 13 Bhuaill Ahab agus òganaich uachdarana Israeil iad. 22 Thàinig na Sirianaich a chogadh ri Israeil aig Aphec, agus bhuaileadh iad a ris le h-àr mòr. 31 Rinn Ahab coimhcheangal ri Ben-hadad.

A GUS chruinnich Ben-hadad rìgh A Shiria a shluagh uile an ceann a chéile; agus bha dà rìgh dheug thar fhichead maille ris, agus eich, agus carbaid: agus chaidh e suas agus theannaich e Samaria, agus chog e 'na aghaidh.

2 Agus chuir e teachdairean gu Ahab rìgh Israeil do'n bhaile, agus thubhairt e ris, Mar so tha Ben-hadad ag ràdh,

3 T'airgid agus t'òr is leamsa; do mhnàir mar an ceudna agus do chlann, eadhon a' chuid a's fearr dhiubh, is leamsa iad.

4 Agus fhreagair rìgh Israeil, agus thubhairt e, A réir t'fhocail, mo thighearn a rìgh, is leat mise, agus gach nì a ta agam.

5 Agus phill na teachdairean, agus thubhairt iad, Mar so labhair Ben-hadad, ag ràdh, Ge do chuir mi fios a d' ionnsuidh, ag ràdh, T'airgid, agus t'òr agus do mhnàir, agus do chlann bheir thu dhomhsa;

6 Gidheadh mu'n tràsh so am màireach cuiridh mi mo sheirbhisich a d' ionnsuidh, agus rannsaichidh iad do thigh, agus tighean do sheirbhisich: agus tacharaidh e, gach nì a ta taitneach do d' shùilibh, gu'n cuir iad 'nan làimh, agus gu'n toir iad leo e.

7 Agus ghairm rìgh Israeil air uile shean-airibh na tìre, agus thubhairt e, Thugaibh fa' near³, guidheam oirbh, agus faicibh cionnus a tha'm fear so ag iarraidh uile; oir chuir e fios a m' ionnsuidh, air mo

¹ Iehu mac Iehosaphait, mhic Nimsi. II. Rìgh Caib. IX. r. 2.

² ghabh Eliah seachad air.
³ comharaichibh.

nìhnaibh, agus air mo chloinn, agus air m'airgid, agus air m'òr, agus cha do dhiùlt mi e.

8 Agus thubhairt na seanairean uile agus an sluagh uile ris, Na éisd ris, agus na aontaich leis.

9 Uime sin thubhairt e ri teachdairibh Bhen-hadaid, innsibh do m' thighearn an rìgh, Gach nì air an do chuir thu *fios* gu t'òglach an toiseach, nì mi; ach an nì so chan' urrainn mi dheanamh. Agus dh'fhalbh na teachdairean, agus thug iad freagradh air ais d'a ionnsuidh.

10 Agus chuir Ben-haded *fios* d'a ionnsuidh, agus thubhairt e, Mar sin deanadh na dée riumsa, agus tuilleadh mar an ceudna, ma's leòr duslach Shamaria gu làn an dorn do'n t-sluagh uile a *tha* gam leantuinn-sa.

11 Agus fhreagair rìgh Israeil, agus thubhairt e, Abrahà *ris*, Na deanadh an tì sin uail, a ta crioslachadh *'armachd* uime, mar an tì a chuir dheth i.

12 Agus an uair a chuala Ben-hadad an teachdaireachd so, agus e féin agus na rìghrean ag òl anns na pàillìunaibh, thubhairt e r'a sheirbhisich, Cuiribh sibh *féin an ordugh*¹. Agus chuir iadsan iad *féin an ordugh* an aghaidh a' bhaile.

13 Agus, feuch, thàinig fàidh àraidh gu Ahab rìgh Israeil, agus thubhairt e, Mar so tha'n Tighearn ag ràdh, Am faca tusa an sluagh mòr so uile? feuch, bheir mise a'd' làimh iad an diugh, agus bithidh fios agad gur mise an Tighearn.

14 Agus thubhairt Ahab, Co leis? Agus thubhairt esan, Mar so tha'n Tighearn ag ràdh, Le òganaich uachdarana nan dùchanna². An sin thubhairt e, Cò chuireas an cath an ordugh? Agus thubhairt esan, Thusa.

15 An sin dh'àireamh e òganaich uachdarana nan dùchanna, agus bha ann diubh dà cheud agus a dhà dheug thar fhichead: agus 'nan déigh-san dh'àireamh e an sluagh uile, *eadhon* uile *shluagh* chloinn Israeil, seachd mìle.

16 Agus chaidh iad a mach mu mheadh-on-là: ach *bha* Ben-hadad ag òl gus an robh e air mhig anns na pàillìunaibh, e féin agus na rìghrean, eadhon an dà rìgh dheug thar fhichead a bha 'ga chòmhnadh.

17 Agus chaidh òganaich uachdarana nan dùchanna mach an toiseach: agus chuir Ben-hadad *daoine* a mach, agus dh'innis iad da, ag ràdh, Thàinig daoine a mach á Samaria.

18 Agus thubhairt esan, Ma's ann gu sìth a thàinig iad a mach, glacaibh beò iad; no ma's ann gu cogadh a thàinig iad a

mach, glacaibh beò iad.

19 Agus thàinig iad a mach as a' bhaile, òganaich uachdarana nan dùchanna, agus an armailt a lean iad.

20 Agus mharbh gach fear diubh 'fhear: agus theich na Sirianaich, agus ruaig Israeil iad; agus chaidh Ben-hadad rìgh Shiria as air muin eich, maille ris a' mharc-shluagh.

21 Agus chaidh rìgh Israeil a mach, agus bhuail e na h-eich, agus na carbad, agus mharbh e na Sirianaich le h-àr mòr.

22 Agus thàinig am fàidh gu rìgh Israeil, agus thubhairt e ris, Falbh, neartaich thu féin, agus thoir fa' near, agus faic ciod a nì thu; oir aig teachd mu'n cuairt³ na bliadhna thig rìgh Shiria nìos a'd' aghaidh.

23 Agus thubhairt seirbhisich rìgh Shiria ris, *Is* dée bheann an dée-san; uime sin bhuadhaich iad oirm: ach cogamaid riu anns a' chòmhnard, agus gun teagamh buadhaichidh sinne orrasan.

24 Agus dean an nì so, Thoir na rìghrean air falbh, gach fear as 'àit, agus cuir ceannardan 'nan àit.

25 Agus àireamh dhuit féin armailt, mar an armailt a thuit agad⁴, each air an each, agus carbad air a' charbad; agus cogaidh sinn riu anns a' chòmhnard, agus gu cinnteach buadhaichidh sinn orra⁵. Agus dh'éisd e r'an guth, agus rinn e mar sin.

26 Agus aig teachd mu'n cuairt na bliadhna dh'àireamh Ben-hadad na Sirianaich, agus chaidh e suas gu h-Aphec a chogadh ri h-Israel.

27 Agus dh'àirmheadh clann Israeil, agus bha iad uile a làthair, agus chaidh iad 'nan coinneamh: agus champaich clann Israeil fa'n comhair, mar dhà threud bheaga ghabhar: ach lìon na Sirianaich an tìr.

28 Agus thàinig duine le Dia, agus labhair e ri rìgh Israeil, agus thubhairt e, Mar so tha'n Tighearn ag ràdh, A chionn gu'n dubhairt na Sirianaich, *Is* Dia bheann an Tighearn, ach cha 'n e Dia nan gleann e; air an aobhar sin bheir mise an sluagh lìonmhor so uile ann ad làimh-sa, agus bithidh fios agaibh gur mise an Tighearn.

29 Agus champaich iad mu choinneamh a chèile seachd làithean: agus air an t-seachdamh là chuireadh an cath: agus mharbh clann Israeil do na Sirianaich ceud mìle coisiche ann an aon là.

30 Ach theich a' chuid eile gu h-Aphec, do'n bhaile; agus an sin thuit balla air seachd mìle fichead fear do na dh'fhàgadh. Agus theich Ben-hadad, agus thàinig e do'n bhaile, do sheòmar-cùil⁶.

¹ *Suidhichibh* na h-innealan-cogaidh.

² *tìr*.

³ *ath-philleadh*.

⁴ *a chaill thu*.

⁵ *bithidh sinn nì's treise na iad*.

⁶ *do sheòmar ann an seòmar*. Eabh.

31 Agus thubhairt a sheirbhiseach ris, Feuch a nls, chuala sinn mu rìghrean tighe Israeil, gur rìghrean iochdmhor iad: cuireamaid ma ta saic-eudach air ar leasraidh, agus cùird¹ air ar cinn, agus rachamaid a mach gu rìgh Israeil; theagamh gu'n saor e t'anam.

32 Agus cheangail iad saic-eudach air an leasraidh, agus chuir iad cùird air an cinn, agus² thàinig iad gu rìgh Israeil, agus thubhairt iad, Tha do sheirbhiseach Ben-hadad ag ràdh, Leig dhomh, guidheam ort, a bhi beò. Agus thubhairt esan, *Am bheil e fathast beò? is e mo bhràthair e.*

33 Agus thug na daoine an aire gu furachar a dh'fheuchainn an tigeadh ni air bith uaith, agus ghrad-ghlac iad e; agus thubhairt iad, Do bhràthair Ben-hadad. An sin thubhairt esan, Rachaidh, thugaibh leibh e. Agus thàinig Ben-hadad a mach d'a ionnsuidh; agus thug e air dol suas do'n charbad.

34 Agus thubhairt Ben-hadad ris, Na bailtean a thug m'athair-sa o t'athair-sa, bheir mise air an ais, agus ni thusa sràide dhuith féin ann an Damascus, mar a rinn m'athair-sa ann an Samaria. An sin thubhairt Ahab, Leigidh mise air falbh thu leis a' choimhcheangal so. Mar so rinn e coimhcheangal ris, agus leig e air falbh e.

35 Agus thubhairt duine àraidh do mhac-aibh nam fàidh r'a choimhearsnach ann am focal an Tighearna, Buail mi, guidheam ort. Agus dhiùlt an duine a bhualadh.

36 An sin thubhairt esan ris, A chionn nach d'èisd thu ri guth an Tighearna, feuch, co luath as a dh'fhalbhas tu uam-sa, marbhaidh leomhan thu. Agus co luath as a dh'fhalbh e uaith, fhuair leomhan e, agus mharbh se e.

37 'Na dhéigh sin fhuair e duine eile, agus thubhairt e, Buail mi, guidheam ort. Agus bhual gu deimhin an duine³ e, agus lot se e.

38 Agus dh'fhalbh am fàidh, agus dh'fheith e air an rìgh làimh ris an t-slighe, agus chuir se e féin ann an coslas⁴ eile le luath⁵ air a'ghaidh⁶.

39 Agus an uair a bha'n rìgh a' gabhail seachad, dh'éigh e ris an rìgh, agus thubhairt e, Chaidh t'òglach a steach gu meadhon a' chatha, agus, feuch, thionndaidh duine a leth-taobh, agus thug e duine a m' ionnsuidh-sa, agus thubhairt e, Gléidh am fear so: mur bi e r'a fhaotainn⁷ air chor sam bith, bithidh t'anam-sa air son 'anama-san, no dìolaidh⁸ tu tàlann airgid.

40 Agus am feadh a bha t'òglach a'

bith-dheanamh an so agus an sud, cha robh esan r'a faghail⁹. Agus thubhairt rìgh Israeil ris, is ann mar so a bhitheas do bhreitheanas-sa; dh'orduich thu féin e.

41 Agus rinn e cabhag, agus chuir e'n luath air falbh o' aghaidh; agus dh'aithnich rìgh Israeil e, gu'm b'ann do na fàidhibh e.

42 Agus thubhairt e ris, Mar so tha'n Tighearna ag ràdh, A chionn gu'n do leig thu as do làimh duine a dh'orduich mise gu léir-sgrìos, uime sin bithidh t'anam-sa air son 'anama-san, agus do shluagh-sa air son a shluagh-san.

43 Agus dh'fhalbh rìgh Israeil a dh'ionnsuidh a thighe dubhach¹⁰ agus feargach¹¹, agus thàinig e gu Samaria.

CAIB. XXI.

1 Bha Ahab dubhach 'na spiorad a chionn gu'n do dhiùlt Nabot 'fhìon-lios a thoirt da. 8 Chuir Iesebel Nabot gu bàs. 17 Thug Eliah fios do Ahab air a' bhreitheanas a labhair Dia d'a thaobh air son a dhroch gheniomhara. 27 Ghabh Ahab aithreachas.

A GUS thachair an déigh nan nithe sin a gu'n robh fìon-lios aig Nabot an t-Ieseleach, a bha ann an Iesreel, làimh ri lùchairt Ahaib rìgh Shamaria.

2 Agus labhair Ahab ri Nabot, ag ràdh, Thoir dhomhsa t'fhìon-lios, gu bhi agam 'na lios¹² luibhean, a chionn gu bheil e fagus do m' thigh, agus bheir mise dhuitse air a shon fìon-lios a's fearr na e; no ma's e a's taitnìche leat¹³, bheir mi dhuith a luach an airgid.

3 Agus thubhairt Nabot ri Ahab, Nar leigeadh Dia dhomhsa, gu'n tugainn oighreachd m'aithriche dhuitse.

4 Agus thàinig Ahab d'a thigh dubhach agus feargach, air son an fhocail a labhair Nabot an t-Ieseleach ris: oir thubhairt e, Cha toir mi dhuith oighreachd m'aithriche: agus luidh e sìos air a leabaidh, agus thionndaidh e 'aghaidh air falbh, agus cha'n itheadh e aran.

5 Ach thàinig Iesebel a bhean d'a ionnsuidh, agus thubhairt i ris, C'ar son a tha do spiorad cho dubhach, agus nach ith thu aran?

6 Agus thubhairt esan rithe, Air son gu'n do labhair mi ri Nabot an t-Ieseleach, agus gu'n dubhairt mi ris, Thoir dhomhsa t'fhìon-lios air airgid; no, ma's àill leat, bheir mi dhuith fìon-lios eile air a shon: agus thubhairt esan, Cha toir mi dhuith m'fhìon-lios.

7 Agus thubhairt Iesebel a bhean ris, Tha thus' a nis a' stiùradh rìoghachd Israeil! Eirich, ith aran, agus biodh do chridhe subhach: bheir mise dhuith fìon-lios Nabot an Ieseleach.

¹ faoid. ² bhual an duine e le bualadh. Eabh.

³ duaineachadh. ⁴ gnais-bhrat.

⁵ a shàilbh. Eabh. ⁶ na dh'ionndruincar e.

⁷ cudthromaichidh. Eabh.

⁹ tuisreach. ¹⁰ fo mhi-ghean.

¹² fearr a'd shùilbh. Eabh.

⁸ fhaotainn.

¹¹ ghàradh.

8 Agus sgrìobh i litrichean ann an ainm Ahaib, agus sheulaich i *iad* le 'sheula; agus chuir i na litriche dh'ionnsuidh nan seanair, agus a dh'ionnsuidh nan uaislean a *bha* chomhnuidh maille ri Nabot 'na bhaile.

9 Agus sgrìobh i anns na litrichibh, ag ràdh, Gairmibh trasgadh, agus thugaibh air Nabot suidhe an toiseach an t-sluaigh:

10 Agus cuiribh dithis dhaoine, mic Bheliail, mu 'choinneamh, a thoirt fianuis 'na aghaidh, ag ràdh, Mhaslaich thu¹ Dia agus an rìgh: agus an sin thugaibh a mach e, agus clachaibh e, a chum gu'm faigh e bàs.

11 Agus rinn daoine a' bhaile *eadhon* na seanairean, agus na h-uaislean a chomhnuich 'na bhaile, a réir an fhios a chuir Iesebel d'an ionnsuidh, a réir an *ni* a *bha* sgrìobhta anns na litrichibh a chuir i d'an ionnsuidh.

12 Ghairm iad trasgadh, agus thug iad air Nabot suidhe an toiseach an t-sluaigh.

13 Agus thàinig dithis dhaoine, mic Bheliail, agus shuidh iad mu 'choinneamh: agus rinn fir Bheliail fianuis 'na aghaidh, *eadhon an aghaidh* Nabot, an làthair an t-sluaigh, ag ràdh, Mhaslaich Nabot Dia agus an rìgh. An sin thug iad a mach as a' bhaile e, agus chlach iad e le clachaibh, agus fhuair e bàs.

14 'Na dhéigh sin chuir iad *teachdair* gu Iesebel, ag ràdh, Chlachadh Nabot, agus tha e marbh.

15 Agus an uair a chuala Iesebel gu'n do chlachadh Nabot, agus gu'n robh e marbh, thubhairt Iesebel ri Ahab, Eirich, gabh sealbh ann an fion-lios Nabot an Iesreelich, a dhiùlt e thoirt duit air air-gìod; oir cha 'n eil Nabot beò, ach marbh.

16 Agus an uair a chual' Ahab gu'n robh Nabot marbh, dh'éirich Ahab a dhol sìos gu fion-lios Nabot an Iesreelich, a ghabhail seilbh ann.

17 Agus thàinig focal an Tighearna dh'ionnsuidh Eliah an Tisbithich, ag ràdh,

18 Eirich, falbh sìos a choinneachadh Ahaib rìgh Israeil, a *tha* ann an Samaria: feuch, tha e ann an fion-lios Nabot, d'an deachaidh e sìos a ghabhail seilbh ann.

19 Agus labhraidh tu ris, ag ràdh, Mar so tha'n Tighearn ag ràdh, An do mharbh thu, agus mar an ceudna an do ghabh thu sealbh? Agus labhraidh tu ris, ag ràdh, Mar so tha'n Tighearn ag ràdh, Anns an àit anns an d'imlich na madraidh fuil Nabot, imlichidh na madraidh t'fhuil-sa, eadhon t'fhuil-sa.

20 Agus thubhairt Ahab ri h-Eliah, An d'fhuair thu mi, O mo nàmhaid? Agus thubhairt esan, Fhuair mi *thu*; a chionn

gu'n do reic thu thu féin a dheanamh uile ann an suilibh an Tighearna.

21 Feuch, bheir mise olc ort, agus cuiridh mi as do d' shliochd, agus gearraidh mi air falbh o Ahab esan a ni uisge ri balla, agus esan a dhruidear a stigh, agus a dh'fhàgar ann an Israel.

22 Agus ni mi do thigh-sa mar thigh Ieroboaim mhic Nebait, agus mar thigh Bhaasa mhic Ahial, air son a' bhrosnachaidh leis an do bhrosnach thu *mi* gu feirg, agus leis an d'thug thu air Israel peacachadh.

23 Agus mar an ceudna mu Iesebel labhair an Tighearn, ag ràdh, Ithidh na madraidh Iesebel aig balla² Iesreel.

24 Esan a gheibh bàs do Ahab anns a' bhaile ithidh na madraidh; agus esau a gheibh bàs anns a' mhachair³ ithidh eunlaith an athair.

25 Ach cha robh *neach* ann cosmhuil ri Ahab, a reic e féin a dheanamh uile ann an suilibh an Tighearna, do blùgh gu'n do tharruing a bhean Iesebel thuige⁴ e.

26 Agus rinn e nithe ro ghràineil ann an leantuinn dhée bréige⁵, a reir nan uile *nithe* a rinn na h-Amoraich, a thilg an Tighearn a mach roimh⁶ chloinn Israeil.

27 Agus an uair a chuala Ahab na briathra sin, reub e 'eudach, agus chuir e saic-eudach air 'fheoil, agus thraisg e, agus luidh e ann an saic-eudach, agus ghluais e gu mall⁷.

28 Agus thàinig focal an Tighearna gu Eliah an Tisbitheach, ag ràdh,

29 Am faic thusa mar a tha Ahab 'ga ùmhlachadh féin a'm' fhianuis-sa? a chionn gu bheil e 'ga ùmhlachadh féin a'm' fhianuis, cha toir mi an t-olc 'na làithibh-san: *ach* ann an làithibh a mhic bheir mi an t-olc air a thigh.

CAIB. XXII.

1 Mhealladh Ahab le fàidhibh bréige, agus mharbhadh e aig Ramot-gilead: 40 rìghich Ahasiah 'na àit. 50 Fhuair Iehosaphat ri Iudah bàs, agus rìghich Iehoram a mhac 'na dhéigh.

A GUS dh'fhan iad trì bliadhna gun chogadh eadar Siria agus Israel.

2 Agus anns an treas bliadhna thàinig Iehosaphat rìgh Iudah a nuas gu rìgh Israeil.

3 (Agus thubhairt rìgh Israeil r'a sheirbh-isich, Nach 'eil fhios agaibh gur leinne Ramot ann an Gilead? agus *gidheadh* *tha* sinn gun ghuth againn air a ghlacadh⁸ a làimh rìgh Shiria.)

4 Agus thubhairt e ri Iehosaphat, An téid thu maille riumsa gu cath do Ramot-gilead? Agus thubhairt Iehosaphat ri rìgh Israeil, *Tha* mise mar a *ta* thusa, mo

¹ Mhallaich thu, thug thu toibheum do.

² ann an daingnach.

³ anns an fhearann.

⁴ chuige.

⁵ dhealbha, riodhola.

⁶ o aghaidh. Eabh.

⁷ gu fòil.

⁸ 'nar tosd o a ghlacadh. Eabh.

shluagh-sa mar do shluagh-sa, m'eich-sa mar t'eich-sa.

5 Agus thubhairt Iehosaphat ri righ Israeil, Fiosraich¹, guidheam ort, an diugh do fhocal an Tighearn.

6 Uime sin chruinnich righ Israeil na fàidhean an ceann a chéile, mu thimchioll ceithir cheud fear, agus thubhairt e riu, An téid mi an aghaidh Ram t-gilead gu cath, no'n leig mi leis? Agus thubhairt iadsan, Falbh suas, oir bheir an Tighearn an làmh an righ e.

7 Agus thubhairt Iehosaphat, Nach 'eil an so fàidh tuilleadh leis an Tighearna, chum gu'm fiosraich sinn dheth?

8 Agus thubhairt righ Israeil ri Iehosaphat, Tha fathast aon fhear ann, Micaiah mac Imlah, leis am feud sinn fiosrachadh do'n Tighearn; ach tha fuath agam dha, oir cha mhaith a chuireas e air mo mhanadh-sa², ach olc. Agus thubhairt Iehosaphat, Na abradh an righ mar sin.

9 Agus ghairm righ Israeil air maor³, agus thubhairt e, Greas an so Micaiah mac Imlah.

10 Agus shuidh righ Israeil, agus Iehosaphat righ Iudah, gach fear air a righ-chaithir féin, le'n earradh rìoghail orra, ann an àite réidh, ann an dol a steach geata Shamaria, agus na fàidhean uile ri fàidheadaireachd 'nam fianuis.

11 Agus rinn Sedeciah mac Chenaanah adhaircean iaruin dha féin, agus thubhairt e, Mar so tha'n Tighearn ag ràdh, Leo so buailidh tu na Sirianaich, gus an cuir thu as doibh.

12 Agus rinn na fàidhean uile fàidheadaireachd⁴ mar so, ag ràdh, Falbh suas gu Ramot-gilead, agus soirbhich; oir bheir an Tighearn an làmh an righ e.

13 Agus an teachdair a chaidh a ghairm Micaiah, labhair e ris, ag ràdh, Feuch a nis, tha briathra nam fàidh le h-aon bheul a' foillseachadh maith do'n righ: bitheadh t'fhocal-sa, guidheam ort, mar fhocal aoin diubhsan, agus labhair an ni a ta maith.

14 Agus thubhairt Micaiah, Mar is beò an Tighearn, an ni a their an Tighearna rium, sin labhraidh mise.

15 Agus thàinig e dh'ionusuidh an righ, agus thubhairt an righ ris, A Micaiah, an téid sinn do Ramot-gilead gu cath, no'n leig sinn leis? Agus thubhairt esan ris, Falbh suas, agus soirbhich; oir bheir an Tighearn an làmh an righ e.

16 Agus thubhairt an righ ris, Cia lìon uair a mhionnaicheas mi thu, nach innis thu dhomh ach an fhirinn ann an ainm an Tighearn?

17 Agus thubhairt esan, Chunnaic mi Israel uile sgapta air na sléibhtibh, mar chaoraich aig nach 'eil aodhaire⁵: agus thubhairt an Tighearna, Cha 'n'eil maighstir orra so: pilleadh gach fear dliubh d'a thigh féin ann an sìth.

18 Agus thubhairt righ Israeil ri Iehosaphat, Nach d'innis mi dhuit nach cuireadh e maith sam bith air mo mhanadh-sa⁶, ach olc?

19 Agus thubhairt esan, Uime sin éisd thusa⁷ ri focal an Tighearna: Chunnaic mise an Tighearna 'na shuidhe air a righ-chaithir, agus uile shlòigh nan nèamh 'nan seasamh làmh ris, air a làmh dheis agus air a làmh chlì.

20 Agus thubhairt an Tighearna, Cò a chuireas impidh⁸ air Ahab, a chum gu'n téid e suas, agus gu'n tuit e ann an Ramot-gilead? Agus thubhairt aon mar so, agus aon eile mar sud.

21 Agus thàinig spiorad a mach, agus sheas e am fianuis an Tighearn, agus thubhairt e, Cuiridh mise impidh air.

22 Agus thubhairt an Tighearna ris, Co leis? Agus thubhairt esan, Théid mi mach, agus bithidh mi a'm' spiorad bréige ann am beul 'fhàidhean uile. Agus thubhairt e, Cuiridh tu impidh air, agus mar an ceudna buadhaichidh tu: falbh a mach, agus dean mar sin.

23 A nis uime sin, feuch, chuir an Tighearna spiorad bréige ann am beul nam fàidh sin agad uile, agus labhair an Tighearn olc mu d' thimchioll.

24 Agus chaidh Sedeciah mac Chenaanah am fagus, agus bhuail e Micaiah air a' ghiall, agus thubhairt e, Cia'n taobh a chaidh spiorad an Tighearn uamsa a labhairt riut-sa?

25 Agus thubhairt Micaiah, Feuch, chi thu san là air an téid thu steach do sheòmar cùil⁹ gu t'fholachadh féin.

26 Agus thubhairt righ Israeil, Glac aibh¹⁰ Micaiah, agus thugaibh air ais e gu Amon uachdaran a' bhaile, agus gu Ioas mac an righ;

27 Agus abraibh, Mar so thubhairt an righ, Cuiribh am fear so anns a' phrìosan¹¹, agus beathaichibh e le aran airce¹², agus le uisge airce, gus an tig mise ann an sìth.

28 Agus thubhairt Micaiah, Ma philleas tusa idir ann an sìth, cha do labhair an Tighearna leamsa. Agus thubhairt e, Eisidibh, a shlòigh uile.

29 Uime sin chaidh righ Israeil, agus Iehosaphat righ Iudah, suas gu Ramot-gilead.

¹ Fèdraich.
thimchioll-sa.

² cha taigir e maith mu m' caillteanach; eunuch. Sasg.

⁴ fàistneachd, manadairachd. ⁵ treudaiche, buachaile.

⁶ nach roimh-innsadh e maith sam

bith mu m' thimchioll-sa.

⁸ a dh'aomas, a mheallas.

an seòmar. Eabh.

tigh a' phrìosain.

⁷ éisdibh.

⁹ do sheòmar ann

¹⁰ Glac.

¹¹ ghainntir;

¹² àn'ghair, gainne.

30 Agus thubhairt rìgh Israeil ri Iehosaphat, Cuiridh mise mi féin ann an coslas eile, agus théid mi a steach do'n chath; ach cuir thusa t'earradh *rioghail* ort. Agus chuir rìgh Israeil e féin ann an coslas eile, agus chaidh e steach do'n chath.

31 Ach dh'àithn rìgh Shiria do'n dà cheannard deug thar fhichead a bha os ceann a charbad, ag ràdh, Na cogaibh ris a' bheag no ris a' mhòr, ach ri rìgh Israeil 'na aonar.

32 Agus an uair a chunnaic ceannardan nan carbad Iehosaphat, thubhairt iad, Gu cinnteach is e so rìgh Israeil. Agus thionndaidh iad a leth-taobh a chogadh 'na aghaidh: agus ghlaodh Iehosaphat a mach.

33 Agus an uair a chunnaic ceannardan nan carbad nach b'e rìgh Israeil a bh'ann, phill iad o a leantuinn.

34 Agus tharruing fear a bhogha a thaobh tuairmeis¹, agus bhuail e rìgh Israeil eadar altaibh na lùirich: uime sin thubhairt e r'a charbadair, Tionndaidh do làmh, agus thoir a mach as an fheachd mi; oir tha mi air mo lotadh.

35 Agus mheudaich² an cath air an là sin: agus chumadh an rìgh suas 'na charbad an aghaidh nan Sirianach, agus fhuair e bàs mu fheasgar; agus ruith an fhuil a mach as an lot gu meadhon a' charbaid.

36 Agus chaidh gairm air feadh an t-slàgh mu luidhe na gréine, ag ràdh, Glach fear d'a bhaile, agus gach fear d'a thìr féin.

37 Agus dh'eug an rìgh, agus thugadh do Shamaria e: agus dh'adhlac iad an rìgh ann an Samaria.

38 Agus nìgh *neach* an carbad ann an lochan Shamaria, agus dh'imlich na madraidh 'fhuil; agus nìgh iad 'armachd, a réir focail an Tighearn, a labhair e.

39 Agus a' chuid eile do ghnìomharaibh Ahaib, agus na h-uile *ni the* a rinn e, agus an tìgh do fhiacailbh *elephant* a thog e, agus na bailtean uile a thog e, nach 'eil iad sgriobhta ann an leabhar eachdraidh rìghrean Israeil?

40 Agus chòidil Ahab maille r'a aithrichibh, agus rìghich Ahasiah a mhac 'na àit.

41 Agus thòisich Iehosaphat mac Asa air rìoghachadh os ceann Iudah annas a'

cheathramh bliadhna do Ahab rìgh Israeil.

42 Bha Iehosaphat cùig bliadhna deug thar fhichead a dh'aois an uair a thòisich e air rìoghachadh, agus rìghich e cùig bliadhna fichead ann an Ierusalem: agus b'e aium a mhàthar Asubah, nighean Shilhi.

43 Agus ghluais e ann an uile shlighe Asa 'athar; cha do chlaon e uaithe, a' deanamh an *ni a bha* ceart ann an sùilibh an Tighearna: gidheadh, cha d'thugadh air falbh na h-àitean àrda, oir fathast dh'ìobair an sluagh, agus loisg iad tùis anns na h-àitibh àrda.

44 Agus rinn Iehosaphat sìth ri rìgh Israeil.

45 Agus a' chuid eile do ghnìomharaibh Iehosaphat, agus a thréine³ a dh'fheuch e, agus cionnus a chog e, nach 'eil iad sgriobhta ann an leabhar eachdraidh rìghrean Iudah?

46 Agus fuigheall nan Sodomach a dh'fhan ann an làithibh Asa 'athar, chuir e as an tìr.

47 San àm sin cha robh rìgh ann an Edom: b'fhear-riaghlaidh a bha 'na rìgh⁴.

48 Rinn Iehosaphat longa do Tharsis⁵ gu dol do Ophir air son òir: (ach cha deachaidh iad ann; oir bhriseadh na longa ann an Esiongeber.)

49 Agus thubhairt Ahasiah mac Ahaib ri Iehosaphat, Rachadh mo sheirbhisich-sa maille ri d' sheirbhisich-sa anns na longaibh: ach cha b'àill le Iehosaphat sin.

50 Agus chòidil Iehosaphat maille r'a aithrichibh, agus dh'adhlac iad e maille r'a aithrichibh ann am baile Dhaibhidh 'athar: agus rìghich Iehoram a mhac 'na àit.

51 Thòisich Ahasiah mac Ahaib air rìoghachadh os ceann Israeil ann an Samaria san t-seachdamh bliadhna deug do Iehosaphat rìgh Iudah, agus rìghich e os ceann Israeil dà bhliadhna.

52 Agus rinn e olc ann an sùilibh an Tighearn, agus ghluais e ann an slighe 'athar, agus ann an slighe a mhàthar, agus ann an slighe Ieroboaim mhic Nebait, a thug air Israel peacachadh:

53 Oir rinn e seirbhis do Bhaal, agus shleuchd e dha, agus bhròsnaich e an Tighearna Dia Israeil gu feirg, a réir nan uile *ni the* a rinn 'athair.

¹ tuairim, teagmhuis.

² dh'éirich. Eabh.

³ neart.

⁴ bha'n àite rìgh.

⁵ longa fairge.

DARA LEABHAR NAN RIGH.

D'AN GOIREAR, GU COITCHEANN

CEATHRAMH LEABHAR NAN RIGH.

CAIB. I.

¹ *Bha Ahasiah tinn, 4 agus fhuair e fìos o Dhia gu'm faigheadh e bàs. 9 Dà uair thug Eliah teine o na nèamhaibh a losgadh an t-sluaigh a chuireadh g'a ghlacadh. 17 Fhuair Ahasiah bàs, agus rìghich Iehoram 'na àit.*

AGUS rinn Moab ceannairc an aghaidh Israeil an déigh bàis Abaih.

2 Agus thuit Ahasiah sìos troimh chliath-uinneig 'na sheòmar uachdarach a bha ann an Samaria, agus bha e tinn; agus chuir e teachdairean uaithe, agus thubhairt e riu, Rachaibh, fiosraichibh do Bhaal-sebub dia Ecroin, an tig mi beò o'n tinneas so.

3 Ach thubhairt aingeal an Tighearn ri Eliah an Tisbitheach, Eirich, falbh suas an coinneamh teachdairean rìgh Shamaria, agus abair riu, An ann a chionn nach 'eil Dia ann an Israel, a tha sibh a' dol a dh'fhiosrachadh do Bhaal-sebub dia Ecroin?

4 A nis uime sin mar so tha'n Tighearn ag ràdh, O'n leabaidh sin air an deachaidh tu suas, cha tig thu a nuas, ach gu cinnteach gheibh thu bàs. Agus dh' fhalbh Eliah.

5 Agus an uair a phill na teachdairean d'a ionnsuidh, thubhairt e riu, C'ar son a tha sibh air pillinn?

6 Agus thubhairt iadsan ris, Thàinig duine a nìos 'nar coinneamh, agus thubhairt e ruinn, Rachaibh, pillibh a dh'ionnsuidh an rìgh a chuir uaithe sibh, agus abraibh ris, Mar so tha'n Tighearn ag ràdh, An ann a chionn nach 'eil Dia ann an Israel, a tha thu a' cur teachdairean a dh'fhiosrachadh do Bhaal-sebub dia Ecroin? Uime sin o'n leabaidh sin air an deachaidh tu suas, cha tig thu a nuas, ach gu cinnteach gheibh thu bàs.

7 Agus thubhairt e riu, Ciod e eugas¹ an duine a thàinig a nìos 'nur coinneamh, agus a labhair ribh na briathra sin?

8 Agus thubhairt iadsan ris, Duine molach, agus e crioslaichte le crios leathair m'a leasraidh. Agus thubhairt esan, Is e Eliah an Tisbitheach a bh'ann.

9 Agus chuir an rìgh d'a ionnsuidh ceannard leth-cheud, maille r'a leth-cheud: agus chaidh e suas d'a ionnsuidh, (agus, feuch, bha e 'na shuidhe air mull-

ach sléibh,) agus labhair e ris, A dhuine le Dia, thubhairt an rìgh, Thig a nuas.

10 Agus fhreagair Eliah, agus thubhairt e ri ceannard an leth-cheud, Agus ma's duine le Dia mise, thigeadh teine a nuas o na nèamhaibh, agus loisgeadh e suas thusa agus do leth-cheud. Agus thàinig teine a nuas o na nèamhaibh, agus loisg e suas esan agus a leth-cheud.

11 Agus a ris chuir e d'a ionnsuidh ceannard eile leth-cheud, maille r'a leth-cheud; agus labhair e, agus thubhairt e ris, A dhuine le Dia, mar so thubhairt an rìgh, Thig a nuas gu grad².

12 Agus fhreagair Eliah agus thubhairt e riu, Ma's duine le Dia mise, thigeadh teine a nuas o na nèamhaibh, agus loisgeadh e suas thusa agus do leth-cheud. Agus thàinig teine Dhé a nuas o na nèamhaibh, agus loisg e suas esan agus a leth-cheud.

13 Agus a ris chuir e uaithe ceannard an treas leth-cheud, maille r'a leth-cheud: agus chaidh an treas ceannard leth-cheud suas, agus thàinig e, agus leig se e féin air a ghlùinibh fa chomhair Eliah, agus dh'aslaich e air, agus thubhairt e ris, A dhuine le Dia, bitheadh, guidheam ort, m'anamsa, agus anam an leth-cheud òglach so agad, luachmhor a'd' shùilibh.

14 Feuch, thàinig teine a nuas o na nèamhaibh, agus loisg e suas an dà cheud cheannard leth-cheud, maille r'an leth-cheudaibh; ach a nis bitheadh m'anamsa luachmhor a'd' shùilibh.

15 Agus thubhairt aingeal an Tighearn ri Eliah, Falbh sìos maille ris; na biodh eagal ort roimhe. Agus dh'éirich e, agus chaidh e sìos maille ris a dh'ionnsuidh an rìgh.

16 Agus thubhairt e ris, Mar so tha'n Tighearn ag ràdh, A chionn gu'n do chuir thu teachdairean a dh'fhiosrachadh do Bhaal-sebub dia Ecroin, mur nach biodh Dia ann an Israel a dh'fhiosrachadh d'a fhocal³, uime sin o'n leabaidh sin air an deachaidh tu suas, cha tig thu nuas, ach gu cinnteach gheibh thu bàs.

17 Agus fhuair e bàs, a réir focail an Tighearn a labhair Eliah: agus rìghich Iehoram 'na àit⁴, anns an dara bliadhna

¹ aogas, coslas.

² Greas ort, thig a nuas. Eabh.

³ an ann a chionn nach 'eil Dia ann an Israel a

dh'fhèdrach d'a fhocal? Eabh.

⁴ rìghich Iehoram, a bhàthair, 'na àit.

do Iehoram mac Iehosaphait rìgh Iudah, a chionn nach robh mac aige.

18 Agus a' chuid eile do ghnìomhar-aibh Ahasiah a rinn e, nach 'eil iad sgriobhta ann an leabhar eachdraidh rìgh-rean Israeil?

CAIB. II.

1 *Dh'ùlt Elisa dealachadh ri Eliah. 11 Thogadh Eliah suas le h-ìom-ghaoith do na nèamhaibh. 14 Roinn Elisa uisge Iordain le falluinn a mhaighstir. 23 Mharbh dà mhath-ghamhuin a' chlann a rinn fanoid air.*

AGUS thachair an uair a bha'n Tighearna gu Eliah a thogail suas le h-ìom-ghaoith do na nèamhaibh, gu'n deachaidh Eliah maille ri Elisa o Ghilgal.

2 Agus thubhairt Eliah ri Elisa, Fan an so, guidheam ort; oir chuir an Tighearna mise gu Bet-el. Agus thubhairt Elisa ris, *Mar* is beò an Tighearna, agus *mar* is beò t'anam, cha'n fhàg mi thu. Agus chaidh iad sìos gu Bet-el.

3 Agus thàinig mic nam fàidh a *bha* ann am Bet-el a mach gu Elisa, agus thubhairt iad ris, Am bheil fhios agad gu'n toir an Tighearna an diugh do mhaighstir air falbh o d'cheann? Agus thubhairt esan, Seadh, tha fhios agam air; bithibh-se 'nur tosd.

4 Agus thubhairt Eliah ris, Elisa, fan an so, guidheam ort; oir chuir an Tighearna mise gu Iericho. Agus thubhairt esan, *Mar* is beò an Tighearna, agus *mar* is beò t'anam, cha dealaich mi riut. Agus thàinig iad gu Iericho.

5 Agus thàinig mic nam fàidh a *bha* ann an Iericho gu Elisa, agus thubhairt iad ris, Nach 'eil fhios agad-sa gu'n toir an Tighearna an diugh do mhaighstir air falbh o d'cheann? Agus fhreagair esan, Seadh, tha fhios agam air; bithibh-se 'nur tosd.

6 Agus thubhairt Eliah ris, Fan, guidheam ort, an so: oir chuir an Tighearna mise gu Iordan. Agus thubhairt esan, *Mar* is beò an Tighearna, agus *mar* is beò t'anam, cha'n fhàg mi thu. Agus chaidh iad 'nan dithis air an aghaidh.

7 Agus chaidh leth-cheud fear do mhac-aibh nam fàidh, agus sheas iad fa'n comhair fad as: agus sheas iadsan 'nan dithis làimh ri Iordan.

8 Agus ghabh Eliah 'fhalluin, agus dh'fhill e cuideachd i, agus bhuail e na h-uisgeachan, agus roinneadh iad a null agus a nall; agus chaidh iadsan 'nan dithis thairis air *talamh* tioram.

9 Agus an uair a bha iad air dol thairis, thubhairt Eliah ri Elisa, iarr ciod as àill leat mise a dheanamh air do shon, mun toirear mi air falbh uait. Agus thubhairt Elisa, Bitheadh, guidheam ort, cuibh-

rionn dhùbailte do d' splorad orm.

10 Agus thubhairt esan, Is cruaidh an nì a dh'iarr thu: *gidheadh*, ma chi thu mise 'nuair a bheirear air falbh uait mi, bithidh e dhuit mar sin; ach mur *faic*, cha bhi e *mar sin*.

11 Agus an uair a bha iad a' gabhail air an aghaidh, agus a' còmhradh, feuch, carbad teime, agus eich theine, agus dhealaich iad o chéile iad: agus chaidh Eliah suas le h-ìom-ghaoith do na nèamhaibh.

12 Agus chunnaic Elisa *sin*, agus ghlaodh e, M'athair, m'athair! carbad Israeil, agus a mharc-shluagh. Agus cha'n fhac' e nì's mò e: agus ring e air 'eudach féin, agus reub e 'na dhà mhrì' e.

13 Agus thog e suas falluinn Eliah a thuit uaithe, agus phill e, agus sheas e làimh ri bruaich Iordain;

14 Agus ghabh e falluinn Eliah a thuit uaithe, agus bhuail e na h-uisgeachan, agus thubhairt e, C'àit a nis *am bheil* an Tighearna Dia Eliah? Agus an uair a bhuail e na h-uisgeacha, roinneadh iad a null agus a nall, agus chaidh Elisa thairis.

15 Agus an uair a chunnaic mic nam fàidh e, a *bha* ann an Iericho fa' chomhair, thubhairt iad, Dh'fhan spiorad Eliah air Elisa. Agus thàinig iad 'na choinneamh, agus chrom siad iad féin dha² gu làr.

16 Agus thubhairt iad ris, Feuch a nis, tha maille ri d' sheirbhisich leth-cheud fear treun³; rachadh iad, guidheamaid ort, agus iarradh iad do mhaighstir, air eagal gu'n do thog spiorad an Tighearna suas e, agus gu'n do thilg se e air beinn éigin, no ann an gleann éigin. Agus thubhairt esan, Cha chuir sibh uaibh *iad*.

17 Agus an uair a chuir iad impidh air gu an robh nàire air, thubhairt e, Cuiribh uaibh *iad*. Agus chuir iad uatha leth-cheud fear; agus dh'iarr iad e rè thrì làithean, ach cha d'fhuair iad e.

18 Agus an uair a thàinig iad a ris d'a ionnsuidh, agus e a còmhnuidh ann an Iericho, thubhairt e riù, Nach dubhairt mise ribh, Na rachaibh?

19 Agus thubhairt fir a' bhaile ri Elisa, Feuch a nis, *tha* suidheachadh a' bhaile so taitneach, mar a *tha* mo thighearna a' faicinn; ach *tha'n* t-uisge olc, agus an talamh neo-thorach.

20 Agus thubhairt esan, Thugaibh a m' ionnsuidh soitheach⁴ nomha, agus cuiribh salann ann. Agus thug iad d'a ionnsuidh e.

21 Agus chaidh e mach a dh'ionnsuidh tobair⁵ nan uisgeachan, agus thilg e salann an sin, agus thubhairt e, Mar so tha'n Tighearna ag ràdh, Shlànnaich mi na

¹ reubadh. Eabh.

² na làithair.

³ mic neart. Eabh.

⁵ teachd a mach, màthar.

⁴ corn, gloin.

II. RIGH, II. III.

h-uisgeacha sin: cha bhi o sin ni's mò bàs, no *talamh* neo-thorach.

22 Agus shlànuicheadh na h-uisgeacha gus an là'n diugh, a réir focail Elisa a labhair e.

23 Agus chaidh e suas as a sin gu Bet-el: agus an uair a bha e a' dol suas air an t-slighe, thàinig clann bheag¹ a mach as a' bhaile, agus rinn iad fanoid air, agus thubhairt iad ris, Gabh suas, fhir mhaoil; gabh suas, fhir mhaoil.

24 Agus sheal e 'na dhéigh, agus chunn-aic e iad, agus mhallaich e iad ann an ainm an Tighearn: agus thàinig dà mbath-ghamhuin bhoirionn a mach as a' choille, agus reub iad a dhà agus dà fhichead duine cloinne dhiubh.

25 Agus chaidh e as a sin gu sliabh Charmeil: agus as a sin phill e gu Samaria.

CAIB. III.

1 *Rìoghachadh aingidh Iehoram. 4 Rinn Mesa rìgh Mhoib ceannaire 'na aghaidh. 24 Bhuail-eadh na Moabaich. 26 Dh'ìobair rìgh Mhoib a cheud-ghin mic, agus phill sluagh Israeil uath.*

A NIS thoisich Iehoram mac Ahaib air rìoghachadh os ceann Israeil ann an Samaria, anns an ochdamh bliadhna deug do Iehosaphat rìgh Iudah, agus rìghich e dà bhliadhna dheug.

2 Agus rinn e ole ann an sùilbhan an Tighearn, ach cha b'ann cosmhuil r'a athair, agus cosmhuil r' a mhàthair; oir chuir e air falbh dealbh Bhaail, a rinn 'athair.

3 Gidheadh, ri peacaibh Ieroboaim mhic Nebait a thug air Israel peacachadh, dhlùth-lean e: cha do dhealaich e riu sin.

4 Agus bha Mesa rìgh Mhoib 'na shealbhadair chaorach, agus dh'ìoc e do rìgh Israeil ceud mìle uan, agus ceud mìle reithe le'n olainn.

5 Agus an uair a dh'eug Ahab, rinn rìgh Mhoib ceannaire an aghaidh rìgh Israeil.

6 Agus chaidh rìgh Iehoram a mach air an là sin à Samaria, agus dh'àireamh e Israeil uile.

7 Agus chaidh e, agus chuir e *teachdair-ean* gu Iehosaphat rìgh Iudah, ag ràdh, Rinn rìgh Mhoib ceannaire a'm aghaidh: an téid thu maille rium an aghaidh Mhoib gu cath? Agus thubhairt esan, Théid mi suas: *tha* mise mar a *ta* thusa, mo shluagh-sa mar do shluagh-sa m'eich-sa mar t'eich-sa.

8 Agus thubhairt e, Cia an rathad a théid sinn suas? Agus fhreagair esan, Rathad fàsaich Edoim.

9 Agus dh'imich rìgh Israeil, agus rìgh Iudah, agus rìgh Edoim, agus chaidh iad mu'n cuairt astar sheachd là; agus cha

robh uisge *aca* do'n t-sluagh, agus do'n spréidh a lean iad.

10 Agus thubhairt rìgh Israeil, Mo thruaighe, gu'n do ghairm an Tighearna na trì rìghrean so cuideachd, chum an toirt thairis do làimh Mhoib.

11 Agus thubhairt Iehosaphat, Nach 'eil an so fàidh leis an Tighearn, a chum gu'm fiosraich sinn do'n Tighearn leis? Agus fhreagair aon do sheirbhisich rìgh Israeil, agus thubhairt e, *Tha'n* so Elisa mac Shaphait, a thaom uisge air làmhnan Eliah.

12 Agus thubhairt Iehosaphat, Tha focal an Tighearna maille ris. Agus chaidh rìgh Israeil, agus Iehosaphat, agus rìgh Edoim, sìos d'a ionnsuidh.

13 Agus thubhairt Elisa ri rìgh Israeil, Ciod e mo ghnothuch-sa riut-sa? imich a dh'ionnsuidh fhàidhean t'athar, agus a dh'ionnsuidh fhàidhean do mhàthar. Agus thubhairt rìgh Israeil ris, Ni h-cadh: oir ghairm an Tighearna na trì rìghrean so cuideachd, chum an toirt thairis do làimh Mhoib.

14 Agus thubhairt Elisa, *Mar* is beò Tighearna nan slògh, an làthair am bheil mi a'm' sheasamh, gu cinnteach mur biodh meas agam-sa do làthaireachd² Iehosaphait rìgh Iudah, cha seallainn ort-sa, ni mò a chithinn thu.

15 Ach a nis thugaibh a m' ionnsuidh fear-ciuil. Agus an uair a bha 'm fear-ciuil a' cluicheadh, bha làmh an Tighearn air.

16 Agus thubhairt e, Mar so tha'n Tighearn ag ràdh, Dean an gleann so làn do chlaisibh³.

17 Oir mar so tha'n Tighearn ag ràdh, Cha'n fhaic sibh gaoth, ni mò a chi sibh uisge; gidheadh lionar an gleann so le h-uisge, agus òlaidh sibh, sibh féin agus bhur spréidh, agus bhur n-ainmhidh ean.

18 Agus is beag⁴ so ann an sùilbhan an Tighearna: bheir e mar an ceudna na Moabaich thairis d'ur làimh.

19 Agus buailidh sibh gach baile daingichte, agus gach baile taghta, agus leagaidh sibh sìos gach craobh mhaith, agus duinidh sibh suas na tobair uisge uile, agus millidh sibh gach mìr maith *fearainn* le clachaibh.

20 Agus anns a' mhaduinn, mu àm toirt suas an tabhartais-bhìdh, feuch, thàinig uisge rathad Edoim, agus lionadh an tìr le h-uisge.

21 Agus an uair a chuala na Moabaich uile gu'n d'thàinig na rìghrean a nìos a chogadh 'nan aghaidh, ghairmeadh cuid-eachd iadsan uile a thàinig gu aois airm

¹ giullain bheaga.

² do ghmùis.

³ na chlaisibh, chlaisibh. Eabh.

⁴ eutrom, suarach.

iomchar¹, agus os a cheann *sin*, agus sheas iad aig a' chrìch.

22 Agus dh'èirich iad gu moch anns a' mhaduinn, agus dhealraich a' ghrian air na h-uisgeachaibh, agus chunnaic na Moabaich thall fa'n comhair na h-uisgeacha dearg mar fhuil:

23 Agus thubhairt iad, *Is* fuil so: sgriosadh gun teagamh na rìghrean, agus bhuail iad a chèile: a nis ma ta, dh'ionnsuidh na creiche, a Mhoaiib.

24 Agus an uair a thàinig iad gu camp Israeil, dh'èirich na h-Israelich, agus bhuail iad na Moabaich, agus theich iad rompa: ach chaidh iadsan air an aghaidh a' bualadh nam Moabach, eadhon 'nan *tìr fèin*.

25 Agus leag iad sìos na bailtean, agus air gach mìr maith fearainn thilg gach fear a chlach, agus lìon iad e; agus dhùin iad suas gach tobar uisge, agus leag iad sìos gach craobh mhaith: a mhàin am an Cir-haraset dh'fhàg iad a chlachan: ach chuairtich luchd nan crann-tàbhuilt e, agus bhuail iad e.

26 Agus an uair a chunnaic rìgh Mhoaiib gu'n do bhuadhaich an cath air, thug e leis seachd ceud fear a tharruing claidheamh, a chum briseadh a steach gu rìgh Edoim; ach cha b'urraim iad.

27 An sin ghabh e a cheud-ghin mic, a bha gu rìoghachadh 'na àit, agus dh'ìobair se e mar ìobairt-loisgte air a' bhalla: agus bha corruich mhòr an aghaidh Israeil: agus dh'imich iad uait, agus phill iad d'an *tìr fèin*.

CAIB. IV.

1 *Mheudaich Elisa oladh na bantraich.* 8 *Aig Sunam thug bean àraidh aoidheachd dha.* 18 *Fhuair a mac bàs, agus dh'ath-bheothaich Elisa e.* 42 *Bheothaich e ceud fear le sìeachd buillean.*

ANIS ghlaodh bean àraidh do mhnaihb mhac nam fàidh ri Elisa, ag ràdh, Fhuair t'òglach m'fhear bàs; agus tha fios agad gu'n robh eagal an Tighearn air t'òglach: agus tha fear nam fiach air teachd a thoirt mo dhithis mhac leis gu bhì 'nan tràillibh aige.

2 Agus thubhairt Elisa rithe, Ciod a ni mise air do shon? iunis dhomh ciod a th'agad san tigh? Agus thubhairt ise, Cha 'n'eil aig do bhanoglaich ni air bith san tigh, ach soitheach olaidh.

3 An sin thubhairt esan, Falbh, iarr dhuit fèin soitheach an coingheall a muigh o d' choimhearsnach uile, eadhon soitheiche falamh: na dean le beagan.

4 Agus an uair a théid thu a steach, druididh tu an dorus ort fèin, agus air do mhacaibh, agus taomaidh tu anns na soitheichibh sin uile, agus cuiridh tu'n

soitheach làn a leth-taobh.

5 Agus dh'fhalbh i uait, agus dhruid i an dorus oirre fèin, agus air a macaibh; agus thug iadsan na soitheiche d'a h-ionnsuidh, agus thaom ise a mach.

6 Agus an uair a bha na soitheiche làn, thubhairt i r'a mac, Thoir a m' ionnsuidh fathast soitheach. Agus thubhairt esan rithe, Cha 'n'eil soitheach ann tuilleadh. Agus stad an oladh.

7 An sin thàinig i agus dh'innis i *sin* do'n duine le Dia: agus thubhairt esan, Falbh, reic an oladh, agus dìol² t'fhiachan; agus thig fèin agus do mhic beò air a' chuid eile.

8 Agus thachair air là àraidh gu'n deachaidh Elisa thairis gu Sunam, far an robh bean mhòr; agus chuir i impidh air³ aran itheadh. Agus ge b' uair a rachadh e seachad, thionndaidheadh e stigh an sin a dh'itheadh arain.

9 Agus thubhairt ise r'a fear, Feuch a nis, tha fhios agam gur duine naomh le Dia e so, a tha gabhail seachad oirnn cho tric⁴.

10 Deanamaid, guidheam ort, seòmar beag balla⁵, agus cuireamaid da an sin leabadh, agus bord, agus caithir, agus coinnleir: agus an uair a thig e d'ar n-ionnsuidh, tionndaidhidh e stigh an sin.

11 Agus tharladh⁶ air là àraidh gu'n d'thàinig e'n sin, agus thionndaidh esteach do'n t-seòmar, agus luidh e'n sin.

12 Agus thubhairt e ri Gehasi 'òglach, Gairm air a' Bhan-sunamaich so. Agus ghairm esan oirre, agus sheas i 'na fhianuis.

13 Agus thubhairt e ris, Abair a nis rithe, Feuch, ghabh thu cùram d'ar taobh-ne leis a' chùram so uile; ciod a tha ri dheanamh air do shon? an àill leat labhairt air do shon ris an rìgh, no ri ceannard an t-sloigh? Agus fhreagair ise, Am measg mo shluaigh fèin tha mi a'm' chòmhnuidh.

14 Agus thubhairt esan, Ciod ma ta a tha ri dheanamh air do shon? Agus thubhairt Gehasi, Gu deimhin cha 'n'eil mac aice, agus tha a fear sean.

15 Agus thubhairt esan, Gairm oirre. Agus an uair a ghairm e oirre, sheas i anns an dorus.

16 Agus thubhairt e, Aig an àm shuidhichte so, a réir àm na beatha, bithidh mac agad a d' ghlacaibh. Agus thubhairt ise, Na dean, mo thighearn, a dhuite le Dia, na dean breug do d' bhanoglaich.

17 Agus dh'fhàs a' bhean torrach, agus rug i mac aig an àm shuidhichte sin mu'n do labhair Elisa rithe, a réir àm na beatha.

¹ gach neach a chrìoslaich e fèin le crìos. Eabh.

² pàigh. ³ choimh-èignich i e.

⁴ an còmhnuidh.

⁶ thachair.

⁵ le balla.

II. RIGH, IV.

18 Agus dh'fhàs an leanabh suas: agus thachair air là *àraidh* gu'n deachaidh e mach a chum 'athar, a dh'ionnsuidh nam buanaichean.

19 Agus thubhairt e r'a athair, Mo cheann, mo cheann! Agus thubhairt esan ri òglach, Tog leat e dh'ionnsuidh a mhàthar.

20 Agus thog esan leis e, agus thug e dh'ionnsuidh a mhàthar e: agus shuidh e air a gluinibh gu meadhon-là, agus an sin dh'eug e.

21 Agus chaidh i suas, agus chuir i 'na luidhe e air leabaidh an duine le Dia, agus dhruid i an *dorus* air, agus chaidh i mach.

22 Agus ghairm i air a fear, agus thubhairt i, Cuir a m' ionnsuidh, guidheam ort, aon do na h-òglachaibh, agus aon do na h-asalaibh, a chum gu'n ruith mi a dh'ionnsuidh an duine le Dia, agus gu'n tig mi a rìs.

23 Agus thubhairt esan, C'ar son a théid thu d'a ionnsuidh? an diugh cha 'n'eil gealach nomha, no sàbaid ann. Agus thubhairt ise, *Bithidh gach ni* gu maith¹.

24 An sin chuir i diollaid air asail, agus thubhairt i r'a h-òglach, Tarruing, agus bi 'g imeachd: na cuir moille orm a' marcachd², mur iarr mi ort.

25 Agus dh'imich i, agus thàinig i dh'ionnsuidh an duine le Dia gu sliabh Charmeil: agus an uair a chunnaic an duine le Dia i fa 'chomhair³, thubhairt e ri Gehasi 'òglach, Feuch, is i sud a' Bhan-sunamach.

26 Ruith a nis, guidheam ort, 'na coinn-eamh, agus abair rithe, Am bheil thu féin gu maith? am bheil t'fhear gu maith? am bheil an leanabh gu maith? Agus fhreagair ise, *Tha* gu maith.

27 Agus an uair a thàinig i a dh'ionnsuidh an duine le Dia chum an t-sleibh, rug i air a chosaibh; ach thàinig Gehasi am fagus gus a cur air falbh. Agus thubhairt an duine le Dia, Leig dhi, oir *tha* a h-anam air a chràdh innte; agus cheil an Tighearn ormsa e, agus cha d'innis e dhomh.

28 Agus thubhairt ise, An d'iarr mise mac o m' thighearna? nach dubhairt mi, Na meall mi?

29 An sin thubhairt e ri Gehasi, Crìs-laich do leasraidh, agus glac mo bhata-sa⁴ ann do làimh, agus bi 'g imeachd: ma thachaireas tu air duine sam bith, na beannaich dha; agus ma bheannaicheas duine sam bith dhuist, na freagair e a rìs: agus cuir mo bhata air aghaidh an leinibh.

30 Agus thubhairt màthair an leinibh, *Mar* is beò an Tighearn, agus *mar* is

beò t'anam-sa cha'n fhàg mi thu. Agus dh'érich e, agus lean e i,

31 Agus chaidh Gehasi air aghaidh rompa, agus chuir e 'm bata air aghaidh an leinibh; ach cha robh cainnt no clàist-eachd aige: uime sin phill e 'na choinn-eamh, agus dh'innis e dha, ag ràdh, Cha 'n'eil an leanabh air dèsgadh.

32 Agus an uair a thàinig Elisa a steach do'n tigh, feuch, bha'n leanabh marbh, agus 'na luidhe air a leabaidh-san.

33 Uime sin chaidh e stigh, agus dhùin e 'n doras orra 'nan dithis, agus rinn e urnuigh ris an Tighearn.

34 Agus chaidh e suas agus luidh e air an leanabh, agus chuir e a bheul air a bheul, agus a shùilean air a shùilibh, agus a làmh an air a làmh aibh, agus shin se e féin sìos air, agus dh'fhàs feoil an leinibh blàth.

35 Agus a rìs, dh'imich e⁵ anns an tigh a null agus a nall⁶, agus chaidh e suas, agus shin se e féin sìos air; agus rinn an leanabh sreothartaich seachd uairean, agus dh'fhosgail an leanabh a shùilean.

36 Agus ghairm e air Gehasi, agus thubhairt e, Gairmair a' Bhan-sunamach so, Agus ghairm esan oirre; agus an uair a thàinig i stigh d'a ionnsuidh, thubhairt esan, Tog leat do mhac.

37 Agus thàinig i agus thuit i aig a chosaibh, agus chrom si i féin sìos gu làr, agus thog i leatha a mac, agus chaidh i mach.

38 Agus phill Elisa gu Gilgal; agus bha gorta san tìr, agus bha mic nam fàidh 'nan suidhe fa 'chomhair: agus thubhairt e r'a òglach, Cuir air a' phoit mhòr, agus bruich brochan do mhacaibh nam fàidh.

39 Agus chaidh ann a mach do'n ach-adh a thional luibhean, agus fhuaire e fionain⁷ fhiadhaich, agus thionail e dhith dearcann⁸ fiadhaich, làn 'fhalluinne, agus thàinig e agus ghearr e sìos iad anns a' phoit bhrochain; oir cha b'aithne dhoibh iad.

40 Agus thaom iad a mach do na daoineibh gu itheadh; agus an uair a bha iad ag itheadh do'n bhrochan, ghlaodh iad, agus thubhairt iad, Bàs anns a' phoit, a dhuine le Dia. Agus cha b'urrainn iad itheadh *dheth*.

41 Agus thubhairt esan, Thugaibh ma ta min a m' ionnsuidh. Agus thilg e anns a' phoit i; agus thubhairt e, Taom a mach air son an t-sluaigh, a chum gu'n ith iad: agus cha robh ni air bith olc anns a' phoit.

42 Agus thàinig duine o Bhaal-salisa, agus thug e dh'ionnsuidh an duine le Dia

¹ *Sith*. Eabh.

² na dean air mo shon-sa

moille ann am marcachd.

³ fad uaith.

⁴ mo lorg-sa. ⁵ Agus phill e, agus dh'imich e. Eabh.

⁶ aon uair an so agus aon uair an sud. Eabh.

⁷ fneamhain, crann-fiona.

⁸ meallain chruinne; gourds. Sasg.

aran do'n cheud toradh, fichead buillonn corra, agus làn dhiasan arbhair 'nan càith-leach¹; agus thubhairt e, 'Thoir do'n t-sluagh, a chum gu'n ith iad.

43 Agus thubhairt 'fhear-frithealaidh² ris, 'C'ar son a chuirinn so an làthair cheud fear? Agus thubhairt esan a ris, 'Thoir do'n t-sluagh, a chum gu'n ith iad: oir mar so tha'n Tighearn ag ràdh, Ithidh iad, agus bithidh fuigheall ann.

44 Uime sin chuir e 'nan làthair e, agus dh'ith iad, agus bha fuigheall aca, a réir focail an Tighearna.

CAIB. V.

1 Leighis Elisa Naaman an Sirianach o 'luibhre.

15 Dhiùlt Elisa tiodhlac a ghabhail uaith.

20 Fhuair Gehazi an tiodhlac le cèilg, agus bhuail-eadh e le luibhre.

ANIS bha Naaman ceannard slòigh a rìgh Shìria 'na dhuine mòr aig a thighearn, agus urramach; a chionn leis-san³ gu'n d'thug an Tighearna saorsa do Shìria: bha e mar an ceudna treun ann an near, ach bu lobhar e.

2 Agus chaidh na Sirianaich a mach 'nam buidhnibh, agus thug iad leo am braighdeanas à tìr Israeil caileag bheag; agus bha i a' feitheamh air mnaoi Naamain.

3 Agus thubhairt i r'a ban-mhaighstir, B'fhearr leam gu'm biodh mo thighearna maille ris an fhàidh a tha ann an Samaria; an sin leighiseadh e o 'luibhre e.

4 Agus chaidh esan⁴ a stigh, agus dh'innis e d'a thighearn, ag ràdh, Mar so agus mar so thubhairt a' chaileag a tha o thìr Israeil.

5 Agus thubhairt rìgh Shìria, Imich romhad, agus cuiridh mise litir a dh'ionnsuidh rìgh Israeil. Agus dh'imich e, agus thug e leis⁵ deich talannan airgid, agus sè mìle bonn òir, agus deich culaidhean eudach.

6 Agus thug e 'n litir a dh'ionnsuidh rìgh Israeil, ag ràdh, A nis an uair a thig an litir so a d' ionnsuidh, feuch, chuir mi a d' ionnsuidh leatha Naaman mo sheirbhiseach, a chum gu'n leighis thu e o 'luibhre⁶.

7 Agus an uair a leugh rìgh Israeil an litir, reub e 'eudach, agus thubhairt e, An Dia mise, a mharbadh agus a dheanamh beò, gu'n cuireadh am fear so fios a m' ionnsuidh duine a leigheas o 'luibhre? uime sin thugaibh fa' near, guidheam oirbh, agus faicibh cionnus a tha e 'g iarraidh aobhair a'm' aghaidh⁷.

8 Agus an uair a chual⁸ Elisa an duine

le Dia gu'n do reub rìgh Israeil 'eudach, chuir e fios a dh'ionnsuidh an rìgh, ag ràdh, C'ar son a reub thu t'eudach? thigheadh e nis a m' ionnsuidh-sa, agus bithidh fios aige gu bheil fàidh ann an Israeil.

9 Agus thainig Naaman le 'eachaibh agus le 'charbad, agus sheas e aig dorus tighe Elisa.

10 Agus chuir Elisa teachdair d'a ionnsuidh, ag ràdh, Imich, agus nigh thu féin seachd uairean ann an Iordan, agus thig t'fheoil a ris a d' ionnsuidh, agus bithidh tu glan.

11 Ach bha fearg air Naaman, agus dh'fhalbh e roimhe, agus thubhairt e, Feuch, shaoil mi⁹, gu cinnteach gu'n tigeadh e mach a m' ionnsuidh, agus gu'n seasadh e, agus gu'n gairmeadh e air ainm an Tighearn a Dhé, agus gu'n cuir-eadh e a làmh air an àit, agus gu'n leighiseadh e an lobhar.

12 Nach 'eil Abana agus Pharpar, aihnichian Dhamascuis, ni's fearr na uile uisgeachan Israeil? nach feud mi mi féin a nigheadh annantas, agus a bhi glan? Agus thionndaidh e, agus dh'fhalbh e roimhe ann an corruich.

13 Agus thainig a sheirbhisich am fagus, agus labhair iad ris, agus thubhairt iad, O athair, nam biodh am fàidh air iarraidh ort ni mòr a dheanamh, nach deanadh tu e? nach ro mhò na sin ma ta, 'muair a tha e'g ràdh riut, Nigh agus bi glan?

14 An sin chaidh e sìos, agus thum se e féin ann an Iordan seachd uairean, a réir focail an duine le Dia; agus thainig 'fheoil a ris mar fheoil leinibh bhig, agus ghlanadh e.

15 Agus phill e a dh'ionnsuidh an duine le Dia, e féin agus a chuideachd uile, agus thainig e, agus sheas e 'na làthair; agus thubhairt e, Feuch, a nis tha fios agam nach 'eil Dia anns an talamh uile ach ann an Israel: a nis ma ta, guidheam ort, gabh tiodhlac⁹ o d' sheirbhiseach.

16 Ach thubhairt esan, Mar is beò an Tighearn, an làthair am bheil mi a'm' sheasamh, cha ghabh mi e. Agus chuir e impidh air a ghabhail, ach dhiùlt esan e.

17 Agus thubhairt Naaman, Nach toir-eam ma ta, guidheam ort, do d' sheirbhiseach eire¹⁰ dhà mhuileid do thalamh¹¹? oir cha toir do sheirbhiseach suas á so a mach tabhartas-loisgte, no lobairt do dhiathaibh air bith eile, ach do'n Tighearn.

18 Anns an ni so gu'n tugadh an Tighearna maithneas do d' sheirbhiseach, an uair a théid mo thighearn a steach do

¹ 'nan caithleanaibh, 'nan cogall; 'na mhàla.

² a sheirbhiseach.

³ le a làmh-san.

⁴ i.e. Naaman.

⁵ 'na làmh. Eabh.

⁶ o a luibhre.

⁷ 'g iarraidh aobhair cur a mach orm.

⁸ thubhairt mi. Eabh.

⁹ beannachadh. Eabh.

¹⁰ ca'lach, luchd, sac.

¹¹ àir.

thigh Rimoin a dheanamh aoraidh¹ an sin, agus a leigeas e a thaic² air mo làimh-sa, agus a chromas mise mi féin sìos ann an tigh Rimoin: an uair a chromas mise mi féin sìos ann an tigh Rimoin, gu'n tugadh an Tighearna maithneas do d' sheirbhiseach anns an ni so.

19 Agus thubhairt esan ris, Imich ann an sìth. Agus dh'imich e uaith beagan astair.

20 Agus thubhairt Gehasi òglach Elisa an duine le Dia, Feuch, chaomhain mo mhaighstir Naaman an Sirianach so, a thaobh nach do ghabh e as a làimh *an ni* sin a thug e leis: ach *mar* is beò an Tighearna, ruithidh mise 'na dhéigh, agus gabhaidh mi ni éigin uaith.

21 Agus lean Gehasi Naaman: agus an uair a chunnaic Naaman e a' ruith 'na dhéigh, leum e nuas as a charbad 'na choinneamh, agus thubhairt e, Am *bheil* gach ni gu maith?

22 Agus thubhairt esan, *Tha gach ni* gu maith: chuir mo mhaighstir uaith mi, ag ràdh, Feuch, a nis thainig a m' ionnsuidh dà òganach o shliabh Ephraim do mhac-aibh nam fàidh: thoir dhoibh, guidheam ort, tàlann airgid, agus dà chulaidh eudaich.

23 Agus thubhairt Naaman, *Ma's* toil leat, gabh dà thàlann. Agus choimh-éiginich se e agus cheangail e dà thàlann airgid ann an dà mhàla, agus dà chulaidh eudaich, agus chuir e iad air dithis d'a òglachaibh; agus ghiùlain iadsan roimhe *iad*.

24 Agus an uair a thàinig e do'n dùn³, ghabh e as an làimh *iad*, agus thaisg e anns an tigh *iad*: agus leig e na daoine air falbh, agus dh'fhalbh iad.

25 Agus chaidh esan a steach, agus sheas e an làthair a mhaighstir, agus thubhairt Elisa ris, Cia as a thàinig *thusa*, a Ghehasi? Agus thubhairt esan, Cha deachaidh do sheirbhiseach taobh air bith.

26 Agus thubhairt esan ris, Nach deachaidh mo chridhe-sa *maille riut*, an uair a phill an duine o 'charbad a'd' choinneamh? an àm so a ghabhail airgid, agus a ghabhail eudaich, agus liosan-olaidh, agus fhion-liosan, agus chaorach, agus buair⁴, agus òglach, agus bhan-oglach?

27 Uime sin dlùth-leanaidh luibhre Naamain riutsa, agus ri d' shliochd gu bràth. Agus chaidh e mach a' fhianuis, 'na lobhar, *geal* mar sheachda.

CAIB. VI.

1 *Thug Elisa air iarunn snàmh.* 8 *Leig e ris comhairle rìgh Shìria, agus thug e gu neo-ni i.* 11 *Chuir rìgh Shìria armailt g'a ghilacadh.* 18 *Bhuaileadh*

iad le doille. 24 *Theannaich Ben-hadad Samaria.* 25 *Bhuaidhaich a' ghorta sa' bhaile.*

A GUS thubhairt mic nam fàidh ri Elisa, Feuch a nis, *tha'n* t-àit anns am bheil sinn a chòmhnuidh maille riut ro chumhainn air ar son.

2 Leig dhunn dol, guidheamaid ort, gu Iordan, agus bheir gach fear againn sail as a sin, agus ni sinn dhunn féin an sin àite gu còmhnuidh a ghabhail ann. Agus fhreagair esan, Rachaibh.

3 Agus thubhairt aon *diubh*, Ma's i do thoil a nis, falbh féin maille ri d' sheirbhiseich. Agus fhreagair esan, Théid mi.

4 Agus chaidh e maille ri u: agus an uair a thàinig iad gu Iordan, ghearr iad sìos fiodh.

5 Ach an uair a bha aon *diubh* a' leagadh saile, thuit iarunn *na tuaighe* anns an uisge: agus dh'éigh e agus thubhairt e, Mo thruaigh, a mhaighstir! agus *gur* ann an coingheall *a bha* e.

6 Agus thubhairt an duine le Dia, C'ait an do thuit e? Agus dh'fheuch esan da an t-àit. Agus ghearr e sìos maide, agus thilg e 'n sin e, agus thug e air an iarunn snàmh.

7 Agus thubhairt e, Tog leat e. Agus shìn esan a mach a làmh, agus ghabh se e.

8 Agus bha rìgh Shìria a' cogadh ri h-Israel; agus chuir e a chomhairle r'a sheirbhiseich, ag ràdh, Ann an leithid so dh'àite *bithidh* mo champ.

9 Agus chuir an duine le Dia *fios* a dh'ionnsuidh rìgh Israeil, ag ràdh, Feuch nach téid thu thairis a dh'ionnsuidh⁵ a leithid so dh'àite; oir an sin tha na Sirianaich air teachd a nuas.

10 Agus chuir rìgh Israeil *daoine* a dh'ionnsuidh an àite mu'n d'innis an duine le Dia dha, agus mu'n d'thug e rabhadh dha, agus dhion se e féin an sin, cha b'ann aon uair no dà uair.

11 Agus bha cridhe rìgh Shìria fo bhuaireas mòr air son an ni so; agus ghairm e air a sheirbhiseich, agus thubhairt e ri u, Nach innis sibh dhomh cò 'nar measg-ne *tha* le rìgh Israeil?

12 Agus thubhairt aon d'a sheirbhiseich, Cha 'n *eil neach air bith*, a thighearn, a rìgh: ach Elisa am fàidh, a *tha* ann an Israel, innsidh *esan* do rìgh Israeil na briathran a labhras tu ann do sheòmar-leapach.

13 Agus thubhairt esan, Rachaibh agus seallaibh c'ait *am bheil* e, a chum gu'n cuir mi *daoine* uam, agus gu'n glac mi e⁶. Agus dh'innsadh dha, ag ràdh, Feuch, *tha* e ann an Dotan.

14 Uime sin chuir e eich an sin, agus carbaid, agus sluagh mòr: agus thàinig iad

¹ a shleuchdadh.

² a chudthrom.

³ tìr, àit òrd; ophel. Eabh.

⁴ cruaidh.

⁵ seachad air.

⁶ gu'n toir mi 'n so e.

sau oidhche, agus chuairtich iad am baile.

15 Agus dh'éirich seirbhiseach an duine le Dia gu moch sa' mhaduinn, agus chaidh e mach, agus feuch, *bha* armailt a' cuairteachadh a' bhaile, maille ri eachaibh agus ri carbadaibh; agus thubhairt 'òglach ris, Mo thruaigh, a mhaighstir! cionnus a ni sinn?

16 Agus fhreagair esan, Na biodh eagal ort; oir is lionnhoire *iad a tha* leinne na *iadsan a tha* leo-san.

17 Agus rinn Elisa urnuigh, agus thubhairt e, A Thighearna, fosgail, guidheam ort, a shùilean, a chum gu'm faic e. Agus dh'fhosgail an Tighearna sùilean an òganaich, agus chunnaic e; agus, feuch, *bha* n' sliabh làn do eachaibh, agus do charbadaibh teine mu'n cuairt air Elisa.

18 Agus an uair a thàinig iad a nuas d'a ionnsuidh, rinn Elisa urnuigh ris an Tighearn, agus thubhairt e, Buail, guidheam ort, an sluagh so le doille. Agus bhuail e iad le doille, a réir focail Elisa.

19 Agus thubhairt Elisa riu, Cha 'n i so an t-slighe, agus cha 'n e so am baile; leanaibh mise, agus bheir mi sibh a dh'ionnsuidh an duine a tha sibh ag iarraidh. Ach thug e iad gu Samaria.

20 Agus an uair a thàinig iad a steach do Shamaria, thubhairt Elisa, A Thighearna, fosgail sùilean nan daoine so, chum gu'm faic iad. Agus dh'fhosgail an Tighearn an sùilean, agus chunnaic iad, agus, feuch, *bha iad* am meadhon Shamaria.

21 Agus thubhairt rìgh Israeil ri Elisa, an uair a chunnaic e iad, Am buail, am buail mi *iad*¹, athair?

22 Agus fhreagair esan, Cha bhuail thu *iad*: am buaileadh tu iadsan a ghlac thu 'nam braighdibh le d' chlaideamh, agus le d'bhogha²? cuir aran agus uisge fa'n comhair, a chum gu'n ith agus gu'n òl iad, agus gun téid iad a dh'ionnsuidh an tighearna féin.

23 Agus rinn e deasachadh mòr air an son; agus an uair a dh'ith agus a dh'òl iad, leig e air falbh iad, agus chaidh iad a dh'ionnsuidh an tighearn. Agus cha d'thàinig buidhne Shiria ni's mò do thir Israeil.

24 Agus 'na dhéigh so chrùinnich Benhadad rìgh Shiria 'armailt uile, agus chaidh e suas agus theannaich e Samaria.

25 Agus bha gorta mhòr ann an Samaria; agus, feuch, theannaich iad e, agus an robh ceannasail *air a reiceadh* air cheithir fichead *bonn* airgid, agus an ceathramh cuid do chab do aolach choluman³ air

chùig *bonnaibh* airgid.

26 Agus an uair a bha rìgh Israeil a' gabhail seachad air a' bhalla, ghlaodh bean ris, ag ràdh, Dean cabhair orm, mo thighearn a rìgh.

27 Agus thubhairt esan, Mur dean an Tighearna cabhair ort, cionnus a ni mise cabhair ort? an ann as urlar an t-sabhail, no as an fhìon-amar?

28 Agus thubhairt an rìgh rithe, Ciod *a tha teachd* riut? Agus fhreagair ise, Thubhairt a' bhean so rium, Thoir seachad do mhac-sa, chum gu'n ith sinn an diugh e, agus mo mhac-sa ithidh sinn am màireach.

29 Agus bhruidh sinn mo mhac-sa, agus dh'ith sinn e: agus thubhairt mise rithe-sa air an ath là, Thoir seachad do mhac-sa, chum gu'n ith sinn e: ach dh'fholaich ise a mac.

30 Agus an uair a chual' an rìgh briathra na mnà, reub e 'eudach, agus ghabh e seachad air a' bhalla, agus dh'amhairc an sluagh, agus, feuch, *bha* saic-eudach air 'fheoil air an taobh a stigh.

31 An sin thubhairt e, Gu'n deanadh Dia mar sin riumsa, agus tuilleadh mar an ceudna, ma sheasas ceann Elisa mhiic Shaphait air an diugh.

32 Ach *bha* Elisa 'na shuidhe 'na thigh, agus na seannairean 'nan suidhe maille ris: agus chuir an rìgh duine uath as a làthaireachd féin⁴: ach mu'n d'thàinig an teachdair d'a ionnsuidh thubhairt e ris na seanairibh, Am faic sibhse mar a chuir mac so a' mhòrtair duine a thoirt mo chinn diomsa? thugaibh an aire⁵ nuair a thig an teachdair, druidibh an dorus, agus cumaidh gu daingean e aig an dorus: nach 'eil fuaim chos a thighearna 'na dhéigh?

33 An uair a bha e fathast a' labhairt riu, feuch, thàinig an teachdair nuas d'a ionnsuidh: agus thubhairt e, Feuch, tha'n t-òlc so o'n Tighearna; c'ar son a dh'fheithinn-se air an Tighearna ni's faide?

CAIB. VII.

1 *Reimh-innis* Elisa gu'm bitheadh mòr-phailteas ann an Samaria. 3 Thug ceathrar dhaoine a chaidh a mach don' champ fios seachad *gu'n do theich na Sirianaich*. 12 Chreach rìgh Israeil agus an sluagh camp nan Sirianach.

AN sin thubhairt Elisa, Eisdibh ri focal an Tighearna: Mar so tha'n Tighearn ag ràdh, Mu'n tràsh so ann màireach *reicear* tomhas do mhin mhìn air shecel, agus dà thomhas eorna air shecel, ann an geata Shamaria.

2 Agus fhreagair ceannard⁶, a lcig an

¹ Le buaidh am buail mi iad? Eabh.

² An ann a chionn gu'n do ghlac thu iad le d' chlaideamh, agus le d'bhogha, a mharbhadh tu iad?

³ do ghall-pheasair.

⁴ ahiubhsan a bha feitheamh air.

⁵ seallaidh.

⁶ mòir-fhear, duine san treas àite fuidh 'n rìgh.

II. RIGH, VII.

rìgh a thaic air a làimh, an duine le Dia, agus thubhairt e, Feuch, *ged* dheanadh an Tighearna tuil-dhorsan¹ anns na nèamhaibh, am feudadh an nì so bhi? agus thubhairt esan, Feuch, chì thusa le d' shùilibh e, ach cha'n ith thu dheth.

3 Agus bha ceathrar do dhaoibh air an robh an luibhre aig dol a steach a' gheata; agus thubhairt iad gach fear r'a chéile, C'ar son a dh'fhanas sinn an so gus am bàsaich sinn?

4 Ma their sinn, Rachamaid a steach do'n bhaile, *tha* a' ghorta anns a' bhaile, agus bàsaichidh sinn an sin; agus ma dh'fhanas sinn an so, bàsaichidh sinn mar an ceudna. A nis ma ta thigibh, agus teicheamaid gu camp² nan Sirianach: ma chaomhnas iad beò sinn, bithidh sinn beò; ach ma mharbhas iad sinn, cha 'n fhaigh sinn ach am bàs.

5 Agus dh'éirich iad anns an dùthra³ gu dol a dh'ionnsuidh caimp⁴ nan Sirianach: agus an uair a thàinig iad gus a' chuid a b'fhaide mach do champ nan Sirianach, feuch, cha robh duine air bith an sin:

6 Oir thug an Tighearna air feachd nan Sirianach fuaim charbad a chluinntinn, agus fuaim each, *eadhon* fuaim slòigh mhòir: agus thubhairt iad gach fear r'a chéile, Feuch, thuarasdalaich rìgh Israeil 'nar n-aghaidh rìghrean nan Hiteach, agus rìghrean nan Èiphiteach, gu teachd oirnn.

7 Uime sin dh'éirich iad, agus theich iad anns an dùthra, agus dh'fhàg iad am bùthan, agus an eich, agus an asail, *eadhon* an camp mar a bha e, agus theich iad air son an anama.

8 Agus an uair a thàinig na lobhair sin gus a' chuid a b'fhaide mach do'n champ, chaidh iad a steach do aon bhùth, agus dh'ith iad, agus dh'òl iad, agus thug iad leo as a sin airiod; agus òr, agus eudach, agus chaidh iad agus dh'fholaich siad iad; agus thàinig iad air an ais, agus chaidh iad a steach do bhùth eile, agus thug iad leo as a sin *mar an ceudna*, agus claidh iad agus dh'fholaich siad iad.

9 Agus thubhairt iad gach fear r'a chéile, Cha 'n'eil sinn a' deanamh gu ceart: is là deadh sgéil an là so, agus *tha* sinne 'nar tosd: ma dh'fhanas sinn gu solus na maidne, thig olc éigin oirnn: a nis ma ta thigibh, agus rachamaid agus innseamaid do theaghlach an rìgh.

10 Agus thàinig iad agus ghlaodh iad ri dorsairibh⁵ a' bhaile, agus dh'innis iad dhoibh, ag ràdh, Chaidh sinne gu camp

nan Sirianach, agus, feuch, cha robh duine air bith an sin, no guth duine, ach eich ceangailte, agus asail ceangailte, agus na bùthan mar a bha iad.

11 Agus ghlaodh na dorsairean⁶, agus dh'innis iadsan do theaghlach an rìgh a stigh.

12 Agus dh'éirich an rìgh anns an oidhche, agus thubhairt e r'a sheirbhisich, Innsidh mi dhuibh a nis ciod a rinn na Sirianaich oirnn: tha fios aca gu *bheil* sinne ocraich, agus chaidh iad a mach as a' champ gu'm folach féin anns a' mhach-air, ag ràdh, An uair a thig iad a mach as a' bhaile, glacaidh sinn beò iad, agus théid sinn a steach do'n bhaile.

13 Agus fhreagair aon d'a sheirbhisich, agus thubhairt e, Gabhar a nis cuig do na h-eachaibh a tha air am fàgail, a dh'fhan anns a' bhaile, (feuch, *tha* iad mar uile shluagh Israeil⁷ d'an do chuir-eadh as,) agus cuireamaid teachdairean uainn agus faiceamaid.

14 Ghabhadh uime sin dà each carbaid⁸; agus chuir an rìgh teachdairean an déigh feachd nan Sirianach, ag ràdh, Rachaibh agus faicibh.

15 Agus chaidh iad 'nan déigh gu ruig Jordan, agus, feuch, bha'n t-slighe uile làn do eudach, agus do shoitichibh, a thig na Sirianaich uatha 'nan cabhaig: agus phill na teachdairean, agus dh'innis iad do'n rìgh.

16 Agus chaidh an sluagh a mach, agus chreach iad camp⁹ nan Sirianach: agus reiceadh tomhas do mhìn mhìn air shecel, agus dà thomhas eorna air shecel, a réir focail an Tighearna.

17 Agus chuir an rìgh cùram a' gheata air a' cheannard, a leig e a thaic air a làimh: agus shaltair an sluagh air anns a' gheata, agus dh'eug e, mar a thubhairt an duine le Dia, a labhair an uair a thàinig an rìgh a nuas d'a ionnsuidh.

18 Agus thachair e, mar a labhair an duine le Dia ris an rìgh, ag ràdh, Bithidh dà thomhas eorna air shecel, agus tomhas do mhìn mhìn air shecel, mu'n tràth so am màireach ann an geata Shamaria:

19 Agus fhreagair an ceannard sin an duine le Dia, agus thubhairt e, Feuch a nis, *ged* dheanadh an Tighearna tuil-dhorsan anns na nèamhaibh, am feudadh a' leithid so do nì a bhi? agus thubhairt esan, Feuch, chì thu le d' shùilibh e, ach cha'n ith thu dheth.

20 Eadhon mar sin thachair e dha: oir shaltair an sluagh air anns a' gheata, agus dh'eug e.

¹ uinneagan.

³ an-mach, duibhre.

⁵ dorsair.

² feachd.

⁴ camp.

⁶ ghlaodh e ris na dorsairibh.

⁷ mar uile shluagh Israeil a dh'fhàgadh ann; feuch tha mi 'g ràdh, *tha* iad mar uile shluagh Israeil.

⁸ da charbad le'n eachaibh.

⁹ bùthan.

CAIB. VIII.

3 *Phill a' Bhan sunamach a' tìr nam Phàisteach.*
10 *Thug Elisa fìos do Hasael gu'm faigheadh Ben-hadad bàs, agus gu'm bitheadh e fèin 'na rìgh air Siria.* 28 *Rinn Edom agus Litmah ceannaire an aghaidh Iudah.* 23 *Rìghich Ahasiah an àit Iehoram.*

AN sin labhair Elisa ris a' mhnaoi, d'an d'ath-bheothaich e a mac, ag ràdh, Eirich, agus imich thusa agus do theaghlach, agus falbh air chuairt ge b'e àit am feud thu bhì air chuairt: oir ghairm an Tighearn air gorta, agus mar an ceudna thig i air an tìr rè sheachd bliadhna.

2 Agus dh'éirich a' bhean, agus rinn i a réir focail an duine le Dia: agus dh'fhalbh i fèin agus a teaghlach, agus bha i air chuairt ann an tìr nam Philisteach rè sheachd bliadhna.

3 Agus aig ceann nan seachd bliadhna phill a' bhean a tìr nam Philisteach: agus chaidh i mach a ghairm air an rìgh air son a tighe, agus air son a fearainn.

4 Agus labhair an rìgh ri Gehasi, òglach an duine le Dia, ag ràdh, Innis dhomh, guidheam ort, na mìthe mòra uile a rinn Elisa.

5 Agus an uair a bha e ag innseadh do'n rìgh mar a dh'ath-bheothaich e *neach* a bha marbh, feuch, ghlaodh a' bhean, d'an d'ath-bheothaich e a mac, ris an rìgh air son a tighe, agus air son a fearainn. Agus thubhairt Gehasi, Mo thighearn, a rìgh, so a' bhean, agus so a mac, a dh'ath-bheothaich Elisa.

6 Agus an uair a dh'fheòraich an rìgh do'n mhnaoi, dh'innis i dha. Agus dh'ordugh an rìgh dhì maor àraidh, ag ràdh, Thoir air ais gach nì bu leatha, agus uile thoradh an fhearainn, o'n là a dh'fhàg i an tìr, eadhon gus a nìs.

7 Agus thàinig Elisa gu Damascus: agus *bha* Ben-hadad rìgh Shiria tinn: agus dh'innseadh dha, ag ràdh, Thàinig an duine le Dia an so.

8 Agus thubhairt an rìgh ri Hasael, Gabh ann ad làimh tiodhlac, agus falbh an coimeamh an duine le Dia, agus fiosraich do'n Tighearna leis ag ràdh, Antig mi beò o'n tinneas so?

9 Agus dh'fhalbh Hasael 'na choinneamh, agus ghabh e tiodhlac 'na làimh, eadhon do gach nì maith a *bha* 'na Damascus, eirè¹ dhà fhichead chàmhail: agus thàinig e. agus sheas e 'na làthair, agus thubhairt e, Chuir do mhac Ben-hadad, rìgh Shiria, mise a d'ionnsuidh, ag ràdh, An tig mi beò o'n tinneas so?

10 Agus thubhairt Elisa ris, Falbh abair ris, Feudaidh tu gun teagamh

teachd uait: gidheadh, nochd an Tigh-earna dhomhsa gu'm faigh e gu cinnteach bàs.

11 Agus shocraich e a ghnùis gu seas-mhach, gus an robh nàire air: agus ghuid an duine le Dia.

12 Agus thubhairt Hasael, C'ar son a *tha* mo thighearn a' gul? Agus fhreagair esan, A chionn gu bheil fìos agam air an olc a nì thusa do chloinn Israeil: an daingneacha làidir cuiridh tu ri theine, agus an daoine òga marbhaidh tu leis a' chhlaidheamh, agus an clann bheag bruthaidh tu², agus am mnathan torrach reubaidh tu suas.

13 Agus thubhairt Hasael, Ach ciod, an cù do sheirbhiseach, gu'n deanadh e an nì mòr so? Agus fhreagair Elisa, Nochd an Tighearna dhomhsa *gu'm bi* thu a' d' rìgh air Siria.

14 Agus dh'fhalbh e o Elisa, agus thàinig e dh'ionnsuidh a thighearn, a thubhairt ris, Ciod a thubhairt Elisa riut? Agus fhreagair esan, Dh'innis e dhomh *gu'n* tig thu gu cinnteach *o'n tinneas* so.

15 Agus air an là màireach ghabh e eudach tiugh, agus thum e ann an uisge e, agus sgaoil e air 'aghaidh e, air chor as gu'n d'fhuair e bàs: agus rìghich Hasael 'na àit.

16 Agus anns a' chiùgeadh bliadhna do Ioram mac Ahaib, rìgh Israeil³, thòisich Iehoram, mac Iehosaphat rìgh Iudah, air rìoghachadh.

17 Dà bhliadhna dheug thar fhichead a dh'aois bha e 'nuair a thòisich e air rìoghachadh, agus rìghich e ochd bliadhna ann an Ierusalem.

18 Agus ghluais e ann an slighe rìgh-rean Israeil, mar a rinn tìgh Ahaib; oir bha nighean Ahaib 'na mnaoi aige: agus rinn e olc ann an sùilbh an Tighearna.

19 Gidheadh cha b'àill leis an Tigh-earn Iudah a sgrios, air sgàth Dhaibhidh 'òglaich, mar a gheall e dha solus⁴ a thabhairt da fèin agus d'a mhacaibh an còmhnuidh.

20 'Na làithibh-san dh'éirich Edom⁵ o *bhi* fuidh làimh Iudah, agus rinn iad rìgh os an ceann fèin.

21 Agus chaidh Ioram thairis gu Sair, agus na carbadan uile maille ris: agus dh'éirich e san oidhche, agus bhuail e na h-Edomaich a bha mu'n cuairt air, agus ceannarda nan carbad: agus theich an sluagh d'am bùthaibh.

22 Gidheadh dh'éirich Edom o *bhi* fuidh làimh Iudah gus an là'n diugh: agus dh'éirich Libnah san àm cheudna.

23 Agus a' chuid eile do ghnìomhar-aibh Ioraim, agus gach nì a rinn e, nach

¹ eallach, luchd.

² bnuilidh tu ris an làr.

³ rìgh Israeil. 'nuair a bha Iehosaphat 'na rìgh air Iudah.

⁴ Iòchran.

⁵ rinn Edom ar' a mach.

'eil iad sgrìobhta ann an leabhar eachdraidh rìghrean Iudah?

24 Agus choidil Ioram maille r'a aithrichibh, agus dh'adhlaicheadh e maille r'a aithrichibh ann am baile Dhaibhidh: agus rìghich Ahasiah a mhac 'na àit.

25 Anns an dara bliadhna deug do Ioram mac Ahaib, rìgh Israeil, thòisich Ahasiah mac Iehoraim, rìgh Iudah, air rìoghachadh.

26 Dà bhliadhna thar fhichead a dh'aois bha Ahasiah an uair a thòisich e air rìoghachadh, agus rìghich e aon bhliadhna ann an Ierusalem: agus b'e ainm a mhàthar Ataliah, nighean Omri¹ rìgh Israeil.

27 Agus ghluais e ann an slighe tìghe Ahaib, agus rinn e ole ann an sùilbhan Tighearna, mar a rinn tìgh Ahaib: oir bu chliamhuin do thigh Ahaib e.

28 Agus chaidh e maille ri Ioram mac Ahaib, gu cogadh an aghaidh Hasaail rìgh Shiria ann an Ramot-gilead; agus lot na Sirianaich Ioram.

29 Agus chaidh rìgh Ioram air ais gu bhì air a leigheas ann an Iesreel o na lotaibh a thug na Sirianaich dha ann an Ramot, an uair a chog e an aghaidh Hasaail rìgh Shiria: agus chaidh Ahasiah mac Iehoraim, rìgh Iudah, sìos a dh'fhaicinn Ioram mhic Ahaib ann an Iesreel, a chionn gu'n robh e tinn.

CAIB. IX.

1 Chuir Elisa fàidh gu Ramot-gilead a dh'ungadh Iehu. 11 Rinnadh Iehu 'na rìgh le ceannardaibh an t-slòigh. 24 Mharbh e Iehoram agus Ahasiah. 39 Thig caillteanaich Iesebel a nuas o ùinneig, agus dh'ith na madraidh a feoil a rèir focail an fàidh Eliah.

AGUS ghairm Elisa am fàidh air aon do mhacaibh nam fàidh, agus thubhairt e ris, Crioslaich do leasraidh, agus gabh an corn olaidh so ann do làimh, agus imich gu Ramot-gilead.

2 Agus an uair a thig thu 'n sin, seallaidh tu an sin air son Iehu mhic Iehosaphait, mhic Nimsi; agus théid thu a stigh, agus bheir thu air éirigh suas o mheasg a bhràithrean, agus bheir thu e do sheomar-cùil:

3 Agus gabhaidh tu an corn olaidh, agus taomaidh tu air a cheam e, agus their thu, Mar so tha'n Tighearn ag ràdh, Dh'ung mi thu a'd' rìgh air Israel; an sin fosgaidh tu an dorus, agus teichidh tu, agus cha 'n fhan thu.

4 Agus dh'imich an t-òganach² am fàidh, gu Ramot-gilead.

5 Agus an uair a thàinig e, feuch, bha ceannardan an t-slòigh 'nan suidhe; agus thubhairt e, Tha ni agam ri ràdh riut³, a

cheannaird. Agus thubhairt Iehu, Cia ris dhinn uile? Agus thubhairt esan, Riutsa, a cheannaird.

6 Agus dh'éirich e, agus chaidh e steach do'n tìgh, agus thaom e an cladh air a cheann, agus thubhairt e ris, Mar so tha'n Tighearna Dia Israeil ag ràdh, Dh'ung mi thusa a'd' rìgh air sluagh an Tighearn, eadhon air Israel.

7 Agus buaidh tu tìgh Ahaib do thighearn, agus diolaidh mise fuil mo sheirbhiseach nam fàidh, agus fuil uile sheirbhiseach an Tighearn, air làimh Iesebeil.

8 Agus sgrìosar tìgh Ahaib uile, agus gearraidh mi as o Ahab esan a ni uisge ri balla, agus esan a dhruidear suas agus a dh'fhàgar an ann Israel.

9 Agus ni mi tìgh Ahaib mar thigh Ieroboaim mhic Nebait, agus mar thigh Bhaasa mhic Ahiah.

10 Agus ithidh na madraidh Iesebel ann an cuibhrionn Iesreil, agus cha bhì neach air bith ann a dh'adhlaiceas i. Agus dh'fhosgail e'n dorus, agus theich e.

11 An sin thàinig Iehu a mach a dh'ionnsuidh sheirbhiseach a Thighearn, agus thubhairt iad⁴ ris, Am bheil gach ni gu maith? c'ar son a thàinig ann fear cuthaich so a d' ionnsuidh? Agus thubhairt esan riu, Is aithne dhuibh an duine, agus a chainnt.

12 Agus thubhairt iadsan, Is breug e; innis dhuinn a nis. Agus thubhairt esan, Mar so agus mar so labhair e rium, ag ràdh, Mar so tha'n Tighearn ag ràdh, Dh'ung mi thu a'd' rìgh air Israel.

13 An sinn rinn iad cabhag, agus ghabh iad gach fear dhiubh 'fhalluinn⁵, agus chuir iad fuidhe i air mullach na staidhrean⁶, agus shéid iad le trompaid, agus thubhairt iad, Is e Iehu an rìgh.

14 Uime sin rinn Iehu mac Iehosaphait, mhic Nimsi, ceannairc⁷ an aghaidh Ioraim: (a nis bha Ioram a' gleidheadh Ramot-gilead, e féin agus Israel uile, an aghaidh Hasaail rìgh Shiria:

15 Ach phill rìgh Ioram gu bhì air a leigheas ann an Iesreel o na lotaibh a thug na Sirianaich dha, 'nuair a chog e ri Hasaail rìgh Shiria.) Agus thubhairt Iehu, Ma's e bhur toil e, na rachadh neach air bith a mach, agus na teicheadh e as a' bhaile, gu dol g'a innseadh ann an Iesreel.

16 Agus mharcaich Iehu ann an carbad, agus chaidh e gu Iesreel; oir bha Ioram 'na luidhe an sin: agus thàinig Ahasiah rìgh Iudah a nuas a dh'fhaicinn Ioraim.

17 Agus sheas fear-faire air an tùr ann an Iesreel, agus chunnaic e buidheann⁸

¹ nighean Ahaib, mhic Omri. Faic I. Rìgh Caib. XVI. r. 28. ² an t-òganach, eadhon an t-òganach.

³ Tha gnothuch agam riut.

⁴ thubhairt neach.

⁵ nan ceum.

⁶ cuideachd.

⁷ a bhrat.

⁸ coimh-chealg.

Iehu 'nuair a bha e a' teachd, agus thubhairt e, *Tha mi faicinn buidhne*. Agus thubhairt Ioram, Gabh marcach, agus cuir 'nan coinneamh e, agus abradh e, An sìth a *th'ann*?

18 Agus chaidh fear a' marcachd air each 'na choinneamh, agus thubhairt e, Mar so tha'n rìgh ag ràdh, An sìth a *th'ann*? Agus thubhairt Iehu, Ciod do ghnothuch-sa ri sìth? tionndaidh air mo chùlaobh. Agus dh'innis am fear-faire, ag ràdh, Thàinig an teachdair d'an ionnsuidh, ach cha 'n'eil e teachd air ais.

19 Agus chuir e uatha fear eile a' marcachd air each, agus thàinig e d'an ionnsuidh, agus thubhairt e, Mar so tha'n rìgh ag ràdh, An sìth a *th'ann*? Agus fhreagair Iehu, Ciod do ghnothuch-sa ri sìth? tionndaidh air mo chùlaobh.

20 Agus dh'innis am fear-faire, ag ràdh, Thàinig e eadhon d'an ionnsuidh, agus cha 'n'eil e teachd air ais: agus tha 'n siubhal cosmhuil ri siubhal Iehu mhic Nimsi¹; oir tha e a' siubhal gu dian.

21 Agus thubhairt Ioram, Ulluich². Agus dh'ulluich e a charbad. Agus chaidh Ioram rìgh Israeil, agus Ahasiah rìgh Iudah, a mach, gach fear dhiubh 'na charbad, agus chaidh iad a mach an coinneamh³ Iehu, agus thachair iad air ann an cuibhrionn Naboit an Iesreelich.

22 Agus an uair a chunnaic Ioram Iehu, thubhairt e, An sìth a *th'ann*, a Iehu? Agus thubhairt esan, Ciod an t-sìth, fhad 's a *bhios* striopachas Iesebeil do mhàthar, agus a druidheachda co lìonmhor?

23 An sin thionndaidh Ioram a làmhnan agus theich e, agus thubhairt e ri Ahasiah, *Tha* feall ann, Ò Ahasiah.

24 Agus tharruing Iehu bogha le 'uile neart, agus bhual e Ioram eadar a ghairdeana, agus chaidh an t-saighead a mach troimh a chridhe, agus chrom e sìos 'na charbad.

25 An sin thubhairt Iehu ri Bidcar a cheannard, Tog agus tilg e ann an cuibhrionn fearainn Naboit an Iesreelich: oir is cuimhe leam⁴, an uair a bha mise agus thusa a' marcachd cuideachd an deigh Ahaib 'athar, gu'n do chuir an Tighearn an eallach so air⁵.

26 Gu cinnteach chunnaic mi an dé fuil Naboit, agus fuil a mhac, ars' an Tighearn, agus diolaidd mi ort anns a' cuibhrionn⁶ so, ars' an Tighearn. A nis ma ta tog agus tilg e anns a' cuibhrionn *fhearainn*, a réir focail an Tighearn.

27 Agus an uair a chunnaic Ahasiah rìgh Iudah so, theich e ratlad tìge an

liosa⁷: agus lean Iehu 'na dhéigh, agus thubhairt e, Buailibh esan mar an ceudna 'na charbad. *Agus bhual iad e* aig uchdaich Ghuir, a *tha* làimh ri Ibleam: agus theich e gu Megido, agus fhuair e bàs an sin.

28 Agus thug a sheirbhisich leo e ann an carbad gu h-Ierusalem, agus dh'adhlaic iad e 'na àit-adhlacaidh, maille r'a aithrichibh ann am baile Dhaibhidh.

29 Agus anns an aon bhliadhna deug do Ioram mac Ahaib, thòisich Ahasiah air rìoghachadh os ceann Iudah.

30 Agus an uair a thàinig Iehu gu Iesreel, chuala Iesebel e; agus chuir i dath mu a sùilibh⁸, agus sgeadaich i a ceann, agus dh'amhairc i mach air uinneig.

31 Agus an uair a bha Iehu a' teachd a stigh air a' gheata, thubhairt i, An *robh* sìth aig Simri, a mharbh a thighearn?

32 Agus thog esan 'aghaidh suas a dh'ionnsuidh na h-uinneig, agus thubhairt e, Cò a *ta* leamsa, cò? agus dh'amhairc a mach air dithis *no* triuir do chailteanaich.

33 Agus thubhairt e, Tilgibh a nuas i. Agus thilg iadsan sìos i; agus chrathadh cuid d'a fuil air a' bhalla, agus air na h-eachaibh, agus shaltair iad⁹ fo 'n cosaibh i.

34 Agus chaidh e stigh, agus dh'ith agus dh'òl e, agus thubhairt e, Rachaibh a nis a dh'fhaicinn na mnà mallaichte sin, agus adhlacibh i; oir is nighean rìgh i.

35 Agus chaidh iad g'a h-adhlacadh, ach cha d'fhuair iad dìth ach an cloig-eann, agus na cosan, agus basan a làmh.

36 Agus phill iad, agus dh'innis iad da: agus thubhairt esan, *Is* e so focal an Tighearn, a labhair e le làmh 'òglaich Elisha an Tisbithich, ag ràdh, Ann an cuibhrionn Iesreel, ithidh na madraidh feoil Iesebeil:

37 Agus bithidh closach Iesebeil mar aolach air aghaidh an fhearainn ann an cuibhrionn Iesreel, *air chor* as nach abair iad, *Is* i so Iesebel.

CAIB. X.

1 Chuir Iehu mic Ahaib gu bàs. 12 Air a shlighe gu Samaria mharbh e bràithrean Ahasiah. 18 Le a sheòltachd sgrios^e e uile luchd-noraidh Bhaail, agus loisg e an dealbhan. 32 Bhual Hasael Israel. 34 Fhuair Iehu bàs, agus rìghich Iehoahas 'na àit.

A GUS bha aig Ahab deich agus trì fichead mac ann an Samaria. Agus sgriobh Iehu litrichean, agus chuir e do Shamaria *iad*, a dh'ionnsuidh uachdarana Iesreel¹, a dh'ionnsuidh nan seanair, agus d'an ionnsuidh anns a thog *clann* Ahaib, ag ràdh,

¹ Iehu mhic Iehosaphait, mhic Nimsi. Faic. r. 2.

² Beartaich. ³ an aghaidh. ⁴ cuimhnich.

⁵ gu'n do chuir an Tighearn an céill an fhaist-neachd so 'na aghaidh.

⁶ bhall, 'àite, achadh.

⁷ a' ghàraidh.

⁸ chuir i nith air a h-aghaidh; chuir i a sùilean ann an dath. Eabh.

⁹ saltair e.

¹⁰ uachdarana Samaria.

2 A uis an uair a thigh an litir so d'ur n-ionnsuidh, o tha mic bhur tighearna maille ribh, agus carbaid agaibh, agus eich, agus baile daingnichte, agus airm,

3 Amhaircibh a mach eadhon air a shon-san a's fearr agus a's iomchuidh do mhac-aibh bhur tighearn, agus cuiribh e air righ-chaitir athar, agus cogaibh air son tighe bhur tighearn.

4 Ach bha eagal ro mhòr orra-san, agus thubhairt iad, Feuch, cha do sheas dà righ roimhe, agus cìomus a sheasas sinne?

5 Agus chuir *esan* a *bha* os ceann an tighe, agus *esan* a *bha* os ceann a' bhaile, agus na seanairean, agus iadsan a thog a' *chlann*, *teachdairean* gu Iehu, ag ràdh, *Is* sinne do sheirbhiseach, agus ni sinn gach *ni* a dh'farras tu oirnn; cha dean sinn righ air bith: an *ni* a *ta* tait-neach a'd' shùilbh-sa, dean e.

6 Agus sgriobh e d'an ionnsuidh litir an dara uair, ag ràdh, Ma's leamsa sibh, agus *ma* dh'èisdeas sibh ri m' ghuth, gabhaibh cinn mhac¹ bhur tighearn, agus thigibh a m'ionnsuidh-sa mu'n tràth so am màireach gu Iesreel: (a nis *bha* mic an righ, deich agus trì fichead fear, maille ri daoimibh mòra a' bhaile a thog iad.)

7 Agus an uair a thàinig an litir d'an ionnsuidh, ghabh iad mic an righ, agus mharbh iad deich agus trì fichead fear, agus chuir iad an cinn ann am bascaidibh, agus chuir iad d'a ionnsuidh *iad* gu Iesreel.

8 Agus thàinig teachdair, agus dh'innis e dha, ag ràdh, Thug iad leo cinn mhac an righ. Agus thubhairt *esan*, Cuiribh iad 'nan dà dhùn aig dol a stigh a' gheata gu maduinn.

9 Agus anns a' mhaduinn chaidh e mach agus sheas e, agus thubhairt e ris an t-sluagh uile, Tha sibhse ionraic: feuch, rinn mise ceannaire an aghaidh mo thighearn, agus mharbh mi e; ach cò a bhuail iad so uile?

10 Biodh fios agaibh a nis, nach tuit *lìde* do fhocal an Tighearna gu làr, a labhair an Tighearn mu thigh Ahaib; oir rinn an Tighearn an *ni* sin a labhair e le làimh a sheirbhiseach Eliah.

11 Mar sin bhuail Iehu iadsan uile a mhair do thigh Ahaib ann an Iesreel, agus a dhaoine mòra uile, agus a luchd-dàimh, agus a shagairt, gus nach d'fhàg e duine beò² aige.

12 Agus dh'èirich e, agus dh'imich e, agus chaidh e do Shamaria. Agus an uair a *bha* e aig tigh-bearraidh nam buachaillean³ air an t-slighe,

13 Thachair Iehu air bràithribh Ahasiah

righ Iudah, agus thubhairt e, Cò sibhse? Agus thubhairt iadsan, *Is* sinne bràithrean Ahasiah, agus tha sinn a' dol sìos a chur fàilte air cloinn an righ, agus air cloinn na ban-righinn⁴.

14 Agus thubhairt *esan*, Glacaibh beò iad. Agus ghlac iad beò iad, agus mharbh siad iad aig slochd an tigh-bhearraidh, dà fhichead agus dithis fhear; agus cha d'fhàg e duine beò dhiubh.

15 Agus an uair a dh'fhalbh e as a sin, thachair e air Iehonadab mac Reltaibh a' teachd⁵ na choinneamh; agus chuir e fàilte air, agus thubhairt e ris, Am bheil do chridhe-sa dìreach⁶, mar a *tha* mo chridhe-sa le d' chridhe-sa? Agus thubhairt Iehonadab, Tha. Ma tha, *ars' esan*, thoir *dhomh* do làmh. Agus thug e dha a làmh, agus thog e suas e d'a ionnsuidh do'n charbad.

16 Agus thubhairt e, Thig maille rium-sa, agus faic m'eud air son an Tighearn. Agus thug e⁶ air marcachd 'na charbad.

17 Agus thàinig e do Shamaria, agus bhuail e iadsan uile a mhair do Ahab ann an Samaria, gus an do sgrios se e, a réir focail an Tighearn, a labhair e ri Eliah.

18 Agus chruinnich Iehu an sluagh uile, agus thubhairt e riu, Rinn Ahab beagan seirbhiseach do Bhaal, *ach* ni Iehu mòran seirbhiseach dha.

19 A nis ma ta gairmibh a m' ionnsuidh-sa fàidhean Bhaail uile, a sheirbhiseach uile, agus a shagairt uile; na biodh duine dhiubh air chall⁷; oir *tha* iobairt mhòr agam *r'a deanamh* do Bhaal: ge b'e neach a bhios air chall, cha mhair e beò. Ach rinn Iehu so ann an seòltachd, a chum gu'n sgriosadh e luchd-aoraidh Bhaail.

20 Agus thubhairt Iehu, Gairmibh féill naomh do Bhaal. Agus ghairm iad *i*.

21 Agus chuir Iehu *fios* air feadl Israeil uile, agus thàinig uile luchd-aoraidh Bhaail; cha d'fhagadh duine dhiubh nach d'fhàgadh iad a steach do thigh Bhaail, agus lìonadh tigh Bhaail o cheann gu ceann.

22 Agus thubhairt e ris-san a *bha* os ceann seòmair nan culaidh, Thoir a mach culaidhean do uile luchd-aoraidh Bhaail. Agus thug e mach dhoibh culaidhean.

23 Agus chaidh Iehu agus Iehonadab mac Rehaib a steach do thigh Bhaail, agus thubhairt e ri luchd-aoraidh Bhaail, Rannsaichibh agus faicibh nach bi an so maille ribh *neach air bith* do sheirbhiseach an Tighearn, ach luchd-aoraidh Bhaail a mhàin.

24 Agus an uair a chaidh iad a steach a thoirt suas iobairtean agus thabhartasan-

¹ nan daoine eadhon mhac. Eabh.

² a mhair. ³ nan aodhair.

⁴ ban-righ.

⁵ ba-righ.

⁵ Am bheil do chridhe-sa dìreach le m' chridhe-sa.

⁶ iad.

⁷ air ionndruin.

⁸ féisd, comh-chruinneachadh.

loisgte, shuidhich Iehu ceithir fichead fear leis a muigh, agus thubhairt e, *Ma théid fear air bith as do na daoineibh a thug mise thairis d'ur làimh, théid anam an neach a leigeas as e air son 'anama-san.*

25 Agus co luath as a chuir e crìoch air an ìobairt-loisgte ìobradh, thubhairt Iehu ris an fhreiceadan, agus ris na ceannardaibh, Rachaidh a steach, buailibh iad, na tigeadh duine dhiubh mach. Agus bhuail siad iad le faobhar a' chlàidheimh, agus thilg am freiceadan agus na ceannardan a mach iad; agus chaidh iad gu baile tighe Bhaail.

26 Agus thug iad a mach na dealbhan á tigh Bhaail, agus loisg siad iad.

27 Agus bhris iad sìos dealbh Bhaail, agus bhris iad sìos tigh Bhaail, agus rinn iad e 'na thigh-salchair gus an là'n diugh.

28 Mar so sgrios Iehu Baal a mach á h-Israel.

29 Gidleadh ri peacaibh Ieroboaim mhic Nebait, a thug air Israel peacachadh, cha do dhealaich Iehu, eadhon ris na laogh-aibh òir a bha ann am Bet-el, agus a bha ann an Dan.

30 Agus thubhairt an Tighearna ri Iehu, A chionn gu'n do rinn thu gu maith anns an nì sin a dheanamh a tha ceart ann mo shùilibh-sa, agus gu'n d'rinn thu ri tigh Ahaib a réir gach nì abha ann am chridhe-sa, suidhidh do mhic do'n cheathramh ginealach air righ-chathair Israeil.

31 Ach cha d'thug Iehu an aire air im-eachd ann an lagh an Tighearna Dé Israeil le 'uile chridhe; oir cha do dhealaich e ri peacaibh Ieroboaim, a thug air Israel peacachadh.

32 Anns na làithibh sin thòisich an Tighearn air Israel a ghearradh goirid; agus bhuail Hasael iad ann an uile chrìoch-aibh Israeil;

33 O Iordan a làimh na h-àirde 'n ear, fearann Ghilead uile, na Gadaich, agus na Reubenich, agus na Manasaich, o Aroer, (a tha làimh ri sruth¹ Arnoin,) eadhon Gilead agus Basan.

34 Agus a' chuid eile do ghnìomharaibh Iehu, agus gach nì a rinn e, agus a thréine uile, nach 'eil iad sgrìobhta ann an leabhar eachdraidh rìghrean Israeil?

35 Agus choidil Iehu maille r'a aithrichibh; agus dh'adhlaic iad e ann an Samaria; agus rìghich Iehoahas a mhac 'na àit.

36 Agus b'i 'n ùin' a rìghich Iehu os ceann Israeil ann an Samaria, ochd bliadhna fichead.

CAIB. XI.

1 Dh'fhuailch Iehoseba Ioas rè shè bliadhna ann an tigh an Tighearn. 4 Air an t-seachdamh bliadhna

dh'ung Iehoiada e 'na righ air Iudah. 13 Mharbhadh Ataliah. 18 Bhriseadh altairan agus dealbhan Bhaail.

A GUS an uair a chunnaic Ataliah màth-air Ahasiah gu'n robh a mac marbh, dh'èirich i, agus sgrios i an sliochd rìgh-aì uile.

2 Ach ghabh Iehoseba nighean righ Ioraim, piuthar Ahasiah, Ioas mac Ahasiah, agus ghoid i e á measg mhac an righ a mharbhadh, agus chuir i e fèin agus a bhanaltrum ann an seòmar nan leabaichean²; agus dh'fholaich iad e o Ataliah³ air chor as nach do mharbhadh e.

3 Agus bha e maille rithe ann folach ann an tigh an Tighearna rè shè bliadhna: agus rìghich Ataliah os ceann na tìre.

4 Agus air an t-seachdamh bliadhna chuir Iehoiada fios uaith, agus ghabh e iadsan a bha os ceann cheudan⁴, agus na ceannardan, agus am freiceadan, agus thug e steach d'a ionnsuidh iad do thigh an Tighearn, agus rinn e coimhcheangal riu, agus ghabh e mionnan diubh ann an tigh an Tighearn, agus dh'fheuch e dhoibh mac an righ.

5 Agus dh'àithn e dhoibh, ag ràdh, So an uì a nì sibh: *Bithidh* an treas cuid dhibhse a théid a steach air an t-sàbaid, a' gleidheadh faire tighe an righ:

6 Agus *bithidh* trian aig geata Shuir, agus trian aig a' gheata air cùlaobh an fhreiceadain: mar so gleidhidh sibh faire an tighe, a chum nach brisear a steach air⁵.

7 Agus *gleidhidh* dà chuid dhibhse uile a théid a mach air an t-sàbaid, gleidhidh eadhon iadsan faire tighe an Tighearna mu'n cuairt air an righ.

8 Agus cuairtichidh sibh an righ air gach taobh, gach fear le 'airm' na làimh: agus esan a thig an taobh a stigh do na sreathaibh⁶, marbhar e; agus bithibh-se maille ris an righ 'nuair a théid e mach, agus an uair a thig e steach.

9 Agus rinn na ceannarda-cheud a réir gach nì a dh'àithn Iehoiada an sagart, agus ghabh iad gach fear dhiubh a dhaoine a bha dol a steach air an t-sàbaid, maille riuthasan a bha dol a mach air an t-sàbaid, agus thàinig iad a dh'ionnsuidh Iehoiada an t-sagairt.

10 Agus thug an sagart do na ceannardaibh-cheud sleaghanna agus sgìathan rìgh Daibhidh, a bha ann an tigh⁷ an Tighearn.

11 Agus sheas am freiceadan, gach fear le 'airm' na làimh, mu'n cuairt air an righ, o thaobh⁸ deas an tighe gu ruig taobh clì an tighe, làimh ris an altair agus an tigh.

¹ amhainn. ² Faic II. Eachdr. Caib. XXII. r. 11. ³ o ghnìis Ataliah. Eabh. ⁴ nan ceannardan-cheud.

⁵ a chum nach briscar sìos e.

⁶ rangailbh.

⁷ teampull.

⁸ oisim, ghualaimn.

12 Agus thug e mach mac an righ, agus chuir e 'n crùn air, agus *thug e dha* an fhianuis; agus rinn iad 'na righ e, agus dh'ung iad e, agus bhuail iad am basan, agus thubhairt iad, Gu ma fada beò an righ.

13 Agus an uair a chual' Ataliah fuaim an t-sluaigh a' ruith cuideachd¹, thàinig i dh'ionnsuidh an t-sluaigh, a steach do thigh an Tighearn.

14 Agus an uair a dh'amhairc i, feuch, sheas an righ làimh ri post, mar bu ghnàth, agus na h-uachdarain, agus na trompad-airean làimh ris an righ; agus rinn sluagh na tìre uile gairdeachas, agus shéid iad le trompaidibh; agus reub Ataliah a h-eudach, agus dh'éigh i, Feall, feall!

15 Ach dh'àithn Iehoiada an sagart do na ceannardaibh-cheud, a chuireadh os ceann an t-slòigh, agus thubhairt e riu, Thugaibh a mach i an taobh a muigh do na sreathaibh; agus ge b'e neach a leanas i, marbhar leis a' chlàidheamh e: oir thubhairt an sagart, Na cuirear gu bàs i ann an tigh an Tighearn.

16 Agus thug iad comas d'i² agus dh'imich i air an t-slighe air an tìg na h-eich gu tigh an righ, agus mharbhadh an sin i.

17 Agus rinn Iehoiada coimhcheangal eadar an Tighearn agus an righ agus an sluagh gu'm biodh iad 'nan sluagh air an Tighearn; mar an ceudna eadar an righ agus an sluagh.

18 Agus chaidh sluagh na tìre uile a steach do thigh Bhaail, agus leag iad sìos e; 'altairean agus a dhealbhan bhris iad gu tur; agus mharbh iad Matan sagart Bhaail fa chomhair nan altair: agus chuir an sagart luchd-riaghlaidh³ os ceann tìghe an Tighearn.

19 Agus ghabh e iadsan a bha os ceann cheudan, agus na ceannardan, agus am freiceadan, agus sluagh na tìre uile; agus thug iad a nuas an righ o thigh an Tighearn, agus thàinig iad rathad geata an fhreiceadain gu tigh an righ: agus shuidh e air caithir nan righ.

20 Agus rinn sluagh na tìre uile gairdeachas, agus bha 'm baile sàmhach: agus mharbh iad Ataliah leis a' chlàidheamh làimh ri tigh an righ.

21 Seachd bliadhna dh'aois bha Iehoas an uair a thòisich e air ròghachadh.

CAIB. XII.

1 Dh'orduich Iehoas do na sagartaibh tigh an Tighearn a chàradh. 16 Ghlac Hasael Gat, agus chuir e 'gshaidh ri dol suas gu Ierusalem. 18 Air dha tiodhlac fhaghail phill e air ais. 20 Chuireadh Iehoas gu bàs, agus rìghich Amasiah 'na àit.

ANNS an t-seachdamh bliadhna do Iehu thòisich Iehoas air ròghachadh, agus rìghich e dà fhichead bliadhna ann an Ierusalem: agus b'e ainm a mlàthar Sibiah o Bheerseba.

2 Agus rinn Iehoas an *ni a bha* ceart ann an suilibh an Tighearna rè a làithean uile, anns an do theagaisg Iehoiada an sagart e.

3 Ach cha d'thugadh air falbh na h-àitean àrda: *bha* 'n sluagh fathast ag iobradh, agus a' losgadh tuis anns na h-àitibh àrda.

4 Agus thubhairt Iehoas ris na sagartaibh, Uile airgiod nan nithe coisrigte a bheirear a steach do thigh an Tighearn, airgiod gach duine a théid seachad *san àireamh*, airgiod meas⁴ gach duine, an t-airgiod uile a thug e ann an cridhe duine sam bith a thoirt a steach do thigh an Tighearna,

5 Gabhadh na sagairt d'an ionnsuidh e, gach duine o 'fhear-eòlais; agus càireadh iad briseadh an tìghe, eadhon gach briseadh a gheibhear ann.

6 Gidheadh, anns an treas bliadhna fichead do rìgh Iehoas, cha do chàraich na sagairt briseadh an tìghe.

7 An sin ghairm rìgh Iehoas air Iehoiada an sagart, agus air na sagartaibh *eile*, agus thubhairt e riu, C'ar son nach 'eil sibh a' càradh brisidh an tìghe? a nis ma ta na gabhaibh airgiod *tuilleadh* o luchd bhur n-eòlais, ach thugaibh air son brisidh an tìghe e.

8 Agus dh'aontaich na sagairt gun airgiod a ghabhail *tuilleadh* o'n t-sluaigh, agus gun bhriseadh an tìghe a chàradh.

9 Ach ghabh Iehoiada an sagart ciste, agus rinn e toll 'na h-uachdar⁵, agus chuir e i ri taobh na h-altarach air an làimh dheis, mar a thig duine a steach do thigh an Tighearn: agus ann an sin chuir na sagairt a bha gleidheadh an doruis, an t-airgiod uile a thugadh a steach do thigh an Tighearn.

10 Agus an uair a chunnaic iad gu'n robh mòran airgid anns a' chiste, chaidh sgrìobhaich an rìgh suas, agus an t-àrd shagart, agus cheangail iad suas, agus dh'àireamh iad⁶ an t-airgiod a fhuaradh ann an tigh an Tighearn.

11 Agus thug iad an t-airgiod, an uair a dh'àirmheadh e, ann an làimh nan daoine a rinn an obair, a chuireadh os ceann tìghe an Tighearn; agus thug iadsan a mach e do na saoraibh, agus do'n luchd-togail, a rinn obair air tigh an Tighearn.

12 Agus do chlacharaibh, agus do luchd-snaidhidh chlach, agus a cheannach fiodha agus chlach a snaidhte a chàradh

¹ fuaim an fhreiceadain agus an t-sluaigh.

² chuir iad làmh innte. ³ luchd-frithealaidh.

⁴ airgiod meas anama. Eabh.

⁵ 'na clàr-beoil.

⁶ chuir iad ann am màladh, agus dh'àireamh iad.

brisidh tighe an Tighearn, agus air son gach nì a chuireadh a mach air an tigh g' a chàradh.

13 Gidheadh cha d' rinneadh do thigh an Tighearna copain airgid, smàladairean, cuachan, trompaidean, soithichean òir air bith, no soithichean airgid air bith, do'n airgid a thugadh a steach do thigh an Tighearn:

14 Ach thug iad e do'n luchd-oibre, agus chàraich iad leis tigh an Tighearn.

15 Os bàrr, cha d' thug iad air na daoineibh, an làimh an d' thug iad an t-airgid chum a thoirt do'n luchd-oibre, cunntas a thoirt seachd: oir rinn iadsan gu firinneach.

16 Cha d' thugadh an t-airgid eusaontais agus an t-airgid peacaidh a steach do thigh an Tighearna: bu leis na sagairt e.

17 An sin chaidh Hasael rìgh Shìria suas, agus chog e an aghaidh Ghat, agus ghlac se e: agus chuir Hasael ' aghaidh ri dòl suas gu h-Ierusalem.

18 Agus ghabh Iehoas rìgh Iudah na nithe coisrigte uile a choisrig Iehosaphat, agus Iehoram, agus Ahasiah ' aithriche, rìghrean Iudah, agus a nithe coisrigte féin, agus an t-òr uile a fhuaradh ann an ionmhasaibh tighe an Tighearn, agus tighe an rìgh, agus chuir e dh' ionnsuidh Hasael rìgh Shìria e; agus dh' imich e o Ierusalem.

19 Agus a' chuid eile do ghnìomharaibh Iehoais, agus gach nì a rinn e, nach ' eil iad sgriobhta ann an leabhar eachdraidh rìghrean Iudah?

20 Agus dh' éirich a sheirbhlisich, agus rinn iad ceannaire, agus bhual' iad Iehoas ann an tigh Mhìlo, a tha san dol sìos gu² Sila:

21 Oir bhual Iosachar mac Shimeat, agus Iehosabad mac Shomair a sheirbhlisich e, agus fhuair e bàs; agus dh' adhlaic iad e maille r' a aithrichibh ann am baile Dhaibhidh: agus rìghich Amasiah a mhac ' na àit.

CAIB. XIII.

1 Rìoghachadh aingidh Iehohais. 5 Shaoradh Israel o fùirneart nan Sirianach. 9 Fhuair Iehoas bàs, agus rìghich a mhac ' na àit. 14 Roimh-innis Elisa do Ios gu'm buadhaicheadh air na Sirianach. 20 Fhuair Elisa bàs. 22 Bhual Ios na Sirianaich trì uairean.

ANNS an treas bliadhna fichead do Ios mac Ahasiah rìgh Iudah, thòisich Iehoas mac Iehu air rìoghachadh os ceann Israeil ann an Samaria; agus rìghich e seachd bliadhna deug.

2 Agus rinn e olc ann an sùilbh an Tighearn, agus lean e peacanna Ieroboaim

mhic Nebait, a thug air Israel peacachadh: cha do dhealaich e riu.

3 Agus las fearg an Tighearn an aghaidh Israeil, agus thug e thairis iad do làimh Hasael rìgh Shìria, agus do làimh Bhen-hadaid mhic Hasael, rè a³ làithean uile.

4 Agus ghuidh Iehoahas air an Tighearn, agus dh' éisd an Tighearna ris; oir chunnaic e fòirneart⁴ Israeil, oir rinn rìgh Shìria fòirneart orra.

5 (Agus thug an Tighearna fear-saoraidh do Israel, agus chaidh iad a mach o bhi fuidh làimh nan Sirianach: agus ghabh clann Israeil còmhnuidh ' nam buthaibh, mar a rinn iad roimhe.

6 Gidheadh, cha do dhealaich iad ri peacaibh tighe Ieroboaim, a thug air Israel peacachadh, ach ghluais iad annta: agus dh' fhan an doire cuideachd ann an Samaria.)

7 Agus cha d' fhàgadh⁵ aig Iehoahas do'n t-sluagh ach leth-cheud marcach, agus deich carbaid, agus deich mìle coisiche; oir sgrios rìgh Shìria iad, agus rinn e iad mar an duslach⁶ le bualadh.

8 Agus a' chuid eile do ghnìomharaibh Iehoahas, agus gach nì a rinn e, agus a thréine⁷, nach ' eil iad sgriobhta ann an leabhar eachdraidh rìghrean Israeil?

9 Agus choidil Iehoahas maille r' a aithrichibh, agus dh' adhlaic iad e ann an Samaria, agus rìghich Ios⁸ a mhac ' na àit.

10 Anns an t-seachdamh bliadhna deug thar fhichead do Iehoas rìgh Iudah, thòisich Ios mac Iehoahas air rìoghachadh os ceann Israeil ann an Samaria; agus rìghich e sè bliadhna deug.

11 Agus rinn e olc ann an sùilbh an Tighearna: cha do dhealaich e ri uile pheacaibh Ieroboaim mhic Nebait, a thug air Israel peacachadh, ach ghluais e annta.

12 Agus a' chuid eile do ghnìomharaibh Iois, agus gach nì a rinn e, agus a thréine leis an do chog e an aghaidh Amasiah rìgh Iudah, nach ' eil iad sgriobhta ann an leabhar eachdraidh rìghrean Israeil?

13 Agus choidil Ios maille r' a aithrichibh, agus shuidh Ieroboam air a rìgh-chathair: agus dh' adhlaicheadh Ios ann an Samaria maille ri rìghribh Israeil.

14 A nis bha Elisa tinn d' a thinneas d' an d' fhuair e bàs, agus thàinig Ios rìgh Israeil a muas d' a ionnsuidh, agus ghul e os a cheam⁹, agus thubhairt e, O athair, athair, carbaid Israeil agus a mharcshluagh.

15 Agus thubhairt Elisa ris, Gabh bogha agus saighdean: agus ghabh e d' a ionnsuidh bogha agus saighdean.

¹ mharbha. ² a thléid sìos gu. ³ an.
⁴ sàrachadh, òmhghar. ⁵ cha d' fhàg e.

⁶ luathre. ⁷ a ghaisge, a neart.
⁸ Iehoas. ⁹ air ' aghaidh. Eabh.

II. RIGH, XIII. XIV

16 Agus thubhairt e ri righ Israeil, Cuir do làmh air a' bhogha. Agus chuir e a làmh air; agus chuir Elisa a làmh air làmh an righ.

17 Agus thubhairt e, Fosgail an uinneag a làimh na h-àirde 'n ear: agus dh'fhosgail e i. An sin thubhairt Elisa, 'Tilg: agus thilg esan. Agus thubhairt e, Saighead shaoraidh an Tighearn, agus saighead shaoraidh o' Shiria: oir buailidh tu na Sirianaich ann an Aphec, gus an cuir thu as doibh.

18 Agus thubhairt e, Gabh na saighdean: agus ghabh esan iad. Agus thubhairt e ri righ Israeil, Buail air an talamh: agus bhual e tri uairean, agus stad e.

19 Agus bha fearg air an duine le Dia ris, agus thubhairt e, Bu chòir dhuit bualadh cuig no sè uairean, an sin bhuaileadh tu Siria gus an cuireadh tu as dith: ach a nis buailidh tu Siria a mhàin tri uairean.

20 Agus fhuair Elisa bàs, agus dh'adhlac iad e: agus thàinig buidhnean nam Moabach a stigh do'n tìr² aig teachd a steach na bliadhna.

21 Agus an uair a bha iad ag adhlacadh duine, feuch, chunnaic iad buidheann *dhaoinne*, agus thilg iad sìos an duine do àit-adhlacaidh Elisa: agus an uair a leigeadh an duine sìos, agus a bhean e ri cnàmhan Elisa, dh'ath-bheothaichheadh e, agus dh'èirich e air a chosaibh.

22 A nis rinn Hasael righ Shiria fòirneart air Israel rè uile làithean Iehoahais.

23 Ach bha 'n Tighearna bàigheil riu, agus ghabh e truas riu, agus dh'amhairc e orra air sgàth a choimhcheangail ri Abraham, Isaac, agus Jacob, agus cha b' àill leis an sgrios, cha mhò a thilg e as a làthair iad gus a nis.

24 Agus fhuair Hasael righ Shiria bàs, agus rìghich Ben-hadad a mhac 'na àit.

25 Agus thug Ios mac Iehoahais air an ais as làmh Bhen-hadaid mhic Hasaèil, na bailtean a thug esan as làimh Iehoahais 'athar anns a' chogadh: tri uairean bhual Ios³ e, agus thug e air an ais bailtean Israeil.

CAIB. XIV.

1 Chuir Amasiah gu bàs na daoine a mharbh 'athair. 7 Bhual e na h-Edomaich ann an gleann an t-salainn. 11 Chog Iehoas righ Israeil 'na aghaidh, agus chreach e Ierusalem. 17 Chuireadh Amasiah gu bàs, agus rìghich Asariah 'na àit.

ANNS an dara bliadhna do Iehoas⁴ mac Iehoahais righ Israeil, rìghich Amasiah mac Iois righ Iudah.

2 Cuig bliadhna fichead a dh'aois bha e an uair a thòisich e air rioghachadh, agus rìghich e naoi bliadhna fichead ann an

Ierusalem: agus b' e ainm a mhathtar Iehoadan o Ierusalem.

3 Agus rinn e an *ni a bha* ceart ann an sùilbh an Tighearn; ach cha b' ann cosmhuil ri Daibhidh 'athair: a réir gach *ni a rinn* Ios 'athair, rinn esan.

4 Ach cha d'thugadh air falbh na h-àitean àrda: fathast *bha* 'n sluagh ag iobradh, agus a' losgadh tùis air na h-àitibh àrda.

5 A nis an uair a dhaingnicheadh an rioghachd 'na làimh, mharbh e a sheirbbhisich a mharbh an righ 'athair.

6 Ach mic nam mortair⁵ cha do mharbh e; mar a tha e sgriobhta ann an leabhar lagha Mhaois, anns an d'àithn an Tighearn, ag ràdh, Cha chuirear na h-aithriche gu bàs air son nam mac, agus cha chuirear na mic gu bàs air son nan aithriche: ach cuirear gach duine gu bàs air son a pheacaidh féin⁶.

7 Bhual e do Edom ann an gleann an t-salainn deich mìle, agus ghlac e Selah anns a' chogadh, agus thug e loctel mar ainm air gus an là 'n diugh.

8 An sin chuir Amasiah teachdairean a dh'ionnsuidh Iehoais mhic Iehoahais, mic Iehu righ Israeil, ag ràdh, Thig, seallamaid air a chéile san aghaidh.

9 Agus chuir Iehoas righ Israeil *teachdairean* a dh'ionnsuidh Amasiah righ Iudah, ag ràdh, Chuir am foghannan⁷ a *bha* ann an Lebanon fios a dh'ionnsuidh an t-seudair a *bha* ann an Lebanon, ag ràdh, Thoir do nighean do mo mhac-sa 'na mnaoi: agus chaidh fiadh-bheathach seachad a *bha* ann an Lebanon, agus shaltair e sìos am foghannan.

10 Bhual thu gum amharus Edom, agus thog do chridhe suas thu: dean uaill *a so*, agus fan aig do thigh: oir c'ar son a bhiodh làmh agad ann an ni chum t'aimhleis, air chor as gu'n tuiteadh tu féin agus Iudah maille riut?

11 Ach cha d'éisd Amasiah ris: uime sin chaidh Iehoas righ Israeil suas, agus dh'amhairc e féin agus Amasiah righ Iudah air aghaidh a chéile aig Betsemes, a *bhuineas* do Iudah.

12 Agus bhuaileadh Iudah roimh Israel, agus theich iad gach fear a dh'ionnsuidh am bithan.

13 Agus ghlac Iehoas righ Israeil Amasiah righ Iudah, mac Iehoais mhic Ahasiah, aig Betsemes, agus thàinig e gu h-Ierusalem, agus bhris e sìos balla Ierusalem o gheata Ephraim gu geata na h-oisne, ceithir cheud làmh-choille.

14 Agus ghabh e an t-òragus an t-airgid uile, agus na soithichean⁸ uile a fhuar-

¹ an aghaidh. ² thug buidhnean nam Moabach ionnsuidh air an tìr. ³ Iehoas.

⁴ Ios.

⁵ nan daoine marbhta.

⁶ 'na pheacadh féin. Eabh.

⁷ chuaran.

⁸ na h-innib, an t-uidheam.

adhann an tigh an Tighearn, agus ann an ionmhasaibh tìghe an rìgh, agus braighdean-gill¹, agus phill e gu Samaria.

15 Agus a' chuid eile do ghnìomharaibh Iehoais a rinn e, agus a thréine, agus mar a chog e ri Amasiah rìgh Iudah, nach 'eil iad sgrìobhta ann an leabhar eachdraidh rìghrean Israeil?

16 Agus choidil Iehoas maille r'a aithrichibh, agus dh'adhlacaidh e ann an Samaria maille ri rìghrìbh Israeil, agus rìghich Ieroboam a mhac 'na àit.

17 Agus bha Amasiah mac Ioais rìgh Iudah beò an dèigh bàis Iehoais, mhic Iehoahais rìgh Israeil, cùig bliadhna deug.

18 Agus a' chuid eile do ghnìomharaibh Amasiah, nach 'eil iad sgrìobhta ann an leabhar eachdraidh rìghrean Iudah?

19 Agus rinn iad ceannaire 'na aghaidh ann an Ierusalem; agus theich e gu Lachis: ach chuir iad daoine 'na dhèigh gu Lachis, agus mharbh iad e an sin.

20 Agus thug iad leo air eachaibh e; agus dh'adhlacaidh e ann an Ierusalem maille r'a aithrichibh ann am baile Dhaibhidh.

21 Agus ghabh sluagh Iudah uile Asariah², agus e sè bliadhna deug a dh'aois, agus rinn iad 'na rìgh e an àit 'athar Amasiah.

22 Thog esan Elat, agus dh'aisig se³ e do Iudah, an dèigh do'n rìgh codal maille r'a aithrichibh.

23 Anns a' chùigeadh bliadhna deug do Amasiah mac Ioais, rìgh Iudah, thòisich Ieroboam mac Ioais rìgh Israeil, air rìoghachadh ann an Samaria; agus rìghich e bliadhna agus dà fhichead.

24 Agus rinn e olc ann an sùilbhan Tighearna: cha do dhealaich e ri uile pheacaibh Ieroboaim mhic Nebait, a thug air Israel peacachadh.

25 Dh'aisig e crìoch Israeil o dhol a steach Hamait gu ruig muir a' chòmhnaidh, a réir focail an Tighearna Dé Israeil, a labhair e le làimh a sheirbhìsich Ionah, mhic Amitai an fhàidh, a bha o Ghat-hepher.

26 Oir chunnaic an Tighearn àmhghar Israeil, gu'n robh e ro shearbh; oir cha robh neach air bith air a dhruideadh suas, agus cha d'fhàgadh neach air bith, agus cha robh fear-còmhnaidh⁴ ann aig Israel.

27 Agus cha dubhairt an Tighearna gu'n dubhadh e mach⁵ ainn Israeil o bhi fuidh nèamh: ach shaer e iad le làimh Ieroboaim mhic Ioais.

28 Agus a' chuid eile do ghnìomharaibh Ieroboaim, agus gach ni a rinn e, agus a thréine, mar a chog e, agus mar a dh'aisig e Damascus, agus agus Hamat, [bu le Iudah,]

do Israel, nach 'eil iad sgrìobhta ann an leabhar eachdraidh rìghrean Israeil?

29 Agus choidil Ieroboam maille r'a aithrichibh, maille ri rìghrìbh Israeil; agus rìghich Sachariah a mhac 'na àit.

CAIB. XV.

7 Fhuair Asariah bàs, agus rìghich Iotam 'na àit.

10 Mharbh Salum Sachariah rìgh Israeil. 14 Chuir Menahem Salum gu bàs, agus rìghich e 'na àit. 29 Rinn Tiglat-pileser fùirneart air Israel, &c.

ANNS an t-seachdamh bliadhna fich-e ad do Ieroboam rìgh Israeil, thòisich Asariah⁶ mac Amasiah rìgh Iudah air rìoghachadh.

2 Sè bliadhna deug a dh'aois bha e 'nuair a thòisich e air rìoghachadh; agus rìghich e dà bhliadhna dheug agus dà fhichead ann an Ierusalem: agus b' e ainm a mhàthar Iecholiah o Ierusalem.

3 Agus rinn e an ni a bha ceart ann an sùilbhan an Tighearn, a réir gach ni a rinn Amasiah 'athair.

4 Gidheadh, cha d'thugadh air falbh na h-àitean àrda: fathast bha 'n sluagh ag iobradh, agus a' losgadh tùis anns na h-àitibh àrda.

5 Agus bhuail an Tighearn an rìgh, agus bha e 'na lobhar gu là a bhàis, agus ghabh e còmhnuidh ann an tigh air leth: agus bha Iotam mac an rìgh os ceann an tìghe, a' toirt breth air sluagh na tire.

6 Agus a' chuid eile do ghnìomharaibh Asariah, agus gach ni a rinn e, nach 'eil iad sgrìobhta ann an leabhar eachdraidh rìghrean Iudah?

7 Agus choidil Asariah maille r'a aithrichibh, agus dh'adhlacaidh e maille r'a aithrichibh ann am baile Dhaibhidh: agus rìghich Iotam a mhac 'na àit.

8 Anns an ochdamh bliadhna deug thar fhichead do Asariah rìgh Iudah, rìghich Sachariah mac Ieroboaim os ceann Israeil ann an Samaria sè mìosan.

9 Agus rinn e olc ann an sùilbhan Tighearna, mar a rinn 'aithriche: cha do dhealaich e ri peacaibh Ieroboaim mhic Nebait, a thug air Israel peacachadh.

10 Agus rinn Salum mac Iabeis ceannaire 'na aghaidh, agus bhuail se e am fianuis an t-sluaigh, agus mharbh se e, agus rìghich e 'na àit.

11 Agus a' chuid eile do ghnìomharaibh Shachariah, feuch, tha iad sgrìobhta ann an leabhar eachdraidh rìghrean Israeil.

12 B'e so focal an Tighearn, a labhair e ri Iehu, ag ràdh, Suidhidh do mhic air rìgh-claithir Israeil, gu ruig an ceathramh ginealach. Agus bha e mar sin.

13 Thòisich Salum mac Iabeis air rìoghachadh anns an naothadh bliadhna deug

¹ hostages. Sagg.

² Udsiah.

³ thug e air ais.

⁴ fear-cuidich.

⁵ gu'n sgrìosadh e.

⁶ Udsiah.

II. RIGH, XV. XVI.

thar fhichead do Udsiah¹ rìgh Iudah, agus rìghich e mìos iomlan² ann an Samaria:

14 Oir chaidh Menahem mac Ghadi suas o Thirsah, agus thàinig e gu Samaria, agus bhuail e Salum mac Iabeis ann an Samaria, agus mharbh se e, agus rìghich e 'na àit.

15 Agus a' chuid eile do ghnìomharaibh Shalumi, agus a cheannairc a rinn e, feuch, *tha* iad sgriobhta ann an leabhar eachdraidh rìghrean Israeil.

16 An sin bhuail Menahem Tiphseh, agus iadsan uile a *bha* ann, agus a chrìochan o Thirsah; a chionn nach d'fhosgail iad *dha*, uime sin bhuail se e: a mhnathan torrach uile reub e suas.

17 Anns an naothadh bliadhna deug thar fhichead do Asariah rìgh Iudah thòisich Menahem mac Ghadi air rìoghachadh os ceann Israeil; agus rìghich e deich bliadhna ann an Samaria.

18 Agus rinn e olc ann an sùilbh an Tighearna: cha do dhealaich e rè 'uile làithean ri peacaibh Ieroboaim mhic Nebait, a thug air Israel peacachadh.

19 Agus thàinig Pul rìgh Asiria an aghaidh na tìre: agus thug Menahem do Phul mìle tàlann airgid, a chum gu'm biodh a làmh leis, a dhaigneachadh na rìoghachd 'na làmh.

20 Agus thog Menahem an t-airgid o Israel, *eadhon* uathasan uile a bha comasach ann an saobhreas, leth-cheud secl airgid o gach duine, chum a thabhairt do rìgh Asiria: agus phill rìgh Asiria air ais, agus cha d'fhan e 'n sin anns an tìr.

21 Agus a' chuid eile do ghnìomharaibh Mhenahem, agus gach *ni* a rinn e, nach 'eil iad sgriobhta ann an leabhar eachdraidh rìghrean Israeil?

22 Agus choidil Menahem maille r'a aithrichibh; agus rìghich Pecahiah a mhac 'na àit.

23 Anns an deicheamh bliadhna agus dà fhichead do Asariah rìgh Iudah, thòisich Pecahiah mac Mhenahem air rìoghachadh os ceann Israeil ann an Samaria; agus rìghich e dà bhliadhna.

24 Agus rinn e olc ann an sùilbh an Tighearna: cha do dhealaich e ri peacaibh Ieroboaim mhic Nebait, a thug air Israel peacachadh.

25 Ach rinn Pecah mac Remaliah, ceannard leis féin, ceannairc 'na aghaidh, agus bhuail se e ann an Samaria, ann an luchairt tighe an rìgh, maille ri Argob, agus ri Arieah, agus maille ris leth-cheud fear do na Gileadaich: agus mharbh se e, agus rìghich e 'na àit.

26 Agus a' chuid eile do ghnìomharaibh Phccahiah, agus gach *ni* a rinn e, feuch,

tha iad sgriobhta ann an leabhar eachdraidh rìghrean Israeil.

27 Anns an dara bliadhna deug agus dà fhichead do Asariah rìgh Iudah, thòisich Pecah mac Remaliah air rìoghachadh os ceann Israeil ann an Samaria; agus rìghich e fichead bliadhna.

28 Agus rinn e olc ann an sùilbh an Tighearn; cha do dhealaich e ri peacaibh Ieroboaim mhic Nebait, a thug air Israel peacachadh.

29 Ann an làithibh Phcach rìgh Israeil thàinig Tiglat-pileser rìgh Asiria, agus ghlac e Iion, agus Abel-bet-maachah, agus Ianoah, agus Cedec, agus Hasor, agus Gilead, agus Galile, uile thir Naph-tali, agus thug e 'nam braighdibh iad gu Asiria.

30 Agus rinn Hoseah mac Elah ceannairc an aghaidh Phcach mhic Remaliah, agus bhuail se e, agus mharbh se e, agus rìghich e 'na àit, anns an fhicheadamh bliadhna do Iotam mac Udsiah³.

31 Agus a' chuid eile do ghnìomharaibh Phcach, agus gach *ni* a rinn e, feuch, *tha* iad sgriobhta ann an leabhar eachdraidh rìghrean Israeil.

32 Anns an dara bliadhna do Phcach mac Remaliah rìgh Israeil, thòisich Iotam mac Udsiah rìgh Iudah air rìoghachadh.

33 Cùig bliadhna fichead a dh'aois bha e 'nuair a thòisich e air rìoghachadh; agus rìghich e sè bliadhna deug ann an Ierusalem: agus *b'e* ainm a mhàthar Ierusa, nighean Shadoic.

34 Agus rinn e an *ni* a bha ceart ann an sùilbh an Tighearn: a réir nan uile *nithe* a rinn Udsiah 'athair, rinn esan.

35 Gidheadh cha d'thugadh air falbh na h-àitean àrda: fathast *bha* 'n sluagh ag iobradh agus a' losgadh tùis anns na h-àitibh àrda. Chuir e suas an geata a b'àirde do thigh an Tighearn.

36 Agus a' chuid eile do ghnìomharaibh Iotaim, agus gach *ni* a rinn e, nach 'eil iad sgriobhta ann an leabhar eachdraidh rìghrean Iudah?

37 (Anns na làithibh sin thòisich an Tighearn air Resin rìgh Shiria, agus Pecah mac Remaliah a chur an aghaidh Iudah.)

38 Agus choidil Iotam maille r'a aithrichibh, agus dh'adhlacaidh e maille r'a aithrichibh ann am baile Dhaibhidh 'athar: agus rìghich Ahas a mhac 'na àit.

CAIB. XVI.

1 Rìoghachadh uingidh Ahais. 5 Chog Resin agus Pecah 'na aghaidh. 10 Rinn Ahas altair a réir samhlaidh altarach a bha ann an Damascus, agus dh'ìobair e oirre. 20 Fhuair e bàs, agus rìghich Hesechiah 'na àit.

SAN t-seachdamh bliadhna deug do Phcach mac Remaliah, thòisich Ahas

¹ Asariah.

² mìos do làithibh.

³ Asariah.

II. RIGH, XVI. XVII.

inac Iotaim rìgh Iudah air rìoghachadh.

2 Fìchead bliadhna dh'aois *bha* Ahas an nair a thòisich e air rìoghachadh, agus rìghich e sè bliadhna deug ann an Ierusalem; agus cha do rinn e an *ni a bha* ceart ann an sùilbh an Tighearn a Dhé, mar a *rinn* Daibhidh 'athair.

3 Ach dh'imich e ann an slighe rìghrean Israeil, agus mar an ceudna thug e air a mhac dol troimh 'n teine, a réir ghràineileachd nan cinneach, a thilg an Tighearn a mach roimh chloinn Israeil.

4 Agus dh'ìobair e agus loig e tùis anns na h-àitibh àrda, agus air na cnoic, agus fuidh gach craoibh uaine.

5 An sin thàinig Resin rìgh Shiria, agus Pecah mac Remaliah rìgh Israeil, a nios gu h-Ierusalem a chogadh: agus theannach iad Ahas, ach cha b'urrainn iad buaidh a thoirt air.

6 San àm sin choisinn Resin rìgh Shiria Elat air ais do Shiria, agus dh'fhògair e na h-Iudhaich á h-Elat: agus thàinig na Sirianaich do Elat, agus ghabh iad còmhnuidh ann gus an là 'n diugh.

7 Agus chuir Ahas teachdairean gu Tiglat-pileser rìgh Asiria, ag ràdh, *Is mise* t'òglach agus do mhac; thig a nios agus saor mi á làimh rìgh Shiria, agus á làimh rìgh Israeil, a dh'èirich a'm' aghaidh.

8 Agus ghabh Ahas an t-airgid agus an t-òr a fhuaradh ann an tigh an Tighearn, agus ann an ionmhasaibh tìghe an rìgh, agus chuir se e mar thiodhlac gu rìgh Asiria.

9 Agus dh'éisd rìgh Asiria ris; oir chaidh rìgh Asiria suas an aghaidh Dhamascuis, agus ghlac se e, agus thug e a *shluagh* leis ann braidhdeanas gu Cìr, agus mharbh e Resin.

10 Agus chaidh rìgh Ahas an coinneamh Thiglat-pileser rìgh Asiria gu Dhamascus, agus chunnaic e altair a *bha* ann an Dhamascus; agus chuir rìgh Ahas gu h-Uriah an sagart samhladh na h-altarach, agus a cumadh a réir a h-uile oibre.

11 Agus thog Uriah an sagart altair a réir gach nì a chuir Ahas an rìgh o Dhamascus: mar sin rinn Uriah an sagart i air cheann do rìgh Ahas teachd o Dhamascus.

12 Agus an uair a thàinig an rìgh o Dhamascus, chunnaic an rìgh an altair: agus thàinig an rìgh am fagus agus dh'ìobair e oirre.

13 Agus loig e a thabhartas-loisgte¹, agus a thabhartas-bìdh, agus thaom e a thabhartas-dìbhe, agus chrath e fuil a thabhartasan-sìth air an altair.

14 Agus thug e mar an ceudna an altair umha, a *bha* ²m fianuis an Tighearn o

bheudaobh an tìghe, o eadar an altair agus tigh an Tighearn, agus chuir e i air taobh tuath na h-altarach.

15 Agus dh'àithn rìgh Ahas do Uriah an sagart, ag ràdh, Air an altair mhòir loisg tabhartas-loisgte na maidne, agus tabhartas-bìdh an fheasgair, agus tabhartas-loisgte an rìgh, agus a thabhartas-bìdh, agus tabhartas-loisgte uile shluaigh na tìre, agus an tabhartas-bìdh, agus an tabhartas-dìbhe; agus crath oirre uile fhuil an tabhartais-loisgte, agus uile fhuil na h-ìobairte: agus bithidh an altair umha agamsa gu fìosrachadh *leatha*.

16 Mar so rinn Uriah an sagart a réir gach nì a dh'àithn rìgh Ahas.

17 Agus ghearr rìgh Ahas iomaill nam bonn diubh, agus dh'atharraich e dhiubh an soitheach-ionnlaid, agus thug e nuas an fhainge bhàrr nan damh umha a bha foipe², agus chuir e i air urlar chlach.

18 Agus an còmhachadh³ sàbaid a thog iad san tigh, agus slighe an rìgh a steach o'n leth muigh, thionndaidh e o thigh an Tighearn air son⁴ rìgh Asiria.

19 A nis a' chuid eile do ghnùmharaibh Ahais a rinn e, nach 'eil iad sgrìobhta ann an leabhar eachdraidh rìghrean Iudah?

20 Agus choidil Ahas maille r'a aithrichibh, agus dh'adhlacaidh e maille r'a aithrichibh ann am baile Dhaibhidh; agus rìghich Hesechia a mhac 'na àit.

CAIB. XVII.

1 Rìoghachadh aingidh Hoseah. 4 Rinn Hoseah agus So rìgh na h-Eiphit ceannaire an aghaidh Shalmanesir. 6 Ghlac Salamaneser Samaria. 24 Chuir Dia lèmhain ann measg an t-sluaigh choigrich a dh'àitich Samaria.

ANNS an dara bliadhna deug do Ahas rìgh Iudah thòisich Hoseah mac Elah air rìoghachadh ann an Samaria air Israel; agus rìghich e naoi bliadhna.

2 Agus rinn e ole ann an sealladh an Tighearn, ach cha b'ann mar rìghribh Israeil a bha roimhe.

3 'Na aghaidh-san thàinig a nios Salmaneser rìgh Asiria; agus bha Hoseah 'na sheirbhiseach aige, agus thug e tiodhlac⁵ dha.

4 Agus fhuair rìgh Asiria ceannaire⁶ ann an Hoseah; oir chuir e teachdairean gu So rìgh na h-Eiphit, agus cha d'thug e tiodhlac air bith gu rìgh Asiria, mar a *chleachde* o bhliadhna gu bliadhna: uime sin dhruid rìgh Asiria suas e, agus cheangail e ann am prìosan e.

5 An sin thàinig rìgh Asiria nios troimh 'n fhearann uile, agus chaidh e suas gu Samaria, agus theannaich se e trì bliadhna.

6 Anns an naothadh bliadhna do Hoseah ghlac rìgh Asiria Samaria, agus thug e leis Israel do Asiria, agus shuidhich e iad

¹ ìobairt-loisgte. ² fuidhe. ³ pàillium.

⁴ air eagal.

⁵ cis.

⁶ feall.

ann an Halah, agus ann an Habor làimh ri amhainn Ghosain, agus ann am bailtibh nam Medeach.

7 Oir tharladh gu'n do pheacaich clann Israeil an aghaidh an Tighearn an Dé, a thug a nìos iad á tìr na h-Eiphit, o bhì fuidh làimh Pharaoh rìgh na h-Eiphit, agus bha eagal dhiathan eile orra,

8 Agus dh'imich iad ann an reachdaibh nan cinneach, (a thilg an Tighearn a mach roimh chloinn Israeil,) agus ann an reachdaibh rìghrean Israeil a rinn iad.

9 Agus rinn clann Israeil gu dìomhair nithe nach robh ceart an aghaidh an Tighearn an Dé, agus thug iad dhoibh féin àitean àrda 'nam mòr-bhailtibh uile, o thùrait an luchd-faire gus a' bhlaise dhaingnichte.

10 Agus chuir iad suas dhoibh féin dealbh an agus doireachan¹ air gach uile chnoc àrd, agus fuidh gach uile chraoibh uaine.

11 Agus an sin loisg iad tùis anns na h-àitibh àrda uile, mar na cinnich a thug Dia air falbh rompa; agus rinn iad nithe olc a bhrosnachadh an Tighearna gu corruich;

12 Oir rinn iad seirbhis do ìodholaibh, mu'n d'thubhairt an Tighearna riu, Cha dean sibh an nì so.

13 Gidheadh thug an Tighearna fianuis an aghaidh Israeil, agus an aghaidh Iudah, leis na fàidhibh uile, agus leis an luchd-seallaidh uile, ag ràdh, Pillibh o bhur droch shlighibh, agus gleidhibh m'àitheantan agus mo reachdan, a réir an lagha uile a dh'àithn mi d'ur n-aithrichibh, agus a chuir mi d'ur n-ionnsuidh le m' sheirbhisich² na fàidhean.

14 Gidheadh cha b'àill leo éisdeachd, ach chruadhaich iad am muineal, cosmhuil ri muineal an aithriche, nach do chreid anns an Tighearn an Dia.

15 Agus rinn iad tàir air a reachdaibh, agus air a choimcheangal a rinn e r'an aithrichibh, agus air a theisteis leis an d'thug e fianuis 'nan aghaidh; agus lean iad dìomhanas, agus dh'fhàs iad dìomhain, agus chaidh iad an dèigh nan cinneach a bha mu'n cuairt orra, mu'n d'thug an Tighearna sparradh dhoibh, nach deanadh iad cosmhuil riu.

16 Agus thréig iad uile àitheantan an Tighearn an Dé, agus rinn iad dhoibh féin dealbhan leaghta, eadhon dà laogh, agus rinn iad doire, agus rinn iad aoradh do uile armaid nèimh, agus rinn iad seirbhis do Bhaal.

17 Agus thug iad air am macaibh agus air an nigheanaibh dol troimh 'n teine, agus ghnàthaich iad fìosachd agus druiddh-

eachd, agus reic siad iad féin a dheanamh uile ann an sealladh an Tighearna, clum a bhrosnachadh gu feìrg.

18 Uime sin bha fearg ro mhòr aig an Tighearna ri h-Israel, agus dh'atharraich e iad as a shealladh: cha d'fhàgadh aon ach treubh Iudah a mhàin.

19 (Mar an ceudna cha do ghléidh Iudah àitheantan an Tighearn an Dé, ach dh'imich iad ann an reachdaibh Israeil a rinn iad.)

20 Agus chuir an Tighearna cùl ri uile shliochd Israeil, agus chuir e fuidh àmhghar iad, agus thug e thairis iad do làimh chreachadairean, gus an do thilg e as a shealladh iad.

21 Oir scar Israel e féin o thigh Dhaibhidh³, agus rinn iad Ieroboam mac Nebait 'na rìgh; agus dh'fhuadaich Ieroboam Israel o'n Tighearn a leantuinn, agus thug e orra peacadh mòr a pheacachadh.

22 Agus dh'imich clann Israeil ann an uile pheacaibh Ieroboaim a rinn e: cha do dhealaich iad riu;

23 Gus an d'atharraich an Tighearn Israel as a shealladh, mar a thubhairt e le 'sheirbhisich uile na fàidhean. Agus thugadh Israel air falbh as an tìr féin do Asiria, gus an là 'n diugh.

24 Agus thug rìgh Asiria daoine o Babilon, agus o Chutah, agus o Abha, agus o Hamat, agus o Shepharbhaim, agus shuidhich e iad ann am bailtibh Shamaria, an àite chloinn Israeil; agus shealbhaich iad Samaria, agus ghabh iad còmhnuidh 'na bhailtibh.

25 Agus tharladh, 'nuair a ghabh iad an toiseach còmhnuidh an sin, nach robh eagal an Tighearn orra; uime sin chuir an Tighearna leòmhain 'nam measg, a mharbh cuid diubh.

26 Air an aobhar sin labhair iad ri rìgh Asiria, ag ràdh, Na cinnich a dh'atharraich thu, agus a shuidhich thu ann am bailtibh Shamaria, cha 'n aithne dhoibh gnàth Dhé na tìre: uime sin chuir e leòmhain 'nam measg, agus, feuch, tha iad 'gam marbhadh, a chionn nach aithne dhoibh gnàth Dhé na tìre.

27 An sin dh'àithn rìgh Asiria, ag ràdh, Thugaibh leibh an sin aon do na sagartaibh a thug sibh as a sin; agus rachadh e⁴ agus gabhadh e còmhnuidh an sin, agus teagaisgeadh e dhoibh gnàth Dhé na tìre.

28 An sin thàinig aon do na sagartaibh a thug iad leo á Samaria, agus ghabh e còmhnuidh ann am Bet-el, agus theagaisg e dhoibh cionnus bu choir dhoibh eagal an Tighearn a bhì orra.

29 Gidheadh, rinn gach cinneach dée

¹ ìodholan; asherim. Eabh.

² le làimh mo sheirbhiseach. Eabh.

³ reub e Israel o thigh Dhaibhidh.

⁴ iad.

dhoibh féin, agus chuir siad *iad* ann an tighibh nan àitean àrda a rinn na Samaritanach, gach cinneach 'nam bailtibh féin anns an do ghabh iad còmhuidh.

30 Agus rinn daoine Bhabiloìn Sucot-Benot, agus rinn daoine Chuit Nergal, agus rinn daoine Hamait Asima,

31 Agus rinn na h-Abhaich Nibhas agus Tartac, agus loisg na Sepharbhaich an clann san teine do Adramelech agus Anamelech, dée Shepharbhaim.

32 Agus bha eagal an Tighearn orra, agus rinn iad doibh féin do'n chuid a b'isle dhiubh sagairt nan àitean àrda, agus thug iad suas iobairtean air an son ann an tighibh nan àitean àrda.

33 Bha eagal an Tighearn orra, agus rinn iad seirbhis d'an diathaibh féin, a réir gnàtha nan cinneach a thug iad leo as a sin.

34 Gus an là 'n diugh tha iad a' deanamh a réir nan ceud ghnàth: cha 'n'eil eagal an Tighearn orra, cha mhò tha iad a' deanamh a réir an reachda, no do réir an orduighean, no do réir an lagha, no do réir na h-àithne a dh'àithn an Tighearna do chloinn Iacòib, air an d'thug e Israel mar ainm:

35 Ris an d'rinn an Tighearn, coimhcheangal, agus d'an d'thug e sparradh¹, ag ràdh, Cha bhi eagal dhiathan eile oirbh, agus cha chrom sibh sibh féin doibh, agus cha dean sibh seirbhis doibh, agus cha 'n iobair sibh doibh:

36 Ach an Tighearn, a thug a nìos sibh á tìr na h-Eiphit le mòr chumhachd, agus le gairdean sint' a mach, eagal-san bithidh oirbh, agus dha-san làbaidh sibh an glùn, agus dha-san iobraidh sibh.

37 Agus na reachdan, agus na h-orduighean, agus an lagh, agus an àithne a sgrìobh e dhuibh, bheir sibh an aire gu'n dean sibh iad gu bràth; agus cha bhi eagal dhiathan eile oirbh.

38 Agus an coimhcheangal a rinn mise ribh cha d'èinnimhuich sibh; agus cha bhi eagal dhiathan eile oirbh.

39 Ach bithidh eagal an Tighearna bhuir Dé oirbh, agus saoraidh esan sibh á làimh bhuir naimhdean nìle.

40 Gidheadh cha d'èisd iad, ach rinn iad a réir an ceud ghnàtha.

41 Agus bha eagal an Tighearn air na cinnich sin, gidheadh rinn iad seirbhis d'an dealbhaibh snaidhte féin, araon an clann, agus clann an cloinne: mar a rinn an aithriche, is amhuil a ta iadsan a' deanamh gus an là'n diugh.

CAIB. XVIII.

1 Rìoghachadh agus treubhantas Hesechia. 9 Ghlac Salmaneser Santaria. 13 Thàinig Senacherib a nìas an aghaidh bhailtean Iudah, agus thog e cis o Hesechia. 17 Chàin Rabsach Hesechia.

AGUS anns an treas bliadhna do Hoseah mac Elah rìgh Israeil, thòisich Hesechia mac Ahais, rìgh Iudah, air rìoghachadh.

2 Cùig bliadhna fichead a dh'aois bha e 'nuair a thòisich e air rìoghachadh; agus rìghich e naoi bliadhna fichead ann an Ierusalem: agus b'e ainm a mhàthar Abi, nighean Shechariah.

3 Agus rinn e an *ni a bha* ceart ann an suilbh an Tighearn, a réir nan nìle nithe a rinn Daibhidh 'athair.

4 Chuir e air falbh na h-àitean àrda, agus bhris e na dealbhan, agus ghearr e sìos na doireachan, agus mhìn-phronn e an nathair umha a rinn Maois; oir gus na làithibh sin bha clann Israeil a' losgadh tùis dhi: agus thugadh² Nehustan mar ainm oirre.

5 As an Tighearna Dia Israeil bha 'earbsadh: agus 'na dhéigh cha robh neach sam bith cosmhail ris am measg uile rìghrean Iudah, no *aon* a bha roimhe.

6 Oir dhlùth-lean e ris an Tighearna, cha do chlaon e o a leantuinn: achi ghléidh e 'aithcantan, a dh'àithn an Tighearn do Mhaois.

7 Agus bha 'n Tighearna maille ris: anns gach àite d'an deachaidh e, shoirbhich e. Agus dh'èirich e 'n aghaidh rìgh Asiria, agus cha d'rinn e seirbhis dha.

8 Bhual e na Philistich gu ruig Gasa, agus a chrìochan, o thùr an fhreiceadain gu ruig am baile daingnichte.

9 Agus anns a' cheathramh bliadhna do rìgh Hesechia, agus san t-seachdamh bliadhna³ do Hoseah mac Elah rìgh Israeil, thàinig Salmaneser, rìgh Asiria, a nìos an aghaidh Shamaria, agus theann-aich se e.

10 Agus ghlac iad e an ceann thrì bliadhna: anns an t-sèathadh bliadhna do Hesechia, agus san naothadh bliadhna do Hoseah rìgh Israeil, ghlacadh Samaria.

11 Agus thug rìgh Asiria leis Israel do Asiria, agus chuir e iad ann an Halah agus ann an Habor *làimh ri* amhainn Ghosain, agus ann am bailtibh nam Medeach:

12 A cliomn nach d'èisd iad ri guth an Tighearn an Dé, ach gu'n do bhris iad a choimhcheangal, na h-uile *nìthe* a dh'àithn Maois òglach an Tighearna: nach d'èisd iad *riu*, agus nach mò a rinn siad *iad*.

13 Agus anns a' cheathramh bliadhna deng do rìgh Hesechia thàinig Senacherib rìgh Asiria a nìos an aghaidh uile bhailte daingnichte Iudah, agus ghlac e iad.

14 Agus chuir Hesechia rìgh Iudah *teachdairean* gu rìgh Asiria do Lachis, ag ràdh, Chiontaich mi; pill uam: *an ni* a chuireas tu orm, giùlainidh mi. Agus

¹ orduigh teann.

² thug e.

³ b'i sin an seachdamh bliadhna. Eabh.

II. RIGH, XVIII.

eluir righ Asiria air Heseciah righ Iudah tri cheud tälann airgid, agus deich tälanna fichead òir.

15 Agus thug Heseciah *dha* an t-airgiod uile a fhuaradh ann an tigh an Tighearn, agus ann an ionmhasaibh tigh e an righ.

16 Anns an àm sin ghearr Heseciah air falbh còmhlaich teampuill an Tighearn, agus na h-ursainnean a chòmhdaich Heseciah righ Iudah, agus thug e iad¹ do righ Asiria.

17 Agus chuir righ Asiria Tartan, agus Rabsaris, agus Rabsaceh, o Lachis gu righ Heseciah le sluagh mòr an aghaidh Ierusalem: agus air teachd a nìos doibh², thàinig iad agus sheas iad aig sruth-chlais na linne a's àrde, a *tha* air slighe achaidh an luadhaidair.

18 Agus an uair a dh'éigh iad ris an righ, thàinig a mach d'an ionnsuidh Eliacim mac Hilciah, a *bha* os ceann an teaghlach, agus Sebna an sgiobhaich, agus Ioas mac Asaiph an seanachaidh.

19 Agus thubhairt Rabsaceh riu, Abairibh a nis ri Heseciah, Mar so tha 'n righ mòr, righ Asiria, ag ràdh, Ciod an t-earbsadh³ mòr so a th'agad?

20 Tha thu ag ràdh, (ach *is* briathra faoin *iad*.) *Tha* comhairle agus neart *agam* chum a' chogaidh: a nis ma ta cò as am bheil thu ag earbsadh, gu'n deanadh tu cogadh a'm' aghaidh-sa?

21 A nis, feuch, tha thu 'g earbsadh as an luirg bhriste chuile sin, as an Eiphit, a theid, ma leigeas duine a chudthrom oirre, a steach 'na làimh, agus a thollas troimhe⁴ i. *Is ann* mar so a *tha* Pharaoh righ na h-Eiphit dhoibhsan uile a dh'earbas as.

22 Ach ma their sibh rium, As an Tighearn ar Dia tha ar n-earbsadh: nach e so esan, a chuir Heseciah air falbh 'àitean àrda, agus 'altairean, agus a thubhairt ri Iudah agus ri Ierusalem, Fa chomhair na h-altarach so sleuchdaidh sibh ann an Ierusalem?

23 A nis uime sin, guidheam ort, their gill do m' thighearna righ Asiria, agus bheir mise dhuìt dà mhìle each, ma's urrainn thusa air do thaobh féin marcaich a chur orra.

24 Cionnus ma ta bheir thu air aon cheannard, do na seirbhisich a's lugha a tha aig mo thighearna-sa, 'aghaidh a thionndadh uait, agus a dh'earbas tu as an Eiphit air son charbad agus marcshluaigh?

25 *Ach* a nis, an ann as eugmhais an Tighearn a thàinig mis' a nìos an aghaidh an àite so, g'a sgrios? *Is e 'n* Tighearn

a thubhairt riumsa, Falbh suas an aghaidh na tìre so, agus sgrios i.

26 An sin thubhairt Eliacim mac Hilciah, agus Sebna, agus Ioah, ri Rabsaceh, Labhair, guidheam ort, ri d' sheirbhisich anns a' chainnt Shirianaich, oir tuigidh sinn *i*; agus na labhair ruinn anns a' chainnt Iudhaich, an clusaibh an t-sluaigh a *tha* air a' bhalla.

27 Ach thubhairt Rabsaceh riu, An ann a dh'ionnsuidh do thighearna-sa, agus a d' ionnsuidh-sa, a chuir mo thighearna mise a labhairt nam briathra so? nach ann a dh'ionnsuidh nan daoine a tha 'nan suidhe air a' bhalla, a chum gu'n ith iad an salchar féin, agus gu'n òl iad an uisge féin maille ri bheh?

28 An sin sheas Rabsaceh, agus dh'éigh e le guth àrd anns a' chainnt Iudhaich, agus labhair e, ag ràdh, Eisdibh ri focal an righ mhòir, righ Asiria:

29 Mar so tha 'n righ ag ràdh, Na mealladh Heseciah sibh, oir cha 'n urrainn e bhur saoradh á m' làimh-sa⁵:

30 Agus na tugadh Heseciah oirbh bhur dòchas a chur san Tighearn, ag ràdh, Gu deimhin saoraidh an Tighearna sinne, agus cha toirear thairis am baile so do làimh righ Asiria.

31 Na h-éisdibh ri Heseciah: oir mar so tha righ Asiria ag ràdh, Deanaibh suas càirdeas riumsa⁶, agus thigibh a mach a'm' ionnsuidh, agus ithibh gach fear d'a chrann-fiona, agus gach fear d'a chrann-fige féin, agus òlaibh gach fear uisge a thobair féin;

32 Gus an tig mise, agus gu'n toir mi air falbh sibh do thir cosmhuil r'ur tìr féin, tìr arbhair agus fiona, tìr arain agus fhion-lios, tìr olaidh a' chroinn-olaidh agus meala, a chum gu'm bi sibh beò, agus nach faigh sibh bàs: agus na h-éisdibh ri Heseciah, an uair a chuireas e impidh oirbh, ag ràdh, Saoraidh an Tighearna sinn.

33 An do shaor riamh dée nan cinneach, gach aon a thir féin, á làimh righ Asiria?

34 C'ait *am bheil* dée Hamait, agus Arphaid? c'ait *am bheil* dée Shepharbhaim, Hena, agus Ibhah? an do shaor iad Samaria as mo làimh-sa?

35 Cò am measg uile dhée nan dùchan-na, a shaor an tìr féin as mo làimh-sa, gu'n saoradh an Tighearn Ierusalem as mo làimh?

36 Ach bha'n sluagh 'nan tosd, agus cha do fhreagair iad aon fhocal da: oir b'i àithne an righ dhoibh, Na tugaibh freagradh air.

37 An sin thàinig Eliacim mac Hilciah,

¹ an t-òr a bha orra.

² agus chaidh iad suas, agus thàinig iad gu Ierusalem: agus an uair a thàinig iad a nìos.

³ an dòchas.

⁴ trid.

⁵ as a làimh-san.

⁶ Deanaibh còimhcheangal riumsa le tiodhlac.

a *bha* os ceannan teaghlaich, agus Sebna an sgrìobhaich, agus Iotha mac Asaiph an seanachaidh, gu Hesechia le'n eudach reubta, agus dh'innis iad da briathra Rabsaceh.

CAIB. XIX.

1 Chuir Hesechia fìos a dh'ionnsuidh Isaiah gu urnuigh a dheanann air a shon. 20 Fàisteachd Isaiah a thaobh Shenacherib. 33 Bhuail aingeal an Tighearn armait na Asirianach. 37 Chuir a mhic Senacherib gu bàs.

AGUS an uair a chual' Hesechia an rìgh e, reub e 'eudach, agus chòmh-daich se e fèin le saic-eudach, agus chaidh e do thigh an Tighearn.

2 Agus chuir e Eliacim, a *bha* os ceann an tighe, agus Sebna an sgrìobhaich, agus seanaire nan sagart, còmhdaichte le saic-eudach, gu Isaiah an fàidh, mac Amois.

3 Agus thubhairt iad ris, Mar so tha Hesechia ag ràdh, *Is* là teinn, agus ach-mhasain, agus maslaidh an là so: oir tha clann air teachd gu inbhe breith, agus neart gu'm breith cha 'n'eil ann.

4 Theagamh gu'n cluinn' an Tighearna do Dhia uile bhriathra Rabsaceh, a chuir a thighearna rìgh Asiria a mhaslachadh an Dè bheò; agus gu'n cronaich e na briathran a chual' an Tighearna do Dhia: tog suas t'urnuigh ma ta air son an fhuighill a dh'fhàgadh.

5 Uime sin an uair a thàinig seirbhishich rìgh Hesechia gu h-Isaiah,

6 Thubhairt Isaiah riu, Mar so their sibh r'ur tighearn, Mar so tha'n Tighearn ag ràdh, Na biodh eagal ort roimh na briathraibh a chuala tu, leis an d'thug seirbhishich rìgh Asiria masladh dhomhsa.

7 Feuch, cuiridh mise spiorad ann², agus chuinnidh e tuairesgeul, agus pillidh e d'a thìr fèin; agus bheir mise air tuit-eam leis a' chlaidheamh 'na thìr fèin.

8 Agus phill Rabsaceh, agus fhuaire e rìgh Asiria a' cogadh an' aghaidh Libnah: oir chual' e gu'n d'fhalbh e o Lachis.

9 Agus an uair a chual' e 'ga ràdh mu Thirhacah rìgh Etiopia³, Feuch, thàinig e mach a chogadh riut; chuir e teachdair-ean a ris gu Hesechia, ag ràdh,

10 Mar so labhairidh sibh ri Hesechia rìgh Iudah, ag ràdh, Na mealladh do Dhia thu, as am bheil thu 'g earbsadh, ag ràdh, Cha toirear Ierusalem thairis do làimh rìgh Asiria.

11 Feuch, chuala tu ciod a rinn rìghrean Asiria ris gach uile thìr, g' an sgrios gu tur; agus an saorar thusa?

12 An do shaor dée nan cinneach iadsan a sgrios m'aithriche-sa, eadhon Gosan, agus Haran, agus Reseph, agus clann Edein a *bha* ann an Telasar?

13 C'ait am bheil rìgh Hamait, agus rìgh Arpaid, agus rìgh mòr-bhaile⁴ Shepharbhaim, Hena, agus Iblah?

14 Agus ghabh Hesechia an litir à làimh nan teachdair-ean, agus leugh e i: agus chaidh Hesechia suas do thigh an Tighearn, agus sgaoil e i am fianuis an Tighearn.

15 Agus rinn Hesechia urnuigh an làthair an Tighearn, agus thubhairt e, O Thighearna Dhé Israeil, a tha d' chòmh-nuidh eadar na cheruban, is tu fèin Dia, thusa a'd' aonar, Dia uile rìoghachda na talmhainn: is tu a rinn na nèamhan agus an talamh.

16 Crom, a Thighearn, a nuas do chluas, agus éisd; fosgail, a Thighearna, do shùilean, agus faic: seadh cluinn briathra Shenacherib, a chuir e a mhaslachadh an Dè bheò.

17 Gu deimhin, a Thighearna, sgrios rìghrean Asiria na cinnich agus an tìre;

18 Agus thilg iad an dée san teine; oir cha bu dée iad, ach oibre làmh dlaoine, fiodh agus clach: uime sin sgrios siad iad.

19 A nis ma ta, O Thighearn ar Dia, saor sinn, guidheam ort, as a làimh, chum gu'n bi fìos aig uile rìoghachdaibh na talmhainn gur tusa an Tighearna Dia, thu fèin a'd' aonar.

20 An sin chuir Isaiah mac Amois teachd-air gu Hesechia, ag ràdh, Mar so tha'n Tighearna Dia Israeil ag ràdh, An urnuigh a rinn thu riumse mu thimchioll Shenacherib rìgh Asiria, chuala mi.

21 So am focal a labhair an Tighearna mu 'thimchioll: Rinn òigh nighean Shioin tàir ort; rinn i gàire fanoid riut; chrath nighean Ierusalem a ceann air do chùl-laobh.

22 Cò d'an d'thug thu masladh agus toibheum? agus cò a dh'ardaich thu do ghuth 'na aghaidh, agus a thog thu do shùilean gu h-àrd? an aghaidh Tì naoimh Israeil.

23 Le làimh do theachdair-ean mhaslaich thu an Tighearn, agus thubhairt thu, Le lìonmhoireachd mo charbad dhirich mi àirde nan beann, sliosnan Lebanoin; agus gearraidh mi sìos a chraobhan seudair a's àirde⁵, agus roghadh a chraobhan giuthais, agus théid mi stigh a dh'aitibh-tàimh a chrìche, frith a Charmeil.

24 Chladhaich mi agus dh'òl mi uisgeacha coimheach, agus le bonn mo cìos thiormaich mi suas uile aimhniche nan daingneach.

25 Nach cuala tu o cheann fada cionnus a rinn mi e, agus o'n aimsir chéin gu'n do dhealbh mi e? a nis thug mi gu crìch e, gu'm bitheadh tusa chum bailtean daing-

¹ O gu'n cluinneadh.

² osag air.

³ Chuis. Eabh.

⁴ caithreach.

⁵ àirde a chraobh seud air. Eabh.

nichte fhàsachadh 'nan carnaibh sgrios.

26 Uime sin bha 'n luchd-àiteachaidh air bheag neirt: bha crith-eagail orra agus amhladh; bha iad mar fheur na macharach, agus mar an luibh ghlas¹, mar fheur mullaich nan tighean, agus mar arbhar seargta mu'm fàs e suas.

27 Ach is aithne dhomh t'àite còmh-nuidh, agus do dhol a mach, agus do theachd a steach, agus fraoch t'fheirge a'm' aghaidh.

28 A chiom gu bheil fraoch t'fheirge a'm' aghaidh, agus t'onfhadh air teachd a nìos gu m' chluasaibh, uime sin cuiridh mi mo dhubhan a'd' shròin, agus mo shrian a'd' bheul², agus pillidh mi air t'ais thu san t-slighe air an d'thàinig thu.

29 Agus bithidh so 'na chomhara dhuit: Ithidh tu air a' bhliadhna so na nìthe a dh'fhàsas leo fèin, agus anns an dara bliadhna na nìthe a chinneas asda sin; agus anns an treas bliadhna cuiridh agus buainidh sibh, agus suidhichidh sibh fion-lìosan, agus ithidh sibh d'an toradh.

30 Agus gabhaidh am fuigheall a théid as do thigh Iudah, fathast freumh sìos, agus cuiridh e toradh suas.

31 Oir á Ierusalem théid fuigheall³ a mach, agus iadsan a théid as o shliabh Shìoin: nì eud Thighearna nan sluagh so⁴.

32 Uime sin mar so tha'n Tighearn, ag ràdh mu thùinchioll rìgh Asiria, Cha tig e do'n bhaile so, agus cha tig e saighead ann, agus cha tig e fa' chomhair le sgéith agus cha chuir e suas tòrr⁵ 'na aghaidh.

33 Air an t-slighe air an d'thàinig e, air an t-slighe cheudna pillidh e, agus cha tig e steach do'n bhaile so, ars' an Tighearn:

34 Oir dìonaidd mise am baile so chum a shaoradh, air mo shon fèin, agus air son Dhaibhidh m'òglaich.

35 Agus air an oidhe sin fèin chaidh aingeal an Tighearna mach, agus bhuail e ann an camp nan Asirianach ceud agus ceithir fichead agus cùig mìle: agus an uair a dh'èirich iad gu moch anns a' mhaduinn, feuch, bha iad uile 'nan cor-paibh marbha.

36 Agus dh'imich Senacherib rìgh Asiria, agus chaidh e agus phill e, agus ghabh e còmhnuidh ann an Ninebbheh.

37 Agus an uair a bha e ri aoradh ann an tigh Nisroich a dhé, bhuail Adrame-lech agus Sareser a mhic e leis a' chlàidheamh; agus thearh iad do thìr Armenia: agus rìghich Esarlhadon a mhac 'na àit.

CAIB. XX.

1 Nuair bha Hesechia tinn gu bàs, rinn e urnuigh ri Dia, agus fhuair e gealladh gu'n tìgeadh e beò.

12 Chuir Berodachbaladan teachdairean d'a ionnsuidh, agus dh'fheuch e dhoibh na h-uile nìthe a bha 'na thigh. 21 Fhuair Hesechia bàs, agus rìghich Manaseh 'na àit.

ANNS na làithibh sin bha Hesechia tinn gu bàs: agus thàinig am fàidh Isaiah mac Amois d'a ionnsuidh, agus thubhairt e ris, Mar so tha'n Tighearn ag ràdh, Cuir do thigh an ordugh, oir gheibh thu bàs, agus cha bhì thu beò.

2 An sin thionndaidh e 'aghaidh ris a' bhalla, agus rinn e urnuigh ris an Tighearn, ag ràdh,

3 Guidheam ort, O Thighearna, cuimh-nich a nis cionnus a ghluais mi a'd' làthair ann am firinn, agus le cridhe iomlan, agus a rinn mi an *ni a ta* maith a'd' shùilibh. Agus ghuil Hesechia gu goirt.

4 Agus mu'n deachaidh Isaiah mach do'n chùirt mheadhonaich, thàinig focal an Tighearna d'a ionnsuidh, ag ràdh,

5 Pill, agus abair ri Hesechia ceannard mo shluaigh, Mar so tha'n Tighearna, Dia Dhaibhidh t'athar, ag ràdh, Chuala mise t'urnuigh, chumnaic mi do dheoir: feuch, slànuchidh mi thu; air an treas là théid thu suas do thigh an Tighearn.

6 Agus cuiridh mi ri d' làithibh cùig bliadhna deug; agus saoraidh mi thusa, agus am baile so, á làimh rìgh Asiria; agus dìonaidd mi am baile so air mo shon fèin, agus air son Dhaibhidh m'òglaich.

7 Agus thubhairt Isaiah, Gabhaibh meall fhèig. Agus ghabh agus chuir iad e air an neascaid, agus slànucheadh e⁶.

8 Agus thubhairt Hesechia ri Isaiah, Cìod an comhara gu'n leighis an Tighearna mi, agus gu'n téid mi suas air an treas là do thigh an Tighearn?

9 Agus thubhairt Isaiah, Bithidh so 'na chomhara dhuit o'n Tighearna, gu'n dean an Tighearn an nì a labhair e: An téid an dubhar air aghaidh deich ceumanna, no'n téid e air ais deich ceumanna?

10 Agus fhreagair Hesechia, Is suarach an nì do'n dubhar dol sìos⁷ deich ceumanna; nì h-eadh, ach pilleadh an dubhar air ais deich ceumanna.

11 Agus ghlaodh Isaiah am fàidh ris an Tighearn; agus thug e air ais an dubhar deich ceumanna, a chaidh e sìos⁸ air ceumannaibh Ahais⁹.

12 San àm sin chuir Berodach-baladan¹⁰ mac Bhaladain, rìgh Bhabiloin, teachdairean le litricheibh agus tiodhlac gu Hesechia: oir chual' e gu'n robh Hesechia tinn.

13 Agus rinn Hesechia gairdeachas os an ceann¹¹, agus dh'fheuch e dhoibh uile

1 uaine. 2 a'd' bhilìbh. 3 iarmad. 4 nì eud an Tighearna so. 5 dàn talmhainn, daingneach. 6 Faic Isaiah, Caib. XXXVIII. r. 21. 7 air aghaidh. 8 air aghaidh.

9 uaireadair-gréine Ahais.

10 Merodach-baladan Isaiah, Caib. XXXIX. r. 1.

11 dh'èisd Hesechia riu. Faic Isaiah, Caib. XXXIX. r. 2.

thigh-tasgaidh a nithe luachmhor, an t-airgiod, agus an t-òr, agus na spiosraidh, agus an oladh luachmhor, agus a thigh armachd, agus na nithean uile a fhuaradh 'na ionmhasaibh: cha robh ni 'na thigh, no 'na rioghachd uile, nach d'fheuch Hesechia dhoibh.

14 An sin thàinig Isaiah am fàidh gu righ Hesechia, agus thubhairt e ris, Ciod a thubhairt na daoine so? agus cia as a thàinig iad a d'ionnsuidh? agus thubhairt Hesechia, Thàinig iad o thir chéin, o Bhabylon.

15 Agus thubhairt e, Ciod a chunnaic iad a'd thigh? agus fhreagair Hesechia, Na h-uile *nithe a ta* a'm' thigh chunnaic iad: cha 'h'eil ni ann am ionmhasaibh nach d'fheuch mi dhoibh.

16 Agus thubhairt Isaiah ri Hesechia, Eisd ri focal an Tighearna:

17 Feuch, tha na làithean a' teachd, anns am bi na h-uile *nithe a tha* ann ad thigh, agus na h-ionmhasan a thaisg t'aithriche suas gus an là'n diugh, air an giùlan gu Babilon: cha'n fhàgar ni air bith, ars' an Tighearn.

18 Agus *cuid* do d' mhacaibh a thigh uait, a ghineas tu, bheir iad leo, agus bithidh iad 'nan caillteanaich ann an luch-airt righ Bhabiloin.

19 An sin thubhairt Hesechia ri Isaiah, *Is* maith focal an Tighearna a labhair thu: thubhairt e mar an ceudna, Nach *maith*, ma bhios sìth agus firinn a'm' làithibh-sa?

20 Agus a' chuid eile do ghnìomhar-aibh Hesechia, agus a thréine uile, agus mar a rinn e lochan¹, agus sruth-chlais, agus a thug e uisge steach do'n bhaile, nach 'eil iad sgrìobhta ann an leabhar eachdraidh rìghrean Iudah?

21 Agus chòidid Hesechia maille r'a aithrichibh: agus rìghich Manaseh a mhac 'na àit.

CAIB. XXI.

1 Rìoghachadh aingidh agus iodhol-aoiridh Mhanaseh.
10 Fàistneachd an aghaidh Iudah. 17 Fhuair Manaseh bàs, agus rìghich Amon 'na àit.
23 Mharbh a sheirbhiseich Amon: 26 rìghich Iosiah 'na àit.

DA bhliadhna dheug a dh'aois bha Manaseh 'nuair a thòisich e air rìoghachadh, agus rìghich e chig bliadhna deug: agus dà fhichead ann an Ierusalem: agus *b'e* ainm a mhàthar Hephzibah.

2 Agus rinn e olc ann an sùilbhan an Tighearn, a réir ghràineileachd nan cinn-each, a thilg an Tighearna mach roimh chloinn Israeil.

3 Oir thog e suas a ris na h-àitean àrda a sgrìos Hesechia 'athair; agus chuir e suas altairean do Bhaal, agus rinn e doire,

mar a rinn Ahab rìgh Israeil; agus shleuchd e do uile armaillt nèimh, agus rinn e seirbhìs doibh.

4 Agus thog e altairean ann an tigh an Tighearna, mu'n dubhairt an Tighearn, Ann an Ierusalem cuiridh mi m'ainm.

5 Agus thog e altairean do uile armaillt nèimh, ann an dà chùirt tìghe an Tighearn.

6 Agus thug e air a mhac dol troimh 'n teine, agus thug e fa'near àmanna, agus ghnàthaich e druidheachd, agus chuir e air chois leannain-shith, agus luchd-fiosachd: dh'òibrich e mòr aingidheachd ann an sùilbhan an Tighearna, g'a bhrosnachadh gu feirg.

7 Agus chuir e dealbh snaidhte an doire a rinn e, anns an tigh mu'n dubhairt an Tighearna ri Daibhidh, agus ri Solamh a mhac, Anns an tigh so, agus ann an Ierusalem, a thagh mi á uile threubhan Israeil, cuiridh mi m'ainm gu bràth.

8 Cha mhò a bheir mi air cosaibh Israeil caruchadh² tuilleadh a mach as an fhear-ann a thug mi d'an aithrichibh; a mhàin ma bheir iad an aire gu'n dean iad a réir nan uile *nithe* a dh'àithn mise dhoibh, agus a réir an lagha uile a dh'àithn m'èg-lach Maois dhoibh.

9 Ach cha d'èisd iad: agus tharruing Manaseh iad gu tuilleadh uile a dheanamh na rinn na cinnich, a sgrìos an Tighearna roimh chloinn Israeil.

10 Agus labhair an Tighearna le 'sheirbhiseich³ na fàidhean, ag ràdh,

11 A chionn gu'n d'rinn Manaseh rìgh Iudah na gràineileachda so, agus gu'n d'rinn e iù's miosa na na h-uile *nithe* a rinn na h-Amoraich a bha roimhe, agus gu'n d'thug e air Iudah mar an ceudna peacachadh le ìodholaibh:

12 Uime sin mar so tha'n Tighearna Dia Israeil ag ràdh, Feuch, *tha* mi tabhairt uile air Ierusalem agus Iudah, a bheir air gach neach a chluinneas e, gu'm bi gaor⁴ na dhà chluais.

13 Agus sinidh mi mach os ceann Ierusalem sreang-thomhais Shamaria, agus sreang-riaghailt⁵ tìghe Ahaib: agus glanaidh mi as Ierusalem mar a ghlanas *neach* soitheach, g'a ghlanadh, agus a' tionnadh a bheoil fuidh⁶.

14 Agus tréigidh mi fuigheall m'oighreachd, agus bheir mi iad do làimh an naimhdean; agus bithidh iad 'nan creich agus 'nan cobhartach d'an naimhdibh uile;

15 A chionn gu'n d'rinn iad olc a'm' shùilbhan, agus gu'n do bhrosnaich iad mi gu feirg o'n là san d'thàinig an aithriche mach as an Eiphit, cadhon gus an là 'n diugh.

¹ poll-éisg.

² corrochadh. Eir.

³ le làimh a sheirbhiseach. Eabh.

⁴ glaom.

⁵ cudthrom. Eabh.

⁶ foidh.

16 Os bàrr, dhòirt Manaseli fuil neò-chiontach gu ro mhòr, agus an do lìon e Ierusalem o cheann gu ceann, a thuilleadh air a pheacadh féin leis an d'thug e air Iudah peacadhadh, le ole a dheanamh ann an sùilbhan an Tighearn.

17 Agus a' chuid eile do ghnìomharaibh Mhanaseh, agus na h-uile *nìthe* a rinn e, agus a pheacadh a rinn¹ e, nach *'eil* iad sgrìobhta ann an leabhar eachdraidh rìgh-rean Iudah?

18 Agus choidil Manaseh maille r'a aithrichibh, agus dh'adhlaicheadh e ann an lìos a thighe féin, ann an lìos Udsa: agus rìghich Amon a mhac 'na àit.

19 Dà bhliadhna thar fhichead a dh'aois *bha* Amon an uair a thòisich e air rìoghachadh; agus rìghich e dà bhliadhna ann an Ierusalem: agus *b'e* ainm a mhàthar Mesulemet, nighean Haruis o Iotbah.

20 Agus rinn e ole ann an sùilbhan an Tighearna, mar a rinn Manaseh 'athair.

21 Agus dh'imich e anns an uile shlighe san d'imich 'athair, agus rinn e seirbhis do na h-iodholaibh d'an d'rinn 'athair seirbhis, agus rinn e aoradh dhoibh:

22 Agus thréig e 'n Tighearna Dia 'aithriche, agus cha do ghluais e ann an slighe an Tighearn.

23 Agus rinn seirbhisich Amon ceann-airc 'na aghaidh, agus mharbh iad an rìgh 'na tluagh féin.

24 Agus mharbh² sluagh na tìre iadsan uile a rinn ceannairc an aghaidh rìgh Amon; agus rinn sluagh na tìre Iosiah a mhac 'na rìgh 'na àit.

25 Agus a' chuid eile do ghnìomharaibh Amon a rinn e, nach *'eil* iad sgrìobhta ann an leabhar eachdraidh rìgh-rean Iudah?

26 Agus dh'adhlaic iad e 'na uaigh féin ann an lìos Udsa; agus rìghich Iosiah a mhac 'na àit.

CAIB. XXII.

1 Dh'ordwich Iosiah tigh an Tighearn a chàradh.
8 Fhuair Hilciah leabhar an lagha, agus leugh Saphan e an làthair an rìgh. 12 Dh'fhosraich Iosiah do Dhia thaobh bhriathran an lagha.
15 Roimh-innis Huldah sgrìos Ierusalem.

OCHD bliadhna dh'aois *bha* Iosiah 'nuair a thòisich e air rìoghachadh, agus rìghich e aon bhliadhna deug thar fhichead ann an Ierusalem: agus *b'e* ainm a mhàthar Iedidah, nighean Adaiah o Bhoscat.

2 Agus rinn e an *nì a bha* ceart ann an sùilbhan an Tighearn, agus dh'imich e ann an uile shlighe Dhaibhidh 'athar, agus cha do chlaon e dh'ionnsuidh na làimhe deise no na làimhe clìthe.

3 Agus anns an ochdamh bliadhna deug

do rìgh Iosiah, chuir an rìgh Saphan mac Asaliah, mhic Mhesulaim, an sgrìobhaiche, do thigh an Tighearn, ag ràdh,

4 Falbh suas gu Hilciah an t-àrd shagart, chum gu'n àireamh e an t-airgiod a thugadh do thigh an Tighearn, a chruinnich luchd-gleidhidh an doruis o'n t-sluagh:

5 Agus thugadh iad e do làimh luchd deanamh na h-oibre, dhoibhsan a tha os ceann tìghe³ an Tighearn: agus thugadh iadsan e do luchd deanamh na h-oibre, a *tha* ann an tigh an Tighearn, a chàradh brisidh an tìghe;

6 Do shaoraigb, agus do luchd togail, agus do chlachairibh, agus a cheannach fiodha, agus chlach snaidhte, a chàradh an tìghe.

7 Gidheadh cha d'rinnheadh cumntas riu thaobh an airgid a thugadh d'an làimh, a chionn gu'n d'rinn iad gu h-ionraic.

8 Agus thubhairt Hilciah an t-àrd shagart ri Saphan an sgrìobhaiche, Fhuair mi leabhar an lagha ann an tigh an Tighearn: agus thug Hilciah an leabhar do Shaphan, agus leugh se e.

9 Agus thàinig Saphan an sgrìobhaiche dh'ionnsuidh an rìgh, agus dh'aithris e 'n gnotuch do'n rìgh, agus thubhairt e, Chruinnich do sheirbhisich an t-airgiod a fhuaradh anns an tigh, agus thug iad e do làimh luchd deanamh na h-oibre, a bha os ceann tìghe an Tighearn.

10 Agus dh'innis Saphan an sgrìobhaiche do'n rìgh, ag ràdh, Thug Hilciah an sagart leabhar dhomh: agus leugh Saphan e an làthair an rìgh.

11 Agus an uair a chual' an rìgh briathra leabhair an lagha, reub e 'eudach.

12 Agus dh'aithn an rìgh do Hilciah an sagart, agus do Ahicam mac Shaphain, agus do Achbor mac Mhiciah, agus do Shaphan an sgrìobhaiche, agus do Asahiah seirbhisich an rìgh, ag ràdh,

13 Rachaibh, fiosaichibh do'n Tighearn air mo shon-sa, agus air son an t-sluaigh, agus air son Iudah uile, thaobh bhriathran an leabhair so a fhuaradh: oir is mòr fearg an Tighearn a tha air lasadh 'nar n-aghaidh, a chionn nach d'èisd ar n-aithriche ri briathraibh an leabhair so, a dheanamh a réir *gach nì* a ta sgrìobhta d'ar taobh.

14 Uime sin chaidh Hilciah an sagart, agus Ahicam, agus Achbor, agus Saphan, agus Asahiah, dh'ionnsuidh Huldah a' bhan-shàidh, mnà Shaluum mhic Thicblah, mhic Harhais, fir-gleidhidh an eud-aich, (a nis *bha i* chòmhnuidh ann an Ierusalem anns an oil-thigh⁴) agus labhair iad rithe.

¹ pheacaich. Eabh.

² bhuail.

³ os ceann na h-oibre ann an tigh.

⁴ tigh an fhòghluim; misena. Eabh.

15 Agus thubhairt i riu, Mar so tha'n Tighearna Dia Israeil, ag ràdh, Innsibh do'n duine a chuir a m' ionnsuidh-sa sibh,

16 Mar so tha'n Tighearn, ag ràdh, Feuch, bheir mise olc air an àite so, agus air a luchd-àiteachaidh, *eadhon* uile bhriathran an leabhair a leugh rìgh Iudah:

17 A chionn gu'n do thèig iad mise, agus gu'n do loisg iad tùs do dhiathaibh eile, chum mo bhrosnachadh gu corruih le uile oibribh an làmh: uime sin lasaidh m'fhearg an aghaidh an àite so, agus cha mhùchar i.

18 Ach ri rìgh Iudah a chuir sibh a dh'fhiosrachadh do'n Tighearna, mar so their sibh ris, Mar so tha'n Tighearna Dia Israeil, ag ràdh, *A thaobh* nam briathran a chual' thu,

19 A chionn gu'n robh do chridhe tiom', agus gu'n d'irislich thu thu féin an làthair an Tighearna, 'nuair a chual' thu ciod a labhair mise an aghaidh an àite so, agus an aghaidh a luchd-àiteachaidh, gu'm biodh iad 'nam fàsach, agus 'nam mallachadh, agus *gu'n do* reub thu t'èudach, agus *gu'n do* ghul thu a'm' fhianuis; chuala mise mar an ceudna *thusa*, ars' an Tighearna.

20 Feuch uime sin, cruinnichidh mise thu chum t'athriche, agus cruinnichear thu do d' uagh an sìth, agus cha 'n fhaic do shùilean an t-olc sin uile a bheir mise air an àite so. Agus thug iad fios a ris a dh'ionnsuidh an rìgh.

CAIB XXIII.

1 *Leugh Iosiah leabhar an lagha an èisdeachd an t-sluaigh*: 3 *Rinn e coimhcheangal an fianuis an Tighearn*: 4 *Chuir e air falbh iodhol-aoradh*, 24 *teannain-sùith, agus luchd-fiosachd*. 29 *Mharbh Pharaoh-necho Iosiah aig Megido, agus rìghich Iehoaahas 'na àit*.

AGUS chuir an rìgh *teachdairean uaith*, agus chruinnich d'a ionnsuidh uile sheanairean Iudah, agus Ierusalem.

2 Agus chaidh an rìgh suas do thigh an Tighearn, agus daoine Iudah uile, agus uile luchd-àiteachaidh Ierusalem maille ris, agus na sagartan, agus na fàidhean, agus an sluagh uile eadar bheag agus mhòr²: agus leugh e 'nan èisdeachd³ uile bhriathra leabhair a' choimhcheangail, a fhuaradh ann an tigh an Tighearn.

3 Agus sheas an rìgh làmh ri post; agus rinn e coimhcheangal am fianuis an Tighearna, gu'n gluaiseadh iad an déigh an Tighearn, agus gu'n gleidheadh iad 'àitheantan, agus a theisteis, agus a reachdan le'n uile chridhe, agus le'n uile anam, a choimhlionadh bhriathran a' choimhcheangail so, *a ta* sgrìobhta san

leabhar so: agus sheas an sluagh uile ris a' choimhcheangal.

4 Agus 'dh'àithn an rìgh do Hileciah an t-àrd shagart, agus do shagartaibh an dara *orduigh*, agus do luchd-gleidhidh an doruis, na soithichean uile a rinneadh do Bhaal, agus do'n doire⁴, agus do uile armaill nèimh, a thoirt a mach a teampull an Tighearn: agus loisg e iad an taobh a muigh do Ierusalem ann am macharaibh Chidroin, agus ghiùlain e'n luath gu Bet-cl.

5 Agus chuir e as do shagartaibh an iodhol-aoraidh, a dh'orduich rìghrean Iudah a losgadh tùis anns na h-àitibh àrda, ann am mòr-bhailtibh Iudah, agus anns na h-àitibh mu thimchioll Ierusalem; iadsan mar an ceudna a loisg tùis do Bhaal, do'n ghréin, agus do'n ghealaich, agus do na reultaibh seachranach, agus do uile armaill nèimh.

6 Agus thug e'n doire⁵ o thigh an Tighearn, an taobh a mach do Ierusalem, gu sruth Chidroin, agus loisg se e aig sruth Chidroin, agus mhin-phronn e gu luathre e, agus thilg e a luathre air uaighibh cloinne an t-sluaigh.

7 Agus bhris e sìos tighean nan Sodomaich a *bha* làmh ri tigh an Tighearna, far an robh na mnà a' figheadh chùirteine⁶ do'n doire.

8 Agus thug e mach na sagairt uile á bailtibh Iudah, agus thruaill⁷ e na h-àitean àrda far an do loisg na sagairt tùis, o Gheba gu Beer-seba, agus bhris e sìos àitean àrda nan geata, a *bha* ann an dol a stigh geata Iosua uachdarain a' bhaile, a *bha* air làmh chli duine ann an geata a' bhaile.

9 Gidheadh, cha deachaidh sagairt nan àitean àrda suas gu altair an Tighearn ann an Ierusalem, ach dh'ith iad aran neo-ghoirtichte am measg am bràithrean.

10 Agus thruaill e Tophet a *tha* ann an gleann mhic⁸ Hinnoin, a chum nach feudadh duine air bith toirt air a mhaic no air a nighinn dol troimh 'n teine do Mholech.

11 Agus thug e air falbh na h-eich a thug rìghrean Iudah do'n ghréin, o dhòl a steach tighe an Tighearna, làmh ri seòmar⁹ Natan-meleic a' chaillteanaich, a *bha* sa' mhach-bhaile¹⁰, agus loisg e carbada na gréine le teine.

12 Agus na h-altairean a *bha* air mullach seomair uachdaraich Ahais, a rinn rìghrean Iudah, agus na h-altairean a rinn Mauaseli ann an dà chùirt tighe an Tighearna, thilg an rìgh sìos, agus bhris e o sin iad¹¹, agus thilg e 'n luathre ann an sruth Chidroin.

¹ maoth. ² o'n bheag agus a' mhòr. Eabh.

³ clasaibh. Eabh. ⁴ do iodhol an doire; asherah. Eabh. ⁵ dealbh snaidhte an doire;

asherah. Eabh. Faic. Caib. XXI. r. 7. ⁶ bhùthan.

⁷ shalaich. ⁸ chloinn. ⁹ tigh, àite-còmhuidh.

¹⁰ Pharurim. Eabh. ¹¹ ruith e leo as a sin

13 Agus na h-àitean àrda a *bha* fa chomhair Ierusalem, a *bh'* air an làimh dheis do shliabh na truaillidheachd¹, a thog Solamh rìgh Israeil do Astarot gràineileachd nan Sidonach, agus do Chemos gràineileachd nam Moabach, agus do Mhileom gràineileachd chloinn Amoin, thruaill an rìgh.

14 Agus bhris e 'nam blioghdibh na dealbhan, agus ghearr e sìos na doireachan, agus lion e 'n àitean le cnàmhaibh dhaoine.

15 Os bàrr, an altair a *bh'* aig Bet-el, agus an t-àit àrd a rinn Ieroboam mac Nebait, a thug air Israel peacachadh, araon an altair agus an t-àit àrd bhris e sìos, agus loisg e 'n t-àit àrd; agus mhìn-phrom e gu luaithre e, agus loisg e 'n doire.

16 Agus an uair a thionndaidh Iosiah mu'n cuairt, chunnaic e na h-uaignean a *bha* 'n sin san t-sliabh, agus chuir e daoine uaith, agus thug e na cnàmhan as na li-uaignibh, agus loisg e iad air an altair, agus thruaill e i, a réir focail an Tighearn, a labhair òglach Dhé² a chuir an céill na briathra so.

17 An sin thubhairt e, Ciod e an carr-agh³ so a *tha* mi faicinn? Agus thubhairt daoine a' bhaile ris, *Is i* uaigh òglaich Dhé a thr'ann, a thàinig o Iudah, agus a chuir an céill⁴ na nithe sin a rinn thusa an aghaidh altarach Bheteil.

18 Agus thubhairt e, Leigibh leis; na gluaiseadh duine sam bith a chnàmhasan: agus leig iad tàmh d'a chnàmhaibh maille ri cnàmhaibh an fhàidh a thàinig á Samaria.

19 Agus mar an ceudna, uile thighean nan àitean àrda a *bha* ann am bailtibh Samaria, a rinn rìghrean Israeil a bhrosnachadh an Tighearna gu feirg, thug Iosiah air falbh, agus rinn e a réir nan uile ghnìomh a rinn e ann am Bet-el.

20 Agus mharbh e uile shagairt nan àitean àrda a *bha* 'n sin air na h-altairibh, agus loisg e cnàmhan dhaoine orra, agus phill e gu h-Ierusalem.

21 Agus dh'àithn an rìgh do'n t-sluagh uile, ag ràdh, Cumaibh a' chàisg do'n Tighearna bhur Dia, mar a *tae* sgrìobhta ann an leabhar a' choimhcheangail so.

22 Gu cinnteach cha do chumadh a leithid so do chàisg, o làithibh nam breitheamh a thug breth air Israel, no ann an uile làithibh rìghrean Israeil, no rìghrean Iudah:

23 Ach anns an ochdamh bliadhna deug do rìgh Iosiah, chumadh a' chàisg so do'n Tighearn, ann an Ierusalem.

24 Os bàrr, na leannain-shìth, agus an luchd-fiosachd, agus na dealbhan, agus na h-iodholan, agus gach uile ghràineileachd a chunncas ann an tìr Iudah, agus ann an Ierusalem, chuir Iosiah air falbh, a chum gu'n coimhlionadh e briathran an lagha, a *bha* sgrìobhta san leabhar a fhuair Hìlciah an sagart ann an tìgh an Tighearn.

25 Agus cosmhuil ris-san cha robh rìgh air bith roimhe, a phill a dh'ionnsuidh an Tighearna le 'uile chridhe, agus le 'uile anam, agus le 'uile neart, a réir lagha Mhaois uile; agus 'na dhéigh cha d'éirich a shamhuil.

26 Gidheadh, cha do phill an Tighearn o theas 'fheirge mòire, leis an do las 'fhearg an aghaidh Iudah, air son nan uile bhrosnachadh⁵ leis an do bhrosnaich Manaseh e.

27 Agus thubhairt an Tighearn, Atharr-aichidh mi Iudah mar an ceudna as mo shealladh, mar a dh'atharraich mi Israel, agus cuiridh mi cùl gu tur ris a' mhòr-bhaile so Ierusalem, a thagh mi, agus ris an tìgh mu'n dubhairt mi, Bithidh m'ainm an sin.

28 Agus a' chuid eile do ghnìomharaibh Iosiah, agus na h-uile *nithe* a rinn e, nach 'eil iad sgrìobhta ann an leabhar eachdraidh rìghrean Iudah?

29 'Na làithibh-san chaidh Pharaoh-necho rìgh na h-Eiphit suas an aghaidh rìgh Asiria gu amhainn Euphrates: agus chaidh rìgh Iosiah 'na aghaidh, agus mharbh esan e aig Megido 'nuair a chunnaic se e.

30 Agus ghiùlain a sheirbhisich e marbh⁶ ann an carbad o Mhegido, agus thug iad e gu h-Ierusalem, agus dh'adhlaid e iad e 'na uaigh féin: agus ghabh sluagh na tìre Iehoahas mac Iosiah, agus dh'ung iad e, agus rinn iad 'na rìgh e an àit 'athar.

31 Tri bliadhna fichead a dh'aois *bha* Iehoahas an uair a thòisich e air rìoghachadh; agus rìghich e trì mìosan ann an Ierusalem: agus *b'e* ainm a mhàthar Hamutal, nighean Ieremiah o Libnah.

32 Agus rinn e ole ann an sùilbhan an Tighearn, a réir nan uile *nithe* a rinn 'aithriche.

33 Agus chuir Pharaoh-necho e ann an cuibhreachaibh aig Riblah, ann an tìr Hamait, a chum nach rìghaicheadh e ann an Ierusalem; agus chuir e ceud tàlann airgid agus tàlann òir, mar chis air an tìr.

34 Agus rinn Pharaoh-necho Eliacim mac Iosiah 'na rìgh an àit Iosiah 'athar, agus thionndaidh e 'ainm gu Iehoiacim,

¹ shliabh nan olaidh. ² a labhair òglach Dhé, 'nuair a sheas Ieroboam air là na féill air an altair. Agus an uair a thionndaidh e mu'n cuairt, thug e suas a shùilean air uaigh òglaich Dhé.

³ comhara, sgrìobhadh.

⁴ a ghairm.

⁵ bhrosnachadh.

⁶ 'nuair a *bha* e faghail a' bhàis.

agus thug e air falbh Ichoahas; agus thàinig e do'n Eiphit, agus dh'eug e an sin.

35 Agus thug Iehoiacim an t-airgiod agus an t-òr do Pharaoh: ach thug e fa' near an t-ir mheas a chum gu'n iocadh iad an t-airgiod a réir àithne Pharaoh; dh'iarr e 'n t-airgiod agus an t-òr o shluagh na tìre, o gach neach a réir a mheas, gus a thabhairt do Pharaoh-necho.

36 Cùig bliadhna fichead a dh'aois bha Iehoiacim an uair a thòisich e air rìoghachadh, agus rìghich e aon bhliadhna deug ann an Ierusalem; agus b'e ainm a mhàthar Sebudah, nighean Phedaiah o Rumah.

37 Agus rinn e olc ann an sùilbhan Tighearn, a réir nan uile *nithe* a rinn 'aithriche.

CAIB. XXIV.

1 Rinn Iehoiacim ceannairc an aghaidh Nebuchadne-sar. 5 Fhuair e bàs, agus rìghich Iehoiachin 'na àit. 7 Bhuidhaich rìgh Bhabiloin air rìgh na h-Eiphit. 10 Ghlac Nebuchadne-sar Ierusalem, agus thug e leis Iehoiachin am braigheanas do Bhabilon. 17 Rinneadh Sedeciah 'na rìgh 'na àit.

NA làithibh-san thàinig Nebuchadne-sar rìgh Bhabiloin a nìos, agus bha Iehoiacim 'na sheirbhiseach aige trì bliadhna: an sin phill e agus rinn e ceannairc 'na aghaidh.

2 Agus chuir an Tighearn 'na aghaidh buidhnean do na Caldeanaich, agus buidhnean do na Sirianaich, agus buidhnean do na Moabaich, agus buidhnean do chloinn Amon, agus chuir e iad an aghaidh Iudah g'a sgrìos, a réir focail an Tighearn, a labhair e le 'sheirbhisich¹ na fàidhean.

3 Gu cinn-teach air àithne an Tighearn thàinig so air Iudah, chum an atharrachadh as a shealladh air son pheacanna Mhanaseh, a réir nan uile *nithe* a rinn e:

4 Agus mar an ceudna air son na fola neo-chiontaich a dhòirt e; oir lion e Ierusalem le fuil neo-chiontaich, nach maith-cadh an Tighearn.

5 Agus a' chuid eile do ghnìomharaibh Iehoiacim, agus na h-uile *nithe* a rinn e, nach 'eil iad sgrìobhta ann an leabhar eachdraidh rìghrean Iudah?

6 Agus chòidil Iehoiacim maille r'a aithricibh: agus rìghich Iehoiachin a mhac 'na àit.

7 Ach cha d'thàinig rìgh na h-Eiphit nì's mò as a thùr fèin: oir ghlac rìgh Bhabiloin o amhainn na h-Eiphit gus an amhainn Euphrates, gach nì bu le rìgh na h-Eiphit.

8 Oidh bliadhna deug a dh'aois bha Ie-

hoiachin an uair a thòisich e air rìoghachadh; agus rìghich e ann an Ierusalem trì mìosan: agus b'e ainm a mhàthar Nehusta, nighean Elnatain o Ierusalem, 9 Agus rinn e olc ann an sùilbhan Tighearn, a réir nan uile *nithe* a rinn 'athair.

10 Anns an àm sin thàinig seirbhisich Nebuchadne-sar rìgh Bhabiloin a nìos an aghaidh Ierusalem, agus theannaicheadh am baile.

11 Agus thàinig Nebuchadne-sar rìgh Bhabiloin an aghaidh a' bhaile, agus theannaich a sheirbhisich e.

12 Agus chaidh Iehoiachin rìgh Iudah a mach a dh'ionnsuidh rìgh Bhabiloin, e fèin, agus a mhàthair, agus a sheirbhisich, agus a cheannardan², agus a chailleanaich³: agus ghlac rìgh Bhabiloin e san ochdamh bliadhna d'a rìoghachadh.

13 Agus thug e mach as a sin uile ionmhais tighe an Tighearn, agus ionmhais tighe an rìgh, agus ghearr e 'nam bloighdibh na soitheachan oir uile a rinn Solamh rìgh Israeil ann an teampull an Tighearn, mar a labhair an Tighearn.

14 Agus thug e leis Ierusalem uile, agus na ceannardan uile, agus na daoine treuna uile, deich mìle do bhraigheadh, agus an luchd-ceirde uile, agus na gaibhne⁴: cha d'fhan a h-aon ach bochdan sluaigh na tìre.

15 Agus thug e leis Iehoiachin do Bhabilon, agus màthair an rìgh, agus mnà an rìgh, agus a chailleanaich, agus daoine cumhachdach na tìre; iad sin thug e leis am braigheanas, o Ierusalem do Bhabilon:

16 Agus na daoine gaisgeil uile, seachd mìle, agus an luchd-ceirde, agus na gaibhnean, mìle, iadsan uile a bha comasach agus a dheanadh cogadh, eadhon iadsan thug rìgh Bhabilon am braigheanas leis do Bhabilon.

17 Agus rinn rìgh Bhabilon Mataniah bràthair 'athar 'na rìgh 'na àit, agus thionndaidh e 'a'inn gu Sedeciah.

18 Bliadhna thar fhichead a dh'aois bha Sedeciah 'nuair a thòisich e air rìoghachadh; agus rìghich e aon bhliadhna deug ann an Ierusalem: agus b'e ainm a mhàthar Hamutal, nighean Jeremiah o Libnah.

19 Agus rinn e olc ann an sùilbhan Tighearn, a réir nan uile *nithe* a rinn Iehoiacim.

20 Oir troimh⁵ chorruidh an Tighearn bha e mar sin ann an Ierusalem agus ann an Iudah, gus an do thilg e as a làthair iad: agus rinn Sedeciah ceannairc an aghaidh rìgh Bhabilon.

¹ le làimh a sheirbhisich. Eabh.

² uachdaran, a mhaithean, a dhaoine mùra.

³ luchd-dreuchd.

⁴ goibhne.

⁵ tre, tìrd.

CAIB. XXV.

1 *Theannaich Nebuchadnesar Ierusalem. 4 Ghlac e Sedeciah, agus chuir e mach a shùilean. 8 Loisg Nebusar-adan Ierusalem. 18 Mharbhadh uaislean Iudah aig Riblah. 23 Chuir Ismael Gedaliah gu bàs. 27 Nochd Ebbil-merodach caoinheas do Jehoiachin.*

AGUS anns an naothadh bliadhna d'a rioghachadh, san deicheamh mìos, air an deicheamh là do'n mhìos, thàinig Nebuchadnesar rìgh Bhabiloin, e fèin agus 'armailt uile, an aghaidh Ierusalem, agus champaich e 'na h-aghaidh; agus thog iad daingnichean¹ 'na h-aghaidh mu'n cuairt.

2 Agus bha am baile air a theannachadh agus an aon bhliadhna deug do rìgh Sedeciah.

3 Agus air an naothadh là do'n cheathramh mìos, bhuadhaich a' ghorta sa' bhaile, agus cha robh aran ann do shluagh na tire.

4 Agus bhriseadh sìos am baile, agus theich na fir chogaidh uile san oidheche, air slighe a' gheata, eadar an dà bhalla, a tha làimh ri lìos an rìgh; (a nis bha na Caldeanaich an aghaidh a' bhaile mu'n cuairt;) agus dh'imich iad² air an t-slighe dh'ionnsuidh a' chòmhnaidh.

5 Agus lean armailt nan Caldeanach an rìgh, agus rug iad air ann an còmhnaidh Iericho; agus sgapadh 'armailt uile uaith.

6 Mar sin ghlac iad an rìgh, agus thug iad suas e dh'ionnsuidh rìgh Bhabiloin gu Riblah; agus thug esan³ breth air.

7 Agus mharbh e⁴ mic Shedeciah fa chomhair a shùl, agus chuir e a shùilean á Sedeciah, agus cheangail se e le geimhlibh⁵ umha, agus thug e leis e do Bhabiloin⁶.

8 Agus anns a' chùigeamh mìos, air an t-seachdamh là do'n mhìos, (b'i sin an naothadh bliadhna deug do rìgh Nebuchadnesar, rìgh Bhabiloin,) thàinig Nebusar-adan ceannard an fhreiceadain, seirbhiseach rìgh Bhabiloin, gu h-Ierusalem:

9 Agus loisg e tigh an Tighearn, agus tigh an rìgh, agus tighean Ierusalem uile; agus gach uile thigh mòr loisg e le teine.

10 Agus leag uile armailt nan Caldeanach, a bha maille ri ceannard an fhreiceadain, sìos ballacha Ierusalem, mu'n cuairt.

11 Agus a' chuid eile do'n t-sluagh a dh'fhàgadh sa' bhaile, agus an luchd-teichidh a chaidh thairis gu rìgh Bhabiloin, maille ri fuigheall an t-sluaigh, thug

Nebusar-adan ceannard an fhreiceadain air falbh leis.

12 Ach dh'fhàg ceannard an fhreiceadain cuid do bhochdaibh na tire, *gu bhi* 'nan luchd-deasachaidh fhìonainean agus 'nan treabhaichibh⁷.

13 Agus na puist umha a bha ann an tigh an Tighearn, agus na buinn, agus an fhaigre umha a bha ann an tigh an Tighearna, bhris na Caldeanaich 'nam bloighdibh, agus thug iad leo an umha do Bhabilon.

14 Agus na poiteau, agus na sluasaidean, agus na smàladairean, agus na spàinean, agus na soithichean umha uile leis an d'rinn iad frithealadh, thug iad leo.

15 Agus na h-aighnean teine⁸, agus na cuachan, na nithe a bha do òr⁹ na òr, agus a bha do airgiod¹⁰ na airgiod, thug ceannard an fhreiceadain air falbh.

16 Dà phost, aon fhaigre, agus na buinn a rinn Solamh air son tighe an Tighearna; bha umha nan soithiche sin uile gun tomhas:

17 Ochd làmhan-coille deug àirde aoin phuist, agus an ceann-mullaich a bh'air do umha; agus àirde a' chinn-mhullaich trì lamhan-coille: agus an lìon obair, agus na pomgranatan air a' cheann-mhullaich mu'n cuairt, iad sin uile do umha: agus an leithide sin bha aig an dara post, maille ri lìon-obair.

18 Agus ghlac ceannard an fhreiceadain Seraiah an t-àrd shagart, agus Sephaniah an dara sagart, agus na trì dorsairean.

19 Agus as a' bhaile thug e aon chaillteanach, a bha os ceann nan fear cogaidh, agus cùigne⁹ fhear dhiubhsan a bha 'n làthair an rìgh, a fhuaradh sa' bhaile, agus àrd sgrìobhaiche na h-armailt, a bha 'g iunnsachadh cogaidh do shluagh na tire¹⁰, agus trì fichead fear do shluagh na tire a fhuaradh sa' bhaile.

20 Agus ghlac Nebusar-adan ceannard an fhreiceadain iad sin, agus thug e iad gu rìgh Bhabiloin do Riblah.

21 Agus bhuail rìgh Bhabiloin iad, agus mharbh e iad aig Riblah, ann an tìr Hamait. Agus thugadh Iudah air falbh as an tìr fèin.

22 Agus os ceann an t-sluaigh a dh'fhàgadh ann an tìr Iudah, a dh'fhàg Nebuchadnesar rìgh Bhabiloin, eadhon os an ceann-san chuir e Gedaliah mac Ahicaim, mhic Shaphain.

23 Agus an uair a chual' uile cheann arda nan armailt, iad fèin agus an daoine, gu'n do rinn rìgh Bhabiloin Gedaliah 'na uachdaran, thàinig gu Gedaliah do Mhispah, eadhon Ismael mac Netaniah, agus

¹ tùir. ² dh'imich an rìgh. ³ iad.

⁴ iad. ⁵ slabhradhibh.

⁶ Faic Jeremiah, Caib. XXXIX. r. 6, 7.

⁷ tuathannaich.

⁸ tuiscean.

⁹ cùigear.

¹⁰ a thairgeadh suas, a ghabhadh àireamh sluaigh na tire.

Iohanan mac Chareah, agus Seraiah mac Thanhumeit an Netophatach, agus Iaasaniah mac Mhaachataich, iad féin agus an daoine.

24 Agus mhionnaich Gedaliah dhoibh, agus d'an daoineibh, agus thubhairt e riu, Na biodh eagal oirbh a bhi 'nur seirbhisich do na Caldeanaich : gabhaibh còmhnuidh san tír, agus deanaibh seirbhis do rìgh Bhabiloin, agus éiridh gu maith dhuibh.

25 Ach anns an t-seachdamh mìos, thàinig Ismael mac Netaniah, mhic Elisama, do'n t-sliochd rìoghail, agus deichnear fhear maille ris, agus bhuail iad Gedaliah air chor as gu'n d'eug e, agus na h-Iudhaich agus na Caldeanaich a bha maille ris aig Mispah.

26 Agus dh'éirich an sluagh uile eadar bheag agus mhòr, agus ceannarda nan armait, agus thàinig iad do'n Eiphit : oir bha eagal nan Caldeanach orra.

27 Ach anns an t-seachdamh bliadhna deug thar fhichead do bhraighdeanas Iehoiachin rìgh Iudah, anns an dara mìos deug, air an t-seachdamh là fichead do'n mhìos, thog Ehbil-merodach rìgh Bhabiloin, air a' bhliadhna anns an do thòisich e air rìoghachadh, suas ceann Iehoiachin rìgh Iudah á prìosan¹.

28 Agus labhair e gu caoimhneil ris, agus chuir e suas a rìgh-chaithir os ceann rìgh-chaithir nan rìgh, a bha maille ris ann am Babilon :

29 Agus mhùth e 'eudach-prìosain ; agus dh'ith e aran a ghnàth 'na làthair rè uile làithean a bheatha.

30 Agus bu chuibhrionn ghnàthaichte a chuibhrionn a thugadh dha o'n rìgh, cuid làitheil fa chomhair gach là, rè uile làithean a bheatha.

¹ á tigh a' phrìosain. Eabh.

CEUD LEABHAR

NAN

EACHDRAIDH.

CAIB. I.

1 *Sliochd Adhaimh gu Noah.* 5 *Mic Iapheit.* 8 *Mic Ham* 17 *Mic Sheim.* 24 *Sliochd Sheim gu Abraham.* 29 *Mic Ismaeil.* 32 *Mic Cheturah.* 36 *Sliochd Abraham le Esau, &c.*

ADHAMH, Set, Enos,
2 Cenan, Mahaleel, Iered,
3 Henoch, Metuselah, Lamech,
4 Noah, Sem, Ham, agus Iaphet.
5 Mic Iapheit ; Gomer, agus Magog, agus Madai, agus Iabhan, agus Tubal, agus Mesech, agus Tiras.
6 Agus mic Ghomeir ; Aschenas, agus Riphath, agus Togarmah.
7 Agus mic Iabhain ; Elisah, agus Tarsis, Citim, agus Dodanim.
8 Mic Ham ; Cus, agus Misraim, agus Phut, agus Canaan.

9 Agus mic Chuis ; Seba, agus Habhilah, agus Sabta, agus Raamah, agus Sabtecha : agus mic Raamah ; Seba agus Dedan.

10 Agus ghin Cus Nimrod : thòisich esan air a bhi cumhachdach air an talamh.

11 Agus ghin Misraim na Ludaich¹, agus na h-Anamaich, agus na Lehabaich, agus na Naplituaich,

12 Agus na Patrusaich, agus na Casluhaich, (o'n d'thàinig na Philistich,) agus na Caphtoraich.

13 Agus ghin Canaan Sidon a cheud-ghin, agus Heth,

14 Agus an Iebusach, agus an t-Amorach, agus an Girgasach,

15 Agus an t-Ibheach, agus an t-Archach, agus an Sineach,

16 Agus an t-Arbhadach, agus an Semarach, agus an t-Hamatach.

17 Mic Sheim ; Elam, agus Asur, agus Arphacsad, agus Lud, agus Aram ; agus mic Aram Us², agus Hul, agus Geter, agus Mesech.

18 Agus ghin Arphacsad Selah, agus ghin Selah Eber.

19 Agus do Eber rugadh dithis mhac : b'e ainm aon duibh Peleg, a chionn 'ua làithibh-san gu'n do roinneadh an talamh ; agus ainm a bhràthar Ioctan.

20 Agus ghin Ioctan Ahmodad, agus Selep, agus Hasarmabhet, agus Ierah,

21 Agus Hadoram, agus Usal, agus Diclath.

22 Agus Ebal³, agus Abimael, agus Seba,

23 Agus Ophir, agus Habhilah, agus Iobab. B'iad sin uile mic Ioctain.

24 Sem, Arphacsad, Selah,

25 Eber, Peleg, Reu,

26 Serug, Nahor, Terah.

¹ Ludim. Eabh.

² Faic Gen. Caib. X. r. 23.

³ Obal.

27 Abram, *is e sin Abraham*,
 28 Mic Abraham; Isaac agus Ismael.
 29 *Is iad* so an ginealach: Ceud-ghin Ismael, Nebaiot; an sin Cedar, agus Adbeel, agus Mibsam,
 30 Misma, agus Dumah, Masa, Hadad, agus Tema,
 31 Ietur, Naphis, agus Cedemah. *Is iad sin mic Ismaeil.*
 32 Agus mic Cheturah, coimhleabaich¹ Abraham: rug ise Simran, agus Iocsan, agus Medan, agus Midian, agus Isbac, agus Suah. Agus mic Iocsain; Seba, agus Dedan.
 33 Agus mic Mhidiaín; Ephah, agus Ephraim, agus Henoch, agus Abida, agus Eldaah. *Is iad sin uile mic Cheturah.*
 34 Agus ghin Abraham Isaac. Mic Isaie; Esau agus Israel.
 35 Mic Esau; Eliphas, Reuel, agus Ieus, agus Iaalam, agus Corah.
 36 Mic Eliphais; Teman, agus Omar, Sephi, agus Gatam, agus Cenas: agus rug Timna, coimhleabach Eliphais, dha Amalec².
 37 Mic Reueil; Nahat, Serah, Samah, agus Midsah.
 38 Agus mic Sheir; Lotan, agus Sobal, agus Sibeon, agus Anah, agus Disor, agus Eser, agus Disan.
 39 Agus mic Lotain; Hori, agus Homam: agus *b'i* Timna piuthar Lotain.
 40 Mic Shobail; Alian, agus Manahat, agus Ebal, Sephi, agus Onam. Agus mic Shibeoin; Aiah, agus Anah.
 41 Mic Anah; Dison. Agus mic Dhisoin; Amram, agus Esban, agus Itran, agus Cheran.
 42 Mic Eseir; Bilhau, agus Sabhan, agus Iacan. Mic Dhisain; Us, agus Aran.
 43 A nis *is iad* so na rìghrean a rìghlich ann an tìr Edoim, mun do rìghlich rìgh air bith os ceann chloinn Israeil; Bela mac Bheoir: agus *b'e* ainm a bhaile³ Dinhabah.
 44 Agus dh'eug Bela; agus rìghlich Iobab, mac Sherah o Bhosrah, 'na àit.
 45 Agus dh'eug Iobab; agus rìghlich 'na àit Husam o thìr nan Temanach.
 46 Agus dh'eug Husam; agus rìghlich Hadad mac Bhedaíd (a bhuail Midian ann am machair Mhoab) 'na àit: agus *b'e* ainm a bhaile Abhit.
 47 Agus dh'eug Hadad; agus rìghlich Samlah o Mhasrecal 'na àit.
 48 Agus dh'eug Samlah; agus rìghlich Saul o Rehobot làimh ris an amhainn 'na àit.
 49 Agus dh'eug Saul; agus rìghlich Baal-hanan mac Achboir 'na àit.
 50 Agus dh'eug Baal-hanan; agus

rìghlich Hadad 'na àit: agus *b'e* ainm a bhaile Pau⁴; agus *b'e* ainm a mhnà Mehetabel, nighean Mhatreid, nighinn Mhesahaib.
 51 Dh'eug Hadad mar an ceudna. Agus *b'i* ad cinn-fheadhna⁵ Edoim; ceann-feadhna Timnah, ceann-feadhna Aluah⁶, ceann-feadhna Ietur,
 52 Ceann-feadhna Aholibamah, ceann-feadhna Elah, ceann-feadhna Pinon,
 53 Ceann-feadhna Cenas, ceann-feadhna Teman, ceann-feadhna Mibsar,
 54 Ceann-feadhna Magdiel, ceann-feadhna Iram. *Is iad sin cinn-fheadhna Edoim.*

CAIB. II.

1 *Mic Israeil.* 3 *Sliochd Iudah le Tamar.* 13 *Mic Iese.* 18 *Sliochd Chaleib mhic Hesroin.* 25 *Sliochd Ierahmeil.* 34 *Sliochd Shesain.* 50 *Sliochd Chaleib mhic Huir.*

I *Is iad* so mic Israeil; Reuben, Simeon, Lebhi, agus Iudah, Isachar, agus Sebulun,
 2 Dan, Ioseph, agus Benjamin, Naphtali, Gad, agus Aser.
 3 Mic Iudah; Er, agus Onan, agus Selah: an triuir so rugadh dha le nighinn Shuah a' Bhan-chanaanaich. Agus bha Er ceud-ghin Iudah ole ann an suilbhan Tighearn, agus mharbh se e.
 4 Agus rug Tamar a bhan-chliamhuin dha Phares agus Serah. *B'i ad uile mhic Iudah cuignear.*
 5 Mic Phareis; Hesron agus Hamul.
 6 Agus mic Sherah; Simri, agus Etan, agus Heman, agus Calcol, agus Dara: cuignear diubh uile.
 7 Agus mic Charmi; Achar, fear-buair-eis⁷ Israeil, a chiontaich anns an nì mhall-aichte.
 8 Agus mic Etain; Asariah.
 9 Agus mic Hesroin, a rugadh dha; Ierahmeel, agus Ram, agus Chelubai.
 10 Agus ghin Ram Aminadab, agus ghin Aminadab Nahson, ceannard chloinn Iudah;
 11 Agus ghin Nahson Salma, agus ghin Salma Boas,
 12 Agus ghin Boas Obed, agus ghin Obed Iese.
 13 Agus ghin Iese a cheud-ghin Eliab, agus Abinadab an dara mac, agus Sima an treas,
 14 Netaneel an ceathramh, Radai an cuigeadh,
 15 Osem an seathadh, Daibhidh an seachdamh⁸:
 16 Agus *b'i ad* am peathraiche-san Seruah agus Abigail. Agus mic Sheraiah; Abisai, agus Ioab, agus Asahel, triuir.
 17 Agus rug Abigail Amasa: agus *b'e* athair Amasa, Ieter an t-Ismeeach.

¹ *leannain.* ² *Cenas, agus Timna,* agus Amalec. Faic Gen. Caib. XXXVI.

³ *a chaitheach, a bhaile mhòir.*

⁴ *Pai.*

⁵ *ceannardan.*

⁶ *Aliah.*

⁷ *fear-tuairgnear.*

⁸ *Eliku an seachdamh, Daibhidh an t-ochdamh.*

I. EACHDRAIDH, II. III.

18 Agus ghlin Caleb mac Hesroin ri Asubah a mhnai, Ieriot¹: *b'iad* so mar an ceudna a mic, Ieser, agus Sobab, agus Ardon.

19 Agus an uair a bha Asubah marbh, ghabh Caleb d'a ionnsuidh Ephrat, a rug Hur dha.

20 Agus ghlin Hur Uri, agus ghlin Uri Besaleel.

21 Agus 'na dhéigh sin chaidh Hesron a steach a dh'ionnsuidh nighinn Mhachir, athar Ghilead, agus ghabh e i' nuair a bha e tri fhead bliadhna dh'aois; agus rug i dha Segub.

22 Agus ghlin Segub Iair, aig an robh tri thar fhichead do bhailtibh mòra² ann an tìr Ghilead.

23 Agus thug e Gesur agus Aram le bailtibh Iair uatha, maille ri Ceuat agus a bhailtibh, *eadhona* tri fhead baile mòr: *bhuin* iad sin uile do mhacaibh Mhachir, athar Ghilead.

24 Agus an déigh do Hesron bàs fhaghaill ann an Caleb-ephratai, an sin rug Abiah bean Hesroin Asur athair Thecoah dha.

25 Agus b'iad mic Ierahmeil ceud-ghin Hesroin, Ram an ceud-ghin, agus Bunah, agus Oren, agus Osem, agus Ahiah.

26 Bha mar an ceudna bean eile aig Ierahmeil d'am b'ainm Atarah: b'ise màthair Onaim.

27 Agus b'iad mic Ram ceud-ghin Ierahmeil, Maas, agus Iamin, agus Ecer.

28 Agus b'iad mic Onaim, Samai, agus Iada. Agus mic Shamai; Nadab agus Abisur.

29 Agus *b'e* ainm mnà Abisuir, Abihail; agus rug i dha Ahban agus Molid.

30 Agus mic Nadaib; Seled agus Apaim: ach fhuair Seled bàs gun chlann.

31 Agus mic Apaim; Isi. Agus mic Isi; Sesan. Agus mic Shesain; Ahlai.

32 Agus mic Iada bràthar Shamai; Ieter, agus Ionatan: agus fhuair Ieter bàs gun chlann.

33 Agus mic Ionatain; Pelet, agus Sasa. B'iad sin mic Ierahmeil.

34 A nis cha robh aig Sesan mic ach nigheana: agus bha aig Sesan òglach, Eiphiteach, d'am b'ainm Iarha.

35 Agus thug Sesan a nighean d'a òglach Iarha 'na mnaoi; agus rug i dha Atai.

36 Agus ghlin Atai Natan, agus ghlin Natan Sabad,

37 Agus ghlin Sabad Ephlal, agus ghlin Ephlal Obed,

38 Agus ghlin Obed Iehu, agus ghlin Iehu Asariah,

39 Agus ghlin Asariah Heles, agus ghlin

Heles Eleasah,

40 Agus ghlin Eleasah Sisamai, agus ghlin Sisamai Salum,

41 Agus ghlin Salum Iecamiah, agus ghlin Iecamiah Elisama.

42 A nis *b'iad* mic Chaleib bràthar Ierahmeil, Mesa a cheud-ghin; b'esan athair Shiph; agus mic Mharesah athar Hebroin³.

43 Agus mic Hebroin; Corah, agus Tapuah, agus Recem, agus Sema.

44 Agus ghlin Sema Raham, athair Iorcoaim: agus ghlin Recem Samai.

45 Agus *b'e* mac Shamai Maon: agus *b'e* Maon athair Bhet-suir.

46 Agus rug Ephah coimhleabach Chaleib Haran, agus Mosa, agus Gases: agus ghlin Haran Gases.

47 Agus mic Iahdai; Regem, agus Iotam, agus Gesan, agus Pelet, agus Ephah, agus Saaph.

48 Rug Maachah coimhleabach Chaleib Seber agus Tirhanah.

49 Rug i mar an ceudna Saaph athair Mhadmanah, Sebhah athair Mhachbenah, agus athair Ghibeah: agus *b'e* nighean Chaleib Achsa.

50 B'iad so mic Chaleib mhic Huir, ceud-ghin Ephrata; Sobal athair Chiriat-iearim,

51 Salma athair Bhet-lehem, Hareph athair Bhet-gadeir.

52 Agus bha aig Sobal athair Chiriat-iearim mic; Haroeh, Hatsi; Hameniot⁴.

53 Agus teaghlaichean Chiriat-iearim; na h-Itrich, agus na Puthich, agus na Sumataich, agus na Misraich: uatha-san thàinig na Sareataich, agus na h-Estaulaich.

54 Mic Shalma; Bet-lehem, agus na Netophataich, Atarot, tigh Ioab, agus leth nam Manaheteach, na Soraich.

55 Agus teaghlaichean nan sgrìobhaich a bha chòmhnuidh aig Iabes; na Tirataich, na Simeataich, agus na Suchataich. *Is iad* sin na Cenich a thàinig o Hemat, athair tighe Rechaib.

CAIB. III.

1 Mic Dhaibhidh. 10 *Sliochd Sholaimh gu Sedeciah.* 17 *Sliochd Iecaniah.*

A NIS b'iad so mic Dhaibhidh, a rug adh dha ann an Hebron: an ceud-ghin Amnon o Ahinoam a' Bhan-iesreel-each: an dara *mac*, Daniel o Abigail a' Bhan-charmeleach:

2 An treas *mac*, Absalom mac Mhaachah, nighinn Thalmi rìgh Ghesuir: an ceathranh, Adoniah mac Hagit:

3 An cùigeadh, Sephatiah o Abital: an seathadh, Iream le Eglah a mhnai.

4 Rugadh au seathnar *sin* dha ann an

¹ agus Ieriot.

² chaitrichibh, bhailtibh daingnichte.

³ agus mic Shiph; Maresah athair Hebroin.

⁴ agus leth nam Manaheteach.

Hebron; agus ann an sin rìghich e seachd bliadhna agus sè miosan: agus ann an Ierusalem rìghich e trì bliadhna deug thar fhichead.

5 Agus rugadh iad so dha ann an Ierusalem; Simea, agus Sobab, agus Natan, agus Solomon, ceathrar, o Bhatseba¹ nighinn Amieil;

6 Ibhar mar an ceudna, agus Elisama², agus Eliphelet,

7 Agus Nogah, agus Nepheg, agus Iaphia,

8 Agus Elisama, agus Eliada, agus Eliphelet³, naonar.

9 *B'iad sin* mic Dhaibhidh uile, a bhàrr air macaibh nan coimhleabach, agus Tammar an piuthar.

10 Agus *b'e* mac Sholomoin Rehoboam, Abia a mhac-san, Asa a mhac-san, Iehosaphat a mhac-san,

11 Ioram a mhac-san, Ahasiah a mhac-san, Ioas a mhac-san,

12 Amasiah a mhac-san, Asariah⁴ a mhac-san, Iotam a mhac-san,

13 Ahas a mac-san, Hececiah a mhac-san, Manaseh a mhac-san,

14 Amon a mhac-san, Iosiah a mhac-san.

15 Agus *b'iad* mic Iosiah; an ceud-ghin Iohanan, an dara *mac* Iehoiacim, an treas *mac* Sedeciah, an ceathramh Salum.

16 Agus mic Iehoiacim; Ieconiah a mhac, Sedeciah a mhac.

17 Agus mic Ieconiah; Asir, Salatiel a mhac,

18 Agus Malchiram, agus Pedaiah, agus Senasar, Iecamiah, Hosama, agus Nedabiah.

19 Agus *b'iad* mic Phedaiah Serubabel, agus Simeil: agus mic Sherubabeil; Mesulam, agus Hananiah, agus Selomit am piuthar:

20 Agus Hasubah, agus Ohel, agus Berechiah, agus Hasadiah, Iusab-hesed, cuignear.

21 Agus mic Hananiah; Pelatiah, agus Iesaiah a mhac-san, Rephaiah a mhac-san, Arnan a mhac-san, Obadiah a mhac-san, Sechaniah a mhac-san⁵.

22 Agus mic Sechaniah; Semaiah: agus mic Shemaiah; Hatus, agus Igeal, agus Bariah, agus Neariah, agus Saphat, seathnar.

23 Agus mic Neariah: Elioenai, agus Hececiah, agus Asricam, triuir.

24 Agus *b'iad* mic Elioenai; Hodaiah, agus Eliasib, agus Pelaiah, agus Acub, agus Iohanan, agus Dalaiah, agus Anani, seachdnar.

CAIB. IV.

1 *Sliochd Iudah le Caleb mac Huir.* 5 *Sliochd Asuir.*
21 *Sliochd Shelah.*

MIC Iudah; Phares, Hesron, agus Carmi, agus Hur, agus Sobal.

2 Agus ghin Reaiah mac Shobail Iahat; agus ghin Iahat Ahumai, agus Lahad. *Is iad sin* teaghlachan nan Soratach.

3 Agus *thàinig* iad so o athair Etaim; Iesreel, agus Isma, agus Idbas: agus *b'e* ainm am peathar Haselelponi.

4 Agus Penuel athair Ghedoir, agus Eser athair Husah. *Is iad sin* mic Huir, ceud-ghin Ephratah, athar Bhet-lehem.

5 Agus bha aig Asur athair Thecoah dà mhnaoi, Helah agus Naarah.

6 Agus rug Naarah dha Ahusam, agus Hepher, agus Temeni, agus Haahastari. *B'iad sin* mic Naarah.

7 Agus *b'iad* mic Helah, Seret, agus Iesoar, agus Etnan.

8 Agus ghin Cos Anub, agus Sobebah, agus teaghlachan Alharheil, mhic Haruim.

9 Agus bha Iabes ni b'urramaiche na a bhràithrean: agus thug a mhàthair Iabes a dh'ainm air, ag ràdh, A chionn gu'n d'rug mi e le doilgheas.

10 Agus ghairm Iabes air Dia Israeil, ag ràdh, O gu'm beannaicheadh tu mi da rìreadh, agus gu'n cuireadh tu mo chrìochan am farsaingeachd, agus gu'm biodh do làmh leam, agus gu'n gleidheadh tu mi o olc, a chum nach cràidh e mi! Agus dheònaich Dia dha an nì sin a ghuidh e.

11 Agus ghin Chelub bràthair Shuah Mehir: *b'esan* athair Estoin.

12 Agus ghin Eston Betrapha, agus Paseah, agus Teginah athair Irnahais. *Is iad sin* fir Rechah.

13 Agus mic Chenais; Otniel, agus Seraiah: agus mic Otniel; Hatat.

14 Agus ghin Meonotai Ophrah: agus ghin Seraiah Ioab, athair *muinntir* glinne Charasaim; oir bu luchd-ceirde iad.

15 Agus mic Chaleib mhic Iephuneh; Iru, Elah, agus Naam; agus mic Elah; Cenas.

16 Agus mic Iehaleleil; Siph, agus Siphah, Tiria, agus Asareel.

17 Agus *b'iad* mic Esra, Ieter, agus Mered, agus Ephher, agus Ialon: agus rug i Miriam, agus Samai, agus Isbah athair Estemoa.

18 Agus rug a bhean Iehudiah Iered athair Ghedoir, agus Heber athair Shocho, agus Iecutiel athair Shanoah. Agus *is iad sin* mic Bhitiah nighinn Pharaoh, a ghabh Mered⁵ na mnaoi.

19 Agus mic a mhnà Hodiah, peathar Nahaim, athar Cheilah a' Gharmaich, agus Estemoa a' Mhaachataich.

20 Agus *b'iad* mic Shimoin, Amnon,

¹ Bhetsua.

² Elisua.

³ Elphala.

⁴ Udsiah.

⁵ Pelatiah, agus Iesaiah: mic Rephaiah, mic Arnain, mic Obadiah, mic Shechaniah.

I. EACHDRAIDH, IV. V.

agus Rinah, Ben-hanan, agus Tilon. Agus *b'iad* mic Isi, Sohet, agus Ben-sohet.

21 *B'iad* mic Shelah mhic Iudah, Er athair Lecah, agus Laadah athair Mhar-esah, agus teaghlaichean tighe na muinntir a dh'òibrich anart grinn do thigh Asbea.

22 Agus Iocim, agus daoine Choseba, agus Ioas, agus Saraph, aig an robh an uachdaranachd ann am Moab, agus Iasubilehem. Agus *is* seann nithe *iad sin*.

23 *B'iad* sin na criadhadairean, agus iadsan a chòmhnuich am measg lusan agus ghàraichean: maille ris an rìgh 'na obair dh'fhan iad an sin.

24 *B'iad* mic Shimeoin, Nemuel, agus Iamin, Iarib, Serah, agus Saul:

25 Salum a mhac-san, Mibsam a mhac-san, Misma a mhac-san.

26 Agus mic Mhisma; Hamuel a mhac, Sachur a mhac-san, Simei a mhac-san.

27 Agus *bha* aig Simei sè mic deug agus sèathnar¹ nighean; ach aig a bhràithribh cha robh mòran cloinne, agus cha deachaidh an teaghlaichean uile an lìonmhoir-eachd, cosmhuil ri cloinn Iudah.

28 Agus chòmhnuich iad ann am Beer-seba, agus Moladah, agus Hasarsual,

29 Agus ann am Bilhah, agus ann an Esem, agus ann an Tolad,

30 Agus ann am Betuel, agus ann an Hormah, agus ann am Siclag,

31 Agus ann am Bet-marcabot, agus ann am Hasar-susim, agus ann am Bet-birei, agus ann am Saaraim. *B'iad* sin am bailte mòra, agus an do rìghich Daibhidh, maille ri'm bailtibh beaga.

32 Etam mar an ceudna, agus Ain, Rimon, agus Tochen, agus Asan, cùig bailte mòra;

33 Agus am frith-bhailtean uile a *bha* mu'n cuairt air na mòr-bhailtibh sin gu ruig Baal. *B'iad* sin an ionaid-tàimh, agus an sloinnt-eireachd.

34 Agus Mesobab, agus Iamlech, agus Iosah mac Amasiah,

35 Agus Ioel, agus Iehu mac Iosibiah, mhic Sheraiah, mhic Aseil,

36 Agus Elioenai, agus Iacobah, agus Iesohaiah, agus Asaiah, agus Adiel, agus Iesimiel, agus Benaiah,

37 Agus Sisa mac Shiphi, mhic Aloin, mhic Iedaiah, mhic Shimri, mhic She-maiah.

38 *Bha* iad sin a *thq* air an aithris air an ainmibh 'nan ceannardaibh 'nan teaghlaichibh féin: agus ann an tigh an aithriche mheudaich iad gu mòr².

39 Agus chaidh iad gu ruig dol a steach Ghedoir, eadhon gu ruig taobh an ear a'

ghlinne, a dh'iarraidh ionaltraidh d'an treudaibh.

40 Agus fhuair iad ionaltradh reamhar agus maith, agus *bha* an tìr farsaing, agus sàmhach, agus sìochail; oir *bha sìochd* Ham a chòmhnuidh an sin roimhe.

41 Agus thàinig iadsan a tha sgrìobhta air an ainm, ann an làithibh Hesechia rìgh Iudah, agus bhuail iad am bùthan, agus na h-ionada-còmhnuidh³ a fhuaradh⁴ an sin, agus chuir iad as doibh gu tur agus an là'n diugh, agus ghabh iad còmhnuidh 'nan àite; a chionn gu'n robh ionaltradh an sin d'an treudaibh.

42 Agus chaidh *cuid* diubh, eadhon do mhacaibh Shimeoin, cùig ceud fear, gu sliabh Sheir; agus Pelatiah, agus Neariah, agus Rephaiah, agus Udsiel, mic Isi air an ceann.

43 Agus bhuail iad am fuigheall a chaidh as do Amalec, agus chòmhnuich iad an sin agus an là'n diugh.

CAIB. V.

1 *Sìochd Reubein* (a chaill a chòir-bhreith) *gus an d'thugadh air falbh iad ann am braigheanas.*
11 *Cinn-fheadhna Ghad,* 18 *Aireamh agus treubh-antans mhac Reubein, Ghad, agus leth-thrèibh Mhanaseh.*

ANIS *b'iad* mic Reubcin, ceud-ghin Israeil, (oir *b'esan* an ceud-ghin; ach a chionn gu'n do thruaill e leabadh 'athar, thugadh a chòir-bhreith do mhacaibh Ioseph mhic Israeil: agus cha 'n'cil na ginealaich gu bhi air an àireamh réir na coir-bhreithe.

2 Oir bhuaidhaich Iudah air a bhràithribh, agus uaith-san *thàinig* an t-àrd riaghladair, ach bu le Ioseph a' chòir-bhreith:)

3 Mic Reubein, ceud-ghin Israeil; Hanoch, agus Palu, Hesron, agus Carmi.

4 Mic Ioel; Semaiah a mhac, Gog a mhac-san, Simei, a mhac-san,

5 Micah a mhac-san, Reaia a mhac-san, Baal a mhac-san,

6 Beerah a mhac-san, a thug Tilgat-pilneser, rìgh Asiria air falbh leis⁵: *b'esan* uachdaran nan Reubeneach.

7 Agus *bha* 'bhràithrean a réir an teaghlaiche, ('nuair a dh'àirmheadh an sloinnte a réir an ginealach), 'nan cinn-fheadhna, Ieiel, agus Sechariah,

8 Agus Bela mac Asais, mhic Shema, mhic Ioel, aig an robh a chòmhnuidh ann an Aroer, eadhon gu ruig Nebo, agus Baalmeon:

9 Agus a làimh na h-àirde 'n ear, chòmhnuich e gu ruig dol a steach an fhàsaidh o'n amhaim Euphrates; a chionn gu'n d'fhàs an spréidh ro lìonmhor ann am fearann Ghilead.

¹ seisear. ² mheudaich tigh an aithriche gu mòr.
³ meunim. Eabh.

⁴ fhuaras.

⁵ air falbh leis ann am braigheanas.

10 Agus ann an làithibh Shaul rinn iad cogadh ris na Hagaraich, a thuit le'n làimh: agus chòmhnuich iad 'nam bùth-aibh-san air feadh uile aghaidh na h-àird' an ear do Ghilcad.

11 Agus chòmhnuich clann Ghad thall fa'n comhair, ann an tìr Bhasain gu ruig Salcah:

12 Ioel an ceann¹, agus Saphan a b'fhaigse², agus Iaanai, agus Saphat ann am Basan.

13 Agus b'iad am bràithre do thlìgh an aithriche, Michael, agus Mesulam, agus Seba, agus Iorai, agus Iachan, agus Sia agus Heber, seachdnar.

14 Is iad sin clann Abihail mhic Huri, mhic Ieroah, mhic Ghilead, mhic Mhi-chaeil, mhic Iesisai, mhic Iabdo mhic Bhuis:

15 Ahi mac Abdieil, mhic Ghuni, ceann tighe an aithriche.

16 Agus ghabh iad còmhnuidh ann an Gilead, ann am Basan, agus 'na bhaitibh, agus ann an uile fhearann chomh-roinn³ Sharoim, air an crìochaibh.

17 Dh'àirmheadh iad sin uile le sloinnt-eireachd ann an làithibh Iotaim rìgh Iudah, agus ann an làithibh Ieroboaim rìgh Israeil.

18 Bha mic Reubein, agus na Gadaich, agus leth-thrèibh Mhanaseh, do fhear-aibh treuna⁴, fir chomasach gu sgiath agus claidheamh iomchar, agus gu tilgeadh le bogha, agus teòma air cogadh, ceithir agus dà fhichead mìle, agus seachd ceud agus trì fichead an àireamh, a chaidh a mach gu cogadh.

19 Agus rinn iad cogadh ris na Hagaraich, agus ri Ietur, agus Nephis, agus Nodab;

20 Agus chuidicheadh leo 'nan aghaidh, agus thugadh thairis 'nan làimh na Hagaraich, agus iadsan uile a bha maille ri: oir dh'éigh iad ri Dia anns a' chath, agus dh'aontaich esan le'n guidhe, a chionn gu'n d'earb iad as.

21 Agus thug iad leo am feudail; d'an càmhalaibh deich agus dà fhichead mìle, agus do chaoiribh dà cheud agus leth cheud mìle, agus do asalaibh dà mhìle, agus do dhaoineibh⁵ ceud mìle:

22 Oir thuit mòran sìos air am marbhadh⁶, a chionn gu'n robh an cogadh o Dhia. Agus ghabh iad còmhnuidh 'nan àite gu ruig am braigheanas.

23 Agus chòmhnuich clann leth-thrèibh Mhanaseh anns an tìr, o Bhasan gu Baalhermon, agus Senir, agus gu sliabh Hermon; agus dh'fhàs iad lìonmhor.

24 Agus b'iad so cinn tighe an aithriche, eadhon Ephraim, agus Isi, agus Eliel, agus

Asriel agus Jeremiah, agus Hodabbiah, agus Ishdiel, daoine treunmhor, daoine allail⁷, cinn tighe an aithriche.

25 Ach chiontaich iad an aghaidh Dhé an aithriche, agus chaidh iad le striopachas an déigh dhé muintir na tìre, a sgrios Dia rompa.

26 Agus dhùisg Dia Israeil suas spiorad Phul rìgh Asiria, agus spiorad Thilgat-pilnèsair rìgh Asiria, agus thug e leis iad, (eadhon na Reubenich agus na Gadaich, agus leth-thrèibh Mhanaseh, agus thug e iad gu Halah, agus Habor, agus Hara, agus gu amhainn Ghosain, gus an là'n diugh,

CAIB. VI.

1 Mic Lebhi. 4 Shìochd Eleasair gu ruig am braigheanas. 20 Mic Ghersein, Chohait, agus Mherari. 49 Dreuchd Aaron: 58 A shìochd gu ruig Ahimaas.

MIC Lebhi; Gerson, Cohat, agus Merari.

2 Agus mic Chohait; Amram, Ishar, agus Hebron, agus Udsiel.

3 Agus mic Amram; Aaron, agus Maouis, agus Miriam. Agus mic Aaron; Nadab, agus Abihu, Eleasar, agus Itamar.

4 Ghin Eleasar Phinehas, agus ghin Phinehas Abisua,

5 Agus ghin Abisua Buci, agus ghin Buci Udsi,

6 Agus ghin Udsi Serahiah, agus ghin Serahiah Meraiot,

7 Ghin Meraiot Amariah, agus ghin Amariah Ahitub,

8 Agus ghin Ahitub Sadoc, agus ghin Sadoc Ahimaas,

9 Agus ghin Ahimaas Asariah, agus ghin Asariah Iohanan,

10 Agus ghin Iohanan Asariah, (esan a bha frithealadh ann an dreuchd an t-sagairt anns an tigh a thog Solamh ann an Ierusalem,)

11 Agus ghin Asariah Amariah, agus ghin Amariah Ahitub,

12 Agus ghin Ahitub Sadoc, agus ghin Sadoc Salum,

13 Agus ghin Salum Hilciah, agus ghin Hilciah Asariah,

14 Agus ghin Asariah Seraiah, agus ghin Seraiah Iehosadac,

15 Agus chaidh Iehosadac am braigheanas, an uair a thug an Tighearn air falbh Iudah agus Ierusalem le làimh Nebuchadnesair.

16 Mic Lebhi; Gerson, Cohat, agus Merari.

17 Agus is iad so ainmean mhac Ghersein, Libni agus Simeil.

18 Agus b'iad mic Chohait, Amram, agus Ishar, agus Hebron, agus Udsiel.

¹ ceann-feadhna, ceannard, prìomh-fhear.

² an t-ath-fhear.

³ ann an uile mhach-bhaitibh, iomall-bhaitibh.

⁴ do mhic gaisge. Eabh.

⁵ anamaibh dhaoine. Eabh.

⁶ chaidh leònach.

⁷ ainmeil.

I. EACHDRAIDH, VI.

19 Mic Mherari; Mahli, agus Musi. Agus is iad so teaghlachan nan Lebhith-each, a réir an aithriche :
 20 O Gherosm; Libni a mhac, Iahat a mhac-san, Simali a mhac-san,
 21 Ioah a mhac-san, Ido a mhac-san, Serah a mhac-san, Ieaterai a mhac-san,
 22 Mic Chohait: Aminadab a mhac, Corah a mhac-san, Asir a mhac-san,
 23 Elcanah a mhac-san, agus Ebiasaph a mhac-san, agus Asir a mhac-san,
 24 Tahat a mhac-san, Uriel a mhac-san, Udsiah a mhac-san, agus Saul a mhac-san.
 25 Agus mic Elcanah; Amasai, agus Ahimot:
 26 Elcanah a mhac-san¹, Sophai a mhac-san, agus Nahat a mhac-san,
 27 Eliab a mhac-san, Ieroham a mhac-san, Elcanah a mhac-san.
 28 Agus mic Shamueil; an ceud-ghin *Ioel*, agus an dara Abiah².
 29 Mic Mherari; Mahli, Libni a mhac-san, Simeí a mhac-san, Udsa a mhac-san,
 30 Simea a mhac-san, Hagiah a mhac-san, Asaiah a mhac-san.
 31 Agus is iad sin *iadsan* a chuir Daibhidh os ceann seirbhis a' chiuil³ ann an tigh an Tighearn, an déigh do'n àire fois fhaghail.
 32 Agus bha iad a' frithealadh fa chomh-air pàilluin bùtha a' choimhthionail le ceòl⁴, gus an do thog Solamh tigh an Tighearn ann an Ierusalem; agus an sin dh'fheith iad air an dreuchd a réir an ordugh.
 33 Agus is iad so iadsan a bha feith-eamh, le'n cloinn: do mhacaibh nan Cohatach; Heman am fear-ciuil⁵, mac Ioel, mhic Shemueil,
 34 Mhic Elcanah, mhic Ierohaim, mhic Elieil mhic Thoah,
 35 Mhic Shuph, mhic Elcanah, mhic Mhahait, mhic Amasai,
 36 Mhic Elcanah, mhic Ioel, mhic Asariah, mhic Shephaniah,
 37 Mhic Thahait, mhic Asir, mhic Ebiasaph, mhic Chorah,
 38 Mhic Ishair, mhic Chohait, mhic Lebhi mhic Israeil.
 39 Agus a bhràthair Asaph, (a sheas air a làimh dheis,) *eadhon* Asaph mac Bherachiah, mhic Shimea,
 40 Mhic Mhichaeil, mhic Bhaaseiah, mhic Mhalchiah,
 41 Mhic Etni, mhic Sherah, mhic Adah,
 42 Mhic Etain, mhic Shimah, mhic Sheimei,
 43 Mhic Iahait, mhic Ghersoin, mhic Lebhi.

44 Agus am bràithrean mic Mherari air an làimh chlì; Etan mac Chisi, mhic Abdi, mhic Mhaluich,
 45 Mhic Hasabiah, mhic Amasiah, mhic Hilciah,
 46 Mhic Amsi, mhic Bhani, mhic Shameir,
 47 Mhic Mhahli, mhic Mhusi, mhic Mherari, mhic Lebhi.
 48 Dh'orduicheadh mar an ceudna am bràithre na Lebhithich chum gach uile ghnè sheirbhis pàilluin tighe Dhé.
 49 Ach thug Aaron agus a mhic suas tabhartais air altair na h-iobairt-loisgte, agus air altair na tùise; agus dh'orduicheadh iad chum uile oibre an *ionaid* ro naomh, agus a chum réite a dheanamh air son Israeil, a réir gach ní a dh'àithn Maois òglach Dhé.
 50 Agus is iad so mic Aaroin; Eleasar a mhac, Phinehas a mhac-san, Abisua a mhac-san,
 51 Buci a mhac-san, Udsi a mhac-san, Seraliah a mhac-san,
 52 Meraiot a mhac-san, Amariah a mhac-san, Ahitub a mhac-san.
 53 Sadoc a mhac-san, Alumaas a mhac-san.
 54 Agus is iad so an àiteacha-còmh-nuidh, air feadh an lùchairte⁶ nan crìochaibh, do mhacaibh Aaroin, do theaghlachibh nan Cohatach; oir bu leo-san an crannchur.
 55 Agus thug iad dhoibh Hebron ann an tìr Iudah, agus 'fhearann comh-roinn⁷ mu'n cuairt air.
 56 Ach achanaid a' bhaile, agus a fhrith-bhaile⁸ thug iad do Chaleb mac Iephuneh.
 57 Agus do mhacaibh Aaroin thug iad bailte; Hebron am baile didein⁹, agus Libna le 'fhearainn comh-roinn, agus Iatir, agus Estemoa le 'fhearainn comh-roinn:
 58 Agus Hilen le 'fhearann comh-roinn, Debir le 'fhearann comh-roinn,
 59 Agus Asan le 'fhearann comh-roinn, agus Betsemes le 'fhearann comh-roinn.
 60 Agus o thréibh Bheniamin; Geba le 'fhearann comh-roinn, agus Almet le 'fhearann comh-roinn, agus Anatot le 'fhearann comh-roinn. *B'iad* am bailtean¹⁰ uile, air feadh an teaghlachan, trì bailte deug.
 61 Agus do mhacaibh Chohait a dh'fhàgadh do theaghlach an tréibh sin, *thugadh* o'u leth-thréibh, *eadhon* leth-thréibh Mhanasch, le crannchur, deich bailtean.
 62 Agus do mhacaibh Ghersoim air feadh an teaghlach, *thugadh* o thréibh Isachair, agus o thréibh Aseir, agus o

¹ Elcanah: mic Elcanah.

² mic Shamueil; an ceud-ghin Bhasi, agus Abiah.

³ na cantaireachd.

⁴ le seinn.

⁵ an t-dranaich, am fear-scinn. ⁶ caistealan.

⁷ iomall-bhaile, a dhlùth-bhaile, 'fho-bhaile; suburbs. Sagg. ⁸ a bhaile beaga.

⁹ thug iad baile Iudah, eadhon Hebron am baile didein. ¹⁰ an caithriche, an mòr-bhaile.

thréibh Naphtali, agus o thréibh Mhanaseh ann am Basan, tri bailte deug.

63 Do mhacaibh Mherari air feadh an teaghlaichean, o thréibh Reubein, agus o thréibh Ghad, agus o thréibh Shebuluin, *thugadh* le crannchur dà bhaile dheug.

64 Agus thug clann Israeil do na Lebhithich na bailte *sin* le'm fearann comh-roinn.

65 Agus thug iad le crannchur o thréibh chloinn Iudah, agus o thréibh chloinn Shimeoin, agus o thréibh chloinn Bheniamin, na bailte sin a ghairmear air an ainmibh.

66 Agus bha *aig a' chuid eile* do theaghlaichibh mliac Chohait bailtean an crìch o thréibh Ephraim.

67 Agus thug iad dhoibh *do* na bailtibh dèidein, Sechem ann an sliabh Ephraim, le 'fhearann comh-roinn: Geser mar an ceudna le fhearann comh-roinn,

68 Agus Iocmeam le 'fhearann comh-roinn, agus Bethoron le 'fhearann comh-roinn,

69 Agus Aialon le 'fhearann comh-roinn, agus Gat-rimon le 'fhearann comh-roinn;

70 Agus o leth-thréibh Mhanaseh; Aner le 'fhearann comh-roinn, agus Bileam le 'fhearann comh-roinn, air son teaghlaich chloinn Chohait a dh'fhàgadh.

71 Do mhacaibh Ghersoim *thugadh* o theaghlach leth-thréibh Mhanaseh, Golan ann am Basan le 'fhearann comh-roinn, agus Astarot le 'fhearann comh-roinn:

72 Agus o thréibh Isachair; Cedès le 'fhearann comh-roinn, Dabrat le 'fhearann comh-roinn,

73 Agus Ramot le 'fhearann comh-roinn, agus Anem le 'fhearann comh-roinn;

74 Agus o thréibh Aseir; Masal le 'fhearann comh-roinn, agus Abdon le 'fhearann comh-roinn,

75 Agus Hucoc le 'fhearann comh-roinn, agus Rehob le 'fhearann comh-roinn:

76 Agus o thréibh Naphtali; Cedès ann an Galilee le 'fhearann comh-roinn, agus Hamon¹ le 'fhearann comh-roinn, agus Ciriataim le 'fhearann comh-roinn.

77 Do'n chuid eile do chloinn Mherari, *thugadh* o thréibh Shebuluin, Rimon le 'fhearann comh-roinn, Tabor le 'fhearann comh-roinn:

78 Agus air taobh thall Iordain làimh ri² Iericho, air an taobh an ear do Iordan *thugadh dhoibh* o thréibh Reubein, Beser anns an fhàsach le 'fhearann comh-roinn, agus Ialìsah le 'fhearann comh-roinn,

79 Agus Cedemot le 'fhearann comh-roinn, agus Mephaat le 'fhearann comh-roinn:

80 Agus o thréibh Ghad; Ramot ann an Gilead le 'fhearann comh-roinn, agus Mahanaim le 'fhearann comh-roinn,

81 Agus Hesbon le 'fhearann comh-roinn, agus Iaser le 'fhearann comh-roinn.

CAIB. VII.

1 Mic Isachair, 6 Bheniamin, 13 Naphtali, 14 Mhanaseh, 20 agus Ephraim. 21 Bròn Ephraim, &c.

ANIS *b'i ad* mic Isachair, Tola, agus Puah, Iasub, agus Simron, ceathrar.

2 Agus mic Thola; Udsi, agus Rephah, agus Ieriel, agus Iahmai, agus Ibsam, agus Semuel, cinn tighe an aithriche, *eadhon* Thola: daoine treuna 'nan ginealach aibh d'am *b' àireamh* ann an làithibh Dhaibhidh dà mhìle thar fhichead agus sè ceud.

3 Agus mic Udsi; Israhiah: agus mic Israhiah; Michael, agus Obadah, agus Joel, agus Isiah, cuighear; iad uile 'nan ceannaibh *tighe*:

4 Agus aca-san, a réir an ginealach, a réir tighe an aithriche, *bha* buidhnean shaighdeir³ gu cogadh, sé mìle deug thar fhichead *fear*: oir bha iomadh bean agus mac aca.

5 Agus *bha* am bràithrean am measg uile theaghlaichean Isachair 'nan daoinibh treuna⁴, air an àireamh san iomlan a réir an ginealach 'nan seachd agus ceithir fichead mìle.

6 Mic Bheniamin; Bela, agus Becher, agus Iediel, triuir.

7 Agus mic Bhela; Esbon, agus Udsi, agus Udsiel, agus Ierimot, agus Iri, cuighear; cinn tighe an aithriche, daoine treuna, agus dh'àirmheadh iad a réir an ginealach 'nan dà mhìle thar fhichead, agus ceithir deug thar fhichead.

8 Agus mic Bhecheir; Semira, agus Ioas, agus Elieser, agus Elioenai, agus Omri, agus Ierimot, agus Abiah, agus Anatot, agus Alamet. *Is* iad sin uile mic Bhecheir.

9 Agus *b'e* an àireamh a réir an sloinntè, a réir an ginealach, cinn tighe an aithriche, daoine treuna, fichead mìle agus dà cheud.

10 Agus mic Iediaeil; Bilhan: agus mic Bhilhan; Ieus, agus Benjamin, agus Ehud, agus Cenaanah, agus Setan, agus Tarsis, agus Ahisahar.

11 *Bha* iad sin uile mic Iediaeil, a réir cheann an aithriche, daoine treuna, 'nan seachd mìle deug agus dà cheud *fear*, iomchuidh gu dol a mach chum cogaidh agus catha.

12 Supim mar an ceudna, agus Hupim mic Ir, agus Husim mic Aheir.

¹ Hamot. Iosua, Caib. XXI. r. 32.

² fa chomhair.

³ shaighd-fhear.

⁴ treun an neart, comasach, gaisgeil.

13 Mic Naphtali; Iahsiel, agus Guni, agus Ieser, agus Salum, mic Bhilbah.

14 Mic Mhanaseh; Asriel, a rug i: (*ach rug a choimhleabach*, a' Bhan-aramach, Machir athair Ghilead.

15 Agus ghabh Machir mar mhnaoi *piuthar* Hupim agus Shupim, agus *b'e ainm* a peathar Maachah:) agus *b'e ainm* an dara *mic* Selophehad: agus bha aig Selophehad nigheanan.

16 Agus rug Maachah bean Mhachir mac, agus thug i Peres mar ainm air; agus *b'e ainm* a bhràthar Seres; agus *b'iad* a mhic-san Ulam agus Racem.

17 Agus mic Ulaim; Bedan. *B'iad sin* mic Ghilead, mhic Mhachir, mhic Mhanasch.

18 Agus rug a phiuthar Hamolecet Isod, agus Abieser, agus Mahalah.

19 Agus *b'iad* mic Shemida, Ahian, agus Sechem, agus Lichi, agus Aniam.

20 Agus mic Ephraim; Sutelah, agus Bered a mhac-san, agus Tahat a mhac-san, agus Eladah a mhac-san, Tahat a mhac-san,

21 Agus Sabad a mhac-san, agus Sutehah a mhac-san, agus Eser, agus Elead, a mharbh fir Ghat a rugadh san tìr *sin*, a chionn gu'n d'fhàinig iad a nuas a thogail an creich¹.

22 Agus rinn an athair Ephraim bròn rè iomadh là, agus thàinig a bhràithre gu comhfhurtachd a thoirt da.

23 Agus chaidh e stigh a dh'ionnsuidh a mhna, agus dh'fhàs i torrach, agus rug i mac, agus thug e Beriah mar ainm air, a chionn gu'n d'èirich gu h-olc le 'thigh.

24 (Agus *b'i* a nighean Serah, ise a thog Bet-horon iochdarach, agus uachdarach, agus Udsen-serah.)

25 Agus *b'e* Rephah a mhac, mar an ceudna Reseph, agus Tela a mhac-san, agus Tahan a mhac-san,

26 Laadan a mhac-san, Amihud a mhac-san, Elisama a mhac-san,

27 Non a mhac-san, Iehosua a mhac-san.

28 Agus *b'iad* an seilbh agus an àiteach-còmhnuidh Bet-el agus a bhailtean, agus a làimh na h-àirde 'n ear Naaran, agus a làimh na h-àirde 'n iar Geser le 'bhailtibh, Sechem mar an ceudna agus a bhailte, gu ruig Gasa agus a bhailtean.

29 Agus làimh ri cloinn Mhanaseh, Betsean agus a bhailte, Taanach agus a bhailte, Megido agus a bhailte, Dor agus a bhailte. Annta sin ghabh clann Ioseph mhic Israeil còmhnuidh.

30 Mic Aseir: Imnah, agus Isuah, agus Isui, agus Beriah, agus Serah am piuthar.

31 Agus mic Bheriah; Heber, agus

Malchiel: *b'esan* athair Bhirsabrit.

32 Agus ghin Heber Iaphlet, agus Somer, agus Hotam, agus Suah am piuthar.

33 Agus mic Iaphleit; Pasach, agus Bimhal, agus Asbhat: *is iad sin* mic Iaphleit.

34 Agus mic Shameir; Ahi, agus Rohgah, Iehubah, agus Aram.

35 Agus mic Heleim a bhràthar; Sophah, Imna, agus Seles, agus Amal.

36 Mic Shophah; Suah, agus Harnepher, agus Sual, agus Beri, agus Imrah,

37 Beser, agus Hod, agus Sama, agus Silsah, agus Itran, agus Beera.

38 Agus mic Ieteir; Iephuneh, agus Pispah, agus Ara.

39 Agus mic Ula; Ara, agus Haniel, agus Resia.

40 *B'iad sin uile mic Aseir, cinn tighe an aithriche, daoine taghta, treun an neart, roghadh² nan uachdaran.* Agus an uair a dh'àirmheadh iad a rèir an ginealach chum cogaidh agus catha, *b'e an àireamh sè mìle fichead fear.*

CAIB. VIII.

1 *Mic agus cinn-fheadhna Bheniamin.* 33 *Slìochd Shaul agus Ionatain.*

A NIS ghin Benjamin Bela a cheud-ghlìn, Asbel an dara, agus Ahara an treas,

2 Nohah an ceathramh, agus Raphah an cùigeadh.

3 Agus *b'iad* mic Bhela, Adar, agus Gera, agus Abihud,

4 Agus Abisua, agus Naaman, agus Ahoah.

5 Agus Gera, agus Sephuphan, agus Huram.

6 Agus *is iad so mic Ehuid: is iad so cinn aithriche³ luchd-àiteachaidh Gheba,* agus dh'atharraich siad iad gu Manahet:

7 Agus Naaman, agus Abiah, agus Gera, dh'atharraich e iad, agus glhìn e Udse, agus Ahilud.

8 Agus ghin Saharaim *clann* ann an tìr Mhoaih, an dèigh dha Husim agus Baara a mhnai a chur air falbh⁴.

9 Agus ghin e ri Hodes a mhnaoi, Iobab, agus Sibia, agus Mesa, agus Malcham,

10 Agus Ieus, agus Sachia, agus Mirma. *B'iad sin a mhic, cinn nan aithriche.*

11 Agus ri Husim ghin e Ahitub agus Elpaal.

12 Mic Elpaail; Eber, agus Misam, agus Samed, a thog Ono, agus Lod le 'bhailtibh.

13 Agus Beriah agus Sema: *b'iadsan cinn aithriche luchd-àiteachaidh Aialoin,* a ruag luchd-àiteachaidh Ghat:

14 Agus Ahio, Sasac, agus Ierimot,

¹ a thoirt leo an feudalach.

² cinn. Eabh. ³ theaghlach.

⁴ an dèigh an cur air falbh, Husim agus Baara a mhnai. Eabh.

I. EACHDRAIDH, VIII. IX.

15 Agus Sebadiah, agus Arad, agus Ader,

16 Agus Michael, agus Ispah, agus Ioha, n'ic Bheriah;

17 Agus Sebadiah, agus Mesulam, agus Heseci, agus Heber,

18 Agus Ismerai, agus Iesliah, agus Iobab, mic Elpaail;

19 Agus Iacim, agus Sichri, agus Sabdi,

20 Agus Elioenai, agus Siltai, agus Eliel,

21 Agus Adaiah, agus Beraiah, agus Simrat, mic Shlimhi;

22 Agus Ispan, agus Heber, agus Eliel,

23 Agus Abdon, agus Sichri, agus Hanan,

24 Agus Hananiah, agus Elam, agus Antotiah,

25 Agus Iphedeiah, agus Penuel, mic Shasaic;

26 Agus Samserai, agus Sehariah, agus Ataliah,

27 Agus Iaresiah, agus Eliah, agus Sichri, mic Ierohaim.

28 Sin cinn nan aithrichean, a réir an ginealach, cinn-fheadhna. Bha iad sin a chòmhnuidh ann an Ierusalem.

29 Agus ann an Gibeon bha *Iehiel*, athair Ghibeom, a chòmhnuidh; agus *b'e* ainm a mhnà Maachah;

30 Agus a cheud-ghin mic Abdon, agus Sur, agus Cis, agus Baal, agus Ner, agus Nadab,

31 Agus Gedor, agus Ahio, agus Sacher, agus Miclot¹.

32 Agus ghin Miclot Simeah. Agus chòmhnuich iad sin mar an ceudna fa chomhair am bràithrean ann an Ierusalem maille r'am bràithribh.

33 Agus ghin Ner Cis, agus ghin Cis Saul, agus ghin Saul Ionatan, agus Malchisua, agus Abinadab, agus Esbaal.

34 Agus *b'e* mac Ionatan Merib-baal; agus ghin Merib-baal Micah.

35 Agus *b'iad* mic Mhica, Píton, agus Melech, agus Tarea, agus Ahas.

36 Agus ghin Ahas Iehoadah; agus ghin Iehoadah Alemet, agus Asmabhet, agus Simri; agus ghin Simri Mosa,

37 Agus ghin Mosa Binea: *b'e* Rapha a mhac-san, Eleasah a mhac-san, Asel a mhac-san.

38 Agus *bha* aig Asel sèathnar mhac; agus *is* iad so an ainmean, Asricam, Bocheru, agus Ismael, agus Seariah, agus Obadiah, agus Hanan. *B'iad* sin uile mic Aseil.

39 Agus *b'iad* mic Eseic a bhràthar, Ulam a cheud-ghin, Iehus an dara, agus Eliphelet an treas.

40 Agus bha mic Ulaim 'nan daoinibh treuna, nam fir-bhogha²; agus bha mòran

mhac aca, agus mhac am mac, ceud agus leth-cheud: iad sin uile do mhacaibh Bheniamin.

CAIB. IX.

1 *Toiseach gheinealach Israeil agus Iudah. 2 Na h-Israelich, 10 na sagairt, 14 agus na Lebhithich, a ghabh còmhnuidh ann an Ierusalem. 27 Cùram nan Lebhithich. 35 Sliochd Shaul agus Ionatan.*

AGUS dh'àirmheadh Israel uile a réir an ginealach, agus, feuch, *bha* iad sgriobhta ann an leabhar rìghrean Israeil. Ach thugadh Iudah³ air falbh do Bhabylon air son an eusaontais.

2 Agus *b'iad* an ceud luchd-àiteachaidh a ghabh còmhnuidh 'nan sealbh 'nam bailtibh, na h-Israelich, na sagairt, na Lebhithich, agus na Nefùnich.

3 Agus ann an Ierusalem ghabh còmhnuidh do chloinn Iudah, agus do chloinn Bheniamin, agus do chloinn Ephraim, agus Mhanaseh;

4 Utai mac Amihuid, mhic Omri, mhic Imri, mhic Bhani, do chloinn Phareis mhic Iudah.

5 Agus do na Silonaich; Asaiah an ceud-ghin, agus a mhic.

6 Agus do mhacaibh Sherah; Ieuel, agus am bràithre, sè ceud agus ceithir fichead agus a deich.

7 Agus do mhacaibh Bheniamin; Salu mac Mhesulaim, mhic Hodabliah, mhic Hasenuah;

8 Agus Ibneiah mac Ierohaim, agu. Elah mac Udsi, mhic Mhichri, agus Mesulam mac Shephatiah, mhic Reueil, mhic Ibneiah;

9 Agus am bràithrean, a réir an ginealach, naoi ceud agus sè deug agus dà fhichead. *Bu* chinn aithriche na daoine sin uile ann an tigh an aithriche.

10 Agus do na sagartaibh; Iedaiah, agus Iehoiarib, agus Iachin;

11 Agus Asariah mac Hileiah, mhic Mhesulaim, mhic Shadoic, mhic Mheraiot, mhic Abituib, riaghladair tighe Dhé;

12 Agus Adaiiah mac Ierohaim, mhic Phasuir, mhic Mhalchiah; agus Maasai mac Adieil, mhic Iahserah, mhic Mhesulaim, mhic Mhesulemit, mhic Imeir;

13 Agus am bràithre, cinn tighe an aithriche, mìle agus seachd ceud agus trì fichead, daoine ro fhoghainteach fa chomhair oibre seirbhìs tighe Dhé.

14 Agus do na Lebhithich; Semaiah mac Hasuib, mhic Asricaim, mhic Hasabiah, do mhacaibh Mherai;

15 Agus Bachacar, Heres, agus Galal, agus Mataniah mac Mhica, mhic Shichri, mhic Asaiph;

16 Agus Obadiah mac Shemaiah, mhic

¹ Faic. Caib. IX. r. 36, 37.

² a thairngadh bogha, a thilgeadh gu maith le bogha.

³ leabhar rìghrean Israeil agus Iudah,

a thugadh.

Ghalail, mhic Iedutuinn, agus Berechiah mac Asa, mhic Elcanah, a bha chòmh-nuidh ann am frith-bhailtibh¹ nan Ne-tophatach.

17 Agus *b'iad* na dorsairean Salum, agus Acub, agus Talmon, agus Ahinan, agus am bràithre: *b'e* Salum an ceannard;

18 A *bha* gus an àm so aig geata an rìgh air an taobh an ear, 'nan dorsairibh ann an cuideachdaibh chloinn Lebhi.

19 Agus *bha* Salum mac Chore, mhic Ebiasaiph, mhic Chorah, agus a bhràithre, (do thigh 'athar,) na Corahaich os ceann oibre na seirbhis, 'nan luchd-gleidhidh gheatacha a' phàilliuin; agus an aithriche os ceann sloigh an Tighearna, 'nan luchd-gleidhidh air dol a stigh a' phàilliuin.

20 Agus *b'e* Phinehas mac Eleasair bu cheann-riaghlaidh orra o *shean* am fianuis an Tighearna².

21 Maille ris *bha* Sechariah, mac Mhe-selemiah, 'na dhorsair doruis pàilliuin a' choimhthionail.

22 Iad sin uile a thaghadh gu bhi 'nan dorsairibh anns na geataibh, bu dà cheud agus dà fhear dheug iad. Dh'àirmh-eadh iad sin a réir an ginealach³ 'nam frith-bhailtibh, a shuidhich Daibhidh agus Samuel am fear-seallaidh 'nan dreuchd suidhichte.

23 Mar sin bha iadsan, agus am mic, os ceann gheatacha tighe an Tighearna, agus tighe a' phàilliuin chum an gleidheadh⁴.

24 Ann an ceithir chearnaibh bha na dorsairean, a làimh na h-àirde 'n ear, na h-àirde 'n iar, na h-àirde tuath, agus na h-àirde deas.

25 Agus am bràithre 'nam frith-bhailtibh, gu teachd an déigh sheachd làithean o àm gu h-àm maille ri u.

26 Oir bha na Lebhitich sin, na ceithir àrd dhorsairean, 'nan dreuchd suidhichte, agus bha iad os ceann sheòmraichean, agus os ceann ionmhasan tighe Dhé.

27 Agus bha iad a' gabhail tàimh mu'n cuairt air tigh Dhé, a chionn gu'm b'ann orra-san a *bha* a chùram, agus gu'm buineadh dhoibh 'fhosgladh gach mad-uinn.

28 Agus *bha cuid* diubh os ceann nan soithiche⁵ frithealaidh, chum an toirt a stigh agus a mach air àreamh.

29 Chuireadh *cuid* diubh mar an ceudna os ceann nan soithiche, agus os ceann uile innealan an ionaid naoimh, agus os ceann na mine mine, agus an fhiona, agus na h-oladh, agus na tùise, agus nan spiosraidh⁶.

30 Agus *bha cuid* do mhacaibh nan

sagart a' deanamh na h-oladh-ungaidh do na spiosraidh.

31 Agus b'ann aig Matitiah *aon* do na Lebhitich, eadhon ceud-ghin Shaluim a' Chorahaich, a *bha* dreuchd suidhichte os ceann⁷ nan nithe a rinneadh ann an aigh-nibh.

32 Agus *bha cuid eile* d'am bràithribh, do mhacaibh nan Cohatach, os ceann arain na fianuis⁸, gu dheasachadh gach sàbaid.

33 Agus *is* iad sin an luchd-ciùil⁹, cinn aithriche nan Lebhitheach, a *bha* anns na seòmraichibh, saor o gach cùram eile; oir a là agus a dh'oidheche *bha* orra bhi r'an obair-san.

34 *Bha* cinn aithriche sin nan Lebhitheach 'nan cinn a réir an ginealach: *bha* iad a chòmhnuidh ann an Ierusalem.

35 Agus ann an Gibeon chòmhnuich athair Ghibeoin, Iehiel; agus *b'e* ainm a mhnà Maachah:

36 Agus a cheud-ghin mic Abdon, an sin Sur, agus Cis, agus Baal, agus Ner, agus Nadab,

37 Agus Gedor, agus Ahio, agus Sechariah, agus Miclot.

38 Agus ghin Miclot Simcam: agus ghabh iadsan mar an ceudna còmhnuidh fa chomhair am bràithrean ann an Ierusalem, maille r'am bràithribh.

39 Agus ghin Ner Cis, agus ghin Cis Saul, agus ghin Saul Ionatan, agus Malchisua, agus Abinadab, agus Esbaal.

40 Agus *b'e* mac Ionatain Merib-baal; agus ghin Merib-baal Micah.

41 Agus *b'iad* mic Mhicah, Piton, agus Melech, agus Tahrea, agus Ahas.

42 Agus ghin Ahas Iehoadah¹⁰, agus ghin Iehoadah Alemet, agus Asmabhet, agus Simri; agus ghin Simri Mosa;

43 Agus ghin Mosa Binea: agus *b'e* Rephaiah a mhac-san, Eleasah a mhac-san, Asel a mhac-san.

44 Agus bha aig Asel sèathnar mhac, agus *is* iad so an ainmean: Asricam, Bocheru, agus Ismael, agus Seariah, agus Obadiah, agus Hanan. *B'iad* sin mic Aseil.

CAIB. X.

1 Bhual na Philistich clann Israeil, agus mharbh iad Saul. 11 Nochd fr Iubeis-ghilead coimhneas do Shaul agus d'a mhic. 14 Thugadh an rìoghachd do Daibhidh.

ANIS chog na Philistich an 'aghaidh A Israeil; agus theich fir Israeil o fhianuis nam Philisteach, agus thuit iad sìos marbhtha ann an sliabh Ghilboa.

2 Agus lean na Philistich gu teann an déigh Shaul, agus an déigh a chuid mac; agus bhual na Philistich Ionatan, agus Abinadab, agus Malchisua, mic Shaul.

¹ bailtibh beaga. ² an Tighearna, a bha maille ris.

³ an sloinnt. ⁴ seal m'an seach. ⁵ air cuid diubh bha cùram nan soithiche. ⁶ nithe cùbhraidh.

⁷ ri Matitiah bha'n earbsadh bhi os ceann.

⁸ an arain thaisbeanta. ⁹ luchd-scinn.

¹⁰ Iarah. Faic Caib. VIII. r. 36.

I. EACHDRAIDH, X. XI.

3 Agus dh'fhàs an cath cruaidh an aghaidh Shaul, agus chuimsich¹ na fir-bhogha e, agus lotadh e leis na fir-bhogha.

4 An sin thubhairt Saul ri fear iomchair² arm, Rùisg do chlaidheamh agus sàth tromham e, air eagal gu'n tig na daoine neo-thimchioll-ghearrta sin, agus gu'n guàthaich iad gu maslach mi. Ach cha deanadh fear iomchair² arm sin, oir bha eagal mòr air. Uime sin ghlac Saul claidheamh, agus thuit e air.

5 Agus an uair a chunnaic fear iomchair² arm gu'n robh Saul marbh, thuit esan mar an ceudna air a' chlaidheamh, agus fhuair e bàs.

6 Mar sin fhuair Saul bàs, agus a thriuir mhac, agus dh'eug a thigh uile san aon àm.

7 Agus an uair a chunnaic uile fhir Israeil a bha sa' ghleann gu'n do theich iad, agus gu'n robh Saul agus a mhic marbh, an sin thréig iad am bailtean, agus theich iad; agus thàinig na Philistich, agus còmhnuich iad anna.

8 Agus air an là maireach, an uair a thàinig na Philistich a dh'fhaobhachadh nam marbh, fhuair iad Saul agus a mhic air tuiteam ann an sliabh Ghilboa.

9 Agus an uair a dh'fhaobhaich iad e, ghlac iad a cheann, agus a'airm, agus chuir iad *fios* do thìr nam Philisteach mu'n cuairt, gus gceul a thoirt do thigh an diathan bréige², agus do'n t-sluagh.

10 Agus chuir iad a'airm ann an tigh an dèe, agus dhaingnich iad a cheann ann an teampull Dhagoin.

11 Agus an uair a chual³ uile luchd-àiteachaidh Iabais-ghilead na h-uile *uith* a rinn na Philistich ri Saul,

12 Dh'éirich na fir threuna uile, agus thug iad leo corp Shaul, agus cuirp a chuid mac, agus thug iad gu Iabes iad, agus dh'adhlac iad an cnàmhan fuaidh 'n daraig ann an Iabes, agus thraisg iad seachd làithean.

13 Mar so dh'eug Saul air son a chionta a rinn e 'n aghaidh an Tighearn, an aghaidh focail an Tighearna nach do ghléidh e, agus mar an ceudna a chionn gu'n d'iarr e *bean* aig an robh leannan-sìth, a dh'fhiosrachadh dhith.

14 Agus nach d'fhiosraich e do'n Tighearn: uime sin mharbh se e, agus thionndaidh e 'n rioghachd a dh'ionnsuidh Dhaibhidh mhic Iese.

CAIB. XI.

1 Rinneadh Daibhidh 'na rìgh air Israel aig Hebron. 5 Ghlac e thìr Shioin. 10 Air eamh a dhaoine treuna.

AN sin chrùinnich Israel uile iad féin a dh'ionnsuidh Dhaibhidh gu Hebron,

ag ràdh, Feuch is sinne do chnàimh agus t'fheoil.

2 Agus a bhàrr air so, san ùine chaidh seachad, eadhon an uair a bha Saul 'na rìgh, bu tusa a threòraich a mach, agus a thug a steach Israel; agus thubhairt an Tighearna do Dhia riut, Beathaichidh tusa mo shluagh Israel, agus bithidh tu a'd' cheannard air mo shluagh Israel.

3 Agus thàinig uile sheanairean Israeil a dh'ionnsuidh an rìgh gu Hebron; agus rinn Daibhidh coimhcheangal riu ann an Hebron am fianuis an Tighearn: agus dh'ung iad Daibhidh 'na rìgh air Israel, a réir focail an Tighearn, le làimh Shamuil.

4 Agus chaidh Daibhidh agus Israel uile gu h-Ierusalem, (is e sin Iebus,) far an robh na Iebusaich, luchd-àiteachaidh an fhearainn.

5 Agus thubhairt luchd-àiteachaidh Iebuis ri Daibhidh, Cha tig thu 'n so. Gidheadh, ghlac Daibhidh thìr Shioin; is e sin baile³ Dhaibhidh.

6 Agus thubhairt Daibhidh, Ge b'e bhuailcas na Iebusaich an toiseach, bithidh esan 'na cheannard agus 'na uachdaran. Agus chaidh Ioab mac Sheruah suas an toiseach, agus bha e 'na cheannard.

7 Agus ghabh Daibhidh còmhnuidh san thìr; uime sin thug iad baile Dhaibhidh mar ainm air.

8 Agus thog e am baile mu'n cuairt, eadhon o Mhìho mu'n cuairt: agus chuir Ioab suas a ris a' chuid eile do'n bhaile.

9 Agus dh'fhàs Daibhidh ni bu mhò, agus ni bu mhò; oir bha Tighearna nan sluagh leis.

10 Agus is iad so roghadh nan daoine treuna a bha aig Daibhidh, a neartaich iad féin leis 'na rioghachd, agus le h-Israel uile, gu rìgh a dheanamh dheth, a réir focail an Tighearna mu thimchioll Israeil.

11 Agus is e so àireamh nan daoine treuna a bha aig Daibhidh: Iasobeam, mac Hachmoni, 'na cheann air triuir⁴; thog esan a shleagh an aghaidh thri ceud, a mharbhadh leis san aon àm.

12 Agus 'na dhéigh-san bha Eleasar, mac Dhodo, an t-Ahohach: b'aon esan do na trì gaisgich.

13 Bha esan maille ri Daibhidh ann am Pasdamin, agus an sin bha na Philistich air cruinneachadh an ceann a chéile gu cath; [agus dh'ùnich fir Israeil rompa:

Dh'éirich esan, agus bhuail e na Philistich gu an robh a làimh sgith, agus gu'n do lean a làmh ris a' chlaidheamh. Agus dh'òibrich an Tighearna saorsa mhòr air

¹ fhuair. Eabh.

² gu sgeul a thoirt d'an

iodholaibh.

³ caithir.

⁴ ceann nan ceannard.

an là sin; agus phill an sluagh 'na dhéigh a mhàin a dh'fhaobhachadh.

Agus 'na dhéigh-san bha Samah, mac Agee, an Hararach: agus chruinnich-eachd na Philistich 'nam buidhinn¹; far an robh dail² fhearainn làn corna³; agus theich an sluagh roimh na Philistich.

14 Agus shuidhich iadsan iad féin am meadhon na dalach *sin*, agus dhòin iad i, agus mharbh iad na Philistich: agus shaor an Tighearn *iad* le saorsa mhòir.

15 A nis chaidh triuir do na deich ceannaird fhichead sìos do'n charraig a dh'ionnsuidh Dhaibhidh, gu uaimh Adulaim: agus champaich feachd nam Philisteach ann an gleann Rephaim.

16 Agus *bha* Daibhidh an sin san daingneach; agus *bha* freiceadan nam Philisteach an sin ann am Bet-lehem.

17 Agus mhiannaich Daibhidh, agus thubhairt e, O nach tugadh neach dhomh deoch uisge, o thobar Bhet-lehem, a *tha* aig a' gheata!

18 Agus bhris an triuir troimh fheachd nam Philisteach, agus tharruing iad uisge á tobar Bhet-lehem a *bha* aig a' gheata agus ghabh iad *e*, agus thug iad *e* gu Daibhidh: ach cha 'n òladh Daibhidh *e*, ach thaom e niach e do'n Tighearn.

19 Agus thubhairt e, Nar leigeadh mo Dhia dhomh gu'n deanainn an ni so: an òlainn-se fuil nan daoine so a chuir an anaman ann an cunnart? oir le cunnart an anaman thug iad leo e: uime sin cha 'n òladh e dheth. Na nithe sin rinn an triuir dhaoine treuna.

20 Agus *bha* Abisai, bràthair Ioaib, 'na cheann air triuir: agus thog e a shleagh an aghaidh trì cheud, a mharbh e; agus *bha* ainm aige am measg thrìuir.

21 Do'n triuir *b'e* a b'urramaiche na an dithis, agus *bha* e 'na cheannard orra: gidheadh, cha d'ràinig e gu ruig a' *cheud* triuir.

22 *Mharbh* Benaiah, mac Iehoiada, mhic duine ghaisgeil o Chabseel, a rinn mòran ghnìomhara, mharbh esan dithis fhear leòmhanta do Mhoab: chaidh e sìos mar an ceudna, agus mharbh e leòmhann ann am meadhon sluichd air latha sneachdaidh.

23 Agus mharbh e Eiphiteach, duine do mheudachd mhòir, cùig lāmhan-coille air àirde; agus ann an làimh an Eiphitich *bha* sleagh cosmhuil ri garmain⁴ figheadair; ach chaidh esan sìos d'a ionnsuidh le luirg, agus spion e 'n t-sleagh á làimh an Eiphitich, agus mharbh e le 'shleagh féin e.

24 Na *nithe* sin rinn Benaiah mac Iehoiada, agus *bha* ainm aige am measg triuir dhaoine treuna.

25 Feuch, do'n triuir⁵ *b'e* a b'urramaiche, ach cha d'ràinig e gu ruig a' *cheud* triuir: agus chluir Daibhidh e os ceann a fhreiceadam.

26 Mar an ceudna *b'iad* daoine treuna nan armait, Asahel bràthair Ioaib, Elhanan mac Dhodo o Bhet-lehem,

27 Samot an t-Hararach, Heles am Pelonach,

28 Ira mac Iceis an Tecoach, Abieser an t-Anatotach,

29 Sibecai an t-Husatach, Itai an t-Aho-hach,

30 Maharari an Netophatach, Heled mac Bhaanah an Netophatach,

31 Itai mac Ribai o Ghibeath chloinn Bheniamin, Benaiah am Piratonach,

32 Hurai o shruthaibh⁶ Ghaais, Abiel an t-Arbatach,

33 Asmabhet am Baharumach, Eliabha an Saalbonach.

34 Mic Haseim a' Ghisonaich; Ionatan mac Shage an t-Hararach,

35 Ahiam mac Shacair an t-Hararach, Eliphal mac Uir,

36 Hephher am Mecheratach, Ahiah am Pelonach,

37 Hesro an Carmeleach, Naarai mac Esbai,

38 Ioel bràthair Natain, Mibchar mac Hageri,

39 Selec an t-Amonach, Naharai am Berotach, fear iomchair arm Ioaib mhic She-ruiah,

40 Ira an t-Itreach, Gareb an t-Itreach,

41 Uriah an t-Hiteach, Sabad mac Ahlai,

42 Adina mac Shisa an Reubeneach, ceannard do na Reubenich, agus deich thar fhichead maille ris,

43 Hanan mac Mhaacah, agus Iosaphat am Mitneach,

44 Udsia an t-Asteratach, Sama agus Iehiel mic Hotaim an Aroerich,

45 Iediael mac Shimri, agus Ioha n bràthair an Tideach,

46 Eliel am Mahablach, agus Ieribai agus Iosabiah mic Elnaaim, agus Itmah am Moabach,

47 Elic, agus Obed, agus Iasiel o Mhesobia.

CAIB. XII.

1 Na buidhnean a thàinig a dh'ionnsuidh Dhaibhidh gu Sielag. 23 Na daoine armaichte a thàinig d'a ionnsuidh gu Hebron.

ANIS is iad so iadsan a thàinig a dh'ionnsuidh Dhaibhidh gu Sielag, 'nuair a *bha* e fathast 'ga chumail féin a stigh air eagal Shauil mhic Chis: agus *bha* iad am measg nam fear treuna, 'nan luchd-cuideachaidh sa' chogadh.

2 *Bha* iad armaichte le boghannaibh,

¹ II. Samuel, Caib. XXIII. r. 9, 10, 11.

² mir.

³ lan do ghall-pheasair. II. Samuel, Caib. XXIII.

⁴ sail.

⁵ do'n deich thar fhichead.

⁶ ainmichibh.

I. EACHDRAIDH, XII.

agus teòma leis an làimh dheis agus chli air clachan a *thilgeadh*, agus saighdean á bogha, *eadhon* do bhràithribh Shaul do Bheniamin.

3 *B'e* Ahieser lu bharraichte¹ *dhiubh*, an sin Iosai, mic Shemaah a' Ghibeataich; agus Iesiel agus Pelet mic Asmabheit; agus Beracha, agus Iehu an t-Anatotach,

4 Agus Ismaiah an Gibeonach, duine treun am measg an deich thar fhichead; agus os ceann an deich thar fhichead; agus Jeremiah, agus Iehasiel, agus Iohanan, agus Iosabad an Gederatach,

5 Elusai, agus Ierimot, agus Bcaliah, agus Semariah, agus Sephatiah an t-Haruphach,

6 Elcanah, agus Iesia, agus Asareel, agus Ioeser, agus Iasobeam, na Corhaich,

7 Agus Ioelah, agus Sebadiah, mic Ierohaim o Ghedor.

8 Agus do na Gadaich chaidh thairis² a dh'ionnsuidh Dhaibhidh, do'n daingneach anns an fhàsach, daoine treuna, fir chogaidh *iomchuidh* chum catha, d'am b'aithne sgiath agus targaid a laimhseachadh, aig an robh an gnùisean mar ghnùisibh leòmhnan, agus iad co luath ris na h-eildibh air na beanntaibh.

9 Eser an ceud fhear, Obadiah an dara, Eliab an treas,

10 Mismanah an ceathramh, Jeremiah an cùigeadh,

11 Atai an sèathadh, Eliel an seachdamh,

12 Iohanan an t-ochdamh, Elsabad an naothadh,

13 Jeremiah an deicheamh, Machbanai an t-aon fhear deug.

14 *Bha* iad sin do mhacaibh Ghad 'nan ceannardaibh an t-slàigh: an t-aon bu lugha dhiubh os ceann cheud, agus an t-aon bu mhò os ceann mhile.

15 Sin iadsan a chaidh thairis air Iordan sa' cheud mhìos, an uair a bha 'sruth cur thairis air a bruachaibh uile; agus chuir iad an ruaig air *muinntir* nan gleann uile, a làimh na h-àirde 'n ear, agus na h-àirde 'n iar.

16 Thàinig mar an ceudna *cuid* do chloinn Bheniamin agus Iudah do'n daingneach a dh'ionnsuidh Dhaibhidh.

17 Agus chaidh Daibhidh a mach 'nan coinneamh, agus fhreagair e, agus thubhairt e riu, Ma thàinig sibh gu sìochail a m' ionnsuidh-sa a chuideachadh leam, bithidh mo chridhe leibh le aon rùn: ach ma *thàinig sibh* a chum mo bhrath do m' naimhdebh, 'nuair nach 'eil eucoir air bith a'm' lànhaibh, gu'n amhairceadh Dia ar n-aithriche air *sin*, agus gu'n cronaicheadh se e.

18 An sin thàinig an spiorad air Amasai, am fear a b'innbiche do na ceannardaibh, agus *thubhairt e*, Leatsa *tha sinne*, a Dhaibhidh, agus air do thaobh, a mhic Iese: sìth, sìth dhuìt, agus sìth do d' luchd cuideachaidh: oir tha do Dhia a' còmhnaidh³ leat. Agus ghabh Daibhidh iad, agus rinn e iad 'nan ceannardaibh na buidhne.

19 Agus chaidh *cuid* do Mhanaseh thairis⁴ a dh'ionnsuidh Dhaibhidh, 'nuair a thàinig e leis na Philistich an aghaidh Shaul gu cath, ach cha do chuidich iad⁵ leo; oir, le comhairle, chuir tighearnan nam Philisteach air falbh e, ag ràdh, *Le cunnart* ar ceann-ne theid e thairis a dh'ionnsuidh Shaul a thighearna.

20 'Nuair a bha e dol gu Siclag, chaidh thairis d'a ionnsuidh do Mhanaseh, Adnah, agus Iosabad, agus Iediael, agus Michael, agus Iosabed, agus Elihu, agus Siltai, cinn-fheadhna nam mìltean a *bha* do Mhanaseh.

21 Agus chuidich iad le Daibhidh an aghaidh buidhne nan creachadairean: oir bu daoine treuna iad uile, agus bhia iad 'nan ceannardaibh san fheadhd.

22 Oir mu'n àm *sin* là 'n déigh là, thàinig iad a dh'ionnsuidh Dhaibhidh a chòmhnaidh⁶ leis, gus an robh feachd mòr ann, mar fheadhd Dhé.

23 Agus *is e* so àireamh⁷ nan *daoine* armaichte chum cogaidh, a thàinig a dh'ionnsuidh Dhaibhidh gu Hebron, a thionndadh rìoghachd Shaul d'a ionnsuidh-san, a réir focail an Tighearna:

24 Mic Iudah, a ghiùlain sgiath agus sleagh, sè mìle agus ochd ceud, armaichte chum cogaidh.

25 Do mhacaibh Shimcoìn, fir threuna gu cogadh, seachd mìle agus ceud.

26 Dho mhacaibh Lebhi, ceithir mìle agus sè ceud.

27 Agus Iehoiada ceannard nan Aaronach, agus maille ris trì mìle agus seachd ceud.

28 Agus Sadoc òganach ro threun, agus do thigh 'athar dà cheannard thar fhichead.

29 Agus do mhacaibh Bheniamin, luchd-dàimh Shaul, trì mìle: oir fathast *bha* chuid bu mhò dhiubh 'nam freiceadan air tigh Shaul.

30 Agus do mhacaibh Ephraim, ficead mìle agus ochd ceud, fir threuna, ainmeil ann an tigh an aithriche.

31 Agus do leth-thréibh Mhanaseh, ochd mìle deug, a dh'ainmicheadh air an ainmibh, gu teachd a dheanamh Dhaibhidh 'na rìgh.

¹ an ceann. Eabh.

² chuir air leth, dhealaich, thearbaidh iad féin.

³ cunnamh. Eir.

⁴ thuit do Mhanaseh. Eabh.

⁵ e.

⁶ chuideachadh.

⁷ cunntas cheann. Eabh.

32 Agus do mhacaibh Isachair, aig an robh aithne¹ air na h-aimsiribh, a thuig-sinn ciod bu chòir do Israel a dheanamh, bu dà cheud an ceannardan; agus am bràithrean uile aig an ordugh-sa.

33 Do Shebulun a' mheud 'sa chaidh mach gu cath, daoine teòma ann an cogadh, le uil' innealaibh cogaidh, deich agus dà fhichead mìle, a chuideachadh *Dhaibhidh*² gun cheilg 'nan cridhe.

34 Agus do Naphtali mìle ceannard, agus maille riu-san, le sgéith agus sleagh, seachd mìle deug thar fhichead.

35 Agus do na Danaich, teòma ann an cogadh, ochd mìle fichead agus sè ceud.

36 Agus do Aser, a' mheud 'sa rachadh a mach gu cath, teòma ann an cogadh, dà fhichead mìle.

37 Agus air an taobh eile do Iordan, do na Reubenich, agus do na Gadaich, agus do leth-thréibh Mhanaseh, le uil' innealaibh cogaidh chum catha, ceud agus fich-ead mìle.

38 Na fir chogaidh sin uile, d'am b' aithne dol an ordugh *blàir*, le cridhe iomlan thàinig iad gu Hebron a dheanamh *Dhaibhidh* 'na rìgh os ceann Israeil uile: agus mar an ceudna *bha* chuid eile do Israel gu léir do aon chridhe chum *Daibhidh* a dheanamh 'na rìgh.

39 Agus bha iad an sin maille ri *Daibhidh* trì làithean, ag itheadh agus ag òl: oir dh'ulluich am bràithrean air an son.

40 A bhàrr air sin, thug iadsan a bha fagus doibh, gu ruig Isachar, agus Sebulun, agus Naphtali, aran leo air asalaibh, agus air chàmhalaibh, agus air mhuileidibh, agus air dhamhaibh, biadh, min, mill fhège, agus bagaidean do fhion-dhearc-aibh tiormaichte, agus fion, agus oladh, agus daimh, agus caoraich ann am pailteas; oir *bha* aoibhneas ann an Israel.

CAIB. XIII.

1 *Thug Daibhidh an àire o Chiriat-earim.* 9 *Bhuail Dia Usa agus fhuair e bàs.* 13 *Dh'fhàgadh an àire aig tigh Obed-edoim.*

A GUS chuir *Daibhidh* a chomhairle rìusan a bha os ceann mhiltean agus cheud, ris gach uile cheannard.

2 Agus thubhairt *Daibhidh* ri uile chomhchruinneachadh Isracil, Ma *chithear* ion-chuidh dhiubh, agus *gur* ann o'n Tighearn ar Dia *a tha chùis*, cuireamaid fios a mach a dh'ionnsuidh ar bràithrean anns gach àit, a dh'fhàgadh ann an uile thìr Israeil, agus maille riu-san a dh'ionnsuidh nan sagart agus nan Lebbitheach *a tha* 'nam bailtibh le'm fearann comh-roinn³, iad g'an cruinneachadh féin thugainn⁴.

3 Agus thugamaid a rìs àire ar Dé d'ar n-ionnsuidh: oir cha d'fhiosraich sinn

dheth ann an làithibh Shauil.

4 Agus thubhairt an comhchruinneachadh gu léir, gu'm bu chòir sin a dheanamh⁵; oir bha an nì ceart ann an sùilbh an t-sluaigh uile.

5 Uime sin chruinnich *Daibhidh* Israel uile an ceann a chéile, o Shihor na h-Eiphit gu dol a steach Hamait, chum àire Dhé a thoirt o Chiriat-earim.

6 Agus chaidh *Daibhidh* suas, agus Israel uile do Bhaalat, *eadhon* gu Ciriati-earim a *bhuineadh* do Iudah, a thabhairt leo as a sin àire Dhé an Tighearn, a tha chòmhnuidh *eadar* na cheruban, air an gairmeas 'ainm.

7 Agus ghiùlain iad àire Dhé air feun⁶ nomha o thigh Abinadaib: agus dh'iomain Usa agus Ahio am feun.

8 Agus chluich *Daibhidh* agus Israel uile am fannais Dhé le 'n uile neart, eadhon le laoidhibh⁷, agus le clàrsaichibh, agus le saltairibh, agus le tiompanaibh, agus le ciombalaibh, agus le trompaidibh.

9 Agus an uair a thàinig iad gu h-urlarbualaidh Chidoin, chuir Usa a mach a làmh a ghabhail greim do'n àire, oir chuir na daimh air chrith i.

10 Agus las fearg an Tighearn an aghaidh Usa, agus bhuail se e, a chionn gu'n do chuir e a làmh ris an àire: agus dh'eug e 'n sin an làthair Dhé.

11 Agus bha doilgheas air *Daibhidh*⁸ a chionn gu'n d'rinn an Tighearn briseadh air Usa: agus dh'ainmich e 'n t-àite sin Peres-usa gu ruig an là 'n diugh.

12 Agus bha eagal air *Daibhidh* roimh Dhia air an là sin, agus thubhairt e, Cionnus a bheir mise àire Dhé dhachaidh a m' ionnsuidh?

13 Uime sin cha d'thug *Daibhidh* an àire d'a ionnsuidh féin gu baile *Dhaibhidh*; ach thug e a leth-taobh i gu tigh Obed-edoim a' Ghitich.

14 Agus dh'fhan àire Dhé maille ri teaghlach Obed-edoim 'na thigh trì mìosan. Agus bheannaich an Tighearn a tigh Obed-edoim, agus gach nì a bh'aige.

CAIB. XIV.

1 *Chuir Hiram fiodh agus clachairean a dh'ionnsuidh Daibhidh.* 4 *Ainmean a chloinne a rugadh dha ann an Ierusalem.* 8 *Bhuail Daibhidh na Philistich dà uair le h-àr mòr.*

A NIS chuir Hiram rìgh Thirus teachd-airean a dh'ionnsuidh *Daibhidh*, agus fiodh seudair, agus clachairean, agus saoir, a thogail tighe dha.

2 Agus dh'aithnich *Daibhidh* gu'n do dhaingnich an Tighearn e 'na rìgh air Israel, agus gu'n d'ardaicheadh gu mòr a rìoghachd air son a shluaigh Israeil.

3 Agus ghabh *Daibhidh* tuille bhan

¹ eòlas. ² a rachadh an ordugh blàir.

³ 'nam bailtibh agus 'nam mach-bhailtibh.

⁴ chugainn.

⁵ gu'n deanadh iad mar sin. ⁶ fèana, cairt.

⁷ air gach inneal-cùil do fhiadh ghiumhais. II. Sam. Caib. VI. r. 3. ⁸ bha *Daibhidh* fo mhi-ghean.

I. EACHDRAIDH, XIV. XV.

ann an Ierusalem; agus ghin Daibhidh fathast mic agus nigheana.

4 Agus is iad so aiumean a chloinne a bha aige ann an Ierusalem; Samua, agus Sobab, Natan, agus Solamh,

5 Agus Ibhar, agus Elisua, agus Elphalet,

6 Agus Nogah, agus Nepheg, agus Iaphia,

7 Agus Elisama, agus Beeliada, agus Eliphalet.

8 Agus an uair a chuala na Philistich gu'n d'ungadh Daibhidh 'na rìgh air Israel uile, thàinig na Philistich gu léir a nìosa dh'iarraidh Daibhidh: agus chuala Daibhidh sin, agus chaidh e mach 'nan aghaidh.

9 Agus thàinig na Philistich, agus sgaoil siad iad féin ann an gleann Rephaim.

10 Agus dh'fhiosraich Daibhidh do Dhia, ag ràdh, An téid mi suas an aghaidh nam Philisteach, agus an toir thu thairis iad a'm làimh? Agus thubhairt an Tighearna ris, Gabh suas, agus bheir mise thairis iad a'd' làimh.

11 Agus thàinig iad gu Baal-perasim; agus bhuail Daibhidh an sin iad. Agus thubhairt Daibhidh, Bhri Dia mo naimhdean o chéile le m' làimh-sa, mar bhriseadh uisgeachan: uime sin thug iad Baal-perasim mar ainm air an àite sin.

12 Agus dh'fhàg iad an diathan an sin, agus thug Daibhidh àithne, agus loisgeadh iad le teine.

13 Agus thàinig na Philistich a ris, agus sgaoil siad iad féin anns a' ghleann.

14 Uime sin dh'fhiosraich Daibhidh a ris do Dhia; agus thubhairt Dia ris, Na gabh suas 'nan déigh; tionndaidh air falbh uatha, agus thig orra fa chomhair craobh nan smeur.

15 Agus an uair a chluinneas tu fuaim siubhail ann am barraibh chraobh nan smeur, an sin théid thu mach chum catha; oir théid Dia a mach romhad, a bhualadh feachd nam Philisteach.

16 Agus rinn Daibhidh mar a dh'àithn Dia dha: agus bhuail iad¹ feachd nam Philisteach o Ghibeon eadhon gu Gaser.

17 Agus chaidh ainm² Dhaibhidh a mach do gach tìr, agus thug an Tighearna 'eagal-san air na h-uile chinneachaibh.

CAIB. XV.

1 *Dh'orduich Daibhidh do na Lebhitich an àire a thoirt suas do'n àit a dh'ulluich e air a son.*
29 *Rinn Michal tàir air 'na cridhe 'nuair chunn-
aic i e a' d'annsadh agus a' cluicheadh.*

A GUS rinn Daibhidh dha féin tighean ann am baile Dhaibhidh, agus dh'ulluich e àite do àire Dhé, agus shuidh e buth dhi.

2 An sin thubhairt Daibhidh; cha chòir

do neach air bith àire Dhé iomchar, ach do na Lebhitich: oir iadsan ròghnaich an Tighearna gu àire Dhé iomchar, agus gu frithealadh dha gu bràth.

3 Agus chruinnich Daibhidh Israel uile an ceann a chéile gu h-Ierusalem, gu àire an Tighearna a thoirt suas a dh'ionnsuidh a h-àite, a dh'ulluich e air a son.

4 Agus chruinnich Daibhidh mic Aaron agus na Lebhitich:

5 Do mhacaibh Chohait; Uriel an ceann, agus a bhràithre ceud agus fichead.

6 Do mhacaibh Mherari; Asaiah an ceann, agus a bhràithre dà cheud agus fichead.

7 Do mhacaibh Ghersoim; Joel an ceann, agus a bhràithre ceud agus deich thar fhichead.

8 Do mhacaibh Elisaphain; Semaiah an ceann, agus a bhràithre dà cheud.

9 Do mhacaibh Hebroin; Eliel an ceann, agus a bhràithre ceithir fichead.

10 Do mhacaibh Udsiel; Amiudab an ceann, agus a bhràithre ceud agus dà fhear dheug.

11 Agus ghairm Daibhidh air Sadoc agus Abiatar na sagairt, agus air na Lebhitich, air Uriel, Asaiah, agus Joel, Semaiah, agus Eliel, agus Aminadab,

12 Agus thubhairt e riu, Is sibhse cinn aithriche nan Lebhitheach: naomhaichibh sibh féin, sibhse agus bhur bràithre, chum gu'n toir sibh suas àire an Tighearna Dé Israeil, a dh'ionnsuidh an àit a dh'ulluich mise dhi:

13 Oir a chionn nach robh sibh a lathair roimhe, rinn an Tighearna ar Dia briseadh oirne, do bhrìgh nach d'iarr sinn e air mhodh dlìgheach.

14 Uime sin naomhaich na sagairt agus na Lebhitich iad féin, a thabhairt suas àire an Tighearna Dé Israeil.

15 Agus ghiùlain mic nan Lebhitheach àire Dhé air an guailnibh, leis na lunn-aibh³ orra, mar a dh'àithn Maois a réir focail an Tighearna.

16 Agus labhair Daibhidh ri h-uachd-aranaibh⁴ nan Lebhitheach, am bràithrean orduchadh bhi 'nan luchd-ciùil le h-innealaibh ciùil, saltairibh, agus clàrsaichibh, agus ciombalaibh, a' deanamh fuaim, a' togail suas a' ghutha le h-aobhicheas.

17 Uime sin dh'orduich na Lebhitich Heman mac Ioel; agus d'a bhràithribh, Asaph mac Bherechia; agus do mhacaibh Mherari am bràithribh, Etan mac Chusaiah:

18 Agus maille riu am bràithrean do'n dara ceum, Sechariah, Ben, agus Iaasiel, agus Semiramot, agus Iehiel, agus Uni, Eliab, agus Benaiah agus Maaseiah, agus

¹ e.

² alladh, cliù.

³ bataichibh.

⁴ prìomh-fhearaibh.

I. EACHDRAIDH, XV. XVI.

Matitiah, agus Eliphele, agus Micneiah, agus Obed-edom, agus Ieiel, na dorsairean.

19 Agus bha'n luchd-ciùil, Heman, Asaph, agus Etan, gu fuaimean a dheanamh le ciombalaibh umha;

20 Agus Sechariah, agus Asiel, agus Semiramot, agus Iehiel, agus Uni, agus Eliab, agus Maaseiah, agus Benaiah, le saltairibh air Alamot;

21 Agus Matitiah, agus Eliphele, agus Micneiah, agus Obed-edom, agus Ieiel, agus Asaph, le clàrsaichibh air Seminit a thoirt barrachd.

22 Agus bha Cenaniah uachdaran do na Lebhithich fa chomhair na laoidh: sheòl e mu thimchioll na laoidh, a chionn gu'n robh e eòlach.

23 Agus bha Berechiah agus Elcanah 'nan dorsairibh do'n àirce.

24 Agus bha Sebaniah, agus Iehosaphat, agus Nataneel, agus Amasai, agus Sechariah, agus Benaiah, agus Elieser na sagairt; a' séideadh leis na trompaidibh roimh àirce Dhé: agus bha Obed-edom agus Iehiah 'nan luchd-gleidhidh dorùis na h-àirce.

25 Mar sin chaidh Daibhidh agus seanairean Israeil, agus na ceannardan mhilt-ean, a thoirt suas àirce coimhcheangail an Tighearn a' tigh Obed-edom le h-aobhneas.

26 Agus an uair a chuidich Dia leis na Lebhithich a ghiùlain àirce coimhcheangail an Tighearna, dh'ìobair iad seachd tairbh òga agus seachd reitheachan.

27 Agus bha Daibhidh sgèadaichte le falluinn do anart grinn, agus na Lebhithich uile a bha giùlan na h-àirce, agus an luchd-ciùil, agus Chenaniah an t-àrd fhear-seinn am measg an luchd-ciùil: air Daibhidh mar an ceudna bha ephod an-airt.

28 Mar so thug Israel uile suas àirce coimhcheangail an Tighearna le h-iol-aich, agus le fuaimean a' bhuabhuill¹, agus le trompaidibh, agus le ciombalaibh a' deanamh coimhsheirm le saltairibh agus clàrsaichibh.

29 Agus an uair a thàinig àirce coimhcheangail an Tighearna steach do bhaile Dhaibhidh, bha Michail nighean Shuail ag amharc a mach air uinneig, agus chunn-aic i rìgh Daibhidh a' dèanamh agus a' cluicheadh; agus rinn i tàir air 'na cridhe.

CAIB. XVI.

1 Thug Daibhidh suas ìobairtean, agus bheannaich e an sluagh. 7 A laoidh mholaidh. 37 Dh'ord-uich e cuid do'n t-sluagh a fhrith-ealadh roimh an àirce.

A GUS thug iad a steach àirce Dhé, agus chuir iad i ann am meadhon a'

bhùtha a shuidhich Daibhidh air a son: agus thug iad seachad ìobairtean-loisgte agus ìobairtean-sith am fianuis Dhé.

2 Agus an uair a chuir Daibhidh crìoch air na h-ìobairtean-loisgte thoirt suas, agus na h-ìobairtean-sith, bheannaich e 'n sluagh an ainm an Tighearn.

3 Agus roinn e air gach aon do Israel, eadar fhear agus bhean, do gach aon builinn arain, agus mir maith feòla, agus copan fionna.

4 Agus dh'orduich e cuid do na Lebhithich a fhrith-ealadh roimh àirce an Tighearn, agus a chur air chuimhne, agus a thoirt buidheachais² agus cliù do'n Tighearna Dia Israeil:

5 Asaph an ceann³, agus 'na dhéigh-san Sechariah, an sin Ieiel, agus Semiramot, agus Iehiel, agus Matitiah, agus Eliab, agus Benaiah, agus Obed-edom; agus Ieiel le saltairibh agus clàrsaichibh; agus Asaph le ciombalaibh a' deanamh fuaime:

6 Benaiah mar an ceudna agus Iahasiel na sagairt, le trompaidibh a ghnàth roimh àirce coimhcheangail Dhé.

7 An sin air an là sin, thug Daibhidh seachad a' cheud uair an laoidh mholaidh so do'n Tighearn, ann an làimh Asaph agus a bhràithre:

8 Molaibh an Tighearna⁴, gairmibh air 'ainm, deanaibh a ghnìomharan aithnichte am measg nan sluagh.

9 Seinnibh dha-san, seinnibh sailm dhia, labhraibh air 'uile oibribh iongantach-sa.

10 Deanaibh-se uail⁵ na ainm naomh: deanadh cridhe na muinntir a tha 'g iarraidh an Tighearna gairdeachas.

11 Iarraibh an Tighearn agus a neart, iarraibh a ghnùis a ghnàth.

12 Cuimhnichibh 'oibran iongantach a rinn e, a chomharan⁶ agus breitheanas a bhéil;

13 O sibhse a shliochd Israeil 'òglaich-san, sibhse a chlann Iacoib, a dhaoine taghta-san.

14 Is e san Tighearn ar Dia-ne; air feadh na talmhainn uile tha a bhrèitheanas-san.

15 Cuimhnichibh an còmhuidh⁷ a choimhcheangal, am focal a dh'àithn e do mhìle ginealach;

16 A rinn e ri h-Abraham, agus a mhiannan do Isaac:

17 Agus dhaingnich e sin do Iacob mar lagh, do Israel mar choimhcheangal bith-bhuan,

18 Ag ràdh, Dhuitse bheir mi fearann Chanaain, crannchur blur n-oighreachd.

19 An uair nach robh iad⁸ ach ro thearc an àireamh, agus 'nan coigrich ann.

¹ na gall-truimp. ² molaibh. ³ am prìomh-fhear. ⁴ Thugaibh buidheachas, aidichibh do'n

Tighearna. ⁵ iongantasan. ⁶ gu bràth. Eabh. ⁷ sibh.

20 Agus a chaidh iad o chinneach gu cinneach, agus o rìoghachd gu sluagh eile;

21 Cha do leig e le duine sam bith euc-oir¹ a dheanamh orra; agus smachdaich e rìghrean air au son-sa:

22 *Ag ràdh*, Na beanaibh ri m' dhaoineibh ungta, agus air m'fhàidhibh na dean-aihbh cron sam bith.

23 Seinnibh do'n Tighearn, gach uile thir²; foillsichibh o là gu là a shlàinte.

24 Cuiribh a ghloir an céill am measg nan cinneach; 'oibre iongantach am measg nan uile shluagh:

25 Oir is mòr an Tighearn, agus ro airidh air cliù; agus is aobhar eagal esan os ceann nan uile dhée:

26 Oir is iodhoil³ uile dhée nan cinn-each⁴; ach is e'n Tighearn a rinn na nèamha.

27 *Tha* glòir agus mòralachd 'na làthair; neart agus subhachas 'na ionad-san.

28 Thugaibh do'n Tighearna, sibhse fhineacha nan sluagh; thugaibh do'n Tighearn urram agus neart.

29 Thugaibh do'n Tighearn an t-urram a's cubhaidh d'a ainm: thugaibh tabhartas leibh, agus thigibh 'na làthair; sleuchd-aihbh do'n Tighearn ann am maise na naomhachd.

30 Biodh eagal oirbh 'na fhianuis-san, gach uile thir: daingnichear an domhan leis, air chor as nach gluaisear e⁵.

31 Biodh na nèamhan ait, agus deanadh an talamh gairdeachas; agus abradh iad am measg nan cinneach, *Tha'n Tighearn a' rìoghachadh*.

32 Beucadh an fhairge, agus a làn; deanadh a' mhachair gairdeachas, agus gach *ni a ta* innte.

33 An sin seinnidh craobhan na coille gu h-àrd-ghuthach an làthair an Tighearn, a chionn gu bheil e teachd a thoirt breth air an talamh.

34 Molaibh an Tighearn⁶, oir *tha* e maith; oir gu bràth *maidridh* a thròcair.

35 Agus abraibh-se, Tèarunn sinn, O Dhé ar slàinte, agus cruinnich r'a chéile sinn, agus saor sinn o na cinnich, a chum gu'n toir sinn moladh do t'ainm naomhsa, agus gu'n dean sinn uail ann ad cliù.

36 Beannaichte gu robh an Tighearna Dia Israeil gu saoghal nan saoghal. Agus thubhairt an sluagh uile, Amen, agus chliùthaich iad an Tighearn.

37 Agus dh'fhàg e an sin fa chomhair àirce còimheangail an Tighearn, Asaph agus a bhràithrean, a fhrithealadh air beul-aobh na h-àirce an còmhnuidh, mar a

dh'iarradh obair gach là:

38 Agus Obed-edom, agus am bràithrean, ochd agus tri-fichead: Obed-edom mar an ceudna, mac Iedutuinn, agus Hosah, 'nan dorsairibh:

39 Agus Sadoc an sagart, agus a bhràithrean na sagairt, fa chomhair pàilliuin an Tighearn, anns an àit àrd a *bh'*ann an Gibeon,

40 A dh'ìobradh ìobairte-loisgte do'n Tighearn air altair na h-ìobairt-loisgte a ghnàth, sa' mhaduinn agus san fheasgar, agus a *dheanamh* a réir gach ni a ta sgrìobhta ann an lagh an Tighearn, a dh'àithn e do Israel:

41 Agus maille riu-san Heman agus Iedutun, agus a' chuid eile a thaghadh, a ghairmeadh⁷ air an ainmibh, a thoirt cliù⁸ do'n Tighearn, a chionn gu *bheil* a thròcair bith-bhuan:

42 Eadhon maille riu-san Heman agus Iedutun le trompaidibh, agus le ciombal-aihbh, a' deanamh fuaime⁹, agus le h-inn-ealaibh ciùil Dé: agus *bha* mic Iedutuinn 'nan dorsairibh.

43 Agus dh'fhalbh an sluagh uile, gach duine d'a thigh féin: agus phill Daibhidh a bheannachadh a thighe féin.

CAIB. XVII.

1 *Thoir misg Natan do Dhaibhidh tigh a thogail do Dha.* 11 *Fhuair Daibhidh gealladh air beannachdaibh àraidh 'na shliochd.* 16 *'Urnuigh agus a laoidh mholaidh.*

ANIS an uair a bha Daibhidh 'na shuidhe 'na thigh, thubhairt Daibhidh ri Natan am fàidh, Feuch, *tha* mise a'm' chòmhnuidh ann an tigh seudair¹⁰, ach *tha* àirc còimheangail an Tigh-earna fuidh chùirteinibh.

2 Agus thubhairt Natan ri Daibhidh, Dean gach ni a *tha* ann ad chridhe; oir *tha* Dia leat.

3 Agus air an oidhche sin féin thàinig focal Dhé gu Natan, ag ràdh,

4 Falbh agus innis do m'òglach Daibhidh, Mar so tha'n Tighearn, ag ràdh, Cha tog thusa dhomhsa tigh gu còmhnuidh ghabhail ann:

5 Oir cha do ghabh mise còmhnuidh ann an tigh o'n là air an d'thug mi nìos Israel as an Eiphit¹¹ agus an là'n diugh, ach bha mi o bhùth gu bùth, agus o phàilliuin gu pàilliuin.

6 Ge b'e taobh a chaidh mi le h-Israel uile, an do labhair mi focal ri h-aon do bhreitheamhaibh Israeil, (d'an d'àithn mi mo shluagh a bheathachadh,) ag ràdh, C'ar son nach do thog sibh dhomh tigh seudair?

¹ foirneart.

² a thalaimh.

³ faoin.

⁴ nan sluagh.

⁵ Faic Salm, XCVI. r. 9, 10.

⁶ Thugaibh buidhachas do'n Tighearn.

⁷ a dh'ainmicheadh, a shònracheadh.

⁸ buidheachais.

⁹ fa'n chomhair-san d'am

buineadh fuaime a dheanamh.

¹⁰ ceudair.

¹¹ 11. Samuel, Caib. VII. r. 6.

I. EACHDRAIDH, XVII. XVIII.

7 A nis uime sin mar so their thu ri m' sheirbhiseach Daibhidh, Mar so tha Tighearna nan sluagh ag ràdh, thug mi thu o chrò nan caorach, o leantuinn nan caorach, gu bhi d' cheannard air mo shluagh Israel:

8 Agus bha mi leat gach taobh a chaidh thu, agus ghearr mi as do naimhdean uile romhad, agus rinn mi dhuit ainm cosmhuil ri ainm nan daoine mòra a tha air an talamh.

9 Agus dh'orduich¹ mi àite do m' shluagh Israel, agus shuidhidh mi iad, agus gabhaidh iad còmhnuidh 'nan àit, agus cha ghluaisear iad tuilleadh; cha mhò a chlaoidheas clann na h-aingidheachd iad tuilleadh, mar an toiseach,

10 Agus o'n àm san d'àithn mi do bheirtheamhnaibh bhi os ceann mo shluaigh Israeil: agus ceannsaichidh mi do naimhdean uile. Mar an ceudna tha mi 'g innsadh dhuit gu'n tog an Tighearna tigh dhuit.

11 Agus an uair a chloimhlionar do làithean, agus gur éigin duit triall maille ri d'aithrichibh, togaidh mise suas do shliochd a'd' dhéigh, a bhios do d' mhac-aibh; agus daingnichidh mi a rìoghachd-san.

12 Togaidh esan tigh dhomh, agus daingnichidh mi a rìgh-chaithir gu bràth.

13 Bithidh mi a'm' athair dha, agus bithidh esan 'na mhac dhomhsa, agus cha toir mi mo thròcair air falbh uaith, mar a thug mi uaithsan a bha romhad-sa.

14 Agus suidhichidh mi e ann am thigh agus ann am rìoghachd gu bràth; agus bithidh a rìgh-chaithir daingean gu bràth.

15 A réir nam briathra so uile, agus a réir an taisbein so uile, mar sin labhair Natan ri Daibhidh.

16 An sin chaidh rìgh Daibhidh a stigh, agus shuidh e am fianuis an Tighearna, agus thubhairt e, Cò mise, O Thighearna Dhé, agus ciod e mo thigh, gu'n d'thug thu mi gu ruige so?

17 Agus bu bheag so a'd' shuilbh-sa, O Dhé, oir labhair thu mar an ceudna mu thigh do sheirbhishich rè aimsir fhada ri teachd, agus thug thu meas² orm a réir staid dnuine àrd-inbhich, a Thighearna Dhé.

18 Ciod tuilleadh is urrainn Daibhidh a ràdh³ riut, air son urrainn do sheirbhishich? ach is aithne dhuit do sheirbhiseach.

19 A Thighearna, is ann air son do sheirbhishich⁴, agus a réir do chridhe féin a rinn thu na nithe mòra so uile, a chum

gu'n deanadh tu na nithe mòra so gu léir aithnichte.

20 O Thighearna, cha 'n'eil neach an cosmhuil riutsa, agus cha 'n'eil Dia ann ach thusa, a réir gach ni a chuala sinn le'r cluasaidh.

21 Agus cia an cinneach air thalamh cosmhuil ri d' shluagh Israel, a chaidh Dia a shaoradh mar shluagh dha féin, a dheanamh ainme dhuit féin, a dheanamh nithe mòra agus uamhasach le cinnich fhògradh roimh do shluagh, a shaor thu as an Eiphit⁵?

22 Oir rinn thu do shluagh Israel 'nan sluagh dhuit féin gu bràth; agus tha thusa, a Thighearna, a'd' Dhia aca.

23 A nis ma ta, a Thighearna, am focal a labhair thu mu thimchioll do sheirbhishich, agus mu thimchioll a thighe, daingnichear e gu bràth, agus dean mar a thubhairt thu.

24 Biodh e eadhon air a dhaingneachadh, agus àrdaichear t'ainm-sa gu bràth, ag ràdh, Is e Tighearna nan sluagh Dia Israeil, is Dia do Israel: agus biodh tigh Daibhidh do sheirbhishich air a dhaingneachadh a'd' fhianuis.

25 Oir dh'fhoillsich⁶ thusa, O mo Dhia, do d' sheirbhiseach, gu'n togadh tu tigh dha: uime sin fhuair do sheirbhiseach 'na chridhe urnuigh a dheanamh a'd' làthair.

26 Agus a nis, a Thighearna, is tu féin Dia, agus gheall thu do d' sheirbhiseach am maitheas so.

27 A nis uime sin, gu ma toil leat tigh do sheirbhishich a bheannachadh, a chum gu'm bi e gu bràth a'd' fhianuis: oir an uair a bheannaicheas thusa, a Thighearna, beannaichte bithidh e gu bràth.

CAIB. XVII.

1 Cheannsaich Daibhidh na Philistich, agus thug e na Moabaich fo chàs. 3 Bhual e Hadadeser agus na Sirianaich. 9 Chuir Tou a mhac le tiodhlacaidh a dh'ionnsuidh Daibhidh. 13 Chuir Daibhidh freiceadain ann an Edom. 15 A luchd-dreuchd.

A GUS an déigh so bhual Daibhidh na Philistich, agus cheannsaich e iad; agus ghlac e Gat agus a bhailte beaga à làimh nam Philisteach.

2 Agus bhual e Moab; agus bha na Moabaich 'nan seirbhishich aig Daibhidh, agus thug iad tabhartais leo⁷.

3 Agus bhual Daibhidh Hadadeser⁸ rìgh Shobah gu ruig Hamat, an uair a chaidh e a dhaingneachadh a thighearna⁹ aig amhainn Euphrates.

4 Agus thug Daibhidh uaith mìle carbad, agus seachd mìle marcach, agus fichead mìle coisiche: agus ghearr Daibhidh

¹ orduichidh. ² dh'amhairc thu. Eabh.

³ Faic II. Samuel, Caib VII. r. 20.

⁴ air son t'fhocail. II. Samuel, Caib VII. r. 21.

⁵ II. Samuel, Caib VII. r. 23.

⁶ dh'innis.

⁷ dh'ic iad cùs dha.

⁸ Hadadeser.

⁹ a làimhe. Eabh.

speireachla *each* nan carbad uile, ach dh'fhàg e dhiubh *dìol* cheud carbad.

5 Agus an uair a thàinig Sirianaich Dhamascuis a chuideachadh le Hadareser rìgh Shobah, mharbh Daibhidh do na Sirianaich dà mhìle fichead fear.

6 An sin chuir Daibhidh freacadain¹ ann an Siria Dhamascuis; agus bha na Sirianaich 'nan seirbhisich aig Daibhidh, agus thug iad tabhartais leo. Agus ghlèidh an Tighearna Daibhidh gach taobh a chaidh e.

7 Agus ghabh Daibhidh na sgiathan òir a bh'air seirbhisich Hadareser, agus thug e iad gu h-Ierusalem.

8 Agus o Thibat agus o Chun, bailtibh Hadareser, thug Daibhidh ro mhòran umha, leis an d'rinn Solamh an fhairge umha, agus na puist, agus na soithichean umha.

9 Agus an uair a chuala Tou² rìgh Hamait gu'n do bhuail Daibhidh uile shluagh Hadareser ribh Shobah,

10 Chuir e Hadoram a mhac gu rìgh Daibhidh, a chur fàilte air, agus g'a bheannachadh, a chionn gu'n do chog e 'n aghaidh Hadareser, agus gu'n do bhuail se e; (oir bha Hadareser a' cogadh ri Tou;) agus leis-san gach nìle ghnè shoithichean òir, agus airgid, agus umha.

11 Iad sin mar an ceudna choisrig rìgh Daibhidh do'n Tighearna, maille ris an airgid agus an òr a thug e o na cinn-eachaibh so uile; o Edom, agus o Mhoab, agus o chloinn Amoin, agus o na Philistich, agus o Amalec.

12 Os bàrr, mharbh Abisai mac Sheruiah do na h-Edomaich ann an gleann an t-salainn ochd mìle deug.

13 Agus chuir e freacadain ann an Edom; agus bha na h-Edomaich uile 'nan seirbhisich aig Daibhidh. Agus ghlèidh an Tighearna Daibhidh gach taobh a chaidh e.

14 Agus rìghich Daibhidh air Israel uile; agus bha e a' cur an gnìomh breitheanais agus ceartais d'a shluagh uile.

15 Agus bha Ioab mac Sheruiah os ceann na h-armailte; agus Iehosaphat mac Ahiluid 'na sheanachaidh;

16 Agus Sadoc mac Ahituib, agus Ahimelech³ mac Abiatair 'nan sagartaibh; agus Sabhsa 'na sgrìobhaiche;

17 Agus Benaiah mac Iehoiada os ceann nan Cereteach, agus nam Peleteach. Agus b'iad mic Dhaibhidh bu mhò inbhe mu thimchioll an rìgh.

CAIB. XIX.

1 Bhuin Hanun gu h-aingidh ri teachdairibh Dhaibhidh. 6 Bhuail Ioab clann Amoin agus na Sirian-

aich a thàinig g'an còmhnaidh. 17 Cheannsaich Daibhidh na Sirianaich.

AGUS an dèigh so fhuair Nahas rìgh chloinn Amoin bàs, agus rìghich a mhac 'na àit.

2 Agus thubhairt Daibhidh, Nochdaidh⁴ mi caoimhneas do Hanun mac Nahais, a chionn gu'n do nochd 'athair-san caoimhneas dhomhsa. Uime sin chuir Daibhidh teachdairean gu comhfhurtachd⁵ a thoirt da mu thimchioll 'athar: agus thàinig seirbhisich Dhaibhidh do fhearann chloinn Amoin gu Hanun, chum comhfhurtachd a thabhairt da.

3 Ach thubhairt ceannardan chloinn Amoin ri Hanun, An saoil thusa gur ann a chum urrainn a thabhairt do t'athair a chuir Daibhidh a d' ionnsuidh luchd comhfhurtachd? nach ann a rannsachadh, agus a ghabhail beachd air an fhearann, agus g'a sgrìos⁶, a thàinig a sheirbhisich a d' ionnsuidh?

4 Uime sin ghlac Hanun seirbhisich Dhaibhidh, agus bhearr e iad, agus ghearr e an eudach sa' mheadhon, gu ruig am màsan; agus chuir e air falbh iad.

5 Agus chaidh daoine, agus dh'innis iad do Dhaibhidh mar a bhuineadh ris na fearaibh; agus chuir esan teachdairean 'nan coinneamh, a chionn gu'n robh nàire mhòr air na daoineibh: agus thubhairt an rìgh, Fanaibh ann an Iericho gus am fàs bhuir feusag, agus an sin pillibh.

6 Agus an uair a chunnaic clann Amoin gu'n d'rinn siad iad fèin gràineil⁷ do Dhaibhidh, chuir Hanun agus clann Amoin mìle tàlann airgid a thuarasdalachadh charbad agus marc-shluaigh dhoibh á Mesopotamia, agus á Siria-maachah, agus á Sobah.

7 Agus thuarasdalaich iad dà mhìle dheug thar fhichead fear, agus carbadan⁸, agus rìgh Mhaachah agus a shluagh; agus thàinig iadsan agus champaich iad fa chomhair Mhedeba. Agus chruinnich clann Amoin iad fèin an ceann a chèile as am bailtibh, agus thàinig iad chum catha.

8 Agus an uair a chuala Daibhidh sin, chuir e mach Ioab, agus uile fheachd⁹ nan daoine treuna.

9 Agus thàinig clann Amoin a mach, agus chuir iad an cath an ordugh fa chomhair geata a' bhaile: agus bha na rìghrean a thàinig, leo fèin anns a' mhach-air.

10 Agus an uair a chunnaic Ioab gu'n robh aghaidh a' chatha ris air a bheulaobh, agus air a chùlaobh, thagh e mach cuid do uile dhaoineibh taghta Israeil, agus chuir e ann an ordugh catha iad an aghaidh uan Sirianach.

¹ II. Samuel, Caib. VIII. r. 6.

² Toi. ³ Abimelech.

⁴ Feuchaidh. ⁵ sòlas.

⁶ g'a chur bun os ceann. II. Samuel, Caib. X. r. 3.

⁷ fuathach.

⁸ dà mhìle dheug thar fhichead carbad.

⁹ armailt, shluagh.

11 Agus a' chuid eile do'n t-sluagh thug e thairis do làimh Abisai a bhràthar, agus chuir iadsan *iad féin* an ordugh an aghaidh chloinn Amoin. ¹

12 Agus thubhairt e, Ma bhios na Sirianaich nì's treise na mise, an sin cuidichidh tusa leamsa: ach ma bhios clann Amoin nì's treise na thusa, an sin cuidichidh mise leatsa.

13 Bi misneachail, agus biomaid gaisgeil air son ar sluaigh, agus air son bhaitean ar Dé: agus deanadh an Tighearn an *nì a ta* maith 'na shùilibh.

14 Agus thàinig Ioab am fagus, agus an sluagh a *bha* maille ris, an aghaidh nan Sirianach gu cath; agus theich iad roimhe.

15 Agus an uair a chunnaic clann Amoin gu'n do theich na Sirianaich, theich iadsan mar an ceudna roimh Abisai a bhràthair, agus chaidh iad a steach do'n bhaile. An sin thàinig Ioab gu h-Ierusalem.

16 Agus an uair a chunnaic na Sirianaich gu'n do bhuailleadh iad roimh Israel, chuir iad teachdairean uatha, agus thug iad a mach na Sirianaich a *bh'* air an taobh thall do'n amhainn; agus *chaidh* Sophach ceannard armailte Hadareseir rompa.

17 Agus an uair a dh'innseadh sin do Dhaibhidh, chruinnich e Israel uile, agus chaidh e thar Jordan, agus thàinig e orra, agus chuir e 'n cath an ordugh 'nan aghaidh. Agus an uair a chuir Daibhidh an cath an ordugh an aghaidh uan Sirianach, chog iad ris.

18 Agus theich na Sirianaich roimh Israel; agus mharbh Daibhidh do na Sirianaich *fir* sheachd mìle carbad, agus dà fhichead mìle coisiche, agus mharbh e Sophach ceannard-na h-armailte.

19 Agus an uair a chunnaic seirbhisich Hadareseir gu'n do bhuailleadh iad roimh Israel, rinn iad sìth ri Daibhidh, agus rinn iad seirbhis da: agus cha chuidicheadh na Sirianaich le cloinn Amoin tuilleadh.

CAIB. XX.

1 *Theannaich Ioab Rabah*: 2 *Chreach Daibhidh am baile, agus bhuin e gu cruaidh r'a shluagh.* 4 *Mharbhadh triuir fhamhàirean.*

AGUS aig teachd mu'n cuairt na bliadhna, mu'n àm anns an téid rìghrean a nach *gu cogadh*, tharruing Ioab a mach neart an airm, agus chuir e fàs dùthaich chloinn Amoin, agus thàinig e agus theannaich e Rabah; (ach dh'fhan Daibhidh ann an Ierusalem;) agus bhuail Ioab Rabah, agus sgrios se e.

2 Agus thug Daibhidh crùn an rìgh bhàrr a chinn, agus fhuair e cudthrom tàlaimn òir ann, agus *bha* clacha luachmhor ann; agus chuireadh e air ceann Dhaibhidh; agus thug e mach ro mhòran creiche as a' bhaile.

¹ cliathaibh.

3 Agus thug e mach an sluagh a *bha* ann, agus ghearr e *iad* le sàbhaibh, agus le h-innealaibh-bualaidh¹ iaruinn, agus le tuaghaibh: agus mar so bhuin Daibhidh ri uile bhailtibh chloinn Amoin. Agus phill Daibhidh agus an sluagh uile gu h-Ierusalem.

4 Agus 'na dhéigh so dh'éirich cogadh ann an Geser ris na Philistich: an sin bhuail Sibeichai an t-Husatach Sipai a *bha* do shliochd an fhamhair; agus cheannsaicheadh iad.

5 Agus bha ris cogadh ris na Philistich; agus bhuail Elhanan mac Iair Lahmi, bràthair Gholiath a' Ghithic, aig an robh crann a shleagha mar gharmin² fighead-air.

6 Agus bha fathast cogadh ann an Gat, far an robh fear do mheudachd mhòir, agus sè meoir aige *air gach làimh*, agus sè *air gach cois*, ceithir thar fhichead an àireamh: agus rugadh esan mar an ceudna do'n fhamhair.

7 Ach an uair a thug e dùbhlán do Israel, mharbh Ionatan mac Shimea, bràthair Dhaibhidh, e.

8 Rugadh iad sin do'n fhamhair ann an Gat; agus thuit iad le làimh Dhaibhidh, agus le làimh a sheirbhiseach.

CAIB. XXI.

1 *Chuir Daibhidh Ioab gu Israel àireamh*: 7 *Mhithaitinn an nì so ri Dia*: 8 *Dh'aicidh Daibhidh a pheacadh.* 10 *Do na trì nithibh a chuir Dia fa chomhair ròghnaich e a' phlàigh.* 16 *Rinn Daibhidh eadar-ghuidhe air son an t-sluaigh.* 18 *Cheannaich e urlar-bualaidh Ornain.*

AGUS sheas Satan suas an aghaidh gu Israel àireamh.

2 Agus thubhairt Daibhidh ri Ioab, agus ri uachdaranaibh an t-sluaigh, Rachaidh, àirmhibh Israel o Bheer-seba eadhon gu Dan; agus thugaibh an àireamh a m' ionnsuidh-sa, chum gu'm bi fios agam air.

3 Agus fhreagair Ioab, Gu'n deanadh an Tighearn a shluagh féin ceud uair nì's lìonmhoire na *tha* iad. Ach, mo thighearn a rìgh, uach iad seirbhisich mo thighearn iad uile? C'ar son ma seadh a tha mo thighearn ag iarraidh an nì so? C'ar son a bhios e 'na aobhar cionta do Israel?

4 Gidheadh, buadhach focal an rìgh an aghaidh Ioab: uime sin dh'imich Ioab, agus chaidh e air feadh Israeil uile, agus thàinig e gu h-Ierusalem.

5 Agus thug Ioabuibhir àireimh an t-sluaigh do Dhaibhidh: agus bha ann do Israel uile, mìle do mhiltibh agus ceud mìle fear a tharruing claidheamh; agus do Iudah, ceithir cheud agus deich agus trì fichead mìle fear a tharruing claidheamh.

6 Ach Lebhi agus Benjamin cha d'àir-

² shail.

eamh e 'nam measg; oir bha focal an rìgh gràineil do Ioab.

7 Agus mhi-thaitinn an ni so ri Dia; uime sin bhuail e Israel.

8 Agus thubhairt Daibhidh ri Dia, Pheacaich mi gu mòr, a chionn gu'n d'rinn mi an ni so; ach a nis, guidheam ort, thoir air falbh cionta do sheirbhisich; oir rinn mi gu ro amaideach.

9 Agus labhair an Tighearna ri Gad, fear-seallaidh Dhaibhidh, ag ràdh,

10 Falbh agus labhair ri Daibhidh, ag ràdh, Mar so tha'n Tighearn, ag ràdh, Tri *nithe* tha mi cur fa d' chomhair; ròghnaich dhuit féin aon diubh, chum gu'n dean mi dhuit e.

11 Agus thàinig Gad a dh'ionnsuidh Daibhidh, agus thubhairt e ris, Mar so tha'n Tighearn ag ràdh, Gabh do rogh-ainn.

12 Aon chuid tri bliadhna gortaidh; no bhi tri miosan a' teicheadh¹ roimh do naimhdbhl, agus claidheamh do naimh-dean a' breith ort; no tri làithean do chladheamh an Tighearn, eadhon do'n phlàigh, anns an fhearann, agus aingeal an Tighearn a' sgrios air feadh uile chrìochan Israeil: a nis uime sin faic cìod a fhreagairas mi dhàsan a chuir uailh mi.

13 Agus thubhairt Daibhidh ri Gad, *Tha* mi ann an teinn mhòir: tuiteam a nis ann an làimh an Tighearn, oir is ro lionmhor a thròcairean; ach ann an làimh duine na tuiteam.

14 Agus chuir an Tighearna plàigh air Israel: agus thuit do Israel deich agus tri fichead mìle fear.

15 Agus chuir Dia aingeal gu h-Ierusalem, chum a sgrios: agus an uair a bha e a' sgrios, dh'amhairc an Tighearn, agus ghabh e aithreachas a thaobh an uile, agus thubhairt e ris an aingeal a bha ri sgrios, *Is* leòr e; cum a nis air do làimh. Agus sheas aingeal an Tighearna làimh ri urlar-bualaidh Ornain² an Iebusaich.

16 Agus thog Daibhidh suas a shùilean agus chunnaic e aingeal an Tighearn 'na sheasamh eadar talamh agus nèamh, agus a chladheamh rùisgte 'na làimh, sìnte mach os ceann Ierusalem: agus thuit Daibhidh agus seanairean *Israeil*, còmh-daichte le saic-eudach, sìos air an aghaidh.

17 Agus thubhairt Daibhidh ri Dia, Nach mise a dh'àithn an sluagh àireamh? Is mise féin a pheacaich, agus a rinn gu ro olc; ach na caoraich so, cìod a rinn iadsan? Bitheadh do làmh, guidheam ort, a Thighearna mo Dhia, a'm' aghaidh-sa, agus an aghaidh tighe m'athar; ach an aghaidh do shluaigh na *bitheadh i*, gu plàigh a chur orra.

18 An sin dh'àithn aingeal an Tighearna do Ghad a ràdh ri Daibhidh, gu'n rachadh Daibhidh suas a thogail altarach do'n Tighearn ann an urlar-bualaidh Ornain an Iebusaich.

19 Agus chaidh Daibhidh suas air focal Ghaid, a labhair e ann an ainm an Tighearn.

20 Agus thionndaidh Ornan air ais, agus chunnaic e an t-aingeal³; agus dh'fhòlaich a cheathrar mhac, a bha maille ris, iad féin. A nis bha Ornan a' bualadh cruithneachd.

21 Agus an uair a thàinig Daibhidh a dh'ionnsuidh Ornain, dh'amhairc Ornan agus chunnaic e Daibhidh, agus chaidh e mach as an urlar-bhualaidh, agus chom se e féin do Dhaibhidh le 'aghaidh gu làr.

22 An sin thubhairt Daibhidh ri Ornan, Thoir dhomhsa àit an urlar-bhualaidh so, a chum gu'n tog mi altair ann do'n Tighearn: air a làn luach⁴ bheir thu dhomh e, a chum gu'n caisgear a' phlàigh o'n t-sluagh.

23 Agus thubhairt Ornan ri Daibhidh, Gabh thugad⁵ e, agus deanadh mo thigh-carn an rìgh an *ni a ta* maith 'na shùilbh: feuch, tha mi toirt a' bhuair *dhuit* chum ìobairtean-loisgte, agus nan innealan-bualaidh chum connaidh, agus a' chruithneachd chum tabhartais-bidh; sin uile tha mi toirt *duit*.

24 Agus thubhairt rìgh Daibhidh ri Ornan, Ni h-eadh, ach gu deimhin ceannaichidh mi *iad* air an làn luach; oir cha ghabh mi an *ni a's* leatsa *gu thoirt* do'n Tighearn, agus cha toir mi suas ìobairtean-loisgte gun chostus.

25 Uime sin thug Daibhidh do Ornan air an àite, sè ceud secel òir air thomhas.

26 Agus thog Daibhidh an sin altair do'n Tighearn, agus dh'ìobair e ìobairte-loisgte agus ìobairte-sith, agus ghairm e air an Tighearn; agus fhreagair se e le teine o nèamh air altair na h-ìobairt-loisgte.

27 Agus dh'àithn an Tighearna do'n aingeal; agus chuir e suas a chladheamh a ris 'na thruaill.

28 San àm sin, an uair a chunnaic Daibhidh gu'n do fhreagair an Tighearn e ann an urlar-bhualaidh Ornain an Iebusaich, dh'ìobair e an sin:

29 Oir bha pàillun an Tighearn a rinn Maoissan fhasach, agus altair na h-ìobairt-loisgte san àm sin anns an àit àrd ann an Gibeon.

30 Ach cha b'urrainn Daibhidh dol 'na làthair, a dh'fhiosrachadh do Dhia; oir bha e fuidh eagal air son claidheimh aingil an Tighearna.

¹ air do chlaoidh. Faic II. Samuel, Caib. XXIV. r. 13.
² *Araunah*. II. Samuel, Caib. XXIV. r. 16.

³ an rìgh.
⁵ chugad.

⁴ làn airgid. Eabh.

CAIB. XXII.

1 *Dh'ulluich Daibhidh gu pailt air son tìghe an Tighearn. 6 Theagaisg e do Sholamh a dh'leas-danas, agus geallama Dhé d'a thaobh. 17 Thug e àithne do nachdaranaibh Israeil iad a chuideachadh le Solamh.*

AGUS thubhairt Daibhidh, *Is e so' tigh an Tighearna Dé, agus is i so' altair na h-iobairt-loisgte do Israel.*

2 Agus dh'àithn Daibhidh na coigrich a bha ann am fearann Israeil a chruinneachadh an ceann a chéile; agus chuir e clachairean a ghearradh clach snaidhte a thogail tìghe Dhé.

3 Agus sholair Daibhidh iarum ann am pailteas chum tairngean do chomhlaichibh² nan geata, agus a chum nan dlùth-adh; agus umha ann am pailteas, gun tomhas;

4 Agus fiodh seudair gun àireamh, oir thug na Sidonaich agus muintir Thiruis fiodh seudair am pailteas a dh'ionnsuidh Dhaibhidh.

5 Agus thubhairt Daibhidh, Tha Solamh mo mhac òg agus maoth; agus an tigh a tha ri thogail do'n Tighearn, *is còir a dheanamh mòr agus àrd*³, a chum gu'm bi e ainmeil agus 'na aobhar naill air feadh gach uile thir: uime sin ulluichidh mise fa chomhair. Agus dh'ulluich Daibhidh gu pailt roimh a bhàs.

6 Agus ghairm e air Solamh a mhac, agus dh'àithn e dha tigh a thogail do'n Tighearna Dia Israeil.

7 Agus thubhairt Daibhidh ri Solamh, A mhic, air mo shonsa dheth, bha ann am aire tigh a thogail do ainm an Tighearna mo Dhé:

8 Ach thàinig focal an Tighearn a m'ionnsuidh, ag ràdh, Dhòirt thu mòran fola, agus rinn thu coganna mòra: cha tog thu tigh do m'ainmsa, a chionn gu'n do dhòirt thu mòran fola air an talamh a m'fhianuis.

9 Feuch, beirear mac dhuit: bithidh esan 'na dhuine foistinneach, agus bheir mise fois dha o'naimhdbh uile mu'n cuairt; oir bithidh Solamh mar ainm air, agus sìth agus suaimhneas bheir mise do Israel r'a linn-san.

10 Togaidh esan tigh do m'ainm-sa; agus bithidh e 'na mhac dhomh, agus bithidh mise a'm' athair dha-san; agus daingnichidh mi rìgh-chaitir a rìoghachd os ceann Israeil gu bràth.

11 A nis uime sin, a mhic, gu'n robh an Tighearna maille riut, chum gu'n soirbhich thu, agus gu'n tog thu tigh an Tighearna do Dhé, mar a labhair e mu d' thimchioll.

12 A mhàin gu'n tugadh an Tighearna

dhuit gliocas agus tuigse, agus gu'n tugadh e dhuit àithne a thaobh Israeil, chum gu'n gléidh thu lagh an Tighearna do Dhé.

13 An sin soirbhichidh tu ma bheir thu 'n aire gu'n coimhlion thu na reachdan agus na breitheanas a dh'àithn an Tighearna do Mhaois a thaobh Israeil: bi làidir, agus biodh deadh mhisneach agad; na gabh eagal agus na bi fo uamhann.

14 A nis, feuch, ann am theantachd⁴ dh'ulluich mise fa chomhairtìghe an Tighearna ceud mìle tàlann òir, agus mìle do mhiltibh tàlann airgid, agus do umha agus do iarum gun tomhas: (oir a ta ro phailteas ann:) fiodh mar an ceudna agus clachan dh'ulluich mi; ach feudaidh tusa cur riu.

15 Mar an ceudna tha luchd-oibre am pailteas agad, snaidheadairean agus luchd saothreach cloiche agus fiodla, agus gach uile ghnè dhaoine tùrail⁵ fa chomhair gach gnè oibre.

16 Air an òr, an airgiod, agus an umha, agus an iarum, cha 'n eil àireamh. Eirich agus dean romhad, agus gu robh an Tighearna maille riut.

17 Dh'àithn Daibhidh mar an ceudna do uachdaranaibh Israeil gu léir, iad a chuideachadh le Solamh a mhac, *ag ràdh,*

18 Nach 'eil an Tighearna bhur Dia maille ribh? agus nach d'thug e dhuibh suaimhneas⁶ air gach taobh? oir thug e luchd-àiteachaidh na tire a'm' làimh-sa; agus tha'n tìr air a cìosnachadh roimh an Tighearn, agus roimh a shluagh.

19 A nis uime sin socraichibh blur cridhe agus blur n-anam a dh'iarraidh an Tighearna bhur Dé: òirbhe agus togaibh ionad naomh an Tighearna Dé, chum gu'n toir sibh steach àire coimhecheangail an Tighearn, agus soithichean naomha Dhé, do'n tigh a tha r'a thogail do ainm an Tighearna.

CAIB. XXIII.

1 Rinn Daibhidh, 'na shean aois, Solamh 'na rìgh. 5 Àireamh nan Lebhithich. 7 Teaghlach nan Gersonuch. 12 Mic Chohait. 21 Mic Mhe-rari. 24 Dreuchd nan Lebhithich.

ANIS an uair a bha Daibhidh sean agus làn do làithibh, rinn e Solamh a mhac 'na rìgh air Israel.

2 Agus chruinnich e 'n ceann a chéile ceannardan⁷ Israeil, uile, agus na sagairt agus na Lebhithich.

3 Agus dh'àirmheadh na Lebhithich o aois dheich bliadhna fichead agus os a cheann: agus b'e an àireamh air an cinn, duin' air dhuine, ochd mìle deug thar fhichead.

¹ an so bithidh.

² dhorsaibh.

³ dheanamh ro mhòr.

⁴ buochdainn, àmhghar.

⁵ glie seòlta.

⁶ fois.

⁷ uachdarain.

4 Dhiubh sin *bha* ceithir mìle fhichead gu obair tìghe an Tighearn a chur air a h-aghaidh, agus sè mìle 'nan luchd-riaghlaidh agus 'nam breitheamhnaibh :

5 Agus ceithir mìle 'nan dorsairibh; agus ceithir mìle a' cliùthachadh an Tighearna leis na h-innealaibh a rinn *Daibhidh*¹ gu cliùthachadh.

6 Agus roinn Daibhidh iad 'nan roinnibh² eadar mhacaibh Lebhi, *eadhon* Ghersoin, Chohait, agus Mherari.

7 Do na Gersonaich; Laadan agus Simeil.

8 Mic Laadain; Iehiel an ceann, agus Setam, agus Joel, triuir.

9 [Mic Shimeil; Selomit, agus Hasiel, agus Haran, triuir.] *B'*iad sin cinn aithriche Laadain.

10 Agus mic Shimeil; Iahat, Sidsa³, agus Ieus, agus Beriah. *B'*iad sin mic Shimeil, ceathrar.

11 Agus b'e Iahat an ceann, agus Sidsa an dara fear: ach cha robh mòran mhac aig Ieus agus Beriah; uime sin *bha* iad ann an aon àireamh, a réir tìghe an aithriche.

12 Mic Chohait; Amram, Itsar, Hebron, agus Udsiel, ceathrar.

13 Mic Amram; Aaron agus Maois; agus dhealaicheadh Aaron chum gu'n naomhaicheadh e na nithe ro naomha, e féin agus a mhic gu bràth, gu'n loisgeadh e tùis an làthair an Tighearna, gu'm frith-eileadh e dha, agus gu'm beannaicheadh e a'ium gu bràth.

14 A nis *mu thimchioll* Mhaois òglaich Dhé, bha a mhic air an ainmeachadh do thréibh Lebhi.

15 Mic Mhaois; Gerson agus Elieser.

16 Mic Ghersoin; Sebul an ceann.

17 Agus b'iad mic Elieseir, Rehabiah an ceann. Agus cha robh aig Elieser mic sam bith eile; ach *bha* mic Rehabiah ro lionmhor.

18 Mic Itsair; Selomit an ceann.

19 Mic Hebroin: Ieriah an ceud *fhear*⁴, Amariah an dara, Iahasiel an treas, agus Iecameam an ceathramh.

20 Mic Udsiel; Micah an ceud *fhear*, agus Iesiah an dara.

21 Mic Mherari; Machli agus Musi: mic Mhachli; Eleasar agus Cis.

22 Agus fhuair Eleasar bàs, agus cha robh mic aige, ach a mhàin nigheanan: agus ghabh am bràithre mic Chis iad.

23 Mic Mhusi; Machli, agus Eder, agus Ieremot, triuir.

24 *B'*iad sin mic Lebhi, a réir tìghe an aithriche, cinn nan aithriche, mar a dh'àirmheadh iad le àireamh an ainmean air an cinn, a rinn obair seirbhis tìghe an Tighearn, o aois fhichead bliadhna agus os a cheann.

25 Oir thubhairt Daibhidh, Tha'n Tigh-earna Dia Israeil air toirt fois d'a shluagh, agus gabhaidh iad còmhuidh ann an Ierusalem gu bràth.

26 Agus mar an ceudna a thaobh nan Lebhitheach, cha *bhi* 'm pàillium aca *ni's mò* r'a iomchar, agus uile shoithichean a sheirbhis.

27 Oir le briathraibh deireannach Dhaibhidh dh'àirmheadh na Lebhitich o aois fhichead bliadhna agus os a cheann:

28 A chionn gu'm *b'e* an dreuchd-san bhi fuidh làimh mhac Aaroin, fa chomhair seirbhis tìghe an Tighearn, anns na cùirtibh, agus anns na seòmraichibh, agus ann an glanadh nan uile nithe naomha, agus ann an obair seirbhis tìghe Dhé;

29 Araon fa chomhair an arain thais-beanta, agus fa chomhair na mine mine chum tabhartais-bìdh, agus fa chomhair nam breacagan neo-ghoirtichte, agus fa chomhair nan nithe a dheasaichear san aghann agus a ròistear, agus fa chomhair gach uile ghnè tomhais agus meud;

30 Agus a chum seasamh gach maduinn a thoirt buidheachais agus cliù do'n Tigh-earn, agus mar an ceudna mu fheasgar;

31 Agus a chum gach iobair-loisgte thoirt suas do'n Tighearn, air na sàbaidibh, agus air na gealaichibh nuadh⁵, agus air na féilibh suidhichte, ann an àireamh, a réir na riaghailt a dh'àithneadh dhoibh a ghnàth an làthair an Tighearn.

32 Agus a chum gu'n gleidheadh iad cùram pàillium a' choimhthionail, agus cùram an ionaid naomh, agus cùram mhac Aaroin am bràithrean, ann an seirbhis tìghe an Tighearna.

CAIB. XXIV.

1 *Roinneadh mic Aaroin le crannchur 'nan ceithir buidhneibh thar fhichead.* 20 *Roinneadh a' chuid eile do mhacaibh Lebhi le crannchur.*

A *UGUS is* iad so roinnean mhac Aaroin. Mic Aaroin; Nadab, agus Abihu, Eleasar, agus Itamar.

2 Ach fhuair Nadab agus Abihu bàs roimh an athair, agus cha robh clann aca: uime sin fhrith-eil Eleasar agus Itamar ann an dreuchd an t-sagairt.

3 Agus roinn Daibhidh iad, araon Sadoc do mhacaibh Eleasair, agus Ahimelech do mhacaibh Itamar, a réir an àireimh 'nan seirbhis.

4 Agus fhuaradh⁶ mic Eleasair ni's lion-mhoire 'nam prìomh-dhaoineibh⁷ na mic Itamair; agus *mar so* roinneadh iad: Do mhacaibh Eleasair *bha* sè prìomh-dhaoine⁸ deug, a réir tìghe an aithriche; agus do mhacaibh Itamair ochdnar, a réir tìghe an aithriche.

¹ a rinn mise, (arsa Daibhidh.) ² nam buidhneibh mu'n seach. ³ Sina. ⁴ an ceann. Eabh.

⁵ nomha. ⁶ fhuaras. ⁷ nan ceannaibh dhaoine. Eabh. ⁸ ceanna.

I. EACHDRAIDH, XXIV. XXV.

5 Agus roinneadh iad le crannchur, iad so leo sin; oir bha uachdarain an ionaid naoimh, agus uachdarain nam breitheamh¹, do mhacaibh Eleasair agus do mhacaibh Itamair.

6 Agus sgrìobh Semaiah mac Netaneil an sgrìobhaiche, *duine* do na Lebhithich iad, am fianuis an rìgh, agus nan uachdaran, agus Shadoic an t-sagairt, agus Ahimelech mhic Abiatair, agus cheann aithriche nan sagart agus nan Lebhith-each; aon phrìomh-thigh² air a ghabhail air son Eleasair, agus aon air a ghabhail air son Itamair.

7 Agus thàinig a' cheud chrann a mach do Iehoiarib, an dara do Iedaiah,

8 An treas do Harim, an ceathramh do Sheorim,

9 An cuigeadh do Mhalchiaiah, an sèathadh do Mhiamin,

10 An seachdamh do Hacots, an t-ochdamh do Abiah,

11 An naothadh do Iesua, an deicheamh do Shlecaniah,

12 An t-aon deug do Eliasib, an dara crann deug do Iacim,

13 An treas deug do Chupah, an ceathramh deug do Ieseheab,

14 An cuigeadh deug do Bhilgah, an sèathadh deug do Imer,

15 An seachdamh deug do Hedsir, an t-ochdamh deug do Aphones,

16 An naothadh deug do Phetahiah, am ficheadamh do Iehesecel,

17 An t-aon thar fhichead do Ièchin, an dara thar fhichead do Ghamul,

18 An treas thar fhichead do Dhelaiah, an ceathramh thar fhichead do Mhaasiah.

19 B'e sin an àireamh a réir an seirbhis chum teachd a steach do thigh an Tigh-eam, a réir an gnàtha, fuidh làimh Aaroin an athar, mar a dh'àithn an Tighearna Dia Israeil dha.

20 Agus a thaobh a' chuid eile do mhacaibh Lebhi: do mhacaibh Amraim; Subael³: do mhacaibh Shubaeil; Iehdeiah.

21 A thaobh Rehabiah: do mhacaibh Rehabiah, an ceud fhear⁴ Isiah.

22 Do na h-Itsaraich; Selomot: do mhacaibh Shelomoit; Iahat.

23 Agus mic Hebroin; Ieriah an ceud fhear, Amariah an dara, Iahasiel an treas, Iecamean an ceathramh.

24 Do mhacaibh Udsieil; Michah: do mhacaibh Mhichah; Samir.

25 B'e bràthair Mhichah Isiah: do mhacaibh Isiah; Sechariah.

26 B'iad mic Mherari, Machli agus Musi: [mic Iasiah; Beno.

27 Mic Mherari le Iasiah: Beno, agus

Soham, agus Sachur, agus Ibrì.]

28 O Mhachli *thàinig* Eleasair, aig nach robh mic sam bith.

29 A thaobh Chis: mic Chis; Ierahmeel.

30 Agus mic Mhusi; Machli, agus Eder, agus Ierimot. B'iad sin mic nan Lebhith-each, a réir tighe an aithriche.

31 Agus chuir iad sin mar an ceudna crannchur fa chomhair am bràithre mhac Aaroin, am fianuis Dhaibhidh an rìgh, agus Shadoic, agus Ahimelech, agus cheann aithriche nan sagart agus nan Lebhith-each, *eadhon* cinn nan aithriche fa-chomhair am bràithrean a b'òige.

CAIB. XXV.

1 *Aireamh agus dreachd an luchd-frithealaidh.*

8 Roinneadh iad le crannchur 'nan ceithir buidhneibh thar fhichead.

OS bàrr, chuir Daibhidh agus ceannardan an t-sluaigh air leth fa chomhair na seirbhis do mhacaibh Asaiph, agus Hemain, agus Iedutuin, *daoine* a dheanadh fàidheadaireachd⁵, le clàrsaichibh, le saltairibh, agus le ciombalaibh. Agus b'e àireamh an luchd-frithealaidh, a réir an seirbhis:

2 Do mhacaibh Asaiph: Sachur, agus Ioseph, agus Netaniah, agus Asarelah, mic Asaiph, fuidh làimh Asaiph, a bha ri fàidheadaireachd a réir àithne an rìgh.

3 O Iedutun: mic Iedutuin; Gedaliah, agus Seri, agus Iesiah, *agus Simeì, agus Hasabiah*, agus Matitiah, seàthnar fuidh làimh an athar Iedutuin, a bha ri fàidheadaireachd le clàrsaich a thoirt buidheachais agus cliu do'n Tighearna.

4 O Heman: mic Hemain; Buciah, Mataniah, Udsiel, Sebul, agus Ierimot, Hananiah, Hanani, Eliatah, Gidalti, agus Romamti-eser, Iosbecasah, Maloti, Hotir, Mahasiot:

5 B'iad sin uile mic Hemain, fhir seallaidh an rìgh, ann am briathraibh Dhé, chum an adharc a thogail suas. Agus thug Dia do Heman ceithir mic dheug agus tri nigheana.

6 Bha iad so uile fuidh làimh an athar, fa chomhair laoidhean tighe Dhé, le ciombalaibh, saltairibh, agus clàrsaichibh, chum seirbhis tighe Dhé, fuidh làimh an rìgh, Asaiph, Hemain, agus Iedutuin⁶.

7 Agus b'e an àireamh maille r'am bràithrean, a fhuair iunnsachadh air laoidhibh an Tighearna, *eadhon* iadsan uile a bha tùrail, dà cheud ceithir fichead agus ochdnar.

8 Agus chuir iad crannchur, buidheann an aghaidh *buidhne*, am beag co maith ris a' mhòr, an t-oid-iunnsaich co mhaith ris an fhoghlumach.

¹ uachdarain Dhé. Eabh. ² tigh athar. Eabh.

³ Sebul. Caib. XXXIII. r. 16.

⁴ am ceann. Eabh.

⁵ a sheinneadh laoidhean fàistneachd.

⁶ a réir àithne an rìgh do Asaph, Iedutun, agus Heman.

9 Agus thàinig an ceud crannchur a mach air Asaph, do Ioseph ; an dara do Ghedaliah, dha féin agus d'a bhràithribh, agus d'a mhacaibh, dà fhear dheug :

10 An treas do Shachur, d'a mhacaibh agus d'a bhràithribh, dà fhear dheug :

11 An ceathramh do Isri¹, d'a mhacaibh agus d'a bhràithribh, dà fhear dheug :

12 An cùigeadh do Netaniah, d'a mhacaibh agus d'a bhràithribh, dà fhear dheug :

13 An sèathadh do Bhuchiah, d'a mhacaibh agus d'a bhràithribh, dà fhear dheug :

14 An seachdamh do Iesarelah², d'a mhacaibh agus d'a bhràithribh, dà fhear dheug :

15 An t-ochdamh do Iesaiiah, d'a mhacaibh agus d'a bhràithribh, dà fhear dheug :

16 An naothadh do Mhataniah, d'a mhacaibh agus d'a bhràithribh, dà fhear dheug :

17 An deicheamh do Shimei, d'a mhacaibh agus d'a bhràithribh, dà fhear dheug :

18 An t-aon deug do Asareel³, d'a mhacaibh agus d'a bhràithribh, dà fhear dheug :

19 An dara crannchur deug do Hasabiah, d'a mhacaibh agus d'a bhràithribh, dà fhear dheug :

20 An treas deug do Shubael, d'a mhacaibh agus d'a bhràithribh, dà fhear dheug :

21 An ceathramh deug do Mhatitiah, d'a mhacaibh agus d'a bhràithribh, dà fhear dheug :

22 An cùigeadh deug do Ierimot, d'a mhacaibh agus d'a bhràithribh, dà fhear dheug :

23 An sèathadh deug do Hananiah, d'a mhacaibh agus d'a bhràithribh, dà fhear dheug :

24 An seachdamh deug do Iosbecasah, d'a mhacaibh agus d'a bhràithribh, dà fhear dheug :

25 An t-ochdamh deug do Hanani, d'a mhacaibh agus d'a bhràithribh, dà fhear dheug :

26 An naothadh deug do Mhaloti, d'a mhacaibh agus d'a bhràithribh, dà fhear dheug :

27 An ficheadamh do Eliatah, d'a mhacaibh agus d'a bhràithribh, dà fhear dheug :

28 An t-aon thar fhichead do Hotir, d'a mhacaibh agus d'a bhràithribh, dà fhear dheug :

29 An dara thar fhichead do Ghidalti, d'a mhacaibh agus d'a bhràithribh, dà fhear dheug :

30 An treas thar fhichead do Mhasiot, d'a mhacaibh agus d'a bhràithribh, dà fhear dheug :

31 An ceathramh thar fhichead do Romamti-eser, d'a mhacaibh agus d'a bhràithribh, dà fhear dheug :

1 Roinnean nan dorsair. 13 Thilgeadh croinn air son nan geatacha. 28 Ghabh na Lebhithich cùram ionmhasa tìghe Dhé, agus ionmhasa nan nithe naomha.

ATHAOBH roinnean nan dorsair: do na Corhaich, Meseleemiah mac Chore, do mhacaibh Asaph.

2 Agus mic Mheseleemiah ; Sechariah an ceud-ghin, Iediael an dara, Sebadiah an treas, Iatniel an ceathramh,

3 Elam an cùigeadh, Iehohanan an sèathadh, Elioenai an seachdamh.

4 Agus mic Obed-edoim ; Semaiah an ceud-ghin, Iehosabad an dara, loah an treas, agus Sacar an ceathramh, agus Netaneel an cùigeadh,

5 Amiel an sèathadh, Isachar an seachdamh, Peultai an t-ochdamh: oir bheannaich Dia e.

6 Agus do Shemaiah a mhac rugadh mic, a bha riaghladh tìghe an athar: oir bu daoine treuna iad.

7 Mic Shemaiah ; Otni, agus Rephael, agus Obed, Elsabad: agus b'iad am bràithre, daoine gaisgeil⁴, Elihu agus Semachiah.

8 Iad sin uile do mhacaibh Obed-edoim: iad féin, agus am mic, agus am bràithrean, daoine comasach an neart fa chomhair na seirbhis, 'nan trì fichead agus a dhà, o Obed-edom.

9 Agus bha aig Meseleemiah mic agus bràithrean, daoine gaisgeil, ochd fir dheug.

10 Agus bha aig Hosah, do chloinn Mhe-rari, mic ; Simri an ceann: (oir ged nach b'e an ceud-ghin, gidheadh rim 'athair e 'na cheann :

11 Hilciai an dara fear, Tebaliah an treas, Sechariah an ceathramh: uile mhic agus bhràithrean Hosah tri deug.

12 Dhiubh sin bha roinnean nan dorsair, eadhon do na prìomh-dhaoineibh a bha ri faire fa chomhair am bràithrean, gu frith-ealadh ann an tìgh an Tighearn.

13 Agus thilg iad croinn, am beag co mhaith ris a' mhòr, a réir tìghe an aithriche, air son gach geata.

14 Agus thuit an crannchur a làimh na h-àird' an ear air Selemiah: agus thilg iad croinn air son a mhic Sechariah, (comhairliche glic,) agus thàinig a crannchur-san a mach mu thuath.

15 Do Obed-edom mu dheas, agus d'a mhacaibh tìgh Asupim⁵.

16 Do Shupim agus do Hosah a làimh na h-àird' an iar, maille ris a' gheata Salechet, làimh ri cruaidh-rathad⁶ na h-uchdaich, faire fa chomhair faire.

17 Air an taobh an car bha sèathnar Lebhitheach, air an taobh mu thuath

¹ Serì, r. 3.

² Asarelah, r. 2.

³ Udsiel, r. 4.

⁴ Mic gaisge. Eabh.

⁵ tìgh an tionail.

⁶ causey. Sasg.

ceathrar gach là, air an taobh mu dheas ceathrar gach là, agus air taobh Asupim dithis agus dithis.

18 Aig Parbar a làimh na h-àird' an iar, ceathrar aig a' chruaidh-rathad, agus dì-this aig Parbar.

19 Is iad sin roinnean nan dorsaìr do mhacaibh Chore, agus do mhacaibh Mhe-rari.

20 Agus do na Lebhithich, *bha* Abiah os ceann ionmhasan tighe Dhé, agus os ceann ionmhasan nan nithe naomha.

21 *A thaobh* mhac Laadain: mic a' Gher-sonaich Laadain, prìomh-aithriche, *eadhon* o Laadan an Gersonach *bha* Iehieli.

22 Mic Iehieli; Setam, agus Ioel a bhràthair, *a bha* os ceann ionmhasan tighe an Tighearna.

23 Do na Hamramaich, do na h-Idsaraich, do na Hebronaich, agus do na h-Udsielich.

24 Agus *bha* Sebul mac Ghersoim, mhic Mhaois, 'na àrd riaghlair air na h-ionmhasaibh.

25 Agus a bhràithre le Elieser; Rehabiah a mhac, agus Iesaiah a mhac-san, agus Ioram a mhac-san, agus Sichri a mhac-san, agus Selomit a mhac-san.

26 *B'e* Selomit so agus a bhràithrean, *a bha* os ceann uile ionmhasa nan nithe cois-riche, a choisrig Daibhidh an rìgh, agus cinn nan aithriche, agus na ceannarda mhiltean agus cheud, agus ceannardan an t-slàigh.

27 As na cathaibh agus as na creachaibh choisrig iad *bhartais* a chàradh tighe an Tighearn.

28 Agus gach uile *ni* a choisrig Samuel am fear-seallaidh, agus Saul mac Chis, agus Abner mac Neir, agus Ioab mac Sheruah; agus ge b'e neach a choisrig *ni air bith*, *bha sin* fo làimh Shelomit agus a bhràithrean.

29 Do na h-Idsaraich, *bha* Chenaniah agus a mhic fa chomhair nan gnothuichean o'n leth muigh os ceann Israeil, 'nan luchd-riaghlaidh' agus 'nam breitheamhaibh.

30 Do na Hebronaich, *bha* Hasabiah agus a bhràithrean, daoine gaisgil, mìle agus seachd ceud fear, 'nan luchd-riaghlaidh air Israel air an taobh so do Iordan a làimh na h-àirde 'n iar, ann an uile gnothuichean an Tighearn, agus ann an seirbhis an rìgh.

31 Do na Hebronaich, *b'e* Ieriah ceann nan Hebronach a réir ghinealach aithriche. Anns an dà fhicheadamh bliadhna do rìoghachadh Dhaibhidh dh'iarradh iad, agus fhuair dh'nam measg daoine treuna ann an Iaser Ghilead.

32 Agus a bhràithrean, daoine gaisgil,

dà mhìle agus seachd ceud, cinn nan teaghlach: agus rinn Daibhidh iad 'nan riaghladairibh os ceann nan Reubeneach, agus nan Gadach, agus leth-thrèibh Mhanaseli, anns gach ni a bhuineadh do Dhia, agus ann an gnothuichean an rìgh.

CAIB. XXVII.

1 *An dà cheannard dheug a fhrithheil do'n rìgh mìos air mìos air feadh uile mhìos na bliadhna.* 16 *Ceannardan threubh Israeil.* 25 *Luchd-dreuchd Dhaibhidh.*

ANIS *bha* clann Israeil, a réir an àir-eimh, *eadhon* cinn nan aithriche², agus ua ceannarda mhiltean agus cheud, agus an luchd-riaghlaidh, a' frithealadh do'n rìgh anns gach cùis *a bhuineadh* do na roinnibh, a *bha* teachd a steach agus a' dol a mach mìos air mìos, air feadh uile mhìos na bliadhna: anns gach roinn *bha* ceithir mìle fichead fear.

2 Os ceann na ceud roinne, fa chomhair a' cheud mhìos, *bha* Iasobeam mac Shab-diel: agus 'na roinn-san *bha* ceithir mìle fichead.

3 Do chloinn Pheres *bha* ceann uile cheannardan an t-slàigh fa chomhair a' cheud mhìos.

4 Agus os ceann roinn an dara mìos *bha* Dodai an t-Ahohach, agus air a roinn-san *b'e* Miclot am fear-riaghlaidh: agus 'na roinn-san mar an ceudna *bha* ceithir mìle fichead.

5 *B'e* treas ceannard an t-slàigh, fa chomhair an treas mìos Benaiah mac Iehoiada, àrd shagairt: agus 'na roinn-san *bha* ceithir mìle fichead.

6 So am Benaiah ud a *bha* treun am measg an deich thar fhichead, agus os ceann an deich thar fhichead: agus 'na roinn-san *bha* Amisabad a mhac.

7 *B'e* 'n ceathramh ceannard, fa chomhair a' cheathramh mìos, Asahel bràthair Ioaib, agus Sebadiach a mhac 'na dhéigh: agus 'na roinn-san *bha* ceithir mìle fichead.

8 *B'e* 'n cùigeadh ceannard, fa chomhair a' chùigeadh mìos, Samhut an t-Israhach: agus 'na roinn-san *bha* ceithir mìle fichead.

9 *B'e* 'n sèathadh ceannard, fa chomhair an t-sèathadh mìos, Ira mac Iceis, an Tecothach: agus 'na roinn-san *bha* ceithir mìle fichead.

10 *B'e* 'n seachdamh ceannard, fa chomhair an t-seachdamh mìos, Heles am Pelonach do chloinn Ephraim; agus 'na roinn-san *bha* ceithir mìle fichead.

11 *B'e* 'n t-ochdamh ceannard, fa chomhair an ochdamh mìos, Sibcai an t-Husatach do na Sarhaich: agus 'na roinn-san *bha* ceithir mìle fichead.

12 *B'e* 'n naothadh ceannard, fa chomhair an naothadh mìos, Abicer an t-Anet-

¹ *luchd-dreuchd.*² *cinn nan teaghlach, na prìomh-aithriche.*

otach do chloinn Iamin: agus 'na roimh-san *bha* ceithir mìle fheadh.

13 *B'e* 'n deicheamh *ceannard*, fa chomhair an deicheamh mìos, Maharai an Netophatach do na Sarhaich: agus 'na roimh-san *bha* ceithir mìle fheadh.

14 *B'e* 'n t-aon *cheannard* deug, fa chomhair an aon mhìos deug, Benaiah am Piratonach do chloinn Ephraim: agus 'na roimh-san *bha* ceithir mìle fheadh.

15 *B'e* 'n dara *ceannard* deug, fa chomhair an dara mìos deug, Heldai an Netophatach o Otneil: agus 'na roimh-san *bha* ceithir mìle fheadh.

16 Os bàrr, os ceann thruabh Israeil: *b'e* ceannard nan Reubeneach, Elieser mac Shichri: nan Simeonach, Sephatiah mac Mhaachah:

17 Nan Lebhitheach, Hasabiah mac Chemueil: nan Aaronach, Sadoc:

18 *Ceannard* Iudah, Elihu¹, aon do bhràithribh Dhaibhidh; *ceannard* Isachair, Omri mac Mhichael:

19 Shebuluin, Ismaiah mac Obadiah: *ceannard* Naphtali, Ierimot mac Asriel:

20 *Ceannard* chloinn Ephraim, Hosea mac Asasiah: leth-thrèibh Mhanaseh, Ioel mac Phedaiah.

21 *Ceannard* leth-thrèibh Mhanaseh ann an Gilead, Ido mac Shechariah: Bheniamin, Iasiel mac Abneir;

22 Dhain, Asareel mac Ierohaim. *B'iad* sin ceannarda thruabh Israeil.

23 Ach cha do ghabh Daibhidh an àireamh o aois fhichead bliadhna agus fuidh; a chionn gu'n dubhairt an Tighearn, gu'n deanadh e Israel lionmhor mar reulta nan nèamh.

24 Thòisich Ioab mac Sheruiah air àireamh, ach cha do chrìochnaich e, a chionn gu'n robh air a shon so fearg an aghaidh Israeil; cha mhò chuireadh sìos an ubhir² ann an àireamh³ eachdraidh rìgh Daibhidh.

25 Agus os ceann iomhasan an rìgh *bha* Asmabhet mac Adieil: agus os ceann nan tigh-tasgaidh anns na machairibh, anns na mòr-bhailtibh, agus anns na frith-bhailtibh, agus anns na tùraibh⁴, *bha* Iehonatan mac Udsiah.

26 Agus os an ceann-san a rinn obair na macharach, ann an treabhadh an fhearainn, *bha* Esri mac Cheluibh.

27 Agus os ceann nam fion-lios *bha* Simeon an Ramatach: os ceann toraidh nam fion-lios, fa chomhair nam fion-thaisgeach, *bha* Sabdi an Siphmitheach.

28 Agus os ceann nan craobh oladh agus nan craobh sicemoir a *bha* sna còmhnard-aibh iosal, *bha* Baal-hanan an Gedereach: agus os ceann nan taisgeach oladh *bha* Ioas.

29 Agus os ceann a' chruidh a *bha* air

feurach ann an Saron *bha* Sitrai an Saronach: agus os ceann a' chruidh anns na gleanntaibh *bha* Saphat mac Adlai.

30 Os ceann nan càmhal mar an ceudna *bha* Obil an t-Ismaeleach: agus os ceann nan asal *bha* Iehdeiah an Meronotach.

31 Agus os ceann nan treud *bha* Iasias an t-Hagereach. *B'iad* sin uile luchd-riaghlaidh na maoin bu le rìgh Daibhidh.

32 Mar an ceudna *bha* Ionatan, bràthair-athar Dhaibhidh 'na chomhairleach, 'na dhuine glic, agus 'na sgrìobhaiche: agus *bha* Iehiel mac Hachmoni maille ri mic an rìgh.

33 Agus *b'e* Ahitophel comhairleach an rìgh, agus Husai an t-Architheach companach⁵ an rìgh.

34 Agus an dèigh Ahitophel *bha* Iehoiada mac Bhenaiiah, agus Abiatar. Agus *b'e* Ioab ceannard armait an rìgh.

CAIB. XXVIII.

1 Chruinnich Daibhidh uile *cheannardan* Israeil gu Ierusalem, agus thug e earail doibh àitheantan an Tighearn a ghleidheadh. 9 Dh'orduich e do Sholamh tigh a thogail do Dhia. 11 Thug e dha samhladh an tighe, agus òr agus airgid air son na h-oibre.

A GUS chruinnich Daibhidh gu h-Ierusalem uile *cheannardan* Israeil, ceannarda nan treubh, agus ceannarda nan roinn⁶ a bha frithealadh do'n rìgh, agus na ceannarda mlùltean, agus na ceannarda cheud, agus an luchd-riaghlaidh os ceann uile mlaoin agus sprèidh an rìgh agus a mhac, leis an luchd-dreuchd, agus na daoineibh cumhachdach, agus na daoineibh gaisgeil uile.

2 An sin sheas Daibhidh an rìgh suas air a chosaibh, agus thubhairt e, Eisdibh riumsa, mo bhràithrean, agus mo shluagh: *Bha* e agamsa a'm' chridhe tigh-còmhnuidh a thogail do àire còimhcheangail an Tighearn, agus do stòl-chos ar Dé-ne, agus dh'ulluich mi fa chomhair na h-oibre:

3 Ach thubhairt Dia rium, Cha tog thu tigh do m'ainm-sa, a chionn gu'n robh thu a'd' fhear-cogaidh, agus gu'n do dhòirt thu fuil.

4 Gidheadh ròghnaich an Tighearna Dia Israeil mi roimh uile thigh m'athar, gu bhi a'm' rìgh air Israel gu bràth: oir ròghnaich e Iudah mar riaghlair, agus á tigh Iudah, tigh m'athar-sa, agus am measg mhac m'athar bu toil leis mise a dheanamh a'm' rìgh os ceann Israeil uile.

5 Agus do m' mhacaibh uile, (oir thug an Tighearna mòran mhac dhomh,) ròghnaich e Solamh mo mhac gu suidhe air rìgh-chaithir rioghachd an Tighearn os ceann Israeil.

6 Agus thubhairt e rium, Togaidh So-

¹ Eliab.

² àireamh.

³ a réir àireimh.

⁴ caisteachaibh. ⁵ caidreach, caraid. ⁶ nam buidheann.

lamh do mhac mo thigh-sa agus mo lùch-airtean; oir thagh mi e gu bhi 'na mhac agam, agus bithidh mise a'm' athair aige-san.

7 Os bàrr, daingnichidh mi a ròghachd gu bràth, ma bhios esan seasmhach a choimhlionadh m' àitheantan agus mo bhreitheanais, mar air an là'n diugh.

8 A nis uime sin *guidheam oirbh* ann an sealladh Israeil uile, comhchruinneachaidh an Tighearn, agus ann an éisdeachd ar Dé-ne, gleidhibh agus iarraidh uile àitheantan an Tighearna bhur Dé: chum gu sealbhaich sibh an fearann maith so, agus gu fàg sibh e mar oighreachd d'ur cloinn, 'nur déigh gu bràth.

9 Agus thusa a Sholaimh, a mhic, biodh aithne agad air Dia t'athar, agus dean seirbhis da le cridhe iomlan, agus le inn-tinn thoilich: oir tha'n Tighearn a' rannsachadh nan uile chridhe, agus a' tuigsinn uile dhealbhadh nan smuain: ma dh'iarraist' esan, gheibhear e leat; ach ma thréigas tu e, tilgidh e uaidh thu gu bràth.

10 Thoir an aire a nis, oir thagh an Tighearn thu gu tigh a thogail do'n ionad naomh; bi làidir agus dean e.

11 An sin thug Daibhidh do Sholamh a mhac samhladh an sgàth-thigh, agus a thighean, agus 'ionadan-ionmhais, agus a sheòmraichean uachdarach, agus a sheòmraichean an leth stigh, agus àite na caithir-thròcair.

12 Agus samhladh nan uile nithe a bha aige 'na inntinn¹, a thaobh lùchairtean tìghe an Tighearn, agus a thaobh nan uile sheòmraiche mu'n cuairt, a thaobh ionadan-ionmhais tìghe Dhé, agus a thaobh ionada-taisgidh nan nithe coisrigte.

13 Mar an ceudna thaobh roinnean nan sagart agus nan Lebbitheach, agus a thaobh uile oibre seirbhis tìghe an Tighearn, agus a thaobh nan uile shoithiche seirbhis ann an tigh an Tighearn.

14 A thaobh òir air chudthrom chum *nithe* òir, chum uile inneala gach uile ghnè sheirbhis; a thaobh *airgid* chum uile innealan airgid air chudthrom, chum uile inneala gach uile ghnè sheirbhis:

15 Eadhon an cudthrom chum nan coimhleir òir, agus a chum an lòchran òir, air chudthrom chum gach coimhleir agus a lòchranan: agus a chum nan coimhleir airgid air chudthrom, chum a' choimhleir agus a lòchranan, a réir feuma gach coimhleir.

16 Agus òr air chudthrom chum bhord an arain thaisbeanta, chum gach bùird, agus airgid chum nam bord airgid:

17 Mar an ceudna òr glan chum nan greimichean feòla, agus nan cuach, agus nan copan: agus a chum nan soitheach-

ionnlaid òir, òr air chudthrom fa chomhair gach soitheach-ionnlaid; agus *airgid* air chudthrom fa chomhair gach soitheach-ionnlaid airgid:

18 Agus a chum altair na tùise òr fìorghlan air chudthrom; agus òr fa chomhair samhlaidh carbaid nan cherub, a sgaoil a mach an *sgiathan*, agus a chòmhdach àire coimhcheangail an Tighearna.

19 So uile, *arsa Daibhidh*, thug an Tighearn orm a' tuigsinn ann an sgrìobhadh le a làimh orm, *eadhon* uile oibre an t-samhlaidh so.

20 Agus thubhairt Daibhidh ri Solamh a mhac, Bi làidir agus gabh misneach, agus dean e: na biodh eagal ort, agus na bi fo uamhas, oir bithidh an Tighearna Dia, mo Dhia-sa, leat; cha 'n fhàilnich e thu, cha mhò a thréigas e thu, gus an crìochnaich thu an obair uile fa chomhair seirbhis tìghe an Tighearn.

21 Agus, fench, roinnean nan sagart agus nan Lebbitheach *maille riut* chum uile sheirbhis tìghe Dhé, agus maille riut a chum gach uile ghnè oibre, gach duine toileach tùrail fa chomhair gach uile ghnè sheirbhis; agus na ceannardan agus an sluagh gu h-iomlan freagarrach do d' àith-eantaibh uile.

CAIB. XXIX.

6 Thug uachdarain thruabh Israeil tabhartais uatha gu toileach fa chomhair tìghe Dhé. 10 Urnuigh Daibhidh. 20 Bheannaich an sluagh an Tighearn, agus rinn iad Solamh an dara uair 'na rìgh. 26 Rìoghachadh agus bàs Daibhidh.

A Gus thubhairt Daibhidh an rìgh ris a' chomhchruinneach uile, Tha Solamh mo mhac d'an d'rinn Dia a mhàin roghainn, òg agus maoth, agus *tha* 'n obair mòr: oir cha'n ann air son duine ach air son an Tighearna Dé *tha* an lùchairt.

2 A nis le m'uile neart dh'ulluich mise fa chomhair tìghe mo Dhé, an t-òr chum *nithe* do òr, agus an t-airgid chum *nithe* do airgid, agus an t-umha chum *nithe* do umha, agus an t-iarunn chum *nithe* do iarunn, agus am fiodh chum *nithe* do fhiodh; clachan onics, agus clachan r'an cur, clachan lonrach agus do iomadh dath, agus gach uile ghnè chlach luachmhor, agus clacha marmoir am pailteas.

3 Os bàrr, a chionn gu'n do shocraich mi m'aigne air tigh mo Dhé, tha agam do m' sheilbh àraidh féin, do òr agus do airgid a thug mi seachad do thigh mo Dhé, a bhàrrair na dh'ulluich mi uile fa chomhair an tìghe naoimh,

4 Tri mìle tàlann òir, do òr na h-Ophir, agus seachd mìle tàlann do airgid fìorghlan, a chòmhdachadh bhallachan an tìghe²:

5 An t-òr fa chomhair *nithe* do òr, agus

¹ o'n Spicrad.

² nan tìghean.

an t-airgiod fa chomhair *nithe* do airgiod, agus fa chomhair gach uile ghnè oibre a *nithear* le làmhaidh luchd-ceirde. Agus cò a tha toileach air a seirbhis a chois-reagadh an diugh do'n Tighearn?

6 An sin thug cinn nan aithriche¹ agus uachdarain thruibh Israeil, agus na ceannarda mhìltean agus cheud, maille ris an luchd-riaghlaidh os ceann oibre an rìgh, tabhartais uatha gu toileach.

7 Agus thug iad seachad fa chomhair seirbhis tighe Dhé, do òr cùig mìle tàlann agus deich mìle darcon, agus do airgiod deich mìle tàlann, agus do umha ochd mìle deug tàlann, agus ceud mìle tàlann iarunn.

8 Agus ge b'e aig an d'fhuaradh clacha *luachmhòr*, thug iad seachad *iad* do ion-mhas tighe an Tighearn, le làimh Iehieil a' Ghersonaich.

9 Agus rinn an sluagh gairdeachas a chionn gu'n d'thug iad uatha gu toileach, a chionn le cridhe iomlan gu'n d'thug iad tabhartas uatha gu toileach do'n Tighearn: agus rinn Daibhidh an rìgh mar an ceudna gairdeachas le aoibhneas mòr.

10 Air an aobhar sin bheannaich Daibhidh an Tighearn ann am fianais a' choimh-chruinnich uile: agus thubhairt Daibhidh, Gu ma beannaicht' thu, a Thighearna Dhia Israeil ar n-athar, gu saoghal nan saoghal.

11 *Is* leatsa, O Thighearnu, a' mhòrachd, agus an cumhachd, agus a' ghloir, agus a' bhuaidh, agus a' mhòralachd; oir is leat na h-uile a ta air nèamh agus air talamh: *is* leat an rìoghachd, O Thighearn, agus tha thu air t'ardachadh mar cheann thar na h-uile.

12 Uaitse *tha teachd* araon saobhbheas agus urram, agus *tha* thu a' rìoghachadh os ceann gach uile, agus ann ad làimh *tha* cumhachd agus neart; agus ann ad làimh *tha e neach* a dheanamh mòr, agus neart a thoirt do gach uile.

13 A nis uime sin, ar Dia-ne, tha sinn a' toirt buidheachais duit, agus a' cliùthachadh t'ainm urramaich.

14 Ach cò mise, agus ciod iad mo shluagh, gu'm biodh e 'nar comas tabhartais a thoirt seachad cho toileach air an dòigh so? oir *is* ann uaitse *tha* na h-uile nithe, agus is ann do d' chuid féin a thug sinn duit:

15 Oir *is* coigrich siune a'd' fhianuis agus luchd-cuairt, mar ar n-aithrichean uile; mar fhaileas *tha* ar làithean air thalamh, agus cha 'n'eil buanas ann.

16 O Thighearn ar Dia, *tha* 'm pailteas so uile a dh'ulluich sinne a thogail tighe dhuit fa chomhair t'ainm naoimh a'

teachd o d' làimh féin, agus *is* leat féin e gu léir.

17 Tha fios agam mar an ceudna, mo Dhia, gu'n dearbh thusa an cridhe, agus gu bheil tlachd agad ann an treibhdhìreas. Do m' thaobh-sa, ann an treibhdhìreas mo chridhe thug mi gu toileach uam mar thabhartas na nithe so uile: agus a nis chunnaic mi le h-aoibhneas do shluagh, a tha 'n so a làthair, a' tòirt seachad gu toileach an tabhartais dhuitse.

18 O Thighearna Dhia Abrahaim, Isaic, agus Israeil ar n-aithriche, gléidh so gu bràth ann am breithneachadh smuaintè cridhe do shluagh, agus ulluich an cridhe dhuit féin;

19 Agus thoir do Sholamh mo mhac cridhe iomlan, a ghleidheadh t'aitheantan, do theisteis, agus do reachdan, agus a dheanamh nan *nithe* so uile, agus a thogail na luchairt fa chomhair an d'ulluich mise.

20 Agus thubhairt Daibhidh ris a' chomhchruinneachadh uile, A nis beannaichibh an Tighearna bhur Dia. Agus bheannaich an comhchruinneachadh gu léir an Tighearna Dia an aithriche, agus chrom iad sìos an cinn, agus thug iad urram do'n Tighearn agus do'n rìgh.

21 Agus dh'ìobair iad iobairtean do'n Tighearn, agus thug iad seachad iobairte-loisgte do'n Tighearn air an là inàireach an dèigh an là sin, eadhon mìle tarbh, mìle reithe, agus mìle uan, le'n tabhartais-dìbhe, agus iobairtean am pailteas air son Israeil uile;

22 Agus dh'ìth agus dh'òl iad an làthair an Tighearn air an là sin le mòr shubhachas; agus rinn iad Solamh mac Daibhidh 'na rìgh an dara uair, agus dh'ung iad e do'n Tighearna 'na àrd uachdaran, agus Sadoc 'na shagart.

23 Agus shuidh Solamh ann an cailhir rìoghail an Tighearna mar rìgh an àite Daibhidh 'athar, agus shoirbhich leis, agus bha Israel uile ùmhal dha.

24 Agus strìochd na h-uachdarain uile, agus na daoine cumhachdach, agus mar an ceudna uile mliic rìgh Daibhidh, iad féin do Sholamh an rìgh.

25 Agus dh'àrdaich an Tighearna Solamh gu ro mhòr an sealladh Israeil uile, agus thug e mòralachd rìoghail dha nach robh aig rìgh sam bith roimhe ann an Israel.

26 Mar so rìghich Daibhidh mac Iese os ceann Israeil uile.

27 Agus b' 'n ùine a rìghich e os ceann Israeil dà fhichead bliadhna: ann an Hebron rìghich e seachd bliadhna, agus ann an Ierusalem rìghich e trì bliadhna deug thar fhichead.

¹ nan teaghlach.

² fuireach.

28 Agus fhuair e bàs ann an deadh shean aois, làn do làithibh, do shaoibhreas, agus do urram; agus rìghich Solamh a mhac 'na àit.

29 A nis gnìomhara Dhaibhidh an rìgh, eadar thoiseach agus dheireadh, feuch, *tha* iad sgriobhta ann an leabhar Sha-

mueil an fhìr-sheallaidh, agus ann an leabhar Nàtain an fhàidh, agus ann an leabhar Ghad an fhìr-sheallaidh.

30 Maille r'a rìoghachadh gu léir, agus a chumhachd, agus na h-aimsirean a chaidh thairis air, agus thar Israel, agus thar uile rìoghachda nan dùchanna.

DARA LEABHAR

NAN

EACHDRAIDH.

CAIB. I.

1 *Dh'iarr Solamh agus coimhthionail Israeil an Tighearn ann an Gibeon. 7 Dh'fhoillsich Dia e féin do Sholamh ann an aistling. 8 Ròghnaich Solamh ghlocas: 13 A charbaid agus a mharc-shluagh.*

A GUS dhaingnicheadh Solamh mac Dhaibhidh 'na rìoghachd, agus bha'n Tighearn a Dhia maille ris, agus dh'ard-aich se e gu mòr.

2 Agus dh'àithn Solamh do' Israel uile, do na ceannardaibh mhiltean agus cheud, agus do na breitheamhnaibh, agus do gach uachdaran air Israel uile, cinn nan aithriche¹.

3 Agus chaidh Solamh agus an coimhthionail uile maille ris do'n àit àrd a *bha* ann an Gibeon; oir an sin bha pàilliuin coimhthionail Dé, a rinn Maois, òglach an Tighearn, anns an fhàsach.

4 Ach àirc Dhé thug Daibhidh a nìos o Chiriat-earim do 'n àit a dh'ulluich Daibhidh dhi; oir shuidhich e pàilliuin air a son ann an Ierusalem.

5 Mar an ceudna, *bha'n* altair umha, a rinn Besaleel mac Uri, mhic Huir, an sin fa chomhair pàilliuin an Tighearn; agus dh'iarr Solamh agus an coimhthionail e².

6 Agus chaidh Solamh suas an sin a dh'ionnsuidh na h-altair umha an fianuis an Tighearn, a *bha* aig pàilliuin a' choimhthionail, agus dh'lobair e oirre³ mille lob-airt-loisgte.

7 Air an oidhche sin dh'fhoillsich Dia e féin do Sholamh, agus thubhairt e ris, Iarr ciod a bheir mi dhuit.

8 Agus thubhairt Solamh ri Dia, Nochd thu do Dhaibhidh m'athair caoimhneas mòr, agus rinn thu mise a'm' rìgh 'na àit⁴.

9 A nis, a Tighearna Dhé, coimhlionar⁵ do ghealladh⁶ do Dhaibhidh m'athair: oir rinn thu mise a'm' rìgh air slugh, lionmhor mar dhuslach na talmhainn.

10 Thoir⁷ dhomh a nis gliocas agus

eòlas, a chum gu'n téid mi mach agus gu'n tig mi steach roimh an t-sluagh so: oir cò a's urrainn breth a thabhairt air do shluagh so a *tha* cho mòr?

11 Agus thubhairt Dia ri Solamh, A chionn gu'n robh so a'd' chridhe, agus nach d'iarr thu beartas, maoin, no cliù, no anam do naimhdean, agus mar an ceudna nach d'iarr thu saoghal fada; ach gu'n d'iarr thu dhuit féin gliocas agus eòlas, leis an tugadh tu breth air mo shluaghsa, air an d'rinn mi thu a'd' rìgh;

12 *Tha* gliocas agus eòlas air an tabhairt duit, agus bheir mise dhuit beartas, agus maoin, agus cliù, air chor as uach robh a leithid aig na rìghrean a *bha* romhad, agus a'd' dhéigh nach bi a leithid.

13 Agus thàinig Solamh o'n àit àrd⁸ a *bha* ann an Gibeon gu h-Ierusalem, o làthair pàilliuin a' choimhthionail, agus rìghich e os ceann Israeil.

14 Agus chruiuich Solamh carbaid agus marc-shluagh: agus bha mìle agus ceithir cheud carbad aige, agus dà mhìle dheug marcach; agus chuir e iad ann am bailtibh nan carbad, agus maille ris an rìgh ann an Ierusalem⁹.

15 Agus thug an rìgh air airgid agus air òr a *bhi* ann an Ierusalem mar na clachan, agus air na crannaibh seudair¹⁰ thug e *bhi* mar na croinn shicomoir a *tha* ams an t-srath, air lionmhoireachd.

16 Agus thugadh eich do Sholamh a mach as an Eiphit, agus snàth-lìn: ghabh ceannaichean an rìgh an snàth-lìn air luach.

17 Agus thàinig iad a nìos, agus thug iad a mach as an Eiphit carbad air shè ceud *secel* airgid, agus each air cheud agus leth-cheud: agus mar sin do uile rìghribh nan Hiteach, agus do rìghribh Shiria, le'n làimh san thugadh a mach iad.

¹ labhair Solamh ri. ² cinn nan teaghlach, na h-àrd aithriche. ³ a' h-ionnsuidh.

⁴ uirre.

⁵ Faic I. Rìgh, Caib III. r. 6.

⁶ daingnichear, firinnichear.

⁸ Tabhair.

¹⁰ I. Rìgh, Caib. X. r. 26.

⁷ t'fhocal Eabh.

⁹ o' thurus do'n àit àrd.

¹¹ ceudair.

CAIB. II.

- 1 *Aireamh an luchd-oibre chum tigh Dhé a thogail.*
 3 *Chuir Solamh fios a dh'ionnsuidh Hiram air son duine teòma air oibreachadh ann an òr, agus air son fiodha.* 11 *Freagradh càirdeil Hiram.*

AGUS shonraich Solamh¹ tigh a thogail do ainm an Tighearn, agus tigh d'a rioghachd.

2 Agus dh'àireamh Solamh a mach deich agus trì fichead mìle fear-iomchair eallaich, agus ceithir fichead mìle fear-gearraidh anns a' bheinn, agus trì mìle agus sè ceud a shealltuinn thairis orra.

3 Agus chuir Solamh *teachdair* gu Hiram² rìgh Thiruis, ag ràdh, Mar a rinn thu ri Daibhidh m'athair, agus a chuir thu d'a ionnsuidh craobhan seudair a thogail tighe dha gu còmhnuidh a ghabhail ann, *dean riumsa*:

4 Feuch, *tha* mi gu tigh a thogail do ainm an Tighearna mo Dhé, chum a choisreagadh³ dha, gu tùis chùbhraidh a losgadh 'na fhianuis, agus air son an arain thaisbeanta bhith-bhuain⁴, agus air son òbairtean-loisgte air maduinn agus air feasgar, air na sàbaidibh, agus air na gealaichibh nomha, agus air àrd fhéillibh an Tighearn ar Dé: gu bràth *tha* so ceangailte air Israel.

5 Agus *bithidh* an tigh a thogas mise mòr: oir is mòr ar Dia-ne os ceann nan uile dhé.

6 Ach cò a's urrainn tigh a thogail dha, 'nuair nach cum na nèamha, no nèamha nan nèamh e? Agus cò mise gu'n togainn dha tigh, ach a mhàin a losgadh iobairtean 'na fhianuis?

7 A nis ma ta cuir a m' ionnsuidh duine, teòma⁵ air oibreachadh ann an òr, agus ann an airgiod, agus ann an umha, agus ann an iarunn, agus ann an corcur, agus ann an dearg, agus ann an gorm, agus a tha eòlach air gearradh gu grinn maille ris na daoineibh ealanta⁶ a *tha* maille riumsa ann an Iudah, agus ann an Ierusalem, a sholair Daibhidh m'athair.

8 Cuir a m' ionnsuidh mar an ceudna craobhan seudair, craobhan giùthais, agus craobhan alguim o Lebanon: or tha fhios agam gu bheil do sheirbhisich eòlach air fiodh a ghearradh ann an Lebanon: agus, feuch, *bithidh* mo sheirbhisich-sa maille ri d'sheirbhisich-sa.

9 Eadhon a dheasachadh dhomh fiodha ann am pailteas; oir *bithidh* an tigh a tha mise gus a thogail mòr agus iongantach.

10 Agus, feuch, bheir mi do d' sheirbhisich, na gearradairean a ghearras fiodh, fichead mìle tomhas do chruithneachd

buaite, agus fichead mìle tomhas eorna, agus fichead mìle bat fiona, agus fichead mìle bat oladh.

11 Agus fhreagair Hiram rìgh Thiruis ann an sgrìobhadh, a chuir e dh'ionnsuidh Sholaimh, A chionn gu bheil gràdh aig an Tighearna d'a shluagh, rinn e thusa a'd' rìgh os an ceann.

12 Thubhairt Hiram mar an ceudna, Beannaichte *gu robh* an Tighearna Dia Israeil a rinn nèamh agus talamh, a thug do Dhaibhidh an rìgh mac glie, aig am bheil eòlas agus tuigse, a thogadh tigh do'n Tighearn, agus tigh d'a rioghachd.

13 Agus a nis chuir mi a d' ionnsuidh duine eòlach, aig am bheil tuigse, a *bha* aig Hiram m'athair⁷:

14 Mac mnà do nigheanaibh Dhain, agus 'athair 'na dhuine o Thirus, teòma⁸ air oibreachadh ann an òr, agus ann an airgiod, ann an umha, ann an iarunn, ann an cloich, agus ann am fiodh, ann an corcur, ann an gorm, agus ann an anart grinn, agus ann an dearg; agus air gearradh gach gnè gearraidh, agus air dealbhadh gach ni innleachdaich a chuirear fa' chomhair, maille ri d' dhaoineibh ealanta-sa, agus daoineibh ealanta mo thighearna Dhaibhidh t'athar.

15 A nis air an aobhar sin an cruithneachd, agus an t-eorna, an oladh, agus am fion, air an do labhair mo thighearn, cuireadh e *iad* a dh'ionnsuidh a sheirbhisich:

16 Agus gearraidh sinne fiodh á Lebanon, a réir gach feum a bhios agad; agus bheir sinn a d'ionnsuidh e 'na ràthaibh air muir gu Iopa; agus bheir thusa suas e gu h-Ierusalem.

17 Agus dh'àireamh Solamh na coigrich uile a *bha* ann an tìr Israeil, an déigh an àireimh leis an d'àireamh Daibhidh 'athair iad; agus fhuaradh ann diubh ceud agus leth-cheud mìle agus trì mìle agus sè ceud.

18 Agus rinn e trì fichead agus deich mìle dhiubh 'nan luchd-iomchair eallach, agus ceithir fichead mìle 'nan gearradairibh anns an t-sliabh, agus trì mìle agus sè ceud 'nan luchd-ainhaire thairis a thoirt air an t-sluagh obair a dheanamh.

CAIB. III.

- 1 *An t-àit agus an t-àm san do thòisich Solamh air togail an teampuill.* 3 *Tomhas agus uidheam an teampuill.* 8 *Tomhas an tighe ro naoimh.* 14 *Am brat,* 15 *agus na puist.*

AGRUS thòisich Solamh air togail tighe an Tighearn ann an Ierusalem air sliabh Mhoriah, far an d'fhoillsicheadh an Tighearna do Dhaibhidh 'athair, anns

¹ chuir Solamh roinhe.

² Hiram. 1. Rìgh, Caib. V. r. 1.

³ naomhachadh.

⁴ làthail.

⁵ eòlach, glie.

⁶ glie.

⁷ duine eòlach aig am bheil tuigse, eadhon Hiram-abi.

⁸ seòlta.

II. EACHDRAIDH, III, IV.

an àit a dh'ulluich Daibhidh ann an ur-lar-bualaidh Ornain an Iebusaich.

2 Agus thòisich e air togail air an dara mìos¹, anns a' cheathramh bliadhna d'a rìoghachaidh.

3 Agus is iad so na nithe a shuidhicheadh le Solamh² chum tigh Dhé a thogail : am fad ann an làmh-choille, a réir a' cheud tomhais, trì fichead làmh-choille, agus an leud fichead làmh-choille.

4 Agus an sgàth-thigh a bha air beulaobh an tìghe, fichead làmh-choille³ fhad, a réir leoid an tìghe, agus ceud agus fichead làmh-choille⁴ àirde: agus chòmhdach e thairis e air an taobh a stigh le h-òr fìor-ghlan.

5 Agus an tigh mòr chòmhdach e le fiodh giuthais, agus chòmhdach e thairis e le h-òr fìor-ghlan, agus thug e air craobhan-pailme éirigh suas air, agus slabhraidhean.

6 Agus sgeadaich⁵ e an tigh le clachaibh uaisle air sgàth sgéimhe; agus b'e an t-òr òr Pharbhaime.

7 Agus chòmhdach e thairis an tigh, na sailean, na puist, agus a bhallachan, agus a dhorsan, le h-òr; agus ghearr e cheruban air na ballachaibh.

8 Agus rinn e 'n tigh ro naomh : 'fhad a réir leoid an tìghe, fichead làmh-choille, agus a leud fichead làmh-choille: agus chòmhdach e thairis e le h-òr fìor-ghlan, a thàinig gu sè ceud tàlam.

9 Agus b'e cothrom nan tairmgean leth-cheud secel òir: agus chòmhdach e thairis na seòmraichean uachdarach le h-òr.

10 Agus anns an tigh ro naomh rinn e dà cherub do obair sho-ghluaiste, agus chòmhdach e thairis le h-òr iad.

11 Agus bha sgiathan nan cherub fichead làmh-choille air fad: aon sgiath cùig làmhan-coille, a' ruigheachd gu balla an tìghe; agus an sgiath eile cùig làmhan-coille, a' ruigheachd gu sgiath a' cheruib eile:

12 Agus sgiath a' cheruib eile cùig làmhan-coille, a' ruigheachd gu balla an tìghe; agus an sgiath eile cùig làmhan-coille, tàhta ri sgiath a' cheruib eile.

13 Sgaol sgiathan nan cherub sin iad fèin a mach fichead làmh-choille: agus sheas iad air an cosaibh, agus an aghaidhean ris an taobh a stigh.

14 Agus rinn e am brat⁴ do ghorm, agus do chorcur, agus do dhearg, agus do anart grinn, agus dh'oibrich e cheruban air.

15 Agus rinn e air beulaobh an tìghe dà phost cùig làmhan-coille deug thar fhichead⁵ air àirde, agus an ceann a bha air

mullach gach aoin diubh cùig làmhan-coille.

16 Agus rinn e slabhraidhean, mar anns a' ghuth-àit, agus chuir e iad air mullach nam post; agus rinn e ceud pomgranat, agus chuir e iad air na slabhraidhibh.

17 Agus chuir e suas na puist air beulaobh an teampull, aon air an làimh dheis, agus aon air an làimh chlì. Agus thug e Iachin mar ainm air a' phost air an làimh dheis, agus Boas mar ainm air a' phost air an làimh chlì.

CAIB. IV.

1 An altair umha, 2 A' mhuir leaghta, 6 Na soithichean-ionnlaid, 7 na coimleirean, 8 agus na bùird, 19 An t-uidheam a rinneadh do òr.

A GUS rinn e altair umha: fichead làmh-choille a fad, agus fichead làmh-choille a leud, agus deich làmhan-coille a h-àirde.

2 Agus rinn e muir leaghta, deich làmhan-coille o bhile gu bile, cruinn mu'n cuairt, agus cùig làmhan-coille a h-àirde; agus chuairtich snathaim dheich làmhan-coille thar fhichead i mu'n cuairt.

3 Agus fuidhe⁶ bha coslas dhagh⁷, a chuairtich i mu'n cuairt, deich anns an làmh-choille a' dol mu thimchioll na mara mu'n cuairt. Thilgeadh dà shreath dhamh an uair a thilgeadh i fèin.

4 Sheas i air dà dhamh dheug, trì ag amharc gu tuath, agus trì ag amharc an iar, agus trì ag amharc gu deas, agus trì ag amharc an ear: agus chuireadh a' mhuir orra gu h-àrd, agus bha a' chnuid-dheiridh dhiubh uile a stigh.

5 Agus bha leud boise air tiugheadh innte, agus bha a bile air a dheanamh mar bhile copain, le blàthaibh lìli: ghabh i agus chum i trì mìle⁸ bat.

6 Agus rinn e deich soithichean-ionnlaid, agus chuir e cùig dhiubh air an làimh dheis, agus cùig air an làimh chlì, a dh-ionnlad anna: nithe na h-ìobairt-loisgte nigh iad amta; ach bha a' mhuir air son nan sagart, a dh-ionnlad innte.

7 Agus rinn e deich coimleirean òir, a réir an cumaidh, agus chuir e iad anns an teampull, cùig air an làimh dheis, agus cùig air an làimh chlì.

8 Agus rinn e deich bùird, agus chuir e iad anns an teampull, cùig air an làimh dheis, agus cùig air an làimh chlì: agus rinn e ceud cuach òir.

9 Agus rinn e cùirt nan sagart, agus a' chùirt mhòr, agus dorsan air son na cùirte, agus chòmhdach e an dorsan thairis le h-umha.

10 Agus chuir e a' mhuir air an taobh

¹ air an dara là do'n dara mìos.

² na nithe anns an do sheòladh Solamh.

³ chòmhdach.

⁴ an roinn-bhrat.

⁵ ochd làmhan-coille deug. I. Rìgh, Caib. VII. r. 15.

⁶ fuidhe, foipe.

⁷ mheall. I. Rìgh, Caib. VII. r. 24.

⁸ dà mìle. I. Rìgh, Caib. VII. r. 26.

deas do'n cheann an ear, fa chomhair na h-àrde deas.

11 Agus rinn Hiram na h-aighnean¹, agus na sluasaidean, agus na cuachau; agus chuir Hiram crìoch air deanamh na h-oibre a rinn e do rìgh Solamh ann an tigh Dhé:

12 *Eadhon* an dà phost, agus na cuairtean, agus na cinn a *bh'* air mullach an dà phuist, agus an dà lìon-obair a chòmhdachadh dà chuairt nan ceann a *bh'* air mullach nam post:

13 Agus ceithir cheud pomgranat do'n dà lìon-obair; dà shreath phomgranat do gach lìon-obair, a chòmhdachadh dà chuairt nan ceann, a *bh'* air na phuist.

14 Agus rinn e buinn, agus rinn e soithichean-ionnlaid air na buinn:

15 Aon mhuir, agus dà dhamh dheug fuidhe²:

16 Agus na h-aighnean, agus na sluasaidean, agus na greimichean³ fèola, agus an uidheam⁴ uile, rinn Hiram⁵ do rìgh Solamh ann an tigh an Tighearna do umha lìobhta.

17 Ann an còmhnaidh Iordain thilg an rìgh iad, anns an talamh chreadha⁶ eadar Sucot agus Seredath.

18 Agus rinn Solamh an t-uidheam so uile ann am mòr-phaileas; oir cha robh e comasach cothrom an umha fhaghail a mach.

19 Agus rinn Solamh an t-uidheam uile a *bhuineadh* do thigh Dhé, agus an altair òir, agus na bùird air an robh aran na fianuis;

20 Agus na coimleirean maille r'an lòchranaibh, chum gu'n loisgeadh iad a réir a' ghnàtha air beulaobh a' ghuth-àite, do òr fìor-ghlan;

21 Agus na blàthan, agus na lòchrain, agus na clobhachan, do òr, eadhon do'n òr bu ghloine;

22 Agus na smàladairean, agus na cuachan, agus na spàinean, agus na tùiseirean, do òr fìor-ghlan;

23 Agus dol a steach an tighe, a dhorsan a b' fhaide a stigh aig an ionad ro naomh, agus dorsan tighe an teampull, do òr.

CAIB. V.

1 *Thug Solamh na nithe naomhaichte a stigh do'n teampull.* 2 *Thug na Lebhithich a nìs an àire à baile Dhaibhidh.* 11 *Nuair bha na Lebhithich, &c. a' moladh Dhé lìonadh an teampull le neul.*

AGUS chrìochnaich eadhn an obair uile a rinn Solamh air sou tighe an Tighearn: agus thug Solamh a stigh nithe naomhaichte Dhaibhidh athar: an t-airgiod, agus an t-òr, agus na h-innealan

uile, chuir e am measg ionmhasan tighe Dhé.

2 An sin chruinnich Solamh seanairean Israeil, agus cinn nan treubh uile, ceannardau aithriche chloinn Israeil, gu h-Ierusalem, chum gu'n tugadh iad a nìs àire coimheangail an Tighearn à baile Dhaibhidh, a's e Sion.

3 Agus chruinnich fir Israeil uile iad féin a dh'ionnsuidh an rìgh air an fhéill, [ann am mìos Etanim,] is e sin⁷ an seachdamh mìos.

4 Agus thàinig uile sheanairean Israeil; agus thog na Lebhithich an àire.

5 Agus thug iad suas an àire, agus pàillion a' choimhthionail, agus na soithichean⁸ naomha uile a *bha* sa' phàillion: thug na sagairt agus na Lebhithich iad sin suas.

6 Agus dh'ìobair rìgh Solamh, agus coimhthional Israeil uile a chruinnich d'a ionnsuidh roimh an àire, caoraich agus crodh, nach robh e'n comas àireamh no mheas, a thaobh lìonmhoireachd.

7 Agus thug na sagairt a steach àire coimheangail an Tighearna d'a h-àite féin, do ghuth-àit an tighe, do'n ionad a's ro naomh, *eadhon* fuidh sgriathaibh nan cherub:

8 Oir sgaoil na cheruban a mach an sgriathan os ceann àite na h-àire, agus chòmhdaich na cheruban an àire agus a lunnan gu h-àrd.

9 Agus tharuing iad a mach na lunnan, air chor as gu'm faicte cinn nan lunn o'n àire fa chomhair a' ghuth-àite; ach cha'n fhaicte a mach iad: agus tha iad⁹ an sin agus an là'n diugh.

10 Cha robh ni air bith anns an àire ach an dà chlàr a chuir Maois an sin ann an Horeb, an uair a rinn an Tighearna *coimheangal* ri cloinn Israeil, ag teachd a mach dhoibh as an Eiphit.

11 Agus an uair a thàinig na sagairt a mach as an ionad naomh; (oir naomhaicheadh na sagairt uile a *bha* làthair: cha robh iad a' feitheamh *san àm sin* a réir an roinnean¹⁰:

12 An sin *bha* na Lebhithich, an luchd-seinn, agus iad uile do Asaph, do Heman, do Iedutun, maille r'am macaibh agus am bràithribh, air dhoibh bhi air an sgeadachadh ann an lìon-eudach geal, le ciombalaibh, agus le saltairibh, agus le clàrs-aichibh, 'nan seasamh aig a' cheann an ear do'n altair, agus maille ri uche agus fichead sagart a' deanamh fuaim le trompaidibh.)

13 Agus bha iad mar aon a' deauamh fuaim le trompaidibh, agus a' seinn, a

¹ poitean.

² fuidhe, foipe.

³ gramaichean.

⁴ innealan.

⁵ Hiram athair; Hiram-abiu. Eabh.

⁶ chreadhaich.

⁷ Faic I. Rìgh, Caib. VIII. r. 2.

⁸ na h-inn-

calan, an t-uidheam.

⁹ i.

¹⁰ a réir an seul.

thoirt air aon ghuth a bhi air a chluinntinn a mholadh agus a thoirt buidheachais do'n Tighearn. Ach an uair a thog iad suas an guth leis na trompaidibh, agus na ciombalaibh, agus na h-innealaibh civil, agus a bha iad a' moladh an Tighearn, a chionn gu bheil e maith. a chionn gu mair a throcair gu bràth : an sin lionadh an tigh le neul, tigh an Tighearn.

14 Agus cha b'urrainn na sagairt seasamh a fhrithealadh air sgàth an neoil : oir lion glòir an Tighearn tigh Dhé.

CAIB. VI.

1 Bheannaich Solamh an sluagh, agus mhol e Dia.
2 Urnuigh agus athchuinge Sholaimh 'nuair choisrig e an teampuil. 19 Ghuidh e gu'n tugadh Dia éisdeachd d'a urnuigh, agus gu'm bitheadh a làthaireachd maille ris a ghnàth.

AN sin thubhairt Solamh, Thubhairt an Tighearna gu'n gabhadh e còmh-nuidh ann an dorchedas tiugh.

2 Ach thog mise tigh-còmhnuidh dhuit, agus àite chum thu dh'fhantuinn ann gu bràth.

3 Agus thionndaidh an rìgh 'aghaidh, agus bheannaich e uile choimhthional Israeil, (agus uile choimhthional Israeil 'nan seasamh.)

4 Agus thubhairt e, Gu ma beannaichte an Tighearna Dia Israeil, a choimhlion le a làimh na labhair e le 'bheul ri m'athair Daibhidh, ag ràdh,

5 O'n là air an d'thug mi mo shluagh a mach á tìr na h-Eiphit, cha do thagh mi baile sam bith á uile threubhan Israeil a thogail tìghe, chum gu'm biodh m'ainm an sin, agus cha do thagh mi duine sam bith gu bhi 'na uachdaran os ceann mo shluaigh Israeil.

6 Ach a nis thagh mi Ierusalem, a chum gu'm biodh m'ainm an sin : agus thagh mi Daibhidh gu bhi os ceann mo shluaigh Israeil.

7 Agus bha e ann an cridhe Dhaibhidh m'athar tigh a thogail do ainm an Tighearna Dé Israeil.

8 Agus thubhairt an Tighearna ri Daibhidh m'athair, A chionn gu'n robh e ann ad chridhe tigh a thogail do m' ainm-sa, is maith a rinn thu gu'n robh e ann do chridhe :

9 Gidheadh, cha tog thusa an tigh, ach do mhac a thig a mach as do leasraibh, togaidd esan an tigh do m'ainm-sa.

10 Agus choimhlion an Tighearn 'fhocal a labhair e, agus dh'éirich mise suas an àite Dhaibhidh m'athar, agus tha mi a'm' shuidhe air rìgh-chaithir Israeil, mar a labhair an Tighearn, agus thog mi an tigh do ainm an Tighearna Dé Israeil :

11 Agus shuidhich mi an sin an àire, annsam bheil coimhcheangal an Tighearn. a rinn e ri cloinn Israeil.

12 Agus sheas e roimh altair an Tigh-

earn, an làthair uile choimhthionail Israeil, agus sgaol e mach a làmhan,

13 (Oir rinn Solamh bonn umha, agus chuir se e ann am meadhon na cùirte, cùig làmhan-coille air fad, agus cùig làmhan-coille air leud, agus trì làmhan-coille air àirde : agus sheas e air, agus leig se e féin air a ghluinibh an làthair coimhthionail Israeil uile, agus sgaol e mach a làmhan gu nèamh.)

14 Agus thubhairt e, A Thighearna Dhé Israeil, cha 'n'eil Dia ann cosmhuil riutsa anns na nèamhaibh, no air an talamh, a chumas coimhcheangal agus trócair ri d' sheirbhiseach, a ghluaiseas a'd' fhanuis le 'n uile chridhe :

15 A chum ri t'òglach Daibhidh m'athair an ni a labhair thu ris : oir labhair thu le d' bheul, agus le d' làimh choimhlion thu, mar air an là'n diugh.

16 A nis uime sin, a Thighearna Dhé Israeil, cum ri t'òglach Daibhidh m'athair an ni a labhair thu ris, ag ràdh, Cha bhi duine dhèith ort a'm' fhanuis-sa, a shuidheas air rìgh-chaithir Israeil, ma choimhdeas a mhàin do chlànn an slighe, a gluasad ann am lagh, mar a ghluais thusa a'm' fhanuis.

17 Agus a nis, a Thighearna Dhé Israeil, daingnichear t'fhocal a labhair thu ri t'òglach Daibhidh.

18 Ach an gabh Dia d'a rìreadh còmh-nuidh maille ri daoineibh air an talamh ? feuch, cha chum na nèamhan agus nèamha nan nèamh thusa : cia is ro lugha na sin an tigh so a thog mise ?

19 Gidheadh, amhaire air urnuigh do sheirbhiseach, agus air 'athchuinge, a Thighearna mo Dhia, a dh'éisdeachd ris a' ghlaodh agus ris an urnuigh, a tha do sheirbhiseach a' deanamh a' d'fhanuis :

20 A chum gu'm bi do shùilean fosgailte ris an tigh so a dh'oidhche agus a là, eadhon ris an àite mu'n dubhairt thu gu'n cuireadh tu t'ainm an sin, a dh'éisdeachd ris an urnuigh a ni do sheirbhiseach a dh'ionnsuidh an àite so.

21 Eisd air an aobhar sin ri athchuinge do sheirbhiseach, agus do shluaigh Israeil, an uair a ni iad urnuigh a dh'ionnsuidh an àite so : agus éisd thusa o t'àite-còmhnuidh, o na nèamhaibh : agus an uair a dh'éisdeas tu, maith dhoibh.

22 Ma pheacaicheas duine an aghaidh a choimhearsnaich, agus ma dh'iarraas e mionnan air, a' toirt air mionnachadh, agus gu'n tig na mionnan an làthair t'altarach anns an tigh so ;

23 An sin éisd thusa o na nèamhaibh, agus dean, agus thoir breth air do sheirbhiseach, ag iocadh do'n aingidh, a' toirt a shlighe air a cheann féin : agus a' fìreanachadh an fhìre, a' tabhairt da a réir 'fhìreantachd.

24 Agus ma bhuailear do shluagh Israel an làthair an nàmhaid, a chionn gu'n do pheacaich iad a'd' aghaidh, agus ma philleas iad agus gu'n aoidich iad t'ainm, agus gu'n dean iad urnuigh, agus gu'n guidh iad a'd' làthair anns an tigh so ;

25 An sin éisd thusa o na nèamhaibh, agus maith peacadh do shluaigh Israeil, agus thoir a ris iad do'n fhearann a thug thu dhoibh féin agus d'an aithrichibh.

26 An uair a dhruidear na nèamhaibh, agus nach bi uisge ann, a chionn gu'n do pheacaich iad a'd' aghaidh-sa, agus a ni iad urnuigh a dh'ionnsuidh an àite so, agus a dh'aideicas iad t'ainm, agus a dh'iompaichear iad o'n peacadh, an uair a chuireas tu fuidh àmhghar iad ;

27 An sin éisd thusa o na nèamhaibh, agus maith peacadh do sheirbhiseach, agus do shluaigh Israeil, a chum gu'n teagaisg thu dhoibh an t-slighe nìhaith air an còir dhoibh gluasad, agus gu'n cuir thu uisge air an fhearann a thug thu do d' shluagh mar oighreachd.

28 An uair a bhios gorta anns an tìr, an uair a bhios plàigh ann, an uair a bhios seargadh ann, no fhuar-dhealt, locust, no burruis ; an uair a theannaicheas a nàmhaid e ann an tìr a bhaite, ciod air bith plàigh, agus ciod air bith euslaint a bhios ann ;

29 Ge b'e urnuigh, ge b'e athchuinge a chuirear suas le duine sam bith, no le d' shluagh Israel uile, an uair a bhios fios aig gach aon air a phlàigh féin, agus a dhoilgheas féin, agus a sgaoileas e mach a làmh an dh'ionnsuidh an tìghe so ;

30 An sin éisd thusa o na nèamhaibh, o t'àite-còmhnuidh, agus maith, agus thoir do gach duine a réir a shlighean uile, a tha fios agad air a chridhe ; (oir is ann agadsa, agadsa mhàin a tha fios air cridheachaidh chloinn nan daoine) ;

31 A chum gu'm bi eagal orra romhad-sa, a ghluasad ann ad shligheibh rè an làithean uile a bhios iad beò anns an tìr a thug thu d'ar n-aithrichibh.

32 Os bàrr, a thaobh a' choigrich, nach 'eil do d' shluagh Israel, ach a thig á tìr chéin air sgàth do mhòir-ainme-sa, agus do làimhe làidir, agus do ghairdein sìnte mach, agus a thig agus a ni urnuigh anns an tigh so ;

33 An sin éisd thusa o na nèamhaibh, o t'àite-còmhnuidh, agus dean a réir nan uile nìthe mu'n glaodh an coigreach riut ; a chum gu'm bi eòlas aig uile shlòigh na talmhaoin air t'ainm, agus gu'm bi eagal orra romhad, mar a ta air do shluagh Israel, agus gu'm bi fios aca gu'n goirear t-ainm-sa air¹ an tigh so a thog mise.

34 An uair a théid do shluagh a mach a chogadh au aghaidh an naimhdean air an t-slighe air an cuir thu iad, agus a ni iad urnuigh riut a làimh² a' bhaile³ so a ròghnaich thusa, agus an tìghe a thog mise do t'ainm ;

35 An sin éisd thusa o na nèamhaibh r'an urnuigh agus r'an athchuinge, agus cum ceartas riut.

36 An uair a pheacaicheas iad a'd' aghaidh, (oir cha 'n'eil duine ann nach peacaich,) agus a lasas t'fhearg 'nan aghaidh, agus a bheir thu thairis iad d'an naimhdibh, agus a bheir iad leo 'nam braighdibh iad do thìr am fad no am fagus ;

37 Gidheadh ma thig iad gu imtinn cheart⁴ anns an tìr d'an d'thugadh 'nam braighdibh iad, agus ma dh'iompaichear iad, agus ma ni iad urnuigh riut ann an tìr am braighdeanais, ag ràdh, Pheacaich sinn, rinn sinn gu h-eucorach, agus rinn sinn gu h-aingidh ;

38 Ma philleas iad a d' ionnsuidh-sa le'n uile chridhe, agus le'n uile anam, ann an tìr am braighdeanais, d'an d'thugadh iad 'uam braighdibh, agus ma ni iad urnuigh a làimh an tìre féin a thug thu d'an aithrichibh, agus a làimh a' bhaile a ròghnaich thu, agus a làimh an tìghe a thog mise do t'ainm ;

39 An sin éisd thusa o na nèamhaibh, o t'àite-còmhnuidh, r'an urnuigh agus r'an athchuinge, agus cum ceartas riut, agus maith do d' shluagh a pheacaich a'd' aghaidh.

40 A nis, mo Dhia, bitheadh, guidheam ort, do shùilean fosgailte, agus thugadh do chluasan an aire do urnuigh an àite so.

41 Ach a nis éirich thusa, a Thighearna Dhé, do d' àite suaimhneis, thu féin, agus àire do neirt. Bitheadh do shagairt, a Thighearna Dhé, air an sgeadachadh le slàinte, agus deanadh do naoimh gairdeachas ann am maitheas.

42 A Thighearna Dhé, na tionndaidh air falbh gnùis t'aoin ungta : cuimhnich trócairean Dhaibhidh do sheirbhisich.

CAIB. VII.

1 Lìon glòir an Tighearn an teampull. 5 Choisrig Solamh agus clann Israeil tigh Dhé, 10 agus an sin phill an sluagh d'am bàthaibh aoidhinn agus subhach 'nan cridhe. 12 Dh'fhoillsich Dia é féin a ris do Sholamh. agus rinn e coimhcheangal ris.

AGUS an uair a chuir Solamh crìoch air urnuigh a dheanamh, thàinig an teine a nuas o nèamh, agus loisg e suas an tabhartas-loisgte agus na h-iobairtean ; agus liou glòir an Tighearn an tigh.

2 Agus cha b'urraim na sagairt dol a steach do thigh an Tighearn, a chionn

¹ gu'n ainmichear ortsa.

² rathad. Eabh.

³ na caithreach.

⁴ ma philleas iad d'an cridhe. Eabh.

gu'n do lion glòir an Tighearn tigh an Tighearn.

3 Agus an uair a chunnaic clann Israel uile mar a thàinig an teine nuas, agus glòir an Tighearn, air an tigh, chrom siad iad féin le'n aghaidhùibh chum na tal-mhainn air an urlar, agus rinn iad aoradh, agus mhol iad an Tighearn, a chionn *gu bheil* e maith, *gu mair* a thròcair gu bràth.

4 An sin dh'ìobair an rìgh agus an sluagh uile ìobairtean am fianuis an Tighearn.

5 Agus dh'ìobair rìgh Solamh mar ìobairt dà mhìle fichead bò, agus ceud agus fichead mìle caora : agus choisrig an rìgh agus an sluagh uile tigh Dhé.

6 Agus dh'fheith na sagairt air an dreuchd; na Lebhithich mar an ceudna le innealaibh-ciùil an Tighearn, a rinn Daibhidh an rìgh a mholadh an Tigh-earn, a chionn *gu mair* a thròcair gu bràth, an uair a bha Daibhidh a' cliùthachadh le 'n làimh-san : agus shéid na sagairt trompaidean rompa, agus sheas Israel uile.

7 Agus naomhaich Solamh meadhon na cùirte a *bha* fa chomhair tighe an Tighearn: oir thug e suas an sin ìobairtean-loisgte, agus saill nan tabhartas-sith, a cliomn nach b'urraim an altair umha a rinn Solamh na h-ìobairtean-loisgte, agus na tabhartasan-bìdh, agus an t-saill, a ghabhail.

8 Agus chum Solamh anns an àm sin an fhéill seachd làithean, agus Israel uile maille ris, comhchruinneachadh ro mhòr, o dhol a stigh Hamait gu ruig amhainn na h-Eiphit.

9 Agus air an ochdamh là chum iad àrd choimhthional; oir chum iad coisreagadh ua h-altarach seachd làithean, agus an fhéill seachd làithean.

10 Agus air an treas là fichead do'n t-seachdamh mìos leig e an sluagh air falbh d'am bùthaibh, aoibhinn agus subhach 'nan cridhe air son a' mhaithis a nochd an Tighearna do Dhaibhidh, agus do Sholamh, agus do Israel a shluagh.

11 Agus chrìochnaich Solamh tigh an Tighearn, agus tigh an rìgh; agus gach nì a thàinig ann an cridhe Sholaimh a dheanamh ann an tigh an Tighearn, agus 'na thigh féin, shoirbhich leis 'na dheanamh.

12 Agus dh'fhoillsich an Tighearn e féin do Sholamh san oidhche, agus thubhairt e ris, Chuala mi t'urnuigh, agus thagh mi 'n t-àite so dhomh féin air son tighe ìobairte.

13 Ma dhruideas mi na nèamhan, agus nach bi uisge ann, no ma dh'àithneas mi do na locuist am fearann itheadh suas, no

ma chuireas mi plàigh am measg mo shluaigh;

14 Ma dh'ìroslaicheas mo shluagh air an goirear¹ m'ainm iad féin, agus gu'n dean iad urnuigh, agus gu'n iarr iad mo ghnùis, agus gu'm pill iad o'n droch shligheibh, an sin chuinnidh mise o na nèamhaibh, agus maithidh mi am peacadh, agus leighisidh mi am fearann.

15 A nis bithidh mo shùilean fosgailte, agus bheir mo chluasan an aire do urnuigh an àite so :

16 Oir a nis thagh mi agus naomhaich mi an tigh so, chum gu'm bi m'ainm an sin gu bràth; agus bithidh mo shùilean agus mo chridhe an sin gach là.

17 Agus ma ghluaiseas tusa ann am fhianuis, mar a ghluais Daibhidh t'athair, agus ma ni thu a réir gach *ni* a dh'àithn mi dhuit, agus gu'n gléidh thu mo reachd-an agus mo bhreitheanais;

18 An sin daingnichidh mise rìgh-chàithir dorìoghachd, mar a rinn mi coimhcheangal ri Daibhidh t'athair, ag ràdh, Cha bhi duine dhìth ort gu bhi 'na uachdaran ann an Israel.

19 Ach ma thionndaidheas sibh uam, agus gu'n tréig sibh mo reachdan agus m'àitheantan a chuir mi roimhibh, agus gu'n téid sibh agus gu'n dean sibh seirbhis do dhiaithaibh eile, agus gu'n sleuchd sibh dhoibh;

20 An sin spìonadh mise sibh² á m'fhearann a thug mi dhuibh³; agus an tigh so a naomhaich mi do m'ainm, tilgidh mi as mo shealladh, agus ni mi e 'na shamhladh⁴ agus 'na leth-fhocal⁵ am measg nan uile chimeach.

21 Agus an tigh so a bha co'àrd, bithidh iongantais air gach neach a théid seachad air, agus their e, C'ar son a rinn an Tighearna mar so ris an tìr so, agus ris an tigh so?

22 Agus freagar⁶, A chionn gu'n do thréig iad an Tighearna Dia an aithriche, a thug a mach iad á tìr na h-Eiphit, agus gu'n do ghabh iad d'an ionnsuidh⁷ diathan eile, agus gu'n do shleuchd iad dhoibh, agus gu'n do rinn iad seirbhis dhoibh; uime sin thug e an t-òle so uile orra

CAIB. VIII.

1 Na bailtean a thog Solamh. 7 Rinneadh tràilleann do na Canaanach. 11 Thug Solamh suas nighean Pharaoh a dh'ionnsuidh a tìghe féin. 14 Shuidhich e roinnean nan sagart, agus nan Lebhitheach. 17 Thug longa Sholaimh or o Ophir.

A GUS tharladh an ceann fhichead bliadhna, anns an do thog Solamh tigh an Tighearn agus a thigh féin,

2 Na bailtean a thug Hiram do Sholamh, gu'n do thog Solamh iad, agus thug

¹ gairmear.

² iad.

³ dhoibh.

⁴ ghnàth-fhocal.

⁵ bhall-magaidh.

⁶ their iad. Eabh.

⁷ gu'n d'rim iad greim air.

II. EACHDRAIDH, VIII. IX.

e air cloinn Israeil còmhnuidh a ghabhail an sin.

3 Agus chaidh Solamh gu Hamat-sobah, agus thug e buaidh air.

4 Agus thog e Tadmor anns an fhàsach, agus na bailtean ionmhais uile a thog e ann an Hamat.

5 Mar an ceudna thog e Bet-horon uachdarach, agus Bet-horon ìochdarach, bailte daingnichte, le ballachaibh, geataibh agus crannaibh:

6 Agus Baalat, agus na h-uile bhailtean ionmhais a bha aig Solamh, agus uile bhailte nan carbad, agus bailtean a' mharc-shluaigh, agus uile mhiann Sholaimh a mhiannaich e thogail ann an Ierusalem, agus ann an Lebanon, agus ann an uile thir a thighearnais.

7 *A thaobh* an t-sluaigh uile a dh'fhàgadh do na Hitich, agus *do* na h-Amoraich, agus *do* na Peridsich, agus *do* na Hibhich, agus *do* na Iebusaich, nach robh do Israel,

8 D'an cloinn a dh'fhàgadh 'nan déigh ann an tìr, uach do sgrios clann Israeil, dhiubhsan thog Solamh eis gus an là'n diugh.

9 Ach do chloinn Israeil cha d' rinn Solamh tràill sam bith air son 'oibre; oir bha iad 'nam fir-chogaidh, agus 'nan uachdaranaibh, agus 'nan ceannardaibh¹ aige, agus 'nan riaghlairibh a charbad agus a mharc-shluaigh.

10 Agus b' iad so uachdarain an luchd-dreuchd a bha aig rìgh Solamh, dà cheud agus leth-cheud² a riaghail os ceann an t-sluaigh.

11 Agus thug Solamh suas nighean Pharaoh á baile Dhaibhidh a dh'ionnsuidh an tighe a thog e dhi: oir thubhairt e, Cha ghabh mo bhean-sa còmhnuidh ann an tigh Dhaibhidh rìgh Israeil; oir is naomh na h-àitean d'an d'fhàinig àire an Tighearna steach.

12 An sin dh'ìobair Solamh ìobairtean-loisgte do'n Tighearna, air altair an Tighearna, a thog e fa chomhair an sgàth-thighe;

13 A dhlighe féin air gach là, ag ìobradh a réir àithne Mhaois, air na sàbaidibh, agus air na gealaichibh nomha, agus air na féilibh³ sonraichte, trì uairean sa' bhliadhna, air féill an arain neo-ghoirtichte, agus air féill nan seachduin, agus air féill nam pàillun.

14 Agus shuidhich e, a réir riaghailt Dhaibhidh 'athar, roinnean nan sagart chum an seirblis, agus na Lebhithich chum an cùraim, a mholadh agus a fhrithealadh am fianuis nan sagart, a réir

dlighe gach là; agus ná dorsairean a réir an roinnean aig gach geata: oir mar sin dh'àithne Daibhidh òglach Dhé.

15 Agus cha do chlaon iad o àithne an rìgh mu na sagairt agus na Lebhithich, a thaobh ni air bith, no thaobh nan ionmhas.

16 Agus dheasaicheadh obair Sholaimh uile gu ruig an là anns an do leagadh bunait⁴ tighe an Tighearna, agus gus an do chrìochnaicheadh e. *Mar sin* rinn eadh tigh an Tighearna gu h-ìomlan.

17 An sin chaidh Solamh gu h-Esiongeber, agus gu h-Elot, air taobh na mara ann an tìr Edoim.

18 Agus chuir Hiram d' a ionnsuidh le làimh a sheirbhiseach longa, agus seirbhisich aig an robh eòlas na fairge; agus chaidh iad maille ri seirbhisich Sholaimh gu h-Ophir, agus thug iad as a sin ceithir cheud agus leth-cheud tàlam òir, agus thug iad gu rìgh Solamh iad.

CAIB. IX.

1 *Thàinig ban-rìghinn Sheba gu-Ierusalem a dhearbhadh Sholaimh.* 3 *Ghabh i iongantais r'a ghliocas.* 13 *Cothrom an òir a thàinig dh'ionnsuidh Sholaimh ann an aon bhliadhna.* 16 *A rìgh-chaitthir.* 20 *A shoithichean òil.* 29 *A bhàs.*

A GUS an uair a chuala ban-rìghinn Sheba cliù Sholaimh, thàinig i a dhearbhadh Sholaimh le ceisidibh cruaidhe gu h-Ierusalem, le cuideachd ro mhòir, agus le càmhalaibh a' giùlan spìosraidh agus òir ann am pailteas, agus chlacha luachmhor: agus an uair a thàinig i dh'ionnsuidh Sholaimh, labhair i ris gach ni a bha 'na cridhe.

2 Agus fhreagair⁵ Solamh dhi a ceisdean⁶ uile; agus cha robh ni air bith am folach air Solamh nach d'innis e dhi.

3 Agus an uair a chunnaic ban-rìghinn Sheba gliocas Sholaimh, agus an tigh a thog e.

4 Agus biadh a bhùird, agus suidhe a sheirbhiseach, agus feitheamh a luchd-frithealaidh agus an trusgan, agus a ghille-ean-cupain agus an trusgan, agus a dholl-suas air an deachaidh e suas gu⁷ tigh an Tighearna; cha robh spiorad imnte ni's mò.

5 Agus thubhairt i ris an rìgh, *B' fhìor* an t-iomradh a chuala mi ann am thìr féin air do ghnìomharaibh, agus air do ghliocas:

6 Gidheadh cha do chreid mi am bràthra, gus an d'fhàinig mi, agus gu'm faca mo shùilean; agus, feuch, cha d'innseadh dhomh leth meud do ghliocais: chaidh thu thar an iomradh a chuala mi.

7 *Is* sona do dhaoine, agus *is* sona iad so do sheirbhisich, a sheasas a'd' fhian-

¹ I. Rìgh, Caib. IX. r. 22.
agus leth-cheud. I. Rìgh, Caib. IX. r. 23.

² cùig ceud
³ fèisidibh. ⁴ stéidh.

⁵ dh'fhuasgail, mhìnich.

⁶ briathran. Eabh.

⁷ na h-ìobairte-loisgte a dh'ìobair e ann.

II. EACHDRAIDH, IX. X.

uis an còmhuidh, agus a chluinneas do ghliocas.

8 Gu ma beannaichte an Tighearna do Dhia a ghabh tlachd annad gu d'chur air a rìgh-chaithir, gu bhì d' rìgh air son an Tighearna do Dhé: a chionn gu'n do ghràdhaich do Dhia Israel, chum an daingneachadh gu bràth, uime sin rinn e thusa a'd' rìgh os an ceann, a dheanamh breitheanais agus ceartais.

9 Agus thug i do'n rìgh ceud agus fichead tàlann òir, agus ro mhòran do spìosraidh, agus clacha luachmhor: Agus cha robh riamh a leithid so do spìosraidh, as a thug ban-rìghinn Sheba do rìgh Solamh.

10 Agus mar an ceudna thug seirbhìsich Huraim, agus seirbhìsich Sholaimh, a thug òr o Ophir, fiodh alguim¹ leo, agus clacha luachmhor.

11 Agus rinn an rìgh do'n fhiodh alguim staidhrichean² do thigh an Tighearna, agus do thigh an rìgh, agus clàrsaichean agus saltairean do'n luchd-ciùil: agus cha 'n fhacas an leithid roimhe ann an tìr Iudah.

12 Agus thug rìgh Solamh do bhan-rìghinn Sheba a h-uile mhìann a dh'iarr i, a thuilleadh air na thug i dh'ionnsuidh a' rìgh³: agus thionndaidh i agus dh'imich i d'a tìr, i féin agus a seirbhìsich.

13 A nis b'e cothrom an òir a thàinig a dh'ionnsuidh Sholaimh ann an aon bhliadhna, sè ceud agus trì fichead agus sè tàlannan òir:

14 A thuilleadh air na thug na ceann-àichean agus an luchd malairt, agus uile rìghrean Arabia, agus uachdarain na tìre; a thug òr agus airgid a dh'ionnsuidh Sholaimh⁴.

15 Agus rinn rìgh Solamh dà cheud sgiath do òr buailte; chaidh sè ceud *secel* do òr buailte chum gach sgèithe.

16 Agus rinn e trì cheud targaid do òr buailte: chaidh trì cheud *secel* òir chum gach targaide: agus chuir an rìgh iad ann an tigh frìthe Lebanoin.

17 Rinn an rìgh mar an ceudna rìgh-chaithir mhòr do fhiaclaibh *elephant*, agus chòmhdaich e i leis an òr bu ghloine.

18 Agus bha sè ceuman aig an rìgh-chaithir agus cos-stòl òir, air an tàthadh ris an rìgh-chaithir, agus làmhan air gach taobh do'n àite-shuidhe, agus dà leòmhann a' seasamh làimh ris na làmhan.

19 Agus sheas dà leòmhann dheug an sin air na sè ceumaibh, air an taobh so agus air an taobh ud. Cha d' rinneadh a leithid ann an rìoghachd air bith eile.

20 Agus bha uile shoithichean òil rìgh Sholaimh do òr, agus uile shoithiche tìghe

frìthe Lebanoin do òr fìor-ghlan: cha robh meas do airgid ann an làithibh Sholaimh chum ni sam bith.

21 Oir chaidh loingear an rìgh gu Tharsis maille ri seirbhìsich Huraim: aon uair anns na trì bliadhnaibh thàinig loingear Tharsis a' giùlan òir agus airgid, fhìacal elephant, agus apa, agus pheucag.

22 Agus thug rìgh Solamh barrachd air uile rìghribh an domhain ann an saoihbheas agus gliocas.

23 Agus dh'iarr uile rìghrean na talmhainn teachd an làthair Sholaimh, a chluinntinn a ghliocais a chuir Dia 'na chridhe.

24 Agus thug iad leo gach fear a thliodhlac, soithichean airgid, agus soithichean òir, agus trusganan, agus airm, agus spìosraidh, agus eich agus muileidean, cuibhrionn bliadhna anns gach bliadhna.

25 Agus bha aig Solamh ceithir mìle prasach each air son a charbad⁵, agus dà mhìle dheug marcach, a chuir e mach ann am bailtibh nan carbad, agus maille ris an rìgh ann an Ierusalem.

26 Agus rìghich e os ceann nan rìgh uile, o'n amhainn gu ruig tìr nam Philisteach, agus gu ruig crìoch na h-Eiphit.

27 Agus thug an rìgh air airgid a *bhi* ann an Ierusalem mar chlachan, agus air na cramaibh seudair thug e *bhi* mar na croinn shìcomoir, a *tha* anns an t-srath, air lìonmhoireachd.

28 Agus thugadh eich a dh'ionnsuidh Sholaimh as an Eiphit, agus as gach uile thìr.

29 Agus a' chuid eile do ghìomharaibh Sholaimh, an toiseach agus mu dheireadh⁶, nach 'eil iad sgriobhta ann an leabhar Nàtain an fhàidh, agus ann an fàidheadaireachd Ahiah an t-Sìlonaich, agus ann an seallannaibh Ido an fhir-sheallaidh an aghaidh Ieroboam mhic Nebait?

30 Agus rìghich Solamh ann an Ierusalem os ceann Israeil uile, dà fhichead bliadhna.

31 Agus choidil Solamh maille r'a aithrichibh, agus dh'adhlacaidh e ann am baile Dhaibhidh 'athar: agus rìghich Rehoboam a mhac 'na àit.

CAIB. X.

1 Thàinig clann Israeil do Shechem gu Rehoboam a dheanamh 'na rìgh. 6 Dùilt esan comhairle nan seann daoine, agus labhair e gu garg ris an t-sluagh, a rèir comhairle nan daoine òga. 16 Rinn clann Israeil ceannairc 'na aghaidh.

A GUS chaidh Rehoboam do Shechem: a' oir thàinig Israel uile do Shechem g'a dheanamh 'na rìgh.

¹ *almuig*. I. Rìgh, Caib. X. r. 11.

² *ard-shlighean*. ³ *a thuilleadh air na thug an rìgh dhi d'a fhiallaidheachd féin*. I. Rìgh, Caib. X. r. 13.

⁴ *Faic I. Rìgh, Caib. X. r. 15.*

⁵ *I. Rìgh, Caib. IV. r. 26.*

⁶ *o thoiseach gu deireadh.*

II. EACHDRAIDH, X. XI.

2 Agus an uair a chuala Ieroboam mac Nebait *sin*, a *bha* anns an Eiphit, far an do theich e o ghnùis rìgh Solaimh, phill Ieroboam as an Eiphit.

3 Agus chuir iad *fios*, agus ghairm iad e: agus thàinig Ieroboam agus Israel uile, agus labhair iad ri Rehoboam, ag ràdh,

4 Dh'antromaich t'athair ar cuing-ne, ach eutromaich thu¹ a nis seirbhis chruaidh t'athar, agus a chuing throm a chuir e oirm, agus ni sinn seirbhis dhuit.

5 Agus thubhairt e riu, An ceann thrì làithean thigibh a ris a m' ionnsuidh. Agus dh'fhalbh an sluagh.

6 Agus chuir rìgh Rehoboam a chomhairle ris na seann daoineibh a sheas an làthair Sholaimh athar, an uair bu bheò e, ag ràdh, Cionnus a chomhairlicheas sibh *dhomh* freagradh a thabhairt do'n t-sluagh so?

7 Agus labhair iadsan ris, ag ràdh, Ma bhios tusa caomhlineil ris an t-sluagh so, agus gu'n toilich thu iad, agus gu'n labhair thu riu briathra maithe, bithidh iadsan agadsa 'nan seirbhisich gu bràth.

8 Ach thréig esan comhairle nan seann daoine, a thug iad air; agus chuir e 'chomhairle ris na daoineibh òga a dh'fhàs suas maille ris féin agus a sheas 'na làthair.

9 Agus thubhairt e riu, Ciod a *tha* sibhse a' comhairleachadh, a chum gu'n toir sinn freagradh do'n t-sluagh so, a labhair rium, ag ràdh, Eutromaich a' chuing a chuir t'athair oirm?

10 Agus labhair na daoine òga a dh'fhàs suas maille ris féin ris, ag ràdh, Mar so their thu ris an t-sluagh a labhair riu, ag ràdh, Dh'antromaich t-athair ar cuing-ne, ach eutromaich thusa dhuinn i; mar so their thu riu, *Is* gairbhe mo lùghdag-sa na leasraidh m'athar.

11 Agus a nis chuir m'athair gun amharus oirbh cuing throm, ach cuiridh mise ri bhur cuing; smachdaich m'athair sibh le slataibh, ach *smachdaichidh* mise sibh le scorpionaidh.

12 Agus thàinig Ieroboam agus an sluagh uile gu Rehoboam air an treas là, mar a dh'àithn an rìgh, ag ràdh, Thigibh a ris a m' ionnsuidh air an treas là.

13 Agus fhreagair an rìgh iad gu garbh; agus thréig rìgh Rehoboam comhairle nan seann daoine.

14 Agus labhair e riu a réir comhairle nan daoine òga, ag ràdh, Dh'antromaich m'athair bhur cuing, ach cuiridh mise rithe; smachdaich m'athair sibh le slataibh, ach *smachdaichidh* mise sibh le scorpionaidh.

15 Mar so cha d'éisd an rìgh ris an

t-sluagh; oir¹ bha'n t-aobhar o Dhia, chum gu'n coimhlionadh an Tighearn 'fhocal féin, a labhair e le làimh Ahiah an t-Silonaich ri Ieroboam mac Nebait.

16 Agus an uair a chummaic Israel uile nach d'éisd an rìgh riu, fhreagair an sluagh an rìgh, ag ràdh, Ciod a' chuibhrionn a *th'*againne ann an¹ Daibhidh? agus cha *n'éil* oighreachd *againn* ann am mac Iese: gach fear do d'bhùthaibh, O Israel; a nis thoir an aire² air do thigh féin, a Dhaibhidh. Agus dh'fhalbh Israel uile d'am bùthaibh.

17 Ach a *thaobh* chloinn Israeil a bha chòmhnuidh ann am bailtibh Iudah, rìgh-ich Rehoboam os an ceann.

18 An sin chuir rìgh Rehoboam Adoram a *bha* os ceann na cise *d'an ionnsuidh*; agus chlach clann Israeil e le clachaibh, agus fhuair e bàs: agus rinn Rehoboam cabhag gu dol suas d'a charbad, chum gu'n teicheadh e do h-Ierusalem.

19 Agus rinn Israel ceannairc an aghaidh tighe Dhaibhidh gus an là'n diugh.

CAIB. XI.

1 Chruinnich Rehoboam armailt a chogadh an aghaidh Israeil. 6 Na bailte daingnichte a thog e.

13 Thàinig na sagairt agus na Lebhithich gu Ierusalem, a chionn gu'n do chuir Ieroboam iad o fhrithleadh 'nan dreuchd. 18 Mnaì agus clann Rehoboaim.

A GUS an uair a thàinig Rehoboam gu h-Ierusalem, chruinnich e do thigh Iudah agus Bheniamin, ceud, agus ceithir fichead mìle fear taghta, deanta ri cogadh, a chogadh an aghaidh Israeil, a chum an rioghadh a thoirt a ris gu Rehoboam.

2 Ach thàinig focal an Tighearna gu Semaiah òglach³ Dhé, ag ràdh,

3 Labhair ri Rehoboam, mac Sholaimh, rìgh Iudah, agus ri h-Israel uile ann an Iudah agus ann am Benjamin, ag ràdh,

4 Mar so tha'n Tighearn ag ràdh, Cha téid sibh suas, agus cha chog⁴ sibh ri'r bràithribh: pillibh, gach fear a dh'ionnsuidh a thighe; oir leamsa rinneadh an ni so. Agus dh'éisd iad ri briathraibh an Tighearn, agus phill iad o dhol an aghaidh Ieroboaim.

5 Agus ghabh Rehoboam còmhnuidh ann an Ierusalem, agus thog e bailte daingnichte ann an Iudah:

6 Thog e eadhon Bet-lehem, agus Etam, agus Tecoa,

7 Agus Bet-sur, agus Socho, agus Adullam,

8 Agus Gat, agus Maresah, agus Siph,

9 Agus Adoraim, agus Lachis, agus Asecah,

10 Agus Sorah, agus Aialon, agus He-

¹ maille ri.

² seall.

³ duine. Eabh.

⁴ chòmhraig.

bron; a *tha* ann an Iudah, agus ann am Beniamin, 'nam bailtibh daingnichte.

11 Agus neartaich e na daingnichean, agus chuir e ceannardan anna, agus taisgeacha bidh, agus olaidh, agus fionn.

12 Agus anns gach baile¹ fa leth *chuir* e sriathan agus sleaghan, agus rinn e ro làidir iad; oir bha Iudah agus Benjamin aige air a thaobh.

13 Agus thàinig na sagairt agus na Lebhithich, a *bha* ann an Israel uile, d'a ionnsuidh as an crìochaibh uile:

14 (Oir dh'fhàg na Lebhithich am fo-bhailtean², agus an sealbh, agus thàinig iad gu Iudah agus gu h-Ierusalem; a chionn gu'n do chuir Ieroboam agus a mhic iad o fhrithealadh ann an dreuchd nan sagart do'n Tighearn.

15 Agus rinn e dha féin sagairt air son nan àitean àrda, agus air son dhiabhol, agus air son nan laogh a rinn e.)

16 Agus 'nan déigh-san thàinig a mach á uile threubhan Israeil, iadsan a shocraich an cridhe a dh'iarraidh an Tighearna Dé Israeil, gu h-Ierusalem a dh'ìobradh do'n Tighearna Dia an aithriche.

17 Agus dhaingnich iad rìoghachd Iudah, agus rinn iad Rehoboam mac Sholaimh làidir rè thri bliadhna; oir rè thri bliadhna ghluais iad ann an slighe Dhaibhidh agus Sholaimh.

18 Agus ghabh Rehoboam Mahalat nighean Ierimoi, mhic Dhaibhidh, dha féin 'na mnaoi; Abihail mar an ceudna, nighean Eliaib, mhic Iese:

19 Agus rug ise dha clann; Ieus, agus Semariah, agus Saham.

20 Agus 'na déigh-san ghabh e Maa-chah, nighean Absaloim, a rug dha Abiah, agus Atai, agus Sisa, agus Selomit.

21 Agus ghràdhaich Rehoboam Maa-chah, nighean Absaloim, os ceann a bhan agus a choimhleabaichean uile; oir ghabh e dha féin ochd mnàid dheug, agus trì fichead coimhleabach, agus ghin e ochd mic fhichead, agus trì fichead nighean.)

22 Agus rinn Rehoboam 'na cheannard Abiah, mac Mhaacah, gu bhí 'na riaghlair am measg a bhràithrean; oir smuainich e air a dheanamh 'na rìgh.

23 Agus rinn e gu glic, agus sgaoil e a' *chuid eile* d'a mhacaibh uile air feadh uile thìre Iudah agus Bheniamin, anns na bailtibh daingnichte uile; agus thug e dhoibh pailteas bidh; agus dh'ìarr e mòran bhan.

CAIB. XII.

1 *Thréig Rehoboam lagh an Tighearn.* 2 *Thàinig Sisac rìgh na h-Eiphit a nìs 'na aghaidh, agus ghlac e bailtean daingnichte Iudah.* 3 *Dh'ìros-laich Rehoboam e féin, agus thug Dia càil-eigin do shaorsa dha.* 13 *A rìoghachadh agus a blàs.*

AGUS an uair a dhaingnicheadh rìoghachd Rehoboam, agus a dh'fhàs e cumhachdach³, thréig e lagh an Tighearn, agus Israel uile maille ris.

2 Agus anns a' chùigeadh bliadhna do rìgh Rehoboam, thàinig Sisac rìgh na h-Eiphit a nìs an aghaidh Ierusalem, (a chionn gu'n do pheacaich iad an aghaidh an Tighearn,)

3 Le mìle agus dà cheud carbad, agus le trì fichead mìle marcach: agus *bha* 'n sluagh gun àireamh a thàinig maille ris as an Eiphit; na Lubaich, na Sucaich, agus na h-Etiopaich,

4 Agus ghlac e na bailte daingnichte a *bhuineadh* do Iudah, agus thàinig e gu h-Ierusalem.

5 An sin thàinig Semaiah am fàidh gu Rehoboam, agus gu h-uachdaranaibh Iudah, a bha air cruinneachadh gu h-Ierusalem air eagal Shisaic, agus thubhairt e riu, Mar so tha'n Tighearn ag ràdh, Dh'fhàg⁴ sibhse mise, agus air an aobhar sin dh'fhàg mise sibhse ann an làimh Shisaic.

6 An sin dh'ìroslaich uachdarain Israeil agus an rìgh iad féin, agus thubhairt iad, *Tha'n* Tighearna ceart.

7 Agus an uair a chunnaic an Tighearn gu'n d'ìroslaich siad iad féin, thàinig focal an Tighearna gu Semaiah, ag ràdh, Dh'ìroslaich siad iad féin; cha sgrios mi iad, ach bheir mi dhoibh càil-eigin do shaorsa; agus cha taomar mo chorruiach a mach air Ierusalem le làimh Shisaic.

8 Gidheadh, bithidh iad 'nan seirbhisich aige, agus bithidh aithne aca air mo sheirbhis-sa, agus air seirbhis rìoghachd-an nan dùchanna.

9 Uime sin thàinig Sisac rìgh na h-Eiphit a nìs an aghaidh Ierusalem, agus thug e leis ionmhais tighe an Tighearn, agus ionmhais tighe an rìgh; bhuin e leis an t-ionlan: thug e leis mar an ceudna na targaidean òir a rinn Solamh.

10 Agus rinn rìgh Rehoboam targaid-eann umha 'nan àit, agus thug e thairis *iad* do làimh cheannard an fhreiceadain, a ghléidh dorus tighe an rìgh.

11 Agus an uair a chaidh an rìgh a steach do thigh an Tighearna, thàinig am freiceadan agus thog siad iad, agus thug iad air an ais iad gu seòmar an fhreiceadain.

12 Agus an uair a dh'ìroslaich se e féin, thionndaidh corruich an Tighearn uaith, chum nach sgriosadh se e gu tur. Agus mar an ceudna ann an Iudah bha nithe gu maith.

13 Agus dhaingnich rìgh Rehoboam e féin ann an Ierusalem, agus rìghich e. A nis *bha* Rehoboam aon agus dà fhic-

¹ caithir. ² dù-bhailtean, fearann comh-roinn; suburbs. Sags.

³ neartaich se, féin.

⁴ Thréig.

II. EACHDRAIDH, XII. XIII.

ead bliadhna dh'aois, an uair a thòisich e air rìoghachadh, agus rìghich e seachd bliadhna deug ann an Ierusalem, am baile a thaghl an Tighearn a mach á uile threubhan Israeil a chur 'ainme an sin: agus b'e ainm a mhàthar Naamah, Banamonach.

14 Agus rinn e ole, a chionn nach d'ulluich e a chridhe a dh'iarraidh an Tighearn.

15 A nis gnìomhara Rehoboam, an toiseach agus mu dheireadh, nach 'eil iad sgriobhta ann an leabhar Shemaiah an fhàidh, agus Ido an fhìr-sheallaidh, mu thimchioll ghinealach? Agus bha cogadh eadar Rehoboam agus Ieroboam rè an làithean uile.

16 Agus choidil Rehoboam maille r'a aithrichibh, agus dh'adhlaicheadh e ann am baile Dhaibhidh: agus rìghich Abiah a mhac 'na àit.

CAIB. XIII.

1 Bha cogadh eadar Abiah agus Ieroboam. 5 Chuir Abiah an cèill ceartas a chèis. 13 Bhuadhaich e air Ieroboam, agus mharbhadh e Israel le h-àr mòr. 21 A mhàin agus a chlam.

ANIS anns an ochdamh bliadhna deug do rìgh Ieroboam, thòisich Abiah¹ air rìoghachadh os ceann Iudah.

2 Tri bliadhna rìghich e ann an Ierusalem: agus b'e ainm a mhàthar Maachah, nighean [Abisaloim, mhic] Uriel o Ghibeah². Agus bha cogadh eadar Abiah agus Ieroboam.

3 Agus chuir Abiah an cath an ordugh le armailt do dhaoineibh treuna ann an cogadh, ceithir chud mìle fear taghta: agus chuir Ieroboam an cath an ordugh 'na aghaidh le ochd ceud mìle fear taghta, daoine treuna gaisgeil.

4 Agus sheas Abiah suas air sliabh Sheमारaim, a tha ann an sliabh Ephraim, agus thubhairt e, Eisdibh rium, a Ieroboam, agus Israeil uile.

5 Nach bu chòir dhuibhse fios a bhi ag-aibh gu'n d'thug an Tighearna Dia Israeil an rìoghachd os ceann Israeil thairis do Dhaibhidh gu bràth, eadhon dha-san agus d'a mhacaibh le coimheangal salainn?

6 Gidheadh, dh'éirich Ieroboam, mac Nebait, seirbhiseach Sholaimh mhic Dhaibhidh suas, agus rinn e ceannairc an aghaidh a thighearn:

7 Agus chruinnich d'a ionnsuidh daoine faoine, mic Bheliail, agus neartaich siad iad féin an aghaidh Rehoboaim, mhic Sholaimh, 'nuair a bha Rehoboam òg agus tais-chridheach³, agus nach b'urrainn e cur 'nan aghaidh.

8 Agus a nis tha sibh a' snuaineachadh air cur an aghaidh rìoghachd an Tigh-

earn ann an làimh mhac Dhaibhidh; agus tha sibh 'nur⁴ sluagh mòr, agus tha agaibh laogh òir, a rinn Ieroboam dhuibh mar dhée.

9 Nach do thilg sibh a mach sagairt an Tighearna, mic Aaroin, agus na Lebhithich, agus nach d'rinn sibh dhuibh féin sagairt mar chinnich eile an domhain? Gach neach a thig g'a choisreagadh féin le tarbh òg agus le seachd reitheachaibh, bithidh esan air ball 'na shagart dhoibh-san nach 'eil 'nan diathaibh.

10 Ach d'ar taobh-ne, is e'n Tighearn ar Dia, agus cha do thréig sinn e: agus is iad mic Aaroin na sagairt a tha frith-ealadh do'n Tighearn, agus tha na Lebhithich a' feitheamh air an obair féin:

11 Agus tha iad a' losgadh do'n Tighearn iobairte-loisgte air gach maduinn agus air gach feasgar, agus tùis chùibhraidh; agus tha aran na fianais air a' bhord fhìor-ghlan, agus an coinnleir òir maille r'a lòchranabhl a lasadh air gach feasgar: oir tha sinne a' gleidheadh cùrainn an Tighearn ar Dé; ach thréig sibh-se e.

12 Agus, feuch, maille ruinne tha Dia féin 'na cheannard oirnn, agus a shagairt le trompaidibh fuaimneach a thoirt caismeachd 'nur n-aghaidh-sa. A chlann Israeil, an cogaibh-se an aghaidh an Tighearna Dé bhur n-aithriche; oir cha soirbhich sibh.

13 Ach thug Ieroboam air luchd feall-fholaich⁵ teachd mu'n cuairt air an cùlaobh, air chor as gu robh iad féin fa chomhair Iudah, agus an luchd feall-fholaich air an cùlaobh.

14 Agus an uair a sheall Iudah 'nan déigh, feuch, bha'n cath air am beulaobh agus air an cùlaobh: agus ghlaodh iad ris an Tighearn, agus rinn na sagairt fuaim le trompaidibh.

15 Agus rinn fir Iudah gair: agus an uair a rinn fir Iudah gair, air ball bhuail Dia Ieroboam agus Israeil uile roimh Abiah agus Iudah.

16 Agus theich clann Israeil roimh Iudah; agus thug Dia thairis iad 'nan làimh.

17 Agus mharb Abiah agus a shluagh iad le h-àr mòr; oir thuit sìos marbhta do Israel, cùig ceud mìle fear taghta.

18 Agus dh'irioslaicheadh clann Israeil air an àm sin, agus neartaicheadh⁶ clann Iudah, a chionn gu'n d'earb iad as an Tighearna Dia an aithriche.

19 Agus lean Abiah an ruaig air Ieroboam, agus ghlac e uath mòr-bhailte⁷; Bet-el le 'bhailtibh beaga, agus Iesana le 'bhailtibh beaga, agus Ephron le 'bhailtibh beaga.

¹ Abiam. I Rìgh, Caib. XV. r. 1.

² Faic I. Rìgh, Caib. XV. r. 2.

³ maoth-chridheach.

⁴ ann blur.

⁵ plaid-luidhe.

⁶ bhuadhaich.

⁷ caitiriche.

20 Agus cha d'fhuair Ieroboam neart nì's mò ann an làithibh Abiah: agus bhuail an Tighearn e, agus fhuair e bàs.

21 Ach dh'fhàs Abiah cumhachdach, agus phòs e¹ ceithir mnàì dheug, agus ghin e dà mhac thar fhlichead, agus sè nigheana deug.

22 Agus a' chuid eile do gh'iomharaibh Abiah, agus a shlighean, agus a bhriathra, *tha iad* sgrìobhta ann an eachdraidh an fhàidh Ido.

CAIB. XIV.

1 *Fhuair Abiah bàs, agus rìghich Asa 'na àit.*

3 *Chuir Asa air falbh altairean nan dèc coimheach.*

9 *Bhuail e na h-Etiopach aig Maresah, agus thug e mòran creiche uatha.*

AGUS choidil Abiah maille r'a aithrichibh, agus dh'adhaic iad e ann am pàile Dhaibhidh; agus rìghich Asa a mhac 'na àit. 'Na làithibh-san bha'n tìr sàmhach² deich bliadhna.

2 Agus rinn Asa an *ni a bha* maith agus ceart ann an stùilbh an Tighearn a Dhé:

3 Oir chuir e air falbh altairean nan *dèc* coimheach, agus na h-àitean àrda, agus bhris e sìos na dealbhan, agus ghearr e sìos na dòireachan;

4 Agus dh'aitm e do Indah an Tighearna Dia an aithriche iarraidh, agus an lagh a ghleidheadh³, agus an àithne.

5 Chuir e air falbh mar an ceudna à uile bhàiltibh Iudah na h-àitean àrda, agus na dealbhan⁴. Agus bha 'n rìoghachd sàmhach 'na làthair.

6 Agus thog e bailte daingnichte ann an Iudah: oir bha'n tìr sìochail, agus cha robh cogadh aige anns na bliadhnaibh sin; oir thug an Tighearna fois da.

7 Uime sin thubhairt e ri Iudah, Togamaid na bailte so, agus deanamaid mu'n cuairt *orra* ballachan, le tùraibh, geatachaibh, agus crannaibh, an uair a *tha'n* tìr fathast romhainn: oir dh'iarr sinne an Tighearn ar Dia; dh'iarr sinn e, agus thug e fois dhuinn air gach taobh. Uime sin thog e iad, agus shoirbhich leo.

8 Agus bha aig Asa armailt do *dhaoinibh* a dh'iomchair sgiath agus sealg, á Iudah trì cheud mìle, agus á Beniamin, a dh'iomchair targaid agus a tharruing bogha, dà cheud agus ceithir fichead mìle; iad sin uile 'nan daoinibh treuna gaisgil.

9 Agus thàinig a mach 'nan aghaidh Serah an t-Etiopach le armailt mìle do mhiltibh, agus trì cheud carbad, agus thàinig e gu Maresah.

10 Agus chaidh Asa mach 'na aghaidh, agus chuir iad an cath an ordugh ann an gleann Shephatah aig Maresah.

11 Agus ghlaodh Asa ris an Tighearn a Dhia, agus thubhairt e, A Thighearna, cha 'n eil ann ach an aon chuid duitse cuideachadh le mòran, no leo-san a *ta* gun neart: cuidich leinne, a Thighearn ar Dia; oir asad-sa earbaidh sinn, agus ann ad ainm-sa thèid sinn an aghaidh na mòrchuideachd so: a Thighearn, is tusa ar Dia; na buadhaicheadh duine a'd' aghaidh.

12 Agus bhuail an Tighearn na h-Etiopach roimh Asa, agus roimh Iudah; agus theich na h-Etiopach.

13 Agus lean Asa agus an sluagh a *bha* maille ris iad gu Gerar: agus thuit do na h-Etiopach uiread⁵ as nach robh tuillcadh neirt aca⁶; oir sgriosadh iad roimh an Tighearn agus roimh 'fheachd: agus thug iad leo ro mhòran creiche.

14 Agus bhuail iad na bailtean uile mu'n cuairt air Gerar, oir bha eagal an Tighearn orra: agus chreach iad na bailtean uile, oir bha mòran creiche anna.

15 Agus bhuail iad mar an ceudna bùthan na spréidh, agus thug iad leo caoraich ann am pailteas, agus càmhail; agus phill iad gu h-Ierusalem.

CAIB. XV.

1 *Fàidheadaireachd Asariah.* 8 *Chuir Asa air falbh na h-iodhola gràitèil á tìr Iudah.* 12 *Rinn e fein agus an sluagh uile coimheangal ris an Tighearn.* 16 *Chuir e Maachah a mhàthair o bhi 'na ban-rìghinn a chionn gu'n d'rinn i dealbh ann an dòire.*

AGUS thàinig spiorad Dhé air Asariah mac Odeid:

2 Agus chaidh e suas an coinneamh Asa, agus thubhairt e ris, Eisdibh riumsa, Asa, agus Iudah uile, agus a Beniamin; *Tha 'n* Tighearn maille ribh, an fèadh a tha sibhse maille ris-san: agus na dh'iarras sibh e, gheibhear leibh e; ach na thréig-eas sibhse esan, tréigidh esan sibhse.

3 An is rè iomadh là *bithidh* Israel as eugmhais Dhé na firinn, agus as eugmhais sàgairt a theagaisgeas, agus as eugmhais lagha.

4 Ach an uair a philleas iad 'nan air a dh'iomhsuidh an Tighearna Dé Isracil, agus a dh'iarras iad e, gheibhear leo e.

5 Agus anns na h-amannaibh sin, cha *bhi* sìth ann dha-san a thèid a mach, no dha-san a thig a steach, ach buaircas⁷ mòr air uile luchd-àiteachaidh nan dùchanna.

6 Agus sgriosar cinneach le cinneach, agus baile le baile; oir claidhidh Dia iad leis gach aire.

7 Ach bithibh-se làidir, agus na biodh bhuir làman lag; oir tha duais ann air son blur u-oibre.

¹ *ghabh e d'a ionnsuidh.* Eabh.

² *aig fois.*

³ *a dheanamh.* Eabh.

⁴ *grian-riochdan.*

⁵ *oiread.* Eir. ⁶ *nach robh a' bheag bed dhiubh*

⁷ *tuairgce, cràd'h-slat.*

8 Agus an uair a chual' Asa na briathra sin, agus fàidheadaireachd [Asariah mhiic] Odeid an fhàidh, ghabh e misneach, agus chuir e air falbh na *h-ìodhola* gràineil a tìr Iudah agus Bheniamin uile, agus as na bailtibh a ghlac e do shliabh Ephraim, agus dh'ath-nuadhaich e altair an Tighearn, a *bha* air beulaobh sgàth-thighe an Tighearn.

9 Agus chruinnich e Iudah uile agus Benjamin, agus na coigrich maille ri u' a h-Ephraim, agus a' Manaseli, agus a' Simeon; oir thàinig iad thairis d'a ionusuidh a h-Israel ann am pailteas, an uair a chunnaic iad gu'n *robh* an Tighearn a Dhia maille ris.

10 Agus chruinnich iad an ceann a chèile aig Ierusalem anns an treas mìos, ams a' chùigeadh bliadhna deug do rìoghachadh Asa.

11 Agus dh'òbair iad do'n Tighearna san àm sin do'n chreich a thug iad leo, seachd ceud bò, agus seachd mìle caora.

12 Agus rinn iad coimhcheangal gu'n iarradh iad an Tighearna Dia an aithriche le'n uile chridhe, agus le'n uile anam;

13 Agus gu'n rachadh gach neach nach iarradh an Tighearna Dia Israeil a chur gu bàs, co dhiubh bu bheag no mòr, fear no bean, e.

14 Agus mhionnaich iad do'n Tighearna le guth àrd, agus le gair, agus le trompaidibh, agus le buabhullaibh.

15 Agus rinn Iudah uile gairdeachas a thaobh nam mìonnan sin: oir mhuonnaich iad le'n uile chridhe, agus dh'iarr iad e le'n uile rùn; agus fhuaradh e leo. Agus thug an Tighearna fois dhoibh air gach taobh.

16 Agus mar an ceudna *thaobh* Mhaachath mathar rìgh Asa, chuir e i o *bhi* 'na ban-rìghinn, a chionn gu'n d'rinn i dealbh uamhasach ann an doire: agus ghearr Asa sìos a dealbh uamhasach, agus mhinphronn se e, agus loisg se e aig sruth Chidroin.

17 Ach cha do chuireadh na h-àitean àrda air falbh a h-Israel: gidheadh, bha cridhe Asa iomlan rè a làithean uile.

18 Agus thug e steach na nithean a naomhaich 'athair, agus na nithean a naomhaich e féin, do thigh an Tighearn, airgid, agus òr, agus soithichean.

19 Agus cha robh cogadh tuilleadh ann gu ruig an cùigeadh bliadhna deug thar fhichead do rìoghachadh Asa.

CAIB. XVI.

1 Rinn Asa coimhcheangal ri Benhadad an aghaidh Bhaasa. 7 Thug Hanani achemhasan do Asa a chionn gu'n d' earb e as na Sìrianaich. 12 Dh'fhàs eucail 'na chosaibh. 13 A thàs.

ANNS an t-seathadh bliadhna deug thar fhichead do rìoghachadh Asa,

thàinig Baasa rìgh Israeil a mìos an aghaidh Iudah, agus thog e Ramah, chum nach leigeadh e le neach air bith dol a mach no teachd a stigh gu Asa rìgh Iudah.

2 An sin thug Asa mach airgid agus òr a ionmhasaibh tighe an Tighearn agus tighe an rìgh, agus chuir e *teachd-àirean* gu Benhadad rìgh Shiria a bha chòmhnuidh aig Damascus, ag ràdh,

3 Bìodh coimhcheangal eadar mise agus thusa, mar a *bha* eadar m'athair-sa agus t'athair-sa: feuch, chuir mi a d'ionnsuidh airgid agus òr; falbh, bris do choimhcheangal ri Baasa rìgh Israeil, a chum gu'n imich e uam.

4 Agus dh'èisd Benhadad ri rìgh Asa, agus chuir e ceannardan nan armailt a *bha* aige, an aghaidh bhailean Israeil; agus bhuail iad Ion, agus Dan, agus Abelmaim, agus uile bhailean ionmhas Naph-tali.

5 Agus an uair a chual Baasa *sin*, leig e dheth Ramah a thogail, agus sguir e d'a obair.

6 An sin thug Asa an rìgh leis Iudah uile; agus thug iad leo clacha Ramah, agus 'fhiodh, leis an robh Baasa a' togail; agus thog e leo Geba, agus Mispah.

7 Agus anns an àm sin thàinig Hanani am fear-seallaidh gu h-Asa rìgh Iudah, agus thubhairt e ris, A chionn gu'n d' earb thu a rìgh Shiria, agus nach d' earb thu as an Tighearna do Dhia, uime sin tha armailt rìgh Shiria air dol as o d' làimh.

8 Nach robh na h-Etiopaich agus na Lubaich 'nan sluagh lionmhor, le ro mhòr-an charbad agus marc-shluaigh? gidheadh a chionn gu'n d' earb thu as an Tighearn, thug e thairis do d' làimh iad.

9 Oir *tha* sùilean an Tighearn ag amharc a null agus a nall air feadh na talmhainn uile, a chum e féin a nochdadh làidir as an leth-san, aig am bheil cridhe iomlan d'a thaobh. Rinn thu gu h-amaideach an so; air an aobhair sin o so a mach bithidh cogadh a d' aghaidh.

10 An sin bha fearg air Asa ris an fhear-sheallaidh, agus chuir e ann an tigh prìs-ain e, a chionn gu'n *robh* e ann an corruich ris a thaobh an *ni* so. Agus rinn Asa ainneart air *cuid* do'n t-sluagh san àm sin.

11 Agus, feuch, gnìomharan Asa, an toiseach agus mu dheireadh, feuch, *tha* iad sgriobhta ann an leabhar rìghrean Iudah agus Israeil.

12 Agus dh'fhàs eucail air Asa 'na chosaibh anns an naothadh bliadhna deug thar fhichead d'a rìoghachadh, *agus an d' thàinig* 'eucail gu h-àirde *mhoir*: gidheadh, 'na eucail cha d'iarr e an Tighearn, ach na liglichean.

13 Agus choidil Asa maille r'a aith-

richibh, agus dh'eug e anns a' cheud bliadhna agus dà fhichead d'a rìoghachadh.

14 Agus dh'adhlaid iad e 'na uaigh féin, a rinn e air a shon féin ann am baile Dhaibhidh, agus chuir iad 'na luidhe e ann an leabaidh, a lionadh le nithibh cùbhairaidh¹, agus le h-ìomadh gnè olaidh² air an deasachadh le h-ealadhain an léigh: agus rinn iad dha losgadh ro mhòr.

CAIB. XVII.

1 *Ghluais Iehosaphat ann an slighibh an Tighearn.*
7 *Chuir e cuid d'a uachdaranaibh a theagasg ann am bailtibh Iudah.* 11 *Thug na Philistich agus na h-Arabaich tiodhlacan d'a ionnsuidh.* 13 *A cheannardan agus 'armailtean.*

AGUS rìghich Iehosaphat a mhac 'na àit, agus neartaich se e féin ann aghaidh Israeil.

2 Agus chuir e feachd ann an uile bhailtibh daingnichte Iudah, agus chuir e freiceadain ann an tìr Iudah, agus ann am bailtibh Ephraim, a ghlac Asa 'athair.

3 Agus bha 'n Tighearna maille ri Iehosaphat, a chiomn gu'n do ghluais e ann an ceud shlighibh Dhaibhidh 'athar, agus nach d'iarr e dh'ionnsuidh Bhaalim³;

4 Ach gu'n d'iarr e dh'ionnsuidh (an Tighearna) Dé 'athar, agus gu'n do ghluais e 'na àitheantaibh, agus cha b'ann a réir deanadais Israeil:

5 Uime sin dhaingnich an Tighearn an rìoghachd 'na làimh; agus thug Iudah uile tiodhlacan gu Iehosaphat; agus bha aige beartas agus urram ann am pailteas.

6 Agus dh'ardaicheadh a chridhe ann an slighibh an Tighearn; agus mar an ceudna chuir e air falbh na h-àitean àrda agus na doireachan á Iudah.

7 Agus anns an treas bliadhna d'a rìoghachadh chuir e *cuid* d'a uachdaranaibh⁴, Benhail, agus Obadiah, agus Sechariah, agus Netaneel, agus Micaiah, a theagasg ann am bailtibh Iudah.

8 Agus maille ri-u-san na Lebhithich, Semaiah, agus Netaniah, agus Sebadiah, agus Asahel, agus Semiramot, agus Iehonatan, agus Adoniah, agus Tobiah, agus Tob-adoniah, Lebhithich uile; agus maille ri-u-san Elisama, agus Iehoram, na sagairt.

9 Agus theagasg iad ann an Iudah, agus leabhar lagha an Tighearn aca, agus chaidh iad mu'n cuairt air feadh uile bhailtean Iudah, agus theagasg iad an sluagh.

10 Agus bha eagal an Tighearn air uile rìoghachdaibh nan tìr a bha mu'n cuairt air Iudah, agus cha do chog iad ri Iehosaphat.

11 Agus thug *cuid* do na Philistich

tiodhlacan do Iehosaphat, agus airgid cise: mar an ceudna thug na h-Arabaich d'a ionnsuidh spréidh, seachd mìle agus seachd ceud reithe, agus seachd mìle agus seachd ceud boc-gaibhire.

12 Agus dh'fhàs Iehosaphat gu h-anbarrach mòr; agus thog e ann an Iudah caistealan⁵ agus bailtean ionmhais.

13 Agus bha mòran oibre aige ann am bailtibh Iudah, agus fir-chogaidh, daoine comasach gaisgeil ann an Ierusalem.

14 Agus so 'an àireamh, a réir tighe an aithriche: Do Iudah, ceannarda mhiltean; Adnah an ceannard, agus maille ris daoine comasach gaisgeil, trì cheud mìle.

15 Agus na dhéigh-san Iehohanan an ceannard, agus maille ris dà cheud agus ceithir fichead mìle.

16 Agus 'na dhéigh-san Amasiah mac Shichri, a thug e féin suas do'n Tighearn, agus maille ris dà cheud mìle fear comasach gaisgeil.

17 Agus do Bheniamin; Eliada fear comasach gaisgeil, agus maille ris daoine armaichte le bogha agus le targaid, dà cheud mìle.

18 Agus 'na dhéigh-san Iehosabad, agus maille ris ceud agus ceithir fichead mìle, deas gu cogadh.

19 *Bha* iad sin a' feitheamh air an rìgh, a bhàrr *orra-san* a chuir an rìgh anns na bailtibh daingnichte air feadh Iudah uile.

CAIB. XVIII.

1 *Chaidh Iehosaphat maille ri Ahab an aghaidh Ramot-ghilead.* 4 *Dh'fhiosraich iad do fhocal an Tighearn, agus thug na fàidhean bréige lán-dearbhadh dhoibh gu'n soirbheicheadh leo.* 6 *Chuir eadh fios air Micaiah: 15 Roimh-innis e bàs Ahaib.*

AGUS bha aig Iehosaphat beartas agus cliù ann am pailteas; agus rinn e cleamhnas ri Ahab.

2 Agus an ceann bhliadhnan àraidh chaidh e sìos a dh'ionnsuidh Ahaib do Shamaria: agus mharbh Ahab caoraich agus crodh ann am pailteas air a shon, agus air son an t-sluaigh a bha maille ris, agus chuir e impidh air dol suas gu Ramot-ghilead.

3 Agus thubhairt Ahab rìgh Israeil ri Iehosaphat rìgh Iudah, An tèid thu maille riumsa do Ramot-ghilead? Agus fhreagair esan e, *Tha* mise mar a *ta* thusa, agus mo shluagh-sa mar do shluagh-sa agus *bithidh sinn* leat anns a' chogadh.

4 Agus thubhairt Iehosaphat ri rìgh Israeil, Fiosraich⁶, guidheam ort, an diugh do fhocal an Tighearn.

5 Uime sin chruinnich rìgh Israeil na fàidhean an ceann a chéile, ceithir cheud fear, agus thubhairt e ri u, An tèid sinn do Ramot-ghilead gu cath, no'n leig mi leis?

¹ spìosraidh deadh-bholaidh.

² oinemeid.

³ dhiathan bréige.

⁴ chuir e fios a dh'ionnsuidh uachdaran.

⁵ tair.

⁶ Fedraich.

Agus thubhairt iadsan, Falbh suas; oir bheir Dia an làimh an righ *iad*.

6 Agus thubhairt Iehosaphat, Nach *'eil* an so fàidh tuilleadh leis an Tighearna, chum gu'm fiosraich sinn dheth?

7 Agus thubhairt righ Israeil ri Iehosaphat, *Tha* fathast aon fhear *ann*, leis am feud sinn fiosrachadh do'n Tighearn; ach tha fuath agam dha, oir cha *'n'eil* e deanamh fàistneachd mu m' thimchioll idir air maith, ach an còmhnuidh air olc: *is* e so Micaiah. mac Imla. Agus thubhairt Iehosaphat, Na h-abradh an righ mar sin.

8 Agus ghairm righ Israeil aon *d'a* mhaoraibh, agus thubhairt e, Greas *an so* Micaiah mac Imla.

9 Agus shuidh righ Israeil, agus Iehosaphat righ Iudah, gach fear air a righ-claithir féin, le'n earradh *rioghail* orra, agus shuidh iad ann an àite rèidh, aig dol a steach geata Shamaria; agus *bha* na fàidhean uile ri fàidheadaireachd 'nan làthair.

10 Agus rinn Sedeciah, mac Chenaanah, adhaircean iarunn dha féin, agus thubhairt e, Mar so tha'n Tighearn ag ràdh, Leo so buailidh tu na Sirianaich¹, gus an cuirear as doibh.

11 Agus rinn na fàidhean uile fàidheadaireachd mar sin, ag ràdh, Falbh suas gu Ramot-gilead, agus soirbhich; oir bheir an Tighearn an làimh an righ *iad*.

12 Agus an teachdair a chaidh a ghairm Mhicaiah, labhair e ris, ag ràdh, Feuch, *tha* briathra nam fàidh le-h-aon bheul *a' foillseachadh* maith do'n righ: bitheadh t'fhocal-sa, guidheam ort, mar *fhocal* aoin diubhsan, agus labhair maith.

13 Agus thubhairt Micaiah, *Mar is* beò an Tighearn, eadhon, *an ni* a their mo Dhia, sin labhraidh mise.

14 Agus thàinig e dli'ionnsuidh an righ, agus thubhairt an righ ris, A Mhicaiah, an téid sinn do Ramot-gilead gu cath, no'n leig mi leis? agus thubhairt esan, Rachaidh suas, agus soirbhichibh, oir bheirear ann bhur làimh *iad*.

15 Agus thubhairt an righ ris, Cia lìon uair a m'bhionnaicheas mi thu, nach innis thu dhomh ach an fhèrrinn ann an ainm an Tighearn?

16 Agus thubhairt esan, Chunnaic mi Israel uile sgapta air na sléibhtibh, mar chaoraidh aig nach *'eil* adhairce: agus thubhairt an Tighearna, Cha *'n'eil* maighstir² orra so; pilleadh gach fear d'a thigh féin ann an sìth.

17 (Agus thubhairt righ Israeil ri Iehosaphat, Nach d'innis mi dhuit, nach dean-

adh e fàistneachd mu m' thimchioll-sa air maith, ach air olc?)

18 A ris thubhairt e, Uime sin éisdibh ri focal an Tighearna: Chunnaic mise an Tighearna 'na shuidhe air a righ-claithir, agus uile shlòigh nan nèamh 'nan seasamh air a làimh dheis agus air a làimh chli.

19 Agus thubhairt an Tighearna, Cò a chuireas impidh³ air Ahab righ Israeil, a chum gu'n téid e suas, agus gu'n tuit e ann an Ramot-gilead? Agus labhair aon, ag ràdh mar so, agus aon eile ag ràdh mar sud.

20 Agus thàinig spiorad a mach, agus sheas e am fianuis an Tighearn, agus thubhairt e, Cuiridh mise impidh air. Agus thubhairt an Tighearna ris, Cia leis?

21 Agus thubhairt esan, Théid mi mach, agus bithidh mi a'm' spiorad bréige ann am beul 'fhàidhean uile. Agus thubhairt an Tighearna, Cuiridh tu impidh air, agus mar an ceudna buaidhichidh tu: imich, agus dean mar sin.

22 A nis uime sin, feuch, chuir an Tighearna spiorad bréige ann am beul nam fàidh sin agad, agus labhair an Tighearn olc mu d' thimchioll.

23 An sin chaidh Sedeciah mac Chenaanah am fagus, agus bhuaile e Micaiah air a' ghiall, agus thubhairt e, Cia an taobh a chaidh spiorad an Tighearn uamsa a labhairt riutsa?

24 Agus thubhairt Micaiah, Feuch, cli thu san là sin air an téid thu steach do sheòmar-cuil gu d'fhalachadh féin.

25 An sin thubhairt righ Israeil, Glacaidh Micaiah, agus thugaibh air ais e gu h-Amon uachdaran a' bhaile, agus gu Ioas mac an righ;

26 Agus abraibh, Mar so thubhairt an righ, Cuiribh am fear so anns a' phrìosan, agus beathaichibh e le aran airce⁴, agus le uisge airce, gus am pill mise ann an sìth.

27 Agus thubhairt Micaiah, Ma philleas tusa idir ann an sìth, cha do labhair an Tighearna leamsa. Agus thubhairt e, Eisidibh, a shlòigh uile⁵.

28 Uime sin chaidh righ Israeil, agus Iehosaphat righ Iudah, suas gu Ramot-gilead.

29 Agus thubhairt righ Israeil ri Iehosaphat, Cuiridh mise mi féin ann an coslas eile, agus théid mi steach do'n chath; ach cuir thusa t'earradh *rioghail* ort. Agus chuir righ Israeil e féin ann an coslas eile, agus chaidh e⁶ steach do'n chath.

30 A nis dh'àithn righ Shiria do cheannardaibh nan carbad a *bha* aige, ag ràdh,

¹ purraidh tu Siria.

² tighearn.

⁴ teamntachd.

⁵ Eisdeadh gach uile shluagh.

⁶ iad.

³ a dli'aomas, a mheallus.

Na cogaibh ris a' bheag, no ris a' mhòr, ach ri rìgh Israeil a' mhàin.

31 Agus an uair a chunnaic ceannardan nan carbad Iehosaphat, thubhairt iad, *Is e so rìgh Israeil: uime sin thàinig iad mu'n cuairt air a chogadh.* Ach ghlaodh Iehosaphat a mach, agus chuidich an Tighearn leis, agus dh'aom Dia iad gu falbh uath.

32 Oir an uair a chunnaic ceannardan nan carbad nach b'e rìgh Israeil a bha ann, phill iad o a leantúinn.

33 Agus tharruing fear a bhogha a thaobh tuairmise¹, agus bhuail e rìgh Israeil eadar alta na lùirich: uime sin thubhairt e r'a charbadair, Tionndaidh do làmh, agus thoir a mach as an fheachd² mi; oir tha mi leòinte.

34 Ach mheudaich an cath air an là sin: uime sin dh'fhan rìgh Israeil suas 'na charbad an aghaidh nan Sirianach gu ruig am feasgar; agus fhuair e bàs mu àm dol fodha³ na grèine.

CAIB. XIX.

1 *Thug Iehu achmhasan do Iehosaphat a chionn gu'n do chuidich e le Ahab.* 4 *Chaidh Iehosaphat a mach air feadh an t-sluaigh, agus shuidhich e breitheamhna anns an tìr.* 6 *Theogaisg e dhoibh an dleasdanas.*

A GUS phill Iehosaphat rìgh Iudah a dh'ionnsuidh a thighe ann an sìth gu h-Ierusalem.

2 Agus chaidh Iehu mac Hanani am fear-seallaidh a mach 'na choinneamh, agus thubhairt e ri rìgh Iehosaphat, Am buineadh dhuitse an t-aingidh a chuid-eachadh, agus iadsan a ghràdhachadh a dh'fhuathaicheas an Tighearn? uime sin *tha* fearg riut o làthair an Tighearn.

3 Ach fhuaradh nithe maith annad, a thaobh gu'n do chuir thu air falbh na doireachan as an tìr, agus gu'n d'ulluich thu do chridhe a dh'iarraidh Dhé.

4 Agus ghabh Iehosaphat còmhnuidh ann an Ierusalem: agus chaidh e mach a ris air feadh an t-sluaigh, o Bheer-seba gu sliabh Ephraim, agus thug e air an ais iad a dh'ionnsuidh an Tighearna Dé an aithriche.

5 Agus shuidhich e breitheamhna anns an tìr, air feadh uile bhailte daingnichte Iudah, anns gach baile fa leth.

6 Agus thubhairt e ris na breitheamhnaibh, Thugaibh an aire ciod a ni sibh, oir cha 'n ann air son duine a tha sibh a' tabhairt breth, ach air son an Tighearn; agus *tha e féin* maille ribh anns a' bhreitheanas⁴.

7 A nis ma ta bitheadh eagal an Tigh-

earn oirbh: thugaibh an aire agus bithibh a' deanamh; oir maille ris an Tighearn ar Dia cha 'n eil euceart, no bàigh ri neach seach a chéile, no gabhail duaise.

8 Agus mar an ceudna ann an Ierusalem shuidhich Iehosaphat *cuid* do na Lebhithich, agus *do* na sagartaibh, agus do cheannaibh theaghlach⁵ Israeil, air son breitheanais an Tighearn, agus gu conn-sachadh a *chriochnacadh* an uair a phill iad gu h-Ierusalem.

9 Agus thug e sparradh dhoibh, ag ràdh, Mar so ni sibh ann an eagal an Tighearn, ann an ionracas⁶, agus le cridlie iomlan.

10 Agus ge b'e cùis a thug d'ur n-ionnsuidh o bhur bràithribh a tha còmhnuidh 'nam bailtibh, eadar fuil agus fuil, eadar lagh agus àithne, reachdan agus breitheanais, bheir sibh rabhadh dhoibh nach dean iad eusaontas an aghaidh an Tighearn, agus gu'n tig fearg oirbhse agus air bhur bràithribh: deanaibh mar so, agus cha chiontaich sibh.

11 Agus, feuch, *tha* Amariah an t-àrd shagart os bhur ceann ann an uile ghnothuichibh an Tighearn; agus Sebadiah mac Ismaeil 'na cheannard air tigh Iudah ann an uile ghnothuichibh an rìgh; agus na Lebhithich 'nan luchd-riaghlaidh 'nur⁷ fianuis. Bithibh misneachail, agus deanaibh; agus bithidh an Tighearna maille ris a' mhaith.

CAIB. XX.

1 *Thàinig na Moabaich agus na h-Amonaich gu cath an aghaidh Iudah.* 5 *Urnuigh Iehosaphat.* 14 *Fàistneachd Iahasail.* 22 *Bhuailleadh clann Amoin agus Mhoab le h-àr mòr.* 26 *Bheannaich an sluagh an Tighearn, agus phill iad gu h-Ierusalem.*

A GUS an déigh nan nithe so thàinig clann Mhoab, agus clann Amoin, agus maille riu cuid do na h-Edomaich⁸, an aghaidh Iehosaphat gu cath.

2 Agus thàinig *teachdairean*, agus dh'innis iad do Iehosaphat, ag ràdh, *Tha* sluagh mòr a' teachd ort a nall thair fairge, agus o Edom⁹; agus, feuch, *tha* iad ann an Hasason-tamar; *is e* sin Engedi.

3 Agus bha eagal air Iehosaphat, agus chuir e 'n aghaidh a dh'iarraidh an Tighearn, agus ghairm e trasgadh air feadh Iudah uile.

4 Agus chruinnicheadh Iudah an ceann a chéile a dh'iarraidh *còmhnaidh*¹⁰ o'u Tighearn: eadhon a uile bhailtibh Iudah thàinig iad a dh'iarraidh an Tighearn.

5 Agus sheas Iehosaphat ann an coimh-thional Iudah agus Ierusalem, ann an

¹ tuairimeis, teagmhuais, tuitimeis.

² as an t-sluagh.

³ fuidh.

⁴ ann am focal no gnothuch a' bhreitheanais. Eabh.

⁵ aithrichean. Eabh.

⁶ firinn.

⁷ ann bhur.

⁸ agus maille riu daoine

eile thuilleadh air na h-Amonaich.

⁹ air an taobh so do Shìria.

¹⁰ congnaimh. Eir

tigh an Tighearna, fa chomhair na cùirte nomha,

6 Agus thubhairt e, a Thighearna Dhé ar n-aithriche, nach tusa Dia anns na nèamhaibh? agus *nach 'eil* thu a' riaghladh os ceann uile rioghachda nan cinn-each? agus ann ad làimhsa *nach 'eil* neart agus cumhachd, air chor as nach 'eil neach air bith comasach air seasamh a'd' aghaidh?

7 Nach tusa ar Dia-ne, a dh'fhògair a mach luchd-àiteachaidh na tìre so roimh doshluaigh Israel, agus a thug i do shliochd' Abraham do charaid gu bràth?

8 Agus ghabh iad còmhnuidh innte, agus thog iad air do shonsa innte ionad naomh, air son t'ainme-sa, ag ràdh,

9 Ma thig olc air bith oirnn, claidheamh, breitheanas¹, no plàigh, no gorta, seasaidh sinn fa chomhair an tìghe so, agus ann ad fhianuis-sa, (oir *tha t'ainm* anns an tìgh so,) agus glaochaidh sinn riut 'nar teinn², agus eisidh tusa, agus saoraidh tu sinn.

10 Agus a nis, feuch, *tha* clann Amoin, agus Mhoais, agus sléibh Sheir, aig nach do leig thu le h-Israel dol troimh an crìocha, 'nuair a thàinig iad à tìr na h-Eiphit, ach thionndaidh iad uatha, agus cha do sgrios siad iad:

11 Feuch a nis, *mar a ta* iad a' toirt luigheachd dhuinn, le teachd gus ar tilgeadh a mach á t'òighreachd, a thug thu dhuinn r'a sealbhachadh.

12 O ar Dia, nach toir thu breth orra? oir cha '*n'eil* neart againne an aghaidh an t-sluaigh mhòir so, a tha teachd oirnn: agus cha 'n'eil fhios againn ciod a ni sinn; ach orts *tha* ar suilean.

13 Agus sheas Iudah uile am fianuis an Tighearna; mar an ceudna an òigridh, am mnà, agus an clann.

14 Agus air Iahasiel, mac Shechariah, mhic Bhenajah, mhic Iehieil, mhic Mhataniah, Lebhitheach do mhacaibh Asaiph, bha spiorad an Tighearn, ann am meadhon a' choimhthionail:

15 Agus thubhairt e, Eisidibh *riumsa*, a Iudah uile, agus a luchd-àiteachaidh Ierusalem, agus thusa a rìgh Iehosaphat: Mar so tha'n Tighearn ag ràdh ribh, Na biodh eagail no faitheas oirbh air son an t-sluaigh mhòir so; oir cha leibhse an cath, ach le Dia.

16 Am màireach rachaibh sios 'nan aghaidh: feuch, *tha iad* a' teachd a mìos rathad uchdaich Shids; agus gheibh sibh iad aig ceann an t-srutha, fa chomhair fàsaich Ierueil.

17 Cha *bhi* cath agaibh r'a chur an so; a machan thigibh a làthair, seasaidh, agus

faicibh saorsa an Tighearna maille ribh, a Iudah, agus a Ierusalem: na biodh eagail no faitheas oirbh; am màireach rachaibh a mach 'nan aghaidh, agus *bithidh* an Tighearna maille ribh.

18 Agus chrom Iehosaphat a cheann, le 'aghaidh gu làr; agus thuit Iudah uile, agus luchd-àiteachaidh Ierusalem, sios am fianuis an Tighearn, a' deanamh aoraidh do'n Tighearn.

19 Agus dh'èirich na Lebhitich do chloinn nan Cohatach, agus do chloinn nan Corach, suas a mholadh an Tighearna Dé Israeil le guth mòr, gu h-àrd.

20 Agus dh'èirich iad gu moch anns a' mhaduinn, agus chaidh iad a mach gu fàsach Thecoa: agus an uair a *bha* iad a' dol a mach, sheas Iehosaphat agus thubhairt e, Eisidibh riumsa, a Iudah, agus a luchd-àiteachaidh Ierusalem; Creidibh anns an Tighearna bhur Dia, agus daingnichear sibh; creidibh 'fhàidhean, agus soirbhichidh sibh.

21 Agus an uair a thug e comhairle do'n t-sluaigh⁴, dh'orduich e luchd-seinn do'n Tighearn, agus daoine a mholadh maise na naomhachd⁵, an uair a thigeadh iad a mach roimh an armait, agus a theireadh⁶, Thugaibh buidheachas do'n Tighearn, oir gu bràth *mairidh* a thròcair.

22 Agus an uair a thòisich iad air seinn agus air moladh, chuir an Tighearna luchd feall-fholaich an aghaidh chloinn Amoin, agus Mhoais, agus sléibh Sheir, a thàinig an aghaidh Iudah; agus bhuailleadh iad:

23 Oir sheas clann Amoin agus Mhoais suas an aghaidh luchd-àiteachaidh sléibh Sheir, chum *am* marbhadh agus *an* sgrios gu tur; agus an uair a chuir iad as do luchd-àiteachaidh Sheir, chuidich iad gach aon diubh gus a chéile a sgrios.

24 Agus an uair a thàinig Iudah làimh ri tìr na faire anns an fhàsach, dh'amhairc iad air an t-sluaigh mhòir, agus, feuch, *bha* iad 'nan corpaibh marbha air tuiteam gu talamh, agus cha deachaidh duine as diubh.

25 Agus thàinig Iehosaphat agus a shluaigh a thoirt leo an creiche; agus fhuair iad 'nam measg ann am pailteas araon beartas maille ris na corpaibh marbha, agus seudan luachmhor⁷ a thug iad dhiubh air an son féin, tuilleadh as a b'urraim iad iomchar leo: agus bha iad trì làithean ann an cruinneachadh na creiche; oir *bha* i mòr.

26 Agus air a' cheathramh là chruinnicheadh iad an ceann a chéile ann an gleann Bherachah; oir an sin bheannaich iad an Tighearn: uime sin thugadh mar

¹ shìol. claidheamh a' bhreitheanas.

² 'nar n-òire.

⁴ chuir e 'chomhairle ris an t-sluaigh.

⁵ chum maise na naomhachd, ann am maise an ionaid naomh. ⁶ deireadh. Eir.

⁷ tuitheach.

ainm air an àite sin gleann Bherachah, gus an là'n diugh.

27 An sin phill fir Iudah agus Ierusalem uile, agus Iehosaphat air an ceann, a dhol air an ais gu h-Ierusalem le gairdeachas; oir thug an Tighearn orra gairdeachas a dheanamh os ceann an naimhdean.

28 Agus thàinig iad gu h-Ierusalem le saltairibh, agus le clàrsaichibh, agus le trompaidibh, a dh'ionnsuidh tighe an Tighearn.

29 Agus bha eagal Dé air uile rìoghachdaibh nan dùchanna sin, an uair a chual' iad gu'n do chog an Tighearn an aghaidh naimhdean Israeil.

30 Agus bha rìoghachd Iehosaphait samhach; oir thug a Dhia fois dha air gach taobh.

31 Agus rìghich Iehosaphat os ceann Iudah: cùig bliadhna deug thar fhichead do aois *bha* e nuair a thòisich e air rìoghachadh, agus rìghich e cùig bliadhna fichead ann an Ierusalem: agus *b'e* ainm a mhàthar Asubah, nighean Shilhi.

32 Agus ghluais e ann an slighe Asa athar, agus cha do dhealaich e rithe, a' deanamh an *ni a bha* ceart ann an sùilibh an Tighearn.

33 Ach cha d'thugadh air falbh na h-àitean àrda; oir fathast cha d'ulluich an sluagh an cridhe air son Dhé an aithriche.

34 A nis a' chuid eile do ghniomharaibh Iehosaphait, an toiseach agus mu dheireadh, feuch, *tha* iad sgrìobhta ann am briathraibh Iehu mhic Hanani, a chuir e sìos ann an leabhar rìghrean Israeil¹.

35 Agus 'na dhéigh so rinn Iehosaphat rìgh Iudah coimhcheangal² ri Ahasiah rìgh Israeil, a bha olc 'na dheanadas.

36 Agus rinn e coimhcheangal ris longan a dheanamh a rachadh gu Tarsis; agus rinn iad na longan ann an Esion-geber.

37 Ach rinn Elieser, mac Dhodabhah o Mharezah, fàistneachd an aghaidh Iehosaphait, ag ràdh, A chionn gu'n d'rinn thu coimhcheangal ri Ahasiah, bhris an Tighearna t'òibre. Agus bhriseadh na longan, agus cha b'urrainn iad dol gu Tarsis.

CAIB. XXI.

¹ *Fhuair Iehosaphat bàs, agus rìghich Iehoram 'na àit.* ² *Mharbh Iehoram a bhràithrean.* ³ *Rinn Edom agus Libnah ceannaire 'na aghaidh.* ⁴ *Chreach na Philistich e agus rinn iad ainneart air.* ⁵ *A bhàs, agus 'adhlac.*

AGUS choidil Iehosaphat maille r'a aithrichibh, agus dh'adhlac e maille r'a aithrichibh ann am baile Dhaibhidh: agus rìghich Iehoram a

mhac na àit.

2 Agus *bha* bràithrean aige-san, mic Iehosaphait, Asariah, agus Iehiel, agus Sechariah, agus Asariah, agus Michael, agus Sepathiah: *b'i* ad sin uile mic Iehosaphait, rìgh Iudah³.

3 Agus thug an athair dhoibh iomadh tiodhlac airgid agus òir, agus nithe luachmhor, maille ri bailtibh daingichte ann an Iudah; ach thug e an rìoghachd do Iehoram, a chionn gu'm *b'e* an ceudghin e.

4 Agus an uair a dh'éirich Iehoram suas gu rìoghachd athar, agus a dhaingnich se e féin, mharbh e a bhràithrean uile leis a' chlaideamha, agus mar an ceudna *cuid* do uachdaranaimh Israeil.

5 Dà bhliadhna dheug thar fhichead a dh'aois *bha* Iehoram an uair a thòisich e air rìoghachadh, agus rìghich e ochd bliadhna ann an Ierusalem.

6 Agus ghluais e ann an slighe rìghrean Israeil, mar a rinn tigh Ahaib; oir bha nighean Ahaib⁴ na mnaoi aige: agus rinn e olc ann an sùilibh an Tighearna.

7 Gidheadh, cha b'aill leis an Tighearna tigh Dhaibhidh a sgrìos, air sgàth a' choimhcheangail a rinn e ri Daibhidh, agus gu'n do gheall e solus a thabhairt da féin agus d'a mhacaibh gu bràth⁴.

8 'Na làithibh-san dh'éirich na h-Edomaich o *bhi* fuidh làimh Iudah⁵, agus rinn iad rìgh os an ceann féin.

9 Agus chaidh Iehoram a mach le 'cheannardaibh, agus a charbadan uile maille ris: agus dh'éirich e san oidhche, agus bhuail e na h-Edomaich a thàinig mu'n cuairt air, agus ceannardan nan carbad.

10 Gidheadh, dh'éirich na h-Edomaich o *bhi* fuidh làimh Iudah gus an là'n diugh. Agus dh'éirich Libnah san àm cheudna o *bhi* fuidh a làimh, a chionn gu'n do thréig e an Tighearna Dia 'aithriche.

11 Mar an ceudna rinn e àitean àrda ann an sléibhtibh Iudah, agus thug e air luchd-àiteachaidh Ierusalem strìopachas a dheanamh, agus tharruing⁶ e Iudah a dh'ionnsuidh sin.

12 Agus thàinig sgrìobhadh d'a ionnsuidh o Eliah am fàidh, ag ràdh, Mar so tha'n Tighearna, Dia Dhaibhidh t'athar, ag ràdh, A chionn nach do ghluais thu ann an slighibh Iehosaphait t'athar, no ann an slighibh Asa rìgh Iudah,

13 Ach gu'n do ghluais thu ann an slighe rìghrean Israeil, agus gu'n d'thug thu air Iudah agus luchd-àiteachaidh Ierusalem strìopachas a dheanamh, cosmhuil ri

¹ air am bheil iomradh ann an leabhar rìghrean Israeil. ² chaidh Iehosaphat rìgh Iudah ann an comh-chuideachd.

³ Israeil.

⁴ an còmhnuidh; gach là. Eabhl.

⁵ rinn Edom aradh a mach an aghaidh Iudah.

⁶ choimh-égnich.

striopachas tighe Ahaib, agus mar an ceudna gu'n do mharbh thu do bhràithrean do thigh t'athar, a b'fhearr na thu féin:

14 Feuch, buailidh an Tighearna le plàigh¹ mhòir do shluagh, agus do chlànn, agus do mhnà, agus do mhaoin uile.

15 Agus bithidh tu ann an tinneas mòr le eucail do mhionach, gus an tuit do mhionach a mach leis an eucail, o là gu là.

16 Uime sin bhrosnaich an Tighearna an aghaidh Iehoraim spiorad nam Philisteach, agus nan Arabach, a bha làmh ris na h-Etiopaich:

17 Agus thàinig iad a nìos gu Iudah, agus bhris iad a steach innte, agus thug iad leo a' mhaoin uile a fhuair ann an tigh an rìgh, agus mar an ceudna a mhic agus a mhnà; air chor as nach d'fhàgadh mac aige ach Ahasiah² a mhac a b'òige.

18 Agus 'na dhéigh so uile, bhuail an Tighearna e 'na mhionach le h-eucail nach gabhadh leigheas.

19 Agus an déigh làithean àraidh, an ceann dà bhliadhna, thuit a mhionach a mach le 'eucail, agus fhuair e bàs le droch ghalaraidh; agus cha d'rinn a shluagh losgadh air a shon cosmhuil ri losgadh 'aithriche.

20 Dà bhliadhna dheug thar fhichead a dh'aois bha e 'nuair a thoisich e air rìoghachadh, agus rìghich e ochd bliadhna ann an Ierusalem, agus shiubhail e gun déidh sam bith air; agus dh'adhlac iad e ann am baile Dhaibhidh, ach cha b'ann an àitibh-adhlac nan rìgh.

CAIB. XXII.

1 Rìoghachadh aingidh Ahasiah. 5 Rinn e coimheangal ri Iehoram, agus mharbhadh e le Iehu mac Nimsi. 10 Chuir Ataliah an sliochd rìoghail gu bàs, agus rìghich i os ceann na tìre.

AGUS rinn luchd-àiteachaidh Ierusalem leim Ahasiah a mhac a b'òige 'na rìgh 'na àit: oir mharbh a' bhuidheann a thàinig maille ris na h-Arabaich do'n champ na mic bu shine uile. Agus rìghich Ahasiah mac Iehoraim, rìgh Iudah.

2 Dà bhliadhna thar fhichead³ a dh'aois bha Ahasiah 'nuair a thoisich e air rìoghachadh, agus rìghich e aon bhliadhna ann an Ierusalem: agus b'e ainm a mhàthar Ataliah, nighean Omri.

3 Ghluais esan mar an ceudna ann an sliogh b'ighe Ahaib; oir b'i' mhàthair a chomhairliche⁴ a dheanadh uile.

4 Air an aobhar sin rinn e olc ann an sìtibh an Tighearna, cosmhuil ri tigh Ahaib, oir b'iad sin a chomhairlichean an déigh bàis 'athar, chum a sgrios.

¹ huille.

² Iehoahas.

³ Dà bhliadhna agus dà fhichead. Faic II. Rìgh, Caib. VIII. r. 26.

⁴ chomhairleach.

⁵ bhuail.

⁶ Iehoram.

5 Ghluais e mar an ceudna a réir an comhairle, agus chaidh e maille ri Iehoram, mac Ahaib rìgh Israeil, a chogadh an aghaidh Hasaeil rìgh Shiria ann an Ramot-gilead: agus lot⁵ na Sirianaich Ioram⁶.

6 Agus phill e gu bhi air a leigheas ann an Iesreel o na lotaibh⁷ a thug iad dha ann an Ramah⁸, an uair a chòmhraig e⁹ an aghaidh Hasaeil rìgh Shiria. Agus chaidh Ahasiah¹⁰ mac Iehoraim, rìgh Iudah, sìos a dh'fhaicinn Ioram mhic Ahaib ann an Iesreel, a chionn gu'n robh e tinn.

7 Agus b'ann o Dhia bha sgrios Ahasiah, le 'theachd gu Ioram: oir an uair a thàinig e, chaidh e mach maille ri Iehoram an aghaidh Iehu mhic Nimsi, a dh'uing an Tighearna a ghearradh as tighe Ahaib.

8 Agus an uair a bha Iehu a' deanamh breitheanais air tigh Ahaib, agus a fhuair e uachdarain Iudah, agus mic bhràithrean Ahasiah, a fhrithheil do Ahasiah, mharbh e iad.

9 Agus dh'iarr e Ahasiah; agus ghlac iad e, agus e am folach ann an Samaria: agus thug iad e dh'ionnsuidh Iehu, agus mharbh iad e, agus dh'adhlac iad e, a chionn, thubhairt iad, gur e mac Iehosaphait e, a dh'iarr an Tighearna le 'uile chridhe. Agus cha robh e 'u comas do thigh Ahasiah an rìoghachd a ghlèidheadh ni b'fhaide.

10 Agus an uair a chunnaic Ataliah, màthair Ahasiah, gu'n robh a mac marbh, dh'éirich i, agus sgrios i uile shliochd rìoghail tighe Iudah.

11 Agus ghabh Iehosabet¹¹, nighean an rìgh, Ioas mac Ahasiah, agus ghoid i e á measg mhac an rìgh a mharbhadh, agus chuir i e féin agus a bhanaltrum ann an seòmar nan leapaiche. Mar sin dh'fhol-aich Iehosabet, nighean rìgh Iehoraim, bean Iehoiada an t-sagairt e (oir b'i piuthar Ahasiah i) o Ataliah, air chor as nach do mharbh i e.

12 Agus bha e maille riu am folach ann an tigh Dhé rè shè bliadhna; agus Ataliah a' rìoghachadh os ceann na tìre.

CAIB. XXIII.

1 Rinn Iehoiada Ioas 'na rìgh. 12 Chuireadh Ataliah gu bàs. 16 Bhriseadh alàrcan agus dealbhan Bhaail. 20 Shuidhich Iehoiada Ioas air an rìgh-chaithir.

AGUS aims an t-seachdamh bliadhna a neartaich Iehoiada e féin, agus ghabh e na ceannardan cheud, Asariah mac Iehoraim, agus Ismael mac Iehohanain, agus Asariah mac Obaid, agus Maaseiah

⁷ a thaobh nan lot.

⁸ Ramot. I. Rìgh, Caib. VIII. r. 29.

⁹ enuir e cath.

¹⁰ Asariah.

¹¹ Iehoseba. II. Rìgh, Caib. XI. r. 2

mac Adaiah, agus Elisaphat mac Shichri, a steach ann an coimhcheangal ris.

2 Agus chaidh iad mu'n cuairt ann an Iudah, agus chruinnich iad na Lebhithich a mach a uile bhaitibh Iudah, agus cinn aithrichean¹ Israeil, agus thàinig iad gu h-Ierusalem.

3 Agus rinn an coimhthional uile coimhcheangal ris an rìgh ann an tigh Dhé: agus thubhairt e riu, Feuch, rioghaichidh mac an rìgh, mar a thubhairt an Tighearna mu mhacaibh Dhaibhidh.

4 So an ni a ni sibh: *Bithidh* an treas cuid dhibhse a théid a steach air an t-sàbaid do na sagartaibh agus do na Lebhithich 'nan luchd-gleidhidh nan dorus:

5 Agus *bithidh* trian aig tigh an rìgh; agus trian aig geata na bunaite; agus *bithidh* an sluagh uile ann an cuirtibh tìghe an Tighearna.

6 Ach na tìgeadh a steach do thigh an Tighearna ach na sagairt, agus iadsan do na Lebhithich a fhritheileas; théid iadsan a steach, oir *tha* iad naomha: ach coimhididh² an sluagh uile faire an Tighearna.

7 Agus cuartichidh na Lebhithich an rìgh air gach taobh, gach fear le 'airm 'na làimh; agus ge b'e neach a thig a steach do'n tigh, cuirear gu bàs e: ach bithibh-se maille ris an rìgh, 'nuair a thig e steach, agus an uair a théid e mach.

8 Agus rinn na Lebhithich, agus Iudah uile, a réir nan uile *nithe* a dh'àithn Iehoiada an sagart, agus ghabh iad gach fear a dhaoine féin a bha gu teachd a steach air an t-sàbaid, maille riu-san a bha gu dol a mach air an t-sàbaid; oir cha do leig Iehoiada an sagart air falbh na roinnean.

9 Agus thug Iehoiada an sagart do na ceannardaibh-cheud sleaghan, agus sgiathan, agus targaidean, a bh'aig rìgh Daibhidh, a bha ann an tigh Dhé.

10 Agus chuir e an sluagh uile, gach fear le 'ghath³ 'na làimh, o thaobh deas an tìghe gu ruig taobh clì an tìghe, làimh ris an altair agus an tigh, mu'n cuairt air an rìgh.

11 Agus thug iad a mach mac an rìgh, agus chuir iad an crùn air, agus *thug iad dha* an fhianuis, agus rinn iad 'na rìgh e: agus dh'ung Iehoiada agus a mhic e, agus thubhairt iad, Gu ma fada beò an rìgh.

12 Agus an uair a chual⁴ Ataliah fuaim an t-sluaigh a' ruith cuideachd, agus a' moladh an rìgh, thàinig i dh'ionnsuidh an t-sluaigh, a steach do thigh an Tighearna.

13 Agus dh'amhairc i, agus feuch, sheas an rìgh làimh r'a phost aig an dol a steach, agus na h-uachdarain agus na

trompaidean làimh ris an rìgh; agus rinn uile shluaigh na tìre gairdeachas, agus rinn iad fuaim le trompaibh, agus an luchd-seinn le h-innealaibh-ciùil, agus iadsan a bha eòlach air moladh: agus reub Ataliah a h-eudach, agus thubhairt i, Feall, feall!

14 An sin dh'àithn Iehoiada an sagart do na ceannardaibh-cheud⁴ a chuireadh os ceann an t-sloigh, agus thubhairt e riu, Thugaibh a mach i an taobh a muigh do na sreathaibh; agus ge b'e neach a leanas i, marbhar leis a' chlaidheamh e: oir thubhairt an sagart, Na cuiribh gu bàs i ann an tigh an Tighearna.

15 Agus thug iad comas di⁵; agus an uair a thàinig i gu dol a stigh geata nan each aig tigh an rìgh, mharbh iad an sin i.

16 Agus rinn Iehoiada coimhcheangal eadar e féin, agus an sluagh gu léir, agus an rìgh, gu'm biodh iad 'nan sluagh aig an Tighearna.

17 Agus chaidh an sluagh uile a stigh do thigh Bhaail, agus leag iad sìos e, agus bhris iad 'altairean agus a dhealbhan gu tur, agus mharbh iad Matan sagart Bhaail fa chomhair nan altair.

18 Agus shuidhich Iehoiada luchd-riaghlaidh tìghe an Tighearna le làimh nan sagart agus nan Lebhithich, a roinn Daibhidh ann an tigh an Tighearna, chum iobairtean-loisgte an Tighearna iobradh, mar a *ta* e sgrìobhta ann an lagh Mhaois, le gairdeachas agus le seinn, a réir ordugh⁶ Dhaibhidh.

19 Agus shuidhich e na dorsairean aig geataibh tìghe an Tighearna, chum nach rachadh neach air bith a stigh, a bha neo-ghlan ann an ni air bith.

20 Agus ghabh e na ceannardan-cheud, agus na h-àrd uaislean, agus uachdarain an t-sluaigh, agus uile shluaigh na tìre, agus thug iad a nuas an rìgh o thigh an Tighearna; agus thàinig iad troimh 'n gheata àrd a steach do thigh an rìgh, agus chuir iad an rìgh 'na shuidhe air rìgh-claithir na rioghachd.

21 Agus rinn uile shluaigh na tìre gairdeachas: agus bha'm baile sàmhach, an déigh dhoibh Ataliah a mharbhadh leis a' chlaidheamh.

CAIB. XXIV.

1 Dh'orduich Ioaas do na sagartaibh agus do na Lebhithich tigh an Tighearna a chàradh. 15 Bàs Iehoiada. 17 Thréig Ioaas lagh Dhé agus mharbh e Sechariah mac Iehoiada. 23 Chreach na Sirianach Ierusalem. 25 Mharbh a sheirbhiseich Ioaas, agus rìghich Amasiah a mhac 'na àit.

SEACHD bliadhna dh' aois bha Ioaas⁷ an uair a thòisich e air rioghachadh, agus rìghich e dà fhichead bliadhna ann

¹ theaghlachain.

² gleidhidh.

³ le 'bhall-airm, le 'chlaidheamh

⁴ thug Iehoiada an sagart a mach na ceannardan-

cheud. Faic II. Rìgh, Caib. XI. r. 15.

⁵ chuir iad làimh imthe.

⁶ làimhe. Eabh.

⁷ Ihoas. II. Rìgh, Caib. XII. r. 1.

an Ierusalem: agus *b'e* ainm a mhàthar Sibia o Bheerseba.

2 Agus rinn Ioas an *ni a bha* ceart ann an sùilibh an Tighearna rè uile làithean Iehoiada an t-sagairt.

3 Agus ghabh Iehoiada air a shon dà mhnai, agus ghin e mic agus nigheanan.

4 Agus 'na dhéigh so bha e ann an inn-tinn¹ Ioais tigh an Tighearn a chàradh².

5 Agus chruinnich e ri chéile na sagairt agus na Lebhithich, agus thubhairt e riu, Rachaibh a mach do bhailtibh Iudah, agus cruinnichibh o Israel uile airgid a chàradh tighe bhuir Dé o bhliadhna gu bliadhna, agus faicibh gu'n dean sibh cabhag³ sa' ghnothuch. Gidheadh cha d'rinn na Lebhithich cabhag.

6 Agus ghairm an rìgh Iehoiada an t-àrd-shagart, agus thubhairt e ris, C'ar son nach d'iarr thu air na Lebhithich cìs Mhaois⁴, òglaich an Tighearn, a thoirt a steach o Iudah, agus o Ierusalem, agus⁵ o choimhthional Israeil, air son pàilliuin na fianuis?

7 Oir bhris mic na droch mhnà Ataliah sìos tigh Dhé; agus mar an ceudna uile nithe coisrigte⁶ tighe an Tighearna thug iad seachad⁷ do Bhaalim.

8 An sin air àithne an rìgh rinn iad ciste, agus chuir iad i aig geata tighe an Tighearn air an taobh a muigh.

9 Agus thug iad gairm air feadh Iudah agus Ierusalem, cìs Mhaois òglaich Dhé, a chuir e air Israel anns an fhàsach, a thoirt a steach do'n Tighearn.

10 Agus rinn na h-uachdarain uile agus an sluagh uile gairdeachas, agus thug iad leo, agus thig iad anns a' chiste, gus an do lìonadh i⁸.

11 Agus an uair a thugadh a' chiste steach a dh'ionusuidh luchd-riaghlaidh⁹ an rìgh le làimh nan Lebhithich, agus a chunnaic iad gu'n robh mòran airgid innte, an sin thàinig sgrìobhaich an rìgh agus fear-riaghlaidh an àrd-shagairt, agus dh'fhalamhuich iad a' chiste, agus ghabh iad i, agus thug iad air a h-ais i d'a h-àite féin. Mar sin rinn iad o là gu là, agus chruinnich iad airgid ann am pailteas.

12 Agus thug an rìgh agus Iehoiada e dhoibhsan a rinn obair¹⁰ seirbhìs tighe an Tighearn, agus thuarasdalaich iad luchd-snaithidh *chlach* agus saoir a chàradh tighe an Tighearn, agus mar an ceudna luchd-oibre ann an iarann agus an umha a dheanamh suas¹¹ tighe an Tighearn.

13 Agus dh'oibrich an luchd-oibre, agus choimhlionadh an obair le'n làimh; agus

rinn iad suas tigh an Tighearna co cheart as a bha e roimhe, agus dhaingnich iad e.

14 Agus an uair a chrìochnaich iad an obair, thug iad na dh'fhàgadh do'n airgid an làthair an rìgh agus Iehoiada, agus rinn iad soithichean deth do thigh an Tighearna, soithichean frithealaidh nan iobairt-loisgte, agus spàinean, agus soithichean òir agus airgid: agus dh'obair iad iobairt-ean-loisgte a ghnàth ann an tigh an Tighearna, rè uile làithean Iehoiada.

15 Ach dh'fhàs Iehoiada sean, agus bha e làn do làithibh, agus fhuair e bàs: ceud agus deich bliadhna fichead a dh'aois bha e¹² nuair a fhuair e bàs.

16 Agus dh'adhlaic iad e ann am baile Dhaibhidh maille ris na rìghribh, a chionn gu'n d'rinn e maith ann an Israel, aram¹² a thaobh Dhé, agus a thaobh a thighe.

17 Agus an déigh bàis Iehoiada, thàinig uachdarain Iudah, agus rinn iad ùmhlaich do'n rìgh. An sin dh'éisd an rìgh riu.

18 Agus thréig iad tigh an Tighearna Dé an aithriche, agus rinn iad seirbhìs do dhoireachaibh agus do dhealbhaibh¹³: agus thàinig fearg air Iudah agus Ierusalem air son an cionta.

19 Gidheadh chuir e fàidhean d'an ionnsuidh, gu'n toirt air an ais a dh'ionnsuidh an Tighearn; agus rinn iad fianuis 'nan aghaidh, ach cha d'éisd iadsan riu.

20 Agus thàinig spiorad an Tighearn air Sechariah mac Iehoiada an t-sagairt, agus sheas e os ceann an t-sluaigh, agus thubhairt e riu, Mar so tha Dia ag ràdh, C'ar son a tha sibh a' briseadh àitheantan an Tighearn? uime sin cha soirbhich sibh. A chionn gu'n do thréig sibhse an Tighearn, tréigidh esan sibhse.

21 Agus chaidh iad ann an comhbhoinn 'na aghaidh, agus chlach iad le clachaibh e, air àithne an rìgh, ann an cùirt tighe an Tighearn:

22 Oir cha do chuimhnich Ioas an rìgh an caoimhneas a rinn Iehoiada 'athair ris, ach mharbh e a mhac: agus an uair a bha esan a' faghail a' bhàis, thubhairt e, Chi an Tighearn, agus agraidd¹⁴ e.

23 Agus aig ceann¹⁵ na bliadhna thàinig armailt Shiria nìos 'na aghaidh; agus thàinig ad gu Iudah agus gu Ierusalem, agus grios iad uile uachdarain an t-sluaigh o mheasg an t-sluaigh, agus chuir iad an creach uile dh'ionnsuidh rìgh Dhamascuis.

24 Oir le beagan dhaoine thàinig armailt Shiria, agus thug an Tighearna thairis 'nan làimh sluagh ro mhòr, a chionn gu'n do thréig iad an Tighearna Dia an aith-

¹ cridhe. Eabh. ² a leasachadh, ath-nuadhachadh. ³ deiftr. ⁴ a' chis a dh'àithn Mhaois bli air a togail. ⁵ cadhon. ⁶ nuomha.

⁷ rinn iad. Eabh.

⁸ gus an do chuir iad crìoch air a' ghnothuch.

⁹ luchd amhairc thairis, luchd ghnòthùichean.

¹⁰ air an robh cùram oibre. Faic II. Rìgh, Caib. XII. r. 11. ¹¹ a chàradh. ¹² an dà chuid.

¹³ òdholaibh. ¹⁴ iarraidh, dìolaiddh.

¹⁵ teachd mu'n cuairt. Eabh.

riche: uime sin rinn iad breitheanas an aghaidh Iois.

25 Agus an uair a dh'imich iad uaith, a chionn gu'n d'fhàg iad e ann an eucailibh mòra, rinn a sheirbhisich féin ceann-airc 'na aghaidh air son fola mhic¹ Iehoia da an t-sagairt, agus mharbh iad e air a leabaidh, agus an uair a fhuair e bàs, dh'adhlac iad e ann am baile Dhaibhidh, ach cha d'adhlac iad e ann an àitibh-adhlac nan rìgh.

26 Agus is iad so iadsan a rinn ceann-airc 'na aghaidh; Sabad mac Shimeait na Ban-amonaich, agus Iehosabad mac Shimir na Ban-mhoabaich, agus a mhic.

27 A nis a thaobh meud na cise a thog e², agus mar a rinn e suas tigh Dhé, feuch, tha iad sgriobhta ann an eachdraidh leabhar nan rìgh. Agus rìghich Amasiah a mhac 'na àit.

CAIB XXV.

3 Chuir Amasiah gu bàs na dachine a mharbh 'athair.

6 Thuarasdalaich e armait a h-Israel an aghaidh nan Edomach. 11 Bhual e na h-Edomach ann an gleann an t-salainn. 22 Chog Iois 'na aghaidh, agus bhuadhaich e air. 27 Bas Amasiah.

CUIG bliadhna fichead a dh'aois bha Amasiah 'nuair a thòisich e air rìoghachadh, agus rìghich e naoi bliadhna fichead ann an Ierusalem: agus b'e ainm a mhàthar Iehoodan o Ierusalem.

2 Agus rinn e an nì a bha ceart ann an sùilbhan Tighearn, ach cha b'ann le cridhe iomlan.

3 A nis an uair a dhaingnicheadh an rìoghachd dha, mharbh e a sheirbhisich a mharbh an rìgh 'athair.

4 Ach an clann cha do mharbh e, a réir mar a ta e sgriobhta anns an lagh ann an leabhar Mhaois, far an d'aithn an Tighearn, ag ràdh, Cha chuirear na h-aithriche gu bàs air son nam mac, agus cha chuirear na mic gu bàs air son nan aithriche; ach cuirear gach duine gu bàs air son a pheacaidh féin.

5 Agus chruinnich Amasiah Iudah r'a chéile, agus rinn e iad, a réir tighe an aithriche, 'nan ceannardaibh mhiltean agus 'nan ceannardaibh cheud, ann an Iudah agus ann am Benjamin uile; agus dh'àireamh e iad o fhichead bliadhna dh'aois agus os a cheann, agus fhuair e ann diubh tri cheud mìle fear taghta, a rachadh a mach gu cath, a laimhsicheadh sleagh agus sgiath.

6 Thuarasdalaich e mar an ceudna á h-Israel ceud mìle fear comasach gaisgeil³ air cheud tàlan airgid.

7 Ach thàinig duine le Dia d'a ionnsuidh, ag ràdh, A rìgh, na rachadh armait Israel maille riut; oir cha 'n'eil an

Tighearna maille ri h-Israel, eadhon maille ri cloinn Ephraim uile.

8 Ach ma's àill leat imeachd, dean, bi làidir air son a' chatha; bheir Dia ort tuiteam roimh an nàmhaid; oir tha Dia comasach air còmhnaidh a dheanamh, agus air tilgeadh sìos.

9 Agus thubhairt Amasiah ris an dume le Dia, Ach ciod a nì sinn mu'n cheud tàlan a thug mi do àrmait Israel? Agus fhreagair an duine le Dia, Tha'n Tighearna comasach air mòran tuilleadh na sin a thabhairt duitse.

10 An sin sgaoil Amasiah iadsan do'n armait a thàinig d'a ionnsuidh á h-Ephraim, a chum gu'n rachadh iad d'an àite féin. Agus las am fear gu mòr an aghaidh Iudah, agus phill iad d'an àite féin ann an corruich mhòir,

11 Agus neartaich Amasiah e féin, agus thug e mach a shluagh, agus chaidh e gu gleann an t-salainn, agus bhual e do chloinn Sheir deich mìle.

12 Agus deich mìle dhiubh ghlac clann Iudah beò, agus thug iad leo iad gu mullach carraig, agus thilg iad sìos iad o mhullach na carraig, agus bhriseadh iad gu tur.

13 Ach bhris fir⁴ na h-armait a chuir Amasiah air an ais, a chum nach rachadh iad maille ris gu cath, a stigh air bailtibh Iudah, o Shamaria eadhon gu ruig Bet-horon, agus bhual iad trì mìle dhiubh, agus thug iad leo creach mhòr.

14 A nis an dèigh do Amasiah teachd o àr nan Edomach, thug e leis dée chloinn Sheir, agus chuir e suas iad dha féin mar dhiathaibh, agus chrom se e féin sìos rompa, agus loisg e tuis dhoibh.

15 Uime sin las fearg an Tighearn an aghaidh Amasiah, agus chuir e d'a ionnsuidh fàidh, a thubhairt ris, C'ar son a dh'iarr thu'n dèigh dhiathan an t-sluaigh, nach b'urrainn an sluagh féin a shaoradh as do làimh-sa?

16 Agus an uair a bha e a' labhairt ris, fhreagair esan e, An d'rinneadh thusa a'd' chomhairliche⁵ do'n rìgh? leig dhìot⁶; c'ar son a bhiodh tu air do bhualadh? Agus leig am fàidh dheth, agus thubhairt e, Tha fios agam gu'n do shònraich⁷ Dia ar do sgrios, a chionn gu'n d'rinn thu so, agus nach d'éisd thu ri m' chomhairle-sa.

17 An sin ghabh Amasiah rìgh Iudah comhairle, agus chuir e teachdairean a dh'ionnsuidh Iois, mhic Iehoahais, mhic Iehu rìgh Israel, ag ràdh, Thig, faiceamaid aghaidh e chéile.

18 Agus chuir Iois rìgh Israel teachdairean gu Amasiah rìgh Iudah, ag ràdh,

¹ mhac. ² meud na h-eallaich a chuireadh air.

³ gaisgeach làidir.

⁴ mic. Eabh.

⁵ chomhairleach.

⁶ bi d'òst.

⁷ shuidhich.

H. EACHDRAIDH, XXV. XXVI.

Chuir am foghannan a *bha* ann an Lebanon *teachdair* a dh'ionnsuidh an t-seud-air¹ a *bha* ann an Lebanon, ag ràdh, Thoir do nighean do m' mhac-sa 'na mnaoi: agus chaidh fiadh-bheathach seachad a *bha* ann an Lebanon, agus shaltair e sìos am foghannan.

19 Thubhairt thu, Feuch, bhuail mi² Edom, agus thog do chridhe suas thu chum uail a dheanamh; fan a nis aig do thigh: c'ar son a bhiodh làmh agad ann an nì chum t'aimhleis, air chor as gu'n tuiteadh tu féin agus Iudah maille riut?

20 Ach cha d'éisd Amasiah ris; oir *bha* e o Dhia an toirt thairis 'na làimh, a chionn gu'n d'iarr iad an déigh dhiathan Edoim.

21 Uime sin chaidh Ioas rìgh Israeil suas, agus chunnaic e féin agus Amasiah rìgh Iudah aghaidh a chèile aig Bet-emes, a *bhuineas* do Iudah.

22 Agus bhuailleadh Iudah roimh Israel, agus theich iad gach fear a dh'ionnsuidh a bhùtha.

23 Agus ghlac Ioas rìgh Israeil Amasiah rìgh Iudah mac Ioas, mhic Ahasiah³, aig Bet-emes, agus thug se e gu h-Ierusalem, agus bhris e sìos balla Ierusalem, o gheata Ephraim gu geata na h-oisne, ceithir cheud làmh-choille.

24 Agus [ghabh e] an t-òr agus an t-airgid uile, agus na soithichean uile a fhuaradh ann an tigh Dhé aig Obededom, agus ionmlhasan tighe an rìgh, agus braighde-gill, agus phill e gu Samaria.

25 Agus mhair Amasiah mac Ioais, rìgh Iudah, beò an déigh bàis Ioais mhic Iehoahais rìgh Israeil, cùig bliadhna deug.

26 Agus a' chuid eile do ghnìomhar-aibh Amasiah, an toiseach agus mu dheireadh, feuch, nach 'eil iad sgrìobhta ann an leabhar rìghrean Iudah agus Israeil?

27 Ach o'n àm anns an do thionndaidh Amasiah o leantuinn an Tighearn, rinn iad ceannaire⁴ 'na aghaidh ann an Ierusalem, agus theich e gu Lachis: ach chuir iad daoine 'na dhéigh gu Lachis, agus mharbh iad e an sin.

28 Agus thug iad leo air eachaibh e, agus dh'adhlac iad e maille r'a aithrichibh ann am baile Dhaibhidh⁵.

CAIB. XXVI.

1 *Soirbheachadh Udsiah: 9 Na tùir a thog e ann an Ierusalem: 11 'Armait, agus 'innil-chogaidh. 16 Bhuailleadh e le luibhre air son a pheacanna. 22 A bhàs.*

AGUS ghabh sluagh Iudah uile Udsiah⁶, agus e sè bliadhna deug a

dh'aois, agus rinn iad e 'na rìgh an àit 'athar Amasiah.

2 Thog esan Elat⁷, agus dh'aisig se e do Iudah, an déigh do'n rìgh codal maille r'a aithrichibh.

3 Sè bliadhna deug a dh'aois *bha* Udsiah 'nuair a thòisich e air rìoghachadh, agus rìghich e dà bhliadhna dheug agus dà fhichead ann an Ierusalem: agus b'e ainm a mhàthar Iecolia o h-Ierusalem.

4 Agus rinn e an *nì a bha* ceart ann an suilbhan an Tighearn, a réir gach *nì a* rinn Amasiah 'athair.

5 Agus dh'iarr e Dia ann an làithibh Shechariah, a theagaisg e ann an eagal⁸ Dé: agus fhad 'sa dh'iarr e an Tighearn, thug Dia air soirbheachadh.

6 Agus chaidh e mach, agus chog e 'n aghaidh nam Philisteach, agus bhris e sìos balla Ghait, agus balla Iabneith, agus balla Asdoid; agus thog e bailtean ann an Asdod⁹, agus am measg nam Philisteach.

7 Agus chuidich Dia leis an aghaidh nam Philisteach, agus an aghaidh nan Arabach a *bha* 'nan còmhnuidh ann an Gur-baal, agus nan Amonach¹⁰.

8 Agus thug na h-Amonaich tìodhlacan do Udsiah; agus chaidh 'ainm a mach gu ruig dol a steach na h-Eiphit, oir dh'fhàs e ro chumhachdach.

9 Agus thog Udsiah tùir ann an Ierusalem aig geata na h-oisne, agus aig geata a' ghlinne, agus aig an oisinn¹¹, agus dhaingnich e iad.

10 Agus thog e tùir anns an fhàsach, agus chladhaich e mòran thobar; oir *bha* mòran spréidh aige, agus anns an tìr ìosal agus anns a' chòmhnard treabh-aichean, agus fion-liosadairean¹² anns na sléibhtibh agus ann an Carmel, a chionn gu'm bu toigh leis tuathanachd.

11 Bha aig Udsiah mar an ceudna armait do *dhaoinibh* a dheanadh cogadh, a rachadh a mach gu cath 'nam buidhneibh, a réir uibhir an àireimh¹³, le làimh Ieheil an sgrìobhaiche, agus Mhaaseiah an fhir-riaghlaidh, fuidh làimh Hananiah aon do uachdaranabhaich an rìgh.

12 B'e àireamh iomlan phrìomh¹⁴-aithriche nan daoine comasach gaisgeil, dà mhìle agus sè ceud.

13 Agus fuidh 'n làimh-san *bha* armait, trì cheud mìle agus seachd mìle agus cùig ceud, a dheanadh cogadh le treun neart, a chuideachadh leis an rìgh an aghaidh an nàmhaid.

14 Agus dheasaich Udsiah air an son, eadhon do'n fheachd uile, targaidean,

¹ a' cheudair. ² thu. ³ Iehoahais.

⁴ còmhchealg. ⁵ Iudah.

⁶ Asariah. ¹¹ Rìgh, Caib. XIV. r. 21.

⁷ Elot. ⁸ a bha tuisgeach ann an seallannaibh.

⁹ mu thimchioll Asdoid.

¹⁰ nam Mehunach.

¹¹ tionndadh a' bhalla.

¹² fion-ghàrdairean.

¹³ an cumtais, am meas.

¹⁴ cheann. Eabh.

agus sleaghan, agus clogaidean, agus lùirichean, agus boghanna, agus crannatbhuilt a thilgeadh chlach.

15 Agus rinn e ann an Ierusalem innil-chogaidh, a dhealbhadh le daoineibh ealanta¹, gu bhàir air na tùraibh agus air oisnibh nam ballacha, a thilgeadh shaighead agus chlach mòra leò; agus chaidh ainm a mach an céin, oir b'iongantach an dòigh air an do chuidicheadh leis gus an d'fhàs e cumhachdach.

16 Ach an uair a dh'fhàs e cumhachdach, thogadh a cliridhe suas a chum aimhleis, agus pheacaich e an aghaidh an Tighearn a Dhé: oir chaidh e steach do theampull an Tighearn, a losgadh tùise air altair na tùise.

17 Agus chaidh Asariah an sagart a steach na dhéigh, agus maille ris ceithir fichead sagart leis an Tighearna, fir threuna;

18 Agus sheas iad an aghaidh Udsiah an rìgh, agus thubhairt iad ris, Cha bhuin e dhuise, Udsiah, tùis a losgadh do'n Tighearn, ach do na sagartaibh, mic Aaroin, a tha air an naomhachadh a losgadh tùise: imich a mach as an ionad naomh, oir pheacaich thu, agus cha bhi e dhuìt a chum urraim o'n Tighearna Dia.

19 Agus bha fearg air Udsiah, agus tùiseir aige 'na làimh a losgadh tùise: agus an uair a bha fearg air ris na sagartaibh, air ball dh'éirich luibhre suas ann an clàr 'eudain, am fianuis nan sagart ann an tigh an Tighearn, os ceann² altair na tùise.

20 Agus dh'amhairc Asariah an t-àrd shagart, agus na sagairt uile air, agus, feuch, bha luibhre air ann an clàr 'eudain, agus ghreas iad a mach as a sin e; agus rinn e féin mar an ceudna cabhag gu dol a mach, a chionn gu'n do bhuail an Tighearn e.

21 Agus bha Udsiah an rìgh 'na lobhar gu là a bhàis, agus ghabh e còmhnuidh ann an tigh air leth, mar fhear a bha 'na lobhar, an uair a dhruideadh a mach e á tigh³ an Tighearn; agus bha Iotam a mhac os ceann tìghe an rìgh, a' toirt breth air sluagh na tìre.

22 Agus a' chuid eile do ghnìomharaidh Udsiah, an toiseach agus mu dheireadh, sgriobh Isaiah am fàidh, mac Amois.

23 Agus choidil Udsiah maille r'a aithrichibh, agus dh'adhlac iad e maille r'a aithrichibh ann am magh àit-adhlacaidh nan rìgh: oir thubhairt iad, Tha e 'na lobhar. Agus rìghich Iotam a mhac 'na àit.

CAIB. XXVII.

1 Rìoghachadh Iotaim: 5 Bhuaidh e air na h-Amonaich. 9 Fhuair e bàs, agus rìghich Ahas 'na àit.

CUIG bliadhna fichead a dh'aois bha Iotam an uair a thòisich e air rìoghachadh, agus rìghich e sè bliadhna deug ann an Ierusalem; agus b'e ainm a mhàthar Ierusa, nighean Shadoic.

2 Agus rinn e an ni a bha ceart ann an sùilbh an Tighearn, a réir nan uile nithe a rinn Udsiah 'athair: gidheadh cha deachaidh e steach do theampull an Tighearn, agus bha 'n sluagh fathast truailidh.

3 Thog e geata àrd tìghe an Tighearn, agus air balla Opheil thog e mòran.

4 Agus thog e bailtean ann an sléibhtibh Iudah, agus anns na coilltibh thog e caist-ealan agus tùir.

5 Agus chog e ri rìgh chloinn Amoin, agus thug e buaidh orra. Agus thug clann Amoin dha air a' bhliadhna sin féin ceud tàlann airgid, agus deich mìle tomhas⁴ cruithneachd, agus deich mìle tomhas eorna. So thug clann Amoin seachad da, araon air an dara bliadhna, agus air an treas.

6 Agus dh'fhàs Iotam cumhachdach, a chionn gu'n do dheasaich e a shlighean am fianuis an Tighearn a Dhé.

7 Agus a' chuid eile do ghnìomharaibh Iotaim, agus a choganna uile, agus a shlighean, feuch, tha iad sgriobhta ann an leabhar rìghrean Israeil agus Iudah.

8 Cuig bliadhna fichead a dh'aois bha e 'nuair a thòisich e air rìoghachadh, agus rìghich e sè bliadhna deug ann an Ierusalem.

9 Agus choidil Iotam maille r'a aithrichibh, agus dh'adhlac iad e ann am baile Dhaibhidh: agus rìghich Ahas a mhac 'na àit.

CAIB. XXVIII.

1 Rìoghachadh aingidh Ahas. 5 Thug Dia thairis e do làimh rìgh Shiria agus rìgh Israeil. 9 Chuir clann Israeil braighdean Iudah air an ais. 20 Shàrach rìgh Asiria Ahab. 22 'Na theanntachd chiontach e nì bu mhò an aghaidh Dhé.

FICHEAD bliadhna⁵ dh'aois bha Ahas an uair a thòisich e air rìoghachadh, agus rìghich e sè bliadhna deug ann an Ierusalem: agus clia d'rinn e an ni a bha ceart ann an sùilbh an Tighearna, mar a rinn Daibhidh 'athair.

2 Ach dh'imich e ann an slighibh rìghrean Israeil, agus mar an ceudna rinn e dealbhan leaghta do Bhaalim.

3 Agus loisg e tùis ann an gleann Blien-hinoim⁶, agus loisg e a chlànn anns an teine, a réir ghràineileachd nan cinneach u

¹ innleachdach.

² o thaobh.

³ oir ghearradh as e o thigh.

⁴ cor. Eabh.

⁵ Cuig bliadhna fichead.

⁶ gleann mhic Hinim.

thilg an Tighearna mach roimh chloinn Israeil.

4 Agus dh'ìobair e agus loisg e tùis anns na h-àitibh àrda, agus air na cnoic, agus fuaidh gach craoibh uaine.

5 Uime sin thug an Tighearna a Dhia thairis e an làimh rìgh nan Sirianach¹; agus bhuail iad e, agus thug iad leo mòr-an diubh² nam braighdibh, agus thug siad iad gu Damascus: agus thugadh mar an ceudna thairis e an làimh rìgh Israeil, a bhuail e le h-àr mòr.

6 Agus mharbh Pecah mac Remaliah ann an Iudah ceud agus fichead mìle ann an aon là, fir threuna³ uile; a chionn gu'n do thréig iad an Tighearna Dia an aithriche.

7 Agus mharbh Siclri, duine treun do Ephraim, Maaseiah mac an rìgh, agus Asricam uachdaran an tighe, agus Elcanah a b'fhaisge do'n rìgh.

8 Agus thug clann Israeil leo 'nam braighdibh d'am bràithribh dà cheud mìle bean, mac agus nighean, agus thog iad mar an ceudna creach mhòr uatha, agus thug iad a' chreach gu Samaria.

9 Ach bha fàidh leis an Tighearna an sin d'am b'ainm Oded, agus chaidh e mach ann fianuis an t-slàigh a thàinig gu Samaria, agus thubhairt e riu, Feuch, a chionn gu robh fearg air an Tighearna Dia bhur n-aithriche ri Iudah, thug e thairis iad ann bhur làimh-sa, agus mharbh sibh iad le buirbe a ràinig suas gu nèamh.

10 Agus a nis tha sibh a' cur roimhibh clann Iudah agus Ierusalem a chur fuaidh ibh mar thràillibh agus mar bhan-tràillibh agaibh. Nach 'eil idir agaibh-se, eadhon agaibh-se peacanna an aghaidh an Tighearna bhur Dé?

11 A nis ma ta éisdibh rium-sa, agus thugaibh air an ais na braighdean a thug sibh leibh ann am braighdeanas o bhur bràithribh; oir tha fearg laiste an Tighearna ribh.

12 An sin dh'érich daoine àraidh do cheannaibh⁴ chloinn Ephraim, Asariah mac Iohanain, Berechiah mac Mhesilemoit, agus Iehisciah mac Shalum, agus Amasa mac Hadlai, suas 'nan aghaidhsan a thàinig o'n chogadh.

13 Agus thubhairt iad riu, Cha toir sibh na braighdean a steach an so; oir bhiodh sin na chionta an aghaidh an Tighearna oirne. Tha sibhse a' cur roimhibh tuilleadh a chur r'ar peacannaibh, agus r'ar cionta, 'nuair a ta ar cionta cheana mòr agus fearg laiste ri h-Israel.

14 An sin dh'fhàg na daoine a bha fo 'narmaibh⁴ na braighdean agus a' chreach

am fianuis nan uachdaran agus a' chomh-chruinnich uile.

15 Agus dh'érich na daoine a ghairmeadh air an ainm, agus ghabh iad na braighdean, agus dh'eudaich iad leis a' chreich iadsan uile a bha lomnochd dhiubh, agus an uair a chuir iad eudach agus brògan orra, thug iad orra itheadh agus òl, agus dh'ung siad iad, agus chuir iad air asalaibh iadsan uile a bha annmhunn diubh, agus thug siad iad gu Iericho, baile nan craobh pailme, a dh'ionnsuidh ann bràithrean; agus phill iad gu Samaria.

16 San àm sin chuir rìgh Ahas fios a dh'ionnsuidh rìgh⁵ Asiria, a chuideachadh leis.

17 Oir thàinig na h-Edomaich a ris, agus bhuail iad Iudah, agus thug iad leo braighdean.

18 Thug na Philistich mar an ceudna ionnsuidh⁶ air bailtibh a' chomhnaird, agus air an taobh deas do Iudah, agus ghlac iad Bet-emes, agus Aialon, agus Gederot, agus Socho le 'bhailtibh beaga, agus Timnah le 'bhailtibh beaga; agus ghabh iad comhnuidh an sin.

19 Oir rinn an Tighearna Iudah ìosal air son Ahais rìgh Iudah⁷, a chionn gu'n d'rinn e Iudah lomnochd, agus gu'n d'rinn e cionta mòr an aghaidh an Tighearna.

20 Uime sin thàinig Tilgat-pilneser rìgh Asiria d'a ionnsuidh, agus slàraich⁸, ach cha do neartaich se e.

21 Oir ghabh Ahas cuibhrionn á tigh an Tighearna, agus á tigh an rìgh, agus o na h-uachdaranaibh, agus thug e sin do rìgh Asiria; ach cha do chuidich e leis.

22 Agus an àm a theanntachd rinn e fathast tuilleadh cionta an aghaidh an Tighearna, an rìgh so féin Ahas.

23 Oir dh'ìobair e do dhiathaibh Dhamaiscuis a bhuail e, agus thubhairt e, A chionn gu'n cuidich dée rìghrean Shiria leo, ìobraidh mise dhoibh a chum gu'n cuidich iad leamsa: ach is ann a bha iad 'nan aobhar sgrios dha féin, agus do Israel uile.

24 Agus chruinnich Ahas soithichean tighe Dhé, agus ghearr e 'nam mìribh soithichean tighe Dhé, agus dhruid e dorsan tighe an Tighearna. Agus rinn e dha féin altairean anns gach cearn do h-Ierusalem.

25 Agus anns gach baile fa leth do Iudah rinn e àitean àrda, chum tùis a losgadh do dhiathaibh coimheach, agus bhrosnaich e gu feirg an Tighearna Dia 'aithriche.

26 Agus a' chuid eile d'a ghnìomhar-

¹ rìgh Shiria.

² mic neirt. Eabh.

³ do phrìomh-dhaoineibh, àrd-uaislibh.

⁴ na daoine armaichte.

⁵ rìghrean, Faic II. Rìgh, Caib XVI. r. 7.

⁶ Bhreis na Philistich a stigh.

⁷ Israeil.

⁸ theamaich, chuir e 'na éiginn.

aibh agus d'a shligheibh uile, an toiseach agus mu dheireadh, feuch, *tha* iad sgriobhta ann an leabhar rìghrean Iudah agus Israeil.

27 Agus choidil Ahas maille r'a aithrichibh, agus dh'adhlac iad e anns a' bhaile, ann an Ierusalem; ach cha d'thug iad e do àitibh-adhlac rìghrean Israeil: agus rìghich Hesechiah a mhac 'na àit.

CAIB. XXIX.

1 Rìoghachadh Hesechiah. 5 Thug e carail do na Lebhithich iad a naomhachadh tigh Dhé. 12 Naomhaich na Lebhithich iad féin, agus ghlan iad an teampull. 20 Iobairtean Hesechiah.

THOISICH Hesechiah air rìoghachadh 'nuair a bha e cuig bliadhna fichead a dh'aois, agus rìghich e naoi bliadhna fichead ann an Ierusalem: agus b'e ainm a mhàthar Abiah¹, nighean Shechariah.

2 Agus rinn e an *ni a bha* ceart ann an sùilbhan an Tighearn, a réir nan uile *nithe* a rinn Daibhidh 'athair.

3 Anns a' cheud bhliadhna d'a rìoghachadh, air a' cheud mhìos, dh'fhosgail e dorsan tighe an Tighearn, agus chàirich e iad.

4 Agus thug e stigh na sagairt agus na Lebhithich, agus chruinnich e iad do'n t-sràid an ear,

5 Agus thubhairt e riu, Eisdibh rium, a Lebhitheacha; a nis naomhaichibh sibh féin, agus naomhaichibh tigh an Tighearna Dé bhur n-aithriche, agus thugaibh a mach an salchar as an *ionad* naomh:

6 Oir pheacaich ar n-aithriche, agus rinn iad an *ni a bha* olc ann an sùilbhan an Tighearn ar Dé, agus thréig iad e, agus thionndaidh iad an aghaidhean o phàillion an Tighearn, agus chuir iad cùl ris.

7 Mar an ceudna dhruid iad dorsan an sgàth-thighe, agus chuir iad as na lòchrain, agus cha do loisg iad tùis, agus cha d'thug iad iobairtean-loisgte suas anns an *ionad* naomh, do Dhia Israeil.

8 Uime sin bha fearg an Tighearna ri Iudah agus ri h-Ierusalem, agus thug e thairis iad do thuairgne², do uamhan³, agus do sgeig, mar a chi sibh le'r sùilbhan.

9 Oir feuch, thuit ar n-aithriche leis a' chlaidheamh, agus *tha* air mic, agus ar nigheanan, agus ar mnàin ann am braighdeanas air son so.

10 A nis *tha* e ann am chridhe coimhleangal a dheanamh ris an Tighearna Dia Israeil, a chum gu'n tionndaidh fhearg laiste uainn.

11 Mo mhic, na bithibh a nis dearmadach; oir thagh an Tighearna sibh gu seasamh 'na làthair a dheanamh seirbhis da, agus gu bhi a' frithealadh dha agus a' losgadh tuise.

12 An sin dh'éirich na Lebhithich,

Mahat mac Amasai, agus Joel mac Asariah, do mhacaibh nan Cohatach: agus do mhacaibh Mherari, Cis mac Abdi, agus Asariah mac Iehaleileil: agus do na Gerseonaich, Ioah mac Shimah, agus Edeu mac Ioah:

13 Agus do mhacaibh Elisaphain, Simri agus Iehiel: agus do mhacaibh Asaiph, Sechariah agus Mataniah:

14 Agus do mhacaibh Hemain, Iehiel agus Simei: agus do mhacaibh Iedutuinn, Semaiah agus Udsiel.

15 Agus chruinnich iad am bràithrean, agus naomhaich siad iad féin, agus thàinig iad a réir àithne an rìgh ann am briathraibh an Tighearn, a ghlanadh tighe an Tighearn.

16 Agus chaidh na sagairt do'n chuid a b' fhaide steach do thigh an Tighearna g'a ghlanadh, agus thug iad a mach gach salchar a fhuair iad ann an teampull an Tighearna, gu cùirt tighe an Tighearn. Agus thog na Lebhithich leo e, gu 'thoirt a mach gu sruth Chidroin.

17 A nis thòisich iad air a' cheud là do'n cheud mhìos air naomhachadh⁴, agus air an ochdamh là do'n mhìos thàinig iad gu sgàth-thigh an Tighearn, agus naomhaich iad tigh an Tighearn ann an ochd làitheibh, agus air an t-seathadh là deug do'n cheud mhìos chrìochnaich iad *an obair*.

18 An sin chaidh iad a steach a dh'ionnsuidh Hesechiah an rìgh, agus thubhairt iad, Ghlan sinn tigh an Tighearn uile, agus altair na h-iobairt-loisgte maille r'a soithichibh uile, agus bord an arain thaisbeanta maille r'a shoithichibh uile.

19 Agus na soithiche sin uile a chuir rìgh Ahas, an uair a rìghich e, air falbh 'na eusaontas, dheasaich sinne agus naomhaich sinn, agus, feuch, *tha* iad fa chomhair altair an Tighearn.

20 An sin dh'éirich Hesechiah an rìgh gu moch, agus chruinnich e uachdarain a' bhaile, agus chaidh e suas do thigh an Tighearn.

21 Agus thug iad leo seachd tairbh òga, agus seachd reitheachan, agus seachd uain, agus seachd buic-ghaibhre mar iobairt-pheacaidh air son na rìoghachd, agus air son an *ionad* naomh, agus air son Iudah: agus dh'àithn e do na sagartaibh, mic Aaroin, an iobradh air altair an Tighearn.

22 Uime sin mharbh iadsan na tairbh, agus ghabh na sagairt an fhuil, agus chrath iad i air an altair: mharbh iad mar an ceudna na reitheachan, agus chrath iad an fhuil air an altair: mharbh iad cuid-eachd na h-uain, agus chrath iad an fhuil air an altair.

¹ Abi. II. Rìgh, Caib. XVIII. r. 2.

² theinn, amhludh.

³ iongantas.

⁴ glanadh.

23 Agus thug iad leo na buic-ghaibhre air son na h-ìobairt-pheacaidh an làthair an rìgh agus a' choimhthionail, agus chuir iad an làmhnan orra :

24 Agus mharbh na sagairt iad, agus chrath iad am fuil¹ air an altair chum réite dheanamh air son Israeil uile : oir dh'àithn an rìgh an ìobairt-loisgte agus an ìobairt-pheacaidh air son Israeil uile.

25 Agus chuir e na Lebhithich ann an tigh an Tighearna le ciombalaibh, le salt-airibh, agus le clàrsaichibh, a réir àithne Dhaibhidh, agus Ghaid fhir-sheallaidh an rìgh, agus Natain an fhàidh : oir b'i sin àithne an Tighearna le làimh fhàidhean.

26 Agus sheas na Lebhithich le h-innealaibh Dhaibhidh, agus na sagairt leis na trompaidibh.

27 Agus dh'àithn Heseciah an ìobairt-loisgte iobradh air an altair : agus an uair a thoisich an ìobairt-loisgte, thoisich *mar an ceudna* laoidh au Tighearna leis na trompaidibh, agus le h-innealaibh Dhaibhidh rìgh Israeil.

28 Agus rinn an coimhthional uile aoradh, agus sheinn an luchd-seinn, agus sheid na trompadairean : *mhair* so uile gus an do chrìochnaiceadh an ìobairt-loisgte.

29 Agus an uair a chuir iad crìoch air iobradh, chrom an rìgh agus iadsan uile a bha maille ris iad féin², agus rinn iad aoradh.

30 Agus dh'àithn Heseciah an rìgh agus na h-uachdarain do na Lebhithich gu moladh iad an Tighearna am briathraibh Dhaibhidh, agus Asaiph an fhir-sheallaidh : agus mhol iad le subhachas, agus chrom iad an cinn, agus rinn iad aoradh.

31 An sin fhreagair Heseciah, agus thubhairt e, A nis choisrig sibh sibh féin do'n Tighearna : thigibh am fagus, agus thugaibh leibh ìobairtean, agus tabhartais-buidheachais do thigh an Tighearna. Agus thug an coimhthional a steach ìobairtean, agus tabhartais-buidheachais, agus iadsan uile a bha toileach 'nan cridhe, tabhartais-loisgte.

32 Agus b'e àireamh nan tabhartais-loisgte a thug an coimhthional leo, trì fichead agus deich tairbh òga, ceud reithe, dà cheud uan; iad sin uile chum ìobairt-loisgte do'n Tighearna.

33 Agus na nithe coisrigte, sè ceud bò, agus trì mìle caora.

34 Ach bha na sagairt tearc, agus cha b'urrainn iad na tabhartais-loisgte uile fhionnadh : uime sin chuidich am bràithre na Lebhithich leo, gus an do chrìochnaiceadh an obair, agus gus an do

naomhaich na sagairt iad féin; oir *bha* na Lebhithich nì bu deise³ 'nan cridhe chum iad féin a naomhachadh nà na sagairt.

35 Agus mar an ceudna *bha* na tabhartais-loisgte am pailteas, maille ri saill nan tabhartas-sìth agus nan tabhartas-dìbhe, chum na h-ìobairt-loisgte. Agus dheasaicheadh⁴ seirbhis tighe an Tighearna.

36 Agus rinn Heseciah agus an sluagh uile gairdeachas, a chionn gu'n do dheasaich Dia air son an t-sluaigh : oir rinneadh an nì gu grad.

CAIB. XXX.

1 *Thug Heseciah fa' near gairm a thabhairt air feadh Israeil uile iad a chumail na càisge ann an Ierusalem.* 13 *Thug an comhchruinneach air falbh altairean nan dèe coimheach, agus chum iad a' chàisg ceithir là deug.*

AGUS chuir Heseciah *fios* gu h-Israel a uile agus gu Iudah, agus mar an ceudna sgrìobh e litrichean gu h-Ephraim agus gu Manaseh, iad a theachd gu tigh an Tighearna ann an Ierusalem, a chumail na càisge do'n Tighearna Dia Israeil.

2 Agus ghabh an rìgh comhairle, agus 'uachdarain, agus an coimhthional uile ann an Ierusalem, a' chàisg a chumail air an dara mìos.

3 Oir cha b'urrainn iad a cumail san àm sin, a chionn nach do naomhaich na sagairt iad féin gu leòr, agus nach robh an sluagh air cruinneachadh gu h-Ierusalem.

4 Agus thaitinn an nì ris an rìgh, agus ris a' choimhthional uile.

5 Agus shuidhich iad reachd, gairm a thabhairt air feadh Israeil uile o Bheerseba eadhon gu Dan, iad a theachd a chumail na càisge do'n Tighearna Dia Israeil ann an Ierusalem; oir cha do chum mòran i⁵ mar a bha e sgrìobhta.

6 Agus chaidh na gillean-ruithe le litricheibh o'n rìgh agus o 'uachdaranuibh air feadh Israeil uile agus Iudah, agus a réir àithne an rìgh, ag ràdh, A chlann Israeil, pillibh a dh'ionnsuidh an Tighearna Dé Abraham, Isaic, agus Israeil, agus pillidh esan a dh'ionnsuidh an fhuighill dèibh a chaidh as o làimh rìghrean Asiria.

7 Agus na bithibh cosmhuil ri'r n-aithrichibh, agus cosmhuil ri'r bràithribh a pheacaich an aghaidh an Tighearna Dé an aithriche, agus thug esan thairis iad gu léir-sgrìos, mar a chi sibh.

8 A nis na bithibh-se cruaidh-mhuineil-each cosmhuil ri'r n-aithrichibh: thugaibh sibh féin thairis do'n Tighearna, agus rachaibh a steach d'a ionad naomh, a naomhaich e gu bràth; agus deanaibh seirbhis do'n Tighearna bhur Dia, a chum gu tionndaidh lasan 'fheirge air falbh uaibh.

¹ rinn iad réite le'm fuil. ² iad féin air an glàinibh. ³ nì bu diriche, ionraice.

⁴ shuidhichadh, chuireadh an ordugh. ⁵ cha do chum iad i rè ùine fhada.

II. EACHDRAIDH, XXX. XXXI.

9 Oir ma philleas sibh a dh'ionnsuidh an Tighearna, [gheibh] bhur bràithrean agus bhur clann iochd 'nam fianuis-san a thug leò am braighdeanas iad, air chor as gu pill iad a dh'ionnsuidh na tìre so: oir gràsmhor agus trócaireach *tha'n* Tighearna bhur Dia, agus cha tionndaidh e a glmùis air falbh uaibh, ma philleas sibh d'a ionnsuidh.

10 Agus chaidh na gillea-rùithe thairis o bhlaie gu baile, air feadh tìre Ephraim agus Mhanaseh, eadhon gu ruig Sebulun; ach bha iad a' fanoid orra, agus a' deanainh ball-magaidh dhiubh.

11 Gidheadh, dh'ìrioslaich daoine àraidh do Aser, agus do Mhanaseh, agus do Shebulun iad féin, agus thàinig iad gu h-Ierusalem.

12 Mar an ceudna ann an Iudah bha làmh Dhé a thoirt aon chridhe dhoibh, a dheanamh àithne an rìgh agus nan uachdaran, a réir focail an Tighearna.

13 Agus chruinnich ann an Ierusalem mòran sluagh, a chumail féill an arain neo-ghoirtichte anns an dara mìos, comh-chruinneachadh ro mhòr.

14 Agus dh'éirich iad, agus thug iad air falbh na h-altairean a bha ann an Ierusalem, agus na h-altairean uile air son tùise thug iad air falbh, agus thilg siad iad ann an sruth Chidroin.

15 Agus mharbh iad a' chàisg air a' cheathramh là deug do'n dara mìos; agus bha nàir air na sagairt agus air na Lebhithich, agus naomhaich siad iad féin, agus thug iad a steach ìobairtean-loisgte do thigh an Tighearna.

16 Agus sheas iad 'nan àit a réir an riaghailt¹, a réir lagha Mhaois òglaich Dhé; agus chrath na sagairt an fhuil a ghabh iad o làimh nan Lebhithich.

17 Oir bha mòran anns a' choimhthional nach robh air an naomhachadh: uime sin bha cùram marbhadh na càisge air na Lebhithich, air son gach neach nach robh glan, a chum an naomhachadh do'n Tighearna.

18 Oir cha do ghlan mòran do'n t-sluagh, mòran do Ephraim, agus do Mhanaseh, do Isachar, agus do Shebulun iad féin; gidheadh, dh'ith iad a' chàisg, cha b'ann mar a ta e sgrìobhta.

19 Ach rinn Heseciah urnuigh air an son, ag ràdh, Gu tugadh an Tighearna maith maitheanas do gach aon, a dheasaich a chridhe a dh'iarraidh an Tighearna Dé² aithriche, ged nach 'eil e glan a réir glanaidh an ìonaid naomh.

20 Agus dh'èisd an Tighearna ri Heseciah, agus leighis e an sluagh.

21 Agus chum clann Israeil a bha làthair

ann an Ierusalem féill an arain neo-ghoirtichte seachd làithean le mòr-ghairdeachas: agus mhol na Lebhithich agus na sagairt an Tighearna o là gu là, a' seinn le h-innealaibh fuaimneach do'n Tighearn.

22 Agus labhair Heseciah gu caoimheil³ ris na Lebhithich uile, a theagaisg eòlas maith⁴ an Tighearna; agus dh'ith⁵ iad air an fhéill rè sheachd làithean, ag ìobradh ìobairte-sìth, agus a' cliùthachadh an Tighearna Dé an aithriche.

23 Agus ghabh an coimhthional uile comhairle seachd làithean eile a chumail: agus chum iad seachd làithean eile le h-aobhneas.

24 Oir thug Heseciah rìgh Iudah suas do'n choimhthional mìle tarbh òg, agus seachd mìle caora; agus thug na h-uachdaran suas do'n choimhthional mìle tarbh òg, agus deich mìle caora: agus naomhaich mòran shagart iad féin.

25 Agus rinn coimhthional Iudah uile gairdeachas, agus na sagairt, agus na Lebhithich, agus an coimhthional uile a thàinig á h-Israel, agus na coigrich a thàinig á tìr Israeil, agus a bha chòmh-nuidh ann an Iudah.

26 Mar sin bha mòr-aobhneas ann an Ierusalem; oir o làithibh Sholaimh, mhic Dhaibhidh rìgh Israeil, cha robh a leithid ann an Ierusalem.

27 An sin dh'éirich na sagairt agus na Lebhithich, agus bheamaich iad an sluagh: agus chuala [Dia] an guth, agus thàinig an urnuigh suas d'a àite-comh-nuidh naomha-san, do nèamh.

CAIB. XXXI.

2 Shuidhich Heseciah roinnean nan sagart agus nan Lebhithich. 5 Thug clann Israeil seachd gu toileach ceud thoradh an fhearainn. 11 An luchd-dreuchd a bha os ceann nan tabhartas.

A GUS an uair a chrìochnaicheadh so uile, chaidh Israel uile a bha làthair a mach do bhailtibh Iudah, agus bhris iad na dealban, agus ghearr iad sìos na doireachan, agus thilg iad sìos na h-ionadan àrda agus na h-altairean á Iudah uile agus á Beniamin, agus ann an Ephraim agus Manaseh, agus an do sgrìos gu tur iad. An sinn phill clann Israeil uile, gach duine a dh'ionnsuidh a sheilbhe féin, d'am bailtibh féin.

2 Agus shuidhich Heseciah roinnean nan sagart agus nan Lebhithich a réir an roinnean, gach duine a réir a sheirblis féin, na sagairt agus na Lebhithich air son nan ìobairt-loisgte, agus air son nan ìobairt-shìth, a fhrithéaladh, agus a thabhairt buidheachais, agus a chliùth-

¹ an modha. ² Dhé, an Tighearna Dé.
³ ri'n cridhe. Eabh.

⁴ a bha tuigsinn còlais mhaith.
⁵ choinnlean, chum.

achadh ann an geatachaibh chaimp an Tighearna :

3 Cuibhrionn an rìgh mar an ceudna d'a mhaoin, air son nan iobairt-loisgte, air son iobairt-loisgte na maidne, agus an fheasgair, agus iobairt-loisgte nan sàbaid, agus nan gealach nomha, agus nam féill suidhichte, mar a ta e sgrìobhta ann an lagh an Tighearna.

4 Dh'àithn e cuideachd do'n t-sluagh a bha chòmhnuidh ann an Ierusalem, gu'n tugadh iad seachad cuibhrionn nan sagart agus nan Lebhitheach, chum gu'm biodh iad air an daingneachadh ann an lagh an Tighearna.

5 Agus co luath as a thàinig an àithne mach, thug clann Israeil seachad gu pailt ceud thoradh an arbhair, an fhiona, agus na h-oladh¹, agus na meala, agus uile fhàis² an fhearainn; agus deachamh nan uile *nithe* thug iad a stigh ann am pailteas.

6 Agus a thaobh chloinn Israeil agus Iudah a bha chòmhnuidh ann am bailtibh Iudah, thug iadsan mar an ceudna stigh deachamh a' bhuair agus nan caorach, agus deachamh nan nithe naomha a bha air an naomhachadh do'n Tighearna an Dia, agus rinn iad mòran chruach *diubh*.

7 Anns an treas mìos thòisich iad air bunaitean nan cruach a lcgadh, agus anns an t-seachdamh mìos chrìochnaich siad iad.

8 Agus thàinig Hecseciah agus na h-uachdarain, agus chunnaic iad na cruachan, agus bheannaich iad an Tighearna agus a shluagh Israel.

9 Agus dh'fhiosraich Hecseciah do na sagairt agus na Lebhithich mu thimchioll nan cruach.

10 Agus fhreagair Asariah an t-àrd shagart do thigh Shadoic e, agus thubhairt e, O'n a thòisich iad air na tabhartais a thoirt a steach do thigh an Tighearna, dh'ith sinn gus an do shàsuicheadh sinn, agus dh'fhàg sinn pailteas: oir bheannaich an Tighearna a shluagh, agus dh'fhàgadh am pailteas mòr so.

11 An sin dh'àithn Hecseciah seòmrach-ean³ ulluchadh ann an tigh an Tighearna; agus dh'ulluich siad *iad*;

12 Agus thug iad a stigh na tabhartais, agus na deachamh, agus na *nithe* naomhaichte gu fìrinneach; agus os an ceann bha Cononiah an Lebhitheach 'na riaghlair, agus Simeì a bhràthair san àit a b'fhaigse.

13 Agus bha Iehiel, agus Asariah, agus Nahat, agus Asahel, agus Ierimot, agus Iosabad, agus Eliel, agus Ismahiah, agus Mahat, agus Benaiah, 'nan luchd-amhairc

thairis fuidh làimh Chononiah, agus Shimeì a bhràthair, air àithne Hecseciah an rìgh, agus Asariah uachdarain tighe Dhé.

14 Agus bha Corc mac Imnah an Lebhitheach, an dorsair a làimh na h-àird' an ear, os ceann shaor-thiodhlac Dhé, chum gu'n tugadh e seachad tabhartais an Tighearna, agus na nithe ro naomha.

15 Agus làimh ris-san Eden, agus Beniamin⁴, agus Iesua, agus Semaiah, agus Amariah, agus Secaniah, ann am bailtibh nan sagart 'nan cùram⁵, a thabhairt d'am bràithribh 'nan roinnibh⁶, mar do'n mhòr mar sin do'n bheag.

16 A thuilleadh air àireamh nam frionnach a réir an ginealach o thrì bliadhna dh'aois agus os a cheann, do gach neach a théid a steach do thigh an Tighearna, a chuibhrionn lathail, air son an seirbhis 'nan cùram, a réir an roinnean;

17 Araon do àireamh nan sagart a réir an ginealach, a réir tighe an aithriche, agus nan Lebhitheach o fhichead bliadhna dh'aois agus os a cheann, 'nan cùram, a réir an roinnean;

18 Agus do àireamh an cloinne bige uile a réir an ginealach, am ban, agus am mac, agus an nigheana, do'n choimhthional uile; oir 'nan cùram naomhaich siad féin gu mòr:

19 Agus do mhacaibh Aaroin na sagartaibh ann am fearann comh-roinn am bailtean, anns gach baile fa leth, na daoine a dh'aicnicheadh air an ainm, a thabhairt an cuibhrionna do gach frionnach am measg nan sagart, agus dhoibhsan uile a bha air an àireamh a réir an ginealach am measg nan Lebhitheach.

20 Agus rinn Hecseciah mar so air feadh Iudah uile: agus rinn e an *ni sin a bha* maith, agus ceart, agus fìrinneach ann am fianuis an Tighearna a Dhé.

21 Agus a thaobh gach oibre air an do thòisich e ann an seirbhis tighe Dhé, agus anns an lagh, agus anns na h-àitheantaibh, a dh'iarraidh a Dhé, rinn e i le 'uile chridhe, agus shoirbhich e.

CAIB. XXXII.

1 *Dhaingnich Hecseciah baile Ierusalem an aghaidh rìgh Asria.* 9 *Teachdaireachd mhaslach Shenacherib.* 20 *Bhuail aingal an Tighearna feachd nan Asirianach.* 32 *Bàs agus adhlac Hecseciah.*

AN déigh nan nithe so agus an uair a bha iad air an suidheachadh, thàinig Senacherib rìgh Asria, agus chaidh e steach do Iudah, agus champaich e an aghaidh nam bailte daingnichte, agus shònraich⁷ e air an cosnadh dha féin.

2 Agus an uair a chunnaic Hecseciah gu'n d'thàinig Senacherib, agus gu'n robh

¹ an olaidh.

² chinnis.

³ àitean-tasgaidh.

⁴ Miniamin.

⁵ 'nan dreuchd shuidhichte.

⁶ 'nan scalaibh.

⁷ shaoil; thubhairt, Eabh.

II. EACHDRAIDH, XXXII.

e cur roimhe cogadh an aghaidh Ierusalem.

3 Chuir e a chomhairle r'a uachdaran-aibh agus r'a dhaoiuibh cumhachdach, uisgeacha nan tobar *abha*'n taobha muigh do'n bhaile a dhùnadh suas; agus chuidich iad leis.

4 Agus chruinnich sluagh mòr, agus dhùin iad suas na tobraichean uile, agus na sruthain a bha ruith ann am meadhon na tìre, ag ràdh, C'ar son a thigeadh rìgh-rean Asiria, agus a gheibheadh iad mòran uisge?

5 Agus dhaingnich se e féin, agus thog e am balla uile a chaidh bhriseadh, agus chuir e suas tùir air¹, agus balla eile air an taobh a muigh, agus dhaingnich e Milo baile Dhaibhidh, agus rinn e gathanna agus targaidean ann am pailteas.

6 Agus chuir e ceannardan cogaidh os ceann an t-sluaigh, agus chruinnich e iad d'a ionnsuidh ann an sràid geata a' bhaile, agus labhair e r'an cridhe, ag ràdh,

7 Bithibh làidir agus bithibh misneachail, na biodh eagal agus na biodh faitcheas oirbh roimh rìgh Asiria, no roimh an t-sluaigh mhòr so uile a *tha* maille ris; oir is mò a *ta* leinne na leis-san.

8 Leis-san *tha* gairdean fèola, ach leinne *tha*'n Tighearn ar Dia, a chuideachadh leinn, agus a chur ar catha. Agus dh'earb an sluagh á briathraibh Hesechia rìgh Iudah.

9 'Na dhéighl so chuir Senacherib rìgh Asiria a sheirbhisich gu h-Ierusalem, (oir *bha* e féin aig Lachis, agus a neart uile maille ris), a dh'ionnsuidh Hesechia rìgh Iudah, agus a dh'ionnsuidh Iudah uile, a *bha* aig Ierusalem, ag ràdh,

10 Mar so tha Senacherib rìgh Asiria ag ràdh, Cia as a *tha* sibh ag earbsadh, agus sibh a' fantuinn 'nur daingneach ann an Ierusalem?

11 Nach 'eil Hesechia 'gur comhairleachadh sibh féin a thoirt thairis gu bàs le gorta agus le tart, ag ràdh, Saoraidh an Tighearn ar Dia sinn á làimh rìgh Asiria?

12 Nach do chuir Hesechia so féin air falbh 'àitean àrda, agus 'altairean, agus nach d'àithn e do Iudah agus do Ierusalem, ag ràdh, Fa chomhair aoin altarach sleuchdaidh sibh, agus loisgidh sibh tùis oirre?

13 Nach 'eil fhios agaibh ciod a rinn mise agus m'aithriche ri uile shluaigh nan dùchanna? an robh dée chinneach nan tìr sin comasach air an tìr féin a shaoradh as mo làimh-sa?

14 Cò am measg uile dhée nan cinneach sin a sgrìos m'aithriche-sa gu tur, a b'urrainn a shluagh a shaoradh as mo làimh-sa,

gu'm biodh bhur Dia-sa comasach air bhur saoradh as mo làimh?

15 A nis ma ta na mealladh Hesechia sibh, agus na comhairlicheadh² e sibh mar so, agus na creidibh e; oir cha robh dia air bith ciumhich no rìoghachd sam bith comasach air a shluagh a shaoradh as mo làimh-sa, agus á làimh m'aithriche; nach lugha gu mòr na sin is urrainn bhur Dia-sa bhur saoradh as mo làimh?

16 Agus labhair a sheirbhisich tuilleadh as so an aghaidh an Tighearna Dé, agus an aghaidh a sheirbhisich Hesechia.

17 Sgrìobh e mar an ceudna litrichean a chàineadh an Tighearna Dé Israeil, agus a labhairt 'na aghaidh, ag ràdh, Mar nach do shaor dée chinneach nan dùchanna an sluagh as mo làimh-sa, mar sin cha saor Dia Hesechia a shluagh as mo làimh.

18 Ghlaodh iad cuideachd le guth àrd sa' chàin Iudhaich ri sluagh Ierusalem a *bha* air a' bhalla, gu eagal agus buaireas a chur orra, chum gu'n glacadh iad am baile.

19 Agus labhair iad an aghaidh Dhé Ierusalem, mar an aghaidh dhée shluaigh na talmhainn, oibre lánhan dhaoine.

20 Agus rinn Hesechia an rìgh, agus an fàidh Isaiah mac Amois, urnuigh air son so, agus ghlaodh iad gu nèamh.

21 Agus chuir an Tighearn aingcal uaith, a sgrìos na daoine comasach gaisgeil uile, agus na ceannardan, agus na h-uachdaran ann an camp rìgh Asiria: uime sin phill e le nàire gnuise d'a thìr féin. Agus an uair a chaidh e steach do thìgh a dhé, mharbh iadsan a thàinig a mach as 'innibh féin e 'n sin leis a' chlaidheamh.

22 Mar so shaor an Tighearna Hesechia agus luchd-àiteachaidh Ierusalem á làimh Shenacherib rìgh Asiria, agus á làimh nan uile, agus stiùir e iad air gach taobh.

23 Agus thug mòran tabhartais a dh'ionnsuidh an Tighearna gu h-Ierusalem, agus tiodhlacan a dh'ionnsuidh Hesechia rìgh Iudah: agus dh'ardaicheadh e ann an sùilbhan nan uile chinneach 'na dhéighl sin.

24 Anns na làithibh sin bha Hesechia tinn gu bàs, agus rinn e urnuigh ris an Tighearn: agus dh'éisd³ esan ris, agus thug e comhara dha.

25 Ach cha d'ìoc Hesechia a ris a réir mar a bhuillicheadh air; oir thogadh a chridhe suas: agus bha fearg ris, agus ri Iudah agus Ierusalem.

26 Gidheadh dh'ìrioslaich Hesechia e féin air son uabhair a chridhe; *arao*n e féin agus luchd-àiteachaidh Ierusalem:

¹ chuir e suas e gu ruig na tùir.

² na h-amaidh.

³ labhair. Eabh.

uime sin cha d'fhàinig fearg an Tighearna orra ann an làithibh Heseciah.

27 Agus bha aig Heseciah beartas agus urram ro mhòr; agus rinn e dha féin ionmhasan do airgid, agus do òr, agus do chlachaidh luachmhor, agus do spioraidh, agus do thargaidibh, agus do gach seud¹ taitneach;

28 Agus tighean-tasgaidh air son toraidh² an arbhair, agus an fhìona, agus na h-oladh; agus tighean air son gach gnè ainmhidh, agus mainneirean air son nan treud.

29 Agus rinn e dha féin bailtean: agus bha sealbh chaorach agus buar aige ann am bailteas, oir thug Dia dha maoin ro mhòr.

30 Chuir Heseciah so féin mar an ceudna stad air sruth uisge uachdarach Ghìhoìn, agus thug e sìos dìreach e a làimh na h-àirde 'n iar do bhaile Dhaibhidh. Agus shoirbhich Heseciah 'na oibrìbh uile.

31 Gidheadh, a thaobh theachdairean uachdarana Bhabiloìn, a chuireadh d'a ionnsuidh a dh'fhiosrachadh mu'n iongantais a bha san tìr, thréig Dia e g'a dhearbhadh, chum gu'm biodh fios aige air gach *ni a bha* 'na chridhe.

32 Agus a' chuid eile do ghniomharaibh Heseciah, agus a mhaithreas, feuch, *tha* iad sgriobhta ann am fàisteachd³ Isaiah an fhàidh, mhic Amois, agus ann an leabhar rìghrean Iudah agus Israeil.

33 Agus choidil Heseciah maille r'a aithrichibh, agus dh'adhlac iad e ann an àrd àit-adhlacaidh mhac Dhaibhidh: agus thug Iudah uile agus luchd-àiteachaidh Ierusalem urram dha 'nuair a fhuair e bàs. Agus rìghich Manaseh a mhac 'na àit.

CAIB. XXXIII.

1 Rìoghachadh aingidh Mhanaseh. 10 Thug ceannarda rìgh Asiria am braighdeanas e gu Babilon.

12 Dh'ìrìoslaich se e féin an sin, agus thug Dia air ais e d'a rìoghachd. 14 A ghniomhara.

24 Fhuair e bàs, agus rìghich Amon 'na àit.

DA bhliadhna dheug a dh'aois bha Manaseh 'nuair a thòisich e air rìoghachadh, agus rìghich e ciùg bliadhna deug agus dà fhichead ann an Ierusalem.

2 Ach rinn e ole ann an sùilbh an Tighearna, a réir ghràineileachd nan cinneach, a thig an Tighearna a mach roimh chloinn Israeil.

3 Oir thog e suas a rìs na h-àitean àrda a sgrios Heseciah 'athair, agus chuir e suas altairean do Bhaalim, agus rinn e doireachan, agus shleuchd e do uile shlòigh⁴ nan nèamh, agus rinn e seirbhis doibh.

4 Agus thog e altairean ann an tigh an

Tighearna, mu'n dubhairt an Tighearna, Ann an Ierusalem bithidh m'ainm-sa gu bràth.

5 Agus thog e altairean do uile shlòigh nan nèamh ann an dà chùirt tìghe an Tighearna.

6 Agus thug e air a chloinn dol troimh 'n teine ann an gleann mhic Hinoim; agus thug e fa'near àmanna, agus ghnàthaich e geasachd⁵ agus druith-eachd, agus chuir e air chois leannain-shlìth agus luchd-fiosachd: dh'oibrich e mòr-aingidheachd ann an sùilbh an Tighearna, g'a bhrosnachadh gu feirg.

7 Agus chuir e dealbh snaidhte, ìodhol⁶ a rinn e, ann an tigh Dhé, mu'n dubhairt Dia ri Dhaibhidh, agus ri Solamh a mhac, Anns an tigh so, agus ann an Ierusalem, a thagh mi á uile threubhan Israeil, cuiridh mi m'ainm gu bràth.

8 Agus cha charuich mi cos Israeil nì's mò as an fhearann a dh'orduich mi do bhuir n-aithrichibh; ma bheir iad a mhàin an aire gu'n dean iad gach *ni* a dh'aithean mi dhoibh, a réir an lagha uile, agus nan reachd, agus nan riaghailt le làimh Mhaois.

9 Mar sin thug Manaseh air Iudah agus luchd-àiteachaidh Ierusalem dol air seachàran, gu tuilleadh uile a dheanamh na rinn na cinnich, a sgrios an Tighearna roimh chloinn Israeil.

10 Agus labhair an Tighearna ri Manaseh, agus r'a shluagh; ach cha'n éisdeadh iad.

11 Uime sin thug an Tighearna orra ceannarda feachd rìgh Asiria; agus ghlac iad Manaseh ann an droighnich, agus cheangail iad e le slabhraidhibh, agus thug iad leo e gu Babilon.

12 Agus an uair a bha e ann an àmhghar dh'iarr e an Tighearna a Dhia, agus dh'ìrìoslaich se e féin gu mòr am fianuis Dhé 'aithriche,

13 Agus rinn e urnuigh ris, agus rinn-eadh esan réidh ris, agus dh'éisd e r'a athchuinge, agus thug e air ais e gu h-Ierusalem d'a rìoghachd. Agus dh'aithnich Manaseh gur e'n Tighearna a's Dia ann.

14 Agus 'na dhéigh so thog e balla an taobh a muigh do bhaile Dhaibhidh, air an taobh an iar do Ghìhon anns a' ghleann, eadhon gu ruig dol a stigh geata an éisg, agus thug e mu'n cuairt air Ophel e, agus thog e suas e gu ro àrd; agus chuir e ceannardan cogaidh⁷ ann an uile bhailtibh daingnichte Iudah.

15 Agus chuir e air falbh na diathan coimheach agus an ìodhol á tigh an Tighearna, agus na h-altairean uile a thog e

¹ uidheam, inneal.

³ sealladh. Eabh.

² fàis, cinnis.

⁴ armaill.

⁵ geasadaireachd. ⁶ cosamlachd; semel. Eabh.

⁷ ceannardan na h-armaill.

ann an sliabh tighe an Tighearn, agus ann an Ierusalem, agus thilg e mach as a' bhaile iad.

16 Agus chàirich e altair an Tighearn, agus dh'ìobair e oirre ìobairtean-sithe agus buidheachais, agus dh'àithn e do Iudah seirbhis a dheanamh do'n Tighearna Dia Israeil.

17 Gidheadh, dh'ìobair an sluagh fathast anns na h-àitibh àrda, ach a mhàin do'n Tighearn an Dia.

18 Agus a' chuid eile do ghnìomharaibh Mhanaseh, agus 'urnuigh r'a Dhia, agus briathra nam fear-seallaidh a labhair ris ann an ainm an Tighearna Dé Israeil, feuch, *tha* iad sgriobhta ann an leabhar rìghrean Israeil.

19 'Urnugh mar an ceudna, agus mar a dh'éisdeadh ris, agus a pheacadh uile, agus 'eusaontas, agus na h-àitean anns an do thog e ionadan àrda, agus an do chuir e suas doireachan agus dealbhan snaidhte, mu'n d'ìrosalachadh e, feuch, *tha* iad sgriobhta am measg bhriathar nam fear-seallaidh.

20 Agus choidil Manaseh maille r'a aithrichibh, agus dh'adhlac iad e 'na thigh féin: agus rìghich a mhac Amon 'na àit.

21 Dà bhliadhna fichead a dh'aois *bha* Amon an uair a thòisich e air rìoghachadh, agus rìghich e dà bhliadhna ann an Ierusalem.

22 Agus rinn e olc ann an sùilibh an Tighearna, mar a rinn Manaseh 'athair: oir dh'ìobair Amon do na dealbhaibh snaidhte uile a rinn Manaseh 'athair, agus rinn e seirbhis doibh:

23 Agus cha d'ìrosalach se e féin am fianuis an Tighearna, mar a dh'ìrosalach Manaseh 'athair e féin; ach mheudaich Amon eusaontas.

24 Agus rinn a sheirbhisich ceannaire 'na aghaidh, agus mharbh iad e 'na thigh féin.

25 Ach mharbh sluagh na tìre iadsan uile a rinn ceannaire an aghaidh rìgh Amon, agus rinn sluagh na tìre Iosiah a mhac 'na rìgh 'na àit.

CAIB. XXXIV.

1 *Ghlan Iosiah Iudah agus Ierusalem o na h-àitibh àrda.* 8 *Chuir e luchd oibre a chàradh tighe an Tighearn.* 14 *Fhuair Hilciah leabhar an lagha, agus leugh Saphan e an éisleadh an rìgh.* 23 *Ròimh-innis Hulda sgrìos Ierusalem.*

OCHD bliadhna dh'aois *bha* Iosiah, 'nuair a thòisich e air rìoghachadh, agus rìghich e ann an Ierusalem aon bhliadhna deug thar fhichead.

2 Agus rinn e an *ni a bha* ceart ann an sùilibh an Tighearn, agus dh'imich e ann an sliabh Dhaibhidh 'athar, agus cha

do chlaon e dh'ionnsuidh na làimhe deise no na làimhe clithe.

3 Oir anns an ochdamh bliadhna d'a rìoghachadh, 'nuair a bha e fathast òg, thòisich e air Dia Dhaibhidh 'athar iarraidh, agus anns an dara bliadhna deug thòisich e air Iudah, agus Ierusalem a ghlanadh o na h-àitibh àrda, agus na doireachaibh, agus na dealbhaibh snaidhte, agus na dealbhaibh leaghta.

4 Agus bhris iad sìos altairean Bhaalim 'na fhianuis, agus na dealbhan grianach a *bha* gu h-àrd os an ceann ghearr e sìos, agus na doireachan; agus na dealbhan snaidhte, agus na dealbhan leaghta bhris e 'nam mribh, agus phronn e gu luaithe, agus chrath e *i* air uaighibh na muinntir a dh'ìobair dhoibh.

5 Agus loisg e cnàmhan nan sagart air an altairibh, agus ghlan e Iudah agus Ierusalem.

6 Mar an ceudna ann am bailtibh Mhanaseh, agus Ephraim, agus Shimeoin, eadhon gu ruig Naphtali, 'nan àitibh fàs-aichte mu'n cuairt.

7 Agus an uair a bhris e sìos na h-altairean agus na doireachan, agus a phronn e na dealbhan snaidhte gu luaithe, agus a ghearr e sìos na dealbhan grianach¹ uile air feadh tìre Israeil uile, phill e gu h-Ierusalem.

8 Agus anns an ochdamh bliadhna deug d'a rìoghachadh, 'nuair a ghlan e an tìr, agus an tìgh, chuir e Saphan mac Asaliah, agus Maaseiah uachdaran a' bhaile, agus Ioah mac Ioahais an seanachaidh, a chàradh tighe an Tighearn a Dhé.

9 Agus thàinig iad gu Hilciah an t-àrd shagart, agus thugadh *dhoibh* an t-airgid a thugadh steach do thigh Dhé, a chrùn-ich na Lebhithich a ghléidh na dorsan o làimh Mhanaseh agus Ephraim, agus o uile fhuigheall Israeil, agus o Iudah uile, agus o Bheniamin, agus o luchd-àiteachaidh Ierusalem².

10 Agus thug iad e do làimh luchd deanamh na h-oibre, a chuireadh os ceann tighe³ an Tighearn, agus thug iadsan e do'n luchd-oibre a dh'oibrich ann an tìgh an Tighearn, a chàradh agus a leasachadh an tìghe:

11 Thug iad e eadhon do na saoraibh agus do'n luchd-togail, a cheannach chlach snaidhte, agus fiodha chum nan ceangal⁴, agus gu ùrlar a chur sna tighibh a mhill rìghrean Iudah.

12 Agus rinn na daoine an obair gu firinneach; agus *b'iad* an luchd amhaire thairis orra Iahat agus Obadiah, na Lebhithich, do mhacaibh Mherari; agus Sechariah agus Mesulam, do mhacaibh

¹ na h-iodholan.

² agus phill iad gu h-Ierusalem.

³ a bha 'nan luchd amhaire thairis ann an tìgh.

⁴ tàthachan.

nan Conatach, a chur na h-oibre air a h-aghaidh; mar an ceudna do na Lebhithich gach neach a bha còlach¹ air imealaibh-ciùil.

13 Bha iad cuideachd os ceann an luchd-ìomhair eallach, agus 'nan luchd amhairc thairis orra-san uile a rinn obair ann an gnè seirbhis air bith: agus do na Lebhithich bha sgrìobhaichean, agus riagh-ladairean, agus dorsairean.

14 Agus an uair a bha iad a' toirt a mach an airgida thugadh a steach do thigh an Tighearna, fhuair Hilciah an sagart leabhar lagha an Tighearna an làimh² Mhaois.

15 Agus fhreagair Hilciah, agus thubhairt e ri Saphan an sgrìobhaiche, Fhuair mi leabhar an lagha ann an tigh an Tighearna. Agus thug Hilciah an leabhar do Shaphan.

16 Agus thug Saphan an leabhar a dh'ionnsuidh an rìgh, agus dh'aithris e 'n gnothuch do'n rìgh, ag ràdh, Gach *ni* a dh'aitheadh do d' sheirbhisich, *tha* iad a' deanamh.

17 Chruinnich iad an t-airgiod a fhuaradh ann an tigh an Tighearna, agus thug iad e do làmh an luchd amhairc thairis, agus do làmh luchd deanamh na h-oibre.

18 Agus dh'innis Saphan an sgrìobhaiche do'n rìgh, ag ràdh, Thug Hilciah an sagart leabhar dhomh. Agus leugh Saphan e an làthair an rìgh.

19 Agus an uair a chual' an rìgh briathran an lagha, reub e 'eudach.

20 Agus dh'aithn an rìgh do Hilciah, agus do Ahicam mac Shaphain, agus do Abdon³ mac Mhìchael, agus do Shaphan an sgrìobhaiche, agus do Asaiah seirbhisich an rìgh, ag ràdh,

21 Rachaidh, fiosraichibh do'n Tighearna air mo shon-sa, agus air an son-san a dh'fhàgadh ann an Israel agus ann an Iudah, thaobh bhriathar an leabhair a fhuaradh: oir is mòr fearg an Tighearna, a tha air a taomhadh a mach oirnn, a chionn nach do choimhid ar n-aithriche focal an Tighearna, a dheanamh a réir gach *ni a ta* sgrìobhta anns an leabhar so.

22 Agus chaidh Hilciah agus iad-san a dh'orduich an rìgh gu Huldah a' bhan-fhàidh, bean Shalum, mhic Thicbhah, mhic Hasrah⁴ fhir-gheidhidh an eudach; (a nis bha i chòmhnuidh ann an Ierusalem ann an oil-thigh⁵;) agus labhair iad rithe mar sin.

23 Agus fhreagair i iad, Mar so tha'n Tighearna Dia Israeil ag ràdh, Innsibh do'n duine a chuir sibh a m'ionnsuidh-sa, 24 Mar so tha'n Tighearna ag ràdh, Feuch, bheir mise olc air an àite so, agus

air a luchd-àiteachaidh, *eadhon* gach mallachadh a *ta* sgrìobhta anns an leabhar a leugh iad ann fianuis rìgh Iudah;

25 A chionn gu'n do thréig iad mise, agus gu'n do loisg iad tùis do dhiathaibh eile, chum mo bhrosuachadh gu corruich le uile oibribh an làmh; uime sin taomar m'fhearg a mach air an àite so, agus cha mhùchar i.

26 Ach a thaobh rìgh Iudah, a chuir sibh a dh'fhiosrachadh do'n Tighearna, mar so their sibh ris, Mar so tha'n Tighearna Dia Israeil ag ràdh, *A thaobh* nam briathar a chual' thu,

27 A chionn gu'n do thiomaidh do chridhe, agus gu'n d'irioslaich thu thu féin an làthair Dhé, 'nuair a chual' thu a bhriathran an aghaidh an àite so, agus an aghaidh a luchd-àiteachaidh, agus gu'n d'irioslaich thu thu féin a'm' làthair-sa, agus gu'n do reub thu 'eudach, agus gu'n do ghuil thu a'm' làthair, chuala mise mar an ceudna *thusa*, ars' an Tighearna.

28 Feuch, cruinnichidh mi thu chum t'aithriche, agus cruinnichear thu do d'uaigh an sìth, agus cha'n fhaic do shùilean an t-olc sin uile a bheir mise air an àite so, agus air a luchd-àiteachaidh. Agus thug iad fios a rìs a dh'ionnsuidh an rìgh.

29 Agus chuir an rìgh *teachdairean* uaith, agus chruinnich e r'a chéile uile sheanairean Iudah agus Ierusalem.

30 Agus chaidh an rìgh suas do thigh an Tighearna, agus fir Iudah uile, agus luchd-àiteachaidh Ierusalem, agus na sagairt agus na Lebhithich, agus an sluagh uile eadar bheag agus mhòr; agus leugh e 'nan éisdeachd uile bhriathran leabhair a' choimhcheangail, a fhuaradh ann an tigh an Tighearna.

31 Agus sheas an rìgh 'na àite féin, agus rinn e coimhcheangal am fianuis an Tighearna, gu'n gluaisheadh e'n déigh an Tighearna, agus gu'n gleidheadh e 'àitheantan, agus a theisteis agus a reachdan, le 'uile chridhe agus le 'uile anam, a choimhleadh bhriathar a' choimhcheangail, *a tha* sgrìobhta anns an leabhar so.

32 Agus thug e orra-san uile a fhuaradh ann an Ierusalem agus Benjamin, seasamh: agus rinn luchd-àiteachaidh Ierusalem a réir coimhcheangail Dé, Dé an aithriche.

33 Agus chuir Iosiah air falbh na gràin-eileachdan uile as na òrribh uile a *bhuin* eadh do chloinn Israeil, agus thug e orra-san uile a fhuaradh ann an Israel seirbhis a dheanamh do'n Tighearna an Dia. Rè a làithean uile cha do chlaon iad o leanuinn an Tighearna, Dé an aithriche.

¹ sedlta, teòma.

² làimh-sgrìobhaidh.

³ Achbor. II. Rìgh, Caib. XXII. r. 12.

⁴ Harhais. II. Rìgh, Caib. XXII. r. 14.

⁵ tigh foghlum; misena. Eabh.

CAIB. XXXV.

1 *Chum Iosiah càisg do'n Tighearn ann an Ierusalem.* 20 *Chaidh e a chogadh ri rìgh na h-Eiphit, agus mharbhadh e aig Megido.* 25 *Rinn Ieremiah tuireadh air a shon.* 26 *A ghnìomhara.*

AGUS chum Iosiah ann an Ierusalem càisg do'n Tighearn: agus mharbh iad a' chàisg air a' cheathramh là deug do'n cheud mhìos.

2 Agus shuidhich e na sagairt 'nan cùram, agus thug e misneach dhoibh chum seirbhis tighe an Tighearn.

3 Agus thubhairt e ris na Lebhithich a theagaisg Israel uile, a *bha* naomha¹ do'n Tighearna, Cuiribh an àire naomh anns an tigh a thog Solamh, mac Dhaibhidh, rìgh Israeil: cha *bhi* i 'na h-eallaich air bhur guailibh: deanaibh seirbhis a nis do'n Tighearna bhur Dia, agus d'a shluagh Israel;

4 Agus deasaichibh sibh féin a réir tighe bhur n-aithriche, a réir bhur roinnean, mar a sgrìobh Daibhidh rìgh Israeil, agus mar a sgrìobh Solamh a mhac;

5 Agus seasaibh anns an *ionad* naomh a réir roinnean theaghlach aithriche bhur bràithre do'n t-sluagh², agus a *réir* roinne theaghlach aithriche nan Lebhitheach;

6 Agus marbhaibh a' chàisg, agus naomhaichibh sibh féin, agus deasaichibh bhur bràithrean, chum gu'n dean *iad* a réir fòcal an Tighearna le làimh Mhaois.

7 Agus thug Iosiah do'n t-sluagh caorach, uain agus minn, iad uile air son iobairtean càisge dhoibhsan uile a bha làthair, gu ruig deich mìle fichead an àireamh, agus trì mìle bò: iad sin do mhaoin an rìgh.

8 Agus thug na h-uachdarain aige gu toileach do'n t-sluagh, do na sagartaibh, agus do na Lebhithich. Thug Hilciah, agus Sechariah, agus Iehiel, uachdarain tighe Dhé, do na sagartaibh, air son iobairtean na càisge, dà mhìle agus sè ceud [caora,] agus trì cheud bò.

9 Agus thug Conaniah, agus Semaiah, agus Netaneel agus a bhràithrean, agus Hasabiah, agus Iehiel, agus Iosabad, uachdarain nan Lebhitheach, do na Lebhithich air son iobairtean na càisge, cùig mìle [caora,] agus cùig ceud bò.

10 Agus dh'ulluicheadh an t-seirbhis, agus sheas na sagairt 'nan àit, agus na Lebhithich 'nan roinnibh, a réir àithne an rìgh.

11 Agus mharbh iad³ a' chàisg, agus chrath na sagairt [an fhuil] le'n làimh, agus dh'fhionn na Lebhithich.

12 Agus thug iad air falbh na h-iobairtean-loisgte, chum gu'n tugadh iad seachad a réir roinnean theaghlach an t-sluaigh, a

dh'ìobradh do'n Tighearna, mar a *ta e* sgrìobhta ann an leabhar Mhaois: agus mar sin *rinn iad* ris a' bhuar⁴.

13 Agus ròist iad a' chàisg le teine, a réir na riaghailt; ach bhrùich⁵ iad na *tabhartais* naomha ann am poitibh, agus ann am coireachaibh, agus ann an aighnibh, agus roinn siad *iad* gu grad am measg an t-sluaigh uile.

14 Agus 'na dhéigh sin dheasaich iad dhoibh féin agus do na sagartaibh. A chionn gu'n *robh* na sagairt, mic Aaroin, ag ìobradh iobairtean-loisgte agus na saill gu h-oidhche, uime sin dheasaich na Lebhithich dhoibh féin agus do na sagairt, mic Aaroin.

15 Agus *bha* n luchd-seim, mic Asaiph, 'nan àite féin, a réir àithne Dhaibhidh, agus Asaiph, agus Hemain, agus Iedutuinn fhear-seallaidh⁶ an rìgh, agus na dorsairean aig gach geata: cha'n fheumadh iad an seirbhis fhàgail, oir dheasaich ann bràithrean na Lebhithich air an son.

16 Agus dheasaicheadh uile sheirbhis an Tighearn air an là sin féin, chum a' chàisg a chumail, agus iobairtean-loisgte ìobradh air altair an Tighearn, a réir àithne an rìgh Iosiah.

17 Agus chum clann Israeil, a bha làthair, a' chàisg san àm sin, agus féill⁷ an arain neo-ghoirtichte, seachd làithean.

18 Agus cha do chumadh a leithid sin do chàisg ann an Israel o làithibh Shamueil an fhàidh; ni mò a chum uile rìghrean Israeil a leithid do chàisg as a chum Iosiah, agus na sagairt, agus na Lebhithich, agus Iudah agus Israel uile a bha làthair, agus luchd-àiteachaidh Ierusalem.

19 Anns an ochdamh bliadhna deug do rìoghachadh Iosiah chumadh a' chàisg so.

20 'Na dheigh so uile 'nuair a dheasaich Iosiah an teampull thàinig Necho rìgh na h-Eiphit a mios a chogadh an aghaidh Charchemis, làimh ri Euphrates: agus chaidh Iosiah a mach 'na aghaidh.

21 Ach chuir esan teachdairean d'a ionnsuidh, ag ràdh, Cìod e mo ghnòthuch-sa riutsa, a rìgh Iudah? Cha'n ann a'd aghaidh-sa *tha* mise teachd an diugh, ach an aghaidh tighe ris am bheil mi a' cogadh; agus dh'àithn Dia dhomh mi dheanamh cablaig; leig dhìot a *bhi* ri Dia, a *tha* maille riumsa, chum nach sgrìos e thu.

22 Gidheadh chum do thionndaidh Iosiah 'aghaidh uaith, ach dh'fhàs e ni bu déine⁸ gu cogadh 'na aghaidh, agus cha d'éisd e ri briathraibh Necho o bheil Dé, agus chaidh e steach a chur catla ann an gleann Mhegido.

23 Agus thilg na fir-bhogha air rìgh Iosiah; agus thubhairt an rìgh r'a sheirbh-

¹ iad féin a naomhachadh.

² mhac an t-sluaigh. Eabh.

³ chuir iad air leth.

⁴ chrodh.

⁵ bhrùith. Eir.

⁶ fhir-sheallaidh.

⁷ cuirm, féisd.

⁸ chuir se c féin ann an atharrachadh crutha.

isich, Beiribh leibh mi, oir tha mi air mo lotadh gu mòr.

24 Agus thug a sheirbhisich e as a' charbad sin, agus chuir iad e anns an dara carbad a *bha* aige; agus thug iad e gu h-Ierusalem, agus fhuair e bàs, agus dh'adhlacaidh e ann an àit-adhlac 'aithriche: agus rinn Iudah agus Ierusalem uile caoidh air son Iosiah.

25 Agus rinn Ieremiah tuireadh¹ air son Iosiah; agus labhair na fir-sheinn agus na mnàir-sheinn uile mu thimchioll Iosiah 'nan tuireannaibh gu ruig an là 'n diugh, agus rinn siad iad 'nan reachd ann an Israel. Agus, feuch, *tha* iad sgrìobhta ann an *leabhar* nan tuireadh.

26 Agus a' chuid eile do ghnìomharaibh Iosiah, agus a mhaithreas mar a *ta* e sgrìobhta ann an lagh an Tighearn,

27 Eadhon a ghnìomharan an toiseach agus mudheireadh, feuch, *tha* iad sgrìobhta ann an leabhar rìghrean Israeil agus Iudah.

CAIB. XXXVI.

1 *Chuir rìgh na h-Eiphit Iehoahas o rìoghachadh ann an Ierusalem.* 4 *Rinneadh Iehoiacim 'na rìgh 'na àit.* 6 *Cheangail Nebuchadneser Iehoiacim chum a thoirt do Bhabilon.* 14 *Sgrìos na Caldeanaich Ierusalem.* 22 *Gairm Chiruis.*

AGUS ghabh sluagh na tìre Iehoahas a' mac Iosiah, agus rinn iad 'na rìgh e ann an àit 'athar ann an Ierusalem.

2 Tri bliadhna fichead a dh'aois *bha* Iehoahas an uair a thòisich e air rìoghachadh, agus rìghich e trì mìosan ann an Ierusalem.

3 Agus chuir rìgh na h-Eiphit e [o rìoghachadh] ann an Ierusalem², agus chuir e ceud tàlann airgid, agus tàlann òir, mar ùbhla³ air an tìr.

4 Agus rinn rìgh na h-Eiphit Eliacim a bhràthair 'na rìgh air Iudah agus Ierusalem, agus thionndaidh e 'aunn gu Iehoiacim. Agus ghabh Necho Iehoahas a bhràthair, agus thug e do'n Eiphit e.

5 Cùig bliadhna fichead a dh'aois *bha* Iehoiacim an uair a thòisich e air rìoghachadh, agus rìghich e aon bhliadhna deug ann an Ierusalem: agus rinn e olc ann an sùilbh an Tighearn a Dhé.

6 'Na aghaidh-san thàinig Nebuchadnesar rìgh Bhabilon a nìos, agus cheangail e ann an geimhlibh unha e, chum a thoirt do Bhabilon.

7 Thug Nebuchadnesar mar an ceudna leis *cuid* do shoithichibh tighe an Tighearn do Bhabilon, agus chuir e iad 'na theampull⁴ ann am Babilon.

8 Agus a' chuid eile do ghnìomharaibh Iehoiacim, agus a ghràineileachdan a rinn e, agus na fhuaradh ann, feuch, *tha* iad

sgrìobhta ann an leabhar rìghrean Israeil agus Iudah. Agus rìghich Iehoiachin a mhac 'na àit.

9 Ochd bliadhna deug⁵ a dh'aois *bha* Iehoiachin an uair a thòisich e air rìoghachadh, agus rìghich e trì mìosan agus déich làithean ann an Ierusalem; agus rinn e olc ann an sùilbh an Tighearn.

10 Agus aig ceann na bliadhna⁶ chuir rìgh Nebuchadnesar *daoine* uaith, agus thug e do Bhabilon e, maille ri soithichibh taitneach⁷ tighe an Tighearn; agus rinn e Sedeciah a bhràthair⁸ 'na rìgh air Iudah agus Ierusalem.

11 Bliadhna thar fhichead a dh'aois *bha* Sedeciah 'nuair a thòisich e air rìoghachadh, agus rìghich e aon bhliadhna deug ann an Ierusalem.

12 Agus rinn e olc ann an sùilbh an Tighearn a Dhé; agus cha d'ìrioslaich se e féin ann fianuis Ieremiah an fhàidh, a *labhair* o bheul an Tighearn.

13 Agus mar an ceudna rinn e ceann-aithre an aghaidh rìgh Nebuchadneser, a thug air mionnachadh air Dia: ach ragaidh e a mhuineal, agus chruaidhich e a chridhe o thionndadh a dh'ionnsuidh an Tighearna De Israeil.

14 Mar an ceudna pheacaich iadsan uile a b'àirde do na sagartaibh agus do'n t-sluagh gu ro mhòr, a réir uile ghràineileachd nan cinneach, agus thruaill iad tigh an Tighearn, a naomhaich e ann an Ierusalem.

15 Agus chuir an Tighearna Dia an aithriche *fios* d'an ionnsuidh le làimh a theachdairean, ag éirigh gu moch, agus a' cur uaith; a chionn gu'n robh truas aige d'a shluagh, agus d'a àite-còmhluaidh.

16 Ach rinn iadsan fanoid air teachdaireibh Dhé, agus rinn iad dìmeas air a bhriathraibh, agus rinn iad tarcuis⁹ air 'fhàidhibh, gus an d'éirich fearg an Tighearn an aghaidh a shluagh air chor as nach *robh* leigheas ann.

17 Uime sin thug e orra rìgh nan Caldeanach, a mharbh an daoine òga leis a' chladheamh ann an tigh an *ionaid* naoimh, agus nach do chaomhain òig-fhear no òigh, seann duine no esan a bha air a chromadh leis an aois: thug e thairis iad uile 'na làimh.

18 Agus uile shoithichean tighe Dhé, mòr agus beag, agus ionmhais tighe an Tighearn, agus ionmhais an rìgh agus 'uachdarana, thug e leis uile do Bhabilon.

19 Agus loisg iad tigh Dhé, agus bhris iad sìos balla Ierusalem, agus loisg iad a lùchairtean uile le teine, agus mhill iad a shoithichean taitneach uile.

¹ cumhadh. ² Faic II. Rìgh, Caib. XXIII. r. 33.

³ nar chis.

⁴ lùchairt.

⁵ Faic II. Rìgh, Caib. XXIV. r. 8.

⁶ teachd mu'n cùairt na bliadhna.

⁷ maisiach, luachmhor.

⁸ bràthair 'athar.

⁹ magadh.

20 Agus iadsan a chaidh as o'n chlaidh-eamh thug e leis do Bhabilon, far an robh iad 'nan seirbhlisich aige féin agus aig a mhacaibh, gus an do rìghicht rìgh¹ Pherisia:

21 Chum gu'm biodh focal an Tighearna la beul Ieremiah air a choimhlionadh, gus am mealladh an tìr a sàbaidean: rè na h-ùine a bha i fàs, chum i sàbaidean², gus an do choimhlionadh trì fichead agus deich bliadhna.

22 A nis ann an ceud bhliadhna Chiruis rìgh Pherisia, chum gu'm biodh focal an Tighearna le beul Ieremiah air a choimh-

lionadh, dhùisg an Tighearna suas spiorad Chiruis rìgh Pherisia, agus thug e fa'near gairm a bhi air a tabhairt air feadh a rìoghachd uile, agus a chur mar an ceudna ann an sgrìobhadh, ag ràdh,

23 Mar so tha Cirus rìgh Pherisia ag ràdh, Uile rìoghachdan an domhain thug an Tighearna Dia nan nèamh dhomhsa, agus dh'àithn e dhomh tigh a thogail dha ann an Ierusalem, a ta ann an Iudah: ge b'e neach a ta 'nur³ measg d'a shluagh uile, gu robh an Tighearna a Dhia maille ris, agus rachadh e suas.

¹ rìoghachd.

² rinn i tàmh.

³ ann blur.

ESRA.

CAIB. I.

1 Dh'orduich Cirus an teampull a thogail. 7 Dh'aisig e soithichean tìghe an Tighearna do Shesbadsar uachdaran Iudah. 9 Aireamh nan soithichean.

ANIS ann an ceud bhliadhna Chiruis rìgh Pherisia, chum gu'm biodh focal an Tighearna le beul Ieremiah air a choimhlionadh, dhùisg an Tighearna suas spiorad Chiruis rìgh Pherisia, agus thug e fa'near gairm a bhi air a tabhairt air feadh a rìoghachd uile, agus a chur mar an ceudna ann an sgrìobhadh, ag ràdh,

2 Mar so tha Cirus rìgh Pherisia ag ràdh, Uile rìoghachdan an domhain thug an Tighearna Dia nan nèamh dhomhsa, agus dh'àithn e dhomh tigh a thogail dha ann an Ierusalem, a ta ann an Iudah.

3 Ge b'e neach a ta 'nur measg-sa d'a shluagh uile, gu robh a Dhia maille ris, agus rachadh e suas gu h-Ierusalem a ta ann an Iudah, agus togadh e tigh an Tighearna Dé Israeil; is esan an Dia, a ta ann an Ierusalem.

4 Agus ge b'e neach a dh'fhàgadh¹ aun an àite sam bith far am bheil e air chuairt, cuidicheadh daoine 'àite leis le h-airgid, agus le h-òr, agus le maoin, agus le h-ainmhidhibh, a thuilleadh air an tabhartas saor-thoile air son tìghe Dhé a ta ann an Ierusalem.

5 An sin dh'èirich cinn aithriche Iudah agus Bheniamin, agus na sagairt agus na Lebhitich, gach neach aig an do dhùisg Dia a spiorad gu dol suas a thogail tìghe an Tighearna, a ta ann an Ierusalem.

6 Agus neartaich iadsan uile a bha mu'n cuairt doibh an làmh an le soithichibh airgid, le h-òr, le maoin, agus le h-ainmhidhibh, agus le nithibh luachmhor,

a thuilleadh air gach nì a thugadh seachad le saor-thoil.

7 Thug mar an ceudna an rìgh Cirus a mach soithichean² tìghe an Tighearna, a thug Nebuchadnesar a mach á h-Ierusalem, agus a chuir e anu an tìgh a dhée:

8 Eadhon iad sin thug Cirus rìgh Pherisia mach le làimh Mhitredait fhir-ghleidhidh an ionmhais, agus dh'àireamh e iad do Shesbadsar uachdaran Iudah.

9 Agus is e so au àireamh: Deich cuacha fichead òir, mìle cuach airgid, naoi sgeana fichead,

10 Deich thar fhichead soitheach-ionnlaid òir, ceithir cheud agus deich soithichean-airgid do'n dara seòrsa, mìle do shoithichibh eile.

11 Na soithichean òir agus airgid uile, cùig mìle agus ceithir cheud; iad sin uile thug Sesbadsar suas maille ris na braighdibh³, a thugadh suas o Bhabilon gu h-Ierusalem.

CAIB. II.

1 Aireamh an t-sluaigh a phill gu h-Ierusalem. 36 Aireamh nan sagart, 40 nan Lebhitheach, 43 nan Netineach, 55 agus mhac sheirbhliseach Sholaimh. 68 Na tabhartasan air son togail an teampull.

AGUS is iad so clann na mòr-roinne, a chaidh suas do na braighdibh, dhiubhsan a thugadh air falbh, a thug Nebuchadnesar rìgh Bhabiloin air falbh leis do Bhabiloin, agus a phill gu h-Ierusalem agus Iudah, gach fear d'a bhaile féin;

2 A thàinig maille ri⁴ Serubabel, Iesua, Nehemiah, Seraiah, Realaiah, Mordecai, Bilsan, Mispar, Bigbhai, Rehum, Baanah.

AIREAMH DHAOTNE SLUAIGH ISRAEL.

3 Mic Pharois, dà mhìle ceud trì fichead agus a dhà-dheug.

¹ dh'fhanas.

² airneis.

³ a' bhraighdeanas. Eabh.

⁴ marri, le.

4 Mic Shephatiah, tri cheud tri fichead agus a dhà-dheug.

5 Mic Arah, seachd ceud tri fichead agus cùig-deug.

6 Mic Phahat-mhoaib, do chloinn Iesua [agus] Ioaib, dà mhìle ochd ceud agus a dhà-dheug.

7 Mic Elaim, mìle dà cheud leth-cheud agus a ceithir.

8 Mic Shatu, naoi ceud dà fhichead agus a cùig.

9 Mic Shacai, seachd ceud agus tri fichead.

10 Mic Bhani, sè ceud dà fhichead agus a dhà.

11 Mic Bhebai, sè ceud fichead agus a tri.

12 Mic Asgaid, mìle dà cheud fichead agus a dhà.

13 Mic Adonicaim, sè ceud tri fichead agus a sè.

14 Mic Blighbhai, dà mhìle dà fhichead agus sè-deug.

15 Mic Adin, ceithir cheud leth-cheud agus a ceithir.

16 Mic Ateir o Heseciah, ceithir fichead agus ochd-deug.

17 Mic Bhesai, tri cheud fichead agus a tri.

18 Mic Iorah, ceud agus a dhà-dheug.

19 Mic Hasuim, dà cheud fichead agus a tri.

20 Mic Ghibair, ceithir fichead agus cùig-deug.

21 Mic Bhet-leheim, ceud fichead agus a tri.

22 Daoine Netophah, dà fhichead agus sè-deug.

23 Daoine Anatoit, ceud fichead agus a h-ochd.

24 Mic Asmabheit, dà fhichead agus a dhà.

25 Mic Chiriat-arim, Chephirah, agus Bheeroit, seachd ceud agus dà fhichead agus a tri.

26 Mic Ramah agus Gheba, sè ceud fichead agus a h-aon.

27 Daoine Mhichmais, ceud fichead agus a dhà.

28 Daoine Bhet-eil agus Ai, dà cheud fichead agus a tri.

29 Mic Nebo, dà fhichead agus dhà-dheug.

30 Mic Mhagbis, ceud leth-cheud agus a sè.

31 Mic Elaim eile¹, mìle dà cheud leth-cheud agus a ceithir.

32 Mic Harim, tri cheud agus fichead.

33 Mic Loid, Hadid, agus Ono, seachd ceud fichead agus a cùig.

34 Mic Iericho, tri cheud dà fhichead agus a cùig.

35 Mic Shenaah, tri mìle agus sè ceud agus deich thar fhichead.

36 Na sagairt: Mic Iedaiah, do thigh Iesua, naoi ceud tri fichead agus tri-deug.

37 Mic Imeir, mìle dà fhichead agus a dhà-dheug.

38 Mic Phasuir, mìle dà cheud dà fhichead agus a seachd.

39 Mic Harim, mìle agus seachd-deug.

40 Na Lebhithich: Mic Iesua agus Chadmiel, do chloinn Hodabbhiah, trì fichead agus ceithir-deug.

41 An luchd seinn: Mic Asaiph, ceud fichead agus a h-ochd.

42 Mic nan dorsair; Mic Shaluim, mic Ateir, mic Thalmoin, mic Acuib, mic Hatita, mic Shobai, iad uile ceud agus naoi-deug thar fhichead.

43 Na Netinich: Mic Shiha, mic Hasupha, mic Thabaoit,

44 Mic Cherois, mic Shiaha, mic Phadoin,

45 Mic Lebanah, mic Hagabah, mic Acuib,

46 Mic Hagaib, mic Shalmal, mic Hanain.

47 Mic Ghideil, mic Ghahair, mic Reaiah,

48 Mic Resin, mic Necoda, mic Ghadsaim,

49 Mic Udsa, mic Phaseah, mic Bhesai,

50 Mic Asnah, mic Mhehumim, mic Nephusim,

51 Mic Bhacbuic, mic Hacupha, mic Harhuir,

52 Mic Bhasluit, mic Mhehida, mic Harsa,

53 Mic Bharcois, mic Shisera, mic Thamah,

54 Mic Nesiah, mic Hatipha,

55 Mic sheirbhiseach Sholaimh: Mic Shotai, mic Shophereit, mic Pheruda,

56 Mic Iaalah, mic Dharcain, mic Ghideil,

57 Mic Shephatiah, mic Hatil, mic Phochereit o Sheboim, mic Ami.

58 Na Netinich uile, agus clann sheirbhiseach Sholaimh, tri cheud ceithir fichead agus a dhà-dheug.

59 Agus so iadsan a chaidh suas o Thel-melah, Telharsa, Cherub, Adan, agus Imer; ach cha b'urraim iad tigh an athar a nochdadh agus an sliochd, am b'ann do Israel iad:

60 Mic Dhelaiah, mic Thobiah, mic Necoda, sè ceud leth-cheud agus a dhà.

61 Agus do mhacaibh nan sagart: Mic Habaiah, mic Chois, mic Bharsillai, a ghabh bean do nigheanaibh Bharsillai a' Ghileadaich, agus a ghoireadh air an ainm.

62 Dh'iarr iadsan an clàr-sgrìobhaidh nam measg-san a bha air an àireamh le sloinnteachd. ach cha d'fhuaradh iad:

¹ mic *Elam-air*.

uime sin ghearradh as o'n t-sagartachd iad¹.

63 Agus thubhairt an Tirsata riu, nach feudadh iad itheadh do na nithibh ro naomha, gus an scasadh sagart suas le Urim agus le Tumim.

64 An coimhthional uile cuideachd, dà fhichead agus dà mhile tri cheud agus tri fichead;

65 A thuilleadh air an seirbhisich agus am banoglaich, d'an robh ann seachd mìle tri cheud agus seachd-deug thar fhichead; agus dhiubh-san dà cheud 'nam fearaibh agus 'nam muaibh-seinn.

66 An eich, seachd ceud agus sè-deug thar fhichead: am muileidean², dà cheud dà fhichead agus a cùig:

67 An càmhail, ceithir cheud agus cùig-deug thar fhichead: an asail, sè mìle seachd ceud agus fichead.

68 Agus thug cuid do chinn nan aithriche, 'nuair a thàinig iad do thighe an Tighearn a tha ann an Ierusalem, seachad d'an saor-thoil air son tighe Dhé, chum a chur suas 'na àite féin.

69 A réir an comais thug iad, gu h-ionmhas na h-oibre, tri fichead agus aon mhìle darcon³ òir, agus cùig mìle pund airgid, agus ceud culaidh sagairt.

70 Agus ghabh na sagairt agus na Lebhithich, agus cuid do'n t-sluagh, agus an luchd-seinn, agus na dorsairean, agus na Netinich, còmhnuidh 'nam bailtibh, agus Israel uile 'nam bailtibh.

CAIB. III.

1 Thog an sluagh altair Dhé Israeil, 4 agus thug iad seachad an ìobairt-loisgte làthail. 10 'Nuair a leagadh bunait an teampuill mhol na sagairt agus na Lebhithich an Tighearn.

AGUS an uair a thàinig an seachdamh mìos, agus clann Israeil 'nam bailtibh, chruinnich an sluagh an ceann a chéile mar aon duine gu h-Ierusalem.

2 Agus sheas Iesua mac Iosadaic suas, agus a bhràithrean na sagairt, agus Serubabel mac Shealtieil, agus a bhràithrean, agus thog iad altair Dhé Israeil, a dh'ìobradh ìobairtean-loisgte oirre, mar a ta e sgriobhta ann an lagh Mhaois òglaich Dhé.

3 Agus shuidhich iad an altair air a bonnaibh, oir⁴ bha eagal orra roimh shluagh nan ùr sin; agus dh'ìobair iad ìobairte-loisgte do'n Tighearn, ìobairte-loisgte air maduinn agus air feasgar.

4 Agus chum iad féil nam pàillium, mar a ta e sgriobhta, agus dh'ìobair iad an ìobairt-loisgte làthail ann an àireamh, a

réir na riaghailt, a dhlighe féin air gach là;

5 Agus 'na dhéigh sin an ìobairt-loisgte ghnàthaichte, araon air na gealaichibh nomha, agus air uile fhéilibh naomhaichte an Tighearn, agus o gach neach a thug seachad gu toileach tabhartas saor-thoile do'n Tighearn.

6 O'n cheud là do'n seachdamh mìos thòisich iad air ìobairtean-loisgte ìobradh do'n Tighearna, 'nuair nach do leagadh fathast bunait teampuill an Tighearn.

7 Ach thug iad airgid do na snaidheadairibh agus do'n luchd-ceirde⁵; agus biadh, agus deoch, agus oladh do na Sidonaich agus do na Tioraich⁶, a chum gu'n tugadh iad fiodh seudair o Lebanon gu muir Iopa, a réir a' chomais⁷ a fhuair iad o Chirus rìgh Phersia.

8 Agus anns an dara bliadhna an déigh dhoibh teachd gu tigh Dhé aig Ierusalem, anns an dara mìos, thòisich Serubabel mac Shealtieil, agus Iesua mac Iosadaic, agus fuigheall am bràithrean na sagairt agus na Lebhithich, agus iadsan uile a thàinig o'n bhraighdeanas⁸ gu h-Ierusalem; agus dh'orduich iad na Lebhithich, o fhichead bliadhna dh'aois agus os a cheann, a chur oibre tighe an Tighearn air a h-aghaidh.

9 Agus sheas Iesua agus a mhic agus a bhràithrean, Cadmiel agus a mhic, agus mic Iudah⁹ mar aon duine, a ghreasadh an luchd-oibre ann an tigh Dhé: mic Henadaid [agus] am mic agus am bràithrean na Lebhithich.

10 Agus an uair a leag an luchd-togail bunait teampuill an Tighearna, sheas na sagairt 'nan culaidhibh le trompaidibh, agus na Lebhithich, mic Asaiph, le ciombalaibh, a mholadh an Tighearna le làimh¹⁰ Dhaibhidh rìgh Israeil.

11 Agus fhrèagair iad a chéile ann am moladh, agus ann an tabhairt buidheachais do'n Tighearn, A chionn gu bheil e maith, gu mair a thròcair do Israel gu bràth. Agus rinn an sluagh uile gàir mhòr, an uair a mhol iad an Tighearn, a chionn gu'n do leagadh bunait tighe an Tighearn.

12 Ach bha mòran do na sagairt agus do na Lebhithich, agus do chinn nan aithriche, seann daoine a chunnaic an ceud thigh, 'nuair a leagadh bunait an tighe so fa chomhair an sùl, a' gul le guth àrd; agus bha mòran a' deanamh gàir gu h-àrd le h-aoibhneas:

13 Air chor as nach b'urrainn an sluagh fuaim gàir an aoibhneis aithneachadh,

¹ mar dhaoine truaillidh chuireadh iad o'n t-sagartachd. ² muilidhean; mules. Sàsg.

³ drachm. Sàsg. Faic I. Eachdr. Caib. XXIX. r. 7.

⁴ ged. ⁵ do na clachairibh agus do na saoraibh.

⁶ dhoibhsan á Sidon agus á Tirus.

⁷ an orduigh.

⁸ ùhruid.

⁹ Hodabiah. Caib. II. r. 40.

¹⁰ a réir riaghailt, no, ann am briathraibh.

seach fuaini gul an t-sluaigh; oir rinn an sluaigh gàir mhòr, agus chualas an fhuaim an cèin.

CAIB. IV.

1 *Ann an togail an teampuill dh'annhunnach sluaigh na tìre lànhan sluaigh Iudah. 7 Sgrìobh iad litir gu Artacerces. 17 Freagradh Artacercesis. 23 Sguir obair tìghe Dhè.*

A GUS chuala naimhdean Iudah agus Bheniamin gu'n robh clann a' bhraighdeanais a' togail an teampuill do'n Tighearna Dia Israeil:

2 Agus thàinig iad gu Serubabel, agus gu cinn nan aithriche, agus thubhairt iad ri, Togaidh sinne maille ribh; oir tha sinne ag iarraidh bhur Dé-sa mar sibh féin, agus dha-san tha sinn ag iobradh o làithibh Esar hadoin rìgh Asiria, a thug a nìos an so sinn.

3 Ach thubhairt Serubabel agus Iesua agus a' chuid eile do cheannuibh aithriche Israeil riu, Cha bhuin e dhuibhse tìgh a thogail maille ruinne d'ar Dia-ne; oir togaidh sinn féin 'nar n-aonar do'n Tìghearna Dia Israeil, mar a dh'àithn Cirus¹ rìgh Phersia dhuinn.

4 Uime sin dh'annhunnach² sluaigh na tìre lànhan sluaigh Iudah, agus chuir iad dragh orra anns an togail;

5 Agus thuarasdalaich iad comhairlich 'nan aghaidh, a bhacadh an rùin rè uile làithean Chiruis rìgh Phersia, eadhon gu an do rìghich Darius rìgh Phersia.

6 Agus an uair a rìghich Ahasuerus, ann an toiseach a rìoghachaidh, sgrìobh iad litir-chasaid an aghaidh luchd-àiteachaidh Iudah agus Ierusalem.

7 Agus ann an làithibh Artacercesis sgrìobh Bislam, Mitridat, Tabeel, agus a' chuid eile d'an cuideachd, gu Artacerces rìgh Phersia; agus bha sgrìobhadh na litreach ann an sgrìobhadh nan Sirianach, agus air a mhìneachadh³ anns a' chànan Shìrianaich.

8 Sgrìobh Rehum an t-àrd-chomhairleach, agus Simsai an sgrìobhaiche, litir an aghaidh Ierusalem gu h-Artacerces an rìgh anns na briathraibh so⁴;

9 An sin sgrìobh Rehum an t-àrd-chomhairleach, agus Simsai an sgrìobhaiche, agus a' chuid eile do'n cuideachd, na Dinathaich, na h-Aphasachaich, na Tarpelaich, na h-Apharsaich, na h-Arch-ebhich, na Babilonaich, na Susanachaich, na Dehabhaich, na h-Elamaich,

10 Agus a' chuid eile do na cinnich a thug Asnapar mòr agus urramach a nall, agus a shuidhich e ann am bailtibh Shamar, agus a' chuid eile air an taobh so

do'n amhainn⁵, agus ann an leithid so do àm.

11 Is e so dùblachadh⁶ na litreach a chuir iad d'aionnsuidh: Gu h-Artacerces an rìgh, do sheirbhisich, na daoine air an taobh so do'n amhainn, agus aig a leithid so do àm.

12 Biodh fios aig an rìgh gu bheil na h-Iudhaich a thàinig a nìos uait d'ar n-ionnsuidh air teachd gu h-Ierusalem, a' togail a' bhaile ceannairich agus uile sin, agus a' cur suas a bhallachan, agus a' ceangal r'a chéile nam bunait.

13 Bitheadh a nìs fios aig an rìgh, ma thogar am baile so, agus ma chuirear suas a bhallachan, nach ioc iad gearradh⁷, cìs, no càin, agus gu'n toir thu call air teachd-a-steach nan rìgh.

14 A nìs a chionn gu bheil sinne air ar beathachadh o'n lùchairt⁸, agus nach 'eil e iomchuidh dhuinn eas-urram an rìgh fhaicinn, uime sin chuir sinn litir uainn, agus thug sinn fios do'n rìgh,

15 Chum gu'n rannsaichear ann an leabhar eachdraidh⁹ a' aithriche, agus gu'm faigh thu anns an leabhar eachdraidh, agus gu'm bi fios agad gu bheil am baile so 'na bhaile ceannairceach, agus diùbhalach¹⁰ do rìghribh agus do mhòr-roinnibh, agus gu'n robh iad a' deanamh duaireachais¹¹ na mheadhon san t-sean aimsir: air son so sgrìosadh am baile so.

16 Tha sinn a' toirt fios do'n rìgh, ma thogar am baile so, agus ma chuirear suas a bhallachan, an sin nach bi cuibh-rionn air bith agad air an taobh so do'n amhainn.

17 Chuir an rìgh freagradh gu Rehum an t-àrd-chomhairleach, agus Simsai an sgrìobhaiche, agus a' chuid eile d'an cuideachd a bha chomhmuidh ann an Samaria, agus a' chuid eile an taobh thall do'n amhainn, Sith, agus aig a leithid so do àm.

18 An litir a chuir sibh a m' ionnsuidh, leughadh gu soilleir a'm' làthair i.

19 Agus thugadh àithne leam, agus rannsaicheadh, agus fhuaradh a mach gu'n robh am baile so o shean ag éirigh an aghaidh rìghrean, agus gu'n d'rinn-eachd ceannaire agus duaireachas ann.

20 Agus bha rìghrean cumhachdach ann an Ierusalem, a riaghlaich os an ceann-san uile air an taobh thall do'n amhainn; agus dh'ìocadh gearradh, cìs, agus càin doibh.

21 Thugaibh-se nìs àithne, a thoirt air na daoine sin sgur, agus nach togar am baile sin gu an tìg ordugh uam-sa.

22 Thugaibh an aire ma ta nach dean

¹ an rìgh Cirus. ² dh'fhannach. ³ a' thuig-sina, air a dheachdadh. ⁴ air a' mhòd so. ⁵ abhuinn. ⁶ samhladh, leithibreach.

⁷ dlìghe. ⁸ o thigh an rìgh. ⁹ cuimhne. ¹⁰ cronail; diùbhalach. Eabh. ¹¹ aimhrcite, buaircis.

sibh mearachd an so. C'ar son a dh'fhàdadh calldach ann gu cron nan rìgh?

23 An sin an uair a leughadh dùblachadh litreach Artacerseis an rìgh an làthair Rehuim, agus Shimais an sgrìobhaiche, agus an cuideachd, chaidh iad le cabhaig suas gu h-Ierusalem a dh'ionnsuidh nan Iudhach, agus thug iad orra sgrù leis an làimh làidir.

24 An sin sguir obair tìghe Dhé, a *ta* ann an Ierusalem. Sguir i gus an dara bliadhna do rìoghachadh Dhariuis rìgh Phersia.

CAIB. V.

1 *Le brosnachadh Hagai thòisich Serubabel agus Iesua air tìgh Dhé a thogail.* 3 *Dh'fheuch Tatnai agus Setar-bosnai ri'm bacadh:* 5 *Thugadh a' chùis a dh'ionnsuidh Dhariuis.*

A CH rinn Hagai am fàidh, agus Sechariah mac Ido an fhàidh, fàidheadair eachd do na h-Iudhaich a *bha* ann an Iudah agus ann an Ierusalem, fàidheadaireachd dhoibh ann an ainm an Tìgh-earna Dé Israel.

2 An sin dh'èirich Serubabel mac Shealtiel, agus Iesua mac Iosadaic, agus thòisich iad air tìgh Dhé a thogail, a *tha* ann an Ierusalem: agus maille riu-san *bha* fàidhean Dhé a' cuideachadh leo.

3 Anns an àm sin fèin thàinig d'an ionnsuidh Tatnai, an t-uachdaran air an taobh so do'n amhainn, agus Setar-bosnai, agus an cuideachd¹, agus mar so thubhairt iad riu, Cò thug ordugh dhuibhse an tìgh so a thogail, agus na ballacha so a dheanamh suas?

4 An sin thubhairt iad² riu air an dòigh so, C'ainm a *th'* air na daoineibh a *tha* togail na h-aitreabh³ so?

5 Ach *bha* sùil an Dé air seanairibh nan Iudhach, agus cha d'thug iad orra sgrù, gus an d'thàinig a' chùis a dh'ionnsuidh Dhariuis; agus an sin thugadh freagradh le litir mu thimchioll so:

6 Dùblachadh na litreach a chuir Tatnai an t-uachdaran air an taobh so do'n amhainn, agus Setar-bosnai agus a chuideachd na h-Arphasachaich, a *bha* air an taobh so do'n amhainn, a dh'ionnsuidh Dhariuis an rìgh:

7 Chuir iad litir d'a ionnsuidh, anns an robh sgrìobhta mar so: Gu Darius an rìgh, gach uile shìochaint.

8 Biodh fios aig an rìgh gu'n deachaidh sinn gu mòr-roinn⁴ Iudea, a dh'ionnsuidh tìghe an Dé mhòir, a *tha* 'ga thogail le clachaibh mòra, agus *tha* fiodh air a chur anns na ballachaibh, agus *tha* 'n obair so a' dol gu luath air a h-aghaidh, agus a' soirbheachadh 'nan làmhaidh.

9 An sin dh'fheòraich sinn do na seanairibh sin, [agus] mar so thubhairt sinn riu, Cò thug dhuibh ordugh an tìgh so a thogail, agus na ballacha so chur suas?

10 Agus mar an ceudna dh'fheòraich sinn an ainmean diubh, a thoirt fios duit, a chum gu'n sgrìobhamaid ainmean nan daoine a *bh'* air an ceann.

11 Agus mar so thug iad freagradh dhuinn, ag ràdh, *Is* sinne seirbhisich Dhé nan nèamh agus na talmhainn, agus *tha* sinn a' togail tìghe a chaidh thogail iomadh bliadhna roimhe so, a thog agus a chrìochnaich⁵ rìgh mòr a *bh'* air Israel.

12 Ach an uair a bhrosnaich ar n-aithriche Dia nèimh gu feirg, thug e thairis iad do làimh Nebuchadnesair rìgh Bhabiloin a' Chaldeanaich, a sgrìos an tìgh so, agus a thug an sluagh leis do Bhabiloin.

13 Ach ann an ceud bhliadhna Chiruis rìgh Bhabiloin, thug rìgh Cyrus ordugh⁶ tìgh so Dhé a thogail.

14 Agus mar an ceudna soithichean òir agus airgid tìghe Dhé, a thug Nebuchadnesar as an teampull a *bha* ann an Ierusalem, agus a thug e leis do theampull Bhabiloin, iad sin thug rìgh Cyrus a mach á teampull Bhabiloin, agus thugadh iad do *fhear d'am b'ainm* Sesbadsar, a rinn e 'na uachdaran:

15 Agus thubhairt e ris, Gabh na soithiche so, imich, thoir leat iad do'n teampull a *ta* ann an Ierusalem, agus biodh tìgh Dhé air a thogail 'na àit.

16 An sin thàinig Sesbadsar sin, agus leag e bunait tìghe Dhé a *ta* ann an Ierusalem: agus o'n àm sin gus a nis *tha* e 'ga thogail, agus cha 'n'eil e *fathast* crìochnaichte.

17 A nis uime sin, ma's maith leis an rìgh, deanar rannsachadh ann an tìgh ionmhais an rìgh a *ta* ann am Babilon, a *dh'fheuchainn* an d'thugadh an t-ordugh so le rìgh Cyrus, tìgh so Dhé a thogail ann an Ierusalem, agus cuireadh an rìgh *fios d'ar n-ionnsuidh ciod i a thoil* a thaobh an nì so.

CAIB. VI.

1 *Thug Darius ordugh do Thatnai agus Shetar-bosnai iad a chuideachadh le seanairibh nan Iudhach chum tìgh Dhé a thogail.* 13 *Chrìochnaich na h-Iudhaich an teampull.* 16 *Choirrig iad e le geardeachas.*

A N sin thug Darius an rìgh ordugh seachad⁷, agus rannsaich iad ann an tìgh nan leabhar, far an robh na h-ionmhais air an tasgaidh ann am Babilon.

2 Agus fhuaradh ann an Achmeta, anns an luchair a *ta* ann am mòr-roinn nam Medach, clàr⁸, agus mar so *bha* sgrìobhta ann gu bhì air a chumail air chuimhne⁹.

¹ an companaich.

² sinn.

³ dearamh na h-òibre.

⁴ mòr-earrann.

⁵ a choinnìon, a dheasach.

⁶ àithne.

⁷ rinn Darius an rìgh reachd.

⁸ rolla; roll. Sasg.

⁹ cuimhneachan.

3 Ann an ceud bhliadhna Chliruis an rìgh, thug Cirus an rìgh ordugh seachad a thaobh tighe Dhé ann an Ierusalem, Biodh an tigh air a thogail, an t-àit anns an d'ìobair iad ìobairtean, agus a bhunaitean air an suidheachadh gu làidir: 'àirde, trì fichead làmh-choille; a leud, trì fichead làmh-choille:

4 Tri sreathan do chlachaibh mòra, agus sreath do fhìodh nomha; agus luasach an costus¹ a tigh an rìgh.

5 Agus mar an ceudna aisgear² soithichean oir agus airgid tighe Dhé, a thug Nebuchadnesar as an teampull a ta ann an Ierusalem, agus a thug e leis do Bhabylon, agus thugar a ris iad do'n teampull a ta ann an Ierusalem, gach aon d'a àit féin, agus suidhich iad ann an tigh Dhé.

6 A nis a Thatnai, uachdarain air an taobh thall do'n amhainn, a Shetar-bosnai, maille ri'r cuideachd na h-Arphasachaich a tha air an taobh thall do'n amhainn, bithibh-se fada o sin:

7 Leigibh le obair tighe so Dhé: togadh uachdaran nan Iudhach, agus seauairean nan Iudhach, tigh so Dhé na àit.

8 Agus tha mise a' toirt ordugh a thaobh na nì sibh ri seanairibh nan Iudhach sin, chum tigh so Dhé a thogail; eadhon gu'n tugar do mhaoin an rìgh, do'n chis air an taobh thall do'n amhainn, costus air ball do na daoineibh sin, a chum nach cuirear bacadh orra.

9 Agus na tha dh'easbhuidh orra³, araon tairbh òga, agus reitheachan, agus uain, air son ìobairte-loisgte Dhé nèimh, cruithneachd, salann, fìon, agus oladh, a réir ordugh nan sagart a ta ann an Ierusalem, thugar gu cinnteach dhoibh o là gu là, gu'n fhàilingeadh;

10 A chum gu'n toir iad seachad tabhartais deadh-bholaich do Dhia nèimh, agus gu'n dean iad ùrnuigh air son beatha an rìgh agus a mhac.

11 Mar an ceudna thug mi seachad ordugh, ge b'e neach a dh'atharraicheas am focal so, gu'n spionar sìos fìodh as a thigh, agus an uair a chuirear suas e, gu'n crochar air e, agus gu'n deanar a thigh 'na òtrach⁴ air son so.

12 Agus an Dia a thug air 'ainm còmh-nuidh a ghabhail an sin, gu'n sgriosadh esan na rìghrean sin uile, agus an sluagh a shineas a mach an làmh a dh'atharrachadh agus a sgrios tighe Dhé a ta ann an Ierusalem. Thug mise Darius ordugh seachad; deanar an nì gu luath.

13 An sin rinn Tatnai an t-uachdaran air an taobh so do'n amhainn, Setar-bosnai,

agus an cuideachd, gun dàil a réir an fhios a chuir Darius an rìgh uaith.

14 Agus thog seanairean nan Iudhach, agus shoirbhich leo a réir fàidheadaireachd Hagai an fhàidh, agus Shechariah mhic Ido; agus thog iad agus chrìochnaich iad, a réir àithne Dé Israeil, agus a réir àithne Chliruis agus Dhariuis, agus Artacserseis rìgh Phersia.

15 Agus chrìochnaich iad an tigh so air an treas là do'n mhìos Adar, a bha anns an t-seathadh bliadhna do rìoghachadh Dhariuis an rìgh.

16 Agus chum clann Israeil, na sagairt agus na Leblithich, agus a' chuid eile do chloinn a' bhraighdeanais, coisreagadh⁵ tighe so Dhé le gairdeachas;

17 Agus dh'ìobair iad aig coisreagadh tighe so Dhé, ceud tarbh òg, dà cheud reithe, ceithir cheud uan; agus mar ìobairt-phheacaidh air son Israeil uile, dà bhoc dheug ghaibhre, a réir àireimh theubh Israeil.

18 Agus shuidhich iad na sagairt 'nan roinnibh, agus na Leblithich 'nan sealaibh, air son seirbhis Dhé, a ta ann an Ierusalem; mar a ta e sgriobhta ann an leabhar Mhaois.

19 Agus chum clann a' bhraighdeanais a' chàisg air a' cheathramh là deug do'n cheud mhìos.

20 Oir ghlanadh na sagairt agus na Leblithich le chéile: bha iad uile glan, agus mharbh iad a' chàisg do chloinn a' bhraighdeanais uile, agus d'am bràithribh na sagartaibh, agus dhoibh féin.

21 Agus dh'ith⁶ clann Israeil a thàinig air an ais o'n bhraighdeanas, agus iadsan uile a dhealaich⁷ iad féin d'an ionnsuidh o shalchar chinneach na tìre, a dh'iarraidh an Tighearna Dé Israeil.

22 Agus chum iad féil an arain neo-ghoirtichte seachd làithean le h-aobhneas: oir rinn an Tighearna aobhinn iad agus thionndaidh e cridhe rìgh Asiria d'an ionnsuidh, a neartachadh an làmhan ann an obair tighe Dhé, Dhé Israeil.

CAIB. VII.

1 Ginealach Esra o Aaron. 6 Chaidh Esra suas o Bhabylon gu h-Ierusalem. 11 Dùblachadh na litreach a thug Artacserceses dha. 27 Bheannach Esra Dia.

AGUS an 'éigh nan nithe sin, ri linn⁸ Artacserseis rìgh Phersia, chaidh Esra mac Sheraiah, mhic Asariah, mhic Hileiah,

2 Mhic Shaluum, mhic Shadoic, mhic Ahituib.

3 Mhic Amariah, mhic Asariah, [mhic Iohanain, mhic Asariah, mhic Ahimaais,

¹ an cur a mach, an caitheamh.

² thugar air an ais.

³ gach nì air am bheil

⁴ na dhùnan.

⁵ naomhachadh, tionnadh suas.

⁶ dl'ich.

⁷ scar.

⁸ ann an rìoghachadh.

mhic Shadoic, mhic Ahituib, mhic Amariah¹, mhic Mheraoit,

4 Mhic Sheraiah, mhic Udsi, mhic Bhuci,
5 Mhic Abisua, mhic Phinehais, mhic Eleasair, mhic Aaroin an àrd-shagairt:

6 Chaidh Esra so suas o Bhabilon, agus e 'na sgrìobhaiche deas ann an lagh Mhaois, a thug an Tighearna Dia Israeil seachad: agus thug an rìgh dha, a chionn gu'n robh làmh an Tighearna a Dhé air, iarrtus uile.

7 Agus chaidh cuid do chloinn Israeil, agus do na sagartaibh, agus do na Lebhithich, agus do'n luchd-seinn, agus do na dorsairibh, agus do na Netinich, suas gu h-Ierusalem, anns an t-seachdamh bliadhna do Artacserces an rìgh.

8 Agus thàinig e gu h-Ierusalem anns a' chùigeadh mìos, a bha anns an t-seachdamh bliadhna do'n rìgh.

9 Oir air a' cheud là do'n cheud mhios thòisich e air dol suas o Bhabilon, agus air a' cheud là do'n chùigeadh mìos thàinig e gu h-Ierusalem, a chionn gu'n robh làmh mhaith a Dhé air.

10 Oir dh'ulluich Esra a chridhe a dh'iarraidh lagha an Tighearna, agus g'a dheanamh, agus a theagasg ann an Israel reachdan agus bhreitheanas.

11 Agus is e so dùblachadh na litreach a thug rìgh Artacserces do Esra an sagart, an sgrìobhaiche, sgrìobhaiche bhriathar àitheantan an Tighearna, agus a reachdan do Israel:

12 Artacserces rìgh nan rìgh, gu Esra an sagart, sgrìobhaiche lagha Dhé nan nèamh, gach uile shìth², agus 'na leithid so do àm.

13 Tha mi a' toirt orduigh, iadsan uile ann am rioghachd do shluagh Israeil, agus d'a shagartaibh, agus d'a Lebhithich, leis an àill triall do h-Ierusalem, gu'n téid iad maille riutsa:

14 A thaobh gu'n do chuireadh thu leis an rìgh, agus le 'sheachd comhairleach aibh, a dh'fhiosrachadh mu thimchioll Iudah agus Ierusalem, a réir lagha do Dhé a ta ann ad làimh;

15 Agus a thoirt leat an airgid agus an òir, a thug an rìgh agus a chomhairlich d'an toil féin do Dhia Israeil, aig am bheil 'aite-còmhnuidh ann an Ierusalem;

16 Agus an airgid agus an òir uile a gheibh thu ann an uile mhòr-roinn Bhabilon, maille ri tabhartas saor-thoile an t-sluaigh agus nan sagart, a' toirt seachad d'an saor-thoil air son tighe an Dé, a ta ann an Ierusalem:

17 A chum gu'n ceannaich thu air ball leis an airgid so tairbh òga, reitheachan,

uain, agus an tabhartais-bidh, agus an tabhartais-dìbhe, agus gu'n òbair thu iad air altair tighe bhur Dé a ta ann an Ierusalem:

18 Agus ge b'e ni a's maith leat féin agus le d' bhràithribh a dheanamh leis a' chuid eile do'n airgid agus do'n òr, a réir toile bhur Dé deanaibh.

19 Na soithiche mar an ceudna a tha air an tabhart duit, air son seirbhis tighe do Dhé, thoir seachad am fianuis Dé Ierusalem.

20 Agus ge b'e ni tuilleadh a bhios feumail air son tighe do Dhé, a chi thu aobhar air a bhuileachadh³, builich e á tigh-ionmhais an rìgh.

21 Agus tha mise, mise féin Artacserces an rìgh, a' toirt orduigh do uile luchd-coimhead an ionmhais a ta air an taobh thall do'n amlainn, ge b'e ni a dh'iarraas Esra an sagart, sgrìobhaiche lagha Dhé nan nèamh oirbh, gu'n deanar air ball e:

22 Gu ruig ceud tàlam airgid, agus gu ruig ceud tomhas cruithneachd, agus ruig ceud bat fìona, agus gu ruig ceud bat olaidh, agus salann gu àireamh⁴.

23 Gach ni a ta a réir àithne Dhé nan nèamh, deanar gu cùramach e do thigh Dhé nan nèamh, air eagal gu'm bi fearg an aghaidh rioghachd an rìgh agus a mhac.

24 Mar an ceudna tha sinn a' toirt fios duibh a thaobh nan sagart uile agus nan Lebhithich, an luchd-seinn, nan dorsair, nan Netineach, no sheirbhisich tighe so Dhé, nach feudar gearradh⁵, cis, no càin a chur orra.

25 Agus suidhich thusa, Esra, a réir gliocais do Dhé, a ta ann ad làimh, uachdarain, agus breitheamhna, a bheir breth air an t-sluagh uile a ta air an taobh thall do'n amlainn, orra-san uile d'an aithne laghanna do Dhé; agus teagaisgibh iadsan do nach aithne iad.

26 Agus gach neach nach dean a réir lagha do Dhé agus lagha an rìgh, deanar breitheanas air ball air, ma's ann a chum bàis, no chum fògraidh, na chum ùbh-laidh⁶, no chum prìosain⁷.

27 Beannaichte gu robh an Tighearna Dia ar n-aithriche, a chuir mar so ann an cridhe an rìgh, a dheanamh tighe an Tighearna, a ta ann an Ierusalem maiseach;

28 Agus a fhuair tròcair dhomhsa am fianuis an rìgh agus a chomhairleach, agus am fianuis uile uachdarana cumhachdach an rìgh: agus neartaicheadh mi a chionn gu'n robh làmh an Tighearna mo Dhé orm; agus chruinnich mi á h-Israel daoine taghta⁸ gu dol suas maille rium.

¹ Faic Eachdr. Caib. VI. r. 7, 8, 9.

² sìth ìomlan. ³ a thoirt seachad, a chaitheamh. ⁴ gun a bhì air a sgrìobhadh. Eabh.

⁵ dìghe.

⁶ call a mhaoin.

⁷ gu geimhlibh.

⁸ cinn. Eabh.

CAIB. VIII.

1 *Aireamh an t-sluaigh a phill maille ri Esra o Bhabilon.* 15 *Chuir Esra fios gu Ido air son sheirbhiseach a fhrithleadh do thigh Dhé.* 24 *Chuir e ionmhasan an teampaill fo làimh nan sagart.*

AGUS is iad so cinn an aithriche, agus an àireamh a réir an ginealach, a chaidh suas maille rium o Bhabilon, ri linn Artacserseis an rìgh:

2 Do mhacaibh Phinehais; Gersom: do mhacaibh Itamair; Daniel: do mhacaibh Dhaibhidh; Hatus.

3 Do mhacaibh Shechaniah: ****: do mhacaibh Pharois; Sechariah: agus maille ris-san *bha* air an àireamh a réir an gin calach do fhirionnach ceud agus leth-cheud.

4 Do mhacaibh Phabat-mhoib; Elieonai mac Sherahiah, agus maille ris dà cheud firionnach.

5 Do mhacaibh [Shatu:] Sechaniah mac Iahaseil, agus maille ris trì cheud-firionnach.

6 Agus do mhacaibh Adin; Ebed mac Ionatain, agus maille ris leth-cheud firionnach.

7 Agus do mhacaibh Elaim; Iesaiiah mac Ataliah, agus maille ris trì fichead agus deich firionnach.

8 Agus do mhacaibh Shephatiah; Sebadiiah mac Mhichacil, agus maille ris ceithir fichead firionnach.

9 Do mhacaibh Ioaib; Obadiiah mac Iehiel, agus maille ris dà cheud agus ochd firionnach deug.

10 Agus do mhacaibh [Bhani:] Selomit mac Iosiphiah, agus maille ris ceud agus trì fichead firionnach.

11 Agus do mhacaibh Bhebai; Sechariah mac Bhebai, agus maille ris fichead agus ochd firionnach.

12 Agus do mhacaibh Asgaid; Iohan-an, mac Hacatain, agus maille ris ceud agus deich firionnach.

13 Agus do mhacaibh deireannach Adoncaim; agus is iad so an ainmean, Eliphelet, Ieiel, agus Semaiah, agus maille riu trì fichead firionnach.

14 Agus do mhacaibh Bhigbhai; Utai agus Sabud, agus maille riu trì fichead agus deich firionnach.

15 Agus chruinnich mi iad a dh'ionnsuidh na h-aimhne a tha teachd gu Ahabiah, agus an sin d'fhan sinn ann am bùth-aibh trì làithean, agus ghabh mi beachd do'n t-sluaigh, agus do na sagairt, agus cha d'fhuair mi'n sin a h-aon do mhacaibh Lebhi.

16 An sin chuir mi fios air Elieser, air Ariel, air Semaiah, agus air Elnatan¹,

agus air Natan, agus air Sechariah, agus air Mesulam, prìomh-dhaoine; agus air Sechariah, agus air Mesulam, prìomh-dhaoine; agus air Ioiarib, agus air Elnatan, daoine tuigseach.

17 Agus chuir mi iad le h-àithne gu Ido an ceann, aig àit Chasiphia, agus dh'innis mi dhoibh ciod² a theireadh iad ri Ido, [agus] r'a bhràithribh na Netinich aig àit Chasiphia, gu'n tugadh iad d'ar n-ionnsuidh seirbhiseich air son tighe ar Dé.

18 Agus le làimh mhaith ar Dé oirnn thug iad d'ar n-ionnsuidh Is-sechel³ do mhacaibh Mhahli, mhic Lebhi, mhic Israeil, agus Serebiah agus a mhic agus a bhràithrean, ochd *fir* dheug;

19 Agus Hasabiah, agus maille ris Iesaiiah do mhacaibh Mherari, a bhràithrean, agus am mic, fichcad;

20 Agus do na Netinich a dh'orduich Daiblidh agus na h-uachdarain air son seirbhis nan Lebhitheach, dà cheud agus fichead Netineach: ghoireadh⁴ iad uile air an ainm.

21 An sin ghairm mi trasgadh san àite sin aig amhainn Ahabha, chum gu'u irios-laicheamaid⁵ sinn féin am fianais ar Dé, a dh'iarraidh air slighe cheirt dhuinn féin, agus d'ar cloinn bhig, agus d'ar maoin uile.

22 Oir bu nàir leam buidheann shaighdearan agus marc-shluagh iarraidh air an rìgh, a chuideachadh leinn an aghaidh an nàmhaid air an t-slighe; a chionn gu'n do labhair sinn ris an rìgh, ag ràdh, Tha làmh ar Dé chum maith orra-san uile a dh'iarraas e, ach a chumhachd agus 'fhearg' nan aghaidh-san uile a thrèig-eas e.

23 Uime sin thraisg sinn, agus dh'iarra sinn ar Dia air son so, agus dh'éisd e rìr n-athcuinge.

24 An sin chuir mi air leth dà fhear dheug dhiubhsan a b'airde do na sagartaibh, Serebiah, Hasabiah, agus deichnear d'am bràithribh maille riu;

25 Agus thomhais⁶ mi dhoibh an t-airgid, agus an t-òr, agus na soithichean, tabhartas tighe ar Dé, a thug an rìgh, agus a chomhairlich⁷, agus a dhaoine mòra, agus Israel uile a bha làthair, seachad;

26 Thomhais mi eadhon d'an làimh sè ceud agus leth-cheud tàlann airgid, agus do shoithichibh airgid ceud talann, agus ceud tàlann òir;

27 Agus fichead cuach òir do mhile darcon; agus dà shoitheach do umha buidh maith, luachlmhor mar òr.

28 Agus thubhairt mi riu, *Tha sibhse*

¹ air Elnatan, agus air Iarib, agus air Elnatan.
² chuir mi nam beul na briathra. Eabh.

³ duine tuigseach.

⁴ dh'uinneachadh.

⁵ cràdhamaid. ⁶ chothromaich. ⁷ chomhairlichean.

naomha do'n Tighearn, agus na soithichean naomha, agus an t-airgid agus an t-òr 'na thabhartas saor-thoile do'n Tighearna Dia bhur n-aithriche.

29 Deanaibh faire, agus coimheadaibh, agus an cothromaich sibh *iad* am fianuis uachdarana nan sagart, agus nan Lebhithich, agus uachdarana aithrichean Israeil ann an Ierusalem, ann an seòmraicheibh tìghe an Tighearn.

30 Uime sin ghabh na sagairt agus na Lebhithich cothrom an airgid agus an òir, agus nan soitheach, chum *an* tabhairt gu h-Ierusalem a dh'ionnsuidh tìghe ar Dé.

31 Agus dh'imich sinn o amlaigh Ahabha air an dara là deug do'n cheud mhios, gu dol do h-Ierusalem; agus bha làmh ar Dé oirnn, agus shaor e sinn o làimh an nàmhaid, agus o'n làimh-san a bha deanamh feall-fholach air an t-slighe.

32 Agus thàinig sinn gu h-Ierusalem, agus dh'fhan sinn an sin trì làithean.

33 Agus air a' cheathramh là thomhais-eadh an t-airgid agus an t-òr agus na soithichean ann an tigh ar Dé, le làimh Mheremoit mhic Uriah an t-sagairt, agus maille ris *bha* Eleasar mac Phinehais, agus maille riu-san Iosabad mac Iesua, agus Noadiah mac Bhinui, Lebhithich:

34 A réir àireimh *agus* a réir tomhais nan uile: agus sgrìobhadh an tomhas uile san àm sin.

35 Thug clann na muinntir a thugadh air falbh, agus a thàinig o'n bhraighdeanas, seachad iobairtean-loisgte do Dhia Israeil, dà tharbhadh dheug òg air son Israeil uile, ceithir fichead agus sè reithe deug, trì fichead agus seachd uain dheug, dà bhoc dheug ghaibhre mar iobairt-pheacaidh: iad uile 'nan iobairt-loisgte do'n Tighearn.

36 Agus thug iad seachad orduighean an rìgh do àrd-riaghlairibh an rìgh, agus do na h-uachdaranaibh air an taobh so do'n amhainn; agus chuir iadsan an sluagh agus tigh Dhé air an aghaidh.

CAIB. IX.

1 Rinn Esra caoidh a chionn gu'n do ghabh sluagh Israeil d'an ionnsuidh nàidheach. 5 Dh'irioslaich se e féin, agus rinn e urnaigh ri Dia.

A GUS an uair a rinneadh na nithe sin, a thàinig na h-uachdarain a m'ionnsuidh, ag ràdh, Cha do dhealaich sluagh Israeil, agus na sagairt, agus na Lebhithich iad féin o shluagh na tìre a' deanamh a réir an gràineileachd, *eadhon* nan Canaanach, nan Hiteach, nam Peridseach, nan Iebusach, nan Amonach, nam Maobach, nan Eiphiteach, agus nan Amorach.

2 Oir ghabh iad d'an nigheanaibh dhoibh féin agus d'am macaibh, agus

mheasgan sliochd naomhiad féin ri sluagh nan tìr; agus bha làmh nan uachdaran agus nan riaghlair air thoiseach anns a' chionta so.

3 Agus an uair a chuala mi an ni so, reub mi m'eudach, agus m'fhalluinn, agus spion mi *cuid* do ghruaig mo chinn agus m'fheusag, agus shuidh mi sìos fo uamhann¹.

4 An sin chruinnicheadh a m' ionnsuidh iadsan uile a chrìothnaich roimh bhriathraibh Dhé Israeil, air son euceirt na muinntir a thugadh air falbh; agus shuidh mi fo uamhann gu ruig an iobairt-fheasgair.

5 Agus aig an iobairt-fheasgair dh'éirich mi o m' thuirse, le m'eudach agus m'fhalluinn reubta umam, agus leag mi mi féin air mo ghluinibh, agus sgaoil mi mach mo làmh an a dh'ionnsuidh an Tighearna mo Dhé,

6 Agus thubhairt mi, O mo Dhia, tha nàir orm agus rudhadh gruaidh m'aghaidh thogail riutsa, mo Dhia: oir tha ar n-eucearta air fàs lionmhor os ar ceann, agus tha ar cionta air éirigh suas gu nàmh.

7 O làithibh ar n-aithriche *bha* sinn ann an cionta mòr gu ruig an là 'n diugh, agus air son ar n-eucearta thugadh thairis sinn féin, ar rìghrean, ar sagairt do làimh rìghrean nan tìr, do'n chlàidheamh, do dhaorsa, agus do chreachadh, agus do nàire gnùise, mar air an là 'n diugh.

8 Agus a nis cartamuill bhig nochdadh gràs² o'n Tighearn ar Dia, a dh'fhàgail duinn fuighill³, agus a thabhairt tairnge dhuinn 'na ionad naomh, chum gu'n soillsicheadh ar Dia ar sùilean, agus gu'n tugadh e dhuinn beagan beothachaidh 'nar daorsa:

9 Oir *bha* sinne 'nar tràillibh, gidheadh 'nar daorsa cha do thréig ar Dia sinn, ach fhuair e tròcair dhuinn ann an sùilibh rìghrean Phersia, a thoirt duinn ath-bheothachaidh a chur suas tìghe ar Dé, agus a leasachadh na mhilleadh ann⁴, agus a thoirt duinn balla ann an Iudah agus ann an Ierusalem.

10 Agus a nis, O ar Dia, ciod a their sinn an déigh so? oir thréig sinn t-àith-eantan,

11 A dh'àithn thu le d' sheirbhisich na fàidhean, ag ràdh, *Tha'n* talamh d'am bheil sibh a' dol g'a shealbhadh, 'na thalamh neòghlan le neòghloine shluaigh nan tìr, le'n gràineileachdaibh, a lion e o cheann gu ceann le'n salchar.

12 A nis ma ta na tugaibh bhur nìgheana d'am macaibh, agus an nigheana-san na gabhaibh do bhur macaibh-sa, agus na h-iarraibh an sìth, no an saobhreas gu bràth: chum gu'n bi sibh làidir, agus gu'n

¹ ioghnaidh.

² bàigh.

³ dol as.

⁴ fhàsaichean.

ith sibh maith an fhearainn, agus gu'm fàg sibh e 'na oighreachd do'r cloinn gu bràth.

13 Ach an déigh gach *ni* a thàinig oirnn air son ar droch oibre, agus air son ar cionta mhòir, o nach d'rinn thusa ar Dia peanas oirnn a réir ar droch thoillteanais¹, agus gu'n d'thug thug dhuinn a leithid so do shaorsa;

14 Nam briseamaid a rìs t-àitheantain, agus nan deanamaid cleamhuas ri sluagh nan gràineileachd sin, nach biodh fearg ort ruinn gus an cuireadh tu as *duinn*, air chor as nach *biodh* fuigheall no dol as ann?

15 A Thighearna Dhé Israeil, *is* ceart thusa, oir tha sinn a làthair a thàinig as², mar air an là'n diugh. Feuch, *tha* sinu a'd' fhianuis 'nar peacannaibh: oir cha'n urrainn sinn seasamh a'd' fhianuis air son so.

CAIB. X.

1 *Thug Sechaniah misneach do Esra, agus chomhairlich e na mnàì choimheach a chur air falbh. 7 Chruinnicheadh an sluagh gu h-Ierusalem, 9 agus dh'aicidh iad am peacanna. 18 Aireamh na muinntir a ghabh dhoibh féin mnàì choimheach.*

A NIS an uair a rinn Esra urnuigh, agus a dh'aicidh e, a' gul, agus 'ga thilgheadh féin sìos fa chomhair tighe Dhé, chruinnich d'a ionnsuidh a h-Israel comhchruinneachadh ro mhòr do fhearaidh, agus do mhnaibh, agus do chloinn; oir ghul an sluagh gu mòr³.

2 Agus labhair⁴ Sechaniah mac Iehieil, aon do mhacaibh Elaim, agus thubhairt e ri h-Esra, Pheacaich sinn an aghaidh ar Dé, agus ghabh sinn d'ar n-ionnsuidh mnàì choimheach⁵ do shluagh na tìre: ach a nis tha dòchas aig Israel a thaobh an ni so.

3 A nis uime sin deanamaid coimheangal ri'r Dia, na mnàì uile a chur uainn, agus iadsan a rugadh leo, a réir comhairle mo thighearn, agus na muinntir a chrìochnaicheas ri àithne ar Dé, agus deanar a réir an lagha.

4 Eirich; oir dhuitse *buinidh* an ni so, agus *bithidh* sinne maille riut: gabh misneach, agus dean.

5 Agus dh'éirich Esra, agus thug e air na h-àrd shagartaibh, na Lebhithich, agus Israel uile mionnachadh, gu'n deanadh iad a réir an fhocail so; agus mhionnach iad.

6 An sin dh'éirich Esra o làthair tighe Dhé, agus chaidh e do sheòmar Iohanain, mhic Eliasib: agus an uair a thàinig e'n sin, cha d'ith e aran, agus cha d'òl e uisge; oir rinn e bròn air son cionta na muinntir a thugadh air falbh.

7 Agus thug iad gairm air feadh Iudah agus Ierusalem, do uile chloinn a' bhraighdeanais, iad a chruinneachadh ri chéile gu h-Ierusalem;

8 Agus ge b'e neach nach tigeadh an ceann thrì làithean, a réir comhairle nan uachdaran agus nan seanair, gu'n tugadh uath⁶ a mhaoin uile, agus gu'm biodh e féin air a dhealachadh o chomhchruinneachadh na muinntir a thugadh air falbh.

9 Agus chruinnicheadh fir Iudah agus Bheniamin uile gu h-Ierusalem an ceann thrì làithean: *bha e anns* an naothadh mìos, air an fhicheadamh là do'n mhios; agus shuidh an sluagh uile ann an sràid tighe Dhé, air chrith air son an ni so, agus air son an uisge mhòir.

10 Agus dh'éirich Esra an sagart, agus thubhairt e riu, Pheacaich sibh, agus ghabh sibh dhuibh féin mnàì choimheach a mheudachadh peacaidh Israeil.

11 A nis ma ta deanaibh aidmheil⁷ do'n Tighearna Dia bhur n-aithriche, agus coimhlionaibh a thoil; agus dealaichibh sibh féin o shluagh na tìre, agus o na mnaibh coimheach.

12 Agus fhreagair an coimhthional uile, agus thubhairt iad le guth ard, Mar sin, a réir t-fhocal, *tha e ceangailte* oirne a dheanamh.

13 Ach *tha'n* sluagh lìonmhor, agus *is* àm mòr uisge e, agus cha'n urrainn sinn seasamh a muigh, agus cha'n obair aoin là, no dà là so; oir tha sinn lìonmhor a pheacaich anns an ni so.

14 Seasadh a nis ar n-uachdaran do'n choimhthional uile, agus, aig àmannaibh suidhichte, thigeadh iadsan uile 'nar bailtibh a ghabh dhoibh féin mnàì choimheach, agus maille riu seanairean gach baile agus a bhreitheamhna, gus an tionndaidhear fearg laiste ar Dé uainn a thaobh an ni so.

15 Sheas a mhàin Ionatan mac Asaheil, agus Iahasiah mac Thichbah, air son so: agus chuidich Mesulam agus Sabetai an Lebhithach leo.

16 Agus rinn clann a' bhraighdeanais mar sin: agus dhealaicheadh Esra an sagart, agus cinn àraidh nan àithriche a réir tighe an aithriche, agus iad uile a réir an ainmean, agus shuidh iad sìos air a' cheud là do'n deicheamh mìos a rannachadh na cùise.

17 Agus chrìochnaich iad a thaobh nan daoine uile a ghabh dhoibh féin mnàì choimheach, air a' cheud là do'n cheud mhios.

18 Agus am measg mhac nan sagart fhuaradh a ghabh dhoibh féin mnàì choimheach: Do mhacaibh Iesua, mhic

¹ gu'n do chaomhain thu sinn *thar* mar a thoill ar peacanna. ² *tha* fuigheall a làthair *ghinn*.

³ le gul mòr. Eabh.

⁴ fhreagair.

⁵ choigreach. ⁶ gu'n cailleadh e. ⁷ thugaibh glòir.

Iosadaic, agus a bhràithrean; Maaseiah, agus Elieser, agus Iarib, agus Gedaliah.

19 Agus thug iad an làmh gu'n cuir-eadh iad uatha am mnà: agus air dhoibh bhì ciontach, *thug iad* reithe do'n treud air son an cionta.

20 Agus do mhacaibh Imeir; Hanani, agus Sebadaiah.

21 Agus do mhacaibh Harim; Maaseiah, agus Eliah, agus Semaiah, agus Iehiel, agus Udsiah.

22 Agus do mhacaibh Phasuir; Elieonai, Maaseiah, Ismael, Netaneel, Iosabad, agus Elasa.

23 Agus do na Lebhitheach; Iosabad, agus Simei, agus Celaiah, (*is e sin Celita*), Petahiah, Iudah, agus Elieser.

24 Agus do'n luchd-seinn; Eliasib: agus do na dorsairibh; Salum, agus Telem, agus Uri.

25 Agus do Israel: Do mhacaibh Pharois; Ramaiah, agus Iesiah, agus Malchiah, agus Miamin, agus Eliaser, agus Malchiah, agus Benaiah.

26 Agus do mhacaibh Elaim; Mataniah, Sechariah, agus Iehiel, agus Abdi, agus Ierimot, agus Eliah.

27 Agus do mhacaibh Shatu; Elieonai, Eliasib, Mataniah, agus Ieremot, agus Sabad, agus Asisa.

28 Agus do mhacaibh Bhebai; Ieho-

hanan, Hananiah, Sabai, agus Atlai.

29 Agus do mhacaibh Bhani; Mesulam, Maluch, agus Adaiah, Iasub, agus Seal, agus Ramot.

30 Agus do mhacaibh Phahat-mhoarib: Adna, agus Chelal, Benaiah, Maaseiah, Mataniah, Besaleel, agus Binui, agus Manaseh.

31 Agus do mhacaibh Harim; Elieser, Isiah, Malchiah, Semaiah, Simeon,

32 Benjamin, Maluch, agus Semariah.

33 Do mhacaibh Hasuim; Matenai, Matatah, Sabad, Eliphelet, Ieremai, Manaseh, agus Simei.

34 Do mhacaibh Bhani; Maadai, Amram, agus Uel,

35 Benaiah, Bedaiah, Cheluh,

36 Bhaniah, Meremot, Eliasib,

37 Mataniah, Matenai, agus Iasau,

38 Agus Bani, agus Binui, Simei,

39 Agus Selemiah, agus Natan, agus Adaiah,

40 Machnadebai, Sasai, Sarai,

41 Asareel, agus Selemiah, Semariah,

42 Salum, Amariah, agus Ioseph.

43 Do mhacaibh Nebo; Ieiel, Matitiah,

Sabad, Sebina, Iadai, agus Ioel, Benaiah,

44 Ghabh iad sin uile dhoibh féin mnà choimheach: agus aig *cuid* diubh bha mnà ris an robh clann aca.

NEHEMIAH.

CAIB. I.

1 'Nuair a chual' Nehemiah iomradh air doilgheas nan Iudhach a dh'fhàgadh do'n bhraighdeanas, *thraig e*, agus rinn e bròn am fianuis Dhé. 5 Urnuigh Nehemiah.

BRIATHRA Nehemiah mhic Hachaliah¹. Agus tharladh anns a' mhios Chisleu, anns an fhicheadamh bliadhna, 'nuair a bha mi ann an Susan an lùchairt,

2 Gu'n d' thàinig Hanani, aon do m' bhràithribh, e féin agus daoine do Iudah; agus dh'fheòraich mi dhiubh a thaobh nan Iudhach a chaidh as, a dh'fhàgadh do'n bhraighdeanas, agus mu thimchioll Ierusalem.

3 Agus thubhairt iad rium, *Tha'm* fuigheall a dh'fhàgadh do'n bhraighdeanas an sin anns a' mhòr-roinn, ann an àmh-ghar mòr agus ann am mi-chliù²; agus bhriseadh balla Ierusalem sìos, agus loisgeadh a geatacha le teine.

4 Agus an uair a chuala mi na briathra so, shuidh mi sìos, agus ghuill mi, agus rinn mi bròn làithean *àraidh*, agus thraig mi, agus rinn mi urnuigh am fianuis Dhé nan nèamh,

5 Agus thubhairt mi, Guidheam ort, a Thighearna, Dhé nan nèamh; an Dia mòr agus uamhasach, a ghlèidheas coimheangal agus tròcair dhoibhsan a ghràdh-aicheas e, agus a choimheadas 'àitheantann;

6 Biodh do chluas a nis furachar, agus do shùilean fosgailte, chum gu'n èisd thu ri urnuigh t-òglach, a *tha* mi a' dean-amh a'd' fhianuis a nis, a là agus a dh'oidliche, air son chloinn Israeil t'òglach: agus *tha mi* 'g aideachadh pheacanna chloinn Israeil, a pheacaich sinn a'd' aghaidh: pheacaich ar aon mise agus tigh m'athar.

7 Rinn sinn gu ro thruaillidh a'd' thaobhsa, agus cha do ghléidh sinn na h-àitheanta, no na reachda, no na breitheanais a dh'àithn thu do t'òglach Maois.

8 Cuimhnich, guidheam ort, am focal a dh'àithn thu do t'òglach Maois, ag ràdh, *Ma* pheacaicheas sibh, sgapaidh mise sibh am neasg nan cìmeach.

9 Ach *ma* philleas sibh a m'ionnsuidh, agus gu'n coimlid sibh m'àitheantann,

¹ Hiciah.

² fo thasart.

agus gu'n dean sibh iad, ged robh iad dhiubh air an tilgeadh a mach do'n chuid a's iomallaiche do nèamh, cruinn-ichidh mi as a sin iad, agus bheir mi iad do'n àit a thagh mi, a chur m'ainme an sin.

10 A nis is iad so do sheirbhisich agus do shluagh, a shaor thu le d'mhòr-chumhachd, agus le d' làimh thréin.

11 A Thighearna, guidheam ort, biodh do chluas a nis furachar ri h-urnuigh do sheirbhisich, agus ri h-urnuigh t'òglach, le'm miann eagal t'ainme bhi orra: agus soirbhich, guidheam ort, le d' sheirbhisich an diugh, agus thoir dha trócair ann an sealladh an duine so. A nis bha mise a'm' ghille-cupain aig an righ.

CAIB. II.

1 *Thug Artacserces comas do Nehemiah dol a thogail balla Ierusalem.* 9 *Thàinig e gu Ierusalem, agus dh'fheuch e litrichean an righ do na uachd-aramaibh.* 17 *Bhrosnaich e an sluagh gus am balla a thogail.*

A GUS tharladh ann am mìos Nisain, anns an fhicheadamh bliadhna do Artacserces an righ, gu'n robh fion roimhe; agus ghabh mi am fion, agus thug mi e do'n righ. Agus cha robh mise roimhe sin dubhach 'na fhianuis¹.

2 Uime sin thubhairt an righ rium, C'ar son a tha do ghnùis dubhach², agus gun thu bhi tinn? cha nì eile so ach cradh cridhe. Agus bha eagal mòr orm;

3 Agus thubhairt mi ris an righ, Gu maireadh an righ gu bràth: c'arson nach biodh mo ghnùis dubhach, an uair a tha 'm baile, àit-adhlacaidh m'aithriche, air 'fhàsachadh, agus a gheatachan air an caitheadh le teine?

4 Agus thubhairt an righ rium, Ciod e so a tha thu ag iarraidh? Agus rinn mi urnuigh ri Dia nan nèamh:

5 Agus thubhairt mi ris an righ, Ma's maith leis an righ, agus ma gheibh do sheirbhisich deadh-ghean a'd' fhianuis, gu'n cuireadh tu mi dh'ionnsuidh Iudah, gu baile àit-adhlacaidh m'aithriche, agus gu'n tog mi e.

6 Agus thubhairt an righ rium, agus a' bhan-righinn 'na suidhe làimh ris, Cia fad an ùine bhios tu air do thurus; agus c'uin a philleas tu? Agus bu toil leis an righ mo chur air falbh, agus shuidhich mi àm ris.

7 Agus thubhairt mi ris an righ, Ma's toil leis an righ, thugar litrichean dhomh a dh'ionnsuidh nan uachdaran air an taobh thall do'n amhainn, chum gu'n cuir iad thairis mi gus an tig mi gu Iudah;

8 Agus litir gu Asaph fear-gleidhidh frithe an righ, chum gu'n toir e dhomh

fiodh a dheanamh sailean air son gheat-achan na lùchairt a bhuineas do'n tigh, agus air son balla a' bhaile, agus air son an tighe d'an téid mi. Agus thug an righ dhomh, a réir làimhe mhaith mo Dhé orm.

9 Agus thàinig mi dh'ionnsuidh nan uachdaran air an taobh eile do'n amhainn, agus thug mi dhoibh litrichean an righ. A nis chuir an righ maille rium ceannard-an do'n armailt agus marc-shluagh.

10 An uair a chuala Sanbalat an t-Horonach, agus Tobiah an seirbhisich an t-Amonach e, chuir e doilgheas mòr orra gu'n d'thàinig duine a dh'iarraidh leas chloinn Israeil.

11 Agus thàinig mi gu h-Ierusalem, agus bha mi 'n sin trì làithean.

12 Agus dh'éirich mi san oidhche, mi féin agus beagan dhaoine maille rium; ach cha d'innis mi do dhuine ciod a chuir mo Dhia ann am chridhe a dheanamh ann an Ierusalem: agus cha robh ainmhidh maille rium, ach an t-ainmhidh air an do mharcaich mi.

13 Agus chaidh mi mach san oidhche air geata a' ghlinne, agus fa chomhair tobair an dragoin, agus gu geata an aolaich, agus ghabh mi sealladh do bhallachaibh Ierusalem, a bha air am briseadh sìos, agus d'a geatachaibh a bha air an caith-eadh le teine.

14 Agus chaidh mi air m'aghaidh gu geata an tobair, agus gu lochan an righ: ach cha robh àit ann do'n ainmhidh a bha fodham gu dol thairis.

15 An sin chaidh mi suas san oidhche làimh ris an t-sruth, agus ghabh mi sealladh do'n bhalla, agus thionndaidh mi air m'ais, agus chaidh mi steach air geata a' ghlinne, agus phill mi.

16 Agus cha robh fios aig na riaghlairibh c'ait an deachaidh mi, no ciod a rinn mi, agus cha d'innis mi e do na h-Iudhaich, no do na sagartaibh, no do na h-àrd uaislibh, no do na riaghlairibh, no do'n chuid eile a rinn an obair.

17 Agus thubhairt mi riu, Tha sibh a' faicinn a' chruaidh-chais anns am bheil sinn, mar a ta Ierusalem air a fàsachadh, agus a geatachan air an losgadh le teine: thigibh agus togamaid balla Ierusalem, chum nach bi sinn nì's mò 'nar masladh.

18 Agus dh'innis mi dhoibh a thaobh làimhe mo Dhé, a bha maith orm, agus mar an ceudna briathran an righ a labhair e rium. Agus thubhairt iad, Eireamaid agus togamaid. Agus neartaich iad an lannan chum maith.

19 Ach an uair a chuala Sanbalat an t-Horonach, agus Tobiah an seirbhisich

¹ cha bu ghnàth leamsa bhi dubhach 'na fhianuis; 472

cha robh mi olc 'na fhianuis. Eabh. ² olc. Eabh.

an t-Amouach, agus Gesem an t-Arabach e, rinn iad gàire fanoid oirnn, agus rinn iad tàir oirnn, agus thubhairt iad, Ciod an nì so a *tha* sibh a' deanamh? an dean sibh ceannaire an aghaidh an rìgh?

20 An sin fhreagair mi iad, agus thubhairt mi ri, Dia nan nèamh, soirbhichidh esan leinn: a chionn gur sinne a sheirbh-isich, éiridh sinn agus togaidh sinn: ach agaibhse cha 'n'eil cuibhrionn, no còir, no cuimhneachan ann an Ierusalem.

CAIB. III.

1 Ainmean agus orduigh a t-huaigh a thog balla Ierusalem.

A GUS dh'éirich Eliasib an t-àrd shagart maille r'a bhràithribh na sagairt, agus thog iad geata nan caorach: naomhaich iad e, agus chuir iad suas a chomhlachan: eadhon gu ruig tùr Mheah naomhaich iad e, agus gu ruig tùr Hana-neil.

2 Agus làimh ris-san thog fir Iericho: agus làimh riu-san¹ thog Sacur mac Imri.

3 Ach geata an éisg thog mic Hasen-aah: leag iad a shailean, agus chuir iad suas a chomhlachan, a ghlasan, agus a chroinn.

4 Agus làimh riu-san leasaich² Meremot mac Uriah, mhic Chois: agus làimh ris-san³ leasaich Mesulam mac Bhereichiah, mhic Mhesesabeil: agus làimh riu-san leasaich Sadoc mac Bhaanah.

5 Agus làimh riu-san leasaich na Tecoaich: ach cha do chuir an àrd uaislean am muineal ri seirbhis an Tighearn.

6 Agus an seann gheata leasaich Iehoia-da mac Phaseah, agus Mesulam mac Bhesodeiah: leag iad a shailean, agus chuir iad suas a chomhlachan, agus a ghlasan, agus a chroinn.

7 Agus làimh riu-san leasaich Melatiah an Gibeonach, agus Iadon am Meronotach, fir Ghibeoin agus Mhispah, gu ruig rìgh-chathair an uachdarain air an taobh so do'n amhainn.

8 Làimh ris-san leasaich Udsiel mac Harhaiah, do na h-òr-cheardaibh: agus làimh ris-san leasaich Hananiah, mac aoin do na léighibh, agus neartaich iad Ierusalem gu ruig am balla leathann.

9 Agus làimh riu-san leasaich Rephaiah mac Huir, riaghlair leth-roinne⁴ Ierusalem.

10 Agus làimh ris-san⁵ leasaich Iedaiah mac Harumaiph, eadhon fa chomhair a thighe: agus làimh ris-san leasaich Hatus, mac Hasabniah.

11 An t-ath-thomhas leasaich Malchiah mac Harim, agus Hasub mac Phahat-

mhoaib, agus tùr nan àmhuinn.

12 Agus làimh ris-san leasaich Salum mac Haloheis, riaghlair leth-roinne Ierusalem, e féin agus a nigheana.

13 Geata a' ghlinne leasaich Hanun, agus luchd-àiteachaidh Shanoah: thog iad e, agus chuir iad suas a chomhlachan, a ghlasan, agus a chroinn, agus mìle làmh-choille do'n bhalla, gu ruig geata an aolaich.

14 Ach geata an aolaich leasaich Malchiah mac Rechaib, riaghlair roinne Bhet-hacereim: thog se e, agus chuir e suas a chomhlachan, a ghlasan, agus a chroinn.

15 Ach geata an tobair leasaich Salum mac Chol-hoseh, riaghlair roinne Mhispah: thog se e, agus chuir e dìon air, agus chuir e suas a chomhlachan, a ghlasan, agus a chroinn, agus balla lochain Shiloah làimh ri lios an rìgh, agus gu ruig na ceuman a' dol sìos o bhaile Dhaibhidh.

16 'Na dhéigh-san leasaich Nehemiah mac Asbuic, riaghlair leth-roinne Bhet-suir, gu ruig fa chomhair àitean-adhlacaidh Dhaibhidh, agus gu ruig an lochan a rinneadh, agus gu ruig Bet-agbarim⁶.

17 'Na dhéigh-san leasaich na Lebhithich, Rehum mac Bhani: làimh ris-san leasaich Hasabiah, riaghlair leth-roinne Cheilah, 'na roinn féin.

18 'Na dhéigh-san leasaich am bràithrean, Babbai mac Henadaid, riaghlair leth-roinne Cheilah.

19 Agus làimh ris-san leasaich Eser mac Iesua, riaghlair Mhispah, an t-ath-thomhas fa chomhair an dol suas do'n arm-thigh aig an tionndadh.

20 'Na dhéigh-san leasaich⁷ Baruch mac Shabai an t-ath-thomhas, o'n tionndadh gu ruig dorus tighe Eliasib an àrd-shagairt.

21 'Na dhéigh-san leasaich Meremot mac Uriah, mhic Acois⁸, an t-ath-thomhas, o dhorus tighe Eliasib gu ruig ceann tighe Eliasib.

22 Agus 'na dhéigh-san leasaich na sagairt, daoina a' chòmhnaird.

23 'Nau dhéigh-san⁹ leasaich Benjamin agus Hasub, fa chomhair an tighe: 'na dhéigh-san leasaich Asariah mac Mhaaseiah, mhic Ananiah, làimh r'a thigh.

24 'Na dhéigh-san leasaich Binui, mac Heuadaid, an t-ath-thomhas, o thigh Asariah gu ruig an tionndadh, agus gu ruig an oisinn.

25 Palal mac Udsai, fa chomhair an tionndaidh, agus an tùir a tha dol a mach o thigh àrd an rìgh, a bha làimh ri cùirt

¹ ris-san. ² chàirich. ³ riu-san.
tìre. ⁵ riu-san. ⁶ tigh nan gaisgeach.

⁷ leasaich gu dìchiollach.
⁸ Chois. ⁹ 'Na dhéigh-san.

a' phrìosain: 'na dhéigh-san Pedaiah mac Pharois.

26 Mar an ceudna na Netinich a bha chòmhnuidh ann an Ophel, gu ruig fa chomhair geata an uisge a làimh na h-àirde 'n ear, agus an tùir a tha dol a mach.

27 'Nan déigh-san leasaich na Tecoaich an t-ath-thomhas, fa chomhair an tùir mhòir a tha dol a mach, gu ruig balla Opheil.

28 O thaobh shuas geata nan each leas-aich na sagairt, gach aon fa chomhair a thighe.

29 'Nan déigh-san' leasaich Sadoc mac Imeir, fa chomhair a thighe: agus 'na dhéigh-san leasaich Semaiah, mac Shechaniah, fear-gleidhidh an doruis an ear.

30 'Na dhéigh-san leasaich Hananiah, mac Shelemiah, agus Hanun, seathadh mac Shalaiph, an t-ath-thomhas: 'na dhéigh-san leasaich Mesulam mac Bhe-rechiah, fa chomhair a sheòmair féin.

31 'Na dhéigh-san leasaich Malchiah, mac an òr-cheird, gu àit nan Netineach, agus nan ceannaiche fa chomhair geata Mhipheaid, agus gu dol suas na h-òisinn.

32 Agus o² dhol suas na h-òisinn gu geata nan caorach, leasaich na h-òr-cheird agus na ceannaichean.

CAIB. IV.

1 'Nuair a bha an naimhdean a' deanamh fanoid air na Iudhaich rinn Nehemiah urnuigh, agus bhuanaiche an ann an togail a' bhalla. 9 Shuidhich e freiceadan, 13 agus dh'armaich e an luchd-oibre.

AGUS an uair a chuala Sanbalat gu'n robh sinn a' togail a' bhalla, bha fearg air, agus bha e ann an corruich ro mhòir, agus rinn e fanoid air na h-Iudhaich.

2 Agus labhair e am fianuis a bhràithrean agus armait Shamaria, agus thubhairt e, Ciod a ni na h-Iudhaich anmhuinn³ so? an daingnich siad iad féin? an iobair iad? an crìochnaich iad ann an là? an tog iad suas a ris⁴ na clachan as na dùnaibh luathra a chaidh losgadh?

3 Agus bha Tobiah an t-Amonach làimh ris, agus thubhairt e, Eadhon an ni a tha iad a' togail, ma théid sionnach suas, brisidh e sìos am balla cloiche.

4 Eisd, O ar Dia, oir tha tàir air a dheanamh oirn, agus tionndaidh am masladh air an ceann féin, agus tabhair iad 'nan cobhartach ann an tìr a' bhraighdeanaiss:

5 Agus na còmhdaich an euceart, agus na dubhar a mach am peacadh⁵ a' d'fhianuis; oir bhrosnaich iad thu gu feirg an làthair an luchd-togail.

6 Agus thog sinn am balla; agus chean-gladh am balla uile ri chéile gu ruig a leth: oir bha toil aig an t-sluagh obair a dheanamh.

7 Ach an uair a chuala Sanbalat, agus Tobiah, agus na h-Arabaich, agus na h-Amonaich, agus na h-Asdodaich, gu'n robh uile bhallacha Ierusalem 'gan cur suas, gu'n do thòisich na bearmen ri bhi air an dùnadh, an sin bha fearg mhòr orra.

8 Agus chuir iad uile an comhairle ri chéile iad a theachd a chogadh an aghaidh Ierusalem, agus g'a bhacadh.

9 Ach rinn sinne urnuigh r'ar Dia, agus shuidhich sinn freiceadan 'nan aghaidh a là agus a dh'oidhche fa'n comhair.

10 Agus thubhairt Iudah, Tha neart luchd-iomhair nan eallach air fàilg-eadh, agus mòran luathra ann, air chor as nach urrainn sinn am balla a thogail.

11 Agus thubhairt ar naimhdean, Cha bhi fios aca, agus cha'n fhaic iad gus an tig sinn a stigh 'nam meadhon, agus gu marbh sinn iad, agus gu'n cuir sinn stad air an obair.

12 Agus an uair a thàinig na h-Iudhaich a bha chòmhnuidh làimh riu, thubhairt iad ruinn deich uairean, As gach àit o'm pill sibh d'ar n-ionnsuidh-ne, bithidh iad oirbh⁶.

13 Uime sin shuidhich mi anns na h-àitibh a b'isle air cùlaobh a' bhalla, agus air na h-àitibh a b'àirde, shuidhich mi eadhon an sluagh a réir an teaghlachan le'n claidhibh, le'n sleaghannaibh, agus le'm boghannaibh.

14 Agus dh'amhairc, agus dh'éirich mi, agus thubhairt mi ris na h-àrd uaislibh, agus ris na riaghlairibh, agus ris a' chuid eile do'n t-sluagh, Na biodh eagal oirbh rompa: cuimhnichibh an Tighearna mòr agus uamhasach, agus cogaibh⁷ air son bhur bràithre, bhur mac, agus bhur nigh-eana, bhur ban, agus bhur tighean.

15 Ach an uair a chual' ar naimhdean gu'n d'fhuair sinn fios air, agus a thug Dia an comhairle gu neo-ni, phill sinn uile dh'ionnsuidh a' bhalla, gach aon a dh'ionnsuidh 'oibre féin.

16 Agus o'n àm sin a mach dh'oibrich leth m'oglach-sa anns an obair, agus chum an leth eile dhiubh na sleaghanna, na sgiathan, agus na boghanna, agus na lùirichean; agus bha na riaghlairan air cùlaobh uile thighe Iudah.

17 Dh'oibrich iadsan a thog air a bhalla, agus iadsan a ghiùlain eallacha, maille riu-san a luchdaich, gach aon le aon làimh anns an obair, agus leis an làimh eile chum e gath⁸.

¹ 'Na dheigh-san.

² eadar. Eabh.

³ an leig iad leo?

⁴ an ath-bheothaich iad?

⁵ peacanna.

⁶ O gach uile àit d'an tionndaidh sibh, bithidh iad oirn.

⁷ còmhraigibh.

⁸ ball-tigildh.

18 Agus *bha* aig gach aon do'n luchd-togail a chlaidheamh crioslaichte air a léis, an uair a thog iad: agus *bha* esan a shéid an trompaid làimh riumsa:

19 Agus thubhairt mi ris na h-àrd uaislibh, agus ris na riaghlairibh, agus ris a' chuid eile do'n t-sluagh, *Tha'n* obair mòr agus farsaing¹, agus tha sinn air a dealachadh air a' bhalla gach aon fada o chéile:

20 Ge b'e àit anns an cluinn sibh fuaim na trompaid, cruinnichibh an sin d'ar n-ionmsuidh-ne: cogaidh ar Dia air ar son.

21 Agus shaothraich sinn anns an obair: agus chum leth dhuibh na sleaghanna o éirigh na maidne gus am facas² na rionnagan.

22 Mar an ceudna san àm sin thubhairt mi ris an t-sluagh, Fanadh gach aon maille r'a òglach ann an Ierusalem, chum gu'm bi iad 'nam freiceadan dhuinn san oidliche, agus san là 'nan oibrichibh.

23 Agus cha do chuir mise no mo bhràithrean, no m'òglaich, no fir an fhreiceadain a lean mi, dhinn ar n-eudach; ach a *mhàin* gu'n do chuir gach duine dheth e air son 'ionnlaid³.

CAIB. V.

1 Rinn an sluagh gearan an aghaidh cise an rìgh, agus daorsa an cloinne. 6 Chronaich Nehemiah na h-àrd uaislean a chionn gu'n robh iad togail ocair o'm bràithribh.

AGUS bha gàir mhòr aig an t-sluagh, agus aig am mnàibh, an aghaidh am bràithre nan Iudhach.

2 Agus bha ann a thubhairt, *Le* ar mic agus ar nigheana *tha* sìme lionmhor; agus gabhaidh sinn sìol *air an son*, chum gu'n ith sinn, agus gu'm bi sinn beò.

3 Agus bha ann a thubhairt, Ar fearann, agus ar fion-liosan, agus ar tighean bheir sinn an geall, chum gu'm faigh sinn sìol anns a' ghorta.

4 Agus bha ann a thubhairt, Ghabh sinn airgid an coingheall air son cise an rìgh *air* ar fearann agus ar fion-liosaibh.

5 Agus a nis mar fheoil ar bràithre *tha* ar feoil-ne, mar am mic-sau ar mic-ne; ach feuch, *tha* sinn a' toirt thairis ar mac agus ar nigheana gu bhi 'nan tràillibh, agus *tha* cuid d'ar nigheanaibh air an toirt thairis a *cheana*, agus gun chomas againn *am fuasgladh*, an uair a ta ar fearann agus ar fion-liosan aig daoineibh eile.

6 Agus bha fearg mhòr orm an uair a chuala mi an gàir, agus na briathra sin.

7 Agus chuir mi mo chomhairle ri m' chridhe féin, agus chronaich mi na h-àrd uaislean, agus na riaghlairean, agus

thubhairt mi riu, *Tha* gach aon agaibh a' togail ocair⁴ o a bhràithair. Agus chuir mi comhchruinneachadh mòr 'nan aghaidh.

8 Agus thubhairt mi riu, Shaor sinne, a réir ar comais, ar bràithre na h-Iudhaich a reiceadh ris na cinnich, agus an reic sibhse mar an ceudna bhur bràithrean, agus an reicear iad ruinn féin? Ach bha iad 'nan tosd, agus cha d'fhuair iad ni air bith ri ràdh,

9 Mar an ceudna thubhairt mi, Cha mhaith an nia *tha* sibh a' deanamh: nach buineadh dhuibh ghuasad ann an eagal ar Dé, air son maslaidh nan cinneach ar naimhde?

10 Dh'fheudainn-se cuideachd, mo bhràithre, agus m'òglaich, airgid agus sìol a thogail uatha. Leigeamaid dhinn, guidheam oirbh, an t-ain-dlighe so⁵.

11 Aisigibh dhoibh, guidheam oirbh, mar air an là 'n diugh, am fearann, an fion-liosan, an liosan-olaidh, agus an tigh-ean; mar an ceudna *cuid* do'n airgid⁶, agus do'n t-sìol, do'n fhìon, agus do'n oladh, a *tha* sibh a' togail uatha.

12 Agus thubhairt iadsan, Aisigidh sinn, agus cha'n iarr sinn uatla; mar sin ni sinn mar a *ta* thu 'g ràdh. An singhairm mi na sagairt, agus ghabh mi mionnan diubh gu'n deanadh iad a réir a' gheallaidh so:

13 Mar an ceudna chrath mi m'uchd, agus thubhairt mi, Mar so crathadh Dia gach duine nach coimhlion an gealladh so, a mach as a thigh, agus a' obair, eadhon mar so crathar a mach agus falmhaichear e. Agus thubhairt an coimhthional uile, Amen, agus mhol iad an Tighearn. Agus rinn an sluagh a réir a' gheallaidh so.

14 Os bàrr, o'n là air an d'thugadh ordugh dhomh mi bhi m'uachdaran orra ann an tìr Iudah, o'n fhicheadamh bliadhna, eadhon gus an dara bliadhna deng thar fhichead do Artacserces an rìgh, dà bhliadhna dheug, cha d'ith mise no mo bhràithrean aran an uachdarain.

15 Ach bha na ceud uachdarain a *bha* romham trom air an t-sluagh, agus ghabh iad uatha aran agus fìon, a thuilleadh air dà fhichead secel⁷ airgid; rinn eadhon an òglaich ain-tighearnas air an t-sluagh: ach cha d'rinn mise mar sin air eagal Dé.

16 Agus mar an ceudna ann an obair a' bhalla so bhuanaich mi, agus cha do cheannaich sinn fearann; agus chruinnicheadh m'òglaich uile an sin a dh'ionnsuidh na h-oibre.

17 Agus *bha* aig mo bhord ceud gu leth

¹ sgaoilleach.

² an d'èirich.

³ aig gach duine bha a ghath agus uisge.

⁴ ain-dlighe. ⁵ an eallach so chur orra.

⁶ mar an ceudna an ceudamh cuid do'n airgid.

⁷ ghabh iad air son arain agus fìona o gach aon dà fhichead secel.

Iudhach agus riaghlair, a bhàrr orra-san a thàinig d'ar n-ionnsuidh o na cinnich a ta mu'n cuairt oirn.

18 Agus so na dheasaicheadh air son gach là, aon damh, sè caoraich thaghta: mar an ceudna dheasaicheadh eoin dhomh, agus aon uair anns na deich làithibh pailteas do gach gné¹ fiona: gidheadh air son so cha d'iarr mi aran an uachd-araìn, a chionn gu'n robh an daorsa trom air an t-sluagh so.

19 Cuimhnich ormsa, mo Dhia, chum maith, a thaobh gach nì a rinn mi air son an t-sluaigh so.

CAIB. VI.

1 Dh'fheuch Sanbalat ri Nehemiah a mhaslachadh le bhà togail droch sgeoil air. 15 Chrìochnaicheadh balla Ierusalem. 17 Chuir uaislean Iudah litrichean fealltach a dh'ionnsuidh Thobiah.

ANIS an uair a chuala Sanbalat, agus Tobiah, agus Gesem an t-Arabach, agus a' chuid eile d'ar naimhdeibh gu'n do thog mi am balla, agus nach d'fhàgadh briseadh ann, (ged nach do chuir mi suas san àm sin comhlachan air na greataibh.)

2 Chuir Sanbalat agus Gesem teachdairean a m' ionnsuidh, ag ràdh, Thig, agus coinnicheadh a chèile ann an Chephirim² ann an còmhnaidh Ono: ach smuainich iadsan air olc a dheanamh orm.

3 Agus chuir mi teachdairean d'an ionnsuidh, ag ràdh, Tha mi a' deanamh oibre mòire, agus cha'n urrainn mi dol sìos: c'ar son a sguireadh an obair, an uair a dh'fhàgaimse i, agus a rachainn sìos d'ur n-ionnsuidh?

4 Gidheadh chuir iad teachdairean a m' ionnsuidh air an dòigh so ceithir uairean; agus fhreagair mi iad air an dòigh cheudna.

5 An sin chuir Sanbalat a m' ionnsuidh air an dòigh so an cuigeadh uair 'òglach féin, agus litir fhosgailte 'na làimh;

6 Anns an robh sgrìobhta; Am measg nan cinneach tha e air 'aithris, agus tha Gesem³ ag ràdh, gu bheil thusa agus na h-Iudhaich a' smuaineachadh air ceann-airc a dheanamh: uime sin tha thu a' togail a' bhalla, a chum gu'm bi thu a' d' rìgh orra a réir nam briathar so.

7 Agus mar an ceudna dh'orduich thu fàidhean a ghairm mu d' thimchioll ann an Ierusalem, ag ràdh, Is rìgh e ann an Iudah: agus a nis aithrisear do'n rìgh a réir nam briathar so. A nis ma ta thig, agus cuireamaid ar comhairle ri chèile.

8 An sin chuir mi fios d'a ionnsuidh, ag ràdh, Cha d'rinneadh nithe sam bith mar a ta thu 'g ràdh, ach is ann as do chridhe féin a tha thu 'gan dealbh.

9 Oir bha iad uile a' cur eagail oirn, ag ràdh, Anmhuinaichear an làmhan o'n obair, agus cha deanar i: ach a nis neartaich mise⁴ mo làmhan.

10 An sin chaidh mi steach do thigh Shemaiah, mhic Dhelaiah, mhic Mhehetabeeil, agus e air a dhruideadh suas; agus thubhairt e, Coinnicheadh a chèile ann an tigh Dhé, ann am meadhon an teampull, agus dùineamaid dorsan an teampull, oir thig iad g'ad mharbhadh, eadhon anns an oidhche thig iad g'ad mharbhadh.

11 Agus thubhairt mi, An teich duine mar a ta mise? agus cò mar a ta mise a rachadh a steach do'n teampull, a chum gu maireadh e beò? Cha téid mi steach.

12 Agus, feuch, dh'aithnich mi nach do chuir Dia uaith e, ach gu'n do labhair e an fhàidheadaireachd so a'm aghaidh: oir thug Tobiah agus Sanbalat duais dha.

13 Air an aobhar so thugadh duais dha chum gu'm biodh eagal ormsa, agus gu'n deanainn mar so, agus gu'm peacaichinn, agus gu'm biodh fàth droch sgeoil aca, chum gu maslaicheadh iad mi.

14 Cuimhnich thusa, mo Dhia, air Tobiah agus Sanbalat a réir an oibre sin, agus mar an ceudna air a' bhan-fhàidh Noadiah, agus a' chuid eile do na fàidhibh leis am b' àill eagal a chur orm.

15 Ach chrìochnaicheadh am balla air a' chùigeadh là fheadh do'n mhìos Elul, ann an dà là dheug agus dà fhichead.

16 Agus an uair a chual' ar naimhdean uile e, agus a chunnaic na cinnich uile a bha mu'n cuairt duinn e, thilgeadh gu mòr sìos iad 'nan suilibh féin; oir dh'aithnich iad gu'm b'ann le'r Dia-ne a rinneadh an obair so.

17 Os bàrr, anns na làithibh sin chuir àrd uaislean Iudah mòran litrichean gu Tobiah, agus thàinig litriche Thobiah d'an ionnsuidh-san:

18 Oir bha mòran ann an Iudah air toirt am mionnan da, a chionn gu'm bu chliamhuin e do Shechaniah mac Arah; agus gu'n do ghabh Iohanan a mhac nighean Mhesulaim, mhic Bherechiah, 'na mnaoi.

19 Mar an ceudna dh'aithris iad a dheadh bhuadhanna⁵ a'm' fhianuis, agus dh'innis iad mo bhriathra-sa dha. Agus chuir Tobiah litriche uaith e gu eagal a chur orm.

CAIB. VII.

1 Thug Nehemiah àithne d'a bhràthair agus do uachdaran na lùchairt a thaobh Ierusalem.

5 Fhuaradh leabhar ginealaich na muinntir a phill gu h-Ierusalem. 8 Aireamh an t-sluaigh, 39 nan

¹ seòrsa. ² ann an aon do na bailtibh beaga.

³ Gasmu. Faic r. 1.

⁴ a nis uime sin neartaich, a Dhé.

⁵ ghnìomhara.

sagart, 43 nan Lebbitheach, 46 agus nan Netin-each, &c. 70 Na tabhartais a thugadh seachad.

A NIS an uair a thogadh am balla, agus a chuir mi suas na comhlachan, agus a dh'orduicheadh na dorsairean, agus an luchd-seinn, agus na Lebbithich,

2 Thug mi àithne do m' bhràthair Hanani, agus Hananiah uachdaran na lùch-airt, a thaobh Ierusalem; (oir *bha* e 'na dhuine frinneach, agus eagal Dé air os ceann mhòrain;)

3 Agus thubhairt nui riu, Na fosgailear geatacha Ierusalem gus am fàs a' ghrian teth; agus ag seasamh doibh fathast aig làimh, druideadh iad na comhlachan, agus crannadh iad *iad*: agus shuidhich mi freiceadain do luchd-àiteachaidh Ierusalem, gach aon 'na fhreiceadan, agus gach aon fa chomhair a thighe féin.

4 A nis *bha*'m baile farsaing agus mòr: ach *bha*'n sluagh tearc ann, agus cha robh na tighean air an togail.

5 Agus chuir mo Dhia ann am chridhe gu'n cruinnichim ri chéile na h-àrd uaislean, agus na riaghlairean, agus an sluagh, gu bhi air an àireamh a réir an ginealach: agus fhuair mi leabhar ginealaich² na muinntir a thàinig a nios an toiseach, agus fhuair mi sgrìoblta ann,

6 *Is* iad so clann na mòr-roinne, a chaidh suas do na braighdibh, dhiubhsan a thugadh air falbh, a thug Nebuchadnesar rìgh Bhabiloìn air falbh leis, agus a phill gu h-Ierusalem agus gu Iudah, gach fear d'a bhaile féin;

7 A thàinig maille ri Serubabel, Iesua, Nehemiah, Asariah, Raamiah, Nahamani, Mordecai, Bilsan³, Misperet, Bigbhai, Nehum, Baanah.

• AIREAMH DHAOINE SLUAIGH ISRAIL.

8 Mic Pharois, dà mhìle ceud tri fichead agus a dhà-dheug.

9 Mic Shephatiah, tri cheud tri fichead agus a dhà-dheug.

10 Mic Arah, sè ceud dà fhichead agus a dhà-dheug.

11 Mic Phahat-mhoab, do chloinn Iesua agus Ioaib, dà mhìle ochd ceud agus ochd-deug.

12 Mic Elaim, mìle dà cheud leth-cheud agus a ceithir.

13 Mic Shatu, ochd ceud dà fhichead agus a cùig.

14 Mic Shacai, seachd ceud agus tri fichead.

15 Mic Bhinui, sè ceud dà fhichead agus a h-ochd.

16 Mic Bhebai, sè ceud fichead agus a h-ochd.

17 Mic Asgaid, dà mhìle tri cheud fichead agus a dhà.

18 Mic Adonicaim, sè ceud tri fichead agus a seachd.

19 Mic Bhigbhai, dà mhìle tri fichead agus a seachd.

20 Mic Adin, sé ceud leth-cheud agus a cùig.

21 Mic Ateir o Heseciah, ceithir fichead agus ochd-deug.

22 Mic Hasuim, tri cheud fichead agus a h-ochd.

23 Mic Bhesai, tri cheud fichead agus a ceithir.

24 Mic Hariph, ceud agus a dhà-dheug.

25 Mic Ghibeoin, ceithir fichead agus cùig-deug.

26 Fir Bhet-leheim agus Netophah, ceud ceithir fichead agus a h-ochd.

27 Fir Anatoit, ceud fichead agus a h-ochd.

28 Fir Bhet-asmabheit, dà fhichead agus a dhà.

29 Fir Chiriat-learim, Chephirah, agus Bheeroit, seachd ceud dà fhichead agus a tri.

30 Fir Ramah agus Ghaba, sè ceud fichead agus a h-aon.

31 Fir Mhichmais, ceud agus fichead agus a dhà.

32 Fir Bhet-eil agus Ai, ceud fichead agus a tri.

33 Fir Nebo-air⁴, leth-cheud agus a dhà.

34 Mic Elaim-air⁵, mìle dà cheud leth-cheud agus a ceithir.

35 Mic Harim, tri cheud agus fichead.

36 Mic Iericho, tri cheud dà fhichead agus a cùig.

37 Mic Loid, Hadid agus Ono, seachd ceud fichead agus a h-aon.

38 Mic Shenaar, tri mìle naoi ceud agus deich thar fhichead.

39 Na sagairt: Mic Iedaiah, do thigh Iesua, naoi ceud tri fichead agus tri-deug.

40 Mic Imeir, mìle leth-cheud agus a dhà.

41 Mic Phasuir, mìle dà cheud dà fhichead agus a seachd.

42 Mic Harim, mìle agus seachd-deug.

43 Na Lebbhithich: Mic Iesua agus⁶ Chadmieil, do chloinn Hodebhah, tri fichead agus ceithir-deug.

44 An luchd-seinn: Mic Asaiph, ceud dà fhichead agus a h-ochd.

45 Na dorsairean: Mic Shaluim, mic Ateir, mic Thalmoin, mic Acuib, mic Hattita, mic Shobai, ceud agus ochd-deug thar fhichead.

46 Na Netinich: Mic Shiha, mic Hasupha, Mic Thabaoit,

47 Mic Cherois, mic Shia, mic Phadoin,

48 Mic Lebana, mic Hagaba, mic Shalmai,

¹ suidhich thusa.

² stoinnteircachd.

³ Faic Esra, Caib. II.

⁵ Elaim-eile.

⁴ Nebo cile.

⁶ Esra, Caib. II. r. 40.

49 Mic Hanain, mic Ghideil, mic Gha-hair,

50 Mic Reaiah, mic Resin, mic Necoda,

51 Mic Ghadsaim, mic Udsa, mic Phas-eah,

52 Mic Bheaiia, mic Mheunim, mic Ne-phisesim,

53 Mic Bhacbuic, mic Hacupha, mic Harhuir,

54 Mic Bhaslit, mic Mhelida, mic Harsa,

55 Mic Bharcois, mic Shisera, mic Tha-mah,

56 Mic Nesiah, mic Hatipha.

57 Mic sheirbhiseach Sholaimh : mic Shotai, mic Shophereit, mic Pherida,

58 Mic Iaala, mic Dharcoim, mic Ghid-eil,

59 Mic Shephatiah, mic Hatil, mic Pho-cherit o Shebaim, mic Amoin :

60 Na Netinich uile, agus clann sheirbhiseach Sholaimh, tri cheud ceithir fichead agus a dhà-dheug.

61 Agus so iadsan a chaidh suas o Thel-melah, Telharsa, Cherub, Adon agus Imer ; ach cha b'urrainn iad tigh an athar a nochdadh agus an sliochd, am b'ann do Israel iad.

62 Mic Dhelaiah, mic Thobiah, mic Ne-coda, sè ceud dà fhichead agus a dhà.

63 Agus do na sagartaibh : mic Habaiah, mic Chois, mic Bharsillai, a ghabh bean do nigheanaibh Bharsillai a' Ghileadaich, agus a ghoireadh air an ainm.

64 Dh'iarr iadsan an clàr-sgrìobhaidh 'nam measg-san a bha air an àireamh a réir an ginealach, ach cha d'fhuaradh e : uime sin ghearradh as o'n t-sagartachd iad¹.

65 Agus thubhairt an Tirsata riu, nach feudadh iad itheadh do na nithibh ro naomha, gus an seasadh sagart suas le Urim agus Tumim.

66 An coimhthional uile cuideachd, dà fhichead agus dà mhìle tri cheud agus tri fichead ;

67 A thuilleadh air an òglaich agus am banoglaich, d'an robh ann seachd mìle tri cheud agus seachd-deug thar fhichead, agus dhiubhsan dà cheud agus dà fhichead agus a cùig 'nam fearaibh agus 'nam mnaibh-seinn.

68 An eich, seachd ceud agus sè deug thar fhichead : am muileidean, dà cheud dà fhichead agus a cùig :

69 [An] càmhail, ceithir cheud agus cùig-deug thar fhichead : [an] asail, sè mìle seachd ceud agus fichead.

70 Agus thug cuid do chinn nan aithriche seachad air son na h-oibre. Thug an Tirsata seachad do'n ionmhas, mìle darcon òir, leth-chend cuach, cùig ceud agus deich thar fhichead culaidh sagairt.

71 Agus thug cuid do chinn nan aithriche seachad do ionmhas na h-oibre, fichead mìle darcon òir, agus dà mhìle agus dà cheud pund airgid.

72 Agus so na thug a' chuid eile do'n t-sluagh : fichead mìle darcon òir, agus dà mhìle pund airgid, agus trì fichead agus seachd culaidh sagairt.

73 Agus ghabh na sagairt, agus na Lebhithich, agus na dorsairean, agus an luchd-seinn, agus cuid do'n t-sluagh, agus na Netinich, agus Israel uile, còmhuidh 'nam bailtibh ; agus an uair a thàinig an seachdamh mìos, bha clann Isracil 'nam bailtibh.

CAIB. VIII.

1 Leugh Esra leabhar an lagha an èisdeachd a' choimhthionail. 9 Shìochainnich na Lebhithich an sluagh. 15 Chum iad feill nam pàitliun.

A GUS chruinnich an sluagh uile an ceann a chèile mar aon duine do'n t-sràid a tha fa chomhair geata an uisge ; agus dh'iarr iad air² Esra an sgrìobhaiche e thoirt a làthair leabhair lagha Mhaois, a dh'àithn an Tighearna do Israel.

2 Agus thug Esra an sagart an lagh an làthair a' choimhthionail, araon fhear agus bhar, agus gach uile a thuigeadh 'nuair a chluinneadh iad e, air a' cheud là do'n t-seachdamh mìos.

3 Agus leugh e ann fa chomhair na sràide a tha fa chomhair geata an uisge, o mhaduinn gu meadhon-là, an làthair nam fear agus nam ban, agus na muinntir a thuigeadh ; agus bha cluasan an t-sluaigh uile ri leabhar an lagha.

4 Agus sheas Esra an sgrìobhaiche air crannaig fhiodha, a rinn iad air son a' ghnòthuich, agus làimh ris sheas Matitiah, agus Sema, agus Anaiiah, agus Uriah, agus Hiliach, agus Maaseiah, air a làimh dheis ; agus air a làimh chlì Pedaiah, agus Misael, agus Malchiah, agus Hasum, agus Hasbadana, Sechariah [agus] Mesulam.

5 Agus dh'fhosgail Esra an leabhar ann an sealladh an t-sluaigh uile, oir bha e os ceann an t-sluaigh uile ; agus an uair a dh'fhosgail se e, sheas an sluagh uile.

6 Agus bheannaich Esra an Tighearna, an Dia mòr : agus fhreagair an sluagh uile, Amen, Amen, a' togail suas an làmh. Agus chrom iad an cium, agus rinn iad aoradh do'n Tighearna le 'n aghaidhibh ris an talamh.

7 Mar an ceudna thug Iesua, agus Bani, agus Serebiah, Iamin, Acub, Sabetai, Hodiah, Maaseiah, Celita, Asariah, Iosabad, Hanan, Pelaiah, agus na Lebhithich, air an t-sluagh an lagh a thuigsim : agus sheas an sluagh 'nan àit.

8 Agus leugh iad ann an leabhar lagha

¹ Faic Esra, Caib. II. r. 62.

² thubhairt iad ri. Eabh.

Dhé gu soilleir, agus thug iad an seadh seachad¹; agus thuig iadsan an uair a leughadh.

9 Agus thubhairt Nehemiah, neach a's e an Tirsata, agus Esra an sagart an sgrìobhaiche, agus na Lebhithich a theagaisg an sluagh, ris an t-sluagh uile, *Tha'n là so naomh do'n Tighearna bhuir Dia*; na deanaibh caoidh no gul: oir ghuil an sluagh uile, 'nuair a chual' iad briathran an lagha.

10 An sin thubhairt e riu, Imichibh, ithibh *nithe* reamha, agus òlaibh *nithe* milse, agus cuiribh cuibhrionna d'an ionnsuidh-san do nach d'ulluicheadh ni air bith; oir *tha'n là so naomh d'ar Tighearn*: agus na bithibh ri bròn, oir *is e gairdeachas* an Tighearna bhuir neart.

11 Agus chiùinich² na Lebhithich an sluagh uile ag ràdh, Bithibh 'nur tosd, oir *a ta'n là naomh*, agus na bithibh ri bròn.

12 Agus dh'imich an sluagh uile a dh'ith-eadh agus a dh'òl, agus a chur chuibhrionn uatha, agus a dheanamh aoibhneis mhòir, a chionn gu'n do thuig iad na briathran a chuir iad an cèll doibh.

13 Agus air an dara là chruinnicheadh cuideachd cinn aithriche an t-sluaigh uile, na sagairt agus na Lebhithich gu h-Esra an sgrìobhaiche, chum gu'n tuiheadh iad briathran an lagha.

14 Agus fhuairead iad sgrìobhta anns an lagh a dh'aithean an Tighearn le làimh Mhaois, gu'n gabhadh clann Israeil còmh-nuidh ann am pàillunaibh³ air an fhéill air an t-seachdamh mìos.

15 Agus an uair a chual' iad so, thug iad gairm⁴ nam bailtibh uile, agus ann an Ierusalem, ag ràdh, Rachaidh a mach do'n t-sliabh, agus thugaibh leibh geuga⁵ chrann-olaidh, agus geuga giuthais, agus geuga miortail, agus geuga pailme, agus geuga chraobh tiugh, a dheanamh phàill-ion, mar *a ta e sgrìobhta*.

16 Agus chaidh an sluagh a mach, agus thug iad leo *iad*, agus rinn iad dhoibh féin pàilluna, gach fear air mullach a thighe, agus 'nan cùirtibh, agus ann an cùirtibh tìghe Dhé, agus ann an sràid geata an uisge, agus ann an sràid geata Ephraim.

17 Agus rinn uile choimhthional na muinntir a thàinig air an ais o'n bhraigheanas pàilluna, agus shuidh iad fuidh na pàillunaibh: oir o làithibh Iosua⁶ mhic Nuin, gu ruig an là sin, cha d'rinn clann Israeil mar sin; agus bha gairdeachas ro mhòr ann.

18 Agus leugh e ann an leabhar lagha

Dhé là'n déigh là, o'n cheud là gu ruig an là mu dheireadh: agus chum iad an fhéill seachd làithean, agus air an ochdamh là àrd-choimhthional a réir a' ghnàtha.

CAIB. IX.

1 *Dh'aicheadh sluagh Israeil am peacanna féin, agus euceartan an aithriche. 4 Labhair na Lebhithich air màitheas agus truacanta Dhé d'a shluagh Israeil.*

A GUS air a' cheathramh là fichead do'n mhìos so chruinnicheadh clann Israeil ann an trasgadh, agus ann an saic-eudach, agus ùir orra.

2 Agus dhealaich siol Israeil iad féin o uile chloinn choigreach, agus sheas iad, agus dh'aicheadh iad am peacanna, agus euceartan an aithriche.

3 Agus dh'éirich iad 'nan àit, agus leugh iad ann an leabhar lagha an Tighearn an Dé an ceathramh cuid do'n là; agus ceathramh eile dh'aicheadh iad, agus rinn iad aoradh do'n Tighearn an Dia.

4 An sin dh'éirich air cheumaibh nan Lebhithich, Iesua, agus Bani, Cadmiel, Sebaniah, Buni, Serebiah, Bani, agus Chenani, agus ghlaodh iad le guth àrd ris an Tighearn an Dia.

5 Agus thubhairt na Lebhithich, Iesua agus Cadmiel, Bani, Hasabniah, Serebiah, Hodiah, Sebaniah, agus Petahiah, Eiribh, beannaichibh an Tighearna bhuir Dia gu saoghal nan saoghla: agus beannaichte gu robh t'ainm glòrmhor-sa, a ta air 'àrd-achadh os ceann gach beannachaidh agus cliù.

6 Is tusa, *is tusa a'd' aonar* an Tighearn: rinn thu na nèamha, nèamha nan nèamh agus an slòigh uile, an talamh agus gach *ni a ta air*, na cuanta agus gach *ni a ta ann*, agus *tha thu 'gan cumail suas'* uile; agus *a ta slòigh nan nèamh a' deanamh aoraidh* dhuit.

7 *Is tu féin* an Tighearn an Dia, a thagh Abram, agus a thug a mach e á h-Ur nan Caldeanach, agus a thug Abraham mar ainm air.

8 Agus fhuairead thu a chridhe fìrinneach a'd' fhianuis, agus rinn thu coimhcheangal ris, gu'n tugadh tu tìr nan Canaanach, nan Hiteach, nan Amorach, agus nam Peridseach, agus nan Iebusach, agus nan Girsach, gu'n tugadh tu *so d'a shliochd*; agus choimhlonn thu do bhriathran, oir *tha thu ceart*:

9 Agus chunnaic thu àmhghar ar n-aithriche anns an Eiphit, agus chuala tu an glaoth aig a' mhuir ruaidh:

10 Agus nochd thu comharan agus iongantais air Pharaoh, agus air a sheirbhisich uile, agus air uile shluagh a thìre,

¹ dh'innis iad ciod bu chiall da.

² shiochaintich.

³ bùthaibh.

⁴ agus gu'n cuireadh iad an cèll, agus gu'n tug-

adh iad gairm.

duilleach. Eabb.

⁷ a' tèirt beatha dhuibh.

⁵ geugan le'n duilleach;

⁶ Iesua.

oir bha fios agad gu'n d'rinn iad gu h-uabhbheach 'nan aghaidh: agus fhuair thu dhuit féin ainm, mar air an là 'n diugh.

11 Agus roinn thu a' mluir rompa, agus chaidh iad troimh mheadhon na mara air talamh tioram; agus an luchd-tòrachd thilg thu anns an doimhne, mar chloich anns na h-uisgeachaibh làidir.

12 Agus le meall¹ neoil threòraich thu iad san là; agus le meall teine san oidheche, a shoillseachadh dhoibh na slighe air an imicheadh iad.

13 Agus thàinig thu nuas air sliabh Shinai, agus labhair thu riu o nèamh, agus thug thu dhoibh breitheanas chearta, agus laghanna fìrinn, reachdan agus àitheanta maithhe.

14 Agus do shàbaid naomh dh'fhoillsich thu dhoibh; agus àitheantan, agus reachdan, agus lagh, dh'àithn thu dhoibh le làimh Mhaois t'òglaich:

15 Agus aran o nèamh thug thu dhoibh 'nan ocras², agus uisge as a' charraig thug thu mach dhoibh 'nan tart: agus thubhairt thu riu³ dol a steach a shealbhadh an fhearainn a mhionnaich thu⁴ gu'n tugadh tu dhoibh.

16 Ach rinn iad féin agus ar n-aithriche gu h-uabhbheach, agus chruaidhich iad am muineal, agus cha d'éisd iad ri t'àitheantaibh,

17 Agus dhiùlt iad eisdeachd, agus cha do chumhnich iad t'iongantasan a rinn thu 'nam measg; ach chruaidhich iad am muineal, agus dh'orduich iad ceannard, chum pilltinn d'an daorsa san Eiphit⁵: ach is Dia thusa a tha ealamh gu maith-eanas a thoirt seachad, gràs mhor agus tròcaireach, mall a chum feirge, agus pailt ann an truacantas⁶, agus cha do thréig thu iad.

18 Eadhon an uair a rinn iad dhoibh féin laogh leaghta, agus a thubhairt iad, So do dhia a thug a nios thu as an Eiphit, agus a dh'oibrich iad mòran brosnachaidh;

19 Gidheadh a'd' thruacantas mòr cha do thréig thu iad san fhàsach: cha do dhealaich am meall neoil riu san là, gu'n treòrachadh air an t-slighe; no am meall teine san oidheche, a shoillseachadh na slighe dhoibh air an imicheadh iad.

20 Agus do spiorad maith thug thu seachad gu'n teagasg, agus do mhana cha do chum thu o'm beul, agus uisge thug thu dhoibh 'nan tart.

21 Eadhon dà fhichead bliadhna bheathaich thu iad san fhàsach: cha robh dìth orra: cha d'fhàs an eudach sean, agus cha d'at an cosan.

22 Agus thug thu dhoibh rìoghachdan

agus slòigh, agus roinn thu iad ann an cearnaibh; agus tùr shealbhaich iad tìr Shihoin, agus tùr rìgh Hesboin, agus tìr Og rìgh Bhasain.

23 Agus rinn thu an clann lìonmhor mar reulta nan nèamh, agus thug thu iad do'n tìr mu'n dubhairt thu r'an aithrichibh, gu'n rachadh iad a steach g'a sealbhadh.

24 Agus chaidh an clann a steach, agus shealbhaich iad an tìr, agus chiosnaich thu rompa luchd-àiteachaidh na tìre, na Canaanach, agus thug thu thairis 'nan làimh iad féin agus an rìghrean, agus sluagh na tìre, a dheanamh riu mar bu mhianu leo.

25 Agus ghlac iad bailte daingnichte⁷, agus talamh reamhar, agus shealbhaich iad tighean làn do gach *ni* maith, tob-
raiche cladhaichte, fìon-liosan agus liosan-olaidh, agus craobhan meas ann am pailteas: agus dh'ith iad, agus shlàsuicheadh iad, agus dh'fhàs iad reamhar, agus bha toil-inntinn aca ann ad mhòr mhaithneas-sa.

26 Gidheadh, bha iad eas-umhal, agus rinn iad ceannaire a'd' aghaidh, agus thilg iad do lagh air an culaobh, agus mharbh iad t'fhàidhean a thug fianuis 'nan aghaidh, chum am pilltinn a d'ionnsuidh; agus dh'oibrich iad mòran brosnachaidh.

27 Air an aobhar sin thug thu thairis iad do làimh an naimhdean, a shàraich iad: agus ann an àm an airce ghlaodh iad riut, agus o na nèamhaibh chuala tu, agus a'd' mhòr-thròcair thug thu dhoibh luchd-saoraidh, a shaor iad á làimh an naimhdean.

28 Ach an uair a bha fois aca, rinn iad ole a rìs a'd' fhianuis; uime sin dh'fhàg thu iad ann an làimh an naimhdean, agus bha uachdaranachd aca orra. Gidheadh, an uair a phill iad agus a ghlaodh iad riut, chuala tu o na nèamhaibh, agus shaor thu iad a'd' mhòr-thròcair iomadh uair:

29 Agus thug thu fianuis 'nan aghaidh, chum an toirt air an ais a dh'ionnsuidh do lagha: gidheadh, rinn iadsan gu h-uabhbheach, agus cha d'éisd iad ri t'àitheantaibh, ach pheacaich iad an aghaidh do bhreitheanasa, nithe ma ni duine, bithidh e beò annta, agus tharruing iad air falbh an gualainn, agus chruaidhich iad am muineal, agus cha 'n éisdeadh iad.

30 Agus ghiùlain thu leo rè iomadh bliadhna, agus rinn thu fianuis 'nan aghaidh le d' spiorad le làimh t'fhàidhean: ach cha 'n éisdeadh iad, agus thug thu thairis iad do làimh shluagh nan tìr.

¹ tùiribh, stuaidh, stac; pillar. Sasg.

² air son an ocras. ³ dh'àithn thu dhoibh.

⁴ a thog thu suas do làmh. Eabh. ⁵ 'nan ceannaire.

⁶ caomhneas. ⁷ làidir.

31 Gidheadh ann ad mhòr thròcair cha do chuir thu as doibh gu tur, agus cha do thréig thu iad; oir is Dia gràsmhor agus tròcaireach thusa.

32 A nis ma ta, O ar Dia-ne, a Dhé nihòir, chumhachdaich, agus uamhasaich¹, a chumas coimhcheangal agus tròcair, na measar beag a' d'fhianuis an sàrachadh so uile a thàinig oirme, air ar rìghribh, air ar n-uachdaranaibh, agus air ar sagartaibh, agus air ar fàidhibh, agus air ar n-aithrichibh, agus air do shluagh uile, o làithibh rìghrean Asiria gu ruig an là'n diugh.

33 Ach a ta thusa cothromach anns gach ni a thàinig oirm; oir rinn thusa gu fìr-inneach, ach rinn sinne gu h-aingidh.

34 Cha do ghléidh ar rìghrean, ar n-uachdarain, ar sagairt, no ar n-aithriche do laghsa, agus cha d'éisd iad ri d'aitheantaibh, agus ri d'itheas leis an d'thug thu teistean 'nan aghaidh:

35 Oir cha do rinn iad seirbhìs dhuit 'nan rìoghachd², agus anns a' mhòr-mhaith a thug thu dhoibh, agus anns an fhearann fharsaing agus reamhar a chuir thu fa'n comhair, agus cha do phill iad o'n droch oibribh.

36 Feuch, is seirbhìsich sinn an diugh, agus am fearann a thug thu d'ar n-aithrichibh a dh'itheadh a thoraidh agus a mhaith, feuch, is seirbhìsich sinn ann.

37 Agus is mòr a thoradh do na rìghribh a chuir thu os ar ceann air son ar peacanna; agus a ta uachdaranachd aca os ceann ar corpa, agus os ceann ar spréidhe, a réir an toile, agus tha sinn ann an àmhghar mòr.

38 Agus air son so uile ni sinn coimhcheangal cinnteach, agus sgriobhaidh sinn e; agus cuiridh ar n-uachdarain, ar Lebhithich, agus ar sagairt an seula air.

CAIB. X.

1 Ainmean an t-sluaigh a chuir an seula air a' choimhcheangal. 23 Chaidh a' chuid eile d'ò'n t-sluaigh fo mhionnaibh gluasad ann an lagh Dhé.

A GUS so iadsan a chuir an seula air: Nehemiah an Tirsata, mac Hachaliah, agus Sedeciah.

2 Seraiah, Asariah, Ieremiah,
3 Pasur, Amariah, Malchiah,
4 Hatus, Sebaniah, Maluch,
5 Harim, Meremot, Obadiah,
6 Daniel, Gineton, Baruch,
7 Mesulam, Abiah, Miamin,
8 Maasiah, Bilgai, Semaiah: b'iad sin na sagairt.

9 Agus na Lebhithich; Iesuah mac Asaniah, Binui do mhacaibh Henadaid, Cadmiel;

10 Agus am bràithrean, Sebaniah, Hodiah, Celita, Pelaiah, Hanan,

11 Micha, Rehob, Hasabiah,
12 Sacur, Serebiah, Sebaniah,
13 Hodiah, Bani, Beninu.
14 Cinn an t-sluaigh: Paros, Pahatmoab, Elam, Satu, Bani,
15 Buni, Asgad, Bessai,
16 Adoniah, Bigbhai, Adin,
17 Ater, Hisciah, Adsar,
18 Hodiah, Hasum, Besai,
19 Hariph, Anatot, Nebai,
20 Magpias, Mesulam, Hesir,
21 Mesesabeel, Sadoc, Iadua,
22 Pelatiah, Hanan, Anaiah,
23 Hosea, Hananiah, Hasub,
24 Halohes, Pileha, Sobec,
25 Rehun, Hasabnah, Maaseiah,
26 Agus Ahiah, Hanan, Anan,
27 Maluch, Harim, Baanah.

28 Agus a' chuid eile d'ò'n t-sluaigh, na sagairt, na Lebhithich, na dorsairean, an luchd-seinn, na Netinich, agus iadsan uile a dhealaich iad féin o shluagh nan tìr a chum lagha Dhé, am mnà, am mic, agus an nigheana, gach aon aig an robh eòlas agus tuigse;

29 Dhlùth-lean iad r'am bràithribh, an àrd-uaislean, agus chaidh iad fo mhallachadh, agus fo mhionnaibh, gluasad ann an lagh Dhé, a thugadh seachad le làimh Mhaois òglaich Dhé, agus a choimhead agus a dheanamh uile àitheantan Iehobhah ar Tighearn, agus a bhreitheanas, agus a reachdan:

30 Agus nach toir sinn ar nigheana do shluagh na tìre, agus nach gabh sinn an nigheana-san d'ar macaibh:

31 Agus ma bheir slugh na tìre leo bathar, no biadh air bith air là na sàbaid, g'a reiceadh, nach ceannaich sinn e uatha air an t-sàbaid no air là naomh: agus gu'n leig sinn leis an t-seachdamh bliadhna, agus le togail nam fiach uile.

32 Mar an ceudna rinn sinn reachdan dhuinn féin, an treas cuid do shecl a chur a dh'fhiachaibh oirnn féin gach bliadhna, air son seirbhìs tighe ar Dé;

33 Air son an arain thaisbeanta, agus air son an tabhartais-bhìdh ghnàthaichte, agus air son iobairt-loisgte ghnàthaichte nan sàbaid agus nan gealach nomha, air son nam féill suidhichte, agus air son nan nithe naomha, agus air son nan iobairt-pheacaidh, a dheanamh réite air son Israeil, agus air son uile oibre tighe ar Dé.

34 Agus thilg sinn croinn, na sagairt, na Lebhithich, agus an sluagh mu'n tabhartas-fhiodha, chum a thabhairt gu tìgl ar Dé, a réir tighe ar n-aithriche, air àmannaibh suidhichte, o bhliadhna gu bliadhna, a losgadh air altair an Tighearn ar Dé, mar a ta e sgriobhta anns an lagh:

¹ eagalaich.

² a' d'òrighachd.

35 Agus a thabhairt ceud-thoraidh ar fearainn, agus ceud-thoraidh uile mheas gach uile cliraoibh, o bhliadhna gu bliadhna, gu tigh an Tighearn:

36 Agus a thabhairt ceud-ghin ar mac, agus ar n-ainmhidhean, mar a ta e sgrìobhta anns an lagh, agus ceud-ghin ar cruaidh agus ar caorach, gu tigh ar Dé, dh'ionnsuidh nan sagart a fhrithchealas ann an tigh ar Dé:

37 Agus gu'n tugamaid ceud-thoradh ar taoise, agus ar tabhartasan, agus meas gach gnè craoibhe, fìona agus olaidh, dh'ionnsuidh nan sagart, gu seòmraichibh tighe ar Dé; agus deachamh ar fearainn do na Lebhithich, air chor a's gu faigh-eadh na Lebhithich sin an deachamh ann an uile bhailtibh ar treabhachais.

38 Agus bithidh an sagart mac Aaron maille ris na Lebhithich, an uair a thogas na Lebhithich an deachamh: agus bheir na Lebhithich suas leo deachamh an deachaimh gu tigh ar Dé, a steach do na seòmraichibh, do thigh an ionmhais:

39 Oir bheir clann Israeil, agus clann Lebhi leo tabhartas an arbhair, an fhìona nuaidh, agus na h-olaidh¹, steach do na seòmraichibh, far am bheil soithichean an ionaid naomh, agus na sagairt, [agus] an luchd-frithealaidh, agus na dorsairean, agus an luchd-seinn. Agus cha tréig sinne tigh ar Dé.

CAIB. XI.

1 Chòmhnuich uachdarain an t-sluaigh, agus na daoine a thàinig iad fèin gu toileach, ann an Ierusalem: 20 Ghabh a' chuid eile do'n t-sluagh còmhnuidh gach duine 'na sheilbh fèin.

AGUS chòmhnuich uachdarain an t-sluaigh ann an Ierusalem; agus thilg a' chuid eile do'n t-sluagh croinn, a thoirt aoin as an deichnear a ghabhail còmhnuidh ann an Ierusalem am baile naomh, agus gu'm biodh naoi earrannan anns na bailtibh eile.

2 Agus bheannaich an sluagh na daoine uile, a thairg iad fèin gu toileach gu còmhnuidh ghabhail ann an Ierusalem.

3 Agus is iad so cinn na mòr-roinne, a chòmhnuich ann an Ierusalem, agus ann am bailtibh Iudah: ghabh gach aon còmhnuidh 'na sheilbh fèin, 'nam bailtibh, na h-Israelich, na sagairt, agus na Lebhithich, agus na Netinich, agus mic sheirbhiseach Sholaimh.

4 Agus chòmhnuich ann an Ierusalem do chloinn Iudah, agus do chloinn Bheniamin: do chloinn Iudah: Aataiah mac Udsiah, mhic Shechariah, mhic Amariah, mhic Shephatiah, mhic Mahalaleil, do chloinn Phereis:

5 Agus Maaseiah mac Bharuich, mhic

Cholhoseh, mhic Hasaiah, mhic Adaiah, mhic Ioairib, mhic Shechariah, mhic Shiloni.

6 Mic Phereis uile a chòmhnuich ann an Ierusalem, ceithir cheud trì fichead agus ochd fir threuna.

7 Agus is iad so mic Bheniamin; Salu mac Mhesulaim, mhic Ioelid, mhic Phedaiiah, mhic Cholaiah, mhic Mhaaseiah, mhic Itieil, mhic Iesaiah.

8 Agus 'na dhéigh-san Gabai, Salai, naoi ceud fichead agus a h-ochd.

9 Agus Ioel mac Shichri 'na fhear-amhaire thairis orra; agus Iudah mac Shenuah an dara fear os ceann a' bhaile.

10 Do na sagartaibh: Iedaiah, Ioairib², Iachin,

11 Seraiah mac Hiltiah, mhic Mhesulaim, mhic Shadoic, mhic Mheraioit, mhic Ahituib, riaghlair tighe Dhé.

12 Agus am bràithrean a rinn obair an tighe, ochd ceud fichead agus a dhà: agus Adaiah mac Ierohaim, mhic Phelaliah, mhic Amsi, mhic Shechariah, mhic Phasuir, mhic Mhalchiah;

13 Agus a bhràithre, cinn nan aitliriche dà cheud dà fhichead agus a dhà: agus Amasai mac Asareil, mhic Ahasai, mhic Mhesilemoit, mhic Imeir.

14 Agus am bràithrean, fir chomasach ghaigheil, ceud fichead agus a h-ochd: agus 'na fhear-amhaire thairis orra Sadiel, mac aoin do na daoineibh mòra³.

15 Agus do na Lebhithich: Semaiah mac Hasuib, mhic Asricaim, mhic Hasabiah, mhic Bhuni;

16 Agus Sabetai, agus Iosabad, do cheannaibh nan Lebhithich, os ceann oibre tighe Dhé o'n leth muigh.

17 Agus Mataniah mac Mhicha, mhic Shabdi, mhic Asaph, an ceud fhear a thòisicheadh air buidheachas a thoirt⁴ ann an urnuigh; agus Bacbuciah, an dara fear am measg a bhràithre, agus Abda mac Shamua, mhic Ghalail, mhic Iedu-tuin.

18 Na Lebhithich uile anns a' bhaile naomh, dà cheud ceithir fichead agus a ceithir.

19 Agus na dorsairean, Acub, Talmon, agus am bràithrean a bha ri faire aig na geataibh, ceud trì fichead agus a dhà-dheug.

20 Agus bha chuid eile do Israel, na sagairt, agus na Lebhithich, ann an uile bhailtibh Iudah, gach fear 'na sheilbh fèin.

21 Ach ghabh na Netinich còmhnuidh ann an Ophel: agus bha Siha agus Gispas os ceann nan Netineach.

22 Agus b'e fear-amhaire thairis nan

¹ an olaidh. ² Iedaiah mac Ioairib. Faic I. Eachdr. Caib. IX. r. 10.

³ mac Ghedelaim. ⁴ an ceud fhear gu moladh agus buidheachas a thabhairt.

Lebhitheach ann an Ierusalem Udsi mac Bhani, mhic Hasabiah, mhic Mhatanah, mhic Mhicah. Do mhacaibh Asaiph, *bha'n* luchd-seinn, fa chomhair¹ oibre tighe Dhé:

23 Oir *b'i* àithne an rìgh mu'n timchioll, gu'm biodh cuibhrionn àraidh air son an luchd-seinn, a dhlighe féin air gach là.

24 Agus *bha* Petaiah mac Mhesesabeeil, do chloinn Sherah mhic Iudah, aig làimh an rìgh anns gach cùis a thaobh an t-sluaigh.

25 Agus a thaobh nam bailte beaga nam fearann², chòmhnuich *cuid* do mhacaibh Iudah ann an Ciriath-arba agus 'na bhailtibh beaga, agus ann an Dibon agus 'na bhailtibh beaga, agus ann an Iecabscel agus 'na bhailtibh beaga,

26 Agus ann an Iesua, agus ann am Moladah, agus ann am Bet-pelet,

27 Agus ann an Hasar-sual, agus ann am Beer-seba agus 'na bhailtibh beaga,

28 Agus ann an Siclag, agus ann am Meconah agus 'na bhailtibh beaga,

29 Agus ann an En-rimon, agus ann an Sareah, agus ann an Iarmut,

30 Sanoah, Adulam, agus 'nam bailtibh beaga, ann an Lachis agus 'na fhearann, ann an Asecah agus 'na bhailtibh beaga. Agus chòmhnuich iad o Bheer-seba gu ruig gleann Hinoim;

31 Agus mic Beniamin o Gheba, ann am Michmas, agus Aia, agus Bet-el agus 'na bhailtibh beaga,

32 Ann an Anatot, Nob, Ananiah,

33 Hasor, Ramah, Gitaïm,

34 Hadid, Seboim, Nebalat,

35 Lod, agus Ono, gleann an luchd-ceirde.

36 Agus do na Lebhitheach *bha* roinnean, ann an Iudah, agus ann am Beniamin.

CAIB. XII.

¹ Na sagairt agus na Lebhitheach a chaidh suas maille ri Serubabel. ¹² Cinn aithriche nan sagart. ²⁷ Coisreagadh balla Ierusalem. ⁴⁴ Dreuchd nan sagart agus nan Lebhitheach a shuidheachadh anns an teampull.

A GUS is iad so na sagairt agus na Lebhitheach a chaidh suas maille ri Serubabel mac Shealtieil, agus Iesua: Seraiah, Jeremiah, Esra,

2 Amariah, Maluch, Hatus,

3 Sechaniah, Rehum, Meremot,

4 Ido, Ginet, Abiah,

5 Miamin, Maadiah, Bilgah,

6 Semaiah, agus Ioarib, Iedaiah,

7 Salu, Amoc, Hilciah, Iedaiah: *b'i*ad sin cinn nan sagart agus am bràithrean ann an làithibh Iesua.

8 Agus na Lebhitheach: Iesua, Binui, Cadmiel, Serebiah, Iudah, agus Mataniah, *a bha* os ceann nan laoidh-mholaidh³, e féin agus a bhràithrean;

9 Agus Bacbuchiah, agus Uni, agus am bràithrean, *a bha* thall fa'n comhair-san anns na fairbh.

10 Agus ghin Iesua Ioiacim, agus ghin Ioiacim Eliasib, agus ghin Eliasib Ioiada,

11 Agus ghin Ioiada Ionatan, agus ghin Ionatan Iadua.

12 Agus ann an làithibh Ioiacim bha sagairt, cinn nan aithriche: o Seraiah, Meraiah: o Jeremiah, Hananiah:

13 O Esra, Mesulam: o Amariah, Ichohanah:

14 O Mhelicu⁴, Ionatan: o Shcchaniah⁵, Ioseph:

15 O Harim, Adnah: o Mheraiot, Helcai:

16 O Ido, Sechariah: o Ghineton, Mesulam:

17 O Abiah, Sichri: o Mhiamin⁶,***: o Mhoadiah, Piltai:

18 O Bhilgah, Samua: o Shemaiah, Ichonatan:

19 O Ioarib, Matenai: o Iedaiah, Udsi:

20 O Shalai, Calai: o Amoc, Eber:

21 O Hilciah, Hasabiah: o Iedaiah, Netaneel.

22 Sgrìobhadh sìos na Lebhitheach ann an làithibh Eliasib, Ioiada, agus Iehonain, agus Iadua, cinn nan aithriche; agus na sagairt gu ruig rìoghachadh Dhariuis a' Phersaich.

23 Sgrìobhadh sìos mic Lebhi, cinn nan aithriche, ann an leabhar nan eachdraidh, gu ruig làithean Iohanain mhic Eliasib.

24 Agus cinn nan Lebhitheach: Hasabiah, Serebiah, agus Iesua mac Chadmiel, agus am bràithre thall fa'n comhair, a mholadh agus a thabhairt buidheachais a réir àithne Dhaibhidh òglaich Dhé, faire fa chomhair faire.

25 Mataniah, agus Bacbuchiah, Obadiah, Mesulam, Talmon, Acub, 'nan dorsairibh a' coimhead na faire aig stairsueachaidh⁷ nan geata.

26 Iad sin ann an làithibh Ioiacim mhic Iesua, mhic Iosadaic, agus ann an làithibh Nehemiah an uachdarain, agus Esra an t-sagairt, an sgrìobhaiche.

27 Agus aig coisreagadh balla Ierusalem dh'iarr iad na Lebhitheach as an àitibh uile, chum an tabhairt gu h-Ierusalem, a chumail a' choisreagaidh le haobhneas, agus le breth-buidheachais, agus le seinn, le ciombalaibh, saltairibh, agus le clàrsaichibh.

¹ os ceann. ² le'n acaibh.

³ os ceann an tabhairt buidheachais.

⁴ Mhaluch. r. 2.

⁵ Shebaniah.

⁶ Mhianamin.

⁷ sgàth-thigheibh, tighibh-tionail; asupim. Eabh. Faic I. Eachdr. Caib. XXVI. r. 15. 17.

28 Agus chruinnich mic an luchd-seinn an ceann a chéile, araon as an tìr réidh mu thimchioll Ierusalem, agus á bailtibh beaga Netophati;

29 Agus á tigh Ghilgail, agus á mach-airibh Gheba agus Asmabheit; oir thog an luchd-seinn bailte beaga dhoibh féin mu thimchioll Ierusalem.

30 Agus ghlan na sagairt agus na Lebhithich iad féin, agus ghlan iad an sluagh, agus na geatachan, agus am balla.

31 An sin thug mi suas uachdarain Iudah air a' bhalla, agus dh'orduich mi dà chuideachd mhòr chum molaigh, agus gu'n imicheadh *aon* a dh'ionnsuidh na làimhe deise air a' bhalla gu geata an aolaich:

32 Agus 'nan déigh-san chaidh Hosaiah, agus leth uachdarana Iudah,

33 Agus Asariah, Esra, agus Mesulam,

34 Iudah, agus Benjamin, agus Semaiah, agus Ieremiah:

35 Agus *cuid* do mhacaibh nan sagart le trompaidibh; Sechariah mac Ionatain, mhic Shemaiah, mhic Mhataniah, mhic Mhichaiah, mhic Shacuir, mhic Asaiph;

36 Agus a bhràithre Semaiah, agus Asareel, Milalai, Gilalai, Maai, Netaneel, agus Iudah, agus Hanani, le innealaibh-ciuil Dhaibhidh òglaich Dhé, agus Esra an sgrìobhaiche rompa.

37 Agus aig geata an tobair a bha fa'n comhair, chaidh iad suas air ceumaibh¹ baile Dhaibhidh, aig dol suas a' bhalla, os ceann tìghe Dhaibhidh, gu ruig geata an uisge a làimh na h-àirde 'n ear.

38 Agus dh'imich a chuideachd eile a bha chum molaigh thall fa'n comhair, agus mise 'nan déigh, agus leth an t-sluaigh air a' bhalla, o thaobh shuas tuir nan àmhuinn gu ruig am balla leathan;

39 Agus o thaobh shuas geata Ephraim, agus os ceann an t-sean gheata, agus os ceann geata an éisg, agus tuir Hananeil, agus tuir Mheah, gu ruig geata nan caorach; agus sheas iad ann an geata a' phriosain².

40 An sin sheas an dà chuideachd a bha chum molaigh ann an tìgh Dhé, agus mise agus leth nan riaghlair maille riom:

41 Agus na sagairt, Eliacim, Maaseiah, Miniamin, Michaiah, Elieonai, Sechariah, Hananiah le trompaidibh;

42 Agus Maaseiah, agus Semaiah, agus Eleasar, agus Udsi, agus Iehohanan, agus Malchia, agus Elam, agus Eser: agus sheinn an luchd-seinn gu h-àrd, agus Iesraiah 'na fhear-amhaire thairis orra.

43 Agus dh'ìobair iad air an là sin ìobairtean mòra, agus rinn iad gairdeachas;

oir thug Dia orra gairdeachas a dheanamh le h-aobhneas mòr: rinn na mnàir mar an ceudna agus a' chlànn gairdeachas, agus chualas gairdeachas Ierusalem an cèin.

44 Agus shuidhicheadh air an là cheudna daoine os ceann nan seòmar air son uan ionmhas, air son nan tabhartas, air son nan ceud thoradh, agus air son nan deachamh, chum gu'n cruinnicheadh iad annta á achannaibh nam bailte cuibhriannon an lagha: do na sagairt agus do na Lebhithich: oir *bha* aobhneas air Iudah air son nan sagart agus air son nan Lebhithich a bha a' feitheamh³.

45 Agus choimhid iad faire an Dé, agus faire a' ghlanaidh, araon an luchd-seinn agus na dorsairean, a rèir àithne Dhaibhidh agus Sholaimh a mhic:

46 Oir ann an làithibh Dhaibhidh agus Asaiph o shean *bha* cinn ann air an luchd-seinn, agus air na laoidhibh molaigh agus buidheachais do Dhia.

47 Agus thug Israel uile seachad ann an làithibh Sherubabeil, agus ann an làithibh Nehemiah, cuibhriannon an luchd-seinn agus nan dorsair, dlighe gach là air a là féin; agus naomhaich iad *nìthe* do na Lebhithich; agus naomhaich na Lebhithich do chloinn Aaroin.

CAIB. XIII.

1 *Air leughadh an lagha dhoibh dhealaicheadh Israel o'n t-sluagh mheasgta.* 4 *Nuair a phill Nehemiah thug e fa'near na seòmraichean a ghlanadh.* 10 *Thagair e cùis nan Lebhithich.* 15 *Mu bhriseadh na sàbaid.* 23 *Mu na h-Iudhaich a phòs mnàir choimheach.*

AIR an là sin leughadh ann an leabhar Mhaois ann an éisdeachd⁴ an t-sluaigh, agus fhuaradh sgrìobhta ann, nach tìgeadh an t-Amonach agus am Moabach a steach do choimhthional Dhé gu bràth;

2 A chionn nach do choimnich iad clann Israeil le h-aran agus le h-uisge, agus gu'n do thuarasdalaich iad Balaam 'nan aghaidh chum am mallachadh: ach thionndaidh ar Dia am mallachadh gu beannachadh.

3 A nis an uair a chual' iad an lagh, dhealaich iad an sluagh measgta⁵ uile o Israel.

4 Agus roimhe so *bha* aig Eliasib an sagart, a chuireadh os ceann seòmair tìghe ar Dé, cleamhnas ri Tobiah.

5 Agus rinn e dha seòmar mòr, far an robh iad roimhe a' cur an tabhartais-bhidh, na taise, agus nan soitheach, agus deachaimh an arbhair, an fhìona nuaidh, agus na h-olaidh, (a dh'orduicheadh do na Lebhithich, agus do'n luchd-seinn,

¹ staidhricibh. ² aig geata na gaintir.

³ a' frithealadh, 'nan seasamh an sin.

⁴ ann an cluasaibh. Eabh.

⁵ na coigrich, iadsan do shìochd eile.

agus do na dorsaibh,) agus tabhartais nan sagart.

6 Ach an uair a thachair so uile¹ cha robh mise ann an Ierusalem; oir anns an dara bliadhna deug thar fhichead do Artacereses rìgh Bhabiloin, thàinig mi dh'ionnsuidh an rìgh, agus an dèigh làithean àraidh fhuair mi mo chead o'n rìgh:

7 Agus thàinig mi gu h-Ierusalem, agus thuig mi an t-olc a rinn Eliasib air son Thobiah, seòmar a dheanamh dha ann an cùirtibh tìghe Dhé.

8 Agus ghabh mi gu ro olc e; agus thilg mi uile airneis-tìghe Thobiah mach as an t-seòmar.

9 Agus dh'àithn mi, agus ghlan iad na seòmraichean: agus thug mi air an ais an sin soithichean tìghe Dhé, an tabhartas-bidh agus an tuis.

10 Agus dh'aithnich mi nach d'thugadh seachad cuibhriannan nan Lebhithich; oir theich na Lebhithich agus an luchd-seim a rinn an obair, gach duine a dh'ionnsuidh 'fhearainn féin.

11 Agus thug mi achmhasan do na riaghlairibh², agus thubhairt mi, C'ar son a thréigeadh³ tìgh Dhé? Agus chruinnich mi iad ri chéile, agus shuidhich mi iad 'nan àit.

12 Agus thug Iudah uile deachamh an arbhair, agus an fhìona nuaidh, agus na h-olaidh a steach do na h-ionmhasaibh.

13 Agus chuir mi luchd-coimhid os ceann nan ionmhas, Selemiah an sagart, agus Sadoc an sgrìobhaiche; agus do na Lebhithich, Pedaiah; agus làimh riu-san Hanan mac Shacuir, mhic Mhataniah: oir mheasadh fìrinneach iad, agus bha orra-san roinn air am bràithribh.

14 Cuimhnich orm, O mo Dhia, air son so, agus na cuir as do shealladh⁴ mo dheadh ghliomharan a rinn mi a thaobh tìghe mo Dhé agus a thaobh 'fhairean⁵.

15 Anns na làithibh sin chunnaic mi ann an Iudah daoine a' saltairt fhìon-amar air an t-sàbaid, agus a' toirt a stigh sguab, agus a' cur luchd air asalaibh; agus mar an ceudna fìon, fìon-dhearcan, agus fìgean, agus gach gnè eallaich, a thug iad a stigh do h-Ierusalem air là na sàbaid: agus thug mi fianais 'nan aghaidh air an là air an do rèic iad biadh.

16 Ghabh mar an ceudna Tìoraich còmhnuidh ann, a thug a stigh iasg agus gach gnè bathair: agus rèic iad air an t-sàbaid ri clann Iudah, agus ann an Ierusalem.

17 Agus thug mi achmhasan do àrd uaislibh Iudah, agus thubhairt mi riu, Cìod an ni olc so a tha sibh a' deanamh,

agus sibh a' briseadh⁶ là na sàbaid?

18 Nach d'rinn bhur n-aithriche mar so, agus nach d'thug ar Dia an t-olc so uile oirne, agus air a' bhaile so? agus tha sibhse a' toirt tuilleadh feirge air Israel leis an t-sàbaid a bhriseadh.

19 Agus an uair a thòisich geatachan Ierusalem air a bhi dorcha roimh 'n t-sàbaid, dh'àithn mi, agus dhruideadh na comhlachan; agus dh'àithn mi nach bitheadh iad air am fosgladh gus an dèigh na sàbaid: agus cuid do m'oglaichaibh shuidhich mi aig na geataibh, chum nach tìgeadh eallach a stigh air là na sàbaid.

20 Agus ghabh na ceannaichean, agus luchd-reicidh gach gnè bathair, tàmh an taobh a muigh do Ierusalem uair no dhà.

21 Agus thug mi fianais 'nan aghaidh, agus thubhairt mi riu, C'ar son a tha sibh a' gabhail tàimh fa chomhair a' bhalla? ma ni sibh a ris e, leagaidh mi làmh oirbh. O'n àm sin cha d'thàinig iad tuilleadh air an t-sàbaid.

22 Agus dh'àithn mi do na Lebhithich, a bha 'gan glanadh féin, agus a thàinig a ghleidheadh nan geata, gu'n naomhaicheadh iad là na sàbaid. Cuimhnich orm, O mo Dhia, thaobh so mar an ceudna, agus caomhain mi a réir meud do thròcair.

23 Mar an ceudna, anns na làithibh sin chunnaic mi Iudhaich a phòs muàil do Asdod, do Amon, agus do Mhoab.

24 Agus labhair an clann leth ann an cainnt Asdoid, agus cha b'urrainn iad labhairt ann an cainnt nan Iudhach, ach a réir cainnte an dà shluaigh⁷.

25 Agus thug mi achmhasan dhoibh, agus mballaich mi iad, agus bhual mi cuid diubh, agus spion mi dhiubh am falt, agus thug mi orra mionnachadh air Dia, nach tugadh iad an nigheana⁸ d'am macaibh-san, agus nach gabhadh iad an nigheana-san d'am macaibh, no dhoibh féin.

26 Leis na nithibh sin nach do pheacach Solamh rìgh Israeil? gidheadh am measg mhòran chinneach cha robh rìgh ann cosmhùil ris, a bha air a ghràdhachadh le 'Dhia, agus a rinn Dia 'na rìgh air Israel uile: ach thug mnàil choimheach⁹ air-san féin peacachadh.

27 An éisd sinn ribh ma ta gus an t-olc mòr so uile a dheanamh, gu peacachadh an aghaidh ar Dé, le mnàil choimheach a phòsadh?

28 Agus bha aon do mhacaibh Ioiada, mhic Éliasib an àrd-shagairt, 'na chlianaigh aig Saubalat an àrd-Horonach: uime sin dh'fhògar mi uam e.

29 Cuimhnich orra, O mo Dhia, chionn

¹ ann an so uile. Eabh.

² thagair mi a' chèis ris na riaghlairibh.

³ a thréig sinn. ⁴ na dubh a mach, na di-chuimhnich.

⁵ air son tìghe mo Dhé, agus air son a fhrithcheallaidh.

⁶ a' truailleadh, a' mi-naomhachadh.

⁷ sluaigh agus sluaigh. Eabh.

⁸ Cha tòir sibh bhur nigheana, &c.

⁹ a bha 'nan coigrich, o thiribh eile.

gu'n do thruaill iad an t-sagartachd, agus coimhcheangal na sagartachd agus nan Lebhitheach.

30 Mar so ghlan mi iad o gach coigreach, agus dh'orduich mi fairean nan sagart agus nan Lebhitheach, gach aon

'na ghnothuch féin:

31 Agus air son nan tabhartas-fiodha, aig àmannaibh suidhichte, agus air son nan ceud thoradh. Cuimhnich orm, O mo Dhia, chum maith.

ESTER.

CAIB. I.

1 Rinn Ahasuerus cuirm d'a uachdaranaibh agus d'a sheirbhisich. 10 Dhiùlt Bhasti teachd an làthair an rìgh 'nuair a chuir e fios oirre. 16 Le comhairle Mhemucain chuir an rìgh air falbh Bhasti.

ANIS ann an làithibh Ahasueruis, (is e so an t-Ahasuerus a rìghich o India gu ruig Etiopia, os ceann ceud agus seachd thar fhichead mòr-roinn;)

2 Anns na làithibh sin, an uair a shuidh rìgh Ahasuerus air rìgh-chaithir a rìghachd, a bha ann an Susan an lùchairt;

3 Anns an treas bliadhna d'a rìghachadh, rinn e fleadh¹ d'a uachdarain uile, agus d'a sheirbhisich; agus cumhachd Phersia agus Mhedia, àrd uaislean agus uachdarain nam mòr-roinn 'na làthair;

4 An uair a nochd e saoihbheas a rìghachd ghlòrmhoir, agus urram a mhòrachd oirdheirc, rè ceud² agus ceithir fich-ead là.

5 Agus an uair a chrìochnaicheadh na làithe sin, rinn an rìgh do'n t-sluagh uile a bha làthair ann an Susan an lùchairt, cadar mhòr agus bheag, fleadh sheachd làithean, ann an cùirt lios³ tighe an rìgh.

6 Bha na cuirteine geal, uaine, agus gorm air an crochadh le cordaibh do anart grinn agus do choreur, air failbh-eagaibh airgid, agus puist marmoir: na leabaiche do òr agus do airgid, air leac-urrlar do mharmor dearg, agus gorm, agus geal, agus dubh.

7 Agus thug iad deoch seachad ann an soithichibh òir, agus na soithichean eacòsmhuil r'a chèile⁴, agus fion rioghail ann am pailteas, mar a thigeadh do'n rìgh⁵.

8 Agus bha 'n t-òl a réir an lagha, gun neach ann a dh'éignicheadh; oir mar sin dh'àithn an rìgh do uile dhaoinebh mòra a thighe, gu'n deanadh iad mar a b'àill leis gach duine

9 Mar an ceudna rinn Bhasti a' bhan-rìghinn fleadh do na mnaibh anns an tigh rioghail a bhuineadh do rìgh Ahasuerus.

10 Air an t-seachdamh là, 'nuair a bha

crìdhe an rìgh subhach le fion, dh'àithn e do Mhehuman, do Bhista, do Harbona, do Bhigta, agus do Abagta, do Shetar, agus do Charcas, na seachd caillteanaich a fhrithheil ann an làthair an rìgh Ahasueruis,

11 Bhasti a' bhan-rìghinn a thoirt an làthair an rìgh leis a' chrùn rioghail, a nochdadh do'n t-sluagh agus do na h-uachdaranaibh a sgèimhe; oir bha i maiseach ri amhaire oirre.

12 Ach dhiùlt a' bhan-rìghinn Bhasti teachd air àithne an rìgh a thug e seachad le làimh nan caillteanach: agus bha corruich mhòr air an rìgh, agus las 'fhearg an taobh a stigh dheth.

13 An sin thubhairt an rìgh ris na daoine glìce, d'am b'àithne na h-aimsir-ean, (oir b'e sin gnàth an rìgh d'an taobhsan uile a bha eòlach air lagh agus breith-eanas;

14 Agus làimh ris bha Carsena, Setar, Admata, Tarsis, Meres, Marsena, [agus] Memucan, seachd uachdarain Phersia agus Mhedia, a bha faicinn gnùise an rìgh, agus a shuidh air thoiseach san rìghachd,)

15 A réir an lagha cìod a ni sinn ris a' bhan-rìghinn Bhasti, a chionn nach d'rinn i iarrtus an rìgh Ahasueruis le làimh nan caillteanach?

16 Agus thubhairt Memucan an làthair an rìgh agus nan uachdaran, Cha'n ann air an rìgh a mhàin a rinn Bhasti a' bhan-rìghinn eucoir, ach mar an ceudna air na h-uachdaranaibh uile, agus air an t-sluagh uile, a tha ann an uile mhòr-roinneibh rìgh Ahasueruis:

17 Oir thèid gnìomh na ban-rìghinn a mach a dh'ionnsuidh nam ban uile, air chor as gu'n dean iad tàir air am fir 'nan suilbhe, 'nuair a thair iad, Dh'àithn an rìgh Ahasuerus a' bhan-rìghinn Bhasti a thoirt a steach 'na làthair, ach cha d'thàinig i.

18 Mar an ceudna air an là'n diugh their bain-tighearnan Phersia agus Mhedia, a chluinneas mu ghnìomh na ban-rìghinn, ri uile uachdaranaibh an rìgh:

¹ cuirm, féisd.

² iomadh latha, eadhon ceud.

³ gairaidh.

⁴ agus mhiùth iad na soithiche.

⁵ mar bu chubhaidh do'n rìgh; a réir làimhe an rìgh. Eabh.

mar so éiridh suas pailteas tàire agus feirge.

19 Ma's maith leis an rìgh, thigeadh àithne rìoghail a mach uaith, agus sgrìobhar i am measg laghanna nam Persach agus nam Medach, chum nach atharraichear i, Nach tig Bhasti ni's mò an làthair an rìgh Ahasueruis, agus gu'n toir an rìgh a h-inbhe rìoghail do mhnaoi eile a's fearr na ise.

20 Agus an uair a chluinnear àithne an rìgh a bheir e seachad air feadh a rìoghachd uile, (oir tha i mòr,) bheir na mnà uile urram d'am fearaibh, eadar mhòr agus bheag.

21 Agus thaitinn am focal ris an rìgh agus r'a uachdaranaibh; agus rinn an rìgh a réir focail Mhemucain:

22 Agus chuir e litrichean a dh'ionnsuidh uile mhòr-roinnean an rìgh, dh'ionnsuidh gach mòr-roinne a réir a sgrìobhaidh, agus a dh'ionnsuidh gach sluagh a réir an càinain¹, gu'm bitheadh gach fear 'na uachdaran 'na thigh féin; agus gu'm biodh so air fhòillsicheadh² a réir càinain gach sluagh.

CAIB. II.

1 Chomhairlich 'òglaich do'n rìgh ban-rìghinn eile iarraidh an àit Bhasti. 5 Dh'àraich Mordecai Ester. 15 Thaitinn Ester ri Ahasuerus, agus rinneadh i 'na ban-rìghinn.

AN déigh nan nithe sin, an uair a thraogh³ fearg an rìgh Ahasueruis, chuimhnich e air Bhasti, agus na rinn i, agus na dh'àithneadh 'na h-aghaidh.

2 An sin thubhairt 'òglaich an rìgh a fhritheil da, Iarrar do'u rìgh òighean òga sgiamhach:

3 Agus orduicheadh an rìgh luchd-riaghlaidh⁴ ann an uile mhòr-roinnibh a rìoghachd, agus cruinnicheadh iad na h-òighean òga sgiamhach uile gu Susan an lùchairt, gu tigh nam ban, fuidh làimh Hegai, chaillteanaich an rìgh, fhir-ghleidhidh nam ban; agus thugar dhoibh na nithe air son an glanaidh.

4 Agus bitheadh an òigh a thaitneas ris an rìgh⁵, 'na ban-rìghinn an àite Bhasti. Agus thaitinn an ni ris an rìgh, agus rinn e mar sin.

5 Bha Iudhach àraidh ann an Susan an lùchairt, d'am b'ainm Mordecai, mac Iair, mhic Shimei, mhic Chis, duine do Bheniamin,

6 A thugadh air falbh o Ierusalem leis a' bhraighdeanas a thugadh air falbh maille ri Ieconiah rìgh Iudah, a thug Nebuchadnesar rìgh Bhabailoin air falbh.

7 Agus dh'àraich⁶ e Hadasah, (b'i sin

Ester,) nighean bràthar-'athar, oir cha robh athair no màthair aice; agus bha'n òigh maiseach 'na cruth, agus sgiamhach 'na gnùis: agus an uair a dh'eug a h-athair agus a màthair, ghabh Mordecai d'a ionnsuidh i mar a nighean féin.

8 Agus an uair a chualas àithne an rìgh agus 'ordugh, agus an uair a chruinnicheadh iomadh òigh gu Susan an lùchairt, gu bhi fuidh làimh⁷ Hegai, thugadh Ester mar an ceudna gu tigh an rìgh, gu bhi fuidh làimh Hegai, fhir-ghleidhidh nam ban.

9 Agus thaitinn an òigh ris, agus fhuaire i caoimheas 'na làthair, agus rinn e deifir gus a nithe air son glanaidh, agus na bhuineadh dhi, a thabhairt d'a h-ionnsuidh, agus gu seachd maighdeanan iomchuidh a thabhairt di á tigh an rìgh; agus chuir e i féin agus a maighdeanan do'n àit a b'fhearr do thigh nam ban.

10 Cha d'innis Ester a sluagh, no a luchd-daimh: oir dh'àithn Mordecai dhi gun innseadh.

11 Agus gach là bha Mordecai ag imeachd fa chomhair cùirte tighe nam ban, a dh'fhiosrachadh cionnus a bha Ester, agus ciod a dh'éireadh dhi.

12 Agus an uair a thàinig àm gach òighe gu dol a steach a dh'ionnsuidh an rìgh Ahasueruis, an déigh dhi bhi dà mhios dheug a réir gnàtha nam ban, (oir 'nar sin choimhlionadh làithean an glanaidh, sè mìosan le h-oladh mirr, agus sè mìosan le luibhibh cùbhraidh, agus le nithibh eile chum glanaidh nam ban,)

13 An sin mar so thàinig gach òigh a dh'ionnsuidh an rìgh: gach ni⁸ a dh'iarr i thugadh dhi gu dol a steach leatha á tigh nam ban gu tigh an rìgh.

14 Air feasgar chaidh i steach, agus sa' mhaduinn phill i gu dara tigh nam ban, fuidh làimh Shaasgaish, chaillteanaich an rìgh, fhir-ghleidhidh nan coimhleabach: cha d'thàinig i steach tuilleadh a dh'ionnsuidh an rìgh, mar do ghabh an rìgh tlachd dhi, agus gu'n do ghairmeadh i air a h-ainm.

15 Agus an uair a thàinig àm⁹ Esteir, nighean Abihail, bràthar-'athar Mhordecai, (a ghabh d'a ionnsuidh i mar a nighean féin,) gu dol a steach a dh'ionnsuidh an rìgh, cha d'iarr i ni air bith ach na dh'orduich Hegai, caillteanaich an rìgh, fear-gleidhidh nam ban: agus fhuaire Ester gean-maith 'nan sùilbhan-san uile a dh'amhaire oirre.

16 Agus thugadh Ester a dh'ionnsuidh an rìgh Ahasueruis, a dh'ionnsuidh a thighe rìoghail, anns an deicheamh mìos,

¹ cànamhain, cainnte.

² air a dheanamh aithnichte.

³ a dh'istich, a sguir. ⁴ luchd-amhairc thairis.

⁵ a bhios maith ann an sùilbhan an rìgh. Eabh.

⁶ thog.

⁷ fuidh chùram, ann an coimhead.

⁸ gach neach.

⁹ car, seal.

(*is* e sin mìos Thebeit.) agus an t-seachd-amh bliadhna d'a rìoghachadh.

17 Agus ghràdhaich an rìgh Ester os ceann nam ban uile, agus fhuair i geann-maith agus caomhneas 'na làthair os ceann nan òighean uile; agus chuir e an crùn rìoghail air a ceann, agus rinn e 'na ban-rìghinn i an àite Bhasti.

18 An sin rinn an rìgh fleadh mòr d'a uachdaranaihb uile agus d'a sheirbhisich, fleadh Ester; agus thug e saorsa do na mòr-roinibh, agus thug e seachad tìodhlacan, mar bu chubhaidh do'n rìgh.

19 Agus an uair a chruinnicheadh na h-òighean an dara uair, an sin shuidh Mordecai ann an geata an rìgh.

20 Cha d'innis Ester *fathast* a luchd-dàimh, no a sluagh, mar a dh'àithn Mordecai dhi; oir rinn Ester iartus Mhordecai, mar a rinn i 'nuair a dh'àraicheadh i maille ris.

21 Anns na làithibh sin, an uair a bha Mordecai 'na shuidhe ann an geata an rìgh, bha fearg air Bigtan agus Teres, dithis do chailteanaich an rìgh, dhiubhsan a bha coimhead an doruis, agus dh'iarr iad làmh a chur anns an rìgh Ahasuerus.

22 Agus fhuair Mordecai fios air an ni sin, agus dh'innis se e do Ester a' bhan-rìghinn; agus dh'innis Ester e do'n rìgh ann an ainm Mhordecai.

23 Agus rannsaicheadh an ni, agus fhuaradh mach e, agus chrochadh suas iad le chéile air crann: agus sgrìobhadh e ann an leabhar nan eachdraidh am fianuis an rìgh.

CAIB. III.

1 Dh'ardaich Ahasuerus Haman, agus thug a sheirbhisich uile urram da, ach Mordecai an t-Iudhach 'na aonar: 5 Air an aobhar sin dh'iarr Haman na h-Iudhaich gu léir a sgrìos.

AN déigh nan nìthe sinn rinn an rìgh Ahasuerus Haman, mac Hamedata an Agagaich, 'na dhuine mòr, agus dh'ardaich se e, agus chuir e 'àite-suidhe os ceann nan uachdaran uile a bha maille ris.

2 Agus chrom na seirbhisich uile a bha ann an geata an rìgh iad féin, agus thug iad urram do Haman, oir dh'àithn an rìgh mar sin d'a thaobh; ach cha do chrom Mordecai e féin, agus cha d'thug e urram dha.

3 Agus thubhairt seirbhisich an rìgh, a bha ann an geata an rìgh, ri Mordecai, C'ar son a tha thu a' briseadh àithne an rìgh?

4 Agus an uair a labhair iad ris la'n déigh là, agus nach d'éisd e riu, an sin dh'innis iad e do Haman, a dh'fheuchainn an seasadh briathra Mhordecai; oir dh'innis e dhoibh gu'm b'Iudhach e.

5 Agus chunnaic Haman nach do chrom Mordecai e féin, agus nach d'thug e urram dha, agus bha Haman làn feirge.

6 Agus cha b'fhiù leis làimh a chur ann am Mordecai 'na aonar, oir nochd iad da sluagh Mhordecai; uime sin dh'iarr Haman na h-Iudhaich uile sgrìos a bha ann an uile rìoghachd Ahasueruis, sluagh Mhordecai.

7 Anns a' cheud mhìos, (*is* e sin mìos Nisain) anns an dara bliadhna deug do rìgh Ahasuerus, thilgeadh¹ Pur, is e *sin* an crannchur, an làthair Hamain, o là gu là, agus o mhìos gu mìos, agus an dara mìos deug, *is* e sin mìos Adair.

8 Agus thubhairt Haman ri rìgh Ahasuerus, Tha sluagh àraidh ann air an sgaroileadh agus air an roinn an measg an t-sluaigh ann an uile mhòr-roinnibh do rìoghachd, agus *tha* laghanna air leth aca seach gach sluagh, agus cha 'n'eil iad a' coimhead laghanna an rìgh; uime sin cha 'n'eil e air son leas an rìgh am fulang.

9 Ma's toil leis an rìgh, sgrìobhar gu'm bi iad air an sgrìos, agus iocaidh mise deich mìle tàlann airgid d'an làimh-san a ni an gnothuch², chum a thabhairt do ionmhasaibh an rìgh,

10 Agus thug an rìgh 'fhàinne bhàrr a làimhe, agus thug se e do Haman, mac Hamedata an Agagaich, namhaid nan Iudhach.

11 Agus thubhairt an rìgh ri Haman, *Tha'n* t-airgid air a thabhairt duit, agus an sluagh, a dheanamh riu mar *is* àill leat.

12 Agus ghairmeadh sgrìobhaichean an rìgh air an treas là deug do'n cheud mhìos agus sgrìobhadh, a réir gach ni a dh'àitlin Haman, chum àrd-riaghlairan an rìgh, agus a chum nan uachdaran a bha os ceann gach mòr-roinne, agus a chum cheann-feadhna³ gach sluaigh, *chum* gach mòr-roinne a réir an sgrìobhaidh, agus a *chum* gach sluaigh a réir an càinain: ann an ainm an rìgh Ahasueruis sgrìobhadh e, agus sheulaicheadh e le fàinne an rìgh.

13 Agus chuireadh na litrichean le làimh ghillean-ruithe gu uile mhòr-roinnibh an rìgh, a sgrìos, a mharbhadh, agus a chur as do na h-Iudhaich uile, eadar òg agus shean, chloinn bhig agus mhnaibh, ann an aon là, air an treas là deug do'n dara mìos deug, (*is* e sin mìos Adair,) agus am feudail⁴ a thogail mar chreigh.

14 B'e dùblachadh an sgrìobhaidh, Gu'n tugta àithne seachad anns gach mòr-roinn, air a foillseachadh do gach sluagh, iad a bhi deas fa chomhair an là sin.

15 Chaidh na gillean-ruithe a mach, air an gcasadh le h-àithne an rìgh; agus thugadh an t-ordugh seachad ann an Su-

¹ thilg c. ² do làimh an luchd-ghnothuiche.

³ cheannard.

⁴ am macin.

sau an luchairt: agus shuidh an rìgh agus Haman sìos a dh'òl; acli bha'm baile Susan fo amhladh¹.

CAIB. IV.

1 Rinn Mordecai agus na h-Iudhaich bròn air son àithne an rìgh d'an taobh. 4 Thugadh fios do Ester air an nì so, agus chomhairlicheadh dhi eadar-ghuidhe a dheanamh air son nan Iudhaich. 15 Ghairm i trasgadh.

AN uair a dh'àithnich Mordecai gach nì a rinneadh, reub e² eudaich, agus chuir e saic-eudaich air agus luaithe, agus ehaidh e mach gu meadhon a' bhaile, agus ghlaodh e le glaoth àrd agus searbh.

2 Agus thàinig e eadhon fa ehomhair geata an rìgh: oir eha'n fheudadh neach air bith dol a stigh do gheata an rìgh le saic-eudach air.

3 Agus anns gach uile mhòr-roinn d'an d'thàinig focal an rìgh agus 'ordugh, bha bròn mòr am measg nan Iudhaich, agus trasgadh, agus gul, agus eaoidh; agus luidh mòran ann an saic-eudach agus an luaithe.

4 Agus thàinig maighdeanan Ester agus a caillteanaich, agus dh'innis iad sin di. Agus bha a' bhan-rìghinn ro dhoilgheasach, agus chuir i eudaich gu bhì air a ehur air Mordecai, agus gu'n tugta 'eudach-saice dheth: aeh eha ghabhadh esane.

5 An sin ghoir Ester air Hatach, aon do chailteanaich an rìgh, d'an d'orduigh e feitheamh oirre, agus thug i àithne dha gu Mordecai, gu'm faigheadh e fios ciod e so, agus e'ar son so.

6 Agus ehaidh Hatach a mach a dh'ionnsuidh Mhordecai, gu sràid a' bhaile, a bha fa ehomhair geata an rìgh.

7 Agus dh'innis Mordecai dha gach nì a thachair dha, agus an t-suim airgid a gheall Haman a thomhas a stigh do ionmhasaibh an rìgh air son³ nan Iudhaich, chum an sgrios.

8 Agus thug e dha dùblaehadh sgrìobhaidh an orduigh, a thugadh ann an Susan agus an sgrios, chum 'fheuchainn do Ester, agus a ehur an cèill di, agus a dh'àithneadh dhi gu'n rachadh i stigh a dh'ionnsuidh an rìgh, a dh'aslachadh air, agus a ghuidheadh air⁴ as leth a sluagh.

9 Agus thàinig Hatach, agus dh'innis e do Ester briathra Mhordecai.

10 Agus labhair Ester ri Hatach, agus thug i àithne dha gu Mordecai:

11 Tha fios aig seirbhisich an rìgh uile, agus aig sluagh mhòr-roinnean an rìgh, ge b'e air bith fear no bean a thèid a steach a dh'ionnsuidh an rìgh do'n ehùirt a's faide a stigh, air naeh goirear, gu bheil aon lagh aige a ehur gu bàs, ach a mhàin esan d'an sin an rìgh a mach a shlat-òir rioghail, a ehum gu'm bi e beò; aeh eha

do ghoireadh ormsa teachd a steach a dh'ionnsuidh an rìgh na deich latha fìthead so.

12 Agus dh'innis iad do Mhordecai briathran Ester.

13 Agus dh'àithn Mordecai freagradh a thoirt do Ester, Na smuainieh agad fèin gu'n téid thu as ann an tigh an rìgh nì's mò na na h-Iudhaich uile:

14 Oir ma bhitheas tusa gu tur a'd' thosd san àm so, thig lasachadh agus saorsa do na h-Iudhaich o àit eile; ach sgriosar thusa agus tigh t'athar: agus eò aig am bheil fios naeh ann air son a leithid so do àm a thàinig thu do'n rioghaehd⁵?

15 An sin dh'farr Ester am freagradh so a thoirt do Mhordecai;

16 Falbh, cruinnich r'a ehéile na h-Iudhaich uile a gheibhear ann an Susan, agus traisgibh air mo shon-sa, agus na h-ithibh agus na h-òlaibh rè thri làithean, a là no dh'oidhehe: traisgidh mise agus mo mhaighdeanan air an dòigh eheudna; agus an sin thèid mi a stigh a gh'ionnsuidh an rìgh, nì naeh 'eil a réir an lagha; agus mar sin ma bhàsaicheas mi, bàsaicheam.

17 Agus dh'imieh Mordecai, agus rinn e a réir gach nì a dh'àithn Ester dha.

CAIB. V.

1 Fhuair Ester deadh-ghean an sealladh an rìgh.

4 Thug i cuireadh do'n rìgh agus do Haman a dh'ionnsuidh fleadha. 9 Bha Haman làn feirge an aghaidh Mhordecai. 14 Le comhairle a mhná agus a chairdean rinn e croich air a shon.

ANIS air an treas là chuir Ester oirre a leulaidh⁴ rioghail, agus sheas i anns a' chùirt a b'fhaide steach do thigh an rìgh, fa ehomhair tighe an rìgh: agus bha'n rìgh 'na shuidhe air a rìgh-ehaithir anns an tigh rioghail, fa chomhair geata an tighe.

2 Agus an uair a ehunnaic an rìgh Ester a' bhan-rìghinn 'na seasamh anns a' chùirt, fhuair i deadh-ghean 'na shealladh: agus shìn an rìgh a mach gu Ester an t-slat-òir rioghail a bha 'na làimh; agus thàinig Ester am fagus, agus bhean i ri bàrr na slaithe.

3 An sin thubhairt an rìgh rìthe, Ciod a's àill leat, a bhan-rìghinn Ester? agus eiod e t'farrtus? gu ruig leth na riogh-aeht bheirar dhuit e.

4 Agus fhreagair Ester, Ma's maith leis an rìgh, thigeadh an rìgh agus Haman an diugh a dh'ionnsuidh na fleadha a dheasaich mi dha.

5 Agus thubhairt an rìgh, Greasaibh Haman a dheanamh mar a thubhairt Ester. Agus thàinig an rìgh agus Haman a dh'ionnsuidh na fleadha a dheasaich Ester.

6 Agus thubhairt an rìgh ri Ester aig

¹ ioncheist. ² Mordecai, Eabh. ³ an aghaidh.

⁴ 'na làthair.

⁵ inbhe rioghail.

fleadh an fhìona, Cìod i t'athchuinge? agus bheirear dhuit i: agus cìod e t'iarrtus? agus gu ruig leth na rìoghachd nìthear e.

7 Agus fhreagair Ester, agus thubhairt i, Is i m'athchuinge agus m'iarrtus;

8 Ma fhuair mì deadh-ghean ann an sealladh an rìgh, agus ma's maith leis an rìgh m'athchuinge a dheònachadh, agus m' iarrtus a dheanamh, thigeadh an rìgh agus Haman a dh'ionnsuidh na fleadh a dheasaicheas mì dhoibh, agus am màir-each ni mì a réir focail an rìgh.

9 Agus chaidh Haman a mach air an là sin aoibhneach agus subhach 'na chridhe: ach an uair a chunnaic Haman Mordecai ann an geata an rìgh, agus nach d'éirich e, agus nach do charuich e air a shon, bha e¹ làn feirge an aghaidh Mhordecai.

10 Gidheadh chum Haman air féin, agus chaidh e dhachaidh; agus chuir e fios uaith, agus thug e air a chairdibh teachd d'a ionnsuidh, agus air Seres a mhnai.

11 Agus chuir Haman an céill doibh mòralachd a bheartais, agus lionmhoir-eachd a mhac, agus gach ni leis an d'rinn an rìgh mòr e, agus mar a dh'ardaich se e os ceann nan uachdaran agus sheirbhis-each an rìgh.

12 Thubhairt Haman mar an ceudna, Os bàrr, cha d'thug Ester a' bhan-rìghinn duine air bith a stigh maille ris an rìgh a dh'ionnsuidh na fleadh a dheasaich i, acli mì féin; agus mar an ceudna am màireach, tha mì air mo chuireadh leatha maille ris an rìgh.

13 Gidheadh cha dean so uile a bheag do mhaith dhomh, am feadh a chi mi Mordecai an t-Iudhach 'na shuidhe ann an geata an rìgh.

14 Agus thubhairt Seres a bhean ris, agus a chairdean uile, Deanar croich leth-cheud làmh-choille air àirde, agus anns a' mhaduinn labhair ris an rìgh gu'n crochar Mordecai oirre; agus gabh a steach maille ris an rìgh dh'ionnsuidh na fleadh gu subhach. Agus thaitinn an nì ri Haman, agus thug e fa'near a' chroich a bhi air a deanamh.

CAIB. VI.

1 Smuainich Ahasuerus air urram a chur air Mordecai a chionn gu'n d'innis e air Bigtana agus air Teres: 10 Shìonaicheadh Haman gu so a dheanamh. 13 Roimh-innis a chairdean do Haman gu'n tuiteadh e roimh Mhordecai.

AIR an oidhche sin theich codal an rìgh uaith; agus dh'iarr e leabhar-cuimhne nan eachdraidh lathail a bhi air a thabhadh

air d'a ionnsuidh; agus leughadh iad am fianuis an rìgh.

2 Agus fhuaradh sgrìobhta, gu'n d'innis Mordecai air Bigtana² agus air Teres, dithis do chaillteanaich an rìgh, dhiubhsan a bha coimhead an doruis, a dh'iarr làmh a chur ann an rìgh Ahasuerus.

3 Agus thubhairt an rìgh, Cìod an t-urram agus an inbhe a thugadh do Mhordecai air son so? Agus thubhairt òglaich an rìgh a fhritheil dha, Cha d'rinneadh ni air bith air a shon.

4 Agus thubhairt an rìgh, Cò a tha sa' chùirt? (a nis bha Haman air teachd do chùirt tighe an rìgh a b'fhaide a mach, a labhairt ris an rìgh, gu'm biodh Mordecai air a chrochadh air a' chroich a dheasaich e dha;)

5 Agus thubhairt òglaich an rìgh ris, Feuch, tha Haman 'na sheasamh anns a' chùirt. Agus thubhairt an rìgh, Thigeadh e stigh.

6 Agus thàinig Haman a stigh; agus thubhairt an rìgh ris, Cìod a nìthear do'n duine air an toil leis an rìgh urram a chur? (A nis thubhairt³ Haman 'na chridhe, Cò air an toil leis an rìgh urram a chur ni's mò na orm féin?)

7 Agus fhreagair Haman an rìgh, Air son an duine air an toil leis an rìgh urram a chur,

8 Thugar a làthair a' chulaidh⁴ rìoghail a chuireas an rìgh air, agus an t-each air am marcaich an rìgh, agus an crùn rìoghail a chuirear air a cheann: .

9 Agus thugar a' chulaidh agus an t-each do làimh aoin do uachdaranaihb ro urramach an rìgh, agus sgeadaicheadh iad an duine air an toil leis an rìgh urram a chur, agus thugadh iad air marcachd air an each air sràid a' bhaile mhòir⁵, agus gairmeadh iad roimhe, Mar so nìthear do'n duine air an toil leis an rìgh urram a chur.

10 Agus thubhairt an rìgh ri Haman, Greas⁶ ort, gabh a' chulaidh agus an t-each mar a thubhairt thu, agus dean mar sin do Mhordecai an t-Iudhach, a tha 'na shuidhe ann an geata an rìgh: na dearmaid ni air bith do na thubhairt thu.

11 An sin ghabh Haman a' chulaidh agus an t-each, agus sgeadaich e Mordecai, agus thug e air marcachd air an each air sràid a' bhaile mhòir, agus ghairm e roimhe, Mar so nìthear do'n duine air an toil leis an rìgh urram a chur.

12 Agus phill Mordecai gu geata an rìgh: ach ghreas Haman d'a thigh féin ri bròn, agus a cheann còmhdaichte⁷.

13 Agus dh'innis Haman do Sheres a

¹ Haman.

² Bigtan. Caib. II. r. 21.

³ smuainich,

⁴ an trugsan, deise.

⁵ tre shràid na càithreach.

⁶ Luathaich.

⁷ folach air a cheann.

bhean, agus d'a chairdibh uile gach *ni* a thachair dha. Agus thubhairt a dhaoine glìce agus Seres a bhean ris, Ma's ann do sliochd nan Iudhach Mordecai, roimh an do thòisich thu air tuiteam, cha bhuadh-aich thu 'na aghaidh, ach gun teagamh tuitidh tu roimhe.

14 An uair a bha iad fathast a' labhairt ris, thàinig caillteanaich an rìgh, agus rium iad deifir gu Haman a thabhairt a dh'ionnsuidh na fleadh a dheasaich Ester.

CAIB. VII.

1 *Aig an fhleadh dh'ìarr Ester air an rìgh gu'n tearnadh e i fèin agus a sluagh o ais-innleachd Hamain. 7 Bha fearg air an rìgh ri Haman, agus dh'orduich e a chur gu bàs.*

AGUS thàinig an rìgh agus Haman chum na fleadh maille ri Ester a' bhan-rìghinn¹.

2 Agus thubhairt an rìgh ri Ester mar an ceudna air an dara là aig fleadh an fhìona, Ciod i t'athchuinge, a bhan-rìghinn Ester? agus bheirear dhuit i: agus ciod e t'ìarrtus? agus gu ruig leth na rìoghachd nithear e.

3 Agus fhreagair Ester a' bhan-rìghinn, agus thubhairt i, Ma fhuair mi deadh-ghean a'd' shùilb, a rìgh, agus ma's maith leis an rìgh, thugar dhomh m'anam air m' athchuinge, agus mo shluagh air m'ìarrtus:

4 Oir reiceadh sinn, mise agus mo shluagh, gu bli air a ditheachadh², air ar marbhadh, agus air a léir-sgrìos: ach nam b'ann mar thràillibh agus mar bhan-tràillibh a reiceadh sinn, bhithinn a'm' thosd, ged nach b'urrainn an nàmhaid call³ an rìgh a dheanamh suas.

5 Agus fhreagair rìgh Ahasuerus, agus thubhairt a ri Ester a' bhan-rìghinn, Cò e so? agus c'ait am bheil esan, aig an robh a dhànadas 'na chridhe deanamh mar sin?

6 Agus thubhairt Ester, Is e'n t-eascaraid agus an nàmhaid Haman an droch dhume so. Agus bha eagal air Haman an làthair an rìgh agus na ban-rìghinn.

7 Agus dh'èirich an rìgh 'na fheirg o fhleadh an fhìona agus chaidh e do lios na lùchairt⁴; agus sheas Haman gu 'anam a ghuidhe o Ester a' bhan-rìghinn; oir chunnaic e gu'n do shònraicheadh olc 'na aghaidh leis an rìgh.

8 Agus phill an rìgh o lios na lùchairt gu tigh fleadh an fhìona; agus bha Haman air tuiteam air an leabaidh air an robh Ester, Agus thubhairt an rìgh, An éignich e a' bhan-rìghinn mar an ceudna a'm' làthair ann am thigh? An uair a chaidh am focal á beul an rìgh, chòmh-

daich iad aghaidh Hamain.

9 Agus thubhairt Harbonah, aon do na caillteanaich, an làthair an rìgh, Feuch, *tha* mar an ceudna a' chroich a rinn Haman do Mhordecai, a labhair maith air son an rìgh, 'na seasamh ann an tigh Hamain, leth-cheud làmh-choille air àrde. Agus thubhairt an rìgh, Crochaibh e oirre.

10 Agus chroch iad Haman air a' chroich a dheasaich e do Mhordecai. Agus thraough fearg an rìgh.

CAIB. VIII.

1 *Dh'ardaich Ahasuerus Mordecai os ceann tìghe Hamain. 3 Thugadh comas do Ester na litrichean a sgrìobh Haman an aghaidh nan Iudhach a ghairm air an ais. 15 Inbhe Mhordecai.*

AIR an là sin thug an rìgh Ahasuerus tigh Hamain, eascaraid nan Iudhach, do Ester a' bhan-rìghinn; agus thàinig Mordecai an làthair an rìgh: oir dh'innis Ester ciod e dhi⁵.

2 Agus thug an rìgh dheth 'fhàinne a thug e o Haman, agus thug se e do Mhordecai. Agus chuir Ester Mordecai os ceann tìghe Hamain.

3 Agus labhair Ester a ris an làthair an rìgh, agus thuit i sìos aig a chosaibh, agus ghul i, agus ghuidh i air gu'n cuir-eadh e air falbh olc Hamain an Agagaich, agus 'ais-innleachd a dhealbhadh e⁶ an aghaidh nan Iudhach.

4 Agus shìn an rìgh a mach an t-slat-òir rìoghail gu h-Ester. Agus dh'èirich Ester, agus sheas i an làthair an rìgh.

5 Agus thubhairt i, Ma's maith leis an rìgh, agus ma fhuair mise deadh-ghean 'na làthair, agus ma *ta* an ni ceart am fianuis an rìgh, agus ma *ta* mi taitneach 'na shùilb, sgrìobhar a ghairm air an ais nan litrichean a dhealbhadh le Haman mac Hamedata an Agagaich, a sgrìobh e chum na h-Iudhaich a *ta* ann an uile mhòr-roinnibh an rìgh a sgrìos.

6 Oir cionnus is urrainn mi amharc air an olc a thig air mo shluagh? agus cionnus is urrainn mi amharc air sgrìos mo luchd-dàimh?

7 An sin thubhairt an rìgh Ahasuerus ri Ester a' bhan-rìghinn, agus ri Mordecai an t-Iudhach, Feuch, tigh Hamain thug mi do Ester, agus esan chroch iad air a' chroich, a chionn gu'n do chuir e a làmh anns na h-Iudhaich.

8 Sgrìobhaibh-se mar an ceudna air son nan Iudhach, mar is maith leibh, ann an ainm an rìgh, agus seulaichibh le fàinne an rìgh: oir an sgrìobhadh a sgrìobhar ann an ainm an rìgh, agus a sheulaichear le fàinne an rìgh, cha 'n fheadar a chur air ais.

9 Uime sin ghairmeadh sgrìobhaichean

¹ bhan-rì'n.

² milleadh, sgrìos.

³ calldach.

⁴ do lios an tìghe, do'n lios a

b'fhaide stigh.

⁵ mar a bha e dhi.

⁶ a dhroch smuainte a smuainich e.

an riagh air an àm sin anns an treas mìos, (is e sin mìos Shìbhain,) air an treas là fichead dhìeth; agus sgrìobhadh, a réir gach ní a dh'àithn Mordecai, chum nan Iudhach, agus a chum nan àrd-riaghlair¹, agus nan ceannard agus uachdaran nam mòr-roinn² a tha o India gu h-Etiopia, ceud fichead agus seachd mòr-roinn chum gach mòr-roinne a réir an sgrìobhaidh, agus a chum gach sluagh a réir an càin³, agus a chum nan Iudhach a réir an sgrìobhaidh, agus a réir an càinain.

10 Agus sgrìobh e ann an ainm an rìgh Ahasueruis, agus sheulaich e le fàinne an rìgh, agus chuir e litrichean le làimh theachdairean⁴ air eachaibh, a' marcachd air eachaibh luatha, agus air muileidibh, mic nan cabull⁵.

11 Anns an d'thug an rìgh cead do na h-Iudhaich, a bha anns gach baile, cruinn-eachadh an ceann a chèile, agus seasamh air son an anama, a sgrìos, a mharbhadh, agus a chur as do uile neart sluagh agus mòr-roinne a thigeadh 'nan aghaidh⁶, aràon an clann bheag agus am mnà, agus an creach a thogail,

12 Air aon là ann an uile mhòr-roinnibh an rìgh Ahasueruis, air an treas là deug do'n dara mìos deug, (is e sin mìos Adair.)

13 B'e dùblachadh an sgrìobhaidh, Gu'n tugta àithne seachad anns gach mòr-roinn, air a foillseachadh do gach sluagh, gu'm biodh na h-Iudhaich deas air an là sin gu'n dìoladh féin⁷ air an naimhdibh.

14 Chaidh na teachdairean⁸ a mach, a' marcachd air eachaibh luatha, [agus] air muileidibh⁹, le cabhaig, agus iad air an greasadh le àithne an rìgh: agus thugadh an t-ordugh seachad ann an Susan an lùchairt.

15 Agus chaidh Mordecai mach á làth-air an rìgh ann an eudach rioghail do ghorm agus do gheal, agus le crùn mòr òir, agus le trusgan do anart grinn agus do choreur: agus rinn baile Shusain gairdeachas, agus bha e aoibhinn.

16 Aig na h-Iudhaich bha solus, agus aoibhneas, agus gairdeachas, agus urram.

17 Agus anns gach mòr-roinn, agus anns gach baile, ge b'e àit d'an d'thàinig àithne an rìgh agus 'ordugh, bha aoibhneas agus gairdeachas aig na h-Iudhaich, cuirm, agus là maith. Agus dh'fhàs mòran do shluagh na tìre 'nan Iudhaich; oir thuit cagal nan Iudhach orra.

CAIB. IX.

- 1 Le còmhnaidh nan uachdaran mharbh na h-Iudhaich an naimhdean, agus chroch iad mic Hamain.
20 Shuidhich Mordecai an ceathramh agus an

càigeadh là deug do mhìos Adair gu bhì 'nan làithibh-féille do na h-Iudhaich.

A NIS anns an dara mìos deug, (is e sin mìos Adair,) air an treas là deug do'n mhìos, air an robh àithne an rìgh agus 'ordugh gu bhì air an còimhlionadh, air an là anns an robh dùil aig naimhdibh nan Iudhach cumhachd fhaghail os an ceann, (ged thachair, air a' chaochladh, gu'n robh aig na h-Iudhaich cumhachd os an ceann-san a dh'fhuathaich iad.)

2 Chruinnich na h-Iudhaich iad féin an ceann a chèile 'nam bailtibh, ann an uile mhòr-roinnibh an rìgh Ahasueruis, gu làmh a chur annta-san a dh'ìarr an cron; agus cha b'urrainn duine air bith seasamh 'nan aghaidh, oir thuit an eagal air gach uile shluagh.

3 Agus thug uile uachdarana nam mòr-roinn agus na h-àrd riaghlairan, agus na ceannardan, agus iadsan a rinn gnòthuichean an rìgh, urram do na h-Iudhaich¹⁰; oir thuit eagal Mhordecai orra:

4 Oir bha Mordecai mòr ann an tìgh an rìgh, agus chaidh 'iomradh a mach air feadh nam mòr-roinn uile; oir dh'fhàs an duine so Mordecai ni bu mhò agus ni bu mhò.

5 Agus bhuail na h-Iudhaich an naimhdean uile le buille a' chlaidheimh, agus àir, agus sgrios; agus rinn iad mar bu mhiann leo orrasan a dh'fhuathaich iad.

6 Agus ann an Susan an lùchairt mharbh na h-Iudhaich, agus sgrìos iad cùig ceud fear.

7 Agus Parsandata, agus Dalphon, agus Aspata,

8 Agus Porata, agus Adalia, agus Aridata,

9 Agus Parmasta, agus Arisai, agus Aridai, agus Bhaiesata,

10 Deich mic Hamain mhic Hamedata, nàmhaid nan Iudhach, mharbh iad: ach air a' chreich clia do chuir iad an làmh.

11 Air an là sin thugadh àireamh na muinntir a mharbhadh ann an Susan an lùchairt an làthair an rìgh.

12 Agus thubhairt an rìgh ri Ester a' bhan-rìghinn, Mharbh na h-Iudhaich agus sgrìos iad cùig ceud fear ann an Susan an lùchairt, agus deich mic Hamain: agus anns a' chuid eile do mhòr-roinnibh an rìgh ciod a rinn iad? ach ciod i t'ath-chuinge? agus bheirear dhuit i: agus ciod a t'ìarrtus os bàrr? agus nithear e.

13 Agus thubhairt Ester, Ma's maith leis an rìgh, thugar comas do na h-Iudhaich a tha ann an Susan, deanamh mar an ceudna am màireach a réir orduigh an là'n dùgh, agus crochar deich mic Hamain air a' chroich.

¹ fear-àite an rìgh.

² mòr-earrann.

³ cainnte.

⁴ ghillean-ruithe, phost.

⁵ agus marcaich air muileidibh, càmhalairb, agus dromedairibh òga.

⁶ a bheireadh ionnsuidh orra.

⁷ gu dìoghaltas a dheanamh.

⁸ ghillean-ruithe.

⁹ air muileidibh agus càmhalairb.

¹⁰ dh'ardaich iad, chuidich iad leis na h-Iudhaich.

14 Agus dh'àlthn an rìgh a dheanamh marsin; agus thugadh an t-ordugh ann an Susan; agus chroch iad deich mic Hamain.

15 Agus chruinnic na h-Iudhaich a *bha* ann an Susan an ceann a chèile mar an ceudna air a' cheathramh là deug do mhìos Adair, agus mharbh iad ann an Susan trì cheud fear; ach air a' chreigh cha do chuir iad an làmh.

16 Agus chruinnic a' chuid eile do na h-Iudhaich a *bha* ann am mòr-roinnibh an rìgh an ceann a chèile, agus sheas iad air son an anama, agus bha fois aca o'n naimhdebh, agus mharbh iad d'an eas-cairdibh cuig-deug agus trì fichead mìle; ach air a' chreigh cha do chuir iad an làmh.

17 Air an treas là deug do mhìos Adair *rinn iad mar so*; agus bha fois aca air a' cheathramh là deug do'n *mhìos* cheudna, agus rinn iad e 'na là cuirme agus aoibhneis.

18 Ach chruinnic na h-Iudhaich a *bha* ann an Susan iad fèin an ceann a chèile air an treas là deug, agus air a' cheathramh là deug do'n *mhìos*; agus bha fois aca air a' chuigeadh là deug do'n *mhìos* cheudna, agus rinn iad e 'na là cuirme agus aoibhneis.

19 Uime sin rinn Iudhaich nam bailte beaga, a bha 'nan còmhnuidh ann am bailtibh nam mòr-roinn¹, an ceathramh là deug do mhìos Adair *'na là* aoibhneis, agus cuirme, agus 'na là maith, agus a chur chuibhrionn a chum a chèile.

20 Agus sgrìobh Mordecai na nithe so, agus chuir e litriche chum nan Iudhach uile a *bha* ann an uile mhòr-roinnibh an rìgh Ahasueruis, am fad 's am fagus;

21 Chum a shuidheachadh nam measg, gu'n cumadh iad an ceathramh là deug do mhìos Adair, agus an cuigeadh là deug dheth gach bliadhna,

22 A réir nan làithean anns an d'fhuair na h-Iudhaich fois o'n naimhdebh, agus a' mhìos a dh'iompaicheadh dhoibh o thuirse gu h-aoibhneas, agus o bhròn gu h-àm² maith; gu'n deanadh siad iad 'nan làithibh cuirme, agus aoibhneis, agus a chur chuibhrionn chum a chèile, agus thiodhlacan chum nam bochd.

23 Agus ghabh na h-Iudhaich os làimh deanamh mar a thòisich iad, agus mar a sgrìobh Mordecai d'an ionnsuidh;

24 A chionn gu'n do smuainich³ Haman, mac Hamedata an Agagach, nàmhaid nan Iudhach uile, an aghaidh nan Iudhach chum an sgrìos, agus gu'n do thilg e Pur, (is e sin, crannchur,) chum

an ditheachadh agus an sgrìos.

25 Ach an uair a thàinig [Ester] an làthair an rìgh, dh'orduich e le litir, gu'm pilleadh 'ais-innleachd donadh⁴ a dhealbha e an aghaidh nan Iudhach air a cheann fèin, agus gu'm biodh esan agus a mhic air an crochadh air a' chroich.

26 Uime sin dh'ainmic iad na làithean sin Purim, a réir ainme Phuir: Air an aobhar sin, air son uile bhriathar na litriche sin, agus na chunnaic iad a thaobh an nì so, agus na thachair dhoibh,

27 Shuidhich⁵ na h-Iudhaich, agus ghabh iad orra fèin, agus air an sliochd, agus orra-san uile a leanadh riu, air chor as nach rachta thairis air, gu'n cumadh iad an dà là sin a réir an sgrìobhaidh, agus a réir an àm, anns gach bliadhna:

28 Agus *gu'm biodh* na làithean sin air an cuimheachadh, agus air an cumail air feadh gach àil, gach teaghlaich, gach mòr-roinne, agus gach baile; agus nach leigte sios⁶ na làithean sin Phurim am measg nan Iudhach, agus nach rachadh as d'an cuimhe o'n sliochd.

29 Agus sgrìobh a' bhan-rìghinn Ester nighean Abihail, agus Mordecai an t-Iudhach, leis an uile ùghdarras, a dhaingneachadh na dara litreach so Phurim.

30 Agus chuir e litriche chum nan Iudhach uile, chum a' cheud agus nan seachd mòr-roinn fhichead do rìghlachd Ahasueruis, le briathraibh sìth agus firinn,

31 A dhaingneachadh làithean sin Phurim 'nan amanaibh, mar a shuidhich Mordecai an t-Iudhach agus Ester a' bhan-rìghinn d'an taobh, agus mar a dh'orduich iad air an son fèin, agus air son an sliochd nithe nan trasgadh agus an éighich.

32 Agus dhaingnich ordugh Esteir nithe Phurim sin; agus sgrìobhadh e ann an leabhar.

CAIB. X.

1 Mòrachd agus cumhachd Ahasueruis. 3 Dh'iarr Mordecai maith d'a shluagh.

A GUS chuir an rìgh Ahasuerus cìs air an tìr, agus air eileanaibh na mara.

2 Agus uile ghnìomharan a thréine agus a chumhachd, agus foillseachadh mòrachd Mhordecai chum an⁷ d'ardaich an rìgh e, nach 'eil iad sgrìobhta ann an leabhar eachdraidh rìghrean Mhedia agus Persia?

3 Oir b'e Mordecai an t-Iudhach a b'fhaigse do rìgh Ahasuerus; agus bha e mòr am measg nan Iudhach, agus taitneach do mhòr-chuideachd a bhràithrean, ag iarraidh maith⁸ d'a shluagh, agus a' labhairt sìth r'a sliochd uile.

¹ anns na bailtibh gu bhallachaibh.

² là. Eabh. ³ thùr.

⁴ an t-aimhleis, a dhroch smuaintè.

⁵ dh'orduich.

⁶ rachar thairis air.

⁷ leis an. ⁸ soirbheis, beartais.

CAIB. I.

1 *Ionracas, teaghlach, agus maoin Iob.* 6 *Rinn Satan casaid blèrte 'na aghaidh.* 13 *Dh'innseadh do Iob gu'n d'thugadh a mhaoin air falbh, agus gu'n d'fhuair a chlann bàs.* 20 *'Na theanntachd bheannaich e Dia.*

BHA duine ann an tìr Uis d'am b'ainm Iob; agus bha'n duine sin coimhlionta¹ agus dìreach², agus 'na neach air an robh eagal Dé, agus a sheachainn olc.

2 Agus rugadh dha seachd mic, agus trì nigheanan.

3 Agus b'i a mhaoin³ seachd mìle caora, agus trì mìle càmh, agus cùig ceud cuing dhamh, agus cùig ceud asal bhoirionn⁴, agus teaghlach ro mhòr: agus bha 'n duine sin mòr os ceann uile dhaoine na h-àirde 'n ear.

4 Agus chaidh a mhic agus rinn iad cuirm aig an tigh, gach fear air a là féin; agus chuir iad *fios*, agus thug iad cuire d'an trì peathraichibh a dh'itheadh agus a dh'òl maille ri u.

5 Agus an uair a chaidh làithean na cuirme mu'n cuairt, chuir Iob *fios orra*, agus naomhaich e iad; agus dh'éirich e moch sa' mhaduinn, agus dh'ìobair e iobairt-loisgte a rèir an àireimh uile: oir thubhairt Iob, Theagamh gu'n do pheacaich mo mhic, agus gu'n do mhallaich iad Dia 'nan cridhe. Mar so rinn Iob gach là.

6 A nis bha là air an d'thàinig mic Dhé gu seasa mh an làthair an Tighearn; agus thàinig mar an ceudna Satan 'nam measg.

7 Agus thubhairt an Tighearna ri Satan, Cia as a thàinig thu? Agus fhreagair Satan an Tighearn, agus thubhairt e, O imeachd mu'n cuairt air an talamh, agus o shiubhal sìos agus suas air.

8 Agus thubhairt an Tighearna ri Satan, An d'thug thu fa' near m'òglach Iob, nach 'eil neach ann cosmhuil ris air an talamh, duine coimhlionta agus dìreach, air am bheil eagal Dé, agus a' seachnadh uile?

9 Agus fhreagair Satan an Tighearn, agus thubhairt e, An ann a nasgaidh a tha eagal Dhé air Iob?

10 Nach do chuir thu gàradh mu'n cuairt air féin, agus mu'n cuairt air a thigh, agus mu'n cuairt air gach *ni* a ta aige air gach taobh? Obair alàmh bheannaich thu, agus dh'fhàs a mhaoin mòr san tìr:

11 Ach cuir a nis a mach do làmh, agus bean ris gach *ni* a ta aige, agus as an eudan mallaichidh e thu.

12 Agus thubhairt an Tighearna ri Satan, Feuch, *tha* gach *ni* a ta aige a'd' làimh-sa: a mhàin air féin na cuir do làmh. Agus chaidh Satan a mach o làthair an Tighearn.

13 Agus bha là air an robh a mhic agus a nigheana ag itheadh, agus ag òl fiona ann an tigh am bràthar bu shine:

14 Agus thàinig teachdair gu Iob, agus thubhairt e, Bha na dàimh ag ar, agus na h-asail ag ionaltradh làimh ri u;

15 Agus leum⁵ na Sabeanaich⁶ orra, agus thug iad leo iad, agus mharbh iad na h-òglaich le faobhar a' chladheimh; agus thàinig mise a'm' aonar as a dh'innseadh dhuit.

16 An uair a bha e fathast a' labhairt, thàinig mar an ceudna fear eile, agus thubhairt e, Thuit teine Dhé o na nèamhaibh, agus loisg e na caoraich, agus na h-òglaich, agus chuir e as doibh; agus thàinig mise a'm' aonar as a dh'innseadh dhuit.

17 An uair a bha e fathast a' labhairt, thàinig mar an ceudna fear eile, agus thubhairt e, Rinn na Caldeanaich suas trì buidhnean, agus thug iad ionnsuidh air na càmhalaibh, agus thug iad leo iad, agus mharbh iad na h-òglaich le faobhar a' chladheimh; agus thàinig mise a'm' aonar a dh'innseadh dhuit.

18 An uair a bha e fathast a' labhairt, thàinig mar an ceudna fear eile, agus thubhairt e, Bha do mhic agus do nigh-eana ag itheadh, agus ag òl fiona ann an tigh am bràthar bu shine:

19 Agus, feuch, thàinig gaoth mhòr o'n fhàsach, agus bhuail i air ceithir oisinnibh an tìghe, agus thuit e air na h-ògan-aich, agus tha iad marbh; agus thàinig mise a'm' aonar as a dh'innseadh dhuit.

20 An sin dh'éirich Iob, agus reub e 'fhalluinn, agus bhearr e a cleann, agus thuit e sìos air an talamh, agus rinn e aoradh,

21 Agus thubhairt e, Lomnochd thàinig mi á broinn mo mhàthar, agus lomnochd pillidh mi an sin: thug an Tighearn uaith, agus thug an Tighearn leis: beannaichte gu robh ainn an Tighearn.

22 Au so uile cha do pheacaich Iob,

¹ fairfe.

³ a ni, a spréidh, 'eudail.

² cothromach.

⁴ bhainionn.

⁶ creachadairean.

⁵ thuit.

agus cha do labhair e gu h-amaideach an aghaidh Dhé¹.

CAIB. II.

1 *Fhuair Satan comas Iob a bhuairleadh: 7 bhuail se e le neasgaidibh cràiteach. 9 Thug Iob ach-mhasan d'a mhnaoi. 11 Thàinig a chairdean a dheanamh bròin maille ris.*

ARIS bha là air an d'thàinig mic Dhé gu seasamh an làthair an Tighearn, agus thàinig mar an ceudna Satan 'nam measg gu seasamh an làthair an Tighearn.

2 Agus thubhairt an Tighearn ri Satan, Cia as a thàinig thu? Agus fhreagair Satan an Tighearn, agus thubhairt e, O imeachd mu'n cuairt air an talamh, agus o shìubhal sìos agus suas air.

3 Agus thubhairt an Tighearn ri Satan, An d'thug thu fa'near m'òglach Iob, nach 'eil neach ann cosmhuil ris air an talamh, duine coimhlionta agus dìreach, air am bheil eagal Dé, agus a' seachnadh uile? agus fathast tha e gleidheadh 'ionracais, ge do ghluais² thusa mi 'na aghaidh chum a sgrìos gun aobhar.

4 Agus fhreagair Satan an Tighearn, agus thubhairt e, Croicinn air son croicinn, eadhon gach *ni* a *ta* aig duine bheir e air son 'anama.

5 Ach cuir a nis a mach do làmh, agus bean r'a chnàimh agus r'a fheoil, agus as an eudan mallachaidh e thu.

6 Agus thubhairt an Tighearn ri Satan, Feuch, *tha* e a' d' làimh-sa; ach caomhain 'anam.

7 Agus chaidh Satan a mach o làthair an Tighearn, agus bhuail e Iob le neasgaidibh cràiteach, o bhonn a choisge gu mullach a chinn.

8 Agus ghabh e slige-chreadha g'a sgrìobadh fèin leatha; agus shuidh e am measg na luaithe.

9 An sin thubhairt a bhean ris, Am *bheil* thu fathast a' cumail t'ionracais? mallaich Dia, agus faigh bàs.

10 Ach thubhairt esan rithe, Mar a labhras aon do na mnaibh amaideach tha thu a' labhairt: seadh, an gabh sinn maith o làimh Dhé, agus nach gabh sinn olc? An so uile cha do pheacaich Iob le 'bhilibh.

11 A nis an uair a chuala trì chairdean Iob an t-olc so uile a thàinig air, thàinig iad gach fear o 'àite féin; Eliphas an Temanach, agus Bildad an Suhach, agus Sophar an Naamatach; oir shuidhich iad eatorra³ féin teachd a dheanamh bròin⁴ maille ris, agus a thubhairt comhfhurtachd dha.

12 Agus an uair a thog iad an sùilean⁵ fad as, agus nach d'aithnich iad e, thog iad an guth agus ghuil iad; agus reub iad gach fear 'fhalluinn, agus chrath iad duslach air an cinn a làimh nan nèamh.

13 Agus shuidh iad sìos maille ris air an talamh seachd làithean agus seachd oidhchean, agus cha do labhair neach focal ris; oir chunnaic iad gu'n robh a dhoilgheas ro mhòr.

CAIB. III.

1 *Mhallaich Iob an là air an d' rugadh e. 20 Ann an searbhais 'anama tha e a' caoidh gu'n do dhruid Dia suas e air gach taobh.*

NA dhéigh so dh'fhosgail Iob a bheul, agus mhallaich e a là.

2 Agus labhair Iob, agus thubhairt e, 3 Rachadh as do'n là air an d'rugadh mi, agus do'n oidhche *anns* an dubhradh, Ghineadh leanabh mic.

4 Biodh an là sin 'na dhorchadas; na h-iarradh Dia e⁶ o'n àirde, agus na dealraicheadh solus air.

5 Dubhbadh an dorchadas agus sgàile a' bhàis e; gabhadh neul còmhnuidh air; deanadh iad uamhasach e mar na làithean a's seirbhe⁷.

6 An oidhche sin, glacadh dorchadas i; na cuirear i ri làithibh na bliadhna; ann an àireamh nam mìos na tigeadh i.

7 Feuch, biodh an oidhche sin aonaranach⁸; na tigeadh fonn aoibhinn oirre⁹.

8 Mallaicheadh iadsan i a mhallaicheas an là, a tha deas a thogail Lebhiaian¹⁰.

9 Dorchaichear reultan a dùthra¹¹; amhairceadh i air son soluis, ach na tigeadh e; agus na faiceadh i rosga na maidne¹².

10 A chionn nach do dhruid i dorsa mo bhronn¹³, agus nach d'fholaich i bròn¹⁴ o m' shùilibh.

11 C'ar son nach d'eug mi o'n bhronn? c'ar son, an uair a thàinig mi as a' bholg, nach d'thug mi suas an deò?

12 C'ar son a ghabh na glùinean romham? agus c'ar son na cìocha, gu'n deothailinn?

13 Oir a nis luidhinn sìos, agus gheibhinn fois; choidlinn, an sin bhiodh tàmh agam;

14 Maille ri rìghribh agus comhairlichibh na talmhainn, a thog àitean aonaranach¹⁵ dhoibh féin;

15 No maille ri h-uachdaranaibh aig an robh òr, a lìon an tighean le h-airgid:

16 No mar thorraicheas anabuich¹⁶ fol-aichte cha bhithinn ann; mar naoidheana nach faca solus.

17 An sin sguiridh na h-aingidh do

¹ cha do chuir e amaideachd as leth Dhé. dhùisg, bhrosnaich. ³ rinn iad coinneamh ri chèile. ⁴ comh-dhoilgheis.

⁵ an uair a dh'amhairc iad. ⁶ na h-amhairceadh Dia air a shon, na biodh seadh aig Dia dheth.

⁷ cuireadh duibhre an là oilt air.

⁸ aonarach. ⁹ na tigeadh guth aoibhinn innte.

¹⁰ na h-uile-bheiste, am bròin. ¹¹ feasgair.

¹² briseadh na fàire. ¹³ bronn mo mhàthar.

¹⁴ docair, doilgheas. ¹⁵ fàsail. ¹⁶ neo-inbhich

bluàireas¹⁷ agus an sin gheibh iadsan a ta sgith le saothair fois:

18 Cuideachd bithidh tàmh aig na prìosanaich; cha chluinn iad guth an fhìr-shàrachaidh.

19 Tha am beag agus am mòr an sin; agus an seirbhiseach saor o' mhaighstir.

20 C'ar son a thug e do'n truagh solus, agus beatha dhoibhsan a ta ann an searbh-as anama?

21 A tha gabhail fadail air son a' bhàis, ach cha 'n'èil e a' teachd; agus a chladhaicheas air a shon nì's mò na air son ionmhasa folaichte:

22 A nì aoibhneas ro mhòr, a nì luathghaire 'nuair a gheibh iad an uaigh:

23 Do'n duine aig am bheil a shlighe folaichte, agus a dhruid Dia suas air gach taobh.

24 Oir roimh mo bhiadh thig m'osnaich, agus taomar a mach mar uisge mo bhùireadh.

25 Oir an nì roimh an robh eagal mòr orm, thachair e dhomh; agus an nì roimh an robh mi fo uamhann, thàinig e orm.

26 Cha robh mi an sìth, agus cha d'fhuair mi fois, agus cha robh tàmh agam; oir thàinig buaireas².

CAIB. IV.

1 Thug Eliphaz achmhasan do Iob a chionn gu'n robh e dh' easbhuidh dòchais dhiadhaidh. 7 Dh'innis e dha gu'n sgriosadh Dia an t-aingidh, ach gu'n gleidheadh e an t-ionracan bed. 12 Tha e ag islicheadh feodhas an duine an làthair Dhé.

AN sin fhreagair Eliphaz an Temanach, agus thubhairt e,

2 Ma dh'fheuchas sinn ri labhairt riut, an gabh thu gu h-olc e³? ach cò a's urrainn e fèin a chluimail o labhairt?

3 Feuch, theagaisg thusa mòran, agus neartaich thu na làmh an lagan.

4 Esan a bha tuiteam chum do bhriathra suas, agus na glùine anmhunn⁴ neartaich thu.

5 Ach a nis thàinig e ort, agus ghabh thu gu h-olc e⁵; bhean e riut, agus tha thu fo amhladh.

6 Nach e t'eagal diadhaidh t'earbsa, agus ionracas do shlighean do dhòchas?

7 Cuimhnich, guidheam ort, cò e an neò-chiontach a sgriosadh, no c'ait an do ghearradh as na h-ionracain.

8 A réir mar a chunnaic mise, iadsan a threabhas⁶ euceart, agus a chuireas aingidheachd, buainidh iad e.

9 Le séideadh⁷ Dhé sgriosar iad, agus le ané a shròine cuirear as doibh.

10 Tha beucaich an leòmhain, agus guth an leòmhain ghaire⁸, agus fiacra nan leòmhain òga air am briseadh.

11 Tha 'n seann leòmhain a' bàsachadh dhith cobhartaich, agus sgarar o chéile cuileana an leòmhain bhoirinn⁹.

12 Ach a m' ionnsuidh-sa thugadh focal¹⁰ gu h-uaignidheach, agus ghabh mo chluas beagan deth.

13 Ann an smuaintibh o aislingibh na h-oidhche, 'nuair a thuiteas codal trom air daoineibh,

14 Thàinig eagal orm agus crith, a thug air mo chnàmha gu léir¹¹ criothnachadh:

15 Agus ghabh spiorad seachad roimh mo ghnùis; sheas falt mo chuirp:

16 Sheas e, ach cha d'athnìch mi a chruth: dealbh fa chomhair mo shùl—tòsd, agus chuala mi guth:

17 Am bi duine nì's ceirte na Dia? am bi fear nì's gloine na 'Chruith-fhear?

18 Feuch, as a sheirbhiseach cha'n earb e; agus as leth 'aingle cuiridh e amaid-eachd:

19 Nach lugha na sin asda-san¹², a tha 'nan còmhuidh ann an tighibh creadh, aig am bheil am bunadh anns an duslach, a bhruthar roimh an leòman¹³?

20 O mhaduinn gu feasgar bruthar¹⁴ iad; gun neach ann 'ga thoirt fa'near, théid as doibh gu bràth.

21 Nach siubhail am feodhas air falbh maille ri? bàsaichidh iad, agus cha'n ann le gliocas.

CAIB. V.

1 Tha Eliphaz a' nochdadh gu bheil crìoch an aingidh truagh; 6 gu bheil an duine air a bhreth chum trioblaid: 8 gu còir iarraidh a dh'ionnsuidh Dhé anns gach teanntachd: 17 agus gu bheil smachdachadh an Tighearna chum maith an duine.

GAIRM a nis, ma ta e ann a fhreagaircas thu; agus cia do na naomhaibh ris an tionndaidh thu?

2 Oir marbhaidh fearg an t-amaideach, agus bheir tnu bàs an duine shuaraich.

3 Chunnaic mi an t-amaideach a' freumhachadh; ach mhallachd an dé-còmhuidh air ball.

4 Is fhad a bhios a mhic o thèaruinteachd, agus bruthar iad anns a' gheata, gun neach ann gu'n teasairginn.

5 Agus ithidh an t-ocrach suas 'fhoghara, agus eadhon as na droighnibh gabhaidh se e¹⁵; sluigidh an creachadar suas am maoin.

6 Ged nach tig àmhghar a mach as an duslach, agus nach fàs carraid¹⁶ as an talamh,

¹ aisith. ² fearg, trioblaid.
³ am bi thu doilich? ⁴ laga, fanna.
⁵ tha thu a' fannachadh. ⁶ dh'aireas.
⁷ anail, oisag. ⁸ sachal. Eabh.
⁹ bhainim. ¹⁰ nì.

¹¹ Ìonmhoireachd mo chnàmha. Eabh.
¹² Mar an ceudna nach cuir e sin as an leth-san.
¹³ reudan. ¹⁴ sgriosar. ¹⁵ Na ghearras iad sìos san fhoghara ithidh an t-ocrach suas; agus o bhioraibh cha saorar iad. ¹⁶ teinn, trioblaid.

7 Gidheadh, rugadh an duine chum carraid, mar a dh'èireas na srada¹ suas.

8 Ach dh'iarraibh-se dh'ionnsuidh Dhé, agus a chum Dhé chuirinn mo ghuth²:

9 A tha deanamh *nithe* mòra agus dorannsaichaidh; *nithe* iongantach gun àir-eamh:

10 A tha toirt fhras uisge³ air aghaidh na talmhainn, agus a' cur uisgeacha air aghaidh nam machair;

11 A chum iadsan a tha ìosal a chur an àird, agus iadsan a tha dubhach a thogail suas an tèaruinteachd:

12 A tha toirt innleachda nan cuilbheartach gu neo-ni, air chor as nach coimhion an làmh an gnìomh:

13 A tha glacadh nan daoine glìce 'nan cuilbheartachd⁴ féin, air chor as gu tilgear sios comhairle nan daoine fiara⁵.

14 San là coinnichidh iad dorchadas; agus mar anns an oidhche smeuraichidh iad⁶ mu mheadhon-là.

15 Agus saoraidh e am bochd o'n chlaidheamh, o'm beul⁷, agus o làmh a' chumhachdaich.

16 Agus aig a' bhochd bithidh dòchas, agus druididh aingidheachd a beul.

17 Feuch, is nìarachd⁸ an duine a smachdaicheas Dia: air cronachadh an Uile-chumhachdaich ma ta na dean-sa tàir.

18 Oir cràdhaidh e, agus ceanglaidh e suas; lotaidh e, agus leighisidh a làmh.

19 Ann an sè⁹ teanntachdaibh¹⁰ saoraidh e thu, agus anns an t-seachdamh cha tig ole an gar dhuìt.

20 Ann an gorta tèarnaidh e thu o'n bhàs; agus ann an cogadh, o chumhachd¹¹ a' chlaidheimh.

21 O sgiùrsadh na teanga folaichear thu: agus cha bhì eagal ort roimh sgrìos an uair a thig e.

22 Rì sgrìos agus rì gorta¹² gàiridh tu; agus roimh fhiadh-bheathaichibh na talmhainn cha bhì eagal ort.

23 Oir rì clachaidh na macharach *bithidh* tu ann an coimhcheangal: agus bithidh fiadh-bheathaiche na macharach ann an sìth riut.

24 Agus aithnichidh tu gu'm bi do phàillion ann an sìth; agus amhaircidh tu air t-àite-còmhnuidh, agus cha dean thu gu h-ole¹³.

25 Aithnichidh tu mar an ceudna gu'm bi do shìochd lìonmhor, agus do ghineal mar fheur na talmhainn.

26 Thig thu ann an làn aois chum na

h-uaigne, mar a chuirear suas cruach¹⁴ arbhair 'na h-àm.

27 Feuch, so an nì a rannsaich sinn; mar sin a ta e: éisd ris, agus biodh fios agad air, air do shon féin.

CAIB. VI.

1 *Tha Iob a' leigeadh ris meudachd a dhòilgheis: 8 agus ag iarraidh gu'm bu toil le Dia a ghearradh as: 14 Thug e achmhasan d'a chairidibh.*

ACH fhreagair Iob, agus thubhairt e, 2 O nach robh mo dhòilgheas¹⁵ air a làn-chothromachadh, agus mo dhòruinn¹⁶ togta anns na meidhibh le chéile!

3 Oir a nis bhiodh e ni bu truipe na gaineamh na fairge: uime sin tha mo bhriathran air an slugadh suas.

4 Oir tha saighdean an Uile-chumhachdaich annam, agus tha an nimh ag òl suas mo spioraid: tha uamhasan Dhé¹⁷ gan cur féin an ordugh catha a'm' aghaidh.

5 An dean am fiadh-asal sìtirich os ceann feoir? an dean an damh geum os ceann 'inlinn?

6 An gabh an nì a ta neo-bhlasta itheadh gun salann? am bheil blas air gealagan an uibhe?

7 Tha m'anam a' dùiltadh beantuinn *riu*: tha iad sin mar mo bhiadh bròn¹⁷.

8 O nach tugta dhomh n'athchuinge; agus gu'n deonaicheadh Dia dhomh mo mhiann!

9 Agus gu'm bu toil le Dia mo sgrìos; gu'n cuireadh e mach a làmh¹⁸, agus gu'n gearradh e as mi!

10 An sin bhiodh furtaichd agam fathast, ged bhithinn air mo chruadhachadh ann an do-bhròn, agus nach caomhnadh e: oir cha do cheil mi briathran an Aoin naoimh.

11 Ciod e mo neart, gu'm biodh dòchas agam? agus ciod i mo chrioch, gu'n sininn mo bheatha?

12 An e neart nan clach mo neart? an *bheil* m'fheoil do umha?

13 Nach 'eil mo chabhair annam féin? agus an d'fhuadaicheadh gliocas uam?

14 Dha-san a thréigeas a charaid is mòr am masladh e¹⁹; tréigidh e mar an ceudna eagal an Uile-chumhachdaich.

15 Mheall mo bhràithre mi mar shruth: mar neart nan sruth ghabh iad seachad:

16 A bhios dubh le h-eigh; anns am folaichear an sneachda:

17 An uair a leaghas iad, théid as doibh; an uair a dh'fhàsas e teth, caithear as an àit iad.

18 Tha ceuman an slighe air clonadh: thig iad gu neo-ni, agus sgrìosar iad.

¹ mic an teine. Eabh.
mo chùis.

² ri Dia dh'earbainn
³ feurthuin.

⁴ 'nan innleachdaibh. Faic I. Cor. III. r. 19.

⁵ carach, aingidh.

⁶ ri iarraidh fo làmh

bithidh iad.

⁷ o chlaidheamh am beòil.

⁸ is ro-shona.

⁹ sea.

¹⁰ cruaidh-chàsaibh, cunnartuibh.

¹¹ o làmhaidh. Eabh.

agus mu ghorta.

¹² mar a chuirear a stigh adag.

¹³ m'òle, m'aingidheachd.

¹⁴ ail gràin.

¹⁵ gu'n leigeadh e a làmh sgaolte.

¹⁶ Dha-san a tha ann an àmhghar dlùghair truac-

¹⁷ Mu fhàsachadh

¹⁸ cha pheacach thu.

¹⁹ m'fhearg.

²⁰ d'am bheil mi galh.

²¹ gu'n leigeadh e a làmh sgaolte.

²² Dha-san a tha ann an àmhghar dlùghair truac-

19 Dh'amhairc buidhnean Thema, dh'fheith cuideachdan¹ Sheba orra.

20 Bha iad fo amhladh, a chionn *roimh sin* gu'n robh dòchas aca: thàinig iad an sin, agus bha nàire orra.

21 Ach a nis tha sibhse 'nur neo-ni; chi sibh mo bhriseadh-cridhe, agus tha eagal oirbh.

22 An dubhairt mi, Thugaibh a m' ionn-suidh? no d'ur maoin thugaibh tiodhlac air mo shon?

23 No tèarnaibh mi o làimh an nàmhaid? no o làimh nan cumhachdach saor-aibh mi?

24 Teagaisgibh mi, agus bithidh mi a'm' thosd; agus ma chaidh mi bheag am mearachd, thugaibh orm a thuigsinn.

25 Nach neartmhor briathran ceart? ach ciod a chronaicheas esan a chronaicheas 'nur measg?²

26 An smuainich sibh air briathran a chronachadh, agus cainnt an eu-dòchas-aich, a tha mar ghaoith?³

27 Seadh, tha sibh a' leum air an dill-eachdan, agus a' cladhachadh *sluichd* d'ur caraid.

28 A nis, uime sin, ma's toil leibh, amhaircibh orm; agus *bithidh e* soilleir dhuibh, ma ni mi breug.

29 Pillibh, guidheam oirbh, na biodh euceart ann; seadh, pillibh fathast, *tha m'* fhìreantachd-sa ann.

30 Am bheil ann am theangaidh eu-ceart? nach aithnich mo bhlas nithe fiara?

CAIB. VII.

1 *Tha Iob a' caoidh gu bheil a thrioblaid ro throm air a shon; 11 agus ann an searbhas a spioraid a' deanamh gearain ri Dia. 26 Dh'aicidh e 'eus-aontas am fianuis Dhé.*

NACH 'eil am suidhichte aig an duine air thalamh? agus mar làithean fhìr-tuasdail a làithean?

2 Mar a mhiannaicheas an seirbhiseach an sgàile, agus mar a bhios sùil aig an fhear-tuasdail ri duais 'oibre;

3 Mar sin fhuair mise mar sheilbh dhomh féin miosan diomhanais, agus àirmhear⁴ dhomh oidhchean cràidh⁵.

4 Ma luidheas mi sìos, their mi, C'uin a dh'éireas mi, agus a théid an oidhche thairis? agus tha mi làn luasgaidh a null agus a nall gu briseadh na faire.

5 Tha m'fheoil air a còmhachadh le cnuimhibh agus spairtibh ùire; bhris mo chroicinn, agus tha e breun.

6 Tha mo làithean nì's luaithe na spàl figheadair, agus tha iad air an caithheadh gun dòchas.

7 Cuimhnich gur gaoth mo bheatha: cha

phill mo shùil a dh'fhaicinn maith.

8 Sùil an ti a chunnaic mi, cha'n fhaic i mi: *bithidh* do shùilean orm, agus cha *bhi* mi ann.

9 Caithear an neul, is théid e as; mar sin esan a théid sìos do'n uaigh, cha tig e nìos.

10 Cha phill e nì's mò dh'ionnsuidh a thighe; agus cha'n aithnich 'ait e nì's mò.

11 Uime sin cha chum mi mo bheul; labhraidh mi ann an teanntachd⁶ mo spioraid; gearainidh mi ann an searbhas m'anama.

12 Am muir mi, no muc-mhara⁷, gu'n cuireadh tu faire orm?

13 Ma their mi, Bheir mo leaba furtachd dhomh; eutromaichidh m'uirigh mo ghearan;

14 An sin cuiridh tu fuathas orm le h-aislingibh, agus uamhas le seallannn-aibh:

15 Agus is fearr le m'anam tachdadh, bàs na beatha⁸.

16 Tha mi gabhail gràin *deth*; cha b'àill leam bhi beò gu bràth: leig leam, oir is diomhanas mo làithean.

17 Ciod e an duine, gu'n àrdaicheadh tu e? agus gu'n suidhicheadh tu do chridhe air?

18 Agus gu'm fiosraicheadh tu e gach maduinn? gach mionaid gu'n dearbhadh tu e?

19 Cia fhad a bhios tu gun dealachadh rium? agus nach leig thu leam gus an sluig mi sìos mo shìle?

20 Pheacaich mi; ciod a ni mi dhuit, O fhir-coimhidh dhaoine? c'ar son a chuir thu mi a d'aghaidh⁹, agus a ta mi a'm' eire¹⁰ orm féin?

21 Agus c'ar son nach maith thu m'eus-aontas, agus nach cuir thu air falbh m'eu-ceart? oir a nis anns an duslach coidlidh mi; agus iarraidh tu mi anns a' mhaduinn, ach cha *bhi* mi ann.

CAIB. VIII.

1 *Tha Bildad a' nochdadh gu'n gléidh an t-Uile-chumhachdach breitheanas; 4 gu'n dìol e do gach neach a rèir a ghniomhara; 8 agus gu'm bàsaich dòchas a' chealgair mar a sheargas luibh na macharach.*

AN sin fhreagair Bildad an Suhach, agus thubhairt e,

2 Cia fhad a labhras tu mar sin, agus a bhios briathra do bheoil mar ghaoith làidir?

3 Am fiar Dia breitheanas, agus am fiar an t-Uile chumhachdach ceartas?

4 Ma pheacaich do chlann 'na aghaidh,

¹ luchd-turuis.

² ciod a tha bhur comh-reuson-

achadh a' cronachadh. ³ air a' ghaoith an tilg sibh gu faoin bhur cainnt? Faic Caib. VIII. r. 2.

⁴ orduichear, suidhichear.

⁵ oidhchean plant-

achail, fadalach.

⁶ cràdh.

⁷ uile-bheist.

⁸ cnamhnan slàna; mò chnàmha. Eabh.

⁹ c'ar son a chuir thu fa d' chomhair mar chusp-air mi?

¹⁰ a' m' eallaich.

agus gu'n d'thug e thairis iad do'n eus-
aontas¹;

5 Nan iarradh tu gu moch a dh'ionn-
suidh Dhé, agus air an Uile-chumhachd-
ach nan aslaicheadh tu;

6 Nam *biodh* tu glan agus ionraic, gu
cinnteach a nis mhosgailleadh e air do
shon, agus dheanadh e àite-còmhnuidh
t'fhreantachd sìochail.

7 Ged bhiodh do thoiseach beag,
dh'fhàsadh do chrìoch gu mòr.

8 Oir fiosraich, guidheam ort, do'n linn
roimhe, agus deasaich thu féin chum rauns-
achaidh an aithriche:

9 (Oir o'n dé *tha* sinne, agus cha 'n
aithne dhuinn, a chionn gur sgàile ar làith-
ean air thalamh:)

10 Nach teagaisg iad thu, nach innis iad
duit, agus o'n cridhe nach labhair iad
briathra.

11 Am fàs an luachair gun làthach? an
fàs am min-fheur² gun uisge?

12 'Nuair a bhios e fathast 'na ghlaise³,
cha ghearrar sìos e; gidheadh, roimh
gach luibh seargaidh e.

13 Mar sin ceuma nan uile a dhi-chuimh-
nicheas Dia; agus bàsaichidh dòchas a'
chealgair:

14 Aig an gearrar a dhòchas as, oir *is* e
lìon⁴ an damhain-allaidh 'earbsa.

15 Leigidh e 'thaic ri 'thigh, ach cha
seas e: cumaidh se gu daingean e, ach
cha mhair e.

16 Uaine *tha* e fa chomhair na gréine;
agus 'na lìos⁵ fàsaidh a mheanglan suas.

17 Air a' charn bithidh a fhreumhan
air am figheadh air feadh a chéile, agus
fiosraichidh e àit nan clach⁶.

18 Ma ghearras e as⁷ o àit e, an sin
àicheadhaidh se e, *ag ràdh*, Cha'n fhaca
mi thu.

19 Feuch, *is* e so aoibhneas a shlighe-
san; ach as an ùir fàsaidh aon eile.

20 Feuch, cha tilg Dia air falbh an *duine*
foirfe, agus cha ghabh e greim do làimh
nan daoine aingidh:

21 Gus an lìon e do bheul le gàire, agus
do bhilean le gairdeachas.

22 Iadsan a dh'fhuathaicheas thu, còmh-
daichear iad le nàire; agus cha *bhi* pàill-
iun nan aingidh ann.

CAIB. IX.

1 *Tha Iob ag aideachadh ceartais Dé*; 14 a' nochd-
adh nach eil e 'g iarraidh e féin fhàreanachadh;
20 agus nach còir breth thoirt air neach air bith
a réir an dòigh air am theil Dia buintinn ris.

1 *chuir e iad ann an làimh an eusaontais.* Eabh.
2 *an gall-sheiltsidheir, fear a' chladaich.* Faic Gen.
Caib. XII. r. 2.

3 *'na ghuirme, uaine.*
4 *tigh.* Eabh.

5 *ghàradh.*
6 *chi e tigh nan clach.* Eabh.

7 *Ma sgriosar.* 8 *a bhios duine ceart?*

9 *Ma nì e strì ris.* 10 *Has.* Eabh.

A GUS fhreagair Iob, agus thubhairt e,
2 Gu deimhin tha fhios agam gu
bheil e mar sin: oir cionnus a shaoras
duine e féin⁸ aig Dia?

3 M'as àill leis a chùis a thagradh 'na
làthair⁹, cha fhreagair se e aon *uair* as a'
mlàle.

4 Glic an cridhe, agus treun an neart,
cò a chruaidhich e féin 'na aghaidh, agus
a shoirbhich?

5 A dh'atharraicheas na beanntan, agus
cha bhi fios ac' *air*; a thilgeas bun os
ceann iad 'n fhearg;

6 A chrathas an talamh as 'àit, agus
criothnaichidh a phuist:

7 A dh'àithneas do'n ghréin, agus cha'n
éirich i; agus air na reultaibh a chuireas
seula:

8 A sgaoileas a mach na nèamha 'na
aonar, agus a shaltaireas air tonnaibh na
fairge:

9 A tha deanamh Arcturus¹⁰, Orioin¹¹,
agus Phleides¹², agus sheòmraiche na
h-àirdeas:

10 A tha deanamh *nithe* mòra, nach bi
e 'n comas fhaghail a mach, agus *nithe*
iongantach nach gabh àireamh.

11 Feuch, théid e seachad orm, agus
cha 'n fhaic mi e; agus gabhaidh e thair-
is, ach cha mhothaich mi e.

12 Feuch, ma bheil e air falbh, cò a
bhacas e¹³? cò a their ris, Ciod a tha thu
a' deanamh?

13 Cha tionndaidh Dia air falbh 'fhearg:
fuidhe cromaidh fir-chuideachaidh an
àrdain.

14 Nach ro lugha na sin a fhreagaireas
mise e, a thaghas mi mo bhriathra ris?

15 Oir ged bhithinn ionraic¹⁴, cha fhreag-
airinne; air mo bhreitheamh dh'aslaichinn.

16 Nan gairminn, agus gu'm freagair-
eadh e mi, cha chreidinn¹⁵ gu'n d'éisd e
ri m' ghuth:

17 Oir le doinionn tha e 'gam bhruth-
adh, agus a' deanamh mo lot lìonmhor
gun aobhar.

18 Cha leig e leam m'anail a tharruing,
ach lìonaidh e mi le searbhas¹⁶.

19 Ma *labhar* mu neart, feuch, *tha* e
làidir; agus ma *labhar* mu bhreitheanas,
cò a shuidhicheas àm¹⁷ air mo shon?

20 Ma dh'fhàreanaicheas mi mi féin,
dùidh mo bheul féin mi; agus foirfe *ma*
nì mi mi féin, nochdaidh e fiar mi.

21 Foirfe ged bhithinn, cha'n aithnich-
inn e; a'm' anam¹⁸ dheanainn tàir air mo
bheatha.

11 *Chesil.* Eabh.

12 *nan seachd riomag; Chima.* Eabh.

13 *ma bheil e leis, cò a bheil air aiseag?*

14 *ceart, còthromach, ned-chiontach.*

15 *is gann a chreidim.* 16 *le searbhasaibh.*

17 *àm-tagraidh.*

18 *Foirfe ged bhithinn, cha'n aithuichinn m'anam.*

22 *Is aon ni e: uime sin thubhairt mi, Am foirfe agus an t-aingidh tha e a' sgrios.*

23 Ma mharbhas an t-slat gu h-obann, ri deuchainn nan neò-chiontach gàiridh e.

24 Thugadh an talamh an làimh an aingidh: aghaidhean a bhreitheamhna còmhdaichidh e: mar *dean e mar so, c'ait, cò san a ni?*

25 Bha mo làithean ni bu luaithe na gille-ruithe: theich iad air falbh, cha'n fhac iad maith.

26 Ghabh iad seachad mar na longaibh luatha; mar an iolaire a' dol air iteig¹ a chum cobhartaich.

27 Ma their mi, Di-chuimhnichidh mi mo ghearan, leigidh mi dhìom mo dhubh-achas², agus bheir mi comhfhurtachd dhomh féin;

28 Tha eagal orm roimh mo dhoil-gheasaibh uile; tha fios agam nach meas thu neò-chiontach mi.

29 Ma bhios mi aingidh³, c'ar son ma ta a shaothraichinn gu dìomhain?

30 Ma nigheas mi mi féin ann an uisgibh sneachdaidh, agus ma ghlanas mi gu glan mo làmhann;

31 Am sin tumaidh tu mi san t-slochd⁴, agus gabhaidh m'eudach féin gràin diom.

32 Oir cha duine e mar a ta mise, gu'm freagairinn e, gu'n tigeamaid cuideachd gu breitheanas.

33 Cha 'n'eil fear-réite⁵ eadaruin, a chuireadh a làmh oirnn le chéile.

34 Thugadh e air falbh a shlat dhìom, agus na cuireadh eagal roimhe uamhas orm.

35 *An sin labhrainn, agus cha bhiodh eagal orm roimhe: ach cha 'n'eil mi mar sin agam féin⁶.*

CAIB. X.

1 *Ann an searbhas 'anama thagair Iob a chèis an làthair Dhé; 18 tha e a' còidh nach d'thug e suas an deò gun sùil 'ga fhaicinn. 20 Ghuidh e air Dia beagan comhfhurtachd a thaobhairt da.*

THA m'anam sgith do m' bheatha; fàgaidh mi mo ghearan orm féin; labhraidh mi ann an searbhas m'anama.

2 Their mi ri Dia, Na dìt mi; thoir fios dhomh c'ar son a tha thu a' cur a'm' aghaidh.

3 Am maith leat gu'n sàraicheadh tu? gu'n deanadh tu tàir air obair do làmh? agus gu'n dealraicheadh tu air conhairle nan aingidh?

4 Am bheil sùilean feòla agad? an ann mar a chi duine, a chi thusa?

5 An ann mar làithibh duine a tha do làithean-sa? am bheil do bhliadhnacha

mar làithibh duine,

6 Gu'n sireadh tu air son⁷ m'euceirt, agus gu'n rannsaicheadh tu air son mo pheacaidh?

7 Tha fhios agad nach d'rinn mi gu h-aingidh: agus cha 'n'eil neach ann a shaoras o d' làimh.

8 Shaothraich do làmh-sa mi, agus rinn iad mi comhcheart mu'n cuairt; agus an sgrios thu mi?

9 Cuimhnich, guidheam ort, gur ann mar chriadh a rinn thu mi; agus gu duslach an tionndaidh thu mi a ris?

10 Mar bhainne nach do thaom thu mi mach, agus mar chàise nach do dhaingnich thu mi?

11 Le croicinn agus le feoil chòmhdaich thu mi, agus le cnàmhaibh agus féithibh-luthaidh dhìon⁸ thu mi.

12 Beatha agus caoimhneas dheònach thu dhomh, agus choimhid do fhreasdal⁹ mo spiorad.

13 Agus na nithe so dh'fholaich thu a' d' chridhe: tha fios agam gu bheil so agad¹⁰.

14 Ma pheacaicheas mi, bheir thu fa' near mi, agus o m'euceart cha saor¹¹ thu mi.

15 Ma bhios mi aingidh, mo thruaigh mi! agus ma bhios mi ionraic, cha tog mi mo cheann. Làn maslaidh¹² a ta mi, agus faic féin m' àmhghar;

16 Oir tha e a' meudachadh; mar leòmhann garg tha thu a' sealg orm; agus a ris tha thu 'gad nochdadh féin iongantach orm¹³.

17 Tha thu ag ath-nuadhachadh t'fhianuisean a'm' aghaidh, agus a' meudachadh do chorroich rium; tha caochlaidh agus cogadh a'm' aghaidh.

18 C'ar son ma ta a thug thu mach as a' bhroinn mi? Och nach d'thug mi suas an deò, gun sùil 'gam fhaicinn!

19 Bhithinn mar nach bithinn ann; o'n bhroinn a dh'ionnsuidh na h-uaghe bhithinn air mo ghiùlan.

20 Nach tearc mo làithean? sguir ma ta, agus leig leam, agus gu faigh mi beagan comhfhurtachd,

21 Mun siubhail mi, agus nach pill mi tuilleadh, gu tìr an dorchadais agus sgàile a bhàis;

22 Tìr dorchadais mar dhuibhre sgàile a bhàis; agus as eughmais gach riaghailt, agus far am bheil an solus mar dhorchadas¹⁴.

CAIB. XI.

1 *Thug Sophar geur-achmhasan do Iob a chionn gu'n d'fhìrinnich se e féin: 7 tha e a' nochdadh nach fheud duine mòrachd Dhé a rannsachadh;*

¹ mar an iolaire a dh'itealaitheas.

² mo thuirse; mo ghnùis. Eabh.

³ ciontach. ⁴ san t-salchar, san d'ig.

⁵ fear-tagraidh, fear-eadraiginn, breitheamh.

⁶ nì h-ann mar a ta e agamsa.

⁷ an dèigh.

⁸ neartaich.

⁹ f'fhiosrachadh.

¹⁰ a' t'aigne.

¹¹ cha ghlan.

¹² amhluidh.

¹³ tha do làmh iongantach trom orm.

¹⁴ agus a bhios dorchas mar an dorchadas féin.

13 agus nach bi dòchas aig neach fhad 's a bhios cuccart 'na làimh.

AN sin fhreagair Sophar an Naamatach, agus thubhairt e,

2 Do lionmhoireachd bhriathar nach toirear freagradh? agus an saorar fear 'na mòr-bhruidhne?

3 An toir do bhreugan-sa air daoineibh a bhi 'nan tosd? agus an uair a ni thu fanoid, nach cuir duin' air bith nàir ort?

4 Oir thubhairt thu, Glan a ta mo theag-asg, agus neò-chiontach¹ tha mi ann ad shuilibh.

5 Ach, O nach labhradh Dia, agus nach fosgaileadh e a bhilean riut²;

6 Agus nach nochdadh e dhuit *nithe* dìomhair a' ghliocais, gu bheil iad dùbailte na ta ann³? Biodh fios agad uime sin gu bheil Dia 'gad agairt air son t'eu-eirt⁴.

7 An urrainn thusa le rannsachadh Dia fhaghail a mach? an urrainn thu an t-Uile-chumhachdach fhaghail a mach gu h-ìomlan?

8 Ard mar na nèamha; ciod a ni thu? ni's doimhne na ifrinn; ciod is aithne dhuit?

9 Ni's faide na'n talamh a thomhas, agus ni's leithne na'n fhaireg.

10 Ma ghearras e as⁵, no ma dhùineas e suas, no ma chruinnicheas e ri chèile, cò a bhacas e?

11 Oir is aithne dha daoine faoine⁶; agus an uair a chi e euceart, nach toir e fa'near i?

12 Agus b'àill leis an duine fholamh⁷ a bhi glic, ged is ann mar loth asail fhiadh-aiach a bheirear duine.

13 Ma dheasaicheas tu do chridhe, agus gu'n sin thu d'a ionnsuidh do làmhnan;

14 Ma bhios euceart a'd' làimh, cuir fada uait i, agus na leig le aingidheachd còmhachadh a'd' phàillunaibh.

15 Oir an sin togaidd tu suas do ghnùis gun smal, agus bithidh tu seasmhach, agus cha bhi eagal ort:

16 Oir di-chuimhnichidh tu do dhoch-air⁸; mar na h-uisgeachaibh a chaidh seachad cuimhnichidh tu i.

17 Agus ni's soilleire na meadhon-là fàsaidh t'aois; ged robh thu ann an dorchadas, mar a' mhaduinn bithidh tu.

18 Agus earbaidh tu⁹, oir bithidh dòchas agad; agus cladhaichidh tu, [agus] gu tèarainte gabhaidh tu tàmh.

19 Agus an uair a luidheas tu sìos, cha chuir neach air bith eagal ort; agus iarraidh mòran do ghnùis.

20 Ach fàilnichidh sùilean nan aingidh; agus dol as cha bhi acu; agus bithidh an dòchas mar thoirt suas an deo.

CAIB. XII.

1 *Chronaich Iob a chairdean:* 6 *Dh'fheuch e dhoibh gu bheil an t-aingidh soirbheachadh sa bheatha so.* 13 Neart agus gliocas an Uile-chumhachdaich.

AGUS fhreagair Iob, agus thubhairt e, 2 Cha 'n eil teagamh nach sibhse an sluagh, agus maille ribhse bàsaichidh gliocas.

3 Ach agamsa tha tuisge¹⁰, mar a ta agaibhse¹¹; cha'n isle mise na sibhse: agus cò aig nach 'eil fios air an leithide sin?

4 Mar neach a ta 'na bhall-magaidh aig a charaid tha mise, a ghairmeas air Dia, agus freagairidh se e: 'na bhall-fochaid tha an duine ceart ionraic.

5 Mar lòchran fuidh thàir ann aa smuaintibh an ti a ta aig fois, bithidh esan a bhios ullamh¹² gu sleamhnachadh le 'chois.

6 Siochail bithidh pàilluna chreachadairean; agus tèarainte bithidh iadsan a bhrosnaicheas Dia; d'an d'thug Dia ni 'nan làimh.

7 Ach feòraich a nis do na h-ainmhidh-ibh, agus teagaisgidh iad thu; agus do eunlaith nan speur, agus innsidh iad dhuit:

8 No labhair ris an talamh, agus teagaisgidh e thu; agus cuiridh iasg na mara an cèill duit.

9 Cò aig nach 'eil fios a thaobh nan *nithe* so uile, gur i làmh an Tighearn a rinn so?

10 Aig am bheil 'na làimh anam gacli ni bcò, agus anail gach uile fheòla dhaoine.

11 Nach dearbh a' chluas briathra? agus nach blais am beul a bhiadh?

12 Anns na h-aosda tha gliocas; agus am fad làithean tuisge.

13 Maille ris-san tha gliocas agus neart; aige-san tha comhairle agus tuisge.

14 Feuch, brisidh e sìos, agus cha togar suas: druididh e suas duine, agus cha'n fhosgailear.

15 Feuch, cumaidh e na h-uisgeachan air an ais, agus tiormaichidh iad suas; agus cuiridh e mach iad, agus tilgidh iad bun os ceann an talamh.

16 Aige-san tha neart agus gliocas: is leis-san esan a mheallar, agus esan a mheallas.

17 Cuiridh e air falbh comhairlich creachta, agus do bhreitheamhnaibh ni e amadain.

¹ glan.

² a'd' aghaidh.

³ na ta air am foillseachadh do dhaoineibh.

⁴ gur lugha a tha Dia a' togail uait na tha t'eu-eart a' toilltinn.

⁵ Ma chaochaileas e.

⁶ breugach.

⁸ do thruaighe.

¹⁰ eridhe. Eabh.

¹² calamh.

⁷ fhàs, fhàoin.

⁹ bithidh tu tèarainte.

¹¹ co mailh ribhse.

18 Cuibhreach rìghrean sgaoilidh e, agus crioslaichidh e crios air an leasraibh.

19 Cuiridh e air falbh uachdarain¹ creachta, agus tilgidh e sìos na cumhachdaich.

20 Atharraichidh e cainnt nam firinn-each, agus bheir e air falbh tuigse nan aosmhor.

21 Taomaidh e tàir air àrd-uaislibh², agus anmhunnaichidh e neart nan daoine treuna.

22 Taisbeanaidh e nithe doimhne á dorchadas, agus bheir e sgàile a' bhàis gu solus.

23 Meudaichidh e na cinnich, agus sgriosaidh se iad: fairsinnichidh e na cinnich, agus cumhannaichidh se iad.

24 Bheir e air falbh cridhe cheannard sluagh na talmhainn, agus cuiridh e air seacharan iad ann am fàsach as eugmhais slighe.

25 Smeuraichidh iad san dorchadas, agus iad gun solus; agus bheir e orra tuisleachadh mar dhuine air mhisg³.

CAIB. XIII.

1 *Chronaich Iob a chairdean do bhrìgh gu'n do labhair iad gun h-àingidh as leth Dhè: 14 Ged nach do thuig e aobhar a thrioblaid cha d'fhàilnich a dhèdas: 20 Dh'iarr e fìs fhaghail air a pheacannaibh.*

FEUCH, chunnaic mo shùil so uile; chuala mo chluas, agus mhothaich⁴ i e.

2 Mar is aithne dhuibh-se, is aithne dhomh-sa mar an ceudna: cha 'n isle mise na sibhse.

3 Ach labhrainn-se ris an Uile-chumhachdach, agus b'àill lean tagradh⁵ ri Dia.

4 Oir is luchd cumadh⁶ bhreug sibhse, léigheau nach fiu sibh uile.

5 O nach robh sibh gu tur 'nur tosd!⁷ agus b'e sin bhur gliocas.

6 Cluinnibh a nis mo thagraidh⁷, agus èisdibh ri deasboireachd mo bhilean.

7 Au labhair sibh gu h-àingidh air son Dhé? agus air a shon-san an labhair sibh gu cealgach?

8 An gabh sibh r'a ghnùis⁸? air son Dhé an dean sibh comhstri?

9 Am bheil e maith gu'n rannsachadh e mach sibh? mar a nìhear fanoid air duine, an dean sibh fanoid air-san?

10 Gu cinnteach cronachidh e sibh, ma ghabhas sibh an uaignidheas ri ghnùis.

11 Nach cuir 'òrdhearcas-san eagail oirbh? agus nach tuit 'uamhann-san oirbh?

12 Tha bhur cuimhne cosmhuil ri luaithre,

mar chuir creadha bhur cuirp.

13 Bithibh 'nur tosd a m' thaobh-sa, agus labhraidh mi, agus thigeadh⁹ orm na dh'fheadas.

14 C'ar son a tha mi gabhail m'fheòla a'm' fhiacailbh, agus a' cur mo bheatha a'm' làimh¹⁰?

15 Ged mliarbh e mi, gidheadh earbaidh mi as¹¹: ach tagraidh¹² mi moshligh-ean 'na fhianuis.

16 Mar an ceudna bithidh e dhomhsa chum slàinte; oir cha tig cealgair 'na làthair¹³.

17 Èisdibh gu furachar ri m' chainnt, agus ri m' sgeul le'r cluasaibh.

18 Feuch a nis, chuir mi mo chùis an ordugh: tha fios agam gu'n saorar mi,

19 Cò esan a thagras rium? oir a nis, ma bhitheas mi a'm' thosd, bheir mi suas an deò.

20 A mhàin dà ni na dean rium; an sin o d' ghnùis cha 'n fholaich mi mi féin.

21 Tarruing do làmh fada uam? agus na cuireadh t' uamhann eagal orm.

22 An sin gairm thusa, agus freagairidh mise: no labhraidh mise, agus freagair thusa mi.

23 Cia lìonmhor m'euceartan agus mo pheacanna? air m'eusaontas agus mo pheacadh thoir fios domh.

24 C'ar son a tha thu a' folachadh do ghnùise, agus 'gam mheas mar nàmhaid duit?

25 Am bris thu an duilleag a thilgear a null agus a nall? agus an ruaig thu an asbhuain thioram?

26 Oir tha thu a' sgrìobhadh nithe searbha a'm' aghaidh, agus a' toirt orm eucearta m'òige a shealbhadh.

27 Agus tha thu a' cur mo chos anns a' cheap, agus a' geur-amharc air mo shlighibh gu léir, agus a' cur chomhar air bonnaibh mo chos.

28 Agus mar ni breun cuirear as da¹⁴, mar thrusgan a dh'itheas an leomann¹⁵.

CAIB. XIV.

1 *Dh'asluich Iob fad-fhulangas Dhé, do bhrìgh gu bheil an duine air bheag lùithean agus làn àmhghair. 13 Dh'iarr e àite tàimh gus an tigeadh crìoch 'a'insire suidhichte.*

THA 'n duine a rugadh o mhnai, gearr-shaoghalach¹⁶, agus làn àmhghair.

2 Mar bhlàth thig e mach, agus gearrar sìos e: agus teichidh e mar sgàile, agus cha'n fhan e.

3 Gidheadh air a leithid sin dh'fhosgail thu do shùilean; agus mise tha thu a' tabhairt gu breitheanas maille riut.

¹ sagairt. ² uachlaranaibh, ceannardaibh.

³ mheisg. ⁴ thuig. ⁵ reusonachadh.

⁶ luchd-dealbh. ⁷ m'achmhasan.

⁸ An: bi sibh leth-bhretheach air a thaobh-san?

⁹ subhadh thairis. ¹⁰ ann an cuntart.

¹¹ cha 'n eil dùil agam ri ni eile.

¹² dearbhaidh, seasaidh. ¹³ 'na shlùinte

dhomhsa, ged nach tig cealgair 'na làthair.

¹⁴ domh. ¹⁵ an reudan, a' chnuimh.

¹⁶ air bheag lùithean.

4 Cò a bheir glan á neòghlan? cha tabhair a h-aon.

5 Gu deimhin tha¹ a làithean suidh-
iehte, tha àireamh a mhios agad-sa;
dh'orduich thu a chrìochan, agus cha
téd e thairis orra.

6 Tionndaidh uaith chum gu bi fois
aige, gus an coimhlon e mar fhear-tuar-
asdail a là.

7 Oir tha dòchas á craoibh, ma ghearrar
sìos i, gu'm fàs i a ris, agus nach fàilnich
a faillean² òg.

8 Ged fhàs a freumh sean anns an tal-
amh, agus anns an ùir ged bhàsaich a
stoc;

9 Trid fhàile an uisge ùr-flàsaidh i,
agus bheir i mach geuga mar òg-chraoibh.

10 Ach bàsaichidh fear, agus théid gu
tur as da; agus bheir duine suas an deò,
agus c'àit am bheil e?

11 Fàilnichidh na h-uisgeacha o'n mhuir,
agus caithear an amhainn, agus tior-
maichidh i suas³:

12 Mar sin luidhidh an duine sìos, agus
cha'n éirich e; gus nach bi na nèamhan
ann, cha mhosgail iad, agus cha dùisgear
as an codal iad.

13 Och nach folaicheadh tu mi anns an
uaigh, nach gleidheadh tu mi an uaig-
nidheas, gus am biodh t'fhearg thairis!
nach suidhicheadh tu dhomh àm àraidh,
agus gu'n cuimhnichidh tu mi!

14 Ma bhàsaicheas duine, an tig e beò?
uile làithean m'aimsire suidhichte feithidh
mi, gus an tig mo chaochladh.

15 Gairmidh⁴ tusa, agus freagairidh
mise thu: air obair do làmh bithidh déigh
agad.

16 Oir a nis tha thu ag àireamh mo
cheum: agus nach 'eil thu ri faire air mo
pheacadh?

17 Seulaichte ann an ceanglachan tha
m'eusaontas, agus fuaighidh tu suas m'eu-
ceart.

18 Agus gu deimhin tuitidh a' bheinn,
agus théid as di; agus atharraichear a'
charraig as a h-àit.

19 Caithidh na h-uisgeacha na clacha:
bheir thu tuil air na nithibh a dh'fhàsas
á h-ùir an talmhainn, agus sgriosaidh tu
dòchas an duine.

20 Buadhaichidh tu gu bràth 'na agh-
aidh, agus sìubhlaidh e: caochailidh tu a
ghnùis, agus cuiridh tu air falbh e.

21 Urramach fàsaidh a mhic, agus cha
bhi fios aig air; agus islichear iad, ach
cha toir e fa' near iad⁵.

22 Ach bithidh 'fheoil an taobh a stigh

dheth⁶ cràiteach, agus ni 'anam an taobh
a stigh dheth bròn.

CAIB. XV.

1 Chronaich Eliphas Iob air son a dhànadais 'na
fhìreantachd féin. 17 Nochd e gu'n cràdhar an
t-aingidh rè a làithean uile.

A N sin fhreagair Eliphas an 'Teman-
ach, agus thubhairt e,

2 An luadh duine glic air eòlas na
gaoithe⁷, agus an lìon e a chliabh leis a'
ghaoith an ear?

3 An tagair e le briathraibh gun tairbhe,
agus le cainnt leis nach dean e maith?

4 Seadh, tha thu a' tilgeadh dhìot eag-
ail⁸, agus a' léigeadh urnuigh dhìot an
làthair Dhé.

5 Oir teagaisgidh t'aingidheachd do
bheul⁹, agus ròghnaichidh tu teanga nan
cuilbheartach.

6 Dìtidh do bheul féin thu, agus cha
mhise; agus bheir do bhilean féin fianuis
a'd' aghaidh,

7 An tusa an ceud duine a rugadh? no
roimh na cnocaibh an do rinneadh thu?

8 An cuala tu bheag ann an comhairle
dhìomhair Dhé? agus a d'ionnsuidh féin
a mhàin an do tharruing thu gliocas¹⁰?

9 Cìod is aithne dhuitse, nach aithne
dhuinne? a thuigeas tusa, nach tuig
sinne¹¹?

10 Tha araon an ceann-liath agus an
t-aos-mhor 'nar measg-ne, ni's sine gu
mòr ua t'athair.

11 Am beag leat sòlasa Dhé? agus am
bheil ni dìomhair agad¹²?

12 C'ar son a tha do chridhe 'gad thoirt
air falbh? agus c'ar son a tha do shùil-
ean a' caogadh.

13 Gu bheil thu a' tionndadh do spior-
aid an aghaidh Dhé, agus a' leigeadh an
leithide sin do bhriathraibh a mach as do
bheul?

14 Cò e an duine, gu'm biodh e glan?
agus gu'n saoradh esan e féin, a rugadh
o mhnai?

15 Feuch, as a naomhaibh cha'n earb
e; agus cha 'n 'eil na nèamha glan 'na
shùilibh.

16 Nach gràineile agus nach sailche gu
mòr an duine, a dh'òlas euceart mar
uisge?

17 Innsidh mi dhuit, éisd rium; agus na
chunnaic mi, cuiridh mi 'n céill;

18 A dh'aithris daoine glice, agus nach
do cheil an aithriche orra¹³:

19 D'an d'thugadh 'nan aonar an tal-
amh, agus cha d'imich coigreach 'nam
measg.

¹ A thaobh gu bheil.

² meanglan.

³ Faic Isaiah, Caib. XIX. r. 5.

⁵ Goiridh.

⁶ cha mhothaich e sin d' an taobh.

⁷ a shon féin.

⁸ eòlas faoin.

⁹ cogail dhiaidhaidh.

¹⁰ nochdaidh do bheul

t'aingidheachd.

¹⁰ a d'ionnsuidh féin an toir thu
air falbh gliocas; riut féin a mhàin an cum thu
gliocas?

¹¹ nach eil againne. Eabh.

¹² an dh'fhoilaich c focal agad?

¹³ dh'aithris

daoine glice o'n aithrichibh, agus nach do cheil iad.

20 Rè a làithean uile cràdhar an t-aingidh; agus folaichear àireamh *a* bhliadh-nau air an fhear-shàrachaidh.

21 *Tha* fuaim eagalach 'na chluasaibh: 'na shoirbheachadh thig am fear-millidh air.

22 Cha chreid e gu'm pill e as an dorchadas; agus feithear air leis a' chlaidheamh.

23 Tha e ag imeachd mu'n cuairt air son arain, *ag ràdh C'ait am bheil e?* tha fios aige gu bheil là an dorchadais deas aig a làimh.

24 Cuiridh teanntachd agus àmhghar¹ uamhas air: buadhaichidh iad air, mar rìgh deas a chum catha.

25 Oir sinidh e mach a làmh an aghaidh Dhé, agus an aghaidh an Uile-chumhachdaich neartaichidh se e féin.

26 Ruithidh e air, air *a* mhuineal, air còpaibh tiugha a sgiath;

27 A chionn gu'n do chòmhaich e a ghnùis le a shult², agus gu'n d'rinn e fill-ean³ saille air a leasraibh.

28 Agus còmhnuichidh e ann am bailtibh fàsaichte⁴, ann an tighibh nach 'eil air an àiteachadh, a tha ullamh gu bhi 'nan carnaibh.

29 Cha bhi e beartach, agus cha mhair a mhaoin; agus cha sin e mach a fhreumh san talamh⁵.

30 Cha triall e á dorchadas; tiormaichidh lasair a mheanlan⁶; agus siubhlaidh e le anail a bheoil.

31 Na h-earbadh esan a mheallar á dìomhanas; oir dìomhanas bithidh aige mar lughachd.

32 Roimh a là coimhlionar e; agus cha bhi a gheug uaine.

33 Crathaidh e dheth mar an fhìonain 'fhìon-dhearc an abaidh, agus tilgidh e dheth mar an crann olaidh a bhlàth.

34 Oir *bithidh* coimhthional nan cealgair aonarach, agus caithidh teine pàilluina na duais-bhratha⁷.

35 Ginidh iad donas, agus beiridh iad droch-bheart⁸, agus ulluichidh an com cealg.

CAIB. XVI.

1 *Chronaich Iob a chairdean do bhrìgh gu'n robh iad 'nan luchd-comhfhurtachd truagh.* 7 *Chuir e an cèill an doilgheas a thàinig air;* 17 *agus thagair e a neò-chiontas.*

ACH fhreagair Iob, agus thubhairt e,
2 Chuala mi mòran d'an leithidibh sin: is luchd-comhfhurtachd truagh sibh uile.

3 Am bi crìoch air briathraibh gaoithe?⁹ no ciod a tha toirt an dànadais duit gu bheil thu a' freagairt?

4 Dh'fheudainn-se mar an ceudna labhairt cosmhuil ribhse: nam biodh bhur n-anam an àit m'anama-sa, dh'fheudainn briathra chur cuideachd 'nur n-aghaidh agus mo cheann a chrathadh ribh:

5 [Ach] neartaichinn sibh le m' bheul, agus lughdaicheadh gluasad mo bhilean *bhur doilgheas*.

6 Ged labhair mise, cha lughdaichear mo dhoilgheas; agus *ma* bhios mi a'm' thosd, ciod am fuasgladh a gheibh mi?

7 Ach a nis sgìthich e mi: sgap thu¹⁰ mo chuideachd uile.

8 Agus rinn thu mi làn phreasag-eudain¹¹; mar fhianuis tha *sin*: agus dh'éirich mo chaoile a'm' aghaidh¹²; ri m'eud-an freagairidh i.

9 Reub a chorruidh mi¹², agus tha fuath aige dhomh: chas e 'fhiacalan rium; tha mo nàmhaid a' geurachadh a shùil orm.

10 Chas iad am beul rium; le masladh bhuail iad mo ghiala; cuideachd chruinnich iad a'm' aghaidh.

11 Thug Dia mi thairis do'n ain-diadhaidh, agus an làimh nan aingidh thilg e mi.

12 An sìth bha mi, ach phronn e mi: agus rug e air mo mhuineal, agus chrath e as a chéile mi, agus chuir e suas mi dha féin mar chuspair.

13 Tha a luchd-shaighead¹⁴ gam chuairt-eachadh air gach taobh: sgoiltidh e m'airnean o chéile, agus cha chaomhain e; taomaidh e mach mo dhomblas air an talamh.

14 Brisidh e mi le briseadh air bhriseadh; ruithidh e orm mar churaidh¹⁵.

15 Dh'fhuair mi saic-eudach air mo chroicinn, agus shalaich mi m'adharc san duslach.

16 Tha m'eudan air a h-atadh¹⁶ le gal¹⁷, agus air mo rosgaibh¹⁸ *tha* sgàile à' bhàis;

17 Cha'n ann air son euceirt a'm' làmh-aibh: mar an ceudna *tha* m'urnuigh glan.

18 A thalamh, na còmhdaich thusa m'fhuil, agus na biodh àit aig mo ghlaodh.

19 Mar an ceudna nis, feuch, anns na nèamhaibh *tha* m'fhianuis, agus esan a bheir teistean orm anns na h-àirdibh.

20 A' fanoid orm *tha* mo chàirdean; chum Dhé tha mo shùil a' taomadh *dheur*.

21 O nach feudadh duine tagradh ri Dia, mar a *thagras* mac an duine r'a choimhearsnach¹⁹!

¹ cruaidh-chàs. ² reamhrad. ³ staoigean.
⁴ fàsail. ⁵ cha sin e an coimhliontachd air an talamh; cha chuir e mach sgàile air an talamh.
⁶ fhàilcan. ⁷ duais na h-eurach.
⁸ dìomhanas. ⁹ briathraibh faoin.
¹⁰ rinn thu aonarach. ¹¹ chasadh.

¹² annam. ¹³ Reub e mi 'na fheirg.
¹⁴ a shaighde. ¹⁵ mar fhamhair.
¹⁶ salchadh. ¹⁷ gal, caoineadh.
¹⁸ air fàbhradh bho shùil.
¹⁹ tagradh air son duine ri Dia, mar a thagras duine air son a choimhearsnach.

22 An uair a thig beagan da bhliadh-naibh, an sin san t-slighe air nach phill mi siubhlaidh mi.

CAIB. XVII.

1 Rinn Iob gearan an aghaidh a chairdean, agus thug e a chèis an laithair Dhé. 11 Chaidh a dhòchas sa' bheatha so thairis.

THRUAILLEADH m'anail; ghearradh as mo làithean; tha na h-uaignean air mo shon-sa.

2 Nach 'eil luchd-fanoid maille rium? agus 'nam brosnachadh nach 'eil mo shùil a' buanachadh?

3 Cuir sìos a nis, thoir dhomh urras maille riut: cò esan a ghlacas mo làmh?

4 Oir dh'fholuich thu an cridhe o thuigse: uime sin cha'n àrdaich thu iad.

5 Esan an ni miodal r'a chàirdibh¹, fàilnichidh sùilean a chloinne.

6 Agus rinn e mi a' m' ghnàth-fhocal an t-sluaigh; agus tha mi mar bhall-fochaid rompa².

7 Agus dhorchaich mo shùil le bròn³, agus tha mo bhuil uile mar sgàile.

8 Bithidh uamhas air na h-ionracain air son so; agus dùisgidh⁴ an neò-chiontach an aghaidh a' chealgair.

9 Agus cumaidh an duine cothromach a shlighe; agus gheibh esan a ta glan 'na làmhaidh tuilleadh neirt.

10 Ach air bhur son-sa uile, pillibh agus thigibh a nis; agus cha'n fhaigh mi duine glic 'nur measg.

11 Chaidh mo làithean thairis, bhriseadh mo smuainte⁵ air falbh, seilbh⁶ mo chridhe.

12 An oidheche tionndadhaidh iad gu là: tha'n solus goirid a thaobh dorchadais.

13 Ma dh'fheitheas mi, is i'n uaign mo thigh: san dorchadas rinn mi mo leaba.

14 Rì truailleadhachd thubhairt mi, Is tu m'àthair; ris a' chnuimh, Is tu mo mhàthair, agus mo phiuthar.

15 Agus e àit a nis am bheil mo dhòch-as⁷? seadh, mo dhòchas-sa, cò chi e?

16 Gu crannaibh an t-sluichd théid iad sìos: an sin bithidh ar fois cuideachd anns an duslach.

CAIB. XVIII.

1 Thug Bildad achmhasan do Iob a chionn gu'n robh e dh'easbhuidh foighidinn. 5 Dh'innis e gu'n cuirear solus an aingidh as, agus gu'n sgriosar a chuimhne bhàrr aghaidh na talmhainn.

AN sin fhreagair Bildad an Suhach, agus thubhairt e,

2 Cia fhada gun an cuir sibh crìoch air briathraibh? tuigibh⁸, agus 'na dhéigh sin labhramaid.

3 C'ar son a mheasar sinne mar ain-

mhidhibh, agus a tha sinn tàireil⁹ a'd' shùilibh-sa?

4 Tha e a' reubadh 'anama 'na chorr-uich: air do shon-sa an tréigear an talamh? agus an atharraichear a' charraig as a h-àit?

5 Seadh, cuirear solus an aingidh¹⁰ as: agus cha dealraich lasair¹¹ a théine.

6 Dorchaichear an solus 'na phàillium, agus cuirear as a lòchran aige.

7 Cumhannaichear ceuman a neirt, agus tilgidh a chomhairle féin sìos e:

8 Oir cuirear ann an lìon e le a chosaibh féin¹², agus air ribe¹³ imichidh e.

9 Glacaidh an cord air shàil e; buadh-aichidh am fear-reubainn 'na aghaidh.

10 Foluichte anns an talamh tha ribe air a shon, agus inneal-glacaidh air a shon air an t-slighe.

11 Air gach taobh cuiridh uamhasan eagal air, agus fuadaichidh iad air a chosaibh e.

12 Bithidh a neart air a chlaoidh le h-ocras, agus léir-sgrios deas aig a thaobh.

13 Ithidh e suas neart¹⁴ a chroicinn; ithidh ceud-ghin a' bhàis suas a neart.

14 Spionar as a phàillium, a dhòchas; agus bheir se e gu rìgh nan uamhann.

15 Gabhaidh e còmhnuidh 'na phàillium, a chionn nach leis-san e; crathar pronnag air àite-còmhnuidh.

16 Shìos tiormaichear a fhreumhan, agus shuas gearrar air falbh a bhàrr.

17 Sgriosar a chuimhne as an talamh, agus cha bhi ainm aige air an t-sràid.

18 Fògairear e o sholus gu dorchadas, agus as an t-saoghal tilgear e.

19 Cha bhi mac aige, no mac a mhiè am measg a shluaigh, no neach a mhair-eas 'na àitibh-còmhnuidh.

20 R'a là bithidh iongnadh orra-san a thig 'na dhéigh, mar a ghlac uamhas¹⁵ iadsan a thàinig roimhe.

21 Gu deimhin is iad sin ionada-còmh-nuidh an aingidh; agus is e so 'àite-san, do nach aithne Dia.

CAIB. XIX.

1 Tha Iob a' gearan gu'n d'àrdaich a chairdean iad féin 'na aghaidh nuair a bhean làmh an Tigh-earna ris. 23 A dhòchas ann an ais-eirigh o na marbhaibh.

ACH fhreagair Iob, agus thubhairt e, 2 Cia fhada chuireas sibh doilgheas air m'anam, agus a bhriseas sibh mo chridhe le briathraibh?

3 Na deich uairean so nìhaslaich sibh mi: cha nàir leibh gu bheil sibh cho còimh-each rium¹⁶.

4 Agus gu deimhin ma chaidh mi air

¹ a gheallas creach d'a chàirdibh.

² roimhe bha mi mar thiompan.

³ doilgheas, àrdan.

⁵ rìna.

⁷ mo dhùil.

⁴ dùisgear.

⁶ smuainte.

⁸ thugaibh fa'ncar.

⁹ gràineil, neò-ghlan.

¹⁰ nan aingidh.

¹¹ srad.

¹² cuirear ann an lìon a chos.

¹³ lìon, painteir.

¹⁵ fuathas.

¹⁶ air bhrù crudhachadh a'm' aghaidh.

seacharan, fauaidh mo sheacharan agam féin.

5 An àrdaich¹ sibhse d'a rìreadh sibh féin a'm' aghaidh, agus an tagair sibh mo mhasladh a'm' aghaidh?

6 Biodh fios agaibh a nis gu'n do thilg Dia thairis mi, agus gu'n do chuir e a lion mu'n cuairt orm.

7 Feuch, glaothaidh mi, Eucoir, ach cha 'n éisdear rium; éighidh mi gu h-àrd, ach cha 'n eil breitheanas ann.

8 Dhùin e suas mo shlighe air chor as nach urrainn mi dol seachad, agus chuir e dorchadas air mo cheumaibh.

9 Bhuin e mo ghloir dhìom, agus thug e an crùn bhàrr mo chinn.

10 Sgrìos e mi air gach taobh, agus chaidh as domh²; agus chuir e air falbh, mar chraoibh, mo dhòchas.

11 Agus las 'fhearga a'm' aghaidh, agus mheas e mi mar aon d'a naimhdbh.

12 Cuideachd thàinig a bhuidhnean, agus chuir iad suas an slighe a'm' aghaidh, agus champaich iad mu'n cuairt air mo phàillium.

13 Chuir e mo bhràithrean fad uam; agus tha mo luchd-eòlais gu deimhin air fàs coimheach rium.

14 Thréig mo dhilsean, agus dhi-chuimhnich mo luchd-eòlais³ mi.

15 Mheas muinntir mo thighe, agus mo bhanoglaich mi mar choigreach: a'm' eilthreach⁴ bha mi 'nan sùilibh.

16 Air mo sheirbhiseach ghairm mi, agus cha do fhreagair e: le m' bheul féin ghuidh mi air.

17 Bha m'anail coimheach do m' mhnai, ge do ghuidh mi as leth⁵ cloinne mo chuirp féin⁶.

18 Rinn eadhon clann òg tàir orm: dh'éirich mi, agus labhair iad a'm' aglaidh.

19 Ghabh mo luchd-rùin uile gràin dìom; agus tha iadsan a ghràdhaich mi air tionndadh a'm' aghaidh.

20 Ri m' chroicinn agus ri m'fheoil dhùlth-lean mo chnàmhan; agus chaidh mi as le croicinn m'fhiacal.

21 Gabhaibh truas dìom, gabhaibh truas dìom, O mo chairdean, oir bhean làmh Dhé rium.

22 C'ar son a gheur-leanas sibhse mi mar a ni Dia, agus le m'fheoil nach sà suichear sibh?

23 O nach robh mo bhriathra nis air an sgrìobhadh! O nach robh iad air an cur sìos ann an leabhar!

24 Le peann iaruinne agus luaidh gu bràth

ann an carraig nach robh iad air an gearradh.

25 Oir a ta fios agam gu bheil m'fhear-saoraidh beò, agus ma dheireadh gu seas e air an talamh⁷:

26 Agus an déigh dhoibh so mo chroicinn a chnàmh⁸, gidheadh ann am fheoil gu'm faic mi Dia:

27 Neach a chi mise air mo shon féin, agus air an amhairc mo shùilean-sa, agus ni h-e neach eile: so uile chuir mi suas a'm' chom féin⁹.

28 Ach their sibhse, C'ar son a gheur-leanamaide, agus gu'n d'fhuaradh freumh a' ghnothuich ann¹⁰?

29 Biodh eagal oirbh roimh 'n chlaidheamh; oir fàsaidh an claidheamh teth [an aghaidh] eucearta¹¹, chum gu'm bi fios agaibh gu'm bi breitheanas ann.

CAIB. XX.

1 *Tha Sophar a' nochdadh gur gearr caithream nan aingidh, agus nach moir soirbheas a' chealgair ach car tiota.*

AN sin fhreagair Sophar an Naamat-ach, agus thubhairt e,

2 Uime sin tha mo smuainte toirt orm freagairt, agus air a shon so ni mi deifir.

3 Achmhasan mo mhaslaidh cluinneam¹², agus tha spiorad mo thuisge a' toirt orm freagairt.

4 Nach aithne dhuit so o chian, o shuidhicheadh an duine air thalamh,

5 Gur gearr caithream¹³ nan aingidh, agus nach 'eil gairdeachas a' chealgair ach car tiota?

6 Ged éirich 'àirde¹⁴ suas gus na nèamhaibh, agus ged ruig a cheann na neoil;

7 Mar 'aolach féin gu bràth théid as da: their iadsan a chunnaic e, C'ait am bheil e?

8 Mar aisling grad-shiubhlaidh¹⁵ e, agus cha'n fhaighear e: agus teichidh e mar shealladh na h-oidhche.

9 An t-sùil a chunnaic e, cha 'n fhaic i e tuilleadh; agus ni's mò cha'n amhairc 'àite féin air.

10 Iarraidh a mhic na bochdan a thoileachadh, agus aisgidh a làmhan am maoin.

11 Tha a chnàmha làn do pheacadh 'òige¹⁶, agus maille ris anns an duslach luidhidh e.

12 Ged robh an t-olc milis 'na bleul, ged fholaich se e fuidh a theangaidh;

13 Ged chaomhain se e, agus nach tréig se e, ach gu'n gléidh se e an-taobh a stigh a bleoil;

14 Tionndaidhear a bhiadh 'na mhion-

chreubhag so. ⁹ ged chaithear m'airnean an taobh a stigh dhìom. ¹⁰ annam.

¹¹ oir bheir fearg peanas a' chlaidheimh.

¹² Mo chionnachadh maslach chuala mi.

¹³ luathghaire.

¹⁴ uail.

¹⁵ iteilichidh. ¹⁶ d'a pheacannaibh dìomhair.

¹ Ma dh'àrdaicheas.

² siubhlam.

³ mo chàirdean. ⁴ almhharach.

⁵ agus tha mi ri caoidh air son.

⁶ n'innidh; mo bhronna. Eabh.

⁷ gu'n éirich e air an duslach.

⁸ an déigh mo chroicinn ged chnàmh iad a'

ach, gu domblas nan nathair an taobh a stigh dheth.

15 Shluig e sìos beartas, agus sgeithidh e nìos e: tilgidh Dia mach as a bhroinn e.

16 Sùgaidh e nimh nan nathair¹: marbhaidh teanga na nathrach milltich e.

17 Cha 'n fhaic e na h-aimhniche 'nan roinnibh², na sruthain meala agus ime.

18 Aisigidh e ann air son an do shaothraich e, agus cha sluig e sìos e; a réir a shaoibhris³ bithidh 'aiseag⁴, agus cha dean e gairdeachas ann:

19 A chionn gu'n d'rinn e fòireigin, gu'n do thréig e na bochdan, le h-ainneart gu'n do thug e air falbh tigh nach do thog e.

20 Oir cha mhothaich e suaimhneas 'na chom⁵, cha tèaruinn e bheag do na mhiannaich e.

21 Cha 'n fhàgar a bheag d'a bhiadh; uime sin cha bhì suil aig duine air bith r'a mhaoin⁶.

22 Ann an iomlaine a' phailteis bithidh e ann an teanntachd: thig gach aobhar dragha air⁷.

23 An uair a bhios e gus a bhrù a lìonadh, tilgidh Dia fraoch⁸ 'fheirge air, agus frasaidd e air e 'nuair a bhios e ag itheadh.

24 Teichidh e roimh na h-armaibh iar-uinn: buailidh am bogha umha⁹ troimhe e.

25 Tairngear, agus thig a mach as a' chorp, thig an claidheamh loinneara¹⁰ mach as a dhomblas: thig uamhasan air.

26 Bithidh gach uile dhorchadas folaichte 'na ionadaibh dìomhair: loisgidh teine gun séideadh e: éiridh gu h-olc dhàsan a dh'fhàgar 'na phàillium.

27 Foillsichidh na nèamhan 'aingidh-eachd; agus éiridh an talamh 'na aghaidh.

28 Triallaidh fàs a thighe; sruthaidh nithe as ann an là 'fheirge.

29 Is e so cuibhrionn an duine aingidh o Dhia, agus an oighreachd a dh'orduich-eadh dha le Dia.

CAIB. XXI.

1 Dh'iarr Iob gu'n éisdeadh a chàirdean gu furachar r'a chainnt: 7 tha e a' nochdadh gu bheil na h-aingidh air uairibh a' soirbheachadh; 16 agus air uairibh eile gu bheil an sgrios soilleir. 30 Tha an t-aingidh air a' ghleidheadh chum là an sgrios.

ACH fhreagair Iob, agus thubhairt e, 2 Eisdibh gu furachar ri m' chainnt, agus biodh so mar¹¹ bhur comhfhurtachd.

3 Fuilgibh dhomh, agus labhraidh mi; agus an déigh dhomh labhairt, cuiribh ri' r fanoid.

4 A'm' thaobh-sa, an ann ri duine a tha mo ghearan? agus nam b'ann, c'ar son nach biodh mo spiorad fo bhuaireas¹²!

5 Amhaircibh orm, agus biodh iongnadh¹³ oirbh, agus cuiribh *bhur* làmh air *bhur* beul.

6 Oir an uair a chuimhniceas mi, tha eagal¹⁴ orm: agus glacadh geilt-chrith m'fheoil.

7 C'ar son a ta na h-aingidh beò, a dh'fhàsas iad sean, agus a bhios iad àrd¹⁵ ann an cumhachd?

8 Tha'n sliochd air a dhaingneachadh 'nam fianuis maille riu, agus an gineal fa chomhair an sùl.

9 Tha'n tighean saor o eagal¹⁶; agus cha 'n eil slat Dhé orra.

10 Ginidh an tarbh, agus cha'n fhàil-nich e; beiridh am bò laogh, agus cha tilg i e.

11 Cuiridh iad a mach an clann bheag mar threud; agus dainsaidh an gineal.

12 Togaidh iad an tiompan agus a' chlàrsach; agus nì iad gairdeachas ri fuaim an orgain,

13 Caithidh iad an làithean ann an saoi bhreas, agus ann an tiota¹⁷ thèid iad sìos do'n uaigh.

14 Agus their iad ri Dia, Imich uainn; oir cha'n àill leinn eòlas do shlighean,

15 Cò e an t-Uile-chumhachdach, gu'n deanamaid seirbhis dha? agus ciod an tairrbe bhios ann duinn, ma nì sinn urnuigh ris?

16 Feuch, cha 'n eil am maith 'nan làimh: tha comhairle nan aingidh fada uam-sa.

17 Cia minic a chuirear coinneal nan aingidh as? agus a thig an sgrios orra: roinnidh Dia doilgheasan 'na fheirge.

18 Bithidh iad mar asbhuaibh roimh 'n ghaoith, agus mar mhol a bheir an iomghaoth leatha.

19 Taisgidh Dia suas 'euceart-san¹⁸ d'a chloinn: diolaidh e dha, agus bithidh fios aig air.

20 Chi a shùilean a sgrios, agus do fheirge an Uile-chumhachdach diolaidh e.

21 Oir ciod an tlachd a bhios aige 'na thigh 'na dhéigh, 'nuair a ghearrar as àir-eamh a mhìos 'nam meadhon?

22 Do Dhia an teagaisg *neach air bith* eòlas, agus gur e féin a bheir breth orra-san a ta àrda?

23 Bàsaichidh e so 'na làn neart, agus e uile aig fois agus an sìth.

24 Tha 'innidh làn saill¹⁹, agus a chnàmhan air an taiseachadh le smior.

¹ asp. Sasg. petan. Eabh. ² meuraibh, sruth-chlaibh. ³ a neirt. ⁴ ath-dhioladh.

⁵ 'na bhroinn. ⁶ cha mhair a shoirbheas.

⁷ buailidh làmh gach duine dhroch-mhuinte air.

⁸ lasan. ⁹ stàilinn, cruadhadh.

¹⁰ lobhta, dealrach. ¹¹ an àit.

¹² air a theannachadh, air a bhrosnachadh.

¹³ uamhas. ¹⁴ uamhas.

¹⁵ barraichte, treun. ¹⁶ tèaruinte, agus as eugmhaits eagal.

¹⁷ ann an gradaig.

¹⁸ euceart an duine aingidh, a thruaighe.

¹⁹ a chiocha làn bainne.

25 Agus bàsaichidh e sin ann an searbh-as 'anama, agus cha 'n ith e idir le toil-inntinn.

26 Cuideachd anns an duslach luidhidh iad, agus còmhdaichidh cnuimhean iad.

27 Feuch, is aithne dhomh bhur smuainte, agus na h-innleachdan a tha sibh a' dealbhadh gu h-eucorach a'm' aghaidh:

28 Oir their sibh, C'ait am bheil tigh an duine mhòir, agus c'ait am bheil ionada-còmhnuidh nan aingidh?

29 Nach d'fheòraich sibh dhiubh-san a ghabhas seachad air an t-slighe? agus nach aithne dhuibh an comharan?

30 Gu'n gleidhear an t-aingidh chum là an sgrios: chum là na feirge gu'n toirear a mach iad.

31 Cò a chuireas an céill a shlighe as an eudan: agus cò a dh'ìocas dha na rinn e?

32 Ach a chum na h-uaigne bheir e, agus anns an àit-adhlacaidh fanaidh e.

33 Bithidh fòidean a' ghlinne milis dha, agus tairngidh gach duine 'na dhéigh, mar a ta iad do-àireamh roimhe.

34 Cionnus ma ta a tha sibh a' tabhairt comhfhurtachd dhomh gu dìomhain, an uair a ta cealg 'nur freagradh?

CAIB. XXII.

1 *Thug Eliphas fa'near nach urrainn duine bhi tarbhach do Dhia. 5 Chuir e mòran aingidheachd as leth Iob. 21 Dh'earail e air gu'n dùth-lanadh e ris an Tighearn, agus gu'n dioladh e a bhòidean da.*

AN sin fhreagair Eliphas an Temanach, agus thubhairt e,

2 Do Dhia am feud duine a bhi tarbhach, mar a dh'fheadas esan a ta glic bhi tarbhach dha féin?

3 An toil-inntinn do'n Uile-chumhachdach gu'n saor thusa thu féin? agus am buannachd e dha-san, gu'n dean thu do shlighean iomlan?

4 Air eagal romhad an cronaich e thu? an téid e chum breitheanais leat?

5 Nach 'eil t'aingidheachd mòr? agus t'euhearta gun chrìoch?

6 Oir ghabh thu geall o d' bhràithribh gun aobhar, agus eudach nan lomnochd bhuin¹ thu dhiubh.

7 Cha d'thug thu uisge do'n sgìth r'a òl, agus o'n ocrach chum thu aran.

8 Ach aig fear a' ghairdean làidir bha an talamh; agus ghabh an duine urramach còmhnuidh ann.

9 Chuir thu bantraichean uait falamh, agus bhriseadh gairdeana nan dilleachdan.

10 Air an aobhar sin mu'n cuairt ort bha ribeachan, agus ghlac² geill obann thu;

11 No dorchadas air chor as nach faic-

eadh tu; agus còmhdaich pailteas uisgeachan thu.

12 Nach 'eil Dia ann an àirde nan nèamh? agus faic mullach³ nan rionnag, cia àrd a ta iad.

13 Agus their thusa, Cionnus a ta fios aig Dia? troimh an dorchadas⁴ am breith-nich e?

14 Tha neoil 'nan còmhdachadh dha, agus cha'n fhaic e, agus ann an cuirt nan nèamh siubhlaidh e.

15 An d'thug thu fa'near an t-slighe o shean, air an d'ìmic daoine aingidh?

16 A ghearradh sìos roimh an am, agus thaom tuil thar am bunait;

17 A thubhairt ri Dia, Imich uainn; agus ciod is urrainn an t-Uile-chumhachdach a dheauamh air ar⁵ son?

18 Gidheadh lìon e an tighean le nithibh maithe: ach gu ma fada bhios comhairle nan aingidh uamsa!

19 Chi na h-ionraic, agus bithidh aoibhneas orra; agus ni an neo-chiontach gàire-fanoid riù.

20 An àit, nach do ghearradh ar maoinne sìos; ach loisgidh teine am fuigheall-san.

21 Gabh-sa nis eòlas air-san, agus bian sith: mar sin thig maithe a d' ionnsuidh.

22 Gabh, guidheam ort, an lagh o'bheul, agus cuir suas a bhriathran, ann ad chridhe.

23 Ma philleas tu dh'ionnsuidh an Uile-chumhachdach, togar suas thu; cuiridh tu euheart am fad o d' phàillionaibh.

24 Agus cuiridh tu suas or mar dhuslach, agus or Ophir mar chlachaidh nan sruth.

25 Agus bithidh an t-Uile-chumhachdach 'na dhìean agad, agus bithidh near⁶ aingidh agad.

26 Oir an sin bithidh do thlachd anns an Uile-chumhachdach, agus togaidh tu suas do ghnùis a dh'ionnsuidh Dhé.

27 Ni thu urnuigh ris, agus éisidh e riut, agus diolaidh tu do bhòidean.

28 Agus cuiridh tu ni romhad, agus daingnichear dhuit e; agus air do shligheibh dealraichidh solus.

29 An uair a dh'ìslichear daoine, an sin their thu, Bithidh àrdachadh ann; agus saoraidh e an t-ìriosal.

30 Saoraidh se esan nach 'eil neo-chiontach⁷, agus saor a le glòine do⁸ làmh-sa.

CAIB. XXIII.

1 *Mhiannaich Iob teachd a dh'ionnsuidh àite-còmhnuidh Dhé, agus a chùis a thagraidh 'na làthair. 8 Ged tha Dia neo-fhaicsinneach is aithne dha slighe an duine. 11 Ionracas Iob. 13 Tha comhairle Dhé neo-chaohlaidheach.*

ACH fhreagair Iob, agus thubhairt e,
2 An diugh féin is searbh mo ghearan: is truite mo bhuille na m'osna.

¹ rùisg.³ àirde; ceann. Eabh.² glacaidh.⁴ an neul dorchas.⁵ an.⁶ pailteas⁷ an neo-chionlach, eilean an neo-chionlach. ⁸ a.

3 Och gun fhios agam c'ait am faighinn esan, agus gu'n tiginn a dh'ionnsuidh 'àite!

4 Chuirinn mo chùis an ordugh 'na làthair, agus lìonainn mo bheul le h-argu-maidibh.

5 Bhiodh fios agam air na briathraibh leis am freagaireadh e mi, agus thuiginn ciod a theireadh e rium.

6 Le a mhòr chumhachd an tagaireadh e a'm' aghaidh? ni h-eadh; ach chuireadh e neart annam.

7 An sin thagaireadh am firean ris, agus bhithinn air mo shaoradh gu bràthl o m' bheirtheamh.

8 Feuch, théid mi air m'aghaidh, ach cha 'n'eil esan ann; agus air m'ais, ach cha mhothaich mi e:

9 Air an làimh chlì, far am bheil e ag oibreachadh, ach cha 'n fhaic mi e; fol-aichidh se e féin air an làimh dheis, agus cha léir dhomh e.

10 Ach is aithne dha an t-slighe agam: an uair a dhearbhas e mi, mar òr thig mi a mach.

11 Air a cheumaibh chum mo chos; ghléidh mi a shlighe, agus cha do chlaon mi.

12 O àithne a bhilean cha deachaidh mi air m'ais; ni's mò na mo dhlighe b'ad mheas mi briathran a bheoil¹.

13 Ach tha e san aon bheachd², agus cò a dh'iompaicheas³ e? agus an ni is miann le 'anam, sin ni e.

14 Oir coimhlionaidh e an ni a dh'ord-uicheadh dhomhas: agus tha mòran d'an leithidibh sin aige.

15 Uime sin tha fiamh orm 'na fhianuis; an uair a bheir mi fa'near, tha eagal orm roimhe:

16 Oir mhaothaich Dia mo chridhe, agus chuir an t-Uile-chumhachdach fiamh orm;

17 A chionn nach do ghearradh as mi roimh an dorchadas, agus o m' ghnùis nach d'fholaich an dorchadas.

CAIB. XXIV.

1 Nochd Iob gu bheil na h-aingidh gu minic a' soirbheachadh 'nan aingidheachd, agus a' bàs-achadh mar shluagh eile.

C'AR son, o nach d'fholaicheadh aim-sircan o'n Uile-chumhachdach, nach faic iadsan d'an aithne e a làithean;

2 Atharraichidh iad na comharan tal-mhainn; bheir iad treudan leo le foir-neart, agus biadhaidh siad iad.

3 Iomainidh iad air falbh asal nan dill-eachdan; mar gheall glacaidh iad damh na bantraich.

4 Tionndaidh iad na feumaich as an

t-slighe: le chéile folaichidh bochdan na talmhainn iad féin.

5 Feuch, mar asalaibh fiadhaich anns an fhàsach théid iad a mach a chum an oibre, ag éirigh gu moch a chum creiche: bheir am fàsach biadh dhoibh d'an òig-ridh⁴.

6 Anns an fhearann buainidh iad arbh-ar; agus cruinnichidh iad fion-fhoghara an aingidh.

7 Bheir iad air an lomnochd luidhe gun eudach, agus gun chòmhdachadh anns an fhuachd.

8 Le frasaibh nam beann bithidh iad fliuch, agus a dhùth fasgaidh⁵ gabhaidh iad 'nan glacaibh a' charraig.

9 Spìonaidh iad an dilleachdan o'n chich, agus o'n bhochd gabhaidh iad geall.

10 Bheir iad air imeachd lomnochd, gun eudach; agus o na h-ocraich bheir iad leo an sguab.

11 An taobh a stigh d'am ballachaibh fàisgidh⁶ iad oladh; bruthaidh iad am fion-amair, agus fuilingidh iad tart.

12 As a' bhaile tha daoine ag osnaich, agus éighidh anam nan daoine leònta; gidheadh cha chuir Dia amaideachd as an leth.

13 Tha iad dhiubhsan a dh'éireas suas an aghaidh an t-soluis; cha 'n aithne dhoibh a shlighean, agus cha ghluais iad 'na cheumaibh.

14 Leis an t-solus éiridh am mortair⁷, [agus] marbhaidh e am bochd agus am feumach; agus anns an oidhche bithidh e mar ghaduiche.

15 Mar an ceudna feithidh sùil an adh-altranaich ris an dubh-thra⁸, ag ràdh, Cha'n fhaic sùil mi; agus cuiridh e fol-ach air 'aghaidh.

16 Cladhaichidh iad anns an dorchadas troimh thighibh, a chomharaich iad dhoibh féin san là; cha'n aithne dhoibh an solus:

17 Oir tha mhaduinn dhoibh-san mar sgàile a' bhàis: ma dh'aithnicheas neach iad, bithidh iad ann an uamhasaibh sgàile a' bhàis.

18 Luath tha e mar na h-uisgeacha⁹; mallaichear an cuibhrionn air an talamh: cha'n fhaic e slighe nam fion-lios.

19 Bheir tiormachd agus teas leo uisg-eachan an t-sneachdaidh; an uaigh iad-san a pheacaich.

20 Di-chuimhnichidh a' bhrù e; biadhaidh a' chnuimh gu milis air; ni's mò cha chuimhnicheare; agus brisear aingidh-eachd mar chrann.

21 Bithidh e olc ris a' mhnai neo-

¹ a'm' chridhe thaig mi briathran a bheoil.

² tha e 'na aon.

³ thionndaidheas, philleas.

⁴ d'an cloinn.

⁵ a chion tearmuinn.

⁶ ni.

⁷ murtair.

⁸ fhuasgar, anmoch.

⁹ air aghaidh nan uisgeacha. Eabh.

thorraich, nach beir *clann*; agus do'n bhantraich cha dean e maith.

22 Agus tairngidh e na daoine treuna le a neart: éiridh e suas, agus cha 'n'èil *neach air bith* cinnteach d'a bheatha.

23 Bleir e dha a bhi ann an tèaruinteachd, agus *as a sin* earbaidh e; ach *a ta* a shùilean air an slighibh.

24 Ardaichear iad rè tamuill, ach cha bhi iad ann; islichear iad, agus mar na h-uile bheirear air falbh iad, agus mar cheann déise gearrar as iad.

25 Agus mur 'eil e mar sin a nis, cò a ni breugair dhiom, agus a bleir gu neo-ni mo chaint?

CAIB. XXV.

1 *Nochd Bildad tighearnas an Uile-chumhachdaich, agus truaillidheachd an duine.*

AN sin fhreagair Bildad an Suhach, agus thubhairt e,

2 *Tha tighearnas agus eagal maille risan: ni e sìth 'na ionadaibh arda.*

3 Am bheil àireamh air bith air a shlòigh? agus cò air nach éirich a sholus.

4 Cionnus ma ta a shaorar duine aig Dia? agus cionnus a bhios esan glan a rugadh o mhaoi?

5 Amhaire eadhon air a' ghealaich, agus cha dealraich i; agus cha 'n'èil na rionnaga glan 'na shealladh.

6 Cia is ro lugha na sin an duine *a ta* 'na chnuimh; agus mac an duine *a ta* 'na chnuimh?

CAIB. XXVI.

1 *Chronaich Iob Bildad: 5 Dh'aidich e gu bheil cumhachd agus gliocas Dhé gun chrìoch, agus dorannachaidh.*

ACH fhreagair Iob, agus thubhairt e, 2 Cionnus a chuidich thu leis an ti *a ta* gun chumhachd? cionnus a shaor thu an gairdean *a ta* gun neart?

3 Cionnus a chomhairlich thu esan aig nach 'eil gliocas, agus a dh'fhoillsich thu gu pailte an ni mar a ta e?

4 Cia ris a labhair thu briathran? agus cia leis an spiorad a thàinig uait?

5 Dealbhar *nithe* marbha fuidh na h-uisgeachaibh, agus an luchd-àiteachaidh.

6 Lomnochd tha ifrinn 'na làthair, agus cha 'n'èil còmhachadh aig léir-sgrìos.

7 *Tha e a'* sineadh na h-àirde tuath os ceann an ionaid fhalaimeh, a' crochadh na talmhainn air neo-ni;

8 A' ceangal suas nan uisgeacha 'na neulaibh, agus cha reubar an neul fopa;

9 A' cumail a stigh¹ aghaidh a righ-chaitreach, a' sgoileadh a neoil oirre.

10 Chuairtich e na h-uisgeacha le crìoch-aibh, gus an teirig² an là maille ris an oidhche.

11 Crìothnaichidh puist³ nan nèamh,

agus bithidh uamhas orra r'a achmhasan.

12 Le 'chumhachd roinnidh e an fhairege, agus le 'thuigse buailidh e an t-uabhair reach.

13 Le a spiorad sgeadaich e na nèamha; dhealbha a làmh an nathair lùbach.

14 Feuch, *is* iad sin cuid d'a shlighibh; ach cia beag a' chuibhrionn a chuala sinn deth? agus cò a dh'fheudas tairneanach a chumhachd a thuigsinn?

CAIB. XXVII.

1 *Tha Iob a' cur roimhe buanachadh 'na ionracas, agus 'na fhèrantachd, 8 a chionn gu bheil an cealgair gun dòchas.*

AGUS bhunaich Iob 'na chosamhlachd a labhairt a mach, agus thubhairt e,

2 Mar is beò Dia *a* thug air falbh mo bhreitheanas, agus an t-Uile-chumhachdach a chràidh m'anam,

3 Co fhad as a bhios m'anail annam, agus spiorad Dhé ann am chuinneibh⁴,

4 Cha labhair mo bhilean aingidheachd, agus cha chan mo theanga cealg.

5 Nar leigeadh Dia gu'n saorainn sibh: gus am bàsaich mi, cha'n atharraich mi m'ionracas uam.

6 Ann am fhèrantachd fanaidh mi, agus cha leig mi uam i; cha mhaslaich mo chridhe *mi* rè mo làithean.

7 Mar an t-aingidh biodh mo nàmhaid; agus esan a dh'èreas suas a'm' aghaidh mar an t-eucorach.

8 Oir ciod e dòchas a' chealgair, ge do bhunaich e, 'nuair a bheir Dia air falbh 'anam?

9 An éisd Dia r'a ghlaodh, 'nuair a thig àmhghar air?

10 Anns an Uile-chumhachdach an gabh e tlachd? an gairm e air Dia gach àm?

11 Tcagaigsidh mi sibh le làimh Dhé; *an ni a ta* aig an Uile-chumhachdach, cha cheil mi.

12 Feuch, chunnaic sibh féin uile è; c'ar son ma ta a tha sibh cho ro fhaoin?

13 Is i so cuibhrionn an duine aingidh aig Dia, agus oighreachd luchd-foirneart *a gheibh* iad o'n Uile-chumhachdach.

14 Ma dh'fhàsas a mhic lìonmhor, *is ann* air son a' chlaidheimh; agus cha sàsaichear a shliochd le h-aran.

15 Adhlai ceair iadsan a mhaireas 'na dhéigh⁵ anns a' bhàs; agus cha ghuil a bhantraichean.

16 Ged charn e suas airgid mar an duslach, agus ged dheasaich e eudach mar an làthaich;

17 Deasaichidh se e, ach cuiridh an t-ionracan air e; agus roinnidh an neòchiontach an t-airgid.

18 Togaidh e mar an leomann a thigh,

¹ air a h-ais.

² tig crìoch air.

³ tuiridhean; pillars. Sasg.

⁴ choimhlionaibh.

⁵ iarmad.

agus mar bhothan *a* ni am fear-coimlid.

19 Luidhidh an saobhir sìos, ach cha chruinnichear e: fosgailidh e a shùilean, agus cha 'n'èil e ann.

20 Glacaidh uamhasan e mar uisgeacha: san oidhche goididh doinnionn air falbh e.

21 Bheir a' ghaoth an ear leatha e, agus siubhlaidh e; agus le h-ìomghaoith grad-ghluaisidh i as 'àit e.

22 Oir caithidh¹ Dia air, agus cha chaomhain e: bu mhiann leis teicheadh as a làimh.

23 Buailidh daoine an basan ris, agus le sgeig fuadaichidh iad as 'àit e.

CAIB. XXVIII.

1 *Tha Iob a' nochdadh, ged rannsaich duine nithe domhain an t-saoghail so, nach urrain e luach gliocais a thuigsinn; 23 Aig Dia a mhàin tha eòlas air gliocas.*

GU cinnteach tha dol a mach² aig an airgid, agus àit aig an òr anns an leagh iad e.

2 Bheirear iarunn as an talamh, agus leaghar a' chlach 'na h-umha.

3 Chuir e crìoch air an dorchadas; agus rannsaichidh e mach gach iomlaine, clachan duibhre agus sgàile a' bhàis.

4 Brisidh an sruth³ a mach o'n luchd-àiteachaidh; dearmadar⁴ iad leis a' chois; tiormaichear suas iad; o dhaoibh siubhlaidh iad.

5 *A thaobh* na talmhainn, aiseid thig aran; agus fuidhe⁵ tionndaidhear suas amhuil teine:

6 *Is iad* a clachan àit na saphir; agus *tha* duslach òir aice:

7 Ceum nach aithne do'n eunlaith, agus nac faca suil na fainge⁶.

8 Cha do shaltair cuileana an leòmhain⁷ air, agus cha deachaidh an leòmhann garg seachad air.

9 Air a' charraig cuiridh e mach a làmh: tilgidh e bun os ceann na beanntan.

10 Anns na creagaibh bheir e air aimhnichibh briseadh a mach; agus chì a shùil gach ni luachmhor.

11 Ceanglaidh e na h-aimhnichean o dhol thairis; agus *an ni a ta* folaichte bheir e gu solus.

12 Ach cia as a gheibhear gliocas? agus c'ait am bheil ionad na tuigse?

13 Cha'n aithne do dhuine a luach⁸; agus cha'n fhaighear i ann an tìr nam beò.

14 Their an doimhne, Cha 'n'èil i an-nam-sa; agus their a' mhuir, Cha 'n'èil i maille rium-sa.

15 Cha toirear òr air a son, agus cha tomhaisear airgid mar a luach.

16 Cha mheasar i le h-òr na h-Ophir, leis an Onics luachmhoir, no leis ant-saphir.

17 Cha choimeasar òr no leug rithe; agus cha *bhi* a malairt le seudaibh do'n òr fhior-ghlan.

18 Air coireal no neamhuidibh⁹ cha luadhar; oir tha luach gliocais os ceann nan clach a's uaisle¹⁰.

19 Cha choimeasar topas na h-Etiopia rithe: leis an òr fhior-ghlan cha mheasar i.

20 Cia as ma ta a thig gliocas? agus c'ait am bheil ionad na tuigse?

21 Oir a ta i am folach o shùilbhan nìle bheò; agus o eunlaith an athair tha i an cleith.

22 Thubhairt léir-sgrios agus am bàs, Le'r cluasaibh chuala sinn a cliù.

23 Tuigidh Dia a slighe, agus is aithne dha a h-ait:

24 Oir gu crìochaibh na talmhainn amhaircidh esan; fuidh na neamhaibh uile chi e:

25 Chum gu dean e cudthrom do'n ghaoith, agus *gu* tomhais e na h-uisgeacha le tomhas.

26 An uair a rinn e reachd do'n uisge, agus slighe do dhealanach na tairneanaich;

27 An sin chunnaic e i, agus dh'fhoillsich e i; dheasaich e i, seadh, agus rannsaich e mach i.

28 Agus thubhairt e ris an duine, Feuch, eagal an Tighearn, *is e sin* gliocas; agus an t-olc a thrèigsinn, tuigse.

CAIB. XXIX.

1 *Chuinneich Iob air na làithibh san do dhealtraich Ìochran Dhé air a cheann: 11 Bha e 'na charaid do'n dìlleachdan, agus do'n bhantraich.*

AGU**S** bhuanach Iob 'na chosamhlachd a labhairt a mach, agus thubhairt e,

2 Och nach robh mi mar anns na mìosaibh a chaidh tharum, mar anns na làithibh *air* an do choimhid¹¹ Dia mi!

3 'Nuair a thug e air a lòchran dealrachadh air mo cheann, *agus le* a sholus a ghluais mi san dorchadas;

4 Mar a bha mi ann an làithibh¹² m'òige, 'nuair a bha rùn-dìomhair Dhé air mo phàillinn;

5 An uair a bha'n t-Uile-chumbachdach fathast maille rium, *agus m'òganaich*¹² mu m' thimchioll;

6 An uair a nìgh mi mo cheuma le h-im, agus a thaom a' charraig a mach dhomh sruthain olaidh;

7 'Nuair a chaidh mi mach gu geata a' bhaile, a dheasaich mi m'àite-suidhe anns an t-sràid.

8 Chunnaic na daoine òga mi, agus dh'fholach siad iad féin; agus dh'érich na daoine aosda, *agus sheas* iad.

9 Sguir na h-uachdarain do labhairt, agus chuir iad an làmh air am beul.

¹ tilgidh. ² cuisle.

³ na sruthain, an tuil.

⁴ di-chuinneichear.

⁵ fuipe, o a h-ìochdar.

⁶ na seabhaig; Aiah.

Eabh.

⁷ mic an àrdain.

⁸ a riaghailt, a slighe.

⁹ gabis. Eabh.

¹⁰ rubies. Sasg.

peninim. Eabh.

¹¹ ghléidh.

¹² mo chlann.

10 Dh'fhan na h-àrd-uaislean 'nan tosd, agus lean an teanga r'an gial.

11 An uair a chual¹ a' chluas, bheannaich i mi; agus an uair a chunnaic an t-sùil, thug i fianuis leam:

12 A chionn gu'n do shaor mi am bochd a bha 'g éigheach, agus an dilleachdan aig nach robh fear-cuideachaidh¹.

13 Thàinig beannachadh an ti a bha ullamh gu bàsachadh orm; agus thug mi air cridhe na bantraich seinn le h-aoibhneas.

14 Chuir mi ionracas orm, agus dh'eudaich e mi: mar fhalluin agus mar choron bha mo bhrèitheanas.

15 Bu shùilean mi do'n dall, agus bu chosan mi do'n bhacach.

16 Bha mi a'm' athair do na bochdaibh; agus a' chùis nach b' aithne² dhomh ramnaich mi mach.

17 Agus bhris mi gial an droch dhuine, agus á fhiaclaibh spion mi a' chreach.

18 Agus thubhairt mi, Ann am nead gheibh mi bàs, agus mar a' ghaineamh mi mi mo làithean lìonmhor.

19 Bha³ mo fhreumh air a sgaoileadh a mach làimh ris na h-uisgeachaibh, agus luidh⁴ an drùchd rè na h-oidhche air mo mheangan.

20 Bha mo ghloir ùr agam, agus dh'ath-nuadhaicheadh mo bhogha ann am làimh.

21 Rium-sa dh'éisd daoine, agus dh'fheith iad, agus bha iad 'nan tosd ri m' chomhairle.

22 An déigh mo bhriathra cha do labh-air iad a ris; agus shìl mo chaimt orra.

23 Agus bha sùil aca rium, mar ris an uisge; agus dh'fhosgail iad am beul gu farsuinn, mar air son an uisge dheireannaich.

24 Ma ghàir mi riu, cha do chreid iad; agus solus mo ghnùise cha do thilg iad sìos.

25 Thagh mi mach an slighe, agus shuidh mi mar cheannard, agus cliòmh-nuich mi mar rìgh ann an armailt, mar aon a bheir comhfhurtachd do luchd-bròin.

CAIB. XXX.

1 Tha Iob a' caoidh gu'n robh a' mheas agus a chliù air an tionndadh gu maslach; 15 agus gu'n robh a shoirbheachadh air atharrachadh gu àmghar.

ACH a nis tha iadsan a's òige na mise a' deanamh fanoid orm, nuinntir nach b'fhiù leam an aithriclean a chur maille ri conaibh mo threuda.

2 Seadh, ciod an tairbhe a bhiodh dhomh-sa ann an neart an làmh, aig an deachaidh as d'an sean aois?

3 Le dìth agus le gorta bha iad uaig-

neach, a' teicheadh do'n fhasach, a bha san àm a chaidh seachad 'na fhàsalachd agus 'na léir-sgrìos:

4 A' gearradh sìos maloinh⁵ làimh ris na preasaibh, agus freumhan-aiteil mar bhiadh.

5 O mheasg dhaoine dh'fhògradh a mach iad: dh'éigh iad 'nan aghaidh, mar an aghaidh gaduiche.

6 Bha iad a' chòmhnuidh ann an sgaradh nan gleann, ann an uamhaibh na tal-mhainn agus nan creag.

7 Am measg nam preas rinn iad gearan⁶: fuidh an eanntagaich chruinnicheadh iad ri chèile:

8 Clann nan amadan, seadh, clann dhaoine gun chliù: bha iad ni bu tàireile na 'n talamh.

9 Agus a nis is mise a's òran doibh, agus a ta mi a'm' leth-fhocal aca.

10 Tha iad a' gabhail gràin dìom, tha iad a' teicheadh fad as uam, agus cha chaomhain iad smugaid a thilgeadh a'm' eudan.

11 A chionn gu'n d'fhuasgail e mo chord, agus gu'n do shàraich e mi, leig iadsan mar an ceudna an t-srian sgaoilte romham.

12 Air mo dheas làimh dh'éirich an òigridh; thug iad air mo chosaibh sleamh-nachadh uam, agus thog iad suas a'm' aghaidh slighean an sgrios.

13 Mhìll iad mo cheuma, chuir iad m' aimhleas air aghaidh, gun fhear-cuid-eachaidh aca.

14 Mar bhriseadh a steach leathan thàinig iad, mar ann an léir-sgrìos thaom iad a stigh.

15 Thionndaidh uamhasan a'm' aghaidh; ruaig iad m'anam mar a' ghaoth; agus mar neul chaidh mo thèarunteachd seachad.

16 Agus a nis tha m'anam air a dhòrtadh a mach orm; ghlac làithean amhghair mi.

17 San oidhche tha mo chnàmhan air an tolladh annam: agus cha bhi m'fhéithean aig fois.

18 Le meud a neirt mhùth e m'eudach⁷: mar bhile mo chòta chuairtich e mi.

19 Thilg e mi ann an làthaich, agus tha mi air fàs cosmhuil ri duslach agus ri luaith.

20 Dh'éigh mi riut, agus cha d'éisd thu rium; sheas mi suas, agus [cha] d'thug thu fa'near mi.

21 Tha thu air fàs an-ìochdmhor rium; le neart do làimhe tha thu 'gad chur féin a'm' aghaidh.

22 Tha thu 'gam thogail ris a' ghlaioith:

¹ agus esan aig nach robh fear-cuideachaidh.

² cùis an ti nach b'aithne dhomh.

³ Bithidh.

⁴ luidhidh.

⁵ gropis; maluch. Eabh.

⁶ ciurrulan; sìtirich. Eabh. ⁷ orm.

⁸ le neart m'eucalach chaochaileadh m'eudach.

tha thu toirt orm marcachd *oirre*, agus a' leaghadh as mo bhrìgh.

23 Oir a ta fhios agam gu'n toir thu mi gu bàs, agus a chum an tìghe a dh'ord-uicheadh do gach uile bheò.

24 Gidheadh cha sin e mach a làmh a chum na h-uaigne, ged ghlaodh iad 'na sgrios.

25 Nach do ghluil mise air a slion-san a bha ann an àmhghar? nach robh m'anam doilich air son an *duine* bhochd?

26 An uair a bha sùil agam ri maith, an sin thàinig olc; agus an uair a bha dùil agam ri solus, thàinig dorchadas.

27 Bha m'ìnnigh air ghoil, agus cha robh fois aca: chuir làithean àmhghair romham.

28 Ri bròn dh'imich mi as eugmhais na gréine: dh'éirich mi, anns a' chomh-chruinneachadh dh'éigh mi.

29 Is bràthair mi do na dragonaibh, agus *is* companach mi do na cumhach-agaibh¹.

30 Dhubhadh mo chroicinn orm, agus loisgeadh mo chnàman na teas.

31 Agus tha mo chlarsach air tionndadh gu bròn, agus m'organ gu guth na muinntir a ghuileas.

CAIB. XXXI.

1 *Tha Iob a' nochdadh gu'n do ghluais e ann an tréibhdhàreas a chridhe; 16 agus gu'n robh e caomhneil ris an dilleachdan agus ris na bochdaibh.*

RINN mi coimhcheangal ri m'shùil-ibh: c'ar son ma ta a smuainichium air maighdinn?

2 Oir ciod e cuibhrionn Dhé o'n *ionad* shuas, agus oighreachd an Uile-chumhachdaich o'n àirde?

3 Nach 'eil sgrios ann do'n droch *dhuine*, agus coimhichead² do luchd-deanamh na h-euceirt?

4 Nach 'eil e a' faicinn mo shlighean, agus ag àireamh mo cheumanna gu léir?

5 Ma ghluais mi le dìomhanas, agus ma ghreas mo chos a chum ceilge;

6 Cudthromaichear mi ann am meidhibh a' cheartais, chum gu'm bi fios aig Dia air m'ionracas.

7 Ma thionndaidh mo cheum as an t-slighe, agus an déigh mo shùil gu'n do ghluais mo chridhe, agus ri m'làmhaidh gu'n do lean smal air bith;

8 Cuiream, agus itheadh neach eile; seadh, biodh mo shliochd air an spionadh as am frèimh.

9 Ma mhealladh mo chridhe le mnaoi, agus aig dorus mo choimhearsnaich ma rinn mi feall-fholach;

10 Meileadh mo bhean do neach eile, agus cromadh daoine eile oirre:

11 Oir *is* cionta mòr so, agus *is* euceart e *air son* nam breitheamh³.

12 Oir *is* teine e a loisgeas chum sgrios, agus a spionadh as m'fhàs uile.

13 Ma rinn mi tàir air cuis m'òglaich, no mo bhanoglaich, an uair a thagair iad⁴ rium;

14 Ciod ma ta a ni mi 'nuair a dh'éireas Dia? agus an uair a dh'fhiosraicheas e, ciod a fhreagaireas mi dha?

15 Nach e'n ti a rinn mise anns a' bhroinn, a rinn esan? agus nach aon a dhealbh sinn anns a' bhroinn?

16 Ma chum mi na bochdan o'm miann, agus ma thug mi air sùilibh na bantraich fàilneachadh;

17 No ma dh'ith mi mo ghreim a'm' aonar, agus nach d'ith an dilleachdan dheth;

18 Oir o m'òige dh'fhàs e suas maille rium, mar *aig* 'athair: agus o bliorinn mo mhàthar thèoraich mi ise;)

19 Ma chunnaic mi neach a' bàsachadh a dhith eudaich agus nach *robh* còmhachadh aig a' bhochd;

20 Mur do bheannaich a leasraidh mi, agus mur do bhlàthaicheadh e le lomradh mo chaorach.

21 Ma thog mi mo làmh an aglaidh an dilleachdain, an uair a chunnaic mi mo chòmhachadh anns a' gheata;

22 Tuiteadh mo ghairdean o'n t-slinnean, agus brisear mo righe o'n chuaimh⁵.

23 Oir *bha* sgrios o Dhia 'na uamhas dhomhsa, agus a thaobh 'àirde-san cha robh e'n comas domh fulang.

24 Ma chuir mi san òr mo dhòchas, agus ma thubhairt mi ris an òr fhiorghlan, *Is tu* m'earbsa;

25 Ma rinn mi gairdeachas a chionn gu'n *robh* mo bheartas mòr, agus a chionn gu'n d'fhuair mo làmh mòran;

26 Ma dh'amhairc mi air a' ghréin an uair a dhealraich i, no air a' ghealaich a' gluasad an soille,;

27 Agus gu'n do mhealladh mo chridhe os iosal, agus gu'n do phòg mo bheul mo làmh;

28 *Is* cionta so mar an ceudna *air son* a' bhreitheimh; oir dh'àicheadhainn an Dia a ta shuas.

29 Ma rinn mi gairdeachas ri sgrios an ti a dh'fhuathaich mi, agus ma thog mi mi féin suas a chionn gu'n d'fhàinig olc air;

30 Oir cha do leig mi le m' bheul peacachadh le mallachadh iarraidh air 'auam.

31 Mur dubhairt fir mo phàilliuin, Och

¹ coileachaibh-oidhche.

² peanas iongantach.

³ gu bhà air a smachdachadh leis na breitheamhnaibh.

⁴ a rinn iad strì rium.

⁵ o'n uillinn.

nach robh sinn air ar sàsachadh le 'fheoil!

32 Am muigh cha do luidh an coigreach: mo dhorus dh'fhosgail mi do'n fhear-turuis.

33 Ma cheil mi, mar Adhamh, m'eu-saontais, le m'eucairt fholachadh a'm' uchd:

34 An uair a bha eagal orm² roimh mhòr-shluagh, no chuir tarcuiss theaghlach uamhas orm, agus a bha mi a'm' thosd, agus nach deachaidh mi mach air dorus.

35 Och nach éisdeadh aon rium! feuch, *is e* mo mhiann *gu'm* freagaireadh an t-Uile-chumhachdach mi, agus *gu'n* sgriobhadh m'fhear-casaid³ leabhar.

36 Gu deimhin air mo ghualainn ghabhainn e; cheanglainn e mar choron orm.

37 Aireamh mo cheumanna chuirinn an céill da; mar cheannard rachainn am fagus da.

38 Ma dh'éigheas m'fhearann 'am' aghaidh, no ma ghearaineas mar an ceudna a chlaisean:

39 Ma dh'ith mi a thoradh gun airgiod, no ma thug mi air a luchd-seilbh an anam a chall:

40 An àit cruithneachd fàsadh droighneach, agus, an àit eorna, ionntagach⁴. Chriochnaichheadh briathran Iob.

CAIB. XXXII.

1 *Las fearg Elihu an aghaidh Iob agus a thriuir chairdean.* 6 *Chronaich e a chairdean a chionn nach do dhearbh iad an aghaidh Iob.* 16 *Nochd e 'eud gu labhairt.*

AN sin sgair an triuir dhaoine so do thoirt freagraidh air Iob, a chionn *gu'n robh* e ionraic 'na shùilbhe féin.

2 Agus las fearg Elihu mhic Bharacheil a' Bhusithich, do chinneadh Ram; an aghaidh Iob las 'fhearg, a chionn *gu'n* d'fhireanaich⁵ se e féin ni's mò na Dia.

3 Mar an ceudna an aghaidh a thriuir chairdean las 'fhearg, a chionn nach d'fhair iad freagradh, agus *gu'n* do dhùit iad Iob.

4 A nis dh'fheith Elihu agus an do labhair Iob, a chionn *gu'm bu* shine iad na esan.

5 An uair a chunnaic Elihu nach *robh* freagradh air bith ann am beul an triuir dhaoine so, an sin las 'fhearg.

6 Agus fhreagair Elihu mac Bharacheil a' Bhusithich, agus thubhairt e, *Tha* mise òg, agus sibhse aosmhor; uime sin bha eagal orm, agus bha mi sgàthach mu m' bharaill a nochladh dhuibh.

7 Thubhairt mi, Labhradh làithean, agus teagaisgeadh lionmhoireachd bhliadh-nacha gliocas.

8 Ach *a ta* spiorad san duine, agus bheir anail an Uile-chumhachdaich tuigse dha⁶.

9 Cha bhi daoine mòra *a ghnàth* glic; agus *cha* tuig na h-aosmhoir breitheanas.

10 Uime sin thubhairt mi, Eisdibh rium; nochdaidh mise mar an ceudna mo bharaill.

11 Feuch, dh'fheith mi ri'r briathraibh; dh'éisd mi ri 'r reusonaibh, gus an do rannsaich sibh ciod a theireadh sibh.

12 Seadh, thug mi fa'near sibh; agus, feuch, cha *robh* aon agaibh a dhearbhl an aghaidh Iob, no a thug freagradh air a bhriathraibh;

13 Aireagal *gu'n* abradh sibh, Fhuair sinn a mach gliocas: *is e* Dia a thilgeas sìos e, cha 'n e duine.

14 A nis cha do chuir e a bhriathran an ordugh a'm' aghaidh-sa; agus le bhur foclaibh-sa⁷ cha fhreagair mise e.

15 Bha uamhas orra; cha do fhreagair iad ni bu mhò; sgair iad do labhairt.

16 Agus dh'fheith mi, ach cha do labhair iad; ach sheas iad, agus cha do fhreagair iad ni bu mhò.

17 Freagairidh mise mar an ceudna mo chuid féin; nochdaidh mise mar an ceudna mo bharaill.

18 Oir a ta mi làn do bhriathraibh; a ta spiorad mo chum 'gam éigheachadh.

19 Feuch, *a ta* mo chom mar fhion gun dol as aige; mar shearraga nuadha, tha e ullamh gu bhi air a reubadh.

20 Labhraidh mi, agus bithidh lasachadh⁸ agam; fosgailidh mi mo bhilean, agus freagairidh mi.

21 Na gabham-sa, guidheam ort, ri gnùis duine air bith; agus ri duine na labhram gu miodalach.

22 Oir cha'n aithne dhomh-sa cainnt mhiodalach: nam *b'aithne*, gu h-aithghearr bheireadh mo Chruith-fhear air falbh mi.

CAIB. XXXIII.

1 *Thairg Elihu e féin a thagradh ri Iob.* 8 *Chronaich se e a chionn gu'n robh dòchas aig 'na neò-chiontas.* 14 *Le aising na h-oidheche bheir Dia eòlas do'n duine.*

UIME sin, a Iob, cluinn, guidheam ort, mo bhriathran⁹, agus éisd ri m'fhoclaibh uile.

2 Feuch, a nis dh'fhosgail mi mo bheul; labhair mo theanga ann am bheul.

3 O ionracas mo chridhe *thig* mo bhriathran; agus labhraidh mo bhilean eòlas gu soilleir.

¹ Och nach robh againn d'a fheoil! cha sàsuich-ear sinn. ² An robh eagal orm, &c.

³ m'escaraid.

⁴ eanntagach, luibh loibhcach.

⁵ gu'n do shaor.

⁷ uirghiol-sa.

⁹ mo chaimt, m'uirghiol.

⁶ dhoibh.

⁸ anail fois.

4 Rinn spiorad Dhé mi, agus thug anail an Uile-chumhachdaich beatha dhomh.

5 Ma's urrainn thu, freagair mi, cuir do bhriathran an ordugh a'm lathair, seas suas.

6 Feuch, a ta mise, mar a ta thu féin o Dhia¹; as a' chréidh dhealbhadh mise mar an ceudna.

7 Feuch, cha chuir m'uamhas-sa eagall ort, agus cha bhi mo lámh trom ort.

8 Gu cinnteach labhair thu a'm éisd-eachd, agus chuala mi guth [do] bhriathar, ag ràdh,

9 Glan a ta mi, gun eusaontas; neòchiontach a ta mi, agus cha 'n'eil euceart annam.

10 Feuch, tha e faghail chùisean² a'm aghaidh; tha e 'gam mheas mar a nàmhaid;

11 Tha e a' cur mo chos anns a' cheap; tha e a' geur-amharc air mo cheumaibh gu léir.

12 Feuch, an so cha 'n'eil thu ceart; freagairidh mi thu gur mò Dia na duine.

13 C'ar son a chuireas tu 'na aghaidh? oir ann an aon air bith d'a nithibh cha toir e cunntas³.

14 Oir aon uair labhraidh Dia, agus an dara uair cha'n amhairc e thairis air⁴.

15 Ann an aising, ann an sealladh⁵ na h-oidheche, 'nuair a thuiteas codal trom air daoineibh, 'nuair a bhios iad 'nan suain air an leabaidh;

16 An sin fosgailidh e cluasan dhaoine, agus seulaichidh e an teagasg,

17 Chum gu tarruing e duine o a dheanadas⁶, agus gu'm folaich e uabhar o dhuine;

18 Gu'n cum e 'anam o'n t-slochd, agus a bheatha o sgrìos leis a' chlaideamh.

19 Oir smachdaichear e le péin air a leabaidh, agus lìonmhoireachd a chnàmh le péin làidir:

20 Air chor as gu'n gabh a bheatha gràin do aran, agus 'anam do bhiadh deadh-bhladasa.

21 Caithcar 'fheoil air chor as nach faicear i; agus a chnàmhan nach facas, seasaidh a mach.

22 Agus tairngidh 'anam am fagus do'n uagh, agus a bheatha do na mìltearaibh.

23 Ma bhios teachdair aige, eadar-theang-air, aon am measg mhìle, a nochdadh 'ionracais do dhuine:

24 An sin gabhaidh e truas deth, agus thair e, Saor e o dhol sìos do'n t-slochd, fhuair mi éric⁷.

25 Bithidh 'fheoil nì's ùire na feoil leinibh; thig e air ais gu làithibh 'òige:

26 Nì e urnuigh ri Dia, agus gabhaidh

e gu caomhneil⁸ ris; agus chi e a ghruis le gairdeachas; oir locaidh e do dhuine 'ionracas.

27 Amhaircidh e air daoineibh, agus ma thair aon duine⁹, Pheacaich mi, agus chlaon mi an nì a bha ceart, agus cha robh e chum tairbhe dhomh;

28 Saoraidh e 'anam¹⁰ o dhol sìos do'n t-slochd, agus chi a¹¹ bheatha solus.

29 Feuch, na nithe sin uile oibrichidh Dia gu minic¹² a thaobh duine,

30 A thoirt 'anamaid air ais o'n t-slochd, gu bhi air a shoillseachadh le solus nam beò.

31 Thoir fa'near, a Iob, eisd rium; bi d'hosd, agus labhraidh mi.

32 Ma ta bheag agad r'a ràdh, freagair mi: labhair, oir bu mhiann leam do shaoradh¹³.

33 Mur 'eil, éisd thusa riumsa; bi d'hosd, agus teagaisgidh mise dhuit gliocas.

CAIB. XXXIV.

1 Rinn Eliku casaid air Iob a chionn gu'n dubhairt e gu'n robh e ionraic, agus gu'n d'thug Dia oir falbh a bhreitheanas. 10 Cha chomhruich aingidheachd maille ri Dia. 34 Chronaich Eliku Iob.

A THUILLEADH air son fhreagair Eliku, agus thubhairt e,

2 Chuinnibh mo bhriathra, a dhaoine glìce, agus éisdibh rium, sibhse aig am bheil eòlas:

3 Oir dearbhaidh a' chluas briathran, agus blaisidh an beul biadh.

4 Ròghnaicheamaid dhuinn féin breitheanas: biodh fios againn eadarunn féin ciod an nì a ta maith.

5 Oir thubhairt Iob, A ta mi ionraic; agus thug Dia air falbh mo bhreitheanas.

6 Ann am bhreitheanas tha mi air mo mhealladh¹⁴: tha mo lot do-leighis, as eugmhais eusaontais.

7 Cia an duine a ta cosmhuil ri Iob, a dh'òlas suas magadh mar uisge?

8 A dh'imicheas ann an cuideachd luchd-deanamh na h-euceirt, agus a shiubhlas le droch dhaoineibh.

9 Oir thubhairt e, Cha 'n'eil tairbhe ann do dhuine tlachd a ghabhail ann an Dia.

10 Uime sin éisdibh rium, sibhse a dhaoine tuigseach: Fada gu robh aingidheachd o Dhia, agus euceart o'u Uile-chumhachdach.

11 Oir gnòmh duine locaidh e dha, agus bheir e air gach duine gu faigh e a réir a shlighe.

12 Seadh, gu cinnteach cha dean Dia gu h-aingidh, agus cha chlaon an t-Uile-chumhachdach breitheanas.

13 Cò a chuir an talamh fuidh a chùram? agus cò a shuidhidh an domhan uile?

¹ a ta mise, a réir do ghuidhe, an àit Dhé.

² chion-fath. ³ cha fhreagair e.

⁴ seadh, dà uair, ged nach toir duine fa'near e.

⁵ taisbean. ⁶ a rùn.

⁷ luach-saoraidh, fuasgladh. ⁸ bàigheil.

⁹ agus thair e. ¹⁰ Shaor e m'anam. ¹¹ mo.

¹² tri uairean. Fabh. ¹³ do ghlanadh.

¹⁴ An deanainn breug an aghaidh mo cheirt?

14 Ma chuireas e a chridhe air¹, ma chruinnicheas e d'a ionnsuidh féin asporad agus 'anail ;

15 Bàsaichidh gach uile fheoil le chéile, agus pillidh an duine a ris do'n duslach.

16 A nis ma *tha* tuigse *agad*, cluin so ; éisd ri guth mo bhriathar :

17 An riaghail esan féin aig am bheil fuath do cheartas ? agus an dìt thu esan a's ro cheirte ?

18 An abrar ri rìgh, *Tha thu* aingidh ? ri daoineibh urramach², *Tha sibh* ain-diadhaidh ?

19 *Ris-san* nach gabh ri gnùis uachdaran, agus nach meas an saoi-bhir nì's mò na'm bochd ? oir *is* iad uile oibre a làmh.

20 Gu h-obann gheibh iad bàs, agus mu mheadhon-oidhche cuirear an sluagh fo bhuairas³, agus siubhlaidh iad : agus bheirear an cumhachdach air falbh gun làmh.

21 Oir *a ta* a shùilean air slighibh duine, agus chi e a cheumanna gu léir.

22 Cha 'n'èil dorchadas no sgàile bàis ann, far am folaich luchd-deanamh na h-aingidheachd iad féin.

23 Oir cha leig e tuilleadh 'sa chòir air duine, chum gu'n rachadh e am breitheanas ri Dia.

24 Brisidh e sìos *daoine* cumhachdach gun àireamh, agus cuiridh e suas *daoine* eile 'nan àit.

25 Uime sin is aithne dha an gnìomharan, agus tìlgidh e bun os ceann *iad* san oidhche, agus sgrìosar iad.

26 Mar dhroch dhaoineibh buailidh e iad ann an sealladh soilleir dhaoine eile :

27 A chionn gu'n do thionndaidh iad air an ais uaith, agus nach d'thug iad fa'near aon air bith d'a shligheibh ;

28 Air chor as gu'n d'thug iad air glaoch nam bochd teachd d'a ionnsuidh, agus gu'n cual' e glaoch nan truaghan.

29 An nair a bheir esan fois, cò a ni buaireas⁴ ? agus an uair a dh'fholaicheas e a ghnùis, cò a chi e ? ma's ann a thaobh cinnich, no a thaobh duine a mhàin.

30 A chum nach rìghidh duine a bhios 'na chealgair, air eagal gu'm biodh an sluagh air an ribeadh.

31 Gu cinnteach ri Dia tha e iomchuidh r'a ràdh, Ghiùlain mi *smachdachadh*, cha chiontaich mi *nì's mò*.

32 An ni nach léir domh, teagaisg thusa dhomh : ma rinn mi aingidheachd, cha dean mi *sin* nì's mò.

33 An ann a réir do thoile-sa *bu chòir an ni a bhi* ? diolaidh se e, ma dhhiùltas tusa, oir is tu féin a ròghnaicheas, agus cha mhise ; uime sin an nia's aithne dhuith labhair.

34 Innseadh daoine tuigseach dhomh,

agus éisdeadh duine glic rium.

35 Labhair Iob gun eòlas, agus *bha* a bhriathran as eugmhais gliocais.

36 *Is* e mo mhiann Iob a bhi air a dhearbhadh chum na crìche, air son a fhreagraidhean le daoineibh aingidh.

37 Oir tha e a' cur ceannairc r'a pheacadh, a' bualadh a bhas 'nar measg, agus a' deanamh a bhriathra ònmhor an aghaidh Dhé.

CAIB. XXXV.

1 *Chronaich Elihu Iob a chionn gu'n dubhairt e gu'n robh 'fhìreantachd os ceann fhìreantachd Dhé.*
2 *Glaohdhaidh mòran a tha air an sàrachadh ri Dia, ach cha'n fhaigh iad éisdeachd, do bhrìgh gu bheil iad as eugmhais creideimh.*

FHREAGAIR Elihu a rìs, agus thubhairt e,

2 An saoil thusa so a bhi ccart, gu'n dubhairt thu, *Tha m'fhìreantachd-sa os ceann fhìreantachd Dhé.*

3 Oir thubhairt thu, Ciod an tairbhe bhios ann dhuith-se ? *Agus*, ciod a' bhuannachd a bhios ann dhomh-sa, *ma shaorar mi o m' pheacadh* ?

4 Freagairidh mise thu, agus do chompanaich maille riut.

5 Amhairc air na nèamhaibh, agus, feuch ; agus faic na neoil a's àirde na thu.

6 Ma pheacaicheas tu, ciod a ni thu 'na aghaidh-san ? agus *ma* dh'fhàsas t'eus-aontais ònmhor, ciod a ni thu air-san ?

7 Ma bhios tu ionraic, ciod a bheir thu dhasan ? no ciod a gheibh e o d' làimh ?

8 Feudaidh t'aingidheachd *cron a dheanamh* do dhuine mar a ta thusa, agus t'fhìreantachd *a bhi tarbhach* do mhac an duine.

9 Glaohdhaidh iadsan a tha air an sàrachadh le mòran, éighidh iad air son gairdein na mòir-chuideachd⁵.

10 Ach cha 'n abair aon neach, C'àit am bheil Dia mo Chruith-fhear, a tha tabhairt dhàn seachad san oidhche ?

11 A tha 'gar teagasg nì's mò na ainmhidhean na talmhainn, agus 'gar deanamh nì's glìce na eunlaith nan speur.

12 An sin éighidh iad, ach cha fhreagair neach *air bith iad*, air son uabhair dhroch dhaoine.

13 Gu cinnteach cha 'n éisd Dia ri diomhanas, agus cha bhi meas aig an Uile-chumhachdach air.

14 Ged their thu nach faic thu e, tha breitheanas 'na làthair ; uime sin earb thusa as.

15 Ach a nis a chionn nach 'èil e *mar sin*, dh'fhiosraich e 'na chorruich, gidheadh nì h-aithne dha *sin* ann an deuch-aime⁶ mhòir.

¹ air duine.

³ fo thrioblaid.

² uachdaranai-bh, àrd-uaislibh.

⁴ a chuireas tuairghe.

⁶ cionta.

⁵ nan daoine mòra.

16 Uime sin fosgailidh Iob a bheul gu dìomhain: nì e briathra lìonmhor gun eòlas.

CAIB. XXXVI.

1 *Nochd Eilìhu gu bheil Dia ceart 'na uile shlighibh.*
8 *Crìoch smachdachaidh Dhé.* 24 *Tha oibre an Tighearn iongantach agus do-thuigsinn.*

AGUS chaidh Eilìhu air aghaidh, agus a thubhairt e,

2 Leig dhomh beagan, agus nochdaidh mi dhuit gu *bheil* fathast nì *agam* ri labhairt air son Dhé.

3 Tairngidh¹ mi m'èolas o chéin, agus do m' Chruith-fhear² bheir mi ceartas.

4 Oir gu cinnteach cha *bhì* mo bhriathra breugach. *tha* esan a ta iomlan ann an eòlas maille riut.

5 Feuch, *tha* Dia cumhachdach, agus cha dean e tàir; cumhachdach ann an neart *le* gliocas.

6 Cha ghléidh e beò an t-aingidh; ach bheir e ceartas do na bochdaibh.

7 Cha tarruing e a shùilean o'n ionracan; ach *a ta iad* le righribh air an righchaithir, agus daingnichidh e iad gu bràth, agus àrdaichear iad.

8 Agus ma *bhios* iad ceangailte an geimhlibh, *ma* ghllacar iad ann an cordaibh àmhghair;

9 An sin nochdaidh e dhoibh an obair agus an eusaontais, gu'n robh iad anabarrach.

10 Agus fosgailidh e an cluas chum fòghlum, agus àithnidh e dhoibh pilltinn o euceart.

11 Ma dh'èisdeas iad *ris* agus ma nì iad seirbhis *da*, caithidh iad an làithean ann an saobhbheas, agus am bliadhnann ann an subhachas.

12 Ach mur éisd³ iad, cuirear as doibh leis a' chlaidheamh, agus gheibh iad bàs gun eòlas.

13 Ach carnaidh na cealgairean sa' chridhe suas fearg; cha 'n èigh iad an uair a cheanglas e iad.

14 Gheibh iad bàs 'nan òige, agus *tha* am beatha an measg nan neòghlan.

15 Saoraidh e am bochd 'na àmhghar; agus fosgailidh e an cluasan 'nan sàrach-adh.

16 Eadhon mar sin dh'atharraicheadh e thusa á meadhon, teanntachd *gu* àite far-suinn, far nach 'eil *teanntachd* air bith; agus *bhiodh* na chùirte air do bhord làn do shaille.

17 Ach choimhlion thu breitheanas an aingidh: gabhaidh breitheanas agus ceartas greim *dhìot*.

18 A chionn *gu bheil* fearg *riut*, tabhair an aire nach toir e air falbh thu le a' bhuille: an sin cha saor éiric⁴ mhòr thu.

19 Am meas e do shaoibheas? cha *mheas*, no òr, no uile neart cumhachd.

20 Na miannaich an oidliche 'nuair a ghearrar as sluagh 'nan àit.

21 Tabhair an aire nach claon thu gu euceart⁵; oir so ròghnaich thu thar àmhghar.

22 Feuch, àrdaichidh Dia le a chumhachd; cò a theagaisgeas cosmhuil risan?

23 Cò a dh'fhiosraich⁶ a shlighe? agus cò a dl'fheudas a ràdh, Rinn thu euceart?

24 Cuimhnich gu'n àrdaich thu 'obair-san, a chi daoine.

25 Chì na h-uile dhaoine i: chì duine i o chéin.

26 Feuch, *tha* Dia mòr, agus cha'n aithne dhuinne e; agus cha rannsaichear a mach àireamh a bhliadhnacha.

27 Oir nì e meanbh na braoin uisge: taomaidh iad a nuas uisge a réir a chèò,

28 A shìleas na neoil; frasaidd iad air an duine gu pailt.

29 A bhàrr air so, an urrainn *neach air bith* sgaoilleadh nan neul a thuigsinn, no fuaim a phàilluinn?

30 Feuch, sgaoididh e a sholus air, agus còmhdaichidh e iochdar na fairge.

31 Oir leo sin bheir e breth air an t-sluagh; bheir e biadh seachad am pailteas.

32 Le a làmhaidh⁷ còmhdaichidh e an solus, agus àithnidh e dha teachd a ris.

33 Nochdaidh an fhuaim aige a thaobh sin, an sprèidh mar an ceudna a thaobh na théid suas⁸.

CAIB. XXXVII.

1 *Tha Dia uamhasach 'na oibrìbh;* 15 *agus 'na ghliocas do-rannsaichidh.* 23 *Is còir do dhaoine eagal bhì orra roimhe.*

MAR an ceudna uime so chrìothnaich *le* mo chridhe, agus charaichheadh as 'ait e.

2 Eisdibh gu furachar ri fuaim a ghutha, agus an torman *a* théid a mach as a bheul.

3 Fuidh na nèamhaibh uile stiùbhraidh se e, agus a dhealanach gu crìochaibh na talmhainn.

4 'Na dhéigh sin beucaiddh guth: nì e tairneanach⁹ le guth a mhòralachd; agus cha chum e air an ais iad an uair a chluinn-e a ghuth.

5 Nì Dia tairneanach le a ghuth gu h-iongantach; nì e nithe mòra do-thuigsinn.

6 Oir ris an t-sneachda their e, Bì-sa air an talamh; mar an ceudna ris an uisge mheanbh, agus ri uisge mòr a neirt.

7 Air làmh gach duine cuiridh e seula,

¹ Togaidh. ² Crutheadair. ³ géill.
⁴ fuasgladh. ⁵ na tabhair spéis do euceart.

⁶ a dh'orduich. ⁷ neulaibh. ⁸ a' chò.
⁹ tairneachidh, no tairnichidh e.

chum gu'n aithnich na h-uile dhaoine 'obair-san.

8 Agus theid na fiadh-bheathaiche steach d'an gearaidh, agus 'nan àitibh-tàmh luidhidh iad.

9 As an àirde deas thig an ioma-ghlaoth¹, agus fuachd as an àirde tuath.

10 Le h-anail Dhé bheirear reodhadh; cumhainnichear leud nan uisgeacha.

11 Mar an ceudna le h-uisgeachadh sgithichidh e an neul tiugh: sgaoilidh e a neul soillseach.

12 Agus tionndaidhear mu'n cuairt e le a chomhairle; chum gu'n dean iad ge b'e ní a dh'àithneas e dhoibh air aghaidh a' chruinne-ché.

13 Bheir e air teachd, ma's ann a chum smachdachaidh, no air son 'fhearainn, no air son tròcair.

14 Eisd ri so, a Iob; seas, agus tabhair fa'near oibre iongantach Dhé.

15 An bheil fios agad c'uin a dh'orduich Dia iad, agus a thug e air solus a neoil dealrachadh?

16 Am bheil fios agad air cothromachadh nan neul, *air* oibrìbh iongantach an tì a ta iomlan ann an eòlas?

17 Cionnus a ta t'eudach blàth, 'nuair a chiùinichear² an talamh leis a' ghaoith á deas?

18 An do sgaoil thu mach maille ris-san na speura, a ta làidir, marsgathan leaghta?

19 Nochd dhuinn cìod a their sinn ris: cha'n urrainn sinn *ar cainnt* a chur an ordugh a thaobh dorchadais.

20 An innsear dha 'nuair a labhras mi? Ma labhras duine, gu cìumteach sluigear suas e.

21 Agus a nis cha'n fhaic *daoine* an solus dealrach a ta anns na neulaibh; ach siubhlaidh a' ghaoth, agus glanaidh i iad.

22 As an àirde tuath thig soinnion³: aig Dia tha mòrachd uamhasach.

23 An t-Uile-chumhachdach, cha 'n urrainn sinn fhaghail a mach: *tha e* òirdheire ann an cumhachd, agus am breitheanas, agus an làn cheartas: cha sàraich e.

24 Uime sin bithidh eagal air daoineibh roimhe: cha bhi meas aige air *duine* sam bith a *bhios* glic an cridhe.

CAIB. XXXVIII.

1 *Ghairm Dia air Iob as a' chuairt-ghaoith, agus dh'iarr e reusnachadh ris: 4 Le bhi 'g àireamh nithe iongantach a chumhachd nochd Dia dha gu bheil an duine a dhith eòlais agus neirt.*

AN sin fhreagar an Tighearn Iob as a chuairt-ghaoith¹, agus thubhairt e,

2 Cò e so a *tha* dorchachadh comhairle le briathraibh gun eòlas?

3 Crìoslaich a nis mar fhear do leas-raidh, agus feòraichidh mi dhìot, agus freagar thusa mi.

4 C'ait an robh thu 'nuair a leag mise bunaitean na talmhainn? innis, ma tha tuigse agad.

5 Cò a shuidhich a thoimhsean, ma's aithne dhuit? no cò a shìnn an snàithne-tomhais air?

6 Cìod air am bheil a bhunaitean air an daingneachadh? no cò a leag chlach-oisinn;

7 'Nuair a sheinn reulta na maidne cuideachd, agus a rinn uile mhic Dhé gairdeachas?

8 No cò a dhruid a stigh an fhairge le dorsaibh, 'nuair a bhris i mach *mar* gu'n tigeadh i as a' bhroinn?

9 An uair a rinn mi neul 'na thrusgan di, agus tiugh dhorchadas 'na chrìos-spaoidh⁵ di?

10 Agus a bhris mi suas di m' àite suidhichte, agus a rinn mi *dhi* crannan agus dorsan;

11 Agus a thubhairt mi, Gu ruig so thig thu, acli cha tig nì's faide, agus an so coisgear do thonna uaibhreach!

12 O *thoiseach* do làithean an d'thug thu àithne do'n mhaduinn? an d'thug thu fios a h-àite do'n scarthanaich⁶?

13 A chum greim a ghabhail⁷ do chrìochaibh na talmhainn, agus gu'n cratha na h-aingidh as.

14 Tionndaidhear e mar chriadh *ris* an t-seula; agus seasaidh iadsan mar eudach.

15 Agus cumar an solus o na h-aingidh, agus brisear an gairdean àrd.

16 An deachaidh tu steach gu tobraichibh na fairge? no ann an rannsachadh an dubhaigein⁸ an d'imich thu?

17 An d'fhosgladh geatachan a' bhàis duit? no m' faca tu dorsan sgàile a' bhàis?

18 An d'thug thu fa'near leud na talmhainn? innis, ma's aithne dhuit e uile.

19 C'ait *am bheil* an t-slighe *anns* an còmhnuich an solus? agus an dorchadas, c'ait *am bheil* 'ionad-san?

20 Gu'n gabhadh tu e g'a chrìch, agus gu'm b'àithne dhuit na ceuman a dh'ionnsuidh a thighe?

21 An aithne dhuit *e*, a chionn gu'n d' rugadh tu an sin, no *gu bheil* àireamh do bhliadhnaicha mòr?

22 An deachaidh tu steach gu ionmhasaibh an t-sneachdaidh? no m' faca tu ionmhasan na cloiche-meallain⁹?

23 A thaigse mise fa chomhair aimsir na teanntachd, fa chomhair là a' chatha agus a' chogaidh.

¹ a' chuairt-ghaoth.

² nuair a shìothaicheas e.

³ deadh-aimsir; òr.

⁴ ioma-ghaoith.

⁵ na chrìos-pasgaidh.

⁶ chamhaoir.

⁷ gus an gabh thu greim.

⁸ na doimhne.

⁹ cloich-shneachdaidh.

24 C'ia an rathad a dhealaichear an solus, a sgaoileas a' ghaoth an ear air an talamh?

25 Cò a roinn sruth-chlais air son na tuile, agus slighe air son dealanaich¹ na tairneanaich;

26 A thoirt air frasadh air an talamh far nach 'eil duine; air an fhàsach gun duine ann;

27 A shàsachadh an fhàsaich agus an dìthreabh, agus a thoirt air cinneas² an lus mhaoth fàs suas?

28 Am bheil athair aig an uisge? no cò a ghlin braoin an drùchda?

29 A broinn cò an d' thàinig an eigh³? agus liath-reodhadh nan speur, cò a ghlin e?

30 Mar chloich tha na h-uisgeachan air an cruadhachadh⁴, agus aghaidh na doimhne air reodhadh.

31 Am feid thusa cumhachda milse Phleiaides⁵ a cheangal, no ceanglaichean Orioin⁶ fhuasgladh?

32 An toir thu mach Madsarot⁷ 'na àm? no an stiùir thu Arctùrus maille r'a mhacaibh?

33 An aithne dhuit reachda nan nèamh? an suidhich thu an uachdaranachd air an talamh?

34 An tog thu suas a dh'ionnsuidh nan neul do ghuth, air chor as gu'n còmh-daich pailteas uisgeacha thu?

35 An cuir thu uait dealanaich, agus au téid iad, agus an abair iad riut, *Tha* sinn an so!

36 Cò a chuir gliocas nan taobh a stigh⁸? no cò a thug tuigse do'n chridhe?

37 Cò a dh'àirmheas na neoil an gliocas? no cò a choisgeas searraga nan nèamh;

38 'Nuair a dh'fhàsas an duslach 'na mheall cruaidh, agus a dhlùth-leanas na fòidean ri chèile?

39 An sealg thusa cobhartach do'n leòmhnan bhoirionn, agus an sàsaich thu ciocras⁹ nan leòmhnan òga;

40 'Nuair a chrùbas iad 'nan garaidh, a dh'fhanas iad ann an sgàile chum feall-fheitheamh?

41 Cò a sholaras do'n fhithreach a lòn? an uair a dh'èigheas an t-àl òg aige ri Dia, théid iad air iomroll⁹ a chion bidh.

CAIB. XXXIX.

1 Nochd Dia a chumhachd fèin, agus anmhuinneachd agus aineolas an duine, le e bhà coimhead agus a' riaghladh fhiadh-bheathaiche na macharach air dòigh neo-aithnichte do chreutair cruthaichte.

An aithne dhuitse an t-àm anns am beir gabhair fhiadhaich na carraig?

an toir thu fa'near c'uin a bheireas na h-eilde laoiigh?

2 An urrainn thu na mìosan àireamh a choimhlionas iad, agus an aithne dhuit an t-àm anns am beir iad?

3 Cromaidh siad iad fèin, beiridh iad an àl, tilgidh iad dhiubh an do-blàròn.

4 Tha an àl an culaidh mhaith, tha iad a' fàs suas anns na cluainibh¹⁰; théid iad a mach, agus cha phill iad d'an ionnsuidh.

5 Cò a chuir a mach an t-asal fiadhaich saor, agus cò a dh'fhuasgail ceanglaichean an asail fhiadhaich?

6 D'an d'rinn mi a thigh do'n fhàsach, agus 'àite-còmhnuidh do'n fhearann neo-thorach.

7 Ni e tarcuis air mòr-shluagh a' bhaile, ri éigheach an fhir-ghreasaidh cha 'n éisd e.

8 Rannsaichidh e na sléibhtean chum ionaltraidh, agus siridh e 'n dèigh gach nì uaine¹¹.

9 Am bi an t-aon-adharcach¹² toileach air seirbhis a dheanamh dhuit? am fau e aig do phrasaich?

10 An ceangail thu an t-aon-adharcach le 'chuing anns a' chlais? no'n cliath e na gleannan a'd' dhèigh?

11 An earb thu as, a chionn gur mòr a neart? no 'm fàg thu t'obair dha?

12 An creid thu e gu'n aigse e¹³ do shìol, agus gu'n cruinnich se e do d' urlar-bualaidh¹⁴?

13 An tusa thug sgiathan breagha do na peucagaibh¹⁵? no sgiathan agus iteach¹⁶ do'n struth¹⁷;

14 A dh'fhàgas a h-uibhean nan talamh, agus a blàthaicheas iad san duslach,

15 Agus a dhì-chuimhniceas gu'm feud cos am bruthadh, no fiadh-bheathach na macharach am briseadh?

16 Cruadhaichear i an aghaidh a h-àlaich mar nach bu leatha iad: diomhain tha a saothair gun eagal;

17 A chionn gu'n do dhiùlt Dia dhi gliocas, agus nach do roinn e tuigse rithe.

18 Ge b'e uair a thogas si i fèin an àird, ni i tàir air an each, agus air a mharach.

19 An d'thug thusa neart do'n each? an d'eudaich thu a mhuineal le tairneanaich?

20 An dean thu gealtach e mar an leum-nach-uaine¹⁸? is uamhasach glòir a chuim-eine¹⁹.

21 Bùraichidh²⁰ e le chois anns a' ghleann, agus ni e gairdeachas 'na neart: théid e air aghaidh an coinneamh an airm.

22 Ni e magadh air eagal, agus cha bhi

¹ theintich.

³ deigh.

⁵ Chimah, Eabh.

⁷ sna h-àirniibh.

⁹ seacharan.

² ùras.

⁴ air am folachadh.

⁶ Chesil, Eabh.

⁸ mianu; anam. Eabh.

¹⁰ le h-arbhar.

¹¹ glas. ¹² an sròn-adharcach, am buabhull.

¹³ gu'n tabhair e stigh. ¹⁴ do d' shabhal.

¹⁵ renanim. Eabh. ¹⁶ cleiteach. Eabh.

¹⁷ ostrich. Sasg.

¹⁸ fionnan feoir, dreolan

tasbhuidh. ¹⁹ a phollairean. ²⁰ Cladhaichidh.

uamhann air, agus cha phill e air ais o fhaobhar¹ a' chlàidheimh.

23 Ni 'm balg-saighid torman 'na aghaidh, an t-sleagh loinreach agus an gath².

24 Le gairge agus feirg cladaichidh³ e 'n talamh; agus cha chreid e gur i fuaim na trompaid *a ta ann*.

25 Am meadhon *fuaim* na trompaid their e, Ha, ha! agus fad as gabhaidh e boladh a' chatha, tairneanaich nan ceannard, agus na h-iolaich.

26 An ann le d' ghliocas-sa a dh'iteal-aicheas an t-seablrag, a' shìneas i a sgiathan a làimh na h-àirde deas?

27 An ann air t' àithne-sa a dh'èireas an iolaire suas, agus a ni i a nead gu h-àrd?

28 Gabhaidh i còmhnuidh anns a' charr-aig, agus fanaidh i air scor⁴ na carraig, agus *anns* an daingneach.

29 As sin iarraidh i còbhartach; chi a sùilean fad as.

30 Agus sùgaidh a h-àlach⁵ suas fuil; agus far *am bi* na mairbh, an sin *bithidh* ise.

CAIB. XL.

1 *Dh'irioslaich Iob e fèin an làthair Dhé. 6 Labhair an Tighearna ris as a' chuairt-ghaoith. 15 Dh'fhòillsich Dia a chumhachd ann an cruthachadh Bhehemot.*

A THUILLEADH air so fhreagair an Tighearna Iob, agus thubhairt e,

2 An teagaisg esan a ni strì ris an Uile-chumhachdach? esan a thagras ri Dia, freagradh e air a shon.

3 Agus fhreagair Iob an Tighearna, agus thubhairt e,

4 Feuch, tha mi gràineil; ciod a fhreagras mi dhuit? cuiridh mi mo làmh air mo bheul.

5 Aon uair labhair mi, ach cha fhreagair mi; seadh, dà uair, ach cha 'n abair mi tuilleadh.

6 An sin fhreagair an Tighearna Iob as a' chuairt-ghaoith, agus thubhairt e,

7 Crìoslaich a nis mar dhuine do leasraidh: feòraichidh mi dhìot, agus freagair thusa mi⁶.

8 An toir thusa mo bhreitheanas-sa gu neo-ni? an dìt thu mise, chum gu saorar thu fèin?

9 Am *bheil* gairdean agad cosmhail ri Dia? no'n dean thu tairneanach le guth cosmhail ris-san?

10 Sgeadaich thu fèin a nis le mòrachd agus le h-òirdheirceas, agus eudaich thu fèin le glòir agus maise.

11 Taom⁷ a mach fraoch t'fheirge, agus faic gach neach a ta uaibhreach, agus irioslaich e.

12 Faic gach neach a ta uaibhreach, islich e, agus saltair sìos na droch dhaoine 'nan àit.

13 Folaich iad san duslach le chéile, ceangail an aghaidhean an d'iomlaireachd.

14 An sin mar an ceudna aidichidh mise dhuit, gu'n saor do dheas làmh fèin thu.

15 Feuch a nis, Behemot, a rinn mise maille riut; ithidh e feur mar dhamh.

16 Feuch a nis, *tha* a neart 'na leasraidh, agus a spionnadh ann an iomaig a bhronn.

17 Ghuaisidh e 'earball mar sheudar: tha fèithean-luthaidh a shléisdean ceangailte r'a chéile.

18 *Tha* a chnàmha làidir *mar* umha; *tha* a chnàmha mar chrannaibh iarunn.

19 *Is* e tùs shlighean Dhé e: an ti a chruthaich e, feudaidh esan a chlàidheamh a thoirt am fagus *da*.

20 Gu cinnteach bheir na sléibhte dha feur, far am bi uile bheathaiche na mach-arach ri sùgradh⁸.

21 Fuidh na crannaibh dubharach luidhidh e, ann am folach na cuilce agus ua làthaich.

22 Còmhdaichidh na cranna duibharach e le'n sgàile: cuairtichidh seileach an t-sruthain e.

23 Feuch, thig amhainn gu cruaidh air, agus cha dean e deifir: bithidh dòchas aige 'nuair a thig Iordan a mach g'a bheul⁹.

24 'Na shùilibh¹⁰ an glac *duine* e? le dubhanaibh¹¹ an toll e a shròn?

CAIB. XLI.

Cumhachd Dhé mar a ta e air a nochdadh anns an Lebhiatan.

A N tarraing thu mach Lebhiatan le dubhan, no a theanga le cord a leig-eas tu sìos?

2 An cuir thu cromag 'na shròn, agus le deilg¹² an toll thu a ghial?

3 An dean e mòran aslachaidh ort? an labhair e *briathra* mine riut?

4 An dean e coimhcheangal riut? an gabh thu e mar sheirbhiseach gu bràth?

5 An dean thu cluicheadh ris mar *ri* h-eun? no'n ceangail thu e do d' ghruagachaibh?

6 An dean na companaich cuirm dheth? ann roinn iad e am meas nan ceannaiche?

7 An lìon thu le gathaibh a chroicinn, no le mòr-ghathaibh éisg a cheann?

8 Cuir do làmh air, cuimhnich an cath, na dean tuilleadh.

9 Feuch, is dìomhain a dhòchas-san: eadhon aig a shealladh nach tilgear *duine* sìos?

10 Nach borbe e 'nuair a dhùisgeas *neach*

¹ aghaidh. Eabh.

² sluidhidh casuas

³ eoin dga.

⁴ Tig.

⁵ an sgiath.

⁶ fiacail. Eabh.

⁷ thoir thusa fios domh.

⁸ mire, cluicheadh.

⁹ dladh e suas amhainn, agus cha-bhi cablag air: is dòigh leis gu'n tarraing e suas Iordan 'na bheul.

¹⁰ 'na shealladh.

¹¹ ann an ribeachaibh.

¹² bior.

e¹? agus cò esan a sheasas 'na làthair²?

11 Cò a ghabh romham³, agus gu'n diolainn? *gach nì a ta* fuidh na nèamhaibh uile, is leam-sa e.

12 Cha cheil mi a' bhuill, no a neart, no a dhealbha sgiamhach.

13 Cò a dh'fhoillsicheas aghaidh 'eud-aich? cò a thig d'a ionnsuidh le a shrian dubailte?

14 Cò a dh'fhosgaileas dorsan 'aghaidh? *tha* 'fhiacalan uamhasach mu'n cuairt.

15 *Is iad a* lannan 'uail, dùinte suas le chéile *mar le* seula daingean;

16 Aon air a cur ri h-aon eile, air chor as nach tig deò eatorra.

17 Tha iad air an làthadh ri chéile, tha iad a' dlùth-leantuinn ri chéile, agus cha ghabh iad dealachadh.

18 Le a shitrich soillsichidh solus; agus *tha* a shùilean cosmhuil ri rosgaibh na maidne.

19 As a bheul théid leusan⁴; leumaidh srada teine a mach.

20 A cuinneanaibh a shròine thig deatach a mach, mar a' poit air ghoil no coire.

21 Lasaidh 'anail gual, agus théid lasair a mach as a bheul.

22 'Na mhuineal còmhnuichidh neart, agus roimhe ruithidh bròn⁵.

23 Tha fillichean⁶ 'fheòla a' leantuinn ri chéile: *tha* iad daingean annta féin; cha ghabh iad gluasad.

24 *Tha* a chridhe cruaidh mar chloich, cruaidh eadhon mar chloich-mhuilinn ìochdaraich.

25 An uair a thogas se e féin suas, bithidh na cumhachdaich fo gheilt: air eagal brisidh glanaidh siad iad féin.

26 Cha seas claidheamh an ti a bheanas ris; an t-sleagh, an gath, no'n lùireach⁷.

27 Measaidh e mar chonlaich ant-iarunn, mar fhiodh grod an t-umha.

28 Cha toir an t-saighead⁸ air teicheadh; 'nan conlaich tionndaidhear leis clachan a' chroinn-tàbhuill.

29 Mar chonlaich measar gathan⁹; agus ni e gàire ri crathadh sleagha.

30 Fuidhe *tha* clacha geura: sgaoilidh e *nithe* geura air an làthair.

31 Bheir e air an doimhne bhi air ghoil mar chuire: an fhaireg ni e mar phoit olaidh-ungaidh.

32 'Na dhéigh bheir e air a shlighe soill-seachladh: saoilidh *neach* an t-aigean a bhi liath.

33 Air thalamh cha 'n eil a shamhuil, a rinneadh as eugmhais eagail.

34 Chi e gach *nì* àrd: *tha* e 'na rìgh os ceann uile chloinne an uabhair.

CAIB. XLII.

1 *Dh'òmhlaich Iob e féin fo làimh Dhé.* 7 *Chronaich Dia a thrì àir chairdean a chionn nach do labhair iad an nì a bha ceart d'a thaobh.* 9 *Ghabh an Tighearna ri Iob, agus thug e da a dhà uiread 'sa bha aige roimhe.* 13 *Clann Iob:* 16 *Aois agus a bhàs.*

A N sin fhreagair Iob an Tighearna, agus thubhairt e,

2 Tha fios agam gur urrainn thusa gach *nì* a dheanamh, agus nach ceilear smuain air bith ort.

3 Cò esan a cheileas comhairle gun eolas? uime sin chuir mi 'n céill *nithe* nach do thuig mi; *nithe* tuilleadh 's iongantach air mo shonsa, nach b'aithne dhomh.

4 Eisd, guidheam ort, agus labhairidh mi: feòraichidh mi dhìot, agus foillsich thusa dhomh.

5 Le éisdeachd na cluaise cluala mi thu; ach a nis chunnaic mo shùil thu.

6 Uime sin gabhaidh mi gràin diom féin, agus ni mi aithreachas ann an duslach agus an lnaith.

7 Ach an déigh do'n Tighearna na briathra sin a labhairt ri Iob, thubhairt an Tighearna ri Eliphaz an Temanach, Tha m'fhearg air a lasadh a'd' aghaidh-sa, agus an aghaidh do dhithis chairdean, a chionn nach do labhair sibh a'm' thaobh-sa¹⁰ an *nì* a bha ceart, mar *a labhair* m'òglach Iob.

8 Agus uime sin gabhaibh dhuibh féin seachd tairbh òga agus seachd reitheach-an, agus rachaibh a dh'ionnsuidh m'òg-laich Iob, agus ìobraibh ìobairt-loisgte air bhur son féin; agus ni m'òglach Iob ùrnuigh air bhur son, oir ris-san¹¹ gabhaidh mi: chum nach buin mi ribh *a réir bhur* n-amaideachd, a chionn nach do labhair sibh a'm' thaobh-sa au *nì* a bha ceart, mar *a labhair* m'òglach Iob.

9 Agus chaidh Eliphaz an Temanach, agus Bildad an Suhach, agus Sophar an Naamatach, agus rinn iad mar a dh'àithn an Tighearna dhoibh: agus ghlabh an Tighearna ri Iob.

10 Agusthionndaidh an Tighearna braighdeanas Iob, an uair a rinn e ùrnuigh air son a chairdean: agus thug an Tighearna do Iob a dhà uiread 'sa bha aige roimhe.

11 Agus thàinig a bhràithrean uile d'a ionnsuidh, agus a pheathraichean uile, agus iadsan uile d'am b'aithne e roimhe, agus dh'ith iad aran maille ris 'na thigh: agus bha tras aca dheth, agus thug iad comhfhurtachd dha thaobh an uile uile a thug an Tighearna ri: agus thug iad dha gach aon diubh bonn airgid, agus gach aon diubh cluas-fhàinne òir.

¹ Cha 'n eil *neach* ann cho borb as gu'n dùisg se e.

² a'm làthair.

³ a chuidich leam.

⁴ òchrain lasarra. ⁵ nì bròn gairdeachas, tionndaidhear bròn gu gairdeachas 'na làthair.

⁶ sl'antach.

⁷ uchd-èididh.

⁸ mac a' bhogha, Eabh. ⁹ totach. Eabh.

¹⁰ umam-sa, a'm' làthair-sa.

¹¹ r'a ghnùis-san. Eabh.

12 Agus bheannaich an Tighearn deir-eadh Iob nì's mò na a thoiseach, agus bha aige ceithir mìle deug caora, agus sè mìle càmhail, agus mìle cuing dhamh, agus mìle asal bhoirionn.

13 Agus bha aige seachd mic, agus trìuir nighean.

14 Agus thug e Iemima mar ainm air a' chleud *nighinn*, agus Cesiah mar ainm air an dara, agus Ceren-hapuch mar ainm air an treas *nighinn*.

15 Agus cha d'fhuaradh muài cho sgiamhach ri nigheanaibh Iob anns an tìr uile; agus thug an athair dhoibh oighreachd am measg am bràithrean.

16 Agus bha Iob beò 'na dhéigh so ceud agus dà fhichead bliadhna; agus chunnaic e a mhic, agus mic a mhac, ceithir ginealaich.

17 Agus fhuair Iob bàs 'na sheann duine, agus làn do làithibh.

LEABHAR

NAN

S A L M.

SALM I.

1 *Son as fhàirein. 4 Sgrìosar na h-aingidh ann am breitheanas.*

IS beannaichte an duine sin nach gluais ann an comhairle nan aingidh, agus nach seas ann an slighe nam peacach, agus nach suidh ann an caithir luchd fanoid:

2 Ach aig *am bheil* tlachd ann an lagh¹ an Tighearn, agus a smuainicheas air a lagh-san a là agus a dh'oidhche.

3 Bithidh e mar chraoibh suidhichte làimh ri sruthaibh uisge, a bheir a mach a toradh 'na h-ainisr, agus nach caill a duille: agus soirbhichidh leis gach nì a ni e.

4 Cha'n ann mar sin *a bhios* na h-aingidh; ach mar inhol a sgapas a' ghaoth.

5 Air an aobhar sin cha seas na h-aingidh ann am breitheanas, no peacaich ann an coimhthional nam firean.

6 Oir is aithne do'n Tighearna² slighe nam firean; ach sgrìosar slighe nan aingidh.

SALM II.

1 *Cumhachd agus oighreachd Chrìosd: 10 Thugadh earail do bhrèitheamhnaibh na talmhainn iad a dheanamh seirbhìs dha.*

C'AR son a ghabh na cinnich boile, agus a smuainich na slòigh nì dìomhain?

2 *C'ar son* a dh'éirich rìghrean na talmhainn, agus a ghabh na h-uachdarain comhairle le chéile, an aghaidh an Tighearn, agus an aghaidh Aoim ungta-san, *ag ràdh*,

3 Briseamaid o chéile an cuibhreach, agus tilgeamaid dhinn an cuing³?

4 An ti a ta 'na shuidhe air nèamh, nì e gàire; nì an Tighearna fo chaidh orra.

5 An sin labhraidh e riu 'na fheirg;

agus 'na chorruih cuiridh e uamhann orra.

6 Gidheadh dh'ung⁴ mise mo Rìgh air Sion, mo shliabh naomh-sa.

7 Cuiridh mi an céill ordugh an Tighearna: thubhairt e rium, *Is* tu mo mhac-sa; an diugh ghin mi thu.

8 Iarr orm, agus bheir mi dhuit na cinnich mar oighreachd, agus crìocha na talmhainn mar sheilbh.

9 Brisidh tu iad le slait iarunn; mar shoitheach criadhaidh, pronnaidh tu iad 'nam bloighdibh.

10 A nis ma ta, a rìghrean, bithibh glic; gabhailh fòghlum, a bhrèitheamlana na talmhainn.

11 Deanaibh seirbhìs do'n Tighearna le h-eagal, agus deanaibh gairdeachas le ball-chrith.

12 Pògaibh am mac⁵, air eagal gu'm bi fearg air, agus gu sgrìosar sibh san t-slighe, 'nuair a lasas ach gu beag a chorruih. *Is* beannaichte iadsan uile a dh'earbas as.

SALM III.

1 *Tha Dha 'na sgéith agus 'na dhèidean dhoibhsan a dh'earbas as.*

Salm le Daibhidh, 'nuair a theich e roimh Absalom a mhac.

A THIGHEARN, nach lionmhor a dh'fhàs mo naimhdean? *is* iomadh iad a tha 'g éirigh a'm' aghaidh.

2 *Is* iomadh iad a their ri m'anam, nach 'eil furtachd aige ann an Dia. Selah.

3 Ach a ta thusa, a Thighearn, a'd' sgéith dhomhsa; mo ghloir, agus fear-togalach mo chinn.

4 Le m' ghuth dh'éigh mi ris an Tighearn, agus dh'éisd e rium as a shliabh naomh. Selah.

¹ reachd. ² is taitneach leis an Tighearn. ³ an càird. 522

⁴ shuidhich. ⁵ Thugaibh ùmhachd do'n mhac.

5 Luidh mi sìos, agus choidil mi: dhuiseg mi, oir chum an Tighearna suas mi.

6 Cha'n eagal leam deich mìle sluagh, a chuir iad fèin a'm' aghaidh air gach taobh.

7 Eirich, a Thighearn; saor mi, O mo Dhia: oir bhuail thu mo naimhdean uile air an gial; bhris thu facla nan aingidh.

8 Is leis an Tighearn an fhurtachd: air do shluagh tha do bheannachd. Selah.

SALM IV.

1 *Thug Daibhidh aclmhasan d'a naimhdh, agus chomhairlich e iad.* 6 Nochd e gu bheil sonas an duine, cha'n ann am mòr phailteas nithe talmaidh, ach ann an deadh-ghean an Tighearna.

Do'n àrd fhear-ciuil air Neginot, Salm le Daibhidh.

NUAIR a dh'éigheas mi, éisd rium, a Dhé m'ionracais; 'nuair a bha mi ann an teinn, dl'fhuasgail thu orm; dean trèacar orm, agus éisd ri m'urnuigh.

2 A chlann nan daoine, cia fhad a thionndaidheas sibh mo ghlòir chum naire! ? a ghràdhaicheas sibh dìomhanas, a shireas sibh an déigh bhreug? Selah.

3 Ach biodh fios agaibh gu'n do ròghnuich an Tighearn an duine naomh dha fèin; éisdidh an Tighearn an uair a dh'éigheas mi ris.

4 Biodh eagal oirbh, agus na peacaichibh: labhraibh r'ur cridhe air bhur leabaidh, agus bithibh tosdach. Selah.

5 Iobraibh iobairtean ionracais, agus earbaibh as an Tighearn.

6 Tha mòran ag ràdh, Cò nochdas dhuinn ni maith? Tog oirmne solus do ghlùise, a Thighearna.

7 Chuir thu aoibhneas ann am chridhe, ni's mò na 'nuair is pailte an arbhar agus am fion-san.

8 An sìth araon luidhidh mi, agus coidlidh mi; oir is tusa mhàin, a Thighearn, a bheir orm còmhnuidh ghabhail gu tèaruinte.

SALM V.

1 *Dh'iarr Daibhidh gu'n tugadh Dia éisdeachd d'a urnuigh.* 4 Is fuathach leis an Tighearn luchd-deanamh an uile. 8 Ghuidh Daibhidh gu'n trèoraicheadh Dia e 'na fhìreantachd.

Do'n àrd fhear-ciuil air Nechoil, Salm le Daibhidh.

RI m' bhriathraibh éisd, a Thighearn; beachdaich air mo smuaintibh.

2 Thoir an aire do ghuth mo ghlaoidh, mo Rìgh, agus mo Dhia; oir riut-sa ni mi urnuigh.

3 A Thighearn, air maduinn cluinidh tu mo ghuth; air maduinn deasaichidh mi mi fèin a'd' làthair², agus amhaireidh mi suas.

4 Oir cha Dia thusa aig am bheil tlachd

an aingidheachd, agus cha chòmhnuich an t-aingidh³ maille riut.

5 Cha seas na h-amadain a'd' làthair: is fuath leat luchd-deanamh an uile.

6 Sgrìosaidd tu luchd-labhairt bhreug: is gràin leis an Tighearn an duine fuil-eachdach agus cealgach.

7 Ach air mo shon-sa, ann an lìonmhoireachd do thròcair, thig mi steach do d' thigh; sleuchdaidh mi aig do theampull naomh⁴, ann ad eagal.

8 A Thighearn, trèoraich mi ann ad fhìreantachd: air sgàth mo naimhde, dean do shlighe dìreach romham:

9 Oir cha 'n'eil ceart⁵ 'nam beul; is fìor aingidheachd an taobh a stigh dhiubh; is uagh fhosgailte an sgornan; ni iad mìodal le 'n teangaidh.

10 Sgrìos⁶ iad, a Dhe; tuiteadh iad le'n comhairle fèin: air son lìonmhoireachd an eucearta tilg a mach iad; oir rinn iad ceannairc a'd' aghaidh.

11 Ach deanadh iadsan uile aoibhneas a chuireas an dòigh annad: gu bràth deanadh iad iolach, a chionn gu'n dìon thu iad: agus deanadh iadsan luathghaire annad, leis an ionmhuinn t'ainm.

12 Oir beannaichidh tusa am firean, a Thighearna: le deadh-ghean cuartichidh tu e, mar le sgéith.

SALM VI.

1 *'Na theanntachd rinn Daibhidh gearan ri Dia.*

8 Chuir e a dlùchas, agus rinn e gairdeachas, ann an trèacar an Tighearna.

Do'n àrd fhear-ciuil air Neginot air Seminit, Salm le Daibhidh.

A THIGHEARN, ann ad chorruich na cronuich mi, agus ann ad fheirg na smachdaich mi.

2 Gabh truas dìom, a Thighearn, oir a ta mi lag: slànuich mi, a Thighearn, oir a ta mo chnàmhan air an cràdh;

3 Agus a ta m'anam air a chràdh gu mòr: ach thusa, a Thighearn, cia fhad?

4 Pill, a Thighearna, fuasgail m'anam: saor mi, air sgàth do thròcair.

5 Oir anns a' bhàs cha 'n'eil cuimhne ort: anns an uagh cò bheir dhuit cliù⁷?

6 Tha mi sgìth le m'osnaich; rè na h-oidheche tha mi cur mo leabaidh air snàmh; le m' dheuraibh uisgicheam m'uirigh.

7 Caithear le dubhachas mo shùil; fàs-aith i sean, air son m'eascairde gu léir.

8 Imichibh uam, sibhse uile a luchd-deanamh na h-euceirt, oir chual' an Tighearn guth mo chaidh.

9 Chual' an Tighearn m'athchuinge: gabhaidh an Tighearn ri m'urnuigh.

10 Cuirear gu nàire agus gu mòr amh-

¹ cia fhad a bhios sibh trom an cridhe? e'ar son.

² stiùraidh mi m'urnuigh a d'ionnsuidh.

³ olc.

⁵ fìrinn.

⁴ le m'aghaidh ri d' lùchairt naomh.

⁶ Dil.

⁷ buidheachas.

luadh mo naimhde gu léir: pilleadh iad, cuirear gu h-obann gu nàire iad.

SALM VII.

1 *Ghuidh Daibhidh air Dia gu'n saoradh se e o làmh a naimhdean. 9 Tha e a' nochdadh gu'n dearbh Dia cridhe an duine, agus gu'n tig an t-aingidh gu bochduinn.*

Sigaion le Daibhidh, a sheinn e do'n Tighearna, thaobh bhriathar Chuis a' Bheniaminich.

A THIGHEARNA mo Dhia, annad cuiream mo dhòigh: saor mi uathasann uile a tha'n tòir orm, agus teasairg mi:

2 Air eagal mar leòmban gu'n reub e m'anam, *ga* liodairt, gun neach a shaoras.

3 A Thighearna mo Dhia, ma rinn mi so; ma tha lochd a'm làmhaidh;

4 Ma dh'òc mi olc do'n fhear a bha an sìth rium, no ma rinn mi fòirneart air-san a bha 'na eascaraid domh gun aobhar¹;

5 Geur-leanadh an nàmhaid m'anam, agus glacadh se e, agus saltradh e mo bheatha gu làr, agus leagadh e mo chliù san duslach. Selah.

6 Eirich, a Thighearna, a'd' fheirg; tog suas thu féin air son corruich mo naimhdean; agus mosgail air mo shon chum na breth a dh'àithn thu.

7 An sin cuairtichidh coimhthional an t-sluaigh thu; air an son-san uime sin pill gu h-ionad àrd.

8 Bheir an Tighearna breth air an t-sluaigh: thoir breth orm, a Thighearna, a réir m'fhìreantachd, agus a réir m'ion-racais a ta annam.

9 Thigeadh crìoch air aingidheachd nan aingidh; ach daingnich thusa am firean: oir dearbhaidh tu na cridheachan agus na h-airnean, a Dhé chothromaich².

10 *Is e Dia mo sgiath, a shaoras iadsan a tha ceart an cridhe.*

11 *Is breitheamh cothromach Dia, agus bithidh Dia am feirg ris a' chiontach gach là.*

12 Mur pill e, geuraichidh e a chlaidheamh: chuir e a bhogha air lagh, agus dheasaich se e.

13 Agus dh'ulluich e air a shon innil bàis: dhealbh e a shaighdean an aghaidh luchd geur-leanmhuinn².

14 Feuch, tha e ri saothair le h-euceart; ghlin e olc, agus rug e breug.

15 Dh'fhosgail e slochd, agus chladhaich se e, agus thuit e féin anns a' chlais a rinn e.

16 Pìlidh 'olc air a cheann féin, agus thig' fhoirneart a nuas air a chloigìonn féin.

17 Molaidh mise an Tighearna a réir a

cheartais; agus seinnidh mi cliù do ainm an Tighearna a's ro àirde.

SALM VIII.

1 *Tha glòir Dhé air a h-àrdachadh le oibribh iongantach a làmh, 5 agus le 'mhaitheas do mhac an duine.*

Do'n àrd fhear-ciuil air Gith. Salm le Daibhidh.

O IEHOBAH ar Tighearna, cia òir-dheire t'ainm air feadh na talmhainn uile? a shocraich do ghloir os ceann nan nàmh.

2 A beul naoidhean agus chòchran dh'òrduich thu neart, air son do naimhde, chum gu coisgeadh tu an nàmhaid agus an dioghaltach.

3 'Nuair a dh'amhairceas mi air do nàmhaidh, obair do mheur; air a' gheallach agus na reultaibh, a shuidhich⁴ thu;

4 Cò e an duine gu'm biodh tusa cuimhneachail air, agus mac an duine gu'm fiosraicheadh tu e?

5 Rinn thu e beagan ni b'isle na na h-aingil, agus chrùn thu e le glòir agus le h-urram.

6 Thug thu uachdaranachd dha air oibribh do làmh: chuir thu gach ni fo 'chos-aibh:

7 Caoraich agus buar uile, agus mar an ceudna ainmhidhean na macharach;

8 Eunlaith nan speur, agus iasg na mara, a shiubhlas air slighibh nan cuan.

9 O Iehobah, ar Tighearna, cia òir-dheire t'ainm air feadh na talmhainn uile?

SALM IX.

1 *Mhol Daibhidh an Tighearna do bhrìgh gu'n d'thug e breth air a naimhidh. 13 Ghuidh e gu'n deanadh Dia trècar air 'na àmhghar, agus gu'n saoradh e an t-ainnis a làmh an aingidh.*

Do'n àrd fhear-ciuil air Mut-laben. Salm le Daibhidh.

MOLAIDH mi thu, a Thighearna, le m' uile chridhe; cuiridh mi'n céill t'òibre iongantach gu léir.

2 Nì mi aobhneas agus gairdeachas annad; seinnidh mi cliù do t'ainm, O Thi a's àirde.

3 'Nuair a phillear mo naimhdean air an ais, tuitidh iad agus théid as doibh a'd' fhianais:

4 Oir sheas thu dhomh mo chòir agus mo chùis: shuidh thu air do righ-chaithir, a' toirt breth le ceartas.

5 Smachdaich thu na cinnich, sgrios thu na h-aingidh; chuir thu as d'an ainm gu saoghal nan saoghal.

6 Chlaidh crìoch air sgrios an nàmhaid am feasd; leag thu sìos am bailte mòra: théid as d'an cuimhne maille riu féin.

¹ (seadh, theasairg mi an tì a bha 'na nàmhaid domh gun aobhar.)

² oir dearbhaidh an Dia cothromach na cridheach-

an agus na h-airnean.

³ luchd tòrach, luchd dìobhargaidh.

⁴ dh'òrduich, dheasaich.

7 Ach mairidh an Tighearna gu sìorruidh: dheasaich e a rìgh-chaithir chum breitheanas.

8 Agus bheir esan breth air an t-saoghal am fireantachd, ni e breitheanas do'n t-sluagh an ceartas.

9 Agus bithidh an Tighearna 'na dhaingneach do'n tì a shàruichear, 'na dhaingneach ann an aimsiribh teanntachd.

10 Agus cuiridh iadsan d'an aithne t'ainm an dòigh annad: oir cha tréig thusa, a Thighearna, iadsan a dh'iarras thu.

11 Seinnibh cliù do'n Tighearna a chòmhnuicheas ann an Sion; aithrisibh am measg nan cinneach a ghnìomhara.

12 'Nuair a ni e rannsachadh air fuil, cuimhnichidh e orra: cha dìchuimhnich e glaoth nam bochd.

13 Dean tròcar orm, a Thighearna: amhairc air m'àmghar *a tha mi fulang* uatha-san le'm fuathach mi, O thusa a tha ga m' thogail suas o gheataibh a' bhàis;

14 Chum gu foillsich mi do chliù uile ann an geataibh nighinn Shioin: ni mi gairdeachas ann ad shlàinte.

15 Thuit na cinnich sìos anns an t-slochd a rinn iad: anns an lìon a dh'fholaich iad, chaidh an cos fèin an sàs.

16 Aithnichte an Tighearna sa' bhreitheanas *a* rinn e: ann an gnìomh a làmh fèin ribear an t-aingidh. Higaion. Selah.

17 Cuirear na h-aingidh gu h-ifrinn¹, na cinnich uile nach cuimhnich Dia.

18 Oir cha dìchuimhnichear an t-ainnis² gu bràth; cha téid as do dhòchas nam bochd gu sìorruidh.

19 Eirich, a Thighearna, na buadhaicheadh duine; thugar breth air na cinnich a'd' fhianuis.

20 Cuir a Thighearna, eagal orra; chum gu'n aithnich na cinnich nach 'eil anna fèin ach daoine. Selah.

SALM X.

1 *Tha Daibhidh a' nochdadh gu bheil slighean nan aingidh doilgheasach an còmhruidh.* 12 *Cuidichidh Dia leis an duine bochd,* 14 *agus cumaidh e ceartas ris an dilleachdan.*

C'AR son, a Thighearna, a sheasas tu fad o làimh? a dh'fholaicheas tu thu fèin ann an aimsiribh teanntachd?

2 'Na uabhar geur-leanaidh an t-aingidh am bochd³: glacar iad sna h-innleachdaibh a dhealbh iad.

3 Oir ni an t-aingidh ràiteachas á miann a chridhe; agus molaidd e an duine sanntach, a's beag air Dia.

4 Ann an uabhar a ghnùise cha'n iarr an t-aingidh *Dia*: cha 'n'eil Dia 'na uile smuaintibh.

5 Tha a shlighean doilgheasach anns

gach àm; *tha* do breitheanas àrd as a shealladh: *thaobh* a naimhdean uile, ni e tarcuis orra⁴.

6 Thubhairt e 'na chridhe, Cha ghluais-e ar mi; gu bràth cha *bhi* mi ann an àmhghar.

7 Tha a bheul làn do mhallachadh, agus do chéilg, agus do mhealltaireachd: fo 'theangaidh *tha* donas agus dìomhanas.

8 Suidhidh e ann an ionadaibh-folaich nam bailte beaga; ann an àitibh dìomhair mortaidh e an neò-chiontach: tha a shùilean ann an uaignidheas a' dearcadh air a bhochd.

9 Ni e feall-fholach gu dìomhair, mar leòmhann 'na gharaidh: ni e feall-fholach chum gu'n glac e an duine bochd: glacaidh e an duine bochd, 'ga tharruing 'na lìon.

10 Crùbaidh e, cromaidh e sìos, agus tuitidh am bochd le '*dhaoinibh* làidir⁵.

11 Thubhairt e 'na chridhe, Dhìchuimhnich Dia: dh'fholaich e a ghnùis; cha léir dha *sud* am feasd.

12 Eirich, a Thighearna Dhé, tog suas do làmh: na dìchuimhnich na daoine bochd⁶.

13 C'ar son a rinn an t-aingidh tàir air Dia? a thubhairt e 'na chridhe, Cha'n iarr thu e?

14 Chumaidh tu e; oir is léir dhuit donas agus mì-run, chum *an* dìoladh le d' làimh: orts a fàgaidh an duine bochd e fèin; is tu fear-cuideachaidh an dilleachdain.

15 Bris thusa gairdean an aingidh, agus an droch dhuine; rannsaich a mach 'aingidheachd gus nach faigh thu i.

16 *Tha'n* Tighearna 'na Rìgh gu saoghal nan saoghal: sgriosadh⁷ na cinnich a mach as a thìr.

17 A Thighearna, chuala tu miann nan daoine bochd⁸: deasaichidh tu an cridhe; bheir thu air do chluais éisdeachd:

18 A chumail ceirt ris an dilleachdan agus ris an truaghan, chum nach dean duine o'n ùir foirmeart ni's mò.

SALM XI.

1 *Chuir Daibhidh a dhòchas ann an Dia.* 4 *Freasdal agus ceartas an Uile-chumhachdaich.*

Do'n àrd fhear-ciuil. Salm le Daibhidh.

AS an Tighearna earbam: c'ar son a their sibh ri m'anam, Teich as mar eun, gu d' shliabh⁹?

2 Oir feuch, chuir na h-aingidh bogha air lagh; ghleus iad an saighead air sreing, chum tilgeadh san dorchra orra-san a ta ceart 'nan cridhe.

3 Ma sgriosar na bunaitean, ciod a ni am firean?

4 *Tha'n* Tighearna 'na theampull naomh;

¹ Pillcar na h-aingidh do'n uaigh.

² an t-uireasbhuidheach. ³ an truaghan.

⁴ séididh e orra.

⁵ 'na ionadaibh làidir.

⁶ truagh, iriosal.

⁷ sgriosar.

⁸ truagh, iriosal.

⁹ Teich as do na beanntaibh, mar eun.

tha rìgh-chaithir an Tighearn anns na nèamhaibh: chi a shùilean, rannsaichidh¹ a rosgan clann nan daoine.

5 Rannsaichidh an Tighearn am firean; ach an t-aingidh, agus esan a thug spéis do fhòirneart, is fuath le 'anam.

6 Frasaidd e air na h-aingidh, ribeach-an², teine agus pronnus, agus doinionn uambasach, mar chuibhrionn an cupain.

7 Oir is ionmhuinn leis an Tighearna cheart ceartas: amhaircidh a ghnùis air an duine iouraic.

SALM XII.

1 *Dh'iarr Daibhidh còmhaidh o Dhia. 3 Tha e a' gabhail misnich dha fèin do bhrìgh gu'n toir Dia an t-aingidh gu breitheanas, agus gu'n teasairg e na h-ionracain.*

Do'n àrd fhear-ciuil air Seminit. Salm le Daibhidh.

CUIDICH *leam*, a Thighearn, oir cha'n 'eil duine diadhlaidh ann; oir theirig³ na h-ionraic o mhcasg chloinn nan daoine.

2 Labhraidh iad diomltanas⁴ gach neach r'a choimhearsnach; le bilibh miodalach, le cridhe dubailte⁵ labhraidh iad.

3 Sgathaidh an Tighearna na bilean miodalach uile, an teangadh a labhras *nìthe* mòra;

4 Iadsan a thubhairt, Le'r teangaidh buaidhichidh sinn; is leinn fèin ar bilean; cò a *ta* 'na thighearn os ar ceann?

5 Air son fòirneirt nam bochd, air son osnaich nan annis⁶, a nis éiridh mi, ars' an Tighearn: cuiridh mi e ann an tèar-uinteachd *uaithe-san* a bhagras 'na aghaidh⁷.

6 Is briathra fìor-ghlan briathran an Tighearna; *mar* airgid air a dhearbhadh ann an àmhuinn chreadha, air a ghlanadh seachd uairean.

7 Gleidhidh tusa sinn⁸, a Thighearn; dìonaidd tu sinn⁹ o'n ghinealach so gu bràth.

8 Gluaisidh na h-aingidh air gach taobh, 'nuair a dh'àrduichear iadsan a's suar-aiche do chloinn nan daoine.

SALM XIII.

1 *Tha Daibhidh a' caoidh gu'n do dhìchuimhnich Dia e: 3 a' guidhe gu'n soillsichadh e 'inntinn: 5 agus ag earbsadh ri slàinte á thròcair an Tighearn.*

Do'n àrd fhear-ciuil. Salm le Daibhidh.

CIA fhad, a Thighearn, a dhìchuimhnichas tu mi? an ann gu bràth? Cia fhad a dh'fholaicheas tu do ghnùis uam?

2 Cia fhad a ghabhas mi comhairle ann am anam, bròn ann am chridhe gach là?

Cia fhad a dh'àrduichear mo nàmhaid os mo chean?

3 Amhairc orm, éisd rium, a Thighearna mo Dhia: soillsich mo shùilean, air eagal gu'n coidil mi chum bàis¹⁰.

4 Air eagal gu'n abair mo nàmhaid, Bhuidhaich mi 'na aghaidh; gu'n dean m' eascairdean gairdeachas an uair a dh'aomar mi.

5 Ach dh'earb mise á do thròcair; ni mo chridhe gairdeachas ann ad shlàinte.

6 Seinnidh mi do'n Tighearn, a chionn gu'n do bhuin e rium gu fial: [agus seinnidh mi cliù do ainm an Tighearn a's ro àirde.]

SALM XIV.

1 *Chuir Daibhidh an cèill truaillidheachd a' chinne-daoine; 4 agus dhearbha e an aghaidh nan aingidh o sholus an coguis fèin.*

Do'n àrd fhear-ciuil. Salm le Daibhidh.

THUBHAIRT *ant-amadan* 'na chridhe, Cha 'n eil Dia ann. Tha iad truaillidh; rinn iad oibre gràineil; cha 'n eil neach ann a ni maith.

2 Dh'amhairc an Tighearn a nuas o nèamh air cloinn nan daoine, a dh'fheuchainn an robh neach ann a bha glic, a bha 'g iarraidh Dhé.

3 Chlaon iad uile; tha iad gu léir air fàs salach; cha 'n eil neach ann a ni maith, cha 'n eil eadhon aon.

4 Nach 'eil eòlas aca-san uile a tha deanamh na h-eucorach, a tha 'g itheadh suas mo shluaigh, *mar* a dh'itheadh iad aran, agus nach gairm air an Tighearn?

5 An sin ghabh iad eagal mòr, a chionn gu bheil Dia ann an ginealach nam firean.

6 Nàirich iad¹¹ comhairle an duine bhochd, a chionn gur e'n Tighearn a thearmunn.

7 O gu tigeadh slàinte Israeil a mach a Sion! An uair a bheir an Tighearn air ais braighdeanas¹² a shluaigh, ni Iacob gairdeachas, ni Israel aoibhneas.

SALM XV.

1 *Còmhnuichidh an t-ionracan, agus an neach a labhras an fhàrrinn 'na chridhe, ann am pàillinn Dhé.*

Salm le Daibhidh.

A THIGHEARN, cò dh'fhanas ann ad phàillinn? cò chòmhnuicheas air do shliabh naomh?

2 Esan a ghluaiseas gu h-iouraic, agus a ni ceartas, agus a labhras an fhàrrinn 'na chridhe:

3 Nach dean cùl-chàineadh le 'theangaidh, nach dean olc d'a charaid¹³, agus nach tog droch sgeul air a choimhearsnach:

¹ dearbhaiddh.

² eibhlean.

³ dh'fhàillich.

⁴ breug.

⁵ le cridhe dà fhille; cridhe agus cridhe. Eabh.

⁶ air son glaoidh nam feumach.

⁷ le'm b'àill a ribeachd.

⁸ iad.

⁹ e, iad.

¹⁰ gu'n coidil mi codal a' bhàis.

¹¹ sibh.

¹² braighdean.

¹³ chompanach, choimhearsnach.

4 Leis an suarach an droch dhuine¹, ach a bheir urram dhoibhsan air am bi eagal an Tighearn; a mhionnaicheas chum a chailldaich fèin², agus nach caochail:

5 Nach cuir 'airgiod a mach air ocar³, agus nach gabh duais an aghaidh an neò-chiontaich. Esan a ni *na nithe* sin, cha ghluaisear gu bràth e.

SALM. XVI.

1 *Tha Daibhidh a' cur a dhòigh ann an Dia: 4 a' gabhail gràin do luchd iodhol-aoraidh; 8 agus a' deanamh gairdeachais do bhrìgh gu bheil dòchas aig ann an aiseirigh o na marbhaibh.*

Michtam le Daibhidh.

GLEIDH mi, a Dhé, oir chuir mi mo dhòigh annad.

2 Thubhairt mi⁴ ri Iehobhah, *Is* tu mo Thighearn: cha *ruig* mo mhaithreas ortsa.

3 A thaobh nan naomh⁵ a *ta* air thalamh, agus nam flat; *tha* mo thlachd uile anna.

4 Meudaichear an doilgheasan dhoibhsan a ni deifir⁶ an déigh *dhee* eile: cha'n iobair mi an iobairtean-dìbhe do fhuil, agus cha luadh mi air an ainmibh le m' bhlilbh⁷.

5 *Is* e an Tighearna cuibhrionn m' oighreachd agus mo chupain: is tusa a chumas suas mo chrannchur.

6 Thuit mo roinn⁸ dhomhsa ann an *ion-daibh* aoibhneach; seadh, *tha* oiglbreachd thaitneach agam.

7 Beannaichidh mise an Tighearn, a thug comhairle orm: tha m' àirnean mar an ceudna 'gam theagasg an àm na h-oidhche.

8 Chuir mi an Tighearna romham a ghnàth: a chionn gu *bheil* e air mo dheas làimh, cha ghluaisear mi.

9 Uime sin ni mo chridhe aoibhneas, agus ni mo ghlòir gairdeachas: gabhaidh m' fheoil mar an ceudna fois ann an dòchas.

10 Oir cha'n fhàg thu m'anam⁹ anns an uaigh: cha leig thu le t'aon naomh truailidheachd fhaicinn.

11 Feuchaidh tu dhomh slighe na beatha: *tha* lànachd aoibhneis a'd' làthair-sa: *tha* mòr-shubhachas aig do dheas làimh gu sìorruidh.

SALM XVII.

1 Chuir Daibhidh an cèill ionracas a chridhe fèin, 8 agus ghuidh e gu'n teasairgeadh Dia e o ghnùis nan aingidh.

Urnigh le Daibhidh.

EISD ri ceartas, a Thighearn, tabhair aire do m' ghlaodh; cluinn m' ur-

¹ Na shùilbh an bi an droch dhuine tàireil. Eabh.

² a mhionnaicheas d'a charaid. ³ air riadh.

⁴ Thubhairt thu, O m'anam.

⁵ Ach air na naomh.

⁶ calhag.

nuigh, *a thig a mach* cha'n am o bhlilbh cealgach.

2 O d'fhlannuis thigeadh mo bhreth: faiceadh do shùilean uithe cothromach.

3 Dhearbh thu mo chridhe; dh'fhiosraich thu mi san oidhche; rannsaich thu mi, cha d'fhuair thu a *bheag*: is e mo rùn nach ciontaich mo bheul.

4 A thaobh ghnìomhara dhaoine, le focal do bhilean sheachainn mi ceum-anna¹⁰ a' mhillteir.

5 Cum suas mo cheumanna ann ad shligheibh, chum nach sleamhnuidh mo chosan.

6 Ghairm mi ort, oir éisdidh tu rium, a Dhé: aom do chluas a m' ionnsuidh, cluinn mo chainnt.

7 Taisbein do chaoimhneas iongantach, O thusa a shaoras le d' dheas làimh iad-san a dh'earbas asad, uatha-san a dh'éireas suas '*nan aghaidh*'

8 Gléidh mi mar chloich na sùla, fuidh sgàile do sgathan foluich mi.

9 O ghnùis nan droch dhaoine a tha ri foirneart orm, naimhdean m'anama a tha ga m' chuairteachadh air gac taobh.

10 'Nan saill tha iad air an druidealh suas; le'm beul labhraidh iad gu h-uaibhreach.

11 'Nar ceum a nis chuairtich iad sinn: shuidhich iad an sùilean, a' cromadh sìos gu làr.

12 Cosmbuil ri leòmhann a tha gionach chum cobhartaich, agus ri leòmhann òg a' feitheamh ann an ionadaibh dìomhair.

13 Eirich, a Thighearn, cuir roimhe, leag sìos e, saor m'anam o'n aingidh le d' chlaidheamh¹¹.

14 O dhaoineibh le d' làimh, a Thighearn, o dhaoineibh an t-saoghail, *d'am bheil* an cuibhrionn sa' bheatha *so*, agus d'an do lìon thu am brù le t'ionmhas foluichte: sàsuichear an clann¹², agus fàgaidh iad am fuigheall d'an naoidheanaibh.

15 Air mo shon-sa, ann am fireantachd clii mi do ghuùis: sàsuichear mi, 'nuair a dhùisgeas mi, le d' chosamhlachd.

SALM XVIII.

1 Laoidh bhuidheachais le Daibhidh air son na saorsa mhòir, agus nam beannachdan lìomhor a dheònaich Dia dha.

Do'n àrd fhear-ciuil, [Salm] le Daibhidh, òglach an Tighearn, a labhair ris an Tighearna briathra na laoidh so, san là air an do shaor an Tighearn e as làimh a naimhdean uile, agus as làimh Shaul: agus an dubhairt e,

GRADHAICHIDH mi thu, a Thighearn, mo neart.

⁷ cha ghabh mi an ainmean air mo bhlilbh.

⁸ na crìocha; na sreagha-tomhais. Eabh.

⁹ mo phearsa, mise.

¹⁰ thug mi fa' near ceumanna.

¹¹ a tha 'na chlaidheamh dhuit. ¹² tha iad làn clòinne.

2 *Is* e an Tighearna mo charraig, agus mo dhaingneach, agus m'fhear-saoraidh: mo Dhia, mo chreag¹ anns an cuiream mo dhòchas; mo sgiath, agus adharc mo shlàinte, mo thùr àrd.

3 Gairmidh mi air an Tighearna a's airidh air cliù, agus o m' naimhdibh saor-air mi.

4 Chuairtich piantan a' bhàis² mi, agus chuir tuille dhroch dhaoine eagal orm.

5 Chuairtich piantan ifrinn³ mi; ghabh liontan a' bhàis romham.

6 A'm' éigin ghairm mi air an Tighearna, agus ri m' Dhia ghlaodh mi: chual⁴ e as a theampull mo ghuth, agus thàinig mo ghlaodh na làthair d'a chluasaibh.

7 An sin chrathadh agus chrìothnuich an talamh, agus ghluaiseadh bunaitean nam beann agus chrathadh iad, a chionn gu'n robh corruich air.

8 Chaidh deatach suas as a shròn⁴, agus dhian-loisg⁵ teine as a bheul: lasadh eibhlean leis.

9 Agus lùb e na nèamhan, agus thuirling e nuas: agus bha dorchadas fuidh a chosaibh.

10 Agus mharcaich e air cherub, agus chaidh e air iteig: agus dh'itealaich e air sgiathaibh na gaoithe.

11 Chuir e dorchadas mar ionad dìomhair mu'n cuairt air: bu phàillion da, duibhreis uisgeacha, neoil nan speur⁶.

12 O'n dealradh a bha fa chomhair chaidh a neoil thairis; clacha-meallain agus eibhlean teine⁷.

13 Agus rinn an Tighearna tairnean-ach sna speuraibh, agus chuir an Tì a's àirde a mach a ghuth⁸.

14 Agus chuir e mach a shaighdean, agus sgap e iad; agus thilg e mòran tein'-athair, agus chlaoidh e iad.

15 Agus chunnacas aigein nan uisge⁹, agus nochdadh bunaitean an domhain, le d' aghmhasan-sa, a Tighearna, le séideadh anail¹⁰ t'fheirge¹¹.

16 Chuir e nuas o'n àirde, ghlac e mi, tharruing e mi á h-uisgeachaibh lìonmhor¹².

17 Shaor e mi o m' nàmhaid làidir, agus uatha-san a dh'fhuaithich mi; oir bu teise iad na mise.

18 Ghabh iad romham ann an là m'àmhaighair: ach bha'n Tighearna 'na chùltaice dhomh.

19 Agus thug e mach mi gu ionad farsuinn: shaor e mi, a chionn gu'n do ghabh e tlachd annam.

20 Thug an Tighearna luigheachd

dhomh a réir m'ionracais: a réir gloine mo làmh dhìol e dhomh.

21 Oir ghléidh mi slighean an Tighearna, agus cha do chlaon mi gu h-aingidh o m' Dhia.

22 Oir bha a blureitheanais uile a'm' fhianuis; agus a reachdan cha do chuir mi uam.

23 Agus bha mi ionraic 'na fhianuis, agus ghléidh mi mi féin o m' aingidheachd.

24 Uime sin dhìol an Tighearna dhomh a réir m'ionracais, a réir gloine mo làmh ann an sealladh a shùl.

25 Do'n duine thròcaireach nochdaidh tu thu féin tròcaireach; do'n duine ionraic nochdaidh tu thu féin ionraic.

26 Do'n duine ghlan nochdaidh tu thu féin glan; agus do'n duine reasgach¹³ nochdaidh tu thu féin reasgach.

27 Oir saoraidh tu an sluagh a ta fo àmhghar; ach na sùilean àrda bheir thu nuas.

28 Oir lasaidh tusa mo lòchran, a Thighearna: soillsichidh mo Dhia mo dhorchadas.

29 Oir leatsa ruith¹⁴ mi troimh bhuidhinn; agus le m' Dhia leum mi thar balla.

30 *A thaobh* Dhé, *tha* a shlighe iomlan: *tha* focal an Tighearna air a dhearbhadh: *is* sgiath e dhoibhsan uile a chuireas an dòchas ann¹⁵.

31 Oir cò a's Dia ann ach an Tighearna? agus cò a's carraig ann ach a' Dia-ne?

32 *Is* e Dia a tha 'gam chrìoslachadh le neart, agus a' deanamh mo shlighe iomlan.

33 *Tha* e deanamh mo chos mar *chosaibh* eilde, agus ga m' shocrachadh air m'aitibh àrda.

34 *Tha* e 'g innnsachadh mo làmh gu cath, air chor as gu'm brisear bogha umha¹⁶ le m' ghairdeinibh.

35 Agus thug thu dhomh sgiath do shlàinte: agus chum do dheas làmh suas mi, agus rinn do chaoimhneas mòr mi.

36 Rinn thu mo cheuma farsuinn fodham, air chor as nach do shleamhnuich mo chosa.

37 Lean mi mo naimhdean, agus rug mi orra; agus cha do phill mi air m'ais gus an do chuir mi as doibh.

38 Lot mi iad, agus cha bhi e 'n comas doibh éirigh: thuit iad fo m' chosaibh.

39 Oir chrìoslaich thu mi le neart chum catha: leag thu sìos fodham iadsan a dh'éirich suas a'm' aghaidh.

40 Agus thug thu dhomh mo naimh-

¹ mo neart, mo dhàidean. ² tonnann a' bhàis.

II. Samuel, Caib. XXII. r. 5. ³ na h-uaighe.

⁴ na fheirge. ⁵ chnàmh, chaith, sgrios.

⁶ ann an neulaibh tìugh nan speur. ⁷ lasadh

eibhlean teine. II. Samuel, Caib. XXII. r. 13.

⁸ a ghuth, le clochaibh-meallain agus eibhlibh teine.

⁹ na farge.

¹⁰ analach.

¹¹ do shròine.

¹² mòra.

¹³ dhòirbh, fhiata.

¹⁴ bhris.

¹⁵ dh'earbas as.

¹⁶ stàitinn, cruadhach.

dean air mhuineal; iadsan a dh'fhuath-
aich mi, agus ghearr mi as iad.

41 Ghlaodh iad, ach cha robh fear-saor-
aidh ann: eadhon air an Tighearn, ach
cha do fhreagair e iad.

42 An sin mhìn-phronn mi iad mar
dhùslach¹ fu chomhair na gaoithe: mar
chlàbar nan sràid bhruth mi iad².

43 Shaor thu mi o chomh-stri an
t-sluaigh: rinn thu mi a'm' cheann air na
cinnich: ni sluagh nach b'aithne dhomh,
seirbhis domh.

44 Co luath 'sa chluinneas iad, géill-
idh iad dhomh: strìochdaidh coigrich
dhomh³.

45 Seargaidh coigrich as, agus bithidh
eagal orra mach⁴ as an àitibh daingne.

46 Is beò an Tighearn, agus gu ma
beannaichte mo charraig-sa! agus air
'àrdachadh gu robh Dia mo shlàinte!

47 Is e Dia a ni dioghaltas air mo shon,
agus a chuireas an sluagh fodham;

48 A shaoras mi o'm' naimh-dibh. Seadh,
os an ceann-san a dh'éireas suas a'm'
aghaidh togaidh tusa suas mi: o fhear an
ainneart saoraidh tu mi.

49 Uime sin cliùthaichidh mi thu, a
Thighearn, am measg nan cinneach, agus
seinnidh mi do d'ainm.

50 Bheir esan saorsa mòr d'a rìgh, agus
nochdaidh e tròcair d'a aon ungta féin, do
Dhaibhidh agus d'a shliochd gu bràth.

SALM XIX.

1 Tha oibre Dhé sna nàmhaidh a' cur an céill glòir
an Cruithfuir. 7 Oirdheirceas lagha Dhé.
12 Gluidh Daibhidh gu'n glanadh Dia e o pheac-
aibh dìomhair agus dànadais.

Do'n àrd fhear-ciùil. Salm le Daibhidh.

CUIRIDH na nàmhaidh an céill glòir
Dhé, agus nochdaidh na speura
gnìomh a làmh.

2 Tha là a' deanamh sgéil do là, agus
oidhche a' foillseachadh eòlais a dh'oidh-
che.

3 Cha 'n'èil cainnt, cha 'n'èil briathra,
anns nach cluinnear an guth.

4 Air feadh na talmhainn uile chaidh
am fuaim⁵ a mach, agus am focail gu
h-iomall an domhain.

5 Do'n ghréin chuir e pàillium annta;
agus tha i mar nuadh fhear-pòsda a'
teachd a mach á'sheòmar; ni i gaird-
eachas mar ghaigseach a ruith na shlighe⁶.

6 Tha a dol a mach o chrìch nan speur,
agus a cuairt gu ruig an crìochaibh; agus
cha 'n'èil ni air bith a dh'fholaichear o a
teas.

7 Is iomlan lagh an Tighearn, ag iom-

pachadh an anama; tha fianuis⁷ an
Tighearna cinnteach, a' deanamh a'
bhaoghalta⁸ glic.

8 Tha reachdan an Tighearna ceart, a'
deanamh a' chridhe aoibhneach; tha
àithne an Tighearna glan, a' soillseach-
adh nan sùl.

9 Tha eagal an Tighearna fìor-ghlan,
a' maireachduinn am feasd; is fìrinn
breitheanais an Tighearna; tha iad gu
h-iomlan còthromach.

10 Nì's mòr r'an iarraidh tha iad na'n
t-òr, seadh, na mòran do'n òr fhìor-ghlan;
agus nì's mìlse na a' mhill, seadh, na a'
mhill a shileas as na cìrìbh-meala.

11 Os bàrr, tha do sheirbhiseach a'
faotainn⁹ rabhaidh uatha: 'nan coimhead
tha mòr dhuais.

12 Cò thuigeas a sheacharain? o lochd-
aibh dìomhair glan thusa mi.

13 Mar an ceudna o pheacaibh dànadais
cum air aist'òglach; na biodh àrd-cheann-
as¹⁰ aca orm: an sin bithidh mi ionraic,
agus bithidh mineò-chiontach o eusaontas¹¹
mòr.

14 Bitheadh briathra mo bheoil, agus
smuainte mo chridhe, taitneach a'd' làth-
air, a Thighearna, mo charraig¹², agus
m'fhear-saoraidh.

SALM XX.

1 Urnuigh air son tèaruinteachd ann an là teann-
tachd. 6 Tha Daibhidh a' cur an céill gu'n saor
Dia 'aon ungta le neart-saoraidh a dheas làimh.

Do'n àrd fhear-ciùil. Salm le Daibhidh.

GU'N éisdeadh an Tighearna riut ann
an là teanntachd! gu cumadh ainm
Dhé Iacob suas thu!

2 Gu cuireadh e cabhair thugad¹³ as
'ionad naomh! agus á Sion gu neart-
aichead e thu!

3 Gu cuimhnichheadh e do thabhartasan
uile, agus gu'n gabhadh e gu taitneach
uait t'ìobait-loisgte! Selah.

4 Gu tugadh e dhuit a réir do chridhe
féin, agus, gu coimhlionadh e do chomh-
airle uile!

5 Nì sinne aoibhneas ann ad shlàinte,
agus ann an ainm ar Dé-ne togaidh sinn
suas ar bratach. Gu coimhlionadh Dia
t'iarrruis uile!

6 A nis tha fios agam gu'n saor an Tigh-
earn 'aon ungta féin: éisidh e ris o
nàmhaidh a naomhachd, le neart-saoraidh
a dheas làimh.

7 Earbaidh cuid á carbadaibh, agus cuid
á h-eachaibh; ach cuimhnichidh sinne
aun an Tighearn ar Dé.

8 Dh'ìslìcheadh iadsan, agus thuit iad;
ach dh'èirich sinne, agus sheas sinn.

¹ luathlre. ² thùg mi mach iad.

³ ni coigrich brug dhomh. Eabh.

⁴ thig iad a mach le h-eagal.

⁵ an crìoch. Faic Rom. Caib. X. r. 18.

⁶ coimhlìonga, réise. ⁷ teistias.

⁸ an duine eu-céillidh, aon-fhillte, shimplidh.

⁹ faghail. Eir. ¹⁰ uachdaranachd. ¹¹ pheacadh.

¹² mo neart. ¹³ chugad, a d' ionnsuidh.

9 Saor an rìgh, a Thighearn; agus éisd ruinn san là a ghairmeas sinn¹.

SALM XXI.

1 *Laoidh bhuidheuchais le Daibhidh air son maith-eis Dhé d'a thaobh.* 7 *Sgrìosaiddh an Tighearn iadsan le'm fuathach e.*

Do'n àrd fhear-ciùil. Salm le Daibhidh.

ANN ad neart, a Thighearn, ni an rìgh aoibhneas; agus ann ad slàinte cia mòr an gairdeachas a ni e?

2 Mianm a chridhe thug thu dha; agus athchuinge a bhilean cha do dhiùlt thu dha. Selah.

3 Oir ghabh thu roimhe le beannachadh do mhaithais; chuir thu m'a cheann coron do òr fìor-ghlan.

4 Dh'iarr e beatha ort: thug thu dha fad làithean gu saoghal nan saoghal.

5 Is mòr a ghloir trid do shlàinte-sa: urram agus mòralachd chuir thu air.

6 Oir rinn thu e ro bheannaichte gu bràth; rinn thu e ro aoibhneach le d' ghnùis.

7 Oir earbaidh an rìgh as an Tighearn; agus trid thròcair an Tì a's àirde, cha ghluaisear e.

8 Gheibh do làmh a mach do naimhdean uile; gheibh do dheas làmh a mach iadsan le m' fuathach thu.

9 Ni thu iad mar àmhuinn² theintich ann an àm t'fheirge: sluigidh an Tighearna sìos iad 'na chorrùich, agus caithidh³ an teine iad.

10 An toradh sgrìosaiddh tu o'n talamh, agus an sliochd o chloinn nan daoine.

11 Oir dhealbhadh iad olc a'd' aghaidh; smuainidh iad droch smuainte, nach b'urrainn iad a choimhlionadh.

12 Uime sin bheir thu orra an cùl a thionndadh; air sreangaibh do bhogha gleusaidh⁴ tu do shaighdean 'nan aghaidh.

13 Bì air t'àrdachadh, a Thighearn, ann ad neart; seinnidh sinne agus molaidh sinn do chumhachd.

SALM XXII.

1 *Na theanntachd ghairm Daibhidh air Dia, 6 agus leig e ris da an trioblaid a thàinig air.* 22 *Gheall e buidheachas follaiseach agus cliù a thabhairt da.*

Do'n àrd fhear-ciùil air Ailet-sachar. Salm le Daibhidh.

MO Dhia, mo Dhia, c'ar son a thréig thu mi? fad o m' ghlaodh⁵ o bhriathraibh mo bhùiridh.

2 O mo Dhia! gairmeam san là, ach cha fhreagair thu; agus san oidhche, ach cha 'n eil fois agam.

3 Ach a ta thusa naomh, a'd' chòmh-

nuidh far am bheil cliù Israeil⁶.

4 Asad-sa dh'earb arn-aithriche; dh'earb iad, agus shaor thu iad.

5 Riut-sa ghlaodh iad, agus theasairgeadh iad; asad-sa dh'earb iad, agus cha robh nàire orra.

6 Ach is cnuimh mise⁷ agus cha duine: masladh dhaoine, agus tàir an t-sluaigh.

7 Ni iadsan uile a chì mi, gàire-fanoid rium; casaidh iad am beul, crathaidh iad an ceann, ag ràdh,

8 Chuir e a dhòigh anns an Tighearn, fuasgladh e air; saoradh se e, a chionn gu bheil tlachd aige ann.

9 Ach is tusa an Tì a thug a mach as a bhroinn mi; bu tu aobhar mo dhòchais, air cìh mo mhàthar.

10 Orsa thilgeadh mi o'n bhroinn: o bhroinn mo mhàthar is tusa mo Dhia.

11 Na bi-sa fad uam, oir a ta àmhghar dlùth dhomh, agus gun neach ann gu m' chuideachadh.

12 Chuairtich mòran tharbh mi; dh'iadh tairbh làidir Bhasain umam.

13 Dh'fhosgail iad orm am beul, mar leòmhann reubach⁸ agus beucach.

14 Mar uisge dhòirteadh mach mi, agus sgàin mo chnàmhann uile o chèile: tha mo chridhe mar chéir, air leaghadh ann meadhon mo chuim.

15 Air tiormachadh mar shoitheach creadha tha mo neart; agus tha mo theangadh a' leantuinn ri m' ghial; agus gu h-ùir bhàis thug thu mi.

16 Oir chuairtich madraidh mi; dh'iadh coimhthional dhroch dhaoine umam: lot iad mo làmhann agus mo chosan.

17 Feudaidh mi mo chnàmhann uile àir-eamh: tha iadsan a' sealltuinn, tha iad a' geur-amharc orm.

18 Roinn iad mo thrusgan eatorra, agus air mo bhrat thilg iad crannchur.

19 Ach na bi-sa, a Thighearn, fad uam: O thusa mo neart, greas gu m' chabhair.

20 Teasairg m'anam o'n chlaideamh; m'aon ghràdh⁹ o neart¹⁰ a' mhadaidh.

21 Saor mi o bheul an leòmhain, agus o adharcaibh nam buabhull¹¹ teasairg mi¹².

22 Cuiridh mi'n céill t'ainm do m'bhàithribh; ann am meadhon a' choimhthionail molaidh mi thu.

23 Sibhshe air am bheil eagal Dé, molaidh e: sibhshe uile, a shìol Iacoib, thugaibh glòir dha; agus biodh 'eagal-san oirbh, sibhshe uile a shìol Israeil.

24 Oir cha do rinn e tàir air, agus cha do ghabh e gràin do àmhghar an truagh-

¹ Fòir, a Thighearn; éisdeadh an rìgh ruinn, 'nuair a ghairmeas sinn. ² Cuiridh tu iad ann an àmhuinn. ³ millidh.

⁴ deas-zichidh.

⁵ o m'fhurtachd.

⁶ Ach O thusa, a tha d' chòmhnuidh san ionad

naomh, cliù Israeil.

⁷ mar chnuimh a ta mise.

⁸ fuileachdach. ⁹ mo bheatha, mo phearsa.

¹⁰ o làimh. Eabh.

¹¹ nan aon-adharcach, nan sròin-adharcach.

¹² dh'èisd thu rium.

ain¹, agus cha d'fholuich e a ghnùis air: acli an uair a ghlaodh e ris, dh'éisd e.

25 Orta *bithidh* mo mholadh anns a' mhòr-choimhthional: mo bhòidean iocaidh mi 'nan làthair-san d'an eagal e.

26 Ithidh na daoine macanta, agus sàs-uchear iad: molaidd iadsan an Tighearn a dh'iarras e: bithidh an cridhe² beò gu bràth.

27 Cuimhnichidh air, agus pillidh a dh'ionnsuidh an Tighearn uile chrìocha na talmhainn; agus strìochdaidh uile theaghlaiche nan cinneach 'na làthair.

28 Oir *is* leis an Tighearn an rìoghachd; agus *tha* esan 'na uachdaran air an cinnich.

29 Ithidh daoine reamhra³ na talmhainn uile, agus ni iad aoradh: 'na làthair-san sleuchdaidh iadsan uile a theid sìos do'n duslach; oir cha chum neach 'anam beò⁴.

30 Ni sliochd⁵ seirbhis dha: measar e do'n Tighearna mar ghinealach.

31 Thig iad, agus cuiridh iad an cèill 'fhìreantachd do'n àl ri teachd, gu'm b'esan a rinn *sud*⁶.

SALM XXIII.

1 *Dh'earb Daibhidh á freasdal agus à maitheas Dé.*

Salm le Daibhidh.

IS e'n Tighearna mo bhuachaille: cha bhi mi ann an dìth.

2 Ann an cluainibh glas bheir e orm luidhe sìos: làimh ri h-uisgeachaibh ciùin treòrachidh e mi.

3 Aisgidh⁷ e m'anam, treòrachidh e mi air shligibh na fireantachd air sgàth 'ainme fèin.

4 Seadh, ged shiubhail mi troimh ghleann sgàile a' bhàis, cha bhi eagal uile orm; oir *a ta* thusa maille rium: bheir do shlat agus do lorg comhfhurtachd dhomh.

5 Deasaichidh tu bord fa m' chomhair air fianuis mo naimhde: d'ung thu le h-oladh mo cheann; tha mo chupan a' cur thairis.

6 Gu cinnteach leanaidh maith agus tròcair mi uile làithean mo bheatha; agus comhnuichidh mi ann an tigh an Tigh-earna fad mo làithean⁸.

SALM XXIV.

1 *Ard-uachdaranachd Dhé os ceann na talmhainn.*
3 *Seasaidh am firean ann an ionad naomh an Tighearn.* 7 *Dol a steach Rìgh na glòire d'a àite-còmhnuidh.*

Salm le Daibhidh.

IS leis an Tighearn an talamh, agus a làr: an domhan, agus iadsan a tha 'nan comhnuidh ann.

2 Oir shuidhich e air na cuantaibh e,

agus shocraich e air na sruthaibh e.

3 Cò theid suas gu sliabh an Tighearn?

agus cò sheasas 'na ionad naomh-san?

4 Esan aig am bheil làmhnan neo-chiontach agus cridhe glan, nach do thog 'anam ri diomhanas, agus nach do mhionnaich chum ceilge.

5 Gheibh esan beannachadh o'n Tigh-earn, agus fireantachd o Dhia' a shlàinte.

6 *Is* i so ginealach na droinge a dh'iarras e, a dh'iarras do ghnùis, a Dhia Iacòib. Selah.

7 Togaibh, a gheatacha, bhur cinn, agus bithibh air bhur togail suas, a dhorsa sìorruidh; agus thig Rìgh na glòire steach.

8 Cò e so Rìgh na glòire? An Tighearna làidir agus treun, an Tighearna treun an cath.

9 Togaibh suas bhur cinn, a gheatacha, agus bithibh air bhur togail suas, a dhorsa sìorruidh, agus thig Rìgh na glòire steach.

10 Cò e so Rìgh na glòire? Tighearna nan slògh, *is* esan Rìgh na glòire. Selah.

SALM XXV.

1 *Ghuidh Daibhidh gu'n treòraicheadh Dia e ann an slighe na firinn;* 7 *gu'm maitheadh e peacanna 'òige;* 16 *agus gu'n deanadh e cabhair air ann an àm a thrìoblaid.*

Le Daibhidh.

RIUTSA, a Thighearn, togam m'anam suas.

2 Annad-sa, mo Dhia, cuiream mo dhòchas; na nàraichear mi, agus na deanadh mo naimhdean gairdeachas os mo cheann.

3 Seadh, na nàraichear neach sam bith a dh'fheitheas ortsa; biodh nàire orrasan a chiontaicheas gun aobhar.

4 Nochd dhomh do shlighean, a Thighearn; teagaisg dhomh do cheumanna.

5 Treòraich mi ann ad fhirinn, agus teagaisg mi; oir *is* tusa Dia mo shlàinte, agus ortsa tha mi feitheamh gach là.

6 Cuimhnich do chaomh-throcairean, a Thighearn, agus do chaoimheasan gràdhach; oir *tha* iad ann o chian nan cian.

7 Peacanna m'òige, agus m'eusaontais, na cuimhnich thusa: a réir do thròcair bi-sa cuimhneachail orm, air sgàth do mhaithais, a Thighearn.

8 *Is* maith agus *is* dìreach an Tighearn; uime sin teagaisgidh e peacaich san t-slighe.

9 Treòrachidh e na daoine ciùin⁹ ann am breitheanas; agus teagaisgidh e do na daoineibh ciùin a shlighe.

10 *Is* tròcair agus firinn uile shlighean an Tighearna, dhoibhsan a ghleidheas a choimhcheangal agus a theisteis.

11 Air sgàth t'ainme, a Thighearn, lagh mo chionta; oir *a ta* i mòr.

¹ an duine bhoichd. ² bhur cridhe. ³ beartach.
⁴ agus bithidh m'anam beò dha-san. ⁵ mo shliochd.

⁶ oir rinn esan e. ⁷ iompaichidh.
⁸ gu bràth. ⁹ tragh, iotasal.

12 Cò e am fear air am bheil eagal an Tighearna? seòladh e esan san t-slighe a ròghnuicheas¹ e.

13 Nì 'anam tàmh aum am maith²; agus mealaiddh a shliochd an tìr.

14 Tha rùn an Tighearna aig an dream d'an eagal e; agus foillsichidh e dhoibh a choimhcheangal.

15 Tha mo shùilean a ghuàth ris an Tighearna; oir bheir esan mo chosan as an lìon.

16 Amhaire orm³, agus gabh truas dìom; oir a ta mi a'm aonar, agus fo àmhghar.

17 Tha teinn mo chridhe a' dol am meud: o m' amhgharaibh saor thusa mi⁴.

18 Amhaire air m' àmhghar, agus air mo phéin⁵, agus lagh mo pheacanna gu léir.

19 Amhaire air mo naimhaidibh, oir tha iad lionmhor; agus le fuath anabarrach⁶ tha iad ga m' fhuathachadh.

20 Gléidh m'anam, agus saor mi; na leig fo naire mi, oir chuir mi mo dhoigh annad.

21 Dìonadh ionracas agus ceartas mi; oir tha mi feitheamh ortsa.

22 Saor Israeil, a Dhé, as 'amhgharaibh uile.

SALM XXVI.

1 Chuir Daibhidh an céill 'ionracas féin, agus ghuidh e gu'n rannsaicheadh Dia 'airnean agus a chridhe. 8 Dh'iarr e bhì air a shaoradh o dhaoinibh fuileachdach.

Le Daibhidh.

THUOIR breth orm, a Thighearna, oir ghluais mi ann an ionracas; o chuir mi mò dhoigh anns an Tighearna, cha ghluaisear mi.

2 Fidir mi, a Thighearna, agus dearbh mi; rannsaich⁷ m'airnean agus mo chridhe.

3 Oir tha do chaoimhneas gràdhach fa chomhair mo shùl; agus ghluais mi ann ad fhèrrinn.

4 Cha do shuidh mi le daoinibh mealltach⁸, agus maille ri luchd-ceilge cha téid mi steach.

5 Is beag orm coimhthional luchd-uile, agus le daoinibh aingidh cha suidh mi.

6 Nighidh mi mò làmh an an neò-chionta, agus cuartichidh mi t'altair, a Thighearna;

7 Chum gu foillsich mi le guth molaidh, agus gu cuir mi an céill t'òibre iongantach gu léir.

8 A Thighearna, is ionmhuinn leam còmhnuidh do theach-sa⁹, agus ionad pàilliuin do ghlòire.

9 Na cruinnich m'anam le peacachaibh, no mo bheatha le daoinibh fuileachdach:

10 Aig am bheil lochd¹⁰ 'nan làmhaibh, agus au làmh dheas làn do dhuais-bhratha.

11 Ach gluaisidh mise ann am ionracas: saor mi, agus dean tròcair orm.

12 Tha mo chos 'na seasamh ann an ionad còmhuard: anns na coimhthionalaibh beannaichidh mi an Tighearna.

SALM XXVII.

1 Cha robh eagal air Daibhidh roimh a naimhaidibh do bhrìgh gu'n robh Dia 'na shlàinte dha. 7 Ghuidh e air an Tighearna tròcair a nochdadh dha, agus a thearmadh o thoil luchd-fòirneirt.

Le Daibhidh.

IS e an Tighearna mo sholus, agus mo shlàinte; cò chuireas eagal orm? Is e an Tighearna neart mo bheatha; cò chuireas geilt orm?

2 'Nuair a thàinig luchd-uile orm a dh'ithheadh suas m'fheòla, mo naimhdean agus m'eascairdean, thuislich iad féin, agus thuit iad.

3 Ged champaicheadh feachd a'm aghaidh, cha bhiodh eagal air mo chridhe: ged éirheadh cogadh a'm' aghaidh, á so nì mi mo bhun.

4 Aon nì ghuidh mi air an Tighearna, sin iarraidh mi, a bhì m' chòmhnuidh ann an tigh an Tighearna rè uile làithean mo bheatha, chum gu faicinn maise an Tighearna, agus gu fiosraichinn 'na theampull.

5 Oir folaichidh e mi 'na sgàth-thigh¹¹ ann an là an uile; folaichidh e mi ann an dìomhaireachd a phàilliuin¹²; air carraig togaidh e suas mi.

6 Agus a nis togar suas mo cheann os ceann mo naimhdean mu'n cuairt orm; agus iobraidh mi 'na phàilliuin iobairtean aobhneis; seinnidh mi, agus canaidh mi cliù do'n Tighearna.

7 Eisd, a Thighearna, ri m' ghuth, 'nuair a dh'éigheas mi; dean tròcair orm, agus freagair mi.

8 'Nuair a thubhairt thusa, Iarraibh-se mo ghnùis; thubhairt mo chridhe riut, Do ghnùis a Thighearna iarraidh mi.

9 Na folaich do ghnùis uam; na cuir air falbh t'òglach am feirg: bu tusa mo chabhair; na fàg mi, agus na tréig mi, a Dhia mo shlàinte.

10 'Nuair a thréigeadh m'athair agus mo mhàthair mi, an sin togaidh an Tighearna suas mi.

11 Teagaisg dhomh do shlighe, a Thighearna, agus treòraich mi air slighe dhirich, air sgàth mo naimhdean.

12 Na tabhair thairis mi do thoil mo

¹ a thaghas e, d'an còir dharòghuim a dheanamh.

² socair, seasgaireachd.

³ Tìomdaidh rium.

⁴ Lasaidh teanntachda mo chridhe, agus o m' amhgharaibh saor thusa mi.

⁵ mo shaothair.

⁶ eucorach.

⁷ glan.

⁸ faoin, dìomhaire.

⁹ aite-còmhnuidh do naomhachd-sa.

¹⁰ aingidheachd, donas.

¹¹ 'na phubull, 'na

phàilliuin.

¹² bhùtha.

naimhdeau: oir dh'érich fianuisean bréige a'm¹ aghaidh, agus luchd bagairt fóir-neirt.

13 Gidheadh chreid mise¹ gu'm faicinn maithas an Tighearn ann an tìr nam beò.

14 Feith air an Tighearna; glac misneach², agus neartaich³ dh'esan do chridhe: feith, tha mi 'g ràdh, air an Tighearn.

SALM XXVIII.

1 *Ghuidh Daibhidh gu'n cuidicheadh Dia leis an aghaidh a naimhdean. 6 Bheannaich e Dia: 9 agus rinn e urnuigh air son an t-sluaigh. Le Daibhidh.*

RIUTSA, a Thighearn, éigheam, mo charraig: na bi-sa a'd thosd³ a m' thaobh, air eagal, ma bhios tu a'd thosd a m' thaobh gu fàs mi cosmhuil riu-san a théid sìos do'n uaigh⁴.

2 Eisd ri guth m'athchuingean an uair a ghlaodhas mi riut, an uair a thogas ni mò làmhan clum do ghuth-àite naoimh-sa⁵.

3 Na taruing mi mach leis na h-aingidh, agus le luchd-deanamh na h-eucorach, a tha làbhairt sìth r'an coimhearsnaich, agus ole aca 'nan cridhe.

4 Thoir dhoibh a réir an oibre, agus a réir aingidheachd an gnìomharan; a réir oibre an làmh thoir dhoibh; ioc an luigh-eachd⁶ dhoibh.

5 A chionn nach toir iad an aire do ghniomharaibh an Tighearna, no do obair a làmh, sgriosaidh e iad, agus cha tog e suas iad.

6 Beannaichte gu robh an Tighearn a chionn gu'n d'éisd e ri guth m'athchuinge.

7 Is e an Tighearna mo neart, agus mo sgiath; ann-san chuir mo chridhe a dhòchas, agus chuidicheadh leam; uime sin rinn mo chridhe gairdeachas; agus le m' laoidh molaidd mi e.

8 Is e an Tighearna neart a shluaigh; agus is esan neart slàinte 'aoin ungta féin.

9 Saor do shluagh, agus beannaich t'òighreachd: beathaich iad, agus àrd-aich iad gu bràth.

SALM XXIX.

1 *Thug Daibhidh caraid do nachdarenaibh glòir a thabhairt do Dhia, 3 a chionn gu bheil a chumhachd mòr, 11 agus gu bheil e 'na dhìdean d'a shluagh.*

Salm le Daibhidh.

THUGAIBH do'n Tighearn, a chlann nan cumhachdach, thugaibh do'n Tighearna glòir agus neart.

2 Thugaibh do'n Tighearn a' ghlòir a's cubhaidh d'a ainm; sleuchdaibh do'n Tighearna ann am maise na naomhachd.

3 Tha guth an Tighearna os ceann nan

uisgeacha: rinn Dia na glòire tairneanach, an Tighearn, os ceann nan uisgeacha mòra.

4 Tha guth an Tighearna cumhachdach; tha guth an Tighearna làn mòralachd.

5 Brisidh guth an Tighearna na seudair; seadh, brisidh an Tighearn seudair Lebanoin.

6 Agus bheir e orra leum mar laogh; Lebanon agus Sirion, mar bhuabhull⁷ òg.

7 Sgoitidh guth an Tighearna lasraiche an teine⁸.

8 Crathaidh guth an Tighearn am fàsach; crathaidh an Tighearna fàsach Chadeis.

9 Bheir guth an Tighearn air na h-eildibh an laogh a thilgeadh⁹, agus lomaidd e na coillte: agus 'na theampull cuiridh gach neach an céill a ghlòir.

10 Suidhidh an Tighearn air tuil; agus suidhidh an Tighearna 'na Rìgh gu sìorruidh.

11 Bheir an Tighearna neart d'a shluagh; beannaichidh an Tighearn a sluagh le sìth.

SALM XXX.

1 *Mhol Daibhidh Dia a chionn gu'n do theasairg se e. 4 Chomhairlich e do gach neach buidheachas a thabhairt do'n Tighearn.*

Salm; laoidh coisreagaidh tighe Dhaibhidh.

MOLAIDD mi thu, a Thighearn; m'oir thog thu suas mi, agus cha d'thug thu air m'eascairidh gairdeachas a dheanamh os mo cheann.

2 A Thighearna mo Dhia, ghlaodh mi riut, agus shlànuich thusa mi.

3 A Thighearna, thog thu m'anam a nìos as an uaigh; ghléidh thu beò mi, chum nach rachainn sìos do'n t-slochd.

4 Seinnibh do'n Tighearna, sibhshe a naoimh-san, agus thugaibh buidheachas ri cuimhneachadh air a naomhachd.

5 Oir cha'n'éil ach tiota 'na fheirg; tha beatha 'na dheadh-ghean: rè oidhche mairidh bròn, ach air maduinn thig gairdeachas.

6 Thubhairt mise a'm' shocair¹⁰, Cha ghluaisear mi am feasd.

7 A Thighearna, le d' dheadh-ghean thug thu air mo bheinn seasam gu daingean¹¹: dh'fholuich thu do ghnùis; bha mi fo amhladh.

8 Ghlaodh mi riutsa, a Thighearn; agus air an Tighearn dh'asluich mi.

9 Ciod an tairbhe a tha ann am fhuil, 'nuair a théid mi sìos do'n t-slochd? Am mol an ùir thu? an cuir i an céill t'fhèrrinn?

¹ Rachadh mo mhisneach air cùl mur creidhinm.

² bi daingean; bi làidir. Eabh.

³ bodhar.

⁴ do'n t-slochd.

⁵ gu ionad-còmhnuidh do

naomhachd-sa. ⁶ an diol, an dlighe.

⁷ aon-adharcach.

⁸ an dealanaich.

⁹ Crathaidh guth an Tighearna na daragan.

¹⁰ shuaimhneas, shoirbheas.

¹¹ thug thu neart do m' urram, do m' nàise.

10 Eisd rium, a Thighearn, agus dean tròcair orm; A Thighearna, bi-sa a'd' fhear-cuidich leam.

11 Thionndaidh thu dhomh-sa mo bhròn gu dannsadh: chuir thu dhìom m'eudach-saich, agus chrìoslaich thu mi le h-aobhneas;

12 Chum gu seinneadh mo ghloir clùidhuit, agus nach bitheadh i 'na tosd. A Thighearna mo Dhia, gu bràth molaidh mise thu¹.

SALM XXXI.

1 Chuir Daibhidh a dhòchas ann an Dia, 7 agus rinn e gairdeachas 'na throcair. 9 'Na thrioblaid dh'earb e as an Tighearn. 19 Mhol e matheas Dhé.

Do'n àrd fhear-ciuil. Salm le Daibhidh.

ANNAD-SA, a Thighearn, cuiream mo dhòigh; na nàraichear mi gu bràth: trid t'fhèantachd saor mi.

2 Aom a m' ionnsuidh do chluas; gu grad furtaich orm: bi-sa a'd' charraig làidir dhomh, a'd' thigh-tearmuinn chum mo dhionadh.

3 Oir is tusa mo charraig, agus mo dhaingneach; agus air sgàth t'ainme treòrachidh agus stiùraidh tu mi.

4 Bheir thu mi as an lion a dh'fholuich iad fa m' chomhair: oir is tusa mo neart.

5 Ann ad làimh-sa tiomnam mo spiorad: saor mi², a Thighearna Dhé na firinn.

6 Is fuath leat³ iadsan a bheir fa'neart dìomhanasa breugach: ach anns an Tighearna chuir mise mo dhòchas.

7 Ni mi aobhneas agus gairdeachas ann ad throcair: oir chunnaic thu m' àmhghar; b'aithne dhuit m'anam ann an teanntachdaibh;

8 Agus cha do dhruid thu suas mi ann an làimh an nàmhaid; shocraich thu mo chosan ann an àite farsuinn.

9 Gabh truas diom, a Thighearn, oir tha mi ann an teinn; tha mo shùil, m'anam, agus mo chom, air seargadh as le doilgheas.

10 Oir chlaoidheadh mo bheatha le bròn, agus mo bhliadhnan le h-osnaich; air son m'eucairt thuit mo neart, agus chaitheadh mo chnàmhan.

11 Am measg mo naimhdean gu léir bha mi a'm' mhasladh, agus gu h-àraidh do m' choimhearsnaich, agus a'm' aobhar eagail do m' luchd eòlais: iadsan a chunnaic mi a muigh, theich iad uam.

12 Dhì-chuimhnich mi mar dhuine marbl air dol á cuimhne; tha mi mar shiotheach briste.

13 Oir chuala mi cùl-chàineadh mòrain dhaoine; bha eagal air gach taobh, 'nuair

a ghabh iad comhairle le chéile a'm' aghaidh, a dhealbh iad mo bheatha thoirt uam.

14 Ach dh'earb mise asad-sa, a Thighearn: thubhairt mi, Is tu mo Dhia.

15 Ann ad làimh-sa tha m' aimsirean: saor mi á làimh mo naimhdean, agus uatha-san a tha 'n tòir orm.

16 Thoir air do ghnìis dealrachadh air t'òglach: saor mi air sgàth do throcair.

17 Na nàraichear mi, a Thighearn, oir ghairm mi ort; nàire biodh air na h-aingidh, 'nan tosd bitheadh iad san uaigh!

18 Deanar balbh na bilean breugach, a labhras an aghaidh an fhìrein gu cruaidh, le h-uabhar agus tarcuis.

19 Cia mòr do mhaithreas, a thaig thu dhoibh-san do'n eagal thu; a rinn thu dhoibh-san a dh'earbas asad, am fianuis chloinn nan daoine!

20 Folaichidh tu iad ann an dìomhair-eachd do làthaireachd⁴ o àilgheas dhaoine; folaichidh tu iad ann am pàillion o strì nan teangadh.

21 Beannaichte gu robh an Tighearn; oir nochd e gu h-iongantach a chaoimheas dhomh-sa ann am baile daingichte⁵.

22 Thubhairt mise a'm' dheifir, Ghearradh as mi o fhianuis do shùl: gidheadh dh'èisd thusa ri guth m'asluchaidh, 'nuair a dh'èigh mi riut.

23 Gràdhaidh an Tighearn, sibhse uile a naoimh-san: gleidhidh an Tighearn na daoine tréibhdhireach, agus diolaidh e gu pailt dhasan a ni gu h-uabhbheach.

24 Bithibh-se misneachail, agus neartaichidh esan bhuir cridhe, sibhse uile a chuir bhuir dòchas anns an Tighearn.

SALM XXXII.

1 Beannachadh an duine d'an do mhaithheadh 'eusaontas. 3 Bheir aidmheil peacaidh fois do'n choguis. 8 Dh'earail Daibhidh air an t-siagha glua:ad gu cothromach.

Le Daibhidh Maschil.

IS beannaichte esan d'an do mhaithheadh⁶ 'eusaontas, d'am bheil a pheacadh air 'fholachadh.

2 Is beannaichte an duine, nach cuir an Tighearn eucairt as a leth, agus aig nach 'eil cealg 'na spiorad.

3 'Nuair a bha mi a'm' thosd⁷, luidh aois air mo clnàmhaibh⁸, le m' bhuireadh fad an là.

4 Oir a là agus a dh'oidhche bha do làmh trom orm: tha mo bhrìgh air a h-atharrachadh gu tìormachd an t-samhraidh. Selah.

5 Dh'aidich mi mo pheacadh dhuit,

¹ bheir mise buidheachas dhuit.

² shaor thu mi.

³ leam.

⁴ do ghnìise. Eabh. ⁵ ann an caithir làidir.

⁶ dhì-chuimhnich mi.

⁷ a thaobh mo pheacaidh.

⁸ chaitheadh mo chnàmhan.

agus cha do cheil mi m'eucairt: thubhairt mi, Aidichidh mi m'èusaontais do'n Tighearn; agus nìhaith thusa cionta mo pheacaidh. Selah.

6 Air an aobhar sin, nì gach duine diadhaidh¹ urnuigh riut-sa, san àm am faighear thu: gu cinnteach ann an tuil nan uisgeacha mòra, cha tig iad ann fagus da.

7 *Tha* thusa a'd² ionad-foluich dhomh; o theinn gleidhidh tu mi; le h-òranaibh saorsa cuairtichidh tu mi. Selah.

8 Fìor-theagaisgidh mi thu, agus nochdaidh mi dhuit an t-slighe air an tigeachd dhuit triall; seòlaidh mi dhuit le m' shùil³.

9 Na bi mar each, no mar mhuileid⁴, aig nach 'eil ciall; d'an cuirear sparrag agus srian 'nam beul, chum nach tig iad an gar dhuit⁴.

10 *Is* lionmhòr doilgheasan do'n aingidh; ach cuairtichidh tròcair esan a dh'earbas as an Tighearn.

11 Bithibh aoibhneach anns an Tighearn, agus deanaibh gairdeachas, sibhse fhìreana; agus deanaibh luathghaire, sibhse uile a *tha* ceart an cridhe.

SALM XXXIII.

1 *Is* còir do'n fhàirean *Dia* a mholadh, 4 air son a mhaithéis, 6 a chumhachd, 12 agus a fhreasdail. 18 *Tha* sùil an Tighearn orra-san a chuireas an dòigh 'na thròcair.

DEANAIBH gairdeachas san Tighearna, sibhse fhìreana; do na h-ionraic *tha* cliù ciatach.

2 Molaibh an Tighearn air clàrsaich: air an t-saltair, inneal-ciùil nan deich teud, seinnibh dha.

3 Canaibh dha òran nuadh; seinnibh fonn gu h-ealanta, le fuaim àrd.

4 Oir *tha* focal an Tighearna ceart, agus *tha* 'oibre uile deanta ann am fìrinn.

5 *Is* ionmhuinn leis ceartas agus breitheanas; do mhaithreas an Tighearna *tha* 'n talamh làn.

6 Le focal an Tighearna rinneadh na nìamha, agus le h-anail a bheoil an slòigh uile.

7 Carnaidh e suas mar thòrr uisgeacha na fairge; cuiridh e an doimhne suas 'na thighibh-tasgaidh.

8 Roimh an Tighearna biodh eagail air an talamh uile; roimhe-san biodh fiamh air uile luchd-àiteachaidh an domhain:

9 Oir labhair e, agus bha e ann; dh'àitlm e, agus sheas e⁵.

10 Rinn an Tighearna comhairle nan cinneach faoin; thug e imleachdan an t-shuaigh gu neo-nì.

11 Seasaidh comhairle an Tighearna

gu sìorruidh, smuaintean a chridhe o linn gu linn.

12 *Is* beannaichte an cinneach sin, 'gam bheil an Tighearna 'na Dhia dhoibh; an sluagh a ròghnaich e mar oighreachd dha féin.

13 O na nìamhaibh amhaircidh an Tighearn a nuas; chì e uile chlamn nan daoine.

14 O ionad seasmhach a chòmhnuidh beachdaichidh e air uile luchd-àiteachaidh na talmhainn.

15 Chum esan an cridhe air aon dòigh; bheir e fa' near an gnìomharan uile.

16 Cha tearnar rìgh le meud 'fheachd⁶; cha saorair laoch le meud a neirt.

17 *Is* dìomhain an t-each chum tèaruinteachd; agus le meud a neirt cha saor e.

18 Feuch, *tha* suil an Tighearn orra-san d'an eagail e; orra-san a chuireas an dòchas 'na thròcair;

19 Chum an anam a theasairginn o'n bhàs, agus an cumail beò anns a' ghorta.

20 Feithidh ar n-anam air an Tighearn; *is* esan ar cabhair, agus ar sgiath.

21 Oir ann-san nì ar cridhe gairdeachas, a chionn 'na ainm naomh-san gu'n do chuir sinn ar dòigh.

22 Gu robh do thròcair, a Thighearn, oirnn, a réir mar a chuir sinn ar dòchas annad.

SALM XXXIV.

1 *Dh'earail Daibhidh air an t-sluagh Dia* a mholadh. 8 *Is* beannaichte an duine a dh'earbas as an Tighearn. 15 *Saoraidh Dia* am fìrean as gach teanntachd.

Le Daibhidh, 'nuair a dh'atharraich e a ghiùlan an làthair Abimeleich, agus a chuir esan uaith e, agus a dh'imich e.

BEANNAICHDH mi an Tighearna gach àm: au còmhnuidh *bithidh* a mholadh ann am bheil.

2 Anns an Tighearna nì m'anam uail; cluinnidh na daoine sèimhle, agus nì iad aoibhneas.

3 Molaibh an Tighearna leamsa, agus àrdaicheamaid 'ainm le chèile.

4 Dh'iarr mi an Tighearn, agus dh'éisd e rium; agus shaor e mi o gach aobhar eagail a bha agam.

5 Dh'amhairc iad air, agus shoillsich-eadh iad; agus cha robh nàire air au gnùis⁷.

6 Ghlaodh an duine bochd so, agus dh'éisd an Tighearna ris; agus as a theanntachdaibh gu léir shaor se e.

7 Campaichidh aingeal an Tighearna mu'n timchioll-san d'an eagail e, agus teasairgidh e iad.

¹ naomh, maith. ² bheir mi comhairle dhuit le m' shùil a bhì ort; soeraichidh mi na shùil ort.

³ mhuilidh; mule. Sags.

⁴ no cha tig iad am fagus duit.

⁵ bha e air bheil.

⁶ a shlòigh.

⁷ Amhaircibh-se air, agus bithibh air bhuir soill-sachadh; agus cha bhì nàire air bhuir gruaidh.

8 O blaisibh agus faicibh gur maith an Tighearn: *is* beannaichte an duine sin a dh'earbas as.

9 Bìodh eagal an Tighearn oirbh, a naoimh-san; oir cha *bhi* dìth air a luchd-eagail-san.

10 Bithidh easbhuidh air na leòmhanaibh òga¹, agus bithidh ocras orra; ach orra-san a dh'iaras an Tighearn cha bhi maith air bith a dhìth.

11 Thigibh, a chlann, éisdibh rium; teagaisgidh mi dhuibh eagal an Tighearna.

12 Cò e am fear a mhiannaicheas beatha, a ghrèdaicheas làithean a dh'fhaicinn maith?

13 Gléidh do theangadh o olc, agus do bhilean o labhairt ceilg.

14 Seachainn an t-olc, agus dean am maith; iarr sìochaint agus lean i.

15 Tha suilean an Tighearn air na fir-eanaibh, agus a chluas r'an glaoth.

16 Tha gnùis an Tighearn an aghaidh luchd-deanamh uile, chum an cuimhne a ghearradh as o'n talamh.

17 Ghlaodh na [fìreana,] agus dh'éisid an Tighearn; agus as an teanntachdaibh gu léir shaoir e iad.

18 *Is* dlùth an Tighearna dhoibh-san a tha briste 'nan cridhe; agus saoraidh e iadsan a tha brùite 'nan spiorad.

19 *Is* lìonmhor àmhgharan an fhèirein; ach asda air fad saoraidh an Tighearn e.

20 Gleidhidh an Tighearn a chnàmhan uile: cha bhi h-aon diubh briste.

21 Marbhaidh olc na h-aingidh²; agus iadsan a tha toirt fuath do'n fhìrean lom-sgrìosar iad.

22 Saoraidh an Tighearn anam a sheirbhiseach; agus cha sgrìosar aon air bith dhiubhsan a chuireas an dòigh ann.

SALM XXXV.

1 Chuir Daibhidh suas athchuinge air son tèaruin-teachd da féin, agus sgrìos d'a naimhidibh. 11 Ghearrain e gu'n do dhìol a naimhdean dha olc an éiric maith. 22 Ghuidh e gu'n tagradh Dia a chàis

Le Daibhidh.

TAGAIR, a Thighearn, riu-san a thagras a'm' aghaidh; cog'nan aghaidh-san a chogas a'm' aghaidh.

2 Glac targaid agus sgiath, agus éirich chum mo chuidcachaigh.

3 Agus tarruing a mach an t-sleagh, agus druid an t-slighe 'nan aghaidh-san³ a tha 'n tòir orm: abair ri m'anam, *Is* mi do shlàinte.

4 Nàire agus masladh gu robh orra-san

a tha 'g iarraidh m'anama: gu pillear iadsan air an ais, agus gu robh amhluidh orra, a tha smuaineachadh uile dhomh.

5 Bitheadh iad mar mhol fa chomhair na gaoithe, agus aingeal an Tighearna 'gan ruagadh.

6 Bitheadh an slighe dorch agus sleamhuinn, agus aingeal an Tighearn an tòir orra,

7 Oir gun aobhar dh'fholuich iad air mo shon an lòn; slochd gun aobhar chladhaich iad air son m'anama.

8 Thigeadh sgrìos air gun fhios da, agus a lòn a dh'fholuich e, glacadh se e féin: san sgrìos sin tuiteadh e.

9 Ach nì m'anam-sa gairdeachas anns an Tighearn; nì e aoibhneas 'na shlàinte.

10 Thoir mo chnàmhan uile, A Thighearn, cò *is* cosmhail riut-sa, a theasairgeas am bochd⁴ uaith-san a's treise na e, agus am bochd agus an t-ainnis⁵ uaith-san a chreachadh e?

11 Dh'éirich fianuisean eucorach; chuir iad as mo leth⁶ *nithe* air nach robh fios agam.

12 Dhìol iad dhomh olc an éiric maith, a' cur rompa mo bheatha a thoirt uam.

13 Ach a m' thaobh-sa, 'nuair a bha iad-san gu tinn, b'e eudach-saic mo chulaidh; dh'irioslaich mi m'anam le trasgadh⁷, agus phill m'umuigh a'm' uchd féin.

14 Mar gu'm bu charaid no bràthair dhomh a bhiodh ann, ghluais mi; mar fhear caoidh a mhàthar, gu dubhach chrom mi sìos.

15 Ach air bhi dhomh-sa ann an àmhghar, bha iadsan aig, agus chruinnich iad le chéile; chruinnich daoine suarach nach b'aithne dhomh le chéile a'm' aghaidh; reub iad, agus cha do sguir iad.

16 Le luchd dian-mhagaidh⁸ cealgach, chas iad am fiacra rium.

17 Cia fhad, a Thighearn, a dh'amhairceas tu air so? saor m'anam o am milleadh, m'aon ghràdh⁹ o na leòmhanaibh.

18 Clùthaichidh mi thu¹⁰ anns a' mhòr-choimhthional; am measg sluaigh lìonmhoir molaigh mi thu.

19 Na deanadh iadsan a ta 'nan naimhidibh dhomh gu h-eucorach, gairdeachas os mo cheann: iadsan aig am bheil fuath dhomh gun aobhar, na caogadh iad le'n sùil:

20 Oir cha labhair iad sìth; ach an aghaidh dhaoine ciùin na tìre dealbhaidh iad nithe cealgach.

21 Dh'fhosgail iad am beul gu farsuinn

¹ Bithidh daoine cumhachdach bochd.

² an t-aingidh.

³ tarruing an t-sleagh

agus an claidheamh 'nan aghaidh-sa.

⁴ an duine truagh, amhgharach.

⁵ am feumach.

⁶ dh'fhèdraich iad dhìom.

⁷ trosgadh.

⁸ luchd-magaidh air cuirmibh.

⁹ mo sheircein, mo phearsa.

¹⁰ Bheir mi buidheachas duit.

a'm' aghaidh; thubhairt iad, Aha, aha! chunnaic ar sùil.

22 Chunnaic thusa so, a Thighearn, na bi a'd' thosd: a Thighearn, na bi fad uam.

23 Tog ort, agus mosgail chum mo cheirt¹; chum mo chùise, mo Dhia agus mo Thighearn.

24 Thoir breth orm a réir do cheartais, a Thighearna mo Dhia, agus na deanadh iad gairdeachas os mo cheann.

25 Na h-abradh iad 'nan cridhe, Aha, is e sud ar miann: idir na h-abradh iad, Shluig sinn suas e.

26 Nàire agus amhladh gu robh orrasan le chèile, a tha deanamh gairdeachas ri m'òle: còmhdaichear le nàire agus masladh iadsan a dh'àrdaicheas iad féin a'm' aghaidh!

27 Deanadh iadsan iolach, agus bith-eadh iad aoibhneach, a sheasas mo chòir dhomh²; agus abradh iad a ghnàth, Mòrchliù gu robh do'n Tighearn, aig am bheil tlachd ann an sìth a sheirbhisich!

28 An sin cuiridh mo theangadh an céill do cheartas, air feadh an là do chliù.

SALM XXXVI.

1 Euceart agus cealg nan aingidh. 5 Oirdheireas trècar Dhè. 10 Dh'asluich Daibhidh air Dia gu'm buanaicheadh e a chaoimhneas dhoibhsan a bha ionraic 'nan cridhe.

Do'n àrd fhear-ciuil, Le Daibhidh òglach a Tighearna.

SE their an t-aingidh an taobh a stigh d'a chridhe³, gu'm peacaich e: cha 'n eil eagal Dé fa chomhair a shùil.

2 Oir nì e bàigh⁴ ris féin 'na shùilibh féin, gus am faighear a mach a chionta mar aobhar fuatha⁵.

3 Is euceart agus cealg briathran a bheoil: leig e dheth bhi glic, maith a dheanamh.

4 Dealbhaidh e euceart air a leabaidh; suidhichidh se e féin air slighe nach 'eil maith; cha'n oilteil leis an t-òle.

5 A Thighearna, anns na nèamhaibh tha do thròcair; tha t'fhìrinn gu ruig na neoil.

6 Tha t'fhìreantachd mar na beanntan àrda, do bheirtheanais 'nan doimhne mhoir: gheidhidh tusa, a Thighearn, duine agus ainmhidh.

7 Cia luachmhor do chaoimhneas gràdhach, a Dhé! uime sin earbaidh clann nan daoine á sgàile do sgiathan.

8 Sàsuichear iad gu mòr le saill⁶ do thighe; agus á amhainn do shòlasan bheir thu orra òl.

¹ mo chòir, mo bhreitheanais. ² leis an ionmluinn mo cheartas. ³ do m' chridhe. ⁴ miodal, brìonnal.

⁵ muir a gheibhear a mach a chionta gràineil.

⁶ pailteas.

⁷ lasan, fearg.

9 Oir agadsa tha tobar na beatha: ann ad sholus-sa chi sinne solus.

10 Buanaich do chaoimhneas gràidh dhoibhsan a chuir còlas ort, agus t'fhìreantachd dhoibhsan a tha ionraic 'nan cridhe.

11 Na tigeadh cos an àrdain orm, agus na gluaiseadh làmh nan aingidh mi.

12 An sin thuit luchd-deanamh na h-euceirt sìos; leagadh sìos iad, agus cha'n urrainn iad éirigh.

SALM XXXVII.

1 Chomhairlich Daibhidh do gach neach fèitheamh air an Tighearn, 10 do bhrìgh gu'n sgrìos e an t-aingidh, 28 agus gu'n gleidh e an t-ionracan bed.

Le Daibhidh.

NA biodh campar⁷ ort mu dhaoineibh aingidh, agus na gabh farmad ri luchd-deanamh na h-euceirt:

2 Oir mar am fear gearrar gu grad sìos iad, agus mar an luibh ghlas⁸ seargaidh iad.

3 Earb thusa as an Tighearn, agus dean maith; mar sin gabhaidh tu còmhnuidh san tìr, agus beathaichear thu gu cinnteach⁹.

4 Mar an ceudna gabh tlachd anns an Tighearn, agus bheir e dhuit iarrtuais do chridhe.

5 Tabhair suas do shlighe do'n Tighearn; agus earb as, agus nì se e:

6 Agus bheir e mach t'fhìreantachd mar an solus, agus do bhreitheanas mar am meadhon-là.

7 Bi d' thosd an Tighearn¹⁰, agus feith le foighidin air: na biodh campar ort mu'n tì a shoirbhicheas 'na shlighe, mu'n fhear a bheir a dhroch innleachda gu buil.

8 Leig fearg dhìot, agus tréig corruich: na biodh campar ort air aon chor¹¹ chum uile.

9 Oir gearrar as droch dhaoine; ach iadsan a dh'fheitheas air an Tighearn, buanmhealaidh iad an talamh¹².

10 Oir fathast tamull¹³ beag, agus cha bhi an t-aingidh ann; seadh, bheir thu fa'near 'àitsan, agus cha bhi e ann.

11 Ach mealaidh daoine macanta¹⁴ an talamh, agus gabhaidh iad tlachd ann am meud na sìth.

12 Tha'n t-aingidh a' cumadh uile do' ionraic, agus a' casadh 'fhiacal ris,

13 Nì Dia fanoid air, oir is léir dha gu bheil a là a' teachd.

14 Tharruing na h-aingidh an claidheamh, agus chuir iad am bogha aù

⁸ uaine.

⁹ le pailteas.

¹⁰ Fan gu sàmhach ris an Tighearn.

¹¹ a mhàin

¹² seallbhaichidh iad an talamh mar oighreachd.

¹³ tiota, sealan.

¹⁴ ciùin, sèimh.

ghleus, a leagadh sìos a' bhochd agus an ainns, a mharbhadh luchd deadh-bheus¹.

15 Théid an claidheamh a steach 'nan cridhe féin, agus brisear am bogha.

16 Is fearr beagan aig an duine ionraic na saoihbheas mhórain dhroch dhaoine.

17 Oir brisear gairdeana dhroch dhaoine; ach cumaidh Dia suas na fireana.

18 Is fiosrach Dia air làithibh nan daoine ionraic, agus bithidh an oighreachd gu sìorruidh.

19 Cha chuirear gu nàire iad ann an àm an uile, agus ann an làithibh na gorta sàsuichear iad.

20 Ach sgriosar droch dhaoine, agus bithidh naimhdean an Tighearna mar shaill uan: théid as doibh, mar dheataich théid as doibh.

21 Gabhaidh an t-aingidh air iasachd², agus cha diol e ris; ach tha'm firean trocaireach, agus bheir e uaith.

22 Oir iadsan a bheannaichear leis, mealaidh iad an talamh; agus iadsan a mhall-aichear leis, gearrar as iad.

23 Leis an Tighearna tha ceumanna duine air an orduchadh, agus gabhaidh e tlachd 'na shlighe:

24 Ged thuit e, cha tilgear gu tur sìos e; oir cumaidh an Tighearna suas air làimh e.

25 Bha mi òg, agus a nis tha mi sean; gidheadh cha'n fhaca mi am firean air a thréigsinn, agus a shliochd ag iarraidh arain.

26 Tha e ghnàth truacanta agus coingheallach; agus bithidh a shliochd beannaichte.

27 Seachainn an t-olc, agus dean am maith, agus gabh còmhnuidh gu bràth.

28 Oir is toigh leis an Tighearna breitheanas, agus cha tréig e a naoimh: gu bràth còimhdear³ iadsan; ach gearrar as sliochd nan aingidh.

29 Meallaidh na fireana an tìr, agus gabhaidh iad còmhnuidh innte gu bràth.

30 Cuiridh beul an fhèin an céill gliocas, agus labhraidh a theangadh breitheanas.

31 Tha lagh a Dhé 'na chridhe: cha sleamhuich a cheumanna.

32 Bithidh an droch dhuine ri faire air an fhèin, agus iarraidh e a mharbhadh.

33 Cha'n fhàg an Tighearna e 'na làimh; agus cha dìt se e, 'nuair a bheirear breth air.

34 Feith air an Tighearna, agus gléidh a shlighe; agus àrdaichidh e thu, chum an tìr a mhealltuinn: 'nuair a ghearrar as droch dhaoine, chì thu e.

35 Chunnaic mi an duine aingidh an

mòr-chumhachd, agus e 'ga sgaoileadh féin a mach mar ùr-chraoibh⁴ uaine.

36 Ach chaidh e seachad⁵, agus, feuch, cha robh e ann; agus dh'iarr mi e, ach cha d'fhuaras e.

37 Thoir fa' near an duine foirfe⁶, agus amhairc air an duine ionraic; oir is i sith a's crìoch do'n duine sin.

38 Ach sgriosar luchd eusaontais far-aon; gearrar as crìoch⁷ dhroch dhaoine.

39 Tha slàinte nam firean o'n Tighearna; is esan an neart ann an àm teanntachd:

40 Agus cuidicidh an Tighearna leo, agus teasairgidh e iad: teasairgidh e iad o dhroch dhaoineibh, agus saoraidh e iad, a chionn gu'n d'earb iad as.

SALM XXXVIII.

1 Ghuidh Daibhidh air Dia gu'n gabhadh e truas deth, 21 agus gu'n cuidicheadh e leis.

Salm le Daibhidh a chur an cuimhne.

A THIGHEARNA, na cronuich mi annad chorruih, agus na smachdaich mi an teas t'fheirge:

2 Oir shàthadh do shaighdean annam, agus tha do làmh trom orm.

3 Cha 'n'eil fallaineachd a'm' fheoil air son t'fheirge: cha 'n'eil sith a'm' chnàmhaibh air son mo pheacaidh:

4 Oir chaidh m'eucaarta thar mo cheann: mar eire⁸ thruim tha iad ro throm air mo shon:

5 Tha mo chreuchdan lobhta, breun, air son m'amaideachd.

6 Tha mi cràiteach; chromadh sìos mi gu mòr; air feadh an là uile tha mi 'g imeachd gu dubhach:

7 Oir tha mo leasraidh làn do ghalar granda; agus cha 'n'eil fallaineachd a'm' fheoil.

8 Tha mi lag, agus ro bhrùite: tha mi a' bùireadh trid mi-shuaimhneis mo chridhe.

9 A Thighearna, tha mo mhiann uile a'd' làthair; agus cha 'n'eil m'osnaich foluichte ort.

10 Tha mo chridhe a' ploscartaich⁹; thréig mo neart mi: a thaobh fradhairc¹⁰ mo shùl, sin mar an ceudna cha 'n'eil agam.

11 Tha luchd mo ghaoil agus mo chaird ean a' seasamh fa' chomhair mo leoin; agus tha mo dhilsean a' seasamh fad uam.

12 Agus tha luchd-iarraidh m'anama a' cur ribeacha romham, agus luchd-iarraidh m'uile a' labhairt nithe aimhleasach, agus a' smuaineachadh ceilge air feadh an là uile.

13 Ach mar dhuine bodhar, cha chluinn

¹ nan daoine dìreach 'nan slighe.

² an coingheall.

³ gléidhear.

⁴ mar sheudair edsrc. Eabh. ⁵ chaidh mi seach.

⁶ coimhlionta, iomlan.

⁸ uallach, eallach.

¹⁰ radhaire, solais.

⁷ fuigheall, stiochd.

⁹ luaimhneach.

mise; agus *tha* mi mar dhuine balbh, nach fosgail a bheul.

14 *Tha* mi eadhon mar fhear nach cluinn, agus aig nach *'eil* achmhasain 'na bheul.

15 Oir annad-sa, a Thighearn, chuir mi mo dhòchas: éisdidh tusa, a Thighearna mo Dhia.

16 Oir thubhairt mi, Air eagal gu'n dean iad gairdeachas a'm' aghaidh; 'nuair a shleamhuicheas mo chos, gu'n àrdaich siad iad féin a'm' aghaidh.

17 Oir *tha* mi ealamh gu tuisleachadh, agus *tha* mo dhoilgheas¹ a'm' fhianuis a ghnàth.

18 Oir aidichidh mi m'euceart; bithidh mi doilich air son mo pheacaidh.

19 Ach a *ta* mo naimehdean beothail, *tha* iad làidir²; agus *tha* iadsan aig am bheil fuath dhomh gu h-eucorach, air fàs lionmhor.

20 Agus *tha* iadsan a dhiolas olc air son maith a' cur a'm' aghaidh, a chionn gu bheil mi leantuinn a' mhaith.

21 Na tréig mi, a Thighearn, mo Dhia; na bi-sa fad uam.

22 Greas chum mo chuideachaidh, a Thighearn, mo shlàinte.

SALM XXXIX.

1 *Thug Daibhidh aire nach peacaicheadh e le 'theangaidh.* 4 *Tha beatha an duine mar sgàile, agus mar leud boise a làithean.* 8 *Dh'iarr Daibhidh gu'n saoradh Dia e o 'eusaontas.*

Do'n àrd fhear-ciùil, do Iedutun. Salm le Daibhidh.

THUBHAIRT mi, Bheir mi 'n aire do m' shlighibh, nach peacaich mi le m' theangaidh: gleidhidh mi srian air mo bheul, an uair a bhios an *duine* aingidh a'm' fhianuis.

2 Bha mi balbh tosdach; dh'fhan mi o labhairt maith *féin*; ach dhùisgeadh mo dhoilgheas.

3 Dh'fhàs mo chridhe teth an taobh a stigh dhomh; 'nuair a bha mi a' beachd-smuaineachadh, las an teine; labhair mi le m' theangaidh:

4 Thoir fios dhomh, a Thighearn, air mo chrich, agus tommas mo làithean ciod e, chum gu bi fios agam cia gearr mo rè.

5 Feuch, mar leud boise rinn thu mo làithean, agus *tha* m'aois mar neo-ni a'd' fhianuis: gu deimhin *is* dìomhanas gach duine d'a fheabhas. Selah.

6 Gu deimhin *tha* gach duine a' siubhal ann an samhladh dìomhain³: gu deimhin cuirear mi-shuaimhneas orra gu faoin: carnaidh *neach* suas *beartas*, gun fhios aig cò mhealas⁴ e.

7 Agus a nis ciod ris am feitheam, a Thighearn? *tha* mo dhòchas annad-sa.

8 Saor mi o m' eusaontasaih uile; na dean ball-maslaidh an amadain dhìom.

9 Bha mi a'm' thosd, cha d'fhosgail mi mo bheul, a chionn gur tusa a rinn e.

10 Tog dhìom do bhuille: le beum do làimh-sa chlaoidheadh mi.

11 Le achmhasanaibh air son euceirt 'nuair a chronaicheas tu duine, bheir thu air a shnuadh caitheadh mar leomann: gu deimhin *is* dìomhanas gach duine. Selah.

12 Cluinn m'urnuigh, a Thighearn, agus éisd ri m' ghlaodh; ri m' dheoir na bi a'd' thosd: oir *is* coigreach mi maille riut, agus fear-cuairt, mar m' aithriche uile.

13 O! caomhain mi⁵, chum gu faigh mi neart⁶, mun siùbhail mi, agus nach bi mi ann ni's mò.

SALM XL.

1 Nochd Daibhidh sonas an duine a chuireas a dhòchas anns an Tighearn 6 'Se ùmhlaich d'a thoil an iobairt e's taimich le Dia. 11 Dh'as-tuich Daibhidh air an Tighearn slàinte dha féin agus amhladh d'a naimehdibh.

Do'n àrd fhear-ciùil. Salm le Daibhidh.

DH'FHEITH mi le foighidinn ris an Tighearn, agus chrom e thugam⁷; agus chual' e mo ghlaodh.

2 Agus thug e mios á slochd uamhuinn mi, á clàbar làthaich, agus chuir e mo chos-an air carraig; shocraich e mo cheum-anna.

3 Agus chuir e òran nuadh ann am bhenl, òran-molaidh d'ar Dia: chi mòran e, agus bithidh eagal orra, agus earbaidh iad as an Tighearn.

4 *Is* beannaichte an duine sin a chuireas a dhòchas anns an Tighearn, agus nach seall an déigh nan uaibhreach⁸, no 'nan déigh-san a chlaonas chum bréige.

5 *Is* lionmhor, a Thighearna mo Dhia, na nithe a rinn thu! t'òibre iongantach, agus do smuainte d'ar taobh-ne, cha 'n eil e 'n comas a chur sìos an ordugh dhuit, nochdainn agus chuirinn an céill iad; ach *tha* iad ni's lionmhoire na gu'n gabh iad àireamh.

6 Ann an iobairt agus an tabhartas cha do ghabh thu tlachd: dh'fhosgail thu mo chluasan⁹: iobairt-loisgte agus iobairt-peacaidh cha d'iarr thu.

7 An sin thubhairt mi, Feuch, *tha* mi teachd; ann an rola an leabhair *tha* e sgrìobhta ormsa;

8 *Is* e mo thlachd do thoil a dheanamh, a Dhé; seadh, *tha* do lagh an taobh a stigh do m' chridhe.

¹ mo bhròn.

² *tha* iadsan a *tha* 'nan

naimehdibh dhomh gun aobhar làidir.

³ mar sgàile siubhlaidh duine.

⁴ chruinnicheas.

⁵ tionndaidh uam.

⁶ fois, comhshurtachd.

⁷ chugam.

⁸ nach tionndaidh chum nan uaibhreach, nach gabh tlachd anns na h-uaibhrich.

⁹ dheasaich thu corp dhomh.

9 Rinn mi sgeul air t'fhìreantachd sa' choimhthional mhòr: feuch, cha do choisg mi mobhilean, a Thighearn, is aithne dhuit.

10 Cha d'fholuich mi t'fhìreantachd ann am meadhon mo chridhe: chuir mi'n cèill t'fhìrinn, agus do shlàinte: cha do cheil mi do chaoimhneas gràdhach, agus t'fhìrinn, o'n choimhthional mhòr.

11 A Thighearn, na cum-sa do chaoimh-thròcairean uam: gleidheadh do chaoimhneas gràdhach agus t'fhìrinn a ghnàth mi.

12 Oir dh'iadh uile gun àireamh mu'n cuairt orm; ghlac m'eucearta¹ mi, agus cha n'èil e n' comas dhomh sealltuinn suas; nì's lionmhoire tha iad na falt mo chinn, agus thréig mo chridhe mi.

13 Gu ma toil leat, a Thighearn, mo theasairginn; greas, a Thighearn, chum mo chuideachaidh.

14 Nàire agus amhladh gu robh² orrasan le chéile, a tha 'g iarraidh m'anama g'a sgrìos: ruagar air an ais agus nàraichear iadsan a tha guidhe uile dhomh.

15 Aonaranach gu robh iadsan³ mar thuarasdal an nàire, a their rium-sa, Aha, Aha!

16 Deanadh iadsan uile a dh'iarras thusa, gairdeachas agus aoibhneas annad: abradh iadsan an còmhnuidh, a ghràdhach-eas do shlàinte, Mòr-mholadh gu robh do'n Tighearn.

17 Tha mise bochd agus uireasbhuidheach, ach smuainichidh an Tighearn orm: is tusa m'fhear-cabhair, agus m'fhear-saoraidh; a Dhé, na dean moille.

SALM XLI.

1 Tuarasdal an duine chaoimhneil. 4 Ghuìdh Daibhidh gu'n nochdadh Dia tròcair dha. 11 Dh'aicidh e maithreas Dhé d'a thaobh.

Do'n àrd fhear-ciùil. Salm le Daibhidh.

IS beannaichte esan a bheir an aire do'n duine bhoichd⁴: ann an là an uile⁵ saoraidh an Tighearn e.

2 Gleidhidh an Tighearn e, agus cumaidh e beò e, agus bithidh e beannaichte air thalamh: na tabhair thusa e do thoil a naimhdean⁶.

3 Bheir an Tighearna neart dha air leabaidh a thinneis iarganaich: a leabadh uile ni thusa dha 'na euslainte.

4 Thubhairt mi, A Thighearn, dean tròcair orm: leighis m'anam, oir pheacaidh mi a'd' aghaidh.

5 Tha mo naimhdean a' labhairt uile orm, ag ràdh, C'uin a gheibh e bàs agus a sgrìosar ainm?

6 Agus ma thig neach g'am shealltuinn, labhraidh e dìomhanas; carnaidh⁷ a

chridhe euceart dha féin; théid e mach, agus labhraidh se e.

7 Tha iadsan uile aig am bheil fuath dhomh a' cogarsaich le chéile a'm' aghaidh: tha iad a' dealbh uile a'm' aghaidh.

8 Tha droch ni, ars' iadsan, air teachd air⁸; agus esan a tha nis 'na luidhe, cha'n éirich e nì's mò.

9 Eadhon fear mo shith⁹, as an d'earb mi, esan a dh'ith do m'aran, thog e a shàil a'm' aghaidh.

10 Ach dean-sa, a Thighearn, tròcair orm, agus tog suas mi, agus bheir mi luigheachd dhoibh.

11 Le so tha fios agam gu bheil tlachd agad-sa annam, a chionn nach 'eil mo nàmhaid a' deanamh caithreim¹⁰ os mo cheann.

12 Ach air mo shon-sa, cumaidh tu suas mi ann am ionracas, agus suidhichidh tu mi a'd' fhianuis gu bràth.

13 Beannaichte gu robh an Tighearna Dia Israeil, o shiorruidheachd gu siorruidheachd! Amen agus Amen!

SALM XLII.

1 Tha cridhe Dhaibhidh a' togairt a dh'ionnsuidh Dhé. 5 Ghlac e misneach a bhrìgh tròcair an Tighearn.

Do'n àrd fhear-ciùil, Maschil, air son mhac Chorah.

MAR a thogras am fiadh chum nan sruth uisge, mar sin tha m'anam a' togairt a' d'ionnsuidh-se, a Dhé.

2 Tha tart air m'anam chum Dhé, chum an Dé bheò: c'uin a thig mi, agus a nochdar mi am fianuis Dhé¹¹?

3 Is iad mo dheoir a's biadh dhomh a là agus a dh'oidhche, 'nuair a theirear rium gach là, C'ait am bheil do Dhia?

4 Na nithe so is cuimhne leam, agus tha mi dòrtadh a mach m'anama leam féin; oir ghabh mi thairis leis a' mhòr chuideachd, chaidh mi leo gu tigh Dhé, le fuaim gairdeachais agus molaidd, leis a' chuideachd a bha cumail là féille¹².

5 C'ar son a tha thu air do leagadh sìos, O m'anam? agus c'ar son a tha thu fo bhuaireas¹³ an taobh a stigh dhìom? earb thusa á Dia; oir fathast molaidd mise e, slàinte mo ghnùise¹⁴, agus mo Dhia.

6 Leagadh sìos m'anam an taobh a stigh dhìom: uime sin cuimhnicidh mi ortsas, mo Dhia, o thir Iordain, agus o Hermon, o shliabh Mhairsair.

7 Tha doimhne a' gairm air doimhne le fuaim t'fheadan uisge; chaidh do stuaidhean¹⁵ agus do thonnas uile tharum.

8 Anns an là àithnidh an Tighearn a thròcair¹⁶; agus san oidhche bithidh a

¹ m'àmgharan.

² bithidh.

³ dì-làraichear iad, gu robh iad fo uamhunn.

⁴ iosal.

⁵ ann an àm teinn.

⁶ agus beannaichidh e air thalornh e, agus cha tabhair e do thoil a naimhdean e.

⁷ cruinnichidh. ⁸ tha droch thimeas a' dlùth-lcantuinn ris; tha mòr-chionta air a chur as a leth.

⁹ mo charaid.

¹⁰ gairdeachais.

¹¹ a chi mi gràis Dhé.

¹² Na nithe so cuimh-

nichidh mi, agus taomaidh mi mach m'anam an taobh a stigh dhìom, 'nuair a ghabhas mi thairis leis a' mhòr-chuideachd, a thèid mi leo, &c.

¹³ mhi-shuaimhneas. ¹⁴ air son furtachd a ghnùise.

¹⁵ do shùimainean. ¹⁶ a chaoimhneas.

laoidh maille rium, agus m'urnuigh ri Dia mo bheatha.

9 Their mi ri Dia mo charraig, C'ar son a dhì-chuimhnich thu mi? c'ar son a tha mi a' triall gu dubhach air son fòirneirt an eascaraid?

10 Mar chlaidheamh a'm' chnàmhaibh, tha mo naimhdean a' toirt maslaidh dhomh, 'nuair a their iad rium gach là, C'ait am bheil do Dhia?

11 C'ar son a tha thu air do leagadh sìos, O m'anam? agus c'ar son a tha thu fo bhuaireas an taobh a stigh dhìom? earb thusa á Dia; oir fathast molaidh mise e, slàinte mo ghnùise, agus mo Dhia.

SALM XLIII

1 *Dh'iarr Daibhidh air Dia a chùis a thagradh, agus e fèin a theocradh chum a phàilliuma.*
4 *Chuir e a dhòchas ann an Dia.*

THOIR breth orm¹, a Dhé, agus tagair mo chùis: o chinneach an-ìochd-mhor²; o fhear na cèilge agus na h-euceirt, saor thusa mi.

2 Oir is tusa Dia mo neirt; c'ar son a chuir thu mi fad uait? c'ar son a tha mi a' triall gu dubhach air son fòirneirt an eascaraid?

3 O cuir a mach do sholus agus t'fhèrinn! seòladh iadsan mi, thugadh iad mi chum do shlèibh naomh-san, agus chum do phàilliuma.

4 An sin thèid mi dh'ionnsuidh altair Dhé, a dh'ionnsuidh Dhé m'aoibhneis ro mhòir³; agus molaidh mi thu air a' chlàrsaich, a Dhia, mo Dhia.

5 C'ar son a tha thu air do leagadh sìos, O m'anam? agus c'ar son a tha thu fo bhuaireas an taobh a stigh dhìom? earb thusa á Dia; oir fathast molaidh mise e, slàinte mo ghnùise, agus mo Dhia.

SALM XLIV.

1 *Chuimhnich an eaglais air na tiodhlacaibh a thug Dia dhi o shean; 9 agus tha i a' caoidh gu'n do thréig e i a nis: 17 chuir i an cèill a h-ionracas, agus ghuidh i gu'n deanadh Dia cabhair oirre.*

Do'n àrd fhear-ciuil, air son mhac Chorah, Maschil.

ADHE, le'r cluasaibh chuala sinn, dh'innis ar n-aithriche dhuinn an obair a rinn thu 'nan làithibh-san, sua làithibh o shean.

2 Le d'làimh thilg thu mach na cinnich, ach shuidhich thu iadsan: chlaoidh thu na slòigh, ach thug thu orra-san soirbh-eachadh⁴.

3 Oir cha'n ann le'n claidheamh fèin a fhuair iad sealbh san tìr, agus cha'n e an gairdean fèin a shaor iad; ach do dheas làmh, agus do ghairdean-sa, agus solus

do ghnùise, a chionn gu'n robh deadh-ghean agad doibh.

4 Is tu fèin mo Rìgh, a Dhé: àithn thusa saorsa do Iacob.

5 'Trid-sa buailidh sinn ar naimhdean; trid t'ainme-sa saltraidh sinn orra-san a dh'éireas 'nar n-aghaidh.

6 Oir as mo bhogha cha'n earb mi, agus cha saor mo chlaidheamh mi.

7 Ach shaor thusa sinn o ar naimhidh, agus nàirich thu iadsan aig an robh fuath dhuinn.

8 A Dia ni sinne uail air feadh an là; agus t'ainm-sa molaidh sinn gu sìorruidh. Selah.

9 Ach a nis thilg thu uat sinn, agus nàirich thu sinn; agus cha 'nèil thu dol a mach le'r n-armailtibh.

10 Thug thu oirnn tionndadh air ar n-ais o'n nàmhaid, agus tha iadsan le'm fuathach sinn 'gar creachadh⁵.

11 Thug thu sinn mar chaoraich air son bìdh; agus am measg nan cinneach sgap thu sinn.

12 Reic thu do shluagh gun fhuach, agus cha do mheudaich thu do mhaoin le'n luach⁶.

13 Rinn thu sinn 'nar masladh d'ar coimhearsnaich, 'nar ball fanoid agus magaidh dhoibhsan a tha mu'n cuairt oirnn.

14 Rinn thu gnàth-fhocal dhinn am measg nan cinneach, aobhar crathaidh cinn am measg an t-sluaigh.

15 Fad an là⁷ tha m'amhladh a'm' fhuais, agus chòmhdaich nàire mo ghnùis mi⁸.

16 Air son guth an fhuir a bheir masladh agus toibheum, air son fuanis an nàmhaid agus an dìoghaltaich.

17 Thàinig so uile oirnn; gidheadh, cha do dhìchuimhnich sinn thu, agus cha d'rinn sinn cealg ann ad choimhcheangal.

18 Cha do thionndaidh ar cridhe air ais, agus cha do chlaon ar cos o d' shlighe:

19 Ged m'ionnsuidh thu sinn ann an ionad dhràgon, agus ged chòmhdaich thu sinn le sgàil a' bhàis.

20 Ma dhìchuimhnich sinn ainm ar Dé, no ma shìnn sinn ar làmhann gu Dia coimheach,

21 Nach raunsaich Dia so a mach? oir tha fios aige-san air nithibh dìomhair a' chridhe.

22 Ach air do shon-sa mharbhadh sinn rè an là gu léir; mheasadh sinn mar chaoraich chum casgraidh.

23 Mosgail; c'ar son a choidleas tu, a Thighearn? dùisg, na tilg sinn uait gu bràth.

¹ Cum còir rium. ² mi naomh, ain-diadhaidh.

³ m'aoibhneis agus mo ghairdeachais.

⁴ rinn thu oile do na slòigh, ach chuir thu iadsan an tìr thèarainte.

⁵ a' creachadh dhoibh fèin.

⁶ pris.

⁷ A ghnàth.

⁸ tha ar n-amhladh 'nar fuanis, agus chòmhdaich nàire ar gnuise sinn.

24 C'ar son a dh'fholaicheas tu do ghnùis? a dhì-chluimhniceas tu ar n-àmh-ghar, agus ar foirneart?

25 Oir chromadh sìos ar n-anam do'n uir; dhlùth-lean ar com' ris an talamh.

26 Eirich, cuidich leinn, agus saor sinn air sgàth do throcair.

SALM XLV.

1 Mòralachd oighreachd Chrìosd. 10 Dleasdanas na h-eaglais, agus na sochairean a tha i a' mealt-uinn.

Do'n àrd fhear-ciuil air Sosanim, air son mhac Chorah, Maschil. Oran gràidh.

THA mo chridhe a' deachdadh² deadh ni; cuiridh mi 'n céill na nithe a rinn mi do'n Rìgh³; bithidh mo thcangadh mar pheann fir-sgrìobhaidh dheis.

2 Is maisiche thu na clann nan daoine; dhòirteadh gràs ann ad bhilibh: uime sin bheannaich Dia thu gu bràth.

3 Crìoslaich⁴ do chlaidheamh air do léis, O a ghaisgeich; le d' ghlòir, agus le d' mhòralachd.

4 Marcaich⁵ air d'aghaidh gu buadhach air sgàth na firinn, agus na macantachd⁶, agus na fireantachd; agus teagaisgidh do dheas làmh dhuit nithe uamhasach.

5 Is geur do shàighdean, (tuitidh na slòigh fodhad,) is geur iad ann an cridhe nàimhdean an Rìgh.

6 Tha do rìgh-chaitir, a Dhé, gu saoghal nan saoghal: is slat cheartais slat-shuaicheantais do rìoghachd-sa.

7 Ghràdhaich thusa fireantachd, agus thug thu fuath do aingidheachd; uime sin dh'ung Dia, do Dhia-sa, thu le h-oladh aoibhneis os ceann do chompanach,

8 Do mhirr, agus do alos, agus do chasia, *théid fàile* o d' thrusgan uile, a mach á luchairtibh do fhaiclaibh elephant⁷, leis an do chuireadh aoibhneas ort.

9 Tha nigheana rìghlean am measg do bhan urramach; seasaidh do bhan-rìgh-inn air do dheas làimh, ann an òr na h-Ophir.

10 Eisd, a nighean, agus amhairc, agus aom do chluas; agus d'cluimhnich do shluagh féin, agus tigh t'athar.

11 An sin gabhaidh an Rìgh mòr-thlachd ann ad àille⁸: a chionn gur esan do Thigh-earn, thoir-sa urram⁹ dha.

12 Thig eadhon nighean Thiruis le tiodhlac; asluichidh daoine saoi bhir an t-sluaigh do dheadh-ghean.

13 Uile glòrmhor tha nighean an rìgh a stigh; air oibreachadh le h-òr tha a h-eudach.

14 Ann an trusgan do obair ghréis bheir-car i chum an Rìgh: bheirear na maigh-

deana 'na déigh, a bana-chompanaich, a steach thugad¹⁰.

15 Bheirear iad le h-aoibhneas agus le gairdeachas; théid iad a steach do luch-airt an Rìgh.

16 An àite t'aithriche bithidh do mhic; ni thu iad 'nan uachdaranaibh air an talamh uile.

17 Bhèir mi air t'ainm a bhi air chuimhne anns gach linn a thig: uime sin molaidh an sluagh thu gu saoghal nan saoghal.

SALM XLVI.

1 Tha Dia 'na thearmum agus 'na neart d'a shluagh féin. 8 Earail gu beachdachadh air oibribh iongantach Dhé.

Do'n àrd fhear-ciuil air son mhac Chorah. Oran air Alamot.

IS e Dia ar tearmunn agus ar neart; I ar cabhair ro dheas ann an teanntachdaibh;

2 Air an aobhar sin cha bhi eagal oirnn, ged ghluaisear¹¹ an talamh, agus ged atharruichear na beannta gu meadhon na fairge:

3 Ged bheuc a h-uisgeacha, agus ged chuirear thar a chéile iad; ged chrìochnaich na beannta le a h-ataireachd. Selah.

4 Tha amhainn¹² ann, agus ni a sruthain caithir¹³ Dhé ait; naomh-ionad phàillium an Ti a's àirde.

5 Tha Dia 'na meadhon; cha ghluaisear i: cuidichidh Dia leatha gu moch air mhaduinn.

6 Ghabh na cinnich boile; ghluaiseadh na rìoghachdan: chuir e mach a ghuth, leagh an talamh.

7 Tha Dia nan slògh leinn; is e Dia Iacoib a's didean duinn. Selah.

8 Thigibh, faicibh oibre an Tighearua, gach léir-sgrìos¹⁴ a riun e air thalamh.

9 Coisgidh e an cogadh gu h-iomall na talmhainn; brisidh e am bogha, agus gearraidh e an t-sleagh: na carbadan-cogaidh loisgidh e le teine.

10 Bithibh sàmhach, agus tuigibh gur mise Dia: àrdaichear mi am measg nan cinneach, àrdaichear mi air thalamh.

11 Tha Dia nan slògh léinn; is e Dia Iacoib a's didean duinn. Selah.

SALM XLVII.

1 Nochd an salmadar gu bheil Dia 'na Rìgh mòr os ceann na talmhainn, agus 'na aobhar eagail do gach neach.

Do'n àrd fhear-ciuil. Salm air son mhac Chorah.

BUAILIBH bhur basan, uile shlòigh; togaibh iolach do Dhia le guth gairdeachais¹⁵.

2 Oir tha'n Tighearn, an Ti a's àirde,

¹ b'ù.

² cur a mach.

³ mi'n Rìgh.

⁴ Crìosraich, Deasaich.

⁵ Ann ad mhòralachd marcaich.

⁶ ceannsaichd.

⁷ air an deanamh maiseach le faclaibh elephant.

⁸ àille, sgèimh.

⁹ ùmhklachd, aoradh.

¹⁰ chugad.

¹¹ mhùthar, chaochaillear.

¹² abhainn.

¹³ mòr-bhaile.

¹⁴ na nithe uamhasach.

¹⁵ cailthreim.

'an aobhar eagail: *is* Rìgh mòr e os ceann na talmhainn uile.

3 Cuiridh e na slòigh fo'r smachd, agus na cinnich fo'r cosaibh.

4 Taghaidh e ar n-òighreachd dhuinn, òirdheirceas¹ Iacoib, a ghràdhaich e. Selah.

5 Chaidh Dia suas le caithream, an Tighearna le fuaim trompaid.

6 Seinnibh moladh do Dhia, seinnibh; seinnibh moladh d'ar Rìgh, seinnibh:

7 Oir *is* e Dia rìgh na talmhainn uile; seinnibh moladh gu h-eòlach.

8 Tha Dia 'na Rìgh os ceann nan cinn-each: tha Dia 'na shuidhe air rìgh-chaitir a naomhachd.

9 Chruinnicheadh uachdarain nan sluagh le chéile, sluagh Dhé Abraham: oir *is* le Dia sgiatha na talmhainn; tha e air àrdachadh gu mòr.

SALM XLVIII.

1 Tha an eaglais sgiamhach 'na suidheachadh, 3 agus tha Dia 'na thearmunn di anns gach teann-tachd.

Oran agus Salm air son mhac Chorah.

IS mòr an Tighearn, agus is ro airidh air cliù e ann am baile² ar Dé, ann an sliabh a naomhachd.

2 Sgiamhach 'na shuidheachadh, aoibhneas na talmhainn uile, *is* e sliabh Shioin: air an taobh mu thuath tha baile³ an Rìgh mhòir.

3 Aithnìchear Dia 'na lùchairtibh mar thearmunn.

4 Oir fench, chruinnicheadh na rìgh-rean; ghabh iad thairis le chéile.

5 Chunnaic iad, agus b'ìoghnadh leo; bha uamhas orra, ghreas iad orra.

6 Ghlac geilt-chrith iad an sin, pian mar phéin mnà ri saothair.

7 Le gaoith an ear min-bhrisidh tu longa Tharsis.

8 Mar a chuala sinn, is amhuil a chunnaic sinn ann am baile Tighearna nan slògh, ann am baile ar Dé: daingnichidh se e gu bràth. Selah.

9 Smuainich sinn air do chaoimhneas gràidh, a Dhé, ann am meadhon do theampaill.

10 Mar t'ainm, a Dhé, mar sin a ta do chliù gu crìochaibh na talmhainn: tha do dheas làmh làn do fhìreantachd.

11 Deanadh sliabh Shioin aoibhneas, deanadh nigheana Iudah gairdeachas, air son do bhreitheanas.

12 Cuairtichibh Sion, agus rachaibh m'a timchioll; àirmhìb a tùir.

13 Thugaibh an aire d'a balla làidir⁴, comharaichibh a lùchairtean⁵, chum gu

cuir sibh an céill e do'n àl ri teachd.

14 Oir *is* e an Dia so ar Dia-ne gu saoghal nan saoghal: stiùraidh e sinn gu ruig am bàs⁶.

SALM XLIX.

1 Chuir an Salmadar an céill do'n t-sluagh gu'n labhradh a bheul air nithibh tuigseach. 6 Noch a dhoibh dìomhanas nìthe talmhaidh.

Do'n àrd fhear-ciùil. Salm air son mhac Churah.

CLUINNIBH so, a shlòigh uile, éisdibh, sibhse uile luchd-àiteachaidh an domhain;

2 Araon a dhaoine ìosal agus àrd, beartach agus bochd le chéile.

3 Labhraidh mo bheul gliocas⁷, agus smuainichidh mo chridhe air tuigse⁸.

4 Aomaidh mi gu cosamhlachd mo chluas; nochdaidh⁹ mi air a' chlàrsaich mo ràdh dorchas.

5 C'ar son a bhiodh eagal orm ann an làithibh an uile, 'nuair a chuairticheas aingidheachd m'eascairdean¹⁰ mi,

6 A dh'earbas as an sgoibhreas, agus a ni uail a' pailteas am beartais?

7 Cha'n urrainn duine air chor sam bith a bhràthair a shaoradh, no éiric a thabhairt do Dhia air a shon:

8 (Oir tha saorsa an anama luachmhor, agus sguiridh e am fearse:)

9 Gu maireadh e beò gu sìorruidh, agus nach faicheadh e truailidheachd¹¹.

10 Oir chi e gu'm faigh na daoine glìce bàs, gu'n sgriosar le chéile an t-amadan agus an t-umaidh, agus gu'm fàg iad am beartas aig daoineibh eile.

11 *Is* iad smuaintean an cridhe gu mair an tighean gu bràth, an ionada-còmhnuidh o linn gu linn: bheir iad ainm air am fearann, a réir an ainme féin.

12 Ach ged robh an duine ann an urram, cha mhair e¹²: is cosmhuil e ris na h-ainmhidhibh, a ghearrar as.

13 *Is* i so an slighe, eadhon an amaidheachd: gidheadh gabhaidh an slìochd tlachd 'nan cainnt. Selah.

14 Mar chaoraich cuirear iad san uaigh: ithidh am bàs iad¹³, agus bithidh uachdaranachd aig na fireanaibh os an ceann anns a' mhaduinn: seargaidh¹⁴ an dreach as san uaigh, an ionad-còmhnuidh¹⁵.

15 Ach saoraidh Dia m'anam-sa o chumhachd¹⁶ na h-uaighe; oir gabhaidh e mi d'a ionnsuidh. Selah.

16 Na gabh thusa eagal an uair a dh'fhàsas duine beartach, 'nuair a mbeudaichear glòir a thighe:

17 Oir 'nuair a gheibh e bàs, cha toir e ni air bith leis; cha téid a ghloir sìos 'na dhéigh:

¹ mòrachd.

² caithir.

³ caistealan.

⁴ nìthe glìce.

⁵ fogsaidh.

⁶ mòr-bhaile, caithir.

⁷ d'a daingneachd, d'a neart.

⁸ gu bràth.

⁹ nithibh tuigseach.

¹⁰ aingidheachd luchd-feall;

lochd mo shàl.

¹¹ Ach mairidh esan [an t-aon naomh] beò gu sìorruidh; cha'n fhaic e truailidheachd.

¹² tha e gun tuigse.

¹³ ionaltraidh am bàs orra.

¹⁴ agus seargaidh.

¹⁵ o'n ionad-còmhnuidh.

¹⁶ o làimh.

18 Ged bheannaich e 'anam féin, 'nuair a tha e beò; agus molar thusa, 'nuair a nì thu maith dhuit féin¹.

19 Théid e gu h-àl a shinnsear: gu bràth cha'n fhaic iadsan solus

20 Tha'n duine, a tha ann an urram, agus a tha gun tuigse, cosmhuil ris na h-ainmhidhibh a ghearrar as.

SALM L.

1 *Moralachd agus cumhachd Dhé. 7 Cha 'n eil tlachd aig an Tighearn ann an iobairt, 14 as eugmhais iobairt buidheachais. 16 Cronaichidh Dia an cealgair.*

Salm le Asaph.

LABHAIR Dia nan Dia², Iehobhah, agus ghairm e an talamh o éirigh gu ruig luidhe gréine.

2 A mach á Sion, iomlaine na maise, dhealruich Dia.

3 Thig ar Dia-ne, agus cha bhi e 'na thosd: roimh a ghnùis lasaidh teine millt-each³, agus mu'n cuairt air bithidh doinn mhòr.

4 Gairmidh e air na nèamhaibh o'n àirde, agus air au talamh, chum breth a thoirt air a shluagh.

5 Cruinnichibh mo naoimh a m' ionnsuidh, iadsan a rinn coimhcheangal rium le h-iobairt.

6 Agus cuiridh na nèamhan an céill a cheartas; oir is e Dia féin a's Breitheamh ann. Selah.

7 Eisidibh, O mo shluagh, agus labhairaidh mi; O Israeil, agus nì mi fianuis a'd' aghaidh⁴: is mise Dia, do Dhia-sa.

8 Air son t'ìobairtean cha'n agair mi thu; oir tha t'ìobairtean-loisgte a ghnàth a'm' fhianuis.

9 Cha ghabh mi tarbh òg as do thigh, no gabhair fhirionn as do mhaoinniribh⁵:

10 Oir is leamsa uile bheathaiche na coille, an spréidh air mìle sliabh.

11 Is aithne dhomh-sa uile eunlaith nam beann⁶; agus is leam-sa fiadh-bheathaiche na macharach.

12 Nam bithiun ocrach, cha'n innsinn duitse; oir is leam-sa an domhan, agus a làn.

13 An e gu'n ithinn feoil tharbh? agus an òlainn fuil ghabhar?

14 Iobair iobairt bhuidheachais do Dhia, agus loc do bhòidean do'n Ti a's àirde.

15 Agus gairm orm ann an là teanntachd: saoraidh mise thu, agus bheir thusa glòir dhomhsa.

16 Ach ris an droch dhuine their Dia, Ciod e do ghnòthuch-sa mo reachdan⁷ a clur an céill, no gu'n gabhadh tu mo choimhcheangal ann ad bheil;

17 'Nuair a ta fuath agad air fòghlum,

agus a thilg thu mo bhriathran air do chùl?

18 Ma chunnaic thu gaduiche, dh'aont-aich thu leis⁸; agus maille ri luchd adhaltrannais bha do chuibhrionn.

19 Chuir thu do bheil chum uile, agus dhealbhadh do theangadh cealg.

20 Shuidh thu, agus an aghaidh do bhràthar labhair thu; agus do mhac do mhàthar thug thu beum⁹.

21 Na nithe so rinn thu, agus bha mise a'm' thosd; shaoil thu gu'n robh mi gu tur mar thu féin: cronaichidh mi thu, agus cuiridh mi gach nì an ordugh fa chomhair do shùl.

22 Smuainichibh a nis air so, sibhse nach cuimhnich Dia; air eagal gu'n reub mi as a chéile, gun neach ann a theas-airgeas.

23 Esan a dh'ìobras moladh, bheir e glòir dhomh-sa; agus dhàsan a dh'ord-uicheas a shlighe, nochdaidh mi¹⁰ slàinte Dhé.

SALM LI.

1 *Dh'aidich Daibhidh a pheacanna, agus ghuidh e gu'n dubhadh Dia as iad. 7 Dh'astuich e air Dia gu'n naomhaicheadh se e. 17 'Se spiorad briste iobairt Dhé.*

Do'n àrd fhear-ciuil. Salm le Daibhidh, 'nuair a thàinig Natan am faidh d'a ionnsuidh, an déigh dha bhi ag Batseba.

DEAN tràcair orm, a Dhé, a réir do chaoimhneis gràidh; a réir lìon-mhoireachd do chaomh-thròcairean¹¹, dubh as m'eusaontas.

2 Gu h-iomlan ionnail mi o m' lochd, agus glan mi o m' pheacadh:

3 Oir tha mi ag aideachadh m'eusaontais, agus tha mo pheacadh a'm' làthair a ghnàth.

4 A'd' aghaidh, a'd' aghaidh féin a mhàin pheacaich mi, agus rinn mi ole a'd' shealladh, air ehor as gu'm fireanaichear thusa 'nuair a labhras tu, gu'm bi thu glan 'nuair a bheir thu breth.

5 Feuch, ann an euceart dhealbhadh mi, agus ann am peacadh ghabh mo mhàthair mi 'na broinn.

6 Feuch, is ionmhuinn leat an fhùrinn san taobh a stigh¹²; agus san ionad fholuichte bheir thu orm gliocas a thuigsinn.

7 Glan mi le hisop, agus bithidh mi glan; ionnail mi, agus bithidh mi nì's gile na sneachdadh.

8 Thoir orm guth subhachais agus aoibhneis a chluinntinn: agus nì na cnàmhan a bhris thu gairdeachas.

9 Foluich do ghnùis o m' pheacaibh, agus dubh as m'eucearta gu léir.

¹ agus ged mhol e thusa, 'nuair a nì thu maith dha.

² an Dia treun.

³ suas. Eabh.

⁵ chròthaibh.

³ caithidh teine, ithidh teine

⁴ mu d' thimchioll, dhuit.

⁶ eunlaith an athair.

⁷ stàtuin.

⁹ masla-th.

air an nochd mi dha.

¹² sna h-àirneibh.

⁸ ruith thu leis.

¹⁰ agus is i so an t-slighe

¹¹ thruacantais.

10 Cruthaich annam cridhe glan, a Dhé; agus ath-nuadhaich spiorad ceart an taobh a stigh dhìom.

11 Na tilg mi o d' shealladh, agus na toir do spiorad naomh uam.

12 Aisig dhomh gàirdeachas do shlàinte, agus le d' spiorad saor cum suas mi.

13 Teagaisgidh mi do luchd-eusaontais do shlighean: agus iompaichear peacach a d'ionnsuidh.

14 Saor mi o chionta fola, a Dhé, a Dhé mo shlàinte: àrd-mholaidh mo theangadh t'fhireantachd.

15 A Thighearn, fosgail mo bhilean, agus cuiridh mo bheul an cèill do chliù.

16 Oir cha'n iarr thu ìobairt, no bheirinn dhuit i; ann an ìobairt-loisgte cha 'n'èil tlachd agad.

17 Is iad ìobairtean Dhé spiorad briste: air cridhe briste agus brùite, a Dhé, cha dean thusa tàir.

18 Dean maith, a d' dheadh-ghean. do Shìon: tog suas ballacha Ierusalem.

19 An sin taitnidh ìobairtean ionracais riut, ìobairtean-loisgte agus làn ìobairtean-loisgte: an sin ìobraidh iad tairbh òga air t'altair.

SALM LII

1 Chronaich Daibhidh Doeg air son a mhìruin, agus roimh-innis e a sgrìos. 8 Thug e buidheachas do Dhia do bhrìgh gu'n robh dòchas aig 'na thròcair.

Do'n àrd fhear-ciùil, Maschil le Daibhidh, 'nuair a thàinig Doeg an t-Edomach, agus a dh'innis e do Shaul, agus a thubhairt e ris, Thàinig Daibhidh gu tigh Ahimelech.

C'AR son a nì thu uail an ann olc, O ghaisgich? *Mairidh* maithreas Dé a ghnaith.

2 Dealbhaidh do theangadh aimhleas, mar ealtuinn ghéir, ag oibreachadh ceilge.

3 Is annsa leat an t-olc na maith, a' bhreug na briathran a' cheartais. Selah.

4 Is ionmhuiunn leat gach focal millteach, an teangadh chealgach.

5 Uime sin³ sgrìosaiddh Dia thu gu bràth: bheir e air falbh thu, agus tairnidh e as [do] phàillinn thu, agus spionaidh e do fhreumhan á tìr nam beò. Selah.

6 Agus chì na fireana, agus bithidh eagal orra, agus nì iad gàire uime, *ag ràdh*,

7 Feuch, so am fear nach d'rinn a neart do Dhia, ach a dh'earb á pailteas a bheartais, agus a neartaich e féin 'na aingidheachd.

8 Ach *bithidh* mise mar chrann-olaidh uaine ann an tigh Dhé; earbaidh mi á tròcair Dhé gu saoghal nan saoghal.

9 Molaidh mise thu gu sìorruidh, a chionn gu'n d'rinn thu e; agus feithidh mi air t'ainmsa, oir tha e maith an làth-air do naomh.

SALM LIII.

1 Chuir Daibhidh an cèill truaillidheachd a' chinn-daoine. 6 Mhìnaich e slàinte an Tighearn fhaicinn.

Do'n àrd fhear-ciùil air Mahalat, Maschil le Daibhidh.

THUBHAIRT an t-amadan 'na chridhe, Cha 'n'èil Dia ann: tha iad truaillidh, agus rinn iad aingidheachd ghràin-eil; cha 'n'èil neach ann a nì maith.

2 Dh'amhaire Dia a nuas o nèamh air cloinn nan daoine, a dh'fheuchainn an robh neach ann a blia glic, a bha 'g iarraidh Dhé.

3 Chaidh gach aon diubh air ais: tha iad gu léir air fàs salach: cha 'n'èil neach ann a nì maith, cha 'n'èil eadhon aon.

4 Nach 'èil eòlas aca-san a tha deanamh na h-eucorach, a tha 'g itheadh suas mo shluaigh, mar a dh'itheadh iad aran, agus nach gairm air Dia?

5 An sin ghabh iad eagal mòr, 'nuair nach robh aobhar eagal ann; sgaoil Dia a chnàmha-san o chèile a champaich a d' aghaidh: nàirich thu iad, a chionn gu'n d'rinn Dia tàir orra.

6 O gu tigeadh slàinte Israeil a mach á Sion! An uair a bheir Dia air ais braighdeanas a shluaigh, nì Iacob gàirdeachas, nì Israel aoibhneas.

SALM LIV.

1 Rinn Daibhidh gearan an aghaidh nan Siph-each. 4 Tha dòchas aig gu'n cuidich Dia leis, agus gu'n dìol e olc d'a naimh-dibh.

Do'n àrd fhear-ciùil air Neginot, Maschil le Daibhidh, 'nuair a thàinig na Siphich, agus a thubhairt iad ri Saul, Nach 'èil Daibhidh 'ga fholach féin maille ruinne?

AIR sgàth t'ainme, a Dhé, saor thusa mi, agus le d' chumhachd cum co-throm rium.

2 Cluinn m'urnuigh, a Dhé; éisd ri briathraibh mo bheoil.

3 Oir dh'èirich coigrich⁴ a m' aghaidh, agus dh'iarr luchd-fòirneir mo bheatha; cha do chuir iad Dia fa'n comhair. Selah.

4 Feuch, is e Dia m'fhear-cuideachaidh: tha'n Tighearna dhiubhsan⁵ a chumas suas mo bheatha.

5 Diolaidh e olc do m' naimh-dibh: a d' fhirinn gearr as iad.

6 Le saor thoil bheir mi ìobairt dhuit; molaidh mi t'ainm, a Thighearn, oir *tha e* maith.

7 Oir shaor thu mi as gach teinn: agus chumnaic mo shùil mo mhiann air mo naimh-dibh.

SALM LV.

1 'Na theanntachd ghuidh Daibhidh gu'n tugaadh Dia éisdeachd d'a urnuigh. 16 Ghlac e misneach

¹ gach là. Eabh.

² a theangadh chealgach.

³ Mar an ceudna.

⁴ na h-uibhrich.

⁵ nam neasg-san, leo-san.

a chionn gu'n robh dòchas aig gu'n saoradh Dia e as gach trioblaid.

Do'n àrd fhear-ciuil air Neginot, Maschil le Daibhidh.

EISD, a Dhé, ri m'urnuigh, agus na folaich thu féin o m'asluchadh.

2 Thoir aire dhomh, agus éisd rium: tha mi àrd ann am ghearan, agus ri bùir-eadh:

3 Air son gutha m'eascaraid, air son foirmeirt an duine aingidh; oir tha iad a tilgeadh euceirt orm, agus am feirg tha iad a' toirt fuathia dhomh.

4 Tha mo chridhe air a chràdh an taobh a stigh dhòm, agus thuit uamhasan a' bhàis orm.

5 Thàinig eagal agus crith orm, agus chòmhdaich uamhunn mi.

6 Agus thubhairt mi, Och, nach robh agam sgiathan! mar choluman theichinn as air iteig agus gheibhinn fois.

7 Feuch, shiùbhlainn fad as; chòmh-nuichinn anns an fhàsach. Selah.

8 Dheanainn deifir¹ gu dol as o ghaoith làidir², agus o'n dòininn.

9 Sgrios, a Thighearn, agus roinn an teagadh³; oir chunnaic mi foirneart agus consachadh sa' bhaile.

10 A là agus a dh'oidhche tha iad a' dol mu'n cuairt air, air a bhallachaibh; agus tha eucart agus aimhleas 'na mheadhon.

11 Tha aingidheachd 'na mheadhon; agus cha dealaich feall agus cealg r'a shràidibh.

12 Oir cha bu nàmhaid a thug masladh dhomh, no dh'fhuilginn e; cha b'e fear le m'b'fhuathach mi a dh'ardaich e féin a'm' aghaidh, no dh'fholaichinn mi féin uath:

13 Ach thusa! fear bu choimpire dhomh féin⁴, fear m'iuil, agus fear m'eòlais.

14 Le chéile ghabh sinn comhairle bhlasta; gu tigh Dhé dh'imich sinn cuid-eachd.

15 Gabhadh am bàs sealbh orra, rachadh iad sìos beò do'n uaigh⁵; oir a ta uile 'nan àite-còmhnuidh, 'nam meadhon.

16 Glaohdhaidh mise ri Dia; agus saoraidh Iehobhah mi.

17 Airfeasgar, air maduinn, agus aig meadhon-là ni mi urnuigh, agus glaohdhaidh mi gu h-àrd; agus éisdidh esan ri m'ghuth.

18 Saoraidh⁶ e m'anam ann an sìth o'n chòmhrag a'm' aghaidh; oir is lìonmhor iad a tha strì rium⁷.

19 Eisdidh Dia, agus bheir e nuas iad, eadhon esan e tha ann o chian. Selah:

oir cha 'n'eil atharrachadh orra, agus cha 'n'eil eagal Dé orra.

20 Shìn e mach a làmh 'nan aghaidh-san a bha an sìth ris: bhris e a choimh-cheangal.

21 Bu mhìne na im focail a bhéil, ach bha cogadh 'na chridhe; bu bhuige a bhriathra na oladh, ach bu chlaidhean rùisgte iad.

22 Tilg air an Tighearna do chùram⁸, agus cumaidh esan suas thu: cha leig e am feasd do'n fhìrean a bhi air a ghluasad.

23 Ach tilgidh tusa, a Dhé, sìos iad gu slochd an sgrios: cha mhair daoine fuil-eachdach agus cealgach leth an làithean; ach cuiridh mise mo dhòigh annad-sa.

SALM LVI.

1 Rinn Daibhidh gearan a bhrìgh foirneirt a naimhdean. 9 Chuir e an céill a dhòchas ann am focal Dé, agus gheall e Dia a mholadh.

Do'n àrd fhear-ciuil air Ionatelim-rechocim, Mich-tam le Daibhidh, an uair a ghlac na Philistich e ann an Gat.

DEAN iochd orm, a Dhé; oir b'ail le duine mo shlugadh suas⁹: tha e 'gam shàrachadh gach là le cogadh.

2 B'ail le m'eascaidibh mo shlugadh suas gach là; oir is lìonmhor iad a tha cogadh rium o ionad¹⁰ àrd.

3 San là air am bi eagal orm, earbaidh mi asad-sa.

4 Ann an Dia molaidh mi 'fhocal; ann an Dia chuir mi mo dhòigh; cha'n eagal leam ciod a dh'fheudas feoil a dheanamh orm.

5 Gach là¹¹ tha iad a' fiaradh mo bhriathar; tha'n smuainte uile a'm' aghaidh chum uile.

6 Tha iad a' cruinneachadh le chéile, tha iad 'gam folach féin; tha iad a' toirt fa'ear mo cheumanna, nuair a tha iad a' feitheamh air son m'anama.

7 Le h-eucoir¹² an téid iad as? ann ad fheirg tilg sìos na slòigh, a Dhé.

8 Dh'àireamh thu mo sheacharain: cuir mo dheoir ann ad shearraig¹³; nach 'eil iad ann ad leabhar?

9 An sin pillar mo naimhdean air an ais, san là a ghairmeas mi ort: air so tha fios agam, oir tha Dia leam.

10 Ann an Dia molaidh mi 'fhocal: annas an Tighearna molaidh mi 'fhocal.

11 Ann an Dia chuir mi mo dhòigh: cha'n eagal leam ciod a dh'fheudas duine a dheanamh orm.

12 Ormsa, a Dhé, tha do bhòidean¹⁴: locaidh mi cliù dhuith:

¹ cabhag.

² amrathaich, bhuaireasaich.

³ comhairle.
mo chridhe féin.

⁴ a réir mo choslais féin, a réir
⁵ gu h-ìfrinn.

⁶ Shaor.

⁷ bu lìonmhor iad a bha leam.

⁸ t'eallach.

¹⁰ O thi a's àirde.

¹² Air son eucéirt.

ann ad shealladh.

⁹ saltair orm.

¹¹ Ré an là.

¹³ ann ad shoirleadh,

¹⁴ mhòidean

13 Oir shaor thu m'anam o'n bhàs, agus mar an ceudna mo chosan o thuisleadh, chum gu gluaisinn ann ad fhianuis, a Dhé, ann an solus nam beò.

SALM LVII.

1 'Na urnuigh tha Daibhidh a' guidhe gu'n deanadh Dia trèid air, agus gu'n saoradh se e o'n fhear le m' b' àill a sgrìos. 7 Dh'ardaichadh a chridhe gu Dia a mholadh.

Do'n àrd fhear-ciuil, Al-taschit, Michtam le Daibhidh, nuair a theich e o làthair Shaul do'n uaimh.

DEAN tròcair orm, a Dhe, dean tròcair orm; oir annad-sha tha m'anam a' cur a dhòigh, agus fuidh sgàile do sgiathan gabhaidh mi mo thearmunn, agus an téid na h-uile os uile thairis.

2 Eighidh mi ris an Dia a's àirde, ri Dia a choimhlionas *nithe* air mo shon.

3 Cuiridh e *neart* o nèamh, agus saoraidh e mi; bheir mi masladh do'n fhear le'm b' àill mo shlugadh suas¹. Selah. Cuiridh Dia a mach a thròcair agus 'fhirinn,

4 Tha m'anam am measg leòmhann; tha mi a'm' luidhe *am measg* droinge air lasadh², daoine aig *am bheil* am fiacal 'nan sleaghaibh agus 'nan saighdibh, agus an teangadh 'na claidheamh geur.

5 Ardaich thu féin os ceann nan nèamh, a Dhé; do ghloir os ceann na talmhainn uile.

6 Dheasaich iad lìon fa chomhair mo cheum; chrom iad m'anam sìos: chladhaich iad slochd romham; thuit iad féin 'na mheadhon. Selah.

7 Tha mo chridhe deas³, a Dhé, tha mo chridhe deas; seinnidh mi, agus molaidh mi.

8 Mosgail, mo ghloir; mosgail, a shalt-air agus a chlarsach: mosglaidh mi féin moch air mhaduinn.

9 Molaidh mi thu am measg nan sluagh, a Thighearn; seinnidh mi dhuit am measg nan cinneach:

10 Oir is mòr do thròcair⁴ gu ruig na nèamha, agus t'fhirinn gu ruig na neula.

11 Ardaich thu féin os ceann nan nèamh, a Dhé; do ghloir os ceann na talmhainn uile.

SALM LVIII.

1 Thug Daibhidh achmhasan do bhreitheamhnaibh aingidh. 3 Nochd e gu bheil na h-aingidh a' dol air seacharan o'n bhroinn; 6 agus thug e thairis iad do bhreitheanas.

Do'n àrd fhear-ciuil, Altaschit, Michtam le Daibhidh.

AN labhair sibh, a choimhthionail⁵, da rìreadh an ceartas? an toir sibh

breth gu cothroniach, a chlaun nan daoine?

2 Seadh, 'nur cridhe tha sibh a' dealbhadh aingidheachd; air talamh tha sibh a' tomhas foirneirt bhur làmh.

3 Tha na h-aingidh a' claadadh o'n bhroinn; tha iad a' dol air seacharan o'm breith, a' labhairt bhrèug.

4 Tha an nìmh mar nìmh nathrach; *tha iad* mar nathair bhodhar, a dhruideas a cluas;

5 Nach éisd ri guth nan druidh, a tha ro sheòlta 'nan druidheachd.

6 Bris am fiacal, a Dhé, 'nam beul; prom gu tur tuigs⁶ nan leòmhann òga, a Thighearn.

7 Leaghadh iad, mar uisgeacha a ruith-eas gu saor⁷; cuireadh Dia a shaighdean 'nan aghaidh, agus gearrar as iad.

8 Mar sheilcheig a bhios a' leaghadh as, rachadh iad as; *mar* thorraicheas ana-buich mnà, na faiceadh iad a' ghrian.

9 Mu'm mothaich bhur coireacha *teas* o'n droighnich, bheir e air falbh iad *mar* le h-ioma-ghaoith⁸, araon beò, agus 'n chorruih.

10 Bithidh aoibhneas air an fhìrean, an uair a chi e an dioghaltas: nìghidh e a chosan ann am fuil an duine aingidh.

11 An sin their duine, Gu deimhin *tha* duais ann do'n fhìrean; gu cinnteach tha Dia ann a tha toirt breth air an talamh.

SALM LIX.

1 Ghuidh Daibhidh gu'n teasairgeadh Dia e o a naimh-dibh. 8 Chuir e a dhòchas ann an Tighearna. 11 Dh'iarr e sgrìos a naimhdean.

Do'n àrd fhear-ciuil, Al-taschit, Michtam le Daibhidh; 'nuair a chuir Saul daoine uaith, agus a chuir iad faire air an tigh, chum a mharbhadh.

TEASAIRG mi o m' naimh-dibh, O mo Dhia; dion mi uatha-san a tha 'g éirigh a'm' aghaidh.

2 Teasairg mi o luchd-deanamh na h-euceirt, agus o dhaoineibh fuileachdach saor mi:

3 Oir feuch, tha iad a' feitheamh nam fàth⁹ an aghaidh m'anama; tha daoine cumhachdach air cruinneachadh a'm' aghaidh; cha'n ann *air son* mo lochd-sa, no *air son* mo pheacaidh, a Thighearn.

4 Gun choir *agam-sa*, ruithidh iad, agus ulluichidh siad iad féin: mosgail thusa a chuideachadh leam, agus amhairc.

5 O thusa, a Thighearn, a Dhé nan sluagh, a Dhé Israeil, mosgail a dh'fhiosrachadh nan cinneach uile: na dean iochd air luchd-eusaontais ciontach sam bith. Selah.

¹ saltairt orm.

² ri theine.

³ ullamh, gleus'ta, suidhichte.

⁴ mkaithneas, claoimheas. ⁵ a bhreitheamhna.

⁶ fiacal mòra, cùl-fhiacla.

⁷ leo féin, an còmhnuidh.

⁸ cuairt-ghaoith.

⁹ ri feall-fholach, a' luidhe am plaid.

6 Pillidh iad san fheasgar, ni iad donnal-
aich mar choin, agus theid iad mu'n cuairt
air a' bhaile.

7 Feuch, brùchdaidh iad a mach le'm
beul; *tha* claidhean 'nam bilibh: Oir cò,
ars' iadsan, a chluinneas?

8 Ach ni thusa, a Thighearn, gàire
umpa; ni thu fanoid¹ air na cinnich
uile.

9 O thusa mo neart², feithidh mi ort:
oir *is* e Dia mo dhaingneach³.

10 Mo Dhia, gabhaidh a thròcair romh-
am⁴: bheir Dia dhomh gu faic mi *mo*
mhiann air m'eascairdibh.

11 Na marbh iad, air eagal gu'n dì-
chuimhnich mo shluagh; sgaoil iad le
d' neart, agus leag gu h-ìosal iad, a
Thighearn ar sgiath.

12 *Air son* peacaidh am beoil, *air son*
bhriathar am bilean, glacar iad 'nan
àrdan; eadhon air son nam mallachd
agus nam breug a labhras iad.

13 Sgrìos [iad] am feirg, sgrìos [iad],
agus na *biodh* iad ann; agus *biodh* fios
aig *daoine* gu bheil Dia 'na uachdaran
ann an Iacob, gu ruig⁵ crìocha na tal-
mhainn. Selah.

14 Pillidh iad san fheasgar, ni iad donn-
alaidh mar choin, agus theid iad mu'n
cuairt air a' bhaile.

15 Gabhaidh iad a null agus a nall air
son bidh⁶, agus mur sàsuichear iad, ni
iad gearan.

16 Ach seinnidh mise mu d' neart, agus
àrd-mholaidh mi sa' mhaduinn do thròc-
air; oir bu tusa mo dhaingneach, agus
mo dhìdean, anu an là mo theanntachd.

17 O thusa mo neart, canaidh mi dhuit;
oir *is* e Dia mo dhaingneach, mo Dhia-sa,
mo thròcair⁷.

SALM LX.

1 *Tha* Daibhidh ri caoidh a chionn gu'n robh fearg
air Dia r'a shluagh. 4 Teasairgidh an Tighearn
iadsan a's ionmhuinn leis.

Do'n àrd fhear-ciùil air Susan-edut, Michtam le
Daibhidh, chum teagag, an uair a chog e an
aghaidh Aram-naharaim, agus an aghaidh
Aram-sobah, agus a phill loab, agus a bhuail e
do Edom ann an gleann an t-salainn da mhìle
dheug.

A DHE, thilg thu uait sinn, sgap⁸ thu
sinn, bha fearg ort; O pill thusa
ruinn.

2 Chuir thu an talamh air chrith; bhris
thu e; slànuaich a bhriseadh, oir tha e air
a luasgadh⁹.

3 Nochd thu do d' shluagh *nihe* cruaidh;
thug thu oirmn fion a' bhuaireis òl.

4 Thug thu bratach dhoibhsan d'an

¹ tarcais.

² Air sgàth a neirt.

³ dhìdean. ⁴ Gabhaidh Dia mo thròcair romham.

⁵ agus gu ruig. ⁶ ag iarraidh bidh.

⁷ Dia mo thròcair, mo Dhia thròcaireach.

⁸ bhris. ⁹ a' crìothmachadh.

eagal thu, gu bhi air a togail suas air
sgàth na firinn. Selah.

5 Chum gu teasairgear iadsan a's ion-
mhuinn leat, saor thusa le d' dheas làimh,
agus éisd rium.

6 Labhair Dia 'na naomhachd: ni mi
aoibhneas; roinnidh mi Sechem, agus
tomhaisidh mi gleann Shucoit.

7 *Is* leam-sa Gilead, agus *is* leam Mana-
seh; agus *is* e Ephraim neart mo chinn,
Iudah fear-tabbairt mo lagha:

8 *Is* e Moab mo shoitheach-ionnlaid; os
ceann Edoim tilgidh mi mo bhròg: thar
Palestín ni mi caithream¹⁰.

9 Cò bheir mi do'n bhaile dhaingnichte?
cò thròraicheas mi gu h-Edom?

10 Nach tusa, a Dhé? *thusa* a thilg
uait sinn, agus nach deachaidh a mach, a
Dhé, maille r'ar n-armaitibh?

11 Thoir còmhnaidh dhuinn ann an
teinn¹¹: oir *is* diomhain furtachd duine.

12 Trid Dhé ni sinn treubhantas; oir
saltraidh esan sìos ar naimhdean.

SALM LXI.

1 Rinn Daibhidh urnuigh ri Dia, 4 agus chuir e a
dhòchas 'na thròcair.

Do'n àrd fhear-ciùil air Negot. Salm le
Daibhidh.

EISD, a Dhé, ri m' ghlaodh, thoir an
aire do m' urnuigh.

2 O iomall na talmhainn éighidh mi riut,
an uair a bhios mo chridhe lag¹²; chum
na carraig a's àirde na mi féin, treòraich
thusa mi:

3 Oir bha thusa a'd' thearmunn dhomh,
a'd' thùr làidir an aghaidh an nàmhaid.

4 Gabhaidh mi còmhnaidh ann ad
phaillinn gu bràth: cuiridh mi mo dhòigh
ann an sgàil do sgiathan. Selah.

5 Oir chuala tusa, a Dhé, mo bhòidean:
thug thu oighreachd dhoibhsan air am
bheil eagal t'ainme.

6 Cuir thusa¹³ làithean ri làithibh an
righ: *biodh* a bhliadhnan mar linn agus
linn.

7 Maireadhe gu bràth am fianuis Dhé:
gleidheadh tròcair agus firinn e¹⁴.

8 Mar sin seinnidh mi cliù do t'ainm gu
bràth, chum gu dòll¹⁵ mi mo bhòidean o
là gu là.

SALM LXII.

1 Chronaich Daibhidh a naimhdean air son an aing-
idheachd, 5 agus thug e misneach do na h-ionrac-
ain. 9 Cha chòir dòchas fhear ann an saoihbheas.

Do'n àrd fhear-ciùil, do Iedutun. Salm le
Daibhidh.

AIR Dia a mhàin *tha* m'anam a' feith-
eamh: uaith-san *thig* mo shlàinte.

¹⁰ air mo shonsa, a Phalestín, dean caithream.

¹¹ an aghaidh an nàmhaid.

¹² trom, fo thuirse. ¹³ Cuiridh tusa.

¹⁴ deasaich, no orduich gu'n gléidh tròcair agus
firinn e. ¹⁵ coimhlion.

2 *Is* esan a mhàin mo charraig agus mo shlàinte: *is e* mo dhìdean: cha ghluaisear gu mòr mi.

3 Cha fhad a dhealbhas sibh aimhleas an aghaidh duine? marbhar sibh uile; mar bhalla ag aomadh, mar ghàradh¹ air chrith, bithidh sibh.

4 A mhàin chum *a* thilgeadh sìos o 'àirde² tha iad a' gahail comhairle le chéile; is miann leo breugan; le'm beul beannaichidh iad, ach 'nan cridhe mall-aichidh iad. Selah.

5 A mhàin air Dia feith, O m'anam; oir is ann uaith-san *a ta* mo dhòchas.

6 *Is* esan a mhàin mo charraig, agus mo shlàinte: *is e* mo dhìdean; cha ghluais-ear mi.

7 An Dia *tha* mo shlàinte agus mo ghloir; carraig mo neirt, mo thearmunn *is e* Dia.

8 Cuiribh air gach àm bhur dòigh ann, O a shluagh; dòirtibh a mach bhur cridhe 'na fhianuis: *tha* Dia 'na thearmunn duinn. Selah.

9 Gu cinnteach *tha* clann Adhaimh³ 'nan dìomhanas, clann ai duine⁴ 'nam bréig; air meidh ma chuirear iad, *is* eu-truime iad gu léir na dìomhanas.

10 Na h-earbaibh á foirneart, agus á reubainn na deanaibh uaill⁵; 'nuair a dh'fhàsas saobhbreas, na cuiribh bhur cridhe air.

11 Aon uair labhair Dia; dà uair chuala mi so, gur le Dia cumhachd.

12 Mar an ceudna dhuit-se, a Thigh-earn, *buinidh* tròcair; oir bheir thu⁶ luigheachd do dhuine a réir 'oibre.

SALM LXIII.

1 *Tha cridhe Dhaibhidh a' togradh a dh'ionnsuidh Dhé. 9 Sgrìosar a naimhdean le faobhar a' chlaidheimh, 11 agus bithidh e féin aoibhneach ann an Dia.*

Salm le Daibhidh, 'nuair a bha e ann am fàsach Iudah.

A DHIA, *is* tu mo Dhia-sa; gu moch a' iarraidh mi thu; tha tart air m'anam a'd' dhéigh, tha m'fheoil a' togradh a dh'ionnsuidh ann an tìr thioraim agus thartmhoir, as eugmhais uisge;

2 Chum, mar a chumnaic mi thu ann ad ionad naomh, gu faicinn do chumhachd agus do ghloir.

3 Do bhrìgh gur fearr do chaoimhneas gràidh⁷ na beatha, bheir mo bhilean cliù dhuit.

4 Mar sin beannaichidh mi thu, an cian is beò mi; ann ad ainm togaidh mi mo làmhnan.

5 Mar le smior agus le saill sàsuaichear m' anam, agus le bìlbh aoibhneach molaidh mo bheul *thu*;

6 'Nuair a chuimhniceas mi ort air mo leabaidh, a bheachd-smuainicheas mi ort ann am fairibh na h-oidhche.

7 A chionn gu robh thu a'd' chabhair agam, uime sin fo sgàile do sgiathan ni mi gairdeachas.

8 Tha m'anam a' dlùth-leantuinn riut: cumaidh do dheas làmh suas mi.

9 Ach iadsan *a* dh'iarras m'anam a chum *a* sgrìos, théid iad do ionadaibh iochdarach na talmhainn.

10 Tuitidh iad le faobhar a' chlaidh-eimh; mar chuibhrionn do na sionnach-aibh bithidh iad.

11 Ach bithidh an rìgh aoibhneach ann an Dia: ni gach neach a mhionnaicheas airsan, uaill; 'nuair a dhruidear beul na droinge a labhras breug.

SALM LXIV.

1 *Ghuidh Daibhidh gu'n gleidhcadh Dia e o chomh-airle dhìomhair dhroch dhaoine: 7 ghabh e misneach dha féin do bhrìgh gu'n robh dùil aig ri'n sgrìos fhaicinn.*

Do'n àrd fhear-ciùil. Salm le Daibhidh.

EISD, a Dhé, ri m' ghuth ann am as-luchadh; o eagal an nàmhaid gléidh mo bheatha.

2 Folaich mi o chomhairle dhìomhair dhroch dhaoine, o chomhchruinneachadh⁸ luchd-deanamh na h-euceirt;

3 A gheuraich mar chlaidheamh an teangadh; a dheasaich an saighdean, *eadhon* briathra searbh;

4 Chum an tilgeadh ann an ionadaibh dìomhair air an duine ionraic⁹; gu h-obann tilgidh iad air, agus cha bhi eagal orra¹⁰.

5 Gabhaidh iad misneach dhoibh féin an droch-hheirt; labhraidh iad le chéile mu leagadh ribeacha gu dìomhair; 'se their iad, Cò a chi sinn¹¹?

6 Rannsachidh iad a mach eucearta; coimhlionaidh iad mìn-rannsachadh; agus sin an taobh a stìgh do dhuine, eadhon sa' chridhe dhomhain.

7 Ach tilgidh Dia saighid orra-san; gu h-obann bithidh iad air an lotadh¹².

8 Agus bheir iad air an teangaidh féin tuiteam orra féin: teichidh gach neach a chi iad.

9 Agus bithidh eagal air gach duine¹³, agus cuiridh iad an céill obair Dhé; oir tuigidh iad a ghnìomh-san.

10 Ni am firean aoibhneas anns an Tighearn, agus cuiridh e a dhòchas ann: agus ni iadsan uile a tha ceart 'nan cridhe gairdeachas.

¹ dhèigh, fhèil.

² o'urram, o a cliù.

³ daoine beag.

⁴ daoine mòra.

⁵ le reubainn na meallair sibh.

⁶ ged b'èir thu.

⁷ do thròcair-sa.

⁸ cheannaire, ionnsuidh ghairbh, bhuaireas.

⁹ fhoirfe, iomlan.

¹⁰ cha'n fhaicear iad.

¹¹ iad.

¹² air am bualadh.

¹³ chì na h-uile dhaoine.

SALM LXV.

1 Mhol Daibhidh an Tighearn air son a thròcair.

4 Beannachadh an t-sluaigh a thaghas Dia, agus a bheir e 'm fagus da.

Do'n àrd fhear-ciuil. Salm no laoidh le Daibhidh.

ORT-SA, O Dhé, *tha* moladh a' feith-eamh ann an Sion; agus dhuit-se diolar a bhòid¹.

2 O thusa a dh'éisdeas ri h-urnuigh, thugad-sa² thig gach feoil.

3 Thug eucearta³ buaidh oirnn⁴: ar n-eusaontais glanaidh tusa uainn.

4 Is beannaichte *esan* a thaghas tusa, agus a bheir thu am fagus *duit*; gheibh e còmhnuidh a'd' chùirtibh: sàsuichear sinne le maithas do thighe, do theampuill naoinh.

5 Le nithibh uamhasach an ceartas bheir thu freagradh dhuinn, a Dhé ar slàinte, dòclàs uile chrìocha na talmhainn, agus na fàirge fada uainn!

6 A tha socrachadh nam beann le do⁵ chumhachd, air do chrìoslachadh le neart⁶:

7 A chaisgeas fuaim fhaireann, fuaim an tonn, agus buaireas nan cinneach.

8 Gabhaidh eadhon luchd-àiteachaidh nan crìoch fada mach⁷ eagal roimh do chomharaibh: bheir thusa air dol a mach na maidne agus an fheasgair gairdeachas a dheanamh.

9 Tha thu a' fiosrachadh na talmhainn⁸, agus 'ga uisgeachadh; ni thu ro bheartach e, oir tha abhainn Dé làn do uisge; deasaichidh tu arbhar⁹, 'nuair a dh'ulluich thu e mar so.

10 Tha thu gu pailte ag uisgeachadh 'iomairean; tha thu a' leagadh sìos a sgrìoban; le frasaibh ni thu tais e; beannaichidh thu 'fhàs.

11 Crùnaidh tu a' bhliadhna le d' mhaith-eas; agus silidh do cheuman¹⁰ saill.

12 Silidh iad air cluainibh¹¹ an fhàs-aich; agus ni na cnuic gairdeachas air gach taobh.

13 Tha na cluaineann air an sgeadachadh¹² le treudaibh, agus tha na glinn air an còmhachadh le h-arbhar: ni iad iolach aith; seadh seinnidh iad.

SALM LXVI.

1 Chuir Daibhidh impidh air gach uile thìr an Tighearn a mholadh. 5 Tha oibre Dhé uamhasach: 8 is còir do gach neach a bheannachadh: 13 gheall Daibhidh gu'n còimhlionadh e a bhòidean da.

Do'n àrd-fhear-ciuil. Salm no laoidh.

TOIGAIBH iolach aith do Dhia, a thìrean uile:

2 Seinnibh glòir 'ainme, deanaibh a chliù glòrmhor.

3 Abraibh ri Dia, Cia h-uamhasach

¹ diolar a' bhòid [ann an Ierusalem.]

² chugad-sa. ³ nith euceart.

⁴ orm.

⁵ le a.

⁶ treubhantas.

⁷ luchd-àiteachaidh chrìocha na talmhainn.

t'oibre? trid meud do neirt, strìochdaidh do naimhde dhuit.

4 Sleuchdaidh gach tìr dhuit, agus seinnidh iad dhuit; seinnidh iad do t'ainm. Selah.

5 Thigibh, agus faicibh oibre Dhé: uamhasach *tha* e 'na ghnìomharaibh air chloinn nan daoine.

6 Thionndaidh e a' mhuir gu talamh tioram: troimh 'n t-sruth ghabh iad thairis d'an cois: an sin rinn¹³ sinn gairdeachas ann.

7 Le 'thréin neart riaghlaidh e gu bràth; amhaircidh a shùilean air na cinnich: na h-àrdaicheadh luchd-ceannairc iad féin. Selah.

8 Beannaichibh, O a shlòigh, ar Dia-ne, agus thugaibh air fuaim a mholaidh bhi air a cluinntinn;

9 Neach a chumas ar n-anam beò, agus nach leig le'r cois carruchadh¹⁴.

10 Oir dhearbhu thu sinn, a Dhé; ghlan thu sinn san teine, mar a ghlanar airgid.

11 Thug thu steach san lìon sinn; chuir thu teinn¹⁵ air ar leasraidh.

12 Thug thu air daoineibh marcachd thar ar cinn: chaidh sinn troimh¹⁶ theine, agus troimh uisge; ach thug thu mach sinn gu h-ionad saobhair.

13 Théid mi do d' thigh le h-ìobairtibh-loisgte: còimhlionaidh mi dhuit mo bhòidean,

14 Leis an d'fhosgladh mo bhilean, agus a labhair mo bheul, 'nuair a bha mi ann an éigin.

15 Ìobairtean-loisgte do *fheudail* reamh-ar ìobraidh mi dhuit, maille ri tùis reithe-eacha: bheir mi suas buar, maille ri gabhraibh. Selah.

16 Thigibh, éisdibh, sibhse uile air am bheil eagal Dé, agus cuiridh mi 'n céill na rinn e air son m'anama.

17 Ghlaodh mi ris le m' bheul, agus dh'àrdaicheadh e le m' theangaidh.

18 Ma bheir mi spéis do euceart a'm' chridhe, cha'n éisd an Tighearna *rium*.

19 Gu dearbh dh'éisd Dia, thug e an aire do ghuth m'urnuigh.

20 Beannaichte gu *robh* Dia, nach do thionndaidh m'urnuigh uaith-san, agus a thròcair uamsa.

SALM LXVII.

1 Urnuigh air son' soirbheis rìoghachd Chrìosd, 3 chum gu'm bi na cinnich aithneach, 4 agus gu mol na slòigh an Tighearn.

Do'n àrd-fhear-ciuil air Neginot. Salm no laoidh.

GU deanadh Dia thròcair oirnn, agus gu beannaicheadh e sinn! agus gu tugadh e air a ghnùis dealrachadh oirnn! Selah.

⁸ an talmhainn. ⁹ arbhar dhoibh. ¹⁰ neoil.

¹¹ Silidh cluaineann. ¹² air an còmhachadh.

¹³ nì.

¹⁴ corruchadh. Eir.

¹⁵ teanntachd, àmhghar. ¹⁶ trid.

2 Chum gu'n aithnichear do shlighe air an talamh, do shlàinte am measg nan uile chinneach.

3 Moladh na slòigh thu, a Dhé! moladh na slòigh uile thu!

4 Biodh na cinnich aoibhneach, agus deanadh iad luathghaire; oir bheir thusa breth air na slòigh an ceartas, agus riaghlaidh tu na cinnich air an talamh. Selah.

5 Moladh na slòigh thu, a Dhé! moladh na slòigh uile thu!

6 Bheir an talamh a thoradh: gu beannaicheadh Dia, ar Dia-ne, sinn!

7 Gu beannaicheadh Dia sinn! agus gu robh 'eagal-san air uile chrìochaibh na talmhainn!

SALM LXVIII.

1 *Ghuidh Daibhidh gu'n sgapadh Dia a naimhdean.*

4 *Earrail gu Dia a mholadh air son a thròcairean.*

7 *agus air son a chùram d'a shluagh.*

Do'n àrd fhear-ciuil. Salm no laoidh le Daibhidh.

EIREADH Dia! biodh a naimhdean air an sgapadh! agus teicheadh iadsan aig am bheil fuath dha, o' ghnùis!

2 Mar a dh'fhuadaichear deatach, fuadaichear¹ iad: mar a leaghar céir fa chomhair an teine, sgriosar droch dhaoine am fianuis Dhé.

3 Ach biodh na fireana aoibhneach; deanadh iad gairdeachas am fianuis Dé, agus biodh iad suilbhir le luathghaire.

4 Seinnibh do Dhia, molaibh² 'ainm; àrdaichibh esan a ta marcachd air na nèamhaibh² le 'ainm Iah, agus deanaibh gairdeachas 'na fhianuis.

5 Athair nan dilleachdan, agus breitheamh nam bantrach, *is e* Dia ann an ionad-còmhnuidh a naomhachd.

6 Suidhichidh Dia na daoine aonaranach ann an teaghlach³; bheir e mach iadsan a tha ceangailte le cuibhreachaibh; ach gabhaidh na ceannairceich còmhnuidh ann an *tìr* thartmhoir⁴.

7 A Dhé, 'nuair a chaidh thu mach roimh do shluagh, 'nuair a dh'imich thu anns an fhàsach; Selah:

8 Chrìothnaich an talamh, shìl mar an ceudna na nèamha; [leagh na beannta⁵] o làthair Dhé, Sinai sin féin o làthair an Tighearna Dé Israeil.

9 Shìl thu nuas uisge gu pailt, a Dhé; air t'òighreachd, agus i sgèith, dh'fhurt-aich thu.

10 Chòmhnuich do choimhthional⁶ innte; dheasaich thu, a Dhé, do d' mhaithneas do'n duine bhoichd.

11 Chuir an Tighearn a ghuth a mach; bu lìonmhor cuideachd na muinntir a dh'fhoillsich⁷ e.

12 Theich, theich rìghrean nan armailtean; agus roinn ise a dh'fhan aig an tigh a' chreach.

13 Ged luidh sibh am measg choir-eacha⁸, *bithidh sibh mar* sgiathaibh colomain air an còmhdachadh le h-airgiod, agus 'iteagan le h-òr buidhe.

14 'Nuair a sgaoil an t-Uile-chumhachdach rìghrean innte, *bha* i geal mar shneachdachd air Salmon.

15 *Tha* beinn Dhé mar bheinn Bhasain, 'na beinn àrd *mar* bheinn Bhasain⁹.

16 C'ar son a leumas sibh¹⁰, a bheannta àrda? *is i* so a' bheinn anns am miann le Dia còmhnuidh a ghabhail, seadh, còmhnuichidh an Tighearn *innte* gu bràth.

17 *Tha* carbaid Dhé 'nam fichead mìle, le mìltibh do mhiltibh *aingle: tha* an Tighearna 'nam measg, *mar* ann an Sinai, san ionad naomh.

18 Chaidh thu suas air ionad àrd, thug thu bruid¹¹ am braighdeanas: thug¹² thu tiodhlacan do dhaoimibh, seadh, eadhon do dhaoimibh ceannairceach, chum gu gabhaidh an Tighearna Dia còmhnuidh *'nam measg*.

19 Beannaichte *gu robh* an Tighearn, *a tha* gach là 'gar cumail suas¹³, Dia ar slàinte! Selah.

20 *Is e* ar Dia-ne Dia na slàinte; agus do'n Tighearna Dia *buinidh* an t-slighe o'n bhàs¹⁴.

21 Ach brisidh Dia ceann a naimhde, claignonn greannach an fhir a dh'imicheas 'na pheacaidh.

22 Thubhairt an Tighearna, *Mar* o Bhasan bheir mi *mo shluagh* air an ais; bheir mi air an ais *iad mar* o dhoimlneachdaibh na faire:

23 Chum gu tumar de chos ann am fuil do naimhde, teangadh do mhadradh anns an *nì* cheudna.

24 Chunnaic iad do thriall, a Dhé! triall mo Dhé, mo Rìgh, san ionad naomh!

25 Dh'imich an luchd seinn air thoiseach, an luchd-ciuil' nan dèigh, am meadhon mhaighdean a' bualadh thiompan¹⁵.

26 Anns na coimhthionalaibh beannaichibh Dia, an Tighearn o thobar Israeil.

27 An sin *tha* Benjamin beag¹⁶ 'na uachdaran orra, ceannardan Iudah an luchd-comhairle, ceannardan Shebuluin, ceannardan Naphtali.

28 Dh'àithn do Dhia dhuith do neart: neartaich, a Dhé, an *nì* so a rinn thu air ar son.

29 Air son do theampuill ann an Ierusalem, bheir rìghrean tiodhlac dhuith.

30 Smachdaich luchd nan sleagh¹⁷, mòr

¹ fuadaich thusa. ² trid nam fàsach. ³ tigh.

⁴ thioraim. ⁵ Faic Breitheamhna, Caib. V. r. 3.

⁶ chreutairean beò.

⁷ a chuir an céill.

⁸ phota. ⁹ Is beinn mhòr beinn

Bhasain, beinn nan àirde beinn Bhasain.

¹⁰ dh'amhairceas sibh gu h-uaihbreach.

¹¹ braighdeanas, braighdean. ¹² fhuair.

¹³ a dh'uallaicheas sinn gach là le 'tiodhlaicheibh.

¹⁴ slighe a' bhàis.

¹⁵ thabur.

¹⁶ òg.

¹⁷ fadh-bheathach na cuilce. Eabh.

chuideachd nan tarbh, le laoghaibh an t-sluaigh, *gus* an strìochd iad le mìribh airgid: sgap thusa na slòigh a ghabh tlachd do'n chogadh.

31 Thig àrd uaislean as an Eiphit; sìnidh Etiopia a làmhlan a mach gu luath ri Dia.

32 A rìoghachda na talmhainn, seinnibh do Dhia; seinnibh moladh do'n Tigh-earna: Selah.

33 Dha-san a tha marcachd air nèamhaibh nan nèamh o chian! Feuch, tha e a' cur a mach a ghutha, gutha neirt.

34 Thugaibh-se neart do Dhia: thar Israel *tha* a ghlòir, agus *tha* a neart anns na neulaibh.

35 Is uamhasach thusa, a Dhé, o d'ion-adaibh naomha! *Is* e Dia Israeil a bheir neart agus treòir d'a shluagh. Gu ma beannaichte Dia!

SALM LXIX.

1 *'Na theanntachd rinn Daibhidh gearan ri Dia:*

13 *ghuidh e air son saorsa o 'thrioblaidibh:*

22 *thug e thoiris a naimhdean gu lèir-sgrìos:*

30 *gheall e Dia 'àrdachadh le breith-buidheachais.*

Do'n àrd fhear-ciuil air Sosann. Le Daibhidh.

THEASAIRG mi, a Dhé, oir thàinig na h-uisgeacha steach gu ruig m'anam.

2 Tha mi a' dol fodha ann an làthaich dhomhain, gun àite gu seasamh: tha mi air teachd gu doimhneachdaibh 'nan uisge, agus tha'n sruth a' dol tharum.

3 Tha mi sgith le m' ghlaodhaich; tha mo sgornan air tiormachadh: tha mo shùilean air fàilneachadh le feitheamh air mo Dhia.

4 Is lìonmhoire na falt mo chinn iadsan aig am bheil fuath dhomh gun aobhar: tha iadsan air fàs làidir le'm b'àill mo mhilleadh, a tha 'nan naimhdeibh dhomh gu h-eucorach; an ni sin nach d'thug mi leam, an sin is éigin domh 'aiseag.

5 Tha fios agad-sa, a Dhé, air m'amaid-eachd; agus cha 'n'eil mo lochdan fol-aichte ortsas.

6 Na biodh nàire orra-san air mo sgàth-sa, a dh'fheitheas ortsas, a Thighearna Dhé nan slògh: na biodh amhludh orra-san air mo sgàth-sa, a dh'iarraas thusa, a Dhé Israeil:

7 Oir air do sgàth-sa dh'fhuiling mi masladh; chòmhdaich amhludh mo ghmùis.

8 Is coigreach mi do m' bhràithribh, agus coinneach do chloinn mo mhàthar:

9 Oir dh'ith eud do thighe suas mi; agus orm-sa thuit toibheum na muinntir sin a thug toibheum dhuit-se.

10 Agus an uair a dh'irioslaich mi m'an-

am le trasgadh¹, bha e 'na mhasladh dhomh.

11 Agus rinn mi mo chulaidh do shaic-eudach, agus bha mi a'm' leth-fhocal² aca.

12 Tha iadsan a tha 'nan suidhe anns a' gheata a' labhairt a'm' aghaidh; agus *tha mi a'm'* òran aca-san a tha 'g òl dibhe làidir.

13 Ach air mo shon-sa, *tha* m'urnuigh riut-sa, a Thighearna, ann an àm tait-neach: a Dhé, ann an lìonmhoireachd do thròcair éisd rium, ann am fìrinn do shlàinte.

14 Saor mi o'n làthaich, agus na racham sìos: teasairgear mi uatha-san le'm fuathach mi, agus o na h-uisgeachaibh domhain.

15 Na rachadh tuil nan uisge tharum, agus na sluigeadh an doimhneachd mi, agus na druideadh an slochd a bheil orm!

16 Eisd rium, a Thighearna, oir *is* maith do chaoimhneas gràdhach; a réir lìonmhoireachd do chaoimh-thròcairean pill rium³.

17 Agus na folaich do ghmùis o d' òg-lach, oir tha mi ann an aire⁴; éisd rium gu grad.

18 Druid ri m'anam, saor e; a bhrìgh m' eascairdean, teasairg mi.

19 Is aithne dhuit mo mhasladh, agus mo nàire, agus mo mhi-chlù: a d' fhianuis *tha* mo naimhdean uile.

20 Bhris masladh mo chridhe, agus tha mi iarganach: agus dh'amhairc mi air son *neach* a ghabhadh truas, ach cha *robh* e ann; agus air son luchd-còmhfhurtachd, ach cha d'fhuair mi *iad*.

21 Agus thug iad dhomh, mar mo bhiadh, domblas; agus ann am ìotadh⁵, thug iad dhomh fion-geur r'a òl.

22 Biodh⁶ am bord fa'n comhair mar ribe, agus an soirbheas mar cheap-tuislidh *dhoibh*.

23 Doreltaichear an sùilean, chum nach faic iad; agus thoir air an leasraidh a ghnàth bhì air chrith.

24 Dòirt t'fhearg orra, agus glacadh do chorrucadh gheur iad.

25 Biodh an àite-tàimh fàs; 'nam pàill-iunaibh na gabhadh neach còmhnuidh!

26 Oir gheur-lean iad an tì a bhual thusa; agus labhair iad chum doilgheis dhoibhsan a lot thu⁷.

27 Cuir euceart r'an euceart, agus na tigeadh iad a steach a d' fhìreantachd-sa.

28 Dubh a mach iad á leabhar nam beò, agus maille ris na fireanaibh na sgriobhhar iad.

¹ nuair a ghuidh mi le trasgadh.

² ghnàth-fhocal, fhocal-fòchaid.

³ amhairc orm.

⁴ teanntachd.

⁵ Bithidh.

nan daoine a lot thu.

⁶ thart, phathadh.

⁷ chuir iad ri doilgheas

29 Ach mise, *a ta* bochd agus brònach, togadh do shlàinte, a Dhé, an àird mi.

30 Molaidh mise ainm Dé le h-òran, agus àrdaichidh mi e le breith-buidheachais.

31 Agus is fearr leis an Tighearn *so* na damh, *na* tarbh òg a ta adharcach, crobh-damh¹.

32 Chi na daoine sèimh *so*, agus bithidh aoibhneas orra: sibhse a dh'iarraas an Tighearna, bithidh bhuir cridhe beò.

33 Oir éisdidh an Tighearna ri bochdaibh, agus cha dean e tàir air a phrìos-naich².

34 Moladh na nèamhan agus an talamh e; na cuantan, agus gach mì a ghluaiseas amta!

35 Oir saoraidh Dia Sion, agus togaidh e bailtean Iudah; agus gabhaidh iad còmhuidh an sin, agus mealaidh iad i.

36 Sealbhaichidh sliochd a sheirbhis-each i, agus gabhaidh iadsan a ghradh-aicheas 'ainm-san còmhuidh innte.

SALM LXX.

1 *Ghuidh Daibhidh gu'n deanadh Dia deifir chum a chuideachaidh, 2 agus gu'n cuiradh e a naimhdean fo amhladh.*

Do'n àrd fhear-ciùil. *Salm* le Daibhidh, a chur an cuimhne.

ADHE, chum mo theasairginn, a Thighearna, chum mo chuideachaidh dean deifir³.

2 Biodh nàire agus amhladh orra-san a tha 'g iarraidh m'anama: piller air an ais iad, agus mòr-amhladh gu robh orra-san a tha miannachadh uile dhomh.

3 Gu piller iadsan air an ais⁴, mar thuarasdal d'an nàire, a their rium, Aha, aha!

4 Deanadh iadsan uile a tha ga d' iarraidh, aoibhneas agus gairdeachas annad; agus abradh iadsan a ghnàth, le'n toigh do shlàinte, Mòr-mholadh gu robh do Dhia!

5 Ach *a ta* mise bochd agus uireasbhuidheach; a Dhé, greas a m' iomsuidh; is tusa mo chabhair agus m'fhear-saoraidh: a Thighearna, na dean moille.

SALM LXXI.

1 *Chuir an salmadar an cèill maithas Dhé d'a thaobh san aimsir a chaidh seachad, 12 agus ghuidh e nach tilgeadh e uaidh e 'na shean aois. 19 Chliathaich e an Tighearn.*

ANNAD-SA, a Thighearna, cuiream mo dhòigh: nàire na biodh orm am feasd.

2 A'd' cheartas teasairg mi, agus thoir orm dol as; aom do chluas rium, agus saor mi.

3 Bi-sa a'd' charraig làidir⁵ dhomh, chum an rachainn a ghnàth: dh'àitlin thu mi bhi air mo shaoradh; oir is tu mo charraig, agus mo dhòighneach.

4 O mo Dhia, thoir fuasgladh dhomh á làimh an aingidh, á làimh an duine eucoraich agus an-ìochdmhoir.

5 Oir is tusa mo dhòchas, a Thighearna Dhé, mo dhòigh o m'òige,

6 Leat-sa chumadh mise suas o'n bhroinn: á h-innibh mo mhàthar bhuin thu mi: orts a bithidh mo nìoladh an còmhuidh.

7 Mar aobhar iongantais tha mi aig mòran; ach is tusa mo thearmunn làidir.

8 Lìonar mo bheul le d' nìoladh, le d' urram-sa gach là.

9 Na tilg uait mi an àm sean aoise; 'nuair a dh'fhàilnicheas mo neart, na tréig mi.

10 Oir labhair mo naimhdean a'm' aghaidh; agus ghabh iadsan a tha feitheamh nam fàth air m'anam, comhairle le chéile,

11 Ag ràdh, Thréig Dia e: leanaibh e gu teann, agus glacaibh e; oir cha 'n eil neach ann a shaoras e.

12 A Dhé, na bi-sa fad uam; O mo Dhia, greas gu m' chabhair.

13 Biodh nàire, biodh claidh, air eascairdibh m'anama: còmhdaichear le masladh agus le mi-chliù iadsan a tha 'g iarraidh m'uile.

14 Ach sìr-earbaidh mise, agus cuiridh mi ri d' chliù uile⁶.

15 Aithridh mo bheul t'fhìreantachd, air feadh an là do shlàinte; ged nach aithne⁷ dhomh an àireamh.

16 Théid mi air m'aghaidh ann an neart an Tighearna Dé: ni mi sgeul air t'fhìreantachd, t'fhìreantachd fém a mhàin.

17 O Dhé, theagaisg thu mi o m'òige; agus gu ruige so chuir mi t'òibre iongantach an cèill.

18 Agus a nis, an uair a ta mi sean agus liath, a Dhé, na tréig mi; gus an cuir mi an cèill do neart do'n àl so, do gach àl ri teachd do chumhaclid.

19 Agus *a ta* t'fhìreantachd-sa, a Dhé, ro àrd, O thusa a rinn nìthe mòra; a Dhé, cò is cosmhuil riut?

20 A nochd dhomh teanntachdan mòra agus cruaidh, a bheothaicheas mi a rìs, agus o dhoimhneachdaibh na talmhainn a bheir a nìs mi a rìs.

21 Meudaichidh tu mo mhòrachd, agus air gach taobh bheir thu sòlas dhomh.

22 Uime sin molaidh mise thu air an t-saltair, *seadh* t'fhìrinn-sa⁸, mo Dhia;

¹ ladharach² a dhaoine ceangailte.³ cabhag.⁴ Anaranach gu robh iadsan.

Faic Salm XL r. 15.

⁵ charraig còmhuidh.⁶ seinnidh mi do chliù nì's mò agus nì's mò.⁷ oir cha'n aithne.⁸ air inneal-ciùil na saltair mo'aidh mise t'fhìrinn.

seinnidh mi dhuit air a' chlàrsaich, O Aoin naomh Israeil.

23 Nì mo bhilean mòr-ghairdeachas an uair a sheinneas mi dhuit, agus m'anam a shaor thu.

24 Labhraidh mar an ceudna mo theangadh air t'fhireantachd air feadh an là; oir chuireadh amhladh, oir chuireadh nàire orra-san a tha 'g iarraidh m'aimhleis¹.

SALM LXXII.

1 Rinn Daibhidh urnuigh air son Sholaimh, 4 agus nochd e ceartas, sonas, agus glòir a rioghachd. 18 Bheannaich e Dia.

Air son Sholaimh.

ADHE, thoir do bhreitheanas do'n rìgh, agus t'fhireantachd do mhac an rìgh.

2 Bheir esan breth air do shluagh le fireantachd, agus air do bhochdaibh le ceartas.

3 Bheir na beannta sìth do'n t-sluagh, agus na tulaich².

4 Le ceartas bheir e breth air bochdaibh an t-sluaigh; saoraidh e clann nan ainns, ach mìn-bhrisidh e fear an fhoirneirt.

5 Bithidh t'eagal orra am feadh a mhair-eas a' ghrian agus a' ghealach³, o linn gu linn.

6 Thig e nuas mar uisge air an fhàiche bhuaite, mar fhraisaibh a dh'uisgicheas an talmh.

7 'Na làithibh-san soirbhichidh leis an fhìrean⁴, agus bithidh pailteas sìth ann, gus nach bi a' ghealach ann nì's mò.

8 Agus bithidh uachdaranachd aige o fhaige gu faige, agus o'n amhainn gu ruig crìochaibh na talmhainn.

9 'Na fhianuis sleuchdaidh sìos luchd-còmhnuidh an fhàsaich; agus imlichidh a naimhdean an ùir.

10 Bheir rìghrean Tharsis agus nan eilean tìodhlacan uatha; bheir rìghrean Sheba agus Shaba⁵ tabhartais dha.

11 Agus sleuchdaidh na h-uile rìghrean sìos dha; nì na cinnich uile seirbhìs dha.

12 Oir saoraidh e an t-ainnis an uair a dh'éigheas e; agus an truaghan, aig nach 'eil fear-cuideachaidh.

13 Caomhnaidh e am bochd agus am feumach; agus tèarnaidh e anama nam feumach.

14 O fheill agus o fhoirneart saoraidh e an anam; agus bithidh am fuil luachmhor 'ua-shùilibh.

15 Agus bithidh e beò, agus bheirear dha do òr Sheba; agus nìhear urnuigh air a shon a ghnàth; gach là beannaichear e.

16 Bithidh dorlach sìl san talmh air

mullach nam beann; crathaidh mar Lebanon a thoradh; agus thig iadsan do'n bhaile fo bhlàth, mar luibh na talmhainn.

17 Bithidh 'ainm-san buan gu sìorruidh; comh-mhairionn ris a' ghréin bithidh 'ainmsan; agus annsan beannaichear na slòigh uile, agus beannaichidh iadsan e⁶.

18 Beannaichte gu robh an Tighearna Dia, Dia Israeil, an ti a mhàin a nì nithe iongantach!

19 Agus beannaichte gu robh 'ainm glòrmhor-san gu sìorruidh; agus lìonar an talmh uile le 'ghlòir! Amen, agus Amen!

20 Chriochnaicheadh urnuighean Dhaibhidh mic Iese.

SALM LXXIII.

1 Is beag nach d'fhàinich creidimh an t-salmadair 'nuair a chunnaic e soirbheas nan aingidh; 15 ach thuig e ma dheireadh gu'n sgriosar iad gu tur. 23 Chuir e a dhòigh ann an Dia

Salm le Asaph.

GU deimhin tha Dia maith do Israel, dhoibhsan a tha glan 'nan cridhe.

2 Ach air mo shonsa, is beag nach d'aom mo chosan; cha mhòr nàcli do shleamhnuich mo cheumanna uam.

3 Oir ghabh mi tnu' rì h-amadanaibh, ri faicinn soirbheis⁶ dhaoine aingidh;

4 Oir cha 'n'eil cuibhrichean 'nam bàs⁷; ach a ta an neart làidir.

5 Ann an docair mar dhaoineibh eile cha 'n'eil iad; agus mar dhaoineibh eile cha 'n'eil iad air an sàruchadh:

6 Uime sin mar shlabhraidh chuairtich àrdan iad; mar thrusgan, chòmhdach foirneart iad.

7 Sheas an sùil a mach¹⁰ le saill; fhuair iad thar miann an cridhe.

8 Tha iad truailidh, agus labhraidh iad gu h-aingidh air foirneart; gu h-àrd labhraidh iad.

9 Chuir iad am beul an aghaidh nan nèamh; agus ghluais an teangadh air feadh na talmhainn.

10 Air an aobhar sin pillidh a shluagh¹¹ an so; agus fàisgear uisgeacha cupain làin a mach dhoibh.

11 Agus their iad, Cionnus is aithne do Dhia? agus am bheil eòlas aig an 'Ti a's àirde?

12 Feuch, is iad sin na daoine aingidh, a tha soirbheachadh san t-saoghal; tha iad a' carnadh suas beartais.

13 Da rìreadh gu dìomhain ghlan mi mo chridhe, agus nìgh mi mo làinhan an neò-chionta:

14 Oir bhuailleadh mi air feadh an là, agus smachdaicheadh mi gach maduinn.

15 Nan abrainn, Labhraidh mi mar so,

¹ m'uile.

² na tulaich fireantachd.

³ maille ris a' ghréin, agus am fianuis na geal-
aich. Eabh.

⁴ le fireantachd.

⁵ Seba.

⁶ bheir iad cliù dha.

⁷ farmad.

⁸ soirbheachaidh. ⁹ ceanglaichean orra gu'm bàs.

¹⁰ Tha an sùilean air bòrcadh.

¹¹ mo shluagh.

feuch, *air* ginealach do chloinne dhean-
ainn eucoir.

16 'Nuair a smuainich mi air so a thuig-
sinn, *bu* chruaidh an gnothuch e ann am
shùilibh.

17 Gus an deachaidh mi steach do
naomh-ionad Dhé: an sin thuig mi an
crioch-san.

18 Gu deimhin ann an àitibh sleamhna
chuir thu iad: thilg thu sìos iad gu sgrios.

19 Cionnus a thugadh iad gu sgrios,
mar ann an tiota? a chuireadh as doibh
gu tur le h-uamhasaibh?

20 Mar aising 'nuair a dhùisgeas neach,
a Thighearn, anns a' bhaile¹ ni thu tar-
uis² air an dealbh.

21 Ach bha mo chridhe goirt, agus bha
goimh a'm³ àirnibh.

22 Agus bha mi baoth, agus aineolach;
mar ainmhidh bha mi a'd⁴ làthair.

23 Gidheadh, *tha* mi a ghnàth maille
riut; chum thu suas *mi* air mo dheas
làmh.

24 Le d' chomhairle stiùraidh tu mi, agus
fa dheoidh⁵ gabhaidh tu mi *chum* glòire.

25 Cò *th'*agam anns na nàmhaidh *ach*
thusa? agus an coimhmeas riut cha 'n'èil
neach air thalamh air an bheil mo dhéigh.

26 Tha m'fheoil agus mo chridhe air
fàilneachadh: *is* e Dia neart mo chridhe
agus mo chuibhrionn gu sìorruidh.

27 Oir feuch, sgriosar iadsan a théid fad
uait: ghearr thu as gach neach a chaidh
le strìopachas uait.

28 Ach is maith dhomh-sa teachd dlùth
do Dhia: anns an Tighearna Dia chuir
mi mo dhòigh, chum gu foillsichinn t'òibre
uile.

SALM LXXIV.

1 *Thu'n salmadar a' caoidh gu'n do thilg Dia uait*
a shluagh féin; 10 agus g' a bhrosnachadh gu
cabhair a dheanamh orra, 18 do bhrìgh gu'n
d' thug an naimhdean beum doibh.

Maschil le Asaph.

C'AR son, a Dhé, a thilg thu uait *sinn*
gu bràth? a lasas t'fhearg ri caor-
aich t'ionaltraidh?

2 Cuimhnich do choimhthional. *a* cheann-
aich thu o chian, a shaor thu; slat³ t'òigh-
reachd, beinn Shìoin so anns an do ghabh
thu còmhnuidh.

3 Tog do chosa chum nam fàsach sìorr-
uidh, *chum* nan uile olc a rinn an nàmh-
aid ann ad ionad naomh.

4 Bheuc do naimhdean am measg do
choimhthionail; chuir iad suas am brat-
aichean mar chomharaibh.

5 Bha *neach* ainmeil mar a thogadh e a
thuagh gu h-àrd air coille thiugh.

¹ nuair a mhosglas tu.

² dìmeas.

³ na dhéigh sin.

⁴ treubh.

⁵ obair shnàidhte an ionaid naomh, a gheatacha.

⁶ shìonagoga, ionadan-aoraidh. ⁷ agus a chumas
tu do dheas làmh air a h-ais ann ad bhrollach?

6 A nis mar an ceudna bhris iad sìos
'obair ghearrta⁵ le chéile le tuaghaibh
agus le h-ordaibh.

7 Chuir iad ri theine t'ionad naomh gu
ruig an làr; thruaill iad pàillunt⁶ ainme-sa.

8 Thubhairt iad 'uan cridhe, Sgriosam-
aid iad le chéile: loisg iad uile ionada-
cruinneachaidh⁶ Dhé san tìr.

9 Ar comharan cha'n fhaic sinn; cha
'n'èil fàidh ann nìs mò, agus cha 'n'èil
neach 'nar measg aig am bheil fhios cia
fad.

10 Cia fad, a Dhé, a bheir an t-eascar-
aid beum? an dean an nàmhaid tarcuais
air t'ainm gu bràth?

11 C'ar son a philleas tu do làmh, do
dheas làmh féin air a h-ais? buin a mach
o d' bhrollach i⁷.

12 Oir *is* e Dia mo Rìgh o chian, ag
oibreachadh slàinte am meadhon na
talmhainn.

13 Sgaol thusa an fhainge le d' neart:
bhris thu cinn nan dràgon⁸ air na h-uisg-
eachaibh.

14 Phronn thu cinn Lebhiatain; thug
thu e mar bhiadh do'n t-sluagh anns an
fhàsach.

15 Sgoilt thu an tiobairt⁹ agus an sruth;
thiormaich thu aimhniche¹⁰ mòra.

16 *Is* leat-sa an là, mar an ceudna *is*
leat-sa an oidheche: is tu dheasaich solus
agus grian.

17 Shuidhich thu uile chrìocha na tal-
mhainn; rinn thu an samhradh agus an
geamhradh.

18 Cuimhnich so: thug an t-eascairaid
beum, a Thighearn, agus rinn sluagh
amaideach tarcuais air t'ainm.

19 Na toir suas do'n fhiadh-bheathaich¹¹
anam do cholumain¹²: anaman do dhaoine
truagh na dichuimhnich gu bràth.

20 Thoir an aire do'n choimhcheangal¹³.
oir tha àitean dorch na tìre làn do ionad-
aibh-còmhnuidh an fhoirneirt.

21 Na pillear air ais le nàire an ti a
shàruichear: moladh am bochd agus am
feumach t'ainm.

22 Eirich, a Dhé, tagair do chùis féin:
cuimhnich mar a ta 'n t-amadan a' toirt
toibheim dhuibh gach là.

23 Na dichuimhnich guth do naimhd-
ean, toirm¹⁴ na muinntir a dh'éirich a'd¹
aghaidh, a tha dol suas an còmhnuidh.

SALM LXXV.

1 *Mhol an salmadar Dia, 2 agus gheall e gu'n*
tugadh e breith le ceartas. 4 Chronaich e na
h-uabhrich.

Do'n àrd fhear-ciùil, Al-taschit. Salm no laoidh
le Asaph.

⁸ uabheist.

⁹ tobar.

¹⁰ aibhne.

¹¹ do mhòr-chuideachd nan aingidh.

¹² an ti a bheir aoradh dhuibh.

¹³ do d' choimhcheangal.

¹⁴ bruidheann.

BHEIR sinn moladh¹ dhuit, a Dhé, bheir sinn moladh; oir gu bheil t'ainm an fagus² cuiridh t'oibre iongantach an céill.

2 Nuair a ghlacas mi an t-àm suidhichte³, bheir mi breth le ceartas.

3 Sgaoileadh an tìr agus a luchd-ait-eachaidh gu léir: cumaidh mise suas a puist. Selah.

4 Thubhairt mi ris na h-amadanaibh, Na bithibh amaideach; agus ris na h-aingidh, Na togaibh suas bhuir n-adharc.

5 Na togaibh suas bhuir n-adharc gu h-àrd; na labhraibh le muineal cruaidh.

6 Oir cha'n ann o'n ear, no o'n iar, no o dheas a thigh àrdachadh.

7 Ach is e Dia am Breitheamh: leagaidh e sìos am fear so, agus àrdaichidh e am fear sin.

8 Oir tha cupan⁴ an làimh an Tighearn, agus tha am fion dearg: làn coimeisg tha e, agus dòirtidh e cuid as: ach a dheasgainean⁵ fàisgidh agus òlaidh uile dhaoine aingidh na talmhainn.

9 Ach ni mise gairdeachas⁶ gu bràth; seinnidh mi moladh do Dhia Iacoib.

10 Agus sgathaidh mi sìos uile adharca nan aingidh: àrdaichear adharcan an fhùrein.

SALM LXXVI.

1 Tha Dia glòrmhor ann an Sion, 7 agus 'na chèis eagail do gach neach. 11 Is còir bòidean òcadh dha.

Do'n àrd fhear-ciùil air Neginot. Salm no laoidh le Asaph.

AITHNICHEAR Dia ann an Iudah; ann an Israel tha 'ainm mòr:

2 Agus ann an Salem tha a phàillium, agus ionad-còmhnuidh ann an Sion.

3 An sin bhris e saighdean a' bhogha, an sgiath, agus an claidheamh, agus an cath⁷. Selah.

4 Is alloil⁸ thusa, is glòrmhor thu os ceann bheann na creiche.

5 Chreachadh iadsan a bha misneachail an cridhe; choidil iad an codal, agus cha d'fhuair na daoine treuna gu léir an làmhann.

6 Le d'achmhasan, a Dhé Iacoib, chuireadh araon am marcach agus an t-each⁹ 'nan suain.

7 Is cuis eagail thusa, eadhon thusa; agus cò sheasas a'd' làthair an uair a bhios fearg ort?

8 Thug thusa air breitheanas gu 'n eualadh o nèamh e: bha eagail air an talmhail, agus bha e 'na thàmh;

9 An uair a dh'èrich Dia chum breitheanas, a shaoradh uile dhaoine ciùine na talmhainn. Selah.

10 Gu cinnteach bheir fearg duine moladh dhuit: fuigheall na feirge coisgidh tu.

11 Bòidichibh, agus òcaibh do'n Tighearna bhuir Dia; thugadh iadsan uile a ta m'a thimchioll tiodhlaca dha-san a's aobhar eagail ann.

12 Sgathaidh e sìos spiorad uachdarana is cuis eagail e do righribh na talmhainn.

SALM LXXVII.

1 Rinn an salmadar urnuigh ri Dia 'na theinn, agus fhuair e èisdeachd. 10 Bheachd-smuainich e air oibribh thròcaireach an Tighearn, agus ghlac e misneach.

Do'n àrd fhear-ciùil, do Iedutun. Salm le Asaph.

LE m' ghuth dh'èigh mi ri Dia, le m' ghuth dh'èigh mi ri Dia, agus dh'éisid e rium.

2 Ann an là mo theinn dh'iarr mi an Tighearn; shineadh mo làmh a mach¹⁰ san oidhe gun sgur; dhùilt m'anam sòlas a ghabhail.

3 Chuimhnich mi air Dia, agus bha mi fo bhuaireas¹¹; rinn mi gearan, agus chlaoidheadh mo spiorad. Selah.

4 Chum thu mo shùilean 'nam faireachadh; tha mi iarganach, agus cha'n urrainn mi labhairt.

5 Smuainich mi air na làithibh o shean, air bliadhnaibh na h-aimsir chéin.

6 Chuimhnich mi mo cheòl¹² san oidhe; rinn mi cainnt ri m' chridhe féin, agus rannsaich mo spiorad gu geur:

7 An tilg an Tighearn uaith gu bràth? agus nach nochd e a dheadh-ghean nì's mò?

8 An do sguir a chaomhnear am feasd? an d'fhàilnich 'fhocal o linn gu linn?

9 An do dhearmaid Dia a bhì gràsmhor? an do dhruid e 'na chorruich a chaomh-thròcairean? Selah.

10 An sin thubhairt mise, Is e so m'anmhuinneachd: is e caochladh deas làimhe¹³ an Tì a's àirde a th'ann.

11 Cuimhnichidh mi oibre an Tighearna; gu deimhin cuimhnichidh mi t'iongantais o'n aimsir chéin.

12 Agus beachd-smuainichidh mi air t'oibribh gu léir, agus air do ghnìomh-araibh labhraidh mi.

13 Tha do shlighe, a Dhé san ionad naomh¹⁴; cò a ta 'na Dhia mòr mar ar Dia-ne?

14 Is tusa an Dia a tha deanamh nithe

¹ buidheachas. ² gu bheil thu am fagus.

³ an coimhthional.

⁵ dheasgaidh.

⁷ agus claidheamh a' chòmraigh.

⁸ urramach.

⁶ copan.

⁹ cuiridh mise an céill.

¹² marcaich nan euch;

luchd nan carbad-cogaidd agus nan cach.

¹⁰ shìl mo shùil, ruith mo leòd.

¹¹ mhi-shuainmheas.

¹³ ach cuimhnichidh mi bliadhnan deas làimhe.

¹⁴ an naomhachd. Eabh.

iongantach : thaisbein thu am measg nan sluagh do neart.

15 Shaor thu le d' ghairdean do shluagh, mic¹ Iacoib agus Ioseiph. Selah.

16 Chunnaic na h-uisgeachan thu, a Dhé! chunnaic na h-uisgeachan thu; bha eagal orra, seadh, ghluaiseadh² na doimhneachda.

17 Dhòirt na neoil a nuas uisge; thug na speura fuaim; mar an ceudna chaidh do shaihdean a mach.

18 Bha guth do thairneanaich san speur; shoillsich do dhealanaich an saoghal; ghluaiseadh agus chrìothnaich an talamh.

19 San fhairge bha do shlighe, agus do cheumanna anns na h-uisgeachaibh mòra; agus cha d'aithnìtheadh luirg do chos.

20 Threòraich thu mar threud do shluagh, le làimh Mhaois agus Aaroin.

SALM LXXVIII.

1 Chomhairlich an salmadar do'n t-sluagh reachdan agus glòir an Tighearn a nochdadh d'an cloinn. Eeachdraidh feirge Dhé an aghaidh chloinn Israeil. Maschil le Asaph.

EISDIBH, O mo shluagh, ri m' reachd; aomaibh bhur cluas chum bhriathar mo bhéil.

2 Fosgailidh mi mo bheul ann an cosamhlachd; cuiridh mi sean-fhocail dhorchas³ an céill:

3 A chuala sinn, agus a b' aithne dhuinn, agus a dh'innis ar n-aithriche dhuinn.

4 Cha cheil sinn air an cloinn iad, a' foillseachadh cliù an Tighearna do'n àl a ta ri teachd, agus a neart, agus 'oibre iongantach a rinn e:

5 Oir chuir e suas teistean⁴ ann an Iacob, agus shuidhich e lagh ann an Israeil, a dh'aithn e d'ar n-aithrichibh gu'n deanadh iad aithnichte d'an cloinn;

6 Chum gu'm biodh fios aig an àl ri teachd orra, gu'n éireadh a' chlànn a bheirteadh, agus gu'n cuireadh iad an céill iad d'an cloinn féin;

7 Agus gu'n cuireadh iad an dòchas ann an Dia, agus nach dìchuimhnìtheadh iad oibre Dhé, ach gu'n gleidheadh iad 'àitheantan⁵;

8 Agus nach bitheadh iad mar an aithriche, 'nan ginealach reasgach⁶ agus ceannaireach, ginealach nach do shuidhich an cridhe gu ceart, agus nach robh an spiorad tairis do Dhia.

9 Ged bha clann Ephraim fo'n armaibh, agus ged thilg iad le bogha, phill iad air an ais ann an là catha.

10 Cha do ghléidh iad coimhcheangal Dhé, agus dhiùlt iad imeachd 'na reachd.

11 Agus dhì-chuimhnich iad 'oibre, agus 'iongantais a nochd e dhoibh.

12 An làthair an aithriche rinn e nithe iongantach, ann an tìr na h-Eiphit, ann am machair Shoaìn.

13 Sgoilt e an fhairge, agus thug e iad-san thairis; agus thug e air na h-uisgeachaibh seasamh mar thorr.

14 Agus stiùir e iad le neul san là, agus air feadh na h-oidhche le solus teine.

15 Sgoilt e na creagan san fhàsach, agus thug e deoch dhoibh, mar á doimhneachdaibh mòra.

16 Agus thug e srutha a mach as a' charraig, agus thug e air uisgeachaibh ruith sìos mar ainmnicibh.

17 Gidheadh pheacaich iad fathast ni's mò 'na aghaidh, a' brosnachadh an Tì a's àirde san fhàsach.

18 Agus bhuair iad⁷ Dia 'nan cridhe, ag iarraidh bìdh d'am miann.

19 Seadh, labhair iad an aghaidh Dhé; thubhairt iad, An urrainn Dia bord a dheasachadh san fhàsach.

20 Feuch, bhuail e a' chreag, agus bhrùchd uisgeacha mach, agus dh'éirich na tuitlean: an urrainn e mar an ceudna aran a thabhairt? an deasaich e feoil d'a shluagh?

21 Uime sin chual' an Tighearn, agus bha corruich air; agus las teine an aghaidh Iacoib, agus mar an ceudna dh'éirich fearg an aghaidh Israeil:

22 A chionn nach do chreid iad ann an Dia, agus nach d'earb iad as a shlàinte;

23 Ged dh'aithn e do na neulaibh o'n àirde, agus ged dh'fhosgail e dorsa nan nèamh;

24 Agus ged fhras e nuas mana orra r'a itheadh, agus ged thug e dhoibh coire nan nèamh.

25 Dh'ith daoine biadh nan aingeal: thug e dhoibh an sàth do lòn.

26 Thug e air gaoith an ear imeachd sna nèamhaibh, agus le a neart thug e stigh a' ghaoth á deas.

27 Agus fhras e nuas feoil orra mar dhuslach⁸, agus eunlaith iteagach⁹ mar ghaineamh na fairge.

28 Agus thug e orra tuiteam am meadhon an caimp, mu thimchioll an àitean-còmhnuidh.

29 Agus dh'ith iad, agus làn-shàsuicheadh iad; oir thug e dhoibh am miann féin.

30 Cha robh iad air an sgarachduinn o am miann: fathast bha an biadh 'nam beul;

31 An sin thàinig fearg Dhé orra, agus mharbhe iadsan bu shultmhoire¹⁰ dhiubh, agus leag e sìos daoine taghta Israeil.

32 An déigh so gu léir pheacaich iad

¹ clann, sliochd.² chrìothnaich.³ sgeula o'n t-sean aimsir.⁴ fianuis.⁵ a àitheantan.⁶ eascaoin, fìar, eas-umhal.⁷ dhearbhadh, dh'fheuch, chuir iad cathachadh air.⁸ luathire.⁹ sgiathanach.¹⁰ a b'fhearr, bu làidire.

fathast agus cha do chreid iad air son 'oibre iongantach-san.

33 Uime sin chaith e an làithean ann an dìomhanas, agus am bliadhnachan ann an uamhas¹.

34 'Nuair a mharbh e iad, an sin dh'iarr iad e, agus phill iad, agus bha iad gu moch ag iarraidh Dhé²;

35 Agus chuimhnich iad gu'm b'e Dia an carraig, agus an Dia a's àirde an fear-saoraidh.

36 Ach rinn iad mìodal ris le'm beul, agus rinn iad breug dha le'n teangaidh:

37 Oir cha robh an cridhe ceart maille ris, agus cha robh iad dileas³ 'na choimh-cheangal.

38 Gidheadh gu h-ìochdmhor mhaith esan an loclid, agus cha do sgrìos e iad; seadh, iomadh uair thionndaidh e 'fhearg uaidh, agus cha do dhùisge a chorruich uile;

39 Oir chuimhnich e nach robh anna ach feoil; osag gaoithe a shiubhlas, agus nach pill a ris.

40 Cia tric a bhrosnuich iad e anns an fhàsach, a chuir iad campar air anns an ionad uaigneach?

41 Seadh, phill iad air an ais, agus bhuair⁴ iad Dia, agus chuir iad tomhas air Aon naomh Israeil.

42 Cha do chuimhnich iad a làmh no'n là air an do shaor e iad o'n nàmhaid⁵;

43 Mar a nochd e a chomharan anns an Eiphit, agus 'oibre iongantach ann am machair Shoin;

44 Agus a thionndaidh e an uisgeacha gu fuil, agus an srutha, air chor as nach feudta òl diubh;

45 A chuir e 'nam measg iomadh gnè chuireag⁶, a dh'ith suas iad, agus losgaim a sgrìos iad;

46 A thug e an toradh do'n bhruras⁷, agus an saothar do'n locust;

47 A mhill e an croinn-fhìona le cloich-mheallain, agus an croinn-fhìge⁸ le reodhadh:

48 Agus a thug e thairis am feudail⁹ do'n chloich-mheallain, agus an treudan do'n tein-athair;

49 A thilg e orra teas 'fheirge, boile¹⁰, agus corruich, agus teinn, le aingil olc a chur nam measg;

50 A rinn e slighe d'a fheirge, nach do chaomhain e an anam o'n bhàs, ach a thug e thairis am beatha do'n phlàigh;

51 Agus a bhuail e gach ceud-ghin san Eiphit, toiseach an neirt ann am pàilliu-aibh Ham;

52 Ach a thug e mach mar chaoraich a

shluagh féin, agus a threòraich e iad mar threud anns an fhàsach;

53 Agus a stiùir e iad gu tèaruainte, air chor as nach robh eagall orra, ach a chòmhdaich an fhairge an naimhdean;

54 Agus a thug e iad gu crìch 'ionaid naomh-san, do'n t-sliabh so a choisinn a dheas làmh;

55 Agus a thilg e mach na cinnich rompa, agus a roinn e oighreachd dhoibh¹¹ le crannchur, agus a thug e air treubhaibh Israeil còmhnuidh a ghabhail 'nam pàilliu-aibh-san.

56 Gidheadh bhuair agus bhrosnuich iad an Dia a's àirde, agus cha do ghléidh iad a theisteis.

57 Ach phill iad, agus ghluais iad gu fealltach, mar an aithriche; chaidh iad a thaoibh, mar bhogha fiar¹²;

58 Agus bhrosnuich iad e le'n ionad-aibh àrda, agus le'n dealbhaibh gearrta dhùisg iad e gu h-eud.

59 Chuala Dia, agus bha fearg air, agus ghabh e gràin mhòr do Israel:

60 Agus thréig e pàilliu Shìloh, am bùth¹³ a shuidhich e am measg dhaoine.

61 Agus thug e suas a neart gu braighdeanas, agus a ghlòir do làimh an nàmhaid.

62 Agus thug e thairis a shluagh do'n chlaidheamh, agus ghabh e fearg r'a oighreachd.

63 Loisg an teine an òigridh, agus cha d'fhuair an òighean pòsadh¹⁴.

64 Thuit an sagairt leis a' chlaidheamh, agus cha d'rinn am bantraich bròn.

65 An sin mhosgail an Tighearna mar neach a bha 'na chodal, mar churaidh a ni iolach an déigh dha fion òl.

66 Agus bhuail e a nàimhdean 'nan deireadh; thug e masladh bithbhuan dhoibh.

67 Agus dhiùlt e pàilliu Ioseiph, agus cha do thagh e treubh Ephraim.

68 Ach thagh e treubh Iudah, sliabh Shìoin a ghràdhaich e.

69 Agus thog e 'ionad¹⁵ naomh féin mar luchairt àrd, mar an talamh¹⁶ a shuidhich e gu bràth.

70 Agus thagh e Daibhidh 'òglach, agus thug se e o chrò nan caorach.

71 O bhi 'n déigh nan caorach a bha trom le h-àl, thug se e a bheathachadh Iacoib a shluaigh, agus Israeil 'òighreachd.

72 Agus bheathaich e iad a réir ionracais a chridhe; agus le seòltachd a làmh stiùir e iad.

¹ carroid, cabhaig.

dh'ionnsuidh Dhé.

⁴ bhrosnuich.

⁶ chonachuireag.

hasil. Eabh.

⁹ an crodh, an ainmuidhean.

² a' teachd gu moch a

³ Daingean, seasmhach.

⁵ o theinn.

⁷ caterpillar. Sasg.

⁸ sicomoir.

¹⁰ buile.

¹² clann, mealltach, cealgach.

¹³ am pobul, an t-ionad-còmhnuidh.

¹⁴ cha do mholadh an òighean.

¹⁵ a ionad.

¹⁶ ann an ionad àrd, air an talamh.

SALM LXXIX.

1 *Tha an salmadar ri caoidh air son sgrìos Ierusalem. 8 Ghuidh e gu'n cuidicheadh Dia le 'oighreachd air sgàth glòire 'ainne fèin.*

Salm le Asaph.

ADHE, thàinig na cinnich a steach do dh' oighreachd; thruaill iad do theampull naomh; dh'fhàg iad Ierusalem 'na carnaibh.

2 Thug iad cuirp do sheirbhiseach mar bhiaidh do eunlaith nan speur, feoil do naomh do fhiadh-bheathaichibh na tal-mhainn.

3 Dhòirt iad am fuil mar uisge timchioll Ierusalem, agus clia *robh* neach gu'n adhlacadh.

4 Tha sinn 'nar masladh d'ar coimhearsnaich, 'narn-aobhar fanoide agus magaidh dhoibhsan a tha mu'n cuairt oirnn.

5 Cia fhad, a Thighearn, a bhios fearg ort? gu bràth an las t'eud mar theine?

6 Dòirt do chorruich air na cinnich aig nach 'eil eòlas ort, agus air na rioghachdaibh nach gairm air t'ainm.

7 Oir chuir iad as do¹ Iacob, agus rinu iad 'àite-còmhnuidh 'na fhàsach.

8 Na cuimhnich thusa 'nar n-aghaidh ar n-eucearta roimhe so²: gu luath gabhadh do thròcairean romhainn; oir thugadh gu ro ìosal sinn.

9 Cuidich leinn, a Dhé ar slàinte, air sgàth glòire t'ainme; agus teasairg sinn, agus glan ar peacaidh uainn 'air son t'ainne fèin.

10 C'ar son a theireadh na cinnich, C'ait am bheil an Dia? aithnìchear am measg nan cinneach fa chomhair air sùl dìoghaltas fola³ do sheirbhiseach, a dhòirt-eadh!

11 Thigeadh osnaich a' phrìosanaich a'd làthair, a réir meud do neirt⁴; saor thusa iadsan a dh'orduicheadh chum bàis⁵.

12 Agus dìol d'ar coimhearsnaich a sheachd uiread 'nam brollach, am masladh leis an do mhaslaich iad thusa, a Thighearn.

13 Agus molaidh sinne do shluagh, agus caoraich t'ionaltraidh, thusa gu bràth: o linn gu linn cuiridh sinn an cèill do chliù:

SALM LXXX.

1 *Dh'astuich an salmadar air Dia gu'n tugadh e air a ghnùis dealrachadh air a shluagh. 8 Thionndaidheadh tròcairean Dhé gu breitheanas.*

Do'n àrd fhear-ciuil air Sosanim Edut. Salm le Asaph.

OAODHAIRE⁶ Israeil, éisd, thusa a stiùireas Ioseph mar threud; thusa

¹ dh'ith iad suas, mhill iad.

² ar seann pheacanna.

³ aithnìchear esan

am measg nan cinneach 'nar sealladh fèin, le

dìoghaltas a gabhail air fuil.

⁴ do ghairdean. Eabh.

⁵ bhuachaille.

⁶ mic a' bhàis.

⁷ leo fèin.

a tha d' chòmhnuidh eadar na cheruban, dealraich a mach.

2 An làthair Ephraim, agus Bheniamin, agus Mhanaseh, duisg do chumhachd, agus thig gu'r saoradh.

3 Pill sinn, a Dhé; agus thoir air do ghnùis dealrachadh, agus saorar sinn.

4 A Thighearn Dhé nan slògh, cia fhad a bhios fearg ort ri urnuigh do shluaigh?

5 Thug thu dhoibh aran nan deur r'a itheadh, agus thug thu dhoibh deoir r'an òl am pailteas.

6 Rinn thu sinn 'nar n-aobhar strì d'ar coimhearsnaich; agus iiii ar n-eascaird-ean gàire-fanoid umainn⁷.

7 A Dhé nan slògh, pill sinn; agus thoir air do ghnùis dealrachadh, agus saorar sinn.

8 Thug thu fionain⁸ as an Eiphit; thilg thu mach na cinnich, agus shuidhich thu i.

9 Réitich thu àite fa comhair, agus thug thu oirre freumhachadh gu daingean, agus lion i an tìr.

10 Chòmhdhaicheadh⁹ beannta le a sgàile, agus le a geugaibh seudair àrda¹⁰.

11 Chuir i mach a meoir gu ruig a' mhuir, agus a meanglain¹¹ gu ruig an amhainn.

12 C'ar son a bhris thu sìos a ballachadionaidh¹², air choras gu bheil uile luchd-gabhlaibh na slighe 'ga spionadh?

13 Tha an torc as a'choille 'ga fàsachadh, agus tha fiadh-bheathach na mach-arach 'ga h-itheadh suas.

14 A Dhé nan slògh, pill, guidheamaid òrt; amhaire a nuas o nèamh, agus faic, agus fiosraich an fhìonain so;

15 Agus am fion-lios a shuidhich do dheas-làmh, agus am meanglan a neartaich thu dhuit fèin¹³.

16 Loisgeadh i le teine, ghearradh sìos i; le achmhasan do ghnùise sgrìosar iad.

17 Bìodh do làmh air fear do làimhe deise, air mac an duine a neartaich thu dhuit fèin.

18 An sin cha phill sinn air ar n-ais uait: beothaich sinn, agus gairmidh sinn air t'ainm.

19 A Thighearn Dhé nan slògh, pill sinn, thoir air do ghnùis dealrachadh, agus saorar sinn.

SALM LXXXI.

1 *Eairail gu Dia a mholadh. 8 Chomhairlich Dia do Israel ùmhachd a thoirt d'a thoil, agus gheall e an teasairginn o làmh an naimhdean.*

Do'n àrd fhear-ciuil air Giit. Salm le Asaph.

⁸ fìncamhuin, crann-fìona. ⁹ Chòmhdhaich.

¹⁰ bha a geugan mar sheudair àrda.

¹¹ geugan.

¹² a callaidean.

¹³ Agus daingnich an nì a shuidhich do dheas làmh; [eadhon air son mic an duine, a neartaich thu dhuit fèin.]

SEINNIBH gu h-ait do Dhia, ar neart ;
2 togaibh iolach do Dhia Iacoib.

2 Glacaibh salm, agus thugaibh tiompan
leibh : a' chlàrsach bhinn maille ris an
t-saltair.

3 Anns a' ghealaich nuaidh¹ séidibh an
trompaid, anns an àm shuidhichte, air là
ar féille.

4 Oir bu reachd so do Israel, riaghailt
le Dia Iacoib.

5 Mar fhianuis shuidhich se e ann an
Ioseph, an uair a thàinig e mach á tìr na
h-Eiphit, far an cual' e cainnt nach do
thuig e².

6 Ò'n eallaich thug mi as a ghuala : o
na potaibh³ shaoradh a làmhnan.

7 Ann an teinn ghairm thu, agus shaor
mi thu ; fhreagair mi thu ann an ionad
dìomhair na tairneanaich : dhearbh mi thu
làimh ri uisgeachaibh Mheribah. Selah.

8 Eisd, O mo shluagh, agus bheir mi
fianuis dhuit ; O Israeil, ma dh'éisdeas tu
rium ;

9 Cha bhi dia coigreach annad⁴, agus
cha chrom thu sìos do dhia coimheach.

10 Is mise an Tighearna do Dhia, a
thug a nìos thu á tìr na h-Eiphit : fosgail
do bheil gu farsuinn, agus lìonaidh mise e.

11 Gidheadh cha d'éisd mo shluagh ri
m' ghuth, agus cha do ghabh Israel rium.

12 Uime sin thug mi thairis iad do ana-
miann an cridhe féin ; dh'imich iad 'nan
comhairle féin.

13 O nach éisdeadh mo shluagh rium !
nach imicheadh Israel a'm' shlighibh !

14 Gu luath leagainn sìos an eascairdean,
agus thionndaidhinn mo làmh an aghaidh
an naimhdean.

15 Bheireadh luchd-fuath an Tighearn
ùmhlachd dha : ach mhaireadh an aimsir-
san gu bràth.

16 Agus bheathaicheadh e iad le smior
a' chruthneachd : agus le mìl o'n charr-
aig shàsuichinn thu⁵.

SALM LXXXII.

1 Chronaich an salmair na h-uachdarain do bhrìgh
gu'n d'thug iad breth gu h-eucorach ; 3 agus
thug e earail doibh ceurtas a chumail ris na
bochdaibh.

Salm le Asaph.

THIA Dia 'na sheasamh ann an coimh-
thional nan cumhachdach⁶ : am
measg nan dée bheir e breth.

2 Cia fhad a bheir sibh breth gu h-eu-
corach, agus a ghabhas sibh ri gnùis⁷
dhaoine angidh ? Selah.

3 Deanaibh ceartas do'n bhoichd agus
do'n dilleachdan ; cumaidh còir ris an
truaghan⁸ agus ris an fheumach.

4 Teasairgibh am boichd agus an t-ain-
nis ; á làimh nan aingidh saor ibh iad.

5 Cha 'n eil eòlas no tuigse aca ; ann an
dorchadas gluaisidh iad : tha uile bhun-
aitean na talmhainn air chrith⁹.

6 Thubhairt mi, Is dée sibh, agus is mic
sibh uile do'n Tì a's àirde.

7 Ach gheibh sibh bàs mar dhaoine,
agus tuitidh sibh mar aon do na h-uachd-
arauaibh.

8 Eirich, a Dhé, thoir breth air an tal-
amh ; oir sealbhaichidh tu na h-uile chin-
nich mar oighreachd.

SALM LXXXIII.

1 Tha an salmair a' gearan gu'n d' rinn naimh-
dean Israeil ceannairc lèidir 'nan aghaidh. 9 Dh'as-
luich e air Dia an sgrios gu h-obann.

Laoidh no Salm le Asaph.

ADHE, na bi a'd' thosd ; na bi sàml-
ach, agus na bi a'd' thàmh, a Dhé :

2 Oir feuch, tha do naimhdean ri buair-
eas ; agus thog iadsan le'm fuathach thu,
suas an cinn.

3 An aghaidh do shluagh gu cuilbheart-
ach dhealbhadh iad olc¹⁰, agus ghabh iad
comhairle le chéile an aghaidh do mhuinn-
tìr dhìomhair.

4 Thubhairt iad, Thigibh, agus gearr-
amaid as iad o bhì 'nan cìmeach, chum
nach cuimhnichear ainm Israeil nì's mò :

5 Oir le h-aon inntinn ghabh iad com-
hairle le chéile, a'd' aghaidh-sa rinn iad
coimhcheangal.

6 Pàilliona Edoim agus na h-Ismaelich,
Moab agus na Hagaraich,

7 Gebal, agus Amon, agus Amalec, na
Philistich maille ri luchd-àiteachaidh
Thìor¹¹ :

8 Mar an ceudna dhlùth-lean Asur riu :
bu chòmhnaidh iad do chloinn Lot. Selah.

9 Dean orra mar air Midian, mar air
Sisera, mar air Iabin, aig sruth Chisoin ;

10 A sgriosadh aig Endor, a rinneadh
mar aolach do'n talamh.

11 Dean an àrd uaislean¹² mar Oreb,
agus mar Sheeb, agus an uachdarain gu
lèir mar Sheba, agus mar Shalmuna ;

12 A thubhairt, Glacamaid dhuinn féin
mar oighreachd àiteacha-còmhnuidh Dhé.

13 O mo Dhia, dean iad mar roth¹³ ;
mar asbhuaibh roimh'n ghaoith.

14 Mar a loisgeas teine a' choille, agus
mar a chuireas lasair na beannta ri theine ;

15 Mar sin dean thusa tòrachd orra le
d' dhoiminn, agus le d'ìoma-ghaoith cuir
uamhunn orra.

16 Lìon an eudan le masladh, chum
gu'n iarr iad t'ainm, a Thighearn.

17 Biodh amhladh agus buaireas orra

¹ nomha. ² chuata mi teangadh nach do thuig mi.

³ o shoithichibh-giùlain na creadh.

⁴ agad. ⁵ shàsuicheadh e iad.

⁶ san àrd-choimhthional. ⁷ pearsa.

⁸ an duine chrùite.

⁹ air an corruchadh.

¹⁰ ghabh iad comhairle chuibheartach.

¹¹ Thìuris.

¹² iad féin agus an àrd-uaislean.

¹³ mar mholl air toimh mu'n cuairt.

gu bràth; seadh, glacadh nàire iad, agus sgriosar iad:

18 Chum gu'm bi fhios aig *daoinibh* gur tusa mhaìn d'an ainm Iehobhah, an Tia's àirde os ceann na talmhainn uile.

SALM LXXXIV.

1 *Bha an salmadar an geall air cùirtibh an Tighearna, 4 agus nochd e beannachadh an t-sluaigh a bha 'nan còmhnuidh anna.*

Do'n àrd fhear-ciuil air Gùit. Salm air son mhac Chorah.

CIA so-ghràdhach do phàilliuma, a Thighearna nan slògh!

2 Tha m'anam a' miannachadh, seadh, eadhon a' fannachadh¹ le déigh air cùirtibh an Tighearna: tha mo chridhe agus m'fheoil ag éigheach gu h-àrd air son an Dé bheò.

3 Fhuair eadhon an gealbhoon tigh, agus an gobhlan-gaoithe nead dhi féin, anns an cuireadh i a h-àlach; t'altairean-sa², a Thighearna nan slògh, mo Dhia, agus mo Rìgh.

4 *Is beannaichte iadsan a tha 'nan còmhnuidh a'd' thigh-sa; molaidd iad thu a ghnàth.* Selah.

5 *Is beannaichte an duine sin aig am bheil a neart annad-sa, agus iadsan aig am bheil do shlighean³ 'nan cridhe.*

6 A' dol troimh ghlinn Baca⁴, ni iad sin tobar⁵ ann: lonaidd mar an ceudna an t-uisge na linnte.

7 Imichidh iad o neart gu neart; nochd-ar gach aon duibh ann làthair Dhé ann an Sion.

8 A Thighearna Dhé nan slògh, cluinn m'urnuigh; éisd, a Dhé Iacoib. Selah.

9 A Dhé, ar sgiath, faic, agus amhaire air gnùis t'Aoin ungta:

10 Oir *is* fearr là a'd' chiùirtibh na mìle: b'fhearr leam a bhì ri dorsaireachd ann an tigh mo Dhé, na bhì'm còmhnuidh ann am pàilliumaibh aingidheachd:

11 Oir *is* grian agus *is* sgiath an Tighearna Dia; agus bheir an Tighearna gràs agus glòir: cha chum e maith air bith uatha-san a ghluaiseas gu h-ionraic.

12 A Thighearna nan slògh, *is* beannaichte an duine a chuireas a dhòigh annad-sa.

SALM LXXXV.

1 *Dh'aidich an Salmadar gu'n robh Dia bàigheil r'a shluagh; 4 ghuidh e gu'm meudaicheadh e a thròcair dhoibh; 8 agus nochd e gu bheil slàinte dlùth dhoibhsan air am bheil eagal an Tighearna.*

Do'n àrd fhear-ciuil. Salm air son mhac Chorah.

BHA thusa bàigheil, a Thighearna ri d' thìr: thug thu air ais braighd-

eanas⁶ Iacoib.

2 Mbaith thu⁷ cionta do shluaigh; dh'fholuich thu am peacadh uile. Selah.

3 Choisg thu do chorruch uile; thionndaidh thu o fhraoch t'fheirge.

4 Pill sinn, a Dhé ar slàinte, agus tog t'fhearg dhinn.

5 Gu bràth am bi corruich ort ruinn? an sin thu t'fhearg o linn gu linn?

6 Nach ath-bheothaich thu sinn? chum gu dean do shluagh gairdeachas annad?

7 Nochd dhuinn, a Thighearna, do thròcair, agus deònuich dhuinn do shlàinte.

8 Chuinnidh mi ciod a their Dia an Tighearna: oir labhraidh e sìth r'a shluagh, agus r'a naomhaibh; ach na pillleadh iad chum amaideachd.

9 Gu dearbh *tha* a shlàinte dlùth dhoibhsan d'an eagal e; chum gu'n còmhnuich glòir 'nar tìr.

10 Tha thròcair agus firinn air còmhlaich-adh⁸ a chéile: tha ceartas agus sìth air pògadh a chéile.

11 Fàsaidh firinn a nìos as an talamh, agus seallaidh ceartas a nuas o na nìamhaibh.

12 Seadh, bheir an Tighearna maith dhuinn; agus bheir ar fearann uaith a thoradh⁹.

13 Imichidh ceartas¹⁰ roimhe, agus stiùraidh e a cheumanna san t-slighe¹¹.

CAIB. LXXXVI.

1 *Athchuinge Dhaibhidh. 5 Dh'aidich e gu'n robh Dia maith agus iochdmhor. 14 Rinn e gearan an aghaidh nan uaibhreach, agus ghuidh e air Dia thròcair a dheanamh air.*

Urnuih le Daibhidh.

AOM, a Thighearna, do chluas, éisd a rium; oir *tha* mi bochd, agus uir-easbhuidheach.

2 Gléidh m'anam, oir *a ta* mi diadhaidh¹²: O thusa mo Dhia, saor t-òglach, a dh'earbas asad.

3 Dean thròcair orm, a Thighearna; oir *tha* mi a' glaochadh riut gach là¹³.

4 Deau anam t'òglaich féin aoibhinn; oir riutsa, a Thighearna, togaidh mi m'anam.

5 Oir *a ta* thusa, a Thighearna, maith agus iochdmhor, agus pait ann an thròcair dhoibhsan uile a ghairmeas ort.

6 Eisd, a Thighearna, ri m'urnuigh, agus thoir fa'near guth m'athchuinge.

7 Ann au là mo theinn gairmidh mi ort; oir freagairidh tu mi.

8 Cha 'n'eil do shamhuil-sa am measg nan dée, a Thighearna; agus cha 'n'eil oibre ann, cosmhuil ri t'oibribh-sa.

¹ a' lagachadh, air a chlaoidh, meata.

² làimh ri t'altairibh-sa.

³ Is beannaichte

an sluagh sin aig am bheil do shlighean.

⁴ ghlinn

nan deur, ghlinn a' bhròin.

⁵ òlaidh iad do thobar.

⁶ braighdean.

⁸ còmhlaich-adh.

⁷ thug thu air falbh.

⁹ 'fhàs.

¹⁰ am firean.

¹¹ stiùraidh e sinn air slighe a cheumanna.

¹² oir a

ta mi naomh, oir a ta thusa maith.

¹³ rè an latha.

9 Thig na cinnich uile a rinn thu, agus sleuchdaidh iad a'd làthair, a Thighearna, agus bheir iad glòir do t'ainm.

10 Oir is mòr thusa, agus *tha* thu a' deanamh nithe iongantach; is tusa Dia, thu fèin a mhàin.

11 Teagaisg dhomh, a Thighearna, do shlighe; gluaisidh mi a'd fhìrinn: coimh-cheangail mo chridhe¹ chum eagal t'ainme bhi orm.

12 Molaidh mi thu, a Thighearna mo Dhia, le m'uile chridhe, agus bheir mi glòir² do t'ainm gu bràth:

13 Oir is mòr do thìrcair ormsa, agus shaor thu m'anam o'n t-slochd³ a's iochd-araiche.

14 A Dhé, dh'éirich na h-uabhrich a'm' aghaidh, agus dh'iarr coimhthional luchd-foirneirt m'anam; agus cha do chuir iad thusa rompa.

15 Ach a *ta* thusa, a Thighearna, a'd' Dhia iochdmhor, agus gràsmhor, mall chum feirge, agus pailt aun an tròcair agus am firinn.

16 Amhairc orm⁴, agus dean tròcair orm; thoir neart⁵ do t'òglach, agus saor mac do bhanoglaich.

17 Thoir dhomh comhara air mhaith, chum gu faic iadsan *e* aig am bheil fuath dhomh, agus gu'n gabh iad nàire, a chionn, a Thighearna, gu'n do chuidich thusa leam, agus gu'n d'thug thu comh-fhurtachd dhomh.

SALM LXXXVII.

1 *Bunait agus glòir Shìoin.* 4 *Tha a sluagh eadar-dhealaichte o gach sluagh eile.*

Salm no laoidh air son mhac Chorah.

THA: a bhunait anns na beanntaibh naomha.

2 Is ionnluinn leis an Tighearna geat-acha Shìoin, thar uile ionada-còmhnuidh Iacoib.

3 Innsear nithe glòrmhor ortsa, a chaithir⁶ Dhé. Selah.

4 Cuimnichidh mi Rahab agus Babel dhoibhsan d'an aithne mi: feuch, Pàlestin, agus Tìor, maille ri h-Etiopia; rugadh am fear so an sin.

5 Ach mu Shìon theirear, Rugadh am fear so agus am fear ud innte, agus daingnichidh an Tì a's àirde i.

6 Comharaichidh an Tighearna⁷, 'nuair a sgriobhas e sìos na fineacha, gu'n d'rugadh am fear so an sud. Selah.

7 *Bithidh* araon luchd-seinn agus luchd-ciùil an sin: *tha* mo thobair uile annad-sa,

SALM LXXXVIII.

1 *Tha an salmadar a' guidhe gu'n tugadh Dia éisd-eachd d'a urnuigh, 3 agus a' leigeadh ris da na trioblaidean a thàinig air.*

¹ aonaich, druid mo chridhe riut. ² urram.

³ o ifrinn, o'n uaigh. ⁴ Pill rium.

⁵ do neart. ⁶ a mhòr-bhaile.

Laoidh no salm air son mhac Chorah, d'on àrd fhear-ciùil air Mahalat Leant, Maschil le Heman an t-Esrahach.

A THIGHEARN, a Dhé mo shlàinte, a là agus a dh'oidhche ghlaodh mi a'd' fhianuis.

2 Thigeadh m'urnuigh a'd' làthair; aom do chluas ri m' ghlaodh:

3 Oir tha m'anam làn truaighe⁸, agus tha mo bheatha dlùth do'n uaigh.

4 Mheasadh mi mar iadsan a théid sìos do'n t-slochd; tha mi mar dhuine gun neart;

5 Saor am measg nam marbh, mar iadsan a mharbhadh, a ta 'nan luidhe san uaigh, air nach 'eil cuimhne agad ni's mò; oir o d' làimh⁹ gearradh as iad.

6 Chuir thu mi san t-slochd a's isle ann an dorchadas, anns na doimhneachd-aibh¹⁰.

7 Luidh t'fhearg orm gu teann, agus le d' thonnaibh uile chlaoidh thu mi. Selah.

8 Chuir thu mo luchd-eòlais fad uam; rinn thu mi a'm' ghràineileachd dhoibh: druidte suas *tha* mi, agus cha'n urrainn mi teachd a mach.

9 Tha mo shùil a' fàilneachadh¹¹ a bhrìgh m'àmghair; ghairm mi ort, a Thighearna, gach là; shìn mi mo làmh-an riut.

10 Do na marbhaibh an nochd thu iongantais? an éirich na mairbh, agus am mol iad thu? Selah.

11 An cuirear an céill do chaoimhneas caomh san uaigh? t'fhìrinn ann an sgrios?

12 An aithnichteas t'iongantais anns an dorchadas? agus t'fhìreantachd ann an talamh na dìchuimhne?

13 Ach riutsa, a Thighearna, ghlaodh mise; agus anns a' mhaduinn thig m'urnuigh a'd' làthair.

14 C'ar son, a Thighearna, a thilgeas tu m'anam uait? a dh'fholaicheas tu do ghnùis uam?

15 *Tha* mise air mo chràdh, agus dlùth do'n bhàs, o m'òige; dh'fhuiling mi t'uamhasan, tha mi an imcheist.

16 Dh'imich t'fhearg gheur tharum; chlaoidh t'uamhasan mi.

17 Chaidh iad timchioll orm mar uisge gach là; chuairtich iad mi le chéile.

18 Chuir thu fear mo ghaoil agus mo charaid fad uam: *tha* luchd m'eòlais aun an dorchadas.

SALM LXXXIX.

1 *Mhol an salmadar Dia air son a gheallanna trèaireach do Dhaibhidh. 5 Cumhachd agus mòrachd an Tighearna. 15 Tre fhìreantachd Dhé bithidh an t-ionracan air àrdachadh; 19 agus dìonaiddh an Tighearna e o làimh a naimhdean.*

⁷ Airmhidh an Tighearna. ⁸ do olcaibh. Eabh.

⁹ le d' làimh. ¹⁰ ann an sgàile a' bhàis.

¹¹ ri bròn.

38 *Tha an salmadar a' caoidh gu'n do thilg Dia a shluagh uath.* 46 *Rinn e urnaigh ri Dia, agus bheannaich se e.*

Maschil¹ le h-Etan an t-Esrahach.

AIR tròcairibh an Tighearna gu bràth seinnidh mi; o linn gu linn foillsichidh mi t'fhirinn le m' bheul:

2 Oir thubhairt mi², Gu bràth togar suas tròcair; anns na nàmhaidh daingnichidh tu t'fhirinn, *ag ràdh*,

3 Rinn mi coimhcheangal ri m'Aon taghta; mhionnaich mi do Dhaibhidh, m'òglach.

4 Gu bràth daingnichidh mi do shliochd, agus togaidh mi suas do rìgh-chaithir o linn gu linn. Selah.

5 Molaidh na nàmhaidh t'iongantais, a Thighearna; mar an ceudna t'fhirinn ann an coimhthional nan naomh.

6 Oir cò ann am flaitheanas³ a choimhmeasar ris an Tighearna; cò am measg mhac nan cumhachdach a shamhluichear ris an Tighearn?

7 Is aobhar eagail Dia gu mòr ann an coimhthional nan naomh; agus is còir urram a thubhairt da os an ceann-san uile *a tha* mu'n cuairt da.

8 A Thighearna Dhé nan slògh, cò *a tha* cosmhail riut? treun *a tha* thu, a Thighearn, agus *tha* t'fhirinn mu'n cuairt duit.

9 Riaghlaidh tusa on fha⁴ na fairge: 'nuair a dh'éireas a tonnan, coisgidh tu iad.

10 Mhìn-phronn thu Rahab, mar dhuine leònta⁵; le gairdean do neirt sgap thu do naimhdean.

11 Is leatsa na nàmhaidh, mar an ceudna is leat an talamh; shuidhich thusa an cruinne-cé, agus a làn.

12 Cruthaich thusa an àirde tuath, agus an àirde deas; ni Tabor agus Hermon gairdeachas ann ad ainm.

13 Agadsa *tha* gairdean neartmhor: is làidir do lamh, is àrd do dheas làmh.

14 Is iad ceartas agus breitheanas àite-tàimh do rìgh-chaithreach; théid tròcair agus firinn roimh do ghnùis.

15 Is beannaichte an sluagh d'an aithne an fhuaim aoibhneach: imichidh iad, a Thighearn, ann an solus do ghnùise.

16 Ann ad ainm-sa ni iad gairdeachas air feadh an là; agus ann ad fhìreantachd àrdaichear iad.

17 Oir is tusa glòir an neirt; agus ann ad dheadh-ghean àrdaichear⁶ an n-adharc.

18 Oir is e 'n Tighearn ar sgiath⁷, agus Aon naomh Israel ar Rìgh.

19 An sin labhair thu ann an taisbean⁸ ri d' Aon naomh⁹, agus thubhairt thu,

Chuir mise cuideachadh air aon a ta cumhachdach; dh'àrdaich mi aon taghta as an t-sluagh.

20 Fhuair mi Daibhidh m'òglach; le m'oladh naomh dh'ung mi e:

21 Le'm bi mo làmh gu daingean: mar an ceudna neartaichidh mo ghairdean e.

22 Cha tog an nàmhaidh cìs dheth¹⁰; agus cha chlaoidh mac an uile e.

23 Agus pronnaidh¹¹ mi a naimhdean roimhe, agus buaidh mi iadsan le'm fuathach e.

24 Agus bithidh m' fhirinn agus mo thròcair maille ris; agus ann am ainm-sa àrdaichear 'adharc-san.

25 Agus cuiridh mi a làmh¹² anns an fhaire, agus a dheas làmh anns na h-aimhnichibh¹³.

26 Glaohdhaidh e rium, *Is tu m'athair*, mo Dhia, agus carraig mo shlàinte.

27 Mar an ceudna ni mi mo cheud-ghin dheth, àrd os ceann rìghrean na talmhainn.

28 Gu bràth gleidhidh mi mo thròcair dha, agus bithidh mo choimhcheangal seasmhach leis.

29 Agus suidhichidh mi gu bràth a shliochd, agus a rìgh-chaithir mar làithibh nan nàmhaidh.

30 Ma thréigeadh a chlann mo lagh, agus nach gluais iad ann am breitheanasaidh;

31 Ma mhi-naomhaicheas iad mo reachdan, agus nach gléidh iad m' àitheantan;

32 An sin fiosraichidh mi le slait an eusaontas, agus le buillibh an euceart.

33 Gidheadh, cha bhuin mi gu tur mo chaoimhneas-gràidh uath, agus cha bhreugaich mi mo ghealladh.

34 Cha bhris mi mo choimhcheangal; agus an ni a thàinig á m' bheilbhaich cha chaochail mi.

35 Aon uair mhionnaich mi air mo naomhachd, nach dean mi breug do Dhaibhidh.

36 Mairidh a shliochd gu bràth, agus a rìgh-chaithir mar a' ghrian a'm làthair.

37 Mar a' ghealach, daingnichear e gu bràth; agus mar fhianuis dhileas ann an nàmhaidh. Selah.

38 Ach thilg thu uait, agus ghabh thu gràin¹⁴; bha fearg ort ri t'Aon ungta.

39 Sgaoil thu coimhcheangal t'òglaich; thruaill thu a choron, *g'a thilgeadh* gu làr.

40 Bhris thu a bhallaicha-dìonaidh uile; rinn thu a dhaingneacha 'nan sgrìos.

41 Creachaidh iadsan uile a ghabhas an t-slighe e; tha e 'na mhasladh d'a choimhearsnaich.

42 Thog thu suas deas làmh a naimhdean; rinn thu 'eascairdean uile ait.

¹ Teagasg. ² thu. ³ anns na speuraibh, sna neulaibh.

⁴ anfa, uabhar. ⁵ sàtha trid, oir mharbhadh.

⁶ àrdaichidh tu. ⁷ didean. ⁸ sealladh.

⁹ ri d' naomhaibh.

¹⁰ Cha dean an nàmhaidh fòireigin air.

¹¹ sgrìosaiddh. ¹² a neart, a chumhachd.

¹³ sruthaibh.

¹⁴ dhùilt tu.

43 Mar an ceudna phill thu faobhar a chlaidheimh, agus cha d'thug thu air seasamh anns a' chath.

44 Chuir thu as d'a ghloir¹, agus thilg thu sìos a rìgh-chaitheir gu làr.

45 Ghiorraich thu làithean 'òige²; chòmhdaich³ thu e le nàire. Selah.

46 Cia fhad, a Thighearn, a dh'fhol-uicheas tu thu fèin gu tur⁴? a loisgeas, mar theine, do chorruich?

47 Cuimhnich cia gearr m'aimsir: c'ar son a chruthaich thu gu dìomhain clann nan daoine uile?

48 Cò e an duine a ta beò, agus nach faic am bàs, no theasairgeas 'anam fèin o làimh na h-uaigne? Selah.

49 C'ait an bheil do chaoimheasagràidh roimhe so, a Thighearn, a mlionnach thu do Dhaibhidh air t'fhirinn.

50 Cuimhnich, a Thighearn, masladh do sheirbhiseach; gu'n do ghiùlain mise ann am uchd uile mhasladh sluaigh mhòir,

51 Leis an do mhaslaich do naimhdean, a Thighearn; leis an do mhaslaich iad ceumanna t-Aoin ungta.

52 Beannaichte gu robh an Tighearn a gu siorruidh! Amen agus Amen.

SALM XC.

1 Dh'fhoillsich Maois freasdal Dé do chloinn Israeil.

9 Nochd e gu bheil làithean an duine gearr;

13 agus ghuidh e gu'n sàsuicheadh Dia a shluagh le 'thràir.

Urnuigh le Maois, òglach Dé.

A THIGHEARNA, bha thusa a'd' ionad-comhnuidh⁵ dhuinn o linn gu linn.

2 Mun do ghineadh na beanntan, agus mun do dhealbha thu an talamh agus an cruinne-cé, eadhon o bith-bhuantachd gu bith-bhuantachd is tusa Dia.

3 Tionndaidhidh tu an duine gu sgrios; agus their thu, Pillibh, a chlann nan daoine.

4 Oir a ta mìle bliadhna ann ad shealladh-sa, mar an là'n dé 'nuair a théid e seachad, agus mar fhaire anns an oidhche.

5 Dl'fhuadaich thu iad, mar le sruth; mar chodal tha iad: anns a' mhaduinn tha iad mar fheur a dh'fhàsas suas⁶.

6 Air maduinn thig e fuaidh bhlàth, agus fàsaidh e suas; air feasgar gearrar sìos e, agus seargaidh e.

7 Oir tha sinn air ar caitheadh le d' fheirge, agus le d' chorruich tha sinn air ar claidh⁷.

8 Chuir thu ar n-euceartan a'd' fhianuis, ar peacanna dìomhair ann an solus do ghnuise.

9 Oir tha ar làithean air teireachduinn⁸ ann ad fheirge: chaith sinn ar bliadhnacha mar sgeul a dh'innseadh.

10 Tha làithean ar bliadhnacha 'nan trì fichead bliadhna agus a deich; agus le tuilleadh neirt ma bhios ceithir fichead ann, is saothair agus dòilgheas an spionnadh⁹: oir gearrar as e gu grad, agus siubhlaidh sinn¹⁰.

11 Cò d'an aithne neart t'fheirge, agus a réir t'eagail do chorruich?

12 Teagaisg dhuinn mar so ar làithean àireamh, chum gu socraich sinn ar cridhe air gliocas.

13 Pill a Thighearna; cia fhad¹¹? agus gabh aithreachas a thaobh do sheirbhiseach.

14 Sàsuich sinn gu moch le d' thròcair, a chum gu dean sinn gairdeachas agus aoibhneas ré ar làithean uile.

15 Dean aoibhneach sinn a réir nan là air an do chràidh thu sinn, nam bliadhna anns am faca sinn olc.

16 Faicear t'obair le d' sheirbhiseich, agus do ghloir le 'n cloinn.

17 Agus biodh maise an Tighearn ar Dé oirnn; agus daingnich thusa obair ar làmh dhuinn¹²; seadh, daingnich obair ar làmh.

SALM XCI.

1 Tèaruinteachd agus sonas nan ìonracan fo sgàile an Uile-chumhachdaich.

GABHAIDH esan a tha 'na chòmh-nuidh ann an ionad dìomhair an Ti a's àirde, tàmh fo sgàile an Uile-chumhachdaich.

2 Their mì¹³ mur thimchioll an Tighearn, Is e mo thearmunn, agus mo dhaingneach; mo Dhia, anns an cuir mi mo dhòigh.

3 Gu dearbha saoraidh e thu o rib an eunadair, o'n phlàigh mhilltich.

4 Le 'teagaibh¹⁴ còmhdaichidh e thu, agus fuaidh a sgjathaibh bithidh t'earbsa: bithidh¹⁵ fhirinn 'na sgéith agus 'na targaid dhuith.

5 Cha bhi eagal ort a thaobh an uamhais anns an oidhche, no na saighde a ruitheas san là;

6 No na plàigh a ghluaiseas an dorchadas, no an sgrios a mhilleas mu mheadhon-là.

7 Tuitidh mìle ri d' thaobh, agus deich mìle air do làimh dheis; ach cha tig e am fagus duit.

8 A mhàin le d' shùilbha seallaidh tu, agus chì thu dìol¹⁵ nan aingidh.

9 A chionn gu'n d'rinn thu an Tighearn

¹ ghloine. ² a dige. ³ dh'fholuich.

⁴ an ann gu bràth? ⁵ a'd' thearmunn.

⁶ a chaochlaideas. ⁷ fo amhluidh.

⁸ air tionndadh, air gabhail seach.

⁹ a' chuid a's fearr, a' chuid a's mò dliubh.

¹⁰ teichidh sinn romhainn.

¹¹ Pill, a Thighearna, fa dheoidh.

¹² oirnn. ¹³ Their e. ¹⁴ a iteich. ¹⁵ duais, tuarasdail.

'na thearmunn¹, an Tia's àirde 'na ionad-
còmhnuidh dhuit;

10 Cha'n èirich olc air bith dhuit, agus
cha tig plàigh am fagus do d'fhàrdach²:

11 Oir bheir e àithne d'a ainglibh mu
d' thimechioll, chum do ghleidheadh ann
ad shligheibh uile.

12 'Nan làmhaibh³ togaidh iad suas
thu, air eagal gu'm buail thu do chos air
cloich.

13 Air an leòmhann⁴ agus an nathair-
nimhe saltraidh tu; prònaidh tu fo d'
chois an leòmhann òg agus an dràgon.

14 A chionn gu bheil gràdh aige dhomh,
saoraidh mi e; àrdaichidh mi e, a chionn
gur aithne dha m'ainm.

15 Gairmidh e orm, agus éisdidh mi
ris; *bithidh* mi maille ris ann an teimn;
teasairgidh mi e, agus bheir mi urram
dha.

16 Le fad làithean⁵ sàsuichidh mi e,
agus nochdaidh mi dha mo shlàinte.

SALM XCII.

1 *Dh'earalaich am fàidh Dia a mholadh, 4 air son
a bhrèitheanais air luchd-deanamh an uile,*
10 agus air son a mhaithis do'n ionracan.

Salm no laoidh air son là na sàbaid.

IS maith an ni buidheachas thabhairt
do'n Tighearn, agus cliù a thabhairt
do t'ainm-sa, O Tha's àirde;

2 Do chaoimhneas-gràdh⁶ a chur an
cèill anns a' mhaduinn, agus t'fhìrinn
gach oidheche.

3 Air inneal-ciùil nan deich teud, agus
air an t-saltair; air a' chlàrsaich le fuaim
fhonnmhoir àird⁷.

4 Oir rinn thu mi aoibhinn, a Thighearna,
trid t'òibre-sa; ann an gnìomharaibh do
làmh ni mi gairdeachas.

5 Cia mòr do ghnìomhara-sa, a Thigh-
earna! ro dhomhain tha do smuainte.

6 Cha'n eòl do'n amhlair⁸ e, agus cha
tuig an t-amadan so.

7 An uair a chinucas na h-aingidh mar
fheur, agus a thig uile luchd-deanamh na
h-euceirt fo bhlàth, *bithidh*⁹ iad air an
sgrios ann feasd.

8 Ach a ta thusa ro àrd gu sìorruidh, a
Thighearn.

9 Oir feuch, do naimhdean, a Thigh-
earn, oir feuch, do naimhdean, sgriosar
iad: sgapar uile luchd-deanamh na h-eu-
ceirt.

10 Ach mar *adharc* buabluill¹⁰ àrdaich-
idh tu m'adharc-sa: ungar mi le h-oladh
ùir.

11 Agus amhaircidh mo shuil air m'eas-

¹ neach a's e mo thearmunn. ² do d' phàillinn.

³ Air an làmhaibh. ⁴ sachal. Eabh.

⁵ Le saoghal fada. ⁶ do thròcair.

⁷ Higaion. Eabh.

⁸ do'n ùmaidh, do'n duine bhrùideil.

⁹ is ann a chum gu'm bi.

¹⁰ aon-adharcaich, sròin-adharcaich.

cairdibh¹¹; mu na droch dhaoineibh a
dh'éireas suas a'm' aghaidh cluinidh mo
chluasan.

12 Mar chrann-pailme, thig am firean
fo bhlàth¹²; mar sheudair air Lebanon,
fàsaidh e suas.

13 Iadsan a shuidhichear ann an tigh
an Tighearn, ann an cuirtibh ar Dé-ne
thig iad fo bhlàth:

14 Fathast 'nan sean aois bheir iad a
mach toradh; sultmhor¹³ agus ùr¹⁴ bithidh
iad.

15 A chum gu nochd iad gu *bheil* an
Tighearna, mo charraig, cothromach,
agus nach 'eil euceart ann.

SALM XCIII.

Mòralachd agus naomhachd oighreachd Chrìosd.

THA'N Tighearn a' rioghachadh, tha
e air a sgeadachadh le mòralachd:
tha'n Tighearn air a sgeadachadh le
neart, agus chrìoslaich se e féin: tha'n
saoghal mar an ceudna air a dhaing-
neachadh, chum nach gluaisear e.

2 Dhaingnicheadh do righ-chainthir o
chian: o shìorruidheadh *tha* thusa.

3 Thog na tuitte suas, a Thighearna,
thog na tuitte suas an guth: togaidh na
tuitte suas an tonna.

4 Os ceann toirme¹⁵ uisgeacha lionmhor,
os ceann thonn neartmhor na mara, is
neartmhor¹⁶ anns na h-àrdaibh¹⁷ an Tigh-
earna.

5 Tha do theisteis¹⁸ ro fhìor: do d'
thigh-sa is iomchuidh naomhachd, a
Thighearna, gu bràth.

SALM XCIV.

1 *Dh'asluich Dàibhidh air Dia gu'n òcadh e lugh-
eachd do h-uaibhrich. 8 Nochd e freasdal
Dé, agus beannachadh an duine a smachdaichear
leis. 16 Tha Dia 'na fhear-cuideachaidh do'n
fhìrean.*

ADHE an dioghaltais¹⁹, a Thighearna
Dhé an dioghaltais, dealraich a
mach.

2 Ardaich thu fein, a Bhreitheimh na
talmhainn; òc luigheachd²⁰ do na
h-uaibhrich.

3 Cia fhad a ni na h-aingidh, a Thigh-
earna, cia fhad a ni na h-aingidh caith-
ream?

4 *Cia fhad* a brùchdas iad briathran, a
labhras iad nithe cruaidhe? a bhios uile
luchd-deanamh an uile ri ràiteachas?

5 A bhruthas iad do shluagh, a Thigh-
earn, agus a chlaoidheas iad t'òighreachd?

6 A mharbhas iad a' bhantrach agus an

¹¹ air crìoch n' eascairdean.

¹² bithidh piseach air, soirbheichidh leis an fhàrcan.

¹³ brìoghmhor, sìghmhor. ¹⁴ uaine.

¹⁵ ghuth. ¹⁶ mòralach, uamhasach,

¹⁷ anns an ionad àrd. ¹⁸ t'fhianuiscan,

¹⁹ d'am buin dioghaltas.

²⁰ luigheachd, duais.

coigreach, agus a mhortas iad na dill-eachdain?

7 Agus a their iad, Cha'n fhaic an Tighearn, agus cha toir Dia Iacoib fa'near e.

8 Tuigibh, sibhse amhlairean¹ am measg an t-sluaigh; agus amadana, c'uin a bhios sibh glic?

9 An ti a shuidhich a' chluas, nach chuinn e? an ti a dhealbh an t-sùil, nach faic e?

10 An ti a smachdaicheas na fineacha², nach cronaich e? an ti a theagaisgeas eòlas do'n duine, nach 'eil eòlas aige?

11 Is fiosrach an Tighearn air smuaintibh dhaoine, gur dìomhanas iad.

12 Is beannaichte an duine a smachdaicheas tusa, a Tighearn, agus a theagaisgeas tu as do lagh:

13 Chum fois a thabhairt da o làithibh an uilc³, gus an cladhaichear slochd do'n aingidh.

14 Oir cha tilg Dia dheth a shluagh, agus cha tréig e⁴ oighreachd féin;

15 Ach pillidh breitheanas ri ceartas; agus leanaidh iadsan uile a tha ionraic⁵ 'nan cridhe e.

16 Cò dh'éireas leam an aghaidh luchd-deanamh an uilc? cò sheasas air mo shon an aghaidh luchd-deanamh na h-aingidheachd?

17 Mur biodh an Tighearna 'gam chuid-eachadh, is beag nach robh m'anam 'na thàmh gu tosdach⁶?

18 'Nuair a thubhairt mi, Tha mo chos air sleamhnachadh uam, chum do thròcair, a Tighearna, suas mi.

19 Ann an lìonmhoireachd mo smuaintean taobh a stigh dhìom, thug do chomh-fhurtachd-sa sòlas do m'anam.

20 Am bi comunn riutsa aig rìgh-chaithir na h-euceirt, a dhealbhas aimhleas le reachd?

21 Crìnnichidh iad le chéile an aghaidh anama an fhìrean, agus dìtidh iad fuil neo-chiontach.

22 Ach is e'n Tighearna mo dhaingneach; agus is e mo Dhia carraig mo dhòchais⁷.

23 Agus dòlaidh e orra féin an euceart, agus 'nan aingidheachd féin gearraidh e as iad; gearraidh an Tighearn ar Dia as iad.

SALM XCV.

1 Earail gu Dia a mholadh air son a mhòrachd, 6 agus air son a mhaitheis.

O THIGIBH, seinneamaid do'n Tighearna; togamaid iolach do charraig ar slàinte.

2 Thigeamaid 'na fhianuis le buidh-

eachas, agus le salmaibh togamaid ceòl dha gu suilbhreach:

3 Oir is Dia mòr an Tighearn, agus is Rìgh mòr e os ceann nan uile dhée.

4 'Na làimh-san tha doimhneachda na talmhainn; agus is leis àirde⁸ nam beann. 5 Is leis an fhaire, oir is e a rinn i; agus dhealbh a làmhan an talamh tioram.

6 O thigibh, sleuchdamaid, agus cromamaid sìos; tuiteamaid air ar glùinibh am fianuis an Tighearn a rinn sinn:

7 Oir is esan ar Dia, agus is sinne sluagh 'ionaltraidh-san, agus caoraich a làimhe.

8 An diugh ma dh'éisdeas sibh r'a ghuth, na cruaidhichibh bhur cridhe, mar anns a' chonsachadh⁹, mar ann an là a' bhuaireadh¹⁰, anns an fhàsach;

9 'Nuair a bhuaire bhur n-aithriche mi, a dhearbhadh iad mi, agus a chunnaic iad m'oire rè dhà fhichead bliadhna¹⁰.

10 Chuireadh campar orm leis a' ghinealach ud, agus thubhairt mi, Is sluagh seacharanach 'nan cridhe iad, agus cha'n aithne dhoibh mo shlighean:

11 D'an d'thug mi mo mhionnan a'm' fheirg, nach rachadh iad a steach a'm' fhois.

SALM XCVI.

1 Earail gu glòir Dhé a chur an céill, 10 agus gu gairdeachas a dheanamh a chionn gu bheil e a' rioghachadh os ceann an domhain.

CANAIBH do'n Tighearn laoidh¹¹ nuadh; canaibh do'n Tighearn, a thirean uile.

2 Canaibh do'n Tighearna, beannaichibh 'ainm; foillsichibh o là gu là a shlàinte.

3 Cuiribh an céill am measg nan cinneach a ghlòir, am measg gach sluaigh 'iongantais-san.

4 Oir is mòr an Tighearn, agus is ro airidh e air cliù: is aobhar eagail esan os ceann nan uile dhée:

5 Oir is ìodhoil¹² uile dhée nan cinneach: ach is e'n Tighearn a rinn na nèamhan.

6 Tha urram agus mòralachd 'na fhianuis; neart agus maise 'na ionad naomh.

7 Thugaibh do'n Tighearna, sibhse fhìneacha nan sluagh; thugaibh do'n Tighearna glòir¹³ agus neart.

8 Thugaibh do'n Tighearn a' ghlòir a's cubhaidh d'a ainm: thugaibh tabhartas leibh, agus thigibh a steach d'a chùirtibh.

9 Sleuchdaibh do'n Tighearn ann am maise na naomhachd; biodh eagail oirbh 'na fhianuis, gach uile thir.

10 Abraibh am measg nan cinneach,

¹ a dhaoine baoghalta, brùideil.

² cinnich.

⁴ dìreach.

⁶ mo charraig dhìonaiddh.

³ àmhghair.

⁵ san uaigh.

⁷ neart.

⁸ chomh-stri; Meribah. Eabh.

⁹ Masah. Eabh.

¹¹ òran.

¹³ urram.

¹⁰ Faic Eabh. Caib. III. r. 9.

¹² deqibha faoin.

Tha'n Tighearn a' rìoghachadh: mar an ceudna daingnichear an domhan, chum nach gluaisear e: bheir e breth air na slòigh le ceartas.

11 Biodh na nèamhan aoibhneach, agus deanadh an talamh gairdeachas; beucadh an fhairege, agus a làn.

12 Biodh a' mhachair ait, agus gach ni a ta innte; an sin deanadh uile chranna na coille luathghaire,

13 An làthair an Tighearn; oir tha e a' teachd, oir tha e a' teachd a thoirt breth air an talamh: bheir e breth air an t-saoghal le ceartas, agus air na slòigh le fhirinn

SALM XCVII.

1 *Mòralachd rìoghachd Dhé. 8 Rinn Sion gairdeachas air son bhreitheanas an Tighearna. 10 Gleidhidh Dia anaman a naomh.*

THA'N Tighearn a' rìoghachadh; biodh aiteas air an talamh: deanadh na h-eileana ìonmhor gairdeachas.

2 Tha neoil agus dorchadas m'a thimchioll: is iad ceartas agus breitheanas àite-còmhnuidh a rìgh chaithreach.

3 Thèid teine roimhe, agus loisgidh e suas a naimhdean air gach taobh¹.

4 Shoillsich a dhealanaich an cruinne-cé; chunnaic, agus chrìochnaich an talamh.

5 Leagh na beanntan as mar chéir o làthair an Tighearna o làthair Thighearna na talmhainn uile.

6 Cuiridh na nèamhan an céill a cheartas, agus chi gach sluagh a ghloir.

7 Bithidh² amhladh orra-san uile a ni seirbhis do dhealbhaibh snaidhte, a ni uail³ à h-ìodholaibh: sleuchdaibh dha, a dhée uile.

8 Chuala Sion, agus bha aoibhneas oirre; agus rinn nigheana Iudah gairdeachas air son do bhreitheanas, a Thighearn.

9 Oir a ta thusa, a Thighearn, àrd os ceann na talmhainn uile; tha thu air f'àrdachadh gu mòr os ceann nan uile dhée.

10 Sibhsa a ghràdhaicheas an Tighearna, fuathaichibh olc: gleidhidh e anaman a naomh; à laimh nan aingidh saoraidh e iad.

11 Dh'éirich³ solus do'n fhìrean, agus aoibhneas dhoibhsan a tha ionraic 'nan cridhe.

12 Biodh aoibhneas⁴ oirbh, fhìreana, anns an Tighearn; agus thugaibh buidheachas ri cuimhneachadh air a naomhachd.

SALM XCVIII.

1 *Chuir an salmadar an céill slàinte Dhé d'a phoball Israel. Thug e earail do'n t-sluagh buidheachas a thabhairt do Dhia.*

Salm.

O SEINNIBH do'n Tighearna laoidh⁵ nuadh, oir rinn e nithe iongantach: dh'oibrich a dheas làmh agus a ghairdean naomh slàinte dha⁶.

2 Thaisbein an Tighearn a shlàinte; an sealladh nan cinneach dh'fhoillsich e fhìreantachd.

3 Chuimhnich e a thròcair agus fhirinn do theaghlach Israeil; chunnaic uile chrìocha na talmhainn slàinte ar Dé.

4 Togaibh iolach ait do'n Tighearn, a threan uile⁷: togaibh bhuir guth, deanaibh gairdeachas, agus seinnibh cliù.

5 Seinnibh do'n Tighearn le clàrsaich; le clàrsaich agus guth sailme.

6 Le trompaidibh agus guth na h-adhaic⁸, togaibh iolach ait an làthair an Rìgh Iehobhah.

7 Beucadh an fhairege agus a làn, an saoghal agus iadsan tha 'nan còmhnuidh ann.

8 Buaileadh na tuitlean am bosan; cuid-eachd deanadh na beannta luathghaire

9 An làthair an Tighearn; oir tha e a' teachd a thabhairt breth air an talamh: bheir e breth air an t-saoghal am fireantachd, agus air na slòigh an ceartas.

SALM XCIX.

1 *Tha am fàidh a nochdadh gu bheil Dia 'na rìgh os ceann na talmhainn, 5 agus gur còir sleuchdadh aig stòl a chos.*

THA'N Tighearn a' rìoghachadh; chriothnaicheadh na slòigh: the e 'na shuidhe eadar cherubhan: biodh crith air an talamh.

2 Tha'n Tighearna mòr ann an Sion, agus tha e àrd os ceann gach sluagh.

3 Moladh iad t'ainm mòr agus uamhasach: is naomh e.

4 Agus is toigh leis an Rìgh chumhachdach⁹ breitheanas: is tu a shocruch-eas a' chòir; ni thusa breitheanas agus ceartas an an Iacob.

5 Ardaichibh an Tighearn ar Dia, agus sleuchdaibh aig stòl a chos: is naomh esan.

6 Bha Maois agus Aaron am measg a shagart, agus Samuel 'nam measg-san a ghairm air 'ainm: ghairm iadsan air an Tighearn, agus fhreagair esan iad.

7 Am baideal¹⁰ neoil labhair e riu: ghléidh iad a theisteis, agus an reachd a thug e dhoibh.

8 A Thighearn ar Dia, fhreagair thusa

buaidh a mach dha. Faic Isaia, Caib. LXIII. r. 5.

⁷ uile luchd-àiteachaidh na talmhainn.

⁸ a' bhuabhuill, na gall-truimp; cornet. Sasg.

⁹ le neart an Rìgh. Eabh. ¹⁰ stac, meall, uathne.

¹ mu'n cuairt.

² Biodh.

³ Chuireadh, Shìol-chuireadh.

⁴ aiteas, gairdeachas.

⁵ òran.

⁶ thug a dheas-làmh agus a ghairdean naomh

iad: is tu an Dia a thug maitheanas dhoibh, ged rinn thu dioghaltas air son an gnìomhara¹.

9 Ardaichibh an Tighearn ar Dia, agus sleuchdaibh aig a shliabh naomh: oir is naomh an Tighearn ar Dia.

SALM C.

1 Earail gu seirbhis a dheanamh do Dhia mar ar cruithfhear agus ar fear-saoraidh, 4 agus gu cliù a thabhairt da air son a mhaithais, a thròcair agus fùirinn.

Salm molaiddh.

TOGAIBH iolach ait do'n Tighearn, a threan uile.

2 Deanaibh seirbhis do'n Tighearna le li-aobhneas, thigibh 'na fhianuis le luathghaire².

3 Biodh fios agaibh gur e'u Tighearn a's Dia ann: is e a rinn sinn, agus cha sinn féin; is sinn a shluagh, agus caorach 'ionaltraidh-san.

4 Thigibh a steach 'na gheataibh le buidheachas, 'na chùirtibh le moladh; thugaibh buidheachas dha, beannaichibh 'ainm.

5 Oir tha'n Tighearna maith; mairidh a thròcair gu bràth, agus f'hirinn o linn gu linn,

SALM CI.

1 Chuir Daibhidh roimhe gu'n gluaiseadh e ann an ionracas a chridhe, 5 agus gu'n gearradh e as luchd-deanamh an uile.

Salm le Daibhidh.

MU thròcair agus breitheanas canaidh mi: dhuitse, a Thighearna, seinnidh mi.

2 Iomchairidh mi mi fein gu glic air slighe ionraic³; O c'uin a thig thu a m' ionnsuidh⁴? gluaisidh mi ann an ionracas mo chridhe an meadhon mo thighe.

3 Cha chuir mi ni ole sam bith fa chomhair air mo shùl: is fuathach leam obair luchd eusaontais; cha lean i rium.

4 Triallaidh cridhe iargalt⁵ uam; air an daoib⁶ cha chuir mi eòlas.

5 An ti gu diomhair a bheir beum d'a choimhearsnach, esan gearraidh mi as; an ti aig am bheil sealladh àrd, agus cridhe uaibhreach, esan cha'n fhuiling mi.

6 Bithidh mo shùilean air fireanaibh na tìre, chum gu gabh iad còmhnuidh leam: esan a ghluaiseas ann an slighe ionraic, ni e seirbhis dhomh.

7 Cha ghabh fear-deanamh ceilge còmhnuidh ann am thigh; cha'n fhuirich fear-labhairt bhreug fa chomhair air mo shùl.

8 Gu moch gearraidh mi as uile dhroch dhaoine na tìre; chum gu sgath mi as o chaithir an Tighearn⁷ uile luchd-deanamh an uile.

SALM CII.

1 *Thaom am fàidh a ghearan an làthair Dhé. 12 Chuimhnich e air tròcair an Tighearn d'a shluagh, agus ghlaic e misneach. 23 Tha Dia neo-chaohluidheach 'na bhith.*

Urnuigh air son duine thruaigh 'nuair a bhios e air a shàruchadh, agus a thaomas e a ghearan an làthair an Tighearn.

A THIGHEARN, éisd ri m'urnuigh, agus thigeadh mo ghlaodh a d'ionnsuidh.

2 Na foluich do ghnùis uam ann an là mo theinn: aom do chluas rium san là air an gairm mi ort; éisd rium gu grad.

3 Oir tha mo làithean air teireachdainn mar dheataich, agus tha mo chnàmhan air an losgadh mar theinntein⁸.

4 Tha mo chridhe air a bhualadh, agus air seargadh mar fheur; air chor as nach cuimhne leam m'aran itheadh.

5 Le guth m'osnaich, lean mo cnàmhan ri m'fheoil⁹.

6 Tha mi cosmhuil ri pelican an fhàsaich; tha mi mar chomhachaig¹⁰ nan ionad aonaranach.

7 Tha mi ri faire, agus tha mi mar eun¹¹ 'na aonar air mullach tighe.

8 Air feadh an là tha mo naimhde gam' mhasluchadh; agus iadsan a tha air bhoile rium, mhionnaich iad a'm' aghaidh¹².

9 Oir dh'ith mi luath mar aran, agus mheasg ni mo dheoch le m'dheuraibh¹³.

10 Trid do chorruich agus t'fheirge; oir thog thu mi suas, agus leag thu mi sìos.

11 Tha mo làithean, mar sgàile, ag aomadh sìos; agus tha mi féin, mar fheur, air seargadh.

12 Ach mairidh tusa, a Thighearna, gu bràth, agus do chuimhne o linn gu linn.

13 Eiridh tusa, ni thu tròcair air Sion; oir tha'n t-àm gu deadh-ghean¹⁴ a nochdadh dhi, seadh, an t-àm suidhichte air teachd.

14 Oir tha do sheirbhisich a' gabhail tlachd 'na clachaibh, agus tha deadh rùn aca d'a luathre.

15 Mar sin bithidh eagal air na cinnich roimh ainm an Tighearn, agus air uile rìghribh na talmhainn roimh a' ghlòir.

16 An uair a thogas an Tighearna suas Sion, chithear e 'na ghlòir.

17 Bheir e 'n aire do urnuigh nan diob-

¹ an innleachda.

² le fonn ait.

³ fhoirfe, iomlain.

⁴ nuair a thig thu a

m' ionnsuidh.

⁵ reasgach, ana-mèineach.

⁶ an droch dhùine.

⁷ o mhòr-bhaile an Tigh-

earna.

⁸ theallach.

⁹ ri m' chraicinn.

¹⁰ chaillich-oidhche.

¹¹ ghealbhoann.

¹² orm.

¹³ le gul.

¹⁴ gràs, truacantas.

¹⁵ do.

arach¹, agus cha dean e tàir air an ath-chuinge.

18 Sgrìobhar so do'n àl ri teachd; agus molaidh an sluagh a ghinear² an Tighearn.

19 Oir dh'amhairc e nuas o àirde a naomhachd³ féin; o na nèamhaibh sheall an Tighearn air an talamh.

20 A chluinntinn osnaich a' phrìosan-ach⁴, chum fuasgladh orra-san a dh'ord-nicheadh chum bàis⁵;

21 Chum ainm an Tighearna chur an céill ann an Sion, agus a chliù ann an Ierusalem;

22 An uair a chruinnichear na slòigh le chéile, agus na rìoghachda, gu seirbhis a dheanamh do'n Tighearna.

23 Chlaoidh e anns an t-slighe mo neart; ghiorraich e mo làithean.

24 Thubhairt mi, Mo Dhia, na tabhair air falbh mi ann am meadhon mo làithean: *tha* do bhliadhanan-sa air feadh nan uile linn.

25 O chian⁶ leag thu bunaite na talmhainn; agus *is* iad na nèamhan obair do làmh.

26 Théid as doibhsan⁷, ach mairidh tusa: fàsaidh iadsan uile sean mar eudach; mar thrusgan caochlaidh tu iad, agus bithidh iad air an caochladh⁸.

27 Ach *is* tusa an Ti ceudna, agus cha chrìochnaichear do bhliadhanan.

28 Mairidh clann do sheirbhiseach, agus daingnichear an sliochd a'd' fhianuis.

SALM CIII.

1 *Eavail gu cliù a thoirt do Dhia do bhrìgh gu bheil a mhaithreas mòr, 15 agus a thròcair o shiorruidheachd orra-san d'an eagal e.*

Salm le Dàibhidh.

BEANNAICH an Tighearn, O m'anam; agus *moladh* gach ni a ta'n taobh a stigh dhiom, 'ainm naomh-san.

2 Beannaich an Tighearn, O m'anam; agus na dluimhnnich a thiodhlacan uile.

3 'Se mhaithreas dhuit do pheacanna gu léir, a shlànuaicheas t'euslaintean⁹ uile;

4 A shaoras thu le caoimhneas-gràidh agus caomh-thròcairibh.

5 A shàsuicheas do bheul le nithibh maithle, air chor as gu'n ath-nuadhaichear t'òige, mar òige na h-iolaire.

6 Ni an Tighearna ceartas agus breitheanas dhoibhsan uile a tha air an sàruchadh¹¹.

7 Dh'fhoillsich e a shlighean do Mhaois, a ghnìomhara do chloinn Israeil.

8 *Is* thròcaireach agus *is* gràsmhor an

Tighearn, mall chum feirge, agus pailt ann an caoimhneas-gràidh¹².

9 Cha chronaich e gu siorruidh, agus cha ghléidh e *'fhearg* gu bràth.

10 A réir ar peacanna cha d'rinne oirnn, agus a réir ar n-eucearta cha d'thug e luigheachd dhuinn.

11 Oir mar a ta na nèamhan àrd¹³ os ceann na talmhainn, *mar sin* a ta a thròcair¹⁴ mòr d'an taobh-san d'an eagale.

12 Co fhad as a ta 'n àird an ear o'n àird an iar, co fhad as a sin chuir e uainn ar n-eusaontais.

13 Mar a ghabhas athair truas d'a chloinn, gabhaidh an Tighearna truas dhiubhsan d'an eagale.

14 Oir *is* aithne dha ar dealbh; *is* cuimhne leis gur duslach sinn.

15 An duine, mar fheur *tha* a làithean; mar bhlàth ua macharach, mar sin fàsaidh e fo bhlàth.

16 Oir gabhaidh a' ghaoth thairis, agus cha *bhi* e ann; agus cha'u aithnich 'ionad féin e ni's mò.

17 Ach *a ta* thròcair an Tighearn o shiorruidheachd orra-san d'an eagale, agus 'fhìreantachd do chloinn *an* cloinne;

18 Dhoibhsan a chumas a choimhcheangal, agus a chuimhnichas 'aith-eanta, chum an deanamh.

19 Shocrum an Tighearn arigh-chaithir anns na nèamhaibh; agus *tha* a rìoghachd a' riaghladh os ceann nan uile.

20 Beannaichibh an Tighearna, sibhse 'aingle, treun an neart, a' deanamh 'iarr-tuis, ag éisdeachd ri fuaim 'fhocail¹⁵.

21 Beannaichibh an Tighearn, a shlòigh uile, sibhse a luchd-frìthealaidh a ni a thoil.

22 Beannaichibh an Tighearn, 'oibre uile, anns gach àit d'a thighearnas: beannaich an Tighearn, O m'anam!

SALM CIV.

1 *Mòralachd, cumhachd, agus freasdal Dé. 31 Mairidh glòir an Tighearna gu bràth. 33 Gheall am fàidh gu'n canadh e moladh do Dhia an cian a bha e beò.*

BEANNAICH an Tighearn, O m'anam! A Tighearna mo Dhia, *tha* thusa ro mhòr; le h-urram agus mòralachd¹⁶ *tha* thu air do sgèadachadh.

2 *Tha* thu a' cur soluis umad mar thrusgan, a' sìneadh a mach nan nèamh mar chuirtein.

3 *Tha* e a' leagadh sailean a sheòmar anns na h-uigseachaibh, a' deanamh nan neul 'nan carbad dha féin, a' siubhal air sgiathaibh na gaoithe;

¹ nan daoine bochd, lom.

² a chruthaichear.

³ 'ionaid naoinn.

⁴ osnaidh a' chionnach.

⁵ air clann a' bhàis.

⁶ An toiseach, air tùs.

⁷ Teirgidh iadsan.

⁸ air am mùthadh air an

atharrachadh.

⁹ cucailean.

¹⁰ o'n t-sliochd. Eabh. ¹¹ fo fhòirneart.

¹² thròcair.

¹³ a réir àirde nan nèamh.

¹⁴ a ghràs, a chaoimhneas gràdhach.

¹⁵ guth 'fhocail.

¹⁶ glòir.

4 A' deanamh 'aingle 'nan spioradaibh, a luchd-frithealaidh 'nan teine lasarach¹.

5 Shuidhich e an talamh air a bhunaitibh, chum nach gluaisteadh e gu bràth.

6 Leis an doimhneachd, mar le trusgan, chòmlaich² thu e; sheas na h-uisgeacha os ceann nam beann.

7 O t'achmhasan-sa theich iad, o ghuth do thairneanaich ghreus iad rompa.

8 Chaidh iad suas ri taobh nam beann; chaidh iad sìos air feadh nan gleann do'n àit a dh'orduich thusa dhoibh.

9 Shuidhich thu crìoch air nach téid iad thairis; chum nach pill iad a ris a chòmh-dachadh³ na talmhainn.

10 Tha e a' cur thobar anns na gleanntaibh, a tha a' ruith air feadh nam beann.

11 Bheir iad deoch do uile bheathaichibh na macharach: coisgidh na h-asail fhiadhaich an iotadh⁴.

12 Am fagus doibh còmhnuichidh eunlaith nan speur, a bhios a' seinn am measg nan geug.

13 Uisgichidh e na beanntan o 'sheòmarachibh: le toradh a⁵ ghnìomh sasuichear an talamh.

14 Bheir e air feur fàs do'n spréidh, agus air luibh chum seirbhis⁶ an duine, chum aran a thabhairt as an talamh,

15 Agus fion a ni cridhe an duine subhach, oladh a ni a ghnùis dealrach, agus aran a neartaicheas cridhe an duine.

16 Tha craobhan an Tighearna làn brìge, seudair Lebanoin a shuidhich e:

17 Far an dean na h-eoin an nid; aig an store⁷ tha na craobhan giuthais⁸ mar ionad-tàimh.

18 Tha na beanntan àrda 'nan tearmunn do na gabhair fhiadhaich; na creagan do na coineanaibh⁹.

19 Rinn e a' ghealach air son aimsirean; is aithne do'n ghréin mar a luidheas i.

20 Ni thu dorchadas, agus tha'n oidhche ann: an sin snàigidh uile bheathaiche na coille mach.

21 Beucaidh na leòmhain òga air son cobhartaich, agus ag iarraidh am bidh air Dia.

22 Eiridh a' ghrian, cruinnichidh iad le chéile, agus 'nan àitibh-tàimh luidhidh iad.

23 Théid an duine mach gu 'obair, agus gu 'shaothair gu feasgar.

24 Cia lìonmhor t'òibre, a Thighearn! ann an gliocas rinn thu iad gu léir: tha'n talamh làn le d' shaoibhreas:

25 Mar an ceudna ancuair so a ta mòr

agus farsuinn, anns am bheil creutairean snàigeach¹³ gun àireamh, araon beathaichean beaga agus mòra.

26 An sin siubhlaidh na longan; agus an Lebhiatan sin, a dhealbh thu gu sugradh ann.

27 Feithidh iad sin uile ortsa, chum gu'n tabhair thu dhoibh am biadh 'na thràth.

28 Bheir thusa dhoibh, cruinnichidh iad-san; fosgailidh tu do làmh, sàsuichear iad le maith.

29 Foluichidh tu do ghnùis, bithidh iad fo amlhoadh; bheir thu uatha an deò, eugaidh iad, agus pillidh iad ri'n ùir¹¹.

30 Cuiridh tu mach do spiorad, cruthaichear iad; agus ath-nuadhaichidh tu aghaidh na talmhainn.

31 Mairidh glòir an Tighearna gu bràth; ni an Tighearna gairdeachas 'na oibribh.

32 Seallaidh e air an talamh, agus crìothnaichidh e; beanaidh e ris na beanntaibh, agus bithidh deatach dhiubh.

33 Seinnidh mise do'n Tighearn an cian is beò mi; canaidh mi moladh do m' Dhia fhad's a bhios bith agam.

34 Bithidh mòr smuaintean air milis¹²; ni mi gairdeachas anns an Tighearna.

35 Sgriosar peacaich a mach as an talamh, agus cha bhi¹³ na h-aingidh ann ni's mò. Beannaich an Tighearn, O m'anam. Molaibhse an Tighearn.

SALM CV.

1 Is còir buidheachas a thabhairt do Dhia, agus a ghnùis iarraidh a ghnàth. 8 Nochd an salmatar freasdaid Dé do Abraham; 16 do Ioseph: 23 agus do Israel san Eiphit, &c.

THUGAIBH buidheachas¹⁴ do'n Tighearna; gairmibh air 'ainm; foillsichibh¹⁵ am measg nan sluagh a ghnìomhara.

2 Seinnibh dha; seinnibh sailm dha; labhraibh air 'oibribh iongantach-san gu léir.

3 Deanaibh uail á 'ainm naomh-san: biodh gairdeachas air cridhe na droinge a dh'iaras an Tighearn.

4 Iarraibh an Tighearn agus a neart; iarraidh a ghnùis a ghnàth.

5 Cuimhnichibh 'oibrean iongantach a rinn e; a chomharan¹⁶ agus breitheanais a bhéil,

6 O sibhse a shliochd Abraham 'òg-laich-san, sibhse a chlanan Iacoib a dhaoine taghta-san.

7 Is esan an Tighearn ar Dia-ne; air

¹ A' deanamh a theachdairean do na gaothaibh, a luchd-frithealaidh do'n teine lasarach.

² dh'fholuich.

³ a dh'fholach.

⁴ an tart, am patladh.

⁵ do.

⁶ feuma.

⁷ a' chorra-bhàin.

⁸ giuthais.

⁹ sapah. Eabh.

¹⁰ snàigeach, gluasadach.

¹¹ duslach, luathhre.

¹² mo smuainté tainneach dha.

¹³ na biodh.

¹⁴ moladh, cliù.

¹⁵ deanaibh aithnichte.

¹⁶ iongantasan.

feadh na talmhainn uile *tha* a bhreith-eanaibh.

8 Chuimhnich e gu sìorruidh a choimhcheangal, am focal *a* dh'orduich e do mhìle ginealach;

9 A rinn e ri h-Abraham, agus a mhionn-an do Isaac;

10 Agus dhaingnich e sin do Iacob mar reachd¹, do Israel mar choimhcheangal bith-bhuan;

11 Ag ràdh, Dhuit-se bheir mi fearann Chanaain, crannchur bhuir n-oidhreacht.

12 An uair nach robh iad ach ro thearce an àireamh, agus 'nan coigrich ann;

13 Agus a chaidh iad o chinneach gu cinneach, o rioghachd gu sluagh eile;

14 Cha do leig e le duine sam bith eucoir a dheanamh orra, agus smachdaich e rìghrean air an son;

15 *Ag ràdh*, Na beanaibh ri m' dhaoineibh ungtà, agus air m'fhàidhibh na dean-aibh cron.

16 Agus ghairm e gorta air an tìr; bhris e uile lorg an arain.

17 Chuir e duine rompa, Ioseph, *a* reic-eachd mar thràill.

18 Le geimhlìbh dhochainn iad a chosan; chuireadh an iarunn e gu teann;

19 Gu ruig an t-àm anns an d'thàinig a bhriathar: dhearbhadh focal an Tighearn e.

20 Chuir an rìgh *teachdair* uaith, agus dh'fhuasgail e air; uachdaranant-sluaigh, agus leig e saor as e.

21 Rinn se e 'na thighearn air a thigh, agus 'na uachdaran os ceann a mhaoin uile;

22 Chum gu'n ceangladh e 'àrd-cheannardan a réir a thoile, agus gu'n deanadh e a sheanairean glìc.

23 Agus thàinig Israel do'n Eiphit, agus bha Iacob air chuairt ann an tìr Cham².

24 Agus thug e air a shlugh fàs ro lìonmhor, agus rinn e ni bu treise iad na'n naimhdean.

25 Dh'iompaich e an cridhe gu fuath a thoirt d'a shlugh, agus gu buntainn gu cealgach r'a sheirbhìshich.

26 Chuir e *d'an ionnsuidh* Maois 'òg-lach féin, Aaron a thagh e.

27 Nochd iad a chomharan 'nam measg, agus a bheartan iongantach ann an tìr Cham.

28 Chuir e mach dorchadas, agus bha dorchadas ann³; agus cha d'rinn iad ceannaire an aghaidh 'fhocail.

29 Thionndaidh e an uisgeacha gu fuil, agus mharbh e an iasg.

30 Thug an tìr a mach losgainn⁴ gu pailt, ann an seòmraichibh an rìghrean.

31 Labhair e⁵, agus thàinig iomadh gnè chuireag⁶ agus mialan 'nan crìoch-aibh uile.

32 Air son an uisge thug e dhoibh clach-mheallain⁷, agus teine lasarach⁸ 'nan tìr.

33 Agus bhuail e an croinn-fhìona agus an croinn-fhìge; agus bhris e craobhan an crìoch.

34 Labhair e, agus thàinig locuist, agus burruis, agus sìn gun àireamh;

35 Agus dh'ith iad gach luibh 'nan tìr; agus dh'ith iad meas⁹ am fearainn.

36 Agus bhuail e gach ceud-ghin 'nan tìr, toiseach an neirt uile.

37 Agus thug e mach iad le h-airgiod agus le h-òr: agus 'nan treubhaibh uile cha robh aon neach lag.

38 Bha aoibhneas air an Eiphit an uair a chaidh iad a mach; oir thuit an eagalsan orra.

39 Sgaol e neul mar chòmhdach¹⁰, agus teine gu solus a thoirt san oidhe.

40 Dh'iarr iad, agus thug e dhoibh gearra-goirt; agus le h-aran nèimh shàs uich e iad.

41 Dh'fhosgail e a' chreag, agus bhrùchd uisgeacha mach; ruith iad air na h-ionadaibh tioram mar amhainn.

42 Oir chuimhnich e a ghealladh naomh do Abraham a sheirbhiseach.

43 Agus thug e mach a shlugh le h-aoibhneas, a dhaoine taghta le gairdeachas.

44 Agus thug e dhoibh fearann nan cinneach; agus shealbhaich iad saothair nan sluagh;

45 Chum gu tugadh iad fa'near a reachdan, agus gu gleidheadh iad a lagh-anna. Molaibh an Tighearna.

SALM CVI.

1 Chomhairlich an salmador do'n t-sluagh *Dia a mholadh air son a mhaithéis*. 4 Ghuidh e gu'n cuimhnicheadh Dia orra le a dheadh-ghean. 6 Chuir e an cèill ceannaire Israeil; 47 agus chrìochnaich e le urnuigh.

MOLAIBH an Tighearn. O thug-aibh buidheachas do'n Tighearn, oir *tha* e maith, oir gu bràth *mairidh* a thròcair.

2 Cò is urrainn gnìomhara treuna an Tighearn a chur an cèill? cò is urrainn a chliù uile fhoillseachadh?

3 Is beannaichte iadsan a choimhneas¹¹ breitheanas, a ni ceartas anns gach àm.

4 Cuimhnich oirn¹², a Thighearna, leis an deadh-ghean *a nochdas tu do d'* shlugh féin: O fiosraich¹³ sinn le d' shlàinte:

¹ lagh. ² Ham. ³ dhorchaidh e.

⁴ bhrùchd an talamh a mach losgainn.

⁵ Dh'athn e. ⁶ sgaoth chuireag.

⁷ clach-sheachd.

⁸ teine dealanaich.

⁹ toradh.

¹⁰ bhrat.

¹¹ ghleidheas.

¹² orm.

¹³ mi.

5 Chum gu faic sinn¹ maith do dhaoine taghta, chum gu dean sinn aoibhneas ann an aoibhneas do chinnich; chum gu dean sinn uail le t' oighreachd-sa.

6 Pheacaich sinne le'r n-aithrichibh; rinn sinn gu h-olc, rinn sinn gu h-aingidh.

7 Cha do thuig ar n-aithriche² t' iong-auntas anns an Eiphit; cha do thuig iad lìonmhoireachd do thròcairean, ach bhrosnuich iad *thu*³ làimh ris a' mhuir, aig a' mhuir ruaidh.

8 Gidheadh theasairg e iad air sgàth 'ainme féin; chum gu nochdadh e a chumhachd.

9 Agus smachdaich e a' mhuir ruadh, agus thiormaicheadh i; agus threòraich e iad⁴ troimh na doimhneachdaibh, mar troimh fàsach.

10 Agus theasairg e iad o làimh an tì a thug fuathl *dhoibh*, agus shaor e iad o làimh an nàmhaid.

11 Agus dh'fholuich na h-uisgeachan an eascairde: cha d'fhàgadh aon diubh.

12 An sin chreid iad a bhriathran⁵, agus sheinn iad a chliù.

13 Gu luath dh'chluimhnich iad a' ghnìomhara; cha d'fheith iad r'a chomhairle.

14 Ach ghlac ana-miann iad⁶ san fhàsach, agus bhuair⁷ iad Dia anns an ionad uaigneach.

15 Agus thug e dhoibh an iarrtus, ach chuir e caoile⁸ air an anam.

16 Agus ghabh iad farmad ri Maois anns a' champ, agus ri h-Aaron *sagart* naomh an Tighearn.

17 Dh'fhosgail an talamh, agus shluig e sìos Datan, agus dh'fholuicheadh cuideachd Abiram.

18 Agus las teine 'nan cuideachd; loisg an lasair suas na droch dhaoine.

19 Rinn iad laogh ann an Horeb, agus shleuchd iad⁹ do'n dealbh leaghta.

20 Agus claochail iad an glòir gu cosamhlachd dainh a dh'itheas feur.

21 Dh'chluimhnich iad Dia am Fear-saoraidh, a rinn nithe mòra anns an Eiphit;

22 Nithe iongantach ann an tìr Cham, nithe uamhasach aig a' mhuir ruaidh:

23 Uime sin thubhairt e gu'm milleadh¹⁰ e iad, mur bhiheadh gu'n do sheas 'òg-lach taghta Maois fa chomhair anns a' bheirn¹¹ gus a chorruih a thionndadh natha, chum nach sgriosadh e iad.

24 Agus rinn iad tarcuis air an tìr thaitnich: cha do chreid iad 'fhocal.

25 Agus riun iad gearau 'nam bùth-aibh¹²; agus cha d'èisd iad ri guth an Tighearn.

26 An sin thog e a làmh¹³ 'nan aghaidh, a thoirt orra tuiteam anns an fhàsach;

27 Agus a thilgeadh sìos an sìochd am measg nan cinneach, agus gu'n sgaoil-eadh air feadh nan tìr.

28 Mar an ceudna naisg iad iad féin ri Baal-peor, agus dh'ith iad iobairtean nam marbh.

29 Agus bhrosnuich iad e le'n gnìomh-araibh¹⁴; agus bhris a' phlàigh a steach orra.

30 An sin sheas Phinehas, agus chuir e breitheanas an gnìomh; agus choisgeadh a' phlàigh.

31 Agus mheasadh sin dha mar fhìr-eantachd o linn gu linn gu bràth.

32 Chuir iad fearg air mar an ceudna aig uisgeachaibh Mheribah¹⁵; agus dh'èir-ich olc do Mhaois air an son.

33 Oir bhrosnuich iad a spiorad, air chor as gu'n do labhair e gu h-aithghearr le 'bhilibh.

34 Cha do sgrios iad na slòigh, mu'n d'thug an Tighearn àithne dhoibh

35 Ach choimh-mheasg iad iad féin am measg nan cinneach, agus dh'fhòghluim iad an oibre.

36 Agus rinn iad seirblis d'an iodhol-aibh¹⁶, a bha mar ribe dhoibh.

37 Agus dh'ìobair iad am mic agus an nigheana do dheamhanaibh,

38 Agus dhòirt iad fuil neò-chiontach, fuil am mac¹⁷ agus an nigheana, a dh'ìobair iad do iodholaibh Chanaain: agus thruaill-eadh an tìr le fuil.

39 Agus rinneadh neòghlan iad le'n oib-ribh, agus chaidh iad air striopachas le'n gnìomharaibh¹⁸.

40 Agus las fearg an Tighearn an aghaidh a shluaigh, agus ghabh e gràin d'a oighreachd.

41 Agus thug e suas iad do làimh nan cinneach: agus bha iadsan a dh'fhuath-aich iad, 'nan uachdarain os an ceann.

42 Agus shàruich an naimhdean iad; agus leagadh gu h-ìosal iad fo'n làimh.

43 Iomadh uair shaor e iad; ach bhrosnuich iad e le'n comhairlibh, agus thug-adh sìos iad air son an cionta.

44 Gidheadh thug e an àmhghar fa'n-ear¹⁹, an uair a chual' e an glaoth:

45 Agus chuimhnich e dhoibh a choimh-cheangal, agus ghabh e aithreachas a réir lìonmhoireachd a thròcair²⁰.

¹ mì. ² Cha d'thug ar sinnseara fa'near.

³ bha iad ceannaircheach. ⁴ thug e orra imeachd.

⁵ 'fhocal. ⁶ loisg iad le h-ana-miann.

⁷ dhearb. ⁸ claoidl, sgrios.

⁹ rinn iad aoradh. ¹⁰ sgriosadh.

¹¹ bheum, bhriseadh. ¹² pàillionaibh, pubullaibh.

¹³ mhìonnaich e.

¹⁴ innleachdaibh.

¹⁵ uisgeachaibh na comh-stri.

¹⁶ diath-aibh-bréige.

¹⁷ clann mhac.

¹⁸ innleachdaibh.

¹⁹ dh'amhairc e orra 'nan teinn.

²⁰ a réir saoirseis a ghràis.

46 Agus fhuair e tras¹ dhoibh an sealladh na muinntir sin a thug leo 'nam braighdibh iad.

47 Saor sinn, a Tighearn ar Dia, agus tionail sinn o mheasg nan cinneach, chum buidheachas² a thabhairt do t'ainm naomh-sa, chum caithream³ a dheanamh ann ad chliù.

48 Gu ma beannaichte an Tighearna Dia Israeil o shiorruidheachd gu siorruidheachd! agus abradh an sluagh uile, Amen. Molaibhse an Tighearn.

SALM CVII.

1 *Chomhairlich Daibhidh do'n t-sluagh Dia a moladh air son a mhaithéis, 6 agus air son a fhreasdail d'an taobh anns gach teanntachd.*

O THUGAIBH buidheachas⁴ do'n Tighearn, oir *tha* e maith, oir gu bràth mairidh a thròcair.

2 *Mar so* abradh iadsan a shaoradh leis an Tighearn, a shaor e o làimh an nàmhaid;

3 Agus a chruinnich e as na tìribh, o'n àird an ear agus o'n àird an iar, o'u àirde tuath agus o'n àirde deas⁵.

4 Chaidh iad air seacharan anns an fhàsach, ann an ionad uaigneach; slighe⁶ gu baile tàimh⁷ cha d'fhuair iad.

5 Ocrach agus tartmhor, dh'fhàilnich an anam anna.

6 An sin ghlaodh iad ris an Tighearna 'nan airc, agus as an teanntachdaibh⁸ shaor e iad.

7 Agus threòraich e iad air slighe cheirt, chum gu moladh iad gu baile tàimh.

8 O gu moladh daoine Dia air son a mhaithéis⁹, agus air son a bhearta iongantach do chloinn nan daoine!

9 Oir shàsuich e an t-anam ciòcrach¹⁰, agus lìon e an t-anam ocrach le maith.

10 Iadsan a shuidh ann an dorchadas agus ann an sgàile a' bhàis, ceangailte ann an truaighe agus an iarunn,

11 A chionn gu'n d'rinn iad ceannaire an aghaidh bhriathar Dhé, agus gu'n d'rinn iad tàir air comhairle an Tì a's àirde;

12 Aig an do leagadh¹¹ sìos an cridhe le docair¹²: thuit iad, agus cha robh fear-cuideachaidh ann:

13 An sin ghlaodh iad ris an Tighearna 'nan airc, agus as an teanntachdaibh shaor e iad.

14 Thug e iad á dorchadas agus á sgàile a' bhàis, agus bhris e o chéile an cuibhrach.

15 O gu moladh daoine an Tighearn

air son a mhaithéis, agus air son a bhearta iongantach do chloinn nan daoine!

16 Oir bhris¹³ e na geatachan umha¹⁴, agus ghear e sìos na croinn iarunn.

17 Bha amadain, air son an eusaontais¹⁵ agus air son an eucearta, fo àmhghar¹⁶.

18 Do gach biadh ghabh an anam gràin, agus thàinig iad dlùth do gheat-aibh bàis.

19 An sin ghlaodh iad ris an Tighearna 'nan airc, agus as an teanntachdaibh shaor e iad.

20 Chuir e 'fhocal uaithe, agus shlànuich e iad; agus shaor e iad o sgrios¹⁷.

21 O gu moladh daoine an Tighearn air son a mhaithéis, agus air son a bhearta iongantach do chloinn nan daoine!

22 Agus gu'n ìobradh iad ìobairte buidheachais, agus gu'n cuireadh iad an céill a ghnìomhara le luathghaire!

23 Iadsan a théid sìos do'n fhaire air longaibh, a ni obair air uisgeachaibh mòra,

24 Chi iadsan gnìomharan an Tighearn, agus a bhearta iongantach¹⁸ san doimhne.

25 Oir labhraidh e, agus dùisgidh e a' ghaoth dhoinionnach, agus togaidh i a tonnan¹⁹.

26 Théid iad suas do na nèamhaibh, théid iad sìos do na doimhneachdaibh; le h-àmhghar leagaidh an anam.

27 Théid iad thuige²⁰ agus uaithe, agus tuislichidh iad mar dhuine air mhuig; agus théid as d'an céill uile²¹.

28 An sin glaothaidh iad ris an Tighearna 'nan airc, agus as an teanntachdaibh bheir e iad.

29 Cuiridh e an doinionn gu féith; agus bithidh a tonnan 'nan tàmh.

30 An sin bithidh iad ait, a chionn gu'm bi iad sàmhach; agus bheir e iad do'n chialadh a's miannach leo.

31 O gu moladh daoine an Tighearn air son a mhaithéis, agus air son a bhearta iongantach do chloinn nan daoine!

32 Agus gu'n àrdaicheadh iad e ann an coimhthional an t-sluaigh, agus ann an àite-suidhe²² nan seanair gu moladh iad e!

33 Ni e aimhniche 'nam fàsach, agus tobair uisge 'nan talamh tartmhor²³.

34 Fearann beartach *ni* e fàs²⁴, air son aingidheachd a luchd-àiteachaidh.

35 Ni e fàsach 'na linne uisge, agus fearann tioram 'na thobraichibh uisge.

36 Agus an sin bheir e air na h-ocraich còmhnuidh a ghabhail; agus deasaichidh iad baile tàimh²⁵;

¹ bàigh, tòchd.

² moladh.

³ uail.

⁴ moladh.

⁵ o'n mhuir ruaidh. Eabh.

⁶ air slighe uaignich.

⁷ baile còmhnuidh.

⁸ àmhgharaibh.

⁹ a thròcair.

¹⁰ miannach.

¹¹ leag c.

¹² saothair.

¹³ bhris.

¹⁴ praise.

¹⁵ le slighe an eusaontais. Eabh.

¹⁶ air an cràdh. ¹⁷ o shlochdaibh truaillidhachd.

¹⁸ iongantais-san.

¹⁹ tonna na faire.

²⁰ chuige.

²¹ sluingear suas an

eiall uile, teirgidh an scètlachd uile.

²² cruimeachaidh.

²³ tioram, cruaidh.

²⁴ goirt, bochd, gun toradh.

²⁵ chum còmhnuidh ann.

37 Agus siol-chuiridh iad achanna, agus suidhichidh iad fion-liosan; agus bheir iad toradh pailt¹ uatha.

38 Agus beannaichidh e iad, agus fàsaidh iad ro lionmhor; agus cha lughdaich e an spréidh.

39 Ach *ma pheacaicheas iad*, lughdaichear agus leigear sìos iad le fòirmeart, olc², agus doilgheas.

40 Dòirtidh e tarcais air àrd-uaislibh³, agus cuiridh e air seacharan iad ann am fàsach as eughmais hehe.

41 Agus togaidh e suas am bochd o thruaighe⁴, agus ni e teaghlachaichean *dha* mar threud.

42 Chi na fireana so, agus bithidh iad ait; agus druididh gach euceart a beul.

43 Cò a *ta* glic, agus a bheir fa'near na nithe sin? tuigidh esan caoimhneas gràdhach⁵ an Tighearna.

SALM CVIII.

1 *Ghlac Daibhidh misneach gu Dia a mholadh*, 5 agus *dh'iarr e còmhnaidh uaidh a rèir a gheallanna*.

Laoidh no Salm le Daibhidh.

THA mo chridhe deas, a Dhé; seinnidh, mi agus molaidd mi, eadhon le m' ghloir⁶.

2 Mosgail, a shaltair agus a chlarsach: mosglaidh mi féin moch air mhaduinn.

3 Molaidd mi thu am measg nan sluagh, a Thighearna, agus seinnidh mi dhuit am measg nan cinneach.

4 Oir *is* mòr do thròcair os ceann na nèamh; agus *tha* t'fhìrinn gu ruig na neula.

5 Bi air t'àrdachadh os ceann na nèamh, a Dhé; agus os ceann na talmhainn uile *biodh* do ghloir.

6 Chun gu teasairgear iadsan a's ionmhuinn leat, saor thusa le d' dheas làimh, agus éisd rium⁷.

7 Labhair Dia 'na naomhachd: ni mi aoihbneas, rionnuidh mi Sechem, agus tomhaisidh mi gleann Shucoit.

8 *Is* leam-sa Gilead; *is* leam Manaseh: agus *is* e Ephraim neart mo chinn; Iudah fear tabhairt mo lagha.

9 *Is* e Moab mo shoitheach-ionnlaid; os ceann Edoim tilgidh mi mo bhròg: thar Palestin ni mi caithrean.

10 Cò bheir mi do'n bhaile dhaingnich-te? cò threòraicheas mi gu h-Edom?

11 Nach tusa, a Dhé? *thusa* a thilg uait sinn, agus nach deachaidh a mach⁸, a Dhé, le ar n-armailtibh?

12 Thoir còmhnaidh dhuinn ann an airc; oir *is* dìomhain furtachd duine.

13 Trid Dhé⁹ ni sinn treubhantas; oir saltraidh esan sìos ar naimhdean.

SALM CIX.

1 *Tha Daibhidh a' gearan gu'n do bhuin a naimhdean gu cealgach ris.* 6 *Thug e thairis iad do léir-sgrìos:* 16 *Nochd e gu'n do ghràdhaich iad aingidheachd;* 21 *agus ghuidh e gu'n saoradh Dia e o luchd-ditidh anama.*

Do'n àrd shear-ciùil. Salm le Daibhidh.

ADHE mo chliù, na bi a'd' thosd.

2 Oir tha beul an aingidh, agus beul na ceilge fosgailte a'm' aghaidh; labhair iad a'm' aghaidh le teangaidh nam breug.

3 Agus le briathraibh fuatha chuairtich iad mi; agus chog iad a'm' aghaidh gun aobhar.

4 An éiric mo ghràidh tha iad naimhdeil dhomh, agus mi ri h-urnuigh.

5 Agus dhiol iad dhomh olc an éiric maith, agus fuath an éiric mo ghràidh.

6 Cuir an t-aingidh os a cheann¹⁰, agus seasadh Satan aig a dheas làimh.

7 'Nuair a bheirear breth air, faighear ciontach e¹¹, agus biodh 'urnuigh dha 'na peacadh.

8 Biodh a làithean tearc, agus glacadh neach eile a dhreuchd¹².

9 Biodh a chlann 'nan dilleachdain¹³, agus a bhean 'na bantraich.

10 A ghnàth air seacharan biodh a chlann, agus iarradh iad déirc; agus sir-eadh¹⁴ iad as an àitibh fàs.

11 Glacadh fear nan fiach gach ni a *ta* aige, agus creachadh coigrich a shaothair.

12 Na biodh neach ann a ni tròcair air¹⁵, agus na biodh aon ann a ghabhas truas d'a chloinn gun athair.

13 Sgrìos gu ròbh air a shliochd: san àl a thig 'na dhéigh, gu cuirear as d'a ainm¹⁶.

14 Air chuimhne biodh aingidheachd 'aitiriche aig an Tighearna; agus na cuirear as¹⁷ peacadh a mhàthar.

15 Biodh iad am fianuis an Tighearna a ghnàth; agus gearradh e as an cuimhne o'n talamh.

16 A chionn nach do chuimhnich e tròc-air a nochdadh, ach *gu'n* do gheur-lean e an duine bochd agus uireasbhuidheach, agus aig an robh cridhe goirt, chum a mharbhadh.

17 Mar a ghràdhaich e mallachadh, thigeadh e air: mar nach robh tlachd aige ann am beannachadh, biodh e fad uaidh.

18 Mar a chuir e mallachadh uime mar 'eudach¹⁸, thigeadh e steach mar uisge

¹ toradh an cinneis.

² le fòirneart an uile.

³ uachdaranaiibh, prionnsaibh.

⁴ àmhghar.

⁵ eamh-thrèairean.

⁶ Faic Salm LVII. r. 7, &c.

⁷ Faic Salm LX. r. 6, &c.

⁸ An do thilg thu

uait sinn? agus nach tèid thu mach? Faic Salm LX. r. 16.

⁹ Ann an Dia. Eabh.

¹⁰ "Cuir an t-aingidh," ars' iadsan, "os a cheann, &c."

¹¹ thigeadh binn a mach 'na aghaidh.

¹² a chàram. Faic Gnìomh Caib. I. 20.

¹³ gun athair.

¹⁴ tilgear a mach.

¹⁵ a shìocas tròcair thuige.

¹⁶ d'an ainm.

¹⁷ glanar as, dubhar as.

¹⁸ a chluaidh.

'na chom, agus mar oladh 'na chnàmhaibh.

19 Biodh e dha mar an trusgan leis an còmlaichear e, agus mar an crios leis an crioslaichear e a ghnàth.

20 Is e so obair m' eascairdean an làth-air an Tighearn¹, agus nan daoine a labhras olc an aghaidh m'anama.

21 Ach dean thusa air mo shon, a Thighearna Dhé, air sgàth t'ainme; a chionn gu bheil do thròcair maith, saor thusa mi.

22 Oir tha mi bochd² agus uireasbhuidheach, agus tha mo chridhe air a lotadh an taobh a stigh dhìom.

23 Mar sgàile a' claonadh sìos tha mi a' siubhal; tha mi air m'fhuadachadh mar an locust.

24 Tha mo ghluinean lag le trasgadh, agus tha m'fheoil a' teireachduinn le dìth sulta.

25 Agus tha mi a'm' aobhar maslaidh dhoibh: 'nuair a sheall iad orm, chrath iad an cinn.

26 Cuidich leam, a Thighearna mo Dhia; saor mi a réir do thròcair:

27 Chum gu'm bi fios aca gur i so do làmh, gur tusa, a Thighearn, a rinn e.

28 Mallaicheadh iadsan, ach beannaich thusa: 'nuair a dh'éireas iad, biodh nàire orra; ach biodh t'òglach-sa aith.

29 Biodh m' eascairdean air an còmh-dachadh le nàire, agus biodh iad air am folachadh le'n amhladh féin, mar le falluinn.

30 Ard-mholaidh mi an Tighearna le m' bheul; agus am measg na mòr-chuid-eachd bheir mi cliù dha.

31 Oir seasaidh e aig deas làimh an duine bhochd, chum a shaoradh o luchd-ditidh³ 'anama.

SALM CX.

1 Oighreachd, 4 sagartachd, 5 buaidh, 7 agus fulangas Chrìosd.

Salm le Daibhidh.

THUBHAIRT an Tighearna ri m' Thighearna, Suidh aig mo dheas làimh, gus an cuir mi do naimhdean 'nan stòl fo d' chosaibh.

2 Slat-shuaicheantais do chumhachd cuiridh an Tighearn a mach á Sion: bi thusa a'd' uachdaran am meadhon do naimhdean.

3 Bithidh do shluagh ro thoileach ann an là do chumhachd: ann am maise na naomhachd, mar an drùchd o bholg na maidne, bithidh t'òigridh agad⁴.

4 Mhionnaich an Tighearn, agus cha ghabh e aithreachas, Is sagart thu gu bràth, a réir orduigh Mhelchisedeic.

¹ duais m' eascairdean o'n Tighearna.

² truagh. ³ bhreitheamhnaibh.

⁴ roimh reult na maidne ghin mi thu.

⁵ Lotaidh.

5 Buailidh⁶ an Tighearn, a ta aig do dheas làimh, rìghrean ann an là 'fheirge.

6 Bheir e breth ann measg nan cinn-each; ìonaidh e gach ùit le corpaibh marbha; lotaidh e an t-uachdaran⁶ os ceann iomadh tìr.

7 Do'n t-sruth air an t-slighe òlaidh e; uime sin togaidh e suas a cheann.

SALM CXI.

1 Is cubhaidh cliù a thabhairt do Dhia air son 'oibre glòrmhor agus iongantach. 7 Is iad firinn agus ceartas gnìomharan a làmh.

MOLAIBHSE an Tighearna. Bheir mise cliù do'n Tighearna le m' uile chridhe, ann an coinneamh nam firean, agus anns a' choimhthional.

2 Tha gnìomharan a Thighearna mòr; rannsaichear iad leo-san uile aig am bheil tlachd anna.

3 Urramach agus glòrmhor tha 'obair-san; mairidh 'fhìreantachd gu bràth.

4 Chuir e a ghnìomharan iongantach air chuimhne⁷ gràsmhor agus truacanta tha an Tighearna.

5 Thug e lòn⁷ dhoibhsan d'an eagal e: cuimhnichidh e gu bràth a choimhcheangal.

6 Chuir e neart 'oibre an céill d'a shluagh, le oighreachd nan cinneach a thabhairt doibh.

7 Is iad firinn agus ceartas gnìomharan a làmh; is fìor⁸ 'aithanta-san uile.

8 Seasmhach tha iad gu saoghal nan saoghal, deanta ann am firinn agus an ceartas.

9 Chuir e saorsa dh'ionnsuidh a shluagh, dh'àithn e a choimhcheangal gu bràth: is naomh agus urramach 'ainm-san.

10 Is e eagal an Tighearna toiseach a' ghliocais; tha deadh thuigse aca-san uile a ni 'aithanta-san⁹: mairidh a chliù gu bràth.

SALM CXII.

1 Beannachadh agus tèaruinteachd nan ionracan: 10 Chi na h-àingidh an soirbheas, agus bithidh fearg orra.

MOLAIBHSE an Tighearn. Is beannaichte an duine air am bi eagal an Tighearn, a ghabhas tlachd mòr d'a aithantaibh.

2 Làidir anns an tìr bithidh a shliochd; beannaichear giùealach nam firean.

3 Bithidh maoin agus saoihbreas 'na thigh; agus mairidh 'fhìreantachd gu bràth.

4 Ann an dorchadas éiridh solus do na fireanaibh: gràsmhor agus làn truacantais, agus cothromach tha [an Tighearn¹⁰].

⁶ ann ceann. Eabh.

⁷ biadh.

⁸ cinnteach, seasmhach.

⁹ a ghnàthaicheas e, i.e. eagal an Tighearn; a ni iad. Eabh.

¹⁰ Faic Salm CXI. r. 4.

5 *Is* maith do'n duine a bhios truacanta agus coingheallach¹, a riaghlas a ghnóth- uiche gu ceart²:

6 Oir gu bráth cha ghluaisear e; air chuimhne gu bráth bithidh am firean.

7 Roimh dhroch sgeul cha bhi eagal air; *tha* a chridhe suidhichte, ag earb- sadh as an Tighearna.

8 *Tha'* a chridhe air a shocrachadh, cha bhi eagal air, gus am faic e crìoch a naimhdean³.

9 Sgaol e, thug e do na bochdaibh; mairidh 'fhìreantachd gu bráth; mairidh 'adharc le h-urram.

10 Chi an droch dhuine, agus bithidh fearg air; casaidd e 'fhiacian, agus seargaidh e as: sgriosar miann nan aing- idh.

SALM CXIII.

1 *Earail gu Dia a mholadh*, 6 do bhrìgh gu'n d' islich se e féin gu amharc air oirbribh a làmh.

MOLAIBHSE an Tighearna. Mol- aibh, O sibhse òglacha an Tigh- earna, molaibh ainm an Tighearna.

2 Gu ma beannaichte ainm an Tighearna, o'n àm so agus gu bráth.

3 O éirigh na gréine gu ruig a luidhe, is ionnmholta ainm an Tighearna.

4 Ard os ceann nan cinneach uile *tha* an Tighearna, os ceann nan nèamh a glhlòir.

5 Cò *is* cosmhuil ris an Tighearna ar Dia, a *tha* 'na chòmhnuidh shuas⁴?

6 A dh'islicheas e féin gu amharc air *na nithibh a ta* sna nèamhaibh, agus air an talamh.

7 Togaidh e am bochd o'n duslach; o'n òtrach àrdaichidh e an t-ainnis;

8 Chum a chur 'na shuidhe le àrd-uais- ligh⁵, le àrd-uaislibh a shluagh.

9 Bheir e air a' mhnaoi a ta gun sliochd còmhnuidh a ghabhail ann an tigh, 'na mathair air cloinne.

SALM CXIV.

1 *Tha cumhachd Dhé, a nochd e do Israel 'nuair a thug e mach iad as an Eiphit, 'na aobhar eagail d'a shluagh.*

MOLAIBHSE an Tighearna. 'Nuair a thàinig Israel a mach as an Eiphit, tigh Iacoib o shluagh coimh- each⁶,

2 Bha Iudah dha mar a chòmhnuidh naomh, Israel mar a thighearnas.

3 Chumnaic an cuan, agus theich e; thionndaidh Iordan air a h-ais.

4 Leum na beannta mar reitheachan, na cuic mar uain.

5 Ciod, a chuain, a thug ort teicheadh?

a Iordan, a thug ort tionndadh air t'ais.

6 A bheannta, a thug oirbh leum mar reitheachan; a chnoca, mar uain?

7 Crìothnaich, a thalaimh, an làthair an Tighearna, an làthair Dhé Iacoib!

8 A thionndaidheas a' charraig gu linne uisge, an aillbhinn⁷ gu tobar uisge!

SALM CXV.

1 *Nochd an salmàdar gu'm buin glòir do Dhia a mhàin.* 4 *Diomhanas iodhol-aoraidh.* 9 *Earail gu earbsadh as an Tighearna.*

TABHAIR glòir, a Thighearna, cha'n ann duinne, cha'n ann duinne, ach do t'ainm féin, air son do thròcair agus air son t'fhirium.

2 C'ar son a theireadh na cinnich, C'àit a nis am bheil an Dia?

3 Ach a *ta* ar Dia-ne anns na nèamh- aibh, agus rinn e gach ni b'àill leis.

4 *Is* airgiod agus òr an iodhoil-san, ob- air làmh dhaoine!

5 *Tha* béil aca, ach cha labhair iad; suilean aca, ach cha'n fhaic iad.

6 *Tha* cluasan aca, ach cha chluinn iad; sròinean aca, ach cha ghabh iad fàile⁸.

7 *Tha* làmhnan aca, ach cha laimhsich iad; cosan⁹ aca, ach cha'n imich iad; agus cha labhair iad troimh an sgornan.

8 Cosmhuil riu féin tha iadsan a ni iad, agus gach neach a dh'earbas asda.

9 Earbaidh tigh Israeil¹⁰ as an Tigh- earn: *is* esan an còmhnadh¹¹, agus an sgiath.

10 Earbaidh tigh Aaroin¹² as an Tigh- earn: *is* esan an còmhnadh, agus an sgiath.

11 Iadsan¹³ air am bi eagal an Tigh- earn, earbaidh iad¹⁴ as an Tighearna: *is* esan an còmhnadh agus an sgiath.

12 Bha an Tighearna cuimhneachail oirn: beannaichidh e sin; beannaich- idh e tigh Israeil; beannaichidh e tigh Aaroin.

13 Beannaichidh e iadsan air am bi eagal an Tighearna, na big agus na mòir.

14 Cuiridh an Tighearna sibh an lòn- mhoireachd, sibh féin agus bhuir clann.

15 *Is* beannaichte sibhse o'n Tighearna, a rinn na nèamhan agus an talamh.

16 *Is* leis an Tighearna na nèamhan, eadhon na nèamhan¹⁵; ach an talamh thug e do chloinn nan daoine.

17 Cha mhol na mairbh an Tighearna, no iadsan uile a théid sìos tosdach do'n uaigh.

18 Ach beannaichidh sinne an Tigh- earn, o'n àm so agus gu bráth. Molaibhse an Tighearna.

¹ Bithidh an duine maith bàigheil agus coingh- eallach. ² ann am breitheanas. Eabh.

³ gus an amhaire e air 'eascairidh. Faic Salm XCII. r. 11. ⁴ a dh'àrdaicheas e féin gu còmhnuidh a gabhail. Eabh. ⁵ maithibh, prionnsaibh.

⁶ o shluagh le teangaidh choimhich.

⁷ a' chlach-theine. ⁸ àile. ⁹ casan.

¹⁰ O Israeil, earb thusa.

¹¹ am fear-cuidcachaidh. ¹² A tigh Aaroin, earb.

¹³ Sibhse. ¹⁴ earbaibh. ¹⁵ nèamha nan nèamh.

SALM CXVI.

1 *Chuir an salmadar an cèill a ghràdh agus a dhleasdanas do Dhia air son na thròcair a nochd e dha.* 12 *Gheall e a bhòidean iocadh do'n Tighearn ann an sealladh a shluaigh.*

IS toigh leam an Tighearn, oir dh'éisd e ri guth m'athchuingean¹.

2 A chionn gu'n d'aom e a chluas rium, uime sin ri m' bheò éighidh mi ris.

3 Chuairtich doilgheasan² a' bhàis mi, agus ghlac piantan ifrinn mi: fhuair mi teinn agus bròn.

4 An sin ghairm mi air ainm an Tighearn: A Thighearna, guidheam ort, saor m'anam.

5 *Is gràsmhor an Tighearn, agus cothromach; agus is thròcaireach ar Dia-ne.*

6 Gleidhidh an Tighearna na daoine aon-fhillte³: dh'islicheadh mi, agus theas-airg e mi.

7 Pill, O m'anam, gu d' shuaimhneas⁴, oir bhuin an Tighearna riut gu fial.

8 Oir shaor thu⁵ m'anam o'n bhàs, mo shùil o dheuraibh, agus mo chos o shleamhnachadh.

9 Gluaisidh mi am fianuis an Tighearn ann an tìr nam beò.

10 Chreid mi, uime sin labhair mi⁶; chlaoidheadh mi gu mòr.

11 Thubhairt mi a' m' dheifir, *Tha* gach duine breugach.

12 Ciod a dh'ìocas mi do'n Tighearn air son 'uile thiòdhlaca dhomh?

13 Glacaidh mi cupan na slàinte, agus gairmidh⁷ mi air ainm an Tighearn.

14 Iocaidh mi mo bhòidean do'n Tighearn, a nis an làthair a shluaigh uile.

15 *Is luachmhor an sealladh an Tighearna bàs a naomh.*

16 O a Thighearn, gu deimhin *is* mi⁸ t'òglach, *is* mi t'òglach, mac do bhanoglaich; sgaoil thu mo chuibhreach.

17 Dhuitse iobaidh mi iobairt molaiddh⁹, agus air ainm an Tighearna gairmidh mi.

18 Iocaidh mi mo bhòidean do'n Tighearn a nis an làthair a shluaigh uile,

19 Ann an cùirtibh tìghe an Tighearn, ann ad mheadhon-sa, O Ierusalem. Molaibhse an Tighearna.

SALM CXVII.

1 *Earail gu Dia a nholadh air son a thròcair agus fàirinn.*

MOLAIBH an Tighearna, sibhse a chinneacha uile; molaibh e, a shloigh uile;

2 Oir is mòr a thròcair chaomh¹⁰ d'ar tabhne; agus mairidh¹¹ frinn an Tighearna gu bràth. Molaibhse an Tighearna.

SALM CXVIII.

1 *Is airidh Dia air buidheachas do bhrìgh gu moir a thròcair gu bràth.* 5 *Nochd an salmadar gur maith an nì earbsadh as an Tighearn.*

OTHUGAIBH buidheachas¹¹ do'n Tighearn, oir *tha* e maith, oir gu bràth mairidh a thròcair.

2 Abradh Israel a nis, gu *mair* a thròcair gu bràth.

3 Abradh tìgh Aaroin a nis, gu *mair* a thròcair gu bràth.

4 Abradh iadsan a nis d'an eagal an Tighearna, gu *mair* a thròcair gu bràth.

5 Ann an teinn ghairm mi air an Tighearn: fhireagair an Tighearna mi, gu *m' chur* ann an ionad farsuinn.

6 *Tha'n* Tighearna leam¹², cha'n eagal leam ciod a dh'fheudas duine a dheanamh orm.

7 *Tha'n* Tighearn am measg mo luchd-cuideachaidh, agus chi mi *crìoch* mo luchd-fuatha¹³.

8 *Is* fearr earbsadh as an Tighearna, na earbsadh á duine.

9 *Is* fearr earbsadh as an Tighearna, na earbsadh á h-uachdaranaibh¹⁴.

10 Chuairtich na cinnich gu léir mi; ach ann an ainm an Tighearna gearraidh mi as¹⁵ iad.

11 Chuairtich iad mi, seadh, chuairtich iad mi; ach ann an ainm an Tighearna gearraidh mi as iad.

12 Chuairtich iad mi mar bheachaibh; cuirear as iad mar theine droighnich; oir ann an ainm an Tighearna gearraidh mi as iad.

13 Thug thu¹⁶ ionnsuidh dhian orm, chum mo leagadh; ach chuidhich an Tighearna leam.

14 *Is* e an Tighearna mo neart, agus mo cheòl¹⁷; agus is e mo shlàinte.

15 *Tha* guth gáirdeachais agus slàinte ann am pàillumaibh nam fìean: rinn deas làmh an Tighearna treubhantas.

16 Dh'ardaicheadh deas làmh an Tighearna; rinn deas làmh an Tighearna treubhantas!

17 Cha'n fhaigh mi bàs, ach mairidh mi beò, agus cuiridh mi'n cèill oibre an Tighearna.

18 Thom-smachdaich an Tighearna mi; ach gu bàs cha d'thug e thairis mi.

19 Fosglaihbh dhomh geatachan an ionracais; théid mi stach orra, agus molaiddh mi an Tighearn.

20 *Is* e so gcata an Tighearn, air an téid na fireana stach.

21 Molaiddh mi thu, oir dh'éisd thu rium, agus is tu mo shlàinte.

¹ ri m' ghuth agus ri m' athchuingibh.

² ioghanna, pianta. ³ simplidh, neo-chronail.

⁴ gu d' fhois. ⁵ shaor e. ⁶ Faic II. Cor.

Caib. IV. r. 15.

⁷ goiridh.

⁸ a chionn gur mi. ⁹ buidheachais. ¹⁰ a ghràs.

¹¹ moladh. ¹² am measg mo luchd-cuideachaidh.

¹³ Faic Salm CXII. r. 8. ¹⁴ prionnsaibh.

¹⁵ ghearr mi as, sgrìos mi.

¹⁶ Thugadh.

¹⁷ mo laoidh, fàth mo mholaidh.

22 A' chiach a dhiùlt na clachairean, rinneadh i' na cloich-chlinn na h-òisinn.

23 O'n Tighearna tha so; is iongantach e 'nar sùilbh-ne!

24 Is e so an là a rinn¹ an Tighearna: deanamaid gairdeachas, agus biomaid ait air.

25 Guidheamaid² ort, a Thighearna, saor a nis; guidheamaid ort, a Thighearna, soirbhich leinn a nis.

26 Beannaichte gu robh an Ti a thig an ainm an Tighearna; thug sinne beannaichd oirbhe o thigh an Tighearna.

27 Is e Dia a's Tighearna ann, agus dhealraich e oirm³: ceanglaibh an iobairt⁴ le cordaibh, eadhon ri adharcaibh na h-altarach.

28 Is tusa mo Dhia, agus molaidh mi thu: mo Dhia, àrdaichidh mi thu.

29 O thugaibh buidheachas do'n Tighearna, oir tha e maith, oir gu bràth mairidh a thròcair!

SALM CXIX.

1 *San t-salm so tha Daibhidh a' deanamh iomadh urnuigh ri Dia, a' seinn cliù d' ainm, a' cur an cèill a thlachd 'na lagh, agus ag iarraidh gu'm bitheadh a cheumanna air an stiùradh chum reachdan an Tighearna a choinhead.*

ALEPH.

IS beannaichte iadsan a tha neo-lochdach⁵ san t-slighe, a dh'imicheas ann an lagh an Tighearna.

2 Is beannaichte iadsan a ghleidheas a theisteis⁶, a dh'iarras e le'n uile cridhe.

3 Mar an ceudna cha dean iad aingidheachd: 'na shligheibh imichidh iad.

4 Dh'àithn thu t'orduighean⁷ a bhi air an coimhead gu dichollach.

5 O nach robh mo cheumanna air an stiùradh, chum do reachdan a choinhead!

6 An sin cha ghabh mi nàire, an uair a bheir mi spéis do t'àitheantaibh gu léir.

7 Molaidh mi thu le tréibhdhireas cridhe, 'nuair a dh'fhòghlumas mi breitheanais do cheartais.

8 Coimhididh mi do reachdan: O na tréig mi gu tur!

BETH.

9 Ciod leis an glan an t-òganach a shlighe? trid faicill, a réir t'fhocail⁸.

10 Le m'uile chridhe dh'iarr mi thu: na leig dhomh dol air seacharan o t'àitheantaibh.

11 A m' chridhe dh'fholuich mi t'fhocal, chum nach peacaichinn a'd' aghaidh.

12 Is beannaichte thusa, a Thighearna; teagaisg dhomh do reachdan.

13 Le m' bhillibh chuir mi 'n cèill uile

bhreitheanais do bhéil.

14 Ann an slighe do theisteas rinn mi gairdeachas, mar os ceann gach uile shaoibhreis.

15 Air t'àitheantaibh beachd-smuainichidh mi, agus dearcaidh⁹ mi air do cheumannaibh.

16 Ann ad reachdaibh gabhaidh mi tlachd; cha dì-chuimhnich mi do bhriathra.

GIMEL.

17 Buin gu fial ri t'òglach, *chum gu* bi mi beò, agus gu coimhid mi do bhriathra.

18 Fosgail mo shùilean, chum gu faic mi nithe iongantach o d' lagh.

19 Is coigreach air thalamh mi; na ceil orm t'àitheantan.

20 Tha m'anam brùite, le déidh air do bhreitheanasaiibh gach tràth.

21 Smachdaich thu na h-uaibhrich: is malluichte iadsan a théid air seacharan o t'àitheantaibh¹⁰.

22 Tionndaidh uam masladh agus tàir; oir ghléidh mi do theisteis.

23 Shuidh eadhon uachdarain, agus labhair iad a'm' aghaidh; ach bheachd-smuainich t'òglach air do reachdaibh.

24 Mar an ceudna is iad do theisteis mo thlachd, mo chomhairlichean.

DALETH.

25 Tha m'anam a' leantuinn ris an ùir¹¹: beothaich mi a réir t'fhocail.

26 Chuir mi an céill mo shlighean, agus dh'éisd thu rium: teagaisg dhomh do reachdan.

27 Thoir orm slighe t'àitheantan¹² a thùigsinn, agus labhraidh mi air t'òibribh iongantach.

28 Tha m'anam a' leaghadh as le tuirse¹³: neartaich mi a réir t'fhocail.

29 Cuir uam slighe nam breug, agus gu gràsmhor deònach dhomh do lagh.

30 Ròghnaich¹⁴ mi slighe na firinn; chuir mi do bhreitheanais fa m' chomhair.

31 Dhlùth-lean mi ri d' theisteasaibh: a Tighearna, na cuir gu nàire mi.

32 Ann an slighe t'àitheantan ruithidh mi, 'nuair a chuireas tu mo chridhe am farsuineachd.

HE.

33 Teagaisg dhomh, a Thighearna, slighe do reachdan, agus gleidhidh mi i gu ruig a' chrìoch¹⁵.

34 Thoir tuigse dhomh, agus gleidhidh mi do lagh; seadh, coimhididh mi e le m' uile chridhe.

35 Thoir orm triall an ceum t'àitheantan; oir ann-san tha mo thlachd.

36 Lùb mo chridhe gu d' theisteasaibh, agus ni h-ann gu sannt.

¹ dh'orduich.

² Guidheam.

³ thug e solus dhuinn.

⁴ an t-van.

⁵ ionraic, iomlan.

⁶ f'fianuisean.

⁷ do reachdan.

⁸ le d' bhriathran a choinhead.

⁹ geur-amhaircidh.

XXVII. r. 26.

¹² t'orduighean.

¹⁴ Thagh.

¹⁰ Faic Deut. Caib.

¹¹ duslach.

¹³ bròn.

¹⁵ gu crìch mo shaoghail.

37 Tionndaidh mo shùilean o amharc air dìomhanas; ann ad shliglibh¹ beothaich mi.

38 Daingnich t'fhocal do t'òglach, air am bheil t'eagal-sa².

39 Cuir uam³ mo mhasladh a's eagal leam; oir tha do bhreitheanais maith.

40 Feuch, is miannach leam-sa do reachd-an⁴: a d' cheartas beothaich mi.

VAU.

41 Agus thigeadh do thròcair a m'ionnsuidh, a Thighearn, do shlàinte a réir t'fhocail:

42 An sin bithidh freagradh agam dhasan a bheir masladh dhomh, gu bheil m'earbsadh á t'fhocal-sa.

43 Agus na buin focal na firinn gu h-ìomlan as mo bheul; oir ann ad bhreitheanasaibh chum mi mo dhòchas.

44 Agus coimhidh mi do lagh a ghnàth, gu suthain is gu sìor.

45 Agus gluaisidh mi am farsuinn-eachd⁵; a clionn gu'n iarr mi do reachd-an.

46 Agus labhraidh mi air do theisteis an làthair rìghrean, agus cha bhì nàire orm.

47 Agus gabhaidh mi tlachd do t'àitheantaibh d'an d'thug mi gràdh.

48 Agus togaidh mi mo làmhan ri t'àitheantaibh, d'an d'thug mi gràdh; agus beachd-smuainichidh mi air do reachdaibh.

ZAIN.

49 Cuimhnich am focal⁶ do t'òglach, as an d'thug thu orm earbsadh.

50 Is e so mo chomhfhurtachd ann am àmhghar; oir bheithaich t'fhocal mi.

51 Rinn na h-uibhrich fanoid orm gu mòr; gidheadh o d' lagh cha do chlaon mi.

52 Chuimhnich mi do bhreitheanais o chian, a Thighearn, agus fhuair mi comhfhurtachd.

53 Ghlac uamhunn mi a thaobh nan daoine aingidh, a thréigas do lagh.

54 B'iad do reachdan mo cheòl ann an tigh mo chuairt.

55 Chuimhnich mi t'ainm, a Thighearn, anns an oidhche, agus ghléidh mi do lagh.

56 Mar so tharladh⁷ e dhomhsa, a chionn gu'n do ghléidh mi do reachdan.

CHETH.

57 Is tusa mo chuibhrionn, a Thighearn: thubhairt mi gu coimhidinn t'fhocail.

58 Dh'asluich mi do dheadh-ghean⁸ le

n'uile chridhe: dean tròcair orm a réir t'fhocail.

59 Chluasaidh mi⁹ mo shlighean, agus phill mi mo chosan ri d' theistesaibh.

60 Rinn mi deifir¹⁰, agus cha robh mi mairnealach¹¹, chum t'àitheantan a choimhead.

61 Chreach buidhnean dhroch dhaoine mi; ach cha do dhì-chuimhnich mi do lagh.

62 Mu mheadhon-oidhche éiridh mi, chum buidheachas a thoirt duit air son bhreitheanas do cheartais.

63 Is fear-comuinn¹² mi dhoibhsan uile air am bi t'eagal, agus dhoibhsan a ghleidheas do reachdan.

64 Do d' thròcair, a Thighearn, tha 'n talamh làn: teagaisg dhomh do reachdan.

TETH.

65 Rinn thu gu maith do t'òglach, a Thighearn, a réir t'fhocail.

66 Teagaisg dhomh deadh thuigse agus eòlas, oir chreid mi t'àitheantan.

67 Mun robh mi ann an àmhghar¹³, chaidh mi air seacharan; ach a nis tha mi a' gleidheadh t'fhocail.

68 Is maith thusa, agus ni thu maith: teagaisg dhomh do reachdan.

69 Dhealb na h-uibhrich breug a'm' aghaidh: ach gleidhidh mise t'àitheantan¹⁴ le m'uile chridhe.

70 Co reamhar¹⁵ ri saill tha an cridhe-san; ach ann ad lagh tha mo thlachd-sa.

71 Is maith dhomhsa gu'n robh mi ann an àmhghar, chum gu fòghlumainn do reachdan.

72 Is fearr dhomhsa lagh do bhéil, na mìltean do òr agus do airgid.

IOD.

73 Rinn agus dhealb do làmhan mi: thoir tuigse dhomh, chum gu fòghlum mi t'àitheantan.

74 Chi iadsan air am bi t'eagal mi, agus bithidh iad ait, a chionn gu'n d'earb mi á d'fhocal.

75 Tha fhios agam, a Thighearn, gu bheil do bhreitheanais ceart, agus gur ann am firinn a chlaoidh thu mi.

76 Biodh a nis do thròcair chaomh chum comhfhurtachd dhomh, a réir t'fhocail ri t'òglach.

77 Thigeadh do chaomh-thròcairean a m'ionnsuidh, chum gu'm bi mi beò; oir is e do lagh mo thlachd.

78 Biodh nàire air luchd an àrdain, oir gun aobhar¹⁶ bhuinid gu fiar ruin; ach beachd-smuainichidh mise air t'àitheantaibh¹⁷.

¹ shlighe. ² a bhios a chum t'eagal-sa.

³ Tionndaidh uam. ⁴ t'orduighean.

⁵ gu saor. ⁶ t'fhocal.

⁷ thachair, bha e. ⁸ do ghnìs. Eabh.

⁹ Mheas, bheachd-smuainich mi air.

¹⁰ cabhag.

¹¹ cha do chuir mi dàil.

¹² companach, caidreach. ¹³ teinn.

¹⁴ do reachdan, t'orduighean. ¹⁵ tugh.

¹⁶ gu fealltach.

¹⁷ t'orduighidh, do riaghalluibh.

79 Pilleadh iadsan air am bheil t'eagal rium, agus iadsan a tha eòlach air do theisteachaibh.

80 Biodh mo chridhe tréibhdhùreach¹ ann ad reachdaibh, chum nach nàraichear mi.

CAPH.

81 Tha m'anam air a chlaoidh le déigh air do shlàinte: ann ad fhocal chuir mi mo dhòchas.

82 Tha mo shùilean air an caitheadh le *feitheamh* ri t'fhocal, 'nuair a ta mi ag ràdh, C'uin a ni thu furtachd orm?

83 Oir tha mi mar shearraig² ann an deataich; gidheadh cha do dhi-chuimhnich mi do reachdan.

84 Cia lìon iad làithean t'òglaich? c'uin a chuireas tu breitheanas an gnìomh orrasan a tha 'n tòir orm?

85 Chladhaich na h-uabhrich sluichd dhomh, nach 'eil a réir do lagha.

86 *Is* firinn t'aitheantan-sa gu léir; gu fealltach tha iad an tòir orm; cuidich thusa leam.

87 *Is* beag nach do chuir iad as domh air thalamh; ach cha do thréig mise do reachdan.

88 A réir do chlaomh-thròcair beothaich thusa mi, agus gleidhidh mi teisteachas do bhéil.

LAMED.

89 Gu bràth, a Thighearn, tha t'fhocal seasmhach anns na nàmhaidh.

90 O linn gu linn tha t'fhirinn: dhaingnich thu an talamh, agus seasaidh e.

91 A réir t'orduighen tha iad buan *gus* an diugh; oir *is* iad na h-uile do sheirbhiseich.

92 Mur bhiodh *gu'm b'e* do lagh mo thlachd, an sin gheibhinn bàs a'm àmhghar.

93 Gu bràth cha dì-chuimhnich mi do reachdan; oir leo-san bheothaich thu mi.

94 *Is* leat mise, saor mi; oir dh'iarr mi do reachdan.

95 Dh'fheith na h-aingidh orm, chum mo sgrios; ach beachd-smuainichidh mise air do theisteachaibh.

96 Chunnaic mi crìoch gach iomlain; *ach* tha t'aitheanas ro fharsuinn.

MEM.

97 O cia h-ionmhuinn leam do lagh-sa? gach là *is* e mo smuaineachadh³.

98 Le t'aithe⁴ rinn thu mi ni's glìce na m'earcairdean; oir *tha* i a ghnàth leam.

99 Os ceann mo luchd-teagaisg uile tha mi a' tuigsinn; oir *is* iad do theisteachas mo smuaineachadh.

100 Os ceann nan seanair tha mi crìonná, a chionn gu bheil mi a' gleidheadh do reachdan.

101 O gach droch shlighe chum mi mo chosan, chum gu coimhidinn t'fhocal.

102 O d' bhrèitheanasaidh cha do chlaon mi; oir theagaisg thusa mi.

103 Cia milis le m' bhlas do bhriathra! *ni's m'ise tha iad* na mìl do m' bheul⁵.

104 Trid do reachdan fhuair mi tuisge: uime sin is fuathach leam gach slighe bhreugach.

NUN.

105 *Is* lòchran t'fhocal do m' chois, agus solus do m' cheum.

106 Mhionnaich mi, agus coimhlionaidh mi e, gu'n coimhid mi breitheanas do cheartais.

107 Tha mi ann an àmhghar ro mhòr: ath-bheothaich mi, a Thighearn, a réir t'fhocail.

108 Gabh uam gu taitneach, guidheam ort, a Thighearna, saor-thabhartais mo bhéil; agus teagaisg dhomh do breitheanas.

109 *Tha* m'anam a ghnàth a'm làimh; gidheadh cha do dhi-chuimhnich mi do lagh.

110 Chuir droch dhaoine ribe⁶ romham; ach o d' reachdaibh cha deachaidh mise air seacharan.

111 Ghabh mi do theisteachas mar oighreachd gu bràth; oir *is* iad aobhneas mo chridhe.

112 Dh'aom mi mo chridhe chum do reachdan a chur an gnìomh a ghnàth, gu ruig a' chrìoch.

SAMECH.

113 *Is* fuath leam smuainte faoin: ach is toigh leam do lagh.

114 *Is* tusa m'ionad-foluich, agus mo sgiath: á t'fhocal-sa tha m'earbsa.

115 Imichibh uam, a luchd-deanamh an uile; oir gleidhidh mise àitheantan mo Dhé.

116 Cum suas mi a réir t'fhocail, agus mairidh mi beò; agus na leig fo nàire mi a thaobh mo dhòchais.

117 Daingnich⁷ mi, agus bithidh mi tèaruinte; agus bithidh tlachd agam ann ad reachdaibh⁸ a ghnàth.

118 Shaltair thu orra-san uile a chaidh air seacharan o d' reachdaibh; oir *is* breug⁹ an cealg.

119 Mar shal tilgidh tu uait¹⁰ uile dhroch dhaoine na talmhainn: uime sin is toigh leam do theisteachas.

120 Chrìothnaich m'fheoil le h-uamh-

¹ ionraic, iomlan.

² shote-craicinn.

³ aobhar mo smuainte.

⁴ t'aitheantaibh.

⁵ do m' chàirean.

⁶ lion.

⁷ Neartaich, cum suas.

⁸ dearcaidh mi air do reachdaibh.

⁹ diomhain.

¹⁰ cuiridh tu as do.

ann romhad; agus bha eagal orm roimh do bhreitheanasaibh.

AIN.

121 Rinn mi breitheanas agus ceartas: na fàg mi do m' luchd-foirneirt.

122 Bi-sa an urras air t'òglach chum maith: na deanadh na h-uaihbhrich foirneart orm.

123 Tha mo shùilean air an caitheadh *le bhi sealltuinn* air son do shlàinte, agus air son focail t'fhireantachd¹.

124 Buin ri t'òglach a réir do thròcair, agus teagaisg dhomh do reachdan.

125 Is mi t'òglach; thoir tuigse dhomh, chum gu'm bi eòlas agam air do theist-easaibh.

126 Is mithich dhuit, a Thighearna, a bhi deanamh: bhris iad do lagh.

127 Uime sin is annsa² leam-sa t'àitheantan na'n t-òr, seadh, na'n t-òr fìor-ghlan.

128 Uime sin measam do reachdan uile [*a thaobh gach ni*] a bhi ceart: is fuath-ach leam gach slighe bhreugach.

PE.

129 Is iongantach do theisteis: air an aobhar sin gleidhidh m'anam iad.

130 Bheir fosgladh do bhriathar solus, a' teagasg nan daoine aon-fhillte³.

131 Dh'fhosgail mi mo bheul, a' ploscartaich; oir bha mi an geall air t'àitheantaibh.

132 Amhaire orm, agus dean tròcair orm, mar is gnàth leat a dheanamh dhoibhsan le'n ionmhuinn t'ainm.

133 Stiur mo cheumanna a réir t'fhocail; agus na biodh aig euceart sam bith uachdaranachd orm.

134 Teasairg mi o fhòirneart dhaoine⁴; agus coimhididh mi t'orduighean.

135 Thoir air do ghnùis dealrachadh air t'òglach, agus teagaisg dhomh do reachdan.

136 Ruith srutha dheur⁵ sìos o m' shùilbh, a chionn nach do choimhid iad do lagh.

TSADDI.

137 Is cothromach thusa, a Thighearn, agus is ceart do bhreitheanas⁶.

138 Dh'àithn thu do theisteis mar cheartas agus mar fhirinn mhòir⁷.

139 Chlaoidh m'end mi⁸, a chionn gu'n do dhì-chuimhnich mi naimhdean do bhriathran.

140 Ro ghlan *tha* t'fhocal-sa, agus is ionmhuinn le t'òglach e.

141 Beag agus suarach *a ta* mi; gidheadh cha d'chuimhnich mi do reachdan.

142 Is ceartas siorruidh do cheartas-sa.

agus *is* firinn do lagh.

143 Ghlac teinn agus àmhghar mi; ach *is* iad t'àitheantan mo thlachd.

144 *Mairidh* ceartas do theisteas gu bràth; thoir-sa tuigse dhomh, agus bithidh mi beò.

KOPH.

145 Ghlaoth mi le m' uile chridhe; éisd rium, a Thighearna: gleidhidh mi do reachdan.

146 Ghlaoth mi riut; saor mi, agus coimhididh mi do theisteis.

147 Thàinig mi roimh 'n scarthanaich⁹, agus dh'èigh mi: á d'fhocal dh'earb mi.

148 Ghabh mi shùilean roimh fhairibh na h-oidhche, chum gu beachd-smuainichinn air t'fhocal.

149 Eisd ri m' ghuth a réir do chaoimhneis-ghràidh: a Thighearn, a réir do bhreitheanais beothaich mi.

150 Thàinig luchd-leanmhuinn drochbheirt am fagus: ach fada bha iad o d' lagh.

151 Am fagus *tha* thusa, a Thighearn; agus *is* firinn t'àitheantan uile.

152 O thoiseach¹⁰ b'fhiosrach mi a thaobh do theisteas, gu'n do shuidhich thu iad gu bràth.

RESH.

153 Amhaire air m'àmghar, agus teasairg mi; oir cha do dhì-chuimhnich mi do lagh.

154 Tagair mo chùis, agus saor mi; a réir t'fhocail beothaich mi.

155 Is fada slàinte¹¹ o dhroch dhaoineibh; oir cha'n iarr iad do reachdan.

156 Is lìonmhor¹² do chaomh-thròcairean, a Thighearn; a réir do bhreitheanas¹³ beothaich mi.

157 Is lìonmhor mo luchd-tòrachd agus m'eascairdean; gidheadh, o d' theist-easaibh cha do chlaon mise.

158 Chunnaic mi luchd-eusaontais¹⁴, agus bha doilgheas orm, a chionn nach do choimhid iad t'fhocal.

159 Feuch, is ionmhuinn leam do reachdan: a Thighearn, a réir do chaoimhneis-ghràidh beothaich thusa mi.

160 O thoiseach¹⁵ *is* firinn t'fhocal-sa; agus gu bràth *mairidh* uile bhreitheanais do cheartais.

SCHIN.

161 Bha uachdaran an tòir orm gun aobhar: ach roimh t'fhocal-sa *tha* eagal air mo chridhe.

162 *Tha* aiteas orm ri t'fhocal-sa, mar neach a fhuair creach mhòr.

163 Is fuath leam, agus is oilteil leam breug: ach is toigh leam do lagh-sa.

¹ do cheartais. ² ionmhuinne. ³ simplidh.

⁴ duine. ⁵ uisgeacha. Eabh. ⁶ bhreitheanas.

⁷ a ta ceart agus ro fhirinneach.

⁸ Chuir mo theas-ghràdh as domh.

⁹ bhriseadh na faire, chamhair.

¹⁰ O cheann fada.

¹¹ saorsa.

¹² mòr.

¹³ bhreitheanas.

¹⁴ daoine fealltach.

¹⁵ Gu h-iomlain,

164 Seachd uairean san là bheiream moladh dhuit, air son bhreitheanas do cheartais.

165 *Is* mòr sìth na muinntir a tha toirt gràidh do d' lagh, agus cha'n éirich aobhar tuislidh dhoibh.

166 Dh'fheith mi ri d' shlàinte, a Thighearn; agus rinn mi t'àitheantan.

167 Choimhid m'anam do theisteis, agus is ro ionmhuinn leam iad.

168 Choimhid mi do reachdan agus do theisteis; oir *tha* mo shlighean uile fa d' chomhair.

TAU.

169 Thigeadh mo ghlaodh am fagus a'd' làthair, a Thighearn: a réir do bhriath-air thoirt tuigse dhomh.

170 Thigeadh m'asluachadh a'd' làthair: a réir t'fhocal teasaig mi.

171 Cuiridh mi bhilean an céill do chliù, 'nuair a theagaisgeas tu dhomh do reachdan.

172 Aithrisidh mi theangadh t'fhocal; oir *is* ceartas t'àitheantan uile.

173 Cuidicheadh do làmh leam; oir ròghnaich mi do reachdan.

174 Bha mi 'n geall air do shlàinte, a Thighearn; agus *is* e do lagh mo thlachd.

175 Biodh m'anam beò, agus molaidd e thu: agus cuidicheadh do bhreitheanas leam.

176 Chaidh mi air seacharan mar chaor-aich chailte; iarr t-òglach, oir cha do dhì-chuimhnich mi t'àitheantan.

SALM CXX.

1 *Ghuidh Daibhidh gu'n saoradh Dia e o'n teangaidh chealgach.*

Laoidh nan ceum.

A M' éigin ghlaodh mi ris an Tighearn, agus dh'éisid e rium.

2 A Thighearna, saor m'anam o bhillibh nam breug, o'n teangaidh chealgach.

3 Ciod a bheirear dhuit? agus ciod a nithear ort, a theangadh chealgach?

4 Geur shaighde laoi, le eibhlidh do'n aiteal.

5 Mo thruaighe mi, gu bheil mi air chuairt ann am Mesech, gu bheil mi a'm' ehòmhnuidh ann am bùthaibh Chedair!

6 Is fada ghabh m'anam còmhnuidh leo-san' a thug fuath do shith.

7 *Tha* mise air son sìth; ach 'nuair a labhras mi, *tha* iadsan air son cogaidh.

SALM CXXI.

1 *Tèaruinteachd an t-sluaigh do'm bheil Dia 'na fhear-coimhid.*

Laoidh nan ceum.

TOGAIDH mi mo shùilean chum nam beann, o'n tig mo chabhair.

2 *Thig* mo chabhair o'n Tighearn, a rinn nèamh agus talamh.

3 Cha leig e le d' chois sleamhnachadh: cha tuit clò codail air t'fhear-coimhid².

4 Feuch, cha tuit clò codail³ no suain air fear-coimhid Israeil.

5 *Is* e an Tighearna t'fhear-coimhid: *is* e an Tighearna do sgàile air do làimh dheis.

6 San là cha bhuail⁴ a' ghrian thu, no a' ghealach san oidheche.

7 Coimhididh an Tighearna thu o gach olc: coimhididh⁵ e t'anam.

8 Coimhididh an Tighearna do dhol a mach, agus do theachd a steach, o'n àm so eadhon gu bràth.

SALM CXXII.

1 *Bha aobhneas air Daibhidh 'nuair chaidh e do thigh an Tighearn. 6 Ghuidh e air son sìth agus suaimhneis do Ierusalem.*

Laoidh nan ceum, le Daibhidh.

BHA aobhneas orm an uair a thubhairt iad rium, Do thigh an Tighearna théid sinn.

2 Seasaidh ar cosan an taobh a stigh do d' gheataibh⁶, O Ierusalem.

3 Tha Ierusalem air a togail mar chaithir⁷ a tha air a coimheangal ri chéile;

4 D'an téid na treubhan suas, treubhan an Tighearna, gu teistean Israeil, a thoirt buidheachais do ainm an Tighearn.

5 Oir an sin tha caithriche breitheanas air an suidheachadh, caithriche tìghe Dhaibhidh.

6 Guidhibh-se air son sìth Ierusalem: soirbhichidh iadsan leis an ionmhuinn thu.

7 Sìth gu robh an taobh a stigh do d' bhallachaibh, suaimhneas⁸ a'd' luchairtibh!

8 Air sgàth mo bhràithrean agus mo chàirdean their mi nis, Sìth *gu robh* an taobh a stigh dhòt?

9 Air sgàth tìghe an Tighearn ar Dé, iarraidh mi maith dhuit.

SALM CXXIII.

1 *Athchuinge air son tròcair, 4 agus air son saorsa o tharcuis nan uaibhreach.*

Laoidh nan ceum.

A D'IONNSUIDH thog mi mo shùilean, O thusa a *tha* d' còmhnuidh anns na nèamhaibh.

2 Feuch, mar a *ta* sùilean òglach air làimh am maighstirean, agus mar a *ta* sùilean banoglaich air làimh a bana-mhaighstir, mar sin *tha* ar sùile-ne air an Tighearn ar Dia, gus an dean e tròcair oirnn.

¹ leis-san.² fhear-gleidhidh.³ d'asal, turra-chodal.⁴ loig.⁵ gleidhidh.⁷ ard-bhaile.⁶ ann ad gheataibh.⁸ soirbhneas, soirbhneachadh.

3 Dean tròcair oirn, a Thighearna, dean tròcair oirn; oir tha sinn air ar lìonadh làn do tharcuis¹.

4 Lìonadh ar n-anam làn le fànoid luchd na seasgaireachd², le tarcuais nan uaibhreach.

SALM CXXIV.

¹ *Bheannaich Daibhidh an Tighearna do bhrìgh gu'n do shao e a shlugh uathasan a dh'èirich 'nan aghaidh.*

Laoidh nan ceum, le Daibhidh.

MUR biodh an Tighearna leinn, abradh Israel a nis;

2 Mur biodh an Tighearna leinn, an uair a dh'èirich daoine 'nar n-aghaidh;

3 An sin shluigeadh iad beò sinn, an uair a las am fearg 'nar n-aghaidh;

4 An sin thigeadh tuiltean uisgeacha tharunn, rachadh an sruth thar ar n-anam;

5 An sin rachadh na h-uisgeachan uaibhreach thar ar n-anam.

6 Beannaichte gu robh an Tighearna, nach d'thug sinn mar chreich d'am fiac-laibh.

7 Chaidh ar n-anam as mar eun á ribe nan eunadair; bhriseadh an ribe, agus chaidh sinn as.

8 Tha ar cabhair ann an ainm an Tighearna, a rinn nèamh agus talamh.

SALM CXXV.

¹ *Bithidh iadsan a dh'earbas as an Tighearna ann an tèaruinteachd. 4 Urnuigh air son nan ion-racan, agus an aghaidh nan aingidh.*

Laoidh nan ceum.

BITHIDH iadsan a dh'earbas as an Tighearna mar shliabh³ Shioin, nach carruichear, ach a mhaireas gu sìorruidh.

2 Mar a ta na beannta mu thimchioll Ierusalem, mar sin tha'n Tighearna mu thimchioll a shlugaigh, o'n àm so agus gu bràth.

3 Oir cha ghabh slat nan daoi⁴ tàmh air crannchur nam firean, air eagal gu'n sìneadh na fireana an làmhnan chum eu-ceirt.

4 Dean maith, a Thighearna, dhoibhsan a ta maith, agus dhoibhsan a ta ionraic 'nan cridhe.

5 Ach iadsan a théid a thaobh d'an sliagh claoana, iomainidh an Tighearna a mach le luchd-deanamh an uilc. Sìth gu robh air Israel!

SALM CXXVI.

¹ *Bha an eaglais aoibhneach 'nuair a thug Dia air ais braighdeanas Shioin.*

NUAIIR a thug an Tighearna air ais braighdeanas Shioin, bha sinn mar dhaoine a chunnaic aisling.

2 An sin lìonadh air beul le gàire, agus ar teangadh le luathghaire⁵: an sin thubhairt iad am measg nan cinneach, Rinn an Tighearna nithe mòra air an son.

3 Rinn an Tighearna nithe mòra air ar soinne: bha sinn aoibhneach.

4 Pill a ris, a Thighearna, ar braighdeanas, mar shruthaibh san àirde deas.

5 Iadsan a chuireas sìol le deuraibh, buainidh iad le gairdeachas.

6 Esan a théid a mach, agus a ghluic, ag iomchar roghadh sìl⁶ gu cinnteach thig e a ris le gairdeachas, ag iomchar a sguab.

SALM CXXVII.

¹ *Tha gach saothair dìomhain as eugmhais beannaichd an Tighearna. 3 'Se clann oighreachd Dhé.*

Laoidh nan ceum, le Solamh.

MUR tog an Tighearna an tigh, gu dìomhain saothraichidh a luchd-togail: mur gléidh an Tighearna am baile, gu dìomhain ni am fear-coimhid faire.

2 Is dìomhain dhuibhse bhi 'g éirigh gu moch, a bhi suidhe gu h-anmoch, ag ith-eadh arain a' bhròin; 'nuair a bheir esan codal d'a sheircin⁷.

3 Feuch, is iad clann oighreachd an Tighearna, toradh na bronn a dhuais.

4 Mar shaighdibh ann an làmh gaisgich, mar sin tha mic na h-dìge.

5 Is sona am fear aig am bheil a bhol-saighead làn diubh: cha bhi nàire orra, 'nuair a labhras iad r'a naimhdibh anns a' gheata.

SALM CXXVIII.

¹ *Na beannachdan a leanas iadsan air am bi eagal an Tighearna.*

Laoidh nan ceum.

IS beannaichte gach neach air am bi eagal an Tighearna, a ghluaiseas 'na shlighibh.

2 Oir ithidh tu toradh do làmh: sona bithidh tu, agus éiridh gu maith dhuit.

3 Bithidh do bhean mar fhionain tharbh-aich ri taobhan do thighe; do chlann mar òg chroinn-olaidh mu thimchioll do bhùird.

4 Feuch, mar so beannaichear an duine air am bi eagal an Tighearna.

5 Beannaichidh an Tighearna thu á Sion, agus chi thu maith Ierusalem rè uile laith-ean do bheatha.

6 Seadh, chi thu clann do chloinne, agus sìth air Israel.

¹ dhìmeas. ² sàmhachair, suaimhneis, fois.

³ bliinn. ⁴ non aingidh; na h-aingidheachd. Eabh.

⁵ seinn, còdl.

⁷ do fhear a ghràidh.

⁶ sìl luachmhoir.

SALM CXXIX.

1 *Maitheas Dhé d'a shluagh Israel. 5 Urnuigh an aghaidh naimhdean na h-eaglais.*
 Laoidh nan ceum.

IS minic a chràidh iad mi o m'òige, abradh Israel a nìs:

2 Is minic a chràidh iad mi o m'òige; gidheadh cha d'thug iad buaidh orm.

3 Air mo dhrum threabh an luchd-treabhaidh; tharruing iad an sgrìoban fada.

4 *Tha an Tighearna cothromach: ghearr e o chéile cùird nan aingidh.*

5 Cuirear gu h-amhludh, agus pillear air an ais iadsan uile le'm fuathach Sion.

6 Bithidh iad mar fheur air mullach thighean, a sheargas mum fàs e suas:

7 Leis nach lìon am buanaiche a ghlac, no fear-ceangail nan sguab a bhrollach¹.

8 Nì mò their iadsan a bhios a' dol seachad riu, Beannachd an Tighearna gu robh oirbh: tha sinn 'gur beannachadh ann an ainm an Tighearna.

SALM CXXX.

1 *'Na theanntachd ghlaodh an sàmadar ri Dia, 5 agus chuir e a dhòigh 'na fhocal.*

Laoidh nan ceum.

ONA doimhneachdaibh ghlaodh mi riut, a Thighearna.

2 A Thighearna, éisd ri m' ghuth; thugadh do chluasan an aire do ghuth m'ath-chuingean.

3 Ma chomharaicheas tusa aingidheachd, a Thighearna; a Thighearna, cò a sheasas.

4 Ach agad-sa *tha* maitheanas; agus uime sin bithidh eagal *air daoimibh* romhad.

5 Tha mi a' feitheamh air an Tighearna, tha m'anam a' feitheamh, agus 'na fhocal tha mo dhòigh.

6 *Tha m'anam a' feitheamh* air an Tighearna nìs mò na luchd-faire na maidne, *seadh*, na luchd-faire na maidne.

7 Earbadh Israel as an Tighearna; oir aig an Tighearna *tha* tròcair, agus aige-san *tha* mòr-shaorsa;

8 Agus saoraidh e Israel o 'euceartaibh gu léir.

SALM CXXXI.

1 *Nochd Daibhidh irioslachd a chridhe féin, 3 agus dh'earail e air Israel earbsadh á Dia.*

Laoidh nan ceum, le Daibhidh.

ATHIGHEARNA, cha 'n'eil mo chridhe uaibhreach, no mo shùilean àrd; agus cha do ghabh mi gnothuch ri nithibh mòra, no ri nithibh àrda air mo shon.

2 Gu deimhin shocraich agus chiùinich mi m'anam, mar leanabh a chuireadh o chich a mhàtlar; mar leanabh a chuireadh o'n chich *tha* m'anam-sa.

3 Earbadh Israel as an Tighearna, o'n àm so agus gu bràth.

SALM CXXXII.

1 *Eud Dhaibhidh gu àit ullachadh do phàillium an Tighearn. 11 Na geallanna a thug Dia do Dhaibhidh.*

Laoidh nan ceum.

CUIMHNICH, a Thighearna, air Daibhidh, agus air 'uile àmhghar:

2 Mar a mhionnaich e do'n Tighearna, a bhòidich e do *Dhia* treun Iacoib, *ag ràdh*,

3 Gu deimhin cha téid mi do phàillium mo thighe, cha téid mi suas air mo leabaidh;

4 Cha toir mi codal do m' shùilibh, no suain do m' rosgaibh²,

5 Gus am faigh mi àit do'n Tighearna, ionad-còmhnuidh do *Dhia* treun Iacoib.

6 Feuch, chuala sinn uime aig E-phratah; fhuair sinn e ann am machar-aibh na coille³.

7 Théid sinn a steach d'a phàilliumaibh; sleuchdaidh sinn aig stòl a choise.

8 Eirich a Thighearna, gu d'thàmh, thu féin agus àir do neirt.

9 Sgeadaichear do shagairt le h-ionrac as, agus deanadh do naoimh luathghaire.

10 Air sgàth Dhaibhidh t'òglaich, na cuir air a h-ais aghaidh t'Aoin ungta.

11 Mhionnaich an Tighearna do Dhaibhidh am firinn; cha phill e uaith: Do thoradh do chuirp suidhichidh mi air do righ-chaithir.

12 Ma choimhideas do chlann mò choimhcheangal agus mo theistean, a theagaisgeas mi dhoibh, suidhidh mar an ceudna an clann-san air do righ-chaithir gu bràth.

13 Oir ròghnaich an Tighearna Sion; mhiannuich e i mar ionad-còmhnuidh dha féin, *ag ràdh*,

14 *Is i* so mo shuaimhneas gu sìorruidh: an so gabhaidh mi còmhnuidh, oir mhiannuich mi i.

15 Beannaichidh mi gu mòr a lòn⁴; sàsuichidh mi a bochdan le h-aran.

16 Eudaichidh mi a sagairt le slàinte; agus nì a uaoimh àrd luathghaire.

17 An sin bheir mi air adharc Dhaibhidh fàs: dh'orduich mi lòchran do m' Aon ungta.

18 Eudaichidh mi a naimhdean le nàire: ach air féin thig a choron fo⁵ bhlàth.

SALM CXXXIII.

1 *Tha Daibhidh a' nochdadh cia taitneach an nì do bhràithribh còmhnuidh a ghabhail cuideachd ann an aonachd.*

Laoidh nan ceum, le Daibhidh.

FEUCH, cia maith agus cia taitneach an nì do bhràithribh còmhnuidh a ghabhail cuideachd ann an aonachd!

2 Mar dheadh oladh-ungaidh air a' cheann, a ruith sìos air an fheusaig, feus-

¹ uchd, 'achlais. ² do fhàbhraibh mo shùil.

³ Iaar. Eabh.

⁴ teachd-an-tìr.

⁵ fuidh.

aig Aaroin, a ruith sìos air iomall a thrusgain;

3 Mar dhealt air Hermon, a thuiteas air sléibhtibh¹ Shioin²: oir an sin dh'àithn an Tighearn am beannachadh, beatha gu siorruidh.

SALM CXXXIV.

Earail gu Dia a bheannachadh.

Laoidh nan ceum.

FEUCH, beannaichibh an Tighearna, sibhse òglacha an Tighearna gu léir, a sheasas ann an tigh an Tighearna gach oidheche.

2 Togaibh bhur làmhan anns an ionad naomh³, agus beannaichibh an Tighearna.

3 Beannaicheadh an Tighearn thu á Sion, a rinn nèamh agus talamh.

SALM CXXXV.

1 Earail gu Dia a mholadh air son a mhaitheis, 6 a chumhachd, 8 agus a bhreitheanas an aghaidh naimhdean a shluagh. 15 Diomhanas iodhol nan cinneach.

MOLAIBH an Tighearna; molaibh ainm an Tighearna, molaibhse, òglacha an Tighearna.

2 Sibhse a sheasas ann an tigh an Tighearn, ann an cùirtibh tìghe ar Dé,

3 Molaibh an Tighearn, oir *tha*'n Tighearna maith: seinnibh cliù d'a ainm, oir *tha* e taitneach.

4 Oir ròghnaich an Tighearn Iacob dha féin, Israel mar 'ionmhas sonruichte.

5 Oir tha fios agam gur mòr an Tighearn, agus *gu bheil* ar Tighearn os ceann nan nìle dhée.

6 Ge b'e ni bu toil leis an Tighearn rinn e air nèamh agus air talamh, anns na cuantaibh, agus anns na doimhneachdaibh uile.

7 *Is* csan a bheir air a' cheò dol suas o chrìch na talmhainn; a ni dealanach le h-uisge; a bheir a mach a' ghaath a 'ionadaibh-tasgaidh;

8 A bhuail ceud-ghin na h-Eiphit, araoon duine agus ainmhidh;

9 A chuir comharan agus iongantasan ann ad mheadhon, O Eiphit, air Pharaoh agus air 'òglachaibh gu léir;

10 A bhuail cinnich mhòra, agus a mharbh rìghrean mòra,

11 Sìhon rìgh nan Amorach, agus Og rìgh Blasain, agus uile rìoghachda Chanaan,

12 Agus a thug am fearann mar oighreachd, mar oighreachd do Israel a shluagh.

13 *Mairidh* t'ainm-sa, a Thighearn, gu bràth: do chuimhne, a Thighearn, o linn gu linn.

14 Oir bheir an Tighearna breth air a shluagh, agus gabhaidh e aithreachas, a thaobh a sheirbhiseach.

15 *Is* airgid agus òr iodhol⁴ nan cinneach, obair làmhan dhaoine.

16 Tha beul aca, ach cha labhair iad; suilean aca, ach cha'n fhaic iad.

17 Tha cluasan aca, ach cha chluinn iad: ni mò a tha anail 'nam beul.

18 Cosmhuil riu féin tha iadsan a ni iad, gach neach a dh'earbas asda.

19 A thigh Israeil, beannaichibh an Tighearn; a thigh Aaroin, beannaichibh an Tighearn.

20 A thigh Lebhi, beannaichibh an Tighearn; sibhse air am bheil eagal an Tighearna, beannaichibh an Tighearn.

21 Beannaichte gu robh an Tighearn á Sion, aig am bheil a chòmhnuidh ann an Ierusalem. Molaibhse an Tighearn.

SALM CXXXVI.

1 Earail gu buidheachas a thoirt do Dhia air son a thròcairean, agus nan iongantasan mòra a rinn e air son sluaigh Israeil.

O THUGAIBH buidheachas do'n Tighearn, oir *tha* e maith; oir gu bràth *mairidh* a thròcair.

2 Thugaibh buidheachas do Dhia nan dia; oir gu bràth *mairidh* a thròcair.

3 Thugaibh buidheachas do Thighearna nan tìghearna; oir gu bràth *mairidh* a thròcair.

4 Dha-san 'na aonar a ni iongantasan mòra; oir gu bràth *mairidh* a thròcair.

5 Dha-san a rinn na nèamhan le gliocas; oir gu bràth *mairidh* a thròcair.

6 Dha-san a shìn an talamh os ceann nan uisge; oir gu bràth a *mairidh* thròcair.

7 Dha-san a rinn soluis mhòra; oir gu bràth *mairidh* a thròcair.

8 A' ghrian a riaghladh an là⁵; oir gu bràth *mairidh* a thròcair.

9 A' ghealach agus na reultan a riaghladh na h-oidheche; oir gu bràth *mairidh* a thròcair.

10 Dha-san a bhuail na h-Eiphitich⁶ 'nan ceud-ghlinibh; oir gu bràth *mairidh* a thròcair:

11 Agus a thug a mach Israel as am mheadhon; oir gu bràth *mairidh* a thròcair:

12 Le làimh thréin, agus le gairdean sìnte mach; oir gu bràth *mairidh* a thròcair.

13 Dha-san a roinn a' mhuir ruadh 'na roinnibh⁷; oir gu bràth *mairidh* a thròcair:

14 Agus a thug air Israel dol troimh a

¹ slabh. ² Shioin. Faic Deut. Caib. IV. r. 48.

³ le naomhachd. ⁴ dealbhan.

⁵ san là.

⁶ an Eiphit.

⁷ na h-curranabha.

meadhon; oir gu bràth *mairidh* a thròc-air:

15 Ach a thilg Pharaoh agus 'armailt bun os ceann anns a' mhuir ruaidh; oir gu bràth *mairidh* a thròc-air.

16 Dha-san a threòraich a shluagh troimh an fhàsach: oir gu bràth *mairidh* a thròc-air.

17 Dha-san a bhuail rìghrean mòra; oir gu bràth *mairidh* a thròc-air.

18 Agus a mharbh rìghrean treuna; oir gu bràth *mairidh* a thròc-air:

19 Sihon rìgh nan Amoraich; oir gu bràth *mairidh* a thròc-air:

20 Agus Og rìgh Bhasain; oir gu bràth *mairidh* a thròc-air:

21 Agus a thug am fearann mar oigh-reachd; oir gu bràth *mairidh* a thròc-air:

22 Mar oighreachd do Israel 'òglach féin; oir gu bràth *mairidh* a thròc-air:

23 A chuimhnich oirn 'nar staid ìosal; oir gu bràth *mairidh* a thròc-air:

24 Agus a shaor sinn o ar naimhdeibh; oir gu bràth *mairidh* a thròc-air.

25 A tha tabhairt bidh do gach feoil; oir gu bràth *mairidh* a thròc-air.

26 O thugaibh buidheachas do Dhia nan nèamh; oir gu bràth *mairidh* a thròc-air.

SALM CXXXVII.

1 'Nam braighdeanas chuimhnich clann Israèil le bròn air an tìr féin. 7 Chronaicheadh clann Edoim agus Bhabìlon.

LAIMH ri aimhnichibh Bhabìloin, an sin shuidh, agus ghul sinn, an uair a chuimhnich sinn air Sìon.

2 Air na crannaibh seilich 'na meadhon croch sinn ar clàrsaichean.

3 Oir an sin dh'iarr iadsan a thug am braighdeanas sinn, òran oirn; agus dh'iarr iadsan a rinn fògaraich dhinn¹ aoibhneas oirn, *ag ràdh*, Seinnibh dhuinn aon do laoidhibh Shìon.

4 Cionnus a sheinneas sinne laoidh an Tighearn ann an tìr choimhich?

5 Ma dhì-chuimhniceas mise thusa, a Ierusalem, dì-chuimhnicheadh mo làmh dheas a seòltachd.

6 Leanadh mo theangadh ri m' ghial², mur cuimhnich mi ort, mur fearr leam Ierusalem na m'aoibhneas a's àirde.

7 Cuimhnich, a Thighearna, clann Edoim, ann an là Ierusalem, a thubhairt, Leagaibh, leagaibh³ sìos i gu ruig a bunait.

8 A nighean Bhabìloin, a lom-sgrìosar⁴, is sona esan a dhìolas dhuitse, a réir mar a rinn thu oirne.

9 Is sona esan a ghlacas agus a phronnas do chlann bheag ris na clachaibh.

SALM CXXXVIII.

1 Mhol Daibhidh an Tighearn air son 'fhìrinn agus a chaoimhneis-gràidh. 4 Roimh-innis e gu'n tugadh rìghrean na talmhainn moladh do Dhia.

Salm le Daibhidh.

MOLAIDH mi thu, a Thighearna, le m' uile chridhe; an làthair nan dée seinnidh mi cliù dhuit.

2 Sleuchdaidh mi aig do theampull⁵ naomh, agus molaidh mi t'ainm air son do chaoimhneis-gràidh, agus air son t'fhìrinn; oir dh'ardaich thu t'fhocal os ceann t'ainme uile.

3 San là air an do ghlaodh mi riut, fhreagair thu mi; neartaich thu mi a'm anam le treòir.

4 Molaidh uile rìghrean na talmhainn thu, a Thighearna, 'nuair a chluinneas iad briathran do bheoil:

5 Agus seinnidh iad ann an slighibh an Tighearn; oir is mòr glòir an Tighearna.

6 Ge h-àrd an Tighearna, gidheadh seallaidh e air an ìrosal; ach aithnichidh e an t-uaibhreach fad as.

7 Ged ghluais mi ann am meadhon àmhghair⁶, ath-bheothaichidh tu mi; an aghaidh corruich mo naimhde sinidh tu do làmh, agus saoraidh do dheas làmh mi.

8 Coimhlonaidh an Tighearn air mo shon; *mairidh* do thròc-air, a Thighearna, gu bràth: na tréig oibre do làmh.

SALM CXXXIX.

1 Dh'aicidh Daibhidh gu'n robh làthaireachd Dhé mu'n cuairt da a ghinàth. 17 Mhol e an Tighearn air son a thròcairean; 23 agus ghuidh e bhàir a threòrachadh san t-slighe shiorruidh.

Do'n àrd fhear-ciùil. Salm le Daibhidh.

ATHIGHEARNA, rannsaich⁷ thu mi, agus is aithne dhuit mi.

2 Is aithne dhuit mo shuidhe agus m' éirigh; tuigidh tu mo smuainte fad as.

3 Chuairtich thu mo cheum agus mo luidhe sìos, agus air mo shlighibh gu léir is fiosrach thu.

4 Oir feuch, cha 'n eil focal air mo theangaidh, Thighearna, nach aithne dhuit gu léir.

5 Am dhéigh, agus romham, chuairtich thu mi⁸, agus chuir thu do làmh orm.

6 Is ro iongantach an t-eòlas so air mo shon: tha e àrd; cha ruig mi air.

7 C'ait an téid mi o d' spiorad? agus c'ait an teich mi d' ghuais⁹?

8 Ma théid mi suas do nèamh, tha thu 'n sin; ma ni mi mo leabadh ann an ifrinn¹⁰, feuch, tha thu 'n sin.

9 Ma ghabhas mi sgiathan na maidne, agus gu còmhnuich mi ann an ionadaibh iomallach na fairge;

¹ a chreach, a chlaoidh sinn.

² chàirean.

³ Ruigsibh, ruigsibh.

⁴ dh'fàsaichear.

⁵ a làmh do theampull.

⁶ tèinn, trioblaid.

⁷ dh'fhidir.

⁸ dhealbhu thu mi.

⁹ fhanuis, làthaireachd.

¹⁰ anns an ionad a's ìochdaraiche, anns an uaigh.

10 Eadhon an sin stiùraidh do làmh mi, agus cumaidh do dhleas làmh mi.

11 Ma their mi, Gu deimhin folaichidh an dorchadas mi, bithidh an oidhche féin mar sholus mu'n cuairt orm.

12 Cha'n fholaich eadhon an dorchadas uaitse; ach dealraichidh an oidhche mar an là: is ionann an dorchadas agus an solus duitse.

13 Oir ghabh thu sealbh air m'àirneibh: dh'fholuich thu mi ann am broinn mo mhàthar.

14 Molaidh mi thu, oir is uamhasach, iongantach a dhealbhadh mi; is iongantach t'òibre-sa, agus is ro fhiosrach m'annam air sin.

15 Cha d'fholaicheadh mo chorp' uait an uair a rinneadh mi an diomhaireachd, a dhealbhadh mi gu h-iongantach ann an ionadaibh iochdarach na talmhainn.

16 Chunnaic do shùilean mo cheudfhàs anabuich, agus ann ad leabhar sgrìobhadh sìos *mobhuill* uile, a dhealbhadh ri h-uine, gun aon diubh *fathast* ann.

17 O cia luachmhor leamsa do smuainte-sa, a Dhé! cia mòr an uibhir?¹

18 Nan àirmhinn iad, is lionmhoire iad na a' ghluineamh: 'nuair a dhùisgeas mi, tha mi a ghnàth maille riutsa.

19 Gu cinnteach, a Dhé, marbhaidh tusa an t-aingidh: uime sin, a dhaoine fuileachdach, imichibh uam:

20 Oir labhair iad a'd' aghaidh gu h-aingidh; thug do naimhde *t'ainm* an diomhanas.

21 Nach 'eil mi tabhairt fuath, a Thighearna, dhoibhsan a tha toirt fuath dhuitse? agus nach 'eil mi gabhail gràin dhiubhsan a tha 'g éirigh suas a'd' aghaidh?

22 Le fuath iomlan tha mi toirt fuath dhoibh; mar naimhde measam iad.²

23 Rannsaich mi, a Dhé, agus aithnich mo chridhe: dearbh mi, agus tuig mo smuainte.

24 Agus amhairc am *bheil* slighe olc air bith annam, agus treòraich mi anns an t-slighe shìorruidh.

SALM CXL.

1 *Ghuidh Daibhidh gu'n teasairgeadh Dia e o ais-innleachd a naimhdean.* 12 *Tha dòchas aig gu'n cum an Tighearna ceartas ris na bochdaibh.*

Do'n àrd fhear-cuill. Salm le Daibhidh.

TEASAIRG mi, a Thighearna, o'n droch dhuine; o fhear na foireigne gléidh mi;

2 A tha smuaineachadh aimhleis 'nan cridhe; cruinnichidh iad gach là⁴ *chum* cogaidh.

3 Gheuraich iad an teangadh, mar

theangaidh nathrach; *tha* nimh na nathrach fo'm bilibh. Selah.

4 Gléidh mi, a Thighearna, o làmhaibh nan aingidh; o fhear an fhoirneirt dìon mi, le'm b'àill mo cheumanna thilgeadh bun os ceann.

5 Dh'fholuich na h-uabhrich ribe dhomh, agus cuird; sgaoil iad lìon ri taobh na slighe; leag iad ceapa-tuislidh dhomh. Selah.

6 Thubhairt mi ris an Tighearna, *Is* tu mo Dhia: éisd, a Thighearna, ri guth m'athchuingean.

7 A Iehobhah, a Thighearna, neart mo shláinte; dh'fholuich thu mo cheann ann an là catha.

8 Na deònuich, a Thighearna, miannan an aingidh; na soirbhich le 'ais-innleachd, air eagal gu'n àrdaich siad iad féin. Selah.

9 A thaobh nan daoine a chuairtich mi, còmhdaicheadh⁵ aimhleas am bilean féin iad.

10 Tuiteadh eibhlean teine orra: san teine tilgear iad; ann an slochdaibh domhain, chum nach éirich iad a ris.

11 Na daingnichear fear-labhairt uile air an talamh: sealgaidh olc air fear an fhoirneirt, chum a sgrìos.

12 Tha fhios agam gu'n cum an Tighearna ceartas ris an duine thruagh, còir ris na bochdaibh.

13 Gu dearbh bheir na fireana moladh do t'ainm: gabhaidh na h-ionracain còmh-nuidh a'd' fhianuis.

SALM CXLI.

1 *Ghuidh Daibhidh gu'n éisdeadh Dia r'a ghuth; 3 gu'n cuireadh e faire air a bheil, 9 agus gu'n còmhdaicheadh se e o ribe luchd-deanamh na h-euceirt.*

Salm le Daibhidh.

A THIGHEARNA, tha mi ag éigheach riut; greas a m' ionnsuidh; éisd ri m' ghuth, 'nuair a dh'éigheas mi riut.

2 Cuirear m'urnuigh a'd' làthair, *mar* thùis; togail suas mo làmh, *mar* an iobairt fheasgair.

3 Cuir, a Thighearna, faire air mo bheil; gléidh dorus mo bhilean.

4 Na aom mo chridhe gu ni olc air bith, gu bearta aingidh a chur an gnìomh le luchd-deanamh na h-euceirt: agus na h-itheam féin d'an nithibh milse.

5 Buailleadh am firean mi, is caoimhneas e; agus cronaicheadh e mi, is oladh luachmhor e, nach bris mo cheann: oir fathast *bithidh* m'urnuigh mar an ceudna *air an son* 'nan àmhghairibh.

6 'Nuair a thilgear sìos am breitheamhna ann an ionadaibh clachach, éisidh iad ri m' bhriathraibh, oir tha iad milis.

¹ neart. ² an cunntas ceann, an àirceanh.

³ tha iad agam. Eabhl. ⁴ a ghnàth. ⁵ còmhdaicheadh.

7 Mar a ghearras agus a sgoilteas neach fiodh air an làr, sgaoileadh ar cnàmhan aig beul na h-uaighe.

8 Ach a d' ionnsuidh-sa, a Iehobhah, a Thighearna, *tha* mo shùilean: annad-sa chuir mi mo dhòigh; na tréig m'anam¹.

9 Coimhid mi o'n ribe a leag iad dhomh, agus o cheapaibh-tuislidh luchd-deanamh na h-euceirt.

10 Tuiteadh na h-aingidh 'nan lìontaibh féin, am feadh a bhios mise a' gabhail thairis.

SALM CXLII.

1 *'Na thrioblaid ghlaodh Daibhidh ris an Tighearna, 5 agus thaom e a ghearan 'na làthair.*

Maschil le Daibhidh. Urnuigh 'nuair a bha e anns an uaimh.

LE m' ghuth ghlaodh mi ris an Tighearna; le m' ghuth dh'asluich mi air an Tighearna.

2 Thaom mi mo ghearan 'na làthair; chuir mi 'n céill mo theinn 'na fhianuis.

3 'Nuair a chlaoidheadh mo spiorad annam, b'aithne dhuitse mo cheum: san t-slighe air an d'imich mi, dh'fholuich iad ribe dhomh.

4 Dh'amhairc mi air mo làmh dheis, agus feuch, cha robh fear ann d'am b'aithne mi; thréig cabhair mi; cha robh neach ann a dh'fheòraicheadh air son m'anama.

5 Ghlaodh mi riut, a Thighearna; thubhairt mi, *Is* tu mo thearmunn², mo chuibhrionn ann an tìr nam beò.

6 'Thoir an aire do m' ghlaodh, oir dh'islicheadh mi gu mòr; saor mi uathas an tha'n tòir orm, oir is treise iad na mì.

7 Thoir m'anam á prìosan, chum gu mol mi t'ainm: cuairtichidh na fireana mi; oir buinidh tu gu fial rium.

SALM CXLIII.

1 *Ghuidh Daibhidh air an Tighearna gu'm bitheadh e bàigheil ris ann am breitheanas. 3 Tha e ri caoidh gu'n d' rinn a naimhdean geur-leanmhuinn air 'anam. 5 Dh'asluich e air Dia gu'n nochdadh e dha a chaomhneas-gràidh, 7 agus gu'n teasairgeadh se e o làimh a naimhdean.*

Salm le Daibhidh.

Céisd ri m'urnuigh, a Thighearna; éisd ri m'athchuingibh ann ad fhìrinn, freagair mi ann ad cheartas.

2 Agus na tig ann am breitheanas le t'òglach; oir ann ad fhianuis cha'n fhìreanaichear duine beò air bith.

3 Oir gheur-lean an nàmhaid m'anam; bhuail e mo bheatha sìos gu làr; thug e orm còmhnuidh ghabhail ann an dorchadas, mar iadsan a bha fada marbh.

4 Uime sin chlaoidheadh mo spiorad annam; tha mo chridhe briste an taobh a stigh dhìom.

5 Is cuimhne leam na làithean o chian; tha do ghnìomhara gu léir a' teachd a'm' aire; tha mi a' beachd-smuaineachadh air obair do làmh.

6 Shin mi mo làmhan riutsa: *tha* m'anam, mar thalamh tartmhor³, an geall ort. Selah.

7 Eisd rium gu grad, a Thighearna; chaidh as do m' spiorad: na folaich do ghnùis orm, air eagal gu'm bi mi cosmhuil riu-san a theid sìos do'n t-slochd.

8 Thoir orm do chaomhneas-gràidh a chluinntinn anns a' mhaduinn, oir annad-sa chuir mi mo dhòigh: thoir orm gu'n aithnich mi an t-slighe anns an còir dliomh imeachd, oir riut-sa tha mi togail suas m'anama.

9 Teasairg mi o m' naimhdibh, a Thighearna: a d'ionnsuidh-sa teichidh mi⁴.

10 Teagaisg dhomh do thoil a dheanamh, oir is tu mo Dhia: treòraicheadh do spiorad maith mi gu tìr an ionracais.

11 Air sgàth t'ainme, a Thighearna, beothaich thusa mi: trid d' fhìreantachd saor m'anam o theinn.

12 Agus trid do thròcair gearr as mo naimhdean, agus sgrios iadsan uile a tha claoidh m'anama; oir is mi t'òglach.

SALM CXLIV.

1 *Bheannaich Daibhidh an Tighearna do bhrìgh gu'n robh e 'na fhear-saoraidh dha. 5 Ghuidh e gu'n teasairgeadh Dia e o làimh cloinne choigreach. 9 Gheall e Dia a mholadh.*

Salm le Daibhidh.

BEANNAICHTHE gu robh an Tighearna mo charraig⁵, a theagaisgeas mo làmhan gu cath, mo mheoir gu comhrag:

2 Mo mhaith, agus mo dhaingneach; mo thùr àrd, agus m'fhear-saoraidh-sa; mo sgiath, agus an tì as an earb mi; a cheannsaicheas mo shluagh⁶ fodham.

3 A Thighearna, ciod e an duine, gu bheil thu a' gabhail eòlais air? mac an duine, gu bheil meas agad air?

4 Is cosmhuil an duine ri dìomhanas: *tha* a làithean mar sgàile a ghabhas seachad.

5 A Thighearna, lùb do fhlaithneas, agus thig a nuas: bean ris na beanntaibh, agus bithidh deatach dhiubh.

6 Cuir a mach dealanach, agus sgaoil iad; tilg do shaighdean, agus claoidh iad.

7 Sìn uait do làmh o'n àirde, saor mi, agus teasairg mi o uisgeachaibh mòra, á làimh cloinne choigreach;

8 Aig am bheil am beul a' labhairt dìomhanais, agus is i'n deas làmh deas làmh na bréige.

9 A Dhé, seinnidh mi dhuit òran nuadh;

¹ na dean m'anam fulamh, lòm.

² mo dhìdean, mo dhòchas. ³ ann an tìr thartmhoir.

⁴ teichidh mi gu m' fholach.

⁵ mo neart.

nu stòigh.

air an t-saltair, *air* inneal-ciùil nan deich teud, seinnidh mi moladh dhuit.

10 *Is* esan a bheir buaidh¹ do rìghribh, a shaoras Daibhidh, 'òglach fèin, o'n chlàidheamh mhìllteach.

11 Saor mi, agus teasaig mi o làimh cloinne choigreach, aig am bheil am beul a' labhairt dìomhanais, agus *is* i'n deas làmh deas làmh na brèige:

12 Chum gu'*m bi* ar mic mar ùr-chroinn a' fàs suas 'nan òige, ar nigheana mar chlachaibh oisinn, snàidhte a *rèir* cos-amhlachd lùchairt:

13 Chum gu'*m bi* ar saibhlean làn, a' toirt uatha do gach gnè thoraidh, ar caoraich a' breth nam mìltean, seadh deich mìltean 'nar macharaibh²;

14 Gu'*m bi* ar daimh làidir gu h-obair; nach *bi* briseadh steach ann, no dol a mach; agus nach *bi* gearan 'nar sràidibh.

15 *Is* sona an sluagh, a tha san staid³ so: *is* sona an sluagh, d'an Dia an Tighearna.

SALM CXLV.

1 Chuir Daibhidh an cèill cumhachd iongantach an Tighearn, 7 a mhaithas, 18 a cheartas agus a naomhachd.

Laoidh-mholaidh le Daibhidh.

ARDACHIDH mi thu, mo Dhia, mo Rìgh; agus beannaichidh mi t'ainm gu saoghal nan saoghal.

2 Gach là beannaichidh mi thu, agus molaidd mi t'ainm gu saoghal nan saoghal.

3 *Is* mòr an Tighearn, agus *is* ro airidh e air moladh; agus cha'n fheudar a mhòrachd a rannsachadh.

4 Molaidd àl do àl do ghnìomhara, agus cuiridh iad an cèill t'òibre cumhachdach.

5 Air urram glòire do mhòrachd agus air t'òibribh iongantach labhraidh mi⁴.

6 Agus labhraidh daoine⁵ air neart do bhearta uamhasach; agus aithrisidh mise⁶ do mhòrachd.

7 Cuiridh iad an cèill gu pailt cuimhne do mhaithais mhòir, agus àrd-mholaidh iad t'fhìreantachd.

8 *Is* gràsmhor agus truacanta an Tighearna; mall chum feirge, agus pailt ann an tròcair.

9 *Is* maith an Tighearna do na h-uile, agus *tha* a chaomh-thròcairean os ceann t'òibre uile.

10 Molaidd t'òibre gu léir thu, a Thighearn: agus beannaichidh do naoimh thu.

11 Air glòir do ròghachd labhraidh iad, agus cuiridh iad an cèill do chumhachd:

12 Chum a' bhearta iongantach a dheanamh aithnichte do chloinn nan daoine, agus glòir mòralachd a' ròghachd.

13 *Is* ròghachd shiorruidh do rògh-

achd-sa; agus *mairidh* t'uachdaranachd air feadh nan uile ghinealach.

14 [Tha an Tighearna frinneach 'na uile bhriathraibh, agus naomh 'na uile ghnìomharaibh.]

15 Cumaidh an Tighearna suas iadsan uile a tha tuiteam, agus togaidh e 'n àird iadsan uile a tha air cromadh sìos.

16 Tha sùilean nan uile a' feitheamh ort, agus bheir thu dhoibh am biadh 'na thràth.

17 Tha thu a' fosgladh do làimh, agus a' sàsachadh miann gach ni beò.

18 Tha'n Tighearna ceart 'na uile shlighibh, agus naomh 'na uile ghnìomharaibh.

19 *Is* dlùth an Tighearna dhoibhsan uile a ghairmeas air, dhoibhsan uile a ghairmeas air am firinn.

20 Coimhlionaidh e miann na droinge d'an eagal e; agus èisdidh e r'an glaoth, agus saoraidh e iad.

21 Gleidhidh an Tighearn iadsan uile a ghràdhaicheas e; ach sgriosaidh e na h-aingidh gu léir.

22 Air cliù an Tighearna labhraidh mo bheul: agus beannaichidh gach feoil 'ainm naomh-san gu saoghal nan saoghal.

SALM CXLVI.

1 Gheall Daibhidh gu'm molaidd e Dia rè a bheatha, 5 *Is* sona an ti a dh'earbas as an Tighearn.

MOLAIBHSE an Tighearna: mol an Tighearn, O m'anam.

2 Molaidd mi an Tighearn an cian is beò mi⁹; seinnidh mi cliù do m' Dhia, am feadh a bhios bith agam.

3 Na h-earbaibh á h-uachdaranai¹⁰, á mac duine sam bith, anns nach 'eil furtachd.

4 Théid anail as, pillidh e g'a ùir; san là sin féin théid as d'a smuaintibh.

5 *Is* sona an ti aig am bheil Dia Iacoib mar a chabhair, aig am bheil a dhòchas anns an Tighearn a Dhia,

6 A rinn nèamh agus talamh, a' mhuir agus gach ni a ta anna; a ghleidheas firinn gu bràth.

7 A chumas coir riu-san a tha fo fhòirneart; a bheir biadh do na h-ocraich. Cuiridh an Tighearna na prìosanaich fo sgaoil.

8 Fosgailidh an Tighearna sùilean nan dall; togaidh an Tighearna suas iadsan a tha air an cromadh sìos: is ionmhuinn leis an Tighearna na fireana.

9 Gleidhidh an Tighearna na coigrich; togaidh e suas an dilleachdan agus a' bhantrach: ach tilgidh e slighe nan aingidh bun os ceann.

¹ slàinte.

² sràidibh.

³ inbhe, chor.

⁴ Air urram glòire

do mhòrachd labhraidh iad, agus air t'òibribh

iongantach beachd-smuainichidh iad.

⁵ iad.

⁶ iad.

⁷ do.

⁹ rè mo bheatha.

¹⁰ daoineibh mòra, uaisle.

⁸ do.

10 Rìoghaichidh an Tighearna gu bràth, do Dhia-sa, a Shìon, o linn gu linn. Molaibhse an Tighearna.

SALM CXLVII.

1 *Dh' àithn am fàidh buidheachas a thabhairt do'n Tighearn air son a mhaitheis d'a shluagh; 4 air son a chumhachd, 6 agus a thròcair. 15 Tha uachdaranachd aig Dia os ceann gach nì a chruthaich e.*

MOLAIBHSE an Tighearn; oir is maith an nì a bhi tabhairt cliù d'ar Dia, oir a ta e taitneach, agus a ta moladh ciatach.

2 Togaidh an Tighearna suas Ierusalem; cruinnichidh e ri chèile diobaraich Israeil.

3 Leighisidh e iadsan aig am bheil cridhe briste, agus ceanglaidh e suas an leònta¹.

4 Innsidh² e àireamh nan rionnag; bheir e ainmean orra uile.

5 Is mòr ar Tighearn, agus is mòr a chumhachd: tha a thuigse gun tomhas.

6 Togaidh an Tighearna suas na daoine ciuine³; tilgidh e sìos na h-aingidh gu làr.

7 Seinnibh do'n Tighearna le buidheachas; seinnibh moladh d'ar Dia-ne air a' chlarsaich:

8 A dh'fholaicheas⁴ nèamh le neulaibh, a dh'ulluicheas uisge do'n talamh, a bheir air feur fàs air na sleibhtibh.

9 Bheir esan a bhiaidh do'n ainmhidh, do na fithich òga a ghoireas⁵.

10 Ann an neart an eich cha bhi a dhùil; ann an cosaibh fir cha ghabh e tlachd.

11 Gabhaidh an Tighearna tlachd ann-tasan d'an eagal e, a chuireas an dòigh 'na thròcair.

12 Mol an Tighearn, a Ierusalem: mol do Dhia, a Shìon:

13 Oir neartaich e croinn do gheatacha; bheannaich e do chlann an taobh a stigh dhìot.

14 Nì e sìth a'd' chrìochaibh; sàsuichidh e thu le smior a' chruthneachd.

15 Cuiridh e mach 'aithne air thalamh; gu luath ruithidh 'fhocal.

16 Bheir e sneachdadh mar olainn; sgaoilidh e an liath-reodh mar luathre.

17 Tilgidh e mach 'eigh⁶ mar ghream-anna; cò dh'fheudas seasamh fa chomhair 'fhuachda?

18 Cuiridh e mach 'fhocal, agus leaghaidh e iad; séididh a ghaoth, sruthaidh na h-uisgeacha.

19 Foillsichidh e 'fhocal do Iacob, a reachdan agus a bhreitheanais do Israeil.

20 Cha do bhuin e mar so ri cinneach

sam bith; cha mhò a b'aithne dhoibh a bhreitheanais. Molaibhse an Tighearna.

SALM CXLVIII.

1 *Dh'earail Daibhidh air na h-ainglibh, agus air gach creutair cruthaichte, Dia a mholadh.*

MOLAIBHSE an Tighearna. Molaibh an Tighearn o na nèamhaibh; molaibh e anns na h-àrdaibh.

2 Molaibh e, 'aingle uile; molaibh e, a shlòigh uile.

3 Molaibh e, a ghrian agus a ghealach; molaibh e, uile reulta soluis,

4 Molaibh e, a nèamha nan nèamh, agus uisgeacha a tha os ceann nan nèamh.

5 Moladh iad ainm an Tighearn; oir dh' àithn e, agus chruthaich iad.

6 Agus dhaingnich e iad gu saoghal nan saoghal; rinn e àithne, nach téid thairis⁷.

7 Molaibh an Tighearn o'n talamh, a dhlàròna, agus a dhoimhneachdan uile.

8 Teine⁸ agus clach-sneachd; sneachdadh agus ceò; gaoth dhoimhneach a' coimhlionadh 'fhocail;

9 Na beanntan agus na cnuic uile; craobhan-meas⁹ agus na h-uile sheudair¹⁰;

10 Fìadh-bheathaiche, agus gach uile ainmhidh; nithe snàigeach, agus eunlaith iteagach¹¹;

11 Rìghrean na talmhainn agus na h-uile shlòigh; uachdarana agus uile bhreitheamhna na talinainn;

12 Araon òig-fhir agus òighean; seann daoine agus clann¹²;

13 Moladh iad sin ainm an Tighearn: oir a ta 'ainm-san a mhàin urramach¹³, tha a ghloir os ceann na talmhainn agus nan nèamh.

14 Agus dh'àrdaich e adharc a shluaigh, moladh a naomh uile; eadhon cloinn Israeil, sluagh a ta 'm fagus da. Molaibhse an Tighearna.

SALM CXLIX.

1 *Is airidh Dia air cliù air son a mhaitheis d'a shluagh, 5 agus air son a dhioghaltais air na cinnich.*

MOLAIBHSE an Tighearna. Seinnibh do'n Tighearn òran nuadh, seinnibh a mholadh ann an coimhthional nan naomh.

2 Biodh Israel aoibhneach 'na Chruith-fhear: deanadh clann Shìoin gairdeachas 'nan Rìgh.

3 Moladh iad 'ainm anns an dannsadh: le tiompan agus le clàrsaich seinneadh iad dha.

4 Oir gabhaidh an Tighearna tlachd 'na shluagh: nì e na daoine sèimhe sgiamhach le slàinte.

5 Deanadh na naoimh gairdeachas ann

¹ doilgheasan. ² Airmhidh. ³ macanta.
⁴ chòmhaicheas. ⁵ ghlaodhas.
⁶ a leac-òighre. ⁷ nach brisear.

⁸ tein'-athair. ⁹ craobhan-toraidh.
¹⁰ cheudair. ¹¹ sgiathach, sgiathanach.
¹² òganaich. ¹³ air àrdachadh.

an glòir: deanadh iad iolach¹ air an leabaichibh.

6 *Biodh àrd-chliù Dhé 'nam beul, agus claidheamh dà fhaobhair 'nan làimh,*

7 A chum dìoghaltas a dheanamh air na cinnich, smachdachadh goirt² air na slòigh;

8 A chum an rìghrean a cheangal le slabhraidhibh, agus an àrd uaislean le geimhlibh iarunn;

9 A chum am breitheanas a chur an gnìomh orra, a tha sgriobhta: *tha'n t-urram so aig a naoimh uile.* Molaibhse an Tighearna.

SALM CL.

Earail gu Dia a mholadh le innealaibh-ciuil.

¹ àrd-sheinneadh iad.

MOLAIBHSE an Tighearna. Molaibh e ann an ionad naomh; molaibh e ann an speuraibh³ a chumhachd.

2 Molaibh e air son a ghnìomhara treuna; molaibh e a réir àirde a mhòrachd.

3 Molaibh e le fuaim trompaid; molaibh e le saltair, agus le clàrsaich.

4 Molaibh e le tiompan agus dannsadh; molaibh e le innealaibh-ciuil nan teud, agus le organ.

5 Molaibh e le ciombalaibh fonnmhor; molaibh e le ciombalaibh àrd-fluaimneach,

6 Moladh gach ni anns am bheil anail an Tighearna. Molaibhse an Tighearna.

² peanas.

³ athar, iarmailt.

GNATH-FHOCAIL.

CAIB. I.

1 *Feum agus luach a' ghliocais.* 7 *Is e eagal an Tighearna tùs an eòlais.* 20 *Rinn gliocas gearan an aghaidh luchd-fochaid, 24 agus bhagair i iad le léir-sgrìos.*

GNATH-FHOCAIL Sholaimh, mhic Dhaibhidh, rìgh Israeil;

2 A dh'aithneachadh gliocais agus teagaisg, a thuigsinn bhriathar na tuigse;

3 A ghabhail teagaisg a' ghliocais, a' cheartais, agus a' bhreitheanais, agus na còrach;

4 A thoirt géire dhoibhsan a ta baoghalt¹, eòlais agus céill² do'n òganach.

5 Eisdidh duine glic, agus meudaichidh e fòghlum; agus sealbhaichidh duine tuigseach comhairlean glice:

6 A thuigsinn gnàth-fhocail, agus eadar-mhìneachaidh; fhocal nan daoine glice, agus am briathar dorch.

7 *Is e eagal an Tighearna tùs an eòlais:* air gliocas agus teagasg ni amadain tair.

8 A mhic, éisd thusa ri teagasg t'athar, agus na tréig lagh do mhàthar:

9 Oir 'nan coron maise *bithidh* iad do d' cheann, agus 'nan slabhruidhibh do d' mhuineal.

10 A mhic, ma thàlaidheas³ peacaich thu, na aontaich thusa leo.

11 Ma their iad, Thig leinne, deanamaid feall-fheitheamh⁴ air fuil, luidheamaid am folach air son an neòchiontaich gun aobhar:

12 Mar an uaigh sluigeanaid suas beò

iad, agus iomlan mar iadsan a théid sìos do'n t-slochd.

13 Gheibh sinn gach uile mhaoin luachmhor, lìonaidh sinn ar tighean le creich⁵:

14 Tilg a steach do chrannchur 'nar measg-ne; bithidh aon sporan againn uile.

15 A mhic, na h-imich thusa san t-slighe maille riu; cum air a h-ais do chos o'n ceum.

16 Oir tha'n cosan a' ruith a chum uile, agus a' deanamh deifir a dhòrtadh fola.

17 Gu deimhin is dìomhain an lìon a sgaoileadh an sealladh eoin air bith.

18 Agus tha iad ri feall-fholach⁶ an aghaidh am fola féin; tha iad a' luidhe an uaigneas an aghaidh an anama féin.

19 Mar sin *tha* slighean gach neach a ta sanntach air buannachd: anam a shealbhadairan bheir i air falbh.

20 Tha gliocas ag éigheach a muigh, anns na sràidibh tha i a' cur a mach a gutha;

21 Ann an àitibh sònruichte a' chomh-chruinneachaidh tha i ag éigheach, ann am fosgladh nan geata: anns a' bhaile tha i a cur a mach a briathra, *ag ràdh*,

22 Cia fhad, a dhaoine baoghaltach? agus a ghabhas luchd-fochaid tlachd 'nam fochaid, agus a bheir amadain fuath do eòlas?

23 Pillibh ri m' achmhasan: feuch, dòirtidh mi mach mo spiorad dhuibh⁷; nì mi aithnichte mo bhriathra duibh.

24 A chionn gu'n do ghairm mi, agus

¹ aon-fhille, neo-gheur.

² eagnuidheachd, deadh chomhairle.

³ dhreugas, mheallas.

⁴ plaid-luidhe.

⁵ spàinne.

⁶ plaid-luidhe.

⁷ cìrbh.

gu'n do dhiùlt sibhse, gu'n do shùn mi nach mo làmh, agus nach d'thug duine sam bith an aire;

25 Ach gu'n do chuir sibh an neo-bhrìgh m'uile chomhairle, agus nach b'àill leibh a bheag do m'achmhasan;

26 Ni mise mar an ceudna gàire ri r'sgrios-sa; ni mi fanoid 'nuair a thig bhrù-eagal;

27 'Nuair a thig bhrù-eagal mar fhàsachadh, agus a thig bhrù léir-sgrios oirbh mar ioma-ghaoith; 'nuair a thig teinn' agus cràdh-cridhe oirbh.

28 An sin gairmidh iad ormsa, ach cha fhreagair mi; iarraidh iad mi gu moch, ach cha'n fhaigh iad mi;

29 A chionn gu'n d'fhuathaich iad eòlas, agus nach do ròghnaich iad eagal an Tighearna.

30 Cha b'àill leo bheag do m'chomhairle¹, rinn iad tàir air m'achmhasan uile.

31 Uime sin ithidh iad do thoradh an slighe féin, agus lionar iad le'n innleachd-aibh féin.

32 Oir marbhaidh clonadh nan daoine baoghalta iad, agus sgriosaidh soirbheas² nan amadan iad féin.

33 Ach ge b'e dh'éisdeas riumsa, gabhaidh e còmhnuidh an tèaruinteachd, agus bithidh e saor⁴ o eagal uile.

CAIB. II.

1 'Nuair a theid gliocas a steach do'n chridhe teagaisgidh i eagal an Tighearna, 10 dìonaiddh i o shlighe an droch dhuine, 20 agus trèraichidh i air slighe na beatha.

A MHC, ma ghabhas tu mo bhriathra-sa, agus ma dh'fholuicheas tu m'aitheantan maille riut;

2 Air chor as gu'n aom thu do chluas ri gliocas, gu'n leag thu do chridhe air tuigse:

3 Seadh, ri eòlas ma dh'éigheas tu, ri tuigse ma thogas tu suas do ghuth;

4 Ma dh'iarraas tu i mar airgiod, agus ma rannsaicheas tu air a son, mar air son ionmhasan folaichte;

5 An sin tuigidh tu eagal an Tighearna, agus gheibh thu eòlas Dé:

6 Oir bheir an Tighearna gliocas; as a bheul thig eòlas agus tuigse.

7 Tha e tasgaidh suas gliocais fhallain air son nam firean: is sgiath e dhoibhsan a ghluaiseas gu h-ionraic.

8 Tha e a' coimhead ceumanna a' bhrèitheanaidh, agus a' dìonadh slighe a naomh.

9 An sin tuigidh tu fireantachd, agus breitheanas, agus ceartas; seadh, gach uile dheadh shlighe.

10 'Nuair a theid gliocas a steach ann

ad chridhe, agus a bhios eòlas taitneach do d'anam,

11 Ni ciall do dhionadhl, coimhididh tuigse thu:

12 Gu d'shaoradh⁵ o shlighe an droch dhuine; o'n duine a labhras nithe fiara⁶;

13 A dh'fhàgas ceumanna an ionracais, a dh'imeachd ann an slighibh an dorchadais;

14 Leis an aoibhinn an t-olc a dheanamh, agus a tha gabhail tlachd ann an aingealtachd nan aingidh.

15 G' am bheil an sligheanna cam, agus iad a' clonadh 'nan ceumannaibh:

16 Chum do shaoradh o'n mhnaoi choimhich, o'n bhana choigrich a ni miodal le a briathraibh;

17 A thréigear oid-iunnsaich⁷ a h-òige, agus a dhì-chuimhniceas coimhcheangal a Dé:

18 Oir tha a tigh a' clonadh chum bàis, agus a ceumanna chum nam marbh.

19 Cha phill duine sam bith a theid d'a h-ionnsuidh, agus a ris cha'n fhaigh e sligheanna na beatha⁸.

20 Chum gu'n imich thu anu an slighe dhaoine maithe⁹, agus gu'n gléidh thu ceumanna nam firean.

21 Oir gabhaidh na h-ionracain còmhnuidh san tìr, agus fanaidh na daoine foirfe¹⁰ innte.

22 Ach gearrar na daoine aingidh bhàrr na talmhainn, agus spionar luchd-eus-aontais as.

CAIB. III.

1 Chomhairlich Solamh, do'n t-sluagh gu'n coimh-ideadh iad lagh an Tighearna, 5 gu'n earbadh iad a' mhaithreas, 7 gu'm bithheadh iad iriosal, 9 diadhaidh, 10 agus foighidneach. 20 Cumhachd, 21 agus sochairan a' gliocais. 33 Mallachadh nan-aingidh.

A MHC, na dì-chuimhnich mo lagh; ach gleidheadh do chridhe m'aitheantan:

2 Oir làithean buan, agus saoghal fada, agus sìth bheir iad dhuit.

3 Na tréigeadh trócair agus firinn thu: ceangail iad mu d' mhuineal; sgrìobh iad air clàr do chridhe.

4 Agus gheibh thu deadh-ghean, agus tuigse mhaith an seiladh Dhé agus dhaoine.

5 Earb as an Tighearna le d' uile chridhe; agus ri d' thuigse féin na biodh do thaice.

6 Ann ad uile shlighibh aidich e, agus seòlaidh esan do cheumanna.

7 Na bi glie a'd' shùilb féin; biodh eagal an Tighearna ort, agus tréig olc.

8 'Na shlàinte bithidh e do d' iomlaig, agus 'na smior do d' chuàmhaibh.

¹ àmhghar. ² cha d'aontaich iad le m'chomhairle.

³ soirbheachadh. ⁴ sàmhach. ⁵ gu d' dhìon.

⁶ tarsuinn. ⁷ trèdraiche, fear-stiùraidh.

⁸ ni mò a ghabhas e greim do shlighibh na beatha.

⁹ matha.

¹⁰ iomlan, coimhlionta.

9 Thoir urram do'n Tighearna le d' mhaoin, agus le ceud thoradh t'uille chinneis¹:

10 Agus lionar do shaibhlean le pailteas, agus le fion nuadh ruithidh t'fhion-amair thairis.

11 Air cronachadh an Tighearn, a mhic, na dean-sa tàir, agus na sgithich d'a smachdachadh.

12 Oir esan a's toigh leis an Tighearna smachdaichidh e, mar a smachdaicheas athair am mac anns am bheil a thlachd.

13 Is sona an duine a dh'amaiseas air gliocas, agus am fear a gheibh tuigse:

14 Oir is fearr a ceannachd² na ceannachd airgid, agus a buannachd³ na'n t'òr.

15 Is luachmhoire i na na seudan⁴, agus cha n'eil gach ni a's urrainn thu mhiannachadh r'an coimhmeas⁵ rithe.

16 Tha saoghal fada 'na làimh dheis; 'na làimh chli saobhbreas agus urram.

17 Is sligheanna subhachais a sligheanna, agus is sìth a ceumanna uile.

18 Is craobh beatha i dhoibhsan a ni greim oirre, agus is sona iadsan a ghleidh-eas i.

19 Le gliocas shuidhich an Tighearn an talamh; le tuigse shonraich e na nèama.

20 Le 'eòlas-san brisear suas na doimhneachdan, agus silidh na neoil a nuas an drùchd.

21 A mhic, na dealaichidh iad ri d' shùilb: coimhid gliocas fallain agus tuigse⁶.

22 Agus bithidh iad 'nam beatha do d' anam, agus 'nam maise do d' mhuineal.

23 An sin imichidh tu a'd shlighe gu tèaruinte, agus cha tuislich do chos⁷.

24 'Nuair a luidheas tu sìos, cha bhi eagail ort: seadh, luidhidh tu sìos, agus bithidh do chodal milis⁸.

25 Na biodh sgàth⁹ ort roimh eagail obann, no roimh fhàsachadh¹⁰ nan aingidh, 'nuair a thig e.

26 Oir bithidh an Tighearna 'na thearmun duit, agus gleidhidh e do chos o bhi air a glacadh.

27 Na cum maith o'n droing d'an dligh-ear e, 'nuair a tha e 'n comas do làimh a dheanamh.

28 Na h-abair ri d' choimhearsnach, Imich, agus thig a ris, agus am màireach bheir mi dhuit, 'nuair a tha e agad làimh riut.

29 Na dealbh olc an aghaidh do choimhearsnach, agus e gabhail còmhuidh gu muinghineach làimh riut.

30 Na dean strì ri duine gun aobhar,

inur do rinn e cron ort.

31 Na biodh farmaid agad ri fear an fhòirneirt, agus na ròglmaich a bheag d'a slighibh.

32 Oir is gràineileachd do'n Tighearn an duine droch-mhuinte¹¹; ach tha a rùn aig an ionracan.

33 Tha mallachd an Tighearn ann an tigh an aingidh; ach beannaichidh e àite-còmhuidh nam firean.

34 Gu cinnteach air luchd-fochaid ni e fochaid; ach do'n iriosal bheir e gràs¹².

35 Sealbhaichidh na daoine glìce urram; ach is e nàire àrdachadh nan amadan.

CAIB. IV.

1 Nochd Solamh do'n t-sluagh an teagasg a thug 'athair dha, 5 agus chomhairlich e dhoibh gliocas fhaotainn do bhrìgh gu'n toir i gu h-urram iad. 14 Dh'earlaich e orraslighe nan aingidh a sheachnadh; 20 aire a thoirt d'a bhriathraibh; 23 agus an cridhe a ghleidheadh leis gach uile dhùcholl.

CLUINNIBH, a chlann, teagasg athar, agus thugaibh an aire, chum gu faigh sibh eòlas air tuigse:

2 Oir tha mi toirt duibh deadh theagaisg; na tréigibh-se mo reachd.

3 Oir bumhise mac muirneach¹³ m'athar, agus mar aon-ghin nic bha mi ann an sealladh mo mhàthar.

4 Theagaisg e mi mar an ceudna, agus thubhairt e rium, Cumadh do chridhe mo bhriathra; coimhid m' àitheantan agus mair beò.

5 Faigh gliocas; faigh tuigse; na dì-chuimhnich, agus na claon o bhriathraibh mo bheoil.

6 Na tréig i, agus gleidhidh i thu: gràdhaidh i, agus coimhididh i thu.

7 Is e gliocas an ni sònruichte¹⁴; faigh gliocas, agus maille ri d' uile fhaghail faigh tuigse.

8 Ardaich i, agus cuiridh i suas thu: bheir i gu h-urram thu, 'nuair a ghabhas tu a'd' ghlacaibh i.

9 Bheir i do d' cheann coron maise; crùn glòire bheir i seachad duit.

10 Eisd, a mhic, agus gabh m'fhocail: agus bithidh bliadhnacha do bheatha lion-mhor.

11 Ann an slighe a' ghliocais theagaisg mi thu: threòraich mi thu ann an ceumannaibh dìreach.

12 'Nuair a dh'imeachas tu, cha teann-aichear¹⁵ do cheumanna; agus an uair a ruitheas tu, cha tuislich thu.

13 Dean greim daingean air teagasg; na leig as e; coimhid e, oir is e do bheatha e.

14 Na gabh a steach do rathad nan

¹ fhàis.

² malairt.

³ tairbhe.

⁴ leugan, clackan luachmhor.

⁵ samalachadh.

⁶ léirsinneachd, cagnuidheachd.

⁷ chas.

⁸ ciùin, suaimhneach.

⁹ faitcheas.

¹⁰ mhilleadh, sgrios.

¹¹ droch-mhèineach, ccannairceach.

¹² deadh-ghcan.

¹³ òg, maoth.

¹⁴ an ceud nì.

¹⁵ chumhainnichear.

aingidh, agus na h-mìch ann an slighe dhroch dhaoine.

15 Seachainn i, na gabh seachad làimh rithe, pill uaithe¹, agus imich romhad.

16 Oir cha choidil iadsan mur dean iad olc: agus tha'n codal air a thoirt uatha mur toir iad air *cuid-eigin* tuiteam.

17 Oir tha iad ag itheadh arainn na h-aingidheachd, agus ag òl fiona an ainneirt.

18 Ach *tha* slighe nam firean mar an solus dealrach, a dhealraicheas nì's mò agus nì's mò gu ruig an là iomlan.

19 *Tha* slighe nan aingidh mar dhorchadas: cha'n aithne dhoibh ciod air am bheil iad a' tuisleachadh.

20 A mhic, do m' fhoclaidh thoir aire; ri mo bhriathraibh aom do chluas:

21 Na imicheadh iad o d' shùilb: gléidh iad am meadhon do chridhe.

22 Oir is beatha iad dhoibh-san a gheibh iad, agus òc-shlainn² d'am feoil uile.

23 Leis gach uile dhìchioll gléidh do chridhe; oir as a sin *tha* sruthanna³ na beatha.

24 Cuir uait am beul fiar⁴, agus na bilean beumnach cuir fad uait.

25 Sealladh do shùilean gu ccart rompa, agus seòladh fàbhrainnean⁵ do shùl gu dìreach romhad.

26 Cothromaich ceumanna do chos, agus biodh do shlighean uile air an socrachadh.

27 Na tionndaidh a chum na làimhe deise, no clìthe: carruich do chos o'n olc.

CAIB. V.

1 *Chomhairlich Solamh do'n t-sluagh aire a thoirt do ghliocas; 5 agus nochd e dhoibh mealltaireachd mnà crìmhich. 23 Glacair an t-aingidh 'na euceartaibh féin.*

A MHC, do m' ghliocas thoir an aire; ri m' thuigse aom do chluas;

2 Chum gu'n coimhid thu⁶ ciall⁷, agus gu'n gléidh do bhilean eòlas.

3 [Na h-éisd ri mealltaireachd mnà:] oir *mar* a' chìr-mheala silidh bìlean mnà coimhich, agus *is* mine⁸ na oladh a beul.

4 Ach *tha* a crìoch searbh mar a' bhurm-aid, geur mar chlaidheamh dà fhaobh-aid.

5 *Tha* a cosan a' dol sìos chum a' bhàis: nì a ceumanna greim air ifrinn⁹.

6 Air eagal gu'n cothromaicheadh tu slighena beatha¹⁰, luaineach¹¹ tha a ceumanna, air chor as nach urrainn thu an aithneachadh.

7 A nis uime sin, a chlann, éisdibh

rium, agus na dealaichibh ri briathraibh mo bheoil.

8 Atharraich do shlighe fad uaithe¹², agus na tig am fagus do dhorus a tighe:

9 Air eagal gu'n toir thu do neart¹³ do mhuinntir eile, agus do bhliadhnacha do'n an-ìochdmhor:

10 Air eagal gu'n lìonar coigrich le d' shaoibhreas, agus gu'm bi do shaothair ann an tigh coigrich;

11 Agus gu'n dean thu caoidh¹⁴ ma dheireadh, nuair a chaithear t'fheoil agus do chorp¹⁵,

12 Agus gu'n abair thu, Cionnus a thug mi fuath do theagasg, agus a rinn mo chridhe tàir air achmhasan?

13 Agus nach robh mi ùmhal do ghuth mo luchd-teagaisg, agus nach d'aom mi mo chluas riù-san a theagaisg mi?

14 Is beag nach robh mi anns gach olc, am meadhon a' chomh-chruinneachaidh, agus a' choimhthionail.

15 Ol uisgeachan as do shoitheach féin; agus uisgeacha ruith as do thobair¹⁶ féin.

16 Biodh¹⁷ do thobraichean air an sgaoileadh a mach; do shruthan uisge anns na sràidibh.

17 Biodh iad agad féin a mhàin, agus na b'ann aig coigrich maille riut.

18 Biodh do thobair beannaichte; agus dean gairdeachas maille ri mnaoi-phòsda t'òige.

19 *Biodh i mar* an eilidh ghràdhach, agus mar an earb¹⁸ thaitneach; sàsuicheadh a cìochan thu sgach àm: le a gràdh bi a ghnàth air do lìonadh.

20 Agus c'ar son, a mhic, a mheallar thu¹⁹ le mnaoi choimhich, agus a dlùth-aicheas tu ri brollach bana-choigrich?

21 Oir fa chomhair shùl an Tighearna *tha* sligheanna an duine, agus *tha* e a' cothromachadh a cheumanna uile.

22 Glacaidh 'eucearta féin an t-aingidh, agus le cùird a pheacaidh ceanglar e.

23 Bàsaichidh e gun teagasg; agus ann am meud 'amaideachd theid e air seacharan.

CAIB. VI.

1 *An aghaidh luchd-urrais, 7 an leisgein, 12 agus nan dachine aingealt. 16 Na seachd nithe a tha 'nan gràineileachd do'n Tighearna. 25 Le mnaoi strìopachail sgriosar anam an duine.*

A MHC, ma ta thu 'n urras air do charaid, ma bhuail thu do làmh le neach eile,

2 Rìbeadh thu le briathraibh do bheoil; ghlacadh thu le foclaibh do bheoil.

¹ uaipe. ² slàinte. ³ tobraiche.

⁴ cealgach. ⁵ ruigs.

⁶ gu'm bi meas agad air.

⁷ crìomachd, eagnuidheachd. ⁸ làithe.

⁹ bheir a ceumanna do'n uaign.

¹⁰ slighe na beatha cha 'n'èit i idir a' cothromachadh.

¹¹ caochlaideach.

¹² i' urram, do mhaise.

¹³ feoil do chuirp.

¹⁴ ìthobairt.

¹⁵ [Na] biodh.

¹⁶ earba.

¹⁷ theid thu air seacharan, bhios tu air do mheadh-radh.

3 Deau so a nis, a mhic, agus saor thu féin, 'mair a thig thu 'n làimh do charaid; imich irioslaich thu féin, agus dean cinnteach do charaid.

4 Na toir codal do d' shùilb, no clò chodail do d' rosgaibh¹.

5 Thoir as thu féin mar earb á làimh an t-sealgair², agus mar eun á làimh an eunadair.

6 Imich a chum an t-seangain, a leisgein³; thoir fa'near a shlighean, agus bi glie:

7 Aig nach 'eil fear-seòlaidh, fear-amhairc⁴ no riaghlair,

8 A dh'ulluicheas a bhiadh san t-samhradh, agus a chruinnicheas a theachd-an-tir san fhogharadh.

9 Cia fhad a choidleas tu, a leisgein? c'nin a dh'éireas tu as do chodal?

10 *Fathast* beagan codail, beagan clò chodail, beagan fillidh⁵ nan làimh gu codal.

11 An sin thig do bhochdainn mar fhear-siubhail, agus t'uireasbhuidh mar dhùine fuidh armaibh.

12 Dnine nach fiù, fear aingidh, siubhlaidh e le beul ana-cneasda.

13 Caogaidh e le 'shùil, bheir e sanas⁶ le 'chois, teagaisgidh e le 'mheuraibh.

14 *Tha* aingealtachd⁷ 'na chridhe, *tha* e a' dealbhadh uile a ghnàth; togaidh e aimhreit⁸.

15 Uime sin gu h-obann thig a sgrios⁹; gu grad brisear e, gun leigheas.

16 Na sè nithe so is fuathach leis an Tighearna; seadh, *tha* seachd nithe 'nan gràineileachd d'a anam:

17 Sealladh àrd¹⁰, teagadh bhreugach, agus làmhan a dhoirteas fuil neo-chiontach;

18 Cridhe a dhealbhas smuaintean aingidh, cosan a bhios luath a ruith chum uile;

19 Fianuis bhreugach a labhras breugan, agus esan a thogas aimhreit¹¹ eadar bhràithribh.

20 A mhic, coimhid àithne t'athar, agus na tréig reachd¹² do mhàthar:

21 Ceangail iad a ghnàth air do chridhe, daingnich iad mu d' mhuineal.

22 'Nuair a dh'imicheas tu, treòraichidh iad¹³ thu; 'nuair a choidleas tu¹⁴ gleidhidh iad¹⁵ thu; agus an uair a dhùisgeas tu, labhraidh iad¹⁶ riut.

23 Oir is lòchran an àithne, agus is solus an reachd, agus is iad slighe na beatha achmhàsain teagaisg;

24 Chum do ghleidheadh o'n droch

mhnaoi, o mhiodal teangaidh na mnà coimhich.

25 Na nriannaich a sgèimh ann ad chridhe; agus na glacadh i thu le a rosgaibh;

26 Oir le¹⁷ mnaoi striopachail *bheirear duine* gu greim arain; agus sealgaidh a' bhan-adhaltrannach air an anam luachmhor.

27 An urrainn duine teine a ghabhail 'na bhròlach, agus gun 'eudach a bhi air a losgadh?

28 An urrainn duine imeachd air eibhlibh teithe, agus gun a chosan a bhi air an losgadh?

29 Mar sin esan a théid a steach chum mnà a choimhearsnaich: cha bhi neach air bith neo-chiontach a bheanas rithe.

30 Cha deanar tàir air gaduiche, ma ghoideas e a shàsachadh 'anama, 'nuair a bhios e ocrach:

31 Ach ma ghlacar e, aisgidh¹⁸ e a sheachd uiread; uile mhaoin a thighe bheir e seachad.

32 Ach ge b'e ni adhaltrannas ri mnaoi, tha e gun tuigse¹⁹: sgriosaidh esan a ni e 'anam féin.

33 Lot agus mi-chliù gheibh e; agus a mhasladh cha ghlana as.

34 Oir is e'n t-eud cuthach an fhir: uime sin cha chaomhain e ann an là an dioghaltais.

35 Cha bhi suim aige dh'éiric air bith²⁰; ni mò a thoilichear e, ged bheir thu *dha* mòran thiodhlacan.

CAIB. VII.

1 *Chomhairlich Solamh do'n t-sluagh 'àitheantan a thasgaidh 'nan cridhe.* 6 *Sòltaich agus cuilbh-eartan na mnà coimhich:* 24 *Sgriosar iadsan a chlaonas 'na dèigh.*

A MHIC, gléidh mo briathran, agus taisg m'aitheantan maille riut.

2 Gléidh m'aitheantan, agus bi beò; agus mo lagh mar dhubhagan²¹ do shùil.

3 Ceangail iad air do mheuraibh; sgriobh iad air clàr do chridhe.

4 Abair ri gliocas, *Is* tu mo phiuthar; agus goir do bhan-charaid do thuigse:

5 Chum gu'n gléidh iad thu o'n mhnaoi choimhich, o'n bhana-choigrich a ni brionnal²² le a briathraibh.

6 Oir aig uinneig mo thighe dh'amhaire mi troimh²³ mo chléith,

7 Agus sheall mi am measg nan daoine baoghalta; thug mi fa'near am measg nan òganach, òig-fhear gun chéill²⁴,

8 A' dol seachad air an t-sràid fagus

¹ fhàhkraidhibh. ² as an lìon. ³ a lundaire.
⁴ fear sùil-bheachd, maighstir oibre. ⁵ pasgaidh.
⁶ labhraidh e. ⁷ coirbteachd, ana-cneasdachd.
⁸ sol-chuir¹h e ais-sith. ⁹ àmhghar.
¹⁰ uaibhreach. ¹¹ ais-sith. ¹² lagh.

¹³ e. ¹⁴ a luidheas tu slòs. ¹⁵ e.
¹⁶ e. ¹⁷ trid. ¹⁸ bheir e air ais.
¹⁹ dhàth cèille. ²⁰ Cha taitim éiric sam bith ris.
²¹ abhal, chloich. ²² miodal.
²³ tre, trid. ²⁴ gun chridhe. Eabh.

d'a h-òisinn, agus ghabh e an t-slighe chum a tighe,

9 San dù-thràth¹, san fheasgar, san oidheach dhuibh dhoirch:

10 Agus, feuch, thachair bean air ann an culaidh strìopaiche, agus cuilbheartach 'na cridhe.

11 (*Tha* i àrd-ghuthach² agus ceann-làidir; cha'n fhan a casan 'na tigh.

12 A nis *tha* i mach, a nis anns na sràidibh, agus a' feitheamh nam fàth aig gach oisinn.)

13 Agus rug i air, agus phòg i e, agus le aghaidh gun nàire thubhairt i ris³,

14 *Tha* tabhartais-shith agam; an diugh dh'ìoc mi mo bhòidean:

15 Uime sin thàinig mi mach a'd' choinneamh, a dh'ìarraidh t'aghaidh gu dìchiollach, agus fhuair mi thu.

16 Le còmhdaichibh grinne⁴ sgeadaich mi mo leabadh, le *oibribh* gearrta, le lìon-eudaich mìn o'n Eiphit.

17 Rinn mi mo leabadh cùbhraidh le mirr, aloe, agus canal.

18 Thig, gabhamaid ar sàth do ghaol gu maduinn; deanamaid comh-ghairdeachas ann an gaol:

19 Oir cha 'n eil fear an tighe aig baile; chaidh e air thurus fada:

20 Sporan airgid thug e leis⁵; air an là shuidhichte thig e dhachaidh.

21 Le mòran d'a cainnt mhilis thug i air aontachadh; le mìodal a bilean chomh-èignich i e.

22 Tha e a' dol 'na dèigh gun dàil, mar a thèid an damh chum a chosgaraidh⁶, no'n t-amadan a chum peanais a' chip;

23 Gus an tèid saighead troimh 'àinean, mar a ghreasas eun do'n ribe, gun fhios aige gur ann chum a bhàis *a ta e*.

24 A nis uime sin éisdibh rium, a chlann, agus thugaibh aire do bhriathraibh mo bheoil:

25 Na claonadh do chridhe chum a sligheanna, na rach⁷ air seacharan 'na ceumaibh.

26 Oir lot agus leag i sìos mòran; seadh chaidh mòran do dhaoineibh treuna a mharbhadh leatha.

27 *Is e* a tigh an t-slighe gu h-ìfrinn, a dol sìos gu seòmraichibh a' bhàis.

CAIB. VIII.

1 *Gairm*, 6 *teagasg luachmhor*, 15 *sochairean prìseil*, 22 *agus sìorruidheachd a' ghliocais*. 32 *Soirbhidh esan a gheibh gliocas*, 36 *agus esan a dhiùllas i ni e cron d'a anam fèin*.

NACH 'eil gliocas ag éigheach? agus nach 'eil tuigse a' cur a mach a gutha?

2 Air mullach nan àit àrda, làimh ris an t-slighe, ann am meadhon nan rathad *tha* i 'na seasamh.

3 Làimh ris na geatachaibh, aig dol a stigh a' bhaile⁸, far an tìgear a steach air na dorsaibh *tha* i ag éigheach:

4 Ribhse, O fheara, *tha* mi ag éigheach; agus *tha* mo ghuth ri cloinn nan daoine.

5 A dhaoine baoghalta, tuigibh gliocas; agus amadana, tuigibh 'nur cridhe.

6 Eisidibh, oir labhraidh mi air nithibh òirdheirc; agus *bithidh* fosgladh mo bhilean air nithibh cearta.

7 Oir labhraidh mo bheul frinn; agus *is* gràineileachd aingidheachd do m' bhlilibh.

8 Ann an ceartas *tha* uile bhriathra mo bheoil; anna-san cha 'n eil ni air bith ole no fiar.

9 *Tha* iad uile soilleir dha-san a thuig-eas, agus ceart dhoibhsan a gheibh eòlas.

10 Gabhaibh mo theagasg, agus ni h-e airgid, agus eòlas thar an òr thaghta.

11 Oir *is* fearr gliocas na na clachan luachmhor; agus cha 'n eil na h-uile nithe a dh'fheadar a mhiannachadh r'an coimhe meas rithe.

12 Tha mise gliocas a'm' chòmhnuidh maille ri céill⁹, agus *tha* mi faghail a mach eòlais air nithibh innleachdach.

13 *Is e* eagal an Tighearn an t-òle fhuathachadh; uabhar, agus àrdan, agus an droch shlighe, agus am beul fiar *is* fuathach leam.

14 *Is* leam-sa comhairle, agus fìor ghliocas: *is* leam-sa tuigse; *is* leam-sa neart¹⁰.

15 Leam-sa¹¹ rioghaichidh rìghrean, agus orduichidh uachdarana ceartas.

16 Leam-sa riaghlaidh uachdarana, agus daoine mòra¹², uile bhreitheamhna na talmhainn.

17 Iadsan aig am bheil gràdh dlomh gràdhaidhidh mi; agus iadsan a dh'ìarras mi gu moch gheibh iad mi.

18 *Tha* beartas agus urram maille rium-sa; saobhreas maireannach agus fireantachd.

19 *Is* fearr mo thoradh na òr, eadhon na òr fìor-ghlan; agus mo theachd-a-stigh na airgid taghta.

20 Air slighe a' cheartais treòraichidh mi; ann am meadhon cheumanna a' bhreitheanais;

21 A chum gu'n toir mi orra-san le'n ionmhuinn mi maoin a shealbhadh; agus lìonaidh mi an ionmhasan.

22 Bha mise aig an Tighearn ann an toiseach a shlighe, roimh 'oibribh o shean.

¹ *Mu dhorchadh nan tràth, san eadar-sholus.*

² *bruidheach.*

³ *chruaidhich i a h-aghaidh, agus thubhairt i ris.*

⁴ *còmhdaichibh do obair ghrèis; tapestry. Sasg.*

⁵ *'na làimh. Eabh.*

⁷ *gabh, inich.*

⁹ *crionnach.*

¹¹ *Triom-sa.*

⁶ *mharbhaidh.*

⁸ *beul a' bhaile. Eabh.*

¹⁰ *is mise tuigse; agamsa tha neart.*

¹² *àrd-naisean.*

23 O shiorruidheachd chuireadh suas¹ mi, o'n toiseach, muu robh an talamh ann.

24 Mun robh doimhneachdan ann, ghineadh mise; 'nuair nach robh tobraiche ann, làn do uisgeachaibh.

25 Mun do shuidhicheadh na beannta; roimh na enocaibh ghineadh mise.

26 Mun d'rinn e fathast an talamh, no na maclraichean, no chuid a's àirde do dhuslach an domhain.

27 'Nuair a dheasaich e na nèamha, bha mi'n sin; 'nuair a tharruing e cuairt air aghaidh na doimhne;

28 'Nuair a dhaingnich e'n t-athar² shuas; 'nuair a neartaich e tobraiche na doimhne;

29 'Nuair a thug e a reachd do'n fhairge, nach rachadh na h-uisgeacha thar 'àithne, 'nuair a shuidhich e bunaite na talmhainn;

30 An sin bha mise aige mar neach a dh'altrumadh³ maille ris; agus bu mhi a thlachd gach là, a' deanamh gàirdeachais 'na fhianuis an còmhnuidh;

31 A' deanamh gàirdeachais anns a' chuid a dh'aitichear d'a thalamh, agus mo thlachd maille ri cloinn nan daoine.

32 A nis uime sin, a chlann, éisdibh rium; oir is sona iadsan a ghleidheas mo shligheanna.

33 Eisidibh ri teagasg, agus bithibh glic, agus na diùltaibh e.

34 Is beannaichte an duine a dh'éisdeas rium, a' deanamh faire aig mo gheataibh gach là, a' feitheamh aig ursainnibh mo dhorsa.

35 Oir esan a gheibh mise, gheibh e beatha, agus gheibh e deadh-ghean⁴ o'n Tighearn.

36 Ach esan a pheacaicheas a'm' aghaidh-sa⁵, ni e cron d'a anam féin: iadsan uile a dh'fhuathaicheas mi, gràdhachidh iad am bàs.

CAIB. IX.

Fòghlum agus luach a' ghliocais. 13 Tha bean amaideach àrd-ghuthach agus baoghalta, 18 agus théid a h-aoidheanna do dhoimhneachd ifrinn.

THOG gliocas a tigh; ghearr i mach⁶ a seachd puist.

2 Mharbh i a feoil; mheasg i a fion; dheasaich i mar an ceudna a bord:

3 Chuir i a mach a h-òighean; tha i a' gairm air na h-àitibh a's àirde do'n bhaile:

4 Ge b'e neach a ta baoghalta, thigeadh e a stigh an so: riu-san⁷ a tha dlùth tuigse tha i ag ràdh,

5 Thigibh, ithibh do m'aran-sa, agus òlaibh do'n fhion a mheasg ni.

6 Tréigibh nithe amaideach, agus bithibh beò; agus imichibh air slighe na tuigse.

7 Esan a bheir aclmhasan do fhear-fochaid, gheibh e dha féin maslach; agus esan a chroaicheas an t-aingidh, gheibh e dha féin snail.

8 Na cronaich fear-fochaid, air eagal gu'm fuathaich e thu: cronaich an duine glic, agus gràdhachidh e thu.

9 Thoir teagasg do'n duine ghlic, agus bithidh e ni's glice: teagaisg an duine cothromach, agus meudaichidh e ann am fòghlum.

10 Is e eagal an Tighearna toiseach a' ghliocais; agus is e eòlas nithe naomha, tuigse.

11 Oir leam-sa nithear do làithean lionmhor, agus cuirear ri bliadhuachaibh do bheatha.

12 Ma bhios tu glic, bithidh tu glic dluit féin: ach ma bhios tu ri fochaid, is tu féin a mhàin a dh'iomchaires e.

13 Tha bean amaideach àrd-ghuthach; baoghalta, agus cha 'n aithne dli ni air bith:

14 Oir suidhidh i aig doras a tìghe, air caithir, ann an àitibh àrda a' bhaile,

15 A ghairm orra-san a bhios a' dol seachad air an t-slighe, a' gabhail dìreach rompa⁸.

16 Ge b'e neach a ta baoghalta, thigeadh e stigh an so; agus ris-san a tha dhith tuigse their i,

17 Tha na h-uisgeachan a ghoidear milis, agus an t-aran a dh'ithear an uaigneas taitneach.

18 Ach cha 'n eil fhios aige gu bheil na mairbh an sin; ann an doimhneachdaibh ifrinn gu bheil a h-aoidheanna.

CAIB. X.

1 Dionaidh Dia an t-ionracan. 6 Beannaichear am firean, ach sgriosar an t-amadan bith-bhriathrach. 12 Folaichidh gràdh gach cionta. 25 Thig sgrios air luchd-deanamh na h-euceirt, 31 ach cha ghluaisear am firean gu bràth.

GNATH-FHOCAIL Sholaimh. Ni mac glic athair subhach; ach is e mac amaideach dubhachas a mhàthar.

2 Cha 'n eil tairbhe ann an ionmhasaibh aingidheachd; ach saoraidh ionracas o'n bhàs.

3 Cha leig an Tighearna le anam an ionraic gort⁹ fhulang; ach sgaoilidh e maoin nan aingidh.

4 Ni làmh na leisge¹⁰ boclid; ach ni làmh nan dicheillach beartach.

5 Esan a chruinicheas anns an t-samhradh, is mac glic e; ach esan a choidleas anns an fhogharadh, is mac maslach e.

¹ dh'ungadh.

² na neoil.

³ dh'araicheadh.

⁴ còmhneas.

⁵ a théid air seacharan uam.

⁶ shnaidh.

⁷ ris-san, ris gach neach.

⁸ a' stiùradh an ceumanna.

⁹ gorta.

¹⁰ na ceilge.

6 *Bithidh* beannachdan air ceann an fhìrean¹; ach còmhdaichidh fòirneart beul² nan aingidh.

7 *Bithidh* cuimhne an fhìrean beannaichte; ach loblaidh ainm nan aingidh.

8 Gabhaidh esan a ta glic 'na chridhe àiteant; ach tuitidh an t-amadan bith-bhriathrach.

9 Esan a ghluaiseas ann an ionracas, gluaisidh e gu tèaruinte; ach esan a chlaonas a shlighean, aithnicher e.

10 Esan a chaogas le 'sheùil, bheir e bròn; agus tuitidh an t-amadan bith-bhriathrach.

11 *Is* tobar beatha beul an fhìrean; ach còmhdaichidh fòirneart beul nan aingidh.

12 Dùisgidh fuath aimhreitean; ach folaichidh gràdh gach coire³.

13 Ann am bilibh an duine thuigsich gheibhear gliocas; ach *tha* slat air son druim an tì a tha as eugmhais tuigse⁴.

14 Ceilidh daoine glice na's aithne dhoibh⁵; ach *tha* beul an amadain dlùth do sgrìos.

15 *Is* e beartas an duine shaoibhir a chaitheir⁶ làidir; *is* e milleadh nam bochd an uireasbhuidh.

16 *Tha* saothair an fhìrean chum beatha; teachd-a-stigh⁷ an aingidh chum peacaidh.

17 *Tha* esan a choimhideas fòghlum *anns* an t-slighe gu beatha; ach *tha* esan a dhiùltas achmhasan air seacharan.

18 Esan a cheileas fuath le bilibh cealgach, agus esan a labhras mi-chliù, *is* amadan e.

19 Aun an lìonmhoireachd bhriathar cha bhithhear saor o pheacadh; ach *tha* esan a choisgeas a bhilean glic.

20 Mar airgid taghta⁸ *tha* teagadh an fhìrean; ach *tha* cridhe nan aingidh mar nì nach fiù.

21 Beathaichidh bilean an fhìrean mòran; ach eugaidh na h-amadain a dhìth tuigse⁹.

22 Nì beannachadh an Tighearna saoihair, agus cha chuir e doilgheas 'na chuid-eachd.

23 *Tha* e mar shùgradh do'n amadan olc a dheanamh; ach *tha* gliocas aig fear na tuigse.

24 An nì is egal leis an aingidh, thig e air; ach deònaichear miann nam firean.

25 Mar a thèid an ioma-ghaath thairis, mar sin clia *bhi* an droch dhuine nì's mò; ach *is* bunait sìorruidh am firean.

26 Mar fhìon-geur do na fìaclaibh, agus mar dheataich do na sùilb, mar sin *tha* 'n leisgein dhoibhsan a chuireas uatha c.

27 Cuiridh egal an Tighearna ri làithibh *duine*; ach giorraichear bliadhnacha nan aingidh.

28 *Bithidh* dùil nam firean 'na aobhar aoibhneis; ach thèid as do dhòchas nan aingidh.

29 *Is* neart do na h-ionraic slighe an Tighearn; ach *thig* sgrìos air¹⁰ luchd-deanamh na h-euceirt.

30 Cha ghluaisear am firean gu bràth; ach cha gabh na h-aingidh còmhnuidh air an talamh.

31 Bheir beul an fhìrean a mach gliocas; ach gearrar as an teagadh fhiar.

32 *Tha* fios aig bilibh an fhìrean air an nì a ta taitneach; ach *labhraidh* beul nan aingidh nithe fiara.

CAIB. XI.

1 *Is taitneach le Dia* an duine ionraic, 5 ach sgrìosar an t-aingidh as a làthair. 15 Cùrrar esan a thèid an urras air coigreach. 20 *Is* gràineil-eachd do'n Tighearna iadsan a tha far 'nan cridhe. 30 Gheibh am firean duais air thalamh.

THÀ meidhean mealltach 'nan gràineil-eachd do'n Tighearn; ach *is* taitneach leis toimhsean ceart¹¹.

2 'Nuair a thig uabhar, thig masladh; ach aig na h-iriosail *tha* gliocas.

3 Seòlaidh ionracas nam firean iad; ach millidh fiaradh¹² luchd dò-bheirt iad féin.

4 Cha bhi tairbhe ann an saoihbreas ann an là na feirge; ach saoraidh fireantachd o'n bhàs.

5 Seòlaidh fireantachd an duine ionraic¹³ a shlighe; ach trid 'aingidheachd féin tuitidh an t-aingidh.

6 Saoraidh fireantachd nan ionraic iad; ach glacar fealltairean¹⁴ 'nan olc féin.

7 'Nuair a bhàsaicheas an droch dhuine, thèid as d'a dhòchas; agus teirgidh dùil luchd-euceirt.

8 Saorar am firean o theim; ach thig an droch dhuine 'na àite.

9 Le 'bheul millidh cealgair a choimhearsnach; ach trid eòlais saorar na fireana.

10 'Nuair a dh'éireas gu maith do na fireanaibh, nì am baile¹⁵ gàirdeachas; agus an uair a sgrìosar na h-aingidh, *bithidh* luathghaire ann.

11 Le beannachadh nan ionraic àrd-aichear baile; ach le beul nan aingidh leagar e.

12 Nì esan a tha as eugmhais gliocais¹⁶ tair air a choimhearsnach; ach bithidh fear na tuigse 'na thosd.

13 Imichidh fear tuailleis mu'n cuairt a' foillseachadh nithe dìomhair; ach esan a ta firinneach 'na spiorad, ceilidh e nì.

14 Far nach 'eil comhairle, tuitidh

¹ an ionracain. ² gnùis. ³ cionta, peacadh.

⁴ cridhe. Eabh. ⁵ Taisgidh daoine glic eòlas.

⁶ a mhòr-bhaile. ⁷ toradh.

⁸ dearbhta, fìor-ghlan. ⁹ cridhe. Eabh.

¹⁰ is aobhar uamhais i do.

¹¹ clach iomlan. Eabh. ¹² clonadh, cealg.

¹³ iomlain. ¹⁴ cealgair, luchd-eusaontais.

¹⁵ a' chaitheir, au mòr-bhaile. ¹⁶ cridhe. Eabh.

sluagh; ach ann an Ìonmhoireachd chomhlairleach *tha* tèaruinteachd.

15 Cùrrar gu goirt esan a bhios an urras air coigreach; ach esan a dh'fhuathaicheas luchd-urrais, bithidh e tèaruinte.

16 Gheibh bean ghràsail urram; agus cosnaidh daoine làidir soirbheas.

17 Ni an duine iochdmhor maith d'a anam féin; ach esan a ta an-ìochdmhor, claidhidh¹ e 'fheoil féin.

18 Oibrichidh an droch dhuine obair mhealltach; ach aige-san a chuireas² fireantachd *bithidh* duais chumteach.

19 Mar so *tha* fireantachd chum beatha; ach esan a leanas an t-olc, *leanaidh* e chum a bhàis féin e.

20 *Is* gràineileachd do'n Tighearn iadsan a tha fiar 'nan cridhe; ach *is* taitneach leis iadsan a tha ionraic³ 'nan slighe.

21 *Ged iadhadh* làmh mu làimh, cha bhì an droch dhuine gun pheanas; ach saorar sliochd nam firean.

22 *Mar fhail*⁴ òir ann an sròin muice, *tha* bean sgiamhach agus i as eugmhais tuigse⁵.

23 *Tha* miann nam firean a mhàin maith; ach *is* e dòchas nan aingidh fearg.

24 *Tha* neach ann a sgaòileas, agus fàsaidh e ni's saobhire⁶: agus *tha* e ann a chumas tuilleadh 'sa ta ceart, ach *thig* e gu bochdainn.

25 Nithear an t-anam fial sultmhor⁷; agus an ti a dh'uisgicheas, uisgichear mar an ceudna e féin.

26 Eсан a chumas suas sìol⁸, mallaichidh an sluagh e; ach *bithidh* beannachd air ceann an ti a reiceas⁹.

27 Eсан a dh'iarras maith gu dùrachdach, gheibh e deadh-ghean¹⁰; ach an ti a dh'iarras olc, thig e air féin.

28 Eсан a dh'earbas as a shaoibhreas, tuitidh e; ach mar ghéig, thig na fireana fo bhlàth.

29 Eсан a chuireas a theaghlach féin fo bhuaireas¹¹, *bithidh* e 'na oighre air a' ghaioith; agus an t-amadan na sheirbhiseach dha-san a tha glic 'na chridhe.

30 *Is* craobh beatha toradh an fhìrean; agus *tha* esan a chosnas anama glic.

31 Feuch, bheirear luigheachd¹² do'n fhìrean air an talamh: nach mò na sin do'n aingidh agus do'n pheacach.

CAIB. XII.

1 *Dionaidh Dia* an duine maith, ach dithid e fear nan droch innleachd. 10 *Iocar* luigheachd a

làmh do gach neach. 22 Tha bilean nam breug 'nan gràineileachd do *Dhia*.

ESAN a ghràdhaicheas fòghlum, gràdhaichidh e eòlas; ach esan a dh'fhuathaicheas achmhasan, tha e am-aideach¹³.

2 Gheibh duine maith deadh-ghean o'n Tighearn; ach dithid e fear nan droch innleachd.

3 Cha daingnichear duine le h-aingidh-eachd; ach cha ghluaisear freumh nam firean.

4 *Tha* bean mhaith¹⁴ 'na crùn d'a fear; ach mar lobhadh 'na chnàmhaibh *tha* ise a nàiricheas e.

5 *Is* ceartas¹⁵ smuainte nam firean; ach *is* cealg comhairle nan aingidh.

6 *Is* iad briathra nan aingidh feall-fheitheamh air son fola: ach tèarnaidd beul nan ionraic iadsan.

7 Tilgear na h-aingidh bun os ceann, agus cha *bhì* iad ann; ach seasaidh tigh nam firean.

8 A réir a ghliocais molar duine; ach nithear dìmeas air-san a tha fiar 'na chridhe.

9 *Is* fearr esan air an deantar tàir, agus a tha 'na sheirbhiseach dha féin¹⁶; na esan a bheir urram dha féin, agus a bhios a dhìth arain.

10 Bithidh cùram aig an duine ionraic do bheatha 'ainmhidh; ach *is* an-ìochdmhor truacantais nan aingidh.

11 Eсан a threabhas¹⁷ fhearann, sàsuichear le h-aran e; ach esan a leanas daoine dìomhain, *tha* e gun tuigse¹⁸.

12 Miannaichidh an t-aingidh lìon dhroch dhaoine; ach bheir freumh nam firean *toradh*¹⁹.

13 Le peacadh a bhilean ribear an droch dhuine; ach thig am firean as o airc²⁰.

14 Do thoradh a bheoil sàsuichear duine le maith; agus iocar luigheachd làmh duine dha féin.

15 *Tha* slighe an amadain ceart 'na shùilbhe féin; ach *tha* esan a dh'éisdeas ri comhairle, glic.

16 Aithnichear air ball²¹ fearg an amadain; ach ceilidh duine ciallach²² mas-ladh.

17 *Eсан* a labhras an fhìrinn, foillsichidh e ceartas²³; ach *foillsichidh* fianuis bhreugach cealg.

18 *Tha* dream ann a labhras mar lot-aibh claidheimh; ach *is* slàinte teangadh nan daoine glice.

19 Bithidh bile na fìrinn seasmhach gu

¹ buairidh.

² sìol-chuireas.

³ ìomhan, neo-lochdach.

⁴ sheud.

⁵ mothachaidh, eagnuidheachd.

⁶ cuirear an

tuilleadh ris. ⁷ Sealbhaichidh an t-anam fial

pailteas. ⁸ gràn. ⁹ a bheir air a bhì air

a reiceadh. ¹⁰ deadh rùn. ¹¹ a thogas an-

riaghailt 'na thigh féin. ¹² luigheachd, duais.

¹³ mar ainmhidh.

¹⁴ bean na subhailce, nan

deadh bheus. ¹⁵ ionracas. ¹⁶ aig am bhì

seirbhiseach. ¹⁷ shaothraicheas.

¹⁸ as eugmhais cridhe. Eabh. ¹⁹ fàsaidh, daing-

nichear freumh nam firean. ²⁰ theamntachd.

²¹ san àm; san là. Eabh. ²² crìonna, glic.

²³ Labhraidh am firean, agus foillsichidh e an fhìrinn.

bràth; ach cha *bhi* an teangadh bhreug-ach ach car tiota.

20 *Is* cealg a bhios an cridhe luchd-deilbh an uile; ach do chomhairleach-aibh na sìthe *bithidh* gàirdeachas.

21 Cha'n éirich aimhleas¹ air bith do'n fhìrean; ach lìonar na h-aingidh le h-olc.

22 *Is* gràineileachd do'n Tighearna bilean nam breug; ach is iad an droing a nì gu fìrinneach, a thlachd.

23 Ceilidh duine ciallach² eòlas; ach foillsichidh cridhe nan amadan amaid-eachd.

24 Riaghlaidh làmh nan dìchiollach; ach bithidh *làmh* na leisge³ fo chis.

25 Nì iomagain⁴ ann an cridhe duine a chromaidh sìos; ach nì focal maith sòlasach e.

26 *Is* fearr am fìrean na a choimhearsnach; ach cuiridh slighe nan aingidh air seacharan iad fèin.

27 Cha ròist an leisgein a shitheann⁵; ach *is* luchdmhor saoihbheas an duine dhìchiollaich.

28 Ann an slighe na fireantachd *tha* beatha; agus 'na ceum cha 'n eil bàs⁶.

CAIB. XIII.

1 Cuiridh duine glic faire air a bheul. 12 Nì an dòchas a shìnear, an cridhe tinn. 20 Sgrìosar companach nan aingidh.

EISDIDH mac glic ri teagasg⁷ athar; ach cha'n éisd fear na fochaid ri achmhasan.

2 Do thoradh a bheoil ithidh duine nì maith; ach *ithidh*⁸ anam nam feallt-air⁹ ainneart.

3 Esan a choimhideas a bheul, gleidhidh e anam: ach esan a dh'fhosglaas a bhilean, *thig* sgrìos air.

4 Miannaichidh anam an leisgein, agus cha *bhi aige*; ach nìthear anam nan dìchiollach sultmhor.

5 *Is* beag air an fhìrean na breugan; ach fàsaidh an droch dhuine gràimeil, agus nàirichear e.

6 Gleidhidh fireantachd esan a ta ionraic 'na shlighe: ach claidhidh aingidheachd am peacadh¹⁰.

7 Tha neach ann a leigeas air a bhi bearttach¹¹, agus gun nì air bith *aige*; *tha* neach ann a leigeas air a bhi bochd, agus mòr-shaoibheas aige.

8 *Is* e éiric¹² anama duine a shaoibheas; ach cha chluinn am bochd achmhasan.

9 Nì solus nam fìrean aoibhneach; ach cuirear as lòchran nan aingidh.

10 O uabhar a mhàin *thig* connsach-

¹ urchoid.

² crìonna, eagnuidheach.

³ ceilge.

⁴ dubhachas.

⁵ an nì a ghlac e le sealg.

⁶ ach treùraichidh

rathad seachranach gu bàs.

⁷ fuilgidh.

⁸ nan cealgair, luchd-eusaontais.

adh; ach aig na daoineibh a ghabhas deadh chomhairle *tha* gliocas.

11 Lughdaichear saoihbheas an diomh-anais; ach esan a chruinnicheas le saoth-air¹², meudaichidh e.

12 Nì an dòchas anns an cuirear, moille¹³, an cridhe tinn; ach *is* craobh beatha am miann¹⁴ 'nuair a thig e.

13 Esan a nì tàir air focal, millear e; ach esan air am bi eagal roimh àithne, gheibh e luigheachd.

14 *Is* tobar beatha lagh an *duine* ghlic, chum dol as o lìontaibh a' bhàis.

15 Bheir tuigse mhaith deadh-ghean; ach *is* cruaidh slighe luchd-eusaontais.

16 Nì gach duine ciallach¹⁵ a ghnothuch le h-eòlas; ach leigidh an t-amadan ris 'amaideachd.

17 Tuitidh an droch theachdair ann an olc; ach *is* slàinte an teachdair dìleas.

18 Bochdaimn agus nàire *bithidh* dhas-an a dh'iùltas fòghlum; ach an ti aig am bi meas air achmhasan, gheibh e urram.

19 *Is* milis do'n anam am miann a choimhlionar; ach *is* beag air amadan-aibh dealachadh ris an olc.

20 An ti a shìubhlas le daoineibh glìce, bithidh e glic; aca sgrìosar companach nan amadan.

21 Leanaidh olc peacaich: ach do na fireanaibh iocar maith.

22 Fàgaidh duine maith oighreachd aig cloinn a chloinne; ach taisgear do'n fhìrean maoin a' pheacaich.

23 *Bithidh* mòran baidh ann an treabhadh nam bochd; ach bithidh neach ann a sgrìosar a dhith breitheanais.

24 An ti a chaomhnas a shlat, is beag air a mhac; ach an ti leis an ionmhuinn e, smachdaichidh se e 'na thràth.

25 Ithidh am fìrean gu sàsachadh 'anama; ach bithidh dìth air broinn nan aingidh.

CAIB. XIV.

1 Claonaidh an t-amadan a shlighe, ⁹ agus nì e magadh do'n pheacadh. 20 Le 'choimhearsnach fèin fuathaichear an duine bochd. 29 *Is* duine glic esan a tha mall chum feirge.

CUIRIDH gach beanghlic a tigh suas; ach leagaidh a' bhean amaideach sìos e le a làmhaidh fèin.

2 Esan a ghluaiseas 'na ionracas, bithidh eagal an Tighearn air; ach esan a ta fiar 'na shlighibh, nì e tàir air.

3 Ann am beul an amadain *tha* slat uabhair; ach gleidhidh bilean nan daoine glìce iad.

4 Far nach bi daimh, *bithidh* a' phras-

⁹ peacadh. Eabh.

¹⁰ a nì c fèin saoihbhir.

¹¹ fuasgladh.

¹² le 'làimh. Eabh.

¹³ an dòchas a shìnear.

¹⁴ fonn, togradh.

¹⁵ crìonna, glic.

ach glan; ach *bithidh* fàs mòr le neart an daimh.

5 Cha dean an fhianuis dhìleas breug; ach labhraidh an fhianuis chealgach¹ breugan.

6 Iaraidh fear na fochaid gliocas, agus cha'n *fhaigh e*; ach do'n tì a thuigeas *tha* eòlas furas².

7 Imich á làthair an duine amaidich, 'nuair nach mothaich thu *ann* bilean an eòlais.

8 *Is e* gliocas an duine chiallaich a shlighe a thuigsinn; ach *is* cealg amaid-eachd nan amadan.

9 Nì amadain magadh do'n pheacadh; ach am measg nam firean *tha* deadh-ghean.

10 *Is* aithne do chridhe *duine* searbhas 'anama; agus 'na aoibhneas cha bhi comh-roinn aig coigreach³.

11 Tilgear tigh nan aingidh bun os ceann; ach thig pàillion nan ionraic fo bhlàth.

12 Tha slighe ann a chithear dìreach le duine; ach *is* iad a crìoch slighean a' bhàis.

13 Ann an gàire fèin bithidh an cridhe brònach; agus *is e* deireadh an t-subhachais sin tuirse.

14 Le 'shlighibh fèin lionar esan a thionnadaidh air ais 'na chridhe; agus uaith fèin *sàsuichear* an duine maith.

15 Creididh an duine baoghalta⁴ gach focal; ach bheir an duine ciallach an aire d'a cheum.

16 Bithidh eagal air an duine ghlic, agus tréigidh e 'n t-olc; ach tha'n t-amadan borb⁵ agus dàna.

17 An ti air am bi fearg gu h-obann, nì e gu h-amaideach; agus fuathaichear fear nan droch innleachd.

18 Sealbhaichidh daoine baoghalta amaideachd mar oighreachd; ach crùnar na daoine ciallach le h-eòlas.

19 Cromaidh droch dhaoine an làthair dhaoine maith, agus na h-aingidh aig geataibh an fhèin.

20 Eadhon le 'choimhearsnach fèin fuathaichear duine bochd; ach *is* lion-mhor iad leis an ionmhuinn an duine saobhir.

21 An ti a nì tàir air a choimhearsnach, peacaichidh e; ach *is* sona an ti a ghabhas truas do na bochdaibh.

22 Nach téid iadsan air seacharan a dhealbhas an t-olc? ach *bithidh* tròcair agus firinn aca-sa a dhealbhas am maith.

23 Anns gach saothair bithidh tairbhe; ach *thig* cainnt nam bile a mhàin gu h-uireasbhuidh.

24 *Is e* crùn nan daoine glìce an saobh-

reas; ach *is* amaideachd amaideachd nan amadan.

25 Saoraidh fianuis fhìor anama; ach labhraidh *fianuis* chealgach breugan.

26 Ann an eagal an Tighearna *tha* aobhar earbsaidh làidir; agus aig a chloinn bithidh dìdean.

27 *Is e* eagal an Tighearna tobar na beatha, chum dol as o liontaibh a' bhàis.

28 Ann an lionmhoireachd sluaigh *tha* urram an rìgh; ach ann an dìth sluaigh *tha* milleadh an uachdarain.

29 An ti a tha mall chum feirge, *tha e* pailt ann an tuigse; ach esan a tha dian 'na spiorad, àrdaichidh e amaideachd.

30 *Is e* beatha na feòla, cridhe fallain; ach *is e* lobhadh nan cnàmh, an t-nù.

31 An ti a shàruicheas⁶ am feumach, masluichidh e a Chruith-fhear; ach bheir an ti sin urram dha, a ghabhas truas do'n bhoich.

32 'Na aingidheachd fuadaichear air falbh an t-aingidh; ach bithidh dòchais aig an fhìrean 'na bhàs.

33 Ann an cridhe an duine thuigsich gablaidh gliocas tàmh; ach aithnìchear *an nì a ta* 'n taobh a stigh nan amadan.

34 Ardaichidh fireantachd cinneach; ach *is e* am peacadh masladh sluaigh air bith⁷.

35 *Bithidh* deadh-ghean an rìgh aig seirbhiseach glìc; ach bithidh 'fhearg 'na aghaidh-san a bhios 'na aobhar nàire,

CAIB. XV.

1 *Is* craobh beatha teangadh nan daoine glìce.

8 *Tha* iobairt nan aingidh 'na gràineileachd do Dhia. 27 Bheir esan a tha sanntach 'na chridhe buaireas air a thigh fèin.

PILLIDH freagradh mìn corruich; ach dùisgidh briathra garg fearg.

2 Cuiridh teangadh nan daoine glìce an céill eòlas gu ceart; ach dòirtidh beul nan amadan a mach amaideachd.

3 *Tha* sùilean an Tighearna anns gach àit, ag amharc air na droch dhaoineibh agus air na deadh dhaoineibh.

4 *Is* craobh beatha teangadh fhallain⁸; ach *is* briseadh spioraid fiaradh innte.

5 Nì amadan tàir air teagasg⁹ athar; ach *is* ciallach an ti a bheir an aire do achmhasan.

6 Ann an tigh an fhèin tha mòran ionmhais; ach ann an teachd-a-stigh an aingidh *tha* buaireas.

7 Sgaoididh bilean nan daoine glìce eòlas; ach cha dean cridhe nan amadan mar sin.

8 *Is* gràineileachd do'n Tighearna iobairt nan aingidh; ach *is i* urnuigh nan ionraic a thlachd.

9 *Is* gràineileachd do'n Tighearna slighe

¹ bhreugach.

² furasd.

³ neach eile.

⁴ neo-gheur, aon-fhillte, simplidh.

⁵ feargach.

⁷ nan slògh.

⁶ bhruthas.

⁸ chlàin, shìothchail.

an aingidh; ach is ionmhuinn leis an tì a leanas an dèigh fireantachd.

10 *Is* searbh smachdachadh dha-san a thréigeas an t-slighe; ach gheibh esan le'm fuathach achmhasan, bàs.

11 *Tha* ifrinn agus sgrìos fa chomhair an Tighearna: cia mòr is mò na sin cridheacha chloinn nan daoine?

12 Cha toigh le fear-fochaid esan a chroaicheas e; agus a dh'ionusuidh dhaoine glice cha téid e.

13 Ni cridhe subhach gnùis shuilbhir; ach le bròn a' chridhe brisear an spiorad.

14 Iarraidh cridhe an duine thuigsich eòlas; ach beathaichear beul nan amadan le amaideachd.

15 *Tha* uile làithean an duine thruaigh olc; ach is cuirm a ghnàth an cridhe ait.

16 *Is* fearr beagan le h-eagal an Tighearna, na ionmhas mòr agus buaireas leis.

17 *Is* fearr lòn¹ do luibhibh, far am bi gràdh, na damh biadhtha agus fuath leis.

18 Dùsgidh fear feargach consachadh; ach esan a ta mall chum feirge, ciùinichidh e aimhreit².

19 *Tha* slighe an leisgein³ mar ghàradh⁴ droighinn; ach *tha* rathad nan ionraic air a dheanamh réidh.

20 Ni mac glic athair aoibhneach; ach ni mac⁵ amaideach tàir air a mhàthair.

21 *Is* aobhar aoibhneis amaideachd dhasan a tha as eugmhais gliocais⁶; ach imichidh fear na tuisge gu dìreach.

22 Gun chomhairle, thig rùinte⁷ gu neo-ni; ach ann an lìonmhoireachd chomhairleach daingnichear iad.

23 Bithidh aoibhneas aig duine le freagradh a bheoil; agus focal 'na thràth, cia maith e!

24 *Tha* slighe na beatha shuas do'n duine ghlic, chum dol as o ifrinn shìos.

25 Sgrìosaidh an Tighearna tigh nan uaibhrean; ach daingnichidh e crìoch na bantraich.

26 *Is* gràineileachd do'n Tighearna smuainte dhroch dhaoine; ach is briathra taitneach *briathra* nam fìor-ghlan.

27 Bheir esan buaireas air a thigh féin, a tha sanntach air buannachd; ach bithidh esan le'm fuathach duais-bhratha, beò.

28 Smuainichidh cridhe an fhèin cionnus is còir dha freagairt; ach dòirtidh beul nan aingidh a mach droch nithe.

29 *Tha'n* Tighearna fada o na h-aingidh; ach éisdidh e ri h-urnuigh nam firean.

30 Ni solus nan sùl an cridhe aoibhneach; agus bheir deadh chliù smior do na cnàmhaibh.

31 Gabhaidh a' chluas a dh'éisdeas ri achmhasan na beatha, còmhuidh am measg nan daoine glice.

32 An tì a dhiùltas fòghlum, ni e tàir air 'anam féin; ach an tì a dh'éisdeas ri achmhasan, gheibh e tuisge⁸.

33 *Is* e eagal an Tighearna fòghlum a' ghliocais; agus roimh urram *tha* irioslachd.

CAIB. XVI.

1 *Tha* Dia 'na Bhrèitheamh os ceann gach dùile. 16 Oirdheirceas a' ghliocais. 27 Gnàthaichidh an duine neo-dhiadhaidh aingidheachd an còmhuidh.

T*HA* deasachadh cridhe duine, agus freagradh na teangaidh o'n Tighearn⁹.

2 *Tha* uile shlighean duine glan 'na shùilbhir féin; ach cothromaichidh¹⁰ an Tighearna na spioraid.

3 Tabhair t'òibre thairis do'n Tighearn, agus daingnichear do smuainte.

4 Rinn an Tighearna gach ni air a shon féin, agus mar an ceudna an t-aingidh air son là¹¹ an uilc.

5 *Is* gràineileachd do'n Tighearna gach neach a ta uaibhrean 'na chridhe: *ged iadhadh* làmh mu làmh, cha bhi e gun pheanas¹².

6 Trid tròcair agus fìrinn glanar euceart; agus trid eagal an Tighearna tréigear an t-olc.

7 An uair a ghabhas an Tighearna tlachd ann an slighibh duine, bheir e air a naimhaidh féin a bhi ann an sìth ris.

8 *Is* fearr beagan le h-ionracas, na teachd-a-stigh mòr gun cheartas.

9 Smuainichidh cridhe duine air a shlighe; ach is e'n Tighearn a stiùreas a cheumanna.

10 *Tha* fàistneachd¹³ air bilibh an rìgh: ann am breitheanas cha dean a bheul euceart.

11 *Is* leis an Tighearna toimhsean agus meidhean cearta¹⁴: is iad uile chlachatomaish a' mhàla¹⁵ 'obair-san.

12 *Is* gràineileachd do rìghribh aingidheachd a dheanamh; oir le h-ionracas daingnichear an rìgh-chaithir.

13 *Is* taitneach do rìghribh b'lean an ionracais; agus is ionmhuinn leo esan a labhras *nìthe* cearta.

14 *Tha* fearg rìgh mar theachdairean bàis; ach ciùinichidh¹⁶ duine glic i.

15 Ann an solus gnùise rìgh *tha* beatha;

o'n Tighearna *tha* freagradh na teangaidh.

¹⁰ measaidh.

¹¹ làtha, là.

¹² cha mheasar ned-chiontach e, cha téid e saor as.

¹³ fàistneachd.

¹⁴ a' cheartais. Eabh.

¹⁵ a' bhuilg.

¹⁶ ceannsaichidh.

¹ àineir, biadh-nòin.

² lundaire.

³ duine.

⁴ smuainte.

⁵ Feudaidh duine a smuaintean ulluchadh; ach

⁶ strì.

⁷ challaid.

⁸ cridhe. Eabh.

⁹ cridhe. Eabh.

agus *tha* a dheadh-ghean mar neul an uisge dheireannaich.

16 Cia mòr *is* fearr gliocas fhaotainn¹ na òr? agus *is* ròghnaiche tuigse fhaotainn na airgid?

17 *Is* e rathad² mòr nan ionraic an t-olc a thrèigsinn; an ti a choimhideas a shlighe, gleidhidh e 'anam.

18 Roinn sgrios *théid* uabhar; agus roinn leagadh, spiorad àrdanach.

19 *Is* fearr a bhi do spiorad iriosal maille ri u-san a ta ciùin, an a' chreach a roinn maille ris na h-uabhrich.

20 An ti a ni gnothuch gu tuigseach, gheibh e maith: agus an ti a dh'èarbas as an Tighearn, *is* sona e.

21 Goirear duine crionna³ do'n ti a tha glic 'na chridhe; agus meudaichidh milse nam bile fòghlum.

22 *Is* tobar beathia an tuigse do'n ti aig ain bheil i; ach *is* amaideachd fòghlum nan amadan.

23 Ni cridhe an duine ghlic a bheul tuigseach, agus air a bhillibh cuiridh e fòghlum.

24 Mar chìr-mheala *tha* briathra taitneach, milis do'n anam, agus 'nan slàinte do na cnàmhaibh.

25 Tha slighe ann a tha ceart ann an sealladh duine; ach *is* iad slighean a' bhàis a crìoch.

26 An ti a shaothraicheas, saothraichidh e air a shon féin; oir iarraidh a bheul air e.

27 Cladhaichidh an duine neo-dhiadhaidh olc; agus air a bhillibh *bithidh* mar theine loisgeach.

28 Togaidh⁴ an duine fiar⁵ aimhreit; agus dealaichidh fear na cogarsaich càirde sonruichte.

29 Meallaidh fear an fhòirneirt a choinhearsnach, agus bheir e air imeachd air slighe nach 'eil maith.

30 Druididh e a shlùilean chum smuain-cachadh air nithibh fiara; a' gluasad⁶ a bhilean, bheir e olc gu crìch.

31 *Is* coron glòire an ceann liath, a gheibhear ann an slighe an ionracais.

32 *Is* fearr an ti a ta mall chum feirge na gaisgeach; agus an ti a riaghlas a spiorad féin na esan a ghlacas àrd-bhaile⁷.

33 Anns an uchd tilgear an crannchur; ach *is* ann o'n Tighearn a *tha* a riaghladh gu léir.

CAIB. XVII.

1 Dearbhaidh Dia smuaintean cridhe an duine.

7 Cha 'n'eil mòralachd ciatach do luchd-deanamh

na h-euceirt. 19 Sgrìosar an neach a ghràdh-aicheas aimhreit.

IS fearr greim tioran, agus suaimhneas leis, na tigh làn do iobairtibh⁸ maille ri h-aimhreit.

2 Riaghlaidh scribedhseach tuigseach os ceann a' mhic a bhios 'na aobhar nàire; agus an measg nam bràthar roinnidh c an oighreachd⁹.

3 *Tha* a' phoit-ghlanaidh air son an airgid, agus an àmhuinn¹⁰ air son an òir: ach dearbhaidh an Tighearn na cridheacha.

4 Bheir an droch dhuine an aire do bhillibh na h-euceirt¹¹; éisidh am breugaire ri teangaidh an aimhreis.

5 An ti a ni fanoid air a' bhochd, bheir a masladh d'a Chruith-fhear: an ti a ni gàirdeachas ri dòrunn¹², cha bhi e neo-chiontach¹³.

6 *Is* iad clann an cloinne coron sheann daoine; agus *is* iad an aithriche urram¹⁴ cloinne.

7 Cha 'n'eil cainnt na mòralachd¹⁵ ciatach do'n amadan: nach lugha na sin a *tha* bilean na bréige ciatach do dhuine mòr¹⁶?

8 *Is* clach uasal tiodhlac ann an sùilbhih an ti aig am bi e¹⁷; ge b'e taobh gus an tionndaidh e, soirbhlidh leis.

9 An ti a cheileas cionta, cosnaidh¹⁸ e gràdh; ach esan a dh'aithriseas ni, dealaichidh e cairdean.

10 Drùthaidh achmhasan ni's mò air duine glic, na ceud buille air amadan.

11 *Is* ceannairc a mhàin a dh'iarras an droch dhuine; uime sin cuirear teachdair an-ìochdmhor 'na aghaidh.

12 Tachaireadh math-ghamhuin air call a cuilean air duine, ni's luaithe na amadan 'na amaideachd.

13 Ge b'e dh'ìocas olc air son maith, cha dealaich olc r'a thigh.

14 Mar gu'n leigeadh neach a mach uisgeacha, *tha* toiseach aimhreit; uime sin mu'n sgaoil¹⁹ a' chomhstri, leig dhiot i.

15 *Tha* 'n ti a shaoras an t-aingidh, agus an ti a dhiteas am firean, araon 'nan gràineileachd do'n Tighearn.

16 C'ar son a ta luach ann an làmh amadain a dh'fhaotainn gliocais, agus e gun rùn²⁰ aige?

17 Anns gach àm gràdhaichidh caraid; agus rugadh bràthair fa chomhair teinn²¹.

18 *Is* duine gun tuigse a bhuailas a làmh, a théid an urras am fianuis²² a charaid.

¹ a chosnadh.

² slighe.

³ ciallach, tuigseach.

⁴ Dùsgidh. slòl-chuiridh.

⁵ coirbte, ana-mèineach.

⁶ gluasad.

⁷ caitheir.

⁸ do nithibh maith, do dheadh ghleus.

⁹ bithidh cuibhrionn aige do'n oighreachd.

¹⁰ fhuirneis.

¹¹ bhillibh cealgach, breugach.

¹² sgrios neach eile.

¹³ uail, glòir.

¹⁴ uasal, àrd.

¹⁵ iarraidh.

¹⁶ chridhe. Eabh.

¹⁷ air son.

¹⁸ gun phcanas.

¹⁹ cainnt òirdheire.

²⁰ a gheibh e.

²¹ mu'n measgar.

²² àmhghair.

19 Gràdhaichidh esan peacadh, a ghràdhaicheas aimhreit: an ti a dh'àrd-aicheas a dhorus, iarraidh e sgrios.

20 An ti a ta fiar 'na chridhe, cha'n fhaigh e maith; agus an ti a ta lùbach¹ 'na theangaidh, tuitidh e ann an olc.

21 An ti a ghineas amadan, *ginidh se e* chum e dhoilgheis féin; oir cha bhi sòlas aig athair amadain.

22 Ni cridhe subhach maith *mar leigh-eas*; ach tiormaichidh spiorad briste na cuàmhnan.

23 Bheir droch dhuine tiodlac á 'uchd, a chlaonadh shlighean a' bhreitheanais.

24 Fa chomhair² an duine thuigsich *tha* gliocas; ach *tha* suilean amadain ann an iomall na talmhainn.

25 *Tha* am mac amaideach 'na dhoilgheas d'a athair, agus 'na shearbhas dh'ise a rug e.

26 Mar an ceudna cha 'n *eil* e maith peanas a dheanamh air an fhìrean, *no* àrd uaislean a bhualadh air son ceartais.

27 Caomhnaidh an ti aig am bheil eòlas a bhriathran; agus bithidh fear na tuigse ciùin³ 'na spiorad.

28 Measar an t-amadan féin, 'nuair a bhios e 'na thosd, na dhuine glic; agus an ti a dhruideas a bhilean, 'na dhuine tuigseach.

CAIB. XVIII.

1 Cha'n *eil* tlachd aig an amadan ann an gliocas. 10 *Tha* an Tighearn 'na thùr làidir dhoilhsan a chuireas an dòigh ann. 21 Ann an cumhachd na teangaidh *tha* bàs agus beatha.

A REIR a thograidh iarraidh esan a sgaras e féin, agus buinidh e ris gach gliocas.

2 Cha 'n *eil* tlachd aig an amadan ann an tuigse, ach gu'm foillsicheadh a chridhe e féin.

3 'Nuair a thig an t-aingidh, thig mar an ceudna tarcuis, agus maille ri mi-chliù, masladh.

4 *Mar* uisgeacha domhain *tha* briathra beoil duine; *mar* shruthl sgaoilteach *tha* tobar a ghliocais.

5 Cha 'n *eil* e maith gabhail ri gnùis⁴ an droch dhuine, chum am firean a thilgeadh bun os ceann ann am breitheanas.

6 Théid bilean an amadain ann an aimhreit, agus gairmidh a bheul air buillibh.

7 *Is* e beul amadain a sgrios, agus *is* iad a bhilean ribe 'anam a féin.

8 *Tha* briathra fir na cogarsaich⁵ mar lotaibh⁶, agus théid iad sìos gu ionadaibh iochdarach a' chuim.

¹ fiar, earach.² Ann an gnùis.³ iriosal, òirdheirc.⁴ pearsa.⁵ cogarach.⁶ mar briathraibh tlàth.⁷ do fhear na h-ana-caitheadh.⁸ àrdachear e.⁹ a mhòr-bhaile.

9 Mar an ceudna an ti sin a ta leasg 'na obair, *is* bràthair e do'n mhillteir mhòr⁷.

10 *Is* tùr làidir ainm an Tighearna: ruithidh am firean d'a ionnsuidh, agus bithidh e tèaruimte⁸.

11 *Is* e beartas an duine shaoibhir a chaithir⁹ làidir, agus mar bhalla àrd 'na bheachd féin.

12 Roimh sgrios bithidh cridhe duine uabhbreach, agus roimh urram *bithidh* irioslachd.

13 An ti a bheir freagradh ann an cùis mu'n cluinn e *i, is* amaideachd agus nàire dha e.

14 Giùlainidh spiorad duine a laigse: ach cò is urrainn spiorad briste¹⁰ a ghiùlan?

15 Gheibh cridhe an duine chrìonna¹¹ eòlas; agus iarraidh cluas nan daoine glìce eòlas.

16 Ni tiodhlac duine àite dha, agus bheir e an làthair dhaoine mòra e.

17 *Saoilear* gu bheil a' chòir aige-san, a tha air thoiseach ann an agairt a chùise; ach thig a choimhearsnach, agus ranns-aichidh se e.

18 Bheir an crannchur air aimhreiteibh sgar, agus roinnidh e eadar na cumhachd-aich.

19 *Tha* bràthair air a bhrosnachadh *ni's* cruaidh *r'a* chosnadh na caithir¹² làidir; agus *tha* aimhreitean *bhràithre* mar chrannaibh lùchairt¹³.

20 Le toradh béil duine lìonar a bhrù; agus le piseach¹⁴ a bhilean sàsuichear e.

21 *Tha* bàs agus beatha ann an cumhachd¹⁵ na teangaidh; agus ithidh esan leis an ionmhuinn i d'a toradh.

22 An ti a dh'amaiseas air mnaoi, amaisidh e air ni maith, agus gheibh e deadh-ghean o'n Tighearn.

23 Le h-impidhibh¹⁶ labhraidh an duine bochd; ach freagraidh an duine saoiibhir gu garbh.

24 Feumaidh fear aig am bi càirdean, càirdeas a nochdadh; agus tha caraid ann a leanas ni's dlùithe na bràthair.

CAIB. XIX.

1 Bàsaichidh an t-anam a bhitheas amaideach agus as eugmhais eòlais. 16 Eiridh gu maith dha-san a gleidheas lagh an Tighearn. 26 Bheir mac aingidh masladh agus nàire air 'athair.

I S fearr am bochd a ghluaiseas 'na ion-racas, na esan a tha fiar 'na bhilibh¹⁷, agus e 'na amadan.

2 Mar an ceudna cha mhaith do'n anam a bhi as eugmhais eòlais; agus an ti a ni cabhag le 'chasaibh, tuislichidh e¹⁸.

¹⁰ brùite, leònta.¹¹ chiallaich, thuigsich.¹² mòr-bhaile.¹³ tùir, dùin, daingnich.¹⁴ fàs, toradh.¹⁵ làimh. Eabh.¹⁶ astlachadh.¹⁷ shligibh.¹⁸ théid e air seacharan, peacaichidh e.

3 Claonaidh amaideachd duine a shlighe, agus an aghlaidh an Tighearna ni a chridhe gearan¹.

4 Ni saobhreas mòran chàirdean; ach sgarar am bochd o a charaid².

5 Cha bhi fianuis bhreugach gun pheanas³; agus *an ti a labhras breugan*, cha téid e as.

6 Iarraidh mòran deadh-ghean an duine mhòir⁴; agus *bithidh* gach duine 'na charaid do fhear nan tiodhlac⁵.

7 Bheir uile bhràithrean an duine bhochd fuath dha: nach mò na sin a théid a chàirdean am fad uaith? leanaidh e *iad le briathraibh*, *ach tha iad a dhìth* air⁶.

8 An ti a gheibh gliocas⁷, gràdhaichidh e 'anam féin; an ti a ghleidheas tuigse, gheibh e maith.

9 Cha bhi fianuis bhreugach gun pheanas; agus sgrìosar an ti a labhras breugan.

10 Cha 'n'eil aoibhneas iomchuidh do amadan; is lugha na sm do sheirbhis-each riaghladh os ceann uachdarana.

11 Ni tuigse duine e mall chum feirge, agus *is i a ghlòir amharc thairis aireucoir*.

12 Mar bheucaich leòmhain *tha* fearg rìgh; ach mar dhrùchd air fear *tha* a dheadh-ghean.

13 *Is* aobhar doilgheis d'a athair mac amaideach; agus mar shìor-shileadh uisge *tha* aimhreitean mnà.

14 *Is* iad oighreachd aithriche tigh agus saobhreas; ach is ann o'n Tighearna *a tha* bean chiallach⁸.

15 Bheir leisge air *duine* tuiteam ann an trom chodal; agus fuilingidh an t-anam dìomhanach ocras.

16 An ti a ghleidheas an àithne, gleidhidh e 'anam féin; ach an ti a ni tàir air⁹ a shlighibh, gheibh e bàs.

17 An ti a ghabhas truas do'n bhòchd, bheir e air iasachd¹⁰ do'n Tighearna; agus an ni a bheir e uaith, òcaidh e dha a ris.

18 Smachdaich do mhac am feadh a ta dòchas *d'a thaobh*, agus na caomhnadh t'anam air son a ghearain¹¹.

19 Fuilingidh fear na feirge mòire peanas; oir ma shaoaras tu e, feumaidh tu dheanamh a ris.

20 Eisd ri comhairle, agus gabh fòghlum, chum gu'm bi thu glic ann ad *làithibh* deireannach¹².

21 *Is* liomhor na smuaintean ann an

cridhe duine; ach is i comhairle an Tigh-earn a sheasas.

22 *Is* e tlachd duine a chaoimhneas; agus *is* fearr duine bochd na breugaire.

23 *Treòraichidh* eagal an Tighearna gu beatha, agus gheibh esan a bhios air a lìonadh *leis* fois; cha'n fhiosraichear le h-olc e.

24 Folaichidh an leisgeim a làmh 'na bhrollach¹³; uiread as chum a bhéil cha tabhair e i a ris.

25 Buail fear-fochaid, agus bithidh an duine neo-gheur air 'fhaicill; agus cronaidh duine tuigseach, agus tuigidh e eòlas.

26 An ti a chreachas¹⁴ 'athair, agus a dh'fhògras *a* mhàthair, *is* mac a bheir nàire agus masladh e.

27 Sguir, a mhic, do éisdeachd ris an teagasg, a chuireas air seacharan o bhriathraibh an eòlais.

28 Ni fianuis aingidh¹⁵ tarcuis air breitheanas; agus sluigidh beul dhroch dhaoine euceart.

29 Dh'ulluicheadh breitheanais do luchd-fochaid, agus builleann do dhruim nan amadan.

CAIB. XX.

1 *Tha* e 'na ni urramach fantuinn o aimhreit.

10 *Is* gràineileachd do Dhia tomhas cealgach.

22 *Cha* chòir do neach olc òcadh air son uile.

Is cealgach an ni fion¹⁶, *is* buaireasach an ni deoch làidir; agus ge b'e neach a mheallar leo, cha 'n'eil e glic.

2 Mar bheucaich leòmhain *tha* eagal rìgh: an ti a bhrosnuicheas e gu feirg, peacaichidh e *an aghaidh* 'anam féin.

3 *Is* urramach an ni do fhear fantuinn¹⁷ o aimhreit; ach measgaidh gach amadan *innte*.

4 Air son an fhuachda¹⁸ cha treabh an leisgein; iarraidh e déire anns an fhogharadh, ach cha'n *fhaigh* e.

5 Mar uisge domhain *tha* comhairle ann an cridhe duine, ach tairigidh fear na tuigse nìos i.

6 Gairmidh mòran dhaoine gach aon diubh a mhaithreas féin; ach cò a gheibh duine firinneach?

7 Gluaisidh am firean 'na ionracas: so na *bithidh* a mhic 'na dhéigh.

8 'Nuair a shuidheas rìgh air caithir bhreitheanais, sgaoilidh¹⁹ e gach olc le 'shùilb.

9 Cò a dh'fheudas a ràdh, Ghlan mi mo chridhe, tha mi glan o m' pleacadh?

¹ bithidh fearg air a chridhe.

² choimhearsnach. ³ neò-chiontach.

⁴ a' phrionnsaidh, an uachdarain.

⁵ dhasan a bheir tiodhlacan seachad.

⁶ tha iad gun éifeachd.

⁷ cridhe. Eabh.

⁸ thuigseach.

⁹ a dhearmadas, nach toir an aire do.

¹⁰ an coingheall.

¹¹ ach na tog t'anam chum a mhilleadh.

¹² Faic Deut. Caib. VIII. r. 16.

¹³ aslaich, asgail.

¹⁴ a mhilleas, a chlaoidheas.

¹⁵ fianuis do Bheilal. Eabh.

¹⁶ Is fear-magaidh om fion. Eabh.

¹⁷ sguir.

¹⁸ a' gheamhraidh.

¹⁹ sguyaidh.

10 *Aon* chloithrom agus cothrom *eile*, *aon* soitheach-tomhais agus soitheach-tomhais¹ *eile*, is gràineileachd iad araon do'n Tighearn.

11 Aithnichteas eadhon leanabh le a bheusaibh, am *bi* a dheanadas glan, agus am *bi* e ceart.

12 A' chluas a chluinneas, agus an t-sùil a chi, rinu an Tighearn iad araon.

13 Na gradhaich codal, air eagal gu'n tig thu gu bochdainn; fosgail do shùilean, agus sàsuichear thu le h-aran.

14 *Is* olc, *is* olc *e*, ars' an ceannuiche; ach an uair a dh'imicheas e roimhe, an sin ni e uail.

15 Tha òr ann, agus mòran do chlach-aibh luachmhor²; ach *is* iad bilean an eòlais an seud a's luachmhoire.

16 Gabh cudach an ti a chaidh an urras air coigreach; agus air son bana-choigrich gabh an geall uait.

17 *Is* milis le duine aran na ceilge; ach 'na dhèighl sin lìonar a bheil do ghaineamh³.

18 Daingnichear gach tionnsgnath le comhairle; agus le comhairle ghlic dean cogadh.

19 A' foillseachadh nithe dìomhair, imichidh fear-tuailis mu'n cuairt⁴; uime sin ris-san a ni miodal le 'bhilibh⁵ na biodh gnothuch agad.

20 Ge be mhalluicheas 'athair, no a mhàthair, cuirear as a lòchran ann an duibhre dorchadais.

21 Feudar oighreachd fhaotainn gu luath an toiseach; ach cha bhi a crìoch beannaichte.

22 Na h-abair, Iocaidh mi olc air son uile: feith air an Tighearn, agus saoraidh e thu.

23 *Is* gràineileachd do'n Tighearn *aon* chlach-thomhais agus clach-thomhais *eile*, agus cha 'n *eil* meidhean cealgach maith.

24 *Is* ann o'n Tighearn *a tha* ceumanna duine: oir cionnus a thuigeas duine a shlighe féin?

25 *Is* ribe e do dhuine itheadh do'n ni a ta naomh, agus an déigh bhòid fiosrachadh⁶.

26 Sgapaidh rìgh glic na h-aingidh, agus bheir e air an roth teachd thairis orra.

27 *Is* e spiorad⁷ duine lòchran an Tighearn, a' sgrùdadh⁸ gach ionaid an taobh a stigh do'n chom.

28 Glcidhidh tròcair agus firinn rìgh;

seadh, le tròcair daingnichear a rìgh-chaitlir.

29 *Is* e urram dhaoine òga an neart; agus *is* e maise sheann daoine, an ceann liath.

30 Glanaidh guirme⁹ cneidhe olc; mar sin *glanaidh* buillean na bheil an taobh a stigh do'n chom¹⁰.

CAIB. XXI.

1 *Rannsaichidh Dia cridhe an duine.* 15 *Rògh-naichidh am firean breitheanas.* 27 *Tha iobairt nan aingidh 'na gràineileachd an làthair Dhé.*

MAR shruthaibh uisgeacha *tha* cridhe rìgh ann an làimh an Tighearna: ge b'e taobh is àill leis, tionndaidhidh se e.

2 *Tha* uile shlighean duine ceart 'na shùilibh féin; ach measaidh an Tighearna na cridheacha.

3 Ceartas a dheanamh agus breitheanas, *is* ròghnaiche leis an Tighearna na iobairt.

4 *Is* peacach sealladh àrd, agus cridhe uaibhreach, lòchran nan aingidh¹¹.

5 *Bheir* gu deimhin smuaintean an duine dhì-chiollaich, gu pailteas; ach *thig* gach neach a ta gun fhoighidin¹² da rìreadh gu dìth.

6 Ionmhasan fhaotainn le teangaidh bhreugaich, *is* dìomhanas e air a luasgadh a null agus a nall aig an droing a dh'iarras am bàs.

7 Sgrìosaidh reubainn nan aingidh iad, a chionn gu'n diùlt iad breitheanas a dheanamh.

8 Fiar agus coimheach *tha* slighe duine; ach *a thaobh* an fhìor-ghloin, *tha* a dheanadas dìreach.

9 *Is* fearr còmhuidh a ghabhail ann an oisinn mullaich tighe, na maille ri mnaoi aimplreitich ann an tigh farsuinn¹³.

10 Miannaichidh anam an aingidh olc: cha'n fhaigh a choimhearsnach deadhighean 'na shùilibh.

11 'Nuair a nìthear peanas air fear-fochaid, fàsaidh am baoghailta¹⁴ glic; agus an uair a dh'fhòghlumar an duine glic, gheibh e eòlas.

12 *Bheir* am firean an aire gu glic do thigh an aingidh: tilgear¹⁵ na h-aingidh bun os ceann air son an aingidheachd.

13 An ti a dhruideas a chluas ri glaoth an duine bhochd, glaothaidh e féin mar an ceudna, ach cha'n éisdear ris.

14 Cùinichidh¹⁶ tiodhlac ann an dìomhaircachd fearg; agus duais san uchd, corruich dhian.

15 *Is* aoibhneas do'n fhìrean breithean-

¹ *clach agus clach, ephah agus ephah.* Eabh. Faic Deut. Caib. XXV. r. 14.

² *neamhnuidibh; peninim.* Eabh.

³ *ghairbheal, gharbh-ghaineamh.*

⁴ Faic Caib. XI. r. 13. ⁵ *a tha bras le 'bhilibh.*

⁶ *dàil a chur nan còimhlionadh.* ⁷ *anam.*

⁸ *rannsaichidh, fiosrachaidh.* ⁹ *salchar, bréine.*

¹⁰ *olc a' chridhe.* ¹¹ agus treabhadh nan aingidh.

¹² *dian, cabhagach.*

¹³ *comuin, comh-chuideachd.*

¹⁴ *neo-ghèur, simpidh.*

¹⁵ *tilgidh Dia.*

¹⁶ *Traoghaidh, mùchaidh.*

as¹ a dheanamh; ach *thig* sgrios air² luchd-deanamh na h-euceirt.

16 An duine a thèid air seacharan o shlighe na tuigse, fanaidh e ann an coimhthional nam marbh.

17 *Bithidh* esan 'na dhuine bochd a ghràdhachas sògh³; an ti a ghràdhachas fion agus oladh, cha'n fhàs e saobhir.

18 'Na éiric air son an fhèin *bithidh* an t-aingidh, agus air son nan ionraic an duine fealltach⁴.

19 *Is* fearr còmhnuidh a ghabhail ann am fàsach⁵, na maille ri mnaoi aimhreiteich agus fheargaich.

20 *Tha* ionmhas taitneach agus oladh ann an àite-còmhnuidh an duine ghlic; ach caithidh an t-amadan e.

21 An ti a leanas fireantachd agus tròcair, gheibh e beatha, fireantachd, agus urram⁶.

22 Do chaithir⁷ nan daoine treuna streapaidh an duine glic, agus leagaidh e sìos neart a h-earbsa.

23 An ti a ghleidheas a bheul agus a theangadh, gleidhidh e 'anam o theanntachdaibh.

24 Fear-magaidh uaibhreach àrdanach *is* ainm dhasan, a ghiùlainneas e féin ann an corruich an uabhair.

25 Marbhaidh miann an leigsein e; oir diùltaidh a làmhnan obair a dheanamh.

26 Air feadh an là sanntaidhidh e gu mòr; ach bheir am firean uaith, agus cha chaomhain e.

27 *Is* gràineileachd ìobairt nan aingidh: cia mòr *is* mò, 'nuair a bheirear suas i le droch rùn?

28 Sgriosar fianuis bhreugach; ach an ti a dh'éisdeas, labhraidh e chum *deadh* chriche⁸.

29 Cruaidhichidh androch dhuine 'eud-an; ach nì esan a ta ionraic a shlighe dir-each⁹.

30 Cha 'n'eil gliocas, no tuigse, no comhairle ann, an aghaidh an Tighearna.

31 Deasaichear an t-each fa chomhair là a' chatha; ach is ann o'n Tighearna a tha tèruinteachd¹⁰.

CAIB. XXII.

1 *Trid eagail an Tighearna tha urram agus beatha.*

9 Beannaichear esan aig am bheil sùil thruacanta, 16 ach esan a shàruicheas am bochd *thig* e gu h-uireasbhuidh. 24 *Is* còir fear na feirge a sheachnadh.

IS ròghnaiche ainm maith na mòr-shaoibhreas, agus deadh-ghean na airgid agus òr.

2 Coinnichidh am beartach¹¹ agus am bochd a chéile: *is* e'n Tighearna a rinn iad gu léir.

3 Chi an duine crònna¹² olc, agus fol-aichidh se e féin; ach gabhaidh na daoine baoghalta¹³ air an aghaidh, agus fuilingidh iad peanas.

4 *Trid* irioslachd [agus] eagail an Tighearna, *thig* saoihbreas, agus urram, agus beatha.

5 *Tha* droghionn agus ribeacha ann an slighe an duine fhiar: an ti a ghleidheas 'anam féin, thèid e am fad uatha.

6 Teagaisg leanabh a thaobh na slighe air an còir dha imeachd; agus an uair a bhios e sean, cha tréig e i.

7 Riaghlaidh am beartach os ceann nam bochd; agus *bithidh* an ti a ghabhas an coingheall¹⁴ 'na sheirbhiseach dhà-san a bheir an coingheall.

8 An ti a shìol-chuineas euceart, buainidh e dìomhanas; agus caithear¹⁵ slat 'fheirge.

9 Beannaichear esan aig am bheil sùil fhial¹⁶; oir bheir e d'a aran do'n bhocid.

10 Tilg a mach am fear-fochaid, agus thèid consachadh a mach; seadh, sguiridh comhstri agus masladh.

11 An ti leis an ionmhunn gloine cridhe, *is* taitneach a bhilean, *bithidh*¹⁷ an rìgh 'na charaid aige.

12 Coimhididh sùilean an Tighearna eòlas; ach tilgidh e bun os ceannbriathran a' chiontaich.

13 Their an leigsein, *Tha* leòmhnan am muigh, anns na sràidibh marbhar mi.

14 *Is* slochd domhain beul bhan coimheach; an ti a's gràineil¹⁸ leis an 'Tighearna, tuitidh e ann.

15 *Tha* amaideachd ceangailte ann an cridhe leimibh; ach cuiridh slat an smachdachaidh fad uaith i.

16 An ti a shàruicheas am bochd a mheudachadh a *mhaoin* féin, agus an ti a bheir do'n t-saoibhir, *thig* e gu deimhin gu h-uireasbhuidh.

17 Aom do chluas, agus éisd ri briathraibh dhaoine glíce, agus socraich do chridhe air m'eòlas-sa:

18 Oir *is* taitneach an *nì* e, ma ghleidheas tu iad ann ad chom¹⁹, ma bhitheas iad araon deas air do bhillibh.

19 Chum gu'm biodh t-carbsa as an Tighearna, nochd mi dhuit an diugh, eadhon dhuitse.

20 Nach do sgrìobh²⁰ mi dhuit nithe òirdheir, ann an comhairlibh, agus an eòlas?

¹ ceartas.

² is aobhar uamhais e do.

³ aoihbneas, aighear.

⁴ ciontach.

⁵ an tìr fhàsil. Eabh.

⁶ glòir.

⁷ àrd-bhaile, bhaile daingichte.

⁸ a ghnàth, am feasd.

⁹ deasaichidh esan a ta

ionraic a shlighe.

¹⁰ saorsa, buaidh.

¹¹ saoihbhir.

¹² ciallach, geur, léirsimeach.

¹³ neo-gheur, simplidh.

¹⁴ air iasachd.

¹⁵ fàinichidh.

¹⁶ mhaith, thruacanta.

¹⁷ air son gràis no deadh-ghean a bhilean bithidh, &c.

¹⁸ fuathach.

¹⁹ an taobh a stigh dhìot.

²⁰ dh'fhoillsich.

21 Chum gu nochdainn duit cinnte bhriathar na firinn; chum gu freagradh tu briathra na firinn dhoibhsan a chuireas fios a d'ionnsuidh?

22 Na creach am bochd a chionn gu *bheil* e bochd, agus na sàruich an truaghan anns a' gheata:

23 Oir tagraidh an Tighearn an cùis, agus millidh e anam na muinntir a mhill-cas iad.

24 Na dean suas cairdeas ris an fheargach; agus maille ri fear na h-àrd-chorruich na h-imich;

25 Aireagal gu'n ionnsaich thu a shligh-ean, agus gu'm faigh thu ribe do t'anam.

26 Na bi dhiubh-san a bhuaileas an làmh¹, no dhiubh-san a théid an urras air son fhìach.

27 Mur 'eil ni agad gu dìoladh, c'ar son a bheirtheadh² uait do leabadh a ta fodhad?

28 Na h-atharraich an seann chomhara-criche, a shuidhich t'aithriche.

29 Ma chi thu fear a bhios eallamh³ 'na ghnothuichibh, seasaidh e an làthair rìghrean, cha seas e an làthair dhaoine iosal.

CAIB. XXIII.

1 *Tha saobhlreas talmhaidh neo-tharbhach.* 13 *Is còir leanabh a smachdachadh.* 21 *Thig am misgeir agus an geòcair gu bochdainn.* 29 *Buinidh bròn dhasan a dh'iarra fion measgta.*

NUAIR a shuidheas tu a dh'itheadh maille ri h-uachdaran, thoir an ro-aire do na *bheil* fa d' chomhair;

2 Agus cuir sgian ri d' sgorman, ma's duine thu air do thabhairt do chraos.

3 Na miannaich a nìthe milse⁴; oir *is* biadh mealltach iad.

4 Na saothraich gu fàs saobhir: leig dhìot do ghliocas féin.

5 An cuir thu do shùilean air an ni nach 'eil ann? oir gu cinnteach ni *saobhlreas* sgiathan dha féin, mar iolaire a dh'iteal-ai-cheas chum nan nèamh⁵.

6 Na h-ith aran an *ti aig am bheil* droch shùil, agus na miannaich a nìthe milse.

7 Oir mar a smuainicheas e 'na anam, mar sin *bithidh* e: Ith agus òl, their e riut, ach cha *bhi* a chridhe leat.

8 An greim a dh'ith thu, sgeithidh tu nìos, agus caillidh tu do bhriathra milse.

9 Na labhair ann an clusaibh amadain; oir ni e tàir air gliocas do bhriathar.

10 Na h-atharraich an seann chomhara-criche; agus air acaibh nan dilleachdan na bris a steach:

11 Oir *tha* am fear-saoraidh cumhachdach; tagraidh e an cùis a d' aghaidh⁶.

12 Aom do chridhe ri fòghlum, agus do chluasan ri briathraibh eòlais.

13 Na cum smachdachadh o leanabh: oir *ma* bhuaileas tu e le slait, cha'n fhaigh e bàs.

14 Buailidh tu e le slait, agus saoraidh tu 'anam o ifrinn⁷.

15 A mhic, ma bhios do chridhe glic, ni mo chridhe-sa gàirdeachas, eadhon mo chridhe-sa;

16 Seadh, ni m'airnean gàirdeachas 'nuair a labhras do bhilean nìthe cearta.

17 Na gabhadh do chridhe farmad ri peacachaibh: ach *bi* an eagal an Tighearn air feadh an là uile.

18 Oir gu deimhin tha crìoch ann, ach⁸ cha ghearrar as do dhòchas.

19 Eisd thusa, a mhic, agus bi glic, agus treòraich do chridhe anns an t-slighe.

20 Na bi am measg phòiteirean fìona; am measg luchd comb-ithidh geòcach feòla.

21 Oir thig am misgeir agus an geòcair gu bochdainn; agus eudaichidh turrachodal⁹ *duine* le luideagaibh.

22 Eisd ri t'athair a ghin thu, agus na dean tàir air do mhàthair 'nuair a bhios i aosda.

23 Ceannaich an fhirinn, agus na reic i; mar an ceudna gliocas, agus fòghlum, agus tuisge.

24 Nì athair an fhìrein mòr-ghairdeachas; agus nì esan a ghincas *mac* glic, aoibhneas ann.

25 Nì t'athair agus do mhàthair aoibhneas, agus nì isc a rug thu gàirdeachas.

26 A mhic, thoir dhomh-sa do chridhe, agus coimhheadh do shùilean mo shligh-ean.

27 Oir *is* staing¹⁰ dliomhain strìopach; agus *is* slochd cumhann bana-choigreach.

28 Tha i mar an ceudna ri feall-fheith-eamh mar chreachadair¹¹, agus cuiridh i luchd dò-bheirt¹² an lìonmhoireachd am measg dhaoine.

29 Cò d' *am buin* truaighe? cò a *ta* ri bròn¹³? cò aig *am bheil* consachadh¹⁴? cò a *ta* ri gearan? cò aig *am bheil* lotan gun aobhar? cò aig *am bheil* deirge shùl?

30 Iadsan a dh'fhanas fad aig an fhìon; iadsan a théid a dh'iarraidh fìona measgta.

31 Na h-amhaire thusa air an fhìon an uair a bhios e dearg, 'nuair a bheir e a dhath sa' chupan, a théid e sìos dìreach¹⁵.

32 Ma dheireadh teumaidh e mar nathair, agus mar an rìgh-nathair¹⁶ sàthaidh e a ghlath.

33 Amhaircidh do shùilean air mnaibh

¹ a bheir an làmhnan seachad.

² a bheirtheadh neach.

³ grad, deas.

⁴ annasach.

⁵ nan speur, nan neul.

⁶ riut.

⁷ o'n uigh, o'n bhàs. ⁸ luigheachd ann, agus.

⁹ codaltachd, lundaireachd, leisge.

¹⁰ slochd.

¹¹ air son creiche.

¹² luchd-eusaontais, frallairean.

¹³ acain.

¹⁴ airmheitean.

¹⁵ a ghluaiseas e gu ceart.

¹⁶ nathair-nimhe.

coimheach, agus cuiridh do chridhe an cèill nithe claona:

34 Agus bithidh tu mar an ti a luidheas sìos ann am meadhon na fairge, no mar esan a luidheas air bàrr croinn-siùil.

35 Bhuail iad mi, *their thu*, agus cha robh mi tinn: ghabh iad orm, agus cha do mhothaich mi: c'uin a dhùisgeas mi? an sin iarraidh mi fathast e.

CAIB. XXIV.

1 *Cha chòir do neach farmad a ghabhail ri droch dhaoineibh.* 11 *Rannsaichidh Dia an cridhe, agus iocaidh e do gach duine a réir a ghnìomhara.* 30 *Bochdainn an duine leisg.*

NA gabh farmad ri droch dhaoineibh, agus na miannaich a bhi maille riu:

2 Oir smuainichidh an cridhe air mill-eadh, agus labhraidh am bilean mu dhon-as¹.

3 Le gliocas togar tigh, agus le tuigse daingnichear e;

4 Agus le h-eòlas lìonar a sheòmraiche leis gach saobhbheas luachmhor agus taitneach.

5 *Tha'n duine glic 'na dhuine làidir;* agus tha fear an eòlais treun an neart.

6 Oir le comhairle ghlic ni thu do chogadh; agus ann an lìonmhoireachd chomhairleach *tha* tèaruinteachd.

7 *Tha* gliocas àrd air son amadain; anns a' gheata na fosgladh e a bheul.

8 Esan a smuainicheas air² olc a dheanamh, goirear fear nan droch innleachd dheth.

9 *Is* peacadh smuaintè na h-amaid-eachd; agus *is* e fear na fo-chaid gràin dhaoine.

10 Ma dh'fhannaicheas³ tu ann an là an àmhghair⁴, *is* beag no neart.

11 Ma dhearmadas tu iadsan a thearnadh a thairngear chum bàis, agus iadsan a tha ullamh gu bhi air am marbhadh;

12 Ma *their thu*, Feuch, cha robh fios againn air so; nach toir esan a chothromaicheas an cridhe fa'near? agus nach bi fios aige-san a choimhideas t'anam? agus nach ioc e do gach duine a réir a ghnìomhara?

13 A mhic, ith thusa mil, do bhrìgh gu *bheil i* maith, agus a' chìr mheala a *tha* millis do d'bhlas.

14 Mar sin *bithidh* eòlas a' ghliocais do t'anam, ma gheibh thu e; agus an uair a thig do chrìoch, cha ghearrar as⁵ do dhòchas.

15 Na dean feall-fholach, a dhìroch dhuine, an aghaidh àite-còmhnuidh an fhàirein; na creach 'ionad-taimh.

16 Oir seachd uairean tuitidh am firean, agus éiridh e *ris*; ach tuitidh na h-aingidh ann an olc.

17 'Nuair a thuiteas do nàmhaid, na bi aoibhneach, agus an uair a thuislicheas e, na deanadh do chridhe gàirdeachas:

18 Air eagal gu'm faic an Tighearn, agus gu'm bi e olc⁶ 'na shùilibh, agus gu'n tionndaidh e 'fhearg uaith.

19 Na biodh campar ort mu dhroch dhaoineibh, agus na gabh farmad ris na h-aingidh⁷:

20 Oir cha bhi crìoch mhaith⁸ air an droch dhuine, cuirear lòchran nan aingidh as.

21 A mhic, biodh eagal an Tighearn agus an rìgh ort: riu-san aig am bheil atharrachadh giùlain⁹ na biodh gnothuch agad:

22 Oir gu h-obann thig¹⁰ an dòruinn; agus cò d'am fios an sgrios araon?

23 *Buinidh* na nithe so mar an ceudna do dhaoineibh glìce. Cha mhaith an ni gnùis aithneachadh ann am breithean-as¹¹.

24 Esan a *their* ris an aingidh, *Tha* thu cothromach¹², malluichidh an sluagh e, gabhaidh na fineacha gràin deth.

25 Ach bithidh toil-inntinn aca-san a chronaicheas e, agus thig beannachadh maith orra.

26 Pògar bilean an ti a bheir freagradh ceart.

27 Ulluich t'obair am muigh, agus deasaich i dhuit fèin anns an achadh, agus 'na dhéigh sin tog do thigh.

28 Na bi t'fhianuis gun aobhar an aghaidh do choimhearsnaich; agus na neall le d' bhlìbhibh.

29 Na h-abair, Mar a rinn e orm, mar sin ni mi air: iocaidh mi do'n duine a réir 'oibre.

30 Ghabh mi seachad air fearann an duine leisg, agus air fion-lias an duine gun tuigse;

31 Agus, feuch, bha e uile air fàs suas le cluara-naibh¹³, chòmhaich an eanntagach¹⁴ 'aghaidh, agus bhriseadh sìos a bhalla cloiche.

32 An sin chunnaic mi, thug mi an aire gu maith¹⁵; dh'amhaire mi, fhuair mi fòghlum.

33 Fathast beagan codail, beagan clòchodail, beagan pasgaidh¹⁶ nan làmh gu codal:

34 An sin thig do bhochdainn mar fhear-siubhail, agus t'uireasbhuidh mar dhuine fùidh armaibh.

¹ aimhleas, urchoid.

² a dhealbhas, a thùrus.

³ lagaicheas.

⁴ na teanntachadh.

⁵ *agus cha ghearrar as.*

⁶ mi-thaitneach.

⁷ Faic Salm XXXVII. r. 1.

⁸ duais, luigheachd.

⁹ a tha caochlaideach, so-ghluaise.

¹⁰ éiridh. Eabh. ¹¹ Faic Lebh. Caib. XIX. r. 15.

¹² ceart, ionraic.

¹³ oighionnaich, droighnich.

¹⁴ ionntagach. ¹⁵ shocraich mi mo chridhe. Eabh.

¹⁶ fùidh.

CAIB. XXV.

- 1 *Gnàth-fhocail mu thimchioll rìghrean.* 8 *Cha 'n eil e iomchuidh dol a mach gu h-obann gu strì.*
 13 *Tha fear na fianuis bhrèige mar chluaidheamh agus mar shaihead gheur.*

IS iad so mar an ceudna gnàth-fhocail Sholaimh, a dh'ath-sgrìobh daoine Hesiach rìgh Iudah.

2 *Is i glòir Dhé ni a cheiltinn; ach is e urram rìghrean ni a rannsachadh.*

3 *Tha nèamh air àirde, agus an talamh air doimhne, agus cridhe rìghrean do-rannsachaidh.*

4 *Buin an salchar o'n airgid, agus thig soitheach a mach do'n òr-cheard.*

5 *Buin an droch dhuine á làthair an rìgh, agus daingnichear ann am fireantachd a rìgh-chaitir.*

6 *Na gabh urram dhuit féin ann am fianuis rìgh, agus na seas ann an àite dhaoine nìora:*

7 *Oir is fearr gu'n abrar riut, Thig a nìos an so, na gu cuirear sìos thu am fianuis an uachdarain a chunnaic do shùilean.*

8 *Na gabh a macl gu h-obann gu strì, air eagal nach bi fios agad ciod a ni thu 'na dhèigh sin, an uair a bheir do choimhearsnach gu nàire thu¹.*

9 *Taigair do chùis ri d' choimhearsnach; agus na foillsich rùn-dìomhair do neach eile:*

10 *Air eagal gu cuir an ti a chluinneas gu nàire thu, agus nach atharraichear² do mhasladh.*

11 *Mar ùbhlán òir ann an dealbhaibh airgid, tha focal a labhrar gu h-iomchuidh.*

12 *Mar chluas-fhàinne òir, agus mar usgair do'n òr fhìor-ghlan, tha fear-cronachaidh glic aig cluais fhurachair.*

13 *Mar fhuachd sneachdaidh ann an àm an fhogharaidh, tha teachdair dìleas dhoibhsan a chuireas uatha e; oir ath-bheothachaidh e anam a mhaighstir.*

14 *Mar neoil agus mar ghaoith gun uisge tha am fear a ni uail a tiodhlac gu breugach.*

15 *Le fad-fhulangas cuirear impidh air uachdaran, agus brisidh teangadh mhìn cnàimh.*

16 *An d'fhuair thu mìl? ith ni's leòr dhuit dìth; air eagal gu 'làn-shàsuichear thu agus gu sgeith thu i.*

17 *Tarruing do chos á tigh do choimhearsnaich, air eagal gu'm bi e sgìth dhìot, agus gu fuathaich e thu.*

18 *Is ord, agus claidheamh, agus saigh-*

ead gheur, am fear a bheir fianuis bhrèigh an aghaidh a choimhearsnaich.

19 *Mar fhìacail bhrìste, agus mar chois as an alt, tha earbsa á duine neo-dhìleas ann an là airce.*

20 *Mar esau a bheir air falbh eudach ann an là fuachda, mar fhìon-geur air creag-shalann³, mar sin tha esau a sheinn-eas òrain do'n chridhe thuirseach.*

21 *Ma bhios do nàmhaid⁴ ocrach, thoir aran dha r'a itheadh; agus ma bhios e iotmhor⁵, thoir uisge dha r'a òl:*

22 *Oir carnaidh tu eibhle teine air a cheann⁶, agus bheir an Tighearna luigh-eachd⁷ dhuit.*

23 *Cuiridh a' ghaoth á tuath air falbh an t-uisge⁸; mar sin cuiridh a' ghnùis fheargach air falbh teangadh a' chùl-chàimhidh.*

24 *Is fearr còmhnuidh a ghabhail ann an oisinn mhullaich tìghe, na maille ri mnaoi aimbreitich ann an tìgh farsuinn.*

25 *Mar uisgeacha fuar do'n anam thartmhor, mar sin tha deadh sgeul á tìr chéin.*

26 *Mar thobar air a chur troimh a chéile, agus mar fhuaran air a thruaill-eadh, tha am firean a thuislicheas am fianuis an aingidh.*

27 *Cha 'n eil e maith mòran meala itheadh; agus cha ghloir e do dhaoineibh an glòir féin iarraidh⁹.*

28 *Mar chaitir¹⁰ brìste sìos, gun bhalla, tha am fear aig nach 'eil ceamnsal air a spiorad féin.*

CAIB. XXVI.

- 1 *Tha urram neo-iomchuidh do'n amadan.* 13 *Mu thimchioll an leisgein; 17 agus an neach a ghabhas gnòthuch ri conspoid nach buin da.*

Magus mar uisge san fhogharadh, mar sin cha 'n eil urram iomchuidh¹¹ do'n amadan.

2 *Mar eun air faondradh, mar an gobhlan-gaoithe ag itealaich, mar sin cha tig an mallachadh gun aobhar.*

3 *Sgiùrs¹² do'n each, srian do'n asal, agus slat do dhrùim nan amadan.*

4 *Na freagair amadan a réir 'amaid-eachd, air eagal gu'm bi thu féin cos-mhuil ris.*

5 *Freagair amadan a réir 'amaideachd, air eagal gu'm bi e glic 'na shùilbhe féin.*

6 *Gearraidh esan dheth a chosan, òlaidh e dochann, a chuireas teachdaireachd le làimh amadan.*

7 *Cha'n ionann cosan¹³ a' bhacaich; mar*

¹ air eagal gu'n dean thu ni-éigin 'na dhèigh sin, air son an cuir do choimhearsnach gu nàire thu.

² pillcar.

³ nìtre. Sasg.

⁴ an ti aig am bheil fuath dhuit.

⁵ tartmhor, paiteach.

⁶ Faic Rom. Caib. XII. r. 20.

⁷ duais.

⁸ Bheir a' ghaoth á tuath a mach uisge.

⁹ ach is urramach an ni bhi' g iarraidh urrainn.

¹⁰ mhòr-bhaile.

¹¹ ciatach.

¹² Sgiùrsair.

¹³ Togar casan.

sin *tha* gnàth-fhocal ann am beul amadana.

8 Mar neach a cheanglas clach ann an crann-tàbhuill, mar sin *tha* esan a bheir urram do amadan.

9 Mar a théid bior suas ann an làimh misgeir, mar sin *tha* gnàth-fhocal ann am beul amadana.

10 Bheir an *Dia* mòr, a dhealbh gach *ni*, duais do'n amadan¹, agus bheir e duais do luchd-eusaontais.

11 Mar a philleas madadh chum a sgeith féin, pillidh amadan chum 'amaid-eachd féin.

12 Am bheil thu faicinn duine a tha glic 'na bharail² féin? *tha* aobhar dòchais *ni*'s mò do'n amadan na dheth-san.

13 Their an leisgein³, *Tha* leòmbhan san t-slighe, leòmbhan anns na sràidibh.

14 Mar a thionndaidheas an dorus air a lùdnanaibh⁴, mar sin an leisgein air a leabaidh.

15 Folaichidh an leisgein a làmh 'na bhrollach; is doilich leis⁵ a toirt chum a bhéil.

16 *Is* glice an leisgein 'na bharail féin, na seachdnar a bheir freagradh gu ceart.

17 Mar neach a bheireas air madadh air a chluasaibh, *tha* esan a théid seach, agus a ghabhas gnothuch ri conspoid nach buin da.

18 Mar fhear air bhoile, a thilgeas leusan-teine, saighdean, agus bàs,

19 Mar sin *tha* am fear a mheallas a choimhearsnach, agus a their, Nach ann ri fearas-chuideachd⁶ a *tha* mi?

20 Far am bi dìth connaidh, théid an teine as; agus far nach bi fear-cogarsaich⁷, sguiridh a' chomh-stri.

21 Mar ghual do eibhlìbh, agus mar chonnadh do theine, mar sin *tha* fear nan aimbreit a dhùsgadh strì.

22 *Tha* briathra fir na cogarsaich mar lotaibh⁸, agus théid iad sìos gu ionadaibh iochdarach a' chuim.

23 Mar shoitheach creadha air a chòmhdachadh le sal airgid, *tha* bilean air lasadh agus cridhe olc.

24 Le 'bhilìbh ceilidh⁹ an ti a dh'fhuathaicheas; ach an taobh a stigh dheth taisgidh e cealg.

25 An uair a labhras e gu breagha, na creid e; oir *tha* seachd gràineileachda 'na chridhe.

26 *An ti* a chòmhdhaicheas¹⁰ 'fhuath le ceilg¹¹, foillsichear 'aingidheachd¹² am fianuis a' chomh-chruinnich.

27 An ti a chladhaicheas slochd, tuitidh e féin ann; agus an ti a charuicheas clach, pillidh i air féin.

28 Fuathaichidh an teagadh bhreugach iadsan d'an dean i dochair: agus oibrichidh am beul miodalach sgrios.

CAIB. XXVII.

1 *Cha chòir uail!* a dheanamh a thaobh an là màir-each. 12 *Seachnaidh* an duine crìonna an t-olc, 23 agus bithidh aithne mhaith aig air staid a thighe.

NA dean uail a thaobh an là màir-each¹³; oir cha 'n'eil fhios agad ciod a bheir là uath.

2 Moladh neach eile thu, agus na b'e do bheul féin; coigreach, agus na b'iad do bhilean féin.

3 *Is* trom clach, agus *is* cudthromach a' ghaimeamh; ach *is* trùime corruich amadain na iad le chéile.

4 *Is* an-ìochdmhor corruich, agus mar thuil *tha* fearg: ach cò is urrainn seasamh am fianuis tnu?

5 *Is* fearr achmhasan follaiseach na gràdh folaichte.

6 *Is* dileas lotan caraid; ach *is* cealgach pògan eascaraid.

7 Gabhaidh an t-anam làn gràin do'n chìr-mheala; ach do'n anam ocrach¹⁴ is mìlis gach ni searbh.

8 Mar eun air seacharan o a nead, mar sin *tha* am fear a théid air seacharan o 'àite féin.

9 Nì oladh-ungaidh agus boltrach an cridhe airt: mar sin *ni* mìlsead caraid duine le comhairle a chridhe.

10 Na tréig do charaid féin, no caraid t'athar, agus na rach¹⁵ a steach do thigh do bhràthar ann an là t'àmhghair¹⁶: *is* fearr coimhearsnach am fagus na bràthair fad as.

11 Bi glic, a mhic, agus dean mo chridhe airt, agus bithidh freagradh agam dhasan a bheir masladh dhomh¹⁷.

12 Chi an duine crìonna olc, agus folaichidh se e féin; ach gabhaidh na daoine baoghalta air an aghaidh, agus fuilingidh iad peanas¹⁸.

13 Gabh eudach an ti a chaidh an urras air coigreach, agus air son bana-choigrich gabh an geall uath.

14 An ti a bheannaicheas a charaid le guth àrd, ag éirigh gu moch sa' mhad-uinn, measar e dha mar mhallachadh.

15 *Tha* sìor-shileadh uisge ann an là frasach, agus bean aimhreiteach cosmhuil ri chéile.

¹ Claidhidh duine mòr gach neach, agus bheir e duais do'n amadan. ² na shùilibh. Eabh.

³ leisgear, lundaire.

⁴ lùdaganaihbh.

⁵ is saothair leis.

⁶ bhriathraibh tlàth.

⁷ cogaraich.

⁸ aithnìcheas.

¹⁰ dh'fholaicheas.

¹¹ olcas.

¹² acrach.

¹³ t'urchoid.

¹⁴ Faic Caib. XXII. r. 3.

¹⁵ Faic Caib. XXII. r. 2

¹⁶ an uaigneas.

¹⁷ an làr-na mhàireach.

¹⁸ teirig. gabh.

¹⁹ Faic Salm CXIX. r. 42.

16 Ge b'e dh'fhlaicheas i, folaichidh e a' ghaoth, agus oladh-ungaidh a làimhe deise a bhrathas i fèin.

17 Geuraichear iarunn air iarunn, agus geuraichidh duine gnùis a charaid.

18 Ge b'e ghleidheas craobh-fhìge, ithidh e d'a toradh; mar sin esan a dh'fheitheas air a mhaighstir, gheibh e urram.

19 Mar ann an uisge a fhreagras aghaidh do aghaidh, mar sin freagraidh cridhe duine do dhuine.

20 Cha sàsuichear ifrinn agus léir-sgrìos¹, agus cha sàsuichear sùilean dhaoine.

21 Mar a' phoit-ghlanaidh air son an airgid, agus an àmhuinn air son an òir, mar sin tha duine do bheul an ti a mholas e.

22 Ged phronn thu amadan ann an soitheach-pronnaidh am measg cruithneachd le bruthadair², cha dealaich amaid-eachd ris.

23 Bithheadh aithne mhaith agad air staid³ do chaorach; thoir an aire do d' theudaibh:

24 Oir cha mhair beartas gu bràth: agus am mair crùn o linn gu linn?

25 Nochdar am fear gearra, agus tais-beanaidh am fear maoth⁴ e fèin, agus cruinnichear luibhean nam beann.

26 Bithidh na h-uain chum t'èudaich; agus is iad na gabhair luach t'fhearainn.

27 Agus bithidh nì's leòr do bhainne ghabhar agad chum bidh, chum bidh do theaghlaich, agus chum beathachaidh do mhaighdeana⁵.

CAIB. XXVIII.

1 *Soirbhichidh leis an duine a ghluaiseas 'na ionracas, 7 ach esan a ni gu h-aingidh tuitidh e 'na shlochd fèin.*

TEICHIDH an t-aingidh, gun neach air bith an tòir air; ach bithidh na h-ionraic dàna mar leòmhann.

2 Air son eusaontais tìre bithidh mòran uachdaran oirre; ach le duine tuigseach eòlach nìhear a staid buan.

3 Tha duine bochd a nì fòirneart air bochdaibh, mar uisge millteach⁶ nach fàg biadh 'na dhéigh.

4 Molaidh iadsan a thréigeas an lagh na h-aingidh; ach nì iadsan a ghleidheas an lagh strì⁷ riu.

5 Cha tuig droch dhaoine breitheanas; ach tuigidh iadsan a dh'iaras an Tigh-earn na h-uile nìthe.

6 Is fearr am bochd a dh'imicheas 'na ionracas, na esan a tha fiar 'na shlighibh, ged robh e saoi bhir.

7 An ti a ghleidheas an lagh, is mac glic e; ach esan a ta 'na chompanach do luchd-craois, nàirichidh e 'athair.

8 An ti a mheudaicheas a mhaoin le h-ocar⁸ agus le tairbhe eucoraich, cruinnichidh e dhàsan a ghabhas truas do'n bhochd.

9 An ti a thionndaidheas a chluas o chluinntinn an lagha, bithidh 'urnuigh fèin 'na gràineileachd.

10 An ti a chuireas na fireana air seacharan air droch slighe, tuitidh e 'na shlochd fèin; ach mealaidh na h-ionraic nìthe maith.

11 Is glic duine saoi bhir 'na bharaill⁹ fèin; ach rannsachaidh an duine bochd aig am bi tuigse mach e.

12 'Nuair a nì ua fireana gàirdeachas, bithidh glòir mhòr ann; ach an uair a dh'éireas na h-aingidh, folaichear¹⁰ duine.

13 An ti a dh'fhlaicheas a pheacama, cha soirbhich leis; ach esan a dh'aidich-eas agus a thréigeas iad, gheibh e tròcair.

14 Is beannaichte an duine air am bi eagal a ghnàth; ach esan a chruaidhich-eas a chridhe, tuitidh e ann an olc.

15 Mar leòmhann beucach, agus mar mhath-ghamhuin a ruitheas a null agus a nall, tha uachdaran aingidh os ceann sluagh bhochd.

16 Am fear-riaghlaidh aig nach 'eil tuigse, is mòr mar an ceudna am fear-foirmeirte; ach an ti a dh'fhuathaicheas sannt, sinidh e a làithean.

17 An duine a nì ainneart air fuil neach sam bith, teichidh e gu ruig an slochd; na cumadh aon duine e¹¹.

18 An ti a ghluaiseas gu h-ionraic, tèarnar e; ach esan a tha fiar 'na shlighibh, tuitidh e dh'aon bheum.

19 An ti a threabhas 'fhearann, bithidh pailteas arain aige; ach esan a leanas an déigh dhaoine dìomhain, bithidh bochd-ainn gu leòr aige.

20 Bithidh duine firinneach pailt ann am beannachdaibh; ach esan a nì deifir¹² gu bhì saoi bhir, cha bhì e neò-chiontach.

21 Cha mhaith an nì gnùis aithneach-adh¹³; gidheadh air son greim arain ciontaichidh duine.

22 Nì fear na droch shùile deifir gu bhì saoi bhir; ach cha'n 'eil fhios aige gu'n tig bochdainn air.

23 An ti a chraoicheas duine, 'na dhéigh sin gheibh e nì's mò do dheadh-ghean na esan a nì miodal le 'theangaidh.

24 An ti a nì reubainn air 'athair no air a mhàthair, agus a their, Cha'n 'eil cionta ann, is companach e do fhear-millidh.

¹ an uaign agus am bàs.

² pronnadair, pestil. Sasg.

³ aghaidhibh. Eabh.

⁵ chailin, bhanoglach.

⁴ mìn.

⁶ sgriosach.

⁷ còmhlag.

⁹ 'na shùilb. Eabh.

¹⁰ iarrar, sircar.

¹¹ na cuirradh duine sam bith stad air.

¹² cabhog. ¹³ Faic Caib. XXIV. r. 23.

25 An ti aig an bheil cridhe àrdanach, dùisgidh e strì; ach esan a dh'earbas as an Tighearna, nìthear sultmhòr e¹.

26 An ti a dh'earbas as a chridhe féin, is amadan e; ach esan a ghluaiseas gu glic, saorar e.

27 An ti a bheir d'òn bhochd, cha bhi dìth air; ach air an ti a dh'fholaicheas a shùilean bithidh iomadh mallachd.

28 'Nuair a dh'éireas na h-aingidh, fol-aichidh daoine iad féin; ach an uair a sgriosar iad, fàsaidh na fireana lionmhor.

CAIB. XXIX.

1 'Nuair a riaghlas na fireana soirbhichidh leis an t-sluagh. 15 Bheir an t-slat agus achmhasan do leanabh. 22 Mu thimchioll feirge, 23 uabhair, 24 agus comh-roinn ri gaduiche.

AM fear a chronaichear gu minic, gidh-eadh a chruaidhicheas a mhùineal, sgriosar e gu h-obann, agus sin gun leigh-eas.

2 'Nuair a bhios na fireana cumhachdach², nì an sluagh gàirdeachas; ach an uair a riaghlas na h-aingidh, nì an sluagh osnaich³.

3 Am fear a ghràdhaicheas gliocas, nì e 'athair ait; ach esan a chumas cuideachd ri strìo aichibh, caithidh e a mhaoin.

4 Le breitheanas daingnichidh an rìgh an tìr; ach sgriosaidh am fear a ghabhas tiodhlacan i.

5 Am fear a nì miodal r'a choimhearsnach, sgaoilidh e lìon air son a chos.

6 Ann an eusaontas droch dhuine *tha* ribe; ach seinnidh am firean, agus bithidh e aoibhneach.

7 Bheir am firean an aire do chùis nam bochd; ach cha ghabh an t-aingidh suim do eòlas a bhi aige oirre.

8 Bheir luchd-fòchaid baile ann an ribe; ach pillidh daoine glìce fearg.

9 Ma nì duine glic strì⁴ ri duine amaid-each, co dhiubh a bhios fearg air, no nì e gàire, cha *bhi* fois ann.

10 Fuathaichidh daoine fuileachdach an duine ionraic; ach iarraidh daoine cothromach 'anam⁵.

11 Cuiridh amadan an céill 'inntin uile; ach cumaidh duine glic a stigh i gus an déigh sin.

12 Ma dh'éisdeas uachdaran ri breug-aibh, *bithidh* a sheirbhich uile aingidh.

13 Coinnichidh am bochd agus an cealg-air⁶ a chéile; bheir an Tighearna solus d'an sùilbh aron.

14 Ma bheir rìgh breth air bochdaibh ann am firinu, daingnichear a rìgh-chaithir gu bràth.

15 Bheir an t-slat agus achmhasan

gliocas uatha; ach cuiridh an leanabh⁷ a dh'fhàgar dha féin nàire air a mhàthair.

16 'Nuair a bhios na h-aingidh lionmhor, bithidh eusaontas lionmhor: ach chi na fireana an leagadh⁸.

17 Cronaich do mhac, agus bheir e suaimhneas⁹ dhuit; seadh, bheir e sòlas do t'anam.

18 Far nach 'eil taisbean, leigear ris an sluagh; ach an ti a choimhideas an lagh, is sona esan.

19 Le briathraibh cha leasaichear seirbhiseach; oir ged thuig e, cha fhreagair e.

20 Am bheil thu faicinn duine a tha dian¹⁰ na bhriathraibh? *tha* aobhar dòchais nì's mò do'n amadan na dheth-san.

21 Ma thogas neach a sheirbhiseach suas gu muirneach o bhi na leanabh, nì a dheireadh bithidh e aige mar mhac.

22 Dùisgidh duine feargach aimhreit, agus bithidh fear na corruich¹¹ pailt ann an eusaontas.

23 Islichidh uabhar duine e; ach gheibh esan a ta iriosal 'na spiorad urram.

24 An ti a nì comh-roinn ri gaduiche, fuathaichidh e 'anam féin: chuinnidh e mallachadh¹², ach cha'n fhoillsich e.

25 Bheir eagal duine ribe leis; ach ge b'e dh'earbas as an Tighearna, bithidh e tearuinte¹³.

26 Iarraidh mòran deadh-ghean¹⁴ an uachdaran; ach is ann o'n Tighearna *tha* breitheanas gach duine.

27 *Is* e fear na h-euceirt gràineileachd nam firean; agus *is* e'n ti a tha ceart 'na shlighe gràineileachd nan aingidh.

CAIB. XXX.

1 Aideachadh Aguir mhic Iaceh. 7 'Na urnuigh dh'iarr e dà nì o Dhia. 11 Na ceithir gineal-aichean aingidh; 15 agus na ceithir nithe nach sàsuichear. 17 Ceithir nithe do - thuigsinn; 24 agus ceithir nithe beaga a tha ro ghlic.

BRIATHRAN Aguir mhic Iaceh, labhair an duine ri h-Itiel 'eadhon ri h-Itiel agus ri h-Ucal.

2 Gu deimhin *tha* mi nì's amaidiche¹⁵ na duine air bith, agus cha 'n eil tuigse duine agam.

3 Agus cha d'fhòghluim mi gliocas, nì mò a tha eòlas agam air nithibh naomha¹⁷.

4 Cò chaidh suas do nèamh, no thàinig a nuas? cò chruinnich a' ghaoth 'na dhornaibh? cò cheangail na h-uisgeachan ann an trusan? cò shuidhich uile chrìocha na talmhainn? ciod is ainm dha? agus ciod e ainm a nìh, ma ta fhios agad?

5 *Tha* uile fhocal Dé fìor-ghlan: *is*

¹ mealaidh e pailteas.

² mòr, lionmhor.

³ caoidh, bròn.

⁴ Ma bhios cuis-lagha aig duine glic.

⁵ a dheadh rùn.

⁶ fear an fhòirneirt.

⁷ òganach.

⁸ sgrios.

⁹ fois.

¹⁰ cabhagach.

¹¹ na boile.

¹² mìonnachadh.

¹³ àrdaichear e.

¹⁴ gnùis. Eabh.

¹⁵ an dàn.

¹⁶ brùideile.

¹⁷ Ged tha mi nì's amaidiche na duine air bith, &c. gidheadh tha eòlas agam air nithibh naomha.

sgriath e dhoibh-san a chuireas an dòigh ann.

6 Na cuir-sa ni air bith r'a bhriathraibh, air eagal gu cronaich e thu, agus gu faighlear breugach thu.

7 Dà ni dh'iarr mi ort; na diùlt iad dhomh mu'm faigh mi bàs.

8 Diomhanas agus breugan cuir fad uam; na toir dhomh bochdainn no beartas, beathaich mi le biadh a bhios iomchuidh air mo shon.

9 Air eagal gu'm bi mi làn, agus gu'n àicheadh mi *thu*, agus gu'n abair mi, Cò e an Tighearn? no gu'm bi mi bochd, agus gu'n goid mi, agus gu'n toir mi ainm mo Dhé an diomhanas.

10 Na dean casaid air seirbhiseach r'a mhaighstir, air eagal gu mallaich e thu, agus gu faighlear ciontach thu.

11 *Tha* ginealach ann a mhallachas an athair, agus nach beannaich am màthair.

12 *Tha* ginealach ann a tha glan 'nan suilibh féin, gidheadh nach 'eil air an nigheadh o an salchar.

13 *Tha* ginealach ann aig am bheil an sùilean àrda, agus fàbhraidhean¹ an sùl air an togail suas.

14 *Tha* ginealach ann aig am bheil am fiacra *mar* chlaidhean, agus am fiacra-cùil *mar* sgeana, a dh'itheadh suas nan truaghan² o'n talamh, agus nam feumach o nheasg dhaoine.

15 Aig an deal-each tha dithis nigheana, *ag éigeach*, 'Tabhair, tabhair. Tha trì nithe ann nach sàsuichear, seadh, ceithir nithe nach abair, *Is leòr e*:

16 An uaign, agus a' bhrù neo-thorrach, an talamh nach sàsuichear le h-uisge, agus an teine nach abair, *Is leòr e*.

17 An t-sùil a ni magadh air 'athair, agus a ni tarcuis air ùmhlaich do 'mhàthair, spìonaich fithichl a'ghlinne a mach i, agus ithidh na h-iolairan òga suas i.

18 Tha trì nithe ann a's iongantach leam, seadh, ceithir nithe nach aithne dhomh:

19 Slighe iolaire anns na speuraibh, slighe nathrach air carraig, slighe luinge ann am meadhon na fairge, agus slighe fir le h-òigh.

20 Mar so *tha* slighe ban-adhaltrannach: ithidh i, agus, glanaidh i a beul, agus their i, Cha d'rinn mi ole air bith.

21 Air son trì nithe ghluaisleadh³ an talamh, agus air son ceithir nach urrainn e ghiùlan:

22 Air son seirbhisich an uair a riaghlas e, agus air son amadain an uair a bhios e làn do bhiadh.

23 Air son mnà fhuathaich an uair a

phòsari, agus air son banoglaich an uair a bhios i 'na h-oighre air a bana-mhaighstir.

24 Tha ceithir nithe beaga air an talamh, ach *tha* iad ro ghlic:

25 *Tha* na seangain 'nan sluagh nach 'eil làidir, gidheadh ulluichidh iad am biadh san t-samhradh;

26 *Tha* na coineana 'nam muinntir nach 'eil neartmhor, gidheadh togaidh iad an tighean anns na creagaidh;

27 Cha 'n'eil righ aig na locustaibh, gidheadh imichidh iad a mach uile 'nam buidhnibh;

28 Gabhaidh an damhan-alluidh greim le a làmhaidh, agus *bithidh* e ann an lùchairtibh nan righ.

29 *Tha* trì nithe a dh'imechas gu maith, seadh, ceithir, a tha tlachdmhor 'nan siubhal:

30 An leòmhann a's làidire ann measg bheathaichean, agus nach pill air ais o aon air bith;

31 Mìol-chù, boc-gaibhre mar an ceudna, agus righ an aghaidh nach feudar éirigh⁴.

32 Ma rinn thu gu h-amaideach le thu féin a thogail suas, no ma smuainich thu ole, *cuir* do làmh air do bheul.

33 Gu deimhin bheir crathadh⁵ bainne im a mach, agus bheir fàsgradh na sròna fuil a mach: mar sin bheir dùsgadh corr-uich aimhreit a mach.

CAIB. XXXI.

1 Comhairle Lemueil mu thimchioll dibhe làidir. 8 Is còir cùis an truaghain agus an fheumach a thagradh. 10 Deadh luach mnà subhaileich

BRIATHRA righ Lemueil, an fhàidh-eadaireachd a theagaisg⁶ a mhàthair dha.

2 Ciod, a mhic? agus ciod, a mhic mo bhronn? agus ciod, a mhic mo bhòidean?

3 Na tabhair do neart⁷ do mhaibh, no do shlighean do mhilleadh righrean.

4 Cha 'n'eil e air son righrean, a Lemueil, cha 'n'eil e air son righrean fion òl, no air son uachdarana déidh a bli aca air dibh làidir;

5 Air eagal gu'n òl iad, agus gu'n dì-chuimhnich⁸ iad an lagh, agus gu'n claoan iad breitheanas do aon sam bith do chloinn an àmhghair.

6 Thugaibh deoch làidir dha-san a tha ullamh gu bàsachadh, agus fion dhoibh-san a tha ann an searbas anama⁹.

7 Oladh e, agus dì-chuimhniceadh e a bhochdainn, agus na cuimhniceadh e a thruaighe ni's mò.

8 Fosgail do bheul air son an duine

¹ fòrdhubha. ² daoine lochda.

³ chrìothnaich, bha mi-shuimhneas air.

⁴ crìostaichte 'na leasraidh. Eabh.

⁵ maistreachadh. Eir.

⁷ do mhaoin.

⁹ aig am bheil cridhe tuirseach.

⁶ dh'iumsaich.

⁸ dìo-chuimhnich.

bhailbh, ann an cùis nan uile a tha air an orduchadh chum sgrios¹.

9 Fosgail do bheul, thoir breth le ceartas, tagair cùis an truaghain agus an fheumaich.

10 Cò gheibh bean shubhailceach²? oir *tha* a luach gu mòr os ceann chlach uasal³.

11 Earbaidh eiridhe a fir aisde, agus cha bhì feum aige air creich.

12 Iocaidh⁴ i maith dha, agus cha'n e ole, rè uile làithean a beatha.

13 Iarraidh i olann agus lìon, agus oibrichidh i gu toileach le a làmhaidh.

14 Tha i mar longaibh nan ceannaiche, bheir i a biadh o *thìr* chéu⁵.

15 Eiridh i mar an ceudna 'nuair is i an oidhche a ta fathast ann, agus bheir i lòn d'a teaghlach, agus cuibhrionn⁶ d'a maighdeanaibh⁷.

16 Measaidh i achadh, agus ceannaichidh i e: le toradh a làmh suidhichidh i fion-lios.

17 Crioslaichidh i a leasraidh le neart, agus neartaichidh i a gairdeana.

18 Mothaichidh i gu *bheil* a ceannachd maith: cha téid a coinneal as san oidhche.

19 Cuiridh i a làmhan air an dealgan, agus gabhaidh glacan a làmh greim do'n chuigeil.

20 Fosgailidh i a glac⁸ do'n truaghan⁹,

agus sinidh i a làmhan do'n fheumnach.

21 Cha 'n'eil eagal oirre roimh 'n t-sneachdadh air son a teaghlach; oir *tha* a teaghlach uile eudaichte le scar-laid¹⁰.

22 Nì i dhi féin trusgain do obair ghréis; do shìde¹¹ agus do chorcur *tha* a h-eudach.

23 Aithnichear anns na geataibh¹² a fear, an uair a shuidheas e maille ri sean-airibh na tìre.

24 Nì i lìon-eudach grinn, agus reicidh i e, agus bheir i criosan do'n cheannaiche.

25 Neart agus urram *is* eudach dhi; agus nì i gairdeachas san àm ri teachd.

26 Fosgailidh i a beul le gliocas, agus *tha* lagh a' chaoimhneis¹³ air a teangaidh.

27 Bheir i an aire do shlighibh a teaghlach, agus cha'n ith i aran an dìomh-anais.

28 Eiridh a clann, agus beannaichidh iad i; a fear, agus molaidh e i.

29 Rinn mòran nighean gu subhaileach, ach thug thusa barrachd orra uile.

30 *Is* mealltach deadh-ghean, agus *is* dìomhain sgèimh; *ach* bean *air am bi* eagal an Tighearn, *is* ise a mholar.

31 Thugaibh dhi do thoradh a làmh, agus moladh a h-oibre féin anns na geat-aibh i.

¹ uile chloinne na truaighe; uile mhac an sgrios. Eabh.

² bean mhaith, bean nan deadh bheus.

³ chlach luachmhor, nèamhnuidean; penenim. Eabh.

⁴ Nì, bheir. ⁵ fad as. ⁶ obair chumta.

⁷ cailinibh.

⁸ a làmhan.

⁹ do'n duine bhoichd.

¹⁰ le culaidhibh dà-fhillte.

¹¹ shìoda.

¹² anns a' chomh-chruinnreachadh.

¹³ na caomhalachd.

ECLESIASTES,

NO AN

SEARMONAICHE.

CAIB. I.

1 *Tha an Searmonaiche a' nochdadh gur dìomhanas gach nì air thalamh.* 9 Cha 'n'eil nì air bith nuadh fuidh 'n ghréin nach robh ann a cheana san aimsir a chaidh seachad.

BRIATHRAN an t-Searmonaiche, mhic Dhaibhidh, rìgh ann an Ierusalem.

2 Dìomhanas nan dìomhanas! ars' an Searmonaiche; dìomhanas nan dìomhanas! *is* dìomhanas na h-uile nìthe.

3 Cìod an tairbhe, a th'aig duine 'na uile shaothair a nì e fuidh 'n ghréin?

4 *Tha aon* ghinealach a' siubhal, agus ginealach *eile* a' teachd; ach fanaidh an talamh gu bràth.

5 Eiridh mar an ceudna a' ghrian, agus théid a' ghrian fuidh¹, agus luathaichidh i d'a h-àite féin as an d'èirich i.

6 Théid a' ghaoth a làimh na h-àirde deas, agus théid i mu'n cuairt do'n àirde tuath; théid i mu'n cuairt agus mu'n cuairt a ghnàth, agus ath-phillidh a' ghaoth air a cuairtibh féin².

7 Ruithidh na h-aimhnichean³ uile chum na mara, gidheadh cha 'n'eil a' mhuir làn: chum an àite as an d'thàinig na h-aimhniche, thuige⁴ sin pillidh iad a rìs.

8 *Tha* na h-uile nìthe làn do shaothair: cha'n urrainn duine a chur an céill: cha sàsuichear an t-sùil le faicinn, agus cha lìonar a' chluas le cluinntinn⁵.

¹ luidhidh a' ghrian.

² a réir a cuairtean.

³ aimhnean.

⁴ chuige.

⁵ clàistinn.

ECLESIASTES, I. II.

9 An ni a bha ann, *is* e an ni sin féin a bhitheas ann; agus an ni sinn a rinneadh, *is* e an ni sin féin a nithear; agus cha *'n*eil ni sam bith nuadh¹ fuidh'n ghréin.

10 Am bheil ni ann mu'm feudar a ràdh, Feuch, *tha* e so nuadh? Bha e ann a cheana san t-sean aimsir a bh'ann romhainn.

11 Cha *'n*eil cuimhne air bith air na nithe a bha ann roimhe; cha mhò a bhios cuimhne air na nithe a ta ri teachd, aca-san a thig 'nan déigh.

12 Bha mise an Searmonaiche a'm' rìgh air Israel ann a Ierusalem.

13 Agus thug mi mo chridhe a shireadh agus a rannsachadh² le gliocas, mu thim-chioll gach ni a nithear fo nèamh: an t-saothair ghoirt so thug Dia do chloinn nan daoine³, chum an cleachdadh féin rithe⁴.

14 Chunnaic mi na h-uile oibre fuidh'n ghréin; agus, feuch, *is* dìomhanas iad uile, agus bnaireadh⁵ spioraid.

15 An ni a ta cam, cha ghabh e deanamh dìreach; agus an ni a ta dh'easbhuidh, cha ghabh e àireamh⁶.

16 Labhair mi ri m' chridhe féin, ag ràdh, Feuch, dh'fhàs mi mòr⁷, agus fhuair mi tuilleadh gliocais na iadsan uile a bha romham ann an Ierusalem, agus chunnaic⁸ mo chridhe mòran gliocais agus eòlais.

17 Agus thug mi mo chridhe a dh'fhaotainn eòlais air gliocas, agus air cuthach⁹ agus amaideachd: dh'aithnich mi gur buaireadh spiorad e so mar an ceudna.

18 Oir ann am mòran gliocais *tha* mòran doilgheis¹⁰; agus an ti a mheudaicheas eòlas, meudaichidh e bròn.

CAIB. II.

1 Mhothaich an Searmonaiche nach robh ann an subhachas ach dìomhanas. 13 *Tha* gliocas fad os ceann amaideachd. 18 *Tha* gach saothair fuidh 'n ghréin dìomhain. 24 Cha *'n*eil ni *is* fearr na gu'n tugadh duine air 'anam maith a mhealtuinn.

THUBHAIRT mi a'm' chridhe, Teann¹¹ a nis, dearbhaidh mi thu le subhachas; uime sin meal maith¹²: ach, feuch, *is* dìomhanas so mar an ceudna.

2 Mu ghàire¹³ thubhairt mi, *Is* cuthach e; agus mu shùgradh, Ciod a nì e?

3 Dh'iarr mi ann am chridhe mi féin¹⁴ a thabhairt do fhìon, (gidheadh a' seòladh mo chridhe ann an gliocas¹⁵.) agus greim a ghabhail air amaideachd, gus am faicinn

ciod e am maith sin do chloinn nan daoine, bu chòir dhoibh a dheanamh fuidh nèamh air feadh uile làithean am beatha.

4 Rinn mi oibre mòra dhomh féin: thog mi dhomh féin tighèan; shuidhich mi dhomh féin fion-liosan:

5 Rinn mi dhomh féin gàrachan agus liosan chran-meas, agus shuidhich mi anna craobhan do gach gnè thoraidh;

6 Rinn mi dhomh féin lochain¹⁶ uisge, a dh'uisgeachadh leo na coille anns am fàs craobhan:

7 Fhuair mi òglaich agus banoglaich, agus rugadh seirbhich¹⁷ a'm' thigh: bha mar an ceudna sealbha mòra bhuar agus threud¹⁸ agam, os ceann uan uile a bha romham ann an Ierusalem:

8 Charn¹⁹ mi suas mar an ceudna dhomh féin airgid agus òr, agus ionmhas sònruichte nan rìgh agus nam mòr-roinn; fhuair mi dhomh féin fir-chiùil²⁰ agus mnàich-chiùil, agus aoihbheas chloinn nan daoine, *mar a ta* innil-chiùil²¹, agus sin do gach gnè.

9 Mar sin bha mi mòr, agus dh'fhàs mi nì's mò na gach duine a bha romham ann an Ierusalem: os bàrr, dh'fhan mo ghliocas agam.

10 Agus gach ni a mhiannaich mo shùilean cha do chum mi uatha; cha do bhac mi²² mo chridhe o shubhachas sam bith: oir rinn mo chridhe aoihbheas ann am shaothair uile; agus b'e so mo chuibhrionn do m'uile shaothair.

11 An sin sheall mi air m'oibrigh uile a rinn mo làmh, agus air an t-saothair anns an do shaothraich mi 'ga deanamh; agus, feuch, *bu* dìomhanas an t-ionlan, agus buaireadh spioraid, agus cha robh tairbhe ann fuidh'n ghréin.

12 Agus sheall mi air m'ais a dh'fhaicinn gliocais, agus cuthaich²³, agus amaideachd: oir ciod a dh'fheudas an duine a dheanamh a thig an déigh an rìgh? an ni sin féin a rinneadh a cheana.

13 Agus chunnaic mi gu bheil gliocas cò fhad os ceann amaideachd²⁴, 'sa tha solus os ceann dorchadais.

14 *Tha* sùilean an duine ghlic 'na cheann: ach imichidh an t-amadan ann an dorchadas: gidheadh dh'aithnich mi mar an ceudna gu'n tachradh an t-aon ni dhoibh uile.

15 An sin thubhairt mi a'm' chridhe, Mar a thachras do'n amadan, mar sin tachraidh dhomh-sa féin; agus c'ar son uime sin a bha mise ni bu ghlice *na esan?* an

¹ nomha, ùr. ² a dh'fhidireadh, a lorgachadh.

³ mhacaibh an duine.

⁴ gu'n cràdhadh, gu'n feuchainn leatha.

⁵ cràdh. ⁶ cha bhì e comasach a dheanamh suiz.

⁷ thàinig mi gu h-inbhe mhòir.

⁸ dh'fhaicich, dh'fhisraich.

⁹ hoile.

¹⁰ carraid, dìomaidh.

¹¹ Thig.

¹² sàimh.

¹³ m'fheoil. Eabh.

¹⁴ a' cleachdadh mo chridhe ri gliocas.

¹⁵ hìntean.

¹⁶ chaozach.

¹⁷ Chruinnich. ¹⁸ muinntirich.

¹⁹ abhaidh-chiùil.

²⁰ cha do chum mi air ais.

²¹ boile.

²² nì's fearr na amaideachd.

sin thubhairt mi a'm' chridhe, gur dìomhanas so mar an ceudna.

16 Oir cha bhi cuimhne air an duine ghlic nì's mò na air an amadan gu bràth; o dhì-chuimhnichear na nithe a ta nis ann, nìle anns na làithibh a ta ri teachd: agus cionnus a dh'eugas an duine glic? mar an t-amadan.

17 Uime sin dh'fhuathaich mi beatha, a chionn gur doilgheasach dhomh an obair a dh'oibrichear fuidh'n ghréin: oir is dìomhanas na h-uile nithe agus buaireadh¹ spioraid.

18 Seadh, dh'fhuathaich mi mo shaothair uile a shaothraich mi fuidh'n ghréin, a chionn gu'm fàg mi i do'n fhear a bhios a'm' dheigh.

19 Agus cò aig am bheil fios cia dhiubh a bhios e 'na dhuine glic no 'na amadan? gidheadh bithidh uachdaranachd aige os ceann mo shaoithreach uile anns an do shaothraich mi, agus anns an d'fhuaradh mi gu glic fuidh'n ghréin. Is dìomhanas so mar an ceudna.

20 Air an aobhar sin, thionndaidh mi thoirt air mo chridhe dol an eu-dòchas mu'n uile shaothair a shaothraich mi fuidh'n ghréin.

21 Oir a ta duine ann aig am bheil a shaothair ann an gliocas, agus an eòlas, agus an ceartas; gidheadh do dhuine nach do shaothraich ann bheir se e mar a chuibhrionn. Is dìomhanas so mar an ceudna, agus ole mòr.

22 Oir ciod a th'aig duine d'a uile shaothair, agus do bhuaireadh² a chridhe, anns an do shaothraich e fuidh'n ghréin?

23 Oir is doilgheasan a làithean uile, agus is dò-bhròn a shaothair: eadhon san oidheche cha ghabh a chridhe fois. Is dìomhanas so mar an ceudna.

24 Cha 'n'eil ni ann a's fearr do dhuine na gu'n itheadh agus gu'n òladh e, agus gu'n tugadh e air 'anam maith a mhealtuin³ 'na shaothair.

25 Oir cò a's urrainn⁴ itheadh, no cò eile a luathaicheas thuige⁵ nì's mò na mise?

26 Oir do'n duine a tha maith 'na shealladh, bheir Dia gliocas, agus eòlas, agus aoibhneas: ach do'n pheacach bheir e saothair, a chruinneachadh agus a charnadh suas, chum gu'n tabhair e do'n tì a ta maith ann am fianuis Dhé. Is dìomhanas so mar an ceudna, agus buaireadh spioraid.

CAIB. III.

1 Tha àm aig gach rùn fuidh nèamh. 11 Rinn Dia gach nì maiseach ged nach urrainn duine

'obair fhaotainn a mach. 16 Tha breitheanas chloinn nan daoine claon, ach bheir Dia breth gu cothromach.

AIG gach nì tha tràth, agus àm aig gach rùn fuidh nèamh:

2 Am gu bhi air breith, agus àm gu bàs fhaotainn; àm gu suidheachadh, agus àm gus an nì a shuidhicheadh, a spionadh suas;

3 Am gu marbhadh, agus àm gu leigh eas; àm gu briseadh sìos, agus àm gu togail suas;

4 Am gu gul⁶, agus àm gu gàire; àm gu caoidh, agus àm gu dannsadh;

5 Am gu clachan a thilgeadh air falbh, agus àm gu clachan a chruinneachadh; àm gu gabhail an glacaibh, agus àm gu fantuinn o ghabhail an glacaibh⁷;

6 Am gu cosnadh⁸, agus àm gu call; àm gu gleidheadh, agus àm gu tilgeadh air falbh;

7 Am gu reubadh, agus àm gu fuaigh-eal; àm gu bhi tosdach, agus àm gu labhairt;

8 Am gu gràdhachadh, agus àm gu fuathachadh; àm gu cogadh, agus àm gu sìth;

9 Ciod an tairbhe⁹ a ta aige-san a dh'oibricheas, san nì sin anns an saothraich e?

10 Chunnaic mi an t-saothair a thug Dia do chloinn nan daoine¹⁰, chum an cleachdadh féin rithe.

11 Rinn e gach nì maiseach 'na àm féin chuir e mar an ceudna an saoghal 'nan cridhe, air chor as nach urrainn aon duine an obair fhaotainn a mach a tha Dia a' deanamh, o thoiseach gu deireadh.

12 Tha fhios agam nach 'eil maith air bith anna, ach gu'm biodh duine subhach, agus gu'n deanadh e maith rè a bheatha¹¹.

13 Agus mar an ceudna gu'n itheadh agus gu'n òladh gach duine, agus gu mealadh e maith a shaoithreach uile, is e sin tiodhlac Dhé.

14 Tha fhios agam gach nì a nì Dia, gu'm bi e gu bràth; cha ghabh aon nì cur ris, no aon nì toirt uaith: agus nì Dia so, chum gu'm biodh eagal air daoineibh roimhe.

15 An nì a bha, tha e ann a nis; agus an nì a bhitheas, bha e ann a cheana; agus iarraidh Dia an nì a chaidh seachad.

16 Agus os bàrr, chunnaic mi fuidh'n ghréin àite a' bhreitheanaís, gu'n robh cu-ceart¹² an sin; agus àite na freantachd, gu'n robh aingidheachd an sin.

17 Thubhairt mi a'm' chridhe, Bheir

¹ smuaircan, cràdh.

² chràdh, àmhghar, dhorran.

³ gu'n nochdadh e maith d'a anan.

⁴ a dh'fheadas.

⁵ chuige.

⁶ gul.

⁷ bhi fad o ghabhail an glacaibh. Eabh.

⁸ iarraidh, faotainn, solaradh. ⁹ a' bhuannachd.

¹⁰ mhacaibh an duine.

¹¹ air feadh a bheatha.

¹² aingidheachd, mì-dhiadhachd.

Dia breth air an fhìrean agus air an aingidh: oir *tha* àm an sin chum gach uile rùn, agus chum gach uile oibre.

18 Thubhairt mi ann am chridhe a thaobh staid¹ chloinn nan daoine, gu'n glanadh² Dia iad, agus gu'm faiceadh iad gur ainmhidhean iad fèin.

19 Oir an ni sin a thachras do chloinn nan daoine, tachraidh e do na h-ainmhidh-ibh; tachraidh dìreach an t-aon ni dhoibh: mar a dh'eugas aon diubh, is ann mar sin a dh'eugas an t-aon eile; seadh, is i an aon anail a *ta* aca uile; agus cha 'n'eil barrachd aig duine air ainmhidh, oir is diomhanas iad uile.

20 Thèid iad uile do aon àite; *tha* iad uile o'n duslach³ agus pillidh iad uile do'n duslach.

21 Cò d'an aithne spiorad chloinn nan daoine⁴ a thèid suas, agus spiorad an ainmhidh a thèid sìos chum na talmhainn⁵?

22 Uime sin *tha* mi ag aithneachadh nach *eil* ni a's fearr na gu'n deanadh duine gàirdeachas na oibribh, a chionn gur e sin a chuibhrionn: oir cò bheir e a dh'fhaicinn an ni a bhios 'na dhéigh?

CAIB. IV.

1 *Tha diomhanas air a mheudachadh le fàirneart, 4 agus le farmad. 7 Amaideachd agus diomhanas saint. 13 Is fearr duine bochd na rìgh amaideach.*

AN sin thionndaidh mi, agus dh'amhairc mi air na h-uile fhòirneartaibh a nìthear fuidh'n ghréin, agus, feuch, deòir na droinge a bha fuidh fhòirneart, agus gun aon fhear-comhfhurtachd aca! agus air taobh⁶ an an luchd-fòirneart *bha* neart, ach cha robh fear-comhfhurtachd aca-san.

2 Uime sin mhol mi na mairbh a dh'eug a cheana, ni's mò na na beòtha a *ta* beo fathast.

3 Ach is fearr na iad le chéile an ti nach robh ann fathast, nach faca an droch obair a nìthear fuidh'n ghréin.

4 A ris, dh'amhairc mi air gach uile shaothair agus gach uile obair cheirt, gur fàth farmaid do dhuine o'choimbhearsnach i. Is diomhanas so mar an ceudna, agus buaireadh spioraid.

5 Fìllidh an t-amadan a làmhnan r'a chéile, agus ithidh e 'fheoil fèin.

6 Is fearr làn duirn le suaimhneas, na'n dà làmh làn le saothair agus buaireadh spioraid.

7 An sin thionndaidh mi, agus chunnaic mi diomhanas fuidh'n ghréin.

8 Tha duine ann leis fèin, agus cha 'n'eil lethbhreac⁷ aige; seadh, cha 'n'eil leanabh no bràthair aige: gidheadh cha 'n'eil

crìoch air a shaothair uile, agus cha sàsùichear a shùil le saoihbreas; cha mhò a *their e*, Cò air son am bheil mi a' saothreachadh, agus a' fàgail m'auama dh'easbluidh maith? Is diomhanas so mar an ceudna, agus is saothair ghoirt e.

9 Is fearr dithis na aon *duine*, a chionn gu bheil deadh dhuais aca air son an saothreach.

10 Oir ma thuiteas duine dhiubh⁸ togaidh an duine eile suas a chompanach: ach mo thruaighe esan a *ta* 'na aonar an uair a thuiteas e; oir cha 'n'eil neach eile aige g'a thogail suas.

11 Mar an ceudna ma luidheas dithis cuideachd, bithidh iad blàth: ach cionnus a bhios aon blàth leis fèin.

12 Agus ma bhuaidhaicheas aon air, seasaidh dithis 'na aghaidh; agus cha bhrisear cord thri dual⁹ gu h-obann.

13 Is fearr leanabh bochd agus glic na rìgh sean agus amaideach, nach gabh comhairle¹⁰ ni's mò.

14 Oir á priosan¹¹ thig e a rioghachadh; an ti mar an ceudna a rugadh 'na rioghachd, *fàsaidh e* bochd.

15 Thug mi an aire do¹² na h-uile bheòthaibh a shiubhlas fuidh'n ghréin, maille ris an dara leanabh a sheasas suas 'na àite.

16 Cha 'n'eil crìoch air an t-sluagh uile, orra-san uile a bha rompa: cha dean iadsan mar an ceudna a thig 'nan déigh gàirdeachas ann. Gu cinnteach is diomhanas so mar an ceudna, agus buaireadh spioraid.

CAIB. V.

1 *Earail gu giùlan iomchuidh ann an teampull Dhé. 9 Cha sàsùich aingiod agus pailteas an neach a ghràdhaicheas iad. 18 'Se tiodhlac Dhé do mhac an duine gàirdeachas a dheanadh 'na uile shaothair, agus a shaoibhreas a mhealtuinn.*

COIMHID¹³ do chos an nair a thèid thu do thigh Dhé, agus bi ni's deise gu cluinntinn na gu ìobairt nan amadan a thabhairt; oir cha 'n'eil iad sin a' toirt an aire gu bheil iad a' deanamh uile.

2 Na bi bras¹⁴ le d' bheul, agus na luathaichidh do chridhe gu ni a labhairt an làthair Dhé: oir a *ta* Dia air nèamh, agus thusa air talamh; uime sin biodh do bhriathra tearc.

3 Oir thig aisling le iomadalachd¹⁵ ghnòthuiche, agus aithnìchear guth amadain le iomadalachd bhriathar.

4 An uair a bhòidicheas tu bòid do Dhia, na cuir dàil 'na dìoladh; oir cha 'n'eil tlachd aige ann an amadanaibh: an ni a bhòidicheas tu, dìol e¹⁶.

¹ cora, inbhe.

² chum gu'n soillsicheadh, gu'n dearbhadh.

³ luathre.

⁴ spiorad an duine.

⁵ fuidh'n talamh.

⁶ làimh. Eabh.

⁷ a lethidh eile, an dara neach.

⁸ ma thuiteas iad.

⁹ snàithne tri-fille.

¹⁰ do nach aithne comhairle a ghabhail. Eabh.

¹¹ gainntir, tigh nam braighe.

¹² Dh'amhairc mi air.

¹³ Gléidh.

¹⁴ obann.

¹⁵ Ìomhoireachd, mìran.

¹⁶ ioc e.

5 *Is* fearr gun thu bhòideachadh, na gu'm bòidicheadh tu, agus nach dioladh tu.

6 Na leig le d' bheul a thoirt air t'fheoil peacachadh; agus na h-abair an làthair an aingil, gu'm bu mhearachd e; c'uim am biodh fearg air Dia air son do ghutha-sa, agus an sgriosadh e obair do làmh?

7 Oir mar ann an iomadalachd nan aisling *a bhios* dìomhanasa, is amhuil *a bhios* iad ann an iomadalachd nam briathar: ach biodh eagal Dé ortsa.

8 Ma chi thu fòirneart an duine bhochd¹, agus fiaradh breitheanaid agus ceartais le làimh làidir ann am mòr-roinn, na biodh iongnadh ort ris an nì so²: oir bheir an tì a's àirde na'n neach a ta àrd aca-san an aire, agus *tha iad ann a's àirde* na iadsan.

9 A nis a ta tairbhe na talmhainn air son nan uile: riarachear an rìgh *féin* as an fhearann.

10 An ti a ghràdhaicheas airgiod, cha sàsuichear e le h-àirgiod; no'n ti a ghràdhaicheas pailteas, le toradh³: *is* dìomhanas so mar an ceudna.

11 An uair a mheudaichear nithe maith⁴, meudaichear iad a dh'itheas iad: agus ciod an tairbhe *a tha* anna d'an sealbhadairibh, ach *am* faicinn le'n sìulibh?

12 *Tha* codal oibriche milis, cia dhiubh a dh'itheas e beagan no mòran: ach cha'n fhuiling sàsachd⁵ an t-saoibhir dha codal.

13 *Tha* olc cràiteach ann *a* chunnaic mi fuidh'n ghréin, saoihbreas air a ghleidheadh d'a shealbhadairibh chum an ainmheais⁶.

14 Ach théid as do'n t-saoibhreas sin le droch shaothair⁷: agus ginidh e mac, agus cha *bhi* ni air bith 'na làimh.

15 Mar a thàinig e mach lomnochd á broinn a mhàthar, ath-phillidh e, a' dol mar a thàinig e; agus cha ghiùlan e ni air bith d'a shaothair a bheir a leis 'na làimh.

16 *Is* olc cràiteach so mar an ceudna, air gach uile chor air an d'thàinig e, mar sin gu'n téid e: agus ciod an tairbhe a ta aige-san a shaothraich do'n ghaoith?

17 Mar an ceudna ré a làithean uile ithidh e ann an dorchadas, agus *bithidh* mòran doilgheis⁸ agus feirge *aige* 'na thinneas.

18 Feuch, an ni a chunnaic mise maith, gur tlachdmhor *do dhuine* itheadh agus ol, agus maith a mhealtuinn 'na uile shaothair a ghabh e fuidh'n ghréin, air

feadh uile làithean a bheatha a bheir Dia dha; oir *is* e sin a chuibhrionn.

19 Gach duine mar an ceudna d'an d'thug Dia beartas agus saoihbreas⁹, agus d'an d'thug e comas itheadh dhiubh, agus a chuibhrionn a ghilacadh, agus gairdeachas a dheanamh 'na shaothair: *is* e so tiodhlac Dhé.

20 Oir cha mhòr a chuimhniceas e làithean a bheatha; a chionn gu'm freagair Dia e ann an aoibhneas a chridhe.

CAIB. VI.

1 *Dìomhanas beartais agus saoihbreis do'n duine do nach 'eil Dia a' tabhairt comais am mealtuinn.*

7 *Cha sàsuichear miann an duine air thalamh.*
10 *Cha'n aithne do neach ciod a bhios 'na dhéigh fuidh'n ghréin.*

THA olc ann a chunnaic mi fuidh'n ghréin, agus *tha* e coitcheinn an measg dhaoine¹⁰:

2 Duine d'an d'thug Dia beartas, agus saoihbreas, agus urram, agus gun e dh'easbhuidh ni air bith d'a anam do na h-uile a mhiannaicheas e, ach do nach 'eil Dia a' tabhairt comais itheadh dheth, ach a ta coigreach 'ga itheadh: *is* dìomhanas so, agus *is* droch an-shocair e.

3 Ma ghlueas duine ceud *leanabh*, agus gu'm bi e beò iomadh bliadhna, air chor as gu'm bi làithean a bhliadhnan lionmhor, agus nach sàsuichear 'anam le maith, agus mar an ceudna nach bi àrlacadh aige, *is* fearr, tha mi ag ràdh, torraicheas anabuich¹¹ na e.

4 Oir an¹² dìomhanas thig e, agus an dorchadas thléid e, agus le dorchadas còmhdaichear¹³ 'ainm.

5 Mar an ceudna cha'n fhac e a' ghrian, agus cha b'aithne dha *ni air bith: tha* tuilleadh foise aige so na aig an fhear eile.

6 Seadh, ged bhi e beò mìle bliadhna dà uair, gidheadh cha'n fhaic e maith: nach imich iad uile do aon àite?

7 *Tha* uile shaothair an duine air son a bheoil, agus gidheadh cha 'n'eil a mhiann¹⁴ sàsuichte.

8 Oir ciod tuilleadh a th'aig an duine ghlic na aig an amadan? ciod a th'aig a' bhochd, d'an aithne siubhal an làthair nam beò?

9 *Is* fearr sealladh¹⁵ nan sùl na seacharan a' mhiann: *is* dìomhanas so mar an ceudna agus buaireadh spioraid.

10 An nì¹⁶ a bha ann, dh'aunmicheadh e a cheana, agus a ta fhios gu'm b'e'n duine e, agus nach urrainn e gleachdadh¹⁷ ris-san a's treise na e féin.

¹ fòirneart air a dheanamh air an duine bhochd.

² an rùn so. Eabh.

³ cinneas.

⁴ maoin, saoihbreas.

⁵ làine, pailteas.

⁶ dorchadh, call.

⁷ ann an droch ghnòthachaidh.

⁸ do-bhròin.

⁹ maoin.

¹⁰ bith-dheanta, ro throm air daoineibh.

¹¹ gin ned-inbhich.

¹² le.

¹³ folaichear.

¹⁴ anam. Eabh.

¹⁵ beachd.

¹⁶ Gach nì.

¹⁷ strì.

11 O tha mòran do nithibh ann a mheudaicheas dìomhanas, ciod *is* fearrrd an duine sin?

12 Oir cò aig am bheil fios ciod a *tha* maith do dhuine sa' bheatha so, ré uile làithean a bheatha dhìomhaibh a chaitheas e mar sgàile? oir cò is urrainn innseadh do dhuine ciod a bhios 'na dhéigh fuidh'n ghréin?

CAIB. VII.

1 *Is fearr deadh ainm na na nithe is luachmhoire; 2 dol do thigh a' bhròin, na dol do thigh na cuirme; 5 agus éisdeachd ri achmhasan duine ghlic, na èisdeachd ri òran amadana. 23 Tha eòlas a' ghliocais cruaidh ri fhaotainn a mach.*

IS fearr deadh ainm na oladh-ungaidh luachmhor, agus là bàis na là breith neach.

2 *Is fearr dol do thigh a' bhròin*¹, na dol do thigh na cuirme; oir *is* e sin crìoch nan uile dhaoine, agus gabhaidh am beò g'a chridhe e.

3 *Is fearr doilgheas*² na gàire; oir le dubhachas na gnùise nìthear an cridhe nì's fearr.

4 *Tha* cridhe nan daoine glìce ann an tigh a' bhròin, ach cridhe nan amadan ann an tigh an t-sublachais.

5 *Is fearr éisdeachd ri achmhasan duine ghlic, na gu'n éisdeadh duine ri h-òran amadana.*

6 Oir mar fhuaim droighnich fuidh phoit, mar sin *tha* gàire an amadain: *is* dìomhanas so mar an ceudna.

7 Gu cinnteach cuiridh foirneart duine glìce air bhoile³, agus millidh tiodhlac an cridhe.

8 *Is fearr* deireadh nì na a thoiseach: *is* fearr esan a tha foighidneach 'na spiorad na esan a tha àrdanach⁴ 'na spiorad.

9 Na deifrich⁵ ann ad spiorad gu fearg a ghabhail; oir còmhnuicheadh fearg ann an uchd amadana.

10 Na h-abair, Ciod a b' aobhar gu'n robh na ceud làithean nì b'fhearr na iad so? oir cha'n ann o ghliocas a dh'fheòraicheas tu mu'n nì so?

11 *Is* maith gliocas maille ri h-oighreachd: agus *leis sin tha* tairbhe aca-san a chi a' glorian.

12 Oir *is* didean⁶ gliocas, agus *is* dìdean airgid: ach *is* e òirdheirceas an eòlais, gu'n toir gliocas beatha dhoihh-san aig am bi e.

13 Smuainich air⁷ obair Dhé: oir cò is urrainn an nì sin a dheanamh dìreach a rinn esan cam?

14 Ann an là an t-soirbheis⁸ bi subh ach, ach ann an là an doirbheis⁹ smuainich: rinn Dia mar an ceudna so fa chomhair sud, a chum nach faigheadh duine *mach* aon nì 'na dhéigh¹⁰.

15 Chunnaic mi ua h-uile nithe ann an làithibh mo dhìomhanais; tha firean¹¹ ann d'an téid as¹² 'na fhìreantachd, agus tha duine aingidh ann a shìneas a làithean 'na aingidheadh.

16 Na bi anbharrach fireanta, agus na gabh ort a bhì ro ghlic: c'ar son a sgriosadh tu thu féin?

17 Na bi ro aingidh, agus na bi amaid-each: c'ar son a dh'eugadh tu roimh t'àm?

18 *Is* maith dhuit greim a ghabhail deth so, agus o so mar an ceudna na tabhair air a h-ais do làmh; oir an ti air am bi eagal Dé, thig e asda sin uile.

19 Neartaichidh gliocas duine glìc nì's mò na deichnear dhaoine cumhachdach a ta sa' chaithir¹³.

20 Oir cha 'n'eil duine ceart¹⁴ air an talamh, an nì maith, agus nach peacaich.

21 Mar an ceudna na tabhair aire do na h-uile bhriathraibh a labhrrar, air eagal gu'n cluinn thu t'òglach gad' mhalluchadh.

22 Oir a ta fhios aig do chridhe, gur minic a mhalluich thu féin daoìn' eile mar an ceudna.

23 So uile dhearbha mì le gliocas: thubhairt mi, Bithidh mi glìc; ach b'fhada sin uam.

24 An nì sin a ta fad as, agus ro dhomhain, cò dh'fheudas 'fhaotainn a mach¹⁵?

25 Leig mi mo chridhe air faotainn eòlais air, agus air rannsachadh¹⁶, agus air sireadh gliocais, agus aobhair¹⁷ *nithe*, agus air fios a bliu agam air aingidheadh amaideachd, agus air amaideachd na mì-chéille¹⁸.

26 Agus fhuair mi nì's seirbhe na'm bàs a' bhean, aig an rìbeachan agus lontan a cridhe, agus ceanglaichean a làmhan: ge b'e neach a thaitneas ri Dia¹⁹, théid e as uaithe²⁰; ach glacar am peacach leatha.

27 Feuch, an nì so fhuair mi, ars' an searmonaiche, a' meas gach aoin an déigh a chéile, a dh'fhaotainn an aobhair²¹ a inach:

28 Nì a ta m'anam ag iarraidh fathast, ach nach d'fhuair mi: aon fhear am measg mhìle fhuair mi, ach bean 'nam measg sin uile cha d'fhuair mi.

¹ na caoidh.

² fearg.

³ air a' chuthach.

⁴ uaibhreach, dian.

⁵ na luathach, na bi cabhagach.

⁶ Faic. Eabh.

⁷ sgàile.

⁸ là maithe.

⁹ là maithe.

¹⁰ là ole, là na h-urchoid.

¹¹ aon do na nithibh a ta gu teachd air.

¹² duine ceart, ionraic.

¹³ a' bhaile.

¹⁴ fireanta.

¹⁵ a thuigsinn.

¹⁶ lorgachadh.

¹⁷ àireimh.

¹⁸ eadhon amaideachd agus eutachd.

¹⁹ a tha maith an làthair Dhé. Eabh.

²⁰ na'pe.

²¹ àireimh.

29 Feuch, an nì so a mhàin fhuair mi, gu'n d'rinn Dia an duine dìreach¹; ach dh'iarr iad féin iomadh innleachd² a mach.

CAIB. VIII.

1 *Bheir gliocas duine air a ghnùis dealrachadh.*
8 *Cha'n 'eìl cumhachd aig neach air bith os ceann an spioraid.* 12 *Eiridh gu maith do'n fhìrean, ach sgriosar an t-aingidh.* 16 *Cha'n urrainn duine obair Dhé fhaotainn a mach.*

CO a ta mar an duine glic? agus cò d'an aithne³ eadar-mhìneachadh nì? Bheir gliocas duine air a ghnùis dealrachadh, agus atharraichear dànachd a ghnùise.

2 Comhairlicheam dhuit àithne an righ a choimhead⁴, agus sin air son mionnan Dé.

3 Na biodh cabhag ort gu dol as a shealladh: na buanaich ann an droch nì, oir nì esan gach nì a's àill leis.

4 Far am bheil focal rìgh, tha cumhachd; agus cò dh'fheudas a ràdh ris, Cìod e sin a ta thu a' deanamh?

5 Ge b'e ghleidheas an àithne, cha mhothaich e droch nì sam bith; agus is aithne do chridhe duine ghlic àm agus breitheanas.

6 A chionn aig gach nì⁵ gu bheil àm agus breitheanas⁶; uime sin tha truaighe an duine trom⁷.

7 Oir cha 'n'eil fhios aige air an nì a bhios ann: oir cò dh'innsas dha cionnus a bhitheas e⁸.

8 Cha 'n'eil duine sam bith aig am bheil cumhachd os ceann an spioraid, a chumail an spioraid, no cumhachd ann an là a' bhàis; agus cha 'n'eil dol as anns a' chath sin; cha mhò a theasairgeas aingidheachd iadsan a ghnàthaicheas i.

9 So uile chunnaic mi, agus shuidhich mi mo chridhe air gach obair a nìthear fuidh'n ghréin: tha àm ann san riaghlaich duine os ceann duin' eile, g'a aimhneas féin.

10 Agus mar sin chunnaic mi na h-aingidh adhlacte⁹, a thàinig agus a dh'imich o àit an naoimh, agus dhi-chuimhnicheadh iad anns a' chaithir¹⁰ san d'rinn iad mar sin: is dìomhanas so mar an ceudna.

11 A chionn nach 'eìl binn¹¹ an aghaidh droch oibre 'ga cur an gnìomh gu luath, uime sin tha cridhe chloinn nan daoine làn-shuidhichte air olc a dheanamh.

12 Ged nì peacach olc ceud uair, agus gu'n sìnear a làithean¹², gidheadh a ta fios cinnteach agam gu'n éirich gu maith

dhoibh-san air am bi eagal Dé, air am bi eagal 'na làthair.

13 Ach cha'n éirich gu maith do'n aingidh cha mhò a shìneas e a làithean; mar sgàile bithidh esan air nach bi eagal an làthair Dhé¹³.

14 Tha dìomhanas ann a nìthear air an talamh, gu bheil fireana ann d'an tachair a réir oibre nan aingidh; agus gu bheil daoine aingidh ann d'an tachair a réir oibre nam firean: thubhairt mi gur dìomhanas so mar an ceudna.

15 An sin mhol mi subhachas, do bhrìgh nach 'eìl nì a's fearr aig duine fuidh'n ghréin na itheadh agus òl, agus a bhi subhach; oir fanaidh sin aige d'a shaoth-air, rè làithean a bheatha, a bheir Dia dha fuidh'n ghréin.

16 An uair a leag mi mo chridhe air eòlas a' ghliocais fhaotainn, agus air na gnothuichean a nìthear air an talamh fhaicinn; (oir mar an ceudna tha neach ann nach faic codal a là no dh'oidheche le 'shùilibh:)

17 An sin chunnaic mi¹⁴ uile obair Dhé, nach urrainn duine obair a nìthear fuidh'n ghréin fhaotainn a mach; a chionn ged nì duine a dhìchioll air¹⁵ a faotainn a mach, gidheadh nach faigh e i: seadh fathast, ged shaoil duine glic gu'm faigh e eòlas oirre, nach urrainn e a faotainn a mach.

CAIB. IX.

1 *Tachraidh an t-aon nì do na h-uile dhaoimibh.*
4 *Tha dòchas aig na beòthaibh a mhàin.* 13 *Is fearr gliocas na neart.*

OIR chuir mi romham ann am chridhe so uile a chur an cèill, Gu bheil na fireana agus na daoine glìce, agus an oibre, ann an làimh Dhé: cha'n aithne do dhuine sam bith aon chuid gràdh no fuath, leis na h-uile nithibh a ta fa'n comhair¹⁶.

2 *Thig na h-uile nithe air an aon seòl do na h-uile dhaoimibh:* tachraidh an t-aon nì do'n fhìrean agus do'n aingidh; do'n mhaith, agus do'n ghlan, agus do'n neòghlan; dhasan a dh'ìobras, agus dhasan nach ìobair: mar a ta an duine maith, is ann mar sin a ta am peacach; agus esan a mhìonnaicheas, mar an ti air am bheil eagal mhionn.

3 *Is olc so am measg nan uile nithe a nìthear fuidh'n ghréin, gu tachair an t-aon nì dhoibh uile;* agus mar an ceudna gu bheil cridhe chloinn nan daoine làn uile, agus gu bheil cuthach 'nan cridhe am fad

¹ ceart, cothromach.

³ mar esan d'an aithne.

⁵ rùn, tionnsgnadh.

⁷ nòr air.

⁹ air an tiodhlacadh.

² ais-innleachd.

⁴ a ghleidheadh.

⁶ modh, riaghaill.

⁸ cuin a bhios e ann.

¹⁰ mhòr-bhaile.

¹¹ breitheanas. ¹² gu'n cuirear a làithean am fad.

¹³ a làithean a bhios mar sgàile a chionn nach 'eìl eagal air an làthair Dhé.

¹⁴ thug mi, thug mi fa'near. ¹⁵ ged shaothraich duine chum. ¹⁶ rompa, 'nan làthair.

is beò iad, agus 'na dhéigh sin *gu'n téid* iad chum nam marbh.

4 Oir aig gach neach a tha ceangailte ris na h-uile bheòthaibh, tha dòchas; oir is fearr madadh beò na leòman marbh.

5 Oir tha fios aig na beòthaibh gu'm faigh iad bàs: ach cha 'n *eil* fios ni air bith aig na mairbh, cha mhò *a ta* luigh-eachd¹ aca ni's mò; oir théid an cuimhne air dhi-chuimhn².

6 Chaidh as mar an ceudna a nis d'an gràdh, agus d'am fuath, agus d'am farmad²; agus cha *bhi* cuibhrionn aca tuilleadh gu bràth an aon ni a nithear fuidh'n ghréin.

7 Imich romhad, ith t'aran le gàirdeachas, agus òl t'fhion le cridhe subhach; oir tha Dia a nis toilichte le t'oibribh.

8 Biodh t'earradh³ sgach àm geal; agus na biodh dìth olaidh-ungaidh air do cheann.

9 Caith do bheatha gu subhach leis a' mhnaoi a's ionmhuinn leat rè uile làithean beatha do dhìomhanais, a thug e dhuit fuidh'n ghréin⁴: oir *is* e so do chuibhrionn anns a' bheatha so, agus ann ad shaothair a ghabhas tu fuidh'n ghréin.

10 Ge b'e ni a gheibh do làmh r'a dheanamh, dean e le d' dhìchioll; oir cha 'n *eil* obair, no innleachd⁵, no eòlas, no gliocas anns an uaigh, d'am bheil thu a' dol.

11 Thionndaidh mi, agus chunnaic mi fuidh'n ghréin, nach ann do na daoineibh luatha *a tha* an rèis⁶, no do na daoineibh treuna an cath, no do na daoineibh glìce aran, no do dhaoineibh tuigseach⁷ saoihbheas, no do dhaoineibh eòlach deadh-ghean, ach gu'n tachair àm agus tuiteamas⁸ dhoibh uile:

12 Oir gu deimhin cha 'n *eil* fhios aig duine air àm féin: mar iasg a ghlacar ann an droch lion, agus mar eoin a ghlacar ann an ribe, is ann mar sin a ribear clann nan daoine ann an droch àm, an uair a thuiteas e orra gu h-obann.

13 An gliocas so mar an ceudna chunnaic mi fuidh'n ghréin, agus *bu* mhòr agam e.

14 *Bha* caithir⁹ bheag ann, agus beagan dhaoine innte; agus thàinig rìgh mòr 'na h-aghaidh, agus shuidh e mu'n cuairt oirre, agus chuir e daingnichan mòra suas 'na h-aghaidh.

15 Agus fhuaradh innte duine bochd glic, agus theasairg e a' chaithir le 'ghliocas; ach cha do chuimhnich neach air bith

air an duine bhochd sin.

16 An sin thubhairt mise, *Is* fearr gliocas na neart: gidheadh, nithear tàir air gliocas an duine bhochd, agus cha'n èisdear r'a bhriathraibh.

17 Eisdear ri briathraibh dhaoine glìce an ciùneas, ni's mò na ri glaoth an ti a riaghlas am measg amadan.

18 *Is* fearr gliocas na inneala cogaidh: ach millidh aon pheacach mòran maith.

CAIB. X.

1 *Mu thimchioll gliocais agus amaideachd.* 12 *Is cuthach millteach briathran an amadain.* 17 *Is sona an tir aig am bheil uachdaran glìc.*

BHEIR cuileaga marbha air oladh-ungaidh an léigh¹⁰ boladh breun a chur uaithe¹¹: *is anhuil* a ni beagan amaideachd aisan a tha cliùiteach air son gliocais agus urraim.

2 *Tha* cridhe duine glìc air a làimh dheis; ach cridhe amadain air a làimh chlì.

3 San t-slighe féin, an uair a shiubhlas an t-amadan, tréigidh a ghliocas e, agus their e ris gach duine, gur amadan e.

4 Ma dh'éireas spiorad an uachdarain a d' aghaidh, na fàg t'àite; oir ciùinichidh géilleadh¹² lochdan mòra.

5 *Tha* olc *a chunnaic* mi fuidh'n ghréin, mar sheacharan a thig o làthair an uachdarain¹³.

6 Cuirear amaideachd an inbhe¹⁴ mhòir, agus suidhidh na saoihbhir ann an ionad ìosal.

7 Chunnaic mi òglaich¹⁵ air eachaibh, agus uachdarain a' siubhal mar òglachaibh air an talamh.

8 An ti a chladhaicheas slochd, tuitidh e féin ann; agus an ti a bhriseas callaid¹⁶, teumaidh nathair e.

9 An ti a dh'atharraicheas clachan, goirtichear e leo; agus an ti a sgoilteas fiodh, bithidh e an cunnart uaithe.

10 Ma bhios an t-iarunn maol, agus nach geuraich e am faobhar, feumaidh e an tuilleadh spionnaidh a chur leis; ach *a ta* gliocas tarbhach a sheòladh.

11 Gu deimhin teumaidh an nathair gun srann¹⁷, agus cha'n fhearr am bith-bhriathrach¹⁸.

12 *Tha* briathra beoil duine ghlic gràsail; ach sluigidh bilean amadain e féin suas.

13 *Is* amaideachd toiseach bhriathar a bheoil; agus *is* cuthach millteach deireadh a chainnte¹⁹.

¹ luagheachd, duais.

² tnu.

³ do thrusgan, t'eudach.

⁴ fu'n ghréin, seadh, rè uile làithean do dhìomhanais.

⁵ smuineachadh. ⁶ a' chomh-rùith, a' choimhliang.

⁷ crìoma.

⁸ teagmhus, cinneamhuin.

⁹ baile.

¹⁰ an ollaimh, an lusragain.

¹¹ uaipe.

¹² ceannasachd, macantachd.

¹³ o'n uachdaran. ¹⁴ àrde. ¹⁵ seirbhisich, tràillean.

¹⁶ fal, garadh, balla-dìonaidh.

¹⁷ druidheachd.

¹⁸ sìor-chainnteach.

¹⁹ a bheoil. Eabh.

14 Agus tha amadan làn do bhriathraibh: cha 'n'eil fhios aig duine ciod a bhios ann; agus ciod a bhios ann 'na dhèigh, cò a's urrainn innseadh dha?

15 Sgithichidh saothair nan amadan gach aon diubh, do bhrìgh nach aithne dha cionnus a thèid e do'n chàithir¹.

16 Mo thruaighe thu, a thir, an uair is leanabh a's rìgh dhuit, agus a dh'itheas t'uaichdarain *biadh* anns a' mhaduinn!

17 Is sona thu, a thir, an uair is e do rìgh mac nan uasal, agus a dh'itheas t'uaichdarain ann an àm iomchuidh, chum neirt, agus cha'n ann chum misge!

18 Le mòran leisge thèid an aitreabh sìos²; agus le dìomhanas nan làmh snidhidh an tigh troimhe.

19 Nithear cuirm chum aiteis, agus ni fìon duine³ subhach: ach freagraidh an t-airgid na h-uile nithe.

20 Eadhon ann ad smuaintibh na malluich an rìgh, agus an taobh a stigh do d' sheòmar na malluich an saoi-bhir; oir giùlainidh eun an athair⁴ an guth, agus innsidh an nì air am bheil sgiathan a' chùis.

CAIB. XI.

1 Earail gu bhì caomhneil ris na bochdaibh. 7 Is còir do gach neach cuimhneachadh air bàs agus breitheanas ann an làithibh 'òige.

TILG t'aran air aghaidh nan uisge; oir an dèigh mhòrain do làithibh gheibh thu e.

2 Thoir cuibhrionn do sheachdnar, agus mar an ceudna do ochdnar; oir cha 'n'eil fhios agad ciod an t-olc a bhios air an talamh.

3 Ma bhios na neoil làn do uisge, fal-mhaichidh siad *iad fèin* air an talamh; agus ma thuiteas craobh mu dheas no mo thuath, anns an àite san tuit a' chraobh, an sin bithidh i.

4 An ti a bheir an aire do'n ghaoith, cha chuir e sìol; agus an ti a dh'amhairceas air na neulaibh, cha bhuaic e.

5 Mar nach 'eil fhios agad ciod i slighe an spioraid⁵, no cionnus a dh'fhàsas na cnàmhan am broinn na mnà a bhios torrach, is amhuil sin nach 'eil fhios agad air oibrigh Dhè, mar a nì e na h-uile nithe.

6 Anns a' mhaduinn cuir do shìol, agus san fheasgar na toir air do làmh sgur; oir cha 'n'eil fhios agad cia dhiubh is fearr a shoirbhicheas so no sud, no am bi iad le chèile co mhaith.

7 Gu deimhin is millis an solus, agus is

taitneach do na sùilb sealltuinn air a' ghrèin.

8 Ach mamlaireas duine iomadh bliadhna, agus gu dean e gairdeachas⁶ anna uile; gidheadh cuimhnicheadh e làithean an dorchadais, gu'm bi iad lionmhor. Is dìomhanas gach nì a thig.

9 Dean gairdeachas, a dhuin 'òig, a' d' òige⁷, agus deanadh do chridhe subhach⁸ thu 'ann an làithibh t'òige, agus siubhail ann an slighibh do chridhe, agus ann an sealladh do shùl: ach biodh fhios agad, air an son so uile, gu'n toir Dia chum breitheanas thu.

10 Uime sin atharraich doilgheas⁹ o d' chridhe, agus cuir olc air falbh o d' fheoil; oir is dìomhanas leanabhachd agus òige.

CAIB. XII.

1 Is còir do gach duine a Chruith-fhear a chuimhneachadh ann an làithibh 'òige. 8 Theagaisg an searmonaiche eòlas do'n t-sluagh. 13 'S e eagal Dé agus àitheantan a ghleidheadh, comh-dhùndh na cùise uile.

CUIMHNICH a nis do Chruith-fhear¹⁰ ann an làithibh t'òige, mu'n tig na droch làithean, agus an druid na bliadhna *riut*, anns an abair thu, Cha'n'eil tlachd agam anna:

2 Mu'n dorchaidhear a ghrian, agus an solus, agus a' ghealach, agus na reultan, agus ann pill na neoil an dèigh an uisge:

3 Anns an là san crìothnaich luchd-gleidhidh¹¹ an tighe, agus an crom na daoine làidir iad fèin, agus an sguir an luchd-bleath¹², a chionn gu bheil iad tearc, agus an dorchaidhear an dream a sheallas a mach air na h-uinneagaibh¹³.

4 Agus an dùinear na dorsan anns na sràidibh, an uair a bhios fuaim na bleith ìosal, agus a dh'éireas e suas aig guth an eoin, agus a dh'islichear uile nigheanan a' chiùil;

5 Mar an ceudna, 'nuair a bhios eagal orra roimh nì àrd, agus a bhios uamhasan anns an t-slighe, agus a bhios a' chraobh-almoin fuidh bhlàth, agus a bhios an leumnach uaine¹⁴ 'na eallaich, agus a theirgeas miann¹⁵; a chionn gu bheil an duine a' triall d'a chòmhnuidh bhuan¹⁶, agus gu bheil an luchd-cumhaidh¹⁷ a' dol mu'n cuairt sna sràidibh,

6 Mu'm fuasgailear an cord¹⁸ airgid, agus am bruthar¹⁹ an copan²⁰ òir, agus am brisear a' chuinneag²¹ aig an tobar, agus am brisear am roth aig an t-soith-each-cumail²².

7 An sin pillidh an duslach²³ chum na

¹ mhòr-bhaile.

² aomaidh an aitreabh, thèid an aitreabh mu làr.

³ daoine bed. Eabh.

⁴ eoin nan speur.

⁵ na gaoithe.

⁶ deanadh e gairdeachas.

⁷ 'na t'òige.

⁸ ait, suilbhreach.

⁹ bròn, fèarg.

¹⁰ Chruthadair.

¹¹ coimheadaichean.

¹² fuinneagaibh.

¹³ a thrèigean fonn.

¹⁴ luchd-caoidh.

¹⁵ brisear.

¹⁶ a' chuach.

¹⁷ an t-slochd, an tiobairt.

¹⁸ na meilteiran.

¹⁹ am fionnan-feoir.

²⁰ d'a thigh sìorruidh.

²¹ gnàithe, teud.

²² an soitheach-uisge.

²³ luathre.

DAN SHOLAIMH, I.

talmhainn mar a bha e; agus pillidh an spiorad chum Dhé, a thug uaith e.

8 Diomhanas nan diomhanas! ars an searmonaiche: *is* diomhanas na h-uile nithe.

9 Agus os bàrr, do bhrìgh gu'n robh an searmonaiche glic, theagaisg e'n còmh-nuidh eòlas do'n t-sluagh; agus thug e deadh aire, agus shir e mach¹, agus dheasaich e² mòran ghnàth-fhocal.

10 Dh'iarr an searmonaiche briathra taitneach fhaotainn: agus *bha* an ni a sgriobhadh ceart, briathra na fìrinn.

11 *Tha* briathra nan daoine glice mar

bhioraibh, agus mar thairngibh air an sparradh³ *le* uachdaranaibh choimh-thional, *a* thugadh le aon aodhaire.

12 Agus tuilleadh, leo so, a mhic, gabh rabhadh: air mòran leabhraichean a dheanamh cha 'n'eil crìoch; agus *tha* mòran leughaidh 'na sgios do'n fheoil.

13 Cluinneamaid brìgh na chaidh ràdh uile⁴; Biodh eagal Dé ort, agus gléidh 'àitheantan; oir *is* e so *dleasdanas* iomlan an duine.

14 Oir bheir Dia gach obair chum breitheanaïs, maille ris gach ni diomhair, ma's maith, no ma's olc e.

¹ rannsaich e.

² chuir e'n ordugh.

³ air an daingneachadh.

⁴ crìoch, no comh-dhùndh na cùise uile.

DAN SHOLAIMH.

CAIB. I.

1 Gràdh na h-caglais do Chrìosd: 7 'na h-urnuigh ghuidh i gu'n treòraicheadh e i a dh'iomhaidh a threud. 8 Sheòl Chrìosd i gu bàthaibh nan aodhaire, 9 agus nochd e meud a ghràidh dhi.

DAN nan dàn, dàn Sholaimh.

2 Pògadh e mi le pògaibh a bhéil; oir *is* maith do ghràdh seach fìon.

3 Air son fàile cùbhraidh *is* maith t'oladh-ungaidh-sa: *is* oladh-ungaidh air a dòrtadh t'ainm¹; uime sin ghràdhaich na h-òighean thu.

4 Tarruing mi. A'd dhéigh ruithidh sinn. D'a sheòmraichibh threòraich an Rìgh mi. Nì sinn luathghaire agus bithidh aoibhneas oirm annad-sa: cuiridh siun an cuimhne do ghràdh nì's mò na fìon: ghràdhaich na fireana thu.

5 Dubh *a ta* mi, ach sgiamhach², O a nigheana Ierusalem, mar bhlùthaibh Chedair, mar chùrteinibh rìomhach³ Sholaimh.

6 Na biodh umhaill agaibh ged *tha* mi dorch, a chionn gu'n d'amhaire⁴ a' ghrìan orm: bha mic mo mhàthar am feirg rium; rinn iad coimheadaiche nam fìon-lios diom: am fìon-lios bu leam fèin cha do choimhid mi.

7 Innis dhomh, O thusa d'am bheil gràdh aig m'anam, c'ait an ionaltair⁵ thu do threuda, c'ait an toir thu orra luidheadh sìos mu mheadhon-là; oir c'ar son

a blithinn mar aon air faondradh am measg threud do chompanach⁶?

8 Mur 'eil fhios agad, O thusa a's àillidh⁷ am measg bhan, imich a mach air luirg an treud, agus ionaltair do mheannain làimh ri bùthaibh⁸ nan aodhaire.

9 Ri h-eachaibh⁹ ann an carbadaibh Pharaoh samhlaicheam thu, a bhean mo ghaoil.

10 Is àillidh do ghruaidhean le sreathaibh sheud¹⁰, do mhuineal le slabhraidh-ibh.

11 Sreathan òir nì sinn dhuit, le ball-achaibh¹¹ airgid.

12 Am feadh a ta'n Rìgh aig a fhleadh¹² tha mo spìocnard a 'sgaoileadh 'fhàile cùbhraidh.

13 *Is* ceanglachan mirr mo ghràdh¹³ dhomhsa; eadar mo chiochaibh luidhidh e rè na h-oidiche.

14 *Tha* mo ghràdh dhomh-sa, mar bhagaid do'n chrann-champhir anu am fìon-liosaibh Engedi.

15 Feuch, *a ta* thu àillidh, a bhean mo ghaoil¹⁴; feuch, *a ta* thu àillidh; *tha* sailean choluman agad.

16 Feuch, *a ta* thu àillidh, fhir mo ghràdh, agus taitneach agus *a ta* ar n-uirigh¹⁵ uaine.

17 *Is* croinn sheudair¹⁶ sailean ar tighe, croinn-ghiuthais ar ceann-fhiodh¹⁷.

¹ Air son deadh bholaidd t'oladh-ungaidh maithe tha t'ainm mar oladh-ungaidh.

² gràdhach, ionmhuinn.

³ chroch-bhrataibh do obair ghréise.

⁴ do dhearrsaich.

⁵ am beathaich.

⁶ làimh ri treudaibh do chaidreamhach.

⁷ sgiamhaiche.

⁸ bothanaibh.

⁹ ri buidheann each, ri m'eachaibh.

¹⁰ usgraichibh. ¹¹ rinnibh, tairngibh, tacaidibh.

¹² 'na shuidhe aig a bhord.

¹³ m'aon gràdhach, m'amusachd, mo rùn.

¹⁴ mo chaidreach, mo leth-sheise, mo chéile.

¹⁵ leabadh.

¹⁶ cheudair.

¹⁷ mullach.

CAIB. II.

1 *Tha gràdh Chrìosd 'na bhratach do'n eaglais.*
 8 *Dòchas, 10 agus dreuchd na h-eaglais.* 14 *Cùram Chrìosd mu thimchioll na h-eaglais.*

I S ròs o Sharon mise, lili nan gleann.
 2 Mar lili am measg droighnich, is amhuil mo ghràdh-sa am measg nan nighean.

3 Mar chrann-ubhall am measg chrann na coille, is amhuil mo rùn-sa am measg nan òganach: fuidh a sgàile mhiannaich mi, agus shuidh mi sìos, agus *bha* a thoradh milis do m' bhlas¹.

4 Threoraich e mi do thigh an fhìona, agus *b' i* a bhratach tharum an gràdh.

5 Cumaidh suas mi le cornaibh, sgapaibh ùbhlán mu m' thimchioll, oir *a ta* mi tinn² le gràdh.

6 *Tha* a làmh chli fuidh m' cheann, agus a làmh dheas timchioll orm.

7 Cuiream mar fhìachaibh oirbh³, a nigheana Ierusalem, air earbaibh agus air eildibh na macharach, nach cuir sibh dragh air, agus nach dùisg sibh mo ghràdh, gus an àill leis féin.

8 Guth mo ghràidh! Feuch, tha e a' teachd, a' leumnaich air na beanntaibh, a' toirt sìthidh air na tulaichibh.

9 *Is* cosmhuil mo ghràdh ri h-earb no ri laogh féidh⁴: feuch, tha e 'na sheasamh air cùl ar balla, a' sealltuinn a mach air na h-uinneagaibh, 'ga nochdadh féin⁵ troimh'n chléith.

10 Fhreagar air mo ghràdh, agus thubhairt e rium, Eirich, a bhean mo ghaoil⁶, m'aon sgiamhach, thig leam:

11 Oir feuch, tha'n geamhradh seachad, tha'n t-uisge thairis, dh'imich e roimhe.

12 Chithear na blàthan air an talamh, tha àm seinn *nan eun* air teachd, agus cluinnear guth an turtuir⁷ 'nar tìr.

13 Tha an crann-fìge a' cur a mach 'fhìge glasa⁸, agus tha dearcan maotha a' chroinn-fhìona a' toirt fàile cùbhraidh uatha: éirich, a bhean mo ghaoil, m'aon sgiamhach, agus thig leam.

14 Mo choluman, *a ta* ann an sgoltaibh na creige, ann an ionad-dìomhair⁹ a' bhruthaich, leig dhomh amharc ort, leig leam do ghuth a chluinntinn! oir *a ta* do ghuth binn, agus t'eugas¹⁰ maiseach.

15 Glacaibh dhùinn na sionnaich, na sionnaich bheaga, a mhilleas na croinn-fhìona, agus dearcan òga ar crann-fìona¹¹.

16 *Is* leam-sa mo ghràdh, agus *is* leis-

san mise: *tha* e ag ionaltradh am measg nan lili.

17 Gus am bris an là¹², agus an teich¹³ na sgàilean, pill; bi cosmhuil ri earb, a ghràidh, no ri laogh féidh air beanntaibh Bheteir.

CAIB. III.

1 *'Na teanntachd di' iarr an eaglais còmhnaidh o Chrìosd: 6 agus rinn i gairdeachas 'na mhaith-eas.*

AIR mo leabaidh anns an oidhche dh'iarr mi an tì d'am bheil gràdh aig m'anam: dh'iarr mi e, ach cha d'fhuair mi e.

2 Eiridh mi a nis, agus théid mi mu'n cuairt anns a' chaithir¹⁴, anns na sràidibh, agus anns na slighibh farsuinn iarraidh mi esan d'am bheil gràdh aig m'anam: dh'iarr mi e, ach cha d'fhuair mi e.

3 Thachair orm an luchd-faire a' dol mu'n cuairt anns a' chaithir: Am faca sibh an tì d'am bheil gràdh aig m'anam?

4 Cha deachaidh mi ach beagan air m'aghaidh uatha¹⁵, 'nuair a fhuair mi esan d'am bheil gràdh aig m'anam; rinn mi greim air, agus cha leiginn as e, gus an d'thug mi e do thigh mo mhàthar, agus d'a seomar-sa a rug mi.

5 Cuiream mar fhìachaibh oirbh, a nigheana Ierusalem, air earbaibh agus air eildibh na macharach, nach cuir sibh dragh air, agus nach dùisg sibh mo ghràdh, gus an àill leis féin.

6 Cò ise a ta 'g éirigh suas as an fhàsach mar stuadhaibh deataich, cùbhraidh le mirr agus tùis, le nìle mhin-dhus¹⁶ ceannaiche nan spìosraidh?

7 Feuch, uirigh¹⁷ Sholaimh! Tri fichead treun-fhear m'a timchioll do threun fhearaibh Israeil.

8 Fir chlaidheimh uile, cleachdta¹⁸ ann an cogadh; gach fear le 'chlaidheamh air a léis, an aghaidh gàbhaidh na h-oidhche.

9 Rinn Solamh an Rìgh leabadh-phòsaidh¹⁹ dha féin do chrannaibh Lebanoin.

10 A puist²⁰ dhealbhi e do airgid, a h-ìochdar do òr, a còmhach do chorcur; *bha* a meadhon air 'oibreachadh²¹ le samhlaibh gràidh le nigheanaibh²² Ierusalem.

11 Rachaibh a mach, a nigheana Shìoin, agus faicibh Rìgh Solamh leis a' chrùn leis an do chrùn a mhàthair e air là²³ a phòsaidh, agus air là sùbhachais a chridhe.

¹ chàirean. Eabh.

² lag.

³ mionnaicheam sibh, àithneam dhuibh.

⁴ mang.

⁵ a' lasadh, a' sradadh.

⁶ mo chaidreach.

⁷ fhearain. Eir.

⁸ uaine.

⁹ còs, ionad-foluich.

¹⁰ aogas.

¹¹ oir a ta dearcan an craobh-fìona maoth.

¹² an éirich, an tog an là; an cuir an là 'anail a

mach. Eabh.

¹³ sgapar, sgaoilear.

¹⁴ mhòr-bhaile.

¹⁵ seachad orra.

¹⁶ phùdaraibh.

¹⁷ leabadh.

¹⁸ tìomha.

¹⁹ carbad.

²⁰ garmuinnear.

²¹ air a sgaoileadh, air a leagadh.

²² o nigheanaibh, air son nigheana

²³ làtha, là.

CAIB. IV.

1 *Nochd Crìosd dreach agus maise na h-eaglais.*
16 *Ghuidh an eaglais gu'm bitheadh i air a deanamh iomchuidh air son làthaireachd Chrìosd.*

FEUCH, is àillidh thu, a bhean mo ghaoil¹; feuch, is àillidh thu! *tha* sùilean choluman agad an taobh a stigh do d' chiabhaibh: *tha* t'fholt² mar threud ghabhar a nochdar o shliabh Ghilead³.

2 *Is* cosmhuil do dheud ris an treud lomarta⁴, a thàinig a nìos o'n àite-nighidh, a bheireas gach aon diubh càraid, agus gun aon chaora sheasg⁵ nam measg.

3 Mar shnàthainn dearg⁶ air a dhath dà uair *tha* do bhilean, agus *tha* do chaint binn: mar mhir⁷ do phomgranat⁸ *tha* do chamoga⁹ am meadhon do chiabh.

4 *Tha* do mhuineal mar thùr Dhaibhidh, air a chur suas gu bhi 'na thigh-arm: *tha* mìle targaid crochta suas ris, uile sgiatha nan treun fhear.

5 *Tha* do dhà chich mar dhà mheann earba, càraid na maoislich, a dh'ionaltas am measg nan lili.

6 Gus am bris¹⁰ an là, agus an teich na sgàilean, thèid mi gu beinn a' mhirr, agus gu tulach na tùise.

7 *Tha* thu uile àillidh, a bhean mo ghaoil, agus smal¹¹ cha 'n eil annad.

8 Leam-sa o Lebanon, a chèile leam-sa thig o Lebanon; seall o mhullach Amana, o mhullach Shenir agus Hermoin, o àitibh tàimh¹² nan leomhan, o bheanntaibh nan leopard.

9 Dh'èiginich thu¹³ mo chridhe, a phiuthar, a chèile; dh'èiginich thu mo chridhe le aon do do shùilibh¹⁴, le aon slabhraidh mu d' mhuineal.

10 Cia taitneach a ta do ghràdh, a phiuthar, a chèile! Cia mòr is fearr na fion do ghràdh, agus fàile¹⁵ t'oladh-ungaidh na na h-uile spìosraidh!

11 Mar a' chìr-mheala silidh do bhilean, a chèile: *tha* mìl agus bainne fo d' theangaidh; agus *tha* fàile do thrusgain mar fhàile cùbhraidh Lebanon.

12 *Is* lios¹⁶ glaiste thu, a phiuthar, a chèile; fuaran dùinte, tobar air a sheulachadh.

13 *Tha* do gheuga mar lios phomgranat, leis a' mheas a's taitnìche¹⁷; le

croinn cliamphir maille ri preasaibli spìocnaird:

14 Spìocnaird¹⁸ agus cròch¹⁹; cuile mhillis agus canal, leis na h-uile chraobhaibh tùise; mirr agus aloè²⁰, maille ris na spìosraidh a's taglita;

15 Fuaran²¹ lios, tobar uisgeacha beò, agus a' sruthadh o Lebanon.

16 Eirich, a ghaoth á tuath, agus thig, a ghaoth á deas, séid air feadh mo liosa, rachadh fàile cùbhraidh a spìosraidh a mach. Thigeadh m'annsachd²² d'a lios, agus itheadh e a thoradh taitneach.

CAIB. V.

1 *Mhosgail an eaglais 'nuair a ghairm Crìosd: 2 A gràdh do'n Tighearna. 9 Tha Crìosd maiseach agus sònruichte am measg dheich mìle.*

THA mi air teachd do m' lios, a phiuthar, a chèile; thionail mi mo mhirr maille ri m' spìosraidh; dh'ith mi mo chìr-mheala maille ri m' mhill; dh'òl mi m'fhion maille ri m' bhainne. Ithibh, a chairde, òlaibh, seadh, òlaibh gu pailt, a luchd mo ghràidh

2 Tha mi m' chodal, ach a ta mo chridhe 'na fhaireach²³. Guth fir mo ghràidh a' bualadh! Fosgail dhomh, mo phiuthar, mo bhana-charaid, mo choluman, mo bhean choimhlionta; oir tha mo cheann comhdaichte le drùchd, mo chìabha le braonaibh na h-oidhche.

3 Chuir mi dhìom mo thrusgan; cionnus a chuireas mi orm e? dh'ionnlaid mi mo chosan; cionnus a shalaicheas mi iad?

4 Chuir fear mo ghràidh a làmh troimh tholl an doruis, agus ghluaiseadh m'innigh air a shon²⁴.

5 Dh'èirich mi a dh'fhosgladh do fhear mo ghràidh; agus shìl mo làmhan mirr, agus mo mheòir mirr ruidhteach, air làmhaibh na glaise.

6 Dh'fhosgail mi do fhear mo ghràidh; ach thionndaidh fear mo ghràidh, agus dh'imich e roimhe. Thréig m'anam mi²⁵ 'nuair a labhair e. Dh'iarr mi e, ach cha d'fhuair mi e; ghairm²⁶ mi air, ach cha do fhreagair e mi.

7 Fhuair an luchd-faire a bha dol air an cnairtibh sa' chaithir mi; bhuail iad mi, lot iad mi; thug luchd-coimhid nam balla m'fhalluin²⁷ dhìom.

8 Cuiream mar fhìachaibh oirbh, a nigheana Ierusalem, ma gheibh sibh fear

¹ a bhana-chara, a bhana-charaid.

² do ghruag. ³ a dh'ionaltas mu bheinn Ghilead.

⁴ bheartha, rùisgte. ⁵ air call a h-uain.

⁶ searlaid, corcùir. ⁷ shlìseig.

⁸ ghran-ubhall. ⁹ leth-cheann, ghruaidhean.

¹⁰ Faic Caib. II. r. 17. ¹¹ gaoid, aineamh.

¹² thuinnidhibh, ghàraidhibh.

¹³ thug thu dh'aindeoin, thug thu leat, lion thu thar tomhas. ¹⁴ dh'aon bheum le d' shùilibh.

¹⁵ boltrach.

¹⁶ gàradh.

¹⁷ mìlse.

¹⁸ nard. Eabh.

¹⁹ cròthach; safran. Sasg.

²⁰ aloes. Sasg.

²¹ tiobairt.

²² mo rùn, m'aon gràdhach.

²³ na dhùisg.

²⁴ bha mo chridhe fo bhuairies leis.

²⁵ chaidh m'anam ann an neul, dh'fhàilnich m'anam, lagaich m'anam.

²⁶ ghoir, ghlaodh.

²⁷ m'fhòlach, mo chòmhachadh.

mo ghràidh, gu'n innis sibh dha, mar a ta mi tinn le gràdh.

9 Ciod e fear do ghràidh-sa thar fear-gràidh eile, O thusa a's àillidh¹ am measg bhan? ciod e fear do ghràidh-sa thar fear gràidh eile, gu'n do chuir thu air an dòigh so mar fhiachaibh oirn?

10 Tha fear mo ghràidh-sa geal agus dearg, sònruichte² am measg dheich mìle.

11 Tha a cheann mar an t-òr a's gloine; a chiabha bachlagach³, dubh mar am fitheach.

12 Tha a shùilean mar shùilibh choluman làimh ri sruthaibh uisgeachan, a nigheas iad féin ann am bainne, air an suidheachadh gu ceart⁴.

13 Tha a ghruidhean mar leabaibh spìosraidh, mar bhlàthaibh cùbhraidh; a bhilean mar lildhibh, a' sìleadh mirr ruidhtich⁵.

14 Tha a làmhnan mar fhàinnibh òir suidhichte le berilibh; a chom mar fhiacail elephant⁶ lobbhta, air a cur thairis⁷ le saphiribh:

15 Tha a chosan mar phuist marmoir, suidhichte air bonnaibh do'n òr a's gloine; 'eugas⁸ mar Lebanon, barraichte⁹ mar na seudair¹⁰.

16 Is ro mhilis a bheul; seadh, tha e gu léir ionmhuinn. Is e so fear mo ghràidh-sa, agus is e so mo charaid, a nigheana Ierusalem.

CAIB. VI.

1 Tha an eaglais a' cur an cèill a creidimh, agus a gràdh do Chrìosd. 4 Nochd Chrìosd maise na h-eaglais, 10 agus a ghràdh dhi.

CAIT an deachaidh fear do ghràidh, O thusa a's àillidh¹¹ am measg bhan? cia an taobh a thionndaidh fear do ghràidh? agus iarraidh sinn e maille riut.

2 Chaidh fear mo ghràidh-sa sìos d'a lìos¹², gu leabaichibh nan spìosraidh, a dh'ionaltradh¹³ anns na liosaibh, agus a thional lili.

3 Is le fear mo ghràidh mise, agus is leam-sa fear mo ghràidh: tha e ag ion-altradh¹⁴ am measg nan lili.

4 Is àillidh thu, a bhean mo ghaoil, mar Thirsah, maiseach mar Ierusalem, uamhasach mar shluagh le'm brataichibh.

5 Tionndaidh uam do shùilean, oir chlaoidh iad mi: tha t'fholt mar threud ghabhar a nochdar o Ghilead.

6 Tha do dheud mar threud chaorach, a thàinig a nìos o'n àite-nighidh, a bheireas gach aon diubh càraid, agus gu aon chaora sheasg¹⁵ nam measg.

7 Mar mhir do phomgranat, tha do chamoga, am meadhon do chiabh¹⁶.

8 Tha tri fichead ban-righinn, agus ceithir fichead leannan¹⁷ ann, agus òighean gun àireamh.

9 Is ise 'na h-aonar mo choluman, mo bhean choimhllionta; is i aon nighean a màthar i, a seircin-sa a rug i¹⁸. Chunnaic na nigheana i, agus bheannaich iad i; na ban-righimean agus na leannain, agus mhol iad i.

10 Cò ise a chithear¹⁹ mar a' mhaduinn, sgiamhach mar a' ghealach, glan mar a' ghrian, uamhasach mar shluagh le'm brataichibh?

11 Do lios nan cnò chaidh mi sìos, a ghabhail beachd²⁰ do thoradh a' ghlinne, a dh'fhaicinn an robh an fhionain fuidh bhlàth, an robh na pomgranait a' briseadh a mach.

12 Mun d'thug mi an aire, air leam gu'n do thairngeadh a mach dhomh²¹ carbadan Aminadaib²².

13 Pill, pill, a Bhan-Shulamach, pill, pill, sgus amhairceamaid ort. C'ar son a dh'amhairceadh sibh air a' Bhan-Shulamaich? mar bhuidheann dà fheachd²³.

CAIB. VII.

1 Ailleachd agus maise na h-eaglais: 10 Nochd i a creidimh, agus a déigh air Chrìosd.

CIA àillidh do chosan ann am brògaibh, a nighean rioghail²⁴! tha uilt do shliasad mar usgraichibh²⁵, obair làmh fir-ceirde:

2 Tha t'imleag mar chuaich chruinn, air nach bi easbhuidh²⁶ dibhe; do bholg mar dhùn cruithneachd, cuairtiche le lildhibh.

3 Tha do dhà chich mar dhà mheann earba, càraid na maosisich.

4 Tha do mhuineal mar thùr ibhori²⁷; do shùilean mar lochaibh éisg ann an Hesbon, làimh ri geata Bhat-rabim; do shròn mar thùr Lebanon, a sheallas a làimh Dhamascuis.

5 Tha do cheann ort cosmhuil ri Carmel, agus folt²⁸ do chinn cosmhuil ri corcur: tha an rìgh ceangailte 'na sheòmraichibh²⁹.

6 Cia àillidh, agus cia taitneach a ta thu, a ghaoil, ann ad mhaisealachd³⁰?

¹ maisiche. ² cosmhuil ris-san a ghiùlaineas a' bhratach. ³ caisreagach, dualach.

⁴ a' suidhe ann an lànachd. Eabh. ⁵ chùbhraidh, dheadh-bholaidh.

⁶ ivory. Sasg. ⁷ còmhdaichte.

⁸ aogas, a chostas, a dheach. ⁹ taghta, dìrdheirc.

¹⁰ ceudair. ¹¹ sgiamhaiche.

¹² ghàradh. ¹³ a dh'itheadh.

¹⁴ ag itheadh.

¹⁵ air call a h-uain. ¹⁶ Faic Caib.IV.r. 1,2,3.

¹⁷ coimhleabach. ¹⁸ aon taghta na té a rug i.

¹⁹ a sheallas a mach. ²⁰ seallaidh.

²¹ shaoil mi gu'n do thairngeadh a mach air no shon; shuidhich m'anam dhomh. Eabh.

²² mo shluagh dhìlis. ²³ Mahanaim. Eabh.

²⁴ a 'nighean an nachdarain. ²⁵ seudaibh.

²⁶ dìth. ²⁷ do fhiacailibh elephant.

²⁸ falt, gruag. ²⁹ ehlaisibh. ³⁰ thaitneachd.

7 Tha'n àirde sin agad cosmhuil ri craoibh-phailme, agus *tha* do chìocha mar bhagaidibh *fhìon-dhearc*.

8 Thubhairt mi, Streapaidh mi suas do'n chraoibh-phailme, gabhaidh mi greim d'a geugaibh: agus a nis bithidh do chìocha mar bhagaidibh do'n fhìon-chraoibh¹, agus cùbhraidheachd t'eudain² mar chùbhraidheachd nan ubhall:

9 Mar an ceudna do chàirean mar am fìon a's fearr, air son mo ghràidh, a théid *sìos* gu milis³, a' toirt cainnte do bhlilibh an dream a choidleas.

10 *Is* le fear mo ghràidh mise, agus is ann ormsa a *tha* a chion⁴.

11 Thig, fhir mo ghràidh, rachamaid a mach do'n mhachair; fanamaid⁵ ré na h-oidheche anns na bailtibh.

12 Anns a' mhoch-thràth rachamaid do na fìon-liosaibh, seallamaid am bheil an fhìon-chraobh air teachd fuidh bhlàth⁶, am bheil an fhìon-dhearc bheag 'ga nochdadh féin, am bheil na pomgranait air briseadh a mach⁷: an sin bheir mi mo ghràdh dhuit.

13 Tha na mandragan⁸ a' tabhairt fàile cùbhraidh uatha; agus aig ar geat-aibh, gach meas a's taghta, ùr agus sean, fhir mo ghràidh, thaisg mi dhuitse.

CAIB. VIII.

1 *Thug an eaglais gràdh mòr do Chrìosd.* 8 *Gairm nan cinneach.* 14 *Ghuidh an eaglais air son teachd Chrìosd.*

IS truagh nach robh thù mar mo bhràthair, a dheothail cìochan mo mhàthar! Nam faighinn a muigh thu, phògann thu, agus cha deantadh tàir orm⁹.

2 Threòraichinn thu, bheirinn leam thu do thigh mo mhàthar, a theagaisgeadh mi¹⁰; bheirinn ort òl do fhìon spìosradh-ach¹¹, do shùgh mo phomgranait.

3 *Bhiodh* a làmh chli fo m' cheann, agus bhiodh a làmh dheas timchioll orm.

4 Cuiream mar fhiachaibh oirbh, a nigheana Ierusalem, [air earbaibh agus air eildibh na macharach,] nach cuir sibh dragh air, agus nach dèis sibh mo ghràdh gus an àill leis féin.

5 Cò ise a ta teachd a nìos o'n fhàsach, an taice rì fear a gràidh? Fuidh'n chraoibh-ubhall thog mi suas thu: an sin bhia do mhàthair ri saothair ort; an sin bhia i ri saothair, rug i thu.

6 Cuir mise mar sheula air do chridhe, mar sheula air do ghairdean: oir làidir mar am bàs a *ta* 'n gràdh, an-ìochdmhor mar an uaigh an t-eud: *is* eibhle-teine 'eibhle-san, lasair ro gharg.

7 Cha'n urrainn uisgeacha lìonmhor an gràdh a mhùchadh¹², agus cha bhàth na tuiltean e. Nan tugadh duine uile mhaoin a thighe air son gràidh, dheanadh daoine tàir air gu tur.

8 *Tha* piuthar bheag againn, agus cha 'n eil cìochan aice: cìod a ni sinn air son ar peathar, san là anns an labhrar m'a timchioll?

9 Ma's balla i, togaidh sinn oirre lùch-airt airgid; agus ma's dorus i, dùinidh sinn suas¹³ i le bordaibh seudair¹⁴.

10 *Bu* bhalla mi, agus *bha* mo chìochan mar thùraibh; an sin *bha* mi 'na shùilibh mar aon a fhuair deadh-ghean.

11 Bha fìon-lios aig Solamh ann am Baal-hamon; dh'earb e am fìon-lios ri¹⁵ luchd-coimhid: bha gach fear gu tabhairt *da*, air son a thoraidh, mìle *bonn* airgid.

12 *Tha* m' fìon-lios a's leam-sa fa m' chomhair: *tha* am mìle *bonn* dhuit-se, a Sholaimh, agus dà cheud do luchd-coimhid a thoraidh.

13 O thusa a chòmhnùicheas anns na liosaibh, tha do chompanaich¹⁶ a' cluinntinn do ghutha; thuir ormsa a chluinntinn.

14 Luathaich ort, fhir mo ghràidh, agus bi cosmhuil ri h-earb, no ri laogh féidh air beanntaibh nan spìosraidh.

¹ *fhìonain.*

³ *gu dìreach.* Eabh.

⁵ *fàmhamaid.*

⁷ *fuidh bhlàth.*

⁹ *gidheadh cha'n fhaighinn masladh.*

² *fàile do shròna.*

⁴ *a dhéidh.*

⁶ *air briseadh a mach.*

⁸ *dudaim.* Eabh.

¹⁰ *Talmudni.* Eabh.

¹¹ *measgta le spìosraidh.*

¹² *a chur as.*

¹⁴ *ceudair.*

¹⁶ *chaidreamhaich.*

¹³ *còmhaichidh sinn.*

¹⁵ *shuidhich e am fìo n-lios air.*

ISAIAH.

CAIB. I.

1 Tha *Isaiah* a' gearan a chionn gu'n d'rinn *Iudah* ceannairc an aghaidh an Tighearna. 5 *Truaillidheachd* an t-sluaigh. 10 *Chronaich* am fàidh iad air son an tabhartasa dìomhain; 16 agus chomhairlich e dhoibh aithreachas a ghabhail. 23 *Sgrìos* nan aingidh.

TAISBEAN *Isaiah* mhic *Amois*, a chunnaic e mu thimchioll *Iudah* agus *Ierusalem*, ann an làithibh *Usiah*, *Iotaim*, *Ahais*, agus *Heseciah*, rìghrean *Iudah*.

2 *Cluinnibh*, O nèamhan, agus tabhair éisdeachd, O thalamh, oir tha an Tighearna a' labhairt: Dh'altruim mise, agus thog mi suas clann; agus rinn iadsan ceannairc a'm' aghaidh.

3 Is aithne do'n damh a shealbhadair, agus do'n asail prasach a maighstir; ach cha 'n aithne do *Israel*; cha 'n eil mo shluagh-sa a' toirt fa'near.

4 Ah, cinneach peacach! sluagh luchdaichte le h-aingidheachd! siol nan daoibh! clann a ta 'nam milltearaibh! thréig iad an Tighearna, bhrosnuich iad *Ti* naomh *Israel* gu feirg, dh'fhalbh iad air an ais.

5 C'ar son a bhuaillear sibh nì's mò? théid sibh nì's faide agus nì's faide air seacharan. Tha an ceann uile tinn, agus an cridhe uile fann.

6 O bhonn na coise gu ruig an ceann, cha 'n eil fallaineachd ann; *ach* lot, agus bruthadh, agus creuchd lobhta; cha do theannaicheadh ri chéile iad, cha do cheangladh suas iad, cha do thaisicheadh le h-oladh iad.

7 Tha bhuir tìr fàs, tha bhuir bailtean air an losgadh le teine; bhuir fearann, tha coigrich 'ga itheadh suas 'nur làthair; agus dh'fhàsaicheadh e, mar gu'm biodh e air a sgrìos le sluagh coimheach².

8 Agus tha nighean *Shioin* air a fàgail mar bhothan ann am fion-lios, mar thigh-fasgaidh ann an gàradh chularan, mar bhaile air a theannachadh le naimhidibh.

9 Mur bhiodh gu'n d'fhàg Tighearna nan sluagh iarmad ro bheag againn, 's ann a bhitheamaid mar *Shodom*, bhiomaid cosmhuil ri *Gomorra*h.

10 Cluinnibh focal an Tighearna, O uachdarana *Shodoim*; éisdibh ri lagh ar Déne, a mhuinntir *Ghomorra*h:

11 Cìod e lìonmhoireachd 'ur n-ìobairt-

ean dhomhsa? deir an Tighearna: tha mi làn do thabhartasaibh-loisgte reitheachan, agus do shàill bheathaichean biadhtha; ach ann am fuil tharbh, agus uan, agus bhoc ghaibhre, cha 'n eil mo thlachd.

12 An uair a thig sibh gu'r taisbeanadh féin ann am làthair-sa, cò dh'iarr so air 'ur làimh, mo chùirtean-sa a shaltairt?

13 Na tugaibh tabhartas dìomhain uaibh nì's mò: tha tuis 'na gràineileachd dhomh; a' ghealach ùr, agus an t-sàbaid, gairm a' chomhchruinnich, cha'n fheudar leam 'fhulang; is euceart eadhon an comhghairm naomh.

14 Bhuir gealaichean ùra, agus u'r féillean suidhichte, is fuath le m'anam; tha iad 'nan eallaich orm; tha mi sgith-d'an giùlan.

15 Agus an uair a shìneas sibh mach 'ur làmhan, folaichidh mise mo shùilean uaibh; seadh an uair a nì sibh iomadh urnuigh, cha n-éisd mi: tha 'ur làmhan làn fola.

16 Nìghibh, glanaibh; cuiribh air falbh olc 'ur deanadais as mo shealiadh³; sguiribh do'n olc;

17 Fòghlumaibh maith a dheanamh; iarraibh breitheanas; deanaibh fuasgladh air an fhear tha sàruichte; cumaidh còir ris an dilleachdan; tagraibh cùis na bant-raich.

18 Thigibh a nis, agus tagramaid ri chéile, deir an Tighearna; ged robh 'ur peacanna mar an scarlaid, bithidh iad geal mar an sneachdadh; ged robh iad dearg mar choreur, bithidh iad mar olainn.

19 Ma bhitheas sibh toileach agus umhal, ithidh sibh toradh maith an fhearainn;

20 Ach ma bhios sibh eas-umhal⁴ agus ceannairceach, ithear suas sibh leis a' chladheamh; oir labhair beul an Tighearna e.

21 Cionnus a dh'fhàs a' chaithir dlùileas 'na strìopaich! bha i làn do bhreitheanas, bha ionracas a' gabhail còmhuidh innte, ach a nis mortairean.

22 Tha t'airgid air fàs 'na shalchar⁵; tha t'fhion air a mheasgadh le h-uisge:

23 Tha t' uachdarain ceannairceach, agus 'nan companachaibh mheirleach; tha gach aon diubh an geall air tiodhlac, agus a' leantuinn dhuaisean; ris an dilleachdan cha 'n eil iad a' cumail cothrom, agus

¹ droch dhaoine.

² tuil.

³ as làthair mo shùil. Eabh.

⁴ mì-fhreagarach.

⁵ shal, shlaoit.

cùis na bantraich cha 'n'eil a' teachd 'nan làthair.

24 Uime sin deir an Tighearn, Tighearn nan sluagh, Ti cumhachdach Israeil, Aha! bheir mi fois dhomh féin a thaobh m'eachairdean; dìolaidh mi mi féin air mo naimhaidibh;

25 Agus pillidh mi mo làmh ort, agus glanaidh mi uait do shalachar gu ro ghlan, agus bheir mi air falbh d' uile staoìn.

26 Agus aisgidh mi do bhreitheamhna mar air tùs, agus do chomhairlichean mar a bha iad an toiseach; 'na dhéigh sin goirear dhìot baile na fireantachd, a' chaithir dhìleas.

27 Saorar Sion ann am¹ breitheanas, agus a muinntir iompaichte ann am² fireantachd.

28 Agus claoidhear luchd-eusaontais agus peacaich maraon; agus bithidh iadsan a thréigean an Tighearn air an caitheamh as.

29 Oir gabhaidh iad nàir do na daragaibh a mhiannaich sibh; agus bithidh rugha gruaidh oirbh air son nan liosan a ròghnaich sibh;

30 Oir bithidh sibh mar dharaig aig am bheil a duilleach air seargadh, agus mar lios anns nach 'eil uisge.

31 Agus bithidh an duine làidir mar asg-art, agus 'oibriche³ mar shrad: agus loisgidh iad le chéile cuideachd, agus cha bhi neach ann a mhùchas iad.

CAIB. II.

1 Fàidheadaireachd mu thimchioll riòghachd Chrìosd.
6 Air son an aingidheachd thréig Dia tigh Iacoib.
10 Dh'innseadh do'n t-sluagh gu'n leagar sìos àrdan nan uaibhrean ann an là mòr an Tighearna.

AM focal a chunnaic Isaiah mac Amois mu thimchioll Iudah agus Ierusalem.

2 Tarlaidh anns na làithibh deireannach gu'm bi sliabh tìghe an Tighearn air a dhàingneachadh air mullach nan sleibhteann; agus àrdaichear e os ceann nam beann; agus sruthaidh na h-uile chinnich d'a ionnsuidh.

3 Agus théid mòran shlogh, agus their iad, Thigibh, agus rachamaid suas gu sliabh an Tighearna, gu tigh Dhé Iacoib; agus teagaisgidh e sin mu a shlighibh, agus imichidh sinn 'na cheumaibh; oir o Shion théid an lagh a mach, agus focal an Tighearn o Ierusalem.

4 Agus bheir e breth am measg nan cinneach, agus bheir e achmhasan do mhòran shlogh; agus buailidh iad an claidhean gu coitair, agus an sleaghan gu corranaibh-sgathaidh; cha tog cinneach claidheamh an aghaidh cinnich, agus cha 'n fhòghlum iad cogadh nì's mò.

5 O thigh Iacoib, thigibh agus imicheam-aid ann an solus an Tighearn.

6 Air an aobhar sin thréig thu do shluagh, tigh Iacoib, a chiònn gu bheil iad air an lìonadh o'n àird an ear, agus 'nan luchd-fiosachd mar na Philistich; agus tha an tlachd ann an cloinn choigreach.

7 Agus tha an tìr air lìonadh le airgid agus òr, agus cha 'n'eil crìoch air an ion-mhasaibh; tha an tìr air a lìonadh le h-eachaibh, agus cha 'n'eil crìoch air an carbadaibh.

8 Tha an tìr fòs air a lìonadh le h-ìodhol-aibh; tha iad a'sleuchdadh do obair an làmh féin, do'n nì sin a riun am meòir féin.

9 Agus tha an duine suarach a' cromadh sìos, agus tha an duine àrd ga isleachadh féin; agus cha tabhair thusa maitheanas dhoibh.

10 Imich a steach do'n charraig, agus folaich thu féin anns an ùir, roimh uamhas an Tighearn, agus o ghlòir a mhòrachd.

11 Islichear sealladh⁴ uaibhreach an duine mhòir, agus leagar sìos àrdan nan daoine suarach; agus bithidh an Tighearn 'na aonar air àrdachadh anns an là sin.

12 Oir thigh⁵ là Tighearna nan sluagh air gach neach a ta uaibhreach agus àrd, agus air gach neach a ta air a thogail suas, agus leagar sìos e;

13 Agus air uile sheudaraibh Lebanon, a ta àrd agus togta suas; agus air uile dharagaibh Bhasain;

14 Agus air na h-uile bheanntaibh àrda, agus air na h-uile chnocaibh a tha togta suas;

15 Agus air gach tùr àrd, agus air gach balla daingnichtie;

16 Agus air uile longaibh Tharsuis, agus air na h-uile dhealbhaibh sgiamhach.

17 Agus islichear uabhar an duine mhòir, agus leagar sìos àrdan nan daoine suarach; agus bithidh an Tighearn 'na aonar air 'àrdachadh anns an là sin.

18 Agus cuiridh e na h-ìodhlan gu buil-each air cùl.

19 Agus théid iad a steach ann an còsaibh nan creag, agus ann an tuill⁶ na talmhainn, roimh uamhas an Tighearn, agus o ghlòir a mhòrachd, 'nuair a dh'éireas e a chrathadh na talmhainn gu h-uamhasach.

20 Anns an là sin tilgidh duine 'ìodholan airgid agus 'ìodholan òir, a rinn iad, gach aon dha féin, gu sleuchdadh dhoibh, chum nam fàmh agus chum nan ialtag;

21 Gu dol a steach ann an còsaibh nan

¹ le.

² le.

³ 'obair.

⁴ sùilean. Eabh.

⁵ uamhaibh.

creag, agus ann am mullaichibh nan sgeir, roimh uamhas an Tighearn, agus o ghloir a mhòrachd, 'nuair a dh'èireas e a chrathadh na talmhainn gu h-uamhasach.

22 Leigibh dhiubh 'ur dìil ri duine, aig am bheil 'anail 'na chuinneanaibh; oir ciod am fàth mu'n gabhar meas¹ dheth?

CAIB. III.

1 Na h-uile a bha gu teachd air Iudah a chionn gu'n do thrèig iad Dia. 80 Eiridh gu maith do'n ionracan, 11 ach dìolar do'n aingidh a réir gnìomhara a làmh. 16 Peanas nigheana Shìoin air son an uail.

OIR feuch, bheir an Tighearn, Tighearn nan sluagh, air falbh o Ierusalem agus o Iudah, an lorg agus am bata, uile lorg an arain, agus uile lorg an uisge.

2 An treun-fhear agus am fear-cogaidh, am breitheamh agus am fàidh, an duine glic² agus an seanair;

3 An ceannard air leth-cheud agus an duine urramach, agus an comhairliche, agus am fear-ceirde seolta, agus an cainnt-fhear deas-bhriathrach.

4 Agus ni mi leanabana 'nan uachdaran-aibh orra, agus riaghlaidh naoidheana³ os an ceann.

5 Agus bithidh an sluagh air an sàruchadh, gach fear le chéile, agus gach fear le 'choinhearsnach; ni an t-òganach tàir air an aosda, agus an duine an-uasal air an duin' uasal.

6 An uair a ghlasas fear a bhràthair, do thigh 'athair, agus a thrusgan, *ag ràdh*, Thig, agus bi a'd' fhear-riaghlaidh oirnn, agus biodh an t-aomadh⁴ so fuidh do làmh-sa⁵:

7 Bheir e briathar⁶ air an là sin, ag ràdh, Cha bhi mis' a'm' fhear-slànuich dhuibh; oir ann am thigh-sa cha 'n'eil biadh no eudach; na cuiribh mise suas a'm' fhear-riaghlaidh air an t-sluagh.

8 Oir tha Ierusalem air aomadh sìos, agus Iudah air tuiteam; a chionn gu bheil an teangadh agus an deanadas an aghaidh an Tighearn, a chur cathachaidh air suilibh a ghloire.

9 Tha sealladh an gnùise a' toirt fianuis 'nan aghaidh; agus tha iad a' deanamh am peacaidh follaiseach, mar Shodom; cha 'n'eil iad 'ga fholach; is truagh do an anamaibh, oir thug iad olc⁷ orra féin.

10 Abraibh ris an ionracan *gur maith a dh'èireas* dha; oir toradh an gnìomhara ithidh iad.

11 Is an-aoibhin do'n aingidh; is olc a dh'èireas dha-san; oir dìolar dha obair a làmh féin.

¹ suim. ² geur-chùiseach, fad-sheallach.

³ naoidheachlain. ⁴ am maidhm.

⁵ an taice riut-sa. ⁶ togaidh e a làmh. Eabh.

⁷ dhìol iad olc, thug iad droch dhìol.

⁸ mòi. ⁹ loisg.

12 Do thaobh mo shluaigh-sa, tha clann a' deanamh sàruchaidh orra, agus tha mnathan⁸ a' riaghladh os an ceann. O mo shluagh, tha do chinne-juil 'gad chur air seacharan, agus a' fiaradh slighe do cheumanna.

13 Tha an Tighearn a' seasamh suas chum tagraidh; agus tha e a' seasamh a thabhairt breth air an t-sluagh.

14 Tionnsnaidh an Tighearn ann am breitheanas ri seanairibh a shluaigh, agus 'an uachdaran-aibh; oir dh'ith⁹ sibh suas am fion-lios; tha creach nam bochd 'nur tighibh.

15 Ciod a's ciall duibh, gu bheil sibh a' pronnadh mo shluaigh, agus a' bleth eudanna nam bochd? deir Iehobhah, Tighearna nan sluagh.

16 Os bàrr, thubhairt an Tighearn, A chionn gu bheil nigheana Shìoin uallach¹⁰, agus ag imeachd le muinealaibh¹¹ sìnte mach, agus le sùilibh meara¹², ag imeachd le ceumaibh iullagach, agus a' deanamh fuaimle le'n cosaibh¹³:

17 Uime sin ni an Tighearn maol¹⁴ nullach cinn nigheana Shìoin, agus leigidh an Tighearn ris an nàire.

18 Anns an là sin bheir an Tighearn air falbh àille nan cos-fhàinneachan, agus na bréidean, agus na samhlanan-gealaich,

19 Na cluigeanan, agus na làmh-fhaill-ean, agus na sgàilean,

20 Na cuaileanan, agus na glùineanan, agus na foilteanan, agus na soireachan-boltraich, agus na cluas-fhàinnean,

21 Na fàinneachan, agus na seudan-sròine.

22 Na trusgana lasach¹⁵, agus na tonn-aga, agus na falluinean, agus na deilg,

23 Na sgàthanachan, agus na léintean an-airt, agus na curaichdean, agus na bratan-sgàile.

24 Agus an àit deadh fhàile bithidh bréine, agus an àit criosa bithidh srachd, agus an àit fuil air a dheadh-chleachdadh bithidh maoile, agus an àit crios-uchd bithidh ceanglachan saic-eudaich, agus losgadh¹⁶ an àit maise.

25 Tuitidh do dhaoine leis a' chlàidheamh, agus do threun-fluir anns a' chogadh.

26 Agus ni a geatacha caoidh agus bròn; agus suidhidh, i, gu h-aonaranach¹⁷, sìos air an làr.

CAIB. IV.

1 Teanntachd bhàn Iudah. 2 Sonas agus maise rìoghachd Chrìosd.

AGUS ni seachd mnathan greim air aon fhear san là sin, ag ràdh, Ar

¹⁰ sgòdail.

¹¹ amhachaibh.

¹² mireagach, beag-nàrach.

¹³ le ailleagan-aibh an cos.

¹⁴ carrach.

¹⁵ so-mhùtha.

¹⁶ dòthadh.

¹⁷ gu h-uaigneach, air a fàsachadh.

n-aran fèin ithidh sin, agus ar n-eudach fèin caithidh sinn; a mhàin biomaid air ar n-ainmeachadh ort-sa, a thoirt air falbh ar mi-chliù.

2 Anns an là sin bithidh meangan an Tighearna sgiamhach agus glòrmhor, agus toradh an fhearainn oirdheire agus maiseach dhoibh-san a thèid as do Israel.

3 Agus tarlaidh, an neach a dh'fhàgar ann an Sion, agus a dh'fhanas ann an Ierusalem, goirear esan naomh, eadhon gach aon a ta sgriobhta am measg nam beò ann an Ierusalem.

4 An uair a nigheas an Tighearn air falbh salchar nigheana Shioin, agus a ghlanas e fuil Ierusalem as a meadhon, le spiorad breitheanais, agus le spiorad losgaidh.

5 Agus cruthaichidh an Tighearn air gach àite-tàimh do shliabh Shioin, agus air a coimhthionalaibh, neul anns an là, agus deatach, agus dealradh teine lasarach anns an oidhche; oir thar a' ghloir uile bithidh còmhach.

6 Agus bithidh e 'na bhùth, air son sgràile o'n teas anns an là, agus air son dèidin, agus air sou ionaid-fasgaidh o'n doininn agus o'n uisge.

CAIB. V.

1 *Le cosamhlachd lios-fiona nochd Dia ceartas a bhreitheanais.* 8 *Ni an Tighearna peanas air luchd-sannt,* 11 *air geòcairibh,* 18 *air luchd-deanamh an uile,* 20 *agus orra-san a ghnàthaicheas euceort.* 26 *Coimhionadh bhreitheanas Dhé.*

SEINNIDH mi nis do fhear mo ghràidh, òran le fear mo ghràidh mu thimchioll a lios-fiona. Bha aig mo ghràdh-sa fion-lios air cnoc àrd tarbhach.

2 Agus chuir e callaid m'a thimchioll, agus ghlan e na clachan as agus shuidhich e rogla fionain ann, agus thog e tùr 'na mheadhon, agus cuideachd chladhaich e amar-fiona; agus dh'amhairc e dh'fheuchainn an tugadh e mach dearcann fiona, agus thug e mach dearcann fhaidhain¹.

3 Agus nise, O luchd-àiteachaidh Ierusalem, agus fheara Iudah, thugaibh breth, agus fheam oirbh, eadar mise agus m'fhion-lios.

4 Ciod tuilleadh a ghabhadh deanamh² ri m' fhion-lios nach d'rinn mi ann? C'ar son, an uair a dh'amhairc mi an tugadh e mach dearcann fiona, a thug e mach dearcann fiadhain?

5 Agus a nis thigibh, nochdaidh mise dhuibh ciod a ni mi ri m' fhion-lios; bheir mi air falbh a challaid, agus ithear suas e; brisidh mi a bhalla, agus bithidh e air a shaltairt sìos.

6 Agus cuiridh mi fàs e; cha sgathar e, agus cha ruamlairear e; ach fàsaidh an dris agus an droighinn ann; agus bheir mi àithne do na neulaibh nach fras iad uisge air.

7 Oir is e fion-lios Tighearna nan sluagh tighl Israel, agus daoine Iudah luibh³ a mhòir thlachd; agus bha suil aige ri breitheanas, agus feuch ain-tighearnas; ri ceartas, agus feuch gaoir ghoirt.

8 Is an-aoibhin dhuibh-se⁴ a ta cur tigh ri tigh, agus a' cur achaidh ri achadh, agus nach bi àit ann, agus gu'n gabh sibh còmhnuidh air leth⁵ ann am meadhon na tire.

9 Ann mo chluasaibh *thubhairt* Tighearna nan sluagh, Gu deimhin bithidh iomadh tigh fàs, *tighean* mòra agus mais-each, gun neach a' gabhail còmhnuidh anna.

10 Bheir deich acairean do fhion-lios aon bhat *fiona*, agus bheir Homer do shìol uaitl Ephah.

11 Is an-aoibhin dhoibhsan a dh'éireas gu moch sa' mhaduinn, a dh'ol an dèigh dibhe làidir; a bhuanaicheas gu feasgar, ionnus gu'n cuir am fion teas orra.

12 Agus tha a' chlarsach, agus a' chruit-chiùil, agus an tabor, agus a' phìb, agus fion 'nan cuirmibh⁶; ach obair an Tighearna cha'n 'eil iad a' cur an suim, agus gnìomh a làmh cha 'n'eil iad a' toirt fa'near.

13 Uime sin tha mo shluagh air dol ann am braighdeanas, a chionn *gu bheil iad* gun eòlas; agus tha an uaislean air bàsachadh le gort, agus an islean air tiormachadh le tart.

14 Air an aobhar sin mheudaich an uaigh⁷ a ciocras, agus dh'fhosgail i a beul thar tomhas; agus thèid an glòir, agus am mòr-shluagh, agus an greadh-nachas, agus esan a ta ri aighir, sìos d'a h-ionnsuidh.

15 Agus leagar sìos an duine suarach, agus islichear an duine cumhachdach, agus islichear suilean nan uaibhreach.

16 Ach bithidh Tighearna nan sluagh air 'àrdachadh ann am breitheanas; agus bithidh an Dia naomh a' naomhachadh ann an ceartas.

17 An sin ionaltraidh na h-uain mar a's àbhaist doibh⁸; agus ithidh coigrich machraichean fàsail na muinntir reamh-air.

18 Is an-aoibhin dhoibhsan a tha tar-ruing aingidheachd le cordaibh diomh-anais, agus peacaidh mar le taodaibh feuna:

¹ dearcana groma.

² a dh'fheudtadh dheanamh.

³ dos, bad.

⁴ dhoibh-san.

⁵ leibh fèin.

⁶ nam steadhaibh.

⁷ ionad nam marbh, an saoghal neo-fhaicsinneach.

⁸ anns an àit gus an iomainear iad.

19 A deir, Deanadh e deifir, luathaich-eadh¹ e 'obair, a chum gu'm faic sinn; agus dlùthaicheadh comhairle Tì naoimh Israeil, agus thigeadh i gu crìch, a chum gu'm bi fios againn.

20 Is truagh dhoibhsan a deir maith ri olc, agus olc ri maith; a ta cur dorchadais an àit soluis, agus soluis an àit dorchadais; a ta cur an t-seirbh an àit a' mhillis, agus a' mhillis an àit an t-seirbh.

21 Is truagh dhoibhsan a ta glic 'nam barail² féin, agus 'nam beachd féin tuigseach³.

22 Is truagh dhoibhsan a ta làidir a dh'òl fiona, agus 'nan daoimibh neartmhor a mheasgadh dibhe làidir:

23 A ta saoradh a' chiontaich air son duaise; agus a' toirt ionracais an fhirein air falbh uaith.

24 Uime sin mar a dh'imlicheas teugadh an teine suas an asbhuain, agus a chnàmhas an lasair am moll, *mar sin* bithidh am freumh-san mar fhiodh grod, agus théid am blàth suas mar dhuslach; a chionn gu'n do dhiùlt iad le tàir lagh Tighearna nan sluagh, agus gu'n do chuir iad cùl ri focal Tì naoimh Israeil.

25 Air an aobhar sin tha corruich an Tighearn air lasadh an aghaidh a shluaigh; agus shìn e mach a làmh 'nan aghaidh, agus bhuail e iad; agus chrìochnaich na sleibhte, agus bha an colainnean mar aolach air meadhon nan sràidean. Air son so uile, cha 'n'eil a chorruich air pilladh air falbh; ach tha a làmh fathast sìnte mach.

26 Agus togaidh e suas bratach do na cinneachaibh am fad as, agus ni e fead air an son o iomall na talmhainn; agus, feuch, le deifir thig iad gu luath.

27 Cha bhi aon neach fann, agus cha bhi aon neach tuisleach 'nam measg; cha tig clò, cha tig codal *air aon diubh*; cha'n fhuasgailear crios an leasraidh, agus cha bhrisear bàr-iall am bròg.

28 Aig am bheil an saighdean geur-aichte, agus am boghachan uile air ghleus⁴; bithidh iongana an eacha air am meas mar aillbhinn, agus an rothlan mar chuairt-ghaoith⁵.

29 *Bithidh* am beucaich mar leòmhnan boireann; beucaidh iad mar leòmhanaibh òga; agus ni iad nuallan, agus glacaidh iad a chireach, agus togaidh iad leo i, agus cha bhi neach ann a theasairgeas.

30 Agus anns an là sin beucaidh iad 'nan aghaidh, mar bheucaich na fairge; agus seallaidh iad air an talamh, agus, feuch, dorchadas agus teanntaclid; agus

bithidh an solus air a dhorchachadh ann a⁶ speuraibh.

CAIB. VI.

1 *Tuisbean Isaiah mu thimchioll an Tighearna 'na ghlòir.* 5 *Bha am fàidh fo eagal,* 6 agus thug aingal misneach dha. 8 *Chuireadh e a dh'ionnsuidh an t-sluaigh a nochdadh dhoibh gu'n robh iad reasgach agus do-lùbaidh.*

ANNS a' bhliadhna san d'fhuair rìgh Uisiah bàs, chunnaic mi an Tighearn 'na shuidhe air caithir rìoghail, àrd agus togta suas; agus lìon iomall⁷ a thrusgain an teampull.

2 Os a cheann sheas seraphim: aig gach aon bha sè sgiathan; le ditlis chòmha-daich e 'aghaidh, agus le dithis chòmha-daich e a chosan, agus le dithis rinn e itealaich.

3 Agus ghlaodh iad, gach aon r'a chéile, agus thubhairt iad, Is naomh, naomh, naomh Tighearn nan sluagh; tha an talamh uile làn d'a ghlòir.

4 Agus ghluais ursainnean an doruis le guth an tì a ghlaodh, agus lìonadh an tigh le deataich.

5 Agus thubhairt mi, Mo thruaighe mise! oir chaidh as domh⁸; oir is duine mi aig am bheil bilean neòghlan, agus am measg sluaigh aig am bheil bilean neòghlan tha mi a'm' chòmhnuidh; oir chunnaic mo shùilean an Rìgh Tighearna nan sluagh.

6 An sin thàinig aon do na seraphim ag itealaich a m'ionnsuidh, agus 'na làimh eibhleag bheò, a thug e leis a' chlobha bhàrr na h-altarach;

7 Agus bhean e ri mo bheul, agus thubhairt e, Feuch, bhean so ri d' bhillibh; agus tha d'aingidheachd air a toirt air falbh, agus do lochd air a ghlanadh.

8 Agus chuala mi guth an Tighearn ag ràdh, Cò leis a chuireas mi fios? agus co théid air an son? Agus thubhairt mi, Feuch, tha mise an so; cuir fios leam-sa.

9 Agus thubhairt e, Rach, agus abair ris an t-sluagh so, Cluinibh da rìreadh⁹, ach na tuigibh; agus faicibh da rìreadh¹⁰, ach na tugaibh fa'near.

10 Dean cridhe an t-sluaigh so reamhar, agus dean an cluasan trom, agus druid an sùilean; mu'm¹¹ faic iad le'n sùilibh, agus mu'n cluin iad le'n cluasaibh, agus mu'n tuig iad le'n cridheachaibh, agus gu'n iompaichear iad, agus gu'm bi iad air an slànuchadh.

11 An sin thubhairt mise, Cia fhad, a Tighearn? Agus thubhairt esan, Gus an cuirear bailtean fàs, gun neach 'gan àit-eachadh; agus tighean, gun duine a'

¹ greasadh.

² sùilibh. Eabh.

³ crìonna, eagnuidh.

⁴ air lagh, deasaichte.

⁵ ioma-ghaoith.

⁶ anns na.

⁷ earr, sgiobull.

⁸ chuireadh as domh, chlaoidheadh mi.

⁹ ag cluinntim cluinibh. Eabh.

¹⁰ a' faicinn faicibh. Eabh.

¹¹ air eagal gu'm.

gabhail còmhnuidh annta; agus gu'm bi am fearann gu tur air 'fhàsachadh;

12 Agus gu'm fogair an Tighearn daoine am fad as; agus gu'm bi fàsalachd mhòr ann am meadhon na tìre.

13 Ach fathast *bithidh* deachamh innte; agus pillidh e, agus caithear e; mar an cuilìonn agus an darach, aig am bheil brìgh annta, ged thilg iad an duilleach¹; mar sin *bithidh* sìol naomh 'na bhrìgh innte-san.

CAIB. VII.

1 *Thug Isaiah misneach do Ahas 'nuair a bha e fo amharus air son Resin agus Phecah.* 14 *Fàist-neachd a thaobh Chrìosd.* 17 *Bhagradh Iudah le breitheanas uamhasach.*

ANN an làithibh Ahais mhic Iotaim, mhic Ushai, rìgh Iudah, chaidh Resin rìgh Shiria, agus Pecah mac Remaliah rìgh Israèil suas do Ierusalem, a chogadh 'na h-aghaidh, ach cha b'urrainn iad buadhachadh oirre.

2 Agus dh'innseadh do thigh Dhaibhidh, ag ràdh, Tha Siria ann an comhbhoinn ri Ephraim; agus bha a chridhe air a ghluasad, agus cridhe a shluaigh; mar a ghluaisear craobhan na coille roimh'n ghaoith.

3 Agus thubhairt an Tighearn ri Isaiah, Rach a mach a nis an còdhail Ahais, thu fèin, agus Sear-iasub do mhac, aig ceann sruth-chlais na linne uachdaraich, air slighe achaidh an luadhadair.

4 Agus abair ris, Thoir an aire, agus bi a'd' thosd; na gabh eagal, agus na bi lag-chridheach, air son dà earr² nan àithinnean³ smùidreach so, air son corruich Resin agus Shiria, agus mhic Remaliah.

5 Air son gu'n do dhealbh Siria, Ephraim, agus mac Remaliah, olc a'd' aghaidh, ag ràdh,

6 Rachamaid suas an aghaidh Iudah, agus teannaicheamaid e, agus briseamaid a steach, agus cuireamaid rìgh suas gu rìoghachadh 'na mheadhon, *eadhon* mac Thabeail:

7 Mar so deir an Tighearn Iehobhah, Cha seas e, ni mò thig e gu crìch.

8 Ged⁴ is e ceann Shiria Damascus, agus ceann Dhamascuis Resin; gidheadh⁵ an taobh a stigh do chùig agus trì fichead bliadhna, bithidh Ephraim air a bhriseadh, ionnus nach bi e 'na chinneach:

9 Ged is e ceann Ephraim Samaria, agus ceann Shamaria mac Remaliah. Mur creid sibh, gu cinnteach cha bhi sibh seasmhach.

10 Agus labhair an Tighearna fathast ri Ahas, ag ràdh,

11 Iarr dhuit fèin comharadh o'n Tighearn do Dhia; iarr anns an doimhne, no anns an àirde shuas.

12 Ach thubhairt Ahas, Cha'n iarr mi, ni mò a bhuaireas mi an Tighearn.

13 Agus thubhairt esan, Eisdibh a nis, a thigh Dhaibhidh; Am beag leibh daoine a sgitheachadh; ach an sgithich sibh fòs mo Dhia?

14 Air an aobhar sin, bheir an Tighearn fèin comharadh dhuibh; Feuch, bithidh òigh⁶ torrach, agus beiridh i mac; agus bheir i Imanuel mar ainm air.

15 Im agus mil ithidh e, gus an⁷ tuig e an t-olc a dhiùltadh, agus am maith a ròghnachadh.

16 Oir mu'n aithne do'n leanabh⁸ an t-olc a dhiùltadh, agus am maith a ròghnachadh, fàsaichear fearann an dà rìgh leis am bheil thu air do chlaoidheadh.

17 Bheir an Tighearn ortsa, agus air do shluagh, agus air tigh t'athar, làithean, nach robh an leithide ann o'n là san do dhealach Ephraim ri Iudah; *eadhon* rìgh Asiria.

18 Agus tarlaidh anns an là sin, gu'n gairm an Tighearn⁹ a' chuileag a ta ann an iomall aimhnichean na h-Eiphit, agus an seillean a th'ann an talamh Asiria:

19 Agus thig iad, agus luidhidh an t-ìomlan diubh anns na gleanntaibh fàsail, agus ann an còsaibh nan creag, agus air gach uile dhroighnich agus air gach uile phreas.

20 Anns an là sin lomaidh an Tighearn le ealtainn thuarsadail, leis an t-sluagh air taobh thall na h-aimbne, le rìgh Asiria, an ceann agus fionna nan cosan; agus bearraidh¹⁰ i eadhon an fheusag,

21 Agus tarlaidh anns an là sin gu'n àraich duine bò òg agus dà chaora:

22 Agus o phailteas a' bhainne bheir iad uatha, ithidh e im; oir im agus mil ithidh gach neach a dh'fhàgar anns an tìr.

23 Agus tarlaidh anns an là sin, gach àit anns an robh mìle fìonan, *air am meas* air mhìle bonn airgid, gu'm bi e 'na sgithich agus 'na dhroighnich.

24 Le saighdibh agus leis a' bhogha thig iad an sin; oir bithidh an talamh uile 'na sgithich agus 'na dhroighnich.

25 Agus air na h-uile chnocaibh a bhitheas air an ruamhradh leis a' chaibe, cha tig eagal sgithich no droighnich; ach bithidh e 'na àiridh¹¹ dhamh, agus 'na ionaltradh¹² mheanbh-chruidh.

¹ aig am bheil am bun a' fantuinn, ged ghearrar sìos iad. ² earball.

³ leusan-teine.

⁴ Oir.

⁵ agus.

⁶ an òigh. Eabh.

⁷ a chum as gu.

⁸ do'n leanabh so.

⁹ dean an Tighearn fead air.

¹⁰ sguabaidh, lom-sgrìobaidh.

¹¹ fhàsach, ionaltradh. ¹² àite-coiseachd.

CAIB. VIII.

¹ *Roimh-innis Isaiah sgrios Dhamascuis agus Shamaria le rìgh Asiria. 9 Seasaidh ràn Dé gu sìorruidh. 11 Bithidh aoibhneas orra-san a chuireas an dòigh agus an earbsa an Dia.*

A GUS thubhairt an Tighearn rium, Gabh clàr mòr, agus sgrìobh air, le inneal-sgrìobhaidh duine mu Mhahe-salal-has-bas¹.

2 Agus thug mi leam, chum dearbhaidh, fianuisean firinneach, Uriaan a sagart, agus Sechariah mac Ieberechia.

3 Agus dhlùthaich mi ris a' bhan-fhàidhe; agus dh'fhàs i torrach, agus rug i mac: agus thubhairt an Tighearn rium, Thoir mar ainm air Maher-salal-has-bas:

4 Oir mu an aithne do'n leanabh m'ath-air agus mo mhàthair a ràdh, togar air falbh saoihbheas² Dhamascuis agus crecach Shamaria, roimh rìgh Asiria.

5 Agus labhair an Tighearn fathast rium, ag ràdh,

6 A chionn gu'n do chuir an sluagh so cùl ri uisgeachaibh Shiloh, a ruithneas gu sèimh; agus gu bheil iad a' gabhail tlachd ann an Resin agus ann am mac Remaliah:

7 Uime sin, feuch, bheir an Tighearn a nìos orra uisgeachan na h-aimline, làidir agus lìonmhor, *eadhon* rìgh Asiria agus 'uile ghreadhnachas; agus éiridh e os ceann a chlaisean uile, agus théid e thar 'uile bhruachaibh.

8 Agus gabhaidh e roimhe air feadh Iudah, a' ruith thairis agus a' sgaoileadh; *eadhon* gus am muineal ruigidh e; agus lonaidh sgaoileadh a sgiathan leud do thìre-sa³, Ó Imanuèil.

9 Cruinnichibh r'a chéile, a chinneacha, agus brisear sibh 'nur bloighdibh: éisdibh, sibhse uile a ta sna dùchannaibh fad as; giosaichibh sibh féin, agus brisear sibh 'nur bloighdibh; crioslaichibh sibh féin, agus brisear sibh 'nur bloighdibh.

10 Cuiribh bhur comhairle ri chéile, agus thig i gu neò-bhrìgh; labhairibh am focal, agus cha seas e; oir tha Dia leinne.

11 Oir thubhairt an Tighearn rium, le làimh làidir⁴, agus theagaisg e mi, a chum nach siubhlainn ann an slighe an t-sluaigh so, ag ràdh,

12 Na abraibh-sa comh-bhoinn ris gach ni ris an abair an sluagh so comh-bhoinn; agus na gabhaibh eagal roimh an uamhas-san, agus na biodh geilt oirbh.

13 Tighearn nan sluagh, naomhaichibh esan féin; agus *biodh* esan duibh 'na chùis eagail, agus *biodh* esan duibh 'na aobhar ball-chrith.

14 Agus bithidh e 'na ionad naomh; ach 'na chloich-thuislidh, agus 'na charr-aig-oilbheim do dhà thigh Israeil; 'na lìon agus 'na ribe do luchd-àiteachaidh Ierusalem.

15 Agus gheibh mòran 'nam measg tuisleadh, agus tuitidh iad, agus brisear iad, agus ribear agus glacar iad.

16 Ceangail suas an fhianuis, seulaich⁶ an lagh am measg mo dheisciobul-sa.

17 Ach feithidh mise ris an Tighearn a ta foluch a ghuaise o thigh Iacoib, agus bithidh suil agam ris.

18 Feuch, *tha* mise, agus a' chlann a thug an Tighearn dhomh, 'nar comhar-aibh agus 'nar n-iongantasaidh ann an Israel, o Thighearn nan sluagh a ta 'na chòmhnuidh ann an sliabh Shioin.

19 Agus an uair a their iad ruibh, Iarraibh a chum nam ban-fhiosaichean, agus chum nan druidhean, muinntir a ni bìdeil agus borbhanaich; nach bu chòir do shluagh iarraidh chum an Dé? an ann a *dh'iarraidh iad* a chum nam marbh, an àit nam beò?

20 *Iarradh iad* chum an lagha agus chum na fianuis: mur labhair iad a réir an fhocail so, 's ann a chionn nach 'eil solus annta⁶.

21 Agus siubhlaidh *gach aon* d'a thrìd, ann an teinn agus ann an gorta; agus tarlaidh, 'nuair a bhios e ann an gorta, gu'm bi corruich⁷ air ris féin, agus mall-aichidh e a rìgh agus a Dhia, agus e sealltuinn suas.

22 Agus seallaidh e air an talamh, agus feuch teanntachd agus doilleireachd; dubhar an àmhghair, agus tiugh-dhorchadas⁸.

CAIB. IX.

¹ *Aoibhneas na h-eaglais air son teachd rìoghachd Chrìosd. 8 Na breitheanaidh a bheir Dia air Israel air son an uabhair, 13 am mì-chreidimh, 18 agus an aingidheachd.*

G IDHEADH cha bhi an doilleireachd mar a bha ri linn a h-àmhghair, an uair a bhuail e gu h-eutrom an toiseach talamh Shebuloin agus talamh Naphtali, agus 'na dhéigh sin bhuail e ni bu truime e⁹, air slighe na fairge, taobh thall Iordain, Galile nan cinneach.

2 An sluagh a bha siubhal ann an dorchadas, chunnaic iad solus mòr; iadsan

¹ Greas chum na creich, grad-ghlac a' chobhartach.
² maoin, toice.

³ sgaoilidh a sgiathan thar leud do thìre.

⁴ agus e 'g am ghilacadh air làimh.

⁵ duin suas, glais.

⁶ anns nach 'eil doilleireachd sam bith.

⁷ campar.

⁸ ruaigear e chum dorchadais.

⁹ Ach cha bhi dorchadas innte-san a bha ann an teinn: oir anns an aimsir chaidh seachad, dh'istich e talamh Shebuloin agus talamh Naphtali, ach anns an aimsir dheireannaich rinn e glòrmhor e.

a bha 'nan còmhnuidh ann an tìrsgàile a' nàis, dh'èirich solus orra.

3 Rinn thu an cinneach lìomhor; nach do mheudaich thu an aoibhneas? rinn iad gàirdeachas a'd làthair, mar ghàirdeachas anns an fhogharadh; mar ni daoine gàirdeachas, an uair a roinneas iad a' chreach.

4 Oir bhris thu cuing 'eallaich, agus bata a ghuailne, slat an fhìr a shàruich e, mar ann an là Mhìdiaìn.

5 Oir *tha* gach uile chath an fhìr-chogaidh le cruaidh iomairt, agus endach air a thumadh ann am fuil; ach bithidh *so* le losgadh, agus connadh air son an teine¹.

6 Oir rugadh dhuinne duine-cloinne², thugadh dhuinne mac; agus bithidh an uachdaranachd air a ghualainn; agus goirear mar ainm dheth, Iongantach, Comhairliche, an Dia cumhachdach, an t-Athair sìorruidh³, Prionnsa na sìthe.

7 Air fàs 'uachdaranachd, agus air *a* shith, cha *tig* crìoch; air caithir rìoghail Dhaibhidh, agus air a rìoghachd; chum a daingneachadh agus a socrachadh le breitheanas agus le ceartas, o so a mach agus gu sìorruidh; bheir eud Tighearna nan sluagh so gu crìch.

8 Chuir an Tighearn focal dh'ionnsuidh Iacòib, agus thuit e air Israel.

9 Agus bithidh fios aig an t-sluagh uile, aig Ephraim agus fear-àiteachaidh Shamaria, a ta ag ràdh, ann an uail agus àrdan cridhe,

10 Tha na clachan creadha air tuiteam, ach togaidh sinn le clachaibh snaidhte; tha na craobhan sicamoir air an gearradh sìos, ach cuiridh sinn craobhan seudair 'nan àit.

11 Uime sin àrdaichidh an Tighearn luchd mì-ruin Resin 'na aghaidh, agus togaidh e suas a naimhdean le chèile;

12 Na Sirianaich o'n taobh bheoil, agus na Philistich o'n taobh chiùil; agus ithidh iad suas Israel le beul farsuinn. Air son so uile cha 'n'èil a chorruidh air a pilleadh air falbh; ach tha a làmh fathast sìnte mach.

13 Ach cha 'n'èil an sluagh so air pill-tinn ris an ti a bhuail iad; ni mò dh'ìarr iad Tighearn nan sluagh:

14 Uime sin gearraidh an Tighearn as o Israel an ceann agus an t-earball, a' gheug agus an luachair, ann an aon là.

15 An duine aosmhor agus urramach, is esan an ceann; agus am fàidh a ta teagasg brèige, is esan an t-earball.

16 Oir tha luchd-stiùraidh an t sluagh so 'gan cur air seacharan; agus *bithidh* iadsan a stiùar leo air an slugadh suas.

17 Air an aobhar sin, cha dean an Tighearn gàirdeachas os ceann an òganacha, ni mò ni e iochd r'n dilleachdanaibh agus am bantrachaibh; oir tha gach aon diubh 'na chealgair agus 'na fhear dò-bheirt, agus tha gach beul a' labhairt amaid-eachd. Air son so uile cha 'n'èil a chorruidh air a pilleadh air falbh, ach tha a làmh fathast sìnte mach.

18 Oir loisgidh aingidheachd mar theine; ithidh i suas an dris agus an droighiorm; agus cuiridh i ri theine badan na frithe; agus éiridh iad an àird 'nan smùid⁴ a' dol suas.

19 Trid corruich Tighearna nan sluagh dhorchaicheadh an tìr; agus bithidh an sluagh mar chonnadh air son an teine: cha dean duine iochd air a bhràthair féin.

20 Agus bheir e teum air an làimh dheis, agus *gidheadh* bithidh e ocrach; agus ithidh e suas air an làimh chlì, agus cha bha iad sàsuichte; ithidh gach duine feoil a ghàirdein⁵ féin.

21 *Ithidh* Manaseh Ephraim, agus Ephraim Manaseh; agus bithidh iad le chèile an aghaidh Iudah. Air son so uile cha 'n'èil a chorruidh air a pilleadh air falbh, ach tha a làmh fathast sìnte mach.

CAIB. X.

1 *Eiridh* gu h-olc dhoibh-san a tha 'g orduchadh reachdan eucorach. 5 Claidhidh Dia na h-Asirianaich air son an droch ghniomhara. 20 Tèarnar iarmad do Israel. 24 Fhuair Iudah gealladh air saorsa. 28 Sgrìos nan Asirianach.

IS truagh dhoibhsan a ta 'g orduchadh reachdan eucorach, na sgrìobhaichean a ta ag àithneadh fòirneirt.

2 A thionndadh an fheumaich o bhreitheanas, agus a thabhairt an còrach⁶ le h-ainneart o bhochdaibh mo shluaigh; air chor as gu'm bi bantraichean 'nan cobhartaich dhoibh, agus *gu'n* creach iad na dilleachdain.

3 Agus ciod a ni sibh ann an là an smachdachaidh? agus anns an léir-sgrìos a thig o chéin? Cò dh'ionnsuidh a theicheas sibh chum cabhair? agus c'àit am fàg sibh 'ur glòir?

4 As m'eugmhais-sa aomaidh *iad* sìos fo na prìosanaich, agus tuitidh iad fo na mairbh. Air son so uile, cha 'n'èil a chorruidh air a pilleadh air falbh, ach tha a làmh fathast sìnte mach.

5 Ho Asirianaich, slat mo chorruidh; agus am bata 'nan làimh *is* e sin m'fhcarg.

¹ Oir uile choisbheart an fhìr-chogaidh 's a' chath, agus an éididh air a thumadh ann am fuil, bithidh iad a chum losgaidh, agus 'nan connadh do'n teine.

² leanabh-mic.

³ Athair na sìorruidheachd. Eabh.

⁴ deathaich.

⁵ righe.

⁶ dlighe.

6 An aghaidh cinnich chealgaich cuiridh mi e; agus an aghaidh sluaigh *ris am bheil* mo chorruch bheir mi dha àithne a thogail creiche, agus a thoirt leò cobhart-aich; agus g'an saltairt sìos mar chlàbar nan sràidean.

7 Gidheadh cha'n e sin a bhios 'na aire-san, agus cha'n e run a chridhe e; ach *is* e milleadh *tha* 'na chridhe, agus cinnich nach gann a ghearradh as.

8 Oir a deir e, Nach 'eil mo cheannard-an¹ uile 'nan rìghribh?

9 Nach 'eil Calno mar Charchemis? Nach 'eil Hamat mar Arphad? Nach 'eil Samaria mar Dhamascus?

10 Mar a ghlac mo làmh ròghachdan nan iodholan, aig an robh dealbhan snaidhte ni b'fhearr na iad sin a ta ann an Ierusalem agus ann an Samaria;

11 Mar a rinn mi ri Samaria agus r'a h-iodholaibh, nach dean mi mar an ceudna ri Ierusalem agus r'a dealbhaibh-san?

12 Ach tarlaidh, 'nuair a choimhlionas an Tighearn 'obair gu h-iomlan air sliabh Shioin agus air Ierusalem, gu'n dean mi dìoghaltas air toradh cridhe uaibhreigh rìgh Asiria, agus air sealladh àrd a shùl.

13 Oir deir e, Le neart mo làimhe rinn mi e, agus le mo ghliocas; oir tha deadh thuigse agam; agus dh'atharraich mi crìocha nam fineachan, agus chreach mi an ionmhasan, agus leag mi sìos an sluagh mar *dhuine* treun:

14 Agus fhuair mo làmh, mar nead, maoin nan slògh; agus mar chruinnicheas neach uighean a thréigeadh, mar sin chruinnich mise an talamh uile; agus cha robh aon a ghluais an sgiath, a dh'fhosgail an gob, no rinn biog.

15 An dean an tuadh uail an aghaidh an fhìr a ta gearradh leatha? An àrdaich an tuireasg e féin an aghaidh an fhìr a ta 'ga iomairt? mar gu'n sìneadh an t-slat *i féin* an aghaidh an neach a ta 'ga togail; no mar gu'n togadh an long suas e *féin* mar nach b'fhiodh a bh'ann.

16 Air an aobhar sin, cuiridh an Tighearn, Tighearn nan sluagh, caoile air a' mhuinntir reamhair; agus fuidh 'òir-dheirceas fadaidh e losgadh, mar losgadh teine.

17 Agus bithidh solus Israeil 'na theine, agus a Thi naomh 'na lasair; agus loisgidh agus caithidh e a dhroighionn agus a dhris ann an aon là:

18 Agus caithidh e glòir a fhrìdhe, agus 'achaidh tharbhaich, eadar anam agus fheoil; agus bithidh iad mar fhear-iom-chair brataich a' call a thréoir.

19 Agus bithidh fuigheall chraobhan a choille tearc, ionnus gu'n sgrìobh leanabh an àireamh.

20 Agus tarlaidh anns an là sin, nach leig iarmad Israeil, agus iadsan a théid as do thigh Iacoib, an taice ni's mò air an fhear a bhuail iad; ach leigidh iad an taice air an Tighearn, Ti naomh Israeil, ann am fìrinn.

21 Pillidh fuigheall², eadhon fuigheall do Iacob, dh'ionnsuidh Dhé uile-chumhachdaich.

22 Oir ged bhi do shluagh, O Israeil, mar ghaineamh na fairge, *cha* phill *ach* fuigheall diubh. An léir-sgrìos a dh'ord-uicheadh, ruitidh e thairis le ceartas.

23 Oir sgrìos, eadhon *sgrìos* sòruichte ni Iehobhah, Tighearn nan sluagh, am meadhon na tìre uile.

24 Air an aobhar sin mar so deir Iehobhah, Tighearn nan sluagh, Na biodh eagal ort, O mo shluagh, a ta chomh-nuidh ann an Sion, roimh an Asirianaich; le slat buailidh e thu, agus a bhata togaidh e suas a'd' aghaidh, a réir gnàth na h-Eiphit.

25 Ach fathast ùine ro ghearr, agus coimhlionar m'fhearg, agus mo chorruch 'nan léir-sgrìos.

26 Agus togaidh Tighearna nan sluagh slat-sgiursaidh 'na aghaidh, cosmhuil ri àr Mhidiain aig carraig Oreib: agus *mar a bha* a shlat air an fhaire, mar sin togaidh e suas i, a réir gnàth na h-Eiphit.

27 Agus tarlaidh anns an là sin, *gu'n* atharraichear 'eallach bhàrr do ghuaille, agus a chuing bhàrr do mhuineil; agus caithear a' chuing do bhrìgh³ na h-oladhungaidh.

28 Thàinig e gu Aiat, chaidh e thairis gu Migron; aig Michmas taisgidh e airneis⁴.

29 Chaidh iad null air an aisig⁵; ann an Gebah ghabh iad tàmh: tha Ramah air chrith; tha Gibeah Shaul a' teicheadh.

30 Tog suas do ghuth, O nighean Ghallim; cluinnear e gu ruig Lais, O Anatot thrugh⁶.

31 Theich Madmenah; tha luchd-àit-eachaidh Ghebim air gabhail na ruaige.

32 Fanaidh e fathast an là sin ann an Nob; crathaidh e a làmh *an aghaidh* cnuc nighinn Shioin, *an aghaidh* sleibh Ierusalem.

33 Feuch, sgathaidh Iehobhah, Tighearn nan sluagh, a' gheug le luasgadh mòr; agus bithidh iadsan a's àrde fàs air an gearradh sìos, agus na h-uaibhreigh air an isleachadh.

34 Agus gearraidh e dosan na frìdhe le

¹ mhaithlean.

³ dh'easbhuidh.

² iarmad, fuighealach.

⁴ a chungaidh, 'acfuin.

⁵ àth, àthan.

⁶ chuinn O Lais; freagair i O Anatot.

iatunn; agus tuitidh Lebanon le làimh chunnachdaich.

CAIB. XI.

¹ *Rioghachd shìochail an fhàillein a dh'fhàsas suas a freumh Iese. 10 Bithidh Criosd mar bhrataich do na cinnich, 12 agus tionailidh e r'a chèile diobaraich Israeil.*

A GUS thig geug a mach o bhonn Iese, agus fàsaidh faillean suas as a fhreumhaibh.

² Agus gabhaidh spiorad an Tighearna còmhnuidh air, spiorad gliocais agus tuisge, spiorad comhairle agus cumhachd, spiorad eòlais agus eagail an Tighearn:

³ Agus bithidh e geur-mhòthachail ann an eagal an Tighearn; agus cha'n ann a réir seallaidh a shùil a bheir e breth, no a réir claisteachd a chluas a bheir e achmhasan.

⁴ Ach le ceartas bheir e breth air a bhòchd, agus bheir e achmhasan le cothrom, as leth dhaoine ciùine na talmhainn; agus buailidh e an talamh le slait a bheoil, agus le anail a bhile marbhaidh e an t-aingidh.

⁵ Agus bithidh ionracas 'na chrìos m'a leasraidh, agus firinn' 'na crìos m'a ainibh.

⁶ An sin gabhaidh an madadh-alluidh còmhnuidh maille ris an uan, agus luidhidh an liopar sios maille ris a' mheann; agus an laogh, agus an leòmhann òg, agus an sprèidh reamhar le chèile; agus nì leanabh beag an stiùradh.

⁷ Agus ionaltraidh a' bhò agus am math-ghamhuin le chèile; luidhidh an àlach sios cuideachd; agus itidh an leòmhann comhlach² mar an damh.

⁸ Agus cluichidh an leanabh cìche air toll na nathrach nimhe; agus air nead na rìgh-nathrach cuiridh an leanabh a thàinig o'n chich a làmh.

⁹ Cha dochainn agus cha sgrios iad, air feadh mo shléibh naoimh-sa gu h-ìomlan; oir ìonar an talamh le eòlas an Tighearna, mar a chòmhaicheas na h-uisgeachan aigin na fairge.

¹⁰ Agus anns an là sin, bithidh freumh Iese 'na sheasamh mar bhrataich do na slòigh; d'a ionnsuidh-san iarraidh na cinnich, agus bithidh a thàmh glòrmhor.

¹¹ Agus tarlaidh anns an là sin, gu'n cuir an Tighearn a mach a làmh a ris an dara uair, a thoirt air ais fuighill a shluaigh, a dh'fhàgar dhiubh, o Asiria, agus o'n Eiphit, agus o Phatros, agus o Chus, agus o Elam, agus o Shinar, agus o Hamat, agus o innsibh³ na fairge.

¹² Agus togaidh e 'n àird bratach air son nan cinneach, agus tionailidh e

diobaraich Israeil, agus muinntir sgapta Iudah cruinnichidh e le chèile o cheithir chearnaibh na talmhainn.

¹³ Agus sguiridh farmad Ephraim, agus bithidh luchd-sàruchaidh Iudah air an gearradh as; cha bhi farmad aig Ephraim ri Iudah, agus cha sàruich Iudah Ephraim.

¹⁴ Ach leumaidh iad air guaillibh⁴ nam Philisteach an taobh an iar; creachaidh iad le chèile muinntir na h-àird' an ear; air Edom agus Moab leagaidh iad an làmh, agus bheir clann Amoin géill doibh.

¹⁵ Agus millidh an Tighearn teangadh na fairge Eiphitich, agus crathaidh e a làmh os ceann na h-Aimhne le a ghaoith làidir; agus buailidh e i 'na seachd sruthaibh, agus bheir e orra imeachd troimpe le cosaibh tioram⁵.

¹⁶ Agus bithidh rathad mòr aig fuigheall a shluaigh a dh'fhàgar o Asiria; mar a bha aig Israeil, anns an là san d'fhàinig e nìs o thir na h-Eiphit.

CAIB. XII.

¹ *Laoidh-bhuidheachais do'n Tighearn air son a mhaithis agus a chomhfhurtachd d'a shluaigh.*

A GUS their thu anns an là sin, Molaidh mi thu, O Thighearn, ged bha thu feargach rium, tha d'fhearg air a pilleadh air falbh, agus thug thu comhfhurtachd dhomh.

² Feuch, is e Dia mo shlàinte; earbaidh mi, agus cha bhi eagal orm; oir is e an Tighearn Iehobhah mo neart agus mo cheòl; is e fòs a's slàinte dhomh.

³ An sin tairngidh sibh uisge le h-aobhneas á tobraichibh na slàinte.

⁴ Agus anns an là sin their sibh, Molaidh an Tighearn, gairmibh air 'ainm; cuiribh an cèill a ghniomhara am measg nan cinneach; cumaibh air chuimhne⁶ gu bheil 'ainm air 'ardachadh.

⁵ Canaibh do'n Tighearn, oir rinn e gnìomh òrdheire; tha so aithnichte anns an talamh uile.

⁶ Eigh gu h-àrd, agus dean iolach, a bhean-àiteachaidh Shìoin; oir is mòr ann ad mheadhon Tì naomh Israeil.

CAIB. XIII.

¹ *Ghairm Dia a dhaoine treuna a chum a chorruich a chur an gnìomh. 5 Bhagair e Babilon a sgrios leis na Medich. 19 Fàsachadh agus léir-sgrios Bhabiloin.*

T ROM eallach⁷ Bhabiloin, a chunnaic Iseiah mac Amois.

² Air sliabh àrd togaibh suas bratach; éighibh riu gu h-àrd; sinibh 'ur làmh, a chum gu'n téid iad a steach air geatach-aibh nan uaislean.

³ Thug mi àithne do mo dhaoibh cois-

¹ tairisneachd. ² fodar. ³ eileanaibh.

⁴ buailidh iad a steach air crìochaibh.

⁵ nam brògaibh.

⁶ aithrisibh.

⁷ Fàistneachd dhubhach, Tairgeachd a' bhròin.

rigte; seadh, ghairm mi mo dhaoine treuna a chum mo chorruih a chur an gnìomh; muinntir a ta deanamh luath-ghaire ann am mhòrachd.

4 Fuaim mòr-chuideachd anns na sléibh-tibh, amhuil sluaigh mhòir; fuaim luasgaidh rioghachdan chinneach air an cruinneachadh le chéile; tha Tighearn nan sluagh a' deasachadh¹ feachd chum catha.

5 Tha iad a' teachd o thìr chéin, o iomall nan nèamha, an Tighearn agus buill-airm a chorruih, a mhilleadh na tìre gu léir.

6 Guilbìh gu h-àrd, oir tha là an Tighearna dlùth; mar léir-sgrìos o'n Uile-chumhachdach thig e.

7 Air an aobhar sin lagaichear na h-uile làmhan, agus leaghaidh gach cridhe duine.

8 Agus bithidh iad fo uamhas; ni piantan agus guinean greim orra; mar mhnaoi ri saothair craidhear iad; seallaidh iad gach aon air a chéile le h-iongantas; mar lasraichibh teine bithidh an eudana.

9 Feuch, tha là an Tighearna teachd, garg le feirg agus le dian chorruih, a chur na tìre fàs, agus a sgrìos nan ciontach a mach aise.

10 Oir cha tabhair reulta nèimh, agus a comh-shoillse, uatha an solus; bithidh a' ghrian air a dorchachadh² na dol a mach, agus cha toir a' ghealach air a solus dealradh.

11 Agus diolaidh mis' air an t-saoghal an droch-bheart, agus air na h-aingidh an euceart; agus cuiridh mi crìoch air àrdan nan uaibhreach; agus leagaidh mi sìos uail nan uamhasach.

12 Ni mi duine ni's luachmhoire na òr grinn; seadh duine, na fìor òr na h-Ophir.

13 Uime sin luaisgidh mi na nèamhan, agus gluaisear an talamh as 'àit, ann am feirg Tighearna nan sluagh, agus ann an là a dhian-chorruih.

14 Agus bithidh iad mar earb air a ruagadh, agus mar threud chaorach nach 'eil neach a' cuairteachadh; tionndaidhidh iad gach aon chum a shluaigh féin; agus teichidh iad gach aon g'a dhùthaich féin.

15 Gach fear a ghlacar, sàthar troimh e; agus na h-uile a dhlùth-leanas r'a chéile, tuitidh iad leis a' chlaidheamh.

16 Agus pronnar an naoidheana fa chomhair an sùl; bithidh an tìghean air an creachadh, agus am mnathan air an éigneachadh.

17 Feuch, dùisgidh mi suas 'nan aghaidh na Medich, aig nach bi meas air airgid; agus air son òir, cha bhi suim aca dheth.

18 Pronnaidh am boghachan na h-ògan-aich, agus cha dean iad iochd air toradh na bronn; cha ghabh an sùil truas do leanabaibh.

19 Agus bithidh Babilon, maise nan rioghachdan, glòir uail nan Caldeach, mar an léir-sgrìos a thug Dia air Sodom agus Gomorrah.

20 Cha'n àitichear gu bràth i, ni mò ghabhar còmhnuidh innte feadh linn nan linn; cha suidhich an t-Arabach bùth an sin; ni mò ni buachaillean buaile an sin.

21 Ach gabhaidh fiadh-bheathaichean an fhàsaich còmhnuidh an sin; agus bithidh an tìghean làn do uath-bheistean²; agus gabhaidh na cailleachan-oidheche tàmh an sin, agus ni na gabhair fhiadhaich mìre an sin.

22 Agus freagraidh na h-eoin fhiadh-aich a chéile 'na lùchairtibh, agus na dragona anns na seòmraichibh aoibhin, agus a ta a h-am am fagus, agus cha bhi a làithean air an sìneadh.

CAIB. XIV.

1 Gheall Dia gu'n deanadh e iochd air Israel, agus gu'n suidhichadh e iad fathast 'nam fearann féin. 3 Sgrìos rìgh Bhabiloin. 24 Rùn Dhé an aghaidh nan Asirianach. 29 Bhagradh Palestina.

OIR ni an Tighearn iochd air Jacob, agus ròghnaichidh e fathast Israel, agus suidhichidh e iad 'nam fearann féin; agus bithidh an coigreach air a cheangal riu, agus dlùth-leanaidh iad ri tìgh Iacob.

2 Agus gabhaidh na cinnich iad, agus bheir iad gu'n àit féin iad, agus sealbhaichidh tìgh Israeil iad am fearann an Tighearna, mar òglaich agus mar bhan-òglaich; agus ni iad braighdean dhiubhsan aig an robh iad 'nam braighdibh; agus riaghlaidh iad os ceann na muinntir a bha 'gan sàruchadh.

3 Agus tarlaidh, anns an là anns an tabhair an Tighearn dhuit fois o d' àmhghar, agus o d' mhi-shuaimhneas, agus o'n daorsa chruaidh a leagadh ort,

4 Gu'n tog thu an fhàisteachd³ so an aghaidh rìgh Bhabiloin, agus their thu, Cionnus a sguir an fear-sàruchaidh! cionnus a sguir ise a bha sgeadaichte le h-òr!

5 Bhreis an Tighearn lorg nan aingidh, slat rioghail an luchd-riaghlaidh.

6 Buan a bhuail na slòigh ann am feirg, le buille gun sgr; esan a thug fo ghéill na cinnich ann an corruich; tha e air a dhian-ruagadh, gun neach a' bacadh.

7 Tha an talamh uile aig fois, agus ann an suaimhneas; tha iad a' togail iolaich.

8 Tha na croinn-ghiuithais féin ri gàird-eachas tharad, agus croinn-sheudair

¹ ag cur an ordugh.

² uile-bheistean.

³ taigrèachd, seanachas bàird, briathar fìlìdh.

Lebanoin *ag ràdh*, O'n uair a thuit thusa, cha d'fhàinig fear-gearraidh a nìos 'nar n-aghaidh-ne.

9 Tha ionad nam marbh air gluasad shìos air do shon, gu *do* choinneachadh aig do theachd; tha e dùsgadh nam marbh air do shon, uile dhaoine mòra na talmhainn; tha e toirt air uile rìghrean nan cinneach éiridh suas o'n caithrichibh.

10 Labhairadh gach aon diubh, agus their iad riut, Am bheil thusa fòs air fàs lag mar sinne? An d'rinneadh thu cosmhuil ruinne?

11 Tha d'uaibhar air a thoirt a nuas chum na h-uaigne, *agus* fuaime d'innealachail; tha a' chnuimh air a sgaoileadh fodhad, agus *is iad* na cnuimheagan do chòmhdachadh.

12 Cionnus a ta thu air tuiteam o nèamh, a reul dhealach, a mhic na maidne! *Cionnus* a bha thu air do ghearradh sìos gu làr, *thusa* a thug fòghéill na cinnich.

13 'S ann a thubhairt thu ann ad chridhe, Thèid mi suas a chum nan nèamhan, os ceann reultan Dé àrdaichidh mi mo rìgh-chaitheir; agus suidhidh mi air sliabh a' chomhchrinneachaidh, air taobh na h-àirde tuath.

14 Thèid mi suas os ceann àirde nan neul: bithidh mi cosmhuil ris an Tì a's àirde.

15 Ach bheirear a nuas thu, chum na h-uaigne, gu taobhan an t-sluichd.

16 Iadsan a chì thu, amhaircidh iad gu gear ort, gabhaidh iad beachd dhìot: An e so, *deir iad*, am fear a thug air an talamh criothnachadh, a chuir rioghachdan air chrith?

17 A rinn an saoghal mar fhàsach, agus a leag sìos a bhailtean; nach d'fhosgail am prìosan d'a bhraighdibh?

18 Tha uile rìghrean nan cinneach, an t-iomlan diubh, a' luidhe sìos ann an greadhnachas, gach aon 'na fhàrdach féin.

19 Ach tha thusa air do thilgeadh mach as an uaigh, mar ghéig ghràineil, *mar* thrusan nan daoine a mharbhadh, a throimh-lotadh leis a' chlaideamh a chaidh sìos do chlachaidh an t-sluichd; mar chlosaich air a saltairt fò chosaibh.

20 Cha'n adhlacair thu 'nan co-chuideachd-san, a chionn gu'n do sgrios thu do dhùthaich, gu'n do mharbh thu do dhaoine; cha bh'iomradh¹ gu bràth air sliochd dhroch dhaoine.

21 Ulluidhibh àr air son a chloinne, air son aingidheachd an aithrichean; a chum nach² éirich iad, agus nach sealbhaich

iad an talamh, agus nach lìon iad ghaidh an domhain le bailtibh.

22 Oir éiridh mise 'nan aghaidh, *deir* Tighearn nan sluagh, agus gearraidh mi as o Bhabìlon an t-ainm agus an t-iarinad, agus am mac agus an t-ogha, *deir* an Tighearn.

23 Agus ni mi e 'na sheilbh do'n ghràineig, agus 'na phollaibh uisge; agus sguabaidh mi e le sguabh an léir-sgrìos, *deir* Tighearn nan sluagh.

24 Mhionnaich Tighearn nan sluagh, *ag ràdh*, Gu cinnteach mar a dhealbh mise, mar sin tarlaidh; agus mar a chuir mi romham, bithidh sin air bhuil;

25 A chum an t-Asirianach a bhriseadh ann mo dhùthaich, agus a shaltradh fo m' chosaibh air mo shleibhtibh: an sin falbhaidh a' chuing dhiubh, agus togar eallach bhàrr an guaille.

26 So a' chomhairle a ta air a suidheachadh mu'n talamh uile; agus so an làmh a ta sìnte mach thar na h-uile chinneachaidh.

27 Oir shònruich³ Tighearn nan sluagh a' chomhairle, agus cò a bhacas⁴? agus is i a làmh-san a ta sìnte mach, agus cò a philleas air a h-ais i?

28 Anns a' bhliadhna san d'fhuaireadh rìgh Ahas bàs, bha an trom eallach so⁵.

29 Na dean-sa gàirdeachas, O uile Phalestina, a chionn gu'n do bhriseadh slat an fhlair a bha 'gad bhualadh; oir o fhreumh na nathrach thig a mach rìgh-nathair, agus is toradh dhi nathair theinteach itealach.

30 Agus beathaichear ceud-ghlin nam bochd, agus luidhidh an t-ainnis sìos ann an tèaruinteachd; agus marbhaidh mi do fhreumh-sa le gorta, agus d'iarmaid cuiridh e gu bàs.

31 Nuallaich, O gheata; éigh, O chaithir; O Phalestina, tha thu uile air do leaghadh as; oir o'n àirde tuath thig deatach, agus cha bh'neach aonaranach⁶ 'na thràthaibh suidhichte⁷.

32 Agus cìod am freagradh bheirear do theachdairibh nan cinneach? Gu'n do leag an Tighearn bunait Shìoin, agus innte cuiridh bochdan a shluaigh an dòchas.

CAIB. XV.

1 Eallach nam Moabach do bhrìgh gu bheil an tìr air a fàsachadh, agus air a lomadh gu làr.

TROM eallach Mhoab. A chionn gu bheil Ar Mhoab air a fàsachadh, anns an oidheche, agus air a lomadh gu làr; a chionn gu bheil Cìr Mhoab air a fàsachadh, agus air a lomadh gu làr:

2 Chaidh e suas gu Bait agus gu Dibon,

¹ biùthas.

³ dh'orduch.

² mu'n.

⁴ bheir gu neo-bhrìgh?

⁵ thugadh seachad an fhàistneachd dhubhach so.

⁶ air chall, air ionndran.

⁷ na bhuidhneibh.

na h-ionadaibh àrda, a ghul. Ni Moab caoineadh air son Nebo agus air son Mhedeba; air gach ceann diubh *bithidh* maoile; *bithidh* gach feusag air a gearradh dheth.

3 Ann a sràidibh crioslaichidh siad iad fèin le eudach-saic; air mullach a tighean agus ann a sràidibh, caoinidh gach aon diubh, a' sìleadh dheur gu frasach.

4 Agus bithidh Hesbon ag éigheach, agus Elealeh; cluinnear an guth gu ruig Iahas; uime sin glaothaidh daoine arm-aichte Mhoab gu h-àrd; bithidh a beatha searbh dhi.

5 Tha mo chridhe ag éigheach air son Mhoab; *teichidh* a luchd-fuadain do Shoar, mar àigh tri bliadhna dh'aois; diridh iad uchdach Luhit le gul; oir ann an slighe Horonaim togaidd iad iolach mhillidh.

6 Oir bithidh uisgeacha Nimrim 'nan léir-sgrìos; oir tha an luibh air seargadh; tha am fear air teireachdainn; cha 'n eil ni glas¹ ann.

7 Air an aobhar sin, am beartas a fhuair iad, agus an ni sin a thaisg iad, bheir iad air falbh gu sruth² nan seil-each.

8 Oir chaidh an éigheach timchioll crìche Mhoab; *ràinig* a caoineadh gu Eglaim, agus a caoineadh gu Beer-elim.

9 Oir tha uisgeacha Dhimoìn làn fola; oir bheir mise tuilleadh air Dimon, an leomhan orra-san a théid as o Mhoab, agus air fuigheall na tìre.

CAIB. XVI.

1 *Chomhairlicheadh do Mhoab bhì umhal dha-san a shuidheas air rìgh-chaithir Dhaibhidh.* 6 Chaidh Moab a bhagradh le sgrìos air son 'àrdain, 'uail, agus 'fheirge.

CUIRIBHSE uan a dh'ionnsuidh na tìre, o Shela an fhàsaich, gu sliabh nigheann Shioin.

2 Oir mar eunlaith seacharanach, air am fògradh o'n nead, *mar sin* bithidh nigheana Mhoab aig àthannaibh Aruoin.

3 Tabhair comhairle, cuir an gnìomh breitheanas; dean do sgàile mar an oidhche ann an àirde mheadhon-là; fol-aich na diobaraich; na brathl am fòg-arach.

4 Gabhadh mo dhìobaraich tàmh maille riut, O Mhoab; bi a'd' ionad-foluich dhoibh o'n mhilltear; oir thàinig crìoch air an fhear-shàruchaidh, sgùir am fear-millidh; tha an luchd-saltairt air an caitheadh as an tìr.

5 Agus daingnìchear an rìgh-chaithir ann an tròcair, agus suidhidh e oirre ann am fìrinn, ann am pàillion Dhaibhidh, a' tabhairt brethe, agus a' rannsachadh na còrach, agus a' deifreachadh³ ceartais.

6 Chuala sinn uabhar Mhoab; *tha e* ro uaibhreach; 'àrdan, agus 'uail, agus 'fhearg; *ach* cha 'n eil a spionnadh⁴ d'a rèir.

7 Air an aobhar sin caoinidh Moab; air son Mhoab caoinidh gach aon; air son bunaite Chir-hareis ni sibh tuireadh; gu cinnteach *tha iad* air am bualadh.

8 Oir tha machraichean Hesboin air fàilneachadh, *agus* fionain Shìbmah; bhris maithèan nan cinneach sìos a fion-chroinn ghasta; ràinig iad gu Iaser; sgaoil iad *air feadh* an fhàsaich; shin a geugan iad fèin a mach, chaidh iad thar an fhaighe.

9 Air an aobhar sin guilidh mi le gul Iaseir air son fionain Shìbmah; uisgichidh mi thu le m' dheuraibh, O Hesboin agus Elealeh; oir dh'fhalbh a' chomh-ghair air son do mheas-samhraidh, agus air son d'fhogharaidh.

10 Agus tha aoibhneas agus gàirdeachas air an toirt air falbh o'n mhachair thorraich; agus anns na fion-lìosaibh cha dean iad ceòl, cha tog iad iolach; anns na h-amaraibh cha bhruth am fear-bruthaidh fion; thug mise air an iolach sgur.

11 Uime sin ni mo chom fuaim mar chlàrsaich, air son Mhoab; agus mo thaobh a stigh, air son Chir-hareis.

12 Agus tarlaidh, 'nuair a chìthear gu'n do sgòthich Moab e fèin air an ionad àrd, gu'n téid e steach d'a ionad naomh a dheanamh urnuigh; ach cha soirbhich leis.

13 So am focal a labhair an Tighearn mu thimchioll Mhoab o'n àm sin⁵.

14 Ach a nis labhair an Tighearn ag-ràdh, an ceann thri bliadhna, mar bhliadhnaibh fir-thuarasdail, nìthear glòir Mhoab tàireil, le a mhòr shluagh uile; agus *bithidh* am fuigheall ro bheag *agus* anmhuinn.

CAIB. XVII.

1 *Tha Siria agus Israel air am bagradh.* 6 Trèigidh fuigheall do Israel an òdhol-aoraidh. 9 Sgrìosar a' chuid eile dhiubh a chionn gu'n do dhà-chuimhnich iad Dia an slàinte.

TROM callach Dhamascuis. Feuch, tha Damascus air 'atharrachadh o *bhì 'na* bhaile, agus bithidh e 'na thòrr léir-sgrìos.

2 Tha bailtean Aroir air an tréigsinn; bithidh iad air son threud a luidheas sìos, agus cha *bhì neach* 'g am fuadachadh.

3 Agus dealaichidh an daingneach o Ephraim, agus an rioghachd o Dhamascus; agus fuigheall Shìria, bithidh iad mar ghloir chloinne Israeil, deir Tighearn nan sluagh.

4 Agus tarlaidh anns an là sin, gu'm bi

¹ uaine. ² gleann. ³ luathachadh.

⁴ a bhreugan. ⁵ o cheann fada.

glòir Iacoib air a caitheadh as, agus fàsaidh saill 'fheòla caol.

5 Agus bithidh e amhuil an uair a chruinnicheas *neach* fogharadh an arbh-air, agus a bhuaineas a ghairdean na diasan; agus bithidh e amhuil a thionailleas *neach* diasan ann an gleann Rephaim.

6 Gidheadh fàgar ann fuigheall dhearc-an, mar ann an crathadh a' chroinn-oladh; dha no trì do dhearcanaibh air mullach a' mheangain a's àrde; ceithir no cùig air a gheugaibh iomallach torrach, deir an Tighearn Dia Israeil.

7 Air an là sin amhaircidh duine air a Chruith-fhear, agus seallaidh a shùilean air Tì naomh Israeil.

8 Agus cha'n amhairc e air na h-altair-ibh a rinn a làmhà féin, agus air an nì sin a dhealbh a' mheoir cha seall e; aràon na doireachan agus na dealbhan.

9 Anns an là sin bithidh a' bhailtean daingnichte cosmhuil ri meangan a dh'fhàgadh, no ri géig a dh'fhàg iad, roimh chloinn Israeil; agus bithidh léir-sgrìos ann.

10 A chionn gu'n do dhì-chuimhnich thu Dia do shlàinte, agus nach robh thu cuimhneachail air carraig do neirt: air an aobhar sin suidhichidh tu craobhan taitneach, agus suidhichidh tu failleana coimheach.

11 Anns an là bheir thu air do chraobhan fàs, agus anns an oidheche bheir thu air do shìol cinntinn; *ach bithidh am fogharadh 'na dhùn ann an là a' dhoilgheis* ¹ agus a' bhròin gun dòchas.

12 Is an-aobhain do mhòr chuideachd nam fineacha lìonmhor, *a ta deanamh fuaime mar fhuaim nan cuantan*; agus do bheucaich nan cinneach, *a ta ri beucaich cosmhuil ri toirm uisgeacha làidir*.

13 Beucaidh na cinnich cosmhuil ri toirm mhòrain uisgeacha; ach bheir *Dia* dhoibh achmhasan, agus teichidh iad fad air falbh; agus fuadaichear iad mar chanach an t-sléibh roimh'n ghaoith, agus mar chuariteig roimh an ioma-ghaoith.

14 Agus, feuch, ri h-àm an fheasgair, uamhas; agus mu'n tig a' mhaduinn, cha'n *eil* e ann. So cuibhrionn na muinntir a ta 'gar creachadh, agus crann-chur na dream a ta 'gar spuinneadh².

CAIB. XVIII.

¹ Bhagair Dia gu'n sgrìosadh e luchd-àiteachaidh Etiopia. ⁷ Bheir tìrean iomallach tabhartas gu Tighearna nan sluagh.

IS truagh do'n tìr a ta folaichte le sgiathaibh, a ta air taobh thall aimh-niechan Etiopia.

2 A ta cur theachdairean air an fhairge, agus ann an eathraichibh cuilce air aghaidh nan uisgeachan, *ag ràdh*, Imich-

ibh, a theachdairean luatha, gu cinneach air a sgaòileadh a mach agus air a lom-adh³; gu sluagh uamhasach o'n toiseach gu ruige so; gu cinneach air a thomhas a mach leis an t-sreing, agus air a shaltairt sìos; aig am bheil 'fhearann air a chreachadh leis na h-aimhnichibh.

3 Sibhse uile a luchd-àiteachaidh an t-saoghail, agus a ta gabhail còmhnuidh air an talamh, an uair a thogar bratach suas air na sléibhtibh, faicibh; agus an uair a shéidear trompaid, éisdibh.

4 Oir mar so thubhairt an Tighearn rium, Gabhaidh mi fois, agus bithidh mo shùil air m'àite-còmhnuidh; mar theas dealrach air an fheur, mar neul dealta ann an teas an fhogharaidh.

5 Oir roimh an fhogharadh, 'nuair a bhitheas am blàth iomlan, agus a bhitheas am fion-dhearc an-abuich a' tilgeadh a bhlàtha; gearraidh e dheth na meoir le corranaibh-sgathaidh, agus na geuga bheir e air falbh, agus gearraidh e sìos.

6 Fàgar iad le chéile gu eunlaith nam beann, agus gu beathaichibh na talmhainn; agus cuiridh an t-eunlaith thairis an samhradh orra, agus cuiridh gach uile bheathach na talmhainn thairis an geamh-radh orra.

7 Anns an àm sin bheirear tabhartas gu Tighearn nan sluagh o chinneach air a sgaòileadh a mach agus air a lomadh; agus o shluagh uamhasach o'n toiseach gu ruige so; cinneach air a thomhas a mach leis an t-sreing, agus air a shaltairt sìos, aig am bheil an fearann air a chreachadh leis na h-aimhnichibh, gu ionad ainme Tighearna nan sluagh, gu sliabh Shioin.

CAIB. XIX.

¹ Eallach na h-Eiphit. ¹¹ Amaideachd cheannardan Shoin. ¹⁸ Fàistneachd mu thimchioll na h-Eiphit; ²³ agus mu thimchioll Israeil agus Asiria.

TROM eallach na h-Eiphit. Feuch tha an Tighearn a' marcachd air neul luath, agus a' teachd do'n Eiphit; agus bithidh iodhola na h-Eiphit air an gluasad 'na fhianuis; agus leaghaidh cridhe na h-Eiphit 'na meadhon.

2 Agus cuiridh mis' Eiphitich an aghaidh Eiphiteach; agus cogaidh iad gach fear an aghaidh a bhràthar, agus gach fear an aghaidh a choimhearsnaich; baile an aghaidh baile, agus rioghachd an aghaidh rioghachd.

3 Agus fannaichidh spiorad na h-Eiphit 'na meadhon; agus cuiridh mi ann an neo-bhrìgh a comhairle; agus iarraidh iad a chum nan ìodholan, agus a chum nan druidhean, agus a chum na muinntir aig am bheil leannain-shith, agus a chum an luchd-fiosachd.

¹ na seilbhe.

² sladadh.

³ 'fhionnadh.

4 Agus bheir mi thairis na h-Eiphitich do làimh thighearna an-íochdmhoir; agus riaghlaidh rìgh borb os an ceann, deir an Tighearn, Tighearn nan sluagh.

5 Agus fàilnichidh na h-uisgeachan o'n fhaire, agus thèid an Amhainn an deòth-adh, agus tiormaichear suas i.

6 Agus tionndaidhidh iad na h-aimhnich-ean fad a leth-taobh, agus bithidh na sruthan dìonaidd air an deanamh falamh agus tioram; seargaidh a' chuile agus an luachair.

7 Na luibhean ùrar ri taobh nan sruth, aig beul nan sruth, agus gach ni a chuir-eadh an cois nan sruth, seargaidh, sguabar air falbh, agus cha bhi e ann ni's mò.

8 Agus ni na h-iasgairean bròn, agus ni iadsan uile ta tilgeadh dubhain anns an amhainn caoidh; agus fannaichidh iadsan a ta sgaoileadh liontan air aghaidh nan uisgeachan.

9 Agus cuirear gu h-amhladh iadsan a ta 'g oibreachadh an lìn ghrinn, agus iadsan a ta figheadh lion-oibre.

10 Agus sgaoilear as a chéile innleachd-an¹ gach uile neach a ni claisean agus linneachan air son éisg.

11 Gu cinnteach is amadain ceannardan Shoain; thug comhairlichean glice Pharaoh comhairle mhi-chéillidh; cionnus a deir sibh ri Pharaoh, Is mise mac nan daoine glice, mac nan rìghrean a bh'ann o chian.

12 C'àit *am bheil* iad? Cia *iad* do dhaoine glice? innseadh iad dhuit a nis, agus cuireadh iad an céill, ciod i comhairle Tighearna nan sluagh do thaobh na h-Eiphit.

13 Dh'fhàs ceannardan Shoain 'nan amadain, tha ceannardan Noph air am mealladh; agus thug iad air an Eiphit dol air seacharan, *eadhon* luchd-taice a treubhan.

14 Mheasg an Tighearn 'nam meadhon spiorad seacharain; agus thug iad air an Eiphit dol air seacharan 'na h-uile oibrìbh, cosmhuil ri misgcar a' tuisleachadh 'na sgeith.

15 Ni mò bhithreas obair air bith anns an Eiphit, aig a' cheann no aig an earball, aig a' ghéig no aig an luachair, r'a dheanamh.

16 Anns an là sin bithidh an Eiphit cosmhuil ri mnaibh; agus bithidh crith agus geilt oirre, roimh chrathadh làimhe Tighearna nan sluagh, a chrathas e os a ceann.

17 Agus bithidh tìr Iudah 'na cùis-eagail do'n Eiphit; gach neach a ni luadh oirre, gabhaidh e eagal ann féin; air son comhairle Tighearna nan sluagh, a ghabh e 'na h-aghaidh.

18 Anns an là sin, bithidh cùig bailtean ann an tìr na h-Eiphit, a labhairt cainnt Chanaain, agus a' mionnachadh do Thighearn nan sluagh; goirear do aon diubh Baile an sgrios.

19 Anns an là sin bithidh altair do'n Tighearn ann am meadhon tìre na h-Eiphit; agus carradh aig a crìch do'n Tighearn.

20 Agus bithidh e mar chomharadh agus mar fhianuis do Thighearn nan sluagh ann an tìr na h-Eiphit; oir glaothaidh iad ris an Tighearn air son an luchd-sàruchaidh, agus cuiridh e d'an ionnsuidh fear-saoraidh, eadhon fear treun, agus fuasglaidh e iad.

21 Agus bithidh an Tighearn aithnichte do'n Eiphit, agus aithnichidh na h-Eiphitich an Tighearn anns an là sin; agus bheir iad iobairt agus tabhartas uatha; agus geallaidh iad gealladh² do'n Tighearn, agus coimhlionaidh iad e.

22 Agus buailidh an Tighearn an Eiphit, a' bualadh agus a' leigheas; agus pillidh iad dh'ionnsuidh an Tighearn, agus éisidh esan ri'n guidhe, agus leighisidh e iad.

23 Anns an là sin bithidh rathad mòr o'n Eiphit gu Asiria; agus thig an t-Asirianach do'n Eiphit, agus an t-Eiphiteach gu Asiria; agus ni an t-Eiphiteach aoradh maille ris an Asirianach.

24 Anns an là sin measar Israel an treas aon, maille ris an Eiphit agus ri Asiria, 'na bheannachadh ann am meadhon na tìre;

25 A bheannaicheas Tighearn nan sluagh, ag ràdh, Beannaichte gu robh an Eiphit, mo shluagh-sa; agus Asiria, obair mo làmh; agus Israel, m'oighreachd.

CAIB. XX.

1 Fàidheadaireachd mu thimchioll braighean na h-Eiphit agus Etiopia.

ANNS a' bhliadhna san d'thàinig Tartan gu Asdod; an uair a chur Sargon rìgh Asiria a mach e, agus chog e an aghaidh Asdoid agus ghlac se e;

2 Anns an àm sin labhair an Tighearn le Isaiah mac Amois, ag ràdh, Imich, agus fuasgail an t-eudach-saic o d'leasraidh, agus cuir dhìot do bhrògan bhàrr do chos; agus rinn e mar sin, ag imeachd lomnochd agus cas-ruisgte³.

3 Agus thubhairt an Tighearn, Amhuil a dh'imich m'òglach Isaiah, lomnochd agus cas-ruisgte trì bliadhna, 'na chomharadh agus 'na iongantais air an Eiphit agus air Etiopia;

4 Mar sin bheir rìgh Asiria air falbh braighean na h-Eiphit, agus fògaraich Etiopia, òigridh agus seann daoine, le an

¹ liontan.

² boidichidh iad boid.

³ caslom.

taobh cùil air a leigeadh ris, a chum nàire na h-Eiphit.

5 Agus bithidh iad fuidh amhladh, agus gabhaidh iad nàire do Etiopia *bu bliun-dòchais* doibh, agus do'n Eiphit *a b' aobhar* uail doibh.

6 Agus their fear-àiteachaidh na tìre so auns an là sin; Feuch is amhuil so ar bun dòchais, gus¹ an do theich sinn air son cabhair, a chum gu'm bitheamaid air ar saoradh o rìgh Asiria; cionnus ma ta thèid sinn as?

CAIB. XXI.

¹ Ann an sealladh chumnaic am fàidh sgrìos *Bhabiloìn*. ¹¹ Thug e rabhadh do Edom. ¹³ Aimsir shuidhichte trioblaid Arabia.

TROM eallach fàsaich na fairge. Mar dhoinionnaibh anns an àirde deas, a' dol seachad; o'n fhàsach tha e teachd, o thir uamhasaich.

2 Dh'fhoillsicheadh sealladh eagalach domh; tha an cealgair a' caitheadh féill, agus tha am fear-creachaidh a' creachadh. Rach suas O Elaim; teannaich O Mhedia; chuir mise crìoch air a h-uile osnaich.

3 Uime sin lìonadh mo leasraidh le cràdh; ghlac piantan mi, mar phiantaibh mnà ri saothair-chloinne. Bha mi air mo chromadh sìos, an uair a chuala mi; dh'fhàs mi air chrith, 'nuair a chunnaic mi.

4 Chlisg mo chridhe; chuir uamhas fiamh orm; feasgar mo shòlais thionndaidh e gu h-uamhunn domh.

5 Deasaich ambòrd; suidhich an fhaire; ith; òl; éiribh, a cheanna-fcadhna, ung-aibh an ghiath.

6 Oir mar so thubhairt an Tighearn rium, Imich, suidhich fear-faire; an ni a chi e, innseadh e.

7 Agus chunnaic e carbad le dà mharach, carbad le asalaibh, agus carbad le càmhalaibh; agus thug e fa'near gu dìchiollach le geur aire;

8 Agus ghlaodh e, Leòmhann²; Mo thighearn, ta mi a'm' sheasamh an còmh-nuidh ann am ionad faire, air feadh an là; agus tha mi a' fantuinn air mo fhreiceadan ré gach oidhche.

9 Agus, feuch, an so tha carbad do dhaoineibh a' teachd, le dà mharach. Agus fhreagair e agus thubhairt e, Tha Babilon air tuiteam, air tuiteam; agus tha uile dhealbhan snaidhte a diathan air am briseadh gu làr.

10 Och mo bhualadh, agus arbhar m'ùrlair! an ni a chuala mi o Thighearn nan sluagh, Dia Israeil, chuir mi an céill duibhse.

11 Trom eallach Dhumah. Dh'eigh e rium o Sheir, Fhir na faire, ciod o'n oidhche? Fhir na faire, ciod o'n oidhche?

12 Thubhairt am fear-faire, Tha a' mhaduinn a' teachd, agus fòs an oidhche: ma dh'fhiosraicheas sibhse, fiosraichibh: pillibh, thigibh.

13 An fhàisteachd mu thimchioll Arabia. Auns an fhàisteachd ann an Arabia gabhaidh sibh tàmh, a chuideachda-siubhail Dhedanim.

14 Thug luchd-àiteachaidh tìre Thema uisge dh'ionnsuidh an tartmhoir; le an aran thàinig iad an còdhail fhògarach.

15 Oir o na claidhibh theich iad, o'n chlaidheamh rùisgte³, agus o'n bhogha lùbta, agus o bhoile a' chogaidh.

16 Oir mar so thubhairt an Tighearn rium, Fathast bliadhna, mar bhliadhnaibh fir-thuarasdail, agus bithidh uile ghlòir Chedair air caitheadh as.

17 Agus lughaichear fuigheall àireimh nam fear-bogha, fir threuna do mhacaibh Chedair; oir labhair an Tighearn Dia Israeil e.

CAIB. XXII.

¹ Tha am fàidh a' còidh léir-sgrìos nan Iudhach. ⁸ Chronaich e iad a chionn gu'n do chuir iad an dòchas 'nan innteachdaibh féin. ¹⁵ Roimh-innis am fàidh sgrìos Shebna. ²⁰ Ardachadh Eliacim.

TROM eallach glinn an taisbein. Ciod a thàinig ort a nis⁴, gu'n deachaidh thu gu léir suas gu mullach nan tiglean?

2 Thus⁵ a bha làn farum⁵, a'd' chaithir fluaimnich, a'd' chaithir aoibhin: do dhaoine a th'air am marbhadh, cha do mharbhadh leis a' chlaidheamh iad; ni mò is anns a' chath a dh'eug iad.

3 Tha do ghiath-fheadhna uile air siubhal le chéile, cheangladh iad leis na fir-bhogha; na h-uile a fhuaradh annad, cheangladh iad le chéile, theich iad fad air falbh.

4 Air an aobhar sin thubhairt mi, Tionndaidh air falbh uam; guilidh mi gu goirt; na feuchaibh ri comh'fhurtachd a thoirt domh, air son léir-chreach nighinn mo shluaigh.

5 Oir is là cruaidh iomairt e, agus saltairt sìos, agus buairidh, o Iehobhah Tighearn nan sluagh, ann an gleann an taisbein; a' briseadh sìos bhallachan, agus a' glaothlach ris na beanntaibh.

6 Agus tha Elam a' giùlan a' bhuilg-shaighead, le carbad do dhaoineibh agus le mare-shluagh; agus tha Cir a' rùsgadh na sgéithe.

7 Agus tarlaidhgu'm bi rogha do ghleann air an lìonadh le carbadaibh, agus cuiridh na marcaich iad féin an ordugh fa chomh-air a' gheata.

¹ dh'ionnsuidh.

² mar gu'm biodh Leòmhann.

³ tharuingte.

⁴ Ciod a dh'fhaireich thu nis.

⁵ iomairt.

8 Agus thugadh air falbh còmh-dach Iudah; agus sheall thu san là sin ri airm¹ tighe na frithe.

9 Agus chunnaic sibh bearnan baile Dhaibhidh, gu bheil iad lìonmhor; agus chruinnich sibh uisgeacha na linne iochd-araich.

10 Agus dh'àireamh sibh tighean Ierusalem, agus bhris sibh sìos na tighean a neartachadh a' bhalla.

11 Agus rinn sibh clais eadar an dà bhalla, air son uisge na seann linne; ach cha d'amhaire sibh a'rsan a rinn e; agus esan a dhealbhadh o shean e, cha d'thug sibh fa'near.

12 Agus anns an là sin ghairn Iehobhah Tighearn nan sluagh gu gùl, agus gu caoidh, agus gu maoile, agus gu crìos-lachadh le eudach saic:

13 Ach feuch, aoibhneas agus aighear, marbhadh dhamh agus casgairt chaorach, itheadh feòla agus òl fìona; Itheamaid agus òlaimaid, oir am màireach gheibh siun bàs.

14 Agus dh'fhoillsicheadh le Tighearn nan sluagh ann mo chluasaibh, Gu deimhin cha ghlanar an aingidheachd so air falbh uaibh, gus am faigh sibh bàs, deir Iehobhah Tighearn nan sluagh.

15 Mar so deir Iehobhah Tighearn nan sluagh, Imich, rach a dh'ionnsuidh an stiubhaird² so, dh'ionnsuidh Shebna, a ta os ceann an tighe, agus abair ris;

16 Cìod a th'agad an so? agus cò a th'agad an so, gu'n do chladhaich thu mach uaigh an so air do shon féin? mar neach a ta cladhachadh mach uaighe dha féin gu h-àrd, a ta gearradh àite-còmh-nuidh dha féin ann an carraig.

17 Feuch tilgidh an Tighearn a mach thu, 'gad thilgeadh a mach gu làidir; agus ni e gu cinnteach do còmh-dachadh.

18 Gu cinnteach cuiridh e car dhòt mu'n cuairt, agus bheir e urchair air falbh dhuit mar spitheig gu tìr fharsuinn; ann an sin gheibh thu bàs, agus ann an sin bithidh do charbada sgiamhach 'nan nàire do thigh do thighearn.

19 Agus iomainidh mi á d'ait thu, agus o d'imbhe tilgidh mi sìos thu.

20 Agus tarlaidh anns an là sin, gu'n gairm mise m'òglach Eliacim mac Hiciah;

21 Agus sgeadaichidh mi e le d'fhalluinn-sa, agus le do chrìos neartaichidh mi e; agus d'uachdaranachd bheir mi thairis ann a làimh; agus bithidh e 'na athair do luchd-àiteachaidh Ierusalem, agus do thigh Iudah.

22 Agus iuchair tighe Dhaibhidh cuiridh mi air a ghualainn; agus fosgailidh e,

agus cha druid aon neach; agus druididh e, agus cha'n fhosgail aon neach.

23 Agus daingnichidh mi e mar tharainn ann an àite cinnteach; agus bithidh e mar chaithir ghlòrmhoir air son tighe 'athar.

24 Agus crochaidh iad a'rsan uile ghlòir tighe 'athar, an sìochd agus an gineal, gach soitheach beag, o na h-uile ghnè chuach gus na h-uile ghnè aghann.

25 Anns an là sin, deir Tighearn nan sluagh, bithidh an tarann abha air a suidheachach ann an àit daingean air a h-atharrachadh; agus gearrar sìos i, agus tuitidh i; agus gearrar an eallach a bha oirre air falbh; oir labhair an Tighearn e.

CAIB. XXIII.

1 Léir-sgrìos eagalach Thirus. 15 An ceann deich agus trì fichead bliadhna pillidh Tirus chum a cosnaidh, agus ni i strìopachas le uile rioghachdaibh an domhain.

TACROM eallach Thirus. Deanaibh caoineadh a longa Tharsuis; oir sgrìosadh i gu tur, ionnus nach 'eil tigh no fardoch³; o thalamh Chitìim dh'fhoillsicheadh dhoibh e.

2 Bithibh tosdach, a luchd-àiteachaidh an eilein: lìonadh thu le ceannaichubh Shidoin, a ta suibhal thu le cuan.

3 Agus sìol Shìoir o uisgeachaibh mòra, fàs na h-Aimhne, b'e sin a teachd-a-stigh; agus bha i 'na margadh do na cinnich.

4 Bìodh nàir ort, O Shidoin, oir labhair an fhairge, eadhon neart na fairge, ag ràdh, cha robh mi ri saothair, agus cha d'rug mi clann; cha d'araich mi òganaich, ni mò thog mi suas òighean.

5 Mar a bha 'nuair a chualas sgeul mu'n Eiphit, mar sin bithidh iad fo àmhghar ri cluinntinn sgeùil mu Thirus.

6 Rachaibh null gu Tarsus; deanaibh caoineadh, a luchd-àiteachaidh nan eilean.

7 An i so bhur caithir aoibhin⁴, aig am bheil a h-aois o aimsir chéin? Gùlainidh a cosan féin i fad as gu fantuinn air chuairt.

8 Cò a ghabh a' chomhairle so an aghaidh Thirus, a thug seachad corona rioghail, aig am bheil a ceannaichean 'nam prionnsaibh⁵; agus a luchd-malairt 'nan daoinibh urramach na tìre?

9 Is e Tighearn nan sluagh a dh'orduich e, a chur smala air uabhar gach uile ghlòire, agus a thabhairt uile uaislean na tìre fuidh dhimeas.

10 Ruith thairis air d'fhearann, mar amhainn, O nighean Tharsuis; cha 'n'eil neart⁶ ann ni's mò.

11 Shìn e a làmh thar an fhairge; chrath e na rioghachdan; thug an Tighearn àithne an aghaidh na caithreach a ta 'na

¹ tigh-airm, arm-lann. ² an fhir riaghlaidh.

³ aràon a sligh agus a muigh.

⁴ aighireach, shuuntach.

⁵ triathaibh, fathaibh.

⁶ crìos. Eabh.

ceannaiche, chum a daingnichean làidir a sgrios.

12 Agus thubhairt e, Cha dean thu caithream nì's mò, O òigil shàruichte, a nigh-ean Shidoin; éirich, rach thairis gu Citim; an sin fòs cha'n fhaigh thu suaimhneas.

13 Feuch tìr nan Caldéach; cha robh an sluagh so ann, *agus an* do shuidhich an t-Asirianach i air son luchd-àiteachaidh an fhàsaich; thog iad a baidealan¹, chuir iad suas a luchairtean; *agus* rinn e a sgrios.

14 Guilbigh gu h-àrd, a longa Tharsuis; oir sgriosadh² bhur neart.

15 Agus tarlaidh anns an là sin, gu'n leigear air dearmad Tirus deich agus trì fichead bliadhna, a réir là lean aon rìgh; an ceann deich agus trì fichead bliadhna, scinnidh Tirus mar striopaich.

16 Glac do chlàrsach, cuartich am baile, a striopach a bha air do dhearmad; dean ceòl gu binn; seinniomadh òran; a chum gu'n cuimhuichear a ris thu.

17 Agus an ceann deich agus trì fichead bliadhna, thig an Tighearn a dh'amharc Thiruis; agus pillidh i a chum a cosnaidh; agus nì i striopachas le uile rioghaclaidibh an domhain, a ta air aghaidh na talmhainn.

18 Agus bithidh a malairt agus a buannachd naomh do'n Tighearn; cha taisgear suas e, agus cha ghleidhear gu tèaraint e; oir bithidh a malairt air son na muinntir a ta chomhnuidh am fianuis an Tighearn, air son lòn a shàsuicheas, agus air son eudaich a mhaireas.

CAIB. XXIV.

1 Breitheanas uamhasach an Tighearn air an tìr.

13 Clùthaichidh iarmad e le h-aoibhneas.

16 Uamhas luchd-àiteachaidh na talmhainn.

23 Rìoghaichidh Tighearna nan sluagh air beinn Shidoin.

FEUCH, tha an Tighearn a' deanamh an fhearainn falamh, agus 'ga chur fàs; tha e 'ga thionndadh bun os ceann, agus a' sgapadh a' luchd-àiteachaidh.

2 Agus tarlaidh, mar a *bhios* an sluagh, mar sin *bithidh* an sagart³; mar a *bhios* an t-òglach, mar sin *bithidh* a mhaighstir; mar a *bhios* a' bhanoglach, mar sin *bithidh* a ban-mhaighstir; mar a *bhios* an ceannaiche, mar sin *bithidh* am fear-reic; mar a *bhios* esan a bheir iasachd, mar sin *bithidh* esan a ghabhas iasachd; mar a *bhios* am fear a ghabhas riadh, mar sin *bithidh* am fear a bheir riadh uaidh.

3 Nithear an tìr gu tur falamh, agus creachar i gu buileach⁴; oir labhair⁵ an Tighearn am briathar so.

4 Tha an tìr ri caoidh *agus* a' seargadh; tha an saoghal air lagachadh *agus* a' seargadh; tha uaislean⁶ na tìre air lagachadh.

5 Tha an tìr eadhon air a truailleadh fuidh a luchd-àiteachaidh; oir bhris iad an reachd, dh'atharraich iad an t-ordugh; sgaoil iad an coimhcheangal siorruidh.

6 Air an aobhar sin dh'ith mallachd suas an tìr, agus tha a luchd-àiteachaidh air am fàsachadh⁷; uime sin tha luchd-àiteachaidh na tìre air an losgadh suas, agus is tearc an dream a dh'fhagadh.

7 Tha am fion nuadh ri caoidh, tha an fhìonan lag, tha luchd a' chridhe aoibhin uile ag osnaich.

8 Sguir fuaim aighireach nan tiompan; theirig luathghaire na muinntir a bha ri gairdeachas; sguir aighir na clàrsaich.

9 Cha'n òl iad fion le ceòl; bithidh deoch làidir searbh dhoibh-san a dh'òlas i.

10 Tha caithir na mi-riaghailt⁸ air a briseadh sìos; tha gach tigh air a dhruid-eadh suas, air chor as nach feud aon neach dol a steach.

11 Tha gaoir anns gach sràid air son fìona; dhorchaidheadh gach aighir; shiubhail gairdeachas an fhearainn air falbh.

12 Dh'fhagadh léir-chreach anns a' bhaile, agus le buaireas bhriseadh sìos an geata.

13 An uair a bhitheas mar so ann am meadhon na tìre, am measg an t-sluaigh, *bithidh* amhuil crathadh a' chroinn-oladh, *agus* mar an dioghluam an uair a chrìochnaichear am fion-fhogharadh.

14 Togaidh iadsan an guth, clùthaichidh iad gu h-àrd mòrachd an Tighearna; nì iad iolach o'n fhaireg.

15 Uime sin anns an teine⁹ glòraichibh an Tighearn; eadhon ainm an Tighearna Dia Israeil, ann an eileanaibh a' chuain.

16 O iomall na talmhainn chuala sinn òran, eadhon glòir do'n fhìrean; ach thubhairt mise, mo chaoile, mo chaoile; mo thruaighe mi! tha na mealltairean a' mealladh, seadh le foill tha na mealltairean a' mealladh.

17 Tha an t-uamhas, agus an slochd, agus an ribe ort, O fhir-àiteachaidh na tìre.

18 Agus tarlaidh, esan a theicheas o ghuth an uamhais, gu'n tuit e san t-slochd; agus esan a thig a nìos o mheadhon an t-sluichd, gu'n glacar anns an ribe e; oir tha na tuil-dhorsan o'n àird air am fosgladh; agus tha bunaitean na talmhainn air an luasgadh.

¹ tìran.

² dhithicheadh.

³ mar a thachairas do'n t-sluagh, mar sin tachairidh do'n t-sagart, &c.

⁴ baileach.

⁵ bhriathraich.

⁶ uaisle dhaoine.

⁷ oir tha a luchd-àiteachaidh ciontach.

⁸ a' caithir fhaondrach.

⁹ ionadaibh grìnach, gleannlaibh.

19 Tha an tìr gu tur air a briseadh sìos ; tha an tìr air a sgaoileadh gu buileach as a chéile ; tha'n tìr air a luasgadh gu garbh.

20 Bithidh an tìr a' gluasad¹ thuig agus uaithe mar mhigear ; agus atharrachear i mar bhothan-tàimh ; oir luidhidh a h-aingidheachd gu trom oirre ; agus tuitidh i, agus cha'n éirich i nì's mò.

21 Agus tarlaidh, anns an là sin, gu'n smachdaich an Tighearn na daoine àrda a ta sluas, agus rìghrean na talmhainn air an talamh.

22 Agus cruinnichear iad ri chéile, mar a chruinnichear prìosanaich² ann an slochd ; agus druidear suas iad mar ann am prìosan³ ; agus an déigh mòrain do làithibh fiosraichear iad.

23 An sin bithidh a' ghealach air a maslachadh, agus a' ghrian air a nàrachadh ; oir rioghaichidh Tighearn nan sluagh air beinn Shioin, agus ann an Ierusalem ; agus ann am fianuis a sheanairean bithidh a ghloir.

CAIB. XXV.

1 Mhol am fàidh Dia air son a bhreitheanas ; 6 agus rinn e gàirdeachas 'na shlàinte.

O THIGHEARN, is tu mo Dhia ; àrd-aichidh mi thu, molaidd mi d'ainm ; oir rinn thu *nìthe* iongantach ; is tairisneachd agus fìrinn do chomhairlean o shean.

2 Oir rinn thu a' chaithir 'na tòrr, am baile daingichte 'na *charn* sgrios ; *chuir thu* àros nan coigreach o bhi 'na bhaile ; gu bràth cha togar e.

3 Air an aobhar sin bheir an sluagh borb dhuit glòir ; gabhaidh caithir nan cinn-each uamhasach eagail romhad.

4 Oir bha thu a'd' neart do'n bhoichd, a'd' neart do'n fheumach 'na airc ; a'd' dhèidean o'n doinninn, a'd' sgàile o'n teas ; an uair a bha gaoth nan uamhasach mar dhoinninn a' séideadh ris a' bhalla.

5 Mar an teas ann am fearann seargta, bheir thusa nuas farum nan uaibhreach ; mar an teas le sgàil neoil, islichear geug nan uamhasach.

6 Agus anns a' bheinn so ni an Tighearn do na h-uile chinnich cuirm do nithibh blasta, cuirm do fhion aosda, do nithibh blasta làn do smior, do fhion aosda air a dheadh tharruing.

7 Agus sgriosaidh e air a' bheinn so an còmhach a chòmhdach aghaidh nan uile shluagh, agus an sgàile bha air a sgaoileadh thar na h-uile chinnich.

8 Sluigidh e suas am bàs le buaidh, agus siabaidh an Tighearn Iehobhah an deur o gach aghaidh, agus masladh a shluagh bheir e air falbh o'n talamh uile ; oir labhair an Tighearn e.

9 Agus anns an là sin theirear, Feuch, is e so ar Dia-ne ; dh'fheith sinn ris, agus thèarruinn e sinn ; is e so an Tighearn, dh'fheith sinn ris, ni sinn gàirdeachas agus uail 'na shlàinte,

10 Oir gabhaidh làmh an Tighearna fois air an t-sliabh so ; agus bithidh Moab air a shaltairt fuidhe, mar a shaltairear connlach air an òtrach.

11 Agus sinidh e mach a làmhnan 'na mheadhon, mar a shìneas am fear a shnàmhas a mach a làmhnan gu snàmh ; agus bheir e nuas uabhar, maille ri creich a làmh.

12 Agus daingneach àrd do bhallachan leagaidh e sìos, islichidh e, bheir a chum an làir, eadhon chum an duslaich.

CAIB. XXVI.

1 Earail gu earbsadh á Dia do bhrìgh gu'n dean e breitheanas air an nàmhaid, 12 agus gu'n nochd e tròcair d'a shluagh féin. 20 Smachdaichidh Dia luchd-àiteachaidh na talmhainn air son an aingidheachd.

A NNS an là sin seinnear an dàn so ann an tìr Iudah ; Tha againn caithir làidir ; slàinte cuiridh e suas mar bhallachan agus mar dhaingneach.

2 Fosglaihb-sa na geatachan, a chum gu'n téid an cinneach fìrinneach a steach, a choimhideas an fhìrinn.

3 Gleidhidh tu esan ann an sìth iomlain, aig am bheil 'inntinn suidhichte ort, a chionn gu'n do chuir e a dhòchas amad.

4 Cuiribh-sa bhur dòchas anns an Tighearn do ghnàth, oir anns an Tighearn Iehobhah tha neart sìorruidh.

5 Oir dh'islich e iadsan a bha chòmhnuidh gu h-àrd ; a' chaithir àrd, thug e nuas i ; thug e nuas i chum an làir ; thug e i eadhon chum an duslaich.

6 Saltraidh a' chos oirre, cosan an fheumaich, ceuma nam bochdan.

7 Tha slighe an fhìrein ro dhìreach ; ni thusa ceum an fhìrein fìor-chòmhnard.

8 Seadh, ann an slighe do bhreitheanais dh'fheith sinn ort tha miann ar n-ama air d'ainm, agus air do chuimhne.

9 Le m'anam mhiannaich mi thu san oidhche ; seadh, le mo spiorad an taobh a stigh dh'iarra⁴ mi thu sa' mhaduinn ; oir an uair a bhios do bhreitheanais air an talamh, foghlumaidh luchd-àiteachaidh an t-saoghail fìreantachd.

10 Nochd tròcair do'n aingidh, gidheadh cha'n fhòglum e fìreantachd ; ann an tìr an ionracais buinidh e gu fealltach ; agus cha toir e fa' near mòralachd an Tighearn.

11 A Thighearn, tha do làmh togta suas, gidheadh cha'n fhaic iad ; ach chi iad, agus bithidh iad fuidh amluadh air

¹ air udal.

² ciomaich.

³ gaintir.

⁴ iarraidh.

son eud an t-sluaigh¹; seadh, loisgidh teine do naimean suas iad.

12 A Thighearn, orduichidh tu sìth dhuinne; oir eadhon ar n-uile bhearta cunhachdach dh'òibrich thusa annainn².

13 O Thighearn ar Dia, bha ceannas oirn aig tighearnaibh eile bharrachd ort-sa³; ach annad-sa a mhàin ni sinn luadh air d'ainm.

14 Tha iad marbh, cha tig iad beò; dh'eug iad, cha'n éirich iad; uime sin dh'fhiosraich agus mhill thu iad, agus sgrios thu as an cuimhne gu tur.

15 Mheudaich thu an cinneach, O Thighearn; mheudaich thu an cinneach; tha thu air do ghlorachadh; sgaoil thu e a mach eadhon gu uile iomallaibh na talmhainn.

16 A Thighearn, ann an àmhghar dh'iarr iad thu: dhòirt iad a mach an ath-chuinge an uair a bha do smachdachadh orra.

17 Mar a bhitheas bean thorrach, an uair a bhios àm a h-aisead am fagus, ann an teanntachd, ag éigheach gu h-àrd 'na saothair; mar so bha sinn ann ad fhianuis, O Thighearn.

18 Dh'fhàs sinn torrach, bha sinn ann an teanntachd, rug sinn mar gu'm b'e gaath; cha d'òibrich sinn slàinte anns an talamh, ni mò tha luchd-àiteachaidh an t-saoghail àir tuiteam.

19 Thig do mhairbh beò; maille ri⁴ mo chorp marbh-sa éiridh iad. Dùisgibh agus seinnibh, sibhse tha chòmhnuidh anns an dulsach; oir tha do dhrùchd mar dhrùchd luibhean; agus tilgidh an talamh a mach na mairbh.

20 Thig, O mo shluagh, imich a steach do d' sheòmraichibh, agus druid do dhorsan mu'n cuairt duit; foluich thu féin car tamuill bhig, car tiota, gus an gabh a' chorruih thairis⁵.

21 Oir, feuch, tha an Tighearn a' teachd a mach as 'àit, a smachdachadh luchd-àiteachaidh na talmhainn air son an aingidheachd; agus leigidh an talamh ris an fhuil a ta air, agus cha chòmhdaich e ni's mò a mhairbh.

CAIB. XXVII.

1 Cùram Dhé d'a fhion-lios. 7 Smachdaichidh Dia a shluagh ann an trócair agus ann an tomhas ceart; 12 agus tionailidh e iad o gach tìr d'an d'fhugadh am braighdeanas iad.

ANNS an là sin smachdaichidh an Tighearn, le a chlaidheamh cruaidh, agus mòr, agus làidir, Lebhiatan an nathair dhìreach, agus Lebhiatan an nathair lùbach; agus marbhaidh e an dràgon a ta san fhairege.

2 Anns an là sin, canaibhse do fhion-lios

an fhiona dheirg:

3 Tha mise, an Tighearn, 'ga choimhead, uisgicheam e gach tiota; chum 's nach dochainn aon neach e, coimhididh mi e a là agus a dh'oidhche.

4 Annamsa cha'n eil dian-chorruih. Cò a chuireadh an droighionn agus an dris a'm' aghaidh anns a' chath? rachainn trompa, loisginn iad le chéile.

5 No deanadh e greim air mo neart; deanadh e sìth rium; sìth ni e rium.

6 Bheir e orra-san a thig o Iacob freumhachadh; brisidh Israel a mach, agus thig e fuidh bhlàth; agus lionaidh e aghaidh an t-saoghail le toradh.

7 An do bhuail se e a réir bualaidh an tì a bhuail esan? Am bheil e air a mharbhadh a réir àir na muinntir a mharbhadh leis?

8 Ann an tomhas ceart, an uair a bhriseas e mach, ni thu tagradh ris. Choisg e a ghaoth gharbh ann an là na gaoithe an ear.

9 Uime sin, le so glanar aingidheachd Iacob air falbh; agus is e so an toradh uile a thabhairt air falbh a pheacaidh; 'nuair a ni e uile chlachan na h-altarach mar chlachan aoile a ta air am pronnadh as a chéile, cha seas na doireachan no na dealbhan suas ni's mò.

10 Ach bithidh a' chaitir dhaingnichte fàs, agus an t-àite-còmhnuidh air a thréig-sinn, agus air fhàgail mar fhàsach; an sin ionaltraidh an laogh, agus an sin luidhidh e sìos, agus ithidh e a geugan⁶.

11 'Nuair a sheargas a meangana, brisear iad; thig mnathan agus cuiridh iad ri theine iad; oir is sluagh gu'n tui gse iad; uime sin cha ghabh an tì a rium iad truas diubh; agus cha nochd esan a dhealbh iad caoimhneas dhoibh.

12 Agus tarlaidh anns an là sin, gu'n dean an Tighearn bualadh o chlais na h-Aimhne gu sruth na h-Eiphit agus tionailear sibhse suas, aon agus aon, O chlann Israeil.

13 Agus tarlaidh anns an là sin, gu'n séidear a' ghall-tromp mhòr: agus thig iadsan a bha bàsachadh ann an tìr Asiria, agus iadsan a bha air an sgapadh ann an tìr na h-Eiphit; agus sleuchdaidh iad sìos do'n Tighearn, anns an t-slabh naomh, ann an Ierusalem.

CAIB. XXVIII.

1 Bhagrath Ephraim air son a mhisge agus 'uail. 5 Bithidh Dia 'na choron naise do iarnad a shluaigh. Tha Crìosd air a ghealltainn. 23 Gliocas freasdail Dé air a nochdadh ann an oibrich an treabhaiche.

IS an-aobhin do chrùn uaibhreach mhisgearan Ephraim, agus do bhlàth

¹ d'eud air son do shluaigh.

² dhuinn. ³ an leth a muigh dhiotsa.

⁴ amhuil mar.

⁵ téid a' chorruih seachad.

⁶ buinncega.

seargach am maise glòrmhoir; *dhoibhsan* a ta air ceann a' ghlinn bheartaich, a ta air an leagadh sìos le fion.

2 Feuch, tha aig an Tighearn fear cumhachdach agus làidir, mar stoirm mheallainn, *mar* dhoìninn mhiltich, mar thuil uisgeacha mòra a' taomadh thairis a thilgeas sìos chum an làir le a làimh.

3 Bithidh corona uaibhreach mhisgearan Ephraim air an saltairt fo 'chosaibh.

4 Agus bithidh blàth seargach am maise glòrmhoir, a ta air ceann a' ghlinn bheartaich, mar am meas luath roimh an t-samhradh, a chi an neach a dh'ambairceas air, agus cha luaithe bhitheas e 'na làimh na dh'itheas e suas e.

5 Anns an là sin, bithidh Tighearn nan sluagh 'na chrùn glòire, agus 'na choron maiseach do iarmad a shluaigh;

6 Agus 'na spiorad breitheanas dhasan a shuidheas ann am breitheanas; agus 'na neart dhoibhsan a philleas air ais an cath chum a' gheata.

7 Ach chaidh iadsan fòs a thaobh le fion, agus le dibh làidir chaidh iad air seacharan; chaidh an sagart agus am fàidh a thaobh le dibh làidir, shluigeadh suas iad le fion, chaidh iad air seacharan le dibh làidir; chaidh iad am mearachd ann an sealladh, thuislich iad ann am breitheanas.

8 Oir tha *am* buird uile làn do sgeith, agus do shalchar, *air chor as* nach 'eil àite sam bith *sàor*.

9 Cò d'an teagasg e eòlas, agus cò d'an iunnsaich e fòghlum? dhoibhsan a chuir eadh o'n chich, *agus* a sgaradh o'n bhrollach¹.

10 Oir tha àithne air àithne, àithne air àithne; rann air roinn, rann air roinn; beagan an so, beagan an sud.

11 Oir le beul manntach, agus le teangaich choimhich, labhraidh e ris an t-sluagh so.

12 Ris an dubhairt e, So an fhois leis an tabhair sibh fois dha-san a ta sgith, agus so an suaimhneas; gidheadh cha 'n éisdeadh iadsan.

13 Ach bithidh focal an Tighearna dhoibhsan 'na àithne air àithne, àithne air àithne; rann air roinn, rann air roinn; beagan an so, beagan an sud; a chum gu'n rachadh iad, agus gu'n tuiteadh iad air an ais, agus gu'm biodh iad air am briseadh, agus air an ribeadh, agus air an glacadh.

14 Uime sin cluinnibh focal an Tighearn, a luchd-fanoid, a luchd-riaghlaidh an t-sluaigh so a *ta* ann an Ierusalem.

15 A chionn gu'n dubhairt sibh, Dhainnich sinn coimhcheangal ris a' bhàs, agus

ris an uaigh rinn sinn còrdadh; an uair a shiùbhlas a' phlàigh thairis mar thuil, cha ruig i sinne; oir ghabh sinn a' bhreug mar ar didein, agus fuidh cheilg dh'fhol-aich sinn sinn fein.

16 Air an aobhar sin mar so deir an Tighearn Iehobhah, Feuch suidhichidh mise mar stéidh ann an Sion clach, clach dhearbhta, clach-chinn na h-oisinn; sàr bhunait; esan a chreideas, cha chuirear gu h-amhluidh e².

17 Agus tomhaisidh mise mach breitheanas leis an riaghailt, agus ceartas leis an t-sreing-thomhais; agus sguabaidh a' chlach-mheallain air falbh an didein-bhréige, agus còmhdaichidh na h-uisgeachan an t-àit-folaich.

18 Agus brisear 'ur coimhcheangal ris a' bhàs, agus cha seas 'ur còrdadh ris an uaigh; nuair a shiùbhlas a' phlàigh thairis mar thuil, an sin bithidh sibhlse air bhur saltairt sìos leatha.

19 O'n àm an siubhail i troimhe, ni i greim oirbh; oir maduinn an déigh maidne siubhlaidh i troimhe, a là agus a dh'oidhche; agus dùisgidh eadhon an t'iomradh a mhàin uamhunn.

20 Oir tha an leabadh tuilleadh 's goirid gu *neach* e féin a shineadh *oirre*; agus tha am brat tuilleadh 's ai-leathan gu *neach* e féin a phasgadh *ann*.

21 Oir éiridh an Tighearn suas, mar ann an sliabh Pherasim, bithidh corruich air mar ann an gleann Ghibeoin; a chum gu'n coimhlon e 'obair féin, 'obair neoghnathach; agus gu'n dean e a ghniomh féin, a ghniomh coimheach.

22 Agus a nis, na bithibh ri fanoid, air eagal gu'n deanar bhur cuibhrichean làidir³; oir chuala mi o Iehobhah Tighearn nan sluagh sgríos⁴, eadhon air a shònruachadh air an tìr uile.

23 Thugaibh-sa an aire, agus cluinnibh mo ghuth; éisdibh, agus cluinnibh mo bhriathra.

24 Am bheil an treabhaiche ri h-ar, rè an là, chum cur a dheanamh? Am bheil e a' fosgladh agus a' briseadh fòidean 'fhearainn?

25 An uair a ni e 'aghaidh còmhnard, nach sgaoil e an sin a' mheanbh-phesair, agus nach sgap e an cumin; agus nach cuir e an cruithneachd anns an àit a's fearr, agus an t-eòrna anns an ionad shuidhichte, agus an seagal 'na chrich féin?

26 Oir bithidh a Dhia ag iunnsachadh eòlais dha, *agus* 'ga theagasg.

27 Oir cha 'n eil a' mheanbh-pheasair air a bualadh le inneal-bualaidh; ni mò bheirear air roth feuna tionndadh air a'

¹ uchd.

² cha bhi e 'na chabhaig, 'na bhreistich.

³ gu'n teannaichear bhur ceanglaichean.

⁴ crìoch iomlan.

chumin; ach tha a' mheanbh-pheasair air bualadh le slait¹, agus an cumin le luirg².
 28 Ach tha *siol air son* arain air a bhruthadh: Do bhrìgh nach bi e 'ga shìr-blualadh, no 'ga bhriseadh le roth 'fheuna, no 'ga phronnadh le 'eachaibh³.
 29 Tha so fòs a' teachd o Thighearn nan sluagh: tha esan iongantach ann an comhairle, òirdheir ann an gnìomh.

CAIB. XXIX.

1 *Teamtadh Ierusalem, agus léir-sgrìos a luchd-claidh le làimh an Tighearn.* 9 *Chronaicheadh na h-Iudhaich air son an cealgaircachd.* 17 *Fhuair iad gealladh air nithibh màithe.*

MO thruaighe Ariel, Ariel, am baile anns an do chòmhnuich Daibhidh; cuiribh bliadhna ri bliadhna; marbhadh iad iobairtean⁴.

2 Gidheadh teannaichidh mise Ariel, agus bithidh caoidh agus bròn ann; agus bithidh e dhomhla mar Ariel⁵.

3 Agus campaichidh mi a'd' aghaidh mu'n cuairt; agus teannaichidh mi thu le tòrr; agus togaidh mi daingnichean a'd' aghaidh.

4 Agus bheirear sìos thu, agus labhairidh tu as an talamh, agus bithidh do chainnt ìosal as an duslach; agus thig do ghuth a mach as an talamh, mar fhiosaiche, agus nì do chainnt borbhanaich as an duslach.

5 Agus mar an dus mìn bithidh mòr bhuidheann do choigreach, agus bithidh mòr bhuidheann nan uamhasach⁶ mar am moll luaineach; agus tarlaidh e ann an tiota, gu h-obann.

6 Smachdaichear thu le Tighearn nan sluagh, le tairneanaich, agus le crith-thalmhainn, agus le treun ghuth, le stoirm agus doinn, agus lasair theine chaithtich.

7 Agus amhuil brùadar, aisling na h-oidheche, bithidh mòr shluagh nan uile chinneach, eadhon na h-uile a ta cogadh rithe féin, agus ri a daingneach, agus a ta 'ga teannachadh.

8 Agus amhuil *duine* ocrach a chi aisling, agus, feuch, ta e 'g' itheadh, ach air dùsgadh dha, tha 'anam ciocrach; agus amhuil *duine* tartmhor a chi aisling, agus, feuch, tha e 'g' òl, ach air dùsgadh dha, feuch, *tha e* fann agus 'anam a' miannachadh; mar sin tarlaidh do mhòr chuid-eachd nan uile chinneach a ta a' cogadh an aghaidh sléibh Shìoin.

9 Stadaibh, agus gabhaibh iongantas; seallaibh mu'n cuairt le h-ìoghnadh, agus amhaireibh; tha iad air mhise, ach cha'n ann le fion; tha iad a'call nan cos, ach cha'n ann le dibh làidir.

10 Oir dhòirt an Tighearn oirbh spiorad suaine; agus dhruid e suas 'ur sùilean; air na fàidhean agus 'ur luchd-riaghlaidh, agus air an luchd-seallaidh chuir e còmh-dach⁷.

11 Agus tha an taisbean uile dhuibhse, mar bhriathra leabhàir air a ghlasadh suas⁸ a bheil *iad* do neach aig am bheil fòghlum, ag ràdh, Leugh so, guidheam-aid ort; agus their esan, Cha'n urrainn mi, oir tha e glaiste suas⁹.

12 Agus bheirear an leabhar do neach aig nach 'eil fòghlum, ag ràdh, Leugh so guidheam ort; agus their esan, Cha'n eil fòghlum agam.

13 Uime sin thubhairt an Tighearn, Do bhrìgh gu bheil an sluagh so a' teachd dlùth *dhomhsa* le'm beul, agus a' toirt onoir dhomh le'm bìlibh, ach 'nan cridhe gu'n do theich iad fada uam; agus gu'm bheil an eagal romham-sa air a theagasg le àitheantaibh dhaoine;

14 Air an aobhar sin, feuch, théid mis' air m' aghaidh a dheanamh iongantais am measg an t-sluaigh so, iongantas agus iongantas; ionnus gu'n téid gliocas an daoine glìce am mugha, agus tuiosg an daoine tuiogeach as an t-sealladh.

15 Is truagh dhoibhsan a ta 'g iarraidh an comhairle fholachadh gu domhain o'n Tighearn; aig am bheil an gnìomhara anns an dorchas, agus a ta 'g ràdh, Cò a ta 'gar faicinn? Cò aig am bheil fios oirnn?

16 Gu cinnteach measar bhuir ais-inn-leachda¹⁰ mar chriada a' chriadhadair: an abair an obair mu'n oibriche, Cha d'rinn e mi? agus an abair an nì a dhealbhadh mu'n ueach a dhealb e, Cha robh tuiosg aige?

17 Nach tamull ro bheag fòs, gus an deanar Lebanon 'na fhearann torrach, agus gus am measar am fearann torrach mar fhrìdhe¹¹?

18 Agus anns an là sin cluinidh na bodhair briathran an leabhair; agus as an dubhar agus as an dorchadas gheibh sùilean nan dall an léirsinn.

19 Meudaichidh fòs na daoine séimhe an aoibhneas anns an Tighearn; agus nì na bochdan am measg dhaoine gàird-eachas ann an Tì naomh Israeil.

20 Oir dh'fhàilnich an t-uamhasach, agus thàinig crìoch air an fhear-fhocaid¹²; agus ghearradh as iadsan uile a bha furachair¹³ chum aingidheachd;

21 A nì duine 'na pheacach air son focail¹⁴; a ta leagadh rìbe air a shonsan a tha tagradh anns a 'gheata; agus a tha tionndadh an ionracaim a leth-taobh air son nì nach fìu.

¹ bata.² buaithear.³ fìaclaibh a rothanna.⁴ itheadh na làithean fèille mu'n cuairt.⁵ mar leòman mòr, mar an altair mhòr.⁶ athach.⁷ cumhadh.⁸ sheulachadh.⁹ seulaichte.¹⁰ tilgeadh nìthe bun os ceann.¹¹ fhàsach, lòn.¹² fhear-seige.¹³ a' fèitheamh, ri faire.¹⁴ a tha toirt air an duine bhochd tuisleachadh 'na chainnt.

2 Air an aobhar sin mar so deir an Tighearn, esan a shaor Abraham, mu thimchioll tighe Iacob, Cha nàraichear Iacob, agus cha bhi 'aghaidh nise fo amhladh¹.

23 Ach an uair a chi e a chlann, obair mo làmh-sa, 'na mheadhon, naomhaichidh iad m'ainm, agus naomhaichidh iad Ti naomh Iacob, agus bithidh eagla orra roimh Dhia Israeil.

24 Tuigidh iadsan fòs, a chaidh mearachd ann an spiorad, fìor eolas; agus foghlumaidh iadsan a bha ri borbhanaich, teagasg.

CAIB. XXX.

1 Chronaicheadh an sluagh do bhrìgh gu'n do chuir iad an dòigh san Eiphit, 8 agus gu'n d'rinn iad tair air focal Dé. 18 Trócair an Tighearn d'a eaglais. 27 Bithidh a shluagh aoibhneach 'nuair a bhuaileas Dia na h-Asirianaich.

IS truagh do'n chloinn cheannaircich, deir an Tighearn, a ta dealbh chomhairlean, ach cha'n ann uamsa; a ta còmhachadh le brat-folaich², ach cha'n ann le mo spiorad-sa; a chum gu'n cuir iad peacadh ri peacadh:

2 A ta 'g imeachd gu dol sìos do'n Eiphit, ach nach d'fhiosraich dhìom-sa³; chum iad féin a neartachadh le neart Pharaoh, agus a dheanamh buin á sgàile na h-Eiphit.

3 Ach bithidh neart Pharaoh dhuibh 'na nàire; agus 'ur bun á sgàile na h-Eiphit 'na mhasladh.

4 Oir bha a cheannardan aig Soan, agus thàinig a theachdairean gu Hanes.

5 Ghabh iad uile nàire do shluagh o nach d'fhuair iad tairbhe; o nach d'fhuair iad cuideachadh no tairbhe; ach a bha 'nan nàire agus 'nam masladh.

6 Eallach ainmhidhean na h-àirde deas; gu tìr aice agus éigin, as an tig an leòmh-an òg agus an seann leòmh-an, an nathair nimhe, agus an nathair theinteach iteach; giùlainidh iad an saobhreas air gualainn nan asal òga, agus an ionmhas air croit nan càmhail; dh'ionnsuidh sluaigh nach tabhair buannachd dhoibh.

7 Oir is dìomhain agus gun tairbhe còmhadh nan Eiphiteach; uime sin thubhairt mi rithe so, 'Se an neart fantuinn 'nan tàmh⁴.

8 Imich a nis, sgrìobh e fa'n comhair air clàr, agus comharach e air leabhar; chum gu'm bi e air son nan aimsirean a thig, air son fianuis gu sìorruidh;

9 Gur sluagh ceannairceach so, clann bhreugach, clann leis nach àill éisdeachd a thubhairt do lagh an Tighearn:

10 A ta 'g ràdh ris na fìr-sheallaidh, Na faicibh; agus ris na fàidhean, Na

labhraibh nithe cearta ruinn ann am fàistneachd; labhraibh ruinn nithe mine; deanaibh fàisneachd cheilge:

11 Clanaibh air falbh o'n t-slighe; rachaibh a leth-taobh o'n rathad dhìreach; cuiribh air falbh uainn 'Ti naomh Israeil.

12 Air an aobhar sin, mar so deir Ti naomh Israeil, A chionn gu bheil sibh a' deanamh tàire air an fhocal so, agus ag earbsadh á claadhadh agus á ceannairc, agus a' leigeadh bhuir taice ris;

13 Uime sin bithidh an t-olc so dhuibh mar bhriseadh⁵ ullamh gu tuiteam, mar aomadh ann am balla àrd, a thuiteas gu làr gu h-obann, ann an tiota.

14 Agus brisidh se e, mar bhriseadh soithich a' chriadhadair, a bhrisear 'na bhloighdibh; cha chaomhain e, air chor as nach faighear, ann a bhriseadh, sgealb a thogas teine o'n teinntein⁶, no a bheir uisge o'n tobar.

15 Oir mar so deir an Tighearn Iehobhah, Ti naomh Israeil, ann am pilleadh, agus ann an sàmhair, tèarmar sibh; ann an suaimhneas agus ann an earbsa bithidh 'ur neart; ach cha b'àill leibhse.

16 Ach thubhairt sibh, Nì h-eadh, ach air eachaibh teichidh sinn; air an aobhar sin teichidh sibh; agus air ainmhidh⁷ luatha marcaichidh sinn; uime sin bithidh iadsan luath a leanas air 'ur tòir.

17 Teichibh aon mhìle roimh achmhasan⁷ aoin; roimh achmhasan chùigear teichidh sibh; gus am fàgar sibh mar clannan lom air mullach sléibh, agus mar bhrataich air cnoc.

18 Agus air an aobhar so feithidh an Tighearn, chum gu'n nochd e deadh-ghean duibh; agus air an aobhar so àrdaichear e, chum gu'n nochd e trócair dhuibh; oir is Dia ceart-bhreitheach an Tighearn; is beannaichte iadsan uile a ta feitheamh ris-san.

19 Oir gabhaidh sluagh còmhuidh ann an Sion, ann an Ierusalem; cha ghluil thu nì's mò; nì e mòr-thrócair ort, ri guth do ghlaoidh; co luath 'sa chluinneas e, bheir e freagradh dhuit.

20 Agus ged bheir an Tighearn dhuibh aran aice, agus uisge àmhghair, gidheadh cha bhi do luchd-teagaisg air am fògradh fad as; ach bithidh do shùilean a' faicinn do luchd-teagaisg.

21 Agus chuinnidh do chluasan focal o d' chùlaobh, ag ràdh, So an t-slighe, gluaisibh innte, nuair a thionndaidheas sibh chum na làimhe deise, no chum na làimhe clìthe.

22 Agus truailidh sibh trusgan 'ur dealbhan airgid, agus sgeadachadh do

¹ bàn. Eabh.

³ o mo bheul. Eabh.

² dòrtadh tabhartais-dìbhe.

⁴ suidhe sàmhach.

⁵ bheum.

⁷ bhagradh.

⁶ teallach.

dhealbhan òir; tilgidh tu uait iad mar eudach truaille; their thu ris, Teich uam.

23 An sin bheir e uisge air son do shìl, leis an cuir thu d'fhearann; agus aran do thoradh na talmhainn, agus bithidh e reamhar agus pailt; anns an là sin, ion-altraidh do sprèidh ann an àilean farsuinn;

24 Agus ithidh na daimh, agus na h-asail òga a threabhas am fearann, inn-linn air a deadh-ghlanadh, air a greadhadh leis a' ghuith agus leis an t-sluasaid.

25 Agus air gach beinn mhòir, agus air gach cnoc àrd, bithidh caochain agus sruthan uisge; ann an là an àir mhòir, an uair a thuiteas na baidealan¹.

26 Agus bithidh solus na gealaich mar sholus na gréine, agus bithidh solus na gréine a sheachd uiread, mar sholus sheachd làithean; san là anns an ceangail an Tighearn suas briseadh a shluaigh, agus anns an leighis e lot a bhuille.

27 Feuch, tha ainm an Tighearn a' teachd o chéin, a' losgadh le 'fheirg, agus an eallach² trom; tha a bhilean air an lìonadh le corruich, agus a theangadh mar theine caithteach.

28 Agus bithidh³ anail mar shruth dian a' ruith thairis, a' ruigheachd gu meadhon a' mhuineil; a dh'fhasgnadh nan cinn-each le fasgan an diomhanais; agus bithidh srian ann an giallaibh an t-sluaigh, 'gan tarruing air seacharan.

29 Bithidh ceòl agaibh, mar anns an oidheche san coimhdear féill naomh; agus gàirdeachas cridhe, amhuil an uair a dh'imicheas neach le ceòl pioba, chum dol gu sliabh an Tighearna, gu carraig Israel.

30 Agus bheir an Tighearn fa' near gu'n cluinnear a ghuth glòrmhor, agus gu'm faicear leagadh a nuas a ghairdein, le corruich ghaire, agus le lasair teine chaithtich; le sgapadh, agus doiminn, agus clachaibh meallain.

31 Oir le guth an Tighearna buailear sìos an t-Asirianach, a bha bualadh le slait.

32 Agus anns gach àit an siubhail an t-slat shònruichte, a leagas an Tighearn air, bithidh tiompan agus clàrsaichean; agus le cruaidh-chòmhraig cogaidh a leatha.

33 Oir dh'ulluicheadh Tophet o shean; eadhon air son an rìgh tha sin air 'ulluchadh; rinn e domlain e, rinn e farsuinn e; cruach theine agus mòran connaidh³; tha anail an Tighearna, mar shruth pronnais 'ga fhadadh⁴.

CAIB. XXXI.

1 Is truagh dhoibhsan a ta 'g iarraidh còmhnaidh o'n Eiphit an àite bhì 'g earbsadh as an Tighearn. 6 Earail gu pilltinn a dh'ionnsuidh Dhé. 8 Sgrìos nan Asirianach.

IS truagh dhoibhsan a tha dol sìos do'n Eiphit air son còmhnaidh; a ta 'g earbsadh á h-eachaibh, agus a' cur an dòchais ann an carbadaibh, a chionn gu bheil iad lionmhor; agus ann am marc-aichibh, a chionn gu bheil iad ro làidir; ach cha seall iad air Ti naomh Israel, agus cha'n iarr iad an Tighearn.

2 Ach tha Esan glic, agus bheir e olc orra, agus cha chuir e 'fhocal air chùl; ach éiridh e an aghaidh tighe nan aingidh, agus an aghaidh cabhair na muinntir a tha deanamh eucèirt.

3 Oir is daoine na h-Eiphitich, agus cha Dia iad; agus is feoil an eich, agus cha spiorad; an uair a shìneas an Tighearn a mach a làmh, tuitidh am fear-cuideachaidh, agus leagar sìos am fear a bha air a chòmhnaidh leis; agus millear iad gu léir le chéile.

4 Oir mar so thubhairt an Tighearn rium; mar a raoiceas⁵ an leòmhann, eadhon an leòmhann òg, os ceann a chobhart-aich, 'nuair a chruinnichear buidheann bhuaichaillean 'na aghaidh; cha gabh e geilt roimh an guth, agus cha chaill e a mhisneach air son an comhghair⁶; is amhluidh thig Tighearna nan sluagh a nuas gu cogadh air son sléibh Shìoin, agus air son a chnuic.

5 Mar eunlaith ag itealaich os ceann an àlaich, mar sin dìonaidd Tighearn nan sluagh Ierusalem; le dìonadh saoraidh e i; agus le leum thairis tèarnaidh e i.

6 Pillibh d'a ionnsuidh-san o'n do chlaon clann Israel le seacharan fada.

7 Oir anns an là sin tilgidh gach aon air falbh uaith 'ìodholan airgid, agus 'ìodholan òir, a rinn 'ur làmhnan fèin duibh chum peacaidh.

8 Agus tuitidh an t-Asirianach, cha'n ann le claidheamh gaisgich; seadh cha'n e claidheamh duine a shluigeas suas e; ach teichidh e o'n chladheamh, agus claidhear a dhaoine òga.

9 Agus troimh eagall théid e null dh'ionnsuidh a dhaingnich, agus gabhaidh a chinu-fheadhna geilt⁷ roimh'n bhrataich; deir an Tighearn, aig am bheil a theine ann an Sìon, agus 'amhuinn⁸ ann an Ierusalem.

CAIB. XXXII.

1 Sonas rìoghachd Chrìosd. 9 Fàidheadaireachd mu thimchioll fàsachadh na tìre. 15 'Nuair a

¹ tìuir.
³ fiodha.
652

² uallach.
⁴ lasadh.

⁵ bhùireas.
⁷ an ruaig.
⁶ tormain.
⁸ 'fhuinnis.

dhòirtear an spiorad a nuas air an t-sluagh, nì breitheanas còmhuidh air talamh.

FEUCH, rioghaichidh rìgh ann am fir-eantachd, agus riaghlaidh uachdarain ann an breitheanas.

2 Agus bithidh duine mar ionad-fasgaidh o'n ghaoith, agus mar dhèidein o'n doinn; mar shruthaibh uisge ann an àite tioram, mar sgàile craige mòire ann an tìr airsnealaich.

3 Agus cha bhì ceò air sùilibh na muinntir a chi¹; agus bheir cluasan na muinntir a chluinneas, éisdeachd.

4 Agus tuigidh cridhe an duine bhrais eòlas; agus bithidh teangadh an duine mhanntaich ealamh chum labhairt gu soilleir.

5 Cha ghoirear an t-ùmaidh fial nì's mò, agus cha'n abrar gu bheil am miodh-oir daoineachdail.

6 Oir labhraidh an t-ùmaidh do ghnàth amadeachd, agus dealbhaidh a chridhe aingidheachd, a chur an gnìomh ceilge, agus a labhairt foill an aghaidh an Tigh-earn, a dheanamh anama an ocaich falamh, agus a thabhairt na dìbhe o'n duine iotnhor.

7 Tha innealan an duine mhiodhoir olc; tha e a' dealbh inleachdan aimhleasach, a' ribeadh nam bochd le briathraibh breugach, sa' cheart àm an labhair an t-ainniseach gu firinneach.

8 Ach dealbhaidh an duine fial nithe fiala; agus le nithibh fiala daingnichear e.

9 Eiribh, a mhnathan a ta gu suaimhneach, cluinnibh mo ghuth; a nigheana gun umhaill, éisdibh ri mo chainnt².

10 Iomadh là agus bliadhna bithidh sibh gun fhois, O mhnathan gun umhaill; oir dh'fhàilnich am fion-fhogharadh, cha tig tional an toraidh.

11 Crìothnaichibh, sibhse ta suaimhneach; bithibh gun fhois, sibhse ta gun umhaill; cuiribh dhìbh, rùisgibh sibh féin agus crioslaichibh 'ur leasraidh le eudach-saic.

12 Nì iad caoidh air son nan cioch, air son nam machraichean taitneach, air son na fionain torraich.

13 Thig an droighionn agus an dris a nìos thar fearann mo shluaigh; seadh thar na h-uile thighibh aobhach anns a' bhaile luaghaireach.

14 Oir tha an t-àros air a thréigsinn; tha buidheann lìonmhor na caithreach air am fàgail; bithidh an daingneach agus an tùr 'nan uamhaibh gu bràth, 'nan aobhneas do na h-asalaibh fiadhaich, 'nan ionaltradh air son uan treudan;

15 Gus an dòirtear a nuas oirn an Spiorad o'n àird, agus gu'm bi am fàsach

'na mhachair thorraich, agus gu'm measar a' mhachair thorraich 'na frìdh.

16 An sin nì breitheanas tàmh anns an fhàsach, agus anns a' mhachair thorraich gabhaidh fireantachd còmhnuidh.

17 Agus is sìth obair na fireantachd; agus is toradh do'n fhìreantachd suaimhneas agus tèaruinteachd gu sìorruidh.

18 Agus gabhaidh mo shluagh còmhnuidh ann am fardaich fhoistnich, agus ann an ionadaibh-còmhnuidh tèaruinte, agus ann an àiteachaibh-tàimh suaimhneach,

19 An uair a thig a' chlach-mheallain a nuas air an doire, agus nithear a' chaithir co ìosal ris a' chòmhnard.

20 Is beannaichte sibhse a ta cur sìl ri taobh gach uisge, a ta cur a mach coise an daimh agus na h-asail.

CAIB. XXXIII.

1 *Breitheanas Dhé an aghaidh nàimhdean Shìoin.*
13 *Glacaidh uamhunn na cealgairean, 15 ach iadsan a ghluaiseas gu h-ionraic bithidh Dia 'na dhèidein doibh.*

IS an-aobhin duitse, a chreachadair, nach robh air do creachadh thu féin; agus fhir na foill, ris nach do bhuin iad gu fealltach: an uair a sguireas tu do chreachadh, creachar thu; agus an uair a bheir thu thairis³ a bhì ri foill, buinidh iad ga fealltach riut.

2 O Thighearn, dean tròcair oirn; ortsas tha sinn a' feitheamh; bi thus' a'd' ghairdean dhoibh gach maduinn; ar slàinte fòs ri h-àm na h-àire⁴.

3 O ghuth a' bhuaireis theich na slòigh; an uair a thog thu suas thu féin, sgapadh na cinnich.

4 Agus cruinnichear 'ur creach mar a chruinnicheadh am burrus: mar shiubhal nan locust, thig e orra.

5 Tha an Tighearn air 'àrdachadh; seadh, tha a chòmhnuidh gu h-ard; lion e Sion le breitheanas agus ceartas.

6 Agus bithidh slàinte làidir, gliocas, agus eòlas, 'nan daingneachadh do d' linn; tha eagal an Tighearn 'na ionmhas da.

7 Feuch, togaidh na daoine cumhachdach gaòir an taobh a muigh; guilidh teachdairean na sìthe gu goirt.

8 Tha na ròide mòra fàsail, dh'fhalbh am fear-turuis; bhris e an coimhcheangal, chuir e cùl ris na caithrichibh, cha 'n eil meas aig air duine.

9 Tha an talamh ri bròn, agus a' fannachadh; tha Lebanon fo nàire, agus air a ghearradh sìos; tha Saron air fàs mar fhàsach; agus Basan agus Carmel air crathadh dhiubh an toraidh.

10 A nis éiridh mi, deir an Tighearn;

¹ cha bhì iad crith-shùileach.
² ghàidh.

³ leigeas tu dhòit, sguireas tu.
⁴ ri h-uchd cruaidh-chais.

a nis àrdaichear mi; a nis togaidh mi suas mi féin.

11 Bithidh sibh torrach air moll; beiridh sibh asbhuaín; ní bhuir anail, mar theine, bhuir caitheadh.

12 Agus bithidh na slòigh mar aol air a losgadh; mar dhroighionn air a ghearr-adhl sìos, loisgear iad anns an teine.

13 Cluinnibh, O sibhse tha fad as, an ní a rinn mi; agus sibhse tha dlùth, aidichibh mo chumhachd.

14 Tha na peacaich ann an Sion fuidh eagal; ghlac uamhunn na cealgairean; cò 'nar measg a ghabhas còmhnuidh maille ri teine millteach? cò 'nar measg a ghabhas còmhnuidh maille ri lasraichibh sìorruidh?

15 Esan a ghluaiseas gu h-ionraic, agus a labhras gu ceart; a ghabhas gràin do bluannachd na h-ainneirt, a chrathas a làmh o bhi glacadh duaise na *h-eucorach*; a dhruideas a chluas o éisdeachd ri *sgeul* fola, agus a dhùineas a shùilean o amharc air olc;

16 Bithidh a chòmhnuidh-san anns na h-ionadaibh àrda; bithidh daingnichean nan creag 'nan dìdean dha; bheirear aran dha; *mairidh* uisge gu cinnteach aige.

17 Seallaidh do shùilean air an Rìgh 'na mhaise; chi iad an tìr cian fad as.

18 Smuainichidh do chridhe air uamhunn, C'ait ambheil an sgrìobhaiche? C'ait am bheil am fear-tomhais? C'ait am bheil esan a dh'àireamh na daingnichean?

19 Cha'n fhaic thu sluagh borb; luchd na cinnte domhain, nach b'urrainn thu chluinntinn; luchd na teangaidh manntaich, nach b'urrainn thu thuigsinn.

20 Amhaire air Sion, caithear air n-àrd fhéillea; chi do shùilean Ierusalem 'na còmhnuidh fhoistnich, na pàillion nach atharraichear; cha ghluaisear¹ aon d'a chuailibh gu bràth, ní mò bhrisear aon d'a chordaibh.

21 Ach ann an sin *bithidh* an Tighearn glòrmhor² dhuinne 'na ionad airmhichean agus shruthan leathan; cha siubhail soith-each ràmhach ann; ní mò théid long ghreadhnach troimhe.

22 Oir *is e* an Tighearn ar breitheamh; *is e* an Tighearn ar fear-tabhairt lagha; *is e* an Tighearn ar Rìgh; tèarnaidh e sinn.

23 Tha do chùird³ fuasgailte; cha b'urrainn iad an crann a ro dhaingneachadh; cha b'urrainn iad an seòl a sgaoileadh; an sin tha creach phailt air a roinn; ghlac am bacach a' chobhartach.

24 Agus cha'n abair am fear-àiteachaidh, Tha mi tinn: gheibh an sluagh, a ta

chomhnuidh an sin maithneas 'nan aingidhleachd.

CAIB. XXXIV.

1 *Fear an Tighearn an aghaidh nan cinneach a tha nan naimhdeibh d'a eaglais.* 16 *Cinne na fàistneachd.*

DLUTHAICHIBH, a chinneacha, chum éisdeachd; agus thugaibh aire, O fhineacha: éisdeadh an talamh, agus a làn; an saoghal, agus na li-uile a ta teachd a mach uath.

2 Oir tha fearg air an Tighearn an aghaidh nan cinneach uile; agus corruidh an aghaidh an slògh uile; chuir e as doibh, thug e thairis iad chum csaigairt.

3 Agus tilgear am mairbh a mach; agus o'n cairbheannaibh éiridh breun bholadh; agus leaghaidh na sléibhtean sìos le'm fuil.

4 Agus crìonaidh feachd⁴ néimh gu léir air falbh, agus fillear na uèamhan air a chéile mar dhuille leabhair; agus tuitidh am feachd uile sìos, mar thuiteas an duilleag sheargta o'n fhionain, agus mar am meas làn-abuich o'n chran-fhige.

5 Oir tha mo chlaidheamh air a chur air mhisg⁵ anns na nèamhaibh; feuch, tuitidh e air Idumea, agus air an t-sluagh a mhallaich mise, chum breitheanas.

6 Tha claidheamh an Tighearna sàs-uichte le fuil; tha e biadhtha le saill, le fuil uan agus ghabhar, le saill airnean reitheachan; oir tha iobairt aig an Tighearn ann am Bosrah, agus àr mòr ann an tìr Idumea.

7 Agus thig na h-aon-adharcaich a nuas maille riù, agus na daimh maille ris na tairbh; agus cuirear an tìr air snàmh le fuil, agus nithear an duslach reamhar le saill.

8 Oir is e là dìoghaltais an Tighearn a *th'ann*, agus bliadhna an ath-dhiolaidh air son connsaichidh Shioin.

9 Agus iompaichear a sruthan gu pìc, agus a duslach gu pronnusc; agus fàsaich a fearann uile 'na phìc loisgich.

10 Cha téid a chur as a dh'oidheche no a là; gu sìorruidh théid a deatach suas; o àl gu h-àl bithidh i fàs; gu linn nan linn cha téid aon neach troimpe.

11 Ach sealbhaichidh am pelican agus a' ghràineag⁶ i; agus gablaidh a' chaill-each-oidheche agus am fitheach còmhnuidh innte; agus sinidh e thairis oirre sreang an léir-sgrìos, agus clachan na faoin-eachd⁷.

12 Gairmidh iad a h-uaislean do'n rìoghachd, acli cha *bhi* iad ann; agus thig a ceannardan uile gu uèo-ni.

13 Agus fàsaich an droighionn suas 'na lùchaidribh; an eamntagach agus an dris

¹ ghlidichear. an Tighearn.

² Ach bithidh ainm glòrmhor ³ bhuill, d'arfuin.

⁴ sluagh.

⁶ an scarbh.

⁵ air a thumadh, air 'uisgeachadh.

⁷ fàsalachd.

'na daingnichibh; agus bithidh i 'na fàrdaich aig dràgonaidh, 'na h-àros aig nigheanaibh na comhachaig.

14 Agus còinnichidh fiadh-bheathaichean¹ an fhàsaich agus fiadh-bheathaichean na macharach a chèile; agus glaothaidh am fiadh-dhuine r'a chompanach; an sin fòs gabhaidh an screuchag-oidheche fòis, agus gheibh i dhi féin àite-tàimh.

15 An sin ni a' chailleach-oidheche mhòr a nead, agus beiridh i a h-uighean; agus ni i gur, agus cruinnichidh i a h-àlach fo a sgàile; an sin fòs cruinnichear na faing, gach aon le a chèile féin.

16 Fiosraichibh do leabhar an Tighearn, agus leughaidh; cha bi aon dhiubh so air chall, cha bhi aon as eugmhais a céile; oir is e mo bheil-sa thug an àithne, agus is e a spiorad a thionail iad.

17 Agus thig e an crannchur air an son, agus roinn a làmh dhoibh e le sreing; sealbhaichidh iad e gu siorruidh; o àl gu h-àl gabhaidh iad còmhuidh ann.

CAIB. XXXV.

1 Glòir agus soirbheas rioghachd Chrìosd. 9 Siubhlaidh a' mhuinntir shaorta ann an slighe an Tighearn, agus thig iad gu Sion le caithream agus aoibhneas.

NI am fàsach agus an talamh tartmhor gairdeachas air an son; agus bithidh an dìthreach ait, agus thig e fo bhlàth mar an ròs.

2 Brisidh e mach gu h-ùrar, seadh ni e gairdeachas gu subhach agus gu ceòlmhor; bheirear glòir Lebanoin dha, maise Charneil agus Sharoin; chi iad sin glòir an Tighearn, agus maise ar Dé-ne.

3 Neartaichibh-sa na làrhan laga, agus daingnichibh na glùinean aumhunn.

4 Àbraibh riu-san a ta lag-chridheach, Bithibh làidir, na biodh eagal oirbh; feuch, thig bhuir Dia le dioghaltas, 'se Dia le ath-dhioladh; thig e féin, agus saoraidh e sibh.

5 An sin fosgailear sùilean nan dall, agus bithidh cluasan nam bodhar air am fosgladh.

6 An sin leumaidh am bacach mar fhiadh, agus seinnidh teangadh a' bhalbha; oir anns an fhàsach brisidh uisgeachan a mach, agus sruthan ann an dìthreach.

7 Agus fàsaidh am fearann tioram 'na linne, agus am fearann tartmhor 'na thobraichibh uisge: ann an àite-còmluidh nan dràgon, agus 'nan leabadh, bithidh feur, leis a' chuile agus an luachair.

8 Agus bithidh rathad mòr an sin, agus slighe; agus goirear slighe na naomh-

achd dheth; cha siubhail neach neò-ghlan troimhe; ach bithidh e air an son-sa; cha téid am fear-turuis no na daoine baoghaltach air seacharan ann².

9 Cha bhi leòmhnan an sin, ni mò thig fiadh-bheathach millteach suas ann; cha'n fhaighear an sin e; ach siubhlaidh a' mhuinntir shaorta ann:

10 Agus pillidh saor-dhaoine an Tighearn, agus thig iad gu Sion le caithream, agus aoibhneas siorruidh air an cinn: gheibh iad gairdeachas agus aoibhneas, agus teichidh bròn agus osnaich air falbh.

CAIB. XXXVI.

1 Ghlac Senacherib rìgh Asiria uile bhailte daingnichte Iudah. 2 Chuir e Rabsaceh a dh'ionnsuidh Ierusalem a thoirt maslaidh do Hesechia. 13 Briathra Rabsaceh a labhair e an èisdeachd an t-sluaigh. 22 Dh'innseadh iad do Hesechia.

AGS tharladh anns a' cheathramh bliadhna deug do rìgh Hesechia, gu'n d'fhàinig Senacherib rìgh Asiria nios an aghaidh uile bhailte daingnichte Iudah, agus ghlac e iad.

2 Agus chuir rìgh Asiria Rabsaceh o Lachis do Ierusalem, dh'ionnsuidh rìgh Hesechia, le armailt mhòir; agus sheas e aig sruth-chlais na linne uachdaraich air rathad mòr achaidh an luadhaidh.

3 An sin thàinig a mach d'a ionnsuidh Eliacim mac Hileciah, a bha os ceann an tighe, agus Sebnah an sgrìobhaiche, agus Ioah mac Asaph an seanachaidh.

4 Agus thubhairt Rabsaceh riu, Àbraibh a nis ri Hesechia, Mar so deir an rìgh mòr, rìgh Asiria, Ciod e am bun-dòchais so as am bheil thu ag earbsadh?

5 Tha ag ràdh, (ach is briathra faoine iad,) Tha comhairle agus neart *agam* air son a' chogaidh; a nis cò as am bheil thu ag earbsadh, gu deanadh tu ceann-àire a'm aghaidh-sa?

6 Feuch, tha thu 'g earbsadh as an luig bhriste chuile sin, as an Eiphit; ni, ma leigas duine a chudthrom air, a théid a steach 'na làimh, agus a thollas troimhe i; mar so tha Pharaoh rìgh na h-Eiphit dhoibh-san uile a dh'earbas as.

7 Ach ma thoir thu rium, As an Tighearn ar Dia tha ar n-earbsa; nach e sin esan a chuir Hesechia air falbh 'ionadan àrda agus 'altairean; agus thubhairt e ri Iudah agus ri Ierusalem, Fa chomhair na h-altarach so sleuchdaidh sibh?

8 A nis uime sin, guidheam ort, tabhair géill³ do m' thighearn rìgh Asiria; agus bheir mise dhuìt dà mhìle each, ma's urrainn thu, as do thaobh-sa, marcaichean a chur orra.

9 Cionnus ma ta a philleas tu air ais

¹ eoin fhiadhaich.

² ach bithidh esan leo,

ag imeachd air an t-slighe; ionns nach téid na

daoine baoghaltach féin air seacharan.

³ geall-unhlachd.

aon cheann-feadhna do na seirbhìsich a's lugha tha aig mo thighearn? agus a dh'earbas tu as an Eiphit air son charbad-an agus marc-shluaigh?

10 Agus a nis, an ann as eugmhais an Tighearn a thàinig mise a nìos an aghaidh na tìre so, g'a sgrìos? Is e an Tighearn a thubhairt rium, Rach suas an aghaidh na tìre so, agus sgrìos i.

11 An sin thubhairt Eliacim, agus Sebnah agus Ioah ri Rabsaceh, Labhair, guidheamaid ort, ri do sheirbhìsich, anns a' chainnt Shirianaich, oir tuigidh sinn i; agus na labhair ruinn anns a' chainnt Iudhaich, ann an cluasaibh an t-sluaigh a ta air a' bhalla.

12 Agus thubhairt Rabsaceh, An ann a dh'ionnsuidh do thighearna-sa agus a d'ionnsuidh-sa, a chuir mo thighearn mise, a labhairt nam briathra so? nach ann a dh'ionnsuidh nan daoine a ta 'nan suidhe air a' bhalla, a chum gu'n ith iad an salchar féin, agus gu'n ol iad an uisge¹ féin, maille ribhse?

13 An sin sheas Rabsaceh, agus ghlaodh e le guth àrd anns a' chainnt Iudhaich, agus thubhairt e, Cluinnibh briathran an rìgh mhòir, rìgh Asiria:

14 Mar so deir an rìgh, Na mealladh Hesechiaibh sibh, oir cha bhi e comasach air 'ur tèarnadh:

15 Agus na tugadh Hesechia oirbh bhuir dòchas a chur anns an Tighearn, ag ràdh, Gu cinnteach tèarnaidh² an Tighearn sinn, cha toirear thairis am baile so ann an làimh rìgh Asiria:

16 Na éisdibh ri Hesechia; oir mar so deir rìgh Asiria, Deanaibh *coimheangal* riumsa le tiodhlac, agus thigibh a m'ionnsuidh; agus itheadh gach fear d'a chrann-fìona, agus gach fear d'a chrann-fìge féin; agus òladh gach fear uisge a thob-air féin;

17 Gus an tig mise agus gu'n toir mi sibh gu tìr cosmhuil ri r' tìr arbhair agus fhìona, tìr arain agus fhion-liosan.

18 *Thugaibh an aire* nach cuir Hesechia impidh oirbh, ag ràdh, Tèarnaidh an Tighearn sinn. An do theasaig³ dée nan cinneach, gach aon a thìr féin, á làimh rìgh Asiria?

19 C'àit am bheil dée Hamait agus Arphaid? c'àit am bheil dée Shepharbhaim? an do theasaig iad Samaria as mo làimh-sa?

20 Cò am measg uile dhiathanan nan dùthchanna so, a theasaig an tìr féin as mo làimh-sa, gu'n teasairgeadh an Tighearn Ierusalem as mo làimh?

21 Ach dh'fhan iad 'nan tosd, agus cha d'thug iad focal freagraidh air; oir b'i àithne an rìgh, Na tugaibh freagradh air.

22 An sin thàinig Eliacim mac Hilciah, a bha os ceann an tighe, agus Sebnah an sgrìobhaiche, agus Ioah mac Asaiph an seanachaidh, gu Hesechia, le'n eudach reubta, agus dh'innis iad dha briathran Rabsaceh.

CAIB. XXXVII.

1 'Na theanntachd chuir Hesechia fios a dh'ionnsuidh Isaiah gu urnuigh a dheanamh air a shon. 8 Litir Shenacherib. 14 Urnuigh Hesechia. 21 Roimh-innis Isaiah sgrìos Shenacherib. 36 Bhuail aingeal an Tighearn camp nan Asirianach.

AGUS an uair a chuala Hesechia an rìgh e, reub e eudach, agus còmhdaich se e féin le eudach saic, agus chaidh e a steach do thlìgh an Tighearn.

2 Agus chuir e Eliacim a bha os ceann an tighe, agus Sebnah an sgrìobhaiche, agus seanairean nan sagart, còmhdaichte le eudach saic, gu Isaiah mac Amois, am fàidh.

3 Agus thubhairt iad ris Mar so deir Hesechia, Is là teinn agus achmlasan agus maslaidh an là so; oir tha clann air teachd gu imbe breith, agus neart gu breith cha 'n'eil ann.

4 Theagamh gu'n tabhair an Tighearn do Dhia fa'near briathran Rabsaceh, a chuir a thighearn rìgh Asiria a mhaslachadh an Dé bhèd; agus gu'n crouich e na briathran a chual an Tighearn do Dhia: cuir thusa ma ta suas urnuigh air son an iarmaid a dh'fhàgadh.

5 Mar sin thàinig òglaich³ rìgh Hesechia gu Isaiah.

6 Agus thubhairt Isaiah riu, Mar so their sibh ri 'ur tighearn, Mar so tha an Tighearn ag ràdh, Na biodh eagal ort air son nam briathran a chuala tu, leis an d'thug òglaich rìgh Asiria masladh dhomh-sa.

7 Feuch cuiridh mi osag air⁴, agus cluinidh e tuairisgeul⁵, agus pillidh e d'a thìr féin, agus bheir mi air tuiteam leis a' chlaideamh 'na thìr féin.

8 Mar sin phill Rabsaceh, agus fhuair e rìgh Asiria a' cogadh an aghaidh Libnah; oir chual e gu'n d'fhalbh e o Lachis.

9 Agus an uair a chual' e mu thimchioll Thirhacah rìgh Etiopia, ag ràdh, Thàinig e mach a chogadh riut: chuir e teachd-airean gu Hesechia, ag ràdh,

10 Mar so their sibh ri Hesechia rìgh Iudah, Na mealladh do Dhia thu, as am bheil thu ag earbsadh, ag ràdh, Cha toir-e Ierusalem thairis do làimh rìgh Asiria.

11 Feuch, chuala tu cìod a rinn rìgh-rean Asiria ris na dùthchannaibh uile, 'gan sgrìos gu tur; agus am bi thusa air do thearnadh?

12 An do theasaig³ dée nan cinneach

¹ mùn. ² teasairgidh. ³ seirbhìsich, searbhanta.

⁴ spiorad ann.

⁵ iomradh.

iadsan a sgrìos m'athriche-sa, *eadhon* Gosan, agus Haran, agus Reseph, agus mic Edein a bha ann an Telasar?

13 C'ait am bheil rìgh Hamait, agus rìgh Arphaid, agus rìgh mòr-bhaile Shepharbhaim, Hena, agus Ibah?

14 Agus ghabh Heseciah an litir o làimh nan teachdairean, agus leugh e i; agus chaidh Heseciah suas do thigh an Tighearn, agus sgaoil e i am fianuis an Tighearn.

15 Agus rinn Heseciah urnuigh ris an Tighearn, ag ràdh,

16 O Thighearn nan sluagh, Dhia Israeil, a ta a' d' chòmhnuidh *eadar* na cherubim; is tusa féin a' d' aonar, Dia uile rìoghachda na talmhainn; is tu a rinn na nèamhan agus an talamh.

17 Crom, O Thighearn, do chluas, agus cluinn; fosgail, O Thighearn, do shùilean, agus faic; agus cluinn uile bhriathran Shenacherib, a chuir e a mhaslachadh an Dé bheò.

18 Gu deimhin, O Thighearn, sgrìos rìghrean Asiria na cinnich uile, agus am fearann,

19 Agus thilg iad an dée anns an teine; oir cha *bu* dée iad, ach obair làmhan duine, fiodh agus clach; uime sin sgrìos iadsan iad.

20 Ach a nis, O Thighearn ar Dia, teas-airg sinu o a làimh; a chum gu'm bi fios aig uile rìoghachdaibh na talmhainn gur tusa, a Thighearn, an t-aon *Dia*.

21 An sin chuir Isaiah mac Amois fios gu Heseciah, ag ràdh, Mar so deir an Tighearn Dia Israeil, Do thaobh na h-urnuigh a rinn thu rium mu thimchioll Shenacherib rìgh Asiria;

22 So am focal a labhair an Tighearn m'a thimchioll-san; Rinn òigh-nighean Shìoin tàir ort, rinn i gàire fanoid riut; chrath nighean Ierusalem a ceann air do chùlaobh.

23 Cò d'an d'thug thu masladh agus toibheum? agus cò a thog thu do ghuth 'na aghaidh, agus a thog thu suas do shùilean gu h-àrd? *an ann* an aghaidh Ti naoimh Israeil?

24 Le do luchd-muinntir mhaslaich thu an Tighearn, agus thubhairt thu, Le lìon-mhoireachd mo charbad dhìr mi àirde nam beann, slìosan Lebanoin; agus gearraidh mi sìos a' chuid a's àirde d'a chraobhan seudair, rogha a chraobhan giuthais; agus thèid mi sìgh do ionad àrd a chrìche, frìdh a Charmeil.

25 Chladhaich mi agus dh'òl mi uisgeachan; agus le bonn mo chos thiormaich mi uile shruthan nan ionada daingichte.

26 Nach cuala tu o shean gu'n d'rinn mi e, agus o aimsiribh cén gu'n do dhealbh mi e? A nis thug mi gu crìch e,

gu'm biodh tusa chum baistibh daingichte chur fàs 'nan carnaibh sgrìos.

27 Uime sin bha an luchd-àiteachaidh air bheag neart; bha iad fo gheilt-chrith agus amhladh; bha iad mar fheur na macharach, agus mar an luibh uaine; *mar* fheur mullaich an tighe, agus *mar* an t-arbhar a sheargas mu'm fàs e suas.

28 Ach is aithne dhomh do shuidhe sìos, agus do dhol a mach, agus do theachd a steach, agus do bhoile a m' aghaidh.

29 A clionn gu'n d'thàinig do bhoile a m' aghaidh, agus d'ardan¹ a nìs gu m' chluasaibh; air an aobhar sin cuiridh mi mo dhubhan ann ad shròin, agus mo shrian ann ad bheul; agus pillidh mi air d'ais thu air an t-slighe air an d'thàinig thu.

30 Agus bithidh so 'na chomhlara dhuit; Ithibh air a' bhliadhna so an uì sin a dh'fhàsas leis féin, agus an dara bliadhna an ni a chinneas as a sin; agus an treas bliadhna cuiribh agus buainibh; agus suidhichibh fion-liosan, agus ithibh an toradh.

31 Agus gabhaidh am fuigheall a théid as do thigh Iudah, fathast freumh sìos, agus giùlainidh e toradh suas.

32 Oir o Ierusalem théid fuigheall a mach, agus iadsan a théid as o shliabh Shìoin: ni eud Tighearna nan sluagh so a choimhlonadh.

33 Air an aobhar sin, mar so deir an Tighearn mu thimchioll rìgh Asiria, Cha tig e a sìgh do'n chaithir so, agus cha tilg e saighead innte, agus cha tog e sgiath fa comhair, agus cha chuir e suas tòrr 'na h-aghaidh.

34 Air an t-slighe air an d'thàinig e, mar sin pillidh e; agus do'n chaithir so cha tig e steach, deir an Tighearn.

35 Agus dìonaidh mise a' chaithir so chum a tèaruadh, air mo sgàth féin, agus air sgàth Dhaibhidh m'òglaich.

36 Agus chaidh aingeal an Tighearn a mach, agus bhuaile e, ann an camp nan Asirianach, ceud agus ceithir fichead agus cùig mìle; agus an uair a dh'érich *daoine* sa' mhaduinn, bha iad sin uile 'nan corpaibh marbha.

37 Agus thog Senacherib rìgh Asiria air, agus dh'fhalbh e, agus phill e, agus ghabh e còmhnuidh ann an Ninebhel.

38 Agus tharladh, an uair a bha e ri aoradh ann an tigh Nisroch a dhé, gu'n do bhuail Adramelec agus Sareser, a mhic, e leis a' chladheamh, agus theich iad do thìr Armenia; agus rìghich Esarhadon a mhac 'ua àit.

CAIB. XXXVIII.

1 Nuair bha Heseciah tinn gu bàs rinn e urnuigh ri Dia, agus fhuair e gealladh gu'n cuirear cùig

bliadhna deug ri a làithibh. 7 Mar chomhara air so thug Dia air ais dubhar nan ceum. 9 Laoidh-bhuidheachais Hesechia.

ANNS na làithibh sin bha Hesechia tinn gu bàs; agus thàinig Isaiah am fàidh, mac Amois, d'a ionnsuidh, agus thubhairt e ris, Mar so tha an Tighearn ag ràdh, Cuir do thigh an ordugh¹; oir gheibh thu bàs, agus cha mhair thu beò.

2 An sin thionndaidh Hesechia 'aghaidh ris a' bhalla, agus rinn e urnuigh ris an Tighearn;

3 Agus thubhairt e, Guidheam ort, O Thighearn, cuimhnich a nis cionnus a ghluais mi a'd' làthair ann am firinn, agus le cridhe iomlan, agus a rinn mi an *ni a ta* maith a'd' shùilibh. Agus ghuil Hesechia gu goirt.

4 An sin thàinig focal an Tighearna dh'ionnsuidh Isaiah, ag ràdh,

5 Falbh agus abair ri Hesechia, Mar so deir an Tighearn, Dia Dhaibhidh d'athar, Chuala mise d'urnuigh, chunnaic mi do dheòir; feuch, cuiridh mi ri d' làithibh ciùg bliadhna deug;

6 Agus saoraidh mi thusa agus am baile so á làimh rìgh Asiria; agus dionaidh mi am baile so.

7 [Agus thubhairt Isaiah²,] *Se so a's* comhara dhuit gu'n dean an Tighearn an ni a labhair e.

8 Feuch, bheir mi air ais duhhar nan ceum, a ta air dol sìos leis a' ghrèin air ceumaibh³ Ahais, deich ceuman air ais. Agus phill a' ghrian air a h-ais deich ceuman air na ceumaibh air an deachaidh i sìos.

9 Sgrìobhadh Hesechia rìgh Iudah, an uair a bha e tinn, agus shlànuicheadh e o 'thinneas.

10 Thubhairt mi, ann an giorrachadh mò làithean, Théid mi a steach air dorsaibh na h-uaigne: chaill mi fuigheall mo bhliadhnachan.

11 Thubhairt mi, Cha'n fhaic mi nì's mò an Tighearn, *eadhon* an Tighearn, ann an tìr nam beò; cha seall mi air duine nì's mò, maille ri luchd-àiteachaidh an t-saoghail.

12 Tha m'ois air dealachadh rium, agus dh'atharraicheadh i air falbh mar *phàill-iun* buachaille; ghearradh as mo bheatha mar *gu'm b'ann* leis an fhigheadair; tha e 'gam chlaoidheadh le tinneas caithreach; o là eadhon gu h-oidhche tha thu a' cur as domh.

13 Shaoil mi, gus a' mhaduinn, gu'm briseadh e, mar leòmlan, mo chnàmhan uile; o là eadhon gu h-oidhche tha thu a' cur as domh.

14 Mar ghobhlan gaoithe *no mar* chorr,

rinn mi cànrann; rinn mi caoidh mar choluman: tha mo shùilean air fàilneachadh *le sealltuinn* suas. O Thighearn, tha mi air mo shàruchadh; bi thusa a'd' urras dhomh.

15 Ciod a their mi? Labhair e rium, agus fòs choimhlion e. Gluaisidh mi gu foil uile bhliadhnachan mo *bheatha*, air son àmhghair m'anama.

16 O Thighearn, troimh na *nithibh* sin bithidh iad beò, agus anns na *nithibh* sin tha beatha mo spioraid: mar sin shlànuich agus bheothaich thu mi.

17 Feuch, tha m'àmghair air a chaochladh gu fois; theasairg thu gu caomh m'anam o shlochd millteach; seadh, thilg thu air do chùlaobh m'ùile lochdan.

18 Gu deimhin cha dean an uagh luadh⁴ ort; cha toir am bàs cliù dhuit; cha chuir iadsan a théid sìos do'n t-slochd an dòigh ann ad fhirinn.

19 Am beò, am beò, molaidh esan thu, mar a dheanam-sa air an là'n diugh; foillsichidh an t-athair do'n chloinn do thairisneachd⁵.

20 Bha an Tighearn *leam* do m' thèarnadh; air an aobhar sin seinnidh sinn mo dhàin air na h-innealaibh-ciùil, uile làithean ar beatha, ann an tigh an Tighearn.

21 Agus thubhairt Isaiah, Gabhadh iad meall fhigean, agus sgaoileadh iad air an neasgaidh iad, agus slànuicheadh e.

22 Agus thubhairt Hesechia, Ciod e an comhara gu'n téid mi suas do thigh an Tighearna?

CAIB. XXXIX.

1 Chuir Merodach-baladan teachdairean a dh'ionnsuidh Hesechia: 2 dh'fheuch esan doibh uile ionmhas a thighe: 3 'nuair chual Isaiah so, dh'innis e do Hesechia gu'n rachadh gach ni a bha 'na thigh a ghluil an falbh gu Babilon.

ANNS an àm sin, chuir Merodach-baladan, mac Bhaladain rìgh Bhabilon, litir agus tiodhlac gu Hesechia; oir chual e gu'n robh e tinn, agus gu'n do shlànuicheadh e.

2 Agus rinn Hesechia gàirdeachas air an son; agus dh'fheuch e dhoibh tigh-tasgaidh a nithe luachmhor, an t-airgid, agus an t-òr, agus na spìosraidhean, agus an oladh luachmhor, agus a thigh-armachd gu léir, agus na h-uile ni a fhuaradh 'na ionmhasaibh; cha robh ni na thigh, agus 'na rioghachd uile, nach d'fheuch e dhoibh.

3 Agus thàinig am fàidh Isaiah gu rìgh Hesechia, agus thubhairt e ris, Ciod a thubhairt na daoine so? agus cia as a thàinig iad a d'ionnsuidh? Agus thubhairt Hesechia, Thàinig iad a m'ionnsuidh o thìr chéin, o Bhabilon.

¹ *Their àithne mu thimchioll do thighe.*

² *Faic II. Rìgh XX. 8, 9.*

³ *uairleadair-gréine.*

⁴ *iomradh.*

⁵ *d'fhìrinn.*

4 Agus thubhairt e, Ciod a chunnaic iad ann ad thigh? Agus thubhairt Heseciah, Na h-uile *nithe* a *th'*ann mo thigh chunnaic iad; cha 'n'eil ni ann am ionmhasaibh nach d'fheuch mi dhoibh.

5 An sin thubhairt Isaiah ri Heseciah, Cluinn focal Tighearna nan sluagh;

6 Feuch, tha na làithean a' teachd, anns am bi gach ni a *th'*ann ad thigh, agus a thaisg t'aithriche suas gus an là an diugh, air a ghiùlan air falbh gu Babilon; cha'n fhàgar ni air bith, deir an Tighearn.

7 Agus do d' mhacaibh a thigh uait, a ghineas tu, bheir iad leo; agus bithidh iad 'nan caillteanaich ann an luchairt rìgh Bhabiloin.

8 An sin thubhairt Heseciah ri Isaiah, *Is* maith focal an Tighearna a labhair thu; oir thubhairt e gu'm bi sìth agus fìrinn ann ré mo làthibh-sa.

CAIB. XL.

1 *Thug Dia comhfhurtachd d'a shluagh.* 3 *Searmonachadh Eoin Bhaiste.* 9 *Deadh sgeul an t-soisgeil.* 12 *Mòrachd agus cumhachd an Tighearna.*

THUGAIBH comhfhurtachd, thugaibh comhfhurtachd do mo shluagh-sa, deir 'ur Dia.

2 Labhraibh gu sòlasach ri Ierusalem; agus gladhaibh rithe, gu'n do choimhlionadh a cogadh, gu'n do ghlanadh a h-aingidheachd; oir fhuair i o làimh an Tighearna a dhà uiread r'a h-uile pheac-aibh.

3 Guth an ti a ghlaodhas anns an fhàsach¹, Ulluichibh slighe an Tighearna; rèitichibh, anns an di-threabh², slighe àrd d'ar Dia-ne.

4 Bithidh gach gleann air 'àrdachadh, agus gach sliabh agus cnoc air 'isleadh; agus nìthean an cam dìreach, agus na h-ionada garbha 'nan còmhnard réidh.

5 Agus foillsichear glòir an Tighearna, agus chi gach uile fheoil i le chéile; oir is e beul an Tighearna a labhair.

6 Tha guth ag ràdh, Eigh; agus thubhairt mise, Ciod a dh'éigheas mi? Is fear gach uile fheoil, agus tha a h-òirdheirceas uile mar bhlàth na macharach:

7 Tha am fear a' seargadh, am blàth a' crìonadh, 'nuair a shéideas gaoth an Tighearna air; gu cinnteach is fear an sluagh.

8 Tha am fear a' seargadh, am blàth a' crìonadh; ach seasaidh focal ar Dé-ne gu sìorruidh.

9 O thusa a tha tabhairt deadh sgéil do Shìon, gabh suas gu sliabh àrd, O thusa a tha tabhairt deadh sgéil do Ierusalem, tog do ghuth le neart; tog e, na biodh eagail ort; abair ri bailtibh Iudah, Feuch, bhuir Dia!

10 Feuch thig an Tighearna Iehobhah le làimh làidir, agus bheir a ghairdean buaidh a mach dha; feuch, tha a dhuais maille ris, agus 'obair 'na fhianuis.

11 Mar bhuachaille beathaichidh e a threud; le a ghairdean cuairtichidh e na h-uain, agus giùlainidh e *iad* 'na uclid; iomainidh e gu sèimh an spréidh a tha trom le h-àl³.

12 Cò a thomhais na h-uisgeachan ann an glaic a làimhe; agus a shìn a mach na nèamha le réis; agus a chruinnich duslach na talmhainn ann an soitheach-tomhais; agus a chothromaich na sléibhteann ann an sligibh, agus na cnuic ann am meigh-chothroim?

13 Cò a sheòl Spiorad an Tighearna, no mar aon d'a chomhairle, a theagaisg e?

14 Cò ris a chuir e a chomhairle, agus cò a theagaisg e, agus a sheòl dha ceum a' bhreitheanais, agus a dh'junnsaich dha eòlas, agus a sheòl dha slighe na tuisge?

15 Feuch, tha na cinnich mar bhoinne an t-soithich-uisge; agus measar iad mar dhus min na slighe-tomhais: feuch, togaidh e suas na h-eileana mar smùirnean:

16 Agus cha leòr Lebanon, gu a losgadh, agus cha leòr a bheathaichean air son iobairt-loisgte.

17 Tha na cinnich uile mar neo-ni 'na làthair-san; tha iad air am meas leis mar fhìor neo-ni agus dìomhanas.

18 Cò ris, ma seadh, a shamhlaicheas sibh Dia? agus ciod an coslas a nì sibh dha⁴?

19 Tilgidh am fear-ceirde dealbh snaidhte, agus cuiridh an t-òr-cheard thairis e le h-òr; agus nì e slabhruidhean airgid *air a shon*.

20 Am fear aig nach 'eil fìù tabhartas, taghaidh e mìr fiodha nach grod; iarraidh e mach dha féin fear-oibre seòlta, a chuireas an uigheam dealbh snaidhte nach téid a ghluasad.

21 Nach d'fhuair sibh fios? nach cuala sibh *sgeul*? nach do chuireadh an céill duibh o thùs? nach do thuig sibh o *leagadh* bunaite na talmhainn?

22 *Is esan* a ta 'na shuidhe air cuairt na talmhainn, agus *tha* a luchd-àiteachaidh mar fhionnain-fheoir⁵; a ta sìneadh a mach nan nèamha mar sgàil thana, agus 'gan sgaileadh mar bhùth anns an gabhar còmhnuidh.

23 A tha tabhairt phrionnsachan gu neo-ni, agus a' deanamh bhreitheamhna 'nan dìomhanas.

24 Seadh, cha suidhichear iad, nì mò a chuirear iad, nì mò a fheumhaicheas am bun san talamh; an uair a shéideas e

¹ Guth neach a' gladhaich; Anns an fhàsach, &c.
² fhàsach. ³ na caoraich-altruim.

⁴ ciod an samhhladh bheir sibh air?

⁵ leumnaich-uaine, dhreollain.

orra, seargaidh iad; agus bheir a' chuairt-ghaoth air falbh iad mar asbhuain.

25 Cò ris ma ta a shamhluchas sibh mise, no a choimeasar mi? deir an Tì naomh.

26 Togaibh 'ur sùilean an àird, agus feuchaibh, cò a chruthaich iad so; Esan a bheir a mach an armaitean air àireamh; a ghairmeas orra uile air an ainm; troinhe meud a neirt agus treise a chumhachd, cha bhi aon air chall¹.

27 C'uime a deir thusa, O Iacoib, agus a labhras tu, O Israeil. Tha mo shlighe foluichte o'n Tighearn, tha mo chòir air a leigeadh air dearmad le mo Dhia?

28 Nach aithne dhuit, nach cuala tu? An Dia bith-bhuan, an Tighearn, Cruith-fhear chrìocha na talmhainn, cha'n fhannaich agus cha sgithich e; cha'n fheudar a thuigse a rannsachadh.

29 Bheir esan neart do'n anmhunn, agus dhoibhsan a ta gun lùgh meudaichidh e treise.

30 Fàsaidh na h-òigfhir lag agus sgèth, agus tuitidh an òigridh thaghta gu làr;

31 Ach iadsan a dh'fheithes air an Tighearn gheibh iad spionnadh nuadh; àridh iad suas mar iolair air a sgiathaibh; ruithidh iad agus cha bhi iad sgith, sìubhlaidh iad agus cha'n fhàs iad fann.

CAIB. XLI.

1 Nochd Dia a fhreasdal agus a ghràdh do'n Eaglais. 9 Chomhairlich e d'a shluagh an dòchas a shuidheachadh airsan do bhrìgh gu'n cum e suas iad le deas làimh fhèantachd. 21 Diomhanas nan dèe coimheadh.

BITHIBH 'nur tosd a'm' làthair, O eileana, agus ath-nuadhaicheadh na slòigh an neart; thigeadh iad am fagus, an sin labhraidh iad; dlùthaicheamaid r'a chéile chum tagraidh.

2 Cò a dhùisg suas an t-ionracan o'n ear, a ghairm e chum a choisie, a chuir na cinnich 'na fhocair, agus a thug dha riaghladh thar rìghribh? a rinn iad mar an duslach roimh a chlaidheamh, agus mar an asbhuain fhuadaichte roimh a bhogha?

3 Ruaig e iad, chaidh e thairis ann an tèaruinteachd; air slighe nach d'imich e roimhe le a chosaibh.

4 Cò a dh'oibrich agus a choimhlion so, a' gairm nan ginealach o thùs? Mise an Tighearn, an ceud neach, agus maille ruisan air dheireadh, is mise e.

5 Chunnaic na h-eileana, agus ghabh iad eagal; iomallan na tìre, agus bha iad fo uamhas; dhlùthaich iad, thàinig iad am fagus.

6 Chuidich gach fear a choimhearsnach, agus thubhairt e r'a bhràthair, Bì misneachail.

7 Mar sin thug an saor misneach do'n òr-cheard; esan a mhùnicheas leis an òrd, do'n fhear a bhuailas air an innein, ag ràdh, *Tha e* ullamh chum a thàladh²; agus dhaingnich e le tairngibh e, air chor as nach gluasteadh e.

8 Ach thusa Israeil, m'òglach, a Iacoib, a ròghnaich mi; sliochd Abraham mo charaid;

9 *Thusa*, a stiùir mi o iomallaibh na talnhaing, agus a ghairm mi o mheasg a maithen; agus thubhairt mi riut, Is tu m'òglach; ròghnaich mi thu, agus cha do chuir mi cùl riut:

10 Na biodh eagal ort, oir *tha* mise maille riut; na biodh geilt ort, oir is mise do Dhia; neartaichidh³ mi thu; seadh, cuidichidh⁴ mi thu; seadh, cumaidh⁵ mi suas thu le deas làimh m'fhèantachd.

11 Feuch nàraichear agus maslaichear iadsan uile a bha air bhoile riut; bithidh iad mar neo-ni; agus théid iadsan a ni strì riut am mugha.

12 Iarraidh tu iad, agus cha'n fhaigh thu iad, *eadhon* na daoine a rinn strì riut; bithidh na daoine a rinu cogadh riut mar neo-ni, agus mar ni gun bhrìgh.

13 Oir tha mise, an Tighearn do Dhia, gad chumail suas air do làimh dheis, tha mi ag ràdh riut, Na biodh eagal ort, ni mise cabhair ort.

14 Na biodh eagal ort, a chnuimh a Iacoib, o dhaoine bàsmhor Israeil; ni mise cabhair ort, deir an Tighearn, agus is e d'fhear-saoraidh Ti naomh Israeil.

15 Feuch, ni mise thu a'd' inneal-buailidh geur, nomha, aig am bi fiacra; buailidh tu na sléibhtean, agus pronnaidh tu gu mìn iad; agus ni thu na cnuic mar mhol.

16 Fosgaidh tu iad, agus bheir a' ghaoth air falbh iad, agus sgapaidh a' chuairt-ghaoth iad; ach ni thusa gàird-eachas anns an Tighearn, ni thu uail ann an Ti naomh Israeil.

17 An uair a bhitheas am bochd agus an t-ainnis ag iarraidh uisge, agus nach bi e ann; agus a bhitheas an teagadh air tìormachadh le tart; mise Iehobhal freagam iad; Dia Israeil, is mi nach tréig iad.

18 Fosgaidh mi aimhnichean anns na h-ionadaibh àrda, agus tobraichean ann am meadhon nan gleann; ni mi an fàsach 'na linne uisge, agus am fearann tioram 'na slruthaibh uisge.

19 Cuiridh mi anns an fhàsach an seudar, an sitta, am miortal, agus an crann-oladh; suidhichidh mi anns an fhàsach an giuthas, an gall-ghiuthas agus am bocsa le chéile:

¹ air dearmad, a dhith.

² ag ràdh mu'n tàthadh, Is maith e.

³ neartaich.

⁴ chuidich.

⁵ chum.

20 A chum gu'n faic agus gu'n aithnich iad, agus gu'n toir iad fa' near, agus gu'n tuig iad maraon, gur i làmh an Tighearn a rinn so, agus gur e Ti naomh Israeil a dhealbh e.

21 Thugaibh am fagus 'ur cùis, deir an Tighearn; thugaibh a làthair bhuir mòr-chumhachdan, deir rìgh Iacòib.

22 Thigeadh iad am fagus, agus innseadh iad dhuinn na nithe a thig gu crìch; innseadh iad dhuinn ciod iad na nithe a bha roimhe, chum gu'n toir sinn fa' near iad; agus gu'm bi fios againn air a' crìch; no cuireadh iad an cèill nithe ri teachd.

23 Innsibh dhuinn na nithe a thig gu crìch an dèigh so, agus aithnichidh sinn gur dée sibh; seadh deanaibh maith no deanaibh olc, a chum gu'n amhairc sinn¹, agus gu'm faic sinn e maraon.

24 Feuch, is neo-ni sibh, agus is ni gun bhrìgh bhuir n-obair: is gràineileachd *esan* a ròghnaicheas sibh.

25 Thog mi suas *fear* o thuath, agus thig e; o éirigh na gréine gairmidh e air m'ainm; agus thig e nuas air prionnsaibh mar air clàbar, agus mar a shaltras an criadhaidh a' chriadh.

26 Cò a dh'innis o thùs, ionnus gu'm biodh fios againn; agus roimh làimh, gu'n abramaid, *Tha e ceart?* Seadh, cha 'n'eil neach ag innseadh, seadh, cha 'n'eil neach ag cur an cèill, seadh, cha 'n'eil neach ag cluinntinn bhuir briathra.

27 *Their mi ri Sion* an toiseach, Feuch, feuch iad sin; agus do Ierusalem bheir mi teachdair deadh sgéil.

28 Oir dh'amhairc mi, agus cha robh neach ann, agus 'nam measg cha robh fear-comhairle; no neach a bheireadh freagradh an uair a dh'fheòraich mi dhiubh.

29 Feuch, is dìomhanas iad uile; is neo-ni an oibre; is gaoth agus faoineis an dealbhan leaghta.

CAIB. XLII.

1 Dreuchd agus sagartachd Chrìosd. 10 Earail gu Dia a chliùthachadh. 17 Nàraichear iadsan a ta cur an dòchais ann an dealbh snaidhte. 18 Chronaicheadh clann Israeil air son am mi-chreidimh.

FEUCH m'òglach, a chumas mi suas; m'aon taghta, anns am bheil tlachd aig m'anam: chuir mi mo spiorad air; foillsichidh e breitheanas do na cinnich.

2 Cha ghlaodh e, agus cha tog e iolach; agus cha chluinnear a gluth anns na sràidibh².

3 A' chuile bhrùite cha bhris e, agus an lìon d'am bheil caòl smùid cha mhuch e; foillsichidh e breitheanas chum fìrinn.

4 Cha tig fàilinn na briseadh air, gus an

suidhich e breitheanas air an talamh; agus feithidh na h-eileana air a lagh.

5 Mar so deir an Tighearn Dia, *esan* a chruthaich na nèamhan, agus a shìn a mach iad; a sgaoil a mach an talamh agus na chinneas as; a tha tabhairt anail² do'n t-sluagh a ta air, agus deò dhoibhsan a ta 'g imeachd air:

6 Ghairm mise Iehoblah thu ann am fìreantachd, agus gabhaidh mi greim do d' làimh, agus gleidhidh mi thu; agus bheir mi thu mar choimhcheangal do'n t-sluagh, mar sholus do na cinnich.

7 A dh'fhosgladh nan sùilean dalla; a thabhairt nam prìosanach a mach as a' phrìosan, agus na muinntir a ta 'nan suidhe ann an dorchadas á tigh na daorsa.

8 Is mise Iehoblah, is e sin m'ainm; agus mo ghloir cha tabhair mi do neach eile, no mo chliù do dhealbhan snaidhte.

9 Feuch na seann nithe, thàinig iad gu crìch, agus nithe nuadha cuiream an cèill; mu'm bris iad a mach, foillsichidh mi dhuibh iad.

10 Seinnibh do'n Tighearn òran nuadh; *seinnibh* a chliù o iomall na talmhainn; sibhse a bhios dol air cuan, agus na h-uile a ta 'ga lìonadh; eileana, agus na li-uile a ta chomhnuidh anna.

11 Togadh am fàsach *iolach*, agus na bailtean a ta ann; na bailtean beaga, luchd-àiteachaidh Chedair; deanadh luchd-àiteachaidh na creige comh-ghair; o mhuillach nan sléibhtean togadh iad iolach.

12 Thugadh iad glòir do'n Tighearn, agus cuireadh iad an cèill a chliù am measg nan eilean.

13 Mar threun-fhear théid an Tighearn a mach; mar fhear-cogaidh dùsgaidh e suas eud: glaothaidh e, seadh togaidd e iolach; ni e gaisge an agbaidh a naimh-dean.

14 Dh'fhan mi fada sàmlach, bha mi a'm' thosd, chum mi orm féin¹; nis éighidh mi mar mhnai ri saothair; sgriosaidh mi, agus ithidh mi suas maraon.

15 Cuiridh mi fàs sléibhtean, agus tiormaichidh mi an fear uile; ni mi na h-aimhnichean 'nan eileanaibh, agus tiormaichidh mi na linneachan uisge.

16 Agus stiùraidh mi na doill air slighe nach b'aithne dhoibh; troimh cheumaibh air nàch robh iad eòlach treòraichidh mi iad; ni mi an dorchadas 'na sholus rompa, agus *ni mi* slighean fiara dìreach: na nithe so ni mi air an son, agus cha tréig mi iad.

17 Pìllear air an ais, nàraichear gu tur, iadsan a ta cur an dòchais ann an dealbh

¹ bi sìan fo uamhas.

² am muigh.

³ analach.

⁴ Am bi mi fathast a'm' thosd? An cum mi orm féin?

sraidhte; a ta 'g ràdh ris na dealbhan leaghta, Is sibhse ar dée-ue.

18 Cluinnibh, sibhse ta bodhar; agus a dhaoine dalla, amhaireibh a chum gu'm faic sibh.

19 Cò a tha dall ach m'òglach-sa, no bodhar mar an teachdair a chuir mi uam? Cò a tha dall mar esan a ta iomlan, no dall mar òglach an Tighearna?

20 Tha thu faiciun iomadh ni, ach cha 'n'eil thu tabhairt fa'near; tha do chluas-an fogsailte, ach gun bhi cluinntinn.

21 Tha an Tighearn gràsmhor air sgàth 'fhuirinn féin; àrdaichidh e an lagh, agus cuiridh e urram air.

22 Ach is sluagh so a tha spùinntè agus creachta; tha iad uile air an glacadh ann an slochdaibh, agus air an druideadh a steach ann am prìosaibh; rimeadh iad 'nan còbhartach, agus cha 'n'eil neach 'gan tèarnadh; 'nan creich, agus cha 'n'eil neach a deir, Thoir air ais.

23 Cò 'nur measg a dh'éisdeas ri so; a bheir fa'near, agus a ghabhas suim san àm ri teachd?

24 Cò a thug Iacob mar chobhartach, agus Israel do'n luchd-creachaidh? Nach b'e an Tighearn, esan an aghaidh an do pheacaich iad, agus nach b'àill leo gluasad na shligheibh, ni mò thug iad géill d'a reachd?

25 Air an aobhar sin dhòirt e air teas a chorruih, agus neart a' chatha; agus dh'fhadaidh e teine mu'n cuairt da, ach cha do thuig e; agus loisg so e, gidheadh cha d'thug e fa'near.

CAIB. XLIII.

1 Thug Dia comhfhurtachd do'n eaglais le 'gheall-anaibh prìseil: 8 ghairm e an sluagh 'na làthair a dh'fhaicinn a chumhachd: 14 roimh-innis e sgrìos Bhabailon, 18 agus tèaruinteachd a shluagh féin. 22 Chronaich Dia a phobull a chionn gu'n do thréig iad a sheirbhhis.

ACH a nis mar so deir an Tighearn a chruthaich thu, O Iacob, agus a dhealbh thu, O Israeil; Na biodh eagall ort, oir shaor mise thu; ghairm mi thu air d'ainm; is leamsa thu.

2 An uair a shìubhlas tu troimh na uisgeachaibh, *bithidh* mise maille riut; agus troimh na aimhnichibh, cha tig iad tharad; an uair a dh'imicheas tu troimh an teine, cha loisgear thu, agus cha dean an lasair greim ort¹.

3 Oir is mise an Tighearn do Dhia, Ti naomh Israeil, d'fhear-saoraidh: thug mi an Eiphit ann ad éiric; Etiopia agus Seba air do shon.

4 A chionn gu'n robh thu luachmhor ann am shealladh, fhuair thu urram, agus thug mise gràdh dhuit; uime sin bheir

mi daoine air do shon, agus slòigh an éiric t'anama.

5 Na biodh eagall ort, oir tha mise maille riut; o'n ear bheir mi do shliochd, agus o'n iar cruinnichidh mi thu:

6 Their mi ris an àirde tuath, Thoir seachad, agus ris an àirde deas, Na cum air ais; thoir mo mhic o chéin, agus mo nigheanan o chrìochaibh na talmhainn;

7 *Eadhon* gach neach a ta air a ghairm air m'ainm-sa; oir chum mo ghloire chruthaich mi e, dhealbh mi e; seadh, rinn mi e.

8 Thugaibh a mach iadsan a tha dall, agus sùilean aca; agus a ta bodhar, agus chluasan aca.

9 Cruinnichear na cinnich uile ri chéile, agus tionaillear na slòigh; cò 'nam measg a dh'fhoillsicheas so, agus a dh'innseas duinn na nithe air thoiseach? Thugadh iad a làthair am fianuisean, a chum gu'm bi iad air am fireanachadh; no éisdeadh iad, agus aidicheadh² iad, *Tha sin* fìor.

10 Is sibhse m'fhiannuisean, deir an Tighearn, eadhon m'òglach a ròghnaich mi; a chum gu'n aithnich agus gu'n creid sibh mi; agus gu'n tuig sibh gur mi Eisan; romham-sa cha robh dia sam bith air a dhealbhadh, ni mò bhitheas aon a'm' dhéidh.

11 Is mise, *eadhon* mise, an Tighearn; agus a mach uamsa³ cha 'n'eil slànuihear ann.

12 Dh'fhoillsich mise, agus theasairg mi, agus chuir mi'n céill, an uair nach robh *dia* eile 'nur measg; uime sin is fianuisean sibh dhomhsa, deir Iehobhah, gur mi Dia.

13 Eadhon mu'n robh là ann, *is* mi E; agus cha 'n'eil neach ann a theasairgeas a'm làimh; oibrichidh mise, agus cò a bhacas e?

14 Mar so deir an Tighearn, 'ur fear-saoraidh, Ti naomh Israeil, Air bhuir son-sa chuir mi fios gu Babilon, agus thug mi nuas a croinn-dhruididh uile, agus na Caldéich a ni uaill⁴ 'nan longaibh.

15 Is mise an Tighearn, bhuir Ti naomh, Cruith-fhear Israeil, bhuir rìgh.

16 Mar so deir an Tighearn, esan a ni slighe anns an fhaighe, agus rathad anns na h-uisgeachaibh làidir;

17 A bheir a mach an carbad agus an t-each, an armaill agus am feachd; le chéile luidhidh iad sìos, agus cha'n éirich iad; chuireadh as iad, mhùchadh iad mar asgart.

18 Na cuimhnichibh na nithe a bh'ann roimhe; agus na nithe a bha o shean na tugaibh fa'near.

19 Feuch ni mi ni nuadh; a nis brisidh

¹ cha dearg an lasair ort.

² abradh.

³ a bhàrr ormsa.

⁴ iolach.

e mach : nach toir sibh aire dha ? Seadh, ni mi anns an fhàsach slighe, agus aimhnichian anns an di-threabh.

20 Bheir fiadh-bheathach na macharach glòir dhomh ; na dràgonan agus na caill-eachan-oidhche ; a chionn gu'n d'thug mi uisgeachan anns an fhàsach, aimhnichian anns an di-threabh ; a chum deoch a thabhairt do m' shluaigh ; do mo mhuinntir thaghta.

21 An sluagh so dhealbh mi air mo shon féin ; cuiridh iad an céill mo chliù.

22 Gidheadh cha doghairm thu orm, O Iacob ; ach ghabh thu seirbhe dhìomh, O Israeil.

23 Cha d'thug thu a m' ionnsuidh meanbh-chrohd do thabhartasa loisgte ; ni mò thug thu urram dhomh le t'ìobairtibh ; cha do shàruich mi thu le tabhartas, ni mò sgèithich mi thu le tùis.

24 Cha do cheannaich thu dhomh-sa le h-airgid a' chuile chùbhraidh, ni mò lìon thu mi le saill t'ìobairtean ; ach shàruich thu mi le do lochdaibh : sgèithich thu mi le d' eu-ceartaibh.

25 Is mise, mise féin, esan a dhubhas d' eu-ceartan as, air mo sgàth féin ; agus do lochdan cha chum mi air chuimhne.

26 Cuir a m' chuimhne, tagramaid ri chéile ; cuir an céill do chùis, dh'fheuchainn an glan thu thu féin.

27 Pheacaich do cheud athair, agus chiontaich do luchd-teagaisg a m' aghaidh :

28 Uime sin sgar mi mach uachdarain an ionaid naoimh ; agus thug mi thairis Iacob chum mallachaidh, agus Israel chum maslaidh.

CAIB. XLIV.

1 Thug Dia comhshurtachd d'a eaglais. 9 Dìomhanas luchd-deanamh dhealbhan snaidhte. 21 Chomhairlich Dia d'a shluaigh an dòigh a chur 'na thròcair, 28 agus gheall e gu'n suidhicheadh e iad a ris 'nan tìr le làimh Chiruis.

ACH a nis éisd, O Iacob in'òglach, agus Israeil a ròghnaich mi.

2 Mar so deir an Tighearn a chruthaich thu, agus a dhealbh thu o'n bhroinn, agus a chuidicheas thu ; Na biodh eagall ort, a Iacob in'òglach, agus a Iesuruin a ròghnaich mi ;

3 Oir dòirtidh mi mach uisge air an tartmhor, agus sruthan¹ air an fhearann chruaidh ; dòirtidh mi mach mo Spiorad air do shliochd, agus mo bheannachd air do ghineil.

4 Agus fàsaidh iad suas mar anns an fheur ; mar gheugaibh seilich ri taobh nan sruth-chlaisean.

5 Their am fear so, Is leis an Tighearn

mise ; agus aimnichear fear eile air ainm Iacob ; agus sgrìobhaidh fear eile le a làimh² do'n Tighearn, agus sloinnidh se e féin air ainm Israeil.

6 Mar so deir an Tighearn, rìgh Israeil, agus 'fhear-saoraidh, Tighearn nan sluagh, Is mi an ceud neach, agus is mi an neach deireannach ; agus a mach uamsa cha 'n eil dia ann.

7 Agus cò, mar mise, a ghairmeas, agus a chuireas an céill e, agus a chuireas an ordugh dhomh c, o'n àm an do shuidhich mi an sluagh o shean ? na a chuireas an céill duinn³ na nithe a ta a' teachd, agus a ta ri teachd.

8 Na biodh eagall oirbh, agus na biodh geilt oirbh ; nach d'fhoillsich mise dhuit o'n àm iud, agus nach d'innis mi ? seadh is fianuisean sibh dhomh. An bheil dia ann ach mise ? seadh cha 'n eil dia⁴ eile ann ; cha'n aithne dhomh aon.

9 Iadsan a ni dealbh snaidhte, is dìomhanas iad uile ; agus 'nan nithibh taitneach cha bhi tairbhe ; agus tha iad 'nam fianuisibh 'nan aghaidh féin, nach faic iad, agus nach tuig iad, a chum gu'm biodh iad air an nàrachadh.

10 Cò a dhealbh dia, no a thilg dealbh leaghta, anns nach 'eil tairbhe sam bith ?

11 Feuch, bithidh a chompanaich nìle air an nàrachadh ; agus an luchd-òibre, is daoine iad⁵ : cruinnichear iad uile r'a chéile, seasadh iad suas ; bithidh eagall orra, agus bithidh iad air an nàrachadh le chéile.

12 Gearraidh an gobha mìr iaruin, oibrichidh se e anns na h-eibhlidh, agus ni e a chumadh le h-ordaibh, agus caithidh e spionnadh a ghairdein air ; seadh bithidh e ocrach, agus fàilnichidh a neart ; cha'n òl e uisge, agus bithidh e fann.

13 Sinidh an saor a mach a riaghail, comharaichidh se e le dath ; cuiridh e cumadh air leis an lochdar, agus sgèithidh se e leis a' ghobhal-roinn ; agus dealbhaidh se e a réir coslais fir, a réir maise duine, chum fantuinn anns an fhàrdach.

14 Gearraidh e sìos craobhan seudair dha féin, agus gabhaidh e an giuthas agus an darach, a thaghas e dha féin an measg chraobhan na fridhe⁶ ; suidhichidh e cram-uinsinn, agus altruidh an t-uisge e.

15 An sin bithidh e aig duine chum a losgadh ; agus gabhaidh e dheth, agus garaidh se e féin ; seadh, cuiridh e teime ris, agus deasaichidh e aran ; seadh, ni e dia, agus bheir e aoradh dha ; ni e dealbh snaidhte dheth, agus cromaidh e sìos dha.

16 Cuid dheth loisgidh e san teine ; le

¹ caochana.

² cuiridh fear eile comhar air a làimh.

³ doibh.

⁴ didéin, carraig. Eabh.

⁵ air an luchd-òibre bithidh rugha gruaidhe.

⁶ agus caithidh e a neart air craobhan na fridhe.

cuid eile dheth *deasaichidh* agus ithidh e feoil; ròstaidh e biadh, agus sàsuichear e; an sin garaidh se e *féin*, agus their e Aha, rinn mi mo gharadh; dh'aithnich mi an teine.

17 Agus do'n chuid eile dheth ni e dia, eadhon dealbh snaidhte dha féin; cromaidh e sìos dha, agus bheir e aoradh dha; agus ni e urnuigh ris, agus their e, Teas-airg mi, oir is tu mo dhia.

18 Cha 'n'eil eòlas aca, ni mò tha tuigse aca; oir dhruid e an suilean air chor as nach faic iad, agus an cridheachan air chor as nach tuig iad.

19 Agus cha 'n'eil aon neach a' toirt fa'near 'na chridhe, ni mò tha eòlas no tuigse aige gu a ràdh, Loisg mi cuid dheth san teine, dheasaich mi fòs aran air eibhlibh dheth; ròist mi feoil agus dh'ith mi, agus an dean mi am fuigheall deth 'na ghràineileachd? an crom mi mi féin sìos do bhun craobhe?

20 Tha e a' teachd beò air luathre; thug cridhe meallta air seacharan e, air chor as nach toir e as 'anam féin; ni mò their e, Nach 'eil breug ann am làimh dheis?

21 Cuimhnich na nithe so, O Iacoib; agus Israeil, oir is tu m'òglach; dhealbh mi thu, is òglach dhomhsa thu; O Israeil, cha leig mise air d'cuimhn' thu.

22 Dhubbh mi as, mar neul, d'eu-ceartan; agus mar cheò, do lochdan; pill rium, oir shaoir mise thu.

23 Seinnibh, O nèamhan, oir thug an Tighearn gu crìch; togaibh iolach, O dhoimhneachda na talmhainn; brisibh a mach le ceilleir, a shlèibhteann; O dhoirc, agus gach craobh a ta ann; oir shaoir an Tighearn Iacob, agus ghlòraich se e féin ann an Israel.

24 Mar so deir an Tighearn d'fhear-saoraidh, agus esan a dhealbh thu o'n bhroinn; Is mise an Tighearn, cruith-fhear nan uile *nithe*; a ta sìneadh nan nèamhan a mach a'm aonar; a ta sgaioleadh na talmhainn leam féin;

25 A bheir gu neo-ni comharan nam mealltairean, agus a chuireas na fiosaichean air chuthach; a philleas daoine glìce air an ais, agus a thionndaidheas an eòlas gu amaideachd.

26 A dhaingnicheas focal a sheirbhisich, agus a choimhlionas comhairle a theachd-airean; a deir ri Ierusalem, Bithidh tu air t'àiteachadh; agus ri bailtibh Iudah, Bithidh sibh air bhur togail; agus a h-ionada fàsail togaidh mi suas.

27 A deir ris an doimhne, Bi air do thìormachadh; agus tìormaichidh mi t'aimhnichean:

28 A deir mu Chirus, Is e mo bhuach-

aille; agus coimhlionaidh e m'uile thoil; ag ràdh ri Ierusalem, Togar thu; agus ris an teampull, Leagar do bhunait¹.

CAIB. XLV.

1 *Ghairm Dia Cirus air sgàth Iacoib agus Israeil.*

11 *Gheall e saorsa agus slàinte d'a shluagh.* 20 *Diomhanas dhealbhann snaidhte.* 22 *Slàinte an Tighearna do uile iomallaibh na talmhainn.*

MAR so deir an Tighearn r'a aon ungta, ri Cirus air am bheil greim agam air a làimh dheis, a cheannsachadh chinneach roimhe, agus fuasgailidh mi leasraidh rìghrean; a dh'fhosgladh nan còmhlaich roimhe, agus cha bhi na geat-achan air an druideadh.

2 Thèid mise romhad, agus ni mi na *slighean* fiara dìreach; na còmhlaichean umba spealgaidh mi, agus na croinn iarunn brisidh mi 'nam bloighdibh.

3 Agus bheir mi dhuit ionmhasan an dorchadais, agus taisgeachan nan ionada diomhair; a chum gu'm bi fios agad gur mise an Tighearn, a ghairm thu air d'ainm, Dia Israeil.

4 Air sgàth Iacoib m'òglaich, agus Israeil a ròghnaich mi, ghairm mi eadhon air d'ainm thu; thug mi sloinneadh ort, agus thu aineolach orm.

5 Is mi an Tighearn, agus cha 'n'eil ann ach mi; a mach uam-sa cha 'n'eil Dia ann: crìslaichidh mi thu, agus thu aineolach orm.

6 A chum gu'm bi fios aca o éirigh na grèine agus o'n iar, nach 'eil ann ach mi. Is mise an Tighearn, agus cha 'n'eil atharrach² ann.

7 Taim a' dealbhadh an t-soluis, agus a' cruthachadh an dorchadais; a' deanamh sìthe, agus a' cruthachadh dòlais; tha mise an Tighearn a' deanamh *nan nithe* so uile.

8 Silibh, O nèamhan, o'n àird, agus frasadh na neoil a nuas fireantachd; fosgladh an talamh, agus gineadh iad slàinte, agus fàsadh fireantachd a nìos maraon; is mise an Tighearn a chruthaich e.

9 Is an-aobhin dhasan a nì strì ris an fhear a rinn e; an t-slige-chreadha ri fear-deilbh na creadha: an abair a' chriadh ris-san a chumas i, Ciod a tha thu deanamh? no *an abair* an ni a rinn thu, Cha 'n'eil làmhnan aige-san a *rinn* mi?

10 Is an-aobhin dha-san a their r'a ath-air, Ciod a ta thu gintinn? no r'a mhàth-air, Ciod a ta thu breith?

11 Mar so deir an Tighearn, Ti naomh Israeil, agus esan a dhealbh e, Feòraichibh dhìom nithe ri teachd, mu thimchioll mo chloinne; agus iarraibh orm a thaobh oibre mo làmh³.

12 Is mise a rinn an talamh, agus chrutli-

¹ stéidh.

² aon eile.

³ Am bheil sibh a' cur ceist ormsa mu nithibh ri

teachd, a thaobh mo chloinne? no am bheil sibh a' toirt àithne dhomh mu thimchioll oibre mo làmh?

aicli mi an duine air; is iad mo làmhnan a shìna mach na n-èamhan; agus d'am feachd uile thug mi àithne.

13 Thig mi esan suas ann am fireantachd, agus ni mi dìreach 'uile shlighean; togaidh e mo chaithir, agus fuasgailidh e mo bhraighdean; cha'n ann air son luach, no air son duaise, deir Tighearn nan sluagh.

14 Mar so deir an Tighearn, Saothair na h-Eiphit, agus ceannachd Etiopia, agus na Sabeich, daoine àrda ann an cruth; thig iad thairis a d'ionnsuidh, agus bithidh iad leat¹; leanaidh iad thu; ann an cuibh-richibh thig iad thairis; agus cromaidh iad sìos duit, agus cuiridh iad suas ath-chuinge riut; ag ràdh, Gu deimhin ann-asda tha Dia; agus cha 'n'eil Dia eile ann.

15 Gu deimhin is Dia thusa a ta 'gad fholachadh féin, O Dhé Israeil, an Slàn-uirgear.

16 Tha iad air an nàrachadh, tha iad eadhon air am maslachadh, an t-iomlan diubh; cuirear iad maraon gu h-amhladh, a tha 'nan luchd-deanamh iodh-olan.

17 Ach saorar Israel anns an Tighearn le saorsa shiorruidh; cha nàraichear sibh, ni mò mhaslaichear sibh, feadh linne na siorruidheachd.

18 Oir mar so deir an Tighearn, a chruthaich na n-èamhan; esan, eadhon Dia, a dhealbha an talamh agus a rinn e, esan a dhaingnich e; (cha do chruthaich e gu dìomhain e, dhealbha se e gu bhì air 'àiteachadh;) Is mise an Tighearn, agus cha 'n'eil atharrach² ann.

19 Cha do labhair mi ann an uaigneas, ann an ionad dorchaidh do'n talamh; cha dubhairt mi ri sliochd Iacoib gu dìomhain³, Iarraibh mi: is mise an Tighearn a labhras ann am fireantachd, a dh'fhoillsicheas nithe cearta.

20 Cruinnichibh sibh féin, agus thigibh; dlùthaichibh ri chèile, sibhse a ta air dol as o mheas gun cinneach; cha 'n'eil eòlas aca san a ta cur suas fiodha an deilbh shnaidhte, agus a' deanamh urnuigh ri dia nach urrainn tèarnadh.

21 Cuiribh an céill, agus thugaibh am fagus; seadh, cuireadh iad an comhairle ri chèile; cò a dh'aithris so o chian? a dh'innis e o'n àm ud? nach mise, an Tighearn? agus cha 'n'eil dia tuilleadh ann ach mi; Dia ceart agus Slàn-uirgear; cha 'n'eil ann ach mi.

22 Seallaibh riumsa, agus bithibh air bhur tèarnadh, uile iomalla na talmhainn; oir is mise Dia, agus cha 'n'eil atharrach ann.

23 Oir féin mhionnaich mi; chaidh firinn a mach as mo bheul; briathar, agus cha phill e air ais; Gu cinnteach dhomhsa lùbaidh gach ghùn, mionnaichidh gach teangadh.

24 Gu cinnteach, deir *neach*, anns an Tighearn tha agam fireantachd agus neart; d'a ionnsuidh-san thig iad; bithidh iadsan uile air an nàrachadh air am bheil corruich 'na aghaidh.

25 Anns an Tighearn fireanaichear uile shliochd Israeil, agus ni iad uail.

CAIB. XLVI.

1 Cha b'urrainn iodholan Bhabiloìn iad féin a thèarnadh. 3 Tèarnaidh Dia a shluagh gu ruig a' chrìch. 5 Cha sàmhluichear Dia ri iodholaibh.

12 Tha slàinte an Tighearn am fagus.

THA Bela 'cromadh sìos, Nebo a' crùbhadh; bha an iodholan air na beathaichibh agus air na h-ainmhidhibh; tha bhur n-eallaichean trom, 'nan cudthrom do'n ainmhidh airsnealach.

2 Chrùb iad, chrom iad sìos le chèile; cha b'urrainn iad an eallach a thèarnadh; ach chaidh iad féin ann am braighdeanas.

3 Eisdibh rium a thigh Iacoib, agus uile iarmad tìghe Israeil; a ghiùlaineadh *leam* o'n bhroinn, a dh'iomchaireadh o'n bholg:

4 Eadhon gu *bhur* sean aois, agus gu *bhur* falt liath, is mise féin an tì a ghiùlaineas sibh; is mi a rinu, agus giùlainidh mi; iomchairidh mi, agus tèarnaidh mi.

5 Cò e ris an samhluich sibh mi, agus ris an dean sibh comhad mi? agus cò e ris an coimeas sibh mi, a chum gu'm bi sinn cosmhail?

6 Taomaidh iad òr as a' mhàla, agus tomhaisidh⁴ iad airgid anus a' mheigh; tuarasdalaichidh iad òr-cheard, agus ni esan dia dheth; cromaidh iad sìos, seadh ni iad aoradh.

7 Giùlainidh iad e air an gvaillibh, iomchairidh iad e, agus cuiridh iad e 'na àit, agus seasaidh e; as 'ionad cha ghluais e: seadh, gladhaidh *neach* ris, ach cha fhreagair e, agus cha teasairg se e o 'theinn.

8 Cuimhnichibh so, agus bithibh fearail⁵; thugaibh fa'near e a ris, a luchd-briseadh an lagha.

9 Cuimhnichibh na ceud nithe, a bh'ann o shean; oir is mise Dia, agus cha 'n'eil atharrach ann; is mise Dia agus cha 'n'eil mo shamhuil⁶ ann;

10 A' foillseachadh na crìche o'n tùs, agus o'n aimsir chéin; nan nithe nach 'eil *fathast* deanta; ag ràdh, Seasaidh mo chomhairle, agus gach ni a's àill leani ni mi:

11 Ag gairm na h-iolaire o'n ear, agus

¹ buinidh iad dhuit.

² aon eile.

³ gu fealltach.

⁴ cothromaichidh.

⁵ gabhaibh nàire.

⁶ leth-bhreac.

fir mo chomhairle o thìr chéin; seadh, labhair mi, agus bheir mi gu crìch e; rùnach mi, agus coimhlionaidd mi e.

12 Eisdibh rium, sibh-se aig am bheil an cridhe rag, a tha fad as o fhìreantachd:

13 Bheir mise am fagus m'fhìreantachd-sa, cha bhi i fad as; agus cha dean mo shlàinte moille; agus bheir mi slàinte ann an Sion, do Israel mo ghloir.

CAIB. XLVII.

1 *Bhagair Dia Babilon le breitheanasaihb uamhasach. 12 Cha teasairg lionmhoireachd a dhruidheachdan, agus a geasadoireachd i.*

THIG a nuas agus dean suidhe anns an duslach, Oig-nighean Bhabailoin; suidh air an làr, cha'n eil rìgh-chaithir ann, a nighean nan Caldéach; oir cha ghoir iad maoth agus muirneach dhìot nì's mò.

2 Gabh na clacha-muilinn agus bleith¹ min; leig ris do chibban, rùisg do throidh, leig ris do cìos², imich troimh na aìmhnicibh.

3 Leigear ris do linnochduigh, chithear eadhon do nàir; ni mi dìoghaltas, cha choinnich mi *thu mar* dhuine³.

4 Ar fear-saoraidh, is e Tighearn nan sluagh a's ainm dha, Tì naomh Israel.

5 Suidh a'd' thosd, rach a steach ann an dorchadas, O nighean nan Caldéach; oir cha'n abrar riut nì's mò Baintighearn nan rìoghachdan.

6 Bha corruich orm ri mo shluagh; thruaill mi m'òighreachd, agus thug mi thairis iad do d' làimh; cha do nochd thusa trócair dhoibh; air an aosda leag thu do chuinge gu trom.

7 Agus thubhairt thu, Bithidh mi a'm' bhaintighearn gu sìorruidh; air chor as nach do leag thu d'aire air na nithibh so! cha do chuimhnich thu a chrìoch dheireannach.

8 Uime sin, chuinn so a nis, a bhean shoghmhor, a ta a'd' shuidhe gun umhaill; a ta 'g ràdh ann ad chridhe, *Tha mi*, agus cha 'n eil ann ach mi; cha suidh mi a'm' bhantraich, cha'n aithnich mi ach cloinne.

9 Gidheadh thig an dà nì so ort gu h-obann, ann an aon là, call cloinne, agus bantrachas; thig iad ort 'nan làn tomhas, air son lionmhoireachd do dhruidheachdan, agus iomadalachd⁴ do ghisreagan⁵.

10 Oir dh'earb thu á d' aingidheachd; thubhairt thu, Cha 'n eil neach 'gam fhaicinn; chuir eadhon do ghliocas agust' eòlas air seacharan thu; air chor as gu'n dubhairt thu ann ad chridhe, *Tha mi*, agus cha 'n eil ann ach mi.

11 Uime sin thig olc ort, nach bi fios agad cia as a dh'érich e; agus tuitidh

aimheas ort, nach bi thu comasach air a thionndadh uait; agus thig léir-sgrìos ort gu h-obann, gun thu 'ga mhothachadh.

12 Seas suas a nis le do ghisreagaibh, agus le lionmhoireachd do dhruidheachdan, anns an do shaothraich thu o t'òige; ma's e as gur urrainn thu buannachd fhaghail, ma's e as gu'm feud thu buadhachadh.

13 Tha thu air do sgìtheachadh ann an lionmhoireachd do chomhairlean. Seasadh na speuradairean suas, luchd-amharc nan reultan, iadsan a ta ri fiosachd gach mìos, agus tèarnadh iad thu o *na nithibh* a tha gu teachd ort.

14 Feuch bithidh iad mar asbhuain, loisgidh an teine suas iad; cha tèarunn iad an anama féin o chumhachd na lasarach; cha'n fhàgar fìu eibhleag gu neach a gharadh, no teine gu suidhe làimh ris.

15 Is amhuil a bhitheas dhuit a' mhuinntir leis an do shaothraich thu, iadsan ris an robh gnòthuch agad o t'òige; tionndaidhidh gach aon a leth-taobh gu a ghnòthuch féin; cha bhi d'fhear-tèarnaidh ann.

CAIB. XLVIII.

1 *Dh'fhoillsich Dia e féin ann am fàistneachd, chum gu'm faiceadh an sluagh nach b'iad an ìodholan a dh'orduich aon nì a thàinig gu crìch. 9 Teas-airgidh e a phobull Israel air sgàth 'aime féin. 12 Chomhairlich e dhoibh bhi umhal d'a thoil. 20 Saoraidh e iad o gach teanntachd.*

CLUINNIBH so, O thigh Iacoib, sibhse a ta air bhuir n-ainmeachadh air Israel; agus a thàinig a mach o uisgeach-aibh Iudah; a ta mionnachadh air ainm an Tighearn, agus a' deanamh luaidh air Dia Israel; ach cha'n ann am fìrinn no ann an ionracas.

2 Oir tha iad 'gan ainmeachadh féin air a' Chaithir naomh, agus a' leigeil an taice ri Dia Israel; is e Tighearn nan sluagh a's ainm dha.

3 Dh'fhoillsich mi na ceud nithe o thùs; agus o m' bheul chaidh iad a mach, agus chuir mi an céill iad; ann an ath-ghoirid rinn mi iad, agus thàinig iad gu crìch.

4 A chionn gu'n robh fios agam gu'n robh thu reasgach, agus *gu'n robh* do mhuineal mar fhèith iarunn, agus d'eudan 'na umha.

5 Uime sin dh'fhoillsich mi dhuit iad o'n tùs; mu'n d'thàinig iad gu crìch, dh'innis mi dhuit iad; a chum nach abradh tu, Is e m'ìodhol a thug mu'n cuairt iad; is iad mo dhealbh snaidhte, agus mo dhealbh leaghta, a dh'orduich iad.

6 Chuala tu so, faic e air a choimhlionadh; agus nach cuir sibhse an céill e? Iunseam dhuit nithe nuadh o'n àm so, a

¹ mel.

² shìasad.

³ cha ghabh mi duine mar eadar-mheadhonair.

⁴ lionmhoireachd, iomar: a'chd.

⁵ gheasadoireachd.

ghleidheadh dìomhair, agus air nach robh fios agad.

7 Tha iad air an tabhairt gu crìch a nis, agus cha b'ann o shean; agus roimh an là so cha chuala tu iad; a chum nach abradh tu, Feuch, bha fios agam orra.

8 Seadh, cha chuala tu; seadh, cha b'aithne dhuit; seadh, o'n toiseach cha d'fhosgladh do chluas; oir bha fios agam gu'm buineadh tu gu ro chealgach, agus gu'm h'e Fear-eusantais a h'ainm dhuit o'n bhroinn.

9 Air sgàth m'ainme cuiridh mi dàil ann am chorroich, agus air son mo chliù cumaidh mi air a h-ais i uaitse, air chor as nach gearr mi as thu.

10 Feuch, ghlan mi thu, ach cha b'ann le h-airgiod; thagh mi thu ann an àmh-uinn an àmhghair¹.

11 Air mo sgàth, air mo sgàth féin, ni mi e; oir cionnus a bhiodh m'ainm air a mhaslachadh? Agus mo ghlòir cha tabhair mi do neach eile.

12 Eisd rium, O Iacoib, agus Israeil, a ghairm mi, *Is* mi Esan, *is* mi an ceud neach; *is* mi fòs an neach deireannach.

13 *Is* i mo làmh a leag stéidh na talmhainn, agus réis mo dheas làimhe a thomhais na nèamhan; bheir mi gairm dhoibh, seasaidh iad suas le chéile.

14 Cruinnichibh uile sihh féin ri chéile, agus éisdibh: cò 'nam² measg a dh'fhoillsich na nithe so? cuiridh esan a's ionmhuinn leis an Tighearn an gnìomh a thoil air Babilon, agus bithidh a ghairdean air na Caldéich.

15 Mise, mise *fàn* labhair; seadh, ghairm mi e, thèdraidh mi e agus soirbhichidh a shlighe.

16 Dlùthaichibh rium, agus cluinnibh so; o'n toiseach cha do labhair mi ann an uaigneas; o'n àm an do thachair e, *bha* mise an sin³; agus a nis chuir an Tighearn Iehobhab, agus a Spiorad, mach mise.

17 Mar so deir an Tighearn, d'fhear-saoraidh, Ti naomh Israeil: *Is* mise an Tighearn do Dhia, a tha teagasg dhuit ciud a thig gu d' bhuannachd; a tha 'gad stiùradh anns an t-slighe air an imich thu.

18 O gu'n tugadh tu fa'near m'ath-eanta-sa! an sin bhiodh do shith mar amhainn, agus d'fhireantachd mar thonna na fairge:

19 Agus bhiodh do shìol mar a' ghain-eamh, agus sliochd do chuim mar a' meanbh-chlocha; cha bhiodh t'ainm air a ghearradh as, no air a sgrìos as mo làth-air.

20 Rachaibh a mach o Bhabilon; teich-

ibh o thìr nan Caldéach; le guth gàird-eachais innsibh, cuiribh so an céill; sgaoilibh an sgeul gu iomall na talmhainn: abraibh, Shaor an Tighearn 'òglach féin Iacob.

21 Agus cha robh tart orra anns na fàs-aichibh troimh an d'thug thu orra sìuh-al; thug e air uisge sruthadh dhoibh as a' charraig; seadh, sgoilt e a' chreag, agus bhrùchd an t-uisge mach.

22 Cha 'n'eil sìth, deir an Tighearn, do'n aingidh.

CAIB. XLIX.

1 *The Criosd a' gearan gu'n do shaothraich e gu dìomhan am measg nan Iudhach. 5 Thug Dia e mar sholus do na cinnich gu iomall na talmhainn.*

13 *Mairidh gràdh an Tighearn gu bràth d'a eag-lais: 24 tèarnaidh Dia i o a luchd-sàruchaidh.*

EISDIBH, O eileana, riumsa; agus o thugaibh aire, a shlòigh, o chéin; o'n bhroinn ghairm an Tighearn mi; o chom mo mhàthar thug e luadh air m'ainm.

2 Agus rinn e mo bheul mar chlaidheamh geur; ann an sgàil a làimhe dh'fhol-aich e mi; seadh, rinn e mi a'm' ghath liomhta; thaisg e mi ann a dhòrlach⁴.

3 Agus thubhairt e rium, Is tu m'òglach, O Israeil, anns am bi mi air mo ghlorachadh.

4 Agus thubhairt mise, Shaothraich mi gu dìomhain; air son neo-ni, agus air son dìomhanais, chaith mi mo neart; *ach* gu cinnteach *tha* mo bhreth maille ris an Tighearn, agus m'obair⁵ maille ri mo Dhia.

5 Agus a nis *mar* so deir an Tighearn, (a dhealbh mi o'n bhroinn *gu bhi* a'm' òglach dha, a thabhairt Iacoib air ais d'a ionnsuidh, agus a chum gu'm bi Israel air a chruinneachadh thuige; uime sin⁶ bith-eam glòrmhor ann an suilbhan an Tighearn, agus bithidh mo Dhia 'na neart dhomh;

6 Mar so deir e,) Is ni suarach dhuit gu'm bitheadh tu a'd' òglach dhomhsa, a thogail suas gheugan Iacoib, agus a dh'aisig mheangana⁷ Israeil; bheir mi thu fòs mar sholus do na cinnich, gu bhi a'd' shlàintè uamsa gu iomall na talmhainn.

7 Mar so deir an Tighearn, fear-saoraidh Israeil, a Thi naomh: ris-san a ta air a dhimeas le daoineibh, ris-san d'an do ghabh an cinneach gràin; ri seirbhiseach an luchd-riaghlaidh; a chi rìghrean, agus éiridh iad suas; uachdarain, agus ni iad aoradh; air son an Tighearn a ta dileas, agus Ti naomh Israeil a ròghnaich thu.

8 Mar so deir an Tighearn, Ann an àm taitneach chuala mi thu, agus ann an là na

¹ fùirneis na teinn.

² naur.

³ praimh dhomh bhi 'n sin bha mi ann.

⁴ bholg-shaighthead.

⁵ duals m'òibre.

⁶ Ged nach bi Israel air a chruinneachadh, gidh-eadh.

⁷ fhuailleana.

slàinte chuidich mi thu; agus gleidhidh mi thu, agus bheir mi thu mar choimh-cheangal do'n t-sluagh; a dhaingneachadh na tìre, agus a thabhairt air na h-oighreachdaibh fàsail bhi air an sealbhachadh;

9 A ràdh ris a' mhuinntir a ta ceangailte, Rachaibh a macl; agus riu-san a ta ann an dorchadas, Thigibh ann follas: Beathaichear iad air na sligheachaibh, agus anns na h-uile ionadaibh àrda ni iad ionaltradh.

10 Cha bhi ocras no tart orra, ni mò bhuaileas an teas no a' ghrian iad; oir ni esan aig am bheil iochd orra an stiùradh, agus treòrachidh e iad a chum nan sruthan uisge.

11 Agus ni mi mo shléibhtean uile 'nan slighe chòmhnaid; agus togar suas mo ròide mòra.

12 Feuch, thig iad so o chian; agus, feuch, iad so o thuath agus o'n iar; agus iad so o thir Shinim.

13 Seinnibh gu h-àrd, O nèamhan, agus dean gàirdeachas, O thalamh; agus tog-aibh iolach, O shléibhtean; oir thug an Tighearn comhfhurtachd d'a shluagh, agus gabhaidh e truas d'a mhuinntir a ta fo àmhghar.

14 Ach thubhairt Sion, Thréig an Tighearn mi, agus rinn mo Tighearn mo dhì-chuimhneachadh.

15 An dì-chuimhnich màthair a leanabh cìche, gun iochd a dheanamh air mac a cuim? Feudaidh eadhon iadsan dì-chuimhneachadh, ach cha dì-chuimhnich mise thusa.

16 Feuch air dearnaibh mo làmh ghearr mi thu; tha do bhallachan a'm fhianuis an còmhnuidh.

17 Ni do chlann deifir; siùbhlaidh iadsan a mach asad, a bha 'gad sgrios agus 'gad chur fàs.

18 Tog suas do shùilean, agus faic; tha iad so uile air an cruinneachadh ri chèile, tha iad a' teachd a d' ionnsuidh. Mar is beò mise, deir an Tighearn, sgeadaichidh tu thu féin leo uile, mar le culaidh rionnach; agus ceanglaidh tu iad *umad*, mar a ni bean-bainnse a seudan.

19 Oir t'ionadan fàsail agus faondrach, agus fearann do léir-sgrios, eadhon a nis bithidh e air a dhomhlachadh le luchd-àiteachaidh; agus siùbhlaidh iadsan fad air falbh, a bha 'gad shluaghadh suas.

20 Their a' chlann, a sgaradh uait, fathast ann ad chluasaibh, Tha an t-ionad so ro chumhann air mo shon; thoir àite dhomh a chum gu'n gabh mi còmhnuidh.

21 An sin their thu ann ad chridhe, Cò a ghin dhomh iad so? oir dh'fhàgadh mi gun chloinn agus a'm' aonar, a'm' fhògarach agus air m'fhudachadh; agus cò

a dh'àraich iad so? Feuch, dh'fhagadh mi a'm' aonar; iad so, c'ait an robh iad?

22 Mar so deir an Tighearn Iehobhah, Feuch, togaidh mise mo làmh ris na cinnich, agus ris na sloigh cuiridh mi suas mo bhratach; agus bheir iad do mhic 'nan uchd, agus giùlainear do nigheanan air an guaillibh.

23 Agus bithidh rìghrean 'nan oideachan-altruim dhuit, agus am ban-rìghinnean 'nam màthraichean-altruim dhuit; sleuchdaidh iad sìos duit, le'n aghaidh ris an làr, agus imlichidh iad duslach do chos; agus aithnidh tu gur mise an Tighearn, agus cha nàraichear iadsan a chuireas an dòchas annam-sa¹.

24 An toirear a' chreach o'n fhear làidir, no an leigear a' chobhartach dhligheach as?

25 Ach mar so deir an Tighearn, Bheir ear eadhon cobhartach an fhir làidir uaith, agus théid creach an fhir uamhasaich as; oir gleacaidh mi ris-san a ghleacas riut, agus do chlann tèarnaidh mi.

26 Agus bheir mi air do luchd-sàruchaidh am feoil féin itheadh; agus cuiridh mi air mhisg iad le'm fuil féin, mar le fion nuadh; agus bithidh fios aig gach uile fheoil gur mise an Tighearn do Shlànuighear, agus gur e d'fhear-saoraidh Tì cumhachdach Iacoib.

CAIB. L.

1 'S ann air son an do-bheartan féin a thilgeadh na h-Iudaich air falbh. 5 Fulangas Chrìosd. 7 Tha Dia 'na fhear-cuideachaidh d'a sheirbhiseach. 10 Earail gu carbsadh as an Tighearn.

MAR so deir an Tighearn, C'ait am bheil litir-dhealach 'ur màthar, a chuir mise uam? No cò e am measg mo luchd-fiacha ris an do reic mi sibh? Feuch, air son 'ur do-bheartan tha sibh air bhur reiceadh; agus air son 'ur n-eu-ceartan chuireadh air falbh 'ur màthair.

2 C'ar son, an uair a thàinig mi, nach robh aon neach ann? an uair a ghairm mi, nach d'thug aon neach freagradh? Am bheil mo làmh air fàs co ro ghoirid as nach urrainn mi saoradh? agus am bheil mi gun cumhachd agam gu tèarnadh? Feuch, le m'achmhasan tiormaichidh mi an fhaire, ni mi na h-aimhnichean 'nam fàsach; tha an iasg a' lobhadh dh'easbhuidh uisge, agus a' bàsachadh le tart.

3 Eideam na nèamha le dubh-dhorchadas, agus cuiridh mi eudach-saic orra mar chòmhachadh.

4 Thug an Tighearn Iehobhah dhomhsa teagadh nan daoine fòghluimte, a chum gu'm b'aithne dhomh focal a labhairt ann an deadh àm ris an *neach a ta a' srèal* ach: tha e dùsgadh, maduinn an déigh

¹ a dh'fheitheas ormsa.

maidne; tha e dùsgadh mo chluaise, gu éisdeachd mar a nì fòghlumach¹.

5 Dh'fhosgail an Tighearn Iehobhah mo chluas, agus cha robh mi ceannairceach; ni mò thionndaidh mi air m'ais.

6 Thug nì mo dhrum do'n luchd-bualaidh, agus mo ghialan dhoibhsan a spion am fionna²; cha d'fholuich mi mo ghnùis o nàire agus o shìle.

7 Oir is e an Tighearn Iehobhah fear mo chuideachaidh, air an aobhar sin cha chuirear mi gu h-amhludh; uime sin shuidhich mi mo ghnùis mar chloich-theine, agus tha fios agam nach nàraichear mi.

8 Tha esan am fagus a dh'fhìreanaicheas mi; cò esan a nì strì rium? Seasamaid a mach le chéile; cò e m'eascaraid³? thig-eadh e dlùth a'm' chòdhail.

9 Feuch, is e an Tighearn Iehobhah m'fhear-cuidich, cò a dhìteas mi? Feuch, fàsaidh iad uile sean mar thrusgan; ithidh an leòman suas iad.

10 Cò e 'nur measg air am bheil eagal an Tighearn, a ta 'g éisdeachd ri guth a sheirbhisich, a ta siubhal ann an dorch-àdas agus aig nach 'eil solus? earbadh e as ainm an Tighearn, agus leigeadh e a thaice r'a Dhia.

11 Feuch, sibhse uile a ta fadadh teine, a ta 'gur cuairteachadh féin le sraidaibh; siubhlaibh ann an solus bhuir teine, agus nan sradan a las sibh; go gheibh sibh o m' làimh-sa, luidhidh sibh sìos ann an doilghios.

CAIB. LI.

1 Chomhairlicheadh do na fìreanaibh an dòchas a chur san Tighearn, do bhrìgh gu'n toir e comh-fhurtachd do Shìon. 4 Mu thimchioll fìreantachd agus slàinte Dhè. 7 Cha chòir eagail a ghabhail roimh mhasladh dhaoine. 17 Tha am fàidh a' deanamh caoidh air son Ierusalem.

EISDIBH rium, sibhse ta leantuinn fìreantachd, sibhse ta 'g iarraidh an Tighearna; seallaibh ris a' charraig o'n do ghearradh a mach sibh, agus ri slochd na h-uamha o'n do chladlaicheadh sibh.

2 Seallaibh air Abraham 'ur n-athair, agus air Sarah a rug sibh; oir ghairm mise e 'na aonar, agus bheannaich mi e, agus rinn mi lionmhor e.

3 Oir bheir an Tighearn comhfhurtachd do Shìon; bheir e comhfhurtachd d'a ionadaibh fàsail uile; agus ni e a fàsach mar Eden, agus a di-threabh mar ghàradh an Tighearna; gheibhear aoibhneas agus subhachas innte, breith-buidheachais agus fonn ciuil.

4 Eisdibh rium, O mo shluagh, agus thugaibh aire dhomh, O mo chinneach;

oir thig reachd a mach uam, agus foill sìchidh mi mo bhreitheanaidh chum soluis do na slòigh.

5 Tha m'fhìreantachd am fagus, tha mo shlàinte air dol a mach, agus ni mo ghàirdean breitheanas air na fineachaibh; feithidh na h-eileana rium, agus ann mo ghàirdean cuiridh iad an dòchas.

6 Togaibh 'ur suilean suas ris na nèamhaibh, agus amhaircibh air an talamh shìos; oir sgaoillear o chéile na nèamha mar dheataich, agus fàsaidh an talamh sean mar thrusgan; agus bàsaichidh a luchd-àiteachaidh air an amhludh cheudna⁴; ach mairidh mo shlàinte-sa gu sìorruidh, agus cha téid m'fhìreantachd air chùl.

7 Eisdibh rium, sibhse ta eòlach air fìreantachd, a shluagh aig am bheil mo lagh ann 'ur cridhe; na biodh eagal oirbh roimh mhasladh dhaoine, agus na gabhaibh geilt roimh an càineadh.

8 Oir ithidh an leòman iad mar thrusgan, agus ithidh a' chnuimh iad mar olainn; ach mairidh m'fhìreantachd-sa gu sìorruidh, agus mo shlàinte gu linn nan linntean.

9 Dùisg, dùisg, cuir umad neart⁵, O ghàirdein an Tighearna; dùisg, mar anns na làithibh o shean, anns na h-aimsiribh o clian. Nach tusa a ghearr Rahab, a lot an dràgon?

10 Nach tusa a thiormaich an fhaireg, uisgeacha na doimhne mòire? a rinn doimhneachdau na faireg 'nan slighe do'n mhuinntir shaorta gu dol thairis.

11 Mar so pillidh muinntir shaorta an Tighearn, agus thig iad gu Sion le h-iol-aich; agus bithidh aoibhneas bith-bhuan air an ceann; gheibh iad aoibhneas agus subhachas, agus teichidh mulad agus caoidh air falbh.

12 Is mise, eadhon mise, an ti a bheir dhuibh comfhurtachd; cò thusa gu'm biodh eagal ort roimh dhuine a gheibh bàs, agus roimh mhac an duine a nithear mar am fear?

13 Agus gu'n dì-chuimhnicheadh tu an Tighearn do Chruith-fhear a shìn a mach na nèamhan, agus a leag stéidh na tal-mhainn; agus gu'm biodh sìor-eagal ort gach là, air son corruich an fhir-shàruchaidh, mar gu'm biodh e ullamh gu sgrios? agus c'ait am bheil corruich an fhir-shàr uchaidh?

14 Tha an ciomach a' deanamh deifir gu bhì air 'fhuasgladh, a chum nach faigh e bàs anns an t-slochd, agus nach fàilnich 'aran.

15 Oir is mise an Tighearn do Dhia, a chùinicheas an fhaireg, an uair a bleucas

¹ iadsan a ta fòghlum, fòghlumaine.

² do'n luchd-fionnaidh.

³ fear m'agairt.

⁴ mar chnuimheig.

⁵ eudaich thu féin le neart.

a tonna: is e Tighearn nan sluagh a's ainm dha.

16 Agus chuir mise mo bhriathran ann ad bheul, agus le sgàile mo làimhe dh'fhluich mi thu; a shuidheachadh nan nàmhainn, agus a leagadh bunaite na talmhainn; agus a ràdh ri Sion, Is tu mo shluagh.

17 Dùisg, dùisg, éirich suas o Ierusalem, a dh'òl¹, o làimh an Tighearna, cuach a chorrùich; dh'òl thu, dh'fhàisg thu as, deisgeanan cuaiche na ball-chrith.

18 Cha 'n'eil fear-stiùraidh aice, am measg nan uile mhac a rug i; cha 'n'eil aon a ghlacas air làimh i, am measg nan uile mhac a dh'altruim i.

19 Thachair an dà ni so dhuit; cò a ni caoidh air do shon? creachadh² agus milleadh, a' ghoirt, agus an claidheamh; cò a bheir³ dhuit comhfhurtachd?

20 Tha do mhic air fannachadh, tha iad air tuiteam sìos aig ceann gach sràide, mar tharbh fiadhaich ann an lion; lìonadh iad làn do chorrùich an Tighearna, do achmhasan do Dhé.

21 Air an aobhar sin, cluinn so a nis, O thusa a ta fuidh àmhghar, agus air mhisg, ach cha'n ann le fion.

22 Mar so deir do Thighearn Iehobhah, agus do Dhia a thagras cùis a shluaigh; Feuch, thug mi as do làimh cuach na ball-chrith; deisgeanan cuaiche mo chorrùich; cha'n òl thu dhi ni's mò.

23 Ach cuiridh mi i ann an làimh luchd do shàruchaidh, a ta 'g ràdh ri t'anam, Crom sìos, a chum gu'n téid sinn thairis: agus leag thu do chorp sìos mar an làr, agus mar an t-sràid, dhoibhsan a ta gabhail seachad.

CAIB. LII.

1 Thug Dia comhfhurtachd do'n eaglais. 7 Maise rioghachd Chrìosd. 7 Chomhairlicheadh do'n eaglais gàirdeachas a dheanamh ann an slàinte a Tighearna. 13 Glòir Chrìosd 'nuair a dh'ard-aihear e.

DUISG, dùisg, cuir umad do neart, O Shion; cuir umad do chulaidh sgiamhach, O Ierusalem, a Chaithir naomh; oir cha téid an neo-thimchioll-ghearra agus an neòghlan a steach annad ni's mò.

2 Crath thu féin o'n duslach; rach suas, dean suidhe, O Ierusalem; fuasgail thu féin o cheanglaichibh do mhuineil, O nighean Shìoin a ta fo dhaorsa⁴.

3 Oir mar so deir an Tighearna, air neo-ni reiceadh sibh, agus cha'n ann le h-airgiod a dh'fhuasgailear sibh.

4 Oir mar so deir an Tighearn Iehobhah, Chaidh mo shluagh sìos do'n Eiphit

an toiseach, gu bhi air chuairt an sin; agus rinn an t-Asirianach, mu dheireadh⁵, an sàruchadh,

5 Agus a nis, ciod a th'agamsa an so, deir an Tighearn, o thugadh air falbh mo shluagh air neo-ni? tha an luchd-riaghlaidh toirt orra caoineadh, deir an Tighearn; agus tha m'ainm-sa an còmhnuidh, gach aon là, a' faghail toibheim.

6 Air an aobhar sin, bithidh eòlas aig mo shluagh air m'ainm; air an aobhar sin bithidh fios aca, air an là sin, gur mise an ti a labhairt; feuch, is mise a th'ann.

7 Cia maiseach air na sléibhtibh cosan an teachdair aobhin, a ta 'g éigheach sìthe; teachdair an deadh sgéil, a ta 'g éigheach slàinte; a ta 'g ràdh ri Sion, Is e do Dhia a's rìgh ann!

8 Togaidh do luchd-faire anguth; le'n guth ni iad iolach le chéile; oir chi iad aghaidh ri h-aghaidh⁶, an uair a bheir an Tighearn Sion air a h-ais.

9 Brisibh a mach le gairdeachas, dean-aibh ceòl⁷ le chéile, O fhàsaichean Ierusalem; oir thug an Tighearn comhfhurtachd d'a shluagh, shaor e Ierusalem.

10 Leig an Tighearn ris a ghairdean naomh ann an sùilb nan uile chinneach; agus chi uile iomalla na talmhainn slàinte ar Dé-ne.

11 Imichibh, imichibh; rachaibh a mach as a sin; na beanaibh ri ni neòghlan; rachaibh a mach as a meadhon; bithibh-sa glan, a ta giùlan shoitheachan an Tighearn.

12 Oir cha'n ann le cabhaig a tléid sibh a mach, agus cha'n ann le teicheadh a shiùbhlas sibh; oir gluaisidh an Tighearn roimhibh, agus cuartichidh Dia Israel sibh o'n taobh chùil.

13 Feuch, ni m'òglach gu glic; bithidh e air a thogail suas, agus air 'àrdachadh, agus bithidh e ro àrd.

14 Mar a ghabh mòran iongantais riut⁸; (is co mhòr a' mhi-mhaise a rinneadh air 'aghaidh, seach aon duine; agus air a dhreach, seach clann dhaoine;)

15 Mar sin crathaidh e uisge⁹ air mòran chinneach; 'na fhianuis druiddidh rìghrean am beoil; oir an ni nach do chuireadh an cèill doibh, chi iad; agus an ni nach cual iad, bheir iad fa' near.

CAIB. LIII.

1 Tha am fàidh a' gearan gu'n robh an sluagh dh'easbhuidh creidimh. 4 Fulangas Chrìosd: 11 Chi e do shaothair 'anama agus bithidh e toilichte.

CO a chreid ar teachdaireachd? agus cò do'n robh gairdean an Tighearn air 'fhoillseachadh?

¹ dh'òl. ² fàsachadh.

³ cò leis a bheir mi.

⁴ a dhaor-nighean Shìoin.

⁵ gun leisgeul. ⁶ sùil ri sùil. Eabh.

⁷ togaibh rann.

⁸ ris.

⁹ ni e crath-ghlanadh. Faic Esec. 36. 25.

2 Oir fàsaidh e suas mar fhailleann 'na làthair, agus mar fhreumh á talamh tioram; chia 'n'eil sgèimh no grinneas aige, gu'n amhairceamaid air; ni mò tha maise¹ aige, gu'n iarramaid e.

3 Tha e air a dhimeas², agus air a chur air chùil le daoibh³; 'na dhuine dhoilghiosan, agus eòlach air bròn; agus mar neach a dh'fholuicheas 'aghaidh uainn, tha e air a dhimeas, agus cha 'n'eil suim⁴ againn dheth.

4 Gu deimhin ar n-anmhuinneachd ghiùlain e, agus ar doilghiosan dh'iomchair e; ach shaoil sinne gu'n robh e air a bhualadh, air a smachdachadh le Dia, agus air a chlaoidheadh.

5 Ach lotadh e air son ar-peacadh-ne, bhrùthadh e air son ar n-aingidheachdan; leagadh a'rsan smachdachadh ar sìth, agus le a chreuchdaibh-san shlànuicheadh sinne.

6 Chaidh sinne uile, mar chaoraich, air seacharan; thionndaidh sinn, gach aon g'a shlighe féin; agus leag an Tighearn a'rsan aingidheachd gach aoin dinn⁵.

7 Shàruicheadh e, agus rinneadh ainneart air⁶, gidheadh cha d'fhosgail e a bheul; thugadh e mar uan chum a' chasgraidh, agus mar chaor a bhios balbh an làthair a luchd-lomairt, mar sin cha d'fhosgail e a bheul.

8 O fhoirneart agus o bhreitheanas thugadh air falbh e; agus a ghinealach cò a chuireas an cèill? oir ghearradh as e o thìr nam beò; air son eusaontais mo shluaigh-sa bha e air a throm-bhualadh.

9 Agus dh'orduicheadh 'uaigh maille ris na h-aingidh, agus maille ri duine saoihlir 'na bhàs; air son nach d'rinn e eucoir, agus nach robh cealg 'na bheul.

10 Ach b'i toil an Tighearn a bhrùthadh; chuir e fo àmhghar e; an uair a ni thu 'anam 'na lobairt-réitich, chi e sìochd, sìnear a làithean; agus soirbhichidh rùn an Tighearna 'na làimh.

11 Do shaothair 'anama chi e, agus bithidh e toilichte⁷. Le eòlas a'rsan ni m'òglach fireanach mòran fhìreanachadh⁸; oir giùlainidh e an eu-ceartan.

12 Air an aobhar sin, roinnidh mi dha cuibhroinn maille ris a' mhòran, agus roinnidh e a' chreach maille ris na cumhachdaich; a chionn gu'n do dhòirt e mach 'anam gu bàs; agus gu'n robh e air 'àireamh am measg nan ciontach; agus ghiùlain e peacadh mhòrain, agus rinn e eadar-ghuidhe air son nan ciontach.

CAIB. LIV.

1 Fhuair na cinnich gealladh gu'm bitheadh iad air an gabhail a steach do rìoghachd Chrìosd.

4 Tèarnar iad anns gach teanntachd. 11 Bheir Dia comhfhurtachd dhoibh, agus teagaisgidh e iad san t-slighe cheart.

SEINN, a bhean aimrid⁹ nach d'rug clann; seinn gu luadh-ghaireach, agus dean iolach àrd, thusa nach robh ri saothair-chloinne; oir is lionmhoire clann na mnà aonaranaich, na clann na mnà pòsda, deir an Tighearn.

2 Leudaich ionad do phàilliuin, agus sgaoidhadh iad a mach brata-còmhdach do bhùthan; na caomhain, leig am fad do chùird, agus daingnich do chuaillean:

3 Oir air an làimh dheis, agus chli, brisidh tu mach; agus seallbaichidh do shliochd na cinnich, agus àitichidh iad na caithrichean fàsal.

4 Na gabh eagal, oir cha mhaslaichear thu; na gabh nàire, oir cha chuirear thu gu h-amhladh; oir di-chuimhnichidh tu nàire t'òige, agus masladh do bhantrachais cha chuimhnichidh tu nì's mò.

5 Oir is e d'fhear-pòsda do Chruith-fhear; 'se Tighearn nan sluagh a's ainm dha; agus is e d'fhear-saoraidh Ti naomh Israeil; goirear Dia an domhain uile mar ainm ris.

6 Oir mar mhnai air a tréigsinn, agus fo àmhghar 'na spiorad, ghairm an Tighearn thu, agus mar mhnai a phòsadh 'na h-òige, a chionn gu'n do chuireadh air falbh thu, deir an Tighearn.

7 Ré tiota bhig, dhealaich mi riut; ach le mòr iochd cruinnichidh mi thu.

8 Ann an corruich bhig, dh'fholuich mi mo ghnùis car tiota uait; ach le caomhneas sìorruidh ni mi tròcair ort, deir an Tighearn d'fhear-saoraidh.

9 Oir tha so mar uisgeachaibh Noah dhomh; mar a mhionnaich mi nach rachadh uisgeacha Noah tuilleadh thar an talamh, is amhuil a mhionnaich mi nach bithinn ann an corruich riut, agus nach toirinn achmhasan duit.

10 Oir dealaichidh na sléibhtean ri'm bunait¹⁰, agus atharraichear na beanntan as an àit; ach cha¹¹ dealaich mo chaoimhneas riutsa, agus cha'n atharraichear coimhcheangal mo shìth, deir an Tighearn aig am bheil truas dhìot.

11 O thusa a ta ainniseach, air do luasgadh leis an doininn, agus gu chomhfhurtachd agad; feuch leagaidh mi do chlachan ann an dath sgiamhach, agus suidhichidh mi do bhunaitean le clachaibh saphir.

12 Agus ni mi t'uinneagan¹² do chlachaidh rubi¹³, agus do gheatachan do charbuncalaibh, agus d'uile iomall do chlachaidh riomhach.

¹ boidheadh. ² chur suarach.

³ air a sgaradh o dhaoinibh.

⁴ ciathaidh. ⁵ againn.

⁶ Thagradh na fàchan, agus rinneadh esan

freagarach. ⁷ sàsuichte.

⁸ làn-fhìreanaichidh m'òglach-sa mòran.

⁹ sheasg. ¹⁰ thèid na sléibhtean as an àit.

¹¹ ma'n. ¹² do bhaidealan. ¹³ agataibh.

13 Agus *bithidh* do chlam uile air an teagasg leis an Tighearn; agus is mòr a *bhios* sìth do chloinne.

14 Ann am fireantachd socraichear thu; bithidh tu fada o shàruchadh, ionnus nach gabh thu eagal; agus o uamhas, ionnus nach tig e dlùth dhuit.

15 Feuch, bithidh cruinneachadh gu deimhin ann, ach cha'n ann leam-sa; cò sam bith¹ a chruinnicheas a'd' aghaidh, tuitidh e air do sgàth.

16 Feuch, is mise a chruthaich an gobha ta sèideadh suas nan eibhlean san teine, agus a' toirt a mach acfuinn a chum 'oibre: agus is mi a chruthaich am milltear² chum cur fàs.

17 Cha soirbhich inneal sam bith a dhealbhar a'd' aghaidh; agus gach teangadh a dh'éireas riut am breitheanas, dithidh tu. Is i so oighreachd sheirbhiseach an Tighearn; agus *tha* am fireantachd uamsa, deir an Tighearn.

CAIB. LV.

1 *Ghairm am fàidh air an t-sluagh teachd a dh'ionnsuidh Chrìosd, agus an slighe aingidh agus an smuainte eucorach a thrèigsinn.* 8 *Sonas an fhèirein.*

HO! gach neach air am bheil tart, thigibh-se chum nan uisgeachan; agus *esan* aig nach 'eil airgid, thigibh, ceannaichibh agus ithibh; seadh, thigibh, ceannaichibh, gun airgid agus gun luach, fion agus bainne.

2 C'ar son a ta sibh a' caitheamh airgid air *ni* nach aran? agus bhur saothair³ air ni nach sàsuich? Eisdibh le deadh aire riumsa, agus ithibh *an ni a ta* maith; agus gabhadh 'ur n-anam toil-inntinn ann an cuilim shòghmhoir⁴.

3 Aomaibh 'ur cluas, agus thigibh a m'ionnsuidh-sa; éisdibh, agus mairidh 'ur n-anam beò; agus ni mi ruibh coimhcheangal siorruidh, *eadhon* tròcairean cinnteach Dhaibhidh.

4 Feuch, thug mi e mar fhianuis do na cinnich, 'na cheann-iùil agus 'na uach-daran do na slòigh.

5 Feuch, gairmidh tu cinneach nach b'aithne dhuit; agus cinnich do nach b'aithne thu, ruitidh iad a d'ionnsuidh, air sgàth an Tighearna do Dhé, agus air son Tì naoimh Israeil; oir ghlòraich e thu.

6 Iarraibh an Tighearn, am feadh a ta e r'a fhaotainn; gairmibh air, am feadh a ta e am fagus.

7 Tréigeadh an t-aingidh a shlighe, agus an duine eucorach a smuainte; agus pilleadh e ris an Tighearn, agus nochdaidh e trócair dha; agus ri ar Dia-ne, oir bheir e maitheanas gu pailt.

8 Oir cha 'n iad mo smuainte-sa bhur smuainte-sa, ni mò *is iad* 'ur slighean-sa, mo shlighean-sa, deir an Tighearn.

9 Oir *mar* a ta na nèamhan àrd seach an talamh; mar sin tha mo shlighean-sa àrd seach bhur slighean-sa, agus mo smuainte-sa seach bhur smuainte-sa.

10 Oir mar a thig an t-uisge a nuas, agus an sneachdadh o nèamh, agus nach pill e an sin, ach gu'n uisgich e an talamh, agus gu'n toir e air fàs torrach, agus toradh thabhairt uaithe, a chum gu'n tabhair e sìol dha-san a chuireas, agus aran dha-san a dh'itheas;

11 Is amhuil a bhios m'fhocal-sa a théid a mach as mo bheul: cha phill e a m'ionnsuidh gun tairbhe; ach coimhlionaidh e an ni a's àill leam, agus bheir e gu buil *an ni* mu'n do chuir mi mach e.

12 Oir le h-aibhneas théid sibh e mach, agus le sìth stiùrar sibh air 'ur n-aghaidh: togaidh na sléibhteagan agus na cuic roimhibh àrd iolach, agus uile chraobhan na macharach buailidh am basan.

13 An àit droighne fàsaidh an giuthas, agus an àit drise fàsaidh am miortal; agus bithidh e do'n Tighearn mar ainm, mar chomhara bith-bhuan, nach cuirear as 'àit.

CAIB. LVI.

1 *Earail gu breitheanas a choimhead.* 3 *Tha Dia a' gealltuinn gu'n gabh e ris gach neach a ghlunneas gu taitneach 'na làthair.* 9 *Tha trioblaidan na h-eaglais ag éirigh o luchd-faire dall agus aineolach.*

MAR so deir an Tighearn, Coimhead-aibh breitheanas, agus deanaibh ceartas; oir tha mo shlàinte dlùth chum teachd, agus m'fhireantachd chum bhi air foillseachadh.

2 Is beannaichte an duine *a* ni so, agus mac an duine *a* ni greim air; a choimhdeas an t-sàbaid gun a mi-naomhachadh, agus a choimhdeas a làmh o aon olc a dheanamh.

3 Agus na labhradh mac a' choigrich, a ta dlùth-leantuinn ris an Tighearn, ag ràdh, Sgar an Tighearn mise gu tur o 'shluagh; agus na h-abradh an caillteanaich, Feuch, *tha* mise a m'chram tioram⁵.

4 Oir mar so deir an Tighearn, Do na caillteanaich a choimhdeas mo shàbaid-eagan, agus a ròghnaicheas *an ni* a thaitneas rium, agus a ni greim air mo choimhcheangal;

5 Dhoibh sin bheir mi ann am thigh, agus an taobh a stigh do m' bhallachan, àit⁶ agus ainm ni's fear na *ainm* mhac agus nighean⁷; ainm siorruidh bheir mi dhoibh, nach gearrar as.

6 Agus mic a' choigrich a ta dlùth-leant-

¹ cia b'e.

² fear millidh.

³ saothrach.

⁴ reamhrachd. Eabh.

⁵ seargta.

⁶ cuimhneachan.

⁷ na do mhacaibh agus do nigheanaibh.

tuinn ris an Tighearn, gu frithealadh dha, agus gràdh a thoirt do ainm an 'Tighearn, agus gu bhì 'nan òglaich dha; gach aon a ghleidheas an t-sàbaid gun a mi-naomhachadh, agus a nì greim air mo choinmhcheangal;

7 Iad sin bheir mi chum mo shléibh naoimh; agus nì mi aoibhheach iad ann an thigh-urnuigh; *bithidh* an tabhartais-loisgte agus an iobairtean air an gabhail gu taitneach air m'altair; oir goirear ri m' thigh-sa, 'Tigh-urnuigh air son nan uile shlògh.

8 Mar so deir an Tighearn Iehobhah, a ta cruinneachadh r'a chéile diobaraich Israeil; Fathast cruinnichidh mi *muinntir eile* d'a ionnsuidh, os bàrr¹ orra-san a ta air an cruinneachadh.

9 O uile bheathaiche na macharach thigibh chum itheadh; O uile bheathaiche na fridhe.

10 Tha a luchd-faire dall, gach aon diubh; tha iad aineolach, gach aon diubh; is coin bhalbh iad nach urrainn tabhannaich; a' tuiteam nan codal², 'gan sineadh féin sìos, leis an ionmhuinn codal.

11 Seadh, is coin chiorrach iad nach urrainn bhì toilichte; agus is buachaillean iad nach urrainn tuigsinn; tha iad a' sealltunn, gach aon diubh, air a shlighe féin; gach fear air a bhuannachd o a chrich féin.

12 Thigibh, *deir iad*, gabhamaid³ fion, agus òlamaid dibhe làidir; agus mar an là'n diugh bithidh am màireach, agus nì's ro phailte gu mòr.

CAIB. LVII.

1 *Gheibh na h-ionracain agus na daoine trèaireach bàs ann an sìth.* 3 *Chronaich Dia na h-Iudhaich air son an droch ghniomhara.* 13 *Eiridh gu maith do'n neach a chuireas a dhòchas anns an Tighearn.*

THA an duine ionraic a' bàsachadh, agus gu'n aon neach a' toirt fa'near; agus na daoine trèaireach air an toirt air falbh, agus gun aon neach a' tuigsinn gu bheil an t-ionracan air a thoirt air falbh o'n òlc *a ta ri teachd*.

2 Siùbhlaidh e ann an sìth; gabhaidh esan fois 'na leabaidh, a ta 'g imeachd 'na ionracas.

3 Ach thigibh-se am fagus an so, a mhaca na ban-ghiosaich, a shliochd an adhaltranaich agus na strìopaich.

4 Cò d'am bheil sibh a' deanamh àbhachd⁴? ris am bheil sibh a' deanamh beoil fharsuinn, agus a' sìneadh a mach na teangaidh? Nach clann sibh a chlaon a leth-taobh, siol na foill⁵?

5 A' fadadh *bhur an-mhiann* le h-iodh-

olaibh fo gach crann uaine; a' marbhadh na cloinne anns na gleanntaibh, fo sgolt-aibh nan creag.

6 Am measg mhìnachlachan a' ghlinne⁶ tha do chuibhrionn: is iad sin, is iad sin do chrannchur; eadhon dhoibh so dhòirt thu mach tabhartas-dibhe, dh'ìobair thu tiodhlac. An gabhainn-sa tlachd anna sin?

7 Air shlabh cruachach àrd shuidhich thu do leabadh; eadhon do'n àit sin chaidh thu suas a thoirt seachad iobairt.

8 Air cùl an doruis agus na h-ursainn chuir thu suas do chuimhneachan; dh'imich thu air falbh uamsa, agus chaidh thu suas; leudaich thu do leabadh, agus rinn thu coimhcheangal riu; thug thu gràdh do an leabaidh-san, cia b'e àit anns am faca tu i⁷.

9 Agus chaidh thu dh'amharc an rìgh le h-òladh-ungaidh, agus mheudaich thu do bholtraichean; agus chuir thu do theachdairean am fad, agus dh'islich thu thu féin eadhon gus an uaigh⁸.

10 Ann am buanas do shlighe sgithich-eadh thu; *ach* cha dubhairt thu, Cha 'n'eil dòchas ann; fhuair thu beatha do làimhe; air an aobhar sin cha d'fhannaich thu.

11 Agus cò as a ghabh thu eagal agus fiamh, gu'n d'rinn thu breug, agus nach do chuimhnic thu ormsa, nì mò thug thu fa'near? Nach d'fhan mise a'm' thosd, eadhon o chian, agus cha 'n'eil eagal ort romham?

12 Leigidh mise ris d'fhìreantachd, agus do ghniomhara; oir cha dean iad feum dhuit?

13 An uair a ghlaodhas tu, deanadh do chuideachdan do thèarnadh; ach togaidh a' ghaoth air falbh iad uile, bheir an ceò as *iad*; ach an neach a chuireas a dhòchas annam-sa, sealbhaichidh e am fearann, agus gheibh e mar oighreachd mo shliabh naomh.

14 An sin thoir mi, Tilgibh suas, tilgibh suas; ulluichibh an t-slighe; thugaibh air falbh *gach* ceap-tuislidh á rathad mo shluaigh.

15 Oir mar so deir an Ti àrd agus uasal, do'n àit-còmhnuidh sìorruidheachd, do'n ainm an Ti naomh; Anns an ionad àrd agus naomh gabham-sa còmhnuidh; maille ris-san fos a ta leònta agus iriosal 'na spiorad; a bheothachadh spiorad nan iriosal, agus a bheothachadh cridhe nan daoine leònta.

16 Oir cha bhì mi a' cronachadh gu sìor, agus cha bhì fearg orm an còmhnuidh; oir dh'fhàilnicheadh an spiorad romham, agus na h-anaman a rinn mi féin.

¹ a thuilleadh.

² a' faicinn shealladh.

³ faigheamaid.

⁴ Cò a ta agaibh mar bhall-abhacha?

⁵ por nan làb.

⁷ dh'ulluich thu àit dhi.

⁸ ionad nam marbth.

⁶ an t-srutha.

17 Air son cionta a shannta bha corr-
uich orm, agus bhual mi e, a' folachadh
mò ghnùise ann am feirg; agus dh'ìnich
e roimhe gu fiar, airslighe a chridhe féin.

18 Dh'amhaire mise air a shlighibh,
agus leighisidh mi e; seadh, treòraichidh
mi e, agus aisigidh mi sòlasan¹ dhàsan
agus d'a luchd-bròin.

19 Is mi a chrùthaicheas toradh nam
bile; sìth, sìth, dhasan a ta fad as, agus
dhasan a ta dlùth, deir an Tighearn;
agus slànuichidh mi e.

20 Ach tha na h-aingidh cosmhuil ris
a' mhuir bhuaire, oir cha'n urrainn i bhi
aig fois; ach tha a h-uisgeachan a' dùsg-
adh nìos salchair agus làthaich².

21 Cha 'n'èil sìth, deir mo Dhia, do na
h-aingidh.

CAIB. LVIII.

1 Chuir am fàidh an cèill an dealachadh a ta eadar
trasg mheadhtach agus trasg dhiadhaidh. 8 Beann-
aichidh an Tighearn esan a thraisgeas gu ceart,
13 agus a choimhneas là na sàbaid.

GLAODH gu h-àrd, na caomhain;
mar ghall-truimp tog suas do ghuth;
agus nochd do m' shluagh-sa an eus-
aontas, agus do thigh Iacoib an lochdan.

2 Gidheadh o là gu là tha iad gam iarr-
aidh-sa, agus is toil leo eòlas a ghabhail
air mo shlighibh; mar chinneach a ta cur
an gnìomh fireantachd, agus nach do
threig reachd an Dé; tha iad a' fiosrach-
adh dhìom-sa mu thimchioll reachdan na
fireantachd, agus is miann leo bhi teachd
dlùth do Dhia.

3 C'ar son a thraisg sinn, deir iad, agus
nach 'èil thusa a' faicinn? C'ar son a
chraidh sinn ar n-anam, agus nach 'èil
thusa a' toirt fa'near? Feuch, ann an là
bhur traisg tha sibh a' mealltuinn 'ur sòl-
ais, agus 'ur n-uile dhlighe saoitreach
tha sibh ag agairt.

4 Feuch, tha sibh a' trasg chum conn-
sachaidh agus aimhreit, agus chum bual-
adh le dorn na h-eucorach; cha bhi sibh
ri trasg mar air an là'n diugh, a thoirt air
bhur guth gu'n cluinnear e gu h-àrd.

5 An e leithid so do thrasg a ròghnaich
mise, gu'n cuireadh duine 'anam fo leòn
car là? An e gu'n cromadh e a cheann
mar luachair, agus gu'n sgaoileadh e sac-
eudach agus luaithe fuidhe? An abair
thu trasg ri so, agus là taitneach do'n
Tighearn?

6 Nach e so an trasg a ta mise a' rògh-
nachadh; cuibhrichean na h-aingidheachd
a sgaoileadh, na h-uallaichean³ troma las-
achadh, agus a' mhuinntir shàruichte
fhuasgladh; agus gach uile chuing a
bhreiseadh?

7 Nach e t'aran a roinn ris an ocrach,

agus aoidheachd a thoirt do na bochdaibh
seachranach; an uair a chi thu an lom-
nochd gu'n còmhdaich thu e; agus nach
fòluich thu thu féin o d'fheoil féin.

8 An sin brisidh do sholus a mach mar
a' mhaduinn, agus fàsaidh do shlàinte gu
grad; agus théid d'fhìreantachd air thois-
each ort; bithidh glòir an Tighearn 'gad
chuaireachadh, o'n taobh chùil.

9 An sin gairmidh tu, agus freagraidh
an Tighearn; gladhaidh tu, agus theire e,
Tha mise an so. Ma chuireas tu air falbh
as do mheadhon a' chuing, tomhadh a'
mheòir, agus labhairt toibheim;

10 Agus ma thiomhaicheas t'anam ris an
ocrach, agus gu'n sàsuich thu an t-anam
leònta⁴; an sin éridh do sholus ann an
doilleireachd, agus bithidh do dhorchadas
mar mheadhon-là.

11 Agus stiùraidh an Tighearn thu an
còmhnuidh, agus sàsuichidh e t'anam ri
àm tarta, agus ungaidh e do chnàmh;
agus bithidh tu mar lìos air a dheadh-
uisgeachadh, agus mar thobar fìor-uisge⁵,
air nach tig fàiling uisge.

12 Agus togaidh iadsan a ghinear uait
na seann làraichean; togaidh tu suas bun-
aite nan iomadh ginealach; agus goirear
dhìot Fear-càramh a' bheuma, Fear-aisg
nan ròidean chum bhi air an àiteachadh.

13 Ma philleas tu air falbh do chos
o'n t-Sàbaid, o do thoil féin a dheanamh
air mò là naomh-sa; agus gu'n abair thu
ris an t-Sàbaid, Toil-inntinn; ri là naomh
an Tighearn, Ùrramach; agus gu'n tabh-
air thu onoir dhi, gun bhi leantuinn do
shligheachan féin, no gabhail do shòlais
féin, no labhairt do bhriathra féin;

14 An sin gabhaidh tu tlachd anns an
Tighearn; agus bheir mise ort marachd
air ionadaibh àrda na talmhainn; agus
beathaichidh mi thu le oighreachd Iacoib
d'athar; oir labhair beul an Tighearn e.

CAIB. LIX.

1 Chuir eu-ceartan chloinn Israeil dealachadh eadar
iad féin agus an Dia. 16 Tha slàinte tre an
Tighearn a mhàin. 20 Coimhcheangal an shir-
shaoraidh.

FEUCH, cha 'n'èil làmh an Tighearn
air dol an giorrad, air chor as nach
feud i tèarnadh; ni mò tha a chluas air
fàs mall, air chor as nach feud i cluinnt-
inn.

2 Ach chuir bhur n-eu-ceartan dealach-
adh eadar sibh féin agus bhur Dia; agus
dh'fholuich 'ur lochdan uaibh a ghnuis,
ionnus nach éisd e.

3 Oir tha bhur làmh air an truail-
eadh le fuil, agus 'ur meòir le h-eu-céirt;
labhair 'ur bileau cealg; bithidh bhur
teangadh a' teachd air aimhleas.

comhfhurtachdan. ² clàbair. ³ callaichean.

⁴ ciosaichte.

⁵ mhàthair-uisge.

4 Cha 'n'eil neach a' gairm air ceartas, cha 'n'eil neach a' tagradh air son na firinn; tha iad a' cur an dòigh ann an diomhanas, agus a' labhairt bhreug: air thorrachas le h-aimhleas, agus a' breith cu-ceirt.

5 Tha iad a' gur air uighean na righ-nath-rach, agus a' figheadh lion an damhan-alluidh; esan a dh'itheas do'n uighean, gheibh e bàs; agus an uair a bhruthar e, brisidh nathair nimhe mach.

6 Do'n lontaibh cha deantar trusgan; ni mò chòmhaicheas iad iad féin le'n oibribh; an oibre is oibre na h-eucorach iad; agus tha gnìomh an fhoirneir 'nan làmhlaibh.

7 Tha an cas a' ruith chum uile, agus tha iad a' greasadh chum fuil neòchiontach a dhòrtadh; is innleachdan aingidheachd an innleachdan; tha léir-sgrìos agus nìleadh 'nan ceumaibh.

8 Slighe na sìthe cha'n aithne dhoibh, ni mò tha ceart-bhreth 'nan ròidibh; rinn iad dhoibh féin ceuma cama; cò air bith a shiùbhlas annta, cha'n aithne dha sìth.

9 Air an aobhar sin tha breitheanas fada uainn, agus cha 'n'eil ceartas a' breith oirnn; tha sinn ag amharc air son soluis¹, ach feuch dorchadas; air son soilleir-eachd, ach tha sinn a' gluasad ann an duibhre.

10 Tha sinn a' smeurachadh, mar na doill, ag iarraidh a' bhalla; agus mar mhuinntir gun fhradharc² tha sinn a' smeurachadh; tha sinn a' tuisleachadh mu mheadhon-là, mar anns an du-thrà; *tha sinn* ann an ionadaibh uaigneach³ mar dhaoinibh marbha.

11 Tha sinn a' bùirich mar mhath-ghamhnuibh; mar cholumain tha sinn ri sìor-chaoirean; tha ar sùil ri breitheanas, ach cha 'n'eile ann; ri fuasgladh, ach 's ann a tha e fada uainn.

12 Oir tha ar lochdan air fàs lìonmhor ann ad làthair, agus tha ar ciontan a' toirt fianuis 'nar n-aghaidh; oir tha ar lochdan 'nar cuideachd⁴, agus ar n-aingidheachd is léir dhuinn;

13 Le peacachadh agus le breugaibh an aghaidh an Tighearn, agus le pilleadh air falbh o ar Dia; le ainneart a labhairt, agus le ceannaire a dhealbhadh; agus le briathran breugach aithris o'n chridhe.

14 Agus tha breitheanas air pilleadh air ais, agus tha ceartas a' seasamh fad as; oir thuislich an fhìrinn air an t-sràid, agus cha b'urrainn ionracas teachd a steach.

15 Agus tha fìrinn air teicheadh air falbh; agus tha esan, a sheachaineas an t-olc, 'ga dheanamh féin 'na chreich;

agus chunnaic an Tighearn, agus mhi-thaitinn e ris, nach robh breitheanas ann.

16 Agus chunnaic e nach robh fear ann, agus b'ìoghnadh leis nach robh eadar-mheadhonair ann; an sin dh'oibrich a ghairdean féin slàinte air a shon; agus fhìreantachd féin chum i suas e.

17 Agus chuir e uime fireantachd mar uchd-éididh; agus clogaid na slàinte air a cheann; agus chuir e uime trusgan an dioghaltais mar 'eudach, agus chòmhaich se e féin le h-eud mar le falluinn.

18 A réir an gnìomhara, mar sin bheir e ath-dhioladh; corruich d'a naimhaidibh, dioghaltas d'a eascairidibh; do na h-eil-eanaibh òcaidh e dioghaltas.

19 Mar sin bheir iadsan o'n iar urram do ainm an Tighearn; agus *iadsan* o éirigh na gréine d'a ghloir; an uair a thig an nàmhaid mar thuil, togaidh Spiorad an Tighearna suas bratach na aghaidh.

20 Agus thig am Fear-saoraidh gu Sion, agus tionndaidhidh e eusaontas o Iacob⁵, deir an Tighearn.

21 Agus air mo shon-sa, so mo choimh-cheangal riu, deir an Tighearn; Mo Spiorad a ta ortsa, agus mo bhriathran chuir mi ann ad bheul, cha dealaich iad ri d' bheul, no ri beul do shliochd, no ri beul sliochd do shliochd, deir an Tighearn, o'n àm so eadhon gu sìorruidh.

CAIB. LX.

1 *Thig na cinnich o chéin, agus tionndaidhear mòr-shluagh an domhain a dh'ionnsuidh Chrìosd.*
15 *Ni Dià an eaglais 'na h-aobhar gairdeachais feadh linn nan linn.*

EIRICH, dealraich; oir thàinig do sholus, agus tha glòir an Tighearn air éirigh ort.

2 Oir, feuch, còmhaichidh dorchadas an talamh, agus dall-cheò na cinnich; ach ortsa éiridh an Tighearn, chithear a ghloir a' dealradh ort.

3 Agus thig cinnich dh'ionnsuidh do sholus, agus rìghrean dh'ionnsuidh do ghrian-éirigh.

4 Tog suas do shùilean mu'n cuairt, agus faic; tha iad uile air an cruinneachadh ri chéile; tha iad a' teachd a'd' ionnsuidh; thig do mhic o chéin, agus bithidh do nigheanan air an giùlan air an léis⁶.

5 An sin chì thu, agus sruthaidh tu thairis, agus ni do chridhe plogartaich, agus nìthear farsuinn e; a chionn gu'n tionndaidhear mòr-shluagh na fairge thugad, agus gu'n tig feachd nan cinn-each a d'ionnsuidh.

6 Còmhaichear thu le lìonmhoireachd nan càmhail, le dromedairibh Mhìdiain agus Ephah; thig iad uile o Sheba; òr

¹ *tha sùil againn ri solus.*

² *sùilibh. Eabh.*

³ *am measg nithe soghmhor.*

⁴ *maille ruinn.*

⁵ *Faic Rom. XI. 26.*

⁶ *air an altrum ri do thaobh.*

agus tùis giùlainidh iad, agus cliù an Tighearna cuiridh iad an céill.

7 Cruinnichear a d'ionnsuidh uile thrudan Chedair; ni reitheachan Nebaioit frithealadh dhuit; théid iad suas, agus gabhar iad gu taitneach air m'alt-air; agus tigh mo ghloire *fathast* glòraichidh mi.

8 Cò iad so a ta snàmh mar cheò, agus mar cholumain *ag itealaich* a dh'ionnsuidh an ionaid-tàmh¹?

9 Gu deimhin feithidh na h-eileanarum, agus longa Tharsuis air thoiseach; a thoirt do mhac o chéin, *le'n* airgid agus an òr maille riu; a chum ainne an Tighearna do Dhé, agus a chum Ti naoimh Israeil, oir ghlòraich esan thu.

10 Agus togaidh mic a' choigrich suas do bhallachan, agus fritheilidh an rìghrean duit; oir ann am chorruch bhuaill mi thu, ach ann am dheadh-ghean ni mi iochd ort.

11 Agus bithidh do gheatachan fosgailt an còmhuidi; a là agus a dh'oidhche cha druidear iad; a chum gu'n toirear a d'ionnsuidh mòr-shluagh nan cinneach, agus an rìghrean le greadhnachas.

12 Oir an cinneach agus an rìghachd nach dean seirbhis dhuit, bithidh iad cailte²; seadh, sgriosar na cinnich sin gu tur³.

13 Thig glòir Lebanon a d'ionnsuidh, an giuthas, an gall-ghiuthas, agus an crann-bocsa le chéile; a chur maise air mo naomh-ionad-sa, agus a chum gu'n glòraichinn àit mo chos.

14 Agus thig mic do luchd-sàruchaidh 'gan cromadh féin ann ad làthair; agus ni gach neach a rinn tàir ort umhlachd gu bonnaibh do chos; agus goiridh iad dhìot, Caithir an Tighearna, Sion Ti naoimh Israeil⁴.

15 An àit thu bhi air do thréigsinn, agus air d'fhuathachadh, air chor as nach do shiubhail aon neach tromhad⁵; ni mi thu a'd' oirdhearcas sìorruidh, a'd' aobhar-gàirdeachais feadh linn nan linn.

16 Agus deothailidh tu bainne chinneach, agus cìoch rìghrean deothailidh tu; agus bithidh fios agad gur mise an Tighearna do Shlànuighear; agus gur e d'fhear-saoraidh Ti cumhachdach Iacoib.

17 Agus an àit umha, bheir mi òr; agus an àit iarunn, bheir mi airgid; agus an àite fiodha, umha; agus an àite chlach, iarunn; agus ni mi do mhaoir 'nan ceartas.

18 Cha chluinnear ni's mò foirneart ann

ad fhearann, sgrios agus milleadh ann ad chrìochaibh; ach their thu Slàinte *mar ainm* ri d' bhallachan, agus Moladh ri d' gheatachan.

19 Cha bhi a' ghrian agad ni's faide mar sholus anns an là; ni mò bhithreas dealradh na gealaich 'gad shoilleseachadh; ach bithidh an Tighearna 'na sholus sìorruidh dhuit, agus do Dhia 'na ghloir agad.

20 Cha téid do ghrian tuilleadh sìos, ni mò dhorcaichear do ghealach; oir bithidh an Tighearna 'na sholus sìorruidh dhuit, agus crìochnaichear làithean do bhròin.

21 Agus *bithidh* do shluaghi uile 'nam fireanaibh; sealbhaichidh iad am fearann gu sìorruidh; am meangan a shuidhich mi, obair mo làmba, chum gu'm bi mi air mo ghlorachadh.

22 Fàsaidh an aon bheag 'na mìle, agus an aon shuarach 'na cinneach làidir; luathaichidh mise Iehobhah e 'na thràth.

CAIB. LXI.

1 *Dreuchd Chrìosd. 4 Ath-nuadhaichidh Dia an eaglais, agus bheir e d' luchd-frithealaidh èididh mhòlaidh an àit spioraid airseil.*

THA Spiorad an Tighearna Iehobhah orm, do bhrìgh gu'n d'ung an Tighearna mi; a thoirt deadh sgéil do'n mhacanta chuir e mi; a cheangal suas luchd a' chridhe bhrìste, a dh'èigheach fuasglaidh do na braighdibh, agus fosglaidh a' phrìosain dhoibh-san a ta ceangailte;

2 A dh'èigheach bliadhna thaitnich an Tighearna, agus là dìoghaltais ar Dé-ne; a thoirt comhfhurtachd dhoibhsan uile a ta ri bròn;

3 A dh'orduchadh do luchd-caoineadh Shìoin, a thoirt doibh maise an àit luathre, oladh aoibhneis an àit bròin, éididh mhòlaidh an àit spioraid airseil; a chum gu'n goirteadh dhuibh Craobhan fireantachd, a shuidhich⁶ an Tighearna air sgàth a ghloire.

4 Agus togaidh iad suas na seann làraichean, càirichidh iad r'a chéile na h-ionada sgaoilte o chian; ath-nuadhaichidh iad na caithrichean brìste, ionada fàsaichte nan iomadh linn.

5 Agus seasaidh coigrich suas, agus beathaichidh iad bhur treudan; agus *bithidh* mic a' choigrich 'nan treabhaichean dhuibh, agus 'nan luchd-saoithreachadh na fionain.

6 Ach goirear dhibhse Sagartan an Tighearna; Luchd-frithealaidh ar Dé-ne theirear sibh; saobhreas nan cinneach ithidh ribh, agus 'nan glòir ni sibh uaill.

7 An àite bhur nàire *gheibh sibh cuibh-rionn* dhùbailte⁷; agus an àite maslaidh,

¹ an còsa, an uinneaga. Eabh.

² théid iad am mughla. ³ le léir-sgrìos.

⁴ Sion a's le Ti naoimh Israeil.

⁵ thromhad.

⁶ suidhachadh, plamdachadh. Eabh.

⁷ dhà fhille.

ni iad gàirdeachas 'nan cuibhrionn; uime sin 'nan tìr sealbhaichidh air roinn dhù-bailte; bithidh aoibhneas ada¹ gu siorruidh.

8 Oir is mise an Tighearn, leis an ionmhuinn breitheanas; is beag orm ainneart air son tabhartais-loisgte; agus cuiridh mi air a h-aghaidh² an obair ann am firinn; agus coimhcheangal siorruidhni mi riu.

9 Agus aithnìchear an sliochd am measg nan cinneach, agus an gineal am measg nan sluagh; na h-uile a chi iad, aidichidh iad gur sliochd iad a bheannaich an Tighearn.

10 Ni mi gàirdeachas gu mòr anns an Tighearn; bithidh m'anam aoibhneach ann am Dhia; oir chuir e orm éididh na slàinte, chòmhdaich e mi le trusgan³ na fireantachd; mar a sgeadaicheas⁴ fear-bainnse⁵ e féin le crùn⁶ sgiamhach, agus mar a dh'uirgheamaicheas bean-bainnse i féin le a seudaibh.

11 Oir mar a chuireas an talamh a mach a chinneas⁷, agus mar a bheir an lios⁸ air an t-sìol fàs a nìos; mar sin bheir an Tighearn Iehobhah air fireantachd agus moladh fàs suas an làthair nan uile chinneach.

CAIB. LXII.

1 Eud an fhàidh air son soirbheis na h-eaglais.
6 Dreuchd an luchd-faire. 8 Dhaingnich Dia a gheallanna le bhì mionnachadh air féin. 10 An t-ulluchadh air son an t-soisgeil.

AIR sgàth Shìoin cha bhi mi a'm' thosd, agus air sgàth Ierusalem cha ghabh mi fois; gus am bris a fireantachd a mach mar sholus dealrach, agus a slàinte mar leus lasarach.

2 Agus clii na cinnich d'fhìreantachd, agus na h-uile rìghrean do ghloir; agus bheirear ainm nuadh ort, a ghairmeas beul an Tighearn.

3 Agus bithidh tu a'd' chrùn glòire ann an làimh an Tighearn, agus a'd' choron rìoghail ann an glaic do Dhé.

4 Cha 'n abrar riut tuilleadh, Té ris an do chuireadh cùl; ni mò theirear ri d'fhearann tuilleadh, am Fàsach; ach 'se theirear riut, Bean mo rùin⁹; agus ri d'fhearann, Bean-phòsa¹⁰; oir bithidh rùn an Tighearn ort, agus bithidh d'fhearann air a cheangal ann am pòsadh.

5 Oir mar a phòsas duin' òg òigh, mar sin pòsaidh d'fhear-togail thusa; agus mar a ni am fear nuadh-pòsa gàirdeachas 'na mhnaoi, mar sin ni do Dhia gàirdeachas annad-sa.

6 Chuir mi luchd-faire air do bhallachan, O Ierusalem; rè an là, agus rè ua

h-oidhche, cha bhi iad 'nan tosd; sibhse ta deanamh luaidh air ainm an Tigh-earna, na bithibhse 'nur tosd;

7 Agus na tugaibh fois dha, gus an daingnich e, agus gus an dean e Ierusalem 'na cliù air an talamh.

8 Mhionnaich an Tighearn air a làimh dheis, agus air a ghairdean cumhachdach, cha tabhair mi nì's mò t'arbhair mar lòn do d' naimhdibh; ni mò dh'òlas clann a' choigrich t'fhion nuadh, air son an do shaothraich thu:

9 Ach ithidh iadsan e, a thionailas e, agus molaidh iad an Tighearn; agus iadsan a chruinnicheas e, òlaidh iad e ann am chùirtibh naomha-sa.

10 Siubhlaibh, siubhlaibh troimh nageat-achaibh; ulluichibh slighe an t-sluaigh; tilgibh suas, tilgibh suas an rathad mòr; glanaibh as na clachan; togaibh suas bratach air son nan slògh.

11 Feuch, ghlaodh an Tighearn gu iomall an domhain; Abraibh ri nighinn Shìoin, Feuch, tha do Shlànuigear a' teachd; feuch, tha a luaigheachd maille ris, agus *duais* 'oibre 'na làthair.

12 Agus theirear riu, An sluagh naomh, muinntir shaorta an Tighearn; agus riutsa theirear, Miannaichte, Caithir nach tréigear.

CAIB. LXIII.

1 Nochd Criosd a chumhachd gu tèarnadh, agus a dhioghaltais air a naimhdibh. 7 Dh'aithris am fàidh thròcairean Dhé, agus meud a mhaithéis do thigh Israel. 15 Ghuidh e gu'n sealladh Dia air a shluagh a réir lionmhoireachd a thròcairean.

CO so a ta teachd o Edom, le culaidh dhachithe o Blosrah? e so a ta sgiamhach 'na éididh, a' siubhal ann am mòrachd a neirt? Mise, a ta labhairt ann am fireantachd, cumhachdach gu tèarnadh.

2 C'ar son a tha d'éididh dearg, agus do chulaidh mar neach a' saltairt an amair-fhìona?

3 Shaltair mi an t-amar a'm' aonar, agus do na slòigh cha robh aon neach maille rium; oir saltair mi orra ann am fheirg, agus phronn mi iad ann am chorr-uich; agus chrathadh am fuil air mo chulaidh, agus tharruing mi sal air m'éididh uile.

4 Oir bha là an dioghaltais ann mo chridhe, agus bha bliadlana mo mhuinntir shaorta air teachd.

5 Agus dh'amhaire mi, agus cha robh fear-cuidich ann; agus b'ìoghnadh lean nach robh fear-taice ann; uime sin dh'òibrich mo ghairdean féine slàinte dhomh, agus chum mo chorruih féin taice rium.

¹ orra.

² air adhart.

³ falluinn.

⁴ choisriges. Eabh.

⁵ fear-nuadh-pòsa.

⁶ uigheam cinn.

⁷ a phiseach, a thoradh.

⁸ garadh.

⁹ Hephisibah. Eabh.

¹⁰ Reulah. Eabh.

6 Agus shaltair mi sìos na slòigh ann am fheirg, agus chuir mi air mhisg iad ann mo chorruich, agus thug mi sìos an neart chum an làir.

7 Tròcairean an Tighearn aithrisidh mi, agus cliù an Tighearn; a réir gach nì a bhuilich an Tighearn oirn, agus meud a mhaithéis do thigh Israel, a dheònaich e dhoibh a réir a chaoimhneis, agus a réir lìonmhoireachd a thròcairean.

8 Oir thubhairt e, Gu deimhin is iad mo shluagh, clann nach dean breug; agus bha e 'na Shlànuighear dhoibh.

9 'Nan uile àmhghar bha esan fo àmhghar; agus rinn aingeal a làthaireachd an tèarnadh; ann a ghràdh agus ann a iochd rinn e féin an saoradh; agus dh'iomchair e iad, agus ghiùlain e iad, rè nan uile làithean o shean.

10 Ach rinn iadsan ceannairc, agus chuir iad doilghios air a Spiorad naomh; air chor as gu'n d'fhàs e 'na nàmhaid doibh, agus chog e féin 'nan aghaidh.

11 An sin chuimhnich e na làithean o shean, Maois agus a shluagh, *ag ràdh*, Cia esan a thug a nìos iad o'n fhaigire, le buachaille a threud? Cia esan a chuir a Spiorad naomh an taobh a stigh d'heath?

12 A stiùir iad aig deas làimh Mhaois le a ghairdean glòrmhor; a' sgoltadh nan uisgeacha roimhe, a dheanamh ainme shiorruidh dha féin?

13 'Gan stiùradh troimh an doimhne, mar each anns an fhàsach, *ionnus* nach tuislicheadh iad?

14 Mar a théid an spréidh sìos do'n ghleann, thug Spiorad an Tighearn orra fois a ghabhail: mar sin threòraich thu do shluagh, a dheanamh ainme ghlòrmhoir dhuit féin.

15 Seall a nuas o nèamh, agus faic o d'ionad-còmhnuidh naomh agus glòrmhor; c'ait am bheil t'èud, agus do neart; lìonmhoireachd do thròcairean agus do thruas dhìom? Am bheil iad air an cumail air an ais?

16 Gu deimhin is tusa ar n-Athair, ged nach aithne do Abraham sinn, agus nach 'eil Israel a' gabhail ruinn; is tusa, a Thighearn, ar n-Athair, ar Fear-saoraidh; *tha* d'ainm o shiorruidheachd.

17 C'ar son, a Thighearn, a thug thu oirn dol air seacharan o d' shligheibh; agus a chruaidhich thu ar cridhe o d' eagal? Pill air sgàth do sheirbhiseach, treubhan d'oighreachd féin.

18 Is beag an ùine a shealbhaich do shluagh naomh; shaltair ar nainmhdcan sìos do naomh-ionad.

19 Bu *leat* sinne riamh; cha robh thu a' riaghladh os an ceann-san; cha robh iad air an gairm air d'ainm.

CAIB. LXIV.

1 Dh'iarr an eaglais foillseachadh cumhachd Dhé; 4 dh'aicidh i gu'n robh a thròcairean lìonmhor; 9 agus ghuidh i nach cuimhniceadh e a h-aingidheachd 'na h-aghaidh gu bràth.

O GU'N reubadh tu o chéile na nèamhan, gu'n tigeaidh tu nuas, gu'n sruthadh na sléibhteas sìos ann ad làthair;

2 Mar a loisgeas an teine-leaghaidh, mar a chuireas an teine goil air uisge; a chum d'ainm a dheanamh aithnichte do d' naimhaidibh, *gu'n* criothnaicheadh na cinnich ann ad fhanuis!

3 An uair a rinn thu nithe iongantach ris nach robh sùil againn, thàinig thu nuas; ann ad làthair shruth na sléibhteas sìos.

4 Oir riamh cha chuala *daoine*, cha d'airich iad le'n cluais, nì mò chunnaic sùil, dia *eile* ach thusa, a nì a *leithid* air son an ti a dh'fheitheas air.

5 Tha thu a' teachd an còdhail an ti a ta gabhail tlachd ann an ceartas a dheanamh; *a' mhuinntir* a ta cuinhnear ortsa ann ad shligheibh: feuch, tha corruich ort, oir pheacaich sinne; *eadhon* rìusan o shean, ach tha sinn air ar tèarnadh;

6 Agus tha sinne uile mar nì truaillidh, agus ar n-uile fhìreantachd mar luideig shalaich; agus tha sinn uile air seargadh mar dhuilleach; agus rinn ar lochdan, mar a' ghaoth, ar giùlan air falbh.

7 Agus cha 'n'eil aon neach ann a ta gairm air d'ainm, a ta 'ga dhùsgadh féin suas a dheanamh greim ort; oir dh'fholuich thu do ghnùis uainn, agus chlaoidh thu sinn air son ar n-euceartan.

8 Ach a nis, O Thighearn, is tusa ar n-Athair; is sinne a' chreadh, agus is tusa ar fear-deilbh; agus is sinne uile obair do làimhe.

9 Na biodh corruich ro gheur ort, a Thighearn, agus na cuimhnich aingidheachd gu bràth; feuch, amhaire, guidheamaid ort, is sinne uile do shluagh.

10 Dh'fhàs do bhailtean naomha 'nam fàsach; tha Sion 'na fàsach; tha Ierusalem faondrach.

11 Tha ar tigh naomh agus àluinn, anns an d'thug ar n-aithrichean moladh dhuit, air a losgadh le teine; agus tha ar n-uile nithe tlachdmhor air an léir-sgrìos.

12 An cum thu ort féin air son nan nithe sin, a Thighearn? Am bi thu a'd' thosd, agus an cràidh thu sinn gu goirt?

CAIB. LXV.

1 Ghairm Dia na cinnich, agus thàinig e na h-Iudhaich air son an mì-chreidimh agus an aingidheachd. 8 Tèarnar fuigheall duibh. 11 Thig breitheanas air an aingidh, ach beannaichear an t-ionracan. 17 An nuadh Ierusalem.

DH'FHOILLSICHEADH mi dhoibh-
san nach robh 'gam fharraid¹;
fhuaradh mi leosan nach robh 'gam
iarraidh; thubhairt mi, Feuch mi, feuch
mi, ri cinneach nach robh air 'ainmeach-
adh orm.

2 Shìn mi mach mo làmh an fad an là
ri sluagh ceannairceach, a ta gluasad ann
an droch shlighe, a réir an inleachdan
féin;

3 Sluagh a ta an còmhnuidh 'gam
bhrosnachadh gu feirg ri m' aghaidh; ag
ìobradh anns na liosaibh, agus a' losgadh
tùise air na clachaibh-creadha;

4 A ta fantuinn an measg nan àiteachan-
adhlaic, agus a' gabhail còmhnuidh anns
na h-uamhaibh; a ta 'g itheadh feòla
mhuc, agus aig am bheil sùgh nithe
gràineil 'nan soithichibh.

5 A ta 'g ràdh, Fan agad féin, na tig
am fagus² domhsa; oir is mise a's naomha
na thusa. Tha iad so 'nan deataich³ ann
am shròin, 'nan teine tha losgadh rè an
là uile.

6 Feuch, tha e sgrìobhta ann am làth-
air; cha'n fhan mi a'm' thosd, ach ath-
dhiolaidh mi; seadh, ath-dhiolaidh mi
ri'n uchd,

7 Bhur n-eu-ceartan, agus eu-ceartan
'ur n-aithrichean le chèile, deir an Tighearn,
a loisg tùis air na sléibhtibh, agus a
thug toibheum dhomh air na cnocaibh;
seadh, tomhaisidh mi air ais dhoibh 'nan
uchd an obair a rinn iad roimhe so.

8 Mar so deir an Tighearn, Amhuil a
gheibhear am fion nuadh anns a' bhagaide,
agus a thair neach, Na mill e, oir tha
beannachadh ann; mar sin ni mise air
sgàth mo sheirbhiseach; cha sgrios mi an
t-iomlan.

9 Agus bheir mi mach sliochd o Iacob,
agus o Iudah sealbhadair mo shléibhtean;
agus sealbhaichidh mo mhuinntir thaghta
am fearann, agus gabhaidh m'òglaich
tàmh ann.

10 Agus bithidh Saron 'na chrò chaor-
ach, agus gleann Achoir 'na bhuaile bhò,
air son mo shluaigh-sa, a bha 'gam iarr-
aidh.

11 Agus sibhse a thréig an Tighearn, a
dhì-chuimhnich mo sliabh naomh; a ta
deasachadh bùird do Ghad⁴, agus a'
lionadh iobairt-dibhe do Mheni⁵;

12 Airmhidh mi sibhse chum a' chlaidh-
eimh, agus cromaidh sibh uile sìos chum
a' chasgraidh; a chionn, an uair a ghlaodh
mi, nach do fhreagair sibhse; an uair a
labhair mi, nach d'éisid sibh; ach rinn
sibh olc ann am shealladh, agus an ni
anns nach robh tlachd agam ròghnaich
sibh.

13 Air an aobhar sin mar so deir an
Tighearn Iehobhah, Feuch, ithidh m'òg-
laich-sa, ach bithidh ocras oirbhse; feuch,
òlaidh m'òglaich-sa, ach bithidh tart
oirbhse; feuch, ni m'òglaich-sa gàird-
eachas, ach bithidh nàire oirbhse;

14 Feuch, seinnidh m'òglaich-sa tre
aoibhneas cridhe, ach glaoibhidh sibhse
tre dhoilghios cridhe; agus tre chràdh
spioraid ni sibh caoineadh.

15 Agus fàgaidh sibh bhur n-ainm mar
mhallachadh dom' mhuinntir thaghta-sa;
oir marbhaidh an Tighearn Iehobhah thu,
agus bheir e ainm eile air 'òglaich.

16 An neach a bheannaicheas e féin air
talamh, beannaichidh se e féin ann an Dia
na firinn; agus an neach a bheir mionnan
air talamh, mionnaichidh e air Dia na fir-
inn; a chionn gu bheil na h-àmgharan
roimhe air an di-chuimhneachadh, agus a
chionn gu bheil iad foluichte o m' shùilbh.

17 Oir feuch, cruthaicheam nèamhan
nuadha agus talamh nuadh; agus cha
chuimhnichear iad sin a bh'ann roimhe,
agus cha tig iad an aire do'n duine.

18 Ach deanaibh-sa gàirdeachas, agus
bithibh aoibhneach gu cian nan cian, air
son an nì a chruthaicheam; oir feuch,
cruthaicheam Ierusalem 'na cùis-aoibh-
neis, agus a sluagh 'nan cùis-ghàird-
eachais.

19 Agus bithidh mi aoibhneach ann an
Ierusalem, agus ni mi gàirdeachas ann
mo shluagh; agus cha chluinnear guth
caoidh no guth caoinidh innte ni's mò.

20 Oir cha bhi as a sin suas naoidhean⁶
garr-shaoghalach, no seann duine nach
do choimhlion a làithean; oir bàsaichidh
an naoidhean an uair a ruigeas e ceud
bliadhna dh'aois; ach bithidh am peacair
a ruigeas ceud bliadhna dh'aois mall-
uichte.

21 Agus togaidh iad tighean, agus gabh-
aidh iad còmhnuidh anna; agus suidh-
ichidh iad fion-liosan, agus ithidh iad d'an
toradh.

22 Cha dean iadsan togail, agus neach
eile àiteachadh; cha dean iadsan suidh-
eachadh, agus neach eile itheadh; oir mar
làithean craoibhe bithidh làithean mo
shluaigh-sa; agus mealaidh mo mhuinntir
thaghta rè ùin' fhada' obair an làmh
féin.

23 Cha saothraich iad gu diomhain, ni
mò ghineas iad sliochd chum dragha; oir
is iad siol dhaoine beannaichte an Tighearn,
agus an sliochd maille ri u.

24 Agus tarlaidh, mu an gairm iad,
freagairidh mi; agus am feadh a bhios
iad fos a' labhairt, éisidh mi.

25 Ni am madadh-alluidh agus an t-uan

¹ a' fìosrachadh mu m' thimicholl. ² an gar.
³ deataich. ⁴ bluidhinn.

⁵ mhòr-àireamh.

⁶ naoidheachan.

⁷ caithidh iad as. Eabh.

ionaltradh le chéile; agus ithidh an leòmhann conlach mar an damh; ach 's e an duslach a's biadh do'n nathair. Cha dochainn agus cha mhill iad ann mo shliabh naomh-sa uile, deir an Tighearn.

CAIB. LXVI.

1 *Tha Dia a' nochdadh d'a shluagh gu'm feum iad seirbhis a dheanamh dha gu h-iriosal, agus ann an tréibhdhìreas an cridhe, 5 Bheir an Tighearn comhfhurtachd dhoibhsan a ghluaisèas 'na eagal. 15 Dòirtidh e a chorroich air an aingidh. 18 Cruinnichear na h-Iudhaich agus na cinneach a dh'aon eaglais.*

MAR so deir an Tighearn, Is iad na nèamha mo rìgh-chaitir, agus an talamh stòl mo chos; cia e an tigh a thogas sibh dhomh-sa? agus cia e ionad mo chòmhnuidh?

2 Oir na nithe so uile rinn mo làmh, agus na nithe so uile is leam-sa, deir an Tighearn; ach air an fhear so amhaireidh mi, eadhon air-san a ta bochd agus leònta 'na spiorad, agus a chriothnaicheas roimh m'fhocal.

3 Tha esan a mharbhas damh, *mar gu'm* mortadh e duine; esan a dh'ìobras uan, *mar gu'n* cuireadh e an ceann do mhadadh; esan a bheir seachad tabhartas, *mar gu'n tugadh e seachad* fuil mhuc; esan a loisgeas tùis, *mar gu'm* beannaicheadh e iodhol; seadh, ròghnaich iad an sligheachan féin, agus 'nan gràineil-eachdaibh féin tha an anam a' gabhail tlachd.

4 Ròghnaichidh mise fòs am faoin-smuainte-san, agus an cùis-eagal bheir mi orra; a chionn gu'n do ghlaoth mi, agus nach d'thug aon neach freagradh; labhair mi, agus cha d'éisd iad; ach rinn iad olc ann am shealladh, agus an ni anns nach robh tlachdagam ròghnaich iad.

5 Cluinnibh-sa focal an Tighearna, sibhse ta criothnachadh roimh fhocal; bhuir bràithrean a tha toirt fuath dhuibh, a thilg a mach sibh air sgàth m'ainme-sa, deir iad, Bìodh an Tighearn air a ghlòrachadh; ach foillsichear e chum aoibhneis dhuibh-se, agus cuirear iadsan gu h-amhluaadh.

6 Guth àrd-ghlaoidh o'n chaithir: guth o'n teampull; guth an Tighearn, a' toirt ath-dhiolaidh d'a naimhdibh.

7 Mu'n robh i ann an saothair-chloinne, dh'aiseadadh i; mu'n d'fhàinig a h-ìogh-anna, rug i leanabh-mic.

8 Cò chual a leithid so? cò chunnaic an leithide so do nithibh? an tabhair an talamh a mach a thoradh ann an aon là? am bi cinneach air a bhreith dh'aon bheum¹? oir cha bu luaithe bha Sion ann an saothair na rug i a clann.

9 An toir nì gus a' bhreith, agus nach

toir mi fa'near gu'm beirear? deir an Tighearn; an gin mi, agus am bac mi a' bhreith? deir do Dhia.

10 Deanaibh gàirdeachas le Ierusalem, agus bithibh sublach air a son, sibhse uile le'n ionmhuinn i; bithibh ro aoibhneach leatha, sibhse uile a ta ri bròn air a son;

11 A chum gu'n deòthail sibh, agus gu'm bi sibh sàsichte le ciochaibh a sòlais; a chum gu'n tarruing² sibh, agus gu'm faigh sibh toil-inntinn ann am pailteas a glòire.

12 Oir mar so deir an Tighearna; Feuch, sgaoileam sith thairis oirre mar amhainn, agus glòir nan cinneach mar shruth a' taomadh a nuas³; an sin deòthaidh sibh, giùlaineair sibh air an léis, agus luaisgear⁴ sibh air na glùinibh.

13 Mar neach do'n tabhair a mlàthair comhfhurtachd, mar sin bheir mise comhfhurtachd dhuibhse; agus ann an Ierusalem gheibh sibh sòlas.

14 An uair a chi sibh so ni bhuir cridhe gàirdeachas; agus bithidh 'ur cnàmhan⁵ urar mar am fear; agus foillsichear làmh an Tighearna d'a òglaich; ach lasaidh 'fhearg an aghaidh a naimhdean.

15 Oir feuch, thig an Tighearn le teine, agus a charbad mar chuairt-ghaoith; a dhòrtadh a mach a chorroich mar an-teas, agus 'achmhasain le lasraichibh teine.

16 Oir le teine agus le a chlaidheamh tagraidh an Tighearn ris gach uile fheoil; agus bithidh mòran air am marbhadh leis an Tighearn.

17 Iadsan a ta 'g an naomhachadh féin agus 'g an glanadh féin anns na liosaibh, air cùl aon chruaibh⁶ a' m' mheadhon; ag itheadh feòla mhuc, agus na gràineileachd, agus nan luch; gearrar⁶ as iad le chéile, deir an Tighearn.

18 Oir is aithne dhomh-sa an gnìomhara, agus an imleachdan; thigeam a chruinneachadh nan uile chinneach agus theang-anna ri chéile; agus thig iad, agus chi iad mo ghlòir.

19 Agus cuiridh mi comhara 'nam measg; agus a' mhuinntir a thèid as diubh cuiridh mi dh'ionnsuidh nan cinneach, gu Tarsis, Pul, agus Lud, a thairngeas am bogha; gu Tubal agus Iabhan, na crìochan fad 'as; nach cuala iomradh orm, agus nach faca riamh mo ghlòir; agus cuiridh iad an céill mo ghlòir am measg nan cinneach.

20 Agus bheir iad 'ur bràithreanuile, as gach cinneach, *mar* thabhartas do'n Tighearn; air eachaibh, agus air carbadaibh, agus air uirighibh, air muilidhibh, agus air ainmheidean luath-chosach⁷; gu mo shliabh naomh-sa Ierusalem deir an Tighearn; amhuil a bheir clann Israeil tabh-

¹ dh'aon tarruing?

² a' dol thar bruaich.

³ fàisg, bloodhainn.

⁴ fu-luaisgear.

⁵ cnàmhean.

⁶ cleibh.

⁷ sguabar.

artas ann an soitheach glan gu tigh an Tighearn.

21 Agus dhiubh-san mar an ceudna gabhaidh mi, air son shagart, agus air son Lebhitheach, deir an Tighearn.

22 Oir amluil a mhaireas na nèamha nuadha, agus an talamh nuadh, a ta mi cruthachadh, ann am fhianuis, deir an Tighearn; mar sin mairidh bhur sliochd-sa, agus 'ur n-ainm.

23 Agus tarlaidh, o ghealaich ùir gu

gealaich ùir, agus o shàbaid gu sàbaid, gu'n tig gach uile fheoil a dheanamh aoraidh ann am làthair-sa, deir an Tighearn.

24 Agus théid iad a mach, agus seallaidh iad air ciosaichean nan daoine a chiontaich a'm' aghaidh; oir cha bhàsaich an enuimh, agus cha mhùchar an teine; agus bithidh iad 'nan gràineileachd¹ do na h-uile fheoil.

¹ oille.

IEREMIAH.

CAIB. I.

1 An t-àm sand' rinn Jeremiah fàisteachd: 4 Naomhaich Dia e o'n bhroinn. 11 Nochdadh dha gu'n rachadh Ierusalem a sgrios. 17 Neartaich Dia e fa chomhair a dhreuchd.

BRIATHRAN Jeremiah mhic Hilciah, aon do na sagartaibh a bha an Anatot ann am fearann Bheniamin:

2 A dh'ionnsuidh an d'thàinig focal an Tighearn ann an làithibh Iosiah mhic Amoin rìgh Iudah, anns an treas bliadhna deug d'a rioghachadh.

3 Thàinig e mar an ceudna ann an làithibh Iehoiachim mhic Iosiah rìgh Iudah, gu ceann aon bhliadhna deug Shedeciah mhic Iosiah, rìgh Iudah, gus an d'thugadh air falbh Ierusalem ann am braighdeanas anns a' chùigeamh mìos.

4 Thàinig an sin focal an Tighearn a m'ionnsuidh-sa, ag ràdh,

5 Mu'n do dhealbh mi thu sa' bhroinn, b'aithne dhomh thu; agus mu'n d'thàinig thu mach o'n bholg, chuir mi air leth thu¹: mar fhàidh do na cinnich thug mi thu.

6 An sin thubhairt mise, Och! a Thighearna Iehobhah, feuch, cha'n aithne dhomh-sa labhairt, oir is leanabh mi.

7 Agus thubhairt an Tighearna rium, Na abair, Is leanabh mi: ach a chum nan uile gus an cuir mise thu, théid thu; agus ciod sam bith a dh'àithneas mi dhuit, labhraidh tu.

8 Na biodh eagal ort roimh an gnùis; oir tha mise maille riut a chum do thèarnadh, deir an Tighearn.

9 Agus chuir an Tighearn a mach a làmh, agus bhean e ri m' bheul; agus thubhairt an Tighearn rium, Feuch, chuir mise mo bhriathran ann ad bheul.

10 Feuch, chuir mi thu air an là'n diugh os ceann nan cinneach agus os ceann nan rioghachd, gu spionadh as, agus gu taruing a nuas, agus gu sgrios, agus gu leagail; gu togail, agus gu suidheachadh.

11 Agus thàinig focal an Tighearn a

m'ionnsuidh, ag ràdh, Ciod a tha thu faicinn, a Jeremiah? Agus thubhairt mise, Tha mi faicinn slaithe do chraoibh almoìn.

12 Agus thubhairt an Tighearna rium, Is ceart a chunnaic thu: oir deifrichidh mise m'fhocal a chum a choimhlionadh.

13 Agus thàinig focal an Tighearn a m'ionnsuidh an dara uair, ag ràdh, Ciod a tha thu faicinn? Agus thubhairt mise, Tha mi faicinn coire air ghoil; agus air a tionndadh o'n àirde tuath.

14 Agus thubhairt an Tighearn rium, O'n àirde tuath brisidh an t-ole a mach air uile luchd-àiteachaidh na tìre.

15 Oir feuch, gairmidh mise air uile theaghlaichean rioghachdan na h-àirde tuath, deir an Tighearn; agus thig iad, agus suidhichidh iad, gach aon a rìgh-chaitir aig dol a steach gheatachan Ierusalem, agus air a ballachan uile mu'n cuairt, agus os ceann uile bhailtean Iudah.

16 Agus cuiridh mise mo bhreitheanas an céill 'nan aghaidh, air son an uil' aingidheachd; a chionn gu'n do thréig iad mise, agus gu'n do loisg iad tùis do dhiathaibh eile, agus gu'n do shleuchd iad do oibribh an làmh faein.

17 Crioslaich thusa suas uime sin do leasraidh, agus éirich, agus labhair riu na h-uile nithe a dh'àithneas mise dhuit; na biodh fiamh² ort rompa, air eagal gu cuir mise gu h-amhladh thu 'nam fianuis.

18 Oir feuch, rinn mise thu an diugh a'd' chaitir dhaignichte, agus a'd' phost iarunn, agus a'd' bhalla umbha, an aghaidh na tìre so uile; an aghaidh rìghrean Iudah, an aghaidh a mòr-uaislean, an aghaidh a sagartan, agus an aghaidh sluagh na tìre:

19 Agus cathaichidh iad ann ad aghaidh, ach cha toir iad buaidh ort: oir tha mise maille riut, deir an Tighearn, chum do thèarnadh.

CAIB. II.

1 Chuimhnich Dia as leth nan Iudhach an caoimhneas a nochd e dhoibh 'nan dìge, agus thagair e riu

¹ naomhaich mi thu.

² faichtas.

mu thimchioll an aingidheachd. 18 Chronaich e iad air son an iodholan. 35 Tha dhòchas an t-sluaigh 'nan nòchdiontas féin diomhain.

THAINIG focal an Tighearna mar an ceudna a m'ionnsuidh, ag ràdh,

2 Imich agus glaoth ann an cluasaibh Ierusalem, ag ràdh; Mar so deir an Tighearna, Chuimhnich mise as do leth an caoimhneas a nochd mi dhuit ann ad òige, gràdh do cheangail-pòsaidh, 'nuair a dh'imich thu a'm' dhéigh anns an fhàsach, ann am fearann 'nach do threabhadh.

3 Is naomhachd do'n Tighearn Israel, ceud thoradh a chinneis: iadsan uile a ta 'ga shluadh suas, measar iad ciontach; thig aihmheas orra, deir an Tighearn.

4 Chuinnibh focal an Tighearn, O thigh Iacobb, agus uile theaghlaichean tighe Israel:

5 Mar so deir an Tighearn; Ciod an euceart a fhuair 'ur n-aithrichean annam-sa, gu'n d'imich iad fada uam, agus gu'n do ghluais iad an déigh diomhanais, agus gu'n d'fhàs iad diomhain?

6 Agus cha dubhairt iad, C'ait am bheil an Tighearn, esan a thug a nìos sinn o thìr na h-Eiphit, a stiùir sinn troimh an fhàsach, troimh fearann fàsail agus làn shlochd, troimh fearann tairt agus sgàile bàis, trid fearainn nach do shiubhail aon duine troimhe, agus far nach do ghabh duine riamh comhnuidh?

7 Thug mi sibh mar an ceudna gu dùthach thorraich, a dh'itheadh a toraidh, agus a maitheis; ach an uair a thàinig sibh a steach, thruaill sibh m'fhearann, agus m'òighreachd rinn sibh 'na gràineil-eachd.

8 Cha dubhairt na sagairt, C'ait am bheil an Tighearn? agus iadsan a laimhsich an reachd, cha b'aithne dhoibh mise: rinn na h-aodhairean fòs ceannairc ann am aghaidh; agus rinn na fàidhean fàistneachd Baa, agus lean iad nìthe nach toir buannachd.

9 Uime sin tagraidh mise ruibh fathast, deir an Tighearn, agus ri cloinn bhuir cloinne tagraidh mi.

10 Oir siubhlaibh thairis gu crìocha Chitim, agus faicibh; agus cuiribh fios gu Cedar, agus thugaibh geur aire; feuch-aibh an do thachair riamh a leithid so.

11 An do chaochail cinneach an dée, eadhon iad sin nach robh 'nan dée? Ach chaochail mo shluagh-sa an glòir air son ni gun bhuannachd.

12 Biodh iognadhl oirbh. O nèamha, mu'n ni so, agus biodh uamhas oirbh: bithibh air bhuir trom-bhualadh le h-uamhunn², deir an Tighearn:

13 Oir chuir mo shluagh-sa dà olc an

gnìomh: thréig iad mise, tobar nan uisgeach a beò; agus chladhaich iad a mach dhoibh féin sluichd, sluichd eu-dìonach, nach cum uisge.

14 An tràill Israel? Ma's ann do chloinn an teaghlaich e, c'uim' an d'rinnneadh e 'na chobhartaich?

15 Beucaidh na leòmhain òga 'na aghaidh; thog iad an guth, rinn iad 'fhearannu 'na fhàsach; tha a bhailean air an losgadh, gun aon 'gan àiteachadh.

16 Ni clann Noiph agus Tahpaneis mar an ceudna mullach do chinn a bhriseadh.

17 Nach do choisinn thu so dhuit féin, a chionn gu'n do thréig thu an Tighearn do Dhia, an uair a bha e 'g ad stiùireadh anns an t-slighe?

18 Agus a nis ciod do ghnothuch ri slighe na h-Eiphit, a dh'òl uisgeachan Shihoir? No ciod do ghnothuch ri slighe Asiria, a dh'òl uisgeachan na h-Aimhne?

19 Sinachdaichidh t'aingidheachd féin thu, agus ni do chùl-sleamhnachadh féin do chronachadh: aithnich uime sin agus faic, gur olc agus searbh an nì, gu'n do thréig thu an Tighearn do Dhia, agus nach 'eil m' eagal-sa annad, deir an Tighearn Dia nan sluagh.

20 Gu deimhin o chian fada bhris mi² do chuing, sgaoil mi do chuibhrichean; agus thubhairt thu, Cha bhi mi eas-umhal³. Oir air gach cnoc àrd, agus fo gach craoibh uaine, tha thu dol air seacharan ri striopachas.

21 Gidheadh shuidhich mise thu a d' fhlionain uasail, gu h-iomlan a d' shìol ceart: ach cionnus a chaochail thu orm, a' gheug crìonaich na fionain coimhich?

22 Oir ged nigh thu thu féin le natar, agus ged ghabh thu mòran sìopiunn, tha t'aingidheachd air a comharachadh ann am làthair-sa, deir an Tighearna Iehobha.

23 Cionnus a dh'fheudas tu ràdh, Cha'n 'eil mi salach, cha deachaidh mi an déigh Bhaalim? Feuch do shlighe anns a' ghleann; aithnich ciod a rinn thu. Tha thu mar dhromedari luath ag imeachd na slighe;

24 Mar asail fhiadhaich cleachdta ri fàsach, a thairngeas a' ghaoth suas 'na cuinneanaibh, ann an ciòcas a h-anama: an trà thig a miann cò a philleas i? Iad-san uile bhios 'ga h-iarraidh cha sgèithichear iad; an ceann a miosa gheibh iad i.

25 Cum do chos o bhi ruisgte, agus do mhuineal o thart. Ach thubhairt thusa, Cha 'n'eil leigheas air a' chùis a nis; cha chum; oir ghràdhaich mi coigrich, agus 'nan déigh théid mi.

26 Mar a bhios nàire air meirleach an uair a ghlacar e; mar sin chuireadh gu nàire tigh Israeil; iad féin, an rìghrean,

¹ air bhuir fàsachadh gu tur.

² thu, LXX.

³ umhal. Eabh.

an uachdarain, agus an sagairt, agus am fàidhean.

27 A ta 'g ràdh ri mìr fiodha, *Is tu m'athair*; agus ri cloich, *Is tu ghin mi*; oir thionndaidh iad riumsa an cùl, is cha'n i an aghaidh; ach ann an àm an airce their iad, Eirich, agus teasaig sinn.

28 Ach c'ait am bheil do dhée a rinn thu dhuit féin? Eireadh iadsan, ma's urrainn iad do thèarnadh ann an àm do chruaidh-chais: oir a réir àireimh do bhailean bha do dhée, O Iudah.

29 C'ar son a thagras sibh rium-sa? chiontaich sibh uile a'm' aghaidh, deir an Tighearn.

30 Gu diomhain bhuail mi bhur clann: cha do ghabh iad cronuchadh. Shluig 'ur claidheamh féin 'ur fàidhean, amhuil leòmhnan millteach.

31 O sibhsè do'n glinealach so, feuch-aibh focal an Tighearn: an robh mise a'm' fhàsach do Israel! a'm' fhearann dorchadais? C'uin an dubhairt mo shluagh, Is tighearnan sinn oirnn féin; cha tig sinn nì's mò thugad-sa?

32 Am feud òg-bhean a h-usgraichean a dhearnadh? no bean-bainne a culaidh? Gidheadh dhearmaid mo shluagh mise làithean gun àireamh.

33 C'uin an seòl thu do shlighe a dh'iarraidh gaol? air an aobhar sin fòs seòlaidh mise dòrainnean air do shlighean-sa.

34 Fhuaradh ann ad sgiobul mar an ceudna fuil anama nan neo-chiontach bochda: cha 'n ann le sgrudadh domhain a fhuair mi mach i, ach air a craobhsgaoileadh.

35 Gidheadh tha thu 'g ràdh, A chionn gu bheil mi neo-chiontach, gu cinnteach pillidh a chorruich uam. Feuch tionnsgaidh mise ann am breitheanas riut, a chionn gu bheil thu ag ràdh, Cha do pheacaich mi.

36 C'uin am bi thu co ro luaineach a chaochladh do shlighe? bithidh fathast nàire ort do'n Eiphit, amhuil a bha nàire ort do Asiria.

37 Seadh, cuideachd théid thu mach as a so, le d' làmhnan air do cheann: oir dhiùlt an Tighearn cuspairean do dhòchais, agus leo cha soirbhich thu.

CAIB. III.

1 Mòr-thrèdair an Tighearn do Iudah. 6 Tha Israeil nì's neo-chiontaiche na Iudah. 12 Ghairm Iad iad gu aithreachas. 20 Dh'aidich an sluagh am peacanna.

THEIR iad, Ma chuireas duine air falbh a bhean, agus gu'n imich i uaith, agus gu'n gabh i le fear eile, am pill e d'a h-ionnsuidh a ris? nach bi am fearann sin gu ro ìmhòr air a thruaillleadh? Ach rinn thusa striopachas le mòran

leannan; gidheadh pill riumsa a ris, deir an Tighearn.

2 Tog do shùilean suas ris na h-ionad-aibh àrda, agus, feuch, cia an t-àit anns nach do thruaillleadh thu? Shuidh thu 'gam feitheamh anns na slighibh, mar an t-Arabach san fhàsach; agus shalaich thu am fearann le d'striopachas, agus le d' dhròch-bheirt.

3 Agus chumadh na frasan air an ais, agus an t-uisge deireannach cha robh ann; gidheadh agad-sa bha eudan striopach, chuir thu cùl ri nàire.

4 Nach gairm thu ormsa o'n uair so, ag ràdh, M'athair, bu tusa fear stiùraidh m'òige?

5 An gléidhear fearg gu bràth? an cumar corruich gu sìorruidh air chuimhne? Feuch, labhair, agus rinn thu aingidheachd; agus chaidh e leat.

6 Thubhairt an Tighearn rium fòs ann an làithibh Iosiah an rìgh, Am faca tu ciod a rinn Israel chùl-sleamhnach? Chaidh i suas air gach sliabh àrd, agus fo gach crann gorm, agus an sin rinn i striopachas.

7 Agus thubhairt mise, an déigh dhi so uile a dheanamh, Pill a m'ionnsuidh-sa: ach cha do phill i. Agus chunnaic a piuthar fhealltach Iudah so.

8 Agus chunnaic mise, 'nuair, air son na h-uile adhaltrais anns an robh Israel chùl-sleamhnach ciontach, a chuir mi air falbh i, agus thug mi litir-dhealaich dhi, gidheadh nach do ghabh a piuthar fhealltach Iudah eagal, ach gu'n d'imich i, agus gu'n d'rinn i féin striopachas mar an ceudna.

9 Agus tharladh, le ro mheud a tograidh gu neo-ghloine, gu'n do thruaill i am fearann, agus gu'n d'rinn i adhaltras le clachaibh agus le crannaibh.

10 Agus fòs an déigh so uile cha do phill a piuthar fhealltach Iudah riumsa le a h-uile chridhe, ach gu cealgach, deir an Tighearn.

11 Uime sin thubhairt Iehobhab rium; Is mò dh'fhireannaich Israel chùl-sleamhnach i féin na Iudah chealgach.

12 Imich agus glaodh na briathran so fa chomhair na h-àirde tuath, agus abair; Pill, O Israel chùl-sleamhnach, deir an Tighearn, agus cha leig mi om chorruich ort; oir tha mise tròcaireach, a' eir an Tighearn, cha ghléidh mi m'fhea g gu bràth.

13 A mhàin aidich do chionta, gu'n d'rinn thu eusaontas an aghaidh an Tighearna do Dhé; agus gu'n d'rinn thu do shligheachan coitichionn do choigrich, fo gach aon chraoibh uaine; agus nach d'thug sibh géill do m' ghuth-sa, deir an Tighearn.

14 Pillibh, O chlann chùl-sleamhnach, deir an Tighearn, oir tha mi pòda ruibh: agus gabhaidh mi sibh, aon a baile, agus

¹ a breaghad.

dithis á teaghlach, agus bheir mi sibh gu Sion:

15 Agus bheir mi dhuibh aodhairean a réir mo chridhe féin, agus beathaichidh iad sibh le h-eolas agus le tuigse.

16 Agus tarlaidh, an uair a théid sibh an lionmhoireachd agus an meud anns an fhearann, anns na láithibh sin, deir an Tighearn, cha'n abair iad ní's mó, Airce coimhcheangail an Tighearna, ní mó thig i 'nan aire, ní mó chuimhnícheas iad i, ní mó bheir iad súil 'na déigh, ní mó nítheas sin tuilleadh.

17 Anns an àm sin theirear ri Ierusalem righ-chaithir an Tighearn; agus bithidh tathaich nan uile chinneach d'a h-ionusuidh, air sgàth ainme an Tighearn a bhith-eas ann an Ierusalem; agus cha ghluais iad ní's mó a réir cruais¹ an droch chridhe féin.

18 Anns na láithibh sin théid tigh Iudah gu tigh Israeil; agus thig iad le chéile mach as an tìr mu thuath, a chum an fhearainn a thug mise mar sheilbh do 'r n-aithrichibh.

19 Agus 'nuair a thubhairt mi, Cionnus a bheir mi àite dhuit am measg mhac, agus a bheir mi dhuit am fearann taitneach, oighreachd aoibhneach shluagh nan cinneach? an sin thubhairt mi, Goiridh tu riumsa, M'athair; agus cha phill thu air t'ais o m' leantuinn.

20 Gu deimhin, mar a chlaonas bean neò-dhileas o a fear-pòsa, mar sin bhuin sibhse gu neò-dhileas riumsa, O thigh Israeil, deir an Tighearn.

21 Chualas guth air na h-ionadaibh àrda, caoidh agus athchuinge cloinne Israeil; a chionn gu'n do chlaon iad an slighe; dhi-chuimhnich iad an Tighearn an Dia.

22 Pillibh, o chlann chùl-sleamhnach, leighisidh mise bhur cùl-sleamhnachaidh. Feuch, tha sinn a' teachd a d'ionnsuidh, oir is tu an Tighearn ar Dia.

23 Gu deimhin cha'n eil ach dìomhanas anns na cnocaibh, ann an neart nan sléibhteas; gu deimhin anns an Tighearn ar Dia-ne tha slàinte Israeil.

24 Ach dh'ith an nì nàrach sin suas saothair ar n-aithrichean o ar n-òige; an caoraich, agus am buar, am mic, agus an nigheana.

25 Luidhidh sinn sìos 'nar nàire, agus thig ar masladh tharunn: a chionn gu'n do pheacaich sinn an aghaidh an Tighearn ar Dia, sinn féin agus ar n-aithrichean, o'r n-òige, eadhon gus an diugh, agus nach robh sinn ùmhal do ghuth an Tighearn ar Dia.

CAIB. IV.

1 Bhrosnuich Dia clann Israeil gu aithreachas le 'gheallannaibh, 2 agus Iudah, le bhì bagairt

¹ ragaireachd, reasgachd.

breitheanas a uamhasach a thuirt orra. 19 Chaoidh am fàidh gu mòr léir-sgrìos an fhearainn.

MA philleas tu a ris, O Israeil, deir an Tighearn, a m'ionnsuidh-sa pillidh tu; agus ma chuireas tu air falbh do ghràineileachdan o m' làthair-sa, an sin cha gluaisear thu:

2 Ach mionnachidh tu, Mar is beò an Tighearn, ann am firinn, ann am breitheanas, agus ann an ionracas; agus beannaichidh na cinnich iad féin ann-san, agus ann-san ni iad uail.

3 Uime sin, mar so deir an Tighearn ri fearaibh Iudah, agus ri Ierusalem; Brisibh suas bhur fearann treabhaidh, agus na cuiribh am measg dhroighionn.

4 Bithibh air 'ur timchioll- ghearradh do'n Tighearn, agus thugaibh air falbh roimh-chroicinn 'ur cridheachan, O fheara Iudah, agus a luchd-àiteachaidh Ierusalem; mu'n téid mo chorruich-sa nach mar theine, agus mu'n las i, air chor as nach feudar a mùchadh, air son aingidheachd 'ur gnìomhara.

5 Cuiribh-sa an céill ann an Iudah, agus ann an Ierusalem deanaibh follas, agus abraibh; Séidibh an trompaid anns an tìr; éighibh gu h-àrd agus abraibh, Cruinnichibh ri chéile, agus rachamaid a steach do na caithrichibh daingnichte.

6 Cuiribh suaicheantas suas ann an Sion, rachaibh air bhur n-ais, na seasaibh; oir tha mise a' tabhairt uile o'n àirde tuath, eadhon léir-sgrìos mòr.

7 Thàinig an leòman a nìos o a dhoire, agus tha milltear nan cinneach air a thurus; dh'imich e mach as 'àite chum d'fhearann a dheanamh 'na fhàsach; bithidh do bhailean air an sgrìos, air chor is nach bi aon 'gan àiteachadh.

8 Air an aobhar sin crioslaichibh sibh féin le sac-éididh, deanaibh caoidh agus gul; oir cha 'n eil fraoch feirge an Tighearn air a pilleadh air falbh uainn.

9 Agus tarlaidh anns an là sin, deir an Tighearn, gu 'm bàsaich cridhe an rìgh, agus cridhe nan àrd-uaislean; agus bithidh amhludh air na sàgartaibh, agus uamhas air na fàidhibh.

10 An sin thubhairt mise, Och! a Thigh-earna Iehobhab! gu cinnteach mheall thu gu tut an sluagh so agus Ierusalem, ag ràdh, Bithidh sìth agaibh; an uair a tha 'n claidheamh a' ruigheachd gu ruig an t-anam.

11 Anns an àm sin theirear ris an t-sluagh so agus ri Ierusalem; Gaoth loisgeach ann an ionadaibh sgaoilte an fhàsaich, leth ri nighinn mo shluaigh-sa; cha 'n ann gu fasnadh no gu glanadh;

12 Thig treun-ghaith o na h-àitibh sin a m' ionnsuidh-sa: a nis fòs labhairidh mi féin breitheanas 'nan aghaidh.

13 Feuch, mar neulaibh thig e nìos;

mar chuairt-ghaoith bithidh a charbadan; is luaithe na iolairean a chuid each; mo thruaighe sinne! oir tha sinn creachta.

14 Glan do chridhe o aingidheachd, O Ierusalem, a chum gu tèarnar thu. Cia fhad a ghabhas do smuaintean aingidh còmhnuidh an taobh a stigh dhìot?

15 Oir tha guth ag éigheach o Dhau, agus a' cur àmhghair an céill o shliabh Ephraim.

16 Glaothaibh-sa ris na cinnich, Feuch! Cuiribh an céill an aghaidh Ierusalem, gu bheil luchd-freiceadain a' teachd do dhùthaich fad as, agus gu tog iad suas an guth an aghaidh bhailtean Iudah.

17 Mar luchd còimhid faiche tha iad 'na h-aghaidh mu'n cuairt di, a chionn gu'n d'rinn i ar a mach ann am aghaidh-sa, deir an Tighearn.

18 Choisinn do shlighe agus do dheanadas na nithe so dhuit; 's i so t'aingidheachd; a chionn gu bheil i searbh, oir tha i ruigheachd gu do chridhe.

19 Mo chom, mo chom! tha mi air mo chràdh ann am ballachan mo chridhe; an taobh a stigh dhìom tha mo chridhe ri fuaim; cha 'n urrainn mi fantuinn a'm' thosd; a chionn gu cuala tu, O m'anam! guth an trompaid, gaor a' chatha.

20 Tha léir-sgrìos air lorg léir-sgrìos air a ghairm; gu cinnteach tha 'n tìr gu h-ìomlan creachta: gu h-obann chreachadh mo phàilluina, mo sgàileachan ann an tiota.

21 Cia fhad a chì mi a' bhratach? a chluinneas mi fuaim na trompaid?

22 Gu cinnteach tha mo shluagh-sa am-aideach, ormsa cha do ghabh iad eòlas; is clann aig nach 'eil tuigse iad, agus tha iad air dhiobhail cèille: tha iad seòlta a dheanamh uile, ach maith a dheanamh cha 'n aithne dhoibh.

23 Chunnaic mi an talamh, agus, feuch! bha e gun dealbh agus falamh; na nèamha fòs, agus bha iad gun solus.

24 Chunnaic mi na sléibhteann, agus, feuch! chrìochnaich iad; agus bha na cnuic uile air an luasgadh gu mòr.

25 Dh'amhairc mi, agus, feuch! cha robh aon duine ann; agus uile eoin na h-ealtuinn¹, theich iad.

26 Dh'amhairc mi, agus, feuch! bha a' mhachair thorrach 'na fàsach, agus a h-uile bhailtean air an tilgeadh sìos, roimh làthair an Tighearna, roimh dhian-theas fheirge.

27 Oir mar so deir Iehobhah, Bithidh am fearann gu h-ìomlan air fhasachadh, ach cha dean² mi làn-chrìoch.

28 Air son so ni an talamh bròn, agus dorchaichear na nèamha shuas; a chionn

gu 'n do labhair mise, agus cha ghabh mi aithreachas; chuir mi romham, agus cha téid mi air m'ais uaith.

29 Roimh iolach nam marcach agus nam fear bogha, tha gach caithir a' teicheadh; chaidh iad a steach do thiugh-choilltibh, agus streap iad suas air na creagaibh: tha na h-uile bhailtean air an tréigsinn, agus cha 'n 'eil aon duine gan àiteachadh.

30 Agus thusa, 'nuair a chreachar thu, ciod a ni thu? Ged éid thu thu féin le corcur, ged sgeadaich thu thu féin le seudaibh òir, ged ung thu do rosgan le dathaibh, gu dìomhain ni thu thu féin sgiamhach: nithear tàir ort le do leannain, air t'anam tha iad an tòir.

31 Gu cinnteach chuala mi glaoth amhuil mnà ri saothair, teanntachd amhuil mnà ri breith a ceud leinibh, glaoth nighinn Shioin; a' caoidh, a' sgaoileadh a bas, agus ag ràdh, Mo thruaighe mise nis! oir tha m'anam air a chlaoidh le luchd mortaidh!

CAIB. V.

1 'Na breitheanais a thug Dia air na h-Iudhaich air son an aingidheachd, 7 an adhaltranais, 10 an ceilge, 20 agus an euceptan.

RUTHIBH air 'ur n-ais agus air 'ur n-aghaidh³ feadh shràidean Ierusalem, agus faicibh a nis, agus biodh fios agaibh, agus iarraidh 'na h-ionadaibh farsuinn, am faigh sibh aon duine, am bheil neach sam bith ann a ta cur an gnìomh breitheanais, a ta 'g iarraidh na firinn; agus bheir mise dhìs maithaeaus.

2 Ach ged their iad, Mar is beò an Tighearn, gu deimhin tha iad a' mionnachadh gu breugach.

3 O Thighearn, nach 'eil do shùilean-sa air an fhèrinn? Bhual thu iad, ach cha d'rinn iad bròn; chaith thu iad, ach dhiùlt iad gabhail ri smachdachadh; rinn iad an aghaidh nìs cruaidhe na creag; dhiùlt iad pilleadh.

4 An sin thubhairt mise, Gu cinnteach is iad so na daoine ìosal; tha iad gun chéill, a chionn nach aithne dhoibh slighe an Tighearna, breitheanas an Dé.

5 Ruigidh mi na daoine uasal⁴ agus labhairidh mi ri-san; oir is aithne dhoibh-san slighe an Tighearna, breitheanas an Dé. Ach spealg iad so gu h-ìomlan a' chuing, sgaoil iad as a chèile na cuibhrichean.

6 Uime sin ni leòmhann as a' choille an sgrios, ni madadh-alluidh an fhàsaich am milleadh; ni liopard faire os ceann am bailtean: gach aon a theid a mach asda reubar e 'na bhloighidibh; a chionn gu

¹ an athair, nan speur, nan nèamhan. Eabh.

² toir, chuir.

³ sìos agus suas

⁴ daoìn uailse.

bheil an lochdan lìonmhor, an cùl-sleamh-nachadh minic.

7 Cionnus a mhaithreas mi so dhuit? thréig do chlann mise, agus mhionnaich iad orra sin nach 'eil idir 'nan dée: an uair a shásuich mise iad *le lòn*, an sin rinn iad adhaltranas, agus ann an tigh na striopaigh chruinnich iad 'nam buidhnibh.

8 Bha iad mar òig-eich bhiaidhta sa' mhaduinn; gach aon a' sitrich an déigh mnà a choimhearsnaich.

9 Air son nan nithe so nach tig mise *g'an* amharc, deir an Tighearn; agus air a' leithid so do chinneach nach dean m'anam dioghaltas?

10 Rachaibh-sa suas air a ballachan, agus sgriosaibh; ach na deanaibh crìochnachadh: thugaibh air falbh a daingnichean, oir cha bhuin iad do'n Tighearn.

11 Oir bhuin tigh Israeil agus tigh Iudah gu ro chealgach riumsa, deir an Tighearn.

12 Dh'àicheadh iad an Tighearn, agus thubhairt iad, Cha 'n e *a t'ann*; ni mò thig olc oirm; agus an claidheamh no a' ghort cha'n fhaic sinn.

13 Ach bithidh na fàidhean mar ghaoith; agus cha 'n'eil am focal annta: mar so nithear orra féin.

14 Air an aobhar sin, mar so deir Iehobhah Dia nan sluagh; A chionn gu bheil sibh a' labhairt an fhocail so, feuch, ni mise m'fhocal ann ad bheul-sa 'na theine, agus an sluagh so 'nan connadh, agus loisgidh e suas iad.

15 Feuch, bheir mi 'nur n-aghaidh cinn-each o chéin, O thigh Israeil, deir an Tighearn: is cinneach cumhachdach e, is cinneach ro shean e; cùimeach nach aithne dhuit an cainnt, ni mò thuigeas tu ciod a their iad.

16 Tha am balg-saighead mar uaigh fhosgailte; tha iad uile 'nan daoine treuna.

17 Agus caithidh iad d'fhogharadh, agus t'aran; caithidh iad do mhic agus do nigheana; caithidh iad do chaoraich agus do chrodh; caithidh iad d'fhionaine an agus do chranna-fige; ni iad bochd leis a' chlaidheamh na bailtean daingnichte anns an robh thu a' cuir do dhòchais.

18 Gidheadh anns na làithibh sin, deir an Tighearn cha dean mise ruibh crìoch-nachadh.

19 Agus tarlaidh, an uair a their sibh, C'uin' an d'rinn an Tighearn ar Dia ruinn na nithe so uile? an sin freagraidh tusa iad, Amhuil a thréig sibhse mise, 's a rinn sibh seirbhis³ do dhiaithaibh coimheach ann 'ur tìr, mar sin ni sibh seirbhis do choigrich ann an dùthaich nach leibh féin.

20 Innsibh-sa so ann an tigh Iacoib, agus cuiribh an céill e ann an Iudah, ag ràdh,

21 Eisdibh so a nis, O shluagh amaid-each agus mhi-chéillidh, aig am bheil sùilean, ach nach faic; aig am bheil chuasan, ach nach cluinn.

22 Nach bi eagal oirbh romham-sa, deir an Tighearn? nach crìothnaich sibh ann am làthair-sa, a shuidhich a' ghaineamh *mar* chrìch do 'n fhainge, le ordugh buan, nach feud i dol thairte: ged luaisg a tuinn iad féin, cha toir iad buaidh; ged bheuc iad, cha téid iad ni 's faide?

23 Ach aig an t-sluagh so tha cridhe eas-ùmhla¹ agus ceannairceach: chaidh iad air an ais, agus dh'imich iad air falbh.

24 Ni mò deir iad 'nan cridhe, Biodh a nis eagal an Tighearn ar Dé oirmn, a tha toirt araon an uisge thoisich agus an uisge dheireannaich, 'na àm féin; seachduinean suidhichte an fhogharaidh tha e gleidheadh air ar son.

25 Phill bhuir n-aingidheachd na nithe so air falbh; agus chum bhuir lochdan an ni a ta maith air ais uaibh.

26 Oir gheibhear am measg mo shluaigh-sa droch dhaoine: tha iad ri feall-fholach, mar neach a' suidheachadh lìontan; tha iad a' leagadh ribe, tha iad a' glacadh dhaoine.

27 Mar chliabh tha làn eun, mar sin tha an tighen làn do chéilg: uime sin tha iad air fàs mòr, agus air cinntinn saobhir.

28 Tha iad air fàs reamhar, tha iad dealrach: seadh, thug iad bàrr air gnìomhar-aibh nan aingidh: cha 'n'eil iad a' toirt breth air a' chùis, cùis an dilleachdain, gidheadh tha iad a' soirbheachadh; agus còir an uireasbhuich cha 'n'eil iad a' seasamh.

29 Air son nan nithe so nach tig mise *g'an* amharc? deir an Tighearn: air a' leithid so do chinneach nach dean m'anam dioghaltas?

30 Tha ni uamhasach agus ro eagalach ga chur an gnìomh anns an tìr:

31 Tha na fàidhean ri fàistneachd bhréige; agus na sagairt a' riaghladh air an làimh-san; agus is ait le m' shluagh-sa e bhi mar sin: ach ciod a ni sibh ann an deireadh na cùise.

CAIB. VI.

1 Tha naimehdean Iudah dian gu a lùchairtean a sgrìos. 9 Ghearain am fàidh gu'n robh an sluagh a' trèigsinn an Tighearna: 18 Dh'fhoillsich e breitheanna is Dhé; 26 agus bhrosnuich e an sluagh gu aithreachas.

TEICHIBH gu h-ìomlan, O mhaca Bheniamin, a mach á meadhon Ierusalem agus ann an Tecoa séidibh an trompaid; air Betacerem fòs cuiribh suas comhara teine: oir dh'fhoillsicheadh olc o'n àirde tuath, agus dòrainn mhòr.

¹ cha leis an Tighearn iad.

² cha chuir mise làn-chrìoch oirbh.

³ foghamh.

⁴ reasgach.

2 Cosmhuil ri àit ionaltraidh taitneach rinn mise nighean Shìon.

3 D'a h-ionnsuidh thig na buachaillean le'n treudaibh; suidhichidh iad am pàill-iuna 'na h-àghaidh air gach taobh; ionaltraidh iad gach aon 'na àite féin.

4 Deasaichibh cogadh 'na h-àghaidh: Eiribh, agus rachamaid suas mu mheadh-on là: Mo thruaighe sinne! oir tha 'n là air dol seachd; oir tha dubharan an anmoich air an sìneadh a mach.

5 Eiribh, agus rachamaid suas anns an oidhche, agus milleamaid a luchairtean.

6 Oir mar so labhair Tighearna nan sluagh, Gearraibh sìos craobhan, agus tilgibh tòrr an aghaidh Ierusalem: is i so a' chaithir a ta gu bhì air smachdachadh; is foirneart i gu h-iomlan an taobh a stigh dhi.

7 Amhuil a chuireas tobar a mach 'uisgeachan, mar sin thaise a' cur a mach a droch-bheairt: tha ainneart agus creach ri chluinntinn innte: a'm' làthair-sa do ghnàth tha bròn agus lotadh.

8 Gabh fòghlum¹, O Ierusalem, air eagal gu dealaich m'anam riut; air eagal gu dean mi fasach dhìot, fearann neo-àitichte.

9 Mar so deir Tighearna nan sluagh: Diolumaiddh iad gu buileach mar fhionain iarmad Israeil: pill air a h-ais do làmh, mar fhear-tionail nam fion-dhearcan gus na cliabha.

10 Cò ris an labhair mi, agus d'an toir mi rabhadh, air chor is gu'n cluinn iad? Feuch, tha an cluas gun timchioll-ghearradh, agus cha'n urrainn iad éisdeachd: feuch, tha focal Iehobhah dhoibh-san 'na mhasladh; cha 'n 'eil tlachd aca ann.

11 Air an aobhar sin tha mise làn do chorruich [an Tighearna:] tha mi sgìth g'a cumail a steach: dòiridh mi mach i air a' chloinn anns na sràidibh, agus air an òigrìdh a ta cruinn le chéile: seadh, glacar am fear, agus fòs a bhean, an t-aosda, maille ris an ti bhios làn do làithibh.

12 Agus bheirear thairis an tighean do dhaoibh eile, am fearann agus na mnathan mar an ceudna; oir sìnidh mise mo làmh a mach an aghaidh luchd-àit-eachaidh na tìre, deir an Tighearna.

13 Oir o'n aon a's lugha gus an aon a's mò dhiubh, tha gach neach g'a thoirt féin suas d'a an-miannaihb: agus o'n fhàidh fòs gus an sagart, tha gach aon a' gnàthachadh ceilge.

14 Leighis iad mar an ceudna lot nighinn mo shluaigh-sa gu faoin, ag ràdh, Sìth, sìth; agus gu sun sìth ann.

15 An robh nàire orra chionn gu'n do chuir iad gràineileachd an gnìomh? ni h-eadh, cha do ghabh iad nàire air aon

chor; ni mò bha rugha air an gruaidh: uime sin tuitidh iad am measg na muinntir a thuiteas; anns an àm an tig mise 'gan amharc, tilgear sìos iad, deir an Tighearna.

16 Mar so thubhairt an Tighearna; Seasaidh anns na ròidibh agus faicibh, agus feòraichibh air son nan seana cheum-anna, C'ait am bheil an t-slighe mhaith agus gluaisibh innte; mar sin gheibh sibh fòis do 'r n-anamaibh. Ach thubhairt iad-san, Cha ghluais sinn [innte.]

17 Chuir mi mar an ceudna luchd-faire os 'ur ceann, ag ràdh; Eisidibh ri fuaim na trompaid. Ach thubhairt iadsan, Cha 'n éisd sinn.

18 Uime sin cluinnibh, O fhineacha, is biodh fios agaibh, O choimhthionail: an ni sin a ta 'nam measg cluinn, O thalamh!

19 Feuch, bheir mise dòrainn air an t-sluagh so, toradh an smuaintean féin; a chionn nach d'thug iad éisdeachd do m'bhriathraibh: agus a thaobh mo reachd, chuir iad eadhon cùl ris.

20 C'uim an tig thugam-sa tùis o Sheba? agus a' chuille chùbhraidh o dhùthaich fad as? Cha 'n 'eil bhur tabhartais-loisgte taitneach, ni mò tha tlachd agam-sa 'nur n-iobairtibh.

21 Air an aobhar sin mar so deir an Tighearna, Feuch, leagaidh mi cip-thuislidh an rathad an t-sluaigh so, agus tuitidh na h-aithrichean agus na mic orra; an coimhearsnach agus a charaid bàsaichidh le chéile.

22 Mar so deir an Tighearna, Feuch, tha sluagh a' teachd o fhearann na h-àirde tuath, agus dùisgear cinneach mòr o chrìochaibh na talmhainn.

23 Glacaidh iad am bogha agus an t-sleagh: tha iad an-ìochdmhor, agus cha ghabh iad truas: beuchdaidh an guth mar an fhaire, agus marcaichidh iad air eachaibh, air an taruing an ordugh mar dhaoine gu cogadh, ann ad aghaidh-sa, O nighean Shìoin.

24 Chuala sinn iomradh air so: dh'fhàs ar làmhnan lag: tha goimh air deanamh greim oirn; pian, amhuil mnà ri saothair chloinne.

25 Na rachaibh a mach do'n mhachair, na siùbhlaibh anns an t-slighe; oir an sin tha claidheamh an nàmhaid, uamhas air gach taobh.

26 O nighean mo shluaigh, éid thu féin le eudach saic, agus aornagain² thu féin ann an luathre: dean caoidh mar air son aoìn mhic, cumha ro gheur: oir gu h-obann thig an creachadair oirn.

27 Shonruich mi thusa gu bhì a'd' bhaideal, a'd' dhaigneach am measg mo shluaigh; agus aithnichidh tu, agus dearbhaidh tu an slighe.

¹ gabh comhairle; gabh iunnsachadh; bi air do leasachadh.

² acineagraim; aonairt.

IEREMIAH. VI. VII.

28 Tha iad uile 'nan daoinibh a thug barrachd ann an ceannairc, a' gluasad gu cealgach: is umha agus iarunn iad; an t-iomlan diubh 'nan innealaibh truaidlidh-eachd.

29 Loisgeadh na builg leis an teine, chaitheadh an luaith; leagh am fear-leaghaidh gu diomhain; oir cha 'n 'eil iadsan a ta olc air an sgaradh air falbh:

30 Airgiod nach fù theirear riu-san, a chionn gu'n do chuir an Tighearn cùl riu.

CAIB. VII.

1 Chuir Dia Ieremiah a ghairm nan Iudhach gu aithreachas, chum 's nach bitheadh iad air an giùlan ann braigheanas. 17 Bhagair an Tighearn iad le 'fheirg do bhrìgh gu'n do chuir iad campar air le'n bodholaibh-aoraidh. 21 Ghluais an sluagh ann an comhairlibh ais-innleachdach an cridhe féin. 32 Breitheanais air am bagradh orra air son an droch ghnìomhara.

AM focal a thàinig gu Ieremiah o'n Tighearn, ag ràdh;

2 Seas ann an geata tighe an Tighearn, agus glaoth anns an àite sin am focal so, agus abair, Cluinnibh focal an Tighearn, uile Iudah, sibhse ta 'g imeachd a steach air na dorsaibh so gu aoradh a thoirt do Iehobhah.

3 Mar so deir Tighearn nan sluagh, Dia Israeil, Leasaichibh 'ur sligheachan agus 'ur gnìomhara, agus bheir mise dhuibh còmhnuidh a ghabhail anns an àite so.

4 Na h-carbaibh á briathraibh breugach, ag ràdh, Is teampull an Tighearna, teampull an Tighearna, teampull an Tighearn iad so.

5 Oir ma leasaicheas sibh gu h-iomlan 'ur sligheachan agus 'ur gnìomhara; ma bheir sibh gu ceart breitheanas eadar duine agus a choimhearsnach;

6 Mar sàruich sibh an coigreach, an dilleadhan agus a' bhantrach; agus mur dòirt sibh fuil neò-chiontach anns an àite so, agus mur téid sibh air lorg dhée eile, chum 'ur dòrainn féin:

7 An sin bheir mise dhuibh còmhnuidh a ghabhail anns an àite so, anns an fhearran a thug mi do'r n-aithrichibh, o linn gu linn.

8 Feuch, tha sibhse a' deanamh buin á briathraibh breugach o nach faigh sibh buannachd.

9 Ciod? am feadh a ta sibh a' goid, a' mortadh, agus a' deanamh adhaltrais, agus a' mionnachadh gu breugach, agus a' losgadh tùise do Bhaal, agus a' gluasad air lorg dhée coimheach, air nach robh eòlas agaibh:

10 An tig sibh an sin, agus an seas sibh ann am làthair-sa, san tigh so a ta air a ghairm air m' ainm, agus an abair sibh,

Tha sinn air ar toirt thairis a chum nan gràineilichdan so uile e chur an gnìomh?

11 An e gu'n d'rinneadh an tigh so, a dh'ainmicheadh ormsa, 'na shlochd mheirleach 'nur sùilbha-sa? Feuch, chunnaic mise féin e, deir an Tighearn.

12 Ach rachaibh a nis do m'àite-sa ta an Siloh, far an do chuir mi m'ainm an toiseach, agus faicibh cionnus a bhuin mi ris, air son aingidheachd mo shluaigh Israeil.

13 Agus a nis, a chionn gu'n d'rinneadh sibhse na h-oibre so uile, deir an Tighearn, agus gu'n do labhair mise ruibh ag éirigh gu moch, agus a' labhairt, ach cha d'éisd sibhse; agus gu'n do ghlaodh mi ruibh, ach cha do fhreagair sibh:

14 Uime sin, ni mi ris an tigh so a dh'ainmicheadh orm, as am bheil sibhse a' deanamh buin, agus ris an ionad a thug mi dhuibhse, agus do 'r n-aithrichibh, amhuil a rinn mi ri Siloh.

15 Agus tilgidh mi sibh a mach á m'fhianuis, mar a thilg mi mach bhur bràithrean uile, an t-iomlan do shlochd Ephraim.

16 Air an aobhar sin, na guidh thusa air son an t-sluaigh so, ni mò chuireas tu suas glaòdh no athchuinge as an leth, ni mò ni thu eadar-ghuidhe riumsa; oir cha'n éisd mise riut.

17 Nach faic thu ciod a tha iad so a' deanamh ann am bailtibh Iudah, agus ann an sràidibh Ierusalem?

18 Tha a' chlann a' tional connaidh, agus na h-aithrichean a' fadadh an teine, agus na mnà a' fuineadh taoise, a dheanamh bhreacag do bhan-righinn nèimh, agus a dhòrtadh a mach thabhartasaidhe do dhiaithaibh eile, gu campar a chur ormsa¹.

19 Am bheil iad a' cur campair ormsa? deir an Tighearn; nach ann a tha iad a' cur [dragh] orra féin, a chum maslaidh an gnùise féin?

20 Air an aobhar sin, mar so deir an Tighearn Iehobhah, Feuch, dòirtear m'fhearg-sa, agus mo dhian-chorroich a mach air an àite so, air duine agus air ainmhidh, agus air craobhan na macharach, agus air toradh an fhearrainn; agus loisgidh i, agus cha ghabh i mùchadh.

21 Mar so deir Tighearn nan sluagh, Dia Israeil, Cuiribh 'ur tabhartais-loisgte ri'r n-ìobairtibh, agus itibh feoil.

22 Oir cha do labhair mise ri'r n-aithrichibh, ni mò dl'àithn mi dhoibh, anns an là san d'thug mi iad a mach á tir na h-Eiphit, mu thimchioll thabhartas-loisgte no ìobairteau:

23 Ach an ni so dh'àithn mi dhoibh, ag

¹ gu mo bhrosnachadh gu feirg.

ràdh, Thugaibh géill do m'ghuth, agus bithidh mise a'm¹ Dhia dhuibh-se, agus bithidh sibhse 'nur sluagh dhomh-sa; agus ghuaisibh anns na h-uile shligheibh a dh'àithn mi dhuibh, a chum gu'n éirich gu maith dhuibh.

24 Ach cha d'éisd iad, ni mò dh'aom iad an cluas, ach ghluais iad ann an comhairlibh ais-innleachdach an droch chridhe féin, agus chaidh iad air an ais, agus cha'n ann air an aghaidh.

25 O'n là air an d'thàinig bhuir n-aithrichean a mach á tìr na h-Eiphit, gus an là 'n diugh, chuir mi d'ur n-ionnsuidh m'uile sheirbhisich na fàidhean, ag éirigh gach là gu moch agus 'gan cur a mach:

26 Gidheadh cha d'éisd iad rium, ni mò dh'aom iad an cluas, ach chruaidhich iad am muineal; rinn iad ni bu mhiosa na'n aithrichean.

27 Uime sin, labhraidh tu na briathra so uile riu, ach cha'n éisd iad riut: gladhaidh tu riu mar an ceudna, ach cha fhreagair iad thu.

28 Uime sin their thu riu, So an cinn-each nach 'eil a 'toirt géill do ghuth an Tighearn an Dia: ni mò ghabh iad ri cronuchadh: dh'eug an fhirinn, agus ghearradh a mach o'm beul i.

29 Gearr dhiot do ghruag, *O Ierusalem*, agus tilg uait i, agus tog suas tuireadh air na h-ionadaibh àrda: oir chuir Iehobhah uait, agus thréig e ginealach a chorr-uich.

30 Air rinn clann Iudah ole ann am shealladh-sa, deir an Tighearn; chuir iad an gràineileachdan anns an tigh a dh'ainmicheadh ormsa, chum a thruaillleadh.

31 Agus thog iad ionadan àrda Thophet, a th'ann an gleann mhic Hinoim, a losgadh am mac agus an nigheana san teine; ni nach d'àithn mise, 's nach d'thàinig idir ann am chridhe.

32 Air an aobhar sin, feuch, tha na làithean a' teachd, deir an Tighearn, anns nach goirear ni 's mò ris Tophet, no gleann mhic Hinoim; ach gleann a' mharbhadh: oir adhlaidh iad ann an Tophet, gus nach bi àite *falamh* ann.

33 Agus bithidh cairbheannan an t-sluaigh so 'nam biadh do eunlaith an athair, agus do bheathaichibh na talmhainn; agus cha'n fhuadaich aon neach air falbh iad.

34 An sin cuiridh mise cosgadh ann am bailtibh Iudah, agus ann an sràidibh Ierusalem, air guth an t-sublachais, agus guth an aoibhneis, guth an fhir nuadh-phòsda, agus guth na mnà nuadh-phòsda: oir bithidh an dùthaich 'na fàsach

nachaidh. 13 Nochd e dhoibh na breitheanas a bha gu teachd orra, 18 agus rinn e caidh air son an leòin.

ANNS an àm sin, deir an Tighearn, bheir iad a mach cnàmhan rìghrean Iudah, agus cnàmhan a prionnsachan, agus cnàmhan nan sagart, agus cnàmhan nam fàidhean, agus cnàmhan luchd-àit-eachaidh Ierusalem as an uaighean;

2 Agus sgaoilidh siad iad fa choinneamh na gréine, agus na gealaich agus uile fheachd nèimh, d'an d'thug iad spéis, agus d'an d'rinn iad seirbhis, agus air an robh iad a' leanmhuinn, agus a bha iad ag iarraidh, agus d'an d'thug iad aoradh. cha chruinnichear iad, cha'n adhlacair iad; 'nan aolach bithidh iad air aghaidh na talmhainn.

3 Agus bithidh bàs nì's roghnaiche na beatha leis an uile fhuigheall a mhaireas do'n teaghlach ole so, a bhios 'nam fuigheall anns gach uile àite gus am fògair mise iad, deir Tighearn nan sluagh.

4 Os bàrr, their thu riu, Mar so deir an Tighearn; An tuit iad agus nach éirich iad a ris? An téid e air falbh, agus nach pill e air ais?

5 C'ar son *ma ta* tha'n sluagh so a' sleamhnachadh air an ais? *c'ar son* a ta Ierusalem ri cùl-sleamhnachadh bith-bhuan? tha iad a' deanamh greim daingean air ceilg, tha iad a' diùltadh pilleadh.

6 Thug mise fa'near, agus chuala mi; cha do labhair iad gu ceart; cha'n 'eil aithreachas air aon neach d'a aingidheachd, ag ràdh, Ciod a rinn mi? Tha gach aon a' pilleadh g'a shlighe, mar a dhian-ruiteas an t-each a chum a' chòmhlraig.

7 Seadh, is aithne do'n chorra-bhàin anns an athar a h-àm féin, agus is aithne do'n choluman, agus do'n chorra-mhionaidh, agus do'n gholan-ghaoithe àm an teachd: ach cha'n eithne do m'shluaigh-sa breitheanas an Tighearna.

8 Cionnus a their sibh, Tha sinn glic, agus tha reachd an Tighearna 'nar measg? Feuch, gu deimhin is diomhanas obair na cleit-sgrìobhaidh, cha 'n'eil anns na sgrìobhaichibh ach diomhanas.

9 Nàraicheadh na daoine glice, tha iad fo gheilt, tha iad an sàs; feuch, ri focal an Tighearna chuir iad cùl; agus ciod an gliocas a ta aca?

10 Uime sin am mnathan bheir mise do dhaoineibh eile; am fearann dhoibh-san a théid an seilbh ann; oir tha iad uile, o'n neach is mò gus an neach is lugha, air an toirt suas d'an an-miannaibh; o'n fhàidh eadhon gus an sagart, tha gach aon a' gnàthachadh ceilge.

11 Agus leigliis iad lot nighinn nio shluaigh-sa gu faoin, ag ràdh, Sìth, sìth; agus gun sìth ann.

CAIB. VIII.

1 Teanntachd agus trioblaidean nan Iudach.

5 Chronaich am fàidh iad air son an cùl-sleamh-

12 An robh nàire orra chionn gu'n do chuir iad gràineileachd an gnìomh? Ni h-eadh, cha robh iad nàrach air aon chor, ni mò ghabh an gruaidh rugha: uime sin tuitidh iad am measg na muinntir a thuiteas; anns an àm an tig mise 'gan amharc tilgear sìos iad, deir an Tighearn.

13 Ni mise gu buileach an sgrìos, deir an Tighearn; cha bhi fion-dhearc air an fhìonain, no figean air a' chrann-flhige; seargaidh eadhon an duilleach; agus *na nithe* thug mise dhoibh sìubhlaidh uatha.

14 C'ar son a ta sinn a' suidhe 'nar tàmh? cruinnichibh sibh fèin agus rach-amaid a steach do na caithrichibh daing-nichte; agus bitheamaid 'nar tosd an sin; oir chuir an Tighearn ar Dia 'nar tosd sinn, agus thug e dhuinn uisge dom-blasda r'a òl, a chionn gu'n do pheacaich sinn an aghaidh an Tighearna.

15 Bha sùil againn ri sìth, ach maith sam bith cha *d'fhàinig*; ri h-aimsir slàinte, agus feuch uamhas!

16 O Dhan chualas srannail a chuid each: roimh thorman sitrich 'eacha meannach chrìochnaich am fearann uile: oir thàinig iad, agus shluig iad am fearann, agus gach ni a ta ann; a' clathair agus iadsan a tha 'ga h-àiteachadh.

17 Oir feuch, cuiridh mise 'nur measg, nathraichean, rìgh-nathraichean, air nach luidh geasan, agus teumaidh iad sibh, deir an Tighearn.

18 Cha 'n'eil leigheas air mo bhròn: tha mo chridhe fo leòn an taobh a stigh dhiom.

19 Feuch, guth glaoidh nìghinn mo shluaigh, o thìr chéin: Nach 'eil an Tighearn ann an Sion? nach 'eil a rìgh innte? c'ar son ma ta bhrosnuich iad mise gu feirg le'n dealbhan snaidhte, agus le'n dìomhanasaibh coimheach?

20 Chaidh am fogharadh seachad, tha'n samhradh crìochnaichte, ach cha'n 'eil sinne air ar saoradh.

21 Air son leòn nìghinn mo shluaigh, tha mise air mo leòn; tha mi dubh-bhrònach; rinn uamhunn mo ghilacadh.

22 Nach 'eil ioc-shlàint ann an Gilead? nach 'eil léigh an sin? C'ar son, ma ta, nach 'eil slàinte air a h-aisig do nìghinn mo shluaigh-sa?

CAIB. IX.

1 Tha am fàidh a' caoidh aingidheachd a shluaigh, 9 agus nam breitheanas a thàinig orra. 12 Nochd e dhoibh gu'n do smachdaich Dia iad a chionn nach robh iad ùmhal d'a ghuth. 21 Chomhairlich e dhoibh gu'n uail a dheanamh 'nan gliocas fèin.

OCH nach b'uisge mo cheann, agus nach bu tobar dheur mo shùilean, a chum gu'n guilinn a là agus a dh'oidhe air son muinntir mharbhta nìghinn mo shluaigh!

2 Och nach robh agam anns an fhàsach

pàillun fir-thuruis, a chum gu fagainn mo shluagh, agus gu'n imichinn uatha! oir is luchd adhaltrais iad uile, coimh-thional do dhaoine cealgach.

3 Agus tha iad a' lùbadh an teagaidh *mar* am bogha chum ceilge; ach cha'n'eil iad treubhach air son na firinn anns an talamh: oir tha iad a' dol air an aghaidh o òl gu òl, agus cha'n'eil eòlas ac' ormsa, deir an Tighearn.

4 Bithibh air 'ur faicill, gach aon roimh a choimhearsnach, agus na h-earbaibh a bràthair air bith: oir le foill meallaidh gach bhràthair, agus gluaisidh gach comp-anach gu cealgach.

5 Agus meallaidh iad, gach aon a choimhearsnach, agus cha labhair iad an fhìrinn: chleachd iad an teagadh ri labhairt bhreug; sgithich iad iad fèin, a' cur an gnìomh do-bheairt.

6 Tha do chòmhnuidh ann am meadhon ceilge; ann an ceilg tha iad a' diùltadh eòlas a ghabhail ormsa, deir an Tighearn.

7 Air an aobhar sin, mar so deir an Tighearn nan sluagh, Feuch, leaghaidh mi iad, agus dearbhaidh mi iad; oir ciod a dh'fheudas mi dheanamh a thaobh nìghinn mo shluaigh?

8 Tha an teagaidh *mar* shaighead fìr-mhìdh; is cealg a's cainnt di: le 'bheul labhraidh neach gu sìochail r'a choimhearsnach, ach 'na chridhe tha e caitheadh foill air.

9 Air son nan nithe so nach tig mise *g'an* amharc? deir an Tighearn: air a' leithid so do chinneach nach dean m'anam dioghaltas?

10 Air son nan sléibhtean togaidh mi gul agus caoidh, agus air son ionada-còmhnuidh an fhàsach, tuireadh, a chionn gu bheil iad air an losgadh suas, air chor as nach téid aon neach trompa¹; agus cha chluinnear *annta* guth na spréidhe: eunlaith an athair agus an t-ainmhidh maraon theich, shiubhail air falbh.

11 Agus ni mise Ierusalem 'na carnaibh, 'na h-uaimh dhràgon; agus bailtean Iudah ni mi 'nam fàsach, gun neach 'gan àiteachadh.

12 Cò e'n duine glic, a thuigeas so? agus ris an do labhair beul an Tighearn, a' chum gu cuireadh e'n céill e. C'ar son a ta 'n tìr air a milleadh; air a losgadh suas mar fhàsach, nach 'eil aon neach ag imeachd troimpe?

13 Agus thubhairt an Tighearn, Do bhrìgh gu'n do thréig iad mo reachd a chuir mise fa'n comhair, agus nach robh iad ùmhal do m' ghuth, ni mò ghluais iad d'a réir;

14 Ach gu'n do ghluais iad a réir breith-

¹ d'an trid, thrompa.

neachaidh an cridhe féin, agus an déigh nan dée¹ a theagaisg an aithrichean dhoibh:

15 Uime sin, mar so deir Tighearn nan sluagh, Dia Israeil; Feuch, beathaichidh naise iad, eadhon an sluagh so, le searbh-luibh, agus bheir mi uisge dom-blasda dhoibh r'a ol.

16 Sgapaidd mi iad mar an ceudna measg nan cinneach, air nach robh aon chuid iad féin no an aithrichean eòlach: agus cuiridh mi an claidheamh air an tòir, agus an cuir mi as doibh.

17 Mar so deir Tighearn nan sluagh, Thugaibh fa' near, agus gairmibh mnathan tuiridh, agus thigeadh iad; agus cuiribh fios air mnathaibh seòlta, agus thigeadh iadsan:

18 Agus deifricheadh iad, agus togadh iad suas caoidh air ar son; a chum gu ruith ar suilean sìos le deuraibh, agus gu brùchd ar rosgan a mach le h-uisgeachaibh.

19 Gun amharus chualas guth caoidh o Shion; Cionnus a tha sinn air ar creachadh! tha sinn air ar maslachadh gu ro mhòr! a chionn gu'n do thréig sinn am fearann, a chionn gu'n do thilg iad sìos ar n-ionada-còmhuidh.

20 Air an aobhar sin éisdibh, O mhnathan, focal an Tighearn, agus glacadh bhuir cluas focal a bheoil; agus teagaisgibh do'r nigheanaibh caoidh, agus gach aon d'a ban-choimhearsnaich tuireadh:

21 Oir tha am bàs air teachd an àird gus ar n-uinneagan, air teachd a steach gus ar lùchairtean; *thàinig e* a ghearradh sìos araon an naoidhean anns a' mhach-air, agus nan òganach anns na sràidibh.

22 Àbair, Mar so deir an Tighearn; Tuitidh eadhon colainnean dhaoine mar aolach air aghaidh na faiche, agus mar an dlaogh² an déigh a' bhuanach, 'nuair nach bi aon neach ann gu' thional.

23 Mar so deir an Tighearn, Na deanadh an duine glic uail as a ghliocas, agus na deanadh an duine neartmhor uail as a neart, agus na deanadh an duine saoi bhir uail a' shaoibhreas.

24 Ach deanadh esan a ni uail, uail á so, gu bheil tuigse agus eòlas aige ormsa, gur mi an Tighearn a nochdas caoimheanas gràdhach, breitheanas, agus ceartas air an talamh; oir anns na nithibh so tha mo thlachd-sa, deir an Tighearn.

25 Feuch, tha na làithean a teachd, deir an Tighearn, anns an smachdaich mise na h-uile thimchioll-ghearrta, maille ris an neo-thimchioll-ghearrta.

26 An Eipht, agus Iudah, agus Edom, agus clann Amoin, agus Moab, agus na h-uile a ta anns na cearnaibh iomallach, a ta còmhnuidh anns an fhàsach: oir

tha na cinnich so uile neo-thimchioll ghearrta, agus tha tigh Israeil uile neo-thimchioll-ghearrta 'nan cridhe.

CAIB. X.

1 Chan 'eil neach air bith ann cosmhuil ri Dia cumhachdach Israeil. 17 Thug an fàidh fios do'n t-sluagh gu'n claidhear iad. 23 Rinn e urnuigh ri Dia.

CLUINNIBH am focal a ta an Tighearn a' labhairt ruibh, O thigh Israeil.

2 Mar so deir an Tighearn; Na fògh-lumaibh slighe nan cinneach, agus na biodh eagal oirbh roimh chomharan nan nèamha, ged tha eagal air na cinnich rompa.

3 Oir tha gnàthachadh nan sògh 'na fhìor-dhìomhanas: oir tha iad a' gearradh craoibhe as a' choille, obair làmh an fhir a dh'oibrichas le inneal geur³.

4 Le h-airgid agus le h-òr tha iad 'ga deanamh maiseach, le tairngibh agus le h-orduibh tha iad 'ga deanamh daingean, air chor as nach gluais i.

5 Mar chrann-pailme tha iad so rag, agus cha labhair iad: is éigin an giùlan, a chionn nach urrainn iad imeachd: na biodh eagal oirbhe rompa, oir cha 'n urrainn iad cron a dheanamh; agus fòs maith a dheanamh cha 'n eil 'nan comas.

6 Cha'n 'eil aon neach ann cosmhuil riutsa, O Thighearna; Is mòr thu, agus is mòr t'ainm ann an cumhachd.

7 Cò air nach biodh eagal romhad-sa, O Rìgh nan sògh? oir dhuitse buinidh *urram*; a chionn nach 'eil am mcasg uile dhaoine glice nan cinneach, agus am measg an uile rìoghachdan, aon neach cosmhuil riut.

8 Ach tha iad gu h-iomlan brùideil agus mi-thuigseach: tha am fiodh e féin a' cur an cèill an dìomhanais.

9 Bheirear airgid air a bhualadh a mach o Tharsis, agus òr o Uphas; obair an fhir-oibre, agus làimhe an òir-cheaird: is gorm agus dearg as éididh dhoibh: is iad gu léir obair dhaoine seòlta.

10 Ach Iehobhah, is esan an Dia fìor, an Dia beò, agus an rìgh bith-bhuan: roimh a chorroich-san crìochnaichidh an talamh, agus cha 'n urrainn na cinnich 'fhearg a ghiulan.

11 Mar so their sibh riu, Na dée nach d'rinn na nèamha no an talamh, sgriosar iad a mach o'n talamh, agus o bhi fuidh na nèamha so.

12 Rinn esan an talamh le 'chumhachd, shocruch e an saoghal le 'ghliocas, agus le 'thuigse sgaol e mach na nèamha.

13 'Nuair a chuireas e mach a ghuth, tha toirm uisgeachan anns na nèamhaibh, bheir e air a' cheò dol suas o chrìochaibh

¹ Bhaalim. Eabh.

² làn an dùirn, dornan.

JEREMIAH, X. XI.

na talmhainn : ni e dealaach le frasaibh, agus bheir e mach a' ghaoth as 'ionad-aibh-tasgaidh.

14 Dh'fhàs gach duine mar bhrùid 'na eòlas; nàraicheadh gach òr-cheard le iomhaigh leaghta; oir is ni breugach an dealbhan leaghta, agus anail air bith cha 'n 'eil anna.

15 Is ni faoin iad, obair mhearachd: ann an àm an smachdachaidh thèid iad am mugha¹.

16 Cha chosmhuil riu so Cuibhrionn Iacoib; oir is esan fear-cumaidh an domhain, agus is e Israel slat 'oighreachd; Tighearna nan sluagh is ainm dha.

17 Cruinnich suas do mhaoin as an fhearran, O thusa a ta 'g àiteachadh an daingnich :

18 Oir mar so deir an Tighearn; Feuch, bheir mi urchair do luchd-àiteachaidh na tìre, air a' chuairt so², agus claoidhidh mi iad, air chor as gu mothaich iad *mo dhioghaltas*.

19 Mo thruaighe mise thaobh mo dhochainn! is cràiteach mo chreuchd: ach thubhairt mi, Gu deimhin is deacair so³, ach is eigin 'fhulang.

20 Tha mo phàillium air a chur fàs, agus tha mo chùird gu léir air am bris-cadh; dh'imich mo chlann a mach uam, agus cha 'n 'eil iad ann: cha 'u'eil ueach ann a sgaoileas mo phàillium a mach ni 's mò, no chuireas suas mo sgàile.

21 Oir tha na h-aodhairean air fàs brùideil, agus cha 'n 'eil iad ag iarraidh an Tighearn: uime sin cha soirbhich leo fèin, agus bithidh an treudan uile air an sgapadh.

22 Fuaim an ionraidh⁴! feuch, tha i teachd dluth, eadhon gluasad mòr o'n tìr mu thuath, a dheanamh bhailtean Iudah 'nam fàsach, 'nan àite-còmhnuidh do dhràgonaidh.

23 Is aithne dhomh, a Thighearna, nach 'eil sliغه duine 'na chomas fèin: cha 'n 'eil e 'n comas duine a ta 'g imeachd a cheum a stiùradh⁵.

24 O Thighearn, cronuich mi, ach ann an tomhas; ni h-ann a'd chorruih, air eagal gu cuir thu as domh⁶.

25 Dòirt a mach do dhian-chorruih air na cinnich nach do ghabh eòlas ort, agus air na teaghlaichean nach 'eil a' gairm air t'ainm; oir dh'ith iad suas Jacob, 'ga itheadh agus 'ga chaitheamh, agus rinn iad 'àite-còmhnuidh fàisail.

CAIB. XI.

1 Ghairm am fàidh briathran a' choimhcheangail, agus thug e achemhasan do na h-Iudhaich a bha

eas-umhal do fhocal an Tighearn. 11 Labhair e ole mu'n tìneachail air son an Iudhaich aoraidh. 18 agus mu thimchioll luchd-àiteachaidh Anatoit.

AM focal a thàinig gu Jeremiah o'n Tighearn, ag ràdh,

2 Cluinn briathran a' choimhcheangail so, agus labhair iad ri fearaibh Iudah, agus ri luchd-àiteachaidh Ierusalem;

3 Agus abair riu, Mar so deir an Tighearn Dia Israeil, Malluichte gu robh an duine nach bi ùmhal do bhriathraibh a' choimhcheangail so.

4 A dh'àithn mise do 'ur n-aithrichibh anns an là sau d'thug mi iad a mach á tìr na h-Eiphit, as an fhuirneis iarunn, ag ràdh, Thugaibh géill do m' ghuth, agus deanaibh na nìthe sin uile, réir mar tha mise 'g àithneadh dhuibh: mar sin bithidh sibh 'nur sluagh dhomh-sa, agus bithidh mise ann am Dhia dhuibh-se;

5 A chum gu coimhlion mi na mionnan a mhionnaich mi do 'ur n-aithrichibh, gu tugainn doibh fearann a' sruthadh le mil agus le bainne, mar air an là 'n diugh. An sin fheargair mise, agus thubhairt mi, Bitheadh amhluidh⁷, O Thighearn.

6 Agus thubhairt an Tighearn rium, Glaodh na briathran so gu léir, ann am bailtibh Iudah, agus ann an sràidibh Ierusalem, ag ràdh, Cluinnibh-sa briathran a' choimhcheangail so, agus deanaibh iad.

7 Oir dh'earalaich mise gu dùrachdach do 'ur n-aithrichibh, air an là san d'thug mi iad a mach á tìr na h-Eiphit, gus an là 'n diugh, ag éirigh gu moch agus ag earalachadh, ag ràdh, Thugaibh géill do m' ghuth.

8 Gidheadh cha d'thug iadsan géill, ni mò dh'aom iad an chuas, ach ghluais iad gach aon a réir crosdachd⁸ a dhroch chridhe fèin: uime sin bheir mise orra uile bhriathran a' choimhcheangail so, a dh'àithn mi dhoibh a dheanamh, ach nach d'rinn iad.

9 Mar an ceudna thubhairt an Tighearn rium, Fhuaradh co-sheall am measg fheara Iudah, agus am measg luchd-àiteachaidh Ierusalem.

10 Tha iad air pilleadh air an ais gu aingidheachd an aithrichean o shean, a dhùlt mo bhriathran-sa a choimhead; agus a chaidh air lorg dhée coimheach, a chum gu'n deanadh iad seirbhis dhoibh: bhris tigh Israeil agus tigh Iudah mo choimhcheangal, a rinn ni r'an aithrichibh.

11 Uime sin mar so deir an Tighearn, Feuch, bheir mise orra dòrainn o nach bi

¹ thèid a' doibh.

² air an tarruing so.

³ is cruaidh so.

⁴ an tuairisgeil!

⁵ Is aithne dhomh an Tighearn, nach 'eil a shlighe mar shlighe duine; nach ann mar dhuine a ghluais-

eas esan, agus a stiùras e' imeachd.

⁶ gu mìn-phrònn thu mi.

⁷ Amen. Eabh.

⁸ reasgachd, coirleachd.

e comasach dhoibh dol as; agus ged glhlaoth iad rium, cha 'n éisd mi riu.

12 An sin tháid bailtean Iudah, agus luchd-àiteachaidh Ierusalem, agus glaothaidh iad ris na diathaibh do'n do loisg iad tuis; ach cha dean iad sin air aon chor an tearnadh ri àm an airce.

13 Oir a réir àireimh do bhailtean, bha do dhée, O Iudah; agus a réir àireimh shráidean Ierusalem chuir sibh suas altairean do'n ní nàrach sin, altairean a losgadh tuis do Bhaal.

14 Air an aobhar sin na dean thusa ur-nuigh air son an t-sluaigh so, ní mò thogas tu suas glaoth no athchuinge as an leth; oir cha 'n éisd mise san àm anns an glaoth iad rium an airce.

15 Ciod a th'áig mo ghràdh ri dheanamh ann am thigh-sa? chuir i 'n gníomh mór ghràineileachdan; agus tha'n fheoil naomh air teicheadh uait. An uair a ta thu aingidh an sin tha thu aoibhneach.

16 Gorm-chrann oladh, maiseach agus deadh-thorrach, thug an Tighearn mar ainm ort: le fuaim tóirme móire dh'fhadaidh e teine 'na mhullach, agus tha a gheugan air am briseadh.

17 Air rinu Tighearn nan sluagh, a shuidhich thu, ole a labhairt a d'aghaidh; air son aingidheachd tighé Israeil, agus tighé Iudah, a chuir iad an gníomh 'nan aghaidh féin, le mise bhrosnuchadh gu feirg, le tuis a losgadh do Bhaal.

18 Thug an Tighearn, mar an ceudna, fios dhomhsa, agus thuig mi; an sin dh'fheuch thu dhomh an innleachdan.

19 Oir bha mi mar uan, *no mar* dhamh, air a stiùradh a chum a' chasraidh; agus cha robh fios agam gu'n do dhealbhadh iad innleachdan ann am aghaidh, *ag ràdh*, Sgríosamaid an crann maille r'a thoradh, agus gearramaid e sìos á fearann nam beò, a chum nach bi 'ainm nì's mò air a chuimhneachadh.

20 Ach, O Thighearna nan sluagh, a bheir breth gu cothromach, a dhearbhas na h-airnean agus an cridhe, faiceam do dhioghaltas orra; oir dhuitse dh'fhoillsich mi mo chùis.

21 Air an aobhar sin, mar so deir an Tighearna, A thaobh muinntir Anatoit, a tha ag iarraidh t'anama, ag ràdh, Na dean faisteachd ann am ainm Iehobhah, mu'm' fàigh thu bàs le'r làimh-ne:

22 (Uime sin, mar so deir Tighearna nan sluagh,) Feuch, smachdaichidh mise iad; bàsaichidh na h-òganaich leis a' chlaidheamh; bàsaichidh an mic agus an nigheana le gorta.

23 Agus cha'n fhàgar fuigheall beò dhiubh; oir bheir mise ole air muinntir Anatoit, bliadhna an smachdachaidh.

CAIB. XII.

1 Tha am fàidh ag gearan gu bheil na h-aingidh a' soirbheachadh 'nan slighe. 7 Thréig Dia a shlugh air son an aingidheachd: 14 bhagair e gu'n sgríosadh e luchd-deanamh an uile, ach gheall e truas a ghabhail dhiubh-san a ghluaiseas gu h-iriosal 'na làthair.

IS ceart thusa, O Thighearn, 'nuair a thagram riut: gidheadh ceadaidh dhomh labhairt riut mu thimchioll do bhreitheanais: C'ar son a ta slighe nan droch dhaoine a' soirbheachadh? c'ar son a ta iadsan uile suaimhneach a ta ro aingidh?

2 Shuidhich thusa iad, seadh, ghabh iad freumh; tha iad a' fàs, agus fòs a' toirt a mach toraidh: tha thusa dlùth 'nam beul, ach fada o'n airmibh.

3 Ach is aithne dhuitse mi, O Thighearn; chunnaic thu mi, agus dhearbhadh thu mo chridhe, [gu bheil] e leat: tarrauing iad a mach mar chaoraich air son a' chasraidh, agus cuir air leth iad fa chomhair là a' mharbhadh.

4 Cia fhad a ni 'm fearann bròn, agus a bhios luibhean gach macharach a' seargadh, air son aingidheachd a luchd-àiteachaidh? Bhàsaich gach ainmhidh agus eun, a chionn gu'n dubhairt iad, Cha'n fhaic esan ar crìoch dheireannach.

5 Ma ruith thu leis na coisichean, agus gu'n do sgithich iad thu, cionnus idir a ni thu strì ri h-eachaidh? agus ann am fearann sìth ged robh agad dòchas, gidheadh ciod a ni thu ann an onfha Iordain?

6 Air son gu'n do bhuin eadhon do bhràithrean agus tigh t'athar, eadhon iadsan gu fealltach riut; ruaig eadhon iadsan thu le h-eighe chruaidh; na creid iad ged labhair iad briathra caoine riut.

7 Thréig mise mo thigh, dh'fhàg mi m'òighreachd, thug mi thairis gràdh m'anama do làimh a naimhdean.

8 Bha m'òighreachd dhomh-sa mar leòmlan anns a' choille; chuir i mach a guth ann am aghaidh: air an aobhar sin thug mi fuath dhi.

9 Bha m'òighreachd dhomh-sa mar an t-eun fuileachdach Seboa; O euna fuileachdach, thigibh-se 'na h-aghaidh air gach taobh; cruinnichibh, uile bheathaiche na macharach, thigibh a chum ith-eadh a suas.

10 Mhill mòran aodhairean mo lios fiona, shaltair iad mo chuibhrionn fo chois, rinn iad mo chuibhrionn taitneach 'na fhàsach uaigheach.

11 Rinn iad e 'na fhàsach, riumsa tha e 'na fhàsach ri caoidh; rinneadh an tìr gu h-iomlan fàs, gidheadh cha'n 'eil aon neach 'ga chur an suin.

12 Air gach uile thulaich san fhàsach thàinig an luchd-creachaidh; oir sluigidh claidheamh an Tighearna suas, o aon

iomall do'n tìr gus an t-iomall eile: cha bli sith aig aon fheoil.

13 Chuir iad cruithneachd, ach buainidh iad droighionn: shaoraich iad, ach cha bhuannaich iad: mar sin masluichear sibh a thaobh 'ur cinnis, do bhrìgh lasair fèirge an Tighearn.

14 Mar so deir an Tighearn; A thaobh m'uile dhroch choimhearsnach, a ta cur dragh air an oighreachd a thug mise mar sheilbh do m'shlugh Israel; feuch, spionaidh mi iad a mach as am fearann, agus as am meadhon spionaidh mi mach tigh Iudah.

15 Agus tarlaidh, an déigh dhomh an tarfuing a mach, gu pill mi, agus gu gabh mi truas diubh, agus bheir mi iad air an ais, gach aon g'a oighreachd féin, agus gach aon g'a fhearann féin.

16 Agus tarlaidh, ma dh'fhògluimeas iad da rìreadh sligheanna mo shluaighsa, gu mionnachadh air m' ainm, Mar is beò Iehobhah, amhuil a theagaisg iadsan do m' shluagh-sa mionnachadh air Baal, an sin daingnichear iad ann am meadhon mo shluaigh.

17 Ach mur toir iad géill, an sin spionaidh mi a nìos an cinneach sin, a' spionadh a nìos agus a' sgrios, deir an Tighearn.

CAIB. XIII.

1 *Le samhladh crios anairt, nochd Dia sgrios a shluagh.* 12 *Le cosamhlachd shearragan air an lìonadh le fion, roimh-innis e meud an trioblaidhean.* 13 *Chomhairlich e dhoibh aithreachas a ghabhail;* 22 *agus nochd e dhoibh gu'm b'e meud an cionta bu aobhar air na h-uile a thàinig orra.*

MAR so thubhairt an Tighearn rium, Imich agus faigh dhuit féin crios anairt, agus cuir air do leasraibh e, ach na cuir ann an uisge e.

2 Is amhuil a fhuair mi crios, a réir focal an Tighearn, agus chuir mi air mo leasraibh e.

3 Agus thàinig focal an Tighearn a m'ionnsuidh an dara uair, ag ràdh,

4 Gabh an crios a fhuair thu, a ta air do leasraibh, agus éirich, imich gu Euphrates, agus folaich an sin e, ann an toll do'n charraig.

5 Is amhuil a dh'imich mi agus dh'fholaidh mi e aig Euphrates, mar a dh'àithn an Tighearn dhomh.

6 Agus tharladh an déigh mhòrain làithean, gu'n dubhairt an Tighearn rium, Eirich, imich gu Euphrates, agus thoir as a sin an crios a dh'àithn mise dhuit fholach anns an àite sin.

7 An sin dh'fhalbh mi gu Euphrates, agus chladhaich mi, agus thug mi an crios as an àite san d'fholuich mi e; agus, feuch, bha'n crios millte, cha b'fhiù air

son ni sam bith e¹.

8 An sin thàinig focal an Tighearn a m'ionnsuidh, ag ràdh,

9 Mar so deir an Tighearn; Air a' mhodh so millidh mise uail Iudah, agus uail mhòr Ierusalem.

10 An slugh ole so, tha diùltadh mo bhriathra-sa éisdeachd, a tha sìubhal a réir cruais an cridhe féin, agus a' dol an déigh dhée coimheach, gu seirbhis a dheanamh dhoibh, agus gu aoradh a thoirt dhoibh; bithidh iad eadhon mar an crios so, nach fiù air son ni sam bith.

11 Oir mar a dhlùth-leanas an crios ri leasraibh duine, mar sin thug mise air tigh Israeil uile, agus air tigh Iudah uile, dlùth-leantuinn riumsa, deir an Tighearn; a chum gu'm biodh iad dhomh mar shluagh, agus mar ainm, agus mar chliù, agus mar ghloir: ach cha'n éisdeadh iadsan.

12 Labhraidh tu riu fòs am focal so Mar so deir Iehobhah Dia Israeil; Lìonar gach soirleadh le fion. Agus their iad riut, Nach 'eil fios cinnteach againn gu lìonar gach soirleadh le fion?

13 An sin their thu riu, Mar so deir an Tighearn, Feuch, lìonaidh mise luchd-àiteachaidh na tìre so air fad, eadhon na rìghrean a tha 'nan suidhe an àite Dhaibhidh air a rìgh-chathair, agus na sagairt, agus na fàidhean, agus uile luchd-àiteachaidh Ierusalem, le misg.

14 Agus pronnaidh mi iad an aghaidh a chéile, eadhon na h-aithrichean agus na mic le chéile, deir an Tighearn; cha ghabh mi truas, ni mò choigleas mi, ni mò a ni mi iochd, air chor as nach sgriosaiun iad.

15 Eisdibh, agus thugaibh aire, na bithibh uaibhreach; oir labhair an Tighearn.

16 Thugaibh-sa glòir do'n Tighearn bhur Dia, mu'n tig an dorchadas, agus mu'n tuislich 'ur cosan air sléibhtibh na doilleireachd; an sin, an uair bhios 'ur sùil ri solus, caochailear e gu sgàile a' bhàis eadhon gu dorchadas tiugh.

17 Ach mur éisd sibh ris, guilidh m'an-am ann an ionadaibh uaigneach air son 'ur n-uabhair, agus guilidh mo shùil gu goirt, agus silidh mo dheòir gu pailt, a chionn gu toirear ann am bruid treud an Tighearn.

18 Abair ris an rìgh, agus ris a' bhan-rìghinn, Irislichibh sibh féin, suidhibh sìos; oir leagar sìos bhur culaidh-chinn, eadhon crùn bhur glòire.

19 Tha bailtean na h-àirde deas air an druideadh suas, agus cha'n 'eil neach 'gam fosgladh; tha Iudah uile air a toirt am bruid, tha i gu h-iomlan air a toirt am braigheanas.

20 Tog suas do shùilean agus faic iad-

¹ cha robh feum sam bith ann; cha robh slà sam bith ann.

san a ta teachd o'n àirde tuath: c'àit am bheil an treud a thugadh dhuit, caoraich do mhaise¹?

21 Ciod a their thu an uair a thig smachdachadh ort? an dèigh dhuit a theagasg dhoibh riaghladh tharad mar cheannardan? nach dean ioghanna do ghilacadh, amhuil mnaoi ri saothair?

22 Agus an uair a their thu ann ad chridhe, C'ar son a thàinig na nithe so orm? Air son meud do chionta tha do sgiortan air an leigeadh ris, tha do shàilt-ean air an rùsgadh.

23 Am feud an t-Etiopach a chraicinn a mhùthadh, no an liopard a bhreice? an sin fendaidd sibhe, bha cleachdta ri olc, maith a dheanamh.

24 Air an aobhar sin sgapaidh mise iad mar an asbhuain, a shiubhlas air falbh le gaoith an fhàsaich.

25 Is e so do chrannchur, an cuibhrionn a thomhaiseadh leam-sa air do shon, deir an Tighearn; a chionn gu'n do dhì-chuimhnich thu mise, agus gu'n do chuir thu do dhòchas anns a' bhréig.

26 Uime sin leigidh mise do sgiortan ris air do bheulaobh, a chum gu faicear do nàire.

27 Chunnaic mi t'adhaltranas, agus do shìtrich, agus do striopachas mi-nàrach, do ghràineileachdan air na cnocaibh, anns a' mhachair. Mo thruaighe thu, O Ierusalem! nach bi thu air do ghlanadh? c'uim idir a bhitheas sin?

CAIB. XIV.

1 Goinne mhòr. 7 Urnuigh an fhàidh. 10 Dhiùlt Dia èisdeachd r'a shluagh. 13 Bàsachidh am fàidh bréige, agus an sluagh a chreid e. 17 Dh'orduich Dia do Ieremiah caoidh a dheanamh air son an trioblaidéan.

FOCAL an Tighearn, a thàinig gu Ieremiah a thaobh na goinne².

2 Tha Iudah ri bròn, dh'fhàs a geatachan lag; tha iad duaichnidh³ air an làr; agus tha gaoir Ierusalem air dol suas.

3 Chuir na h-uaislean fòs an clann bheag a dh'iarraidh uisge: thàinig iad gus na sluichd, agus cha d'fhuair iad uisge sam bith; phill iad le 'n soithichibh falamh; bha nàire agus masladh orra, chòmhdaich iad an cinn.

4 A chionn gu bheil am fearann' na smùr, oir cha robh uisge⁴ anns an tìr; ghabh na treabhaichean nàire, dh'fholuich iad an cinn.

5 Seadh fòs, rug an eilid a laogh anns a' mhachair, agus thréig i e, a chionn nach robh fear ann.

6 Agus sheas na h-asala fiadhaich air na h-ionadaibh àrda, tharruing iad suas a'

ghaoth mar dhràgonaibh; dh'fhàilnich an sùilean a chionn nach robh fear ann.

7 Ged tha ar n-euceartan a' tabhairt fianuis 'nar n-aghaidh, O Thighearn, dean thusa air sgàth t'ainme féin: oir tha ar cùl-sleamhnachaidh lìonmhor, pheacaich sinn a d'aghaidh.

8 O dhòchais Israeil, a Shlànuighear ri àm airce, c'uim am bitheadh tu mar choigreach anns an tìr? agus mar fhear-turuis a thionndaidheas a leth-taobh gu fuireach car oidhche?

9 C'uim am bitheadh tu mar reach ann an suain chodail⁵? mar ghaisgeach aig nach 'eil cumhachd gu tèarnadh? Gidheadh tha thusa, O Thighearn, 'nar meadhon, agus orts a tha sinn air ar n-ainmeachadh; na dean ar tréigsinn.

10 Mar so deir an Tighearn a thaobh an t-sluaigh so, Mar so bu toil leo dol air seachran, cha do chum iad air an ais an cosan; uime sin cha ghabh an Tighearn riu, cuimhnichidh e nis an aingidheachd, agus cronuichidh e an cionta.

11 Uime sin thubhairt an Tighearn rium, Na guidh as leth an t-sluaigh so air son an leas.

12 An uair a thraisgeas iad, cha'n éisd mise r'an glaoth; agus an uair a dh'ìobras iad ìobairt-loisgte agus tabhartas, cha ghabh mise iad; ach leis a' chlaidheamh, agus leis a' ghort, agus leis a' phlàigh, cuiridh mi as doibh.

13 An sin thubhairt mise, Och! a Thighearna Dhià! feuch, tha na fàidhean ag ràdh riu. Cha 'n fhaic sibh an claidheamh, ni mò thig gort oirbh, ach sìth chinnteach bheir mise dhuibh anns an àite so.

14 An sin thubhairt an Tighearn rium, Tha na fàidhean ri fàistneachd bhreige ann am ainm-sa; cha do chuir mise uam iad, ni mò thug mi àithne dhoibh, ni mò labhair mi riu: sealladh breugach, agus fiosachd, agus neo-ni, agus mealltaireachd an cridhe féin, tha iad a' fàistneachd dhuibh.

15 Uime sin mar so deir an Tighearn; A thaobh nam fàidhean a tha ri fàistneachd ann am ainm-sa, ged nach do chuir mise mach iad, agus ag ràdh, Cha bli claidheamh agus gorta san fhearann so; Le claidheamh agus le gorta bithidh na fàidhean sin air an caitheamh.

16 Agus bithidh an sluagh do'n d'rinn iad fàistneachd air an tilgeadh a mach ann an sràidibh Ierusalem, fa chùis⁶ na gorta, agus a' chlaidheimh, agus cha bhi neach ann a dh'adhlaiceas iad; iad féin, am mnathan, agus am mic, agus an nigh-eanan: oir taomaidh mise orra féin an aingidheachd.

¹ sgèimhe.

² an tairt.

³ dh'fhàs iad dubh.

⁴ fearthuinn.

⁵ na bhreistich?

⁶ do bhrìgh.

17 Agus labhraidh tu riu am focal so; Sileadh mo shùilean le deuraibh a dh-oidhche is a là, agus na sguireadh iad: oir tha òigh-nighean mo shluaigh air a dochann le dochann mòr, le buille ro chràit-each.

18 Ma théid mi mach do'n mhachair, an sin feuch iadsan a mharbhadh leis a' chlaidheamh! agus ma théid mi steach do'n chaithir, an sin feuch iadsan a ta air an claidh leis a' ghorta! seadh, tha am fàidh, agus fòs an sagart ag imeachd air chuairt, gu talamb anns nach 'eil iad eòlach.

19 An do chuir thu gu tur cùl ri Iudah? an d'fhuathaich t'anam Sion? c'uim an do bhuail thu sinn, agus gun aon chabhair againn? bha ar sùil ri sith, ach maith cha d'fhàinig; agus ri àm leighis, agus feuch àmhghar!

20 Tha sinn ag aideachadh, O Thighearn, ar n-aingidheachd féin, agus euceart ar n-aithrichean; oir pheacaich sinn a d'aghaidh-sa.

21 Na tilg uait sinn air sgàth t'ainme féin; na maslaich caithir do ghloire; cuimhnich, na bris do choimhcheangal ruinn.

22 Am bheil aon air bith am measg dhìomhanas nan cinneach a's urrainn uisge thoirt seachad? no'n urrainn na nèamha frasan a thabhairt? nach tu féin an ti a nì sin, O Thighearn ar Dia-ne? air an aobhar sin, feithidh sinne riut; oir is tu a rinn na nìthe so uile.

CAIB. XV.

1 Sgrìos uamhasach nan Iudhach. 10 'Nuair rinn am fàidh gearan a bhrìgh mì-rùin a nàimhdean, fhuair e gealladh gu'm bitheadh iad bàigheil ris ann an àm na h-airce. 13 Rinn e urnuigh, 19 agus thugadh mìsneach dha.

AN sin thubhairt an Tighearn rium; Ged sheasadh Maois agus Samuel a'm làthair, cha bhiodh m'anam leis an t-sluagh so; cuir a mach iad á m'fhianuis, agus siùbhladh iad air falbh.

2 Agus tarlaidh, ma their iad riut, C'àit an siubhail sinn air falbh? an sin their thu riu, Mar so deir an Tighearn, Iadsan a ta air son bàis, a chum bàis; agus iadsan a ta air son a' chlaidheimh, a chum a' chlaidheimh; agus iadsan a ta air son na gorta, chum na gorta; agus iadsan a ta air son na bruid, a chum braigheanais.

3 Agus orduichidh mise os an ceann ceithir seòrsanna, deir an Tighearn; an claidheamh gu marbhadh, agus na coin gu reubadh, agus eunlaith an athair, agus beathaichean na macharach, gu itheadh agus gu milleadh.

4 Agus fuadaichidh mi iad air feadh uile rìoghachdan an domhain, air son Mhana-

seh, mliic Hececiah, rìgh Iudah, air son nan nìthe sin a rinn e ann an Ierusalem.

5 Oir cò ghabhas truas dìot, O Ierusalem? no cò nì bròn leat? no cò théid a leth-taobh, a dh'fheòrach cionnus a tha thu?

6 Thréig thu mise, deir an Tighearn, chaidh thu air t'ais; air an aobhar sin, sinidh mise mo làmh a mach a d'aghaidh, agus sgriosaidh mi thu; tha mi sgìth do ghabhall aithreachais.

7 Uime sin dh'fhuadaich mi iad le inneal fasnaidh ann an geatachaidh na tìre: dh'fhàg mi gun chlann, sgrios mi mo shluagh; o'n sliogh chaidh do phill iad.

8 Rinneadh am bantraichean nì bu lìon-mhoire leam-sa na gaineamh na fairge: thug mi an aghaidh na màthar agus nam mac fear-millidh ann am meadhon an là: thug mi air nàmhaid agus air uamhasan bualadh oirre gu h-obann.

9 Dh'fhannaich ise a rug seachdnar, thug i suas an deò; chaidh a grian sìos am feadh a ta fathasd an là ann; nàraicheadh agus mhasluicheadh i: agus na mlaireas diubh bheir mise do'n chlaidheamh ann am fianuis an nàimhdean, deir an Tighearn.

10 Mo thraighe mise, O mo mhàthair! oir rug thu mi a'm' fhear-strì, agus a'm' fhear-connsachaidh anns an fhearann uile; cha d'thug mi seachad air ocar, nì mò thug aon neach air ocar dhomh *gidheadh* tha iad uile 'gam mhalluchadh.

11 Thubhairt an Tighearn, gu cinnteach éiridh gu maith do t'iarmaid; gu cinnteach bheir mi air an nàmhaid bhì bàigheil riut ann an àm na h-airce, agus ann an àm a' chruaidh-chais.

12 Am bris esan iarunn 'na bhloighdibh, iarunn o thuath agus umha?

13 Do mhaoin agus t'ionmhasan bheir mise mar chreic, cha'n ann air son luach, ach air son t'uile lochdan; seadh ann ad uile chrìochaibh.

14 Agus bheir mi orra siubhal air falbh le d' naimhdibh gu fearann air nach robh thu eòlach; oir tha teine air 'fhadadh ann am fheirg, agus lasaidh e'nur n-aghaidh.

15 Agad-sa tha fios, O Thighearn; cuimhnich ormsa, agus thig g'am amharc, agus thoir dhomh aicbheil air mo luchd-tòrachd; aun am buanas t'fheirge na toir air falbh mi; thoir fa'near gu'n d'fhuiling mi masladh air do sgàth.

16 Fhuaradh do bhriathran, agus dh'ith mi suas iad; agus bha t'fhocal dhomh 'na aoibhneas, agus 'na ghàirdeachas do m' chridhe; oir tha mi air m'ainmeachadh ortsa, O Iehobhah Dhia nan sluagh.

17 Cha do shuidh mi ann an cuideachd

Iuchd-fochaid, ni mò bha mi subhach; air son do làimh-sa shuidh mi ann am aonar; a chionn gu'n do lion thusa mi le boile.

18 C'uim am bheil mo ghoimh gun lasachadh? agus mo chreuchd bàsmhor, a' diùltadh a bhi air a leigheas? c'ar son a bhios tusa dhomh uile gu léir amhuil sruthan mealltach, as nach feudar earbsadh?

19 Uime sin mar so deir an Tighearn, Ma philleas tu, an sin bheir mise air t'ais thu, agus¹ seasaidh tu ann am làthair: agus ma sgaras tu an luachmhor o'n ni nach fù, mar mo bheul-sa bithidh tu: pillidh iad so riutsa, ach cha phill thusa riu-san².

20 Agus ni mise dhìot, an aghaidh an t-sluaigh so, balla làidir umha; an uair a chathachaicheas iad a d' aghaidh cha toir iad buaidh ort: òir tha mise maille riut, a chum do dhion, agus a chum do thearnadh, deir an Tighearn.

21 Agus saoraidh mi thu o làimh nan aingidh, agus fuasglaidh mi thu o ghreim nan uamhasach.

CAIB. XVI.

1 Roimh-innis am fàidh léir-sgrìos nan Iudhach. 14 Bheir Dia orra pilltinn o'm braidheanas air dòigh ni's glòimhoire na thug e nìos iad á tìr na h-Eiphit. 16 Diolaidh e dhoibh an aingidheachd le tomhas dùbailte, agus an sin pillidh iad d'a ionnsuidh.

THAINIG focal an Tighearna fòs a m' ionnsuidh, ag ràdh,

2 Cha ghabh thu dhuit féin bean, ni mò bhios agad mic no nigheanan anns an àite so.

3 Oir mar so deir an Tighearn; A thaobh nam mac, agus a thaobh nan nigheanan, a ta air am breith anns an àite so, agus a thaobh am màithrichean a rug iad, agus a thaobh an aithrichean a ghin iad, anns an tìr so;

4 Le bàs doilgheasach bàsaichidh iad; cha chlaoidhear iad, agus cha'n adhlacair iad; mar aolach air aghaidh na talmhainn bithidh iad; le claidheamh fòs, agus le gorta, caithear iad; agus bithidh an cairbheannan mar lòn do eunlaith an athair, agus do bheathaichibh na talmhainn.

5 Oir mar so deir an Tighearn, Cha téid thu stigh do thigh a' bhròin, ni mò théid thu dheanachd caoidh, no thoirt dhoibh comhfhurtachd; oir thug mise air falbh mo shith o'n t-sluaigh so, deir an Tighearn, caoimhneas gràdhach agus caomh-thròcairean.

6 Agus gheibh iad bàs, eadar bheag agus mhòr, anns an tìr so; cha'n adhlacair iad, agus cha deanar caoidh air an son; cha ghearr aon neach e féin, ni mò ni aon

neach e féin maol air an son.

7 Agus cha bhris daoine aran 'nam measg, ri àm bròin, a chum comhfhurtachd a thoirt doibh air son neach a fhuair bàs; ni mò bheirear dhoibh deoch á cupan na comhfhurtachd, air son athar neach, no air son a mhàthar.

8 Mar an ceudna cha téid thu gu tigh na cuirme, gu suidhe sìos maille riu a dh'itheadh agus a dh'òl.

9 Oir mar so deir Tighearn nan sluagh, Dia Israel, Feuch, cuiridh mise 'na thòsd anns an àite so, fa chomhair 'ur sùl-sa, agus ann 'ur làithibh, guth an t-subhachais, agus guth an aoibhneis, guth an fhir nuadh-phòsda, agus guth na mnà nuadh-pòsda.

10 Agus tarlaidh, an uair a dh'innseas tu d'on t-sluaigh so na nithe so uile, agus a their iad riut, C'ar son a labhair an Tighearn 'nar n-aghaidh an t-òlc mòr so uile? agus ciod i ar n-aingidheachd, agus ciod e ar lochd, a chuir sinn an gnìomh an aghaidh an Tighearn ar Dia?

11 An sin their thusa riu, A chionn gu'n do thréig bhuir n-aithrichean mise, deir an Tighearn, agus gu'n deachaidh iad air lorg dhée eile, agus gu'n d'thug iad seirbhis dhoibh, agus gu'n d'thug iad dhoibh aoradh, agus gu'n do thréig iad mise, agus nach do choimhid iad mo reachd.

12 Agus gu'n d'rinn sibhse ni's miosa na bhuir n-aithrichean; oir feuch, tha sibh ag imeachd, gach aon a réir ais-innleachd a dhroch chridhe féin, gun ghéill a thoirt dhomh-sa.

13 Uime sin tilgidh mi sibh a mach as an tìr so, gu tìr air nach d'fhuair sibh eòlas, sibh féin no 'ur n-aithrichean; agus an sin ni sibh seirbhis do dhiathaibh coimheach, a là agus a dh'òidhche, a chionn nach dean mise trócair oirbh.

14 Uime sin, feuch tha na làithean a' teachd, deir an Tighearn, anns nach abrai ni's mò, Mar is beò an Tighearn, a thug a nìos clann Israel á tìr na h-Eiphit;

15 Ach, Mar is beò an Tighearn, a thug air an ais clann Israel o thalamh na h-àirde tuath, agus o gach talamh gus an d'fhògair e iad; oir bheir mise air an ais iad gu'm fearann féin, a thug mi do'n aithrichibh.

16 Feuch, cuiridh mi fios air mòran iasgairean, deir an Tighearn, agus ni iad an iasgach; agus 'na dhéigh sin, cuiridh mi fios air mòran shealgairean, agus ni iad an sealg, o gach uile shliabh, agus o gach uile chnoc, agus o sgeiribh nan creag.

17 Oir tha mo shùilean-sa air an uile shligheibh; cha'n 'eil iad foluichte o m'

¹ Ma philleas tu agus gu toir mise air d'ais thu.

² pillidh iad so riutsa, ach na pill thusa riu-san.

ghnùis, ni mò tha an aingidheachd air a comhdachadh o fhradharc mo shùil.

18 Agus dìolaidh mi le tomhas dùbailte¹ an aingidheachd agus an lochd, a chionn gu'n do thruaill iad m' fhearann le sailthead² an gnìomhara fuathach; agus le 'n gràineileachdaibh lìon iad m' oigh-reachd.

19 O Thighearn, mo neart, agus mo dhaingneach, agus mo dhidein ann an là na h-airce³; a d'ionnsuidh sa thig na cinnich o chrìochaibh na talmhainn, agus their iad, Gu deimhin shealbhaich ar n-aithrichean ni gun bhrìgh; diomhanas, agus *nithe* gun tairbhe.

20 An dean duine dha féin dée, agus nach 'eil iad 'nan dée⁴?

21 Air an aobhar sin, foillsichidh mi dhoibh, air an aon uair so, foillsichidh mi dhoibh mo làmh agus mo chumhachd; agus bithidh fios aca gur e m'ainm Iehobhah.

CAIB. XVII.

1 *Braighdeanas Iudah air son am peacanna.* 5 *Is malluichte an neach a chuireas a dhòchas ann an duine, ach is beannaichte esan a chuireas a dhòchas ann an Dia.* 9 *Rannsaichidh Dia cridhe cealgach an duine.* 17 *Athchuinge an fhàidh* 19 *Aithne nu' thimicholl na sàbaid.*

THA peacadh Iudah air a sgrìobhadh le peann iarunn; le roinn daoimein tha e air a ghearradh, air clàr an cridhe, agus air adharcaibh an⁵ altairean:

2 Am feadh a ta an clann a' cuimhneachadh an altairean, agus an doir-eachan, air na crannaibh uaine, air na cnocaibh àrda.

3 O mo shliabh anns a' mhachair, do mhaoin, agus do thaisgeacha gu h-iomlan, bheir mi thairis do 'n chreich; t'ionadan làidir, air son peacaidh, air feadh t'uile chrìochan.

4 Agus fògrar thu, eadhon thusa féin, o d' oighreachd a thug mi dhuit; agus bheir mi ort seirbhis a dheanamh do d'naimhaidh ann an tìr anns nach 'eil thu eòlach: a chionn gu'n d'fhadaidh sibh, ann am fheirg-sa, teine a loisgeas gu sìorruidh.

5 Mar so deir an Tighearn, Is malluichte an neach a chuireas a dhòchas ann an duine, agus a ni feoil 'na gairdean da, agus aig am bheil cridhe tha claonadh air falbh o'n Tighearn.

6 Oir bithidh e mar phreas seargta san ionad sgaoilte, nach mothaich am maith an uair a thig e; ach a ta 'g àiteachadh ionada loisgte an fhàsaich, fearainn gun toradh agus gun chòmhnuidh.

7 Is beannaichte an neach a dh'earbas as an Tighearn, agus a chuireas a dhòchas ann an Iehobhah⁶.

8 Oir⁷ bithidh e mar chraoibh air a suidheachadh ri taobh nan uisgeachan, a sgaoileas a mach a freumhan ri taobh an t-srutha, agus nach mothaich c'uin a thig an tart: ach aig am bi a duilleach uaine, agus air nach bi iomgain ann am bliadhna na tìormachd, ni mò sguireas i thoirt seachad toraidh.

9 Tha an cridhe cealgach thar na h-uile *nithe*, agus *tha e* do-leigheas⁸; cò is urrainn a thuigsinn?

10 Tha mise Iehobhah a' rannsachadh a' chridhe, agus a' sgrudadh nan àirnean, a chum gu tabhair mi do gach neach a réir a shlighe, agus a réir toraidh a dheanadais.

11 *Mar a'* chearc a ni gur *air uighean*, agus nach toir a mach eoin, [tha] esan a gheibh beartas, ach nach ann le còir; ann am meadhon a làithean dealaichidh e ris; agus 'na chrìch dheireannaich bithidh c'na amadan.

12 Is rìgh-chaitir ghlòrmhor, àrdaichte o chian, àit ar n-ionaid naoimh-ne.

13 O Thighearn, cuspair-dòchais Israeil, bithidh amhludh air gach aon a thréigeas thu; sgrìobhar iad 'nan luchd-ceannairc san talamh; a chionn gu'n do thréig iad an Tighearn, tobar nan uisgeacha beò.

14 Leighis mi, O Thighearn, agus bithidh mi air mo leigheas; slànuidh mi, agus bithidh mi air mo shlànuchadh; oir is tu mo mholadh.

15 Feuch, tha iad so ag ràdh rium, C'ait am bheil focal an Tighearna? thigeadt e nis.

16 Ach cha d'rinn mi deifir o bhi a'm' fhear-coimhid a'd' dhéigh-sa, agus là na h-iarguin cha d'iarr mi; agad féin tha fios air an ni a thàinig a mach as mo bheul, bha e ann ad làthair.

17 Na bi a'd' uamhas domh; is tu mo dhèid ann an là na h-airce.

18 Biodh nàire air a' mhuinntir a ta 'g am ruagadh, ach na nàraichear mise: biodh iadsan fogheilt, ach na biodh gèilt ormsa: thoir thusa orra là na dòrainn, agus le sgrios ath-bhuailte sgrios iad.

19 Mar so thubhairt an Tighearn rium; Falbh agus seas ann an geata cloinne an t-sluaigh, air an tig rìghrean Iudah a steach, agus air an téid iad a mach, agus ann an uile gheatachaibh Ierusalem;

20 Agus abair riu, Cluinnibh-sa focal an Tighearn, a rìghrean Iudah, agus a Iudah uile, agus uile luchd-àiteachaidh Ierusa-

¹ dà-shillte.

² closaichibh. Eabh.

³ na teinn; a' chruaidh-chais.

⁴ do *nithe* nach 'eil 'nan dée?

⁵ bhuir.

⁶ oir bithidh an Tighearn 'na chul-taice dho.

⁷ Agus.

⁸ lag; euslan.

leim, a ta teachd a steach air na geatacha so.

21 Mar so deir an Tighearn, 'Thugaibh aire dhuibh féin, agus na giùlainibh uallach air bith air là na sàbaid, agus na tugaibh a steach i air geatachan Ierusalem;

22 Ni mò bheir sibh a mach uallach as blur tighibh air là na sàbaid, ni mò ni sibh obair air bith; ach naomhaichibh là na sàbaid, mar a dh'àithn mise do 'ur n-aithrichibh.

23 Ach cha d'thug iadsan géill, ni mò dh'aom iad an cluas, ach rinn iad am muineal rag, air chor as nach éisdeadh iad, agus air chor as nach gabhadh iad teagasg.

24 Ach tarlaidh, ma dh'éisdeas sibh gu cùramach riumsa, deir an Tighearn, gun uallach sam bith a thoirt a steach troimh geatachan a' bhaile so air là na sàbaid, ach là na sàbaid a naomhachadh, gun obair sam bith a dheanamh air:

25 An sin théid a steach air geatachan a' bhaile so, rìghrean agus prionnsachan, 'nan suidhe air rìgh-chaitir Dhaibhidh, a' marcachd air carbadaibh agus air eachaibh, iad féin agus an ceannardan, fir Iudah, agus luchd-àiteachaidh Ierusalem; agus daingnichear gu bràth a' chaithir so.

26 Agus thig iad o bhailtibh Iudah, agus o na h-àiteachaibh timchioll Ierusalem, agus o fhearam Bheniamin, agus o'n chòmhnard, agus o na beanntaibh, agus o'n àirde deas, a' toirt leò thabhartas-loisgte, agus iobairtean, agus thabhartasabidh, agus tùise, a' toirt iobairtean molaidh gu tigh an Tighearn.

27 Ach mur éisd sibh riumsa, chum là na sàbaid a naomhachadh, agus gun uallach a ghiulan, a' dol a steach air geatachan Ierusalem air là na sàbaid; an sin fadaidh mise teine 'na geatachaibh, agus loisgidh e luchairtean Ierusalem, agus cha 'n fheudar a mhuichadh.

CAIB. XVIII.

1 *Le samhladh soithich a' chriadhadair nochd Dia gu'm feudadh e dheanamh r'a shluagh mar is àill leis.* 11 Chaidh olc a chumadh an aghaidh shluagh Iudah air son an ceannaire. 18 *Ath-chuinge Jeremiah.*

AM focal a thàinig a dh'ionnsuidh Ieremiah o'n Tighearn, ag ràdh,

2 Eirich, agus imich sìos gu tigh a' chriadhadair, agus an sin bheir mise ort mo bhriathran a chluinntinn.

3 An sin chaidh mi sìos gu tigh a' chriadhadair, agus, feuch, bha e deanamh oibre air na leacaibh.

4 Agus bha 'n soitheach a bha e deanamh do chriadh, air a mhilleadh ann an làimh a' chriadhadair; an sin rinn e dheth

a ris soitheach eile, mar a chunnacas ceart do'n chriadhadair a dheanamh.

5 An sin thàinig focal an Tighearn a m'ionnsuidh, ag ràdh,

6 O thigh Israeil, nach feud mise a dheanamh ruibhse mar an criadhadair so? deir an Tighearn. Feuch, mar a' chriadh an làimh a' chriadhadair, is amhuil sin sibhse ann mo làimh-sa, O thigh Israeil.

7 C'uin air bith a labhras mise mu thimchioll cinnich, agus mu thimchioll rìoghachd, gu spìonadh a nìos, gu leagail sìos, agus gu sgrios;

8 Ma philleas an cinneach sin an aghaidh an do labhair mi, o'n olc; gabhaidh mise aithreachas do'n olc a bha ann am aire thoirt orra.

9 Agus c'uin air bith a labhras mi mu thimchioll cinnich, agus mu thimchioll rìoghachd, gu 'thogail, agus gu 'shuidh-eachadh;

10 Agus gu'n dean e an ni sin a ta olc ann am shealladh, agus nach bi e umhal do m' ghuth; an sin gabhaidh mi aithreachas do'n mhaith a bha romham a dheanamh dhoibh.

11 A nis, uime sin, imich agus labhair ri fearaibh Iudah, agus ri luchd-àiteachaidh Ierusalem, ag ràdh, Mar so deir an Tighearn, Feuch, tha mise a' cumadh uile 'nur n-aghaidh, agus a' dealbh innleachd 'nur n-aghaidh: pillibh a nis gach aon o 'dhroch shlighe, agus leasaichibh 'ur sligheanna agus 'ur gnìomhara.

12 Ach thubhairt iadsan, Cha 'n'eil dòchas ann; oir gluaisidh sinn a réir ar smuainte féin, agus ni sinn, gach aon a réir tograidh a dhroch chridhe féin.

13 Uime sin mar so deir an Tighearn, Feòraichibh a nis am measg nan cinneach, cò chuala an samhuil so do nithibh? rinn òigh Israeil ni ro ghràineil.

14 An tréig duine mo mhagh-sa air son carraig, air son shneachdaidh Lebanoin? an tréigear am fuar uisge-ruith air son uisgeachan eile?

15 Ach dhì-chuimhnich mo shluagh mise, loisg iad tùis do dhìomhanas, agus thug iad orra tuisleachadh 'nan sligheachaibh a bha 'nan seann ròidibh, gu gluasad air ceumaibh eile, air slighe neach 'eil deanta;

16 A chum am fearann a dheanamh fàs, 'na bhall-àbhacais bith-bhuan: gabhaidh gach neach a théid seachad air mòr iongantas, agus crathaidh e a cheann.

17 Sgapaidh mise iad mar gu b'ann le gaoith an ear roimh an nàmhaid; tionndaidhidh mi riù mo chùl, agus cha 'n i m' aghaidh, ann an là an léir-sgrios.

18 An sin thubhairt iad, Thigibh, agus dealbhamaid innleachdan an aghaidh Ieremiah: oir cha bhàsaich an reachd o'n

t-sagart, no comhairle o'n eagnuidh, no 'm focal o'n fhàidh. Thigibh, agus buaileamaid e leis an teagaidh, agus na tugamaid aire do aon d'a bhriathraibh.

19 Thoir thusa, O Iehobhah, aire dhomh, agus cluinn guth na muinntir a ta ri strì rium.

20 An diolar olc air son maith? Gu cinnteach chladhaich iad slochd air son m' anama. Cuimhnich cionnus a sheas mi ann ad fhianuis, a dheanamh eadar-ghuidhe a clum an leas, a thionndadh do chorruich air falbh uatha.

21 Uime sin thoir thusa thairis an clann do'n ghorta, agus thoir orra leaghadh as¹ le neart a' chlaidheimh; biodh am mnathan air an fàgail gun chlann, agus iad 'nam bantraichean, agus faigheadh am fir bàs leis a' phlàigh, agus marbhar an òganaich anns an àraich leis a' chlaidheamh.

22 Cluinnear gaoir as an tighean, an trà bheir thusa feachd orra gu h-obann; oir chladhaich iad slochd gu mise a ghllacadh, agus shuidhich iad liontan air son mo chos.

23 Ach agad-sa, O Thighearn, tha fios air an innleachdaibh uile an aghaidh m' anama; na maith an cionta, agus na glan an lochd a mach á d'fhianuis: ach tilgear iad thairis ann ad làthair; tionnsgain 'nan aghaidh ann an àm do chorruich.

CAIB. XIX.

1 *Le samhladh soithich criadhadair air a briseadh 'na bhloighdibh, nochd Dia léir-sgrìos nan Iudhaich air son am peacanna.*

MAR so thubhairt Iehobhah rium-sa, Falbh agus faigh criadh-shoitheach criadhadair, agus *thoir leat* cuid do sheanairibh an t-sluaigh, agus do shean-airibh nan sagart;

2 Agus théid thu mach gu gleann mhic Hinoim, a ta fa chomhair a' gheata Harsit, agus glaothaidh tu anns an àite sin na briathran a labhras mise riut,

3 Agus their thu, Eisdibh-sa focal an Tighearn, O a rìghrean Iudah, agus a luchd-àiteachaidh Ierusalem; Mar so deir Tighearn nan sluagh, Dia Israeil, feuch, bheir mise olc air an àite so, a bheir air neach sam bith a chluinneas e gu'm bi gaoir 'na chluasaibh.

4 A chionn gu'n do thréig iad mise, agus gu'n d'rinn iad an t-àite so coimheach, agus gu'n do loisg iad tùis ann do dhiathaibh eile, nach b'aithne dhoibh; iad féin, agus an aithrichean, agus rìghrean Iudah, agus gu'n do lion iad an t-àite so le fuil neò-chiontach:

5 Agus gu'n do thog iad ionadan àrda Bhaail, a chum am mic a losgadh anns an teine, *mar* thabhartais-loisgte do Bhaal;

ni nach d'àithn mise, ni mò labhair mi, ni mò thàinig e ann am aire;

6 Uime sin, feuch, tha na làithlean a' teachd, deir an Tighearn, anns nach abrar ris an àite so ni's mò Tophet, no gleann mhic Hinoim, ach gleann a' mharbhaidh.

7 Agus cuiridh mise gu neò-bhrìgh comhairle Iudah agus Ierusalem anns an àite so; agus bheir mi orra tuiteam leis a' chlaidheamh an làthair an naimhdean, agus le làimh na muinntir a ta 'g iarraidh an anama: agus bheir mi an colainnean mar bhìadh do eunlaith an athair, agus do bheathaichibh na talmhainn.

8 Agus ni mi a' chaithir so 'na fàsach, agus 'na ball-sgeig: bithidh mòr-ioghnadh air gach peach a théid seachad oirre, agus ni e sgeig air son a h-uile phlàigh-ean.

9 Agus bheir mise orra gu'n ith iad feoil am mac, agus feoil an nigheanan; agus ithidh iad, gach aon feoil a charaid, anns a' chogadh, agus anns an teinne, leis an teannaichear iad le 'n naimhdebh, agus leo-san a ta 'g iarraidh an anama.

10 An sin brisidh tu an soitheach ann an sealladh nan daoine a théid maille riut.

11 Agus their thu riu, Mar so deir Tighearn nan sluagh, Amhuil so brisidh mise an, sluagh so, agus a' chaithir so, mar a bhriseas *neach* soitheach a' chrìadhadair, nach feudar a shlànuachadh a ris; agus adhlacair *daoine* ann an Tophet, agus nach bi àit ann gu adhlacadh.

12 Mar so ni mise ris an àite so, deir an Tighearn, agus r'a luchd-còmhnuidh, air chor as gu'n deanar a' chaithir so eadhon mar Tophet.

13 Agus bithidh tighean Ierusalem, agus tighean rìghrean Iudah, amhuil ionad Tophet, neòghlan; maille ris na² tighean sin air fad, air an d'rinn iad tùis a losgadh air am mullaich do uile fheachd nèimh, agus iobairtean-dìbhe a dhòrtadh a mach do dhiathaibh coimheach.

14 Agus thàinig Iereniah o Tophet, agus an do chuir an Tighearn e gu fàist-neachd; agus sheas e ann an cùirt tighe an Tighearn, agus thubhairt e ris an t-sluagh uile,

15 Mar so deir Tighearn nan sluagh, Dia Israeil, Feuch, bheir mise air a' chaithir so, agus air a h-uile bhailtibh, an t-olc sin uile a labhair mi 'na h-aghaidh; a chionn gu'n d'rinn iad am muineal rag, air chor as nach éisdeadh iad ri mo bhriathraibh.

CAIB. XX.

1 *Fhuair Pasur ainm eile, agus bhagraidh e le brèitheanasaibh uanhasach, do bhrìgh gu'n do bhuail e Ieremiah. 7 Ghearruinn am fàidh gu'n*

¹ *dòirt a mach iad.*

² *air son nan.*

robh e 'na chùis-mhaslaidh do na h-Iudhaich, 14 agus mhalluich e an là air an d'rugadh e.

AN uair a chuala Pasur mac Imeir an sagart, (a bha fòs 'na àrd uachdaran ann an tigh an Tighearna,) Ieremiah a' faisteachd nan nithe so:

2 An sin bhuail Pasur Ieremiah am fàidh, agus chuir e anns an tigh-smachdachaidh¹, a bha aig geata uachdarach Bheniamin, làimh ri tigh an Tighearn.

3 Agus tharladh air an là màireach, gu'n do leig Pasur Ieremiah a mach as an tigh-smachdachaidh. An sin thubhairt Ieremiah ris, Cha 'n e Pasur a thug an Tighearn mar ainm ort, ach Magor-misabib².

4 Oir mar so deir an Tighearn, Feuch, ni mise dhìot uamhas duit féin, agus do d' uile chàirdibh; agus tuitidh iadsan le claidheamh an naimhdean, agus do shùilean-sa 'g amharc; agus Iudah uile bheir mi do làimh rìgh Bhabiloìn, agus bheir e leis iad ann am bruid gu Babilon, agus cuiridh e gu bàs iad leis a' chlaidheamh.

5 Agus bheir mi seachd uile-neart na caithreach so, agus a h-uile shaothair, agus a h-uile nithe luachmhor; agus uile bheartas rìghrean Iudha bheir mi thairis do làimh an naimhdean, a chreachas iad, agus a ghlacas iad, agus a bheir iad air falbh gu Babilon.

6 Agus thusa, a Phasuir, agus na h-uile ta chomhnuidh ann ad thigh, siùbhlaidh sibh air falbh ann am braighdeanas; agus théid thusa gu Babilon, agus an sin gheibh thu bàs, agus an sin adhlaicear thu, thu féin agus t-uile chairdean, do'n d'rinn thu faisteachd bhréige.

7 Mheall thu mi, O Tighearn, agus bha mi air mo mhealladh: is tu a's treise na mise, agus thug thu buaidh: tha mi ann am chùis-mhagaidh gach là, gach aon ri fanaid orm.

8 Oir co tric as a labhras mi, a ghlaodhas mi mach an aghaidh ainneirt, no dh'éigheas mi léir-chreach, tha focal an Tighearn air a dheanamh dhomh 'na chùis-mhaslaidh agus fhanaid gach aon là.

9 An uair a their mi, Cha toir mi iomradh air, ni mò labhras mi tuilleadh 'na ainm; an sin thia e ann am chridhe, mar gu'm b'e teine loisgeach, air a dhruideadh suas ann am chnàmhàn; agus ged sgithich mi mi féin 'ga chumail a steach, cha'n urrainn mi.

10 Oir chuala mi tuairisgeul mhòrain, Uamhas air gach taobh aithrisibh-se, agus aithrisidh sinne e: tha iadsan uile ris an robh mi ann an sith furachair air son mo thuislidh, *ag ràdh*, Theagamh gu meallan e, agus gu faigh sinn buaidh air, agus gu'n gabh sinn dioghaltas deth.

11 Ach tha an Tighearn leam mar aon chumbachdach uamhasach; air an aobhar sin tuislichidh mo luchd-toir, agus cha bhuadhaich iad: tha iad air an lìonadh le nàire ro mhòr, a chionn nach do shoirbhich leo, le masladh bithbhuan, nach leigear gu bràth air dì-chuimhne.

12 Ach, O Thighearna nan sluagh, a dhearbhas am firean, *agus* a chì na h-airnean agus an cridhe, faiceam orra do dhioghaltas: oir dhuit-se leig mise ris mo chùis.

13 Seinnibh-se do'n Tighearn; molaibh-se an Tighearn, oir shaor e anam a' bhoichd á làimh nan aingidh.

14 Malluichte *gu robh* an là air an d'rugadh mise; an là air an d'rug mo mhàthair mi, nar robh e beannaichte.

15 Malluichte *gu robh* esan a thug fios a dh'ionnsuidh m' athar, *ag ràdh*, Tha leanabh mic air bhreth dhuit, g'a dheanamh ro aoibhneach.

16 Agus biodh an duine sin mar na bailtean a sgrios an Tighearn, agus mu nach do ghabh e aithreachas; chuinneadh e gaoir anns a' mhaduinn, agus iolach anns a' mheadhon-là;

17 A chionn nach do mharbh e mi o'n bhroinn, no gu'm biodh mo mhàthair 'na h-uagh dhomh, agus a brù an còmhnuidh torrach *leam*³.

18 C'uim an d'thàinig mi mach as a' bhroinn a dh'fhaicinn mi-shuaimhneis agus bròin, agus a chaitheamh mo laithean ann am masladh?

CAIB. XXI.

1 *Thug am fàidh fios do Shedeciah gu'm buadhaicheadh Nebuchadresar 'na aghaidh.* 8 *Chomhairliche e do'n t-sluagh dol thairis a dh'ionnsuidh nan Caldéach.* 11 *Dh'àithn e do'n rìgh breitheanas a dheanamh.*

AM focal a thàinig chum Ieremiah o'n Tighearn, an uair a chuir an rìgh Sedeciah d'a ionnsuidh Pasur mac Mhelciah, agus Sephaniah mac Mhaaseiah an sagart, *ag ràdh*,

2 Fiosraich, guidheamaid ort, do'n Tighearn air ar son-ne, oir tha Nebuchadresar rìgh Bhabiloìn a' cogadh 'nar n-aghaidh; a dh'fheuchainn an dean an Tighearn ruinn a réir 'uile bhearta iongantach, a chum gu'n téid e suas uainn.

3 Agus thubhairt Ieremiah riu, Mar so their sibh ri Sedeciah;

4 Mar so deir an Tighearn Dia Israeil, Feuch, tionndaidhidh mise air an ais na h-airm-chogaidh a ta 'nur làmhan, leis am bheil sibh a' cogadh an aghaidh rìgh Bhabiloìn, agus an aghaidh nan Caldéach a ta 'g'ur teannachadh air taobh a mhuigh a' bhalla, agus cruinnichidh mi iad ann am mheadhon a' bhaile so.

¹ a'cheap.

² Uamhas air gach taolh.

³ erm.

5 Agus ni mise féin cogadh 'nur n-aghaidh le làimh sìnte mach, agus le gairdean treun, eadhon ann am feirg, agus ann am boile, agus ann am corruich mhòir.

6 Agus buailidh mi luchd-àiteachaidh a' bhaile so, eadar dhuine agus ainmhidh; ghéibh iad bàs do phlàigh mhòir.

7 Agus 'na dhéigh sin, deir an Tighearn, bheir mi thairis Sedeciah rìgh Iudah, agus 'oglaich, agus an sluagh, eadhon na dh'fhàgar anns a' bhaile so o'n phlàigh, o'n chlaidheamh, agus o'n ghorta, do làimh Nebuchadresair rìgh Bhabiloin, agus do làimh an naimhdean, agus do làimh na muinntir a ta 'g iarraidh an anama, agus buailidh e le faobhar a' chlaidheimh iad: cha ghabh e truas diubh, ni mò choigleas e, ni mò ni e tròcair.

8 Agus ris an t-sluagh so their thu, Mar so deir an Tighearn, Feuch, tha mise a' cur mu 'r coinneamh slighe na beatha, agus slighe a' bhàis.

9 Esan a dh'fhanas anns a' bhaile so, bàsaichidh e leis a' chlaidheamh, agus leis a' ghorta, agus leis a' phlàigh: ach esan a théid a mach, agus a théid thairis a dh'ionnsuidh nan Caldéach a ta 'g 'ur teannachadh mu'n cuairt, mairidh e beò, agus bithidh 'anam aige mar chobhart-aich.

10 Oir chuir mise mo ghnuis an aghaidh a' bhaile so air son uile, agus cha'n ann air son maith, deir an Tighearn; do làimh rìgh Bhabiloin bheirear thairis e, agus loisgidh esan e le teine.

11 Agus mu thimchioll tighe rìgh Iudah, cluinnibh-sa focal an Tighearn;

12 O thigh Dhaibhidh, mar so deir Iehobhah, Deanaibh gu moch breitheanas, agus saoraibh an duine sàruichte o làimh an fhìr-shàruchaidh, mu'n téid mo chorr- uich-sa mach mar theine, agus mu'n las i air chor as nach feudar a mùchadh, air son aingidheachd bhur gnìomhara.

13 Feuch, tha mise a'd' aghaidh, O thusa a ta còmhnuidh ann an gleann Shoir, anns a'chòmhnaid', deir an Tighearn; sibhse ta 'g ràdh, Cò thig a nuas 'nar n-aghaidh? no cò thig a steach d'ar n-ionada còmhnuidh?

14 Ach smachdaichidh mise sibh a réir toraidh bhur deanadais, deir an Tighearn; agus lasaidh mi teine 'na coilltibh, agus loisgidh e gach ni mu'n cuairt da.

CAIB. XXII.

1 Earail do thigh an rìgh gu breitheanas agus ceartas a chur an gnìomh. 10 Mu thimchioll Shaluum, 13 Iehoiacim, 20 agus Choniah.

MAR so thubhairt an Tighearn; Falbh sìos gu tigh rìgh Iudah, agus an

sin labhraidh tu am focal so,

2 Agus their thu, Cluinn focal an Tigh-earn, O a rìgh Iudah, a ta a'd' shuidh air rìgh-chaitir Dhaibhidh, thu féin, agus t'oglaich; agus do shluagh a ta dol a steach air na dorsaibh so;

3 Mar so deir an Tighearn; Cuiribh an gnìomh breitheanas agus ceartas, agus saoraibh an duine sàruichte o làimh an fhìr-shàruchaidh: agus na deanaibh foill: na deanaibh ainneart air a' choigreach, air an dilleadhan, air a' bhantraich, ni mò dhòirteas sibh fuil neò-chiontach anns an àite so.

4 Oir ma ni sibh gun amharus a réir an fhocail so, an sin thig a steach air geat- achan an tighe so rìghrean a shuidheas ann an àite Dhaibhidh, air a rìgh-chaitir, a' marcachd air carbadaibh agus air each- aibh, gach aon, 'oglaich, agus a shluagh.

5 Ach mur toir sibh éisdeachd do na briathraibh so, orm féin thug mise mionn- an, deir an Tighearn, Gu cinnteach nithear ionad fàs do'n tigh so.

6 Oir mar so thubhairt an Tighearn a thaobh tighe rìgh Iudah; Tha thu mar Ghilead dhomh-sa, O mhullaich Lebanoin; ach ni mi gu cinnteach fàsach dhiot, bailtean nach bi àitichte.

7 Agus orduichidh mi ann ad aghaidh luchd-millidh, gach aon le 'airmibh; agus gearraidh iad sìos rogha do sheudair, agus tilgidh iad anns an teine iad.

8 Agus gabhaidh mòran chinneach seach- ad air a' chaithir so, agus their iad, gach aon r'a choimhearsnach, C ar son a rinn an Tighearn mar so ris a' chaithir mhòir so?

9 An sin freagraidh iad, A clionn gu'n do thréig iad coimhcheangal an Tighearn an Dia, agus gu'n d'thug iad aoradh do dhiathaibh coimheach, agus gu'n d'rinn iad seirbhis dhoibh.

10 Na guilb air son a' mhairbh, ni mò ni sibh caoidh air a shon: guilb gu goirt air a shon-san a dh'imich air falbh: oir cha phill e ni's mò, agus cha'n fhaic e tuilleadh tìr a dhùchais.

11 Oir mar so deir Iehobhah mu thimchioll Shaluum mhic Iosiah, rìgh Iudah, a rìghich an àite Iosiah 'athar, a chaidh a mach as an àite so, Cha phill e thuige ni's mò.

12 Ach anns an àite gus an d'thug iad air falbh e ann am braighdeanas, gheibh e bàs; agus an tìr so cha'n fhaic e ni's mò.

13 Is ana-aoibhin dha-san a thogas a thigh le h-eucoir, agus 'àrd-sheòmraich- ean le ana-cothrom; a ghabhas saothair a choimhearsnaich a nasgaidh, agus air son 'oibre nach toir dha dioladh.

14 A ta 'g ràdh, Togaidh mi dhomh féin tigh mòr, agus seòmraichean farsuinn; a' gearradh a mach dhà féin mar an

ceudna uinneaga, 'ga chòmhdachadh¹ fos le seudar, agus 'ga dhath le corcur.

15 An rìgh thu a chionn gu bheil thu 'gad dhùnadh féin ann an seudar? nach d'ith agus nach d'òl t'athair, agus nach d'rinn e cothrom agus ceartas? An sin shoirbhich leis.

16 Dhìone cùis a' bhochdagus an fheum-aich; an sin dh'éirich gu maith *dha*. Nach b'e so eòlas a ghabhail ormisa? deir an Tighearn.

17 Ach cha 'n'eil do shùilean-sa agus do chridhe ach air t'ana-mianna féin, agus air fuil nan neòchiontach, a chum a d'òrtadh, agus air sàrachadh agus foirneart, a chum a dheanaimh.

18 Air an aobhar sin, mar so deir an Tighearn mu thimchioll Iehoiacim mhic Iosiah rìgh Iudah, Cha dean iad caoidh air a shon, *ag ràdh*, Och mo bhràthair! no, Och mo phiuthar! Cha dean iad caoidh air a shon, *ag ràdh*, Och a Thighearn! no, Och a ghloir-sa!

19 Le h-adhlacadh asail adhlaisear e, air a tharruing air falbh, agus air a thilgeadh an taobh a mach do gheatachan Ierusalem.

20 Imich suas gu Lebanon agus éigh; agus air Basan tog an àird do ghuth, agus glaoth o na crìochaibh mu'n cuairt, oir chlaoidheadh iadsan uile a thug gràdh dhuit.

21 Labhair mi riut ann an àm do shoirbheachaidh, thubhairt thu, Cha'n éisd mi; b'e so do chleachd o t'òige.

22 A chionn nach d'éisd thu ri m'ghuthsa, ithidh osann suas an t-iomlan do d'aodhairibh, agus imichidh do luchd-gaoil air falbh ann am braighdeanas: gu cinnteach an sin bithidh naire ort, agus còmhdaichear thu le h-amhludh air son t'uile dhroch dheanadas.

23 O thusa ta 'g àiteachadh Lebanoin, a ta deanamh do nid ann an seudaraibh, cia gràs-mhor a bhitheas tu² an uair a ni piantan greim ort, goimh, amhuil mnà ri saothair!

24 Mar is beò mise, deir an Tighearn, ge b'e Coniah mac Iehoiacim rìgh Iudah, am fàinne air mo làimh dheis, gidheadh as a sin dheanainn do spionadh;

25 Agus bheir mi thu do làimh na muinntir a ta 'g iarraidh t'anama, agus do làimh na muinntir roimh am bheil eagal ort, eadhon do làimh Nebuchad-resair rìgh Bhabiloin, agus do làimh nan Caldéach.

26 Agus tilgidh mi mach thu féin, agus do mhàthair a rug thu, gu dùthaich choimhich, far nach robh sibh air 'ur breith, agus an sin gheibh sibh bàs.

27 Agus gus an talamh d'am bu mhiann-

ach leo pilleadh, gu sin cha phill iad.

28 An dealbh suarrach briste an duine so Coniah? no an soitheach e anns nach 'eil aig aon neach tlachd? c'uim am bheil iad air an tilgeadh a mach, e féin agus a shliochd, agus air an iomain gu tìr anns nach 'eil iad eòlach.

29 O thalamh! a thalamh! a thalamh! cluinn focal an Tighearn.

30 Mar so deir an Tighearn, Sgriobhaibh-se am fear so gun chlann, duine nach soirbhich 'na làithibh: oir cha soirbhich duine d' a shliochd, a shuidheas air caithir Dhaibhidh, agus a riaghlas 'na dhéigh so ann an Iudah.

CAIB. XXIII.

1 *Chuir Ieremiah an cèill do na h-aodhairibh aingidh gu'n claoideadh Dia iad air son an deanadais, 3 agus gu'n tionailleadh e fuigheall a threud. 5 Tha Crìosd, am Meanglan fireanach, air a ghealltainn. 9 Breitheanais Dhè an aghaidh nam fàidhean brèige, 33 agus 'nan aghaidh-san a rinn fàid air fàidhean an Tighearn.*

IS an-aobhin do na h-aodhairibh a ta sgrios agus a' sgapadh treud mo chluaine-sa, deir an Tighearn.

2 Air an aobhar sin mar so deir an Tighearn Dia Israeil, a thaobh nan aodhairean a ta 'g ionaltradh mo shluaigh-sa, Sgap sibh mo threud, agus dh'fhuadaich sibh air falbh iad, agus cha deachaidh sibh g'an amharc; feuch, thig mise g'ur n-amharc-sa air son aingidheachd 'ur deanadais, deir an Tighearn.

3 Ach tionailidh mi fuigheall mo threud as gach uile dhùthaich gus an d'fhogair mi iad, agus bheir mi iad air an ais d' am mainniribh³ féin, agus fàsaidh iad torrach agus lìonmhor.

4 Agus togaidh mi suas os an ceann aodhairean a dh'ionaltras iad, air chor as nach li eagal orra tuilleadh, ni mò bhios geilt orra, ni mò bhios iad air an smachd achadh⁴, deir an Tighearn.

5 Feuch, tha na làithean a' teachd, deir an Tighearn, anns an tog mise suas do Dhaibhidh Meanglan fireanach, agus rioghaichidh rìgh, agus soirbhichidh leis; agus cuiridh e an gnìomh breitheanas agus ceartas air an talamh.

6 'Na làithibh-san tèarnar Iudah, agus gabhaidh Israel còmhnuidh ann an tèaruinteachd: agus is e so 'ainm a ghoirear ris, IEOBHAIH AR FIREANTACHD-NE.

7 Air an aobhar so, feuch, tha na làithean a' teachd, deir an Tighearn, anns nach abair iad ni's mò, Mar is beò an Tighearn a thug a nìos clann Israeil á tìr na h-Eiphit.

8 Ach, Mar is beò an Tighearn, a thug a nìos agus a stiùir sliochd tìghe Israeil as an tìr mu thuath, agus as na dùthchann-

¹ chur thairis. ² cia goirt a bhitheas do chaoidh.

³ crò.

⁴ air ionndruinn.

aibh sin uile gus an d'fhuadaich mise iad: a chum gu'n gabhadh iad còmhnuidh 'nam fearann féin.

9 A thaobh nam fàidhean. Tha mo chridhe briste an taobh a stigh dhìom; tha mo chnàmh gu léir air ghluasad; is cosmhuil mi ri fear air mhisg; is ionnan mi 's duine air an d'fhuair fion làmh-an-uachdar, air son an Tighearn, agus air son bhriathran a naomhachd.

10 Oir tha am fearann làn do luchd-adhaltrais: oir air son mhionnan tha 'n tìr a' caoidh: tha ionadan aoibhin an fhàsaich air tiormachadh suas: tha an siubhal mar an ceudna olc, agus an neart eucorach.

11 Oir tha am fàidh agus an sagart aràon ain-diadhaidh; eadhon ann am theach¹ féin fhuair mi an aingidheachd, deir an Tighearn.

12 Uime sin bithidh an slighe dhoibh mar ionada sleamhainn ann an dorchadas; ionainear iad air an aghaidh, agus tuitidh iad ann: gu cinnteach bheir mise dòrainn orra, bliadhna an smachdachaidh, deir an Tighearn.

13 Amhuil a chunnaic mi ann am fàidhean Shamaria amaideachd; rinn iad fàistneachd ann an ainm Bhaail, agus thug iad air mo shluagh Israel dol air seacharan:

14 Mar sin ann am fàidhean Ierusalem chunnaic mi uamharrachd: tha iad a' deanamh adhaltrais, agus ag imeachd ann am breugaibh: tha iad a' neartachadh mar an ceudna làmhnan nan aingidh, air chor as nach 'eil aon neach a' pillleadh o 'aingidheachd: tha iad, an t-ionmhu diubh, dhomhsa mar Shodom, agus a luchd-àiteachaidh mar Ghomorah.

15 Air an aobhar sin mar so deir Tighearn nan sluagh mu thimchioll nam fàidhean; Feuch, bheir mise dhoibh searbh-luibhean r'an itheadh, agus uisge domblasda r'a òl; oir o fhàidhean Ierusalem tha ain-diadhachd air dol a mach air feadh na tìre gu h-ionmhu.

16 Mar so deir Tighearn nan sluagh, Na h-éisdibh ri briathraibh nam fàidhean, a ta ri fàistneachd dhuibh; tha iad 'g'ur mealladh le nithibh faoine; tha iad a' labhairt fiosachd an cridhe féin, agus cha'n ann o bheul an Tighearn;

17 Ag ràdh an còmhnuidh ris a' mluinntir a ta deanamh di-meas air focal an Tighearna, Bithidh sìth agaibh; agus am feadh a ta gach aon ag imeachd a réir ana-mianna a chridhe féin, tha iad ag ràdh, Cha tig olc air bith oirbh.

18 Oir cò sheas ann an comhairle dhiomhair an Tighearn, agus a chunnaic, agus a chual a chùis? no cò dh'èisd agus

a chual a fhocal?

19 Feuch, chaidh cuairt-ghaath mach o'n Tighearn le boire, eadhon cuairt-ghaath ro dhian; air ceann nan aingidh tuitidh i gu h-uamhasach.

20 Cha phill corruich an Tighearn air a h-ais, gus an cuir e 'n gnìomh, agus gus an còmhla e rùn a chridhe: anns na làithibh deireannach bheir sibh so fa'near le làn-aire.

21 Cha do chuir mise na fàidhean so a mach, gidheadh ruith iad: cha do labhair mi riu, gidheadh rinn iad fàistneachd.

22 Ach nam biodh iad air seasamh ann am chomhairle-sa, an sin bheireadh iad air mo shluagh mo bhriathran éisdeachd, an sin bheireadh iad orra pilleadh o'n slighe, agus o aingidheachd an deanad-ais.

23 An Dia dlùth do làimh mise, deir an Tighearn? agus nach Dia mi am fad as?

24 Am feud neach air bith e féin fhòlach ann an ionadaibh diomhair, air chor as nach faic mise e? deir an Tighearn. Nach 'eile mise a' lionadh nan néamhan agus na talmhainn? deir an Tighearn.

25 Chuala mise ciod a thubhairt na fàidhean, a ta fàistneachd bhreug ann am ainm-sa, ag ràdh, Chunnaic mi aisling, chunnaic mi aisling.

26 Cia fhad a bhios so an cridhe nam fàidhean a ta ri fàistneachd bhreug? seadh fàidhean ceilge an cridhe féin:

27 Aig am bheil rùn a thoirt air mo shluagh-sa m'ainm a leigil air dì-chuimhne, le 'n aislingibh a ta iad ag innseadh, gach aon d'a choimhearsnach, amhuil a rinn an aithrichean m'ainm a leigil air dì-chuimhne, air son Bhaail.

28 Am fàidh aig am bheil aisling, innseadh e 'aisling; ach esan aig am bheil m' fhocal-sa, labhradh e m' fhocal gu dlèas: ciod e am moll do'n chruithneachd? deir an Tighearn.

29 Nach ionann m'fhocal-sa agus teine? deir an Tighearn; agus nach ionann e agus ord a bhriseas a' chreag 'na bloighdibh?

30 Uime sin, feuch, tha mise an aghaidh nam fàidhean, deir an Tighearn, a ta goid mo bhriathran-sa, gach aon o 'choimhearsnach.

31 Feuch, tha mise an aghaidh nam fàidhean, deir an Tighearn, a ta gnàthachadh an teangaidh féin, agus ag ràdh, Labhair esan e.

32 Feuch tha mise an aghaidh na muinntir a ta fàistneachadh aislingean bréige, deir an Tighearn, agus a ta 'gan innseadh, agus a' toirt air mo shluagh-sa dol air seacharan le 'm breugaibh agus le 'm briathraibh faoine; gidheadh cha do

¹ thigh.

² seach an cruithneachd.

chuir mise a mach iad, nì mò thug mi àithne dhoibh; air an aobhar sin cha dean iad, air aon chor, tairbhe do'n t-sluagh so, deir an Tighearn.

33 Agus an uair a dh'fheòruicheas an sluagh so, no fàidh, no sagart, diot, ag ràdh, Ciod e focal cudthroniach an Tighearn? an sin their thusa riu, Is sibhse an cudthrom, agus tilgidh mise dhìom sibh, deir an Tighearn.

34 Agus am fàidh, agus an sagart, agus an sluagh, a their, Focal cudthromach an Tighearna, bheir eadhon mise peanas air an duine sin agus air a theaghlach.

35 Mar so their sibh, gach aon r'a choimhearsnach, agus gach aon r'a bhàthair, Ciod a fhreagair an Tighearn? agus, Ciod a labhair an Tighearn?

36 Agus air focal cudthromach an Tighearna cha toir sibh luadh nì's mò; oir is cudthrom do gach aon a bhriathra féin: oir chlaon sibh briathran an Dé bheò, Tighearna nan sluagh, ar Dé-ne.

37 Mar so their thu ris an fhàidh, Ciod am freagradh a thug an Tighearn dhuit? agus, Ciod a labhair an Tighearn?

38 Ach ma their sibh, Focal cudthromach an Tighearn: uime sin, mar so deir an Tighearn, A chionn gu bheil sibh ag ràdh an fhocail so, Focal cudthromach an Tighearna, ged chuir mise fios thug-aibh, ag ràdh, Cha'n abair sibh Focal cudthromach an Tighearn;

39 Uime sin, feuch, togaidh mise sibhse mar-chudthrom, agus tilgidh mi air falbh, araon sibh féin agus a' chaithir so, a thug mi dhuibh-se, agus do'ur n-aithrichibh, a mach as mo làthair:

40 Agus bheir mi oirbh masladh siorruidh, agus nàire bhith-bhuan, nach leigear gu bràth air dì-chuimhne.

CAIB. XXIV.

1 Le samladh fhègan maithe agus olca chuir am fàidh an cèill gu'n gabhadh Dia ris na dh'fhalbh ann am bruid do Iudah: 8 agus gu'n tugadh e thairis Sedeciah agus a shluagh gu bhì 'nan cùis-fhanaid do na cinich.

DH'FHOILLSICH an Tighearn dhomh, agus, feuch, dà chliabh¹ fhègan air an cur fa chomhair teampuill an Tighearn, an deigh do Nebuchadresar rìgh Bhabiloin, Ieconiah mac Iehoiacim rìgh Iudah, agus maithean Iudah, agus an luchd-ealainn², agus na h-airm-cheaird, a thoirt air falbh ann am braigheanas o Ierusalem, agus an toirt leis gu Babilon: 2 Ann an aon chliabh bha fègan ro mhaith, mar na fègan a bhios an toiseach abuich: agus anns a' chliabh eile fègan ro olc, nach feudta itheadh aig an olcas.

3 An sin thubhairt an Tighearn rium, Ciod a tha thu faicinn, a Ieremiah? agus thubhairt mise, Fègan: na fègan maithe ro mhaith; agus na droch fhègan ro olc, air chor as nach feudar an itheadh aig an olcas.

4 An sin thàinig focal an Tighearn a m' ionnsuidh, ag ràdh,

5 Mar so deir an Tighearn, Dia Israeil, Amhuil na fègan maithe so, mar sin gabhaidh mise ris na dh'fhalbh ann am bruid do Iudah, a chuir mi mach as an àite so gu tìr nan Caldéach, a chum an leas.

6 Oir cuiridh mi mo shùilean orra chum maith, agus bheir mi iad air an ais do'n tìr so; agus togaidh mi iad, agus cha tilg mi sìos; agus suidhichidh mi iad, agus cha spòin mi à bun.

7 Agus bheir mi dhoibh cridhe gu m'aithneachadh, gur mi an Tighearn; agus bithidh iad dhomhsa 'nan sluagh, agus bithidh mise dhoibhsan a'm' Dhia; oir pillidh iad a m' ionnsuidh le 'n uile chridhe.

8 Agus amhuil na droch fhègan, nach feudar itheadh aig an olcas, (mar so gu deimhin deir an Tighearn,) mar sin bheir mi thairis Sedeciah rìgh Iudah, agus 'uachdarain, agus am fuigheall do Ierusalem, a dh'fhanas anns an tìr so, agus iadsan a ta chòmhnuidh ann am fearann na h-Eiphit;

9 Bheir eadhon mise thairis iad gu bhì air an luasgadh air feadh uile rìghachdan an domhain, a chum an aimhleis; gu bhì 'nan cùis-fhanaid, agus 'nan gnàth-fhocal, agus 'nam ball-magaidh, agus 'nam mallachadh, anns na h-uile àite gus am fogair mi iad.

10 Agus cuiridh mi an claidheamh, a' ghort agus a' phlàigh 'nam measg, gus an caithear iad bhàrr an fhearainn, a thug mise dhoibh féin agus do'n aithrichibh.

CAIB. XXV.

1 Roimh-innis Ieremiah braighdeanas nan deich agus trifeachd bliadhna; 12 agus léir-sgrìos Bhabiloin 'nuair a choimhlonar no làithean sin. 15 Le samladh cuaiche fiona chuir am fàidh an cèill sgrìos mhòran chinneach.

AM focal a thàinig a dh'ionnsuidh Ieremiah mu thimchioll uile shluaigh Iudah, ann an ceathramh bliadhna, Iehoiacim mhic Iosiah rìgh Iudah; b'i sin ceud bliadhna Nebuchadresar rìgh Bhabiloin:

2 A labhair Ieremiah am fàidh ri uile shluaigh Iudah, agus ri uile luchd-àiteachaidh Ierusalem, ag ràdh,

3 O theas bliadhna deug Iosiah mhic Amoin rìgh Iudah, eadhon gus an là an diugh, (is i so an treas bliadhna fichead,)

¹ bhascaid.

² na saoir.

thàinig focal an Tighearn a m' ionnsuidh-sa, agus labhair mi ruibh-sa, ag éirigh gu moch agus a' labhairt; ach cha d'éisd sibh.

4 Agus chuir an Tighearn do 'ur n-ionnsuidh uile sheirbhisich na fàidhean, ag éirigh gu moch agus 'gan cur a mach; ach cha d'éisd sibhse, agus ni mò dh'aom sibh 'ur cluas gu éisdeachd.

5 Thubhairt iadsan, Pillibh air 'ur n-ais a nis, gach aon o' dhroch shlighe, agus o olcas a dheanadais, agus gabhaibh comh-nuidh anns an fhearann a thug an Tighearn dhuibh, agus do 'ur n-aithrichibh o linn gu linn.

6 Agus na rachaibh an déigh dhée coimheach, gu seirbhis a dheanamh dluibh, agus gu aoradh a thoirt doibh, agus na brosnuichibh mise gu corruich le obair 'ur làmh; agus cha dean mi ole oirbh.

7 Gidheadh cha d'éisd sibh riumsa, deir an Tighearn; a chum gu'm brosnuicheadh sibh mi gu corruich le obair 'ur làmh, a chum 'ur n-aimh leis féin.

8 Uime sin mar so deir Tighearn nan sluagh, A chionn nach d'éisd sibh ri mo bhriathraibh-sa.

9 Feuch, cuiridh mi fios, agus bheir mi leam uile mhuinntir na h-àirde tuath, deir an Tighearn, agus Nebuchadresar rìgh Bhabiloin m'òglach, agus bheir mi iad an aghaidh na tìre so, agus an aghaidh a luchd-àiteachaidh, agus an aghaidh nan cinneach so uile mu'n cuairt, agus sgriosaidh mi gu tur iad, agus ni mi iad 'nan uamhas, agus 'nan sgeig, agus 'nam fàsach gu bràth.

10 Os bàrr, bheir mi uatha guth a' ghairdeachais agus guth an aoibhneis, guth an fhir nuadh-phòsda, agus guth na mnà nuadh-phòsda, fìaim nan clachamullinn, agus solus na coinnle.

11 Agus bithidh am fearann so uile 'na fhàsach, agus 'na uamhas; agus ni na cinnich so seirbhis do rìgh Bhabiloin deich agus trì fichead bliadhna.

12 Agus tarlaidh, 'nuair a choimhlionar deich agus trì fichead bliadhna, gu'n smachdaich mise rìgh Bhabiloin, agus an cinneach sin, deir an Tighearn, air son an aingidheachd, agus fearann nan Caldéach, agus ni mi e 'na fhàsach gu bràth.

13 Agus bheir mi air an fhearann sin m' uile bhriathran a labhair mi 'na aghaidh, gach ni tha sgriobhta san leabhar so, a rinn Jeremiah fhàistneachd an aghaidh nan uile chinneach.

14 Oir ni mòran chinneach, agus rìgh-rean mòra, seirbhis a ghabhail dhiubhsan mar an ceudna: agus diolaidh mise riu a réir an gnìomhara, agus a réir oibre an làmh féin.

15 Oir mar so tha an Tighearn Dia Israel

ag ràdh rium, Gabh cuach fhìona na fraoich feirge so as mo làimh-sa, agus thoir r'a h-òl i do na h-uile chimich gus an cuir mise thu;

16 Agus òlaidh iad, agus bithidh iad air bhall-chrith, agus air chuthach, leis a' chlaidheamh a chuireas mise 'nam measg.

17 An sin ghlac mi a' chuach á làimh an Tighearn, agus thug mi r'a h-òl i do na h-uile chinneach gus an do chuir an Tighearn mi;

18 Do Ierusalem, agus do bhailtibh Iudah, agus d'a rìghribh, agus d'a h-uachd-aranaibh, a chum an deanamh 'nan nochd-laraich, 'nan uamhas, 'nan sgeig, agus 'nam mallachadh, mar air an là 'n diugh:

19 Do Pharaoh rìgh na h-Eiphit, agus d'a òglachaibh, agus d'a uachdaranuibh, agus d'a uile shluagh;

20 Agus do gach uile shluagh eile tha measg a chéile, agus do uile rìghribh fearainn Uis, agus do uile rìghribh fearainn nam Philisteach, agus do Ascelon, agus do Ghasah, agus do Ecron, agus do fhuigheall Asdoid;

21 Do Edom, agus do Mhoab, agus do chloinn Amoin;

22 Agus do uile rìghribh Thiruis, agus do uile rìghribh Shidoìn, agus do rìghribh nan crìochan a ta 'n taobh thall do 'n fhainge;

23 Do Dhedan, agus do Thema, agus do Bhus, agus do na h-uile a ta anns na cearnaibh iomallach;

24 Agus do uile rìghribh Arabia, agus do uile rìghribh an t-sluaigh mheasgta ta chòmhnuidh anns an fhàsach;

25 Agus do uile rìghribh Shimri, agus do uile rìghribh Elaim, agus do uile rìghribh Mhedia;

26 Agus do uile rìghribh na h-àirde tuath, am fad agus am fagus, gach aon le chéile, agus do uile rìoghachdaibh an domhain, a ta air aghaidh na talmhainn: agus òlaidh rìgh Shesaich 'nan déigh so.

27 Agus their thu riu, Mar so tha an Tighearn Dia nan sluagh, Dia Israel, ag ràdh, Olaidh, agus bithidh air mhisg, agus sgeithibh, agus tuitibh agus na h-éiribh nì's mò roimh 'n chlaidheamh a chuireas mise 'nur measg.

28 Agus tarlaidh, ma dhiùltas iad a' chuach a ghabhail as do làimh, gu òl, an sin gu'n abair thu riu, Mar so deir Tighearn nan sluagh, Olaidh sibh gu deimhin.

29 Oir feuch, 'air a' chaithir a ta air a h-ainmeachadh air m'ainm, oirre sin tha mise tionnsgnadh air ole a thabhairt, agus am feud sibhse dol as gu glan-shaor o pheanas? cha téid sibh as: oir gairmidh mise claidheamh air uile luchd-àiteachaidh na talmhainn, deir Tighearn nan sluagh.

30 Air an aobhar sin labhair thusa 'nan aghaidh na briathran faistneachd so air

fad, agus abair riu, Beucaidh an Tighearn o'ionad àrd, agus o ionad còmh-nuidh a naomhachd cuiridh e mach a ghuth; beucaidh e gu cumhachdach an aghaidh ionaid a thàimh; togaidh e iol-ach, mar [iolaich] luchd-bruthaidh nam fion dearc, an aghaidh uile luchd-àiteachaidh na talmhainn.

31 Thig toirm gu iomallaibh na talmhainn, a chionn gu bheil comh-strì aig Dia ris na cinnich; tagraidh e ris na h-uile fheoil; bheir e 'n dream a ta olc do'n chlàidheamh, deir an Tighearn.

32 Mar so tha Tighearn nan sluagh ag ràdh, Feuch, théid olc a mach o chinn-each gu cinneach, agus dùisgear suas ioma-ghaoth mhòr o chrìochaibh na talmhainn.

33 Agus bithidh iadsan a uharbhar leis an Tighearn san là sin, o aon iomall na talmhainn eadhon gu iomall eile na talmhainn; cha chaidhear iad, ni mò chruinnichear iad, ni mò dh'adhlaicear iad; 'nan aolach air aghaidh na talmhainn bithidh iad.

34 Togaibh gaòir bhròin, a bhuachaill-ean, agus éighibh, agus aornaganaibh sibh féin, [ann an luathre,] sibhse a 's urram-aiche do'n treud, a chionn gu bheil làith-ean bhur marbhaidh agus bhur sgapaiddh air an coimhlionadh; agus tuitidh sibh mar shoitheach luachmhor.

35 Agus cha bhi seòl-theichidh aig na buachaillibh, no dol as aig maithean an treud.

36 Guth caoidh nam buachaill-ean, agus nuallan mhaithean an treud: oir mhill an Tighearn an cluain-ionaltraidh.

37 Mhilleadh fòs ionada-còmhnuidh na sìthe¹ le dian-chorruich an Tighearna.

38 Thréig e, mar leòmhnan, a gharradh; oir rinneadh an cuid fearann fàs, troimh corruich a' mhillteir, agus troimh dian-theas 'fheirge.

CAIB. XXVI.

1 Chomhairlich Ieremiah do'n t-sluagh an aingidh-eachd a thréigsinn: 8 Ghlac na sagairt agus an sluagh e chum a chur gu bàs air son nan nìthe a labhair e riu. 12 Thagair e chùis féin. 16 Leig an sluagh as e.

ANN an toiseach linn Iehoiacim, mhic Iosiah rìgh Iudah, thàinig am focal so o 'n Tighearn, ag ràdh,

2 Mar so tha an Tighearn ag ràdh, Seas ann an cùirt tìghe an Tighearn, agus labhair ri uile bhailtibh Iudah, a ta teachd a dheanamh aoraidh ann an tìgh an Tighearna, na h-uile bhriathrau a dh'àithneas mise dhuit a labhairt riu; na lughdaich focal;

3 A dh'fheuchainn an éisd iad, agus am pill iad, gach aon o 'dhroch shlighe, chum

gu'n gabh mise aithreachas do'n olc a th'ann am rùn a thoirt orra air son aingidheachd an gnìomhara.

4 Agus their thu riu, Mar so tha an Tighearn ag ràdh, Mur éisd sibh riumsa, gu siubhal ann am reachd, a chuir mi fa 'r comhair,

5 Gu éisdeachd a thoirt do bhriathraibh mo sheirbhiseach na fàidhean, a chuir mi thugaibh, araon ag éirigh gu moch agus 'g an cur a mach, (ged nach d'éisd sibhse;)

6 An sin ni mise an tìgh so cosmhuil ri Siloh, agus ni mi a' chaithir so 'na mall-achadh do uile chinnich na talmhainn.

7 Agus chuala na sagairt, agus na fàidhean, agus an sluagh uile, Ieremiah a' labhairt nam briathra so ann an tìgh an Tighearn.

8 A nis tharladh, air do Ieremiah sgur do labhairt nan uile nìthe a dh'àithn an Tighearn dha a labhairt ris an t-sluagh uile, gu'n do ghlac na sagairt, agus na fàidhean, agus an sluagh uile e, ag ràdh, Cuirear gu deimhin gu bàs thu.

9 C'ar son a rinn thu fàistneachd ann an ainm an Tighearn, ag ràdh, Bithidh an tìgh so cosmhuil ri Siloh, agus cuirear a' chaithir so fàs gun aon 'ga h-àiteachadh? Agus chruinnicheadh an sluagh air fad an aghaidh Ieremiah, ann an tìgh an Tighearna.

10 'Nuair a chuala maithean Iudah na nìthe so, an sin thàinig iad a nìos o thigh an rìgh, gu tìgh an Tighearn, agus shuidh iad ann an dol a steach a' gheata nuaidh aig tìgh an Tighearn.

11 An sin labhair na sagairt, agus na fàidhean ris na maithibh, agus ris an t-sluagh gu léir, ag ràdh, Is airidh an duine so air bàs, oir rinn e fàistneachd an aghaidh na caitheach so, mar a chuala sibh le 'r clusaibh.

12 An sin labhair Ieremiah ris na maithibh uile, agus ris an t-sluagh gu h-iomlan, ag ràdh, Chuir an Tighearn misc gu labhairn ann am fàistneachd an aghaidh an tìghe so, agus an aghaidh na caitheach so, na h-uile bhriathra sin a chuala sibh.

13 Uime sin a nis leasaichibh 'ur slighe agus 'ur deanadas, agus thugaibh géill do ghuth an Tighearna bhur Dé; agus gabhaidh an Tighearn aithreachas do'n olc a labhair e 'nur n-aghaidh.

14 Air mo shon-sa, feuch, tha mi 'nur làimh; deanaibh rium mar a chithear maith agus ceart duibh.

15 Ach biodh gu cinnteach fios agaibh, ma chuireas sibh gu bàs mise, gu'n tarruing sibh fuil neo-chiontach oirbh féin, agus air a' chaithir so, agus air a luchd-àiteachaidh: oir gu fìrinneach chuir an Tighearn mise thugaibh, gus na briathran so uile a labhair 'nur clusaibh.

¹ na h-ionada-còmhnuidh suaimhneach.

16 An sin thubhairt na maithean, agus an sluagh uile ris na sagartaibh, agus ris na fàidhibh, Cha 'n airidh an duine so air bàs, oir ann an ainm an Tighearn ar Dé labhair e ruinn.

17 An sin sheas cuid do sheanairibh na tìre suas, agus labhair iad ri uile choimhthional an t-sluaigh, ag ràdh,

18 Rinn Micah am Morastach fàistneachd ann an làithibh Hesechiah rìgh Iudah, agus labhair e ri uile shluaigh Iudah, ag ràdh, Mar so deir Tighearn nan sluagh, Bithidh Sion mar mbachair air a treabhadh, agus bithidh Ierusalem 'na carnaibh, agus sliabh an tighe mar ionadaibh àrda na fridhe.

19 An d'thug Hesechiah rìgh Iudah, agus Iudah uile thairis gu bàs e? nach robh eagal an Tighearn air, agus nach d' iarr e an Tighearn, agus ghabh an Tighearn aithreachas do'n olc a labhair e 'nan aghaidh? Ach sinne, tha sinn a' deanamh aimhleis mhòir an aghaidh ar n-anama féin.

20 Agus bha fòs duine ann a rinn fàistneachd ann an ainm an Tighearn, Uriah mac Shemariah, o Chireat-earim, a rinn fàistneachd an aghaidh na caithreach so, agus an aghaidh na tìre so, a réir uile bhriathran Ieremiah :

21 Agus an uair a chuala Iehoiacim an rìgh, agus a dhaoine cumhachdach uile, agus na maithean uile, a bhriathran, dh'iarr an rìgh a chur gu bàs; agus chuala Uriah sin, agus bha eagal air, agus theich e, agus dh'imich e do'n Eiphit :

22 Agus chuir an rìgh Iehoiacim daoine Eipliteach, Elnatan mac Achboir, agus iadsan a bha leis, do'n Eiphit ;

23 Agus thug iad Uriah a mach as an Eiphit, agus thug iad e chum an rìgh Iehoiacim, a mharbh e leis a' chlaidheamh, agus a thilg a chorp ann an uaignean nan daoine coitichionn.

24 Gidheadh bha làmh Ahicaim mhic Shaphain le Ieremiah, chum nach biodh e air a thoirt thairis do làimh an t-sluaigh, gu 'chur gu bàs.

CAIB. XXVII.

1 *Tha Ieremiah a' fàistneachd gu'm buadhaicheadh Nebuchadresar air na rìghrean a bha mu'n cuairt da.* 9 Chomhairlich e dhoibh géill do rìgh Bhabiloin. 12 Thug e a' chomhairle cheudna do Shedeciah.

ANN an toiseach linn Iehoiacim mhic Iosiah rìgh Iudah, thàinig am focal so gu Ieremiah o'n Tighearn, ag ràdh,

2 Mar so tha an Tighearn ag ràdh rium, Dean dhuìt féin boinn agus cuingeann, agus cuir iad air do mhuineal;

3 Agus cuir iad gu rìgh Edoim, agus gu rìgh Mhoab, agus gu rìgh nan Amonach, agus gu rìgh Thiruis, agus gu rìgh Shuidoin, le làimh nan teachdairean a ta a'

teachd gu Ierusalem, a chum Shedeciah rìgh Iudah :

4 Agus àithn doibh a ràdh ri 'n tighearnaibh, Mar so tha Tighearn nan sluagh, Dia Israeil, ag ràdh, Mar so their sibh ri 'ur tighearnaibh ;

5 Rinn mise an talamh; an duine agus an t-ainmhidh a ta air aghaidh na talmhainn, le mo mhòr-chumhachd, agus le m' ghairdean sìnte mach; agus cò air bith do 'm facas iomchuidh leam a thabhairt, dha-san thug mi e.

6 Agus a nis thug mi na dùthchanna so uile do làimh Nebuchadresar rìgh Bhabiloin, m' òglaich; agus beathaichean na macharach fòs thug mi dha, gu frithcaladh dha.

7 Agus bheir na h-uile chinnich géill dhàsan, agus d' a mhac, agus do mhac a mhic, gus an tig àm a dhùthcha féin: an sin bheir iomadh cinneach, agus rìghrean mòra air-san gu'n toir e géill doibh.

8 Agus tarlaidh, an cinneach no an rioghachd nach toir géill do Nebuchadresar so rìgh Bhabiloin, agus nach cuir am muineal fo chuing rìgh Bhabiloin; le claidheamh, agus le gort, agus le plàigh smachdaichidh mise an cinneach sin, deir an Tighearn, gus an sgrìos mi iad gu tur le 'làimh-san.

9 Uime sin na h-éisdibh-sa ri 'ur fàidhean, no ri 'ur fiosaichean, no ri 'ur brudaraichean, no ri 'ur speuradairean, no ri 'ur druidhean, a ta labhairt ruibh, ag ràdh, Cha toir sibh géill do rìgh Bhabiloin :

10 Oir tha iad a' fàistneachd bréige dhuibh, a chum 'ur n-atharrachadh fad o 'ur fearann féin, agus a chum gu fòg-rainn-sa mach sibh, agus gu'n rachadh sibh am mugha.

11 Ach an cinneach sin a chuireas an amhach fo chuing rìgh Bhabiloin, agus a bheir dha ùmhachd, leigidh mise dhoibh siu fuircach 'nam fearann féin, agus treabhaidh iad e, agus gabhaidh iad còmhnuidh ann.

12 Agus labhair mise ri Sedeciah rìgh Iudah, a réir nam briathran so air fad, ag ràdh, Cuiribh 'ur n-amhacha fo chuing rìgh Bhabiloin, agus thugaibh dha ùmhachd, dha féin, agus d'a shluaigh, agus mairibh beò.

13 C'ar son a bhàsaicheas sibh, thu féin agus do shluaigh, leis a' chlaidheamh, leis a' ghort, agus leis a' phlàigh, mar a labhair Dia an aghaidh a' chinnich nach toir géill do rìgh Bhabiloin?

14 Uime sin na h-éisdibh ri briathraibh nam fàidhean a ta labhairt ruibh, ag ràdh, Cha toir sibh ùmhachd do rìgh Bhabiloin: oir tha iad a' fàistneachd bréige dhuibh.

15 Oir cha do chuir mise a mach iad,

deir an Tighearn, gidheadh tha iad a' fàisteachd bhréig ann am ainm, a chum gu fograinn sibhse mach, agus gu rachadh sibh am mugha; sibh féin agus na fàidhean a ta ri fàisteachd dhuibh.

16 Labhair mi cuideachd ris na sagart-aibh, agus ris an t-sluagh so uile, ag ràdh, Mar so deir an Tighearn, Na h-éisdibh ri briathraibh 'ur fàidhean a ta ri fàisteachd dhuibh, ag ràdh, Feuch, bheirear soithichean tighe an Tighearn air an ais o Bhabilon a nis gu h-aithghearr; oir tha iad a' fàisteachd bhréig dhuibh.

17 Na h-éisdibh riu; géillibh do rìgh Bhabilon agus mairibh beò; c'ar son a bhitheadh a' chaithir so air a deanamh 'na fàsach?

18 Ach ma's fàidhean iad, agus ma ta focal an Tighearna maille riu, deanadh iad a nis eadar-ghuidhe ri Tighearn nan sluagh, a chum nach rachadh na soithichean a ta air am fàgail ann an tigh an Tighearn, agus ann an tigh rìgh Iudah, agus ann an Ierusalem, gu Babilon.

19 Oir mar so tha Tighearn nan sluagh ag ràdh, mu thimchioll nam prop, agus mu thimchioll na fairge, agus mu thimchioll nam bonn, agus mu thimchioll na cuid eile do na soithichibh a dh'fhan anns a' chaithir so;

20 Nach d'thug Nebuchadnesar rìgh Bhabiloin leis, an uair a thug e air falbh ann am braighdeanas Ieconiah mac Iehoiaim rìgh Iudah, o Ierusalem gu Babilon, agus uile uaislean Iudah agus Ierusalem;

21 Seadh, mar so deir Tighearn nan sluagh, Dia Israel, mu thimchioll nan soithichean a dh'fhan ann an tigh an Tighearn, agus ann an tigh rìgh Iudah, agus ann an Ierusalem;

22 Gu Babilon bheirear air falbh iad, agus an sin bithidh iad gus an là anns an téid mise g'an amharc, deir an Tighearn: an sin bheir mise a nìos iad, agus aisigidh mi iad a ris do'n àite so.

CAIB. XXVIII.

1 Fàisteachd bhréige Hananiah. 5 Chuir Ieremiah an cèill ciod an dòigh air an aithnichear na fàidhean a chuir Dia a mach. 10 Bhris Hananiah a' chuing bhàrr muineil Ieremiah. 12 Le samhladh chuibhrichean iaruin dhaingnich Ieremiah an fàisteachd a labhair e. 15 Roimh-innis e bàs Hananiah.

AGUS tharladh anns a' bhliadhna sin féin, an toiseach linn Shedeciah rìgh Iudah, anns a' cheathramh bliadhna anns a' chùigeadh mìos, gu'n do labhair Hananiah mac Asuir, am fàidh a bha o Ghibeon, riumsa ann an tigh an Tighearn, an làthair nan sagart, agus an t-sluaigh uile, ag ràdh,

2 Mar so labhair Tighearn nan sluagh, Dia Israel, ag ràdh, Bhri mise cuing rìgh Bhabiloin.

3 An ceann dhà bhliadhna iomlain bheir mise air an ais a chum an àite so uile shoithichean tighe an Tighearn, a thug Nebuchadnesar rìgh Bhabiloin air falbh o'n àite so, agus a ghiùlain e gu Babilon.

4 Agus bheir mi chum an àite so a ris Ieconiah mac Iehoiaim rìgh Iudah, maille ri uile bhraighdibh Iudah, a dh'imich gu Babilon, deir an Tighearn; oir brisidh mise cuing rìgh Bhabiloin.

5 Agus thubhairt am fàidh Ieremiah ris an fhàidh Hananiah, an làthair nan sagart, agus an làthair an uile shluaigh a bha 'nan seasamh ann an tigh an Tighearn.

6 Thubhairt eadhon am fàidh Ieremiah, Amen: gu'n deanadh an Tighearn mar sin; gu'n coimhlionadh an Tighearn do bhriathran a rinn thu fhàisteachd, le soithichean tighe an Tighearn, agus gach nì eile a thugadh air falbh ann am bruid, a thoirt air an ais o Bhabilon a chum an àite so.

7 Gidheadh cluinn thusa a nis am focal so tha mise a' labhairt ann ad éisdeachd, agus ann an éisdeachd an t-sluaigh uile;

8 Na fàidhean a bha romham-sa agus romhad-sa o shean, rinn iad fàisteachd araon a thaobh mhòran dhùthchannan, agus a thaobh rìoghachdan mòra, air cogadh, agus air gort, agus air plàigh.

9 Am fàidh a nì fàisteachd mu shith, 'nuair a thig focal an fhàidh gu crìch, aithnichear gur e an Tighearn gu deinnhin a chuir am fàidh sin a mach.

10 An sin thug am fàidh Hananiah a' chuing bhàrr muineil an fhàidh Ieremiah, agus bhris e i.

11 Agus labhair Hananiah an làthair an t-sluaigh uile, ag ràdh, Mar so deir an Tighearn, Amhuil so brisidh mise cuing Nebuchadnesar rìgh Bhabiloin o mhuineal nan uile chinneach an taobh a stigh do dhà bhliadhna iomlan. Agus dh'fhalbh am fàidh Ieremiah roimhe.

12 Agus thàinig focal an Tighearn gu Ieremiah (an déigh do'n fhàidh Hananiah a' chuing a bhriseadh bhàrr muineil an fhàidh Ieremiah,) ag ràdh,

13 Imich agus labhair ri Hananiah, ag ràdh, Mar so deir an Tighearn, Na cuibhrichean fiodha bhris thu, ach nì thu 'nan àite cuibhrichean iaruin.

14 Oir mar so deir Tighearn nan sluagh, Dia Israel, Cuing iaruin chuir mise air muineal nan cinneach so uile, a chum gu'n tugadh iad géill do Nebuchadnesar rìgh Bhabiloin; agus bheir iad

gèill da; agus beathaichean na màcharach thug mi dha mar an ceudna.

15 An sin thubhairt am fàidh Ieremiah ris an fhàidh Hananiah, Eisd a nis, a Hananiah; Cha do chuir an Tighearn fios leatsa, ach tha thu toirt air an t-sluagh so earbsa a dheanamh á bréig.

16 Uime sin mar so deir an Tighearn, Feuch, tilgidh mise thu bhàrr aghaidh na talmhainn; air a' bhliadhna so gheibh thu bàs, a chionn gu'n do labhair thu ceannairc an aghaidh an Tighearna.

17 Mar sin fhuair am fàidh Hananiah bàs air a' bhliadhna sin féin, anns an t-seachdamh mìos.

CAIB. XXIX.

1 Briathran na litreach a chuir Ieremiah a dh'ionnsuidh an t-sluagh a thugadh air falbh am braighdeanas. 10 Dh'innis e dhoibh gu'm pillcadh iad a ris d'an t-ir féin, 'nuair a choimhlionar deich agus tri fichead bliadhna. 20 Fàistneachd mu thimchioll nam fàidhean bréige: 24 agus mu thimchioll Shemaiah air son nan litrichean a sgrìobh e dh'ionnsuidh an t-sluagh.

ANIS is iad so briathran na litreach a chuir am fàidh Ieremiah o Ierusalem gus a' chuid eile do na seanairibh a thugadh air falbh ann am braighdeanas, agus gus na sagartan, agus gus na fàidhean, agus gus an uile shluagh a thug Nebuchadnesar air falbh ann am braighdeanas o Ierusalem gu Babilon;

2 (An dèigh do Ieconiah an rìgh, agus a' bhan-rìghinn, agus na caillteanaich, agus maithéan Iudah agus Ierusalem, agus an luchd-ealainn, agus na h-àirm-cheaird, imeachd air falbh o Ierusalem;)

3 Le làimh Elasa mhic Shaphain, agus Ghemariah mhic Hilciah, (a chuir Sedeciah rìgh Iudah do Bhabilon, gu Nebuchadnesar rìgh Bhabiloin,) ag radh,

4 Mar so deir Tighearn nan sluagh, Dia Israeil, ris na h-uile a ta air an toirt air falbh ann am braighdeanas, a chuir mise air falbh ann am braighdeanas o Ierusalem gu Babilon,

5 Togaibh tighean, agus gabhaibh còmhnuidh; agus suidhichibh liosan, agus ithibh an toradh:

6 Gabhaibh mathan, agus ginibh mic agus nigheanan; agus gabhaibh mnathan d'ur macaibh, agus thugaibh 'ur nigheana do fhearaibh, a chum gu'm beir iad mic agus nigheanan; a chum gu meudaichear sibh anns an àite sin, agus nach lughaichear sibh.

7 Agus iarraidh sibh na dùthcha gus an do chuir mise air falbh sibh ann am braighdeanas: agus guidhibh air a son ris an Tighearn: oir 'na sith-sa bithidh sith agaibh-sa.

8 Oir mar so deir Tighearn nan sluagh, Dia Israeil, Na meallair sibh leis na fàidhean a ta 'nur measg, agus le 'ur luchd-fiosachd; ni mò dh'èisdeas sibh

ri 'ur brudair a ta sibh a toirt fa'near a bhrudair.

9 Oir tha iad a' fàistneachd bhreug dhuibh ann am ainm-sa; cha do chuir mise a mach iad, deir an Tighearn.

10 Oir mar so deir an Tighearn, An uair a choimhlionar ann am Babilon deich agus tri fichead bliadhna, thig mise gu 'r n-amhar, agus coimhlionaidh mi dhuibh m' fhocal maith, a chum 'ur toirt air 'ur n-ais do'n àite so.

11 Oir is aithne dhomh na smuaintean a smuainich mi do 'ur taobh, deir an Tighearn, smuaintean sìthe, agus cha'n e aimhleas, a thoirt duibh sliochd agus dòchais.

12 An sin gairmidh sibh orm, agus théid sibh agus ni sibh urnuigh rium, agus éisdidh mise ruibh.

13 Agus iarraidh sibh mi, agus gheibh sibh mi, an uair a rannsaicheas sibh air mo shon le 'ur n-uile chridhe.

14 Agus bithidh mise air m' fhaotainn leibh, deir an Tighearn, agus pillidh mi air a h-ais 'ur bruid, agus cruinnichidh mi sibh o na h-uile chinnich, agus o na h-uile àite gus an d'fhògair mi sibh, deir an Tighearn; agus bheir mi sibh a ris a chum an àite o'n do-chuir mi air falbh sibh ann am braighdeanas.

15 A chionn gu'n dubhairt sibh, Thog an Tighearn suas duinn fàidhean ann am Babilon:

16 Mar so deir an Tighearn ris an rìgh a ta 'na shuidhe air caithir Dhaibhidh, agus ris an uile shluagh a ta còmhnuidh anns a bhaile so, agus ri 'ur bràithribh nach deachaidh a mach leibh ann am braighdeanas;

17 Mar so deir Tighearn nan sluagh, Feuch, cuiridh mise orra an claidheamh, a' ghort, agus a' phlàigh, agus ni mi iad mar dhroch fhìgean, nach feudar itheadh aig an olcas.

18 Agus dian-ruaigidh mi iad leis a' chlaidheamh, leis a' ghort, agus leis a' phlàigh; agus bheir mi thairis iad gu bhi air an luasgadh air feadh uile rìoghachdan an domhain, gu bhi 'nam mallachadh, agus 'nan uamhas, agus 'nan sgeig, agus 'nam masladh, am measg nan uile chinn-each gus am fògair mi iad.

19 A chionn nach d' éisd iad ri m' bhriathraibh-sa, deir an Tighearn, 'nuair a chuir mi do'n ionnsuidh m' òglacha na fàidhean, ag éirigh gu moch, agus 'gan cur a mach; ach cha n-éisdeadh sibhse, deir an Tighearn.

20 Cluinnibh uime sin, focal Iehobhah, sibhse uile a ta do'n bhruid, a chuir mise o Ierusalem gu Babilon:

21 Mar so deir Tighearn nan sluagh, Dia Israeil, a thaobh Ahaib mhic Choleaiah, agus Shedeciah mhic Mhaaseiah, a

ta fàistneachd bhréig dhuibh ann am ainm-sa, Feuch, bheir mise thairis iad do láimh Nebuchadresair rìgh Bhabiloìn, agus marbhaidh esan iad fa chomhair 'ur sul;

22 Agus uatha-san togar suas mallach-adh le uile bhraighdibh Iudah a th'ann am Babilon, ag ràdh, Gu'n deanadh an Tighearn thu cosmhuil ri Sedeciah, agus cosmhuil ri Ahab, a ròst rìgh Bhabiloìn anns an teine.

23 Do bhrìgh gu'n do chuir iad an gnìomh aingidheachd ann an Israel, agus gu'n d'rinn iad adbaltras le mnaibh an còimhearsnach, agus gu'n do labhair iad briathran breugach ann am ainm-sa, nach d'àithn mise dhoibh, air am bheil eadhon mise fiosrach agus a'm' fhianuis, deir an Tighearn.

24 Labhraidh tu fòs ri Semaiah an Nehelamach, ag ràdh,

25 Mar so labhair Tighearn nan sluagh, Dia Israeil, ag ràdh, A chionn gu'n do chuir thu litrichean ann ad ainm a chum an uile shluaigh a th'ann Ierusalem, agus a chum Shephaniah mhic Mhaaseiah an sagart, agus a chum nan sagart air fad, ag ràdh,

26 Rinn an Tighearn dhìot-sa sagart ann an àite Iehoiada an t-sagairt, a chum gu'm biodh luchd-riaghailt ann an tìgh an Tighearn, air son gach duine tha air chuthach, agus a' deanamh dheth féin fàidh, a chur anns an tigh-smachdachaidh, agus ann an sàs.

27 Uime sin a nis, c'uime nach do chronuich thu Ieremiah o Anatot, a tha 'ga dheanamh féin 'na fháidh dhuibh?

28 Oir chuir e gun amharus fios thugainne a ta ann am Babilon, ag ràdh, Tha a' bhruid so buan, togaibh tighean, agus gabhaibh comhnuidh, agus suidhichibh liosan, agus ithibh an toradh.

29 [Agus leugh Sephaniah an sagart an litir so ann an cluasaibh Ieremiah an fhàidh.]

30 Uime sin thàinig focal an Tighearna gu Ieremiah, ag ràdh,

31 Cuir fios gu muinntir na bruid air fad, ag ràdh, Mar so labhair an Tighearn a thaobh Shemaiah an Nehelamaich; A chionn gu'n d'rinn Semaiah fàistneachd dhuibh an uair nach do chuir mise mach e, agus gu'n d'thug e oirbh earbsa a dheanamh á bréig:

32 Air an aobhar sin, mar so tha an Tighearn ag ràdh, Feuch, smachdaichidh mise Semaiah an Nehelamach agus a shliochd: cha bhi aige duine ghabhas comhnuidh am measg an t-sluaigh so, ni mò chi e am maith a ni mise air son mo phobuill, deir an Tighearn, a chionn gu'n do labhair e ceannairc an aghaidh an Tighearna.

1 Nochd Dia do Ieremiah gu'n tugadh e air ais bruid a shluaigh; 4 agus gu'n tèarnadh e iad o'n uile àmhgharaibh. 10 Thug am fàidh misneach do Iacob. 23 Tuitidh dòrainn air ceann nan ciontach.

AM focal a thàinig a chum Ieremiah o'n Tighearn, ag ràdh,

2 Mar so labhair an Tighearn Dia Israeil, ag ràdh, Sgrìobh dhuit féin na h-uile bhriathran a labhair mise riut, ann an leabhar.

3 Oir feuch, tha na làithean a' teachd, deir an Tighearn, anns an toir mise air a h-ais bruid mo shluaigh, Israeil agus Iudah, deir an Tighearn, agus bheir mi orra pilltinn a chum an fhearainn a thug mi do'n aithrichibh, agus sealbhaichidh iad e.

4 Agus so na briathran a labhair an Tighearn, mu thimchioll Israeil, agus mu thimchioll Iudah.

5 Oir mar so deir an Tighearn, Guth crìothnachaidh chuala sinn; eagal, agus cha'n e sith.

6 Feòruichibh a nis, agus feuchaibh am beir firionnach leanabh? c'uime am faic mi gach duine agus: a làmhan air a leasraibh, mar mhnai ri saothair, agus tha na h-uile aghaidh air fàs bàn?

7 Mo thruaighe! oir is mòr an là sin, agus cha 'n'eil a choimheas ann: agus is aimsir teanntachd 'i do Iacob; ach tèarnar aisd' e.

8 Oir tarlaidh anns an là sin, deir Tighearn nan sluagh, gu'm bris mise a chuing bhàrr a mhuineil, agus a chuibrichian sgaoilidh mi as a chèile; agus cha ghabh coigrich nì's mò seirbhis deth.

9 Ach bheir iad seirbhis do'n Tighearn an Dia, agus do Dhaibhidh an rìgh, a thogas mise suas doibh.

10 Uime sin na biodh eagal ort, O Iacob, m'òglaich-sa, deir an Tighearn, agus na biodh geilt ort, O Israeil: oir feuch, bheir mise tèaruint thu o chéin, agus do shliochd o thìr an daorsa; agus pillidh Iacob, agus gheibh e fois agus sith, agus cha bhi aon neach a' cur eagal air.

11 Oir tha mise maille riut, deir an Tighearn, chum do thèarnadh: ged bheir mi crìoch iomlan air na h-uile chinnich gus an d'fhògair mi thu, gidheadh cha toir mi crìoch iomlan ortsa: ach smachdaichidh mi thu ann an tomhas, agus cha leig mi as thu gu h-iomlan o pheanas.

12 Oir mar so deir an Tighearn, Is do-leigheas do bhruthadh, is cràiteach do chreuchd.

13 Cha 'n'eil neach ann a ni tagradh air do shon, a chum gu'm biodh tu air do

cheangal suas: iocshlaint chum leigheis cha 'n eil agad.

14 Rinn do leannana gu léir do dhearmad: cha'n 'eil iad 'g a d' iarraidh, oir rinn mise do lot le lot nàmhaid, le smachdachadh garg; a chionn gu'n robh do chionta mòr; do lochdan lionmhor.

15 C'uime an glaoth thu air son t'àmhghair? cha ghabh do bhròn leigheas; a chionn gu'n robh do chionta mòr, do lochdan lionmhor, rinn mise na nithe so ort.

16 Uime sin bithidh iadsan uile a ta ga d' shlugadh, air an slugadh, agus théid do naimhdean uile, gach aon diubh ann am braighdeanas: bithidh iadsan a ta ga d' chreachadh 'nan creich, agus na h-uile a ta deanamh cobhartaich dhìot, bheir mise gu bhi 'nan cobhartach.

17 Oir aisigidh mi slàinte dhuit, agus leighisidh mi do chreuchdan, deir an Tighearn; ge do thubhairt iad riut Diobarach, Sion, ise do nach 'eil aig aon neach suim.

18 Mar so deir an Tighearn, Feuch, bheir mise air a h-ais bruid phàillium Iacoib, agus air 'ionada-còmhnuidh ni mi iochd, agus togar a chaithir air a tòrr féin, agus bithidh an luchair a réir a nòis féin air a daingneachadh.

19 Agus a mach asda thig buidheachas, agus guth na muinntir a ni gàirdeachas; agus ni mise lionmhor iad, agus cha bhi iad tearc; ni mi fòs glòrmhor iad, agus cha bhi iad suarrach.

20 Bithidh a chlann fòs mar roimhe so, agus bithidh a choimhthional air a dhaingneachadh ann am làthair-sa, agus ni mi peanas air gach neach a shàruicheas e.

21 Agus thig 'Uachdaran uaith féin, agus thig 'fhear-riaghlaidh a mach as a mheadhon; agus tairngidh mise e, agus thig e dlùth dhomh: oir cò e so a shocruich a chridhe air teachd am fagus dhomh-sa? deir an Tighearn.

22 Agus bithidh sibhse 'nur sluagh dhomh-sa, agus bithidh mise ann am Dhia dhuibh-se.

23 Feuch, tha cuairt-ghaoth an Tighearn a' dol a mach le corruich; cuairt-ghaoth bhuan, a thuiteas le dòrainn air ceann nan ciontach.

24 Cha phill dian-chorroich an Tighearn air a h-ais, gus an dean, agus gus an coimhlon e run a chridhe: anns na làithibh deireannach bheir sibh so fa' near.

CAIB. XXXI.

1 Gheall Dia gu'n nochdadh e caoimhneas do Israel, 9 agus gu'n treòraicheadh e iad air slighe réidh, 15 Thugadh comhfhurtachd do Rachel 'nuair a bha i a' gul air son a cloinne. 18 Ghabh Ephraim

aithreachas agus phill e a dh'ionnsuidh Dhé. 27 Cùram an Tighearna d'a eaglais.

ANNS an àm sin, deir an Tighearn, bithidh mise ann am Dhia do uile theaghlachaibh Israeil, agus bithidh iadsan dhomh-sa 'nan sluagh.

2 Mar so deir an Tighearn, Fhuair an sluagh a dh'fhàgadh leis a' chlaidheamh, caoimhneas anns an fhàsach; eadhon Israeil, 'nuair a chaidh mise a thoirt fois da.

3 O chein dh'fhoillsicheadh Iehobhah dhomh-sa, ag ràdh, Seadh, le gràdh siorruidh ghràdhaich mi thu; uime sin tharruing mi thu le caoimhneas gràdhach.

4 A ris toigaidh mi thu, agus bithidh tu air do thogail, O òigh Israeil; a ris sgeadaichear thu le d' thiompanaibh, agus théid thu mach ann an dannsa na muinntir a ni aidhear.

5 Suidhichidh tu fathast fion-liosan air sléibhtibh Shamaria; suidhichidh an luchd-suidheachaidh, agus ithidh iad an toradh.

6 Oir thàinig an là, dh'éigh an luchd-faire air sliabh Ephraim; Eiribh, agus rachamaid suas gu Sion, a chum an Tighearn ar Dia.

7 Oir mar so deir an Tighearn, Deanaibh iolach ann an Iacob le h-aobhneas, agus deanaibh luadh-ghair am measg rogha nan cinneach; cuiribh an céill, molaibh, agus abraibh, O Tighearn, saor do shluagh, iarmad Israeil.

8 Feuch, bheir mi iad o'n tìr mu thuath, agus tionailidh mi iad o chriocheibh na talmhainn: an dall agus am bacach maille ri, a' bhean thorrach, maraon agus ise a ta ri saothair; 'nan cuideachd mhòir pillidh iad.

9 Thig iad le gul, agus le caomhalachd ni mise an treòrachadh; treòraichidh mi iad ri taobh nan sruthan uisge, air slighe réidh, far nach faigh iad tuisleadh; oir tha mise ann am athair do Israel; agus Ephraim, is esan mo cheud-ghin.

10 Cluinnibh focal an Tighearn, O chinneacha, agus cuiribh an céill e anns na h-eileanaibh fad as, agus abraibh, Esan a sgap Israel, ni e a chruinneachadh agus a choimhead, mar ni buachaille a threud.

11 Oir shaor an Tighearn Iacob, agus dh'fhuasgail se e o làimh an fhir bu treise na e féin.

12 Uime sin thig iad agus seinnidh iad ann an àirde Shìoin, agus cruinnichidh iad ri chéile chum maithis an Tighearn, air son cruithneachd, agus air son fìona, agus air son olaidh, agus air son àlaich an treud agus na spréidhe: agus bithidh an anam mar ghàradh uisgichte, agus cha dean iad air aon chor bròn ni's mó.

13 An sin ni an òigh gàirdeachas anns an dannsa, na daoine òga, agus na seann daoine le chèile: oir tionndaidhidh mise

am bròn gu h-aobhneas, agus bheir mi dhoibh comhfhurtachd, agus nì mi sòlasach iad an déigh an àmhghair.

14 Agus sàsuidhidh mi anam nan sagart le nithibh blasda, agus bithidh mo shluagh air an sàsuidhadh le mo mhaitheas, deir an Tighearn.

15 Mar so deir an Tighearn, Chualas guth ann an Ramah, caoidh, gul ro ghoirt; Rachel a' gul air son a cloinne; dhiùlt i comlfhurtachd air son a cloinne, a chionn nach 'eil iad ann¹.

16 Mar so deir an Tighearn, Cum do ghuth o chaoidh, agus do shùilean o dheuraibh: oir gheibh do shaothair duais, deir an Tighearn, agus thig iad a ris o thir an nàmhaid.

17 Agus tha dòchas a thaobh do chrìch dheireannaich, deir an Tighearn, gu'n tig² do chlann a ris gu'n crìochaibh féin.

18 Gu deimhin chuala mi Ephraim a' caoidh gu goirt, Smachdaich thu mi, agus bha mi air mo smachdachadh, mar dhamh nach do chleachd a' chuing: pill thusa mi, agus bithidh mi air mo philleadh: oir is tu an Tighearn mo Dhia.

19 Gu deimhin an déigh dhomh bhi air mo philleadh, ghabh mi aithreachas; agus an déigh dhomh bhi air mo theag-asg, bhuail mi air mo léis; bha nàire orm, seadh fòs geur-amhladh, a chionn gu'n do ghiùlain mi masladh m'òige.

20 Nach e Ephraim mo mhac caomh? nach leanabh rò thaitneach e? oir o'n uair a labhair mi 'na aghaidh, tha mi gu dùrachdach 'ga chuimhneachadh fathasd: uime sin tha iomairt ann am chom air a shon: nì mi gu deimhin tròcair air, deir an Tighearn.

21 Cuir suas dhuit féin comharan slighe; dean duit féin cròinàrda: cuir do chridhe ris an t-slighe, an t-slighe air an d'ìmhich thu: pill a ris, O òigh Israeil, pill a ris dh'ionnsuidh do chaithrichean so.

22 Cia fhad a bhios tu a' tionndadh mu'n cuairt, O a nighean chùl-sleamh-nach: oir chruthaich an Tighearn nì nuadh air an talamh, Nì bean fear a chuairteachadh.

23 Mar so deir Tighearn nan sluagh, Dia Israeil, Gnàthaichidh iad fathast a' chainnt so ann am fearann Iudah, agus 'na bhailtibh, an uair a bheir mise air a h-ais am bruid, Gu'm beannaicheadh an Tighearn thu, O àite-còmhnuidh a' chearta-ais, O shléibh na naombachd.

24 Agus ann an Iudal, agus 'na uile bhailtibh, gabhaidh treabhaichean còmh-nuidh, agus luchd-coimhead nan treuda.

25 Oir shàsuidh mise an t-anam tart-mhor, agus gach anam ocrach lion mi.

26 An sin mhosgail, agus chunnaic mi, agus bha mo chodhal taitneach dhomh.

27 Feuch, tha na làithean a' teachd, deir an Tighearn, anns an cuir mise tigh Israeil, agus tigh Iudah le siol duine agus le siol ainmhidh.

28 Agus tarlaidh, amhuil a rinn mise faire os an ceann gu spionadh a nìs, gu briseadh, agus gu tilgeadh sìos, agus gu sgrios, agus gu claoidh; mar sin nì mi faire os an ceann, gu togail, agus gu suidheachadh, deir an Tighearn.

29 Anns na làithibh sin cha'n abair iad nì's mò, Dh'ith na h-aithrichean meas searbh, agus tha déisinn air fìaclaibh na cloinne.

30 Ach gheibh gach aon bàs 'na aingidheachd féin; gach aon a dh'itheas an caorann searbh, air 'fhiacclaibh-san bithidh deisinn.

31 Feuch, tha na làithean a' teachd, deir an Tighearn, anns an dean mise coimh-cheangal nuadh ri tigh Israeil, agus ri tigh Iudah:

32 Cha'n ann a réir a' choimhcheangail a rinn mi r'an aithrichibh, anns an là san do ghlac mi air làimh a' chum an toirt a mach á tir na h-Eiphit; eadhon mo choimhcheangal a bhris iad, ged bha mi a'm' fhear-posda dhoibh, deir an Tighearn:

33 Ach so an coimhcheangal a nì mi ri tigh Israeil; An déigh nan làithean sin, deir an Tighearn, cuiridh mi mo reachd 'nan taobh a stigh, agus sgrìobhaidh mi air an cridheachan e, agus bithidh mise dhoibh-san a'm' Dhia, agus bithidh iad-san dhomh-sa 'nam pobull.

34 Agus cha teagaisg iad nì's mò, gach aon a choimhearsnach, agus gach aon a bhràthair, ag ràdh, Gabhaibh eòlas air an Tighearn; oir bithidh eòlas aca ormsa uile, o'n neach a's lugha, gus an neach a's mò dhiubh, deir an Tighearn: oir maithidh mise an aingidheachd, agus cha chuimhnich mi nì's mò an cionta.

35 Mar so deir an Tighearn, tha toirt na gréine air son soluis an là, orduigh-eau na gealaich agus nan reultan air son soluis anns an oidhche, tha deanamh na faireige ciùin, trà bhios a tuinn a' beucaich; Tighearn nan sluagh is e 'ainm.

36 Ma dh'ìmicheas na h-orduighean so as mo shealladh-sa, deir an Tighearn, an sin cuideachd sguridh slìochd Israeil o bhi 'nan cinneach am feasd ann am làth-air.

37 Marsodeir an Tighearn, Ma dh'fheudar na nàmh shuas a thomhas, agus bun-aite na talmhainn shìos a rannsachadh a mach, an sin tilgidh mise uam mar an

¹ nach maireann iad; nach 'eil iad bed.

² bithidh dòchas aig do shliochd, tha an Tighearn ag ràdh, agus thig.

ceudna uile shliochd Israeil, air son gach ni a rinn iad, deir an Tighearn.

38 Feuch, tha na làithean a' teachd, deir an Tighearn, anns an togar a' chaitbir air son an Tighearn, o thòrr Hanameeil, gu geata na h-oisne.

39 Agus théid an t-sreang-thomhais fathasd a mach m' a coinneamh, thar sliabh Ghareib, agus cuairtichidh i seach Goat.

40 Agus gleann nan corpa marbha gu h-iomlan, agus na luathre, agus na mach-raichean uile gu sruthan Chidroin, gu oisinn geata nan each an taobh an ear, bithidh iad naomh do'n Tighearn: cha spionar a nìos, agus cha tilgear sìos e nì's mò gu bràth.

CAIB. XXXII.

1 'Nuair bha Ieremiah air a dhruideadh suas a' phrìosan le Sedeciah, thug Dia ordugh dha achadh Hanameeil a cheannachadh. 13 Fhuair Baruch earail theann air sgrìobhainnean na ceannachd a ghlèidheadh mar chomhar gu'm pill-eadh an sluagh d'an tìr féin. 16 Urnuigh Ieremiah. 26 Fàistneachd mu thimchioll Israeil agus Iudah.

AM focal a thàinig gu Ieremiah o'n Tighearn anns an deichead bliadhna do linn Shedeciah rìgh Iudah, (b'i sin an t-ochdamh bliadhna-deug do linn Nebuchadnesair:)

2 Anns an àm an robh feuchd rìgh Bhabiloin a' cuairteachadh Ierusalem, agus Ieremiah am fàidh air a dhruideadh suas ann an cùirt a' phrìosain a bha'n tigh rìgh Iudah.

3 Oir dhruid Sedeciah rìgh Iudah suas e, ag ràdh, C'uime am bheil thu ri fàistneachd, agus ag ràdh, Mar so deir an Tighearn, Feuch, bheir mise a' chaitbir so do làimh rìgh Bhabiloin, agus glacadh esan i?

4 Agus cha téid Sedeciah rìgh Iudah as o làimh nan Caldéach, ach bheirear suas e gu deimhin do làimh rìgh Bhabiloin, agus labhraidh e ris, beul ri beul, agus chi a shùilean a shùilean-san.

5 Agus bheir e leis Sedeciah gu Babilon, agus an sin bithidh e gus an tig mise 'ga amharc, deir an Tighearn: ged ghlèachd sibh ris na Caldéich, cha bhuaidhaich sibh.

6 Agus thubhairt Ieremiah, Thàinig focal an Tighearn a m' ionnsuidh, ag ràdh,

7 Feuch, thig Hanameel mac Shalum, bràthar t'athar, do d' ionnsuidh, ag ràdh, Ceannaich dhuit féin m' achadh-sa a ta ann an Anatot, oir is leat còir a fuasglaidh, gus a ceannach.

8 Agus thàinig Hanameel, mac bhràth-

ar m' athar a m' ionnsuidh ann an cùirt a' phrìosain, a réir focal an Tighearn, agus thubhairt e rium, Ceannaich, guidheam ort, m'achadh a ta ann an Anatot ann an dùthaich Bheniamin: oir is leatsa a' chòir-sheilbhe, agus is leatsa a fuasglaidh, ceannaich i dhuit féin: an sin dh'aithnich mi gu'm b'e so focal an Tighearn.

9 Agus cheannaich mi achadh Hanameel, mhic bhràthar m'athar, a bha ann an Anatot, agus thomhais mi dha an t-airgiod, seachd seceile deug airgid.

10 Agus chuir mi mo làmh ris an sgrìobhadh, agus sheulaich mi e, agus ghaòh mi fianuisean, agus thomhais mi an t-airgiod air a' mheigh.

11 Agus ghabh mi dearbhadh a' cheannaich, e sin anns an robh an gnothuch agus na cùmhnantan seulaichte, agus e sin a bha fosgailte.

12 Agus thug mi dearbhadh a' cheannaich do Bharuch mac Neriah, mhic Mhaaseiah, ann an sealladh Hanameel mhic bhràthar m'athar, agus an làthair nam fianuisean, a chuir an làmh ri leabhar a' cheannaich, an làthair nan Iudhach uile bha 'nan suidhe ann an cùirt a' phrìosain.

13 Agus thug mi earail theann do Bharuch 'nan làthair, ag ràdh,

14 Mar so tha Tighearn nan sluagh, Dia Israeil ag ràdh, Gabh na sgrìobhainnean so, sgrìobhadh so na ceannachd, araon e sin a ta seulaichte, agus an sgrìobhadh so a ta fosgailte, agus cuir iad ann an soitheach crìadha, chum gu mair iad mòran làithean.

15 Oir mar so deir Tighearn nan sluagh, Dia Israeil, Sealbhaichear tighean, agus machraichean, agus fion-liosan anns an tìr so fathasd.

16 A nis an uair a thug mi seachd sgrìobhadh na ceannachd do Bharuch mac Neriah, rinn mi urnuigh ris an Tighearn, ag ràdh,

17 Ah, a Thighearna Dhia, feuch, rinn thusa nèamh agus an talamh le d' mhòr chumhachd agus le d' ghlairean sìnte mach, agus cha 'n 'eil ni sam bith tuilleadh 's cruaidh ort.

18 Taisbeanaidh tu caoimhneas gràdhach do mhiltibh, agus dìo'aidh tu aingidheachd nan aithrichean ann an uchd an cloinne 'nan déigh; an Dia mòr, cumhachdach, do'n ainm Tighearn nan sluagh.

19 Mòr ann an comhairle, agus cumhachdach ann an gnìomh, (oir tha do shùilean fosgailte air uile shligheibh chloinn nan daoine, a thoirt do gach aon a réir a shlighe, agus a réir toraidh a ghnìomhara:)

20 A dh'fhoillsich comharan agus mìorbhuilean ann an tìr na h-Eiphit, gus an là

an diugh, agus ann an Israel, agus am measg dhaoine, agus a rinn duit féin ainm, mar air an là 'n diugh;

21 Agus a thug a mach do shluagh Israel a tìr na h-Eiphit le comharaibh, agus le mìorbhuilbh, agus le làimh làidir, agus le gairdean sìnte a mach, agus le h-uamhas mòr;

22 Agus a thug dhoibh am fearann so, a mhionnachadh thu do'n aithrichibh gu'n tugadh tu dhoibh, fearann a' sruthadh le bainne agus le mìl:

23 Agus thàinig iad a steach, agus shealbhaich iad e; ach cha d' thug iad géill do d' ghuth-sa, ni mò ghluais iad ann ad reachd; cha d' rinn iad ni sam bith do na h-uile nitibh a dh'àithn thusa dhoibh a dheanamh; uime sin thug thu an t-olc so uile orra.

24 Feuch na h-innill-bhrisidh, tha iad air teachd a chum na caithreach gus a glacadh, agus tha a' chaithir air a toirt do làimh nan Caldéach a ta cogadh 'na h-aghaidh, air son a' chlaidheimh, agus na gorta, agus na plàighe; agus an ni a labhair thu, thàinig e gu crìch; agus, feuch, tha thusa 'g a fhaicinn.

25 Gidheadh thubhairt thu riumsa, (O Thighearna Dhia,) Ceannaich dhuit féin an t-achadh air son airgid, agus gabh fianuisean: an uair a ta a' chaithir air a toirt thairis do làimh nan Caldéach.

26 An sin thàinig focal an Tighearna gu Jeremiah, ag ràdh,

27 Fench, is mise an Tighearn, Dia na h-uile fheòla: am bheil ni sam bith tuilleadh 's cruaidh ormsa?

28 Uime sin, mar so deir an Tighearn, Feuch, bheir mi a' chaithir so do làimh nan Caldéach, agus do làimh Nebuchadne-sar rìgh Bhabiloin, agus glacadh e i:

29 Agus thig na Caldéich a ta cogadh an aghaidh na caithreach so, agus cuiridh iad teine rithe, agus loisgidh iad i, maille ris na tighibh air an do loisg iad tùis air am mullach do Bhaal, agus air an do dhòirt iad tabhartasa-dìbhe a mach do dhàthaibh eile, chum mise a bhrosnachadh gu feìrg.

30 Oir cha d' rinn clann Israel, agus clann Iudah ach olc a mhàin ann am fhianuis-sa o'n òige: oir cha d' rinn clann Israel ach a mhàin mò bhrosnachadh gu feìrg le obair an làmba; deir an Tighearn.

31 Oir bha a' chaithir so dhomh-sa 'na h-aobhar feìrge agus corruich, o'n là san do thog iad i, eadhon gus an là an diugh; a chum gu'n atharraichinn i as mo shealladh;

32 Air son uile aingidheachd cloinne Israeil, agus cloinne Iudah, a rinn iad a chum mise a bhrosnachadh gu corruich, iad féin, an rìghrean, an uachdarain, an

sagairt, agus am fàidhean, agus muinntir Iudah, agus luchd-àiteachaidh Ierusalem.

33 Agus thionndaidh iad riumsa an cùl, agus cha'n i an aghaidh; ged theagaisg mi iad, ag éirigh gu moch agus a' teagasg, gidheadh cha d' éisd iadsan, a ghabhail teagaisg.

34 Ach shuidhich iad an gràineileachd-an anns an tigh a ta air ainmeachadh ormsa, chum a thruailleadh.

35 Agus thog iad ionadan àrda Bhaail, ta ann an gleann mhic Hinoim, a thoirt air am mic agus air an nigheana dol troimh an teine do Mholoch; ni nach d'àithn mise dhoibh, agus nach d'thàinig idir ann am aire; a' cur an gnìomh na gràineileachd so, gu cionta thoirt air Iudah.

36 Agus a nis uime sin, mar so deir an Tighearn Dia Israeil, a thaobh na caithreach so, mu'm bheil sibhse ag ràdh, Bithidh i air a toirt thairis do làimh rìgh Bhabiloin, leis a' chlaidheamh, agus leis a' ghort, agus leis a' phlàigh:

37 Feuch, tionailidh mise iad as na h-uile dhùthchannaibh gus an d' fhògair mi iad ann am chorrùich, agus ann am bhoile, agus ann am mhòr-fheìrg; agus bheir mi chum an àite so iad a ris, agus bheir mi orra còmhnuidh ghabhail gu tèarainte.

38 Agus bithidh iad dhomh-sa 'nan sluagh, agus bithidh mise dhoibh-san a'm' Dhia.

39 Agus bheir mi dhoibh aon chridhe, agus aon slighe, a chum gu 'm bi m' eagal-sa gu bràth orra, chum an leas féin, agus leas an cloinne 'nan dèigh.

40 Agus ni mi riu còimhcheangal sìorruidh, nach pill mi air falbh uatha, chum maith a dheanamh dhoibh; agus cuiridh mi m' eagal 'nan cridhe, chum nach dealaich iad rium.

41 Seadh, ni mi gairdeachas os an ceann chum maith a dheanamh dhoibh, agus suidhichidh mi iad anns an fhearann so gu deimhin, le m' uile chridhe, agus le m' uile anam.

42 Oir mar so deir an Tighearn, Amhuil a thug mi an t-olc mòr so uile air an t-sluagh so, is amhluidh bheir mi orra am maith sin uile a gheall mi dhoibh.

43 Agus ceannaichidh achaidh anns an fhearann so, mu'm bheil sibhse ag ràdh, Tha e fàs gun duine no ainmhidh: tha e air a thoirt do làimh nan Caldéach.

44 Ceannaichidh daoine achaidh air son airgid, agus cuiridh iad an làmh ri sgrìobh-aìnnibh, agus seulaichidh iad, agus gabhaidh iad fianuisean ann am fearann Bheniamin, agus anns na h-àiteachaibh dlùth do Ierusalem, agus ann am bailtibh Iudah, agus ann am bailtibh nam beann, agus ann am bailtibh a' chòmhnaird, agus ann

am bailtibh na h-àirde deas: oir bheir mise air a h-ais am bruid, deir an Tighearn.

CAIB. XXXIII.

1 *Dhaingnich Dia a ghealladh da na h-Iudhaich gu'm pilleadh iad o'm braigheanas, 10 agus gu'n cluinnear a ris 'nam fearann guth an aoibhneis agus an t-subhachais. 15 Tha Crìosd air a ghealltuinn. 19 Bithidh an coimhcheangal a rinn Dia ri Daibhidh seasmhach gu bràth.*

OS bàrr, thàinig focal an Tighearna gu Jeremiah an dara uair, (an trà bha e fathasd air a dhruideadh suas ann an cùirt a' phrìosain,) ag ràdh,

2 Mar so deir an Tighearn a rinn e, an Tighearn a dhealbha e, a ta fòs 'ga dhaingneachadh; is e 'ainm Iehobhah;

3 Glaoth riumsa, agus freagraidh mi thu, agus feuchaidh mi dhuit nithe mòra agus cumhachdach, air nach 'eil thu eòlach.

4 Oir mar so tha an Tighearn, Dia Israeil, ag ràdh, a thaobh thighean na caithreach so, agus a thaobh thighean rìghrean Iudah, a ta air an tilgeadh sìos leis na h-innill-bhrisidh, agus leis a' chlaidheamh;

5 A ta air teachd gu cogadh air taobh nan Caldeach, agus gu'n lìonadh le corp-aibh marbha nan daoine a bhuail mise ann am fheirg, agus ann am chorruidh, agus a thug orm, air son an uile aingidh-eachd, mo ghnùis fholach o'n chaithir so:

6 Feuch, bheir mi dhi slàinte agus leigheas, agus nì mi an slànuchadh; agus nochdaidh mi dhoibh pailteas sìthe agus fìrinn.

7 Agus bheir mi air a h-ais bruid Iudah, agus bruid Israeil; agus togaidh mi iad mar air tùs.

8 Agus glanaidh mi iad o'n uile aingidh-eachd, leis an do chiontaich iad a'm' aghaidh; agus maithidh mi an uile lochdan, leis an do pheacaidh iad, agus leis an d'rinn iad ceannairc a'm' aghaidh.

9 Agus bithidh a' chaithir so dhomh-sa 'na h-ainm sòlais, 'na moladh, agus 'na maise, am measg uile chinneach na talmhainn, a chluinneas gach uile mhaith a nì mise dhoibh: agus bithidh eagal agus crìth orra, air son an uile mhaithais, agus air son an uile shoirbheachaidh a dheònaicheas mise dhoibh.

10 Mar so deir an Tighearn, a ris cluinnear anns an àite so, (mu 'm bheil sibhse ag ràdh, Tha e fàs gun duine agus gun ainmhidh, eadhon ann an caithriclibh Iudah, agus ann an sràidibh Ierusalem, a ta fàs, gun duine, eadhon gun fhear-àiteachaidh, agus gun ainmhidh,)

11 Guth aoibhneis, agus guth subhachais, guth an fhìr nuadh-phòsda, agus guth na mna nuadh-phòsda; guth na muinntir a their, Molaibh-se Tighearn nan sluagh, oir tha an Tighearn maith, oir tha a

thròcair buan gu sìorruidh; agus na muinntir a bheir an iobairt-mholaidh gu tigh an Tighearn: oir bheir mise air a h-ais bruid an fhearainn, mar air tùs, deir an Tighearn.

12 Mar so deir Tighearn nan sluagh, Fathasd anns an àite so a ta fàs, gun duine agus gun ainmhidh, agus 'na uile bhailtibh, bithidh àite-còmhnuidh nam buachaillean a' toirt air an treudan luidhe sìos.

13 Ann am bailtibh nam beann, agus ann am bailtibh a' chòmhnaidh, agus ann am bailtibh na h-àirde deas, agus ann am fearann Bheniamin, agus anns na h-ionad-aibh timchioll Ierusalem, agus ann am bailtibh Iudah, siùbhlaidh na treudan a ris fo làimh an tì dh'airmheas iad, deir an Tighearn.

14 Feuch, tha na làithean a' teachd, deir an Tighearn, anns an còimhlion mise an nì maith sin a gheall mi do thigh Israeil, agus do thigh Iudah.

15 Anns na làithibh sin, agus anns an àm sin, bheir mise air Meanglan fireantachd fàs suas do Dhaibhidh, agus cuiridh e an gnìomh breitheanas agus ceartas air an talamh.

16 Anns na làithibh sin tèarnar Iudah, agus gabhaidh Ierusalem còmhnuidh ann an tèaruinteachd: agus is e so esan ris an goirear IEHOBAH AR FIREANTACHD.

17 Oir mar so tha Iehobhah ag ràdh, Cha bhi gu bràth a dh'uireasbhuidh air Daibhidh duine a shuidheas air rìgh-chaithir tìghe Israeil;

18 Nì mò bhios na sagairt na Lebhithich gun duine ann am làthair-sa, a dh'ìobradh thabhartas-loisgte, agus a losgadh thabhartas-bìdh, agus a dheanamh iobairt an còmhnuidh.

19 Thàinig focal an Tighearna fòs gu Jeremiah, ag ràdh,

20 Mar so deir an Tighearn, Ma dh'fheudar leibh mo choimhcheangal-sa ris an là a bhriseadh, agus mo choimhcheangal ris an oidhche, agus nach bi là no oidhche ann 'nan àm fèin;

21 An sin fòs feudar mo choimhcheangal-sa ri Daibhidh m'òglach a bhriseadh, gun mhac a bhi aige gu riaghladh air a rìgh-chaithir; agus ris na Lebhithich na sagairt, mo luchd-frithealaidh.

22 Mar nach feud feachd nèimh a bhi air 'àireamh, no gaineamh na fairge bhi air a tomhas: is amhluidh a nì mise lìonmhor sliochd Dhaibhidh m'òglach, agus na Lebhithich a ta frithealadh dhomh.

23 Os bàrr, thàinig focal an Tighearna gu Jeremiah, ag ràdh,

24 Am bheil thu toirt fa'near cìod a tha'n sluagh so a' labhairt, ag ràdh, An dà theaghlach a ròghnaich an Tighearn, rinn e an tilgeadh uailh? agus rinn iad di-meas

air mo shluagh-sa, air chor as nach 'eil iad 'gam meas ni's mò mar chinneach.

25 Mar so tha an Tighearn ag ràdh, Mur 'eil mo choimhcheangal-sa ris an là agus ris an oidhche; reachdan nèimh agus talmhainn mur do shocruidh mi;

26 An sin tilgidh mi uam sliochd Iacoib, agus Dhaibhidh m'òglaich, gun aon d'a shliochd a ghabhail, gu bhì nan luchd-riaghlaidh thar sliochd Abraham, Isaac, agus Iacoib: oir bheir mi air a h-ais am bruid, agus ni mi tròcair orra.

CAIB. XXXIV.

1 *Roimh-innis am fàidh sgrìos Ierusalem, agus dòn Shedeciah. 8 Leig na h-uachdarain d'an òglaich agus d'ambanoglaich falbh saor a rèir a' choimhcheangail, 11 ach thug iad fo smachd iad a ris. 12 Ghairm am fàidh saorsa do'n chlaidheamh, do'n phlàigh, agus do'n ghort an aghaidh nan Iudhach.*

AM focal a thàinig gu Ieremiah o'n Tighearn, ('nuair a chog Nebuchadnezzar rìgh Bhabiloin, agus 'uile fheachd, agus uile rioghachdan an domhain a bha fo 'thighearnas, agus na slòigh uile, an aghaidh Ierusalem, agus an aghaidh a h-uile bhailtean,) ag ràdh,

2 Mar so tha an Tighearn, Dia Israeil, ag ràdh, Imich, agus labhair ri Sedeciah rìgh Iudah, agus abair ris, Mar so deir an Tighearn, Feuch, bheir mise a' chaithir so do làimh rìgh Bhabiloin, agus loisgidh e i le teine:

3 Agus thusa, cha téid thu as o 'làimh, ach bithidh tu gu cinnteach air do ghlacadh, agus air do thoirt thairis d'a làimh, agus chi do shùilean sùilean rìgh Bhabiloin, agus labhairidh e riut beul ri beul, agus falbhaidh tu gu Babilon.

4 Gidheadh cluinn focal an Tighearn, O Shedeciah, a rìgh Iudah; Mar so deir an Tighearn do d' thaobh-sa, Cha'n fhaigh thu bàs leis a' chlaidheamh;

5 Gheibh thu bàs ann an sìth; agus a rèir losgaidh t'aithrichean, na rìghrean roimhe so, a bha air thoiseach ortsa, is amhnidh a loisgear tùis dhuith-se; agus ni iad caoidh air do shon, *ag ràdh*, Òch a thighearn! oir labhair mise am focal¹, deir an Tighearn.

6 Agus labhair Ieremiah am fàidh na briathran so uile ri Sedeciah rìgh Iudah, ann an Ierusalem,

7 An uair a chog feachd rìgh Bhabiloin an aghaidh Ierusalem, agus an aghaidh uile bhailtean Iudah a bha air am fàgail, an aghaidh Lacheis, agus an aghaidh Asecah: oir mhair iad so do bhailtibh Iudah 'nam bailtibh daingnichte.

8 Am focal a thàinig gu Ieremiah o'n Tighearn, an dèigh do rìgh Sedeciah coimhcheangal a dheanamh ris an uile shluagh a bha ann an Ierusalem, a dh'-

éigheach saorsa dhoibh:

9 A chum gu'n leigeadh gach duine d'a òglach, agus gach duine d'a bhanoglaich, Eabhrach no ban-Eabhrach, falbh saor, gun neach a ghabhail seirbhis diubh, gach aon do Iudhach a bhràthair.

10 A nis, an uair a chuala na h-uachdarain uile, agus an sluagh uile a thionnsgain anns a' choimhcheangal, gu'n leigeadh gach duine d'a òglach, agus gach duine d'a bhanoglaich falbh saor, nach gabhadh aon seirbhis diubh ni bu mhò, an sin thug iad géill, agus leig iad air falbh iad.

11 Ach thionndaidh iad a ris, agus thug iad air na h-òglaich, agus air na banoglaich, a leigeadh air falbh saor, pilleadh air an ais, agus thug iad fo smachd iad, a chum bhì 'nan òglaich, agus 'nam banoglaich.

12 Uime sin thàinig focal an Tighearna gu Ieremiah, ag ràdh,

13 Mar so tha an Tighearn, Dia Israeil, ag ràdh, Rinn mise coimhcheangal ri 'ur n-aithrichean anns an là san d'thug mi iad a mach á tìr na h-Eiphit, á tigh nan daor, ag ràdh,

14 An ceann sheachd bliadhna, leigibh a chead, gach aon d'a bhràthair Eabhrach, a bha air a reic riut: an uair a bheir e seirbhis duit sè bliadhna, leigidh tu dha falbh uait saor. Ach cha d'éisd 'ur n-aithrichean riumsa, ni mò dh'aom iad an cluas.

15 Agus bha sibh a nis air pilleadh, agus air deanamh gu ceart ann am shealladh-sa, le saorsa a ghlaodhach, gach neach d'a choimhearsnach; agus rinn sibh coimhcheangal ann am fhianuis, anns an tigh a ta air a ghairm air m'ainm:

16 Ach phlùil sibh, agus thruaill sibh m'ainm, agus thug sibh, gach aon air òglach, agus gach aon air a bhanoglaich, a leig e saor uait gu 'thoil féin, pilleadh air an ais; agus chuir sibh fo smachd iad, gu bhì dhuibh 'nan òglaich agus 'nam banoglaich.

17 Air an aobhar sin, mar so deir an Tighearn, Cha d'éisd sibh riumsa ann an saorsa a ghlaodhach, gach aon d'a bhràthair, agus gach aon d'a choimhearsnach: feuch do 'ur taobhsa tha mise a' glaothach saorsa, deir an Tighearn, do'n chlaidheamh, do'n phlàigh, agus do'n ghort; agus bheir mi oirbh bhì air 'ur luasgadh air feadh uile rioghachdan an domhain.

18 Agus bheir mi a' mhuinntir a bhris mo choimhcheangal, nach do choimhlean briathran a' choimhcheangail a rinn iad ann am làthair-sa, 'nuair a ghearr iad an laogh 'na dhà leth, agus a dh'imich iad eadar a hhoighdean,

19 Ceannardan Iudah, agus ceannardan

¹ briathraich mise briathar.

Ierusalem, agus na caillteanaich, agus na sagairt, agus uile shluagh an fhearainn a dh'ìmh eadar bloighdean an laigh ;

20 Bheir mi eadhon iad sin do làimh an naimhdean, agus do làimh na muinntir a ta 'g iarraidh an anama ; agus bithidh an cairbheannan mar bhiadh do eunlaith an athair, agus do bheathaichibh na talmhainn.

21 Agus Sedeciah rìgh Iudah, agus a phrìomsachan, bheir mise do làimh an naimhdean, agus do làimh na muinntir a ta 'g iarraidh an anama, eadhon do làimh feachdan rìgh Bhabiloin, a ta air imeachd suas uaibh.

22 Feuch, bheir mise àithne, deir an Tighearn, agus bheir mi orra pilleadh air an ais do'n chaithir so ; agus cogaidh iad 'na h-aghaidh, agus glacadh iad i, agus loisgidh i le teine ; agus bailtean Iudah nì mi 'nan làraich sgaoilte, gun aon neach 'g an àiteachadh.

CAIB. XXXV.

1 *Le ùmhlachd nan Rechabach do àithne an athar, 12 dhùteadh na h-Iudhaich air son an eas-ùmhachd do Dhia. 18 Bheannaich Dia na Rechabaich.*

AM focal a thàinig gu Ieremiah o'n Tighearn, ann an làithibh Iehoiachim mhic Iosiah rìgh Iudah, ag ràdh,

2 Ìmhich gu tigh nan Rechabach, agus labhair riu, agus thoir iad a chum tìghe an Tighearna gu aon do na seòmraichibh, agus thoir dhoibh fion r'a òl.

3 An sin ghabh mi Iaasaniah mac Ieremiah, mhic Habasaniah, agus a bhràithrean, agus uile mhic, agus uile theaghlach nan Rechabach :

4 Agus thug mi iad gu tigh an Tighearna, gu seomar mhac Hanain, mhic Igdaliah, òglaich Dhé, a bha ri taobh seòmair nan uachdaran, a bha os ceann seòmair Mhaaseiah mhic Shaluim, fir-gleidhidh an doruis :

5 Agus chuir mi air beulaobh mhac tìghe nan Rechabach soireachan làn fìona, agus copain ; agus thubhairt mi riu, Olaibh fion.

6 Ach thubhairt iadsan, Cha'n òl sinne fion : oir thug Ionadab mac Rechaib air n-athair, àithne dhuinn, ag ràdh, Na h-òlaibh-se fion, sibh féin no 'ur mic gu bràth.

7 Nì mò thogas sibh tìgh, no chuireas sibh sìol, no shuidhicheas sibh fion-lios, no bhios aon agaibh ; ach fad 'ur n-uile làithean nì sibh còmhnuidh ann am bùthaibh, a chum gu mair sibh mòran làithean san fhearann anns am bheil sibh 'nur coigreach.

8 Agus thug sinn géill do ghuth Ionadab mhic Rechaib ar n-athar, anns gach nì a chuir e mar fhìachaibh oirnn, gun fhìon air bith òl fad ar n-uile làithean,

sinn féin, ar muà, ar mic, no ar nigheana ;

9 No tighean a thogail duinn féin gu còmhnuidh ghabhail anna : nì mò fa againn fion-lios, no achadh, no sìol.

10 Ach ghabh sinn còmhnuidh ann am bùthaibh, agus thug sinn géill, agus rinn sinn a réir gach nì a dh'àithn ar n-athair Ionadab dhuinn.

11 Ach tharladh, an uair a thàinig Nebuchadnesar rìgh Bhabiloin a nìos do'n fhearann, gu'n dubhairt sinn, Thigibh, agus rachamaid gu Ierusalem, air eagal feachd nan Caldéach, agus air eagal feachd nan Siriach : air an aobhar sin tha sinn a còmhnuidh ann an Ierusalem.

12 An sin thàinig focal an Tighearna gu Ieremiah, ag ràdh,

13 Mar so tha Tighearn nan sluagh, Dia Israeil, ag ràdh, Ìmhich agus abair ri fearaibh Iudah, agus ri luchd-àiteachaidh Ierusalem, Nach gabh sibh ri teagasg, a thoirt éisdeachd do m' bhrìathraihh-sa ? deir an Tighearn.

14 Tha briathran Ionadaib mhic Rechaib, a dh'àithn e d'a mhacaibh, gun fhìon òl, air an còimhlionadh ; oir gus an là an diugh cha'n òl iad fion sam bith, ach tha iad ùmhail do àithne an athar : gidheadh labhair mise ruibhse, ag éirigh gu moch agus a' labhairt, ach cha d'éisd sibh rium.

15 Chuir mi d'ur n-ionsuidh mar an ceudna m'uile sheirbhisich na fàidhean, ag éirigh gu moch agus 'g an cur a mach, ag ràdh, Pillibh a nis, gach aon o' dhroch shlighe, agus leasaichibh 'ur deanadas, agus na rachaibh air lorg dhée eile gu seirbhis a thoirt dhoibh, agus gabhaibh còmhnuidh anns an fhearann a thug mise dhuibh, agus d'ur n-aithrichibh : ach cha d'aom sibh 'ur cluas, nì mò thug sibh éisdeachd dhomh.

16 A chionn gu'n do choimhlion mic Ionadaib, mic Rechaib, àithne an athar, a dh'àithn e dhoibh, ach nach d'éisd an sluagh so riumsa ;

17 Air an aobhar sin, mar so deir Iehobhal Dia nan sluagh, Dia Israeil : Feuch, bheir mise air Iudah, agus air uile luchd-àiteachaidh Ierusalem, an t-òle sin uile a labhair mi 'nan aghaidh : a chionn gu'n do labhair mi riu, ach nach d'éisd iad ; agus gu'n do ghlaodh mi riu, ach nach do fhreagair iad.

18 Agus ri teaghlach nan Rechabach thubhairt Ieremiah : Mar so deir Tighearn nan sluagh, Dia Israeil, A chionn gu'n d'thug sibhse géill do àithne Ionadab 'ur n-athar, agus gu'n do choimhid sibh 'uile iarrtuais, agus gu'n d'rinn sibh a réir gach nì a dh'àithn e dhuibh :

19 Uime sin mar so deir Tighearn nan sluagh, Dia Israeil, Cha bhi Ionadab mac Rechaib gun duine aige gu seasamh ann am làthair-sa gu bràth.

1 Sgrìobh Baruch fàidheadaireachd Ieremiah air clàr, agus leugh e i an làthair an t-sluaigh. 11 Chuir na h-uachdarain fios gu Baruch, agus leugh e an clàr 'nan éisdeachd. 20 Loisg an rìgh an clàr. 31 Sgrìobh Baruch air clàr cile uile bhriathran a' cheud chlàir.

AGUS tharladh ann an ceathramh bliadhna Iehoiacim mhic Iosiah rìgh Iudah, gu'n d'thàinig am focal so gu Ieremiah o'n Tighearn, ag ràdh,

2 Gabh dhuit clàr-sgrìobhaidh, agus sgrìobh ann na h-uile bhriathran a labhair mise riut an aghaidh Israeil, agus an aghaidh Iudah, agus an aghaidh nan uile chinneach, o'n là san do labhair mi riut ann an làithibh Iosiah, eadhon gus an là 'n diugh.

3 Theagamh gu'n tabhair rìgh Iudah fa' near an t-olc sin uile a th'ann am aire-sa dheanamh orra; air chor as gu'm pill iad, gach aon o'dhroch shlighe, agus gu maith mise an aingidheachd agus am peacadh.

4 An sin ghairm Ieremiah Baruch mac Neriah; agus sgrìobh Baruch o bheul Ieremiah uile bhriathran an Tighearn, a labhair e ris, air clàr-sgrìobhaidh.

5 Agus dh'àithn Ieremiah do Bharuch, ag ràdh, Tha mise air mo dhruideadh suas, cha'n urrainn mi dol gu tigh an Tighearn;

6 Uime sin, imich thusa agus leugh anns a' chlàr a sgrìobh thu o m' bheul-sa, briathran an Tighearn, ann an éisdeachd an t-sluaigh, ann an tigh an Tighearn, air là an traisg: agus fòs leughaidh tu iad ann an éisdeachd uile Iudah a thig a mach as am bailtibh.

7 Theagamh gu'n taisbean iad¹ an ath-chuinge an làthair an Tighearn, agus gu'm pill iad, gach aon o' dhroch shlighe; oir is mòr an fhearg, agus a' chorruiach a labhair an Tighearn an aghaidh an t-sluaigh so.

8 Agus rinn Baruch mac Neriah a réir gach ni a dh'àithn Ieremiah am fàidh dha, a' leughadh anns an leabhar bhriathran an Tighearn ann an tigh an Tighearn.

9 Agus tharladh ann an cùigeamh bliadhna Iehoiacim mhic Iosiah rìgh Iudah, anns an naothamh mìos, gu'n d'éigh iad trasg an làthair an Tighearn, an sluagh uile a bha ann an Ierusalem, agus an sluagh uile a thàinig o bhailtibh Iudah gu Ierusalem.

10 An sin leugh Baruch anns an leabhar briathran Ieremiah ann an tigh an Tighearn, ann an seòmar Ghemariah mhic Shaphain an sgrìobhaiche, anns a' chùirt uachdarach, aig dol a steach geata nuaidh

tighe an Tighearn, ann an éisdeachd² an t-sluaigh uile.

11 Agus chuala Michaiah mac Ghemariah, mhic Shaphain, uile bhriathran an Tighearn as an leabhar,

12 Agus chaidh e sìos gu tigh an rìgh, gu seòmar an sgrìobhaiche; agus, feuch, bha na h-uachdarain uile 'nan suidhe an sin, Elisama an sgrìobhaiche, agus Delaiah mac Shemaiiah, agus Elnatan mac Achboir, agus Gemariah mac Shaphain, agus Sedeciah mac Hananiah, agus na h-uaislean uile.

13 An sin chuir Michaiah an cèill doibh na h-uile bhriathran a chual' e, 'nuair a leugh Baruch an leabhar ann an éisdeachd an t-sluaigh.

14 Agus chuir na h-uachdarain uile Iehudi mac Netaniah, mhic Shelemiah, mhic Chusi, gu Baruch, ag ràdh, Glac ann ad làimh an clàr san do leugh thu ann an éisdeachd an t-sluaigh, agus thig. Agus ghabh Baruch mac Neriah an clàr 'na làimh, agus thàinig e do'n ionnsuidh.

15 Agus thubhairt iad ris, Suidh sìos a nis, agus leugh e 'nar n-éisdeachd. Agus leugh Baruch 'nan éisdeachd.

16 A nis tharladh, an uair a chuala iad na h-uile bhriathran, gu'n d'amhairc iad le h-eagal, gach aon air a chèile; agus thubhairt iad ri Baruch, Innsidh sinn gu deimhin do'n rìgh na briathran so air fad.

17 Agus dh'fheòraich iad do Bharuch, ag ràdh, Innis duinn a nis cionnus a sgrìobh thu na briathran so uile o' bheul?

18 Agus f'hreagair Baruch iad, Labhair e rium le 'bheul na briathran so uile, agus sgrìobh mi iad le dubh³ ann an leabhar.

19 An sin thubhairt na h-uachdarain ri Baruch, Falbh, agus folaich thu féin, thusa agus Ieremiah; agus na biodh fios aig aon neach c'ùit am bi sibh.

20 Agus chaidh iad a steach a chum an rìgh do'n chùirt, ach thaisg iad suas an clàr ann an seòmar Elisamah an sgrìobhaiche; agus dh'innis iad na h-uile bhriathran ann an éisdeachd an rìgh.

21 An sin chuir an rìgh Iehudi a thoirt a' chlàr d'a ionnsuidh, agus thug e a seòmar Elisamah an sgrìobhaiche e, agus leugh Iehudi e ann an éisdeachd an rìgh agus ann an éisdeachd nan uile uachdar-an a sheas ri taobh an rìgh.

22 Agus bha'n rìgh na shuidhe anns an tigh gheamhraidh, anns an naothamh mìos, agus bha teinteìn fa' chomhair le éibhlìbh teime.

23 Agus tharladh an uair a leugh Iehudi trì no ceithir earrannan, gu'n do ghearr e leis an sgein-phinn e, agus thilg e anns an teine a bha air an teinteìn e, gus an

¹ cuir iad suas.

² cluasaibh. Eabh.

³ ink. Sasg.

robh an clàr gu h-ìomlan air a chaith-eamh anns an teine a bha air an teintean.

24 Ach cha do ghabh iad eagal, ni mò reub¹ iad an trusgair, aon chuid an rìgh, no aon d'a sheirbhisich a chuala na briathran so uile.

25 Agus ged rinn Elnatan, agus Delaiah, agus Gemariah eadar-ghuidhe ris an rìgh, nach loisgeadh e an clàr, gidheadh cha'n éisdeadh e riu.

26 Agus dh'àithn an rìgh do Ierahmeel mac Hameleich, agus do Sheraiah mac Asrieil, agus do Shelemiah mac Abdeciil, Baruch an sgrìobhaiche agus Ieremiah am fàidh a ghlacadh: ach dh'fholaich an Tighearn iad.

27 An sin thàinig focal an Tighearna gu Ieremiah, (an dèigh do'n rìgh an clàr agus na briathran a sgrìobh Baruch o bheul Ieremiah a losgadh,) ag ràdh,

28 Gabh thugad a ris clàr eile, agus sgrìobh ann na h-uile bhriathran ceudna bha sa' cheud clàr, a loisg Iehoiacim rìgh Iudah.

29 Agus their thu ri Iehoiacim rìgh Iudah, Mar so deir an Tighearn, Loisg thu 'n clàr so, ag ràdh, C'uime an do sgrìobh thu ann, ag ràdh, Thlig rìgh Bhabiloìn gu deimhin, agus sgriosaidh e am fearann so, agus gearraidh e gach duine agus gach beathach a mach as?

30 Air an aobhar sin, mar so deir an Tighearn a thaobh Iehoiacim rìgh Iudah, Cha bhi aige neach a shuidheas air rìgh-chaithir Dhaibhidh, agus tilgear a chair-bhean² a mach a chum an teas anns an là, agus a chum an reothaidh anns an oidhche.

31 Agus ni mise peanas air fèin agus air a shìochd, agus air a sheirbhisich, air son an eusaontais, agus bheir mi orra-san, agus air luchd-àiteachaidh Ierusalem, agus air fearaibh Iudah, an t-òle sin uile a labhair mi 'nan aghaidh, ach nach d'éisd iad.

32 An sin ghabh Ieremiah clàr eile, agus thug e do Bharuch mac Neriah, an sgrìobhaiche e, a sgrìobh ann o bheul Ieremiah, uile bhriathran an leabhair a loisg Iehoiacim rìgh Iudah anns an teine; agus cluirdh os bàrr riu mòran do bhriathraibh eile cosmhuil riu sin.

CAIB. XXXVII.

1 Chuir Sedeciah fìos a dh'ionnsuidh Ieremiah gu urnuigh dheanamh air a shon. 8 Roimh-innis am fàidh gu'm buadhaicheadh na Caldéich. 11 Ghlac na h-uachdaran Ieremiah, agus chuir iad am prìosan e. 16 Dh'inns am fàidh do Sedeciah gu'n tugadh Dia thairis e do làimh rìgh Bhabiloìn.

AGUS rìghich Sedeciah mac Iosiah ann an àite Chloniah mhic Iehoiacim, a rinn Nebuchadncsar rìgh Bhabiloìn 'na

rìgh ann am fearann Iudah.

2 Ach cha d'éisd, aon chuid e fèin no a sheirbhisich, no sluagh na tìre, ri briathraibh an Tighearn, a labhair e leis an fhàidh Ieremiah.

3 Agus chuir an rìgh Sedeciah Iehucal mac Shelemiah, agus Sephaniah mac Mhaaseiah an sagart, a chum an fhàidh Ieremiah, ag ràdh, Dean urnuigh, a nis, guidheam ort, ris an Tighearn ar Dia air ar son-ne.

4 A nis bha Ieremiah a' teachd a steach agus a' dol a mach am measg an t-sluaigh, oir cha do chuir iad fathasd ann am prìosan e.

5 Anns an àm sin bha feachd Pharaoh air teachd a mach as an Eiphit; agus an uair a chuala na Caldéich, a bha a' teannachadh Ierusalem mu'n cuairt, iomradh orra, dh'imich iad o Ierusalem.

6 An sin thàinig focal an Tighearna chum an fhàidh Ieremiah, ag ràdh,

7 Mar so tha an Tighearn, Dia Israeil, ag ràdh, Mar so their sibh ri rìgh Iudah a chuir thugam-sa sibh, gu m'iarraidh; Feuch, pillidh feachd Pharaoh, a thàinig a mach 'gur còmhndadh, do'n Eiphit, d'an tìr fèin.

8 Agus thig na Caldéich a ris, agus cogaidh iad an aghaidh na caithreach so, agus glacadh iad i, agus loisgidh iad i le teine.

9 Mar so deir an Tighearn, Na meallaidh sibh fèin, ag ràdh, Gu deimhin imichidh na Caldéich uainn: oir cha'n imich iad.

10 Oir ged bhuailleadh sibh uile fhaelid nan Caldéach a ta cogadh 'nur n-aghaidh, agus nach maireadh 'nam measg ach daoine leònta, gach aon 'na bhùth, dh'eir-eadh iad sin fèin suas, agus loisgeadh iad a' chaithir so le teine.

11 Agus tharladh an uair a dh'imich sluagh nan Caldéach air falbh o Ierusalem, air eagal sluaigh Pharaoh,

12 Gu'n d'imich an sin Ieremiah a mach á Ierusalem, a chum dol gu fearann Bheniamin, a dh'fhaotainn cuibhrrinn deth am measg an t-sluaigh.

13 Agus an uair a bha e 'n geata Bheniamin, bha ceannard an fhriceadain an sin, d' am b'ainm Iriah, mac Shelemiah, mhic Hananiah; agus ghlac e Ieremiah am fàidh, ag ràdh, Tha thu dol thairis a chum nan Caldéach.

14 An sin thubhairt Ieremiah, Cha 'n fhior sin; Cha 'n'eil mi dol thairis a chum nan Caldéach: ach cha d'éisd e ris: mar sin ghlac Iriah Ieremiah, agus thug e chum nan uachdaran e.

15 Agus bha corruich air na h-uachdaran aibh ri Ieremiah, agus bhuail iad e,

¹ shrachd.

² chlosaeh.

agus chuir iad ann am prìosan e, ann an tigh Ionatain an sgriobhaiche; oir rinn iad prìosan deth sin.

16 An uair a chaidh Ieremiah steach do'n phrìosan iochdarach, agus do na slochdaibh, agus a bhuavaich Ieremiah an sin mòran làithean;

17 An sin chuir Sedeciah an rìgh fios, agus thug e mach e; agus dh'fheòraich an rìgh dheth gu h-uaigneach 'na thìgh, agus thubhairt e, Am bheil focal sam bith o'n Tighearn? Agus thubhairt Ieremiah, Tha: oir thubhairt e, Do làimh rìgh Bhabiloin bheirear thairis thu.

18 Os bàrr thubhairt Ieremiah ri rìgh Sedeciah, Ciod an cron a rinn mise ann ad aghaidh-sa, no'n aghaidh do sheirbhisich, no'n aghaidh an t-sluaigh so, gu'n do chuir sibh mi ann am prìosan?

19 C'ait am bheil a nis 'ur fàidhean a rinn fàisteachd dhuibh, ag ràdh, Cha tigh rìgh Bhabiloin 'nar n-aghaidh, no'n aghaidh an fhearainn so?

20 Ach éisd a nis, guidheam ort, a thighearn, morigh; gabharm'athchuinge, guidheam ort, ann ad làthair; agus na toir orm pilleadh gu tigh Ionatain an sgriobhaiche, air eagal gu'm faigh mi bàs an sin.

21 Agus dh'àithn an rìgh Sedeciah gu'n cuireadh iad Ieremiah ann an cùirt a' phrìosain, agus gu'n tugadh iad dha gach là cuibhrionn arain à sràid nam fuinead-airean, gus am biodh uile aran na caithreach air teireachduinn. Agus dh'fhan Ieremiah ann an cùirt a' phrìosain.

CAIB. XXXVIII.

1 *Thilgeadh Ieremiah san t-slochd a bha ann an cùirt a' phrìosain: 7 Thug Ebed-melech a nìos as an t-slochd e. 14 Dh'iarr an rìgh comhairle o Ieremiah: 17 Dh'àithn esan da e fèin thoirt thairis do làimh rìgh Bhabiloin.*

AN sin chuala Sephatiah mac Mhatain, agus Gedaliah mac Phasuir, agus Iucal mac Shelemiah, agus Pasur mac Mhalchiah, na briathran a labhair Ieremiah ris an t-sluagh uile, ag ràdh,

2 Mar so deir an Tighearn, Esan a dh'fhanas anns a' chaithir so bàsaichidh e leis a' chlaidheamh, leis a' ghort, agus leis a' phlàigh; ach esan a thèid a mach a chum nan Caldéach, mairidh e beò; oir gheibh e 'anam mar chobhartach, agus mairidh e beò.

3 Mar so tha an Tighearn ag ràdh, Bheirear gu deimhin a' chaithir so suas do làimh feachda rìgh Bhabiloin, a ghlaças i.

4 Air an aobhar sin, thubhairt na h-uachdairin ris an rìgh, Biodh an duine so, guidheamaid ort, air a chur gu bàs: oir mar so tha e a' lagachadh làmhau an luchd-cogaidh a ta fathasd a làthair anns a' chaithir so, agus làmhau an t-sluaigh

uile, le bhì labhairt a' leithide so do bhriathraibh riu: oir cha'n 'eil an duine so ag iarraidh leas an t-sluaigh so, ach an aihmleis.

5 An sin thubhairt an rìgh Sedeciah, Feuch, tha e 'nur làimh: oir cha'n e 'n rìgh esan a dh'fheudas aon ni a chur 'nur n-aghaidh.

6 An sin ghlac iad Ieremiah, agus thilg iad e ann an slochd Mhalchiah mhic Hamelech, a bha ann an cùirt a' phrìosain; agus leig iad sìos Ieremiah le cordaibh. Agus anns an t-slochd cha robh nìsge sam bith, ach clàbar: agus chaidh Ieremiah fuidhe anns a' chlàbar.

7 A nis an uair a chuala Ebed-melech an t-Etiopach, aon do na caillteanaich a bha 'n tigh an rìgh, gu'n do chuir iad Ieremiah san t-slochd, (agus an rìgh 'na shuidhe san àm sin ann an geata Bheniamin,)

8 Chaidh Ebed-melech a mach á tigh an rìgh, agus labhair e ris an rìgh, ag ràdh,

9 Mo thighearn a rìgh, rinn na daoine so gu h-òc anns gach ni a rinn iad ri Ieremiah am fàidh, a thilg iad anns an t-slochd; oir gheibh e bàs le h-ocras anns an aite sin, a chionn nach 'eil nì's mò aran anns a' bhaile.

10 An sin dh'àithn an rìgh do Ebed-melech an t-Etiopach, ag ràdh, Thoir leat á so deich fir fhichead, agus thoir a nìos Ieremiah am fàidh as an t-slochd, mu 'm faigh e bàs.

11 Agus thug Ebed-melech leis na daoine, agus chaidh e steach do thigh an rìgh fo 'n tigh-thasgaidh, agus thug e as a sin seana bhroineagan, agus seann luid-eagan, agus leig e sìos iad gu Ieremiah do'n t-slochd le cordaibh.

12 Agus thubhairt Ebed-melech an t-Etiopach ri Ieremiah, Cuir a nis na seann luid-eagan, agus na broineagan so, fo d' asgailtean mu na cordaibh. Agus rinn Ieremiah mar sin.

13 Agus tharruing iad a nìos Ieremiah le cordaibh, agus thug iad a mach as an t-slochd e; agus dh'fhan Ieremiah ann an cùirt a' phrìosain.

14 An sin chuir an rìgh Sedeciah fios, agus thug e Ieremiah am fàidh d'a ionnsuidh gus an treas dol-a-steach a ta 'n tigh an Tighearn. Agus thubhairt an rìgh ri Ieremiah, Feòraichidh mi ni àraidh dhìot; na ceil a' bheag orm.

15 Agus thubhairt Ieremiah ri Sedeciah, Ma dh'inneas mi dhuit, nach dean thu gu cinnteach mo chur gu bàs? agus ma bheir mi comhairle ort, an éisd thu rium?

16 An sin mlionnaich an rìgh Sedeciah do Ieremiah os ìosal, ag ràdh, Mar is beò an Tighearn a rinn dhuinn an t-anam so,

cha chuir mi gu bàs thu, ni mò bheir mi thairis thu do làimh na muinntir sin a ta 'g iarraidh t'anama.

17 Agus thubhairt Ieremiah ri Sedeciah, Mar so tha Iehobhah, Dia nan sluagh, Dia Israeil, ag ràdh, Ma théid thu gu deimhin thairis gu cinn-fheadhna rìgh Bhabiloin, an sin mairidh t'anam beò, agus cha loisgear a' chaithir so le teine; ach mairidh tu beò, thu féin agus do theaghlach.

18 Ach mur téid thu mach gu cinn-fheadhna rìgh Bhabiloin, an sin bheirear a' chaithir so do làimh nan Caldéach, agus loisgidh iad le teine, agus cha téid thusa féin as o'n làmhan.

19 Agus thubhairt an rìgh Sedeciah ri Ieremiah, Tha eagal nan Iudhach orm, a theich a chum nan Caldéach, gu'n toir iad thairis mi do'n làmhan, agus gu'n dean iad fanaid orm.

20 Ach thubhairt Ieremiah, Cha toir iad thairis thu; thoir géill, guidheam ort, do ghuth an Tighearna san ni a ta mise a' labhairt riut: mar sin éiridh gu maith dhuit, agus mairidh t'anam beò.

21 Ach ma dhùiltas tu dol a mach, so an ni a thaisbein an Tighearna dhomh-sa:

22 Eadon, feuch, na h-uile mhnathan a ta air am fàgail ann an tigh rìgh Iudah, bheirear a mach gu cinn-fheadhna rìgh Bhabiloin, agus their iad, Bhrosnuich do chairdean thu, agus thug iad buaidh ort: chuir iad do chosan an sàs anns an làthaich, agus phill iad air an ais.

23 Agus bheir iad a mach t' uile mhnathan, agus do chlan a chum nan Caldéach; agus cha téid thu féin as o'n làmhan, ach glacar thu le làimh rìgh Bhabiloin, agus bithidh tu coireach anns a' bhaile so bhi air a losgadh le teine.

24 An sin thubhairt Sedeciah ri Ieremiah, Na biodh fios aig duine sam bith air na briathraibh so, agus cha'n fhaigh thu bàs.

25 Ach ma chluinneas na h-uachdarain gu'n do labhair mise riut, agus gu'n tig iad a d'ionnsuidh, agus gu'n abair iad riut, Innis duinn a nis ciod a thubhairt thu ris an rìgh, na ceil e oirne, agus cha chuir sinn gu bàs thu; mar an ceudna ciod a thubhairt an rìgh riutsa:

26 An sin their thu riu, Thaisbein mi m' athcheuinge an làthair an rìgh, nach tugadh e orm pilleadh gu tigh Ionatain, a dh'fhaotainn bàis an sin.

27 Agus thàinig na h-uachdarain uile gu Ieremiah, agus dh'fhiosraich iad dheth; agus dh'innis e dhoibh a réir nan uile bhriathran so a dh'àithn an rìgh dha: mar sin sguir iad do labhairt ris, oir cha do mhothaicheadh a' chùis.

28 Mar sin dh'fhan Ieremiah ann an cùirt a' phrìosain, gus an là san do ghlac-

adh Ierusalem; agus bha e 'n sin an uair a ghlacadh Ierusalem.

CAIB. XXXIX.

1 *Ghlac rìgh Bhabiloin Ierusalem.* 6 *Mharbh e mic Shedeciah, 7 agus cheangail se e féin chum a thoirt gu Babilon.* 11 *Aithne Nebuchadnesair mu thimchioll Ieremiah.* 15 *Gealladh Dhé do Ebed-melech.*

ANN an naothamh bliadhna Shedeciah rìgh Iudah, anns an deicheamh mìos, thàinig Nebuchadnesar rìgh Bhabiloin, agus uile fheadh an aghaidh Ierusalem, agus champaich iad m' a timchioll¹.

2 Ann an aon bhliadhna deug Shedeciah, anns a' cheathramh mìos, air an naothamh là do'n mhìos, bha a' chaithir air a bris-eadh suas.

3 Agus thàinig uile chinn-fheadhna rìgh Bhabiloin a steach, agus shuidh iad anns a' gheata sa' mheadhon; Nergal-sareser, Samgar-nebo, Sareschim, Rabсарis, Nergal-sareser, Rabmag, leis a' chuid eile air fad do chinn-fheadhna rìgh Bhabiloin.

4 Agus tharladh, an trà chunnaic Sedeciah rìgh Iudah iad, agus na fir-chogaidh uile, gu'n do theich iad, agus gu'n deachaidh iad a mach as a' chaithir anns an oidhche, air slighe gairaidh an rìgh, troimh a' gheata, eadar an dà bhalla; agus chaidh iad a mach air slighe a' chòmh-naird.

5 Ach lean feachd nan Caldéach air an tòir, agus rug iad air Sedeciah ann an còmhnradaibh Iericho; agus ghlac iad e, agus thug iad e gu Nebuchadnesar rìgh Bhabiloin, aig Riblah, ann am fearann Hamait, far an d'thug e breth air.

6 An sin mharbh rìgh Bhabiloin mic Shedeciah, ann an Riblah, fa chomhair a shùl; uile mhaithean Iudah mar an ceudna mharbh rìgh Bhabiloin.

7 Agus chuir e mach slèlean Shedeciah, agus cheangail e le slabhruidhean e, a chum a thoirt gu Babilon.

8 Agus loisg na Caldéich tigh an rìgh, agus tighean an t-sluaigh le teine, agus bhris iad sìos ballachan Ierusalem.

9 An sin thug Nebusar-adan, ceannard an fhreiceadain, leis 'nam braighdibh gu Babilon am fuighleach sluaigh a dh'fhan anns a' chaithir, agus iadsan a theich thairis d'a ionnsuidh, leis a' chuid eile do'n t-sluaigh a dh'fhan beò.

10 Ach cuid do bhochdaibh an t-sluaigh, aig nach robh ni sam bith, dh'fhàg Nebusar-adan ceannard an fhreiceadain ann am fearann Iudah, agus thug e dhoibh fion-liosan agus machraichean anns an àm sin.

11 Agus thug Nebuchadnesar rìgh Bhabiloin àithne mu thimchioll Ieremiah do

¹ theannaich se e.

Nebusar-adan ceannard an fhreiceadain, ag ràdh,

12 Thoir leat e, agus thoir aire mhaith dha, agus na dean cron sam bith air, ach dean ris amhuil mar a thair e riut.

13 Mar sin chuir Nebusar-adan ceannard an fhreiceadain fios, agus Nebusaban, Rabsaris, agus Nergal-sareser, Rabmag, agus uile chinn-fheadhna rìgh Bhabiloin:

14 Chuir eadhon iadsan fios, agus thug iad Ieremiah mach á cùirt a' phrìosain, agus thug iad e do Ghedaliah mac Ahicaim, mhic Shaphain, gu 'thoirt dhachaidh: mar sin ghabh e còmhnuidh am measg an t-sluaigh.

15 Agus thàinig focal an Tighearna chum Ieremiah, 'nuair a bha e *fathasd* air a dhruideadh suas ann an cùirt a' phrìosain, ag ràdh,

16 Imich agus labhair ri Ebed-melech an t-Etiopach, ag ràdh, Mar so tha Tighearn nan sluagh, Dia Israeil, ag ràdh, Feuch, bheir mise mo bhriathran air a' chaithir so air son uile, agus cha'n ann air son maith; agus thig iad gu crìch ann ad fhianuis-sa anns an là sin.

17 Ach tèarnaidh mi thusa san là sin, deir an Tighearn, agus cha toirear thairis thu do làimh na muinntir roimh am bheil eagal ort.

18 Oir tèarnaidh mi thu, agus cha tuit thu leis a' chlaidheamh, ach bithidh t'an am mar chobhartach agad, a chionn gu'n do chuir thu do dhòchas annam-sa, deir an Tighearn.

CAIB. XL.

1 Chaidh Ieremiah air ais gu Gedaliah an dèigh do Nebusar-adan fhuasgladh o na slabhruidhean a bha air a làmh. 8 Phill na h-Iudhaich a chaidh a sgapadh gu Gedaliah. 13 Cha do chreid Gedaliah Iohanan 'nuair dh'innis e dha gu'n robh Ismael ag iarraidh a mharbhadh.

AM focal a thàinig a chum Ieremiah o'n Tighearn, an dèigh do Nebusar-adan ceannard an fhreiceadain a leigeadh as o Ramah, an uair a thugadh e d'a ionnsuidh, agus e ceangailte le slabhruidhean am measg na muinntir sin uile a thugadh air falbh 'nam braigheadh o Ierusalem agus o Iudah, a thugadh ann am braigheanas gu Babilon.

2 Agus ghabh ceannard an fhreiceadain Ieremiah, agus thubhairt e ris, Labhair an Tighearn do Dhia-sa an t-olc so an aghaidh an àite so.

3 A nis thug an Tighearn gu crìch e, agus rinn e mar a labhair e: a chionn gu'n do pheacach sibh an aghaidh an Tighearn, agus nach d'thug sibh géill d'a ghuth, air an aobhar sin tha'n t-olc so air teachd oirbh.

4 Agus a nis feuch, tha mise 'g ad fhuasgladh an diugh o na slabhruidhean

'a bha air do làmh: ma chi thu ceart teachd leam-sa gu Babilon, thig; agus bheir mi aire mhaith dhuit: ach mur faic thu ceart teachd leam-sa gu Babilon, fan: feuch, tha am fearann gu h-iomlan fa d' chomhair: far am faicear ceart agus iomchuidh dhuit dol, theirig' ann; agus ciod air bith tuilleadh cha chumar air ais e.

5 Falbh uime sin air d'ais gu Gedaliah mac Ahicaim, mhic Shaphain, a rinn rìgh Bhabiloin 'na uachdaran os ceam bhailtean Iudah, agus gabh còmhnuidh leis am measg an t-sluaigh: no falbh c'ait air bith am faic thu iomchuidh dol. Mar sin thug ceannard an fhreiceadain biadh agus duais da, agus leig e dha imeachd.

6 An sin chaidh Ieremiah gu Gedaliah mac Ahicaim, gu Mispah, agus ghabh e còmhnuidh leis, am measg an t-sluaigh a dh'fhàgadh anns an fhearann.

7 A nis an uair a chuala uile cheannardan an fheachd a bha sna machraichibh, iad féin agus an daoine, gu'n d'rinn rìgh Bhabiloin Gedaliah mac Ahicaim 'na uachdaran anns an fhearann, agus gu'n d'earb e ris fir, agus mnathan, agus clann, eadhon cuid do bhochdaibh an fhearainn, dhiubh-san nach d'thugadh air falbh ann am bruid gu Babilon;

8 An sin thàinig iad gu Gedaliah gu Mispah, eadhon Ismael mac Netaniah, agus Iohanan, agus Ionatan, mic Char-eah, agus Seraiah mac Thanhumeit, agus mic Ephai an Netophataich, agus Iesaniah mac Maachataich, iad féin agus an daoine.

9 Agus mhionnaich Gedaliah mac Ahicaim mhic Shaphain dhoibhsan, agus do'n daoine, ag ràdh, Na biodh eagal oirbh géill a thoirt do na Caldéich; gabhaibh còmhnuidh anns an tìr, agus thugaibh géill do rìgh Bhabiloin, agus éiridh gu maith dhuibh.

10 Air mo shon-sa, feuch, ni mi còmhnuidh ann am Mispah, a fhrithealadh do na Caldéich a thig d'ar n-ionnsuidh; ach sibhse, tionailibh fion, agus meas samhraidh, agus oladh, agus cuiribh iad 'nur soithichibh, agus deanaibh còmhnuidh 'nur bailtibh air an d'rinn sibh greim.

11 Air an dòigh cheudna 'nuair a chuala na h-uile Iudhaich a bha ann am Moab, agus am measg nan Amonach, agus ann an Edom, agus a bha anns na h-uile dhùthchannaibh, gu'n d'fhàg rìgh Bhabiloin fuigheall do Iudah, agus gu'n do chuir e os an ceann Gedaliah mac Ahicaim, mhic Shaphain;

12 An sin phill na h-uile Iudhaich as na h-uile àite gus an robh iad air am fògradh, agus thàinig iad gu tìr Iudah, gu

Gedaliah, do Mhispah, agus thionail iad fion, agus meas samhraidh, gu ro phailt.

13 Agus thàinig Iohanan mac Chareah, agus uile cheannardan an fheachd a bhla sna machraichibh, gu Gedaliah do Mhispah,

14 Agus thubhairt iad ris, Am bheil fios agad gu cinnteach gu'n do chuir Baalis rìgh nan Amonach Ismael mac Netaniah chum do mharbhadh? Ach cha do chreid Gedaliah mac Ahicaim iad.

15 An sin labhair Iohanan mac Chareah ri Gedaliah ann am Mispah gu h-uaigneach, ag ràdh, Leig dhomh-sa dol, guidheam ort, agus marbhaidh mi Ismael mac Netaniah, agus cha bhi fios aig duine sam bith air: c'uime am marbhadh e thusa, agus gu'm biodh na h-uile Iudhaich a ta air an cruinneachadh a d' ionnsuidh air an sgapadh. agus gu'm bàsaicheadh na tha mairionn do Iudah?

16 Ach thubhairt Gedaliah mac Ahicaim ri Iohanan mac Chareah, Cha dean thu an ni so, oir is breug a tha thu labhairt a thaobh Ismaeil.

CAIB. XLI.

1 Mharbh Ismael Gedaliah, 5 agus daoine àraidh a thàinig d'a ionnsuidh o Shechem agus o Shamaria. 10 Dh'imich Ismael gu dol thairis chum nan Amonach. 12 Chaidh Iohanan a chogadh 'na aghaidh, agus thug e uaith na braighean.

ANIS tharladh air an t-seachdamh mìos, gu'n d'thàinig Ismael mac Netaniah, mhic Elisama, do'n t-sìol rìoghail, agus maithean an rìgh eadhon deich fir, maille ris, gu Gedaliah mac Ahicaim do Mhispah, agus an sin dh'ith iad aran le chèile ann am Mispah.

2 An sin dh'èirich Ismael mac Netaniah, agus na deich fir a bha maille ris, agus bhuail iad Gedaliah mac Ahicaim, mhic Shaphain, leis a' chlaidheamh, agus mharbh iad e, esan a chuir rìgh Bhabaloin 'na uachdaran os ceann an fhearainn.

3 Mharbh Ismael mar an ceudna na h-Iudhaich uile bha maille ris, maille ri Gedaliah ann am Mispah, agus na Caldèich a fhuairleadh an sin, na fir-chogaidh.

4 Agus tharladh air an dara là, an déigh dha Gedaliah a mharbhadh, agus gun fhios aig duine sam bith air;

5 Gu'n d'thàinig daoine àraidh o Shechem, o Shiloh, agus o Shamaria, ceithir fichead fear, aig an robh am feusagan air am bearradh, an eudaichean air an reubadh', agus iad féin gearrta, le tabhartasaibh agus tùis 'nan làimh gu'n toirt gu tigh an Tighearn.

6 Agus chaidh Ismael mac Netaniah

mach o Mhispah 'nan còdhail, a' gul fad naslighe²: agus tharladh an uair a choinnich e iad, gu'n d' thubhairt e riu, Thigibh gu Gedaliah mac Ahicaim.

7 Agus tharladh an uair a thàinig iad gu meadhon a' bhaile, gu'n do mharbh Ismael mac Netaniah iad, agus thilg e iad ann am meadhon an t-sluichd, e féin agus na daoine bha leis.

8 Ach fhuairleadh 'nam measg deichnear fhear a thubhairt ri Ismael, Na marbh sinne: oir tha ionmhasan againn sa' mhachair, do chruthneachd, agus do eorna, agus do oladh, agus do mhill. Mar sin sguir e, agus cha do mharbh e iad am measg am bràithrean.

9 A nis b'e 'n slochd anns an do thilg Ismael uile chorp marbha nan daoine a mharbh e air son Ghedaliah an slochd sin a rinn Asa an rìgh air eagal Bhaasa rìgh Israeil; lion Ismael mac Netaniah e leosan a mharbhadh.

10 An sin thug Ismael leis ann am bruid na h-uile bha làthair do'n t-sluagh a bh'ann am Mispah, eadhon nigheanan an rìgh, agus an sluagh uile a dh'fhan ann am Mispah, a thug Nebusar-adan ceannard an fhreiceadain do Ghedaliah mac Ahicaim; thug eadhon Ismael mac Netaniah leis ann am bruid iad, agus dh'imich e gu dol thairis a chum nan Amonach.

11 Ach an uair a chuala Iohanan mac Chareah, agus uile cheannardan an fheachd, a bha maille ris, an t-olc ud a rinn Ismael mac Netaniah,

12 An sin thug iad leo na daoine air fad, agus chaidh iad a chogadh ri Ismael mac Netaniah, agus fhuair iad e aig na h-uisgeachaibh mòra a ta ann an Gibeon.

13 A nis tharladh an uair a chunnaic an sluagh sin uile bha le Ismael Iohanan mac Chareah, agus uile cheannardan an fheachd a bha maille ris, gu'n robh iad an sin aoibhneach.

14 Agus thionndaidh an sluagh uile, a thug Ismael air falbh ann am bruid o Mhispah, mu'n cuairt, agus phill iad, agus chaidh iad gu Iohanan mac Chareah.

15 Ach chaidh Ismael mac Netaniah as o Iohanan le ochdnar fhear, agus chaidh e chum nan Amonach.

16 An sin ghabh Iohanan mac Chareah, agus uile cheannardan an fheachd a bha leis, uile iarmad an t-sluaigh a bhuin e o Ismael mac Netaniah, o Mhispah, (an déigh dha Gedaliah mac Ahicaim a mharbhadh,) gaisgich, fir-chogaidh, agus mnathan, agus clann, agus cailteanaich, a thug e air an ais o Gibeon:

17 Agus dh'imich iad, agus ghabh iad còmhnuidh ann an aitreabh Chimhaim, a ta làimh ri Betlehem, a chum falbh gu

¹ srachdadh.

² ag imeachd agus a' gul. Eabh.

dol a steach do'n Eiphit, á fianuis nan Caldéach:

18 Oir bha eagal orra rompa, a chionn gu'n do mharbh Ismael mac Netaniah Gedaliah mac Ahicaim, a rinn righ Bhabiloin 'na uachdaran anns an fhearann.

CAIB. XLII.

1 *Dh'iarr ceannardan an fheachd air Ieremiah ur-nuigh a dheanamh ri Dia air an son. 5 Gheallt iad bhí ùmhail do fhocal an Tighearna. 7 Dh'imis am fàidh dhoibh gu'n tèarnar iad aon an Iudea, ach gu'n sgriosar iad nan rachadh iad sìos do'n Eiphit. 19 Thug e achmhasan dhoibh air son an ceilge.*

AN sin thàinig am fagus uile cheannardan an fheachd, agus Iohanan mac Chareah, agus Iesaniah mac Hosaiah, agus an sluagh gu h-ìomlan, o'n bheag gus a' mhòr;

2 Agus thubhairt iad ri Ieremiah am fàidh, Biodh ar n-athchuinge, guidheam-aid ort, taitneach ann ad làthair, agus dean urnuigh air ar son ris an 'Tighearn do Dhia, eadhon air son an iarmaid so uile, (oir cha d'fhàgadh dhinn ach beagan do mhòran, mar a tha do shùilean 'gar faicinn,)

3 Gu seòladh an Tighearn do Dhia dhuinn an t-slighe anns an gluais sinn, agus an ni a tha sinn ri dheanamh.

4 Agus thubhairt Ieremiah am fàidh riu, Chuala mi; feuch, ni mise urnuigh ris an Tighearn bhur Dia a réir 'ur briathran; agus tarlaidh, ge b'e freagradh a bheir an Tighearn dhuibh, gu'n innis mise dhuibh e: cha chum mi ni sam bith air ais uaibh.

5 Agus thubhairt iad ri Ieremiah, Biodh an Tighearn 'na fhianuis fhìor agus dhìleas eadaruin, mur dean sinne gach ni air son an cuir an Tighearn do Dhia d'ar n-ionnsuidh thu.

6 Ma's maith no ma's olc e, bheir sinn géill do ghuth an Tighearn ar Dia, gus am bheil sinn 'gad chur; a chum gu'n éirich gu maith dhuinn an uair a bhios sinn ùmhail do ghuth an Tighearn ar Dia.

7 Agus tharladh an ceann dheich làithean, gu'n d'fhàinig guth an Tighearna do Ieremiah.

8 An sin ghairm e Iohanan mac Chareah, agus uile cheannardan an fheachd a bha maille ris, agus an sluagh uile, o'n bheag gus a' mhòr.

9 Agus thubhairt e riu, Mar so deir an 'Tighearn Dia Israeil, gus an do chuir sibh mise chum 'ur n-athchuinge a chur suas 'na làthair;

10 Ma dh'fhanas sibh an còmhnuidh anns an tìr so, an sin togaidh mise sibh, agus cha tìlg mi sìos; agus suidhichidh mi sibh, agus cha spion mi sìos: oir is aithreach leam an t-olc a rinn mi oirbh.

11 Na biodh eagal righ Bhabiloin oirbh, as am bheil sibh a' gabhail eagal: na biodh eagal oirbh roimhe, deir an Tigh-earn; oir tha mise leibh g'ur tèarnadh, agus g'ur saoradh as a làimh.

12 Agus nochdaidh mi tròcairean duibh, agus gabhaidh esan truas dèibh, agus suidhichidh e sibh 'nur dùthaich féin.

13 Ach ma their sibh, Cha ghabh sinn còmhnuidh anns an fhearann so; air chor as nach toir sibh géill do ghuth an 'Tigh-earna bhur Dia,

14 Ag ràdh, Ni h-eadh; ach théid sinn do thìr na h-Eiphit, far nach faic sinn cogadh sam bith, ni mò chluinneas sinn fuaim na trompaid, no bhios easbhuidh arain oirnn; agus an sin gabhaidh sinn còmhnuidh:

15 (Seadh a nis uime sin éisdibh focal an Tighearn, O iarmaid Iudah, Mar so tha 'Tighearn nan sluagh, Dia Israeil, ag ràdh, Ma chuireas sibh da rìreadh bhur n-aghaidh ri dol do'n Eiphit, agus gu'n téid sibh an sin air chuairt:)

16 An sin tarlaidh gu'n dean an claidheamh, roimh am bheil eagal oirbh, 'ur glacadh an sin ann an tìr na h-Eiphit; agus a ghort, roimh am bheil eagal oirbh, dlùth-leanaidh air 'ur tòir an sin anns an Eiphit; agus an sin gheibh sibh bàs.

17 Is amhluidh a thachairas do na h-uile dhaoine a chuireas an aghaidh ri dol do'n Eiphit gu fantuinn air chuairt an sin; bàsaichidh iad leis a' chlaidheamh, leis a' ghort, agus leis a' phlàigh: agus cha bhì aon a mhaireas, no théid as o'n olc a bheir mise orra.

18 Oir mar so deir 'Tighearn nan sluagh, Dia Israeil, Mar a bha m'fhearg agus mo chorruich air a dòrtadh a mach air luchd-àiteachaidh Ierusalem, is amhluidh bhios mo chorruich air a dòrtadh a mach oirbhse 'n trà, théid sibh a steach do'n Eiphit: agus bithidh sibh 'nur mallachadh, agus 'nur n-uamhas, agus 'nur mallachd, agus 'nur masladh; agus cha'n fhaic sibh an t-àite so ni's mò.

19 Is e focal an Tighearna do 'ur taobhsa, O fhuigheall Iudah, Na rachaibh do'n Eiphit; biodh fios cinnteach agaibh gu'n d'thug mise rabhadh dhuibh an diugh.

20 Gu deimhin chuir sibh an gnìomh cealg an aghaidh 'ur n-anama féin: oir chuir sibh mise chum an Tighearna bhur Dia, ag ràdh, Guidh air ar son-ne ris an Tighearn ar Dia, agus a réir gach ni a their an Tighearn ar Dia, mar sin innis duinn, agus ni sinne.

21 Agus dh'imis mise dhuibh air an là an diugh, ach cha d'thug sibhse géill do ghuth an Tighearna bhur Dia, no do aon ni air son an do chuir e mise do 'ur n-ionnsuidh.

22 Air an aobhar sin biodh dearbh fhios

agaibh gu'm bàsaich sibh leis a' chlaidheamh, agus leis a' ghort, agus leis a' phlàigh, anns an àite agus an àill leibh siubhal gu fantuinn air chuairt.

CAIB. XLIII.

1 *Chado chreid na ceannardan fàistneachd Ieremiah; 5 agus air an aobhar sin ghèill iad e féin agus a' chuid eile do'n t-sluagh do'n Eiphit. 8 Roimh-innis Ieremiah gu'm buaileadh rìgh Bhabailoin tìr na h-Eiphit.*

AGUS tharladh, trà sguir Ieremiah do labhairt ris an iomlan do'n t-sluagh uile bhriathran an Tighearn an Dia, air son an do chuir an Tighearn an Dia esan d'an ionnsuidh, *eadhon* nan uile bhriathra so;

2 Gu'n do labhair Asariah mac Hosaiah, agus Iohanan mac Chareah, agus na daoine uaibhreach uile, ag ràdh ri Ieremiah, Is breug a tha thu labhairt: cha do chuir an Tighearn ar Dia thu gu ràdh, Na rachaibh do'n Eiphit a dh'fhantuinn air chuairt an sin:

3 Ach tha Baruch mac Neriah 'gad bhrosnuchadh 'nar n-aghaidh, a chum ar toirt suas do làimh nan Caldéach, a chum ar marbhadh, no ar toirt air falbh 'nar braighdibh gu Babilon.

4 Mar so cha d' thug Iohanan mac Chareah, agus uile cheannardan an fheachd, agus an sluagh uile, géill do ghuth an Tighearn, gu còmhnuidh ghabhail ann an tìr Iudah:

5 Ach ghabh Iohanan mac Chareah, agus uile cheannardan an fheachd, a' mheud as a bha làthair do Iudah, a phill o na h-uile chinnich gus an robh iad air am fògradh, gu còmhnuidh ghabhail ann an tìr Iudah;

6 Na fir, agus na mnathan, agus a' chlann agus nigheanan an rìgh, agus gach neach a dh'fhàg Nebusar-adan ceannard an fhriceadain le Gedaliah mac Ahicaim, mhic Shaphain, agus Ieremiah am fàidh, agus Baruch mac Neriah;

7 Agus dh'imich iad gu tìr na h-Eiphit; oir cha d' thug iad géill do ghuth an Tighearn; agus thàinig iad eadhon gu Tahpanes.

8 An sin thàinig focal an Tighearn a gu Ieremiah ann an Tahpanes, ag ràdh,

9 Gabh ann ad làimh clachan mòra, agus folaich iad anns a' chreadh, ann an àth nan clacha-creadh, a ta aig dol a steach tighe Pharaoh, ann an Tahpanes, ann an sealladh fheara Iudah.

10 Agus abair riu, Mar so tha Tighearn nan sluagh, Dia Israel ag ràdh; Feuch, cuiridh mise fios, agus gabhaidh mi Nebuchadnesar rìgh Bhabailoin, mo sheirbheiseach, agus suidhichidh mi a rìgh-chathair air na clachaibh so a dh'fholaich mi, agus sgaoilidh e a phàillium rioghail os an ceann.

11 Agus thig e, agus buailidh e tìr na h-Eiphit, iadsan a ta chum bàis, le bàs; agus iadsan a ta chum daorsa, le daorsa; agus iadsan a ta chum a' chlaidheamh, leis a' chlaidheamh.

12 Agus fadaidh mise teine ann an tighibh dhèe na h-Eiphit; agus loisgidh esan iad, agus bheir e air falbh 'nam braighdibh iad, agus éididh se e féin le tìr na h-Eiphit, mar a dh'èideas buachaill e féin le 'thrusgan; agus thèid e mach as a sin ann an sìth.

13 Brisidh e fòs dealbhan tighe na gréine a ta an tìr na h-Eighit; agus tighean dhèe na h-Eiphit loisgidh e le teine.

CAIB. XLIV.

1 *Chronaich Ieremiah na h-Iudhaich san Eiphit air son an iodhol-aoradh: 11 Dh'inns e roimh-làimh an léir-sgrìos. 15 Aingidheachd agus reusgachd nan Iudhach.*

AM focal a thàinig gu Ieremiah mu thimchioll nan uile Iudhach a ta chòmhnuidh ann am fearann na h-Eiphit, a ta chòmhnuidh aig Migdol, agus aig Tahpanes, agus aig Noph, agus ann an dùthaich Phatrois, ag ràdh,

2 Mar so tha Tighearn nan sluagh, Dia Israel, ag ràdh, chunnaic sibh an t-uile olc a thug mise air Ierusalem agus air uile bhailtibh Iudah; oir feuch an diugh tha iad 'nam fàsach, agus cha 'n 'eil neach 'gan àiteachadh,

3 Air son an aingidheachd a chuir iad an gnìomh, a chum mise a bhrosnuchadh gu feigr, le iad a dhol a losgadh tùise, gu seirbhis a thoirt do dhiathaibh eile nach b'aithne dhoibh: dhoibh-san, dhuibh-se, no do 'ur n-aithrichibh.

4 Chuir mi mar an ceudna do 'ur n-ionnsuidh m' uile sheirbhisich na fàidhean, ag éirigh gu moch agus 'gan cur a mach, ag ràdh, Guidheam oirbh, na deanaibh an nì gràineil so a's fuathach leam-sa.

5 Ach cha d'èisd iad, ni mò thionndaidh iad an cluas, gu pilleadh o'n aingidheachd, agus gun tùs a losgadh do dhiathaibh eile.

6 Uime sin bha m'fhearg agus mo chorr- uich air a taomadh a mach, agus air a lasadh ann am bailtibh Iudah, agus ann an sràidibh Ierusalem, agus tha iad 'nam fàsach, agus 'nan làraich sgaoilte, mar air an là an diugh.

7 Agus a nis mar so deir Iehobhah Dia nan sluagh, Dia Israel; C' uime am bheil sibh a' cur an gnìomh an uile mhòir so an aghaidh 'ur n-anama féin, a ghearradh as uaibh an fhir agus na mnà, an leinibh agus an naoidhein, a mach à Iudah; ionnus nach fàgar fuigheall beò dhibh;

8 Agus gu bheil sibh 'gam bhrosnuchadh-sa gu corruich le oibribh 'ur làmh, a' losgadh tùise do dhiathaibh coimheach

ann an tìr na h-Eiphit, gus am bheil sibh air dol a ghabhail còmhnuidh; a chum gu'm biodh sibh air 'ur gearradh as, agus gu'm biodh sibh 'nur mallachadh, agus 'nur masladh am measg uile chinneach na talmhainn?

9 An do dhìc-huimhnich sibh aingidh-eachd bhuir n-aithrichean, agus aingidh-eachd rìghrean Iudah, agus aingidh-eachd am mnathan, agus 'ur n-aingidh-eachd féin, agus aingidh-eachd 'ur ban, a chuir iad an gnìomh ann am fearann Iudah, agus ann an sràidibh Ierusalem?

10 Cha 'n 'eil iad air an irioslachadh gus an là an diugh, ni mò ghabh iad eagal, no ghluais iad ann am lagh-sa, no ann am reachdaibh, a chuir mi roimhibh-sa, agus roimh bhuir n-aithrichibh.

11 Uime sin mar so tha Tighearn nan sluagh, Dia Israeil, ag ràdh, Feuch, cuiridh mise mo ghnuis 'nur n-aghaidh a chum uile, eadhon a chum Iudah uile a ghearradh air falbh.

12 Agus gabhaidh mi fuigheall Iudah, a chuir an aghaidh ri dol do thìr na h-Eiphit gu fantuinn air chuairt an sin, agus caith-ear iad uile ann an tìr na h-Eiphit; tuitidh iad leis a' chlàidheamh, caith-ear iad leis a' ghort; o'n bheag gus a' mhòr, bàsaichidh iad leis a' chlàidheamh, agus leis a' ghort; agus bithidh iad 'nam mallachadh, agus 'nan uamhas, agus 'nam mallachd, agus 'nam masladh.

13 Agus smachdaichidh mi iadsan a ta chòmhnuidh ann an tìr na h-Eiphit, mar a smachdaich mi Ierusalem, leis a' chlàidheamh, leis a' ghort, agus leis a' phlàigh.

14 Agus do fhuigheall Iudah a ta air teachd air chuairt do'n Eiphit, cha bhi neach a thèid as no mhaireas beò, gu pill-eadh do thìr Iudah, gus am bheil iad an geall air pilleadh a ghabhail còmhnuidh; seadh, cha phill ach iadsan a thèid as.

15 An sin na h-uile dhaoine aig an robh fios gu'n do loisg am mnathan tùis do dhiathlaibh eile, agus na h-uile mhnathan a sheas dlùth, sluagh mòr, eadhon an t-uile shluagh a bha chòmhnuidh ann an tìr na h-Eiphit, ann am Patros, fhreagair iad Jeremiah, ag ràdh,

16 A thaobh an fhocail a labhair thu ruinn ann an ainm an Tighearna, cha'n éisd sinn riut.

17 Ach ni sinn gu deimhin gach uile ni a thig a mach as ar beul féin, a losgadh tùise do bhan-rìghinn nèimh, agus a thaomadh a mach tabhartasa-dìbhe dhi; amhuil a rinn sinn, sinn féin agus ar n-aithrichean, ar rìghrean, agus ar n-uaislean, ann am bailtibh Iudah, agus ann an sràidibh Ierusalem: oir an sin bha pailteas bìdh againn, agus shoirbhich leinn, agus cha'n fhaca sinn olc air bith.

18 Ach o'n àm an do sguir sinn do losgadh tùise do bhan-rìghinn nèimh, agus do thaomadh a mach tabhartasa-dìbhe dhi, bha easbhuidh nan uile nithe oirnn, agus bha sinn air ar caitheamh leis a' chlàidheamh agus leis a' ghort.

19 Agus an uair a loisg sinn tùis do bhan-rìghinn nèimh, agus a dhòirt sinn a mach tabhartasa-dìbhe dhi, an d'rinn sinn breacagan dhi d'a h-aoradh, agus a dhòrtadh tabhartasa-dìbhe dhi, as eugmhais ar feara?

20 An sin labhair Jeremiah ris an uile shluagh, ris na fearaibh, agus ris na mnaibh, agus ris an uile shluagh a thug dha freagradh, ag ràdh,

21 An tùis a loisg sibh ann am bailtibh Iudah, agus ann an sràidibh Ierusalem, sibh féin, agus 'ur n-aithrichean, 'ur rìghrean, agus 'ur n-uachdarain, agus sluagh an fhearainn, nach do chuimhnich an Tighearn iad, agus nach d'thàinig iad 'na aire?

22 Air chor as nach feudadh an Tighearn giùlan *leibh* ni b'fhaide, air son aingidh-eachd 'ur deanadais, air son nan gràineil-eachdan a chuir sibh an gnìomh: air an aobhar sin tha 'ur fearann 'na fhàsach, agus 'na uamhas, agus 'na mhallachd, gun aon fhear-àiteachaidh, mar air an là an diugh.

23 A chionn gu'n do loisg sibh tùis, agus a chionn gu'n do pheacaich sibh an aghaidh an Tighearn, agus nach d'thug sibh géill do ghuth an Tighearna, ni mò ghluais sibh 'na lagh, no 'na reachdaibh, no 'na àitheantaibh: air an aobhar sin, tha'n t-olc so air teachd oirbh, mar air an là an diugh.

24 Os bàrr, thubhairt Jeremiah ris an t-sluagh uile, agus ris na mnaibh uile, Eisdibh focal an Tighearn, uile Iudah a ta an tìr na h-Eiphit;

25 Mar so labhair Tighearn nan sluagh, Dia Israeil, ag ràdh, Labhair sibh féin agus 'ur mnathan le 'ur beoil, agus chuir sibh an gnìomh le 'ur làmhnan, ag ràdh, Coimhlionaidh sinn gu deimhin ar bòidean a thug sinn, gu tùis a losgadh do bhan-rìghinn nèimh, agus tabhartasa-dìbhe dhòrtadh a mach dhi: ni sibh gu deimhin 'ur bòidean a dhaingneachadh, agus ni sibh gu deimhin 'ur bòidean a choimhlionadh.

26 Uime sin éisdibh focal an Tighearn, uile Iudah, a ta chòmhnuidh ann an tìr na h-Eiphit; Feuch, mhlionnaich mise air m'ainm mòr, deir an Tighearn, nach bi m'ainm ni's mò air 'ainmeachadh ann am beul duine air bith do Iudah, ann an uile thìr na h-Eiphit, ag ràdh, Mar is beò an Tighearn Dia.

27 Feuch, ni mise faire os an ceann air son uile, agus cha'n ann air son maith,

agus sgriosar gach duine do Iudah a ta 'n tìr na h-Eiphit, leis a' chlaidheamh; agus leis a' ghort, gus am bi làn chrìoch orra.

28 Agus a' mhuinntir a thèid as o'n chlaidheamh, pillidh iad o thìr na h-Eiphit gu tìr Iudah, tearc ann an àireamh: agus aithnichidh uile fhuigheall Iudah a chaidh air chuairt do thìr na h-Eiphit, cò am focal a sheasas, m'fhocal-sa, no am focal-san.

29 Agus *bithidh* so mar chomhara dhuibh, deir an Tighearn, gur mise a smachdaich sibh anns an àite sin, a chum gu'n aithnich sibh gu cinnteach gu seas mo bhrìathran-sa 'nur n-aghaidh a chum 'ur dochainn:

30 Mar so deir an Tighearn, Feuch, bheir mise Pharaoh-hopra rìgh na h-Eiphit do làimh a naimhdean, agus do làimh na muinntir a ta 'g iarraidh 'anama; mar a thug mi Sedeciah rìgh Iudah do làimh Nebuchadnesair rìgh Bhabiloin, agus fear-tòrachd¹ 'anama.

CAIB. XLV.

1 'Nuair bha Baruch fo eagal thug Ieremiah misneach dha.

AM focal a labair Ieremiah am fàidh ri Baruch mac Neriah, 'nuair a sgriobh e na briathran so ann an leabhar o bheul Ieremiah, ann an ceathramh bliadhna Iehoiacim mhic Iosiah rìgh Iudah, ag ràdh, 2 Mar so labhair an Tighearn Dia Israeil do d' tlaobh-sa, O Bharuich;

3 Thubhairt thu, Mo thruaighe mise nis! oir chuir an Tighearn bròn ri m' dhoilghios; tha mi sgìth le m' osnaibh, agus fois air bith cha d'fhuair mi!

4 Mar so their thu ris, Mar so thubhairt an Tighearn, Feuch, an ni sin a thog mi, tilgidh mi sìos; agus an ni sin a shuidhich mi spionaidh mi nìos; eadhon am fearann so gu h-ìomlan.

5 Agus am bheil thusa ag iarraidh air do shon fèin nithe mòra? Na h-iarr: oir, feuch, bheir mise olc air na h-uile fheoil, tha an Tighearn ag ràdh: ach bheir mi dhuitse t'anam mar chobhartach, anns na h-uile àite gus an téid thu.

CAIB. XLVI.

1 Roimh-innis Ieremiah gu'm buaileadh Nebuchadnesar feachd rìgh na h-Eiphit. 17 Thug e comfhurtachd do Jacob 'na bhràighdeanas.

FOCAL an Tighearn a thàinig gu Ieremiah am fàidh, mu thimchioll nan cinneach.

2 Mu thimchiol na h-Eiphit. A thaobh feachda Pharaoh-necho rìgh na h-Eiphit, a bha ri taobh na h-aimhne Euphrateis ann an Charchemis, a bhuail Nebuchadnesar rìgh Bhabiloin, ann an ceathramh bliadhna Iehoiacim, mhic Iosiah, rìgh Iudah.

3 Glensaidh an targaid agus an sgiath,

agus dlùthaichibh a chum a' chatha.

4 Uidhimichibh na h-eich, agus rachaidh air am muin, a mharc-shluagh; agus seasaibh a mach le ceann-bheartaibh; lìomhaibh na sleaghan, cuiribh oirbh na lùirichean.

5 C'uime am faca mi iad so fo gheilt, agus a' gabhail na ruaige? tha eadhon an daoine cumhachdach air an claidh; seadh a' teicheadh gu luath, agus gun iad a' sealltuinn 'nan déigh. Tha eagal air gach làimh, deir an Tighearn.

6 Na teicheadh am fear luath, agus na rachadh am fear làidir as; a làimh na h-àirde tuath, ri taobh na h-aimhne Euphrateis, thuislich, agus fhuair iad leagadh.

7 Cò so teachd a nìos mar amhainn, agus a h-uisgeachan ag atadh mar thuiltean?

8 Dh'éirich an Eiphit mar amhainn, tha a h-uisgeachan ag atadh mar thuiltean, agus tha i ag ràdh, Thèid mi suas, còmhdaichidh mi am fearann, sgriosaidh mi a' chaitheir agus iadsan a ta 'ga h-àiteachadh.

9 Rachaibh air 'ur n-eachaibh, agus bithibh air mhìre-chatha; air na carbadaidh, agus rachaidh na fir-chogaidh a mach: na h-Etiopaich, agus na Libian-aich a ghlacas an sgiath, agus na Lidian-aich a ghlacas agus a chuireas air lagh am bogha.

10 Oir is e so là Tighearna nan sluagh, là dioghaltais, a chum e fèin a dhioladh air a naimhdeibh: agus sluigidh an claidheamh, agus bithidh e sàthach, agus cuircar air mhisg e le 'm fuil: oir tha iobairt aig Tighearn nan sluagh anns an tìr mu thuath, laimh ri amhainn Euphrateis.

11 Theirg suas gu Gilead, agus gabh ioc-shlaint, O òg-bhean, a nighean na h-Eiphit; is dìomhain duit mòran chungaidhean-leigheis a ghnàthachadh: air do leigheas cha bhi thu.

12 Chuala na cinnich do mhasladh, agus lìon do ghaoir an talamh: oir thuislich iad, an laoch an aghaidh na laoi; thuit iad araon le chèile.

13 Am focal a labhair an Tighearn ri Ieremiah am fàidh, mu theachd Nebuchadnesair rìgh Bhabiloin, a bhuailadh tìre na h-Eiphit.

14 Foillsichibh anns an Eiphit, agus cuiribh an céill ann am Migdol; insibh fòs ann an Noph, agus ann an Tahpanes abraibh; Seas daingean, agus deasaich thu fèin; oir shluig an claidheamh a' mhuinntir a ta mu'n cuairt duit.

15 C'uime am bheil do chumhachdaich air an leagail? cha do sheas iad, a chionn gu'n do thug an Tighearn sìos iad.

16 Thug e air mòran tuisleachadh,

¹ a bha 'g iarraidh.

seadh, tuiteam air muin a chéile¹: thubhairt iad uime sin, 'Thigibh, agus pilleamaid gu ar sluagh féin, agus gu tír ar dúchais, o chlaidheamh a' mhillteir.

17 Dh'éigh iad an sin, O Pharaoh, a rìgh na h-Eiphit, chuir ioma-luasgadh bacadh air a' choinneamh a shuidhicheadh.

18 Mar is beò mise, deir an Rìgh, d'an aium Iehobhah! Dia nan sluagh, gu deimhin mar Thabor am measg nam beann, agus mar Charmel ri taobh na fairge, thig e.

19 Cuir t' airneis an uidheam air son dol air ghluasad, Oa nighean a ta chòmh-nuidh san Eiphit; oir bithidh Noph 'na fhàsach, bithidh e fòs 'na làraich sgaoilte, gun aon 'ga àiteachadh.

20 Is agh aig am bheil aogus àluinn an Eiphit; tha milleadh o'n àirde tuath a' teachd 'na h-aghaidh.

21 Tha a fir-thuarasdail fòs 'na meadhon mar dhaimh bliadhna; gidheadh thionndaidh eadhon iadsan an cùlaobh, theich iad le chéile, cha do sheas iad; a chionn gu'n d'fhàinig orra là an aimhleis, aimsir an smachdachaidh.

22 Théid a ghuth a mach mar ghuth nathrach; oir gluaisidh iad mar armait, agus thig iad 'na h-aghaidh le tuaghaibh, mar luchd-gearradh chraobh.

23 Gearraibh sìos a coilteach, tha an Tighearn ag ràdh, air chor as nach bi i r'a faotainn le iarraidh; ge lìonmhoire iad na locuist, agus ged nach feudar an àir-eamh.

24 Tha amhladh air nighinn na h-Eiphit; thugadh thairis i do làimh sluagh na h-àirde tuath.

25 Thubhairt Tighearn nan sluagh, Dia Israeil, Feuch, smachdaichidh mise Amon, No, agus Pharaoh, agus an Eiphit, agus a dée, agus a rìghrean; eadhon Pharaoh agus iadsan a ta cur an dòchais ann.

26 Agus bheir mi thairis iad do làimh na muinntir a ta 'g iarraidh an anama, eadhon do làimh Nebuchadnesair rìgh Bhabailoin, agus do làimh a sheirbhiseach: agus 'na dhéigh sin àitichear i, mar ann na làithibh o shean, deir an Tighearn.

27 Ach na biodh eagal ortsa, O Iacoib, m' òglaich, agus na biodh geilt ort, O Israeil; oir, feuch, bheir mise tèaruinte thu o chéin, agus do shliochd o thìr an daorsa; agus pillidh Iacob, agus gheibh e fois agus sìth; agus cha bhi aon neach ann a chur eagail air.

28 Na biodh eagal ort, O Iacoib m' òglaich, deir an Tighearn, oir tha mise maille riut; ged bheir mi crìoch iomlan air na h-uile chinnich gus an d'fhògair mi thu, gidheadh cha toir mi crìoch iomlan ortsa: ach smachdaichidh mi thu ann an

tomhas, agus cha'n fhuing mi dhuit dol as gu h-iomlan saor.

CAIB. XLVII.

1 Fàisteachd mu thimchioll léir-sgrìos nam Philisteach.

FOCAL an Tighearn a thàinig gu Ieremias am fàidh a thaobh nam Philisteach, mu'n do bhuail Pharaoh Gasa.

2 Mar so deir an Tighearn, Feuch, tha uisgeachan a' teachd a nìos o'n àirde tuath, agus fàsaidh iad 'nan tuil a thig thairis, agus a chòmhdaicheas am fearann, agus gach nì a ta ann; a' chaithir, agus iadsan a ta 'g a h-àiteachadh: agus éighidh na daoine gu h-àrd, agus nì uile luchd-àiteachaidh na tìre tuireadh.

3 Ri fuaim tartair iongan an eacha meamnach, ri farum a' charbad, ri stairich a rothan, cha seall na h-aithrichean air an ais ri 'n cloinn le laigse làmh;

4 Air son an là a ta teachd a chreachadh nam Philisteach uile, agus a ghearradh air falbh o Thirus agus o Shidon gach fear-cuideachaidh a mhaireas: oir creachaidh an Tighearn na Philistich, fuigheall tìre Chapltoir.

5 Thàinig maoile air Gasa; mhilleadh Ascelon. O fhuigheall an glinne; cia fhada nì thusa thu féin a ghearradh?

6 Ho! a chlaidheimh Iehobhah! cia fhada gus an gabh thu fois? taisg thu féin ann ad thruaill, gabh fois, agus bi sàmhach.

7 Cionnus a dh'fheudas e bhi sàmhach, o thug an Tighearn àithne dha? An aghaidh Asceloin, agus an aghaidh oirthir na fairge, an sin dh'orduich se e

CAIB. XLVIII.

1 Breitheanas nam Moabach, 7 a chionn gu'n do chuir iad an dòchas 'nan saoihbheas, 11 'nan soirbheas, 14 agus 'nan neart chum cogaidh. 26 Nìthear Moab 'na bhall-fanaid air son uaille agus àrdain a chridhe. 47 Bheirear bruid Mhoab air a h-ais anns na làithibh deireannach.

MU thimchioll Mhoab. Mar so tha Tighearn nan sluagh, Dia Israeil, ag ràdh; Is an-aoibhin do Nebo! oir tha e air a chreachadh: tha Ciriataim air a chur gu h-amhladh, air a ghlacadh; tha e air a mhaslachadh, an daingneach àrd, agus air a bhriseadh sìos.

2 Nì's mò cha bhi uail aig Moab ann an Hesbon; dhealbhadh iad olc 'na aghaidh, ag ràdh, Thigibh, agus gearramaid as e o bhi 'na chinneach: millear thusa mar an ceudna, O Mhadmein, bithidh an claidheamh air do thòir.

3 Tha fuaim éighich o Horonaim, mill-eadh agus àr mòr.

4 Tha Moab air a mhilleadh, thug a chlann bheag air an gaor a bhi air a cluinntinn.

5 Gu dearbh aig uchdaich Lulit, théid

¹ càch a chéile.

gul a suas gun fhois: gu dearbh aig leathad Horonaim chuala mo naimhdean éigh a' mhillidh.

6 Teichibh, tèarnaibh 'ur n-anam, agus bithibh mar phreas seargta san ionad sgaoilte.

7 Oir a chionn gu'n d'earb thu á do mhaoin, agus á d'ionmhasaibh, air an aobhar sin bithidh tuféin fós air do ghlaacadh: agus théid Chemos air falbh am braighdeanas, a shagairt agus uachdarain maille ris.

8 Thig creachadair fos air gach uile chaithir; agus cha téid caithir air bith as: agus millear an gleann, agus théid an comhnard a sgrios, amhuil a labhair an Tighearn.

9 Thugaibh sgiathan do Mhoab, a chum gu'n teich e gu luath air falbh; agus biodh a bhailean 'nam fàsach, gum aon 'gan àiteachaidh.

10 Is malluichte esan a ni obair an Tighearna gu cealgach; agus is malluichte esan a chumas a chlaidheamh air ais o fhuil.

11 Bha suaimhneas aig Moab o 'òige, agus shocruidh e air a dheasgainibh, agus cha do tharruingeadh a mach o shoitheach gu soitheach e, ni mò dh'imich e ann am braighdeanas: air an aobhar sin mhair a bhlas ann, agus cha d'atharraicheadh 'fhàile.

12 Uime sin, feuch, tha na làithean a' teachd, deir an Tighearn, anns an cuir mise d'a ionnsuidh luchd-gluasaid, a bheir air dol air ghluasad, agus a dh'fhalbh-mhaicheas a shoitichean, agus a bhriseas a shoireachan.

13 Agus bithidh nàire air Moab do Chemos, mar a bha nàire air tigh Israeil do Bhet-el am muinghinn.

14 Cionnus a their sibh, Tha sinn 'nar daoine cumhachdach, agus treuna air son a' chatha?

15 Tha Moab air a chreachadh, agus air dol suas as a bhailtibh, agus thàinig an òigridh thaghta-san a nuas a chum an àir, deir an Rìgh, d'an ainm Iehobhah Dia nan sluagh.

16 Tha léir-sgrios Mhoab dlùth do làmh, agus 'amhgar gu luath a' greasad.

17 Guilb air a shon, sibhse uile mu'n cuairt da; agus sibhse uile d'an aithne 'ainm, abraibh, Cionnus a bhriseadh slat-rìoghail na treise! lorg na maise!

18 Thig a nuas o d' àilleachd, agus suidh ann an iota, O a nighean a ta 'g àiteachadh Dhiboin; a chionn gu bheil creachadair Mhoab air teachd a nìs ann ad aghaidh, fear-millidh do dhaing-nichean.

19 Seas aig an t-slighe, agus gabh seall-

adh, O bhean-àiteachaidh Aroer; feòraich dheth-san a theicheas, agus dh'ise chaidh as, abair Ciod a rinneadh?

20 Mhasluicheadh Moab, oir bhriseadh a sìos e: deanaibh ulartaich agus àrd-éigheach; insibh an sgeul ann an Arnon, gu bheil Moab air a mhilleadh.

21 Agus thàinig breitheanas air an tìr chòmhnaird; air Holon, agus air Iahasah, agus air Mephaat,

22 Agus air Dibon, agus air Nebo, agus air Bet-diblataim,

23 Agus air Ciriataim, agus air Bet-gamul, agus air Bet-meon,

24 Agus air Ceriot, agus air Bosrah, agus air uile bhailtibh fearainn Mhoab, am fad agus am fagus.

25 Ghearradh adharc Mhoab uath, agus tha a ghairdean air a bhriseadh, deir an Tighearn.

26 Cuir air mhig e; a chionn gu'n do thog e suas e féin an aghaidh an Tighearna; seadh, ni Moab e féin aonair 'na sgeith féin, agus bithidh e mar an ceudna 'na bhall-fanaid.

27 Oir, nach robh Israel 'na bhall-fanaid dhuitse? an d'fhuaradh am measg mheirleach e, gu'n tugadh tu ana-cainnt da leis na h-uile bhriathraibh a b'urrainn thu?

28 Fàgaibh na bailtean, agus gabh-aibh còmhuidh anns a' charraig, O sibhse a ta 'g àiteachadh Mhoab; agus bithibh còmhuidh ris a' choluman a ni a nead ann am braich bile na h-uaimhe.

29 Chuala sinn uabhar Mhoab; tha e ro uaibhreach; a mhòr-chùis, agus 'uabhar, agus 'uail, agus àrdan a chridhe.

30 Is aithne dhomh-sa, deir an Tighearn, a chorruidh, ach cha'n 'eil a neart d'a réir; a ràiteachas, ach cha'n 'eil a dheanadas d'a réir.

31 Air an aobhar sin guilidh mise air son Mhoab, eadhon air son Mhoab uile togaidh mi 'n àird mo ghuth; ri fearaibh Chir-hereis ni laser éigheach le gul.

32 Guilidh mi air do shon, O fhionain Shibmah; sgaoil do mheanglain thar an fhairge, ràinig iad gu ruig fairge Iaseir; air do mheas-samhradh, agus air d'fhion-fhogharadh bhuaill am fear-millidh.

33 Agus tha aoibhneas agus gàirdeachas air an toirt air falbh o'n mhachair thorraich, eadhon o thìr Mhoab; agus air fion o'n anar-bhruthaidh chuir mise casgadh; am fear-bruthaidh cha bhruth, an iolach cha'n iolach i.

34 O ghaoir Hesboim gu Elealeh, gu Iahas chuir iad a mach an guth, o Shoar gu ruig Horonaim, mar thri-bliadhnach aigh; oir bithidh eadhon uisgeacha Nimrim 'nan léir-sgrios.

35 Agus cuiridh mise casgadh ann am Moab, tha an Tighearn ag ràdh, airesan a

¹ shìolaidh.

dh'ìobras air ionad àrd, agus airsan a loisgeas tuis d'a dhiathaibh.

36 Air an aobhar sin ni mo chridhe fuaim mar phhìobaibh air son Mhoab; ni eadhon mo chridhe fuaim mar phhìobaibh air son fheara Chir-hereis: a chionn gu'n deachaidh am beartas a fhuair iad am mugha.

37 Seadh, *bithidh* gach ceann maol, agus gach feusag bearrta: air na h-uile làmhnan *bithidh* gearraidhean, agus air na h-uile leasraibh sac-éididh.

38 Air mullach uile thighean Mhoab, agus 'na shràidibh, *bithidh* tuireadh coit-chionn: oir bhris mise Moab, mar shoith-each anns nach 'eil aig aon neach tlachd, deir an Tighearn.

39 Cionnus a bhriseadh sìos e! (bhàir iad:) cionnus a thionndaidh Moab a chùl-aobh! nàraicheadh Moab, agus bithidh e 'na bhall-fanaid, agus 'na uamhunn dhoibhsan uile mu'n cuairt da.

40 Oir mar so tha an Tighearn ag ràdh, Feuch, itealaichidh *aon* mar iolair, agus sgaoilidh e a sgiathan thar Mhoab.

41 Ghlacadh na bailtean, agus tha na daingnichean an làimh, agus bithidh cridheachan laoch Mhoab anns an là sin mar chridhe mnà ri saothair.

42 Agus sgriosar Moab o bhi nì's mò 'na chinneach, a chionn gu'n d' àrdaich se e fèin an aghaidh an Tighearn.

43 *Bithidh* an t-uamhas, an slochd, agus an rib ort, O fhir-àiteachaidh Mhoab, deir an Tighearn.

44 Esan a theicheas o'n uamhas, tuitidh e san t-slochd, agus esan a dh'èireas as an t-slochd, glacar e san rib; oir bheir mise air, *eadhon* air Moab, bliadhna a smachdachaidh, deir an Tighearn.

45 Fuidh sgàile Hesboin sheas iadsan a theich o'n ainneart: ach thig teine mach o Hesbon, agus lasair à meadhan Shihoin, agus loisgidh e cearna Mhoab, agus mullach cinn nan daoine céannairceach.

46 Is an-aibhin dhuitse, O Mhoab! tha thusa caillte, O shluaigh Chemois! oir thugadh do mhic air falbh am braigheanas, do nigheanan ann am bruid mar an ceudna.

47 Gidheadh bheir mise air a h-ais bruid Mhoab anns na làithibh deireannach, deir an Tighearn. An fhad so breith-eanas Mhoab.

CAIB. XLIX.

1 Breitheanas nan Amonach, 7 nan Edomach, 23 Dhamascuis, 28 Chedair, 30 Hasoir, 34 agus Elaim. 39 Bheirear bruid Elaim air a h-ais anns na làithibh deireannach.

MU thimchioll nan Amonach, Mar so 'tha an Tighearn ag ràdh, Nach 'eil mic idir aig Israel? nach 'eil oighre sam bith aige! c'uime am bheil sealbh

aig Milcom air Gad, agus a shluagh a chòmhnuidh 'na bhaitibh?

2 Uime sin, feuch, tha na làithean a' teachd, deir an Tighearn, san toir mise fa'near gu'n chluinnear ann an Rabah nan Amonach caismeachd cogaidh; agus bithidh e 'na thòrr léir-sgrios, agus loisgear a nigheanan le teine: an sin bithidh Israel 'na oighre air an dream a bha 'nan oighreachan air-san, deir an Tighearn.

3 Dean ulartaich, O Hesboin, oir chreachadh ai: éighibh, a nigheana Rabah, cuiribh umaibh eudach-saice: deanaibh tuireadh, agus ruithibh air 'ur n-ais agus air 'ur n-aghaidh ri taobh nan callaidean; oir falbhaidh Milcom ann am braigheanas, a shagairt agus 'uachdarain maille ris.

4 C'uime am bheil thu ri uaill ann an gleanntaibh? *ged* tha do ghleann torrach, O a nighean cheannaireach; ag earbsa as a h-ionmhasaibh, *ag ràdh*, co thig a m'ionnsuidh-sa?

5 Feuch, bheir mise uamhas ort, tha an Tighearn Dia nan sluagh ag ràdh, o na h-uile taobh mu'n cuairt duit, agus ionaimear a mach sibh, gach aon roimhe, agus cha bhi neach ann a chruinnicheas air an ais a' mhuinntir a ghabhas an ruaig.

6 Ach 'na dhóigh sin bheir mise air a h-ais bruid cloinne Amon, deir an Tighearn.

7 Mu thimchioll Edoim. Mar so tha Tighearn nan sluagh ag ràdh, Nach 'eil gliocas nì's mò ann an Teman? an do bhàsaich comhairle nan daoine glice? an deachaidh an gliocas am mugha?

8 Teichibh, pillibh air 'ur n-ais, rachaibh domhain a ghabhail còmhnuidh, O a luchd-àiteachaidh Dhèdain; oir bheir mise dòrainn Esau air, an uair a smachdaicheas mi e.

9 Ma thig luchd-tionail fhion-dhearc a d' ionnsuidh, cha'n fhàg iad uirread as dioghlum: ma thig gaduichean anns an oidheche, creachaidh iad gus am bi aca nì's leòr.

10 Oir rùisg mise Esau, leig mi ris 'ionada dìomhair, air chor as nach feud se e fèin fhòlach; chreachadh a shliochd, agus a bhràithrean, agus a choimhears-naich, agus cha'n 'eil e fèin ann.

11 Fàg do dhilleachdain, gleidhidh mise beò iad; agus cuireadh do bhantraichean an dòchas annam-sa.

12 Seadh, mar so deir an Tighearn, Feuch, iadsan nach robh cho toillteanach air òl do'n chualaich, dlr'òl iad dhi gu deimhin, agus am feud thusa dol saor as? cha téid thu as, ach gu deimhin òlaidh tu.

13 Oir orm fèin mhionnaich mise, deir an Tighearn, gu'm bi Bosrah 'na léir-sgrios, 'na mhasladh, 'na fhàsach, agus

'na mballachadh; agus gu'm bi 'uile bhailean 'nam fàsaichean sìorruidh.

14 Chuala mi aithris o'n Tighearn, agus chuireadh teachdair chum nan cinn-each, ag ràdh, Cruinnichibh ri chèile, agus thigibh 'na h-aghaidh, agus eiribh suas chum a' chatha.

15 Oir feuch, ni mise beag thu am measg nan cinn-each, agus suarach am measg dhaoine.

16 Rinn do mhòr-chumhachd do mhealladh, uabhar do chridhe, O thusa ta 'g àiteachadh uamha na carraig, a ta gleidheadh àirde a' chnuic: ged dhean thu gu h-àrd, mar an iolair, do nead, as a sin bheir mise nuas thu, deir an Tighearn.

17 Agus bithidh Edom 'na fhàsach; bithidh uamhunn air gach neach a thèid seachad air, agus ni iad sgeig m' a uile léir-sgrìos.

18 Ceart mar ann an sgrìos Shodoim agus Ghomorah, agus nan ionadan a bha dlùth dhoibh, deir an Tighearn, cha ghabh duine còmhnuidh an sin, ni mò thèid mac duine gu fuireach air chuairt ann.

19 Feuch, mar leòmhnan thig e nìos o ataireachd Iordain gu ionad-còmhnuidh nan cumhachdach. Gu deimhin bheir mise fa'near gu luath gu'n ruith e nìos as a sin; agus cò e an gaisgeach taghta a chuireas mi os a cheann? Oir cò is cos-mhuil riumsa, no cò a chumas còinneamh rium, no c'ait am bheil am buachaill sin a's urrainn seasamh ann am làthair?

20 Air an aobhar sin éisdibh rùn an Tighearn, a rùnaich e an aghaidh Edoim, agus a smuaintean a smuaintich e an aghaidh luchd-àiteachaidh Thèmain: gu deimhin spionair sin falbh àlach an treud, gu deimhin nìhear léir-sgrìos, os an ceann, d'an àite-còmhnuidh.

21 Le fuaim an leagaidh, tha crith air an talamh; tha 'ghaoir a' dol a mach; aig a' Mhuir-ruaidh chualas an éigh-each.

22 Feuch, thig e nìos mar iolair ag itealach, agus sgaoilidh e a sgiathan thar Bosrah; agus bithidh cridheachan laochruidh Edoim anns an là sin mar chridhe mnà ri saothair.

23 Mh thimchioll Dhamascuis. Chuireadh gu h-amhladh Hamat agus Arphad, oir chual' iad droch sgeul; tha iad fuidh iomagain mar mhuir bhuairte nach feud a bhi sàmhach.

24 Tha Damascus air fàs lag, tha e 'ga thionndadh fèin gu teicheadh, agus fhuair eagal greim air; ghlac teanntachd e, agus ioghanna, mar mhuaoi ri saothair.

25 Cionnus nach mairionn caithir a' mhòlaidh, baile mo shòlais!

26 Uime sin tuitidh a h-òganaich 'na sràidibh, agus gearrar as na fir-chogaidh uile san là sin, deir Tighearn nan sluagh.

27 Agus fadaidh mise teine ann am balla Dhamascuis, agus loisgidh e luchairtean Bhenhadaid.

28 A thaobh Chedair, agus a thaobh rioghachdan Hasoir, a bhuail Nebuchadnesar rìgh Bhabiloin. Mar so thubhairt an Tighearn, Eiribh, rachaibh suas gu Cedar, agus creachaibh daoine an àirde an ear.

29 Am bùthan agus an treudan glacadh iad, an sgàileachan agus an airneis uile; agus an càmhalan gabhadh iad dhoibh fèin; agus abradh iad riu', Uamhas air gach taobh.

30 Teichibh, imichibh gu luath, rachaibh domhain a ghathail còmhnuidh, O a luchd-àiteachaidh Hasoir, deiran Tighearn; oir ghabh Nebuchadnesar rìgh Bhabiloin comhairle 'nur n-aghaidh, agus dhealbh e innleachd 'nur n-aghaidh.

31 Eiribh, rachaibh suas an aghaidh cinnich shuaimhneich, a ta gabhail còmhnuidh gun chùram, deir an Tighearn; aig nach 'eil aon chuid dorsan no croinn; a ta còmhnuidh air leth leo fèin.

32 Agus bithidh an càmhala 'nan cobliartaich, agus pailteas an spréidhe 'na chreich; agus sgapaiddh mise gus na h-uile ghaoth iadsan a th'auns na cearnaibh iomallach, agus o na h-uile taobh dheth bheir mise an dòrainn, deir an Tighearn.

33 Agus bithidh Hasor 'na ionad-còmhnuidh dhràgon, 'na fhàsach bith-bhuan; cha ghabh duine còmhnuidh an sin, ni mò thèid mac duine gu fuireach air chuairt ann.

34 Focal an Tighearn a thàinig gu Ieremiah an fuidh mu thimchioll Elaim, an toiseach linn Shedeciah rìgh Iudah, ag ràdh,

35 Mar so tha Tighearn nan sluagh ag ràdh, Feuch, brisidh mise bogha Elaim, a' chuid a's tréine d'an cumhachd.

36 Agus bheir mise air Elam ceithir ghaoithean o cheithir chearnaibh nèimh, agus sgapaiddh mi iad roimh na gaoithean so uile; agus cha bhi cinneach sam bith gus nach tig iadsan a dh'fhògradh o Elam.

37 Oir bheir mise air Elam a bhi fuidh gheilt roimh an naimhdean, agus roimh 'n mhuinntir a ta 'g iarraidh an anama; agus bheir mi ainnheas orra, teas mo chorruidh, deir an Tighearn; agus cuiridh mi 'nan déigh an claidheamh gus an cuir mi as doibh.

38 Agus cuiridh mi mo rìgh-chaitir ann an Elam, agus sgriosaidh mi as a sin an rìgh agus na ceannardan, deir an Tighearn.

39 Ach tarlaidh anns na làithibh deir-

eannach, gu'n toir mise air an ais bruid
Elaim, deir an Tighearn.

CAIB. L.

1, 9, 21, 35 *Nà breitheanais uamhasach a bha gu teachd air Babilon.* 4, 17, 33 *Saorsa chloinn Israeil.*

AM focal a labhair an Tighearn mu thimchioll Bhabiloìn, agus mu thimchioll fearainn nan Caldéach, le Ieremiah am fàidh.

2 Cuiribh an céill am measg nan cinn-each, agus foillsichibh, agus cuiribh suas a' bhratach; foillsichibh, na ceilbh: ab-raibh, Ghlacadh Babilon, mhasluicheadh Bel, bhriseadh Merodach 'na bhloighdibh, chlaoidheadh a h-iodholan, bhriseadh 'nam bloighdibh a dealbhan.

3 Oir tha cinneach a' teachd a nìos 'na h-aghaidh o'n àirde tuath, a nì a fearann 'na fhàsach, air chor as nach gabh aon neach còmhnuidh ann; eadar dhuine agus ainmhidh gluaisidh iad, siubhlaidh iad air falbh.

4 Ach anns na làithibh sin, agus air an àm sin, deir an Tighearn, thig clann Israeil, iad féin agus clann Iudah le chéile, ag imeachd, agus a' gul 'nan imeachd, agus iarraidh iad an Tighearn an Dia.

5 Iarraidh iad an t-slighe gu Sion le 'n aghaidh d'a h-ionnsuidh, *ag ràdh*, Thigibh agus naisgeamaid¹ sinn féin ris an Tighearn ann an coimhcheangal siorruidh nach leigear air di-chuimhne.

6 Bu chaoraich chaillte mo shluagh-sa: thug an aodhairean orra dol air seacharan, tharruing iad a thaoibh iad *air* na sléibhtibh; shuibhail iad o shliabh gu cnoc, leig iad an àite-fois air di-chuimhne.

7 Iadsan uile a fhuair iad, shluig iad suas iad; oir thubhairt an naimhdean, Cha 'n eil sinn ri cron air bith, a chionn gu'n do pheacaich iad an aghaidh an Tighearn, àite-tàimh a' cheartais; eadhon an Tighearna, dòchais an aithrichean.

8 Gluaisibh a mach á meadhon Bhabiloìn, agus imichibh á tìr nan Caldéach, agus bithibh mar na gabhraibh fìrionn air toiseach nan treudan.

9 Oir feuch, dùisgidh mise, agus bheir mi nìos an aghaidh Bhabiloìn, coimhthional chiuneach mòra o'n tìr mu thuath; agus cuiridh iad iad féin an ordugh 'na h-aghaidh, air sheòl as gu'n glacar i: bithidh an saighdean mar gu'm b' ann o ghaisgeach scolta; cha phill aon diubh gu diomhain.

10 Agus bithidh Caldéa 'na creich, iadsan uile a chreachas i gheibh iad an sàth, deir an Tighearn.

11 A chionn gu bheil sibh ri gàirdeachas, a chionn gu bheil sibh ri aidhear, O sibhse a chreach m' oighreachd; a chionn

gu bheil sibh air fàs reamhar mar aigh bhiadhta, agus ri sitrich mar eachaibh meannach.

12 Masluichear 'ur màthair gu mòr, nàraichear ise a rug sibh; feuch ise, deir-eadh nan cinneach, 'na fàsach, 'na fearann tioram agus falamb.

13 Air son corruich an Tighearn cha bhi i nì's mò air a h-àiteachadh, ach bithidh i 'na fàsach gu h-iomlan: bithidh uamhunn air gach aon a théd seachad air Babilon, agus nì e sgeig m' a h-uile phlàighibh.

14 Cuiribh sibh féin an ordugh an aghaidh Bhabiloìn air gach taobh: sibhse uile a lùbas am bogha, caithibh oirre, na caomhnaibh saighdean; oir chiontaich i an aghaidh an Tighearn.

15 Eighibh os a ccamn air gach taobh: strìochd si i féin; thuit a daingnichean, thilgeadh sìos a ballachan: oir is e so dioghaltas an Tighearna, deanaibh-se dioghaltas oirre: mar a rinn i féin; deanaibh-se rithe.

16 Gearraibh o Bhabilon am fear-cuir, agus esan a ghlacas an corran an àm an fhogharaidh: air eagal claidheimh a' mhìllteir, pillidh iad, gach aon g'a shluagh, teichidh iad gach aon g'a dhùth-aich.

17 Is treud sgapta Israel; rinn leòmhain a ruagadh; an toiseach, chaith rìgh Asiria suas e; agus mu dheireadh, dh'ith Nebuchadnesar so rìgh Bhabiloìn gu ruig an cnàimh e.

18 Air an aobhar sin mar so tha Tighearn nan sluagh, Dia Israeil, ag ràdh, Feuch, smachdaichidh mise rìgh Bhabiloìn agus 'fhearann, mar a smachdaich mi rìgh Asiria.

19 Ach bheir mi Israel air ais gu 'àite-còmhnuidh féin, agus ionaltraidh e air Carmel agus Basan, agus air sliabh Ephraim agus air Gilcad sàsuichear 'anam anns na làithibh sin.

20 Agus anns an àm sin, deir an Tighearn, iarrar aingidheachd Israeil, agus cha bhi i ann; agus locbhadh Iudah, ach cha bhi iad r'am faotainn: oir bheir mise maitheanas dhoibh sin a chaomhaineas mi.

21 An aghaidh fearainn nan ceannairceach imich suas, air féin, agus air a luchd-àiteachaidh dean peanas, O a chlaidheimh, agus cuir as gu buileach d'an gineil, deir an Tighearn, agus coimhliion gach uì mar a dh'àithn mise dhuit.

22 Tha fuaim a' chatha san fhearann, eadhon milleadh ro mhòr.

23 Cionnus a bhriseadh agus a spealgadh fairech an domhain uile! Cionnus a dh'fhàs Babilon 'na fàsach sgaoilte am measg nan cinneach!

24 Leag mise rib air do shon, agus bhia thu fòs air do ghlacadh, O Bhabilon, an

¹ ceanglamaid.

IEREMIAH, L. LI.

uair nach do shaoil thu: fhuaradh, agus fòs ghlacadh thu, a chionn gu'n d'rinn thu strì an aghaidh an Tighearna.

25 Dh'fhosgail an Tighearn a thigh-arm, agus thug e mach airm a chorruih: oir is i so obair Iehobhah, Tighearna nan sluagh, ann an tìr nan Caldéach.

26 Thigibh 'na h-aghaidh o 'n chearna a's iomallaiche, fosglaihb a tighéan-taisg, cuiribh fo 'ur cosaibh i mar thòrr, agus sgriosaihb i gu buileach; na biodh fuigh-eall di air 'fhàgail.

27 Marbhaibh a daimh air fad: rachadh iad sìos a chum an àir; is truagh dhoibhsan! oir tha an là air teachd, àm an smachdachaidh.

28 Guth na muinntir a theich, agus a chaidh as o thìr Bhabiloin, a dh'fhoill-seachadh ann an Sion dioghaltais an Tighearn ar Dia-ne, dioghaltais a theampuill.

29 Gairmibh sluagh lionmhor an aghaidh Bhabiloin; sibhse uile ta lùbadh a' bhogha, cuairtichibh le feachd i air gach làimh; na rachadh cuid air bith dhi as; dìolaibh rithe a réir a h-oibre, a réir gach nì a rinn i, deanaibh rithe; a chionn gu'n d' rinn i gu h-uaihbreach an aghaidh an Tighearn, an aghaidh Ti naoimh Israeil.

30 Air an aobhar sin tuitidh a h-ògan-aich 'na sràidibh, agus bithidh a fir-chogaidh uile air an gearradh as anns an là sin, deir an Tighearn.

31 Feuch tha mise a'd' aghaidh, O uaihbreich, deir Iehobhah, Tighearn nan sluagh: gu cinnteach tha do là air teachd, an t-àm san dean mise do smachdachadh.

32 Agus gheibh an t-uaihbreach tuisleadh agus leagadh, agus cha bli neach ann a thogas suas e: agus fadaidh mise teine 'na bhailtibh, agus loisgidh e gach nì mu'n cuairt da.

33 Mar so tha Tighearn nan sluagh ag ràdh, Shàruicheadh clann Israeil, agus clann Iudah le chéile; agus rium iadsan uile a thug am braigheanas iad greim daingean orra; dhiùlt iad an leigeadh air falbh.

34 Is cumbachdach am fear-saoraidh; Iehobhah Dia nan sluagh is e 'ainm: tagraidh e gu daingean an cùis, a chum gu'n toir e suaimhneas do 'n talamh, agus mi-shuaimhneas do luchd-àiteachaidh Bhabiloin.

35 Bithidh claidheamh air na Caldéich, tha an Tighearn ag ràdh, agus air luchd-àiteachaidh Bhabiloin, agus air a h-uachd-aranaibh, agus air a daoineibh glíce;

36 Claidheamh air na breugairibh, agus bithidh iad air mhi-chéill; claidheamh air a daoineibh cumbachdach agus bithidh iad fo uabhunn.

37 Claidheamh air a h-eachaibh, agus air a carbadaibh, agus air a h-uile shluagh coimh-measgta ta 'na meadhon, agus

bithidh iad mar mhnaibh: claidheamh air a h-ionmhasaibh, agus bithidh iad air an spùinneadh;

38 Tiormachd¹ air a h-uisgeachaibh, agus tiormaichear suas iad: a chionn gur i tìr nan dealbha snaidhte, agus as a h-ìodholaibh gu bheil i a' deauamh uaille.

39 Air an aobhar sin gabhaidh fiadh-bheathaichean nam fàsach, agus madaidh-alluidh nan coilltean tàmh an sin; an sin fòs nì nigheana na caillich-oidheche còmhnuidh: agus cha 'n àiteichear i tuilleadh gu sìorruidh; nì mò ghabhar còmhnuidh innte o linn gu linn.

40 Amhuil 'ntair a sgrios Dia Sodom agus Gomorah, agus na bailtean a bha dlùth dhoibh, deir an Tighearn, cha ghabh duine còmhnuidh an sin, nì mò theid mac duine gu fuireach air chuairt ann.

41 Feuch, sluagh a' teachd o 'n àirde tuath, eadhon cinneach mòr, agus dùisgear mòran rìghrean o chrìochlaibh an domhain.

42 Am bogha agus an t-sleagh glacadh iad: tha iad fuileachdach, agus cha nochd iad tròcair: beucaidh an guth mar an fhaighe, agus maraichidh iad air eachaibh, ann an ordugh mar dhaoine chum a' chatha, ann ad aghaidh-sa, O nighean Bhabiloin.

43 Chuala rìgh Bhabiloin iomradh orra, agus dh'fhàs a làmhnan lag: ghlac àmhghar e, goimh, amhuil mna ri saothair.

44 Feuch, mar leòmhnan thig e nìos o ataireachd Iordain gu còmhnuidh nan cumbachdach. Gu deimhin bheir mise fa' near gu luath gu'n ruith e nìos as a sin; agus cò e an gaisgeach taghta a chuireas mise os a cheann? Oir cò is cosmhuil rium-sa, no cò a chumas coinneamh rium, no c'ait am bheil am buachail sin a's urrainn seasamh ann am làthair?

45 Air an aobhar sin èisdibh rùn an Tighearn a rùnaich e an aghaidh Bhabiloin, agus a smuaintean a smuaintich e an aghaidh tìre Chaldéa. Gu deimhin spion-ar air falbh àlach an treud, gu deimhin nìthear léir-sgrios os an ceann, d' an àite-còmhnuidh.

46 Leis an fhuaim, Ghlacadh Babilon! tha an talamh air a luasgadh, agus chualas a' ghaoir am measg nan cinneach.

CAIB. LI.

1 Breitheanais uamhasach an Tighearn an oghaidh Bhabiloin. 19 Is e Dia cuibhrionn Iacob agus Israeil, 59 Sgrìobh Ieremiah an fhaistneachd mu thimchioll léir-sgrios Bhabiloin ann an leabhar, agus dh' àithn e do Sheriala a thilgeadh am meadhon Euphrateis.

MAR so tha an Tighearn ag ràdh, Feuch, dùisgidh mise suas an aghaidh Bhabiloin, agus an aghaidh na

¹ Claidheamh.

minntir, a ta chòmhnuidh ann am meadhan na dream sin a ta 'g éirigh am aghaidh, gaoth sgriosach:

2 Agus cuiridh mi gu Babilon luchd-fasgaidh, agus fasgaidh iad i, agus falamhaichidh iad a fearann; oir cuairt-ichidh iad air gach taobh i ann an là na h-àirce.

3 Lùbadh an saighdear gun tàmh a bhogha, agus na cuireadh e dhetli a lùir-each; agus na caomhaibh a h-òganaich, sgriosaidh gu buileach an t-iomlan d' a feachd.

4 Agus tuitidh iadsan a mharbhar ann an tìr nan Calcéach, agus iadsan a bhuailear troimh 'na àidibh.

5 Oir cha do dhìobradh Israel no Iudah le 'Dhia, le Tighearn nan sluagh, ged bha am fearann air a lionadh le peacadh an aghaidh Ti naoimh Israeil.

6 Teichibh a mach à meadhan Bhabailoin, agus sàbhaladh gach neach 'anam, mu'n gearr as sibh na h-aingidheachd; oir is i so aimsir dioghaltas an Tighearna; dìolaidh e rithe luigheachd.

7 Bu chupan òir Babilon ann an làimh an Tighearn, a chuir air nùisg an talamh uile: d'a fion dh'òl na cinnich, uime sin tha na cinnich air bhoile.

8 Thuit Babilon gu h-obann, agus mhilleadh i; guilbh os a ceann; gabhaibh loc air son a leòin, ma dh'fheudar mar sin a leigheas.

9 B'àill leinne Babilon a leigheas, ach cha'n'eil i air a leigheas; tréigibh i, agus rachamaid gach aon d'a dhùthaich féin: oir ràinig a breitheanas na nèamha, agus togadh suas e gus na speuraibh.

10 Thug an Tighearn saorsa dhuinne; thugibh agus cuireamaid an céill ann an Sion obair an Tighearn ar Dia.

11 Geuraichibh na saighdean; cruinnichibh na sgiathan; dhùisg an Tighearn suas spiorad rìghrean Mhedia; oir tha a rùn an aghaidh Bhabailoin, a chum a sgrios: gu deimhin is e dioghaltas an Tighearna, dioghaltas a theampuil.

12 Fa chomhair bhallacha Bhabailoin cuiribh suas a' bhratach, deanaibh am freiceadan làidir; suidhichibh fir-fhaire, deasaichibh luchd feall-fholach; oir mar a dhealbh an Tighearn, mar an ceudna rinn e, na nithe sin a labhair e an aghaidh luchd-àiteachaidh Bhabailoin.

13 O thusa tha chòmhnuidh air mòran uisgeachaidh, saobhir ann an ionmhasaibh, thàinig do chrioch, tomhas do shàinnt.

14 Thug Tighearn nan sluagh mìonnau air féin, *ag ràdh*, Gu deimhin lìonaidh mi thu le daoineibh, mar gu'm b' ann le locuist, agus togaidh iad suas iolach ann ad aghaidh.

15 Rinn esan an talamh le 'chumhachd, shocruich e 'n saoghal le 'ghliocas,

agus le 'thuigse sgaol e mach na nèamha.

16 'Nuair a chuireas e mach a ghuth, tha toirm uisgeachan anns na nèamhaibh, agus bheir e air a' cheò dol suas o iomallaibh na talmhainn; ni e dealanach le frasaibh agus bheir e mach a' ghaoth as 'ionadaibh tasgaidh.

17 Dh'fhàs gach duine mar bhrùid 'na eòlas; nàraicheadh gach òr-cheard le òmhaigh leagta: oir is ni breugach an dealbhan leaghta, agus cha 'n'eil anail anna.

18 Is ni faoin iad, obair mhearachd: ann an àm an smachdachaidh théid iad am mugha.

19 Cha chosmhuil riu so Cuibhrionn Iacoib, oir is esan Fear-cumaidh an domhain uile; agus is e *Israel* slat oighreachd; Tighearn nan sluagh is e 'ainm.

20 Is tu mo thuagh-chatha, agus m' acfuinn-chogaidh; agus leatsa brisidh mi 'nam bloighdibh cinnich; agus leatsa millidh mi rioghachdan;

21 Agus leatsa brisidh mi 'nam bloighdibh an t-each agus a mharcach; agus leatsa brisidh mi 'na bhloighdibh an carbaid, agus esan a shuidheas air;

22 Agus leatsa brisidh mi 'nam bloighdibh am fear agus a' bhean; agus leatsa brisidh mi 'nam bloighdibh an seann duine agus an leanabh; agus leatsa brisidh mi 'nam bloighdibh an t-òganach agus a' ghruagach;

23 Agus leatsa brisidh mi 'nam bloighdibh am buachaill agus a threud; agus leatsa brisidh mi 'nam bloighdibh an treabhaiche agus a chuing; agus leatsa brisidh mi 'nam bloighdibh cinn-fheadhna agus luchd-riaghlaidh.

24 Agus dìolaidh mi ri Babilon, agus ri uile luchd-àiteachaidh Chaldéa, an uile olc a rinn iad ann an Sion 'nur sealladhsa, deir an Tighearn.

25 Fench, tha mise ann ad aghaidh, O a shléibh sgriosach!, deir an Tighearn, a ta sgrios na talmhainn uile; agus sinidh mi mo làmh a mach ort, agus iomainidh mi thu sìos o na creagaibh, agus ni mi beinn loisgte dhìot.

26 Agus cha ghabh iad dhìot clach air son oisne, no clach air son bhunaitean; ach ann ad charnaibh léir-sgrios bithidh tu gu sìorruidh, deir an Tighearn.

27 Cuiribh suas bratach anns an fhearann, séidibh an trompaid ann measg nan cinneach, deasaichibh 'na h-aghaidh cinnich, gairmibh an ceann a chéile 'na h-aghaidh rioghachdan, Ararat, Mini, agus Aschenas; sonraichibh ceann-feadhna 'na h-aghaidh; thugaibh air na h-eachaidh teachd a mios mar na locuist fhriodh-anach.

28 Deasaichibh 'na h-aghaidh cinnich, rìghrean Mhedia, a cinn-fheadhna, agus a h-uile luchd-riaghlaidh, agus uile fhear-ann a tighearnais.

29 Agus bithidh crith air an fhearann, agus doilghios; oir seasaidh comhairle an Tighearn an aghaidh Bhabiloìn gu daingean, a dheanamh tìre Bhabiloìn 'na fàsach, gun neach 'g a h-àiteachadh.

30 Leig laoiach Bhabiloìn dhiubh cogadh, dh'fhan iad ann an daingnichibh; dh'fhàilnich an treise; dh'fhàs iad mar mhnaibh; loisgeadh a h-ionada-còmh-nuidh; bhriseadh a croinn-dhruididh.

31 Greasaidh fear-ruith gu luath an còdhail fir-ruithe, agus teachdair an còdhail teachdair, a dh'innseadh do rìgh Bhabiloìn gu'n do ghlacadh a chaithir aig *gach* ceann;

32 Agus tha na sligheachan air an glacadh, agus a' chuilceach loisg iad le teine, agus tha na fir-chogaidh air am bualadh le h-uamhunn.

33 Oir mar so tha Tighearn nan sluagh, Dia Israeil, ag ràdh, Tha nighean Bhabiloìn mar urlar-bualaidh; fathasd tiota beag, agus thig àm a bualaidh, *agus* àm a buain.

34 Dh'ith Nebuchadnesar rìgh Bhabiloìn suas sinn, chaith e sinn, rium e sinn 'nar soitheach falamh; shluig e suas sinn mar dhràgon; lion e bhrù le ar nitlìbh blasda, thilg e mach sinn.

35 Gu robh an t-ainneart a rinneadh orm-sa, agus air m'fheoil air Babilon, their fear-àiteachaidh Shioin; agus, Gu robh m'fhuil-sa air luchd-àiteachaidh Chaldéa, their Ierusalem.

36 Air an aobhar sin, mar so tha an Tighearn ag ràdh, Feuch, tagraidh mise do chùis, agus ni mi dioghaltas air do shon; agus tiormaichidh mi suas a fairge, agus ni mi a màthair-uisge tioram.

37 Agus bithidh Babilon 'na carnaibh, 'na h-ionad-còmhnuidh dhràgon, 'na h-uamhas, agus 'na ball-sgeig, gun aon 'ga h-àiteachadh.

38 Beucaidh iad le chéile mar leòmhanaibh; screadaidh iad mar chuileanaibh leòmhana.

39 'Nan teas cuiridh mise cuirm rompa, agus cuiridh mi air nhisg iad a chum gu'n dean iad aighir, agus gu'n coidil iad codal siorruidh, agus nach dùisg iad, ars' an Tighearn.

40 Bheir mi nuas iad mar uain a chum am marbhadh, mar reitheachan leis na gabhraibh firionn.

41 Cionnus a ghlacadh Sesac! agus cionnus a rinneadh greim air cliù an domhain uile! cionnus a dh'fhàs Babilon 'na h-uamhas am measg nan cinneach!

42 Thàinig an fhairge nìos air Babilon: tha i air a còmhachadh le ìonmhoir-

eachd a tonnan.

43 Tha a bailtean 'nam fàsach, 'nam fearanntioram, agus 'nan làraich sgaoilte; talamh anns nach 'eil duine a chòmh-nuidh, ni mò théid mac duine troimpe¹.

44 Agus bheir mise breitheanas air Bel ann am Babilon, agus bheir mi mach as a bheul an ni sin a shluig e; agus cha chruinnich na cinnich an ceann a chéile thuige ni's mò; thuit fòs balla Bhabiloìn.

45 Rachaibh-se mach as a meadhon, O mo shluagh-sa, agus tèarnaibh gach aon 'anam o chorruih ghaire an Tighearn.

46 Agus a chum nach bi 'ur cridhe meat, ni mò bhios eagal oirbh roimh an iomradh a chluinnear anns an fhearann: oir thig an t-iomradh air bliadhna, agus air an *ath*-bhliadhna 'na dhéigh sin thig iomradh, agus ainneart anns an fhearann, uachdaran an aghaidh uachdarain;

47 Air an aobhar sin, feuch, tha na làithean a' teachd anns an dean mise breitheanas air dealbhan snaidhte Bhabiloìn; agus cuirear gu h-amhluadh a fear-ann uile, agus tuitidh a mairbh gu léir 'na meadhon.

48 Agus togaidh na nèamhan agus an talamh iolach os ceann Bhabiloìn, agus na h-uile ta annta: an uair a thlig a luchd-creachaidh 'na h-aghaidh o'n àirde tuath, deir an Tighearn.

49 Oir mar thug Babilon air muinntir chlaoidhte Israeil tuiteam; mar sin aig Babilon thuit muinntir chlaoidhte an domhain uile.

50 Sibhe a chaidh as o'n chlaidheamh, imichibh roimhibh, na fanaibh 'nur seasamh: cuimhnichibh an Tighearn o chéin, agus thigeadh Ierusalem 'nur n-aire.

51 Bha sinn fo ambluadh, a chionn gu'n cuala sinn mi-chliù, chòmhdaich nàire ar n-aghaidh; oir thàinig còimhich a steach do ionadaibh naomha tìge an Tighearn.

52 Uime sin feuch, tha na làithean a' teachd, deir an Tighearn, anns an dean mise breitheanas air a dealbhan snaidhte; agus feadh a fearainn uile bithidh acain nan daoine leònta.

53 Ged éireadh Babilon suas gu ruig na nèamha, agus ged dhaignichtheadh i gu h-àrd a neart, uamsa thig luchd-creachaidh d'a h-ionnsuidh, deir an Tighearn.

54 Fuaim éighich o Bhabilon, agus léir-sgrìos mòr o thir nan Caldéach.

55 Oir mhill an Tighearn Babilon, agus bhàsaich a mòr-fharum 'na meadhon; ged bha a fuaim mar thoirm uisgeacha mòra, ge b'àrd a dh'éirich a farum.

56 A chionn gu'n d'thàinig fear-millidh 'na h-aghaidh, an aghaidh Bhabiloìn; agus ghlacadh a laoiach, agus bhriseadh

¹ rompa, d'a trid.

gach aon d' am boghachan; oir bheir an Tighearn, Dia na luigheachd, gu cinn-teach luigheachd dh'ise.

57 Agus cuiridh mise air mhìs a prionnsachan, agus a daoine glìce, a cinn-fheadhna, agus a h-uachdarain, agus a daoine cumhachdach; agus coillidh iad codal bith-bhuann, agus cha dùisg iad tuilleadh, deir an Rìgh d' an ainm Iehobhab *Dia* nan sluagh.

58 Mar so tha Tighearn nan sluagh ag ràdh, Brisear gu tur ballacha leathan Bhabiloin, agus loisgear a geatachan àrda le teine; agus saoraichidh na slòigh gu diomhain, agus na cinnich anns an teine, gus an toir iad thairis le sgrios.

59 Am focal a dh'àithn Ieremiah am fàidh do Seraiah mac Neriah, mhic Mhaaseiah, 'nuair a chaidh e le Sedeciah rìgh Iudah gu Babilon, anns a' cheathramh bliadhna d'a linn: agus b'e Seraiah an t-àrd chailteanach.

60 Agus sgrìobh Ieremiah na h-uile olc a bha ri teachd air Babilon ann an aon leabhar, na briathran so uile ta air an sgrìobhadh mu thimchioll Bhabiloin.

61 Agus thubhairt Ieremiah ri Seraiah, 'Nuair a thig thu gu Babilon, agus a chi, agus a leughas tu na briathra so uile,

62 An sin their thu; O Thighcarn, labhair thu an aghaidh an àite so gu 'ghearradh as, air chor as nach bi neach a chòmhnuidh ann, aon chuid duine no ainmhidh, ach gu'm bi e fàs gu sìorruidh.

63 Agus tarlaidh, 'nuair a sguireas tu do leughadh an leabhair so, gu'n ceangail thu clach ris, agus tilgidh tu e ann am meadhon Euphrateis.

64 Agus their thu, Mar so théid Babilon fuidhe, agus cha'n éirich i nì's mò, do bhrìgh an uile a bheir mise oirre; agus ciosnaichear iad.

An fhad so briathran Ieremiah.

CAIB. LII.

1 *Rìoghachadh aingidh Shedeciah agus a cheann-airc an aghaidh Nebuchadnesair.* 4 *Ghlac Nebuchadnesair Ierusalem.* 8 *Mharbh e mic Shedeciah, agus chuir e mach a shùilean fèin.* 12 *Chreach Nebusar-adan am baile, agus loisg se e.* 24 *Chuir rìgh Babiloin àrd uaislean nan Iudhach gu bàs ann an Riblah.*

BHA Sedeciah bliadhna thar fhichead a dh'aois an uair a thòisich e air rìoghachadh, agus rìghich e aon bhliadhna deug ann an Ierusalem; agus b'e ainm a mhàthar Hamutal, nighean Ieremiah o Libnah.

2 Agus rinn e an *ni sin e bha* olc ann an sùilbh an Tighearn, a réir gach nì a rinn Iehoiacim.

3 Oir troimh feirg an Tighearna tharladh ann an Ierusalem agus ann an Iudah, gus an do thilg e iad a mach as 'fhianuis, gu'n d' rinn Sedeciah ar a mach an aghaidh

rìgh Bhabiloin.

4 Agus tharladh anns an naothamh bliadhna d'a linn, anns an deicheamh mìos, air an deicheamh là do'n mhìos, gu'n d' thàinig Nebuchadnesair rìgh Bhabiloin, e fèin agus 'uile fheadh, an aghaidh Ierusalem, agus shuidhich iad *camp*, na h-aghaidh, agus thog iad daingnichean 'na h-aghaidh, air gach taobh.

5 Mar sin bha a' chaithir air a teannachadh gus an aon bhliadhna deug do linn rìgh Shedeciah.

6 Agus anns a' cheathramh mìos, air an naothamh là do'n mhìos, bha a' ghorta trom anns a' chaithir, agus cha robh aran air bith aig muinntir na tìre.

7 An sin bha a' chaithir air a briseadh sìos, agus theich na fir-chogaidh uile, agus chaidh iad a mach as a' chaithir feadh na h-oidhche, air slighe a' gheata, eadar an da bhalla a bha aig lìos an rìgh, (an uair a bha na Caldéich aig a' chaithir timchioll mu'n cuairt,) agus dh'imich iad air slighe a chòmhnaird.

8 Ach lean feachd nan Caldéach air tòir an rìgh, agus rug iad air Sedeciah ann an còmhnardaibh Iericho; agus bha 'fheadh uile air an sgapadh uath.

9 Agus ghlac iad an rìgh, agus thug iad suas e gu rìgh Bhabiloin, aig Riblah, ann am fearann Hamait, far an d'thug e breitheanas air.

10 Agus mharbh rìgh Bhabiloin mic Shedeciah fa chomhair a shùl: mharbh e mar an ceudna uile cheannardan Iudah ann an Riblah.

11 Agus chuir e mach sùilean Shedeciah, agus cheangail e le slabhruidh bh e; agus thug rìgh Bhabiloin leis e gu Babilon, agus chuir e ann am prìosan e gu là a' bhàis.

12 Agus anns a' chùigeamh mìos, air an deicheamh là do'n mhìos, (b' isin anna naothamh bliadhna deug do linn Nebuchadnesair rìgh Bhabiloin,) thàinig Nebusar-adan ceannard an fhreiceadain, a fhrith-eil do rìgh Bhabiloin, gu Ierusalem,

13 Agus loisg e tigh an Tighearn, agus tigh an rìgh; agus uile thighean Ierusalem, eadhon na h-uile tigh mòr loisg e le teine.

14 Agus bhris uile fheadh nan Caldéach, a bha le ceannard an fhreiceadain, ballachan Ierusalem sìos air gach taobh.

15 Agus *cuid* do bhochdaibh an t-sluaigh, agus fuigheall an t-sluaigh a dh'fhan anns a chaithir, agus iadsan a chaidh thairis gu rìgh Bhabiloin, agus a' chuid eile do'n t-sluaigh, thug Nebusar-adan ceannard an fhreiceadain air falbh 'nam braighdibh.

16 Ach *cuid* do bhochdaibh an fhearainn dh'fhàg Nebusar-adan, ceannard an

fhriceadain gu *bhi* 'nan luchd-deasachaidh fhionainean, agus 'nan treabhaichibh.

17 Agus na puist umha¹ a bha an tigh an Tighearn, agus na buinn, agus an fhairge umha a bha 'n tigh an Tighearna, bhris na Caldéich, agus thug iad an umha uile gu Babilon.

18 Na coireachan fòs, agus na sluas-aidean, agus na smàladairean, agus na cuachan, agus na liadhan, agus na h-uile shoithichean umha, leis an do fhrithheil iad, thug iad air falbh.

19 Agus na soithichean ionnlaid, agus na h-aighnean-teine, agus na cuachan, agus na coireachan, agus na coinnleirean, agus na liadhan, agus na copain, *a' chuid a bha do òr 'na òr*; agus *a' chuid a bha do airgid 'na airgid*, thug ceannard an fhriceadain air falbh.

20 An dà phost, an aon fhairge, agus an dà tharbh dheug umha, a bha fuidh na bonnaibh a rinn rìgh Solamh air son tighe an Tighearna; cha robh tomhas air umha nan soithichean so uile.

21 A thaobh nam post, b'e àirde gach aoin phuist ochd làmh-choille deug; agus dheanadh sreang dà làmh-choille dheug a thombas mu'n cuairt; agus b'e 'thiùigh-ead ceithir oirlich, fàs a stigh.

22 Agus bhà coron umha air; agus b'e cùig làmh-choille àirde gach aoin choroin, le lion-obair agus pomgranataibh² air na coronaibh mu'n cuairt, an t-ìomlan do umha; air a' phost eile mar an ceudna bha pomgranatan cosmhuil ri u.

23 Agus bha sè-deug agus ceithir fichead pomgranat air aon taobh, ceud pomgranat air an lion-obair uile mu'n cuairt.

24 Agus thug ceannard an fhriceadain leis Seraiah an t-àrd-shagart, agus Sephaniah an dara sagart, agus na trì dorsairean.

25 Thug e fòs as a' chaithir caillteanach air an robh cùram nam fear-cogaidh, agus seachd fir dhiubh-san a bha dlùth

do phearsa an rìgh, a fhuaradh anns a' chaithir, agus àrd-sgrìobhaiche an t-sluaigh, a ghabh àireamh muinntir an fhearainn, agus trì fichead fear do mhuinntir an fhearainn, a fhuaradh ann am meadhon a' bhaile;

26 Ghabh eadhon Nebusar-adan ceannard an fhriceadain iad, agus thug e iad a chum rìgh Bhabiloin gu Riblah.

27 Agus bhuail rìgh Bhabiloin iad, agus chuir e gu bàs iad ann an Riblah, ann am fearann Hamait: mar sin thugadh Iudah air falbh ann am bruid as 'fhearann fèin.

28 So an sluagh a thug Nebuchadnesar air falbh ann am bruid; anns an t-seachdamh bliadhna, trì mìle Iudhach agus trì thar fhichead.

29 Ann an ochdamh bliadhna deug Nebuchadnesair, thug e air falbh ann am bruid o Ierusalem, ochd ceud anam, agus a dhà dheug thar fhichead.

30 Ann an treas bliadhna fichead Nebuchadnesair, thug Nebusar-adan, ceannard an fhriceadain, air falbh ann am bruid do na h-Iudhaich, seachd ceud dà fhichead agus cùig anam: b' iad na h-anaman uile ceithir mìle agus sè ceud.

31 Agus tharladh anns an t-seachdamh bliadhna deug thar fhichead do bhraighdeanas Iehoiacim rìgh Iudah, anns an dara mìos deug, air a' chùigeamh là fichead do'n mhìos, gu'n do thog Ebhil-merodach rìgh Bhabiloin, anns a' cheud bhliadhna d'a linn, suas ceann Iehoiacim rìgh Iudah, agus thug e mach á prìosan e,

32 Agus labhair e gu caomhail ris, agus chuir e a chaithir os ceann chaithriche nan rìghrean a bha leis ann am Babilon.

33 Agus dh'atharraich e a chulaidh-phrìosain: agus dh'ith e aran 'na fhianuis do ghnàth, fad uile làithean a bheatha.

34 Agus air son a lòn lathail, thugadh dha o rìgh Bhabiloin, gach aon là cuibhrionn, gu là a bhàis, fad uile làithean a bheatha.

¹ phraise.

² ubhlaibh granait.

TUIREADH

IEREMIAH.

CAIB. I.

1 *Staid mhuladach Ierusalem.* 11 *Tha i ri caoidh a chionn gu'n robh a trioblaidean mòr thar tomhas, 18 agus ag aideachadh gu'n robh breitheanaidh Dhè ceart, &c.*

CIA uaigneach a ta i 'na suidhe, a' chaithir a bha làn do dhaoine! cionnus a dh'fhàs i mar bhantraich! Ise bha mòr am measg nan cinneach, agus 'na h-uachd-

aran am measg nan dùthchanna, cionnus a ta i air teachd fuidh chis!

2 Tha i ri gul gu geur anns an oidhche, agus a deoir air a gruaidhean; fear comhfhurtachd air bith cha 'n eil aice am measg a h-uile luchd-gaoil; bhuin a càirdean uile gu fealltach rithe, dh'fhàs iad 'nan naimhdean di.

3 Dh'imich Iudah air falbh ann am

braighdeanas; ann an an-shocair, agus ann an daorsa mhòr tha i chomhnuidh am measg nan cinneach; cha'n 'eil i faotainn suaimhnais air bith; rug a luchd-ruagaidh uile oirre¹ eadar na cunglaichean.

4 Tha ròidean Shìoin ri bròn, a chionn nach 'eil aon neach a' teachd a chum na h-àrd-fhléille; tha a geatachan uile fàs; tha a sagairt ag acain; tha a h-òighean fo leòn, agus tha i féin ann an searbhadas.

5 Is iad a h-eascairdean a tha 'n uachdar, tha a naimhdean a' soirbheachadh; oir leòn an Tighearn i air son lìonmhoir-eachd a lochdan; dh'fhalbh a clann am braighdeanas fa chomhair an nàmhaid.

6 Agus dhealaich a sgèimh uile ri nighinn Shìoin; tha a prionnsachan air fàs mar fhéidh nach 'eil a' faotainn ionaltraidh; agus dh'imich iad gun neart roimh an fhear-ruaige.

7 Chuimhnich Ierusalem ann an là a h-àmhghair, agus a truaighe, air a h-uile nithibh sòlasach a bha aice anns na làithibh o shean; an trà thuit a daoine ann an làimh an nàmhaid, agus nach d' rinn neach a cuideachadh; chunnaic na naimhdean, agus rinn iad fanoid air a sàbaidibh.

8 Pheacaich Ierusalem gu trom; air an aobhar sin tha i air a h-atharrachadh: iadsan uile thug urram dhi, tha iad ri tàir oirre, a chionn gu fac' iad a lomnochd-uidh; seadh, tha ise ri caoidh, agus a' tionndadh air a h-ais.

9 Bha a salchar 'na sgiortaibh; cha robh i cuimhneach air a crìch dheireannaich; uime sin thugadh i nuas gu h-iongantach; cha'n 'eil fear-comhfhurtachd aice: amhairc, O Thighearn, air m' àmhghar, oir mheudaich an nàmhaid *e féin*.

10 Shìn an nàmhaid a mach a làmh air a h-uile nithibh taitneach; gu deimhin chunnaic i cinnich a' dol a steach d'a h-ionad naomh, do'n d'àithn thusa nach rachadh iad a steach do d' choimhthional.

11 Tha a sluagh uile ag osnaich; tha iad ag iarraidh arain; thug iad an nìthe luach-mhor air son lòin, a chumail beò an anama: feuch, O Thighearn, agus thoir fa'near, mar a ta mi air fàs suarach.

12 O sibhse uile tha gabhail an rathaid, amhaircibh agus faicibh am bheil bròn sam bith cosmhuil ri mo bhròn-sa a thugadh orm, o'n uair an d'rinn an Tighearn mo smachdachadh ann an là a dhian-fheirge.

13 Chuir e teine a nuas, agus thug e air dol a steach do m' chnàmhaibh; sgaoil e lìon air son mo chos; phill e mi air m' ais: rinn e fàs mi, fad an là ri caoidh.

14 Tha a' chuing air a ceangal; tha mo lochdan air an sniomh le a làmh, tha iad air an càradh mu m' mhuineal; thug e air mo threise tuiteam, thug an Tighearn

thairis mi d' an làmhaidh, cha'n urrainn mi éirigh suas.

15 Shaltair an Tighearn fo chois m' uile dhaoine cumhachdach ann am mheadhon: ghairm e coimhthional a'm' aghaidh a bhruthadh mo dhaoine òga; mar ann an amar-bruthaidh fiona, bhruth an Tighearn òigh nighean Iudah.

16 Air son nan nìthe so guileam, tha mo shùil, mo shùil a' sìleadh sìos le h-uisge; chionn gu bheil am fear-comhfhurtachd, a bheireadh fuasgladh do m'anam, fada uam: tha mo chlànn uaigneach, a chionn gu'n d'thug an nàmhaid buaidh.

17 Tha Sion a' sgaoileadh a mach a làmh, cha'n 'eil neach ann a thoirt dicomhfhurtachd; dh'àithn an Tighearn a thaobh Iacoib, a naimhdean a bhi air gach taobh mu'n cuairt da; tha Ierusalem 'nam measg mar aon a chuireadh air leth air son neo-ghloine.

18 Is ceart an Tighearn, oir chathaich mise an aghaidh 'àitheantan; éisdibh, guidheam oirbh, a shloigh gu léir, agus faicibh mo bhròn: m'òighean agus m'òganaich dh'fhalbh ann am braighdeanas.

19 Ghairm mi air mo leannain, ach mheall iad mi; thug mo shagairt agus mo sheanairean suas an deò anns a' chaithir, am feadh a dh'iarr iad am biadh gu cabhair air an anam.

20 Feuch, O Thighearn, mar a ta mi ann an teinn; tha mo chom fo thrioblaid; tha mo chridhe air tionndadh an taobh a stigh dhìom; oir chiontaich mi gu trom: a muigh tha claidheamh a' sgrios, a stigh tha amhuil bàs.

21 Chual iad mar a rinn mi acain, ach cha'n 'eil neach ann a thoirt dhomh comhfhurtachd; chuala mo naimhdean uile m' àmhghar; rinn iad gàirdeachas a chionn gu'n d'rinn thusa *sin*: bheir thusa an là a ghairm thu, agus bithidh iadsan cosmhuil rium-sa.

22 Thigeadh an aingidheachd uile fa d' chomhair; agus dean riu, mar a rinn thu rium-sa air son m'uile lochdan: oir tha m' osnaidhean lionmhor, agus mo chridhe lag.

CAIB. II.

1 Tha Ieremiah a' deanamh gearran do bhrìgh gu'n do thilg Dia sìos àiteacha-còmhnuidh nighinn Iudah, 5 agus gu'n do mheudaich e a bròn agus a doilghios. 15 Tha a naimhdean ri sgeig-fhiacal agus a' crathadh an cinn ri nighinn Ierusalem.

CIONNUS a tharruing an Tighearn 'na chorruich neul air nighinn Shìoin! agus a thilg e sìos o nèamh gu talamh maise Israeil! agus cha do chuimhnich e stòl a chois ann an là 'fheirge.

2 Shluig an Tighearn suas uile àiteacha-còmhnuidh Iacoib, agus cha do ghabh e truas: thilg e sìos 'na chorruich daing-nichean làidir nighinn Iudah: thug c nuas

¹ orra.

TUIREADH IEREMIAH, II. III.

gu làr iad; thruaill e an rìoghachd agus a daoine urramach.

3 Ghearr e as 'na dhian-fheirg adharc Israeil uile; tharruing e air a h-ais a làmh dheas o aghaidh an nàmhaid; agus loisg e an aghaidh Iacoib mar theine lasarach a loisgeas air gach taobh.

4 Lùb e a bhogha mar nàmhaid; thog e 'n àird a làmh dheas mar eas-caraid, agus mharbh e na h-uile *òganach* a bha taitneach do'n t-sùil; ann am pàillinn nighinn Shioin thaom e mach a chorruich mar theine.

5 Bha an Tighearn mar nàmhaid: shluig e suas Israel, shluig e suas 'àrois uile; sgrios e a dhaingnichean làidir, agus mheudaich e ann an nighinn Iudah bròn agus caoidh.

6 Agus sgaoil e as a chéile a phàillinn mar challaid; sgrios e a choimhthional féin; leig an Tighearn as 'aire ann an Sion an àrd-fhéil agus ant-sàbaid; agus rinn e tàir, ann an teas a chorruich, air an rìgh agus air an t-sagart.

7 Chuir an Tighearn air cùl 'altair, ghabh e gràin d' a naomh-ionad: thug e suas ballachan a h-àrois do làmh an eas-caraid; rinn iad gair ann an tigh an Tighearna, mar ann an là àrd-fhéile.

8 Tha an Tighearn a rùn ballachan nighinn Shioin a mhilleadh; shìn e mach sreang, cha do chum e a làmh o mhill-eadh: ach thug e air an daingneach agus air a' bhalla caoidh; shearg iad as le chéile.

9 Tha a geatachan air dol sìos anns an talamh; mhill agus bhris e a croinn-dhruididh; tha a rìghrean agus a h-uachd-arain ann measg nan cinneach; an lagh cha'n 'eil ann; aig a fàidhean fòs cha'n 'eil sealladh air bith o'n Tighearn.

10 Tha seanairean nighinn Shioin 'nan suidhe air an làr, tha iad 'nan tosd; chuir iad duslach air an ceann: chrìoslaich iad iad féin le sac-éididh: tha òighean Ierusalem a' cromadh sìos an cinn gu làr.

11 Tha mo shùilean air fàilneachadh le deuraibh; tha mo chom fo thrioblaid; dhòirteadh mo sgamhan air an talamh air son léir-sgrios nighinn mo shluaigh; a chionn gu bheil a' chlann bheag agus na naoidheana a' fannachadh ann an sràidibh na caithreach.

12 Ri 'm màithrichibh tha iad ag ràdh, C'ait am bheil arbhar agus fion? an trà tha iad a' fàilneachadh mar dhaoine leònta ann an sràidibh a' bhaile, trà tha an anam air a dhòrtadh a mach ann an uchd am màthar.

13 Ciod a thairngeas mi mar fhianuis a'd' aghaidh? ciod an ni a shàmhlucias mi riut, O nìghean Ierusalem? ciod a choimeasas mi riut, a chum gu'n tugainn còmhfhurtachd dhuit, O òigh-nìghean

Shioin? oir tha do bhriseadh mòr mar an fhairge; cò dh'fheudas do leigheas.

14 Chunnaic d' fhàidhean nìthe dìomhain agus amaidheach air do shon, agus cha do leig iad ris t' euceart, a chum do bhruid a philleadh air a h-ais; ach chunnaic iad air do shon fàistneachd neo-fhirinneach, agus aobhar fògraidh.

15 Tha mheud as a ta gabhail seachad a' bualadh am bas riut: tha iad ri sgeig-fhiacal, agus a' crathadh an cinn ri nighinn Ierusalem, *agràdh*, An i so a' chaithir ri 'n goirear Foirfeachd maise, Aoibhneas an domhain uile?

16 Dh'fhosgail do naimhdean uile am beul a'd' aghaidh: rinn iad sgeig is giosg-an fhiacal; thubhairt iad, Shluig sinn suas i; gu cinnteach is e so an là ri 'n robh ar sùil: fhuair sinn e, chunnaic sinn e.

17 Rinn an Tighearn an nì sin a dhealbha; choimhlion e fhocal, a dh'àithn e anns na làithibh o shean: thilg e sìos, agus cha do ghabh e truas; ach thug e air nàmhaid gàirdeachas a dheanamh os do cheann, dh'ardaich e adharc do naimhdean.

18 Dh'éigh an cridhe, Ann an làthair an Tighearn, O a nìghean Shioin, sìleadh deoir sìos mar shruth a là agus a dh'oidhche: na toir dhuìt féin suaimhneas air bith; na gabhadh cloch do shùil fois.

19 Eirich, glaoth gu h-àrd anns an oidhche: ann an tùs na faire dòirt a mach do chridhe mar uisge fa chomhair gnùise Iehobhah: tog suas do làmhan d'a ionnsuidh air son anama do chloinne òige, a ta fàilneachadh le h-ocras aig ceann gach aoin sràide.

20 Feuch, O Thighearn, agus thoir fa' near cò ris a bhuin thu mar so: an ith na mnathan toradh na bronn, naoidheana maotha? am marbhar an sagart agus am fàidh ann an ionad naomh an Tighearna?

21 Luidh an t-òg agus an sean air an làr anns na sràidibh; tha m' òighean agus m' òganaich air tuiteam leis a' chladheamh; mharbh thu *iad* ann an là do chorruich; mharbh thu, agus cha do ghabh thu truas.

22 Ghairm thu, mar air là suidhichte, m' uamhasan air gach taobh, air chor as, air là feirge an Tighearna, nach robh neach ann a chaidh as, na mhair beò: a' mhuinntir a dh'òil agus a dh'àirich mi, chuir mo nàmhaid as doibh.

CAIB. III.

¹ Tha am fàidh ri caoidh air son a thrioblaiden féin. 22 Mòr-thròcair an Tighearna dhoibh-san uile a dh'fheitheas air. 37 Cha chòir do neach gearan a dheanamh 'nuair a smachdaichear e air son a pheacanna. 55 Ghuidh am fàidh gu'n tugadh Dia tuigheachd d'a naimh-dibh.

IS mise an duine chunnaic àmhghar le slait a chorruich.

TUIREADH IEREMIAH, III.

2 Stùir e mi, agus thug e orm gluasad ann an dorchadas, agus ni h-ann an solus.

3 Gu cinnteach a'm' aghaidh-sa phill e; tha e pilleadh a làimhe air a h-ais *ann am aghaidh* feadh an là gu h-ìomlan.

4 M'fheoil agus mo chraicinn rinn e sean: bhris e mo chnàmhan.

5 Thog e ann am aghaidh, agus chuairtich e mi le domblas agus le saothair.

6 Chuir e mi chòmhnuidh ann an ionad-aibh dorcha, mar iadsan a ta cian marbh.

7 Chuairtich e mi le gàradh air gach taobh, air chor as nach feud mi teachd a mach; rinn e mo shlabhruidh trom.

8 Mar an ceudna, trà ghlaodhas agus a dh'èigheas mi, tha e druideadh a mach m'urnuigh.

9 Dhruid e suas mo shlighe le clachaibh snaidhte; rinn e cam mo cheuma.

10 Mar mhath-ghamhuinn a' luidhe am folach bha e dhomh, *mar* leòmhann ann an ionadaibh uaigneach.

11 Rinn e mo shlighe fiar, agus reub e mi am bloighdibh: rinn e mi a'm' aonaran.

12 Lùb e a bhogha, agus chuir e mise mar chomhara air son na saighde.

13 Thug e air saighdibh a dhorlaich dol a steach ann am airnibh.

14 Bha mi ann am chùis-mhagaidh do mo shluagh uile, ann am òran doibh fad an là.

15 Lìon e mi le searbhadas, chuir e air mhig mi le searbh-luibhean.

16 Bhris e m' fhiacra fòs le clachaibh gainmhiche, chòmhaich e mi le luathre.

17 Agus dh'atharraich thu m' anam am fad o shùil; dhì-chuimhnich mi soirbheachadh.

18 Agus thubhairt mi, Tha mo spionnadh agus mo dhòchas air bàsachadh o 'n Tighearn.

19 Tha cuimhneachadh air m' àmhghair agus mo thruaighe, 'na shearbhadas agus 'na dhomblas.

20 Tha m' anam fathasd 'g an cuimhneachadh, agus air irioslachadh an taobh a stigh dhìon.

21 Tha mi gairm so a rìs gu m' aire; uime sin tha dòchas agam.

22 Is ann do thròcairibh an Tighearna nach 'eil sinn air ar caitheadh, a chionn nach 'eil fàilinn air a thròcairibh.

23 Tha iad nuadh gach aon mhaduinn, is mòr do dhìlseachd¹!

24 Is e an Tighearn mo chuibhrionn, tha m' anam ag ràdh; uime sin cuiridh mi mo dhòchas ann.

25 Is maith an Tighearn dhoibh-san a dh'fheitheas air, do'n anam a dl'iarras e.

26 Is maith bhi ann an dòchas, agus

feitheamh gu fòil ri slàinte an Tighearn.

27 Is maith do dhuine a' chuing a ghiùlan 'na òige;

28 Suidhidh e 'na aonar, agus bithidh e 'na thosd, a chionn gu'n d'rinn e a giùlan.

29 Cuiridh e 'bheul anns an duslach, ma's teagamh gu'm bi dòchas ann.

30 Bheir e a ghial do'n tì a bhuail eas e; bithidh e air a lìonadh làn do mhasladh.

31 Oir cha tilg an Tighearn uaith gu bràth;

32 Ach ged bheir e aobhar bròin, gidheadh ni e iochd a réir lionmhoireachd a thròcairean.

33 Oir cha chlaoidh e d' a dheòin, ni mò chràidheas e clann nan daoine.

34 Prìosanaich na talmhainn uile a bhruthadh f'a chosaibh,

35 Còir duine thionndadh a leth-taobh, fa chomhair gnùise an Tì a's airde,

36 Eucoir a dheanamh air duine 'na chùis, cha taitneach leis an Tighearn.

37 Cò esan a their, agus gu'n tig e gu crìch, an uair nach àithn an Tighearn?

38 Nach ann o ordugh an Tì a's ro àirde a thig olc agus maith?

39 C'uime an dean duine beò gearan, duine air son *smachdachaidh* a pheacaidh.

40 Rannsaicheamaid agus dearbhamaid ar slighean, agus pilleamaid a rìs a dh'ionnsuidh an Tighearna.

41 Togamaid suas ar cridhe maille ri ar làmhnan ri Dia anns na nèamhaibh.

42 Pheacaich sinne agus rinn sinn ar a mach, agus cha do mhaith thusa.

43 Chuairtich thu le feirg, agus gheurlean thu sinn; mharbh thu, cha do ghabh thu truas.

44 Chòmhaich thu thu féin le neul, ionnus nach rachadh urnuigh troimhe².

45 Rinn thu sinn 'nar salchar agus 'nar diù am measg an t-sluaigh.

46 Dh'fhosgail ar naimhdean uile am beul 'nar n-aghaidh.

47 Thàinig eagal agus rib oirnn, fàsalachd agus milleadh.

48 Tha mo shùil a' sìleadh sìos le sruthaibh uisge air son léir-sgrìos nìghinn mo shluagh.

49 Tha mo shùil a' sìleadh sìos gun chasgadh agus gun sgrùr,

50 Gus an seall an Tighearn a nuas, agus gu 'n amhairec e o nèamh.

51 Tha mo shùil a' cur doilgheis air mo chridhe, air son uile nigheana mo chaithreach.

52 Ruaig mo naimhdean mi gu geur, mar eun gun aobhar.

53 Ghearr iad as m'anam anns a' phrìosan, agus chuir iad clach orm.

54 Chaidh uisgeachan thar mo cheann

¹ *thairisncachd.*

² *roimhe, trid.*

TUIREADH IEREMIAH, III. IV.

mar thuil; thubhairt mi, Tha mi air mo ghearradh as.

55 Ghairm mi air t' ainm-sa, o Thighearn, as an t-slochd ìochdarach.

56 Chuala tu mo ghuth; na cum do chiuas o m' athchuinge agus o mo ghlaodh.

57 Tharruing thu 'm fagus anns an là sau do ghairm mi ort: thubhairt thu, Na biodh eagail ort.

58 Thagair thusa, O Thighearn, cùisean m'anama; shaor thu mo bheatha.

59 Chunnaic thusa, O Thighearn, m' amhghar; cum thusa còir rium.

60 Chunnaic thu an uile dhioghaltas, an uile innleachdan ann am aghaidh.

61 Chuala tu am masladh, O Thighearn, an uile innleachdan ann am aghaidh;

62 Bile na muinntir a dh'érich suas a m' aghaidh, agus am borbhanaich ann am aghaidh fad an là.

63 Feuch an suidhe sìos, agus an éirigh suas; is mise an ceòl.

64 Bheir thusa luigheachd dhoibh, O Thighearn, a réir oibre an làmh.

65 Bheir thu doilghios cridhe dhoibh, ni thu am mallachadh.

66 Ruaigidh tu ann am feirg, agus sgriosaidh tu iad o bhì fuidh nèamhaibh an Tighearna.

CAB. IV.

1 *Tha am fuidh ri caoidh air son trioblaidean Shìoin.* 21 *Bhagradh Edom.* 22 *Fhuair Sìon comhfhurtachd.*

CIONNUS a thàinig smal air an òr! a chaochail an t-òr ro fhìnealta! tha clachan an uaomh-ionaid air an tilgeadh a mach air mullach gach aoin sràide!

2 Mic luachmhor Shìoin, a dh'fheudta choimeas ri òr fhìnealta, cionnus a mheasar iad mar shoithichean creadha, obair a' chreadhadair!

3 Tairngidh eadhon na dràgoin a mach am brollach, bheir iad a' chìoch d' an àlach: tha nighean mo shluaigh-sa an-ìochdmhor, mar na struthan¹ san fhàsach.

4 Tha teagadh naoidhein na cìche a' leantuinn r'a ghial le tart: tha chlann òg ag iarraidh arain; cha 'n'eil aon 'ga bhriseadh dhoibh.

5 Tha iadsan aig an robh biadh sòghail 'nan aonarain anns na sràidibh; iadsan a thhogadh suas ann an scarlaid, tha iad a' fìlleadh an làmh mu'n òtrach.

6 Seadh, tha peanas aingidheachd nighinn mo shluaigh-sa nì's mò na peanas peacaidh Shodoim, a thilgeadh bun os ceann ri tiota, agus air nach d'thàinig laighe làmh.

7 Bha a Nasaraich ni bu ghloine na sneachdadh; bu ghile iad na bainne; bu

deirge iad sa' chorp na ruiteachain²; bha an dreach mar Shaphir.

8 Is duibhe an gnùis na gual; cha'n aithnichear iad anns na sràidibh; tha an craicionn a' leantuinn ri 'n cnàmhaibh; tha e air tiormachadh; tha e air fàs mar mhaide.

9 Is fearr dhoibh-san a mharbhar leis a chlaidheamh na dhoibh-san a mharbhar le gort; oir tha iad sin a' seargadh às, air an lotadh dh'uireasbhuidh toraidh na macharach.

10 Bhruich làmh na ban iochdmhor an clann féin; b' iad am biadh, ann an léir-sgrios nighinn mo shluaigh.

11 Choimhlion an Tighearn a chorruich; thaom e mach a dhian-fhearg, agus las e teine ann an Sìon, agus loisg e sin a bunait-ean.

12 Cha chreideadh nìghrean na talmhainn, no uile luchd-àiteachaidh an domhain, gu'n rachadh an t-eas-caraid agus an nàmhaid a steach air geatachan Ierusalem.

13 Air son pheacanna a fàidhean, agus aingidheachdan a sagart, a dhòirt fuil nam firean 'na meadhan;

14 Chaidh iad air seacharan mar dhaoine dall anns na sràidibh, shalaich iad iad féin le fuil, air chor as nach feudadh daoine buntainn ri 'n eudach.

15 Imichibh, tha sibh neòghlan, thubhairt daoine riu; imichibh, imichibh, na beanaibh: seadh, theich iad, dh'fhalbh iad; thubhairt iad am measg nan cinneach, Cha ghabh iad còmhnuidh an so nì's mò.

16 Rinn fearg an Tighearn an sgaoileadh; cha chuir e nì's mò an suim iad: cha robh meas aca air pearsannaibh nan sagart; ris na seanairibh cha do chum iad bàigh.

17 Am feadh a bha sinn ann, dh'fhàilnich ar sùilean ag amharc ri cabhair dhìomhain: am feadh a rinn sinn faire, bha ar sùil ri cinneach nach b' urrainn tèarnadh.

18 Lorgaich iad ar ceuma, air chor as nach feudamaid imeachd 'nar sràidibh: tha ar crìoch dlùth, tha ar làithean air an coimhlionadh; seadh, thàinig ar crìoch.

19 Bu làithe ar luchd-leanmhuinn na ìolairean nèimh; ruaig iad sinn air na sléibhtibh, luidh iad am folach air ar son anns an fhàsach.

20 Ghlacadh 'nan slochdaibh anail ar cuinneana, ti ungta an Tighearna, mu'n d' thubhairt sinn, Fuidh a sgàile mairidh sinn beò am measg nan cinneach.

21 Dean gàirdeachas; agus bi ait, O nighcan Edoim, aig am bheil do chòmhnuidh ann an fearann Uis; thèid an

¹ ostriches. Sasg.

² rubies. Sasg.

cupan thairis fòs thugad-sa; bithidh tu air mhisg, agus leigidh tu ris do lommochd-uidh.

22 Tha peanas t' euceirt air a choimh- lionadh, O nighean Shioin; cha toir e n's mò air falbh ann am bruid thu: smachd- aichidh e t' euceart-sa, O nighean Edoim, leigidh e ris do lochdan.

CAIB. V.

1 *Tha Sion a' gearan a maslaidh agus a' cur an céill na h-uile a thàinig oirre.*

CUIMHNICH, O Thighearn, ciod a thàinig oirnn: thoir fa'near, agus faic ar masladh.

2 Thugadh thairis ar n-oighreachd gu coimhich, ar tighean gu coigrich.

3 Tha sinn 'nar dilleachdain, agus gun athair, ar màthraichean mar bhantraichibh.

4 Dh'òl sinn ar n-uisge air son airgid; tha ar coille air a reic ruinn.

5 Le cuing ar muineal tha sinn air ar sior-leòn; tha sinn a' saothreachadh, agus gun fhois againn.

6 Thug sinn an làmh do na h-Eiphit- ich, agus do na h-Asirianaich, a chum bhi air ar sàsachadh le h-aran.

7 Pheacaich ar n-aithrichean, agus cha 'n 'eil iad ann, agus ghiùlain sinn an euceartan.

8 Bha seirbhishich 'nan uachdarain oirnn: cha 'n 'eil duine sam bith ann a shaoras o'n làmhnan.

9 Fhuair sinn ar n-aran le *cunnart* ar n-anama, do bhrìgh claidheimh an fhàs- aich.

10 Bha ar craicionn dubh mar àmhunn, do bhrìgh na gorta uamhasaich.

11 Dh'éignich iad na mnathan ann an Sion, na maighdeanan ann an caithrichibh Iudah.

12 Bha prionnsachan air an crochadh suas le 'n làimh: cha d' thug iad urram do aghaidh nan aosda.

13 Ghabh iad na h-òganaich gu meil- eadh, agus thuit a' chlànn fuidh 'n chonn- adh.

14 Thréig na seanairean an geata, na h-òganaich an ceòl.

15 Sguir aoibhneas ar cridhe; chaoch- ail ar danusadh gu bròn.

16 Thuit an coron¹ bhàrr ar cinn: mo thruaighe sinne, a chionn gu'n do pheac- aich sinn.

17 Air son so tha ar cridhe lag; air son nan nithe so tha ar sùilean air an dorch- achadh².

18 Air son sléibh Shioin a ta fàs; tha na sionnaich a' coiseachd air.

19 Ach tha thusa, O Thighearn, mair- eannach gu siorruidh; do chaithir rioghail o linn gu linn.

20 C'uime an dean thu dearmad oirnn gu bràth, agus am bheil thu 'g ar tréig- sinn ùine co fhada?

21 Pill sinne thugad, O Thighearn, agus bithidh sinn air ar pilleadh: ath-nuadh- aich ar làithean mar o shean.

22 Oir thilg thu sinn cian fada uait; bha thu ro fheargach 'nar n-aghaidh.

¹ crùn

² lag-radharcach.

ESECIEL.

CAIB. I.

1 *An t-àm san d'rinn Eseciel fàidheadaireachd aig amhainn Chebair.* 4 *Coslas nan ceithir cherubim a chunnaic am fàidh 'nuair bha làmh an Tighearn air.* 26 *Sàmhkladh glòire Dhé.*

AGUS tharladh, anns an deicheamh bliadhna fichead, anns a' cheathramh mìos, air a' chùigeamh là do'n mhìos, (air dhomhsa bhi measg nam braighdean aig amhainn Chebair,) gu'n d' fhosgladh na nèamhan, agus chunnaic mi taisbeana Dhé.

2 Air a' chùigeamh là do'n mhìos (b'i sin an cùigeamh bliadhna do bhruid rìgh Iehoiacin.)

3 Thàinig focalan Tighearn gu Eseciel an sagart, mac Bhusi, ann an tìr nan Cal- déach, aig uisge Chebair; agus bha làmh an Tighearn air anns an àite sin.

4 Agus dh'amhairc mi, agus, feuch, ghiùlain ioma-ghaoth o'n àirde-tuath,

neul mòr a bha air a chuairteachadh le filltean teine, agus dealradh air gach taobh dheth; agus 'na mheadhon bha amhuil dreach omair, eadhon ann an meadhon an teine.

5 Agus mach as a mheadhon mar an ceudna thàinig coslas cheithir ainmhidh- ean, agus b'e so an aogus; Bha iad ann am meudachd duine,

6 Agus bha ceithir aghaidhean aig gach aon diubh, agus ceithir sgiathan aig gach aon diubh;

7 Agus bha an cosan dìreach; agus bha bonn an cos mar bhonn coise laoirigh, agus loimrich iad mar dhath praise lomhta.

8 Agus bha làmhnan duine fuidh an sgiathaibh, air an ceithir taobhaibh; agus bha aig a' cheithir an aghaidhean agus an sgiathan.

9 Bha an sgiathan dlùthaichte, gach aon r'a chéile; cha do thionndaidh iad 'nuair

a ghluais iad; chaidh iad air an aghaidh, gach aon dìreach roimhe.

10 Air son coslais an aghaidhean, bha aca 'nan ceathrar aghaidh duine, agus aghaidh leòmhain air an taobh deas; agus bha aca 'nan ceathrar aghaidh daimh air an làimh chli; bha fòs aca 'nan ceathrar aghaidh iolaire¹.

11 B' amhuil so an aghaidhean: agus an sgiathan sgaoilte gu h-àrd; dithis aig gach aon, dlùthaichte r'a chèile, agus dithis a' folach an cuirp.

12 Agus dh'imich iad, gach aon dìreach air aghaidh: far an robh an spiorad air tì dol, dh'imich iad; cha do thionndaidh iad 'nuair a dh'imich iad.

13 A thaobh coslais nan ainmhidhean, bha an aogus mar eibhle dearga teine, cosmhuil ri lòchran, a chaidh air ais agus air aghaidh am measg nan ainmhidhean: agus bha 'n teine dealrach; agus as an teine thàinig a mach dealanach.

14 Agus ruith na h-ainmhidhean, agus phill iad, mar phlath dealanaich.

15 A nis am feadh a bha mi sealltuinn air na h-ainmhidhean, feuch, aon roth air an talamh, làimh ris na h-ainmhidhean, aig an ceithir aghaidhean.

16 Bha dreach nan rothan agus an obair mar dhreach criostail; agus bha an aon choslas aig a' cheithir, agus bha an aogus agus an obair mar gu'm biodh ann roth ann am meadhon rotha.

17 'Nan imeachd dh'imich iad air an ceithir taobhaibh: cha do thionndaidh iad 'nuair a dh'imich iad.

18 A thaobh an cearcal, bha iad cò àrd as gu'm b' uambasach iad; agus bha an cearcail làn do shùilbhu mu'n cuairt doibh 'nan ceathrar.

19 Agus an uair a ghluais na h-ainmhidhean, ghluais na rothan làimh ri u: agus an uair a thogadh na h-ainmhidhean suas o'n talamh, thogadh na rothan.

20 C'ait air bith a bha'n spiorad air tì dol, dh'imich iadsan an taobh a bha'n spiorad air tì dol, agus thogadh suas na rothan fa 'n comhair; oir bha spiorad an ainmhidh² anns na rothaibh.

21 'Nuair a ghluais iad sin, ghluais [iad so:] agus 'nuair a sheas iad sin, sheas [iad so:] agus 'nuair a thogadh iad sin suas o'n talamh, thogadh na rothan suas fa'n comhair: oir bha spiorad an ainmhidh anns na rothaibh.

22 Agus bha aogus an speur a bha thar cinn an ainmhidh mar dhreach criostail uambasach, air a sgaoileadh thar an cinn gu h-àrd.

23 Agus fuidh an speur bha an sgiathan gu dìreach, gach aon fa chomhair a chèile; aig gach aon bha dithis, a dh'fhol-

uich air an taobh so, agus aig gach aon bha dithis a dh'fholuich air an taobh sin, an cuirp.

24 Agus chuala mi fuaim an sgiathan, mar thoirn mhòran uisgeacha, mar ghuth an Uile-chumhachdaich; an uair a ghluais iad, chluinnteadh fuaim mar thorman sluaigh; trà sheas iad, lcig iad sìos an sgiathan.

25 Agus bha guth o'n speur, a bha thar an cinn, trà sheas iad, agus a leig iad sìos an sgiathan.

26 Agus os ceann an speur, a bha thar an cinn, bha sàmhladh righ-chaitheach, mar choslas cloiche sapheir; agus air sàmhladh na righ-chaitheach, bha taisbean mar gu'm biodh coslas duine 'na shuidhe air.

27 Agus chunnaic mi mar dhreach òm-air, mar choslas teine gach taobh a stigh ann: o thaisbean a leasraidh, agus os a cheann, agus o thaisbean a leasraidh agus fuidhe, chunnaic mi mar gu'm biodh ann coslas teine, agus e dealrach mu'u cuairt.

28 Mar choslas a' bhogha a ta san neul ann an là na fraise, b' amhuil dreach an dealraidh mu'n cuairt. B' e so foill-seachadh sàmhlaidh glòire an Tighearn; agus 'nuair a chunnaic mise, thluit mi air m' aghaidh, agus chuala mi guth aoin a' labhairt.

CAIB. II.

1 Dreuchd Eseciel. 6 An àithne a thug Dia dha. 9 Chaidh rola leabhair a sgaoileadh fa 'choinneamh anns an robh sgrìobhta tuireadh agus bròn.

AGUS thubhairt e rium, A mhic an duine, seas air do chosaibh, agus labhraidh mise riut.

2 Agus chaidh an spiorad a steach annam an uair a labhair e rium, agus chuir e air mo chosaibh mi, ionnus gu'n cuala mi an ti a labhair rium.

3 Agus thubhairt e rium, A mhic an duine, tha mise ga d' chur gu cloinn Israeil, gu cinneach ceannairceach a rinn ar a mach a'm' aghaidh; chiontaich iad féin agus an aithrichean a'm' aghaidh, agus an là an diugh.

4 Oir is clann mhi-nàrach agus chruaidh-chridheach iad: tha mise ga d' chur d'an ionnsuidh, agus their thu riu, Mar so deir an Tighearn Dia.

5 Agus iadsan, ma dh'éisdeas iad, no ma dhearmaideas iad, (oir is tigh ceannairceach iad,) gidheadh bithidh fios aca gu robh fàidh 'nam measg.

6 Agus thusa, a mhic an duine, na biodh eagail ort rompa, agus na biodh fiamh ort roimh am briathraibh, ged tha drisean agus droighionn mu'n cuairt duit, agus do chòmhnuidh am measg nathraichean nimhe: na biodh eagail ort roimh am

¹ iolarach.

² na beatha.

ESECIEL, II. III.

briathraibh, ni mò bhi os geilt ort roimh an gnùis, ged is tigh ceannairceach iad.

7 Agus labhraidh tu mo bhriathra-sa riu, co ac' a dh'éisdeas iad, no dhearm-aideas iad; oir tha iad ro cheannairceach.

8 Ach thusa a mhic an duine, cluinn ciod a tha mise ag ràdh riut; Na bi thusa eas-umhal cosmhuil ris an tigh eas-umhal sin: fosgail do bheul, agus ith an ni bheir mise dhuit.

9 Agus 'nuair a dh'amhairc mi, feuch, bha làmh air a' cur a m' ionnsuidh, agus, feuch, bha rola leabhair innte;

10 Agus sgaoil e fa m' choinneamh e; agus bha e sgrìobhta stigh agus a mach: agus bha sgrìobhta ann tuireadh, agus bròn, agus truaighe.

CAIB. III.

1 *Dh'ith Eseciel rola an leabhair: 4 thug Dia misneach dha: 15 fhuair e fios air a dhleasdanas mar fhear-faire, 25 agus air an dòigh air am buineadh na h-Iudhaich ris.*

OS bàrr thubhairt e rium, A mhic an duine, ith an ni gheibh thu; ith an rola so, agus falbh, labhair ri tigh Israeil.

2 Mar sin dh'fhosgail mi mo bheul, agus thug e orm an rola sin itheadh.

3 Agus thubhairt e rium, A mhic an duine thoir air do bhroinn itheadh, agus liou do chom leis an rola so a bheiream-sa dhuit. An sin dh'ith mi, agus bha e ann mo bheul mar mhill air mhillsead.

4 Agus thubhairt e rium, A mhic an duine, falbh, imich gu tigh Israeil, agus labhair le m' bhriathraibh-sa riu.

5 Oir cha'n eil thu air do chur gu sluagh aig am bheil teagaidh choimheach, agus cainnt chruaidh, ach gu tigh Israeil.

6 Cha 'n ann gu mòran sluagh, aig am bheil teagaidh choimheach, agus cainnt chruaidh, nach urrainn thu m' briathran a thuigsinn: gu cinnteach nan cuirinn do'n ionnsuidh-san thu, dh'éisdeadh iad riut.

7 Ach cha'n éisd tigh Israeil riut, oir cha'n éisd iad riumsa; oir tha tigh Israeil uile mi-nàrach agus cruaidh-chridheach.

8 Feuch, rinn mi do ghnùis làidir an aghaidh an gnùise-san, agus t' eudan làidir an aghaidh an eudain-san.

9 Mar adamant, ni's cruaidhe na clach theine, rinn mise t'eudan: na biodh eagail ort rompa, agus na biodh sgàth ort roimh an gnùis, ged tha iad 'nan tigh ceannairceach.

10 Os bàrr, thubhairt e rium, A mhic an duine, gabh ann ad chridhe m' uile bhriathra-sa a labhras mi riut, agus éisd le d' chluasaibh.

11 Agus falbh, imich dh'ionnsuidh na muinntir a ta ann am bruid, gu cloinn do shluagh, agus labhair riu, agus innis doibh, Mar so tha an Tighearn Dia ag

ràdh, co ac' a dh'éisdeas iad no nach éisd.

12 An sin thog an spiorad suas mi, agus chuala mi air mo dhéigh guth tormain mhòir, *ag ràdh*, Beannaichte gu robh glòir an Tighearn o 'àite féin.

13 *Chuala mi* fòs fuaim sgiath nan ainmhidhean a bhean ri chéile, agus fuaim nan roth thall mu'n coinneamh, agus fuaim luasgaidh mhòir.

14 An sin thog an spiorad suas mi, agus thug e leis mi, agus dh'imich mi ann an searbhas, ann an teas mo spioraid, ach bha làmh an Tighearna treun orm.

15 An sin thàinig mi chum na muinntir a bha 'nam braidhaidh aig Tel-abib, a bha chòmhnuidh làimh riamhainn Chebair, agus shuidh mi far an do shuidh iadsan, agus dh'fhan mi 'n sin seachd làithean làn uamhais 'nam meadhon.

16 Agus tharladh an ceann sheachd làithean, gu'n d' thàinig focal an Tighearn a m' ionnsuidh, *ag ràdh*,

17 A mhic an duine, rinn mise fear-faire dhìot do thigh Israeil: uime sin, éisd am focal o m' bheul, agus thoir rabhadh dhoibh uamsa.

18 'Nuair a their mise ris an aingidh, Gheibh thu gu cinnteach bàs; agus nach toir thusa rabhadh dha, agus nach labhair thu thoirt rabhaidh do'n chiontach o 'dhroch shlighe, chum 'anam a thèarnadh; bàsaichidh an droch dhuine sin 'na aingidheachd, ach iarraidh mise 'fhuil air do làimh-sa.

19 Gidheadh ma bheir thu rabhadh do'n aingidh, agus nach pill e o 'aingidheachd, no o 'dhroch shlighe, bàsaichidh esan 'na aingidheachd; ach shaor thusa t'anam féin.

20 A ris, an uair a philleas fìrean o 'fhìreantachd, agus a chuireas e 'n gnìomh peacadh, agus a chuireas mise ceap-tuislidh fa chomhair, gheibh e bàs; a chionn nach d'thug thusa dha rabhadh, 'na pheacadh gheibh e bàs, agus cha chuimhnich-e ar 'fhìreantachd a rinn e; ach iarraidh mise 'fhuil air do làimh-sa.

21 Gidheadh ma bheir thu rabhadh do'n fhìrean, air chor as nach ciontaich am fìrean, agus nach dean e peacadh; mairidh e gu cinnteach beò, do bhrìgh gu'n d' fhuair e rabhadh; mar an ceudna shaor thusa t'anam féin.

22 Agus bha làmh an Tighearn orm an sin, agus thubhairt e rium; Eirich, siubhail a mach do'n chòmhnard, agus an sin labhraidh mise riut.

23 An sin dh'éirich mi, agus chaidh mi mach a chum a' chòmhnaird, agus, feuch, sheas glòir an Tighearna san àite sin, mar a' ghloir a chumnaic mi aig amhainn Chebair; agus thuit mi air m' aghaidh.

24 An sin chaidh an spiorad annam, agus chuir e air mo chloisibh mi, agus

labhair e rium, agus thubhairt e rium, Falbh, druid thu féin a stigh ann ad thigh.

25 Ach thusa, O mhic an duine, feuch, cuiridh iad boinn ort, agus ceanglaidh iad thu leo, agus cha téid thu mach 'nam measg.

26 Agus bheir mise air do theangaidh leantuinn ri d' ghial, air chor as gu'm bi thu balbh, agus nach bi thu dhoibh a'd' fhear-cronachaidh; oir tha iad 'nan tigh ceannairceach.

27 Ach an uair a labhras mise riut, fosglaidh mi do bheul, agus their thu riu, Mar so tha an Tighearn Dia ag ràdh, Esan a dh'éisdeas, éisdeadh e: agus esan a dhearmaideas, dearmaideadh e: oir tha iad 'nan tigh ceannairceach.

CAIB. IV.

1 *Dh'orduicheadh do'n fhàidh baile Ierusalem a tharruing air lic-shuaine, agus a chuairteachadh le feachd, mar chomhara do thigh Israeil.* 9 *Leis an lòn a chaidh shonrachadh dha chuireadh an cèill an teanntachd a bha gu teachd air na h-Iudhaich.*

THUSA mar an ceudna, a mhic an duine, gabh thugad leac-shuaine, agus cuir fa d' chomhair i, agus tarruing oirre am baile, Ierusalem:

2 Agus cuairich e le feachd, agus tog 'na aghaidh daingneach, agus tilg suas tòrr 'na aghaidh; suidhich fòs camp 'na aghaidh, agus cuir reitheacha-cogaidh 'na aghaidh air gach taobh mu'n cuairt.

3 A thuilleadh air so, gabh thugad aghann iarunn, agus suidhich e mar bhalla iarunn, eadar thu agus am baile, agus cuir do ghuais 'na aghaidh, agus bithidh e air a theannachadh, agus cuiridh tu camp 'na aghaidh: bithidh so 'na chomhara do thigh Israeil.

4 Luidh thusa fòs air do thaobh clì, agus leig euceart tighe Israeil air: a réir àireimh nan làithean a luidheas tu air, giùlainidh tu an euceart.

5 Oir leig mise ortsa bliadhnachan an euceartan, a réir àireimh nan làithean, tri cheud deich agus ceithir fichead là: mar sin giùlainidh tu euceart tighe Israeil.

6 Agus 'nuair a choimhlionas tu iad, luidh a ris air do thaobh deas, agus giùlainidh tu euceart tighe Iudha dà fhichead là: dh'orduich mise dhuìt là air son bliadhna.

7 Uime sin cuiridh tu d' aghaidh ri séisdeadh Ierusalem, agus bithidh do ghairdean air a rùsgadh, agus ni thu fàistneachd 'na aghaidh.

8 Agus, feuch, cuiridh mise cuibhlichean ort, agus cha tionndaidh thu thu féin o'n aon taobh gus an taobh eile, gus an crìochnaich thu làithean do shéisdidh.

9 Gabh thugad fòs cruithneachd, agus corna, agus pònair, agus peasair, agus meanbh-peasair, agus peasair fhiadhain,

agus cuir iad ann an aon soitheach, agus dean duit féin aran diubh, a réir àireimh nan làithean a luidheas tu air do thaobh; tri cheud ceithir fichead agus deich làithean ithidh tu dheth.

10 Agus bithidh am biadh a dh'itheas tu air a chothromachadh, fichead secl anns an là: o am gu h-am ithidh tu e.

11 Olaidh tu mar an ceudna uisge le tomhas; an seathamh cuid do hin: o am gu h-am òlaidh tu.

12 Agus ithidh tu e mar arain eorna, agus le aolach a thig a mach á duine deasaichidh tu e 'nan sealladh.

13 Agus thubhairt an Tighearn, Eadhon mar so ithidh clann Israeil an aran truaille measg nan cinneach, gus an iomain mise iad.

14 An sin thubhairt mise, Ah a Thighearn Dhia! feuch, cha do thruailleadh m' anam-sa: oir o m' bhe nìos gus a nis cha d' ith mi dheth sin a bhàsaicheas leis féin, no bha 'na chonabhlach; ni mò thàinig feoil ghràineil ann am bheul.

15 An sin thubhairt e rium, Feuch, thug mi dhuìt buachar bhò an àite aolaidh duine, agus deasaichidh tu t' aran leis.

16 Os bàrr thubhairt e rium, A mhic an duine, feuch, brisidh mise lorg an arain ann an Ierusalem; agus ithidh iad aran le cothrom agus le cùram; agus òlaidh iad uisge le tomhas agus le h-uamhas.

17 A chum gu'm bi uireasbhuidh arain agus uisge orra, agus gu'n bi namhas orra gach aon ri chèile, agus gu'n leagh iad air falbh air son an euceirt.

CAIB. V.

1 *Le sàmhladh ealtuinn bearradair nochdadh breith-eanais Dhé an aghaidh Ierusalem, 12 le plàigh, le gorta, le claidheamh, agus le sgapadh.*

AGUS thusa, a mhic an duine, gabh thugad sgian gheur, gabh thugad ealtuinn bearradair, agus thoir oirre siubhal air do cheann, agus air d' fheusaig; an sin gabh meigh thomhais, agus roinn am folt.

2 Trian loisgidh tu le teine ann am meadhon a' bhaile, trà bhios làithean an t-séisdidh air an coimhlionadh; agus gabhaidh tu trian, agus buailidh tu m'a thimchioll le sgein; agus sgapaidh tu trian leis a' ghaoith, agus tairngidh mise mach claidheamh 'nan déigh.

3 Gabhaidh tu mar an ceudna dhiubh beagan ann an àireamh, agus ceanglaidh tu iad ann ad sgiortaibh¹.

4 An sin gabh dhiubh a ris, agus tilg iad ann meadhon an teine, agus loisg iad anns an teine; as a sin thig teine mach gu tigh Israeil eile.

5 Mar so tha an Tighearn Dia ag ràdh,

¹ sgiobul, sgiathaibh. Eabh.

Is i so Ierusalem; chuir mise i am meadhon nan cinneach, agus nan dùthchanna mu'n cuairt di.

6 Agus dh'atharraich i mo bhreitheanais gu aingidheachd ni's mò na na cinnich; agus mo reachdan ni's mò na na dùthchanna mu'n cuairt di: oir dhiùlt iad mo bhreitheanais; agus mo reachdan cha do ghluais iad anna.

7 Uime sin, mar so tha an Tighearn Dia ag ràdh, A chionn gu'n d' fhàs sibh lìon-mhor seach na cinnich mu'n cuairt duibh, agus nach do ghluais sibh ann am reachdaibh-sa, ni mò choimhid sibh mo bhreitheanais, ni mò rinn sibh eadhon a réir breitheanais nan cinneach mu'n cuairt duibh;

8 Uime sin, mar so tha an Tighearn Dia ag ràdh, Feuch, tha mise, eadhon mise a' d' aghaidh, agus ni mi breitheanais ann ad mheadhon, ann an sealladh nan cinneach.

9 Agus ni mi annad an ni sin nach d' rinn mi, agus nach dean mi ni's mò ni cosmhuil ris, air son t' uile ghràineileachdan.

10 Uime sin ithidh na h-aithrichean am mic ann ad mheadhon, agus ithidh na mic an aithrichean; agus ni mise breitheanais annad, agus sgapaidh mi an t-ionlan do d' fhuigheall anns gach uile ghaoith.

11 Air an aobhar sin, mar is beò mise, deiran Tighearn Dia, Gu deimhin, a chionn gu'n do thruaill thu m' ionad naomh le t' uile nithibh fuathach, agus le t' uile ghràineileachdaibh, uime sin lughaichidh mise thu mar an ceudna; agus cha choigil mo shùil, ni mò bhios truas air bith agam.

12 Bàsaichidh trian diot leis a' phlàigh, agus le gorta caithear iad ann ad mheadhon: agus tuitidh trian leis a' chlaidheamh mu'n cuairt duit; agus sgapaidh mise trian anns na h-uile ghaothaibh, agus tairgaidh mi mach claidheamh 'nan déigh.

13 Mar so coimhlionar mo chorruih, agus bheir mi air mo dhian-fheirg luidhe orra, agus bheir mi dhomh féin fois: agus bithidh fios aca gur mise an Tighearn a labhair ann am eud, an trà choimhlionas mi orra mo dhian chorruih.

14 A thuilleadh air so, ni mi dhìot fàdach agus masladh am measg nan cinneach mu'n cuairt duit, ann an sealladh nan uile a théid seachad.

15 Agus bithidh tu ann ad mhasladh, agus ann ad mhagadh, ann ad theagasg, agus ann ad uamhas, do na cinnich mu'n cuairt duit, an trà ni mise breitheanais annad, ann am feirg, agus ann an corruich, agus ann an garg achmhasanaibh: mise Iehobhah labhair.

16 An trà chuireas mi orra droch

shaighde na gorta, a bhios air son sgrios, a chuireas mise g'ur sgrios: meudaichidh mi fòs a' ghort oirbh, agus brisidh mi lorg 'ur n-arain.

17 Mar sin cuiridh mi oirbh gort, agus droch bheathaichean, agus ni iad uireasbhuidheach thu': agus siùhlaidh plàigh agus fuil tromhad², agus bheir mi ort an claidheamh; mise Iehobhah labhair.

CAIB. VI.

1 Breitheanas Israeil air son an iòdholan. 8 Tèarnar fuigheall dhiubh. 11 Dh'orduicheadh do'n fhàidh caoidha dheanamh air son ghràineileachdan tìghe Israeil.

A GUS thàinig focal an Tighearn a m' ionnsuidh, ag ràdh,

2 A mhic an duine, cuir d' aghaidh ri sléibhtibh Israeil, agus dean fàistneachd 'nan aghaidh,

3 Agus abair, A shléibhtean Israeil, cluinibh focal an Tighearna Dia, mar so tha an Tighearn Dia ag ràdh ris na sléibhtibh, agus ris na cnocaibh, ris na sruthaibh, agus ris na gleaunaibh, Feuch, bheir mise, mise féin, claidheamh oirbh, agus sgriosaidh mi 'ur n-ionadan àrda.

4 Agus bithidh 'ur n-altairean fàs, agus 'ur dealbhan air am briseadh: agus tilgidh mise sìos 'ur daoine marbhta a chomhair 'ur n-ìodholan.

5 Agus leagaidh mi cuirp mharbha chloinn Israeil fa chomhair an iòdholan; agus sgapaidh mi 'ur cnàmhan mu thimchioll 'ur n-altairean.

6 Ann 'ur n-uile àiteachaibh còmhnuidh, nìthear an bàltean fàs, agus bithidh 'ur n-ionadan àrda faondrach, air chor as gu'm bi 'ur n-altairean fàs agus uaigneach, agus gu'n tig briseadh agus cosgadh air 'ur n-ìodholaibh, agus gu'n dubhar as 'ur n-oibre.

7 Agus tuitidh iadsan a bhios leònta 'nur meadhon; agus bithidh fios agaibh gur mise an Tighearn.

8 Gidheadh fàgaidh mi fuigheall, air chor as gu'm bi agaibh cuid a théid as o'n chlaidheamh am measg nan cinneach, an trà bhios sibh air 'ur sgapadh am measg nan dùthchanna.

9 Agus cuimhnichidh a' mheud dhiubh³ is a théid as mise, am measg nan cinneach gus an toirear iad 'nam braighdibh, an trà chiosnaicheas mise an cridhe strìopachail a dhealaich rium, agus an sùilean a ta dol air strìopachas an déigh an iòdholan; agus bithidh gràin aca dhiubh féin air son nan olc a chuir iad an gnìomh 'nan uile ghràineileachdaibh.

10 Agus aithnichidh iad gur mise an Tighearn, agus nach ann gu dìomlain a thubhairt mi gu'n deanainn an t-olc so orra.

¹ fàgaidh iad gun chlann thu.

² thromhad.

³ mheud agaibh.

11 Mar so tha an Tighearn Dia ag ràdh, Buail le d' làimh, agus breab le d' chois, agus abair, Mo thruaighe! air son nile dhroch ghràineileachdan tìghe Israeil; oir tuitidh iad leis a' chlaidheamh, leis a' ghort, agus leis a' phlàigh.

12 Esan a ta fad as bàsaichidh leis a' phlàigh; agus esan a tha dlùth tuitidh leis a' chlaidheamh; agus esan a mhair-eas, agus a ta air a shéisdeadh, bàsaichidh leis a' ghort: mar so coimhlionaidh mise mo chorruih orra.

13 An sin bithidh fios agaibh gur mise an Tighearn, an trà bhios an daoine marbhta, measg an iodholan, mu'n cuairt air an altairibh, air gach aon chnoc àrd, air uile mhullachaibh nan sliabh, agus fo gach uile chrann uaine, agus fo gach daraig gheugaich¹; an t-àite san d' thug iad boltrach cùbhraidh do'n uile iodhol-aibh.

14 Mar sin sinidh mise mach mo làmh orra, agus ni mi am fearann fàs, seadh, ni's uaigniche 'na fàsach Dhiblaid, 'nan uile ionadaibh còmhnuidh; agus bithidh fios aca gur mi an Tighearn.

CAIB. VII.

1 *Léir-sgrìos Israeil.* 16 *Ni am fuigheall a théid as caoidh air son an aingidheachd.* 20 *Cheadaich Dia do naimhdean Israeil an t-ionad naomh a thruaillleadh a chionn gu'n do pheacaich iad 'na aghaidh.* 23 *Le sàmhladh slabhruidh chuir am fàidh an céill braighdeanas a shluagh.*

OS bàrr, thàinig focal an Tighearn a m' ionnsuidh, ag ràdh,

2 Fòs a mhic an duine, *abair*, Mar so tha an Tighearn Dia ag ràdh ri fearann Israeil: Thàinig crìoch, *thàinig* crìoch air ceithir chearnaibh na tìre.

3 A nis *thàinig* crìoch ort, agus cuiridh mise mo chorruih ort, agus bheir mi breth ort a réir do shlighe, agus diolaidh mi riut t' uile ghràineileachdan.

4 Agus cha choigil² mo shùil thu, ni mò bhios truas agam, ach diolaidh mi riut do shlighe, agus bithidh do ghràineileachdan ann ad mheadhon; agus bithidh fios agaibh gur mise an Tighearn.

5 Mar so tha an Tighearn Dia ag ràdh; Feuch, tha olc, aon olc eile a' teachd.

6 Tha crìoch air teachd, thàinig a' chrioch; tha i ri faire air do shon, feuch thàinig i.

7 Dh'éirich a' mhaduinn ort, O thusa a ta ag àiteachadh na tìre; thàinig an t-àm, tha là an àmhghair dlùth, agus cha'n e ath-fhreagradh nan sliabh.

8 A nis gu h-àithghearr dòirtidh mi mach m' fhearg, agus coimhlionaidh mi mo chorruih ort: agus bheir mi breth ort a réir do shlighe, agus diolaidh mi

riut t' uile ghràineileachdan.

9 Agus cha choigil mo shùil, ni mò bhios truas agam: diolaidh mi riut a réir do shlighe, agus do ghràineileachdan ann ad mheadhon; agus bithidh fios agaibh gur mise an Tighearn a ta bualadh.

10 Feuch an là, feuch, thàinig e; chaidh a' mhaduinn a mach, thàinig blàth air an t-slaic, ùr-fhàs air an uabhar.

11 Dh'fhàs ainneart suas gu slait aingidheachd: cha *mhair* aon diubh, no do'n sluagh, no aon a bhuineas doibh, ni mò bhios cumha³ sam bith air an son.

12 Thàinig an t-àm, tha an là a' teachd am fagus; na deanadh am fear-reice gairdeachas, no am fear-ceannaich bròn: oir *thuit* fearg air a mòr-chuideachd uile.

13 Oir cha phill am fear-reice ris an ni sin a reiceadh, ged robh iad am measg nam beò; oir tha an taisbean mu thim-chioll a mòr-chuideachd uile; cha phill iad, ni mò neartaicheas aon duine e féin ann an aingidheachd a bheatha.

14 Shéid iad an trompaid, eadhon a chum na h-uile a dheanadh deas; ach cha 'n 'eil neach air bith a' dol a chum a' chatha: oir tha m' fhearg-sa air a mòr-chuideachd uile.

15 Tha an claidheamh a muigh, agus a' phlàigh, agus a' ghort a stighe: esan a ta sa' mhachair bàsaichidh e leis a' chlaidheamh; agus esan a ta sa' bhaile ni gort agus plàigh 'itheadh suas.

16 Ach iadsan a théid as diubh, théid as, agus bithidh iad air na sléibhtibh mar cholumain nan gleann, iad uile a' caoidh, gach aon diubh air son 'aingidheachd féin.

17 Bithidh na h-uile làmhnan lag, agus bithidh na h-uile ghlùinean anmhuinn mar uisge.

18 Crioslaichidh iad fòs *iad féin* le eudach-saic, agus ni uamhas an còmh-achadh, agus bithidh nàire air na h-uile aghaidh, agus air an cinn uile bithidh maile.

19 Tiglidh iad an airgiod anns na sràid-ibh, agus atharraichean an òr: cha bli an airgiod agus an òr comasach air an saoradh ann an là feirge an Tighearna: cha sàsuich iad an anama, ni mò lìonas iad an com: a chionn gu'n toir an aingidheachd tuisleadh orra.

20 A chionn gu'n d' rinn iad dheth éididh àillidh agus sgiamhach, leis an do sgeudaich iad dealbhan gràineil an nithe fuathach, uime sin bheir mise fa'near gu'm buinear e uatha.

21 Agus bheir mi e do làmh-aibh nan coimheach mar chobhartaich, agus do dhroch dhaoineibh na talmhainn mar chreich, agus ni iadsan a thruaillleadh.

¹ dhosraich.

² chaomhain.

³ caoidh.

22 Pillidh mi fòs m' aghaidh uatha, agus bithidh m' ionad dìomhair air a thruaillleadh; oir théid an luchd-spiùnnidh a steach ann, agus truaillidh iad e.

23 Deanslabhruidh; oir tha am fearann làn do chiontaibh fuilteach, agus tha a chaithir làn do ainneart.

24 Uime sin, bheir mise a' chuid a's miosa do na cinnich, agus sealbhaichidh iad an tighean: cuiridh mi fòs cosgadh air uabhar nan neartmhor, agus truailllear an ionada naomha.

25 Tha léir-sgrìos a' teachd, agus iarraidh iad sìth, ach cha bhi i ann.

26 Thig urchuid air urchuid, agus tuairisgeul air thuairisgeul; an sin iarraidh iad sealladh o'n fhàidh: ach eugaidh an lagh o'n t-sagart, agus comhairle o na seanairibh.

27 Ni an rìgh caoidh, agus bithidh am prionnsa air èideadh le léir-sgrìos, agus bithidh làmhnan sluagh na tìre fo gheilt: ni mise riu a réir an slighe, agus a réir an toilleanais bheir mi breth orra, agus bithidh fios aca gur mi an Tighearn.

CAIB. VIII.

1 *Thugadh am fàidh ann am foillseachaibh Dhé gu Ierusalem, 5 agus nochdadh dha ìomhaigh an eud, 7 cùirt nan cosamhlachd, 13 luchd-caoidh Thamuis, 16 agus luchd-aoraidh na gréine. 17 Corruich Dhé an aghaidh luchd an ìodhol-aoraidh.*

AGUS tharladh anns an t-sèathamh bliadhna, anns an t-sèathamh mìos, anns a' chùigeamh là do'n mhios, 'nuair a shuidh mi ann am thigh, agus seanairean Iudah 'nan suidhe mu'm chomhair, gu'n do thuit orm an sin làmh an Tighearna Dia.

2 An sin dlh'amhaire mi, agus feuch, cosamhlachd mar shàmhladh duine: o thaisbean a leasraidh agus fuidhe mar theine: agus o'leasraibh agus os a cheann, mar thaisbean dealanaich, mar dhath òmair.

3 Agus chuir e mach cumachd làimhe, agus ghlac e mi air dual do m' cheann, agus thog an spiorad suas mi eadar talamh agus nèamh, agus thug e mi ann am foillseachaibh Dhé gu Ierusalem, gu dorus a' gheata is faide steach, a ta 'g amharc ris an àirde tuath, far an robh àite ìomhaigh an eud, a bhrosnuicheas gu eud.

4 Agus, feuch, bha glòir Dhé Israeil an sin, a réir an t-seallaidh a chunnaic mi anns a' chòmhnard.

5 An sin thubhairt e rium, A mhic an duine, tog suas do shùilean a nis ri slighe na h-àirde tuath: agus thog mi suas mo shùilean ri slighe na h-àirde tuath, agus, feuch, mu thuath, aig geata na h-altarach, ìomhaigh so an eud anns an dol a steach.

6 Agus thubhairt e rium, A mhic an duine, am faic thu ciod a ta iad a' deanamh? na gràineileachda mòra tha tigh Israeil a' cur gnìomh an so, a chum gu'n rachainn-sa am fad o m' naomh-ionad? ach pill fathasd, chi thu gràineileachdan a's mò.

7 Agus thug e mi gu dorus na cùirte; agus an uair a dh'amhaire mi, feuch toll anns a' bhalla.

8 An sin thubhairt e rium, A mhic an duine, cladaich a nis anns a' bhalla: agus 'nuair a chladaich mi anns a' bhalla, feuch dorus.

9 Agus thubhairt e rium, Imich a steach, agus feuch na gràineileachdan aingidh a ta iad a' deanamh an so.

10 Mar sin chaidh mi steach agus chunnaic mi, agus, feuch, uile chosamhlachda gach ni shnàgas, agus gach beathaich ghràineil, agus uile ìodholan tìghe Israeil air an tarruing air a' bhalla, gach taobh mu'n cuairt.

11 Agus sheas 'nan làthair deich agus trì fichead fear do sheanairibh tìghe Israeil, agus 'nam meadhon sheas Iasaniah mac Shaphain, gach fear le 'thùiseir 'na làmh, agus neul tiugh tùise a' dol suas.

12 An sin thubhairt e rium, A mhic an duine, am faca tu ciod a tha seanairean tìghe Israeil a' deanamh anns an dorch, gach fear ann an seòmraichibh 'ìomhaigh-eachd féin? oir tha iad ag ràdh, Cha 'n 'eil an Tighearn 'g ar faicinn; thréig an Tighearn an talamh.

13 Thubhairt e rium mar an ceudna, Pill fòs a ris, chi thu gràineileachdan a's mò a ta iad a' deanamh.

14 An sin thug e mi gu dorus geata tìghe an Tighearn, a bha ris an àirde tuath, agus, feuch, an sin shuidh mnai a' gul air son Thamuis.

15 An sin thubhairt e rium, Am faca tu so, a mhic an duine? pill fòs a ris, chi thu gràineileachdan ni's mo na iad so.

16 Agus thug e mi do'n chùirt a's faide steach do thigh an Tighearn, agus, feuch, aig dorus teampuil an Tighearn, eadar an sgàth-thigh agus an altair, tuaiream cùig fir fhichead, le 'n cùlaobh ri teampull an Tighearn, agus an aghaidh ris an àird an ear, agus iad ag aoradh do'n ghréin ris an àird an ear.

17 An sin thubhairt e rium, Am faca tu, O mhic an duine? An ni faoin do thigh Iudah a bhi deanamh nan gràineileachdan a ta iad a' deanamh an so? oir lion iad an tìr le ainneart, agus phill iad do m' bhrosnachadh-sa chum feirge; agus, feuch, chuir iad am meanglan ri an sròin.

18 Uime sin buinidh mise riu-san fòs ann am feirg: cha choigil mo shùil, ni

mò bhios truas agam: agus ged éigh iad ann am chluasaibh le guth árd, gidheadh cha'n éisd mi riu.

CAIB. IX.

1 *Ann an taisbean chumnaic am fàidh seisear fhear, agus air gach aon diubh inneal-sgrìos. 4 Dh'ord-uicheadh iadsan a bha 'g osnaich air son an gràineileachdan a chomharachadh, 5 agus càch a sgrìos.*

GHLAODH e fòs ann am chluasaibh le guth árd, ag ràdh, Thoir air uachdarain a' bhaile teachd an fagus, eadhon gach duine le 'arm-sgrìosaidh 'na làimh.

2 Agus, feuch, thàinig seisear¹ fhear o shlighe a' gheata a's àirde, ta 'g amharc ris an àirde tuath, agus aig gach fear 'inneal-sgrìos féin 'na làimh: agus bha aon fhear 'nam measg air éideadh le lìon-eudach, agus acfuinn-sgrìobhaidh cléirich air a léis: agus chaidh iad a steach, agus sheas iad ri taobh na h-altarach umha.

3 Agus dh'éirich glòir Dhé Israeil suas bhàrr a' cheruib air an robh e, gu stairs-neach an tighe; agus ghlaodh e ris an duine bha air 'éideadh leis an lìon-eudach, aig an robh an acfuinn-sgrìobhaidh cléirich r'a thaobh;

4 Agus thubhairt an Tighearn ris, Imich troimh² mheadhon a' bhaile, troimh mheadhon Ierusalem, agus cuir comhara air eudanaibh na muinntir a ta 'g osnaich agus a glaothaich air son nan uile ghràineileachdan a ta air an deanamh 'na mheadhon.

5 Agus ri càch thubhairt e ann am éisd-eachd, Rachaibh-se 'na dhéigh-san troimh 'n bhaile, agus buailibh: na coigleadh 'ur sùil, ni mò bhios truas agaibh.

6 Marbhaibh gu tur an sear, agus an t-òg, an òigh, agus an leanabh, agus na mnai; ach na beanaibh ri aon duine air am bheil an comhara; agus toisichibh aig mo naomh-ionad-sa. An sin thòisich iad aig na seann daoine bha fa chomhair an tighe.

7 Agus thubhairt e riu, Truailibh an tigh, agus lionaibh na cuirtean leis na marbhaibh; rachaibh a mach: agus chaidh iad a mach, agus mharbh iad anus a' bhaile.

8 Agus tharladh trà bha iad 'g am marbhadh, agus a bha mise air m' fhàgail, gu'u do thuit mi air m' aghaidh, agus ghlaodh mi, ag ràdh, Ah! a Tighearna Dliia, an sgrìos thu iarmad Israeil uile, ann an dòrtadh a mach do dhian chorr-uich air Ierusalem?

9 An sin thubhairt e rium, Tha aingidh-eachd tighe Israeil agus Iudah anmhor, agus tha am fearann làn do fhuil, agus am baile làn do cheannaire: oir tha iad

ag ràdh, Thréig an Tighearn an talamh, agus cha'n 'eil an Tighearn a' faicinn.

10 Agus air mo shon-sa mar an ceudna, cha choigil mo shùil, ni mò bhios truas agam; diolaidh mi an slighe air an ceann.

11 Agus, feuch, dh'innis am fear a bha sgeudaichte leis an lìon-eudach, agus aig an robh an acfuinn-sgrìobhaidh r'a thaobh, a' chùis, ag ràdh, Rinn mi amh-uil mar a dh'àithn thu dhomh.

CAB. X.

1 *Taisbean nan eibhlean teine a bha air an sgapadh thar a' bhaile. 5 Taisbean nan cerubim. 10 Dreach agus coslas nan cerubim.*

AN sin dh'amhairc mi, agus, feuch, anns an speur a bha thar cinn nan cerubim, thaisbeanadh os an ceann, mar gu'm biodh ann clach shaphair, mar thaisbean coslais righ-chaitheach.

2 Agus labhair e ris an duine bha sgeudaichte leis an lìon-eudach, agus thubhairt e, Imich a steach eadar na rothan, fuidh an cherub, agus lìon do làmh le éibhligh teine eadar na cerubim, agus sgap iad thar a' bhaile. Agus chaidh e steach ann am shealladh.

3 A nis sheas na cerubim air taobh deas an tighe, 'nuair a chaidh an duine steach; agus lìon an neul a' chùirt a b'fhaide stigh.

4 An sin chaidh glòir an Tighearna suas bhàrr a' cheruib, agus sheas i os ceann stairsuich an tighe; agus lìonadh an tigh leis an neul, agus bha a' chùirt làn do dhealradh glòire an Tighearn.

5 Agus chualas fuaim sgiath nan cerubim agus a' chùirt a b'fhaide mach, mar ghuth an Dé uile-chumhachdaich an uair a labhras e.

6 Agus tharladh, an trà thug e àithne do'n duine bha sgeudaichte leis an lìon-eudach, ag ràdh, Glac teine o eadar na rothan, o eadar na cerubim, gu'n deachaidh e 'n sin a steach, agus sheas e làmh ris na rothaibh.

7 Agus shìn cerub a mach a làmh o eadar na cerubim, chum an teine a bha eadar na cerubim, agus ghabh e dheth; agus chuir e 'n làmh an ti bha sgeudaichte leis an lìon-eudach e; neach a ghlac e agus a chaidh a mach.

8 Agus chunnacas anns na cerubim cumachd làimhe duine fo an sgiathaibh.

9 Agus 'nuair a dh'amhairc mise, feuch na ceithir rothan aig taobh nan cerubim, aon roth aig aon cherub, agus roth eile aig cerub eile: agus bha dreach nan rothan air dhath cloiche crìostal.

10 Agus air son an aoguis, bha 'n aon choslas aca 'nan ceathrar, mar gu'm biodh roth ann am meadhon rotha.

¹ sèanar.

² trè.

11 'Nuair a ghluais iad, dh'imich iad air an ceithir taobhaibh; cha do thionndaidh iad 'nan imeachd, ach ris an àite agus an robh an ceann ag amharc, lean iadsan e; cha do thionndaidh iad 'nuair a dh'imich iad.

12 Agus bha an corp gu h-ìomlan, agus an dromauna, agus an sgiathan, agus na rothan, làn do shùilbhu mu'n cuairt air gach taobh, *eadhon* na rothan a bha aca nan ceathrar.

13 Agus ris na rothaibh ghlaodhadh ann am èisdeachd-sa, Ruithibh.

14 Agus bha ceithir eudanan aig gach aon: aghaidh cheruib a' cheud eudan, agus aghaidh duine an dara eudan, agus aghaidh leomhain an treas, agus aghaidh iolair an ceathramh.

15 Agus thogadh suas na cerubim. So an t-ainmhidh a chunnaic mise aig sruth Chebair.

16 Agus an uair a ghluais na cerubim, dh'imich na rothan làimh riu: agus 'nuair a thog na cerubim suas an sgiathan, a chum éiridh suas o'n talamh, cha do thionndaidh na rothan ceudna sin o bhi 'nam fochair.

17 'Nuair a sheas iad sin, sheas *iad so*; agus 'nuair a dh'éirich iad sin suas, dh'éirich *iad so*; oir bha spiorad an ainmhidh anna.

18 An sin dh'imich glòir an Tighearn o stairsnich an tighe, agus sheas i thar na cerubim.

19 Agus thog na cerubim suas an sgiathan, agus chaidh iad suas o'n talamh ann am shealladh: an uair a chaidh iad a mach, bha na rothan mar an ceudna làimh riu; agus sheas iad aig dorus geata shoir tighe an Tighearn, agus bha glòir Dhé Israeil tharta os an ceann.

20 So an t-ainmhidh a chunnaic mi fuidh Dhia Israeil, làimh ri sruth Chebair; agus dh'aithnich mi gu'm b' iad na cerubim.

21 Bha ceithir eudanan aig gach aon fa leth, agus aig gach aon bha ceithir sgiathan; agus bha coslas làmhan duine fuidh an sgiathaibh.

22 Agus b'e coslas an aghaidhean na h-aghaidhean ceudna a chunnaic mi aig sruth Chebair, an aogus agus iad féin: dh'imich iad gach aon dìreach air aghaidh.

CAIB. XI.

1 *Thaisbeanadh do Eseciel dànachd mhaithean Iudah: 4 dòlaidh Dia am peacanna air an ceann. 13 Bàs Phelataih. 17 Cruinnichidh Dia a shluagh féin as na dùthchannaibh anns an robh iad air an sgapadh. 22 Chaidh glòir an Tighearn suas á meadhon a' bhaile.*

A GUS thog an spiorad suas mi, agus thug e mi gu geata 'n ear tighe an Tighearna, ta 'g amharc ris an àird an

ear: agus, feuch, aig dorus a' gheata, cùig fir fhichead: agus chunnaic mi 'nam measg Iaasaniah mac Asuir, agus Pelataih mac Bhenaiiah, uachdarain an t-sluaigh.

2 An sin thubhairt e rium, A mhic an duine, so na daoine tha dealbh uile, agus a' toirt droch chomhairle sa' bhaile so;

3 A ta 'g ràdh, Cha'n 'eil e dlùth; togamaid tighean: is e *am baile* so an coire, agus sinne an fheoil.

4 Air an aobhar sin, dean fàistneachd 'nan aghaidh, dean fàistneachd a mhic an duine.

5 Agus thuit orm spiorad an Tighearn, agus thubhairt e rium, Abair, Mar so tha an Tighearn ag ràdh, Mar so thubhairt sibh, O thigh Israeil: oir is aithne dhomhsa na nithe tha teachd 'nur n-inntinn, *gach uile ni* dhiubh.

6 Mheudaich sibh 'ur mairbh anns a' chaithir so, agus lìon sibh a sràidean leo-san a mharbhadh.

7 Air an aobhar sin mar so tha an Tighearn Dia ag ràdh, 'Ur mairbh a chuir sibh 'na meadhon, is iadsan an fheoil, agus is i a' chaithir so an coire; ach bheir mise sibh a mach as a meadhon.

8 Bha eagal oirbh roimh an chlaidheamh; agus bheir mise claidheamh oirbh, deir an Tighearn Dia.

9 Agus bheir mi sibh a mach as a meadhon, agus bheir mi thairis sibh do làmhan choimheach, agus ni mi breitheanais 'nur measg.

10 Tuitidh sibh leis a' chlaidheamh: bheir mise breitheanas oirbh ann an iomall Israeil, agus bithidh fios agaibh gur mi an Tighearn.

11 Cha 'n i a' chaithir so a bhios 'na coire dhiubh, ni mò bhios sibhse 'na meadhon mar fheoil: ann an iomall Israeil bheir mise breth oirbh.

12 Agus bithidh fios agaibh gur mise an Tighearn; oir cha do ghluais sibh ann am reachdaibh, ni mò rinn sibh mò bhreitheanais, ach rinn sibh a réir nòis¹ nan cinneach a ta air gach taobh mu'n cuairt duibh.

13 Agus tharladh an tra rinn mise fàistneachd, gu'n d' eug Pelataih mac Bhenaiiah: an sin thuit mi sìos air m' aghaidh, agus ghlaodh mi le guth àrd, agus thubhairt mi, Ah! a Thighearn Dhia, an dean thu làn-chrìochnachadh air iarmad Israeil?

14 A ris thàinig focal an Tighearn a m' ionnsuidh, ag ràdh,

15 A mhic an duine, is iad do bhràithrean, *eadhon* do bhràithrean, fir do dhìlseachd, agus uile thigh Israeil gu h-ìomlan, ris an dubhairt luchd-àiteachaidh Ierusalem,

¹ gnàth.

Imichibh am fad o'n Tighearn: dhuinne thugadh am fearann so mar sheilbh.

16 Air an aobhar sin abair, Mar so tha an Tighearn Dia ag ràdh, Ged thig mi fada uam iad am measg nan cinneach, agus ged sgap mi iad am measg nan dùthchanna, gidheadh bithidh mi dhoibh ann am naomh-ionad bheag, anns na dùthchannaibh gus an tig iad.

17 Uime sin abair, Mar so tha an Tighearn Dia ag ràdh, Ni mi eadhon 'ur tional o na cinnich, agus 'ur cruinneachadh as na dùthchannaibh anns an robh sibh air 'ur sgapadh, agus bheir mi dhuibh fearann Israeil.

18 Agus thig iad d'a ionnsuidh, agus bheir iad 'uile nithe fuathach, agus 'uile ghràineileachdan air falbh as.

19 Agus bheir mi dhoibh aon chridhe, agus cuiridh mi spiorad nuadh na taobh a stigh dhiubh; agus bheir mi an cridhe cloiche as am feoil, agus bheir mi dhoibh cridhe feòla;

20 A chum gu'n gluais iad ann am reachdaibh, agus gu'n coimhid iad m' orduighean, agus gu'n dean siad iad: agus bithidh iad 'nam pobull dhomh-sa, agus bithidh mise a'm Dhia dhoibh-san.

21 Ach *do'n taobh-san* a thionndas an cridhe a réir cridhe an nithe fuathach agus an gràineileachda, diolaidh mise an sliغه air an ceann féin, deir an Tighearn Dia.

22 An sin thog na cerubim suas an sgiathan, agus na rothan làimh riu; agus bha glòir Dhia Israeil tharta os an ceann.

23 Agus chaidh glòir an Tighearna suas o mheadhon a' bhaile, agus sheas i air an t-sliabh a ta air an taobh an ear do'n bhaile.

24 'Na dhéigh sin ghlac an spiorad suas mi, agus thug e mi ann an taisbean le spiorad Dhé gu Caldéa, chum nam braidhean. Mar sin chaidh an sealladh a chunnaic mi suas uam.

25 An sin labhair mi riu-san a bh'anns an daorsa, na h-uile nithe a thaisbean an Tighearn dhomh.

CAIB. XII.

1 *Le atharrachadh Eseciel nochdadh braidheanas Shedeiach. 17 Ball-chirih agus uamhunn nan Iudhach. 21 Chronuich am fàidh iad air son an gnàth-shocail.*

THAINIG focal an Tighearna fòs a m' ionnsuidh, ag ràdh,

2 A mhic an duine, tha thu chòmhnuidh ann am meadhon tìghe cheannaircìch, aig am bheil sùilean gu faicinn, ach cha'n 'eil iad a' faicinn; tha cluasan aca gu cluinntinn, ach cha'n 'eil iad a' cluinntinn: oir is tìgh ceannaircìch iad.

3 Uime sin, a mhic an duine, deasaich¹

dhuith féin airneis air son dol air imrich, agus atharraich anns an là 'nan sealladh; agus atharraichidh tu o t' àite, gu àit eile 'nan sealladh; theagamh gu'n toir iad fa'near, ged is tìgh ceannaircìch iad.

4 An sin bheir thu mach t' airneis anns an là 'nan sealladh, mar airneis air son imrich: agus thèid thu mach san annmoch 'nan sealladh, mar iadsan a thèid à mach ann am braidheanas.

5 Cladhaich troimh a' bhalla 'nan sealladh, agus thoir a mach troimh sin.

6 'Nan sealladh giùlainidh tu air do ghuaillibh, bheir thu mach anns an dubh-anmoch: còmhdaichidh tu d' aghaidh air chor as nach faic thu an làr: oir chuir mi thu mar chomhara do thìgh Israeil.

7 Agus rinn mi ceart mar a dh' àithneadh dhomh: thug mi mach m' airneis anns an là, mar airneis air son braidheanas, agus anns an annmoch chladhaich mi troimh a' bhalla le m' làimh; thug mi mach i san dubh-anmoch, agus giùlain mi air mo ghuaillibh i 'nan sealladh.

8 Agus air maduinn thàinig focal an Tighearn a m' ionnsuidh, ag ràdh,

9 A mhic an duine, nach dubhairt tìgh Israeil, an tìgh ceannaircìch, riut, Cìod a tha thu deanamh?

10 Abair thusa riu, Mar so tha an Tighearn Dia ag ràdh, Do'n phrionnsa ann an Ierusalem *buinidh* an t-uallach² so, agus do thìgh Israeil a ta 'nam measg.

11 Abair, Tha mise ann am chomhara dhuibh; amhuil a rinn mise, mar sin nìthear riu-san: atharraichidh iad, agus thèid iad air falbh ann am braidheanas.

12 Agus am prionnsa a ta 'nam measg giùlainidh e air a ghuaillibh anns an dubh-anmoch, agus thèid e mach: cladhaidh iad troimh a' bhalla, chum giùlain a mach d'a thrid³: còmhdaichidh e 'aghaidh, air chor as nach faic e 'n làr le 'shùilibh.

13 Sgaoilidh mise fòs lìon air, agus glacar ann am rib e; agus bheir mi e gu Babilon, gu tìr nan Caldéach; gidheadh cha 'n fhaic e i, ged fhaigh e bàs an sin.

14 Agus sgapaidh mi ris gach aon ghaoith na h-uile ta m' a thimchioll g' a chòmhnaidh, agus 'uile chlàidhean⁴; agus tairgidh mi mach an claidheamh 'nan déigh.

15 Agus aithnichidh iad gur mise an Tighearn, 'nuair a sgapas mi iad am measg nan cinneach, agus a sgaoileas mi iad feadh nan dùthchannan.

16 Agus fàgaidh mi beagan fhear dhiubh o'n chlàidheamh, o'n ghort, agus o'n phlàigh, a chum gu'n cuir iad an céill an uile ghràineileachdan am measg

¹ ulluich.

² callach.

³ troimhe.

⁴ bhruidhnicean.

nan cinneach gus an tìg iad; agus aith-nichidh iad gur mise an Tighearn.

17 Os bàrr, thàinig focal an Tighearn a m' ionnsuidh, ag ràdh,

18 A mhic an duine, ith t' arau le crith, agus òl t' uisge le ball-chrith agus le curam;

19 Agus abair ri sluagh na tìre, Mar so tha an Tighearn Dia ag ràdh mu thim-chioll luchd-àiteachaidh Ierusalem, agus dùthcha Israeil, Itidh iad an aran le cùram, agus òlaidh iad an uisge le uamhas, air chor as gu'n bi am fearann fàs o 'n iomlan a ta ann, air son fòirneirt na muinntir sin uile a ta chòmhuidh ann.

20 Agus nìthear na bailtean a ta air an àiteachadh fàs, agus bithidh am fearann falamh;

21 Agus thàinig focal an Tighearn a m' ionnsuidh, ag ràdh,

22 A mhic an duine, Ciod e an gnàth-fhocal sin a th'agaibh ann am fearann Israeil, ag ràdh, Tha na làithean air an sìneadh, agus dh'fhàillnich gach uile fhoillseachadh

23 Innis doibh uime sin, Mar so tha an Tighearn Dia ag ràdh, Bheir mise air a' ghnàth-fhocal so sgar, agus cha labhair iad e ni 's faide mar ghnàth-fhocal ann an Israel: ach abair riu, Tha na làithean aig làimh, agus buil gach aoine taisbein.

24 Oir cha bhi nì's mò aon taisbean faoin, no fàistneachd mhodalach an taobh a stigh do thigh Israeil.

25 Oir mise Iehobhah, labhraidh mi, agus am focal a labhras mi thig gu crìch: cha dean e ni 's faide moille; oir ann 'ur làithibh-sa, O thigh cheannairich labhraidh mise am focal, agus ni mi e, deir an Tighearn Dia.

26 A rìs thàinig focal an Tighearn a m' ionnsuidh, ag ràdh,

27 A mhic an duine, feuch tha tigh Israeil ag ràdh, Tha 'n taisbean a tha e faicinn air son mhòran làithean, agus tha e ri fàistneachd mu na h-aimsiribh fad as.

28 Air an aobhar sin abair riu, Mar so tha an Tighearn Dia ag ràdh, Cha bli aon do mo bhriathraibh-sa air a shineadh nì's faide; ach am focal a labhras mi, coimhlionar e, deir an Tighearn Dia.

CAIB. XIII.

1 Chronaicheadh na fàidhean brèige a chionn gu'n d' rinn iad fiosachd 'nuair nach do chuir an Tighearn a mach iad. 17 Mu thimchioll nam ban-fhàidhean brèige.

AGUS thàinig focal an Tighearn a m' ionnsuidh, ag ràdh,

2 A mhic an duine, dean fàistneachd an aghaidh fhàidhean Israeil, a ta ri fàistneachd, agus abair thusa riu-san a ta ri fàistneachd as an cridhe féin, Eisidibh-se focal an Tighearna.

3 Mar so tha an Tighearn Dia ag ràdh, Is deacair ' do na fàidhibh amaideach, a ta leantuinn an spioraid féin, agus nach faca ni sam bith.

4 O Israeil, is cosmhuil d' fhàidhean ris na sionnachaidh anns na fàsaichibh.

5 Cha deachaidh sibh suas a chum nam bearnan, ni mò rinn sibh suas a' challaid do thigh Israeil, gu seasamh anns a' chath ann an là an Tighcarna.

6 Chunnaidh iad diomhanas, agus rinn iad fiosachd bhréige, ag ràdh, Deir an Tighearn; 'nuair nach do chuir an Tighearn a mach iad: agus thug iad air daoineibh earbsadh gu'n daingnicheadh iad am focal.

7 Nach faca sibh sealladh faoin, agus nach do labhair sibh fiosachd bhréige, le bhi 'g ràdh, Thubhairt an Tighearn ged nach do labhair mise?

8 Air an aobhar sin, Mar so tha an Tighearn Dia ag ràdh, A chionn gu'n do labhair sibh diomhanas, agus gu'm faca sibh breugan, uime sin feuch, tha mise 'nur n-aghaidh, deir an Tighearn Dia.

9 Agus bithidh mo làmh air na fàidhibh a chi diomhanas, agus a ta fàistneachd bhréig: cha bhi iad ann an coimhlional mo shluaigh, ni mò bhios iad air an sgrìobhadh ann an sgrìobhadh tighe Israeil, ni mò théid iad a steach do fhearann Israeil; agus aithnichidh sibh gur mise an Tighearn Dia.

10 A chionn, eadhon a chionn gu'n d'thug iad air mo shluaigh dol air seacharan, ag ràdh, Sith, agus gun sìth a bhi ann: agus thog aon suas balla, agus, feuch, thilg càch thairis e le crè gun oibreachadh.

11 Abair riu-san a ta 'ga thilgeadh thairis le crè gun oibreachadh, gu'n tuit e: bithidh fras thuilteach ann, agus tuirlingidh sibhse, O chlacha-meallain mòra; agus ni gaoth dhoinionnach a bhriseadh.

12 Feuch, 'nuair a thuiteas am balla, nach abrar ruibh, C'ait am bheil a' chrè leis an do thilg sibh thairis e?

13 Uime sin, mar so tha an Tighearn Dia ag ràdh, Ni mise fòs a bhriseadh le gaoith dhoinionnach ann am fheirg: agus bithidh fras thuilteach ann am chorruch-sa ann, agus clachan-meallain mòra ann am dhian-fheirg g' a mhilleadh.

14 Mar sin brisidh mi sìos am balla a thilg sibh thairis le crè gun oibreachadh, agus bheir mi nuas gu làr e, air chor as gu'n leigear ris a bhunaite; agus tuitidh e, agus bithidh sibhse air 'ur milleadh 'na mheadhon; agus aithnichidh sibh gur mise an Tighearn.

15 Mar so coimhlionaidh mi mo chorruch air a' bhalla, agus orra-san a thilg

thairis e le *crè* gun oibreachadh, agus their mi ruibh, Cha'n 'eil am balla ann, ni mò tha iadsan a thilg thairis e ;

16 *Eadhon* fàidhean Israeil a ta ri fàistneachd mu thimchioll Ierusalem, agus a ta faicinn seallaidh sìothaimh dhi, agus gun sìth idir ann, deir an Tighearn Dia.

17 Mar an ceudna, thusa, a mhic an duine, cuir d' eudan an aghaidh nigheana do shluaigh, a ta ri fàistneachd as an cridhe féin, agus dean-sa fàistneachd 'nan aghaidh.

18 Agus abair, Mar so tha an Tighearn Dia ag ràdh, Is truagh do na mnaibh a ta fuaigheal chluasag ris na h-uile asgalt-aibh, agus a' cur bhréidean air ceann gach aoise, a dheanamh seilg air anamaibh. An dean sibh sealg air anamaibh mo shluaigh-sa, agus an coimhid sibh beò anama na muinntir a ta teachd thug-aibh ?

19 Agus an truail sibh mise measg mo shluaigh air son ghlaiceadan eorna, agus air son mhéirean arain, a mharbhadh nan anama nach bu chóir bàsachadh, agus a choinhead beò nan anama nach bu chóir a bhi beò, le 'ur breugaibh do m' shluaigh-sa, ta 'g éisdeachd 'ur breug ?

20 Air an aobhar sin, mar so tha an Tighearn Dia ag ràdh, Feuch tha mise an aghaidh 'ur cluasag, leis am bheil sibh an sin a' sealg air na h-anamaibh, a chum an glacadh ; agus spionaidh mise iad o 'ur gairdeinibh, agus leigidh mi air falbh na h-anama, na h-anama sin air am bheil sibh a' sealg a chum an glacadh.

21 Reubaidh mi fòs 'ur bréidean, agus saoraidh mi mo shluagh a mach as 'ur làimh, agus cha bhi iad nìs mò 'nur làimh gu bhi air am fiadhach : agus aithnichidh sibh gur mise an Tighearn.

22 A chionn le breugaibh gu'n d' rinn sibh cridhe an iouracain dubhach, agus nach d' rinn mise dubhach e ; agus gu'n do neartaich sibh làmhan an aingidh, chum nach pilleadh e o 'dhròch shlighe, le bhi gealltuinn beatha dha.

23 Uime sin cha'n fhaic sibh dìomhanas nìs mò, agus cha dean sibh fàistneachd tuilleadh ; oir saoraidh mise mo shluagh as 'ur làimh, agus bithidh fios agaibh gur mi an Tighearn.

CAIB. XIV.

1 *Thug Dia achmhasan do'n t-sluagh a chuir suas ìodholan 'nan cridhe.* 3 Chomhairticheadh dhoibh aithreachas a ghabhail. 12 Cha saor cadarghuidhe air bith iad o'n ghorta, 15 o bheathaichibh cronail. 17 o'n chlàidheamh, 19 agus o'n phlàigh. 22 Fàgar iarmad do'n t-sluagh.

AN sin thàinig cuid do sheanairibh Israeil a m' ionnsuidh, agus shuidh iad mu m' choinneamh.

: fa chomhair an aghaidh. Eabh.

2 Agus thàinig focal an Tighearn a m' ionnsuidh, ag ràdh,

3 A mhic an duine, chuir na daoine so sras an ìodholan 'nan cridhe, agus chuir iad ceap-tuislidh an aingidheachd fa'n comhair !: an leig mise dhoibh air aon chor m' iarraidh ?

4 Uime sin labhair riu, agus abair riu, Mar so tha an Tighearn Dia ag ràdh, Gach duine do thigh Israeil a chuireas suas 'ìodhola 'na cridhe, agus a chuireas ceap-tuislidh 'aingidheachd fa chomhair, agus a thig chum an fhàidh, bheir mise Iehobhah freagradh dhasan a thig, a réir lionmhoireachd 'ìodholan.

5 A chum gu'n glac mi tigh Israeil 'nan cridhe féin, a chionn gu bheil iad uile air dol air seachlaran uamsa tre an ìodholan.

6 Air an aobhar sin, abair ri tigh Israeil, Mar so tha an Tighearn Dia ag ràdh, Gablaibh aithreachas, agus pillibh o 'ur n-ìodholaibh ; agus tionndaibh 'ur n-aghaidh air falbh o 'ur n-uile ghràineileachd-aibh.

7 Oir gach aon do thigh Israeil, no do na coigrich a ta air chuairt ann an Israel, a ta 'ga sgaradh féin uam-sa, agus a' cur suas 'ìodhola 'na cridhe, agus a' cur ceap-tuislidh 'aingidheachd fa chomhair, agus a' teachd a chum fhàidh, a dh'fhiosrachadh dheth mu m' thiomchioll-sa ; bheir mise Iehobhah freagradh dha leam féin.

8 Agus cuiridh mi mo ghnùis an aghaidh an duine sin, agus ni mi e 'na chomhara agus 'na ghnàth-fhocal, agus gearraidh mi as e o mheadhon mo shluaigh ; agus aithnichidh sibh gur mise an Tighearn.

9 Agus ma bhios am fàidh air a mhealladh an trà labhair e ni, is mise an Tighearn a mheall am fàidh sin ; agus sinidh mi mo làmh a mach air, agus sgriosaidh mi e o mheadhon mo phobull Israeil.

10 Agus giùlainidh iad peanas an eucartan : bithidh peanas an fhàidh anluail peanas an ti a dh'iarras *thuige* ;

11 A chum nach téid tigh Israeil nìs mò air seacharan uamsa, agus nach bi iad air an truailleadh nìs mò le 'n uile chiont-aibh ; ach a chum gu'm bi iad dhomh-sa 'nam pobull, agus mise dhoibh-san ann am Dhia, deir an Tighearn Dia.

12 Thàinig a ris focal an Tighearn a m' ionnsuidh, ag ràdh,

13 A mhic an duine, trà pheacaicheas an tìr ann am aghaidh-sa le ciontachadh gu h-annmor, an sin sinidh mi a mach mo làmh oirre, agus brisidh mi lorg a h-arain, agus cuiridh mi gort oirre, agus gearraidh mi uaipe duine agus ainmhidh.

14 Ged bhiodh an triur fhear so, Noah, Daniel, agus Iob innte, cha saoradh² iad

² teasairgeadh, tèarnadh.

ach an anama fèin le 'm fireantachd, deir an Tighearn Dia.

15 Ma bheir mise air beathaichibh cronail dol troimh an fhearann, agus gu mill iad e, air chor as gu'm bi e fàs, ionnus nach feud neach air bith dol troimhe air son a' bheathaich:

16 Ged bhiodh an triuir dhaoine so ann, mar is beò mise, tha an Tighearn Dia ag ràdh, cha saoradh iad aon chuid mic no nigheana; shaoirteadh iad fèin a mhàin, ach bhiodh am fearann fàs.

17 No ma bheir mise claidheamh air an fhearann so, agus gu'n abair mi, A chlaidheimh, imich troimh an fhearann; air chor as gu'n gearr mi duine agus ainmhidh a mach as:

18 Ged bhiodh an triuir dhaoine so ann, mar is beò mise, tha an Tighearn Dia ag ràdh, cha saoradh iad aon chuid mic no nigheanan, ach bhiodh a mhàin iad fèin air an saoradh.

19 No ma chuireas mi plàigh do'n fhearann sin, agus gu'n dòirt mi mo chorruch a mach air ann am fuil, a chum duine agus ainmhidh a ghearradh a mach as:

20 Ged bhiodh Noah, Daniel, agus Iob ann, mar is beò mise, tha an Tighearn Dia ag ràdh, cha saoradh iad aon chuid mac no nigean: cha saoradh iad ach an anama fèin le 'm fireantachd.

21 Oir mar so tha an Tighearn Dia ag ràdh, Cìo mò gu mòr trà chuireas mi mo cheithir breitheanais ghoirt air Ierusalem, an claidheamh, agus a' ghort, agus am beathach cronail¹, agus a' phlàigh, a chum duine agus ainmhidh a ghearradh a mach as?

22 Gidheadh feuch, fagar iarmad ann, a bheir a mach, mic agus nigheanan: feuch, thig iad a mach thugaibh, agus chì sibh an slighe, agus an gnìomhara: agus gheibh sibh comhfhurtachd a thaobh an uile a thug mise air Ierusalem, a thaobh gach nì a thug mi air.

23 Agus bheir iad comhfhurtachd dhuibh, an uair a chì sibh an slighe, agus an gnìomhara: agus aithnichidh sibh nach ann gun aobhar a rinn mise gach nì a rinn mi ann, deir an Tighearn Dia.

CAIB. XV.

¹ Le cosamhlachd an fhìon-chroinn, 6 nochd Dia do Eseciel gu'n tilgadh e clann Israeil uaihte gu tur.

AGIS thàinig focal an Tighearn a m' ionnsuidh, ag ràdh,

2 A mhic an duine, Cìod e am fion-chrann thar crann air bith eile, *ma bhios e mar ghéig a ta measg chraobha na fridhe?*

3 An gabhar fiodh dheth gu obair air bith a dheanamh? no an gabhar cnag

dheth a chrochadh soithich air bith air? 4 Feuch, tilgear e san teine mar chonnadh; loisgidh an teine a dhà cheann, agus loisgear a mheadhon: am bheil e iomchuidh air son cungaaidh?

5 Feuch, 'nuair a bha e slàn cha robh e iomchuidh air son cungaaidh sam bith: cìo mò gu mòr is lugha bhios e iomchuidh air son oibre, 'nuair a chaitheas an teine e, agus a bhios e loisgte?

6 Air an aobhar sin, mar so tha an Tighearn Dia ag ràdh, Mar am fion-chrann am measg chramma na fridhe, a thug mise do'n teine mar chonnadh, is amhluidh a bheir mi luchd-àiteachaidh Ierusalem.

7 Agus cuiridh mi mo ghnùis 'nan aghaidh, thèid iad a mach o theine, agus nì tein' eile an caitheamh: agus aithnichidh sibh gur mise an Tighearn, trà chuireas mi mo ghnùis 'nan aghaidh.

8 Agus nì mi am fearann fàs, a chionn gu'n do chuir iad an gnìomh euceart, deir an Tighearn Dia.

CAIB. XVI.

¹ Le cosamhlachd leinibh mhaoth nochdadh ceud staid Ierusalem. 9 Gràdh Dhé d'a taobh. 15 A strìopachas gràneil. 35 Bhagair Dia Ierusalem le breitheanas uamhasach. 44 Thruaill sluagh Israeil iad fèin nì's mò na na cinich a bha mu'n cuairt doibh.

ARIS thàinig focal an Tighearn a m' ionnsuidh, ag ràdh,

2 A mhic an duine, thoir air Ierusalem a gràineileachdan aitheachadh,

3 Agus abair, Mar so tha an Tighearn Dia ag ràdh ri Ierusalem, Tha do bhreth agus do dhùchas o thìr Chanaain; b' Amorach t' athair, agus bu bhan-Hiteach do mhàthair.

4 Agus air son do dhùchais, anns an là san d' rugadh thu, cha do ghearradh t' imleag, nì mò bha thu air do nigheadh ann an uisge, gu do mhaothachadh: cha do chrathadh salann ort, nì mò bha thu air do spaoileadh.

5 Cha do ghabh sùil air bith truas diot, a chum aon nì dhuibh so a dheanamh dhuìt, a dheanamh iochd ort; ach bha thu air do thilgeadh a mach anns a' mhachair sgaoilte, le gràin do d' anam, air an là san d' rugadh thu.

6 Agus an trà ghabh mise seachad dlùth dhuìt, agus a chunnaic mi thu salach ann ad fhuil fèin, thubhairt mi riut, *agus thu ann ad fhuil, Mair beò; seadh, thubhairt mi riut, agus thu ann ad fhuil, Mair beò.*

7 Thug mi ort fàs lionmhor mar chinn-eas na faiche, agus dh'fhàs thu lionmhor agus mòr; agus thàinig thu gu sgeudachadh maiseach: tha do chlochan air an cumadh, agus do ghruag air fàs, an àite dhuìt a bhi rùisgte agus lom.

8 Agus 'nuair a ghabh mise seachad dlùth dhuìt, agus a dh'ambaire mi ort,

¹ millteach.

feuch, bha t'aimsir 'na h-aimsir ghràidh, agus sgaol mise mo sgiort os do cheann, agus dh'fhluich mi do lònnochduidh: seadh mhionnaich mi dhuit, agus thionns-gain mi ann an coimhcheangal riut, deir an Tighearn Dia, agus bu leam-sa thu.

9 An sin nigh mi thu le h-uisge, seadh, nigh mi d' fhuil gu glan air falbh uait, agus dh'ung mi thu le h-oladh.

10 Sgeudaich mi thu fòs le h-obair-ghréise, agus chuir mi brògan do chraic-ionn bruic ort, agus chrioslaich mi mu'n cuairt thu le h-anart grinn, agus chòmh-daich mi thu le sìde.

11 Rinn mi sgiamhach thu mar an ceud-na le h-usgraichibh, agus chuir mi làmh-fhàilean air do làmhan, agus slabhruidh mi d' mhuineal.

12 Agus chuir mi seud riomhach air t' eudan, agus cluas-fhàinneachan ann ad chluasaibh, agus crùn maiseach air do cheann.

13 Mar so bha thu air do sgeudachadh le h-òr agus le h-airgiod; agus bha do thrusgan a dh'anart grinn, agus do shìde, agus do obair ghréise; dh'ith thu mìn-chruithneachd, agus mìl, agus oladh, agus bha thu ro mhaiseach, agus dh'fhàs thu suas gu bhì a'd' rìoghachd.

14 Agus chaidh d' iomradh a mach am measg nan cinneach air son do mhaise: oir bha sin iomlan tre mo sgèimh-sa a chuir mi ort, deir an Tighearn Dia.

15 Ach chuir thu do dhòigh ann ad mhaise féin, agus rinn thu striopachas an aghaidh do chliù, agus dhòirt thu mach do striopachas air gach neach a ghabh seachad; bu leis-san thu.

16 Agus ghabh thu do d' chulaidhean, agus rinn thu maiseach t' ionadan àrda le dathaibh eag-samhluidh, agus rinn thu striopachas orra, mar nach robh, agus mar nach bì.

17 Ghabh thu fòs do sheudan riomhach do m' òr-sa, agus do m' airgiod, a thug mi dhuit; agus rinn thu dhuit féin dealbh-an dhaoine, agus chuir thu striopachas an gnìomh leo.

18 Agus ghabh thu do chulaidhean gréise, agus chòmhdaich thu iad: agus chuir thu m' oladh-sa, agus mo thùis mu'n comhair.

19 Mo bhiadh fòs a thug mi dhuit, mìn-chruithneachd, agus oladh, agus mìl, a thug mi dhuit r'an itheadh, chuir thu eadhon 'nan làthair iad mar fhàile¹ cùbh-raidh.

20 Seadh cuideachd, tha an Tighearn Dia ag ràdh, ghabh thu do mhic agus do nigh-eanan a rug thu dhomh-sa, agus iad so dh'obair thu dhoibh-san, gu bhì air an slugadh sìos.

21 Anni suarach dhuit, le d' striopachas, gu'n do mharbhl thu mo chlann, agus gu'n d' thug thu iad seachad gu dol troimh an teine air an son-san?

22 Agus ann ad uile ghràineileachdaibh agus striopachais, cha do chuimhnich thu làithean t' òige, trà bha thu lomnochd agus rùisgte, air do thruailleadh ann ad fhuil féin.

23 Agus tharladh, an dèigh t' aingidh-eachd uile, (Mo thruaighe, mo thruaighe thu! deir an Tighearn Dia.)

24 Gu'n do thog thu dhuit féin fòs ionad àrd, agus gu'n d' rinn thu dhuit féin àite àrd anns gach aon sràid.

25 Thog thu ionad àrd air gach aon cheann do'n t-slighe, agus thug thu air do mhaise bhì air a fuathachadh, agus rinn thu coitchionn thu féin do gach aon a ghabh seachad, agus rinn thu do striopachais lìonmhor.

26 Rinn thu fòs striopachas leis na h-Eiphitich, do choimhearsnaich, a ta mòr am feoil; agus mheudaich thu do striopachais, a chum mise a bhrosnuchadh gu feirg.

27 Feuch uime sin, shìn mise mo làmh a mach os do cheann, agus lughdaich mi do lòn, agus thug mi thairis thu do thoil na muinntir leis am fuathach thu, nigh-eana nam Philisteach, air am bheil nàire do d' shlighe mhi-chiataich.

28 Rinn thu mar an ceudna striopachas leis na h-Asirianaich, a chionn gu'n robh thu do-shàthachadh²; seadh, rinn thu striopachas leo, agus gidheadh cha'n fheudadh tu bhì air do shàthachadh.

29 Mheudaich thu os bàrr do striopachas ann am fearann Chanaain gu ruig Caldéa, agus gidheadh cha robh thu sàthaichte le sin.

30 Cionnus a ghlanas mise do chridhe, tha an Tighearn Dia ag ràdh, 'nuair a tha thu deanamh nan nithe so uile, obair mnà neo-gheamnuidh ladarna?

31 'Nuair a tha thu togail t' ionaid àird an ceann gach slighe, agus a' deanamh t' àite àird anns gach aon sràid; agus nach robh thu cosmhuil ri striopach, (a chionn nach b'fhuil leat tuarasdai:)

32 Ach ri mnaoi a nì adhaltras, a ghabhas coigrich an àit a fir féin.

33 Do na h-uile striopachaibh bheir iad duais; ach tha thusa a' toirt duaise do d' leannanaibh uile, agus 'g an tuarasdalachadh, a chum gu'n tigeadh iad thugad gach aon taobh air son do striopachais.

34 Agus tha thusa dìreach an aghaidh nòis³ mhnathan uile ann ad striopachas, am feadh nach 'eil aon neach a' dol air do dhéigh a dheanamh striopachais: is ann a tha thu a' toirt duaise seachad, agus

¹ bhola.

² do-shàsuichte.

³ cleachd.

gun duais air bith 'ga toirt duit: uime sin tha thu 'nan aghaidh ann ad nòs.

35 Air an aobhar sin, O a strìopach, cluin focal an Tighearna:

36 Mar so tha an Tighearna Dia ag ràdh, A chionn gu'n robh do shalchar air a dhòrtadh a mach, agus do lomnochduidh air a leigeadh ris troimh do strìopachais le d' leannanaibh, agus le uile iòdholaibh do ghràineileachdan, agus le fuil do chloinne, a thug thu dhoibh;

37 Feuch uime sin, cruinnichidh mise t' uile leannain, leis an do ghabh thu sòlas, agus na h-uile do'n d'thug thu gràdh, leis na h-uile do'n d'thug thu fuath: ni mi eadhon an cruinneachadh mu'n cuairt ann ad aghaidh, agus leigidh mi ris doibh do lomnochduidh, a chum gu faic iad do lomnochduidh uile.

38 Agus bheir mi breth ort mar a bheir-eir breth air mnaibh a bhriseas an ceangal-pòsaidh, agus a dhòrteas fuil, agus bheir mi peanas¹ ort ann an corruich agus ann an eud.

39 Agus bheir mi thu fòs d' an làimh, agus tilgidh iad sìos t' àite cnocach, agus brisidh iad sìos t' ionadan àrda; buinidh iad dhìot mar an ceudna t' eudach, agus glacaidh iad do sheuda riomhach, agus fàgaidh iad thu lomnochd agus rùisgte.

40 Bheir iad mar an ceudna buidheann a nìos a'd' aghaidh, agus clacaidh iad thu le clachaibh, agus sàthaidh iad tromhad² an claidhean.

41 Agus loisgidh iad do thighean le teine, agus ni iad breitheanas ort ann an sealladh mhòran bhan: agus bheir mise ort sgar do strìopachas, agus cha toir thu tuarasad seachd nì's mò.

42 Mar sin bheir mi air mo chorruich riut fois a ghabhail, agus imichidh m' eud uait, agus gabhaidh mi fois, agus cha bhi fearg orm nì's mò.

43 A chionn nach do chuimhnich thu làithean t' òige, agus gu'n do chuir thu corruich ormsa anns na nithibh so uile; feuch uime sin, diolaidh mise fòs do shlighe air do cheann, tha an Tighearna Dia ag ràdh; agus cha chuir thu an gnìomh an neò-ghloine so thar t' uile ghràineileachdaibh.

44 Feuch gach aon a ghnàthaicheas sean-fhocla, gnàthaichidh an sean-fhocal so a'd' aghaidh, ag ràdh, Mar a' mhàthair is amhluidh an nighean.

45 Is tusa nighean do mhàthar, leis am fuathach a fear agus a clann; agus is tu piuthar do pheathraichean, leis am b' fhuathach am fir agus an clann: bu bhan-Hiteach 'ur màthair, agus b' Amorach 'ur n-athair.

46 Agus is i do phiuthar a 's sine Sama-

ria, i féin agus a nigheanan a ta chòmh-nuidh aig do làimh chli: agus do phiuthar a 's òige, ta chòmhnuidh aig do làimh dheis, Sodom agus a nigheanan.

47 Gidheadh 'nan slighe-san cha do ghluais thu, ni mò rinn thu a réir an gràineileachdan: ach mar gu'm bu ni ro bheag sin, bha thu air do thruailleadh nì's mò na iadsan a'd' uile shlighibh.

48 Mar is beò mise, tha an Tighearna Dia ag ràdh, cha d' rinn do phiuthar Sodom, i féin no a nigheanan, mar a rinn thusa, thu féin agus do nigheanan.

49 Feuch, b' i so aingidheachd do pheathar Sodom; uabhar, sàth arain, agus pailteas dìomhanais, bha innte féin agus na nigheanaibh; ni mò a neartaich i làmh a' bhoich agus an fheumaich.

50 Agus bha iad àrdanach, agus chuir iad gràineileachd an gnìomh ann am fhianuis-sa; uime sin thug mi air falbh iad mar a chunnacas ceart domh.

51 Ni mò chuir Samaria an gnìomh leth do lochdan-sa; ach mheudaich thu do ghràineileachda nì's mò na iadsan, agus dh'fhìreanaich thu do pheathraichean ann ad uile ghràineileachdaibh a rinn thu.

52 Thusa fòs a thug breth air do pheathraichibh, giùlain do nàire féin, air son do lochdan a chuir thu 'n gnìomh nì's gràineile na iadsan: tha iadsan nì's ionraice na thusa: seadh, bi thusa air do mhaslachadh fòs, agus giùlain do nàire, chionn gu'n d' fhìreanaich thu do pheathraichean.

53 An uair a philleas mi air a h-ais am braighdeanas, bruid Shodoim agus a cuid nighean, agus bruid Shamaria agus a cuid nighean, an sin *bheir mi air a h-ais* bruid do bhraghdean-sa 'nam meadhan;

54 A chum gu'n giùlain thu do nàire féin, agus gu'm bi thu air do mhàslachadh anns gach ni a rinn thu, a chionn gu'n robh thu toirt doibh comhfhurtachd.

55 'Nuair a philleas do pheathraichean, Sodom agus a cuid nighean, gus an ceud staid, agus a philleas Samaria agus a cuid nighean gus an ceud staid, an sin pillidh tusa agus do nigheana gu'r ceud staid.

56 Oir cha robh luadh air do phiuthar Sodom ann ad bheul ann an là t' uabhair.

57 Mu'n robh t' aingidheachd air a leigeadh ris, agus àm do mhaslaidh, mar nigheanan Shiria, agus na h-uile bha dluth dhi, agus mar nigheanan nam Philisteach a bha mu'n cuairt duit.

58 Giùlainidh tu do neò-ghloine agus do ghràineileachdan, deir an Tighearna.

59 Oir mar so tha an Tighearna Dia ag ràdh, Buinidh mise riutsa amhuil mar a rinn thu féin, a rinn thair air na miannan, ann am briseadh a' chòimlicheangail.

¹ fuil. Eabh.

² romhad.

60 Gidheadh cumhnicidh mi mo choimhcheangal riut ann an làithibh t'òige, agus daingnichidh mi riut coimhcheangal sìorruidh.

61 An sin cumhnicidh tu do shlighe, agus bithidh nàire ort, nuair a ghabhas tu do pheathraichean, do phiuthar a's sine agus a's oige: agus bheir mise dhuith iad mar nigheanan, ach cha'n ann air son do choimhcheangail-sa.

62 Agus daingnichidh mi mo choimhcheangal riutsa, agus bithidh fios agad gur mi an Tighearn:

63 A chum gu'n cumhnic thu, agus gu'm bi nàire ort, agus nach fhosgail thu do bheul gu bràth ni's mò, do bhrìgh do nàire, nuair a bhios mise rèidh riut air son gach uile ni a rinn thu, deir an Tighearn Iehobhah.

CAIB. XVII.

1 *Chuir am fàidh an cèill am breitheanas a bha gu teachd air Sedeciah a chionn gu'n d' rinn e ceann-airc an aghaidh rìgh Bhabiloin.* 2 *Fàistneachd mu thimchioll rìghachd Chriosd.*

AGUS thàinig focal an Tighearn a' ionnsuidh, ag ràdh,

2 A mhic an duine, cuir a mach toimheachan, agus labhair cosamhlachd ri tìgh Israeil;

3 Agus abair, Mar so tha an Tighearn Dia ag ràdh, Thàinig fir-eun¹ mòr le sgiathaibh mòra, agus le altaibh làidir, làn do chùmhachd², air an robh dathan eugsamhluidh, gu Lebanon, agus ghabh e am meangan a b' àirde do'n t-seudair.

4 Ghearr e dheth bàrr a mheangana òga, agus thug e leis e gu tìr malairt; shuidhich e ann am baile cheannaichean e.

5 Ghabh e fòs do shìol an fhearainn, agus chuir e ann am machair thorraich e; shuidhich e ri taobh uisgeacha mòra e, ga chur mar chrann seilich:

6 Agus dh'fhàs e, agus thàinig e gu bhith na fhionain leathlain, air bheag àirde, aig an robh a gheugan air an tionndadh ris [an fhir-eun,] agus aig an robh a fhreumhan fuidhe: mar sin dh'fhàs e 'na fhionain, agus thug e mach geugan, agus chuir e uaithe meangain.

7 Bha fòs ann fir-eun mòr eile, le sgiathaibh mòra, agus mòran clùmaich; agus, feuch, chlaon an fhionain so a freumha d'a ionnsuidh, agus thilg i mach e geugan thuige, chum bhi air a h-uisgeachadh le claisibh a ghàraidh.

8 Bha i air a suidheachadh ann am fearann maith, ri taobh uisgeacha mòra, chum gu'n tugadh i mach geugan, agus gu'n giùlaineadh i toradh, agus gu'm biodh i na deadh fhionain.

9 Abair thusa, Mar so tha an Tighearn Dia ag ràdh, Am bi piseach oirre? nach

spìon e nìos a freunha, agus nach gearr e dhi a toradh, air chor as gu'n searg e? crìonaidh i ann an uile dhùillibh a ceud-fhàis, eadhon gun chumhachd mòr, no mòran sluaigh, g'a spìonadh a nìos as a freumhaibh.

10 Seadh, feuch, an déigh a suidheachadh, am bi piseach oirre? nach searg i gu tur an uair a bheanas a' ghaoth an ear rithe? crìonaidh i anns na claisibh anns an d' fhàs i.

11 Os bàrr, thàinig focal an Tighearn a m' ionnsuidh, ag ràdh,

12 Abair a nis ris an tigh cheannairc-each, Nach 'eil fios agaibh ciod *is ciall* do na nithibh so? Innis doibh, Feuch, tha rìgh Bhabiloin air teachd gu Ierusalem, agus ghlac e a rìgh, agus a prionnsachan, agus thug e leis iad gu Babilon:

13 Agus ghabh e do shliochd an rìgh, agus rinn e coimhcheangal ris, agus ghabh e mionnan deth: ghlac e fòs daoine cumhachdach na tìre:

14 A chum gu'm biodh an dùthaich suarach, ionnns nach togadh i suas i féin; ach le 'choimhcheangal a choimhead gu feudadh i seasamh.

15 Ach rinn e àr a mach 'na aghaidhsan le 'theachdairean a chur do'n Eiphit, a chum gu'n tugadh iad dha eich agus mòran sluaigh: an éirich gu maith dha? an téid esan a ni na nithe so as? no am bris e an coimhcheangal, agus an saor ar e?

16 Mar is beò mise, deir an Tighearn Dia, gu deimhin anns an àit *am bheil còmhnuidh* an rìgh a rinn rìgh dheth-san, neach a rinn e tàir air a mhionnan, agus a bhris e a chùmhannantan, eadhon leis-san, ann am meadhon Bhabiloin, gheibh e bàs.

17 Nì mòr ni Pharaoh feum dha, le 'fheachd cumhachdach, agus le 'bhuidheinn mhòir, anns a' chogadh, le tòrr a thilgeadh suas, agus le daingnichean a thogadh, a ghearradh as mhòran anama.

18 A chionn gu'n d' rinn e tàir air na mionnan, leis a' choimhcheangal a bhriseadh, (an uair a thug e, feuch, a làmh,) agus a rinn e na nithe so uile, cha téid e as.

19 Uime sin, mar so tha an Tighearn Dia ag ràdh, Mar is beò mise, mo mhionnan air an d' rinn e tàir, agus mo choimhcheangal a bhris e, eadhon sin diolaidh mise air a cheann féin.

20 Agus sgaoilidh mi mo lìon air, agus glacar ann am rib e; agus bheir mi e gu Babilon, agus tagraidh mi ris an sin air son a chionta, leis an do chiontaich e a'm' aghaidh.

21 Agus tuitidh na theich thuige, le 'uile fheachd, leis a' chlàidheamh; agus bithidh iadsan a dh'fhàgar air an sgapadh

¹ *tolair.*² *cùlùtmh.*

ris na h-uile ghaoith: agus aithnichidh sibh gur mise Iehobhah a labhair e.

22 Mar so tha an Tighearn Dia ag ràdh, Gabhaidh mise mi féin do'n ghéig a's àirde do'n t-seudar àrd, agus suidhichidh mi e; gearraidh mi o bhàrr a mheangana òga, geug mhaoth, agus suidhichidh mi air sliabh uachdarach agus àrd i.

23 Air sliabh àrd Israeil suidhichidh mi i: agus togaidh i suas a geug, agus bheir i mach toradh, agus fàsaidh i 'na seudar ròghail: agus fuipe gabhaidh na h-uile eunlaith do gach aon iteig còmhnuidh: fo dhubhar a geug ni iad còmhnuidh.

24 Agus aithnichidh uile chraobha na macharach gu'n d' thug mise Iehobhah nuas an crann àrd, gu'n d' àrdaich mi an crann ìosal, gu'n d' rinn mi an crann uaine tioram, agus gu'n d' thug mi air a' chram thioram bhi fuidh bhlàth: mise Iehobhah labhair, agus ni mi e.

CAIB. XVIII.

1 An dòigh air am buin Dia ri duine ionraic, 10 ri mac aingidh an duine ionraic, 10 agus ri mac ionraic an duine aingidh. 19 Giùlainidh gach neach 'aingidheachd féin. 21 Gheibh an t-aingidh maithneas 'na aingidheachd ma ghabhas e aithreachas.

THAINIG focal an Tighearn a m' ionnsuidh a ris, ag ràdh,

2 Ciod is ciall duibh, gu bheil sibh a' gnàthachadh an t-sean fhocail so a thaobh dùthcha Israeil, ag ràdh, Dh'ith na h-aithrichean dearcan searbha, agus tha déisinn air fiacailibh na cloinne?

3 Mar is beò mise, tha an Tighearn Dia ag ràdh, cha bhi aobhar agaibh an sean-fhocal so a ghnàthachadh ni's mò ann an Israel.

4 Feuch is leam-sa na h-uile anama; mar is leam anam an athar, is amhluidh is leam anam a' mhic: an t-anam a chiontaicheas gheibh e sin bàs.

5 Ach ma bhios duine ionraic, agus gu'n dean e an ni a bhios dlìgheach agus ceart,

6 Mur d'ith e air na sléibhtibh, ni mò thog e suas a shùilean ri ìodholaibh tighe Israeil, no thruaill e bean a choimhearsnaich, no thàinig e dlùth do mhnaoi a chuireadh air leth,

7 Agus mur do shàraich e aon neach, ach gu'n d'thug e 'gheall air ais do'n fheumach; mur do chreach e neach air bith le fòirneart, ach gu'n d'thug e aran do'n acrach, agus gu'n do chòmhdach e 'n lomnochd le eudach;

8 Esan nach d' thug seachad air ocar, ni mò ghabh aon riadh, a chum air a h-ais a làmh o euceart, a rinn breitheanas fìor eadar duine agus duine,

9 A ghluais ann am reachdaibh, agus a choimhid mo bhrèitheanas, gu fìrinn a

chur an gnìomh; so an duine ionraic, mairidh esan gu deimhin beò, deir an Tighearn Dia.

10 Ma ghineas e mac a bhios 'na shlaidear, agus 'na fhear-dòrtaidh fola, a ni sàmhail aoin ni dhiubh so,

11 Agus nach dean aon do na *dleasdais* sin, ach a dh'ith eadhon air na sléibhtibh, agus a thruaill bean a choimhearsnaich,

12 A shàruich am bochd agus am feumach, a chreach le fòirneart, nach d'thug air ais an geall, agus a thog suas a shùilean ri ìodholaibh, a chuir an gnìomh gràineileachd,

13 A thug seachad air ocar, agus a ghabh riadh: am mair e 'n sin beò? cha mhair e beò: rinn e na gràineileachdan so uile; gheibh e gu cinnteach bàs, bithidh 'fhuil air féin.

14 Agus, feuch, ma ghineas esan mac a chi na h-uile lochdan a rinn 'athair, agus gu'n toir e fa'near, agus nach dean e an leithide;

15 Nach d'ith air na sléibhtibh, ni mò thog e suas a shùilean ri ìodholaibh tighe Israeil, nach do thruaill bean a choimhearsnaich,

16 Nach do shàruich aon neach, nach do ghléidh an geall, ni mò chreach le h-aimneart, ach a thug 'aran do'n acrach, agus a chòmhdach an lomnochd le eudach;

17 A thog a làmh o na bochdaibh, nach do ghabh ocar no riadh, a rinn mo bhrèitheanas, a ghluais ann am reachdaibh; cha'n fhaigh esan bàs air son aingidheachd 'athar, mairidh e gu cinnteach beò.

18 'Athair, a chionn gu'n do shàruich e gu h-an-ìochdmhor, gu'n do chreach e a bhràthair le fòirneart, agus gu'n d' rinn e an ni sin nach robh ceart am measg a shluaigh, feuch, bàsaichidh eadhon esau 'na aingidheachd.

19 Gidheadh tha sibhse ag ràdh, C'ar son? nach 'eil am mac a' giùlan aingidheachd an athar? An uair a rinn am mac an ni sin a tha dlìgheach agus ceart, a ghléidh e mo reachdan-sa uile, agus a rinn e iad, mairidh e gu cinnteach beò.

20 An t-anam a chiontaicheas, gheibh esan bàs: cha giùlain am mac aingidheachd an athar, ni mò ghiùlaincas an t-athair aingidheachd a' mhic: bithidh fìreantachd an fhùein air féin, agus aingidheachd an aingidh air féin.

21 Ach ma philleas an t-aingidh o 'uile aingidheachd a rinn e, agus gu'n coimhid e mo reachdan-sa, agus gu'n dean e an ni sin a tha dlìgheach agus ceart, mairidh e beò, cha'n fhaigh e bàs.

22 'Uile lochdan a chuir e 'n gnìomh cha bhi iad air an cuimhneachadh dha:

'na fhleantachd a chuir e 'n gnìomh mairidh e beò.

23 Am bheil tlachd air bith agam-sa ann am bàs an aingidh? tha an Tighearn Dia ag ràdh: nach ann a ta mo thlachd 'na philleadh o shlighe, agus gu'm biodh e beò?

24 Ach an uair a philleas am firean air falbh o 'fhleantachd, agus a chuireas e 'n gnìomh aingidheachd, a' deanamh a réir nan uileghràineileachdan a niant-aingidh, am mair e beò? air 'uile fhleantachd a rinn e cha bhi iomradh: 'na chionta a chiontaich e, agus 'na pheacadh a pheacach e, annta-san gheibh e bàs.

25 Gidheadh tha sibhse ag ràdh, Cha'n 'eil slighe an Tighearna cothromach. Eisidibh a nis, O thigh Israeil, nach 'eil mo shlighean-sa cothromach? nach 'eil 'ur shlighean-sa neo-chothromach?

26 'Nuair a chlaonas am firean o 'fhleantachd, agus a chuireas e 'n gnìomh aingidheachd, agus a bhàsaicheas e innte; air son 'aingidheachd a rinn e, gheibh e bàs.

27 A ris, an uair a philleas an t-aingidh air falbh o 'aingidheachd a chuir e 'n gnìomh, agus a ni e an ni a ta dligheach agus ceart, gléidhidh e 'anam beò.

28 A chionn gu bheil e toirt fa'near, agus a' pilleadh o 'uile lochdaibh a chuir e 'n gnìomh, mairidh e gu cinnteach beò, cha'n fhaigh e bàs.

29 Gidheadh tha tigh Israeil ag ràdh, Cha'n 'eil slighe an Tighearna cothromach. O thigh Israeil, Nach 'eil mo shlighean-sa cothromach? nach 'eil 'ur shlighean-sa neo-chothromach?

30 Uime sin bheir mise breth oirbh, O thigh Israeil, gach aon a réir a shlighe, tha an Tighearn Dia ag ràdh: Gabhaibh aithreachas, agus pillibh o 'ur n-uile chiontaibh; mar sin cha dean aingidheachd 'ur milleadh.

31 Tilgibh uaibh 'ur n-uile chionta leis an do chiontaich sibh, agus deanaibh dluibh féin cridhe nuadh, agus spiorad nuadh; oir e'ar son a bhàsaicheas sibh, O thigh Israeil?

32 Oir cha'n 'eil tlachd agam-sa ann am bàs an ti a bhàsaicheas, tha an Tighearn Dia ag ràdh: uime sin, pillibh-sc, agus mairibh beò.

CAIB. XIX.

1 *Tuircadh air son uachdarana Israeil.* 10 *Le cosmhachd fhìonain air a suidheachadh anns an fhàsach nochdadh staid aonaranach Ierusalem.*

OS bàrr, tog thusa suas tuireadh air son uachdarana Israeil.

2 Agus abair, Ciod i do mhàthair? leòmhann boirionn: luidh i sìos am measg leòmhann, dh'altruim i a cuileanan am measg leòmhann òga.

3 Agus thog i suas aon d'a cuileanaibh:

dh'fhàs e na leòmhann òg, agus dh'fhoghlaim e breth air a' chreich; shluig e daoine.

4 Chuala na cinnich fòs iomradh air, ghlacadh e 'nan slochd, agus thug iad e le slabhruidhibh gu tìr na h-Eiphit.

5 A nis, 'nuair a chunnaic i gu'n d'fhàs i lag, agus gu'n do chaill i a dòchas, an sin ghabh i aon eile d'a cuileanaibh, agus rinn i leòmhann òg dheth.

6 Agus dh'imich e sìos agus suas am measg nan leòmhann, dh'fhàs e 'na leòmhann òg, agus dh'fhoghlaim e breth air a' chreich; shluig e daoine.

7 Agus thug e fa'near an àrois, agus chuir e fàs am bailtean; agus bha 'n dùthaich fuidh uamhas, agus an làn a bha innte, le fuaim a bheucaich.

8 An sin chruinnich na cinnich 'na aghaidh air gach taobh, o na mòr-roinnibh, agus sgaoil iad an lion thàiris air: ghlacadh e 'nan slochd.

9 Agus chuir iad e 'n sàs ann an slabhruidhean, agus thug iad e gu rìgh Bhabailoin; thug iad e gu daingnichean, a chum nach cluintheadh tuilleadh a ghuth air sléibhtibh Israeil.

10 Tha do mhàthair cosmhuil ri fìonain, suidhichte ri taobh nan uisgeacha: bha i torrach, agus làn do gheugaibh, a thaobh mhòran uisgeacha.

11 Agus bha slata làidir aice, air son slata-riaghlaidh nan uachdaran; agus bha a h-àirde togta suas am measg nan tiugh-gheugan, agus chunnacas i 'na h-àirde féin am measg lìonmhoireachd a meanglan.

12 Ach spionadh a nìos i ann an corruich, thilgeadh i sìos gu làr, agus thiormaich a' ghaath an ear suas a meas: bhris-eadh agus sheargadh a slata làidir, loisg an teine iad.

13 Agus a nis, tha i air a suidheachadh anns an fhàsach, ann am fearann tioram tartmhor.

14 Agus tha teine air dol a mach o shlait d'a geugaibh, a loisg a meas, air chor as nach 'eil slat làidir air bith aice gu bhi 'na slait gu riaghladh. Is tuireadh so, agus bithidh e 'na thuireadh.

CAIB. XX.

1 *Dhiùlt Dia bhi air fhiosrachadh le seanairibh Israeil:* 4 *Dh'aithris e an ceannaire 'na aghaidh san Eiphit,* 13 *san fhàsach,* 27 *agus ann an tìr a' ghlacaidh.* 33 *Bhagair e iad le 'chorruich,* 34 *ach gheall e an tional as na dùthchannaibh anns an robh iad air an sgapadh.*

AGU S tharladh anns an t-seachdamh bliadhna, sa' chùigeamh mìos, air an deicheamh là do'n mhìos, gu'n d'fhàinig cuid àraid do sheanairibh Israeil a dh'fhiosrachadh o'n Tighearn, agus shuidh iad ann am làthair-sa.

2 An sin thàinig focal an Tighearn a m' ionnsuidh, ag ràdh,

3 A mhic an duine, labhair ri seanairibh Israel, agus abair riu, Mar so tha an Tighearn Dia ag ràdh, An d'fhàinig sibh a dh'fhiosrachadh dhìom-sa? mar is beò mise, deir an Tighearn Dia, cha bhi mi air m' fhiosrachadh leibh.

4 An tagair thusa as an leth, a mhic an duine, an tagair thu? thoir orra gu'n aithnich iad gràineileachdan an aithrichean:

5 Agus abair riu, Mar so tha an Tighearn Dia ag ràdh, Anns an là san do ròghnaich mise Israel, agus anns an do thog mi suas mo làmh air son sliochd tìghe Jacob, agus anns an d'rinn mi mi féin aithnichte dhoibh ann an tìr na h-Eiphit, 'nuair a thog mi suas mo làmh air an son, ag ràdh, Is mi Iehobhabh 'ur Dia:

6 Anns an là san do thog mi suas mo làmh air an son, gu' n toirt a mach á tìr na h-Eiphit, a chum fearainn a rannsaich mi mach dhoibh, a' sruthadh le bainne agus le mil, a's e glòir nan uile fhearann.

7 An sin thubhairt mi riu, Tilgibh uaibh, gach aon neach gràineileachdan a shùl, agus na truaillibh sibh féin le ìodholaibh na h-Eiphit; is mise Iehobhabh 'ur Dia.

8 Ach chathaich iad a'm' aghaidh, agus cha 'n éisdeadh iad rium: cha do thilg iad uatha, gach aon gràineileachdan an sùl, ni mò thréig iad ìodhola na h-Eiphit: an sin thubhairt mi, Dòirtidh mi mo chorruih orra, a chum gu'n coimhlion mi m'fhearg 'nan aghaidh ann am meadhon tìre na h-Eiphit.

9 Ach dh'oirbich mi air sgàth m' ainme féin, a chum nach truaillteadh e an làthair nan cinneach am measg an robh iad, agus an d'rinn mi mi féin aithnichte dhoibh 'nan sealladh, le 'n toirt a mach á tìr na h-Eiphit.

10 Air an aobhar sin thug mi orra dol a mach á tìr na h-Eiphit, agus thug mi iad a chum an fhàsaich:

11 Agus thug mi dhoibh mo reachdan, agus dh'fhoillsich mi dhoibh mo bhreitheanais, iad sin ma choimhlionas duine sam bith, mairidh e beò anna.

12 A thuilleadh air so fòs, thug mi dhoibh mo shàbaidean, gu bhi 'nan comhara eadar mise agus iadsan, a chum gu'n aithnheadh iad gur mi an Tighearn a ta 'gan naomhachadh.

13 Ach rinn tìgh Israel ceannaire a'm' aghaidh anns an fhàsach: cha do ghluais iad ann am reachdaibh, agus rinn iad tàir air mo bhreitheanais, nithe ma ni duine, mairidh e beò anna; agus mo shàbaidean thruaill iad gu mòr: an sin thubhairt mi gu'n dòirtinn mo chorruih a mach orra san fhàsach, a chum an caitheamh.

14 Ach dh'oirbich mi air sgàth m' ainme

féin, a chum nach blodh e air a thruaillteadh am measg nan cinneach, a thug mi iad a mach 'nan sealladh.

15 Ach fòs thog mi suas mo làmh dhoibh anns an fhàsach, nach tugainn iad do'n fhearann a thug mi dhoibh, a' sruthadh le bainne agus le mil, a's e glòir nan uile fhearann:

16 A chionn gu'n d'rinn iad tàir air mo bhreitheanais, agus nach do ghluais iad ann am reachdaibh, ach gu'n do thruaill iad mo shàbaidean: oir chaidh an cridhe an déigh an ìodholan.

17 Gidheadh choigil mo shùil iad o'n sgrios, ni mò rinn mi crìoch a thoirt orra san fhàsach.

18 Ach thubhairt mi r'an cloinn anns an fhàsach, Na gluaisibh-sa ann an reachdaibh 'ur n-aithrichean, ni mò ghléidheas sibh am breitheanais, no thruaillleas sibh sibh féin le 'n ìodholaibh.

19 Is mise an Tighearn 'ur Dia; gluaisibh ann am reachdaibh, agus coimhidibh mo bhreitheanais, agus deanaibh iad:

20 Agus naomhaichibh mo shàbaidean; agus bitidh iad 'nan comhara eadar mise agus sibhse, a chum gu'm bi fios agaibh gur mise an Tighearn bhuir Dia.

21 Gidheadh, rinn an clann ar a mach 'ann am aghaidh: cha do ghluais iad ann am reachdaibh, ni mò choimhid iad mo bhreitheanais gu'n deanamh, nithe ma ni duine, mairidh e beò anna; thruaill iad mo shàbaidean: an sin thubhairt mi gu'n dòirtinn a mach mo chorruih orra, chum gu'n coimhlionainn m'fhearg 'nan aghaidh anns an fhàsach.

22 Gidheadh, phill mi air a h-ais mo làmh, agus rinn mi air sgàth m' ainme féin, a chum nach biodh e air a thruaillteadh ann am fianuis nan cinneach, a thug mi iad a mach 'nan sealladh.

23 Thog mi suas mo làmh dhoibh fòs anns an fhàsach, gu'n sgapainn iad am measg nan cinneach, agus gu'n sgaoilinn iad feadh nan dùthchannan;

24 A chionn nach do chuir iad an gnìomh mo bhreitheanais, ach gu'n d'rinn iad tàir air mo reachdaibh, agus gu'n do thruaill iad mo shàbaidean, agus gu'n robh an suilean an déigh ìodholan an aithrichean.

25 Uime sin thug mi dhoibh fòs reachdan nach robh maith, agus breitheanais leis nach biodh iad beò.

26 Agus thruaill mi iad 'nan tiodhlac-aibh féin, le iad a bhi toirt air gach ni a dh'fhosglaas a' bhrù dol troimh an teine, ionnus gu'n deanainn-sa fàs iad, a chum gu'n aithnheadh iad gur mi an Tighearn.

27 Uime sin, a mhic an duine, labhair

ri tigh Israeil, agus abair riu, Mar so tha an Tighearn Dia ag ràdh, Ann an so fòs mhasluich 'ur n-aithrichean mise, le ciontachadh gu trom a'm' aghaidh.

28 'Nuair a thug mi iad do'n fhearran, mu 'n do thog mi suas mo làmh gu'n tugainn doibh e, an sin chunnaic iad gach cnoc àrd, agus na h-uile chranna tiugha, agus dh'ìobair iad an sin an ìobairtean, agus an sin thug iad seachad an tabhartasa fuathach: an sin fòs rinn iad am fàile cùbhraidh, agus dhòirt iad a mach an ìobairtean dibhe.

29 An sin thubhairt mi riu, Ciod an t-ionad àrd gus am bheil sibh a' dol? agus goirear Bamah mar ainm air gus an là an diugh.

30 Uime sin, abair ri tigh Israeil, Mar so tha an Tighearn Dia ag ràdh, Am bheil sibh air 'ur truailleadh a réir nòis bhur n-aithrichean? agus am bheil sibh a' cur striopachais an gnìomh a réir an gràineil-eachda-san?

31 Oir an uair a tha sibh a' toirt seachad 'ur tiodhlaca, 'nuair a tha sibh a' toirt air 'ur mic dol troimh an teine, tha sibh 'g' ur truailleadh féin le 'ur n-uile ìodhol-bhaidh, eadhon gus an là an diugh: agus an toir mise freagradh dhuibh, O thigh Israeil? Mar is beò mi, tha an Tighearn Dia ag ràdh, cha toir mi dhuibh freagradh.

32 Agus an ni sin a ta teachd 'nur n-aire cha tachair air chor air bith, ann am bheil sibh ag ràdh, Bithidh sinn mar na cinnich, mar mhuinntir nan dùthchannan, ann an seirbhis a thoirt do chranan agus do chloich.

33 Mar is beò mise, tha an Tighearn Dia ag ràdh, gu cinnteach le làimh chumhlachdaich, agus le gairdein sìnte mach, agus le corruich air a dòrtadh a mach, riaghlaidh mise os 'ur ceann:

34 Agus bheir mi mach sibh as na slòigh, agus tionaidh mi sibh as na dùthchannaibh anns am bheil sibh air 'ur sgapadh, le làimh thréin, agus le gairdein sìnte mach, agus le corruich air a dòrtadh a mach.

35 Agus bheir mi sibh gu fàsach nam fineachan, agus an sin tagraidh mi ruibh aghaidh ri h-aghaidh.

36 Amhuil a thagair mi ri 'ur n-aithrichibh ann am fàsach ùre na h-Eiphit, is amhuil a thagras mi ruibhse, deir an Tighearn Dia.

37 Agus bheir mi oirbh imeachd fuidh 'n t-slaig, agus bheir mi sibh fuidh cheangal a' chùmhnaint.

38 Agus glanaidh mi mach as 'ur measg na ceannairich, agus an dream a ta ciontachadh a'm' aghaidh: bheir mi iad a

mach as an dùthaich anns am bheil iad air chuairt, agus cha téid iad a steach do fhearran Israeil: agus aithnichidh sibh gur mise an Tighearn.

39 Air 'ur son-sa, O thigh Israeil, mar so tha an Tighearn Dia ag ràdh, Imichibh, deanaibh seirbhis, gach aon duine d'a ìodholaibh a nis na dhéigh so, mur éisd sibh riumsa; ach na truailleibh m' ainm naomh-sa nìs mò le 'ur tabhartas-aibh agus le 'ur n-ìodholaibh.

40 Oir ann am shliabh naomh-sa, ann an sliabh àirde Israeil, tha an Tighearn Dia ag ràdh, ann an sin nì uile thigh Israeil, na bhios air thalamh uile dhiubh, seirbhis dhomh-sa: an sin gabhaidh mi riu, agus an sin iarraidh mi 'ur tabhartais, agus ceud thoraidh 'ur n-ìobairtean, le 'ur n-uile nithibh naomha.

41 Gabhaidh mi ruibh le 'ur boltrach cùbhraidh an uair bheir mi mach sibh o na fineachaibh, agus a thionailas mi sibh o na dùthchannaibh anns an robh sibh air 'ur sgapadh; agus bithidh mi air mo naombachadh annaibh ann am fianuis nan cinneach.

42 Agus aithnichidh sibh gur mise an Tighearn, 'nuair a bheir mi sibh gu fearann Israeil, gus an dùthaich mu'n do thog mi suas mo làmh gun tugainn i do 'ur n-aithrichibh.

43 Agus ann an sin cuimhnichidh sibh 'ur slighe, agus 'ur n-uile dheanadais, anns an robh sibh air 'ur truailleadh: agus bithidh sibh gràineil ann 'ur sealladh féin air son 'ur n-uile lochdan a rinn sibh.

44 Agus aithnichidh sibh gur mise an Tighearn, 'nuair a dh'oibrichas mi leibh air son m'ainme féin, cha'n ann a réir 'ur droch shlighe, no a réir 'ur deanadais aingidh, O thigh Israeil, deir an Tighearn Dia.

45 Os bàrr thàinig focal an Tighearn a m' ionnsuidh, ag ràdh,

46 A mhic an duine, cuir d' aghaidh ris an àirde deas, agus leig silcadh do d' fhocal ri deas, agus dean fàisteachd an aghaidh fridhe na macharach mu dheas;

47 Agus abair ri frìdh na h-àirde deas, Eisd focal an Tighearna; Mar so tha an Tighearn Dia ag ràdh, Feuch, fadaidh mise teine annad, agus loisgidh e gach uile chrann uaine annad, agus gach uile chrann seargta; cha m'ùchar an teine lasarach, agus loisgear ann na h-uile aghaidh, o dheas gu ruige tuath.

48 Agus chì na h-uile fheoil gur mise an Tighearn a las e: cha bhi e air a mhuchadh.

49 An sin thubhairt mise, Ah! a Thighearna Dhia, tha iad ag ràdh do m' thaobhsa, Nach 'eil e labhairt chosamhlachd dorchas?

CAIB. XXI.

1 Fàistneachd an aghaidh fearainn Israeil. 18 Stiùir-eadh claidheamh rìgh Bhabiloìn an àghaidh Ierusalem. 28 Lèir-sgrìos nan Amonach.

AGUS thàinig focal an Tighearn a m' ionnsuidh, ag ràdh,

2 A mhic an duine, cuir d' aghaidh ri Ierusalem, agus leig sìleadh *do d' fhocal* ris na h-ionadaibh naomha, agus dean fàistneachd an aghaidh fearainn Israeil,

3 Agus abair ri fearann Israeil, Mar so tha an Tighearn ag ràdh, Feuch, tha mise ann ad aghaidh, agus tairgidh mi mach mo chladheamh as a thruaill, agus buidh mi mach asad am firean agus an t-aingidh.

4 A chionn gu'n gearr mi as uait am firean agus an t-aingidh, uime sin thèid mo chladheamh a mach as a thruaill an aghaidh gach uile fheòla, o dheas gu tuath:

5 A chum gu'n aithnich gach uile fheoil gu'n do tharuing mise Iehobhah mo chladheamh a mach as a thruaill; cha phill e air ais ni's mò.

6 Dean acain uime sin, a mhic an duine, a dhochainneas do leasraidh; agus le searbh as dean osnaich fa chomhairan sùl.

7 Agus tarlaidh, 'nuair a their iad riut, C'ar son a ta thu 'g osnaich? gu freagair thusa, Air son an sgeoil, a chionn gu bheil e teachd: agus leaghaidh gach aon chridhe, agus bithidh na h-uile làmhlag, agus gach aon spiorad fann, agus na h-uile ghluineau anmhunn mar uisge: feuch tha e teachd, agus bheirear e gu crìch, deir an Tighearn Dia.

8 A ris thàinig focal an Tighearn a m' ionnsuidh, ag ràdh,

9 A mhic an duine, dean fàistneachd, agus abair, Mar so tha an Tighearn ag ràdh, Abair, Tha claidheamh, tha claidheamh air a gheurachadh, agus fòs air a lìomhadh.

10 Tha e air a gheurachadh a dheanamh àir ghoirt; tha e air a lìomhadh a chum gu'n dealradh e; a chum gu'n tìleadh e sìos slat rìoghail mo mhic, gun chrann air bith a chaomhadh.

11 Agus thuge e gu bhì air a lìomhadh e, chum gu'm biodh e air a glacadh: tha an claidheamh air a gheurachadh, agus tha e air a lìomhadh, gu 'thoirt do làimh a' mharbhaiche.

12 Eigh agus nuallaich, a mhic an duine, oir bithidh e air mo shluagh-sa, air uile mhòr-uaislibh Israeil: bithidh namhan, do thaobh a' chladheimh, air mo shluagh: buail, uime sin, air do léis.

13 Oir tha e dearbhta; agus an t-slat rìoghail an uair nach coigil e i, cha bhì ann ni's mò, deir an Tighearn Dia.

14 Dean thusa, uime sin, a mhic an

duine, fàistneachd, agus buail do làmh an air a chéile, agus biodh an claidheamh an treas uair air a dhùblachadh, claidheamh nan daoine marbhta, claidheamh a ghaigich a mharbhadh, a thèid a steach d' an seòmraichibh uaigneach.

15 Chuir mi roinn a' chladheimh an aghaidh an geatachan uile, a chum gu meathadh an cridhe, agus gu meudaichear am milleadh: ah! rinneadh lònreach e, gheuraicheadh air son an àir e.

16 Imich thusa taobh no taobh éigin, air do làimh dheis, no air do làimh chli, ciod air bith taobh a ta d' aghaidh.

17 Buailidh mise fòs mo làmh an air a chéile, agus bheir mi air mo chorruich gu'n gabh i fois: mise Iehobhah thubhairt e.

18 Thàinig focal an Tighearn a m' ionnsuidh a ris, ag ràdh,

19 Mar an ceudna, a mhic an duine, sonraich dà shlighe dhuit féin, a chum gu'n tìleadh claidheamh rìgh Bhabiloìn: thig ar an an dithis a mach as an aon tìr; agus tagh thusa àite, tagh e aig ceann na slighe chum a' bhaile.

20 Sonraich slighe, chum gu'n tìleadh an claidheamh gu Rabat nan Amonach, agus gu Iudah ann an Ierusalem, a' chaithir dhaingichte.

21 Oir sheas rìgh Bhabiloìn aig dealachadh na slighe, aig ceann an dà shlighe, a dheanamh fiosachd: lìomh¹ e a shaighdean; chuir e a chomhairle ri dealbhan, sheall e anns an sgamhan.

22 Aig a làimh dheis bha'n fhàistneachd air son Ierusalem, a dh'orduchadh cheanna-feadhna, a dh'fhosgladh a' bheoil anns an àr, a thogail suas a' ghutha le h-iolaich, a dh'orduchadh reitheadh-cogaidd an aghaidh nan geatachan, a thilgeadh suas tòrr, a thogail daingnich.

23 Agus bithidh e dhoibh-san mar neach ri fàistneachd bhréige 'nan sealladh, dhoibh-san a thug mi onnan: ach gairmidh e gu cuimhne an aingidheachd, a chum gu'm bi iad air an glacadh.

24 Air an aobhar sin, mar so tha an Tighearn Dia ag ràdh, a chionn gu'n d'thug sibh air 'ur n-aingidheachd a bhì air a cuimhneachadh, le 'ur n-eusaontas a bhì air a leigeadh ris, air chor agus gu bheil 'ur lochdan follas 'nur n-uile dheanadas: a chionn gu bheil sibh air 'ur toirt gu cuimhne glacar an làimh sibh.

25 Agus thusa, a phrionnsa mhi-dhiadhaidh, aingidh Israeil, aig am bheil do là air teachd, anns am bi crìoch air aingidheachd.

26 Mar so tha an Tighearn Dia ag ràdh, Atharraich an coron rìoghail, agus thoir dhìot an crùn: cha 'n e an aon ceudna

bhios ann : àrdach an t-Iosal, agus islich an t-àrd.

27 Tilgidh mi e bun os ceann, bun os ceann, bun os ceann, agus cha bhi e ann, gus an tig esan aig am bheil còir air, agus dhàsan bheir mi e.

28 Agus thusa, a mhic an duine, dean fàistneachd, agus abair, Mar so tha an Tighearn Dia ag ràdh a thaobh nan Amonach, agus a thaobh am maslaidh : eadhon abair thusa, Tha an claidheamh, tairngte : air son an àir tha e lìomhta ; air son sgrios tha e mar dhealanaich.

29 (Am feadh a ta thu faicinn dhuit féin diomhanais, am feadh a ta thu fàistneachd dhuit féin bréige, a chum do thoirt air mhuinealaibh na muinntir a lèonadh, nan aingidh aig am bheil an là air teachd, anns am bi crìoch aig an euceart.

30 An toir mi air pilleadh air ais g' a thruaill ? Anns an àite san do chruthaicheadh thu, ann am fearann do dhùchais, bheir mise breith ort.

31 Agus dòrtidh mi mach ort mo dhian chorruih ; séididh mi ort ann an teine m' fheirge, agus bheir mi thairis thu do làmh dhaoine brùideil, cleachda ri milleadh.

32 Bithidh tu mar chonnadh do'n teine : bithidh d'fhuil ann am meadhon an fhearainn ; cha bhi thu nì's mò air chuimhne ; oir mise Iehobhah labhair e.

CAIB. XXII.

1 Gràineileachdan Ierusalem. 17 Loisgidh Dia clann Israeil mar shal am meadhan na fuirneis. 23 Truaillidheachd gach uile shluaigh, air son an do dhòirtadh dian-chorruih Dhé orra.

OS bàrr thàinig focal an Tighearn a m' ionnsuidh, ag ràdh,

2 A nis, a mhic an duine, an tagair thu, an tagair thu a leth na caithreach fhuileachdaich ? Seadh, feuchaidh tu dhi a h-uile ghràineileachdan.

3 An sin abair thusa, mar so tha an Tighearn Dia ag ràdh, Tha a' chaithir a' dòrtadh fola 'na meadhon, a chum gu'n tigeadh a h-àm, agus a' deanamh iodhola 'na h-aghaidh féin, gu i féin a thruaillleadh.

4 Tha thu air fàs ciontach ann ad fhuil a dhòirt thu, agus thruaill thu thu féin ann ad iodholaibh a rinn thu ; agus thug thu air do làithean teachd dlùth, agus thàinig thu chum do bhlàdnachan ; uime sin rinn mise dhiot masladh do na cinnich, agus ball-magaidh do na h-uile dhùthchanuaidh.

5 Iadsan a ta dlùth, agus iadsan a ta fada uait, nì iad fanoid ortsa, ta mi-chliùtach, a ta ri mòran sàruchaidh.

6 Feuch tha uachdarain Israeil annad, gach aon a réir a chumbachd a dhòrtadh fola.

7 Annad-sa rinn iad dimeas air athair agus màthair ; ann ad mheadhon bhuin iad le h-ainneart ris a' choigreach : annad-sa shàruich iad an dilleachdan agus a' bhantrach.

8 Rinn thu tàir air mo nithibh naomhasa, agus thruaill thu mo shàbaidean.

9 Annad-sa tha luchd aithris sgeoil a dhòrtadh fola : agus annad tha iad ag itheadh air na sléibhtibh : ann ad mheadhon tha iad a' cur an gnìomh neò-ghloine.

10 Annad-sa leig iad ris lomnochduidh an athar ; dh'islich iad annad ise a chuireadh a thaobh air son neò-ghloine.

11 Agus rinn aon gràineileachd le mnaoi a choimhearsnaich ; agus thruaill aon eile gu gràineil nighean a mhna ; agus dh'islich neach eile annad a phiuthar, nighean athar.

12 Annad-sa ghabh iad duais gu fuil a dhòrtadh : ghabh thu ocar agus riadh, agus bhuannaich thu gu sanntach o d' choimhearsnaich le h-ana-cothrom, agus dhi-chuimhnich thu mise, dear an Tighearn Dia.

13 Feuch uime sin bhuail mise mo làmh air do bhuannachd neo-ionraic a rinn thu, agus air d'fhuil, a bha ann ad mheadhon.

14 An urrainn do chridhe fulang, no'n urrainn do làmhan a bhi làidir anns na làithibh anns am buin mise riut ? Mise Iehobhah labhair, agus nì mi.

15 Agus sgapaidh mi thu measg nan cinneach, agus sgànraidh mi thu measg nan dùthchannan, agus caithidh mi do neò-ghloine asad.

16 Agus bithidh tu air do thruaillleadh ann an sealladh nan cinneach, agus aithnichidh tu gur mise an Tighearn.

17 Agus thàinig focal an Tighearn a m' ionnsuidh, ag ràdh,

18 A mhic an duine, tha tigh Israeil air fàs dhomh-sa mar shal ; tha iad uile 'nan umha, agus 'nan stàn, agus 'nan iarunn, agus 'nan luaith, ann am meadhon na fuirneis ; cha'n 'eil anna ach sal airgid.

19 Air an aobhar sin, mar so tha an Tighearn Dia ag ràdh, A chionn gu'n d'fhàs sibh uile 'nur sal, feuch, uime sin, cruinnichidh mise sibh gu meadhon Ierusalem.

20 Mar a chruinnicheas iad airgid, agus umha, agus iarunn, agus luaith, agus stàn gu meadhon na fuirneis, a chum an teine a shéideadh air, gus a leaghadh ; is amhuil a chruinnicheas mise sibhse ann am chorruih, agus ann am fheirg, agus fàgadh mi sibh an sin, agus leaghadh mi sibh.

21 Seadh, cruinnichidh mi sibh, agus séididh mi oirbh ann an teine mo chorruih, agus bithidh sibh air 'ur leaghadh 'na mheadhon.

22 Mar a leaghar airgid ann am meadh-

on na fuirneis, is amhluidh a leaghar sibhse 'na meadhon-sin; agus aithnichidh sibh gu'n do dhòirt mise Iehobhah nach mo chornnigh oirbh.

23 Agus thàinig focal an Tighearn a m' ionnsuidh, ag ràdh,

24 A mhic an duine, abair ris an *fhearann*, Is tusa am fearann nach 'eil air t' uisgeachadh, air nach do thuit frasachd ann an là na dian-fheirge.

25 Tha co-bhoinn fhàidhean 'na mheadh-on; mar leòmhann beucach, an tòir air a' chreich: shluig iad anama: ghlac iad an t-ionmhas agus na nithe luachmhor: rinn iad a bhantraichean lionmhor 'na mheadh-on.

26 Bhais a shagairt mo reachd, agus mhi-naomhaich iad mo nithe naomha: cha do chuir iad dealachadh sam bith eadar an naomh agus am mi-naomh, ni mò dh'fheuch iad ciod tha neò-ghlan, agus ciod glan: agus dh'fholuich iad an sùilean o m' shàbaidean, agus tha mi air mo mhi-naomhachadh 'nam measg.

27 Tha 'uachdarain 'na mheadh-on mar mhadraibh-alluidh, cìocrach a chum creiche, a dhòrtadh fola, a sgrios anama, a dh'fhaotainn buannachd neo-ionraic¹.

28 Agus chòmhdaich 'fhàidhean iad le cre² gun oibreachadh, a' faicinn dìomhanais, agus a' fàistneachd bhreug dhoibh, ag ràdh, Mar so tha an Tighearn Dia ag ràdh, 'nuair nach do labhair an Tighearn.

29 Ghnàthaich sluagh an fhearainn ainneart, agus chuir iad an gnìomh reubainn, agus shàruich iad am bochd agus am feumach: seadh, rinn iad fòirneart air a' choigreach gu h-eucorach.

30 Agus dh'iarr mise air son duine 'nam measg a dheanadh suas a' challaid, agus a sheasadh anns a' bhriseadh³ fa m' chomhair air son an fhearainn, a chum nach sgriosainn e; ach cha d'fhuir mi aon neach.

31 Uime sin dhòirt mi mach orra mo dhian-chorroich; chaith mi iad le teine m' fheirge: an slighe fèin dhìol mi air an cinn, deir an Tighearn Dia.

CAIB. XXIII.

1 *Striopachas Aholah agus Aholibah.* 22 *Smachdaichidh an luchd-gaoil iad.* 36 *Thugadh ach-mhasan dhoibh air son an striopachais, 45 agus dh'fhoillsicheadh na breitheanas a bha gu teachd orra.*

THAINIG focal an Tighearn a m' ionnsuidh a ris, ag ràdh,

2 A mhic an duine bha dìthis bhan ann, nigheanan na h-aoin mhàthar;

3 Agus rinn iad striopachas anns an Eiphit, rinn iad striopachas 'nan òige; an

sin bha an uchd air a bhruthadh, agus an sin bhruthadh cìochan am maighdeanais.

4 Agus b' iad an ainmcan, Aholah ise bu shine, agus Aholibah a pinthar; agus bu leam-sa iad, agus rug iad mic agus nigheana: mar so an ainmcan; is i Aholah Samaria, agus is i Aholibah Ierusalem.

5 Agus rinn Aholah striopachas an uair bu leam-sa i; agus bha i 'n cion⁴ air a leannain, air na h-Asirianaich, a còmh-eansnaich.

6 Sgeudaichte le gorm, 'nan cinn-fheadhna, agus 'nan luchd-riaghlaidh, iad uile 'nan òganaich àillidh, marc-shluagh, a' marcachd air eachaibh.

7 Mar so rinn i striopachas leo, leis a' mheud as a bha do fhearaibh taghta 'n Asiria, agus leis na h-uile air an robh a cion⁶; le 'n òdholaibh uile shalaich si i fèin.

8 Ni mò a sguir i d' a striopachas leis an Eiphit: oir na h-òige ludh iad leatha, agus bhruth iad cìochan a maighdeanais, agus dhòirt iad oirre an striopachas.

9 Air an aobhar sin thug mise thairis i do làimh a leanuan, do làimh nan Asirianaich air an robh a cion.

10 Leig iad so ris a lomnochduidh; ghabh iad a mic agus a nigheanan, agus mharbh iad i leis a' chlaidheamh: agus dh'fhàs i iomraiteach am measg bhan, oir thug iad breitheanas oirre.

11 Agus an uair a chunnaic a piuthar Aholibah so, bha i ni bu truailldh 'na gràdh neo-mheasarra na ise; agus 'na striopachas ni bu mhò na a piuthar 'na striopachas.

12 Bha a cion air na h-Asirianaich a coimhearsnaich, cinn-fheadhna, agus luchd-riaghlaidh, sgeudaichte gu ro sgiamhlach, marc-shluagh, a' marcachd air eachaibh, iad uile 'nan òganaich àillidh.

13 An sin chunnaic mi gu'n robh i air a truailleadh, gu'm b' ionnan slighe dhoibh araon;

14 Ach gu'n deachaidh ise ni b' fhaide 'na striopachas: oir 'nuair a chunnaic i daoine air an dealbh air a' bhalla, òmh-aighean nan Caldéach, air an tarruing le coreur,

15 Crioslaichte le criosaibh air an easraibh, sgeudaichte le ceann-éididh dàithte air an cinn, iad uile mar chinn-fheadhna ri 'm faicinn, cosmhuil ri mic Bhabiloin, a dh'àraich tìr Chaldéa.

16 Agus co luath as a chunnaic i iad le a sùilibh, ghabh i cion orra, agus chuir i teachdairean d'an ionnsuidh, gu Caldéa.

17 Agus thàinig na Babilonaich d' a h-ionnsuidh gus an leabadh-ghaoil, agus thruaill iad i le 'n striopachas; ach an

¹ mhi-dhlighich.

² criadh, creuch.

³ bheum.

⁵ déigh, ceist.

⁴ an déigh.

déigh bhi air a truailleadh leo, bha a h-intinn air a claonadh air falbh uatha.

18 Mar sin leig i ris a striopachas, agus leig i ris a lomnochduidh; an sin phill m' inntinn-sa uaipe, amhuil a phill m' inntinn o a piuthair.

19 Gidheadh mbeudaich i a stròpachais, le lùthair a h-òige ghairm gu cuimhne, anns an d' rinn i stròpachais ann an tìr na h-Eiphit.

20 Oir mhiannaich i a co-chéilidhean, aig am bheil am feoil mar fheoil asal, agus an siol mar shìol each.

21 Mar so ghairm thu gu cuimhne neò-ghloine t' òige, ann am bruthadh do bhrollaich leis na h-Eiphitich, ann am bruthadh clocha t' òige.

22 Air an aobhar sin, O Aholibah, mar so tha an Tighearn Dia ag ràdh, Feuch, dùisgidh mise suas do leannain ann ad aghaidh, o 'm bheil t' inntinn air claonadh, agus bheir mi iad ann ad aghaidh air gach taobh.

23 Na Babilonaich, agus na Caldéich uile, Pecod agus Soa, agus Coa, na h-Asirianaich uile maille riu: iad uile 'nan daoine àillidh, cinn-fheadhna, agus luchd-riaghlaidh, tighearnan mòra agus iomrait-each, iad uile a' marcachd air eachaibh.

24 Agus thig iad ann ad aghaidh le carbadaibh, le cobhanaibh¹, agus le roth-aibh, agus le coimhthional sluagh, a chuireas ann ad aghaidh targaid, agus sgiath, agus clogaide, air gach aon taobh: agus cuiridh mise breitheanas fa'n comhair, agus bheir iad breth ort a réir am breitheanas.

25 Agus cuiridh mise m' eud a'd' aghaidh, agus buinidh iad gu ro gharg riut: bheir iad air falbh do shròin, agus do chluasan, agus tuitidh d' fhuigheall leis a' chlaidheamh: bheir iad leo do mhic, agus do nigheanan, agus loisgear na dh'-fhàgar dhìot anns an teine.

26 Bheir iad dhìot mar an ceudna t'eudach, agus bheir iad air falbh do sheuda maiseach.

27 Mar so bheir mise air do neò-ghloine sgar annad, agus air do striopachas le tìr na h-Eiphit: air chor as nach tog thu suas do shùilean riu, agus nach cuimhnich thu an Eiphit ni's mò.

28 Oir mar so tha an Tighearn Dia ag ràdh, Feuch, bheir mise thairis thu do làimh na muinntir leis am fuathach thu, do làimh na muinntir o'm bheil do chridhe air claonadh.

29 Agus buinidh iad riut gu fuathach, agus bheir iad air falbh t'uile shaothair, agus fhàgaidh iad thu lom agus rùisgte; agus bithidh lomnochduidh do striopachais air a leigeadh ris, araon do ghràineil-

eachd agus do stròpachas.

30 Ni mise na nithe so riut, a chionn gu'n deachaidh tu le stròpachas an déigh nan cinneach, a chionn gu bheil thu air do thruailleadh le'n ìodholaibh.

31 Ghluais thu ann an slighe do pheathar, uime sin bheir mise a cupan-sa ann ad làimh.

32 Mar so tha an Tighearn Dia ag ràdh, Olaidh tu do chupan do pheathar, domhain agus farsuinn; nìhear gàire fanoid riut, agus bithidh tu a'd' bhall-magaith; is mòr na bheil ann.

33 Lionar thu le misg agus le doilghios, le cupan uamhaig agus léir-sgrìos, le cupan do pheathar Shamaria.

34 Ni thu fòs 'òl agus a shùghadh a mach, agus brisidh tu a bhloighdean, agus spionaidh tu do chiochan féin asad: oir mise labhair e, deir an Tighearna Dia.

35 Uime sin mar so tha an Tighearna Dia ag ràdh, A chionn gu'n do dhì-chuimhnich thu mise, agus gu'n do thilg thu mi air do chùlaobh, air an aobhar sin, giùlain thusa fòs do ghràineileachd agus do striopachais.

36 Thubhairt an Tighearn rium os bàrr, A mhic an duine, an toir thu breth air Aholah, agus air Aholibah? seadh, foillsich dhoibh an gràineileachdan.

37 Gu'n do chuir iad an gnìomh adhaltras, agus gu bheil fuil 'nan làmhnan, agus le 'n ìodholaibh gu'n d'rinn iad adhaltras, agus gu'n d'thug iad fòs air am mic, a rug iad dhomh-sa, siubhal air an son-san troimh an teine g' an losgadh.

38 Os bàrr rinn iad so rium-sa; thruaill iad m' ionad naomh air an là sin féin, agus mhi-naomhaich iad mo shàbaidean.

39 Oir an uair a mharbh iad an clann d' an ìodholaibh, an sin thàinig iad air an là sin féin do m' ionad naomh-sa, g'a thruaill-eadh; agus, feuch, mar so rinn iad ann am meadhon mo thighe.

40 Agus a thuilleadh air so, gu'n do chuir iad fios air daoine gu teachd o chéin, agus an do chuireadh teachdair: agus, feuch, thàinig iad, air son an d'rinn thu thu féin a nigheadh, do shùilean a dhath, agus thu féin a sgeudachadh le h-usg-raichibh.

41 Agus shuidh thu air leabaibh urram-aich, agus bord ulluichte f'a comhair, air an do chuir thu mo bholtrach-sa, agus m'oladh.

42 Agus bha guth na muinntir a bha aig suaimhneas maille riu, agus mòr-chuideachd nam fear o Shaba, o'n fhàsach, a chuir làmh-fhailean air an làmhnan, agus corona maiseach air an cinn.

43 An sin thubhairt mise rithe-sa bha sean ann an adhaltras, An dean iad a nis striopachas leatha, agus ise *leo-san*?

44 Gidheadh chaidh iad a steach d'a

¹ *feunaibh.*

h-ionnsuidh, mar a théid iad a steach gu striopaich: mar sin chaidh iad a steach gu Aholah agus gu Aholibah, na mnathan neòghlan.

45 Agus bheir na daoine cothromach breth orra, a réir breith bhan-adhaltranach, agus a réir breith bhan a dhòirteas fuil; a chionn gu ban-adhaltranaich iad, agus gu bheil fuil 'nan làmhnan.

46 Oir mar so tha an Tighearna Dia ag ràdh, Bheir mise nìs cuideachd orra, agus bheir mi iad gu bhì air an atharrachadh, agus air an creachadh.

47 Agus clachaidh a' chuideachd iad le clachaibh, agus gearraidh iad sìos iad¹ le 'n claidhùibh; marbhaidh iad an mic agus an nigheanan, agus loisgidh iad an tighcan le teine.

48 Mar so cuiridh mise cosgadh air gràineileachd anns an fhearann, a chum gu foghlum na h-uile mhnathan gun deanamh a réir 'ur gràineileachd-sa.

49 Agus dìolaidh iad ruibh 'ur gràineileachd, agus giùlainidh sibh lochdan 'ur n-ìodholan, agus aithnuidh sibh gur mise an Tighearn Dia.

CAIB. XXIV.

1 *Le cosamhlachd coire air ghoil nochdadh léir-sgrìos Ierusalem. 15 Thoir misgeadh do Eseciel bròn a dheanamh air son bàis a mhà, 19 chum gu'n cuireadh e an cèill do na h-Iudhaich gu'n tig trioblaidhean orra a théid os ceann bròin.*

A RIS, auns an naothamh bliadhna, anns an deicheamh mìos, air an deicheamh là do'n mhìos, thàinig focal an Tighearn a m' ionnsuidh, ag ràdh,

2 A mhic an duine, sgrìobh dhuit ainm an là, a' cheart là so: chuir rìgh Bhabiloin e fèin an aghaidh Ierusalem air a' cheart là so.

3 Agus labhair cosamhlachd ris an tigh cheannairceach, agus abair ris, Mar so tha an Tighearna Dia ag ràdh, Cuir air coire; cuir air e, agus fòs dòirt ann uisge:

4 Cruinnich a mhìrean ann, gach aon mhir maith, an t-sliasaid agus an sliinnean; lìon e le taghadh nan cnàmh.

5 Gabh roghadh an treud, agus loisg fòs na cnàmhan fuidhe, thoir goil bhras air, agus biodh a chnàmhan air am bruich ann.

6 Uime sin, mar so tha an Tighearna Dia ag ràdh, Is an-aobhlin do'n chaithir fhuiltich, do'n choire aig am bheil a shal ann, agus o nach deachaidh a shal a mach uaithe; thoir a mach e, m' air mhir, na tuiteadh crannchur air bith air.

7 Oir tha a fuil 'na meadhon, chuir i air mullach creige i, cha do dhòirt i air an talamh i, chum a folach le duslach:

8 A chum gu'n tugadh i air feirg teachd a mìos a dheanamh dìoghaltais: chuir

mise a fuil air mullach creige, chum nach biodh i air folach.

9 Air an aobhar sin, Mar so tha an Tighearna Dia ag ràdh, Is an-aobhlin do'n chaithir fhuiltich; nì mise fòs a' chruach-theine mòr.

10 Carnaibh connadh, fadaibh an teine, caithibh an fheoil, cuiribh oirre spiosraidh gu leòr, agus loisgear na cnàmhan.

11 An sin cuir falamh e air 'èibhlìbh, a chum gu'n teasaich a' phrais, agus gu'n loisg i, agus gu'm bi a salchar air a leaghadh innte, air chor as gu'm bi a sal air a chaitheamh.

12 Lean a sal rithe gu teann, agus cha do dhealaich e rithe; tha a salchar mòr, tha a salchar breun.

13 Ann ad shalchar tha neò-ghloine, do bhrìgh gu'n do ghlan mi thu, agus nach robh thu glan; cha bhì thu air do ghlanadh o d' thruaillidheachd nì's mò, gus an toir mise air mo chorruidh gu'n gabh i tàmh ort.

14 Mise Iehobhah labhair, thig e gu crìch, agus coimhlionaidh mise e, cha téid mi air m' ais, nì mò choigleas mi, no ghabhas mi aithreachas; a réir do shlighe, agus a réir do dheanadais bheir iad breth ort, deir an Tighearna Dia.

15 Mar an ceudna thàinig focal an Tighearn a m' ionnsuidh, ag ràdh,

16 A mhic an duine, feuch, bheiream-sa air falbh uait miann do shùl le buille: gidheadh cha dean thu bròn no gul, nì mò shìleas do dheòir.

17 Leig dhìot glaothaich, na dean caoidh air son nam marbh, ceangail culaidh do chinn ort, agus cuir do bhrògan air do chosaibh, agus na fòluich do ghntùis, agus na h-ith aran luchd-bròin.

18 Mar sin labhair mi ris na daoineibh auns a' mhaduinn, agus dh'eug mo bhean mu amoch; agus rinn mi sa' mhaduinn mar dh'àithneadh dhomh.

19 Agus thubhairt an sluagh rium, Nach innis thu dhuinn ciod ar gnothuch-ne ris na nithibh so a ta thu deanamh?

20 An sin fhreagair mi iad, Thàinig focal an Tighearn a m' ionnsuidh, ag ràdh,

21 Labhair ri tigh Israeil, Mar so tha an Tighearna Dia ag ràdh, Feuch, truaidh mise m' ionad naomh, òirdheirceas 'ur treise, miann 'ur sùl, agus an nì a's caomh le 'ur n-anam: agus 'ur mic agus 'ur nigheanan a dh'fhàgadh, tuitidh leis a' chlàidheamh.

22 Agus nì sibh mar a rinn mise: cha'n fhòluich sibh 'ur n-aghaidh. agus cha'n ith sibh aran luchd-bròin.

23 Agus bithidh 'ur n-éididh air 'ur cinn, agus 'ur brògan air 'ur cosaibh: cha dean sibh bròn no gul, ach seargaidh sibh as air son 'ur n-euceartan, agus nì sibh bròn, gach aon r'a chéile.

24 Mar so tha Eseciel dhuibh 'na chomh-ara : a réir gach ní a rinn esau, ní sibhlise ; agus an uair a thig so, aithnichidh sibh gur mise an Tighearna Dia.

25 Mar an ceudna, a mhic an duine, nach *tachair* e anns an là sam buin mise uatha an neart, aoibhneas an glóire, miann an sùl, agus an ní sin air an suidh-ich iad an inntinn, am mic, agus an nigh-eana ;

26 Gu'n tig esan a théid as air an là sin do d' ionnsuidh, a thoirt ort a chluinntinn le d' chluasaibh ?

27 Anns an là sin fosgailear do bheul do'n tí théid as, agus labhairaidh tu, agus cha bhi thu ní's mò balbh, agus bithidh tu dhoibh mar comhara, agus aithnichidh iad gur mise an Tighearna.

CAIB. XXV.

1 *Nìthear dioghaltas air na h-Amonaich, 8 air Moab agus air Seir, &c. air son an naimhdeas a nochd iad do na h-Iudhaich.*

THAINIG focal an Tighearna a rìs a m' ionnsuidh, ag ràdh,

2 A mhic an duine, cuir do ghnùis an aghaidh nan Amonach, agus dean fàist-neachd 'nan aghaidh ;

3 Agus abair ris na h-Amonaich, Cluin-ibh focal an Tighearna Dia, Mar so tha an Tighearna ag ràdh, a chionn gu'n d' thubh-airt thu, Aha, an aghaidh m' ionaid naoimh, 'nuair a thruailladh e, agus an aghaidh fearainn Israeil, an uair a bha e fàs, agus an aghaidh tighe Iudah, an uair a dl'r fhalbh iad ann am braighdeanas ;

4 Feuch, uime sin, bheir mise thairis thu do mhuinntir na àirde 'n ear mar sheilbh, agus suidhichidh iad annad an àrois, agus ní iad an àite-còmhnuidh annad : ithidh iad do mheas, agus òlaidh iad do bhainne.

5 Agus ní mi Rabah 'na crò air son chàmbhal, agus clann Amon 'na àite-luidhe do threudaibh : agus aithnichidh sibh gur mise an Tighearna.

6 Oir mar so tha an Tighearna Dia ag ràdh, A chionn gu'n do bhuail thu do làmhnan, agus gu'n do bhreab thu le do chosaibh, agus gu'n d' rinn thu gairdeachas ann ad chridhe, le d' uile tharcuis an aghaidh fearainn Israeil ;

7 Feuch, uime sin, sinidh mise mach mo làmh ort, agus bheir mi seachad thu mar chreich do na cinnich, agus gearraidh mi as thu o na sloigh, agus caitlidh mi thu a mach as na dùthchannaibh ; sgriosaidh mi thu, agus aithnichidh tu gur mi an Tighearna.

8 Mar so tha an Tighearna Dia ag ràdh, A chionn gu bheil Moab agus Seir ag ràdh, Feuch, tha tigh Iudah cosmhuil ris na h-uile clinnich ;

9 Air an aobhar sin, feuch, fosglaidh mise taobh Mhoab, a leigeadh ris nam

bailean a ta air 'iomall, maise na dùth-cha, Bet-iesimot-Baalmeon, agus Ciriataim.

10 Do fhearaibh na h-àirde 'n ear, maille ri cloinn Amon, agus bheir mi iad mar sheilbh, a chum nach bi cuimhne air cloinn Amon am measg nan cinneach.

11 Agus bheir mi breitheanas air Moab, agus aithnichidh iad gur mi an Tighearna.

12 Mar so tha an Tighearna Dia ag ràdh, A chionn gu'n do ghnàthaich Edom dioghaltas trom an aghaidh Iudah, agus gu'n d'thug e oibheum mòr anns an dioghaltas a rinn e orra :

13 Uime sin, mar so tha an Tighearna Dia ag ràdh, Sinidh mise fòs a mach mo làmh air Edom, agus gearraidh mi as duine agus ainmhidh uaithe, agus ní mi fàs e o Theman, agus tuitidh muinntir Dhedain leis a' chlaidheamh.

14 Agus leagaidh mi mo dhioghaltas air Edom le làmh mo shluaigh Israeil, agus ní iad ann an Edom a réir mo chorr-uirich, agus a réir mo dhian-fheirge ; agus bithidh fios mo dhioghaltais aca, deir an Tighearna Dia.

15 Mar so tha an Tighearna Dia ag ràdh, A chionn gu'n do bhuin na Philistich gu dioghaltach, agus gu'n d' rinn iad dioghaltas le cridhe aingidh gu milleadh, air son an t-sean naimhdeis !

16 Uime sin, mar so tha an Tighearna Dia ag ràdh, Feuch, sinidh mise mach mo làmh air na Philistich, agus gearraidh mi as na Ceretich, agus millidh mi fuigh-eall slìos na fàirge.

17 Agus ní mi dioghaltas mòr orra le achmhasain gharga, agus aithnichidh iad gur mise an Tighearna, 'nuair a leagas mi orra mo dhioghaltas.

CAIB. XXVI.

1 *Sgriosar Tirus a chionn gu'n d' rinn i tàir air Ierusalem. 7 Mòr-chumhachd Nebuchadnesair an aghaidh Thiruis. 15 Criothmaichidh prions-acha na fàirge, agus bithidh uamhas orra ri fuaim a leagaidh.*

AGUS tharladh anns an aon bhliadhna deug, air a' cheud là do'n mhìos, gu'n d'thainig focal an Tighearna a m' ionnsuidh, ag ràdh,

2 A mhic an duine, a chionn gu'n d' thubh-airt Tirus an aghaidh Ierusalem, Aha, tha ise bha 'na dorsaibh do'n t-sluagh briste : phill i thugam-sa ; leasaichear mise nis, o chuireadh ise fàs ;

3 Air an aobhar sin, mar so tha an Tighearna Dia ag ràdh, Feuch, tha mise a'd' aghaidh, O Thiruis, agus bheir mi air mòran chinneach teachd a nìs a'd' aghaidh, mar a bheir an fhaerge air a tonnaibh teachd a nìs.

4 Agus sgriosaidh iad ballachan Thiruis,

agus brisidh iad sìos a bàbhuinn: tairn-
gidh mise fòs a duslach uaipe, agus ni mi
i mar mhullach creige.

5 Bithidh i 'na h-ionad-sgaoilidh lion
ann am meadhon na fairge: oir labhair
mise, tha an Tighearna Dia ag ràdh,
agus bithidh i 'na creich do na cinnich.

6 Agus marbhar a nigheanan a ta sa
mhachair leis a' chlaidheamh, agus aith-
nichidh iad gur mise an Tighearn.

7 Oir mar so tha an Tighearna Dia ag
ràdh, Feuch bheir mise air Tirus Nebu-
chadnesar rìgh Bhabiloin, rìgh rìghrean
o'n àirde tuath, le eachaibh, agus le carb-
adaibh, agus le marcaibh, agus le cuid-
eachdaibh, agus le mòran sluagh.

8 Marbhaidh e leis a' chlaidheamh do
nigheanan anns a' mhachair; agus ni e
daingneach ann ad aghaidh, agus tilgidh
e suas tòrr a' d' aghaidh, agus togaidh e
suas a' d' aghaidh an sgiath.

9 Agus cuiridh e innil-cogaidh an agh-
aidh do bhallachan, agus le 'thuaghaibh
brisidh e sìos do bhàbhuinn.

10 Le lìonmhoireachd a chuid each, fol-
aichidh an duslach thu; criothnaichidh
do bhalla le toirm a' mharc-shluaigh, agus
nan rothan, agus nan carbadan, an uair
théid e steach air do gheatachaibh, mar a
théid daoine steach air baile san d' rinn-
eadh briseadh.

11 Le ioghannaibh a chuid each sal-
traidh e sìos do shràidean uile: marbhaidh
e do shluaigh leis a' chlaidheamh, agus
théid do dhaignichean làidir sìos gu làr.

12 Agus ni iad creach do d' shaoibh-
reas, agus ni iad cobharrach do d' cheann-
achd; agus brisidh iad sìos do bhallachan,
agus millidh iad do thighean taitneach;
agus leagaidh iad do chlachan, agus
d' fhiodh, agus do dhuslach ann am
meadhon an uisge.

13 Agus bheir mise air fuaim t' òran
sgur, agus cha chluinnear fonn do chlàrs-
ach ni's mò.

14 Agus ni mi thu mar mhullach creige:
bithidh tu ann ad ionad gu sgaoileadh
lion air: cha bhi thu air do thogail ni's
mò: oir mise Iehobhah labhair, deir an
Tighearna Dia.

15 Mar so tha an Tighearna Dia ag
ràdh ri Tirus, Nach criothnaich na h-eil-
eanan ri fuaim do leagaidh, 'nuair dh'èigh-
eas a' mhuinntir leònta, 'nuair nìthear an
t-àr ann ad meadhon?

16 An sin thig uile phrionnsacha na
fairge nuas o'n rìgh-chaithrichibh, agus
cuiridh iad am falluinnear a thaoibh, agus
cuiridh iad dhiubh an culaidhean grèise:
éididh iad iad féin le ball-chritl, suidhidh
iad air an làr, agus criothnaichidh iad
gach tiota, agus bithidh uamhas orra do
d' thaobh-sa.

17 Agus togaidh iad tuireadh air do

shon, agus their iad riut, Cionnus a
sgriosadh thusa bha air d' àiteachadh le
luchd-fairge, a' chaithir iomraiteach a
bha làidir anns an fhairge, i féin agus a
luchd-àiteachaidh, a ta cur an eagail air
na h-uile a ta ga tathaich?

18 A nis criothnaichidh na h-eileanan
ann an là do leagaidh? seadh, bithidh
na h-eileanan a ta san fhairge fo bhuair-
eadh air son do shiubhail.

19 Oir mar so tha an Tighearna Dia ag
ràdh, An uair ni mise dhìot caithir fhàs,
mar na caithrichean nach 'eil air an àit-
eachadh, an uair bheir mi nìos ort an
doimhne, agus a thig na tuitlean mòra os
do cheann;

20 An uair bheir mi ort dol sìos leo-san
a théid sìos do'n t-slochd, le muinntir na
h-aimsir o shean, agus a chuireas mi thu
an ionadaibh ìochdarach na talmhainn,
ann an ionadaibh fàs o shean, leo-san a
théid sìos do'n t-slochd, air chor as nach
bi thu air d'aitheachadh, agus nach seas
thu ni's mò ann an tìr nam beò:

21 Ni mi uamhas dhìot, agus cha bhi
thu ann: ged iarrar thu, gidheadh cha'n
fhaighear thu ni's mò gu bràth, deir an
Tighearna Dia.

CAIB. XXVII.

1 *Margaidhean Thiruis: 26 Ann an là a sgrios
tuitidh a beartas ann am builsghean na fairge.
29 Ni maraichean agus luchd-àiteachaidh nan
eileana caoidh air a son.*

THAINIG focal an Tighearn a ni'
ionnsuidh a ris, ag ràdh,

2 A nis, a mhic an duine, tog suas tuir-
eadh air son Thiruis;

3 Agus abair ri Tirus, O thusa ta air do
shuidheachadh aig dol a steach na fairge,
a ta d' cheannaeiche do'n t-sluaigh air son
mhòran eileanan, Mar so tha an Tighearn
Dia ag ràdh, O Thiruis, thubhairt thu.
Tha mi ro sgiamhach.

4 Tha t'iomall ann am meadhon na
fairge, rinn do luchd-togail do mhaise
foirfe.

5 Rinn iad t' uile chlàra do chrannaibh
giubhais Shenir: thug iad seudair O Leba-
non a dheanamh chranna-siùil duit.

6 Do dharagaibh Bhasain rinn iad do
ràmhàn: rinn cuideachd nan Asurach do
thotachan do chnàmha-deuda o eilean-
aibh Chitim.

7 B'e anart grinn, le obair ghrèise o'n
Eiphit a sgaoil thu mach gu bhì 'na sheòl
duit: b'e gorm agus purpur o eileanaibh
Elisah an ni sin a sgeudaich thu.

8 B' iad luchd-àiteachaidh Shidoin agus
Arbhaid do mharachan: b' iad do
dhaoine glìce bha annad, O Thiruis,
luchd-stiuridh do lingeis.

9 B' iad seanairean Ghcbail, agus a
dhaoine glìce, bha agad 'nan luchd-calc-
aidh: bha lingeis na fairge gu léir, le

'm maraichibh annad, a chum do mhalairt a mheudachadh.

10 B' iad muinntir Phersia, agus Luid, agus Phuit, d'fhir-chogaidh ann ad fheachd: chroch iad suas an sgiath agus a' cheann-bheart annad; chuir iad an céill do mhaise.

11 Bha fir Arbhaid le d' fheachd air do bhallachaibh mu'n cuairt, agus bha na Gamadaich ann ad thuraibh: chroch iad an sgiathan air do bhallachaibh mu'n cuairt: rinn iad do mhaise foirfe.

12 B' i Tarsis do cheannaiche, do bhrìgh pailteis an uile stòrais; le airgiod, iarunn, stàn, agus luaith, rinn iad malairt ann ad mhargaidhean.

13 Iabhan, Tubal, agus Mesech, b' iad-san do cheannaichean: reic iad pearsanna dhaoine, agus soithichean umha ann ad mhargadh.

14 Rinn muinntir Thogarmah malairt ann ad mhargaidhean, le eachaibh, agus le marc-shluagh, agus le muileidibh.

15 B' iad fir Dhedain do cheannaichean, mòran eileanan malairt do làimhe: thug iad a d' ionnsuidh mar thiodhlac, adharca deud-chnàmh, agus eboni.

16 B' i Siria do cheannaiche air son lìonmhoireachd nan oibre a rinn thu: rinn iad malairt ann ad mhargaidhean le emeraid, purpur, agus obair ghrèise, agus anart grinn, agus coireal, agus agat.

17 B' iad Iudah agus tìr Israeil do cheannaichean: reic iad ann ad mhargadh cruithneachd Mhinnit, agus Pannag, agus mil, agus oladh, agus ioc.

18 B' e Damascus do cheannaiche ann an lìonmhoireachd nan oibre a rinn thu, air son pailteis an uile shaoibhreis: ann am fìon Helboin, agus ann an olainn ghil.

19 Rinn Dan fòs, agus Iabhan, a' dol air an ais agus air an aghaidh, malairt ann ad mhargaidhean: bha iarunn oibrichte, casia agus calamus ann ad mhargadh.

20 B' e Dedan do cheannaiche ann an eudaichibh luachmhor air son charbad.

21 Rinn Arabia, agus uile phrionnsachan Chedair malairt riut ann an uanaibh, agus ann an reitheachaibh, agus ann an gabbraibh: anns na nithibh so b' iad do luchd-malairt.

22 Ceannaichean Sheba agus Raamah, b'iadsan do cheannaichean: rinn iad malairt ann ad mhargadh le taghadh nan uile spiosradh, agus leis na h-uile chlachaibh luachmhor, agus le h-òr.

23 B' iad Haran agus Canueh, agus Eden, ceannaichean Sheba, Asuir, agus Chilmad, do cheannaichean-sa.

24 B' iad so do luchd-malairt anns na h-uile nithibh, ann an eudaichibh gorma, agus ann an obair ghrèise, agus ann an

cisteachan do chulaidhean rìomhach, air an ceangal le cordaibh, agus deanta do sheudar, ann measg do mhalairt.

25 Sheinn longa Tharsis mu d' thimchioll ann ad mhargadh; agus bha thu air do lìonadh, agus air do dheanamh ro ghlòrmhor ann am meadhon nan cuanta.

26 Thug do ràmhachean thu gu uisgeacha mòra: bhris a' ghaoth an ear thu ann am meadhon na fairge.

27 Do shaoibhreas, agus do mhargadh, do mhalairt, do mharaichean, agus d'fhir-stiuridh, do luchd-calcaidh, agus do luchd-malairt, agus t-uile luchd-cogaidh a ta annad, agus ann ad uile chuideachd a ta ann ad mheadhon, tuitidh ann am buillsgean na fairge, ann an là do sgrios.

28 Rì fuaim gaoire luchd-stiuridh do loingeis, criothnachidh na bailean mu'n cuairt duit.

29 Agus thig na h-uile a ghlacas an ràmh, na maraichean, uile stiùreadairean na fairge, nuas o'n longaibh, seasaidh iad air an tìr.

30 Agus bheir iad air an guth gu'n cluinnear e os do cheann, agus glaothaidh iad gu goirt, agus tilgidh iad suas duslach air an cinn, aornaganaidh iad iad féin anns an luaithre.

31 Agus nì iad iad féin uile maol air do shon, agus crioslaichidh iad iad féin ann an eudach-saig, agus gullidh iad air do shon le goirteas cridhe, le tìreadh geur.

32 Agus 'nan caoidh togaidh iad cumha air do shon, agus nì iad bròn os do cheann, *ag ràdh*, Cò bu chosmhuil ri Tìrus, bu chosmhuil rithe-sa ta millte ann am meadhon na fairge?

33 'Nuair chaidh t' oibre a mach anns na fairgibh, shàsuich thu iomadh sluagh; rinn thu beartach rìghrean na talmhainn le mòr-phailteas do shaoibhreis agus do mhalairt.

34 San àm anns am brisear thu leis an fhairge ann an doimhneachd nan uisgeachan, tuitidh do cheannachd agus do chuideachd gu h-iomlan ann ad mheadhon.

35 Bithidh uamhas, do d' thaobh, air uile luchd-àiteachaidh nan eileanan, bithidh eagal anmhor air an rìghrean bithidh an gnùis fo ghruaimean.

36 Nì na ceannaichean am measg nan cinneach sgeige ort; bithidh tu ann ad uamhas, agus cha bhi thu ann nì's mò gu bràth.

CAIB. XXVIII.

1 Breitheanas an aghaidh prionnsa Thìruis a chionn gu'n robh e uaibhreach 'na chridhe. 11 Caoidh os ceann rìgh Thìruis. 20 Breitheanas Shìdoin 24 Tìonailear sluagh Israeil o na cinnich am measg am bheil iad air an sgapadh.

THAINIG focal an Tighearn a m' ionnsuidh a ris, ag ràdh,
2 A nìhic an duine, abair ri prionnsa

Thuiris, Mar so tha an Tighearna Dia ag ràdh, a chionn gu bheil do chridhe air a thogail suas, agus gu'n d' thubhairt thu, Is dia mi, tha mi 'm shuidhe ann an caithir Dhé, ann am meadhon nan cuanta; gidheadh is duine thu, agus cha Dia, ged chuir thu do chridhe mar chridhe Dhé.

3 Feuch, is glìce thu na Daniel; cha'n 'eil dìomhaireachd sam bith foluichte uait;

4 Le d' ghliocas, agus le d' thuigse, fhuair thu dhuilg féin maoin, agus fhuair thu òr agus airgid ann ad thaisgeach-aibh.

5 Le d' ghliocas mòr, agus le d' mhalairt, mheudaich thu do shaoibhreas, agus tha do chridhe air a thogail suas le d' bheartas.

6 Air an aobhar sin, mar so tha an Tighearna Dia ag ràdh, A chionn gu'n do chuir thu do chridhe mar chridhe Dhé;

7 Feuch, uime sin, bheir mise coimhich ort, fir uamhasach nan cinneach; agus tairngidh iad an claidhean an aghaidh maise do ghliocais, agus truailidh iad do dhealradh.

8 Cuiridh iad sìos do'n t-slochd thu, agus bàsaichidh tu le bàs na muinntir a mharbhar ann am meadhon na fairge.

9 An abair thu fathas an làthair an ti a mharbhas thu, Is dia mi? ach bithidh tu a'd' dhuine, agus ni h-ann a'd' dhia ann an làimh an ti a mharbhas thu.

10 Bàsaichidh tu le bàs nan neo-thimchioll-gheartta, le làimh nan coimheach: oir mise labhair e, deir an Tighearna Dia.

11 Os bàr, thàinig focal an Tighearna a m' ionnsuidh, ag ràdh,

12 A mhic an duine, tog suas caoidh os ceann rìgh Thuiris, agus abair ris, Mar so tha an Tighearna Dia ag ràdh, Tha thu cur seiladh air do chuid stòrais, làn do ghliocas, agus foirfe ann am maise.

13 Bha thu ann an Eden, gàradh Dhé; b'e do chòmhdachadh na h-uile clach luachmhor, an sardius, an topas, agus an daimean, am beril, an t-onics, agus an iasper, an saphir, an t-emerald, agus an carbuncal, agus an t-òr: ghleusadh obair do thiompan, agus do phìoban annad anns an là san do chruthaichidh thu.

14 Is tu an cerub ungta a chòmhdach-eas; agus shuidhich mise thu; bha thu air slabh naomh Dhé; shiubhail thu ann am meadhon nan clacha dealrach.

15 Bha thu foirfe ann ad shligibh, o'n là san do chruthaichidh thu, gus an d' fhuaradh annad aingidheachd.

16 Le lìonmhoireachd do mhalairt lìon iad do mheadhon le h-ainneart, agus pheacaich thu: uime sin, tilg' da mise thu, mar ni mi-naomh, a mach o shliabh Dhé: agus sgriosaidh mi thu, O a cheruib a

chòmhdach-eas! á meadhon nan clacha dealrach.

17 Bha do chridhe air a thogail suas le d' mhaise; thruaill thu do ghliocas le d' dhealradh: tilgidh mise gu làr thu, cuiridh mi thu an làthair rìghrean, gu bhì a' d' bhall-amhaire dhoibh.

18 Le lìonmhoireachd t' euceartan thruaill thu t' ionadan naomha, le euceart do mhalairt; uime sin bheir mise mach teine as do mheadhon, caithidh e thu, agus ni mise luath dhìot air an talamh, ann an sealladh nan uile a chì thu.

19 Iadsan uile d'an aithne thu measg an t-sluaigh, bithidh uamhas orra do d' thaobh: bithidh tu ann ad uamhuun, agus cha bhì thu ann ni's mò gu bràth.

20 A ris thàinig focal an Tighearna a m' ionn uidh, ag ràdh,

21 A mhic an duine, cuir do ghnùis an aghaidh Shidoin, agus dean fàistneachd 'na h-aghaidh.

22 Agus abair, Mar so tha an Tighearna Dia ag ràdh, Feuch, tha mise ann ad aghaidh, O Shidoin, agus bithidh mi air mo ghlòrachadh ann ad mheadhon: agus aithnichidh iad gur mi an Tighearna 'nuair a ni mi innte breitheanas, agus a bhios mi air mo naomhachadh innte.

23 Oir cuiridh mi innte plàigh, agus fuil 'na sràidibh, agus bheir ar breitheanas air an leònta 'na meadhon, leis a' chlaidheamh a bhios oirre air gach taobh; agus aithnichidh iad gur mi au Tighearna.

24 Agus cha bhì dris dhealgach' ann ni's mò do thigh Israel, no dris a bheir doilghìos, dhuibh-san uile mu'n cuairt a ta ri àir orra; agus aithnichidh iad gur mise an Tighearna Dia.

25 Mar so tha an Tighearna Dia ag ràdh, 'nuair a thionailas mise tigh Israel o na cinich am measg am bheil iad air an sgapadh, agus a bhios mi air mo naomhachadh anna an sealladh nan cinneach, an sin gabhaidh iad còmhnuidh 'nam fearann a thug mise do m' òglach Iacob.

26 Agus gabhaidh iad còmhnuidh ann gu tèaruinte, agus togaidh iad tigh, agus suidhichidh iad fion-liosan: seadh, gabhaidh iad còmhnuidh le dànachd, an uair a ni mise breitheanas orra-san uile ta deanamh tàir orra gach taobh mu'n cuairt doibh; agus aithnichidh iad gur mise Iehobhah an Dia.

CAIB. XXIX.

¹ Breitheanas an aghaidh Pharaoh do bhrìgh gu'n do bhuin e gu cealgach ri Israel. 8 Cuir ar tìr na h-Eipht fàs, ach cruinnichear a sluagh a ris d'an dùthaich féin an ceann dà fhichead bliadhna. 17 Gheibh Nebuchadnezzar an Eipht mar thuarasdail air son a sheirbhìs an aghaidh Thuiris.

ANNS an deicheamh bliadhna, anns an deicheamh mìos, air an dara là deug do'n mhìos, thàinig focal an 'Tighearn a m' ionnsuidh, ag ràdh,

2 A mhic an duine, cuir do ghnùis an aghaidh Pharaoh rìgh na h-Eiphit, agus dean fàistneachd 'na aghaidh-san, agus an aghaidh na h-Eiphit uile.

3 Labhair agus abair, Mar so tha an Tighearna Dia ag ràdh, Feuch, tha mise a' d' aghaidh, O Pharaoh, a rìgh na h-Eiphit, an uabheist¹ mhòr a ta 'na luidhe ann am meadhan 'aimhnichean fèin, a thubhairt, Is leam fèin m' amhainn, rinn mi air mo shon fèin i.

4 Ach cuiridh mise dubhain ann ad ghialaibh, agus bheir mi air iasg t' aimhnichean leantuinn ri d' lannaibh, agus bheir mi nìos thu á meadhon t' aimhnichean, agus leanaidh uile iasg t' aimhnichean ri d' lannaibh.

5 Agus tréigidh mise thu san fhàsach, thu fèin agus uile iasg t' aimhnichean: tuitidh tu air na machraichibh sgaoilte; cha bhi thu air do thional, no air do chrùineachadh ri chéile: thug mise thu mar bhiadh do bheathaichibh na macharach, agus do eunlaith an athair.

6 Agus aithnichidh uile luchd-àitcachaidh na h-Eiphit gur mise an Tighearn, a chionn gu'n robh iad 'nan luing chuilce do thigh Israeil.

7 'Nuair a ghlac iad thu, bhris thu 'nan làimh, agus reub thu an gualainn uile: agus an uair a leig iad an taice riut, bhris thu, agus dh'fhàg thu an leasraidh uile gun taice.

8 Air an aobhar sin, mar so tha an Tighearna Dia ag ràdh, Feuch, bheir mise claidheamh ort, agus gearraidh uni mach asad duine agus ainmhidh.

9 Agus bithidh tìr na h-Eiphit falamh agus fàs; agus aithnichidh iad gur mise an Tighearn: a chionn gu'n d' thubhairt e, Is leam-sa an amhainn, agus is mi a rinn i.

10 Feuch, uime sin, tha mise ann ad aghaidh, agus an aghaidh t' aimhnichean; agus ni mi tìr na h-Eiphit gu tu fàs agus falamh, o thùr Sliène, eadhon gu iomall Etiopia.

11 Cha'n imich cos duine sam bith troimpe², agus cha'n imich cos ainmhidh troimpe, ni mò bhios i air a h-àiteachadh rè dà fhichead bliadhna.

12 Agus ni mi tìr na h-Eiphit fàs ann am meadhon nan dùthchanna ta fàs, agus bithidh a caithrichean, an am meadhan nan caithrichean a ta falamh, air an deanamh 'nam fàsach rè dà fhichead bliadhna: agus sgapaidh mi na h-Eiphitich an measg nan cinneach, agus sgaoil-

idh mi iad feadh nan dùthchannan.

13 Gidheadh mar so tha an Tighearna Dia ag ràdh, An ceann dà fhichead bliadhna crunnichidh mise na h-Eiphitich o na cinnich anns an robh iad air an sgaoileadh.

14 Agus bheir mi air a h-ais bruid nan Eiphiteach, agus bheir mi orra pilleadh gu fearann Phatrois, gu dùthaich an còmhnuidh, agus bithidh iad an sin 'nan rioghachd shuaraich.

15 Bithidh i suarach seach gach rioghachd, agus cha'n àrdaich si i fèin nì's mò am measg nan cinneach: oir lughdaiclidh mise iad, air chor as nach riaghlaidh iad nì's mò os ceann nan cinneach.

16 Agus cha bhi i nì's faide 'na dòchas aig thigh Israeil, a bheir an eusaontas gu cuimhne, 'nuair a sheallas iad 'nan deigh: ach aithnichidh iad gur mise an Tighearna Dia.

17 Agus tharladh anns an t-seachdamh bliadhna fichead, anns a' cheud mhìos, air a' cheud là do'n mhìos, gu'n d' thàinig focal an Tighearn a m' ionnsuidh, ag ràdh,

18 A mhic an duine, thug Nebuchadnesar rìgh Bhabiloin air a shluagh seirbh-is mhòr a dheanamh an aghaidh Thirus: rinneadh gach ceann mach, agus gach guala lom; gidheadh cha robh tuarasdail air bith aige fèin, no aig a shluagh, air son Thirus, air son na seirbh-is a rinn e 'na h-aghaidh.

19 Air an aobhar sin, mar so tha an Tighearna Dia ag ràdh, Feuch, bheir mise tìr na h-Eiphit do Nebuchadnesar rìgh Bhabiloin, agus glacadh e a shluagh, agus glacadh e a creach, agus glacadh e a cobhartaich, agus bithidh sin 'na thuarasdail aig a shluagh.

20 Thug mise dha tìr na h-Eiphit air son a shaoithreach leis an do shaoithrich e 'na h-aghaidh; a chionn gu'n d' oibrich iad air mo shonsa, deir an Tighearna Dia.

21 Anns an là sin bheir mi air adharc tìghe Israeil briseadh a mach, agus bheir mi dhuit-sa fosgladh a' bheoil 'nam meadhon; agus aithnichidh iad gur mise an Tighearn.

CAIB. XXX.

1 Tuitidh an Eiphit leis a' chladheamh, agus thig uabhar a cumhachd a mas. 20 Neartaichear gairdean rìgh Bhabiloin chum gu'm bris e gairdean rìgh na h-Eiphit.

THAINIG focal an Tighearn a m' ionnsuidh a rìs, ag ràdh,

2 A mhic an duine, dean fàistneachd agus abair, Mar so tha an Tighearna Dia ag ràdh, Deanaibh ulartaich; Och, an là!

3 Oir tha an là dlùth, eadhon là an Tighearna dlùth, là neulach, àn nan cinn-each a bhios ann.

4 Agus thig an claidheamh air an Eiphit,

¹ an uile-bheist, an dragon.

² roumpe.

agus bitlhidh cràdh mòr ann an Etiopia, 'nuair a thuiteas iadsan a mharbhar anns an Eiphit, agus bheir iad a sluagh air falbh, agus brisear sìos a bunaitean.

5 Etiopia, agus Libia, agus Lidia, agus an sluagh coimeasgta gu léir, agus Chub, agus muinntir na tìre ta 'n co-bhoinn, tuitidh leo-san leis a' chlaidheamh.

6 Mar so tha an Tighearn ag ràdh, Tuitidh iadsan fòs a ta cumail suas na h-Eiphit, agus thig uabhar a cumhachd a muas: o thùr Shiene tuitidh iad innte leis a' chlaidheamh, deir an Tighearna Dia.

7 Agus bithidh iad fàs ann am meadhon nan dùthchanna fàsail, agus bithidh a caithrichean ann am meadhon nan caithrichean a ta air am fàsachadh.

8 Agus aithnichidh iad gur mise an Tighearn, 'nuair a chuireas mi teine san Eiphit, agus a sgriosar a h-uile luchd-cuideachaidh.

9 Anns an là sin théid teachdairean a mach uamsa ann an longaibh, a chur eagail air na h-Etiopaich air nach 'eil cùram, agus thig cràdh mòr orra, mar ann an là na h-Eiphit: oir feuch, tha e teachd.

10 Mar so tha an Tighearna Dia ag ràdh, Cuiridh mise fòs cosgadh air mòr-shluagh na h-Eiphit, le làimh Nebuchadne-sair rìgh Bhabiloin.

11 Bheirear e féin agus a shluagh maille ris, a' chuid a's uamhasaiche do na cinnich, a sgrios na tìre: agus tairngidh iad an claidheamh an aghaidh na h-Eiphit, agus lìonaidh iad an talamh le mairbh.

12 Agus nì mise na h-aìmhneachan tioram, agus reicidh mi am fearann ri làimh nan aingidh; agus nì mi an tìr fàs, agus na h-uile ta innte, le làimh nan coimheach: mise Iehobhah labhair.

13 Mar so tha an Tighearna Dia ag ràdh, Sgriosaidh mi fòs na h-iodholan, agus dithichidh mi Ìomhaighean a mach á Noph: agus cha bhì nì's mò prionnsa air tìr na h-Eiphit; agus cuiridh mi eagail ann am fearann na h-Eiphit.

14 Agus nì mi Patros na fhàsach, agus cuiridh mi teine ann an Soan, agus nì mi breitheanais ann an No.

15 Agus dòrtidh mi mo chorruich air Sin, neart na h-Eiphit, agus gearraidh mi as muinntir No.

16 Agus cuiridh mi teine anns an Eiphit, bithidh cràdh mòr air Sin, agus reubar No as a chéile, agus bithidh Noph gach là ann an airc.

17 Tuitidh òganaich Abhein agus Phibeseit leis a' chlaidheamh, agus imichidh na bailtean so gu daorsa.

18 Ann an Tahapanes fòs bithidh an là dorch, 'nuair a bhriseas mise an sin cuing na h-Eiphit: agus sguiridh mòr-chuis a neirt innte: seadh, folaichidh neul i, agus

théid a nigheanan air falbh am braighdeanas.

19 Mar so nì mise breitheanais anns an Eiphit; agus aithnichidh iad gur mi an Tighearn.

20 Agus tharladh, anns an aon bhliadhna deug, anns a' cheud mhìos, air an t-seachdamh là do'n mhìos, gu'n d'fhàinig focal an Tighearn a m' ionnsuidh, ag ràdh,

21 A mhic an duine, blbris mise gairdean Pharaoh rìgh na h-Eiphit, agus, feuch, cha cheanglar e suas gu bhì air a leigheas, a chur crìos air g' a cheangal, g' a dheanamh làidir, a chumail a' chlaidheamh.

22 Uime sin, mar so tha an Tighearna Dia ag ràdh, Feuch, tha mise an aghaidh Pharaoh rìgh na h-Eiphit, agus brisidh mi a ghairdeanan, e sin a ta làidir, agus e sin a bhriseadh; agus bheir mi air a' chlaidheamh tuiteam as a làimh.

23 Agus sgapaidh mi na h-Eiphitich am measg nan cinneach, agus sgaoilidh mi iad feadh nan dùthchannan.

24 Agus neartaichidh mi gairdeanan rìgh Bhabiloin, agus cuiridh mi mo chlaidheamh na làimh: ach brisidh mi gairdeanan Pharaoh, agus nì e caoirean 'na fhianuis, mar dhuine a ta leònta gu bàs.

25 Ach neartaichidh mi gairdeanan rìgh Bhabiloin, agus tuitidh gairdean Pharaoh sìos; agus aithnichidh iad gur mise an Tighearn, 'nuair a chuireas mi mo chlaidheamh ann an làimh rìgh Bhabiloin, agus a shìneas e mach e air tìr na h-Eiphit.

26 Agus sgapaidh mi na h-Eiphitich am measg nan cinneach, agus sgaoilidh mi iad feadh nan dùthchannan; agus aithnichidh iad gur mi an Tighearn.

CAIB. XXXI.

1 Chuir am fàidh an céill mòrachd an Asirianaich, agus a léir-sgrìos a chionn gu'n robh a chridhe air a thogail suas; 18 nochd e gu'm buineadh Dia air an dòigh cheudna ri Pharaoh rìgh na h-Eiphit.

AGUS tharladh, anns an aon bhliadhna deug, anns an treas mìos, air a' cheud là do'n mhìos, gu'n d'fhàinig focal an Tighearn a m' ionnsuidh, ag ràdh,

2 A mhic an duine, labhair ri Pharaoh rìgh na h-Eiphit, agus r'a mhòr-chuideachd, Co ris a's cosmhuil thu ann ad mhòrachd?

3 Feuch, bu chrann seudair ann an Lebanon an t-Asirianaich, le geugaibh mais-each, agus le sgàile dhiorcha, agus le àirde mhòir; agus bha a bhàrr am measg nam meangana tiugha.

4 Thug na h-uisgeachan air fàs, dh'àraich an doimhne suas c, ruith a sruthan mu thimchioll a mheanglan, agus chuir i mach a sruthana beaga chum uile chraobha na macharach.

5 Uime sin dh'érich àirde suas os ceann uile chraobha na macharach, agus bha a mheangana lìonmlor, agus dh'fhàs a gheugan fada, le lìonmhoireachd nan uisgeachan, an uair a sgaoil e mach.

6 Rinn uile eunlaith nan speur an nid 'na gheugaibh agus fuidh a gheugaibh rug uile bheathaichean na macharach an àlach, agus fuidh a sgàile ghabh cruinneachadh mhòran chinneach còmhnuidh.

7 Mar so bha e maiseach 'na mhòrachd, ann am fad a gheuga: oir bha a fhreumh ri taobh nan uisgeacha mòra.

8 Cha b'urrainn na seudair ann an gàradh Dhé 'fhalach: cha robh na craobha giuthais cosmhuil r'a mheanganaibh, no na craobha geann-chnò cosmhuil r'a gheugaibh: cha robh crann air bith ann an gàradh Dhé cosmhuil ris 'na mhaise.

9 Rinn nì maiseach e le lìonmhoireachd a gheuga: ionnus gu'n do ghabh uile chraobhan Edein, a bha ann an gàradh Dhé, farmad ris.

10 Air an aobhar sin, mar so tha an Tighearna Dia ag ràdh, A chionn gu'n d'riun e uail as 'àirde, agus gu'n do chuir e suas a bhàrr ann am meadhon nan neul, agus gu bheil a chridhe air a thogail suas 'na àirde;

11 Uime sin thug mi thairis e do làimh aoin chumbachdaich nan cinneach: buinidh esan gu làidir ris, dh'fhuadaich mise a mach e air son a chionta.

12 Agus ghearr coimhich, a' chuid a's uamhasaiche do na cinnich, a mach e, agus dh'fhàg iad e: air na sléibhtibh, agus anns na gleanntaibh uile thuit a gheugan, agus tha a mheangain air am briseadh anns gach uile chearnaidh do'n talamh; agus dh'imich uile shluagh an domhain sios o a sgàile, agus thréig iad e.

13 Air a bhallaicheibh briste gabhaidh uile eunlaith an athair còmhnuidh, agus bithidh uile bheathaiche na macharach air a gheugaibh:

14 A chum nach àrdaicheadh crann air bith do chrannaibh nan uisgeachan, iad féin air son an àirde, agus nach cuireadh iad suas am bàrr ann measg nan tiugh-geugan, nì mòr sheasadh na croinn suas 'nan àirde, gach aon ag òl suas nan uisgeachan: oir tha iad uile air an toirt thairis gu bàs, do ionadaibh ìochdarach na talmhainn, ann am meadhon chloinn nan daoine, maille riu-san a théid sios do'n t-slochd.

15 Mar so tha an Tighearna Dia ag ràdh, Anns an là air an deachaidh e sios do'n uaigh, thug mise fa'near caoidh a dheanamh; chòmhdach mi air a shon an doimhne, agus choisg mi a tuitlean, agus bhacadh na h-uisgeacha mòra; thug mi

fòs air Lebanon caoidh air a shon, agus dh'fhannaich air a shon uile chraobhan na macharach.

16 Thug mi air na cinnich criothnachadh ri fuaim a leagaidh, 'nuair a thilg mi e sios do'n ionad ìochdarach, leosan a théid sios do'n t-slochd: agus bithidh an comhfhurtachd ann an ionadaibh ìochdarach na talmhainn aig uile chraobhan Edein, rogha agus tagha Lebanon, na h-uile ta 'g òl suas an uisge.

17 Chaidh iadsan mar an ceudna sios do'n ionad ìochdarach maille ris, a chum na dream a mharbhadh leis a' chlaidheamh; agus iadsan bu ghaidean da, a ghabh còmhnuidh fuidh a sgàile ann am meadhon nan cinneach.

18 Cò ma ta ris an cosmhuil thusa mar so ann an glòir, agus ann am mòrachd am measg chraobhan Edein? gidheadh, bheirear sios thu maille ri craobhan Edein gu àiteachan ìochdarach na talmhainn: luidhidh tu ann am meadhon na muinntir neo-thinchioll-gheartta, maille riu-san a mharbhadh leis a' chlaidheamh: so Pharaoh agus a mhòr-chuidheachd uile, deir an Tighearna Dia.

CAIB. XXXII.

1 Tuireadh air son thrioblaidhean uamhasach na h-Eiphit: 11 Sgrìosaidh claidheamh rìgh Bhablòin i. 17 Bheirear luchd-àiteachaidh na h-Eiphit sios gu ionadan ìochdarach na talmhainn.

AGUS tharladh, anns an dara bliadhna deug, anns an dara mìos deug, air a' cheud là do'n mhìos, gu'n d'fhàinig focal an Tighearna a m'ionnsuidh, ag ràdh,

2 A mhic an duine, tog suas tuireadh air son Pharaoh rìgh na h-Eiphit, agus abair ris, Is cosmhuil thu ri leòman 'òg do na cinnich, agus tha thu mar uabheist anns na cuntaibh; agus thàinig thu mach le d' shruthaibh, agus chuir thu troimh chèile na h-uisgeachan le d' chosaibh, agus shalaich thu an aimhnichean.

3 Mar so tha an Tighearna Dia ag ràdh, Sgaoilidh mise uime sin mò lion os do cheann, le cuideachd mhòran chinneach, agus bheir iad a nìos thu ann am lìon.

4 An sin fàgaidh mi air an talamh thu, tilgidh mi mach air an fhàiche luim thu, agus bheir mi air uile eunlaith an athair luidhe ort, agus bheir mi do uile bheathaicheibh na talmhainn an sàth dhìot.

5 Agus cuiridh mi d' fheoil air na sléibhtibh, agus lìonaidh mi na glinn le do thulaicheibh.

6 Uisgichidh mi fòs le d' fhuil d' fearann anns am bheil thu a' snàmh, gu ruig na sléibhteann; agus bithidh na h-aimhnichean làn dìot.

7 Agus an uair a chluireas mi as thu, folaichidh mi na nèamhan, agus ui mi an reulta dorch: còmhdaichidh mi a' ghrian

le neul, agus cha toir a' ghealach seachad a solus.

8 Uile sholuis dealrach¹ nèimh ni mi dorchas os do cheann, agus cuiridh mi dorchadas air d' fhearann, deir an Tighearna Dia.

9 Cuiridh mi fòs doilghios air cridheach-aibh mhòran dhaoine, 'nuair a bheir mi do léir-sgrìos am measg nan cinneach, gus na dùthchanna nach b' aithne dhuit.

10 Seadh, cuiridh mi air mòran dhaoine uamhas do d' thaobh, agus bithidh eagal ro mhòr air an rìghribh air do shon, nuair thogas² mise mo chlaidheamh 'nan làth-air; agus crìothnaichidh iad ann an tìota; gach aon air son a bheatha féin, ann an là do leagaidh-sa.

11 Oir mar so tha an Tighearna Dia ag ràdh, Thig claidheamh rìgh Bhabiloìn ort.

12 Le claidhibh nan cumhachdach bheir mise air do mhòr-chuideachd tuiteam, leo-san uile a's uamhasaiche do na cinnich; agus millidh iad mòr-chuis na h-Eiphit, agus bithidh a mòr-shluagh gu léir air an sgrìos.

13 Sgrìosaidh mi fòs a h-ainmhidhean uile o thaobh nan uisgeacha mòra, agus cha chuir cos duine dragh orra tuilleadh, ni mò ghluaisear iad le ionga ainmhidh.

14 An sin ni mise an uisgeachan domhain³, agus bheir mi air an ainmhnichian ruith mar oladh, deir an Tighearna, Dia.

15 'Nuair a ni mi tìr na h-Eiphit 'na fàsach, agus a bhios an dùthaich falamh do'n ni sin do'n robh i làn, 'nuair a bhuaileas mi na h-uile ta chòmhnuidh innte, an sin aithnichidh iad gur mise an Tighearna.

16 So an tuireadh⁴ leis an tuir iad os a ceann: ni nigheana nan cinneach caoidh air a son: ni iad caoidh air son, air son na h-Eiphit, agus air son a mòr-shluaigh uile, deir an Tighearna Dia.

17 Tharladh mar an ceudna, san dara bliadhna deug, air a' chùigeamh là deug do'n mhìos, gu'n d'fhàinig focal an Tighearna a m' ionnsuidh, ag ràdh,

18 A mhic an duine, dean cumha air son mòr-shluaigh na h-Eiphit, agus tilg sìos i, i féin agus nigheana nan cinneach iomraiteach, gu ionadan ìochdarach na talmhainn, maille riu-san a théid sìos do'n t-slochd.

19 Cò air am bheil thu toirt barrachd ann am maise? imich sìos, agus luidh leis na neo-thimchioll-ghearrta.

20 Tuitidh iad 'nam meadhon-san a mharbhadh leis a' chlaidheamh: thugadh thairis do'n chlaidheamh i: tairngibh a mach i féin agus a sluagh gu h-ìomlan.

21 Labhraidh cinn-fheadhna nan cumh-

achdach ris o mheadhon an ionaid ìochd-araich, maille riu-san a chuidich leis: chaidh iad sìos, tha iad 'nan luidhe leis na neo-thimchioll-ghearrta a mharbhadh leis a' chlaidheamh.

22 Tha Asur an sin agus a chuideachd uile: tha 'uaighean-sau m' a thimchioll: tha iad uile marbh, air tuiteam leis a' chlaidheamh.

23 Tha an uaighean air an suidheachadh air gach taobh do'n t-slochd, agus tha a chuideachd mu thimchioll 'uaighe: iad uile air am marbhadh, air tuiteam leis a' chlaidheamh, a dhùisg uamhas ann an tìr nam beò.

24 An sin tha Elam agus a shluagh uile mu thimchioll 'uaighe, iad uile air am marbhadh, air tuiteam leis a' chlaidheamh; chaidh iadsan sìos neo-thimchioll-ghearrta gu ionadan ìochdarach na talmhainn, a dhùisg uamhas ann an tìr nam beò; gidheadh ghiùlain iad an nàire leo-san a chaidh sìos do'n t-slochd.

25 Ann am meadhon nam marbh shuidhich iad leabadh dha maille r'a uile shluagh: tha an uaighean m' a thimchioll, iad uile neo-thimchioll-ghearrta, air am marbhadh leis a' chlaidheamh: ged dhùisgeadh an uamhas ann an tìr nam beò, gidheadh ghiùlain iad an nàire leo-san a chaidh sìos do'n t-slochd: chuireadh e ann am meadhon na muinntir a mharbhadh.

26 An sin tha Mesech, Tubal, agus a shluagh uile; tha an uaighean m' a thimchioll. iad uile neo-thimchioll-ghearrta, air am marbhadh leis a' chlaidheamh, ged sgaoil iad an uamhas ann an tìr nam beò.

27 Agus cha luidh iad leis na cumhachdaich, a thuit do na neo-thimchioll-ghearrta, a chaidh sìos do ifrinn le 'n armaibh⁵ cogaidh: agus chuir iad an claidhean fuidh 'n cinn, ach bithidh an aingidheachd air an cnàmhan, ge b' iad uamhas nan cumhachdach ann an tìr nam beò.

28 Seadh, brisear thu ann am meadhon nan neo-thimchioll-ghearrta, agus luidhidh tu leo-san a mharbhadh leis a' chlaidheamh.

29 An sin tha Edom, a rìghrean, agus a phrionnsachan uile, a ta le 'n neart 'nan luidhe ann am fochair na muinntir a mharbhabh leis a' chlaidheamh: luidhidh iad leis na neo-thimchioll-ghearrta, agus leo-san a théid sìos do'n t-slochd.

30 An sin tha prionnsachan na h-àirde tuath, an t-ìomlan dùbh, agus na Sidonaich uile, a chaidh sìos leis na mairbh, le 'n uamhas tha nàir orra d'an cumhachd;

¹ loinreach, drithlineach.

² ghluaisear, chrathas. Eabh.

³ soilleir.

⁴ cumha.

⁵ aefuinn.

agus tha iad 'nan luidhe neo-thimchioll-ghearrta leo-san a mharbhadh leis a' chlaidheamh, agus a' giùlan an nàire leosan a thèid sìos do'n t-slochd.

31 Chi Pharaoh iad, agus bithidh comh-fhurtachd aige os ceann a mhòr-chuid-eachd uile, *eadhon* Pharaoh agus 'fheachd gu léir air am marbhadh leis a' chlaidheamh, deir an Tighearna Dia.

32 Oir dhùisg mise m' uamhas ann an tìr nam beò: agus suidhichear esan ann am meadhon nan neo-thimchioll-ghearrta, leo-san a mharbhadh leis a' chlaidheamh, Pharaoh agus a shluagh gu léir, deir an Tighearna Dia.

CAIB. XXXIII.

1 *Nochdadh do Eseciel a dhleasdanas mar fhear-faire do thigh Israeil. 10 Cha 'n 'eil tlachd air bith aig Dia ann am bàs an aingidh. 21 'Nuair ghlacadh Ierusalem rinn Eseciel fàidheadaireachd gu'm biodh am fearann air a chur fàs. 30 Cealg-airreachd an t-sluaigh.*

A RIS thàinig focal an Tighearn a m' ionnsuidh, ag ràdh,

2 A mhic an duine, labhair ri cloinn do shluaigh, agus abair riu, 'Nuair a bheir mise an claidheamh air dùthaich, ma ghabhas muinntir na dùthcha do'n crìoch-aibh féin, agus gu'n cuir iad e gu bhi 'na fhear-faire dhoibh;

3 Ma shéideas e 'n trompaid 'nuair a chi e an claidheamh a' teachd air an fhear-ann, agus ma bheir e rabhadh¹ do'n t-sluaigh;

4 An sin, cò air bith a chluinneas fuaim na trompaid, agus nach gabh rabhadh; ma thig an claidheamh, agus gu'n toir e air falbh e, bithidh 'fhuil air a cheann féin.

5 Chual e fuaim na trompaid, agus cha do ghabh e rabhadh, bithidh 'fhuil air féin: ach esan a ghabhas rabhadh tèarnaidh e 'anam.

6 Ach ma chi am fear-faire an claidheamh a' teachd, agus nach séid e 'n trompaid, agus nach faigh an sluagh rabhadh; ma thig an claidheamh, agus gu'n toir e aon neach air falbh uatha, tha e air a thoirt air falbh 'na aingidheachd: ach iarraidh mise 'fhuil air làimh an fhìr-fhaire.

7 Mar sin thusa, a mhic an duine, chuir mi thu mar fhear-faire chum tighe Israeil: uime sin éisdidh tu am focal o m' bheul-sa, agus bheir thu dhoibh rabhadh uam-sa.

8 'Nuair a their mise ris an aingidh, O dhuine aingidh, gheibh thu gu deimhin bàs; mur labhair thusa chum an t-aingidh a thoirmeasg o 'shlighe², gheibh an duine aingidh sin bàs 'na aingidheachd: ach air do làimh-sa iarraidh mise 'fhuil.

9 Gidheadh, ma bheir thusa rabhadh

do'n aingidh mu thimchioll a shlighe, gu pilladh uaipe: mur pill e o 'shlighe, gheibh e bàs 'na aingidheachd, ach thear-unn thusa t' anam.

10 Uime sin, a mhic an duine, labhair thusa ri thigh Israeil, Mar so deir sibh, ag ràdh, Ma bhios ar cionta agus ar lochdan oirnn, agus gu'n searg sinn anna, cionnus a dh'fheudas sinn mar sin bhi beò?

11 Abair riu, Mar is beò mise, deir an Tighearna Dia, cha 'n 'eil tlachd air bith agam-sa ann am bàs an aingidh; ach gu'm pilladh an t-aingidh o 'shlighe, agus gu'm biodh e beò: pillibh, pillibh, o 'ur droch shlighibh, c'ar son a bhàsaicheas sibh, O thigh Israeil?

12 Uime sin, a mhic an duine, abair thusa ri cloinn do shluaigh, Cha dean fìreantachd an fhìrein a shaoradh ann an là a chionta: agus 'na aingidheachd cha tuit an t-aingidh anns an là sam pill e o 'chionta; ni mò dh'fheudas am fìrean a bhi beò air son 'fhìreantachd anns an là sam peacaich e.

13 'Nuair a their mise ris an fhìrean gu mair e gu deimhin beò: ma ni e bun á 'fhìreantachd féin, agus gu'n dean e aingidheachd, cha chuimhnichear 'uile fhìreantachd; ach air son 'aingidheachd a rinn e, air son sin gheibh e bàs.

14 A ris, an uair a their mise ris an aingidh, Gheibh thu gu deimhin bàs: ma philleas e o 'pheacadh, agus gu'n dean e an ni sin a ta dligheach agus ceart;

15 Ma bheir an t-aingidh air ais an geall, agus gu'n aisig e a ris an ni a ghoid e, gu'n gluais e ann an reachdaibh na beatha, gun aingidheachd a chur an gnìomh; mairidh e gu deimhin beò, cha'n fhaigh e bàs.

16 Cha chuimhnichear dha lochd air bith a rinn e: rinn e ann a ta dleasdhanach agus ceart: mairidh e gu cinnteach beò.

17 Gidheadh tha clann do shluaigh-sa ag ràdh, Cha 'n 'eil slighe an Tighearna cothromach, Ach air an son-san, cha'n 'eil an slighe cothromach.

18 'Nuair a philleas am fìrean air ais o 'fhìreantachd, agus a chuireas e 'n gnìomh aingidheachd, gheibh e bàs d'a chionn.

19 Ach ma philleas an t-aingidh air falbh o 'aingidheachd, agus gu'n dean e an ni sin a ta dleasdhanach agus ceart, mairidh e beò d'a chionn.

20 Gidheadh tha sibh ag ràdh, Cha 'n 'eil slighe an Tighearna cothromach: O thigh Israeil, bheir mise breth oirbh, air gach aon a réir a shlighe.

21 Agus tharladh anns an aon bhliadhna deug d' ar bruid, anns an deicheamh mìos, air a' chùigeamh là do'n mhios, gu'n d'thàinig aon a theich o Ierusalem a

¹ roghadh.

² chum rabhadh thoirt

do'n aingidh pillinn o 'shlighe.

m' ionnsuidh-sa, ag ràdh, Bhuaileadh am baile.

22 Agus bha làmh an Tighearn orm anns an an-moch, mu'n d'fhàinig esan a theich, agus dh'fhosgail i mo bheul, gus an d'fhàinig e thugam anns a' mhaduinn; agus dh'fhosgladh mo bheul, agus cha robh mi ni bu mhò balbh.

23 An sin thàinig focal an Tighearn a m' ionnsuidh, ag ràdh,

24 A mhic an duine, tha iadsan a ta 'g àiteachadh nan ionada fàsa sin do fhearann Israeil a' labhairt, ag ràdh, Bha Abraham 'na aonar, agus shealbhaich e am fearann: ach tha sinne lionmhor, thugadh am fearann dhuinn mar sheilbh.

25 Air an aobhar sin abair riu, Mar so tha an Tighearna Dia ag ràdh, Tha sibh ag itheadh maille ris an fhuil, agus a' togail 'ur sùl suas ri 'ur n-iodholaibh, agus a' dòrtadh fola; agus an sealbhaich sibh am fearann?

26 Tha sibh a' seasamh air 'ur claidheamh, tha sibh a' deanamh gràineileachd, agus a' truailleadh, gach aon *agaibh*, mnà a choimhearsnaich; agus an sealbhaich sibh am fearann?

27 Abair thusa riu mar so, Mar so tha an Tighearna Dia ag ràdh, Mar is beò nùise, gu deimhin tuitidh iadsan a ta anns na h-ionadaibh fàsa leis a' chlaideamh; agus esan a ta sa' mhachair sgaoilte, bheir mise do na beathaichibh r'a itheadh; agus bàsaichidh iadsan a bhios anns na daingnichibh agus anns na h-uamhaibh leis a' phlàigh.

28 Oir fàgaidh mise am fearann ro fhàisail, agus sguiridh mòrachd a threise: agus bithidh slèibhtean Israeil fàs, air chor as nach téid ann nach trompa¹.

29 An sin aithnichidh iad gur mise an Tighearn, 'nuair a nì mi am fearann ro fhàisail, air son an uile ghràineileachdan a chuir iad an gnìomh.

30 Agus thusa, a mhic an duine, tha clann do shluaigh an còmhnuidh a' labhairt umad ri taobh nam ballachan, agus ann an dorsaibh nan tighean, agus a' labhairt aon r'a chéile, gach aon r'a bhràthair, ag ràdh, Thigibh, guidheam oirbh, agus éisdibh ciod am focal a ta teachd a mach o'n Tighearn.

31 Agus tha iad a' teachd a d' ionnsuidh mar chruinneachadh sluaigh, agus tha iad a' suidhe ann ad làthair mar mo phobull-sa, agus tha iad ag éisdeachd do bhriathran, ach cha'n 'eil iad 'gan deanamh: oir tha iad a' taisbeanadh mòran gràidh le 'm beul, ach tha an cridhe a' dol an déigh an saint.

32 Agus, feuch, tha thusa dhoibh mar òran ro thaitneach duine aig am bheil

guth binn, agus a chluicheas gu maith air inneal ciùil: oir tha iad ag éisdeachd do bhriathran, ach cha'n 'eil iad 'gan deanamh.

33 Agus 'nuair a thig so gu crìch, (feuch tha e teachd,) an sin aithnichidh iad gu'n robh fàidh 'nam measg.

CAIB. XXXIV.

1 *Achmhasan do aodhairibh Israeil.* 7 *Breitheanas Dhé 'nan aghaidh:* 11 *A fhrèasdal mu thimchioll a shluaigh.* 20 *Beannachdan rioghachd Chrìosd.*

AGUS thàinig focal an Tighearn a m' ionnsuidh, ag ràdh,

2 A mhic an duine, dean fàistneachd an aghaidh aodhairean Israeil, dean fàistneachd, agus abair riu, O aodhairean, mar so tha an Tighearna Dia ag ràdh, Mo thruaighe aodhairean Israeil, a ta 'g am beathachadh féin; nach bu chòir do na h-aodhairibh an treud a bheathachadh.

3 Tha sibh ag itheadh na saill, agus 'g ur n-éideadh féin leis an olainn, tha sibh a marbladh nan ainmhidhean biadhtha: cha'n 'eil sibh a' beathachadh an treud.

4 Cha do neartaich sibh an lag, ni mò leigliis sibh an tinn, ni mò cheangail sibh suas e sin a bha briste, ni mò thug sibh air ais a' chuid a sgapadh, ni mò dh'iarr sibh a' chuid a chailleadh; ach le h-ainm-eart riaghlaidh sibh iad, agus le h-an-iodh.

5 Agus sgapadh iad le dith aodhairean: agus bha iad 'nam biadh do uile bheathaichibh na macharach, an uair a bha iad air an sgapadh.

6 Chaidh mo chaoraich-sa air seacharan air feadh nan uile bheann, agus air gach sliabh àrd: seadh, bha mo threud air a sgapadh air aghaidh na talmhainn uile, agus cha robh aon neach 'g an sireadh no 'g an iarraidh.

7 Uime sin, O aodhairean, éisdibh-se focal an Tighearna;

8 Mar is beò mise, tha an Tighearna Dia ag ràdh, gu deimhin a chionn gu'n robh mo threud 'nan creich, agus gu'n d'rinneadh mo threud 'nam biadh do uile bheathaichibh na macharach, a chionn nach robh aodhaire sam bith ann, ni mò dh'iarr m' aodhairean mo threud, ach bheathaich na h-aodhairean iad féin, agus cha do bhiath iad mo threud-sa:

9 Uime sin, O aodhairean éisdibh focal an Tighearna.

10 Mar so tha an Tighearna Dia ag ràdh, Feuch, tha mise an aghaidh nan aodhairean, agus iarraidh mi mo threud air an làimh, agus bheir mi orra sgur do bhiathadh an treud; ni mò bheathaicheas na h-aodhairean iad féin tuilleadh; oir saoraidh mise mo threud as am beul, a chum nach bi iad dhoibh 'nam biadh.

11 Oir mar so tha an Tighearna Dia ag

¹ *rompa.*

ràdh, Feuch, lorgaichidh mise, mise féin, mo chaoarach, agus iarraidh mi mach iad.

12 Amhuil a lorgaicheas aodhaire mach a threud, anns an là bhios e measg a chaorach a chaidh a sgapadh; mar sin iarraidh mise mo chaoarach féin, agus saoraidh mi iad as na h-uile àite gus an robh iad air an sgànradh, anns an là neulach agus dhorch.

13 Agus bheir mi mach iad o mheasg nan cinneach, agus cruinnichidh mi iad o na dùthchannaibh, agus bheir mi iad gu'm fearann féin, agus ionaltraidh mi iad air sléibhtibh Israeil, an cois nan aimhnichean, agus ann an uile ionadaibh àitichte na tìre.

14 Ionaltraidh mi iad ann an innis mhaith, agus bithidh am buail air sléibhtibh àrda Israeil: an sin luidhidh iad ann an cluain mhaith, agus ionaltraidh iad ann an innis reamhair air sléibhtibh Israeil.

15 Beathaichidh mise mo threud, agus bheir mi orra luidhe sìos, deir an Tighearna Dia.

16 Iarraidh mi a' chuid a chailleadh, agus bheir mi air ais a' chuid a dh'fhuadaicheadh air falbh, agus ceanglaidh mi suas a' chuid a bhriseadh, agus neartaichidh mi a' chuid a bha tinn: ach sgriosaidh mi an reamhar agus an làidir; beathaichidh mi iad sin le breitheanas.

17 Agus air 'ur son-sa, O mo threud; mar so tha an Tighearna Dia ag ràdh, Feuch, bheir mise breth eadar spréidh agus spréidh, eadar na reitheachan agus na gabhair fhìrionn.

18 An ni suarach leibhse an innis mhaith itheadh suas, ach gu'n saltair sibh fòs a' chuid eile do'n ionalttradh sìos fuidh 'ur cosaibh? agus òl do na h-uisgeachan domhain, ach gur éigin duibh a' chuid eile a shalachadh le 'ur cosaibh.

19 Agus air son mo threud-sa, tha iad ag itheadh an ni sin a shaltair sibh fuidh 'ur cosaibh, agus ag òl an ni sin a rinn 'ur cosan a thruailleadh.

20 Air an aobhar sin, mar so tha an Tighearna Dia ag ràdh riu, Feuch, bheir mise, mise féin, breth eadar an spréidh reamhar agus an spréidh chaol.

21 A chionn gu'n do thug sibh le taobh agus le slinnein, agus gu'n d'rinn sibh an t-euslan uile a phurradh le 'ur n-adharcaibh, gus an do sgaimir¹ sibh iad o chèile:

22 Uime sin tèrnaidh mise mo threud, agus cha bhi iad nìs mò 'nan creich; agus bheir mi breth eadar spréidh agus spréidh.

23 Agus cuiridh mi suas aodhaire os an ceann, agus beathaichidh esan iad, *eadhon* mo sheirbhiseach Daibhidh;

beathaichidh esan iad, agus bithidh e dhoibh 'na aodhaire.

24 Agus bithidh mise Iehobhah ann am Dhia dhoibh, agus mo sheirbhiseach Daibhidh 'na phrionnsa 'nam measg; labhair mise Iehobhah e.

25 Agus ni mise coimhcheangal sìthe riu, agus cuiridh mi cosgadh air na droch bheathaichibh anns an fhearann; agus gabhaidh iad còmhnuidh gu tèaruainte san fhàsach agus coildidh iad anns na coilltibh.

26 Agus ni mi iadsan, agus na h-ionadan timchioll mo shléibh 'nam beannachadh; agus bheir mi air an fhras teachd a nuas 'na h-àm: bithidh frasan do bheannachdaibh ann.

27 Agus bheir craobh na macharach seachad a toradh, agus bheir an talamh seachad a chinneas, agus bithidh iad tèaruainte 'nan dùthaich, agus aithnichidh iad gur mise an Tighearn, 'nuair a bhriseas mi cuibhrichean an cuinge, agus a shaoras mi iad á làimh na muinntir a ghabh seirbhis diubh.

28 Agus cha bhi iad nìs mò 'nan cobhartaich do na cinnich, ni mò ni beathaichean an fhearainn an slugadh suas: ach gabhaidh iad còmhnuidh gu tèaruainte, agus cha chuir aon neach eagail orra.

29 Agus togaidh mi suas doibh meangan² cliùiteach, agus cha bhi iad air an claoidh nìs mò le gort anns an fhearann, ni mò ghluaineas iad masladh nan cinn-each nìs faide.

30 Mar so aithnichidh iad gu bheil mise an Tighearna Dia maille riu, agus gur iadsan, tigh Israeil, mo shluagh, deir an Tighearna Dia.

31 Agus sibhse, mo threud, treud m' ionaltraidh, is daoine sibh, agus is mise bhuir Dia, deir au Tighearna Dia.

CAIB. XXXV.

1 *Nithear breitheanas air sliabh Sheir, 4 agus cuirear a bhailean fàs do bhrìgh gu'n do dhòirt e fuil cloinne Israeil.*

OS bàrr, thàinig focal an Tighearn a m' ionnsuidh, ag ràdh,

2 A mhic an duine, cuir d'aghaidh ri sliabh Sheir, agus dean fàistneachd 'na aghaidh,

3 Agus abair ris, Mar so tha an Tighearna Dia ag ràdh, Feuch, O shléibh Sheir, tha mise a'd' aghaidh, agus sinidh mi mo làmh a mach a'd' aghaidh, agus ni mi sgrios agus léir-sgrios ort.

4 Ni mi do bhailean 'nam fàsach, agus bithidh tu a'd' nochd-làrach, agus bithidh fios agad gur mise an Tighearn.

5 A chionn gu'n robh fuath bith-bhuan agad, agus gu'n do dhòirt thu *fuil* cloinne Israeil le neart a' chlaidheimh, ann an àm

¹ sgap.

² faillean.

an airce, anns an àm an robh deireadh aig an aingidheachd.

6 Air an aobhar sin, mar is beò mise, tha an Tighearna Dia ag ràdh, ulluichidh mi thusa air son fola, agus ni fuil do dhian ruagadh: a chionn nach d' fhuath-aich thu fuil, ni fuil do dhian-ruagadh.

7 Mar so ni mi léir-sgrìos air sliabh Sheir, agus gearraidh mi uaithe an ti théid a mach agus an ti a philleas air ais.

8 Agus lìonaidh mi a shléibhteann le 'dhaoine marbhtha: air do chnocaibh, agus ann ad ghleanntaibh, agus ann ad uile aimhnichean tuitidh iadsan a mharbhar leis a' chhlaidheamh.

9 Ni mise fàsaichean sìorruidh dhìot, agus cha togar a ris do bhailtean; agus aithnichidh sibh gur mise an Tighearna;

10 A chionn gu'n d' thubhairt thu, Bithidh an dà chinneach so, agus an dà dhùthaich so agam-sa, agus sealbhaichidh sinn iad: ged bha an Tighearna an sin:

11 Uime sin, mar is beò mise, tha an Tighearna Dia ag ràdh, ni mi eadhon a réir d'fheirge, agus a réir d'fharmaid a nochd thu, le d'fhuath 'nan aghaidh; agus ni mi mi féin aithnichte 'nam measg, an uair a bheir mi breth ortsa.

12 Agus aithnichidh tusa gur mi an Tighearna, agus gu'n cuala mi t' uile thoibheum an aghaidh shléibhteann Israeil, ag ràdh, Dh'fhàgadh fàs iad, agus thugadh iad dhuinne g' an slugadh.

13 Mar so le 'ur beul rinn sibh uail ann am aghaidh-sa, agus mheudaich sibh 'ur briathran ann am aghaidh; chuala mise.

14 Mar so tha an Tighearna Dia ag ràdh, An uair a ni an talamh uile gàird-eachas, ni mise fàs thusa.

15 Mar a rinn thusa gàird-eachas os ceann oighreachd tighe Israeil, a chionn gu'n robh i fàs, mar sin ni mise riutsa: bithidh tu fàs, O shléibh Sheir, agus Idumea uile, an t-ionmhan deth: agus aithnichidh iad gur mise an Tighearna.

CAIB. XXXVI.

1 Sgrìosar fuigheall nan cinneach a chionn gu'n d' rinn iad gàird-eachas thar léir-sgrìos Iudea, 7 agus àrdachear sléibhteann Israeil. 20 Thig Dia sluagh Israeil uaithe air son am peacanna, ach cruinnichidh e iad a ris le mòr-thrócair.

MAR an ceudna, a mhic an duine, dean fàistneachd do shléibhtibh Israeil, agus abair, A shléibhte Israeil, cluinnibh focal an Tighearna.

2 Mar so tha an Tighearna Dia ag ràdh, A chionn gu'n d' thubhairt an nàmhaid 'nur n-aghaidh, Aha, is leinne fòs na seann ionada àrda mar sheilbh:

3 Uime sin, dean fàistneachd agus abair, Mar so tha an Tighearna Dia ag ràdh, A chionn gu'n d' rinn iad fàs sibh, agus gu'n

do shluig iad suas sibh air gach taobh, gu bhi 'nur seilbh do fhuigheall nan cinneach, agus gu bheil sibh air 'ur gabhail ann am beul luchd seanachais, agus 'nur mi-chlù am measg dhaoine:

4 Air an aobhar sin, a shléibhte Israeil, éisdibh focal an Tighearna, Mar so tha an Tighearna Dia ag ràdh ris na sléibhtibh agus ris na cnocaibh, ris na sruthaibh, agus ris na gleanntaibh, ris na fàsaichibh uaigneach, agus ris na bailtibh a thréigeadh, a dh'fhàs 'nan cobhartaich agus 'nam ball-fanaid do fhuigheall nan cinneach mu'n cuairt:

5 Air an aobhar sin mar so tha an Tighearna Dia ag ràdh, Gu deimhin ann an teine m'eud labhair mi 'n aghaidh fuighill nan cinneach, agus an aghaidh Idumea uile, a ghabh mo dhùthaich-sa gu bhi 'na seilbh dhoibh, le gàird-eachas an uile chridhe, le intinn aingidh, g'a toirt thairis mar chreich.

6 Dean fàistneachd uime sin mu thimchioll fearainn Israeil, agus abair ris na sléibhtibh agus ris na cnocaibh, ris na sruthaibh agus ris na gleanntaibh, Mar so tha an Tighearna Dia ag ràdh, Feuch, labhair mise ann am eud agus ann am chorruih, a chionn gu'n do ghiùlain sibh tàmailte nan cinneach.

7 Air an aobhar sin, mar so tha an Tighearna Dia ag ràdh, Thog mise suas mo làmh; Gu deimhin na cinnich mu'n cuairt duibh giùlainidh iad féin am mas-ladh.

8 Ach sibhse, O shléibhte Israeil, cuiridh sibh a mach 'ur geugan, agus bheir sibh 'ur toradh do m' shluagh-sa Israel, oir tha iad am fagus a chum teachd.

9 Oir feuch, tha mise leibh, agus pillidh mi ruibh, agus bithidh sibh air 'ur treabh-adh agus air 'ur cur.

10 Agus ni mi daoine lìonmhor oirbh, uile thigh Israeil gu h-ionmhan; agus bithidh na bailtean air an àiteachadh, agus bithidh na h-ionadan fàs air an togail.

11 Agus ni mi lìonmhor oirbh duine agus ainmhidh, agus fàsaidh iad lìonmhor, agus bheir iad toradh; agus suidhicidh mi sibh mar a bha sibh o shean, agus ni mi ruibh ni's fearr na ann 'ur toiseach; agus aithnichidh sibh gur mise an Tighearna.

12 Seadh, bheir mi air daoine coiseachd oirbh, eadhon mo phobull Israel, agus sealbhaichidh iadsan thu, agus bithidh tu dhoibh a'd' oighreachd, agus cha dean thu iad ni's mò nìreasbhuidheach.

13 Mar so tha an Tighearna Dia ag ràdh, A chionn gu'n abair iad riut, Thusa a shluig suas daoine, agus a dh'fhàg gun sliochd do chinnich:

14 Uime sin cha sluig thu daoine ni's

mò, agus cha'n fhàg thu do chinnich nì's mò gun sliochd, deir an Tighearna Dia.

15 Nì mò dh'fhuingeas mise gu'n cluinnear tàmailte nan cinneach annad tuilleadh, nì mò ghùilaineas tu masladh an t-sluaigh nì's faide, nì mò bheir thu air do chinnich tuiteam tuilleadh, deir an Tighearna Dia.

16 Os bàrr, thàinig focal an Tighearn a m' ionnsuidh, ag ràdh,

17 A mhic an duine, 'nuair bha tigh Israeil a chòmhnuidh 'nan dùthaich féin, thruaill iad i le an slighe féin, agus le an deanadas: bha an slighe ann am làthair-sa mar neo-ghloine mnà a chuireadh air leth.

18 Air an aobhar sin dhòirt mi orra mo chorruich, air son na fola a dhòirt iad air an fhearann, agus air son an iodhola leis an d'rinn iad a thruaillleadh:

19 Agus sgap mi iad am measg nan cinneach, agus bha iad air an sgaioileadh air feadh nan dùthchannan. A réir an slighe, agus a réir an deanadais thug mise breth orra.

20 Agus 'nuair chaidh iad a steach a chum nan cinneach gus an deachaidh iad, thruaill iad sin m' ainm naomh-sa 'nuair a thubhairt iad riu, Is iad so sluagh an Tighearna, gidheadh chaidh iad a mach as 'fhearann.

21 Ach ghabh mise truas diubh air son m' ainme naoimh féin, a thruaill tigh Israeil am measg nan cinneach gus an deachaidh iad.

22 Air an aobhar sin, abair ri tigh Israeil, Mar so tha an Tighearna Dia ag ràdh, Cha'n 'eil mi deanamh so air 'ur son-sa, O thigh Israeil, ach air son m' ainme naoimh féin, a thruaill sibhse am measg nan cinneach gus an deachaidh sibh.

23 Ach naomhaichidh mi m' ainm mòr féin, a bha air a thruaillleadh am measg nan cinneach, a thruaill sibhse 'nam meadhon; agus aithnichidh na cinnich gur mise an Tighearn, tha an Tighearna Dia ag ràdh, 'nuair a bhios mi air mo naomhachadh annaibh-sa fa chomhair an sùl.

24 Oir bheir mi sibh o mheasg nan cinneach, agus tionailidh mi sibh as na h-uile dhùthchannaibh, agus bheir mi sibh gu 'ur fearann féin:

25 An sin crathaidh mi uisge glan oirbh, agus bithidh sibh glan: o 'ur n-uile shalachar, agus o 'ur n'uile iodholaibh glanaidh mi sibh.

26 Bheir mi fòs dhuibh cridhe nuadh, agus cuiridh mi spiorad nuadh an taobh a stigh dhihbh; agus buinidh mi air falbh an cridhe cloiche as 'ur feoil, agus bheir mi dhuibh cridhe feòla.

27 Agus cuiridh mi mo spiorad an taobh

a stigh dhihbh, agus bheir mi oirbh gluasad ann am reachdaibh, agus coimhididh sibh mo bhreitheanais, agus nì sibh iad.

28 Agus gabhaidh sibh còmhnuidh anns an fhearann a thug mise do 'ur n-aithrichibh, agus bithidh sibh 'nur sluagh dhomh-sa, agus bithidh mise ann am Dhia dhuibh-se.

29 Saoraidh mi sibh fòs o 'ur n-uile shalacharaibh; agus gairmidh mi air an arbhar, agus meudaichidh mi e, agus cha chuir mi gort air bith oirbh.

30 Agus meudaichidh mi meas na craoibhe, agus cinneas na macharach, air chlor as nach faigh sibh nì's mò masladh gorta measg nan cinneach.

31 An sin cuimhnichidh sibh 'ur droch shlighe féin, agus 'ur deanadais nach robh maith, agus fuathaichidh sibh sibh féin ann 'ur sealladh féin, air son 'ur n-eu-ceartan, agus air son 'ur gràineileachdan.

32 Cha'n ann air 'ur son-sa ta mise a' deanamh so, tha an Tighearna Dia ag ràdh, biodh fios agaibh: biodh nàire agus amhluidh oirbh air son 'ur sligheanna féin, O thigh Israeil.

33 Mar so tha an Tighearna Dia ag ràdh, Anns an là san glan mi sibh o 'ur n-uile aingidheachd, bheir mi fòs fa'near gu'n gabh sibh còmhnuidh anns na caithrichibh, agus bithidh na h-ionadan fàsa air an togail.

34 Agus bithidh am fearann fàs air a threabhadh, an àit e bhi 'na luidhe fàs an sealladh gach aoin a ghabh seachad,

35 Agus their iad, Tha an tìr so a bha uaigneach, air fàs mar ghàradh Edein; agus na caithrichean falamh, fàs, agus millte, tha iad air an daingneachadh, agus air an àiteachadh.

36 An sin aithnichidh na cinnich a dh'fhàgadh air gach taobh dhihbh gur mise an Tighearn a thogas na h-àitean sgriosta, a shuidhicheas an t-ionad fàsa: mise Iehobhah labhair, agus nì mi.

37 Mar so tha an Tighearna Dia ag ràdh, Bithidh mise fathasd air m' iarraidh san nì so le tigh Israeil, a chum a dheanamh air an son; nì mi lìonmhor iad le daoine mar threud.

38 Mar an treud naomh, mar threud Ierusalem 'na féilibh àrda: mar sin bithidh na bailtean fàs air an lìonadh le treudaibh dhaoine; agus aithnichidh iad gur mise an Tighearn.

CAIB. XXXVII.

1 Le ais-eirigh nan càmhnan tiorma nochd Dia do'n fhàidh gu'n ath-bheòthaicheadh e a shluagh le a spiorad. 15 Nìthear Israel agus Iudah 'nan aon sluagh. 21 Na beannachdan a shruthas d'an ionnsuidh o Chriosd an rìgh.

BHA làmh an Tighearn orm, agus thug e mach mi ann an spiorad an

Tighearn, agus chuir e sìos mi ann am meadhon a' ghlinne a bha làn do chnàmhan.

2 Agus thug e orm gabhail seachad orra mu'n cuairt, air gach taobh: agus, feuch, bha iad ro lionmhor anns a' mhachair sgaoilte; agus, feuch, bha iad ro thioram.

3 Agus thubhairt e rium, A mhic an duine, am feud na cnàmhan so teachd beò? agus fhreagair mise, O Thighearn Dhia, agad-sa tha fios.

4 An sin thubhairt e rium, A mhic an duine, dean fàistneachd do na cnàmhan so, agus abair riu, O chnàmha tiorma, éisdibh-sa focal an Tighearna.

5 Mar so tha an Tighearn Iehobhah ag ràdh ris na cnàmhan so, Feuch, cuiridh mise anail annaibh, agus bithidh sibh beò.

6 Agus cuiridh mi féithean oirbh, agus bheir mi air feoil fàs oirbh, agus còmh-daichidh mi sibh le craicinn, agus cuiridh mi anail annaibh; agus bithidh sibh beò, agus aithnichidh sibh gur mi an Tighearn.

7 Mar sin rinn mise fàistneachd mar a dh'àithneadh dhomh agus am feadh a bha mi ri fàistneachd, bha toirm ann, agus, feuch, crith-ghluasad, agus thàinig na cnàmha chum a chéile, cnàimh a chum a chnàmha.

8 Agus an uair a dh'amhairc mi, feuch, dh'fhàs fèithean agus feoil orra, agus chòmhdaich an craicinn iad; ach cha robh anail anna.

9 An sin thubhairt e rium, Dean fàistneachd do'n anail, dean fàistneachd, a mhic an duine, agus abair ris an anail, Mar so tha an Tighearn Iehobhah ag ràdh, Thig o na ceithir ghaothaibh, O anail, agus séid air na mairbh so, chum gu'm bi iad beò.

10 Is amhuil a rinn mise fàistneachd mar a dh'àithneadh dhomh, agus thàinig an anail do'n ionnsuidh, agus dh'fhàs iad beò, agus sheas iad air an cosaibh, arm-aile anbharr mòr.

11 An sin thubhairt e rium, A mhic an duine, is iad na cnàmhan so an t-iomlan do thigh Israeil; feuch tha iad ag ràdh, tha ar cnàmhan air tiormachadh, agus ar dòchas air a chall, is ann a tha sinn air ar gearradh as.

12 Air an aobhar sin dean fàistneachd, agus abair riu, Mar so tha an Tighearn Iehobhah ag ràdh, Feuch, O mo shluagh, fosglaidh mise bhuir n-uaighean, agus bheir mi oirbh teachd a nìs as 'ur n-uaighibh, agus bheir mi sibh gu fearann Israeil.

13 Agus aithnichibh sibh gur mise an Tighearn 'nuair a dh'fhosglas mi 'ur n-uaighean, O mo shluagh, agus a bheir mi sibh a nìs as 'ur n-uaighibh,

14 Agus a chuireas mi mo spiorad annaibh, agus a bhitheas sibh beò, agus a

shuidhicheas mi sibh 'nur fearann féin: an sin aithnichidh sibh gur mise Iehobhah a labhair, agus gu'n d'rinn mi, deir an Tighearn.

15 Thàinig focal an Tighearn a m' ionnsuidh a ris, ag ràdh,

16 A bhàrr air so, a mhic an duine, gabh thusa dhuit féin aon mhaide, agus sgrìobh air, Air son Iudah, agus air son cloinne Israeil a chompanaich: an sin gabh maide eile, agus sgrìobh air, Air son Ioseph, maide Ephraim, agus uile thighe Israeil a chompanaich.

17 Agus ceangail iad aon r'a chéile 'nan aon mhaide; agus fàsaidh iad 'nan aon ann ad làimh.

18 Agus an uair a labhras clann do shluagh riut, ag ràdh, Nach feuch thu dhuinn ciod is ciall duit leis na nithibh so?

19 Abair riu, Mar so tha an Tighearn Iehobhah ag ràdh, Feuch, gabhaidh mise maide Ioseph a ta 'n làimh Ephraim, agus fineachan Israeil, a chompanaich, agus cuiridh mi iad maille ris, maille ri maide Iudah, agus ni mi aon mhaide dhiubh, agus bithidh iad 'nan aon ann am làimh.

20 Agus bithidh na maidean air an sgrìobh thu ann ad làimh fa chomhair an sùl.

21 Agus abair riu, Mar so tha an Tighearn Iehobhah ag ràdh, Feuch, bheir mise clann Israeil o mheasg nan cinneach agus am bheil iad air imeachd, agus cruinnichidh mi iad air gach taobh, agus bheir mi iad gu'n dùthaich féin.

22 Agus ni mi aon chinneach dhiubh anns an fhearann, air sléibhtibh Israeil, agus bithidh aon righ 'na righ dhoibh uile: agus cha bhi iad nìs mò 'nan dà chinneach, ni mò bhios iad air an roinn 'nan dà rìoghachd tuilleadh air aon chor.

23 Ni mò thruailleas siad iad féin tuilleadh le 'n ìodholaibh, no le 'n nithibh fuathach, no le aon air bith do'n euceartaibh: ach saoraidh mise iad o'n uile cheannaircibh anns an robh iad ciontach, agus glanaidh mi iad: mar sin bithidh iadsan 'nan sluagh dhomh-sa, agus bithidh mise ann am Dhia dhoibh-san.

24 Agus bithidh m' òglach Daibhidh 'na righ os an ceann: agus bithidh aon bhuachaill ac' uile: gluaisidh iad fòs ann am reachdaibh, agus bheir iad fa'near m' ordnighean, agus ni siad iad.

25 Agus gabhaidh iad còmhnuidh san fhearann a thug mise do m' òglach Iacob, anns an do ghabh 'ur n-aithrichean còmhnuidh: agus gabhaidh iadsan còmhnuidh ann, iad féin, agus an clann, agus clann an cloinne gu bràth; agus bithidh m' òglach Daibhidh 'na righ dhoibh gu sìorruidh.

26 A thuilleadh air so, ni mise còimh-

cheangal sìthe riu; bithidh e 'na choimh-cheangal sìorruidh riu, agus suidhichidh mi iad, agus ni mi lìonmhor iad, agus cuiridh mi mo naomh-ionad 'nam meadhon gu bràth.

27 Bithidh mo phàillun mar an ceudna maille riu: seadh, bithidh mise dhoibhsan ann am Dhia, agus bithidh iadsan dhomh-sa 'nan sluagh.

28 Agus aithnichidh na cinnich gur mise Iehobhah a naomhaicheas Israel, an uair a bhios mo naomh-ionad 'nam meadhon gu sìorruidh.

CAIB. XXXVIII.

Fàistneachd an aghaidh Ghog: 10 a dhroch smuainte sna bliadhnaibh deireannach. 14 Sgrìosar e fèin agus a mhòr-shluagh le breitheanas namhach.

A GUS thàinig focal an Tighearn a' ionnsuidh-sa, ag ràdh,

2 A mhic an duine, cuir do ghnùis an aghaidh Ghog, tìr Mhagog, àrd phrionnsa Mheseich agus Thubail, agus dean fàistneachd 'na aghaidh,

3 Agus abair ris, Mar so tha an Tighearna Dia ag ràdh, Feuch, tha mise a' d' aghaidh, O Ghog, àrd phrionnsa Mheseich agus Thubail;

4 Agus pillidh mi air a ais thu, agus cuiridh mi dubhain ann ad ghialaibh, agus bheir mi mach thu féin, agus d'fheachd uile, eich agus marcaich, iad uile air an éideadh leis gach uile ghné *armachd*; cuideachd mhòr le tàrgaidibh agus le sgìathaibh, an t-ìomlan diubh ag iomairt chlaidhean.

5 Persia, Etiopia, agus Libia maille riu; an t-ìomlan diubh le sgéith agus ceannbheart:

6 Gomer agus a chuideachdan uile, tigh Thogarmah o na h-àirdibh tuath, agus uile bhuidhnean; mòran sluagh maille riu.

7 Bi thusa deas, agus ulluich air do shon féin, thu féin agus t' uile chuideachd a ta air an cruinneachadh thugad, agus bi dhoibh a' d' dhèin.

8 An déigh mhòran làithean thigear do d' amharc: anns na bliadhnaibh deireannach thig thu do'n fhearann a thugadh air ais o'n chlaidheamh, a chruinnicheadh á mòran chinneach, an aghaidh shléibhtean Israeil, a bha fada fàs: ach thugadh a mach as na cinnich e, agus gabhaidh iadsan uile còmhnuidh ann an tèaruinteachd.

9 Eiridh tu suas, agus thig thu mar dhoimn, bithidh tu cosmhail ri neul a dh'fholach an fhearainn, thu féin agus t' uile bhuidhnean, agus mòran sluagh maille riu.

10 Mar so tha an Tighearna Dia ag ràdh, Tarlaidh anns an là sin gu'n tig

nithe ann ad aire, agus gu'n smuainich thu droch smuainte.

11 Agus their thu, Théid mi suas gu tìr nam bailtean gun bhallachan, thig mi air a' mhuinntir a ta aig fois, a ta gabhail còmhnuidh ann an tèaruinteachd, iad uile gabhail còmhnuidh gun bhallachan, agus gun chroinn no dorsan aca,

12 A ghilacadh creiche, agus a ghilacadh cobhartaich; a thionndadh do làimhe air na h-ionadan fàsa a ta *nìs* air an àiteachadh, agus air an t-sluagh a chruinnicheadh a mach as na cinnich, a fhuair seilbh¹ agus maoin, a ta còmhnuidh ann am meadhon na tìre.

13 Their Seba, agus Dedan, agus ceann aichean Tharsuis, agus a chuid bailtean, riut, Am bheil thu air teachd a ghilacadh cobhartaich? an do chruinnich thu do chuideachd a ghilacadh creiche? a thoirt leat òir agus airgid; a thoirt air falbh spréidhe agus maoin; a ghilacadh creiche mòire?

14 Uime sin, a mhic an duine, dean fàistneachd, agus abair ri Gog, Mar so tha an Tighearna Iehobhah ag ràdh, Anns an là san gabh mo shluagh-sa Israeil còmhnuidh gu tèaruinte, nach bi fios agad?

15 Agus thig thu á d' àite, mach as na h-àirdibh tuath, thu féin agus mòran sluagh maille riut, iad uile a marcachd aireachaibh, buidheann mhòr, agus feachd cumhachdach:

16 Agus thig thu nìos an aghaidh mo shluagh-sa Israeil, mar neul a dh'fholach an fhearainn tarlaidh e sna làithibh deireannach, agus bheir mise thu an aghaidh m' fhearainn, a chum gu'n aithnich na cinnich mi, nuair a bhios mi air mo naomhachadh annad-sa, O Ghog, fa chomhair an sùl.

17 Mar so tha an Tighearna Dia ag ràdh, An tusa an ti mu'n do labhair mi o shean le m' sheirbhisich, fàidhean Israeil, a rinn fàistneachd anns na làithibh sin, rè bhliadhnachan, gu'n tugainn-sa thu 'nan aghaidh?

18 Agus tarlaidh anns an àm cheudna, nuair a thig Gog an aghaidh fearainn Israeil, tha an Tighearna Dia ag ràdh, gu'n tig mo chorruich-sa nìos ann am eudan.

19 Oir ann am eud, ann an teine mo chorruich, labhair mi: Gu cinnteach anns an là sin bithidh crith mhòr air fearann Israeil:

20 Air chor as gu'n crìochnuich ann am làthair-sa iasga na fairge, agus eunlaith an athair, agus beathaichean na macharach, agus na h-uile nithe snàgach a shnàgas air uachdar na talmhainn, agus na h-uile dhaoine a ta air aghaidh na tal-

¹ toic, nì.

² éiridh tusa suas.

mhainn; agus tilgear na sléibhteann sìos, agus tuitidh na h-ionadan àrda, agus tuitidh na h-uile balla gu talamh.

21 Agus gairmidh mise air son claidheimh 'na aghaidh air feadh m' uile sléibhteann, tha an Tighearn Iehobhal ag ràdh; bithidh claidheamh gach aoin duine an aghaidh a bhràthar.

22 Agus tagraidh mi 'na aghaidh le plàigh agus le fuil, agus frasaiddh mi air féin, agus air a bhuidhnean, agus air a' mhòr-shluagh a ta maille ris, frasan tuilteach, agus clachan-meallain mòra, teine agus pronnus.

23 Mar so ni mi mòr mi féin, agus naomhaichidh mi mi féin; agus aithnich-e ar mi ann an sùilbh mhòran chinneach, agus bithidh fios aca gur mi an Tighearn.

CAIB. XXXIX.

1 Breitheanas Dhé an aghaidh Ghog. 8 Bheir Israel buaidh air a shluagh. 11 Adhlaicear Gog ann an gleann Hamon-Gog. 17 Ithidh eoin an athair feoil nan cumhachdach, agus òlaidh iad fuil phrionnsachan na talmhainn air sléibhtibh Israel. 25 Bheirear air a h-ais bheir Iacoib.

UIME sin, dean thusa, a mhic an duine, fàistneachd an aghaidh Ghog, agus abair, Mar so tha an Tighearna Dia ag ràdh, Feuch, tha mise ann ad aghaidh, O Ghog, àrd-phrionnsa Mheseich agus Thubail:

2 Agus pillidh mi air d' ais thu, agus cha'n fhàg mi ach an seàthadh¹ cuid dhiot, agus bheir mi ort teachd a nìos o na h-àirdibh tuath, agus bheir mi thu gu sléibhteann Israel:

3 Agus buailbh mi do bhogha á do làimh chli, agus bheir mi air do shaighdean tuit-eam á do làimh dheis.

4 Tuitidh tu air sléibhtibh Israel, thu féin agus do bhuidhnean uile, agus an sluagh a ta maille riut: bheir mi thu do'n eunlaith fhuileachdach do gach seòrsa, agus do bheathaichibh na talmhainn, a chum bli air do shlugadh suas.

5 Tuitidh tu air a' mhachair sgaoilte: oir labhair mise, deir an Tighearn Iehobhal.

6 Agus cuiridh mi teine air Magog, agus am measg na muinntir a ta chòmhnuidh gu neo-umhaileach anns na h-eileanaibh; agus aithnichidh iad gur mi an Tighearn.

7 Mar so ni mi m' ainm naomh aith-nichte ann am meadhon mo phobuill Israel, agus cha leig mi m' ainm naomh a thruaillleadh nì's mò; agus bithidh fios aig na cinnich gur mi an Tighearn, aon naomh Israel.

8 Feuch thàinig e gu crìch, agus rinn-eadh e, tha an Tighearn Iehobhal ag ràdh: is e so an là mu'n do labhair mise.

9 Agus théid iadsan a ta chòmhnuidh

ann am bailtibh Israeil a mach, agus cuiridh iad ri theine, agus loisgidh iad na h-airm, an targaid, agus fòs an sgiath, am bogha, agus na saighdean, agus an gath, agus an t-sleagh, agus loisgidh iad le teine iad seachd bliadhna:

10 Air chor as nach toir iad connadh air bith as a' mhachair, ni mòr ghearras iad a' bheag do na coilltibh: oir loisgidh iad na h-airm anns an teine, agus creachaidh iad an dream le 'n do chreachadh iad, agus spùinnidh iad an dream le 'n do spùinneadh iad, deir an Tighearn Iehobhal.

11 Agus tarlaidh air an là sin gu'n toir mise do Ghog an sin àite air son uaignean ann an Israel, gleann an luchd-siubhail air taobh an ear na fairge; agus bacaidh e 'n luchd-siubhail: agus an sin adhlaicidh iad Gog, agus a shluagh uile; agus goiridh iad ris, Gleann sluagh Ghog.

12 Agus bithidh tigh Israeil 'gan adhlacadh, a chum am fearann a ghlanadh, seachd mìosan.

13 Seadh, bithidh uile shluagh an fhearainn 'gan adhlacadh, agus bithidh là mo ghloire-sa iomraiteach 'nam measg, deir an Tighearn Iehobhal.

14 Agus cuiridh iad air leth daoine deanadach, a shiùbbhas feadh an fhearainn, a dh'adhlacadh leis an luchd-siubhail na muinntir a ta fathasd air aghaidh na talmhainn, a chum a ghlanadh; an ceann sheachd mìosan bithidh iad 'g an iarraidh.

15 Agus an luchd-siubhail a ta 'g imeachd troimh an fhearann, 'nuair a chi aon neach cnàimh duine, an sin cuiridh e comhara suas làimh ris, gus an adhlaic an luchd-adhlacaidh e ann an Gleann Hamon-Gog.

16 Agus fòs bithidh Hamonah mar ainm air a' bhaile: mar so glanaidh iad am fearann.

17 Agus thusa, a mhic an duine, mar so tha an Tighearn Iehobhal ag ràdh, Labhair ris gach eun iteagach, agus ri uile bheathaichibh na macharach, Cruinnichibh sibh féin, agus thigibh; cruinnichibh sibh féin o gach taobh, gu m' iobairt-sa ta mi deanamh air 'ur son, eadhon àr mòr air sléibhtibh Israel, a chum gu'n ith sibh feoil, agus gu'n òl sibh fuil.

18 Ithidh sibh feoil nan cumhachdach, agus òlaidh sibh fuil phrionnsachan na talmhainn, fuil reitheachan, uan, agus ghabhar, agus tharbh; iad uile air am biathadh ann am Basan.

19 Agus ithidh sibh saill gus am bi sibh sàthach, agus òlaidh sibh fuil gus am bi sibh air mhisg, do m' iobairt-sa a mharbh mi air 'ur son.

20 Mar so lìonar sibh air mo bhord-sa le h-eachaibh, agus le carbadaibh, le daoine cumhachdach, agus leis na h-uile fhear-

¹ seiseadh.

aibh-cogaidh, deir an Tighearn Iehobhah.

21 Agus cuiridh mi mo ghloir am measg nan cinneach, agus chi na cinnich mo bhrèitheanas a rinn mi, agus mo làmh a leag mi orra.

22 Mar sin aithnichidh tigh Israeil gur mise an Tighearn an Dia o'n là sin, agus uaithe sin a mach.

23 Agus aithnichidh na cinnich gu'n deachaidh tigh Israeil gu bruid air son an aingidheachd; a chionn gu'n do pheacaich iad a' m' aghaidh-sa, uime sin dh'fholuich mi mo ghnùis uatha, agus thug mi iad do làimh an naimhdean; mar sin thuit iad uile leis a' chlaidheamh.

24 A réir an neo-ghloine, agus a réir an cionta rinn mise riu, agus dh'fholuich mi mo ghnùis uatha.

25 Air an aobhar sin, mar so tha an Tighearn Iehobhah ag ràdh, A nis bheir mi air a h-ais bruid fa coib, agus ni mi tròcair air uile thigh Israeil, agus bithidh mi eudmhor air son m' ainme naoimh.

26 An déigh dhoibh an nàire a ghiulan, agus ar uile chionta leis an do chiontaich iad a' m' aghaidh-sa, 'nuair a ghabhas iad còmhnuidh gu tèaruinte 'nan dùthaich féin, agus nach cuir aon neach eagail orra.

27 An uair a bheir mise air an ais iad o na cinnich, agus a chruinnicheas mi iad o dhùthchannaibh an naimhdean, agus a naomhaichear mi annta ann an sealladh mhoran chinneach.

28 An sin aithnichidh iad gur mise Iehobhah an Dia, a thug fa'near iad a bhi air an toirt ann am bruid am measg nan cinneach: ach chruinnich mi iad chum an dùthcha féin, agus cha d'fhàg mi aon duibh ni's mò an sin.

29 Ni mò dh'fholaicheas mi tuilleadh mo ghnùis uatha: oir dhòirt mi mach mo spiorad air tigh Israeil, deir an Tighearn Iehobhah.

CAIB. XL.

1 Taisbean mu thimchioll cumadh na caithreach.

9 Tomhas geatachan an sgàth-thighe. 27 Geatachan na cùirte stigh. 39 Na h-ochd clàir air an do mharbhadh na h-ìobairtean.

ANNS a' chùigeamh bliadhna fichead d' ar bruid, ann an toiseach na bliadhna, air an deicheamh là do'n mhìos, (b' i sin an ceathramh bliadhna deug an déigh do'n bhaile bhi air a bhuàladh,) air a' cheart là sin bha làmh an Tighearn orm, agus thug e chum an àite sin mi.

2 Ann an taisbean Dhé thug e mi gu tìr Israeil, agus chuir e mi air sliabh ro àrd, làimh ris an robh amhuil cumadh caithreach thall fa chomhair.

3 Agus thug e 'n sin mi, agus feuch, duine, agus a dhreach mar dhreach umha, le sreing lìn 'na làimh, agus le slait-thomhais; agus sheas e anns a' gheata.

4 Agus thubhairt an duine rium, A mhic an duine, faic le d' shùilb, agus chuinne le d' chluasaibh, agus socruich do chridhe air na h-uile ni a dh'fheuchas mise dhuit; oir is ann a chum gu feuchainn duit iad a thugadh an so thu; foillsich gach ni a chi thu do thigh Israeil.

5 Agus, feuch, bha balla air taobh a mach an tighe mu'n cuairt, agus ann an làimh an duine bha slat-thomhais sè làmh-coille air fad, le leud boise ris gach aon làmh-choille: mar sin thomhais e leud a' bhalla, aon slat; agus 'àirde, aon slat.

6 An sin thàinig e gus a' gheata ta' g amharc ris an àird' an ear, agus chaidh e suas air a cheumaibh, agus thomhais e stairsneach a' gheata, aon slat air leud, agus an t-àrd-dhorus cuideachd, aon slat air leud.

7 Agus bha gach seòmar beag aon slat air fad, agus aon slat air leud, agus eadar na seòmraichean beaga bha cùig làmh-coille, agus bha stairsneach a' gheata, aig sgàth-thigh a' gheata an taobh a stigh, aon slat.

8 Thomhais e mar an ceudna sgàth-thigh a' gheata an taobh a stigh, aon slat.

9 An sin thomhais e sgàth-thigh a' gheata, ochd làmh-coille, agus a phuist, dà làmh-choille; agus bha sgàth-thigh a' gheata an taobh a stigh.

10 Agus bha trì do sheòmraichibh beaga geata na h-àird' an ear, air an taobh so, agus trì air an taobh sin; bha iad 'nan trì do aon tomhas, agus bha na puist do aon tomhas, air an taobh so agus air an taobh sin.

11 Agus thomhais e leud dol a steach a' gheata, deich làmh-coille, agus fad a' gheata trì làmh-coille deug.

12 B'e an dealachadh fòs fa chomhair nan seòmraichean beaga aon làmh-choille air an taobh so, agus aon làmh-choille an dealachadh air an taobh sin; agus bha na seòmraichean beaga sè làmh-coille air an taobh so, agus sè làmh-coille air an taobh sin.

13 Thomhais e 'n sin an geata o mhuillach aoin seòmair bhig gu mullach aoin eile: b'e an leud cùig làmh-coille fichead, dorus fa chomhair doruis.

14 Thomhais e mar an ceudna puist trì fichead làmh-choille, eadhon gu bhi 'nam puist do'n gheata, air gach taobh do'n chùirt.

15 Agus o aghaidh geata an dol a steach, gu aghaidh sgàth-thighe a' gheata-stigh, bha deich agus dà fhichead làmh-choille.

16 Agus bha uinneagan cumhann ris na seòmraichibh beaga, agus ri 'n aghaidh an taobh a stigh do'n gheata mu'n cuairt, agus mar an ceudna ris na sgàth-thighibh;

agus bha uinneagan mu'n cuairt air an taobh a stigh: agus air gach post bha croinn-phailme.

17 An sin thug e mi do'n chùirt a stigh, agus, feuch, seòmraichean agus urlar deanta air son na cùirte timchioll air gach taobh: bha deich seòmraichean fichead anns an urlar.

18 Agus an t-urlar ri taobh nan geatachan, thall fa chomhair leud nan geatachan, b'e sin an t-urlar a b' isle.

19 An sin thomhais e 'n leud o aghaidh a' gheata b' isle, gu aghaidh a mach na cùirte a b' fhaide steach, ceud làmh-choille ris an àird' an ear.

20 An sin thug e mi gus an taobh mu thuath, agus thomhais e fad geata na cùirte mach a ta 'g amharc ris an àirde tuath, agus a leud.

21 Agus b' iad a sheòmraichean beaga, tri air an taobh so, agus tri air an taobh sin; agus bha a phuist agus a sgàth-thighean a réir tomhais a' cheud gheata; b'e deich agus dà fhichead làmh-choille 'fhad; agus cùig làmh-choille thar fhichead 'àirde.

22 Agus b'a an uinneagan, agus an sgàth-thighean, agus an croinn-phailme a réir tomhais a' gheata ta 'g amharc ris an àirde 'n ear; agus chaidh iad suas d'a ionnsuidh le seachd ceumaibh; agus bha a sgàth-thighean fa'n comhair.

23 Agus bha geata na cùirte stigh fa chomhair a' gheata ta 'g amharc ris an àirde tuath, mar e sin ris an àirde 'n ear; agus thomhais e o gheata gu geata ceud làmh-choille.

24 An dèigh sin thug e mi air slighe na h-àirde deas, agus, feuch, geata ris an àirde deas; agus thomhais e a phuist, agus a sgàth-thighean, a réir nan tomhas ceudna.

25 Agus bha uinneagan ann, agus 'na sgàth-thighibh mu'n cuairt air gach taobh, cosmhuil ris na h-uinneagaibh sin; b'e 'fhad deich agus dà fhichead làmh-choille, agus a leud cùig làmh-choille thar fhichead.

26 Agus bha seachd ceuma gu dol suas thuige, agus bha a sgàth-thighean fa chomhair; agus bha croinn-phailme air, aon air an taobh so, agus aon eile air an taobh sin, air a phuist.

27 Agus bha geata sa' chùirt a stigh ri deas, agus thomhais e o gheata gu geata ri deas, ceud làmh-choille.

28 Agus thug e mi do'n chùirt a stigh troimh a' gheata mu dheas, agus thomhais e an geata mu dheas a réir nan tomhas ceudna.

29 Agus a sheòmraichean beaga, agus a phuist, agus a sgàth-thighean, a réir nan tomhas ceudna; agus bha uinneagan ann, agus 'na sgàth-thighibh air gach

taobh mu'n cuairt: b'e deich agus dà fhichead làmh-choille 'fhad, agus cùig làmh-choille thar fhichead a leud.

30 Agus bha na sgàth-thighean air gach taobh mu'n cuairt, cùig làmh-choille thar fhichead air fad, agus cùig làmh-choille air leud.

31 Agus bha a sgàth-thighean ris a' chùirt a mach, agus croinn-phailme air a phuist; agus bha ochd ceuma 'na dhòl suas.

32 Agus thug e mi gus a' chùirt a stigh leth ris an àirde 'n ear, agus thomhais e an geata a réir an tomhais so.

33 Agus bha a sheòmraichean beaga, agus a phuist, agus a sgàth-thighean a réir nan tomhas so; agus bha uinneagan ann, agus 'na sgàth-thighibh air gach taobh mu'n cuairt; deich agus dà fhichead làmh-choille 'fhad, agus cùig làmh-choille thar fhichead a leud.

34 Agus bha a sgàth-thighean ris a' chùirt a mach, agus croinn-phailme air a phuist air an taobh so, agus air an taobh sin; agus bha ochd ceuma 'na dhòl suas.

35 Agus thug e mi gus a' gheata tuath, agus thomhais e a réir nan tomhas so:

36 A sheòmraichean beaga, a phuist, agus a sgàth-thighean, agus 'uinneagan air gach taobh mu'n cuairt: deich agus dà fhichead làmh-choille 'fhad, agus cùig làmh-choille thar fhichead a leud.

37 Agus bha a phuist ris a' chùirt a mach, agus croinn-phailme air a phuist¹ air an taobh so, agus air an taobh sin, agus 'na dhòl suas bha ochd ceuma.

38 Agus bha na seòmraichean agus an dol a steach làmh ri puist nan geatacha, far an do nì iad na tabhartais-loisgte.

39 Agus ann an sgàth-thigh a' gheata bha dà chlàr air an taobh so, agus dà chlàr air an taobh sin, a chum an ìobairt-loisgte, agus an ìobairt-pheacaidh, agus an ìobairt-eusaontais a mharbhadh orra.

40 Agus air an taobh a mach, mar théid aon suas gu fosgladh a' gheata tuath, bha dà chlàr; agus air an taobh eile, aig sgàth-thigh a' gheata bha dà chlàr.

41 Bha ceithir clàir air an taobh so, agus ceithir clàir air an taobh sin, ri taobh a' gheata; ochd clàir, air an do mharbh iad an ìobairtean.

42 Agus bha na ceithir clàir do chloich shnaighte air son na h-ìobairt-loisgte, làmh-choille gu leth air fad, agus làmh-choille gu leth air leud, agus aon làmh-choille air àirde; air an do leag iad mar an ceudna an acfium leis an do mharbh iad an tabhartas-loisgte agus an ìobairt.

43 Agus bha dubhain² iaruinn do leud boise an taobh a stigh, air an daingneachadh mu'n cuairt air gach taobh; agus air na clàraibh bha feoil na h-ìobairt.

¹ phostaibh.

² cromagan.

44 Agus thug e mi chum a' gheata stigh; agus, feuch, an sin bha dà sheòmar anns a' chùirt a stigh; aon air taobh tuath a' gheata, ag amharc ris an àirde deas, agus an t-aon eile air taobh deas a' gheata, ag amharc ris an àirde tuath.

45 Agus thubhairt e rium, Tha an seòmar so ta'g amharc ri deas, air son nan sagart a tha frithealadh air coimhead an tìghe.

46 Agus tha an seòmar a ta'g amharc ri tuath air son nan sagart a tha frithealadh air coimhead na h-altarach: is iad so mic Shadoich am measg mhac Lebhi, a ta teachd dlùth do'n Tighearn chum frithealadh dha.

47 Mar sin thomhais e a' chùirt, ceud làmh-choille air fad, agus ceud làmh-choille air leud, ceithir-chearnach; agus an altair ri aghaidh an teampuill.

48 Agus thug e mi gu sgàth-thigh an teampuill, agus thomhais e gach post do'n sgàth-thigh, cùig làmh-choille air an taobh so, agus cùig làmh-choille air an taobh sin; agus b' e leud a' gheata trì làmh-choille air an taobh so, agus trì làmh-choille air an taobh sin.

49 B' e fad an sgàth-thìghe fichead làmh-choille, agus a leud aon làmh-choille deug, agus anns an dol suas d'a ionnsuidh *bha deich ceuma*: agus bha pruiop aig na puist, aon air an taobh so, agus aon air an taobh sin.

CAIB. XLI.

1 *Tomhas, 6 seòmraichean, 18 cerubim, 23 agus dorsan an teampuill.*

NA dhéigh sin thug e mi do'n teampull, agus thomhais e na puist, sè làmh-choille air leud air an aon taobh, agus sè làmh-choille air leud air an taobh eile, b' e so leud gach puist.

2 Agus b' e leud an doruis deich làmh-choille; agus bha ursannan an doruis cùig làmh-choille air an aon taobh, agus cùig làmh-choille air an taobh eile: agus thomhais e 'fhad, dà fhichead làmh-choille, agus a leud fichead làmh-choille.

3 An sin chaidh e gus an taobh a stigh, agus thomhais e post an doruis dà làmh-choille, agus an doruis féin sè làmh-choille air leud, agus air gach taobh do'n doruis seachd làmh-choille.

4 Mar sin thomhais e 'fhad fichead làmh-choille, agus an leud fichead làmh-choille, fa chomhair aghaidh an teampuill; agus thubhairt e rium, Is e so an t-ionad ro naomh.

5 'Na dhéigh sin thomhais e balla an teampuill sè làmh-choille; agus leud gach seòmair-thaobh ceithir làmh-choille, timchioll an teampuill air gach taobh.

6 Agus bha na seòmraichean-taobh aon

an déigh aoin, trì deug thar fhichead an àireamh, agus bhuineadh iad do'n bhalla sin a bha mu'n cuairt air an teampull air cùl nan seòmraichean-taobh, bha greim aca dheth, ach cha robh greim aca ann am balla an teampuill.

7 Agus bha farsuinneachd agus sìor dhol mu'n cuairt an àird chum nan seòmraichean-taobh, oir chaidh cuairteachadh an tìghe do ghnàth suas mu thimchioll an tìghe: agus mar sin bha leud an tìghe shuas, agus air an dòigh sin bha e dol am meud o'n t-seòmar iochdarach gus an aon a b' àirde aig a' mheadhon.

8 Chumnaic mi fòs mu'n cuairt air an tìgh, o iochdar stéidh nan seòmraichean-taobh, gu'm b'e àirde gach aoin diubh slat iomlan shè làmh-choille mòra.

9 B' e leud a' bhalla, a bha eadar na seòmair-thaobh a mach cùig làmh-choille; b' e sin fhad as a bha eadar na seòmraichean-taobh a bha ri taobh an tìghe.

10 Agus eadar na seòmraichean *eile* bha fichead làmh-choille air gach taobh, mu'n cuairt do'n tìgh.

11 Agus bha dorsan nan seòmraichean-taobh ris an ionad a dh'fhàgadh, aon doruis ris an àirde tuath, agus doruis eile ris an àirde deas; agus b' e leud an ionaid a dh'fhàgadh cùig làmh-choille air gach taobh mu'n cuairt.

12 A nis bha an aitreabh a bha fa chomhair an àite air leth, ris an àird an iar, deich agus trì fichead làmh-choille air leud; agus bha balla na h-aitreabh cùig làmh-choille air tiuighead gach taobh mu'n cuairt; agus b' e 'fhad deich agus ceithir fichead làmh-choille.

13 Mar sin thomhais e an tìgh ceud làmh-choille air fad, agus an t-àit air leth, agus an aitreabh le a ballachaibh, ceud làmh-choille air fad.

14 Mar an ceudna leud aghaidh an tìghe, agus an ionaid air leth ris an àird an ear, ceud làmh-choille.

15 Agus thomhais e fad na h-aitreabh fa chomhair an àit air leth, agus a bha air a chùlaobh, agus a sheòmraichean air an taobh so agus air an taobh eile, ceud làmh-choille, maille ris an teampull a stigh, agus ri sgàth-thìghibh na cùrte.

16 Bha puist an doruis agus na h-uinneagan cumhann, agus na seòmraichean mu'n cuairt air an trì urlair, thall fa chomhair an doruis, fòluichte le fiodh timchioll mu'n cuairt, agus o'n làr suas gu ruig na h-uinneagan agus bha na h-uinneagan air an còmhachadh.

17 Ach os ceann an doruis, agus anns an teampull a mach, gu e sin a b' fhaide steach, agus air a' bhalla uile mu'n cuairt do'n teampull a stigh agus a muigh.

18 Bha cerubim air an deanamh, agus croinn-phailme, air chor as gu'n robh

crann-pailne eadar cerub agus cerub ; agus aig gach cerub bha dà aghaidh :

19 Air chor as gu'n robh aghaidh duine ris a' chrann-phailme air an aon taobh, agus aghaidh leòmhain òig ris a' chrann-phailme air an taobh eile ; bha so deanta feadh an tighe uile mu'n cuairt.

20 O'n làr gus os ceann an doruis bha cerubim air an deanamh, agus croinn-phailme, agus air balla an teampuill.

21 Bha puist an teampuill ceithir-chearnach, agus aghaidh an ionaid naoimh air a' chumachd cheudna.

22 Bha an altair do fhiodh trì làmh-coille air àirde, agus dà làmh-choille air fad ; air a deanamh cearnach le oisibh agus clàraibh fiodha : agus thubhairt e rium, So am bord a ta fa chomhair an Tighearu.

23 Agus bha dà dhorus aig an teampull agus aig an ionad naomh.

24 Agus bha dà dhuilleig aig gach dorus, dà dhuilleig a' tionndadh ; dà *dhuilleig* air son an aoin doruis, agus dà dhuilleig air son an doruis eile.

25 Agus bha cerubim agus croinn-phailme deanta orra, air dorsaibh an teampull, mar a bha deanta air na ballachan, agus bha déileachan tiugha air aghaidh an sgàth-thighe a mach.

26 Agus bha uinneagan cumhann agus croinn-phailme air an aon taobh agus air an taobh eile, air taobhan an sgàth-thighe, agus air seòmraichean-taobh an tighe, agus air na déileachan tiugha.

CAIB. XLII.

1 Seòmraichean nan *sogart*. 13 Naomhaichear iad do'n Tighearn. 15 Tomhas na cùirte mach.

AN sin thug e mach mi gus a' chùirt a mach, air slighe na h-àirde tuath, agus thug e mi do'n t-seòmar a bha os ceann an ionaid air leth, agus a bha fa chomhair na h-aitreibh ris an àirde tuath.

2 Fa chomhair fad cheud làmh-choille bha an dorus tuath ; agus b' e an leud leth-cheud làmh-choille.

3 Fa chomhair dhorsan na cùirte steach, agus fa chomhair an urlair a bha air son na cùirte mach, bha seòmar air aghaidh seòmair air trì urlair.

4 Agus fa chomhair nan seòmraichean bha àite spaisdearachd deich làmh-coille air leud a stigh, agus ceud làmh-choille air fad ; agus bha na dorsan ri tuath.

5 Agus bha na seòmraichean uachdarach cumhann : oir aca so chrìochnaich na seòmraiche beaga, a dh'érigh gus a' cheud agus an dara urlar do'n aitreibh.

6 Oir bha iad 'nan trì urlair, ach cha robh pruiop aca mar phruiop nan cùirt-ean : uime sin bha *an tigh* ni bu chumhaime na chuid a b'ìochdaraiche agus bu

mheadhonaiche o'n làr.

7 Agus bha am balla bha mach fa chomhair nan seòmraichean, leth ris a' chùirt a b' fhaide mach air beulaobh nan seòmraichean, leth-cheud làmh-choille air fad.

8 Oir b' e fad nan seòmraichean a bha sa' chùirt a mach leth-cheud làmh-choille : agus, feuch, fa chomhair an teampuill bha ceud làmh-choille.

9 Agus fo na seòmraichean so bha 'n dol a steach air an taobh an ear, mar théid aon a steach annta o'n chùirt a muigh.

10 Bha na seòmraichean ann an tiugh-ead balla na cùirte ris an àird an ear, thall fa chomhair an ionaid air leth, agus thall fa chomhair an tighe.

11 Agus bha an t-àite spaisdearachd aig an aghaidh cosmhul ris sin a bha aig seòmraichean na h-àirde tuath ; ionnan ann am fad, agus ionnan ann an leud ; agus bha an uile dhol a mach aron air an aon dreach, agus fòs an dorsan.

12 Agus a réir dorsa nan seòmraichean a bha ris an àirde deas, bha dorus ann an ceann na slighe, na slighe dìreach fa chomhair a' bhalla, ris an àird an ear, mar a théid aon a steach orra.

13 An sin thubhairt e rium, Na seòmraichean mu thuath, agus na seòmraichean mu dheas, a ta fa chomhair an ionaid air leth, is seòmraichean naomha iad, far an ith na sagairt a thig dlùth do'n Tighearn ua nithe a's ro naomha : an sin cuiridh iad na nithe a's ro naomha, agus an tabhartas-bidh, agus an tabhartas-peacaidh, agus an tabhartas-eusaontais ; oir tha an t-ionad naomh.

14 'Nuair a théid na sagairt a steach ann, an sin cha téid iad a mach as an ionad naomh gus a' chùirt a mach, ach an sin cuiridh iad an eudaichean, far am bheil iad a' frithealadh ; oir tha iad naomha : agus cuiridh iad orra eudaichean eile, agus thig iad dlùth do na nithibh sin a ta air son a' phobuill.

15 A nis 'nuair a chuir e crìoch air tomhas an tighe stigh, thug e mach mi chum a' gheata, ta 'g amharc ris an àird an ear, agus thomhais e mu'n cuairt e.

16 Thomhais e an taobh an ear leis an t-slaith-thomhais, cùig agus ceud slat leis an t-slaith-thomhais timchioll mu'n cuairt.

17 Thomhais e an taobh mu thuath, cùig agus ceud slat, leis an t-slaith-thomhais timchioll mu'n cuairt.

18 Thomhais e an taobh-deas, cùig agus ceud slat, leis an t-slaith-thomhais.

19 Thionndaidh e mu'n cuairt gus an taobh an iar, agus thomhais e cùig agus ceud slat, leis an t-slaith-thomhais.

20 Thomhais e air na ceithir taobhan e : bha balla aige mu'n cuairt, cùig agus

ceud slat air fad, agus cùig agus ceud air leud, a dheanamh dealachaidh eadar an t-ionad naomh agus an t-àite mi-naomh.

CAIB. XLIII.

1 Thàinig glòir an Tighearna chum an teampull. 7 Gheall Dia còmhnuidh a ghabhail ann, nan trèigeadh an sluagh am peacanna. 10 Chum gu'n gabhadh iad nàire do'n euceartaibh dh'fheuch ann fàidh dhoibh sàmhladh agus dreach an teampull. 13 Tomhas na h-altarach.

NA dhéigh sin thug e mi chum a' gheata, an geata ta 'g amhare ris an àird an ear:

2 Agus, feuch, thàinig glòir Dhé Israeil o shlighe na h-àirde 'n ear: agus bha a ghuth mar thoirn mhòran uisgeachan, agus dhealraich an talamh le 'ghlòir.

3 Agus bha an sealladh so a chunnaic mi cosmhuil ris an t-sealladh sin a chunnaic mi, 'nuair thàinig e chum am baile a sgrìos: agus bha a' choslas mar an coslas a chunnaic mi aig sruth Chebair: agus thuit mi air m' aghaidh.

4 Agus thàinig glòir an Tighearna chum an teampull, air slighe a' gheata ta 'g amhare ris an àird an ear.

5 An sin thog an spiorad suas mi, agus thug e mi gus a' chùirt a stigh, agus, feuch, lion glòir an Tighearna an teampull.

6 Agus chuala mi e labhairt rium a mach as an teampull; agus sheas an duine làmh rium.

7 Agus thubhairt e rium, A mhic an duine, tha thu faicinn àite mo rìgh-claithreach, agus ionad bhonn mo chos, far an gabh mi còmhnuidh ann am meadhon cloinne Israeil gu sìorruidh, agus m' ainm naomh-sa cha truailigh Israeil nì's mò, iad fèin no'n rìghrean, le 'n strìopachas, no le conablachaidh an rìghrean 'nan ionadaibh àrda.

8 Le suidheachadh an stairsneich aig mo stairsneich-sa, agus am puist aig mo phuist-sa, agus am balla eadar mise agus iadsan, rinn iad eadhon m' ainm naomh a thruaillleadh le 'n gràineileachdaibh a chuir iad an gnìomh: uime sin chaith mise iad annam chorroich.

9 A nis cuireadh iad air falbh an strìopachas, agus cairbhinnèan an rìghrean fada uam, agus gabhaidh mi còmhnuidh 'nam meadhon gu sìorruidh.

10 A mhic an duine, feuch an teampull so do thigh Israeil, a chum gu'n gabh iad nàire do'n euceartaibh; agus tomhaiseadh iad an sàmhladh.

11 Agus ma bhios nàire orra do gach nì a rinn iad, feuch dhoibh dreach an tighe, agus a chumachd, agus a dhol a mach, agus a theachd a stigh, agus 'uile choslas, agus 'uile orduighean, agus 'uile dheilbh, agus 'uile reachdan; agus sgrìobh e 'nan sealladh, a chum gu'n coimhid iad 'uile

dhreach, agus 'uile orduighean, agus gu'n dean siad iad.

12 Is e so reachd an tighe; Air mullach an t-slàibh bithidh a chrìoch uile mu'n cuairt ro naomh: feuch is e so reachd an tighe.

13 Agus is iad so toimhsean na h-altarach ann an làmh-choille, le leud boise ris gach aon làmh-choille; bithidh eadhon làmh-choille 'na bonn, agus làmh-choille 'na leud, agus réis 'na h-ìomall air an fhoir mu'n cuairt; agus bithidh so 'na chuairteachadh do'n altair.

14 Agus o'n bhonn air an làr gu ruig an suidheachadh ìochdarach bithidh dà làmh-choille, agus aon làmh-choille an leud; agus o'n t-suidheachadh a's lugha agus an suidheachadh a's mò, bithidh ceithir làmh-choille, agus an leud aon làmh-choille.

15 Mar sin bithidh an altair ceithir làmh-choille; agus o'n altair an àird bithidh ceithir adharcan.

16 Agus bithidh an altair dà làmh-choille dheug air fad, a dhà-dheug air leud, ceithir-chearnach 'na ceithir chearn-aibh.

17 Agus bithidh am bonn ceithir làmh-choille deug air fad, agus ceithir-deug air leud 'na cheithir chearnaibh; agus bithidh an fhoir mu'n cuairt oirre leth làmh-choille; agus bithidh a bonn làmh-choille mu'n cuairt, agus amhaircidh a ceuma ris an àird an ear.

18 Agus thubhairt e rium, A mhic an duine, mar so tha an Tighearna Dia ag ràdh, Is iad so orduighean na h-altarach anns an là san dean iad i, chum tabhartas-loisgte iobraidh oirre, agus a chum fuil a chrathadh oirre.

19 Agus bheir thu do na sagartaibh na Lebhithich a ta do shliochd Shadoic, a thig dlùth dhomh-sa, chum frithealadh dhomh, tha an Tighearna Dia ag ràdh, tarbh òg mar thabhartas-peacaidh.

20 Agus gabhaidh tu d' a fhuil, agus cuiridh tu i air a ceithir adharcaibh, agus air ceithir chearnaibh a buinn, agus air an fhoir mu'n cuairt: mar so glanaidh agus nigheadh tu i.

21 Gabhaidh tu fòs tarbh na h-ìobairt-pheacaidh, agus loisgidh esan e ann an ionad orduichte an tighe, an taobh a mach do'n naomh-ionad.

22 Agus air an dara là iobraidh tu meanm do na gabhraibh gun ghaoid, air son tabhartas-pheacaidh; agus glanaidh iad an altair, mar a ghlan iad i leis an tarbh.

23 'Nuair a sguireas tu d' a glanadh, iobraidh tu tarbh òg gun ghaoid, agus reithe as an treud gun ghaoid.

24 Agus iobraidh tu iad an làthair an Tighearna; agus tilgidh na sagairt salann

orra, agus iobairdh iad suas iad mar iobairt-loisgte do'n Tighearn.

25 Seachd làithean deasaichidh tu, gach aon là, gabhar air son iobairt-pheacaidh: deasaichidh iad fòs tarbh òg agus reithe as an treud gun ghaid.

26 Seachd làithean glanaidh iad an alt-air, agus nighidh iad i, agus naomhaichidh siad iad féin.

27 Agus an uair a bhios na làithean so air an crìochnachadh, tarlaidh air an oclidamh là, agus mar sin sìos, gu'n dean na sagairt 'ur n-iobairtean-loisgte air an altair, agus 'ur n-iobairtean-sith, agus gabhaidh mise ruibh, deir an Tighearn Iehobhah.

CAIB. XLIV.

1 Chaidh an geata ta 'g amharc ris an àird an ear a shonrachadh do'n phrionnsa. 4 Thugadh geur-acmhlasan do'n t-sluaigh do bhrìgh gu'n do leig iad le coigriche an t-ionad naomh a thruaillleadh.

9 Giùlainidh na Lebhithich, a dh'fhalbh air seacharan an dèigh an iodholan, an aingidheachd.

17 Orduighean mu thimchioll nan sagart.

AN sin thug e mi air m' ais air slighe geata an ionaid naoimh a muigh, a ta 'g amharc ris an àird an ear, agus bha e druידte.

2 An sin thubhairt an Tighearna rium, Bithidh an geata so druידte, cha'n fhosg-ailear e, agus cha téid neach air bith a steach air, a chionn gu'n deachaidh an Tighearna Dia Israeil a steach air.

3 Uime sin bithidh e druידte air a' phrionnsa; am prionnsa féin suidhidh ann a dh'itheadh arain an làthair an Tighearna; théid e steach air slighe cùirt' a' gheata, agus thig e mach air an t-slighe cheudna.

4 An sin thug e mi air slighe a' gheata thuath, fa chomhair an teampull, agus dh'amhairc mi, agus, feuch, lìon glòir an Tighearna teampull an Tighearna; agus thuit mise air m' aghaidh.

5 Agus thubhairt an Tighearn rium, A mhic an duine, thoir geur-aire, agus feuch le d' shùilibh, agus chuinn le d' chluas-aibh, gach nì a their mise riut mu thimchioll uile orduighean tighe an Tighearna, agus 'uile reachdan, agus thoir aire mhaith do dhol a steach an tighe, le uile dhol a mach an ionaid naoimh.

6 Agus their thu ris an tigh cheannaireach, ri tigh Israeil, Mar so tha an Tighearna Dia ag ràdh, O thigh Israeil, gu ma leòr leibh do 'ur n-uile ghràineileachdaibh,

7 Gu'n d'thug sibh coigriche neo-thimchioll-ghearrta 'nan cridhe, agus neo-thimchioll-ghearrta 'nam feoil, gu bli ann am naomh-ionad-sa, a thruaillleadh mothighe, am feadh a ta sibh a' tiodhlacadh dhomhsa an arain, na saill, agus na fola; agus bhris sibh mo choimhcheangal le 'ur n-uile ghràineileachdaibh.

8 Agus cha do ghléidh sibh cùram mo nithe naomha; ach chuir sibh luchd-coimhid mo chùram ann am ionad naomh air 'ur son féin.

9 Mar so tha an Tighearna Dia ag ràdh, Cha téid aon choigreach neo-thimchioll-ghearrta 'na chridhe, no neo-thimchioll-ghearrta 'na fheoil, a steach do m' ionad naomh-sa, do choigreach air bith a ta measg cloinne Israeil.

10 Agus na Lebhithich a dh'imich am fad uamsa, 'nuair a chaidh Israeil air seacharan, a dh'fhalbh air seacharan uamsa an dèigh an iodhola, giùlainidh eadhon iadsan an aingidheachd.

11 Gidheadh bithidh iad 'nan luchd-frithealaidh ann am ionad naomh, air am bi cùram gheatachan an teampull, agus a bhios a' frithealadh do'n teampull: marbhaidh iad an tabhartas-loisgte agus an iobairt air son an t-sluaigh, agus seasaidh iad 'nan làthair gu frithealadh dhoibh:

12 A chionn gu'n d'rinn iad frithealadh dhoibh ann an làthair an iodholan, agus gu'n d'thug iad air tigh Israeil tuiteam gu aingidheachd; uime sin thog mise suas mo làmh 'nan aghaidh, tha an Tighearn Iehobhah ag ràdh, agus giùlainidh iad an aingidheachd.

13 Agus cha tig iad am fagus domh-sa, a dheanamh dleasdanas sagairt domh, no theachd dlùth do bheag air bith do m' nithibh naomha san ionad a's ro-naomh: ach giùlainidh iad an nàire, agus an gràineileachdan a chuir iad an gnìomh.

14 Ach nì mi iad 'nan luchd-coimhid cùram an tighe, air son 'uile sheirbhis, agus air son gach uile nì bhios ri dheanamh ann.

15 Ach na sagairt na Lebhithich, mic Shadoic, a choimhid cùram m' ionaid naoimh, 'nuair a chaidh clann Israeil air seacharan uam, thig iadsan dlùth dhomh, chum frithealadh dhomh, agus seasaidh iad ann am fhianuis a dh'ìobradh dhomh na saill agus na fola, deir an Tighearn Iehobhah:

16 Théid iad a steach do m' ionad naomh, agus thig iad dlùth do m' bhord, a chum frithealadh dhomh, agus coimhididh iad mo chùram.

17 Agus tarlaidh, 'nuair a théid iad a steach air geatacha na cùirte stigh, gu'm bi iad air an éideadh le eudach lìn; agus cha tig olainn air bith orra, am feadh a ta iad a' frithealadh ann an geatachaibh na cùirte steach, agus an taobh a stigh.

18 Bithidh curaichdean lìn air an cinn, agus bithidh triughais lìn air an leas-raibh: cha chrìoslaich siad iad féin le aon nì a thogas fallus.

19 Agus 'nuair a théid iad a mach do'n chùirt a muigh, a chum an t-sluaigh,

cuiridh iad dhiubhl an eudaichean anns an d'rinn iad frith-ealadh, agus cuiridh iad anns na seòmraichibh naomha iad, agus cuiridh iad orra eudaichean eile, agus cha naomhaich iad am pobull 'nan eudaichibh.

20 Nì mò a lomas iad an cinn, no dh'fhuilingeas iad do'n ciabhan fàs fada; cha dean iad ach a mhàin an cinn a bharradh.

21 Nì mò dh'òlas sagart air bith fion, 'nuair théid iad a steach do'n chùirt a stigh.

22 Nì mò ghabhas iad dhoibh féin mar mhnai banntrach, no bean a chuireadh air falbh: ach gabhaidh iad maighdeanan do shliochd tighe Israeil, no banntrach aig an robh sagart roimhe.

23 Agus teagaisgidh iad do m' shluagh-sa an dealachadh eadar naomh agus mi-naomh, agus bheir iad orra dealachadh a chur eadar an glan agus an neo-ghlan.

24 Agus ann an comhstri seasaidh iad ann am breitheanas; bheir iad breth air a réir mo reachdan-sa; agus coimhidh iad mo lagh agus mo reachdan, ann am uile choimhthionalaibh, agus naomhaichidh iad mo slàbaidean.

25 Agus cha tig iad dlùth do dhuine marbh gu iad féin a thruaillleadh: ach air son athar, no air son màthar, no air son mic, no air son nighium, air son bràthar, no air son peathar aig nach robh fear, feudaidh siad iad féin a thruaillleadh.

26 Agus an déigh dha bhi air a ghlanadh, àirmhidh iad dha seachd làithean.

27 Agus air an là san téid e steach do'n ionad naomh, do'n chùirt a stigh gu frith-ealadh anns an ionad naomh, bheir e seachad tabhartas-peacaidh, deir an Tighearna Dia.

28 Agus cha bhi oighreachd air bith aca; is mise an oighreachd-san: agus cha toir sibh dhoibh sealbh air bith ann an Israel; is mise an sealbh.

29 Ithidh iad an tabartas-bidh, agus an tabhartas-peacaidh, agus an tabhartas-eusaontais; agus aca-san bithidh gach uile nì coisrigte ann an Israel.

30 Agus bithidh toiseach ceud thoraidh nan uile nithe, agus gach uile thabhartas do gach seòrsa do 'ur tabhartais aig na sagairt: bheir sibh mar an ceudna do'n t-sagart toiseach 'ur taoise, chum gu'n toir e air a bheannachadh còmhnuidh a glabhail ann ad thigh.

31 Cha'n ith an sagart do nì air bith a dh'eugas leis féin, no bhios reubta, ma's eun no ainmhidh e.

CAIB. XLV.

1 An earrann do'n fhearann air son an ionaid naomh, 6 air son a' bhaile, 7 agus air son a' phrionnsa. 9 Orduighean nu thimcheoll a' phrionnsa.

MAR an ceudna 'nuair a roinneas sibh le crannchur am fearann mar oigh-

reachd, bheir sibh tabhartas do'n Tighearna, earrann naomh do'n fhearann: is e 'fhad cùig mìle fichead làmh-choille, agus a leud deich mìle; bithidh so naomh 'na uile chrìochaibh mu'n cuairt.

2 Dheth so bithidh air son an ionaid naomh cùig ceud air fad, le cùig ceud air leud, ceithir-chearnach mu'n cuairt; agus leth-cheud làmh-choille mu'n cuairt, air son a dhlùth-bhailtean.

3 An déigh an tomhais so, toimhsidh tu ann am fad cùig mìle fichead, agus ann an leud deich mìle; agus an sin bithidh an t-ionad naomh, an t-àite ro naomh.

4 Bithidh a' chuid so do'n fhearann naomh do na sagairt, luchd-frith-ealaidh an ionaid naomh, a thig dlùth chum frith-ealadh do'n Tighearna; agus bithidh e 'na ionad air son an tìghean, agus 'na àite naomh air son an naomh-ionaid.

5 Agus fòs cùig mìle fichead air fad, agus deich mìle air leud bithidh aig na Lebhithich, luchd-frith-ealaidh an tìghe, air an aon féin, mar sheilbh air son fichead seòmar.

6 Agus orduichidh sibh mar sheilbh na caitheach cùig mìle làmh-choille air leud, agus cùig mìle fichead air fad, thall fa chomhair àite an ionaid naomh: bithidh e aig uile thigh Israeil.

7 Agus bithidh aig an uachdaran air an aon taobh, agus air an taobh eile do chuibhrionn an ionaid naomh, agus do sheilbh na caitheach, fa chomhair cuibh-rinn an ionaid naomh, agus fa chomhair seilbh na caitheach, o'n taobh an iar, ris an iar: agus o'n taobh an ear, ris an ear; agus bithidh am fad thall fa chomhair aoin do na h-carrannaibh, o'n ionall an iar gus an ionall an ear.

8 Auns an fhearann bithidh a shealbh ann an Israel; agus cha sàruich m' uachd-arain-sa nì's mò mo shluagh: agus am fearann bheir iad do thigh Israeil a réir am fucachan.

9 Mar so tha an Tighearna Dia ag ràdh, Gu ma leòr leibh, O uachdarana Israeil: cuiribh uaibh ainneart agus creach, agus deanaibh breitheanas agus ceartas, tog-aibh leibh 'ur n-an-tighearnas o m' shluagh-sa, deir an Tighearna Iehobhah.

10 Bithidh agaibh meighean cothromach, agus ephah cothromach, agus bat cothromach.

11 Bithidh an ephah agus am bat do aon tomhas, air chor as gu'n cum am bat an deicheamh cuid do homer, agus an ephah an deicheamh cuid do homer: bithidh a thomhas a réir an homeir:

12 Agus bithidh ann an secel fichead gerah: fichead secel, cùig secel thar fhichead, cùig secel deug, bithidh sin 'na mhaneh agaibh.

13 So an tabhartas a bheir sibh uaibh;

an sèathamh cuid do ephah á homer cruithneachd, agus bheir sibh an sèathamh cuid do ephah á homer eorna.

14 A thaobh reachd na h-oladh, am bat oladh, bheir sibh uaibh an deicheamh cuid do bhat as a' chòr, is e sin homer dheich bhat; oir is deich bait a ta ann an homer:

15 Agus aon uan as an treud, á dà cheud, a h-ionaltradh reamhar Israeil, air son tabhartais-bhìdh, agus air son iobairt-loisgte, agus air son tabhartas-sìth, chum réite dheanamh air an son, deir an Tighearna Dia.

16 Bheir uile shluagh an fhearainn an tabhartas so air son an uachdarain ann an Israel.

17 Agus buinidh e do'n phrionnsa tabhartasa-loisgte, agus tabhartasa-bìdh, agus tabhartasa-dìbhe thoir uaithe air na làithibh féill, agus air na gealaichibh nuadha, agus air na sàbaidibh, agus air uile àrd-fhéillibh tighe Israeil: deasaichidh e 'n tabhartas-peacaidh, agus an tabhartas-bìdh, agus an tabhartas-loisgte, agus na tabhartasa-sìth, a dheanamh réite air son tighe Israeil.

18 Mar so tha an Tighearna Dia ag ràdh, Auns a' cheud *mhìos*, air a' cheud là do'n mhìos, gabhaidh tu tarbh òg gun ghaoid, agus glanaidh tu an naomh-ionad.

19 Agus gabhaidh an sagart do fhuil na h-iobairt-pheacaidh, agus cuiridh e i air puist an tìghe, agus air ceithir chearn-aibh buinn na h-altarach, agus air puist geata na cùirte stigh.

20 Agus mar sin ni thu air an t-seachdamh là do'n mhìos, air son gach aoine a théid air seacharan, agus a ni gu h-am-aideach: mar sin ni sibh réite air son an teampaill.

21 Anns a' cheud *mhìos*, air a' cheathramh là deug do'n mhìos, bithidh a' chàisg agaibh, féill sheachd làithean; ithear aran gun ghoirteachadh.

22 Agus air an là sin deasaichidh am prionnsa air a shon féin, agus air son uile shluaigh an fhearainn, tarbh air son iobairt-pheacaidh.

23 Agus air seachd làithean na féille deasaichidh e iobairt-loisgte do'n Tighearn, seachd tairbh, agus seachd reitheachan gun ghaoid, gach là, fad nan seachd làithean, agus meann do na gabhairibh gach là air son iobairt-pheacaidh.

24 Agus deasaichidh e tabhartas-bìdh, eadhon ephah air son tairbh, agus ephah air son reithe, agus hin oladh air son ephah.

25 Anns an t-seachdamh *mìos*, air a' chùigeamh là deug do'n mhìos, ni e a réir sin air féill nan seachd làithean, a réir an tabhartais-pheacaidh, a réir na h-ofrail-loisgte, agus a réir an tabhartais-bhìdh, agus a réir na h-oladh.

CAIB: XLVI.

1 *Riaghailtean mu thimchioll a' phrionnsa, 9 agus mu thimchioll an t-sluaigh: 16 mu thimchioll thiodhlacan a' phrionnsa d'a mhacaibh, agus d'a sheirbhiseich. 21 An t-àit sam bruich na sagairt an iobairt-eusanta is agus an iobairt-pheacaidh.*

MAR so tha an Tighearna Dia ag ràdh, Bithidh geata na cùirte stigh, a ta 'g amharc ris an àird an ear, druידte na sè làithean oibre: ach air an t-sàbaid bithidh e fosgailte, agus air là na ré nuaidh¹ bithidh e fosgailte.

2 Agus théid an t-uachdaran a steach air slighe sgàth-thighe a' gheata an taobh a mach, agus seasaidh e aig ursann a' gheata, agus deasaichidh an sagart a thabhartas-loisgte, agus a thabhartais-shith, agus ni e aoradh aig stairsneich a' gheata: an sin théid e mach, ach cha druidear an geata gu anmoch.

3 Mar an ceudna ni sluagh an fhearainn aoradh aig dorus a' gheata so an làthair an Tighearn, air na sàbaidibh, agus air na gealaichibh nuadha.

4 Agus is i an iobairt-loisgte a bheir an t-uachdaran do'n Tighearn air là na sàbaid, sè uain gun ghaoid, agus reithe gun ghaoid.

5 Agus is e an tabhartas-bìdh ephah air son reithe, agus an tabhartas-bìdh air son nan uan mar a bhios 'na chomas a thoir uaithe, agus hin oladh air son ephah.

6 Agus air là na ré nuaidh bheir e tarbh òg gun ghaoid, agus sè uain, agus reithe: bithidh iad gun ghaoid.

7 Agus deasaichidh e tabhartas-bìdh, ephah air son tairbh, agus ephah air son reithe: agus air son nan uan a réir mar a bhios 'na chomas, agus hin oladh air son ephah.

8 Agus 'nuair a théid an t-uachdaran a steach, théid e stigh air slighe sgàth-thighe a' gheata, agus théid e mach air a shlighe sin.

9 Ach 'nuair a thig muinntir an fhearainn an làthair an Tighearn, anns na h-àrd-fhéillibh, esan a théid a steach air slighe a' gheata thuath gu aoradh, théid e mach air slighe a' gheata dheas; agus esan a théid a steach air slighe a' gheata dheas, théid e mach air slighe a' gheata thuath: cha phill e air slighe a' gheata air an deachaidh e steach, ach théid e mach thall fa chomhair.

10 Agus théid an t-uachdaran a steach 'nam meadhon 'nuair théid iad a steach; agus 'nuair théid iad a mach, théid e mach.

11 Agus air na féillibh, agus air na h-àrd-fhéillibh, is e an tabhartas-bìdh ephah air son tairbh, agus ephah air son reithe, agus air son nan uan a réir a chomais, agus hin oladh air son ephah.

12 Anis' nuair a dheasaicheas an t-uachdaran o 'thoil féin iobairt-loisgte, no tabhartais-shìth, gu toileach do'n Tighearn, fosgailear dha an sin an geata ta 'g amharc ris an àird an ear, agus ulluichidh e 'iobairt-loisgte, agus a thabhartasa-sìth mar a rinn e air là na sàbaid: an sin théid e mach, agus an déigh dha dol a mach, druidear an dorus.

13 Ulluichidh tu gach là tabhartas-loisgte do'n Tighearn, uan do'n cheud bhliadhna gum ghaoid; ulluichidh tu e gach aon mhaduinn.

14 Agus ulluichidh tu tabhartas-bìdh air a shon gach aon mhaduinn, an seàthamh cuid do ephah, agus an treas cuid do hin oladh, chum a mheasgadh leis a' mhinchruithneachd; tabhartas-bìdh do ghnàth, le ordugh siorruidh do'n Tighearn.

15 Mar so ulluichidh iad an t-uan, agus an tabhartas-bìdh, agus an oladh gach aon mhaduinn, mar iobairt-loisgte ghnàth-aichte.

16 Mar so tha an Tighearna Dia ag ràdh, Ma bheir an t-uachdaran tiodhlac do aon air bith d'a mhic, bithidh a shealbh sin aig a mhic; bithidh a shealbh aca mar oighreachd.

17 Ach ma bheir e tiodhlac do aon d'a sheirbhisich, an sin bithidh e aige-san gu bliadhna na saorsa: 'na dhéigh sin pillidh e chum an uachdarain; ach bithidh oighreachd aig a mhic dhoibh féin.

18 A thuilleadh air so cha ghabh an t-uachdaran do oighreachd an t-sluaigh le h-ainneart, a chum an tilgeadh a mach as an seilbh: ach bheir e d' a mhic oighreachd as a sheilbh féin: a chum nach bi mo shluagh-sa air an sgapadh gach aon o 'sheilbh.

19 'Na dhéigh sin thug e mi troimh an fhosgladh, a bha aig taobh a' gheata, gu seòmraichean naomha nan sagart, a bha 'g amharc ri tuath; agus, feuch, bha àite an sin aig oisinn na h-àird' an iar.

20 An sin thubhairt e rium, So an t-àite sam bruch na sagairt an iobairt-eusaontais, agus an iobairt-pheacaidh, far am fuin iad an tabhartas-bìdh: a chum nach toir iad a mach iad gus a' chùirt a mach, gus an slugh a naomhachadh.

21 An sin thug e mach mi gus a' chùirt a mach, agus thug e orm gabhail seachad air ceithir oisinnibh na cùirte; agus, feuch, bha cùirt anns gach aon oisinn do'n chùirt.

22 Ann an ceithir oisinnibh na cùirte bha cùirtean ceangailte rithe, dà fhichead làmh-choille air fad, agus deich thar fhichead air leud: bha na ceithir oisinn-ean so do aon tommas.

23 Agus bha aca balla mu'n cuairt doibh 'nan ceithir, agus ionada bruich deanta fo 'n bhalla, mu'n cuairt.

24 An sin thubhairt e rium, Is iad so àiteachan na muinntir a bhruicheas, far am bruich luchd-frithealaidh an teampuill iobairtean an t-sluaigh.

CAIB. XLVII.

1 *Taisbean nan uisgeacha naomha; 6 Leighisidh iad gach beathach a ta ghuasad. 13 Cricchan an fhearainn. 22 Théid am fearann a roinn le crannchur.*

NA dhéigh sin thug e mi ris gu dorus an teampuill, agus, feuch, bhrùchd uisgeachan a mach o iochdar stairsneich an tighe ris an àird an ear: oir bha aghaidh an tighe ris an àird an ear, agus thàinig na h-uisgeachan a nuas fuidhe o thaobh deas an tighe, air taobh mu dheas na h-altarach.

2 An sin thug e mach mi air slighe a' gheata mu thuath, agus thug e orm siubhal mu'n cuairt air an t-slighe muigh gus an geata mach, air an t-slighe ta 'g amharc ris an àird an ear, agus, feuch, ruith uisgeachan a mach air an taobh deas.

3 Agus 'nuair a chaidh an duine aig an robh an t-sreang 'na làimh, a mach air slighe na h-àird' an ear, thomhais e mìle làmh-choille, agus thug e mi troimh¹ na h-uisgeachan: bha na h-uisgeachan gu ruig na h-aobrana.

4 A ris thomhais e mìle, agus thug e mi troimh na h-uisgeachan; bha na h-uisgeachan gu ruig na glùinean: a ris thomhais e mìle, agus thug e mi troimh na h-uisgeachan; bha na h-uisgeachan gu ruig na leasraidh.

5 'Na dhéigh sin thomhais e mìle; agus bha e 'na shruth nach b'urrainn mi dol thairis: oir bha na h-uisgeachan air éirigh, uisgeachan air son snámh anna, amhainn nach feudta dol troimpe.

6 Agus thubhairt e rium, Nach faca tu, a mhic an duine? an sin thug e leis mi, agus thug e orm pillleadh gu bruaich na h-aimehne².

7 A nis an uair a phill mi, feuch, air bruaich na h-aimehne bha ro mhòran chraobh, air an taobh so, agus air an taobh eile.

8 An sin thubhairt e rium, Tha na h-uisgeachan so ag imeachd a mach rathad tìre na h-àirde 'n ear, agus a' dol sìos do'n fhàsach, agus a' dol a steach do'n fhairge; 'nuair bheirear iad a mach a chum na fàirge, leighisear na h-uisgeachan.

9 Agus tarlaidh, gach aon bheathach beò, a ta ghuasad taobh air bith gus an tig na h-aimehnichean, mairidh e beò: agus bithidh ro mhòran éisg ann, a chionn gn'u'n tig na h-uisgeachan so thuige: oir leighisear iad, agus mairidh gach ni beò far an tig an amhainn.

¹ tre.

² aibhne.

10 Agus tarlaidh, gu'n seas na h-iasg-
airean oirre, o Engedi gu ruig Eneglaim;
bithidh iad 'nan ionad a sgaoileadh a mach-
lion, bithidh an iasg a réir an seòrsa, mar
iasg na fairge mòire, ro lionmhor.

11 Ach a làthach, agus 'àiteachan fliucha
cha blii air an leigheas, bheirear iad
thairis gu salann.

12 Agus air taobh na h-aimhne, air a
bruaich, air an taobh so, agus air an taobh
sin, fàsaidh na h-uile chraobhan air son
bìdh, aig nach bi an duilleach air searg-
adh, no an toradh air a chaitheamh:
bheir e mach toradh nuadh a réir a mhòs-
an, do bhrìgh gu'n do shruth 'uisgeach-
an a mach o'n ionad naomh; agus bith-
idh a thoradh air son bìdh, agus a dhuill-
each air son leighis.

13 Mar so tha an Tighearna Dia ag
ràdh, So a' chrìoch leis an sealbhaich
sibh ann fearann, a réir dà theubh dheug
Israeil: bithidh dà roinn aig Ioseph.

14 Agus sealbhaichidh sibh e, aon co
maith r'a chéile: oir am fearann so mu'n
do thog mise suas mo làmh, gu'n tugaime
e do 'ur n-aithrichibh, tuitidh oirbhe mar
oighreachd.

15 Agus so crìoch an fhearainn air an
taobh mu thuath, o'n fhairge mhòir,
slighe Hetloin, mar a théid daoine gu
Sedad:

16 Hamat, Berotah, Sibram, a ta eadar
crìoch Dhamascuis agus crìoch Hamait;
Hasar-haticon, a ta làmh ri iomall Haur-
ain.

17 Agus o'n fhairge bithidh a' chrìoch
aig Haser-enan, crìoch Dhamascuis, agus
an àirde tuath air an taobh mu thuath,
agus crìoch Hamait: agus so an taobh
mu thuath.

18 Agus an taobh an ear toimhsidh sibh
o Hauran, agus o Dhamascus, agus o
Ghilead, agus o fhearann Israeil làmh ri
Iordan, o'n chrìch gu ruig an fhairge 'n
ear: agus so an taobh an ear.

19 Agus an taobh deas mu dheas o
Thamar, gu uisgeacha na strì ann an
Cades, an sruth gus an fhairge mhòir:
agus so an taobh deas mu dheas.

20 An taobh an iar mar an ceudna bith-
idh aig an fhairge mhòir o'n iomall, gus
an tig duine nall fa chomhair Hamait;
so an taobh an iar.

21 Mar so roinnidh sibh am fearann so
dhuibh, a réir fhineachan Israeil.

22 Agus tarlaidh gu'n roinn sibh e le
crannchur air son oighreachd dhuibh féin,
agus do na coigrich a bhios air chuairt
'nur measg a ghineas clann 'nur measg:
agus bithidh iad dhuibh mar gu'm biodh
iad air am breth: san dùthaich am measg
cloinne Israeil; bithidh oighreachd aca
maille ruibh, am measg fhineachan Is-
raeil.

23 Agus tarlaidh, anns an treubh anns
am bi an coigreach air chuairt, an sin gu'n
toir sibh dha 'oighreachd, deir an Tigh-
earna Dia.

CAIB. XLVIII.

1 Crìochan an dà theubh dheug, 8 an ionaid naoimh,
15 a' bhaile agus nan dlùth-bhailtean, 21 agus an
uachdairain. 30 Tomhas agus geata a' bhaile.

ANIS is iad so ainmean nan treubh, o
'n cheann mu thuath gu iomall slighe
Hetloin, mar a théid neach gu Hamat,
Hasarenan, crìoch Dhamascuis mu thuath,
gu iomall Hamait, (oir is iad so a thaobhan
an ear agus an iar,) bithidh aon roinn aig
Dan.

2 Agus làmh ri crìch Dhain, o'n taobh
an ear gus an taobh an iar, aon aig Aser.

3 Agus làmh ri crìch Aseir, o'n taobh
an ear gus an taobh an iar, aon aig Naph-
tali.

4 Agus làmh ri crìch Naphtali, o'n
taobh an ear gus an taobh an iar, aon aig
Manaseh.

5 Agus làmh ri crìch Mhanaseh, o'n
taobh an ear gus an taobh an iar, aon aig
Ephraim.

6 Agus làmh ri crìch Ephraim, o'n
taobh an ear gus an taobh an iar, aon aig
Reuben.

7 Agus làmh ri crìch Reubein, o'n taobh
an ear gus an taobh an iar, aon aig Iudah.

8 Agus làmh ri crìch Iudah, o'n taobh
an ear gus an taobh an iar, bithidh tabh-
artas a bheir sibh seachad, cuig mìle fich-
ead làmh-choille air leud, agus air fad
mar aon do na h-earrannaibh eile, o'n
taobh an ear gus an taobh an iar, agus
bithidh an t-ionad naomh 'na mheadhon.

9 An tabhartas a bheir sibh seachad do'n
Tighearn, bithidh e cuig mìle fichead
làmh-choille air fad, agus deich mìle
làmh-choille air leud.

10 Agus air an son-san, air son nan sag-
art, bithidh an tabhartas naomh so, ris an
àirde tuath, cuig mìle fichead làmh-choille
air fad, agus ris an àird an iar, deich mìle
làmh-choille air leud, agus ris an àird an
ear, deich mìle làmh-choille air leud, agus
ris an àirde deas, cuig mìle fichead làmh-
choille air fad; agus bithidh ionad naomh
an Tighearna 'na mheadhon.

11 Bithidh e air son nan sagart a ta
naomhaichte, do mhacaibh Shadoic, a
choimhid a' nì a dh'earb mise riu, nach
deachaidh air seacharan an uair a chaidh
clann Israeil air seacharan, mar a chaidh
na Lebhitich air seacharan.

12 Agus is ro naomh dhoibh-san tabh-
artas so an fhearainn, làmh ri crìch nan
Lebhitheach.

13 Agus thall fa chomhair crìche nan
sagart, bithidh aig na Lebhitich cuig mìle
fichead làmh-choille air fad, agus deich

mìle làmh-choille air leud; is e am fad uile cùig mìle fichead làmh-choille,* agus an leud deich mìle.

14 Agus cha reic iad deth, ni mò ni iad a mhalairt, no bheir iad uatha ceud thoradh an fhearainn: oir tha e naomh do'n Tighearn.

15 Agus bithidh na cùig mìle làmh-choille a ta air am fàgail ams an leud, thall fa chomhair nan cùig mìle fichead, 'na ionad nach bi naomh, air son a' bhaile, air son còmhnuidh, agus air son dlùth-bhailtean; agus bithidh am baile 'na mheadhon.

16 Agus so a thoimhsean; an taobh mu thuath ceithir mìle agus cùig ceud, agus an taobh mu dheas ceithir mìle agus cùig ceud, agus air an taobh an ear ceithir mìle agus cùig ceud, agus an taobh an iar ceithir mìle agus cùig ceud.

17 Agus bithidh dlùth-bhailtean na caithreach ris an àirde tuath dà cheud agus leth-cheud, agus ris an àirde deas dà cheud agus leth-cheud, agus ris an àird an ear dà cheud agus leth-cheud, agus ris an àird an iar dà cheud agus leth-cheud.

18 Agus bithidh a' chuid eile air leud, thall fa chomhair tabhartais a' chuibhrinn naomh, deich mìle ris an taobh an ear, agus deich mìle ris an taobh an iar: agus bithidh e thall fa chomhair tabhartais a chuibhrinn naomh; agus bithidh a chinn-eas mar lòn do luchd-frithealaidh na caithreach.

19 Agus ni a' mhuinntir a fhrithealas do'n bhaile frithealadh dha á uile threubhaibh Israeil.

20 Is e an tabhartas uile cùig mìle fichead, le cùig mìle fichead: bheir sibh seachad an tabhartas naomh ceithir-chearnach, maille ri seilbh na caithreach.

21 Agus bithidh a' chuid eile air son an uachdarain, air an taobh so, agus air an taobh eile do'n tabhartas naomh, agus do sheilbh na caithreach, thall fa chomhair nan cùig mìle fichead do'n tabhartas leth ris a' chrich an ear, agus an taobh an iar thall fa chomhair nan cùig mìle fichead leth ris a' chrich an iar, thall fa chomhair nan cuibhrionn air son an uachdarain; agus bithidh e so 'na thabhartas naomh, agus bithidh naomh-ionad an teampuill 'na mheadhon.

22 An déigh seilbh nan Lebhitheach, agus seilbh na caithreach, bitlidh sin anns a' mheadhon aig an uachdaran, eadar crìoch Iudah agus crìoch Bheniamin, bithidh so aig an uachdaran.

23 A thaobh na cuid eile do na treubhan, o'n taobh an ear gus an taobh an iar, bithidh aon roinn aig Bheniamin.

24 Agus làimh ri crìch Bheniamin, o'n taobh an ear gus an taobh an iar, aon aig Simeon.

25 Agus làimh ri crìch Shimeoin, o'n taobh an ear gus an taobh an iar, aon aig Isachar.

26 Agus làimh ri crìch Isachair, o'n taobh an ear gus an taobh an iar, aon aig Sebulun.

27 Agus làimh ri crìch Shebuluin, o'n taobh an ear gus an taobh an iar, aon aig Gad.

28 Agus làimh ri crìch Ghaid, aig an taobh deas mu dheas, bithidh a' chrioch o Thamar, eadhon gu uisgeacha na stri ann an Cades, gus an amhainn leth ris an fhairge mhòir.

29 So am fearann a roinneas sibh le crannchur do threubhan Israeil air son oighreachd, agus so na cuibhrionn an aca, deir an Tighearna Dia.

30 Agus so dol a mach na caithreach air an taobh mu thuath, ceithir mìle agus cùig ceud tomhas.

31 Agus bithidh geatachan na caithreach a réir ainmean threubhan Israeil, tri geatacha ris an àirde tuath; aon gheata do Reuben, aon gheata do Iudah, aon gheata do Lebhi.

32 Agus air an taobh an ear ceithir mìle agus cùig ceud: agus tri geatachan; aon gheata do Ioseph, aon gheata do Bheniamin, aon gheata do Dhan.

33 Agus air an taobh mu dheas ceithir mìle agus cùig ceud tomhas: agus tri geatachan; aon gheata do Shimeon, aon gheata do Isachar, aon gheata do Shebulun.

34 Air an taobh an iar ceithir mìle agus cùig ceud, le'n tri gheatachaibh; aon gheata do Ghad, aon gheata do Aser, aon gheata do Naphtali.

35 Bha e mu'n cuairt ochd mìle deug tomhas: agus bithidh mar ainm air a' chaithir o'n là sin, A ta an Tighearn an sin.

DANIEL.

CAIB. I.

1 *Braighdeanas Iehoiacim. 3 Fhuair Aspenas ordugh foghlum agus teagadh nan Caldéach a theagasg do Dhaniel, Hananiah, Mhisael, agus Asariah. 8 Dhiùlt siad iad fèin a thruaillleadh le biadh an rìgh; 16 uime sin fhuair iad peasair r'a h-ith-eadh, agus uisge r'a òl. 17 Dh'fhàs iad ann an gliocas agus ann an tuigse.*

ANNS an treas bliadhna do linn Iehoiacim rìgh Iudah, thàinig Nebuchadnesar rìgh Bhabiloin gu Ierusalem, agus chuairtich e le feachd e.

2 Agus thug an Tighearn Iehoiacim rìgh Iudah d'a làimh, le cuid do shoithichibh tighe Dhé, a thug e gu rìgh Shlàin, gu tigh a dhé; seadh, thug e na soithichean gu tigh-tasgaidh a dhé.

3 Agus labhair an rìgh ri Aspenas uachdaran a chaillteanach, gu'n tugadh e leis cuid do chloinn Israeil, agus do shliochd an rìgh, agus do na prionnsachaibh,

4 Clann air nach robh ciurram air bith, ach a bha maiseach, agus foghlumte anns na h-uile ghliocas, agus fiosrach ann an eòlas, agus seòlta air ealuidh, agus a bha comasach air seasamh ann an lùchairt an rìgh, agus d' am feudadh iad foghlum agus teagadh nan Caldéach a theagasg.

5 Agus dh'orduich an rìgh dhoibh lòn lathail do bhiadh an rìgh, agus do'n fhìon a bha e ag òl: mar sin 'g an àrachadh trì bliadhna, a chum gu seasadh iad an ceann na h-aimsir sin an làthair an rìgh.

6 A nis am measg na muinntir so bha do chloinn Iudah, Daniel, Hananiah, Misael, agus Asariah:

7 D'an d'thug uachdaran nan caillteanach ainmean: oir thug e air Daniel *mar ainm* Beltesasar; agus air Hananiah Sad-rach; agus air Misael Mesach; agus air Asariah Abednego.

8 Ach ghabh Daniel rùn 'na chridhe nach truaillleadh se e fèin leis a' chuibhrionn do bhiadh an rìgh, no leis an fhìon d' an d' òl e: uime sin ghuidh e air uachdaran nan caillteanach, nach biodh e air a shal-achadh.

9 A nis thug Dia do Dhaniel deadh-ghean agus caoimhneas gràdhach o uachdaran nan caillteanach.

10 Agus thubhairt uachdaran nan caillteanach ri Daniel, Tha eagal orm roimh mo thighearn an rìgh, a dh'orduich 'ur biadh agus 'ur deoch: oir ciod uime am faiceadh e 'ur n-aghaidhean nì's miosa coslais na chlann eile d'ur seòrsa? an sin cuiridh sibh mise ann an cunnart mo chum o'n rìgh.

11 An sin thubhairt Daniel ri Melsar, a

chuir uachdaran nan caillteanach os ceann Dhaniel, Hananiah, Mhisael agus Asariah,

12 Dearbh do sheirbhiseich, guidheam ort, deich làithean, agus thugar dhuinn peasair ri h-ith-eadh, agus uisge r'a òl.

13 An sin amhaircear air ar n-aghaidhean ann ad làthair-sa, agus air aghaidh na cloinne ta'g itheadh do chuibhrionn bidh an rìgh: agus mar a chithear ceart duit, buin ri d'sheirbhiseich.

14 Is amhuil a dh'aontaich e leo anns a' chùis so, agus dhearbh e iad deich làithean.

15 Agus an ceann dheich làithean bha dreach an aghaidhean nì bu mhaisiche agus nì bu shultmoire na an uile chlann a dh'ith an cuibhrionn do bhiadh an rìgh.

16 Mar so thug Melsar air falbh cuibhrionn am bidh, agus am fion bu chòir dhoibh òl; agus thug e dhoibh peasair.

17 A thaobh nan ceathrar chloinne so, thug Dia dhoibh eòlas agus tuigse anns na h-uile fhoghlum agus ghliocas: agus bha tuigse aig Daniel anns na h-uile sheallanaibh agus bhrudaraibh.

18 A nis aig ceann nan làithean, anns an d' thubhairt an rìgh gu'n tugadh e steach iad, an sin thug uachdaran nan caillteanach a steach iad an làthair Nebuchadnesair.

19 Agus rinn an rìgh còmhradh riu; agus 'nam measg uile cha d'fhuaradh aon cosmhuil ri Daniel, Hananiah, Misael, agus Asariah: air an aobhar sin sheas iad fa chomhair an rìgh.

20 Agus anns na h-uile ghnòthuicheibh gliocais agus tuigse a dh'fhiosraich an rìgh dhiubh, fhuair e iad deich uairean nì b' fhearr na na h-uile dhruidhean agus speuradairean a bha 'na rioghachd uile.

21 Agus mhair Daniel gu ceud bhliadhna rìgh Chimis.

CAIB. II.

1 *Ghairm Nebuchadnesar druidhean agus luchd-fiosachd nan Caldéach 'na làthair, 5 agus dh'iarr e gu'n tugadh iad fios da air a bhrudar a bha air dol as àire. 10 'Nuair a dh'aicheadh iad nach b'urrainn doibh an ghnòthuch fhoillseachadh do'n rìgh, dh'orduich e an cur gu bàs. 18 Chaidh am brudar fhoillseachadh do Dhaniel ann an sealladh na h-oidiche. 31 Am brudar agus a bhrìgh.*

AGUS anns an dara bliadhna do linn Nebuchadnesair, bhrudair Nebuchadnesar brudar, leis an robh 'iuntinn air a buaireadh, agus dhealaich a chodal ris.

2 An sin dh'àitln an rìgh na druidhean, agus na speuradairean, agus an luchd-fiosachd, agus na Caldéich a ghairm, a

dh'fheuchainn do'n rìgh a bhruadair: mar sin thàinig iad, agus sheas iad an làthair an rìgh.

3 Agus thubhairt an rìgh riu, Bhruadair mi brudair, agus bha m' inntinn air a buaireadh a dh'fhaotainn fios a bhruadair.

4 An sin labhair na Caldéich ris an rìgh anns a' chànan Shiriaich, O a rìgh, mair beò gu bràth: innis do d' sheirbhisich am brudair, agus feuchaidh sinne a bhrìgh.

5 Fhreagair an rìgh agus thubhairt e ris na Caldéich, Tha an ni air dol as m' aire; mur toir sibhse fios dhomh air a' bhrudair le 'bhrìgh, gearrar sibh 'nur bloighdibh, agus nìhear 'ur tighean 'nan dùn aolaich.

6 Ach ma dh'fheuchas sibh am brudair agus a bhrìgh, gheibh sibh uam-sa tiodhlacan agus duais, agus onoir mhòr: uime sin feuchaibh dhomh am brudair agus a bhrìgh.

7 Fhreagair iadsan a ris, agus thubhairt iad, Innseadh an rìgh d'a sheirbhisich am brudair, agus feuchaidh sinne a bhrìgh.

8 Fhreagair an rìgh agus thubhairt e, Tha fios again gu deimhin gu'm b' àill leibh ùine fhaotainn, a chionn gu bheil sibh a' faicinn gu bheil an ni air dol as m' aire.

9 Ach mur toir sibh fios domh air a' bhrudair, cha'n 'eil ach an aon bhreth dhuibh: oir dh'ulluich sibh briathran breugach agus truailidh gu labhairt am làthair-sa, gu atharrachadh na h-aimsir: uime sin innsibh dhomh am brudair, agus aithnichidh mi gur urrainn sibh a bhrìgh fheuchainn dhomh.

10 Fhreagair na Caldéich ann am fianuis an rìgh, agus thubhairt iad, Cha'n 'eil duine air an talamh a's urrainn gnothuch an rìgh fhoillseachadh: air an aobhar sin cha'n 'eil rìgh, no tighearn, no fear-riaghlaidh a dh'iarr an leithide so do nithibh air aon druidh, no speuradair, no Caldéach.

11 Agus is ni deacair a ta an rìgh ag iarraidh, agus cha'n 'eil aon air bith eile a's urrainn fheuchainn fa chomhair an rìgh, ach na dèe aig nach 'eil an còmh-nuidh maille ri feoil.

12 Air an aobhar so bha 'n rìgh ann am feirg, agus ann an teas-chorruich, agus dh'aithn e uile dhaoine glìce Bhabailoin a mhilleadh.

13 Agus chaidh an t-ordugh a mach gu'm biodh na daoine glìce air am marbhadh; agus dh'iarr iad Daniel agus a chompanaich gu bhli air am marbhadh.

14 An sin fhreagair Daniel le comhairle agus le glìocas, Ariocho, ceann-feadhna freiceadain an rìgh, a chaidh a mach a mharbhadh dhaoine glìce Bhabailoin.

15 Fhreagair e agus thubhairt e ri Ariocho, ceann-feadhna an rìgh, C'ar son a tha'n t-ordugh cho dian o'n rìgh? An sin dh'innis Ariocho a' chùis do Dhanìel.

16 An sin chaidh Daniel a steach, agus ghuidh e air an rìgh gu'n tugadh e dha ùine agus gu feuchadh e do'n rìgh a' bhrìgh.

17 An sin chaidh Daniel g'a thigh, agus dh'innis e a' chùis do Hananiah, Mhisael, agus Asariah, a chompanaich;

18 A chum gu'n iarradh iad tròcair air Dia nèimh mu thimchioll na diomhaireachd so; a chum nach bàsaicheadh Daniel agus a chompanaich leis a' chuid eile do dhaoine glìce Bhabailoin.

19 An sin bha an diomhaireachd air a foillseachadh do Dhanìel ann an sealladh san oidhche: an sin bheannaich Daniel Dia nèimh.

20 Fhreagair Daniel agus thubhairt e, Beannaichte gu robh aium Dhé gu saoghal nan saoghal; oir is leis-san glìocas agus cumhachd.

21 Agus atharraichidh e na h-amanna, agus na h-aimsirean: atharraichidh e rìghrean, agus cuiridh e suas rìghrean: bheir e glìocas do'n ghlic, agus eòlas dhoibh-san d'an aithne tuigse.

22 Foillsichidh e na nithe domhain agus diomhair: is aithne dha ciod a ta san dorchadas, agus tha an solus a chòmh-nuidh maille ris.

23 Tha mi toirt buidheachais agus cliù dhuit, O thusa, a Dhia m' aithrichean, a thug dhomh glìocas agus cumhachd, agus a thug fios duinn a nis air an ni a dh'iarr sinn ort: oir thug thu fios duinn a nis air gnothuch an rìgh.

24 Uime sin chaidh Daniel a steach gu Ariocho, a shonraich an rìgh gu daoine glìce Bhabailoin a mhilleadh: chaidh e agus labhair e mar so ris, Na sgrios daoine glìce Bhabailoin: thoir mise steach ann am fianuis an rìgh, agus feuchaidh mi do'u rìgh an seadh.

25 An sin thug Ariocho a stigh Daniel ann am fianuis an rìgh gu luath, agus thubhairt e mar so ris, Fhuair mi duine do bhraghaidibh Iudah, a bheir fios do'u rìgh air an t-seadh.

26 Fhreagair an rìgh, agus thubhairt e ri Daniel, d' am b' ainm Beltesasar, An urrainn thusa fios a thoirt domh air a' bhrudair a chunnaic mi, agus air a bhrìgh.

27 Fhreagair Daniel ann am fianuis an rìgh, agus thubhairt e, An diomhaireachd a dh'iarr an rìgh cha'n urrainn na daoine glìce, na speuradair, na druidhean, no an luchd-fiosachd fheuchainn do'u rìgh;

28 Ach tha Dia ann an nèamh a dh'fhoill-

DANIEL, II. III.

sicheas nithe dìomhair, agus a ta toirt fios do Nebuchadnesar ciod a thachras anns na làithibh deireannach. Do bhruadar, agus aislingean do chiun air do leabaidh, is iad so iad:

29 (Do d' thaobh-sa, O a rìgh, thàinig do smuainte ann ad aire air do leabaidh, na nithe bha ri tachairt 'na dhéigh so; agus tha esan a dh'fhoillsicheas nithe dìomhair a' toirt fios duit ciod a thig gu crìch.

30 Ach do m' thaobh-sa, cha'n 'eil an dìomhaireachd so air a leigeadh ris domh air son gliocais air bith a ta agam thar aon *duine* beò, ach air an son-san a ni a' bhrìgh aithnichte do'n rìgh; agus a chum gu'm biodh fios agad-sa air smuainte do chridhe:)

31 Chunnaic thusa, O a rìgh, agus feuch iomhaigh mhòr: sheas an iomhaigh mhòr so, aig an robh dealradh òirdheirc, fa d' chomhair, agus bha a dreach uamhasach.

32 Bha ceann na h-iomhaigh so do òr finealta, a h-uchd agus a làmhha do airgid, a brù agus a sléisde do umha.

33 A luirg nan do iarunn, a cosan¹, cuid do iarunn, agus cuid do chré².

34 Chunnaic thu gus an robh clach air a gearradh a mach gun làmhnan, a bhuail an iomhaigh air a cosan a bha do iarunn agus do chré, agus a bhris 'nam bloighdibh iad.

35 An sin bha an t-iarunn, a' chré, an umha, an t-airgid agus an t-òr, air am briseadh 'nam bloighdibh le chéile, agus dh'fhàs iad cosmhuil ri moll nan urlar-bualaidh anns an t-samhradh, agus thug a' ghaoth air falbh iad, ar chor as nach d'fhuaradh àite sam bith dhoibh: agus dh'fhàs a' chlach a bhuail an iomhaigh 'ua sliabh mòr, agus lion i an talamh.

36 So am bruadar; agus innsidh sinn a bhrìgh an làthair an rìgh.

37 O a rìgh, is rìgh os ceann rìghrean thusa: oir thug Dia nèimh dhuit rìghrachd, cumhachd, agus neart, agus glòir.

38 Agus c'ait air bith am bheil clann nan daoine a' gabhail còmhuidh, beathaichean na macharach, agus eunlaith an athair, thug e do d' làmh-sa, agus rinn e uachdaran diot os an ceann uile: is tusa an ceann so do òr.

39 Agus ann ad dhéigh-sa éiridh rìghrachd eile, m' s lugha na thusa, agus treas rìghrachd eile do umha, ag am bi uachdaranachd os ceann an domhain uile.

40 Agus bithidh an ceathramh rìghrachd làidir mar iarunn: amhuil a bhriseas iarunn ann am bloighdibh, agus a chlaoidheas e na h-uile nithe: agus amhuil iarunn a bhriseas iad so uile, brisidh i ann am

bloighdibh, agus bruthaidh.

41 Agus mar a chunnaic thu na cosan agus na meoir, cuid do chré a' chriadh-adair, agus cuid do iarunn, bithidh an rìghrachd air a roinn; ach bithidh iunte do neart an iarunn, ann a' mheud as a chunnaic thu an t-iarunn air a mheasgadh le cré làthaich.

42 Agus mar a bha meoir nan cos, cuid do iarunn, agus cuid do chré; bithidh cuid d' an rìghrachd làidir, agus cuid briste.

43 Agus mar a chunnaic thu iarunn air a mheasgadh le cré làthaich, measgaidh iadsan iad féin le siol dhaoine: ach cha ghreimich iad r'a chéile, amhuil mar nach gabh iarunn tathadh ri cré.

44 Agus ann an làithibh nan rìghrean so, cuiridh Dia nèimh suas rìghrachd nach téid gu sìorruidh a sgrìos: agus cha bhi an rìghrachd air a fàgail aig sluagh eile, *ach* brisidh i 'nam bloighdibh, agus caithidh na rìghrachdan so uile, agus seasaidh i gu sìorruidh.

45 Ann a' mheud as gu facadh tu gu'n robh a' chlach air a gearradh a mach as an t-sliabh as eugmhais làmhnan, agus gu'n do bhris i 'nam bloighdibh an t-iarunn, an umha, a' chré, an t-airgid agus an t-òr; thug an Dia mòr fios do'n rìgh ciod a thig gu crìch 'ua dhéigh so: agus tha am bruadar cinnteach, agus a bhrìgh dearbhta.

46 An sin thuit an rìgh Nebuchadnesar air 'aghaidh, agus thug e urram do Dhanìel, agus dh'aitn e gu'n tugadh iad dha tabhartas agus boltrach cùbhraidh.

47 Fhreagair an rìgh Daniel, agus thubhairt e, Gu fìrinneach is e bhuir Dia-sa Dia nan dée, agus Tighearna na rìghrean, agus fear-foillseachaidh nithe dìomhair, air dhuist-se bhi comasach an dìomhaireachd so fhoillseachadh.

48 An sin rinn an rìgh duine mòr do Dhanìel, agus thug e dha mòran thiodh-laca luachmhor, agus rinn e fear-riaghlaidh dheth os ceann mhòr-roinn Bhabailoin uile, agus ceannard air na h-uachdaran os ceann uile dhaoine glìce Bhabailoin.

49 An sin dh'iarr Daniel air an rìgh, agus chuir e Sadrach, Mesach, agus Abednego os ceann ghnòthuichean mhòr-roinn Bhabailoin, ach shuidh Daniel ann an geata an rìgh.

CAIB. III.

1 Chuir Nebuchadnesar suas iomhaigh òir, agus dh'orduich e do gach sluagh aoradh a thoirt dì. 8 Dhiùlt Sadrach, Mesach, agus Abednego so a dheanamh. 13 Bhagair an rìgh iad: 16 Am freagradh: 19 Thilgeadh iad ann meadhan na h-àmhuinn theintich: 24 Chuir Dia aingeal maillo

riu, agus cha robh cumhachd air bith aig an teine air an corpaibh. 26 Thug Nebuchadnesar a mach as an àmhuinn iad.

RINN Nebuchadnesar an rìgh iomhaigh òir, a bha trì fichead làmh-choille air àirde, agus sè làmh-choille air leud: chuir e suas i ann am machair Dhura, ann am mòr-roinn Bhabiloin.

2 An sin chuir Nebuchadnesar an rìgh fios a chum gu'n cruinnichear ri chéile na prionusachan, na fir-riaghlaidh, agus na cinn-fheadhna, na breitheamhna, luchd-coimhid an ionmhais, na comhairlich, na fir-lagha, agus uile luchd-riaghlaidh nam mòr-roinn, gu teachd a chum coisreagaidh na h-ìomhaigh a chuir Nebuchadnesar an rìgh suas.

3 An sin bha na prionnsachan, na fir-riaghlaidh, na cinn-fheadhna, na breitheamhna, luchd-coimhid an ionmhais, na comhairlich, na fir-lagha, agus uile luchd-riaghlaidh nam mòr-roinn air an cruinneachadh ri chéile, chum coisreagaidh na h-ìomhaigh a chuir Nebuchadnesar an rìgh suas; agus sheas iad fa chomhair na h-ìomhaigh a chuir Nebuchadnesar suas.

4 An sin ghlaodh fear-éighich gu h-àrd, Dhuibh-se ta e air 'àithneadh, O shluagh, fhineacha, agus a theanganna,

5 Cìod air bith àm an cluinn sibh fuaim na trompaid, an fheadain, na clàrsaich, sacbuit, saltair, dulsimeir, agus na h-uile seòrsa ciùil, gu'n tuit sibh sìos, agus gu'n toir sibh aoradh do'n ìomhaigh òir a chuir an rìgh Nebuchadnesar suas.

6 Agus cò air bith nach strìochd sìos, agus nach dean aoradh, tilgear e san uair sin féin ann am builsgéan àmhuinn theintich dhian-loisgich.

7 Uime sin anns an àm sin, an uair a chuala an sluagh uile fuaim na trompaid, an fheadain, na clàrsaich, sacbuit, saltair, agus na h-uile seòrsa ciùil, thuit an sluagh uile, na fineacha, agus na teanganna, sìos, agus thug iad aoradh do'n ìomhaigh òir a chuir an rìgh Nebuchadnesar suas.

8 Air an aobhar sin, anns an àm sin thàinig Caldéich àraidh ann fagus, agus rinn iad casaid air na h-Iudhaich.

9 Labhair iad, agus thubhairt iad ris an rìgh Nebuchadnesar, O a rìgh mair beò gu bràth.

10 Thug thusa, O a rìgh, ordugh gu'n deanadh gach aon a chluinneadh fuaim na trompaid, an fheadain, na clàrsaich, sacbuit, saltair, agus dulsimeir, agus na h-uile seòrsa ciùil, strìochdadh agus aoradh do'n ìomhaigh òir:

11 Agus cò air bith nach strìochd sìos, agus nach dean aoradh, gu'm biodh e air a thilgeadh ann am builsgéan àmhuinn theintich dhian-loisgich.

12 Tha Iudhaich àraidh, a chuir thu os ceann ghnòtluchean mhòr-roinn Bhabiloin, Sadrach, Mesach, agus Abednego; cha d'thug na daoine so, O a rìgh, meas ortsa, cha 'n 'eil iad a' deanamh seirbhis do d' dhiathaibh, no toirt aoraidh do'n ìomhaigh òir a chuir thu suas.

13 An sin dh'àithn Nebuchadnesar, 'na fheirg, agus 'na chorrùich, Sadrach, Mesach, agus Abednego, a thoirt d'a ionnsuidh: an sin thug iad na daoine so an làthair an rìgh.

14 Labhair Nebuchadnesar, agus thubhairt e riu, Am bheil so fìor, O Shadrach, a Mhesaich, agus Abednego? nach 'eil sibhse toirt seirbhis do m' dhiathaibh-sa, no toirt aoraidh do'n ìomhaigh òir a chuir mi suas?

15 A nis ma bhios sibh deas, ge b'e air bith àm anns an cluinn sibh fuaim na trompaid, an fheadain, na clàrsaich, sacbuit, saltair, agus dulsimeir, agus na h-uile seòrsa ciùil, gu strìochdadh sìos, agus aoradh a dheanamh do'n ìomhaigh a rinn mise, *is maith*: ach mur dean sibh aoradh, tilgear sibh, anns a' cheart uair sin, ann am builsgéan àmhuinn theintich dhian-loisgich; agus cò an Dia sin a's urrainn 'ur tearnadh as mo làmh-sa?

16 Fhreagair Sadrach, Mesach, agus Abednego, agus thubhairt iad ris an rìgh, O Nebuchadnesair, cha 'n 'eil suim againne freagradh a thoirt duit anns a' chùis so.

17 Ma's ann mar sin a bhitheas, tha ar Dia-ne, d'am bheil sinn a' toirt seirbhis, comasach air ar saoradh o'n àmhuinn theintich dhian-loisgich, agus ni e ar saoradh as do làmh-sa, O a rìgh.

18 Ach mur dean, biodh fios agad, O a rìgh, nach toir sinn seirbhis do d' dhiathaibh, no aoradh do'n ìomhaigh òir a chuir thu suas.

19 An sin bha Nebuchadnesar làn do chorrùich, agus bha dreach a ghnùise air caochladh an aghaidh Shadrach, Mhesaich, agus Abednego; labhair agus dh'àithn e gu'n teasaicheadh iad an àmhuinn seachd uairean ni bu mhò na bu ghuàth-leo a teasachadh.

20 Agus dh'àithn e do na daoine bu treise 'na fheadh Sadrach, Mesach, agus Abednego a cheangal, agus a thilgeadh do'n àmhuinn theintich dhian-loisgich.

21 An sin cheangladh na daoine so 'nan còtaichibh, 'nan triughasaibh, agus 'nan ceann-eudaichibh, agus 'nan eudaichibh eile, agus thilgeadh iad ann am meadhan na h-àmhuinn theintich dhian-loisgich.

22 Air an aobhar sin, a chionn gu'n robh àitline an rìgh ro theann, agus an àmhuinn ro theith, mharbh lasair an teine na daoine sin a thog suas Sadrach, Mesach, agus Abednego.

23 Agus thuit an triuir dhaoine so, Sadrach, Mesach, agus Abednego sìos ceangailte ann am builsghean na h-àmhuiinn theitnich dhian-loisgich.

24 An sin bha an rìgh Nebuchadnesar làn uamhuinn, agus dh'èirich e suas ann an deifir, agus labhair e, agus thubhairt e r'a chomhairlich, Nach do thilg sinn triuir dhaoine ceangailte do mheadhon an teine? Fhreagair iadsan agus thubhairt iad ris an rìgh, Is fìor, O a rìgh.

25 Fhreagair esan agus thubhairt e, Feuch, chì mi ceathrar dhaoine fuasgaile, a' coiseachd ann am meadhon an teine, agus cha'n 'eil dochann sam bith orra, agus tha coslas a' cheathramh mar mhac Dé.

26 An sin thàinig Nebuchadnesar dlùth do bheul na h-àmhuiinn theitnich dhian-loisgich, agus labhair e. ag ràdh, A Shadraich, Mhesaich, agus Abednego, òglacha an Dé a's àirde, thigibh a mach, agus thigibh an so. An sin thàinig, Sadrach, Mesach, agus Abednego a mach á meadhon an teine.

27 Agus chunnaic na prionnsachan, na uachdarain, agus na cinu-sheadhna, agus comhairlich an rìgh, a bha cruinn an ceann a chéile, na daoine so, nach robh cumhachd air bith aig an teine air an corpaibh, ni mò bha fuiltean d' an ceann dàithte, no an còtaichean air an caochladh, no fàile an teine dhiubh.

28 An sin labhair Nebuchadnesar, agus thubhairt e, Gu ma beannaichte gu robh Dia Shadraich, Mhesaich, agus Abednego, a chuir a nuas 'aingeal, agus a shaor 'òglach a chuir an dòchas ann, agus a chuir an aghaidh focail an rìgh, agus a thug seachad an cuirp a chum nach tugadh iad seirbhis no aoradh do dhia air bith, ach an Dia féin.

29 Uime sin tha mise a' toirt teann-orduigh, gu'm bi gach sluagh, cinneach, agus teangaidh, a labhras ni sam bith air dhochair an aghaidh Dhé Shadraich, Mhesaich, agus Abednego, air an gearradh 'nam bloighdibh, agus an tighean air an deanamh 'nan dùn aolaich, a chionn nach 'eil Dia air bith eile ann a's urrainn tèarnadh air an dòigh so.

30 An sin dh'àrdaich an rìgh Sadrach, Mesach, agus Abednego ann am mòr-roinn Bhabiloìn.

CAIB. IV.

1 Chuir Nebuchadnesar an cèill gu'n robh uachdaranachd an Tighearna o linn gu linn. 4 Dh'aithris e an aistling a chunnaic e. 8 Dh'innis Daniel dha ciod bu bhrìgh dhi. 28 Choimhlionadh an aistling.

NEBUCHADNESAR an rìgh chum nan uile shluagh, fhineacha agus theanganna a ta chòmhnuidh air an talamh uile: Gu meudaichear sìth dhuibh.

2 Chunnacas ceart dhomh-sa gu'n cuirinn an cèill na comharan agus na mòr-bhuilean a dh'oibrich an t-àrd Dhia do m' thaobh.

3 Cia mòr a chomharan! agus cia cumhachdach a mhìorbhuilean! a rìoghachd-san is rìoghachd shiorruidh i, agus tha 'uachdaranachd o linn gu linn.

4 Bha mise Nebuchadnesar gu suaimheach ann am thigh, agus gu h-àluinn ann am lùchairt:

5 Chunnaic mi brùadar a chuir eagail orm, agus rinn mo smuainte air mo leabaidh, agus aislinge mo chinn mo bhuair-eadh.

6 Uime sin thug mi teann-ordugh uile dhaoine glìce Bhabiloìn a thoirt a steach a'm' fhianuis, a chum gu'n tugadh iad fios domh air brìgh a' bhrùadair.

7 An sin thàinig a steach na druidhean, na speuradairean, na Caldèich, agus na fiosaichean: agus dh'innis mi am brùadar 'nan làthair; ach cha d'thug iad fios domh air a bhrìgh.

8 Ach mu dheireadh, thàinig Daniel a steach a'm' làthair, (d'am b' ainm Beltesasar, a réir ainme mo dhé-sa, agus anns am bheil spiorad nan dée naomha,) agus 'na làthair-san dh'innis mi am brùadar, *ag ràdh,*

9 O Bheltesasar, thusa a's àirde do ua druidhibh, a chionn gu bheil fios agam gu bheil spiorad nan dée naomha annad-sa, agus nach cuir dìomhaireachd air bith dragh ort, innis domh sealladh mo bhrùadair a chunnaic mi, eadhon a bhrìgh.

10 Mar so bha aislinge mo chinn air mo leabaidh; Chunnaic mi, agus, feuch, craobh ann am meadhon na talmhainn, agus bha a h-àirde mòr.

11 Dh'fhàs a' chraobh, agus bha i làidir, agus ràinig a h-àirde gu nèamh, agus a sealladh gu crìch na talmhainn uile:

12 Bha a duilleach maiseach, agus a toradh pailt, agus innte bha biadh air son na h-uile: bha aig beathaichean na macharach sgàile fuipe, agus ghabh eunlaith an athair còmhnuidh 'na gengaibh, agus bheathaicheadh na h-uile fheoil uaipe.

13 Chunnaic mi ann an aislingibh mo chinn air mo leabaidh, agus, feuch, thàinig fear-faire, eadhon aon naomh a nuas o nèamh:

14 Ghlaodh e gu h-àrd, agus thubhairt e mar so, Gearr sìos an crann, agus sgath dheth a gheugan, crath dheth a dhuilleach, agus sgap a thoradh; imicheadh na beathaichean o bli fuidhe, agus ua h-eunlaith o 'gheugaibh.

15 Gidheadh, fàg bun a fhreumh anns an talamh, eadhon le boinn iaruin anns

DANIEL, IV.

umha, ann am feur maoth na faiche; agus biodh e fliuch le dealt nèimh, agus a chuibhrionn leis na beathaichibh ann am feur na talmhainn.

16 Atharraichear a chridhe o bhi 'na chridhe duine, agus thugar dha cridhe ainmhidh; agus gabhadh seachd aimsir-ean thairis air.

17 Tha a' chùis so le teann-ordugh nam fear-faire, agus an t-iarrtas air focal nan naomh: a chum gu'm biodh fios aig na bheil beò gu bheil an Tì a's àirde a' riaghladh ann an rìoghachd dhaoine, agus 'ga tabhairt do neach air bith as àill leis, agus a' cur snas os a ceann an tì a's surraiche do dhaoine.

18 Am brùadar so chunnaic mise Nebuchadnesair an rìgh: a nis, O Bheltesasair, foillsich thusa a bhrìgh, a chionn nach 'eil uile dhaoine glìce mo rìoghachd comasach air fios a thoirt domh air a bhrìgh: ach tha thusa comasach, oir tha spiorad nan dèe naomha annad.

19 An sin bha Daniel, (d' am b' ainm Beltesasar,) air a lionadh le h-uamhunn car aon uaire, agus rinn a smuaintean a bhuaireadh: labhair an rìgh, agus thubhairt e, A Bheltesasair, na deanadh am brùadar no a bhrìgh do bhuaireadh. Fhreagair Beltesasar, agus thubhairt e, Mo thighearn, biodh am brùadar dhoibhsan le am fuathach thu, agus a bhrìgh do d' naimhdibh.

20 An crann a chunnaic thu, a dh'fhàs, agus a bha làidir, a ràinig 'àirde gu nèamh, agus a shealladh gus an talamh uile;

21 Aig an robh a dhuilleach maiseach, agus a thoradh pailt, agus anns an robh biadh do na h-uile; fuidh an do ghabh beathaichan na macharach còmhnuidh, agus aig an robh air a gheugaibh àite-tàimh do eunlaith an athair:

22 Is tusa sin, O a rìgh, a ta air fàs agus air cinntinn làidir: oir tha do mheud air fàs agus a' rugheachd gu nèamh, agus t' uachdaranachd gu crìch na talmhainn.

23 Agus mar a chunnaic an rìgh fear-faire, agus aon naomh a' teachd a nuas o nèamh, agus ag ràdh, Gearr an crann sìos, agus sgrios e; gidheadh fàg bonn a fhreumh anns an talamh, eadhon le boinn iarùinn agus umha ann am feur maoth na faiche; agus biodh e fliuch le dealt nèimh, agus a chuibhrionn le beathaichibh na macharach, gus an gabh seach aimsir-ean thairis air:

24 So a' bhrìgh, O a rìgh, agus so ordugh an Tì a's àirde, a ta air teachd air mo thighearn an rìgh:

25 Gu fògair iad thu o dhaoibh, agus gu'm bi do chòmhnuidh le beathaichibh na macharach, agus bheir iad ort feur

itheadh mar dhaimh, agus fliuchaidh iad thu le dealt nèimh, agus thèid seachd aimsirean thairis ort, gus am bi fios agad gu bheil an Tì a's àirde a' riaghladh ann an rìoghachd dhaoine, agus 'ga tabhairt do neach air bith as àill leis.

26 Agus mar a dh'àithn iad bun freumh a' chroinn fhàgail, bithidh do rìoghachd cinnteach dhuit, an dèigh dhuit fios a bhi agad gu bheil na nèamhan a' riaghladh.

27 Uime sin, O a rìgh, biodh mo chomhairle-sa taitneach leat, agus bris air falbh do pheacanna le fireantachd, agus t' euceartan le trócair a nochdadh do na bochdaibh, a dh'fheuchaimu am buanaichear do shiochaint.

28 Thàinig so uile air rìgh Nebuchadnesar.

29 An ceann dà mhìos deug bha e spaisdearachd ann an lùchairt rìoghachd Bhabiloin.

30 Labhair an rìgh agus thubhairt e, Nach i do Babilon mhòr, a thog mise mar thigh na rìoghachd, le neart mo chumhachd, agus air son onoir mo mhòrachd?

31 Am feadh a bha am focal ann am beul an rìgh, thuit guth o nèamh, ag ràdh, O a rìgh Nebuchadnesair, riutsa ta e air a labhairt, Tha an rìoghachd air dealachadh riut.

32 Agus fògraidh iad thu o dhaoine, agus bithidh do chòmhnuidh le beathaichibh na macharach: bheir iad ort feur itheadh mar dhaimh, agus thèid seachd aimsirean thairis ort, gus am bi fios agad gu bheil an Tì a's àirde a' riaghladh ann an rìoghachd dhaoine, agus 'ga tabhairt do neach air bith as àill leis.

33 Air an uair sin fèin choimhlionadh an nì sin air Nebuchadnesair; agus bha e air fhògradh o dhaoine, agus dh'ith e feur mar dhaimh, agus bha a cholann fliuch le dealt nèimh, gus an d'fhàs 'fhionna mar chloimh na h-iolaire, agus 'iongannan mar *spuirean* eun.

34 Agus an ceann nan làithean thog mise Nebuchadnesar suas mo shùilean ri nèamh, agus phill mo thuigse a m' ionnsuidh, agus bheannaich mi an Tì a's àirde, agus chluithaich mi, agus thug mi onoir dha-san a ta beò gu sìorruidh, aig am bheil 'uachdaranachd 'na h-uachdaranachd shiorruidh, agus a rìoghachd o linn gu linn.

35 Agus tha uile luchd-àiteachaidh na talmhainn air am meas mar neo-ni: agus ni esan mar is àill leis ann am feachd nèimh, agus am measg luchd-àiteachaidh na talmhainn: agus cha 'n urrainn aon neach a làmh a bhacadh, no ràdh ris, Cìod a tha thu deanamh?

36 Anns an àm sin fèin phill mo thuigse thugam; agus a thaobh glòir mo rìoghachd, phill m' onoir agus mo mhòrachd

thugam, agus dh'iarr mo chomhairlichean agus mo thighearnan a m' ionnsuidh; agus bha mi air mo dhaingnicheadh ann am rioghachd, agus thugadh tuilleadh dhomh do mhòrachd òirdheire.

37 A nis tha mise Nebuchadnesar a' cliùthachadh agus ag àrdachadh, agus a' toirt onoir do Rìgh nèimh, aig am bheil 'uile oibre 'nam firinn, agus a shligheanna 'nam breitheanais; agus a' mhuinntir a shiùbhlas ann an uabhar, tha esan comasach air an isleachadh.

CAIB. V.

1 *Cuirm aingidh Bhelsasair: 5 Rinn a smuaintean a bhuaireadh 'nuair chumaid e an lamh-sgrìobhadh air a' bhalla. 25 Dh'innis Daniel do'n rìgh brìgh an sgrìobhaidh.*

RINN Belsasar an rìgh cuirm mhòr do mhìle d'a thighearnaibh agus dh'òl e fion ann an làthair a' mhìle.

2 Dh'àithn Belsasar, 'nuair a bhlais e am fion, na soithichean òir agus airgid a thug 'athair Nebuchadnesar as an team-pull a bha ann an Ierusalem a thoirt d'a ionnsuidh, a chum gu'n òladh an rìgh agus a mhòr-uaislean, a mhnathan agus a choimhleabaich asda.

3 An sin thug iad thuige na soithichean òir a thugadh a' teampull tighe Dhé, a bha ann an Ierusalem; agus dh'òl an rìgh agus a mhòr-uaislean, a mhnathan agus a choimhleabaich asda.

4 Dh'òl iad fion, agus chliùthaich iad na diathan òir agus airgid, umha, iaruin, fhiodha, agus chloiche.

5 Anns an uair sin féin thàinig a mach meoir làimhe duine, agus sgrìobh iad thall fa chomhair a' choinnleir, air aghaidh balla làchair an rìgh; agus chunnaic an rìgh a' chuid d'an làimh a sgrìobh.

6 An sin chaochail gnùis an rìgh, agus rinn a smuaintean a bhuaireadh, air chor as gu'n robh uilt a leasraidh air am fuasgladh, agus bhuail a ghlùinean an aghaidh a chèile.

7 Ghlaodh an rìgh gu h-àrd na speuradairean, na Caldéich, agus na fiosaichean a thoirt a stigh: agus labhair an rìgh, agus thubhairt e ri daoine glìce Bhabiloìn, Cò air bith a leughas an sgrìobhadh so, agus a dh'fhoillsicheas domh-sa a bhrìgh; sgeudaichear e le sgarlaid, agus cuirear slabhruidh òir m'a mhuineal, agus is e an treas fear-riaghlaidh a bhios anns an rìoghachd.

8 An sin thàinig uile dhaoine glìce an rìgh a steach; ach cha b'urrainn iad an sgrìobhadh a leughadh, no fios a thoirt do'n rìgh air a bhrìgh.

9 An sin bha an rìgh Belsasar gu mòr air a bhuaireadh, agus bha a ghnùis air a h-atharrachadh, agus bha uanbas air a thighearnaibh.

10 A nis thàinig a' bhan-rìghinn air son bhriathran an rìgh agus a thighearnan, a stigh gu tigh na cuirme; agus labhair a' bhan-rìghinn, ag ràdh, O a rìgh mair beò gu bràth: na deanadh do smuaintean do bhuaireadh, agus na biodh do ghnùis air a caochladh.

11 Tha duine ann ad rioghachd anns am bheil spiorad nan dée naomha, agus ann an làthibh t'athar, bha solus, agus tuigse, agus gliocas, mar ghliocas nan dée, air am faotainn ann; neach a rinn an rìgh Nebuchadnesar t'athair, t'athair-sa, O a rìgh, 'na uachdaran air na druiddibh, speuradaibh, Caldéich, agus fiosaichibh;

12 Do bhrìgh gu'n d'fhuair eadh spiorad òirdheire agus eòlas, agus tuigse, minceachadh bhruadar, agus taisbean cheistein cruaidhe, agus fuasgladh imcheistean, anns an Daniel so féin, air an d'thug an rìgh mar ainm Beltesasar: a nis gairmeair Daniel, agus foillsichidh esan a bhrìgh.

13 An sin thugadh Daniel a steach an làthair an rìgh; agus labhair an rìgh, agus thubhairt e ri Daniel, An tusa an Daniel sin a ta do chloinn bhraighdeanaïs Iudah, a thug an rìgh, m' athair á tìr nan Iudach?

14 Chuala mise iomradh ort, gu bheil spiorad nan dée annad, agus gu bheil solus, agus tuigse, agus gliocas òirdheire air 'fhaotainn annad.

15 Agus a nis thugadh na daoine glìce, na speuradairean a steach a m' fhianuis, a chum gu'n leughadh iad an sgrìobhadh so, agus gu'n tugadh iad dhomh-sa fios air a bhrìgh: ach cha b'urrainn iad brìgh na cùise fhoillseachadh.

16 Agus chuala mi do d' thaobh-sa, gur urrainn thu brìgh a thoirt á nì, agus ceistean fuasgladh; a nis ma's urrainn thu an sgrìobhadh a leughadh, agus a bhrìgh fhoillseachadh dhomh-sa, éidichear thu le sgarlaid, agus cuirear slabhruidh òir mu d' mhuineal, agus is tu an treas fear-riaghlaidh a bhios anns an rìoghachd.

17 An sin fhreagair Daniel, agus thubhairt e an làthair an rìgh, Biodh do thiodhlacan agad féin, agus thoir do dhuaislean do neach eile, gidheadh leughaidh mise an sgrìobhadh do'n rìgh, agus leigidh mi ris a bhrìgh dha.

18 O thusa a rìgh, thug an Dia a's àirde do Nebuchadnesar t'athair rioghachd, agus mòrachd, agus glòir, agus onoir.

19 Agus air son na mòrachd a thug e dha, bha crith agus eagal air na h-uile shluagh, fhineachaibh, agus theangannaibh roimhe: mharbhadh e an tì a b'àill leis, agus an neach a b'àill leis chumadh e beò, agus an neach a b'àill leis chuireadh e suas, agus an neach a b'àill leis chuir eadh e sìos.

20 Ach an uair a bha a chridhe air a

thogail suas, agus 'inntinn air a cruadhachadh ann an uabhar, chuireadh sìos o' chaitir rioghail e, agus thug iad a ghlòir uait.

21 Agus dh'fhògradh e o chloinn nan daoine, agus bha a chridhe mar na h-àinmhidhean, agus a chòmhaidh leis na h-asal-aibh fiadhaich: bhiadh iad e le fear mar dhaimh, agus bha a chorp fliuch le drùchd uèimh, gus an d'aithnich e gu'm b' e an Dia a's àirde bha riaghladh leis an rìoghachd dhaoine, agus gu bheil e 'g orduchadh os a ceann an tì is àill leis.

22 Agus thusa a mhac, O Bhelsasair, cha d'islich thu do chridhe, ged bha fios agad air so uile:

23 Ach thog thu suas thu féin an aghaidh Tighearna nèimh, agus thug iad soithichean a thighe ann ad làthair, agus dh'òl thu féin, agus do thighearnan, do mhnathan, agus do leannain, fion asda, agus chliùthaich thu na diathan airgid, agus òir, umha, iaruin, fhiodha, agus chloiche, aig nach 'eil léirsinn no clàisteachd, no aithne: agus an Dia aig am bheil t'anail 'na làimh, agus do'm buin t'uile shlighe, cha do ghlòraich thu.

24 An sin chuireadh a' chuid do'n làimh uait, agus bha an sgrìobhadh so air a sgrìobhadh.

25 Agus so an sgrìobhadh a bha air a sgrìobhadh, MENE, MENE, TECEL, UPHARSIN.

26 So brìgh na cùise; MENE, rinn Dia do rìoghachd àireamh, agus chrìochnaich e i.

27 TECEL, tha thu air do thomhas air a' mheigh, agus fhuair eadh easbhuidheach thu.

28 PERES, roinneadh do rìoghachd, agus thugadh i do na Medich agus do na Persich.

29 An sin dh'àithn Belsasar gu'n èideadh iad Daniel le sgarlaid, agus gu'n cuireadh iad slabhruidh òir m'a mhuineal, agus gu'n glaothadh iad m'a thimchioll gu'm b' e an treas fear-riaghlaidh a bhiodh anns an rìoghachd.

30 Air an oidhche sin chaidh Belsasar rìgh nan Caldéach a mharbhadh.

31 Agus ghlac Darius am Medach an rìoghachd, agus e mu thimchioll trì fich-ead agus dà bhliadhna dh'aois.

CAIB. VI.

1 Chuireadh Daniel os ceann nan uachdarain: 4 rinn iadsan ceannaire 'na aghaidh, agus thug iad air Darius a thilg do gharaidh nan leòmhann. 18 Theas-airg Dia e air dòigh ro iongantach. 24 Thilgeadh a naimhdean do'n gharaidh, agus mharbh na leòmhain iad. 25 Chliùthaich Darius Dia.

B'I toil Dharius ceud agus fichead uachdarain a chur os ceann na rìoghachd, muinntir a bhiodh os ceann na rìoghachd uile;

2 Agus os an ceann so trì àrd-uachdarain, (do'm b' e Daniel an ceud aon,) a chum gu'n tugadh na h-uachdarain an cunntais doibh, agus nach biodh calltach air bith aig an rìgh.

3 An sin bha Daniel so air 'àrdachadh os ceann nan uachdarain, agus nam prionnsachan, a chionn gu'n robh spiorad oirdheir ann; agus bha e'n aire an rìgh a chur os ceann na rìoghachd uile.

4 An sin dh'iarr na h-uachdarain agus na prionnsachan cùis fhaotainn an aghaidh Dhaniel a thaobh na rìoghachd, ach cha b'urrainn iad cùis air bith fhaotainn no coire: do bhrìgh gu'n robh e dileas, ni mò fhuair eadh mearachd no coire sam bith ann.

5 An sin thubhairt a' mhuinntir so, Cha'n fhaigh sinn cùis air bith an aghaidh an Daniel so, mur faigh sinn i 'na aghaidh a thaobh reachd a Dhé.

6 An sin chruinnich na h-uachdarain agus na prionnsachan so ri cléile chum an rìgh, agus thubhairt iad ris mar so, A rìgh Dharius mair beò gu bràth.

7 Ghabh uile uachdarain na rìoghachd, an luchd-riaghlaidh, agus na prionnsachan, na comhairlich agus na cinn-fheadhna, comhairle le chéile gu reachd rìoghail a dhaingneachadh, agus ordugh làidir a dheanamh, ge b' e dh'iarras ath-chuinge air bith air aon dia no duine rè deich làithean fichead, ach orts, O a rìgh, gu'n tilgear e ann an garaidh nan leòmhann.

8 A nis, O a rìgh, daingnich an t-ordugh agus seulaich an sgrìobhadh, a chum nach caochlaidhear e, a rèir reachd nam Medach agus nam Persach, nach fheudar atharrachadh.

9 Uime sin sheulaich rìgh Daruis an sgrìobhadh agus an t-ordugh.

10 A nis 'nuair a thug Daniel gu'n deachaidh an sgrìobhadh a sheulachadh, chaidh e chum a thighe, agus air da 'uimeagan a bhi fosgailte 'na sheòmar ri Ierusalem, thuit e sìos air a ghlùinibh trì uairean anns an là, agus rinn e urnuigh, agus thug e buidheacnas an làthair a Dhia, mar a rinn e san aimsir roimhe.

11 An sin chruinnich na daoine so, agus fhuair iad Daniel ri urnuigh, agus a' deanamh athchuinge ann an làthair a Dhia.

12 An sin thàinig iad am fagus, agus labhair iad ann am fianuis an rìgh mu thimchioll orduigh an rìgh, Nach do sheulaich thusa reachd, gach duine sam bith a ni athchuinge ri aon dia no duine, an taobh a stigh do dheich làithean fichead, ach riutsa, O a rìgh, gu'n tilgear ann an garaidh¹ nan leòmhann e? Fhreagair an

¹ stochd.

righ, agus thubhairt e, Tha an ni fìor a rèir reachd nam Medach agus nam Persach, nach atharraichear.

13 An sin fhreagair iadsan, agus thubhairt iad ann an làthair an rìgh, Daniel sin a ta do chloinn bhruid Iudah, cha'n 'eil suim aige dhìot-sa, O a rìgh, no do'n reachd a sheulaich thu, ach tha e ri ath-chuinge trì uairean anns an là.

14 An sin bha 'n rìgh, 'nuair a chual e na briathran; ro dhiombach dheth fèin, agus shuidhich e a chridhe air Daniel g'a shaoiradh: agus shaothraich e gu dol fuidhe na grèine chum a thèarnadh.

15 An sin chruinnich na daoine so chum an rìgh, agus thubhairt iad ris an rìgh, Biodh fios agad, O a rìgh, gur e lagh nam Medach agus nam Persach, nach feudar ordugh no reachd air bith a dhaingnich an rìgh a chaochladh.

16 An sin dh'àithn an rìgh, agus thug iad leo Daniel, agus thilg iad e do gharaidh nan leòmhann: agus labhair an rìgh ri Daniel, ag ràdh, Do Dhia, d'am bheil thu a' deanamh seirbhis a ghnàth, ni esan do thèarnadh.

17 Agus thugadh clach, agus leagadh air beul na garaidh i; agus sheulaich an rìgh le 'sheula fèin i, agus le seula a thighearnan; a chum nach biodh a' chomhairle air a h-atharrachadh mu thimchioll Dhaniell.

18 An sin chaidh an rìgh d'a lùchairt, agus chaith e an oidhche ri trasg: ni mò thugadh innil-ciùil 'na làthair; agus dh'imich a chodal uath.

19 An sin dh'èirich an rìgh gu ro mhoch anns a' mhaduim, agus chaidh e gu luath gu garaidh nan leòmhann.

20 Agus an uair a thàinig e chum na garaidh, ghlaodh e le guth muldach¹ ri Daniel; seadh labhair an rìgh, ag ràdh ri Daniel, O Dhaniell, òglaich an Dé bhead, am bheil do Dhia, d'am bheil thu a' deanamh seirbhis an còmhnuidh, comasach air do thèarnadh o na leòmhanaibh?

21 An sin thubhairt Daniel, O a rìgh mair beò gu bràth.

22 Chuir mo Dhia-sa nuas 'aingeal, agus dhruid e beoil nan leòmhann, air chor as nach d'rinn iad mo dhochann: do bhrìgh 'na fhianuis gu'n d'fhuaireadh neo-chiont annam; agus fòs a'd' fhianuis-sa, O a rìgh, cha d'rinn mi cron sam bith.

23 An sin bha an rìgh ro aoibhneach air a shon, agus dh'àithn e gu'n tugadh iad Daniel a nìos as a' gharaidh: mar sin thugadh Daniel a nìos as a gharaidh, agus cha d'fhuaireadh gnè air bith dochainn air, a chionn gu'n do chreid e 'na Dhia.

24 Agus dh'àithn an rìgh, agus thug iad

leo na daoine sin a rinn casaid air Daniel, agus thilg siad iad do gharaidh nan leòmhann, iad fèin, an clann, agus am mnathan; agus thug na leòmhain buaidh orra, agus bhris iad an cnàmhan uile 'nam bloighdibh, mu'n d' ràinig iad ìochdar na garaidh.

25 An sin sgrìobh Darius a chum nan uile shluagh, chinneach agus clànainean a ta còmhnuidh air an talamh uile, Gu robh sìth air a meudachadh dhuibh.

26 Tha mise a' toirt orduigh, anns gach uile thighearnas do m' rìoghachd, gu'm bi crith agus eagal air daoine roimh Dhia Dhaniell: oir is esan an Dia beò, agus bunaiteach gu bràth, agus a rìoghachd-san cha sgrìosar a chaoidh, agus 'uachdaranachd tha gus a' chrìoch.

27 Saoraidh esan, agus tèarnaidh e, agus oibrichidh e comharan agus mìorbhuilean air nèamh agus air talamh, neach a shaor Daniel o chumhachd nan leòmhann.

28 Mar so shoirbhich Daniel so am an linn Dharuis, agus ann an linn Chiruis am Persach.

CAIB. VII.

1 *Aisling mu thimchioll nan ceithir bheathaichean mòra a thàinig a nìos as an fhairge, 8 agus mu thimchioll ceithir-rìghail an Tighearna.*

15 *Brìgh nan aisling.*

ANN an ceud bhliadhna Bhelsasair rìgh Bhabiloìn, chunnaic Daniel brúadar, agus aisling a chinn air a leabaidh: an sin sgrìobh e am brúadar, agus dh'innis e suim nan nithe.

2 Labhair Daniel agus thubhairt e, Chunnaic mi ann am aisling anns an oidhche, agus, feuch, ghleachd ceithir ghaotha nèimh air an fhairge mhòir.

3 Agus thàinig ceithir beathaichean mòra nìos as an fhairge, eag-samhuil aon o chéile.

4 Bha a' cheud aon cosmhuil ri leòmhann, agus bha sgiathan iolair e aige: agus dh'amhairc mi gus an do sponadh a sgiathan, agus thogadh suas o'n talamh e, agus thugadh air seasamh air a chosaibh mar dhuine, agus thugadh dha cridhe duine.

5 Agus feuch beathach eile, an dara aon, cosmhuil ri math ghiamhuim, agus thog e suas e fèin air aon taobh, agus bha aige trì giala 'na bheul, an taobh a stigh d'a fhaiclaibh: agus thubhairt iad ris mar so, Eirich, sluig mòran feòla.

6 'Na dhéigh so dh'amhairc mi, agus, feuch, aon eile amhuil liopard, aig an robh air a dhruim ceithir sgiathan còim; bha aig a' bheathach mar an ceudna ceithir chinn; agus thugadh dha uachdaranachd.

7 'Na dhéigh so chunnaic mi am an aislingibh na h-oidhche, agus feuch ceathramh beathach; eagalach agus uamhasach, agus ro làidir; agus bha faclan

¹ caointeach.

mòra iarainn aige: shluig e suas agus bhris e ann am bloighdibh, agus shaltair e 'm fuigheall le 'chosaihb; agus bha e ea-cosmhùil ris na h-uile bheathaichean a bha roimhe; agus bha deich adhaircean air.

8 Thug mi fa' near na h-adhaircean, agus, feuch, thàinig a nìos 'nam measg adharc bheag eile, roimh an robh trì do na ceud adhaircibh air an spìonadh a nìos as am freumhaibh: agus, feuch, anns an adharc so bha sùilean mar shùilean duine, agus beul a' labhairt nithe mòra.

9 Dh'amhairc mi gus an robh na rìgh-chaitheichean air an suidheachadh, agus shuidh Aosda nan làithean, aig an robh a thrusgan geal mar shneachdadh, agus folt a clinn mar olainn ghlain; a chaithir-rìoghail mar lasair theine, a rothan mar theine loisgeach.

10 Bhrùchd sruth teinteach, agus thàinig e mach o a làthair: bha mìle do mhìltibh a' frithealadh dha, agus sheas deich mìle uair deich mìle 'na fhianuis: shuidhich-eadh an breitheanas, agus dh'fhosgladh na leabhraichean.

11 Dh'amhairc mi an sin, do bhrìgh guth nam briathran mòra a labhair an adharc: dh'amhairc mi gus an do mharbhadh am beathach, agus gus an robh a chorp air a sgrios, agus air a thoirt do'n lasair loisgich.

12 A thaobh na cuid eile do na beathaichibh, thugadh an uachdaranachd air falbh: gideadh shineadh am beatha, rè tamuill agus aimsir.

13 Chunnac mi ann an aislingibh na h-oidhche, agus, feuch, thàinig neach cosmhùil ri mac an duine le neulaibh nèimh, agus thàinig e chum Aosda nan làithean, agus thug iad e dlùth 'na làthair.

14 Agus thugadh dha uachdaranachd, agus glòir, agus rìoghachd, a chum gu'n tugadh na h-uile shluagh, chinneacha, agus theanganna, seirbhis dha: 'uachdaranachd is uachdaranachd shiorruidh i, nach siubhail thairis, agus a rìoghachd cha sgriosar i.

15 Bha mise Daniel muladach ann am spiorad, ann am meadhan mo chuirp, agus rinn aislingean mo chinn mo bhuaireadh.

16 Thàinig mi am fagus do aon dhiubhsan a sheas dlùth, agus dh'fheòraich mi dheth brìgh an iomlain deth so: an sin dh'innis e dhomh, agus thug e fios domh air brìgh nan nithe.

17 Na ceithir beathaiche mòra so, is ceithir rìghrean iad, a dh'èireas a mach as an talamh.

18 Ach glacaidh naoimh an Ti a's àirde an rìoghachd, agus sealbhaichidh iad an rìoghachd gu shiorruidh, eadhon gu saoghal nan saoghal.

19 An sin b'àill leam fios fhaotainn air

seadh a' cheatlramh beathaich, a bha eag-samhail ri càch uile, anbharr uamhasach, aig an robh 'fhiacra do iarunn, agus 'iongannan do phraisi; a shluig suas, a bhris ann am bloighdibh, agus a shalt-air am fuigheall le 'chosaihb;

20 Fòs air seadh nan deich adharca bha 'na cheann, agus na h-aoin eile a thàinig a nìos agus roimh an do thuit trì, eadhon na h-adhairc sin aig an robh sùilean, agus beul a labhair nithe ro mhòr, aig an robh sealladh ni bu cluadalaiche na càch.

21 Dh'amhairc mi, agus rinn an adharc cheudna cogadh ris na naoimh, agus bhuaidhaich i 'nan aghaidh;

22 Gus an d'thàinig Aosda nan làithean, agus an d' thugadh breitheanas do naoimh an Ti a's àirde; oir thàinig an t-àm anns an do shealbhaich na naoimh an rìoghachd.

23 Mar so thubhairt e, Is e an ceathramh beathach an ceathramh rìoghachd a bhios air an talamh, a bhios eag-samhail o na h-uile rìoghachd, agus a shluigeas suas an talamh uile, agus a shaltras sìos e, agus a bhriseas e 'na bhloighdibh.

24 Agus na deich adhaircean as an rìoghachd so, is deich rìghrean iad a dh'èireas suas: agus éiridh aon eile 'nan déigh; agus bithidh e eag-samhail o'n cheud aon, agus ceannsaichidh e trì rìghrean.

25 Agus labhraidh e briathran an aghaidh an Ti a's àirde, agus claidhidh e naoimh an Ti a's àirde, agus bithidh dùil aige aimsirean agus reachdan a chaochladh: agus bheirear iad d'a làimh gu aimsir, agus aimsirean, agus roinn aimsir.

26 Agus suidhidh am breitheanas, agus bheir iad air falbh a thighearnas, gu 'chaitheamh, agus gu a sgrios gu ruig a' chrìoch.

27 Agus bheirear an rìoghachd agus an uachdaranachd, agus mòrachd na rìoghachd fuidh nìamh uile, do mhuinntir naomh an Ti a's ro àirde, aig am bheil a rìoghachd 'na rìoghachd shiorruidh, agus bheir na h-uile thighearnais umhlachd agus géill da.

28 An so bha crìoch na cùise. Air mo shon-sa Daniel, rinn mo smuainte gu ro mhòr mo bhuaireadh, agus dh'atharraich mo ghnùis annam; ach ghléidh mi a' chùis ann am chridhe.

CAIB. VIII.

1 Taisbean Dhanieil mu thimchioll an reithe agus a' bhuic-ghaibhre. 15 Thug Gabriel comhfhurtachd do Dhanieil, 19 agus dh'innis e dha brìgh an taisbein.

ANNS an treas bliadhna do linn rìgh A' Bhelsasair, chunnacas aisling leam-sa, leam-sa Daniel, an déigh na h-aisling sin a chunnacas leam an toiseach.

2 Agus chunnac mi ann an aisling,

(agus tharladh 'nuair a chunnaic mi, gu'n robh mi ann an Susan, anns an àros, a ta ann am mòr-roinn Elaim,) agus chunnaic mi ann an aising, agus bha mi aig amh-ainn Ulai.

3 Au sin thog mi suas mo shùilean, agus chunnaic mi, agus, feuch, sheas fa chomhair na h-aimhne reithe, aig an robh dà adhairc; agus bha an dà adhairc àrd; ach aon ni b' àirde na 'n aon eile; agus thàinig an aon a b' àirde nìos mu dheireadh.

4 Chunnaic mi an reithe a' purradh le 'adhaircibh an iar, agus mu thuath, agus mu dheas; air chor as nach feudadh beathach air bith seasamh fa chomhair, ni mò bha neach ann a b' urrainn saoradh as a làimh, ach rinn e a réir a thoile, agus dh'fhàs e mòr.

5 Agus am feadh a bha mi a' beachdachadh, feuch, thàinig boc-gaibhre o'n àird an iar, air aghaidh na talmhainn uile, agus cha do bhean e do'n làr: agus bha adhare shònraichte aig a' bhoc eadar a shùilean.

6 Agus thàinig e chum an reithe aig an robh dà adhairc, a chunnaic mi 'na sheasamh fa chomhair na h-aimhne, agus ruith e d'a ionnsuidh ann an cuthach a threise.

7 Agus chunnaic mi e teachd teann air an reithe, agus dhùisg 'fhearg 'na aghaidh, agus bhuail e 'n reithe, agus bhris e a dhà adhairc; agus cha robh cumhachd air bith aig an reithe gu seasamh roimhe, ach thilg e sìos chum an làir e, agus shalt-'ar e air: agus cha robh neach air bith a b' urrainn an reithe a thèarnadh as a làimh.

8 Air an aobhar sin dh'fhàs am boc-gaibhre ro mhòr: agus 'nuair a bha e làidir, chaidh an adhare mhòr a bhriseadh; agus 'na h-àite thàinig a nìos ceithir adhaircean sònraichte, ri ceithir ghaoth-aihbh nèimh.

9 Agus a mach as aon diubh thàinig adhare bheag, a dh'fhàs anbharr mòr, ris an àirde deas, agus ris an àird an ear, agus ris an tìr thaitnich.

10 Agus dh'fhàs i mòr gu ruig feachd nèimh, agus thilg i sìos cuid do'n fheachd, agus do na reultaibh a chum an làir, agus shaltair i orra.

11 Seadh, rinn i uaill aiseid fèin an aghaidh prionnsa an fheachd, agus leatha thugadh air falbh an iobairt lathail, agus bha àite a naomh-ionaid air a thilgeadh sìos.

12 Agus thugadh feachd dhi an aghaidh na h-iobairt lathail, do bhrìgh euceirt, agus thilg i sìos an fhìrinn a chum an làir; agus dhealbha i innleachdan, agus shoirbhich i.

13 An sin chuala mi aon naomh a' labhairt, agus thubhairt naomh eile ris an naomh àraidh sin a labhair, Cia fhad a bhios an aising mu thimcheall na h-iob-

airt lathail, agus a bheirear thairis euceart gu milleadh, agus a bhios an naomh-ionad agus am feachd air an saltairt fo chois?

14 Agus thubhairt e rium, Gu dà mhìle agus trì cheud là: an sin glanar an naomh-ionad.

15 Agus tharladh an uair a chunnaic mise, mise Daniel, an sealladh, agus a dh'iarr mi air son na brìgh, an sin feuch, sheas fà m' chomhair amhuil coslas duine.

16 Agus chuala mi guth duine eadar bhruachan Ulai, a ghlaodh, agus a thubhairt, A Ghabriel, thoir air an fhear so an sealladh a thuigsinn.

17 Agus thàinig e dlùth do'n àite san do sheas mi: agus 'nuair a thàinig e, bha eagail orm, agus thuit mi air m' aghaidh: ach thubhairt e rium, Tuig, O mhic an duine, oir anns an aimsir dheireannaich bithidh an sealladh.

18 A nis, am feadh a bha e labhairt rium, bha mi ann an codal trom, air m' aghaidh ris an talamh: ach bhean e dhomh, agus chuir e suas gu dìreach mi.

19 Agus thubhairt e, Feuch, bheir mise fios duit ciod a thachras ann an crìch dheireannaich na dian-fheirge: oir anns an àm a shònraicheadh thig a' chrìoch.

20 An reithe a chunnaic thu, aig an robh dà adhairc, is iad sin rìghrean Mhedia agus Phersia.

21 Agus a' ghabhar ribeach is e sin rìgh na Grèige; agus an adhare mhòr a ta eadar a shùilean, is e sin an ceud rìgh.

22 A nis, air dha sin briseadh, mar a sheas ceithir suas 'na àite, seasaidh ceithir rìoghachdan suas as a' chinneach, ach cha'n ann 'na neart-san.

23 Agus ann an aimsir dheireannaich an rìoghachd, 'nuair a bhios luchd an eusaontais air an coimhlionadh, seasaidh suas rìgh aig am bi aghaidh bhorb, agus a thuigeas briathran dorch.

24 Agus bithidh a neart cumhachdach, ach cha'n ann le 'threise fèin: agus sgriosaidh e gu h-iongantach, agus soirbhichidh leis, agus bheir e gu crìch, agus millidh e na cumhachdaich agus an sluagh naomh.

25 Agus le a sheòltachd fòs bheir e air ceilg soirbheachadh 'na làimh; agus ni e uaill as fèin 'na chridhe, agus le foill sgriosaidh e mòran: seasaidh e fòs suas an aghaidh prionnsa nam prionnsachan, ach brisear e as eugmhais làimhe.

26 Agus tha aising nan làithean', a chaidh innseadh, fìor: air an aobhar sin druid thusa suas an sealladh, oir bithidh e an ceann mhòran làithean.

27 Agus ormsa Daniel thàinig fàilinn, agus bha mi tinn car làithean àraidh;

'na dhéigh sin, dh'éirich mi suas, agus rinn mi gnothuichean an rìgh; agus bha uamhas orm mu'n aisling, ged nach d' thug aon neach sin fa' near.

CAIB. IX.

1 Dh'aidich Daniel peacanna an t-sluaigh an làthair an Tighearna. 16 Ghuidh e air son Ierusalem. 24 Tha deich agus trì fichid seachdain air an orduchadh a chrìochmachadh lochdan agus euccirt.

ANN an ceud bhliadhna Dhariuis mhic Ahasueruis, do shìol nam Medach, a rinneadh 'na rìgh os ceann rìoghachd nan Caldeach.

2 Anns a' cheud bhliadhna d'a linn-san, thuig mise Daniel, le leabhraichean, àir-eamh nam bhliadhnachan, mu'n d' thàinig focal an Tighearna gu Jeremiah am fàidh, gu'n coimhlionadh e deich agus trì fichid bliadhna sam biodh Ierusalem 'na làraichibh.

3 Agus chuir mi m' aghaidh ris an Tighearna Dia, g'a iarraidh le urnuigh agus le athchuinge, le trasg, agus le eudach-saic, agus le luathre:

4 Agus rinn mi urnuigh ris an Tighearna mo Dhia, agus rinn mi m' aidmheil, agus thubhairt mi, O Thighearna, an Dia mòr, agus uamhasach, a ta cumail coimhcheangail agus tròcair riusan a ghràdh-aicheas e, agus do'n dream a choimhdeas 'àitheantan:

5 Pheacaich sinne, agus chuir sinn an gnìomh euceart, agus rinn sinn gu h-aingidh, agus bha sinn ceannaireach, eadhon le dealachadh ri t' àitheantaibh agus ri d' bheithenais.

6 Nì mò dh'èisd sinn ri d' sheirbhisich na fàidhean, a labhair ann ad ainm-sa ri ar rìghribh, ri ar n-uachdaranaibh, agus ri ar n-aithrichibh, agus ri uile shluagh an fhearainn.

7 O Thighearna, *buinidh* freantachd dhuit-sa, ach dhuinne nàire gnùise, mar air an là an diugh: do mhuinntir Iudah, agus do luchd-àiteachaidh Ierusalem, agus do uile Israel, am fagus agus am fad as, feadh nan uile dhùthchannan gus an d'fhògair thusa iad, air son am peacannan a pheacaich iad ann ad aghaidh-sa.

8 O Thighearna, dhuinne *buinidh* nàire gnùise, do ar rìghribh, do ar prionnsachan, agus do ar n-aithrichibh, a chionn gu'n do pheacaich sinn a'd' aghaidh.

9 Do'n Tighearna ar Dia *buinidh* tròcairean agus maithenais, ged rinn sinne ár a mach 'na aghaidh.

10 Nì mò thug sinn géill do ghuth an Tighearna ar Dia, a chum gluasad 'na reachdaibh a chuir e romhainn le 'sheirbhisich na fàidhean.

11 Seadh, bhris Israel uile do reachd,

eadhon le dol a thaoibh, a chum nach tugadh iad géill do d' ghuth; air an aobhar sin tha am mallachd air a dhòrtadh oirn, agus an truaighe a ta sgrìobhta ann an lagh Mhaois òglaich Dhé, a chionn gu'n do pheacaich sinn 'na aghaidh.

12 Agus dhaingnich e a bhriathran a labhair e 'nar n-aghaidh, agus an aghaidh ar breitheamhna a thug breth oirn, le dòrainn mhòr a thoirt oirn; oir fuidh nèamh uile cha d'rinneadh mar a rinneadh air Ierusalem.

13 Mar a ta e sgrìobhta ann an lagh Mhaois, tha an t-olc so uile air teachd oirn; gidheadh cha d'rinn sinn ar n-urnuigh an làthair an Tighearna ar Dia, a chum gu'm bitheamaid air ar pilleadh o'r n-euceartaibh, agus gu'n tuigamaid d'fhirinn.

14 Uime sin rinn Dia faire air an olc, agus thug e oirnne: oir tha an Tighearna ar Dia ceart 'na uile oibribh a ta e deanamh: oir cha d' thug sinne géill d'a ghuth.

15 Agus a nis, O Thighearna ar Dia, a thug do shluagh a mach à tìr na h-Eiphit le làimh chumhachdach, agus a fhuair dhuit féin cliù, mar air an là an diugh, pheacaich sinne, rinn sinn gu h-aingidh.

16 O Thighearna, a réir t' uile fhreantachd, guidheam ort, leig le d' chorruich agus le d' fheirg pilleadh air falbh o d' chaithir Ierusalem, do shliabh naomh: a chionn, air son ar lochdan, agus air son aingidheachdan ar n-aithrichean, gu bheil Ierusalem agus do shluagh 'nam masladh do na h-uile mu'n cuairt duinn.

17 A nis, uime sin, O ar Dia, éisd urnuigh t'òglaich, agus 'athchuinge, agus thoir air do ghnùis dealradh air t'ionad naomh a ta 'na làraich air sgàth an Tigh-earna.

18 O mo Thighearna, crom do chluas agus cluin; fosgail do shùilean, agus faic ar sgaoileadh, agus a' chaithir a ta air a gairm air t'ainm: oir cha'n 'eil sinn a' taisbeanadh ar n-athchuingean a'd' làthair air son ar n-ionracais, ach air son do mhòr-throcair féin.

19 O Thighearna, éisd; O Thighearna, maith; O Thighearna, chuinn agus dean; na dean maille, air do shon féin, O mo Dhia: oir tha do chaithir agus do shluagh air an gairm air t' ainm.

20 Agus am feadh a bha mi a' labhairt, agus ri urnuigh, agus ag aideachadh mo lochd, agus lochd mo shluaigh Israeil, agus a' taisbeanadh m' athchuinge an làthair an Tighearna mo Dhia, air son sléibh naoimh mo Dhé:

21 Seadh, am feadh a bha mi a' labhairt ann an urnuigh, an neach ceudna, a chumnaic mi anns an aisling air tús, Gabriel air an d' thugadh itealaich gu luath,

bhean rium mu àm na h-ìobairt fheasg-air.

22 Agus thug e fios dhomh, agus labhair e rium, agus thubhairt e, O Dhaniel, tha mise nis air teachd a mach a thoirt duit gliocais agus tuigse,

23 Aig toiseach t' athchuinge thàinig an àithne a mach, agus thàinig mise a dh'fheuchainn duit: oir tha thu air do glràdhachadh gu ro mhòr: uime sin, tuig a' chùis, agus thoir fa'near an aisling.

24 Tha deich agus trì fichead seachd-uim air an orduchadh air do shluagh, agus air a' chaithir naomh, a chrìoch-nachadh euceirt, agus a chur crìch air lochdan, agus a dheanamh rèite air son aingidheachd, agus a thoirt a steach fireantachd shiorruidh, agus a sheulachadh suas na h-aisling agus na fàistneachd, agus a dh'ungadh an Tì a's ro naomha.

25 Aithnich uime sin agus tuig, o dhol a mach na h-àithne, gu Ierusalem aiseag agus a thogail suas, gu Mesiah am Prionnsa, gu'm bi seachd seachduinean, agus trì fichead agus dà sheachduin: togar an t-sràid a ris agus am balla, eadhon ann an aimsiribh carraideach.

26 Agus an ceann nan trì fichead agus dà sheachduin, gearrar Mesiah as, ach cha'n ann air a shon féin: agus sgriosaidh sluagh a' phrionnsa a thig a' chaithir, agus an naomh-ionad; agus bithidh a chrìoch sin le tuil, agus gu deireadh a' chogaidh tha léir-sgrios air a h-orduchadh.

27 Agus daingnichidh esan an coimheangal ri mòran car aon seachduin: agus ann am meadhan na seachduin bheir e air an ìobairt agus air an tabhartas sgar; agus anns an teampull bithidh gràineileachd an léir-sgrios, agus an coimh-lìonar an sgrios a dh'orduicheadh, air a làraich fhàsail.

CAIB. X.

1 Nuair a dh'irioslaich Daniel e féin chunnaic e taisbean glòrmhor, agus bha e fo eagal. 10 Thug aingeal misneach dha, 19 agus neartaich se e.

ANN an treas bliadhna Chimus rìgh Phersia, dh'fhoillsicheadh ni do Dhaniel, (do'm b' ainm Beltesasar,) agus bha an nì fìor, agus mu thimcheall feachd mhòir: agus thug e a' chùis, oir bha e eòlach ann an sealladh.

2 Anns na làithibh sin bha mise Daniel ri bròn trì seachduinean iomlan.

3 Cha d'ith mi aran taitneach air bith, ni mò thàinig feoil no fìon ann am bheil, ni mò dh'ung mi ni féin idir, agus an robh trì seachduinean iomlan air an coimh-lìonadh.

4 Agus air a' cheathramh là fichead do'n cheud mhòis, an uair a bha mi ri taobh na h-aimhne mòire, Hìdecel;

5 An sin thog mi suas mo shùilean, agus dh'amhairc mi, agus, feuch, dhuine àraidh ann an eudach lìn, aig an robh a leasraidh erioslaichte le òr grinn Uphais:

6 Bha a chorp fòs cosmhuil ri beril, agus a ghnuis mar dhreach dealanaich, agus a shùilean mar lochrana teine, agus a ghairdeanan agus a chosan cosmhuil ann an dath ri umha liomhta, agus fuaim a bhriathran cosmhuil ri guth sluaigh mhòir.

7 Agus chunnaic mise Daniel a mhàin an sealladh: oir cha'n fhaca na daoine bha maille rium an sealladh: ach thuit erith mhòr orra, ionnus gu'n do theich iad gu iad féin fholach.

8 Air an aobhar sin dh'fhàgadh mise ann am aonar, agus chunnaic mi an sealladh mòr so, agus cha d'fhan cunhachd air bith annam: oir dh'atharraicheadh annam mo mhaise gu duaicheachd, agus cha do mhair neart annam.

9 Gidheadh chuala mi fuaim a bhriathran: agus an uair a chuala mi fuaim a bhriathran, an sin bha mi ann an codal trom air m' aghaidh, agus m' aghaidh ris an làr.

10 Agus, feuch, bhean làmh rium, a chuir mi air mo ghluinibh, agus air basailh mo làmh.

11 Agus thubhairt e rium, O Dhaniel, a dhuine ro ionmhuinn, tuig na briathran a ta mise a' labhairt riut, agus éirich an ad sheasamh: oir a d' ionnsuidh-sa tha mi nis air mo chur. Agus an uair a labhair e am focal so rium, sheas mi air chrith.

12 An sin thubhairt e rium, Na biodh eagal ort, a Dhaniel; oir o'n cheud là san do shuidhich thu do chridhe chum tuigsinn, agus chum thu féin irioslachadh ann an làthair do Dhia, bha do bhriathran air an cluinntinn, agus tha mise air teachd air son do bhriathran.

13 Ach sheas prionnsa ròghachd Phersia ann am aghaidh là thar fhichead: ach feuch, thàinig Michael, aon do ua h-àrd phrionnsachan gu m' chomhnadh; agus dh'fhan mi an sin le rìghrìbh Phersia.

14 A nis tha mi air teachd a thoirt ort a thuigsinn ciod a thachras do d' shluagh anns na làithibh deireannach: oir tha an sealladh fathasd rè mhòran làithean.

15 Agus an uair a labhair e an leithide so do bhriathraibh rium, chuir mi m' aghaidh ris an làr, agus bha mi ann am thosd.

16 Agus, feuch, bhean neach cosmhuil ri samladh mhac dhaoine ri m' bhilìbh; an sin dh'fhosgail mi mo bheil, agus labhair mi, agus thubhairt mi ris-san a sheas fa m' chomhair, O mo thighearn, leis an t-sealladh, tha m' àmhghar air pilltinn orm, agus thréig mo neart mi.

17 Oir cionnus a dh'fheadas òglach an ti so mo thighearna labhairt ris an ti so mo thighearn? oir air mo shon-sa, air ball cha d'fhan neart air bith annam, ni mò a dh'fhàgadh anail annam.

18 An sin thàinig a ris agus bhean rium, neach cosmhuil ri samhladh duine, agus neartaich e mi.

19 Agus thubhairt e, O dhuine ro ionmhuinn, na biodh eagal ort; sìth dhuit, bi làidir, seadh bi làidir. Agus an uair a labhair e rium, neartaicheadh mi, agus thubhairt mi, Labhradh mo thighearn; oir rinn thu mo neartachadh.

20 An sin thubhairt e, Am bheil fios agad c'ar son a thàinig mi a d' ionnsuidh? agus a nis pillidh mi gu cogadh ri prionnsa Phersia: agus an uair a théid mise a mach, feuch, thig prionnsa na Gréige.

21 Ach nochdaidh mi dhuit an ni sin a ta comharaichte ann an sgrioptur na firinn: agus cha'n 'eil aon a chuireas leam-sa anns na nithibh so ach Michael 'ur prionnsa-sa.

CAIB. XI.

1 Sgrìosar Persia le rìgh na Gréige. 5 Coimhcheangal eadar rìgh na h-àirde deas agus rìgh na h-àirde tuath. 14 Co-bhoinn an aghaidh rìgh na h-àirde deas.

A GUS ann an ceud bhliadhna Dhariuis a' Mhedich, sheas mise gu 'dhaingneachadh agus gu 'neartachadh.

2 Agus a nis foillsichidh mi dhuit an flùrinn; Feuch, seasaidh suas fathasd tri rìghrean ann am Persia; agus bithidh an ceathramh ni's beartaiche gu mòr na iad uile; agus le 'chumhachd, trid a bheartais, dùisgidh e suas na h-uile an aghaidh rìoghachd na Gréige.

3 Agus seasaidh rìgh cumhachdach suas a riaghlas le tighearnas mòr, agus a ni a réir a thoile féin.

4 Agus an uair a sheasas e suas, brisear a rìoghachd, agus roinnear i ri ceithir ghaothaibh néimh; agus cha'n ann d' a shliochd, no a réir a thighearnais, leis an do riaghlaidh e: oir bithidh a rìoghachd air a spionadh a nìos, eadhon air son muinntir eile a bharrachd orra so.

5 Agus bithidh rìgh na h-àirde deas làidir, ach bithidh aon do na prionnsaich aibh eadhon ni's làidire na esan; agus bithidh aige tighearnas ni's mò na 'thighearnas-san.

6 Agus an ceann bhliadhnachan ceanglaidh siad iad féine r'a chéile; oir thig nighean rìgh na h-àirde deas a chum rìgh na h-àirde tuath a dheanamh réite eat-orra: ach cha ghléidh i cumhachd a' ghairdean, ni mò sheasas i féin no a sliochd: ach bheirear ise seachad, agus iadsan a thug leo i, agus esan a ghin i,

agus esan a neartaich i anns na h-aimsir. ibh so.

7 Ach a mach á meangan d'a freumh seasaidh aon suas 'na imbhe, a thig le feachd, agus a théid a steach gu daingneach rìgh na h-àirde tuath, agus cuiridh e 'nan aghaidh, agus bheir e buaidh:

8 Agus bheir e fòs 'nam braighdibh do'n Eiphit, an dée, maille ri 'm prionnsaibh, agus ri an soithichibh luachmhor airgid agus òir; agus buanaichidh e tuilleadh bhliadhnachan na rìgh na h-àirde tuath.

9 Mar sin thig rìgh na h-àirde deas d'a rìoghachd-san, agus pillidh e g'a dhùth-aich féin.

10 Ach bithidh a mhic air an dùsgadh suas, agus cruinichidh iad sluagh do fheachdaibh mòra; agus thig aon gu deimhin, agus sgaoilidh e thairis, agus imichidh e troimh: an sin pillidh e, agus dùisgear suas e, gu ruig a dhaingnich.

11 Agus lìonar rìgh na h-àirde deas le feirg, agus thig e mach, agus cogaidh e ris, eadhon ri rìgh na h-àirde tuath: agus cuiridh e mach sluagh mòr; ach bheirear am mòr-shluagh thairis d'a làimh-san.

12 Agus 'nuair a bheir e air falbh am mòr-shluagh, bithidh a chridhe air a thogail suas, agus tilgidh e sìos deich mìltean; gidheadh cha neartaichear e.

13 Oir pillidh rìgh na h-àirde tuath, agus cuiridh e sluagh mòr a mach, a's mò na cheud sluagh, agus thig e gu cinnteach, (an déigh bhliadhnachan àraidh,) le feachd mòr, agus le pailteas saoihbheis.

14 Agus anns na h-aimsiribh sin seasaidh mòran suas an aghaidh rìgh na h-àirde deas: mar an ceudna ni luchd-creachaidh mo shluaigh-sa, iad féin àrdachadh a chum an sealladh a dhaingneachadh, ach tuitidh iad.

15 Mar sin thig rìgh na h-àirde tuath, agus tilgidh e suas tòrr, agus glacadh e na bailtean a's làidire; agus cha seas gairdeana na h-àirde deas 'na aghaidh, no a shluagh taghta, ni mò bhios neart air bith a chuireas 'na aghaidh.

16 Ach ni esan a thig 'na aghaidh a réir a thoile féin, agus cha seas neach air bith roimhe: agus seasaidh e san tìr ghlòrmhoir, a bhios air a sgrìos le a làimh.

17 Suidhichidh e fòs 'aghaidh gu dol a steach le neart a rìoghachd uile, agus daoine ionraic maille ris: mar so ni e; agus bheir e dha nighean nam ban g'a truaillleadh: ach cha seas i air a thaobh-san, ni mò bhios i air a shon.

18 'Na dhéigh so tionndaidhidh e 'aghaidh ris na h-eileanaibh, agus glacadh e mòran: ach bheir prionnsa air a shon féin fa' near gu'n sguir am masladh a thug e

uaith: gun mhasladh dha féin bheir e air pilladh aisans.

19 An sin tionndaidhidh e 'aghaidh ri daingneach a thìre féin: ach gheibh e tuisleadh agus leagadh, agus cha bhi e ri fhaotainn.

20 An sin seasaidh suas 'na àite aon a chuireas fear-togail chisean thar an rìoghachd ghlòrmhoir; ach an ceann bhcagan làithean sgriosar e, cha'n ann an corruich no an cath.

21 Agus 'na àite-san seasaidh suas neach suarach, do nach toir iad onoir na rìoghachd: ach thig e steach gu sìochail, agus gheibh e'n rìoghachd le modal.

22 Agus gairdeana na tuile bàthar as a làthair, agus brisear iad; seadh, fòs prionnsa a' choimhcheangail.

23 Agus an déigh na réite ris, buinidh e gu cealgach; agus thig e mios, agus fàsaidh e làidir le sluagh beag.

24 Théid e steach gu sìochail eadhon air na h-ionadan a's fearr do'n mhòr-roinn, agus ni e an ni nach d'rinn 'aithrichean, no aithrichean 'aithriche; sgapaidh e 'nam measg a' chreach, agus a' chobhartach, agus an saobhbreas: agus dealbhaidh e 'innleachdan an aghaidh nan daingnichean làidir, eadhon ré seal.

25 Agus dùisgidh e suas a chumhachd agus a chruadal, an aghaidh rìgh na h-àirde deas le feachd mòr; agus bithidh rìgh na h-àirde deas air a dhùsgadh suas gu cath, le feachd ro mhòr agus cumhachdach; ach cha seas e: oir dealbhaidh iad innleachdan 'na aghaidh.

26 Seadh, marbhaidh iadsan a dh'itheas cuibhrionn d'a bhiaidh e, agus sgaoilidh 'fheachd a mach mar thuil: agus tuitidh mòran sìos marbh.

27 Agus bithidh cridheachan nan rìgh-rean so araon air aihmleas a dheanamh, agus labhraidh iad breugan air aon bhord; ach cha soirbhich sin: oir fathasd bithidh a' chrìoch anns an àm a shonraicheadh.

28 An sin pillidh esan gu 'dhùthaich le saobhbreas mòr; agus bithidh a chridhe an aghaidh a' choimhcheangail naoimh: agus an déigh so a dheanamh, pillidh e gu 'thìr féin.

29 Anns an àm a shonraicheadh pillidh e, agus thig e ris an àirde deas; ach cha bhi na nithe ma dheireadh mar na ceud nithe.

30 Oir thig longa Chitim 'na aghaidh: air an aobhar sin bithidh doilghios air, agus pillidh e, agus bithidh fearg air an aghaidh a' choimhcheangail naoimh: mar sin ni e; eadhon pillidh e, agus cumaidh e bàigh riu-san a thréigeas an coimhcheangal naomh.

31 Agus seasaidh lànhan air a thaobh, agus truaillidh iad naomh-ionad an neirt,

agus bheir iad air falbh an ìobairt lathail, agus suidhichidh iad a' ghràineileachd a chuireas fàs.

32 Agus a' mhuinntir a ni gu h-olc an aghaidh a' choimhcheangail truaillidh e le modal¹: ach an sluagh aig am bheil eòlas air an Dia, bithidh iadsan làidir, agus ni iad gu treun.

33 Agus iadsan aig am bheil tuigse am measg an t-sluaigh, teagaisgidh iad mòran: gidheadh tuitidh iad leis a' chhlaidheamh, agus leis an lasair, le bruid, agus le creich, rè mòran làithean.

34 A nis 'nuair a thuiteas iad, cuidichear iad le beagan cùideachaidh: ach leanaidh mòran riu le modal.

35 Agus tuitidh cuid dhiubh-san aig am bheil tuigse, chum an dearbhadh, agus an glanadh, agus an deanamh geal, eadhon gu àm na crìche; a chionn gu bheil e fathasd air son àm a shonraicheadh.

36 Agus ni an rìgh a réir a thoile féin; agus àrdaichidh se e féin, agus togar e 'na mhòrchuis os ceann gach dé, agus labhraidh e nithe iongantach an aghaidh Dhé nan dée, agus soirbhichidh leis gus an coimhlionar a' chorruch: oir nithear an ni sin a dh'ordnìcheadh.

37 Ni mò bhios suim aige do dhia 'aithrichean, no do thoil bhan, no suim do dhia air bith: oir meudaichidh se e féin os ceann nan uile.

38 Ach 'na àite bheir e onoir do'n dia Mahusim: agus do Dhia uach b'aithne d'a aithrichean bheir e onoir le h-òr agus airgid, agus le clachaibh rìomhach, agus nithibh taitneach.

39 Mar so ni e: do luchd-coimhid Mahusim, dhé choimhich, a ta esan ag aideachadh, bheir e onoir mhòr, agus bheir e orra riaghladh thar mòran; agus roinnidh e am fearann air son duaise.

40 Agus an àm na crìche ni rìgh na h-àirde deas a phurradh, agus thig rìgh na h-àirde tuath 'na aghaidh mar chuairt-ghaoith, le carbadaibh, agus le marcachaibh, agus le mòran longa; agus théid e steach do na dùthchannaibh, agus sgaoilidh e mar thuil, agus sìubhlaidh e thairis.

41 Théid e fòs a steach do'n tìr ghlòrmhor, agus bithidh mòran dhùthchannan air an tilgeadh bun os ceann; ach théid iad so as o 'làimh, Edom, agus Moab, agus rogha cloinne Amoin.

42 Suidh e fòs a mach a làmh air na dùthchannaibh; agus cha téid tìr na h-Eiphit as.

43 Ach bithidh cumhachd aige os ceann nan ionmhasan òir agus airgid, agus os ceann uile nithe rìomhach na h-Eiphit: agus bithidh na Libiaich agus na h-Etiop-aich air a lorg.

¹ sodal, brosgal.

44 Ach nì sgeul o'n àird an ear, agus o'n àirde tuath a bhuaireadh: air an aobhar sin thèid e mach le corruich mhòir gu sgrios, agus gu mòran a mhilleadh gu tur.

45 Agus suidhichidh e pàilliuann a lùch-eairdean eadar na cuantan, anns an t-sliabh ghloirmhor naomh; gidheadh thig e gu 'chrìch, agus cha chuidich neach air bith leis.

CAIB. XII.

1 *Saoraidh Michael Israel ann an aimsir an carraid.*

2 *An aiseirigh choitichionn. 5 Fhuair Daniel eblas mu thimchioll nan aimsirean.*

AGUS anns an àm sin seasaidh Michael suas, am prionnsa mòr a ta seasamh air son cloinne do shluaigh-sa; agus bithidh aimsir carraid ann, mar nach robh riamh o bha cinneach ann, gus an uair sin féin: agus anns an àm sin saorair do shluaigh-sa, gach aon a gheibhear sgrìobhta san leabhar.

2 Agus dùisgidh mòran dhiubh-san a ta 'nan codal ann an duslach na talmhainn, cuid gu beatha shiorruidh, agus cuid gu nàire agus masladh bith-bhuan.

3 Agus dealraidh iadsan a ta glic mar shoilleireachd nan speur; agus iadsan a thionndaidheas mòran gu fireantachd mar na reultan fad saoghail nan saoghal.

4 Ach thusa, O Dhanieil, druid suas na briathran, agus seulaich an leabhar, gu àm na crìche: ruithidh mòran sìos agus suas, agus bithidh eòlas air a mheudachadh.

5 An sin dh'amhaire mise Daniel, agus, feuch, sheas dithis eile, aon air an taobh so do bhruaich na h-aimhne, agus aon air an taobh eile do bhruaich na h-aimhne.

6 Agus thubhairt neach ris an duine bha sgeudaichte le lion-eudach, a bha air uisgeachaibh na h-aimhne, 'nuair a thog e suas a bhithheas gu crìch nan iongantais so?

7 Agus chuala mi an duine bha sgeudaichte le lion-eudach, a bha air uisgeachaibh na h-aimhne, 'nuair a thog e suas a làmh dheas agus a làmh chlì gu nèamh, agus a mhionnaich e airsan a ta beò gu sìorruidh, gu 'm bi e gu aimsir, agus aimsirean, agus leth aimsir: agus 'nuair a sguireas e do sgapadh feachd an t-sluaigh naoinh, crìochnaichear na nìthe so uile.

8 Agus chuala mi, ach cha do thuig mi: an sin thubhairt mi, O mo Thighearn, ciod a' chrìoch a bhios aig na nìthe so?

9 Agus thubhairt e, Imich romhad, a Dhanieil: oir tha na briathran air an druideadh suas, agus air an seulachadh gu àm na crìche.

10 Bithidh mòran air an glanadh, agus air an deanamh geal, agus air an dearbhadh: ach nì na h-aingidh gu h-olc; agus cha tuig aon neach do na h-aingidh; ach tuigidh na daoine glìce.

11 Agus o'n àm an toirear air falbh an òbairt lathail, agus an cuirear suas a' ghràineileachd a nì léir-sgrios, bithidh mìle, dà cheud, ceithir fichead agus deich làithean.

12 Is beannaichte esan a dh'fheitheas, agus a thig gus am mìle trì cheud agus cùig deug thar fhichead là.

13 Ach imich thusa romhad gus an tig a' chrìoch: oir gabhaidh tu fois, agus seasaidh tu ann ad chrannchur aig crìch nan làithean.

HOSEA.

CAIB. I.

1 *An t-àm san d'rinn Hosea fàidheadaireachd.*

2 *Chum gu'n nochdadh e strìopachas na tìre ghabh Hosea d'a ionnsuidh bean strìopachais, 4 agus rug i Iesreel, Loruhamah, agus Lo-annà dha.*

FOCAL an Tighearn a thàinig gu Hosea, mac Bheeri, ann an làithibh Usiah, Iotaim, Ahais, agus Hececiah, rìghrean Iudah; agus ann an làithibh Ieroboaim, mhic Iohais, rìgh Israeil.

2 Toiseach focail an Tighearna le Hosea. Agus thubhairt an Tighearn ri Hosea, Imich, gabh a d' ionnsuidh bean strìopachais: agus clann strìopachais: oir rinn am fearann strìopachais mòr ann an dealachadh ris an Tighearn.

3 Agus dh'imich e, agus ghabh e Gomer

nighean Dhiblaime; agus dh'fhàs i torrach, agus rug i mac dha.

4 Agus thubhairt an Tighearn ris, Goir Iesreel mar ainm air: oir fòs tamull beag, agus dìolaidh mise fuil Iesreil air tigh Iehu, agus cuiridh mi cosgadh air rìoghachd tigh Israeil.

5 Agus tarlaidh air an là sin, gu'm bris mise bogha Israeil ann an gleann Iesreil.

6 Agus dh'fhàs i torrach a ris, agus rug i nighean; agus thubhairt Dia ris, Goir Loruhamah, Cha d'fhuairas tròcair, mar ainm oirre; oir cha dean mise tròcair nì's mò air tigh Israeil, ach bheir mi gu tur air falbh iad.

7 Ach air tigh Iudah nì mi tròcair, agus tèarnaidh mi iad leis an Tighearn an Dia,

agus cha'n ann le bogha no le claidheamh a thèarnas mi iad, no le cath, no le h-eachlaibh, no le marcaich.

8 Agus chuir i o'n chich Lornhamah, agus dh'fhàs i torrach, agus rug i mac.

9 An sin thubhairt *Dia*, Goir Lo-ammi, *Shuagh nach leam-sa*, mar ainm air: oir cha sibhse mo shluagh-sa, agus cha bhi mise ann am *Dhia* dhuibh-sa.

10 Gidheadh bithidh àireamh cloinne Israeil mar ghaineamh na fàirge, nach gabh tomhas no àireamh: agus tarlaidh, anns an àite san dubhradh riu, Cha sibh mo shluagh-sa, gu'n abrar riu, Is sibh mic an Dé bheò.

11 Agus bithidh clann Iudah agus clann Israeil air an cruinneachadh ri chéile, agus gabhaidh iad dhoibh féin aoncheann, agus thig iad a nìos as an tìr: oir is mòr a bhitheas là Iesreil.

CAIB. II.

1 *Chom airlicheadh d'òn t-sluagh an droch ghnùmh-aran a thréigsinn.* 14 *Bhrosnuich Dia iad gu pilltinn d'a ionnsuidh féin le geallannaibh tròcair-each.*

A BRAIBH-SE ri 'ur bràithribh, Ammi, *Mo shluagh-sa*, agus ri 'ur peathraichibh, Ruhamah, *Fhuairesas tròcair.*

2 Tagraibh ri 'ur màthair, tagraibh: oir cha'n i mo bhean-sa, ni mò is mise a fear-sa: cuireadh i air falbh uime sin a strìopachais as a sealladh, agus a h-adh-altrais o h-uchd;

3 Air eagal gu'n ruisg mise i lomnochd, agus gu'n cuir mi i mar anns an là san d' rugadh i, agus gu'n dean mi i mar fhàsach, agus gu'm fàg mi i mar fhear-ann tioram, agus gu marbh mi i le tart:

4 Agus nach gabh mi truas d'a cloinn, oir is clann strìopachais iad.

5 Oir rinn am màthair strìopachas: rinn ise a ghabh 'na broinn iad gu beag-narach: oir thubhairt i, théid mi an déigh mo luchd-gaoil, a ta tòirt dhomh m' arain agus m' uisge, m' olainn agus mo lìn, m' oladh agus mo dhibhe.

6 Uime sin feuch, druididh mise suas a slighe le droighionn, agus dùinidh mi a callaid, air chor as nach amais¹ i air a ceuma.

7 Agus leanaidh i an déigh a luchd-gaoil, ach cha bheir i orra; agus iarraidh i iad, ach cha'n amais i orra: an sin their i, Siùbhlaidh mi agus pillidh mi gu m' cheud fhear, oir bha mi ni b'fhearr dheth an sin na a nis.

8 Agus cha robh fios aice gu'n d'thug mise dhi arbhar, agus fion, agus oladh, agus an t-airgid a rinn mi pailt dhi, agus an t-òr a thug iad mar thabhartas do Bhaal.

9 Uime sin pillidh mise, agus bheir mi

m' arbhar leam 'na àm, agus m' fhlon 'na àm, agus bheir mi leam m' olann agus mo lion, a *thugadh* a chòmhachadh a lomnochduidh.

10 Agus a nis leigidh mi ris a neòghloine ann ansealladh a luchd-gaoil, agus cha saor duine sam bith as mo làimh i.

11 Bheir mi fòs air a h-aighir uile sgur; a rè nuadh, agus a sàbaid, agus a h-àrd-fhèillean uile.

12 Agus millidh mi a fionain agus a crannfige, mu'n d'thubhairt i, Is iad so mo dhuais a fhuair mi o m' luchd-gaoil: agus ni mi frith dhiubh, agus ithidh beathaichean na macharach iad.

13 Agus agraiddh mi oirre làithean Bhaalim, anns an do loisg i tùis doibh, agus anns an do sgeudaich si i féin le a cluas-fhàinnibh agus le a seudaibh, agus anns an deachaidh i an déigh a leannan, agus anns an do dhichuimhnich i mise, deir an Tighearn.

14 Gidheadh feuch, bheir mise oirre mo leantuinn, agus bheir mi i do 'n fhàsach, agus labraidh mi rithe gu cairdeil.

15 Agus as a sin bheir mi dhi a fionliosann, agus gleann Achoir mar dhorus dòchais; agus seinnidh i an sin, mar ann an làithibh a h-òige, agus mar anns an là san d'thàinig i nìos á tìr na h-Eiphit.

16 Agus tarlaidh air an là sin, tha an Tighearn ag ràdh, gu'n goir thu dhiom-sa, M'fhear², agus nach goir thu rium ni's mò, Mo Bhaal³.

17 Oir bheir mi ainmean Bhaalim a mach as a beul, agus cha'n ainmichear ni's mò iad air an ainm.

18 Agus anns an là sin ni mise coimh-cheangal air an son, ri beathaichibh na macharach, agus ri eunlaith nèimh, agus ri nithibh snàgach na talmhainn: agus am boglia, agus an claidheamh, agus an cath, brisidh mi a mach as an fhearann, agus bheir mi orra gu'n luidh iad sìos an tèaruinteachd.

19 Agus pòsaidh mi thu rium féin gu bràth; seadh, pòsaidh mi rium féin thu ann am fìreantachd, agus ann an ceartas, agus ann an caoimhneas, agus ann an caomh-ghràdh;

20 Seadh, ni mi ceangal-pòsaidh riut ann am fìrinn, agus gabhaidh tu eòlas air an Tighearn.

21 Agus tarlaidh air an là sin, cluinidh mise, tha an Tighearn ag ràdh, cluinidh mise na nèamha; agus cluinidh iadsan an talamh;

22 Agus cluinidh an talamh an t-arbhar, agus am fion, agus an oladh; agus cluinidh iadsan Iesreil.

23 Agus suidhichidh mi dhomh féin i anns an fhearann, agus ni mi tròcair

¹ *airmis.*² *Ishì. Eabh.*³ *Mo Tighearn.*

oirre-sa nach d'fhuir tròcair; agus their mi rìusan nach robh 'nan shuagh dhomh, Is tu mo shluagh; agus their iadsan, *Is tu mo Dhia*.

CAIB. III.

1 *Le ban-adhaltranach a ghabhail, 4 chuir am fàidh an cèill trioblaiden Israeil, 5 agus an aithreachas anns na làithibh deireannach.*

OS bàrr thubhairt an Tighearn rium, Imich a ris. gràdhaich bean, (ion-mhuinn le a caraid, ged tha i 'na ban-adhaltranaich,) a réir gràidh an Tighearna do chloinn Israeil, ged tha iadsan ag amharc ri diathaibh eile, agus a' gràdhachadh chopana fiona.

2 Mar sin cheannaich mi dhomh féin i air chùig *buinn* deug airgid, agus homer eorna, agus leth homeir eorna.

3 Agus thubhairt mi ri the, Fanaidh tu leam-sa mòran laithean; cha dean thu strìopachas, ni mò bhios tu aig fear eile; mar sin bithidh mise mar an ceudna agad-sa.

4 Oir fanaidh clann Israeil mòran làithean gun rìgh, agus gun phrionnsa, agus gun iobairt, agus gun iomhaigh, agus gun ephod, agus gun teraphim:

5 'Na dhéigh sin pillidh clann Israeil, agus iarraidh iad an Tighearn an Dia, agus Daibhidh an rìgh; agus bithidh eagal an Tighearn agus a mbaitheis orra, anns na làithibh deireannach.

CAIB. IV.

1 *Bha comhstri aig Dia ri cloinn Israeil, 6 agus r'an sagartaibh air son am peacanna. 13 Thugadh rabhadh do Iudah le t-eir-sgrìos Israeil.*

EISDIBH-SE focal an Tighearn, O chlann Israeil: oir tha comhstri aig an Tighearn ri luchd-àiteachaidh na tìre; a chionn nach 'eil firinn, no tròcair, no còlas Dé anns an fhearann.

2 Le mionnaibh, agus breugaibh, agus marbladh, agus goid, agus deanamh adhaltrais, bhris iad a mach; agus tha fuil a' ruigheachd gu fuil.

3 Uime sin ni am fearann caoidh, agus seargaidh gach aon a ta chòmhnuidh ann, maille ri beathaichibh na macharach, agus ri eunlaith an athair; seadh, bheirear iasga na fairge fòs air falbh.

4 Gidheadh cha 'n 'eil duine sam bith a' tagradh, agus cha 'n 'eil duine sam bith a' cronuchadh: oir tha mo shluagh mar dhream a ni strì ris an t-sagart.

5 Uime sin tuitidh tu san là, agus tuitidh am fàidh fòs leat anns an oidhche; agus sgriosaidh mise do mhlàthair.

6 Tha mo shluagh-sa air an sgrios le dìth eòlais. A chionn gu'n do chuir thu cùl ri eòlas, cuiridh mise fòs cùl riutsa, air chor as nach bi thu agam a'd' shagart: a chionn gu'n do dhearmaid thu lagh do Dhia, dearmaididh mise fòs do ehlann-sa.

7 Amlhuidh mar chaidh iad am meud, mar sin chiontaich iad a'm' aghaidh-sa: caochlaidh mise an glòir gu nàire.

8 Tha iad ag itheadh suas peacaidh¹ mo shluagh-sa, agus a' socruchadh an cridhe air an euceart.

9 Agus amhuil a bhios an sluagh, mar sin bithidh an sagart; agus smachdaichidh mise iad air son an slighean, agus diolaidh mi orra an deanadas.

10 Agus ithidh iad, ach cha bhi iad sà- uichte; ni iad strìopachas, agus cha 'n fhàs iad lìonmhor: oir leig iad dhiubh bhi toirt aire do'n Tighearn.

11 Bheir strìopachas, agus fìon, agus fìon nuadh air falbh an cridhe.

12 Tha mo shluagh-sa ag iarraidh comhairle air an crannaibh, agus tha an lorg a' deanamh foillsachaidh dhoibh: oir thug spiorad an strìopachais orra dol air seacharan, agus chaidh iad le strìopachas air falbh o'n Dia.

13 Air mullaichibh nan sliabh tha iad ag iobradh, agus air na sléibhtibh tha iad a' losgadh tuise; fo chrannaibh daraich, agus crithich, agus cuilinn, a chionn gu bheil an sgàile taitneach: air an aobhar sin tha 'ur nigheana ri strìopachas, agus 'ur mnathan ri adhaltras.

14 Nach smachdadh mise bhur nigh-eanan, a chionn gu bheil iad ri strìopachas? agus 'ur mnathan a chionn gu bheil iad ri adhaltras? a chionn gu bheil iad 'gan cur féin air leth le strìopachaibh, agus ag iobradh le luchd neo-ghloine: uime sin, an sluagh aig nach 'eil tuigse, tuitidh iad.

15 Ged dhean thusa strìopachas, O Israeil, *gidheadh* na ciontaichead Iudah; agus na tigibh-sa gu Gilgal, ni mò theid sibh suas gu Bet-abhen; ni mò a mlionn- aicheas sibh, Mar is beò an Tighearn.

16 Oir tha Israel a' claonadh air ais, mar agh cùl-sleamhnach: a nis biadhaidh an Tighearn iad mar uan ann an àite farsuinn.

17 Tha Ephraim air a dhlùth-cheangal ri Iodholaibh, leig leis:

18 Tha an deoch searbh: rinn a h-uachd- arain strìopachas gun chlos: ghràdhaich iad ni nàrach:

19 Cheangail a' ghaoth suas i 'na sgiath- aibh; agus bithidh nàire orra a thaobh an iobairtean.

CAIB. V.

1 *Breitheanas an aghaidh nan sagart, an t-sluaigh, agus phrionnsachan Israeil air son am peacanna agus an ceannaire.*

CLUINNIBH-SE so, a shagartan; agus thugaibh-sa aire, O thigh Israeil; agus thugaibh-sa fa'near, O thigh an rìgh; oir tha breitheanas dlùth dhuibh; a

¹ iobairt-pheacaidh.

chionn gu'n robh sibh mar rib air Mispah, agus mar lion sgaoilte air Tabor.

2 Agus rinn na ceannairich air domhain; uime sin b'fheir mise smachdachadh air an iomlan diubh.

3 Is aithne dhomh-sa Ephraim, agus Israel cha'n 'eil am folach orm: oir a nis rinn Ephraim strìopachas; tha Israel air a thruaillleadh.

4 Cha dealbh iad an deanadas gu pill-eadh chum an Dé: oir tha spiorad strìopachais 'nam meadhon, agus air an Tighearn cha do ghabh iad eòlas.

5 Air an aobhar sin islichear uabhar Isracil fa chomhair a shùil; agus Israeil, agus Ephraim tuislichidh 'nan aingidheachd: tuislichidh fòs Iudah maille riu.

6 Le 'n treudaibh agus le 'm buaraibh, théid iad a dh'iarraidh an Tighearna: ach cha'n fhaigh iad e; tharruing se e féin uatha.

7 Bhuin iad gu fealltach an aghaidh an Tighearn; oir ghin iad clann choimheach: a nis sluigidh mìos iad maille r' an cuibhriomaibh.

8 Séidibh-sa an trompaid ann an Gibeah, am buabhull ann an Ramah: éighibh caismeachd chatha ann am Bet-abhen: an nàmhaid air do thòir, O Bheniamin.

9 Bithidh Ephraim 'na fhàsach ann an là an achmhasain: am measg threubhan Israeil rinn mise aithnichte an ni sin a thig gu crìch gu deimhin.

10 Bha prionnsachan Iudah cosmhuil riusan a dh'atharraicheas an comhara-fearainn: dòirdidh mise mo chorruih a mach orra mar uisge.

11 Tha Ephraim sàruichte, briste ann am breitheanas; a chionn gu'n do ghluais e gu toileach an dèigh na h-àithne.

12 Uime sin bithidh mise mar leòman do Ephraim: agus mar lobhadh do thigh Iudah.

13 'Nuair a chunnaic Ephraim a thinn-eas, agus Iudah a chreuchd, an sin chaidh Ephraim a chum an Asirianaich, agus chuir e fios gu rìgh Iareb: gidheadh cha b'urraim e 'ur leigheas, ni mò shlànuich e 'ur creuchd.

14 Gu deimhin bithidh mise mar leòman do Ephraim, agus mar leòman òg do thigh Iudah: reubaidh mise, eadhon mise féin, agus imichidh mi romham; bheir mi leam, agus cha bhí aon neach ann a thèarnas:

15 Imichidh mi, agus pillidh mi gu m' àite, gus an aidich iad an cionta, agus an iarr iad m' aghaidh: 'nan àmhghar iarraidh iad mi gu moch.

CAIB. VI.

1 Earail gu aithreachas. 4 Rinn am fàidh gearan an aghaidh Israeil agus Iudah a chionn gu'n do bhunaich iad 'nan strìopachas.

THIGIBH, agus pilleamaid ris an Tighearn: oir is esan a reub, agus is e ni ar leigheas; is e bluail, agus ceanglaidh e suas sinn.

2 An ceann dà là ni e ar n-ath-bheothachadh, air an treas là d'uisgidh e suas sinn, agus bithidh sinn beò 'na shealladh.

3 Agus bithidh eòlas againn; thèid sinn air ar n-aghaidh a ghabhail eòlais air an Tighearn: tha a dhol a mach air 'ulluchadh mar a' mhaduinn; agus thig e d' ar n-ionnsuidh mar an t-uisge; mar an t-uisge deireannach, agus an ceud uisge air an talamh.

4 Ciod a ni mi riut, O Ephraim? Ciod a ni mi riutsa, O Iudah? oir tha 'ur maithreas mar neul maidne, agus mar an drùchd moch, a shiùbhlas air falbh.

5 Uime sin sgath mi sìos iad leis na fàidhibh: mharbh mi iad le briathraibh mo bheoil: agus bha do bhreitheanais mar an solus 'na dhol a mach.

6 Oir dh'iarr mise trócair, agus ni h-e iobairt; agus eòlas Dé ni's mò na iobairt-ean-loisgte.

7 Ach bhris iadsan an coimheangal mar Adhamh¹: an sin bhuin iad gu fealltach a m' aghaidh-sa.

8 Is caithir luchd-deanamh eucorach Gilead; air a truailleadh le fuil.

9 Agus amhuil a dh'fheithcas buidheann² air son duine, tha cuideachd nan sagart a' marbhadh anns an t-slighe gu Sechem a dh'aon-bheachd; oir rinn iad gu dàna aingidheachd.

10 Ann an tigh Israeil chunnaic mi ni ro ghràineil: an sin tha Ephraim ri strìopachas; tha Israel air a thruaillleadh.

11 Air do shon-sa, mar an ceudna, O Iudah, tha fogharadh air a shònrachadh, an uair a philleas mise air a h-ais bruid mo shluaigh.

CAIB. VII.

1 Chronaicheadh sluagh Israeil air son am peacanna.

11 Bha fearg air Dia 'nan aghaidh air son an cealgairichd.

AN uair a b'ail leam-sa Israel a leigheas, an sin leigeadh ris aingidheachd Ephraim, agus euceart Shamaria: oir tha iad a' cur an gnìomh ceilge: seadh, tha an gaduiche a' dol a steach; tha a' cheathairne ri creach a muigh.

2 Agus cha'n 'eil iad a' toirt fa'near 'nan cridhe gur cuimhne leam-sa an uile aingidheachd: a nis chuaitich an gnìomh-ara féin iad air gach taobh; tha iad fa chomhair m' aghaidh-sa.

3 Le'n aingidheachd tha iad a' deanamh an rìgh ait; agus nan uachdaran le 'm breugaibh.

4 Is adhaltranaich iad uile; mar àmh-uinn air a teasachadh leis an fhuincadair, an uair a sguireas fear-oibreachaidh na

¹ mar dhaoine.

² ceathairne.

taoise d'a fuineadh gus am bi i air a gortachadh.

5 Air là *féille* ar rìgh, 'nuair a bha na prionnsachan air an teasachadh le fìon, shin esan a mach a làmh le luchd-fanoid.

6 Oir dh'ulluich iad an cridhe mar àmhuinn, am feadh a ta iad ri feall-fholach: fad na h-oidheche tha am fuineadair a' codal; anns a' mhaduim tha i losgadh mar theine lasarach.

7 Theasaich iad uile iad féin mar àmhuinn, agus shluig iad am breitheamhna; tha an rìghrean uile air tuiteam; cha 'n 'eil aon 'nam measg a ta gairm orm-sa.

8 Ephraim, mheasg esan e féin leis na cinnich; is aran nach deachaidh a thionndadh Ephraim.

9 Shluig coigrich suas a neart, agus cha'n 'eil fios aig air: seadh, tha fuilt-eanan liatha air, an sud agus an so, gidheadh cha'n 'eil fios aig air.

10 Agus tha uabhar Israeil a' tabhairt fianuis fa chomhair a shùil: gidheadh cha'n 'eil iad a' pilleadh ris an Tighearn an Dia, no 'ga iarraidh air son so uile.

11 Tha Ephraim fòs mar choluman amaideach, gun eòlas: tha iad a' glaothach ris an Eiphit, tha iad a' triall gu Asiria.

12 An uair a thriallas iad, sgaoilidh mise mo lìon thairis orra; mar eunlaith an athair bheir mi nuas iad; smachdaichidh mi iad an uair a dh'éisdeas iad ri 'n coimhthional.

13 Mo thruaighe iad! oir theich iad uamsa: léir-sgrìos dhoibh, oir chiontaich iad a'm' aghaidh-sa: ged shaor mi iad, gidheadh labhair iad breugan a'm' aghaidh.

14 Agus cha do ghlaodh iad riumsa le 'n cridhe; ged rinn iad donnalaich air an leabaichibh air son arbhair agus fìona; tha iad a' cruinneachadh an ceann a chéile, tha iad ag éirigh suas a'm' aghaidh-sa.

15 Seadh, smachdaich mi iad; neartaich mi fòs an gairdeanan; gidheadh tha iad a' dealbh aimhclis a'm' aghaidh.

16 Tha iad a' tionndadh an déigh ni gun bhuannachd: tha iad mar bhogha cealgach: tuitidh an uachdarain leis a' chlaidheamh, airson nimhe an teangaich: so cùis am maslaidh ann an tìr na h-Eiphit.

CAIB. VIII.

1 Bhagrath Israel agus Iudha le léir-sgrìos air son am mì-dhiadhachd agus an ìodhol-aoraidh.

AN trompaid ri d' bheul! mar iolair an aghaidh tighe an Tighearna *thig e*: a chionn gu'n do bhris iad mo choimhcheangal-sa, agus gu'n do chiontaich iad an aghaidh mo reachd.

2 Rium-sa glaothaidh iad, O Dhia Israeil, is aithne dhuinne thu.

3 Chuir Israel uaith am fad an ni ta maith: ni nàmhaid a ruagadh.

4 Chuir iad suas rìghrean, ach cha'n ann uamsa: rinn iad uachdarain, agus cha robh agamsa fios air: d' an airgid agus d' an or rinn iad dhoibh féin ìodholan, a chum gu'n gearr ar iad.

5 Cuir am fada uait do laogh, O Shamarìa; tha mo chorruih-sa air lasadh 'nan aghaidh: cia fhad a bhios iad gun ruigh-eachd air neo-chionta?

6 Oir bha so fòs o Israeil: dhealbh am fear-oibre e; agus cha Dia ta ann: oir brisear 'na bhloighdibh laogh Shamarìa.

7 Oir chuir iad a' ghaoth, agus buainidh iad a' chuairt-ghaoth: cha'n 'eil toradh air an déis; cha toir i uaipe min; no ma bheir, shluigidh coigrich suas i.

8 Tha Israel air a shlugadh suas: a nis tha iad am measg nan cinneach, mar shoitheach anns nach 'eil tlachd air bith.

9 Oir chaidh iad suas gu Asiria: is asal fhìadaich san aonach Ephraim; thuarasdalaich iad leannain.

10 Seadh, ged thuarasdalaich iad am measg nan cinneach, a nis tionlailidh mise iad ri chéile; agus bithidh iad gu goirid air an cràdh le uallach an rìgh agus 'uachdaran.

11 A chionn gu'n d'rinn Ephraim mòran altairean gu peacachadh, altairean gu peacachadh tha aige.

12 Sgrìobh mise d'a ionnsuidh nithe mòra mo reachd; *ach* mheasadh iad mar ni nach buineadh dhoibh.

13 Tha iad ag iobradh feòla mar thabh-artas dhomh-sa, agus 'ga h-ithcadh; *ach* cha ghabh an Tighearn riu: a nis cuimhnichidh e an aingidheachd, agus smachdaichidh e an lochdan: pillidh iad air an ais do'n Eiphit.

14 Oir dhì-chuimhnich Israel a Chruithfhear, agus thog e teampuill: agus chuir Iudha an ìonmhoireachd caithreachan daingeann: ach cuiridh mise teine air a chaithrichibh, agus loisgidh e a luchairtean.

CAIB. IX.

1 Teanntachd agus braigheanas Israeil air son am peacanna, gu h-àraidh air son an ìodhol-aoraidh.

NA dean aoibhneas, O Israeil, na dean, gairdeachas mar na cinnich: oir chaidh thu air strìopachas o d' Dhia; ghràdhaich thu duais air gach uile urlar arbhair.

2 An t-urlar arbhair agus an dabhach-fhìona cha dean am beathachadh, agus meallaidh am fìon nuadh an dòchas.

3 Cha ghabh iad còmhnuidh ann am fearann an Tighearn: ach pillidh E-

phraim do'n Eiphit; agus ann an Asiria ithidh iad nithe neòghlan.

4 Cha'n iobair iad *tabhartais*-fhìona do'n Tighearn, ni mò bhios iad taitneach dha: bithidh an iobairtean doibh mar aran luchd-bròin; bithidh iadsan uile a dh'itheas deth air an salachadh; gu dearbh cha tig an aran air son an anama gu tigh an Tighearna.

5 Ciod a ni sibh ann an là na h-àrd-fhèille, agus ann an là fèille an Tighearna?

6 Oir feuch, dh'imich iad air falbh o làthair an fhir-mhillidh: tionailidh an Eiphit iad, adhlaididh Memphis iad: na *h-ionada* taitneach a *cheannaich* iad le'n airgid, sealbhaichidh an ionntagach iad: 'nam pàillunaibh *fàsaidh* an droighionn.

7 Thàinig làithean an smachdachaidh, thàinig làithean na luigheachd: aithnichidh Israel gu'm b' amadan an fàidh, gu'n robh fear an spioraid air bhoile; air son ro mheud t' aingidheachd, agus air son d' fhuath mhòir.

8 Tha fear-faire Ephraim le m' Dhiasa: tha am fàidh *mar* lìon an eunadair 'na uile shlighibh-san: *neartaich* iad am fuath an aghaidh tighe mo Dhé.

9 Thruaill siad iad féin, mar ann an làithibh Ghibeah: cuimhnichidh esan an aingidheachd, smachdaichidh e an lochdan.

10 Mar dhearca-fìona san fhàsach, fhuair mise Israel; mar am meas luath air a' chrann-flìge 'na cheud àm chunnaic mi 'ur n-aithrichean. *Ach* chaidh iad gu Baal-peor, agus dhealaich siad iad féin a chum an ni nàraich sin; agus dh'fhàs iad gràineil, mar *chuspair* an gràidh.

11 Air son Ephraim, itealaichidh an glòir air falbh mar eun; o'n bhreth, agus o'n bhroinn, agus o'n ghineamhuinn.

12 Seadh, ged àraich iad an clann, sgriosaidh mise iad o mheasg dhaoine; seadh, is an-aoibhin doibh, an uair a dh'imicheas mise uatha.

13 Tha Ephraim, mar a chunnaic mi Tirus, air a shuidheachadh ann an ionaid taitneach: ach bheir Ephraim a mach a chlann do'n fhear-mhillidh.

14 Thoir, O Tighearn. Ciod a bheir thu? thoir dhoibh brù chailteach, agus ciochan seasga.

15 Tha an cionta gu léir ann an Gilgal *fa' m' chomhair*: oir an sin thug mise fuath dhoibh; air son aingidheachd an deanadais iomainidh mi as mo thigh iad: cha toir mi nì's faide gràdh dhoibh; tha am maithean uile cùl-sleamhnach.

16 Tha Ephraim buailte; thiormaicheadh suas an freumh; cha ghiùlain iad a' bheag do thoradh: seadh, ged bheireadh iad, gidheadh marbhaidh mise *tor-*

adh gràdhach am bronn.

17 Tilgidh mo Dhia air falbh iad, a chionn nach d'éisd iad ris: agus bithidh iad 'nam fògaraidh am measg nan cinn-each.

CAIB. X.

1 Bhagràdh clann Israel air son am mì-dhiadhachd, agus an ìodh-aoraidh, 12 agus thugadh earail dhoibh aithreachas a ghabhail.

B' FHIONAIN thorrach Israel: thug e mach toradh dha féin: a réir pailteis a thoraidh chuir e altairean an lìonmhoireachd; a réir maitheis 'fhear-ainn rinn e dealbhan àlunn.

2 Tha an cridhe air a roinn; a nis gheibhear ciontach iad: brisidh esan sìos an altairean: sgriosaidh e an dealbhan.

3 Oir a nis tha iad ag ràdh, Cha'n 'eil rìgh air bith againn, a chionn nach robh eagal an Tighearn oirnn: ciod uime sin a dheauadh rìgh dhuinn?

4 Labhair iad briathra *faoine*, 'nuair a mhionnaich iad; breugan an uair a rinn iad coimlicheangal: mar so tha breitheanas a' fàsa nìos, mar an iteotha ann an claisibh na macharach.

5 Air son laoiagh Bhet-abhein bithidh eagal air luchd-àiteachaidh Shamaria; oir ni a shluagh caoidh os a cheann, agus a shagairt acain air a shon; air son a ghlòire, oir dhealaich i ris.

6 Os bàrr bheirear e féin gu Asiria, mar thabhartas do rìgh Iareb: ni masladh greim air Ephraim, agus gabhaidh Israel nàire d'a chomhairle féin.

7 Air son Shamaria, ghearradh a rìgh as mar an cobhar air uachdar an uisge.

8 Sgriosar fòs ionada àrda Abhein, cionta Israel: thig an droighionn agus am foghannan a nìos air an altairean; agus thoir iad ris na sléibhtibh, Folaichibh sinn, agus ris na beanntaibh, Tuitibh oirnn.

9 O Israel, chiontaich thu nì's mò na ann an làithibh Ghibeah: an sin sheas iad: nach d'rug an cath orra ann an Gibeah?

10 An aghaidh cloinne na h-aingidheachd thàinig mise, agus smachdaich mi iad. Agus cruinnichear na slòigh 'nan aghaidh-san 'nuair a smachdaichear iad air son an dà chionta.

11 Agus bithidh Ephraim 'na agh foghlumte, le 'm miann a bhi saltair a mach an arbhair; ach chaidh mise thairis air a muineal sgiamhach. Bheir mi air Ephraim marcachd; treabhlaidh Iudah, brisidh Iacob 'fhoèdan.

12 Cuiribh dhuibh féin ann am fireantachd, buainibh ann an toradh na tròcair: brisibh suas 'ur fearann neo-threabhla: oir is mitchidh Iehobhah iarraidh, gus an tig e; agus am fras e oirbh fireantachd.

13 Thrcabh sibh aingidheachd, bluain

sibh euceart; dh'ith sibh toradh bhreug-an; a chionn gu'n d'earb thu as do shlighe, à mòr-chuideachd do dhaoine treuna;

14 Uime sin éiridh buaireas an measg do shluaigh, agus bithidh t' uile dhaingnichean air am milleadh, amluail a mhill Salmon Bet-arbel ann an là a' chatha; ghearradh 'nam bloighidh a' mhàthair agus a' chlann le chéile.

15 Is amhuil a nithear ruibhse, O Bhet-el, air son ro mheud bhuir n-aingidheachd: ann am maduinn gearrar as gu cinnteach righ Israeil.

CAIB. XI.

1 Bha sluagh Israeil mì-thaingeil do'n Tighearn air son a thròcairean. 5 Breitheanas Dhé 'nan aghaidh. 8 A thròcair d'an taobh. 12 Cealgair-eachd Ephraim.

NUAIR a bha Israel 'na leanabh, an sin thug mise gràdh dha; agus a mach as an Eiphit ghairm mi mo mhac.

2 'Nuair a ghairm iad orra, an sin dh'imich iadsan uatha: dh'ìobair iad do Bhaalim, agus loisg iad tùis do dhealbhan snaighle.

3 Theagaisg mise fòs do Ephraim cois-cachd, 'gan togail ann am ghairdeanaibh; ach cha robh fios aca gu'n do leighis mi iad.

4 Tharruing mi iad le cordaibh duine, le ceanglaichibh gràidh; agus bha mi dhoibh mar neach a thogas dhiubh a' chuing air an gialaibh, agus chuir mi sìos biadh dhoibh.

5 Cha phill e gu tìr na h-Eiphit, ach bithidh an t-Asirianach 'na righ air, a chionn gu'n do dhiùlt iad pilleadh *riumsa*.

6 Agus tuitidh an claidheamh gu trom air a bhailtibh, agus caithidh e a gleugan; agus sluigidh e, air son an comhairlean.

7 Agus tha mo shluagh-sa an tì air cùl-sleamhnachadh uam; ged ghlaodh iad ris an Tì a's àirde, cha'n àrdaicheadh aon neach e.

8 Cionnus a bheir mi thairis thu, O Ephraim! cionnus a bheir mi seachad thu, O Israeil! cionnus a ni mi thu mar Admah! a chuireas mi thu mar Sheboim! tha mo chridhe an taobh a stigh dhìom air tionndadh; tha m' aithreachais air lasadh le chéile.

9 Cha chuir mi 'n gnìomh mo dhianchorruich, cha phill mi a mhilleadh Ephraim; oir is Dia mise, agus cha duine; an Tì naomh ann ad mheadhon; gidheadh nach 'eil a' tathaich bhailtean.

10 Sìubhlaidh iad an déigh an Tigh-earna: beucaidh e mar leòman: an uair a bheucas e, an sin criothnaichidh¹ na mic o'n àird an iar.

11 Itelaichidh iad mar eun as an Eiphit,

agus mar choluman á tìr Asiria; agus suidhichidh mise 'nan tighibh iad, deir an Tighearn.

12 Tha Ephraim 'g am chuairteachadh le breugaibh, agus tigh Israeil, le ceilg: ach fathast tha Iudah a' riaghladh maille ri Dia; agus tha e dileas maille ris na naoimh.

CAIB. XII.

1 Aingidheachd Ephraim agus Iudah. 6 Chomhairlicheadh dhoibh aithreachas a ghabhail. 7 Chuir peacanna Ephraim campar air an Tighearn.

THA Ephraim ag ionaltradh air gaoith, agus ag imeachd an déigh na gaoithe an ear: gach aon là tha e cur bhreug agus reubaim an lionmhoireachd; rinn iad fòs coimhcheangal ri Asiria, agus tha oladh 'ga giùlain do'n Eiphit.

2 Tha consachadh fòs aig an Tighearn ri Iudah, agus ni e peanas air Iacob a réir a shligheana; a réir a dheanadais bheir e dha luigheachd.

3 Anns a' bhroinn ghlaic e a bhràthair air shàil; agus le a neart bha cumhachd aige maille ri Dia.

4 Seadh, bha cumhachd aige maille ris an aingeal; agus thug e buaidh: ghuil e, agus rinn e guidhe ris: fhuair e ann an Betel e, agus an sin labhair e ris.

5 Eadhon Iehobhah Dia nan sluagh, is e Iehobhah a chuimhneachan.

6 Uime sin pill thusa ri d' Dhia: coimhid tròcair agus breitheanas; agus feith air do Dhia a ghnàth.

7 Is fear malairt e: 'na làimh tha meigh na mealltaireachd; is toigh leis a bhi ri ainneart.

8 Agus thubhairt Ephraim, Gu deimhin tha mi air fàs saobhir, fhuair mi dhomh féin stòras: ann am shaothairibh uile cha'n fhaigh iad euceart air bith annam; bhiodh sin 'na clionta.

9 Agus mise Iehobhah do Dhia, a thug a nìos thu o thìr na h-Eiphit, bheir mi ort fòs còmhnuidh ghabhail ann am pailleanaibh, mar ann an làithibh na h-àrd-fhéile.

10 Labhair mi fòs leis na fàidhean, agus rinn mi lionmhor seallanna; agus le frith-ealadh nam fàidhean ghnàthaich mi cos-amlachdan.

11 Gu dearbh ann an Gilead tha eucart: gu cinnteach is dìomhanas iad; tha iad ag iobradh tharbh ann an Gilgal; seadh, tha an altairean mar chùirn ann an claisibh na macharach.

12 Ach theich Iacob gu dùthaich Shiria; agus rinn Israel seirbbhis air son mnà; agus air son mnà glhèidh e *caoraich*.

13 Agus le fàidh thug an Tighearn Israeil a mach as an Eiphit; agus le fàidh thearnadh e.

14 Bhrosnuich Ephraim e chum feirge

¹ thig iad le cabhaig.

gu ro shearbh: uime sin fàgaidh a Thighearn 'fhuil air féin; agus pillidh e thuige féin a mhasladh.

CAIB. XIII.

1 *Dh'fhalbh glòir Ephraim mar mhol air 'fhuadachadh le cuairt-ghaoith.* 4 *Sgrìosaidd Dia iad do bhrìgh gu'n do mhi-gl'nàthaich iad a thròcairean.* 15 *Breitheanas Shamaria air son a ceann-airc.*

AN uair a labhair Ephraim le crith, dh'ardaich se e féin ann an Israel; ach an uair a chiontaich e ann am Baal, bhàsaich e.

2 Agus a nis tha iad a' ciontachadh ni's mò agus ni's mò, agus rinn iad dhoibh féin dealbh leaghta d'an airgid: iodholan a réir an seòltachd féin an t-iomlan deth obair nam fear-ceirde: tha iad ag ràdh do'n taobh, Deanadh a' mhuinntir a ta 'g iobradh na laoigh a phògadh.

3 Air an aobhar sin bithidh iad mar neul na maidne; agus mar an drùchd moch a shiùbhlas air falbh: mar am moll air 'fhuadachadh le cuairt-ghaoith o'n urlar-bhuailidh; agus mar thoit a mach as an luidheir.

4 Gidheadh is mise an Tighearn do Dhia, a thug a nìos thu o thir na h-Ei-phit, agus cha bhi aithne agad air dia air bith ach mise; oir cha'n 'eil slànuihear ann ach mi.

5 B'aithne dhomh-sa thu san fhàsach, ann am fearann an tarta mhòir:

6 'Nan ìonaltradh bha iad air an lìonadh: bha iad air an lìonadh, agus dh'ardachadh an cridhe: air an aobhar sin dhi-chuimhnich iad mise.

7 Uime sin bithidh mise dhoibh mar leòmhann: mar liopard anns an t-slighe bheir mi fa'near iad.

8 Coinnichidh mi iad mar mhath-ghamhuinn o'n do bhuineadh a cuileanan, agus reubaidh mi sgairt an cridhe; agus an sin sluigidh mi iad mar leòmhann boirionn: nì fiadh-bheathach na macharach an reubadh.

9 O Israel, sgrìos thu thu féin, ach ann-am-sa tha do chabhair.

10 Bithidh mise ann am rìgh dhuit: c'àit ann bheil aon neach eile a thèarnas thu ann ad chaitrichibh uile! agus do bhrèitheambna uile ris an d' thubhairt thu, Thoir dhomh rìgh agus prionnsach-an.

11 Thug mise rìgh dhuit ann am fheirg, agus thug mi air falbh e ann am chorruih.

12 Tha aingidhcadh Ephraim air a carnadh suas: tha a chionta air a thasgaidh.

13 Thig ioghanna mnà ri saothair air: is mac nach 'eil glic e so; no cha'n fhanadh e fada ann an àite briseadh mach na cloinne.

14 Fuasglaidh mise iad o chumhachd na h-uaigne: saoraidh mi iad o'n bhàs: O bhàis, bithidh mise a'm' phlàigh dhuit; O uaign, bithidh mise a'm' sgrìos duit; bithidh aithreachas air 'fholach o m' shùilbh.

15 Ged bha e torrach am measg a bhràithrean, thig gaoth an ear, thig gaoth an Tighearna nìos o'n fhàsach, agus fàs-aidh 'fhuaran tioram, agus tiormaichear suas a thobar: bithidh ionmhas uile shoithichean taitneach air a chreachadh.

16 Bithidh Samaria 'na fàsach, oir rìnn i ceannairc an aghaidh a Dé: tuitidh iad leis a' chlaidheamb, brisear an naoidheana 'nam bloighdibh; agus reubar suas am mnathan torrach.

CAIB. XIV.

1 *Earail chum aithreachais.* 4 *Leighisidh Dia cùl-sleamhnachadh a shluiagh.*

PILL, O Israel, ris an Tighearn do Dhia, oir thuit thu le t' aingidheachd.

2 Thugaibh leibh briathran, agus pillibh ris an Tighearn; abraibh ris, Thoir air falbh ar n-uile chionta, agus gabh ruinn gu gràs mhòr: mar sin bheir sinn seachad laoigh ar bilean.

3 Cha dean Asur ar tèarnadh; air each-aibh cha dean sinn marcachd: nì mò their sinn tuilleadh ri obair ar làmba féin, Is sibhse ar dèe: oir annad-sa gheibh an dilleachdan tròcair.

4 Leighisidh mise an cùl-sleamhnachadh, gràdhachidh mi iad gu saor: oir phill mò chorruih air falbh uait.

5 Bithidh mi mar an drùchd do Israel: fàsaidh e mar an lili, agus cuiridh e mach a fhreumha mar Lebanon.

6 Sgaoididh a gheugan, agus bithidh a mhaise mar an crann-oladh, agus 'fhàile mar Lebanon.

7 Pillidh iadsan a ta chòmhnuidh fo a sgàile: mar an t-arbhar bithidh iad air an ath-bheothachadh; agus fàsaidh iad mar an fhìonain: bithidh 'fhàile mar fhìon Lebanon.

8 *Their Ephraim, Cìod mò gnothuch-sa tuilleadh ri iodholaibh?* Chuala mise e; agus thug mi fa'near e; is cosmhail mi ri crann uaine giuthais; uamsa tha do thoradh r'a faotainn.

9 Cò a ta glic, agus tuigidh esan na nithe so? crionna, agus aithnichidh e iad? oir tha sligheana an Tighearna ceart, agus gluaisidh na fireana anna: ach gheibh na ciontaich tuisleadh anna.

IOEL.

CAIB. I.

1 *Chuir Ioel an céill léir-sgríos na talmhainn leis an locust, a' chnàmh-bheist, agus a' bhurru. Chomhairlich e do'n t-sluagh trasg a ghairm, agus iad féin irioslachadh an làthair an Tigh-earna chum gu'm pilleadh e air falbh a bhreith-eanaís.*

FOCAL an Tighearn a thàinig a chum Ioel mhic Phetueil.

2 Cluinnibh-sa so, a sheann daoine; agus thugaibh-sa fa' near, uile luchd-àiteachaidh na tìre: an robh so 'nur làithibh-sa; no 'n làithibh bhur n-aithrichean?

3 Innsibh-sa do 'ur cloinn e, agus innseadh 'ur clann do'n cloinn-san agus an clannsa do ghinealach eile.

4 An ni sin a dh'fhàg a' phailm-chnuimh, dh'ith an locust; agus an ni a dh'fhàg an locust, dh'ith a' chnàmh-bheist; agus an ni sin a dh'fhàg a' chnàmh-bheist, dh'ith am burru.

5 Dùisgibh, a mhisgearan, agus guilibh; agus deanaibh-sa caoidh, uile phòitearan fìona, air son an fhìon-nuadha, oir tha e air a ghearradh air falbh o 'ur beul.

6 Oir tha ciunneach air teachd a nìos air m' fhearann-sa, treun, agus thar àireamh; is fiacian leòmhain am fiacian; agus tha fiacian carbaid leòmhain bhoirinn aca.

7 Dh'fhàg iad m'fhionain-sa 'na fàsach, agus rùisg iad mo chrann-fìge; rùisg iad e gu buileach, agus thilg iad air falbh e; tha a gheugan air an deanamh geal.

8 Dean caoidh mar òighe criosluichte le eudach-saic air son céile¹ a h-òige.

9 Tha an tabhartas-bidh air a ghearradh air falbh, agus an tabhartas-dibhe o thigh an Tighearna; deanaibh-sa bròn, O shagarta, òglacha an Tighearna.

10 Tha a mhachair 'na fàsach, tha an talamh ri caoidh; oir tha an t-ARBHAR air a mhilleadh; tha am fìon nuadh air seargadh, dh'fhàilnich an oladh.

11 Gabhaibh nàire, O threabhaichean: deanaibh-sa caoidh, O luchd-deasachaidh na fìonain, air son a' chruthneachd, agus air son an eorma: a chionn gu'n do mheath fogharadh na macharach.

12 Tha an fhìonain air tiormachadh suas, agus an crann-fìge air seargadh; tha am pomgranat, an crann-pailme fòs agus an crann-ubhall, eadhon uile chraobha na macharach, air seargadh: gu deimhin shearg aoibhneas air falbh o chloinn nan daoine.

13 Criosluiclibh sibh féin le eudach-saic, agus tuiribh, O shagarta: deanaibh ulartaich, a luchd-frithealaidh na h-altarach: thigibh, luidhibh fad na h-oidhche ann an eudach saic, òglacha mo Dhé: oir tha an tabhartas-bidh agus an tabhartas-dibhe air a chumail air ais o thigh ar Dé.

14 Naomhaiclibh-sa trasg, gairmibh là toirmisg, cruinnichibh na seanairean, uile luchd-àiteachaidh na tìre, gu tigh an Tighearn 'ur Dé, agus glaothaibh ris an Tighearn,

15 Och air son an là! oir tha là an Tighearna dlùth, agus mar léir-sgríos o'n Uile-chumhachdach thig e.

16 Nach 'eil ar lòn air a ghearradh as fa chomhair ar sùl? aoibhneas agus luagh-air o thigh ar Dé?

17 Lobh an siol f'a fhòidibh; dh'fhàgadh fàs na h-ionada-tasgaidh; bhriseadh sìos na saibhlean: a chionn gu'n do shearg an t-ARBHAR.

18 Cionnus a tha na beathaichean ag osnaich? tha na buailean spréidhe ann an airc, a chionn nach 'eil ionaltradh aca: tha na treudan chaorach fòs air am mill-eadh.

19 Riutsa, O Thighearn, glaothaidh mise; oir chaith an teine cluaintean an fhàsaich, agus loisg an lasair uile chraobha na macharach.

20 Tha beathaichean na macharach fòs a' glaothach riutsa: oir thiormaicheadh suas na h-aimhnichean uisge, agus chaith an teine cluaintean an fhàsaich.

CAIB. II.

1 *Chuir am fàidh an céill meudachd armaill Dhé: 12 chomhairlich e do'n t-sluagh aithreachas a ghabhail, 13 dh'orduich e trasg, 18 agus gheall e tròcar dhòibh o Dhia. 21 Thug e comhfhurtachd do Shìon.*

SEIDIBH-SE an trompaid ann an Sion, agus éighibh caismeachd catha ann am shliabh naomh-sa: criothnaicheadh uile luchd-àiteachaidh na tìre: oir tha là an Tighearn a' teachd, oir tha e am fagus.

2 Là dorchadais agus ogluidheachd: là neul agus tiugh-dhorchadais; mar an doilleireachd² air a sgaoileadh air na sléibhtibh, thig sluagh liomhor agus làidir; an leithide cha robh ann o shean, agus cha bhì ni's mò 'nan déigh, eadhon gu bliadhnacha mhòran ghinealach.

3 Rompa tha teine ri sgríos, agus 'nan

¹ fir-pòsda

² a' chamh.

déigh tha lasair a' losgadh: tha am fear-ann mar ghàradh Edein rompa, agus 'nan déigh 'na fhàsach uaigneach; seadh, cha bhi dol as aig aon ni uatha.

4 Bithidh an coslas mar choslas each; agus mar mharcaichean is amhluidh a ruitheas iad.

5 Mar fharum charbad air mhullach nam beann leumaidh iad; mar thoirm lasair theine a loisgeas anasbhuaibh: mar shluagh làidir air an cur an ordugh catha.

6 Roimh an gnùis bithidh geur-ghoimh air an t-sluagh: tionailidh na h-uile aghaidh dubhachas.

7 Ruithidh iad air an aghaidh mar dhaoine cumhachdach; streapaidh iad am balla mar luchd-cogaidh; agus siùbhlaidh iad gach aon air a shlighe, agus cha bhris iad an ordugh.

8 Ni mò theannaicheas aon air aon eile; coisichidh iad gach aon 'na cheum féin: agus ma thuiteas iad air a' chlaidheamh, cha bhi iad air an leònadh.

9 Ruithidh iad air an ais agus air an aghaidh anns a' bhaile: ruithidh iad air a' bhalla: streapaidh iad suas do na tighean: théid iad a steach air na h-uinn-eagaibh mar mheirleach.

10 Bithidh ball-chrith air an talamh rompa, criothnaichidh na nعامha: bithidh a' ghrian agus a' ghealach dorcha, agus cumaidh na reultan air ais an dealradh.

11 Agus cuiridh an Tighearn a mach a ghuth fa chomhair 'fheachd: oir tha a champ ro mhòr; oir is treun esan a thoirt gu buil 'fhocail; oir tha là an Tighearna mòr agus ro uamhasach, agus cò dh'fheudas fhulang?

12 Uime sin a nis mar an ceudna, tha an Tighearn ag radh, pillibh a m' ionnsuidh-sa le 'ur n-uile chridhe, agus le trasg, agus le gul, agus le caoidh.

13 Agus reubaibh bhuir cridhe, agus ni h-e 'ur n-eudach; agus pillibh ris an Tighearn bhuir Dia: oir tha e tròcaireach agus iochdmhor, mall a chum feirge, agus làn do chaomhalachd, agus gabhaidh e aithreachas mu'n olc.

14 Cò aig am bheil fios nach pill, agus nach gabh e aithreachas, agus nach fàg e beanuachd 'na dhéigh, tabhartas-bidh, agus tabhartas-dibhe, do'n Tighearna bhuir Dia.

15 Séidibh an trompaid ann an Sion, naomhaichibh trasg, gairmibh là toirmisg.

16 Cruinnichibh an sluagh, naomhaichibh an coimhthional; gairmibh na sean-àirean; tionailibh a' chlann, agus iadsan a ta deòthal na cìche: rachadh am fear nuadh-pòsda mach as a sheòmar, agus a'

bhean nuadh phòsda mach as a seòmar uaigneach.

17 Deanadh na sagairt, seirbhisich an Tighearna, gul eadar an sgàth-thigh agus an altair, agus abradh iad, Coigil¹, O Thighearna, do shluagh, agus na toir t'oighreachd thairis gu masladh: a chum gu'n riaghladh na cinnich os an ceann: c' uim' an abradh iad am measg nan cinneach, C'ait am bheil an Dia?

18 An sin bithidh an Tighearn eudmhor m'a fhearann, agus gabhaidh e truas d'a shluagh.

19 Seadh, freagraidh an Tighearn, agus their e r'a shluagh; Feuch, cuiridh mi d'ur n-ionnsuidh arbhar, agus fion, agus oladh, agus bithidh sibh air 'ur sàsachadh leò; agus cha dean mi sibh ni's mò 'nur masladh am measg nan cinneach.

20 Ach atharraichidh mi am fad uaibh *feachd* na h-àirde tuath, agus fògraidh mi e gu fearann falamh fàsail, a thoiseach gus an fhairge 'n ear, agus a dheireadh gus an fhairge 'n iar; agus thig a bhréine nìos, agus éiridh a dhroch fhàile², a chionn gu'n do mhaoidh e nithe mòra.

21 Na biodh eagail ort, O fhearainn; bi luaghaireach agus ait: oir ni an Tighearn nithe mòra.

22 Na biodh eagail oirbh a bheathaiche na macharach: oir tha cluaintean an fhàs-aich a' briseadh a nìos; oir tha a' chraobh a' giùlan a toraidh; tha an crann-fìge agus an fhionain a' toirt seachad an neirt.

23 Bithibh ait, ma ta, O chlann Shioin, agus deanaibh gàirdeachas anns an Tighearn bhuir Dia; oir thug e dhuibh an t-uisge a's toisiche ann an ceart-thomhas; agus bheir e air frasaibh teachd a nuas d'ur n-ionnsuidh, an ceud uisge, agus an t-uisge deireannach amhuil roimhe so.

24 Agus bithidh na h-urlair-bhualaidh làn do chruthneachd, agus cuiridh na dabhacha thairis le fion agus le h-oladh.

25 Agus aisgidh mise dhuibh na bliadh-nachan a dh'ith an locust, a' chnàmhbheist, am burrus³, a' phailm-chnuimh, m'fheachd mòr, a chuir mi 'nur measg.

26 Agus ithidh sibh ann am pailteas, agus bithidh sibh sàthach, agus clùth-aichidh sibh ainm an Tighearna bhuir Dia, a bhuin ruibh gu h-iongantach: agus cha nàraichear am feasd mo shluagh-sa.

27 Agus aithnichidh sibh gu bheil mise ann am meadhan Israeil, agus gur mi an Tighearn 'ur Dia, agus nach aon air bith eile: agus cha nàraichear am feasd mo shluagh.

28 Agus tarlaidh 'na dhéigh sin, gu'n dòirt mise mach mo spiorad air gach uile fheoil, agus ni bhuir mic agus bluir uigh-

¹ Caomhain.² bholadh.³ caterpillar. Sasg.

eana fàistneachd, brudairidh 'ur seann daoine brudair, agus chi 'ur n-òganaich seallanna:

29 Agus fòs air na h-òglachaibh agus air na banoglaibh, anns na làithibh sin, dòirtidh mi mach mo spiorad.

30 Agus nochdaidh mi iongantais anns na nèamhaibh, agus air an talamh; fuil, agus teine, agus smùidrich dheathaich.

31 Iompaichear a' ghrian gu dorchadas, agus a' ghealach gu fuil, mu'n tig là mòr agus uamhasach an Tighearn.

32 Agus tarlaidh, ge b'e air bith a ghairmeas air ainm an Tighearna, tèarnar e: oir ann an sliabh Shìoin agus ann an Ierusalem bithidh tèarnadh, mar a thubhairt an Tighearn; eadhon am measg an iarmaid a ghairmeas an Tighearn.

CAIB. III.

1 *Tagraidh Dia ris na cinnich air son a shluaigh Israèil, 4 agus dìolaidh e dhoibh a réir an gnìomh-ara. 18 Beannachdan na h-eaglais.*

OIR feuch, anns na làithibh sin, agus anns an àm sin, 'nuair a bheir mise air a h-ais bruid Iudah, agus Ierusalem, *tarlaidh,*

2 Gu'n cruinnich mi na h-uile chinnich, agus bheir mi sìos iad gu gleann Iehosaphait, agus tagraidh mi riut an sin air son mo shluaigh, agus *air son m' oigh-reachd Israèil*, a sgap iad am measg nan cinneach; agus roinn iad mo dhùthaich.

3 Agus thilg iad croinn air son mo shluaigh; agus thug iad macan air son strìopaich, agus reic iad nigheanag air son fiona, chum gu'n òladh iad.

4 Seadh, agus ciod 'ur gnothuch-sa riumsa, O Thiruis, agus a Shidoìn, agus uile chrioche Phalestin? an diol sibh rium luigheachd? a nis ma bheir sibh dhomh luigheachd, gu luath, gu grad dìolaidh mi 'ur luigheachd air 'ur ceann féin;

5 A chionn gu'n do ghabh sibh m' air-giod agus m' òr, agus gu'n do ghiùlain sibh gu bhur teampuill mo nithe luach-mhor taitneach.

6 Clann Iudah fòs, agus clann Ierusalem reic sibh ris na Greugaich, a chum gu'n atharraicheadh sibh iad am fad o'n crìch féin.

7 Feuch, togaidh mise iad as an àite gus an do reic sibh iad; agus pillidh mi bhur luigheachd air bhur ceann féin.

8 Agus reicidh mi 'ur mic agus 'ur nigh-eana gu làimh cloinne Iudah; agus reicidh iadsan iad ris na Sabéich, ri sluagh fad as; oir labhair an Tighearn e.

9 Eighibh-sa so am measg nan cinneach;

ulluichibh cogadh, dùisgibh suas na cumhachdaich; thigeadh na fir-chogaidh uile am fagus, thigeadh iad a nìos.

10 Deanaibh claidhean do 'ur coltraibh, agus sleaghan do 'ur corranaibh-sghathaidh; abradh an lag, Tha mi làidir.

11 Cruinnichibh sibh féin, agus thigibh, a chinneacha gu léir, agus tionailibh o gach taobh mu'n cuairt: an sin bheir thusa air na cumhachdaich teachd a nuas, O Thighearn.

12 Thigeadh na cinnich, agus thigeadh iad a nìos gu gleann Iehosaphait: oir an sin suidhidh mise gu breth a thoirt air na cinnich uile mu'n cuairt.

13 Sàthaibh an corran, oir tha am fogharadh abuich; thigibh, gabhaibh sìos, oir tha an t-amar-fiona làn, tha na dabhacha a' cur thairis: oir tha an aingidheachd mòr.

14 Mòr-chuideachda, mòr-chuideachda, ann an gleann a' ghearraidh; oir tha là an Tighearna dlùth ann an gleann a' ghearraidh.

15 Dorchaichear a' ghrian agus a' ghealach, agus cumaidh na reultan air ais ar dealradh.

16 Agus beucaidh an Tighearn a mach á Sion, agus o Ierusalem cuiridh e mach a ghuth, agus bithidh crith air na nèamhaibh, agus air an talamh; ach bithidh an Tighearn 'na ionad-dìdein d'a shluaigh; agus na dhaingneach làidir do chloinn Israèil.

17 Mar sin aithnichidh sibh gur misean Tighearn 'ur Dia, a ta chòmhnuidh ann an Sion, mo shliabh naomh: an sin bithidh Ierusalem naomh, agus cha téid coigrich troimhe¹ ni's mò.

18 Agus tarlaidh anns an là sin, gu'n sil na sléibhteana a nuas fìon nuadh, agus sruthaidh na beannta le bainne; agus sruthaidh uile aimhnichean Iudah le h-nisgeachaidh; agus thig tobar a mach o thigh an Tighearn, agus uisgichidh e gleann Shitim.

19 Bithidh an Eiphit 'na nochd-làraich, agus bithidh Edom 'na fhàsach uaigheach; air son an ainneirt *an aghaidh* cloinne Iudah; a chionn gu'n do dhòirt iad fuil nan neò-chiontaich 'nam fearann.

20 Ach gabhaidh Iudah còmhuidh gu sìorruidh, agus Ierusalem o linn gu linn.

21 Agus glanaidh mise am fuil-san, nach do ghlan mi; agus gabhaidh an Tighearn còmhnuidh ann an Sion.

¹ d'a thrìd.

A M O S.

CAIB. I.

1 An t-àm san d'rinn Amos fàidheadaireachd.
3 Nochd e na breitheanais a bha gu teachd air
Siria, 6 air na Philistich, 9 air Tirus, 11 air
Edom, 13 agus air Moab.

BRATHRAN Amois, a bha am measg
bhuachaillean Thecoa, a fhuair e mu
thimchioll Israeil, ann an làithibh Usiah
righ Iudah, agus ann an làithibh Iero-
boaim mhic Iohais, righ Israeil, dà
bhliadhna roimh an chrith-thalmhainn.

2 Agus thubhairt e; Beucaidh Iehobhah
o Shion, agus o Ierusalem cuiridh e mach
a ghuth; agus ni ionada-còmhnuidh
nam buachaillean bròn, agus seargaidh
mullach Charneil.

3 Mar so tha an Tighearn ag ràdh; Air
son thri lochdan Dhamascuis, agus air
son cheithir, cha phill mi air falbh a
pheanas; a chionn gu'n do bhuail iad
Gilead le innealaibh-bualaidh iarunn.

4 Ach cuiridh mise teine air tigh Ha-
sael, a loisgeas lùchairtean Bhenhadaid.

5 Brisidh mi fòs crann-druididh Dham-
ascuis, agus gearraidh mi as am fear-
àiteachaidh o chòmhnard Abheìn, agus
esan a ghlacas an t-slat-rioghail o thigh
Edein: agus sìubhlaidh sluagh Shiria ann
am bruid gu Cir, deir an Tighearn.

6 Mar so tha an Tighearn ag ràdh; Air
son thri lochdan Ghasa, agus air son
cheithir, cha phill mi air falbh a *pheanas*;
a chionn gu'n d'thug iad a' bhruid uile
air falbh am braighdeanas, a chum an
toirt seachad do Edom:

7 Ach cuiridh mi teine air balla Ghasa,
a sgrìosas a lùchairtean.

8 Agus gearraidh mi am fear-àiteach-
aidh air falbh o Asdod, agus esan a
ghlacas an t-slat-rioghail o Ascelon; agus
tionndaidhidh mi mo làmh an aghaidh
Ecein: agus bàsaichidh fuigheall nam
Philisteach, deir an Tighearn Iehobhah.

9 Mar so tha an Tighearn ag ràdh, Air
son thri lochdan Thiruis, agus air son
cheithir, cha phill mi air falbh a *phean-
as*; a chionn gu'n d'thug iad suas a'
bhruid uile do Edom, agus nach do
chuimhnich iad an coimhcheangal bràth-
aireil.

10 Ach cuiridh mi teine air balla Thi-
ruis, a loisgeas 'àrois rioghail.

11 Mar so tha an Tighearn ag ràdh;
Air son thri lochdan Edoim, agus air son
cheithir, cha phill mi air falbh a *pheanas*;
a chionn gu'n do ruaig e a bhràthair leis
a' chladheamh, agus gu'n do thilg e
uaith na h-uile iochd, agus gu'n do reub

'fhearg a ghnàth, agus gu'n do ghléidh e
a chorruih an còmhnuidh.

12 Ach cuiridh mi teine air Teman, a
loisgeas lùchairtean¹ Bhosrah.

13 Mar so tha an Tighearn ag ràdh;
Air son thri lochdan chloinne Amoin,
agus air son cheithir, cha phill mi air
falbh a *pheanas*; a chionn gu'n do reub
iad suas mnathan torrach Ghileaid, a
chum an crìocha féin a chur am farsuin-
eachd.

14 Ach fadaidh mise teine air balla Ra-
bah, agus loisgidh e sìos a lùchairtean, le
iolaich ann an là a' chatha, le cuairt-
ghaoith ann an là na doinnn.

15 Agus imichidh an righ ann am
braighdeanas, e féin agus a mhòr-uaislean
le chéile, deir an Tighearn.

CAIB. II.

1 Na breitheanais a bha gu teachd air Moab, 4 air
Iudah, 6 agus air Israel. 9 Bhagair an Tigh-
earn sluagh Israeil air son am peacanna.

MAR so tha an Tighearn ag ràdh;
Air son thri lochdan Mhoaih, agus
air son cheithir, cha phill mi air falbh a
pheanas; a chionn gu'n do loisg e cnàmh-
an² righ Edoim gu h-aol.

2 Ach cuiridh mi teine air Moab, agus
loisgidh e lùchairtean Chirioit, agus bàs-
aichidh Moab le co-ghaoir, le iolaich, le
fuaim no trompaid.

3 Agus gearraidh mi as am breitheamh
as a mheadhon, agus marbhaidh mi 'uile
phrionnsachan maille ris, deir an Tigh-
earn.

4 Mar so tha an Tighearn ag ràdh;
Air son thri lochdan Iudah, agus air son
cheithir, cha phill mi air falbh a *pheanas*;
a chionn gu'n d'rinn iad dimeas air reachd
an Tighearn, agus nach do choimhid iad
'àitheantan; agus thug an *diathan* bréige
orra dol air seacharan, iad sin a chaidh an
aithrichean air an déigh.

5 Ach cuiridh mi teine air Iudah, agus
loisgidh e lùchairtean Ierusalem.

6 Mar so tha an Tighearn ag ràdh; Air
son thri lochdan Israeil, agus air son
cheithir, cha phill mi air falbh a *pheanas*;
a chionn gu'n do reic iad am fìrean air
son airgid, agus am bochd air son bhròg.

7 Tha iad a' saltairt sìos ceann nam
bochd ann an duslach na talmhainn, agus
a' fìradh slighe nan daoine ciùine: agus
tha duine agus athair a' dol a steach a
chum na h-aoin ghrugaich, a thruaill-
eadh m'ainme naoimh-sa.

¹ àrois.

² cnàmhean.

8 Agus tha iad 'gan sìneadh féin air eudaichibh a ghabhadh an geall, aig taobh gach altarach; agus tha iad ag òl fionana muinntir a dhiteadh ann an tigh an dée.

9 Gidheadh sgrios mise an t-Amorach rompa, a bha àrd mar àirde nan seudar; agus làidir mar na daragaibh: gidheadh sgrios mise a thoradh os a cheann, agus a fhreumha fuidhe.

10 Fòs thug mi sibhse a nìos o thìr na h-Eiphit, agus stùir mi sibh troimh an fhàsach dà fhichead bliadhna; a chum gu'n sealbhaicheadh sibh fearann nan Amorach.

11 Agus thog mi suas *cuid* do 'ur macaibh air son fhàidhean, agus do 'ur n-òganaich air son Nasarach. Nach ann mar so a ta e, O chlann Israeil? deir an Tighearn.

12 Ach thug sibh do na Nasaraich fion r'a òl; agus dh'àithn sibh do na fàidhean, ag ràdh, na deanaibh fàistneachd.

13 Feuch, bruthaidh mise bhuir n-àite, mar a bhruthas carbad luchdaichte le arbhar a sguaban.

14 Agus tréigidh a luathas an duine luath, agus cha bhi 'n duine làidir treun 'na neart, ni mò ni n' duine cumhachdach e féin a shaoradh.

15 Cha seas esan fòs a laimsheas am bogha, agus cha saor an luath-chosach e *féin*; ni mò thèarnas an ti a mharcaicheas an t-each e féin.

16 Agus esan a ta daingneachadh a chridhe am measg nan cumhachdach, teichidh e air falbh ruisgte san là sin, deir an Tighearn.

CAIB. III.

1 *Aobhar nam breitheanas a thug Dia air cloinn Israeil. 13 San là anns an agair Dia lochdan Israeil air, sgriosaidh e altairean Bhaail.*

CLUNNIBH am focal so a labhair an Tighearn 'nur n-aghaidh, O chlann Israeil, an aghaidh an uile theaghlaich a thug mi nìos o thìr na h-Eiphit, ag ràdh,

2 Is sibhse mhàin air an do ghabh mi eòlas do uile theaghlaichibh na talmhainn: uime sin smachdaichidh mi sibh air son 'ur n-uile lochdan.

3 Am feud dithis imeachd le chéile, mur bi iad réidh?

4 Am beuc an leòmhann anns a choille, an uair nach 'eil creach air bith aige? an éigh an leòmhann òg as a' gharaidh, mur do ghlac e aon ni?

5 Am feud eun tuiteam ann an lìon air an talamh, far nach 'eil aon rib air a shon? an tog *neach* eangach suas o'n talamh, agus gun ni air bith a ghilacadh?

6 An séidear an trompaid ann am baile, agus gun eagal a bhi air an t-sluagh? am bi dòrainn¹ ann am baile, agus nach e an Tighearn a chuir ann e?

7 Gu deimhin cha dean an Tighearn

Iehobhah aon ni, gun a rùn-dìomhair fhoillseachadh d'a sheirbhisich na fàidhean.

8 Bheuc an leòmhann; cò air nach bi eagal? labhair an Tighearn Iehobhah, cò nach deanadh fàistneachd?

9 Cuiribh an céill anns na lùchairtibh an Asdod, agus anns na tallachaibh an tìr na h-Eiphit, agus abraibh, Cruinnichibh sibh féin air sléibhtibh Shamaria; agus feuchaibh an t-ioma-luasgadh mòr a ta 'na meadhon, agus iadsan a ta air an sàruchadh innte.

10 Oir cha'n aithne dhoibh a' chòir a dheanamh, tha an Tighearn ag ràdh; tha iad a' tasgaidh suas fòirneart agus creich 'nan lùchairtibh.

11 Air an aobhar sin, mar so tha an Tighearn Iehobhah ag ràdh, *Bithidh* eascaraidh fòs mu'n cuairt air an fhearann; agus bheir e nuas do neart uait, agus creachar do lùchairtean.

12 Mar so tha an Tighearn ag ràdh, Amhuil a spionas am buachaill a mach á beul an leòmhain dà chois, no mìr do chluais; mar sin bheir e a mach clann Israeil, a ta chòmhnuidh ann an Samaria, ann an cùil leabach; agus ann an Damascus, air uirigh.

13 Eisidibh-sa agus togaibh fianuis do thigh Iacoib, tha an Tighearn Iehobhah, Dia nan sluagh, ag ràdh,

14 Anns an là san agair mise lochdan Israeil air, gu'n agair mi fòs air altairean Bheteil; agus gearrar adhaircean na h-altarach dhi, agus tuitidh iad chum an làir.

15 Agus buailidh mi an tigh-geamhraidh maille ris an tigh-shamhraidh; agus sgriosar na tighean deud-chnàmh², agus thig crìoch air na tighean mòra, deir an Tighearn.

CAIB. IV.

1 *Chronaicheadh Israeil air son am fòirneirt, 4 an iodhol-aoraidh, 6 agus an ceannaire an aghaidh an Tighearna.*

CLUNNIBH-SE am focal so, O a spréidh Bhasain, a ta air sliabh Shamaria; a ta sàruchadh nam bochd, a ta bruthadh nam feumach; a ta 'g ràdh ri am maighstiribh, Thugaibh d'ar n-ionn suidh agus òlamaid.

2 Mhionnaich an Tighearn Iehobhah air a naomhachd, Feuch, gu'n tig oirbh na làithean anns an toir e sibh air falbh le dubhanaibh, agus bhuir slìochd le dubhanaibh-iasgaich.

3 Agus thèid sibh a mach air na beal-aich, gach bò air a' bhealach m'a coinn-eamh; agus tilgear sibh anns an tigh-chasgairt, deir an Tighearn.

4 Rachaibh gu Betel agus ciontaichibh;

¹ dosgann.

² ivory. Sasg.

aig Gilgal deanaibh 'ur lochdan lìonmhor; agus thugaibh leibh bhuir n-òbairtean gach maduinn, 'ur deachamh gach trì bliadhna;

5 Agus iobraibh iobairt-bhuidheachais le taois ghoirt, agus éighibh, cuiribh an céill na saor-thabharta; oir tha so taitneach dhuibh, O chlam Israeil, deir an Tighearn Iehobhah.

6 Agus thug mi fòs dhuibh glaine fhiaical 'nur n-uile bhailtibh, agus gainne arain ann 'ur n-uile luchairtibh: gidheadh cha do phill sibh riumsa, deir an Tighearn.

7 Agus chum mi uaibh mar an ceudna an t-uisge, 'nuair a bha fathasd trì mìosa gu fogharadh; agus thug mi air frasadh air aon bhaile, agus gun fhrasadh air baile eile; air aon chuid thàinig an t-uisge; agus a' chuid eile air nach d'thàinig an t-uisge, shearg e.

8 Agus shiubhail dà no trì do bhailtean gu aon bhaile, a dh'òl uisge; ach cha robh iad air an sàsachadh: gidheadh cha do phill sibh riumsa, deir an Tighearn.

9 Bhuail mi sibh le seargadh agus le crith-reodh; 'nuair a dh'fhàs 'ur gàraidhean agus 'ur fion-liosan, 'ur croinn-fhìge, agus 'ur croinn-oladh, dh'ith a' phailm-chnuimh iad: gidheadh cha do phill sibh riumsa, deir an Tighearn.

10 Chuir mi 'nur measg a' phlàigh, a réir nòis na h-Eiphit; mharbh mi 'ur n-òganaich leis a' chlàidheamh, agus thug mi air falbh 'ur n-eacha, agus thug mi air droch fhàile bhuir cainp teachd a nìos gu'r pollairibh: gidheadh cha do phill sibh riumsa, deir an Tighearn.

11 Sgrìos mi cuid dibh, mar a sgrìos Dia Sodom agus Gomorah, agus bha sibh mar aithinne air a spionadh as an losgadh: gidheadh cha do phill sibh riumsa, deir an Tighearn.

12 Air an aobhar sin mar so ni mi riut, O Israeil; agus a chionn gu'n dean mi so riut, ulluich thu féin gu codhail a chumail ri d' Dhia, O Israeil.

13 Oir feuch, esan a dhealbhas na sléibhte, agus a chruthaicheas a' ghaoth, agus a dh'fhoillsicheas do dhuine cìod is smuainte dha; esan a ni a' mhaduinn 'na dorchadas, agus a shaltras air ionadaibh àrda na talmhainn, Iehobhah, Dia nan sluagh, is e 'ainm.

CAIB. V.

1 Tuireadh air son Israeil. 4 Earail chum aithreachais. 21 Chuir Dia cùl ri seirbhis chealgach an t-sluagh.

EISDIBH-SE am focal so a ta mise cur an céill 'nur n-aghaidh, cadhon tuireadh, O thigh Israeil.

2 Thuit, agus cha'n éirich nì's mò, òigh Israeil: tha i sinte mach air a fearann féin; cha'n 'eil neach ann g'a togail suas.

3 Oir mar so tha an Tighearn Iehobhah

ag ràdh; A' chaithir a chaidh a mach 'na mìle, fàgaidh i ceud; agus i sin a chaidh a mach 'na ceud, fàgaidh i deichnear aig tigh Israeil.

4 Uime sin, mar so tha an Tighearn ag ràdh ri tigh Israeil; Iarraibh-sa mise, agus mairidh sibh beò:

5 Ach na h-iarraibh Betel, agus na rach-aibh a steach gu Gilgal, agus na siùbhaibh thairis gu Beer-seba: oir thèid Gilgal gu deimhin am braighdeanas, agus thig Betel gu neo-ni.

6 Iarraibh an Tighearn agus mairidh sibh beò; air eagal gu'm bris e mar theine air tigh Ioseiph, agus gu'n loisg e tigh Israeil, agus nach bi aon neach ann gu 'mhùchadh.

7 Sibhse tha tionndadh breitheanas is searbhadas, agus a' leigeadh dhìbh fir-eantachd air an talamh,

8 Iarraibh esan a ta deanamh nan seachd reultan agus Orion; agus a' tionndadh sgàile a' bhàis gu maduinn, agus a ni an là dorchas mar an oidhche: a ta gairm air uisgeachaidh na faire, agus gan dòrtadh a mach air aghaidh na talmhainn; is e Iehobhah 'aùm:

9 A neartaicheas an creachta an aghaidh an tréin; air chor as gu'n tig an duine creachta an aghaidh an daingnich.

10 Is fuath leo esan a bheir achmhasan anns a' gheata: agus is gràin leo esan a labhras gu h-ionraic.

11 Air an aobhar sin, a chionn gu bheil sibh a' saltairt air a' bhlochd, agus a' gabhail uaith duaise do chruthneachd; ged thog sibh tighean do chlachaibh snaighte, gidheadh cha'n àitich sibh iad; ged shuidhich sibh fion-liosan taitneach, gidheadh cha'n òl sibh fion diubh.

12 Oir is aithue dhomh-sa bhuir lochdan lìonmhor, agus bhuir peacanna mòra; sibhse ta claoidh an fhìrein, a ta gabhail cumha, agus a' cur a' bhochd a lethtaobh anns a' gheata.

13 Air an aobhar sin fanaidh an duine glic 'na thosd anns an àm sin; oir is aimsir olc i.

14 Iarraibh-sa maith, agus ni h-e olc, a chum gu mair sibh beò: agus mar sin bithidh an Tighearna Dia nan sluagh leibh, mar a labhair sibh féin.

15 Fuathaichibh an t-olc, agus gràdh-aichibh am maith, agus daingnichibh breitheanas anns a' gheata; thcagamh gu'm bi an Tighearna Dia nan sluagh gràmhor do iarraidh Ioseiph.

16 Oir mar so tha Iehobhah Dia nan sluagh, an Tighearn, ag ràdh; Bithidh caoidh anns na h-uile shràidibh; agus their iad anns na h-uile rathaidibh mòra, Mo thruaighe, mo thruaighe! agus gairmidh iad an treabhaiche gu bròn, agus iadsan a ta eòlach air caoidh gu tuireadh.

17 Agus anns na h-uile fion-lios bithidh caoineadh: oir gabhaidh misc troimh do mheadhon, agus mar gu'n Tighearn.

18 Is truagh dhuibh-sa ta 'g iarraidh là an Tighearna. Ciod e sin duibh-sa là an Tighearna? dorchadas agus cha'n e solus.

19 Ceart mar gu'n teicheadh duine o leòmhann, agus gu'n coinnicheadh math-ghamhuinn e; no gu'n rachadh e steach d'a thigh, agus a làmh a leigeadh air a' bhalla, agus gu'n deanadh nathair a theumadh.

20 Nach bi là an Tighearna 'na dhorchadas, agus ni h-ann 'na sholus? eadhon ro dhorchas, agus gun soilleireachd air bith ann?

21 Is fuath leam, is beag orm 'ur làithean-fèille, agus cha gabh mi tlachd ann am fàile 'ur n-àrd-fhéilean.

22 Ged ìobair sibh dhomh ìobairtean-loisge, agus tabhartais-bhìdh, cha ghabh mi iad: ni mò bheir mi fa'near tabhartais-shìth 'ur beathaiche reamhra.

23 Buin uam fuaim t' òran; agus ceòl do chlàrsach cha'n èisd mi.

24 Ach ruitheadh breitheanas sìos mar uisgeacha, agus fireantachd mar shruth làidir.

25 An do thairg sibh dhomh-sa ìobairtean agus tabhartais anns an fhàsach rè dà fhichead bhliadhna, O thigh Israeil?

26 *Ni h-eadh*, ach ghiùlain sibh pàillium 'ur Moloich, reul bhur dé Chiuin, bhur dealbhan, a rinn sibh dhuibh féin.

27 Uime sin bheir mise oirbh imeachd am bruid taobh thall Dhamascuis, tha an Tighearn, do'n ainm Dia nan sluagh, ag ràdh.

CAIB. VI.

1 *Smachdaichear Israeil air son an neo-gheamnuidh-eachd, 12 agus air son am peacanna.*

IS truagh dhoibh-san a ta gu suaimhneach ann an Sion, agus ag earbsadh á sliabh Shamaria; a ta gan ainmeachadh féin air tús nan cinneach, gus am bheil imeachd tighre Israeil.

2 Siùbhlaibh thairis gu Calneh, agus faicibh; agus rachaibh as a sin gu Hamat mòr: an sin rachaibh sìos gu Gat nam Philisteach: am fearr iadsan na na rìoghachdan so? no am bheil an crìocha nì's mò na 'ur crìoch-sa?

3 *Is truagh* dhoibh-san a ta cur an droch là fada uatha, agus a' toirt am fagus àite-suidhe an fhòirneirt:

4 A ta luidhe air leabaichibh deudchnàmh, agus 'gan sineadh féin air an uirighibh; a ta ag itheadh uan an treud, agus nan laogh á meadhon an tigh-bhiadhaidh:

5 A ta seinn do fhuaim na clàrsaich; a ta cosmhuil ri Daibhidh, a' dealbh dhoibh féin inneala-ciùil:

6 A ta 'g òl fiona ann an cuachaibh,

agus 'g an ungradh féin le tagha gach oladh: ach nach 'eil doilich air son àmhghair Ioseiph.

7 Air an aobhar sin a nis théid iad am bruid leis a' cheud chuid a dh'fhalbhas ann am braigheanas; agus bheirear air falbh cuirm na muinntir a bha 'g an sin-eadh féin.

8 Mhionnaich an Tighearn Iehobhah air féin, tha Iehobhah Dia nan sluagh ag ràdh; Is gràin leam òirdheireas Iacob, agus is fuath leam a lùchairtean: uime sin bheir mi seachad am baile, agus gach nì a ta ann.

9 Agus tarlaidh ma dh'fhanas deichnear fhear ann an aon tigh, gu faigh iad bàs.

10 Agus togaidh caraid duine suas e, agus esan a loisgease, chum na cnàmhan a thoirt á mach as an tigh; agus their e ris-san a ta steach san tigh, *am bheil aon neach* fathasd leat? Agus their esan, Cha 'n 'eil: An sin their e, Bi a'd' thosd. A chionn nach 'eil iad a' toirt luaidh air ainm Iehobhah.

11 Oir feuch, àithnidh an Tighearn, agus buailidh e an tigh mòr le bearnaibh, agus an tigh beag le sgoltaibh.

12 An ruith eicl air carraig? an treabhar i le daimh? oir thionndaidh sibh breitheanas gu domblas, agus toradh an ionracais gu iteodha.

13 Sibhse a ta ri gàirdeachas ann an nì a's neo-nì; a ta ag ràdh, Nach do ghabh sinn do ar n-ionnsuidh uachdaranachd le ar neart féin?

14 Agus, feuch, dùsgidh mise suas cinneach 'nur n-aghaidh, O thigh Israeil, tha Iehobhah Dia nan sluagh ag ràdh; agus sàrnichidh iad sibh o dhol a steach Hamait, gu ruig amhainn an fhàsaich.

CAIB VII.

1 *Rinn Amos urnuigh, agus ghabh Dia aithreachas a thaobh an uile a bha e gu thoirt air Israel. 7 Le balla agus sreing-riaghailt nochdadh léir-sgrìos Israeil. 10 Rinn Amasiah gearan an aghaidh Amois. 14 Chuir Amos an cèill a dhreuchd.*

MAR so thaisbein an Tighearn Iehobhah dhomh-sa, agus, feuch, dhealbh e locuist ann an toiseach teachd a mìos an fhàis mu dheireadh; agus, feuch, b'e sin am fàs deireannach, an déigh buain an rìgh.

2 Agus tharladh 'nuair a chuir iad crìoch air itheadh luibhean na tire, gu'n d' thubhairt mise, O Thighearna Iehobhah, maith, guidheam ort; cò thogas suas Iacob? oir tha e ro bheag.

3 Ghabh an Tighearn aithreachas dheth so: Cha tachair so, deir an Tighearn.

4 Mar so thaisbein an Tighearn Iehobhah dhomh-sa; agus, feuch, ghairm an Tighearn Iehobhah gu breitheanas le

teine, agus loisg e an doimhne mhòr: agus shluig e suas earrann.

5 An sin thubhairt mise, O Thighearn Iehobhah, sguir, guidheam ort: cò thogas suas Jacob? oir tha e ro bheag.

6 Ghabh an Tighearn aithreachas dheth so: Cha tachair so fòs, deir an Tighearn Iehobhah.

7 Mar so thaisbein e dhomh; agus, feuch, sheas an Tighearn air balla *deanta* le sreing-riaghailt, agus sreang-riaghailt 'na làimh.

8 Agus thubhairt an Tighearn rium; Ciod a tha thu faicinn, Amois? Agus thubhairt mise, Sreang-riaghailt. An sin thubhairt an Tighearn, feuch, cuiridh mise sreang-riaghailt ann am meadhon mo shluaigh Israeil; cha ghabh mi ni's mò seachad orra tuilleadh.

9 Agus cuirear ionadan àrda Israeil fàs; agus nithear naomh-ionaid Israeil 'nan làraich sgaoilte, agus éiridh mise an aghaidh tighe Ieroboam leis a' chlaidheamh.

10 An sin chuir Amasiah sagart Bheteil fios gu Ieroboam rìgh Israeil, ag ràdh, Dhealbh Amos feall a'd' aghaidh ann am meadhon tighe Israeil: cha'n urrainn am fearann a bhriathran uile a ghiùlan.

11 Oir mar so tha Amos ag ràdh, Gheibh Ieroboam bàs leis a' chlaidheamh; agus bheirear Israel gu deimhin air falbh ann am bruid as an tìr féin.

12 Thubhairt Amasiah mar an ceudna ri Amos; O fhiosaiche, falbh, teich thusa gu tìr Iudah, agus ith aran an sin, agus an sin dean fàistneachd:

13 Ach na dean fàistneachd ni's mò ann am Betel: oir is e sin naomh-ionad an rìgh, agus is e sin teach na rìoghachd.

14 An sin fhreagair Amos, agus thubhairt e ri Amasiah, Cha b'fhàidh mise, ni mò bu mhac fàidh mi; ach bu bhuachaill spréidhe mi, agus fear-tionail meas sic-amoir:

15 Agus thug an Tighearn mi o bhi leantuinn an treud; agus thubhairt an Tighearn rium, Falbh, dean fàistneachd do m' phobul Israeil.

16 A nis uime sin, cluinn thusa focal an Tighearna: tha thu ag ràdh, Na dean fàistneachd an aghaidh Israeil, agus na sìleadh d'fhocal an aghaidh tighe Isaic.

17 Air an aobhar sin, mar so tha an Tighearn ag ràdh, Bithidh do bhean 'na striopaich anns a' bhaile, agus tuitidh do mhic agus do nigheana leis a' chlaidheamh; agus bithidh d'fhearann air a roinn leis an t-sreing: agus gheibh thu bàs ann am fearann truailte, agus theid Israel gu deimhin air falbh ann am bruid, a mach a' dhùthaich féin.

CAIB. VIII.

1 *Le cliabh do mheas samhraidh nochdadh gu'n robh crìoch Israeil am fagus.* 4 *Thugadh ach-mhasan dhoibh do bhrìgh gu'n robh iad a' toirt air bochdan an fhearainn fàilneachadh.* 11 *Bhagradh an sluagh le dìth fhocal an Tighearna.*

MAR so thaisbein an Tighearn Iehobhah dhomh-sa; agus, feuch, cliabh do mheas samhraidh.

2 Agus thubhairt e, Ciod a tha thu faicinn, Amois? Agus thubhairt mise, Cliabh do mheas samhraidh. An sin thubhairt an Tighearn rium, Tha a' chrìoch air teachd air mo shluagh-sa Israel; cha ghabh mise seachad orra ni's mò.

3 Agus bithidh òrain an teampuill 'nan ulartaich anns an là sin, tha an Tighearn Iehobhah ag ràdh: *bithidh* mòran do chorp marbha anns gach ionad: tilgidh iad gu tosdach a mach *iad*.

4 Cluinnibh so, O sibhse ta slugadh suas an ainmis, eadhon a thoirt air bochdan an fhearainn fàilneachadh.

5 Ag ràdh, C'uin a theid a' ghealach ùr seachad, a chum gu'n reiceamaid sìol? agus an t-sàbaid, a chum gu'n tugamaid a mach cruithneachd? a' deanamh an ephah beag, agus an t-seceil mòr; agus a' deanamh na meighe mearachdach le ceilg:

6 A' ceannach nam bochd air son airgid, agus an fheumaich air son bhrog; a' reic fòs deireadh a' chruithneachd.

7 Mhionnaich an Tighearn air òirdheirc-eas Iacob, Gu deimhin cha dicluimhnich mi gu bràth an uile oibre.

8 Nach crìothuich am fearann air son so? agus nach dean gach duine ta chòmhuigh ann caoidh? agus nach éirich amhuil tuil thar an iomlan deth? nach tilgear a mach, agus nach bàthar e, mar gu'm b'ann le amhainn na h-Eiphit?

9 Agus tarlaidh air an là sin, tha an Tighearn Iehobhah ag ràdh, gu'n toir mise air a' ghréin dol fuidh air mheadhon-là, agus ni mi an talamh dorchas san là shoilleir.

10 Agus tionndaidhidh mi 'ur féillean gu bròn, agus 'ur n-òrain uile gu tuireadh; agus bheir mi air na h-uile leasraibh eudach-saic, agus air gach aon cheann maoile, agus ni mi e mar chumha air son aoin mic, agus a chrìoch mar là searbh.

11 Feuch tha na làithean a' teachd, tha an Tighearn Iehobhah ag ràdh, san cuir mise gort anns an fhearann; cha'n i gort *dhìth* arain, no tart *dhìth* uisge, ach *dhìth* éisdeachd fhocal an Tighearna.

12 Agus sìubhlaidh iad o fhairge gu fairge, agus o'n àirde tuath, eadhon gus an àird an ear; ruithidh iad air an ais agus air an aghaidh, a dh'iarraidh focail an Tighearn, agus cha'n fhaigh iad e.

13 Anns an là sin fannaichidh na h-òigh-

ean maiseach, agus na' h-òganaich le tart.

14 Iadsan a ta mionnachadh air peacadh Shamaria, agus ag ràdh, Tha do dhia-sa beò, O Dhain, agus tha cuis-aoraidh Bheerseba beò; tuitidh eadhon iadsan, agus cha'n éirich iad suas gu bràth tuilleadh.

CAIB. IX.

1 Làn-dearbhadh léir-sgrios Israeil. 11 Togaidh Dia suas pàilliun Dhaibhidh, 14 agus bheir e air a h-ais bruid a shluagh.

CHUNNAIC mi an Tighearn 'na sheasamh air an altair; agus thubhairt e, Buail an t-àrd-dhorus, air chor as gu'n criothnuich na h-ursannan: oir gearraidh mise sa' cheann iad, an t-iomlan diubh; agus an sliochd marbhaidh mi leis a' chlaidheamh: an ti theicheas dhiubh cha teid e as; agus an ti a ghabhas an ruaig dhiubh cha tèamar e.

2 Ged chladhaich iad gu ruig an t-ionad ìochdarach, as a sin bheir mo làmh-sa nìos iad; ged théid¹ iad suas gu nèamh, as a sin bheir mise suas iad:

3 Agus ged fholuich siad iad féin ann am mullach Charneil, rannsaichidh mise, agus bheir mi mach as a sin iad; agus ged bhiodh iad air am fòlach o m' shealladh ann an ìochdar na fairge, an sin bheir mi àithne do'n nathair, agus ni i an teumadh.

4 Agus ged rach iad gu daorsa roimh an naimhdean, an sin bheir mise àithne do'n chlaidheamh, agus marbhaidh e iad: agus leagaidh mi mo shùilean orra chum uile, agus ni h-ann a chum maith.

5 Oir is e an Tighearn Iehobhah Dia nan sluagh a bheanas ris an fhearann, agus leagaidh e; agus ni na h-uile ta chòmhnuidh ann caoidh; agus éiridh e suas gu h-iomlan mar thuil, agus bàthar e, mar gu'm b' ann le amhainn na h-Eiphit.

6 Is esan a thogas 'àrd-sheòmarichean anns na nèamhaibh, agus a shuidhicheas a thigh-tasgaidh air an talamh; an ti a

ghairmeas air uisgeachaibh na fairge, agus a dhòirteas iad a mach air aghaidh na talmhainn: is e Iehobhah 'ainm.

7 Nach 'eil sibh mar chloinn nan Etiopach dhomh-sa, O chlann Israeil? tha an Tighearn ag ràdh. Nach d'thug mise Israel á tìr na h-Eiphit: agus na Philistich á Caphtor, agus na Siriaich á Cir?

8 Feuch, tha sùilean an Tighearn Iehobhah air an rìoghachd chiontaich, agus sgriosaidh mise bhàrr aghaidh na talmhainn i: a mhàin cha mhill mi gu tur tigh Iacoib, deir an Tighearn.

9 Oir feuch, bheir mise àithne, agus criathraidh mi tigh Israeil am measg nan uile chinneach, mar a chriathrar sìol ann an criathar, gidheadh cha tuit an sìlean² a's lugha dheth air an talamh.

10 Bàsaichidh uile pheacaich moshluaigh-sa leis a' chlaidheamh, a ta 'g ràdh, Cha bheir an t-cìle oirnn, agus cha ghlac e sinn gu h-obann.

11 Anns an là sin togaidh mise suas pàilliun Dhaibhidh a ta air tuiteam, agus dùinidh mi suas a bhearnan; agus togaidh mi suas a làraichean, agus cuiridh mi suas e mar anns na làithibh o shean:

12 A chum gu'n sealbhaich iad na mhair-eas do Edom, agus na h-uile chinnich á dh'ainmichear air m'ainm-sa, deir an Tighearn a ni so.

13 Feuch tha na làithean a' teachd, tha an Tighearn ag ràdh, anns am beir an treabhaiche air a' bhùanaiche, agus fear-bruthaidh nam fion-dhearc air fear cur an t-sil; agus silidh na sléibhteann fion milis, agus leagaidh na h-uile chnuic.

14 Agus bheir mise air a h-ais a rìs bruid mo shluaigh Israeil, agus togaidh iad na bailtean fàsa, agus ni iad an àiteachadh; agus suidhichidh iad fion-liosan, agus òlaidh iad am fion; ni iad fòs liosan, agus ithidh iad an toradh.

15 Agus suidhichidh mise iad 'nam fearann, agus cha bhi iad ni's mò air an spionadh a nìos as an fhearann a thug mise dhoibh, deir an Tighearn do Dhia-sa.

¹ streap.

² càilean.

OBADIAH.

CAIB. I.

1 Léir-sgrios Edoim, 3 air son uabhair a chridhe, 10 agus a ghiùlain a thaobh sluaigh Israeil 'nan teanntachd. 17 Saorsa agus buaidh Iacoib.

SEALLADH Obadiah. Mar so tha an Tighearn Iehobhah ag ràdh a thaobh Edoim: Chuala sinn aithris o'n Tighearn, agus chuireadh teachdair am

measg nan cinneach, ag ràdh, Eiribh-sa, agus éireamaid-ne suas 'na h-aghaidh ann an cath.

2 Feuch, rinn mise beag thu measg nan cinneach: tha thu gu mòr air do chuir fo dhimeas.

3 Mheall uabhar do chridhe thu, O thusa ta chòmhnuidh ann an sgeiribh nan creag, ann ad chòmhnuidh àrd; a ta 'g ràdh

ann ad chridhe, Cò bheir a nuas mi chum an làir?

4 Ged àrdaich thu thu féin mar an iol-air, agus ged shuidhich thu do nead am measg nan reultan, as a sin bheir mise nuas thu, deir an Tighearn.

5 Ma thig meirlich a d'ionnsuidh, ma thig gaduichean anns an oidheche, (cionnus a ghearradh as thu!) nach goideadh iad gu am biodh gu leòr aca? nan tigeadh luchd-tional nam fion-dhearc a d'ionnsuidh, nach fagadh iad dioghilum do na dearcaibh?

6 Cionnus a ta Esau air iarraidh a mach! a nithe foluichte air an rannsachadh!

7 Thug uile dhaoine do chomuinn a chum na crìche thu; na daoine bha 'n sìth riut, a dh'ìth aran leat, mheall iad thu, agus bhuadhaich iad ann ad aghaidh: leag iad rib fodhad: cha'n 'eil tuigse sam bith annad.

8 Nach sgrios mise san là sin, tha an Tighearn ag ràdh, araan na daoine glìce mach á Edom, agus tuigse á sliabh Esau?

9 Agus claidhear do dhaoine treun-sa, O Thomain; a chum gu'n gearrar as gach duine do shliabh Esau le h-àr.

10 Air son t' ainneirt an aghaidh do bhràthair Iacoib, nì nàire do chòmh-dachadh, agus bithidh tu air do ghearradh as gu bràth.

11 Anns an là san do sheas thu air an taobh eile, anns an là san d'thug na coimhich a shluagh am bruid, anns an deachaidh coigrich a steach air a gheat-achan, agus anns an do thilg iad crannchur air Ierusalem, bha eadhon thusa mar aon diubh.

12 Ach cha bu chòir dhuit amharc *le sòlas* air là do bhràthar, anns an là san d'rinneadh coigreach dheth: nì mò bu chòir dhuit gàirdeachas a dheanamh os ceann cloinne Iudah ann an là an léir-sgrios: nì mò bu chòir dhuit labhairt gu h-uaihbreach ann an là an àmhghair.

13 Cha bu chòir dhuit dol a steach air

geata mo shluaigh-sa ann an là an àmhghair; seadh, cha bu chòir dhuit amharc *le sòlas* air an teinn ann an là an airce; no làmh a chur air am maoin ann an là an àmhghair.

14 Nì mò bu chòir dhuit seasamh anns an t-slighe tharsuinn, a ghearradh as na dream a chaidh as d'a mhuinntir; nì mò bu chòir dhuit iadsan a mhair d'a chuid-eachd a thoirt suas ann an là na dòrainn.

15 Oir tha là an Tighearn dlùth air na h-uile chinnich: mar a rinn thusa, nì-thear riut: pillidh do luigheachd air do cheann féin.

16 Oir amhuil a dh'òl sibhse air mo shliabh naomh-sa, òlaidh na h-uile chinnich mu'n cuairt; seadh òlaidh, agus sluigidh iad sìos; agus bithidh iad mar nach biodh iad idir ann.

17 Ach air sliabh Shioin bithidh saorsa, agus bithidh naomhachd; agus sealbh-aichidh tigh Iacoib an sealbh féin.

18 Agus bithidh tigh Iacoib 'na theine, agus tigh Ioseph 'na lasair; agus tigh Esau 'na asbhuaig; agus lasaidh, agus loisgidh iadsan iad; agus cha'n fhàgar a h-aon beò¹ do thigh Esau; oir labhair an Tighearn.

19 Agus gabhaidh iadsan o dheas sealbh air sliabh Esau; agus iadsan o'n chòmh-nard air na Philistich; agus sealbhaichidh iad machair Ephraim, agus machair Shamarìa; agus *sealbhaichidh* Benjamin Gilead.

20 Agus *sealbhaichidh* braighdean an t-sluaigh so chloinne Israeil, fearann nan Canaanach, eadhon gu Sarephat; agus sealbhaichidh braighdean Ierusalem, a ta an Sepharad, bailtean na h-àirde deas.

21 Agus thig fir-shaoraidh nìos air sliabh Shioin, a thoirt breith air sliabh Esau; agus bithidh an rioghachd leis an Tighearn.

¹ cha bhì aon mairionn.

I O N A H.

CAIB. I.

1 *Dh'orduich Dia do Ionah dol gu Ninebheh, 3 ach theich e gu Tarsis. 4 Bhac Dia e air an t-slighe le onfha ro mhòr. 11 Thilgeadh do'n fhairge e leis na maraichean, 17 agus shluig iasg mòr suas e.*

ANIS thàinig focal an Tighearn gu Ionah mac Amitai, ag ràdh,

2 Eirich, imich gu Ninebheh, am baile mòr sin, agus tog do ghuth 'na aghaidh; oir tha an aingidheachd air teachd a nìos a'm' làthair-sa.

3 Ach dh'éirich Ionah suas gu teicheadh do Tharsis o fhianuis an Tighearn; agus chaidh e sìos gu Iopa; agus fhuair e long a' dol gu Tarsis, agus phàigh e 'n luach-aisig, agus chaidh e sìos innte, gu dol leo gu Tarsis, o làthair an Tighearn.

4 Ach chuir an Tighearn a mach gaoth mhòr air an fhairge, agus bha onfha ro mhòr air an fhairge: ionnus gu'n do shaoil iad gu'm biodh an long air a briseadh.

5 An sin bha eagal air na maraichean, agus ghlaodh iad gach duine r'a dhia;

agus thilg iad a mach am bathar a bha san luing do'n fhairge, chum a h-eutromachadh: ach chaidh Ionah sìos gu taobhan na luinge; agus luidh e, agus bha e 'na shuain chodail.

6 An sin thàinig maighstir na luinge d'a ionnsuidh, agus thubhairt e ris, Ciod is ciall duit, O thusa a ta a'd' chodal? éirich, gairm air do Dhia; theagamh gu'n smuainich Dia oirnn, a chum nach bàs-aich sinn.

7 Agus thubhairt iad, gach aon r'a chompanach, Thigibh, agus tilgeamaid croinn, a chum gu'n aithnicheamaid cò air son a ta an t-olc so air teachd oirnn. Mar sin thilg iad croinn, agus thuit an crannclur air Ionah.

8 An sin thubhairt iad ris, Innis duinn, guidheamaid ort, ciod a b' aobhar do'n olc so teachd oirnn; ciod is dreuchd¹ dhuit? agus cia as a thàinig thu? ciod is dùthaich dhuit? agus cò na daoine do'm bheil thu?

9 Agus thubhairt e riu, Is Eabhruidheach mi, agus tha eagal an Tighearna Dia nèimh orm, an Ti a rinn an cuan agus an *talamh* tioram.

10 An sin bha na daoine fo anbharr eagail, agus thubhairt iad ris, C'ar son a rinn thu so? (oir thuig na daoine gu'n do theich e o làthair an Tighearn; oir dh'innis e dhoibh.)

11 An sin thubhairt iad ris, Ciod a ni sinn riut, a chum gu'm bi an fhairge ciùin dhuinn? (oir bha onfha na fairge a' fàs ni bu mhò agus ni bu mhò.)

12 Agus thubhairt e riu, Togaibh suas mi, agus tilgibh a mach mi anns an fhairge; mar sin bithidh an fhairge ciùin dhuibh-sa: oir tha fios agam gur ann air mo shon-sa tha'n doinionn mhòr so oirbh.

13 Gidheadh dh'iomraim² na daoine gu cruaidh, a chum pilladh gu tìr, ach cha b'urrainn iad; oir dh'fhàs onfha na fairge ni bu mhò agus ni bu mhò 'nan aghaidh.

14 Air an aobhar sin, ghlaodh iad ris an Tighearn, agus thubhairt iad, Guidheamaid ort, O Tighearn, na leig dhuinne bàsachadh air son anama an duine so, agus na leig oirnn fuil nèò-chiontach: oir rinn thusa, O Tighearn, mar a b'àill leat féin.

15 An sin ghlac iad Ionah, agus thilg iad a mach e anns an fhairge; agus sguir an fhairge d'a boile.

16 An sin bha eagal an Tighearna gu ro mhòr air na daoine, agus dh'ìobair iad ìobairt do'n Tighearn, agus thug iad bòidean.

17 A nis dh'ulluich an Tighearn iasg mòr chum Ionah a shlugadh suas; agus

bha Ionah ann am broinn an éisg tri làithean agus tri oidhchean.

CAIB. II.

1 *Urnuigh agus breth-buidheachais Ionah. 10 Thilg an t-iasg Ionah a mach air talamh tioram.*

AN sin rinn Ionah urnuigh ris an Tighearn a Dhia, á broinn an éisg,

2 Agus thubhairt e; Ghlaodh mi a thaobh m' àmhghair ris an Tighearn, agus dh'éisd e rium; á broinn na h-uaigne ghlaodh mi; chuala tusa mo ghuth.

3 Oir thilg thu mi san doimhne, ann am meadhon na fairge; agus dh'iadh na tuilean mu m' thimchioll; chaidh do shumainnean agus do thonnan-sa uile thairis orm.

4 An sin thubhairt mi, Tha mi air mo thilgeadh a mach á fradharc do shùl: gidheadh seallaidh mi a ris ri do theampull naomh.

5 Dh'iadh na h-uisgeachan mu m' thimchioll, eadhon guruig an t-anam: chòmhdaich an doimhne mi mu'n cuairt; bha mo cheann air a ribeadh anns an fheamainn.

6 Chaidh mi sìos gu h-ìochdar nan sléibhteann; dhruid an talamh a croinn gu bràth orm: gidheadh thug thusa a nìos as an t-slochd mo bheatha, O Thighearna mo Dhia.

7 'Nuair a lag air m'anam na taobh a stigh dhìom, chuimhnich mi air an Tighearn; agus thàinig m' urnuigh a d'ionnsuidh, gu d' theampull naomh.

8 Iadsan a ta leantuinn air dìomhanasa breugach, tha iad a' tréigsinn an tròcair féin.

9 Ach ìobraidh mise dhuit-se le guth buidheachais; iocaidh mi an ni sin a bhòidich mi; is ann do'n Tighearn a bhuineas slàinte.

10 Agus labhair an Tighearn ris an iasg, agus thilg e mach Ionah air an talamh tioram.

CAIB. III.

1 *Chuireadh Ionah a ris a dh'ionnsuidh Ninebheh, agus labhair e riu anns na briathraibh a dh'àithn Dia dha. 5 Ghabh muinntir Ninebheh aithreachas, 10 agus phill Dia o'dhian-chorruidh 'nan aghaidh.*

AGS thàinig focal an Tighearna gu Ionah an dara uair, ag ràdh,

2 Eirich, imich gu Ninebheh, am baile mòr sin, agus labhair ris anns na briathraibh³ a dh'àithneas mise dhuit.

3 Agus dh'éirich Ionah, agus chaidh e gu Ninebheh, a réir focail an Tighearna. (A nis bu bhaile ro mhòr Ninebheh, astar trì làithean.)

4 Agus thòisich Ionah air dol troimh⁴ an bhaile, astar aoin là; agus ghlaodh e, agus thubhairt e, Fathasd dà fhichead là, agus sgriosar Ninebheh.

¹ mathas.
828

² dh'iomair.

³ éigh ris an éigh. Eabh.

⁴ throimh, tre,

5 Agus chreid muinntir Ninebheh Dia, agus dh'éigh iad trasg, agus chuir iad umpa eudach-saic, o'n aon bu mhò dhiubh gus an aon bu lugha.

6 Oir thàinig an sgeul gu rìgh Ninebheh; agus dh'éirich e o a rìgh-chaithir, agus chuir e 'fhalluin uath, agus chòmhdaich se e féin le eudach-saic, agus shuidh e ann an luathre.

7 Agus thug e fa'near a ghlaodhach agus a chur an céill feadh Ninebheh, (le ordugh an rìgh agus 'uaislean,) ag ràdh; Na blaiseadh duine no beathach, buair no treud, aon ni; na h-ionaltradh iad, agus na h-òladh iad uisge.

8 Ach biodh duine agus ainmhidh air an còmhdaich le eudach-saic, agus glaothadh iad gu treun ri Dia: seadh, pilleadh iad gach aon o 'dhroch shlighe, agus o'n fhòir-neart a ta 'nan làmh.

9 Cò aig am bheil fios nach pill Dia, agus nach gabh e aithreachas, agus nach pill e o 'dhian-chorruich; air chor as nach bàs-aich sinn?

10 Agus chunnaic Dia an oibre, gu'n do phill iad o'n droch shlighe; agus ghabh Dia aithreachas mu'n olc a thubhairt e gu'n deanadh e orra, agus cha d'rinn se e.

CAIB. IV.

1 Bha fearg mhòr air Ionah do bhrìgh gu'n do nochd Dia tròcair do Ninebheh. 4 Chronaicheadh e le samhlaidh luibh-sgàile.

AGUS mhi-thaitinn sin ri Ionah gu ro mhòr, agus bha fearg mhòr air.

2 Agus ghuidh e ris an Tighearn, agus thubhairt e, Guidheam ort, O Thighearn, nach dubhairt mise so, 'nuair a bha mi fathasd ann am dhùthaich féin? Uime sin theich mi roimhe so gu Tarsis: oir bha fios agam gur Dia gràsmhor thusa, agus tròcaireach, mall a clum feirge, agus pailt ann an iochd, agus gu'n gabh thu aith-

reachas mu olc.

3 Uime sin a nis, O Thighearn, buin, guidheam ort, m'anam uam; oir is fearr dhomh bhi marbh na beò.

4 An sin thubhairt an Tighearn, Am maith a thig dhuit fearg a bhi ort?

5 A nis bha Ionah air dol a mach as a bhaile, agus shuidh e air an taobh an ear do'n bhaile, agus an sin rinn e dha féin bothan, agus shuidh e fuidhe san dubhar, gus am faiceadh e ciod a thachradh do'n bhaile.

6 Agus dh'ulluich an Tighearna Dia luibh-sgàile, agus dh'fhàs i suas¹ os ceann Ionah, a chum gu'm biodh i mar sgàile thar a cheann, g'a shaoradh o 'dhoilghios. Agus bha Ionah ro ait air son na luibh-sgàile.

7 Ach dh'ulluich Dia cnuimh an uair a dh'éirich a mhaduinn air an ath là, agus bhuail i an luibh-sgàile, agus shearg i.

8 Agus tharladh 'nuair a dh'éirich a' ghrian, gu'n do dheasaich Dia gaoth theath o'n ear; agus bhuail a' ghrian air ceann Ionah, ionnus gu'n d' fhamnuich e, agus ghuidh e ann féin bàs fhaotainn, agus thubhairt e, Is fearr dhomh bhi marbh na beò.

9 Agus thubhairt Dia ri Ionah, An ceart dhuit do chorruich a bhi air lasadh air son na luibh-sgàile? Agus thubhairt esan, Is ceart domh a bhi ann an corruich gu bàs.

10 An sin thubhairt an Tighearn, Choigleadh tusa an luibh-sgàile, air son nach do shaothraich thu, ni mò thug thu oirre fàs; a dh'fhàs suas² ann an oidhche, agus a chaidh seachad ann an oidhche.

11 Agus nach coiglinn-sa³ Ninebheh, am baile mòr sin, anns am bheil tuilleadh agus sè fichead mìle pearsa, do nach aithne an làmh dheas seach an làmh chli; agus mòran spréidhe?

¹ nios.

² thàinig a nios.

³ caomhanainn-sa.

M I C A H.

CAIB. I.

1 An t-àm san d'rinn Micah fàidheadaireachd.

2 Nochd e fearg Dhé an aghaidh Israeil agus Iudah air son an iodhol-aoiraidh. 10 Caoidh an fhaidh.

FOCAL an Tighearn, a thàinig gu Micah am Morastach, ann an làithibh Iotaim, Ahais, agus Hesechia, rìghrean Iudah; a chunnaic e a thaobh Shamaria agus Ierusalem.

2 Eisdibh, O shlòigh, an t-ìomlan dibh: thoir fa'near, O thalaimh, agus na h-uile a ta ann; agus biodh an Tighearn Iehobh 'na fhianuis 'nur n-aghaidh, an Tighearn á 'theampull naomh.

3 Oir feuch, thig an Tighearn a mach as 'àite; agus thig e nuas, agus saltraidh e air ionadaibh àrda na talmhainn.

4 Agus leaghar na sléibhtean fuidhe, agus sgoiltar na gleannta: mar chéir fa chomhlair an teine, mar uisgeachan a dhòirtar thar bruaich chorraich.

5 Air son eusaontais Iacoib tha so uile, agus air son lochdan tighe Israeil. Ciod e eusaontas Iacoib? Nach e Samaria? agus ciod iad ionadan àrda Iudah? nach iad sin a ta an Ierusalem?

6 Uime sin ni mise Samaria 'na carn sa' mhachair, 'na h-àit air son suidheachaidh fhion-lios; agus taomaidh mi sìos a

clachan do'n ghleann, agus leigidh mi ris a bunaitean.

7 Agus breisear a dealbhan snaighte gu léir 'nam bloighdibh, agus loisgear a tuarasdal gu léir le teine, agus an t-iomlan d'a h-ìodholaibh leigidh mise sìos 'nan làraich; oir do thuarasdal strìopaich chruinnich i a h-*ionmhais*; agus do thuarasdal strìopaich pillidh iad.

8 Air an aobhar sin ni mise caoidh agus àrd-ghul; sìubhlaidh mi rùisgte agus lomnochd: ní mi caoidh mar na dragoin, agus cumha mar nigheana na caillich-oidheche.

9 Oir tha a creuchd do-leigheas, oir thàinig i gu Iudah; thàinig i gu geata mo shluaigh-sa, gu Ierusalem.

10 Na cuiribh an céile e ann an Gat; na guilibh air aon chor; ann an tigh Aphrah aornagain thu féin san luaithre.

11 Imich air falbh, a bhean-àiteachaidh Shaphir, le d' nàire air a leigeadh ris: cha deachaidh luchd-àiteachaidh Shanain a mach gu tuireadh: O Bheteisil, gheibh e uaibhse àite seasamh.

12 Gu dearbh tha bean-àiteachaidh Mharoit a' feitheamh air son maith; gu dearbh thàinig olc a nuas o'n Tighearn gu geata Ierusalem.

13 Ceangail an carbad ris an each luath, O thusa ta 'g àiteachadh Lacheis. B' ise bu toiseach peacaidh do nighean Shioin: oir annad-sa fhuaireadh eusaontais Israeil.

14 Uime sin bheir thu tiodhlacan do Mhoret-Gat: bithidh tighean Achsib 'nam mealladh do rìghribh Israeil.

15 Agus bheir mise oighre a d' ionnsuidh-sa, O bhean-àiteachaidh Mhareth; thig e gu Adulam, glòir Israeil.

16 Dean maol thu féin, agus dean do bhearradh air son do chloinne àillidh; sgaoil, mar an iolair, do mhaoile; oir dh' fhalbh iad uait am braighdeanas.

CAIB. II.

1 *Breitheanas an Tighearn an aghaidh luchd-fòirneirt.* 4 *Tuireadh air son atharrachaidh an t-sluaigh.* 7 *Thugadh achmhasan doibh air son an aingidheachd.*

IS tuagh dhoibh-san a ta dealbh aingidheachd, agus a' cur an gnìomh uile air an leabaichibh; an uair a shoillsicheas a' mhaduinn tha iad 'g a dheanamh, a chionn gu bheil e 'n comas an làimhe.

2 Agus tha iad a' sanntachadh mhachraichean, agus 'gan glacadh le fòirneart; agus thighean, agus tha iad 'gan toirt air falbh: mar sin tha iad a' sàruchadh duine agus a thighe; duine mhòir agus 'oighreachd.

3 Air an aobhar sin, mar so tha an Tighearn ag ràdh: Feuch, an aghaidh an Teaghlach so tha mise a' dealbh uile, o

nach buin sibh air fàlbh bhuirm uineil, ni mò dh'imicheas sibh gu h-uaibhreach: oir is aimsir olc so.

4 Anns an là sin togar cosamhlachd 'nur n-aghaidh, agus nithear tuireadh le cumha brònach, ag ràdh; Tha sinn gu tur air ar creachadh; dh'atharraich e cuibhrionn mo shluaigh: cionnus a dh'atharraich e uam e? roinn e ar machraichean, a shaoil sinn a bhiodh air an aiseag dhuinn féin.

5 Gu dearbh cha bhì aon neach agad a shìneas a mach sreang le crannchur ann an coimhthional an Tighearna.

6 Na deanaibh-sa fàistneachd, O sibhse ta ri fàistneachd: cha dean iad fàistneachd dhoibh; cha toir esan air falbh am maslath.

7 Am bheil tigh Iacoib ag ràdh, Am bheil Spiorad an Tighearn air a chumhannachadh? an iad so a ghnìomhara? nach 'eil mo bhriathran-sa a' deanamh maith do'n neach a ghluaiseas gu h-ionraic?

8 Ach o chian fada dh'érich mo shluagh suas mar nàmhaid: tha sibh a' spionadh na falluinn, maille ris an trusgan, o'n mhuinntir a ta 'g imeachd seachad gu tèaruimte, mar dhaoine gun spéis do chogadh.

9 Mnathan mo phobuill thilg sibh a mach o'n tighibh taitneach; o'n cloimh thug sibh air falbh mo ghloir gu bràth.

10 Eiribh, agus imichibh, oir cha 'n i so *bhur* còmhnuidh: a chionn gu bheil e air a shalachadh, sgriosar e; agus bithidh an sgrìos mòr.

11 Ma ni duine sam bith, ag imeachd ann an spiorad bréige agus ceilg, fàistneachd dhuit air son fiona agus air son dibhe làidir, bithidh eadhon esan 'na fhàidh do'n t-sluaigh so.

12 Cruinnichidh mi gu cinnteach, O Iacoib, an t-iomlan diot-sa: cruinnichidh mi gu cinnteach iarmad Israeil; cuiridh mi iad ri chéile mar chaoraich Bhosrah. mar threud ann am meadhon am mainnneach: ni iad farum mòr le lìonmhoireachd dhaoine.

13 Thàinig am fear-brisidh a nìos rompa bhris iad an geata, agus chaidh iad troimhe agus chaidh iad a mach d'a thrìd; agus sìubhlaidh an rìgh air an toiseach, eadhon an Tighearn air an ceann.

CAIB. III.

1 *Chronaicheadh na prìomsachan air son am fòirneirt,* 5 *agus na fàidhean air son an cealgairachd.* 11 *Aingidheachd nan ceannardan, nan sagart, agus nam fàidhean.*

AGUS thubhairt mi, Eisdibh, guidheam oirbh, O cheannarda Iacoib, agus a phrìomsachan tighe Israeil; nach

¹ an crò, an manrach.

bhuin duibhse fios a bli agaibh ciod a tha ceart?

2 Sibhse ta fuathachadh a' mhaith, agus a' gràdhachadh an uile; a ta spionadh dhiubh an craicinn, agus am feòla bliàrr an cnàmh:

3 A ta fòs ag itheadh feòla mo shluaigh-sa, agus a' fionnadh dhiubh an craicinn, agus a' briseadh an cnàmh, agus 'gan gearradh 'nam bloighdibh, mar fheoil air son na poite, agus mar bhiadh ann am meadhon a' choire.

4 An sin glao dhaidh iad ris an Tighearn, ach cha chluinn e iad: folaichidh e fòs a ghuais uatha san àm sin, mar a ghiùlain siad iad féin gu h-olc 'nan gnìomharaibh.

5 Mar so tha an Tighearn ag ràdh mu thimchioll nam fàidhean a ta toirt air mo shluaigh-sa dol air seacharan, a ta teumadh le 'm faclaibh, agus a' glao dhach, Sith: ach air son an ti nach cuir 'nam beul, tha iad ag ulluchadh cogaidh 'na aghaidh.

6 Air an aobhar sin thig oidhche oirbh, air chor as nach faic sibh sealladh; agus thig dorchadas oirbh, air chor as nach dean sibh fàistneachd; agus théid a' ghrian sìos air na fàidhean, agus bithidh an là os an ceann dorcha.

7 An sin bithidh nàire air na fiosaichean, agus amhladh air na fàidhean; seadh, còmhdaichidh iad uile am beul, oir cha'n 'eil freagradh air bith o Dhia.

8 Ach gu deimhin tha mise làn do chumhachd, do spiorad an Tighearn, agus do bhrèitheanas, agus do neart; a leigeadh ris 'eusaontais do Iacob, agus a pheacaidh do Israel.

9 Cluinnibh so, guidheam oirbh, a cheannarda tighe Iacob, agus a luchd-siùraidh tighe Israeil; sibhse aig am bheil fuath do bhrèitheanas, agus a ta fiaradh gach uile cheartais:

10 A ta a' togail Shìoin suas le fuil, agus Ierusalem le dò-bheart.

11 Tha an ceannardan a' toirt breth air son duaise, agus an sagairt a' teagasg air son tuarasdail, agus am fàidhean a' fàistneachd air son airgid; gidheadh leigidh iad an taice ris an Tighearn, ag ràdh, Nach 'eil an Tighearn 'nar meadhon? cha tig aon olc oirnn.

12 Uime sin, air bhur son-sa bithidh Sion air a treabhadh mar mhachair, agus bithidh Ierusalem 'na carnaibh; agus sliabh an tighe mar ionada àrda na frìthe.

CAIB. IV.

1 Daingneachadh rìoghachd Chrìosd: 3 bithidh a rìoghachd sìochail. * 6 Buaidh na h-Eaglais.

ACH tarlaidh anns na làithibh deir-eannach gu'm bi sliabh tighe an Tighearn air a dhaigneachadh air mullach nan sliabh, agus àrdaichear e os ceann

nam beann; agus sruthaidh na slòigh d'a ionnsuidh.

2 Agus théid mòran chinneach, agus their iad, Thigibh, agus rachamaid suas gu sliabh an Tighearn, agus gu tigh Dhé Iacob; agus teagaisgidh e dhuinn m'a shlighibh, agus gluaisidh sinne 'na cheum-aibh: oir a' Sion théid an lagh a mach, agus focal an Tighearn á Ierusalem.

3 Agus bheir e breth am measg mhòran shluaigh, agus bheir e achmhasan do chinnich làidir fad as; agus buailidh iad an claidhean gu coltair, agus an sleaghan gu corranaibh-sgathaidh: cha tog cinn each claidheamhl an aghaidh cinnich, agus cha'n fhòghluim iad cogadh ni's mò.

4 Ach suidhidh iad, gach duine fuidh 'fhìonain, agus fuidh 'chrann-fìge féin, agus cha chuir aon neach eagail orra: oir beul Iehobhah Dhia nan sluagh labhair e.

5 Oir gluaisidh na h-uile shluaigh, gach aon ann an ainm a dhé féin; ach gluaisidh sinne ann an ainm Iehobhah ar Dé-ne, gu saoghal nan saoghal.

6 Anns an là sin, tha an Tighearn ag ràdh, cruinnichidh mi ise ta bacach, agus tionaidh mi ise ta air a fògradh a mach, agus ise a chuir mi fuidh àmhghar.

7 Agus ni mi ise bha bacach 'na h-iar-mad, agus ise bha air a tilgeadh air falbh, 'na cinneach làidir; agus riaghlaidh an Tighearn os an ceann ann an sliabh Shìoin, o so a mach, eadhon gu sìorruidh.

8 Agus thusa, O thùir an treud, a dhaignich làidir nighinn Shìoin, thig t' àm-sa; agus pillidh an t-sean uachdar-anachd, an rìoghachd, gu nighinn Ierusalem.

9 Anis c'ar son a ta thu glao dhach gu h-àrd? am bheil rìgh air bith annad? an do bhàsaich d'fhear-comhairle? oir ghlac ioghanna thu, mar mhnai ri saothair.

10 Bi ann an saothair, agus beir, O nigh-ean Shìoin, mar mhnai ri saothair¹: oir a nis théid thu mach as a' chaithir, agus gabhaidh tu còmhnuidh anns a' mhachair, agus théid thu eadhon gu Babilon; an sin saorar thu; an sin fuasglaidh an Tighearn thu á làimh do naimhdean.

11 A nis fòs tha mòran chinneach air cruinneachadh a'd' aghaidh, a ta 'g ràdlì, Biodh i air a truailleadh, agus faiceadh ar suil ar miann air Sion.

12 Ach cha'n aithne dhoibh so smuainte an Tighearna, ni mò thuigear iad a chomhairle: oir ni e an cruinnachadh mar na sguaban a chum an urlair.

13 Eirich agus buail an t-arbhar, O nighean Shìoin; oir ni mise t' adharc 'na h-iarunn, agus t' ionganna 'nan umha; agus buailidh tu 'nam bloighdibh mòran chinneach; agus coisrigidh tu an ionmhas

¹ 'na tuidh-siùbhladh.

do'n Tighearn; agus am maoin do Thriath na talmhainn uile.

CAIB. V.

1 Fàidheadaireachd mu thimchioll Chrìosd: 4 a rioghachd ghloirmhor: 8 Bheir e buaidh air a naimhidh.

ANIS cruinnich thu fèin ann am buidh-nibh, O nighean bhuidhnean: chuairt-ich iad le feachd sinn; bhuail iad le slait air a' ghial breitheamh Israeil.

2 Agus thusa, a Bhetlehem-Ephratah, ged tha thu beag am measg mhiltean Iudah; *gidheadh* asad thig a mach a m' ionnsuidh-sa neach a bhios na uachdaran air Israeil; aig an robh a dhol a mach o shean, a làithibh na siorruidheachd.

3 Air an aobhar sin bheir e thairis iad, gus an t-àm anns an toir ise, a ta gu lean-abh a bhreth, dhachaidh clann; agus gus an iompaichear fuigheall am bràithrean, maille ri macaibh Israeil.

4 Agus seasaidh e, agus ionaltraidh e a *threud* ann an neart an Tighearn; ann am mòrachd ainme an Tighearn a Dhia; agus bithidh iadsan air an iompachadh: oir a nis bithidh esau mòr gu ruig crìocha na talmhainn.

5 Agus bithidh esan 'na shith. 'Nuair a thig an t-Asirianach d'ar tìr, agus a shaltras e 'nar luchairtibh, an sin togaidh sinn 'na aghaidh seachd buachaillean, agus ocdh cinn-fheadhna sluagh.

6 Agus cuiridh iad fearann Asiria fàs leis a' chlaidheamh, eadhon fearann Nim-roid 'na dhol a steach: mar so saoraidh iad sinn o'u Asirianach 'nuair a thig e chum ar fearainn, agus 'nuair a shaltras e an taobh a stigh d'ar crìochan.

7 Agus bithidh fuigheall Iacoib am measg mhòran shluagh, mar an drùchd o'n Tighearn, mar na frasan air an fheur nach feith ri duine, agus nach fan ri macaibh dhaoine.

8 Agus bithidh fuigheall Iacoib am measg nan cinneach, am meadhon mhòran shluagh, mar leòmhnan am measg bheathaichean na frìthe, mar chuirean leòmhain am measg nan treuda caorach: e sin, ma théid e roimhe, araon saltraidh sìos, agus reubaidh, agus cha tèarunn aon neach.

9 Togar do làmh suas os ceann do naimhdean, agus bithidh t' eascairdean gu léir air an gearradh as.

10 Agus tarlaidh anns an là sin, tha an Tighearn ag ràdh, gu'n gearr mise do chuid each a mach as do mheadhon, agus sgriosaidh mi do charbaid.

11 Agus gearraidh mi as bailtean d'fhearainn, agus tilgidh mi sìos t' uile dhaingnichean.

12 Agus gearraidh mi na druidhean a mach as do mheadhon; agus cha bhi fiosaichean air bith agad.

13 Do dhealbhan snaighte mar an ceud-

na gearraidh mi as, agus do dhealbhan seasmhach a mach as do mheadhon; agus cha toir thu ni's mò aoradh do obair do làmh.

14 Agus spìonaidh mi nìos do dhoireach-an as do mheadhon: sgriosaidh mi fòs do naimhdean¹:

15 Agus ni mi dioghaltas, ann am feirg agus ann an corruich, air na cinnich, ionnus nach cual iad a leithid.

CAIB. VI.

1 Bha comhstri aig an Tighearn r'a shluagh air son am mì-thaingeachd. 13 Thug e achmhasan dhoibh air son an aingidheachd, 16 agus air son an iodhol-aoraidh.

EISDIBH-SE nis ciod a ta an Tigh-earn ag ràdh; Eirich, tagairfachomh-air nam beann, agus cluinneadh na cnuc do ghuth.

2 Eisdibh-sa, O shléibhte, comhstri an Tighearn; agus sibhe, a bhunaite làidir na talmhainn: oir tha comhstri aig an Tigh-earn r'a shluagh, agus tagraidh e ri Israeil.

3 O mo shluagh, ciod a rinn mise ort? agus ciod anns an do sgithich mi thu? tog fianuis a'm' aghaidh.

4 Oir thug mi nìos thu á tìr na h-Ei-phit; agus á tigh nan tràillean shaor mi thu; agus chuir mi romhad Maois, Aaron, agus Miriam.

5 O mo shluagh, cuimhnich a nis ciod a' chomhairle a ghabh Balac rìgh Mhoab; agus ciod am freagradh a thug Balaam mac Bheoir dha, o Shitim gu Gilgal; a chum gu'n aithnich sibh fireantachd an Tighearna.

6 Ciod leis an tig mi ann am fianuis an Tighearna; leis an strìochd mi mi fèin an làthair an Dia a's àirde? an tig mi 'na fhianuis le ìobairtibh-loisgte; le laoigh a bhios bliadlana dh'aois?

7 Am bi an Tighearn toilichte le mìltibh do reitheadhaibh, le deich mìltibh do shruthaibh oladh? an toir mi mo cheudghin air son mo chionta; toradh mo chuirp air son cionta m'anama?

8 Dh'fheuch e dhuit, O dhuine, ciod a tha maith; agus ciod a tha an Tighearn ag iarraidh ort, ach ceartas a dheanamh, trocair a ghràdhachadh, agus gluasad gu h-iriosal maille ri d' Dhia.

9 Tha guth an Tighearna glaodhach ris a' bhaile, agus bheir an duine glic fa'near t'ainm: eisdibh-sa an t-slat, agus an Tì a dh'orduich i.

10 Am bheil fathasd ionmhasa na h-aingidheachd ann an tigh an droch dhuine; agus an tomhas gann a ta gràineil?

11 Am meas mise glau i leis na meighibh eucorach, agus le màla nan cothroma cealgach?

12 Aig am bheil a daoine beartach làn

¹ bhailllean.

ainneirt; agus labhair a luchd-àiteachaidh breugan; agus tha an teangadh cealgach 'nam beul.

13 Uime sin tionsgnaidh mise air do blualadh, air do dheanamh fàs air son do lochdan.

14 Ithidh tu, ach cha sàsuichear thu; agus bithidh do leagadh ann ad mheadhou; agus gabhaidh tu greim, ach cha ghléidh thu: agus an nì sin a ghléidheas tu, bheir mise do'n chlaidheamh.

15 Cuiridh tu, ach cha bhuain thu: bruthaidh tu meas a' chroinn-oladh, ach cha'n ung thu thu féin le h-oladh; agus dearcan an fhìon-nuadh, ach cha'n òl thu fìon.

16 Oir choimhid thu reachdan Omri, agus uile oibre tighe Ahaib; agus tha sibh ag imeachd 'nan comhairlibh; a chum gu'n deanainn-sa 'na h-ionad fàs i, agus a luchd-àiteachaidh 'nan seig; agus gu'n giùlain sibhse masladh mo shluaigh-sa.

CAIB. VII.

1 Chuir an Eaglais a muinghinn ann an Dia.

8 Rinn i gairdeachas 'na dòchas ri saorsa.

11 Thug Dia misneach dhi le bhì gealtuinn gu'n smachdaicheadh e a naimhdean. 18 Tròcairean Dhé d'a thaobh a shluaigh.

MO thruaighe mise! oir dh'fhàs mi mar luchd-tionaid a' mheas shamhraidh; mar luchd-dioghluim an fhìon-fhogharaidh: cha'n 'eil aon bhagaide r'a itheadh: tha m'anam ag iarraidh a' cheud thoraidh.

2 Blàsaich an t-ionracan as an fhearann, agus cha'n 'eil neach treibhdhireach am measg dhaoine: tha iad uile a' gabhail fàth air son fola: tha iad, gach aon, a' sealg a bhràthar le lìon.

3 A chum gu'n dean iad olc le uile dhìchioll an làmh; tha am prionnsa agus am breitheamh ag iarraidh duaise: agus tha an duine mòr a' foillseachadh a dhroch thograidh: mar sin tha iad 'ga phasgadh suas.

4 'Tha an ti is fearr dhiubh mar dhris; tha an ti ionraice 'nam measg mar phris dhroighinn: *is e so* là do luchd-faire; tha do smachdaicheadh air teachd; a nis bithidh iad aon an imcheist.

5 Na h-earbaibh á caraid; na cuirbh muinighinn ann am fear-ùil: o'n té a luidheas ann ad uchd gléidh dorsa do bheoil.

6 Oir tha am mac a' toirt eas-onoir do'n athair; tha an nighean ag éirigh suas an aghaidh a màthar, bean a' mhic an aghaidh a màthar-chéile: is iad naimhdean duine muinntir a thighe féin.

7 Ach seallaidh mise ris an Tighearn: bithidh mo dhòchas ann an Dia mo shlàinte: éisdidh mo Dhia rium.

8 Na dean gairdeachas a'm' aghaidh, O mo nàmhaid; ged thuit mi, éiridh mi; ged shuidheam ann an dorchadas, bithidh an Tighearn 'na sholus dhomh.

9 Giùlainidh mi corruich an Tighearn, a chionn gu'n do pheacaich mi 'na aghaidh; gus an tagair e mo chùis, agus an toir e breth air mo shon: bheir e mach mi chum an t-soluis; chi mi 'fhìreantachd.

10 Agus chì mo nàmhaid sin, agus còmhdaichidh nàire ise thubhairt rium, C' àit am bheil an Tighearn do Dhia? chì do shùilean *am miann* oirre; a nis saltrar sìos i mar chlàbar nan sràidean.

11 Anns an là sam bì do bhallachan air an togail, anns an là sin cuirear am fad uait an t-ordugh.

12 Anns an là sin fòs thig iad a d'ionnsuidh o Asiria, agus o na bailtibh daingnichte; agus o'n daingneach eadhon gus an amhainn; agus o fhainge gu fairge, agus o shliabh gu sliabh.

13 Gidheadh bithidh an talamh 'na fhàsach, air son a luchd-àiteachaidh, air son toraidh an deanadais.

14 Beathaich do shluagh le d' luirg, treud t' oighreachd, a ta gabhail còmhnuidh gu h-uaigneach san fhìrth; ann am meadhon Charmeil ionalttradh iad, ann am Basan, agus an Gilead, mar anns na làithibh o shean.

15 Mar anns na làithibh san d' thàinig iad a mach á tìr na h-Eiphit, nochdaidh mise dhoibh nithe mìorbhuileach.

16 Chi na cinnich, agus bithidh iad fo amhladh air son an uile chumhachd: cuiridh iad *an làmh* air am beul, bithidh *an cluasan* bodhar.

17 Imlichidh iad an duslach mar nathair; gluaisidh iad a mach as an tuill mar chnuimhean na talmhainn: bithidh eagall orra roimh an Tighearn ar Dia-ne, agus bithidh iad fo gheilt air do shon-sa.

18 Cò a's Dia ann cosmhuil riutsa, a mhaithreas aingidheachd, agus a ghabhas seachad air eusaontas iarmaid 'oighreachd? cha ghléidh e a chorruich gu sìorruidh a chionn gur toigh leis tròcair.

19 Pillidh e a ris, gabhaidh e truas dinn; còmhdaichidh e ar n-eusaontais: seadh, tilgidh tu an uile lochdan ann an doimhneachdaibh na fairge.

20 Coimhlonaidh tu an fhìrinn do Iacob, agus an tròcair do Abraham, a mhionnaich thu do ar n-aithrichibh o na làithibh o shean.

N A H U M.

CAIB. I.

1 *Morachd an Tighearna. 7 Bithidh e 'na dhaingneach làidir dhoibh-san a chuireas an dòchas ann; 8 ach bheir e crìoch iomlan air a naimhdebh.*

AN fhàistneachd mu thimchioll Ninebheh. Leabhar seallaidh Nahuim an Elcosich.

2 Tha Dia eudmhor, agus ni an Tighearn dioghaltas; ni an Tighearn dioghaltas air 'eascairdibh; agus taisgidh e *corruich* air son a naimhdean.

3 Tha 'n Tighearn mall a chum feirge, agus mòr ann an cumhachd, agus cha saor an Tighearn air chor air bith *an t-aingidh*. Anns a' chuairt-ghaoith agus anns an doinnn tha a shlighe, agus is iad na neoil luathra e chos.

4 Bheir e achmhasan do'n fhairge, agus ni e tioram i; agus tiormaichidh e suas na h-aimhnichean uile: shearg Basan agus Carmel; agus tha blàth Lebanoin air crìonadh.

5 Crìothnaichidh na sléibhtean roimhe-san, agus leagaidh na cnnic; agus tha an talamh air a losgadh suas 'na làthair; an saoghal, agus 'uile luchd-àiteachaidh.

6 Cò a's urrainn seasamh roimh 'fhearg-san? agus cò dh'fheudas fuireach ann an dian-theas a chorruch? tha a chorruch air a dòrtadh a mach mar theine, agus tha na creagan air an tilgeadh sìos leis.

7 Is maith an Tighearn, is daingneach làidir e ann an là na h-àirce, agus is aithne dha iadsan a ta cur an dòchais ann.

8 Ach le tuil a' ruith thairis bheir e crìoch iomlan air an dream a dh'èireas 'na aghaidh; agus ruaigidh dorchadas a naimhdean.

9 Ciod a tha sibh a' smuaineachadh an aghaidh an Tighearna? ni e crìoch iomlan; cha'n èirich àmhghar suas an dara uair.

10 Oir am feadh a ta iad air am filleadh¹ anns a' chéile mar sgitheach; agus mar gu'm b' ann air mhisg le 'm fion, caithear iad mar as-bhuain làn thioram.

11 Asad-sa chaidh aon a mach a dhealbh olc an aghaidh an Tighearna; droch fhear-comhairle.

12 Mar so tha an Tighearn ag ràdh, Ged tha iad sàmhach, agus fòs lìonmhor, gidheadh gearrar as iad, agus siùbhlaidh iad air falbh. Ged rinn mi thusa chlaoidh, cha chlaoidh mi thu ni's mò.

13 Oir a nis brisidh mi a chuingean

dhìot, agus sgaoilidh mi as a chéile do chuibhrichean.

14 Agus thug an Tighearn àithne mu d' thimchioll, nach frosair a mach t' ainm ni's mò. A mach á tigh do dhée gearraidh mise an òmhaigh shnaighte, agus an òmhaigh leaghta; orduichidh mi t' uaigh, oir dh'fhàs thu gràineil.

15 Feuch air na sléibhtibh cosan an ti a ta toirt deadh sgeoil leis, a ta craobh-sgaoleadh sìthe: O Iudah, gléidh t' àrd-fhéilean; coimhlion do bhoidean: oir cha siubhail an t-aingidh ni's mò tromhad; tha e gu tur air a ghearradh as.

CAIB. II.

1 *Aisigidh Dia òirdheirceas Iacoib a rìs; 8 agus bheir e armaitlean mòra an aghaidh Ninebheh chum a fasachadh gu tur.*

THA esan a phronnas ann am bloighdibh air teachd a nìs fa d' chomhair; gléidh an daingneach, cuir faire air an t-slighe, dean do leasraidh làidir, neartaich gu treun do chumhachd.

2 Oir aisigidh an Tighearn a rìs òirdheirceas Iacoib, mar òirdheirceas Israeil: oir mhill an luchd-millidh² iad, agus sgrios iad an geugan.

3 Rinneadh sgiath a dhaoine cumhachdach dearg, tha na gaisgich ann an sgarlaid: bithidh na carbaid mar leusa lasarach ann an là 'ulluichidh; agus crathar gu h-uamhasach na *seaghan* giùmhais.

4 Bithidh na carbaid air bhoile anns na sràidibh, buailidh iad an aghaidh a chéile anns na h-ionadaibh farsuinn; bithidh an dreach mar leois, ruithidh iad mar dhealanaich.

5 Airmhidh e a dhaoine treuna a rìs: leagaidh iad a sìos 'nan imeachd: ni iad deifir a chum a bhalla, agus ulluichear an didein.

6 Fosgailear geatacha na h-aimhne, agus bithidh an lùchairt air a sgaoleadh.

7 Agus bheirar Husab air falbh am bruid, bheirar suas i; agus a gruagaichean 'na co-imeachd mar le guth choluman, a' bualadh air an uchd.

8 Ach tha sruthan Ninebheh mar linne uisge; agus tha iadsan a' teicheadh. Seasaibh, seasaibh; ach chasall aon neach 'na dhéigh.

9 Glacaibh-sa a' chreach airgid, glacaibh a' chreach òir; oir cha 'n 'eil crìoch air an ionmhas ghlòrmhor, leis gach uile sheòrsa do shoitichibh rìomhach.

¹ *prabadh.*

² *dh'fholmhuich an luchd-folmhachaidh. Eabh.*

10 Tha i falamb, agus faoin, agus fàs, agus tha an cridhe a' leaghadh, agus na ghluinean a' bualadh air a chéile; agus tha mòran cràidh anns na h-uile leasraibh; agus tha an aghaidhean gu léir a' tionail dorchadais.

11 C' àit am bheil còmhnuidh nan leòmhnan, agus àite-beathachaidh nan leòmhnan òga? far an do ghluais an leòmhnan, an seann leòmhnan, agus cuilean an leòmhain, gun aon air bith a chur geilt. *orra.*

12 Reub an leòmhnan gu leòr air son a chuileanan, agus mharbh e air son a leòmhana-boirionn, agus lìon e a thuill le cobhartach, agus 'uaimh le creich.

13 Feuch tha mise ann ad aghaidh, tha Tighearn nan sluagh ag ràdh, agus loisgidh mi do charbadan san teine; agus ithidh an claidheamh do leòmhain òga; agus gearraidh mise do chreach o'n talamh, agus cha chluinnear ni's mò guth do theachdairean.

CAIB. III.

1 *Fàistneachd mu thimchioll léir-sgrìos Ninebheh.*
 9 *Cha'n urrainn a luchd-cuideachaidh a tèarnadh.*

IS truagh do'n chaithir fhuiltich! tha i uile 'na ceilg, làn do reubainn; cha'n 'eil sgur air a' chreich.

2 Fuaim slait-sgiùrsaidh, agus torman farum nan rothan, agus nan each meamnach, agus nan carbad leumnach

3 Togaidh am marcach suas araon an claidheamh loinreach, agus an t-sleagh lìomhaidh; agus tha mòran do mhairbh ann, agus àireamh mòr do chorpaidh; cha'n 'eil crìoch air an cairbhinnibh; tha iad a' tuisleachadh air an corpaibh:

4 Air son lìomhoireachd striopachais na striopaich maisich, ban-mhaighstir nan druidheachdan; a ta reic chinneach le a striopachas, agus theaghlachan le a druidheachdan.

5 Feuch, tha mise a'd' aghaidh, tha Tighearn nan sluagh ag ràdh, agus leigidh mi ris do sgiortan air t' aghaidh, agus foillsichidh mi do na cinnich do lomnochduidh, agus do na rioghachdaibh do mhasladh.

6 Agus tilgidh mi salchar gràineil ort, agus ni mi suarach thu, agus cuiridh mi thu mar bhall-amhairc.

7 Agus tarlaidh, iadsan uile a dh'amhairceas ort, gu'n teich iad uait, agus their iad, Rinneadh Ninebheh 'na fàsach, cò chaoidheas i? cia as a dh'iarraas mi luchd-còmhfhurtachd air do shon?

8 Am fearr thusa na No sluaghmhor a

bha air a suidheachadh am measg nan aimhnichean; aig an robh na h-uisgeachan mu'n cuairt di, aig an robh an fhairge mar dhùidein, agus a' mhuir mar bhalla.

9 B'e Etiopia agus an Eiphit a neart, agus bha sin anbharr: b' iad Put agus Lubim a luchd-cuideachaidh.

10 Gidheadh thugadh air falbh i, dh'imich i ann am braighdeanas: bha a clann òg fòs air am pronnadh 'nam bloighdibh aig ceann nan uile shràidean: agus thilg iad croinn air son a daoine urramach, agus bha a daoine mòra gu léir air an ceangal ann an slabhruidhean.

11 Bithidh tusa fòs air mhisg; folaidh tu thu féin; iarraidh tu didein o'n nàmhaid.

12 Bithidh t' uile dhaingnichean làidir mar chroinn-fhìge leis na ceud fhigibh abuich: ma chrathar iad, tuitidh iad ann am beul an ti a dh'itheas iad.

13 Feuch, tha do dhaoine mar mhnathan ann ad mheadhon: sgaoilear gu farsuinn do d' naimhdibh geatacha do thìre; caithidh an teine do chroinn-dhruididh.

14 Tarruing uisge dhuit féin air son an fheachd, neartaich do dhaingnichean làidir: rach a steach do'n chriadh agus post an làthach; daingnich an àth-chriadh.

15 An sin ni an teine do chaitheamh; gearraidh an claidheamh as thu, ithidh e suas thu mar a' chnàmh-chnuimh: dean thu féin lìonmhor mar a' chnàmh-chnuimh, dean thu féin lìonmhor mar an locust:

16 Rinn thu do luchd-malairt lìonmhor thar reulta nèimh: millidh a' chnàmh-chnuimh, agus sìubhlaidh i air falbh.

17 Tha iadsan a chrùnadh annad mar na locuist, agus do chinn-fheadhna mar na fionnain-fheoir, a chòmhnuicheas anns na barranaibh¹ san là fhuar; ach 'nuair a dh'éireas a' ghrian teichidh iad air falbh, agus cha'n 'eil fios cia an t-àit am bheil iad.

18 Tha do bhuachaillean ri clò-chodal, O rìgh Asiria: tha t' uaislean 'nan tàmh: tha do shluagh air an sgapadh air na sléibhteann, agus cha'n 'eil aon neach ann g' an cruinneachadh.

19 Cha'n 'eil leigheas air do bhruthadh: tha do lot nimhueach: na h-uile a chluinneas iomradh ort, buailidh iad am basan os do cheann; oir cò air nach do shiubhail t'ole an còmhnuidh?

¹ callaidibh.

HABACUC.

CAIB. I.

1 *Rinn Habacuc gearan a bhrìgh fòirneirt agus aingidheachd a shluaigh. 5 Nochdadh dha dìoghaltas eagalach an Tighearna le làimh nan Cal-deach.*

AN fhàistneachd a chunnaic Habacuc am fàidh.

2 Cia fhad, O Thighearn, a ghlaodhas mi, agus nach éisd thu? a ghlaodhas mi riut air son fòirneirt, agus nach saor thu?

3 C'ar son a ta thu nochdadh dhomh aingidheachd, agus a' toirt orm sealltuinn air doilghios? oir tha creach agus fòirneart fa m' chomhair; agus luchd-dùsgaidh strì agus ainnheite.

4 Air an aobhar sin tha an reachd air fàilneachadh, agus cha'n 'eil breitheanas uair air bith a' dol a mach: oir tha an ciontach ag iadhadh mu thimchioll an fhàidh: uime sin tha breitheanas eucorach a' dol air aghaidh.

5 Faicibh am measg nan cinneach, agus amhaircibh, agus gabhaibh iongantais gu mòr: oir ni mise obair 'nur làithibh, nach creid sibh ged innsear i duibh.

6 Oir feuch, dùsgidh mi suas na Cal-deich, an cinneach searbh agus easgaidh sin, a dh'imeicheas troimh leud an fhearainn, a ghabhail seilbh air na h-àiteachacòmhnuidh nach leo féin.

7 Tha iad uamhasach agus eagalach: thig am breitheanas agus an òirdheirceas a mach uatha féin.

8 Tha 'n eich fòs ni's luaithe na liopaird, agus tha iad ni's buirbe na madaidh-alluidh an annoch: agus sgaoilidh am marcaichean iad féin, agus thig am marcshluagh o ioma-chéin: itealaichidh iad mar an iolair a dheifrìcheas gu itheadh.

9 Thig iad uile air son ainneirt: sgriosaidh iad rompa mar a' ghaoth an ear; agus cruinnichidh iad braighdean mar a' ghaineamh.

10 Agus ni iad sgeig air rìghribh, agus bithidh prionnsachan 'nan cuis-mhagaidh dhoibh: ni iad fanoid air gach daingneach làidir; agus cruachaidh iad suas talamh, agus glacadh iad e.

11 An sin caochlaidh an inntinn, agus siùbhlaidh iad air falbh, agus measar iad ciontach. Tha an neart so aca o an dia.

12 Nach 'eil thusa o shiorruitheachd, O Thighearn, mo Dhia-sa, m' Aon naomh? cha bhàsaich sinn. O Thighearn, dh'orduich thu iadsan air son breitheanas; agus O Dhé chumhachdaich, dhaingnich thu iad air son smachdachaidh.

13 Tha do shùilean ni's glaine na gu'n 836

seall thu air olc, agus cha'n fheud thu amharc air aingidheachd: c' uim' am bheil thu 'g amharc air luchd-ceannairc, agus a' fantuinn a'd' thosd an uair tha 'n t-aingidh a' slugadh suas an duine is ionraice na e féin?

14 Agus c' uim' am bheil thu deanamh dhaoine mar iasga na fairge, mar na nithe snàgach aig nach 'eil aon fhear-riaghlaidh os an ceann?

15 Tha iad 'gan togail suas uile leis an dubhan; tha iad 'gan glacadh 'nan lìon, agus 'gan cruinneachadh 'nan eangaich; uime sin tha iad aobhneach agus ait.

16 Air an aobhar sin, tha iad ag iobradh d'an lìon, agus a' losgadh tùise d' an eangaich: a chionn leò sin gu bhéil an cuibhrionn reamhar, agus an lòn pailte.

17 An dean iad air an aobhar sin an lìon falamh, agus nach coigil iad a bhì sior-mharbhadh nan cinneach?

CAIB. II.

1 *Dh'orduicheadh do Habacuc an fhàistneachd a sgrìobhadh. 6 Nithear breitheanas air an t-sluagh a mheudaicheas an ni nach leo féin, 9 orra-san a shanntaicheas droch shannt, 12 agus orra-san a dhaingnicheas an caithir le aingidheachd.*

SEASADH mi air m'fhaire, agus cuiridh mi mi féin air an tùr, agus feuchaidh mi ciod a their e rium, agus ciod a fhreagras mi 'nuair a chronuichear mi.

2 Agus fhreagair an Tighearn mi, ag ràdh: Sgrìobh an fhàistneachd, agus dean soilleir i air clàraibh, air chor as gu feud esan ruith a leughas i.

3 Oir tha 'n fhàistneachd fathasd air son aimsir shònraichte, ach air a' cheann mu dheireadh labhraidh i, agus cha dean i breug: ged dhean i maille, feith rithe; oir gu deimhin thig i, cha bhì i air dheireadh¹.

4 Feuch, cha'n 'eil 'anam-san, a ta air a thogail suas, ceart an taobh a stigh dheth: ach mairidh am firean beò le a chreidimh.

5 Seadh fòs, mar dhuine théid as an rathad le fion, tha e uaibhreach, agus cha'n 'eil a gabhail fois; a' meudachadh a chloicrais mar an uaigh; agus mar am bàs cha'n fheudar a shàsachadh; agus tha e cruinneachadh d'a ionnsuidh nan uile chinneach, agus a' tional dha féin nan uile shlugh.

6 Nach tog iad so uile suas cosamhlachd 'na aghaidh, agus gnàth-fhocal tàmailteach m'a thimchioll, ag ràdh, Is truagh

¹ esan a tha teachd, thig e, cha bhì e ro annoch.

dha-san a mheudaicheas an nì nach leis féin! cia fhad? agus dha-san a luchdaicheas e féin le cré¹ thigh.

7 Nach éirich iadsan suas gu grad a theumas thu; agus nach dùisg iadsan a chuireas dragh ort? agus nach bi thusa dhoibh mar chobhartach?

8 A chionn gu'n do chreach thu mòran chinneach, creachaidh uile iarmad nan cinneach thusa: air son fola dhaoine, agus sàruchaidh an fhearainn, na caithreach, agus a h-uile luchd-àiteachaidh.

9 Mo thruaighe esan a ta sanntachadh droch shainnt d'a thigh; a chum a nead a shuidheachadh gu h-àrd; gu e féin a shaoradh o chumhachd àmhghair.

10 Dhealbh thu nàire do d' thigh, le mòran shluagh a ghearradh as; agus pheacaich thu an aghaidh t' anama féin.

11 Oir glaothaidh a' chlach a mach as a' bhalla; agus freagraidh an t-sail as an fhiodh i.

12 Is an-aoibhin dha-san a thogas baile le fuil, agus a dhaingnicheas caithir le aingidheachd.

13 Feuch, nach ann o Thighearn nan sluagh a ta so, gu'n saothraicheadh daoine anns an teine, agus gu'n sgithicheadh slòigh iad féin air son nì faoin?

14 Gu cinnteach lìonar an talamh le eòlas glòire an Tighearna, mar a ta na h-uisgeachan a' còmhachadh na fairge.

15 Is an-aoibhin dha-san a tha toirt air a choimhearsnach òl, a ta cur ris a' chopain, agus 'ga chur air mhisg mar an ceudna, chum gu'n amhairceadh e air a lomnochd-uidh.

16 Tha thu air do lìonadh le nàire au àit glòire: òl thusa fòs, agus biodh do roimh-chraicinn air a leigeadh ris: riutsa pillear cupan làimhe deise an Tighearn; agus bithidh sgeith nàrach air do ghloir.

17 Oir nì ainneart Lebanoin do chòmhdachadh, agus cuiridh sgrios ainmhidhean eagal ort; air son fola dhaoine, agus air son sàruchaidh an fhearainn, na caithreach, agus a h-uile luchd-àiteachaidh.

18 Cìod an tairbhe tha san ìomhaigh shnaighte, gu'n d'rinn am fear a dhealbh i a snagheadh: anns an ìomhaigh leaghta, agus ann am fear-teagasg nam breug, gu'n earbadh fear-deanamh na h-oibre so aisde, a dheanamh iodhola balbha?

19 Is truagh dha-san a ta ag ràdh ris an fhiodh, Dùisg: ris a' chloich bhaillbh, Eirich. An teagaisg i? Feuch, tha i air a' cur thairis le h-òr agus airgiod; agus cha'n 'eil anail air bith an taobh a stigh dhi.

20 Ach tha an Tighearn 'na theampull naomh: bi a' d' thosd 'na fhianuis, O thalaimh uile.

CAIB. III.

1 *Urnuigh Habacuc. 3 Mòrachd an Tighearna. 17 Nochd am fàidh gu'n robh a chreidimh làidir ann an Dia a shlàinte.*

URNUIGH Habacuc an fhàidh air Sigionot.

2 O Thighearn, chuala mi do chainnt; bha eagal orm: O Thighearn, ath-bheothaich t' obair ann am meadhon nam bliadh-nachan, ann am meadhon nam bliadh-nachan dean aithnichte; ann an corruich cuimhnich tròcair.

3 Thàinig Dia o Theman, agus an Ti naomh o shliabh Pharain. Selah. Chòmhdaich a ghloir na nèamhan, agus bha an talamh làn d'a chliù.

4 Agus bha a shoilleireachd mar a' ghrian; o a làimh *shruith* dèarsanna soluis; agus an sin bha àite foluich a mhòrachd.

5 Roimh a ghnùis chaidh a phlàigh; agus chaidh eibhle teine mach o 'chosaibh.

6 Sheas e, agus thomhais e an talamh: dh'amhairc e, agus sgap e na cinnich as a chéile; agus bha na sléibhte sìorruidh air am briseadh; chrom na cnuc bhith-bhuan; tha a shlighe maireannach.

7 Chunnaic mi pàilliuna Chusain ann am àmhghar: chrìochnuich brat-sgàile fearainn Mhidiain.

8 An robh corruich air an Tighearn ris na tuiltibh? an robh d'fhearg an aghaidh nam ainmhnichean? an robh do chorruich an aghaidh na fairge, gu'n do mharcaich thu air t' eachaibh, agus air do charbad-aibh slàinte?

9 Rinneadh do bhogha glan-rùisgte, a réir nam mionn do na treubhaibh, *eadhon* d'fhocail. Selah. Sgoilt thu an talamh le sruthaibh.

10 Chunnaic na sléibhteann thu agus chrìochnuich iad: ghabh tuil nan uisgeachan seachd: chuir an t-aigein a mach a ghuth, thog an doimhne suas a làmhnan.

11 Sheas a' ghrian agus a' ghealach 'nan àite: 'nan solus shiubhail do shaighdean; 'nan dealradh do shleaghan ìomhaigh.

12 Dh'imich thu troimh an fhearann ann am feirg, bhuail thu na cinnich ann an corruich.

13 Chaidh thu mach air son tèarnaidh do shluagh, air son tèarnaidh do mhuinntir ungta: bhuail thu 'n ceann o thigh an aingidh; leig thu ris na bunaite gu ruig a' mhuineil. Selah.

14 Bhuail thu le d' shlait ceann a bhailtean. Ruith iad a mach mar chuairt-ghaoith gu ar sgapadh; bha an gairdeachas mar gu'n sluigeadh iad am bochd gu h-uaigneach.

15 Choisich thusa troimh an fhairge le t'eachaibh: troimh cruinneachadh nan uisgeacha mòra.

¹ *criadh, creuch.*

SEPHANIAH, I. II.

16 'Nuair a chuala mi, chrìochnuich mo chom: bha mo bhile air chrith roimh do ghuth: chaidh lobhadh a steach ann am chnàmhaidh, agus chrìochnuich mi ann am àite; a chum gu'm biodh fois agam ann an là an àmhghair: nuair a théid e suas an aghaidh an t-sluaigh, agus a chlaoidheas e iad le 'bhuidhneibh.

17 Ged nach toir an crann-fige uaith blàth, agus ged nach fàs air an fhionain cinneas; ged fhàilnich meas a' chroinn-ladh, agus ged nach toir na machraich-

ean uatha lòn; ged ghearrar an treud as o'n mhaonnir, agus ged nach bi buar air bith anns na buailtibh;

18 Gidheadh mi mise gàirdeachas anns an Tighearn, ni mi aoibhneas ann an Dia mo shlàinte.

19 Is e an Tighearn Iehobhah mo neart, agus ni e mo chosan mar *chosaibh* éilde, agus bheir e orm coiseachd air m' ion-adaibh àrda. Do'n àrd-fhear-chiùil air m' innealaibh teudach.

SEPHANIAH.

CAIB. I.

1 *An t-àm san d'rinn Sefaniah fàidheadaireachd.*
2 *Smachdaichidh Dia sluagh Iudah air son am peacanna.*

FOCAL an Tighearn a thàinig gu Sefaniah mac Chusi, mhic Ghedaliah, mhic Amariah, mhic Hisciah, ann an làithibh Iosiah, mhic Amoin, rìgh Iudah.

2 Sgrìosaidd mise gu tur na h-uile nithe bhàrr aghaidh an fhearainn, deir an Tighearn.

3 Sgrìosaidd mi duine agus ainmhidh, sgrìosaidd mi eunlaith an athair, agus iasga na fairge, agus na cip-thuislidh maille ris na h-aingidh: agus gearraidd mi as an duine bhàrr aghaidh an fhearrainn, deir an Tighearn.

4 Sinidh mi fòs a mach mo làimh air Iudah, agus air uile luchd-àiteachaidh Ierusalem; agus gearraidd mi as fuigh-eall Bhaail o'n àite so; ainm an luchd-ìobraidh maille ris na sagairt;

5 Agus iadsan a ta 'g aoradh do fheachd nèimh air mhullach nan tighean; agus iadsan a ta 'g aoradh, agus a' miomnachadh air an Tighearn, agus fòs a' miomnachadh air Malcham;

6 Agus iadsan a phill air an ais o'n Tighearn; agus iadsan nach d'iarr an Tighearn, agus nach d'fhiosraich dheth.

7 Bithibh tosdach an làthair an Tighearn Iehobhah, oir tha là an Tighearna dlùth; oir dh'ulluich an Tighearn iobairt, ghairm e 'aoidhean.

8 Agus tarlaidh ann an là iobairt an Tighearna gu'n smachdaich mise na prionnsachan, agus clann nan rìghrean, agus na h-uile ta air an éideadh le culaidh choimhich.

9 Agus air an là cheudna smachdaichidh mi iadsan uile a ta leum air a' stairsnich, a ta lìonadh tighean am maighstirean le ainneart agus le ceilg.

10 Agus tarlaidh air an là sin, tha an Tighearn ag ràdh, gu'm bi fuaime éighich o gheata an éisg, agus ulartaich o'n dara

baile, agus bruanadh mòr o na cnocaibh.

11 Ard-ghuilbh, a luchd-àiteachaidh Mhacteis, oir tha 'n luchd-malairt gu h-iomlan air an gearradh as; tha uile luchd-giùlain an airgid air am milleadh.

12 Agus tarlaidh anns an àm sin, gu'n rannsaich mise Ierusalem le coinnlibh, agus smachdaichidh mi na daoine ta socair air an deasgainibh; a ta 'g ràdh 'nan cridhe, Cha dean an Tighearn maith, ni mò ni e olc.

13 Air an aobhar sin bithidh am maoin 'na chobhartach, agus an tighean 'nam fàsach: agus togaidh iad tighean, ach cha 'n àitich iad; agus suidhichidh iad fionliosan, ach cha 'n òl iad am fion.

14 Tha là mòr an Tighearna dlùth, *tha e dlùth*, agus a' deifreachadh gu mòr: tha guth là an Tighearna searbh: guilidh an sin an cumhachdach.

15 Is là feirge an là sin, là trioblaid agus teanntachd; là fàsalachd agus léir-sgrìos; là dorchadais agus ogluidheachd; là neul agus tiugh-dhorchadais;

16 Là trompaid agus iolaich an aghaidh nam bailtean daingnichte, agus an aghaidh nan tùr àrda.

17 Agus bheir mise airc air daoine, ionnus gu'n siubhail iad mar dhaill', a chiom gu'n do pheacaich iad an aghaidh an Tighearn; agus dòirtear a mach am fuil mar dhuslach, agus am feoil mar aolach.

18 Ni mò dh'fheudas an airgid no 'n òr an saoradh ann an là feirge an Tighearn; ach le teine 'eud-san loisgear am fearann uile: oir bheir e gu deimhin léir-sgrìos obann air uile luchd-àiteachaidh na tìre.

CAIB. II.

1 *Eorail chum aithreachais.* 4 *Breitheanas an aghaidh nam Philisteach,* 8 *Mhoib agus Amoin,* 12 *Etiopia, 13 agus Nìnebheh.*

CRUINNICHIBH sibh féin ri chéile, seadh cruinnichibh ri chéile, O fhineadh gun iarraidh:

dhoill.

2 Mu'n tig an t-ordugh gu buil, mu'n siubhail 'ur là seachad mar mholl; mu'n tig corruicil gharg an Tighearn oirbh, mu'n tig là feirge an Tighearn oirbh.

3 Iarraibh-sa an Tighearn, uile dhaoine ciùine na talmhainn, a dh'oibricha bhreith-eanas; iarraibh fireantachd, iarraibh mac-antachd: feudaidd e bhith gu'n tèamar sibhse ann an là feirge an Tighearn.

4 Gu dearbh tréigear Gasa, agus cuir-eas fâs Ascelon: fògraidh iad a mach Asdon air mheadhon-là; agus bithidh Ecron air a spionadh á freumh.

5 Mo thruaighe luchd-àiteachaidh sliosa na fairge, cinneach nan Cereteach: tha focal an Tighearn 'nur n-aghaidh. O Chanaain, a thir nam Philisteach, sgriosaidh mise thu, ionnus nach bi aon g' ad àiteachadh.

6 Agus bithidh taobh na fairge 'na bhothanaibh aig buachaillibh, agus 'na mhanraichibh aig treudan.

7 Agus bithidh an slios aig iarmad tighe Iudah; ionaltraidh iad air: ann an tigh-ibh Asceloin luidhidh iad sìos anns an anmoch: oir thig an Tighearn an Dia g' an amharc, agus bheir e air an ais am braighean.

8 Chuala mise masladh Mhoab, agus anacainnt cloinne Amoin, leis an d'rinn iad mo shluagh-sa mhoalachadh, agus iad féin a mheudachadh an aghaidh an crìoch-an.

9 Air an aobhar sin mar is beò mise, tha Tighearn nan sluagh, Dia Israeil, ag ràdh; gu deimhin bithidh Moab mar Shodom, agus clann Amoin mar Ghomorah, 'na fhàsach ionntagach, agus 'na phuill shal-ainn, agus 'na léir-sgrios siorruidh; ni fuigheall mo shluaigh-sa an creachadh, agus iarmad mo chinnich an sealbhach-adh.

10 So gheibh iad air son an uabhair, a chionn gu'n d'thug iad masladh, agus gu'n do mheudaich siad iad féin an aghaidh cinnich Tighearna nan sluagh.

11 Bithidh an Tighearn uamhasach 'nan aghaidh: oir bheir e gort air uile dliath-aibh na talmhainn; agus bheir iad aoradh dha-san, gach aon o' àite féin, eadhon uile eileana nan cinneach.

12 Sibhse, Etiopacha, mar an ceudna, marbhar sibh féin leis a' chlaidheamh.

13 Agus sinidh e mach a làmh an aghaidh na h-àirde tuath, agus sgriosaidh e Asiria; agus ni e Ninebheh 'na làraich luim, tioram mar an fhàsach.

14 Agus luidhidh treudan sìos 'na meadhon, uile bheathaiche na talmhainn: gabhaidh am pelican agus a' ghràineag tàmh 'na h-àrd-dhoruis: bithidh am fuaim 'na h-uinneagaibh: bithidh fàsalachd anns an sgàth-thigh: oir leigidh e ris a h-obair sheudair.

15 So a' chaithir luaghaireach a ghabh còmhnuidh gu tèaruinte; a thubhairt 'na cridhe, Tha mi, agus cha'n 'eil ann ach mi. Cionnus a dh'fhàs i 'na fàsach, 'na h-àite air son bheathaichean gu luidhe sìos ann! sgeigidh gach aon a theid seachad oirre, agus crathaidh e a làmh.

CAIB. III.

1 Thugadh geur-achmhasan do na h-Iudhaich air son am peacanna. 8 Eavail gu feitheamh air an Tighearna, 14 agus gu gàird-eachas a dheanamh 'na shlàinte.

IS an-aibhin dh'ise a ta ceannairceach agus truailte, do'n chaithir a ta ri sàr-uchadh.

2 Cha d'thug i géill do'n ghuth; cha do ghabh i cronachadh: cha d'earb i as an Tighearn: cha do tharruinn i dlùth d'a Dia.

3 Tha a prionnsachan an taobh a stigh dhi 'nan leomhain bheucach; is madaidh-alluidh an anmoch am breitheamhna, cha'n fheith iad gus a' mhaduinn gun na cnàmhan' itheadh.

4 Is daoine eutrom fealltach a fàidhean: thruaill a sagairt an t-ionad naomh: bhris iad an reachd.

5 Tha an Tighearn cothromach 'na meadhon: cha dean esan euceart: gach maduinn bheir e breitheanas gu solus, cha'n fhàilnich e; ach cha'n 'eil eòlas aig an eucorach air nàire.

6 Ghearr mi as na cinnich: tha an tùir uaigneach; rinn mi fâs an sràidean, air chor as nach 'eil aon 'gan imeachd: tha am bailtean air an sgrios, gun duine sam bith *annta*, gun aon neach 'gan àiteachadh.

7 Thubhairt mi, Gu deimhin bithidh m' eagal ort, gabhaidh tu teagasg: mar sin cha bhiodh an àite-còmhnuidh air a ghearradh as, cionnus air bith a smachd-aichinn iad: ach dh'érich iad gu moch, agus thruaill iad an uile dheanadas.

8 Uime sin feithibh-sa riumsa, tha an Tighearn ag ràdh, gus an là san érich mi suas a chum na creiche: oir is e mo rùn na cinuich a chruinneachadh, na rioghachdan a tharruing ri chéile; a dhòrtadh orra mo chorruidh, uile theas m' fheirge: oir loisgear an talamh gu h-iomlan le teine m' eud-sa.

9 Gu deimhin pillidh mi 'n sin air na slòigh teangadh ghlan, gu gairm gu léir air ainm an Tighearna, gu seirbhis a dheanamh dha le aon rùn.

10 O thaobh thall aimhnichean Etiopia, bheir mo luchd-atheuinge, am measg mo mhuinntir sgapta, tabhartas a m' ionnsuidh.

11 Anns an là sin cha nàraichear thu air son t' uile dheanadais, leis an do

chiontaich thu ann am aghaidh-sa ; oir an sin bheir mi air falbh as do mheadhlon iadsan a ta ri gàirdeachas ann ad uabhar ; agus cha'n àrdaich thu ni's mò thu féin ann am shliabh naomh-sa.

12 Fàgaidh mi fòs ann ad mheadhlon sluagh an-shocrach agus diblidh ; agus cuiridh iad an dòchas ann an ainm an Tighearna.

13 Cha dean iarmad Israeil aingidheachd, ni mò labhras iad breugan : ni mò gheibhear teagadh chealgach nam beul. Oir ionaltraidh agus luidhidh iad sìos, agus cha chuir aon neach eagal orra.

14 Seinn, O nighean Shioin ; tog iolach, O Israeil ; bi ait, agus dean gàirdeachas le t'uile chridhe, O nighean Ierusalem.

15 Thug an Tighearn air falbh do breitheanais ; phill Rìgh Israeil air falbh do naimhdean : tha 'n Tighearn ann ad mheadhon ; cha 'n fhaic thu olc ni's mò.

16 Anus an là sin theirear ri Ierusalem,

Na biodh eagal ort ; agus ri Sion, Na biodh do làmh lag.

17 Tha 'n Tighearna Dia ann ad mheadhon cumhachdach ; ni e do thèarnadh ; ni e gàirdeachas os do cheann le luaghair ; gabhaidh e fois 'na ghràdh ; ni e gàirdeachas os do cheann le seinn.

18 Cruinnichidh mi iadsan a'd mheasg a ta ri caoidh air son an àrd-choimhthionail, do'n robh a mhasladh 'na eallaich.

19 Feuch, millidh mise t' uile luchd-sàruchaidh anns an àm sin ; agus leighidh mi ise ta bacach, agus cruinnichidh mi ise bha sgaoilte ; agus gheibh mi dhoibh cliù agus deadh iomradh anns gach aon tìr anns an d'fhuair iad nàire.

20 Anus an àm sin bheir mi air bhuir n-ais sibh ; agus anns an àm san cruinnichidh mi sibh, bheir mi gun amharus dhuibh ainm agus cliù am measg uile chinneach na talmhainn, an uair a philleas mi air a h-ais 'ur bruid fa chomhair an sùl-san, deir an Tighearn.

HAGAI.

CAIB. I.

1 Chronuich am fàidh an sluagh do bhrìgh gu'n do ghabh iad còmhnuidh ann an tighibh maiseach, 'nuair bha tigh Dhè 'na fhàsach ; 8 agus bhrosnuich e iad gus an teampull a thogail.

Ann an dara bliadhna Dhariuis an rìgh, anns an t-seathamh mìos, air a' cheud là do'n mhìos, thàinig focal an Tighearna le Hagai am fàidh gu Serubabel mac Shealtiel, uachdaran Iudah, agus gu Iosuah mac Iosedèich, an t-àrd shagart, ag ràdh ;

2 Mar so labhair Tighearn nan sluagh, ag ràdh, Thubhairt an sluagh so, Cha d' thàinig an t-àm gu tigh an Tighearn a thogail.

3 An sin thàinig focal an Tighearna le Hagai am fàidh, ag ràdh,

4 An àm dhuibh-sa, O sibhse, còmhnuidh a ghabhail 'nur tighibh maiseach, agus an tigh so 'na fhàsach ?

5 A nis ma ta, mar so tha Tighearn nan sluagh ag ràdh, Thugaibh fa'near bhuir sligheanna.

6 Chuir sibh mòran, agus is beag a thug sibh a steach ; tha sibh ag itheadh, ach cha'n 'eil gu leòr agaibh : tha sibh ag òl, ach cha'n 'eil sibh sàthach : tha sibh 'gur n-èideadh, ach cha'n 'eil aon neach blàth : agus esan a tha cosnadh tuarasdail, tha e 'ga chosnadh gu 'chur ann an sporan tolltach.

7 Mar so tha Tighearn nan sluagh ag ràdh, Thugaibh fa'near bhuir sligheanna.

8 Rachaibh suas a chum an t-sléibh, agus thugaibh leibh fiodh, agus togaibh an tigh ; agus gabhaidh mise tlachd ann, agus bithidh mi air mo ghlòrachadh, deir an Tighearn.

9 Bha sùil agaibh ri mòran, agus, feuch, thàinig e gu beagan ; agus an uair a thug sibh dhachaidh e, shéid mise air. C'ar son ? tha Tighearn nan sluagh ag ràdh. Air son mo thighe ta fàs, agus sibhse a' ruith gach duine g'a thigh féin.

10 Air an aobhar sin chum ua nèamha os 'ur ceann air ais an drùchd, agus ghléidh an talamh a thoradh.

11 Agus ghairm mise tart air an fhearann, agus air na sléibhteann, agus air an arbhar, agus air an fhion nuadh, agus air an oladh ; agus air gach ni bheir an talamh a mach : agus air duine, agus air ainmhidh ; agus air uile shaothair nan làmh.

12 An sin thug Serubabel mac Shealtiel, agus Iosuah mac Iosedèich, an t-àrd-shagart, leis a' chuid eile do'n t-sluagh uile, géill do ghuth an Tighearn an Dia, agus do bhriathraibh Hagai an fhàidh, (mar a chuir an Tighearn an Dia fios leis,) agus bha eagal air an t-sluagh roimh an Tighearn.

13 An sin labhair Hagai teachdair an Tighearn, ann an teachdaireachd an Tighearna, ris an t-sluagh, ag ràdh Tha mise leibh, deir an Tighearn.

14 Agus dhùisg an Tighearn spiorad Sherubabeil mhic Shealtiel, uachdaran

Iudah, agus spiorad Iosuah mhic Iosed-eich, an àrd-shagairt, agus spiorad na cuid eile do'n t-sluagh uile; agus thàinig iad, agus rinn iad obair ann an tigh Tighearna nan sluagh, an Dia,

15 Air a' cheathramh là fichead do'n t-seathamh mìos, ann an dara bliadhna Dhariuis an rìgh.

CAIB. II.

1 *Dh'innis Hagai gu'm bitheadh glòir an dara teampull nì's mò na glòir a' cheud teampull.*
10 *Chuir peacanna an t-sluaigh maille air an obair.*

ANNS an t-seachdamh mìos, air an aon là fichead do'n mhios, thàinig focal an Tighearna leis an fhàidh Hagai, ag ràdh;

2 Labhair a nis ri Serubabel mac Shealtiel, uachdaran Iudah, agus ri Iosuah mac Iosed-eich an t-àrd-shagart; agus ris a' chuid eile do'n t-sluagh, ag ràdh,

3 Cò a ta air 'fhàgail 'nur measg a chunnaic an tigh so 'na cheud ghloir? agus cionnus a tha sibh 'ga fhaicinn a nis? nach 'eil e 'nur sùilbh, làimh ri sin, mar neo-ni?

4 Gidheadh a nis bi làidir, O Sherubabel, tha an Tighearn ag ràdh; agus bi làidir, O Iosuah, mhic Iosed-eich, an t-àrd-shagart; agus bithibh-sa làidir, uile shluagh an fhearainn, tha an Tighearn ag ràdh; agus deanaibh obair: oir tha mise leibh, deir Tighearn nan sluagh.

5 *A réir* an fhocail a dhaingnich mi ruibh 'nuair a thàinig sibh a mach as an Eiphit, mar sin tha mo spiorad a' fantuinn 'nur measg: na biodh eagal oirbh.

6 Oir mar so tha Tighearn nan sluagh ag ràdh; Fathasd aon uair, ann an ùine bhig, crathaidh mise na nèamhan, agus an talamh, agus an fhaire, agus am fearann tioram:

7 Agus crathaidh mi na h-uile chinnich, agus thig miann nan uile chinneach; agus lìonaidh mi an tigh so le glòir, deir Tighearn nan sluagh.

8 Is leam-sa an t-airgiod, agus is leam-sa an t-òr, deir Tighearn nan sluagh.

9 Bithidh glòir an tìghe dheireannaich so nì's mò na glòir a' cheud thighe, tha Tighearn nan sluagh ag ràdh; agus anns an àite so bheir mise sìth, deir Tighearn nan sluagh.

10 Air a' cheathramh là fichead do'n naothamh mìos, ann an dara bliadhna Dhariuis, thàinig focal an Tighearna, le Hagai ann fàidh, ag ràdh;

11 Mar so tha Tighearn nan sluagh ag ràdh, Feòraich a nis do na sagartaibh mu'n reachd, ag ràdh,

12 Ma ghiùlaineas aon feoil naomh ann an sgiobul a thrusgain, agus gu'm bean

a thrusgan ri aran, no brochan, no fion, no oladh, no biadh sam bith, am bi sin naomh? Agus fhreagair na sagairt, agus thubhairt iad, Cha bhi.

13 An sin thubhairt Hagai, Ma bheanas aon a ta neòghlan le corp marbh ri aon air bith do na nithe so, am bi sin neòghlan? Agus fhreagair na sagairt, agus thubhairt iad, Bithidh e neòghlan.

14 An sin fhreagair Hagai agus thubhairt e, Is amhuil a bha an sluagh so, agus is amhuil a bha an cinneach so ann am làth-air-sa, tha an Tighearn ag ràdh: agus is amhuil a bha uile obair an làmh; agus an tabhartas a thug iad seachad an sin bha e neòghlan.

15 Agus a nis guidheam oirbh, thugaibh fa'near: o'n là 'n diugh, agus o sin suas, mu'n do leagadh clach air cloich ann an teampull an Tighearna:

16 'Nuair a thàinig aon gu cruaich 'fhichead *tomhas*, cha robh ann ach deich: 'nuair a thàinig aon gu amar-bruthaidh an fhiona, gu leth-cheud *soitheach* a tharruing a mach as an amar, cha robh ann ach fichead.

17 Bhuail mi sibh le seargadh, agus le fuar-dhealt, agus le cloich-mheallain, ann an uile shaothair bhur làmh; gidheadh cha do phill sibh riumsa, deir an Tighearn.

18 Thugaibh fa'near a nis o'n là 'n diugh, agus o sin suas, o'n cheathramh là fichead do'n naothamh mìos, agus o'n là san do leagadh bunaite teampull an Tighearna: thugaibh fa'near.

19 Am bheil siol fathasd anns an t-sabhal? seadh gu ruige so, cha d'thug am fionain, no a' chraobh-fhige, no a' phomgranat, no an crann-oladh, seachlad toradh. *Ach* o'n là so mach beannaichidh mise.

20 Agus thàinig focal an Tighearn a ris gu Hagai, air a' cheathramh là fichead do'n mhios, ag ràdh;

21 Labhair ri Serubabel uachdaran Iudah, ag ràdh, Crathaidh mise na nèamhan, agus an talamh;

22 Agus tilgidh mi caithir ròghachdan bun os ceann, agus sgriosaidh mi neart ròghachdan nan cinneach; agus tilgidh mi bun os ceann na carbaid, agus iadsan a ta marcachd orra, agus tuitidh na h-eich agus am marcaichean sìos, gach aon le claidheamh a bhràthar.

23 Anns an là sin, tha Tighearn nan sluagh ag ràdh, gabhaidh mi thusa, O Sherubabel, a mhic Shealtiel, m' òglaich, tha an Tighearn ag ràdh, agus ni mi thu mar sheula; oir roghnaich mise thu, deir Tighearn nan sluagh.

SECHARIAH.

CAIB. I.

1 *Dh'earalaich Sechariah an sluagh gu aithreachas a ghabhail. 7 Taisbean nan each ruadha, bhreaca, agus bhàna. 12 Geallanna tròcaireach a thaobh Ierusalem. 18 Taisbean nan ceithir adhaircean. 20 Na ceithir fir-cheirde.*

ANNS an ochdamh mìos, ann an dara bliadhna Dhariuis, thàinig focal an Tighearna gu Sechariah mac Bharachiah, mhic Ido, am fàidh, ag ràdh,

2 Bha corruich ro mhòr air an Tighearn ri bhur n-aithrichibh:

3 Agus abair thusa riu, Mar so tha Tighearna nan sluagh ag ràdh, Pillibh-sa riumsa, tha Tighearn nan sluagh ag ràdh; agus pillidh mise ruibh-se, deir Tighearn nan sluagh.

4 Na bithibh mar bhur n-aithrichean, ris an do ghlaodh na fàidhean a bh'ann roimhe so, ag ràdh; Mar so tha Tighearn nan sluagh ag ràdh; Pillibh-sa nis o bhur droch shlighibh, agus o bhur droch dheanadais. Ach cha d' éisd iad, ni mò thug iad aire dhomh-sa, deir an Tighearn.

5 'Ur n-aithrichean, c'ait am bheil iad? agus na fàidhean, am mair iad beò am feasd?

6 Ach mo bhriathran-sa, agus mo reachdan, a dh'àithn mi do m' òglaich na fàidhean, nach d'rinn iad greim air bhur n-aithrichean? agus nach d' thubhairt iad, Amhuil mar a shaoil Tighearn nan sluagh a dheanamh ruinne, a réir ar slighean, agus a réir ar deanadais mar sin rinn e ruinn.

7 Air a' cheathramh là fichead do'n aon mhìos deug, (sin am mìos Sebat,) ann an dara bliadhna Dhariuis, thàinig focal an Tighearna gu Sechariah, mac Bharachiah, mhic Ido, am fàidh, ag ràdh;

8 Chunnaic mi san oidheche, agus feuch duine a' marcachd air each ruadh, agus sheas e measg nan craobha-miortail a bha sa' ghleann, agus air a chùlaobh bha eich ruadha, bhreaca, agus bhàna.

9 An sin thubhairt mi, Ciod iad so, O mo Tighearn? Agus thubhairt an t-aingeal a labhair rium Feuchaidh mise dhuit ciod iad so.

10 Agus fhreagair am fear a bha 'na sheasamh ann measg nan craobha-miortail, agus thubhairt e, So iadsan a chuir an Tighearn gu siubhal sìos agus suas air feadh na talmhainn.

11 Agus fhreagair iad aingeal an Tighearn, a sheas ann measg nan craobha-miortail, agus thubhairt iad, Shiubhail sinne nìos agus sìos air feadh na tal-

mhainn; agus, fench, tha an talamh uile 'na thàmh, agus a' gabhail fois.

12 An sin fhreagair aingeal an Tighearn, agus thubhairt e; O Thighearn nan sluagh, cia fhad a bhios tu gun tròcair a dheanamh air Ierusalem, agus air bailtibh Iudah, ris am bheil thu ann an corruich a nis deich agus tri fichead bliadhna?

13 Agus fhreagair an Tighearn an t-aingeal a labhair rium-sa, le briathraibh maithe, le briathraibh sòlasach.

14 Mar sin thubhairt an t-aingeal a bha labhairt rium, Glaodh thusa, ag ràdh, Mar so tha Tighearn nan sluagh ag ràdh, Tha mise eudmhor air son Ierusalem, agus air son Shìoin le eud mòr:

15 Agus tha mi ann an corruich ro mhòir ris na cinnich a ta suaimhneach; oir cha robh orm-sa ach corruich bheag, agus chuidich iadsan air a h-ghaidh an dòrainn.

16 Air an aobhar sin mar so tha an Tighearn ag ràdh; Phill mi ri Ierusalem le tròcairibh: bithidh mo thigh air a thogail ann, tha Tighearn nan sluagh ag ràdh, agus bithidh sreang-thomhais air a sgaoileadh a mach air Ierusalem.

17 Glaodh fathasd, ag ràdh, Mar so tha Tighearn nan sluagh ag ràdh, Bithidh mo bhailtean-sa fathasd air an sgaoileadh a mach le soirbheachadh, agus bheir an Tighearn fathasd comhfhurtachd do Shìoin, agus ròghnaichidh e fathasd Ierusalem.

18 An sin thog mi suas mo shùilean, agus chunnaic mi; agus feuch ceithir adhaircean.

19 Agus thubhairt mi ris an aingeal a bha labhairt rium, Ciod iad so? Agus fhreagair esan mi, Is iad so na h-adhaircean a sgap Iudah, Israel, agus Ierusalem.

20 Agus dh'fheuch an Tighearna dhomh ceithir fir-cheirde.

21 An sin thubhairt mi, Ciod a thàinig iad so gu dheanamh? Agus labhair esan, ag ràdh; Is iad so na h-adhaircean a sgap Iudah, ionnus nach do thog aon duine suas a cheann: ach thàinig iad so chum eagal a chur orra, a thilgeadh a mach adhaircean nan cinneach a thog suas an adharc an aghaidh fearainn Iudah, chum a sgapadh.

CAIB. II.

1 *Chuir eadh aingeal a thomhas Ierusalem. 6 Thugadh rabhadh do'n t-sluagh Babilon a thrèigsinn. 10 Gheall Dia comhnuidh a ghabhail ann meadhan a shluagh.*

THOG mi suas mo shùilean a ris, agus dh'amhairc mi; agus, feuch, fear le sreing-thomhais 'na làimh.

2 An sin thubhairt mise, C'ait am bheil thu dol? Agus thubhairt e rium, A thomhas Ierusalem, a dh'fheuchainn ciod e a leud, agus ciod e a fad.

3 Agus, feuch, chaidh an t-aingeal a labhair rium a mach, agus chaidh aingeal eile mach 'na chòdhail.

4 Agus thubhairt e ris, Ruith, labhair ris an òganach sin, ag ràdh; Bithidh Ierusalem air a h-àiteachadh mar bhaitean gun bhallachan, le lìonmoireachd nan daoine agus na spréidhe bhios innte.

5 Oir bithidh mise, tha an Tighearn ag ràdh, ann am bhalla teine dhi mu'n cuairt, agus bithidh mi ann am ghloir 'na meadhon.

6 Ho! ho! *thigibh* agus teichibh o'n tìr mu thuath, tha an Tighearn ag ràdh; oir ri ceithir ghaiothaibh an athair sgaoil mise sibh a mach, deir an Tighearn.

7 Ho! a Shìoin, tàr as, O thusa ta chòmhnuidh maille ri nighinn Bhabiloin.

8 Oir mar so tha Tighearn nan sluagh ag ràdh; An déigh na glòire so chuir e mise chum nan cinneach a chreach sibhse; oir an tì bheanas ruibh-se, beanaidh e ri cloich a shùla-san.

9 Oir feuch, crathaidh mise mo làmh orra, agus bithidh iad 'nan cobharthaich d' an tràillibh: agus aithnichidh sibhse gu'n do chuir Tighearn nan sluagh fios leam-sa.

10 Seinn, agus dean gàirdeachas, O nigh-ean Shìoin; oir feuch, tha mise a' teachd, agus gabhaidh mi còmhnuidh ann ad mheadhon, deir an Tighearn.

11 Agus bithidh mòran chinneach air an cur ris an Tighearn san là sin, agus bithidh iad 'nan sluagh dhomh-sa: agus gabhaidh mise còmhnuidh ann ad mheadhon; agus bithidh fios agad gu'n do chuir Tighearn nan sluagh mise a d' ionnsuidh.

12 Agus sealbhaichidh an Tighearn Iudah, a chuibhrionn, anns an fhearann naomh; agus ròghnaichidh e Ierusalem a ris.

13 Bi tosdach, O uile fheoil, an làthair an Tighearna: oir tha e air a thogail suas o' ionad-còmhnuidh naomh.

CAIB. III.

1 *Le samhladh culaidh mhaisich leis an d' éidichear Iosuah an t-àrd-shagart, 8 chuireadh an céill teachd Chrìosd a thoirt air falbh aingidheachd.*

AGUS thaisbein e dhomh Iosuah an t-àrd-shagart, 'na sheasamh an làthair aingeil an Tighearn; agus Satan 'na sheasamh aig a làimh dheis, gu cur 'na aghaidh.

2 Agus thubhairt an Tighearn ri Satan, Gu'n deanadh an Tighearn do chronachadh, O Shatain; gu'n deanadh eadhon an Tighearn a ròghnaich Ierusalem, do chronachadh: nach aithinne e so, air a spionadh as an teine?

3 A nis bha Iosuah air 'éideadh le eud-

ach salach, agus sheas e an làthair an aingeil.

4 Agus fhreagair esan, agus labhair e riu-san a sheas 'na làthair, ag ràdh, Thugaibh dheth an t-eudach salach. Agus ris-san thubhairt e, Feuch, thug mi air t' aingidheachd imeachd uait, agus éididh mi thu le culaidh mhaisich.

5 Agus thubhairt e, Cuireadh iad ceann-eudach maiseach air a cheann: agus chuir iad ceann-eudach maiseach air a cheann, agus dh'éid iad e le falluinnibh; agus sheas aingeal an Tighearna leo.

6 Agus dhearbhb aingeal an Tighearna do Iosuah, ag ràdh,

7 Mar so tha Tighearn nan sluagh ag ràdh, Ma ghluaiseas tu ann am shligibh-sa, agus ma choimhideas tu mo reachd; an sin bheir thu mar an ceudna breth air mo thigh, agus gléidhidh tu fòs mo chùirtean; agus bheir mi dhuit àiteacha coiseachd an measg na muinntir so 'nan seasamh leat.

8 Eisd a nis, O Iosuah, àrd-shagairt, thu féin agus do chompanaich a ta 'nan suidhe a'd' làthair: oir is daoine tha 'nan samhladh iad: oir feuch, bheir mise mach m'òglach, Am MEANGAN.

9 Oir feuch, a' chlach a leag mise fa chomhair Iosuah: air aon chloich tha seachd sùilean. Feuch gearraidh mise a gearradh, tha Tighearn nan sluagh ag ràdh, agus atharraichidh mi aingidheachd an fhearainn so ann an aon là.

10 Anns an là sin, tha Tighearn nan sluagh ag ràdh, gairmidh sibh gach fear a choimhearsnach fo 'n fhionain, agus fo'n chrann fhìge.

CAIB. IV.

1 *Leis a' choimleir a bha uile do òr, nochdadh soirbheas stéidh an teampull; 14 agus le dà chrann-oladh shamhuichear an diùths ungt a sheas làimh ris an Tighearna.*

AGUS thàinig an t-aingeal a labhair rium a ris, agus dhùisg e mi, mar dhuine air a dhùsgadh as a chodal.

2 Agus thubhairt e rium, Ciod a tha thu faicinn? Agus thubhairt mise, Dh'amhairc mi, agus, feuch, coinnleir uile do òr, le 'chopan air a mhullach, agus a sheachd lòchrain air, agus seachd feadain gus na seachd lòchrain a ta air a mhullach.

3 Agus dà chrann-oladh làimh ris, aon air taobh deas a' chopain, agus aon air a thaobh chl.

4 An sin fhreagair mi, agus labhair mi ris an aingeal a bha ri còmhradh rium, ag ràdh, Ciod iad so, mo thighearn?

5 Agus fhreagair an t-aingeal a bha labhairt rium, agus thubhairt e rium, Nach 'eil fios agad ciod iad so? Agus thubhairt mise, Cha'n 'eil, mo thighearn.

6 An sin fhreagair e agus labhair e rium, ag ràdh, Is e so focal an Tighearna

ri Serubabel, ag ràdh, Cha'n ann le neart, no le cumhachd, ach le m' spioradas, deir Tighearn nan sluagh.

7 Cò thusa, O shlèibh mhòir? Roimh Sherubabel *fàsaidh tu a'd' chòmhnard*; agus bheir e mach a' chlach-chiunn le h-ìolach, *a glaothach*, Gràs, gràs gu robh dhi.

8 Os bàrr, thàinig focal an Tighearn a m' ionnsuidh-sa, ag ràdh;

9 Leag làmhnan Sherubabel stéidh an tighe so; ni a làmhnan fòs a chrìochnachadh: agus bithidh fios agaibh gu'n do chuir Tighearn nan sluagh mise do bhur n-ionnsuidh.

10 Oir cò rinn dimeas air là nan nithe beaga? ni eadhon iadsan gàirdeachas, agus chiiad an t-sreang-thomhais an làimh Sherubabel. Is iad an t-seachdnar so sùilean an Tighearna; tha iad a' ruith sìos agus suas air feadh na talmhainn uile.

11 An sin fhreagair mise, agus thubhairt mi ris, Ciod iad an dà chrann-oladh so air *taobh* deas a' choinnleir, agus air a *thaobh* clì?

12 Agus fhreagair mi a rìs, agus thubhairt mi ris, Ciod iad dà ghéig nan crann-oladh, a ta làimh ris an dà fheadan òir a' taomadh na h-oladh asda féin?

13 Agus fhreagair e mi, agus thubhairt e, Nach 'eil fios agad ciod iad so? Agus thubhairt mise, Cha'n 'eil, mo thighearn.

14 An sin thubhairt esan, Is iad so an dìthis ungta ta 'nan seasamh làimh ri Tighearn na talmhainn uile.

CAIB. V.

1 *Le sàmhladh ròla ag itealaich nochdadh mallachd an t-sluaigh a ghoideas, agus a mhionnaicheas gu breugach air ainm an Tighearna. 5 Le sàmhladh mna' na suidhe ann an ephah chuireadh an cèill aingidheachd na tìre.*

AGUS thog mi suas mo shùilean a rìs agus dh'amhairc mi, agus, feuch, ròla ag itealaich.

2 Agus thubhairt esan rium, Ciod a tha thu faicinn? Agus fhreagair mise, tha mi faicinn ròla ag itealaich, fìthead làmh-choille air fad, agus deich làmh-choille air leud.

3 An sin thubhairt e rium, Is e so am mallachd a ta dol a mach air aghaidh an fhearainn uile: agus gearrar as gach aon a ghoideas, mar air an taobh so dheth: agus gearrar as gach aon a mhionnaicheas, mar air an taobh sin deth.

4 Thug mise mach e, tha Tighearn nan sluagh ag ràdh, agus théid e steach do thigh a' mheirlich, agus do thigh an ti a ta mionnachadh gu breugach air m' ainm-sa; agus fanaidh e ann am meadhon a thighe, agus sgriosaidh e, eadar fhiodh agus chloich e.

5 An sin chaidh an t-aingeal a labhair rium a mach, agus thubhairt e rium, Tog suas a nis do shùilean, agus faic ciod so tha dol a mach.

6 Agus thubhairt mise, Ciod e? Agus thubhairt esan, So Ephah a ta dol a mach. Agus thubhairt e, Is i so an samhladh anns an fhearann uile.

7 Agus, feuch, bha tàlann luaidhe air a thogail suas: agus, feuch, bean 'na suidhe ann am meadhon na h-ephah.

8 Agus thubhairt e, Is i so Aingidheachd: agus thilg e i ann am meadhon na h-ephah; agus chuir e'n cothrom luaidhe air a beul.

9 An sin thog mi suas mo shùilean, agus dh'amhairc mi; agus, feuch, thàinig a mach dà mhnaoi, agus a' ghaoth 'nan sgiathaibh; (oir bha sgiathan aca mar sgiathan corra-glaise;) agus thog iad an ephah suas eadar an talamh agus na nèamha.

10 An sin thubhairt mise ris an aingeal a labhair rium, C'ait am bheil iad so a' giùlan na h-ephah?

11 Agus thubhairt e rium, A thogail tighe dhi ann an tìr Shùinair; agus bithidh i air a daingneachadh, agus air a suidheachadh an sin air a bonn.

CAIB. VI.

1 *Taisbean nan ceithir charbad a thàinig a mach o eadar dhà shliabh. 9 Le sàmhladh cruin òir a chuireadh air ceann Iosuah nochdadh òirdheirceas rioghachd Chrìosa.*

AGUS a ris thog mi suas mo shùilean, agus dh'amhairc mi; agus, feuch, thàinig ceithir carbaid a mach o eadar dhà shliabh; agus bu shlèibhteann umha na slèibhteann.

2 Rìs a' cheud charbad bha eich ruadha, agus ris an dara carbad eich dhubha,

3 Agus ris an treas carbad eich gheala, agus ris a' cheathramh carbad eich bhalla-dhearg.

4 An sin fhreagair mi, agus thubhairt mi ris an aingeal a bha labhairt rium, Ciod iad so, mo thighearn?

5 Agus fhreagair an t-aingeal, agus thubhairt e rium, Is iad so ceithir spiorada nan nèamha, a ta dol a mach o bhi 'nan seasamh an làhair Tighearna na talmhainn uile.

6 Théid na h-eich dhubha a ta ann a mach do'n tìr mu thuath, agus théid na h-eich gheala mach 'nan dèigh; agus théid na h-eich bhalla-dhearg a mach ris an tìr mu dheas.

7 Agus chaidh na h-eich bhalla-dhearg a mach, agus thairg iad imeachd a chum gu'n sìubhladh iad sìos agus suas air feadh na talmhainn: Agus thubhairt e, Falbhaibh, imichibh sìos agus suas air feadh na talmhainn. Is amhuil a dh'imich iad sìos agus suas air feadh na talmhainn.

SECHARIAH, VI. VII. VIII.

8 An sin ghairm e orm, agus labhair e rium, ag ràdh; Feuch, iad so a ta 'g im-eachd gus an tìr mu thuath, chùinich iad mo spiorad anns an tìr mu thuath.

9 Agus thàinig focal an Tighearn a m' ionnsuidh, ag ràdh;

10 Gabh dhiubh-san a ta do'n bhruid, do *theaghlach* Heldai, agus Thobiah, agus Iedaiah; agus falbhaidh tu air an là cheudna, agus thèid thu steach do thigh Iosiah mhic Shephaniah, a phill o Bhabylon.

11 Agus gabhaidh tu airgid agus òr, agus ni thu crùn, agus cuiridh tu e air ceann Iosuah, mhic Iosedeich, an àrd-shagairt;

12 Agus labhraidh tu ris, ag ràdh; Mar so labhair Tighearn nan sluagh, ag ràdh; Feuch an duine do'n ainm Am MEANGAN; agus fàsaidh e mios as 'àite, agus togaidh e teampull an Tighearna.

13 Togaidh eadhon esan teampull an Tighearn, agus gheibh e glòir, agus suidhidh e, agus riaghlaidh e air a rìgh-chaithir; agus bithidh e 'na shagart air a rìgh-chaithir; agus bithidh comhairle na sìthe eatorra aron,

14 Agus bithidh crùn aig Helem, agus aig Tobiah, agus aig Iedaiah, agus aig Hen nac Shephaniah, mar chumhneach-an ann an teampull an Tighearn.

15 Agus thig iadsan a ta fad as, agus togaidh iad ann an teampull an Tighearn; agus bithidh fios agaibh gu'n do chuir Tighearn nan sluagh mise do bhuir n-ionnsuidh. Agus thig so gu crìch, ma bheir sibh gèill gu cùramach do ghuth an Tighearn 'ur Dia.

CAIB. VII.

1 Nochd Dia do'n t-sluagh gu'n do thraisg iad gu dìomhain do bhrìgh nach do thraisg iad air a shon-sa. 4 Chronuich Sechariah iad air son an cealgairachd, 6 agus chomhairlich e dhoibh aithreachas a ghabhail.

AGUS tharladh ann an ceathramh bliadhna Dhariuis, gu'n d'thàinig focal an Tighearna gu Sechariah, air a cheathramh là do'n naothamh mìos, eadhon Chisleu.

2 ('Nuair a chuir iad gu tigh Dhé, Sersar agus Regemelech, agus an daoine, a dh'fhiosrachadh an làthair an Tighearn;

3 A labhairt ris na sagairt a bha an tigh Tighearna nan sluagh, agus ris na faidhean, ag ràdh; An dean mi gul anns a' chùigeamh mìos, 'gam dhealachadh féin, mar a rinn mi an iomadh bliadhna so?)

4 An sin thàinig focal Tighearna nan sluagh a m' ionnsuidh-sa, ag ràdh;

5 Labhair ri uile shluagh an fhearainn, agus ris na sagairt, ag ràdh; 'Nuair a thraisg agus a ghuil sibh anns a' chùigeamh agus anns an t-seachdamh mìos, eadhon na deich agus trì fichead bliadhna

so, an do thraisg sibh idir air mo shon-sa, eadhon air mo shon-sa?

6 Agus an uair a dh'ith sibh, agus 'nuair a dh'òl sibh, nach d'ith sibh *air bhuir son féin*, agus nach d'òl sibh *air bhuir son féin*?

7 Nach iad so na briathran a dh'éigh an Tighearn leis na ceud fhàidhibh, 'nuair bha Ierusalem air a h-àiteachadh, agus a' soirbheachadh, agus a bailtean mu'n cuairt di; agus an taobh deas agus an còmharnad air an àiteachadh?

8 An sin thàinig focal an Tighearna gu Sechariah, ag ràdh;

9 Mar so labhair Tighearn nan sluagh, ag ràdh; Cuiribh angniomh ceart-bhreith-eanas, agus nochdaibh trócair agus iochd gach duine d'a bhràthair;

10 Agus na sàruichibh a' bhantrach, no an dilleachdan, an coigreach, no am bochd; agus na smuainicheadh neach air bith agaibh 'nur cridhe, olc an aghaidh a bhràthar.

11 Ach dhiùlt iadsan éisdeachd, agus tharruing iad a' ghualadh o'n chuing, agus dhruid iad an cluasan, a chum nach cluinneadh iad.

12 Seadh, rinn iad an cridheachan mar chloich adamaint, mu'n cluinneadh iad an lagh, agus na briathran a chuir Tighearna nan sluagh le a Spiorad, leis na fàidhean roimhe so: air an aobhar sin, thàinig corr-uich mhòr o Thighearn nan sluagh.

13 Agus thachair, amhuil a ghlaodh mise, agus nach d'éisd iadsan; mar sin ghlaodh iadsan, agus cha d'éisd inise, deir Tighearn nan sluagh.

14 Ach sgap mi iad le cuairt-ghaoith, am measg nan uile chinneach nach b'aithne dhoibh; agus bha am fearann fàs 'nan déigh, air chor as nach do shiubhail neach air bith troimhe', air ais no air aghaidh; agus rinn iad an tìr thaitneach 'na fàsach.

CAIB. VIII.

1 Soirbheachadh Ierusalem. 9 Thugadh misneach do'n t-sluagh an teampull a thogail. 16 Dh'iarr Dia ceartas agus fircantachd uapa. 18 Ghealladh aoibhneas agus soirbheas do'n Eaglais.

AGUS thàinig focal Tighearna nan sluagh a m' ionnsuidh, ag ràdh;

2 Mar so tha Tighearn nan sluagh ag ràdh; Bha mise eudmhor air son Shioin le eud mòr, agus bha mi eudmhor air a son le mòr-chorruih.

3 Mar so tha Tighearn nan sluagh ag ràdh; Phill mise gu Sion, agus gabhaidh mi còmhnuidh ann an Ierusalem; agus goirear ri Ierusalem, Baile firinn, agus ri sliabh Tighearna nan sluagh, Sliabh naomh.

4 Mar so tha Tighearn nan sluagh ag

1 d'a thrìd, d'an trid.

ràdh, Gabhaidh seann daoine, agus seana mhnathan còmhnuidh fathasd ann an sràidibh Ierusalem, agus gach duine le a luirg 'na làimh le ro aois.

5 Agus bithidh sràidean a' bhaile làn do mhacanaibh agus do nheganagaibh, a' cluicheadh 'na sràidibh.

6 Mar so tha Tighearn nan sluagh ag ràdh, Ma bhios e iongantach ann an sùilibh iarmaid an t-sluaigh so anns na làithibh sin, am bi e iongantach ann an shùilibh-sa fòs, deir Tighearn nan sluagh?

7 Mar so tha Tighearn nan sluagh ag ràdh, Feuch, saoraidh mise mo shluagh o'n tìr an ear, agus o'n tìr an iar:

8 Agus bheir mi air an ais iad, agus gabhaidh iad còmhnuidh ann an Ierusalem, agus bithidh iad 'nan sluagh dhomhsa, agus bithidh mise am Dhia dhoibhsan, ann am fìrinn, agus ann an ceartas.

9 Mar so tha Tighearn nan sluagh ag ràdh; Biodh bhur làmhnan làidir, sibhse ta cluinntinn, anns na làithibh so, nam briathran so á beul nam fàidhean, ta sau là sam bheil stéidh tighe Tighearna nan sluagh 'ga shuidheachadh, eadhon an teampull, a chum gu'n biodh e air a thogail.

10 Oir roimh na làithean so, cha robh luach saothaireach air bith aig duine, no luach saothaireach air bith aig ainmhidh; ni mò bha sìth aig an tì a rachadh a mach, no thigeadh a steach, leis an teinn; oir chuir mise na h-uile dhaoine, gach aon an aghaidh a choimhearsnach.

11 Ach a nis cha bhi mi do iarmad an t-sluaigh so, mar anns na làithibh roimhe so, deir Tighearn nan sluagh.

12 Oir soirbhichidh an siol; bheir an fhionain seachad a meas, agus bheir an talamh seachad a thoradh, agus bheir na nàmh seachad an drùchd; agus bheir mise air iarmad an t-sluaigh so na nithe so gu léir a shealbhachadh.

13 Agus tarlaidh, mar a bha sibh 'nur mallachadh am measg nan cinneach, O thigh Iudah, agus a thigh Israeil, is amhuil a shaoras mise sibh, agus bithidh sibh 'nur beannachadh. Na biodh eagal oirbh, biodh 'ur làmhnan làidir.

14 Oir mar so tha Tighearn nan sluagh ag ràdh, Mar a chuir mi romham olc a dheanamh oirbh, an uair a bhrosnuich bhur n-aithrichean mi gu feirg, tha Tighearn nan sluagh ag ràdh, agus nach do ghabh mi aithreachas;

15 Mar sin smuainich mi a ris, anns na làithibh so, maith a dheanamh do Ierusalem, agus do thigh Iudah. Na biodh eagal oirbhse.

16 So na nithe a ni sibh, Labhraibh, gach neach an fhìrinn r'a choimhearsnach: deanaibh breitheanas na fìrinn agus na sìthe 'nur geatachaibh:

17 Agus na dealbhaibh 'nur cridhe, gach aon neach olc an aghaidh a choimhearsnaich, agus na gràdhaichibh mionnan bréige sam bith: oir na nithe so uile is fuathach leam-sa, deir an Tighearn.

18 Agus thàinig focal Tighearna nan sluagh a m' ionnsuidh, ag ràdh;

19 Mar so tha Tighearn nan sluagh ag ràdh, Trasg a' cheathramh *miosa*, agus trasg a' chùigeamh, agus trasg an t-seachdamh, agus trasg an deiceamh, bithidh do thigh Iudah, 'nan aoibhneas agus 'nan gàirdeachas, agus 'nam féillean subhach; a mhàin gràdhaichibh-sa fìrinn agus sìochainnt.

20 Mar so tha Tighearn nan sluagh ag ràdh, Fathasd *tarlaidh* gu'n tig mòran dhaoine, agus luchd-àiteachaidh mhòran bhailean:

21 Agus théid luchd-àiteachaidh aoin *bhaile* gu aon eile, ag ràdh, Rachamaid da rìreadh a dheanamh urnuigh an làthair an Tighearn, agus a dh'iarraidh Tighearna nan sluagh: théid mise mar an ceudna.

22 Seadh, thig mòran shluagh, agus cinnich chumhachdach a dh'iarraidh Tighearna nan sluagh ann an Ierusalem, agus a ghuidhe an làthair an Tighearna.

23 Mar so tha Tighearn nan sluagh ag ràdh, Anns na làithibh sin *tarlaidh* gu'n dean deichnear greim, as uile chànanibh nan cinneach, eadhon gu'n dean iad greim air sgiort an tì a bhios 'na Iudhach, ag ràdh, Théid sinne leat, oir chuala sinn gu bheil Dia leibh.

CAIB. IX.

1 *Ann am meadhan a bhreitheanas air na cinnich teasairgidh Dia an Eaglais. 9 Chomhairlicheadh do Shion gàirdeachas a dheanamh air son teachd Chrìod. 12 Gheall Dia saorsa agus buaidh d'a phobull.*

FAISTNEACHD focail an Tighearna.

Air fearann Hadrach, agus air Damascus gabhaidh i tàmh: (oir tha sùil gach duine, agus uile theubhan Israeil, air an Tighearn.)

2 Agus fòs air Hamat a ta làimh ris; air Tirus agus air Sidon, ged tha i ro ghlic.

3 Ged thog Tirus dhi féin daingneach làidir, agus ged charn i suas airgid mar an duslach, agus òr fìor-ghlan mar pholl nan sràidean;

4 Feuch, tilgidh an Tighearn mach i, agus buailidh e san fhaige a neart; agus sgriosar i le teine.

5 Chi Ascelon, agus bithidh eagal oirre; Gasa fòs, agus bithidh i ro bhronach; is amhuil a bhitheas Ecron, oir nàraicheadh a dòchas; agus bàsaichidh an rìgh o Ghasa, agus cha'n àitichear Ascelon.

6 Agus gabhaidh clann diolain còmhnuidh ann an Asdod; agus gearraidh mise as uabhar nam Philisteach.

SECHARIAH, IX. X. XI.

7 Agus bheir mi air falbh 'fhuil as a bheul, agus a ghràineilachdan o eadar 'fhiacian: ach an ti a mhaireas, bithidh esan air son ar Dé-ne, agus bithidh e mar uachdaran ann an Iudah, agus Ecron mar an Iebusach.

8 Agus campaichidh mise timchioll mo thighe, 'g a dhìonadh o'n fheachd a bhios dol seachad, no a bhios a' pillinn; ni mò theid am fear-sàruchaidh trompa¹ ni's mò: oir a nis chunnaic mi le m' shùilbhh.

9 Dean gàirdeachas gu mòr, O nighean Shioin; tog iolach, O nighean Ierusalem: feuch, tha do rìgh a' teachd a d' ionn-suidh: is firean, agus is Slànuighear e; iriosal, agus a' marcadh air asail, agus air searrach, mac na h-asail.

10 Agus gearraidh mi as an carbad o Ephraim, agus an t-each o Ierusalem; agus gearrar as am bogha-cogaidh; agus labhraidh esan sìth ris an cinnich: agus bithidh 'uachdaranachd o mhuir gu muir, agus o'n amhainn gu iomallaibh na tìre.

11 Air do shon-sa fòs, le fuil do choimh-cheangail chuir mi mach do phrìosanaich as an t-slochd anns nach robh uisge sam bith.

12 Pillibh a chum an daingnich, O phrìosanacha an dòchais; eadhon air an là an diugh tha mi 'g innseadh gu'n dìol mi dhuibh *beannachdan* dibailt.

13 Oir lùb mi dhomh féin Iudah, lìon mi am bogha le Ephraim; agus togaidh mi suas do mhic-sa, O Shioin, an aghaidh do mhaic-sa, O Ghréig, agus ni mi thu mar chlaidheamh duine chumhachdaich.

14 Agus chithear an Tighearn os an ceann, agus theid a shaignead a mach mar an dealanach: agus séididh an Tighearn Iehobhah an trompaid, agus theid e mach le ioma-ghaothaibh na h-àirde deas.

15 Ni Tighearn nan sluagh an dìon: agus ithidh iad, agus ceannaichidh iad le clachaibh-tabhuill; agus òlaidh iad, agus ni iad iolach mar le fìon; agus lìonar iad mar chopain, mar oisinnibh na h-altarach².

16 Agus tèarnaidh an Tighearn an Dia iad anns an là sin, mar threud a shluaigh; oir togar suas clacha-buaidh an crùin air feadh am fearainn.

17 Oir cia mòr an soirbheachadh, agus cia mòr am maise! ni an t-arbhar na h-òganaich, agus am fìon-nuadh na h-òigh-ean, subhach.

CAIB. X.

1 Is còir iarraidh a dh'ionnsuidh Dhé, 2 agus cha'n ann a dh'ionnsuidh òdhola. 3 Cruinnichidh Dia a shluaigh, agus saoraidh e iad.

IARRAIBH-SE air an Tighearn uisge I ann an àman uisge dheireannaich; ni an Tighearn dealanach, agus bheir e dhuibh

pailteas uisge; do gach aon fear anns an fhaiche.

2 Oir labhair na h-òdhola dìomhanas, agus chunnaic na fiosaichean breug, agus dh'innis iad aislinge faoine; is dìomhain an comhfhurtachd: uime sin dh'imich iad air falbh mar threud; bhà iad air an claidh, a chionn nach robh buachaill air bith ann.

3 An aghaidh nam buachaillan las mo chorruich-sa, agus na gabhair smachd-aichidh mi. Ach dh'amhaire Tighearn nan sluagh air a threud, tigh Indah; agus ni e iad mar each maiseach anns a' chath.

4 Uaith-san thig a mach a' chlach-oisne, uaith-san an tarann, uaith-san am bogha-catha, uaith-san gach uile uachdaran le chèile.

5 Agus bithidh iad ann an cath cosmhuil ri gaisgich a shaltras air clàbar nan sràidean: agus gogaith iad, a chionn gu bheil an Tighearn maille riu; agus cuirear marcaichean nan each gu nàire.

6 Agus neartaichidh mise tigh Iudah, agus tèarnaidh mi tigh Ioseiph; agus suidhichidh mi iad a ris; oir tha truas agam dhiubh: agus bithidh iad mar nach tilginn fada uam iad; oir is mise Iehobhah an Dia, agus éisdidh mi riu.

7 Agus bithidh Ephraim mar ghaigeach; agus ni an cridhe gàirdeachas, mar le fìon: seadh, chì an clann, agus bithidh iad ait; ni an cridhe gàirdeachas anns an Tighearn.

8 Gairmidh mise iad, agus cruinnichidh mi iad, oir shaor mi iad: agus meudaichidh iad, *eadhon* mar a mheudaich iad.

9 Agus cuiridh mi iad mar shìol am measg nan cinneach; agus cuimhnicidh iad ormsa ann an dùthchannaibh fad as; agus mairidh iad beò le 'n cloinn, agus pillidh iad a ris.

10 Agus bheir mi air an ais iad o thìr na h-Eiphit, agus cruinnichidh mi iad a mach á Asiria; agus bheir mi iad air an ais gu tìr Ghileaid agus Lebanon; agus cha bhi àite ni's leòr r'a fhaotainn doibh.

11 Agus theid e troimh an fhaire, le dorainn: agus buailidh e na tonnan anns an fhaire; agus tiormaichidh uile dhòimhneachdan na h-aimhne suas: agus bheir ear a nuas uabhar Asiria, agus imichidh slat-rioghail na h-Eiphit seachad.

12 Agus neartaichidh mi iad anns an Tighearn: agus 'na ainm-san gluaisidh iad, deir an Tighearn.

CAIB. XI.

1 Léir-sgrìos Ierusalem, 4 Càram Chrìosd d'a threud. 15 Samhladh agus mallachd buachaill amaidich.

FOSGAIL do dhorsan, O Lebanon, a clum gu'n loisg an teine do sheudair.

¹ d'an trid.

² altaire.

SECHARIAH, XI. XII.

2 Guil gu h-àrd, O chraobh ghiumhais, oir thuit an seudair; oir tha iadsan a b' àirde air am milleadh: deanaibh gul, O dharaga Bhasain oir ghearradh frith na callaid.

3 Guth ulartaich nam buachaillean! a chionn gu bheil an glòir air milleadh: guth beucaich nan leomhan òga! oir tha uabhar Iordain air a chreachadh.

4 Mar so thubhairt an Tighearn mo Dhia, Beathaich thusa treuda' chasgraidh;

5 A ta an sealbhadairean a' marbladh, agus 'gam meas fèin neo-chiontach: agus tha iadsan a ta 'gan reic ag ràdh, Beannaichte gu'n robh an Tighearn, oir tha mi saobhair: agus cha'n u' eil truas aig an aodhairibh fèin duibh.

6 Oir cha ghabh mise ni's mò truas do luchd-àiteachaidh na tìre, tha an Tighearn ag ràdh; ach feuch, bheir mi thairis daoine, gach aon do làimh a choimhearsnaich, agus do làimh a rìgh; agus buailidh iad am fearann, agus cha saor mi as an iad.

7 Agus beathaichidh mi treud a' chasgraidh, eadhon sibhe, bhochdan an treud. Agus ghabh mi a m' ionnsuidh dà luirg: air aon duibh thug mi mar ainm Maise, agus air aon eile thug mi mar ainm Cuibhrichean; agus bheathaich mi an treud.

8 Tri aodhairean fòs ghearr mi as ann an aon mhios; agus bha gràin aig m' anam-sa dhiubh-san, agus bha fuath aig an anam-sa dhomh-sa.

9 An sin thubhairt mi, Cha bheathaich mi sibh; an ni sin a bhàsaicheas, bàsaicheadh e; agus an ni sin a ta gu bhì air a ghearradh as, gearrar as e: agus itheadh a' chuid eile, gach aon feoil a chéile.

10 Agus ghabh mi mo lorg, eadhon Maise, agus ghearr mi 'na bloighdibh i, chum gu'm brisinn mo choimhecheangal a rinn mi ris na slòigh uile.

11 Agus bhriseadh e san là sin: agus mar sin dh'aithnich bochdan an treud a thug an aire dhomh, gu'm b'e sin focal an Tighearn.

12 Agus thubhairt mi riu, Ma chithear ceart duibh, thugaibh *dhomh* mo luach: agus mur faicear, leigibh leis: mar sin thomhais iad air son mo luach, deich *buinn* fhichead airgid.

13 Agus thubhairt an Tighearn rium, Tilg a chum a' chriadhadair e: luach ciat-ach leis an robh mise air mo mheas leo-san. Agus ghabh mi na deich *buinn* fhichead airgid, agus thilg mi iad ann an tigh an Tighearn, a chum a' chriadhadair.

14 Agus ghearr mi as a chéile mo lorg eile, eadhon Cuibhrichean; a chum gu'm brisinn am bràithreachas eadar Iudah agus Israel.

15 Agus thubhairt an Tighearn rium a

ris, Gabh a d' ionnsuidh fathasd innil buachaill amaidich:

16 Oir feuch, togaidh mise suas buachaill san fhearann, nach seall an déigh an ni sin a ghearrar as; nach iarr a' chuid a ta òg; agus nach leighis a' chuid a fhuair dochann; ni mò bheathaicheas e a' chuid a sheas: ach ithidh e feoil na cuid a ta reamhar, agus reubaidh e an crobhain 'nam bloighdibh.

17 Is truagh do'n droch bhuachaill a dh'fhàgas an treud: *thig* sgrios air a ghairdean, agus air a shùil deas: seargaidh a ghairdean gu tur, agus dorchaidhear a shùil deas gu h-ìomlan.

CAIB. XII.

1 *Nithear Ierusalem 'na copan ball-chrith, agus 'na cloich chudthromaich do na slòigh uile.* 6 *Buaidh uachdaran Iudah.* 10 *Aithreachas Ierusalem.*

FAISTNEACHD focail an Tighearna. A thaobh Israeil, tha an Tighearn ag ràdh, a ta sgaoileadh a mach nan nèamha, agus a' suidheachadh stéidh na talmhainn, agus a' cruthachadh spioraid dhuine an taobh a stigh dheth.

2 Feuch, ni mise Ierusalem 'na copan ball-chrith do na slòigh uile mu'n cuairt: air son Iudah mar an ceudna bithidh e san fheachd an aghaidh Ierusalem.

3 Agus anns an là sin ni mi Ierusalem 'na cloich chudthromaich do na slòigh uile; na h-uile a ghabhas i mar uallach orra fèin, gearrar iad 'nam bloighdibh: agus 'na h-aghaidh bithidh uile chinnich an domhain air an cruinneachadh ri chéile.

4 Anns an là sin, tha an Tighearn ag ràdh, buailidh mise gach each le uamhas, agus a mharcach le cuthach; agus fosglaidh mi mo shùilean air tigh Iudah, agus gach aon each aig na slòigh buailidh mi le doille.

5 Agus their uachdarain Iudah 'nan cridhe, Is iad luchd-àiteachaidh Ierusalem mo neart ann an Tighearna nan sluagh an Dia.

6 Anns an là sin ni mise uachdarain Iudah mar theallach teine am measg connaidh, agus mar leus teine ann an sguaib; agus loisgidh iad air an làimh dheis, agus air an làimh chli, na slòigh uile mu'n cuairt: agus àitichear Ierusalem a ris, 'na h-ionad fèin, ann an Ierusalem.

7 Saoraidh an Tighearn fòs pàilliunan Iudah, mar o shean; mu'n dean glòir tìghe Dhaibhidh, no glòir luchd-àiteachaidh Ierusalem, iad fèin àrdachadh an aghaidh Iudah.

8 Anns an là sin dìonaidh an Tighearn luchd-àiteachaidh Ierusalem; agus bithidh esan a ta lag 'nam measg anns an là sin mar Dhaibhidh; agus tigh Dhaibhidh mar Dhia, mar aingeal an Tighearna 'nan làthair.

9 Agus tarlaidh anns an là sin, gu'n iarr

mise na h-uile chinnich a thig an aghaidh Ierusalem a mhilleadh.

10 Agus dòirtidh mi air tigh Dhaibhidh, agus air luchd-àiteachaidh Ierusalem, spiorad nan gràs agus nan athchuingean; agus amhaircidh iad airsan a lot iad, agus ni iad caoidh air a shon, mar a chaoideas duine air son aoin mhic: agus bithidh an doilghios air a shon mar dhoilghios air son ceud-ghlin.

11 Anns an là sin bithidh cumha mhòr annan Ierusalem, cosmhuil ri cumha Hadadrinoin, ann an gleann Mhegidoin.

12 Agus ni am fearann caoidh, gach aon teaghlach air leth, teaghlach tigh Dhaibhidh air leth, agus am mnathan air leth: teaghlach tigh Naitan air leth, agus am mnathan air leth:

13 Teaghlach tigh Lebhi air leth, agus am mnathan air leth: teaghlach Shimeir air leth, agus am mnathan air leth:

14 Na h-uile theaghlach eile, gach teaghlach air leth, agus am mnathan air leth.

CAIB. XIII.

1 An tobar a dh'fhosgaillear do luchd-àiteachaidh Ierusalem air son peacadh, agus air son neò-ghloine. 7 Bàs Chrìosd, agus tèaruinteachd trian do'n t-sluagh.

ANNS an là sin bithidh tobar air 'fhosgladh do thigh Dhaibhidh, agus do luchd-àiteachaidh Ierusalem, air son peacadh agus air son neò-ghloine.

2 Agus tarlaidh air an là sin, tha Tighearn nan sluagh ag ràdh, gu'n gearr mise mach ainmean nan iodhola as an fhearann, agus cha chuinnichear iad ni's mò; agus fos bheir mi air na fiosaichean, agus air na spioradaibh neòghlan siubhal a mach as an fhearann.

3 Agus tarlaidh, 'nuair a ni duine sam bith fàistneachd, an sin gu'n abair 'athair agus a mhàthair a ghlin e ris, Cha mhair thu beò; oir labhair thu breugan ann an ainm an Tighearn: agus ni 'athair agus a mhàthair a ghlin e, a bhualadh troimhe an uair a ni e fàistneachd.

4 Agus tarlaidh anns an là sin, gu'm bi nàire air na fàidhibh, gach aon d'a shealladh, 'nuair a ni e fàistneachd: ni mò chuireas iad umpa falluinne molach gu mealladh.

5 Ach their gach aon, Cha'n fhàidh mise, is treabhaiche ni; oir tha còir ag duine eile orm o m' òige.

6 Agus their 'aon ris, Ciod iad na lota sin ann ad lànhaibh? An sin freagraidh esan, Iad sin leis an do lotadh mi ann an tigh mo chairdean.

7 Dùisg, O chlaidheimh, an aghaidh mo bhuachaill, agus an aghaidh an duine ta 'na dhlùth-chompanach dhomh-sa, tha Tighearn nan sluagh ag ràdh. Buailidh mise am buachaill, agus bithidh an treud air a sgapadh; agus tionndaidhidh mi mo

lànha air a' mhuinntir bhig.

8 Agus tarlaidh anns an fhearann uile, tha an Tighearn ag ràdh, gu'n gearrar as dà thrian ann, agus gu'm bàsaich iad; ach bithidh an treas trian air fhàgail ann.

9 Agus bheir mise an treas trian troimh an tèine, agus glanaidh mi iad mar a ghlannar an t-airgid, agus dearbhaidh mi iad mar a dhearbhar an t-òr; gairmidh iad air m' ainm-sa, agus éisdidh mise ri; their mi, Is iad mo shluagh; agus their iadsan, Is e an Tighearn mo Dhia.

CAB. XIV.

1 Léir-sgrìos Ierusalem. 3 Teachd Chrìosd. 12 Buaidh Dia naimhdean Ierusalem le plàigh. 16 Pillidh am fuigheall ris an Tighearn.

FEUCH, tha là an Tighearn a' teachd, agus roinnear do chreach ann ad mheadhon.

2 Oir cruinnichidh mise na h-uile chinnich an aghaidh Ierusalem gu cogadh; agus gluar am baile, agus creachar na tighean, agus éignichear na mnathan; agus théid leth a' bhaile air falbh am bruid; agus cha ghearrar a' chuid eile do'n t-sluagh as o'n bhaile.

3 Agus théid an Tighearn a mach, agus cogaidh e an aghaidh uan cinneach sin, mar a chog e ann an là a' chatha.

4 Agus seasaidh a chosan air an là sin air sliabh nan-Oladh, a ta fa chomhair Ierusalem air an taobh an ear: agus sgoiltidh sliabh nan Oladh 'na mheadhon, ris an àird an ear, agus ris an àird an iar, air chor as gu'm bi gleann ro mhòr ann: agus gluaidh leth an t-sléibh ri tuath, agus an leth eile ri deas.

5 Agus teichidh sibhse rathad glinn nan sliabh: oir ruigidh gleann nan sliabh gu h-Asal: seadh, teichidh sibh mar a theich sibh roimh an chrith-thalmhainn, ann an làithibh Usiah rìgh Iudah: agus thig an Tighearn mo Dhia-sa, agus a naoimh uile maille ris.

6 Agus tarlaidh anns an là sin, nach bi solus soilleir agus dorchadas ann;

7 Ach bithidh e 'na aon là; a bhios aithnichte do'n Tighearn: cha là, agus cha'n oidliche bhios ann: ach tarlaidh air trà feasgair gu'm bi solus ann.

8 Agus tarlaidh air an là sin, gu'n téid uisgeacha beò a mach á Ierusalem; leth dhiubh ris an fhaighe 'n ear, agus leth dhiubh ris an fhaighe 'n iar: anns an t-samhradh agus anns a' gheamhradh bithidh e.

9 Agus bithidh an Tighearn 'na rìgh os ceann na talmhainn uile: anns an là sin bithidh aon Tighearn ann, agus 'ainm 'ua aon.

10 Agus cuairtichidh e am fearann uile mar chomhnard, o Gheba gu Rimon, nu dheas do Ierusalem: agus togar suas i, agus àitichear i 'na h-ionad, o gheata

Bheniamin gu àit a' cheud gheata, agus gu geata na h-oisne, agus o thùr Hana-neoil gu fion-amair an rìgh.

11 Agus ni daoine comhnuidh innte, agus clia bhi léir-sgrìos ann nì's mò; acli bithidh Ierusalem air a h-àiteachadh ann an tèaruinteachd.

12 Agus so a' phlàigh leis am buail an Tighearn na sìòigh uile a chog an aghaidh Ierusalem: leaghaidh am feoil air falbh am feadh a ta iad 'nan seasamh air an cosaibh, agus leaghaidh an sùilean air falbh 'nan sluichd, agus leaghaidh an teagadh air falbh 'nam beul.

13 (Agus tarlaidh anns an là sin gu'm bi buaireas mòr o'n Tighearn 'nam measg: agus glacaidh iad greim, gach aon do làimh a choimhearsnaich; agus éiridh a làmh suas an aghaidh làimhe a choimhearsnaich.

14 Agus cogaidh Iudah fòs aig Ierusalem; agus cruinnichear ri chéile maoin nan uile chiuneach mu'n cuairt, òr, agus airgid, agus earradh, ann am pailteas mòr.)

15 Agus bithidh plàigh an eich, na mulaid, a' chàmhail, agus na h-asail, agus nan uile bheathaichean a bhios anns na camp-aibh so, mar a' phlàigh so.

16 Agus tarlaidh gu'n téid gach aon a dh'fhàgar, do na h-uile chinnich a thàinig an aghaidh Ierusalem, suas o bhliadh-

na gu bliadhna gu aoradh a dheanamh do'n Rìgh, Tighearn nan sluagh, agus a choimhead féille nam pàilliuann.

17 Agas tarlaidh, cò sam bith do uile theaghlaichibh na talmhainn nach téid suas gu Ierusalem, a dheanamh aoraidh do'n Rìgh, Tighearn nan sluagh, eadhon orra sin cha tig uisge sam bith.

18 Agus mur téid teaghlach na h-Eiphit suas. agus mur tig iad: orra-san bithidh a' phlàigh sin leis am buail an Tighearn ua cinnich nach téid suas a choimhead féille nam pàilliuann.

19 So peanas na h-Eiphit, agus peanas nan uile chinneach nach téid suas a choimhead féille nam pàilliuann.

20 Anns an là sin, bithidh air cluig nan each, NAOMHACHD DO'N TIGHEARN: agus bithidh na coireachan ann an tigh an Tighearna mar na cuachan fa chomhair na h-altarach.

21 Seadh, bithidh gach poit ann an Ierusalem, agus ann an Iudah, 'nan naomhachd do Thighearn nan sluagh: agus thig iadsan uile a dh'ìobras, agus gabhaidh iad dhiubh, agus bruichidh iad anna: agus cha bhi nì's mò an Canaanach¹ ann an tigh Iehobhabh Dhia nan sluagh, san là sin.

¹ ceannuiche

MALACHI.

CAIB. I.

1 *Rinn Malachi gearan an aghaidh an t-sluaigh air son an aingidheachd. 6 Chuir e an cèill doibh an neò-chàram mu thimcheall seirbhis an Tighearna.*

IASTNEACHD focail an Tighearna a chum Israeil, le Malachi.

2 Ghràdhaich mise sibh, tha an Tighearn ag ràdh: Gidheadh tha sibhse ag ràdh, Ciod san do ghràdhaich thu sinn? Nach b'e Esau bràthair Iacuib, tha an Tighearn ag ràdh? gidheadh ghràdhaich mise Iacob,

3 Agus dh'fhuathaich mi Esau agus chuir mi a shléibhteann fàs, agus tha 'oighreachd aig nathraichibh an fhàsaich.

4 Mar a ta Edom ag ràdh, Rinneadh bochd sinn, ach pillidh sinn agus togaidh sinn na h-ionada sgaoilte; mar so tha Tighearn nan sluagh ag ràdh, Togaidh iadsan, ach tilgidh mise sìos; agus goirear riu, Crìoch na h-aingidheachd, agus an sluagh ris am bheil corruich aig an Tighearn gu sìorruidh.

5 Agus chi bhur sùilean-sa, agus their sibh, Bithidh an Tighearn air 'ardachadh thar crìochan Israeil.

6 Bheir mac onoir d'a athair, agus seirbhiseach d'a mhaighstir; ma's athair mise ma ta, c'ait am bheil m' onoir? agus ma's maighstir mi, c'ait am bheil m'

eagal? tha Tighearn nan sluagh ag ràdh ruibhse, O shagartan a ta deanamh tàire air m'ainm-sa; agus tha sibh ag ràdh, Ciod anns an d'rinn sinne tàir air t'ainm?

7 Tha sibh a' toirt seachad arain thruaillte air m' altair; agus tha sibh ag ràdh, Ciod anns an d'rinn sinne do thruaillteadh? Le sibh a bhi 'g ràdh, Tha bord an Tighearna suarach.

8 A nis ma thairgeas sibh an ni tha dall mar ìobairt, nach olc sin? agus ma thairgeas sibh an ni tha bacach agus tinn, nach olc sin? tairg e nis do t' uachdaran, am bi e toilichte leat, no 'n gabh e riut, deir Tighearn nan sluagh?

9 Agus a nis, guidhean oirbh, iarraibh aghaidh an Tighearna gu'm bi e tròcaireach dhuinn. Is ann o bhur làimh-sa thàinig so; an gabh mise ri aon agaibh gu taitneach? deir Tighearn nan sluagh.

10 Gu cinnteach druidear na dorsan 'nur n-aghaidh; agus cha'n fhadaidh sibh teine air m' altair-sa gu dìomhain. Cha'n 'eil tlachd air bith agam annaibh, tha Tighearn nan sluagh ag ràdh, ni mò ghabhas mi tabhartas air bith o bhur làimh.

11 Oir, o éirigh na gréine gu ruig a dol sìos, bithidh m' ainm-sa mòr am measg nan cinneach; agus anns gach àite tairg-car tùis do m' ainm-sa, agus tabhartas

fior-ghlan: oir bithidh m' ainm mòr am measg nan cinneach, deir Tighearn nan sluagh.

12 Ach thruaill sibhse e, le sibh a bhi 'g ràdh, Tha bord an Tighearna truailte; agus an tabhartas air, *eadhon* a bhiadh, tha e suarach.

13 Thubhairt sibh fòs, Cia mòr an sgìos e? agus shéid sibh uaibh e, tha Tighearn nan sluagh ag ràdh! agus thug sibh a m' ionnsuidh an nì bha reubta, agus bacach, agus tinn; mar so thug sibh tabhartas: an gabh mise sin o bhur làimh, deir Tighearn nan sluagh?

14 Ach malluichte gu robh am meall-tair, aig am bheil firionn 'na threud, agus a bhòidheas agus a dh'ìobras nì truaidh do'n Tighearn: oir is Rìgh mòr mise, tha Tighearn nan sluagh ag ràdh, agus tha m' ainm uamhasach am measg nan cinneach.

CAIB. II.

1 *Chronicheadh na sagairt do bhrìgh nach do chuir iad an suim an àithne; 10 agus an sluagh a chionn gu'n do phòs iad mnathan coimheach, 13 gu'n d'rinn iad ceannaire, 17 agus gu'n do chuir iad an gnìomh aingidheachd.*

A GUS a nis dhuibh-sa tha 'n àithne so, O shagartan.

2 Mur éisd sibh, agus mur cuir sibh an suim i, chum glòir a thoirt do m'ainm-sa, tha Tighearn nan sluagh ag ràdh, cuiridh mise eadhon mallachd oirbh; agus mall-aichidh mi bhur beannachdan; seadh mbhallach mi iad cheana, a chionn nach 'eil sibh 'g a chur an suim.

3 Feuch, bheir mi air an t-sìol nach fàs e, agus tilgidh mi aolach 'nur n-aghaidh, aolach bhur n-àrd-fhéillean; agus giùl-aineas sibh fèin maille ris.

4 Agus aithnichidh sibh gu'n do chuir mise do 'ur n-ionnsuidh an àithne so, chum gu maireadh mo choimhcheangal le Lebhi, deir Tighearn nan sluagh.

5 Bha mo choimhcheangal ris-san, mu thimchioll beatha agus sìthe, agus thug mi dha iad, air son an eagail leis an robh eagail air romham, agus leis an robh geilt air roimh m' ainm.

6 Bha lagh na firinn 'na bheul, agus cha d'fhuaireadh aingidheachd 'na bhilìbh; ghluais e leam-sa ann an sìth agus ann an ionracas, agus phill e mòran air falbh o euceart.

7 Oir bu chòir do bhilìbh an t-sagairt eòlas a choimhead, agus bu chòir an reachd iarraidh as a bheul: oir is esan teachdair Tighearna nan sluagh.

8 Ach chaidh sibh air seacharan o'n t-slighe; thug sibh air mòran tuisleachadh air an reachd: thruaill sibh coimhcheangal Lebhi, deir Tighearna nan sluagh.

9 Uime sin rinn mise fòs sibhse suarach agus tàireil ann an sealladh an uile shluaigh, a réir mar nach do choimhidh

sibh mo shlighean, ach gu'n robh sibh leth-bhreitheach anns an lagh.

10 Nach 'eil aon athair againn uile? nach aon Dia a chruthaich sinn? c'uime am bheil sin a' buntainn gu fealltach, gach duine an aghaidh a bhràthar, le bhi briseadh coimh-cheangail ar n-aithrichean?

11 Bhuin Iudah gu fealltach, agus chuir eadh gràineileachd an gnìomh ann an Israel agus ann an Ierusalem; oir thruaill Iudah naomhachd Dhia a's ionmhuinn leis, agus phòs e nighean dé choimhich.

12 Gearraidh an Tighearn as an duine a ni so; am fear-faire, agus am fear-freagraidh, a mach á pàillìunaibh Iacoib; agus esan a bheir tabhartas do Thighearn nan sluagh.

13 Agus so fòs rinn sibh; chòmhdaich sibh le deuraibh altair an Tighearna, le gul, agus le h-éigheach; ionnus nach 'eil suim aige do thabhartas nì's mò, agus cha ghabh e le deadh-ghean o bhur làimh e.

14 Gidheadh tha sibh ag ràdh, C'ar son? Ach ionn gu'n robh an Tighearn 'na fhianuis eadar thu agus bean t' òige, ris an do bhuin thu gu fealltach: gidheadh b' i do bhana-chompanach i, agus bean do choimh-cheangail.

15 Agus nach d'rinn e aon *fheoil diubh*? agus tha fuigheall an spioraid aige. Agus ciod a tha esan ag iarraidh? sliochd diadhaidh. Uime sin, biodh faicill agaibh air bhur spiorad, agus na buineadh neach air bith gu fealltach an aghaidh mnà 'òige.

16 Oir is fuath leam-sa esan a chuireas air falbh, tha an Tighearn Dia Israeil ag ràdh: agus esan a dh'fhòlaicheas ainneart le 'thrusgan, tha Tighearn nan sluagh ag ràdh. Uime sin biodh faicill agaibh air bhur spiorad, nach buin sibh gu fealltach.

17 Sgithich sibh an Tighearn le bhur briathraibh: gidheadh tha sibh ag ràdh, Ciod anns an do sgithich sinne e? Le sibh a bhi 'g ràdh, Tha gach aon a ta deanamh uile taitneach ann an sealladh an Tighearn; agus tha tlachd aig annta: no, C'ait am bheil Dia a' bhreitheanas?

CAIB. III.

1 *Thig Mesiah a ghlamadh na h-Eaglais, agus a thoirt breth air na h-aingidh. 7 Thugadh rabhadh do'n t-sluagh aithreachas a ghabhail. 8 An cionta uamhasach.*

F EUCH, cuiridh mise mach mo theachdair, agus ulluichidh e 'n t-slighe romham; agus thig an Tighearn a ta sibh ag iarraidh, g'a theampull gu grad; eadhon teachdair a' choimhcheangail, anns am bheil bhur tlachd; feuch thig esan, deir Tighearn nan sluagh.

2 Ach cò dh'fheudas là a theachd a ghiullan? agus cò sheasas an uair a dh'fhoillsichear e? oir is cosmhuil e ri teine an fhir-leaghaidh, agus ri acfuinn-ghlanaidh an fhir a nigheas eudach:

3 Agus suidhidh e mar fhear-leaghaidh

agus glanaidh airgid: agus glanaidh e mic Lebhi, agus saoraidh e o shal iad, mar òr agus mar airgid, chum gu'm bi iad 'nan òglaich do'n Tighearn, a' tairg-seadh dha tabhartais ann am fireantachd.

4 An sin bithidh tabhartas Iudah agus Ierusalem taitneach do'n Tighearn, mar anns na làithibh o shean, agus anns na bliadhnaibh roimhe so.

5 Agus thig mise dlùth dhuibh gu breitheanas, agus bithidh mi a'm' fhianuis luath an aghaidh fhiosaichean, agus an aghaidh adhaltrannach, agus an aghaidh na muinntir a bheir mionnan-eithich, agus an aghaidh na muinntir a ta cumail air ais a' thuarasdail o'n t-seirbhiseach, a' sàruchadh na bantraich agus an dilleachdain, agus a' cur a' choigrich a thaoibh, agus air nach 'eil eagal romham-sa, deir Tighearn nan sluagh.

6 Oir is mise Ichobhabh, cha chaochail mi: air an aobhar sin cha'n 'eil sibhse, O chlann Iacoib, air 'ur sgrios.

7 Eadhon o làithibh 'ur n-aithrichean chlaon sibh o m' reachdaibh-sa, agus cha do choimhid sibh iad: pillibh rium-sa, agus pillidh mise ruibh-sa, tha Tighearn nan sluagh ag ràdh: Ach thubhairt sibhse, Ciod anns am pill sinn?

8 An spùinn duine Dia? gidheadh spùinn sibhlise mise: ach tha sibh ag ràdh, Ciod anns an do spùinn sinn thu? Ann an deachamh agus ann an tabhartasaibh.

9 Tha sibh malluichte le mallachd: oir spùinn sibhlise mise; eadhon an cinneach so uile.

10 Thugaibh an deachamh uile chum an tigh-thasgaidh, air chor as gu'm bi biadh ann am thigh-sa; agus dearbhaibh mi nis leis an ni so, tha Tighearn nan sluagh ag ràdh, mur fosgail mi dhuibh uinneagan nan nèamh a dhòrtadh a mach beannachd oirbh, gus nach bi àit ann g'a chumail.

11 Agus cronuichidh mi am milltear air 'ur sgàth-sa, agus cha mhill e toradh bhuir fearainn, ni mo thilgeas bhuir fionain a meas an-abuich san fhaiche, deir Tighearn nan sluagh.

12 Agus goiridh na h-uile chinnich beannaichte sibh²: oir bithidh sibh 'nur dùthaich thaitnich, deir Tighearn nan sluagh.

13 Bha bhuir briathran dalma³ ann am aghaidh-sa, tha an Tighearn ag ràdh; gidheadh tha sibh ag ràdh, Ciod a labhair sinn a'd' aghaidh.

14 Thubhairt sibh, Is dìomhain seirbhis a thoirt do'n Tighearn; agus ciod a' bhuannachd dhuinn gu'n do choimhid

sinn 'ordugh, agus gu'n do ghluais sinn gu brònach an làthair Tighearna nan sluagh?

15 Agus a nis tha sinn a' meas nan uaihb-reach sona: seadh, tha iadsan a ta cur an gnìomh aingidheachd air an àrdachadh: seadh, tha iadsan a ta buaireadh Dhia, eadhon air an saoradh.

16 An sin labhair iadsan air an robh eagal an Tighearna, gach aon gu tric ri chéile; agus dh'éisd an Tighearn, agus chual' e, agus bha leabhar-cuimhne air a sgrìobhadh 'na làthair air sou na muinntir air an robh eagal an Tighearn, agus a smuainich air ainm.

17 Bithidh iad leam-sa⁴, tha Tighearn nan sluagh ag ràdh, anns an là sin anns an dean mi suas mo sheudan; agus coiglidh mi iad, mar a choigleas duine a mhac féin a ta deanamh seirbhis da.

18 An sin pillidh sibhse, agus chi sibh an dealachadh eadar am firean agus an t-aingidh; eadar an ti a ta deanamh seirbhis do Dhia, agus an ti nach 'eil ri seirbhis da idir.

CAIB. IV.

1 Breitheanas Dhé air na h-aingidh, agus a mhaith-eas dhoibh-san air am bheil eagal roimhe. 4 Chomhairlicheadh do'n t-sluagh lagh an Tighearn a chuimhneachadh. 5 Dreuchd an fhàidh Eliah.

OIR feuch, tha 'n là a' teachd, a loisgeas mar àmbuinn; agus bithidh na h-uaihbreich uile, seadh, gach neach a ta ri aingidheachd, mar asbhuaibh; agus loisgidh an là tha teachd suas iad, tha Tighearn nan sluagh ag ràdh; oir cha 'n fhàg e bun no bàrr dhuibh.

2 Ach dhuibh-sa air am bheil eagal m' ainme-sa éridh Griat na fireantachd le slàinte 'na sgiathaibh; agus théid sibh a mach, agus fàsaidh sibh suas mar laoigh bhiadhta.

3 Agus saltraidh sibh sìos na h-aingidh: oir bithidh iad mar luathre fo bhonnaibh 'ur cos, anns an là san dean mise so, deir Tighearn nan sluagh.

4 Cuimhnichibh-sa lagh Mhaois m'òglaich, a dh'àithn mise dha ann an Horeb, air son Israeil uile, eadhon na reachdan agus na breitheanas.

5 Feuch, cuiridh mise do bhuir u-ionnsuidh Eliah am fàidh, roimh theachd là mhòir agus uamhasaich an Tighearn.

6 Agus tionndaidhidh esan cridhe nan aithrichean a chum na cloinne, agus cridhe na cloinne chum an aithrichean, air eagal gu'n tig mise, agus gu'm buail mi am fearann le léir-sgrios.

¹ an dean duine sladaidh air Dia?

² beannaichidh na h-uile chinnich dhuibh.

³ dàna, treuna.

⁴ buinidh iad dhomh-sa.

TIOMNADH

NUADH

AR

TIGHEARN AGUS AR SLANUIGHIR

IOSA CRIOSD:

AIR A THARRUING

O'N GHREUGAIS

CHUM

GAELIC ALBANNAICH.

LONDON:

PRINTED FOR THE BRITISH AND FOREIGN BIBLE SOCIETY,

INSTITUTED IN THE YEAR 1804:

(FROM THE 12th EDITION PUBLISHED IN EDINBURGH IN 1826.)

By R. Watts, Crown Court, Temple Bar.

M DCCC XXIX.

THE

LIBRARY

OF

177

AN SOISGEUL

A REIR

M H A T A.

CAIB. I.

1 *Sinnsearachd, 18 gineamhuinn, 21 breith, 23 agus mìneachadh ainm Chrìosd.*

LEABHAR ginealaich Iosa Crìosd, mhic Dhaibhidh, mhic Abraham.

2 Ghin Abraham Isaac, agus ghin Isaac Iacob, agus ghin Iacob Iudas agus a bhràithrean.

3 Agus ghin Iudas Phares agus Sara o Tamar, agus ghin Phares Esrom, agus ghin Esrom Aram.

4 Agus ghin Aram Aminadab, agus ghin Aminadab Naason, agus ghin Naason Salmon.

5 Agus ghin Salmon Boos o Rachab, agus ghin Boos Obed o Rut, agus ghin Obed Iese.

6 Agus ghin Iese Daibhidh an rìgh, agus ghin Daibhidh an rìgh Solomon o'n mhnaoi a bha aig Urias.

7 Agus ghin Solomon Roboam, agus ghin Roboam Abia, agus ghin Abia Asa.

8 Agus ghin Asa Iosaphat, agus ghin Iosaphat Ioram, agus ghin Ioram Osias.

9 Agus ghin Osias Ioatam, agus ghin Ioatam Ahas, agus ghin Ahas Esecias.

10 Agus ghin Esecias Manases, agus ghin Manases Amon, agus ghin Amon Iosias.

11 Agus ghin Iosias Iechonias agus a bhràithre, mu àm an giùlain do Bhabylon.

12 Agus an déigh an toirt do Bhabylon, ghin Iechonias Salatiel, agus ghin Salatiel Serobabel.

13 Agus ghin Serobabel Abiud, agus ghin Abiud Eliacim, agus ghin Eliacim Asor.

14 Agus ghin Asor Sadoe, agus ghin Sadoe Achim, agus ghin Achim Eliud.

15 Agus ghin Eliud Eleasar, agus ghin Eleasar Matan, agus ghin Matan Iacob.

16 Agus ghin Iacob Ioseph fear Mhuire, o'n d'rugadh Iosa, d'an goirear Crìosd.

17 Uime sin na h-uile ghinealaich o Abraham gu Daibhidh, is ceithir ginealaich deug iad; agus o Dhaibhidh gu bruid Bhabiloin, ceithir ginealaich deug; agus o bhruid Bhabiloin gu Crìosd, ceithir ginealaich deug.

18 Agus mar so bha breith Iosa Crìosd: oir an déigh do cheangal-pòsaidh bhi air a dheanamh eadar a mhàthair Mhuire agus

Ioseph, roimh dhoib teachd cuideachd, fhuaradh torrach i o'n Spiorad Naomh.

19 Ach air bhi do Ioseph a fear 'na dhuine cothromach, agus gun toil aige ball-sampuill a dheanamh dhi, bu mhiann leis a cur uaith os ìosal¹.

20 Ach ag smuaineachadh nan nithe sin dha, feuch, dh'fhoillsich aingeal an Tigh-earn e féin da ann am bruadar, ag ràdh, A Ioseph, a mhic Dhaibhidh, na biodh eagail ort do bhean Mhuire a ghabhail a d'ionnsuidh: oir an nì a ta air a ghineamhuin innte, is ann o'n Spiorad Naomh e.

21 Agus beiridh i mac, agus bheir thu Iosa mar ainm air; oir saoraidh² e a shlugh féin o'm peacaibh.

22 (Agus rinneadh so uile chumgu coimhliontadh an nì a thubhairt an Tighearna leis an fhàidh, ag ràdh,

23 Feuch, bithidh maighdean torrach, agus beiridh i mac, agus bheir iad Emanuel mar ainm air, is ionnan sin r'a ràdh, air eadar-theangachadh, Dia maille ruim.)

24 Agus air mosgladh do Ioseph as a chodal, rinn e mar a dh'iarr aingeal an Tighearn air, agus ghabh e d'a ionnsuidh a bhean:

25 Agus cha d'aithnich e i agus an d'rug i a ceud-ghin mic; agus thug e Iosa mar ainm air.

CAIB. II.

1 *Thug na druidhean urram do Chrìosd: 14 Theich Ioseph leis do'n Eiphit, 16 agus mharbh Herod na leanabana.*

AGUS an uair a rugadh Iosa ann am Betlehem Iudea, ann an làithibh Herod an rìgh, feuch, thàinig druidhean³ o'n àird an ear gu Ierusalem,

2 Ag ràdh, C'àit am bheil rìgh sin nan Iudhach a ta air a bhreith? oir chunnaic sinn e reult san àird an ear, agus a ta sinn air teachd a thabhairt aoraidh⁴ dha.

3 An uair a chual Herod an rìgh sin, bha e fo thrioblaid⁵, agus Ierusalem uile maille ris.

4 Agus air cruinneachadh nan àrd-shagart uile dha, agus sgrìobhaichean an t-shluaigh, dh'fheoraich e dhiubh c'àit an robh Crìosd gu bhi air a bhreith.

5 Agus thubhairt iad ris, Ann am Betlehem Iudea: oir mar so sgrìobhadh leis an fhàidh,

¹ an uaighidheas. ² slànauichidh. ³ daoine glìce.

⁴ onoir.

⁵ air a bhuaireadh

6 Agus thusa Bhetlehem an tìr Iudah, cha tu idir a's lugham am measg cheannard¹ Iuda: oir asadsa thig Uachdaran a stiùras mo shluagh Israel.

7 An sin, air do Herod na druidhean a ghairms iosal d'a ionnsuidh, gheur-fhiosraich e dhiubh cia an t-àm an d'fhoillsich-eadh an reult.

8 Agus chuir e iad gu Betlehem, agus thubhairt e, Imichibh, agus iarraibh gu dìchiollach an naoidhean; agus an déigh dhuibh 'fhaotaim², innsibh dhomhsa e, chum guracham-sa féin, agus gu deanam aoradh dha.

9 Agus an uair a chual iad an rìgh, dh'imich iad; agus, feuch, chaidh an reult a chunnaic iad san àird an ear rompa, gus an d'thàinig i agus gu'n do stad i os ceann an ionaid an robh an naoidhean.

10 Agus an uair a chunnaic iad an reult, rinn iad gairdeachas le h-aobhneas ro mhòr.

11 Agus air dol a steach dhoibh do'n tigh, fhuair iad an naoidhean maille³ r'a mhàthair Muire, agus thuit iad sìos, agus rinn iad aoradh dha: agus air fosgladh an ionmhas dhoibh, thug iad dha tiodhlacan; òr, agus tùis, agus mirr.

12 Agus air faotainn rabhaidh o *Dhia* ann am brúadar, gun iad a philltinn a dh'ionnsuidh Heroid, chaidh iad d'an dùthaich féin air slighe eile.

13 Agus an uair a dh'imich iad air an ais, feuch, nochdadh aingeal an Tighearna do Ioseph ann am brúadar, ag ràdh, Eirich, agus gabh an naoidhean agus a mhàthair, agus teich do'n Eiphit, agus bi an sin gus an labhair mise riut: oir iarraidh Herod an naoidhean g'a mhilleadh.

14 Agus dh'éirich e, agus ghabh e d'a ionnsuidh an naoidhean agus a mhàthair san oidheche, agus dh'imich e do'n Eiphit:

15 Agus bha e an sin gu bàs Heroid: a chum gu coimhlionadh an nì a labhair an Tighearna leis an fhàidh, ag ràdh, A mach as an Eiphit ghoir mi mo Mhac.

16 An sin an uair a chunnaic Herod gu'n d'rinn na druidhean fannaid air⁴, las e le feirg ro-mhòir, agus chuir e *luchd-millidh* uaith, agus mharb e na bha do leanabaibh macam Betlehem, agus 'na crìochaibh uile, o aois dhà bhliadhna agus fuidh, a réir na h-aimsir a dh'fhòghluim e gu dìchiollach o na druidhibh.

17 An sin choimhlionadh an nì a labhradh le Jeremias am fàidh, ag ràdh,

18 Chualas guth ann an Rama, caoidh, agus gual, agus bròn ro mhòr, Rachel a' caoineadh a cloinne, agus cha b'èill leathas solas a ghabhail, a chionn nach 'eil iad beò.

19 Ach an uair a dh'eug Herod, feuch, nochdadh aingeal an Tighearn ann am brúadar do Ioseph san Eiphit,

20 Ag ràdh, Eirich, agus gabh an naoidhean agus a mhàthair, agus imich gu talamh Israeil: oir fhuair an dream a bha 'g iarraidh anama an leinibh bàs.

21 Agus dh'éirich esan, agus ghabh e an leanabh agus a mhàthair d'a ionnsuidh, agus thàinig e gu talamh Israeil.

22 Ach an uair a chual e gu'n robh Archelaus 'na rìgh an tìr Iudea an àit Heroid 'athar, bha eagal air dol an sin: ach, air faotainn da rabhaidh o *Dhia* ann am brúadar, thionndaidh e gu crìochaibh Ghalile:

23 Agus thàinig e agus ghabh e còmh-nuidh ann am baile d'an goirear Nasaret, a chum gu coimhlionadh an nì a labhradh leis na fàidhibh, Gu goirear Nasarach dheth.

CAIB. III.

1 *Teagasg, dreuchd, agus caitheamh-beatha Eoin Bhaiste.* 7 *Thug e achmhasan do na Phairisich.* 13 *Bhaist e Crìosd ann an uisge Iordain.*

A GUS anns na làithibh sin thàinig Eoin Bhaiste, a' searmonachadh am fàsach Iudea,

2 Agus ag ràdh, Gabhaibh aithreachas: oir a ta rìoghachd nèimh am fogus.

3 Oir is e so an ti ud mu'n do labhair Easias am fàidh, ag ràdh, Guth an ti a ghlaodhas anns an fhàsach, Ulluichibh slighe an Tighearna, deanaibh a cheum-anna dìreach.

4 Agus bha a chulaidh aig Eoin do fhionna chàmhail, agus crìos leathair aige timchioll a leasraidh; agus is e bu bhiadh dha locuist agus mil fhiadhaich.

5 Chaidh Ierusalem a mach d'a ionnsuidh an sin agus Iudea uile, agus luchd-àiteachaidh na dùthcha timchioll Iordain uile.

6 Agus bhaisteadh iad leis-san ann an Iordan, ag aideachadh⁵ am peacanna.

7 Ach an uair a chunnaic e mòran do na Phairisich, agus do na Sadusaich a' teachd a chum a bhaistidh-san, thubhairt e ri u, A shìol nan nathraiche nimhe, cò a thug rabhadh dhuibh-sa teicheadh o'n fheirg a ta ri teachd?

8 Air an aobhar sin, thugaibh a mach toradh iomchuidh do'n aithreachas.

9 Agus na smuainichibh a ràdh annaibh féin, A ta Abraham 'na athair againn: oir a ta mi ag ràdh ribh, gur comasach Dia air clann a thogail suas a dh'Abraham do na clochaibh sin.

10 Agus a nis a ta an tuadh air a cur ri freumh nan crann: air an aobhar sin, ge b'e crann nach toir a mach toradh maith, gearrar e, agus tilgear san teine e.

11 Gu deimhin a ta mise 'gur bhaisteadh le h-uisge chum aithreachais; ach an ti a thig a'm dhéigh, is cumhachdaiche e na mi, agus cha'n airdh mise air a bhrogan a ghiùlan: baistidh esan sibh leis an Spiorad Naomh, agus le teine:

¹ phrionnsadh. ² shlaghail. ³ am fochair.

⁴ gu'n do mheall na druidhean e. ⁵ aithmheil.

12 Aig am bheil a ghluir 'na làimh, agus glanaidh e gu ro bhaileach 'urlar-bualaidh, agus cruinnichidh e a chruithneachd d'a thigh-tasgaidh¹; ach loisgidh e am moll le teine nach feudar a mhùchadh.

13 An sin thàinig Iosa o Ghalile gu Iordan a dh'ionnsuidh Eoin, chum gu'm biodh e air a bhaisteadh leis.

14 Ach bhac Eoine, ag ràdh, A ta feum agamsa bhì air mo bhaisteadh leatsa, agus ambheil thusa a' teachd a m' ionnsuidh-sa?

15 Agus fhreagair Iosa agus thubhairt e ris, Leig do'n chùis a bhì mar so a nis: oir mar so is iomchuidh dhuinn gach uile fhìreantachd a choimhlionadh. An sin dh'fhulaing e dha.

16 Agus an uair a bhaisteadh Iosa, chaidh e air ball suas as an uisge; agus, feuch, dh'fhosgadh nèamh dha, agus chunnaic e Spiorad Dé a' tuirling² mar cholunan, agus a' teachd air-san:

17 Agus, feuch, guth o nèamh, ag ràdh, Is e so mo Mhac gràdhach, anns am bheil mo mhòr-thlachd.

CAIB. IV.

1 Bhuairean a diabhul Crìosd. 17 An dèigh do Iosa buadhachadh air, thòisich e air searmonachadh. 24 Shlànuich e sluagh a bha euslan.

AN sin thèoraicheadh Iosa leis an Spiorad d'on fhàsach, chum gu'm biodh e air a bhuaireadh leis an diabhul.

2 Agus an uair a thraisg e dà fhichead là agus dà fhichead oidhche, an dèigh sin bha ocras air.

3 Agus air teachd do'n bhuaireadair d'a ionnsuidh thubhairt e, Ma's tu Mac Dhé, thoir àithne do na clochaibh so a bhì 'nan aran.

4 Ach fhreagair esan agus thubhairt e, A ta e sgrìobhta, Cha'n ann le h-aran a mhàin a bheathaichear duine, ach leis gach uile fhocal a thig o bheil Dé.

5 An sin thug an diabhul e do'n bhaile naomh, agus chuir e air binnein an teampuill e.

6 Agus thubhairt e ris, Ma's tu Mac Dhé, tilg thu féin sios: oir a ta e sgrìobhta, gu toir e àithne d'a ainglibh mu d' thimchìoll, agus togaidh iad suas thu 'nan làmbaibh, chum nach buail thu, uair air bith, do chos air cloich.

7 Thubhairt Iosa ris a ris, A ta e sgrìobhta, Cha bhuaire³ thu an Tighearna do Dhia.

8 Thug an diabhul e a ris chum beinne ro àird, agus nochd e dha uile rìoghachdan an domhain, agus an glòir;

9 Agus thubhairt e ris, Iad so uile bheir mise dhuit, ma thuiteas tu sìos agus ma ni thu aoradh dhomhsa.

10 An sin thubhairt Iosa ris, Imich uam, a Shatain: oir a ta e sgrìobhta, Bheir thu aoradh do'n Tighearna do Dhia, agus dhasan 'na aonar ni thu seirbhis.

11 An sin dh'fhàg an diabhul e; agus, feuch, thàinig aingil agus fhrithle iad da.

12 Ach an uair a chual Iosa gu'n do chuireadh Eoin an làimh, dh'imich e do Ghalile.

13 Agus air fàgail Nasaret da, thàinig e agus ghabh⁴ e comhnuidh ann an Capernaum, a ta ri taobh⁵ na fairge, ann an leth-iomall Shabuloin agus Nephtalim:

14 A chum gu'n coimhliontadh an ni a labhradh le Esaiaas am fàidh, ag ràdh,

15 Talamh Shabuloin, agus talamh Nephtalim, sìghe na fairge air an taobh thall do Iordan⁶, Galile nan Cimeach:

16 Am pobull a bha 'nau suidhe an dorchadas, chunnaic iad solus mòr; agus a ta solus air éirigh do na daoineibh a bha 'nan suidhe an tìr agus an sgàil a' bhàis.

17 O sin a mach thòisich Iosa air searmon a dheanamh, agus a ràdh, Gabhaibh aithreachas, oir a ta rìoghachd nèimh am fogus.

18 Agus ag imeachd do Iosa ri taobh fairge Ghalile, chunnaic e dithis bhràithre, Simon d'an goirear Peadar, agus Aindreas a bhràthair, a' tilgeadh lìn san fairge: (oir b'iasgairean iad.)

19 Agus thubhairt e riu, Leanaibh mise, agus ni mi iasgairean air daoineibh dhìbh.

20 Agus air ball dh'fhàg iad na lonta, agus lean iad esan.

21 Agus air triall da as a sin, chunnaic e dithis eile bhràithre, Seumas mac Shebede, agus Eoin a bhràthair, ann an luing maille r'an athair Sebede, a' càradh an lìon: agus ghairm e iad.

22 Agus air ball dh'fhàg iad an long agus an athair, agus lean iad e.

23 Agus dh'imich Iosa timchìoll Ghalile uile, a' teagasg 'nan sionagogaibh, agus a' searmouachadh soisgeil na rìoghachd, agus a' slànuchadh gach gnè thinnis, agus gach gnè eucail am measg an t-sluaigh.

24 Agus chaidh a chliu feadh Shìria uile: agus thug iad d'a ionnsuidh iadsau uile a bha euslan, agus a bha air an cuibhreachadh le galaraiibh, agus iomadh gnè phianta, agus iadsan aig an robh deamhain annta, agus air an robh an tuiteamas⁷, agus luchd pairilis⁸; agus shlànuich e iad.

25 Agus lean cuideachd mhòr e o Ghalile, agus o Dhecapolis, agus o Jerusalem, agus o Iudea, agus o na crìochaibh a ta an taobh thall do Iordan.

CAIB. V.

1 Searmoin Chrìosd air a' bheinn, anns am bheil na h-òchd beannachdan, 17 agus nàncachadh an lagha.

AGUS an uair a chunnaic Iosa an sluagh, chaidh e suas air beinn; agus air suidhe dha, thàinig a dheisciobuil d'a ionnsuidh.

¹ thaisg - thigh.

² teachd a nuas.

³ dearbh.

⁴ rin.

⁵ chois.

⁶ ri taobh Iordain.

⁷ tuiteas na gcalaich, tuiteamach. ⁸ crith-ghalair.

2 Agus dh'fhosgail e a bheul, agus theagaisg e iad, ag ràdh,

3 *Is beannaichte iadsan a ta bochd 'nan spiorad : oir is leo rioghachd nèimh.*

4 *Is beannaichte iadsan a ta ri bròn : oir gheibh iad sòlas.*

5 *Is beannaichte na daoine macanta¹ : oir sealbhaichidh iad an talamh mar oighreachd.*

6 *Is beannaichte an dream air am bheil ocras agus tart na còrach² : oir sàsuichear iad.*

7 *Is beannaichte na daoine tròcaireach : oir gheibh iad tròcair.*

8 *Is beannaichte na daoine a ta glan 'nan cridhe : oir chi iad Dia.*

9 *Is beannaichte luchd-deanamh na sìthe : oir goirear clann Dé dhiubh.*

10 *Is beannaichte an dream a ta fulang geur-leanmhuinn air son na còrach : oir is leosan rioghachd nèimh.*

11 *Is beannaichte bhitheas sibh an uair a bheir daoine anacainnt dhuibh, agus a ni iad geur-leanmhuinn oirbh, agus a labhras iad gach uile dhroch fhocal ribh gu breugach, air mo sgàth-sa.*

12 *Deanaibh gairdeachas, agus bithibh ro shubhach ; oir is mòr bhuir duais air nèamh : oir mar sin 'rinn iad geur-leanmhuinn air na fàidhibh a bha roimhibh.*

13 *Is sibhse salann na talmhainn : gidheadh ma chailleas an salann a bhlas, ciod leis an saillear e ? cha'n 'eil feum ann o sin suas, ach a thilgeadh mach, agus a shaltairt fo chosaibh dhaoine.*

14 *Is sibhse solus an t-saoghail. Cha'n fheudar baile a ta air a shuidheachadh air slabh fholach.*

15 *Agus cha las daoine coinneal, chum gu'n cuir iad i fuidh shoitheach, ach ann an coimneil, agus ni i solus do na bheil a stigh.*

16 *Gu ma h-ann mar sin a dhealraicheas bhuir solus an làthair dhaoine, chum gu faic iad bhuir deadh oibre, agus gu toir iad glòir do bhuir n-Athair a ta air nèamh.*

17 *Na measaibh gu'n d'thàinig mise a bhriseadh³ an lagha no nam fàidhean ; cha'n ann⁴ a bhriseadh a thàinig mi, ach a choimhlionadh.*

18 *Oir a ta mi ag ràdh⁵ ribh gu firinn-each, Gus an téid⁶ nèamh agus talamh thairis, cha téid aon lide⁷ no aon phunc do'n lagh thairis, gusan coimhlionar gach aon ni.*

19 *Air an aobhar sin ge b'e neach a bhriseas aon do na h-àitheantaibh, so a's lugha, agus a theagaisgeas daoine mar sin, goirear an duine a's lugha dheth ann an rioghachd nèimh : ach ge b'e neach a ni, agus a theagaisgeas iad, goirear duine mòr dheth ann an rioghachd nèimh.*

20 *Oir a ta mi ag ràdh ribh, Mur toir bhuir fireantachd-sa barrachd air fireant-*

achd nan sgrìobhaiche agus nam Phairis-each, nach téid sibh, air chor air bith, a steach do rioghachd nèimh.

21 *Chuala sibh, gu'n dubhradh ris na sinnsiribh, Na dean mortadh ; agus ge b'e neach a ni mortadh, bithidh e an cunnart a' bhreitheanais.*

22 *Ach a ta mise ag ràdh ribh, Ge b'e neach aig am bi fearg r'a bhràthair gun aobhar, gu'm bi e an cunnart a' bhreitheanais : agus ge b'e neach a their r'a bhràthair, Raca, gu'm bi e an cunnart na comhairle : ach ge b'e neach a their, Amadain, gu'm bi e an cunnart teine ifrinn.*

23 *Uime sin ma bheir thu do thabhartas⁸ chum na h-altarach⁹, agus gu'n cuimhnich thu an sin gu bheil ni air bith aig do bhràthair a'd' aghaidh ;*

24 *Fàg do thabhartas an sin an làthair na h-altarach, agus imich, agus dean réite air tùs ri d' bhràthair, agus an déigh sin thig agus tabhair uait do thiodlac.*

25 *Bi réidh ri d' eascaraid gu luath, am feadh a bhios tu maille ris san t-slighe : air eagal gu'n toir an t-eascaraid thairis thu do'n bhreitheamh, agus gu'n toir am bhreitheamh thu do'n mhaor, agus gu tilgear am prìosan thu.*

26 *A ta mi ag ràdh riut gu firinneach nach téid thu mach as a sin, gusan an ioc thu an fheoiring¹⁰ dheireannach.*

27 *Chuala sibh gu'n dubhradh ris¹¹ na sinnsiribh, Na dean adhaltrannas.*

28 *Ach a ta mise ag ràdh ribh, Ge b'e neach a dh'amhairceas air mnaoi chum a miannachadh, gu'n d'rinn e adhaltrannas leatha cheana 'na chridhe.*

29 *Agus ma bheir do shùil dheas aobhar tuislidh dhuit, spìon a mach i, agus tilg uait i : oir is fearr dhuit gu sgriosar aon do d' bhallaibh, na do chorp uile bhi air a thilgeadh do ifrinn.*

30 *Agus ma bheir do làmh dheas oilbheum dhuit, gearr dhìot i, agus tilg uait i : oir is fearr dhuit gu sgriosar aon do d' bhallaibh, na do chorp uile bhi air a thilgeadh do ifrinn.*

31 *Agus a dubhradh, Ge b'e chuireas a bhean phòsda air falbh, thugadh e litir-dhealaich dhi.*

32 *Ach a ta mise ag ràdh ribh, Ge b'e neach a chuireas air falbh a bhean-phòsda féin, ach a mhàin air son striopachais, gu bheil e toirt oirre adhaltrannas a dheanamh : agus an ti a phòsas a' bhcan sin a chuireadh air falbh, a ta e a' deanamh adhaltrannais.*

33 *Mar an ceudna, chuala sibh gu'n dubhradh ris na sinnsiribh, Na tabhair mionnan eitheich, ach coimhlion do mhionnan d'on Tighearna.*

34 *Ach a ta mise ag ràdh ribh, Na tugaibh*

¹ ciùin.

² a' cheartais, na fireantachd.

³ a sgaoileadh. ⁴ ni h-ann. ⁵ deirim, theiream.

⁶ an d'théid.

⁷ altair.

⁸ aon iota.

⁹ farthing. Sasg.

¹⁰ thiodlac.

¹¹ leis

mionnan idir: na *tugaibh* air nèamh, oir is e righ-chaithir Dhé e.

35 Na *tugaibh* air an talamh, oir is e stòl a chos e: na *tugaibh* air Ierusalem, oir is e baile an righ mhòir e.

36 Na tabhair mionnan air do cheann, oir cha'n urrainn thu aon fhuiltein a dheanamh geal no dubh.

37 Ach gu ma h-e is còmhraidh dhuibh, Seadh, seadh: Ni h-eadh, ni h-eadh; oir ge b'e ni a bhios os ceann so, is ann o'n olc a ta e.

38 Chuala sibh gu'n dubhradh, Sùil air son sùla, agus fiacail air son fiacail.

39 Ach a ta mise ag ràdh ribh, Na cuiribh an aghaidh an uilc: ach ge b'e neach a bhuail eas tu air do ghial deas, tionndaidh thuige an gial eile mar an ceudna.

40 Agus an tile m'b' àill thusa a thagradh san lagh, agus do chòta a bhuin diot, leig leis d'fhalluin mar an ceudna.

41 Agus ge b'e bheir leis air feadh mìle a dh'aindeoin thu, imich leis air feadh dhà mhìle.

42 Tabhair do'n ti a dh'iarras ort; agus uathsan le'm bu mhiann iasachd fhaotainn uait, na pill air falbh.

43 Chuala sibh gu'n dubhradh, Gràdh-aichidh tu do choimhearsnach, agus bithidh fuath agad do d' nàmhaid.

44 Ach a ta mise ag ràdh ribh, Biodh gràdh agaibh do bhuir naimhdibh, beannaichibh an dream a mhallaicheas sibh, deanaibh maith do na daoineibh air am beag sibh, agus deanaibh urnuigh air son na muinntir a ta buntuinn ribh gu naimhdeil, agus a ta 'g ur geur-leanmhuinn:

45 A chum gu'm bi sibh 'nur cloinn aig bhuir n-Athair a ta air nèamh: oir a ta esan a' tabhairt air a ghréin féin éirigh air na droch dhaoineibh, agus air na deadh dhaoineibh, agus a' cur uisge air na fireanaibh agus air na neo-fhìreanaibh.

46 Oir ma bhios gràdh agaibh do'n mhuinntir aig am bheil gràdh dhuibh, ciod an duais a gheibh sibh? nach 'eil eadhon na cìs-mhaoir a' deanamh an ni ceudna?

47 Agus ma chuireas sibh fàilte air bhuir bràithribh féin a mhaìn, ciod a tha sibh a' deanamh thar *chàch*? nach 'eil na cìs-mhaoir féin a' deanamh an ni ceudna?

48 Air an aobhar sin bithibh-sa coimhlionta¹ mar a ta bhuir n-Athair a ta air nèamh coimhlionta.

CAIB. VI.

1 Tha Crìosd a' labhairt mu dhéirc, 5 mu urnuigh, 14 mu mhaithneas d'ar bràithribh, 16 mu thrasgadh, 25 agus mu ro-chùram an t-saoghail so.

THUGAIBH an aire nach toir² sibh 'bhuir déire an fianuis dhaoine, chum gu'm faicear leo sibh; no cha'n f'haigh

sibh tuarasdal o bhuir n-Athair a ta air nèamh.

2 Uime sin, an uair a bheir thu do dhéirc, na toir fa' near galltomp a shéideadh romhad, mar a ni na cealgairean, anns na sionagogaibh, agus anns na sràideibh, chum gu faigh iad glòir o dhaoineibh. Gu firinneach a ta mise ag ràdh ribh, gu bheil an tuarasdal aca.

3 Ach an uair a bheir thusa déirc, na biodh fios aig do làimh chli ciod a ta do làmh dheas a' deanamh;

4 Chum gu'm bi do dhéire an uaignidheas: agus bheir t' Athair a chi an uaignidheas, duais dhuithse gu follaiseach.

5 Agus an uair a ni thu urnuigh, na bi mar luchd an fhuar-chràbhaidh: oir is ionmhuinn leo urnuigh a dheanamh anns na sionagogaibh, agus ann an coinneachadh nan sràid 'nan seasamh, chum gu faicear le daoineibh iad, Gu deimhin tha mise ag ràdh ribh, gu bheil an tuarasdal aca.

6 Ach thusa, an uair a ni thu urnuigh, imich a steach do d' sheòmar, agus air dùnadh do dhòrus duit, dean urnuigh ri t' Athair a ta an uaignidheas, agus bheir t' Athair a chi an uaignidheas, duais dhuith gu follaiseach.

7 Ach an uair a ni sibh urnuigh na gnàthaichibh ath-iartais dhiomhain, mar na Cinnich: oir saoilidh iasdan gu'n éisd-eir riu air son lionmhoireachd am focla.

8 Uime sin na bithibh-sa cosmhuil riu: oir a ta fios aig bhuir n-Athair cia iad na nithe a ta dh'uireasbhuidh oirbh, mu'n iarr sibh air iad.

9 Air an aobhar sin deanaibh-sa urnuigh air a' mhodh so: Ar n-Athair a ta air nèamh, Gu naomhaichear t'ainm.

10 Thigeadh do rìoghachd. Deanar do thoil air an talamh, mar a nithear air nèamh.

11 Tabhair dhuinn an diugh ar n-aran laitheil.

12 Agus maith dhuinn ar fiacha, amhuil mar a mhaithcas sinne d'ar luchd-fiach³.

13 Agus na leig am buaireadh sinn; ach saor sinn o olc: oir is leatsa an rìoghachd, agus an cumhachd, agus a' ghloir, gu sìorruidh. Amen.

14 Oir ma mhaithes sibh an cionta do dhaoineibh, maithidh bhuir n-Athair nèamhaidh dhuibh-sa mar an ceudna:

15 Ach mur maith sibh an cionta do dhaoineibh, cha mhò a mhaithes bhuir n-Athair dhuibh-sa bhuir cionta.

16 Agus an uair a ni sibh trasgadh, na bitheadh gruaim air bhuir gnùis, mar luchd an fhuar-chràbhaidh: oir cuiridh iadsan mi-dhreach air an aghaidh chum gu faicear le daoineibh iad a bhi trasgadh. Tha mi ag ràdh ribh gu firinneach, gu bheil an tuarasdal aca.

¹ fairshe, dìongmhaltas.

² dean.

³ feichneimibh.

17 Ach thusa, an uair a ni thu trasgadh, cuir oladh air do cheann, agus ionnail t'aghaidh¹:

18 Chum nach faicear le daoineibh gu bheil thu a' deanamh trasgaidh, ach le t'Àthair a ta an uaignidheas: agus bheir t'Àthair a chi an uaignidheas, duais dhuit gu follaiseach.

19 Na taisgibh dhuibh féin ionmhais air an talamh, far an truail² an leomann³ agus a' mheirg e, agus far an cladhaich na meirlich a stigh agus an goid iad.

20 Ach taisgibh ionmhais dhuibh féin air nêamh, far nach truail an leomann no a' mheirg, agus nach cladhaich, agus nach goid na meirlich.

21 Oir ge b'e àit am bheil bhur n-ionmhais, is ann an sin a bhios bhur chridhe mar an ceudna.

22 Is i an t-sùil solus a' chuirp: uime sin ma bhios do shùil glan, bithidh do chorp uile làn soluis.

23 Ach ma bhios do shùil gu h-olc, bithidh do chorp uile dorch. Air an aobhar sin ma tha an solus a ta annad na dhorchadas, cia mòr an dorchadas sin.

24 Cha'n urrainn neach air bith seirbhis a dheanamh do dhà 'Thighearn: oir an dara cuid bithidh fuath aige do neach aca, agus gràdh do neach eile; no gabhaidh e le neach aca, agus ni e tàir air neach eile. Cha'n urrainn sibh seirbhis a dheanamh do Dhia agus do Mhamon.

25 Uime sin, a ta mise ag ràdh ribh, Na biodh ro-chùram oirbh mu thimchioll bhur beatha, ciod a dh'itheas no dh'òlas sibh; no mu thimchioll bhur cuirp, ciod a chuireas sibh umaibh. Nach mò a' bheatha na 'm biadh, agus an corp na'n t-eudach?

26 Amhaireibh air eunlaith an athair: oir cha chuir iad siol, agus cha bhuain iad, agus cha chruinnich iad an saibhligh: gidheadh a ta bhur n-Àthair nêamhaidh-sa⁴ g am beathachadh. Nach fearr sibhse gu mòr na iadsan?

27 Agus cò agaibh le mòr-chùram a dh'fheudas aon làmh-choille⁴ a chur r'a àirde féin?

28 Agus c'ar son a ta sibh ro chùramach mu thimchioll bhur culaidh? fògh-lumaibh cionnus a ta na llighean a' fàs sa' mhachair; cha saothraich iad, agus cha sniomh iad.

29 Gidheadh a ta mise ag ràdh ribh, Nach robh Solamh féin na uile ghloir, air eudachadh mar aon diubh so.

30 Air an aobhar sin, ma tha Dia mar sin a' sgeadachadh feoir na macharach¹ a ta an diugh ann, agus am màireach air a thilgeadh san àmhuinn, nach mò na sin a sgeadaicheas e sibhse, a dhaoine air bheag creidimh?

31 Uime sin na bithibh làn do chùram,

ag radh, Ciod a dh'itheas sinn? no ciod a dh'òlas sinn? no ciod a chuireas sinn umainn?

32 (Oir iad so uile iarraidh na Cinnich;) oir a ta fios aig bhur n-Àthair nêamhaidh gu bheil feum agaibh-sa air na nithibh so uile.

33 Ach iarraidh air tùs rìoghachd Dhe, agus 'fhìreantachd-san, agus cuirear na nithe so uile ribh.

34 Uime sin, na bitheadh ro-chùram oirbh mu thimchioll an là màireach: oir bithidh a làn do chùram air an là màireach mu thimchioll a nithe féin: is leor do'n là 'ole féin.

CAIB. VII.

1 Tha ar Slànuighear a' cronuchadh breth ghrad, 6 a' toirmeasg nithe naomha chur an neo-shuim, 7 agus ag ordachadh urnuigh a dheanamh. 13 Chomhairlich e do gach neach dol a steach air an dorus chumhann.

NA tugaibh breth, chum nach toirear breth oirbh:

2 Oir a réir na breth a bheir sibh, bheir ear breth oirbh: agus leis an tomhas le'n tomhais sibh, tomhaisear dhuibh a ris.

3 Agus c'ar son a ta thu a' faicim an smùirnein⁵ a ta an sùil do bhràthar, ach nach 'eil thu toirt fa' near an t-sail a ta ann do shùil féin?

4 No cionnus a their thu ri d'bràthair, Fulaing dhomh an smùirnein a spionadh as do shùil; agus, feuch, an t-sail ann do shùil féin?

5 A chealgair, buin air tùs an t-sail as do shùil féin; agus an sin is léir dhuit gu maith an smùirnein a bhuntuiun a sùil do bhràthar.

6 Na toiribh an ni naomh do na madraibh, agus na tilgibh bhur nêamhnuidean am fianuis nam muc, air eagal gu saltair iad orra le'n cosaibh, agus⁶ air pilltinn doibh gu reub iad sibh féin as a chéile.

7 Iarraibh, agus bheir ear dhuibh: sibh⁷, agus gheibh sibh: buailibh andorus, agus fogailear dhuibh:

8 Oir gach uile neach a dh'iarras, glacaidh e: agus ge b'e a shìreas, gheibh e: agus do'n ti a bhuaileas an dorus, fosgailear.

9 Oir cò an duine agaibh-sa, ma's e's gu'n iarr a mhac aran, a bheir cloch dha?

10 Agus ma's iasg a dh'iarras e, an tabhair e nathair dha?

11 Air an aobhar sin ma's aithne dhuibh-sa a ta olc, tiodhlacan maithe a thabhairt do bhur cloinn, nach mò na sin a bheir bhur n-Àthair a ta air nêamh nithe maithe dhoibhsan a dh'iarras air iad?

12 Uime sin, gach uile ni bu mhiann leibh daoine a dheanamh dhuibh-sa, dean-aibh-sa a leithid dhoibhsan mar an ceudna: oir is e so an lagh agus na fàidhean.

13 Imichibh a steach air an dorus chumh-

¹ t'eudan.

³ an reudan, a' mhiol-chrion.

² mill.

⁴ bhann-làmh

⁵ caimcin.

⁷ lorgaichibh.

⁶ no.

ann; oir is farsuinn an dorus, agus is leathan an t-slighe a ta treòrachadh chum sgrios, agus is lionmhor iad a ta dol a steach oirre:

14 Ach is¹ cumhann an dorus, agus is aithmleathan an t-slighe a ta treòrachadh chum na beatha, agus is tearc iad a ta 'g amas oirre.

15 Coimhidibh sibh féin o na fàidhibh bréige, a thig d'ur n-ionnsuidh ann an culaidhibh chaorach, ach a ta o'n leth a stigh 'nam madaibh-alluidh.

16 Air an toraibh aithnichidh sibh iad: an tionail daoine dearcán-fìona do dhrisibh, no figean do na foghannanaibh?²

17 Agus mar sin bheir gach uile chrann maith toradh maith: ach bheir an droch chrann droch thoradh.

18 Cha'n fheadh a' chraobh mhaith droch thoradh a ghiùlan³, no an droch chraobh toradh maith a thabhairt.

19 Gach uile chrann nach giùlain toradh maith, gearrar sìos e, agus tilgear san teine e.

20 Air an aobhar sin, is ann air an toraibh a dh'aithnicheas sibh iad.

21 Cha'n e gach uile neach a their riumsa, A Thighearn, a Thighearn, a théid a steach do rìoghachd nheimh: ach an ti a ni toil m' Athar-sa a ta air nèamh.

22 Is iomadh iad a their riumsa san là ud, A Thighearn, a Thighearn, nach d'rinn sinn fàidheadaireachd a' t'ainm-sa? agus a' t'ainm-sa nach do thig sinn a mach deamhain? agus a' t'ainm-sa nach d'rinn sinn iomadh miorbhuile?

23 Agus an sin aithnidh mise gu follaiseach dhoibh, Cha b'aithne dhomh riamh sibh: imichibh uam, a luchd-deanamh na h-eucorach.

24 Air an aobhar sin, gach uile neach a chluinneas na briathra so agamsa, agus a ni iad, samhluichidh mi e ri duine glic, a thog a thigh air carraig:

25 Agus thuirling⁴ an t-uisge, agus thàinig na tuitlean, agus shéid na gaothan, agus bhuail iad air an tigh sin: agus cha do thuit e, oir bha a bhunadh suidhichte air carraig.

26 Agus gach uile neach a chluinneas na briathra so agamsa, agus nach coimhlion iad, samhluichear e ri duine amaideach a thog a thigh air a' ghaineamh:

27 Agus thuirling an t-uisge, agus thàinig na tuitlean, agus shéid na gaothan, agus bhuail iad air an tigh sin: agus thuit e; agus bu mhòr a thuiteam.

28 Agus tharladh⁵, an uair a chrìochnaich Iosa na briathra so, gu'n do ghabh am pobull iongantais r'a theagasg-san:

29 Oir theagaisg e iad mar neach aig an robh cumhachd⁶, agus cha'n ann mar na sgriobhaichean.

1 Ghlan Crìosd an lobhar; 5 shlànuich e seirbhisach a' Chaipitin-ceud; 14 agus màthair-chéile Pheadair; 23 Chùinich e an fhàirge, 28 agus thig e mach deamhain á dithis dhaoine.

A GUS air teachda nuas o'n bheinn dha, lean cuideachd mhòr e.

2 Agus, feuch, thàinig lobhar, agus rinn e aoradh dha, ag ràdh, A Thighearna, ma's àill leat, is comasach thu air mise a ghlanadh.

3 Agus shìn Iosa mach a làmh, agus bhean e ris, ag ràdh, Is àill leam; bithusa glan. Agus air ball bha a lùbhrè air a glanadh.

4 Agus thubhairt Iosa ris, Feuch nach innis thu do dhuine sam bith, ach imich, taisbein thu féin do'n t-sagart, agus thoir d'a ionnsuidh⁷ an tiodhlac a dh'àithn Maois, mar fhianùis dhoibh.

5 Agus air dol do Iosa a steach do Chapernaum, thàinig d'a ionnsuidh Caipitin-ceud, a' guidhe air,

6 Agus ag ràdh, A Thighearna, tha m'òglach 'na luidhe a stigh am pairilis agus air a phianadh gu h-anabarrach.

7 Agus thubhairt Iosa ris, Théid mise, agus slànuichidh mi e.

8 Agus air freagairt do'n Chaipitin-ceud, thubhairt e, A Thighearna, cha'n aairidh mise air thu a theachd a steach fo m' chleith: ach a mhàin abair am focal, agus slànuichear m'òglach.

9 Oir is duine mise féin a ta fuidh ughdarras, aig am bheil saighdeara fodham: agus their mi ris an fhear so, Imich, agus imichidh e: agus ris an fhear so eile, Thig, agus thig e: agus ri m' sheirbhiseach, Dean so, agus nì se e.

10 'Nuair a chual Iosa so, ghabh e iongantais, agus thubhairt e ris a' mhuinntir a lean e, Gu fìrinneach a ta mi ag ràdh ribh, ann an Israel féin nach d'fhuair mi creidimh cò mòr as so.

11 Agus a ta mi ag ràdh ribh, gu'n tig mòran o'n àird an ear, agus o'n àird an iar, agus gu'n suidh iad maille ri Abraham, agus Isaac, agus Iacob, ann an rìoghachd nheimh:

12 Ach gu'n tilgear clann na rìoghachd ann an dorchadas a ta 'n leth a muigh; bithidh an sin gul agus giosgan⁸ fhìcal.

13 Agus thubhairt Iosa ris a' Chaipitin-ceud, Imich romhad, agus biodh dhuit a réir mar a chreid thu. Agus shlànuicheadh 'òglach air an uair sin féin.

14 Agus an uair a thàinig Iosa gu tigh Pheadair, chunnaic e màthair a mhnà 'na luidhe, agus i ann am fiabhrus⁹.

15 Agus bhean e r'a làmh, agus dh'fhàg am fiabhrus i: agus dh'èirich i, agus rinn i frithealadh dha¹⁰.

¹ do thrìgh gur.

² cluanaibh.

³ iomchar.

⁴ thàinig a nuas.

⁵ thachair.

⁶ ngèdarras.

⁷ thuige, chuige.

⁸ snagardaich.

⁹ an teasaich.

¹⁰ doibh.

16 Agus an uair a bha am feasgar air teachd, thug iad d'a ionnsuidh mòran anns an robh deamhain; agus thilg e na spioraid a mach le 'fhocal, agus shlànuich e iad uile a bha eùslan:

17 A chum gu'n coimhlionadh¹ an nì a labhradh le Easias am fàidh, ag ràdh, Ghabh esan ar n-anmhuinneachdan air fèin, agus ghiùlain e ar n-euslaintean.

18 Agus an uair a chunnaic Iosa sluagh mòr m'a thimchioll, dh'àithn e dol á sin do'n taobh cile.

19 Agus thàinig sgrìobhaiche àraidh, agus thubhairt e ris, A mhaighstir, leanaidh mise thu, ge b'e taobh a thèid thu.

20 Agus thubhairt Iosa ris, Tha tuill aig na sionnach, agus nìd aig eunlaith an athair²; ach cha'n 'eil aig Mac an duine ionad anns an cuir e a cheann fuidh.

21 Agus thubhairt fear cile d'a dheisciobluibh ris, A Thighearna, leig dhomh-sa imeachd air tús agus m' athair adhlacadh.

22 Ach thubhairt Iosa ris, Lean mise, agus leig leis na mairbh am mairbh fèin adhlacadh.

23 Agus air dol dhasan a steach do luing, lean a dheisciobuil e.

24 Agus, feuch, dh'èirich doiniom³ mhòr air an fhaighe, ionnus gu'n d'fholaich na tuinn an long: ach bha esan 'na chodal.

25 Agus thàinig a dheisciobuil d'a ionnsuidh, agus dhùisg iad e, ag ràdh, A Thighearna, teasaig sinn: a ta sinn cailtte.

26 Agus thubhairt e riu, C'ar son a ta sibh eagalach, sibhse air bheag creidimh? An sin dh'èirich e, agus chronuich e na gaothan agus an fhaighe; agus bha ciùine mhòr ann.

27 Ach ghabh na daoine iongantais, ag ràdh, Ciod⁴ e ghnè dhuine so, gu bheil na gaotha fèin agus an fhaighe ùmhal dha?

28 Agus air teachd dha do'n taobh eile, gu tìr na Gergeseneach⁵, thachair dithis dhaoine air, anns an robh deamhain, a' teachd a mach as na h-àitibh adhlac, agus iad ro-gharg, ionnus nach feudadh duine sam bith an t-slighe sin a ghabhail.

29 Agus, feuch, ghlaodh iad, ag ràdh, Ciod e ar gnothuch-ne riut, Iosa a Mhic Dhé? An d'thàinig thu an so g'ar pianadh roimh an àm?

30 Agus bha treud mòr mhuc am fad uatha, ag ionaltradh.

31 Agus dh'ìarr na deamhain a dh'ath-chuinge airsan, ag ràdh, Ma thilgeas tu mach sinn, leig dhuinn dol san treud mhuc ud.

32 Agus thubhairt e riu, Imichibh. Agus air dol a mach dhoibh, chaidh iad anns an treud mhuc: agus, feuch, ruith an treud mhuc uile gu dian sìos air ionad

corrach⁶, do'n chuan; agus chailleadh sna h-uisgeachaibh iad.

33 Agus theich na buachaillean, agus chaidh iad do'n bhaile, agus dh'innis iad na nithe so uile, agus na thachair dhoibh-san anns an robh na deamhain.

34 Agus, feuch, chaidh am baile uile a mach a choinneachadh Iosa; agus an uair a chunnaic iad e, ghuidh iad air imeachd as an crìochaibh-san.

CAIB. IX.

1 An dèigh do Chrìosd neach air an robh am pairilis a leigheas, 9 ghairm e Mata o bhòrd na cise; 10 dh'ith e maille ri cismhuoir agus ri peacach; 20 shlànuich e bean air an robh dortadh fala; 32 agus duine balbh anns an robh deamhan.

AGUS air dol an luing dha, chaidh e thar an uisge, agus thàinig e d'a bhaile fèin.

2 Agus, feuch, thug iad d'a ionnsuidh duine air an robh am pairilis, 'na luidhe air leabaidh: agus an uair a chunnaic Iosa an creidimh, thubhairt e ri fear na pairilis, Biodh deadh mhisneach agad, a mhic, a ta do pheacanna air am maitheadh dhuit.

3 Agus, feuch, thubhairt dream àraidh do na sgrìobhaichibh anna fèin, A ta am fear so a' labhairt toibheim⁷.

4 Agus air do Iosa an smuaintean fhaicinn, thubhairt e, C'ar son a ta sibh a' smuaineachadh uile ann bhur cridheachaibh?

5 Oir cia is usadh a ràdh, A ta do pheacanna air am maitheadh dhuit? no a ràdh, Eirich agus imich?

6 Ach a chum gu'm bi fios agaibh gu bheil cumhachd aig Mac an duine peacanna a maitheadh air an talamh, (thubhairt e an sin ri fear na pairilis,) Eirich, tog do leabaidh, agus imich do d' thigh.

7 Agus dh'èirich e, agus chaidh e d'a thigh fèin.

8 Ach an uair a chunnaic am' pobull so, ghabh iad iongantais, agus thug iad glòir do Dhia, a thug a leithid so a chumhachd do dhaoimibh.

9 Agus ag dol do Iosa as an àite sin, chunnaic e duine 'na shuidhe aig bòrd na cise, d'am b'ainm Mata; agus thubhairt e ris, Lean mise. Agus dh'èirich e, agus lean se e.

10 Agus tharladh, air suidhe do Iosa aig biadh san tigh, feuch, thàinig mòran chismhaor agus pheacach, agus shuidh iad sìos maille ris-san agus r'a dheisciobluibh.

11 Agus an uair a chunnaic na Phairisich so, thubhairt iad r'a dheisciobluibh, C'ar son a dh'itheas bhur maighstir-sa maille ri cis-mhaoraibh agus ri peacachaibh?

12 Ach an uair a chual Iosa so, thubhairt e riu, Cha'n ann aig a' mhuinntir a ta slàn a ta feum air an léigh, ach aig a' mhuinntir a ta euslan.

¹ Air chor as gu'n do choimhlionadh.

² aidheir.

³ stòirm.

⁴ Creud.

⁶ cas.

⁵ Gadareneach.

⁷ dia-mhasluchaidh.

13 Ach imichibh agus fòghlumaibh ciod is ciall da so, Tròcair is àill leam, agus cha'n iobairt: oir cha d'thàinig mise a ghairm nam fireanach, ach nam peacach chum aithreachais.

14 An sin thàinig deisciobuil Eoin d'a ionnsuidh, ag ràdh, C'ar son a ta sinne agus na Phairisich a' trasgadh gu mimic, ach ni'm bheil do dheisciobuil-sa a' trasgadh?

15 Agus thubhairt Iosa riu, Am feud clann seòmair an fhir-nuadh-phòsda¹ bhi brònach, am feadh a bhitheas am fear-nuadh-phòsda maille riu? Ach thig na làithean anns an toirear am fear-nuadh-phòsda uatha, agus an sin ni iad trasgadh.

16 Cha chuir duine sam bith mìr do eudach nuadh air sean eudach: oir buinidh an ni a chuireadh g'a lionadh suas as an eudach, agus nithear an reubadh ni's miosa.

17 Cha mhò a chuireas daoine fion nuadh ann an seann searragaibh²: no brisear na searragan, agus dòirtear am fion, agus caillear na searragan: ach cuiridh iad fion nuadh ann an searragaibh nuadha, agus bithidh iad araon slàn.

18 'Nuair a bha e a' labhairt nan nithe so riu, feuch, thàinig uachdaran àraidh, agus thug e aoradh dha, ag ràdh, Thuair mo nighean bàs air ball³: ach thig-sa agus cuir do làmh oirre agus bithidh i beò.

19 Agus dh'èirich Iosa, agus lean e féin agus a dheisciobuil e.

20 (Agus, feuch, thàinig bean, air an robh dòrtadh fola rè dhà bhliadhna dheug, air a chlàobh, agus bhean i ri iomall 'eudaich:

21 Oir thubhairt i innte féin, Ma bheanas mi ach ri 'eudach, bithidh mi slàn.

22 Ach air tionndadh do Iosa mu'n cuairt, chunnaic e i, agus thubhairt e, A nighean, biodh deadh mhisneach agad; shlànuich do chreidimh thu. Agus bha a' bhean slàn o'n uair sin.)

23 Agus an uair a thàinig Iosa gu tigh an uachdaran, agus a chunnaic e an luchd-ciùil, agus a' chuideachd a' deanamh toirm bhròin,

24 Thubhairt e riu, Imichibh roimhibh, oir cha'n 'eil an nigheanag⁴ marbh ach 'na codal. Agus rinn iad gàire fòchaid ris.

25 Ach an uair a chuireadh a' chuideachd a mach, chaidh e a steach, agus rug e air làimh oirre, agus dh'èirich an nigheanag.

26 Agus chaidh iomradh sin a mach air feadh na tìre sin uile.

27 Agus an uair a dh'imich Iosa as a sin, lean dithis dhall e, ag èigheach, agus ag ràdh, A Mhic Dhaibhidh, dean tròcair oirne.

28 Agus an uair a thàinig e steach do'n tigh, thàinig na doill d'a ionnsuidh: agus thubhairt Iosa riu, Am bheil sibh a' creidsinn gur comasach mise so a dheanamh? Thubhairt iad ris, A ta, a Thighearn.

29 An sin bhean e 'an sùilibh, ag ràdh, Biodh e dhuibh a réir blur creidimh.

30 Agus dh'fhosgladh an sùilean, agus bhagair Iosa gu geur iad⁵, ag ràdh, Faicibh nach faigh neach air bith fios air so:

31 Ach an uair a dh'imich iad a mach, sgaoil iad a clìlù air feadh na dùthcha sin uile.

32 Agus ag dol dhoibhsan a mach, feuch, thug iad d'a ionnsuidh duine balbh anns an robh deamhan.

33 Agus an déigh do'n deamhan a bhi air a thilgeadh a mach, labhair am balbhan: agus ghabh an sluagh iongantas, ag ràdh, Cha'n fhacas a leithid so ann an Israel riamh.

34 Ach thubhairt na Phairisich, Troimh phrionnsa nan deamhan a ta e a' tilgeadh a mach dheamhan.

35 Agus ghabh Iosa mu chuairt nan uile chaithrichean agus bhailean⁶, a' teagasg 'nan sionagogaibh, agus a' searmonachadh soisgeil na rioghachd, agus a' slànuchadh gach uile euslaint agus eucail am measg a' phobuill.

36 Ach an uair a chunnaic e an sluagh, ghabh e truas diubh, air son gu'n robh iad air fannachadh, agus air an sgapadh o chéile, mar chaorach aig nach 'eil buach-aill⁷.

37 An sin thubhairt e r'a dheisciobluibh, Gu deimhin is mòr am fogharadh, ach is tearc an luchd-oibre.

38 Uime sin, guidlibh-sa air Tighearn an fhogharaidh, luchd-oibre chur a mach chum 'fhogharaidh féin.

CAIB. X.

1 Chuir Crìosd a mach a dhà Abstol deug, agus thug e cumhachd dhoibh mìorbhuilean a dheanamh: 5 theagaisg e iad: 16 thug e misneach dhoibh an aghaidh geur-leannmuinn, 40 agus gheall e beannachadh do'n dream a ghabhadh riu.

AGUS airgairm a dhà dheisciobul deug d'a ionnsuidh, thug e cumhachd dhoibh an aghaidh nan spiorad neòghlan, gu'n tilgeadh a mach, agus a shlànuichadh gach gnè euslaint, agus gach gnè eucail.

2 Agus is iad so ainmean an dà Abstol deug; an ceud *fhear*, Simon d'an goirear Peadar, agus Andreas a bhràthair, Seumas mac Shebede, agus Eoin a bhràthair;

3 Philip agus Bartolemeu, Tomas, agus Mata an cis-mhaor, Seumas mac Alpheus, agus Lebeus d'an co-ainm Tadeus;

4 Simon an Canaanach, agus Iudas Iscariot, an neach fòs a bhrath esan⁸.

5 Chuir Iosa an dà fhear dheug so a mach a' tabhairt àithne dhoibh, ag ràdh, Na gabhaibh gu slighe nan Cinneach, agus na rachaibh a steach do aon bhaile a bhuineas do na Samaraich⁹:

6 Ach gu ma fearr leibh dol a dh'ionnsuidh chaorach chaillte tighe Israeil.

¹ fhir-na-bainne.

² bhuideilbh.

³ a nis.

⁴ cailin.

⁵ thug Iosa sparradh geur doibh.

⁶ bhaile mòra agus beaga.

⁷ adhairc.

⁸ an ti a thug thairis esan.

⁹ Samaritans. Sasg.

7 Agus air imeachd dhuibh, searmon-aichibh, ag ràdh, A ta nìoghachd nèimh am fagus.

8 Leighisibh an dream a ta tinn, glan-aibh na lobhair, [dùisgibh na mairbh,] tilgibh a mach na deamhain: a nasgaidh fhuair sibh, a nasgaidh thugaibh uaibh.

9 Na solairibh or, no airgiod, no umha ann bhur sporanaibh¹;

10 No màla chum bhur turuis, no dà chòta, no brògan, no bataichean: (oir is airidh am fear-oibre air a lòn².)

11 Agus ge b'e air bith caithir no baile d'an tèid sibh a steach feòraichibh cò a ta 'na dheadh airidh innte; agus fanaibh an sin gus am fàg sibh an t-àite sin.

12 Agus 'nuair a thig sibh steach do thigh, beannaichibh dha.

13 Agus ma's airidh an tigh sin, thigeadh bhur sìth air; ach mur airidh, pillleadh bhur sìth do bhur n-ionnsuidh féin a ris.

14 Agus ge b'e neach nach gabh ribh, agus nach eisd ri 'ur briathraibh; air dol a mach as an tigh, no as a' bhaile sin dhuibh, crathaibh dhibh duslach bhur cos.

15 Gu deimhin tha mi ag ràdh ribh, gur so-ionmhaire a bhitheas staid fearainn Shodoin agus Ghomora an là a' bhreitheanais, na staid a' bhaile siu.

16 Feuch, cuiream-sa sibh se mach mar chaoraich am measg mha'cadh-alluidh: air an aobhar sin bithibh-sa glic mar na nathraiche, agus neo-chronail mar na columaibh.

17 Ach bithibh air bhur faicill o dhaoiribh, oir bheir iad an làimh sibh do chomhairlibh, agus sgiùrsaidh iad sibh 'nan sion-agogaibh:

18 Agus bheirear sibh an làthair uachdar-an agus rìghrean air mo sgàth-sa, mar fhianuis dhoibh-san agus do na Cinnich³.

19 Ach an uair a bheir iad an làmh sibh, na biodh e 'na ro-chàs oirbh cionnus no ciod a labhras sibh; oir bheirear dhuibh, san uair sin féin, an nì a labhras sibh.

20 Oir cha sibhse a labhras, ach Spiorad bhur n-Athar féin a labhras annaibh.

21 Agus bheir an bràthair a bhràthair féin suas chum bàis, agus an t-athair am mac; agus éiridh a' chlànn an aghaidh am pàrantan, agus bheir iad fa' near gu cuirear gu bàs iad.

22 Agus bithidh fuath aig 'na h-uile dhaoimibh dhuibh air son m'ainme-sa: ach, ge b'e bhuaicheas gus a' chrìoch, is e so a tlièarnar⁴.

23 Agus an uair a ni iad geur-leannmuinn oirbh sa' bhaile so, teichibh gu baile eile; oir gu deimhin tha mi ag ràdh ribh, Nach imich sibh air feadh bhailtean Israeil mu'n tig Mac an duine.

24 Cha'n 'eil an deisciobul os ceann a nìhaighstir, no an seirbhiseach os ceann a

thighearna.

25 Is leòr do'n deisciobul a bhi mar a mhaighstir, agus do'n t-seirbhiseach a bhi mar a thighearn: ma ghoir iad Beelsebub do fhear an tighe, nach mò na sin a ghoir-eas iad e d'a mhuinntir?

26 Uime sin na biodh eagal oirbh rompa: oir cha'n 'eil ni sam bith folaichte, nach foillsichear; agus an ceilt, nach aithnich-ear.

27 An nì a dh'innseas mise dhuibh san dorchadas, labhraibh e san t-solus; agus an nì a chluinneas sibh sa' chluais, searmonaichibh e air mullach nan tighean.

28 Agus na biodh eagal na muinntir sin oirbh a mharbhas an corp, ach aig nach 'eil comas an t-anam a mharbhadh: ach gu ma mò bhitheas eagal an Ti sin oirbh, a's urrainn an corp agus an t-anam a mhillleadh araon an ifrinn.

29 Nach 'eil dà ghealbhoon air an reiceadh air fheoiring: agus cha tuit a h-aon diubh air an talamh as eugmhais *freadail* bhur n-Athar-sa.

30 Ach a ta eadhon fuilteine bhur cinn uile air an àireamh.

31 Air an aobhar sin na biodh eagal oirbh, is fearr sibhse na mòran ghealbhoon.

32 Uime sin ge b'e dh'àidicheas nùse am fianuis dhaoine, aicididh mise esan mar an ceudna am fianuis m' Athar a ta air nèamh.

33 Ach ge b'e dh'àicheadhas mise am fianuis dhaoine, àicheadhaidh mise esan am fianuis m' Athar a ta air nèamh.

34 Na measaibh gu'n d'thàinig mise a chur sìthe⁵ air an talamh: cha'n ann a chur sìthe a thàinig mi, ach a *chur* claidheimh:

35 Oir thàinig mi a chur duine an aghaidh 'athar, agus na nighinn an aghaidh a màthar, agus bean a' mhic an aghaidh a màthar-chèile.

36 Agus is iad muinntir a theaghlach féin a *bhitheas* 'nan naimhidh do dhuine.

37 An ti a ghràdhaicheas athair no màthair nì's mò na mise, cha'n airidh orm e⁶: agus an ti a ghràdhaicheas mac no nigh-ean os mo cheann-sa, cha'n airidh orm e:

38 Agus an ti nach glac a chram-ceusaidh, agus nach lean mise, cha'n airidh orm e.

39 An ti a gheibh 'anam, caillidh se e: ach an ti a chailleas 'anam air mo shonsa, gheibh se e?

40 An ti a ghabhas ribhse, gabhaidh e riumsa; agus an ti a ghabhas riumsa, gabhaidh e ris an ti a chuir uaith mi.

41 An ti a ghabhas ri fàidh an ainm fàidh, gheibh e duais fàidh; agus an ti a ghabhas ri firean an ainm firein, gheibh e duais firein.

42 Agus ge b'e bheir cupan a dh'uisge fuar a mhàin r'a òl do aon neach do na daoimibh beaga so, an ainm deisciobuil, gu deimhin tha mi ag ràdh ribh, nach caill e air chor sam bith a dluais.

¹ criosaibh. ² is fù am fear-oibre a bhiadh.

³ 'nan aghaidh-san agus an aghaidh Geintileach.

⁴ a shlànachear.

⁵ sìochaint.

⁶ cha'n fhiù e m' se.

CAIB. XI.

1 *Chuir Eoin a dheisciobuil a dh'ionnsuidh Chrìosd.*
 7 *Fianuis Chrìosd mu thimchioll Eoin.* 18 *Barail an t-sluaigh mu thimchioll Eoin agus mu thimchioll Chrìosd.* 20 *Chronuich Crìosd muinntir Bhetsaida, &c.* 28 *A ghairm tròcaireach do'n t-sluaigh a ta fu thròm uallaich.*

A GUS tharladh, an uair a chrìochnaich Iosa àitheantan a thabhairt d'a dhà dheisciobul deug, gu'n d'imich e as a sin a theagasg agus a shearmonachadh nam bailtibh.

2 A nis an uair a chual Eoin sa' phrìosan gnìomhara Chrìosd, chuir e dithis d'a dheisciobluibh *d'a ionnsuidh*,

3 Agus thubhairt e ris, An tusa an ti ud a bha ri teachd, no am bi sùil againn ri nach eile?

4 Fhreagair Iosa agus thubhairt e riu, Imichibh agus innsibh do Eoin na nithe a ta sibh a' cluinntinn agus a' faicinn:

5 A ta na doill a' faotainn¹ an radhaire, agus na bacaich ag imeachd, a ta na lobhair air an glanadh, agus na bothair a' cluinntinn, a ta na mairbh air an dùsgadh, agus an soisgeul air a shearmonachadh do na bochdaibh.

6 Agus is beannaichte an ti nach faigh oibheum annasa.

7 Agus air imeachd dhoibhsan air falbh, thòisich Iosa air labhairt ris an t-sluaigh mu thimchioll Eoin, *ag ràdh*, Ciod e an ni a chaidh sibh a mach do'n fhàsach a dh'fhaicinn? an i cuile air a crathadh le gaoith?

8 Ach ciod e an ni a chaidh sibh a mach a dh'fhaicinn? *an* e duine air a sgeadachadh ann an eudach mìn? feuch, a' mhuinntir a chaitheas eudach mìn, is ann an tighibh nan rìghrean a ta iad.

9 Ach ciod e an ni a chaidh sibh a mach a dh'fhaicinn? *An* e fàidh? seadh, tha mi ag ràdh ribh, agus nì's mò na fàidh.

10 Oir is e so an ti mu'm bheil e sgriobhta, Feuch, cuiream-sa mo theachdair roimh do ghnùis, a dh'ulluicheas do shlighe romhad.

11 Gu deimhin tha mi ag ràdh ribh, nam measg-san a rugadh le mnaibh, nach d'èrich neach a's mò na Eoin Baiste: gidheadh, an ti sin a's lugha an rìoghachd nèimh, is mò e na esan.

12 Agus o làithibh Eoin Baiste gus a nis, a ta rìoghachd nèimh a' fulang ainneirt, agus luchd na h-ainneirt ga glacadh le làmhachas-làidir.

13 Oir rinn na fàidhean uile, agus an lagh fàidheadaireachd gu àm Eoin.

14 Agus ma's toil leibh a ghabhail, is e so Elias a bha ri teachd.

15 Ge b'e aig am bheil cluasan chum éisdeachd, éisdeadh e.

16 Ach co ris a shamhluicheas mise an ginealach so? Is cosmhuil e ri cloinn a shluicheas anns a' mhargadh², agus ag

éigheach r'an companaich.

17 Agus ag ràdh, Rinn sinne plobair-eachd dhuibhse, ach cha d'rinn sibhse dannsa: rinn sinne tuireadh³ dhuibhse, ach cha d'rinn sibhse gul.

18 Oir thàinig Eoin cha'n ann ag itheadh no ag òl, agus tha iad ag ràdh, A ta dcamhan aige.

19 Thàinig Mac an duine ag itheadh agus ag òl, agus tha iad ag ràdh, Feuch, duine geòcach agus pòiteir fiona, caraid chis-mhaor agus pheacach: ach a ta gliocas air a fireanachadh le a cloinn.

20 An sin thòisich e air achmhasan a thabhairt do na bailtibh anns am mò a rinneadh d'a oibribh cumhachdach, air son nach d'rinn iad aithreachas.

21 Is an-aobhinn duit, a Chorasin; is anaobhinn duit, a Bhetsaida: oir nam biodh na h-oibre cumhachdach a rinneadh annaibh-sa, air an deanamh ann an Tirus agus ann an Sidon, is fada o'n a dheanadh iad aithreachas ann an saic-eudach agus an luath.

22 Ach tha mi ag ràdh ribh, Gu'm bi staid Thirus agus Shìdoin nì's so-iomchaire ann an là a' bhreitheanais, na bhith-eas bhur staid-sa.

23 Agus thusa, a Chapernaum, a ta air do thogail suas gu nèamh, tilgear sìos gu h-ìfrinn thu: oir nam biodh na h-oibre cumhachdach a rinneadh annad-sa, air an deanamh ann an Sodom, dh'fhanadh e *gun a sgrìos* gus an diugh.

24 Ach tha mi ag ràdh ribh, gur so-iomchaire a bhitheas e do fhearann Shòdoin ann an là a' bhreitheanais, na dhuitse.

25 Anns an àm sin fhreagair Iosa agus thubhairt e, Tha mi a' toirt buidheachais dhuit, O Athair, Thighearna nèimh agus na talmhainn, air son gu d'fholuich thu na nithe so o dhaoineibh eagnuidh agus tuigseach, agus gu d'fhoillsich thu iad do leanabaibh.

26 Seadh, Athair, do bhrìgh gu'm b'ann mar sin a bha do dheadh thoil-sa.

27 A ta na h-uile nithe air an tabhairt thairis dhomhsa o m' Athair: agus cha'n aithne do neach air bith am Mac, ach do'n Athair: nì mò is aithne do neach air bith an t-Athair, ach do'n Mhac, agus do gach aon d'an àill leis a' Mhac fhòillseachadh.

28 Thigibh a m' ionnsuidh-sa, sibhse uile a ta ri saothair, agus fuaidh throm uallaich, agus bheir mise suaimhneas⁴ dhuibh.

29 Gabhaibh mo chuing oirbh, agus fòghlumaibh uam, oir a ta mise macanta agus iriosal⁵ an cridhe: agus gheibh sibh fois do bhur n-anamaibh.

30 Oir a ta mo chuing-sa so-iomchair, agus a ta m'uallach eutrom.

CAIB. XII.

1 *Chronuich Crìosd doille nam Phairiseach mu thimchioll brisidh na sàbaid, 3 le sgriobhairibh,*

¹ faghail.² anns na margaibh.³ caoine.⁴ fois.⁵ ùmhal.

11 *le reuson*, 13 *agus le miorbhuil*. 22 *Shlànuih e an duine dall agus balbh anns an robh deamhan*. 31 *Cha mhaithear toibheum an aghaidh an Spioraid naomh*.

CHAIDH Iosa san àm sin air là na sàbaid troimh¹ na h-achaibh arbhair, agus bha ocras air a dheisciobuil, agus thòisich iad air diasan arbhair a bhuain, agus itheadh.

2 Ach an uair a chunnaic na Phairisich so, thubhairt iad ris, Feuch, a ta do dheisciobuil a' deanamh an ni nach còir a dheanamh air là na sàbaid.

3 Agus thubhairt esan riu, Nach do leugh sibh ciod a rinn Daibhidh an uair a bha ocras air féin, agus air a' mhuinntir a bha maille ris;

4 Cionnus a chaidh e steach do thigh Dhé, agus a dh'ith e aran na fiamuis², nach robh ceaduichte dha féin itheadh, no dhoibhsan a bha maille ris, ach do na sagartaibh a mhàin?

5 No nach do leugh sibh san lagh, gu bheil na sagairt anns an teampull air làithibh na sàbaid a' briseadh na sàbaid, agus iad neo-chiontach?

6 Ach a ta mise ag ràdh ribh, gu bheil san ionad so neach a's mò na'n teampull.

7 Agus nam biodh fhios agaibh ciod is ciall da so, Trócair is àill leam agus cha'n iobairt, cha dìteadh sibh an dream a ta neo-chiontach.

8 Oir is e Mac an duine Tighearna na sàbaid.

9 Agus air dha imeachd as a sin, chaidh e steach d'an sionagog;

10 Agus, feuch, bha duine ann aig an robh làmh sheargta: agus dh'fheòraich iad dheth, ag ràdh, Am bheil e ceaduichte leigheas a dheanamh air làithibh na sàbaid? chum gu'm biodh cuis dhùidh aca 'na aghaidh.

11 Agus thubhairt esan riu, Cò agaibhsa an duine aig am bi aon chaora, agus, ma thuiteas i ann an slochd air là na sàbaid, nach beir e oirre, agus nach tog e nìos i?

12 Nach mòr ma ta is fearr duine na caora? Uime sin a ta e ceaduichte maith a dheanamh air làithibh na sàbaid.

13 An sin thubhairt e ris an duine, Sin a mach do làmh: agus shìn e mach i; agus bha i air a h-aiseag slàn, mar an làmh eile.

14 Ach chaidh na Phairisich a mach, agus chum iad comhairle 'na aghaidh, cionnus a dh'fheudadh iad a mhilleadh.

15 Ach an uair a thuig Iosa so, dh'imich e as a sin: agus lean sloigh mhòr e, agus leighis e iad uile.

16 Agus thug e sparradh dhoibh chum nach deanadh iad aithnichte³ e;

17 A chum gu coimhliontadh an ni a labhradh le Esaias am fàidh, ag ràdh,

18 Feuch, mo sheirbhiseach féin a thagh mi; m'aon gràdhach anns am bheil tlachd aig m'anam: cuiridh mi mo Spiorad féin air, agus nochdaidh e breitheanas do na Cinnich.

19 Cha dean e strì, agus cha ghlaodh e; nì mò a chluinneas neach air bith a ghuth air na sràidibh.

20 Cha bhris e a' chuire bhrùite, agus cha mhùch e an lìon as am bi deatach, gu an tabhair e mach breitheanas chum buaidh.

21 Agus is ann a ainm-san a bhitheas muinighinn aig na Cinnich.

22 An sin thugadh d'a ionnsuidh duine anns an robh deamhan, dall agus balbh: agus shlànuih se e, ionnus gu'n do labhair am balbhan agus gu'n robh an dall a' faicinn.

23 Agus ghabh am pobull uile iongantas, agus thubhairt iad, An e⁴ so Mac Dhaibhidh?

24 Ach an uair a chuala na Phairisich so, thubhairt iad, Cha'n 'eil am fear so a tilgeadh a mach dheamhan, ach troimh Bheelsebub prionnsa nan deamhan.

25 Agus thuig Iosa an smuaintean, agus thubhairt e riu, Gach rìoghachd a ta roinnte 'na h-aghaidh féin, nìthear 'na fàsach i; agus gach uile bhaile no tigh a ta roinnte 'na aghaidh féin, cha seas e.

26 Agus ma thilgeas Satan a mach Satan, a ta e roinnte 'na aghaidh féin; air an aobhar sin cionnus a sheasas a rìoghachd?

27 Agus ma tha mise troimh Bheelsebub a' tilgeadh a mach dheamhan, troimh cò am bheil bhuir clann-sa 'gan tilgeadh a mach? Uime sin bithidh iad 'nam breith-eamhnaihb oirbh:

28 Ach ma's am le Spiorad Dhé a ta mise a' tilgeadh a mach dheamhan, thàinig rìoghachd Dhé do bhuir n-ionnsuidh-sa⁵.

29 No cionnus is urrainn neach dol do thigh duine làidir, agus airneis a thighe a chreachadh, mur ceangail e air tùsan duine làidir? agus an sin creachaidh e a thigh.

30 An ti nach 'eil leam, tha e a m' aghaidh; agus an ti nach cruinnich leam, sgapaidh e.

31 Air an aobhar sin tha mi ag ràdh ribh, Gu maithear gach peacadh agus gach toibheum do dhaoinibh: gidheadh cha mhaithear toibheum an aghaidh an Spioraid Naomh do dhaoinibh.

32 Agus ge b'e neach a labhras focal an aghaidh Mhic an duine, maithear dha e: ach ge b'e neach a labhras an aghaidh an Spioraid Naomh, cha mhaithear dha e, anns an t-saoghal so, no anns an t-saoghal a ta ri teachd.

33 An dara cuid deanaibh a' chraobh maith, agus a toradh maith; no deanaibh a' chraobh truailidh, agus a toradh truailidh: oir is ann air a toradh a dh'aithnìthear a' chraobh.

¹ tre, trid.² an t-aran taisbeanta.³ follus.⁴ Nach e?⁵ l'huigaibh-se.

34 A shliochd nan nathraiche nimhe, cionnus a dh'fheudas sibh nithe maitha e labhairt, o a ta sibh féin olc? oir is ann á pailteas a' chridhe a labhras am beul.

35 Bheir duine maith a' mach nithe maitha á deadh ionmhas a chridhe¹: agus bheir an droch duhine mach droch nithe as a dhroch ionmhas.

36 Ach tha mi ag ràdh ribh, Gu'n toir² daoine cunntas ann an là a' bhreitheanas air son gach focail dhìomhain a labhras iad.

37 Oir is ann le³ d'fhoclaibh a shaorar thu, agus is ann le d'fhoclaibh a dhitear thu.

38 An sin fhreagair dream àraidh do na sgriobhaichean agus do na Phairisich, ag ràdh, A mhaighstir, bu mhiann leinn comhara fhaicinn uait.

39 Ach fhreagair esan agus thubhairt e riu, A ta ginealach olc agus adhaltrannach ag iarraidh comhara, agus cha toirear comhara dhoibh, ach comhar' an fhàidh Ionais.

40 Oir mar a bha Ionas am broinn na muice-mara trì làithean agus trì oidhchean; is ann mar sin a bhitheas Mac an duine ann an cridhe na talmhainn trì làithean agus trì oidhchean.

41 Eiridh muinntir Ninebheh sa' bhreitheanas maille ris a' gheinealach so, agus dìtidh iad e; oir rinn iad aithreachas aig searmoin Ionais; agus, feuch, a ta ni's mò na Ionas an so.

42 Eiridh ban-righinn na h-àirde deas sa' bhreitheanas maille ris a' gheinealach so, agus dìtidh i e; oir thàinig i o na h-àitibh a's iomallaich do'n talamh a dh'éisdeachd gliocais Sholaimh; agus, feuch, a ta ni's mò na Solamh an so.

43 An déigh do'n spiorad neò-ghlan dol a mach á duine, imichidh e troimh ionad-aibh tiorma, ag iarraidh fois, agus cha'n fhaigh e.

44 An sin their e, Pillidh mi do m' thigh as an d'thàinig mi; agus air teachd dha, gheibh e falamh, sguabta, agus deadh-mhaiseach e.

45 Imichidh e an sin, agus bheir e leis seachd spioraid eile a's miosa na e féin, agus théid iad a steach agus gabhaidh iad còmhnuidh an sin: agus bithidh staid dheireannach an duine sin ni's miosa na a thoiseach. Is ann eadhon mar sin a thachairas do'n gheinealach aingidh so.

46 Agus air dha bhi fastast a' labhairt ris a' phobull, feuch, sheas a mhàthair agus a bhràithrean a muigh, ag iarraidh labhairt ris.

47 An sin thubhairt neach éigin ris, Feuch, a ta do mhàthair, agus do bhràithrean 'nan seasamh a muigh, ag iarraidh labhairt riut.

48 Ach fhreagair esan agus thubhairt e ris an ti a dh'innis so dha, Cò i mo mhàthair? agus cò iad mo bhràithrean?

49 Agus air sineadh a làimhe chum a dheisciobul, thubhairt e, Feuch mo mhàthair, agus mo bhràithrean!

50 Oir ge b'e neach a ni toil m' Athar-sa a ta air nèamh, is e sin féin mo bhràthair, agus mo phiuthair, agus mo mhàthair.

CAIB. XIII.

1 Cosamhlachd an t-sìoladair agus an t-sìl, 18 air eadar-mhìneachadh. 24 Cosamhlachd a' chogail; 31 an t-sìl mhustaird; 33 na laibhin; 44 an ionmhais fholaichte; 45 agus na nèamhuid. 54 Rinn muinntir a dhùthcha iàir air Cri. sd.

AIR an là sin féin chaidh Iosa mach as an tigh, agus shuidh e ri taobh na fairge.

2 Agus chruinnich sluagh mòr d'a ionnsuidh, air chor as air dol a steach do luing dha, gu'n do shuidh e; agus sheas an sluagh uile air an tràigh.

3 Agus labhair e moran do uithibh riu ann an cosamhlachdaibh⁴, ag ràdh, Feuch, chaidh sìoladair a mach a chur sìl.

4 Agus ag cur an t-sìl da, thuit cuid dheth ri taobh an rathaid; agus thàinig na h-eumlaith agus dh'ith iad e.

5 Thuit cuid air ionadaibh creagach, far nach robh mòran talmhainn aige; agus air ball dh'fhàs e suas, do bhrìgh nach robh doimhneachd talmhainn aige.

6 Ach air éirigh do'n ghréin dhothadh e; agus, do bhrìgh nach robh freumh aige, shearg e as.

7 Agus thuit cuid am measg droighinn: agus dh'fhàs an droighionn suas, agus mhùch se e.

8 Ach thuit cuid eile am fearainn maith, agus thug e toradh a mach, cuid a cheud uiread, cuid a thri fichead, cuid a dheich thar fhichead uiread 'sa chuireadh.

9 Ge b'e neach aig am bheil chuasa chum éisdeachd, éisdeadh e.

10 Agus thàinig na deisciobuil, agus thubhairt iad ris, C'ar son a ta thu a' labhairt riu ann an cosamhlachdaibh?

11 Fhreagair esan agus thubhairt e riu, Do bhrìgh gu'n d'thugadh dhuibh-sa eòlas a bhi agaibh air rùn dìomhair rioghachd nèimh, ach dhoibhsan cha'n 'eil so air a thoirt.

12 Oir ge b'e neach aig am bheil, dhasan bheir, agus bithidh aige an tuilleadh pailteis: ach ge b'e neach aig nach 'eil, uathsan bheir eadhon an ni a ta aige.

13 Uime sin a ta mise a' labhairt riu ann an cosamhlachdaibh, do bhrìgh air dhoibh faicinn nach faic iad, agus a' cluinninn nach cluinn iad, agus nach tuig iad.

14 Agus annta-san a ta fàidheadaireachd Esaias air a coimhlionadh, a ta 'g ràdh, Le h-éisdeachd cluinnidh sibh, agus cha

¹ as a dhèadh ionmhas.² labhair.³ as, á.⁴ parablaih, comhadai'h.

tuig sibh; agus le h-amfarc chi sibh, agus cha'n aithnich sibh.

15 Oir a ta cridhe a' phobuill so air fàs reamhar, agus an cluasan mall chum éisd-eachd, agus dhruid iad an sùilean; air eagall uair air bith gu'm faiceadh iad le'n sùilibh, agus gu'n cluinneadh iad le'n cluasaibh, agus gu'n tuigeadh iad le'n cridhe, agus gu'm biodh iad air an iom-pachadh, agus gu'n slànuichinn-sa iad.

16 Ach is beannaichte bhur sùilean-sa, oir a ta iad a' faicinn; agus bhur cluasan, oir a ta iad a' cluinntinn.

17 Oirtha miag ràdh ribh gu fireannach, Gu'm b'iomadh fàidh agus firean leis am bu mhiann na nithe so fhaicinn, a ta sibhse a' faicinn, agus nach fac siad *iad*: agus na nithe so chluinntinn, a ta sibhse a' cluinntinn, agus nach cual iad.

18 Eisdibh air an aobhar sin ri cosamhlachd an t-sioladair.

19 An uair a chluinneas neach air bith focal na rioghachd, agus nach toir e fa'near e¹, thig an droch *spiorad*, agus bheir e air falbh an ni a chuireadh 'na chridhe: is e so esan anns an do chuireadh an siol ri taobh an rathaid.

20 Ach esan a fhuair siol ann an àitibh creagach², is e so an ti a chluinneas am focal, agus a ghabhas e air ball le gairdeachas;

21 Gidheadh cha'n 'eìl freumh aige ann fèin, ach fanaidh e rè tamuill: agus an uair a thug trioblaid no geur-leanmhuinn air son an fhocail, air ball gheibh e oilbheum.

22 Esan mar an ceudna a ghabh siol ann measg an droighinn, is e so an ti a ta 'cluinntinn an fhocail; agus a ta ro-chùram an t-saoghail so, agus mealltaireachd beartais a' mùcladh an fhocail, agus bithidh e gun toradh.

23 Ach an ti ud a ghabh siol ann an deadh fhearann, is e sin an neach a ta 'cluinntinn an fhocail, agus 'ga thoirt fa'near; neach mar an ceudna tha 'giùlan toraidh, agus a ta toirt a mach cuid a cheud uiread, cuid a thri fichead, agus cuid eile a dheich thar fhichead uiread *'sa chuireadh*.

24 Chuir e cosamhlachd eile mach dhoibh, ag ràdh, Is cosmhuil rioghachd nèimh ri duine a chuir siol maith 'na fhearann:

25 Agus an uair a bha daoine 'nan codal, thàinig a nàmhaid agus chuir e cogal am measg a' chruithneachd, agus dh'imich e roimhe.

26 Ach an uair a thàinig an t-arbhar fuidh dhéis, agus a thug e mach a thoradh, dh'fhoillsich an cogal e fèin mar an ceudna.

27 Agus air teachd do sheirbhisich fhir-

an-tighe thubhairt iad ris, A Thighearna, nach do chuir thusa siol maith ann ad fhearann? c'àite, ma seadh, as an d'fhuair e an cogal?

28 Thubhairt esan riu, Rinn nàmhaid éigin so. Agus thubhairt na seirbhisich ris, An àill leat, uime sin, gu'n téid sinne agus gu'n cruinnich sinn ri chéile iad?

29 Ach thubhairt esan, Cha'n àill; air eagall 'nuair a chruinnicheas sibh an cogal, gu spion sibh an cruithneachd maille ris.

30 Leigibh leo fàs araon gus an *tigam* fogharadh: agus an àm an fhogharaidh their mise ris an luchd-buanaidh, Cruinnichibh air tús an cogal, agus ceanglaibh e 'na cheanglachanaibh³ chum a losgaidh: ach cruinnichibh an cruithneachd do m' shabhal.

31 Chuir e mach cosamhlachd eile dhoibh, ag ràdh, A ta rioghachd nèimh cosmhuil ri gràinne do shìol mustaird, a ghabh neach agus a chuir e 'na fhearann.

32 Ni gun amharus a's lugha do gach uile phòr⁴: gidheadh air fàs da, is e a's mò do na luibheanaibh, agus fàsaidh e 'na chrann: iomus gu'n tig eumlaith an athair, agus gu'n dean iad nid 'na gheugaibh.

33 Cosamhlachd eile labhair e riu; Is cosmhuil rioghachd nèimh ri taois ghoirt⁵, a ghabh bean agus a dh'fholaich i ann an tri tomhasaibh mine, gus an do ghoirtich-cadh an t-iomlan.

34 Na nithe sin uile labhair Iosa ris a' phobull ann an cosamhlachdaibh; agus gun chosamhlachd cha do labhair e riu:

35 A chum gu coimhliontadh an ni a labhradh leis an fhàidh, ag ràdh, Fosglaidh mi mo bheul ann an cosamhlachdaibh, cuiridh mi'n céill nithe a bha folaichte o thoiseach an t-saoghail⁶.

36 An sin chuir Iosa am pobull air falbh, agus chaidh e steach do'n tigh: agus thàinig a dheisciobuil d'a ionnsuidh, ag ràdh, Mìnich dhuinne cosamhlachd cogail an fhearainn.

37 Agus fhreagair esan agus thubhairt e riu, An ti a chuireas an siol maith is e Mac an duine e:

38 'S e m' fearann an domhan: agus is e an siol maith clann na rioghachd: ach is e an cogal elann an droch *spioraid*:

39 'S e an nàmhaid a chuir iad an diabhl: 's e am fogharadh deireadh an t-saoghail: agus is iad na buanaichean na h-aingil.

40 Agus amhuil mar a chruinniclear an cogal, agus a loisgear le teine e, is ann mar sin a bhitheas ann an deireadh an t-saoghail so.

41 Cuiridh Mac an duine 'aingil uath, agus tionailidh iad as a rioghachd na

¹ nach tuig se e.

² clochach.

³ thrusaichibh.

⁴ ros.

⁵ laibhin.

⁶ o leogadh bunaite an domhain.

h-uile nìthe a bheir oilbheum, agus iadsan a ta deanamh aingidheachd;

42 Agus tilgidh siad iad anns an àmh-uinn air dearg-lasadh: an sin bithidh gul agus giosgan fhiacal.

43 An sin dealraichidh na fireana mar a' ghrian, ann an rìoghachd an Athar féin. Ge b'e aig am bheil chuasa chum éisdeachd, éisdeadh e.

44 A ris, a ta rìoglachd nèimh cosmhuil ri ionmhas air fhòlach am fearann: nì au déigh fhaotainn, a dh'fhòlaich duine, agus air sgàth a ghairdeachais air a shon, dh'imich e agus reic e na bha aige uile, agus cheannaich e am fearann sin.

45 A ris, is cosmhuil rìoghachd nèimh ri ceannaiche àraidh ag iarraidh neamh-nuide maiseach:

46 Agus air amas¹ da air aon nèamhnuid ro-luachmhoir, dh'imich e agus reic e na bha aige, agus cheannaich e i.

47 A ris, a ta rìoghachd nèimh cosmhuil ri lìon air a thilgeadh san fhaire, agus a chruinnich do gach uile sheòrsa éisg:

48 Agus air dha bhi làn, tharruing na h-iasgairean e chum na tràighe, agus air suidhe dhoibh, chruinnich iad na h-éisg mhaith ann an soithichibh, ach thilg iad na droch éisg a mach.

49 Is ann mar sin a bhitheas ann an deireadh an t-saoghail: théid na h-aingil a mach, agus dealaichidh iad na droch dhaoine á measg nam fireanach:

50 Agus tilgidh siad iad san àmh-uinn theintich: an sin bithidh gul agus giosgan fhiacal.

51 Thubhairt Iosa riu, An do thuig sibh na nìthe so uile? thubhairt iad ris, Thuig, a Thighearn.

52 Agus thubhairt esan riu, Air an aobhar sin, gach uile sgrìobhaiche a ta fòghluimte chum rìoghachd nèimh, is cosmhuil e ri fear-tighe, a bheir a mach as 'ionmhas nìthe nuadha agus sean.

53 Agus thachair an uair a chrìochnaich Iosa na cosamhlachda so, gu'n d'imich e as a sin.

54 Agus an uair a thàinig e d'a dhùthaich féin, theagaisg e iad 'nan sionagag, ionnus gu'n do ghabh iad iongantais, agus gu'n dubhairt iad, C'ait an d'fhuair am fear so an gliocas so, agus na feartan ud?

55 Nach e so mac an t-saoir? nach e ainm a mhàthar Muire? nach iad a bhràithre, Seumas, agus Ioses, agus Simon, agus Iudas?

56 Agus a pheathraiche, nach 'eil iad uile maille ruinn? c'ait uime sin an d'fhuair an duine so na nìthe ud uile?

57 Agus fhuair iad oilbheum ann. Ach thubhairt Iosa riu, Cha'n 'eil fàidh gun urram, ach 'na dhùthaich féin, agus 'na thigh féin.

58 Agus cha d'riun e mòran do oibribh cumhachdach an sin, air son am mì-chreidimh.

CAIB. XIV.

1 Barail Heroid mu thimchioll Chrìosd. 3 Chaidh an ceann a bhuntainn a dh'Eoin Baiste. 13 Chaidh Iosa gu ionad fàsail, 15 far an do bheathaich e cùig mìle fear le cùig aranaibh, agus dà iasg. 22 Dh'imich e air an fhaire a dh'ionnsuidh a dheisciobul. 34 Shlànuich e sluagh a bha euslan.

SAN àm sin chual Herod an Tetrach cliù Iosa.

2 Agus thubhairt e r'a sheirbhisich, Is e so Eoin Baiste; dh'éirich e o na marbhaibh, agus uime sin a ta feartan air an oibreachadh leis.

3 Oir 'nuair a ghlac Herod Eoin, cheangail se e, agus thilg e am prìosan e air son Herodias, mnà Philip a bhràthar féin.

4 Oir thubhairt Eoin ris, Cha'n 'eil e dlìgheach dhuit i bhi agad.

5 Agus an uair bu mhiann leis a chur gu bàs, bha eagal a' phobull air, oir bha meas fàidh aca air.

6 Ach an uair a bha co-ainm là-breithe Heroid air a chumail, rinn nighean Herodias dannsa 'nan làthair, agus thaitinn i ri Herod:

7 Ionnus gu'n do gheall e le mionnaibh, gu tugadh e dhi ge b'e air bith nì a dh'iarraidh i.

8 Agus air dhise bhi air a teagasg le a màthair roimh làimh, thubhairt i, Thoir² dhomh an so ceann Eoin Baiste air mèis.

9 Agus bha 'n rìgh doilich: ach air son a mhiannan, agus na muinntir a bha 'nan suidhe aig biadh maille ris, dh'àithn e a thabhairt di.

10 Agus air cur fir-marbhaidh uaith, bhuin e a cheann do Eoin anns a' phrìosan.

11 Agus thogadh a cheann air mèis, agus thugadh do'n chailin e: agus thug ise d'a màthair e.

12 Agus thàinig a dheisciobuil, agus thug iad an corp leo, agus dh'adhlaic iad e, agus thàinig iad agus dh'innis iad sin do Iosa.

13 An uair a chual Iosa so, chaidh e as a sin air luing gu ionad fàsail air leth: agus an uair a chual am pobull sin, lean iad d'an cois e as na bailtibh.

14 Agus air dol a mach do Iosa, chunnaic e coimhthional mòr, agus ghabh e truas mòr dhiubh, agus shlànuich e an dream aca bha euslan.

15 Agus an uair a b'fheasgar e, thàinig a dheisciobuil d'a ionnsuidh, ag ràdh, Is àite fàsail so, agus a ta an t-àm a nis air dol seachad: cuir an sluagh air falbh, chum gu'n téid iad do na bailtibh, agus gu'n ceannaich iad biadh dhoibh féin.

16 Ach thubhairt Iosa riu, Cha ruig iad a leas falbh; thugaibh-sa dhoibh r'a itheadh.

¹ airm-scachd.

² Tabhair.

17 Agus thubhairt iad ris, Cha'n 'eil againn an so ach cùig arain¹, agus dà iasg.

18 Thubhairt esan *riu*, Thugaibh an so iad a m' ionnsuidh-sa.

19 Agus dh'àithn e do'n t-sluagh suidhe sìos air an fheur, agus ghlac e na cùig arain, agus an dà iasg, agus air amharc dha suas gu nèamh, bheannaich agus bhris e, agus thug e na h-arain d'a dheisciobluibh, agus *thug* na deisciobuil do'n t-sluagh iad.

20 Agus dh'ith iad uile, agus shàsuich-eadh iad: agus thog iad làn dà chliabh dheug do'n bhìadh bhriste, *a bha* dh'fhuigheall² *aca*.

21 Agus bha iadsan a dh'ith mu thimchioll cuig mìle fear, thuilleadh air mnaibh agus air cloimn.

22 Agus air ball cho-éignich Iosa a dheisciobuil gu dol an luing, agus dol roimhe do'n taobh eile, gus an cuireadh esan an sluagh air falbh.

23 Agus an uair a leig e an sluagh uaith, chaidh e suas air beinn na aonar a dheanamh urnuigh: agus an uair a bha am feasgar air teachd, bha e an sin 'ua aonar.

24 Ach bha an lough san àm sin am meadhan na fàirge, air a tilgeadh a null agus a nall leis na tonnaibh: oir bha a' ghaoth 'nan aghaidh.

25 Agus anns a' cheathramh faire do'n oidheche, chaidh Iosa d'an ionusuidh, ag imeachd air an fhairge.

26 Agus an uair a chunnaic na deisciobuil e ag imeachd air an fhairge, bha iad fo bhuairesas, ag ràdh, Is spiorad a ta ann; agus ghlaodh³ iad a mach le h-eagal.

27 Ach labhair Iosa riu air ball, ag ràdh, Bìodh misneach mhàith aguibh; is mise a ta ann, na bìodh eagal oirbh.

28 Agus fhreagair Peadar e agus thubhairt e, A Thighearna, ma's tu a ta ann, iarr ormsa teachd a d'ionnsuidh air na h-uisgeachaibh.

29 Agus thubhairt esan, Thig. Agus an uair a bha Peadar air teachd a nuas as an luing, dh'imich e air na h-uisgeachaibh, chum teachd gu h-Iosa.

30 Ach an uair a chunnaic e a' ghaoth làidir, ghabh e eagal: agus an uair a thòisich e air dol fuadh, ghlaodh e, ag ràdh, A Thighearna, fòir orm.

31 Agus air ball shìn Iosa mach a làmh, agus rug e air, agus thubhairt e ris, O thusa air bheag creidimh, c'ar son a bha thu fo amharus?

32 Agus an uair a chaidh iad a steach do'n luing, choisg a' ghaoth.

33 An sin thàinig iadsan a bha san luing, agus rinn iad aoradh dha, ag ràdh, Gu frinneach is tu Mac Dhé.

34 Agus an uair a chaidh iad do'n taobh eile, thàinig iad gu talamh Ghenesaret.

35 Agus an uair a fhuair luchd an àite sin fiosrachadh uime, chuir iad fios air feadh na tìre sin uile air gach taobh dhiubh, agus thug iad d'a ionnsuidh an dream sin uile a bha euslan.

36 Agus ghuidh iad air, gu feudadh iad beantuinn ri iomall 'eudaich a mhàin: agus a mheud dhiubh as a bheap, shlàn-uicheadh gu h-iomlan iad.

CAIB. XV.

1 *Chronuich Criosd na sgrìobhaichean agus na Phairisich air son àitheanta Dhé a bhriseadh le'n gnàthachadh-san; 11 tha e a' teagasg nach e an nì a thèid a steach do'n bheul a thruailleas an duine. 21 Shlànuich e nighean na mnà do mhuinntir Chanaana.*

AN sin thàinig sgrìobhaichean agus Phairisich o Ierusalem gu Iosa ag ràdh,

2 C'ar son a ta do dheisciobuil a' dol an aghaidh gnàthachaidh nan sinnsear? oir cha'n ionnlaid iad an làmhan an uair a dh'itheas iad aran.

3 Ach fhreagair esan agus thubhairt e riu, C'ar son a ta sibhse a' briseadh àithne Dhé le bhur gnàthachadh féin?

4 Oir thug Dia àithne, ag ràdh, Thoir urram do t'athair agus do d' mhàthair: agus b'e mhallachas⁴ a'athair no 'mhàthair, cuirear gu bàs e.

5 Ach their sibhse, Ge b'e neach a their r'a a'athair no r'a mhàthair, Bìodh e 'na thìodhlac do'n teampull gach nì leis am feudadh tu buannachd fhaotainn uamsa;

6 Nach feum e urram a thabhairt d'a a'athair no d'a mhàthair. Mar sin chuir sibhse an neò-bhrìgh àithne Dhé le bhur gnàthachadh féin.

7 A chealgairean, is maith a rinn Esaia⁵ fàidheadaireachd m' ur timchioll, ag ràdh,

8 A ta an sluagh so a' dlùthachadh riumsa le 'm beul, agus a' toirt urram dhomh le'm bìlibh: ach a ta an cridhe fada uam.

9 Ach is ann an dìomhanas a ta iad a' deanamh aoraidh dhomhsa, a' teagasg àitheanta dhaoine mar theagasg.

10 Agus air gairm an t-slòigh dha, thubhairt e riu, Eisidibh agus tuigibh:

11 Cha'n e an nì a thèid a steach sa' bheul a shalacheas an duine; ach an nì a thig a mach as a' bheul, is e so a shalacheas an duine.

12 An sin thàinig a dheisciobuil, agus thubhairt iad ris, Am bheil fhios agad gu'n do ghabh na Phairisich oilbheum, an dèigh dhoibh na briathran ud a chluinntinn?

13 Ach fhreagair esan agus thubhairt e, Gach uile luibh nach do shuidhich m' Athair nèamhaidh-sa, spionar a bhun e.

14 Leigibh leo: is cinn-ùil dhall nan dall iad. Agus ma theòraicheas dall dall eile, tuitidh iad araon anns a' chlais.

¹ buillonna.² dh'fhuigheach.³ dh'èigh.⁴ chàineas.⁵ Isaiah.

15 Agus fhreagair Peadar agus thubhairt e ris, Minich dhuinn a' chosamlachd sin.

16 Agus thubhairt Iosa, Am bheil sibhse fathast mar an ceudna gun tuigse!

17 Nach 'eil sibh a' tuigsinn fathast ge b'e ni a' theid a steach sa' bheul, gu'n téid e sa' bhroinn, agus gu'n tilgear a mach do'n t-slochd shalchair e?

18 Ach na nithe sin a thig a mach as a' bheul, a ta iad a' teachd o'n chridhe, agus is iad sin a shalaicheas an duine.

19 Oir is ann as a' chridhe thig droch smuainte, mortadh, adhaltrannas, striopachas, gadachd¹, fianuis bhréige, toibheum.

20 Is iad so na nithe a shalaicheas an duine: ach itheadh le lámhaibh gumionnadh, cha salaich sin an duine.

21 Agus air dol do Iosa as a sin, chaidh e gu crìochaibh Thiruis agus Shìdoìn.

22 Agus, feuch, thàinig bean do mhuinntir Chanaain o na crìochaibh sin, agus ghlaodh i ris, ag ràdh, Dean tròcair orm, a Thighearn, a Mhic Dhaibhidh; a ta mo nighean air a buaireadh gu truagh le deamhan.

23 Ach cha d'thug esan freagradh sam bith dlù. Agus thàinig a dheisciobuil d'a ionnsuidh, agus dh'iarr iad air, ag ràdh, Cuir air falbh i, oir tha i a' glaochaich 'nar déigh.

24 Ach fhreagair esan agus thubhairt e, Cha do chuireadh mise ach a chum chaorach chailte thighe Israeil.

25 An sin thàinig ise agus rinn i aoradh dha, ag ràdh, A Thighearna, cùidich leam².

26 Ach fhreagair esan agus thubhairt e, Cha chòir aran na cloinne a ghlacadh, agus a thilgeadh chum nan con.

27 Agus thubhairt ise, Is fìor, a Thighearn: ach ithidh na coin do'n sbruileach³ a thuiteas o bhord am maighstirean.

28 An sin fhreagair Iosa agus thubhairt e rithe, O bhean, is mòr do chreidimh: biodh e dhuit mar is toil leat. Agus rinn eadh a nighean slàn o'n uair sin a mach.

29 Agus air imeachd do Iosa as a sin thàinig e làimh ri fairge Ghalile; agus an uair a chaidh e suas air beinn, shuidh e sìos an sin.

30 Agus thàinig mòr-shluagh d'a ionnsuidh, agus aca maille ri bacaich, doill, balbhain, daoine ciurramach, agus mòran eile, agus thilg iad sìos aig cosaibh Iosa iad, agus shlànuidh e iad:

31 Ionnsuigh gu'n do ghabh an sluagh iongantas nuair a chunnaic iad na balbhain a' labhairt, na daoine ciurramach slàn, na bacaich ag imeachd, agus na doill a' faicinn: agus thug iad glòir do Dhia Israeil.

32 An sin ghairm Iosa a dheisciobuil d'a ionnsuidh, agus thubhairt e, A ta mi a' gabhail truais do'n t-sluagh, oir dh'flian iad maille rium a nis rè thrì làithean, agus cha'n 'eil ni air bith aca r'a itheadh: agus cha chuir mi uam 'nan trasg iad, air eagail gu fannuich iad air an t-slighe.

33 Agus thubhairt a dheisciobuil ris, Cia as a gheibheamaid na h-uiread a dh'aran san fhàsach, as bu leòir a shàsachadh slòigh co mhòr?

34 Agus thubhairt Iosa riu, Cia lìon aran a ta agaibh? agus thubhairt iadsan, Seachd, agus beagan a dh'iasgaibh beaga.

35 Agus dh'àithn e do'n t-sluagh suidhe sìos air an làr.

36 Agus air glacadh nan seachd aran agus nan iasg dha, agus air tabhairt buidheachais⁴, bhris e iad, agus thug e d'a dheisciobuil, agus thug na deisciobuil do'n t-sluagh iad.

37 Agus dh'ith iad uile, agus shàsuicheadh iad: agus thog iad do'n bhiadh bhrìste a dh'fhàgadh làn sheachd bascaid.

38 Agus b'iad a' mhuinntir a dh'ith, ceithir mìle fear, thuilleadh air mnaibh agus air cloinn.

39 Agus air dha an sluagh a leigeadh uaidh, chaidh e air luing, agus thàinig e gu crìochaibh Mhagdala.

CAIB. XVI.

1 Dh'iarr na Phairisich comhara. 6 Thug Iosa rabhadh d'a dheisciobuil mu thimchioll droch theagaisg nam Phairiseach agus nan Sadusaich. 13 Barail an t-sluaigh mu thimchioll Chrìosd. 21 Roimh-innis e a bhàs; 23 agus chronuich e Peadar.

AGUS air teachd do na Phairisich agus do na Sadusaich⁵, g a dhearbhadh⁶, dh'iarr iad air comhar' a nochdadh dhoibh o nèamh.

2 Ach fhreagair esan agus thubhairt e riu, An uair is feasgar e, their sibh, *Bithidh* deadh aimsir ann; oir a ta an t-athar dearg:

3 Agus air maduinn, *Bithidh* droch aimsir ann an diugh; oir a ta an t-athar dearg agus dorch. A chealgairean, is aithne dhuibh breth a thoirt air gnùis an athair, agus nach 'eil e'n comas duibh comharan nan aimsir a *thuigsinn*?

4 A ta ginealach aingidh agus adhaltrannach ag iarraidh comhara, agus cha toirear comhara dhoibh, ach comhar' an fhàidh Ionais. Agus air dha am fàgail, dh'imich e *as a sin*.

5 Agus an uair a thàinig a dheisciobuil a dh'ionnsuidh na taoibh eile, dh'èuchaimh-nich iad aran a thabhairt *leo*.

6 Agus thubhairt Iosa riu, Thugaibh an

¹ gaduigheachd.
³ crumbs. Sasg.

² fòir orm.
⁴ air breth buidheachais.

⁵ g a fhèuchainn, 'g a bhuaireadh.

aire, agus gleidhibh sibh féin o thaois ghoirt nam Phairiseach, agus nan Sadusach.

7 Agus bha iad a' reusonachadh eatorra féin, ag ràdh, *Is ann* air son nach d'thug sinn aran leinn.

8 Agus 'nuair a thuig Iosa sin, thubhairt e riu, O sibhse air bheag creidimh, c'ar son a ta sibh a' reusonachadh eadaraibh féin, *gur ann* a chionn nach d'thug sibh aran leibh?

9 Nach 'eil sibh fathast a' tuigsinn, no a' cuimhneachadh nan cùig aran nan cùig mìle, agus cia lion cliabh a thog sibh?

10 No nan seachd aran nan ceithir mìle, agus cia lion bascaid a thog sibh?

11 Cionnus nach 'eil sibh a' tuigsinn, nach ann mu aran a thubhairt mi ribh, sibh a bhi air bhuir faicill o thaois ghoirt nam Phairiseach, agus nan Sadusach?

12 An sin thuig iad cionnus nach d'iarr e *orra* bhi air am faicill o thaois ghoirt an arain, ach o theagasg nam Phairiseach, agus nan Sadusach.

13 Agus air teachd do Iosa gu crìoch-aibh Chesarea Philipi, dh'fheòraich e d'a dheisciobluibh, ag ràdh, Cò tha daoine ag ràdh is e Mac an duine?

14 Agus thubhairt iadsan, *Tha* cuid ag ràdh Eoin Baiste, cuid Elias, agus cuid eile Ieremias¹, no aon do na fàidhibh.

15 Thubhairt esan riu, Ach cò tha sibhse ag ràdh is mi?

16 Agus fhreagair Simon Peadar agus thubhairt e, Is tusa Crìosd, Mac an Dé bheò.

17 Agus fhreagair Iosa agus thubhairt e ris, Is beannaichte thusa, a Shimoin Bhar-Iona; oir cha d'fhoillsich fuil agus feoil sin duitse, ach m' Athair-sa a ta air nèamh.

18 Agus a ta mise ag ràdh riut, Gur tusa Peadar, agus air a' charraig² so togaidh mise m' eaglais: agus cha toir geatachan ifrinn buaidh oirre.

19 Agus bheir mi dhuit iuchraiche rìoghachd nèimh: agus ge b'e ni a cheanglas tusa air talamh bithidh e ceangailte air nèamh; agus ge b'e ni a dh'fhuasglas tusa air talamh, bithidh e fuasgailte air nèamh.

20 An sin dh'àithn e d'a dheisciobluibh gun iad a dh'innseadh do neach air bith, gu'm b'esan Iosa an Crìosd.

21 O'n àm sin a mach thòisich Iosa air a nochdadh d'a dheisciobluibh, gur éigin dhasan dol suas gu Ierusalem, agus mòran do nithibh fhulang o na seanairibh, agus na h-àrd-shagartaibh, agus na sgrìobhaichibh, agus a bhi air a chur gu bàs, agus a bhi air a thogail suas air an treas là.

22 Agus ghabh Peadar e, agus thòisich e air achmhasan a thabhairt dha, ag ràdh, Gu ma fada sin uaitse, a Thighearna; cha tachair sin duitse.

23 Ach air tionndadh dhasan, thubhairt e ri Peadar, Imich air mo chùl, a Shatain; is oibheum dhomh thu: oir cha'n 'eil spéis agad do nithibh Dhé, ach do nithibh dhaoine.

24 An sin thubhairt Iosa r'a dheisciobluibh, Ma's àill le neach air bith teachd a m' dhéigh-sa, àicheadhadh se e féin, agus togadh e air a chrann-ceusaidh, agus leanadh e mise.

25 Oir ge b'e neach le'm b'àill 'anam a ghleidheadh, caillidh se e; agus ge b'e neach a clailleas 'anam air mo sgàth-sa, gheibh se e.

26 Oir ciod an tairbhe a ta ann do dhuine, ged chosnadh e an saoghal uile, agus 'anam féin a chall? no ciod i a' mhalairt³ a bheir duine air son 'anama.

27 Oir thig Mac an duine ann an glòir 'Athar, maille r'a ainglibh; agus an sin bheir e do gach neach a réir a ghnìomhara.

28 Gu deimhin a ta mi ag ràdh ribh, Gu bheil cuid do'n dream a ta 'nan seasamh an so, nach blais bàs, agus am faic iad Mac an duine a' teachd 'na rìoghachd féin.

CAIB. XVII.

1 *Atharrachadh agus dealrachadh crutha Iosa.*

14 *Shlànnaich e an leanabh air an roth an tuit-eamas.* 22 *Dh'innis e 'fhuilangas roimh làimh,* 24 *agus dh'ìoc e a' chìs.*

A GUS an déigh shè làithean, ghabh Iosa Peadar, agus Seumas, agus Eoin a bhràthair, agus threòraich e iad air leth gu beinn àrd,

2 Agus dh'atharraicheadh a chruth 'nan làthair; agus dheabraich 'aghaidh mar a' ghrian, agus rinneadh 'eudach geal mar an solus.

3 Agus, feuch, chunncas leo⁴ Maois agus Elias a' còmhradh ris.

4 An sin fhreagair Peadar, agus thubhairt e ri Iosa, A Thighearna, is maith dhuinne bhi an so: ma's àill leatsa, dean-amaid trì pàilliona⁵ an so: aon dhuitse, aon do Mhaois, agus aon do Elias.

5 Air dha bli fathast a' labhairt, feuch, thilg neul soillseach sgàile orra: agus, feuch, guth as an neul, ag ràdh, Is e so mo Mhac gràdhach-sa, anns am bheil mo mhòr-thlachd, éisdibh ris.

6 Agus an uair a chual na deisciobuil so, thuit iad air an aghaidh, agus ghabh iad eagal ro mhòr.

7 Agus thàinig Iosa agus bhean e riu, agus thubhairt e, Eiribh, agus na biodh eagal oirbh.

¹ Ieremiah.

² petra. Gr.

³ iomlaid.

⁴ dh'fhoillsicheadh dhoibh.

⁵ bothain.

8 Agus an uair a thog iad suas an sùilean, cha'n fhac iad neach air bith, ach Iosa 'na aonar.

9 Agus an àm dhoibh teachd a nuas o'n bheinn, thug Iosa àithne dhoibh, ag ràdh, Na innsibh do neach air bith an nì a chunnaic sibh, gus an éirich Mac an duine o na marbhaibh.

10 Agus dh'fheadraich a dheisciobuil dheth, ag ràdh, C'ar son ma seadh a their na sgrìobhaichean, gur éigin Elias a theachd air tús?

11 Agus fhreagair Iosa agus thubhairt e riu, Thig Elias gu firinneach air tús, agus aisigidh e na h-uile nithe:

12 Ach a ta mise ag ràdh ribh, Gu'n d'thàinig Elias a cheana, agus cha d'aithnìch iad e, ach rinn iad gach nì bu toil leo ris: is ann mar sin, mar an ceudna, a dh'fhulaingeas Mac an duine uatha.

13 An sin thuig na deisciobuil gu'm b'ann mu Eoin Baiste a labhair e riu.

14 Agus an uair a thàinig iad chum an t-sluaigh, thàinig duine àraidh d'a ionnsuidh, a' tuiteam air a ghlùinibh dha, agus ag ràdh,

15 A Thighearna, dean tròcair air mo mhac, oir a ta e gu tinn leis an tuiteamas¹, agus is mòr an cràdh a ta e a' fulang: oir a ta e gu minic a' tuiteam san teine, agus gu tric san uisge.

16 Agus thug mi e dl'ionnsuidh do dheisciobuil, agus cha b'urraim iad a leigheas.

17 Agus fhreagair Iosa agus thubhairt e, A ghinealaich neo-chreidich, agus choirbte, cia fhad a bhitheas mi maille ruibh? cia fhad a dh'fhulaingeas mi sibh? thugaibh a m' ionnsuidh-sa an so e.

18 Agus chronuich Iosa an deamhan, agus dh'imich e as: agus shlànnicheadh an leanabh o'n uair sin a mach.

19 An sin, an uair a thàinig na deisciobuil chum Iosa fa leth, thubhairt iad, C'ar son nach b'urraim sinne a thilgeadh a mach?

20 Agus thubhairt Iosa riu, Air son bhur mì-chreidimh: oir gu firinneach tha mi ag ràdh ribh, Nam biodh agaibh creidimh mar ghràinne mustaird, theireadh sibh ris a' bheinn so, Atharraich á so an sud, agus dh'atharraicheadh i; agus cha bhiodh nì air bith eu-comasach dhuibh.

21 Gidheadh, cha téid a' ghné so mach, ach le h-urnuigh agus le trasgadh.

22 Agus an feadh a bha iad a' fantuinn ann an Galile, thubhairt Iosa riu, Bithidh Mac an duine air a bhrath thairis do làmhaibh dhaoine:

23 Agus marbhaidh iad e, ach an treas là éiridh e. Agus bha iadsan ro bhrònach.

24 Agus air teachd dhoibh do Chaper-nam, thàinig luchd-togail na cise gu Peadar, agus thubhairt iad ris, Nach 'eil bhur maighstir-sa ag ìocadh na cise?

25 Thubhairt esan, A ta. Agus an uair a chaidh e steach do'n tigh, labhair Iosa ris air tús, ag ràdh, Ciod i do bharail-sa, a Shimoin? co uaith a ta rìghrean na talmhainna? togail càine no cise? An ann o'n cloinn féin, no o choigrich?

26 Thubhairt Peadar ris, O choigrich. Thubhairt Iosa ris-san, Air an aobhar sin a ta a' chlann saor.

27 Gidheadh, chum nach tugamaid oilbheum dhoibh, imich thusa chum na fairge, agus tilg dubhan *innfe*, agus tog an ceud iasg a thig a mios: agus air fosgladh a bheoil duit, gheibh thu bonn airgid; sin gabh, agus tabhair dhoibh air mo shon-sa, agus air do shon féin.

CAIB. XVIII.

1 Thug Criosd àithne d'a dheisciobluibh bhì ìmhail agus neo-chronail, 7 oilbheum a sheachnadh, agus gun iad a dheanamh tàir air cloinn bhig. 15 Labhair Criosd mu thimcheall mailteanais. 23 Cosanulachd an rìgh a ghabh cumtas d'a sheirbhisich.

ANNS an àm sin féin thàinig na deisciobuil chum Iosa, ag ràdh, Cò is mò ann an rìoghachd nèimh?

2 Agus air do Iosa leanabh beag a ghairm d'a ionnsuidh, chuir e 'nam meadhon e,

3 Agus thubhairt e, Gu firinneach tha mi ag ràdh ribh, Mur iompaichear sibh, agus mur bi sibh mar leanabana, nach téidsibh a steach do rìoghachd nèimh.

4 Air an aobhar sin, ge b'e dh'islicheas e féin mar an leanaban so, 'se sin féin is mò ann an rìoghachd nèimh.

5 Agus ge b'e ghabhas aon leanaban d'a leithid so ann am ainm-sa, gabhaidh e mise.

6 Ach ge b'e neach a bheir oilbheum do aon neach do'n mhuinntir bhig so a ta creidsinn annam-sa, b'fhearr dha gu'm biodh cloch-mhuilinn air a crochadh r'a mhuineal, agus gu'm biodh e air a bhàthadh ann an doimhne na fairge.

7 Is an-aoibhinn do'n t-saoghal air son oilbheuman: oir is éigin do oilbheumaibh teachd; ach is an-aoibhinn do'n duine sin troinhe an tig an t-oilbheum.

8 Uime sin, ma bheir do làmh no do chos aobhar oilbheim³ dhuìt, gearr dhuìt iad, agus tilg uait iad: is fearr dhuìt dol a steach do'n bheatha air leth-chois no air leth-làimh, na dà làimh no dà chois a bhi agad, agus thu bhi air do thilgeadh anns an teine shiorruidh.

9 Agus ma bheir do slùil aobhar oilbheim dhuìt, spìon asad i, agus tilg uait i: is fearr dhuìt dol a steach chum na

¹ tuiteamach, guin na ré, timeas na gealach.

² gearraidh no duilinne.

³ tuislùth.

beatha air leth-shùil, na dà shùil a bhi agad agus thu bhi air do thilgeadh ann an teine ifrinn.

10 Thugaibh an aire nach dean sibh tarcuis air aon neach do'n mhuinntir bhig so; oir tha mise ag ràdh ribh, gu bheil an aingil-san air nèamh a' faicinn a ghnàth gnùis m' Athar-sa, a ta air nèamh.

11 Oir thàinig Mac an duine a shaoradh an ni sin a bha cailte.

12 Cìod is barail dhuibhse? ma bhitheas aig duine ceud caora, agus gu'n téid aon diubh air seacharan, nach fàg e na naoi caoraich dheug agus ceithir fichead air na beanntaibh, agus nach téid e dh'iarraidh na caorach a chaidh air seacharan.

13 Agus ma tharlas da gu'm faigh e i, gu deimhlin a ta mi ag ràdh ribh, Gu'n dean e tuilleadh gairdeachais air son na caorach sin, na air son nan naoi caorach dheug agus ceithir fichead, nach deachaidh air seacharan.

14 Mar so cha'n e toil bhuir n-Athar-sa a ta air nèamh, gu'n rachadh aon neach do'n mhuinntir bhig so a chall.

15 Uime sin ma pheacaicheas do bhràthair a' d' aghaidh, imich agus innis a lochd dha' eadar thu féin agus esan a mhàin: ma dh'éisdeas e riut, choisinn thu do bhràthair.

16 Ach mur éisd e riut, thoir² leat aon no dithis eile, chum gu'm bi gach ni air a dheanamh³ seasmhach am beul dithis no triuir do fhianuisibh.

17 Agus ma dhiultas e iadsan éisdeachd, innis do'n eaglais e: ach ma dhiultas e 'n eaglais éisdeachd, biodh e dhuit mar Gheintileach, agus mar chis-mhaor.

18 Gu deimhin a ta mi ag ràdh ribh, Ge b'e air bith nithe a cheanglas sibhse air talamh, bithidh iad ceangailte air nèamh: agus ge b'e air bith nithe a dh'fhuasglas sibhse air talamh, bithidh iad fuasgailte air nèamh.

19 A ris tha mi ag ràdh ribh, Ma choird-eas dithis agaibh air talamh mu thimchìoll aoin ni a dh'iarrais iad, nìhear so dhoibh le m' Athair-sa a ta air nèamh.

20 Oir ge b'e àit am bheil dithis no triuir air an cruinneachadh an ceann a chèile a'm ainm-sa, a ta mise an sin 'nam meadhan.

21 Air dol do Pheadar d'a ionnsuidh san àm sin, thubhairt e, A Thighearna, cia minic a pheacaicheas mo bhràthair a m' aghaidh, agus a mhaithes mi dha? An ann gu ruig an seachdamh uair?

22 Thubhairt Iosa ris, Cha'n abair mi⁴ riut, gus an seachdamh uair, ach gu deich agus trì fichead seachd uairean.

23 Air an aobhar sin is cosmhuil rògh-

achd nèimh ri rìgh àraidh le'm b'àill cunntas a dheanamh r'a sheirbbhisich.

24 Agus an uair a thòisich e air cunntas a dheanamh, thugadh aon d'a ionnsuidh air an robh aige deich mìle tàlann:

25 Ach do bhrìgh nach robh aige ni leis an dioladh e, dh'àithn a thighearn e féin, agus a bhean, agus a chlann, agus na h-uile nithe a bha aige a reiceadh, agus dioladh a dheanamh.

26 Air an aobhar sin thuit an seirbbhisich sin sìos, agus rinn e umhlachd dha, ag ràdh, A Thighearn, dean foighidinn rium, agus iocaidh mi dhuit an t-iomlan.

27 An sin air do thighearn an òglaich sin truas mòr a ghabhail dheth, leig e a chead da, agus mhaith e na fiacha dha.

28 Ach an uair a chaidh an seirbbhisich sin féin a mach, fhuair e aon d'a chomh-sheirbbhisich air an robh aige ceud peghinn: agus chuir e làmh ann, agus rug e air sgornan air, ag ràdh, Ioc dhomh na bheil agam ort.

29 Agus thuit a chomh-sheirbbhisich sìos aig a chosaibh, agus ghuidh e air, ag ràdh, Dean foighidinn rium, agus iocaidh mi dhuit an t-iomlan.

30 Agus cha b'àill leis-san sin: ach dh'imich e agus thilg e ainm prìosan e, gus an iocadh e na fiachan,

31 Agus an uair a chunnaic a chomh-sheirbbhisich na nithe a rinneadh, bha iad ro dhoilich, agus thàinig iad, agus dh'fhoillsich iad d'an tighearn gach ni a rinneadh.

32 An sin ghairm a thighearn air, agus thubhairt e ris, A dhroch sheirbbhisich, mhaith mi dhuit na fiachan ud uile, do bhrìgh gu'n do chuir thu impidh orm;

33 Nach bu chòir dhuitse, mar an ceudna, tròcair a dheanamh air do chomh-sheirbbhisich féin, amhuil mar a rinn mise tròcair ortsa?

34 Agus ghabh a thighearn fearg, agus thug e do na ceusadairibh⁵ e, gus an iocadh e 'fhiachan uile dha.

35 Agus mar sin ni m' Athair nèamhaidh ribhse, mur maith gach aon agaibh o bhuir cridheachaibh d'a bhràthair an cionta.

CAIB. XIX.

1 Shlànuich Crìosd a' mhuinntir a bha tinn: 3 fureag-air e na Phairisich mu thimchìoll dealachaidh: 10 nochd e c'uin ata am pòsadh feumail; 13 agus ghabh e ri cloinn bhig.

A GUS tharladh⁶ an uair a chrìochnaich Iosa na briathra sin, gu'n d'imich e o Ghalile, agus thàinig e gu crìochaibh Iudea, air an taobh thall do Iordan:

2 Agus lean sluagh mòr e, agus shlànuich e iad an sin.

3 Thàinig na Phairisich mar an ceudna

¹ spreig, tagair ris.

² tabhair.

³ a' chlàis uile air a deanamh.

⁴ Ni abram.

⁵ tormentors. Sasg.

⁶ thachair.

d'a ionnsuidh 'ga dhearbhadh¹, agus ag ràdh ris, An bheil e ceaduichte do dhuine a bhean a chur uaith air gach uile aobhar?

4 Agus fhreagair esan agus thubhairt e riu, Nach do leugh sibh, An ti a rinu air tùs *iad*, gu'n d'rinn e iad fear agus bean?

5 Agus thubhairt e, Air an aobhar so fàgaidh duine 'athair agus a mhàthair, agus dlùth-leanaidh e r'a mhnaoi: agus bithidh iad araon 'nan aon fheoil.

6 Air an aobhar sin, cha dithis iad ni's mò, ach aon fheoil. Uime sin, an ni a cheangail Dia, na sgaoileadh duine.

7 Thubhairt iad ris, C'ar son, ma seadh, a dh'àithn Maois litir-dhealaich a thabhairt *dhi*, agus a cur air falbh?

8 Thubhairt esan riu, Dh'fhulaing Maois dhuibh-sa air son cruais bhuir cridhe, bhuir mnà a chur uaibh: ach cha robh e mar sin o thùs.

9 Agus tha mise ag ràdh ribh, Ge b'e chuiras uaith a bhean, ach air son strìopachais, agus a phòsas bean eile, a ta e a' deanamh adhaltrannais: agus ge b'e neach a phòsas ise a chuireadh air falbh, a ta e a' deanamh adhaltrannais.

10 Thubhairt a dheisciobuil ris, Ma's e sin cor an fhir r'a mhnaoi, cha'n eil am pòsadh maith r'a dheanamh.

11 Ach thubhairt esan riu, Cha'n eil na h-uile dhaoine comasach air a' chaint so a ghabhail, ach *iadsan* d'an d'thugadh e.

12 Oir a ta cuid 'nan caillteanaich, a rugadh mar sin o bhroinn *am* màthar; agus a ta cuid do chaillteanaich ann, a rinn-eadh 'nan caillteanaich le daoibh; agus a ta caillteanaich ann, a rinn iad féin 'nan caillteanaich air son rioghachd nèimh. Ge b'e neach a ta comasach air a ghabhail d'a ionnsuidh, gabhadh se e.

13 An sin thugadh clann bheag d'a ionnsuidh, chum gu cuireadh e a làmhan orra, agus gu'n deanadh e urnuigh: agus chronuich na deisciobuil iad.

14 Ach thubhairt Iosa, Fulaingibh do na leanabaibh, agus na bacaibh dhoibh teachd a m' ionnsuidh: oir is ann d'an leithidibh sin a ta rioghachd nèimh.

15 Agus an déigh dha a làmhan a chur orra, dh'ìmich e as a sin.

16 Agus, feuch, thàinig neach agus thubhairt e ris, A mhaighstir mhaith, ciod am maith a ni mi chum gu faigh mi a' bheatha mhaireannach?

17 Agus thubhairt esan ris, C'ar son a' ghoireadh tu maith dhiom-sa? cha'n eil ann neach maith ach a h-aon, *eadhon* Dia: ach ma's àill leat dol a steach chum na beatha, coimhid² na h-àitheanta.

18 Thubhairt esan ris, Cia iad? agus thubhairt Iosa, Na dean mortdach. Na dean adhaltrannas. Na goid. Na toir

fianuis bhréige.

19 Thoir urram do t'athair, agus do d' mhàthair: agus, Gràdhach do choimh-earnach mar thu féin.

20 Thubhairt an t-òganach ris, Choimhid mi iad sin uile o m'òige: ciod a ta dh'uireasbluidh orm fathast?

21 Thubhairt Iosa ris, Ma's àill leat bhi coimhlionta, ìmich, reic na bheil agad, agus tabhair do na bocldaibh, agus gheibh thu ionmhas air nèamh; agus thig, agus lean mise.

22 Ach an uair a chual an t-òganach na briathra sin, dh'fhalbh e gu brònach: oir bha mòr-shaoibhreas aige.

23 An sin thubhairt Iosa r'a dheisciobuilbh, Gu fìrinneach tha mi ag ràdh ribh, gu bheil e cruaidh air duine saoi bhir dol a steach do rioghachd nèimh.

24 Agus a ris tha mi ag ràdh ribh, Gur usadh do chàmhach dol troimh³ chrò snàthaid, na do dhuine saoi bhir dol a steach do rioghachd Dhé.

25 Agus 'nuair a chual a dheisciobuil so, ghabh iad iongantas mòr, ag ràdh, Cò ma seadh an neach a dh'fheudas a bhi air a shaoradh?

26 Ach air amharc do Iosa orra, thubhairt e riu, Do dhaoibh a ta so eu-comasach, ach do Dhia a ta na h-uile nithe comasach.

27 An sin fhreagair Peadar, agus thubhairt e ris, Feuch, thréig sinne na h-uile *nithe*, agus lean sinn thusa; air an aobhar sin ciod a gheibh sinn?

28 Agus thubhairt Iosa riu, Gu deimhin a ta mi ag ràdh ribh, Sibhse a lean mise, anns an ath-gheineamhuin⁴, an uair a shuidheas Mac an duine air caithir a ghlòire féin, gu'n suidh sibhse mar an ceudna air dà chaithir dheug, a' toirt breth air dà thréibh dheug Israeil.

29 Agus ge b'e neach a thréig tighean, no bràithrean, no peathraichean, no athair, no màthair, no bean-phòsa, no clann, no fearann air sgàth m'ainme-sa, gheibh e a' cheud uiread, agus a' bheatha mhair-eannach mar oighreachd.

30 Ach a ta mòran air thoiseach a bhith-eas air dheireadh; agus air dheireadh, a *bhitheas* air thoiseach.

CAIB. XX.

1 Dhearbhadh Crìosd, le cosamhlachd air a ghabhail o luchd saoi-threach ann an gàradh fìona, nach eil Dia fo fhìachaibh do dhuine air bith: 17 roimh-innis e a bhàs; 20 agus theagaisg e d'a dheisciobuilbh bhi umhal.

OIR is cosmhuil rioghachd nèimh ri fear-tighe, a chaidh a mach moch air mhaduinn a thuarasdalachadh luchd-oibre d'a gharadh fìona⁵.

2 Agus an déigh dha cordadh ris an

¹ g'asfheuchaim, g'abhuaireadh. ² gléidh. ³ trid, tre.

⁴ ath-ùrachadh, ath-chruthachadh. ⁵ fhion-lìos.

luchd-oibre air pheghinn *Romhanaich* san là, ehuir e d'a ghàradh fiona iad.

3 Agus an uair a chaidh e mach timchioll na treas uaire, chunnaic e dream eile 'nan seasamh dìomhanach sa' mhargadh.

4 Agus thubhairt e riu, Imichibh-sa mar an ceudna do'n ghàradh fhìona, agus ge b'e ni a bhitheas ceart, bheir mi dhuibh e. Agus dh'imich iad.

5 An uair a chaidh e mach a rìs timehioll na seathadh agus na naothadh uaire, rinn e mar an ceudna.

6 Agus an uair a chaidh e mach mu thimehioll na h-aoin uaire deug, fhuair e dream eile 'nan seasamh dìomhanach, agus thubhairt e riu, C'ar son a ta sibh 'nur seasamh an so feadh an là dìomhanach?

7 Thubhairt iad ris, A chionn nach do thuarasdalaich duine air bith sinn. Thubhairt esan riu, Imichibh-sa mar an ceudna do'n ghàradh fhìona, agus ge b'e ni a ta ceart, gheibh sibh e.

8 Agus 'nuair thàinig am feasgar, thubhairt tighearn a' ghàraidh fhìona sin r'a stiùbhard¹, Gairm an luchd-oibre, agus thoir dhoibh an tuarasdail, a' toiseachadh o'n dream a thàinig mu dheireadh gu ruig na ceud daoine,

9 Agus an uair a thàinig iadsan a thuarasdalaicheadh mu thimehioll na h-aoin uaire deug, fhuair gach duine dhiubh peghinn.

10 Ach an uair a thàinig an ceud dream, shaoil iadsan gu'm faigheadh iad ni bu mhò; ach fhuair gach aon diubh mar an ceudna peghinn.

11 Agus air dhoibh 'fhaotainn, rinn iad gearan an aghaidh fhir-an-tighe,

12 Ag ràdh, An dream sin a thàinig mu dheireadh, cha d'rinn iad obair ach aon uair, agus rinn thu iad ionnan ruinne², a ghluilain uallach³ agus teas an là.

13 Ach fhreagair esan agus thubhairt e ri fear dhiubh, A charaid, cha'n 'eil mi a' deanamh eucor ort: nach do choird thu rium air pheghinn?

14 Tog leat do thail fèin, agus imich romhad: is i mo thoil-sa a thabhairt do'n tì so a thàinig mu dheireadh, mar a thug mi dhuit-sa.

15 Nach 'eil e ceaduichte dhomh-sa an ni a's toil leam a dheanamh ri mo chuid fèin? ambheil do shùil-sa olc, air son gu bheil mise maith?

16 Mar sin bithidh an dream dheireamhach air thoiseach, agus an dream a ta air thoiseach air dheireadh: oir a ta mòran air an gairm, ach beagan air an taghadh.

17 Agus a' dol do Iosa suas gu Ierusalem, thug e an dà dheiseibul deug leis a

leth taobh anns an t-slighe, agus thubhairt e riu,

18 Feuch, a ta sinn a' dol suas gu Ierusalem; agus bithidh Mac an duine air a bhrath thairis do na h-àrd-shagartaibh, agus do na sgrìobhaicheibh, agus dìtidh iad eum bàis e.

19 Agus bheir iad thairis e do na Cinnich chum fanoid a dheanamh air, agus chum a sgiùrsadh, agus a cheusadh: ach an treas là éiridh e a rìs.

20 An sin thàinig d'a ionusuidh màthair eloinne Shebede, maille r'a mic, a' toirt aoraidh dha, agus ag iarraidh ni àraidh air.

21 Agus thubhairt esan rithe, Ciod a b'àill leat? Thubhairt i ris, Abair⁴ gu'n suidh iad so mo dhithis mhac, fear aca air do làimh dheis, agus fear eile air do làimh ehlì, a d' ròghachd.

22 Ach fhreagair Iosa agus thubhairt e, Cha'n 'eil fhios agaibh ciod a ta sibh ag iarraidh. Am bheil sibh comasach air a' chupan sin ol a dh'òlas mise, agus a bhi air bhur baisteadh leis a' bhaisteadh leis am baistear mise? Thubhairt iad ris, A ta sinn comasach.

23 Agus thubhairt esan riu, Olaidh sibh gu deimhin do m' chupan-sa, agus baistear sibh leis a' bhaisteadh leis am baistear mise: ach suidhe air mo làimh dheis agus ehlì, cha leamsa sin a thabhairt, ach dhoibh-san d' am bheil e air ulluchadh le m' Athair-sa.

24 Agus 'nuair a chual an deichnear so, bha iad diombach air an dithis bhràithre.

25 Ach ghairm Iosa iad d'a ionnsuidh, agus thubhairt e, A ta fhios agaibh gu bheil aig uachdaranaihb⁵ nan Cinneach tighearnas orra, agus gu bheil aig an daoinibh mòra smachd orra.

26 Ach mar sin cha bhi e 'nur measg-sa: ach ge b'e neach le'm b'àill a bhi mòr 'nur measg, biodh e dhuibh 'na fhear-frithealaidh.

27 Agus ge air bith le'm b'àill toiseach a bhi aige 'nur measg, biodh esan 'na sheirbhiseach dhuibh:

28 Amhul mar nach d'thàinig Mac an duine eum gu'n deantadh frithealadh dha, ach a dheanamh frithealaidh, agus a thabhairt 'anama fèin mar éiric air son mhòran.

29 Agus ag dol a mach dhoibh á Iericho, lean sluagh mòr e:

30 Agus, feuch, dithis dhaoine dalla, a bha 'nan suidhe ri taobh na slighe, 'nuair a chual iad gu'n robh Iosa a' dol seachad, ghlaodh iad, ag ràdh, Dean tròear oirne, a Thighearn, a Mhic Dhaibhidh.

31 Agus chronuich an sluagh iad, chum gu'm biodh iad 'nan tosd: ach is mòid⁶

¹ fhear-riaghlaidh.

² agus sinne.

³ a dh'iom-

chair callach.

⁴ Dednuich.

⁵ prionnsaibh.

⁶ mò.

a ghlaodh iadsan ag ràdh, Dean tràcair oirinn, a Thighearn, a Mhic Dhaibhidh.

32 Agus sheas Iosa, agus ghairm e iad, agus thubhairt e, Ciod is àill leibh mise a dheanamh dhuibh?

33 Thubhairt iadsan ris, A Thighearn, ar sùilean a bhi air am fosgladh.

34 Agus ghabh Iosa truas dhiubh, agus bhean e r'an sùilb: agus air ball¹ thàinig radharc d'an sùilb, agus lean iad e.

CAIB. XXI.

1 Mharcaich Iosa gu Ierusalem air asail; 12 thilg e mach an luchd-reicidh agus ceannachd as an teampull; 17 mhalluich e an crann-fìge, 23 chuir e na sagairt 'nan tosd; 28 agus chrònuich e iad le cosamlachd.

A GUS an uair a dhruid iad ri Ierusalem, agus a thàinig iad gu Betphage, gu sliabh nan crann-oladh, an sin chuir Iosa dithis d'a dheisciobluibh uaith,

2 Ag ràdh riu, Rachaidh do'n bhaile a ta thall fa 'ur comhair, agus air ball gheibh sibh asail ceangailte ann, agus loth maille rishe²: fuasgaibh, agus thugaibh a m' ionnsuidh iad.

3 Agus ma labhras aon duine ni air bith ribh, abraibh, Gu bheil feum aig an Tighearn orra; agus cuiridh e uaith air ball iad.

4 Rinneadh na nithe so uile, chum gu'n coimhliontadh an ni a labhradh leis an fhàidh ag ràdh,

5 Imsibh do nighean Shioin, Feuch, a ta do Rìgh a' teachd a d' ionnsuidh gu chùin, agus e 'na shuidhe air asail, agus air lath³ mac na h-asail.

6 Agus dh'imich na deisciobuil, agus rinn iad mar a dh'àithn Iosa dhoibh;

7 Agus thug iad an asail agus an loth leo, agus chuir iad am falluinn⁴ orra, agus chuir iad esan 'na shuidhe air am muin.

8 Agus sgaoil mòr-shluagh am falluinn-eann air an t-slighe; agus ghearr dream eile geuga do na crannaibh, agus leag iad air an t-slighe iad.

9 Agus thog an sluagh a bha roimhe agus 'na dheigh iolach, ag ràdh, Hosanna do Mhac Dhaibhidh: beannaichte gu robh an Ti a thig ann an ainm an Tighearna; Hosanna anns na h-àrdaibh.

10 Agus 'nuair thàinig e steach do Ierusalem, ghluaiseadh am baile⁵ uile, ag ràdh, Cò e so?

11 Agus thubhairt an sluagh, Is e so Iosa am fàidh o Nasaret Ghàile.

12 Agus chaidh Iosa a steach do theampull Dé, agus thilg e mach iadsan uile a bha reic agus a' ceannach anns an teampull, agus thilg e buird luchd-malairt⁶ an airgid thairis, agus caithreach luchd-

reicidh nan columan.

13 Agus thubhairt e riu, A ta e sgrìobhta, Goircair tigh urnuigh do m' thighsa; ach rinn sibhse 'na ghàraidh luchd-reubainn⁷ e.

14 Agus thàinig na doill agus na bacaich d'a ionnsuidh anns an teampull, agus shlànuch e iad.

15 Agus an uair a chunnaic na h-àrd-shagairt agus na sgrìobhaichean na gnìomharan iongantach a rinn e, agus a chlam a' glaothaich san teampull, agus ag ràdh, Hosanna do Mhac Dhaibhidh, bha corruich mhòr orra.

16 Agus thubhairt iad ris, An cluinn thu ciod a ta a' mhuinntir sin ag ràdh? Agus thubhairt Iosa riu, A ta mi 'cluinnintinn; nach do leugh sibhse riamh, A beul naoidhean agus chiochran choimhlion thu moladh?

17 Agus an uair a dh'fhàg e iad, chaidh e mach as a' bhaile gu Betani, agus dh'fhan e an sin.

18 Agus an uair a phill e chum a' bhaile air mhaduinn, bha ocras air.

19 Agus air dha crann-fìge fhaicinn air an t-slighe, thàinig e d'a ionnsuidh, agus cha d'fhuair e ni air bith air, ach duilleach a mhàin; agus thubhairt e ris, Na fàsadh⁸ toradh o so suas gu bràth ort. Agus chròn ann crann-fìge air ball.

20 Agus an uair a chunnaic na deisciobuil e, ghabh iad iongantas, ag ràdh, Cia luath a shearg an crann-fìge as?

21 Agus fhreagair Iosa agus thubhairt e riu, Gu deimhin a ta mi ag ràdh ribh, ma bhitheas creidimh agaibh, agus nach bi sibh fo amharas, cha'n e mhàin gu'n dean sibh an ni a rinneadh do'n chrann-fhìge, ach mar an ceudna ma their sibh ris a' bheinn so, Togar thu, agus tilgear san fhaire thu, bithidh e decanta:

22 Agus ge b'e air bith nithe a dh'iarraas sibh ann bhur n-urnuigh, ma chreideas sibh, gheibh sibh iad.

23 Agus an uair a thàinig e do'n teampull, thàinig na h-àrd-shagairt agus seanairean a' phobuill d'a ionnsuidh, agus c a' teagasg, ag ràdh ris, Ciod e an t-ùghdarras leis⁹ am bheil thusa a' deanamh nan nithe so? agus cò thug an cumhachd so dhuit?

24 Agus fhreagair Iosa agus thubhairt e riu, Feòraichidh mise mar an ceudna aon ni dhibh-sa, agus ma dh'innseas sibh dhomh e, innsidh mise dhuibh-sa, air mhodh ceudna, cia an t-ùghdarras leis am bheil mi deanamh¹⁰ nan nithe so.

25 Baisteadh Eoin, cia as a thàinig e? O nèamh, no o dhaoibh? Ach reusonaich iadsan 'nam measg féin, ag ràdh, Ma

¹ gun dàil, san uair. ² na fochair. ³ bioraiche. ⁴ eudach uachdair. ⁵ a' chaithir. ⁶ iomlaid.

⁷ na uaimh chreachadairean, 'na shlochd mheirleach. ⁸ Ner fhàsadh. ⁹ trid, ¹⁰ trid an deanam.

their sinn, O nèamh, their esan ruinn, C'ar son, ma seadh, nach do chreid sibh e?

26 Ach ma their sinn, O dhaoibh, a ta eagal a' phobuill oirn; oir a ta meas fàidh aig gach uile *dhuine* air Eoin.

27 Agus fhreagair iad Iosa, agus thubhairt iad, Cha'n 'eil fhios againn. Agus thubhairt esan riu, Ni mò dh'innseas mise dhuibh-sa cia an t-ùghdarras leis am bheil mi deanamh nan nithe so.

28 Ach ciod i bhur barail-sa? Bha aig duine àraidh dithis mhac, agus thàinig e dh'ionnsuidh a' cheud *mhic*, agus thubhairt e, A mhic, imich, dean obair an diugh a m' ghàradh fiona.

29 Agus fhreagair esan agus thubhairt e, Cha dean : ach 'na dhéigh sin, ghabh e aithreachas agus dh'imich e.

30 Agus thàinig e gus an dara *mac*, agus thubhairt e mar an ceudna. Agus fhreagair esan agus thubhairt e, *Théid*, a Thigh-earn; gidheadh cha deachaidh e.

31 Cò do'n dithis a rinn toil 'athar? Thubhairt iadsan ris, An ceud fhear. Thubhairt Iosa riu, Gu firinneach tha mise ag ràdh ribh, gu'n téid na cis-mhaoir agus na striopaichean do rìoghachd Dhé roimh-bhisa.

32 Oir thàinig Eoin do 'ur n-ionnsuidh an slighe na fireantachd agus cha do chreid sibh e : ach chreid na cis-mhaoir agus na striopaichean e. Agus ge do chunnaic sibhse so, cha do ghabh sibh aithreachas 'na dhéigh sin, a chum gu'n creideadh sibh e.

33 Eisdibh ri cosamhlachd eile : Bha fear-tighe àraidh ann, a phlannuich fion-lios, agus chuir e gàradh¹ m'a thimchioll, agus chladhaich e ionad-bruthaidh an fhiona ann, agus thog e tùr, agus shuidhich e air tuath e; agus chaidh e féin air choigrich.

34 Agus an uair a dhruid *riu* àm an toraidh, chuir e a sheirbhisich a dh'ionnsuidh na tuatha, a dh'fhaotainn a thoraidh.

35 Agus rug an tuath air a sheirbhisich, agus ghabh iad air fear dhiubh, agus mharbh iad fear eile, agus chlach iad fear eile.

36 A ris, chuir e seirbhisich eile uaith, tuilleadh na *sa'* cheud *chuideachd*; agus rinn iad orra-san mar an ceudna.

37 Ach ma dheireadh, chuir e a mhac féin d'an ionnsuidh, ag ràdh, Bheir iad urram do mo mhac.

38 Ach an uair a chunnaic an tuath am mac, thubhairt iad eatorra féin, 'S e so an t-Oighre, thigibh, marbhamaid e, agus glacamaid 'oighreachd-san *dhuinn féin*.

39 Agus rug iad air, agus thilg iad a mach as an fhion-lios e, agus mharbh iad e.

40 Air an aobhar sin, an uair a thig Tigh-

earn an fhion-lios *sin*, ciod a ni e ris an tuath sin?

41 Thubhairt iad ris, Sgriosaidh e gu truagh na droch dhaoine sin, agus suidhichidh e am fion-lios air tuath eile, a bheir a thoraidh dha 'nan aimsiribh féin.

42 Thubhairt Iosa riu, Nach do leugh sibh riamh anns na sgriobtuiribh, A' chlach a dhiult na clachairean, rinneadh i 'na cloich-chinn na h-oisne : is e an Tighearn a rinn so, agus a ta e iongantach 'nar suilibh-ne?

43 Uime sin tha mi ag ràdh ribh, Gu'n toirear rìoghachd Dhé uaibhse, agus gu'n toirear do chinneach *eile* i, a bheir a toraidh uatha.

44 Agus ge b'e neach a thuiteas air a' chloich so, brisear e; ach ge b'e air an tuit i, ni i mìn-luathre dheth.

45 Agus an uair a chuala na h-àrd-shagairt agus na Phairisich a chosamhlachd-san, thuig iad gu'm b'ann mu'n timchioll féin a labhair e.

46 Ach an uai bu mhiann leo breith air², bha eagal a' phobuill orra, oir bha meas fàidh aca air-san.

CAIB. XXII.

1 Cosamhlachd bainnse mhic an Rìgh. 9 Gairm nan Cinneach : 12 peanas an fhir a bha dh'uireasbhuidh trusgain na bainnse. 15 Is còir cis vocadh do Cheasar. 23 Barail mhearachdach nan Sadusach mu thimchioll aiseirigh nam marbh.

AGUS fhreagair Iosa, agus labhair e riu a ris ann an cosamhlachdaibh, ag ràdh,

2 Is cosmhuil rìoghachd nèimh ri rìgh àraidh, a rinn banais-phòsaidh d'a mhac féin;

3 Agus chuir e a sheirbhisich a ghairm na muinntir a fhuair cuireadh chum na bainnse : ach cha b'àill leo-san teachd.

4 A ris, chuir e d'an ionnsuidh seirbhisich eile, ag ràdh, Abraibh-sa ris a' mhuinntir d'an d'thugadh cuireadh, Feuch, dheasaich mi mo dhèinneir : *ata* mo dhaimh agus *mo* spréidh bhiadhtha air am marbhadh, agus *a ta* na h-uile nithe ullamh; thigibh chum na bainnse.

5 Ach chuir iadsan an suarachas e, agus dh'imich iad rompa, fear dhiubh d'a fhearann, agus fear eile chum a cheannachd :

6 Agus rug a' chuid eile *dhiubh* air a sheirbhisich, agus thug iad masladh *dhoibh*, agus mharbh siad *iad*.

7 Ach an uair a chual an rìgh so ghabh e fearg; agus chuir e 'armailtean uaith, agus sgrios e an luchd-mortaidh sin, agus loisg e am baile-san.

8 An sin thubhairt e r'a sheirbhisich, Gu firinneach a ta a' bhanais ullamh, gidheadh an dream a fhuair cuireadh cha b'airidh iad *air*³.

¹ dige, callaid.

² b'àill leo làmh a chur ann.

³ cha b'fhàid iad e.

9 Air an aobhar sin imichibh-sa gus na rathaidibh mòra, agus a lìon *daoine* 's a gheibh sibh, cuiribh *iad* chum na bainnse.

10 Agus chaidh na seirbhiseich sin a mach air na rathaidibh, agus chruinnich iad gach uile neach a fhuaire iad, eadar olc agus mhaith: agus lìonadh *tigh* na bainnse le muinntir a shuidh chum bith.

11 Agus air dol a steach do'n rìgh a dh'fhaicinn nan aoidhean, chunnaic e an sin duine aig nach robh trusgan na bainnse uime:

12 Agus thubhairt e ris, A charaid, cionnus a thàinig thusa steach an so, gun trusgan na bainnse umad? Ach dh'fhan esan 'na thosd.

13 An sin thubhairt an rìgh ris na seirbhiseich, Air a cheangal duibh eadar chosan agus làmhnan, togaibh leibh e, agus tilgibh e anns an dorchadas iomallach: an sin bithidh gul agus giosgan fhiachal.

14 Oir a ta mòran air an gairm, ach beagan air an taghadh.

15 An sin dh'imich na Phairisich, agus ghabh iad comhairle cionnus a dh'fheudadh iad esan a ribeadh¹ 'na chainnt.

16 Agus chuir iad d'a ionnsuidh an deisciobuil féin, maille ri luchd-leanmhuinn Heroid, ag ràdh, A mhaighstir, a ta fhios againn gu bheil thusa fìor, agus gu bheil thu teagasg slighe Dhé ann am fìrinn, agus nach 'eil suim agad do dhuine sam bith: oir cha'n 'eil thu ag amharc air pearsaibh² dhaoine.

17 Uime sin innis dhuinne do bharail, Am bheil e ceaduidhte cìs a thabhairt do Cheasar, no nach 'eil?

18 Ach air tuigsinn am mìruin a dh'Iosa, thubhairt e, C'ar son a ta sibh ga m'bhuaireadh, a chealgairean?

19 Nochdaibh dhomhsa airgid na cìse. Agus thug iad d'a ionnsuidh peghinn³.

20 Agus thubhairt e riu, Co dha a bhuineas an dealbh so, agus an sgrìobhadh *a ta m'a thimchioll*?

21 Thubhairt iadsan ris, Do Cheasar. An sin thubhairt esan riu, Thugaibh uime sin do Cheasar na nithe a's le Ceasar; agus do Dhia, na nithe a's le Dia.

22 Agus an uair a chual iad so, ghabh iad iongantas, agus dh'fhàg iad e, agus dh'imich iad rompa.

23 Air an là sin féin thàinig d'a ionnsuidh na Sadusaich, a their nach 'eil aiseirigh ann, agus chuir iad ceisd air.

24 Ag ràdh, A mhaighstir, thubhairt Maois, Ma gheibh duine bàs gun chlànn aige, gur coir d'a bhràthair a bhean-san a phòsadh a dhlìghe daimhe, agus sliochd a thogail d'a bhràthair.

25 A nis bha seachdnar bhràithre 'nar

measg-ne; agus air do'n cheud fhear dhiubh bean a phòsadh, fhuaire e bàs, agus do bhrìgh nach robh sliochd aige, dh'fhàg e a bhean d'a bhràthair.

26 Agus *thachair* mar an ceudna do'n dara, agus do'n treas *bràthair*, gu ruig an seachdamh.

27 Agus 'nan déigh uile fhuaire a' bhean bàs mar an ceudna.

28 Air an aobhar sin anns an aiseirigh, cò do'n t-seachdnar d'am bean i? Oir bha i aca uile.

29 Agus fhreagair Iosa agus thubhairt e riu, A ta sibh air seacharan⁴, gun eòlas agaibh air na sgrìobtuiribh, no air cumhachd Dhé:

30 Oir anns an aiseirigh cha dean iad pòsadh, ni mò a bheirear am pòsadh iad; ach a ta iad mar aingil Dhé air nèamh.

31 Ach mu thimchioll aiseirigh nam marbh, nach do leugh sibh an nì sin a labhradh ribh le Dia, ag ràdh,

32 Is mise Dia Abraham, agus Dia Isaac, agus Dia Iacob: cha'n e Dia, Dia nam marbh, ach nam beò.

33 Agus an uair a chual am pobull so, ghabh iad iongantas r'a theagasg-san.

34 Ach an uair a chuala na Phairisich gu'n do chuir e na Sadusaich 'nan tosd, chruinnicheadh iad an ceann a chèile.

35 An sin chuir neach àraidh dhiubh, a b'fhear teagaisg an lagha, ceisd *air*, 'ga dhearbhadh, agus ag ràdh,

36 A mhaighstir, cia i an àithne a's mò san lagh?

37 Thubhairt Iosa ris, Gràdhaidhidh tu an Tighearn do Dhia le t'uile chridhe, agus le t'uile anam, agus le t'uile inntinn.

38 Is i so a' cheud *àithne* agus an àithne mhòr.

39 Agus *is* cosmhuil an dara rithe so, Gràdhaidhidh tu do choimhearsnach mar thu féin.

40 Air an dà àithne so tha'n lagh uile, agus na fàidhean an crochadh.

41 Ach air do na Phairisich bhì cruinn an ceann a chèile, dh'fheòraich Iosa dhiubh,

42 Ag ràdh, Ciod i bhur barail-sa mu thimchioll Chriosd? cò d'am mac e? thubhairt iadsan ris, Do Dhaibhidh.

43 Thubhairt esan riu, Cionnus ma seadh a ghoireas Daibhidh san spiorad a Thigh-earna dheth, ag ràdh,

44 Thubhairt an Tighearn ri m' Thigh-earn, Suidh air mo làimh dheis, gus an cuir mi do naimhdean 'nan stòl fo d' chosaibh?

45 Air an aobhar sin, ma ghoireas Daibhidh a Thigh-earn dheth, cionnus is mac dha e?

¹ ghlacadh.² gnùis. Gr.³ b'ionnan a'

pheghinn Romhanach agus 7½.

⁴ iomroll.

46 Agus cha b'urrainn aon neach freagradh sam bith a thabhairt air; ni mò a bha chridhe aig aon neach, o'n là sin suas, ni air b'ith fhèorach dheth.

CAIB. XXIII.

1 *Chomhairlich Criosd do'n t-sluagh éisdeachd ri deadh theagasg nan sgrìobhaichean, agus nam Phairiseach: ach gun an droch eisimpleir a lean-tuinn: 5 is còir d'a dheisciobluibh bhì air am faicill an aghaidh an uabhair.*

AN sin labhair Iosa ris an t-sluagh, agus r'a dheisciobluibh féin,

2 Ag ràdh, A ta na sgrìobhaichean agus na Phairisich 'nan suidhe ann an caithir Mhaois:

3 Air an aobhar sin, na h-uile nithe dh'iarras iad oirbh-sa a choimhead¹, coimhidibh agus deanaibh iad; ach na deanaibh a rèir an oibre: oir their iad, agus cha dean iad.

4 Oir ceanglaidh iad uallaiche² troma, agus do-ionmchar, agus cuiridh siad iad air guailnibh dhaoine; gidheadh cha charuich iad féin iad le h-aon d'am meuraibh.

5 Ach an oibre uile a ta iad a' deanamh chum a bhi air am faicinn le daoineibh: ni iad am philacteridh leathan, agus iomall an eudaich mòr;

6 Agus is ionmhuiinn leo na ceud ionada-suidhe anns na féillibh, agus na ceud chaithriche anns na coimhthionalaibh,

7 Agus fàilte *fhaghail* air na margaidh, agus daoine a ghairm Rabbi, Rabbi dhiubh.

8 Ach na goirear Rabbi dhibhse: oir is aon àrd-mhaighstir a ta agaibh, Criosd; agus is bràithre sibh féin uile.

9 Agus na goiribh bhur n-athair do dhuine sam bith air thalamh: oir is aon Athair a ta agaibh, a ta air nèamh.

10 Cha mho a ghoirear àrd-mhaighstir-ean dhiubh: oir is aon àrd-mhaighstir a ta agaibh, Criosd.

11 Ach an ti a's mò 'nur measg, bithidh e 'na òglach agaibh.

12 Agus ge b'e neach a dh'àrdaicheas e féin, islichear e; agus ge b'e neach a dh'islicheas e féin, àrdaichear e.

13 Ach is an-aobhinn dhiubh-sa, a sgrìobhaichean agus Phairiseacha, a chealgair-ean, do brìgh gu bheil sibh a' druid-eadh rioghachd nèimh an aghaidh dhaoine: oir cha téid sibh féin a steach, agus cha'n fhulaing sibh do'n dream a ta dol a stigh dol ann.

14 Is an-aobhinn dhiubh, a sgrìobhaichean agus Phairiseacha, a chealgair-ean; oir a ta sibh ag itheadh suas tighean bhan-trach, agus air sgàth deadh choslais à deanamh urnuighean fada; uime singheibh sibh an dannadh a's mò.

15 Is an-aobhinn dhiubh, a sgrìobhaichean agus Phairiseacha, a chealgair-ean; oir cuairtichidh sibh muir agus tìr chum aon duine a dheanamh do bhur creidimh féin; agus an uair a bhitheas e deanta, ni sibh mac ifrinn dheth dà uair ni's mò na sibh féin.

16 Is an-aobhinn dhiubh, a chinn-iùil³ dhalla, a their, Ge b'e duine a bheir mionn-an air an teampull, cha ni air bith sin: ach ge b'e bheir mionn-an air òr an teampull, a ta e ceangailte⁴.

17 Amadana, agus a dhaoine dalla! oir cò aca is mò an t-òr, no an teampull a ta naomhachadh an òir?

18 Agus, Ge b'e bheir mionn-an air an altair, cha'n'eil suim ann: ach ge b'e bheir mionn-an air an tiodhlac a ta oirre, a ta e ceangailte.

19 Amadana, agus a dhaoine dalla! oir cò aca is mò an tiodhlac, no'n altair a ta naomhachadh an tiodhlaic?

20 Air an aobhar sin, ge b'e mhionnaicheas air an altair, a ta e a' mionnachadh oirre féin, agus air gach ni a ta oirre.

21 Agus ge b'e mhionnaicheas air an teampull, a ta e a' mionnachadh air san, agus air an Tì a ta 'na chòmhnuidh ann.

22 Agus ge b'e neach a mlionnaicheas air nèamh, a ta e a' mionnachadh air righ-caithir Dhé, agus airsan a ta 'na shuidhe oirre.

23 Is an-aobhinn dhiubh, a sgrìobhaichean agus Phairiseacha, a chealgair-ean; oir a ta sibh a' toirt an deachamh as a' mhiinnt, agus an anise, agus a' chuimn, agus dhiobair sibh nithe cudthromach an lagha, cothrom, tròcair, agus frinn: bu chòir dhiubh iad so a dheanamh, agus gun iad sud fhàgail gun deanamh.

24 A chinn-iùil dhalla, a shìolaidheas⁵ a' mhin-chuileag, agus a shluigeas an càmhail.

25 Is an-aobhinn dhiubh, a sgrìobhaichean agus Phairiseacha, a chealgair-ean; oir glanaidh sibh an taobh a muigh do'n chupan, agus do'n mhèis, ach a ta iad an taobh a sìgh làn do reubaim, agus do eucòir⁶.

26 Phairisich dhoill, glan air tùs an taobh a stigh do'n chupan agus do'n mhèis, chum gu'm bi an taobh a muigh dhiubh glan mar an ceudna.

27 Is an-aobhinn dhiubh, a sgrìobhaichean agus Phairiseacha, a chealgair-ean: oir is cosmhuil sibh ri uaighibh gealaichte, a ta deadh-mhaiseach air an taobh a muigh, ach air an taobh a stigh a ta làn do chnàmhaibh dhaoine marbha, agus do'n uile shalachar.

28 Mar an ceudna, a ta sibhse an leth a muigh ann fianuis dhaoine ann an coslas

¹ ghleidheadh. ² callacha.
³ a bukad-sèdlaidh, a thedraichean.

⁴ fuidh fhiachaibh. ⁵ sgagas.
⁶ dh'anabhara.

fhìreana, ach san taobh a stigh làn ceilg, agus eusaontais.

29 Is an-aobhinn dhuibh, a sgrìobhaichean agus Phairiseacha, a chealgairéan; oir a ta sibh a' togail àitean-adhlacaidh nam fàidhean, agus a' deanamh leac-lithidh nam firean deadh-mhaiseach.

30 Agus ag ràdh, Nam bitheamaid ann an làithibh ar n-aithriche, cha bhitheamaid compàirteach riu am fuil nam fàidhean.

31 Mar sin a ta sibh 'nur fianuisibh 'nur n-aghaidh féin, gur sibh clann na muinntir a mharbh na fàidhean.

32 Mar sin lìonaibh-sa suas tomhas bhur n-aithriche.

33 A nathraiche, a shìol nan nathraiche nimhe, cionnus a dlt'fheudar leibh dol as o dhannadh ifrinn.

34 Air an aobhar sin, feuch, cuiream-sa do 'ur ionnsuidh fàidhean, agus daoine glìce, agus sgrìobhaichean; agus *cuid* dhuibh marbhaidh agus cèusaidh sibh, agus *cuid* dhuibh sgiùrsaidh sibh ann bhur sionagogaibh, agus ni sibh geur-leannmuinn *orra* o bhaile gu baile:

35 Chum gu'n tig oirbh gach uile fhuil fhìreanta a dhòirteadh air an talamh, o fhuil Abeil fhìreanta, gu fuil Shachariais, mhic Bharachiais, a mharbh sibh eadar an teampull agus an altair.

36 Gu fìrinneach a ta mi ag ràdh ribh, Gu'n tig na nithe so uile air a' gheinealach so.

37 A Ierusalem, a Ierusalem, a mharbhas na fàidhean, agus a chlachas an dream a chuirear a d'ionnsuidh, cia minic a b' àill leam do chlànn a chruinneachadh r'a chéile, mar a chruinniceas ceare a h-eoin fuidh a sgiathaibh, agus cha b' àill leibh!

38 Feuch, fàgar bhur tigh agaibh 'na fhàsach.

39 Oir tha mise ag ràdh ribh, nach faic sibh mise o so suas, gus an abair sibh, *Is beannaichte an Tì a thig ann an ainm an Tighearn.*

CAIB. XXIV.

1 *Dh'innis Criosd roimh-làimh sgrìos Ierusalem:*

3 *cìod iad agus cia mòr na triobladairean a bhitheas roimhe sin;* 29 *comharan a theachd gu breitheanas.*

36 *Do bhrìgh gu bheil là a' bhreitheanas fo-ùichte, is còir do gach neach faire a dheanamh.*

AGUS chaidh Iosa mach, agus dh'ìmhich e o'n teampull; agus thàinig a dheisciobuil d'a ionnsuidh, a nochdadh dha aitreabh an teampull.

2 Agus thubhairt Iosa riu, Nach faic sibh iad so uile? gu fìrinneach tha mi ag ràdh ribh, Nach fàgar clach air muin cloiche an so, nach tilgear sìos.

3 Agus air suidhe dha air sliabh nan crann-oladh, thàinig a dheisciobuil d'a ionnsuidh an uaignidheas¹, ag ràdh, Imis

dhuinne, c'uin a thig na nithe sin *gueriche*? agus cìod e comhara do theachd-sa, agus deiridh an t-saoghail?

4 Agus fhreagair Iosa agus thubhairt e riu, Thugaibh an aire nach meall aon neach sibh:

5 Oir thig mòran a'm ainm-sa, ag ràdh, Is mise Criosd; agus meallaidh iad mòran.

6 Agus cluinidh sibh coganna, agus tuairisgeul² choganna: thugaibh an aire nach bi sibh fo amhladh³: oir is éigin do na *nithibh sin* uile teachd gu crìch⁴, ach cha'n 'eil an deireadh ann fathast.

7 Oir éiridh cinneach an aghaidh cinnich, agus rioghachd an aghaidh rioghachd: agus bithidh gorta, agus plàighean, agus criothanna-talmhainn ann am mòran àitean.

8 Agus cha'n 'eil anna so uile ach toiseach thruaighean.

9 An sin bheir iad thairis sibh chum àmhghair, agus marbhaidh iad sibh, agus bithidh fuath aig gach uile chinneach dhuibh air sgàth m'ainme-sa.

10 Agus an sin gabhaidh mòran oilbheum, agus brathaidh iad a chéile, agus bithidh fuath aca d'a chéile.

11 Agus éiridh mòran do fhàidhibh bréige, agus meallaidh iad mòran.

12 Agus do bhrìgh gu'm bi an eucòir air a meudachadh, fuaraichidh gràdh mhòran.

13 Ach ge b'e bhitheas seasmhach chum na crìche, is e so a thèarnas⁵.

14 Agus bithidh soisgeul so na rioghachd air a shearmonachadh air feadh an domhain uile, mar fhianuis do na h-uile chinnich: agus an sin thig an deireadh.

15 Air an aobhar sin, an uair a chì sibhse gràineileachd an léir-sgrìos, air an do labhair Daniel am fàidh, 'na seasamh ann an ionad naomh, (tuigeadh an ti a leughas.)

16 An sin teicheadh iadsan *a ta ann an Iudea*, chum nam beann:

17 An ti a ta air mullach an tighe, na tigeadh e nuas a thabhairt ni sam bith leis as a thigli:

18 Agus an ti a ta sa' mhachair, na pill-eadh e air ais a thogail fhalluinn leis.

19 Agus is an-aobhinn do na mnaibh torrach, agus dhoibh-san a bheir cìoch uatha sna làithibh sin.

20 Ach guidlibh-sa gun bhur teicheadh a bhì sa' gheamhradh, no air an t-sàbaid:

21 Oir anns an àm sin bithidh àmhghar mòr ann, amhuil nach robh ann o thùs an domhain gus a nis, agus nach mò a bhitheas a chaoidh.

22 Agus mur biodh na làithean sin air an giorrachadh, cha bhiodh feoil sam bith air a tèarnadh: ach air son nan daoine

¹ os ìosal.² iomradh.³ bhuaireas.⁴ tachairt.⁵ a shlànùichear.

taghta bithidh na làithean sin air an giorrachadh.

23 An sin ma their aon duine ribh, Feuch, *a ta* Criosd an so, no an sud; na creidibh *e*:

24 Oir éiridh Criosdan bréige, agus fàidhean bréige, agus ni iad comharan agus mìorbhuilean mòra, ionnus gu mealladh iad, nam feudadh *e* bhi, na daoine taghta féin.

25 Feuch, dh'innis mi dhuibh *e* roimh-làimh.

26 Uime sin ma their iad ribh, Feuch, a ta e san fhàsach, na rachaibh a mach: feuch, *a ta* e sna seòmraichibh uaigneach, na creidibh *sin*.

27 Oir a réir mar a thig an dealanach o'n àird an ear, agus a dhealraicheas i gus an àird an iar; mar sin mar an ceudna bhitheas teachd Mhic an duine.

28 Oir ge b'e àit¹ am bi a' chairbh², is ann an sin a chruinnichear n h-iolairean.

29 Air ball an déigh trioblaid nan làithean ud, dorchaidhear a' ghrian, agus cha tabhair a' ghealach a solus, agus tuitidh na reultan o nèamh, agus bithidh cumhachdan nan nèamh air an crathadh.

30 Agus an sin foillsichear comhara Mhic an duine an nèamh: agus an sin ni uile threubha na talmhainn bròn, agus chi iad Mac an duine a' teachd air neulaibh nèimh, le cumhachd agus glòir ro mhòir.

31 Agus cuiridh *e* mach a' aingil le fuaimean mhòir na gall-triump, agus cruinnichidh iad a shlughag taghta o na ceithir gaothaibh, o leth-iomall nèimh gus an leth-iomall eile.

32 Ach fòghlumaibh cosamhlachd o'n chrann-fhige: an uair a bhitheas a gheug a nis maoth, agus a dh'fhàsas an duilleach, aithnichidh sibh gur fagus an samhradh:

33 Agus mar an ceudna, an uair a chi sibhse na nithe sin uile, biodh fios agaibh gu bleil e am fagus, *eadhon* aig na dorsaibh.

34 Gu deimhin a ta mi ag ràdh ribh, Nach téid an ginealach so féin thairis, gus an tachair na nithe so uile.

35 Théid nèamh agus talamh thairis, ach cha téid mo bhriathra-sa thairis a maoidh.

36 Ach cha'n 'eil fios an là no na h-uaire sin aig duine air bith, no fòs aig ainglibh nèimh, ach aig m'Àthair-sa a mhàin.

37 Ach amhuil a bha làithean Noe, mar sin mar an ceudna bithidh teachd Mhic an duine.

38 Oir mar a bha iad anns na làithibh roimh an tuil ag itheadh agus ag òl, a' pòsadh agus a' toirt am pòsadh, gus an

là an deachaidh Noe a steach san àire.

39 Agus nach robh fhios aca gus an d'fhàinig an tuil, agus an do thog i leatha iad uile; mar sin mar an ceudna bithidh teachd Mhic an duine.

40 An sin bithidh dithis air a' mhachair; gabhar fear aca, agus fàgar am fear eile.

41 Bithidh dithis bhan a' meileadh³ anns a' mhuilean; gabhar a h-aon aca, agus fàgar an aon eile⁴.

42 Uime sin deanaibh-sa faire, oir cha'n 'eil fhios agaibh cia an uair an tig bhuir Tighearn.

43 Ach a ta fhios so agaibh, nam b'fhiosrach fear an tighe cia an uair an tigeadh an gaduiche, gu'n deanadh *e* faire, agus nach fulaingeadh *e* gu'm bristeadh a thigh troimh.

44 Uime sin, bithibh-sa ullamh mar an ceudna: oir is ann an uair nach saoil sibh, a thig Mac an duine.

45 Cò e, ma seadh, a ta 'na òglach frinn-each agus glic, a chuir a Thighearn os ceann a mhuinntir, a thabhairt bidh dhoibh 'na àm féin?

46 Is beannaichte an t-òglach sin, a gheibh a Thighearn, ri àm dha teachd, a' deanamh mar sin.

47 Gu deimhin a ta mi ag ràdh ribh, gu'n cuir se e os ceann a mhaoin gu h-iomlan.

48 Ach ma their an droch sheirbhiseach ud 'na chridhe, A ta mo Thighearn a' cur dàil 'na theachd;

49 Agus ma thòisicheas e air a chomh-sheirbhisich a bhualadh, agus air itheadh agus òl maille ri luchd-misge;

50 Thig Tighearn an òglach sin ann an là nach 'eil suil aige ris, agus ann an uair nach fios da,

51 Agus gearraidh *e* 'na bhloighdibh *e*, agus bheir *e* a chuibhrionn da maille ris na cealgairibh: an sin bithidh gul agus giosgan fhialac.

CAIB. XXV.

1 Cosamhlachd nan deich òighean, 14 agus nan tàlann: 31 mar an ceudna min-inneadh mu'n bhreitheanas dheireannach.

AN sin samhlaichear rìoghachd nèimh ri deich òigheibh, a thug leo an lòchrain, agus a chaidh a mach an còdhail an fhir nuadh-phòsda⁵.

2 Agus bha cuignear dhiubh glic, agus cuignear amaideach.

3 Thug iadsan a bha amaideach an lòchrain *leo*, ach cha d'thug iad oladh leo.

4 Ach iadsan a bha glic, thug iad oladh leo 'nan soithichibh maille r'an lòchran-aibh.

5 Agus air deanamh maille do'n fhear

¹ bail.

² a' chlosach.

³ bleath.

⁴ an té eile.

⁵ flùir-na-bainnse.

nuadh-phòsda, thuit clò codail orra uile, agus suain¹.

6 Ach anns a' mheadhon-oidhche, rinn-eadh glaoth, Feuch, a ta am fear nuadh-phòsda a' teachd; rachaibh a mach g'a choinneachadh.

7 An sin dh'èirich na h-òighean ud uile, agus dheasaich iad an lòchrain.

8 Agus thubhairt na h-òighean amaid-each riusan a bha glic, Thoiribh dhuinne cuid do bhur n-oladh; oir a ta ar lòchrain a' dol as.

9 Ach fhreagair iadsan a bha glic, ag ràdh, Air eagal nach bi na 's leoir ann dhuinn féin agus dhuibh-san, gu ma fearr leibh dol a chum an luchd-reicidh, agus ceannaichibh dhuibh féin.

10 Agus am feadh a bha iad a' dol a cheanuach, thàinig am fear nuadh-phòsda; agus chaidh iadsan a bha ullamh a steach leis chum a' phòsaidh, agus dhruideadh an dorus.

11 'Na dhéigh sin, thàinig mar an ceudna na h-òighean eile, ag ràdh, A Thighearna, a Thighearna, fogsail dhuinne.

12 Ach fhreagair esan agus thubhairt e, Gu deimhin a ta mi ag ràdh ribh, nach aithne dhomh sibh.

13 Deanaibh faire air an aobhar sin, do bhrìgh nach aithne dhuibh an là no an uair, air an tig Mac an duine.

14 Oir is cosmhail² ri duine a' dol air choigrich, a ghairm a sheirbhisich, agus a thug dhoibh a mhaoin:

15 Agus do h-aon diubh thug e cùig tàlanna, agus do neach eile a dhà, agus do neach eile a h-aon; do gach aon fa leth a réir a chomais; agus air ball ghabh e a thurus.

16 Agus dh'imich esan a fhuair na cùig tàlanna, agus rinn e ceannachd leo, agus bhuannaich e cùig tàlanna eile.

17 Agus mar an ceudna esan a fhuair a dhà, bhuannaich e dithis eile.

18 Ach an ti a fhuair a h-aon, dh'imich e agus chladhaich e san talamh, agus dh'fholaich e airgid a mhaighstir.

19 An dèigh aimsir fhada thàinig Tigh-earna nan seirbhiseach sin, agus rinn e cumtas riu.

20 Agus thàinig esan a fhuair na cùig tàlanna, agus thug e leis cùig tàlanna eile, ag ràdh, A Thighearna, thug thu dhomh-sa cùig tàlanna: feuch, bhuannaich mi cùig tàlanna eile thuilleadh orra.

21 Agus thubhairt a Thighearna ris, Is maith, a dheadh sheirbhisich fhèinmich; bha thusa frinneach ann am beagan, cuiridh mise os ceann mhòran thu: imich a steach do aoibhneas do Thighearna.

22 Agus thàinig esan a fhuair an dà

thàlam, agus thubhairt e, A Thighearna, thug thu dhomh-sa dà thàlam: feuch, bhuannaich mi dà thàlam eile thuilleadh orra.

23 Thubhairt a Thighearna ris, Is maith, a dheadh sheirbhisich fhèinmich; bha thusa frinneach ann am beagan do nithibh, cuiridh mise os ceann mòran do nithibh thu: imich a steach do aoibhneas do Thighearna.

24 Ach an uair a thàinig esan a fhuair an t-aon tàlam, thubhairt e, A Thighearna, bha fhios agam gur duine cruaidh thu, a bhuaineas san àite nach do chuir thu, agus a thionaileas san ionad anns nach do sgaoil thu;

25 Agus air dhomh bhi fo eagal, chaidh mi agus dh'fholaich mi do thàlam san talamh: feuch, sin agad do chuid féin.

26 Fhreagair a Thighearna agus thubhairt e ris, A sheirbhisich uile agus leisg, bha fhios agad gu buaininn-sa san àit anns nach do chuir mi, agus gu tionallainn as an ionad anns nach do sgaoil mi;

27 Bu chòir dhuit, uime sin, m'airgid a thabhairt do'n luchd-malairt, agus air dhomh teachd, gheibhinn mo chuid féin maille r'a riadh.

28 Buinibh uath, uime sin, an tàlam, agus thugaibh dhàsan e, aig am bheil na deich tàlanna.

29 (Oir do gach neach aig am bheil, bheir, agus bithidh aige gu pailt: ach uathsan aig nach 'eil, bheir eadhon an ni sin a ta aige.)

30 Agus tilgibh an seirbhiseach mi-tharbhach so do dhorchadas iomallach: an sin bithidh gul agus giosgan fhìacal.

31 An uair a thig Mac an duine 'na ghlòir, agus na h-aingil naomha uile maille ris, an sin suidhidh e air caithir rìoghail a ghloire:

32 Agus crùinnichear 'na làthair na h-uile, chinnich; agus sgaraidh e iad o chéile, amhuil a sgaras³ buachaill na caoraich o na gabhraibh:

33 Agus cuiridh e na caoraich air a làimh dheis, ach na gabhair air a làimh chlì.

34 An sin their an Rìgh riusan air a dheis, Thigibh, a dhaoine beannaichte m' Athar-sa, seallbaichibh mar oighreachd an rìoghachd a ta air a deasachadh dhuibh o leagadh bunaite an domhain:

35 Oir bha mi ocrach, agus thug sibh dhomh biadh: bha mi tartmhor⁴, agus thug sibh dhomh deoch: bha mi a'm choigreach, agus thug sibh aoidheachd dhomh:

36 Lomnochd, agus dh'eudaich sibh mi: bha mi euslan, agus thàinig sibh g'am

¹ rinn iad dìsal uile, agus choidil iad.

² is cosmhail rioghachd nèimh.

³ thearbaidheas.

⁴ iolmhor, pàiteach.

amharc: bha mi am prìosan, agus thàinig sibh a m' ionnsuidh.

37 An sin freagraidh na fireana e, ag ràdh, A Thighearna, c'uin a chunnaic sinn ocrach thu, agus a bheathaich sinn thu? no tartmhor, agus a thug sinn deoch dhuìt?

38 No c'uin a chunnaic sinn a'd' choigreach thu, agus a thug sinn aoidheachd dhuìt? no lomnochd, agus a dh'èudaich sinn thu?

39 No c'uin a chunnaic sinn euslan thu, no am prìosan, agus a thàinig sinn a d'ionnsuidh?

40 Agus freagraidh an Rìgh, agus their e riu, Gu deimhin a ta mi ag ràdh ribh, a mheud 's gu'n do rinn sibh e do aon do na bràithribh a's lugha agam-sa, rinn sibh dhomh-sa e.

41 An sin their e mar an ceudna rìusan air an làimh chli, Imichibh uam, a shluagh malluichte, dh'ionnsuidh an teine shiorruidh, a dh'ulluicheadh do'n diabhul agus d'a ainglibh:

42 Oir bha mi ocrach, agus cha d'thug sibh dhomh biadh; bha mi tartmhor, agus cha d'thug sibh dhomh deoch:

43 Bha mi a'm' choigreach, agus cha d'thug sibh aoidheachd dhomh: lomnochd, agus cha d'èudaich sibh mi: euslan, agus am prìosan, agus cha d'thàinig sibh g'am amharc.

44 An sin freagraidh iadsan mar an ceudna e, ag ràdh, A Thighearna, c'uin a chunnaic sinn thu ocrach, no tartmhor, no d' choigreach, no lomnochd, no euslan, no am prìosan, agus nach do fhritheil sinn dhuìt?

45 An sin freagraidh esan iad, ag ràdh, Gu deimhin a ta mi ag ràdh ribh, a mheud as nach d'rinn sibh e do'n neach a's lugha dhiubh so, cha d'rinn sibh dhomh-sa e.

46 Agus imichidh iadsan chum peanaìs shiorruidh; ach na fireana chum na beatha maireannaich.

CAIB. XXVI.

1 Ghabh na h-uachdarain comhairle chum Iosa a ghlacadh, agus a chur gu-bàs. 6 Dh'ung bean araidh a cheann le oladh luachmhoir. 14 Reic Iudas e ris na h-àrd-shagairt. 17 Dh'ith Criosd a' chàisg maille r'a dheisciobluibh.

A GUS tharladh, 'nuair a chrìochnaich Iosa na briathra so uile, gu'n dubhairt e r'a dheisciobluibh,

2 A ta fhios agaibh gu bheil a' chàisg an déigh dà là, agus a ta Mac an duine air a bhrath chum a cheusadh¹.

3 An sin chruinnich uachdarain nan sagart, agus na sgrìobhaichean, agus sean-àirean a' phobuill, gu talla an àrd-shagairt, d'an goirear Caiaphas,

4 Agus ghabh iad comhairle le chéile chum Iosa a ghlacadh le feall, agus a chur bàs.

5 Ach thubhairt iad, Na *deanamaid* e san fhéill, air eagal gu'm bi buaireas am measg a' phobuill.

6 Agus air do Iosa a bhi ann am Betani, ann an tigh Shimoìn an lobhair,

7 Thàinig bean d'a ionnsuidh aig an robh bocsa alabastair làn do oladh ro luachmhoir, agus dhòirt i air a cheann e, agus e 'na shuidhe aig *biadh*.

8 Ach an uair a chunnaic a dheisciobuil sin, bha fearg orra, ag ràdh, Ciod is ciall do'n ana-caitheadh so?

9 Oir dh'fhendadh an oladh so bhi air a reiceadh air mhòran, agus a bhi air a toirt do na bochdaibh.

10 Ach air aithneachadh so do Iosa, thubhairt e riu, C'ar son a ta sibh a' cur dragha air a' mhnaoi? oir rinn i deadh obair dhomhsa.

11 Oir a ta na bochdan agaibh a ghlànath maille ribh, ach cha'n 'eil mise agaibh a ghlànath.

12 Oir air dòrtadh na h-oladh so dhi air mo chorp-sa, is ann fa chomhair m'adhlac a rinn i e.

13 Gu deimhin a ta mi ag ràdh ribh, Ge b'e àit am bi an soisgeul so air a shearmonachadh air feadh an t-saoghail gu h-iomlan, aithrisear an nì a rinn a' bhean so, mar chuimhne oirre.

14 An sin dh'imich aon do'n dà fhear dheug, d'am b'ainm Iudas Iscariot, chum nan àrd-shagart.

15 Agus thubhairt e, Ciod a bheir sibh dhomh-sa, agus brathaidh mi dhuibh e? Agus chòird iad ris air dheich buinn fhichead airgid.

16 Agus o'n àm sin a mach dh'iarr e fàth² air esan a bhrath.

17 Agus air a' cheud là do *fhéill* an arain neo-ghoirtichte, thàinig na deisciobuil chum Iosa, ag ràdh ris, C'ait an àill leat sinne a dh'ulluchadh dhuìt, chum gu'n ith thu a' chàisg.

18 Agus thubhairt esan, Rachaidh do'n bhaile gu leithid so do dhuine, agus abraidh ris, Tha am maighstir ag ràdh, A ta m'am am fagus, cumaidh mi a' chàisg aig do thigh-sa maille ri m' dheisciobluibh.

19 Agus rinn na deisciobuil mar a dh'orduich Iosa dhoibh, agus dheasaich iad a' chàisg.

20 Agus an uair a thàinig am feasgar, shuidh e maille ris an dà fhear dheug.

21 Agus ag itheadh dhoibh, thubhairt e, Gu deimhin a ta mi ag ràdh ribh, gu'm brath fear dhiubh mise.

22 Agus bha iad ro bhrònach, agus

¹ bheirair thairis Mac an duine gu bli

air a cheusadh.

² cothrom.

thòisich gach aon aca fa leth air a ràdh ris, Am mise e, a Thighearn?

23 Agus fhreagair esan agus thubhairt e, An ti a thumas a làmh sa' mhèis maille rium-sa, brathaidh esan mi.

24 Gu deimhin a ta Mac an duine ag imeachd, a réir mar a ta e sgrìobhta m'a thimchioll: ach is an-aobhinn do'n duine sinle'm brathar Mac an duine: bu mhaith do'n duine sin mur beirte rianh e.

25 An sin fhreagair Iudas a bhrath e, agus thubhairt e, A mhaighstir, am mise e? Thubhairt esan ris, Thubhairt thu.

26 Agus ag itheadh dhoibh, ghlac Iosa aran, agus air tabhairt buidheachais, bhris se e¹, agus thug e do na deiscioblubh e, agus thubhairt e, Gabhaibh, ithibh; is e so mo chorp-sa.

27 Agus air glacadh a' chupain, agus air tabhairt buidheachais, thug e dhoibh e, ag ràdh, Olaibh uile dheth:

28 Oir is i so m'fhuil-sa an tiomnaidh² nuaidh, a dhòirtear air son mhòran chum maithheanais pheacanna.

29 Ach tha mi ag ràdh ribh, Nach òl mi á so suas do thoradh so na fionain³, gus an là sin an òl mi e nuadh maille ribh ann an rìoghachd m' Athar.

30 Agus air dhoibh laoidh a sheinn, chaidh iad a mach gu sliabh nan crann-ladh.

31 An sin thubhairt Iosa riu, Gheibh sibh uile oibheum annam-sa an nochd; oir a ta e sgrìobhta, Buailidh mi am buach-aill, agus sgapar caoraich an treuda.

32 Ach an déigh dhomhsa éirigh a ris, théid mi roimhibh do Ghalile.

33 Agus fhreagair Peadar agus thubhairt e ris, Ged gheibh gach uile dhaoine oibheum annad, cha'n fhaigh mise oibheum gu bràth.

34 Thubhairt Iosa ris, Gu deimhin a ta mi ag ràdh riut, air an oidhche so féin mu'n goir an coileach, gu'n àicheadh thu mi tri uairean.

35 Thubhairt Peadar ris, Ged a b'éigin dhomh bàsachadh maille riut, cha'n àicheadh mi thu. Agus thubhairt na deisciobuil uile mar an ceudna.

36 An sin thàinig Iosa maille riu gu ionad d'angoirear Getsemane, agus thubhairt e ris na deiscioblubh, Suidhibh-sa an so, gus an téid mise a dheanamh urnuigh an sud.

37 Agus thug e Peadar leis, agus dithis mhac Shebede, agus thòisich e air a bhi brònach, agus ro dhoilgheasach.

38 An sin thubhairt e riu, A ta m'anam ro bhrònach, eadhon gu bàs: fanaibh-sa an so, agus deanaibh faire maille riumsa,

39 Agus dh'imich e beagan air adhart⁴,

agus thuft e air aghaidh, a' deanamh urnuigh, agus ag ràdh, O m' Athair, ma dh'fheudas e bhi, rachadh an cupan so seachad orm; gidheadh, na biodh e mar is àill leamsa, ach mar is toil leatsa.

40 Agus thàinig e chum nan deisciobul, agus fhuair e 'nan codal iad, agus thubhairt e ri Peadar, An ann mar sin, nach b' urrainn sibh faire a dheanamh aon uair a mhàin maille riumsa?

41 Deanaibh faire agus urnuigh, chum nach tuit sibh am buaireadh: a ta gun amharus an spiorad togarach; ach a ta 'n fheoil anmhumh⁵.

42 A ris an dara uair, dh'imich e agus rinn e urnuigh, ag ràdh, O m' Athair, mur feudar gu'n téid an cupan so seachad orm, gun mi 'ga òl, do thoil-sa gu robh deanta.

43 Agus thàinig e agus fhuair e iad a ris 'nan codal: oir bha an sùilean trom.

44 Agus dh'fhàg e iad, agus dh'innich e a ris, agus rinn e urnuigh an treas uair, ag ràdh nam briathra ceudna.

45 An sin thàinig e chum a dheisciobul, agus thubhairt e riu, Coidlibh roimhibh a nis, agus gabhaibh fois; feuch, a ta an uair air druidealh, agus a ta Mac an duine air a bhrath thairis do làmhaibh pheacach.

46 Eiribh, imicheamaid: feuch, a ta an ti a bhrathas mise am fagus.

47 Agus air dha bhi fathast a' labhairt, feuch, thàinig Iudas, aon do'n dà fhear dheug, agus maille ris cuideachd mhòr le claidhibh agus bataibh o na h-àrd-shagartaibh agus o sheanaribh a' phobuill.

48 A nis bha an ti a bhrath esan air tabhairt comhara dhoibh, ag ràdh, Ge b'e neach a phògas mise, is e sin e; deanaibh greim air.

49 Agus air ball thàinig e chum Iosa, agus thubhairt e, Fàilte dhuìt, a mhaighstir; agus phòg se e.

50 Ach thubhairt Iosa ris, A charaid, c'ar son a thàinig thu? An sin thàinig iad, agus chuir iad làmh ann an Iosa, agus ghlac iad e.

51 Agus, feuch, shìn a h-aon diubhsan a bha maille ri Iosa a làmh, agus tharruing e a chlaidheamh, agus air dha seirbhis-each an àrd-shagairt a bhualadh, ghearr e a chluas dheth.

52 An sin thubhairt Iosa ris, Cuir a ris do chlaidheamh air ais 'na ionad féin: oir iadsan uile a ghlacas an claidheamh, tuitidh iad leis a' chlaidheamh.

53 An saoil thusa nach feug mise a nis m' Athair a ghuidhe, agus bheir e dhomh tuilleadh na⁶ dà legion deug do ainglibh?

54 Ach cionnus an sin bhiodh na sgrìob-

¹ agus bheanmaich, agus bhris se e.

² a' choimheangail. ³ fineamhain. Eir.

⁴ air aghaidh.

⁵ lag.

⁶ is.

tuirean air an coimhliadh, a tha 'g ràdh gur ann mar so is éigin tachairt?

55 Anns an uair sin féin thubhairt Iosa ris an t-sluagh, An d'fhàinig sibh a mach mar gu b'ann an aghaidh gaduiche, le claidhibh agus bataibh chum mise a ghlacadh? Bha mi gach là a'm' shuidhe maille ribh san teampull a' teagasg, agus cha do chuir sibh làmh annam.

56 Ach thachair so uile, chum gu'm biodh sgriobtuire nam fàidhean air an coimhliadh. An sin thréig na deisciob-uil uile e, agus theich iad.

57 Agus air dhoibh-san Iosa a ghlacadh, thug iad leo e gu Caiaphas an t-àrd-shagart, far an robh na sgrìobhaichean agus na seauairean air cruinneachadh.

58 Ach lean Peadar e fad uatha, eadhon gu talla an àrd-shagairt, agus chaidh e steach, agus shuidh e maille ris na seirbhisich, a dh'fhaicinn na crìche.

59 Agus dh'iarr na h-àrd-shagairt agus na seanairean, agus a' chomhairle uile, fianuis bhréige an aghaidh Iosa, chum a chur gu bàs.

60 Ach cha d'fhuair iad: seadh, ge do thàinig mòran do fhianuisibh bréige, cha d'fhuair iad. Fa dheòidh thàinig dà fhianuis bhréige,

61 Agus thubhairt iad, Thubhairt am fear so, Is urrainn mise teampull Dé a leagadh, agus a thogail a ris an trì làithibh.

62 Agus air do'n àrd-shagart éirigh, thubhairt e ris, Nach freagair thu bheag? Ciod e a ta iad sin a' toirt fianuis¹ a' d' aghaidh?

63 Ach dh'fhan Iosa 'na thosd. Agus fhreagair an t-àrd-shagart agus thubhairt e ris, A ta mi ga d' mhiannachadh air an Dia bheò, gu'n innseadh tu dhuinn, an tu Crìosd Mac Dhé.

64 Thubhairt Iosa ris, Thubhairt thu: gidheadh tha mi ag ràdh ribh, 'Na dhéigh so chi sibh Mac an duine 'na shuidhe air deas làimh cumhachd Dhé, agus a' teachd air neulaibh nèimh.

65 An sin reub an t-àrd-shagart 'eudach, ag ràdh, Gu'n do labhair e toibheum; ciod am feum tuilleadh a ta againn air fianuisibh? feuch, a nis chuala sibh a thoibheum.

66 Ciod i bhur barail-sa? Fhreagair iadsan agus thubhairt iad, A ta e toillteanach air a' bhàs.

67 An sin thilg iad smugaid 'na eudan, agus bhuail iad le am basaibh e; agus ghabh cuid eile air le slataibh,

68 Ag ràdh, Dean fàidheadaireachd² dhuinn, a Chrìosd, Cò e a bhuail thu?

69 Agus shuidh Peadar a mach anns an

talla: agus thàinig cailin àraidh d'a ionnsuidh, ag ràdh, Bha thusa mar an ceudna maille ri Iosa o Ghalile.

70 Ach dh'àicheadh esan 'nan làthair uile, ag ràdh, Cha'n eil fhios agam ciod a ta thu ag ràdh.

71 Agus air dol a mach dha do'n fhor-dhorus, chunnaic cailin eile e, agus thubhairt i riu-san a bha 'n sin, Bha 'm fear so mar an ceudna maille ri Iosa o Nasaret.

72 Agus dh'àicheadh e a ris le mionnaibh, ag ràdh, Cha'n aithne dhomh an duine.

73 Agus tamull beag 'na dhéigh sin thàinig an dream a bha 'nan seasamh a làthair, agus thubhairt iad ri Peadar, Gu fìrinneach is ann diubh sud féin tha thusa; oir a ta do chainnt ga d' bhrath.

74 An sin thòisich e ri mallachadh agus mionnachadh, ag ràdh, Cha'n aithne dhomh an duine. Agus air ball ghoir an coileach.

75 Agus chuimhmich Peadar briathran Iosa, a thubhairt ris, Mu'n goir an coileach, àicheadhaidh tu mi trì uairean. Agus air dol a mach dha, ghuil e gu geur³.

CAIB. XXVII.

1 Cheangail na h-uachdarain agus na seanairean Crìosd, agus thug iad thairis e do Philat. 3 Chroch Iudas e féin. 19 Fhuair Pilat rabhadh o 'n h-naoi mu thìnechioll Chrìosd, 20 dh'ionnlaid e a làmh; 26 agus teig e Barabas fa sgaoil.

AIR teachd do'n mhaduinn, ghabh uachdarain nan sagart uile, agus seanairean a' phobuill, comhairle le chèile an aghaidh Iosa, chum a chur gu bàs.

2 Agus air dhoibh esan a cheangal, thug iad leo e, agus thug iad thairis e do Phontius Pilat an t-uachdaran.

3 An sin, an uair a chunnaic Iudas a bhrath e, gu'n do dhìteadh e, ghabh e aithreachas, agus thug e air an ais na deich buinn fhichead airgid do na h-àrd-shagartaibh, agus do na seanairibh,

4 Ag ràdh, Pheacaich mi, annam brath na fola neo-chiontaich. Ach thubhairt iadsan, Ciod e sin duime; amhaire thusa air sin.

5 Agus air tilgeadh uaith nam bonn airgid anns an teampull, dh'imich e roimhe, agus chaidh e agus chroch⁴ se e féin.

6 Agus ghlac na h-àrd-shagairt na buinn airgid, agus thubhairt iad, Cha chòir an cur san ionmhas, oir is luach fola iad.

7 Agus air gabhail comhairle dhoibh, cheamuaich iad leo fearann a' chriadh-adair⁵, chum a bhi 'na àit-adhlaic do choigrich⁶.

8 Air an aobhar sin goirear do'n fhearann sin, Fearann na fola, gus an là'n diugh.

¹ a' fianuiseadh.

³ goirt.

² fàisteachd.

⁴ thachd.

⁵ fhir deanamh shoithiche creadha. choigreachaibh.

9 (An sin choinhliadh an nì a labhradh le Ieremias am fàidh, ag ràdh, Agus ghabh iad na deich buinn fhichead airgid, luach an tì a mheasadh, neach a mheas iadsan a bha do chloinn Israeil,

10 Agus thug siad iad air son fearainn a' chriadhaidh, mar a dh'orduich an Tighearna dhomh-sa.)

11 Agus sheas Iosa an làthair an uachdarain: agus dh'fhiosraich an t-uachdaran dheth, ag ràdh, An tusa Rìgh nan Iudhach? Agus thubhairt Iosa ris, Thubhairt thu.

12 Agus an uair a chuir na h-àrd-shagairt agus na seanairean cionta as a leth, cha do fhreagair e nì sam bith.

13 An sin thubhairt Pilat ris, Nach cluinn thu cia lìon nithe air am bheil iad a' toirt fianuis a'd' aghaidh?

14 Agus cha d'thug e freagradh dha air aon fhocal; ionnus gu'n do ghabh an t-uachdaran iongantas ro mhòr.

15 A nis ri àm na fèille, chleachd an t-uachdaran aon phrìosanach a b' àill leo chur fa sgaoil do'n phobull.

16 Agus bha aca, san àm sin, prìosanach ro chomharaichte, d'am b'ainm Barabas.

17 Air an aobhar sin, an uair a bha iad cruinn an ceann a chèile, thubhairt Pilat riu, Cò is àill leibh mise a chur fa sgaoil duibh? Barabas, no Iosa, d'an goirear Crìosd?

18 Oir bha fhios aige gu'm b'ann o fharmaid a thug iad thairis e.

19 Agus an uair a bha e 'na shuidhe air caithir a' bhreitheanaidh, chuir a bhean *teachdaireachd* d'a ionnsuidh, ag ràdh, Na biodh agad-sa gnothuch sam bith ris an fhùrean¹ sin: oir is mòr a dh'fhulaing mise an diugh ann am brúadar, air a shon-san.

20 Ach chuir na h-àrd-shagairt agus na seanairean impidh air a' phobull gu'n iarradh iad Barabas, agus gu milleadh iad Iosa.

21 Agus fhreagair an t-uachdaran agus thubhairt e riu, Cò do'n dithis is àill leibh mise a chur fa sgaoil duibh? Thubhairt iadsan, Barabas.

22 Thubhairt Pilat riu, Ciod ma seadh a nì mi ri Iosa, d'an goirear Crìosd? Thubhairt iad ris uile, Ceusar e.

23 Agus thubhairt an t-uachdaran, C'ar son? ciod an t-olc a rinn e? ach is mòr gu mòr a ghlaodh iadsan, ag ràdh, Ceusar e.

24 Agus an uair a chunnaic Pilat nach do bhuadhaich e bheag sam bith, ach gu'n d'éirich an tuilleadh buaireis, ghabh e uisge, agus dh'ionnlaid e a làmhnan am fianuis an t-sluaigh, ag ràdh, A ta mise neo-chiontach do fhuil an fhùrein so; faicibh-sa sin.

25 Agus fhreagair am pobull uile, agus thubhairt iad, Biodh 'fhuil oirne, agus air ar cloinn.

26 An sin leig e fa sgaoil Barabas dhoibh: ach air dha Iosa a sgiùrsadh, thug e thairis e chum a cheusadh.

27 An sin thug saighdearan an uachdarain leo Iosa do thalla a' bhreitheanaidh, agus chruinnich iad a' bhuidheann uile m'a thimchioll.

28 Agus air dhoibh a rùsgadh², chuir iad uime falluinn scarlaid.

29 Agus air dhoibh crùn droighinn fhigheadh, chuir iad m'a cheann e, agus slat chuilce 'na làimh dheis: agus lùb iad an glùn 'na làthair, agus rinn iad fanoid air, ag ràdh, Gu'm beannaichear thu, a Rìgh nan Iudhach.

30 Agus thilg iad smugaid air, agus ghlac iad an t-slat chuilce, agus bhuail iad sa' cheann e.

31 Agus an dèigh dhoibh fanoid a dhean-amh air, thug iad an fhalluinn dheth, agus chuir iad 'eudach fèin uime, agus thug iad lco e chum a cheusadh.

32 Agus an uair a chaidh iad a mach, fhuair iad duine o Chirene, d'am b'ainm Simon: esan dh'èignich iad chum a chrann-ceusaidh-san a ghiùlan.

33 Agus an uair a thàinig iad gu ionad d'an ainm Golgota, sin r'a radh, àite cloiginn.

34 Thug iad dha r'a òl fion geur, measgta le domblas: agus air dha a bhlasadh, cha'n òladh se e.

35 Agus an uair a cheus iad e, roinn iad a thrusgan eatorra, a' tilgeadh crann-chuir: chum gu'n coimhliontadh an nì a labhradh leis an fhàidh, Roinn iad m'eudach eatorra, agus chuir iad crannchur air mo bhrat.

36 Agus shuidh iad, agus rinn iad faire air an sin:

37 Agus chuir iad a chùis-dhithidh sgrìobhta os a cheann, **IS E SO IOSA RÌGH NAN IUDHACH.**

38 An sin cheusadh maille ris dà ghad-uiche³; fear air a làimh dheis, agus fear eile air a làimh chli.

39 Agus thug iadsan a bha dol seachad, toibheum dha, a' crathadh an ceann,

40 Agus ag ràdh, Thusa a leagas an teampull, agus a cluireas suas an trì làithibh e, fòir ort fèin: ma's tu Mac Dhé, thig a nuas o'n chrann-cheusaidh.

41 Mar an ceudna, thubhairt na h-àrd-shagairt, maille ris na sgrìobhaichibh, agus na seanaibh, a' fanoid air.

42 Shaor e daoine eile, e fèin a shaoradh nì 'n comasach e: ma's e Rìgh Israeil, thigcadh e nis a nuas o'n chrann-cheusaidh, agus creididh sinn e.

¹ ionracan.

² 'eudach a thoirt dheth.

³ dà fheor-reubainn, dà chreacadair.

43 Chuir e a dhòigh an Dia; saoradh e a nis e, ma tha toil aige dha: oir thubhairt e, Is mise Mac Dhé.

44 Agus thug na gaduichean a cheusadh maille ris, am beum ceudna dha.

45 A nis, o'n t-seathadh uair bha dorchadas air an tìr uile, gus an naothadh uair.

46 Agus mu thimchioll na naothadh uaire, dh'éigh Iosa le guth àrd, ag ràdh, Eli, eli, lama sabachtani? is e sin r'a ràdh, Mo Dhia, mo Dhia, c'ar son a thréig thu mi?

47 Agus air cluinntinn sin do chuid diubhsan a bha 'nan-seasamh an sin, thubhairt iad, A ta am fear so a' glaoth-aich air Elias.

48 Agus air ball ruith a h-aon diubh, agus ghabh e sponge, agus lìon e do fhìon geur i, agus air dha a cur air slait chuilce, thug e dha r'a òl.

49 Ach thubhairt càch, Leig dha, faic-eamaid an tig Elias g'a thèarnadh.

50 Agus an uair a dh'éigh Iosa a ris le glaoth mòr, thug e suas a spiorad.

51 Agus, feuch, reubadh brat-roinn an teampuill na dhà chuid, o mhullach gu ìochdar; agus chrìochnuich an talamh, agus sgoilteadh na creagan:

52 Agus dh'fhosglaigh na h-uaignean, agus dh'éirich mòran do chorpaidh nan naomh, a bha 'nan codal,

53 Agus chaidh iad a mach as na h-uaignibh an déigh 'aiseirigh-san, agus chaidh iad a steach do'n bhaile naomh, agus nochdadh iad do mhòran.

54 A nis, an uair a chunnaic an ceannard-ceud, agus iadsan a bha maille ris a' coimhead¹ Iosa, a' chrith-thalmhainn, agus na nithe eile a rinneadh, ghabh iad eagal mòr, ag ràdh, Gu fìrinneach b'e so Mac Dhé.

55 Agus bha an sin mòran bhan (ag amharc am fad) a lean Iosa o Ghalile, a frithealadh dha:

56 Am measg an robh Muire Magdalen, agus Muire màthair Sheumais agus Ioseis, agus màthair cloinne Shebede.

57 Agus air teachd do'n fheasgar, thàinig duine saobhair o Arimatea, d'am b'ainm Ioseph, a bha e fèin 'na dheisciobul aig Iosa mar an ceudna.

58 Chaidh esan gu Pilat, agus dh'iarr e corp Iosa: an sin dh'àithn Pilat an corp a thabhairt da.

59 Agus ghlac Ioseph an corp, agus phaisg e ann an lìon-eudach fìor-ghlan e.

60 Agus chuir se e 'na uaigh nuaidh fèin, a chladhaiche ann an carraig: Agus charuich e clach mhòr gu dorus na h-uaigne, agus dh'imich e roimhe.

61 Agus bha Muire Magdalen, agus a'

Mhuire eile 'nan suidhe fa chomhair na h-uaigne.

62 A nis air an là màireach, an là'n déigh an ulluchaidh, chrùinnicheadh na h-àrd-shagairt agus na Phairisich gu Pilat.

63 Ag ràdh, A Thighearn, is cuimhne leinn an uair a bha am mealltair ud fathast beò, gu'n dubhairt e, Eiridh mi an déigh tlùri làithean.

64 Orduich, uime sin, an uaigh a bhi air a coimhead gu cinnteach, gus an treas là, air eagal gu'n tig a dheisciobuil san oidhche, agus gu'n goid iad leo e, agus gu'n abair iad ris an t-sluagh, Dh'éirich e o na marbhaibh: agus mar sin bithidh am mearachd deireannach nì's miosa na'n ceud mhearachd.

65 Thubhairt Pilat riu, Tha faire agaibh; imichibh, deanaibh an uaigh cho tèaruinte 's is aithne dhuibh.

66 Agus dh'imich iad, agus rinn iad an uaigh cinnteach, a' cur seula air a' chloich, maille ri faire.

CAIB. XXVIII.

1 Tha aiseirigh Chrìosd air a' cur an cèill do na mnaibh: 9 nochd Chrìosd e fèin doibh. 11 Thug na h-àrd-shagairt airgid do na saighdearaibh chum gu'n abradh iad gu'n do ghloideadh as 'uaigh e.

AN déigh na sàbaid, aig briseadh na faire air a' cheud là do'n t-seachdain, thàinig Muire Magdalen, agus a' Mhuire eile, a dh'fhaicinn na h-uaigne.

2 Agus, feuch, bha crith-thalmhainn mhòr ann; oir thàinig aingeal an Tighearna nuas o nèamh, agus air teachd dha, charuich e a' chlach o'n dorus, agus shuidh e oirre.

3 Agus bha a ghnùis mar dhealanach, agus eudach geal mar shneachdadh.

4 Agus air eagal roimhe chrìochnuich an luchd-coimhid², agus chaidh iad an riochd mairbh.

5 Ach fhreagair an t-aingeal agus thubhairt e ris na mnaibh, Na biodh eagal oirbhe: oir a ta fhios agam gu bheil sibh ag iarraidh Iosa, a chaidh cheusadh.

6 Cha'n 'eil e 'n so; oir dh'éirich e, mar a thubhairt e: thigibh, faicibh an t-àit an robh an Tighearn 'na luidhe.

7 Agus imichibh gu luath, agus innsibh d'a dheisciobluibh gu'n d'éirich e o na marbhaibh: agus, feuch, tha e dol roimhibh do Ghalile; an sinchi sibh e; feuch, thubhairt mise ribh e.

8 Agus dh'imich iad gu luath o'n uaigh, le h-eagal agus mòr-ghairdeachas, agus ruith iad a dh'innseadh d'a dheisciobluibh.

9 Agus ag imeachd dhoibhsan a dh'innseadh d'a dheisciobluibh, feuch, thachair Iosa fèin orra, ag ràdh, Fàilte dhuibh. Agus thàinig iad am fagus da, agus rug

¹ gleidheadh.

² luchd-faire.

iad air a chosaibh, agus rinn iad aoradh dha¹.

10 An sin thubhairt Iosa riu, Na biodh eagal oirbh: imichibh, abraibh ri m' bhràithribh iadsan a dhol do Ghalile, agus an sin chi iad mi.

11 Agus an uair a bha iadsan ag imeachd, feuch, thàinig cuid do'n luchd-faire do'n bhaile, agus nochd iad do na h-àrd-shagartaibh gach ni a thachair.

12 Agus air cruinneachadh dhoibh-san an ceann a chéile maille ris na seanairibh, agus air gabhail comhairle dhoibh, thug iad mòran airgid do na saighdearaibh.

13 Ag ràdh, Abraibh-sa gu'n d'thàinig a dheisciobuil anns an oidhche, agus gu'n do ghoid iad e, an uair a bha sinne 'nar codal.

14 Agus ma chluinneas an t-uachdaran so, cuiridh sinne impidh air, agus ni sinn sibhse tèarainte.

¹ thug iad urram dha.

15 Agus ghabh iad an t-aargiod, agus rinn iad mar a theagaisgeadh dhoibh: agus a ta a' chainnt so air a h-aithris am measg nan Iudhach gus an là'n diugh.

16 An sin chaidh an t-aon deisciobul deug do Ghalile, do'n bheinn far an d'ord- uich Iosa dhoibh.

17 Agus an uair a chunnaic iad e, rinn iad aoradh dha: ach bha cuid aca fo amharus.

18 Agus thàinig Iosa, agus labhair e riu, ag ràdh, Thugadh dhomh-sa gach uile chumhachd air nèamh agus air talamh.

19 Uime sin imichibh-sa, agus deanaibh deisciobuil do' gach uile chinneach, 'gam baisteadh ann an ainm an Athar, agus a' Mhic, agus an Spioraid naoimh;

20 A' teagasg dhoibh gach uile nithe a dh'àithn mise dhuibh a choimhead: Agus, feuch, a ta mise maille ribh a ghnàth, gu deireadh an t-saoghail. Amen.

² iompaichibh, teagaisgibh.

AN SOISGEUL

A REIR

MHARCUIS.

CAIB. I.

1 Dreuchd Eoin Bhaiste. 9 Bhaisteadh Iosa.
14 Shearmonaich e soisgeul rioghachd Dhé.
16 Ghairm e Peadar, Aindreas, Seumas agus Eoin. 23 Leighis e aon anns an robh deamhan,
32 agus mòran do mhuinntir a bha eusan.

Toiseach Soisgeil Iosa Criosd, Mhic Dhé:

2 A réir mar a ta e sgrìobhta anns na fàidhibh, Feuch, cuiream mo theachdair roimh do ghnùis, a dh'ulluicheas doshligh e romhad.

3 Guth an ti a dh'éigheas anns an fhàsach, Ulluichibh slighe an Tighearna, dean- aibh a cheumanna dìreach.

4 Bha Eoin a' baisteadh anns an fhàsach, agus a' searmonachadh baistidh an aithreachais chum maitheanais pheacanna.

5 Agus chaidh a mach d'a ionnsuidh tìr Indea uile, agus luchd-àiteachaidh¹ Ierusalem, agus bhaisteadh leis iad uile ann an amhainn Iordain, ag aideachadh am peacanna.

6 Agus bha Eoin air eudachadh² le fionna chàmhail, agus crios leathair m'a leasraidh; agus bu bhiadh dha locuist agus mil fhaidhaich.

7 Agus shearmonaich e, ag ràdh, A ta neach a' teachd a'm' dhéigh a's cumhachdaiche na mise, neach nach airidh mise

air cromadh sìos agus barr-iall a bhròg fhuasgladh.

8 Bhaist mise gu dearbh sibh le h-uisge: ach baistidh esan sibh leis an Spiorad Naomh.

9 Agus tharladh anns na làithibh sin, gu'n d'thàinig Iosa o Nasaret Ghalile, agus bhaisteadh e le h-Eoin ann an Ior- dan.

10 Agus air ball, an uair a chaidh e suas as an uisge, chunnaic e na nèamhan air am fosgladh, agus an Spiorad mar chol- uman a' teachd a suas air.

11 Agus thàinig guth o nèamh, *ag ràdh*, Is tusa mo Mhac gràdhach, anns am bheil mo mhòr-thlachd.

12 Agus air ball, tharruing an Spiorad e do'n fhàsach.

13 Agus bha e 'n sin san fhàsach dà fhichead là air a bhuaireadh le Satan, agus bha e maille ris na fiadh-bheathaich- ibh, agus fhrithheil na h-aingil dha.

14 Agus an déigh Eoin a chur am prìosan, thàinig Iosa do Ghalile, a' searmonachadh soisgeil rioghachd Dhé,

15 Agus ag ràdh, Choimhlionadh an aimsir, agus a ta rioghachd Dhé am fagus; deanaibh-sa aithreachas, agus creidibh an soisgeul.

16 Agus air dha bli 'g imeachd ri taobh fairge Ghalile, chunnaic e Simon, agus

¹ luchd-àitich.

² air chòmhdach.

Aindreas a bhràthair, a' tilgeadh lù san fhairge: (oir b'iasgairean iad.)

17 Agus thubhairt Iosa ri, Thigibh a'm dhéigh-sa, agus ni mi 'nur iasgairibh air daoimibh sibh.

18 Agus air ball dh'fhàg iad an lìonta, agus lean iad esan.

19 Agus an uair a chaidh e beagan air aghaidh as a sin, chunnaic e Seumas *mac Shebede*, agus Eoin a bhràthair, agus iad san luing a' càradh an lìonta.

20 Agus air ball ghairm e iad; agus dh'fhàg iad Sebede an athair san luing maille ris an luchd-tuairasdail, agus lean iad esan.

21 Agus chaidh iad a steach do Chaper-naum; agus air ball air dha dol a stigh do'n t-sionagog¹ air an t-sàbaid, theag-aig e.

22 Agus ghabh iad iongantais r'a theag-asg: oir bha e'g an teagasg mar neach aig an robh ùghdarras, agus cha b'ann mar na sgrìobhaichean.

23 Agus bha 'nan sionagog-san neach anns an robh spiorad neòghlan, agus ghlaodh e,

24 Ag ràdh, Leig leinn; ciod ar gnoth-uch-ne riut, Iosa o' Nasaret? an d'thàinig thu g'ar sgrìos-ne? Is aithne dhomh cò thu, aon naomh Dhé.

25 Agus chronuich Iosa e, ag ràdh, Bi a'd' thosd, agus thig a mach as.

26 Agus an uair a reub an spiorad neòghlan e, agus a ghlaodh e le guth àrd, thàinig e mach as.

27 Agus ghabh iad mòr-iongantais uile, ionnus gu'n robh iad a' cur na ceisde so r'a² chéile, ag ràdh, Ciod e so? Ciod e an teagasg nuadh so? oir le h-ùghdarras a ta e toirt orduigh eadhon do na spioradaibh neòghlan, agus tha iad ùmhal dha.

28 Agus chaidh a chliù air ball a mach air feadh na tìre uile timchioll Ghalile.

29 Agus gun dàil, air dhoibh dol a mach as an t-sionagog, chaidh iad a steach do thigh Shimoin agus Aindreais, maille ri Seumas agus Eoin.

30 Ach bha màthair-chéile Shimoin 'na luidhe ann am fiabhirus; agus ghrad labhair iad ris uimpe.

31 Agus thàinig esan agus thog e i, a' breith air làimh oirre; agus air ball dh'fhàg am fiabhirus i, agus fhritheil i dhoibh.

32 Agus an uair a bha 'm feasgar ann, air do'n ghréin dol fuidhe, thug iad d'a ionnsuidh iadsan uile a bha euslan, agus iadsan anns an robh deamhain.

33 Agus bha 'm baile uile air a chruinn-eachadh chum an doruis.

34 Agus leighis e mòran air an robh

iomadh gné eucail, agus thilg e mach mòran dheamhan, agus cha d'fhulaing e do na deamhaibh labhairt, air son gu'm b'aithne dhoibh e.

35 Agus air dha éirigh sa' mhaduinn, fada roimh là, chaidh e mach, agus dh'imich e gu àite fàsail⁴, agus rinn e urnuigh an sin.

36 Agus lean Simon, agus an dream a bha maille ris e.

37 Agus air 'fhaotainn doibh thubhairt iad ris, A ta gach uile neach ga d'iarraidh.

38 Agus thubhairt esan ri, Raclamaid⁵ a dh'ionnsuidh nam bailtean eile làimh ruinn, chum gu'n searmonaich mi an sin mar an ceudna: oir is ann a chum na criche so thàinig mise mach.

39 Agus shearmonaich e 'nan sionagogaibh air feadh Ghalile uile, agus thilg e mach na deamhain.

40 Agus thàinig lobhar d'a ionnsuidh, a' guidhe air, agus a' lùbadh a ghluin da, agus ag ràdh ris, Ma's àill leat, tha thu comasach air mise a dheanamh glan.

41 Agus ghabh Iosa truas mòr dheth⁶, agus air sìneadh a mach a làimhe, bhean e ris, agus thubhairt e ris, Is àill leam; bi-sa glan.

42 Agus co luath as a labhair e, air ball dh'fhalbh an luibhre⁷ uaith, agus rinneadh glan e.

43 Agus thug e geur-ordugh dha, agus air ball chuir e air falbh e;

44 Agus thubhairt e ris, Feuch nach innis thu bheag do neach air bith: ach imich, nochd thu féin do'n t-sagart, agus tabhair mar iobairt air son do ghlanaidh na nithe a dh'àithn Maois, mar fhianuis dhoibh.

45 Agus air dhasan dol a mach, thòisich e air innseadh gu ro fhollaiseach, agus air a' chùis a sgaoileadh mu'n cuairt, air chor as nach feudadh Iosa dol tuilleadh gu follaiseach a steach do'n bhaile; ach bha e mach ann an àitibh uaigneach: agus thàinig iad d'a ionnsuidh as gach àird.

CAIB. II.

1 Leighis Criosd neach air an robh am pairilis: 14 ghairm e Mata o àite togail na cise: 16 dh'ith e maille ri cis-mhaoir agus ri peacaich: 18 ghabh e leith-sgeul a dheisciobul air son nach robh iad a' trasgadh.

AGUS an déigh làithean àraidh, chaidh e a ris a steach do Chaper-naum; agus chualas esan a bhi san tigh.

2 Agus air ball chruinnicheadh mòran an ceann a chéile, air chor as nach robh àit a chumadh iad, eadhon timchioll an doruis: agus labhair e am focal rin.

3 Agus thàinig iad, a' toirt d'a ionnsuidh neach air an robh am pairilis, air a ghiùlan le ceathrar.

¹ tigh-aoraidh.
³ air a.

² bho, a.
⁴ dìomhair, uaigneach.

⁵ imicheamaid, theirigeamaid.
⁷ mcire.

⁶ ris.

4 Agus a chionn nach l'urrainn iad teachd am fagus da leis an t-sluagh, ruisg iad mullach an tighe anns an robh e : agus air dhoibh a tholladh, leig iad sìos an leabhadh air an robh an neach a bha tinn leis a' phairilis 'na luidhe.

5 'Nuair chunnaic Iosa an creidimh-san, thubhairt e ris an neach air an robh am pairilis, A mhic, tha do pheacanna¹ air am maithheadh dhuit.

6 Ach bha dream àraidh² do na sgrìobhaichibh 'nan suidhe an sin, agus iad a' reusonachadh 'nan cridheachaidh fén,

7 C'ar son a ta am fear so a' labhairt toibheim mar so? Cò dh'fhendas peacanna a mhaithheadh ach Dia a mhàin?

8 Agus air ball, air aithneachadh do Iosa 'na spiorad féin gu'n robh iadsan a' reusonachadh mar sin ann ta fén, thubhairt e riu, C'ar son a ta sibh a' reusonachadh nan nithe sin ann bhur cridheachaidh?

9 Cò aca is usadh a ràdh ris an neach air am bheil am pairilis, Tha do pheacanna air am maithheadh dhuit, no a ràdh, Eirich, agus tog do leabhadh, agus imich?

10 Ach a chum gu'm bi fios agaibh gu bheil ùghdarras aig Mac an duine peacanna a mhaithheadh air thalamh, (thubhairt e ris an fhear air an robh am pairilis,)

11 A ta mi ag ràdh riu, Eirich, agus tog do leabhadh, agus imich do d' thigh.

12 Agus dh'éirich esan air ball, agus thog e an leabhadh agus chaidh e mach 'nam fianuis uile, ionnus gu'n robh mòr-iongantas orra uile, agus gu'n do ghlòraich iad Dia, ag ràdh, Cha'n fhaca sinne riamh a leithid so.

13 Agus chaidh e mach a ris ri taobh na mara; agus thàinig an sluagh uile d'a ionnsuidh, agus theagaisg e iad.

14 Agus ag dol seachad da, chunnaic e Lebhi mac Alpheus 'na shuidhe aig àite togail na cise, agus thubhairt e ris, Lean mise. Agus dh'éirich e, agus lean se e.

15 Agus tharladh, 'nuair a shuidh Iosa chum bith 'na thigh-san, gu'n do shuidh mòran chis-mhaor agus pheacach maille ri Iosa, agus r'a dheisciobluibh: oir bha mòran ann, agus lean iad e.

16 Agus an nair a chunnaic na sgrìobhaichean agus na Phairisich esan ag itheadh maille ri cis-mhaoraibh agus ri peacachaidh, thubhairt iad r'a dheisciobluibh, C'ar son a ta e ag itheadh agus ag òl maille ri cis-mhaoraibh agus ri peacachaidh?

17 Agus an uair a chuala Iosa so, thubhairt e riu, Cha'n 'eil feum aca-san a ta slàn air an leigh, ach aca-san a ta tinn: cha d' thàinig mise a ghairm nam firean, ach nam peacach chum aithreachais.

18 Agus bughnàth le deisciobluibh Eoin,

agus nam Phairiseach a bhi trasgadh³: agus thàinig iad, agus thubhairt iad ris, C'ar son a ta deisciobuil Eoin, agus nam Phairiseach ri trasgadh, agus nach 'eil do dheisciobuil-sa a' trasgadh.

19 Agus thubhairt Iosa riu, Am bheil clann seòmair an fhir nuadh-phòda comasach air trasgadh a dheanamh, am feadh a bhitheas am fear nuadh-phòda maille riu⁴? am feadh a ta am fear nuadh-phòda aca maille riu, cha'n fheud iad trasgadh a dheanamh.

20 Ach thig na làithean anns an toirear am fear nuadh-phòda uatha; agus an sin nì iad trasgadh sna làithibh sin.

21 Agus cha'n 'eil duine sam bith a dh'fhuairgheas mìr do eudach nuadh air sean eudach; no, *ma dh'fhuairgheas*, buinidh am mìr nuadh, a chuireadh g'a lionadh suas, as an t-sean eudach, agus nìthean an reubadh nì's miosa.

22 Agus cha chuir duine air bith fion ùr ann an seann searragaibh⁵; no brisidh am fion nuadh na searragan, agus dòrtear am fion, agus caillear na searragan: ach is còir fion nuadh a chur ann an searragaibh nuadha.

23 Agus tharladh gu'n deachaidh e troimh⁶ na h-achaibh arbhair air là na sàbaid; agus thòisich a dheisciobuil, ag imeachd dhoibh, ris na diasan arbhair a spionadh.

24 Agus thubhairt na Phairisich ris, Feuch, c'ar son a ta iad a' deanamh an nì nach 'eil ceaduichte air là na sàbaid?

25 Agus thubhairt esan riu, Nach do leugh sibhse riamh ciod a rinn Daibhidh 'nuair a bha uireasbhuidh air, agus ocras air fén agus orra-san a bha maille ris?

26 Cionnus a chaidh e steach do thigh Dhé ann an làithibh Abiatair an àrd-slagairt, agus a dh'ith e aran na fianuis⁷, nach 'eil ceaduichte do neach air bith itheadh, ach do na sagartaibh, agus a thug e, mar an ceudna, do'n dream a bha maille ris?

27 Agus thubhairt e riu, Dh'orduicheadh an t-sàbaid air son an duine, cha'n e an duine air son na sàbaid?

28 Air an aobhar sin, is Tighearna⁸ Mac an duine air an t-sàbaid fén.

CAIB. III.

1 Leighis Criosd an duine aig an robh an làmh sheargta. 11 Chronich e na spiorada nòghlan; 13 agus thagh e dà abstol deug, 22 Dhearbha e aingidheachd an t-sluaigh a bha 'g ràdh gu'n robh e a' tilgeadh dheanhan a mach le Beelzebub.

AGS chaidh e ris a steach do'n t-sionagag; agus bha an sin duine aig an robh làmh sheargta.

2 Agus rinn iad faire air, a dh'fheuch-aim an leighiseadh se e air là na sàbaid,

¹ pheacaidh.

² àraid.

⁵ leathar-bhuidealaibh.

⁶ trid, air feadh.

³ trasgadh.

⁴ nam fochair.

⁷ an t-aran taisbeannta.

⁸ Maighistir.

chur: gu'm biodh cùis-dhùidh aca 'na aghaidh¹.

3 Agus thubhairt e ris an duine aig an robh an làmh sheargta, Eirich sa' mheadhon.

4 Agus thubhairt e riu, Am bheil e cead-ùichte maith a dheanamh air làithibh na sàbaid, no olc? anam a thèarnadh, no a sgrios? ach dh'fhan iadsan 'nan tosd.

5 Agus an uair a dh'amhairc e mu'n cuairt orra le feig², air dha bhi doilich air son cruais an cridhe, thubhairt e ris an duine, Sin a mach do làmh. Agus shìn e mach i: agus rinneadh slàn i mar an làmh eile.

6 Agus chaidh na Phairisich a mach, agus ghabh iad comhairle air ball maille ri luchd-leanmhuinn Heroid 'na aghaidhsan, cionnus a dh'fheudadh iad a sgrios³.

7 Ach chaidh Iosa maille r'a dheisciobluibh a leth chum na mara: agus lean sluagh mòr e o Ghalile, agus o Iudea,

8 Agus o Ierusalem, agus o Idumea, agus o thaobh thall Iordain; agus iadsan a bha timchioll Thuiris agus Shìdon, thàinig cuideachd mhòr dhiubh d'a ionnsuidh, 'nuair a chual iad cia mòr na nithe a rinn e.

9 Agus thubhairt e r'a dheisciobluibh, long bheag a bhi feitheamh air, air son an t-sluaigh, chum nach dòmhluicheadh iad e:

10 Oir leighis e mòran; ionnus gu'n do dhlùth-theann iad ris, a mheud 's air an robh plàighean, chum gu'm beanadh iad ris.

11 Agus na spiorada neòghlan, an uair a chunnaic iad e, shleuchd iad da, agus ghlaodh iad, ag ràdh, Is tusa Mac Dhé. 12 Agus thug e sparradh teann⁴ dhoibh nach deanadh iad aithnichte e.

13 Agus chaidh e suas gu beinn, agus ghairm e iadsan a b' àill leis: agus thàinig iad d'a ionnsuidh.

14 Agus dh'orduich e dà fhear dheug, chum gu'm biodh iad maille ris, agus gu'n cuireadh e mach iad a shearmonachadh;

15 Agus gu'm biodh aca cumhachd a leigheas euslaint, agus a thilgeadh a mach dheamhan.

16 Agus air Simon thug e Peadar mar cho-ainm:

17 Agus Seumas mac Shebede, agus Eoin bràthair Sheumais, (agus orra-san thug e Boanerges mar cho-ainm, is e sin ri ràdh, Clann na tairneanaich.)

18 Agus Aindreas, agus Philip, agus Bartolomeus, agus Mata, agus Tomas, agus Seumas mac Alpheus, agus Tadeus, agus Simon an Canaanach,

19 Agus Iudas Iscariot, an neach sin a bhrath e: agus chaidh iad do thigh.

20 Agus chrùinnicheadh an sluagh a ris, ionnus nach robh e'n comas doibh uiread

as aran itheadh.

21 Agus an uair a chual a chairdean so, thàinig iad a macha bhreith air: oir thubhairt iad, Tha e air mhi-chéill.

22 Agus thubhairt na sgrìobhaichean a thàinig a nuas o Ierusalem, A ta Beelsebub aige, agus is ann troimh phrionnsa nan deamhan a ta e tilgeadh a mach dheamhan.

23 Agus ghairm e iad d'a ionnsuidh, agus thubhairt e riu ann an cosamhlachdaibh, Cionnus a dh'fheudas Satan Satan a thilgeadh a mach?

24 Agus ma bhitheas ròghachd roinnte 'na h-aghaidh féin, cha'n urrainn an ròghachd sin seasamh.

25 Agus ma bhitheas tigh air a roinn 'na aghaidh féin, cha'n urrainn an tigh sin seasamh.

26 Agus ma dh'éireas Satan 'na aghaidh féin, agus gu'm bi e roinnte, cha'n urrainn e seasamh, ach a ta crìoch aige.

27 Cha'n urrainn neach air bith dol a steach do thigh duine làidir, agus 'airneis a thogail leis, mur ceangail e 'n duine làidir an toiseach; agus an sin creachaidh e a thigh.

28 Gu deimhin a ta mi ag ràdh ribh, Gu maithean na h-uile pheacanna do chloinn nan daoine, agus gach toibheum a labhras iad.

29 Ach ge b'e labhras toibheum an aghaidh an Spioraid Naoimh, cha'n fhaigh e maitheanas a chaidh, ach a ta e an cunnart peana⁵is shiorruidh;

30 Air son gu'n dubhairt iad, Tha spiorad neòghlan aige.

31 An sin thàinig a bhràithrean agus a mhàthair, agus air dhoibh seasamh a muigh, chuir iad fios d'a ionnsuidh, a' gairm air.

32 Agus bha 'n sluagh 'nan suidhe m'a thimchioll; agus thubhairt iad ris, Feuch, a ta do mhàthair agus do bhràithrean a muigh ga d' iarraidh.

33 Agus fhreagair e iad, ag ràdh, Cò i mo mhàthair, no mo bhràithrean?

34 Agus sheall e mu'n cuairt orra-san a bha 'nan suidhe m'a thimchioll, agus thubhairt e, Feuch mo mhàthair agus mo bhràithrean.

35 Oir ge b'e neach a ni toil Dé, is esan mo bhràthair, agus mo phiuthair, agus mo mhàthair.

CAIB. IV.

1 Cosamhlachd an t-sìoladair, agus a bhrìgh. 21 Is còir dhuinn solus ar n-eòlais a phàirteachadh ri muinntir eile. 26 Cosamhlachd an t-sìl a ta fàs an uaignidheas, 30 agus a' ghràinne mhustaird. 39 Chruinnich Crìosd an fha na fairge.

AGUS thòisich e air teagasg a ris làimh ris a' mhuir; agus chrùinnicheadh sluagh mòr d'a ionnsuidh, ionnus gu'n deachaidh e steach do luing, agus gu'n do

¹ dha. ² diomb. ³ mhillleadh.

⁴ geur-àithne. ⁵ damnaidh, breitheana⁵is.

shuidh e air a' mhuir; agus bha'n sluagh uile ri taobh na mara air tìr.

2 Agus theagaisg e dhoibh mòran do nithibh ann an cosamhlachdaibh, agus thubhairt e riu 'na theagasg.

3 Eisdibh; Feuch, chaidh fear-cuir¹ a mach a chur sil:

4 Agus tharladh 'nuair chuir e an sìol, gu'n do thuit cuid deth ri taobh an rathaid, agus thàinig eunlaith an athair, agus dh'ith iad suas e.

5 Agus thuit cuid eile dheth air fearann creagach, far nach robh mòr thalamh aige; agus air ball dh'fhàs e suas, do bhrìgh nach robh doimhne talmhainn aige:

6 Ach air do'n ghréim éirigh, loisgeadh e; agus a chionn uach robh freumh² aige, shearg e as.

7 Agus thuit cuid eile am measg droighinn, agus dh'fhàs an droighionn suas, agus thachd se e, agus cha d'thug e toradh uaith.

8 Agus thuit cuid eile air talamh maith³, agus thug e toradh uaith a' fàs suas agus a' meudachadh; agus thug e mach, cuid a dheich thar fhichead uiread, agus cuid a thri fichead uiread, agus cuid a cheud uiread⁴ s a chuireadh.

9 Agus thubhairt e riu, An ti aig am bheil cluasa chum éisdeachd, éisdeadh e.

10 Agus an uair a bha e 'na aonar, dh'fhiosraich iadsan, a bha mu'n cuairt da⁵, maille ris an dà fhear dheug, an cosamhlachd deth.

11 Agus thubhairt e riu, Dhuibhse thugadh eòlas a ghabhail air nithibh dìomhair rioghachd Dhé: ach dhoibhsan a ta an leth muigh nìhear gach ni an cosamhlachdaibh:

12 Chum as ag faicinn doibh gu'm faic iad, agus nach aithnich iad, agus ag cluinntinn doibh gu'n cluinn iad, agus nach tuig iad; air eagal àn air bith gu'm pillleadh iad, agus gu'm biodh am peacanna air am maitheadh dhoibh.

13 Agus thubhairt e riu, Nach aithne dhuibh an cosamhlachd so? agus cionnus ma ta a thuigeas sibh gach uile chosamhlachd?

14 Tha 'm fear-cuir a' cur an fhocail.

15 Agus is iad so iadsan ri taobh an rathaid, anns an cuirear am focal, an déigh dhoibh a chluinntinn, air ball a ta Satan a' teachd, agus a' togail leis an fhocail, a shìol-chuireadh 'nan cridheach-aibh.

16 Agus is iad so iadsan mar an ceudna a chuireadh air fearann creagach; muinntir, an uair a chluinneas iad am focal, a ghabhas e air ball le gairdeachas:

17 Agus cha'n 'eil freumh aca annta

féin, ach mairidh iad rè sealain, 'na dhéigh sin, 'nuair a dh'éreas amhghar⁶ no geur-leannmhuinn air son an fhocail, air ball a ta iad a' gabhail oibbheim.

18 Agus is iad so iadsan a chuireadh am measg an droighinn, an dream a dh'éisdeas ris an fhocal;

19 Agus a ta ro-chùram an t-saoghail so, agus mealltaireachd saobhbheis, agus anamianna nithe eile teachd a steach, agus a' tachdadh an fhocail, agus nìhear neo-thorach e.

20 Agus is iad so iadsan a chuireadh ann an talamh maith; an dream a chluinneas am focal, agus a ghabhas e, agus a bheir a mach toradh, cuid a dheich thar fhichead uiread, cuid a thri fichead uiread, agus cuid a cheud uiread s a chuireadh.

21 Agus thubhairt e riu, An toirear coinneal chum gu'n cuirear i fuidh bheul soithich, no fuidh leabaidh? nach ann a chum a cur ann an coinneir?

22 Oir cha'n 'eil ni air bith fohuichte, nach foillsichear; agus cha robh ni air bith an cleith⁶, nach tig am follais⁷.

23 Ma tha cluasa chum éisdeachd aig neach air bith, éisdeadh e.

24 Agus thubhairt e riu, Thugaibh fa'n ear ciod a chluinneas sibh: leis an tomhas a thomhaiseas sibh, tomhaisear dhuibh féin; agus bheirear tuilleadh dhuibh-sa ta 'g éisdeachd.

25 Oir ge b'e neach aig am bheil, bheir ear dha: agus ge b'e neach aig nach 'eil, bheir ear uaith an ni sin féin a ta aige.

26 Agus thubhairt e, Is amhuil rioghachd Dhé, mar gu'n cuireadh duine sìol anns an talamh.

27 Agus gu'n coidleadh e, agus gu'n éireadh e a dh'oidhche agus a là, agus gu'n giueadh an sìol, agus gu'm fàsadh e suas, air dòigh nach fhios da.

28 Oir bheir an talamh a mach toradh uaith féin, air fùs am fochann, a ris an dias, an déigh sin an làn arbhar anns an dèis.

29 Ach an uair a ta 'n toradh abaich, air ball cuiridh e au corran ann, a chionn gu bheil am fogharadh air teachd.

30 Agus thubhairt e, Ciod an ni ri 'n samhluich sinn rioghachd Dhé? no ciod e an cosamhlachd leis an coimhneas sinn i⁸?

31 Is cosmhail i ri gràinne mustaird, ni, 'nuair a chuirear san talamh e, a's lugha do na h-uile phòraibh a ta air thalamh.

32 Ach an déigh a chur, fàsaidh e suas, agus cinnidh e nì's mò na luibh sam bith eile, agus fàsaidh geugan mòra air; ionnus gu'm feud eunlaith an athair nìd a dhcanamh fuidh a sgàile.

33 Agus le iomadh d'a leithidibh sin do

¹ sioladair.

² freumhach.

³ math.

⁴ 'na shochair.

⁵ trioblaid.

⁶ an uaignidheas.

⁷ os àird.

⁸ an coibhearta ris an coibheartaich sinn i?

chosamhlachdaibh labhair e am focal riu, a réir mar a b'urrainn iad a chluinntinn.

34 Ach gun chosamhlachd cha do labhair e riu: Agus mhínich e na h-uile níthe d'a dheisciobluibh féin air leth.

35 Agus thubhairt a riu air an là sin féin, air teachd do'n fheasgar, Rachamaid thairis do'n taobh eile.

36 Agus an uair a sgaoil iad an coimhthional, thug iad leo esan anns an luing mar a bha e; agus bha longa beaga eile maille ris¹ mar an ceudna.

37 Agus dh'éirich doinni² mhòr ghaoithe, agus leum na tonnna a steach do'n luing, air chor as gu'n robh i nis làn.

38 Agus bha esan ann an deireadh na luinge, 'na chodal air clusaig³: agus dhùisg iad e, agus thubhairt iad ris, A mhaighstir, nach 'eil suim agad gu'n caillear sinn?

39 Agus dh'éirich e, agus chronuich e a' ghaoth, agus thubhairt e ris an fhairge, Tosd, bisamhach. An sin luidh a' ghaoth, agus bha fèath⁴ mòr ann.

40 Agus thubhairt e riu, C'ar son a ta sibh co eagalach? cionnus nach 'eil creidimh agaibh.

41 Agus ghabh iad eagal ro mhòr, agus thubhairt iad r'a chéile, Cìod e an duine so, gu bheil a' ghaoth, agus an fhairge féin umhal da?

CAIB. V.

1 *Air do Chrìosd na deamhain a chur a mach as an duine anns an robh legion diubh, 13 chaidh iad a stigh anns na mucaibh. 23 Leighis e a' bhean air an robh dòrtadh folta, 35 agus thug e o na marbhaibh nighean lairuis.*

AGUS thàinig iad gu taobh eile na mara, gu dùthaich na Gadarach.

2 Agus an uair a chaidh e mach as an luing, air ball thachair air as na h-àitibh-adhlaic, duine anns an robh spiorad neòghlan,

3 Aig an robh a chòmhnuidh sna h-àitibh-adhlaic; agus cha b'urrainn neach air bith a cheangal, eadhon le slabhraidh⁵:

4 Oir chaidh a cheangal gu tric le geimhilibh agus le slabhraidh⁵ibh, agus tharruing e na slabhraidhean as a cheile, agus mhìn-bhris e na geimhlean: Agus cha b'urrainn duine sam bith a cheannsachadh.

5 Agus bha e ghnàth, a là agus a dh'oidhche, sna beamtaibh, agus sna h-ionadaibh-adhlaic, a' glaothaich agus 'ga ghearradh féin le clachaibh.

6 Ach an uair a chunnaic e Iosa fada uath, ruith e agus shleuchd e dha,

7 Agus ghlaodh e le guth mòr, agus thubhairt e, Cìod mo ghnòthuch-sa riut, Iosa, a Mhìc an Dé a's ro àirde? tha mi a' cur ort á h-uchd Dé, gun mo phianadh.

8 (Oir thubhairt e ris, Thig a mach as

an duine, a spioraid neò-ghloin.)

9 Agus dh'fhiosraich e deth, Cìod is ainm dhuit? Agus fhreagair esan, ag ràdh, Legion is ainm dhomh: oir a ta sinn mòran ann.

10 Agus ghuidh e gu ro gheur air, gun e g'an cur a mach as an dùthaich sin.

11 Agus bha treud mòr mhuc an sin, ag ionaltradh am fagus do'n bheinn⁵.

12 Agus ghuidh na deamhain uile air, ag ràdh, Cuir sinne dh'ionnsuidh nam muc, chum gu'n rachamaid a steach anna.

13 Agus air ball thug Iosa cead doibh; agus air dol a mach do na spioradaibh neòghlan, chaidh iad a stigh anns na mucaibh, agus ruith an treud sìos gu dian le àite cas do'n fhairge, (bha iad mu thimchioll dà mhìle,) agus thachdadh iad san fhairge.

14 Agus theich iadsan a bha 'g ionaltradh nam muc, agus dh'innis iad sin, araon anns a' bhaile, agus anns an tìr. Agus chaidh iad a mach a dh'fhaicinn cìod e an ni ud a thachair.

15 Agus thàinig iad chum Iosa, agus chunnaic iad an ti anns an robh an deamhan, agus aig an robh an legion, 'na shuidhe, agus 'eudach uime, agus a chiall aige; agus ghabh iad eagal.

16 Agus dh'innis iadsan a chunnaic e dhoibh, cionnus a thachair do'n ti anns an robh an deamhan, agus mu thimchioll nam muc.

17 Agus thòisich iad ri guidhe air imeachd a mach as an crìochaibh.

18 Agus air dha dol a stigh san luing, ghuidh an ti anns an robh an deamhan air, gu'm feudadh e bhi maille ris.

19 Gidheadh cha do leig Iosa leis, ach thubhairt e ris, Imich dhachaidh dh'ionnsuidh do mhuinntir, agus innis dhoibh meud nan níthe a rinn an Tighearna dhuit, agus gu'n d'rinn e tròcair ort.

20 Agus dh'imich esan, agus thòisich e ri chur an cèll ann an Decapolis meud nan níthe a rinn Iosa dha: agus ghabh iad iongantais uile.

21 Agus 'nuair a chaidh Iosa a ris thairis anns an luing do'n taobh eile, chruinnich-eadh sluagh mòr d'a ionnsuidh; agus bha e làimh ris a' mhuir.

22 Agus, feuch, thàinig aon do uachdaran-aibh uan sionagag, d'am b'ainm Iairus; agus an uair a chunnaic e esan, leig se e féin sìos aig a chosaibh.

23 Agus ghuidh e gu dùrachdach air, ag ràdh, A ta mo nighean bheag ann an cunnart grad bhàis; thig, *tha mi a' guidhe ort*, agus leag do làmhnan oirre chum gu'n slànuichear i, agus mairidh i beò.

24 Agus dh'imich Iosa maille ris; agus lean sluagh mòr e, agus dhòmhluich iad e.

¹ na shochair.

² stoirm.

³ adhartan.

⁴ ciùine.

⁵ do na sléibhtibh.

25 Agus bha bean àraidh an sin, air an robh dòrtadh fola rè dha bhliadhna dheug,

26 Agus dh'fhulaing i mòran o iomadh léigh, agus chaith i na bha aice, agus cha b' fheairrd i bheage, ach gu'm bumhiosd;

27 'Nuair a chual i iomradh air Iosa, thàinig i am measg an t-sluaigh o chùl-aobh, agus bhean i r'a eudach:

28 Oir thubhairt i, Ma dh'fheudas mi beantuinn ach r'a eudach, slànuichear mi.

29 Agus air ball thiormaicheadh tobar a fola; agus dh'aithnich i air a corp féin, gu'n do leighiseadh i o'n phlàigh sin.

30 Agus dh'aithnich Iosa air ball ann féin gu'n deachaidh cumhachd a mach as, agus air dha tionndadh san t-sluagh, thubhairt e, Cò a bhean ri m' eudach?

31 Agus thubhairt a dheisciobuil ris, A ta thu faicinn gu bheil an sluagh ga' dhòhlachadh, agus an abair thu, Cò a bhean rium?

32 Agus dh'amhaire e mu'n cuairt g'a faicinn-sa a rinn so.

33 Ach air do'n mhnaoi bhi fo eagal agus air chrith, air aithneachadh an nà rinneadh innte, thàinig i, agus leig si i féin sìos 'na làthair, agus dh'innis i an fhìrinn uile dha.

34 Agus thubhairt e rithe, A nighean, shlànuich do chreidimh thu; imich an sìth, agus bi slàn o d' phlàigh.

35 Am feadh a bha e fathast a' labhairt, thàinig dream o thigh uachdarain na sionagoig, ag ràdh, Fhuair do nighean bàs; c'ar son a chuireadh tu tuilleadh dragha air a' mhaighstir?

36 Cò luath is a chual Iosa an còmhradh so a labhradh, thubhairt e ri nachdaran na sionagoig, Na biodh eagal ort, a mhàin creid.

37 Agus cha d'fhulaing e do neach air bith a leantuinn, ach Peadar, agus Seumas, agus Eoin bràthair Sheumais.

38 Agus thàinig e gu tigh uachdarain na sionagoig, agus chunnaic e an iomairt¹ agus iadsan a bha gul, agus a' caoineadh gu mòr.

39 Agus 'nuair thàinig e a steach, thubhairt e riu, C'ar son a ta sibh ris an iomairt so, agus ri bròn? cha'n 'eil an nigheanag² marbh, ach 'na codal.

40 Agus rinn iadsan gàire fanoide air³: ach air dhasan an cur uile mach, thug e leis athair agus màthair na nighinn, agus iadsan a bha maille ris, agus chaidh e steach far an robh an nigheanag 'na luidhe.

41 Agus rug e air an nigheanaig air làimh, agus thubhairt e rithe, Talitha-cumi; 's e sin, air eadar-mhineachadh, A chailin, (a ta mise ag ràdh riut,) éirich.

42 Agus air ball dh'éirich an nigheanag, agus dh'imich i; oir bha i dà bhliadhna dheug a dh'aois: agus ghabh iad iongantas anabarrach.

43 Agus thug e ordugh teann doibh, nach faigheadh duine air bith fios air so; agus dh'àithn e caileigin a thoirt d' r'a itheadh.

CAIB. VI.

1 Rinneadh tàir air Crìosd le muinntir a dhùthcha.

7 Thug e cumhachd do'n dà fhear dheug os ceann spiorada neòghlan. 14 Iomadh barail mu Chrìosd.

16 Chuireadh an ceann do Eoin Baiste.

AGS chaidh e mach as a sin, agus thàinig e d'a dhùthaich féin; agus lean a dheisciobuil e.

2 Agus an uair a thàinig an t-sàbaid, thòisich e air teagasg anns an t-sionagóg: agus air do mhòran a chluinntinn, ghabh iad iongantais, ag ràdh, Cia uatha a ta na nithe sin aig an fhear so? Agus ciod e an gliocas so thugadh dha, gu bheil a leithid so do fheartaibh air an deanamh le a làmh-aibh-san?

3 Nach e so an saor mac Mhuire, bràthair Sheumais, agus Ioseis, agus Iudais, agus Shimoin? Agus nach 'eil a pheathraiche an so maille ruinn? Agus fhuair iad oibhheum ann⁴.

4 Ach thubhairt Iosa riu, Cha'n 'eil fàidh gun urram, ach 'na dhùthaich féin, agus am measg a chàirdean, agus 'na thigh féin.

5 Agus cha robh e 'n comas da mìorbhuil air bith a dheanamh an sin, saor o gu'n do chuir e a làmhan air beagan do mhuinntir a bha tinn, agus gu'n do leighis e iad.

6 Agus bha iongantais air air son am mi-chreidimh. Agus chaidh e timchioll nam bailtean, a' teagasg.

7 Agus ghairm e d'a ionnsuidh an dà fhear dheug, agus thòisich e air an cur a mach dithis agus dithis: agus thug e dhoibh cumhachd air spioradaibh neòghlan:

8 Agus dh'àithn e dhoibh gun ni air bith thoirt leo air son na slighe, ach lorg a mhàin; gun mhàla, gun aran, gun airgid⁵ 'nan sporan;

9 Ach bonn-bhròga⁶ bhi air an cosaibh, agus gun dà chòta bhi umpa.

10 Agus thubhairt e riu, Ge b'e ionad air bith anns an téid sibh a steach do thigh, au sin fanaibh gus am falbh sibh as an àite sin.

11 Agus cò air bith iad nach gabh ribh, agus nach éisd ribh, air dhùnbh imeachd as an àite sin, crathaibh an duislach a bhitheas fo 'ur cosaibh, mar fhianuis 'nan aghaidh. Gu deimhlin a ta mi ag ràdh ribh, Gur so-iomchlaire⁶ a bhitheas e do

¹ am buaireas.

² nìonag.

³ gàire fo-chaid ris.

⁴ ghabh iad oibhheum ris.

⁵ cuair air.

⁶ so-fhulaing.

Shodom agus do Ghomorah ann an là a' bhreitheanais, na do'n bhaile sin.

12 Agus chaidh iad a mach, agus shear-monaich iad gu'n deanadh *daoine* aithreachas.

13 Agus thilg iad a mach mòran dheamhan, agus dh'ung iad le h-oladh mòran a bha tinn, agus leighis siad iad.

14 Agus chual Herod an rìgh *uime*, (oir chaidh ainm am follais;) agus thubhairt e, A ta Eoin Baiste air éirigh o na marbhaibh, agus uime sin a ta feartan air an oibreachadh leis.

15 Thubhairt cuid eile, Gur e Elias a t'ann. Agus thubhairt cuid eile, Gur faidh a t'ann, no mar aon do na fàidhibh.

16 Ach an uair a chual Herod *so*, thubhairt e, Is e Eoin d'an do chuir mise an ceann, a th'ann; dh'éirich e o na marbhaibh.

17 Oir chuir Herod féin a mach agus ghlac e Eoin, agus cheangail e ann am prìosan e, air son Herodiais bean phòsda Philip, a bhràthar féin, do bhrìgh gu'n do phòs e i.

18 Oir thubhairt Eoin ri Herod, Cha'n 'eil e ceaduichte dhuìt bean do bhràthar a bhi agad.

19 Uime sin bha diom' mòr aig Herodias ris, agus bu mhiann leatha a chur gu bàs; ach cha b'urrainn i.

20 Oir bha eagal Eoin air Herod, air dha fios a bhi aige gu'm bu duine ceart agus naomh e, agus thug e fa'near² e; agus 'nuair a chual se e, rinn e mòran do nithibh *air a chomhairle*, agus dh'éisd e ris gu toileach.

21 Agus air teachd do là iomchuidh, rinn Herod, air co-ainm an là an d'rugadh e, suiper d'a uaislibh, agus d'a àrd-cheannardaibh, agus do mhaithibh Ghailile:

22 Agus an uair a chaidh nighean Herodiais so steach, agus a rinn i dannsa, thaitinn i ri Herod agus riu-san a shuidh maille ris, agus thubhairt an rìgh ris a' chailin, Iarr ormsa ge b'e ni is àill leat, agus bheir mi dhuìt e.

23 Agus thug e miannan di, Ge b'e ni a dh'iarras tu orm, bheir mi dhuìt e, gu leth mo ròghachd.

24 Agus an uair a chaidh i mach thubhairt i r'a màthair, Ciod a dh'iarras mi? Agus thubhairt ise, Ceann Eoin Bhaiste.

25 Agus chaidh i air ball le cabhaig a steach a dh'ionsuidh an rìgh, agus dh'iarr i, ag ràdh, Is àill leam gu'n tugadh tu dhomh gun dàil ceann Eoin Bhaiste air mèis.

26 Agus bha 'n rìgh ro dhoilich; *gidheadh* air son a mhionnan, agus an dream a bha 'nan suidhe maille ris, cha robh

toil aige a diultadh.

27 Agus air ball, chuir an rìgh a mach fear-millidh, agus dh'àithn e a cheann a thoirt a steach: agus dh'imich esan agus thug e an ceann deth anns a' phrìosan;

28 Agus thug e a cheann leis air mèis, agus thug e do'n chailin³ e: agus thug an cailin d'a màthair e.

29 Agus an uair a chual a dheisciobuil sin, thàinig iad agus thog iad a chorp, agus chuir iad ann an uaigh e.

30 Agus chruinnicheadh na h-Abstoil chum Iosa, agus dh'innis iad da na h-uile nithe, araon gach ni a rinn iad, agus gach ni a theagaisg iad.

31 Agus thubhairt e riu, Thigibh-sa air leth do àit uaigneach, agus gabhaibh fois car tamuill bhig: Oir bha mòran a' teachd agus a' dol, agus cha robh ùine aca uiread as biadh itheadh.

32 Agus chaidh iad gu àite fàsail ann an luing air leth.

33 Agus chunnaic an sluagh iadsan a' falbh, agus dh'aithnich mòran e, agus ruith iad d'an cois as na baitibh uile an sin, agus bha iad rompa, agus chruinnicheadh iad d'a ionsuidh.

34 Agus an uair a chaidh Iosa mach, chunnaic e sluagh mòr, agus ghabh e truas mòr dhiubh, a chionn gu'n robh iad mar chaoraich gun bhuachaill aca: agus thòisich e air mòran do nithibh a theag-asg dhoibh.

35 Agus an uair a bha nis mòran do'n là air dol seachad⁴, thàinig a dheisciobuil d'a ionsuidh, ag ràdh, A ta 'n t-àite so fàs, agus a ta nis mòran do'n là *air dol thairis*:

36 Leig air falbh iad, chum gu téid iad do'n tìr mu'n cuairt, agus do na baitibh, agus gu ceannaich iad biadh dhoibh féin: oir cha'n 'eil ni air bith aca r'a itheadh.

37 Ach fhreagair esan, agus thubhairt e riu, Thugaibh-sa dhoibh r'a itheadh. Agus thubhairt iadsan ris, An téid sinn agus an ceannaich sinn luach dhà chend peghinn a dh'aran, chum gu tugamaid dhoibh ni r'a itheadh?

38 Ach thubhairt esan riu, Cia lìon builinn⁵ a ta agaibh? rachaibh agus faicibh. Agus air faotainn fios doibh, thubhairt iad, Cùig, agus dà iasg.

39 Agus dh'àithn e dhoibh a thoirt orra uile suidhe sìos 'nan cuideachdaibh air an fheur uaine.

40 Agus shuidh iad sìos 'nan buidhnibh fa leth, 'nan ceudaibh, agus 'nan leth-cheudaibh.

41 Agus air dha na cùig builinnean agus an dà iasg a ghabhail, agus amharc suas gu nèamh, bheannaich, agus bhris e na buil-

¹ diomb. ² choimhid se. ³ ghruagaich, nìonaig.

⁴ air a chaitheadh.

⁵ aran.

innean, agus thug e d'a dheisciobluibh iad, chum gu'n cuireadh iad rompa iad; agus roinn e an dà iasg orra uile.

42 Agus dh'ith iad uile, agus shàsuich-eadh iad.

43 Agus thog iad dà chliabh dheug làn do'n bhìadh bhrìste, agus do na h-iasgaibh.

44 Agus b'iad an dream a dh'ith do na builinnibh cùig mìle fear.

45 Agus air ball cho-éignich e a dheisciobuil gu dol anns an luing, agus dol roimhe dh'ionnsuidh na taoibh thall gu Betsaida, gus an cuireadh e an sluagh air falbh.

46 Agus an uair a chuir e air falbh iad, chaidh e gu beinn a dheanamh urnuigh.

47 Agus an uair a bha an t-anmoch ann, bha an long am meadhon na mara, agus esan 'na aonar air tìr.

48 Agus chunnaic e iadsan air am pianadh ag iomramh; oir bha a' ghaoth 'nan aghaidh; agus thàinig e d'an ionnsuidh mu thimchioll na ceathramh faire do'n oidhche, ag imeachd air a' mhuir, agus b'àill leis dol seachad oirre.

49 Ach an uair a chunnaic iadsan e ag imeachd air a' mhuir, shaoil iad gu'm bu tannasg a bh'ann; agus ghlaodh iad.

50 (Oir chunnaic iad uile e, agus bha iad fo bhuaireas;) Agus air ball labhair e riu, agus thubhairt e riu, Biodh miseach mhaith agaibh; is mise ta ann, na biodh eagal oirbh.

51 Agus chaidh e suas d'an ionnsuidh do'n luing; agus luidh a' ghaoth: agus bha uamhas mòr thar tomhas orra, agus ghabh iad iongantas.

52 Oir cha d'thug iad fa'near *mìorbhuil* nam builinnean; oir bha'n cridhe air a chruadhachadh.

53 Agus an uair a chaidh iad thairis, thàinig iad gu talamh Ghenesaret, agus tharruing iad gu tìr.

54 Agus an uair a thàinig iad a mach as an luing, air ball dh'aithnich iad e.

55 Agus ruith iad air feadh na tìre sin uile mu'n cuairt, agus thòisich iad air an dream a bha tinn a ghlùlan mu'n cuairt air leabaichibh, ge b'e àit an cual iadesan abhi.

56 Agus ge b'e air bith bailte, no caithriche, no duthaich an deachaidh e steach, chuir iad na daoine tinn air na sràidibh, agus ghuidh iad air gu'm feudadh iad beantuinn a mhàin ri iomall eudaich: agus a mhead is a bhean ris, leighiseadh iad.

CAIB. VII.

1 *Fhuair na Phàirisich coire do na deisciobluibh do bhrìgh gu'n d'ith iad le làmhaibh neo-ionnlaidte.*
14 *Cha salaich biadh an duine.* 24 *Leighis Crìosd nighean aig an robh spiorad neò-ghlan,* 31 *agus duine a bha bodhar.*

A GUS chruinnicheadh na Phairisich d'a ionnsuidh, agus dream àraidh do na

sgriobhaiclibh a thàinig o Ierusalem.

2 Agus an uair a chunnaic iad cuid d'a dheisciobluibh ag itheadh arain le làmhaibh salach, (sin r'a ràdh neo-ionnlaidte,) fhuair iad cron *doibh*.

3 Oir cha'n ith na Phairisich, agus na h-Iudhaich uile, biadh, mur ionnlaid iad an làmhan gu minic, a' coimhead beul-aithris nan seanaircan.

4 Agus *air dhoibh teachd* o'n mhargadh, mur tum¹ siad iad, cha'n ith iad. Agus a ta mòran do nithibh eile a ghabh iad orra a choimhead, *mar a ta* nigheadh chupan, agus phoitean, agus shoithiche umha², agus leabaichean³.

5 An sin dh'fheòraich na Phairisich agus na sgrìobhaichean dheth, C'ar son nach 'eil do dheisciobuil ag imeachd a réir beul-aithris nan seanaircan, ach a ta iad ag itheadh arain le làmhaibh neo-ionnlaidte?

6 Ach fhreagair esan agus thubhairt e riu, Is maith a rinn Esaias fàidheadaireachd mu bhuir timchioll-sa, a chealgairean, a réir mar a ta e sgrìobhta, A ta am pobull so toirt urrain⁴ dhomh-sa le 'm bìlibh, ach a ta an cridhe fada uam.

7 Ach is ann gu dìomhanach a ta iad a' toirt aoraidh dhomh-sa, a' teasgag àith-eanta dhaoine mar theagasg.

8 Oir air dhuibh àithne Dhé a thréigsinn, a ta sibh a' cumail orduchaidh dhaoine, *mar a ta* nigheadh phoitean agus chupan: agus mòran eile d'an leithidibh sin a ta sibh a' deanamh.

9 Agus thubhairt e riu, Is maith a ta sibh a' cur air cùl àithne Dhé, chum gu'n coimhid sibh bhuir orduchadh féin.

10 Oir thubhairt Maois, Thoir urram do t'athair, agus do d' mhàthair: agus, Ge b'e neach a mhallaicheas athair no màthair, cuirear gu cìnteach gu bàs e.

11 Ach their sibhse, Ma their neach r'a athair, no r'a màthair, Biodh e 'na Chorb-an, sin r'a ràdh, 'na thiodhlac *do'n team-pull*, ge b'e ni leis am faigheadh tu tairbhe uamsa:

12 Nach leig sibh dha á sin suas ni sam bith a dheanamh air son'athar, no a mhàthar;

13 A' cur focail Dé an neò-bhrìgh le bhuir beul-aithris féin, a dh'aithris sibh: agus mòran d'an leithidibh sin do nithibh a ta sibh a' deanamh.

14 Agus 'nuair a ghairme an sluagh uile d'a ionnsuidh, thubhairt e riu, Eisidibh riumsa uile, agus tuigibh:

15 Cha'n 'eil ni sam bith o'n taobh a muigh do'n duine, a théid a steach ann, d'am bheil e 'n comas a shalachadh; ach na nithe tha teachd a mach as, is iad sin a ta salachadh an duine.

16 Ge b'e aig am bheil cluasa chum éisdeachd, éisdeadh e.

¹ ionnlaid.

² prais.

³ àiteacha-suidhe. ⁴ onoir.

17 Agus an uair a chaidh e steach do'n tigh o'n t-sluagh, chuir a dheisciobuil ceisd air mu thimchioll a' chosamhlachd.

18 Agus thubhairt e riu, Am bheil sibhse mar so fathast gun tuigse? Nach 'eil fhios agaibh, ge b'e ni air bith a théid a steach san duine o'n leth a muigh, nach 'eil e 'n comas da esan a shalachadh?

19 Do bhrìgh nach téid e steach d'a chridhe, ach do'n bhroinn, agus théid e mach do'n t-slochd shalachair, a' glanadh gach uile bhìdh.

20 Agus thubhairt e, Is e an ni a thig a mach as an duine, a shalaicheas an duine.

21 Oir is ann o'n taobh a stigh, á cridhe dhaoine, a thig a mach droch smuaintean, adhaltrannas, striopachas, mortadh,

22 Goid, sannt, aingidheachd, mealltaireachd, macnus¹, droch shùil, toibheum, uabhar, amaideachd:

23 A ta na h-uile so uile a' teachd a mach o'n taobh a stigh, agus a' salachadh an duine.

24 Agus air dha éirigh as a sin, chaidh e gu crìochaibh Thiruis agus Shidoin: agus an uair a chaidh e steach do thigh, cha b'àill leis fios a bhi aig neach sam bith air; gidheadh cha'n fheudadh e bhì'm folach.

25 Oir chuala bean uime, aig an robh nighean bheag, anns an robh spiorad neòghlan, agus thàinig i agus thuit i aig a chosaibh:

26 (Agus bu Ghreugach a' bhean, Ban-shiropeniseach a thaobh cinnich;) agus ghuidh i air gu'n tilgeadh e an deamhan a mach as a nighinn.

27 Agus thubhairt Iosa rithe, Fulaing do'n chloinn air tùsa bhi air an sàsachadh: oir cha 'n'eil e iomchuidh aran na cloinne a ghabhail, agus a thilgeadh chum nan con.

28 Agus fhreagair ise agus thubhairt i ris, Is fìor sin, a Thighearn: gidheadh ithidh na coin fo 'n bhòrd do sbruileach na cloinne.

29 Agus thubhairt esan rithe, Air son na cainnte so féin, imich romhad; a ta an deamhan air dol a mach á d' nighinn.

30 Agus an uair a bha ise air teachd a dh'ionnsuidh a tighe, fhuair i an deamhan air dol a mach, agus a nighean air a cur 'na luidhe air an leabaidh.

31 Agus a ris, 'nuair a dh'imich e o chriocheibh Thiruis agus Shidoin, thàinig e gu muir Ghàile, troimh mheadhon chrioche Dhecapolis.

32 Agus thug iad d'a ionnsuidh duine bodhar, aig an robh staduich 'na chaimnt: agus ghuidh iad air gu'n cuireadh e a làmh air.

33 Agus thug e a leth o'n t-sluagh e, agus chuir e a mheor 'na chluasaibh, agus shìl² e, agus bhean e r'a theangaidh.

34 Agus air dha amharc suas gu nèamh,

rinn e osna, agus thubhairt e ris, Ephphata, is e sin r'a ràdh, Bi fosgailte.

35 Agus air ball dh'fhosgladh a chluasan, agus dh'fhuasgladh ceangal a theangaidh, agus labhair e gu ceart.

36 Agus dh'àithn e dhoibh gun iad a dh'innseadh sin doneach air bith: ach mar is mò a thoir misg ean doibh, bu mhóid gu ro mhòr a chuir iadsan an gnìomh am follais³;

37 Agus bha iad gu ro mhòr air an lìonadh le h-iongantas, ag ràdh, Rinn e na h-uile nithe gu maith: tha e ar aon a' tabhairt air na bodhair gu'n cluinn iad, agus air na bailbh gu'n labhair iad.

CAIB. VIII.

1 Bheathaich Crìosd an sluagh gu mìorbhuileach.

11 Dhùilt e comhar' a thòirt do na Phairisich: 14 Dh'iarr e air a dheisciobuil bhì air am faicill an aghaidh taois ghoirt nam Phairiseach agus Heroid: 22 Thug e a radharc do dhuine dall.

A NNS na làithibh sin, air do shluagh ro mhòr a bhì ann, agus gun ni air bith aca r'a itheadh, ghairm Iosa a dheisciobuil d'a ionnsuidh, agus thubhairt e riu,

2 A ta truas mòr agam do'n t-sluagh, do bhrìgh gu'n d'fhan iad a nis tri làithean maille rium, agus nach 'eil ni air bith aca r'a itheadh;

3 Agus ma leigear mi d'an tighibh féin 'nan trasg⁴ iad, fannuichidh iad air an t-slighe: oir thàinig cuid aca am fad.

4 Agus fhreagair a dheisciobuil e, Cia as a dh'fheudas neach iad so a shàsachadh le h-aran an so san fhàsach?

5 Agus dh'fhiosraich e dhiubh, Cia lìon builinn a ta agaibh? Agus thubhairt iadsan, Seachd.

6 Agus thug e ordugh do'n t-sluagh suidhe, sìos air an làr: agus ghlac e na seachd builinnean, agus air toirt buidheachais, bhris e, agus thug e iad d'a dheisciobuilbh, chum gu'n cuireadh iad 'nan làthair iad: agus chuir iad sìos an làthair an t-sluaigh iad.

7 Agus bha aca beagan a dh'iasgaibh beaga: agus bheannaich e iad, agus dh'àithn e an cur sìos 'nan làthair mar an ceudna.

8 Agus dh'ith iad, agus shàsuaicheadh iad: agus thog iad làn sheachd bascaidean do'n bhiaidh bhrìste, a bha dh'fhuigheall⁵ aca.

9 Agus bha iadsan a dh'ith mu thimchioll cheithir mìle; agus leig e air falbh iad.

10 Agus air ball chaidh e steach an luing maille r'a dheisciobuilbh, agus thàinig e gu crìochaibh Dhalmanuta.

11 Agus thàinig na Phairisich a mach: agus thòisich iad ri ceisdean a chur air, ag iarraidh comhara uaith o nèamh, 'ga dhearbhadh.

12 Agus air deanamh osna dhasan 'na

¹ amaiseachd.

² sheil.

³ os àird.

⁴ trasg.

⁵ dh'fhuigheach.

spiorad, thubhairt e, C'ar son a ta an ginealach so ag iarraidh comhara? gu deimhin a ta mise ag ràdh ribh nach toirear comhara do'n gheinealach so.

13 Agus dh'fhàg e iad, agus air dha dol a steach do'n luing a rìs, chaidh e do'n taobh eile.

14 Agus dh'chluimhuich na deisciobuil aran a thoirt leo; agus cha robh aca ach aon bhuilinn¹ maille riu san luing.

15 Agus dh'àithn e dhoibh, ag ràdh, Thugaibh an aire, bithibh air bhuir faicill an aghaidh taois ghoirt nam Phairiseach, agus taois ghoirt Heroid.

16 Agus bha iadsan a' reusonachadh nam measg féin, ag ràdh, *Is ann* air son nach 'eil aran againn *a ta e*.

17 Agus air aithneachadh sin do Iosa, thubhairt e riu, C'ar son a ta sibha' reusonachadh do bhrìgh nach 'eil aran agaibh? Nach 'eil fhios agaibh fathast, agus nach 'eil sibh a' tuigsinn? am bheil bhuir cridhe fathast air a chruadhachadh?

18 Air dhuibh sùilean a bhi agaibh, nach faic sibh? agus air dhuibh cluasan a bhi agaibh, nach cluinn sibh? agus nach 'eil sibh a' cuimhneachadh?

19 An uair a bhris mi na cùig builinnean am measg nan cùig mìle, cia lìon cliabh làn do bhiadh briste a thog sibh? Thubhairt iadsan ris, A dhà dheug.

20 Agus an uair a bhris mi na seachd am measg nan ceithir mìle, cia lìon bascaid làn do bhiadh briste a thog sibh? Agus thubhairt iadsan, Seachd.

21 Agus thubhairt e riu, Cionnus nach 'eil sibh a' tuigsinn?

22 Agus thàinig e gu Betsaida: agus thug iad d'a ionnsuidh duine dall, agus ghuidh iad air gu'm beanadh e ris.

23 Agus rug e air làimh an doill agus threòraich e mach as a' bhaile e; agus air dha a shìleadh a chur air a shùilb, agus a làmhan a chur air, dh'fheòraich e dheth an robh e faicinn ni air bith.

24 Agus dh'amhairc esan suas, agus thubhairt e, A ta mi faicinn dhaoine mar chraobhan ag imeachd.

25 Na dhéigh sin, chuir e a làmhan a ris air a shùilb, agus thug e air amharc suas: agus dh'aisigeadh a *radharc dha*, agus chunnaic e gach uile dhuine gu soilleir.

26 Agus chuir e dh'ionnsuidh a thighe féin e, ag ràdh, Na rach a steach do'n bhaile, agus na innis do neach air bith anns a' bhaile e.

27 Agus chaidh Iosa agus a dheisciobuil a mach gu bailtibh Chesarea Philipi: agus air an t-slighe chuir e ceisdair a dheisciobuibh, ag ràdh riu, Cò a tha daoine ag ràdh is mise?

28 Agus fhreagair iadsan, Eoin Baiste;

agus cuid eile, Elias; agus cuid eile, Aon do na fàidhibh.

29 Agus thubhairt esan riu, Ach cò a tha sibhse ag ràdh is mi? Fhreagair Peadar agus thubhairt e ris, Is tu Criosd.

30 Agus thug e sparradh dhoibh gun iad a dh'innseadh so uime do neach sam bith.

31 Agus thòisich e r'an teagasg, gur éigin do Mhac an duine mòran do nithibh fhulang, agus a bhi air a dhiultadh leis na seanairibh, agus na h-àrd-shagartaibh, agus na sgrìobhaichibh, agus a bhi air a chur gu bàs, agus éirigh a rìs an déigh thri làithean.

32 Agus labhair e a' chainnt so gu follaiseach. Agus rug Peadar air, agus thòisich e r'a chronuchadh.

33 Ach air dhasan tionndadh mu'n cuairt, agus amhare air a dheisciobuibh, chronuich e Peadar, ag ràdh, Imich air mo chùlaobh, a Shatain: oir cha'n 'eil spéis agad do nithibh Dhé², ach do nithibh dhaoine.

34 Agus air gairm an t-sluaigh, agus a dheisciobul d'a ionnsuidh, thubhairt e riu, Ge b'e neach leis an àill teachd a'm' dhéighsa, àicheadhaidh se e féin, agus togadh e a chrann-ceusaidh, agus leanadh e mise.

35 Oir ge b'e neach leis an àill 'anam féin a choimhead, caillidise e; ach ge b'e neach a chailleas 'anam air mo shonsa, agus air son an t-soisgeil, coimhididh esan e.

36 Oir ciod e an tairbhe do dhuine, ge do chosnadh e an saoghal gu h-iomlan, agus 'anam a chall?

37 No ciod a bheir duine an éiric 'anama?

38 Oir ge b'e neach a ghabhas nàire dhiomsa, agus do m'fhoclaidh, anns a' ghinealach adhaltrannach agus olc so, dheth-san gabhaidh Mac an duine nàire, 'nuair a thig e an glòir 'Athar, maille ris na h-ainglibh naomha.

CAIB. IX.

1 *Dh'atharraicheadh cruth Iosa.* 11 *Theagaisg e a dheisciobuil mu thimchioll teachd Eliàs:* 14 *Thig e mach Spiorad balbh agus bodhar:* 30 *Roimh-innis e a bhàs agus 'aiceirigh.*

A GUS thubhairt e riu, Gu deimhin a ta mi ag ràdh ribh, gu bheil cuid dhiubhsan a ta nan seasamh an so, nach blais bàs, gus am faic iad rioghachd Dhé a' teachd le cumhachd.

2 Agus an ceann shè làithean, thug Iosa Peadar, agus Seumas, agus Eoin leis, agus threòruich e iad leo féin air leth gu beinn àird: agus dh'atharraicheadh a chruth nam fianuis.

3 Agus rinneadh 'eudach dealrach, ro gheal mar an sneachdadh; air mhodh nach robh e 'n comas do ghlanadair-eudaich sam bith air talamh a ghealachadh.

¹ aran.

² cha'n 'eil d' aire air nithibh Dhé.

4 Agus dh'fhoillsicheadh dhoibh Elias maille ri Maois: agus bha iad a' còmhradh ri Iosa.

5 Agus fhreagair Peadar, agus thubhairt e ri Iosa, A mhaighstir, is maith dhuinne bhì an so: air an aobhar sin deanamaid tri pàilluna¹; aon duitse, agus aon do Mhaois, agus aon do Elias.

6 Oir cha robh fhios aige ciod a theireadh e: oir bha iad fuidh eagal ro mhòr.

7 Agus thàinig neul a chuir sgàile orra, agus thàinig guth as an neul, ag ràdh, Is e so mo Mhac gràdhach-sa, éisdibh ris.

8 Agus air ball, an uair a dh'amhairc iad mu'n timchioll, cha'n fhac iad neach air bith á sin suas, ach Iosa 'na aonar maille riu.

9 Agus ag teachd dhoibh a nuas o'n bheinn, dh'àithn e dhoibh gun na nithe a chunnaic iad innseadh do neach sam bith, gus an éireadh Mac an duine a ris o na marbhaibh.

10 Agus ghléidh iad a' chainnt so aca féin, a' fiosrachadh d'a chéile ciod bu chiall do'n aiseirigh o na marbhaibh.

11 Agus dh'fheòraich iad deth, ag ràdh, C'ar son a ta na sgrìobhaichean ag ràdh, gur éigin Elias a theachd air tús?

12 Agus fhreagair esan agus thubhairt e riu, Thig Elias gu deimhin air tús, agus aisigidh e na h-uile nithe, agus mar a ta e sgrìobhta mu Mhac an duine, gu bheil e gu mòran do nithibh fhulang, agus a bhi air a chur an dèiseas.

13 Ach a ta mi ag ràdh ribh, gu bheil Elias da rìreadh air teachd, agus rinn iad ris gach ni a thogair iad, a réir mar a ta e sgrìobhta uime.

14 Agus 'nuair thàinig e chum a dheisciobul, chunnaic e sluagh mòr mu'n timchioll, agus na sgrìobhaichean a' deasboireachd riu.

15 Agus air ball bha 'n sluagh uile, 'nuair a chunnaic iad e, fò uamhas mòr, agus air dhoibh ruith d'a ionusuidh, chuir iad fàilte air.

16 Agus dh'fhiosraich e do na sgrìobhaichibh, Ciod e mu am bheil sibh a' deasboireachd riu?

17 Agus air freagairt do neach do'n t-sluagh, thubhairt e, A mhaighstir, thug mi mo mhaic a d' ionnsuidh, anns am bheil spiorad balbh:

18 Agus ge b'e ionad sam bith an glac se e, a ta e 'ga tharruing as a chéile; agus a ta e cur cobhair *as a bheil*, agus a' giosgarnaich le 'fliaclaibh, agus a ta e a' seargadh as: agus thubhairt mi ri d' dheisciobluibh, iad g'a chur a mach, agus cha b'urrainn iad.

19 Ach fhreagair esan, agus thubhairt e ris, O chinnich gun chreidimh, cia fhad

a bhitheas mi maille ribh? cia fhad a dh'fhuilgeas mi sibh? thugaibh e a m'ionnsuidh.

20 Agus thug iad d'a ionnsuidh e: agus au uair a chunnaic se e, reub an spiorad air ball e; agus thuit e air an talamh, agus *bha e* 'ga aoirneagan² féin, agus a' cur cobhair *as a bheil*.

21 Agus dh'fhiosraich e d'a athair, Cia fhad an aimsir o thàinig so air? agus thubhairt e, O bha e 'na leanabh.

22 Agus gu minic thilg e san teine e, agus anns an uisge, chum gu milleadh se e: ach ma ta thusa comasach air ni sam bith a dheanamh, gabh truas dinn, agus cuidich leinn.

23 Ach thubhairt Iosa ris, Ma 's urrainn thusa creidsinn, a ta gach aon ni comasach do'n neach a chreideas.

24 Agus ghlaodh athair an leinibh a mach air ball, agus thubhairt e le deuraibh, A ta mi creidsinn, a Thighearn; cuidich thusa le mo mhi-chreidimh.

25 Agus an uair a chunnaic Iosa an sluagh a' ruith cuideachd, chronuich e an spiorad neòghlan, ag ràdh ris, A spioraid bhailbh agus bhodhair, a ta mi ag orduchadh dhuit, Thig a mach as, agus na rach³ a steach ann ni's mò.

26 Agus ghlaodh an spiorad, agus reub e gu ro chràiteach e, agus chaidh e mach as: agus bha e'n riochd mairbh, ionnus gu'n dubhairt mòran, Tha e marbh.

27 Ach air do Iosa a ghlacadh air làimh, thog e suas e, agus de'éirich e.

28 Agus an uair a chaidh e steach do'n tigh, dh'fhiosraich a dheisciobuil deth an uaignidheas, C'ar son nach b' urrainn sinne a thilgeadh mach?

29 Agus thubhairt esan riu, Cha'n eil e comasach gu'n téid a' ghnè so mach le ni air bith, ach le h-urnuigh agus trasgadh.

30 Agus dh'imich iad as a sin, agus chaidh iad troimh Ghalile: agus cha b'aill leis fhios so bhi aig aon neach.

31 Oir theagaisg e a dheisciobuil féin, agus thubhairt e riu, A ta Mac an duine air a thabhairt thairis do làmhaidh dhaoine, agus cuiridh iad gu bàs e; agus an déigh a chur gu bàs, éiridh e a ris an treas là.

32 Ach cha do thuig iad a' chainnt so, agus bha eagal orra fheòraich dheth.

33 Agus thàinig e gu Capernaum; agus air dha bhi san tigh, dh'fhiosraich e dhiubh, Ciod e mu'n robh sibh a' deasboireachd eadaraibh féin, air an t-slighe?

34 Ach dh'fhan iadsan 'nan tosd: oir air an t-slighe bha iad a' reusonachadh eatorra féin, co aca bu mhò a bhiodh.

35 Agus air suidhe dha, ghairm e'n dà fhear dheug d'a ionnsuidh, agus thubhairt e riu, Ge b'e neach leis am miann a bhi

¹ bothain.

² aoineagan, aonair t.

³ teirig, gabh.

air thoiseach, bithidh esan air dheireadh air chàch uile, agus 'na sheirbhiseach do na h-uile.

36 Agus ghabh e leanabh, agus chuir e 'nam meadhon e: agus an uair a thog e suas 'na uchd e, thubhairt e riu.

37 Ge b'e neach a ghabhas ri h-aon d'an leithidibh so do leanabaibh a'm' ainm-sa, a ta e a' gabhail riumsa; agus ge b'e neach a ghabhas riumsa, cha mhise ris am bheil e a' gabhail, ach an Ti a chuir uaith mi.

38 Agus fhreagair Eoin e, ag ràdh, A mhaighstir, chunnaic sinne neach nach 'eil 'gar leantuinn¹ a' tilgeadh a mach dheamhan a'd' ainm-sa; agus bhac² sinn e, a chionn nach 'eil e 'gar leantuinn féin.

39 Ach thubhairt Iosa, Na bacaibh e: oir cha'n 'eil neach sam bith a ni mìorbhuil a'm' ainm-sa, d'am bheil e'n comas olc a labhairt gu h-ealamh umam.

40 Oir ge b'e neach nach 'eil 'nar n-aghaidh, a ta e leinn³.

41 Oir ge b'e neach a bheir cupan uisge dhuibh-sa r'a òl a'm' ainm-sa, a chionn gur le Crìosd sibh, gu deimhin a ta mi ag ràdh ribh, nach cail e a dhuais.

42 Agus ge b'e bheir aobhar oilbheim do aon neach do na h-aonaibh beaga so, a ta creidsinn annam-sa, b' fhearr dha gu'm biodh clach-mhuilinn air a crochadh m'a mhuineal, agus gu'm biodh e air a thilgeadh san fhairge.

43 Agus ma bheir do làmh aòbhar oilbheim dhuit, gearr dhìot i: is fearr dhuit dol a steach do'n bheatha air leth-làimh, na dà làimh a bhi agad, agus dol gu h-ìfrinn, do'n teine nach mùchar a chaoidh;

44 Far nach bàsaich an cnuimh, agus nach téid an teine as.

45 Agus ma bheir do chos aobhar oilbheim dhuit, gearr dhìot i: is fearr dhuit dol a steach do'n bheatha air leth-chois, na dà chois a bhi agad, agus a bhi air do thilgeadh ann an ìfrinn, do'n teine nach mùchar a chaoidh;

46 Far nach bàsaich an cnuimh, agus nach téid an teine as.

47 Agus ma bheir do shùil aobhar oilbheim dhuit, spion asad i: is fearr dhuit dol a steach do rìoghachd Dhé air aon shùil, na dà shùil a bhi agad, agus a bhi air do thilgeadh ann an teine ìfrinn;

48 Far nach bàsaich an cnuimh, agus nach téid an teine as.

49 Oir saillear gach aon neach le teine, agus saillear gach aon ìobairt le salann.

50 Is maith an salann: ach ma chaill eas an salann a shailleadh, ciod e leis an dean sibh deadh-bhlàsda e? Bionn agaibh salann annaibh féin, agus bithibh sìochail r'a chéile.

1 *A ta Crìosd a' deasboireachd ris na Phairisich mu thimchioll dealachaidh fir agus mnà pòsda: 13 bheannaich e clann a thugadh d'a ionnsuidh. 32 Roimh-innis e a bhàs agus aiseirigh. 46 Dh'aisig e a radharc do Bharthimeus.*

A GUS air éirigh dha as a sin, thainig e gu crìochaibh Iudea troimh an dùth-aich a ta air an taobh thall do Iordan: agus thainig slòigh d'a ionnsuidh a ris; agus mar bu ghnàth leis, theagaisg e iad a ris.

2 Agus thainig na Phairisich d'a ionnsuidh, agus dh'fhiosraich iad deth, Am bheil e ceaduichte do dhuine a bhean a chur air falbh? 'ga dhearbhadh.

3 Ach fhreagair esan agus thubhairt e riu, Ciod a dh'aithn Maois dhuibh?

4 Agus thubhairt iadsan, Thug Maois cead duinn litir-dhealaich a sgrìobhadh, agus a cur air falbh.

5 Agus fhreagair Iosa agus thubhairt e riu, Air son cruais bhur cridhe, sgrìobh e an àithne so dhuibh.

6 Gidheadh o thoiseach na cruitheachd, rinn Dia iad fear agus bean.

7 Air an aobhar so, fàgaidh duine 'athair agus a mhàthair, agus dlùth-leanaidh e r'a mhnaoi-phòsda:

8 Agus bithidh iad araon 'nan aon fheoil; ionnus nach dithis iad o sin suas, ach aon fheoil.

9 Air an aobhar sin, an ni a chuir Dia cuideachd, na cuireadh duine o chéile.

10 Agus anns an tigh, dh'fheòraich a dheisciobuil deth a ris mu thimchioll an ni cheudna.

11 Agus thubhairt e riu, Ge b'e neach a chuireas air falbh a bhean féin, agus a phòsas bean eile, a ta e a' deanamh adhaltrannais 'na h-aghaidh.

12 Agus ma chuireas bean air falbh a fear féin, agus ma bhitheas i air a pòsadh ri fear eile, a ta i a' deanamh adhaltrannais.

13 Agus thug iad leanabana d'a ionnsuidh, chum gu'm beanadh e riu; agus chronuich a dheisciobuil a' mhuinntir a thug leo iad.

14 Ach an uair a chunnaic Iosa sin, bha e ro dhiombach, agus thubhairt e riu, Leigibh do na leanabanaibh teachd a m' ionnsuidh, agus na bacaibh iad: oir is ann d'an leithidibh a ta rìoghachd Dhé.

15 Gu deimhin a ta mi ag ràdh ribh, Ge b'e neach nach gabh rìoghachd Dhé mar leanabh beag, nach téid e gu bràth a steach innte.

16 Agus ghlac e 'na uchd iad, agus chuir e a làmhnan orra, agus bheannaich e iad.

17 Agus an uair a chaidh e mach air an

¹ leannhuinn.

² thoirmisg.

³ 'uair n-aghaidh a ta e leibh.

t-slighe, thàinig neach 'na ruith, agus leig se e féin air a ghluinibh dha, agus dh'fheoraich¹ e 'dhetli, A mhaighstir mhaith, ciod a ni mi chum gu sealbhaich mi a' bheatha mhaireannach?

18 Agus thubhairt Iosa ris, C'ar son a ghloireas² tu maith dhìomsa? cha'n 'eil neach sam bith maith, ach a h-aon, is e sin Dia.

19 Is aithne dhuit na h-àitheanta, Na dean adhaltrannas, Na dean mortadh, Na goid, Na toir fianuis bhréige, Na dean eucoir³, Thoir urram do t'athair, agus do d' mhàthair.

20 Ach fhreagair esan agus thubhairt e ris, A mhaighstir, choimhid mi iad so uile o m'òige.

21 Agus air amharc do Iosa air, ghràdh-aich se e, agus thubhairt e ris, A ta aon ni dh'uireasbhuidh ort: imich, reic na bheil agad, agus tabhair do na bochdaibh, agus bithidh agad ionnhas air nèamh; agus thig, tog an crann-ceusaidh, agus lean mise.

22 Agus bha doilghios airsan air son nam briathra sin, agus dh'fhalbh e gu tuirseach; oir bha mòran saoihbheis aige.

23 Agus air amharc do Iosa mu'n cuairt, thubhairt e r'a dheisciobluibh, Cia deacair⁴ do'n mhuinntir sin aig am bheil mòr-saoibhreas dol a steach do rìoghachd Dhé!

24 Agus bha mòr-uamhas air na deisciobluibh air son a bhriathra. Ach fhreagair Iosa a ris, agus thubhairt e riu, A chlann, cia deacair dhoibh-san a chuireas an dòigh ann an saoihbheas, dol a steach do rìoghachd Dhé!

25 Is usadh do chàmhail dol troimh chrò na snàthaid, na do dhuine saoihbhir dol a steach do rìoghachd Dhé.

26 Ach bha uamhas orra-san thar tomhas, ag ràdh eatorra féin, Cò, ma seadh, a dh'fheudas a bhi air a shaoRADH?

27 Agus air do Iosa amharc orra, thubhairt e, Do dhaoineibh a ta so eu-comasach, ach cha 'n'èil e do Dhia: oir do Dhia a ta na h-uile nithe comasach.

28 Agus thòisich Peadar air a ràdh ris, Feuch, thréig sinne na h-uile nithe, agus lean sinn thusa.

29 Ach fhreagair Iosa, agus thubhairt e, Gu deimhin a ta mi ag ràdh ribh, nach 'eil neach sam bith a dh'fhàg tigh, no bràithre, no peathraiche, no athair, no màthair, no bean-phòsda, no clann, no fearann, air mo shonsa agus air son an t-soisgeil.

30 Nach faigh a cheud uiread san aimsir so féin, tighean, agus bràithrean, agus peathraichean, agus màthraichean, agus clann, agus fearann, maille ri geur-

leamhuinn; agus anns an t-saoghal a ta ri teachd, a' bheatha mhaireannach.

31 Ach a ta mòran air thùs, a bhitheas air dheireadh; agus air dheireadh, a bhitheas air thùs.

32 Agus bha iad air an t-slighe a' dol suas gu Ierusalem: agus bha Iosa ag imeachd rompa; agus ghlac uamhas iad, agus ag dhoibh esan a leantuinn, bha eagal orra. Agus thug e an dà fhear dheug air leth a ris, agus thòisich e air na nithe a bha gu tachairt da innseadh dhoibh,

33 Ag ràdh, Feuch, a ta sinn a' dol suas gu Ierusalem; agus bithidh Mac an duine air a thoirt thairis do na h-àrd-shagart-aibh⁵, agus do na sgrìobhaichibh: agus dithidh iad clum bàis e, agus bheir iad thairis e do na Cinnich;

34 Agus ni iad fanoid air, agus sgùrsaidh iad e, agus tilgidh iad smugaid air, agus cuiridh iad gu bàs e: agus air an treas là éiridh e a ris.

35 Agus thàinig d'a ionnsuidh Seumas agus Eoin, mic Shebede, ag ràdh, A mhaighstir, is àill leinn gu'n dean thu dhuinne ge b'e ni a dh'farras sinn.

36 Agus thubhairt esan riu, Ciod is àill leibh mise a dheanamh dhuibh?

37 Agus thubhairt iadsan ris, Deònuich dhuinne gu'n suidheamaid, a h-aon air do làimh dheis, agus am fear eile air do làimh chli, ann do ghloir.

38 Ach thubhairt Iosa riu, Cha'n aithne dhuibh ciod a ta sibh ag iarraidh: am bheil sibh comasach air a' chupan òl a dh'òlas mise? agus a bhi air bhur baisteadh leis a' bhaisteadh leis am baistear mise?

39 Thubhairt iadsan ris, A ta sinn comasach. Ach thubhairt Iosa riu, Olaidh sibhse gu deimhin an cupan a dh'òlas mise; agus baistear sibh leis a' bhaisteadh leis am baistear mise:

40 Ach suidhe air mo làimh dheis, agus air mo làimh chli, cha leamsa sin r'a thabhairt, ach dhoibh-san d'an d'ulluicheadh e.

41 Agus air cluinntinn so do'n deichnear, thòisich iad air mòr-chorruch a ghabhail ri Seumas agus Eoin.

42 Ach ghairm Iosa iad d'a ionnsuidh, agus thubhairt e riu, A ta fhios agaibh gu bheil aca-san a ta air am meas mar uachdarain air na Cinnich, àrd-thighearnas orra; agus gu bheil aig an daoinibh mòra làn-ùghdarras orra.

43 Ach cha bhi e mar sin 'nur measg: ach ge b'e neach le'n àill a bhi mòr 'nur measg, bithidh e 'na òglach agaibh:

44 Agus ge b'e neach agaibh le'n àill

¹ dh'fhiosraich.
² meallaireachd.

³ ghairmeas.
⁴ doilich.

⁵ prìomh-shagartaihb.

toiseach a bhi aige, bithidh e 'na sheirbheiseach do na h-uile.

45 Oir cha d'fhàinig eadhon Mac an duine chum gu'n deantadh frithealadh dha, ach a dheanamh frithealaidh, agus a thoirt 'anama féin mar éiric air son mhòran.

46 Agus thàinig iad gu Iericho: agus air imeachd dhasan agus d'a dheisciobluibh, agus do shluagh mòr, a mach á Iericho, bha Bartimeus an dall, mac Thimeuis, 'na shuidhe ri taobh na slighe, ag iarraidh déirce.

47 Agus an uair a chual e gu'm b'e Iosa o Nasaret a bh'aun, thòisich e ri glaoth-aich, agus a ràdh, Iosa, Mhic Dhaibhidh, dean tròcair orm.

48 Agus chronuich mòran e, chum gu'm biodh e 'na thosd: ach bu ro mhòid a ghlaodh esan, A Mhic Dhaibhidh, dean tròcair orm.

49 Agus sheas Iosa, agus dh'àithn e esan a ghairm d'a ionnsuidh: agus ghairm iad an dall, ag ràdh ris, Biodh misneach agad, éirich; tha e ga d'ghairm.

50 Agus air dhasan 'fhalluinn¹ a thilgeadh uath, dh'éirich e, agus thàinig e gu Iosa.

51 Agus fhreagair Iosa, agus thubhairt e ris, Cìod is àill leat mise a dheanamh dhuit? Thubhairt an dall ris, A Thigh-earn, mi dh'fhaotainn mo radhaire.

52 Agus thubhairt Iosa ris, Imich; shlànuich do chreidimh thu. Agus air ball fhuair e a radharc, agus lean e Iosa san t-slighe.

CAIB. XI.

1 *Mharcaich Iosagu buadhach do Ierusalem; 12mhall-uich e a' chraobh air an robh duilleach gun mheas; 15 ghlac e an teampull: 20 dh'earlaich e a dheisciobuil chum iad a bhi seasmhach sa' chreidimh, &c.*

AGUS an uair a thàinig iad am fagus do Ierusalem, gu Bethpage agus Betani, aig sliabh nan crann-oladh, chuir e uath dithis d'a dheisciobluibh,

2 Agus thubhairt e riu, Rachaibh do'n bhaile ud thall fa bhur comhair; agus air ball an uair a théid sibh a steach ann, gheibh sibh searrach ceangailte, air nach do shuidh aon duine riamh; fuasglaibh e, agus thugaibh leibh e.

3 Agus ma their neach air bith ruibh, C'ar son a ta sibh a' deanamh so? abraibh, Gu bheil feum aig an Tighearn air; agus air ball cuiridh e'n so e.

4 Agus dh'imich iad, agus fhuair iad an searrach ceangailte a muigh aig an doras, aig coinneachadh dà shlighe; agus dh'fhuasgail iad e.

5 Agus thubhairt cuid dhiubh-san, a bha 'nan seasamh an sin, riu, C'ar son a ta sibh a' fuasgladh an t-searraich?

6 Agus thubhairt iadsan riu mar a dh'àithn Iosa dhoibh: agus leig iad uatha iad.

7 Agus thug iad an searrach chum Iosa, agus chuir iad am falluinnan air; agus shuidh esan air.

8 Agus sgaoil mòran am falluinnan féin air an t-slighe: agus ghearr cuid eile geugan do na craobhaibh, agus sgaoil iad air an t-slighe iad.

9 Agus ghlaodh iadsan a bha 'g imeachd roimhe, agus iadsan a bha 'ga leantuinn, ag ràdh, Hosanna, is beannaichte an ti a ta teachd ann an ainm an Tighearn.

10 Is beannaichte rioghachd ar n-Athar Daibhidh, a ta teachd lann an ainm an Tighearna;] Hosanna anns na h-àrdaibh.

11 Agus chaidh Iosa a steach do Ierusalem, agus do'n teampull; agus an uair a dh'amhairc e air gach ni mu'n cuairt, agus a bha 'm feasgar a nis air teachd, chaidh e mach gu Betani maille ris an da fhear dheug.

12 Agus air an là màireach, 'nuair a chaidh iad a mach á Betani, dh'fhàs e ocrach.

13 Agus air faicinn craobh-fhèige fada uath, air an robh duilleach, thàinig e, dh'fheuchainn am faigheadh e ni sam bith oirre: agus air dha teachd d'a h-ionnsuidh, cha d'fhuair e ni sam bith ach duilleach; oir cha robh àm *tionail* nam fìge fathast ann.

14 Agus fhreagair Iosa agus thubhairt e rithe, Nar itheadh neach sam bith toradh dhìotsa o so suas a chaidh. Agus chual a dheisciobuil e.

15 Agus thàinig iad gu Ierusalem: agus chaidh Iosa a steach do'n teampull, agus thòisich e air an dream a bha reiceadh agus a' ceannach san teampull a chur a mach, agus thilg e thairis bùird luchd malairt an airgid, agus caithriche na muinntir a bha reiceadh choluman:

16 Agus cha'n fhuilgeadh e gu'n giùl-aineadh² neach sam bith soitheach troimh an teampull.

17 Agus theagaisg e, ag ràdh riu, Nach 'eil e sgrìobhta, Goirear tigh urnuigh do m' thighsa do³ ua h-uile chinnich? Ach rinn sibhse 'na gharaidh luchd-reubainn e.

18 Agus chuala na sgrìobhaichean agus na h-àrd-shagairt⁴ so, agus dh'iarr iad cionnus a dh'fheadhadh iad esan a mhill-eadh: oir bha 'eagal-san orra, do bhrìgh gu'n robh an sluagh uile fo iongantais mòr r'a theagasg.

19 Agus an uair a bha am feasgar air teachd, chaidh e mach as a' bhaile⁵.

20 Agus air mhaduinn, ag gabhail seachad dhoibh, chunnaic iad an crann-fìge air crìonadh o fheumhaibh.

¹ eudach-uachdair.

² iomchaircadh.

³ leis.

⁴ prìomh-shagairt.

⁵ a' chaitthir.

21 Agus air cuimhneachadh do Pheadar, thubhairt e ris, A mhaighstir, feuch, a ta a' chraobh-fhìge, a mhalluich thu, air crìonadh.

22 Agus fhreagair Iosa, agus thubhairt e riu, Bìodh creidimh Dhé agaibh.

23 Oir gu deimhin a ta mi ag ràdh ribh, ge b'e neach a their ris a' bheinn so, Tog-ar thu, agus tilgear san fhairege thu, agus nach bi fo amharus 'na chridhe, ach a chreideas gu'n tachair na nithe a their e, thig gach ni a their e gu crìch dha.

24 Air an aobhar sin tha mi ag ràdh ribh, Ge b'e nithe air bith a dh'farras sibh ann an urnuigh, creidibh gu'm faigh sibh, agus gheibh sibh.

25 Agus an uair a sheasas sibh a' deanamh urnuigh, maithibh, ma ta ni air bith agaibh an aghaidh aoìn duine; chum gu maith bhur n-Athair a ta air nèamh bhur peacanna féin duibhse.

26 Ach mur maith sibhse, cha mhò a mhaitheas bhur n-Athair a ta air nèamh bhur peacanna féin duibhse.

27 Agus thàinig iad a ris gu Ierusalem: agus air dhasan bhia' spaisdeireachd¹ anns an teampull, thàinig d'a ionnsuidh na h-ard-shagairt², agus na sgrìobhaichean, agus na seanaircan.

28 Agus thubhairt iad ris, Cìod e an t-ùghdarras leis am bheil thu a' deanamh nan nithe so? Agus cò thug dhuit an t-ùghdarras so chum na nithe so dheanamh?

29 Agus fhreagair Iosa agus thubhairt e riu, Feòraichidh mise mar an ceudna aon ni dhibhse, agus freagraibh mi, agus innsidh mise dhuibh-sa cìod e an t-ùghdarras leis am bheil mi deanamh nan nithe so.

30 An ann o nèamh, no o dhaoinibh a thàinig baisteadh Eoin? freagraibh mi.

31 Agus bha iad a' reusonachadh eatorra féin, ag ràdh, Ma their sinn, O nèamh; their esan ruinn, C'ar son ma seadh nach do chreid sibh e?

32 Ach ma their sinn, O dhaoinibh; bha eagal an t-sluaigh orra; oir b'e meas gach uile air Eoin gu'm b'fhàidh e gu firinneach.

33 Agus air freagairt dhoibh, thubhairt iad ri Iosa, Cha'n 'eil fhios againn. Agus fhreagair Iosa agus thubhairt e riu, Cha mhò a dh'innseas mise dhuibhse cìod e an t-ùghdarras leis am bheil mi deanamh nan nithe so.

CAIB. XII.

1 Dh'innis Crìosd roimh-làimh diùltadh nan Iudhach, agus gairm nan Cinneach. 13 Sheachainn e an rìbe a chuir na Phairisich, agus na Herodianaich roimhe: 18 nochd e mearachd nan Sadusach mu thimchioll aiseirigh nam marbh.

AGUS thòisich e air labhairt riu ann an cosamhlachdaibh. Shuidhich duine

àraidh fion-lios, agus chuir e gàradh mu'n cuairt air, agus chladhaich e ionad-bruthaidh nam fion dhearc, agus thog e tùr, agus shuidhich e air tuath e, agus ghabh e a thurus as a dhùthaich.

2 Agus san àm dhlìgheach chuir e seirbhiseach a dh'ionnsuidh na tuatha, chum gu'm faigheadh e do thoradh an fhìon-lios o'n tuath.

3 Ach air dhoibh-san esan a ghlacadh, bhuail iad e, agus chuir iad uatha falamhe.

4 Agus a ris chuir e seirbhiseach eile d'an ionnsuidh; agus chlach iad e, agus reub iad a cheann, agus chuir iad uatha e le h-easurram.

5 Agus a ris chuir e neach eile d'an ionnsuidh; agus esan mharbh iad: agus mòran eile, a' bualadh cuid duibh, agus a' marbhadh cuid eile.

6 Fathast uime sin, air dha aon Mhac a bhi aige, a b' ionmhuinn leis, chuir e esan mar an ceudna fa dheòidh d'an ionnsuidh, ag ràdh, Bheir iad urram do m' Mhac.

7 Ach thubhairt an tuath sin 'nam measg féin, Is e so an t-oighre; tigibh, marbhamaid e, agus bithidh an oighreachd againn féin.

8 Agus rug iad air, agus inharbh iad e, agus thilg iad a mach as an fhìon-lios e.

9 Cìod e uime sin a ni Tighearn an fhìon-lios? Thig e agus sgrìosaidh e'n tuath sin, agus bheir e am fìon-lios do dhaoinibh eile.

10 Nach do leugh sibh an sgrìobtuir so? A' chlach a dhiùlt na clachaircan, rinneadh ceann na h-oisinn dith.

11 Rinneadh so leis an Tighearn, agus is iongantach e 'nar suilbhe-ne.

12 Agus dh'iarr iad breith air, ach bha eagal an t-sluaigh orra; oir thuilg iad gu'm b'ann 'nan aghaidh féin a labhair e an cosamhlachd: agus air fhàgail doibh, dh'imich iad rompa.

13 Agus chuir iad d'a ionnsuidh dream àraidh do na Phairisich, agus do luchd-leannmhuinn Heroid, chum gu'n glacadh iad e 'na chainnt.

14 Agus air dhoibh-san teachd, thubhairt iad ris, A mhaighstir, a ta fhios againn gu bheil thusa firinneach, agus nach 'eil suim agad do neach air bith: oir cha'n 'eil thu ag amharc air gnùis dhaoine, ach a' teagasg slighe Dhé ann am firinn. Am bheil e ceaduichte cis a thoirt do Cheasar, no nach 'eil? an tabhair, no nach tabhair sinn i?

15 Ach air dhasan an cealg a thuigsinn, thubhairt e riu, C'ar son a ta sibh ga m' bhuaireadh? thugaibh peghinn a m' ionnsuidh, chum gu'm faic mi i.

16 Agus thug iad d'a ionnsuidh i, agus thubhairt e riu, Cò d'au ionmhaigh so, agus

¹ sràideis.

² prìomh-shagairt.

co d' am buin an sgrìobhadh so? Agus thubhairt iadsan ris, Do Cheasar.

17 Agus fhreagair Iosa, agus thubhairt e riu, Thugaibh do Cheasar na nithe a's le Ceasar, agus do Dhia na nithe a's le Dia. Agus ghabh iad iongantas ris.

18 An sin thàinig na Sadusaich d'a ionnsuidh, a ta 'g ràdh nach 'eil aiseirigh ann; agus dh'fheoraich iad deth, ag ràdh,

19 A mhaighstir, sgrìobh Maois dhuinne, Nam faigeadh bràthair duine air bith bàs, agus gu'm fàgadh e bean, agus nach fàgadh e clann, gu'n gabhadh a bhràthair a bhean d'a ionnsuidh, agus gu'n togadh e sliochd d'a bhràthair.

20 An is bha seachdnar bhràithrean ann: agus ghabh an ceud fhear dhuibh bean, agus an uair a dh'eug e, cha d'fhàg e sliochd.

21 Agus ghabh an dara fear i, agus fhuaire esan bàs, agus cha mhò a dh'fhàg esan sliochd: agus an treas fear mar an ceudna.

22 Agus ghabh an t-seachdnar i, agus cha d'fhàg iad sliochd: 'nan déigh uile, chaochail a' bhean mar an ceudna.

23 Anns an aiseirigh uime sin, an uair a dh'éireas iad, cò dhiubh d'am bean i? oir bha i aig an t-seachdnar 'na mnaoi.

24 Agus fhreagair Iosa agus thubhairt e riu, Nach 'eil sibh uime sin ann am mearachd, do bhrìgh nach 'eil eòlas agaibh air na sgrìobtuiribh, no air cumhachd Dhé?

25 Oir an uair a dh'éireas iad o na marbhaibh, cha phòs iad, ni mò a bheirear an pòsadh iad; ach a ta iad mar na h-aingil a ta air nèamh.

26 Ach mu thimchioll nam marbh, gu'n éirich iad, nach do leugh sibh ann an leabhar Mhaois, cionnus a labhair Dia ris anns a' phreas, ag ràdh, Is mise Dia Abraham, agus Dia Isaac, agus Dia Iacob?

27 Cha 'n e Dia nam marbh e, ach Dia nam beò: tha sibhse uime sin ann am mearachd mòr.

28 Agus thàinig neach do na sgrìobhaichibh, agus an uair a chual e iadsan a' deasboireachd r'a chéile, agus a thuig e gu'n do fhreagair e gu maith iad, chuir e ceisd air, Cia i a' cheud àithne do na h-àitheant-
aibh uile?

29 Agus fhreagair Iosa e, 'Si so a' cheud àithne do na h-àitheantaibh uile, Eisd, O Israeil, an Tighearn ar Dia-ne, is aon Tighearn e;

30 Agus gràdhaichidh tu an Tighearn do Dhia le d'uile chridhe, agus le d'uile anam, agus le d'uile inntinn, agus le d'uile neart: is i so a' cheud àithne;

31 Agus is cosmhuil an dara àithne rithe so, Gràdhaichidh tu do choimhearsnach mar thu féin: cha 'n 'eil àithne eile ann a's mò na iad so.

32 Agus thubhairt an sgrìobhaiche ris,

Is maith gu firinneach, a Mhaighstir, a thubhairt thu: oir a ta aon Dia ann, agus cha 'n 'eil atharrach ann ach e féin.

33 Agus esan a ghràdhachadh leis an uile chridhe, agus leis an uile thuigse, agus leis an uile anam, agus leis an uile neart, agus neach a ghràdhachadh a choimhearsnaich mar e féin, is mò sin na na h-uile làn iobairte-loisgte, agus thabhartasa.

34 Agus an uair a chunnaic Iosa gu'n do fhreagair e gu tuigseach, thubhairt e ris, Cha 'n 'eil thu fada o rioghachd Dhé. Agus cha robh a mhisnich aig neach air bith o sin suas ceisd a chur air.

35 Agus fhreagair Iosa agus thubhairt e, a' teasgag anns an teampull, Cionnus a tha na sgrìobhaichean ag ràdh gur c Criosd Mac Dhaibhidh?

36 Oir thubhairt Daibhidh féin troimh an Spiorad naomh, Thubhairt an Tighearn ri mi' Thighearn-sa, Suidh air mò làimh dheis, agus an cuir mi do naimhde 'nan stòl fo d' chosaibh;

37 Air an aobhar sin, a ta Daibhidh féin a' gairm a Thighearna dheth; cionnus ma seadh is e a mhac e? Agus dh'éisd am mòr-shluagh ris gu taitneach.

38 Agus thubhairt e riu 'na theagasc, Bithibh air bhur faicill o na sgrìobhaichibh, leis an ionmhuinn imeachd ann an culaidhibh fada, agus fàilte fhaotainn air na margaibh,

39 Agus na ceud chaithriche anns na sionagogaibh, agus na ceud àiteacha-suidhe aig na féillibh;

40 A dh'itheas suas tighean bhantrach, agus air sgàth deadh choslais a ni urnuigh-ean fada: gheibh iadsan an dèadhl' a's mò.

41 Agus air do Iosa suidhe fa chomhair àite-còimhid an ionmhais, thug e fa'near cionnus a bha 'm pobull a' cur an airgid anns an ionmhas: agus chuir mòran do dhaoineibh saobhair mòran ann.

42 Agus air teachd do bhantraich bhochd, thilg i dà bhonn bheag ann, a ni feoirling.

43 Agus air dha a dheisciobuil a ghairn d'a ionnsuidh, thubhairt e riu, Gu deimhin a ta mi ag ràdh ribh, gu'n do chuir a' bhantrach bhochd so tuilleadh san ionmhas, na iadsan uile a thilg ann.

44 Oir thilg iadsan uile ann d'am mòr-phailteas; ach thilg ise as a gainne na bha aice uile, eadhon a beathachadh gu h-ìomlan.

CAIB. XIII.

1 Dh'innis Criosd roimh-laimh sgrìos an teampull, 9 geur-leanmhuinn air son an t-soisgeil, 10 gur éigin an soisgeul a bhi air a shearmonochadh do goch uile chinneach; 14 agus gu'n tig àmhghara mòra air na h-Iudhaich.

AGUS an uair a bha e dol a mach as an teampull, thubhairt neach d'a

dheisciobluihb ris, A Mhaighstir, feuch ciod e a' ghnè chlach so, agus ciod e a' ghnè aitreibh so!

2 Agus fhreagair Iosa agus thubhairt e ris, Am faic thu an aitreabh mhòrso? cha'n fhàgar clach air muin cloiche, nach sgarar o chéile.

3 Agus 'nuair a shuidh e air sliabh nan crann-oladh, fa chomhair an teampuill, dh'fheòraich Peadar, agus Seumas, agus Eoin, agus Aindreas an uaignidheas deth;

4 Innis duinne c'uin a bhitheas na nithe sin, agus ciod e an comhara 'nuair a bhitheas na nithe sin gu léir air an coimhlionadh.

5 Agus fhreagair Iosa iad, agus thòisich e air a ràdh, Thugaibh an aire nach meall an neach sibh:

6 Oir thig mòran ann am ainm-sa, ag ràdh, Is mise e: agus meallaidh iad mòran.

7 Agus an uair a chluinneas sibh coganna, agus tuairisgeul¹ choganna, na biodh buaireas oirbh: oir is éigin iad so a theachd; ach cha 'n'èil an deireadh ann fathast.

8 Oir éiridh cinneach an aghaidh cinnich, agus rìoghachd an aghaidh rìoghachd: agus bithidh critheanna talmhainn ann an iomadh àit, agus bithidh gorta agus triobladaidhean ann: is iad sin toiseach dhòruinn-ean².

9 Ach thugaibh an aire dhuibh féin: oir bheir iad thairis sibh do chomhairlibh: agus anns na sionagogaibh sgiùrsar sibh, agus cuirear sibh an làthair uachdaran agus rìghrean air mo shonsa, mar fhianuis dhoibhsan³.

10 Agus is éigin air tùs an soisgeul a bhi air a shearmonachadh do na h-uile chinich.

11 Ach an uair a bheir iad leo sibh, 'gur tabhairt thairis, na biodh e 'na ro-chùram oirbh ciod e a labhras sibh, agus na smuainichibh roimh-làimh air: ach ge b'e ni a bheirear dhuibh san uair sin féin, abraigibh e: oir cha sibhse ta labhairt, ach an Spiorad naomh.

12 Agus bheir am bràthair a bhràthair thairis chum bàis, agus an t-athair a mhac: agus éiridh a' chlann suas an aghaidh am pàranta, agus bheir iad fa' near an cur gu bàs.

13 Agus bithidh sibh air bhuir fuathachadh leis na h-uile dhaoineibh air sgàth m'ainme-sa: ach an ti a bhuanaicheas chum na crìche, is e so a shaorar.

14 Ach an uair a chi sibh gràineileachd an fàidh-sgrìos, air an do labhair Daniel am fàidh, 'na seasamh anns an ionad nach bu chòir dhi, (tuigeadh an ti a leughas,) an sin teicheadh iadsan, a ta ann an ùir Iudea, chum nam beann:

15 Agus na tigeadh esan a ta air innullach

an tighe, a nuas do'n tigh, agus na rachadh e steach, a thoirt ni air bith as a thigh.

16 Agus an ti a ta sa' mhachair, na pilleadh e air ais a thogail 'fhalluinn leis.

17 Ach mo thruaigh iad na mnà sin a ta torrach, agus iadsan a ta toirt cìche sna làithibh sin!

18 Agus guidhibh-sa gun bhuir teicheadh a bhi sa' gheamhradh.

19 Oir bithidh àmhghar anns na làithibh sin, amhuil nach robh a leithid ann o thoiseach na cruiththeadh a chruthaich Dia, agus a nis, agus nach mò a bhitheas.

20 Agus mur giorraicheadh an Tighearn na làithean ud, cha rachadh feoil air bith as: ach air son an t-sluaigh taghta, a thagh e féin, ghiorraich e na làithean ud.

21 Agus an sin ma their neach air bith ribh, Feuch, a ta Criosd an so, no, Feuch, a ta e 'n sin, na creidibh e:

22 Oir éiridh Criosdan bréige, agus fàidhean bréige, agus ni iad comharan, agus mìorbhuilean, chum, nam bu chomasach e, na daoine taghta féin a mhealladh.

23 Agus thugaibh-sa an aire: feuch, roimh-innis mi dhuibh na h-uile nithe.

24 Ach anns na làithibh sin, an déigh an àmhghair ud, bithidh a' ghrian air a dorachadh, agus cha toir a' ghealach a solus uaipe⁴:

25 Agus tuitidh reulta nèimh, agus bithidh na cumhachdan a ta sna nèamhaibh air an crathadh.

26 Agus an sin chi iad Mac an duine a' teachd anns na neulaibh, maille ri mòr-chumhachd, agus glòir.

27 Agus an sin cuiridh e 'aingil a mach, agus cruinnichidh e r'a chéile a dhaoine taghta féin o na ceithir gaothaibh, o leth-iomall na talmhainn gu leth-iomall nèimh.

28 A nis fòghlumaibh cosamhlachd o'n chraoibh-fhige: An uair a bhitheas a geug a nis maoth, agus a chuireas i mach a duilleach, a ta fhios agaibh gu bheil an samhradh am fagus;

29 Agus mar an ceudna sibhse, an uair a chi sibh na nithe sin tachairt, biodh fhios agaibh gu bheil e 'm fagus, eadhon aig na dorsaibh.

30 Gu deimhin a ta mi ag ràdh ribh, nach téid an ginealach⁵ so thairis, agus an coimhlionar na nithe sin uile.

31 Théid nèamh, agus talamh seach; ach cha téid m'fhocail-sa seach a chaoidh.

32 Ach cha'n 'èil fios an là no na h-uaire sin aig neach air bith, cha'n 'èil aig na h-ainglibh a ta air nèamh, no aig a' Mhac, ach aig an Athair.

33 Thugaibh fa' near, deanaibh faire agus urnuigh: oir cha'n 'èil fhios agaibh c'uin a thig an t-àm.

34 Oir a ta Mac an duine mar dhuine a

¹ iomraidhean.

² àmhgharan.

³ nan aghaidh-san.

⁴ uaithe.

⁵ linn.

chaidh air thurus, agus a dh'fhàg a thigh fèin, agus a thug d'a sheirbhisich cumhachd, agus 'obair fèin do gach neach, agus a thug àithne do'n dorsair faire a dheanamh.

35 Uimesin deanaibh-sa faire, (oir cha'n 'eil fhios agaibh c'uin a thigh maighstir an tighe; an ann air feasgar, no air mheadh-on-oidhche, no aig gairm-choileach, no anns a' mhaduinn;)

36 Air eagal air teachd dha gu h-obann, gu'm faigh e sibh 'nur codal.

37 Agus na nithe a ta mi ag ràdh ribhse, a ta mi ag ràdh ris na h-uile dhaoibh, Deanaibh faire.

CAIB. XIV.

1 Comhairle an aghaidh Chrìosd. 3 Dhòirteadh oladh phàrteil air a cheann. 10 Reic Iudas a Mhaighstir air son airgid. 12 Tha Crìosd fèin ag innseadh roimh-làimh cionnus a bha e gu bhith air a bhrath le h-aon d'a dheisciobluibh.

A GUS bha a' chàisg, agus féill an arain neo-ghoirtichte an déigh dà là: agus dh'iarr na h-àrd-shagairt agus na sgrìobhaichean, cionnus a ghlacadh iad esan le foill¹, agus a chuireadh iad gu bàs e.

2 Ach thubhairt iad, Cha'n ann air an fhéill, air eagal gu'n éirich buaireas am measg an t-sluaigh.

3 Agus air bhith dha ann am Betani, ann an tigh Shimoin an lobhair, an uair a bha e 'na shuidhe air bòrd, thàinig bean, aig an robh bocsa alabastair do oladh spicnaird, ro luachmhoir; agus bhris i am bocsa, agus dhòirt i air a cheann e.

4 Agus bha cuid diubh diombach ann ta fèin, agus ag ràdh, C'ar son a rinneadh an t-ana-caitheadh so air an oladh?

5 Oir dh'fheudadh i bhith air a reiceadh air son tuilleadh na trì cheud peghinn, agus air a toirt do na bochdaibh. Agus rinn iad gearan 'na h-aghaidh.

6 Ach thubhairt Iosa, Leigibh leatha; c'ar son a ta sibh cur dragha oirre? rinn i obair mhaith ormsa.

7 Oir a ta na bochdan a ghnàth maille ribh, agus ge b'e uair is àill leibh, feudaidh sibh maith dheanamh dhoibh: ach cha'n 'eil mise a ghnàth agaibh.

8 Rinn i na dh'fheudadh i; thàinig i roimh-làimh a dh'ungadh mo chuirp chum adhlaid.

9 Gu deimhin a ta mi ag ràdh ribh, Ge b'e earrann² air bith, air feadh an domhain uile, am bi an soisgeul so air a shearmonachadh, bitlaidh mar an ceudna an ni so a rinn i air innseadh, mar chuimhne oirre.

10 Agus dh'imich Iudas Iscariot, aon do'n dà-fhear dheug, chum nan àrd-shagart, gu esan a bhrath dhoibh.

11 Agus 'nuair a chual iadsan so, bha

iad aoibhneach, agus gheall iad airgid a thoirt da. Agus dh'iarr e cionnus a dh'fheudadh e gu h-ìomchuidh esan a bhrath.

12 Agus air a' cheud là do fhéill an arain neo-ghoirtichte, an uair bu ghnàth leo an t-uan càisge a mharbhadh, thubhairt a dheisciobuil ris, C'ait an toil leat sinne dhol a dh'ulluchadh, chum gu'n itheadh tu a' chàisg?

13 Agus chuir e dithis d'a dheisciobluibh, agus thubhairt e riu, Rachaibh a steach do'n bhaile, agus coinnichidh duine sibh a' giùlan soithich uisge: leanaibh e.

14 Agus ge b'e àitan téid e stigh, abraibhsa ri fear-an-tighe, Tha am Maighstir ag ràdh, C'ait am bheil an seòmar aoidheachd, anns an ith mi a' chàisg maille ri m' dheisciobluibh?

15 Agus nochdaidh esan dhuibh seòmar àrd, farsuinn, 'na làn uidheam agus deasaichte: an sin ulluichibh dhuiunn.

16 Agus chaidh a dheisciobuil a mach, agus thàinig iad do'n bhaile, agus fhuair iad mar thubhairt e riu; agus dh'ulluich iad a' chàisg.

17 Agus air teachd do'n fheasgar, thàinig esan maille ris an dà fhear dheug.

18 Agus an uair a bha iad 'nan suidhe, agus ag itheadh, thubhairt Iosa, Gu deimhin a ta mi ag ràdh ribh, gu'm brath aon agaibh-sa, a ta 'g itheadh maille rium, mise.

19 Agus thòisich iad air a bhi dubhach, agus a ràdh ris an déigh a chéile, Am mise e? agus fear eile, Am mise e?

20 Agus air freagairt dhàsan thubhairt e riu, Is fear do'n dà fhear dheug e, a ta tumadh maille³ riumsa sa' mhèis.

21 A ta mac an duine gu deimhin ag imeachd, mar a ta e sgrìobhta uime, ach is an-aoibhinn do'n fhear sin le 'm brathar Mac an duine: bu mhaith do'n duine sin mur beirteadh riamh e.

22 Agus ag itheadh dhoibh, ghlac Iosa aran, agus an déigh a bheannachadh, bhris e, agus thug e dhoibhsan e, agus thubhairt e, Gabhaibh, ithibh: is e so mo chorp-sa.

23 Agus air glacadh a' chupain, agus air tabhairt⁴ buidheachais, thug e dhoibhsan e: agus dh'òl iad uile as.

24 Agus thubhairt e riu, Is i so m'fhuil-sa an Tìomnaidh-nuaidh, a dhòirtear air son mhòran.

25 Gu deimhin a ta mi ag ràdh ribh, Nach òl mi ni's mò do thoradh na fìon-ain⁵, gus an là sin an òl mi nuadh e ann an rioghachd Dhé.

26 Agus air dhoibh laoidh a sheinn, chaidh iad a mach gu sliabh nan crann-oladh.

27 Agus thubhairt Iosa riu, Gheibh sibh

¹ feill.

² àit, ball.

³ maraon.

⁴ breith.

⁵ fìneamhain.

uile oilbheum annam-sa an nochd: oir a ta e sgriobhta, Buailidh mi am buachaill, agus sgapar na caoraich.

28 Ach an déigh dhomh éirigh, théid mi roimhibh do Ghalile.

29 Ach thubhairt Peadar ris, Ged fhaigh iadsan uile oilbheum annad, gidheadh cha'n fhaigh mise e.

30 Agus thubhairt Iosa ris, Gu deimhin a ta mi ag ràdh riut, An diugh, air an oidliche so féin, mu'n goir an coileach dà uair, gu'n àicheadh thusa mi tri uairean.

31 Ach is ro mhòid a thubhairt esan, Ged is éigin domh am bàs fhulang maille riut, cha'n àicheadh mi chaidh thu. Agus mar sin thubhairt càch uile mar an ceudna.

32 Agus thàinig iad gu ionad d'am b' ainm Getsemane; agus thubhairt e r'a dheisciobluibh, Suidhibh-sa an so, gus an dean mise urnuigh.

33 Agus thug e leis Peadar, agus Seumas, agus Eoin, agus thòisich e air a bhli fuidh uamh-chrith, agus fuidh anabarra bròin.

34 Agus thubhairt e riu, Tha m'anam ro bhrònach, eadhon gu bàs: fanaibh-sa an so, agus deanaibh faire.

35 Agus chaidh e beagan air aghaidh, agus thuit e air an talamh, agus rinn e urnuigh, nam bu chomasach e, gu'n rachadh an uair thairis air.

36 Agus thubhairt e, Abba, Athair, a ta gach ni so-dheanta dhuitse; cuir an cupan so seachad orm: gidheadh, na' b'e an ni a b'àill leamsa, ach an ni a's toil leatsa.

37 Agus thàinig e, agus fhuair e iadsan 'nan codal, agus thubhairt e ri Peadar, A Shìmoin, am bheil thu a'd' chodal? nach b'urraim thu faire a dheanamh aon uair?

38 Deanaibh faire agus urnuigh, chum nach tuit sibh am buaireadh: a ta an spiorad gu deimhin togarrach, ach a ta an fheoil anmhuinn¹.

39 Agus air dha imeachd a ris, rinn e urnuigh, ag ràdh nam briathra ceudna.

40 Agus an uair a phill e, fhuair e iad a ris 'nan codal, (oir bha'n sùilean trom,) agus cha robh fhios aca cionnus a bheireadh iad freagradh air.

41 Agus thàinig e an treas uair, agus thubhairt e riu, Coidlibh roimhibh a nis, agus gabhaibh fois: is leoir e, thàinig an uair; feuch, a ta Mac an duine air a bhrath thairis do làmhaidh nam peacach.

42 Eiribh, imicheamaid; feuch, a ta an ti a bhrathas mise am fagus.

43 Agus air ball, air dha bhi fathast a' labhairt, thàinig Iudas, aon do'n dà fhear dheug, agus sluagh mòr maille ris le claidhibh agus bataibh, o na h-àrd-shag-

artaibh, agus na sgriobhaichibh, agus na seanairibh.

44 Agus bha an ti a bhrath esan air toirt comhara dhoibh, ag ràdh, Ge b'e neach d'an toir mise pòg, is e sin e; glacaibh e, agus thugaibh leibh e gu tèaruinte.

45 Agus air teachd dha, chaidh e air ball d'a ionnsuidh-sa, agus thubhairt e, Fàilte dhuit, a mhaighstir; agus phòg se e.

46 Agus chuir iadsan làmh ann, agus ghlac iad e.

47 Agus air tarruing claidheimh do fhear do na bha làthair, bhuail e òglach an àrd-shagairt, agus ghearr e a chluas deth.

48 Agus fhreagair Iosa agus thubhairt e riu, Au d'fhàinig sibh a mach gu mo ghlacadh-sa, mar gu b'ann an aghaidh fir-reubainn le claidhibh agus le bataibh?

49 Bha mi gach là maille ribh san team-pull, a' teagasg, agus cha do ghlac sibh mi: ach a ta so chum gu biodh na sgriobtuirean air an coimhlionadh.

50 Agus air do na h-uile a thréigsinn, theich iad.

51 Agus lean òganach àraidh e, aig an robh lion-eudach air a chur m' a chorp lomnochd; agus rug na h-òganaich air.

52 Ach air dhasan an lion-eudach fhàgail, theich e lomnochd uatha.

53 Agus thug iad leo Iosa chum an àrd-shagairt: agus chruinnicheadh maille ris na h-àrd-shagairt uile, agus na seanairean, agus na sgriobhaichean.

54 Agus lean Peadar e fada uatha, gus an deachaidh e steach do thalla an àrd-shagairt: agus bha e 'na shuidhe maille ris na seirbhisich, agus 'ga gharadh ris an teine.

55 Agus dh'iarr na h-àrd-shagairt, agus a' chòmhairle uile fianuis an aghaidh Iosa, chum a chur gu bàs; agus cha d'fhuair iad.

56 Oir rinn mòran dhaoine fianuis bhréige 'na aghaidh, ach cha do chòrd am fianuis r'a chéile².

57 Agus dh'éirich dream àraidh, agus thug iad fianuis bhréige 'na aghaidh, ag ràdh,

58 Chuala sinne e ag ràdh, Leagaidh mi sìos an teampull so, a rinneadh le làmhaidh, agus an tri làithibh, togaidh mi teampull eile, neo-dheanta le làmhaidh.

59 Agus mar sin féin cha robh am fianuis a' teachd r'a chéile.

60 Agus air éirigh suas do'n àrd-shagart sa' mheadhou, chuir e ceisd air Iosa, ag ràdh, Nach toir thu freagradh air bith uait? ciod sin mu bheil iad so a' toirt fianuis a'd' aghaidh?

¹ nìor.

² lag.

³ cha robh

am fianuis ionnan, cha d'fhoghainn am fianuis.

61 Ach dh'fhan esan 'na thosd, agus cha do fhreagair e ni sam bith. A ris dh'fheòraich an t-àrd-shagart deth, agus thubhairt e ris, An tu Criosd, Mac an ti bheannaichte?

62 Agus thubhairt Iosa, Is mi: agus chi sibh Mac an duine 'na shuidhe air deas làimh cumhachd *Dhé*, agus a' teachd le neulaibh nèimh.

63 An sin reub an t-àrd-shagart 'eudach, agus thubhairt e, Ciod am feum a ta againn tuilleadh air fianuisibh?

64 Chuala sibh an toibheum: ciod i bhur barail-sa? Agus thug iad uile breth 'na aghaidh gu'n do thoill e am bàs.

65 Agus thòisich cuid diubh air smugaid a thilgceadh air, agus 'aghaidh fhòlach, agus a bhualadh le'n dornaibh, agus a ràdh ris, Dean faidheadaireachd: agus ghabh na seirbhisich le'm basaibh air.

66 Agus air do Pheadar a bhi shìos anns an talla, thàinig aon do bhanoglaich an àrd-shagairt:

67 Agus 'nuair a chunnaic i Peadar 'ga gharadh, agus air dhi beachdachadh air, thubhairt i ris, Bha thusa cuideachd maille ri Iosa o Nasaret.

68 Ach dh'àicheadh esan, ag ràdh, Cha'n aithne dhomh, agus cha'n 'eil mi tuigsinn ciod a ta thu 'g ràdh. Agus chaidh esan a mach do'n fhor-dhorus¹; agus ghoir an coileach.

69 Agus air do bhanoglaich fhaicinn a ris, thòisich i air a ràdh riu-san a bha 'nan seasamh a làthair, Is ann diubh a ta 'm fear so.

70 Agus dh'àicheadh e ris. Agus an ceann beagan 'na dhéigh sin, thubhairt iadsan a bha 'nan seasamh a làthair a ris ri Peadar, Gu firinneach is ann diubh sud thu: oir is Galiléach thu, agus is cosmhuil do chainnt riu.

71 Ach thòisich esan air mallachadh agus air mionnachadh, ag ràdh, Cha'n aithne dhomh an duine so mu 'm bheil sibh a' labhairt.

72 Agus ghoir an coileach an dara uair. Agus chuimhnich Peadar am focal a thubhairt Iosa ris, Mu'n goir an coileach dà uair, àicheadhaidh tu mi tri uairean. Agus an uair a smuainich e air, ghuil e.

CAIB. XV.

1 Thugadh Iosa ceangailte an làthair Philat. 17 Chuireadh coron sgìthich air, 20 agus chaidh fanoid a dheanamh air. 21 Dh'fhanuich e le giùlan a' chroinn-cheusaidh; 27 chrochadh e eadar dà ghaduiche, &c.

AGUS air ball sa' mhaduinn chum na h-àrd-shagairt maille ris na seanairibh, agus na sgrìobhaichibh, agus a' chomhairle gu h-ìomlan, comhairle, agus air dhoibh Iosa a cheangal, thug iad leo

e, agus thug iad thairis e do Philat.

2 Agus dh'fhiosraich Pilat deth, An tusa rìgh nan Iudhach? Agus air freagairt dha, thubhairt e ris, Thubhairt thu e.

3 Agus chuir na h-àrd-shagairt mòran do nithibh as a leth: ach cha do fhreagair esan aon ni.

4 Agus chuir Pilat a ris ceisd air, ag ràdh, Nach freagair thu ni sam bith? feuch cia lìon nithe air am bheil iad sin a' toirt fianuis a'd' aghaidh.

5 Ach cha do fhreagair Iosa ni sam bith tuilleadh; air chor as gu'n do ghabh Pilat iongantas.

6 A nis air an fhéill bu ghnàth leis aon phrìosanach, ge b'e air bith a dh'iarradh iad, a leigeadh as doibh.

7 Agus bha *neach àraidh* d'am b'ainm Barabas, ceangailte maille r'a chompanaich ceannairce, muinntir a bha air deanamh mortaidh anns a' cheannairce.

8 Agus air glaothaich gu h-àrd do'n t-sluagh, thòisich iad air iarraidh air, a dheanamh dhoibh mar a rinn e an còmh-nuidh.

9 Ach fhreagair Pilat iad, ag ràdh, An àill leibh gu'n cuir mi rìgh nan Iudhach fa sgaoil duibh?

10 (Oir bha fhios aige gu'm b'ann troimh fharmaid a thug na h-àrd-shagairt thairis e.)

11 Ach bhrosnuich na h-àrd-shagairt an sluagh, chum gu'm b'fhearr leis Barabas a chur fa sgaoil doibh.

12 Agus fhreagair Pilat, agus thubhairt e riu a ris, Ciod ma seadh is àill leibh mi a dheanamh ris an duine sin, do an goir sibh Rìgh nan Iudhach?

13 Agus ghlaodh iad a ris, Ceus e.

14 An sin thubhairt Pilat riu, C'ar son, ciod e 'n t-òlc a rinn e? Ach bu ro mhòid a ghlaodh iadsan, Ceus e.

15 Agus air do Philat bhi toileach gnìomh taitneach a dheanamh do'n t-sluagh, dh'fhuasgail e Barabas dhoibh, agus thug e thairis Iosa, an déigh dha a sgiùrsadh, chum a cheusadh.

16 Agus thug na saighdearan leo e steach do'n talla, eadhon cùirt an uachdarain²: agus ghairm iad a' chuideachd uile an ceann a chéile.

17 Agus chuir iad uime eudach purpur³, agus air dhoibh coron droighinn fhligheadh, chuir iad air e.

18 Agus thòisich iad air beannachadh dha, ag ràdh, Fàilte dhuit, a Rìgh nan Iudhach!

19 Agus bhuail iad sa' cheann e le slait chuilce, agus thilg iad smugaid air, agus a' lùbadh an glùn, rinn iad aoradh dha⁴.

20 Agus an déigh dhoibh fanoid a dheanamh air, thug iad deth an t-eudach pur-

¹ ugh-dorus, sgùth-thigh.

² pretorium.

³ corcur.

⁴ thug iad urram da.

puir, agus chuir iad 'eudach féin uime, agus thug iad a mach e chum gu'n ceusadh iad e.

21 Agus dh'éignich iad duine àraidh bha dol seachad, Simon o Chirene, (athair Alecsandair agus Rufuis, a bha teachd as a' mhachair,) chum a chrann-ceusaidh a ghiulan.

22 Agus thug iad e gu ionad *d'am b'ainm* Golgota, is e sin air eadar-theangachadh, àite cloiginn.

23 Agus thug iad da r'a òl, fion air a mheasgadh le mirr: ach cha do ghabh esan e.

24 Agus an uair a cheus iad e, roinn iad a thrusgan, a' tilgeadh croinn air, ciod a chuid a bhiodh aig gach duine dheth.

25 Agus bha 'n treasuair ann; agus cheus iad e.

26 Agus bha sgrìobhadh a chùise-ditidh air a sgrìobhadh os a cheann, **RIGH NAN IUDHACH.**

27 Agus cheus iad maille ris dà gladiuiche¹; fear air a làimh dheis, agus fear air a làimh chli.

28 An sin choimhlionadh an sgrìobtuir, a thubhairt, Agus bha e air àireamh am measg nan ciontach.

29 Agus thug iadsan a bha dòl seachad anacaint da, a' crathadh an ceann, agus ag ràdh, O thusa a leagas an teampull, agus a thogas e ann an trì làithibh,

30 Fòir ort féin, agus thig² a nuas o'n chrann-cheusaidh.

31 Agus mar an ceudna thubhairt na h-àrd-shagairt agus na sgrìobhaichean r'a chéile, a' fanoid air, Shaor e daoine eile; cha'n 'eil e comasach air e féin a shaoradh.

32 Thigheadh a nis Crìosd Rìgh Israeil a nuas o'n chrann-cheusaidh, chum gu'm faic agus gu'n creid sinn. Agus thug iadsan a chaidh cheusadh maille ris, anacaint da.

33 Agus, an uair a thàinig an seathadh nair, bha dorchadas air an talamh uile, gu ruig an naothadh uair.

34 Agus air an naothadh nair, dh'éigh Iosa le guth àrd, ag ràdh, Eloi, Eloi, lama sabachtani? is e sin, air eadar-theangachadh, Mo Dhia, mo Dhia, c'ar son a thréig thu mi?

35 Agus air cluinntinn sin do chuid diubh-san a bha 'nan seasamh a làthair, thubhairt iad, Feuch, a ta e a' gairm Eliais.

36 Agus ruith fear diubh, agus air dha spòg a lìonadh do fhion geur agus a cur air slait chuille, thug e deoch dha, ag ràdh, Leigibh leis; faiceamaid an tig Elias g'a thoirt a nuas.

37 Agus air do Iosa éigheach le guth àrd, thug e suas an deò.

38 Agus bha brat-roimh an teampuill air a reubadh 'na dhà chuid o mhullach gu ìochdar.

39 Agus an uair a chunnaic an ceannard-ceud, a bha 'na sheasamh fa chomhair, gu'n d'thug e suas an deò, a' glaochaich mar sin, thubhairt e, Gu firinneach b'e 'n duine so Mac Dhé.

40 Agus bha, mar an ceudna, mnà am fad uathla ag amharc: 'nam measg sin bha Muire Magdalen, agus Muire màthair Sileumais bu lugha, agus Ioseis, agus Salome;

41 Muinntir a lean e mar an ceudna, an uair a bha e an Galile, agus a bha frith-ealadh dha; agus mòran eile do mhnàibh a chaidh suas maille ris gu Ierusalem.

42 Agus a nis air teachd do'n fheasgar, (do bhrìgh gu'm b'e là an ullachaidh e, eadhon an là roimh an t-sàbaid,)

43 Thàinig Ioseph o Arimatea, comhairleach urramach, aig an robh, mar an ceudna, sùil ri rìoghachd Dhé, agus chaidh e steach gu dàna dh'ionsuidh Philait, agus dh'iarr e corp Iosa.

44 Agus b'ìoghnadh le Pilat ma bha e cheana marbh: Agus air dha an ceannard-ceud a ghairm, dh'fhiosraich e dheth, An robh fad o fhuir e bàs.

45 Agus air dha fios fhaotainn o'n cheannard-ceud, thug e 'n corp do Ioseph.

46 Agus cheannaich esan lìon-eudach grinn, agus thug e nuas e, agus phaisg e san lìon-eudach e, agus chuir se e ann an uigh³ a chladhaicheadh á carraig, agus charuich e clach gu doras na h-uighe.

47 Agus dh'amhairc Muire Magdalen, agus Muire màthair Ioseis, air an àite san do chuircadh e.

CAIB. XVI.

1 Chuir aingeal an cèil aiseirigh Chriosd do thri mnaibh. 9 Dh'fhoillsichadh Crìosd do Mhuire Magdalen: 12 Chunnas e le dithis a bha dol do'n dùthaich; 14 an dèigh sin leis na h-Abstoil. 15 Chuir e mach iad a shearmonachadh an t-sois-geil.

A GUS air dol do'n t-sàbaid seachad, a cheannaich Muire Magdalen, agus màthair Sheumais, agus Salome, spioraidh deadh fhàile⁴, chum air dhoibh teachd gu'n ungadh iad e.

2 Agus thàinig iad gu ro mhoch air maduinn a' chend là do'n t-seachdain chum na h-uighe, aig éirigh na gréine.

3 Agus thubhairt iad eatorra féin, Cò a charuicheas dhuinn a' chlach o dhorus na h-uighe?

4 (Agus air dhoibh amharc, chunnaic iad gu'n robh a' chlach air a h-atharrachadh air falbh,) oir bha i ro mhòr.

5 Agus air dhoibh dol a stigh do'n àit-adhlaic, chunnaic iad òganach 'na shuidhe

¹ dà chreachadair, dà fhear-reutainn. ² tàr.

³ àit-adhlacaidh. ⁴ luibhean càbhraih th.

air an làimh dheis, uime an robh trusgan fada geal; agus bha eagal orra.

6 Agus thubhairt esan riu, Na biodh eagal oirbh: a ta sibh ag iarraidh Iosa o Nasaret, a cheusadh: dh'éirich e, cha'n 'eil e 'n so: faicibh an t-àit anns an do chuir iad e:

7 Ach imichibh, innsibh d'a dheisciobluibh agus do Pheadar, gu bheil e dol roimhibh do Ghalile: chi sibh an sin e, mar thubhairt e ribh.

8 Agus air dol a mach dhoibh, theich iad o'n uaigh; oir bha ball-chrith agus uamhunn orra: agus cha dubhairt iad ni sam bith ri neach air bith; oir bha eagal orra.

9 Agus air éirigh do Iosa sa' mhaduinn air a' cheud là do'n t-seachdain, nochdadh e air tùs do Mhuire Magdalen, as an do thilg e seachd deamhain.

10 Agus air imeachd dhise, dh'innis i sin dhoibh-san a bha maille ris, agus iad ri bròn agus gul.

11 Agus iadsan, an uair a chual iad gu'n robh e beò, agus gu'm facadh leatha-san e, cha do chreid iad.

12 'Na dhéigh sin, nochdadh e do dhithis diubh ann an cruth eile, ag imeachd dhoibh, agus iad a' dol do'n dùthaich.

13 Agus dh'imich iadsan agus dh'innis

iad e do chàch: agus cha mhiò a chreid iad iadsan.

14 An déigh sin nochdadh e do'n aon fhear deug, agus iad' nan suidhe aig biadh, agus thilg e orra am mi-chreidimh, agus an cruas-cridhe, a chionn nach do chreid iad iadsan a chunnaic e an déigh dha éirigh.

15 Agus thubhairt e riu, Imichibh air feadh an t-saoghail uile, agus searmonaichibh an soisgeul do gach dùil¹.

16 Ge b'e chreideas agus a bhaistear, saorair e, ach ge b'e nach creid, d'itear e.

17 Agus leanaidh na comharan so an dream a chreideas: Ann am ainm-sa tilgidh iad a mach deamhain; labhraidh iad le² teangaibh nuadha;

18 Togaidh iad nathraiche nimhe; agus ma dh'òlas iad ni air bith marbhtach, cha chiùrr e iad; cuiridh iad an làmhan air daoineibh tinne, agus bithidh iad gu maith.

19 Mar sin, an déigh do'n Tighearna labhairt riu, ghabhadh suas gu nèamh e, agus shuidh e air deas làimh Dhé.

20 Agus air dhoibh-san dol a mach, shearmonaich iad anns gach àit, air bhi do'n Tighearn a' co-oibreachadh leo, agus a' daingneachadh an fhocail leis na comharaibh a lean e. Amen.

¹ creutair.

² ann an

AN SOISGEUL

A REIR

L U C A I S.

CAIB. I.

1 Roimh-radh Lucais d'a shoisgeul gu h-ìomlan.
5 Ghabhadh Eoin Baiste am broinn a mhàthar,
26 agus Criosd am broinn Mhuire. 39 Fàidh-eada reachd Elisabet, agus Mhuire mu thimchioll Chrisd. 57 Breith Eoin Bhaiste.

DO bhrìgh gu'n do ghabh mòran os làimh eachdraidh sgrìobhadh ann an ordugh air na nithibh sin a ta air an coimhlionadh¹ 'nar measg-ne,

2 A réir mar a dh'aithris na daoine sin dhuinne iad, a chunnaic iad o thùs le 'n sùilibh, agus a bha 'nan luchd-frithealaidh an fhocail:

3 Chunncas dhomh-sa mar an ceudna, a Theophiluis ro òirdheire, air faotainn dearbh fhios nan uile nithe dhomh o'n fhìor thoiseach, sgrìobhadh a d' ionnsuidh-sa an ordugh,

4 Chum gu'm biodh fios agad air cinnteachd nan nithe anns an deachaidh do theagasg.

¹ le làn dearbhadh air an creidsinn.

5 **B**H A ann an làithibh Heroid rìgh Iudea, sagart àraidh d'am b'ainm Sacharias, do sheal² Abia: agus bha a bhean do nigheanaibh Aaroin, agus b'ainm dhi Elisabet.

6 Agus bha iad le chèile ionraic am fianuis Dé, ag imeachd ann an uile àitheant-aibh agus orduighibh an Tighearna, gu neo-lochdach.

7 Agus cha robh duine cloinne aca, do bhrìgh gu'n robh Elisabet neo-thorrach³, agus bha iad le chèile aos-mhor.

8 Agus tharladh, am feadh a bha esan a' frithealadh mar shagart an làthair Dhé ann an ordugh a sheala,

9 A réir gnàtha na sagartachd, b'e a chrannchur tùis a losgadh, air dha dol a steach do theampull an Tighearn.

10 Agus bha coimhthional an t-sluaigh uile a' deanamh urnuigh a muigh, ri àm na tùise.

11 Agus chunncas leis-san aingeal an

² chùrsa, roinn.

³ gun slìochd.

Tighearna 'na sheasamh air taobh deas altarach na tùise.

12 Agus an uair a chunnaic Sacharias e, bha e fo thrioblaid, agus thuirt eagal air.

13 Ach thubhairt an t-aingeal ris, Na gabh eagal, a Shachariais; oir fluair t'urnuigh éisdeachd, agus beiridh do bhean Elisabet mac dhuìt, agus bheir thu Eoin mar ainm air.

14 Agus bithidh aoihbneas agus subhachas ort; agus nì mòran gairdeachas r'a bhreith.

15 Oir bithidh e mòr an làthair an Tighearn, agus cha'n òl e fion no deoch làidir; agus bithidh e air a lìonadh leis an Spiorad naomh, eadhon o bhroinn a mhàthar.

16 Agus pillidh e mòran do chloimn Israeil chum an Tighearn an Dé.

17 Agus thèid e roimhe-san ann an spiorad agus ann an cumhachd Eliais, a thionndadh cridhe nan aithriche chum na cloinne, agus uan eas-umhal gu gliocas nam firean, a dh'ulluchadh pobuill deas do'n Tighearn.

18 Agus thubhairt Sacharias ris an aingeal, Cionnus a bhios fhios so agam? oir is seann duine mise, agus a ta mo bhean aos-mhor.

19 Agus fhreagair an t-aingeal agus thubhairt e ris, Is mise Gabriel a sheasas an làthair Dhé; agus chuireadh mi a labhairt riut-sa, agus a dh'inneadh an naidheachd¹ mhaith so dhuìt.

20 Agus, feuch, bithidh tu balbh agus gun chomas labhairt, gus an là anns aig tig na nithe so gu crìch, a chionn nach do chreid thu mo bhriathra-sa, a bhitheas air an coimhlionadh 'nan àm féin.

21 Agus bha am pobull a' feitheamh ri Sacharias, agus b'iongantach leo a' mhoille a rinn e san teampull.

22 Agus an uair a thàinig e mach, cha b'urraim e labhairt riut: agus thuig iad gu'm fac e sealladh² *nèamhaidh* san teampull: oir bha e smèideadh orra, agus dh'fhan e 'ua thosd.

23 Agus tharladh, an uair a chloimhlionadh làithean a fhrithealaidh, gu'n deachaidh e d'a thigh féin.

24 Agus an déigh nan làithean sin dh'fhàs a bhean Elisabet torrach, agus dh'fhòlaich si i féin rè chùig mìosan, ag ràdh,

25 Is ann mar so a rinn an Tighearna dhomh anns na làithibh air an d'amhairc e orm, a thogail diom mo mhaslaidh am measg dhaoine.

26 Agus anns an t-seathadh mìos, chuireadh an t-aingeal Gabriel o Dhia, gu caithir do Ghalilé, d'am b'ainm Nasaret,

27 Dh'ionnsuidh òigh a bha fo cheangal pòsaidh aig fear d'am b'ainm Ioseph, do

thigh Dhaibhidh; agus b'e ainm na h-òigh Muire.

28 Agus air dol a steach do'n aingeal d'a h-ionnsuidh, thubhairt e, Fàilte dhuìt, o thusa d'an do nochdadh mòr dheadh-ghean, *a ta* an Tighearna maille riut: is beannaichte thu am measg bhan.

29 Agus an uair a chunnaic i e, bha i fo thrioblaid inntinn air son a chainnte, agus a' reusonachadh ciod a' ghnè altachabha dh'fheadadh bhi 'n so.

30 Agus thubhairt an t-aingeal rithe, Na biodh eagal ort, a Mhuire: oir fluair thu deadh-ghean o Dhia.

31 Agus, feuch, gabhaidh tu a'd' bhroinn, agus beiridh tu mac, agus bheir thu Iosa mar ainm air.

32 Bithidh e mòr, agus goirear Mac an Ti a's ro àirde dheth; agus bheir an Tighearna Dia dha rìgh-chaithir athar féin Dhaibhidh.

33 Agus bithidh e 'na Rìgh air tigh Iacoib gu bràth, agus cha bhi crìoch air a rìoghachd.

34 Agus thubhairt Muire ris an aingeal, Cionnus a bhitheas so, do bhrìgh nach 'eil aithne agam-sa air duine?

35 Agus fhreagair an t-aingeal agus thubhairt e rithe, Thig an Spiorad naomh ort, agus cuiridh cumhachd an Ti a's àirde sgàil ort: uime sin an nì naomh sin a bheirear leat, goirear Mac Dé dheth.

36 Agus, feuch, do bhan-charaid Elisabet, a ta ise féin torrach air mac 'na sean aois; agus is e so an seathadh mìos dhise d'an goitheadh bean neo-thorrach;

37 Oir clia 'n'eil nì sam bith do-dheanta do Dhia.

38 Agus thubhairt Muire, Feuch banoglach an Tighearna; biodh e dhomh-sa a réir t'fhocail. Agus dh'fhalbh an t-aingeal uaipe³.

39 Agus air éirigh do Mhuire sna làithibh sin, chaidh i le cabhaig do dhùthaich nam beann, gu baile do Iuda,

40 Agus chaidh i steach do thigh Shachariais, agus chuir i fàilte air Elisabet.

41 Agus tharladh, an uair a chual Elisabet beannachadh Mhuire, gu'n do leum an naoidhean 'na broinn: agus lìonadh Elisabet leis an Spiorad naomh.

42 Agus ghlaodh i mach le guth àrd, agus thubhairt i, Is beannaichte thu am measg bhan, agus is beannaichte toradh do bhroinn.

43 Agus cionnus *a dh'èirich* so dhomh-sa, gu'n tigeadh màthair mo Thighearn a m' ionnsuidh?

44 Oir feuch, co luath as a thàinig fuaim do bheannachaidh a'm' chluasaibh, bhriosg an naoidhean le h-aoibhneas ann mo bhroinn.

¹ nuaidheachd, noimheachd.

² taisbean.

³ uaithe.

45 Agus is beannaichte isè a chreid: oir coimhlionar¹ na nithe a labhradh rithe leis an Tighearn.

46 Agus thubhairt Muire, A ta m'anam ag àrd-inholadh an Tighearn,

47 Agus a ta mo spiorad a' deanamh gairdeachais ann an Dia mo Shlànuigh-eair:

48 Do bhrìgh gu'n d'amhairc e air staid ìosal a bhanoglaich: oir feuch, o so suas goiridh gach linn beannaichte dhìom.

49 Do bhrìgh gu'n d'rinn an Ti a ta cumhachdach nithe mòra dhomh; agus is naomh 'ainm.

50 Agus a ta thròcair-san o linn gu linn, do'n dream d'an eagal e.

51 Nochd e neart le 'ghairdean, sgap e na h-uairbhich ann an smuaintibh an cridhe féin.

52 Thug e nuas na daoine cumhachdach o'n caithrichibh rìoghail, agus dh'àrdaich e iadsan a bha ìosal.

53 Lìon e 'n dream a bha ocrach le nithibh maithe; agus chuir e uaith na daoine saobhair falamh.

54 Rinn e còmhnaidh² ri Israel òglach féin, ann an cuimhneachadh a thròcair:

55 Mar a labhair e r'ar n-aithrichibh, do Abraham agus d'a shliochd gu bràth.

56 Agus dh'fhan Muire maille rithe mu thimchioll trì mìosan, agus phill i d'a tigh féin.

57 A nis thàinig làn inbhe Elisabet, gu'm biodh i air a h-aisead; agus rug i mac.

58 Agus chual a coimhearsnaich agus a càirdean mar a nochd an Tighearna mòr-thròcair dhi: agus rinn iad gairdeachas maille rithe.

59 Agus tharladh air an ochdamh là gu'n d'thàinig iad a thimchioll-ghearradh an naoidhein: agus ghairm iad Sacharias deth, a réir ainme 'athar.

60 Agus fhreagair a mhàthair, agus thubhairt i, Nì h-eadh; ach goirear Eoin deth.

61 Agus thubhairt iad rithe, Cha'n 'eil aon neach do d' chàirdibh d' an gairmear an t-ainm so.

62 Agus smèid iad air 'athair, ciod an t-ainm a b'àill leis thoirt air.

63 Agus air iarraidh clàir-sgrìobhaidh dhasan, sgrìobh e, ag ràdh, Is e Eoin is ainm dha. Agus ghabh iad iongantas uile.

64 Agus air ball dh'fhosgladh a bheul, agus dh'fhuasgladh a theangadh, agus labhair e, a' moladh Dhé.

65 Agus thàinig eagal air an coimhearsnaich uile: agus dh'aithriseadh na nithe sin gu léir feadh dlùthaich àrd Iudea uile.

66 Agus iadsan uile a chuala na nithe

sin, thaisg iad 'nan cridhe iad, ag ràdh, Ciod a' ghnè leinibh a blùtheas an so? Agus bha làmh an Tighearna maille ris.

67 Agus bha Sacharias 'athair air a lìonadh leis an Spiorad naomh, agus rinn e fàidheadaireachd, ag ràdh,

68 Gu ma beannaichte an Tighearna Dia Israeil, air son gu'n d'fhiosraich e, agus gu'n d'thug e saorsa d'a phobull,

69 Agus gu'n do tliog e suas dhuinne adharc slàinte, ann an tigh Dhaibhidh òglaich féin;

70 A réir mar a labhair e le beul 'fhàidhean naomha féin, a bha ann o thoiseach an t-saoghail;

71 A thoirt saorsa dhuinn o ar naimhdebh, agus o làimh na muinntir sin uile le'm fuathach sinn:

72 A choimhlionadh na tròcair a gheall e d'ar n-aithrichibh, agus a chuimhneachadh a choimhcheangail naoimh féin:

73 Na mionnan a mhionnaich e d'ar n-athair Abraham,

74 Gu'n tugadh e dhuinn, air dhuinn bli air ar saoradh o làimh ar naimhde, gu'n deanamaid seirbhis dha as eugmhais eagail.

75 Ann an naomhachd agus ann am fireantachd 'na làthair féin, uile làithean ar beatha.

76 Agus thusa, a leinibh, goirear dhìot Fàidh an Ti a's àirde: oir théid thu roimh aghaidh an Tighearn, a dh'ulluchadh a shlighe;

77 A thoirt eòlais na slàinte d'a phobull, ann am maitheanas am peacanna,

78 Troimh thròcair ro mhòir ar Dé-ne, leis an d'fhiosraich an ùr-mhaduinn o'n ionad a's àirde sinn,

79 A thoirt soluis dhoibhsan a ta 'nan suidhe ann an sgàil a' bhàis, a threòrachadh ar cos air slighe na sìthe.

80 Agus dh'fhàs an leanabh, agus neartaicheadh an spiorad e, agus bha e san fhàsach gu là 'fhoillseachaidh do Israel.

CAIB. II.

1 Mheas Augustus Impireachd nan Romanach uile.

6 Breith Chrìosd: 8 chuir aingeal so an cèill do na buachaillibh: 13 thug mòran diubh clùd do Dhia air a shon. 21 Tha Crìosd air a thimchioll-ghearradh.

A GUS tharladh sna làithibh sin, gu'n deachaidh ordugh a mach o Cheasar Augustus, an domhan uile a mheas³.

2 (Agus rinneadh an ceud mheas so 'nuair a bha Cirenus 'na uachdaran air Siria.)

3 Agus chaidh iad uile chum a bhi air am meas, gach aon fa leth d'a bhaile féin.

4 Agus chaidh Ioseph mar an ceudna suas o Ghalile, à baile Nasaret, do Iudea, gu baile Dhaibhidh, d'au gairmear Bet-

¹ a chréid gu'n coimhlionar. ² congnamh. Eir.

³ an impireachd uile a sgrìobhadh an cìs-chlàr.

leilem (do bhrìgh gu'n robh e do thigh agus do shliochd Dhaibhidh.)

5 Chum gu biodh e air a mheas maille ri Muire a bha fo cheangal pòsaidh dha, agus i mòr-thorrach.

6 Agus tharladh, am feadh a bha iad an sin, gu'n do choimhlionadh làithean a h-inbhe, chum i bhi air a h-aisead.

7 Agus rug i a ceud-ghin mic, agus phaisg i e am brat-speilidh, agus chuir i na luidhe am prasaich e; do bhrìgh nach robh àit aca san tigh-òsda.

8 Agus bha anns an dùthaich sin buachailllean a' fantuinn a muigh, agus a' deanamh faire-oidheche air an treud.

9 Agus, feuch, thàinig aingeal an Tighearna orra, agus dhealraich glòir an Tighearna mu'n timchioll; agus ghabh iad eagal mòr.

10 Agus thubhairt an t-aingeal riu, Na biodh eagal oirbh: oir feuch, a ta mi ag innseadh dhuibh deadh sgéil mhòr-aoibhneis, a bhitheas do'n uile shluagh:

11 Oir rugadh dhuibh an diugh Slànuigh-e, ann am baile Dhaibhidh¹, neach a's e Crìosd an Tighearna.

12 Agus bithidh so 'na chomhara dhuibh: Gheibh sibh an naoidhean paisgte ann am brat-speilidh, 'na luidhe am prasaich.

13 Agus air ball bha maille ris an aingeal cuideachd mhòr do armailltibh nèimh, a' moladh Dhé, agus ag ràdh,

14 Glòir do Dhia anns na h-àrdaibh, agus air talamh sìth, deadh-ghean do dhaoinibh.

15 Agus tharladh, 'nuair a dh'fhalbh na h-aingil uatha do nèamh, gu'n dubhairt na buachailllean r'a chèile, Rachamaid a nis eadhon do Bhet-lehem, agus faicamaid an ni so a rinneadh, a dh'fhoillsich an Tighearna dhuinne.

16 Agus thàinig iad gu grad, agus fhuair iad Muire agus Ioseph, agus an leanabh 'na luidhe sa' phrasaich.

17 Agus an uair a chunnaic iad sin, dh'aithris iad an ni a dh'innseadh dhoibh mu thimchioll an leinibh so.

18 Agus ghabh gach neach a chuala so, iongantais ris na nithibh sin a dh'innseadh dhoibh leis na buachaillibh.

19 Ach gliléidh Muire na nithe sin uile, a' beachd-smuaineachadh orra² 'na cridhe.

20 Agus phill na buachailllean, a' tabhairt glòire agus molaidd do Dhia air son nan nithe sin uile a chual agus a chunnaic iad, a réir mar a labhradh riu.

21 Agus an uair a choimhlionadh ochd làithean chum an leanabh a thimchiollghearradh, thugadh IOSA mar ainm air, eadhon au t-ainm a ghairm an t-aingeal deth mu'n do ghabhadh sa' bhroinn e.

22 Agus an uair a choimhlionadh làithean a³ glanaidh, a réir lagha Mhaois, thug iad esan gu Ierusalem, chum a thaisbeanadh do'n Tighearna;

23 (Mar a ta e sgriobhta ann an lagh an Tighearna, Gach ceud-ghin mica dh'fhosgla a' bhrù, gairmear naomh do'n Tighearna e;)

24 Agus a thoirt ìobairt a réir mar a theirear ann an lagh an Tighearna, dà⁴ thurtur, no dà choluman òg.

25 Agus, feuch, bha duine ann an Ierusalem d'am b'ainm Simeon; agus bha 'n duine so ionraic agus diadhaidh, agus bha dùil aige ri sòlas Israeil: agus bha 'n Spiorad naomh air.

26 Agus dh'fhoillsicheadh dha leis an Spiorad naomh, nach faicadh e bàs, gus am faicadh e Crìosd an Tighearna.

27 Agus thàinig e le treòrachadh an Spioraid do'n teampull: Agus an uair a thug na pàrantan an leanabh Iosa a stigh, chum gu'n deanadh iad air a shon a réir gnàthachaidh an lagha,

28 An sin ghlac esan 'na uchd⁵ e, agus bheannaich e Dia, agus thubhairt e,

29 A nis, a Thighearna, a ta thu leigeadh do d' sheirbhiseach siubhal an sìth, a réir t'fhocail;

30 Oir chunnaic mo shùilean do shlàinte,

31 A dh'ulluich thu roimh ghnùis nan uile shluagh:

32 Solus a shoillseachadh nan Cinneach, agus glòir do phobuill Israeil.

33 Agus ghabh Ioseph agus a mhàthair iongantais mu na nithibh a labhradh uime.

34 Agus bheannaich Simeon iad, agus thubhairt e ri Muire a mhàthair, Feuch, chuireadh an *leanabh* so chum tuiteam agus aiseirigh mhòran ann an Israel, agus 'na chomhar' an aghaidh an labhrar:

35 (Agus théid claidheamh troimh d'anam-sa féin,) chum gu'm foillsichear smuainte cridheacha mhòran.

36 Agus bha Anna ban-fhaidh, nighean Phanueil, do thréibh Aseir; *bha* i ro aosmhor, agus chaith i seachd bliadhna maille ri fear o àm dhi bhi 'na h-òigh:

37 Agus bu bhantrach i mu thimchioll ceithir bliadhna agus ceithir fichead a dh'aois, nach deachaidh o'n teampull, a' deanamh seirbhis do *Dhia* a là agus a dh'oidliche le trasgadh agus le h-urnuigh.

38 Agus air teachd dhise a stigh san uair sin féin, thug i moladh do'n Tighearna, agus labhair i m'a thimchioll rìusan uile aig an robh sùil ri saorsa ann an Ierusalem.

39 Agus an uair a choimhlion iad na h-uile nithe a réir lagha an Tighearna, phill iad do Ghalile, d'am baile féin Nasaret.

¹ an caithir Dhaibhidh.

² gan tomhas. Gr.

³ an.

⁴ Càraid, Paidhir.

⁵ air a ghairdeinibh.

40 Agus dh'fhàs an leanabh, agus neartaicheadh an spiorad e, air a lìonadh le gliocas; agus bha gràsa Dhé air.

41 Agus chaidh a phàranta gach bliadhna gu Ierusalem, aig féill na càisge.

42 Agus 'nuair a bha e dà bhliadhna dheug a dh'aois, chaidh iad suas gu Ierusalem; agus cha robh fios aig Ioseph no aig a mhàthair air sin.

43 Agus air coimhlionadh nan làithean sin doibh, 'nuair a phill iadsan, dh'fhan an leanabh Iosa 'nan déigh ann an Ierusalem; agus cha robh fios aig Ioseph no aig a mhàthair air sin.

44 Ach air dhoibh a shaoilsinn gu'n robh e sa' chuideachd, dh'imich iad astar là; agus dh'farr iad e measg an càirdean, agus an luchd-eòlais.

45 Agus an uair nach d'fhuair iad e, phill iad gu Ierusalem, 'ga iarraidh.

46 Agus tharladh an déigh thri làithean, gu'n d'fhuair iad e san teampull, 'na shuidhe am meadhon an luchd-teagaisg, araon 'gan éisdeachd, agus a' cur cheisd orra.

47 Agus ghabh a' mhuinntir a chual e uile iongantais r'a thuigse agus r'a fhreagairbh.

48 Agus an uair a chunnaic iad e, ghlac uamhas iad: agus thubhairt a mhàthair ris, A mhic, c'ar son a rinn thu mar so oirn? feuch, bha t'athair agus mise gu brònach ga d'iarraidh.

49 Agus thubhairt esan riu, C'ar son a bha sibh ga m' iarraidh? nach robh fhios agaibh gu'm bu chòir dhomh-sa bhi ann an tigh m'Athar¹?

50 Agus cha do thuig iadsan an ni a labhair e riu.

51 Agus chaidh e sìos maille riu, agus thàinig e gu Nasaret, agus bha e ùmhal doibh: ach ghléidh a mhàthair na nithe sin uile 'na cridhe.

52 Agus thàinig Iosa air aghaidh ann an gliocas agus am meudachd, agus ann an deadh-ghean aig Dia, agus aig daoineibh.

CAIB. III.

1 Searmonachadh Eoin Bhaiste. 15 'Fhianuis mu thimchioll Chrìosd. 20 Chuir Herod Eoin am prìosan. 21 Bhaisteadh Chrìosd, agus fhuair e fianuis o nèamh. 23 Aois agus sinnsireachd Chrìosd.

ANIS anns a' chùigeadh bliadhna deug a do impireachd Thiberiuis Cheasair, air bhi do Phontius Pilat 'na uachdaran air Iudea, agus Herod 'na Thetrarc air Galile, agus Philip a bhràthair 'na Thetrarc air Iturea agus dùthaich Thrachonitis, agus Lisanias 'na Thetrarc air Abilene.

2 An uair a bha Annas agus Caiaphas 'nan àrd-shagartaibh, thàinig focal Dé chum Eoin, mhic Shachariais, anns an fhàsach.

3 Agus thàinig e do'n dùthaich uile timchioll Iordain, a' searmonachadh baistidh an aithreachais, chum maithheanais pheacanna;

4 Mar a ta e sgrìobhta ann an leabhar bhriathra an fhàidh Esaiais, ag ràdh, Guth an ti a dh'éigheas anns an fhàsach, Ulluchibh slighe an Tighearna, deanaibh a cheumanna dìreach.

5 Bithidh gach gleann air a lìonadh, agus gach beinn agus cnoc air an ìsleachadh; agus bithidh na nithe cama air an deanamh dìreach, agus na slighean garbha air an deanamh rèidh;

6 Agus chì gach uile fheoil slàinte Dhé.

7 Uime sin thubhairt e ris an t-sluagh a thàinig a mach chum bhi air am baisteadh leis, A shìl nan nathraiche nimhe, cò thug rabhadh dhuibh-sa teicheadh o'u fheing a ta ri teachd?

8 Air an aobhar sin thugaibh a mach toradh iomchuidh an aithreachais, agus na tòisichibh air a ràdh annaibh féin, A ta Abraham 'na Athair againn: oir a ta mi ag ràdh ribh, gur comasach Dia do na clachaibh so air clann a thogail suas do Abraham.

9 Agus a nis féin a ta an tuagh air a' cur ri bun nan craobh: air an aobhar sin gach craobh nach toir a mach toradh maith, gearrar sìos i, agus tilgear san teine i.

10 Agus dh'fhiosraich an sluagh dheth, ag ràdh, Ciod uime sin a ni sinne?

11 Agus fhreagair esan agus thubhairt e riu, An ti aig am bheil dà chòta, roinneadh e ris an ti aig nach 'eil; agus an ti aig am bheil biadh, deanadh e mar an ceudna.

12 Agus thàinig mar an ceudna cismhaoir gu bhi air am baisteadh, agus thubhairt iad ris, A mhaighstir, ciod a ni sinne?

13 Agus thubhairt esan riu, Na dean-aibh² ni air bith os ceann na dh'orduich-eadh dhuibh.

14 Agus dh'fhiosraich na saighdearan mar an ceudna dheth, ag ràdh, Agus ciod a ni sinne? Agus thubhairt e riu, Na deanaibh fòirmeart air neach sam bith, no casaidh-blhréige, agus bithibh toilichte le 'ur tuarsadal.

15 Agus air bhi do'n phobull a' feith-eamh, agus na h-uile dhaoine a' reusonachadh 'nan cridheachaibh féin mu thimchioll Eoin, am b'e Chrìosd a bh'ann;

16 Fhreagair Eoin, ag ràdh riu uile, Tha mise gu dearbh 'gur baisteadh le h-uisc; ach a ta neach a' teachd a's cumhachdaiche na mise, agus cha'n airidh mise air barr-iall a blhròg fhuasgladh: baistidh esan sibh leis an Spiorad naomh, agus le teine.

¹ mu ghnòthuichibh m'Athar.

² togaibh.

LUCAS, III. IV.

17 Aig am bheil 'a ghuit¹ 'na làimh, agus ro ghlanaidh e 'ùrlar, agus cruinn-ichidh e an cruithneachd d'a thigh-tasgaidh; ach loisgidh e am moll le teine nach fheadar a mhùchadh.

18 Agus ag earalachadh mòran do nithibh eile, shearmonaich e do'n t-sluagh.

19 Ach air do Herod an Tetrarc bhi air a chronachadh leis air son Herodiais bean a bhràthar (Philip,) agus air son gach olc a rinn Herod.

20 Chuir e so ris gach olc eile, gu'n do dhruid e Eoin ann prìosan.

21 Agus tharladh, 'nuair a bha 'n sluagh uile air am baisteadh, air do Iosa mar an ceudna bhi air a bhaisteadh; agus e ri ùrnuigh, gu'n d'fhosgladh nèamh,

22 Agus gu'n d'thàinig an Spiorad naomh a nuas air an coslas corporra, mar cholum-an, agus gu'n d'thàinig guth o nèamh, ag ràdh, Is tusa mo Mhac gràdhach, anns am bheil mo mhòr-thlachd².

23 Agus thòisich Iosa féin air a bhi mu thimchioll deich bliadhna fichead a dh'aois, air dha bhi, (a réir barail *dhaoiné*,) 'na mhac do Ioseph, *mac Heli*,

24 *Mhic Mhatait, mhic Lebhi, mhic Mhelchi, mhic Ianna, mhic Ioseph,*

25 *Mhic Mhatatais, mhic Amois, mhic Nauim, mhic Esli, mhic Nage,*

26 *Mhic Mhaait, mhic Mhatatais, mhic Shemei, mhic Ioseph, mhic Iudah,*

27 *Mhic Ioanna, mhic Rhesa, mhic Shorabail, mhic Shalatieil, mhic Neri,*

28 *Mhic Mhelchi, mhic Adi, mhic Chosaim, mhic Elmodaim, mhic Eir,*

29 *Mhic Iose, mhic Elieseir, mhic Ioreim, mhic Mhatait, mhic Lebhi,*

30 *Mhic Shimeoin, mhic Iudah, mhic Ioseph, mhic Ionain, mhic Eliacim,*

31 *Mhic Mhelea, mhic Mhainain, mhic Mhatata, mhic Natain, mhic Dhaibhidh,*

32 *Mhic Iese, mhic Obeid, mhic Bhoos, mhic Shalmoin, mhic Naasoin,*

33 *Mhic Aminadaib, mhic Araim, mhic Esroim, mhic Phareis, mhic Iudah,*

34 *Mhic Iacoib, mhic Isaac, mhic Abraham, mhic Thara, mhic Nachoir,*

35 *Mhic Sharuich, mhic Ragau, mhic Phaleic, mhic Ebeir, mhic Shala,*

36 *Mhic Chainain, mhic Arphacsaid, mhic Shem, mhic Noe, mhic Lameich,*

37 *Mhic Mhatusala, mhic Enoich, mhic Iareid, mhic Mhaleleil, mhic Chainain,*

38 *Mhic Enois, mhic Shet, mhic Adhaimh, mhic Dhé.*

CAIB. IV.

1 *Buaireadh agus trasgadh Chrìosd: 13 Thug e buaidh air an diabhul; 14 thòisich e ri searmonachadh. 16 Ghabh pobul Nasaret iongantais r'a fhoclaibh gràsmhor. 33 Leighis e an duine san robh deamhán, 38 agus màthair-chéile Pheadair, &c.*

AGUS air do Iosa bhi làn do'n Spiorad naomh, phill e air ais o Iordan, agus threòraicheadh e leis an Spiorad do'n fhàsach,

2 Agus bha e air a bhuaireadh rè dhà fhichead là leis an diabhul; agus cha d'ith e ni sam bith anns na làithibh sin: agus air dhoibh bhi air an crìochnachadh, an sin dh'fhàs e ocrach.

3 Agus thubhairt an diabhul ris, Ma's tu Mac Dhé, abair ris a' chloich so bhi 'na h-aran.

4 Agus fhreagair Iosa e, ag ràdh, A ta e sgriobhta, nach ann le h-aran a mhàin a thig duine beò, ach le gach uile fhocal Dé.

5 Agus air do'n diabhul a thoirt gu beinn àrd, nochd e dha uile rìoghachdan an domhain ann am mionaid aimsir.

6 Agus thubhairt an diabhul ris, Bheir mise an cumhachd so uile dhuit, agus an glòir; oir thugadh dhomh-sa sin; agus bheir mi e do neach air bith a's toil leam.

7 Uime sin ma ni thu aoradh dhomh-sa, is leat iad uile.

8 Agus fhreagair Iosa agus thubhairt e ris, Tar air mo chùlaobh, a Shatain: oir a ta e sgriobhta, Ni thu aoradh do'n Tigh-earn do Dhia, agus dhàsan 'na aonar ni thu seirbhis.

9 Agus thug se e gu Ierusalem, agus chuir e air binnein an teampuill e, agus thubhairt e ris, Ma's tu Mac Dhé, tilg thu féin sìos á so.

10 Oir a ta e sgriobhta, Bheir e àithne d'a ainglibh mu d' thimchioll, thusa a choimhead.

11 Agus togaidh iad suas thu 'nan làmhaibh, air eagal gu'm buail thu, uair air bith, do chos air cloich.

12 Agus air freagairt do Iosa thubhairt e ris, A dubhradh, Na buair³ thusa an Tighearna do Dhia.

13 Agus an uair a chrìochnaich an diabhul am buaireadh uile, dh'imich e uaith rè tamuill.

14 Agus phill Iosa ann an cumhachd an Spioraid chum Ghalile; agus chaidh 'iomradh-san air feadh na dùthcha mu'n cuairt gu h-iomlan.

15 Agus theagaisg e 'nan sionagogaibh, a' faotainn glòire o na h-uile dhaoinibh.

16 Agus thàinig e gu Nasaret, far an d'àraicheadh e: agus chaidh e steach, mar bu ghnàth leis, air là na sàbaid do'n t-sionagag, agus dh'éirich e 'na sheasamh chum leughaidh.

17 Agus thugadh dha leabhar an fhàidh Esaias; agus air fosgladh an leabhair dha, fhuair e an t-àit anns an robh e sgriobhta,

18 Tha Spiorad an Tighearn orm, do

¹ inneà-'fasgnaidh. ² annadsa tha mi làn-toilichte.

³ Na dearbh.

bhrìgh gu'n d'ung e mi a shearmonachadh an t-soisgeil do na bochdaibh; chuir e mi a shlànuchadh na muinntir aig am bheil an cridhe briste, a ghairm¹ fuasglaidh do na braighdibh, agus aiseag an radhaire do na doill², a thoirt saorsa do'n mhuinntir a ta brùite,

19 A shearmonachadh bliadhna thaitnich an Tighearn.

20 Agus air dùnadh an leabhair dha, thug e do'n fhear-frithéalaidh e, agus shuidh e: agus bha sùilean na bha san t-sionagag uile a' geur-amharc airsan.

21 Agus thòisich e air a ràdh riu, An diugh a ta an sgrìobtur so air a choimhlionadh ann bhur cluasaibh-sa.

22 Agus thug iad uile fianuis da, agus ghabh iad iongantais ris na briathraibh gràsmhor a thàinig a mach as a bheul. Agus thubhairt iad, Nach e so mac Ioseph?

23 Agus thubhairt e riu, Gun amharus thubhairt sibh rium an gnàth-fhocal so, A leigh, leighis thu féin: ge b'e air bith iad na nithe a chuala sinn a rinneadh *leat* an Capernaum, dean mar an ceudna iad an so a'd' dhùthaich féin.

24 Agus thubhairt e, Gu deimhin a ta mi ag ràdh ribh, nach 'eil fàidh air bith taitneach 'na dhùthaich féin.

25 Ach gu firinneach a ta mise ag ràdh ribh, gu'n robh mòran bhantrach ann an Israel an làithibh Eliais, an uair a dhruid-eadh nèamh rè thri bliadhna agus shè miosan, agus a bha gorta mhòr air feadh na tìre uile.

26 Ach cha do chuireadh Elias dh'ionnsuidh aoin diubh, ach gu Sarepta Shidoìn, chum mnà a bha 'na bantrach.

27 Agus bha mòran lobhar ann an Israel ri linn Eliseuis an fhàidh; agus cha do ghlanadh a h-aon aca, ach Naaman an Sirianach.

28 Agus lìonadh iadsan uile a bha san t-sionagag le feirg, an uair a chual iad na nithe sin;

29 Agus dh'érich iad suas, agus thilg iad a mach as a' bhaile e, agus thug iad leo e gu maluidh a' chnoic³, air an robh am baile togtà, chum a thilgeadh sìos an coinneamh a chinn.

30 Ach air gabhail dhasan troimh am meadhon dh'fhalbh e,

31 Agus chaidh e sìos gu Capernaum, baile do Ghalile, agus bha e 'gan teagasg air làithibh na sàbaid:

32 Agus ghabh iad iongantais r'a theagasg; do bhrìgh gu'n robh 'fhocal le cumhachd.

33 Agus bha anns an t-sionagag duine anns an robh spiorad deamhain neòghloin, agus ghlaodh e le guth mòr,

34 Ag ràdh, Leig leinn; ciod e ar gnothuch-ne riut, Iosa o Nasaret? an d'thàinig thu g'ar sgrìos? a ta fhios agam cò thu, Aon naomh Dhé.

35 Agus chronuich Iosa e, ag ràdh, Bi a'd' thosd, agus thig a mach as. Agus air do'n deamhan esan a thilgeadh sìos 'nam meadhon, thàinig e mach as, gun chiurradh sam bith a dheanamh air.

36 Agus thàinig uamhas orra uile, agus labhair iad r'a chéile, ag ràdh, Ciod a' ghnè cainnte so? oir le h-ùghdarras agus cumhachd a ta e toirt orduigh do na spioradaibh neòghlan, agus tha iad a' teachd a mach.

37 Agus chaidh iomradh airsan a mach feadh gach àite do'n dùthaich mu'n cuairt.

38 Agus dh'érich e as an t-sionagag, agus chaidh e steach do thigh Shimoìn: agus bha fiabhrus mòr air màthair-chéile Shimoìn; agus ghuidh iad air as a leth.

39 Agus air dha seasamh os a ceann⁴, caronuich e am fiabhrus, agus dh'fhàg e i. Agus dh'érich ias air ball, agus rinn i frithéaladh dhoibh.

40 Agus ag dol fuidhlc na gréine, iadsan uile aig an robh daoine euslan le iomadh gnè tinnis, thug iad d'a ionnsuidh iad: agus chuir esan a làmhan air gach aon diubh, agus leighis e iad.

41 Agus chaidh mar an ceudna deamhain a mach á mòran, a' glaothaich agus ag ràdh, Is tu Crìosd Mac Dhé. Agus chronuich e iad, agus cha d'fhulaing e dhoibh labhairt: oir bha fhios aca gu'm b' esan Crìosd.

42 Agus air teachd do'n là, chaidh e mach, agus dh'imich e gu àite fàsail: agus bha'n sluagh 'ga iarraidh, agus thàinig iad d'a ionnsuidh, agus b'àill leo a chumail, chum nach rachadh e uatha.

43 Ach thubhairt esan riu, Is éigin dhomh-sa rioghachd Dhé a shearmonachadh do bhailtibh eile mar an ceudna; oir is ann chum so a chuireadh mi.

44 Agus shearmonaich e ann an sionagogaibh Ghalile,

CAIB. V.

1 *Theagaisg Crìosd an sluagh á luìng Pheadair; 4 le tarraing mhìorbhuileach éisg nochd e cionnus a bha e gu Peadar agus a chompanaich a dheanamh 'nan iasgairibh air daoineibh: 12 ghlàn e neach a bha 'na lobhar, &c.*

AGUS tharladh, 'nuair a bha am pobull a' dlùth-theannadh air, chum focal Dé éisdeachd, gu'n do sheas e làimh ri loch Ghenesaret,

2 Agus chunnaic e dà luìng⁵ 'nan seasamh ri taobh an locha: ach bha na li-iasg-airean air dol a mach asda, agus a' nigh-eadh an lonta.

3 Agus chaidh e steach do aon do na

¹ a shearmonachadh.

² dallaibh.

³ beul-bhruach a' chnoic.

⁴ làimh rìthe.

⁵ bharc.

longaibh bu le Simon, agus dh'iarr e air dol a mach beagan o thir: agus air suidhe dha, theagaisg e an sluagh as an luing.

4 A nis an uair a sguir e do labhairt, thubhairt e ri Simon, Cuir a mach chum na doimhne, agus leigibh sìos bhur lìonta clum tarruing.

5 Agus fhreagair Simon, agus thubhairt e ris, A mhaighstir, shaothraich sinn feadh na h-oidhche uile, agus cha do ghlac sinn nì sam bith: ach air t'fhocal-sa leigidh mi sìos an lìon.

6 Agus an uair a riun iad so, chluairtich iad tachdar¹ mòr éisg; ionnus gu'n do bhriseadh an lìon.

7 Agus sméid iad air an companaich, a bha san luing eile, teachd agus còmhnaidh a dheanamh leo. Agus thàinig iad, agus lìon iad an dà luing, ionnus gu'n robh iad an ìmhe dol fuidhe.

8 Nuair a chunnaic Simon Peadar so thuit e sìos aig glùinibh Iosa, ag ràdh, Imich uam-sa, a Thighearn, oir is duine peacach mi.

9 Oir ghlac uamhas e féin agus iadsan uile bha maille ris, air son an tarruing éisg a ghlac iad:

10 Agus mar an ceudna Seumas agus Eoin, mic Shebede, a bha 'nan companaich aig Simon. Agus thubhairt Iosa ri Simon, Na biodh eagal ort; á so suas glacaidh tu daoine.

11 Agus an uair a thug iad an longa gu tìr, dh'fhàg iad na h-uile nithe, agus lean iad esan.

12 Agus an uair a bha esan ann am baile àraidh, feuch duine làn do luibhre: agus air dha Iosa fhaicinn, thuit e sìos air 'aghaidh, agus ghluidh e air, ag ràdh, A Thighearn, ma's toil leat, tha thu comasach air mise a ghlanadh.

13 Agus shìn e a làmh, agus bhean e ris, ag ràdh, Is toil leam; bi glan. Agus air ball dh'fhàg an luibhre e.

14 Agus dh'àithn e dha, gun innseadh do neach air bith: Ach imich, agus nochd thu féin do'n t-sagart, agus thoir seachad air son do ghlanaidh, mar a dh'àithn Maois, mar fhianuis doibh.

15 Ach bu mhòid a sgaileadh 'iomradh-san: agus thàinig sluagh mòr an ceann a chèile chum éisdeachd, agus a bhí air an slànuchadh leis o'n eucailibh.

16 Agus chaidh e air leth chum an fhàs-aich, agus rinn e urnuigh.

17 Agus tharladh air là àraidh, 'nuair a bha e a' teagasg, gu'n robh 'nan suidhe an sin Phairisich agus luchd-teagaisg an lagha, a thàinig as gach uile bhaile do Ghalile, agus do Iudea, agus o Ierusalem: agus bha cumhachd an Tighearn a làthair chum an slànuchadh.

18 Agus, feuch, ghiulain daoine air leabaidh duine air an robh am pairilis: agus dh'iarr iad a thoirt a steach, agus a chur 'na làthair-san.

19 Agus an uair nach d'fhuir iad seòl air am feudadh iad a thoirt a steach, le meud na cuideachd, chaidh iad suas air an tigh, agus leig iad sìos troimh mhullach an tighe e féin agus a leabadh, anns a' mheadhon an làthair Iosa.

20 Agus an uair a chunnaic e an creidimh, thubhairt e ris, A dhuine, tha do pheacanna air am maitheadh dhuit.

21 Agus thòisich na sgrìobhaichean agus na Phairisich air reusonachadh, ag ràdh, Cò e so a ta labhairt toibheim? cò dh'fheudas peacanna a mhaithheadh ach Dia a mhàin?

22 Ach air aithneachadh an smuainte do Iosa, fhreagair e agus thubhairt e riu, Ciod a ta sibh a' reusonachadh 'nur cridheachaibh?

23 Co aca is usadh a ràdh, Tha do pheacanna air am maitheadh dhuit, no ràdh, Éirich agus imich?

24 Ach a chum gu'm bi fios agaibh gu bheil cumhachd aig Mac an duine peacanna a mhaithheadh air talamh, (thubhairt e ri fear na pairilis,) A ta mi ag ràdh riu, éirich, agus tog do leabadh, agus imich do d' thigh.

25 Agus dh'éirich e air ball 'nan làthair, agus thog e an leabadh air an robh e 'na luidhe, agus chaidh e d'a thigh féin a' toirt glòire do Dhia.

26 Agus ghlac uamhas iad uile, agus thug iad glòir do Dhia, agus lìonadh le h-eagal iad, ag ràdh, Chunnaic sinn nithe do-chreidsinn² an diugh.

27 Agus an déigh nan nithe sin, chaidh e mach, agus chunnaic e cis-mhaor d'am b'ainm Lebhi, 'na shuidhe aig àite togail na cise; agus thubhairt e ris, Lean mise.

28 Agus air fàgail nan uile nithe dha, dh'éirich e, agus lean se e.

29 Agus rinn Lebhi féisd³ mhòr dha 'na thigh féin: agus bha cuideachd mhòr do chis-mhaoraibh, agus do mhuinntir eile a shuidh maille riu.

30 Agus rinn an sgrìobhaichean agus am Phairisich gearan an aghaidh a dheisciobul-san, ag ràdh, C'ar son a ta sibh ag itheadh, agus ag òl maille ri cis-mhaoraibh agus ri peacachaibh?

31 Agus fhreagair Iosa agus thubhairt e riu, Cha'n 'eil feum aca-san a ta slàn air an leigh, ach aca-san a ta tinn.

32 Cha d'thàinig mise a ghairm nam firean, ach nam peacach chum aithreachais.

33 Agus thubhairt iadsan ris, C'ar son a ta deisciobuil Eoin gu tric ri trasgadh⁴,

¹ àireamh.

² iongantach.

³ cuirm.

⁴ trossadh.

agus a' deanamh urnuigh, agus mar an ceudna *dheisciobuil* nam Phairiseach; ach a ta do dheisciobuil-sa ag itheadh agus ag òl?

34 Agus thubhairt esan riu, Am feud sibh a thoirt air cloinn seomair an fhir nuadh-phòsda trasgadh a dheanamh, am feadh a ta am fear nuadh-pòsda maille riu?

35 Ach thig na làithean an uair a bheir ear am fear nuadh-pòsda uatha; an sin ni iad trasgadh anns na làithibh sin.

36 Agus labhair e mar an ceudna cosamhlachd riu; Cha chuir neach air bith mìr a dh'eudach nuadh air sean eudach: no, reubaidh an t-eudach nuadh e, agus cha tig am mìr do'n eudach nuadh ris an t-sean eudach.

37 Agus cha chuir duine sam bith fion nuadh ann an seann searragaibh; no, brisidh am fion nuadh na searragan, agus dòirtear e féin, agus caillear na searragan.

38 Ach is còir fion nuadh a chur ann an searragaibh nuadha; agus bithidh iad le chèile téaruinte.

39 Agus cha n'èil duine sam bith, air dha sean *fhion* òl, a dh'iarraas air ball *fhion* nuadh: oir their e, Is e an sean *fhion* a's fearr.

CAIB. VI.

1 *Chronuich Criosd doille nam Phairiseach mu thimchioll coimhead na sàbaid, le sgriobtur, le reusan, agus le mìorbhuil; 13 thagh e dà abstol deug; 17 shlànuich e muinntir a bha tinn.*

A GUS tharladh air a' cheud là sàbaid ann a déigh an dara là do *fhéill na càisge*¹, gu'n deachaidh e troimh na h-achaibh arbhair; agus spion a dheisciobuil na diasan arbhair, agus dh'ith iad, an déigh am bruthadh le'n làmhaibh.

2 Agus thubhairt cuid do na Phairisich riu, C'ar son a ta sibh a' deanamh an ni nach 'èil ceaduichte r'a dheanamh air làithibh na sàbaid?

3 Agus fhreagair Iosa iad, agus thubhairt e, Nach do leugh sibhse an ni so rinn Daibhidh, 'nuair a bha ocras air féin, agus orra-san a bha maille ris;

4 Cionnus a chaidh e steach do thigh Dhé, agus a ghabh e aran na fianuis², agus a dh'ith e féin, agus thug e mar an ceudna dhoibh-san a bha maille ris; ni nach 'èil ceaduichte itheadh ach do na sagartaibh a mhàin?

5 Agus thubhairt e riu, Is Tighearn Mac an duine air an t-sàbaid féin.

6 Tharladh mar an ceudna air sàbaid eile, gu'n deachaidh e steach do'n t-sion-agog, agus gu'n do theagaisg e; agus bha an sin duine, aig an robh a làmh dheas air seargadh.

7 Agus rinn na sgrìobhaichean agus na Phairisich faire, a dh'fheuchainn an leighiseadh e air an t-sàbaid; chum gu'm faigh-eadh iad cùis-dhithidh³ 'na aghaidh.

8 Ach thuig esan an smuaintean, agus thubhairt e ris an duine aig an robh an làmh sheargta, Eirich, agus seas a mach sa' mheadhon. Agus dh'èirich esan, agus sheas e.

9 An sin thubhairt Iosa riu, Feòraichidh mise aon nidhibh; Am bheil e ceaduichte air làithibh na sàbaid maith a dheanamh, no olc? anam a shaoradh, no a sgrios?

10 Agus air dha amharc mu'n cuairt orra uile, thubhairt e ris an duine, Sin a mach do làmh. Agus rinn e sin: agus dh'aisigeadh a làmh slàn da mar an làmh eile.

11 Agus lìonadh iadsan do chutlach; agus labhair iad r'a chèile, ciod a dheanadh iad ri Iosa.

12 Agus anns na làithibh sin chaidh esan gu beinn a dheanamh urnuigh, agus bhuanach e rè na h-oidhche ann an urnuigh ri Dia⁴.

13 Agus air teachd do'n là, ghairm e d'a ionnsuidh a dheisciobuil; agus thagh e dà fhear dheug asda, d'an do ghairm e Abstoil:

14 Simon, (a dh'ainmich e mar an ceudna Peadar,) agus Aindreas a bhràthair, Seumas agus Eoin, Philip agus Bartolomeus,

15 Mata agus Tomas, Seumas mac Alpheuis, agus Simon d'an goirear Selotes,

16 Iudas bràthair Sheumais, agus Iudas Iscariot, esan a bha 'na fhear-brathaidh.

17 Agus thàinig e nuas leo, agus sheas e air ionad còmhnaid, agus coimhthional a dheisciobul, agus buidheann mhòr-shluaigh o Iudea uile agus o Ierusalem, agus o chois fairge Thiruis agus Shidoin, muinntir a thàinig g'a éisdeachd, agus gu bhì air an leigheas o'n euslaintibh;

18 Agus iadsan a bha air am pianadh le spioradaibh neòghlan: agus leighiseadh iad.

19 Agus dh'ìarr an sluagh uile beantuinn ris: oir chaidh cumhachd a mach as, agus shlànuich e iad uile.

20 Agus thog e suas a shùilean air a dheisciobuibh, agus thubhairt e, Is beannaichte *sibhse* ta bochd: oir is leibh rìoghachd Dhé.

21 Is beannaichte *sibhse* ta ocrach a nis; oir sànuichear sibh. Is beannaichte *sibhse* ta caoidh a nis: oir gàiridh sibh.

22 Is beannaichte sibh, 'nuair a bheir daoine fuath dhuibh, agus a chuireas iad as an cuideachd sibh, agus a bheir iad cainnt mhaslach dhuibh, agus a thilgeas

¹ air an dara là sàbaid an déigh na ceud sàbaid.

² an t-aran taisbeanta.

³ cùis-chasaid.

⁴ tigh-urnuigh Dhé.

iad a mach bhur n-ainm mar olc, air son Mhic an duine.

23 Deanaibh-sa gairdeachas san là sin, agus leumaibh le h-aobhneas: oir feuch, is mòr bhur duais air nèamh: oir is ann mar sin a rinn an aithriche air na fàidhibh.

24 Ach is an-aobhinn duibhse ta saoihbhir: oir fhuair sibh bhur sòlas.

25 Is an-aobhinn duibhse ta sàitheach: oir bithidh ocras oirbh. Is an-aobhinn duibhse ta gàireachdaich a nis: oir ni sibh bròn agus gul.

26 Is an-aobhinn duibhse 'nuair a labhras daoine¹ maith umaibh: oir is ann mar sinn a rinn an aithriche ris na fàidhibh bréige.

27 Ach a ta mi ag ràdh ribhse ta 'g éisdeachd, Gràdhaichibh bhur naimhde, deanaibh maith dhoibh-san le'm fuathach sibh:

28 Beannaichibh iadsan a ta 'gur mallachd, agus deanaibh urnuigh air son na muinntir a ta buntuinn gu naimhdeil ribh.

29 Ris an ti a bhuaileas thu air aon ghial, cum an gial eile; agus do'n ti a bheir t'fhalluinn dhìot, na bac do chòta mar an ceudna.

30 'Thoir do gach neach a dh'iarraas ort; agus o'n neach a bheir uait do mhaoin, na iarr air ais i.

31 Agus mar a b'àill leibh daoine a dheanamh dhuibh, deanaibh-sa mar an ceudna dhoibhsan.

32 Oir ma ghràdhaicheas sibh iadsan aig am bheil gràdh dhuibh, ciod am buidheachas a ta agaibh? oir gràdhaichidh peacaich féin an dream aig am bheil gràdh dhoibh.

33 Agus ma ni sibh maith do'n mhuinntir a ni maith dhuibh, ciod am buidheachas a ta agaibh? oir ni peacaich an ni so féin mar an ceudna.

34 Agus ma bheir sibh iasachd² dhoibhsan o'm bheil dùil agaibh ri fhaotainn a ris, ciod an buidheachas a ta agaibh? oir bheir peacaich féin iasachd do pheacach-aibh, chum gu'm faigh iad uiread a ris.

35 Ach gràdhaichibh-sa bhur naimhde, agus deanaibh maith, agus thugaibh iasachd, gun dùil a bhi agaibh ri ni sam bith 'na éiric³: agus bithidh bhur duais mòr, agus bithidh sibh 'nur cloinn do'n Tì a's àirde: oir a ta esan tabhartach dhoibhsan a ta mi-thaingéal agus olc.

36 Bithibh-sa uime sin tròcaireach, mar a ta bhur n-Athair tròcaireach.

37 Agus na tugaibh breth agus cha toir-eair breth oirbh: na ditibh, agus cha dìtear sibh: thugaibh maitheanas, agus bheirear maitheanas dluibh.

38 Thugaibh uaibh, agus bheirear dhuibh; deadh thomhas, air a gheinneadh, agus air a chrathadh ri chéile, agus a' cur thairis, bheir daoine ann bhur n-uchd; oir leis an tomhas le'n tomhais sibh, tomhaisear dhuibh a ris.

39 Agus labhair e cosamlachd riu, Am feud an dall dall a threòrachadh? nach tuit iad le chéile⁴ ann an slochd?

40 Cha'n 'eil an deisciobul os ceann a mhaighstir: ach ge b'e neach a ta coimhlionta, bithidh e mar a mhaighstir.

41 Agus c'ar son a ta thu faicinn an smùirnein a ta an sùil do bhràthar, agus nach 'eil thu toirt fa'near an t-sail a ta ann do shùil féin?

42 No cionnus a dl'i'fheudas tu ràdh ri do bhràthair, A bhràthair, leig dhomh an smùirnein a thoirt á d' shùil, agus nach 'eil thu toirt fa'near an t-sail a ta ann do shùil féin? A chealgair, tilg a mach air tús an t-sail as do shùil féin, agus an sin is léir dhuit gu soilleir an smùirnein a ta ann an sùil do bhràthar a thoirt aisde.

43 Oir cha deadh chraobh a bheir a mach droch thoradh: agus cha droch chraobh a bheir a mach deadh thoradh.

44 Oir aithnìhear gach craobh air a toradh: oir cha tionail daoine fìgeau do dhroighionn, no caoran fìona do'n fhearr-dhris.

45 Bheir duine maith ni maith a mach á deadh ionmhas a chridhe; agus bheir droch dhuine ni olc a mach á droch ionmhas a chridhe: oir is ann á pailteas a chridhe a labhras a bheul.

46 Agus c'ar son a ghoireas sibh, a Thighearn, a Thighearn, dhiom-sa, agus nach dean sibh na nithe a ta mi ag ràdh?

47 Gach neach a thig a m' ionnsuidh-sa, agus a chluinneas mo bhriathra, agus a ni iad, feuchaidh mi dhuibh co ris is cosmhuil e:

48 Is cosmhuil e ri duine a thog tigh, agus a chladhaich domhain, agus a chuir a' bhunait air carraig: agus an uair a thàinig an tuil, bhuail an sruth gu dian air an tigh sin, agus cha b'urraim e clarachadh; oir bha e air a shuidheachadh⁵ air carraig.

49 Ach an ti a chluinneas, agus nach dean, is cosmhuil e ri duine a thog tigh air an talamh gun bhunait, air an do bhuail an sruth gu dian, agus air ball thuit e; agus bu mhòr tuiteam an tighe sin.

CAIB. VII.

1 *Leighis Crìosd seirbhiseach ceannaird-ceud.*

11 *Thog e mac na bantraich ann an Nàin o'n bhàs; 19 dhearbha e do theachdairibh Eoin, le oibribh miorbhuileach a rinn e 'nan làthair, gu'm b'e*

¹ na h-uile dhaoine.

² coingheall.

³ gun bhur dòchas a chall.

⁴ araon.

⁵ sléidheachadh.

fèin an Crìosd a bha ri teachd; 24 nochd e do'n t-sluagh ciod i a bharrail mu Eoin, &c.

ANIS an uair a chrìochnaich e a bhriathra-san uile ann an èisdeachd an t-sluaigh, chaidh e steach do Chapernaum.

2 Agus bha seirbhiseach ceannaird-ceud àraidh, a b' ionmhuinn leis, gu tinn, agus ri h-uchd bàis.

3 Agus an uair a chual e mu Iosa, chuir e seanairean nan Iudhach d'a ionnsuidh, a' cur impidh air gu'n tigeadh e, agus gu'n leighiseadh e a sheirbhiseach.

4 Agus an uair a thàinig iad gu Iosa, ghuidh iad air gu dùrachdach, ag ràdh, Gu'm b'airidh e gu'n deanadh esan so dha:

5 Oir is toigh leis ar cinneach-ne, agus thog esan dhuinn sionagog¹.

6 Agus chaidh Iosa maille riu. Ach air dha bhi nis fagus do'n tigh, chuir an ceannard-ceud càirdean d'a ionnsuidh, ag ràdh ris, A Thighearn, na cuir dragh ort féin; oir cha'n a'iridh mise gu'n rachadh tu steach fo m' chleith:

7 Uime sin cha mhò a mheas mi gu'm b'airidh mi féin air teachd a d' ionnsuidh: ach a mhàin abair am focal, agus slànuichear m' òglach.

8 Oir is duine mise féin air mo chur fo ùghdarras, aig am bheil saighdeara fodh-am; agus their mi ris an fhear so, Imich, agus imichidh e; agus ri fear eile, Thig, agus thig e; agus ri m' sheirbhiseach, Dean so, agus ni se e.

9 Agus an uair a chual Iosa na nithe so, ghabh e iongantais ris, agus air tionndadh dha, thubhairt e ris an t-sluagh a lean e, A ta mi ag ràdh ribh, nach d'fhuair mi creidimh co mòr as so, ann an Israel féin.

10 Agus air pilltim air an ais do'n tigh do na teachdairibh a chuireadh d'a ionnsuidh, fhuair iad an seirbhiseach a bha tinn, slàn.

11 Agus tharladh, an là 'na dhéigh sin, gu'n deachaidh e chum baile d'an gairmear Nain; agus chaidh a dheisciobuil² maille ris, agus sluagh mòr.

12 A nis an uair a thàinig e am fagus do gheata a' bhaile, feuch, ghiùlaineadh a mach duine marbh, aon mhac a mhàthar, agus bu bhantrach i: agus bha sluagh mòr do mhuinntir a' bhaile maille rithe.

13 Agus an uair a chunnaic an Tighearn i, ghabh e truas dith, agus thubhairt e rithe, Na guil.

14 Agus thàinig e agus bhean e ris a' ghiùlan³; (agus sheas iadsan a bha 'ga iomchar); agus thubhairt e, Oganaich, a ta mi ag ràdh riut, éirich.

15 Agus dh'éirich an duine bha marbh 'na shuidhe, agus thòisich e air labhairt: agus thug e d'a mhàthair e.

16 Agus ghlac eagall iad uile: agus thug iad glòir do Dhia, ag ràdh, Dh'éirich fàidh mòr 'nar measg-ne; agus, Dh'amhairc Dia air a shluagh féin.

17 Agus chaidh an t-ìomradh so mach a'rsan air feadh Iudea uile, agus na dùthcha mu'n cuairt uile.

18 Agus dh'innis a dheisciobuil do Eoin mu thimchioll nan nithe sin uile.

19 Agus ghairm Eoin d'a ionnsuidh dithis àraidh d'a dheisciobluibh, agus chuir e iad gu Iosa, ag ràdh, An tusa esan a bha ri teachd, no m' bi suil againn ri neach eile?

20 Agus air teachd do na daoineibh d'a ionnsuidh, thubhairt iad, Chuir Eoin Baiste sinne a d' ionnsuidh, ag ràdh, An tusa an ti a bha ri teachd, no 'm bi suil againn ri neach eile?

21 Agus anns an uair sin féin leighis e mòran o 'n euslaintibh agus o 'm plàighibh, agus o dhroch spioradaibh; agus thug e 'n radharc do mhòran a bha dall.

22 Agus fhreagair Iosa, agus thubhairt e riu, Imichibh-sa agus innisibh do Eoin na nithe a chunnaic agus a chuala sibh, gu bheil na doill a' faicinn, na bacaich ag imeachd, na lobhair air an glanadh, na bodhair a' cluinntinn, na mairbh air an dùsgadh, an soisgeul air a shearmonachadh do na bochdaibh.

23 Agus is beannaichte esan nach faigh oibhceun annamsa⁴.

24 Agus an uair a dh'fhalbh teachd-airean Eoin, thòisich e air labhairt ris an t-sluagh mu thimchioll Eoin, Ciod an ni a chaidh sibh a mach do'n fhàsach a dh'fhaicim? an i cuile air a crathadh le gaoith?

25 Ach ciod e an ni chaidh sibh a mach a dh'fhaicim? an e duine air a sgreadachadh ann an eudach min? feuch, iadsan a ta sgèdaichte le eudach riomhach, agus a' caitheadh am beatha gu sòghail, is ann an cuirtibh nan rìghrean a ta iad.

26 Ach ciod e an ni chaidh sibh a mach a dh'fhaicim? an e fàidh? seadh, a ta mi ag ràdh ribh, agus ni's mò na fàidh.

27 Is e so an ti mu'm bheil e sgriobhta, Feuch, cuiridh mi mo theachdair roimh do ghnùis, a dh'ulluicheas do shlighe romhad.

28 Oir a ta mi ag ràdh ribh, 'Nam measg-san a rugadh le mnaibh, cha'n 'eil fàidh a's mò na Eoin Baiste: gidheadh an ti a's lugha ann an rioghachd Dhé, is mò e na esan.

29 Agus dh'fhìreanaich an pobull uile a chual e, agus na cis-mhaoir, Dia, air dhoibh bhi air am baisteadh le baisteadh Eoin.

30 Ach chuir na Phairisich agus an

¹ thog esan ar sionagog.

² mòran d'o dheisciobluibh.

³ chiste mhairbh.

⁴ nach gabh oibhceun rium-sa.

luchd-lagha cùl ri comhairle Dhé d'an taobh féin, am feadh nach do bhaisteadh iad leis.

31 Agus thubhairt an Tighearna, Cò ris uime sin a shamhlaicheas mi daoine a' ghinealaich so? agus cò ris a ta iad cos-mhuil?

32 A a iad cosmhuil ri cloinn a ta 'nan suidhe sa' mhargadh, agus a dh'éigheas r'a chéile, ag ràdh, Rinn sinne pìobair-eachd dhuibh-sa, agus cha d'rinn sibhse dannsa: rinn sinne tuireadh dhuibh-sa, agus cha d'rinn sibhse gul.

33 Oir thàinig Eoin Baiste, cha'n ann ag itheadh arain, no ag òl fiona; agus their sibh, A ta deamhan aige.

34 Thàinig Mac an duine ag itheadh agus ag òl; agus their sibh, Feuch duine geòcach, agus pòitear-fiona, caraid chis-mhaor agus pheacach.

35 Ach a ta gliocas air a fìreanachadh le a cloinn uile.

36 Agus dh'iarr duine àraidh do na Phairisich air, gu'n itheadh e biadh maille ris. Agus chaidh e steach do thigh an Phairisich, agus shuidh e sìos chum bìdh.

37 Agus, feuch, an uair a fhuair bean anns a' bhaile, a bha 'na peacach, fìos gu'n robh e 'na shuidhe aig biadh ann an tigh an Phairisich, thug i leatha bocsa alabastair làn do oladh chubhraidh,

38 Agus sheas i aig a chosaibh air a chùlaobh a' gul, agus thòisich i air a chos-an a fhliuchadh le a deuraibh, agus thiormaich i iad le folt a cinn, agus phòg i a chosa, agus dh'ung i leis an oladh iad.

39 Agus an uair a chunnaic am Phairis-each, a thug cuireadh dha, so, labhair e ann féin, ag ràdh, Nam b'fhàidh an duine so, bhiodh fhios aige cò i a' bhean so a ta beantuinn ris, agus ciod is gnè dhi; oir is peacach i.

40 Agus fhreagair Iosa, agus thubhairt e ris, A Shimoìn, a ta ni agam ri ràdh riut. Agus thubhairt esan, A mhaighstir, abair e.

41 Bha aig fear-fìacha àraidh dithis do fhéichneibh: bha aige air aon fhear ciug ceud peghlinn, agus air an fhear eile leth-cheud.

42 Agus do bhrìgh nach robh aca ni leis an diòladh iad, mhaith e gu saor dhoibh araon. Innis dhomh-sa uime sin, cò dhiubh is mò a ghràdhaicheas e?

43 Agus fhreagair Simon agus thubhairt e, Is i mo bharail gur e an neach is mò d'an do mhaith e. Agus thubhairt e ris, Is ceart a thug thu breth.

44 Agus air tionndadh ris a' mhnai, thubhairt e ri Simon, Am faic thu a' bhean so? thàinig mi steach do d' thigh, cha d'thug thu domh uisge chum mo chos;

ach dh'ionnlaid ise mo chosa le deuraibh, agus thiormaich i iad le folt a cinn.

45 Cha d'thug thusa dhomh pòg: ach o thàinig ise² stigh, cha do sguir i a phòg-adh mo chos.

46 Cha d'ung thusa mo cheann le li-oladh: ach dh'ung ise mo chosa le h-oladh chubhraidh.

47 Uime sin a ta mi ag ràdh riut, Gu bheil a peacanna a ta lionmhor, air am maitheadh; air an aobhar sin³ ghràdh-aich i gu mòr: ach ge b'e neach d'am maithear beagan, bitheadh a ghràdh beag.

48 Agus thubhairt e rithe, Tha do pheacanna air am maitheadh.

49 Agus thòisich iadsan a bha 'nan suidhe aig biadh maille ris, air a ràdh anna féin, Cò e so a ta eadhon a' maitheadh pheacanna?

50 Agus thubhairt e ris a' mhnai, Shlànuich do chreidimh thu; imich an sìth.

CAIB. VIII.

1 *Fhrithheil mnai do Chrìosd le am maoin. 4 An déigh do Chrìosd seurmoin a dheanamh o àit gu h-àit, agus e air a leantuinn le abstolaibh, labhair e cosamhlachd an t-sìoladair, 16 agus na còinne; 21 chuir e an cèill cò iad a mhàthair, agus a bhràithrean.*

AGUS tharladh an déigh sin, gu'n d'imich esan troimh gach caithir agus baile, a' searmonachadh, agus a' cur an cèill soisgeil rioghachd Dhé, agus an dà fhear dheug maille ris;

2 Agus mnai àraidh a leighiseadh o dhroch spioradaibh agus o euslaintibh, Muire d'an gairmear Magdalen, as an deachaidh seachd deamhain.

3 Agus Ioanna bean Chusa stiùbhaird Heroid, agus Susanna, agus mòran eile, a bha frithealadh dha le am maoin.

4 Agus an uair a cluinnich sluagh mòr, agus a thàinig iad as gach baile d'a ionnsuidh, labhair e ann an cosamhlachd:

5 Chaidh fear-cuir a mach a chura shìl: agus ag cur da, thuit cuid ri taobh an rathaid; agus shaltradh sìos e, agus dh'ith eunlaith an athair suas e.

6 Agus thuit cuid eile air carraig, agus air fàs da, shearg e, do bhrìgh nach robh sìgh aige.

7 Agus thuit cuid eile am measg droighl-inn, agus dh'fhàs an droighinn maille ris, agus thachd se e.

8 Agus thuit cuid eile air tàlamh maith, agus dh'fhàs e suas, agus thug e toradh uaithe a cheud uiread *as a chuireadh*. Agus air dha na nithe sin a ràdh, ghlaodh e, Ge b'e aig am bheil cluasa chum éisd-eachd, éisdheadh e.

9 Agus dh'fhiosraich a dheisciobuil deth, ag ràdh, Ciod e an cosamhlachd so?

10 Agus thubhairt esan, Thugadh dhuibh-

sa eòlas fhaotaim air rùn dìomhair rioghachd Dhé; ach do chàch an cosamhlachdaibh, ionnus ag faicinn doibh nach faiceadh iad, agus ag cluinntinn doibh nach tuigeadh iad.

11 Ach is e so an cosamhlachd: Is e an siol focal Dé.

12 Iadsan ri taobh an rathaìd, is iad sin a dh'éisdeas: 'na dhéigh sin a ta an diabhul a' teachd, agus a' togail air falbh an fhocail as an cridheachaibh, air eagal gu'n creideadh iad agus gu'm biodh iad air an saoradh.

13 An dream air a' charraig, is iad sin iadsan, an uair a dh'éisdeas iad, a ghabhas am focal d'an ionnsuidh le gairdeachas, ach cha'n 'eil aca so freumh, *muinntir* a chreideas rè tamuill, agus an àm buairidh a ta tuiteam air falbh.

14 Agus an uir a thuit am measg droighinn, is iad sin an dream a dh'éisdeas, agus air dhoibh dol a mach, a ta iad air an tachdadh le cùram, agus le saobhlreas, agus le sàimh na beatha so, agus cha 'n 'eil iad a' toirt toraidh uatha chum foirfeachd.

15 Ach an ni a thuit san talamh mhaith, is iad sin iadsan, air dhoibh am focal éisdeachd, a ta 'ga choimhead ann an cridhe treibh-dhireach agus maith, agus a' toirt toraidh uatha la foighidinn¹.

16 Cha'n 'eil neach air bith, air dha coinneal a lasadh, a dh'fholaicheas fo shiotheach i, no chuireas fo leabaidh i: ach cuiridh e ann an coinneir i, chum gu'm faic iadsan a thig a stigh an solus.

17 Oir cha 'n 'eil ni sam bith folaichte, nach deanar follaiseach; no uaigneach, nach aithuichear, agus nach tig am follais².

18 Air an aobhar sin thugaibh fa'near cionnus a dh'éisdeas sibh: oir ge b'e neach aig am bheil, bheirear dha; agus ge b'e neach aig nach 'eil, bheirear uath eadhon an uir sin a shaoilear a bhi aige.

19 An sin thàinig d'a ionnsuidh a mhàthair agus a bhràithre, agus cha b'urraim iad teachd am fagus da leis an dòmhlas.

20 Agus dh'innseadh dha le *dream àraidh*, a thubhairt, Tha do mhàthair agus do bhràithre 'nan seasamh a muigh, ag iarraidh t'fhaicinn.

21 Agus fhreagair esan agus thubhairt e riu, Is iad mo mhàthair agus mo bhràithrean iadsan a dh'éisdeas ri focal Dé, agus a ni e.

22 Agus tharladh air là àraidh, gu'n deachaidh e féin agus a dheisciobuil a stigh do luing: agus thubhairt e riu, Rachamaid thairis gu taobh thall an locha. Agus chuir iad a mach o thir.

23 Ach ag seòladh dhoibh, thuit codal

airsan: agus thàinig ànradh³ gaoithe a nuas air an loch, agus lìonadh iad le *h-uisge*, agus bha iad ann an gàbhadh.

24 Agus thàinig iad d'a ionnsuidh, agus dhùisg iad e, ag ràdh, A mhaighstir, a mhaighstir, tha sinn cailte! An sin dh'èirich esan, agus chronuich e a' ghaoth, agus onfa an uisge: agus sguir iad, agus thàinig fèath⁴ ann:

25 Agus thubhairt e riu, C'ait am bheil bhuir creidimh? agus air dhoibh bhi fo eagal, ghabh iad iongantais, ag ràdh r'a chéile, Ciod a' ghnè dhuine so? oir a ta e toirt àithne do na gaothaibh, agus do'n uisge féin, agus a ta iad umhal dha.

26 Agus thàinig iad air tìr aig dùthaich nan Gadareneach, a ta thall fa chomhair Ghalile.

27 Agus an uair a chaidh e mach air tìr, choinnich duine àraidh as a' bhaile e, anns an robh deamhain ré aimsir fhada, agus aig nach biodh eudach uime, agus nach fanadh ann an tigh, ach anns na h-àitibh-adhlaic.

28 An uair a chunnaic e Iosa, ghlaodh e mach, agus thuit e sìos 'na làthair, agus thubhairt e le guth àrd, Ciod e mo ghnothuch-sa riut, Iosa, a Mhic an Dé a's ro àirde? guidheam ort, na pian mi.

29 (Oir bha e air toirt àithne do'n spiorad neòghlan dol a mach as an duine. Oir bu tric a rug e gu naimhdeil air: agus chaidh e le slabhruidhribh, agus choimhleadh an geimhlibh e; agus air briseadh a chuibhreacha dha, dh'iomaineadh e leis an deamhan do'n fhàsach.)

30 Agus dh'fhiosraich Iosa dheth, ag ràdh, Ciod is ainm dhuit? agus thubhairt esan, Legion: do bhrìgh gu'n deachaidh mòran dheamhan a steach ann.

31 Agus ghuidh iad air, gun àithne thoirt doibh dol sìos do'n doimhneachd⁵.

32 Agus bha treud lionmhor mhuc an sin, ag ionaltadh air an t-slabh: agus ghuidh iad air cead a thoirt doibh dol a steach anna. Agus thug e cead doibh.

33 An sin air dol do na deamhaibh a mach as an duine, chaidh iad anns na mucaibh; agus ruith an treud mhuc gu dian sìos le bruthach⁶ do'n loch, agus thachdadh⁷ iad.

34 Agus an uair a chunnaic an dream a bha 'gam biadhadh an ni a rinneadh, theich iad, agus dh'innis⁸ iad e anns a' bhaile, agus anns an dùthaich.

35 Agus chaidh iadsan a mach a dh'fhaicinn an ni a rinneadh; agus thàinig iad gu Iosa, agus fhuair iad an duine as an deachaidh na deamhain, 'na shuidhe aig cosaibh Iosa, air eudachadh. agus e 'na chéill: agus ghabh iad eagal.

¹ scasmhachd. ² os àird. ³ doinninn, stoirm.

⁴ cùine. ⁵ dubh-aigcan.

⁶ leathad, àite corrach.

⁷ bhàthadh.

⁸ theich iad, (agus chaidh iad,) agus dh'innis.

36 Agus dh'innis an dream a chunnaic e dhoibh, cionnus a shlànuicheadh an duine san robh na deamhain.

37 An sin dh'iarr muinntir dùthcha nan Gadareneach uile airsan imeachd uatha; oir ghlacadh le h-eagal mòr iad: agus chaidh e san luing, agus phill e air ais a ris.

38 A nis ghuidh an duine as an deachaidh na deamhain air, e féin a bhi maille ris: ach chuir Iosa uaidh e, ag ràdh,

39 Pill do d' thigh féin, agus cuir an céill meud nan nithe a rinn Dia dhuit. Agus dh'imich e roimhe, ag innseadh gu folaiseach air feadh a' bhaile uile, meud nan nithe a rinn Iosa dha.

40 Agus tharladh, an uair a phill Iosa air ais, gu'n do ghabh an sluagh *gu toileach* ris: oir bha iad uile 'ga fheitheamh.

41 Agus, feuch, thàinig duine d'am b'ainm Iairus, a bha 'na uachdaran air an t-sionagog; agus thuit e aig cosaibh Iosa, agus ghuidh e air gu'n tigeadh e d'a thigh:

42 Do bhrìgh gu'n robh aon-ghin nighinn aige, mu thimchioll dà bhliadhna dheug, agus i faotainn a' bhàis. Ach air dha bhi 'g imeachd, bha'n sluagh 'ga theannadh.

43 Agus *thàinig* bean air an robh dòrtadh fola dà bhliadhna dheug, agus a chaith a beathachadh uile ri leighibh, agus nach b'urrainn bhi air a leigheas le neach air bith,

44 Thàinig *ise* air a chùlaobh, agus bhean i ri iomall 'eudaich: agus sguir a dòrtadh fola air ball.

45 Agus thubhairt Iosa, Cò bhean rium? Air àicheadh do na h-uile, thubhairt Peadar ris, agus iadsan a bha maille ris, A mhaighstir, tha'n sluagh ga d' dhòmh-lachadh, agus ga d' theannadh, agus an abair thu, Cò bhean rium?

46 Agus thubhairt Iosa, Bhean neach éigin rium: oir mhothaich mi cumhachd a' dol asam.

47 Agus an uair a chunnaic a' bhean nach robh i an ain-fhios¹, thàinig i air chrith, agus a' sleuchdadh dha, chuir i'n céill da, an làthair an t-sluaigh uile, c'ar son a bhean i ris, agus mar a shlànuicheadh i gu grad.

48 Agus thubhairt esan rithe, A nighean, biodh misneach agad: shlànuich do chreidimh thu; imich an sìth.)

49 Am feadh a bha e fathast a' labhairt, thàinig neach o *thigh* Uachdarain na sionagoig, ag ràdh ris, Tha do nighean marbh; na cuir dragh air a' mhaighstir.

50 Ach an uair a chual Iosa so, fhreagair se e, ag ràdh, Na biodh eagal ort: a

mhàin creid, agus bithidh i air a slàn-uchadh.

51 Agus an uair a chaidh e do'n tigh, cha do leig e le neach air bith dol a stigh, ach Peadar, agus Eoin, agus Seumas, agus athair agus màthair na nighinn.

52 Agus bha iad uile a' gul, agus a' deanamh caoidh air a son: ach thubhairt esan, Na guilibh; cha 'n'eil i marbh, ach 'na codal.

53 Agus rinn iad gàire fanoid ris, do bhrìgh gu'n robh fhios aca gu'n robh i marbh.

54 Agus air dha an cur a mach uile, ghlac e air làimh i, agus ghlaodh e, ag ràdh, A nighean, éirich.

55 Agus thàinig a spiorad air ais, agus dh'éirich i air ball; agus dh'àithn e biadh a thoirt di.

56 Agus ghlac² uamhas mòr a pàrant-an³: ach thug esan àithne dhoibh gun an ni a rinneadh innseadh do neach air bith.

CAIB. IX.

1 *Chuir Crìosd a mach 'abstoil a dh'oibreachadh mhorbhuile, agus a shearmonachadh. 7 Bha togradh aig Herod Crìosd fhaicinn. 17 Thug Crìosd lòn do chùig mìle gu mòrbhuileach, 22 dh'innis e 'fhuilangas roimh-laimh. 28 Atharrachadh a chrutha.*

AGUS ghairm e an dà fhear dheug⁴ an ceann a chèile, agus thug e cumhachd agus ùghdarras doibh air na h-uile dheamhnaibh, agus a chum euslaintean a leigheas.

2 Agus chuir e mach iad a shearmonachadh rioghachd Dhé, agus a shlànuchadh nan eusan.

3 Agus thubhairt e riu, Na tugaibh ni air bith leibh chum na slighe, bataiche, no malla, no aran, no airgiod; ni mò bhios dà chòta aig gach fear agaibh.

4 Agus ge b'e air bith tigh d'an téid sibh a steach, fanaibh an sin, agus á sin rach-aibh a mach⁵.

5 Agus cò air bith iad nach gabh ribh, air dhuibh dol a mach as a' bhaile sin, crathaibh dhìbh eadhon an duslach o blhur cosaibh mar fhianuis 'nan aghaidh.

6 Agus chaidh iadsan a mach, agus ghabh iad troimh na bailtibh, a' searmonachadh an t-soisgeil, agus a' leigheas anns gach àit.

7 Agus chual Herod an Tetrarc na h-uile nithe a rinneadh leis: agus bha e an imcheist, do bhrìgh gu'n dubhradh le cuid, gu'n robh Eoin air éirigh o na marbhaibh;

8 Agus le cuid, gu'n d'fhoillsicheadh Elias; agus le cuid eile, gu'n robh aon do na sean fhàidhibh air éirigh a ris.

9 Agus thubhairt Herod, Thug mise an

¹ am folach.

³ a gintciran.

² ghabh.

⁴ a dhà dheisciobul deug.

⁵ fanaibh an sin gus am fàg sibh an t-àit.

ceann do Eoin : ach cò e am fear so mu 'm bheil mi cluinntinn¹ a leithid so do nithibh ? Agus dh'iarr e fhaicinn.

10 Agus air pilltinn do na h-abstolaibh, dh'innis iad dha gach ni a rinn iad. Agus thug e leis iad, agus chaidh e fa leth gu àite fàsail, a bhuineadh do'n bhaile d'an goirear Betsaida.

11 Agus an uair a fhuair an sluagh fios air, lean iad e : agus ghabh e d'a ionn-suidh iad, agus labhair e riu mu thimchioll rioghachd Dhé, agus leighis e iadsan aig an robh feum air leigheas.

12 Agus an uair a thòisich an là air teireachdainn, thàinig an dà fhear dheug, agus thubhairt iad ris, Cuir air falbh an sluagh, chum gu'n téid iad do na bailtibh agus do'n tìr mu'n cuairt, agus gu'n gabh iad tàmh agus gu'm faigh iad biadh ; oir tha sinn an so an àite fàsail.

13 Ach thubhairt esan riu, Thugaibh-sa dhoibh ni r'a itheadh. Agus thubhairt iadsan, Cha'n'eil againn tuilleadh na cùig builinnean agus dà iasg : mur téid sinn agus biadh a cheannach do'n t-sluagh so uile.

14 Oir bha iad mu thimchioll cùig mìle fear. Agus thubhairt e r'a dheisciobluibh, Cuiribh 'nan suidhe iad, leth-cheud anns gach cuideachd.

15 Agus rinn iad mar sin, agus chuir iad 'nan suidhe iad uile.

16 Agus ghabh e na cùig builinnean agus an dà iasg, agus air amharc suas gu nèamh, bheannaich e iad, agus bhris e, agus thug e d'a dheisciobluibh iad gu'n cur an làthair an t-sluaigh.

17 Agus dh'ith iad, agus shàsuicheadh iad uile : agus thogadh dà chliabh dheug do bhiadh briste, a bha dh'fhuigheall aca.

18 Agus tharladh, air dha bhi ri urnuigh fa leth, gu'n robh a dheisciobuil maille ris : agus dh'fheòraich e dhiubh, ag ràdh, Cò tha an sluagh ag ràdh is mise ?

19 Fhreagair iadsan agus thubhairt iad, Eoin Baiste : ach *tha* cuid ag ràdh Elias : agus cuid eile, gu bheil aon do na sean fhàidhibh air éirigh a ris.

20 Thubhairt e riu, Ach cò tha sibhse ag ràdh is mi ? Agus fhreagair Peadar, agus thubhairt e, Crìosd Dhé.

21 Agus air dha sparradh teann a thoirt doibh, dh'àithn e gun iad a dh'innseadh so do neach sam bith ;

22 Ag ràdh, Gur éigin do Mhac an duine mòran fhulang, agus a bhi air a dhiùltadh leis na seanairibh, agus na h-àrd-shagart-aibh, agus na sgrìobhaichibh, agus a bhi air a chur gu bàs, agus air a thogail suas air an treas là.

23 Agus thubhairt e riu uile, Ma's àill le neach air bith teachd a'm' dhéigh-sa,

àicheadh se e féin, agus togadh e a chrann-ccusaidh gach là, agus leanadh e mise.

24 Oir ge b'e neach le'm b'àill 'anam a thearnadh, caillidh se e : ach ge b'e neach a chailleas 'anam air mo sgàth-sa, saoraidh esan e.

25 Oir ciod e an tairbhe do dhuine, ged chosnadh e an saoghal gu h-iomlan, agus e féin a chall, no bhi air a sgrios ?

26 Oir ge b'e neach a ghabhas nàire dhiom-sa agus do m' bhriathraibh, gabhaidh Mac an duine nàire dheth-san, an uair a thig e 'na ghloir féin, agus an glòir 'Athar, agus nan aingeal naomha.

27 Ach a ta mise ag ràdh ribh gu fìrinn-each, gu bheil cuid 'nan seasamh an so, nach blais bàs, gus am faic iad rioghachd Dhé.

28 Agus tharladh, mu thimchioll ochd làithean an déigh nam briathra so², gu'n d'thug e leis Peadar, agus Eoin, agus Seumas, agus gu'n deachaidh e suas gu beinn a dheanamh urnuigh.

29 Agus an uair a bha e ri urnuigh, bha dreach a ghnùise air atharrachadh, agus rinneadh 'eudach geal agus dealrach.

30 Agus, feuch, bha dithis fhear a' còmhradh ris, eadhon Maois agus Elias,

31 A nochdadh ann an glòir, agus a bha labhairt m'a bhàs³, a bha esan gu choimh-lionadh ann an Ierusalem.

32 Ach bha Peadar, agus iadsan a bha maille ris, trom 'nan codal : agus an uair a dhuìsg iad, chunnaic iad a ghloir, agus an dithis fhear a bha 'nan seasamh maille ris.

33 Agus an uair a bha iadsan a' deal-achadh ris, thubhairt Peadar ri Iosa, A mhaighstir, is maith dhuine bhi an so ; agus deanamaid trì pàilliuma⁴, aon duitse, agus aon do Mhaois, agus aon do Elias ; gun fhios aige ciod a bha e ag ràdh.

34 Am feadh a bha e ag ràdh so, thàinig neul, agus chuir e sgàile orra : agus ghabh iad eagal an uair a bha iad a' dol a stigh san neul.

35 Agus thàinig guth as an neul, ag ràdh, Is e so mo Mhac gràdhach-sa ; éisdibh ris.

36 Agus an uair a rinneadh an guth so, fhuaradh Iosa 'na aonar : agus dh'fhan iadsan 'nan tosd, agus cha d'innis iad do neach air bith, anns na làithibh sin, aon ni do na chunnaic iad.

37 Agus tharladh, an là 'na dhéigh sin, an uair a thàinig iad a nuas o'n bheinn, gu'n do thachair sluagh mòr air.

38 Agus, feuch, ghlaodh duine àraidh do'n t-sluagh, ag ràdh, A mhaighstir, tha mi a' guidhe ort, amhaire air mo mhac, oir is e m'aon duine cloinne e⁵.

¹ mu'n cluinneam. ² nan nithe so. ³ m'a shiubhal,

⁴ bothain.

⁵ is e m'aon ghlin e.

39 Agus, feuch, a ta spiorad a' breith air, agus a ta e gu h-obann ag éigheach; agus a ta e 'ga tharruing as a chéile, air chor as gu bheil e cur cobhair a mach, agus an déigh a chomh-bhruthadh is gann a dh'fhàgas se e.

40 Agus ghuidh mi air do dheisciobluibh gu'n cuireadh iad a mach e, agus cha b'urrainn iad.

41 Agus fhreagair Iosa agus thubhairt e, O ghinealaich mhi-chreidich agus fhiair¹, cia fhad a bhios mi maille ribh, agus a dh'fhuilgeas mi sibh? Thoir an so do mhac.

42 Agus am feadh a bha e fathast a' teachd, thilg an deamhan sìos e, agus reub se e: agus chronuich Iosa an spiorad neòghlan, agus shlànuich e an leanabh, agus thug e d'a athair e.

43 Agus ghabh iad uamhas uile ri mòr-chumhachd Dhé. Ach air dhoibh uile bhi gabhail iongantais ris na h-uile nithibh a rinn Iosa, thubhairt e r'a dheisciobluibh,

44 Taisgibh na briathra so ann bhur cluasaibh: oir tha Mac an duine gu bhi air a thoirt thairis do làmhaidh dhaoine.

45 Ach cha do thuig iadsan an còmhradh so, agus bha e folaichte uatha air chor as nach b'aithne dhoibh e²: agus b'eagalach leo ceisd a chur air mu thimchioll a' chòmhradh so.

46 An sin dh'éirich deasboireachd eat-orra, cò aca bu mliò a bhitheadh.

47 Agus air do Iosa smuaintean an cridhe fhaicinn, ghabh e leanabh, agus chuir e làmh ris féin e,

48 Agus thubhairt e riu, Ge b'e ghabhas ris an leanabh so ann am ainm-sa, tha e a' gabhail rium-sa: agus ge b'e neach a ghabhas rium-sa, tha e gabhail ris an ti a chuir uaidh mi: oir an neach a's lugha 'nur measg-sa uile, bithidh esan mòr.

49 Agus fhreagair Eoin, agus thubhairt e, A mhaighstir, chunnaic sinne duine àraidha' tilgeadh mach dheamhana' d'ainm-sa; agus bhac sinn e, a chionn nach 'eil e 'gar leantuinn-ne.

50 Agus thubhairt Iosa ris, Na bacaibh e: oir ge b'e nach 'eil 'nar n-aghaidh, tha e leinn.

51 A nis, an uair a choimhlionadh làith-ean a gabhail suas, shuidhich e a ghnùis chum dol gu Ierusalem;

52 Agus chuir e teachdairean roimh a ghnùis: agus dh'imich iad, agus chaidh iad a steach do bhaile leis na Samaritan-ach, a dh'ulluchadh air a shon-san.

53 Agus cha do ghabh iadsan ris, a chionn gu'n robh 'aghaidh mar gu'm biodh e dol gu Ierusalem.

54 Agus an uair a chunnaic a dheisciob-

uil Seumas agus Eoin so, thubhairt iad, A Thighearn, an àill leat gu'n abramaid³ teine a theachd a nuas o nèamh, agus an losgadh, eadhon mar a rinn Elías?

55 Ach thionndaidh esan agus chronuich e iad, agus thubhairt e, Cha'n 'eil fhios agaibh ciod a' ghnè spioraid d'am bheil sibh:

56 Oir cha d'thàinig Mac an duine a sgrìos anama dhaoine, ach g'an saoradh. Agus chaidh iad gu baile eile.

57 Agus tharladh, an uair a bha iad ag imeachd air an t-slighe, gu'n dubhairt duine àraidh ris, A Thighearn, leanaidh mise thu ge b'e àit an téid thu.

58 Agus thubhairt Iosa ris, Tha tuill⁴ aig na sionnach, agus nid aig eunlaith an athair; ach cha'n 'eil àit aig Mac an duine anns an cuir e a cheann fuidhe.

59 Agus thubhairt e ri duine eile, Lean mise: ach thubhairt esan, A Thighearn, leig dhomh dol air tùs agus m'athair adhlac.

60 Ach thubhairt Iosa ris, Leig leis na mairbh am mairbh féin adhlac; ach imich thusa agus searmonaich rìoghachd Dhé.

61 Agus thubhairt neach eile mar an ceudna, A Thighearn, leanaidh mise thu: ach leig dhomh air tùs mo chead a ghabhail diubhsan a ta aig mo thigh.

62 Ach thubhairt Iosa ris, Cha'n 'eil neach air bith, a chuireas a làmh ris a' chrann-araidh, agus a sheallas 'na dhéigh, iomchuidh air son rìoghachd Dhé.

CAIB. X.

1 Chuir Crìosd a mach dh'aom uair deich agus trì fichead deisciobul a shearmonachadh; 17 dh'iarr e orra bhi iriosal, agus dh'innis e dhoibh ciod e an ni anns am buineadh dhoibh gairdeachas a dheanamh. 41 Chronuich e Marla.

AN déigh nan nithe sin, dh'orduich an Tighearna mar an ceudna deichnear agus trì fichead eile, agus chuir e lìon dithis agus dithis roimh a ghnùis iad, do gach baile, agus àit, anns an robh e féin gu teachd.

2 Air an aobhar sin thubhairt e riu, Tha am fogharadh gu fìrinneach mòr, ach a ta an luchd-oibre tearc: guidhibh uime sin air Tighearn an fhogharaidh, luchd-oibre chur a mach chum 'fhogharaidh féin.

3 Imichibh: feuch, a ta mise 'gur cur a mach mar uain am measg mhadadh-alluidh.

4 Na giùlainibh sporan, no màla, no brògan; agus na beannaichibh do neach air bith san t-slighe.

5 Agus ge b'e tigh d'an téid sibh a steach, abraibh air tùs, Sìth do'n tigh so.

6 Agus ma bhios mac na sìthe an sin gabhaidh bhur sìth còmhnuidh air: ach

¹ choirbte. ² chum nach mothaicheadh iad e.

³ orduicheadaid.

⁴ garaidh, brocluidh.

mur bi, pillidh *bhur sìth* do *bhur n-ionn-suidh*¹ fèin a ris.

7 Agus fanaibh anns an tigh sin, ag ith-eadh agus ag òl nan nithe a bheirear dhuibh: oir is airidh an t-oibriche air a thuarasdal. Na rachaibh o thigh gu tigh.

8 Agus ge b'e baile d'an tèid sibh a steach, agus san gabh iad ribh, ithibh na nithe sin a chuireas iad 'nur làthair.

9 Agus leighisibh a' mhuintir a ta euslan ann, agus abraibh riu, Tha rioghachd Dhé air teachd am fagus duibh.

10 Ach ge b'e baile d'an teid sibh a steach, agus nach gabh iad ribh, air dhuibh dol a mach air a shràidibh, abraibh,

11 Eadhon duslach *bhur baile* a lean ruinn, tha sinne a' glanadh dhinn 'nur n-aghaidh-sa; gidheadh, biodh fhios so agaibh gu'n do dhruid rioghachd Dhé ribh.

12 Ach a ta mise ag ràdh ribh, gur so-ìomchaire a bhitheas e do Shodom san là ud, na do'n bhaile sin.

13 Is an-aobhinn duit, a Chorasin! is an-aobhinn duit, a Bhetsaida! oir nam bithheadh na h-oibre cumhachdach a rinn-eadh annaibh-sa air an deanamh ann an Tirus agus ann an Sidon, is fad o'n a dheanadh iad aithreachas, 'nan suidhe ann an saic-eudach agus ann an luaithre.

14 Ach bithidh e nì's so-ìomchaire² do Thirus agus do Shidon anns a' bhreitheanas, na dhuibh-sa.

15 Agus thusa, a Chapernaum, a ta air t'àrdachadh gu nèamh, tilgear sios gu h-ifrinn thu.

16 Esan a dh'éisdeas ribhse, éisdidh e rium-sa: agus esan a dhiùltas sibhse, tha e ga mo dhiùltadh-sa: agus an neach a dhiùltas mise, tha e a' diùltadh an tì a chuir uaith mi.

17 Agus phill an deichnear agus an tri fichead le gairdeachas, ag ràdh, a Thighearn, a ta na deamhain fèin fo smachd againne troimh t'ainm-sa.

18 Agus thubhairt e riu, Chunnaic mi Satan, mar dhealanach, a' tuiteam o nèamh.

19 Feuch, a ta mi toirt dhuibh cumhachd saltairt air nathraichibh, agus air scorpionaibh, agus air uile neart an nàmhaid; agus cha ghoirich nì air bith air aon dòigh sibh.

20 Gidheadh na deanaibh gairdeachas air son gu bheil na spioraid fo *bhur smachd*; ach deanaibh gairdeachas air son gu bheil *bhur n-ainmean sgrìobhta* anns na nàmhaidibh.

21 Anns an uair sin fèin rinn Iosa gairdeachas 'na spiorad, agus thubhairt e, Tha mi toirt buidheachais duit, O Athair, a

Thighearn nèimh agus talmhaime, air son gu'n d'fhòlaich thu na nithe sin o *dhaoineibh* glice agus tuigseach, agus gu'n d'fhoillsich thu iad do naoidheanaibh: seadh, Athair, oir is ann mar sin bu toil leatsa.

22 Tha na h-uile nithe air an tabhairt domh-sa le m' Athair: agus cha'n aithne do neach air bith cò e am Mac, ach do'n athair; no cò e an t-athair ach do'n Mhac, agus an neach d'an àill leis a' Mhac fhoillseachadh.

23 Agus air tionndadh r'a dheisciobluibh, thubhairt e riu an uaignidheas, Is beannaichte na suilean a chi na nithe ta sibhse a' faicinn:

24 Oir a ta mi ag ràdh ribh, Gu'm b'iomadh fàidh agus righ, le'm bu mhiann na nithe fhaicinn a ta sibhse a' faicinn, agus nach fac iad; agus na nithe a chluinntinn, a ta sibhse a' cluinntinn, agus nach cual iad.

25 Agus, feuch, sheas fear-lagha àraidh suas, 'ga dhearbhadh³, agus ag ràdh, A mhaighstir, ciod a ni mi chum gu sealbh-aich mi a' bheatha mhaireannach?

26 Agus thubhairt e ris, Ciod a tha sgrìobhta san lagh? cionnas a leughas tu?

27 Agus ag freagairt dasan, thubhairt e, Gràdhaichidh tu an Tighearna do Dhia le d'uile chridhe, agus le d'uile anam, agus le d'uile neart, agus le d'uile inn-tinn; agus do choimhearsnach mar thu fèin.

28 Agus thubhairt esan ris, Is ceart a fhreagair thu: dean-sa so, agus bithidh tu beò.

29 Ach air dhasan toil a bhi aige e fèin fhìreanachadh, thubhairt e ri Iosa, Agus cò e mo choimhearsnach?

30 Agus fhreagair Iosa, agus thubhairt e, Chaidh duine àraidh sios o Ierusalem gu Iericho, agus thuit e am measg luchd-reubainn⁴, agus air dhoibh a rusgadh, agus a lotadh, dh'imich iad rompa, air fhàgail-san doibh leth-mharbh.

31 Agus tharladh, gu'n d'imich sagart àraidh sìos air an t-slighe sin: agus an uair a chunnaic se e, ghabh e seachad air an taobh eile.

32 Agus mar an ceudna, air do Lebhitheach bhi dlùth do'n ionad sin, thàinig e agus dh'amhairc e air, agus ghabh e seachad air an taobh eile.

33 Ach air do Shamairitanach àraidh bhi gabhail an rathaid, thàinig e far an robh esan: agus an uair a chunnaic se e, ghabh e truas mòr deth,

34 Agus thàinig e d'a ionnsuidh, agus cheangail e suas a chreuchdan, a' dortadh oladh agus fìona anna, agus chuir e air

¹ *thugaibh.*

² *so-fhulainge.*

³ *'ga bhuaireadh.*

⁴ *chreachadairean.*

'ainmhídh féin e, agus thug e gu tigh-
òsda e, agus ghabh e cùram dheth.

35 Agus air an là màireach, 'nuair a
dh'fhalbh e, thug e mach dà pheghinn
Romhanach, agus thug e do fhear an
tigh-òsda *iad*, agus thubhairt e ris, Gabh
cùram dheth; agus ge b'e ní tuilleadh a
chaitheas tu, an tràth philleas mise air
m'ais, dìolaidh mi dhuit e.

36 Cò a nis do'n triuir so, a shaoileas tu,
bu choimhearsnach dhasan a thuit am
measg an luchd-reubainn?

37 Agus thubhairt esan, An ti a rinn
tròcair air. An sin thubhairt Iosa ris.
Imich thusa, agus dean mar an ceudna.

38 Agus ag imeachd dhoibh, chaidh e
steach do bhaile àraidh; agus ghabh bean
àraidh, d'am b'ainm Marta, d'a tigh
féin e.

39 Agus bha piuthar aice d'an goirte
Muire, a shuidh aig cosaibh Iosa, agus a
bha 'g éisdeachd 'fhocail.

40 Ach bha Marta air a ro chùradh le
mòran frithealaidh, agus air seasamh dhi
'na làthair, thubhairt i, A Thighearn,
nach 'eil suim agad gu'n d'fhàg mo
phiuthar mise a'm' aonar ri frithealadh?
uime sin abair rithe cuideachadh leam.

41 Agus fhreagair Iosa, agus thubhairt
e rithe, a Mharta, a Mharta, tha thusa làn
cùram, agus dragha mu thimchioll mòrain
do nithibh:

42 Ach a ta aon ni feumail. Agus rinn
Muire roghainn do'n chuid mhaith sin,
nach toirear uaipе.

CAIB. XI.

1 *Theagaisg Criosd d'a dheisciobluibh urnuigh a
dheanamh gu bithchionta. 14 Thilg e mach
deamhan a bha balbh, agus chronuich e na Phair-
isich air son an toibheim. 28 Nochd e cò iad a ta
beannaichte.*

A GUS tharladh air dha bhi ann an
A' ionad àraidh ri h-urnuigh, 'nuair a
sguir e, gu'n dubhairt neach àraidh d'a
dheisciobluibh ris, A Thighearna, teagaisg
dhuinne urnuigh a dheanamh, mar a
theagaisg Eoin d'a dheisciobluibh féin.

2 Agus thubhairt e riu, 'Nuair a nì sibh
urnuigh, abraibh, Ar n-Athair a ta air
nèamh, Gu naomhaichear t'ainm. Thig-
eadh do rìoghachd. Deanar do thoil, mar
air nèamh, gu ma h-amhluidh sin air thal-
amh.

3 Thoir dhuinn o là gu là ar n-aran
lathail.

4 Agus maith dhuinn ar peacanna: oir
a ta sinne féin a' maitheadh do gach aon
air am bheil fiachan againn. Agus na
leig ann am buaireadh sinn, ach saor sinn
o'n olc.

5 Agus thubhairt e riu, Cò agaibh-sa aig
am bi caraid, agus a théid d'a ionnsuidh

air mheadhon-oidhche, agus a their ris, A
charaid, thoir dhomh trì builinnean air
iasachd;

6 Oir thàinig caraid dhomh a m' ionn-
suidh as a shlighe, agus cha 'n 'eil ni
agam a chuireas mi 'na làthair:

7 Agus gu'm freagair esan o'n taobh a
stigh agus gu'n abair e, Na cuir dragh
orm: tha 'n dorus a nis air a dhùnadh,
agus tha mo chlànn maille rium san
leabaidh; cha'n fhaigh mi éirigh agus an
toirt duit.

8 A ta mi ag ràdh ribh, Ged nach éirich
e agus nach toir e dha, air son gur e a
charaid e; gidheadh air son a liosdachd¹,
éiridh e agus bheir e dha mhead as a ta
dh'uireasbhuidh air.

9 Agus a ta mise ag ràdh ribh, Iarraibh,
agus bheirair dhuibh: siribh, agus gheibh
sibh; buailibh an dorus, agus fosgailear
dhuibh.

10 Oir gach neach a dh'iarras, glacaidh
e: agus an ti a shireas, gheibh e: agus
do'n ti a bhuailcas, fosgailear.

11 Ma dh'iarras mac aran air aon neach
agaibh-sa ta 'na athair, an toir e dha
clach? no ma dh'iarras e iasg, an toir e
nathair dha an àit éisg?

12 No ma dh'iarras e ubh, an toir e scor-
pion da?

13 Air an aobhar sin, ma's aithne dhuibh-
sa a ta olc, tiòdhlaçan maithe a thoirt do
'ur cloinn, nach mòr is mò na sin a bheir
bhur n-Athair nèamhaidh an Spìorad
naomh dhoibh-san a dh'iarras air e?

14 Agus bha e tilgeadh a mach deamh-
ain, agus bha e balbh. Agus air dol do'n
deamhan a mach, labhair am balbhan;
agus ghabh an sluagh iongantas.

15 Ach thubhairt cuid diubh, Is ann
troimh Bheelsebub ceannard² nan deamh-
an a ta e tilgeadh mach dheamhan.

16 Agus dh'iarr dream eile dhiubh, 'ga
dhearbhadh, comhar air o nèamh.

17 Ach air dhasan an smuaintean a
thuigsin, thubhairt e riu, Gach rìoghachd
a ta roinnte 'na h-aghaidh féin, fàsaichear
i; agus gach tigh a ta roinnte 'na agh-
aidh féin, tuitidh e.

18 Agus ma tha Satan mar an ceudna air
a roinn 'na aghaidh féin, cionnus a sheasas
a rìoghachd? oir tha sibhse ag ràdh, gu
bheil mise troimh Bheelsebub a' tilgeadh
a mach dheamhan.

19 Agus ma 's ann troimh Bheelsebub
a ta mise a' tilgeadh mach dheamhan, cò
e troimh am bheil bhur clann-sa 'gan
tilgeadh mach? uime sin bithidh iadsan
'nam breitheamhnaibh oirbh.

20 Ach ma 's ann le mèur Dhé a ta mise
a' tilgeadh mach dheamhan, tha rìoghachd
Dhé, gun teagamh, air teachd oirbhse.

¹ dhian-iarrtachd.

² prionnsadh, ceann-feadhna.

21 'Nuair a ghleidheas duine làidir fo armaibh a thalla' féin, tha na bhuineas da ann an sìth.

22 Ach an uair a thig duine a's treise na e, agus a bheir e buaidh air, bheir e uaith 'armachd uile anns an robh a dhòigh, agus roinnidh e a chreach.

23 An neach nach 'eil leam-sa, tha e a'm' aghaidh; agus an neach nach 'eil a' cruinn-eachadh leam-sa, sgapaidd e.

24 'Nuair a théid an spiorad neòghlan a mach á duine, imichidh e troimh ionad-aibh tiorma, ag iarraidh foise: agus an uair nach faigh e sin, their e, Pillidh mi dh'ionnsuidh mo thighe as an d' thàinig mi.

25 Agus air dha teachd, gheibh se e air a sguabadh agus air a dheanamh mais-each.

26 An sin imichidh e, agus bheir e leis seachd spioraid eile a's miosa na e féin; agus air dhoibh dol a steach, gabhaidh iad còmhnuidh an sin: agus bithidh deir-eadh an duine sin nì's miosa na a thoiseach.

27 Agus an uair a bha e labhairt nan nithe so, thog bean àraidh do'n t-sluagh a guth, agus thubhairt i ris, Is beannaichte a' bhrù a ghiùlain thu, agus na cìochan a dheoghail thu.

28 Ach thubhairt esan, Is mò gur beannaichte iadsan a dlr'isdeas ri focal Dé, agus a choimhideas e.

29 Agus an uair a chruinnich an sluagh gu tiugh d'a ionnsuidh, thòisich e air a ràdh, Is droch ghinealach so: tha iad ag iarraidh comhara; agus cha toirear comhara dhoibh, ach comhara Ionais an fhàidh.

30 Oir mar a bha Ionas 'na chomhara do mhuinntir Ninebheh, is ann mar sin mar an ceudna bhios Mac an duine do'n ghinealach so.

31 Eiridh ban-rìghinn na h-àirde deas suas anns a' bhreitheanas maille ri daoineibh a' ghinealach so, agus didh i iad: oir thàinig ise o iomallaibh na talmhainn, a dh'éisdeachd ri gliocas Sholaimh; agus, feuch, a ta nì's mò na Solamh an so.

32 Eiridh muinntir Ninebheh suas anus a' bhreitheanas maille ris a' ghinealach so, agus didh iad e: oir rinn iadsan aithreachas le searmoin Ionais; agus, feuch, a ta nì's mò na Ionas an so.

33 Cha 'n eil neach sam bith, air dha coinneal a lasadh, a chuireas am fòlach i, no fo shoitheach; ach ann an cinnleir, chum gu'm faic an dream a thig a stigh an solus.

34 Is i an t-sùil solus a' chuip: uime sin an uair a bhios do shùil glan, bithidh do chorp uile làn soluis: ach an uair a

bhios do shùil olc, bithidh do chorp mar an ceudna dorcha.

35 Uime sin thoir an aire, nach bi an solus a ta annad 'na dhorchadas.

36 Air an aobhar sin, ma blitheas do chorp uile soillseach, gun chuid sam bith dheth dorcha, bithidh e soillseach gu h-iomlan, mar an uair a shoillsicheas coinneal thu le dealradh.

37 Agus a' labhairt dhasan, dh'iarr Phairiseach àraidh air a dhiuneir a ghabhail maille ris: agus chaidh e stigh, agus shuidh e chum bith.

38 Agus an uair a chunnaic am Phairiseach sin, b'ìoghnadh leis nach d'ionnlaid se e féin roinn a dhiuneir.

39 Agus thubhairt an Tighearna ris, An nis, Phairiseacha, glanaidh sibhse an taobh a muigh do'n chupan agus do'n mhèis: ach a ta 'n taobh a stigh dhibh làn do reubainn agus do aingidheachd.

40 Amadana, an ti a rinn an ni a ta 'n taobh a muigh, nach do rinn e an ni a ta 'n taobh a stigh mar an ceudna?

41 Ach thugaibh uaibh déird do na nithibh a ta agaibh: agus, feuch, a ta na h-uile nithe glan duibh.

42 Ach is an-aobhinn duibh, Phairiseacha: oir a ta sibh a' toirt deachaimh á mionnt, agus á rù, agus as gach uile ghnè luibhean, agus a' gabhail thairis air breitheanas agus air gràdh Dhé: bu chòir dhuibh iad so a dheanamh, agus gun iad sud fhàgail gun deanamh.

43 Is an-aobhinn duibh, Phairiseacha: oir is ionmhuinn leibh na ceud àiteachasuidhe anns na sionagogaibh, agus fàilte fhaotainn air na margaibh.

44 Is an-aobhinn duibh, a sgrìobhaichean agus Phairiseacha, a chealgairean: oir a ta sibh mar uaighean nach faicear, agus do nach toir na daoine a ta 'g im-eachd thairis orra, an aire.

45 Agus fhreagair duine àraidh do'n luchd-lagha, agus thubhairt e ris, A mhaighstir, le so a labhairt, tha thu toirt maslaidh dhuinne mar an ceudna.

46 Agus thubhairt esan, Is an-aobhinn dhuibh-sa mar an ceudna, a luchd-lagha: oir a ta sibh a' cur uallacha troma do ghiùlan air daoineibh, agus cha bhean sibh féin ris na h-uallaichibh le h-aon do bhuir mèuraibh.

47 Is an-aobhinn duibh: oir a ta sibh a' togail àitean-adhlaid nam fàidhean, agus is iad bhur n-aithriche a mharbh iad.

48 Gu deimhin a ta sibh a' toirt fianuis gu bheil sibh ag aontachadh le gnìomhar-aibh bhur n-aithriche: oir mharbh iadsan gu deimhin iad, agus ta sibhse a' togail an àitean-adhlaid.

49 Air an aobhar sin thubhairt gliocas Dé, Cuiridh mise fàidhean, agus abstoil d'an ionnsuidh, agus cuid diubh marbh-

aith iad, agus *cuid eile* geur-leanaidh iad;

50 Chum gu'n agrar air a' ghinealach so fuil nam fàidhean uile a dhòirteadh o thoiseach an domhain;

51 O fhuil Abeil gu fuil Shachariais, a mhilleadh eadar an altair agus an team-pull: gu deimhin a ta mi ag ràdh ribh, gu'n agrar i air a' ghinealach so.

52 Is an-aobhinn duibh, a luchd-lagha: oir thug sibh air falbh iuchair an eòlais: cha deachaidh sibh féin a steach, agus an dream a bha dol a steach, bhac sibh iad.

53 Agus an uair a bha e labhairt nan nithe so riu, thòisich na sgrìobhaichean agus na Phairisich air a chur thuige gu dian, agus a tharruing gu labhairt air mòran do nithibh:

54 A' deanamh feall-aire air, agus ag iarraidh ni éigin a ghlacadh as a bheul, chum gu'm biodh cuis-dhitidh aca 'na aghaidh.

CAIB. XII.

1 *Shearmonaich Criosd d'a dheisciobluibh iad a sheachnadh céilg, agus geillt ann an cur a theagaisg an céill. 13 Rabhadh do'n t-sluagh a bhàir am faicill an aghaidh sàinnt. 22 Cha'n fheud sinn bhàir ro chùramach mu nithibh talmhaidh.*

ANNS an àm sin, an uair a bha sluagh gun àireamh air cruinneachadh, ionnus gu'n robh iad a' saltairt air a chéile, thòisich e air a ràdh r'a dheisciobluibh féin, Roimh gach ni bithibh air bhur faicill o thaois ghoirt nam Phairiseach, eadhon cealgaireachd.

2 Oir cha'n 'eil ni air bith foluichte, nach foillsichear: no uaigneach, air nach faighear fios.

3 Air an aobhar sin ge b'e ni a labhair sibhsan dorchadas, cluinnear e san t-solus: agus an ni a labhair sibh sa' chluais an seòmraichibh uaigneach, gairmear e air mullach nan tighean.

4 Agus a ta mi ag ràdh ribhse, mo chàirde, Na biodh eagal oirbh roimh 'n mhuinntir sin a mharbhas an corp, agus 'na dhéigh sin aig nach 'eil ni tuilleadh dh'fheudas iad a dheanamh:

5 Ach nochdaidh mi dhuibh cò e roimh an còir dhuibh eagal a bhi oirbh: Biodh eagal an Ti ud oirbh, aig am bheil cumhachd, an déigh neach a mharbhadh, a thilgeadh do ifrinn; seadh, a ta mi ag ràdh ribh, Biodh eagal an Ti so oirbh.

6 Nach 'eil cùig gealbhoinn air an reiceadh air dhà fheoiring¹, agus cha'n 'eil aon duibh air dhearmad am fianuis Dé?

7 Ach a ta eadhon fuilteine bhur cinn uile air an àireamh. Uime sin na biodh eagal oirbh: is fearr sibhse na mòran ghealbhoinn.

8 Agus a ta mise ag ràdh ribh, Ge b'e

neach a dh'aidicheas mise am fianuis dhaoine, aidichidh Mac an duine esan mar an ceudna an làthair aingle Dhé.

9 Ach ge b'e neach a dh'àicheadhas mise am fianuis dhaoine, àicheadhar esan am fianuis aingle Dhé.

10 Agus ge b'e neach a labhras focal an aghaidh Mhic an duine, maithear dha e: ach do'n ti a labhras toibheum an aghaidh an Spioraid naoimh, cha toirear maith-eanas.

11 Agus an uair a bheir iad sibh chum nan sionagog, agus nan uachdaran, agus nan daoine cumhachdach, na biodh e 'na ro-chùram oirbh cionnus no ciod a fhreagras sibh, no ciod a their sibh:

12 Oir teagaisgidh an Spiorad naomh dhuibh, anns an uair sin féin, na nithe a's còir dhuibh a ràdh.

13 Agus thubhairt neach àraidh do'n t-sluagh ris, A mhaighstir, abair ri m' bhràthair an oighreachd a roinn rium.

14 Agus thubhairt e ris, A dhuine, cò a chuir mise a'm' bhreitheamh, no a'm' fhear-roinn os bhur ceann?

15 Agus thubhairt e riu, Thugaibh an aire, agus gleidhibh sibh féin o shannt: oir cha'n ann am mòr-phailteas nan nithe a ta e sealbhachadh tha beatha an duine.

16 Agus labhair e cosamhlachd riu, ag ràdh, Thug fearann duine shaoibhir àraidh bàrr pailte uath:

17 Agus smuainich e ann féin, ag ràdh, Ciod a ni mi, a chionn nach 'eil agam àit anns an cruinnich mi mo thoraidh?

18 Agus thubhairt e, Ni mi so: leagaidh mi mo shàibhlean, agus togaidh mi *sàibhlean* a's mò: agus cruinnichidh mi ann ta sin mo thoraidh uile, agus mo mhaoin.

19 Agus their mi ri m' anam, Anam, a ta agad mòran do nithibh maith air an tasgaidh fa chomhair mòrain bhliadh-nacha: gabh fois, ith, òl, agus bi subhach.

20 Ach thubhairt Dia ris, Amadain, air an oidhche so féin iarrar t'anam uait: an sin cò dha a bhuineas na nithe sin a dh'ulluich thu?

21 Is ann mar sin a ta an ti a thaisgeas ionmhas dha féin, agus nach 'eil saobhir a thaobh Dhé.

22 Agus thubhairt e r'a dheisciobluibh, Uime sin a ta mise ag ràdh ribh, na biodh ro-chùram oirbh mu thimchioll bhur beatha, ciod a dh'itheas sibh; no mu thimchioll bhur cuirp, ciod a chuireas sibh umaibh.

23 Is mò a' bheatha na 'm biadh, agus an corp na 'n t-eudach.

24 Thugaibh fa' near na fithich: oir cha 'n 'eil iadsan a' cur no buain; cha 'n 'eil aca tigh-tasgaidh no sabhal; agus a ta Dia 'gam beathachadh: Cia mòr is fearr sibhse na an eunlaith?

25 Agus cò agaibh-sa, le ro-chùram, is

¹ farthings. Sasg.

urraim aon làmh-choille¹ a chur r'a àirde féin?

26 Mur 'eil sibh uime sin comasach air an nì a's lugha a dheanamh, c'ar son a ta sibh ro chùramach mu nithibh eile?

27 Thugaibh fa' near na lilighean, ciomus a ta iad a' fàs; cha'u 'eil iad a' saothreachadh, no a' snìomh: gidheadh a ta mi ag ràdh ribh, nach robh Solamh féin 'na ghloir uile, air a sgeadachadh mar aon duibh so.

28 Agus ma tha Dia mar sin a' sgeadachadh an fheoir, a ta'n diugh sa' mhach-air, agus am màireach air a thuilgeadh san àmhuim; nach mòr is mò a sgeadaicheas e sibhse, O dhaoine air bheag creidimh?

29 Uime sin na iarraibh-sa ciod a dh'ith-eas sibh, no ciod a dh'òlas sibh, agus na bithibh amharusach.

30 Oir na nithe so uile ta Cinnich an t-saoghail ag iarraidh: ach a ta fhios aig bhur n-Athair-sa gu bheil feum agaibh air na nithibh sin.

31 Ach iarraibh-sa rìoghachd Dhé, agus cuirear na nithe so uile ribh.

32 Na biodh eagail ort, a threud bhlìg; oir is e deadh thoil blur n-Athar an rìoghachd a thoirt duibh.

33 Reicibh na bheil agaibh, agus thugaibh déire uaibh: deanaibh dhuibh féin sporain nach fàs sean, ionmhas nach teirig anns na n-èamhaibh, far nach tig gaduiche am fagus, agus nach truail an reudan².

34 Oir ge b'e àit am bheil bhur n-ionmhas, an sin bithidh blur cridhe mar an ceudna.

35 Biodh bhur leasraidh crioslaichte mu'n cuairt, agus *bhur* lòchrain air an lasadh;

36 Agus sibh féin cosmhuil ri daoineibh a ta feitheamh an Tighearna, 'nuair a philleas e o'n phòsadh; chum air dha teachd agus bualadh, gu'n grad-fhosgail iad dha.

37 Is beannaichte na seirbhisich sin, a gheibh an Tighearna, 'nuair a thig e, ri faire: gu deimhin a ta mi ag ràdh ribh, gu'n crioslaich se e féin mu'n cuairt, agus gu'n cuir e 'nan suidhe iad chum bidh, agus gu'n tig e mach agus gu'n dean e frithealadh dhoibh.

38 Agus ma thig e san dara faire, no ma thig e san treas faire, agus gu'm faigh e iad mar sin, is beannaichte na seirbhisich sin.

39 Agus biodh cinnt agaibh air so, nam biodh fhios aig fear an tighe cia an uair anns an tigeadh an gaduiche, gu'n deanadh e faire, agus nach fuilgeadh e a thigh a bhi air a tholladh troimh.

40 Bithibh-sa uime sin deas mar an ceudna: oir thig Mac an duine 'nuair nach saoil sibli.

41 Agus thubhairt Peadar ris, A Thighearn, an ann ruime a ta thu labhairt a' chosamhlachd so, no ris gach uile?

42 Agus thubhairt an Tighearn, Cò e uime sin an stiùbhard fìrinneach agus glic sin, a chuireas a Thighearn os ceann a theaghlach, a thoirt *doibh* an cuibhrionn bith 'na àm féin?

43 Is beannaichte an seirbhiseach sin, a gheibh a Thighearn, an uair a thig e, a' deanamh mar sin.

44 Gu fìrinneach a ta mi ag ràdh ribh, gu'n cuir se e os ceann na bheil aige.

45 Ach ma their an seirbhiseach sin 'na chridhe, Tha mo Thighearn a' cur dàile 'na theachd; agus ma thòiseachas e air na h-òglaich agus na banòglaich a bhualadh, agus itheadh, agus òl, agus a bhi air mhisg:

46 Thig Tighearn an t-seirbhisich sin ann an là nach 'eil sùil aige ris, agus ann an uair nach fios da, agus gearraidh e 'na bhloighidh e³, agus bheir e a cuibhrionn da maille ris na mi-chrèidich.

47 Agus an seirbhiseach sin d'am b'aithne toil a mhaighstir, agus nach d'ulluich e féin, agus nach d'rinn a réir a thoile, buailear e le mòran bhuillean.

48 Ach an ti do nach b'aithne, agus a rinn nithe a b'airidh air buillibh, buailear esan le beagan *do bhuillibh*. Oir gach neach d'an d'thugadh mòran, iarrar mòran uaith: agus ge b'e ri 'n d'earbadh mòran, iarrar an tuilleadh air.

49 Thàinig mise a chur teine air an talamh, agus ciod is àill leam, ma ta e cheana air fhadadh.

50 Ach a ta baisteadh agam ri bhi air mo bhaisteadh leis, agus cionnus a ta mi air mo theannadh gus an coimhlionar e!

51 Am bheil sibh a' saòilsinn gu'n d'thàinig mise a thoirt sìthe air an talamh? nì h-eadh, a ta mi ag ràdh ribh, ach aimhreit.

52 Oir bithidh a so suas cùignear an aon tigh air an roinn, triuir an aghaidh dithis, agus dithis an aghaidh triuir.

53 Bithidh an t-athair air a roinn an aghaidh a' mhic, agus am mac an aghaidh an athar; a' mhàthair an aghaidh na nighini, agus an nighean an aghaidh na màthar; a' mhàthair-chéile an aghaidh mnà a mic, agus bean a' mhic an aghaidh a màthar-chéile.

54 Agus thubhairt e mar an ceudna ris an t-sluagh, 'Nuair a chi sibh neul ag éirigh san àird an iar, air ball their sibh, A ta fras a' teachd; agus a ta e mar sin.

55 Agus an uair a *chi sibh* a' ghaoth á

¹ bhan-lamh.

² leomann.

³ sgaraidh e uailh e.

deas a' séideadh, their sibh, Bithidh teas ann; agus a ta e tachairt.

56 A chealgairean, is aithne dhuibh breth a thoirt air aghaidh nan speur, agus na talmhainn; ach cionnus nach 'eil sibh a' toirt breth air an aimsir so?

57 Agus c'ar son nach 'eil sibh eadhon uaibh féin a' bhreithneachadh an ni sin a ta ceart?

58 'Nuair a théid thu maille ri d' eascaraid chum an uachdarain, dean dicholl san t-slighe air bhi air do shaoradh naith¹; air eagal gu'n tarraing e chum a' bhreith-eimh thu, agus gu'n toir am breitheamh thairis do'n mhaor thu, agus gu'n tilg am maor am prìosan thu.

59 A ta mi ag ràdh riut, nach téid thu mach as a sin, gus an ioc thu eadhon a' pheghinn dheireannach.

CAIB. XIII.

¹ Shearmonaich Crìosd aithreachas o'n sgrìos a thàinig air na Galiléaich, agus air muinntir eile.

⁶ Cosamhlachd na craoibhe-fhìge gun toradh.

¹¹ Shlànuich Crìosd bean a bha air a cromadh le h-eucail phiantaich rè ochd bliadhna deug.

A GUS bha làthair san àm sin daoine àraidh a dh'innsidh dha mu thimchioll nan Galiléaich, muinntir a mheasg Pilat am fuil maille r'an ìobairtibh.

2 Agus fhreagair Iosa agus thubhairt e riu, Am bheil sibh a' saòilsinn gu'n robh na Galiléaich sin 'nam peacaich nì's mò na na Galiléaich uile, air son gu'n d'fhulaing iad a leithid so?

3 Ni h-eadh, a ta mi ag ràdh ribh: ach mur dean sibhse aithreachas, sgrìosar sibh uile mar an ceudna.

4 No na h-ochd ri dheug sin air an do thuit an tùr ann an Sìloam, agus a mharbh iad, an saoil sibh gu'n robh iadsan 'nam peacaich² os ceann nan uile dhaoine a bha nan còmhnuidh an Ierusalem?

5 Ni h-eadh, a ta mi ag ràdh ribh: ach mur dean sibhse aithreachas, sgrìosar sibh uile mar an ceudna.

6 Labhair e mar an ceudna an cosamhlachd so: Bha aig duine àraidh crann-fìge suidhichte 'na ghàradh fìona³: agus thàinig e ag iarraidh toraidh air, agus cha d'fhuair e.

7 An sin thubhairt e ris a' ghàradair⁴, Feuch, a ta mi rè thri bliadhna a' teachd a dh'iarraidh toraidh air a' chrann-fhìge so, agus cha 'n eil mi faotainn a bheag: gearr sìos e, c'ar son a ta e fàsachadh na talmhainn?

8 Agus fhreagair esan agus thubhairt e ris, A Thighearna, leig leis air a' bhliadhna so mar an ceudna, gus an cladhaich mi m'a thimchioll, agus gu'n cuir mi aolach⁵ m'a bhun:

9 Agus ma ghiùlaineas e toradh, is maith sin: ach mur giùlain, 'na dhéigh sin gearraidh tu sìos e.

10 Agus bha e a' teagasg an aon do na sionagogaibh air an t-sàbaid.

11 Agus, feuch, bha bean àraidh a làthair aig an robh spiorad anmhuinneachd rè ochd bliadhna deug, agus bha i air a cromadh ri chéile, agus gun chomas aice air chor sam bith i féin a dhìreachadh.

12 Agus an uair a chunnaic Iosa i, ghairm e d'a ionusuidh i, agus thubhairt e rithe, A bhean, tha thu air d' fhuasgladh⁶ o d' anmhuinneachd.

13 Agus chuir e a làmhan oirre; agus air ball⁷ rinneadh dìreach i, agus thug i glòir do Dhia.

14 Agus fhreagair uachdaran na sionagòig, agus e làn do fheirg air son gu'n d'rinn Iosa leigheas air là na sàbaid, agus thubhairt e ris an t-sluagh, Tha sè làithean anns an còir obair a dheanamh: orra so air an aobhar sin thigibh, agus bithibh air bhur leigheas, agus na b'ann air là na sàbaid.

15 An sin fhreagair an Tighearn e, agus thubhairt e, A chealgair⁸, nach fuasgail gach aon agaibh a dhàmh no 'asal o'n phrasaich, agus nach toir e gu uisge e air là na sàbaid?

16 Agus nach bu chòir a' bhean so, a ta 'na nighinn do Abraham, a cheangail Satan a nis rè ochd bliadhna deug, a bhi air a fuasgladh o'n chuibhreach so air là na sàbaid?

17 Agus an uair a thubhairt e na nithe sin, chuireadh a naimhdean uile gu nàire; ach rinn an sluagh uile gairdeachas, air son nan uile nithe glòrmhor a rinneadh leis.

18 An sin thubhairt e, Co ris a ta rìoghachd Dhé cosmhuil? agus co ris a shamhlacheas mi i?

19 Tha i cosmhuil ri gràinne do shìol mustaird, a ghabh duine, agus a chuir e 'na ghàradh: agus dh'fhàs e, agus rinn-eadh craobh mhòr dheth; agus rinn eunlaith an athair mid 'na geugaibh.

20 Agus thubhairt e a ris, Co ris a shamhlacheas mi rìoghachd Dhé?

21 Tha i cosmhuil ri taois ghoirt⁹, a ghabh bean agus a dh'fholaich i an tri tomhasaibh mine, gus an do ghoirticheadh an t-iomlan.

22 Agus chaidh e troimh¹⁰ gach caithir agus baile beag, a' teagasg, agus a' gabhail na slighe gu Ierusalem.

23 An sin thubhairt neach àraidh¹¹ ris, A Thighearn, an tearc iad a shaorar? Agus thubhairt esan riu,

24 Deanaibh spairn chruaidh gu dol a

¹ air a bhì rèidh ris.

² feichneimibh.

³ fìon-tìos.

⁴ ghairdinear.

⁵ inneir.

⁶ air do shaoradh.

⁷ san uair sin féin.

⁸ A chealgairean.

⁹ laibhin.

¹⁰ tre, trid.

¹¹ àraid.

stigh air a' gheata chumhann: oir a ta mi ag ràdh ribh, gu'n iarr mòran dol a stigh, agus nach urrainn iad.

25 O'n uair a dh'éireas fear an tighe, agus a dhùineas e 'n dorus, agus a thòisicheas sibhse air seasamh a muigh, agus an dorus a bhualadh, ag ràdh, A Thighearn, a Thighearn, fosgail duinn; agus air dhasan freagairt their e ribh, Cha'n aithne dhomh sibh, cò as a ta sibh:

26 An sin tòisichidh sibh air a ràdh, Dh'ith sinn agus dh'òl sinn a'd' làthair, agus theagaisg thu 'nar sràidibh.

27 Ach their esan, A ta mi ag ràdh ribh, cha'n aithne dhomh sibh, cò as a ta sibh; imichibh uam uile, a luchd-deanamh na h-eucorach.

28 An sin bithidh gul agus g'iosgan fhiacal, an uair a chli sibh Abraham, agus Isaac, agus Iacob, agus na fàidhean uile ann an riochachd Dhé, agus sibh féin air bhuir tilgeadh a mach.

29 Agus thig iad o'n àird an ear, agus o'n àird an iar, agus o'n àirde tuath agus deas, agus suidhidh iad ann an riochachd Dhé.

30 Agus, feuch, a ta daoine air dheireadh a bhitheas air thoiseach, agus air thoiseach a bhitheas air dheireadh.

31 Air an là sin féin thàinig Phairisich àraidh d'a ionnsuidh, ag ràdh ris, Gabh¹ a mach agus imich a so: oir tha toil aig Herod do mharbhadh.

32 Agus thubhairt e riu, Imichibh agus innsibh do'n t-sionnach sin, Feuch, a ta mi tilgeadh mach dheamhan, agus a ta mi deanamh leigheas an diugh, agus am màireach, agus air an treas là bithidh mi air mo dheanamh foirfe.

33 Gidheadh, is éigin domh imeachd an diugh agus am màireach, agus an là 'na dhéigh sin: oir cha'n fheud e bhi gu'n cuirear fàidh gu bàs a mach á Ierusalem.

34 A Ierusalem, a Ierusalem, a mharbhas na fàidhean, agus a chlachas an dream a chuirear a d' ionnsuidh: cia minic a b'àill leam do chlann a chruinneachadh, mar a chruinneicheas ceare a h-àlach fuidh a sgiathaibh, agus cha b'àill leibh!

35 Feuch, dh'fhàgadh bhuir tigh fàs agaibh: agus gu deimhin a ta mi ag ràdh ribh, nach faic sibh mise, Gus an tig an t-àm, anns an abair sibh, Is beannaichte an ti a thig an ainm an Tighearna.

CAIB. XIV.

1 Shlànuich Crìosd neach air an robh a' mheud-bhronn, 1 theagaisg e irioslachd. 16 Le cosamhlachd na suipeir mòire, nochd e cionnus a blios daoine saoghalta, a ni tàir air focal Dé, air an druideadh a mach á riochachd nèimh.

A GUS tharladh, an tràth chaidh e gu tigh uachdarain àraidh do na Phairisich a dh'itheadh bidh air là na sàbaid, gu'n robh iad a' deanamh geur-fhaire air.

2 Agus, feuch, bha duine àraidh 'na làthair air an robh a' mheud-bhronn².

3 Agus fhreagair Iosa, agus labhair e ris an luchd-lagha, agus ris na Phairisich, ag ràdh, Am bheil e ceaduichte leigheas a dheanamh air là na sàbaid?

4 Ach dh'fhan iadsan 'nan tosd, Agus air dha breith air, leighis se e, agus leig e uaith e:

5 Agus fhreagair e iadsan³, ag ràdh, Cò agaibh-sa, ma thuiteas 'asal no a dhamh ann an slochd, nach tarraing a mach gu grad e air là na sàbaid?

6 Agus cha b'urrainn iad a fhreagairt a ris anns na nithibh sin.

7 Agus labhair e cosamhlachd⁴ riu-san a fhuair cuireadh, 'nuair a thug e fa'near mar a thagh iad na ceud àiteacha-suidhe, ag ràdh riu.

8 'Nuair a gheibh thu cuireadh o'neach air bith chum bainnse, na suidh anns a' cheud àit; air eagail gu'n d' fhuair duine a's urramaiche na thusa cuireadh uaith;

9 Agus gu'n tig an ti a thug cuireadh dhuitse agus dhàsan, agus gu'n abair e riut, Thoir àit do'n duine so; agus gu'n tòisich thusa an sin le nàire air suidhe anns an àit a's isle.

10 Ach an uair a gheibh thu cuireadh, imich agus suidh anns an àit a's isle; chum, 'nuair a thig esan a thug cuireadh dhuit, gu'n abair e riut, A charaid, suidh suas ni's àirde: an sin gheibh thu urrainn an làthair na muinntir a ta 'nan suidhe air bord maille riut.

11 Oir ge b'e neach a dh'àrdaicheas e féin, islicheas e; agus ge b'e neach a dh'islicheas e féin, àrdaichear e.

12 An sin thubhairt e ris an ti mar an ceudna a thug cuireadh dha, 'Nuair a ni thu dinneir no suipeir, na gairm do chàird-ean, no do bhràithre, no do luchd-dàimh, no do choinhearsnaich shaoibhir; air eagail gu'n toir iadsan mar an ceudna cuireadh dhuitse a ris, agus gu'n faigh thu a' chomain cheudna.

13 Ach an uair a ni thu cuirm⁵, gairm na bochdan, na daoine ciurramach, na bacaich, na doill:

14 Agus bithidh tu beannaichte, a chionn nach urrainn iad a' chomain cheudna thoirt duit: oir gheibh thu comain ann an aiseirigh nam firean.

15 Agus an uair a chual aon do na shuidh maille ris air bord na nithe sin, thubhairt e ris, Is beannaichte an ti sin a dh'itheas aran ann an riochachd Dhé.

16 Ach thubhairt esan ris, Rinn duine àraidh suipeir mhòr, agus thug e cuireadh do mhòran:

¹ Theirig, Rach.

² dropsy. Sasg.

³ labhair e riu a ris.

⁴ comhad, parabol.

⁵ fèisd.

17 Agus chuir e a sheirbhiseach uaith an àm na suipeir a ràdh ris a' mhuinntir a fhuair cuireadh, Thigibh, oir a ta na h-uile nithe a nis ullamh.

18 Agus thòisich iad uile a dh'aon *ghuth* air an leithsgeul a ghabhail. Thubhairt an ceud fhear ris, Cheannaich mi fearann, agus is éigin domh dol a mach agus fhaicinn: tha mi ag guidhe ort, gabh mo lethsgeul.

19 Agus thubhairt fear eile, Cheannaich mi cùig cuing dhamh, agus a ta mi dol g'an dearbhadh: tha mi ag guidhe ort, gabh mo lethsgeul.

20 Agus thubhairt fear eile, Phòs mi bean, agus air an aobhar sin cha'n 'eil e 'n comas domh teachd.

21 Agus thàinig an seirbhiseach sin, agus dh'innis e na nithe sin d'a thighearn. An sin air gabhail feirge do fhear an tighe, thubhairt e 'a sheirbhiseach, Gabh a mach gu grad gu sràidibh agus gu caol-sràidibh a' bhaile, agus thoir a stigh an so na bochdan, agus na daoine ciurramach, agus na bacaich, agus na doill.

22 Agus thubhairt an seirbhiseach, A Thighearn, rinneadh mar a dh'òrduich thu, gidheadh tha àite *falamh* ann fathast.

23 Agus thubhairt an Tighearna ris an t-seirbhiseach, Gabh a mach gus an rathaidibh mòra agus na gàrachaibh, agus co-éignich iad gu teachd a steach, chum gu'm bi mo thigh air a lìonadh.

24 Oir a ta mi ag ràdh ribh, nach blais aon do na daoineibh ud a fhuair cuireadh, do m' shuiper-sa.

25 Agus bha sluagh mòr ag imeachd maille ris: agus air dha tionndadh, thubhairt e riu,

26 Ma thig neach air bitl a m' ionnsuidh-sa, agus nach fuathaich e 'athair, agus a mhàthair, agus a bhean-phòsda, agus a chlann agus a bhràithrean, agus a pheathraichean, seadh, agus a bheatha mar an ceudna, cha'n 'eil e'n comas da bhi 'na dheisciobul dhomh-sa.

27 Agus ge b'e neach nach giùlain a chrann-ceusaidh, agus nach lean mise, cha'n 'eil e 'n comas da bhi 'na dheisciobul dhomh-sa.

28 Oir cò am fear agaibh-sa leis am miann tùr a thogail, nach suidh sìos air tùs, agus nach meas an costus, a dh'-fheuchainn am bheil aige na chuireas crìoch air?

29 Air eagal an déigh dha a bhunadh a leagadh, agus gun bhi comasach air crìoch a chur air, gu'n tòisich na h-uile a chi e ri fanoid air.

30 Ag ràdh, Thòisich an duine so air *tigh* a thogail, agus cha b'urrainn e a chrìochnachadh.

31 No cò an righ, ag dol a mach dha gu cogadh an aghaidh righ eile, nach suidh

sìos air tùs, agus nach gabh comhairle, a dh'-fheuchainn an urrainn e le deich mìle coinneamh a thoirt d'asan a ta teachd le fichead mìle 'na aghaidh?

32 No air bhi dhàsan fathast fad uaith, cuiridh e teachdaireachd a dh'iarraidh cumhachan sìthe.

33 Mar sin mar an ceudna, gach neac agaibh-sa, nach tréig na h-uile nithe a ta aige, cha'n 'eil e'n comas da bhi 'na dheisciobul dhomh-sa.

34 Tha 'n salann maith: ach ma chaill-eas an salann a bhlas, ciod e leis an deanar deadh-bhlasda e?

35 Cha'n 'eil e iomchuidh chum na talmhainn, no chum an dùnain'; ach tilgidh daoine mach e. An ti aig am bheil cluasa chum éisdeachd, éisdeadh e.

CAIB. XV.

4 Cosamhlachd na caorach cailte, 8 a' mhìr airgid, 11 agus a' mhic struidheil.

AN sin thàinig na cìs-mhaoir uile agus na peacaich am fagus da, chum éisdeachd ris.

2 Agus rinn na Phairisich agus na sgrìobhaichean gearan, ag ràdh, Tha am fear so gabhail pheacadh d'a ionnsuidh, agus ag itheadh maille riu.

3 Agus labhair esan an cosamhlachd so riu, ag ràdh,

4 Cò an duine dhibhse aig am bheil ceud caora, ma chailleas e aon diubh, nach fàg an naoi deug agus an ceithir fichead anns an fhàsach, agus nach téid an déigh na caorach a chailleadh, gus am faigh e i?

5 Agus air dha a faotainn, cuiridh e air a ghuaillibh i le gairdeachas.

6 Agus an fhuair a thig e dhachaidh, gairmidh e a chàirdean agus a choimhearsnaich an ceann a chéile, ag ràdh riu, Deanaibh gairdeachas maille rium-sa, a chionn gu'n d'fhuair mi mo chaora bha cailte.

7 Mar sin, a ta mi ag ràdh ribh, gu'm bi aoibhneas air nèamh air son aoin pheacaich a ni aithreachas, ni's mò na air son naoi deug agus ceithir fichead fìrean, aig nach 'eil feum air aithreachas.

8 No cò a' bhean aig am bheil deich buinn airgid, ma chailleas i aon bhonn diubh, nach las coinneal, agus nach sguab an tigh, agus nach iarr gu dìchiollach gus am faigh i e?

9 Agus air dhi fhaotainn, gairmidh i a ban-chairdean agus a ban-choimhearsnaich an ceann a chéile, ag ràdh, Deanaibh gairdeachas leam-sa, oir fhuair mi am bonn a chaill mi.

10 Mar an ceudna a ta mi ag ràdh ribh, A ta gairdeachas an làthair aigle Dhé, air son aoin pheacaich a ni aithreachas.

11 Agus thubhairt e, Bha aig duine àraidh dithis mhac:

12 Agus thubhairt am mac a b' òige dhiubh r'a athair, Athair, thoir dhomh-sa a' chuid-roinn a thig orm do d' mhaoin. Agus roinn e eatorra a bheathachadh.

13 Agus an déigh beagain do làithibh, chruinnich am mac a b' òige a chuid uile, agus ghabh e a thurus do dhùthaich fad air astar, agus an sin chaith e a mhaoin le beatha struidheasaich¹.

14 Agus an uair a chaith e a chuid uile, dh'éirich gorta ro mhòr san tìr 'sin; agus thòisich e ri bhì ann an uireasbhuidh.

15 Agus chaidh e agus cheangail se e fèin ri aon do shaoir-dhaoimibh na dùthcha sin; agus chuir e d'a fhearann e, a bhiadh-adh² mhuc.

16 Agus bu mhiann leis a bhrù a lìonadh do na plaosgaibh³ a bha na mucan ag itheadh; ach⁴ cha d'thug neach air bith dha.

17 Agus an uair a thàinig e d'a ionnsuidh⁵ fèin, thubhairt e, Cia lìon do luchd-tuasadail m'athar-sa aig am bheil aran gu leoir⁶ agus r'a sheachnadh, 'nuair a ta mise a' bàsachadh le gorta?

18 Eiridh mi, agus thèid mi dh'ionnsuidh m'athar, agus their mi ris. Athair, pheacaich mi an aghaidh fhlaithenais, agus a'd' làthair-sa.

19 Agus cha'n airidh⁷ mi tuilleadh gu'n goirte do mhac-sa dhìom: dean mi mar aon do d' luchd-tuasadail.

20 Agus dh'éirich e, agus chaidh e dh'ionnsuidh 'athar. Ach air dha bhì fathast fad uaith, chunnaic 'athair e, agus ghabh e truas mòr d'eth, agus ruith e, agus thuit e air a mhuineal, agus phòg se e.

21 Agus thubhairt am mac ris, Athair, pheacaich mi an aghaidh fhlaithenais, agus a'd' làthair-sa, agus cha'n airidh mi tuilleadh gu'n goirte do mhac dhìom.

22 Ach thubhairt an t-athair r'a sheirbh-isich, Thugaibh a mach a' chulaidh a's fearr, agus cuiribh uime i; agus cuiribh fainne air a làimh, agus brògan air a chosaibh.

23 Agus thugaibh an so an laogh biadh-ta, agus marbhaibh e; agus itheamaid agus biomaid subhach:

24 Oir bha mo mhac so marbh, agus tha e beò a ris; bha e caillte, agus fhuaradh e. Agus thòisich iad air bhì subhach.

25 A nis bha a mhac bu shine mach san fhearann: agus an uair a thàinig e, agus a thà⁸ e am fagus do'n tigh, chual e an ceòl agus an damsa.

26 Agus ghairm e d'a ionnsuidh aon do na h-òglaich, agus dh'fhiosraich e ciod bu chiall do na nithibh sin.

27 Agus thubhairt esan ris, Thàinig do bhràthair; agus mharbh t'athair an laogh biadh-ta, a chionn gu'n d'fhuair e ris slàn fallain e.

28 Agus ghabh esan fearg, agus cha b' àill leis dol a stigh: air an aobhar sin thàinig 'athair a mach, agus chuir e impidh air.

29 Ach fhreagair esan agus thubhairt e r'a athair, Feuch, a ta mise a' deanamh seirbhis duit an uiread so do bhliadhnach-aibh, agus uair air bith cha do bhris mi t'àithne, gidheadh cha d'thug thu meann riamh dhomh, chum gu'm bithinn subhach maille ri mo chàirdibh.

30 Ach an uair a thàinig do mhac so, a dh'ith suas do bheathachadh maille ri striopaichibh, mharbh thu an laogh biadh-ta dha.

31 Agus thubhairt e ris, A mhic, tha thusa a ghnàth maille rium, agus na h-uile nithe a's leamsa, is leatsa iad.

32 Bu chòir dhuinn a bhì subhach, agus aoibhneach; oir bha do bhràthair so marbh, agus tha e beò a ris; agus bha e caillte, agus fhuaradh e.

CAIB. XVI.

1 Cosamhlachd an stiùbhaird eucoraich. 14 Chron-uich Crìosd cealg nam Phàiriseach sanntach. 19 Cosamhlachd a' ghèdcair shaoibhir, agus an duine bhòchd Lasarus.

A GUS thubhairt e mar an ceudna r'a dheisciobluibh, Bha duine saoi bhir àraidh ann aig an robh stiùbhard; agus chasaideadh ris e, mar neach a bha deanamh ana-caithidh air a mhaoin.

2 Agus ghairm se e, agus thubhairt e ris, Cìod e so a ta mi cluinntinn mu d' thimchioll? thoir cunntas air do stiùbhardachd; oir cha'n fhead thu bhì nì's faide a'd' stiùbhard.

3 An sin thubhairt an stiùbhard ann fèin, Cìod a ni mi? oir a ta mo mhaighstir a' toirt na stiùbhardachd nam: cha'n urrainn mi ruamhar a dheanamh, is nàr leam déire iarraidh.

4 A ta fhios agam cìod a ni mi, chum 'nuair a chuirear as an stiùbhardachd mi, gu'n gabh iad a steach d'an tighibh mi.

5 Agus air dha gach aon dhiubsan air an robh fiachan aig a Thighearn a ghairm d'a ionnsuidh, thubhairt e ris a' cheud fhear, Cia meud a ta aig mo Thighearn ortsa?

6 Agus thubhairt esan, Ceud tomhas⁹ oladh. Agus thubhairt e ris, Gabh do sgrìobhadh, agus suidh sìos gu h-ealamh, agus sgrìobh leth-cheud.

7 An sin thubhairt e ri fear eile, Agus cia meud a ta aig ortsa? Agus thubhairt esan, Ceud tomhas¹⁰ cruithneachd. Agus

¹ ana-caithlich.
² cochallaibh.

³ bhuackailleachd.
⁴ oir.

⁵ thuige, chuide.
⁶ tharruing.

⁷ leòr.
⁸ bat.

⁹ cha'n fhiù.
¹⁰ omer.

thubhairt e ris, Gabh do sgriobhadh, agus sgriobh ceithir fichead.

8 Agus mhol an Tighearn an stiùbhard eucorach, do bhrìgh gu'n d'rinn e gu glic: oir a ta clann an t-saoghail so 'nan ginealach féin nì's glìce na clann an t-soluis.

9 Agus a ta mise ag ràdh ribh, Dean-aibh dhuibh féin càirdean le Mamona na h-eucorach; chum 'nuair a shiubhlas sibh¹, gu'n gabhar sibh do àitibh-còmh-nuidh sìorruidh.

10 An ti a ta fìrinneach anns an nì a's lugha, tha e fìrinneach mar an ceudna ann am mòran; agus an ti a ta eucorach anns an nì a's lugha, tha e eucorach ann am mòran mar an ceudna.

11 Air an aobhar sin, mur robh sibh fìrinneach anns an t-saobhreas eucorach, cò a dh'earbas ribh an *saoibhreas* fìor?

12 Agus mur robh sibh fìrinneach ann an cuid duine eile, cò a bheir dhuibh an nì a's leibh féin?

13 Cha'n 'eil seirbhiseach sam bith comasach air seirbhis a dheanamh do dhà thighearn; oir an dara cuid fuathaichidh e aon diubh, agus bheir e gràdh do'n fhear eile; no gabhaidh e le aon diubh agus nì e tàir air an fhear eile. Cha'n 'eil sibh comasach air seirbhis a dheanamh do Dhia agus do Mhamon.

14 Agus chuala na Phairisich, a bha sanntach, na nithe sin uile: agus rinn iad fanoid air.

15 Agus thubhairt e rin, Is sibhse an dream a ta 'gur fireanachadh féin am fianuis dhaoine; ach is aithne do Dhia bhuir cridheachan: oir an nì sin a ta ro mheasail aig daoineibh, is gràineileachd e am fianuis Dé.

16 Bha an lagh agus na fàidhean ann gu teachd Eoin: o sin tha rioghachd Dhé air a searmonachadh², agus a ta gach duine a' dol le dian strì a steach innte.

17 Agus is usadh do nèamh agus do'n talamh dol thairis, na do aon lide do'n lagh tuiteam.

18 Gach neach a chuireas uaith a bhean, agus a phòsas bean eile, tha e deanamh adhaltrannais: agus ge b'e neach a phòsas a bhean a chuireadh air falbh o a fear, tha e deanamh adhaltrannais.

19 Bha duine saoi bhir àraidh ann, a bha air a sgeadachadh le purpur³ agus lion-eudach grunn, agus bha e caitheadh a bheatha gach là gu sòghail le mòr-ghreadhnachas:

20 Agus bha duine bochd àraidh ann, d'am b'ainm Lasarus, a chuireadh 'na luidhe aig a dhorus, làn do chreuchdaibh,

21 Agus bu mhiann leis bhi air a shàs-uchadh leis an sbruileach a bha tuiteam o bhord an duine shaoibhir; seadh, agus

thàinig na madraidh agus dh'imlich iad a chreuchdan.

22 Agus tharladh gu'n d'fhuair an duine bochd bàs, agus gu'n do ghiùlaineadh leis na h-ainglibh e gu uchd Abraham: fhuair an duine saoi bhir bàs mar an ceudna, agus dh'adhlaiceadh e.

23 Agus ann an ifrinn thog e suas a shùilean, air dha bhi ann am piantaibh, agus chunnaic e Abraham, fad uaith, agus Lasarus 'na uchd.

24 Agus ghlaodh e, agus thubhairt e, Athair Abraham, dean tròcair orm, agus cuir Lasarus, chum gu'n tum e bàrr a mheoir ann an uisge, agus gu'm fuaraich e mo theangadh; oir a ta mi air mo ro phianadh san lasair so.

25 Ach thubhairt Abraham, A mhic cuimhnich gu'n d'fhuair thusa do nithe maithe ri àm dhuith bhi beò, agus Lasarus mar an ceudna droch nithe: ach a nis a ta esan a' faotainn sòlais, agus a ta thusa air do phianadh.

26 Agus a bhàrr air so uile, tha doimhne mhòr air a cur eadar sinne agus sibhse, air chor agus iadsan le am b'àill dol á so do 'ur ionnsuidh-sa, nach 'eil e 'n comas doibh; agus nach mò tha e 'n comas do aon neach teachd as sin d' ar n-ionnsuidh-ne.

27 An sin thubhairt e, Uime sin tha mi a' guidhe ort, athair, gu'n cuireadh tu e gu tigh m'athar:

28 Oir a ta cuignear bhlàithrean agam; chum gu'n toir e fianuis doibh, air eagal gu'n tig iadsan mar an ceudna do'n ionad ro phiantach so.

29 Thubhairt Abraham ris, Tha Maois agus na fàidhean aca, éisdeadh iad ri-usan.

30 Agus thubhairt esan, Nì h-eadh, Athair Abraham: ach ma thèid neach d'an ionnsuidh o na marbhaibh, nì iad aithreachas.

31 Agus thubhairt e ris, Mur éisd iad ri Maois agus ris na fàidhibh, cha mhò a chreideas iad, ged éireadh neach o na marbhaibh.

CAIB. XVII.

1 *Theagaisg Criosd gur còir dhuinn aobhar oibheim a sheachnadh, 3 agus maitheanas a thoirt d'a chèile; 6 nochd e mòr-chumhachd beò-chreidimh: 7 tha sinne fo cheangal do Dhia, ach cha'n 'eil esan mar sin dhuinne.*

AN sin thubhairt e r'a dheiscioblaibh, Cha'n fheudar nach tig oibheuman: ach is an-aobhinn *dasan* troimh an tig iad.

2 B'fhearr dha gu'm biodh clach-mhuilinn air a crochadh m'a mhuineal, agus gu'm biodh e air a thilgeadh san fhainge,

¹ nuair is bàs duibh.

² soisgeulachadh.

³ gorm-dhearg, corcur.

na gu'n tugadh e oilbheum¹ do aon neach do'n mhuinntir bhig so.

3 Thugaibh an aire dhuibh féin : ma pheacaicheas do bhràthair a'd' aghaidh, cronuich e ; agus ma ghabhas e aithreachas, thoir maitheanas da.

4 Agus ma pheacaicheas e a'd' aghaidh seachd uairean san là, agus gu'm pill e riut seachd uairean san là, ag ràdh, Tha aithreachas orm ; thoir maitheanas da.

5 Agus thubhairt na li-abstol ris an Tighearn, Meudaich ar creidimh.

6 Agus thubhairt an Tighearn, Nam biodh agaibh creidimh mar ghràinne do shìol mustaird, theireadh sibh ris a' chraoibh Shicamin so, Bi air do spionadh as do fhreumhaibh, agus bi air do shuidheachadh sa' chuan? agus bhlitheadh i ùmhal duibh.

7 Ach cò agaibh-se aig am bheil seirbhis-each a' treabhadh, no ri buachailleachd, a their ris, an déigh dha teachd a steach o'n fhearann, Thig air ball, agus suidh sìos chum bidh?

8 Agus nach dòchadh e ràdh ris, Ulluch nì a ghabhas mise gu m' shuipeir, agus crioslaich thu féin, agus fritheil domh, gus an ith agus an òl mi; agus 'na dhéigh sin ithidh agus òlaidh tusa?

9 An toir e buidheachas do'n t-seirbhis-each sin do bhrìgh gu'n d'rinn e na nithe a dh'orduicheadh dha? cha saoil mi *gu'n toir*.

10 Mar sin sibhse, 'nuair a nì sibh na h-uile nithe a dh'aitheadh dhuibh, abraibh, Is seirbhisich neo-tharbhach sinn : oir rinn sinn a *mhaìn* an nì bu dligheach dhuinn a dheanamh.

11 A nis, ag dol suas da gu Ierusalem, chaidh e troimh mheadhon Shamaria agus Ghalile².

12 Agus an uair a bha e dol a stigh do bhaile àraidh, thachair deichnear dhaoine air a bha 'nan lobhair, a sheas fad uaith :

13 Agus thog iad suas an guth, ag ràdh, Iosa, a mhaighstir, dean tròcair oirnn.

14 Agus an uair a chunnaic e iad, thubhairt e riu, Imichibh, nochdaibh sibh féin do na sagartaibh. Agus ag imeachd dhoibh, ghlanadh iad.

15 Agus an uair a chunnaic aon diubh gu'n do leighiseadh e, phill e air ais, a' toirt glòire do Dhia le guth àrd,

16 Agus thuit e air aghaidh aig a chos-aibh-san, a' toirt buidheachais da : agus bu Samaritanach e.

17 Agus fhreagair Iosa agus thubhairt e, Nach do ghlanadh deichnear? ach an naòinear, c'ait am bheil iad?

18 Cha d'fhuaradh a phill a thoirt glòire do Dhia, ach an coigreach so.

19 Agus thubhairt e ris, Eirich, imich ; shlànuich do chreidimh thu.

20 Agus an uair a dh'fheòraich na Phairisich dheth, c'uin a thigeadh rioghachd Dhé, fhreagair e iad agus thubhairt e, Cha tig rioghachd Dhé air chor gu moth-aichear i³.

21 Cha mhò a their iad, Feuch an so, no, Feuch an sin : oir feuch, a ta rioghachd Dhé an taobh a stigh dhibh⁴.

22 Agus thubhairt e ris na deiscioblubh, Thig na làithean anns am miannach leibh aon do làithibh Mliic an duine fhaicinn, agus cha'n fhaic sibh e.

23 Agus their iad ribh, Feuch an so, no, Feuch an sud : na rachaibh, agus na lean-aibh iad.

24 Oir mar a ta an dealanach a dheal-raicheas o aon *ionad* fo nèamh, a' soill-seachadh gus an *ionad* eile fo nèamh, mar sin a bhitheas Mac an duine mar an ceudna 'na là féin.

25 Ach is éigin da a bhith tùs mòran do nithibh fhulang, agus a bhi air a dhiult-adh leis a' ghinealach so.

26 Agus mar a bha e ann an làithibh Noe, mar sin mar an ceudna bithidh e ann an làithibh Mhic an duine :

27 Bha iad ag itheadh agus ag òl, a' pòsadh agus air an toirt am pòsadh, gus an là an deachaidh Noe a steach do'n àir : agus thàinig an dile⁵, agus sgrios i iad uile.

28 Amhuil fòs mar a thachair ann an làithibh Lot; bha iad ag itheadh agus ag òl, a' ceannach agus a' reiceadh, a' plann-dachadh agus a' togail aitreabh :

29 Ach air an là sin féin anns an deachaidh Lot a mach á Sodom, fhrasadh teine agus pronnasag o nèamh, agus sgrios e iad uile.

30 Is ann mar sin a bhitheas anns an là am foillsichear Mac an duine.

31 Anns an là sin, an ti bhios air mullach an tighe, agus 'airneis anns an tigh, na tigeadh e nuas gu a toirt leis : agus an ti a ta sa' mhachair, na pilleadh esan air ais mar an ceudna.

32 Cuimhnichibh bean Lot.

33 Ge b'e neach a dh'iarras a bheathia féin a thèarnadh, caillidh e i ; agus ge b'e neach a chailleas a bheatha, gleidhidh esan i.

34 A ta mi ag ràdh ribh, anns an oidhche sin bithidh dithis dhaoine san aon leabaidh ; gabhar aon diubh, agus fàgar am fear eile.

35 Bithidh dithis bhan a' bleath⁶ cuid-eachd ; gabhar aon diubh agus fàgar a' bhean eile.

36 Bithidh dithis dhaoine anns a' mlach-

¹ aobhar tuislidh. ² eadar Samaria agus Galile.

³ gu moth-aichear dhi.

⁴ cheana 'nur measg.

⁵ tuil.

⁶ meilleadh.

air; gabhar aon diubh agus fàgar am fear eile.

37 Agus fhreagair iadsan agus thubhairt iad ris, C'ait, a Thighearn? agus thubhairt esan riu, Ge b'e àit *am bi* an corp, an sin crunnichear na h-iolairean.

CAIB. XVIII.

1 *Mu thimchioll na bantraich liosda.* 9 *Mu'n Phairiseach agus mu'n chis-mhaor.* 18 *B'àill le uachdaran àraidh Crìosd a leantainn, ach a ta e air a bhacadh le a shaoibhreas.* 31 *Roimh-innis Crìosd a bhàs.*

A GUS labhair e cosamhlachd riu, a' nochdadh gur còir urnuigh a dheanamh a ghnàth, agus gun fhannachadh¹;

2 Ag ràdh, Bha breitheamh ann am baile àraidh, air nach robh eagal Dé, agus aig nach robh urram do dhuine;

3 Agus bha bantrach àraidh sa' bhaile sin, agus thàinig i d'a ionnsuidh, ag ràdh, Cum còir rium an aghaidh mo nàmhaid.

4 Agus cha b'àill leis rè tamuill: ach 'na dhéigh sin thubhairt e ann féin, Ged nach 'eil eagal Dé orm, no urram agam do dhuine;

5 Gidheadh air son gu bheil a' bhantrach so cur dragha orm, cumaidh mi còir rithe, air eagal le a sìr-theachd gu'n sgèithich i mi.

6 Agus thubhairt an Tighearn, Eisdibh ciod a ta am breitheamh eucorach ag ràdh.

7 Agus nach dean Dia dioghaltas air son a dhaoine taghta féin, a ta ag éigheach ris a là agus a dh'oidheche, ged tha e fad-fhulangach mu'n timchioll?

8 A ta mi ag ràdh ribh gu'n dean e dioghaltas air an son gu luath. Gidheadh, an uair a thig Mac an duine, am faigh e creidimh air an talamh?

9 Agus labhair e an cosamhlachd so ri dream àraidh a bha 'g earbsadh asda féin gu'n ròbh iad 'nam fireanaibh, agus a bha deanamh tàir air dream eile:

10 Chaidh dithis dhaoine suas do'n team-pull a dheanamh urnuigh; fear diubh 'na Phairiseach, agus am fear eile 'na chis-mhaor.

11 Sheas am Phairiseach leis féin, agus rinn e urnuigh mar so, A Dhé, tha mi toirt buidheachais duit nach 'eil mi mar a ta daoine eile, 'nan luchd-foireigin, eucorach, adhaltrannach, no eadhon mar an cis-mhaor so.

12 Tha mi a' trasgadh² dà uair san t-seachdain, tha mi toirt deachaimh as na h-uile nithibh a ta mi sealbhadh.

13 Agus air seasamh do'n chis-mhaor fad air ais, cha b'àill leis fiù a shùl a thogail suas gu nèamh, ach bhuail e 'uchd, ag ràdh, A Dhia, dean tròcair ormsa ta am pheacach.

14 A ta mi ag ràdh ribh, gu'n deach-

aidh am fear so sìos d'a thigh air fhreanachadh *ni's mò* na'm fear ud eile: oir ge b'e neach a dh'ardaicheas e féin, islichear e; agus ge b'e a dh'islicheas e féin, àrd-aichear e.

15 Agus thug iad d'a ionnsuidh mar an ceudna naoidheana, chum gu'm beanadh e riu: agus an uair a chunnaic na deisciobuil so, chronuich siad iad.

16 Ach air do Iosa an gairm d'a ionnsuidh, thubhairt e, Fuilgibh do na leanabaibh teachd a m' ionnsuidh-sa, agus na bacadh iad; oir is ann d'an leithidibh so a ta rìoghachd Dhé.

17 Gu deimhin a ta mi ag ràdh ribh, ge b'e nach gabh rìoghachd Dhé mar leanabh beag, nach téid e air chor sam bith a steach innte.

18 Agus dh'fheòraich uachdaran àraidh dheth, ag ràdh, A mhaighstir mhaith, ciod a ni mi chum gu sealbhaich mi a' bheatha mhaireannach?

19 Agus thubhairt Iosa ris, C'ar son a ghoireas tu maith dhìom-sa? cha'n 'eil neach sam bith maith ach a h-aon, *eadhon* Dia.

20 Is aithne dhuìt na h-àitheanta, Na dean adhaltrannas, Na dean mortadh, Na goid, Na toir fianuis bhréige, Thoir urram³ do t'athair agus do d' mhàthair.

21 Agus thubhairt esan, Choimhid mi iad sin uile o m' òige.

22 Agus an uair a chual Iosa so, thubhairt e ris, Tha aon ni fathast a dh'uireas-bhuidh ort; reic na h-uile nithe a ta agad, agus roinn air na bochdaibh, agus bithidh agad ionnmas air nèamh; agus thig, *agus* lean mise.

23 Agus an uair a chual e so, bha e ro dhoilich; oir bha mòr-bheartas aige.

24 Agus an uair a chunnaic Iosa gu'n robh e làn tuirse, thubhairt e, Cia deacair dhoibhsan⁴ aig am bheil saoihbreas, dol a steach do rìoghachd Dhé!

25 Oir is usadh do chàmhail dol troimh chrò snàthaid, na do dhuine saoihbhir dol a steach do rìoghachd Dhé.

26 Agus thubhairt iadsan a chuala so, Cò ma seadh a dh'fheudas bhi air a shaoradh?

27 Ach thubhairt esan, Na nithe a ta eu-comasach do dhaoineibh, tha iad comasach do Dhia.

28 An sin thubhairt Peadar, Feuch, thréig sinne na h-uile nithe, agus lean sinn thusa.

29 Agus thubhairt esan riu, Gu deimhin a ta mi ag ràdh ribh, nach 'eil aon neach a thréig tigh, no pàrantan, no bràithrean, no bean-phòsda, no clann air son rìoghachd Dhé,

30 Nach faigh mòran ni's mò anns an

¹ sgèitheachadh.

² trosgadh.

³ onoir.

⁴ cruaidh orra-san.

aimsir so a ta làthair, agus anns an t-saoghail a ta ri teachd, a' bheatha mhair-eannach.

31 Agus ghabh e an dà fhear dheug d'a ionnsuidh, agus thubhairt e riu, Feuch, a ta sinn a' dol suas gu Ierusalem, agus bithidh na b-uile nithe a ta sgrìobhta leis na fàidhìbh mu Mhac an duine, air an coimhlionadh.

32 Oir bheirear thairis e do na Cinnich, agus thèid fanoid a dheanamh air, agus masluicbear e, agus tilgear smugaid air;

33 Agus sgiùrsaidh agus marbhaidh iad e: agus air an treas là éiridh e a ris.

34 Agus cha do thuig iadsan aon ni dhiubh so: agus bha na briathra so fol-uichte orra, agus cha b'athne dhoibh na nithe a chaidh labhairt.

35 Agus tharladh, 'nuair a dhruid e ri Iericho, gu'n robh dall àraidh 'na shuidhe ri taobh na slighe, ag iarraidh déirce;

36 Agus air cluinntinn an t-sluaigh a' dol seachad, dh'fhiosraich e ciod e so.

37 Agus db'iunnis iad da, gu'm b'e Iosa o Nasaret a bba gabhail seachad.

38 Agus ghlaodh e, ag ràdh, Iosa, Mhic Dhaibidh, dean tròcar orm.

39 Agus cronuich iadsan a bha air thoiseach e, chum gu'm biodh e 'na thosd: ach bu mhòid gu mòr a ghlaodh esan, A Mhic Dhaibidh, dean tròcar orm.

40 Agus air seasamh do Iosa, dh'àithn e a thoirt d'a ionnsuidh: agus an uair a thàinig e am fagus da, dh'fhiosraich e dlèth,

41 Ag ràdh, Ciod is àill leat mise a dheanamh dhuit? agus thubhairt esan, a Thighearn, mi dh'fhaotainn mo radhaire.

42 Agus thubhairt Iosa ris, Faigh¹ do radharc: shlànuich do cbreidimb thu.

43 Agus air ball fhuair e a radharc, agus lean se e, a' toirt glòire do Dbia: agus thug an sluagh uile cliù do Dhia, 'nuair a chunnaic iad so.

CAIB. XIX.

7 Mu thimchioll Shacheus a' clàs-mhaoir. 11 Na deich puind airgid. 28 Mharcaich Crisid do Ierusalem le greadhnachas; 41 rinn e caoidh air a son; 45 thig e mach an luchd ceannachd agus reicidh as an teampull.

AGUS air do Iosa dol a steach, chaidh e troimh Iericho.

2 Agus, feuch, bha duine ann d'am b'ainm Sacheus, agus b'ard chis-mhaor esan, agus bha e saoi-bhir:

3 Agus bha déidh aige air Iosa fhaicinn, cò e; agus cba b'urrainn e air son an t-sluaigh, a chionn gu'n robh e iosal 'na phearsa.

4 Agus ruith e roimhe, agus streap e suas ann an craoibh Shicamoir, chum gu

faiceadh se e; oir bha e gus an t-slighe sin a ghabhail.

5 Agus an uair a thàinig Iosa chum an àite sin, air dha amharc suas, chunnaic se e, agus thubhairt e ris, A Shacheus, thig a nuas gu grad; oir is éigin domh-sa stad an diugh aig do thigh.

6 Agus thàinig e nuas le cabhaig, agus ghabh e ris gu subhach.

7 Agus an uair a chunnaic iad so, rinn iad uile gearan, ag ràdh, Gu'n deachaidh e steach air aoidheachd gu duine a ta 'na pbeacach.

8 Agus sbeas Sacheus agus thubhairt e ris an Tighearn, Feuch, a Thighearn, a ta mi toirt leth mo mhaoin do na bochdaibh: agus ma thug mi aon ni o neach air bith le casaid bbréige², tha mi toirt dha a cbeithir uiread.

9 Agus thubhairt Iosa ris³, Thàinig slàinte an diugh a db'ionnsuidh an tighe so, do bhrìgh gur mac do Abraham esan mar an ceudna.

10 Oir tbàinig Mac an duine a dh'iarraidh agus a thèarnadh an ni sin a bha caillte.

11 Agus ag cluinntinn nan nithe sin dhoibh, chuir e ris, agus labhair a cosamlachd, do bbrìgh gu'n robh e am fagus do Ierusalem, agus gu'n do shaoil iadsan gu'm biodh rioghachd Dhé air a grad-fhoillseachadh.

12 Air an aobhar sin thubhairt e, Chaidh duine usal àraidh do dhùthaich fad as a dh'fhaotainn riogbachd dha féin, agus a philltinn air ais.

13 Ach gbaire e a dheich seirbhìsich⁴, agus thug e dhoibh deich puind, agus thubhairt e riu, Cuiribh gu buil iad, gus an tig mise.

14 Ach bba fuath aig muinntir a dhùthaicha dha, agus chuir iad teachdaireachd 'na dhéigh, ag ràdh, Cha'n àill leinn an duine so bhi 'na rìgh oirnn.

15 A nis an uair a phill e air ais, an déigh dha an rioghachd fhaotainn, an sin dh'orduicb e na seirbhìsich ud bhi air an gairm d'a ionnsuidh, d'an d'thug e an t-airgid, chum gu'm biodh fhios aige ciod a bhuannaich gach aon diubh leis a bhuileachadh.

16 An sin thàinig an ceud fhear, ag ràdh, A Thighearn, bhuidhinn do phund deich puind.

17 Agus thubhairt e ris, Is maith, a dheadh sheirbhìsich: do bhrìgh gu'n robh thusa fìrinneach ann an ro bheagan, biodh agad-sa uachdaranachd air deich bailtibh.

18 Agus thàinig an dara fear, ag ràdh, A Tbighearn, rinn do phund cuig puind.

¹ Gabh.

² gu h-eucorach.

³ m'a thimchioll.

⁴ deichnear d'a sheirbhìsich.

19 Agus thubhairt e ris-san, Bi-sa mar an ceudna os ceann chùig bailtean.

20 Agus thàinig *fear* eile, ag ràdh, a Thighearn, feuch do phund, a bha agam-sa taisgte ann an neapaicin¹:

21 Oir bha eagail orm romhad, do bhrìgh gur duine geur-theann thu: tha thu a' togail an nì nach do leag thu, agus a' buain an nì nach do chuir thu.

22 Agus thubhairt e ris, As do bheul fèin bheir mi breth ort, a dhroch sheirbh-isich. Bha fhios agad gu'm bu duine geur-theann mi, a' togail an nì nach do leag mi, agus a' buain an nì nach do chuir mi:

23 Air an aobhar sin c'ar son nach d'thug thu m' airgid do'n luchd-mal-airt², agus air teachd dhomh-sa thogainn e le riadh?

24 Agus thubhairt e rìusan a bha 'nan seasamh a làthair, Thugaibh uaith am pund, agus thoiribh dhasan e aig am bheil na deich puind.

25 (Agus thubhairt iad ris, A Thighearn, tha deich puind aige;)

26 Oir a ta mi ag ràdh ribh, Gu'n toirear do gach neach aig am bheil: ach uaithsan aig nach 'eil, bheirear eadhon an nì sin a ta aige.

27 Ach thugaibh an so na naimhdean ud agam-sa, leis nach b'àill mise bhi am rìgh os an ceann, agus marbhaibh a'm' fhianuis iad.

28 Agus air dha so a ràdh, dh'imich e rompa, a' dol suas gu Ierusalem.

29 A nis an uair a dhruid e ri Betphage agus Betani, làimh ris an t-sliabh d'an gairmear³ *sliabh* nan crann-oladh, chuir e dìthis d'a dheisciobluibh uaith,

30 Ag ràdh, Imichibh do'n bhaile ta fa bhrù comhair; anns am faigh sibh, air dhuibh dol a steach, searrach ceangailte, air nach do shuidh aon duine riamh: fuasglaidh, agus thugaibh an so e.

31 Agus ma dh'fhiosraicheas neach air bith dhiubh, C'ar son a ta sibh 'g a fuasgladh? mar so their sibh ris, A ta feum aig an Tighearn air.

32 Agus air imeachd dhoibh-san a chuir-eadh air falbh, fhuair iad mar thubhairt e riu.

33 Agus an uair a bha iad a' fuasgladh an t-searraich, thubhairt a shealbhadairean riu, C'ar son a ta sibh a' fuasgladh an t-searraich?

34 Agus thubhairt iadsan, Tha feum aig an Tighearn air.

35 Agus thug iad gu Iosa e: agus thilg iad am falluinnean air an t-searrach, agus chuir iad Iosa air.

36 Agus ag imeachd dhàsan, sgaol iad

am falluinnean fuidhe air an t-slighe.

37 Agus an uair a thàinig e am fagus, eadhon gu dol sìos sléibh nan crann-oladh, thoisich mòr-chuideachd nan deisciobul uile ri gairdeachas a dheanamh, agus moladh a thoirt do Dhia le guth àrd, air son nan uile oibre cumhachdach a chunnaic iad.

38 Ag ràdh, Gu ma beannaichte an rìgh a ta teachd ann an aium an Tighearna: sìth air nèamh, agus glòir anns na h-àrd-aibh.

39 Agus thubhairt cuid do na Phairisich o mheasg an t-sluaigh ris, A mhaighstir, cronuich do dheisciobuil.

40 Agus fhreagair esan, agus thubhairt e riu, A ta mi ag ràdh ribh, nam fanadh iad sin 'nan tosd, gu'n glaothadh na clacha fèin.

41 Agus an uair a thàinig e am fagus, chunnaic e am baile, agus ghuih e air a shon.

42 Ag ràdh, Nam b'aithne dhuit⁴, eadhon dhuitse, air bheag sam bith ann ad là so fèin, na nithe a bhuineas do d' shith! ach a nis a ta iad folaichte o d' shùilbhih.

43 Oir thig na làithean ort, anns an tilg do naimhde d'g mu d' thimchioll, agus an iad iad umad mu'n cuairt, agus an druid iad a stigh air gach taobh thu,

44 Agus an leag iad co ìosal ris an làr thu, agus do chlann annad, agus nach fàg iad annad clach air muin cloiche; do bhrìgh nach b'aithne duit aimsir t'fhiosrachaidh.

45 Agus chaidh e steach do'n teampull, agus thoisich e air an dream a bha reic-eadh, agus a' ceannach ann a thilgeadh mach,

46 Ag ràdh riu, Tha e sgriobhta, Is tigh urnuigh mo thigh-so; ach rinn sibhse 'na gharaidh luchd-reubainn e.

47 Agus bha e gach là a' teagasg san teampull. Ach dh'iarr na h-àrd-shagairt agus na sgriobhaichean, agus ceannardan a' phobuill esan a mhilleadh,

48 Gidheadh cha robh fhios aca ciod a dheanadh iad: oir bha am pobull uile ag éisdeachd ris le ro-aire.

CAIB. XX.

I Dhearbh Crìosd gu'n robh ùghdarras aige, le ceisd mu bhaisteadh Eoin. 9 Cosamhlachd an fhionlios. 19 Mu thimchioll cìs a thoirt do Cheasar. 27 Dhearbh e mearachd nan Sadusach, a bha 'g àicheadh aiseirigh nam marbh.

AGUS tharladh air aon do na làithibh sin, an uair a bha e teagasg a' phobuill san teampull, agus a' searmonachadh an t-soigheil, gu'n d'thàinig na h-àrd-shagairt agus na sgriobhaichean air, maille ris na seanairibh.

¹ brèid, làmh-anart.

² nach do chuir thu m' airgid do'n bhanc.

³ d'an goirear, ris an abrar.

⁴ O gu'm b'aithne dhuit.

2 Agus labhair iad ris, ag ràdh, Innis duinn ciod e an t-ùghdarras leis am bheil thu a' deanamh nan nithe so? no cò esan a thug an t-ùghdarras so dhuit?

3 Agus fhreagair esan agus thubhairt e riu, Feòraichidh mise mar an ceudna aon ni dhìbhe; agus freagraibh mi:

4 Baisteadh Eoin, an ann o nèamh a bha e, no o dhaoinibh?

5 Agus reusonaich iad eatorra féin, ag ràdh, Ma their sinn, O nèamh; their esan, C'ar son ma ta nach do chreid sibh e?

6 Ach ma their sinn, O dhaoinibh, clachaidh an sluagh uile sin; oir is deimhin leo gu'm b'fhàidh Eoin.

7 Agus fhreagair iadsan, Nach robh fhios aca cia uaith a bha e.

8 Agus thubhairt Iosa riu, Ni mò a dh'innseas mise dhuibh-se ciod e an t-ùghdarras leis am bheil mi deanamh nan nithe so.

9 An sin thòisich e air a' chosamhlachd so a labhairt ris an t-sluagh; Phlannduich duine àraidh fìon-lios, agus shuidhich e air tuath e; agus chaidh e air choigrich rè aimsir fhada.

10 Agus anns an àm dhligheach chuir e seirbhiseach a dh'ionnsuidh na tuatha, chum gu'n tugadh iad da do thoradh an fhìon-lios: ach ghabh an tuath air, agus chuir iad uatha falamh e.

11 Agus a ris chuir e seirbhiseach eile uaith; agus ghabh iad aisans mar an ceudna, agus mhaslach iad e, agus chuir iad uatha falamh e.

12 Agus a thuilleadh air sin chuir e an treas seirbhiseach uaith; agus lot iad esan mar an ceudna, agus thilg iad a mach e.

13 An sin thubhairt Tighearn an fhìon-lios, Ciod a ni mi? cuiridh mi mo Mhac gràdhach d'an ionnsuidh: feudaich e bi, nuair a chi iad e, gu'n toir iad urram dha.

14 Ach an uair a chunnaic an tuath e, reusonaich iad eatorra féin, ag ràdh, Is e so an t-oighre: thigibh, marbhamaid e, chum gu'm bi an oighreachd againn féin.

15 Agus thilg iad a mach as an fhìon-lios e, agus mharbh iad e. Ciod uime sin a ni Tighearn an fhìon-lios riu?

16 Thig e agus sgriosaidh e an tuath ud, agus bheir e am fhìon-lios do dhaoinibh eile. Agus an uair a chual iad so, thubhairt iad, Nar leigeadh Dia.

17 Agus air dhàsan amharc orra, thubhairt e, Ciod e so ma seadh a ta sgrìobhta, A' chlach a dhiùlt na clachairean, rinn-eadh ceann na h-òisne dhith?

18 Ge b'e neach a thuiteas air a' chloich sin, breisair e: ach ge b'e neach air an tuit i, pronnaidh i gu luathre e.

19 Agus anns an uair sin féin dh'iarr na h-àrd-shagairt agus na sgrìobhaichean làmh-a chur ann; ach bha eagal an t-sluaigh

orra; oir thuig iad gu'm b'ann 'nan aghaidh féin a labhair e'n cosamhlachd so.

20 Agus rinn iad geur-fhaire air, agus chuir iad a mach leuchd-feill, a leigeadh orra féin a bhi 'nam fìreanaibh, chum gu'n deanadh iad greim air 'fhoclaibh, air chor's gu'n tugadh iad thairis e do chumhachd agus do ùghdarras an uachdarain.

21 Agus dh'fhiosraich iad deth, ag ràdh, A mhaighstir, tha fios againn gu bheil thu a' labhairt agus a' teagas gu ceart, agus nach 'eil suim agad do pìearsa duine sam bith, ach gu bheil thu teagasg slighe Dhé a réir na fìrinn.

22 Am bheil e ceaduichte dhuinn cìs a thoirt do Cheasar, no nach 'eil?

23 Ach thuig esan an cuilbheartachd, agus thubhairt e riu, C'ar son a ta sibh ga m' bhuaireadh?

24 Nochdaibh dhomh peghinn: co leis an dealbh agus an sgrìobhadh a ta oirre? Fhreagair iadsan agus thubhairt iad, Le Ceasar.

25 Agus thubhairt esan riu, Thugaibh-se air an aobhar sin do Cheasar na nithe a's le Ceasar, agus do Dhia na nithe a's le Dia.

26 Agus cha b'urrainn iad greim a dheanamh air 'fhoclaibh am fianuis an t-sluaigh: agus ghabh iad iongantais r'a fhreagradh, agus dh'fhan iad 'nam tosd.

27 An sin thàinig d'a ionnsuidh dream àraidh do na Sadusaich, a ta 'g àicheadh gu bheil aiseirigh ann, agus dh'fhiosraich iad deth,

28 Ag ràdh, A mhaighstir, sgrìobh Maois dhuinn, Nam faigeadh bràthair duine air bith bàs, agus bean-phòsa aige, agus gu'm faigeadh e bàs gun chlann, gu'n gabhadh a bhràthair a bhean, agus gu'n togadh e suas sliochd d'a bhràthair.

29 Air an aobhar sin, bha seachdnar bhràithrean ann: agus ghabh an ceud fhear bean, agus fhuair e bàs gun chlann.

30 Agus ghabh an dara fear i mar mhnaoi, agus fhuair esan bàs gun chlann.

31 Agus ghabh an treas fear i; agus mar an ceudna an t-seachdnar. Agus cha d'fhàg iad clann, agus fhuair iad bàs.

32 Ma dheireadh uile fhuair a' bhean bàs mar an ceudna.

33 Aims an aiseirigh uime sin, co dhiubhl d' am bean i? oir bha i aig an t-seachdnar 'na mnaoi.

34 Agus fhreagair Iosa, agus thubhairt e riu, Tha clann an t-saoghail so a' pòsadh, agus air an toirt am pòsadh:

35 Ach an dream sin a mheasar gur airidh iad air an t-saoghal ud fhaghail, agus an aiseirigh o na marbhaibh, cha'n 'eil iad a' pòsadh, no air an toirt am pòsadh.

36 Agus cha'n urrainn iad bàs fhaghail ni's mò; oir tha iad an co-inbhe ris na

h-ainglibh; agus is iad clann Dé iad, air bhi dhoibh 'nan cloinn do'n aiseirigh.

37 Ach gu'n éirich na maibh, nochd Maois féin aig a' phreas, an uair a ta e a' gairm do'n Tighearn, Dia Abraham, agus Dia Isaac, agus Dia Iacob.

38 A nis cha'n e Dia nam marbh e, ach nam beò: oir a ta iad uile beò dhàsan.

39 An sin fhreagair drcam àraidh do ua sgrìobhaichibh, agus thubhairt iad, A mhaighstir, is maith a labhair thu.

40 Agus cha robh chridhe aca tuilleadh ni sam bith fheòraich dheth.

41 Agus thubhairt e riu, Cionnus a their iad gur e Criosd mac Dhaibhidh?

42 Agus tha Daibhidh féin ag ràdh ann an leabhar nan Salm, Thubhairt an Tighearn ri mo Thighearn, Suidh air mo làimh dhcis,

43 Gus an cuir mi do naimhde 'nan stòl fo do chosaibh.

44 Tha Daibhidh air an aobhar sin a' gairm a Thighearna dheth, cionnus ma seadh is e mhac e?

45 An sin thubhairt e r'a dheisciobluibh, ann an éisdeachd an t-sluaigh uile,

46 Thugaibh an aire dhuibh féin o na sgrìobhaichibh, leis an miann imeachd ann an culaidhibh fada, agus leis an ionmhuinn fàilte *fhàltainn* air na marg-aibh, agus na caithrichean a's àirde anns na sionagogaibh, agus na ceud àiteachasuidhe aig féillibh;

47 A shluigeas suas tighean bhantrach, agus air sgàth deadh chlosais a ni urnuighean fada: gheibh iad sin an dìteadh a's mò.

CAIB. XXI.

1 *Mhol Criosd a' bhantrach bhochd: 4 roimh-innis e sgrios an teampull, agus bhaile Ierusalem; 25 mar an ceudna na comharan bhios ann roimh an la dheireannach. 34 Earail chum faire a dheanamh.*

AGUS air dha amharc suas, chunnaic e na daoine saobhir a' tilgeadh an tiodhlacan ann an àite-coimhead an ion-mhais.

2 Agus chunnaic e mar an ceudna bant-rach bhochd àraidh a' tilgeadh dà leth-fheoiring an sin.

3 Agus thubhairt e, Gu fìrinneach a ta mi ag ràdh ribh, gu'n do chuir a' bhant-rach bhochd so ni's mò ann na iad uile.

4 Oir thilg iad so uile d'am pailteas a steach do thiodhlacaibh Dhé: ach thilg ise d'a h-uireasbhuidh féin am beathachadh uile a bha aice.

5 Agus air do chuid diubh bhi labhairt mu'n teampull, mar a bha e air a dheanamh maiseach le clachaibh sgiamhach, agus le tiodhlacaibh, thubhairt e,

6 *A thaobh nan nithe so a chi sibh, thig*

na làithean, anns nach fàgar clach air muin cloiche *dhiubh*, nach tilgear sìos.

7 Agus dh'fhiosraich iadsan deth, ag ràdh, A mhaighstir, c'uin ma ta bhitheas na nithe so? agus ciod e an comhara 'nuair a bhios na nithe so gu teachd gu crìch?

8 Agus thubhairt esan, Feuchaibh nach meallar sibh; oir thig mòran ann am ainm-sa, ag ràdh, Is mise *Criosd*; agus a ta an t-am am fagus; uime sin na leanaibh iad.

9 Ach an uair a chluinneas sibh mu chogannaibh, agus mu cheannaircibh¹, na biodh mòr-gheilt oirbh: oir is éigin do na nithibh so tachairt air tùs; ach cha 'n' eil a' chrìoch air ball.

10 An sin thubhairt e riu, Eiridh cinn-each an aghaidh cinnich, agus rìoghachd an aghaidh rìoghachd:

11 Agus bithidh crìtheanna mòra tal-mhainn ann an iomadh àit, agus gortaidh, agus plàighean; agus nithe uamhasach, agus comharan mòra o nèamh.

12 Ach rompa so uile cuiridh iad làmh annaibh-sa, agus geur-leanaidh iad *sibh*, 'gur tabhairt thairis do choimhthionalaibh², agus do phrìosanaibh, 'gur tabhairt chum rìghrean agus uachdaran air sgàth m'ainme-sa.

13 Agus tacharaidh so dhuibh-se mar fhianuis.

14 Air an aobhar sin daingnichibh ann bhur cridheachaibh, gun smuaineachadh roimh làimh, ciod a fhreagras sibh air bhur son féin:

15 Oir bheir mise dhuibh beul agus gliocas, nach bi bhur naimhdean uile comasach air labhairt no cur 'na aghaidh.

16 Agus brathar sibh le 'ur pàrantaibh, agus le 'ur bràithribh, agus le 'ur luchd dàimhe, agus le 'ur cairdibh; agus bheir iad fa'near *cuid* dhibh a chur gu bàs.

17 Agus bithidh fuath aig na h-uile dhaoineibh dhuibh air son m'ainme-sa.

18 Ach cha chaillear fuiltein³ do ghruaig bhur cinn.

19 Ann bhur foighidinn sealbhaichibh bhur n-anama féin.

20 Agus an uair a chi sibh Ierusalem air a cuairteachadh le armailtibh, an sin biodh fhios agaibh gu bheil a fàsachadh am fagus.

21 (An sin teicheadh iadsan a ta ann an Iudea chum nam beann,) agus imicheadh iadsan a ta 'na meadhon-sa mach aise; agus na rachadh iadsan a ta sa' mhachair, a steach innte.

22 Oir is iad sin làithean an dioghaltais, chum gu'n coimhlionar na h-uile nithe a ta sgrìobhta.

23 Ach mo thruaigh na mnà a bhios torrach, agus iadsan a bhios toirt cìche

¹ bhuaireas, éirigh-mach.

² shionagogaibh.

³ ròinneag.

anns na làithibh sin! oir bithidh teannt-achd¹ mhòr san dùthaich, agus fearg air a' phobull so.

24 Agus tuitidh iad le faohhar a' chlaidh-einbh, agus hheirear iad am bhraghdeanas chum nan uile chinneach: agus bithidh Ierusalem air a saltairt sìos fuidh na Cinnich, gus an coimhlionar aimsire nan Cinneach.

25 Agus bithidh comharan anns a' ghréin, agus anns a' ghealaich, agus anns na reultaibh: agus air an talamh airc nan cinneach, ann an ioma-chomhairle; an cuan agus na tonnan a' heuchdaich;

26 Cridhe dhaoine 'gan tréigsinn troimh eagall, agus feitheamh nan nithe sin a ta teachd air an domhan: oir bithidh cumhachdan nan nêamh air an crathadh.

27 Agus an sin chi iad Mac an duine a' teachd ann an neul, le cumhachd agus mòr-ghlòir.

28 Agus an uair a thòisicheas na nithe so air tachairt, an sin amhaircibh snas, agus togaibh bhur cinn; oir a ta bhur saorsa am fagus.

29 Agus lahhair e cosamhlachd riu, Amhaircibh air a' chraoibh-fhige, agus na craohhan uile;

30 'Nuair a bhios iad a cheana a' cur a mach an duillich, tha sibh a' faicinn, agus ag aithneachadh uaihh féin, gu bheil an samhradh a nis am fagus.

31 Agus mar an ceudna sibhse, 'nuair a chi sibh na nithe so a' tachairt, hiodh fhios agaibh gu bheil rìoghachd Dhé fagus do làimh.

32 Gu deimhin a ta mi ag ràdh ribh, nach téid an ginealach² so thairis, gus an coimhlionar na nithe so uile.

33 Théid nêamh agus talamh thairis: ach cha téid mo hhrithra-sa thairis a chaoidh.

34 Agus thugaibh an aire dhuibh féin, air eagall uair air hith gu'm bi bhur cridhe fuidh uallaich le geòcaireachd³, agus le misg⁴, agus le ro-chùram mu nithibh na heatha so, agus gu'n tig an là sin oirrh gu h-ohann.

35 Oir mar rihe thig e air na h-uile dhaoineibh, a ta 'g àiteachadh aghaidh na talmhainn uile.

36 Deanaibh-se air an aohhar sin faire, a' deanamh urnuigh gach àm, chum gu measar gur airidh sibh air dol as o na nithibh sin uile a ta gu teachd, agus seasamh an làthair Mhic an duine.

37 Agus bha e san là a' teagasg san teampull, agus san oidhche chaidh e mach, agus dh'fhan e air an t-sliabh, d'an goir-ear sliabh nan crann-oladh.

38 Agus thàinig an sluagh uile gu moch

d'a ionnsuidh san teampull, a dh'éisd-eachd ris.

CAIB. XXII.

1 *Ghabh na h-Iudhaich comhairle an aghaidh Iosa.*
3 *Dh'aom Satan Iudas gu esan a bhrath.* 7 *Dh'ulluich an h-abstail a' chàisg.* 19 *Dh'orduich Criosd an t-suipeir-naomh.* 32 *Dh'innis e do Pheadar nach dìobradh a chreidimh e;* 34 *ach gu'n àicheadhadh e esan trì uairean.*

ANIS dhruid riu féill⁵ an arain neo-ghoirtichte, d'an goirear⁶ a' chàisg.

2 Agus bha na h-àrd-shagairt⁷ agus na sgrìobhaichean ag iarraidh cionnus a dh'fheadadh iad esan a chur gu hàs; oir bha eagall an t-sluaigh orra.

3 An sin chaidh Satan ann an Iudas d'an co-ainm Iscariot, a bha do àireamh an dà fhir dheug.

4 Agus dh'imich e, agus lahhair e ris na h-àrd-shagartaibh agus ri ceannard-aibh an teampull, cionnus a hhrathadh se esan doibh.

5 Agus bha iad suhhach, agus rinn iad coimhcheangal airgid a thoirt da.

6 Agus gheall esan, agus dh'iarr e àm iomchuidh air a hhrath dhoibh gun an sluagh a bhi làthair.

7 An sin thàinig là an arain neo-ghoirtichte, anns am h'éigin an t-uan-càisge a mharhhadh.

8 Agus chuir e uaith Peadar agus Eoin, ag ràdh, Imichibh, agus ulluichibh dhuinn a' chàisg, chum gu'n ith sinn i.

9 Agus thubhairt iadsan ris, C'àit an àill leat sinn a dh'ulluchadh?

10 Agus thubhairt e riu, Feuch, air dhuibh dol a steach do'n hhaile, tach-araidh oir'h duine, a' giùlan soithich uisge; leanaibh e do'n tigh anns an téid e steach.

11 Agus ahràibh ri fear an tighe, Tha am maighstir ag ràdh riut, C'àit am bheil an seòmar aoidheachd anns an ith mi a' chàisg maille ri mo dheisciobluibh?

12 Agus feuchaidh e dhuibh àrd-sheòmar farsuinn uidhimichte: ulluichibh an sin.

13 Agus dh'imich iad agus fhuair iad mar thubhairt e riu: agus dh'ulluich iad a' chàisg.

14 Agus an tràth thàinig an uair, shuidh e sìos, agus an dà ahstol deug maille ris.

15 Agus thubhairt e riu, Le mòr-thogradh mhiannaich mi a' chàisg so itheadh maille ribh roimh dhomh fulang:

16 Oir a ta mi ag ràdh ribh, nach ith mi dhith tuilleadh, gus an coimhlionar i ann an rìoghachd Dhé.

17 Agus ghlac e cupan, agus air dha huidheachas a thabhairt, thubhairt e, Gabhaidh so, agus roinnibh eadaraibh féin e.

¹ cruaidh-chàs.

² linn.

³ craos.

⁴ meigs.

⁵ féisd.

⁶ gairmear.

⁷ prìomh-shagairt.

18 Oir a ta mi ag ràdh ribh, nach òl mi do thoradh na fionain, gus an tig rìoghachd Dhé.

19 Agus ghlac e aran, agus an déigh buidheachas a thabhairt, bhris e, agus thug e dhoibh-san e, ag ràdh, Is e so mo chorp-sa a ta air a thoirt air bhuir son-sa: deanaibh so mar chuimhneachan ormsa.

20 Agus mar an ceudna an cupan, an déigh na suiper, ag ràdh, Is e an cupan so an tiomnadh nuadh ann am fhuil-sa, a dhòirteadh air bhuir son-sa.

21 Ach feuch, làmh an ti a bhrathas mise maille rium air a' bhòrd.

22 Agus gu fìrinneach a ta Mac an duine ag imeachd, a reir mar a dh'orduicheadh: ach is an-aoibhinn do'n duine sin leis am brathar e.

23 Agus thòisich iadsan air fiosrachadh eatorra féin, cò aca bha gus an ni so a dheanamh.

24 Agus bha mar an ceudna comhstri eatorra, cò aca bu mhò a bhiodh.

25 Ach thubhairt esan riu, A ta aig rìghribh nan Cinneach tighearnas orra; agus goirear daoine fiala dhiubhsan, ag am bheil ùghdarras¹ orra.

26 Ach na bithibh-sa mar sin: ach an neach a's mò 'nur measg, biodh e mar an neach a's òige²; agus an ti a's àirde, mar esan a ta ri frithealadh.

27 Oir co aca is mò, an ti a shuidheas air bòrd, no esan a fhritheileas? nach e an ti a shuidheas; ach a ta mise 'nur measg-sa mar fhear-frithealaidh.

28 Is sibhse iadsan a dh'fhan maille rium-sa ann am dheuchainnibh³;

29 Agus a tamise ag orudhadh dhuibh rìoghachd, mar a dh'orduich m' Athair dhomh-sa;

30 Chum gu'n ith agus gu'n òl sibh air mo bhòrd-sa ann am rìoghachd, agus gu'n suidh sibh air caithrichibh rìoghail, a' toirt breth air dà thrèibh dheug Israeil.

31 Agus thubhairt an Tighearn, A Shimoin, a Shimoin, feuch, dh'iarr Satan sibhse, chum *bhuir* criaradh mar chruithneachd.

32 Ach ghuidh mise air do shonsa, nach diobradh do chreidimh thu: agus an uair a dh'iompaichear thu⁴, neartaich do bhràithre.

33 Agus thubhairt esan ris, A Thighearn, tha mise ullamh gu dol maille riut araon chum prìosain, agus a chum bàis.

34 Agus thubhairt esan, A ta mi ag ràdh riut, a Pheadair, nach goir an coil-each an diugh, gus an àicheadh thu tri uairean gur aithne dhuit mi.

35 Agus thubhairt e riu, 'Nuair a chuir mi uam sibh gun sporan, agus gun mhàla,

agus gun bhrògan, an robh uireasbhuidh nì sam bith oirbh? Agus thubhairt iad, Cha robh.

36 An sin thubhairt e riu, Ach a nis ge b'e aig am bheil sporan, togadh se e, agus mar an ceudna a mhàla: agus an ti aig nach 'eil claidheamh, reiceadh e 'fhall-uinn, agus ceannachadh e aon.

37 Oir a ta mi ag ràdh ribh, gur éigin fathast an ni so ta sgrìobhta a choimhlionadh annam-sa, Agus bha e air àireamh am measg nan ciontach: oir a ta crìoch aig na nithibh ud, a ta mu m' thimchioll-sa.

38 Agus thubhairt iadsan, A Thighearn, feuch, a ta dà chladheamh an so. Agus thubhairt esan riu, Is leoir e.

39 Agus air dha dhol a mach, chaidh e, mar bu ghnàth leis, gu sliabh nan crann-oladh; agus lean a dheisciobuil e.

40 Agus an uair a thàinig e do'n àit, thubhairt e riu, Deanaibh urnuigh, chum nach tuit sibh ann am buaireadh.

41 Agus thairngeadh esan uatha mu thimchioll urchuir chloiche, agus leig se e féin air a ghluinibh, agus rinn e urnuigh,

42 Ag ràdh, Athair, ma's toil lead, cuir an cupan so seachad orm⁵: gidheadh, na b'i mo thoil-sa, ach do thoil-sa gu robh deanta.

43 Agus dh'fhoillsicheadh dha aingeal o nèamh, 'ga neartachadh.

44 Agus air dha bhi ann an cruaidh-ghleachd anama, riun e urnuigh ni bu dìrachdaiche: agus bha 'fhallas nìar bhraonaibh mòra fola a' tuiteam sìos air an talamh.

45 Agus air dha éirigh o urnuigh, thàinig e chum a dheisciobuil, agus fhuair e 'uan codal iad troimh thuirse.

46 Agus thubhairt e riu, C'ar son a ta sibh 'nur codal? éiribh, agus deanaibh urnuigh, chum nach tuit sibh ann am buaireadh.

47 Agus an uair a bha e fathast a' labhairt, feuch sluagh, agus dh'imich esan d'am b' ainm Iudas, aon d'on dà fhear dheug, rompa, agus dhruid e ri Iosa, chum a phògadh.

48 Ach thubhairt Iosa ris, A Iudais, am bheil thu le pòig a' brath Mhic an duine?

49 Agus air a chunnaic iadsan a bha mu thimchioll-san an ni a bha gu tachairt, thubhairt iad ris, A Thighearn, am buail sinn leis a' chladheamh?

50 Agus bhuail aon diubh seirbhiseach an àrd-shagairt, agus ghearr e dheth a chluas dheas.

51 Agus fhreagair Iosa agus thubhairt e, Fulaingibh gu so. Agus bhean e r'a chluais, agus shlànuich e i.

¹ smachd, cumhachd.

² bhuairibh.

² a's lugha.

⁴ bhios tu air tionndadh.

⁵ tharum.

52 An sin thubhairt Iosa ris na h-àrd-shagartaibh agus ri ceannardaibh an teampuill, agus ris na seanairibh, a thàinig d'a ionnsuidh, An d'fhàinig sibh a mach le claidhibh agus le bataibh, mar gu b' ann an aghaidh fir-reubainn¹?

53 'Nuair a bha mi gach là maille ribh san teampull, cha do shìn sibh a mach bhuir làmhnan a'm' aghaidh: ach is i so bhuir n-uair-sa, agus cumhachd an dorchadais.

54 An sin rug iad air, agus thug iad leo e² do thigh an àrd-shagairt. Agus lean Peadar am fad uaith e.

55 Agus air dhoibh teine fhadadh ann am meadhon an talla, agus suidhe sìos maille ri³ chéile, shuidh Peadar 'nam meadhon.

56 Ach chunnaic cailin àraidh e 'na shuidhe aig an teine, agus air dhi amharc gu geur air, thubhairt i, Bha 'm fear so mar an ceudna maille ris.

57 Agus dh'àicheadh esan e, ag ràdh, A bhean, cha'n aithne dhomh e.

58 Agus beagan 'na dhéigh sin chunnaic neach eile e, agus thubhairt e, Is ann diubh thusa mar an ceudna. Agus thubhairt Peadar, A dhuine, cha'n ann.

59 Agus mu thimchioll ùine aoin uaire 'na dhéigh sin, chòmhdaich⁴ neach eile air, ag ràdh, Gu fìrinneach bha am fear so mar an ceudna maille ris; oir is Galiléach e.

60 Agus thubhairt Peadar, A dhuine, cha'n aithne dhomh ciod a ta thu 'g ràdh. Agus air ball, am feadh a bha e fathast a' labhairt, ghoir an coileach.

61 Agus air tionndadh do'n Tighearn, dh'amhairc e air Peadar: agus chuimhnich Peadar focal an Tighearna, mar thubhairt e ris, Mun goir an coileach, àicheadhaidh tu mi trì uairean.

62 Agus chaidh Peadar a mach, agus ghuil e gu goirt.

63 Agus rinn na daoine, a chum Iosa, fanoid air, 'ga bhualadh.

64 Agus an uair a dh'fholuich iad a shùilean, bhuail iad e san aghaidh, agus dh'fhiosraich iad deth, ag ràdh, Dean fàidheadaireachd cò e a bhuail thu?

65 Agus labhair iad mòran do uithibh eile gu toibheumach 'na aghaidh.

66 Agus an uair a bha an là air teachd, chruinnich seanadh an t-sluaigh, agus na h-àrd-shagairt, agus na sgrìobhaichean an ceann a chéile, agus thug iad esan chum an comhairle,

67 Ag ràdh, An tusa Criosd? innis dhuinn. Agus thubhairt e riu, Ma dh'inneas mi dhuibh, cha chreid sibh:

68 Agus ma dh'fhiosraicheas mi *ni air*

bith, cha toir sibh freagradh dhomh, agus cha leig sibh as mi.

69 O'n àm so bithidh Mac an duine 'na shuidhe air deas làimh cumhachd Dhé.

70 An sin thubhairt iad uile, An tusa ma seadh Mac Dhé? Agus thubhairt e riu, A ta sibhse ag ràdh gur mi.

71 Agus thubhairt iad, Ciod tuilleadh am feum a ta againn air fianuis? oir chuala sinn féin i as a bheul féin.

CAIB. XXIII.

1 Chasaid na h-Iudhaich Criosd an làthair Philait. 8 Rinn Herod fanoil air. 12 Rinneadh Herod agus Pilat 'nan càirdibh. 18 Dh'arradh Barabas leis an t-sluagh, agus air fhuasgladh le Pilat, thug e Iosa thairis gu bhì air a cheusadh.

AGUS air éirigh d'an cuideachd uile, a thug iad e gu Pilat.

2 Agus thòisich iad air a chasaid, ag ràdh, Fhuair sinn am fear so a' clàonadh a' chinnich, agus a' bacadh cis a thoirt do Cheasar, ag ràdh, Gur e féin Criosd an rìgh.

3 Agus dh'fhiosraich Pilat deth, ag ràdh, An tusa rìgh nan Iudhach? agus fhreagair esan agus thubhairt e, A ta thu 'g a ràdh.

4 An sin thubhairt Pilat ris na h-àrd-shagartaibh agus ris an t-sluagh, Cha'n 'eil mi faotainn coire air bith san duine so.

5 Agus bha iadsan ni bu ro dhéine, ag ràdh, Tha e buaireadh an t-sluaigh, a' teagasg troimh Iudea uile, a' toiseachadh o Ghalile agus an àit so.

6 'Nuair a chuala Pilat mu Ghalile, dh'fhiosraich e am bu Ghaliléach an duine.

7 Agus an uair a chual e gu'm b'ann fo uachdaranachd⁵ Heroid a bha e, chuir se e gu Herod, a bha e féin ann an Ierusalem sna làithibh sin.

8 Agus an uair a chunnaic Herod Iosa, bha aoibhneas mòr air: oir bha déidh aige rè ùine fhada air esan fhaicinn, do bhrìgh gu'n cual e mòran ùime; agus bha duil⁶ aige gu'm faicheadh e mìorbhuil éigin air a dheanamb leis.

9 An sin dh'fhèoraich e mòran do cheisidibh dheth; ach cha d'thug e freagradh sam bith air.

10 Agus sheas na h-àrd-shagairt agus na sgrìobhaichean 'ga chasaid gu dian.

11 Ach chuir Herod agus a luchd-cogaidh an neo-mheas e, agus rinn iad fanoid air, agus an déigh a sgeadachadh an eudach dealrach⁷ chuir e air ais gu Pilat e.

12 Agus rinneadh Pilat agus Herod 'nan càirdibh d'a chéile san là sin: oir bha iad roimhe sin an naimhdeas r'a chéile.

13 Agus an uair a ghairm Pilat an ceann

¹ creachadair, meirlich.

² am fochair.

³ agus thug iad e.

⁴ chathach.

⁵ fo chumhachd, fo riaghladh.

⁶ dòchas.

⁷ ro gheal.

a chéile na h-àrd-shagairt, agus na h-uachdarain, agus an sluagh,

14 Thubhairt e riu, Thug sibh a m'ionnsuidh-sa an duine so, mar neach a ta tionndadh an t-sluaigh a thaobh: agus, feuch, air dhomh a cheasnachadh ann bhur làthair, cha d'fhuair mi coire air bith san duine so thaobh nan nithe sin mu 'm bheil sibh a' deanamh casaid air;

15 No mar an ceudna Herod: oir chuir mi d'a ionnsuidh sibh, agus, feuch, cha d'rinneadh ni air bith leis¹ toilltinneach air bàs.

16 Uime sin, air dhomh-sa a smachdachadh, leigidh mi as e.

17 (Oir b'èigin da aon a leigeadh as doibh air an fhéill.)

18 Agus ghlaodh iad a mach dh'aon ghuth, ag ràdh, Beir uainn *am fear* so, agus leig air a chomas duinne Barabas:

19 (Neach air son ceannairc àraidh a rinneadh anns a' bhaile, agus air son mortaidh, a thilgeadh ann prìosan.)

20 Air an aobhar sin labhair Pilat riu a ris, air dha bhi toileach Iosa a chur fa sgaoil.

21 Ach glaodh iadsan, ag ràdh, Ceus e, ceus e.

22 Agus thubhairt e riu an treas uair, C'ar son? ciod an cron a rinn e? cha d'fhuair mise cùis bhàis air bith ann: uime sin, an déigh dhomh a smachdachadh, leigidh mi as e.

23 Agus luidh iadsan air le guthaibh mòra, ag iarraidh esan a cheusadh: agus bhuadhaich an guthanna-san, agus *guthanna* nan àrd-shagart.

24 Agus thug Pilat breth gu'n deanta na dh'iarr iad.

25 Agus leig e mach dhoibh esan a thilgeadh ann prìosan air son ceannairc agus mortaidh, an neach a dh'iarr iad; ach thug e thairis Iosa d'an toil.

26 Agus an tràth thug iad leo e, rug iad air Simon, duine àraidh o Chirene, a bha teachd o'n dùthaich, agus chuir iad an crann-ceusaidh air, g'a ghiùlan an déigh Iosa.

27 Agus lean cuideachd mhòr e do'n t-sluagh, agus do mhnaiibh, a bha mar an ceudna ri bròn², agus³ ga chaoineadh-san.

28 Ach air tionndadh do Iosa riu, thubhairt e, A nigheana Ierusalem, na guilibh air mo shonsa, ach guilibh air bhur son féin, agus air son bhur cloinne:

29 Oir feuch, a ta na làithean a' teachd, anns an abair iad, Is beannaichte na *mnai* neo-thorrach³, agus na bronna nach do ghiùlain *clann*, agus na ciocha nach d'thug bainne.

30 An sin tòisichidh iad air a ràdh ris na beanntaibh, Tuitibh oirne; agus ris na

cnocaiibh, Folaichibh sinn.

31 Oir ma ni iad na nithe so ris a' chrann ur, ciod a ni iad ris a' chrionaich?

32 Agus thugadh mar an ceudna dithis eile, a bha 'nan luchd droch-bheirt, chum bhi air an ceusadh maille ris.

33 Agus an uair a thàinig iad do'n àit d'an goirear Calbhari⁴, an sin cheus iad e féin, agus na droch dhaoine; fear dhiubh air a làimh dheis, agus am fear eile air a làimh chlì.

34 An sin thubhairt Iosa, Athair, maith dhoibh; oir cha'n 'eil fhios aca ciod a ta iad a' deanamh. Agus roinn iad 'eudach, agus thilg iad crannchur *air*.

35 Agus sheas an sluagh ag amharc: agus rinn na h-uachdarain fanoid *air* maille riu-san, ag ràdh, Shaor e daoine eile; saoradh se e féin, ma's e so Crìosd, aon taghta Dhé.

36 Agus rinn na saighdearan mar an ceudna fanoid air, a' teachd d'a ionnsuidh, agus a' tairgseadh fìon geur dha,

37 Agus ag ràdh, Ma's tu rìgh nan Iudhach, teasaig thu féin.

38 Agus bha sgriobhadh mar an ceudna air a sgriobhadh os a cheann, ann an litricheibh Gréigis, agus Laidin, agus Eabhra, **IS E SO RÌGH NAN IUDHACH.**

39 Agus thug aon do na droch dhaoineibh a chrochadh, toibheum dha, ag ràdh, Ma's tu Crìosd, saor thu féin agus sinne.

40 Ach fhreagair am fear eile, agus chronuich se e, ag ràdh, Nach 'eil eagal Dé ort, agus gu bheil thu fo 'n aon dìteadh ris?

41 Agus sinne da rìreadh an ceartas; oir a ta sinn a' faotainn nan nithe sin a thoill ar gnìomharan: ach cha d'rinn an duine so cron air bith.

42 Agus thubhairt e ri Iosa, A Thigh-earn, cuimhnich ormsa 'nuair a thig thu do d' rìoghachd.

43 Agus thubhairt Iosa ris, Gu deimhin a ta mi ag ràdh riut, gu'm bi thu maille rium-sa an diugh ann am pàrras.

44 Agus bha e mu thimchioll na seath-adh uaire, agus bha dorchadas air an talamh uile gus an naothadh uair.

45 Agus dhorchaicheadh a' ghrian, agus reubadh brat-roinn an teampuill 'na mheadhon.

46 Agus an uair a ghlaodh Iosa le guth mòr, thubhairt e, Athair, a ta mi tiomnadh mo spioraid a'd làmh aibh-sa: agus an uair a thubhairt e so, thug e suas an deò.

47 A nis an uair a chunnaic an ceannard-ceud an ni a rinneadh, thug e glòir do Dhia, ag ràdh, Gu fìrinneach b'ionracan an duine so.

48 Agus an sluagh uile a chruinnich,

¹ dha.

² bas-bhuadhadh.

³ sheasga, gun sliochd.

⁴ àit a' chlaiginn.

dh'ionnsuidh an t-seallaidh sin, an uair a chunnaic iad na nithe a rinneadh, phill iad air an ais, a' bualadh an uchd.

49 Agus sheas a luchd-eòlais uile, agus na mnà a lean e o Ghalile, am fad uaith, ag amharc air na nithibh sin.

50 Agus, feuch, duine àraidh d' am b' ainm Ioseph, comhairleach, a bha 'na dhuine maith, agus 'na fhàirean;

51 (Cha d'aontaich an duine so d'an comhairle no d'an gnìomh;) O Arimatea, baile leis na h-Iudhaich; neach mar an ceudna ag an robh sùil ri rioghachd Dhé.

52 Chaidh esan gu Pilat, agus dh'iarr e corp Iosa.

53 Agus air dha a thoirt a nuas, phaisg e ann an lion-eudach e, agus chuir e ann an uaigh e a chladhaicheadh á carraig, anns nach do chuireadh aon duine riamh roimhe.

54 Agus b'e sin là an ulluchaidh, agus bha an t-sàbaid am fagus.

55 Agus lean na mnà a thàinig maille ris o Ghalile, agus chunnaic iad an uaigh, agus cionnus a chuireadh, a chorp.

56 Agus phill iad, agus dh'ulluich iad spìosraidh agus oladh deadh fhàile; agus ghabh iad tàmh air là na sàbaid, a réir na h-àithne.

CAIB. XXIV.

1 Chuireadh aiseirigh Chrìosd an céill le dà aingeal do na mnàibh a thàinig a dh'amharc na h-uaighe :
13 Dh'fhoillsicheadh Chrìosd féin do'n dithis dheisciobal a chaidh gu h-Emaus : 36 'na dhéigh sin dh'fhoillsicheadh e do na h-abstolaibh, agus chronuich e iad air son an mi-chreidimh.

A NIS air a' cheud là do'n t-seachdain, gu ro mhoch air mhaduinn, thàinig iad chum na h-uaighe, a' toirt leo nan spìosraidh a dh'ulluich iad, agus mnà àraidh eile maille riu.

2 Agus fhuair iad a' chlach air a caruchadh o'n uaigh.

3 Agus air dhoibh dol a steach, cha d'fhuair iad corp an Tighearn Iosa.

4 Agus am feadh a bha iad an ioma-cheisd mu'n ni so, feuch, sheas dithis dhaoine làimh riu ann an eudaichibh dealrach.

5 Agus air dhoibh bhi fuidh eagal, agus a' cromadh an aghaidh chum na tal-mhainn, thubhairt iad riu, C'ar son a ta sibh ag iarraidh an ti a ta beò, am measg nam marbh ?

6 Cha 'n 'eil e an so, ach dh'éirich e : cuimhnichibh mar a labhair e ribh air dha bhi fatlast ann an Galile,

7 Ag ràdh, Is éigin do Mhac an duine bhiair a thoirt thairis do làmhaidh dhaoine peacach, agus a bhi air a cheusadh, agus éirigh a ris an treas là.

8 Agus chuimhnich iad a bhriathran.

9 Agus air dhoibh pillinn o'n uaigh, dh'innis iad na nithe so uile do'n aon fhear deug, agus do chàch uile.

10 Agus b'i Muire Magdalen, agus Ioanna, agus Muire mathair Sheumais, agus mnà eile maille riu, a dh'innis na nithe so do na h-abstolaibh.

11 Agus mheasadh am briathra leo-san mar sgeula faoine, agus cha do chrìd iad iad.

12 An sin air éirigh do Pheadar, ruith e chum na h-uaighe; agus air dha cromadh sìos, chunnaic e'n lion-eudach 'na luidhe leis féin, agus dh'fhalbh e, a' gabhail iongantais leis féin mu'n ni so a rinneadh.

13 Agus, feuch, bha dithis diubh a' dol air an là sin féin gu baile d'am b'ainm Emaus, a bha trì fichead stàid o Ierusalem.

14 Agus bha iad a' labhairt eatorra fein mu thimchioll nan nithe ud uile a thachair.

15 Agus an uair a bha iad a' còmhradh, agus a' co-reusonachadh, thàinig Iosa e féin am fagus, agus dh'imich e maille riu.

16 Ach bha'n sùilean air an cumail, air chor as nach d'aithnich iad e.

17 Agus thubhairt e riu, Ciod e an còmhradh so air am bheil sibh a' teachd eadaraih fhéin, ag imeachd dhuibh, agus sibh dubhach ?

18 Agus fhreagair fear diubh d'am b'ainm Cleopas, agus thubhairt e ris, Am bheil thusa a mha'n a'd' choigreach an Ierusalem, agus gun fhios agad air na nithibh a rinneadh innte anns na làithibh so ?

19 Agus thubhairt e riu, Ciod na nithe ? Agus thubhairt iadsan ris, Na nithe a thaobh Iosa o Nasaret, a bha 'na fhàidh cumhachdach ann an gnìomh agus ann am focal am fianuis Dé, agus an t-sluaigh uile :

20 Agus cionnus a thug na h-àrd-shagairt agus ar n-uachdarain thairis chum dithid bàis e, agus a cheus iad e.

21 Ach bha dùil againne gu'm b'esan an ti a bha gu Israel a shaoradh; agus a thuilleadh air so uile, is e'n diugh an treas là o rinneadh na nithe so.

22 Agus mar an ceudna, chuir mnà àraidh dhinn féin, a chaidh gu moch a dh'ionnsuidh na h-uaighe, mòr-ìoghnadh oirnn :

23 Agus an uair nach d'fhuair iad a chorp, thàinig iad, ag ràdh, gu'm fac iad sealladh do ainglibh, a thubhairt gu bheil e beò.

24 Agus chaidh dream àraidh dhiubh-san a bha maille ruinn féin, chum na

¹ luibhean cùbhraidh.

² uamhas.

h-uaighe, agus fhuair iad eadhon mar thubhairt na mnà; ach cha'n fhac iad esan.

25 An sin thubhairt e riu, O dhaoine amaideach¹, agus mall-chridheach a chreidsinn nan nithe sin uile a labhair na fàidhean!

26 Nach b'éigin do Chrìosd na nithe so fhulang, agus dol a steach d'a ghlòir?

27 Agus air dha tòiseachadh o Mhaois, agus o na fàidhibh uile, dh'eadar-mhìnich e dhoibh anns na sgrìobtuiribh uile na nithe m'a thimchioll féin.

28 Agus dhruid iad ris a' bhaile, d'an robh iad a' dol: agus leig esan air gu'n rachadh e ni b'fhaide.

29 Ach cho-éignich iadsan e, ag ràdh, Fan maille ruinne, oir a ta e dlùth do'n fheasgar, agus tha deireadh an là ann. Agus chaidh e steach a dh'fhuireach maille riu.

30 Agus an uair a shuidh e gu biadh maille riu, air dha aran a ghlacadh, bheannaich se e, agus bhris se e, agus thug e dhoibh e.

31 Agus dh'fhosgladh an sùilean, agus dh'aithnich iad e; agus chaidh e as an t-sealladh.

32 Agus thubhairt iad r'a chéile, Nach robh ar cridhe a' lasadh annainn, am feadh a bha e a' labhairt ruinn air an t-slighe, agus an uair a dh'fhosgail e dhuinn na sgrìobtuirean?

33 Agus dh'éirich iad air an uair sin féin, agus phill iad gu Ierusalem, agus fhuair iad an t-aon fhear deug cruinn an ceann a chéile, agus an dream a bha maille riu,

34 Ag ràdh, Dh'éirich an Tighearna da rìreadh, agus chunncas le Simon e.

35 Agus dh'innis iad na nithe a rinneadh air an t-slighe, agus mar a dh'aithnich-eadh leo e ann am briseadh an arain.

36 Agus ag labhairt nan nithe so dhoibh, sheas Iosa féin 'nam meadhon, agus thubhairt e riu, Sìth maille ribh.

37 Ach bha iadsan fuidh gheilt-chrith agus fuidh eagal, agus shaoil iad gur spiorad a chumaic iad.

38 Agus thubhairt e riu, C'ar son a ta sibh fo bhuaireas², agus c'ar son a ta

smuaintean ag éirigh suas ann bbur cridh-eachaibh?

39 Feuchaibh mo làmhan agus mò chosan, gur mi féin a th'ann: laimhsichibh mi, agus faicibh; oir cha'n 'eil aig spiorad feoil agus cnàmha, mar a chi sibh agam-sa.

40 Agus an uair a thubhairt e so, nochd e dhoibh a làmhan agus a chosan.

41 Agus air dhoibh bhi fathast mìchreideach troimh aoibhneas, agus iad fuidh iongantas, thubhairt e riu, Am bheil biadh sam bith agaibh an so?

42 Agus thug iad da mìr do iasg ròiste, agus do chìr-mheala.

43 Agus ghlac se e, agus dh'ith e 'nam fianuis.

44 Agus thubhairt e riu, Is iad so na briathran a labhair mi ribh, 'nuair a bha mi fathast maille ribh, gur éigin do na h-uile nithibh a ta sgrìobhta ann an lagh Mhaois, agus anns na fàidhibh, agus anns na salmaibh mu m' thimchioll-sa, bhi air an coimhlionadh.

45 An sin dh'fhosgail e an tuigse, chum gu'n tuigeadh iad na sgrìobtuirean.

46 Agus thubhairt e riu, Mar so a ta e sgrìobhta, agus mar so b'éigin do Chrìosd fulang, agus éirigh o na marbhaibh an treas là:

47 Agus aithreachas agus maitheanas peacaidh bhi air an searmonachadh 'na ainm-san, do na h-uile chinnich, a' tòiseachadh aig Ierusalem.

48 Agus is fianuisean sibhse air na nithibh so.

49 Agus, feuch, cuiridh mise gealladh m'Athar oirbh³: ach fanaibh-sa ann am baile Ierusalem, gus an sgèadaichear le cumhachd o na h-àrdaibh sibh.

50 Agus thug e mach iad co fhad ri⁴ Betani; agus thog e suas a làmhan, agus bheannaich e iad.

51 Agus am feadh a bha e 'gam beannachadh, dhealaicheadh riu e, agus thogadh suas gu nèamh e.

52 Agus rinn iad aoradh dha, agus phill iad gu Ierusalem le gairdeachas mòr:

53 Agus bha iad a ghnàth anns an team-pull, a' moladh agus a' beannachadh Dhé. Amen.

¹ neo-mhothachail.

² thrioblaid.

³ cuiridh mise na gheall m' Athair d'ur n-ionnsuidh.

⁴ as.

E O I N.

CAIB. I.

1 *Diadhachd, daoineachd, agus dreuchd Iosa Crìosd.*
15 *Fianuis Eoin.* 37 *Gairm Aindreas, Pheadair,*
43 *Philip, 45 agus Netanael.*

ANNS an toiseach bha am Focal, agus bha am Focal nuaille ri Dia, agus b'e am Focal Dia.

2 Bha e so air tìs maille ri Dia.

3 Rinneadh na h-uile nithe leis; agus as 'eugmhais cha d'rinneadh aon ni a rinneadh.

4 Ann-san bha beatha, agus b'ia' bheatha solus dhaoine.

5 Agus tha 'n solus a' soillseachadh anns an dorchadas, agus cha do ghabh an dorchadas e.

6 Chuireadh duine o Dhia, d'am b'ainm Eoin.

7 Thàinig esan mar fhianuis, chum fianuis a thoirt mu'n t-solus, chum gu'n creideadh na h-uile tridsan.

8 Cha b'esan an solus sin, ach *chuireadh e* chum gu tugadh e fianuis mu'n t-solus.

9 B'e so an solus fìor a ta soillseachadh gach uile dhuine tha teachd chum an t-saoghail.

10 Bha e anns an t-saoghal, agus rinneadh an saoghal leis, agus cha d'aithnich an saoghal e.

11 Thàinig e dh'ionnsuidh a dhùtlìcha fèin, agus cha do ghabh a *mhuinntir* fèin ris.

12 Ach a mheud as a ghabh ris, thug e dhoibh cumhachd a bhi 'nan cloinn do Dhia, *eadhon* dhoibh-san a ta creidsinn 'na ainm:

13 A bha air an giùeamhuin, cha'n ann o fhuil, no o thoil na fèola, no o thoil duine, ach o Dhia.

14 Agus rinneadh 'am Focal 'na fheoil, agus ghabh e còmhnuidh 'nar measg-ne, (agus chunnaic sinn a ghlòir, mar ghlòir aoin-ghin Mhic an Athar,) làn gràis agus fìrinn.

15 (Thug Eoin fianuis uime, agus ghlaodh e, ag ràdh, Is e so an ti mu'n do labhair mi, An ti a ta teachd a'm' dhéigh, tha toiseach aig orm; oir bha e romham.)

16 Agus as a lánachd-san fhuair sinne uile, agus gràs air son gràis.

17 Oir thugadh an lagh le Maois, ach thàinig an gràs agus an fhìrinn le Iosa Crìosd.

18 Cha'n fhaca neach air bith **Dia** rianh; an t-aon-ghin Mic, a ta ann an uchd an Athar, is esan a dh'fhoillsich e.

19 Agus is e so fianuis Eoin: An uair a chuir na h-Iudhaich sagairt agus Lebhithich o Ierusalem, chum gu'm fiosraicheadh iad deth, Cò thusa?

20 Dh'aidhich esan, agus cha d'aidhich e; ach dh'aidhich e, Cha mhi Crìosd.

21 Agus dh'fhiosraich iad deth, Ciod ma seadh? An tu Elias? Agus thubhairt e, Cha mhi. An tu am fàidh? Agus fhreagair e, Cha mhi.

22 An sin thubhairt iad ris, Cò thu? chum gu'n toir sinn freagradh dhoibh-san a chuir *uatha* sinn: ciod a tha thu 'g ràdh mu do thimchioll fèin?

23 Thubhairt e, *Is* mise guth an ti a ghlaodhas² anns an fhàsach, Deanaibh dìreach slighe an Tighearna, mar thubhairt am fàidh Esaias.

24 Agus an dream a chuireadh *leis an teachdaireachd*, b'ann do na Phairisich iad.

25 Agus dh'fhiosraich iad deth, agus thubhairt iad ris, C'ar son ma seadh a ta thu a' baisteadh, mur tu Crìosd, no Elias, no am fàidh?

26 Fhreagair Eoin iad, ag ràdh, A ta mise a' baisteadh le h-uisge; ach a ta neach 'na sheasamh 'nur measg, nach aithne dhuibh;

27 Is e so an ti, a ta teachd a'm' dhéighsa, aig an bheil toiseach orm, neach nach airdh mise air barr-iall a bhròige fhuasgladh.

28 Rinneadh na nithe so ann am Betani³ air an taobh thall do Iordan, far an robh Eoin a' baisteadh.

29 Air an là màireach chunnaic Eoin Iosa a' teachd d'a ionnsuidh, agus thubhairt e, Feuch Uan Dé, a ta thoirt air falbh peacaidh an t-saoghail!

30 Is e so an ti mu'n dubhairt mi, Tha fear a' teachd a'm' dhéigh, aig am bheil barrachd orm; oir bha e romham.

31 Agus cha robh aithne agam-sa air: ach a chum gu'm bitheadh e air fhoillseachadh do Israel, uime sin thàinig mi a' baisteadh le h-uisge.

32 Agus thug Eoin fianuis, ag ràdh, Chunnaic mi an Spiorad a' teachd a nuas mar choluman o nèamh, agus ghabh e còmhnuidh air.

¹ dh'fhàs.

² Is mise csan aig am bheil

a ghuth ag éigheach.

³ Betalana.

33 Agus cha b'aithne dhomhsa e: ach an ti a chuir mi a bhaisteadh le h-uisge, thubhairt esan rium, Ge b'e air am faic thu an Spiorad a' teachd a nuas agus a' gabhail còmhnuidh air, is e sin an ti a bhaisteadh leis an Spiorad naomh.

34 Agus chunnaic mi, agus rinn mi fianuis, gur e so Mac Dhé.

35 Air an là màireach a ris sheas Eoin, agus dithis d'a dheisciobluibh;

36 Agus air dha amharc air Iosa, agus e ag imeachd¹, thubhairt e, Feuch Uan Dé!

37 Agus chual an dithis dheisciobul e a' labhairt, agus lean iad Iosa.

38 Agus air tionndadh do Iosa, chunnaic e iad² g'a leantuinn, agus thubhairt e riu, Ciod a ta sibh ag iarraidh? Thubhairt iadsan ris, Rabbi, (is e sin r'a ràdh, air eadar-theangachadh, A mhaighstir,) c'ait am bheil thu gabhail còmhnuidh?

39 Thubhairt e riu, Thigibh agus faicibh. Thàinig iad agus chunnaic iad c'ait an robh e gabhail còmhnuidh, agus dh'fhan iad maille ris an là sin: oir bha e mu thimchioll na deicheadh uaire.

40 B'e Andreas, bràthair Shimoin Pheadair, aon do'n dithis a chual Eoin a' labhairt, agus a lean esan.

41 Fhuair esan air tùs a bhràthair féin Simon, agus thubhairt e ris, Fhuair sinne am Mesias, is e sin, air eadar-theangachadh, Crìosd³.

42 Agus thug e chum Iosa e; Agus an uair a dh'amhairc Iosa air, thubhairt e, Is tusa Simon mac Iona: gairmear Cephas dhìot, is e sin air eadar-theangachadh, Peadar⁴.

43 Air an là 'na dhéigh sin, bu toil le Iosa dol a mach do Ghalile, agus fhuair e Philip, agus thubhairt e ris, Lean mise.

44 A nis bha Philip o Bhetsaida, baile Andreais agus Pheadair.

45 Fhuair Philip Natanael, agus thubhairt e ris, Fhuair sinne an ti mu'n do sgrìobh Maois anns an lagh, agus na fàidhean, Iosa o Nasaret, mac Ioseph.

46 Agus thubhairt Natanael ris, Am feud ni maith air bith teachd á Nasaret? Thubhairt Philip ris, Thig agus faic.

47 Chunnaic Iosa Natanael a' teachd d'a ionnsuidh, agus thubhairt e uime, Feuch Israeleach da rìreadh, anns nach 'eil cealg! 48 Thubhairt Natanael ris, Cionnus is aithne dhuit mi? Fhreagair Iosa agus thubhairt e ris, Mun do ghairm Philip thu, 'nuair a bha thu fo 'n chrann-fhìge, chunnaic mise thu.

49 Fhreagair Natanael agus thubhairt e ris, Rabbi, is tusa Mac Dhé; is tu Rìgh Israel.

50 Fhreagair Iosa agus thubhairt e ris, A chionn gu'n dubhairt mi riut, chunnaic mi thu fo 'n chrann-fhìge, am bheil thu creid-sinn? chi thu nithe a's mò na iad so.

51 Agus thubhairt e ris, Gu deimhin deimhin a ta mi ag ràdh ribh, 'Na dhéigh so chi sibh nèamh fosgailte, agus aingil Dhé a' dol suas agus a' teachd a nuas air Mac an duine.

CAIB. II.

1 Rinn Crìosd fion do'n uisge: 12 chaidh e do Chapernaum, agus do Ierusalem. 14 far an do ghlan e an teampull o luchd reicidh agus ceannachadh: 19 roimh-innis e a bhàs agus 'ais-èirigh. 23 Chreid mòran ann air son a mhìorbhuilean, ach cha d'earb se e féin riu.

AGUS air an treas là bha pòsadh ann an Cana Ghalile; agus bha màthair Iosa an sin.

2 Agus fhuair Iosa mar an ceudna agus a dheisciobuil cuireadh chum a' phòsaidh.

3 Agus air teireachdainn do'n fhìon, thubhairt màthair Iosa ris, Cha'n 'eil fìon aca.

4 Thubhairt Iosa rithe, Ciod e mo ghnothuch-sa riut, a bhean? cha d'fhàinig m' uair-sa fathast.

5 Thubhairt a mhàthair ris an luchd-frithealaidh, Ge b'e ni a their e ribh, dean-aibh e.

6 Agus bha se soithichean uisge do chloich air an cur an sin, a réir gnàtha glanaidh nan Iudhach, a ghabhadh dà fheircin no trì gach aon diubh.

7 Thubhairt Iosa riu, Lìonaibh na soithiche le uisge. Agus lìon siad iad gus am beul.

8 Agus thubhairt e riu, Tairngibh a nis, agus thugaibh chum uachdaran na cuirme⁴. Agus thug iad ann e.

9 'Nuair a bhlais uachdaran na cuirme an t-uisge a rinneadh 'na fhìon, (agus cha robh fhios aige cia as a thàinig e; ach bha fhios aig an luchd-frithealaidh a tharruing an t-uisge,) ghairm uachdaran na cuirme am fear nuadh-pòsda⁵.

10 Agus thubhairt e ris, Cuiridh gach duine fìon maith a làthair air tùs; agus an uair a dh'òlas daoine gu leoir, an sin am fìon a's miosa: ach ghléidh thusa am fìon maith gus a nis.

11 An toiseach so do mhìorbhuilibh rinn Iosa ann an Cana Ghalile, agus dh'fhoillsich e a ghloir; agus chreid a dheisciobuil ann.

12 An déigh so chaidh esìos do Chapernaum, e féin, agus a mhàthair, agus a bhràithrean, agus a dheisciobuil; agus cha d'fhan iad ann mòran do làithibh.

13 Agus bha càisg nan Iudhach am fagus; agus chaidh Iosa suas gu Ierusalem.

¹ a' sràid-imeachd.

² Christos, Gr. i. e. Aon ungta.

³ Petros, Gr. i. e. carraig.

⁴ fèisde.

⁵ fear na bainnse.

14 Agus fhuair e 'nan suidhe anns an teampull luchd-reicidh cruidh¹, agus chaorach, agus choluman, agus luchd-malairt an airgid:

15 Agus air deanamh sgiùrsair² dha do chordaibh caola, dh'fhuadaich e mach as an teampull iad uile, agus na caoraich agus an crodh; agus dhòirt e mach airgid an luchd-malairt, agus thilg e na buird thairis;

16 Agus thubhairt e riu-san a bha reic-eadh choluman, Togaibh iad sin á so; na deanaibh tigh m' Athar-sa 'na thigh mar-sandachd.

17 Agus chuimhnich a dheisciobuil gu'n robh e sgrìobhta, Dh'ith eud³ do thighe suas mi.

18 An sin fhreagair na h-Iudhaich, agus thubhairt iad ris, Ciod an comhar a nochdas tu dhuinne, do bhrìgh gu bheil thu deanamh nan nithe sin?

19 Fhreagair Iosa agus thubhairt e riu, Leagaibh sios an teampull so, agus an trì làithibh cuiridh mise suas e.

20 An sin thubhairt na h-Iudhaich, Se bliadhna agus dà fhichead bha an teampull so 'ga thogail, agus an cuir thusa suas an trì làithibh e?

21 Ach labhair esan mu theampull a chuirp.

22 Uime sin an uair bha e air éirigh o na marbhaibh, chuimhnich a dheisciobuil gu'n dubhairt e so: agus chreid iad an sgrìobtuir, agus am focal a thubhairt Iosa.

23 A nis an uair a bha e an Ierusalem aig a' chàisg, air an fhèill⁴, chreid mòran 'na ainm, an uair a chunnaic iad na mìorbhuilean a rinn e.

24 Ach cha d'earb Iosa e fèin riu, do bhrìgh gu'm b'aithne dha na h-uile dhaoine,

25 Agus nach robh feum aige neach air bith a dheanamh fianuis air duine: oir bha fhios aige ciod a bha anns an duine.

CAIB. III.

1 *Theagaisg Crìosd do Nicodemus feum na h-ath-gheamhuin.* 11 *Mu chreidimh na bhàs.* 16 *Mòr-ghràdh Dhé do'n chinne-daoine.* 23 *Baisteadh, fianuis, agus teagasg Eoin.*

A GUS bha duine do na Phairisich, d'am b'ainm Nicodemus, a bha 'ua uachdaran air na h-Iudhaich:

2 Thàinig esan chum Iosa san oidhche, agus thubhairt e ris, A mhaighstir, tha fhios againn gur fear-teagaisg thu a thàinig o Dhia: oir cha'n urrainn duine air bith na mìorbhuile so dheanamh a ta thusa a' deanamh, mur bi Dia maille ris.

3 Fhreagair Iosa agus thubhairt e ris, Gu deimhin deimhin a ta mi ag ràdh riut, mur beirear duine a ris⁵, nach feud e rioghachd Dhé fhaicinn.

4 Thubhairt Nicodemus ris, Cionnus a dh'fheudas duine bhi air a bhreith 'nuair a ta e aosda? am bheil e comasach air dol a stigh an dara uair do bhroinn a mhàthar, agus a bhi air a bhreith?

5 Fhreagair Iosa, Gu deimhin deimhin a ta mi ag ràdh riut, mur bi duine air a bhreith o uisge, agus o'n Spiorad, cha 'n urrainn e dol a steach do rioghachd Dhé.

6 An ni sin a ta air a bhreith o'n fheoil, is feoil e; agus an ni si na ta air a bhreith o'n Spiorad, is spiorad e.

7 Na gabh iongantas gu'n dubhairt mi riut, Is éigin duibh bhi air bhuir breith a ris.

8 Tha a' ghaoth a' séideadh far an àill leatha, agus tha thu a' cluinntinn a fuaim, ach cha'n 'eil fhios agad cia as a tha i teachd, no c'àit a tha i dol: is ann mar sin a tha gach neach a tha air a bhreith o'n Spiorad.

9 Fhreagair Nicodemus agus thubhairt e ris, Cionnus a dh'fheudas na nithe so bhi?

10 Fhreagair Iosa agus thubhairt e ris, Am bheil thusa a'd' fhear-teagaisg Israeil, agus nach aithne dhuit na nithe so?

11 Gu deimhin deimhin a ta mi ag ràdh riut, gu bheil sinne a' labhairt an ni a's fios duinn, agus a' toirt fianuis air an ni sin a chunnaic sinn; agus cha ghabh sibhse ar fianuis.

12 Ma dh'innis mi dhuibh nithe tal-mhaidh, agus nach creid sibh, cionnus a chreideas sibh ma dh'innseas mi dhuibh nithe nèamhaidh?

13 Agus cha deachaidh aon neach suas do nèamh, ach an ti a thàinig a nuas o nèamh, Mac an duine a ta air nèamh.

14 Agus mar a thog Maois suas an nathair san fhàsach, is ann mar sin is éigin do Mhac an duine bhi air a thogail suas:

15 Chum as ge b'e neach a chreideas ann, nach sgriosar e⁶, ach gu'm bi a' bheatha mhaireannach aige.

16 Oir is ann mar sin a ghràdhaich Dia an saoghal, gu'n d'thug e 'aon-ghin Mhic fèin, chum as ge b'e neach a chreideas ann, nach sgriosar e, ach gu'm bi a' bheatha shiorruidh aige.

17 Oir cha do chuir Dia a Mhac do'n t-saoghal, chum gu'n dìteadh e an saoghal, ach a chum gu'm biodh an saoghal air a shaoradh trid-san.

18 An ti a chreideas ann, cha dìtear e: ach an ti nach creid, tha e air a dhìteadh cheana, a chionn nach do chreid e an ainm aoin-ghin Mhic Dhé.

19 Agus is e so an dìteadh, gu'n d'thàinig an solus do'n t-saoghal, agus gu'n do ghràdhaich daoine an dorchadas ni's mò na'n solus, a chionn gu'n robh an gnìomh-aran olc.

¹ dhannh.

² cuipe.

³ ro-chùram.

⁴ an àm na fèisde.

⁵ o'n àirde.

bi e cuillte.

20 Oir gach neach a ta deanamh uile, tha e toirt fuatha do'n t-solus, agus cha 'n 'eil e teachd chum an t-soluis, air eagal gu'm biodh 'oibre air an cronachadh.

21 Ach an ti a ui an fhìrinn, thig e chum an t-soluis, chum gu'm bi 'oibre follais-each, gur ann an Dia a rinneadh iad.

22 An déigh sin thàinig Iosa agus a dheisciobuil do thir Iudea; agus dh'fhan e an sin maille ri, agus bhaist e.

23 Agus bha Eoin mar an ceudna a' baisteadh ann an Enon, làimh ri Salim, do bhrìgh gu'n robh mòran uisgeachan an sin; agus thàinig iad, agus bhaisteadh iad.

24 Oir cha robh Eoin fathast air a thilgeadh am prìosan.

25 An sin dh'èirich ceisd eadar deisciobuil Eoin agus na h-Iudhaich, mu thimchioll glanaidh.

26 Agus thàinig iad chum Eoin, agus thubhairt iad ris, A nìhaighstir, an ti a bha maille riut an taobh thall do Iordan, d'an d'thug thu fianuis, feuch, tha esan a' baisteadh, agus tha ua li-uile dhaoine a' teachd d'a ionnsuidh.

27 Fhreagair Eoin agus thubhairt e, Cha 'n 'eil duine comasach air nì sam bith a ghabhail, mur bi e air a thoirt da o nèamh.

28 Tha sibhse féin a' toirt fianuis dhomh-sa, gu'n dubhairt mi, Cha mhi Crìosd, ach gu'n do chuireadh roimhe mi.

29 An ti aig am bheil a' bhean nuadh-phòsda, is e ain fear nuadh-phòsda e: ach caraid an fhir nuadh-phòsda, a ta 'na sheasamh agus ag éisdeachd ris, tha e a' deanamh gairdeachais mhòir air son gutha an fhir nuadh-phòsda: uime sin tha mo ghairdeachas so air a choimhlionadh.

30 Is éigin dasan fàs, ach dhomh-sa bhi air mo lughdachadh.

31 An ti a thig a nuas tha e os ceann nan uile: an ti a tha o'n talamh, tha e talmhaidh, agus labhraidh e air mhodh talmhaidh: an ti a thig o nèamh, tha e os ceann nan uile.

32 Agus an nì a chunnaic agus a chual e, air sin tha e toirt fianuis; agus cha'n 'eil aon duine a' gabhail r'a fhianuis.

33 An ti a ghabh r'a fhianuis-san, chuir e a sheula ris, gu bheil Dia fìor.

34 An ti a chuir Dia uaith, tha e a' labhairt bhriathra Dhé: oir cha'n ann a réir tomhais a tha Dia a' toirt an Spioraid da.

35 Is toigh leis an Athair am Mac, agus thug e na h-uile nìthe 'na làimh.

36 An ti a chreideas anns a' Mhac, tha a' bheatha maireannach aige; ach an ti nach 'eil a' creidsinn anns a' Mhac, cha'n fhaic e beatha; ach a ta fearg Dhé a' gabhail còmhnuidh air.

1 Rinn Crìosd còmhradh ris a' Bhan-samaraich, agus dh'fhoillsich se e féin di. 27 Tha 'dheisciobuil fo iongantas. 31 Chuir e an céill doibh 'eul féin air son glòire Dhé. 39 Chreid mòran do na Samaraich ann.

AIR an aobhar sin an uair a thuig Iosa gu'n cuala na Phairisich gu'n robh e a' deanamh agus a' baisteadh tuilleadh dheisciobul na Eoin,

2 (Ged nach do bhaist Iosa féin iad ach a dheisciobuil),

3 Dh'fhàg e Iudea, agus chaidh e a ris do Ghalile.

4 Agus b'éigin da dol troimh Shamaria.

5 An sin thàinig e gu baile a *bhuineadh* do Shamaria, ris an abrar Sichar, agus do'n fhearann a thug Iacob d'a mhac Ioseph.

6 A nis bha tobar Iacoib an sin. Uime sin air do Iosa bhi sgèth le a thurus, shuidh e mar sin làimh ris an tobar; agus bha e mu thimchioll na seathadh uaire.

7 Thàinig bean o Shamaria a tharruing uisge: thubhairt Iosa rithe, Thoir dhomh-sa deoch.

8 Oir bha a dheisciobuil air dol do'n bhaile a cheannach bidh.

9 An sin thubhairt a' bhean o Shamaria ris, Cionnus a ta thusa agus gur Iudhach thu, ag iarraidh deoch uam-sa, a ta am Bhan-samaritanaich? oir cha 'n 'eil commonn aig na h-Iudhaich ris na Samaritanaich.

10 Fhreagair Iosa agus thubhairt e rithe, Nam b'àithne dhuìt tiodhlac¹ Dhé, agus cò e a ta 'g ràdh riut, Thoir dhomh deoch, dh'iarraidh tu airsan, agus bheireadh e uisge beò dhuìt.

11 Thubhairt a' bhean ris, A Thighearn, cha 'n 'eil inneal tarruing agad, agus tha'n tobar domhain: uime sin cia as a ta an t-uisge beò sin agad?

12 Am mò thusa na ar n-athair Iacob, a thug dhuinne an tobar so, agus a dh'òlas e féin, agus a chlann, agus a spréidh?

13 Fhreagair Iosa agus thubhairt e rithe, Ge b'e neach a dh'òlas do'n uisge so, bithidh tart² air a ris:

14 Ach ge b'e neach a dh'òlas do'n uisge a bheir mise dha, cha bhi tart gu bràth air: ach an t-uisge a bheir mise dha, bithidh e 'na thobar uisge ann, a' sruthadh suas chum na beatha maireannaich.

15 Thubhairt a' bhean ris, A Thighearn, thoir dhomh-sa an t-uisge so, chum nach bi tart orm, agus nach tig mi an so a tharruing.

16 Thubhairt Iosa rithe, Imich, gairm t'fhear-phòsda, agus thig an so.

17 Fhreagair a' bhean agus thubhairt i, Cha 'n 'eil fear agam. Thubhairt Iosa

¹ tairbheartas.

² iola.

rithe, Is maith a thubhairt thu, Cha'n 'eil fear agam :

18 Oir bha cùignear fhear agad, agus esan a ta agad a nis, cha'n e t'fhear féin e: thubhairt thu so gu fìor.

19 Thubhairt a' bhean ris, A Thighearn, tha mi faicinn gur fàidh thu.

20 Rinnar n-aithriche aoradh sant-sliabh so; agus tha sibhse ag ràdh, gur ann an Ierusalem a ta an t-ionad anns an còir aoradh a dheanamh.

21 Thubhairt Iosa rithe, A bhean, creid mise, gu bheil an uair a' teachd, anns nach dean sibh aoradh do'n Athair aon chuid san t-sliabh so, no ann an Ierusalem.

22 Tha sibh a' deanamh aoraidh do'n ni nach aithne dhuibh: tha sinne a' deanamh aoraidh do'n ni a's aithne dhuinn: oir is ann o na h-Iudhaich a ta slàinte.

23 Ach a ta an uair a' teachd, agus a ta i nis ann, anns an dean am fìor luchd-aoraidh aoradh do'n Athair ann an spiorad agus ann am fìrinn: oir a ta an t-Athair ag iarraidh an leithide so do luchd-aoraidh.

24 Is Spiorad Dia, agus is éigin d'a luchd-aoraidh, aoradh a dheanamh dha an spiorad agus am fìrinn.

25 Thubhairt a' bhean ris, Tha fhios agam gu bheil am Mesias a' teachd, ris an abrar Crìosd: 'nuair a thig esan innsidh e na h-uile nithe dhuinn.

26 Thubhairt Iosa rithe, Is mise e, a ta labhairt riut.

27 Agus air a so thàinig a dheisciobuil, agus b' iongantach leo gu'n robh e labhairt ris a' mhnaoi: ach cha dubhairt aon neach, Ciod a tha thu 'g iarraidh? no, C'ar son a tha thu labhairt rithe?

28 An sin dh'fhàg a' bhean a soitheach uisge, agus dh'fhàg i do'n bhaile, agus thubhairt i ris na daoineibh,

29 Thigibh, faicibh duine a dh'innis dhomh-sa na h-uile nithe a rinn mi riamh: Nach e so Crìosd?

30 An sin chaidh iad a mach as a' bhaile, agus thàinig iad d'a ionnsuidh-san.

31 San àm sin féin ghuidh a dheisciobuil air, ag ràdh, A mhaighstir, ith.

32 Ach thubhairt esan riu, Tha agam-sa biadh r'a itheadh air nach 'eil fhios ag-aibh-sa.

33 Uime sin thubhairt na deisciobuil r'a chèile, An d'thug neach air bith ni d'a ionnsuidh r'a itheadh?

34 Thubhairt Iosa riu, Is e mo bhiadh-sa toil an ti a chuir uath mi a dheanamh, agus 'obair a chrìochnachadh.

35 Nach abair sibhse, A ta uime cheithir mìosan ann fathast, agus an sin thig am fogharadh? feuch, a ta mi ag ràdh ribh, Togaibh suas bhur suilean, agus seallaibh

air na h-achaibh; oir a ta iad a cheana geal chum an fhogharaidh.

36 Agus an ti a bhuaineas tha e faotainn tuarasdail, agus a' cruinneachadh toraidh chum na beatha maireannaich; chum gu'n dean an ti a chuireas, agus an ti a bhuaineas, gairdeachas le chèile².

37 Agus an so tha an ràdh³ ud fìor, Gu bheil neach a' cur, agus neach eile a' buain.

38 Chuir mise sibhse a bhuaìn an ni sin nach do shaothraich sibh: shaothraich daoine eile, agus chaidh sibhse steach 'nan saothair.

39 Agus chreid mòran do Shamaritanaich a' bhaile sin ann, air son caimnte na mnà, a thug fianuis, ag ràdh, Dh'innis e dhomh na h-uile nithe a rinn mi riamh.

40 Uime sin an uair a thàinig na Samaritanaich d'a ionnsuidh, ghuidh iad air fantuinn maille riu: agus dh'fhuirich e an sin dà là.

41 Agus chreid mòran tuilleadh air son 'fhocail féin:

42 Agus thubhairt iad ris a' mhnaoi, Tha sinn a' creidsinn cha'n ann á so suas air son do chòmhradh-sa: oir chuala sinn féin e, agus a ta fhios againn gur e so da rìradh Crìosd, Slànuighear an t-saoghail.

43 Agus an déigh dà là dh'fhalbh e as a sin, agus chaidh e do Ghalile:

44 Oir thug Iosa féin fianuis, nach 'eil urram aig fàidh na thir féin.

45 Uime sin, an uair a thàinig e do Ghalile, ghabh na Galiléaich ris, air dhoibh na nithe sin uile fhaicinn a rinn e ann an Ierusalem air an fhéill: oir chaidh iadsan mar an ceudna chum na féille.

46 An sin thàinig Iosa a ris do Chana Ghalile, far an d'rinn e fion do'n uisge. Agus bha duine cumhachdach⁴ àraidh, aig an robh a mhac gu tinn ann an Capernaum.

47 'Nuair a chual esan gu'n robh Iosa air teachd á Iudea do Ghalile, chaidh e d'a ionnsuidh, agus ghuidh e air gu'n rachadh e sìos, agus gu'n slànuicheadh e a mhac: oir bha e ri h-uchd bàis.

48 An sin thubhairt Iosa ris, Mur faic sibh comharan agus mìorbhuilean, cha chreid sibh.

49 Thubhairt an duine cumhachdach ris, A Thighearn, rach⁵ sìos mun faigh mo leanaban bàs.

50 Thubhairt Iosa ris, Imich; tha do mhac beò. Agus chreid an duine am focal a labhair Iosa ris, agus dh'imich e.

51 Agus am feadh a bha e fathast a' dol sìos, choinnich a sheirbhisich e, agus dh'innis iad da, ag ràdh, Tha do mhac beò⁶.

52 An sin dh'fhiosraich e dhiubhan uair

¹ An e so Crìosd?

³ an gnàth-fhocal.

² cuideachd, maraon.

⁴ mòr, rìoghail.

⁵ theirig, falbh, gabh.

⁶ gu maith.

annas an deachaidh e am feabhas: agus thubhairt iad ris, An dé air an t-seachdamh uair dh'fhàg am fiabhras e.

53 An sin dh'athnìich an t-athair gu'm b'i an uair sin féin, annas an dubhairt Iosa ris, Tha do mhac beò; agus chreid e féin, agus a theaghlach uile.

54 'Se so a ris an dara mìorbhuil a rinn Iosa, 'nuair a thàinig e á Judea do Ghalile.

CAIB. V.

1 *Leighis Iosa air là na sàbaid an duine a bha fuidh leòn rè ochd bliadhna deug thar fhichead: 10 Rinn na h-Iudhaich uime sin connsachadh ris, agus geur-leanmhuinn air.*

NA dhéigh so bha féil nan Iudhach ann; agus chaidh Iosa suas gu Ierusalem.

2 A nis a ta ann an Ierusalem, làimh ri *geata*¹ nan caorach, lochan ris an abrar sa' chainnt Eabhruidhich, Betesda, aig am bheil cùig tighean-fasgaidh².

3 Annta sin bha 'nan luidhe mòr-bhuidheann do dhaoineib euslan, dalla, bacach, seargta, a' feitheamh ri caruchadh an uisge.

4 Oir chaidh aingeal sìos an àm àraidh san lochan, agus chuir e an t-uisge troimh chéile: uime sin an ceud neach a rachadh sìos ann, an déigh cur troimh chéile an uisge, rinneadh slàn e a dh'aon tinneas a bhiodh air.

5 Agus bha duine àraidh an sin, a bha ochd bliadhna deug thar fhichead ann an euslaint.

6 'Nuair a chunnaic Iosa esan 'na luidhe, agus fios aige gu'n robh e nis ùine flada *mar sin*, thubhairt e ris, Am miann leat bhì air dò dheanamh slàn?

7 Fhreagair an duine euslan e, A Thigh-earn, cha'n 'eil duine agam, an uair a chuirear an t-uisge troimh a chéile, a chuireas anns an lochan mi: ach am feadh a ta mise teachd, tha neach eile a' dol sìos romham.

8 Thubhairt Iosa ris, Eirich, tog do leabadh, agus imich.

9 Agus air ball rinneadh an duine slàn, agus thog e a leabadh, agus dh'imich e: agus bha'n t-sàbaid ann air an là sin.

10 Uime sin thubhairt na h-Iudhaich ris an ti a shlànuicheadh, Is i an t-sàbaid a ta ann; cha'n 'eil e dligheach dhuìt do leabadh a ghiulan.

11 Fhreagair e iad, An ti a rinn slàn mi, thubhairt esan rium, Tog do leabadh agus imich?

12 An sin dh'fhiosraich iad deth, Cò an duine a thubhairt riut, Tog do leabadh agus imich?

13 Agus cha robh fhios aig an ti a shlànuicheadh, cò e: oir chaidh Iosa as a shealladh, air do mhòr-shluagh bhì anns an àit.

14 'Na dhéigh so fhuair Iosa e anns an teampull, agus thubhairt e ris, Feuch, rinneadh slàn thu: na peacaich nì's mò, air eagal gu'n tachair nì's miosa dhuìt.

15 Dh'imich an duine, agus dh'innis e do na h-Iudhaich gu'm b'e Iosa rinn slàn e.

16 Agus air a shon so rinn na h-Iudhaich geur-leanmhuinn air Iosa, agus dh'iarr iad a mharbhadh, do bhrìgh gu'n d'rinn e na nithe so air an t-sàbaid.

17 Ach fhreagair Iosa iad, Tha m' Athair ag oibreachadh gus a nis, agus tha mise ag oibreachadh.

18 Uime sin bu mhòid a dh'iarr na h-Iudhaich a mharbhadh, a chionn nach e mhàin gu'n do bhris e an t-sàbaid, ach gu'n dubhairt e mar an ceudna gu'm b'e Dia 'Athair-san, 'ga dheanamh féin co-ionann ri Dia.

19 Air an aobhar sin fhreagair Iosa, agus thubhairt e riu, Gu deimhin deimhin a ta mi ag ràdh ribh, nach 'eil am Mac comasach air nì sam bith a dheanamh uath féin, ach an nì a chì e an t-Athair a' deanamh: oir ge b'e nithe a nì esan, na nithe sin féin nì am Mac mar an ceudna.

20 Oir is ionmhuinn leis an Athair am Mac, agus a ta e a' foillseachadh dha nan uile nithe a tha e féin a' deanamh: agus foillsichidh e dha oibre a's mò na iad so, air chor as gu'm bì iongantas oirbhe.

21 Oir mar a ta an t-Athair a' dùsgadh, agus a' beothachadh nam marbh, is amhuil sin a ta am Mac a beothachadh an dream a's àill leis.

22 Oir cha'n 'eil an t-Athair a' toirt breth air duine sam bith; ach thug e gach uile bhreitheanas do'n Mhac:

23 Chum gu'n tugadh na h-uile dhaoine urram do'n Mhac, amhuil mar a ta iad a' toirt urraim do'n Athair. An ti nach 'eil a' toirt urraim do'n Mhac, cha'n 'eil e toirt urraim do'n Athair a chuir uath e.

24 Gu deimhin deimhin a ta mi ag ràdh ribh, An ti a dh'éisdeas ri m' fhocal-sa, agus a ta creidsinn anns an ti a chuir uath mi, tha a' bheatha mhaireannach aige, agus cha tig e chum dithidh; ach chaidh e thairis o bhàs gu beatha.

25 Gu deimhin deimhin a ta mi ag ràdh ribh, Gu bheil an uair a' teachd, agus gu bheil i nis ann, anns an cluinn na mairbh guth Mhic Dhé: agus an dream a chluinn-eas, bithidh iad beò.

26 Oir mar a ta aig an Athair beatha ann féin, is amhuil sin a thug e do'n Mhac beatha a bhì aig ann féin;

27 Agus thug e mar an ceudna dha ùghdarras chum breth a thabhairt, do bhrìgh gur e Mac an duine.

28 Na gabhaibh iongantas deth so; oir a ta an uair a' teachd, anns an cluinn iad-

¹ margadh.² sgath thighean.

san uile a ta sna h-uaighibh a ghuth-san:

29 Agus théid iad a mach; iadsan a rinn maith, chum aiseirigh na beatha; agus iadsan a rinn olc, chum aiseirigh an dam-naidh.

30 Cha'n 'eil mise comasach air nì sam bith a dheanamh uam féin: mar a chluinn-eas mi bheir mi breth: agus a ta mo bhreitheanas ceart; do bhrìgh nach 'eil mi ag iarraidh mo thoile féin, ach toil an Athar a chuir uaith mi.

31 Ma bheir mise fianuis mu m' thimchioll féin, cha'n 'eil m' fianuis fìor¹.

32 Tha neach eile a' toirt fianuis mu m' thimchioll, agus a ta fhios agam gur fìor an fianuis a ta e deanamh mu m' thimchioll.

33 Chuir sibhse chum Eoin, agus thug e fianuis do'n fhirinn.

34 Ach cha'n 'eil mise a' gabhail fianuis o dhuine: ach a ta mi ag ràdh nan nìthe so, chum gu'm bi sibhse air bhuir tèarnadh.

35 B'esan an lòchran lasarach² agus dealrach: agus bha sibhse toileach car tamuill gàirdeachas a dheanamh 'na sholas.

36 Ach a ta agam-sa fianuis a's mò na fianuis Eoin: oir na h-oibre a thug an t-Athair dhomh-sa chum gu'n crìochnaichinn iad, tha na h-oibre sin féin a tha mise a' deanamh, a' toirt fianuis mu m' thimchioll, gu'n do chuir an t-Athair uaith mi.

37 Agus an t-Athair féin a chuir uaith mi, thug e fianuis mu m' thimchioll. Cha chuala sibh riamh a ghuth, nì mò a chunnaic sibh a choslas.

38 Agus cha'n 'eil fhocal-san agaibh a' gabhail còmhnuidh annaibh: oir an tì sin a chuir esan uaith, cha'n 'eil sibh 'ga chreidsinn.

39 Rannsaichibh³ na sgrìobtuirean, oir a ta sibh a' saòilsinn gu bheil a' bheatha mhaireannach agaibh anna-san; agus is iadsan a ta toirt fianuis mu m' thimchioll-sa.

40 Gidheadh cha'n àill leibh teachd am' ionnsuidh-sa, chum gu'm faigheadh sibh beatha.

41 Cha'n 'eil mise a' gabhail urrainn⁴ o dhaoibh.

42 Ach is aithne dhomh sibhse, nach 'eil gràdh Dhé agaibh annaibh.

43 Thàinig mise an ainm m' Athar, agus cha'n 'eil sibh a' gabhail rium: ma thig neach eile 'na ainm féin, gabhaidh sibh ris-san.

44 Cionnus a dh'fheadas sibh creidsinn, a ta gabhail urrainn o chéile, agus nach 'eil ag iarraidh an urrainn a thig o Dhia a mha'n?

45 Na saoilbh gu'n dean mise bhuir casaid ris an Athair: tha aon a tha deanamh casaid oirbh, Maois, nns am bheil sibh a' cur bhuir dòchais⁵.

46 Oir nan creideadh sibh Maois, chreideadh sibh mise: oir sgrìobh esan mu m' thimchioll.

47 Ach mur creid sibh a sgrìobhadh-san, cionnus a chreideas sibh mo bhriathra-sa.

CAIB. VI.

1 *Bheathaich Crìosd cùig mìle fear le cùig builinnibh arain agus dà iasg: 15 Air an aobhar sin b'àill leis an t-sluagh esan a dheanamh 'na rìgh: 16 Ach air dhasan a sgaradh féin uatha, chaidh e suas gu beinn, agus dh'imich e air a' chuan a dh'ionnsuidh a dheisciobul.*

NA dhéigh sin chaidh Iosa thar muir⁶ Ghalile, no Thiberias.

2 Agus lean sluagh mòr e, do bhrìgh gu'm fac iad a mhìorbhuilean a rinn e air an dream a bha euslan.

3 Agus chaidh Iosa suas air beinn, agus shuidh e an sin maille r'a dheisciobluibh.

4 Agus bha a' chàisg, féill nan Iudhach, am fagus.

5 An sin an uair a thog Iosa suas a shùilean, agus a chunnaic e gu'n d' thàinig buidheann mhòr shluaigh d'a ionnsuidh, thubhairt e ri Philip, Cia an t-àit as an ceannaich sinn aran chum gu'n ith iad so?

6 (Ach thubhairt e so 'ga dhearbhadh-san; oir bha fhios aige féin ciod a dheanadh e.)

7 Fhreagair Philip e, Cha leoir dhoibh luach dhà cheud pèghinn a dh'aran, chum gu'n gabhadh gach aon diubh beagan.

8 Thubhairt aon d'a dheisciobluibh, Aindreas, bràthair Shimoin Pheadair, ris,

9 Tha òganach an so, aig am bheil cùig builinnean còrna, agus dà iasg bheag: ach ciod iad so am measg na h-uiread?

10 Agus thubhairt Iosa, Thugaibh air na daoibh suidhe sìos. A nis bha mòran feoir anns an àit. Air an aobhar sin shuidh na daoine sìos, an àireamh timchioll chùig mìle.

11 Agus ghlac Iosa na builinnean, agus air tabhairt⁷ buidheachais da, roinn e air na deisciobluibh iad, agus na deisciobul orra-san a shuidh: agus mar an ceudna do na h-iasgaibh beaga, mheid as a b'àill leo.

12 'Nuair a shàsuicheadh iad, thubhairt e r'a dheisciobluibh, Cruinnichibh am biadh briste a ta thuilleadh ann, chum nach caillear a bheag.

13 Air an aobhar sin chruinnich iad e r'a chéile, agus lion iad dà chliabh dheug do sbruileach nan cùig builinnean còrna,

¹ iomchu'dh.

² lasta.

³ Tha sibh a' rannsaichadh.

⁴ glòire.

⁵ as am bheil sibh ag earbsadh.

⁶ fàirge.

⁷ breith.

a bha dh'fhuigheall aig a' mhuinntir a dh'ith.

14 An sin an uair a chunnaic na daoine sin am mìorbhuil a rinn Iosa, thubhairt iad, Gu fìrinneach is e so am fàidh a bha gu teachd chum an t-saoghail.

15 Uime sin an uair a thuig Iosa gu'n robh iad air tì¹ teachd agus breith air le làimh làidir, chum gu'n deanadh iad rìgh dheth, dh'imich e ris do'n bheinn 'na aonar.

16 Agus an uair a thàinig am feasgar, chaidh a dheisciobuil sìos chum na mara.

17 Agus air dol an luing dhoibh, chaidh iad thar a' mhuir gu Capernaum: agus bha an dorchadas a nis an, agus cha robh Iosa air teachd d'an ionnsuidh.

18 Agus ag sèideadh do ghaoith mhòir, dh'éirich a' mhuir.

19 Uime sin an uair a rinn iad iomramh tímchioll cuig no deich thar fhichead do stàidibh, chunnaic iad Iosa ag imeachd air a' mhuir, agus a' druideadh ris an luing; agus ghabh iad eagal.

20 Ach thubhairt esan riu, Is mise ta ann; na biodh eagal oirbh.

21 Uime sin ghabh iad gu toileach a steach do'n luing e: agus air ball ràinig an long an tìr gus an robh iad a' dol.

22 Air an là 'na dhéigh sin, an uair a chunnaic an sluagh a sheas air taobh eile na mara, nach robh long² eile an sin, ach an long sin anns an deachaidh a dheisciobuil a steach, agus nach deachaidh Iosa san luing maille r'a dheisciobuibh, ach gu'n d'fhalbh a dheisciobuil 'nan aonar;

23 (Gidheadh thàinig longa beaga eile o Thiberias, làimh ris an àit san d'ith iad an t-aran, an déigh do'n Tighearn buidheachas a thoirt;)

24 Uime sin an uair a chunnaic an sluagh nach robh Iosa an sin, no a dheisciobuil, chaidh iad fèin mar an ceudna ann an longaibh, agus thàinig iad gu Capernaum, ag iarraidh Iosa.

25 Agus air dhoibh fhaotainn air an taobh thall do'n mhuir, thubhairt iad ris, A mhaighstir, c'uin a thàinig thu an so?

26 Fhreagair Iosa iad agus thubhairt e, Gu deimhin deimhin a ta mi ag ràdh ribh, Tha sibh ga m'iarraidh, cha'n anna chionn gu'm faca sibh na mìorbhuilean, ach a chionn gu'n d'ith sibh do na builinnibh, agus gu'n do shàisheadh sibh.

27 Deanaibh saothair cha'n ann air son a' bhìdh a theirgeas, ach air son a' bhìdh a mhaireas chum na beatha sìorruidh, a bheir Mac an duine dhuibh: oir esan sheulaich³ Dia an t-Athair.

28 An sin thubhairt iad ris, Ciod a ni

sinn, chum as gu'n oibrich sinn oibre Dhé?

29 Fhreagair Iosa agus thubhairt e riu, Is i so obair Dhé, gu'n creid sibh anns an ti a chuir e uaith.

30 Uime sin thubhairt iad ris, Ciod an comhar a ni thusa ma ta, chum gu'm faic sinn, agus gu'n creid sinn thu? ciod an obair a ni thu?

31 Dh'ith ar n-aithriche mana san fhàsach; a réir mar a ta e sgrìobhta, Thug e dhoibh aran o nèamh r'a itheadh.

32 An sin thubhairt Iosa riu, Gu deimhin deimhin a ta mi ag ràdh ribh, nach d'thug Maois dhuibh an t-aran o nèamh; ach a ta m' Athair-sa a' toirt dhuibh an arain fhìor o nèamh.

33 Oir is e sin aran Dhé a ta teachd a nuas o nèamh, agus a ta tabhairt beatha do'n t-saoghal.

34 An sin thubhairt iad ris, A Thigh-earn, thoir dhuinne an t-aran so an còmh-nuidh.

35 Agus thubhairt Iosa riu, Is mise aran na beatha: an ti a thig a m' ionnsuidh-sa, cha bhì ocras gu bràth air; agus an ti a chreideas annam-sa, cha bhì tart gu bràth air.

36 Ach mar a thubhairt mi ribh, ged chunnaic sibh mi, cha'n 'eil sibh a' creidsinn.

37 Gach ni a bheir an t-Athair dhomh-sa, thig e a m' ionnsuidh; agus an ti a thig a m' ionnsuidh, cha tilg mi air chor sam bith a mach e.

38 Oir thàinig mi nuas o nèamh, cha'n ann chum gu'n deanainn mo thoil féin, ach toil an ti a chuir uaith mi.

39 Agus is i so toil an Athar a chuir uaith mi, nach caillinn a bheag sam bith do'n uile a thug e dhomh, ach gu'n togainn suas e ris air an là dheireannach.

40 Agus is i so toil an ti a chuir uaith mi, gu'm biodh a' bheatha mhaireannach aig gach neach a chi am Mac, agus a chreideas ann: agus togaidh mise suas e air an là dheireannach.

41 An sin rinn na h-Iudhaich gearan uime, a chionn gu'n dubhairt e, Is mise an t-aran a thàinig a nuas o nèamh.

42 Agus thubhairt iad, Nach e so Iosa mac Ioseph, neach aig an aithne dhuinn 'athair agus a mhàthair? cionnus ma seadh a ta e ag ràdh, Thàinig mi nuas o nèamh.

43 Air an aobhar sin fhreagair Iosa agus thubhairt e riu, Na deanaibh gearan 'nur measg féin.

44 Cha'n urrainn neach air bith teachd a m' ionnsuidh-sa, mur tarruing an t-Athair a chuir uaith mise e: agus togaidh mise suas e air an là dheireannach.

¹ rin orra.

² barc, bàt.

³ chomhraich, shonraich.

45 Tha e sgriobhta sna fàidhibh, Agus bithidh iad uile air an teagasg o Dhia. Uime sin gach¹ neach a chuala, agus a dh'fhòghluim o'n Athair, thig e a m' ionnsuidh-sa.

46 Cha 'n e gu'm faca neach sam bith an t-Athair, ach an ti a ta o Dhia; chunn-aic esan an t-Athair.

47 Gu deimhin deimhin a ta mi ag ràdh ribh, An ti a ta creidsinn annam-sa, tha a' bheatha mhaireannach aige.

48 Is mise aran na beatha.

49 Dh'ith bhur n-aithriche mana san fhàsach agus fhuair iad bàs.

50 Is e so an t-aran a tha teachd a nuas o nèamh, chum as gun ith neach dheth, agus nach faigh e bàs.

51 Is mise an t-aran beò, a thàinig a nuas o nèamh: ma dh'itheas neach air bith do'n aran so, bithidh e beò gu sìorruidh; agus an t-aran a bheir mise uam, is e m'fheoil e, a bheir mi air son beatha an t-saoghail.

52 Air an aobhar sin bha conn-sachadh² aig na h-Iudhaich r'a chéile, ag ràdh, Cionnus a dh'fheudas an duine so 'fheoil a thoirt duinn r'a itheadh.

53 An sin thubhairt Iosa riu, Gu deimhin deimhin a ta mi ag ràdh ribh, mur ith sibh feoil Mhic an duine, agus mur òl sibh 'fhuil, cha'n 'eil beatha agaibh annaibh.

54 Eсан a dh'itheas m' fheoil-sa, agus a dh'òlas m' fhuil-sa, a ta a' bheatha sìorruidh aige; agus togaidh mise suas e air an là dheireannach.

55 Oir is biadh gu fìrinneach m'fheoil, agus is deoch gu fìrinneach m' fhuil.

56 Eсан a dh'itheas m'fheoil-sa, agus a dh'òlas m'fhuil-sa, tha e gabhail comh-nuidh annam-sa, agus mise annsan.

57 Mar a ta 'n t-Athair beò a chuir uaith mise³, agus a ta mise beò troimh⁴ an Athair; is amhuil sin esan a dh'itheas mise, bithidh e mar an ceudna beò tromh-am-sa⁵.

58 Is e so an t-aran sin a thàinig a nuas o nèamh; cha'n e mar a dh'ith bhur n-aithriche mana, agus fhuair iad bàs: esan a dh'itheas an t-aran so, bithidh e beò am feasd.

59 Thubhairt e na nithe so anns an t-sionagag, an uair a bha e a' teagasg an Capernaum.

60 Uime sin 'nuair a chual mòran d'a dheisciobluibh so, thubhairt iad, Is cruaidh a' chainnt so; cò a dh'fheudas éisdeachd rithe.

61 'Nuair a thuig Iosa ann féin gu'n robh a dheisciobuil ri gearan uime so, thubhairt e riu, Am bheil so a' toirt oil-

bheim dhuibh-sa?

62 Agus *ciod* nam faiceadh sibh Mac an duine a' dol suas do'n àit anns an robh e roimhe?

63 Is e an Spiorad a bheothaicheas; cha'n 'eil tairbhe air bith san fheoil: na briathran a tha mise a' labhairt ribh, is spiorad agus is beatha *iad*.

64 Ach a ta cuid dibhse nach 'eil a' creidsinn. (Oir b'aithne do Iosa o thùs, cò iad nach robh a' creidsinn, agus cò an ti a bhrathadh e.)

65 Agus thubhairt e, Air an aobhar sin thubhairt mi ribh, nach urrainn neach air bith teachd a m' ionnsuidh, mur bi e air a thoirt da o m' Athair.

65 O'n àm sin chaidh moran d'a dheisciobluibh air an ais, agus cha d'imich iad ni's mò maille ris.

67 An sin thubhairt Iosa ris an dà fhear dheug, An àill leibhse falbh cuideachd?

68 An sin fhreagair Simon Peadar e, A Thighearn, co dh'ionnsuidh an téid sinn? agad-sa tha briathra na beatha maireann-aich.

69 Agus a ta sinne a' creidsinn, agus a ta fhios againn gur tusa Crìosd⁶ Mac an Dé bheò.

70 Fhreagair Iosa iad, Nach do thagh mise sibhse dà fhear dheug, agus a ta fear agaibh 'na dhiabhul?

71 Ach labhair e mu Iudas Iscariot, *mac Shimoin*: oir is e so an ti a bha gu esan a bhrath, air dha bhi 'na aon do'n dà fhear dheug.

CAIB. VII.

1 *Chronuich Iosa àrd-inntinn agus dànadas a chairdean: 10 chaidh e suas o Ghalile gu féill nam páillium; 14 agus theagaisg e anns an teampull. 40 Iomadh gnè bharail mu thimchioll Iosa am measg an t-sluaigh.*

AGUS an déigh nan nithe sin, bha Iosa ag imeachd mu'n cuairt ann an Galile: oir cha b'àill leis a bhi 'g imeachd⁷ ann an Iudea, a chionn gu'n robh na h-Iudhaich ag iarraidh a mharbhadh.

2 Agus bha féill nan Iudhach, *eadhon* féill nam páillium, am fagus.

3 Uime sin thubhairt a bhràithre ris, Imich as so agus rach⁸ do Iudea, clum gu faic do dheisciobuil mar an ceudna t'òibre a tha thu a' deanamh.

4 Oir cha dean neach air bith aon ni am folach, a dh'iarraas e féin a bhi am follais⁹: ma tha thu a' deanamh uan nithe so, nochd thu féin do'n t-saoghal.

5 Oir cha do chreid a bhràithre féin ann.

6 An sin thubhairt Iosa riu, Cha d'thàinig m' àm-sa fathast; ach a ta bhur n-àm-sa ghnàth deas.

² Gach. ² deasboireachd, tagradh.

³ Mar a chuir an t-Athair beò uaith mise.

⁴ tre. ⁵ triom-sa.

⁶ an Crìosd, am Mesias.

⁷ comhnuidh a ghabhail.

⁸ theirig.

⁹ bhi iomraideach.

7 Cha'n 'eil e'n comas do'n t-saoghal sibhse fhuathachadh; ach fuathaichidh e mise, do bhrìgh gu bheil mi tòirt fianuis m'a thimchioll, gu bheil 'oibre olc.

8 Rachaibh-sa suas chum na féille so: cha téid mise suas fathast chum na féille so, do bhrìgh nach 'eil m' àm fathast air a choimhlionadh.

9 'Nuair thubhairt e na nithe so riu, dh'fhan e an Galile.

10 Ach an uair a chaidh a bhràithre suas, an sin chaidh esan suas mar an ceudna chum na féille, cha'n ann am follais¹, ach mar gu b'ann an uaighnidheas².

11 An sin dh'iarr na h-Iudhaich e air an fhéill, agus thubhairt iad, C'ait am bheil e?

12 Agus bha borbhan³ mòr am measg an t-sluaigh m'a thimchioll: oir thubhairt cuid, Is duine maith e: ach thubhairt cuid eile, Cha'n eadh⁴; ach a ta e mealladh an t-sluaigh.

13 Gidheadh cha do labhair neach sam bith gu follaiseach uime, air eagal nan Iudhach.

14 A nis mu mheadhon na féille, chaidh Iosa suas do'n teampull, agus theagaisg e.

15 Agus ghabh na h-Iudhaich iongantas, ag ràdh, Cionnus is aithne do'n duine so litrichean, agus nach d'fhòghluim e?

16 Fhreagair Iosa iad, agus thubhairt e, Cha leam féin mo theagasg, ach leis-san a chuir uaith mi.

17 Ma's àill le neach sam bith a thoil-san a dheanamh, bithidh fios aige mu'n teagasg, an ann o Dhia a ta e, no'm bheil mise a' labhairt uam féin.

18 An ti a labhras uaith féin, tha e 'g iarraidh a ghlòire féin: ach ge b'e dh'iarras glòir an ti a chuir uaith e, tha esan fìrinneach, agus cha'n 'eil eucoir⁵ air bith ann.

19 Nach d'thug Maois an lagh dhuibh, agus gidheadh cha'n 'eil aon neach agaibh a' coimhlionadh an lagha? C'ar son a ta sibh ag iarraidh mise a mharbhadh?

20 Fhreagair an sluagh agus thubhairt iad, Tha deamhan agad: co tha 'g iarraidh do mharbhadh?

21 Fhreagair Iosa agus thubhairt e riu, Rinn mise aon obair, agus a ta iongantas oirbh uile air an aobhar sin.

22 Thug Maois dhuibh an timchioll-ghearradh, (cha'n e gur ann o Mhaois a ta e, ach o na h-aithrichibh), agus timchioll-ghearradh sibhse duine air an t-sàbaid.

23 Ma tha duine air an t-sàbaid a' gabhail timchioll-ghearradh, chum nach bi lagh Mhaois air a bhriseadh; am bheil

fearg agaibh riumsa, a chionn gu'n d'rinn mi duine uile slàn air an t-sàbaid?

24 Na tugaibh breth a réir coslais, ach thugaibh breth cheart.

25 An sin thubhairt cuid do mhuinntir Ierusalem, Nach e so esan a tha iad ag iarraidh a mharbhadh?

26 Agus, feuch, tha e labhairt gu follaiseach, agus cha'n 'eil iad ag ràdh ni sam bith ris: am bheil dearbh-fhios aig na h-uachdarain gur e so da rìreadh Criosd?

27 Gidheadh is aithne dhuinn an duine so cia as da: ach an uair a thig Criosd, cha'n aithne do neach air bith cia as da.

28 An sin ghlaodh Iosa san teampull, agus e a' teagasg, ag ràdh, Is aithne⁶ dhuibh araon mise, agus cia as domh: agus cha d'thàinig mi uam féin, ach a ta esan fìor a chuir uaith mi, air nach 'eil eòlas agaibh-sa.

29 Ach a ta eòlas agam-sa air; oir is ann uaith a ta mi, agus chuir esan uaith mi.

30 An sin dh'iarr iad a ghlacadh: ach cha do chuir neach air bith làmh ann, a chionn nach robh 'uair-san fathast air teachd.

31 Agus chreid mòran do'n t-sluaigh air, agus thubhairt iad, 'Nuair a thig Criosd, an dean e ni's mò do mhòrbhuilb na iad sin a rinn an duine so?

32 Chuala na Phairisich gu'n robh an sluagh a' borbhanaich nan nithe so m'a thimchioll: agus chuir na Phairisich agus na h-àrd-shagairt maòir g'a ghlacadh.

33 An sin thubhairt Iosa⁷, Fathast tamull beag tha mise maille ribh, agus an sin a ta mi dol chum an ti a chuir uaith mi.

34 Iarraidh sibh mi, agus cha'n fhaigh sibh mi: agus do'n àit am bi mi, cha'n urrainn sibhse teachd.

35 An sin thubhairt na h-Iudhaich eat-orra féin, C'ait an téid am fear so, nach faigh sinn e? an téid e chum na muinntir a ta air an sgapadh am measg nan Greugach, agus an teagaisg e na Greugach?

36 Ciod i a' chainnt so a thubhairt e, Iarraidh sibh mi, agus cha'n fhaigh sibh mi: agus do'n àit am bheil mise, cha'n urrainn sibhse teachd?

37 Air an là dheireannach, là mòr sin na féille, sheas Iosa agus ghlaodh e, ag ràdh, Ma tha tart air neach sam bith, thigeadh e a m'ionnsuidh-sa, agus òladh e.

38 An ti a chreideas annam-sa, mar a ta an sgrìobhtair ag ràdh, sruthaidh as a bhroinn⁸ aimhnichean do uisge beò.

39 (Ach labhair e so mu'n Spiorad, a bha iadsan a chreideadh annsan gu fhaghaill: oir cha robh an Spiorad⁹ fathast air

¹ os àird.

² os ìosal.

³ cogarsaich.

⁴ Ni h-eadh.

⁵ cealg.

⁶ An aithne.

⁷ thubhairt Iosa riu.

⁸ a chom, a chliabh.

⁹ Spiorad naomh.

a thabhairt, do bhrìgh nach robh Iosa fathast air a ghìorachadh.)

40 Uime sin, an uair a chuala mòran do'n t-sluagh a' chaint so, thubhairt iad, Gu fìrinneach is e so am fàidh.

41 Thubhairt cuid eile, Is e so Crìosd. Ach thubhairt dream eile, An ann o Ghalile a thig Crìosd?

42 Nach dubhairt an sgrìobtuir, Gu'n tig Crìosd do shìol Dhaibhidh, agus á Betlehem, am baile san robh Daibhidh?

43 Air an aobhar sin dh'éirich eas-aonachd¹ am measg an t-sluaigh air a shon-san.

44 Agus b'àill le cuid diubh a ghlacadh; ach cha do chuir duine air bith làmh ann.

45 An sin thàinig na maòir chum nan ard-shagart agus nam Phairiseach; agus thubhairt iadsan riu, C'ar son nach d'thug sibh leibh e?

46 Fhreagair na maòir, Cha do labhair duine riamh mar an duine so.

47 An sin fhreagair na Phairisich iad, Am bheil sibhse mar an ceudna air bhuir mealladh?

48 An do chreid aon air bith do na h-uachdarain ann, no do na Phairisich?

49 Ach an sluagh so aig nach 'eil eòlas an lagha, tha iad malluichte.

50 Thubhairt Nicodemus riu, (esan a thàinig d'a ionnsuidh san oidheche, air dha bhi 'na aon diubh,)

51 Am bheil air lagh-ne toirt breth air duine sam bith gus an cluinn e uaith féin an toiseach, agus gus am bi fhios aige ciod a tha e a' deanamh?

52 Fhreagair iadsan agus thubhairt iad ris, Am bheil thusa mar an ceudna o Ghalile? Rannsaich, agus faic: oir á Galile cha d'éirich fàidh².

53 Agus dh'imich gach aon d'a thigh féin.

CAIB. VIII.

1 *Thug Crìosd a' bhean a ghlacadh an adhaltrannas as saor: 12 shearmonaich e gur e féin solus an t-saoghail, agus dhearbhadh e gu bheil a theagasg ceart. 33 Fhreagair e na h-Iudhaich a bha deanamh bòsd á Abraham.*

ACH chaidh Iosa chum sléibh nan crann-oladh:

2 Agus gu moch air mhaduinn thàinig e ris do'n teampull, agus thàinig an sluagh uile d'a ionnsuidh; agus air suidhe dha, theagaisg e iad.

3 Agus thug na sgrìobhaichean agus na Phairisich bean d'a ionnsuidh a ghlacadh an adhaltrannas; agus air dhoibh a cur anns a' mheadhon,

4 Thubhairt iad ris, A mhaighstir, ghlacadh a' bhean so anns a' ghnìomh féin, a' deanamh adhaltrannais.

5 A nis dh'àithn Maois dhuinn san lagh, an leithide so a chlachadh: ciod ma seadh a ta thusa ag ràdh?

6 Thubhairt iad so 'ga dhearbhadh³, chum gu'm biodh aca cùis-chasaid 'na aghaidh. Ach chrom Iosa sìos, agus sgrìobh e le 'mheur air an làr, (mar nach biodh e 'gan cluinntinn.)

7 Mar sin air dhoibh buanachadh a' feòrach dheth, thog se e féin suas agus thubhairt e riu, An neach a ta gun pleacadh agaibh-sa, tilgeadh e a' cheud chlach oirre.

8 Agus chrom e sìos a ris agus sgrìobh e air an làr.

9 Agus an uair a chual iadsan so, (air dhoibh bhi air an agairt le'n coguis⁴ féin,) chaidh iad a mach an dèigh a chèile, a' toiseachadh aig an dream bu shine, gus an dream mu dheireadh: agus dh'fhàgadh 'na aonar Iosa, agus a' bhean 'na seasamh sa' mheadhon.

10 Agus 'nuair a dh'éirich Iosa suas, agus nach fac e aon air bith ach a' bhean, thubhairt e rithe, A bhean, c'ait am bheil iad sud do luchd-casaid? an do dhìt duine air bith thu?

11 Thubhairt ise, Cha do dhìt aon duine, a Thighearn. Agus thubhairt Iosa rithe, Cha mhò a tha mise ga d' dhìtheadh: imich romhad, agus na peacaich nì 's mò.

12 An sin labhair Iosa riu a ris, ag ràdh, Is mise solus an t-saoghail: an ti a leanas mise, cha siubhail e an dorchadas, ach bithidh solus na beatha aige.

13 Uime sin thubhairt na Phairisich ris, Tha thu toirt fianuis mu d' thimchioll féin; cha'n 'eil t'fhiannais fìor.

14 Fhreagair Iosa, agus thubhairt e riu, Ged tha mi toirt fianuis mu m' thimchioll féin, gidheadh a ta m' fhiannais fìor: oir a ta t'fhios agam cia as a thàinig mi, agus c'ait am bheil mi dol; ach cha'n 'eil fhios agaibh-sa cia as a thàinig mi, no c'ait am bheil mi dol.

15 Tha sibhse a' toirt breth a réir na feòla; cha'n 'eil mise a' toirt breth air aon duine.

16 Agus gidheadh ma bheir mise breth, tha mo bhrèth fìrinneach: oir cha'n 'eil mi a'm' aonar, ach mise agus an t-Athair a chuir uaith mi.

17 Agus a ta e sgrìobhta ann blur lagh féin, gu bheil fianuis dithis dhaoine fìor.

18 Is aon mise a ta deanamh fianuis mu m' thimchioll féin, agus a ta an t-Athair a chuir uaith mi, a' deanamh fianuis mu m' thimchioll.

19 An sin thubhairt iad ris, C'ait am bheil t' Athair? Fhreagair Iosa, Cha'n aithne dhuibhse aon chuid mise no m'

¹ roinn, connsachadh.

² Rannsaich agus faic nach éirich fàidh á Galile.

³ 'ga fheuchainn, 'ga bhuaireadh.

⁴ coimh-fhios, coisnais.

Athair : nam biodh eòlas agaibh ormsa, bhiodh eòlas agaibh air m' Athair mar an ceudna.

20 Labhair Iosa na briathra so an tigh-coimhead an ionmhais, ag teagasg dha san teampull : agus cha do chuir duine air bith làmh ann; oir cha robh 'uair fathast air teachd.

21 An sin thubhairt Iosa riu a ris, Tha mise a' falbh, agus iarraidh sibh mi, agus bàsaichidh sibh ann bhur peacadh; cha'n urrainn sibhse teachd do'n àit am bheil mise a' dol.

22 An sin thubhairt na h-Iudhaich, Am marbh se e féin? do bhrìgh gu bheil e 'g ràdh, Far am bheil mise a' dol, cha'n urrainn sibhse teachd.

23 Agus thubhairt e riu, Tha sibhse o shìos, tha mise o shuas : tha sibhse do'n t-saoghal so, cha'n 'eil mise do'n t-saoghal so.

24 Uime sin thubhairt mi ribh, Gu'm bàsaich sibh ann bhur peacaibh : oir mur creid sibh gur mise e, gheibh sibh bàs ann bhur peacaibh.

25 An sin thubhairt iad ris, Cò thusa? Agus thubhairt Iosa riu, *An neach* sin féin a thubhairt mi ribh o thùs.

26 Tha mòran agam ri ràdh, agus r'a bhreithneachadh m'ur timchioll-sa : ach a ta an ti a chuir uaith mi fìrinneach; agus a ta mise a' labhairt ris an t-saoghal nan nithe a chuala mi uaith-san.

27 Cha do thuig iad gu'm b'ann mu timchioll an Athar a labhair e riu.

28 An sin thubhairt Iosa riu, 'Nuair a thogas sibh suas Mac an duine, an sin bitidh fios agaibh gur mise e¹, agus nach 'eil mi deanamh ni sam bitli uam féin; ach mar a theagaisg m' Athair mi, gu bheil mi labhairt nan nithe so.

29 Agus tha 'n ti a chuir uaith mi maille rium: cha d'fhàg an t-Athair a'm' aonar mi, do bhrìgh gu bheil mi deanamh a ghnàth nan nithe sin a's taitneach leis.

30 An uair a bha e labhairt nan nithe so, chreid mòran ann.

31 An sin thubhairt Iosa ris na h-Iudhaich a chreid ann, Ma bhunaicheas sibh ann am fhocal-sa, bitidh sibh da rìreadh 'nur deisciobuil agam;

32 Agus bithidh eòlas agaibh air an fhìrinn, agus ni an fhìrinn saor sibh.

33 Fhreagair iad e, Is sinne sliochd Abraham, agus cha robh sinn riamh fo dhaorsa aig duine sam bith: cionnus a ta thusa ag ràdh, Bithidh sibh saor?

34 Fhreagair Iosa iad, Gu deimhin deimhin a ta mi ag ràdh ribh, ge b'e ni peacadh, is seirbhiseach do'n pheacadh e.

35 Agus cha'n fhan an seirbhiseach san

tigh gu bràth : *ach* fanaidh am mac gu bràth.

36 Uime sin ma ni am Mac saor sibh, bithidh sibh saor da rìreadh.

37 Tha fhios agam gur sibh sliochd Abraham; ach a ta sibh ag iarraidh mise a mharbhadh, do bhrìgh nach 'eil àit aig m' fhocal annaibh.

38 Tha mise a' labhairt an 'ni sin a chunnaic mi aig m' Athair; agus tha sibhse a' deanainn an ni a chunnaic sibh aig bhuir n-athair féin.

39 Fhreagair iadsan agus thubhairt iad ris, Is e Abraham ar n-athair-ne. Thubhairt Iosa riu, Nam bu chlann do Abraham sibh, dheanadh sibh oibre Abraham.

40 Ach a nìs tha sibh ag iarraidh mise a mharbhadh, duine a dh'innis duibh an fhìrinn, a ehuala mi o Dhia : cha d'rim Abraham so.

41 Tha sibhse a' deanamh oibre bhuir n-athar féin. An sin thubhairt iad ris, Cha d'rugadh an strìopachas sinne; tha aon Athair againn, *eadhon* Dia.

42 An sin thubhairt Iosa riu, Nam b'e Dia bhuir n-Athair, ghràdhaichidh sibh mise : oir chaidh mise mach, agus thàinig mi o Dhia; agus cha d'fhàinig mi uam féin, ach chuir esan uaith mi.

43 C'ar son nach 'eil sibh a' tuigsinn mo chòmhradh? do bhrìgh nach urrainn sibh éisdeachd ri m' fhocal.

44 Tha sibhse o *bhuir* n-athair an diabhul, agus is iad ana-mianna bhuir n-athar a's toil leibh a dheanamh: bha esan 'na mhortair² o thùs, agus cha d'fhàin e san fhìrinn, a chionn nach 'eil fìrinn ann. 'Nuair a labhras e breug, is ann uaith féin a ta e labhairt: oir is breugair e, agus *is* e athair na bréige.

45 Agus do bhrìgh gu bheil mise ag innseadh na fìrinn, cha'n 'eil sibh ga m' chreidsinn.

46 Cò agaibh-sa chuireas peacadh as mo leth-sa? agus ma tha mi ag innseadh na fìrinn, c'ar son nach 'eil sibh 'ga m' chreidsinn?

47 An ti a ta o Dhia, éisdidh e ri briathraibh Dhé: uime sin cha'n 'eil sibhse ag éisdeachd, a chionn nach ann o Dhia a ta sibh.

48 An sin fhreagair na h-Iudhaich, agus thubhairt iad ris, Nach maith a thubhairt sinn gur Samaritanach thu, agus gu bheil deamhan agad?

49 Fhreagair Iosa, Cha'n 'eil deamhan agam; ach a ta mi toirt urraim do m' Athair, agus a ta sibhse toirt eas-urraim dhomh-sa.

50 Agus cha'n 'eil mi ag iarraidh mo ghloire féin: tha neach a ta 'g iarraidh agus a' toirt breth.

¹ bithidh fios agaibh co mise.

² 'na fhear-millidh dhavine.

51 Gu deimhin deimhin a ta mi ag ràdh ribh, Ma choimhideas neach m'fhocal-sa, cha'n fhaic e bàs am feasd.

52 An sin thubhairt na h-Iudhaich ris, A nis tha fhios againn gu bheil deamhan agad. Fhuair Abraham bàs, agus na fàidhean; gidheadh a ta thusa ag ràdh, Ma choimhideas duine m'fhocal-sa, cha bhlaic e bàs am feasd.

53 Am mò thusa na ar n-athair Abraham, a fhuair bàs? agus fhuair na fàidhean bàs: cò a tha thu deanamh dhìot féin?

54 Fhreagair Iosa, Ma tha mi toirt glòire dhomh féin, cha'n 'eil ach neo-ni a'm' ghloir: ise m' Athair a ta toirt glòire dhomh. Neach a ta sibhse ag ràdh gur e bhur Dia e:

55 Gidheadh cha do ghabh sibh eòlas air; ach a ta eòlas agam-sa air: agus nan abrainn, Nach aithne dhomh e, bhithinn cosmhuil ribhse a'm' bhreugair: ach is aithne dhomh e, agus a ta mi coimhead' 'fhocail.

56 Bha déidh² mhòr aig Abraham bhur n-athair-sa air mo là-sa fhaicinn: agus chunnaic se e, agus rinn e gairdeachas.

57 An sin thubhairt na h-Iudhaich ris, Cha'n 'eil thu fathast leth-cheud bliadhna dh'aois, agus am faca tu Abraham?

58 Thubhairt Iosa riu, Gu deimhin deimhin a ta mi ag ràdh ribh, Mun robh Abraham ann, A TA MISE.

59 An sin thog iadsan clachan chum an tilgeadh air: ach dh'fholaich Iosa e féin, agus chaidh e mach as an teampull, a' dol troimh an meadhon, agus mar sin chaidh e seachad.

CAIB. IX.

1 *Dh'aisgeadh a radharc do dhuine a rugadh dall: 13 Thugadh e chum nam Phairiseach: 15 ghabh iad corruich ris, agus thilg iad mach as an t-sion-agog e; 35 ach a ta Crìosd a' gabhail ris. 39 Cò iadsan a ta Crìosd a' soillseachadh.*

A GUS an uair a ghabh Iosa seachad, chunnaic e duine a bha dall o rugadh e.

2 Agus dh'fheòraich a dheisciobuil deth, ag ràdh, A mhaighstir, cò a pheacaich, an duine so, no a phàrantan, gu'n d'rugadh dall e?

3 Fhreagair Iosa, Cha do pheacaich aon chuid an duine so, no a phàrantan: ach a chum gu'm foillsichte oibre Dhé ann.

4 Is éigin domh-sa oibre an ti a chuir uaith mi a dheanamh, am feadh is là e: tha'n oidheche a' teachd, 'nuair nach urrainn aon duine obair a dheanamh.

5 Am feadh a ta mise san t-saoghal, is mi solus an t-saoghail.

6 'Nuair a thubhairt e na nithe so, chuir

e sìle air an talamh, agus rinn e criadh³ do'n t-sìle, agus sgaoil e a' chriadh air shùilbhan an doill.

7 Agus thubhairt e ris, Imich, ionnlaid ann an lochan Shiloaim, (is e sin air eadar-theangachadh, Air a chur.) Uime sin dh'imich e, agus dh'ionnlaid e, agus thàinig e a' faicinn.

8 Uime sin thubhairt na coimhearsnaich, agus iadsan a chunnaic dall e roimhe sin, Nach e so esan a bha 'na shuidhe ag iarraidh na déirce?

9 Thubhairt cuid, Is e so e; cuid eile, Tha e cosmhuil ris: thubhairt e féin, Is mise e.

10 Air an aobhar sin thubhairt iad ris, Cionnus a dh'fhosgladh do shùilean?

11 Fhreagair esan agus thubhairt e, Rinn duine d'an ainm Iosa criadh, agus sgaoil e air mo shùilbhan, agus thubhairt e rium, Imich gu lochan Shiloaim, agus ionnlaid: agus dh'imich mi agus dh'ionnlaid mi, agus fhuair mi mo radharc.

12 An sin thubhairt iad ris, C'ait am bheil e? Thubhairt esan, Cha'n aithne dhomh.

13 Thug iad chum nam Phairiseach esan a bha roimhe dall.

14 Agus b'i an t-sàbaid a bha ann an uair a rinn Iosa a' chriadh, agus a dh'fhosgail e 'shùilean.

15 An sin a ris dh'fheòraich na Phairisich dheth mar an ceudna cionnus a fhuair e a radharc. Agus thubhairt esan riu, Chuir e criadh air mo shùilbhan, agus dh'ionnlaid mi, agus tha mi a' faicinn.

16 Uime sin thubhairt cuid do na Phairisich, Cha'n 'eil an duine so o Dhia, do bhrìgh nach 'eil e gleidheadh na sàbaid. Thubhairt cuid eile, Cionnus a dh'fheudas duine a ta 'na pheacach, an leithide so do nìhiorbhuilbhan a dheanamh? Agus bha easaonachd⁴ nam measg.

17 Thubhairt iad a ris ris an duine dhail, Cìod a ta thusa ag ràdh uime a thaobh gu'n d'fhosgail e do shùilean? Agus thubhairt esan, Is fàidh e.

18 Ach cha do chreid na h-Iudhaich m'a thimchioll, gu'n robh e dall, agus gu'n d'fhuair e a radharc, gus an do ghairm iad pàrantan an ti a fhuair a radharc.

19 Agus dh'fhiosraich iad dhiubh, ag ràdh, An e so bhur mac-sa, a ta sibh ag ràdh a rugadh dall? cionnus ma seadh a ta e nis a' faicinn?

20 Fhreagair a phàrantan iad agus thubhairt iad, Tha fhios againn gur e so ar mac, agus gu'n do rugadh dall e:

21 Ach cionnus a ta e nis a' faicinn, cha'n 'eil fhios againn; no cò a dh'fhosgail

¹ gleidheadh.² togradh, gairdeachas.³ tàlach.⁴ roinn, sgaradh.

a shùilean, cha'n aithne dhuinn: tha e fèin air teachd gu aois, fèoraichibh dheth, labhraidh e air a shon fèin.

22 Thubhairt a phàrantan na briathra so, a chionn gu robh eagal nan Iudhach orra; oir shuidhich na h-Iudhaich a cheana eatorra fèin, Nan aidheadh duine sam bith gu'm b'esan Criosd, gu'n rachadh a chur as an t-sionagag.

23 Air an aobhar sin thubhairt a phàrantan, Tha e air teachd gu aois, fèoraichibh dheth fèin.

24 Air an aobhar sin ghairm iad an dara uair an duine a bha dall, agus thubhairt iad ris, Thoir glòir do Dhia: tha fhios againne gur peacach an duine so.

25 An sin fhreagair esan agus thubhairt e, Am peacach e cha'n aithne dhomh: air aon ni tha fhios agam, air dhomh bhi dall, gu bheil mi nis a' faicinn.

26 Ach thubhairt iad ris a ris, Ciod a rinn e dhuit? cionnus a dh'fhosgail e do shùilean?

27 Fhreagair e iad, Dh'innis mi dhuibh a cheana, agus cha d'éis sibh; c'ar son a b'aill leibh a chluinntinn a ris? am bheil a' mhiann oirbhe bhi 'nur deisciobuil aige mar an ceudna?

28 An sin chàin iad e, agus thubhairt iad, Is tusa a dheisciobul; ach is sinne deisciobuil Mhaois.

29 Tha fhios againn gu'n do labhair Dia ri Maois: ach mu thimchioll an fhir so, cha'n 'eil fhios againn cia as da.

30 Fhreagair an duine agus thubhairt e riu, An so tha ni iongantach, nach 'eil fhios agaibh cia as da, agus gu'n d'fhosgail e mo shùilean;

31 Ach a ta fhios againn nach éisd Dia ri peacaich: ach ma ta neach air bith 'na fhear-aoraidh do Dhia, agus a' deanamh a' thoile, ris-san éisdidh e.

32 O thoiseach an t-saoghail cha chualas gu'n d'fhosgail aon neach sùilean duine a rugadh dall.

33 Mur biodh an duine so o Dhia, cha b'urrainn e ni sam bith a dheanamh.

34 Fhreagair iadsan agus thubhairt iad ris, Rugadh thusa uile ann am peacaibh, agus am bheil thu 'gar teagasg-ne? agus thilg iad a mach e.

35 Chual Iosa gu'n do thilg iad a mach e; agus air dha fhaotainn, thubhairt e ris, Am bheil thu creidsinn ann am Mac Dhé?

36 Fhreagair esan agus thubhairt e, Cò e, a Thighearn, chum gu'u creid mi ann?

37 Agus thubhairt Iosa ris, Chunnaidh thu araon e, agus an ti a ta labhairt riut, is esan e.

38 Agus thubhairt esan, Tha mi creidsinn, a Thighearn. Agus rinn e aoradh dha.

39 Agus thubhairt Iosa, Is ann chum breitheanais a thàinig mise chum an t-saoghail so, chum iadsan nach 'eil a' faicinn, gu'm faicheadh iad; agus gu'm biodh iadsan a ta faicinn, air an deanamh dall.

40 Agus chuala cuid do na Phairisich a bha maille ris, na nithe so, agus thubhairt iad ris, Am bheil sinne dall mar an ceudna?

41 Thubhairt Iosa riu, Nam bitheadh sibh dall, cha bhiodh peacadh agaibh: ach a nis a ta sibh ag ràdh, Is léir dhuinn; umne sin tha bhuir peacadh a' fantuinn.

CAIB. X.

1 Is e Criosd an dorus agus an deadh bhuaichail.

19 Iomadh gnè bharail n'a thimchioll. 24 dhearbha e le 'oibribh gur e fèin Criosd Mac Dhé; 39 chaidh e as o na h-Iudhaich; 40 agus ràinig e taobh thall Iordain, far an do chreid mòran ann.

GU deimhin deimhin a ta mi ag ràdh an dorus do chrò nan caorach, ach a theid suas air sheòl eile, is gaduiche agus fear-reubainn esan.

2 Ach an ti a theid a steach air an dorus, is esan buaichail nan caorach.

3 Dhasan fosglaidh an dorsair; agus éisdidh na caoraich r'a ghuth: agus gairmidh e a chaoraich fèin air an ainm, agus treòraichidh e mach iad.

4 Agus an uair a chuireas e mach a chaoraich fèin, imichidh e rompa, agus leanaidh na caoraich e: oir is aithne dhoibh a ghuth.

5 Agus cha lean iad coigreach, ach teichidh iad uaith, do bhrìgh nach aithne dhoibh guith choigreach.

6 An cosamhlachd so labhair Iosa riu: ach cha do thuig iadsan ciod iad na nithe a labhair e riu.

7 An sin thubhairt Iosa riu a ris, Gu deimhin deimhin a ta mi ag ràdh ribh, gur mis dorus nan caorach.

8 Iadsan uile a thàinig romham-sa, is gaduichean agus luchd-reubainn iad: ach cha d'éis na caoraich riu.

9 Is mise an dorus: ma theid neach air bith steach tromham-sa, tèarnar e, agus theid e steach agus a mach, agus gheibh e ionaltradh.

10 Cha tig an gaduiche ach a ghoid, agus a mharbhadh, agus a mhilleadh: thàinig mise chum gu'm biodh beatha aca, agus gu'm biodh i aca nì's pailte.

11 Is mise am buaichail maith: leigidh i am buaichail maith, auam sìos air son nan caorach.

12 Ach am fear-tuarsdail, agus an ti nach e am buaichail, agus nach leis fèin na caoraich, chì e am madadh-alluidh a'

teachd, agus fàgaidh e na caoraich, agus teichidh e: agus glacadh am madadh-alluidh iad, agus sgapaich e na caoraich.

13 Ach teichidh am fear-tuasdail, a chionn gur fear-tuasdail e, agus nach 'eil suim aige do na caoraich.

14 Is mise an buachaill maith, agus is aithne dhomh mo *chaoraich* féin, agus aithnìchear le m' *chaoraich* féin mi.

15 Mar is aithne do'n Athair mise, mar sin is aithne dhomh-sa an t-Athair: agus a ta mi leigeadh m'anama sìos air son nan caorach.

16 Agus a ta caoraich eile agam, nach 'eil do'n chrò so: is éigin domh iad sin mar an ceudna thoirt a *stigh*, agus éisdidh iad ri m' ghuth; agus bithidh aon treud ann, *agus* aon bhuachaill.

17 Air an aobhar so is ionmhuinn¹ leis an Athair mise, air son gu'n leig mi sìos m'anam, chum gu'n glac mi e a ris.

18 Cha'n 'eil neach air bith 'ga thoirt uam, ach a ta mi 'ga leigeadh sìos uam féin: tha cumhachd agam a leigeadh sìos, agus tha cumhachd agam a ghlacadh a ris. An àithne so fhuir mi o m' Athair.

19 Air an aobhar sin, dh'éirich eas-aonachd a ris am measg nan Iudhach air son nam briathra so.

20 Agus thubhairt mòran diubh, Tha deamhan aige, agus tha e air bhoile²; c'ar son a tha sibh ag éisdeachd ris?

21 Thubhairt cuid eile, Cha'n iad so briathra duine anns am bheil deamhan; am bheil deamhan comasach air suilean nan dall fhosgladh?

22 Agus bha féill-chuimhne an ath-choisreagaidh³ ann an Ierusalem, agus b'e an gearmhadh a bha ann.

23 Agus bha Iosa a' sràid-imeachd san teampull ann an sgàth-thigh⁴ Sholaimh.

24 An sin chruinnich na h-Iudhaich m'a thimchioll, agus thubhairt iad ris, Cia fhad a chumas tu ar n-anama an amhar-us? ma's tu Crìosd, innis dhuinn gu follaiseach.

25 Fhreagair Iosa iad, Dh'innis mi dhuibh, agus cha do chreid sibh: na h-oibre a ta mi deanamh an ainm m' Athar, tha iad sin a' toirt fianuis mu m' thimchioll.

26 Ach cha'n 'eil sibhse a' creidsinn; oir cha'n ann do m' chaoraich sibh, mar thubhairt mi ribh.

27 Tha mo chaoraich-sa ag éisdeachd ri m' ghuth, agus is aithne dhomh iad, agus leanaidh iad mi:

28 Agus bheir mi a' bheatha mhaireannach dhoibh; agus cha sgriosar⁵ iad am feasd, ni mò a spionas neach air bith as mo làmh iad.

29 M' Athair a thug dhomh-sa *iad*, is mo e na na h-uile; agus cha'n urrainn neach air bith an spionadh á làimh m' Athar.

30 Mise agus an t-Athair, is aon sinn.

31 Uime sin thog na h-Iudhaich clachan a ris chum a chlachadh.

32 Fhreagair Iosa iad, Nochd mi dhuibh mòran do oibribh maithe o m' Athair; cia do na h-oibribh sin air son am bheil sibh ga m' chlachadh?

33 Fhreagair na h-Iudhaich e, ag ràdh, Air son oibre maithe cha'n 'eil sinn ga d' chlachadh; ach air son toibheim, agus air son, air bhì dhuistea a'd' dhuine, gu bheil thu deanamh Dé dhiot féin.

34 Fhreagair Iosa iad, Nach 'eil e sgrìobhta ann bhur lagh-sa, Thubhairt mi, Is dée sibh?

35 Ma thubhairt e dée riu-san, dh'ionnsuidh an robh focal Dé, agus nach feudar an sgrìobtuir a bhriseadh⁶;

36 An abair sibh ris-san, a naomhaich an t-Athair, agus a chuir e chum an t-saoghail, Tha thu a' labhairt toibheim; air son gu'n dubhairt mi, Is mi Mac Dhé;

37 Mur dean mi oibre m' Athar, na creidibh mi.

38 Ach ma ni, ged nach creid sibh mise, creidibh na h-oibre, chum gu'm bi fios agaibh, agus gu'n creid sibh gu bheil an t-Athair annam-sa, agus mise ann-san.

39 Uime sin dh'iarra iad a ris a ghlacadh: ach chaidh e as an làimh.

40 Agus chaidh e ris do'n taobh thall do Iordan, do'n ionad anns an robh Eoin air tùs ri baisteadh; agus rinn e còmhnuidh an sin.

41 Agus thàinig mòran d'a ionnsuidh, agus thubhairt iad, Cha d' rinn Eoin aon mhiorbhuil: ach bha na h-uile nithe thubhairt Eoin mu'n duine so fìor.

42 Agus chreid mòran san àit sin air.

CAIB. XI.

1 *Thog Crìosd suas Lasarus an dèigh dha bhì ceithir làithean san uaigh.* 45 *Chreid mòran do na h-Iudhaich.* 47 *Chum na h-àrd-shagairt agus na Phairisich comhairle an aghaidh Crìosd.*

A NIS bha duine àraidh gu tinn, d'am b'ainm Lasarus o Bhetani, baile Mhuire agus Mharta a peathar.

2 (B'i Mhuire sin a dh'ung an Tighearn le oladh luachmhoir, agus a thiormaich a chosan le a folt, aig an robh a bràthair Lasarus gu tinn.)

3 Uime sin chuir a pheathraiche fios d'a ionnsuidh, ag ràdh, A Tighearn, feuch, tha'n ti a's ionmhuinn leat tinn.

4 'Nuair a chual Iosa so, thubhairt e, Cha'n 'eil an tinneas so chum bàis, ach a chum glòire Dhé, chum gu'm bi Mac Dhé, air a ghlorachadh d'a thaobh.

¹ toigh. ² mhi-chéill. ³ feill an ath-nuadhachaidh. 109

⁴ àileir. ⁵ chailleir. ⁶ sgacailadh. 3 Q 2

5 A nis b'icnmhuinn le Iosa Marta, agus a piuthar, agus Lasarus.

6 Uime sin an uair a chual e gu'n robh esan tinn, dh'fhan e fathast dà là anns an ionad an robh e.

7 'Na dhéigh sin thubhairt e r'a dheisciobluibh, Rachamaid a ris do Iudea.

8 Thubhairt a dheisciobuil ris, A Mhaighstir, a nis dh'iarr na h-Iudhaich do chlachadh; agus am bheil thu dol a ris an sin?

9 Fhreagair Iosa, Nach 'eil dà uair dheug san là? Ma dh'imicheas duine anns an là, cha tuislich e, oir tha e faicinn soluis an t-saoghail so:

10 Ach ma dh'imicheas duine anns an oidhche, tuislichidh e, do bhrìgh nach 'eil an solus ann.

11 Na nithe so labhair e: agus 'na dhéigh sin thubhairt e riu, Tha ar caraid Lasarus 'na chodal: ach a ta mise a' dol chum gu'n dhuig mi as a chodal e.

12 An sin thubhairt a dheisciobuil, A Thighearn ma tha e 'na chodal, bithidh e slàn.

13 Gidheadh labhair Iosa m'à bhàs: ach shaoil iadsan gu'n do labhair e mu thimchioll fois codail.

14 An sin thubhairt Iosa riu gu soilleir, Fhuair Lasarus bàs:

15 Agus a ta mi subhach air bhur sonsa nach robh mi an sin, chum gu'n creid sibh; ach rachamaid d'a ionnsuidh.

16 An sin thubhairt Tomas, ris an abrar Didimus, r'a cho-dheisciobluibh, Rachamaid-ne mar an ceudna, chum gu'm faigh sinn bàs maille ris.

17 An sin an uair a thàinig Iosa, fhuair se e an déigh dha bhì cheana ceithir làithean san uaigh.

18 (A nis bha Betani fagus do Ierusalem, mu thimchioll cùig stàide deng uaith.)

19 Agus thàinig mòran do na h-Iudhaich chum Mharta agus Mhuire, gu comhfhurtachd a thoirt doibh a thaobh am bràthar.

20 An sin an uair a chuala Marta gu'n robh Iosa a' teachd, chaidh i 'na chòdhail: ach shuidh Muire san tigh.

21 An sin thubhairt Marta ri Iosa, A Thighearn, nam biodh tusa an so, cha 'n fhaigheadh mo bhràthair bàs.

22 Ach a ta fhios agam a nis féin, ge b'e air bith nithe a dh'iarras tu air Dia, gu'n toir Dia dhuit iad.

23 Thubhairt Iosa rithe, Eiridh do bhràthair a ris.

24 Thubhairt Marta ris, Tha fhios agam gu'n éirich e a ris san aiseirigh air an là dheireannach.

25 Thubhairt Iosa rithe, Is mise an aiseirigh, agus a' bheatha: an ti a chreideas

annam-sa, ged gheibheadh e bàs, bithidh e beò

26 Agus ge b'e neach a ta beò, agus a' creidsinn annam-sa, cha'n fhaigh e bàs am feasd. Am bheil thu creidsinn so?

27 Thubhairt i ris, Tha, a Thighearn: tha mi creidsinn gur tusa Crìosd, Mac Dhé, a bha gu teachd chum an t-saoghail.

28 Agus air dhi na nithe so ràdh, dh'fhalbh i, agus ghairm i a piuthar Muire an uaignidheas¹, ag ràdh, Thàinig am Maighstir, agus tha e ga d' ghairm.

29 'Nuair a chual ise sin, dh'éirich i gu grad, agus thàinig i d'a ionnsuidh.

30 A nis cha robh Iosa fathast air teachd do'n bhaile, ach bha e anns an àit an do choinnich Marta e.

31 An sin na h-Iudhaich a bha maille rithe san tigh, agus a' toirt comhfhurtachd dhi, 'nuair a chunnaic iad Muire gu'n d'éirich i gu grad, agus gu'n deachaidh i mach, lean iad i, ag ràdh, Tha i dol chum na h-uaighe, a chaoineadh an sin.

32 An sin an uair a thàinig Muire do'n àit an robh Iosa, agus a chunnaic i e, thuit i aig a chosaibh, ag ràdh ris, A Thighearn, nam biodh tusa an so, cha'n fhaigheadh mo bhràthair bàs.

33 Uime sin an uair a chunnaic Iosa i a' gul, agus na h-Iudhaich a thàinig maille rithe a' gul mar an ceudna, rinn e osna 'na spiorad, agus chuir se e féin fo àmhghar².

34 Agus thubhairt e, C'àit an do chuir sibh e? Thubhairt iad ris, A Thighearn, thig agus faic.

35 Ghul Iosa.

36 An sin thubhairt na h-Iudhaich, Feuch cionnus a ghràdhaich se e!

37 Agus thubhairt cuid diubh, Nach feudadh an duine so a dh'fhosgail sùilean an doill, a thoirt fa'near nach faigheadh eadhon am fear so bàs?

38 Uime sin thàinig Iosa, ag osnaich a ris ann féin, chum na h-uaighe. Agus b' uaimh³ i, agus bha clach air a cur oirre.

39 Thubhairt Iosa, Togaibh a' chlach. Thubhairt Marta, piuthar an duine mhairbh, ris, A Thighearn, tha nis droch bholadh dheth; oir is e so an ceathramh là⁴.

40 Thubhairt Iosa rithe, Nach dubhairt mi riut, Ma chreideas tu, gu'm faic thu glòir Dhé?

41 An sin thog iad a' chlach (o'n àit anns an robh an duine marbh air a chur.) Agus thog Iosa suas a shùilean, agus thubhairt e, Athair, tha mi toirt buidheachais duit, gu'n d'éisd thu rium.

42 Agus bha fhios agam gu bheil thu ag éisdeachd rium a ghnàth: ach thubhairt mi e air son an t-sluaigh a tha 'nan

¹ os ìosal.

² thrioblaid.

³ chuas.

⁴ tha e ceithir làithean san uaigh.

seasamh mu m' thimchioll, chum gu'n creid iad gu'n do chuir thusa uait mi.

43 Agus an uair a labhair e na nithe so, ghlaodh e le guth mòr, A Lasarus, thig a mach.

44 Agus thàinig esan a bha marbh a mach, agus a chosan agus a làmhnan ceangailte leis an eudach-mhairbh: agus bha 'aghaidh ceangailte mu'n cuairt le neap-ainc. Thubhairt Iosa riu, Fuasglaibh e, agus leigibh leis imeachd.

45 An sin chréid mòran do na h-Iudhaich ann, a thàinig chum Mhuire, agus a chunnaic na nithe a rinn Iosa.

46 Ach dh'fhalbh cuid chum nam Phairiseach, agus dh'innis iad dhoibh na nithe a rinn Iosa.

47 An sin chruinnich na h-àrd-shagairt agus na Phairisich comhairle, agus thubhairt iad, Ciod a tha sinn a' deanamh? oir a ta an duine so deanamh mòrain mhiorbhuile.

48 Ma leigeas sinn leis air an dòigh so, creididh na h-uile dhaoine ann; agus thig na Romhanaich¹, agus sgriosaidh iad² ar n-àit, agus ar cinneach.

49 An sin thubhairt fear àraidh dhiubh d' am b'ainm Caiaphas, air dha bhi 'na àrd-shagart air a' bhliadhna sin, riu, Cha'n aithne dhuibh ni sam bith.

50 Ni mò tha sibh a' toirt fa'near gur iomchuidh dhuinne gu'm faigheadh aon duine bàs air son an t-sluaigh, agus nach biodh an cinneach uile air a sgrios.

51 Ach cha b'ann uaith féin a labhair e so: ach air dha bhi 'na àrd-shagart air a' bhliadhna sin, rinn e fàidheadaireachd gu'm faigheadh Iosa bàs air son a' chinnich sin;

52 Agus cha'n ann air son a' chinnich sin a mhàin, ach a chum mar an ceudna gu'n cruinnicheadh e an ceann a chéile 'nan aon clann Dhé a bha air an sgapadh.

53 Uime sin o'n là sin a mach, chuir iad an comhairle r'a chéile chum esan a chur gu bàs.

54 Air an aobhar sin cha d'imich Iosa ni's mò gu follaiseach³ am measg nan Iudhach; ach chaidh e as a sin do dhùthaich làimh ris an fhàsach, gu baile ris an abrar Ephraim, agus an sin ghabh e còmhnuidh maille r'a dheisciobluibh.

55 Agus bha càisg nan Iudhach am fagus: agus chaidh mòran suas as au dùthaich do Ierusalem roimh an chàisg, chum iad féin a ghlanadh.

56 An sin dh'iarr iad Iosa, agus labhair iad r'a chéile 'nan seasamh san teampull, Ciod bhur barail-sa? an e nach tig e chum na féille?

57 A nis bha araon na h-àrd-shagairt agus na Phairisich air toirt àithné, nam

biodh fhios aig neach air bith c'ait an robh e, gu'n innseadh se e, chum gu'n glacadh iad e.

CAIB. XII.

¹ Ghabh Iosa leith-sgeul Mhuire air son gu'n d'ung i a chosan. ⁹ Thàinig an sluagh 'nam buidhnibh a dh'fhaicinn Lasarus. ¹⁰ Ghabh na h-àrd-shagairt comhairle chum Lasarus a mharbhadh. ¹² Mharcaibh Crìosd gu Ierusalem.

AN sin thàinig Iosa, sè làithean roimh an chàisg, gu Betani, far an robh Lasarus a bha marbh, neach a thog esan o na marbhaibh.

2 Uime sin rinn iad suipeir dha an sin; agus bha Marta a' frithealadh: ach bha Lasarus 'na aon diubh-san a 'shuidh air bord maille ris.

3 An sin ghabh Muire pund do oladh spienaird ro luachmhoir, agus dh'ung i cosan Iosa, agus thiorraich i a chosan le a folt: agus lìonadh an tigh le fàile⁴ chùbhraidh na h-oladh.

4 An sin thubhairt aon d'a dheisciobluibh, Iudas Iscariot, mac Shimoin, a bha gu esan a bhrath,

5 C'ar son nach do reiceadh an oladh so air son trì cheud peghim, agus nach d'thugadh do na bochdaibh e?

6 Thubhairt e so, cha b'ann a chionn gu'n robh suim aige do na bochdaibh; ach a chionn gu'm bu ghaduiche e, agus gu'n robh an sporan aige, agus gu'n do ghiùlain e na nithe a chuireadh ann.

7 An sin thubhairt Iosa, Leig leatha: fa chomhair là m' adhlaic ghléidh i so.

8 Oir tha na bochdan a ghnàth agaibh maille ribh, ach cha 'n 'eil mise agaibh a ghnàth.

9 Agus bha fhios aig sluagh mòr do na h-Iudhaich gu'n robh e an sin: agus thàinig iad, cha'n ann a mhàin air son Iosa, ach a chum gu'm faicheadh iad mar an ceudna Lasarus, a thog esan o na marbhaibh.

10 Ach ghabh na h-àrd-shagairt comhairle, chum Lasarus mar an ceudna a mharbhadh;

11 Do bhrìgh air a shon-san gu'n d'imich mòran do na h-Iudhaich, agus gu'n do chreid iad ann an Iosa.

12 Air an là màireach, air chluinntinn do mhòr-shluagh a thàinig chum na féille⁵, gu'n robh Iosa a' teachd gu Ierusalem,

13 Ghlac iad geuga pailme, agus chaidh iad a mach 'na chòdhail, agus ghlaodh iad, Hosanna, beannaichte gu robh Rìgh Israeil a tha teachd ann an ainm an Tigh-eam!

14 Agus air do Iosa asal òg fhaotainn, shuidh e air; a réir mar a ta e sgriobhta,

15 Na biodh eagal ort, a nighean Shioin:

¹ Romanaich. ² dìthichidh iad, bheir iad air falbh.

³ os àird.

⁴ boltrach.

⁵ féisle.

feuch, a ta do Rìgh a' teachd, 'na shuidhe air loth asail.

16 Cha do thuig a dheisciobuil na nithe so air tūs: ach an uair a ghlòraicheadh Iosa, an sin chuimhnich iad gu'n robh na nithe so sgrìobhta uime, agus gu'n d'rinn iad na nithe so dha.

17 Uime sin rinn an sluagh a bha maille ris fianuis, gu'n do ghairm e Lasarus as an uagh, agus gu'n do thog e o na marbhaibh e.

18 Air an aobhar sin mar an ceudna choinnich an sluagh e, do bhrìgh gu'n cual iad gu'n d'rinn e am mìorbhuil so.

19 Thubhairt na Phairisich uime sin eatorra fèin, Am faic sibh nach 'eil sibh a' buadhachadh bheag sam bith? feuch, tha'n saoghal air dol 'na dhéigh.

20 Agus bha Greugaich àraidham measg na muinntir a chaidh suas chum aoradh a dheanamh aig an fhéilil:

21 Air an aobhar sin thàinig iadsan gu Philip, a bha o Bhetsaida Ghalile, agus dh'farr iad air, ag ràdh, A Thighearn, bu mliann leinn Iosa fhaicinn.

22 Thàinig Philip agus dh'innis e do Andreas; agus a ris dh'innis Andreas agus Philip do Iosa.

23 Agus fhreagair Iosa iad, ag ràdh, Thàinig an uair, chum gu'm biodh Mac an duine air a ghlòrachadh.

24 Gu deimhin deimhin a ta mi ag ràdh ribh, Mur faigh an gràinne cruithneachd a thuiteas anns an talamh bàs, fanaidh e 'na aonar: ach ma gheibh e bàs, bheir e toradh mòr uath.

25 Esan a ghràdhacheas 'anam, caillidh se e; agus esan a dh'fhuathaicheas 'anam anns an t-saoghal so, gleidhidh se e chum na beatha maireannaich.

26 Ma ni neach air bith seirbhis dhomhsa, leanadh e mi; agus ge b'e àit am bi mise, an sin bithidh mo sheirbhuiseach mar an ceudna: ma ni neach seirbhis dhomhsa bheir m' Athair urram¹ dha.

27 A nis tha m'anam fo àmhghar²; agus ciod a their mi? Athair, saor mi o'n uair so: ach is ann air a shon so a thàinig mi chum na h-uaire so.

28 Athair, glòraich t'ainm. An sin thàinig guth o nèamh, ag ràdh, Ghlòraich mi àraon e, agus glòraichidh mi ris e.

29 Uime sin thubhairt an sluagh a sheas a làthair, agus a chuala so, Gu'n robh tairneanach ann: thubhairt cuid eile, Labhair aingeal ris.

30 Fhreagair Iosa agus thubhairt e, Cha'n ann air mo shon-sa thàinig an guth so, ach air bhuir son-sa.

31 A nis tha breitheanas an t-saoghail so ann: a nis tilgear uachdaran an t-saoghail so mach.

32 Agus mise, ma thogar suas o'n talamh mi, tairngidh mi na h-uile dhaoine a m'ionnsuidh.

33 (Ach thubhairt e so, a' ciallachadh ciod a' ghnè bàis a gheibheadh e.)

34 Fhreagair an sluagh e, Chuala sinne as an lagh, gu'm fan Criosd gu sìorruidh: agus cionnus a ta thusa ag ràdh, Gur éigin do Mhac an duine bhì air a thogail suas? cò e Mac an duine so?

35 An sin thubhairt Iosa riu, Fathast rè tamuill bhig tha'n solus maille ribh: gluaisibh am feadh 's a ta solus agaibh, chum nach beir an dorchadas oirbh: oir an ti a ta ag imeaclid san dorchadas, cha'n aithne dha c'ait am bheil e dol.

36 Am feadh as a ta'n solus agaibh, creidibh san t-solus, chum gu'm bi sibh 'nur cloim do'n t-solus. Labhair Iosa na nithe so, agus dh'fhalbh e, agus dh'fhlòraich se e fèin uatha.

37 Ach ge do rinn e a choimhlion so do mhìorbhuilbhl 'nan làthair, cha do chreid iad ann:

38 Chum gu'm biodh briathran an fhàidh Esaiais air an coimhlionadh, a thubhairt e, A Thighearn, cò a chreid ar n-aithris-ne³? agus cò dha dh'fhoillsich-eadh gairdean an Tighearna?

39 Air an aobhar so cha robh e'n comas doibh creidsinn, do bhrìgh gu'n dubhairt Esaiais a ris,

40 Dhall e an sùilean, agus chruaidhich e an cridhe, chum nach faiceadh iad le'n sùilibh, agus nach tuigeadh iad le'n cridhe, agus nach pilleadh iad, agus gu'n slàn-uichinn iad.

41 Thubhairt Esaiais na nithe so, 'nuair a chunnaic e a ghlòir-san, agus a labhair e uime.

42 Gidheadh chreid mòran do na h-Uachdaranabhl fèin ann: ach air son nam Phairiseach cha d'aicidh iad e, air eagal gu'n cuirte mach as an t-sionagag iad.

43 Oir b'annsa leo glòir dhaoine na glòir Dhé.

44 Agus ghlaodh Iosa, agus thubhairt e, An ti a ta creidsinn annam-sa, cha'n ann annam-sa tha e creidsinn, ach anns an ti a chuir uath mi.

45 Agus an ti a tha ga m' fhaicinn-sa, tha e faicinn an ti a chuir uath mi.

46 Thàinig mi a'm' sholus chum an t-saoghail, chum ge b'e chreideas annam, nach fanadh e an dorchadas.

47 Agus ma chluinneas neach air bith mo bhriathran-sa, agus nach creid e, cha 'n 'eil mise 'ga dhèthead: oir cha d'thàinig mi a dhèthead an t-saoghail, ach a shaoradh an t-saoghail.

48 An ti a tha cur cùil rium-sa, agus

¹ onoir. ² bhuairneas, thrioblaid.

³ iomradh-ne.

nach 'eil a' gabhail ri m' bhriathraibh, tha aige neach a bheir breth air : am focal a labhair mi, bheir e sin breth air san là dheireannach.

49 Oir cha do labhair mi uam féin; ach an t-Athair a chuir uaith mi, thug e àithne dhomh, ciod a theirinn, agus ciod a labhairinn.

50 Agus a ta fhios agam gur beatha mhaireannach 'àithne-san: air an aobhar sin na nithe tha mi a' labhairt, mar thubhairt an t-Athair rium, mar sin a ta mi a' labhairt.

CAIB. XIII.

1 *Nigh Crìosd cosan nan deisciobul; 13 dh'earail e orra bhi iriosal agus seirceil; 18 dh'innis e roimh-lainn, agus dh'fhoillsich e do Eoin le comhara, gu'm b'e Iudas a bhrathadh e.*

A NIS roimh fhéill na càisge, air do Iosa fios a bhi aige gu'n robh 'uair air teachd, auns an rachadh e as an t-saoghal so chum an Athair, air dha a mhuinntir féin a bha auns an t-saoghal a ghràdhachadh, ghràdhaich e gu crìch iad.

2 Agus an uair a bha 'n t-suipeir thairis¹, (air do'n diabhul a nis a chur an cridhe Iudais Iscarioit, *mhic* Shimoin, esan a bhrath,)

3 Air aithneachadh do Iosa gu'n d'thug an t-Athair na h-uile nithe 'na làmh-aibh, agus gur ann o Dhia a thàinig e, agus gur ann a dh'ionnsuidh Dhé a bha e dol;

4 Dh'éirich e o 'shuipeir, agus chuir e dheth 'fhalluinn², agus ghlac e làmh-an-art, agus cheangail e uime e.

5 'Na dhéigh sin, thaom e uisge ann an soitheach-ionnlaid, agus thòisich e air cosan nan deisciobul ionnlad, agus an tiormachadh leis an làmh-an-art a bha ceangailte uime.

6 An sin thàinig e gu Simon Peadar: agus thubhairt esan ris, A Thighearn, am bheil thusa ag ionnlad mo chosan-sa?

7 Fhreagair Iosa agus thubhairt e ris, An ni so ta mi deanamh cha'n aithne dhuitse a nis; ach bithidh fios agad air an déigh so.

8 Thubhairt Peadar ris, Cha nigh thu mo chosan-sa gu bràth. Fhreagair Iosa e, Mur nigh mi thu, cha'n 'eil cuid agad maille rium.

9 Thubhairt Simon Peadar ris, A Thighearn, cha'n iad mo chosan a mhàin, ach mar an ceudna mo làmh-an-art agus mo cheann.

10 Thubhairt Iosa ris, An ti a ta air ionnlad, cha 'n 'eil feum aige ach a chosan ionnlad, ach tha e gu h-iomlan glan: agus a ta sibhse glan, ach cha'n 'eil sibh uile glan.

11 Oir bha fhios aige cò a bhrathadh e; uime sin thubhairt e, Cha 'n 'eil sibh uile glan.

12 An sin, an déigh dha an cosan ionnlad, agus 'fhalluinn a ghabhail *d'a ionnsuidh*, shuidh e a ris, agus thubhairt e riu, Am bheil fhios agaibh ciod a rinn mi dhuibh?

13 Tha sibh a' gairm Maighstir, agus Tighearn dhiom-sa: agus tha sibh ag ràdh gu maith; oir is mi *sin*.

14 Uime sin ma dh'ionnlaid mise, bhur Tighearn agus bhur Maighstir, bhur cosan-sa, is còir dhuibh-sa mar an ceudna cosan a chéile ionnlad.

15 Oir thug mi eisempleir dhuibh, chum mar a rinn mise dhuibh, gu'n deanadh sibhse mar an ceudna.

16 Gu deimhin deimhin a ta mi ag ràdh ribh, Cha mhò an t-òglach na 'mhaighstir, agus cha mhò an teachdair na an ti a chuir uaith e.

17 Ma's aithne dhuibh na nithe so, is beannaichte sibh ma ni sibh iad.

18 Cha'n 'eil mi labhairt oirbh uile: is aithne dhomh cò a thagh mi: ach is éigin an sgrìobtur a choimhlichadh. An ti a ta 'g itheadh arain maille rium, thog e a shàil a'm' aghaidh.

19 A nis a ta mi ag ràdh so ribh mun tig e gu crìch, chum, 'nuair a tharlas e, gu'n creid sibh gur mise e.

20 Gu deimhin deimhin a ta mi ag ràdh ribh, an ti a ghabhas ri neach sam bith a chuireas mise uam, gabhaidh e rium-sa; agus an ti a ghabhas rium-sa, gabhaidh e ris an ti a chuir uaith mi.

21 Air do Iosa na nithe so ràdh, bha e fo thrioblaid 'na spiorad, agus rinn e fianuis, agus thubhairt e, Gu deimhin deimhin a ta mi ag ràdh ribh, gu'm brath aon agaibh mise.

22 An sin dh'amhairc na deisciobuil air a chéile, fo amharas co uime a labhair e.

23 A nis bha aon d'a dheisciobluibh, 'na luidhe an uchd³ Iosa, neach a b'ionmhuinn le Iosa.

24 Air an aobhar sin smèid Simon Peadar aisans, gu'm feòraicheadh e co uime a labhair e.

25 An sin air dhasan aomadh ri uchd Iosa, thubhairt e ris, A Thighearn cò e?

26 Fhreagair Iosa, Is e an ti sin e, d'an toir mise an greim, an déigh dhomh a thumadh. Agus an uair a thum e an greim, thug se e do Iudas Iscariot, *mac* Shimoin.

27 Agus an sin an déigh a' ghreama, chaidh Satan a steach ann-san. An sin thubhairt Iosa ris, An ni a ta thu a' deanamh, dean gu grad e.

28 A nis cha do thuig aon diubh-sa a

¹ an uair a bha iad 'an suipeir.

² eudach-uachdair.

³ ag aomadh ri uchd.

bha 'nan suidhe air a' bhord c'ar son a thubhairt e so ris.

29 Oir shaoil cuid diubh, do bhrìgh gu'n robh an sporan aig Iudas, gu'n dubhairt Iosa ris, Ceannaich na nithe a ta dh'uireas-bhuidh oirn chum na fèille; no gu'n tugadh e ni-éigin do na bochdaibh.

30 An sin an déigh dhasan an greim a ghabhail, chaidh e mach air ball; agus bha'n oidhche ann.

31 Uime sin, nuair a chaidh esan a mach, thubhairt Iosa, A nis a ta Mac an duine air a ghlòrachadh, agus tha Dia air a ghlòrachadh ann.

32 Ma tha Dia air a ghlòrachadh ann, glòraichidh Dia esan mar an ceudna ann féin, agus air ball glòraichidh se e.

33 A chlann bheag, fathast uine bheag tha mise maille ribh. Iarraidh sibh mi: agus mar a thubhairt mi ris na h-Iudhaich, Do'n àit an teid mise, cha 'n'eil e 'n comas duibhse teachd; mar sin a ta mi ag ràdh ribhse nis.

34 Aithne nuadh tha mi toirt dhuibh, Gu'n gràdhaich sibh a chéile; mar a ghràdhaich mise sibhse, gu'n gràdhaich sibh féin a chéile mar an ceudna.

35 Le so aithnichidh na h-uile dhaoine gur sibh mo dheisciobuil-sa, ma bhios gràdh agaibh féin d'a chéile.

36 Thubhairt Simon Peadar ris, A Thighearn, c'ait a théid thu? Fhreagair Iosa e, Do'n àit an téid mi, cha'n urrainn thusa nis mo leantuinn; gidheadh leanaidh tu mi 'na dhéigh so.

37 Thubhairt Peadar ris, a Thighearn, c'ar son nach urrainn mi do leantuinn a nis? Leigidh mi sìos m'anam air do shon.

38 Fhreagair Iosa e, An leig thu t'anam sìos air mo shonsa? Gu deimhin deimhin a ta mi ag ràdh riut, Nach goir an coilcach, gus an àicheadh thu mi tri uairean.

CAIB. XIV.

1 *Thug Crìosd comhfhurtachd d'a dheisciobluibh le dòchas fhlaithheana: 6 dh'innis e gur e féin an t-slighe, an fhìrinn, agus a' bheatha, agus gur aon e féin agus an t-Athair: 13 thug e fios doibh gu'm bi an urnuighean 'na ainm-sa an èifeachdach.*

NA biodh bhuir cridhe fo thrioblaid¹: tha sibh a' creidsinn ann an Dia, creidibh annam-sa mar an ceudna².

2 Ann an tigh m'Àthair-sa tha iomadh àite-còmhuidh: mur biodh e mar sin, dh'innisinn-sa dhuibh. Tha mi dol a dh'ulluchadh àite dhuibh.

3 Agus ma théid mi agus gu'n ulluich mi àit dhuibh, thig mi ris, agus gabhaidh mi sibh a m' ionnsuidh féin; chum far am bheil mise, gu'm bi sibhse mar an ceudna.

4 Agus is aithne dhuibh c'ait am bheil mi dol, agus is aithne dhuibh an t-slighe.

5 Thubhairt Tomas ris, A Thighearn, cha'n 'eil fhios againn c'ait am bheil thu dol; agus cionnus a dh'fheudas eòlas na slighe bhi againn?

6 Thubhairt Iosa ris, Is mise an t-slighe, agus an fhìrinn, agus a' bheatha: cha tig aon neach chum an Atharach tromham-sa.

7 Nam b'aithne dhuibh mise, b'aithne dhuibh m'Àthair mar an ceudna: agus á so suas is aithne dhuibh e, agus chunnaic sibh e.

8 Thubhairt Philip ris, A Thighearn foillsich an t-Athair dhuinne, agus is leoir leinn e.

9 Thubhairt Iosa ris, Am bheil mise uine co fhada maille ribh, agus nach aithne dhuit fathast mi, Philip? an ti a chunnaic mise, chunnaic e 'n t-Athair: agus cionnus a ta thu ag ràdh, Foillsich an t-Athair dhuinn?

10 Nach 'eil thu creidsinn gu bheil mise anns an Athair, agus an t-Athair annam-sa? na briathran a ta mi labhairt ribh, cha'n ann uam féin a ta mi 'gan labhairt: ach an t-Athair, a ta gabhail còmhuidh annam-sa, tha esan a' deanamh nan oibre.

11 Creidibh mise gu bheil mi anns an Athair, agus an t-Athair annam-sa; no, creidibh mi air son nan oibre féin.

12 Gu deimhin deimhin a ta mi ag ràdh ribh, An ti a chreideas annam-sa, na h-oibre a ta mise a' deanamh, ni esan mar an ceudna; agus ni e oibre a's mò na iad so, do bhrìgh gu bheil mise dol chum m'Àthar.

13 Agus ge b'e ni a dh'iarras sibh a'm' ainm-sa, ni mise sin: chum gu'm bi an t-Athair air a ghlòrachadh anns a' Mhac.

14 Ma dh'iarras sibh ni air bith a'm' ainm-sa, ni mise e.

15 Ma's toigh leibh mise, coimhidibh m'aitheantan:

16 Agus guidhidh mise an t-Athair, agus bheir e dhuibh Comhfhurtair³ eile, chum gu fan e maille ribh gu bràth;

17 Spiorad na fìrinn; neach nach urrainn an saoghal a ghabhail, do bhrìgh nach 'eil e 'ga fhaicinn, agus nach aithne dha e: ach is aithne dhuibhse e, oir tha e fantuinn maille ribh, agus bithidh e annaibh.

18 Cha'n fhàg mi sibh 'nur dilleachdain; thig mi do 'ur n-ionnsuidh.

19 Tamull beag fathast, agus cha'n fhaic an saoghal mi tuilleadh; ach chi sibhse mi: do bhrìgh gu bheil mise beò, bithidh sibhse beò mar an ceudna.

20 Anns an là sin bithidh fios agaibh gu bheil mise ann am Athair, agus sibhse annam-sa, agus mise annaibh-sa.

¹ bhuaireas.

² creidibh ann an Dia, agus creidibh annam-sa.

³ Fear-comhfhurtachd, Fear-comhairle, Fear-ùil.

21 An ti aig am bheil m' àitheanta-sa, agus a ta gan coimhead, is esan aig am bheil gràdh dhomh sa: agus an ti aig am bheil gràdh dhomh-sa, gràdhaichear le m' Athair e, agus gràdhaichidh mise e, agus foillsichidh mi mi féin da.

22 Thubhairt Iudas (cha'n e Iscariot.) ris, A Thighearn, c'ar son a dh'fhoillsicheas tu thu féin dhuinne, agus nach dean thu sin do'n t-saoghal?

23 Fhreagair Iosa agus thubhairt e ris, Ma ghràdhaicheas neach mise, coimhididh e m' fhocal: agus gràdhaichidh m' Athair esan, agus thig sinn d'a ionnsuidh, agus ni sinn còmhnuidh maille ris.

24 An ti nach gràdhaich mise, cha choimhid e mo bhriathra: agus am focal a ta sibh a' cluinntinn, cha leam-sa e, ach leis an Athair a chuir uaith mi.

25 Na nithe so labhair mi ribh, air dhomh bhi m' còmhnuidh maille ribh:

26 Ach an Comhfhurtair, an Spiorad naomh, a chuireas an t-Athair uaith a'm ainm-sa, teagaisgidh esan dhuibh na h-uile nithe, agus cuiridh e'n cuimhne duibh na h-uile nithe a labhair mise ribh.

27 Tha mi fàgail sìthe agaibh, mo shith-sa a ta mi toirt duibh: cha'n ann mar a bheir an saoghal, a tha mise toirt duibh. Na biodh blur cridhe fo thrioblaid, agus na biodh eagal air.

28 Chuala sibh mar thubhairt mi ribh, Tha mi falbh, agus thig mi ris do 'ur n-ionnsuidh. Nam biodh gràdh agaibh dhomh-sa, bhiodh aoibhneas oirbh, a chionn gu'n dubhairt mi, Tha mi dol¹ chum an Athar: oir is mò m' Athair na mise.

29 Agus a nis dh'innis mi dhuibh so roimh dha teachd gu crìch, chum, 'nuair a thig e gu crìch, gu creideadh sibh.

30 A so suas cha labhair mi mòran ribh: oir a ta uachdaran an t-saoghail so a' teachd, agus cha'n 'eil ni air bith aige annam-sa.

31 Ach a chum gu'm bi fios aig an t-saoghal gur ionmhuinn leam an t-Athair; agus mar a thug an t-Athair àithne dhomh, mar sin a ta mi a' deanamh. Eiribh, rachamaid as so.

CAIB. XV.

1 An sòlas a ta aig deiseiobhuibh Chrìosd; 9 an gaol agus an coimheangal a ta eadar iad agus esan.
13 Comhfhurtachd fuidh fhuath agus gheur-leannuinn an t-saoghail so. 26 Dreuchd an Spioraid naomh, agus nan abstol.

IS mise an fhionain fhior, agus is e m' Athair an treabhaiche².

2 Gach uile gheug annam-sa nach 'eil a' giùlan toraidh, bheir e air falbh; agus gach uile gheug a ta tabhairt toraidh,

glanaidh e i, chum gu'n giùlan i tuilleadh toraidh.

3 A nis a ta sibhse glan tre an fhocal a labhair mi ribh.

4 Fanaibh annam-sa, agus mise annaibh sa. Mar nach urrainn a' gheug toradh a thoirt uaip³ féin, mur fan i san fhionain, cha mhò is urrainn sibhse, mur fan sibh annam-sa.

5 Is mise an fhionain, sibhse na geuga: an ti a dh'fhanas annam-sa, agus mise annsan, bheir esan mòr-thoradh uaith; oir as m' eugmhais-sa cha'n urrainn sibh aon ni a dheanamh.

6 Mur fan neach annam-sa, tha e air a thilgeadh a mach mar ghéig, agus air crìonadh⁴; agus tionailidh daoine iad, agus tilgidh iad san teine iad, agus loisgear iad.

7 Ma dh'fhanas sibh annam-sa, agus ma dh'fhanas m'fhocail-sa annaibh-se, iarraidh sibh gach ni a's àill leibh, agus nithear dhuibh e.

8 An so tha m' Athair-sa air a ghlòrachadh, gu'n toir sibhse mòr-thoradh uaibh; agus bithidh sibh 'nur deisciobuil dhomh-sa.

9 Mar a ghràdhaich an t-Athair mise, mar sin ghràdhaich mise sibhse: fanaibh ann am ghràdh-sa.

10 Ma choimhideas sibh m' àitheanta, fanaidh sibh ann am ghràdh; mar a choimhid mise àitheanta m' Athar, agus a tha mi a' fantuinn 'na ghràdh.

11 Na nithe so labhair mi ribh, chum gu fanadh mo ghairdeachas annaibh, agus gu'm biodh bhur gairdeachas-sa làn.

12 Is i so m' àithne-sa, gu'n gràdhaich sibhse a chèile, mar a ghràdhaich mise sibhse.

13 Gràdh a's mò na so cha'n 'eil aig neach air bith, gu'n leigeadh duine 'anam sìos air son a chairdean.

14 Is sibhse mo chairdean-sa, ma ni sibh gach ni a ta mi ag àithneadh dhuibh.

15 A so suas cha ghairm mi seirbhisich dhibh; oir cha'n aithne do'n t-seirbhisich ciod a ta a Thighearn a' deanamh: ach ghairm mi càirde dhibh; oir na h-uile nithe a chuala mi o m' Athair, thug mi fios dhuibhse orra.

16 Cha sibhse a thagh mise, ach is mise a thagh sibhse, agus dh'orduich⁵ mi sibh, chum gu'n rachadh sibh, agus gu'n tugadh sibh a mach toradh, agus gu maireadh bhur toradh: chum ge b'e ni a dh'iarras sibh air an Athair ann am ainm-sa, gu'n toir e dhuibh e.

17 Tha mi 'g àithneadh nan nithe so dhuibh, chum gu'n gràdhaich sibh a chèile.

¹ a chionn gu bheil mi dol.

² tuathanach.

³ uaith.

⁴ mar ghéig a ta e air crìonadh.

⁵ shuidhich, shonruich.

18 Ma tha an saoghal 'gur fuathachadh, tha fhios agaibh gu'n d' fhuathaich e mise roimhibh.

19 Nam b'ann do'n t-saoghal sibh, ghràdhaicheadh an saoghal a chuid féin: ach do bhrìgh nach ann do'n t-saoghal sibh, ach gu'n do thagh mise sibh as an t-saoghal, uime sin tha fuath aig an t-saoghal duibh.

20 Cuimhnichibh am focal a thubhairt mi ribh, Cha 'n 'eil an seirbhiseach ni's mò na a Thighearn. Ma rinn iad geur-leannmuinn ormsa, ni iad geur-leannmuinn oirbhse mar an ceudna: ma choimhid iad m'fhocal-sa, coimhididh iad bhur focal-sa mar an ceudna.

21 Ach na nithe so uile ni iad oirbh air son m'ainme-sa, do bhrìgh nach aithne dhoibh esan a chuir uaith mi.

22 Mur bithinn-sa air teachd, agus air labhairt riu, cha bhiodh peacadh aca: ach a nis cha'n 'eil leithsgeul am peacaidh aca.

23 An ti aig am bheil fuath domh-sa, tha fuath aige do m'Àthair mar an ceudna.

24 Mur bithinn-sa air deanamh nan oibre 'nam measg nach d'rinn aon neach eile, cha bhiodh peacadh aca: ach a nis chunnaic siad iad, agus dh'fhuathaich iad araoon mise agus m'Àthair.

25 Ach rinneadh so chum gu'n coimhliontadh am focal a ta sgrìobhta 'nan lagh féin, Dh'fhuathaich iad mi gun aobhar.

26 Ach an uair a thig an Comhfhurtair, a chuireas mise do 'ur ionnsuidh o'n Àthair, Spiorad na fìrinn, a tha teachd a mach o'n Àthair, ni esan fianuis mu m' thimchioll-sa.

27 Agus ni sibhse fianuis mar an ceudna, do bhrìgh gu bheil sibh maille rium o thùs.

CAIB. XVI.

1 *Thug Crìosd comhfhurtachd d'a dheisciobluihb an aghaidh trioblaid le gealladh an Spioraid naoimh, agus 'aiseirigh agus a dhol suas air nèamh; 23 thug e cinnte dhoibh gu'm bi na h-urnuighean a nìthear 'na ainm-san taitneach d'a Àthair.*

NA nithe so labhair mi ribh, chum nach faigheadh¹ sibh oibheum.

2 Cuiridh iad as an t-sionagag sibh: seadh, thig an uair, ge b'e neach a mharbhas sibh, gu'n saoil e gu bheil e deanamh seirbhis do Dhia.

3 Agus ni iad na nithe so², do bhrìgh nach aithne dhoibh an t-Àthair, no mise.

4 Ach dh'innis mi na nithe so dhuibh, chum nuair a thig an t-àm, gu'n cuimhnich sibh gu'n d'innis mi dhuibh iad. Ach cha dubhairt mi na nithe so ribh o thùs, do bhrìgh gu'n robh mi maille ribh.

5 Ach a nis a ta mi dol chum an ti a chuir uaith mi; agus cha 'n 'eil a h-aon

agaibh-sa a' feòraich dhìom, C'ait tha thu dol?

6 Ach a chionn gu'n dubhairt mi na nithe so ribh, lion do-bhròn bhur cridhe.

7 Gidheadh a ta mi ag innseadh dhuibh na fìrinn, Is buannachd dhuibh mise a dh'fhalbh: oir mur fàlbh mi, cha tig an Comhfhurtair do 'ur n-ionnsuidh-sa; ach ma dh'fhalbhas mi, cuiridh mi esan do 'ur n-ionnsuidh.

8 Agus an uair a thig esan, bheir e dearbh-shoilleireachd do'n t-saoghal mu pheacadh, agus mu fhìreantachd, agus mu bhreitheanas:

9 Mu pheacadh, do bhrìgh nach 'eil iad a' creidsinn annam-sa;

10 Mu fhìreantachd, do bhrìgh gu bheil mi dol a dh'ionnsuidh m'Àthar, agus nach faic sibh ni's mò mi;

11 Mu bhreitheanas, a chionn gu bheil uachdaran an t-saoghail so air a dhiteadh.

12 Tha mòran nithe agam fathast ri ràdh ribh, ach cha'n urrainn sibh an giùlan an tràth so.

13 Ach an uair a thig esan, Spiorad na fìrinn, treòraichidh e sibh chum gach uile fhirinn: oir cha labhair e uaith féin: ach labhraidh e na h-uile nithe a chluinneas e: agus foillsichidh e dhuibh-se nithe a ta ri teachd.

14 Bheir esan glòir dhomh-sa: oir gheibh e do m' chuid-se, agus nochdaidh e dhuibh-se e.

15 Na h-uile nithe a ta aig an Àthair, is leam-sa iad: air an aobhar so thubhairt mi, gu'm faigh e do m' chuid-se, agus nochdaidh e dhuibhse e.

16 Tamull beag agus cha'n fhaic sibh mi; agus a ris, tamull beag agus chì sibh mi, do bhrìgh gu bheil mi dol chum an Àthar.

17 An sin thubhairt cuid d'a dheisciobluihb eatorra féin, Ciod e so a ta e ag ràdh ruinn, Tamull beag agus cha'n fhaic sibh mi: agus a ris, tamull beag agus chì sibh mi: agus, Do bhrìgh gu bheil mi dol chum an Àthar?

18 Air an aobhar sin thubhairt iad, Ciod e so a ta e ag ràdh, Tamull beag? Cha'n 'eil sinne a' tuigsinn ciod a ta e ag ràdh.

19 A nis dh' aithnich Iosa gu'n robh toil aca fheòraich dheth, agus thubhairt e riu, Am bheil sibh a' feòraich 'nur measg féin mar a thubhairt mi, Tamull beag agus cha'n fhaic sibh mi: agus a ris, tamull beag agus chì sibh mi?

20 Gu deimhin deimhin a ta mi ag ràdh ribh, gu'n dean sibhse gul agus caoidh, ach ni an saoghal gairdeachas: agus bithidh sibhse do-bhrònach, ach pillear bhur bròn gu gairdeachas.

21 Nuair a bhios bean ri saothair-

¹ gabhadh.² na nithe so [dhuibh.]

chloinne, bithidh i fo dhoilgheas, chionn gu bheil a h-uair air teachd: ach an uair a bheireas i an leanabh, cha chuimhnich i a h-àmhghar nì's mò, tre aoibhneas gu'n d'rugadh duine chum an t-saoghail.

22 Agus a ta nis uime sin doilgheas oirbh-sa: ach chi mise a ris sibh, agus ni bhur cridhe gairdeachas, agus bhur gairdeachas cha bhuin neach air bith uaibh.

23 Agus air an là sin cha'n fheòraich sibh ni air bith dhiom-sa¹: Gu deimhin deimhin a ta mi ag ràdh ribh, Ge b'e nithe dh'iarras sibh air an Athair ann am ainm-sa, gu'n toir e dhuibh iad.

24 Gus a so cha d'iarr sibh ni air bith ann am ainm-sa: iarraibh, agus gheibh sibh, chum gu'm bi bhur n-aoibhneas làn².

25 Na nithe so labhair mi ribh am briathraibh dorch³: ach thig an uair anns nach labhair mi nì's mò ribh am briathraibh dorch³, ach iunsidh mi gu soilleir mu'n Athair dhuibh.

26 Anns an là sin iarraidh sibh a'm' ainm-sa: agus cha 'n'eil mi ag ràdh ribh, gu'n guidh mi an t-Athair air bhur son:

27 Oir is toigh leis an Athair féin sibh, air son gu'n d'thug sibh gràdh dhomh-sa, agus gu'n do chreid sibh gur ann o Dhia a thàinig mi.

28 Thàinig mi mach o'n Athair, agus tha mi air teachd chum an t-saoghail: a ris, tha mi fàgail an t-saoghail, agus a' dol chum an Athair.

29 Thubhairt a dheisciobuil ris, Feuch, a nis tha thu labhairt gu soilleir, agus cha 'n'eil thu labhairt cosamhlachd air bith.

30 A nis tha fhios againn gur aithne dhuit na h-uile nithe, agus nach feum thu duine air bith a dh'fheòraich dhìot: air a shon so tha sinn a' creidsinn gur ann o Dhia a thàinig thu.

31 Fhreagair Iosa iad, Am bheil sibh a nis a' creidsinn?

32 Feuch, thig an t-àm⁴, seadh, tha e cheana air teachd, anns an sgapar o chéile sibh, gach aon g'a ionad féin, agus am fàg sibh mise a'm' aonar: gídheadh cha 'n'eil mise a'm' aonar, oir tha an t-Athair maille rium.

33 Na nithe so labhair mi ribh, chum gu'm biodh sibh agaibh annam-sa. Anns an t-saoghal bithidh àmhlghar agaibh: ach biodh deadh mhisneach agaibh, thug mise buaidh air an t-saoghal.

CAIB. XVII.

¹ Tha Crìosd a' deanamh urnuigh r'a Athair gu'n glòraicheadh se e, ⁶ gu'n coimhleadh e 'abstoil, ¹¹ ann an aonachd, ¹⁷ agus anns an fhìrinn;

20 gu'n glòraicheadh e iad, agus na h-uile chreidich maille ris féin air nèamh.

LABHAIR Iosa na briathra so; agus thog e suas a shùilean gu nèamh, agus thubhairt e, Athair, thàinig an uair; glòraich do mhac, chum gu'n glòraich do Mhac thusa mar an ceudna:

2 Chum, mar a thug thu cumhachd dha air gach feoil, na h-uile a thug thu dha, gu'n tugadh esan dhoibh a' bheatha mhaireannach.

3 Agus is i so a' bheatha mhaireannach, eòlas a bhi aca ortsa an t-aon Dia fìor, agus air Iosa Crìosd a chuir thu uait.

4 Ghlòraich mise thusa air thalamh: chròchamaich mi 'n obair a thug thu dhomh r'a dheanamh.

5 Agus a nis, Athair, glòraich thusa mise maille riut féin⁵, leis a' ghloir a bha agam maille riut mun robh an saoghal ann.

6 Dh'fhoillsich mise t'ainm do na daoineibh a thug thu dhomh as an t-saoghal: bu leatsa iad, agus thug thu dhomh-sa iad; agus choimhid iad t'fhocal.

7 A nis thuig iad gur ann uait a tha na h-uile nithe, a thug thu dhomh-sa.

8 Oir thug mi dhoibh na briathran a thug thusa dhomh; agus ghabh siad iad, agus thuig iad gu fìrinneach gur ann uait-sa thàinig mi, agus chreid iad gu'n do chuir thu uait mi.

9 Air an sonsan tha mi guidhe: cha'n 'eil mi guidhe air son an t-saoghail, ach air son na muinntir sin a thug thu dhomh, oir is leatsa iad.

10 Agus is leatsa na h-uile nithe a's leamsa, agus is leamsa na nithe a's leatsa; agus a ta mi air mo ghlorachadh anna.

11 Agus a nis cha'n 'eil mise nì's mò anns an t-saoghal, ach a ta iadsan san t-saoghal, agus a ta mise a' teachd a d'ionnsuidh-sa. Athair naomh, coimhid iadsan tre t'ainm⁶, a thug thu dhomh-sa, chum gu'm bi iad 'nan aon, mar a ta sinne.

12 Am feadh a's bha mise maille riut anns an t-saoghal, choimhid mi iad tre t'ainm-sa: glèididh mi a' mhuinntir a thug thu dhomh, agus cha do chailleadh a h-aon diubh, ach mac an sgrios: chum gu biodh an sgrìobtur air a choimhlionadh.

13 Agus a nis tha mi teachd a d'ionnsuidh-sa; agus tha mi labhairt nan nithe so anns an t-saoghal, chum gu'm biodh mo ghairdeachas aca air a choimhlionadh anna.

14 Thug mi t'fhocal dhoibh; agus thug an saoghal fuath dhoibh, air son nach ann do'n t-saoghal iad, mar nach 'eil mise do'n t-saoghal.

¹ cha'n iarr sibh ni air bith ormsa.

² coimhlionta. ³ an comhlaibh.

⁴ an uair.

⁵ a'd' fliamais.

⁶ ann ad ainm.

15 Cha'n 'eil mi guidhe gu'n tugadh tu as an t-saoghal iad, ach gu'n coimhreachadh tu o n olc iad.

16 Cha'n 'eil iadsan do'n t-saoghal, mar nach 'eil mise do'n t-saoghal.

17 Naomhaich iad troimh an fhùrinn¹: is e t'fhocal-sa an fhùrinn.

18 Mar a chuir thusa mise chum an t-saoghail, mar sin chuir mise iadsan chum an t-saoghail.

19 Agus air an sonsan tha mise ga m' naomhachadh féin, chum gu'm bi iadsan mar an ceudna air an naomhachadh troimh an fhùrinn.

20 Agus cha'n 'eil mi guidhe air an sonsan a mhaì, ach mar an ceudna air son na muinntir sin a chreideas annam-sa troimh am focal-sa :

21 Chum gu'm bi iad uile 'nan aon; chum mar a ta thusa, Athair, annam-sa, agus mise annad-sa, gu'm bi iadsan mar an ceudna 'nan aon annainne; chum gu'n creid an saoghal gu'n do chuir thusa uait mi.

22 Agus thug mise dhoibhsan a' ghlòir a thug thusa dhomh-sa chum gu'm bi iad 'nan aon, mar a ta sinne 'nar n-aon;

23 Mise annta-san, agus thusa annam-sa, chum gu'n deanar coimhlionta iad ann an aon; agus a chum gu'm bi fios aig an t-saoghal gu'n do chuir thusa uait mi, agus gu'n do ghràdhaich thu iadsan, mar a ghràdhaich thu mise.

24 Athair, is àill leam an dream a thug thu dhomh, gu'm bi iad maille rium, far am bheil mi; chum gu faic iad mo ghlòir a thug thu dhomh: oir ghràdhaich thusa mi mun do leagadh bunaite an domhain.

25 Athair chothromaich, cha b'aithne do'n t-saoghal thusa; ach b'aithne dhomh-sa thu, agus thuig iad so gu'n do chuir thusa uait mi.

26 Agus dh'fhoillsich mise t'ainm dhoibh, agus foillsichidh mi e, chum gu'm bi an gràdh leis an do ghràdhaich thu mise, annta-san, agus mise annta.

CAIB. XVIII.

1 Bhrath Iudas Iosa. 6 Thuit na maoir air an talamh. 10 Ghearr Peadar cluais Mhalechuis d'eth. 12 Ghlac na maoir Iosa, agus thug iad gu Annas agus Caiaphas e. 15 Aitheadh Pheadair.

NUAIR a labhair Iosa na briathra so, chaidh e maille r'a dheisciobluibh thairis air sruth Chedroin, far an robh lios, anns an deachaidh e féin agus a dheisciobuil.

2 Agus b'aithne do Iudas, a bhrath esan, an t-àit: oir thàinig Iosa gu tric an sin maille r'a dheisciobluibh.

3 An sin air do Iudas buidheann agus maoir fhaotainn o na h-àrd-shagairt agus

na Phairisich, thàinig e do'n àit sin le leusaibh, agus lòchranaibh, agus arm-aibh.

4 Uime sin air do Iosa fios a bhi aige air na h-uile nithibh a bha gu teachd air, chaidh e mach, agus thubhairt e riu, Cò tha sibh ag iarraidh?

5 Fhreagair iadsan e, Iosa o Nasaret, Thubhairt Iosa riu, Is mise e. Agus sheas mar an ceudna Iudas, a bhrath esan, maille riu.

6 An sin co luath 's a thubhairt e riu, Is mise e, chaidh iad air an ais, agus thuit iad air an làr.

7 An sin dh'fheòraich e dhiubh a rìs, Cò tha sibh ag iarraidh? Thubhairt iadsan, Iosa o Nasaret.

8 Fhreagair Iosa, Thubhairt mi ribh gur mise e. Uime sin ma's mise tha sibh ag iarraidh, leigibh leo sin falbh:

9 Chum gu'n coimhliontadh am focal a labhair e, An dream a thug thu dhomh, cha do chaill mi aon diubh.

10 An sin air do Shimon Peadar claidheamh a bhi aige, tharruing se e, agus bhuail e òglach an àrd-shagairt, agus ghearr e a' chluas dheas deth. Agus b'e ainm an òglach Malchus.

11 An sin thubhairt Iosa ri Peadar, Cuir do chlaidheamh san truail: an cupan a thug m' Athair dhomh-sa, nach òl mi e?

12 An sin rug a' bhuidheann, agus an ceannard, agus maoir nan Iudhach air Iosa, agus cheangail iad e,

13 Agus thug iad leo e air tùs gu Annas; (oir b'esan athair-céile Chaiphais, a bha 'na àrd-shagart air a' bhliadhna sin.)

14 A nis b'e Caiaphas a thug comhairle do na h-Iudhaich, gu'm b'iomchuidh gu'm faigheadh aon duine bàs air son an t-sluaigh.

15 Agus lean Simon Peadar agus deisciobul eile Iosa. B'aithne do'n àrd-shagart an deisciobul sin, agus chaidh e steach maille ri Iosa do chùirt an àrd-shagairt.

16 Ach sheas Peadar aig an doras an leth muigh. Uime sin chaidh an deisciobul sin eile a b'aithne do'n àrd-shagart a mach, agus labhair e ris a' bhan-dorsair, agus thug e Peadar a steach.

17 An sin thubhairt a' bhanoglach a bha gleidheadh an dorais ri Peadar, Nach ann do dheisciobluibh an duine so thusa mar an ceudna? thubhairt esan, Cha'n ann.

18 Agus bha na seirbhisich agus na maoir 'nan seasamh, air dhoibh teine guail a chur suas, oir bha'm fuachd ann, agus bha iad 'gan garadh féin: agus bha Peadar 'na sheasamh maille riu, agus 'ga gharadh féin.

19 An sin dh'fhiosraich an t-àrd-shagart do Iosa mu thimchioll a dh'isciobul, agus mu thimchioll a theagaisg.

20 Fhreagair Iosa e, Labhair mise gu

¹ tre t'fhùrinn.

follaiseach¹ ris an t-saoghal; theagaisg mi a ghuàth anns an t-sionagag, agus anns an teampull, far am bheil na h-Iudhaich a' cruinneachadh sa gach àit; agus am folach cha do labhair mi ni air bith.

21 C'ar son a ta thu fiosrachadh dhiom-sa? Fiosraich dhiubh-san a chuala, ciod a thubhairt mi riu: feuch, a ta fhios aca-san ciod a thubhairt mi.

22 Agus an uair a thubhairt e na nithe so, bhuail aon do na maoraibh, a bha 'na sheasamh a làthair, a bhas air Iosa, ag ràdh, An ann mar so a fhreagras tu an t-àrd-shagart?

23 Fhreagair Iosa e, Ma labhair mi gu h-olc, dean fianuis air an olc: ach ma's ann gu maith, c'ar son a ta thu ga m' bhuailadh?

24 (A nis chuir Annas^e ceangailte gu Caiaphas an t-àrd-shagart.)

25 Agus bha Simon Peadar 'na sheasamh agus 'ga gharadh: Uime sin thubhairt iad ris, Nach aon d'a dheisciobluibh thusa mar an ceudna? Dh'àicheadh esan, agus thubhairt e, cha mhi.

26 Thubhairt aon do sheirbhisich an àrd-shagairt, (caraid do'n fhear do'n ghearr Peadar a chluas,) Nach faca mise thu san lios maille ris?

27 An sin dh'àicheadh Peadar a ris, agus air ball ghoir an coileach.

28 An sin thug iad Iosa o Chaiaphas gu àit a' bhreitheanais: agus b'i mhaduinn a bh'ann, agus cha deachaidh iad féin do àit a' bhreitheanais, chum nach biodh iad air an salachadh; ach gu'n itheadh iad a' chàisg.

29 An sin chaidh Pilat a mach d'an ionnsuidh-san, agus thubhairt e, Ciod a' chasaid a tha sibh a' toirt an aghaidh an duine so?

30 Fhreagair iadsan agus thubhairt iad ris, Mur b'fhear droch-bheirt e, cha tugamaid thairis dhuitse e.

31 An sin thubhairt Pilat riu, Gabhaibh-sa e, agus thugaibh breth air a réir bhuir lagha féin. An sin thubhairt na h-Iudhaich ris, Cha'n 'eil e ceaduichte dhuinne neach air bith a chur gu bàs:

32 Chum gu'm biodh focal Iosa air a choimhlionadh, a labhair e, a' ciallachadh ciod a ghnè bàis a bha e gu faotainn.

33 An sin chaidh Pilat a steach a ris do àit a' bhreitheanais, agus ghairm e Iosa, agus thubhairt e ris, An tusa Rìgh nan Iudhach?

34 Fhreagair Iosa e, Am bheil thu ag ràdh so uaf' féin, no an d'innis daoine eile dhuit e mu m' thimchioll-sa?

35 Fhreagair Pilat, An Iudhach mise? Thug do chinneach féin, agus na h-àrd-

shagairt thairis dhomh-sa thu: ciod a rinn thu?

36 Fhreagair Iosa, Cha'n ann do'n t-saoghal so tha mo rioghachd-sa: nam b'ann do'n t-saoghal so bhiodh mo rioghachd, dheanadh mo sheirbhisich cogadh, chum nach tugtadh thairis do na h-Iudhaich mi: ach a nis cha'n ann o so a ta mo rioghachd.

37 Air an aobhar sin thubhairt Pilat ris, An rìgh thu ma seadh? Fhreagair Iosa, Thubhairt thusa gur rìgh mi. 'S ann chum na crìche so a rugadh mi, agus chum na crìche so thàinig mi do'n t-saoghal, chum gu'n deanainn fianuis do'n fhìrinn. Gach neach a ta air taobh na fìrinn, éisdidh e ri m' ghuth-sa.

38 Thubhairt Pilat ris, Ciod i an fhìrinn? Agus air dha so a ràdh, chaidh e mach a ris chum nan Iudhach, agus thubhairt e riu, Cha'n 'eil mise a' faotainn coire air bith ann.

39 Ach a ta gnàth agaibh-sa, gu'n leighinn as duine dhuibh air a' chàisg: uime sin an àill leibh mi a leigeadh rìgh nan Iudhach fa sgaol duibh?

40 An sin ghlaodh iadsan uile², ag ràdh, Cha'n e an duine so, ach Barabas. A nis b'fhear-reubainn Barabas.

CAIB. XIX.

1 Chaidh Crìosd a sgiùrsadh, a chrùnadh le droighinn, agus a bhuailadh. A Bha Pilat togarrach a leigeadh fa sgaol, ach air dha bh' air aomadh le gàraich nan Iudhach, thug e thairis e gu bh' air a cheusadh. 23 Thilg iad croinn air 'eudach.

An sin air an aobhar sin ghilac Pilat Iosa, agus sgiùrs se e.

2 Agus dh'fhigh na saighdearan crùn droighinn, agus chuir iad air a cheann e, agus chuir iad falluinn phurpuir³ uime.

3 Agus thubhairt iad, Fàilte ort, a rìgh nan Iudhach! agus bhuail iad le'm bas-aibh e.

4 An sin chaidh Pilat a mach a ris, agus thubhairt e riu, Feuch, a ta mise 'ga thoirt a mach do 'ur n-ionnsuidh, chum gu'm bi fios agaibh nach 'eil mise faotainn coire sam bith ann.

5 An sin thàinig Iosa mach, agus an crùn droighinn air, agus an fhalluinn phurpuir uime. Agus thubhairt Pilat riu, Feuch an duine!

6 Uime sin, an uair a chunnaic na h-àrd-shagairt agus na maoir e, ghlaodh iad, ag ràdh, Ceus e, ceus e. Thubhairt Pilat riu, Gabhaibh-sa e, agus ceusaibh e: oir cha'n 'eil mise a' faotainn coire sam bith ann.

7 Fhreagair na h-Iudhaich e, Tha lagh againne, agus a réir ar lagha-ne is còir a chur gu bàs, air son gu'n d'rinn e Mac Dhé dheth féin.

¹ os àird.² uile [a ris.]³ chorcuir.

8 Uime sin an uair a chuala Pilat a' chainnt sin, bu mhòid a bha dh'eagal air;

9 Agus chaidh e steach a ris do àit a' bhreitheanais, agus thubhairt e ri Iosa, Cia as dhuìt? ach cha d'thug Iosa freagradh air.

10 An sin thubhairt Pilat ris, Nach labhair thu riumsa? nach 'eil fhios agad gu bheil cumhachd agam-sa do cheusadh, agus gu bheil cumhachd agam do chur fa sgaoil?

11 Fhreagair Iosa, Cha bhiodh cumhachd air bith agad a'm' aghaidh-sa, mur tugtadh dhuìt o'n àird e; air an aobhar sin an ti a thug mise thairis dhuìt, tha aige-san am peacadh a's mò.

12 Agus o sin suas dh'iarr Pilat a chur fa sgaoil: ach ghlaodh na Iudhaich, ag ràdh, Ma leigeas tu am fear so fa sgaoil, cha charaid do Cheasar thu: ge b'e neach a ta 'ga dheanamh féin 'na rìgh, tha e labhairt an aghaidh Cheasar.

13 Uime sin an uair a chuala Pilat a' chainnt sin, thug e mach Iosa, agus shuidh e air a' chaithir-bhreitheanais, anns an ionad ris an abrar an Leac-ùrlar, ach anns an Eabhra¹, Gabata.

14 Agus b'e là ullachaidh na càisge e, agus mu thimchioll na seathadh uaire: agus thubhairt e ris na h-Iudhaich, Feuch bhur rìgh!

15 Ach ghlaodh iadsan a mach, Beir uainn, beir uainn, ceus e. Thubhairt Pilat riu, An ceus mi bhur rìgh-sa? Fhreagair na h-àrd-shagairt, Cha'n 'eil rìgh againne ach Ceasar.

16 An sin air an aobhar sin thug e thairis dhoibh e, gu bhi air a cheusadh. Agus ghlac iad Iosa, agus thug iad leo e.

17 Agus chaidh e mach, a' giùlan a chrann-ceusaidh, do'n ionad d'an goirear àit a' chloiginn, d'an ainm san Eabhra, Golgota.

18 An sin cheus iad e, agus dithis eile maille ris, fear air gach taobh, agus Iosa sa' mheadhon.

19 Agus sgrìobh Pilat mar an ceudna tìodal, agus chuir e air a' chrann-cheusaidh e. Agus b'e an sgrìobhadh, IOSA O NASARET RÌGH NAN IUDH-ACH.

20 Uime sin leugh mòran do na h-Iudhaich an tìodal so: oir bha'n t-àit anns an do cheusadh Iosa fagus do'n bhaile: agus bha an sgrìobhadh an Eabhra, an Greugais, agus an Laidin.

21 An sin thubhairt àrd-shagairt nan Iudhach ri Pilat, Na sgrìobh, Rìgh nan Iudhach; ach gu'n dubhairt e féin, Is mi rìgh nan Iudhach.

22 Fhreagair Pilat, An nì a sgrìobh mi, sgrìobh mi e.

23 An sin an uair a cheus na saighdearan Iosa, ghlac iad a thrusgan, (agus rinn iad ceithir earrannan, earrann do gach saighdear,) agus a chòta mar an ceudna: agus bha'n còta gun fhuaigneal, air fhligheadh o bhràigh sìos gu h-ìomlan.

24 Thubhairt iad uime sin eatorra fein, Na reubamaid e, ach tilgeamaid croinn air, cò aig a bhithas e: chum gu'n coimhliontadh an sgrìobtuir, a ta 'g ràdh, Roinn iad mo thrusgan eatorra, agus thilg iad croinn air mo bhrat. Air an aobhar sin rinn na saighdearan na nithe so.

25 A nis sheas làimh ri crann-ceusaidh Iosa, a mhàthair, agus piuthar a mhàthar, Muire bean Chleophais, agus Muire Magdalen.

26 Uime sin an uair a chunnaic Iosa a mhàthair, agus an deisciobul a b'ionmhuinn leis 'na sheasamh a làthair, thubhairt e r'a mhàthair, A bhean, feuch do mhac!

27 An sin thubhairt e ris an deisciobul, Feuch do mhàthair! Agus o'n àm sin a mach thug an deisciobul sin leis i d'a thigh féin.

28 An dèigh so air do Iosa fios a bhi aige gu'n robh na h-uile nithe a nis air an crìochnachadh, chum gu'n coimhliontadh an sgrìobtuir, thubhairt e, Tha tart orm.

29 A nis bha an sin soitheach làn do fhìon geur: agus air dhoibh-san spong a lìonadh do'n fhìon gheur, agus a chur air hisop, shìn iad chum a bheoil e.

30 An sin an uair a ghabh Iosa am fìon geur, thubhairt e, Tha e crìochnaichte: agus air cromadh a chinn da, thug e suas a spiorad.

31 An sin chum nach fanadh na cuirp air a' chrann-cheusaidh air an t-sàbaid, a chionn gu'm b'e là an ullachaidh a bha ann, (oir bu là mòr an là sàbaid sin,) dh'iarr na h-Iudhaich air Pilat gu'n rachadh an luirgne a bhriseadh, agus gu'n tugtadh air falbh iad.

32 An sin thàinig na saighdearan, agus bhris iad luirgne a' cheud fhir, agus luirgne an fhir eile, cheusadh maille ris.

33 Ach air dhoibh teachd chum Iosa, an uair a chunnaic iad gu'n robh e cheana marbh, cha do bhris iad a luirgne-san.

34 Ach lot fear do na saighdearaibh a thaobh le sleagh, agus air ball thàinig a mach fuil agus uisge.

35 Agus thug an ti a chunnaic sin fianuis, agus a ta 'fhanuis fìrinneach: agus a ta fhios aige gu bheil e labhairt na fìrinn, chum gu'n creideadh sibhse.

36 Oir rinneadh na nithe so chum gu'n coimhliontadh an sgrìobtuir, Cha bhrisear cnàimh dheth.

37 Agus a ris a ta sgrìobtuir eile ag ràdh, Amhaircidh iad a'rsan a lot iad²

¹ Eabhrais.

² shàth iad troimhe.

38 'Na dhéigh so, dh'iarr Ioseph o Aimatea, (a bha 'na dheisciobul aig Iosa, ach am folach air eagal nan Iudhach,) air Pilat comas corp Iosa a thoirt leis: agus leig Pilat sin leis. Thàinig e air an aobhar sin, agus thug e leis corp Iosa.

39 Thàinig mar an ceudna Nicodemus, (a thàinig air tùs gu Iosa san oidhche,) agus thug e leis mu thimchioll ceud pund do mhirr agus do aloes air am measgadh feadh a chéile.

40 An sin ghabh iad corp Iosa, agus cheangail¹ iad e ann an lìon-eudaichibh, maille ris an spioraidh², mar is gnàth leis na h-Iudhaich adhlac a dheanamh³.

41 A nis bha lios anns an àit an do cheusadh e; agus anis an lios uaigh nuadh, anns nach do chuireadh aon duine riamh.

42 Air an aobhar sin, air son ulluchaidh càisge nan Iudhach, do bhrìgh gu'n robh an uaigh am fagus, chuir iad Iosa an sin.

CAIB. XX.

1 Thàinig Muire chum na h-uaighe; 3 agus Peadar agus Eoin, agus iad gun fhios aca air aiseirigh Chrìosd. 14 Dh'fhoillsicheadh Chrìosd do Mhuire Magdalen, 19 agus d'a dheisciobluih. 24 Mìchreidimh agus aidmheil Thomaïs.

AIR a' cheud là do'n t-seachdain thàinig Muire Magdalen gu moch, agus an dorchadas fathast ann, chum na h-uaighe, agus chunnaic i a' chlach air a togail o'n uaigh.

2 Ruith i an sin, agus thàinig i gu Simon Peadar, agus gus an deisciobul eile a b'ionmhuinn le Iosa, agus thubhairt i riu, Thug iad leo an Tighearn as an uaigh, agus cha'n 'eil fhios againn c'ait an do chuir iad e.

3 Uime sin chaidh Peadar a mach, agus an deisciobul sin eile, agus thàinig iad chum na h-uaighe.

4 Agus ruith iad 'nan dithis cuideachd⁴: agus ruith an deisciobul eile nì bu luaithe na Peadar, agus thàinig e air tùs chum na h-uaighe.

5 Agus air cromadh sìos da, chunnaic e'n lìon-eudach 'na luidhe; gidheadh cha deachaidh e steach.

6 An sin thàinig Simon Peadar 'ga lean-tuinn, agus chaidh e steach do'n uaigh⁵, agus chunnaic e'n lìon-eudach 'na luidhe;

7 Agus an neapaicin a bha m'a cheann. cha'n ann 'na luidhe maille ris an lìon-eudach, ach air leth air fhilleadh ann an aon àit.

8 An sin chaidh a steach mar an ceudna an deisciobul sin eile a thàinig air tùs chum na h-uaighe, agus chunnaic, agus chreid e.

9 Oir cha do thuig iad fathast an sgrìob-

tuir, gu'm b'éigin gu'n éireadh esan a ris o na marbhaibh.

10 An sin dh'imich na deisciobuil a ris chum an cuideachd féin.

11 Ach sheas Muire aig an uaigh a muigh, a' gul: agus ag gul dì chrom i sìos, ag amharc a steach do'n uaigh,

12 Agus chunnaic i dà aingeal ann an culaidhibh geala, 'nan suidhe, fear aig a' cheann, agus fear aig na cosaibh, san àit an robh corp Iosa 'na luidhe;

13 Agus thubhairt iadsan rithe, A bhean, c'ar son a ta thu gul? Thubhairt i riu, Air son gu'n d'thug iad mo Thighearn leo, agus nach 'eil fhios agam c'ait an do chuir iad e.

14 Agus an uair a thubhairt i so, phill i air a h-ais, agus chunnaic i Iosa 'na sheasamh, agus cha d'aithnich i gu'm b'e Iosa bha ann.

15 Thubhairt Iosa rithe, A bhean, c'ar son a ta thu gul? cò tha thu 'g iarraidh? air saolsinn d'ise gu'm b'e an gàradair a bh'ann, thubhairt i ris, A thighearn, ma thug thusa leat e, innis dhomhsa c'ait an do chuir thu e, agus bheir mise leam e.

16 Thubhairt Iosa rithe, A Mhuire. Air tionndadh dh'ise, thubhairt i ris, Rabboni, 'se sin r'a ràdh, A Mhaighstir.

17 Thubhairt Iosa rithe, Na bean rium; oir cha deachaidh mi fathast suas chum m' Athar: ach imich chum mo bhràithre, agus abair riu, Tha mise dol suas chum m' Athar féin agus bhuir n-Athar-sa, agus chum mo Dhé féin agus bhuir Dé-sa.

18 Thàinig Muire Magdalen agus dh'innis i do na deisciobluih, gu'm fac i an Tighearn, agus gu'n dubhairt e na nithe so rithe.

19 Agus air teachd do'n fheasgar an là sin féin, air a' cheud là do'n t-seachdain, agus na dorsa dùinte far an robh na deisciobuil cruinn air eagal nan Iudhach, thàinig Iosa agus sheas e sa' mheadhon, agus thubhairt e riu, Sìth dhuibh.

20 Agus air dha so a ràdh, nochd e dhoibh a làmlan agus a thaobh. An sin bha aoibhneas air na deisciobluih an uair a chunnaic iad an Tighearn.

21 An sin thubhairt Iosa riu a ris, Sìth dhuibh: mar a chuir an t-Athair uaith mise, mar sin a ta mise 'gur cur-sa uam.

22 Agus air dha so a ràdh, shéid e orra, agus thubhairt e riu, Gabhaibh-sa an Spìrad naomh.

23 Cò air bith iad d'am maith sibh am peacanna, tha iad maithte dhoibh; agus cò air bith iad d'an cum sibh am peacanna gun am maiththeadh, tha iad air an cumail.

24 Ach cha robh Tomas, aon do'n dà

¹ phaisg.

² maille ris na luibhibh cùbhraidh.

³ spìosraidh chur air corp; embalm. Sasg.

⁴ maraon.

⁵ àit-adhlacaidh.

fhear dheug, d'an goirear Didimus, maille riu, 'nuair a thàinig Iosa.

25 Uime sin thubhairt na deisciobuil eile ris, Chumnaic sinne an Tighearn. Ach thubhairt esan riu, Mur faic mise aileadh¹ nan tairngean 'na làmhaidh, agus mur cuir mi mo mheur ann an aileadh nan tairngean, agus mur cuir mi mo làmh 'na thaobh, cha chreid mi.

26 Agus an ceann ochd làithean 'na dhéigh sin, bha a dheisciobuil a rìs a stigh, agus Tomas maille riu; thàinig Iosa, agus na dorsa dùinte, agus sheas e sa' mheadhon, agus thubhairt e, Sìth dhuibh.

27 'Na dhéigh sin thubhairt e ri Tomas, Cuir an so do mheur, agus féuch mo làmh; agus sin an so do làmh, agus cuir a'm' thaobh i: agus na bi mi-chreideach, ach creideach.

28 Agus fhreagair Tomas, agus thubhairt e ris, Mo' Tighearn agus mo Dhia.

29 Thubhairt Iosa ris, Air son gu faca tu mi, a Thomais, chreid thu: is beannaichte iadsan nach faca, agus a chreid.

30 Agus rinn Iosa gu fìrinneach mòran do mhòrbhuilb eile an fìanuis a dheisciobul, nach 'eil sgrìobhta san leabhar so.

31 Ach tha iad so sgrìobhta, chum gu'n creideadh sibh gur e Iosa an Crìosd Mac Dhé, agus ag creidsinn duibh, gu'm biodh agaibh beatha troimh 'ainm-san.

CAIB. XXI.

1 *Dh'fhoillsich Crìosd e fèin a rìs d'a dheisciobluibh, agus dh'aithnicheadh leo e leis an tarruing mhòr éisg: 12 Ghabh e a dhìmeir maille riu: 15 thug e sparradh do Pheadar 'uain agus a chaoraich a bhàdhadh; 18 roimh-innis e a bhàs dha.*

AN déigh nan nithe sin dh'fhoillsich Iosa e fèin a rìs d'a dheisciobluibh aig muir Thiberiais; agus air an dòigh so nochd se e fèin:

2 Bha maille r'a chéile Simon Peadar, agus Tomas d'an goirear Didimus, agus Natanael o Chàna Ghalile, agus mic Shebede, agus dithis eile d'a dheisciobluibh.

3 Thubhairt Simon Peadar riu, Tha mi dol a dh'iasgach. Thubhairt iadsan ris, Tha sinne a' dol maille riut. Dh'imich iad a mach, agus chaidh iad a steach do luing air ball; agus cha do ghlac iad ni air bith an oidhche sin.

4 Ach an uair a bha a' mhaduinn a nis air teachd, sheas Iosa air an tràigh²: gidheadh cha robh fhios aig na deisciobluibh gu'm b'e Iosa bha ann.

5 An sin thubhairt Iosa riu, A chlann, am bheil biadh air bith agaibh? Fhreagair iadsan e, Cha'n 'eil.

6 Agus thubhairt esan riu, Tilgibh an

lìon air an taobh deas do'n luing, agus gheibh sibh. Thilg iad uime sin, agus a nis cha b'urrainn iad a tharruing air son lìonmhoireachd an éisg.

7 Uime sin thubhairt an deisciobul sin, a b'ionmhuinn le Iosa, ri Peadar, Is e'n Tighearn a ta ann. A nis an uair a chuala Simon Peadar gur e an Tighearn a bh'ann, cheangail e a chòt-uachdair uime, (oir bha e lomnochd,) agus thilg se e fèin sa' mhuir.

8 Thàinig na deisciobuil eile ann an luing bhig; (oir cha robh iad fada o thù, acli mu thimchioll dà cheud làmh-choille³), a' tarruing an lìn éisg.

9 Uime sin an uair a thàinig iad air tìr, chunnaic iad griosach an sin, agus iasg air a chur oirre, agus aran.

10 Thubhairt Iosa riu, Thugaibh an so do'n iasg a ghlac sibh a nis.

11 Chaidh Simon Peadar suas, agus tharuing e an lìon gu tìr, làn do iasgaibh mòra, ceud agus leth-cheud agus trì: agus ceud bha'n uiread sin ann, cha do bhriseadh an lìon.

12 Thubhairt Iosa riu, Thigibh, gabhaibh bhuir dinnèir. Agus cha robh a chridhe⁴ aig a h-aon do na deisciobluibh fheadraich dheth, Cò thusa? oir dh'aithnich iad gur e an Tighearn a bha ann.

13 An sin thàinig Iosa, agus ghlac e aran, agus thug e dhoibh e, agus iasg mar an ceudna.

14 Is i so a nis an treas uair a nochd Iosa e fèin d'a dheisciobluibh, an déigh dha éirigh o na marbhaibh.

15 An sin an déigh dhoibh an dinnèir a ghabhail, thubhairt Iosa ri Simon Peadar, A Shìmoin *mhic* Ionaìs, am bheil barrachd gràidh agad dhomh-sa orra sin? Thubhairt e ris, Tha, a Thighearn; tha fios agad gur toigh leam thu. Thubhairt e ris, Beathaich m' uain.

16 Thubhairt e ris a rìs an dara uair, A Shìmoin *mhic* Ionaìs, an toigh leat mise? Thubhairt e ris, Seadh, a Thighearn; tha fios agad gur toigh leam thu. Thubhairt e ris, Beathaich mo chaoraich⁵.

17 Thubhairt e ris an treas uair, A Shìmoin *mhic* Ionaìs, an toigh leat mise? Bha Peadar doilich a chionn gu'n dubhairt e ris an treas uair, An toigh leat mise? Agus thubhairt e ris, A Thighearn, is aithne dhuit na h-uile nithe: tha fhios agad gur toigh leam thu. Thubhairt Iosa ris, Beathaich mo chaoraich.

18 Gu deimhin deimhin a ta mi ag ràdh riut, an uair a bha thu òg, chrioslaich thu thu fèin, agus dh'imich thu an taobh bu mhiann leat: ach an uair a bhios tu aos-mhor, sìnidh tu mach do làmhnan, agus

¹ lorg, àit.

² a' chladach.

³ barr-lènnh.

⁴ mhìsneich.

⁵ bi d'aodhaire air mo chaoraich.

crioslaichidh neach eile thu, agus bheir e *thu* an taobh nach àill leat.

19 So thubhairt e, a' ciallachadh ciod a' ghnè bàis leis an tugadh e glòir do Dhia. Agus air dha so a ràdh, thubhairt e ris, Lean mise.

20 An sin air do Pheadar tionndadh, chunnaic e an deisciobul a b'ionmhuinn le Iosa, a' leantuinn; an ti mar an ceudna a luidh air uchd Iosa air a shuipeir, agus a thubhairt ris, A Thighearn, cò e a bhrathas thu?

21 Air do Pheadar esan fhaicinn, thubhairt e ri Iosa, A Thighearn, ciod a ni am fear so?

22 Thubhairt Iosa ris, Ma's àill leam-sa e dh'fhanuinn gus an tig mi, ciod e *sin*

duitse? Lean thusa mise.

23 Uime sin chaidh an ràdh so mach am measg nam bràithre, nach faigheadh an deisciobul sin bàs: gidheadh cha dubhailt Iosa ris, nach faigheadh e bàs: ach, Ma's i mo thoil-sa e dh'fhanuinn gus an tig mi, ciod e *sin* duitse?

24 Is e so an deisciobul a ta deanamh fianuis air na nithibh so, agus a sgrìobh na nithe so: agus a ta fhios againne gu bheil 'fhianuis fìor.

25 Agus a ta mar an ceudna mòran do nithibh eile a rinn Iosa, agus nam biodh iad uile sgrìobhta, is i mo bharail nach cumadh an saoghal féin na racladh a sgrìobhadh do leabhraichibh. Amen.

GNÌOMHARA

NAN

ABSTOL.

CAIB. I.

1 *Dol suas Iosa gu nèamh.* 10 *An dèigh a dhol suas thug dà aingeal rabhadh do na h-abstolaibh iad a dh'imeachd rompa, agus a shocrachadh an inntinn air 'ath-theachd-san:* 12 *a rèir sin phill iad, agus rinn iad urnuigh, agus thugh iad Matias 'na Abstol an àit Iudais.*

RINN mi an ceud leabhar, a Theophiluis, mu thimchioll nan uile nithe a thòisich¹ Iosa air a dheanamh agus a theagasg.

2 Gus an là an do thogadh suas e, an dèigh dha, troimh an Spiorad Naomh, àitheant an thoirt do na h-abstolaibh a thagh e:

3 D'an d'rinn e mar an ceudna e féin a nochdadh beò an dèigh 'fhulangais, le mòran do chomharaibh fìrinneach, air dha bhi air fhaicinn leo feadh dhà fhichead là, agus e labhairt mu na nithibh sin a bhuineadh do rìoghachd Dhé:

4 Agus air dha bhi maille riu, dh'àithn e dhoibh gun iad a dhol o Ierusalem, ach feitheamh ri gealladh an Athar, *ars' esan*, a chuala sibh uamsa.

5 Oir bhaist Eoin gu deimhin le uisge: ach baistear sibhse leis an Spiorad naomh, air bheag do làithibh an dèigh so.

6 Uime sin an uair a chruinnich iad an ceann a chèile, dh'fheòraich iad deth, ag ràdh, A Thighearn, an aigis thu san àm so an rìoghachd do Israel?

7 Ach thubhairt esan riu, Cha bhuin e dhuibh-sa fios nan aimsir no nan àm fhaotainn, a chuir an t-Athair 'na chumhachd féin.

8 Ach gheibh sibhse cumhachd an uair

a thig an Spiorad naomh oirbh: agus bithidh sibh 'nur fianuisibh dhomh-sa, araon ann an Ierusalem, agus ann an Iudea uile, agus ann an Samaria, agus gu iomall na talmhainn.

9 Agus an uair a thubhairt e na nithe so, thogadh suas e, agus iadsan 'ga fhaicinn; agus thug neul as an sealladh e.

10 Agus am feadh a bha iadsan a' geur-amharc gu nèamh, agus esan a' dol suas, feuch, sheas dithis fhear làimh riu ann an eudach geal;

11 Agus thubhairt iad, Fheara Ghalile, c'ar son a ta sibh 'nur seasamh ag amharc gu nèamh? An t-Iosa so a thogadh suas uaibh gu nèamh, is amhuil sin a thig e, mar a chunnaic sibh e a' dol gu nèamh.

12 An sin phill iad gu Ierusalem, o'n t-sliabh ris an abrar *sliabh* nam crann-oladh, a tha'm fagus do Ierusalem, astar là sàbaid as.

13 Agus an uair a thàinig iad a stigh, chaidh iad suas do sheòmar uachdarach, far an robh a' fantuinn Peadar, agus Seumas, agus Eoin, agus Aindreas, Philip, agus Tomas, Bartolomeus, agus Mata, Seumas *mac* Alpheuis, agus Simon Selotes, agus Iudas *bràthair* Sheumais.

14 Bhuaich iad so uile a dh'aon inntinn ann an urnuigh, [agus an guidhe,] maille ris na mnaibh, agus Muire màthair Iosa, agus maille r'a bhràithribh.

15 Agus anns na làithibh sin dh'éirich Peadar ann am meadhon nan deisciobul, agus thubhairt e, (b'e àireamh nan ainm a bha làthair, mu thimchioll ceud agus fichead,)

16 Fheara *agus* a bhràithre, b'èigin an

¹ thionnsgain.

sgriobtuir so bhi air a choimhlionadh, a roimh-labhair an Spiorad naomh le beul Dhaibhidh timchioll Iudais, a bha 'na cheann iùil¹ aca-sana ghlac Iosa.

17 Oir bha e air àireamh maille ruinne, agus fhuair e cuibhrionn do'n fhrithealadh so.

18 A nis cheannaich am fear so fearann le duais na h-eucorach; agus air dha tuit-eam sìos air 'aghaidh², sgàin e sa' mheadhon, agus bhrùchd a mliònach uile mach.

19 Agus rinneadh so aithnichte do luchd-àiteachaidh Ierusalem uile; air chor as gu'n abrar ris an fhearann sin 'nan cainnt féin, Aceldama, sin ri ràdh, Fearann fola.

20 Oir a ta e sgriobhta ann an leabhar nan Salm, Biodh 'àite-còmhnuidh 'na fhàsach, agus na gabhadh neach sam bith tàmh ann; agus, Glacadh neach eile a dhreuchd³.

21 Air an aobhar sin is còir aon do na daoineibh sin a bha maille ruinne, rè na h-aimsir sin uile anns an deachaidh an Tighearn Iosa steach agus a mach 'nar measg-ue,

22 A' tòiseachadh o bhaisteadh Eoin, gus an là an do thogadh suas uaim e, bhi air a dheanamh 'na fhianuis air 'aiseirigh-san maille ruinne.

23 Agus shonraich iad dithis, Ioseph ris an abrar Sababas, d'am bu cho-aime Iustus, agus Matias.

24 Agus rinn iad urnuigh, agus thubhairt iad, Thusa a Thighearn, d'an aithne cridheacha nan uile dhaoine, foillsich cò do'n dithis so a thagh thu,

25 A ghabhail cuibhinn do'n fhrithealadh agus do'n abstolachd so, o'n do thuit Iudas le seacharan⁴, gu dol d'a àit féin.

26 Agus thilg iad an crannchur; agus thuit an crannchur air Matias; agus bha e air àireamh maille ris an aon abstol deug.

CAIB. II.

1 Lionadh na h-abstoil leis an Spiorad naomh, agus labhair iad iomadh gnè cainte; 7 ghabh cuid iongantais riù, agus rinn cuid eile fanoid orra: 14 Nochd Peadar gu'n do labhair na h-abstoil le cumhachd an Spiorad naomh.

A GUS an uair a thàinig là na cuingis⁵, bha iad gu léir a dh'aon inntinn ann an aon àit.

2 Agus thàinig gu h-obann toirm o nèamh, mar shéideadh gaoithe ro thréin, agus llon i an tigh uile far an robh iad 'nan suidhe.

3 Agus dh'fhoillsicheadh dhoibh teanganna sgoilte, mar do theine, agus shuidh e air gach aon diubh fa leth:

4 Agus lionadh iad uile leis an Spiorad

naomh, agus thòisich iad air labhairt le teangaibh eile, a réir mar a thug an Spiorad comas labhairt dhoibh.

5 Agus bha a' gabhail còmhnuidh ann an Ierusalem, Iudhaich, daoine cràbhach, do gach uile chinneach fo nèamh.

6 A nis, an uair a sgaoileadh an t-iomradh so, thàinig an sluagh an ceann a chèile, agus bha iad fo amhludh, do bhrìgh gu'n cuala gach aon iad a' labhairt 'nan càinain⁶ féin.

7 Agus bha iad uile fo uamhas agus ghabh iad iongantais, ag ràdh r'a chèile, Feuch, nach Galiléich iad sin uile a ta labhairt?

8 Agus cionnus a ta sinne 'gan cluinntinn gach aon 'nar càinain féin, anns an d'rugadh sinn?

9 Partaich, agus Medich, agus Elam-aich, agus luchd-àiteachaidh Mhesopotamia, Iudea, agus Chapadocia, Phontuis, agus Asia,

10 Phrigia, agus Phamphilia, na h-Eiphit, agus chrioch na Libia timchioll Chirene, agus coigrich o'n Ròimh, Iudhaich agus Proselitich⁷,

11 Muinntir Chrete, agus Arabia, tha sinn 'gan cluinntinn a' labhairt 'nar teangaibh féin gnìomhara mòralach Dhé.

12 Agus bha iad uile fo uamhas, agus ann an ioma-chomhairle, ag ràdh gach aon r'a chèile, Ciod is ciall da so?

13 Ach thubhairt dream eile a' fanoid, Tha na daoine so làn do fhion ùr.

14 Ach air seasamh do Pheadar maille ris an aon fhear deug, thog e a ghuth, agus thubhairt e riù, Fheara Iudea, agus sibhse uile a luchd-àiteachaidh Ierusalem, biodh fios so agaibh, agus éisdibh ri m'bhriathraibh-sa:

15 Oir cha 'n 'eil iad so air mhisg, mar a ta sibhse a' meas, oir is i an treas uair do'n là⁸ a ta ann.

16 Ach is e so an nì a chaidh labhairt leis an fhàidh Ioeil:

17 Agus tarlaidh⁹ anns na làitheibh deir-eannach, (arsa Dia,) dòirtidh mise do m' Spiorad air gach uile fheoil; agus nì bhur mic agus bhur nigheana fàidheadair-eachd, agus chì bhur n-òganaich seallanna, agus brudaraidh bhur seann daoine brudarra¹⁰:

18 Agus dòirtidh mise air m'òglaich, agus air mo bhanoglaich do m' Spiorad anns na làitheibh sin; agus nì iad fàidheadaireachd:

19 Agus nochdaidh mise iongantais anns na nèamhaibh shuas, agus comharan air an tal mh shìos; fuil, agus teine, agus duibh-neul deataich.

¹ thredruiche.

² an comhair a chinn.

³ oifig.

⁴ a dh'fhàg Iudas.

⁵ an uair a choimhlionadh

là na cuingis.

⁶ cainnt.

⁷ i. e. Geintilich a

dh'iompaicheadh gu creidimh nan Iudhach.

⁸ i. e. an naothad uair roimh mheadhon-là.

⁹ tachairidh. ¹⁰ chì bhur seann daoine aisingean.

GNÍOMHARA, II. III.

20 Iompaichear a' ghrian gu dorchadas, agus a' ghealach gu fuil, mun tig là mòr agus comharaichte sin an Tighearna :

21 Agus tarlaidh, ge b'e neach a ghairmeas air ainm an Tighearna, gu'n tèarnar e.

22 Fheara Israeil, éisdibh ris na briathraibh so; Iosa o Nasaret, duine a dhearbhadh le Dia 'nur measg-sa, le cumhachdaibh agus le mìorbhuilibh agus le comharaibh, a rinn Dia leis-san 'nur meadhon-sa, mar a ta fhios agaibh féin;

23 An duine so, a thugadh thairis le comhairle chinntich agus roimh-eòlas Dé, ghlac sibhse, agus le lámhaibh dhroch dhaoine¹ cheus agus mharbh sibh e²:

24 Neach a thog Dia suas, air dha piantan³ a' bhàis fhuasgladh; do bhrìgh nach robh e'n comas gu'n cumtadh esan leis:

25 Oir thubhairt Daibhidh m'a thimchioll, Chunnaic mi an Tighearn romham a ghnàth; oir a ta e aig mo dheas làimh, chum nach gluaisteadh mi.

26 Air an aobhar so rinn mo chridhe gairdeachas, agus rinne mo theangadh aoibhneas: tuilleadh fòs, gabhaidh m'fheoil còmhnuidh fhoisneach ann an dòchas⁴:

27 Do bhrìgh nach fàg thu m'anam shìos ann an ifrinn⁵, nì mò a dh'fhuilingeas tu do d' naomh Aon féin gu faic e truaillidheachd.

28 Dh'fhoillsich thu dhomh-sa slighean na beatha; lìonaidh tu mi do shubhachas le d' ghnùis.

29 Fheara agus a bhràithre, leigibh leam-sa labhairt gu dàna ribh mu'n plùromh-athair Daibhidh, araon gu'n d'fhuair e bàs, agus gu'n d'adhlaiceadh e, agus gu bheil 'uaigh maille ruinne gus an là an diugh:

30 Air an aobhar sin air dha bhi 'na fhàidh, agus fiosrach gu'n do mhionnaich Dia le mionnaibh dha, do thoradh a leasraidh, a réir na feòla, gu togadh e suas Crìosd, gu suidhe⁶ air a rìgh-chaithirsan.

31 Air dhasan so a roimh-fhaicinn, labhair e mu aiseirigh Chrìosd, nach d'fhàgadh 'anam ann an ifrinn⁷, agus nach fae 'fheoil truaillidheachd.

32 An t-Iosa so thog Dia suas, air am bheil sinne uile 'nar fianuisibh,

33 Uime sin, air dha bhi air àrdachadh le⁸ deas làimh Dhé, agus gealladh an Spioraid naomh fhaotainn o'n Athair, dhòirt e mach an uì so, a tha sibhse nìs a' faicinn agus a' cluintinn.

34 Oir cha deachaidh Daibhidh suas chum nan nèamh: ach a ta e féin ag ràdh, Thubhairt an Tighearn ri m' Thighearn,

Suidh air mo làimh dheis,

35 Gus an cuir mi do naimhde 'nan stòl fo d' chosaibh.

36 Uime sin biodh fios gu cinnteach aig tigh Israeil uile, gu'n d'rinn Dia 'na Thighearn agus 'na Chrìosd, an t-Iosa so féin, a cheus sibhse.

27 A nis an uair a chual iad so, bha iad air am bioradh 'nan cridhe, agus thubhairt iad ri Peadar, agus ris a' chuid eile do na h-abstolaibh, Fheara agus a bhràithre, ciod a nì sinn?

38 An sin thubhairt Peadar riu, Dean-aibh aithreachas, agus bithibh air bhur baisteadh gach aon agaibh ann an ainm Iosa Crìosd, chum maithenanais pheacanna, agus gheibh sibh tiodhlac an Spioraid naomh.

39 Oir a ta an gealladh dhuibh-sa, agus do 'ur cloinn, agus do na h-uile a ta fad o làimh, eadhon a mheud as a ghairmeas an Tighearn ar Dia.

40 Agus le mòran do bhrìathraibh eile rinn e fianuis agus dh'earalaich e iad⁹, ag ràdh, Saoraibh sibh féin o'n glinealach fhìar¹⁰ so.

41 An sin bhaisteadh iadsan a ghabh r'a fhocal gu toileach: agus an là sin féin chuireadh riu timchioll trì mìle anam.

42 Agus bhunaich iad gu seasmhach ann an teagasg nan abstol, agus ann an co-chomunn, agus ann am briseadh arain, agus ann an urnuighibh.

43 Agus thàinig eagal air gach anam: agus rinneadh mòran do mhìorbhuilibh agus do chomharaibh leis na h-abstolaibh.

44 Agus bha iadsan uile a chreid ann an aon àit, agus bha na h-uile nithe aca coitchionn¹¹;

45 Agus reic iad an seilbh agus am maoin, agus roinn iad air na h-uile iad, a réir mar a bha feum gach neach.

46 Agus ag buanachadh dhoibh gach là a dh'aon intinn anns an teampull, agus a' briseadh arain o thigh gu tigh, chaith iad am biadh le gairdeachas agus le aon-fhillteachd cridhe,

47 A' moladh Dhé, agus deadh-ghean aca o'n t-sluagh uile. Agus chuir an Tighearn gach là ris an eaglais an dream a thàruinnear.

CAIB. III.

1 Leighis Peadar agus Eoin duine bacach; 12 dh'inis iad do'n t-sluagh a bha air cruinneachadh nach d'rinneadh am mìorbhuil so le naomhachd nan Abstol, ach le cumhachd diadhaidh Chrìosd; 13 chronuich siad iad air son esan a chur gu bàs.

AGUS chaidh Peadar agus Eoin le chéile suas do'n teampull, aig uair

¹ le làmhan aingidh.

air, mharbh sibh e.

⁴ carbsa.

² nuair a rinn sibh fanòid

³ cuibhreach, boinn.

⁵ san uaigh.

⁶ gu'n suidhicheadh e.

⁸ aig.

¹⁰ olc.

⁷ san uaigh.

⁹ chomhairlich e iad, ghuidh e orra.

¹¹ ann an comhpairt.

a h-urnuigh, *eadhon* an naothadh *uair*¹.

2 Agus bhla duine àraidh a bha 'na bhacach² o bhroinn a mhàthar air a ghlùlan, neach a chuireadh gach là aig dorus sin an teampull ris an abrar Sgiambach, a dh'iarraidh déirce orra-san a bha dol a steach do'n teampull:

3 Neach, an uair a chunnaic e Peadar agus Eoin air tì dol a steach do'n teampull, a dh'iarr déirce.

4 Agus air do' Pheadar sealltuinn gu gear air, maille ri Eoin, thubhairt e, Amhairc oirne.

5 Agus thug esan aire dhoibh an dòchas gu'm faigheadh e ni-éigin uatha.

6 An sin thubhairt Peadar, Airgiod no òr cha'n 'eil agam; ach an ni a ta agam, so bheir mi dhuit: An ainm Iosa Criosd o Nasaret, éirich agus imich.

7 Agus air dha breith air a làimh dheis, thog e suas e; agus air ball neartaicheadh 'aobrunnan agus a throidhean.

8 Agus leum e suas, agus sheas e, agus dh'imich e, agus chaidh e steach maille riù do'n teampull, ag imeachd, agus a' leumnaich, agus a' toirt cliù do Dhia.

9 Agus chunnaic an sluagh uile e ag imeachd, agus a' toirt cliù do Dhia.

10 Agus dh'aithnich iad esan gu'm b'e a bhla 'na shuidhe aig geata Sgiambach an teampull ag iarraidh déirce: agus lìonadh iad le h-iongantas agus le h-uamhas air son an ni sin a thachair dha.

11, Agus ag cumail Pheadair agus Eoin, [do'n bhacach a chaidh leigheas,] ruith an sluagh uile d'an ionnsuidh anns an sgàth-thigh³ ris an abrar sgàth-thigh Sholaimh, làn iongantais.

12 Agus an uair a chunnaic Peadar so, fhreagair e an sluagh, Fheara Israeil, c'ar son a ta iongantas oirbh mu'n ni so? no c'ar son a ta sibh a' gear-amharc oirne, mar gu b'ann le ar cumhachd no ar naomhachd féin a thug sinn air an duine so imeachd?

13 Ghlòraich Dia Abrahaim, agus Isaac, agus Iacoib, Dia ar n-aithriche a Mhac Iosa; a thug sibhse thairis, agus a dh'àicheadh sibh an làthair Philait, an uair a b'i a bhreth a chur fa sgaoil.

14 Ach dh'àicheadh sibhse an t-Aon naomh, agus am Firean, agus dh'iarr sibh mortair a thiodhlacadh⁴ dhuibh;

15 Agus mharbh sibh Prionnsa⁵ na beatha, a thog Dia o na marbhaibh; air am bheil sinne 'nar fianuisibh.

16 Agus tre chreidimh 'na ainm neartaich e an tì so, a tha sibhse a' faicinn, agus a's aithne dhuibh: seadh, thug

'ainm-san agus an creidimh a ta trid-san, dhasan an t-slàinte iomlan so 'nur làthair-sa uile.

17 Agus a nis, a bhràithre, tha fhios agam gur ann troimh aineolas a rinn sibh e, mar a rinn mar an ceudna bhur n-uachdarain.

18 Ach choimhilion Dia air an dòigh so na nithe sin a roimh-fhoillsich e le beul 'fhàidhean uile, gu'n fuilingeadh Criosd.

19 Air an aobhar sin, deanaibh-sa aithreachas agus bithibh air bhur n-iompachadh, chum gu'm bi bhur peacanna air an glanadh as, 'nuair a thig amanna fionnuaireachd o làthair an Tighearn;

20 Agus a chuireas e Iosa⁶ Criosd d'ur ionnsuidh, a chaidh roimh-orduchadh⁷:

21 Neach is éigin do nèamh a ghabhail gu aimsiribh aig nan uile nithe, air an do labhair Dia le beul 'fhàidhean naomha uile, o thoiseach an t-saoghail.

22 Oir gu fìrinneach thubhairt Maois ris na h-aithrichibh, Togaidh an Tighearn bhur Dia suas fàidh dhuibh, do 'ur bràithribh, mar mise; ris-san éisdidh sibh anns na h-uile nithibh a labhras e ribh.

23 Agus tarlaidh, gach anam nach éisd ris an fhàidh sin, gu'n sgriosar a mach as an t-sluagh e.

24 Seadh, dh'fhoillsich na fàidhean uile o Shamuel, agus iadsan a lean o sin, a mhead duibh as a labhair roimh-làimh mu na làithibh so.

25 Is sibhse clann nam fàidhean, agus a' choimhcheangail a rinn Dia r'ar n-aithrichibh, ag ràdh ri Abraham, Agus ann ad shliochd-sa bithidh uile theaghlache na talmhainn air am beannachadh.

26 Air do Dhia a Mhac Iosa thogail suas, chuir e do 'ur n-ionnsuidh-sa e air tùs, chum gu'm beannaicheadh e sibh, leis gach aon agaibh iompachadh o bhur lochdaibh.

CAIB. IV.

1 Chuir uachdarain nan Iudhach Peadar agus Eoin am prìosan, air son iad a bhi searmonachadh Iosa do'n t-sluagh; 5 an dèigh an ceasnachadh dh'aidich Peadar gu'n do leighiseadh am bacach le cumhachd diadhaidh Iosa a mhàin, agus gur ann trid-san 'na aonar a ta slàinte shiorruidh r'a faghail.

A Agus am feadh 'sa bha iad a' labhairt ris an t-sluagh, thàinig orra na sagairt, agus ceannard an teampull, agus na Sadusaich;

2 Agus bha iad fo dhoilgheas gu'n robh iadsan a' teagasg an t-sluaigh, agus a' searmonachadh tre Iosa aiseirigh nam marbh.

¹ i. e. an treas uair an dèigh mheadhon-là.

² chrìopach.

³ àilleir phòrsa.

⁴ thubhairt.

⁵ Ceann-iuil, Ceannard.

⁶ chum gu tig amanna fois o làthair an Tighearna, agus gu cuir e Iosa.

⁷ roinne so a

shearmonaicheadh dhuibh.

3 Agus chuir iad làmh anna, agus chuir iad am prìosan iad gus an là màireach¹: oir b'e nis am feasgar a bh'ann.

4 Gidheadh chreid mòran diubh-san a chual am focal; agus b'e àireamh nan daoine timchioll chùig mìle.

5 Agus tharladh air an là màireach, gu'n do chruinnicheadh an ceann a chèile an uachdarain, agus an seanaircan, agus an sgrìobhaichean ann an Ierusalem,

6 Agus Annas an t-àrd-shagart, agus Caiaphas, agus Eoin, agus Alecsander², agus a mheud as a bha do chinneach an àrd-shagairt.

7 Agus air dhoibh iadsan a chur anns a' mheadhon, dh'fhiosraich iad, Ciod e an cumhachd, no ciod e an t-ainm anns an d'riinn sibh so?

8 An sin air do Pheadar bhi air a lionadh leis an Spiorad naomh, thubhairt e riu, Uachdarana a' phobuill, agus a sheanaircan Israeil,

9 Ma tha sinne an diugh air ar ceasnachadh mu'n deadh ghniomh a rinneadh do'n duine euslan, cionnus a shlànuicheadh e;

10 Biodh e aithnichte dhuibh-se uile, agus do phobuill Israeil uile, gur ann tre ainm Iosa Crìosd o Nasaret, a cheus sibhse, a thog Dia o na marbhaibh, eadhon trid-san a ta 'n duine so 'na sheasamh an so 'nur làthair-sa slàn.

11 Is i so a' chlach a dhiùltadh leibhse, a luchd togail, a rinneadh 'na ceann na h-oisne.

12 Agus cha'n 'eil slàinte ann an neach air bith eile: oir cha'n 'eil ainm air bith eile fo nèamh air a thoirt am measg dhaoine, tre am feud sinn bhi air ar tèarnadh³.

13 A nis an uair a chunnaic iad dànachd Pheadair agus Eoin, agus a thuig iad gu'm bu daoine gun fhòghlum agus cumanta iad, ghabh iad iongantas; agus dh'aithnich siad iad⁴ gu'n robh iadsan maille ri Iosa.

14 Agus air faicinn an duine a leighis-eadh 'na sheasamh maille riu, cha robh ni air bith aca ri ràdh 'na aghaidh.

15 Agus an dèigh dhoibh orduchadh dhoibh-san dol a mach as a' chomhairle, chuir iad an cinn cuideachd⁵,

16 Ag ràdh, Ciod a ni sinn ris na daoineibh so? Oir gu'n deachaidh mìorbhuil aithnichte⁶ dheanamh leo, a ta e follaiseach do luchd-àiteachaidh Ierusalem uile, agus cha'n urrainn sinne àicheadh.

17 Ach a chum nach sgaoilear e ni's mò air feadh an t-sluaigh, bagramaid orra gu geur, gun iad a labhairt ni's mò ri neach air bith anns an ainm so.

18 Agus air dhoibh an gairm, dh'àithn iad dhoibh gun iad a labhairt air chor sam bith, no a theagasg ann an ainm Iosa.

19 Ach fhreagair Peadar agus Eoin agus thubhairt iad riu, Am bheil e ceart am fianuis Dé, éisdeachd ribhse roimh Dhia, thugaibh fèin breth.

20 Oir cha'n 'eil e'n comas duinne gun na nithe a chunnaic agus a chuala sinn a labhairt.

21 Agus air dhoibh-san tuilleadh bagraidh a dheanamh orra, leig iad as iad, gu'n dòigh air bith fhaotainn air am feudadh iad peanas a dheanamh orra, air son an t-sluaigh: oir bha na h-uile a' toirt glòire do Dhia air son an ni a rinneadh.

22 Oir bha an duine air an d'rinneadh am mìorbhuil leighis so tuilleadh as dà fhlichead bliadhna dh'aois.

23 Agus an uair a leigeadh as iad, thàinig iad dh'ionnsuidh am muinntir fèin, agus dh'innis iad na h-uile nithe a thubhairt na h-àrd-shagairt, agus na seanaircan riu.

24 Agus an uair a chual iadsan so, thog iad suas a dh'aon inntinn an guth ri Dia, agus thubhairt iad, A Thighearn, is tusa an Dia a rinn nèamh agus talamh, agus an fhairge, agus na h-uile nithe ta anna:

25 A thubhairt le beul Dhaibhidh do sheirbhishich, C'ar son a ghabh na Cinnich boil, agus a smuainich an sluagh nithe dìomhanach?

26 Sheas rìghrean na talmhainn suas, agus chruinnicheadh na h-uachdarain an ceann a chèile, an aghaidh an Tighearn, agus an aghaidh a Chrìosd⁷.

27 Oir gu fìrinneach chruinnicheadh an ceann a chèile, an aghaidh do Leinibh naoimh Iosa, a dh'ung thu, araon Herod agus Pontius Pilat, maille ris na Cinnich, agus sluagh Israeil.

28 A dheanamh gach ni a roimh-orduich do làmh agus do chomhairle a bhi deanta.

29 Agus a nis, a Thighearn, amhairc air am bagraidhibh: agus dèonaich do d' sheirbhishich fèin, t'fhocal a labhairt leis gach uile dhànachd.

30 Le d' làimh a shìneadh a mach chum leighis: agus gu'm bi comharan agus mìorbhuilean air an deanamh tre ainm do Leinibh naoimh Iosa.

31 Agus air dhoibh urnuigh a dheanamh, chrathadh an t-àit anns an robh iad cruinn; agus lionadh iad uile do'n Spiorad naomh, agus labhair iad focal Dé le dànachd.

32 Agus bha aig a' chuideachd a chreid aon chridhe, agus aon anam: agus ni mò

¹ gus an là air na màireach. ² Alastair.
³ slànachadh, sàbhatadh. ⁴ thug iad aire dhoibh.

⁵ an comhairle r'a chèile. ⁶ soilleir.
⁷ an aghaidh Aoin ungta-san.

a thubhairt neach air bith *dhiubh*, gu'm bu leis féin aon nì a shealbhaich e; ach bha na h-uile nithe coitchionn' aca.

33 Agus le mòr-chumhachd thug na h-abstol fianuis air aiseirigh an Tighearna Iosa: agus bha mòr-ghràs orra uile.

34 Agus nì mò a bha aon neach uireas-bhuidheach 'nam measg: oir a mhead as a bha 'nan sealbhadaraibh fearainn, no thighean, air dhoibh an reiceadh, thug iad luach nan nithe a chaidh reiceadh leo;

35 Agus chuir iad aig cosaibh nan abstol e: agus roinneadh e air gach neach a réir 'fheuma.

36 Agus air do fhearann a bhi aig Ioses d'an do ghoireadh leis na h-abstolaibh Barnabas, (is e sin, air eadar-theangachadh, Mac na comhfhurtachd,) Lebhith-each, d'am bu dùthaich Cipras.

37 Reic se e, agus thug e'n t-airgid, agus chuir e aig cosaibh nan abstol e.

CAIB. V.

1 *Air son an céilge thuit Ananias agus Saphira sìos marbh le cronachadh Pheadair.* 12 Mòran mhìorbhuilean air an oibreachadh; 17 chuireadh na h-abstol a ris am prìosan, 19 ach a ta iad air an leigeadh as le aingeal.

ACH reic fear àraidh d'am b'aim Ananias, maille r'a mhnai Saphira, sealbh fearainn,

2 Agus cheil e cuid do'n luach, le fios a mhnai, agus air dha cuid-éigin a thoirt leis, chuir e aig cosaibh nan abstol e.

3 Ach thubhairt Peadar, Ananiais, c'ar son a lìon Satan do chridhe a dheanamh bréige do'n Spiorad naomh, agus a cheiltinn cuid do luach an fhearainn?

4 Am feadh 's a dh'fhuirich e gun reiceadh, nach bu leat féin e? agus an déigh a reiceadh nach robh e a'd' chomas féin? c'ar son a smuainich thu ann do chridhe an gnìomh so? cha d'rinn thu breug do dhaoibh, ach do Dhia.

5 Agus an uair a chuala Ananias na briathra so, thuit e sìos, agus chaidh an deò as: agus thàinig eagail mòr air na h-uile a chuala na nithe so.

6 Agus air éirigh do na h-òganaich, phaisg iad an eudach-mairbh e, agus air dhoibh a ghiulan a mach, dh'adhlaic iad e.

7 Agus tharladh, timchioll trì uaire 'na dhéigh sin, gu'n d'thàinig a bhean a-steach, gun fhios aice air an nì a rinneadh.

8 Agus fhreagair Peadar i, Innis dhomh-sa an ann air an uiread so reic sibh am fearann? Agus thubhairt ise, Is ann, air son an uiread sin.

9 An sin thubhairt Peadar rithe, C'ar son a cho-aontaich sibh Spiorad an Tighearna a dhearbhadh²? feuch, tha cosan

na muinntir a dh'adhlaic t'fhear aig an dorus, agus giùlainidh iad thusa mach.

10 An sin thuit i air ball aig a chosaibh, agus chaidh an deò aise: agus air do na h-òganaich teachd a steach, fhuair iad i marbh, agus air dhoibh a giùlan a mach, dh'adhlaic iad làimh r'a fear i.

11 Agus thàinig eagail mòr air an eaglais uile, agus air na h-uile a chuala na nithe so.

12 Agus rinneadh mòran chomharan agus mhìorbhuilean am measg a' phobuill le làmhaidh nan abstol; (agus bha iad uile dh'as inntinn ann an sgàth-thigh³ Sholaimh:

13 Agus cha robh chridhe aig aon do chàch e féin a cheangal riu:) ach bha mòr-mheas aig a' phobull orra.

14 Agus is mòid a chuireadh creidich ris an Tighearna, buidheann mhòr⁴ araon do fhearaibh agus do mhnaibh:

15 Air chor as gu'n d'thug iad a mach a' mhuinntir euslan air na sràidibh, agus gu'n do chuir iad air leabaichibh agus air uirighibh⁵ iad, chum ag teachd do Pheadar gu'n cuireadh 'fhaileas, mur bu lugha, sgàile⁶ air neach éigin aca.

16 Agus thàinig mar an ceudna mòr-shluagh as na bailtibh mu'n cuairt air Ierusalem, a' toirt leo muinntir euslain, agus dream a bha air am buaireadh le spioradaibh neòghlan: agus leighiseadh iad uile.

17 An sin dh'éirich an t-àrd-shagart, agus iadsan uile a bha maille ris, (eadhon luchd-bharail nan Sadusach,) agus lionadh iad le t'nùth⁷.

18 Agus chuir iad làmh anns na h-abstolaibh, agus chuir iad sa' phrìosan chumanta iad.

19 Ach dh'fhosgail aingealan Tighearna dorsan a' phrìosain san oidhche, agus thug e iadsan a mach, agus thubhairt e,

20 Imichibh, agus ag seasamh dhuibh labhraibh san teampull ris an t-sluagh, uile bhriathra na beatha so.

21 Agus an uair a chual iad so, chaidh iad gu moch a steach do'n teampull, agus theagaisg iad. Ach thàinig an t-àrd-shagart agus iadsan a bha maille ris, agus ghairm iad a' chomhairle, agus seanadh chloinn Israeil uile an ceann a chéile, agus chuir iad do'n phrìosan chum gu'n tugtadh iadsan d'an ionnsuidh.

22 Ach an uair a thàinig na maor, cha d'fhuair iad sa' phrìosan iad, agus air pilltinn dhoibh, dh'innis iad,

23 Ag ràdh, Fhuair sinne gu firinneach am prìosan dùinte gu ro thearuinte, agus an luchd-coimhead 'nan seasamh a mach fa chomhair nan dorsan; ach an uair a

¹ ann an comhairte.

² a bhuaireadh.

³ àilear, pòrsa.

⁴ sluagh mòr.

⁶ dubhar.

⁵ couches. Sasg.

⁷ cud.

dh'fhosgail sinn, cha d'fhuair sinn aon duine a stigh.

24 A nis an uair a chual an t-àrd-shagart, agus ceannard an teampull, agus uachdarain nan sagart na briathra so, bha iad fo amharus mu'n timchioll ciod gus an tigeadh so.

25 An sin thàinig neach àraidh agus dh'innis e dhoibh, ag ràdh, Feuch, a ta na daoine a chuir sibh sa' phrìosan, 'nan seasamh san teampull, agus a' teagasg a' phobuill.

26 An sin dh'imich an ceannard maille ris na maoraibh, agus thug e leis iad gun ainneart: (oir bha eagal orra roimh an t-sluagh, gu'm biodh iad air an clachadh leo.)

27 Agus an uair a thug iad leo iad, chuir iad ann am fianuis na comhairle iad; agus dh'fheòraich an t-àrd-shagart diubh,

28 Ag ràdh, Nach d'thug sinne geur-ordugh dhuibh gun teagasg a dheanamh san ainm so? agus, feuch, lion sibh Ierusalem le 'ur teagasg, agus is àill leibh fuil an duine so a tharruing¹ oirne.

29 An sin fhreagair Peadar agus na h-abstoil eile, agus thubhairt iad, Is còir géill a thoirt do Dhia ni's mò na do dhaoineibh.

30 Thog Dia ar n-aithriche Iosa, a mharbh sibhse agus a chroch sibh air crann.

31 Eanndh'ardaich Dia le a dheas làimh 'na Ceannard² agus na Shlànuighear, a thoirt aithreachais agus maitheanas pheacanna do Israel.

32 Agus tha sinne 'nar fianuisibh dha air na nithibh so; agus mar an ceudna an Spiorad naomh, a thug Dia dhoibhsan a ta ùmhal dha.

33 Agus an uair a chual iadsan so, bha iad air an gonadh³, agus ghabh iad comhairle an cur gu bàs.

34 An sin dh'éirich Phairiseach àraidh anns a' chomhairle, d'am b'ainm Gamaliel, fear teagaisg an lagha, air an robh meas aig an t-sluagh uile, agus dh'orduich e na h-abstoil a chur a mach rè tamuill;

35 Agus thubhairt e riu, Fhèara Israeil, thugaibh aire dhuibh féin, ciod a ta roimh-bhaid a dheanamh mu thimchioll nan daoine sin.

36 Oir roimh na làithibh so dh'éirich Teudas suas, ag ràdh, gu'm bu neach éigin mòr e féin, agus cheangail àireamh dhaoine, timchioll ceithir cheud, iad féin ris: mharbhadh esan, agus a mheud 'sa dh'aontaich leis, sgaoileadh iad uile as a chèile, agus chaidh iad gu neo-ni.

37 An déigh an fhir so dh'éirich Iudas an Galiléach suas, ann an làithibh na

cis-mheasaidh, agus tharruing e mòran sluagh 'na dhéigh: sgriosadh esan mar an ceudna, agus a mheud 's a ghéill da⁴, sgapadh iad uile.

38 Agus a nis a ta mi ag ràdh ribh, Fanaibh o na daoineibh so, agus leigibh leo: oir ma's ann o dhaoineibh a ta a' chomhairle so, no an obair so, thig i gu neo-bhrigh⁵:

39 Ach ma's ann o Dhia a ta i, cha'n urrainn sibhe a' cur gu neo-bhrigh: air eagal gu'n tarladh gu'm faighear sibh eadhon a' cogadh an aghaidh Dhé.

40 Agus dh'aontaich iad leis-san: agus an uair a ghairm iad na h-abstoil, agus a ghabh iad orra, dh'orduich iad dhoibh gun labhairt ann an ainm Iosa, agus leig iad as iad.

41 Agus dh'imich iadsan o làthair na comhairle, le gairdeachas a chionn gu'n do mheasadh gu'm b'airidh iad air eas-urram fhulang air son 'ainme-san.

42 Agus gach là anns an teampull, agus o thigh gu tigh, cha do sguir iad a bli teagasg, agus a' searmonachadh Iosa Crìosd.

CAIB. VI.

1 Thagh na h-abstoil seachdnar gu frithealadh do uireasbhuidh nam bochd: 5 b'ann diubh so Stephan, neach a bha làn do chreidimh, agus do'n Spiorad naomh: 12 Chaidh a ghluacadh agus agairt gu h-eucorach an làthair na comhairle.

AGUS anns na làithibh sin, an uair a bha àireamh nan deisciobul a' meudachadh, dh'éirich gearan am measg nan Greugach an aghaidh nan Eabhrach, a chionn gu'n do dhearmaideadh am bantraichean san fhrithealadh làitheil.

2 An sin ghairm an dà fhear dheug mòrchuideachd nan deisciobul d'an ionnsuidh, agus thubhairt iad, Cha'n 'eil e iomchuidh sinne dh'fhàgail focail Dé, agus a fhrithealadh do bhordaibh.

3 Uime sin, a bhràithre, iarraibh a mach 'nur measg seachdnar dhaoine fo dheadh iomradh, làn do'n Spiorad naomh agus do ghliocas, a chuireas sinne os ceann an dreuchd so⁶.

4 Ach buanaichidh sinne a ghnàth ann an urnuigh, agus am ministeireachd an fhocail.

5 Agus bha chainnt so taitneach an làthair na mòrchuideachd uile: agus thagh iad Stephan, duine làn do chreidimh, agus do'n Spiorad naomh, agus Philip, agus Prochorus, agus Nicanor, agus Timon, agus Parmenas, agus Nicolas prosliteach do mhuinntir Antioch.

6 Chuir iad iadsan an làthair nan abstol: agus air deanamh urnuigh dhoibh, chuir iad an làmhnan orra.

¹ thoirt.

³ chas iad am facla.

² Phrionnsa.

⁴ dh'earb as.

⁶ na h-oibre.

⁵ théid as dìth.

7 Agus dh'fhàs focal Dé; agus mheudaich eadhaigh àireamh nan deisciobul gu ro mhòr ann an Ierusalem; agus bha cuid-eachd mhòr do na sagartaibh ùmhal do'n chreidimh.

8 Agus rinn Stephan, làn do chreidimh agus do chumhachd, mìorbhuilean agus comharan mòra ann meas an t-sluaigh.

9 An sin dh'èirich dream àraidh do'n t-ionagag, ris an abrar *sionagag* nan Libertineach¹, agus nan Cirenianach, agus mhuinntir Alecsandria, agus na dream o Chìlicia, agus o'n Asia, a' deasboireachd ri Stephan.

10 Agus cha b'urrainn iad cur an aghaidh a' ghliocais agus an spioraid leis an do labhair e.

11 An sin thug iad a steach an uaigh-nidheas daoine a thubhairt, Chuala sinne e labhairt bhriathra toibheumach an aghaidh Mhaois, agus Dhé.

12 Agus dluisg iad suas an sluagh, agus na seanairean, agus na sgrìobhaichean, agus thàinig iad air, agus ghlac iad e, agus thug iad an làthair na comhairle e.

13 Agus chuir iad suas fianuisan brèige, a thubhairt, Cha'n 'eil an duine so a' sgur do labhairt bhriathra toibheumach² an aghaidh an ionaid naoimh so, agus an lagha.

14 Oir chuala sinn e ag ràdh, gu'n sgrìos an t-Iosa so o Nasaret an t-àit so, agus gu'n caochail e na gnàthanna³ a thug Maois dhuinne.

15 Agus air dhoibh-san uile a bha 'nan suidhe sa' chomhairle amharc gu geur air, chunnaic iad a'ghaidh mar a'ghaidh aingil.

CAIB. VII.

1 *Air do Stephan comas fhaghail freagairt air a shon féin, 2 nochd e gu'n d'rinn Abraham aoradh do Dhia gu taitneach; 37 gu'n d'thug Maois féin fàmais mu Chrìosd; 51 chrònuich e na h-Iudaich air son an ceannaire, agus morta Chrìosd.*

AN sin thubhairt an t-àrd-shagart, Am bheil ma ta na nithe so mar so?

2 Agus thubhairt esan, Fheara, a bhràithre, agus aithriche, éisidibh; Dh'fhoillsicheadh Dhia na glòire d'ar n-athair Abraham, 'nuair a bha e ann am Mesopotamia, mun do ghabh e còmhnuidh ann an Charan.

3 Agus thubhairt e ris, Rach a mach á d' thir féin, agus o d' chinneach, agus thig chum na tìre a nochdas mise dhuit.

4 An sin chaidh esan a mach á talamh nan Caldéach, agus ghabh e còmhnuidh ann an Charan: agus as a sin, an déigh bàis 'athar, dh'atharraich se e do'n fhear-ann so anns am bheil sibhse nis 'nur còmhnuidh.

5 Agus cha d'thug e dha oighreachd *sambith* ann, cha d'thug *fiu* leud troidhe: goidheadh gheall e gu'n tugadh e mar sheilbh e dha féin agus d'a shliochd 'na dhéigh, ged nach robh fathast duine cloinne aige.

6 Agus labhair Dia air an dòigh so, Gu'm biodh a shliochd air chuairt ann an dùth-aich choigrich, agus gu'n deanadh iad tràillean diubbh, agus gu'm buineadh iad gu h-òle *riu* rè ceithir cheud bliadhna.

7 Agus air a' chinneach sin d'am bi iad-san fò dhaorsa, bheir mise breth, arsa Dia: agus an déigh nan nithe sin thig iad a mach, agus ni iad seirbhis dhomh-sa anns an àit so.

8 Agus thug e dha coimhcheangal⁴ an timchioll-ghearraidh: agus mar sin ghni *Abraham* Isaac, agus thimchioll-ghearr se e air an ochdamh là: agus *ghin* Isaac Iacob, agus Iacob an dà phrìomh-athair dheug.

9 Agus a' gabhail farmaid, reic⁵ na prìomh-aithriche Ioseph do'n Eiphit: ach bha Dia maille ris,

10 Agus shaor se e as a thrioblaidibh uile, agus thug e deadh-ghean⁶ agus gliocas da an làthair Pharaoh rìgh na h-Eiphit; agus chuir se e 'na uachdaran air an Eiphit, agus air a theaghlach féin uile.

11 Nis thàinig gorta agus àmhghar mòr air an Eiphit uile, agus air talamh Chan-aain; agus cha d'fhuair ar n-aithriche teachd-an-tìr⁷.

12 Ach an uair a chuala Iacob gu'n robh arbhar san Eiphit, chuir e mach ar n-aithriche air tìs.

13 Agus airan dara *uair* rinneadh Ioseph aithnichte d'a bhràithribh; agus rinneadh cinneach Ioseph follaiseach do Pharaoh.

14 An sin chuir Ioseph *fios* uath, agus ghairm e d'a ionnsuidh Iacob 'athair, agus a luchd-dàimhe uile, cuig anama deug agus tri fichead.

15 Agus chaidh Iacob sìos do'n Eiphit, agus fhuair e bàs, e féin agus ar n-aithriche.

16 Agus ghiùlaineadh thairis iad gu Sicheam, agus chuireadh iad anns an àit-adhlaic a cheannaich Abraham air suim airgid o mhic Eموir, *athar* Shicheim.

17 Ach an uair a dhruid àm a' gheallaidh, a bhionnaich Dia do Abraham, dh'fhàs an sluagh agus rinneadh iad lionmhor san Eiphit,

18 Gus an d'èirich rìgh eile, do nach b'athlaine Ioseph.

19 Bhuin esan⁸ gu cuilbheirteach r'ar cinneach, agus rinn e òle air ar n-aithrichibh, air chor as gu'n d'thug e orra an

¹ Suoirsineach.

² maslach.

³ cleachdan, ordughan. ⁴ cinnradh, cinnhant.

⁵ chreic.

⁷ biatachd.

⁶ bàigh, fàbhor.

⁸ Ghiùlain se e féin.

naoidheana a thilgeadh mach, chum nach sìolaicheadh iad¹.

20 Anns an àm sin rugadh Maois, agus bha e ro sgiamhach, agus dh'altrumadh e trì mìosan ann an tigh 'athar:

21 Agus an uair a thilgeadh a mach e, thog nighean Pharaoh leatha e, agus dh'altrum² i e mar mhac dhì fèin.

22 Agus dh'fhòghlumadh³ Maois ann an uile ghliocas nan Eiphiteach, agus bha e cumhachdach am briathraibh agus an gnìomharaibh.

23 Agus an uair a bha e dà fhichead bliadhna iomlan a dh'aois, thàinig e 'na chridhe a bhràithre clann Israeil fhiosrachadh⁴.

24 Agus air dha duine àraidh *dhiubh* fhaicinn a' fulang eucoir, theasairg se e, agus air bualadh an Eiphitich dha, rinn e dioghaltas do'n fhear air an d'rimheadh an eucoir:

25 Oir shaoil e gu'n tuigeadh a bhràithre, gu'n tugadh Dia le a làimh-san saorsa dhoibh; ach cha do thuig iadsan.

26 Agus air an là 'na dhéigh sin nochd se e fèin doibh agus iad a' comhstri, agus b' àill leis sìth a dheanamh eatorra⁵, ag ràdh, A dhaoine, is bràithre sibh fèin; c'ar son a ta sibh a' deanamh eucoir air a chèile?

27 Ach chuir am fear a rinn an eucoir air a choimhearsnach uaiti e, ag ràdh, Cò a rinn thusa a'd' uachdaran agus a'd' bhrèitheamh oirne?

28 Am miann leat mise a mharbhadh, mar *mharbh thu* an t-Eiphiteach an dé?

29 An sin theich Maois air son an fhocail so, agus bha e 'na choigreach ann an dùthaich Mhidiain, far an do ghin e dithis mhac.

30 Agus an uair a choimhlionadh dà fhichead bliadhna, dh'fhoillsicheadh dha ann am fàsach beime Shina, aingeal an Tighearn ann an lasair theine ann am preas.

31 Agus an uair a chunnaic Maois so, ghabh e iongantais mu'n t-sealladh; agus air dha teachd am fagus gu beachdachadh air, thàinig guth an Tighearna d'a ionnsuidh,

32 *Ag ràdh, Is mise Dia t'aithriche, Dia Abraham, agus Dia Isaac, agus Dia Iacob.* An sin chrìochnuic Maois, agus cha robh chridhe aige amharc⁶.

33 An sin thubhairt an Tighearn ris, Fuasgail do bhrògan o d' chosaibh: oir is talamh naomh an t-àit air am bheil thu a'd' sheasamh.

34 Chunnaic mi gu cinnteach àmhghar mo phobuill a ta san Eiphit, agus chuala

mi an osnaidh, agus thàinig mi nuas g'an saoradh. Agus a nis thig, cuiridh mi do'n Eiphit thu.

35 Am Maois so fèin a dhiùlt iadsan, ag ràdh, Cò rinn uachdaran agus breitheamh dhìot-sa? esan chuir Dia *gu bhi* 'na uachdaran agus 'na fhear-saoraidh le làimh an aingil a dh'fhoillsicheadh dha sa' phreas.

36 Thug esan a mach iad an déigh dha mìorbhuilean, agus comharan a dheanamh ann an tìr na h-Eiphit, agus annas a' mhuir ruaidh, agus annas an fhàsach rè dhà fhichead bliadhna.

37 Is e so am Maois ud a thubhairt ri cloinn Israeil, Togaidh an Tighearn bhuir Dia suas fàidh dhuibh do 'ur bràithribh, cosmhuil rium-sa; ris-san éisidh sibh.

38 So esan a bha san eaglais anns an fhàsach, maille ris an aingeal a labhair ris ann am beinn Shina, agus maille r'ar n-aithrichibh-ne: neach a fhuair briathra na beatha' chum an toirt dhuinne:

39 Do nach b' àill le ar n-aithrichibh bli ùmhal, ach chuir iad uatha e, agus 'nan cridhe phill iad air an ais do'n Eiphit,

40 Ag ràdh ri Aaron, Dean dhuinne dée a théid romhainn: oir mu thimchioll a' Mhaois so, a thug a mach sinn à tìr na h-Eiphit, cha'n 'eil fhios againn ciod a dh'éirich dha.

41 Agus rinn iad laogh sna làithibh sin, agus thug iad iobairt do'n dealbh, agus rinn iad gairdeachas ann an oibribh an làmhha fèin.

42 An sin phill Dia, agus thug e thairis iad chum aoradh a dheanamh do armaill nèimh, a réir mar a ta e sgrìobhta ann an leabhar nam fàidhean, An d'thug sibh dhomh-sa beathaichean marbtha, agus iobairte rè dhà fhichead bliadhna anns an fhàsach, O a thigh Israeil?

43 Seadh, thog sibh suas pàillium Mholoich, agus reult bhuir dé Rempain, dealbhan a rinn sibh chum aoraidh dhoibh: uime sin atharraichidh mi sibh an taobh thall do Bhabylon.

44 Bha pàillium na fianuis aig ar n-aithrichibh san fhàsach, a réir mar a dh'aithean an ti a labhair ri Maois, gu'n deanadh se e a réir an t-samhlaidh⁸ a chunnaic e.

45 An ni a thug mar an ceudna ar n-aithriche a bha 'nan déigh, a steach maille ri Iosa do sheilbh nan Ciuneach, a thilg Dia a mach roimh ghnùis ar n-aithriche, gu làithibh Dhaibhidh;

46 Neach a fhuair deadh-ghean am fianuis Dhé, agus a dh'iarr pàillium fhaotainn do Dhia Iacob.

47 Ach thog Solamh tigh dha.

48 Gidheadh cha'n 'eil an ti a's àirde a'

¹ nach fàsadh sliochd orra, nach maireadh iad beò.

² dh'oil. ³ dh'ionnsaichidh.

⁴ dol a shealltuinn a bhràithre cloinn Israeil.

⁵ an cur réidh.

⁶ aire a thabhairt.

⁷ na beò-bhriathra.

⁸ an t-saimpleir, an t-samhlachais.

gabhaíl còmhnuidh ann an teampluibh làmh-dheanta; mar a ta am fàidh ag ràdh,

49 *Is e nèamh mo rìgh-chaitheir, agus an talamh stòl mo chos: cìod an tìgh a thogas sibh dhomh? a ta an Tighearn ag ràdh: no cìod e ionad mo thàimh?*

50 Nach do rinn mo làmh na nithe so uile?

51 A dhaoine cruaidh-mhuinealach, agus neo-thimchioll-ghearrta ann an crìdhe agus ann an clusaibh, tha sibh a ghnàth a' cur an aghaidh an Spioraid naoimh: mar a rinn bhuir n-aithriche, mar sin a ta sibhse a' *deanamh*.

52 Cò do na fàidhibh air nach d'rinn bhuir n-aithriche geur-leanmhuinn? agus mharbh siad iadsan a roimh-fhoillsich teachd an Fhìreìn ud; air an robh sibhse a nis 'nur luchd-brathaidh, agus 'nur mortairibh:

53 *Sibhse a fhuair a lagh le frithealadh nan aingeal, agus nach do choimhid e.*

54 'Nuair a chual iad na nithe sin, bha iad air an gonadh 'nan crìdhe, agus chas iad *am* fìaclan ris.

55 Ach air dhasan bhi làn do'n Spiorad naomh, dh'amhairc e gu geur suas gu nèamh, agus chunnaic e glòir Dhé, agus Iosa 'na sheasamh air deas làimh Dhé;

56 Agus thubhairt e, Feuch, tha mi faicinn nan nèamh fosgailte, agus Mac an duine 'na sheasamh air deas làimh Dhé.

57 An sin ghlaodh iadsan le guth mòr, agus dhruid¹ iad an chusan, agus leum iad air a dh'aon intinn.

58 Agus air dhoibh a thilgeadh a mach as a' bhaile², chlacl iad e: agus thilg na fianuisean an eudach sìos aig cosaibh òganaich, d'am b'ainm Saul.

59 Agus chlach iad Stephan, agus e a' gairm air *Criosd*, agus ag ràdh, A Thighearn Iosa, glac mo spiorad.

60 Agus air dha a leigeadh féin air a ghluinibh, ghlaodh e le guth mòr, A Thighearn, na cuir am peacadh so as an leth. Agus air dha so a ràdh, choidil e.

CAIB. VIII.

1 *Shearmonaicheadh an soisgeul ann an Samaria le Philip, a bhaist mòran, agus an measg chàich Simon an Druidh. 14 Thàinig Peadar agus Eoin a dh'aingneachadh na h-eaglais: 17 le cur an làmh air an dream a chreid, bha an Spiorad naomh air a thiodhlacadh.*

A GUS bha Saul ag aontachadh le a bhàs-san. Agus dh'éirich anns an àm sin geur-leanmhuinn mhòr an aghaidh na h-eaglais a bha ann an Ierusalem; agus bha iad uile air an sgapadh air feadh tìre Iudea, agus Shamaria, ach na h-ab-stoil a *mhàin*.

2 Agus ghiùlain daoine diadhaidh³ Ste phan *chum 'adhlaid*, agus rinn iad caoidh mhòr air a shon.

3 Ach bha Saul a' fàsachadh na h-eaglais, a' dol a steach do gach tìgh; agus ag tarruing a mach fhear agus bhan, chuir e am prìosan iad.

4 Uime sin dh'imich an dream a sgapadh, feadh gach àite, a' searmonachadh an fhocail.

5 An siu chaidh Philip sìos do bhaile Shamaria, agus shearmonaich e Criosd doibh.

6 Agus thug an sluagh a dh'aon toil aire do na nithibh a labhradh le Philip, ag éisdeachd ris⁴, agus a' faicinn nam mìorbhuile a rinn e.

7 Oir chaidh spiorada neòghlan a mach à mòran anns an robh iad, a' glaothaich le guth mòr: agus chaidh mòran air an robh am pàirilis⁵, agus a bha 'nam bacaich, a shlànuachadh.

8 Agus bha gairdeachas mòr sa' bhaile sin.

9 Ach bha roimhe sin duine àraidh sa' bhaile sin d'am b'ainm Simon, a ghnàthaich druidheachd, agus a mheall⁶ muinntir Shamaria, ag ràdh gu'm bu neach mòr éigin e féin.

10 Dhasan thug iad uile aire o'n bheagus a' mhòr, ag ràdh, Is e an duine so cumhachd mòr Dhé.

11 Agus thug iad an aire dha, a chionn gu'n do mheall e iad rè ùine fhada le a dhruidheachd.

12 Ach an uair a chreid iad Philip, a' searmonachadh nan nithe a bhuineas do rìoghachd Dhé, agus do ainm Iosa Criosd, bhaisteadh iad eadar fheara agus mhnà.

13 An sin chreid Simon féin mar an ceudna: agus an uair a bhaisteadh e, dh'fhan e maille ri Philip, agus a' faicinn nan comhara agus nam feartan a rinn-eadh, ghabh e iongantas ro mhòr.

14 Agus an uair a chuala na h-abstoil a bha ann an Ierusalem, gu'n do ghabh Samaria focal Dhé, chuir iad d'an ionnsuidh Peadar agus Eoin:

15 Agus an uair a chaidh iad sìos, ghuidh iad air anson gu'm faigheadh iad an Spiorad naomh.

16 (Oir cha d'thàinig e fathast a nuas air aon aca: ach a mhàin bhaisteadh iad ann an ainm an Tighearna Iosa.)

17 An sin chuir iad an làmhnan orra, agus fhuair iad an Spiorad naomh.

18 Agus an uair a chunnaic Simon gu'n robh an Spiorad naomh air a thoirt tre làmhnan nan abstol a chur orra, thairg e airgid dhoibh,

19 Ag ràdh, Thugaibh dhomh-sa mar

¹ dhùin, stop.

² cràbhach.

³ a' chaitheir.

⁴ riu.

⁵ crith-ghalar; palsy. Sasg.

⁶ a chuir uamhas air, a chuir 'nam breathal.

an ceudna an cumhachd so, ge b'e neach air an cuir mi *mo* làmh, gu'm faigh e an Spiorad naomh.

20 Ach thubhairt Peadar ris, Gu rachadh t'airgid am mugha maille riut féin, a chionn gu'n do mheas thu gu'm feudtadh tiodhlac Dhé a cheannach le h-airgid.

21 Cha'n 'eil agad cuid no crannchur sa' chùis so: oir cha'n 'eil do chridhe dìreach¹ am fianuis Dhé.

22 Gabh aithreachas uime sin do t'olc so, agus guidh air Dia, ma dh'fheudar gu maithear dhuit smuaine do chridhe.

23 Oir a ta mi 'gad fhaicinn ann an domblas na seirbhe, agus *fo* chuibhreach na h-eucorach.

24 An sin fhreagair Simon, agus thubhairt e, Guidhibh-sa an Tighearn air mo shon, nach tig aon do na nithibh sin a thubhairt sibh orm.

25 An sin air dhoibh-san fianuis a dheanamh agus focal an Tighearn a labhairt, phill iad gu Ierusalem, agus shearmonaich iad an soisgeul ann am mòran do bhaitibh nan Samaritanach.

26 Agus labhair aingeal an Tighearna ri Philip, ag ràdh, Eirich agus imich chum na h-àirde deas, chum na slighe a ta dol sìos o Ierusalem gu Gasa, a ta 'na fhàdach².

27 Agus dh'éirich e, agus dh'imich e: agus, feuch, duine àraidh, caillteanach o Etiopia, aig an robh mòr-ùghdarras fo Chandace ban-rìghinn na h-Etiopia, agus a bha os ceann a h-ionmhais uile, agus a bha air teachd gu Ierusalem chum aoradh a dheanamh,

28 Bha e a' pilltinn air ais, agus 'na shuidhe 'na charbad, agus bha e a' leughadh an fhàidh Esaias.

29 An sin thubhairt an Spiorad ri Philip, Imich am fagus, agus druid ris a' charbad so.

30 Agus ruith Philip d'a ionnsuidh, agus chual a se e a' leughadh an fhàidh Esaias, agus thubhairt e, Am bheil thu a' tuigsinn nan nithe a tha thu a' leughadh?

31 Agus thubhairt esan, Cionnus is urrainn mi, mur seòl neach éigin mi? Agus dh'iarr e air Philip teachd a nìos, agus suidhe maille ris.

32 A' chuibhrionn do'n sgrìobtuir a bha e leughadh, b'i so i, Thugadh e mar chaora chum marbhaidh; agus mar uan a ta 'na thosd am fianuis an fhir-lomairt, mar sin cha d'fhosgail e a bheul:

33 'Na 'sleachadh thugadh a bhreith-eanas air falbh: agus cò a nochdas a ghinealach? oir thogadh a bheatha o'n talamh.

34 Agus fhreagair an caillteanach, agus

thubhairt e ri Philip, Guidheam thu, co uime tha am fàidh ag ràdh so? uime féin, no mu neach éigin eile?

35 An sin dh'fhosgail Philip a bheul, agus a' tòiseachadh o'n sgrìobtuir sin, shearmonaich e Iosa dha.

36 Agus an uair a dh'imich iad air an t-slighe, thàinig iad gu h-uisge àraidh: agus thubhairt an caillteanach, Feuch, uisge; ciod a ta bacadh mise bhi air mo bhaisteadh?

37 Agus thubhairt Philip, Ma tha thu a' creidsinn le d' uile chridhe, feudaidd tu. Agus fhreagair e agus thubhairt e, Tha mi a' creidsinn gur e Iosa Crìosd Mac Dhé.

38 Agus dh'àithn e 'n carbad a sheasamh: agus chaidh iad sìos le chéile do'n uisge, araon Philip agus an caillteanach; agus bhaist se e.

39 Agus an uair a thàinig iad a nìos as an uisge, thug Spiorad an Tighearna Philip leis, agus cha'n fhac an caillteanach tuilleadh e: agus dh'imich e air 'aghaidh le gairdeachas.

40 Ach fhuaradh Philip ann an Asotos: agus shearmonaich e anns na bailtibh uile, a' dol troimh an *dùthaich*, gus an d'thàinig e gu Cesarea.

CAIB. IX.

1 Tha Saul, air dha bhi 'g imeachd gu Damascus, air a leagadh sìos gu talamh le solus, agus guth o nèamh: 10 ghairmeadh e chum na h-abstolachd, 18 agus bhaisteadh e le Ananias: 20 shearmonaich e Crìosd gu dàna. 31 Leigheas Peadar Eneas do'n phairilis; 38 thug e Tabita beò.

A GUS air do Shaul bhi fathast a' séideadh bagraidh, agus àir³ an aghaidh dheisciobul an Tighearna, chaidh e chum an àrd-shagairt.

2 Agus dh'iarr e litrichean uaith gu Damascus chum nan sionagoc, chum nam faigheadh e aon neach do'n t-slighe so, co aca b'fhir no mnà iad, gu'n tugadh e leis ceangailte gu Ierusalem iad.

3 Agus ag imeachd dha, tharladh⁴ gu'n do dhruid e ri Damascus: agus dhealraich gu h-obann mu'n cuairt air solus o nèamh.

4 Agus air tuiteam dha air an talamh, chual e guth ag ràdh ris, A Shaul, A Shaul, c'ar son a ta thu 'gam gheur-leannmuinn-sa?

5 Agus thubhairt esan, Cò thu, a Thighearn? Agus thubhairt an Tighearn, Is mise Iosa a ta thusa a' geur-leannmuinn: is cruaidh dhuitse breabadh an aghaidh nan dealg.

6 Agus air dhasan bhi air chrith agus làn uamhuinn, thubhairt e, A Thighearn, ciod is àill leat mise a dheanamh? Agus thubhairt an Tighearn ris, Eirich, agus rach⁵ a steach do'n bhaile, agus innsear dhuit ciod is còir dhuit a dheanamh

¹ ccart, treibhdhireach.

² troimh an fhàsach.

³ marbhaidh.

⁵ theirig, gabh.

⁴ thachair.

7 Agus sheas na daoine bha 'g imeachd uaille ris¹ nan tosd, a' cluinntinn a' ghutha, ach gun neach air bith fhaicinn.

8 Agus dh'éirich Saul o'n talamh, agus air fosgladh a shùil dha, cha'n air fhac e neach² air bith: ach air dhoibh breith air a làimh, threòraich iad e gu Damascus.

9 Agus bha e trì làithean gun radharc, agus cha d'ith agus cha d'òl e nì air bith.

10 Agus bha deisciobul àraidh ann an Damascus, d'am b'ainm Ananias; agus thubhairt an Tighearn ris ann am foillseachadh³, Ananias. Agus thubhairt esan, Feuch a ta mi an so, a Thighearn.

11 Agus thubhairt an Tighearn ris, Eirich, agus imich do'n t-sràid, ris an abrar Direach, agus iarr ann an tigh Iudais, duine o Tharsus d'an goirear Saul: oir feuch, a ta e ri urnuigh,

12 Agus chunnaic e ann am foillseachadh duine d'an ainm Ananias, a' teachd a steach, agus a' cur a làimhe air, chum gu'm faigheadh e a radharc.

13 An sin fhreagair Ananias, A Thighearn, chuala mi o mhòran mu'n duine so, cia lion olc a rinn e do d' naomhaibh ann an Ierusalem:

14 Agus a ta an so ùghdarras aige o uachdaranaibh nan sagart, iadsan uile a cheangal a ta gairm air t'ainm-sa⁴.

15 Ach thubhairt an Tighearn ris, Imich; oir is soitheach taghta dhomh-sa e, chum m'ainm a ghiùlan am fianuis nan Cinn-each, agus rìghrean, agus chloinn Israeil.

16 Oir nochdaidh mise dha cia mòr na nithe a's éigin da fhulang air sgàth m'ainme-sa.

17 Agus dh'imich Ananias, agus chaidh e steach do'n tigh; agus chuir e a làmhan air, agus thubhairt e, A Shaul, a bhràthair, chuir an Tighearn, (*eadhon* Iosa a dh'fhoillsicheadh dhuitse anns an t-slighe air an d'thàinig thu,) mise chum gu'm faigheadh tu do radharc, agus gu'm biodh tu air do lionadh leis an Spiorad naomh.

18 Agus air ball thuit o'shuilb mar gu'm biodh lannan; agus dh'aisigeadh a radharc dha gun dàil, agus air dha éirigh, bhaisteadh e.

19 Agus an uair a ghabh e biadh, neartaicheadh e. An sin bha Saul làithean àraidh maille ris na deisciobluibh a bha ann an Damascus.

20 Agus air ball shearmonaich e Iosa⁴ anns na sionagogaibh, gur esan Mac Dhé.

21 Ach bha na h-uile a chual e fo uamhas, agus thubhairt iad, Nach e so esan a bha sgrios ann an Ierusalem iadsan a bha gairm air an ainm so, agus a thàinig an so chum na crìche so, gu'n tugadh e ceang-

aillte iad dh'ionnsuidh uachdarana nan sagart?

22 Ach bu mhòid a neartaicheadh Saul, agus chuir e gu h-amhladh na h-Iudhaich a bha chòmhnuidh ann an Damascus, a' dearbhadh gur e so an Crìosd.

23 Agus air dol do mhòran làithean seachad, rinn na h-Iudhaich comhairle r'a chéile esan a mharbhadh:

24 Ach thugadh fios do Shaul air am féill⁵: agus bha faire aca air na geatach-aibh a là agus a dh'oidhche chum a mharbhadh.

25 An sin ghabh na deisciobuil e san oidhche, agus chuir iad a mach thar a' bhalla e, agus leig iad sìos ann an cliabh e.

26 Agus an uair a thàinig Saul gu Ierusalem, dh'fheuch e ri e féin a cheangal ris na deisciobluibh: ach bha eagal orra uile roimhe, agus cha do chreid iad gu'm bu deisciobul e.

27 Ach ghabh Barnabas d'a ionnsuidh e, agus thug e chum nan abstol e, agus chuir e'n céill doibh cionnus a chunnaic e'n Tighearn anns an t-slighe, agus gu'n do labhair e ris, agus cionnus a shearmonaich e gu dàna ann an Damascus an ainm Iosa.

28 Agus bha e maille riu a' teachd a steach, agus a' dol a mach ann an Ierusalem.

29 Agus labhair e gu dàna an ainm an Tighearna Iosa, agus rinn e deasboireachd an aghaidh nan Greugach: ach chuir iadsan rompa esan a mharbhadh.

30 Ach an uair a thuig na bràithre so, thug iad sìos e gu Cesarea, agus chuir iad air falbh gu Tarsus e.

31 An sin bha fois aig na h-eaglaisibh troimh Iudea uile, agus Ghalile, agus Shlamar, agus air dhoibh bhi air an togail suas, agus a' siubhal ann an eagal an Tighearn, agus ann an comhfhurtachd⁶ an Spioraid naoimh, mheudaicheadh gu mòr iad.

32 Agus tharladh, air do Pheadar imeachd troimh gach àite, gu'n deachaidh e sìos mar an ceudna chum nan naomh a bha gabhail còmhnuidh ann an Lida.

33 Agus fhuair e an sin duine àraidh d'am b'ainm Eneas, a bha rè ochd bliadhna air a leabaidh, agus e gu tinn leis a' phairilis⁷.

34 Agus thubhairt Peadar ris, Eneais, tha Iosa Crìosd ga d' leigheas: éirich agus dean do leabadh. Agus air ball dh'éirich e.

35 Agus chunnaic iadsan uile e, a bha chòmhnuidh ann an Lida, agus ann an Saron, agus phill iad chum an Tighearn.

36 A nis bha ban-deisciobul àraidh ann an Iopa d'am b'ainm Tabita, 'se sin, air

¹ nì.

² sealladh.

³ a tha air an gairm air t'ainm.

⁴ Crìosd.

⁶ còmhnaidh, cuideachadh

⁵ ceilg.

⁷ chrith-ghalar.

eadar-theangachadh, Dorcas: bha a' bhean so làn do dheadh oibribh, agus do dh'éiribh a rinn i.

37 Agus tharladh anns na làithibh sin, air dhi bhi gu tinn gu'n d'fhuair i bàs: Agus air dhoibh a h-ionnlad, chuir iad ann an seòmar uachdarach i.

38 Agus air do Lida bhi fagus do Iopa, agus air cluinntinn do na deiscioblubh gu'n robh Peadar an sin, chuir iad dithis dhaoine d'a ionnsuidh, a' guidhe air e theachd d'an ionnsuidh gun dàil.

39 An sin dh'éirich Peadar, agus chaidh e maille ri u. Agus an uair a bha e air teachd, threòraich iad suas e do'n t-seòmar uachdarach: agus sheas na bantraichean uile làimh ris a' caoineadh, agus a' nochdadh nan còta agus nan trusgan a rinn Dorcas ann feadh a bha i maille ri u.

40 Ach air do Pheadar an cur a mach uile, leig se e féin air a ghluinibh agus rinn e urnuigh; agus air dha tionndadh ris a' chorp, thubhairt e, A Thabita, éirich. Agus dh'fhosgail e sùilean: Agus air dhi Peadar fhaicinn, dh'éirich i 'na suidhe.

41 Agus thug e a làmh dhi, agus thog e 'na seasamh i; agus an uair a ghairm e na naoimh agus na bantraichean, chuir e 'nan làthair beò i.

42 Agus fhuaradh fios air so tre Iopa uile; agus chreid mòran anns an Tigh-earn.

43 Agus tharladh gu'n d'fhan e mòran do làithibh ann an Iopa maille ri Simon àraidh fear-deasachaidh leathair.

CAIB. X.

1 *Air do Chornelius, duine cràbhach, àithne fhaotainn o aingeal, chuir e fios air Peadar, 11 a bha air a theagasg ann an taisbean gun e dheanamh tàir air na Cinnich: 34 Am feadh a bha e searmonachadh Chrìosd do Chornelius agus d'a chuideachd, thàinig an Spiorad naomh nuas orra, agus bhaisteadh iad.*

AGUS bha duine àraidh ann an Cesa-rea, d'am b'ainm Cornelius, ceannard-ceud do'n chuideachd ris an abrar a' chuideachd Eadailteach,

2 Duine cràbhach, agus air an robh eagail Dé maille r'a thigh uile, a bha toirt mòrain déirce do'n t-sluagh, agus a' deanamh urnuigh ri Dia a ghnàth.

3 Chunnaic e ann an sealladh¹ gu soilleir, mu thimchioll na naothadh uaire do'n là, aingeal Dé a' teachd a stigh d'a ionnsuidh, agus ag ràdh, A Chorneliuis.

4 Agus air dhasan amharc gu geur air, ghabh e eagail, agus thubhairt e, Ciod e, a Thighearn? Agus thubhairt e ris, Chaidh t'urnuighean agus do dh'éircean suas mar chuimhneachan ann am fianuis Dé.

5 Agus a nis cuir daoine gu Iopa, agus cuir fios air Simon, d'an co-ainm Peadar:

6 Tha e air aoidheachd maille ri Simon àraidh fear-deasachaidh leathair, aig am bheil a thigh làimh ris an fhairge: innsidh esan duit ciod is còir dhuit a dheanamh.

7 Agus an uair a dh'fhalbh an t-aingeal a labhair ri Cornelius, ghairm e d'a ionnsuidh dithis do mhuinntir a thighe, agus saighdear cràbhach do'n dream a bha ghnàth a' feitheamh air;

8 Agus an uair a chuir e an t-ìomlan an céill doibh, chuir e iad gu Iopa.

9 Agus air an là màireach, nuair a bha iadsan air an turas, agus a' teachd am fagus do'n bbaile, chaidh Peadar suas air mullach an tighe a dheanamh urnuigh, mu thimchioll na seathadh uaire².

10 Agus dh'fhàs e ro ocrach, agus bu mhiann leis biadh itheadh: ach am feadh a bha iadsan ag ulluchadh, thuit e ann an neul,

11 Agus chunnaic e nèamh fosgailte, agus soitheach àraidh a' teachd a nuas d'a ionnsuidh, mar bhraith-lin³ mhòir, ceangailte air a ceithir oisnibh⁴, agus air a leigeadh sìos air an talamh;

12 Anns an robh gach uile ghnè bheathaiche ceithir-chosach na talmhainn, agus bheathaiche allta, agus bhiasda snaigeach, agus eunlaith an athair.

13 Agus thàinig guth d'a ionnsuidh, Eirich, a Pheadair; marbh agus ith.

14 Ach thubhairt Peadar, Nì h-eadh, a Thighearn; oir cha d'ith mi riamh aon ni coitichionn⁵ no neòghlan.

15 Agus thubhairt an guth ris a ris an dara uair, Na nithe sin a ghlan Dia, na gairm thusa coitichionn.

16 Agus rinneadh so trì uairean: agus thogadh an soitheach a ris suas gu nèamh.

17 A nis an uair a bha Peadar fo amharus ann féin ciod bu chiall do'n t-sealladh a chunnaic e, feuch, bha na daoine a chuireadh o Chornelius, an déigh dhoibh tigh Shimoin iarraidh, 'nan seasamh aig an doras.

18 Agus air gairm dhoibh, dh'fheòraich iad an robh Simon d'an co-ainm Peadar, air aoidheachd an sin.

19 Am feadh a bha Peadar a' smuaineachadh air an t-sealladh, thubhairt an Spiorad ris, Feuch, tha triuir dhaoine ga d'iarraidh.

20 Uime sin éirich, agus gabh sìos, agus imich maille ri u, gun amharus air bith a bhi ort: oir is mise a chuir uam iad.

21 Agus chaidh Peadar sìos chum nan daoine, [a chuireadh d'a ionnsuidh o Chornelius,] agus thubhairt e, Feuch, is

¹ foillseachadh, taisbeanadh.

² i. e. meadhan-là.

³ lìon-eudach.

⁵ cumanta.

⁴ beannaibh.

mise an ti a tha sibh ag iarraidh : ciod e an t-aobhar mu'n d'fhàinig sibh ?

22 Agus thubhairt iadsan, Fhuair Cornelius an ceannard-ceud, duine cothromach, air am bheil eagal Dé, agus fo dheadh ainm¹ aig cinneach nan Iudhach uile, rabhadh o Dhia le aingeal naomh, fios a chur ortsa d'a thigh, agus briathran a chluinntinn uait.

23 An sin ghairm e steach iad, agus thug e aoidheachd *dhoibh*. Agus air an là màireach dh'imich Peadar maille riu, agus chaidh dream àraidh do na bràithribh o Iopa maille ris.

24 Agus air an là màireach chaidh iad a steach do Chesarea : agus bha Cornelius a' feitheamh riu, agus air gairm a luchd-dàimh agus a chàirde disle an ceann a chéile.

25 Agus an uair a bha Peadar a' dol a steach, choinnich Cornelius e, agus thuit e sìos aig a chosaibh, agus rinn e aoradh *dha*.

26 Ach thog Peadar suas e, ag ràdh, Seas suas ; is duine mise mar an ceudna.

27 Agus ag còmhraidh ris, chaidh e steach, agus fhuair e mòran cruinn.

28 Agus thubhairt e riu, Tha fios agaibh gu bheil e mi-dhligeach do dhuine a tha 'na Iudhach, comhludair a chumail ri neach a tha do chinneach eile, no teachd am fagus da ; ach nochd Dia dhomh-sa, gun duine air bith a ghairm coitichionn no neoèghlan.

29 Uime sin thàinig mise 'nuair a chuir-eadh fios orm, gun aon ni a bha 'na aghaidh : air an aobhar sin tha mi feòraich c'ar son a chuir sibh fios orm ?

30 Agus thubhairt Cornelius, O'n cheathramh là gus an uair so bha mi a' deanamh trasgaidh ; agus air an naothadh uair bha mi deanamh urnuigh ann mo thigh, agus, feuch, sheas duine a'm làthair aun an eudach dealrach².

31 Agus thubhairt e, A Chorneliuis, fhuair t'urnuigh éisdeachd³, agus tha do dhéircean air an cuimhneachadh am fianuis Dé.

32 Uime sin cuir gu Iopa, agus cuir fios air Simon, d'an co-ainm Peadar ; tha e air aoidheachd ann an tigh Shimoin, fear-deasachaidh leathair, làimh ris a' mhuir ; neach, 'nuair a thig e, a labhras riut.

33 Uime sin chuir mi air ball fios ort ; agus is maith a rinn thu teachd. Air an aobhar sin tha sinne uile an so a làthair am fianuis Dé, a dh'éisdeachd nan uile nithe a tha air an àithneadh dhuit-se le Dia.

34 An sin dh'fhosgail Peadar a bheul, agus thubhairt e, Gu fìrinneach tha mi 'g

aithneachadh nach 'eil Dia ag amharc air pearsaibh seach a chéile :

35 Ach anns gach uile chinneach a ta an neach air am bheil 'eagal-san, agus a ta 'g oibreachadh fìreantachd, taitneach aige.

36 Am focal a chuir Dia gu cloinn Israeil a' searmonachadh sìth tre Iosa Criosd, (neach is e Tighearna nan uile,)

37 Am focal sin is aithne dhuibh, a sgaoileadh air feadh tìre Iudea uile, agus a thòisich o Ghàille, an déigh a' bhaistidh a shearmonaich Eoin :

38 Cionnus a dh'ung Dia Iosa o Nasaret leis an Spiorad naomh, agus le cumhachd ; neach a chaidh mu'n cuairt a' deanamh maith, agus a' slànuchadh nan uile a bha air am foireigheachadh⁴ leis an diabhl : oir bha Dia maille ris.

39 Agus tha sinne 'nar fianuisibh air na h-uile nithibh a rinn e, araon ann an tìr nan Iudhach, agus ann an Ierusalem ; neach a mharbh iad, 'ga chrochadh air crann :

40 Esan thog Dia suas air an treas là, agus nochd se e gu follaiseach ;

41 Cha'n ann do'n t-sluagh uile, ach do fhianuisibh, a thaghadh le Dia roimh-làimh, *eadhon* dhuinne, a dh'ith agus a dh'òl maille ris an déigh dha éirigh o na marbhaibh.

42 Agus dh'àithn e dhuinne searmonachadh do'n t-sluagh, agus fianuis a dheanamh gur esan a dh'orduicheadh le Dia 'na bhreitheamh air bheòthaibh agus air mharbhaibh.

43 Dhasan tha na fàidhean uile a' toirt fianuis, gu'm faigh gach neach a chreideas ann maitheanas 'nam peacaibh tre 'ainm-san.

44 Am feadh a bha Peadar fathast a' labhairt nam briathra sin, thuirling⁵ an Spiorad naomh orra-san uile a chual am focal.

45 Agus ghabh na creidich do'n timchioll-ghearradh, a mheud diubh 'sa thàinig maille ri Peadar, iongantas mòr, do bhrìgh gu'n do dhòirteadh air na Cinnich mar an ceudna tiodhlac an Spioraid naomh.

46 Oir chuala siad iad a' labhairt le teangaibh, agus ag àrd-mholadh Dhìe. An sin fhreagair Peadar,

47 Am feud neach sam bith uisge a thoirmeasg, chum nach rachadh iad so a bhaisteadh, a fhuair an Spiorad naomh, co maith ruinne ?

48 Agus dh'orduich e iad a bhi air am baisteadh, ann an ainm an Tighearna. An sin ghuidh iad air fantuinn maille riu làithean àraidh.

¹ air am bheil deadh theisteas.

² ro gheal.

³ dh'éisdeadh ri t'urnuigh.

⁴ thugadh fo cheannsal.

⁵ thuit.

CAIB. XI.

1 *Fhuaradh cron do Pheadair air son comhlàdar a ghleidheadh ris na Cinnich : 4 dh'innis e a reuson, agus thuitim sin r'a luchd-ditidh. 19 Sgaoileadh an soisgeul feadh Phenice, agus Chipruis, agus Antioch. 26 Dh'ainmicheadh na deisciobuil 'nan Crìosduidhean air tùs ann an Antioch, &c.*

AGUS chuala na h-abstoil agus na bràithrean a bha ann an Iudea, gu'n do ghabh na Cinnich mar an ceudna ri focal Dé.

2 Agus an uair a chaidh Peadar suas gu Ierusalem, rinn iadsan a bha do'n tim-chioll-ghearradh conspoid ris.

3 Ag ràdh, Chaidh thu steach a dh'ionnsuidh dhaoine nach robh air an timchioll-ghearradh, agus dh'ith thu maille riu.

4 Agus thòisich Peadar, agus chuir e'n t-iomlan an céill doibh an ordugh, ag ràdh,

5 Bha mi ann am baile¹ Iopa ri urnuigh; agus ann an neul chunnaic mi sealladh, Soitheach àraidh a' teachd a nuas, mar bhràith-lìn mhòir, air a leigeadh a nuas o nèamh air a ceithir oisnibh²; agus thàinig i a m' ionnsuidh-sa.

6 Agus air dhomh beachdachadh gu geur oirre, thug mi fa'near, agus chummic mi beathaiche ceithir-chosach na talmhainn, agus na fiadh-bheathaiche, agus na biasda snàigeach, agus eunlaith an athair.

7 Agus chuala mi guth ag ràdh rium, Eirich, a Pheadair; marbh agus ith.

8 Ach thubhairt inise, Nì h-eadh, a Tighearn: oir cha deachaidh riamh aon ni coitichionn no neòghlan a steach do m' bheul.

9 Ach fhreagair an guth mi an dara uair o nèamh, Na nithe a ghlan Dia na meas thusa neòghlan³.

10 Agus rinneadh so tri uairean: agus thogadh an t-iomlan a ris suas gu nèamh.

11 Agus, feuch, air ball bha triuir dhaoine air teachd chum an tighe anns an robh mi, a chuireadh o Chesarea a m' ionnsuidh.

12 Agus thubhairt an Spiorad rium dol maille riu, gun amharus air bith a bhi orm. Agus chaidh mar an ceudna an t-seatlmair bhràithre so maille rium, agus chaidh sinn a steach do thigh an duine:

13 Agus nochd e dhuinn cionnus a chumnaic e aingeal 'na sheasamh 'na thigh, a thubhairt ris, Cuir daoine gu Iopa, agus cuir fios air Simon, d'an co-ainm Peadar;

14 Neach a labhras briathra riut, leis an tèarnar⁴ thu féin agus do thigh uile.

15 Agus an uair a thòisich mi air labhairt, thuirling⁵ an Spiorad naomh orrasan, mar oirne air tùs.

16 An sin chuimhnich mise focal an Tighearna, mara a thubhairt e, Bhaist Eoin gun amharus le h-uisge; ach baistear sibhse leis an Spiorad naomh.

17 Uime sin ma thug Dia dhoibh-san a cho-ionnan tiodhlaca ruinne, a chreid anns an Tighearn Iosa Crìosd, cò mise gu'm bithium comasach bacadh a chur air Dia?

18 Agus an uair a chual iad na nithe so, thosd iad, agus thug iad glòir do Dhia, ag ràdh, Thug Dia ma seadh mar an ceudna do na Cinnich aithreachas chum na beatha.

19 A nis chaidh iadsan a sgapadh a mach leis an àmhghar⁶ a dh'éirich air sou Stephain, gu ruig Phenice, agus Ciprus, agus Antioch, gun am focal a labhairt ri aon neach ach ris na h-Iudhaich a mhàin.

20 Agus bha cuid diubh o Chiprus, agus o Chirene, dream air dhoibh dol a steach do Antioch, a labhair ris na Greug-aich, a' searmonachadh an Tighearna Iosa.

21 Agus bha làmh an Tighearna maille riu: agus chreid àireamh mhòr, agus phill iad chum an Tighearn.

22 Agus thàinig sgeula air na nithibh sin gu cluasaibh na h-eaglais a bha ann an Ierusalem; agus chuir iad Barnabas uatha, chum gu'n rachadh e gu Antioch:

23 Neach an uair a thàinig e, agus a chunnaic e gràs Dhé, a rinn gairdeachas, agus a dh'earail orra uile, gu'n dlùth-leannadh iad ris an Tighearn le rùn cridhe.

24 Oir bha e 'na dhuine maith, agus làn do'n Spiorad naomh, agus do chreidimh. Agus chuireadh sluagh mòr ris an Tighearn.

25 An sin chaidh Barnabas gu Tarsus, a dh'iarraidh Shaul.

26 Agus air dha fhaotainn, thug e leis e gu Antioch. Agus tharladh, gu'n robh iad rè bliadhna iomlain air an cruinneachadh maille ris an eaglais, agus gu'n do theagaisg iad sluagh mòr; agus gu'n do ghoireadh Crìosduidhean do na deisciobluibh air tùs ann an Antioch.

27 Agus anns na làithibh sin thàinig fàidhean o Ierusalem gu Antioch.

28 Agus air seasamh suas do aon diubh d'am b'ainm Agabus, dh'fhoillsich e troimh an Spiorad, gu'm biodh gorta mhòr air feadh an domhain uile⁷: nì mar an ceudna a thachair ri linn Chlaidiuis Cheasair.

29 An sin chuir gach aon do na deisciobluibh roimhe, a réir a chomais, còmh-nadh a chur chum nam bràithrean, a bha chòmhluuidh ann an Iudea.

30 Nì mar an ceudna a rinn iad, agus

¹ caithir.

² beannaibh.

³ coitichionn.

⁴ saorar.

⁵ thuit.

⁶ trioblaid.

⁷ na tìre uile.

chuir iad e chum nan seanairean le làimh Bharnabais agus Shaul.

CAIB. XII.

1 *Rinn Herod geur-leanmhuinn air na Crisduidh-ibh, 2 mharbh e Seumas, 3 agus chuir e Peadar am prìosan, naach a thugadh a mach le aingeal tre urnuighibh na h-eaglais: 23 Bhuaileadh Herod le aingeal, agus bhàsaich e gu truagh.*

ANIS mu'n àm sin, shìn Herod an rìgh a làmhnan, a dheanamh uile air dream àraidh do'n eaglais.

2 Agus mharbh e Seumas bràthair Eoin leis a' chlàidheamh.

3 Agus an uair a chunnaic e gu'n do thaitinn sin ris na h-Iudhaich, chaidh e air aghaidh a ghhlacadh Pheadair mar an ceudna. (Agus b'iad làithean an arain neo-ghoirtichte a bh'ann.)

4 Agus ghlac e agus chuir e'm prìosan e, agus thug se e r'a ghleidheadh do cheithir cheathrar shaighdearan, a rùn a thoirt a mach do'n t-sluagh an déigh na càisege.

5 Air an aobhar sin ghleidheadh Peadar anns a' phrìosan: ach bha bith-urnuigh¹ air a deanamh leis an eaglais ri Dia air a shon.

6 Agus an uair a b'àill le Herod a thoirt a mach, san oidhche sin féin bha Peadar 'na chodal eadar dithis shaighdearan, ceangailte le dà shlabhruidh: agus bha'n luchd faire fa chomhair an doruis a' coimhead a' phrìosain.

7 Agus, feuch, thàinig aingeal an Tighearn air, agus dhealraich solus anns a' phrìosan: agus bhuail e taobh Pheadair, agus dhùisg se e, ag ràdh, Eirich gu grad. Agus thuit a cheanglaiche d'a làmhailbh.

8 Agus thubhairt an t-aingeal ris, Crislaich thu féin, agus ceangail ort do bhonn-bhrògan²: agus rinn e mar sin. Agus thubhairt e ris, Tilg t'fhalluin³ umad, agus lean mise.

9 Agus chaidh e mach, agus lean se e; agus cha robh fhios aige gu'n robh e fìor an ni a rinneadh leis an aingeal: ach shaoil e gu'm bu taisbean⁴ a chunnaic e.

10 Agus air dhoibh dol troimh⁵ 'n cheud agus an dara faire, thàinig iad chum a' gheata iaruin⁶ a ta treòrachadh do'n bhaile, a dh'fhosgail doibh leis féin: agus air dol a mach dhoibh, chaidh iad air an aghaidh troimh aon sràid, agus air ball dh'fhalbh an t-aingeal uaith.

11 Agus an uair a thàinig Peadar d'a ionnsuidh féin, thubhairt e, A nis tha fhios agam gu fìrinneach gu'n do chuir an Tighearn aingeal uaith, agus gu'n do

shaor e mi o làimh Heroid, agus o uile dhùil pobuill nan Iudhach.

12 Agus an uair a smuainich e air a' chùis⁷, thàinig e gu tigh Mhuire màthar Eoin, d'an co-ainm Marcus, far an robh mòran cruinn, agus iad ri urnuigh.

13 Agus an uair a bha Peadar a' bualadh doruis a' gheata, thàinig gruagach d'am b' ainm Roda a dh'éisdeachd.

14 Agus an uair a dh'aithnich i guth Pheadair, tre aoibhneas cha d'fhosgail i an geata, ach ruith i stigh, agus dh'innis i gu'n robh Peadar 'na sheasamh aig a' gheata.

15 Ach thubhairt iad rithe, Tha thu air mhi-chéill. Ach bha ise toirt dearbh-chinnt⁸ e gu'n robh e mar sin. An sin thubhairt iad, Is e 'aingeal a ta ann.

16 Ach bhunaich Peadar a' bualadh an doruis: agus an uair a dh'fhosgail iad, agus a chunnaic iad e, bha iad làn uamhais.

17 Ach air dhasan smèideadh orra le a làimh iad a bhì 'nan tosd, chuir e'n céill doibh cionnus a thug an Tighearn as a' phrìosan e. Agus thubhairt e, Innsibh na nithe so do Sheumas agus do na bràithribh. Agus air dol a mach dha, chaidh e gu àit eile.

18 Agus air teachd do'n là bha iomairt⁹ nach bu bheag am measg nan saighdearan, ciod a thachair do Pheadar.

19 Agus an uair a dh'iarr Herod e, agus nach d'fhuair se e, rannsaich e an luchd-coimhead, agus dh'orduich e an toirt air falbh chum peana¹⁰. Agus chaidh e sìos o Iudea gu Cesarea, agus rinn e còmh-nuidh an sin.

20 Agus bha fearg mlior aig Herod ri muinntir Thirus agus Shidoìn: ach thàinig iadsan a dh'aon inntinn d'a ionnsuidh, agus air dhoibh Blastus seomradair an rìgh a thoirt air an crann, dh'iarr iad sìth; do bhrìgh gu'n robh an tìr air a beathachadh le tìr an rìgh.

21 Agus air là orduichte, air do Herod bhì air a sgeudachadh le eudach rioghail, agus 'na shuidhe air a rìgh-chaitheir, labhair e gu deas-bhriathrach riu¹¹.

22 Agus rinn an slugh iolach¹², ag ràdh, Is guth Dé so, agus cha ghuth duine.

23 Agus air ball bhuail aingeal an Tighearn e, do bhrìgh nach d'fhuair e a' ghloir do Dhia: agus dh'itheadh le cnuimhibh e, agus chaidh an deò as.

24 Ach dh'fhàs focal an Tighearn agus mheudaicheadh e.

25 Agus phill Barnabas agus Saul o Ierusalem, air dhoibh am ministrileachd

¹ gnàth-urnuigh, sìor-urnuigh.

² chuarain.

³ do bhrat, t'eudach-uachdair.

⁴ shealladh.

⁶ buaireas.

⁸ gair.

⁵ a' cathachadh.

⁷ rinn e òraid doibh.

a choimhlionadh, a' toirt leo mar an ceud-na Eoin, d'an co-ainm Marcus.

CAIB. XIII.

1 Thaghadh Pòl agus Barnabas gu dol chum nan Cinneach. 7 Mu thimchioll Shergiuus Pauluis, agus Elimais an druith. 14 Shearmonaich Pòl aig Antioch, gur e Iosa an Crìosd. 42 Chreid na Cinnich, ach labhair na h-Iudhaich an aghaidh na fìrinn.

ANIS bha anns an eaglais a bha aig Antioch, fàidhean, agus luchd-teagaisg àraidh; mar a ta Barnabas, agus Simeon ris an abrar Niger, agus Lucius o Chirene, agus Manaen comh-alta Heroid an Tetrairc, agus Saul.

2 Agus air dhoibh bhì ri ministrileachd do'n Tighearn, agus a' trasgadh, thubhairt an Spiorad naomh, Cuiribh air leth dhomh-sa Barnabas agus Saul, chum na h-oibre gus an do ghairm mi iad.

3 An sin air dhoibh trasgadh agus urnuigh a dheanamh, agus an làmhnan a chur orra, leig iad uatha iad.

4 Mar sin air dhoibh-san a bhì air an cur a mach leis an Spiorad naomh, chaidh iad sìos gu Seleucia; agus o sin sheòl iad gu Ciprus.

5 Agus air dhoibh bhì ann an Salamis, shearmonaich iad focal Dé ann an sionagogaibh nan Iudhach: agus bha mar an ceudna Eoin aca mar fhear-frithealaidh.

6 Agus an uair a chaidh iad troimh an eilean gu Paphos, fhuair iad druith àraidh, fàidh bréige, Iudhach, d'am b'ainm Bar-iesus:

7 Neach a bha maille ri Sergius Paulus an t-uachdaran, duine tuigseach; air dhasan Barnabas agus Saul a ghairm d'a ionnsuidh, dh'iarr e focal Dé a chluinntinn.

8 Ach chuir Elimas an druith, (oir is ann mar so a dh'eadar-theangaichear 'ainm,) 'nan aghaidh, ag iarraidh an t-uachdaran a thionndadh o'n chreidimh.

9 An sin air bhì do Shaul, (d'an goirear Pòl,) làn do'n Spiorad naomh, agus ag amharc gu geur air,

10 Thubhairt e, O thusa a ta làn do'n uile cheilg, agus do'n uile dhroch-bheirt, a mhic an diabhuil, a nàmhaid na h-uile fhèrantachd, nach seuir thu do fhìradh shlighean dìreach an Tighearna?

11 Agus feuch a nis, tha làmh an Tighearn ort, agus bithidh tu dall, gun a' ghrian fhaicinn rè tamuill. Agus air ball thuit ceò agus dorchadas air; agus a' tionndadh mu'n cuairt, dh'iarr e dream a theòraicheadh air làmh e.

12 An sin an uair a chunnaic an t-uachdaran an nì a rinneadh, chreid e, air dha bhì làn iongantais mu theagasg an Tighearna.

13 Agus air gabhail luinge do Phòl agus

d'a chuideachd o Phaphos, thàinig iad gu Perga na Pamphilia: agus air do Eoin am fàgail, phill e gu Ierusalem.

14 Ach air dhoibh-san imeachd o Pherga, thàinig iad gu Antioch na Pisidia, agus chaidh iad a steach do'n t-sionagog air là na sàbaid, agus shuidh iad.

15 Agus an dèigh leughadh an lagha agus nam Fàidhean, chuir uachdaran na sionagoig d'an ionnsuidh, ag ràdh, Fheara agus a bhràithre, ma tha focal earail agaibh do'n t-sluagh, abraibh e.

16 An sin an uair a sheas Pòl suas agus a smèid e orra le 'làmh, thubhairt e, Fheara Israeil, agus sibhs e air am bheil eagal Dé, éisdibh.

17 Thagh Dia a' phobuill so Israeil ar n-aithriche, agus dh'ardaich e'm pobull 'nuair a bha iad air choigrich ann an tìr na h-Eiphit, agus le làmh àrd thug e iad a mach aise.

18 Agus mu thimchioll ùine dhà fhichead bliadhna ghiùlain e le'm beusaibh¹ anns an fhàsach.

19 Agus an uair a sgrios e seachd cinnich ann an tìr Chanaain, roinn e am fearann orra-san le crannchur.

20 Agus 'ua dhéigh sin mu thimchioll ceithir cheud agus leth-cheud bliadhna, thug e dhoibh breitheamhna, gu Samuel am fàidh.

21 Agus 'na dhéigh sin dh'iarr iad rìgh: agus thug Dia dhoibh Saul mac Chis, duine do thréibh Bheniamin, rè dhà fhichead bliadhna.

22 Agus air dha esan atharrachadh, thog e suas Daibhidh gu bhì 'na rìgh dhoibh; d'an d'thug e mar an ceudna fianuis, ag ràdh, Fhuair mi Daibhidh mac Iese, duine a réir mo chridhe féin, a nì m' uile thoil.

23 Do shliochd an duine so thog Dia suas do Israel a réir a gheallaidh Slàn-uirghear, eadhon Iosa:

24 Air do Eoin roimh a theachd-san, baisteadh an aithreachais air tús a shearmonachadh do phobull Israeil uile.

25 Agus mar a choimhlion Eoin a thriall², thubhairt e, An ti a ta sibh a' saòilsinn is mise, cha mli e. Ach feuch, a ta neach a' teachd a'm' dhéigh, nach airidh mi air brògan a chos fhuasgladh.

26 Fheara agus a bhràithre, a chlann fine Abraham, agus a mhead agaibh air am bheil eagal Dé, is ann do 'ur n-ionnsuidh-sa a chuireadh focal na slàinte so.

27 Oir iadsan a ta chòmhnuidh ann an Ierusalem, agus an uachdaran, air dhoibh bhì aineolach airsan, agus air foclaibh nam Fàidhean a ta air an leughadh gach sàbaid, le esan a dlùteadh choimhlion siad iad.

¹ dh'altrum e iad.

² a thurus, a chùrsa.

28 Agus ged nach d'fhuair iad coire bàis air bith ann, dh'iarr iad air Pilat gu'n cuirteadh esan gu bàs.

29 Agus an uair a choimhlion iad na h-uile nithe bha sgriobhta mu 'thimchioll, thug iad a nuas o'n chrann e, agus chuir iad ann an uaigh e.

30 Ach thog Dia suas o na marbhaibh e:

31 Agus chunncas e rè mòrain làithean leo-san a chaidh suas maille ris o Ghalile gu Ierusalem, dream a ta 'nam fiauuisibh dha-san do'n t-sluagh.

32 Agus a ta sinne a' soisgeulachadh dhuibh-se a' gheallaidh¹, a rinneadh do na h-aithrichibh,

33 Gu'n do choimhlion Dia so dhuinne an clann, air dha Iosa thogail suas; mar a ta e sgriobhta mar an ceudna san dara Salm, Is tu mo Mhac-sa, an diugh ghin mi thu.

34 Agus mar dhearbhadh gu'n do thog e suas e o na marbhaibh, gun e a philltinn air ais tuilleadh chum truaillidheachd, thubhairt e mar so, Bheir mise dhuibh tròcaire cinnteach Dhaibhidh.

35 Uime sin thubhairt e mar an ceudna ann an *Salm* eile, Cha'n fhuiling thu do d' Aon naomh gu'm faic e truaillidheachd:

36 Oir an déigh do Dhaibhidh a ghinealach féin a riarachadh a réir toil Dhé, choidil e, agus chuireadh e chum 'aithriche, agus chunnaic e truaillidheachd:

37 Ach an ti a thog Dia suas, cha'n fhac e truaillidheachd.

38 Uime sin biodh fhios agaibh-sa, fheara agus a bhràithre, gur ann tre'n duine so a ta maithneas phcacanua air a shearmonachadh dhuibh:

39 Agus trid-san a ta gach neach a chreideas air a shaoradh o na h-uile nithibh, o nach robh e'n comas duibh bhi air bhuir saoradh le lagh Mhaois.

40 Thugaibh aire uime sin, nach tig oirbh an ni a ta air a ràdh anns na Fàidhibh;

41 Fenchaidh, a luchd-tarcuis, agus gabhaibh iongantas, agus rachadh as duibh²: oir oibrichidh mise obair ann bhuir làithibh-sa, obair nach creid sibh idir, ge do chuireadh duine an céill duibh e.

42 Agus an uair a chaidh na h-Iudhaich a mach as an t-sionagag, ghuidh na Cinnich gu'n rachadh na briathra so a labhairt riu féin an t-sàbaid 'na dhéigh sin.

43 A nis an uair a sgaoil an coimhthional, lean mòran do na h-Iudhaich agus do na proselitich chràbhach Pòl agus Barnabas: agus labhair iadsan riu, agus

chuir iad impidh orra fuireach ann an gràs Dhé.

44 Agus air an là sàbaid a b'fhaigse, is beag nach do chruinnich ann baile gu h-iomlan a dh'éisdeachd ri focal Dé.

45 Ach an uair a chunnaic na h-Iudhaich na slòigh, lionadh iad le h-eud³, agus labhair iad an aghaidh nan nithe sin a labhradh le Pòl, a' labhairt 'nan aghaidh agus a' tabhairt toibheim.

46 An sin dh'fhàs Pòl agus Barnabas dàna, agus thubhairt iad, B'éigin focal Dé bhi air a labhairt ribhse air tùs: ach do bhligh gu'n do chuir sibh cùl ris, agus gur i bhuir breth oirbh féin nach a'ridh sibh air a' bheatha mhaireamh, feuch, a ta sinne a' pilltinn chum nan Cinnich.

47 Oir is ann mar sin a dh'àithn an Tighearna dhuim, ag ràdh, Chuir mi thu mar sholus do na Cinnich, chum gu'm bitheadh tu mar shlàinte gu iomall na talmhainn.

48 Agus an uair a chuala na Cinnich so, rinn iad gairdeachas, agus ghloirail iad focal an Tighearna: agus chreid a mheud 'sa bha orduichte⁴ chum na beatha mair-eannaich.

49 Agus sgaoileadh focal an Tighearna feadh na tìre uile.

50 Ach bhrosnuich na h-Iudhaich na mnàì chràbhach agus urramach, agus daoine uaisle⁵ na caithreach, agus thog iad geur-leanmhuinn air Pòl agus Barnabas, agus thilg iad a mach as an crìoch-aibh iad.

51 Ach chrath iadsan duslach an cos dhiubh 'nan aghaidh, agus thàinig iad gu Iconium.

52 Agus bha na deisciobuil air an lìonadh le h-aobhneas, agus leis an Spiorad naomh.

CAIB. XIV.

¹ Dhian-ruagadh Pòl agus Barnabas o Iconium.

² Aig Lìstra teigheas Pòl crìoplach: uime sin mheasadh iad 'nan diathaibh. ³ 19 Chlachadh Pòl: 21 chaidh iad troimh iomadh eaglais, a' daingeachadh nan deisciobul ann an creidimh agus ann am foighidin.

AGUS tharladh ann an Iconium, gu'n deachaidh iad araon a steach do shionagag nan Iudhach, agus gu'n do labhair iad air chor as gu'n do chreid cuideachd mhòr do na h-Iudhaich, agus mar an ceudna do na Greugaich.

2 Ach bhrosnuich na h-Iudhaich mhi-chreideach, agus lion iad do dhroch rùn inntinn nan Cinneach an aghaidh nam bràithre.

3 Uime sin dh'fhan iad aimsir fhada a' labhairt gu dàna mu thimchioll an Tigh-

¹ ag innseadh deadh sgéil duibhse eadhon a' gheallaidh. ² rachaibh as an t-scathadh.

³ trùth.

⁴ air an cur an o'dugh.

⁵ prìomh-dhaoine.

earn, a rinn fianuis do fhocal a ghràis, agus a thug fa'near comharan agus miorbhuilean a bhi air an deanamh le'n làmh-aibh-san.

4 Ach bha sluagh a' bhaile air an roinn: agus bha cuid diubh leis na h-Iudhaich, agus cuid eile leis na h-abstolaibh.

5 Agus an uair a thugadh ionnsuidh araoon leis na Cinnich, agus mar an ceudna leis na h-Iudhaich, maille r'an uachdaran-aibh, chum iadsan a mhaslachadh agus a chlachadh,

6 'Nuair a thuig iadsan so, theich iad gu Lистра agus Derbe, bailte do Licaonia, agus chum na dùthcha mu'n cuairt:

7 Agus bha iad a' searmonachadh an t-soisgeil an sin.

8 Agus bha am an Lистра duine àraidh gun lùth 'na chosaibh 'na shuidhe, a bha bacach o bhroinn a mhàthar, neach nach d'imich riamh:

9 Chual esan Pòl a' labhairt: neach air dha amharc gu geur air, agus a thuigsinn gu robh creidimh aige chum a leigheas,

10 Thubhairt e le guth àrd, Seas suas gu dìreach air do chosaibh. Agus leum esan agus dh'imich e.

11 Agus an uair a chunnaic an sluagh an ni a rinn Pòl, thog iad an guth, ag ràdh ann an cànan Licaonia, Tha na Déa air teachd a nuas an coslas dhaoine d'ar n-ionnsuidh-ne.

12 Agus ghoir iad do Bharnabas, Iupiter; agus do Phòl, Mercurius, do bhrìgh gu'm b'e am prìomh-fhear-labhairt e.

13 An sin thug sagart Iupiteir, a bha fa chomhair an caithreach-san, tairbh agus blàth-fhleasgaidh¹ chum nan geata, agus b'àill leis iobairt a dheanamh maille ris an t-sluagh.

14 Ach an uair a chuala na h-abstol Barnabas agus Pòl so, reub iad an eudach, agus ruith iad a steach am measg an t-sluaigh, ag éigheach,

15 Agus ag ràdh, A dhaoine, c'ar son a ta sibh a' deanamh nan nithe so? oir is daoine sinne cosmhuil ribh féin thaobh fulangais², a' searmonachadh dhuibh-se, pilltinn o' na uithibh diomhain sin chum an Dé bheò, a rinn nèamh agus an talamh, agus an cuan, agus na h-uile nithe a ta annata:

16 Neach anns na linnibh a chaidh seachad, a dh'fhuiling do na h-uile Chinnich imeachd 'nan sliabh nan féin.

17 Gidheadh, cha d'fhàg se e féin gun fhianuis, a' deanamh maith, agus a' toirt dhuinn uisge o nèamh, agus aimsire tar-bhach, a' lìonadh ar cridheacha le biadh agus le subhachas.

18 Agus ag ràdh nan nithe so dhoibh,

is gann a chum iad an sluagh gun iobairt a dheanamh dhoibh.

19 Agus thàinig Iudhaich o Antioch agus o Iconium, agus chomhairlich iad an sluagh, agus air dhoibh Pòl a chlachadh, tharruing iad a mach as a' bhaile e, a' saoilinn gu robh e marbh.

20 Ach air seasamh do na deisciobluibh m'a thimchioll, dh'éirich e, agus chaidh e steach do'n bhaile; agus air an là màir-each dh'imich e maille ri Barnabas gu Derbe.

21 Agus an uair a shearmonaich iad an soisgeul do'n bhaile sin, agus a rinn iad mòran dheisciobul, phill iad gu Listra, agus Iconium, agus Antioch,

22 A' neartachadh anama nan deisciobul, agus ag earail³ orra buanachadh sa' chreidimh, agus a' teagasg gur ann tre iomadh àmhghar is éigin duinn dol a steach do rìoghachd Dhé.

23 Agus an uair a dh'orduich iad sean-airean dhoibh anns gach eaglais, agus a rinn iad urnuigh maille ri trasgadh, dh'earb siad iad ris an Tighearn, anns an do chaidh iad.

24 Agus an déigh dhoibh dol troimh Phisidia, thàinig iad gu Pamphilia.

25 Agus air dhoibh am focal a labhairt ann am Perga, chaidh iad sìos gu Atalia:

26 Agus sheòl iad as a sin gu Antioch, an t-àit o'n d'earbadh iad ri gràs Dhé, chum na h-oibre a choimhion iad.

27 Agus an uair a thàinig iad, agus a chruinnich iad an eaglais an ceanna chéile, dh'aithris iad meud nan nithe a rinn Dia leo, agus gu'n d'fhosgail e dorus creidimh do na Cinnich.

28 Agus dh'fhan iad an sin aimsir nach bu bheag maille ris na deisciobluibh.

CAIB. XV.

1 Dh'éirich comsachadh mòr mu thimchioll an timchioll-ghearraidh: 6 chum na h-abstol comhairle mu'n chùis sin, 22 agus chuir iad ordugh na comhairle ann an litricheibh chum nan eaglaisean. 36 Chuir Pòl agus Barnabas a mach air a chéile, agus dhealaich iad.

A GUS theagaisg dream àraidh, a thàinig a nuas o Iudea, na bràithre, ag ràdh, Mur timchioll-ghearrar sibh a réir gnàtha Mhaois, cha 'n eil e'n comas duibh bhi air bhur teanadh⁴.

2 Uime sin air do Phòl, agus do Barnabas comsachadh agus deasboireachd nach bu bheag a bhi aca ri, dh'orduich iad Pòl agus Barnabas, agus dream àraidh eile dhuibh féin, a dhol suas chum nan abstol agus nan sean-airean gu Ierusalem mu thimchioll na ceisde so.

3 Agus air dhoibh bhi air an toirt air an aghaidh leis an eaglais, chaidh iad troimh

¹ lus-chrùna.

² aig am bheil comh-aighe ribh féin.

³ a' guidhe.

⁴ slànuchadh.

Phenice, agus Shamaria, a' cur an céill iompachaidh nan Cinneach: agus thug iad aobhneas mòr do na bràithribh uile.

4 Agus an uair a thàinig iad gu Ierusalem, ghabhadh riu leis an eaglais, agus na h-abstolaibh, agus na seanairibh, agus dh'innis iad meud nan nithe a rinn Dia leo-san.

5 Ach dh'érich dream àraidh do bharail nam Phairiseach a bha 'nan creidich, ag ràdh, Gur còir an timchioll-ghearradh, agus àithneadh *dhoibh* lagh Mhaois a choimhead.

6 Agus thàinig na h-abstoil agus na seanairean an ceann a chéile a dh'fheuchainn mu'n chùis so.

7 Agus an dèigh mòrain deasboireachd, dh'érich Peadar agus thubhairt e riu, Fheara *agus* a bhràithre, tha fhios agaibh o cheann fhada gu'n do ròghnuich Dia 'nar measg-ne, o m' bheul-sa gu'n cluinneadh na Cinnich focal an t-soisgeil, agus gu'n creideadh iad:

8 Agus rinn an Dia d'an aithne an cridhe, fianuis dhoibh, a' tabhairt an Spioraid naomh dhoibh, mar a *thug e* dhuinne;

9 Agus cha d'rinn e eadar-dhealachadh eadar sinne agus iadsan, a' glanadh an cridhe le creidimh.

10 C'ar son uime sin a nis a ta sibh a' brosnachadh Dhé¹, le cuing a chur air muineal nan deiseicobul, nach robh aon chuid ar n-aithriche no sinne comasach air a giùlan?

11 Gidheadh a ta sinn a' creidsinn, tre ghràs an Tighearna Iosa Crìosd, gu saorar sinn amhuil mar iadsan.

12 An sin dh'fhan a' chuideachd uile 'nan tosd, agus thug iad éisdeachd do Bharnabas agus do Phòl, ag innseadh meud nan comhara agus nam mìorbhuile a rinn Dia leo-san am measg nan Cinneach.

13 Agus an dèigh dhoibh bhi 'nan tosd, fhreagair Seumas, ag ràdh, Fheara *agus* a bhràithre, éisdibh riumsa:

14 Chuir Simeon an céill cionnus a dh'fhiosraich Dia na Cinnich air tús le pobull a ghabhail as am measg d'a ainm féin.

15 Agus do so tha briathra nam fàidhean a' co-fhreagairt; a réir mar a ta e sgrìobhta,

16 An dèigh so pillidh mi, agus togaidh mi suas a ris paillun Dhaibhidh, a ta air tuiteam; agus togaidh mi a ris an ni a thuit deth, agus cuiridh mi suas e:

17 Chum gu'n iarr fuigheall nan daoine an Tighearn, agus na h-uile Chinnich, air an goirear m'ainn-sa, tha an Tighearn ag ràdh, a ta deanamh nan nithe sin uile.

18 Aithnichte do Dhia tha 'oibre féin

uile o thoiseach an t-saoghail.

19 Uime sin is i mo bhreth-sa, nach cuir sinn mì-shuaimhneas² orra-sa do na Cinnich, a ta air pilltinn chum Dhé:

20 Ach gu'n sgrìobh sin d'an ionnsuidh, iad a sheachnadh truailleadhachd iodhola, agus strìopachais, agus ni tachdta, agus fola.

21 Oir a ta aig Maois o na linnibh cian anns gach baile daoine a ta 'g a shearmonachadh, air dha bhi air a leughadh gach là sàbaid anns na sionagogaibh.

22 An sin chunncas iomchuidh do na h-abstolaibh, agus do na seanairibh, maille ris an eaglais uile, daoine taghta dhiubh féin a chur gu Antioch, maille ri Pòl agus Barnabas; *eadhon*, Iudas d'an co-ainm Barsabas, agus Silas, daoine inbheach am measg nam bràithre:

23 Agus sgrìobh iad litriche leo air an dòigh so, Tha na h-abstoil, agus na seanairean, agus na bràithrean a' cur beannachd chum nam bràithre do na Cinnich a ta ann an Antioch, agus ann an Siria, agus ann an Cilicia:

24 Do bhrìgh gu'n cuala sinne, gu'n do chuir dream àraidh a chaidh uainne mì-shuaimhneas oirbh le briathraibh, ag atharrachadh³ bhur n-inntinn, ag ràdh, *Gur còir dhuibh* bhi air bhur timchioll-ghearradh, agus an lagh a choimhead: do nach d'thug sinne a *leithid sin* a dh'àithne:

25 Chunncas iomchuidh duinne, air dhuinn bhi cruinn a dh'aon toil, daoine taghta a chur do 'ur n-ionnsuidh-sa, maille ri ar bràithribh gràdhach Barnabas agus Pòl;

26 Daoine a thug an anama féin air son ainme ar Tighearna Iosa Crìosd.

27 Chuir sinn uime sin Iudas agus Silas uainn, a dh'innseas *dhuibh* na nithe ceudna le cainnt bheoil.

28 Oir chunncas iomchuidh do'n Spiorad naomh agus dhuinne, gun ni air bitli tuilleadh a chur oirbh a dh'uallaich ach na nithe feumail so;

29 Sibh a sheachnadh nithe a chaidh ìobradh do iodholaibh, agus fola, agus ni tachdta, agus strìopachais: uatha so ma choimhèdas sibh sibh féin, ni sibh gu maith. Slàn leibh.

30 Uime sin an uair a leigeadh uatha iad, thàinig iad gu Antioch: agus air cruinneachadh an t-sluaigh dhoibh, thug iad seachad an litir.

31 Agus an uair a leugh iad *sin*, rinn iad gairdeachas air son na comhfhurtachd.

32 Agus air bhi do Iudas agus do Shìlas 'nam fàidhibh iad féin, le mòran bhriathraibh dh'earaillich agus neartaich iad na bràithre.

33 Agus air fuireach rè ùine dhoibh,

¹ a' cur cathachaidh air Dia, a' dearbhadh Dhé.

² dragh.

³ a' daingneachadh.

leigeadh air falbh an sìth iad o na bràithribh chum nan abstol.

34 Gidheadh chunncas iomchuidh do Shilas còmhnuidh a dheanamh an sin.

35 Dh'fhan Pòl mar an ceudna agus Barnabas ann an Antioch, a' teagasg agus a' searmonachadh, maille ri mòran eile mar an ceudna, fòcail an Tighearna.

36 Agus an déigh làithean àraidh, thubhairt Pòl ri Barnabas, Pilleamaid agus faiceamaid ar bràithre, anns gach baile anns an do shearmonaich sinn focal an Tighearna, cionnus a ta iad.

37 Agus b' àill le Barnabas iad a thoirt Eoin, d' an co-ainm Marcus, leo.

38 Ach cha do mheas Pòl gu'm bu chòir dhoibh esan, a dh'fhalbh uatha o Phamphilia, agus nach deachaidh maille riu chum na h-oibre, a thoirt leo.

39 Dh'éirich uime sin conspoid eatorra cho dian, as gu'n do sgaradh o chéile iad: agus mar sin thug Barnabas leis Marcus, agus chaidh e air luing gu Ciprus;

40 Ach thagh Pòl Silas, agus dh'imich e, air dha bhi air earbsadh ri gràs Dé leis na bràithribh.

41 Agus shiubhail e troimh Shiria agus Chìlicia, a' daingneachadh¹ 'nan eaglaisean.

CAIB. XVI.

1 *Thimchioll-ghearr Pòl Timoteus: 7 ghairmeadh e leis an Spiorad o dhùthaich gu dùthch; 14 dh'iompaich e Lidia: 16 thilg e a mach spiorad fiosachd: 19 uime sin bha e fèin agus Silas air an sgiùrsadh, agus air an cur am prìosan. 26 Dh'fhosgladh dorsan a' phrìosan, agus dh'iompaich eadh an dorsair.*

AN sin thàinig e gu Derbe agus Listra: agus, feuch, bha deisciobul àraidh an sin, d'am b' ainm Timoteus, mac mnà àraidh do'n chinneach Iudhach a bha 'na creideach; ach bu Ghreugach a b'athair dha:

2 A bha fo dheadh ainm aig na bràithre a bha ann an Listra agus ann an Iconium.

3 Bha toil aig Pòl am fear so a dhol a mach maille ris; agus ghabh e agus thimchioll-ghearr se e, air son nan Iudhach a bha anns na h-àitibh sin: oir bha fios aca uile gu'm bu Ghreugach 'athair.

4 Agus mar a shiubhail iad troimh na bailtibh, thug iad doibh na h-orduighean r'an coimhead, a dh'orduicheadh leis na h-abstolaibh agus na seanairibh a bha ann an Ierusalem.

5 Agus mar sin bha na h-eaglaisean air an daingneachadh anns a' chreidimh, agus mheudaicheadh iad gach là an àireamh.

6 A nis an uair a chaidh iad troimh Phrìgia, agus tìr Ghalatia, agus a bhacadh

dhoibh leis an Spiorad naomh am focal a labhairt san Asia,

7 An déigh dhoibh teachd gu Misia, dh'fheuch iad ri dol gu Bitinia: ach cha do leig an Spiorad² leo.

8 Agus air dhoibh gabhail seachad air Misia, chaidh iad sìos gu Troas.

9 Agus chunncas sealladh³ le Pòl san oidhche: Sheas duine àraidh o Mhacedonia, agus ghuidh e air, ag ràdh, Thig thairis gu Macedonia agus cuidich leinne.

10 Agus an uair a chunnaic e an sealladh, air ball dh'iarr sinn dol thairis gu Macedonia, a' dearbh-thuigsinn gu'n do ghairm an Tighearna sinn chum an soisgeul a shearmonachadh dhoibh.

11 Uime sin air dhuinn long a ghabhail o Throas, thàinig sinn gu dìreach gu Samotracia, agus air an là 'na dhéigh sin gu Neapolis;

12 Agus o sin gu Philipi, ceud⁴ bhaile na cuid sin do Mhacedonia, agus b'ur-threabhachas⁵ e: agus bha sinn a' còmh-nuidh anns a' bhaile sin làithean àraidh.

13 Agus air là na sàbaid chaidh sinn a mach as a' bhaile ri taobh aimhne, far am b' àbhaist urnuigh a dheanamh⁶; agus air dhuinn suidhe, labhair sinn ris na mnaibh a chruinnicheadh an sin.

14 Agus dh'éisd bean àraidh ruinn d'am b' ainm Lidia, bean-reicidh purpur⁷, o bhaile Thiatira, a bha deanamh aoraidh do Dhia; aig an d'fhosgail an Tighearna a cridhe, ionnus gu'n d' thug i aire do na nithibh a labhradh le Pòl.

15 Agus an uair a bhaisteadh i, agus a teaghlach, ghuidh i oirnn, ag ràdh, Ma mheas sibh mise bhi dileas do'n Tighearna, thigibh a steach do m' thigh, agus dean-aibh còmhnuidh ann. Agus cho-éignich i sinn.

16 Agus tharladh, ag dol dhuinne chum urnuigh, gu'n do thachair oirn banoglsch àraidh aig an robh spiorad fiosachd, a thug mòr-bhuannachd d'a maighstiribh le fiosachd a dheanamh;

17 Lean ise Pòl agus sinne, agus ghlaodh i, ag ràdh, Is iad na daoine so seirbhisich an Dé a's ro àirde, a ta a' nochdadh dhuinne slighe na slàinte.

18 Agus rinn i so rè mòran do làithibh. Ach air do Phòl a bhi doilich, thionndaidh e agus thubhairt e ris an Spiorad, A ta mi toirt orduigh dhuit ann an ainm Iosa Crìosd dol a mach àsde. Agus chaidh e mach air an uair sin féin.

19 Agus an uair a chunnaic a maighstir-eann gu'n d'fhalbh dòchas⁸ am buannachd, rug iad air Pòl agus air Silas, agus tharruing iad do'n mhargadh iad, chum nan uachdaran;

¹ a' neartachadh. ² Spiorad Ios. ³ taisbean.

⁴ prìomh. ⁵ cholamhuinn; colony. Sasg.

⁶ far am b' àbhaist do thigh urnuigh a bhi.

⁷ corcur.

⁸ earbsa.

20 Agus air dhoibh an toirt chum luchd-riaghlaidh a' bhaile, thubhairt iad, Tha na daoine so a' buaireadh ar baile gu ro mhòr, air dhoibh bhí 'nan Iudhaich,

21 Agus a ta iad a' teagasg ghnàthanna nach 'eil ceaduichte dhuinne a ghabhail no leantuinn, do bhrìgh gur Romhanaich sinn.

22 Agus dh'éirich an sluagh dh'aon-fheachd 'nan aghaidh: agus reub na h-uachdarain an eudach diubh, agus dh'aitlín iad an sgiùrsadh le slataibh.

23 Agus an déigh dhoibh iomadh buille a leagadh orra, thilg iad am prìosan iad, a' toirt sparraidh do fhear-coimhead a' phrìosan an gleidheadh gu tèarainte.

24 Neach air dha an àithne sin fhaotainn, a thilg iad do'n phrìosan a b' fhaide a stigh, agus a dhaingnich an cosa sa' cheap.

25 Agus mu mheadhon-oidhche air do Phòl agus do Shilas urnuigh a dheanamh, sheinn iad laoidh-mholaidh do Dhia; agus chuala na prìosanaich iad.

26 Agus gu h-obann bha crith-thalmhainn mhòr ann, air chor as gu'n do chrathadh bunaitean a' phrìosan: agus air ball dh'fhosgladh na dorsan uile, agus dh'fhuasgladh cuibhreacha gach neach aca.

27 Agus air do fhear-coimhead a' phrìosan dùsgadh á codal, agus air faicinn dorsa a' phrìosan fosgailte, tharruing e a chlaidheamh, air ti¹ e féin a mharbhadh, a' saòilsinn gu robh na prìosanaich air teicheadh.

28 Ach ghlaodh Pòl le guth àrd, ag ràdh, Na dean cron sam bith ort féin; oir tha sinn uile an so.

29 Agus air gairm soluis dasan, leum e steach, agus thàinig e air chrith, agus thuit e sìos an làthair Phòil agus Shilais;

30 Agus air dha an toirt a mach, thubhairt e, A mhaighstirean, ciod is còir domh a dheanamh chum gu tèarnar² mi?

31 Agus thubhairt iadsan, Creid anns an Tighearn Iosa Crìosd, agus tèarnar thu féin, agus do thigh.

32 Agus labhair iad focal an Tighearna ris, agus riu-san uile a bha 'na thigh.

33 Agus air dha an toirt leis air an uair sin féin do'n oidhche, nìg e an creuchdan; agus bhaisteadh e féin, agus a mhuinntir uile, gun dàil.

34 Agus an uair a thug e d'a thigh iad, chuir e bord rompa, agus rinn e gairdeachas maille r'a theaghlach uile, a' creidsinn ann an Dia.

35 Agus air teachd do'n là, chuir an luchd-riaghlaidh na maoir uatha, ag ràdh, Leig air an comas na daoine sin.

36 Agus dh'innis fear-coimhead a'

phrìosan na briathra so do Phòl, Gu'n do chuir an luchd-riaghlaidh fios uatha sibhse a leigeadh as: uime sin rachaidh a mach, agus imichibh an sìth.

37 Ach thubhairt Pòl riu, an déigh dhoibh ar sgiùrsadh gu follaiseach gun ar dìteadh, agus gur Romhanaich sinn, thilg iad am prìosan sinn; agus a nis am b'àill leo ar cur a mach an uaignidheas? cha'n eadh gu deimhin; ach thigeadh iad féin agus thugadh iad a mach sinn.

38 Agus dh'innis na maoir na briathra sin do na h-uachdaranaibh: agus ghabh iad eagal an uair a chual iad gu'm bu Romhanaich iad.

39 Agus thàinig iad agus chuir iad impidh orra, agus air dhoibh an toirt a mach, ghuidh iad orra imeachd a mach as a' bhaile.

40 Agus air dol a mach as a' phrìosan doibh, chaidh iad a steach do thigh Lidia: agus an uair a chunnaic iad na bràithre, thug iad comhfhurtachd dhoibh, agus dh'imich iad rompa.

CAIB. XVII.

1 Shearmonaich Pòl aig Tesalonica, 4 far an do chreid cuid agus an d'rinn cuid eile geur-leann-mhuinn air. 10 Chuireadh e gu Berea, agus shearmonaich e an sin. 13 Rinneadh geur-leann-mhuinn air; 15 thàinig e gu baile na h-Aithne, agus shearmonaich e dhoibh an Dia beò.

A NIS air dhoibh imeachd troimh Amphipolis, agus Apolonia, thàinig iad gu Tesalonica, far an robh sionagog aig na h-Iudhaich:

2 Agus mar bu ghnàth le Pòl, chaidh e steach d'an ionnsuidh, agus air trì làitheibh sàbaid reusonaich³ e riu as na sgrìobtuiribh,

3 Gam fosgladh agus a' dearbhadh gu'm b'éigin do Chrìosd fulang, agus éirigh a ris o na marbhaibh: agus gur e an t-Iosa so a ta mise a' searmonachadh dhuibh, Crìosd.

4 Agus chreid cuid diubh, agus lean iad ri Pòl agus ri Silas: agus do na Greugach chràbhach buidheann mhòr, agus do na mnaibh inbheach àireamh nach bu bheag.

5 Ach air do na h-Iudhaich mi-chreid-each bhí air am brosnachadh le tiùth⁴, ghabh iad d'an ionnsuidh droch dhaoine àraidh do na corraibh-margaidh⁵, agus air tioul cuideachd mòire dhuibh, chuir iad am baile uile thar a chéile, agus chuairtich iad tigh Iason, agus dh'ìarr iad an toirt a mach chum an t-sluaigh.

6 Agus an uair nach d'fhuair siad iad, tharruing iad Iason, agus bràithrean àraidh chum uachdaran a' bhaile, ag éigheach, Tha na daoine so a chuir an

¹ fu rùn. ² saorar, slànuichear. ³ thagair.

⁴ farmad, eud.

⁵ do'n ghràisg.

saoghal bun os ceann, air teachd an so mar an ceudna;

7 D'an d'thug Iason aoidheachd: agus a ta iad so uile a' cur an aghaidh orduigh Cheasair, ag ràdh, Gu bheil rìgh eile ann, *eadhon* Iosa.

8 Agus chuir iad buaireas¹ fo'n t-sluagh, agus fouachdarainn² bhaile, nuair a chual iad na nithe so.

9 Agus an uair a ghabh iad urras² o Iason, agus o chàch, leig iad uatha iad.

10 Agus air ball chuir na bràithre Pòl agus Silas san oidhche gu Berea: agus air teachd dhoibh-san *an sin*, chaidh iad a steach do shionagog nan Iudhach.

11 Bha iad sin ni b'uaisle na muinntir Thesalonica, oir ghabh iad am focal d'an ionnsuidh leis an uile thogradh, a' rannsachadh nan sgrìobtuir gach aon là, *a dh'fheuchainn* an robh na nithe sin mar so.

12 Uime sin chreid mòran diubh: agus mar an ceudna do mhnaibh uaisle do na Greugaich, agus do fhearaibh àireamh nach bu bheag.

13 Ach an uair a thuig na h-Iudhaich o Thesalonica gu'n do shearmonaicheadh focal Dé le Pòl am Berea, thàinig iad an sin mar an ceudna, a' brosnuchadh an t-sluaigh.

14 An sin air ball chuir na bràithrean uatha Pòl, chum gu'n rachadh e mar gu b'ann chum na mara: ach dh'fhan Silas agus Timoteus an sin fathast.

15 Agus thèoraich luchd-coimheadachd Phòil e gu baile na h-Aithne³; agus air faghail aithne dhoibh gu Silas agus Timoteus, iad a theachd d'a ionnsuidh-san mar bu luaithe, dh'imich iad rompa.

16 A nis am feadh a bha Pòl a' feitheamh riu san Aithne, bha a spiorad air a bhrosnuchadh⁴ ann, do bhrìgh gu'm fac e am baile làn iodhol-aoraidh.

17 Air an aobhar sin rinn e deasboir-eachd ris na h-Iudhaich, agus ris na daoineibh cràbhach anns an t-sionagog, agus air a' mhargadh gach là riu-san a thachair air.

18 An sin thug feallsanaich⁵ àraidh do na h-Epicuraich, agus do na Stoicheibh, aghaidh air; agus thubhairt cuid, Cìod a b' àill leis an fhear blith-bhriathrach so a ràdh? thubhairt cuid eile, Is cosmhuil gu bheil e a' searmonachadh dhée coimheach; do bhrìgh gu'n do shearmonaich e dhoibh Iosa, agus an aiseirigh.

19 Agus rug iad air, agus thug iad leo e gu Areopagus, ag ràdh, Am feud sinn fios fhaotainn cìod e an teagasg nuadh⁹ so, a labhrar leat?

20 Oir a ta thu toirt nithe àraidh neo-

ghnàthach chum ar cluasan: b' àill leinn uime sin fios fhaotainn cìod is ciall doibh sin.

21 (Oir cha do chaith muinntir na h-Aithne uile agus a' choigrich a bha air chuairt 'nam measg, an uine ri ni air bith eile, ach ri innseadh, no ri cluinntinn noimheachd éigin.)

22 An sin air seasamh do Phòl am meadhon Areopagus, thubhairt e, A muinntir na h-Aithne, tha mi faicinn gu bheil sibh anns na h-uile nithibh cràbhach thar tomhas:

23 Oir air dhomh bhi dol seachad, agus ag amharc air bhur nithibh naomha, fhuair mi altair air an robh an sgrìobhadh so, **DO'N DIA NEO-AITHNICHTE**. Uime sin esan d'am bheil sibh a' deanamh aoraidh gu'n eòlas agaibh air, is e a ta mise a' searmonachadh dhuibh.

24 An Dia a rinn an saoghal, agus na h-uile nithe a ta ann, do bhrìgh gur e féin Tighearna nèimh agus na talmhainn, cha'n 'eil e gabhail còmhnuidh ann an teampuibh làmh-dheanta:

25 Ni mò a bheirear aoradh dha le làmh-aibh dhaoine, mar gu'm biodh uireasbhuidh ni sam bith air; oir is e féin a ta toirt do na h-uile beatha, agus anail, agus nan uile nithe:

26 Agus rinn e dh'aon fhuil uile cinnich dhaoine, chum iad a ghabhail còmhnuidh air aghaidh na talmhainn uile, agus shonraich⁷ e na h-amanna roimh-orduichte, agus crìochan an àite-còmhnuidh;

27 Chum gu'n iarradh iad an Tighearn, a dh'fheuchainn an tarladh dhoibh, le mìn-rannsachadh, gu'm faigheadh iad e, ged nach 'eil e fada o gach aon againn:

28 Oir annsan tha sinn beò, agus a' gluasad, agus tha ar bith againn; mar a thubhairt mar an ceudna dream àraidh do' ur bàrdaibh féin, Oir is sinne fòs a ghineal-san.

29 Uime sin do bhrìgh gur sinne gineal Dé, cha chòir dhuinn a shaoilsinn gu bheil an Diadhachd cosmhuil ri h-òr, no ri h-airgiod, na ri cloich, nithe a ghearradh⁸ le h-ealadhain agus innleachd dhaoine.

30 A nis air do Dhia amharc thairis air aimsiribh an aineolais so, tha e nis ag àithneadh do na h-uile anns gach àit aithreachas a dheanamh:

31 Do bhrìgh gu'n do shuidhich e là anns an toir e breth air an t-saoghal am fireantachd, tre'n duine *sin* a dh'orduich e; agus air so thug e dearbhadh do na h-uile dhaoineibh, le esan a thogail suas o na marbhaibh.

32 Agus an uair a chual iad mu aiseirigh nam marbh, rinn cuid diubh fanoid:

¹ tuairgne, gluasachd.

² Athens. Sasg.

² daingneachadh.

⁴ bhuaireadh.

⁵ daoine foghlumta, eagnuidhean.

⁶ nomha.

⁷ shuidhich.

⁸ a dhuaireadh, a ghràbhadh.

ach thubhairt cuid eile, Eisdidh sinn riut a ris mu'n ni so.

33 Agus mar sin chaidh Pòl a macl as am meadhon.

34 Gidheadh, lean cuid do dhaoineibh ris, agus chreid iad. 'Nam measg so bha Dionisius an t-Areopagach, agus bean d'am b'ainni Damaris, agus dream eile maille riu.

CAIB. XVIII.

1 Rinn Pòl obair le a làmhaidh féin, agus shearmonaich e do na Cinnich ann an Corintus : 9 Thug an Tighearn misneach dha ann an taisbean : 12 chaidh a chasaid an làthair an uachdarain Ghalio, ach leigeadh as e : 18 'na dhéigh sin, chaidh e o bhaile gu baile, agus neartaich e na deisciobuil, &c.

AN déigh nan nithe so, dh'fhàg Pòl baile na h-Aithne, agus thàinig e gu Corintus ;

2 Agus fhuair e Iudhach àraidh d'am b'ainm Acula, a rugadh am Pontus, air ùr-theachd as an Eadailt, maille r'a mhnaoi Priscila, (a chionn gu'n d'orduich Claudius do na h-Iudhaich uile an Ròimh fhàgail,) agus thàinig e d'an ionnsuidh.

3 Agus a chionn gu'n robh e a dh'aon cheird riu, dh'fhan e maille riu, agus bha e ag obair, (oir bu cheird doibh bhi deanamh phàilliuina.)

4 Agus thagair¹ e anns an t-sionagog gach aon là sàbaid, agus chuir e impidh air Iudhaich agus Greugaich.

5 Agus an uair a thàinig Silas agus Timoteus o Mhacedonia, bha Pòl air a theannadh 'na spiorad, agus rinn e fianuis do na h-Iudhaich, gu'm b'e Iosa an Crìosd.

6 Agus an uair a chuir iad 'na aghaidh, agus a labhair iad toibheum, chrath e 'eudach, agus thubhairt e riu, *Biodh* bhur fuil air bhur ceann féin ; *tha* mise glan : á so suas théid mi chum nan Cinneach.

7 Agus chaidh e as a sin, agus thàinig e gu tigh duine àraidh d'am b'ainm Iustus, a bha deanamh aoraidh do Dhia, agus aig an robh a thigh làimh ris an t-sionagog.

8 Agus chreid Crispus, prìomh²-uachdaran na sionagoig anns an Tighearna, maille r'a theaghlach uile : agus chreid mòran do na Corintianaich, air dhoibh éisdeachd ris, agus bhaisteadh iad.

9 An sin thubhairt an Tighearn ri Pòl ann an sealladh³ san oidhche, Na biodh eagal ort, ach labhair, agus na bi a'd' thosd :

10 Oir a ta mise maille riut, agus cha toir duine sam bith ionnsuidh ort, chum do chron a dheanamh : oir a ta mòr-shluagh agam-sa anns a' bhaile so.

11 Agus dh'fhan e bliadhna agus sè

mìosan *an sin*, a' teagasg focail Dé 'nam measg.

12 Agus an uair a bha Galio 'na uachdaran air Achaia, dh'éirich na h-Iudhaich a dh'aon inntinn an aghaidh Phòil, agus thug iad e gu caithir a' bhreitheanaich,

13 Ag ràdh, Tha'n duine so a' comhairleachadh dhaoine aoradh a dheanamh do Dhia an aghaidh an lagha.

14 Agus an uair a bha Pòl dol a dh'fhosgladh a bheoil, thubhairt Galio ris na h-Iudhaich, Nam b'eucoir no droch ghniomh a bhiodh ann, O Iudhacha, bu reusonta gu'n giùlaininn leibh :

15 Ach ma's ceisd a ta ann timchioll fhocla agus ainmean, agus bhur lagha féin, amhaircibh féin air sin ; oir cha'n àill leam-sa bhi m' bhreitheamh air an leithidibh sin do nithibh.

16 Agus dh'fhuadaich e iad o chaithir a' bhreitheanaich.

17 An sin rug na Greugaich uile air Sostenes, uachdaran na sionagoig, agus ghabh iad an làthair caithir a' bhreitheanaich : agus cha do ghabh Galio suim do ni sam bith dhiubh sin.

18 Agus dh'fhan Pòl fathast ùine mhaith *sa' bhaile sin*, agus an sin an déigh a chead a ghabhail do na bràithribh, chaidh e air luing o sin gu Siria, agus maille ris-san Priscila agus Acula ; an déigh a cheann a bhearradh⁴ ann an Cenchrea : oir bha bòid air.

19 Agus thàinig e gu h-Ephesus, agus dh'fhàg e iadsan an sin : ach chaidh e féin a steach do'n t-sionagog, agus reusonaich e ris na h-Iudhaich.

20 Agus an uair a dh'iarr iad *air* fuir-each maille riu ni b'fhaide, cha d'aontaich e :

21 Ach ghabh e a chead diubh, ag ràdh, Is éigin dhomh, air gach aon chor, an fhéill⁵ so a ta teachd a choimhead ann an Ierusalem : ach pillidh mi a ris do 'ur n-ionnsuidh-sa, ma's toil le Dia. Agus sheòl e o Ephesus.

22 Agus thàinig e tir aig Cesarea, agus air dha dol suas agus fàilt a chur air an eaglais, chaidh e sìos gu Antioch.

23 Agus an uair a dh'fhan e rè tamuill *an sin*, dh'imich e, agus chaidh e an ordugh⁶ troimh thir Ghalatia uile agus Phrigia, a' neartachadh nan deisciobul uile.

24 Agus thàinig gu h-Ephesus Iudhach àraidh d'am b' ainm Apollos, a rugadh an Alecsandria, duine deas-bhriathrach, agus cumhachdach anns na sgrìobtuiribh.

25 Bha'n duine so air a theagasg ann an slighe an Tighearn ; agus air dha bhi dian⁷ 'na spiorad, labhair agus theagaisg

¹ reusonaich.

² àrd.

⁵ an fhéisd.

⁶ an eagar.

³ taisbean.

⁴ a lomadh.

⁷ teth.

e gu dìchiollach na nithe a bhuineadh do'n Tighearn, agus gun eòlas aige ach air baisteadh Eoin.

26 Agus thòisich e air labhairt gu dàna san t-sionagag. Agus air do Acula agus do Phriscila a chluinntinn, ghabh iad d'an iomnsuidh e, agus mhinich iad dha slighe Dhé ni bu choimhlionta.

27 Agus an uair bu mhiann leis dol gu Achaia, an déigh a chomhairleachadh, sgrìobh na bràithre chum nan deisciobul iad a ghabhail ris: neach, air dha teachd, a rinn còmhnaidh¹ mor riu-san a chreid tre glòras:

28 Oir le mòr-dhìchioll rinn e deasboir-eachd² ris na h-Iudhaich gu follaiseach, a' dearbhadh leis na sgrìobtuiribh, gur e Iosa an Crìosd.

CAIB. XIX.

1 *Tha an Spiorad naomh air a thabhairt le làmhaidh Phòil.* 9 *Thug na h-Iudhaich toibheum d'a theagasg, a bha air a dhaingneachadh le mìorbhuilb.* 13 *Bhuaicadh na h-Iudhaich a bha cur spiorada fo gheasaibh leis an Diabhal.* 19 *Loisgadh labhraiche druidheachd.*

AGUS tharladh, 'nuair a bha Apollos ann an Corintus, air do Phòl dol troimh na crìochaibh uachdarach, gu'n d'fhàinig e gu Ephesus. Agus air faot-ainn dheisciobul àraidh,

2 Thubhairt e riu, An d'fhuair sibh an Spiorad naomh o chreid sibh? Agus thubhairt iadsan ris, Cha chuala sinn uiread as gu bheil Spiorad naomh ann.

3 Agus thubhairt e riu, Ciod ma seadh anns an do bhaisteadh sibh? Agus thubhairt iadsan, Am baisteadh Eoin.

4 An sin thubhairt Phòl, Bhaist Eoin gu deimhin le baisteadh an aithreachais, ag ràdh ris an t-sluagh, iadsan a chreidsinn anns an neach a bha gu teachd 'na dhéigh-san, sin r'a ràdh, ann an Iosa Crìosd.

5 Agus an uair a chual iad so, bhaisteadh iad ann an ainm an Tighearna Iosa.

6 Agus air do Phòl a làmhan a chur orra, thàinig an Spiorad naomh orra; agus labhair iad le teangaibh, agus rinn iad fàidheadaireachd.

7 Agus bha ann uile timchioll dà fhear dheug.

8 Agus chaidh esan a steach do'n t-sionagag, agus labhair e gu dàna rè thri miosan, a' deasboireachd agus a' comhairleachadh nan nithe a bhuineas do rìoghachd Dhé.

9 Ach an uair a' chrudhaicheadh cuid, agus nach do chreid iad, ach a labhair iad oile mu'n t-slighe sin an làthair an t-sluaigh, dh'fhàg e iad, agus sgar e na deisciobul uatha, agus bha e gach là a' deasboir-eachd ann an sgoil neach àraidh d'am

b'ainm Tirannus.

10 Agus rinneadh so rè dhà bhliadhna; air chor as gu'n cuala luchd-àiteachaidh na h-Asia uile, eadar Iudhaich agus Ghreugaich, focal an Tighearna Iosa.

11 Agus rinn Dia mìorbhuilean nach bu bheag le làmhaidh Phòil:

12 Air chor as gu'n d'fhugadh o' chorp-san chum nan daoine tinne, neapaicinne no aprain, agus gu'n d'fhalbh an euslaint-ean uatha, agus gu deachaidh na droch spioraid a mach asda.

13 Agus ghabh dream àraidh do na h-Iudhaich, a bha 'g imeachd o àit gu h-àit, a' cur spiorada fo gheasaibh³, os làimh ainm an Tighearna Iosa ainmeachadh os ceann na muinntir sin anns an robh droch spioraid, ag ràdh, Cuireamaid fo gheasaibh sibh tre Iosa a ta Phòl a' searmonachadh.

14 Agus bha aig Scebha Iudhach àraidh, aon do na h-àrd-shagartaibh, seachdnar mliac a bha deanamh so.

15 Agus fhreagair an droch spiorad, agus thubhairt e, Tha eòlas agam air Iosa, agus is aithne dhomh Phòl: ach cò sibhse?

16 Agus leum an duine anns an robh an droch spiorad orra, agus air dha làmh an uachdar fhaotainn orra, thug e buaidh orra, air chor as gu'n do theich iad a mach as an tigh sin lomnochd agus reubta.

17 Agus fhuair na h-Iudhaich uile agus mar an ceudna na Greugaich a bha thàmh ann an Ephesus fios air so; agus thuit eagal orra uile, agus bha ainm an Tighearna Iosa air àrdachadh.

18 Agus thàinig mòran diubh-san a chreid, ag aideachadh, agus ag innseadh an gnìomhara.

19 Agus thug mòran diubhsan a bha gnàthachadh dhroch innleachda, an leabhraiche leo, agus loisg siad iad am fianuis nan uile: agus dh'àireamh iad an luach, agus fhuair iad e 'na leth-cheud mìle *bonn* airgid.

20 Mar sin le cumhachd dh'fhàs agus bhuadaich focal an Tighearn.

21 Agus an uair a choinnhlionadh na nithe so, chuir Phòl roimhe 'na spiorad, an déigh dha imeachd troimh Mhacedonia, agus Achaia, dol gu Ierusalem, ag ràdh, An déigh dhomh bhi an sin, is éigin domh an Roimh fhaicinn mar an ceudna.

22 Agus air dha dithis dhiubh-san a bha frithealadh dha, Timoteus, agus Erastus, a chur do Mhacedonia, dh'fhan e féin rè tamuill san Asia.

23 Agus dh'éirich mu'n àm sin iomairt⁴ nach bu bheag mu thimchioll na slighe sin.

¹ cògmhnadh, congnamh.

² le mòr-sbairn thugair e.

³ a' cur spiorada fo mhionnaibh, a' tilgeadh a mach spiorada.

⁴ buaireas.

24 Oir bha ceard-airgid àraidh d'am b'ainm Demetrius *ann*, a bha deanamh theampull airgid¹ do Dhiana, agus a thug buannachd nach bu bheag do'n luchd-ceirde;

25 Agus air dha iadsan a chruinneachadh an ceann a chéile, agus a' mhuinntir eile a bha dh'aon cheird ri, thubhairt e, Fheara, tha fhios agaibh gur ann o'n cheird so a ta ar beartas² againne:

26 Os bàrr, tha sibh a' faicinn agus a' cluinntinn gu bheil am Pòl so le 'chomhairle air tionndadh air falbh shluaigh mhòir, cha 'n e a mhàin ann an Ephesus, ach cha mhòr³ san Asia uile, ag ràdh, Nach dée iad a nìthear le làmhaidh:

27 Air chor as nach e mhàin gu bheil e'n cunnart gu'n deanar tair air ar ceird; ach mar an ceudna gu cuirear teampull na ban-dé mòire Diana an neo-phrìs, agus gu claoidhear a mòrachd-sa, d'am bheil an Asia uile, agus an domhan a' deanamh aoraidh.

28 Agus an uair a chual iadsan so, lìonadh le feirg iad, agus ghlaodh iad, ag ràdh, Is mòr Diana nan Ephesianach.

29 Agus bha am baile uile air a lìonadh le mi-riaghailt: Agus ruith iad a dh'aon toil chum àite-cruinnich an t-sluaigh, a' tarraing leo Ghaiuis agus Aristarchuis Macedonaich, luchd comh-thuruis Phòil.

30 Agus an uair a b'àill le Pòl dol a steach chum an t-sluaigh, cha do leig na deisciobuil leis.

31 Agus mar an ceudna chuir cuid do uachdaranaidh na h-Asia, a bha 'nan càirdibh dha, fios d'a ionnsuidh, a' guidhe air nach rachadh e gu àite-cruinnich an t-sluaigh.

32 Ghlaodh uime sin cuid diubh aon ni, agus cuid ni eile: oir bha an coimhthional troimh a chéile, agus cha robh fios aig a' chuid bu mhò c'ar son a thàinig iad cuid-eachd.

33 Agus tharruing iad a mach Alecsander as an t-sluagh, air bhi do na h-Iudhaich 'ga iomain rompa. Agus sméid Alecsander le 'laimh, agus b'àill leis a leithsgeul a ghabhail ris an t-sluagh.

34 Ach an uair a thuig iad gu'm b' Iudhach e, rinneadh àrd-iolach leo uile mu thimchioll ùine dhà uair, a' glaothaidh, Is mòr Diana nan Ephesianach.

35 Agus an uair a chiùinich an cléir-each⁴ an sluagh, thubhairt e, Fheara Ephesus, cò an duine aig nach 'eil fios gu bheil baile⁵ nan Ephesianach a' deanamh aoraidh do'n bhan-dia mhòir Diana, agus do'n dealbh a thuit a nuas o Iupiter?

36 Air an aobhar sin do bhrìgh nach

fheudar cur an aghaidh nan nithe so, is còir dhuibhse bhi ciùin, agus gun ni sam bith a dheanamh gu h-obann.

37 Oir thug sibh an so na daoine so, ged nach 'eil iad a' creachadh theampull, no a' toirt toibheim d'ar ban-dia.

38 Uime sin ma ta aig Demetrius agus aig an luchd-ceird a ta maille ris, cùis an aghaidh neach air bith, tha'n lagh réidh dhoibh, agus tha uachdarain *ann*; agradh iad a chéile.

39 Ach ma ta ceisd sam bith agaibh mu nithibh eile, réitichear sin ann an coimhthional dlìgheach.

40 Oir tha sinn an cunnart bhi air ar n-agairst air son ceannaire air an l'an diugh, do bhrìgh nach 'eil cùis sam bith againn a dh'fheudas sinn a thoirt seachad mar aobhar a' chruinneachaidh so.

41 Agus air dha so a ràdh, sgaoil e an coimhthional.

CAIB. XX.

1 Chaidh Pòl do Mhacedonia: 7 fhrithheil e suipeir an Tighearn, agus shearmonaich e. 9 Air do Eutichus tuiteam sìos an cruith marbh, thogadh suas beò e. 17 Aig Miletus ghairm Pòl seana'irean na h-eaglais an ceann a chéile, agus dh'innis e dhoibh ciod a bha gu tachairt dha féin, &c.

A GUS an dèigh do'n chomhghàir⁶ a' sgur, ghairm Pòl na deisciobuil d'a ionnsuidh, agus air dha a' chead ghabhail diubh⁷, thriall e gu dol do Mhacedonia.

2 Agus air dha dol troimh na crìochaidh sin, agus mòr-earail a dheanamh orra, thàinig e do'n Ghréig;

3 Agus dh'fhàn e an sin trì mìosan: agus an uair a bha na h-Iudhaich ri feall-fholach⁸ air a shon, agus e air ti⁹ dol air luing do Shiria, chuir e roimhe pilltinn troimh Mhacedonia.

4 Agus chaidh 'na chuideachd gu h-Asia, Sopater o Bherea; agus do mhuinntir The-salonica, Aristarchus agus Secundus; agus Gaius o Dherbe, agus Timotheus; agus do mhuinntir na h-Asia, Tichicus agus Trophimus.

5 Air dhoibh so imeachd romhain-ne dh'fheith iad ruinn ann an Troas.

6 Agus sheòl sinn o Philipi, an dèigh làithean an arain neo-ghoirtichte, agus thainig sinn d'an ionnsuidh-san gu Troas ann an cùig làithibh, far an d'fhan sinn seachduin.

7 Agus an ceud là do'n t-seachduin, air do na deisciobluibh cruinneachadh an ceann a chéile a bhriseadh arain, shearmonaich Pòl doibh, agus a rùn air¹⁰ imeachd uatha air an là maireach, agus lean e air labhairt gu meadhan-oidhche.

8 Agus bha mòran lòchran anns an

¹ dealbh-theampull.

² saibhreas.

³ air bheag nithe.

⁴ Cléireach-sgrìobhaidh

a bhaile.

⁵ caithir.

⁶ bhuaireas.

⁷ an glacadh 'na uchd.

⁸ a' luidhe am fulach, am plaid.

⁹ a rùn air.

¹⁰ air bhi fuidhe.

t-seòmar uachdarach, far an robh iad cruinn.

9 Agus bha oganach àraidh d'am b'ainm Eutichus 'na shuidhe ann an uimeig, air tuiteam gu trom 'na chodal: agus air do Phòl bhàr rè fad a' searmonachadh, shàr-uicheadh leis a' chodal e, agus thuit e sìos o'n treas lobhta, agus thogadh marbh e.

10 Agus chaidh Pòl sìos, agus thuit e air, agus air dha a ghlacadh 'na uchd, thubhairt e, Na biodh trioblaid¹ oirbh; oir a ta 'anam ann.

11 Agus air dol suas da a rìs, bhris e aran agus dh'ith e, agus labhair e riu rè ùine fhada, cadhon gu teachd na maidne, agus mar sin dh'fhalbh e.

12 Agus thug iad leò an t-òganach agus e beò, agus rinn iad gairdeachas nach bu bheag.

13 Agus air dhuinne imeachd air thoiseach chum na luinge, sheòl sinn gu Asos, fa rùn Pòl a ghabhail a steach an sin: oir is ann mar sin a dh'orduich e, a cur roimhe gu'n imicheadh e féin d'a chois.

14 Agus an uair a choinnich e sinn aig Asos, ghabh sinn a steach, agus thàinig sinn gu Mitilene.

15 Agus air seòladh dhuinn as a sin, thàinig sinn air an là maireach fa chomh-ràir Chiois; agus air an là 'na dhéigh sin thàinig sinn gu Samos, agus dh'fhan sinn aig Trogillum; agus air an là b'fhaisge thàinig sinn gu Miletus.

16 Oir chuir Pòl roimhe seòladh seach Ephesus, chum nach tarladh dha moille a dheanamh anns an Asia: oir rinn e cabhag², chum nam feudadh e, bhà ann an Ierusalem air là na Cuingeis.

17 Agus chuir e fios o Miletus gu h-Ephesus, agus ghairm e d'a ionnsuidh seanairean na h-eaglais.

18 Agus an uair a thàinig iad d'a ionnsuidh, thubhairt e riu, Tha fhios agaibh, cionnus a bha mi 'nur measg anns an uile aimsir, o'n cheud là a thàinig mi do'n Asia.

19 A' deanamh seirbhis do'n Tighearn leis gach uile irioslachd inntinn, agus maille ri mòran dheur, agus dheuchainnean, a thachair dhomh le ceilg nan Iudhach.

20 Agus cionnus nach do ghléidh mi ni sam bith am folach a bha feumail dhuibhse, gun a nochdadh dhuibh, agus gun sibhse a theagasg am follais, agus o thigh gu tigh,

21 A' deanamh fianuis araon do na h-Iudhaich, agus do na Greugaich, mu aithreachas a thaobh Dhé, agus mu chreidimh a thaobh ar Tighearna Iosa Crìosd.

22 Agus a nis feuch, a ta mi dol gu Ierusalem ceangailte san Spiorad, gun fhios agam ciod iad na nithe a tharlas dhomh an sin;

23 Ach a mhàin gu bheil an Spiorad naomh a' deanamh fianuis anns gach baile, ag ràdh, Gu bheil geimhlichean agus trioblaidean³ a' feitheamh orm.

24 Ach cha 'n 'eil suim agam do ni air bith, ni mò tha mi a' measadh m'anama féin luachmhor dhomh, chum gu crìochnaich mi mo thurus⁴ le h-aobhneas, agus gu coimhlion mi a' mhinistirealachd a fhuair mi o'n Tighearna Iosa, a dheanamh fianuis do shoigheil gràis Dhé.

25 Agus a nis feuch, a ta fhios agam nach faic sibhse uile, measg an d'imich mise a' searmonachadh rìoghachd Dhé, mo ghnuis ni's mò.

26 Uime sin a ta mi a' deanamh fianuis dhuibh⁵ air an là'n diugh, gu bheil mise glan o fhuil nan uile.

27 Oir cha do sheachainn mi uile chomh-airle Dhé fhoillseachadh dhuibh.

28 Air an aobhar sin thugaibh aire dhuibh féin, agus do'n treud uile, air an d'rinn an Spiorad naomh luchd-coimhead⁶ dhibh, a bheathachadh eaglais Dhé⁷, a cheannaich e le 'fhuil féin.

29 Oir a ta fhios agam-sa air so, an déigh m' imeachd-sa gu'n tig madaidh-allaidh gharga 'nur measg, nach caomhain an treud.

30 Agus éiridh daoine dhibh féin, a labhras nithe fiara, chum deisciobuil a tharruing 'nan déigh 'féin.

31 Uime sin deanaibh faire, a' cuimhneachadh nach do sguir mise rè thri bliadhna, a chomhairleachadh gach aon agaibh a là agus a dh'oidche le deuraibh.

32 Agus a nis, a bhràithre, earbam sibh ri Dia, agus ri focal a ghràis, a ta comasach air bhur togail suas, agus oighreachd a thoirt dhuibh am measg na muinntir sin uile a ta air an naomhachadh.

33 Cha do shanntaich mi airgiod, no òr, no eudach duine sam bith.

34 Seadh, is aithne dhuibh féin, gu'n do fhrithheil na làmhnan so do m' uireasbhuidh féin, agus do'n mhuinntir sin a bha maille rium.

35 Nochd mi na h-uile nithe dhuibh, gur ann le saothreachadh mar so is còir dhuibh còmhnaidh a dheanamh riu-san a ta annhunn⁸; agus focail an Tighearna Iosa a chuimhneachadh, mar a thubhairt e, Tha e ni's beannaichte ni a thoirt na ghabhail.

36 Agus air dha na briathra so a radh, leig se e féin air a ghlùinibh, agus rinn e urnuigh maille riu uile.

¹ buaires

² àmhghair.

³ bha deifir air.

⁴ thrial, chùrsa.

⁵ gabham sibhse mar fhianuisibh.

⁷ eaglais an Tighearna.

⁶ easbuigean.

⁸ lag.

37 Agus ghuil iad uile gu goirt, agus thuit iad air muineal Phòil, agus phòg iad e,

38 Air dhoibh bhi gu h-àraidh brònach air son nam briathra so a thubhairt e, Nach faiceadh iad a ghnùis-san nì's mò. Agus thug iad coimheadachd dha chum na luinge.

CAIB. XXI.

1 *Cha ghabhadh Pòl comhairleachadh o dhol gu Ierusalem.* 8 *Mu Philip an soisgeulaiche, agus a cheathrar nighean a bha 'nam ban-shàidhibh.* 17 *Thàinig Pòl gu Ierusalem, 27 far an robh e air a ghluacadh agus an cunnart mòr.* 31 *Theasairg-eadh e leis an àrd-chaptin.*

AGUS air dhuinn dealachadh riu-san, sheòl sinn romhainn, agus thàinig sinn gu dìreach gu Coos, agus air an là maireach gu Rodos, agus as a sin gu Patara:

2 Agus air dhuinn long fhaotainn a bha a' gabhail thairis gu Phenicia, chaidh sinn air bord, agus sheòl sinn romhainn.

3 Agus air dhuinn teachd an sealladh Chipruis, agus fhàgail air an làimh chli, sheòl sinn gu Siria, agus thàinig sinn tir aig Tirus: oir is ann an sin a bha an long gus a luchd a chur a mach.

4 Agus air dhuinn deisciobuil fhaotainn, dh'fhan sinn an sin seachd làithean: muinntir a thubhairt ri Pòl tre'n Spiorad, gun e dhol suas gu Ierusalem.

5 Agus an uair a chrìochnaicheadh na làithean sin, chaidh sinn a mach, agus thriall sinn romhainn; agus thàinig iadsan uile maille ri mnaibh agus ri cloinn 'nar cuideachd, a mach as a' bhaile: agus chaidh sinn air ar glùinibh air an tràigh, agus rinn sinn urnuigh.

6 Agus an déigh dhuinn air cead a ghabhail d'a chèile, chaidh sinn do'n luing; agus phill iadsan d'an tighibh féin.

7 Agus an uair a chrìochnaich sinn ar turus¹ o Thirus, thàinig sinn gu Ptolemais, agus chuir sinn fàilte air na braithribh, agus dh'fhan sinn aon là maille riu.

8 Agus air an là maireach, air dhuinne, a bha do chuideachd Phòil, imeachd, thàinig sinn gu Cesarea; agus chaidh sinn a steach do thigh Philip an t-soisgeulaiche, (a bha do'n t-seachdnar,) agus dh'fhan sinn aige.

9 Agus bha ceathrar nighean aige-san, òighean, a bha ri fàidheadaireachd.

10 Agus ag fantuinn duinn mòran do làithibh an sin, thàinig a nuas o Iudea fàidh àraidh, d'am b'ainm Agabus.

11 Agus an uair a thàinig e d'ar n-ionnsuidh-ne, ghabh e crios Phòil, agus cheangail e a làmhan agus a chosan féin, agus thubhairt e, Mar so tha an Spiorad

naomh ag ràdh, Is ann mar so a cheanglas na h-Iudhaich ann an Ierusalem an duine d'am buin an crios so, agus bheir iad thairis e do làmhaibh nan Cinneach.

12 Agus an uair a chuala sinne na nithe so, ghuidh sinn féin agus muinntir an àite air, gun e dhol suas gu Ierusalem.

13 An sin fhreagair Pòl, Ciod is ciall duibh a' gul, agus a' briseadh mo chridhe? oir a ta mise ullamh cha'n e a mhàin gu bhi air mo cheangal, ach eadhon gu bàsachadh ann an Ierusalem air son ainme an Tighearna Iosa.

14 Agus an uair nach gabhadh e comhairle, sguir sinne, ag radh, Deanar toil an Tighearna.

15 Agus an déigh nan làithean so, air dhuinn bhi ullamh², chaidh sinn suas gu Ierusalem.

16 Agus chaidh mar an ceudna maille ruinn cuid do na deisciobluibh o Chesarea, a' toirt leo Mhnasoin o Chiprus, seain deisciobul àraidh, aig an robh sinn gu bhi air aoidheachd.

17 Agus an uair a thàinig sinn gu Ierusalem, ghabh na bràithre ruinn gu subhach.

18 Agus air an ath là, chaidh Pòl maille ruinne dh'ionnsuidh Sheumais; agus bha na seanairean uile a làthair.

19 Agus air dhàsan fàilte chur orra, chuir e'n cèill doibh fa leth na nithe a rinn Dia le 'mhinistirealachd-san am measg nan Cinneach.

20 Agus an uair a chual iadsan so, thug iad glòir do'n Tighearn³, agus thubhairt iad ris-san, Tha thu faicinn, a bhràthair, cia lìon mìle do na h-Iudhaich a ta creidsinn; agus tha iad uile ro eudmhor mu'n lagh.

21 Agus chual iad umad-sa, gu bheil thu teagasg do na h-Iudhaich uile a ta measg nan Cinneach, Maois a thréigsinn, ag ràdh riu, Nach còir dhoibh an clann a thimchioll-ghearradh, no gluasad a réir nan gnàth⁴.

22 Ciod uime sin a nìthear? Gun teagamh, is éigin do'n t-sluagh cruinneachadh: oir chuinnidh iad gu'n d'thàinig thu.

23 Uime sin dean so a ta sinne ag ràdh riut: Tha ceathrar fhear maille ruinne, air am bheil bòid;

24 Thoir⁵ iadsan leat, agus bi air do ghlanadh maille riu, agus dean costus⁶ leo, chum gu bear⁷ iad an cinn: agus gu'm bi fhios aig na h-uile nach 'eil ach neo-ni anns na chual iad mu d' thimchioll-sa, ach gu bheil thu féin mar an ceudna ag imeachd gu riaghailteach, agus a' coimhead an lagha.

25 Ach mu thimchioll nan Cinneach a

¹ triall, taisdeal, cìrsa.

² thog sinn ar n-airneis, agus, &c.

³ do Dhia.

⁴ a réir gnùthanna [an lagha.]

⁶ caitheamh, cosgus.

⁵ Beir.

⁷ lom.

chreid, sgrìobh sinne agus b' i ar breth, gun iad a ghleidheadh a h-aon do na nithibh sin, ach a mhàin iad fèin a' choimhead o nithibh a chaidh iobradh do Ìodhlaibh, agus o fhuil, agus o ni tachdta, agus o striopachas.

26 An sin ghabh Pòl na daoine; agus air an là màireach air dha bhì air a ghlanadh maille riu, chaidh e steach do'n teampull, a' foillsachadh coimhlionaidh làithean a' ghlanaidh, gus an tugtadh tabhartas air son gach aon aca.

27 Agus an uair a bha na seachd làithean air bheag nithe¹ air an coimhlionadh, air do na h-Iudhaich o'n Asia esan fhaicinn san teampull, bhrosnuich iad am pobull uile, agus chuir iad làmh ann,

28 Ag éigheach, Fheara Israeil, cuidichibh: is e so an duine a ta teagasg nan uile dhaoine anns gach àit an aghaidh a' phobuill, agus an lagha, agus an àite so: agus os barr, thug e steach Greugaich do'n teampull, agus shalaich e'n t-ionad naomh so.

29 (Oir chunnaic iad Trophimus an t-Ephesianach roimhe sin anns a' bhaile maille ris, agus shaoil iad gu'n d'thug Pòl a steach do'n teampull e.)

30 Agus ghluaiseadh am baile gu h-iomlan, agus ruith an sluagh cuideachd: agus air dhoibh breith air Pòl, tharruing iad a mach as an teampull e: agus air ball dhùineadh na dorsa.

31 Agus an uair a b'àill leò a mharbhadh, chaidh sgeula dh'ionnsuidh àrd-cheannaird na cuideachd, gu'n robh Ierusalem uile thar a chéile²:

32 Neach air ball a thug leis saighdearan, agus ceannardan-cheud, agus a ruith sìos d'an ionnsuidh: Agus an uair a chunnaic iadsan an t-àrd-cheannard agus na saighdearan, sguir iad do bhualadh Phòil.

33 An sin thàinig an t-àrd-cheannard am fagus agus rug e air, agus dh'àitlin e a cheangal le dà shlabhraidh; agus dh'fhiosraich e, Cò e, agus ciod a rinn e.

34 Agus ghlaodh aon chuid am measg an t-sluaigh aon ni, agus cuid eile ni eile: agus an uair nach robh e an comas da ciunteachd na cùise a thuigsim air son na h-àrd-bhruidhne, dh'orduich e esan a thoirt do'n chaisteal.

35 Agus an uair a thàinig e chum na staidhreach, tharladh gu'n do ghluilaineadh e leis na saighdearaibh, air son foireigin an t-sluaigh.

36 Oir lean am mòr-shluagh e, a' glaoth-aich, Bheir uainn e.

37 Agus an uair a bha Pòl gu bhì air a thoirt a steach do'n chaisteal, thubhairt e ris an àrd-cheannard, An cead domh-sa

ni a labhairt riut? agus thubhairt esan, An labhair thu Gréigis?

38 Nach thusa an t-Eiphiteach sin a thog ceannaire roimh na làithibh so, agus a thug leat do'n fhàsach ceithir mìle fear a bha 'nan luchd-mortaigh?

39 Ach thubhairt Pòl, Is duine mise a tha a'm Iudhach gun amharas o Tharsus, saor-dhuine do bhaile ro inbheach ann an Cilicia: agus guidheam ort, thoir cead domh labhairt ris an t-sluagh.

40 Agus an uair a thug e cead da, Air do Phòl seasamh air an staidhir, smèid e le 'làimh air an t-sluagh, ag iarraidh éisd-eachd: agus air fantuinn ro thosdach dhoibh-san, labhair e riu sa' chànan Eabhruidhich, ag ràdh,

CAIB. XXII.

1 Chuir Pòl gu pailt an cèill cionnus a dh'iompaich-eadh e chum a' chreidimh, 17 agus a ghairmeadh e chum na h-ahstolachd. 22 Nuair a dh'ainmich e na Cinnich, thog am pobull aon ghàir ris: 24 Bha e gu bhì air a sgiùrsadh; 25 ach air dha a chòir-shaorsa mar Romhanach agairt, leigeadh as e.

FHEARA, a bhràithre, agus aithriche, éisdibh-sa ri m' dhion-chaimt³ ribh a nis:

2 (Agus an uair a chual iadsan gu'n do labhair e riu sa' chànan Eabhruidhich, bu mhòid a thosd iad: agus thubhairt esan,)

3 Is Iudhach mise da rìreadh, a rugadh ann an Tarsus na Cilicia, ach a dh'oil-eadh⁴ sa' bhaile so, aig cosaibh Ghamaileil, agus a theagaisgeadh gu coimhlionta a réir gnàtha lagha nan aithriche, agus bha mi eudmhor a thaobh Dhé, mar a ta sibhse uile an diugh.

4 Agus rinn mi geur-leanmhuinn gu bàs air an t-slighe so, a' ceangal fhear agus bhan, agus 'gan tarruing gu prìosan:

5 Mar a ni an t-àrd-shagart mar an ceudna fianuis dhomh, agus comhairle nan seanairean uile; o'n d'fhuair mise mar an ceudna litriche chum nam bràithre, agus chaidh mi gu Damascus, chum an dream a bha'n siu a thoirt ceangailte gu Ierusalem, chum gu deantadh peanas orra.

6 Agus tharladh, air dhomh bhì 'g im-eachd, agus a' druideadh ri Damascus mu mheadhon-là, gu'n do dhealraich gu h-obann o nèamh solus mòr mu'n cuairt orm.

7 Agus thuit mi air an talamh, agus chuala mi guth ag ràdh, A Shaul, a Shaul, c'ar son a ta thu 'gam gheur-leanmhuinn-sa?

8 Agus fhreagair mise, Cò thu, a Thigh-carn? Agus thubhairt e rium, is mise Iosa o Nasaret, air am bheil thusa a' deanamh geur-leanmhuinn.

9 Agus chunnaic na daoine a bha maille

¹ cha mhòr.

² fo bhuaireas.

³ mo leithsguel.

⁴ thogadh suas.

rium an solus gu deimhin, agus ghabh iad eagal; ach cha chual iad guth an tì a labhair rium-sa.

10 Agus thubhairt mise, Cìod a ni mi, a Thighearn? Agus thubhairt an Tighearn rium, Eirich, agus imich gu Damascus, agus an sin labhar riut mu thimchioll nan nìthe sin uile a dh'orduicheadh dhuitse a dheanamh.

11 Agus an uair nach bu léir dhomh tre ghloir an t-soluis sin, air dhomh bhi air mo thèorachadh air làimh leo-san a bha maille rium, thàinig mi gu Damascus.

12 Agus air do dhuine àraidh *d'amb'ainm* Ananias, a bha cràbhach a réir an lagha, agus air an robh deadh theistean aig na h-Iudhaich uile a bha chòmhnuidh *an sin*,

13 Teachd a m' ionnsuidh, agus seasamh làimh rium, thubhairt e rium, A Shaul a bhràthair, faigh do radharc. Agus air an uair sin féin dh'ambaire mi suas air.

14 Agus thubhairt esan, Thagh Dia ar n-aithriche roimh-làimh thusa, chum gu'n gabhadh tu eòlas air a thoil, agus gu'm faiceadh tu an t-Aon cothromach sin, agus gu'n cluinneadh tu guth as a bheul.

15 Oir bithidh tu a'd' fhianuis aige chum nan uile dhaoine, air na nithibh a chunnaic agus a chuala tu.

16 Agus a nis c'ar son a ta thu a' deanamh moille? Eirich, agus bi air do bhaisteadh, agus ionnlaid uait do pheacanna, a' gearm air ainm an Tighearn.

17 Agus tharladh, 'nuair a phill mise gu Ierusalem, agus a bha mi a' deanamh urnuigh san teampull, gu'n deachaidh mi ann an neul,

18 Agus gu'm faca mi esan ag ràdh rium, Dean deisir, agus imich gu grad á Ierusalem; oir cha ghabh iad ri d' theistean mu m' thimchioll-sa.

19 Agus thubhairt mise, A Thighearn, tha fhios aca gu robh mise a' tilgeadh am prìosan, agus a' sgiùrsadh anns gach sionagag iadsan a chreid annad-sa:

20 Agus an uair a dhòirteadh fuil do mhairtirich¹ Stephain, bha mise mar an ceudna a'm' sheasamh a làthair, agus ag aontachadh leis a mharbhadh, agus a coimhead eudaich na muinntir a mharbh e.

21 Agus thubhairt e rium, Imich: oir cuiridh mise thu am fad chum nan Cinn-each.

22 Agus dh'éisd iad ris gus an fhocal so, agus thog iad *an sin* an guth gu h-àrd. ag ràdh, Beir o'n talamh a leithid so do dhuine; oir cha chòir e bhi beò.

23 Agus an uair a bha iadsan ag éigheach agus a' tilgeadh dhiubh *an eudaich*, agus a' tilgeadh luathre san athar²,

24 Dh'àithn an t-àrd-cheannard esan a thoirt do'n chaisteal ag orduchadh a

cheasnachadh le a sgiùrsadh; chum gu faigheadh e fios cìod i a' choire mu'n robh iad a' glaochaich mar sin 'na aghaidh.

25 Agus an uair a bha iad 'ga cheangal le iallaibh, thubhairt Pòl ris a' cheannard-ceud a sheas a làthair, Am bheil e cead-uichte dhuibhse duine a ta 'na Romhanach a sgiùrsadh, agus gun e air a dhìteadh?

26 Agus an uair a chual an ceannard-ceud so, dh'imich e agus dh'innis e do'n àrd-cheannard, ag ràdh, Thoir fa'near cìod a ni thu: oir is Romhanach an duine so.

27 An sin thàinig an t-àrd-cheannard d'a ionnsuidh, agus thubhairt e ris, Innis domh-sa, an Romanach thu? Agus thubhairt esan, Is mi.

28 Agus fhreagair an t-àrd-cheannard, Is mòr an t-suim air an do cheannaich mise an t-saorsa so. Agus thubhairt Pòl, Ach rugadh mise *saor*.

29 An sin dh'imich iadsan uaith air ball a bha gus a cheasnachadh: agus ghabh an t-àrd-cheannard mar an ceudna eagal 'nuair a thuig e gu'm bu Romanach e, agus a chionn gu'n do cheangail se e.

30 Agus air an là màireach, air dha bhi togarrach air fios cinnteach fhaotainn cìod i a' choire a bha na h-Iudhaich a' cur as a leth, dh'fhuasgail se e o a chuibhreachaibh, agus dh'àithn e do na h-àrd-shagartaibh agus d'an comhairle uile teachd a làthair, agus air dha Pòl a thoirt sìos, chuir e 'nam fianuis e.

CAIB. XXIII.

1 Thagair Pòl a chàis. 2 Dh'orduich Ananias a bhualadh. 7 Connsachadh am measg a luchd-casaid. 11 Thug Dia misneach dha. 14 Nochdadh feall nan Iudhach an aghaidh Phòil do'n àrd-cheannard. 23 Chuir se e gu Felics an t-uachdaran.

A GUS air dearcadh do Phòl air a' chomhairle, thubhairt e, Fheara agus a bhràithre, anns an uile dheadh choguis chaith mise mo bheatha a thaobh Dhé gus an là'n diugh.

2 Agus dh'àithn an t-àrd-shagart Ananias dhoibh-san a bha 'nan seasamh làimh ris, a bhualadh air a bheul.

3 An sin thubhairt Pòl ris, Buailidh Dia thusa, a bhalla ghealaichte: oir am bheil thusa a'd' shuidhe a thoirt breth ormsa a réir an lagha, agus an aghaidh an lagha ag orduchadh mo bhualadh?

4 Agus thubhairt iadsan a sheas làimh ris, Am bheil thusa a' toirt ana-cainnt³ do àrd-shagart Dhé?

5 An sin thubhairt Pòl, Cha robh fhios agam⁴, a bhràithre, gu'm b'e an t-àrd-

¹ *f'fianuis-sa.*

² *aidhear.*

³ *càineadh.*

⁴ *Cha d'thug mi fa'near.*

shagart e: oir a ta e sgrìobhta, Na labhair olc mu uachdaran do phobuill.

6 Ach an uair a thuig Pòl, gu robh cuid diubh 'nan Sadusaich, agus a' chuid eile 'nam Phairisich, ghlaodh e anns a' chomhairle, Fheara agus a bhràithre, is Phairiseach mise, mac Phairisich: is ann á leth d'ùchais agus aiseirigh nam marbha, a tha mi air mo thoirt am breitheanas.

7 Agus air dhasan so a labhairt, dh'éirich comhstri eadar na Phairisich agus na Sadusaich: agus roinneadh an coimhthional an aghaidh a chéile.

8 Oir tha na Sadusaich ag ràdh nach 'eil aiseirigh, no aingeal, no spiorad ann; ach a ta na Phairisich ag aideachadh gach aon diubh¹.

9 Agus dh'éirich gair² mhòr: agus air seasamh suas do na sgrìobhaichibh a bha air taobh nam Phairiseach, chathaich iad 'nan aghaidh, ag ràdh, Cha'n 'eil sinne faotainn³ cron air bith san duine so: ach ma labhair spiorad no aingeal ris, na cogamaid an aghaidh Dhé.

10 Agus an uair a dh'éirich connsachadh mòr eatorra, air do'n àrd-cheannard bhi fo cagal gu'n rachadh Pòl a tharruing as a chéile leo, dh'àithn e do na saighdearaibh dol sìos, agus esan a tlogail leis an làimh làidir as am meadhon, agus a thoirt do'n chaisteal.

11 Agus air an oidhche 'na dhéigh sin, sheas an Tighearn làimh ris, agus thubhairt e, Biodh misneach mhaith agad, a Phòil; oir mar a rinn thu fianuis mu m' thimchioll-sa ann an Ierusalem, is amhuil sin is éigin duit fianuis a dheanamh anns an Ròimh.

12 Agus air teachd do'n là, chruinnich dream àraidh do na h-Iudhaich an ceann a chéile⁴, agus chuir siad iad féin fo mhallachadh, ag ràdh, nach itheadh agus nach òladh iad gus am marbhadh iad Pòl.

13 Agus bha iad os ceann dà fhichead fear a rinn an co-mhionnachadh so.

14 Agus thàinig iad chum nan àrd-shagart, agus nan seanairean, agus thubhairt iad, Chuir sinne sinn féin fo àrd-mhallachadh, nach blaiseamaid ni sam bith gus am marbhamaid Pòl.

15 A nis uime sin iarraidh-sa maille ris a' chomhairle air an àrd-cheannard, gu'n tugadh e do 'ur n-ionnsuidh-sa e am màireach, mar gu biodh a rùn oirbh fios fhaotainn ni bu choimhlionta air ni éigin m'a thimchioll; agus tha sinne deas chum esan a mharbhadh, mu'n tig e'm fagus duibh.

16 Agus an uair a chuala mac peathar Phòil am feall-fholach⁵ so, thàinig e, agus air dha dol a steach do'n chaisteal, dh'innis

e sin do Phòl.

17 An sin ghairm Pòl d'a ionnsuidh aon do na ceannardaibh-cheud, agus thubhairt e, Thoir an t-òganach so chum an àrd-cheannard; oir a ta ni àraidh aige r'a innseadh dha.

18 An sin thug e leis e, agus threòraich se e chum an àrd-cheannard, agus thubhairt e, Ghairm Pòl am prìosanach mise d'a ionnsuidh, agus ghuidh e orm an t-òganach so thoirt a d' ionnsuidh-sa, aig am bheil ni-éigin r'a innseadh dhuit.

19 An sin rug an t-àrd-cheannard air a làimh, agus chaidh e a leth-taobh an uaignidheas maille ris, agus dh'fhiosraich e dheth, Ciod a tha agad r'a innseadh dhomh-sa?

20 Agus thubhairt esan, Rinn na h-Iudhaich comhairle iarraidh ortsa, gu'n tugadh tu Pòl am màireach do'n chomhairle, mar gu'm biodh iad gu rannsachadh n's géire a dheanamh air ni-éigin m'a thimchioll.

21 Ach na aontaich thusa leo: oir a ta os ceann dà fhichead fear dhiubh ri feall-fholach 'na aghaidh, a chuir iad féin fo mhallachadh, nach ith agus nach òl iad gus am marbh iad e: agus a nis tha iad ullamh, a' feitheamh ri gealladh uaitse.

22 An sin leig an t-àrd-cheannard uaith an t-òganach, agus dh'àithn e dha, ag ràdh, Feuch nach innis thu do neach sam bith, gu'n d'fhoillsich thu na nithe so dhomh-sa.

23 Agus ghairm e d'a ionnsuidh dà cheannard-ceud, agus thubhairt e, Ull-uichibh dà cheud saighdear a théid gu Ccsarea, agus deich agus trì fichead marcach, agus dà cheud fear-sleagha, air an treas uair do'n oidhche.

24 Agus ulluichibh eich, chum air dhoibh Pòl a chur orra, gu'n toir iad e gu tèarainte chum an uachdarain Felics.

25 Agus sgrìobh e litir air a' mhodh so: 26 Beatha agus slàinte o Chlaudius Lisis, chum an uachdarain ro òirdheirc Felics.

27 Ghlacadh an duine so leis na h-Iudhaich, agus an uair a bha iad air tí a mharbhadh, thàinig mise orra le saighdearaibh, agus thug mi dhiubh e, a' tuigsinn gu'm bu Romhanach e.

28 Agus air dhomh bhi toileach air fios an aobhair fhaotainn air son an d'agair iad e, thug mi sìos e chum an comhairlesan:

29 Agus thuig mi gu'n robh e air agairt mu cheisdibh d'an lagh féin, gun ni sam bith air a chur as a leth a b'airidh air bàs no air ceanglaichibh.

30 Ach an uair a dh'innseadh dhomh gu'n robh na h-Iudhaich gu fcall a chaith-

¹ 'gan aideachadh le chéile.

² iolach.

³ faghail, faghainn.

⁴ rinn dream àraidh do na h-Iu 'haich comh-bhann r'a chéile.

⁵ plaid luidhe.

eadh air an duine, air ball chuir mi a d'ionnsuidh-sa e, agus thug mi àithne mar an ceudna d'a luchd-casaid, gach cùis a bha aca 'na aghaidh a chur an céill a' d' làthair-sa. Slàn leat.

31 An sin air do na saighdearaibh Pòl a ghabhail, a réir mar a dh'àithneadh dhoibh, thug iad san oidhche e gu Antiphris.

32 Agus air an là maireach leig iad do'n mharc-shluagh dol leis, agus phill iad féin do'n chaisteal.

33 Agus an uair a chaidh iad a stigh do Chesarea, agus a thug iad an litir do'n uachdaran, chuir iad mar an ceudna Pòl 'na fhianuis.

34 Agus an uair a leugh an t-uachdaran an litir, dh'fhiosraich e cò an dùthaich o'n robh e. Agus an uair a thuig e gur ann o Chìlicia bha e,

35 Thubhairt e, Eisdidh mi riut, 'nuair a thig do luchd-casaid mar an ceudna. Agus dh'àithn e esan a choimhead ann an talla-breitheanais Heroid.

CAIB. XXIV.

1 Air do Phòl a bhì air a chasaid le Tertullus an cainnt-fhear, 10 fhreagair e air a shon féin thaobh a chaithe-beatha agus a theagaisg : shear-monaich e Crìosd do'n uachdaran agus d'a mhnaoi. 26 Bha sùil aige-san ri a' gairid fhaotainn uaith, ach an dòmhannas.

AGUS an ceann chùig làithean 'na dhéigh sin chaidh Ananias an t-àrd-slagart sìos maille ris na seanairibh, agus ri Tertullus fear-tagraidh¹ àraidh, muinntir a nochd iad féin an làthair an uachdaran an aghaidh Phòil.

2 Agus an uair a ghairmeadh a mach e thòisich Tertullus air a chasaid, ag ràdh, Do bhrìgh gu bheil sinn tromhad-sa a' mealtuinn mòr-shith, agus gu'n d'rinn-eadh iomadh deadh ghnìomh do'n chinn-each so tre do ghliocas-sa,

3 Tha sinne gabhail ri so, anns gach àm agus anns gach àit, Fhelics ro òirdheire, maille ris gach uile bhuidheachas. -

4 Ach, chum nach cuirinn mòr-mhoille ort, guidheam ort, do d' shuariceas gu'n éisd thu ruinn gu h-ath-ghoirid.

5 Oir fhuair sinn am fear so 'na phlàigh, agus a' dùsgadh² nan Iudhach uile gu ceannaire air feadh an domhain, agus 'na cheann-feadhna do luchd saobh-chreidimh nan Nasarenach.

6 Neach mar an ceudna a thogair an teampull a shalachadh; agus a ghlac sinne, agus b' àill leinn breth a thoirt air a réir ar lagha féin:

7 Ach air teachd do Lìsias an t-àrd-cheannard oirnn, thug e le mòr-ainneart as ar làmhaidh e.

8 Ag àithneadh d'a luchd-casaid teachd a d' ionnsuidh-sa; neach o'm feud thu le a cheasnachadh, fios fhaotainn air na h-uile nithibh a tha sinne a' cur as a leth. 9 Agus dh'aontaich na h-Iudhaich mar an ceudna, ag ràdh, Gu'n robh na nithe sin mar sin.

10 An sin air do'n uachdaran sméideadh air Pòl e a labhairt, fhreagair esan, Is mòid mo mhisneach gu freagairt air mo shon féin, gu bheil fhios agam gu robh thusa rè mòrain bhliadlana a' d' bhreith-eamh air a' chinneach so.

11 Oir feudaidh tu fios fhaotainn, nach mò na dà là dheug o chaidh mi suas gu Ierusalem a dheanamh aoraidh.

12 Agus cha d'fhuair iad mi a' deas-boireachd ri aon neach san teampull, no a' brosnuchadh an t-sluaigh gu ceann-airc, aon chuid sna sionagogaibh, no anns a' bhaile.

13 Nì mò is urrainn iad na nithe sin a dhearbhadh a tha iad a' cur as mo leth.

14 Ach tha mi ag aideachadh so dhuitse, gur ann a réir na slighe sin ris an abair iadsan saobh-chreidimh, a ta mise a' deanamh aoraidh do Dhia m'athriche, a' creidsinn nan uile nithe a ta sgrìobhta san lagh agus anns na fàidhibh:

15 Agus a ta dòchas agam an Dia, ris am bleil sùil mar an ceudna aca féin, gu'n tig aiseirigh nam marbh, nam firean araon agus nan neo-fhìrean.

16 Agus an so tha mi a' saothreachladh a ghnàth coguis³ neo-lochdach a bhì agam a thaobh Dhé, agus a thaobh dhaoine.

17 A nis an dèigh mòrain bhliadhna, thàinig mi a thoirt déirce chum mo chinn-ich, agus thabhartas.

18 Air a so fhuair Iudhaich àraidh o'n Asia mi air mo ghlanadh san teampull, gun sluagh, agus gun bhuaireas.

19 Muinntir d'am bu chòir bhì'n so a' d' làthair-sa, agus m'agairt, nam biodh nì sam bith aca a'm' aghlaidh.

20 No abradh iad so féin, ma fhuair iad eucoir⁴ sam bith annam-sa, 'nuair a sheas mi an làthair na comhairle;

21 Mur ann a mhàin air son an aoin fhocail so, a ghlaodh mi a'm' sheasamh 'uam measg, Gur ann air son aiseirigh nam marbh, a ta mi air mo thoirt gu breitheanas leibhse an diugh.

22 Agus an uair a chuala Fèlics na nithe so, air dha eòlas nì bu dìongmhalta bhì aige air an t-slighe sin, chuir e air dàil iad, ag ràdh, 'Nuair a thig Lìsias an t-àrd-cheannard a nuas, làn-rannsaichidh mi⁵ bhuir cùis.

23 Agus dh'àithn e do cheannard-ceud Pòl a ghleidheadh, agus e bhì fuasgailte

¹ cainnt-fhear.

² brosnuchadh.

³ coimh-fhios, coisnens.

⁴ mì-ghnòmh.

⁵ bithidh làn-fhios agam air.

aige, agus gun neach d'a mhuinntir féin a bhacadh o fhrithealadh dha, no teachd d'a ionnsuidh.

24 Agus an déigh làithean àraidh, 'nuair a thàinig Felics maille r'a mhaoi Dru-silla, a bha 'na Ban-Iudhach, chuir e fios air Pòl, agus dh'éisd e ris mu thimchioll a' chreidimh¹ ann an Crìosd.

25 Agus air dhasan bhi a' reusonachadh mu fhìreantachd, stuaim², agus breitheanas ri teachd, ghabh Felics eagal mòr, agus fhreagair e, Imich romhad an tràth so; 'nuair a bhios ùine agam, cuiridh mi fios ort.

26 Bha dùil aige mar an ceudna gu rachadh airgid a thoirt da le Pòl, chum gu'm fuasgladh se e: uime sin chuir e fios air ni bu trice, agus labhair e ris.

27 Ach air do dhà bhliadhna bhi air an coimhlionadh, thàinig Porcius Festus an àit Fhelics: agus air do Fhelics bhi toileach comain a chur air na h-Iudhaich³, dh'fhàg e Pòl ceangailte.

CAIB. XXV.

1 Chasaid na h-Iudhaich Pòl an làthair Fhestuis: 8 fhreagair Pòl air a shon féin, 11 agus thog e a chàis gu Ceasar. 14 Dh'fhosgail Festus cùis Phòil do Agripa, agus dh'èinn e nach d'fhuaradh coire air bith ann a' b'airidh air bàs.

ANIS 'nuair a thàinig Festus do'n mhòr-roinn⁴, an ceann trì làithean chaidh e suas o Chesarea gu Ierusalem.

2 Agus nochd an t-àrd-shagart agus maillean nan Iudhach iad féin 'na làthair an aghaidh Phòil, agus chuir iad impidh air,

3 Ag iarraidh fabhoir 'na aghaidh, gu'n cuireadh e fios air gu Ierusalem, agus iad a dheanamh feall-fholach⁵ chum esan a mharbhadh air an t-slighe.

4 Ach fhreagair Festus, Gu'm bu chòir Pòl a ghleidheadh ann an Cesarea, agus gu'n rachadh e féin an sin gu h-aithghearr.

5 Uime sin, ars' esan, rachadh iadsan 'nur measg a dh'fheudas, sìos maille riumsa, agus ma ta coire air bith san duine so, cuireadh iad sin as a leth.

6 Agus air dha fantuinn 'nam measg os ceann deich làithean, chaidh e sìos do Chesarea; agus air an là màireach shuidh e air a' chaithir-bhreitheanas, agus dh'èithn e Pòl a thoirt a làthair.

7 Agus an uair a thàinig esan, sheas na h-Iudhaich a thàinig a nuas o Ierusalem m'a thimchioll, a' cur choireanna lionmhor agus mòra á leth Phòil, nach b'urrainn iad a dhearbhadh:

8 'Nuair a fhreagair esan 'ga shaoradh

féin, Cha d'rinn mi cionta sam bith an aghaidh lagha nan Iudhach, no 'n aghaidh an teampuill, no 'n aghaidh Cheasair.

9 Ach air bhi do Fhestus togarrach air toileachas-intinn a thoirt do na h-Iudhaich, fhreagair e Pòl, agus thubhairt e, An àill leatsa dol suas gu Ierusalem, agus an sin dol fo bhreitheanas thaobh nan nithe sin ann mo làthair-sa?

10 An sin thubhairt Pòl, Tha mi m' sheasamh aig caithir-breitheanas Cheasair, far an còir breth a thoirt orm: air na h-Iudhaich cha d'rinn mi eucoir sam bith, mar is maith a ta fios agad-sa.

11 Oir ma tha mi deanamh eucoir, agus ma rinn mi ni sam bith a thoill bàs, cha'n 'eil mi diùltadh bàs fhulang: ach mur'eil ni sam bith dhiubh sin, fìor a tha iad so a' cur as mo leth, cha'n fheud duine sam bith mo thoirt thairis doibh⁶. Tha mi togail mo chùis gu Ceasar.

12 An sin an déigh do Fhestus labhairt ris a' chomhairle, fhreagair e, An do thog thu do chùis gu Ceasar? gu Ceasar théid thu.

13 Air dol do làithibh àraidh seachad, thàinig Agripa an rìgh agus Bernice gu Cesarea a chur fàilte air Festus.

14 Agus air dhoibh mòran làithean a chaitheadh an sin, chuir Festus cùis Phòil an cèill do'n rìgh, ag ràdh, Dh'fhàgadh duine àraidh le Felics 'na phrìosanach.

15 Air-san, an uair a bha mise ann an Ierusalem, rinn na h-àrd-shagairt agus seanairean nan Iudhach casaid rium, ag iarraidh binne⁷ 'na aghaidh.

16 D'an d'thug mise an freagradh so, Cha'n e gnàth nan Romhanach duine sam bith a thoirt thairis chum bàis⁸, gus am bi aig an neach a tha air agairt, a luchd-casaid aghaidh ri h-aghaidh, agus gu'm bi cothrom aige air e féin a shaoradh o'n choire a chuireadh as a leth.

17 Uime sin an uair a thàinig iad araon an so, gun mhoille sam bith shuidh mi air an là màireach sa' chaitlir-bhreitheanas, agus dh'èithn mi'n duine a thoirt a làthair.

18 Agus an uair a sheas a luchd-casaid⁹ m'a thimchioll, cha do chuir iad coire air bith as a leth do na nithibh a shaoil mise:

19 Ach thug iad ceisdean àraidh 'na aghaidh mu thimchioll an creidimh¹⁰ féin, agus mu thimchioll Iosa àraidh, a fhuair bàs, neach a thubhairt Pòl a bhi beò.

20 Agus a chionn gu robh mise amharusach mu thimchioll an leithid sin do cheisdibh, dh'fheòraich mi dheth¹¹ am

¹ na creidimh.

² measarrachd.

³ gnìomh taitneach a dheanamh do na h-Iudhaich.

⁴ earrainn; province. Sasg. ⁵ pluid-luideh.

⁶ cha'n fheud duine sam bith an toileachadh le

mise a thoirt thairis doibh.

⁸ millidh.

¹⁰ an saobh-chreidimh.

¹¹ thubhairt mi ris.

⁷ diùidh.

⁹ luchd-agraidh.

b'áill leis dol suas gu Ierusalem, agus an sin dol fo bhreitheanas mu na nithibh so.

21 Ach an uair a dh'iarr Pòl a choimhead gus am fiosraichteadh a chùis-san le Augustus, dl'r àithn mi e bhí air a ghleidhcadh gus an cuirinn gu Ceasar e.

22 An sin thubhairt Agripa ri Festus, B'áill leamsa féin an duine so chluinntinn. Am maireach, thubhairt esan, cluinnidh tu e.

23 Uime sin air an là maireach, 'nuair a thàinig Agripa, agus Bernice, le mòrghreadhnachas, agus a chaidh iad a steach maille ris na h-àrd-cheannardaibh agus prìomh-dhaoineibh na caithreach do'n ionad éisdeachd, air do Fhestus àithne a thoirt, thugadh Pòl a làthair.

24 Agus thubhairt Festus, A rìgh Agripa, agus sibhse a dhaoine uile a ta làthair an so maille ruinn, tha sibh a' faicinn an duine so, mu'n do chuir sluagh nan Iudhach uile impidh ormsa, araon ann an Ierusalem, agus an so, a' glaoth-aich nach bu chòir e bhí ni b'fhaide beò.

25 Ach an uair a thuig mise nach d'rinn e ni sam bith a thoill bas, agus a chionn gu'n do thog e féin a chùis gu Augustus, shonraich mi a chur d'a ionnsuidh.

26 Mu nach 'eil ni sam bith cinnteach agam r'a sgrìobhadh chum mo Thighearn. Uime sin thug mi mach e do 'ur n-ionnsuidh-sa, agus gu h-àraidh a d' ionnsuidh-sa, a rìgh Agripa, chum an déigh rannsachadh a dheanamh, gu'm biodh agam ni éigin r'a sgrìobhadh.

27 Oir is mi-reusonta a'm' bheachd-sa prìosanach a chur uam agus gun na cùisean a ta 'na aghaidh ainmeachadh.

CAIB. XXVI.

1 An làthair Agripa, chuir Pòl an céill a chaith-beatha o 'òige, 12 agus cionnus a dh'iompaicheadh e gu mòrbhuileach, agus a ghairmeadh e gu bhí 'na abstol. 24 Chuir Festus as a leth gu robh e air a chuthach, ach fhreagair esan gu sèimh.

AN sin thubhairt Agripa ri Pòl, Tha cead agad labhairt air do shon féin. An sin shìn Pòl a mach a làmh, agus fhreagair e air a shon féin.

2 A ta mi 'gam mheas féin sona, a rìgh Agripa, do bhrìgh gu bheil mi gu freagairt air mo shon féin an diugh a d' làthair-sa, thaobh nan nithe sin uile a ta air an cur as mo leth leis na h-Iudhaich.

3 Gu h-àraidh, a chionn gu bheil thusa eòlach¹ air gach gnàth agus ceisid a tha am measg nan Iudhach: uime sin guidheam ort, éisd rium gu foighidneach.

4 Tha mo bheatha-sa o m'òige, a chaith-eadh air tús am measg mo chinnich féin ann an Ierusalem, aithnichte do na h-Iudhaich uile;

5 D'am b'aithne mi o thùs, (nam b'áill leo fianais a dheanamh,) gu'n do chaith mi mo bheatha a'm' Phairiseach, a réir an luchd comh-bharail a's teinne d'ar creidimh-ne.

6 Agus a nis tha mi a' m' sheasamh fo bhreitheanas air son dòchais a' gheallaidh a rinneadh le Dia d'ar n-aithrichibh:

7 Chum am bheil dùil aig ar dà thréibh dheug-ne teachd, a' deanamh seirblis do *Dhia* a là agus a dh' oidhche do ghnàth; agus air son an dòchais so tha mise, a rìgh Agripa, air m'agairt leis na h-Iudhaich.

8 C'ar son a mheasar² leibhse mar ni do-chreidsinn, gu'n dùisgeadh Dia na mairbh?

9 Gu deimhin mheas mise annam féin, gu'm bu chòir dhomh mòran nithe a dheanamh an aghaidh ainme Iosa o Nasaret.

10 Ni mar an ceudna a rinn mi ann an Ierusalem: agus air faotainn ùghdarrais o na h-àrd-shagartaibh, dhruid mi mòrau do na naoimh am prìosanaibh; agus an uair a chuireadh gu bàs iad, thug mi mo ghuth 'nan aghaidh.

11 Agus a' deanamh peanaidh orra gu minic anns gach sinagog, cho-éignich mi iad gu toibheum³ a labhairt; agus air dhomh bhí gu ro mhòr air bhoile 'nan aghaidh, rinn mi geur-leanmhuinn orra, eadhon gu bailtibh coigreach.

12 Air a so, 'nuair a bhia mi dol gu Damascus, le cumhachd agus barantas⁴ o na h-àrd-shagartaibh:

13 Mu mheadhon-là, O a rìgh, chunnaic mi air an t-slighe solus o nèamh, bu shoilleire na solus na gréine, a' dealrachadh mu'n cuairt orm, agus orra-san a bha 'g imeachd maille rium.

14 Agus an uair a thuit siun uile air an talamh, chuala mi guth a' labhairt rium, agus ag ràdh anns a' chainnt Eabhruidhich, A Shaul, a Shaul, c'ar son a ta thu ga m' gheur-leanmhuinn? *Is* cruaidh dhuitse bhí breabadh an aghaidh nan dealg.

15 Agus thubhairt mise, Cò thu, a Thighearn? Agus thubhairt esan, Is mise Iosa a ta thusa a' geur-leanmhuinn.

16 Ach éirich, agus seas air do chosaibh; oir dh'fhoillsich mi mi féin duit chum na crìche so, gu'n orduichinn thu a d' mhinisteir agus a d' fhianais araon air na nithibh sin a chunnaic thu, agus air na nithibh anns am foillsich mi mi féin duit;

17 Ga d' shaoradh o'n t-sluagh, agus o na Cinnich, chum am bheil mi nis ga d' chur,

18 A dh'fhosgladh an sùl, chum gu tionndaidh iad⁵ o dhorchadas gu solus,

¹ gur aithne dhomh gu bheil thusa eòlach.

² C'ar son? am measar.

³ gu beum a thabhairt do ainm Iosa.

⁴ ùghdaras, comas.

⁵ agus gun tionndadh.

agus o chumhachd Shatain gu Dia, chum gu faigh iad maithneas pheacanna, agus oighreachd maille ris a' mhuinntir sin a ta air an naomhachadh tre'n chreidimh a ta annam-sa.

19 Uime sin, a rìgh Agripa, cha robh mi cas-ùmhail do'n taisbean nèamh-aithd:

20 Ach shearmonaich mi air tùs dhoibhsan ann an Damascus, agus ann an Ierusalem, agus air feadh tìre Iudea uile, agus an sin do na Cinnich, iad a dheanamh aithreachais agus pillinn ri Dia, a' deanamh oibre iomchuidh an aithreachais¹.

21 Air son nan nithe so ghlac na h-Iudhaich mi san teampull, agus b' àill leo mo mharbhadh².

22 Uime sin air dhomh còmhnaidh fhaotainn o Dhia, bhuaanaich mi gus an là'n diugh, a' deanamh fianuis do'n bheag agus do'n mhòr, gun nì air bith a' labhairt ach na nithe sin a thubhairt na fàidhean agus Maois a bha gu teachd;

23 Gu robh Criosd gu fulang, agus gu robh e gu éirigh an ceud neach o na marbhaibh, agus gu'm foillsicheadh e solus do'n phobull, agus do na Cinnich.

24 Agus air dha bhì labhairt nan nithe so air a shon féin, thubhairt Festus le guth àrd, Tha thu air mhi-chéill³ a Phòil: tha mòr-fhòghlum ga d' chur air bhoile.

25 Ach thubhairt esan, Cha 'n' eil mi air bhoile, Fhestuis ro òirdheirc; ach tha mi a' labhairt bhriathra na fìrinn agus na céille.

26 Oir a ta fhios aig an rìgh roimh am bheil mise a' labhairt gu saor, air na nithibh so: oir tha cinnt agam nach 'eil a h-aon do na nithibh so an ain-fhios da; oir cha'n ann an cùil a rinneadh so.

27 Am bheil thu creidsinn nam fàidhean, a rìgh Agripa? tha fhios agam gu bheil thu 'g an creidsinn.

28 An sin thubhairt Agripa ri Pòl, Is beag nach 'eil thu 'gam aomadh gu bhì am Chriosduidh.

29 Agus thubhairt Pòl, B'e mo ghuidhe air Dia, gu'm biodh cha'n e mhàin thusa, ach mar an ceudna iadsan uile a tha 'g éisdeachd rium an diugh, ann am beag agus am mòr, mar a ta mise, saor o na geimhlibh so.

30 Agus air dha na briathra so a labhairt, dh'éirich an rìgh, agus an t-uachdaran, agus Bernice, agus an dream a shuidh maille riu:

31 Agus an uair a chaidh iad a lethtaobh, labhair iad r'a chéile, ag ràdh, Cha 'n' eil an duine so a' deanamh nì air bith toillteanach air bàs, no air geimhlibh.

32 An sin thubhairt Agripa ri Festus, Dh'fheudtadh an duine so a leigeadh as, mur bhiodh gu'n do thog e a chùis gu Ceasar.

CAIB. XXVII.

1 *Ghabh Pòl long do'n Ròimh; 9 dh'innis e roimhlainh cumart an turuis, ach cha d'thugadh creideas da. 14 Luaisgeadh iad null agus a nall le stoirm, agus dh'fhuiling iad long-bhrisidh; 44 gidheadh thàinig iad air tìr gu tearuinte.*

AGUS an uair a thugadh breth sinne a sheòladh do'n Eadailt, thug iad Pòl thairis, maille ri prìsonaich àraidh eile, do cheannard-ceud d'am b'ainm Iulius, do chuideachd Augustus.

2 Agus air dhuinn dol air luing le Adramitium, thog sinn ar seòil, a' cur romhainn seòladh seachad air crìochaibh na h-Asia, air do Aristarchus Macedonach o Thesalonica bhì maille ruinn.

3 Agus air an là màireach, thàinig sinn gu Sidon. Agus air do Iulius buntainn gu suaice⁴ ri Pòl, leig e dha dol a dh'ionnsuidh a chàirde chum comhfhurtachd fhaotainn.

4 Agus air dhuinn stiùradh as a sin, sheòil sinn fo Chiprus, a chionn gu robh na gaotha⁵ 'nar n-aghaidh.

5 Agus an uair a sheòil sinn troimh'n fhairge ta làimh ri Cilicia agus Pamphilia, thàinig sinn gu Mira baile⁶ do Licia.

6 Agus fhuair an ceannard-ceud long an sin o Alesandria, a bha seòladh do'n Eadailt, agus chuir e sinn a steach innte.

7 Agus an uair a sheòil sinn gu mall rè mòran do làithibh, agus a thàinig sinn air éigin fa chomhair Chniduis, a chionn nach do leig a' ghaoth leinn, sheòil sinn fo Chrete, fa chomhair Shalmone;

8 Agus air dhuinn seòladh air éigin seachad air, thàinig sinn gu ionad àraidh ris an abrar, Na calaidh sgiamhach, am fagus d'an robh baile Lasea.

9 Agus air do mhòran ùine dol seachad, 'nuzair a bha seòladaireachd a nis cumartach, a chionn gu'n deachaidh an trasgadh⁷ cheana seachad, chomhairlich Pòl iad.

10 Ag ràdh riu, Fheara, tha mi faicinn gu'm bi an t-seòladaireachd so le dochann agus call mòr, cha'n e mhàin do'n luchd agus do'n luing, ach d'ar n-anamaibh féin.

11 Gidheadh, is mò chreid an ceannard-ceud an seòladair agus maighstir na luinge, na na nithe a labhradh le Pòl.

12 Agus a chionn gu'n robh an caladh neo iomchuidh gus an gearmhradh a chaitheadh ann, b'ì comhairle na cuid bu mhò seòladh as a sin mar an ceudna,

¹ cubhaibh do aithreachas, àiridh air aithreachas.

² làmh a chur annam.

³ air a chluathach.

⁴ caoinmhicil.

⁵ ceithir.

⁶ an sotrbheas.

⁷ trasgadh.

agus nam feudadh iad air chior sam bith teachd gu Phenice, caladh do Chreite a ta ag amharc chum an iar-dheas, agus an iar-thuath, agus fantuinn rè a' gheamhraidh *an sin*.

13 Agus an uair a shéid a' ghaoth á deas gu cùin, shaoil iad gu d'fhuair iad an rùn, agus ag togail an seòl dhoibh, stiùir iad ri taobh Chreite.

14 Ach an ceann beagann 'na dhéigh sin, shéid gaoth anrathach¹ 'na h-aghaidh², ris an abrar Eucloidon.

15 Agus air bhi do'n luing air a fuadachadh, agus gun chomas di dol an aghaidh na gaoithe, leig sinn ruith dhi.

16 Agus air dhuinn ruith a stigh fuidh eilean beag àraidh d'am b'ainm Clada, is ann le éigin a ràinig sinn air a' bhàta:

17 Agus air dhoibh a thogail suas, ghnàthaich iad gach gleus còmhnuidh, a' crìosadh na luinge fuipe; agus air dhoibh bhi fo eagal gu'n tuiteadh iad sa' bheòghaineimh, leig iad an seòl sìos, agus mar sin dh'iomaineadh iad.

18 Agus air dhuinne bhi gu ro mhòr air ar luasgadh³ leis an doiminn⁴, air an là 'na dhéigh sin thilg iad a mach *an luchd*;

19 Agus air an treas là thilg sinn le ar làmhaidh féin a mach acfuinn na luinge.

20 Agus an uair nach robh a' ghrian no na reulta r'am faicinn rè mòrain do làitheibh, agus a luidh doiminn nach bu bheag oirnn, thugadh an sin uainn gach uile dhòchas gu teasairgteadh sinn.

21 Ach air dhuinn bhi fada 'nar trasg, an sin air seasamh do Phòl 'nam meadhon, thubhairt e, Fheara, bu chòir dhuibh mo chomhairle-sa ghabhail, agus gun fhuasgladh o Chreite, agus an dochann agus an call so a sheachnadh.

22 Agus a nis guidheam oirbh, biodh misneach mhaith agaibh: oir cha bhi call anama sam bith 'nur measg, ach a *mhàin* na luinge.

23 Oir, air an oidhche nochd, sheas làimh rium-sa aingeal an Dé sin, d'am buin mi, agus d'am bheil mi deanamh seirbhis,

24 Ag ràdh, A Phoil, na biodh eagal ort; is éigin duit bhi air do thoirt an làthair Cheasair: agus, feuch, thiodhlaic⁵ Dia dhuith iadsan uile a ta seòladh maille riut.

25 Uime sin, fheara, biodh agaibh deadh misneach: oir a ta mi creidsinn Dhé, gu'n tachair ceart mar a labhradh rium.

26 Ach is éigin duinn bhi air ar tilgeadh air eilean àraidh.

27 Agus an uair a bha an ceathramh oidhche deug air teachd, air dhuinne bhi air ar séideadh null agus a nall⁶ ann an

cuan Adria, mu mheadhon-oidhche b'i barail nam maraichean gu robh iad am fagus do thir éigin:

28 Agus air leigeadh na luaidhe sìos doibh⁷, fhuair iad *an doimhne* fichead aitheamh; agus an uair a chaidh iad beagan air an aghaidh, leig iad sìos an luaidh a ris, agus fhuair iad i 'na cùig aitheamh deug.

29 An sin air dhoibh bhi fo eagal gu'm buaileadh iad air ionadaibh garbha, thilg iad ceithir acraichean á deireadh na luinge, agus ghuidh iad an là a theachd.

30 Agus an uair a bha na maraichean air tì⁸ teicheadh a mach as an luing, agus a leig iad sìos am bàta do'n fhaire, a' gabhail orra bhi tilgeadh a mach acraichean á toiseach na luinge.

31 Thubhairt Pòl ris a' cheannard-ceud, agus ris na saighdearaibh, Mur fan iad sin san luing, cha 'n 'eil e'n comas duibh bhi àir bhur teasairginn.

32 An sin ghearr na saighdearan cùird a' bhàta, agus leig iad leis tuiteam sìos.

33 Agus am feadh a bha an là a' teachd, thug Pòl a chomhairle orra uile biadh a ghabhail, ag ràdh, Is e so an ceathramh là deug dhuibh a' feitheamh, agus a' fantuinn 'nur trasg, gun bhiadh sam bith a ghabhail.

34 Uime sin guidheam oirbh biadh a ghabhail; oir a ta so chum bhur slàinte: oir cha chaillear⁹ fuiltean á ceann a h-aon agaibh.

35 Agus air dha na nithe so a labhairt, agus aran a ghlacadh, thug e buidheachas do Dhia 'nan làthair uile; agus air dha a bhriseadh, thòisich e ri itheadh.

36 An sin ghlac iad uile deadh mhisneach, agus ghabh iad biadh mar an ceudna.

37 Agus bha sinn a dh'anamaibh uile anns an luing, dà cheud agus sè deug agus trì fichead.

38 Agus an uair a shàsuicheadh iad le biadh, dh'eutromaich iad an long, agus thilg iad a mach an cruithneachd san fhaire.

39 Agus an uair a bha'n là air teachd, cha d'aithnich iad am fearann: ach thug iad an aire do lùib¹⁰ àraidh aig an robh tràigh, anns an robh mhiann orra, nam b'urrainn iad, an long a chur gu tìr.

40 Agus air togail nan acraichean doibh, leig iad ris an fhaire i, agus an uair a dh'fhuasgail iad ceanglaichean na stiùire, agus a thog iad am prionn-sheòl¹¹ ris a' ghaoith, sheòl iad chum na tràighe.

41 Agus air tuiteam dhoibh ann an ionad *àraidh* far an do chòimnich dà fhaire a

¹ *stoirmeil.*

² *'nar n-aghaidh*

³ *séideadh o thonn gu tonn.*

⁴ *stoirn.*

⁵ *dheònuich.*

⁶ *chuige agus uait.*

⁸ *fonn.*

⁹ *tuit.*

¹¹ *an seòl mòr*

⁷ *grunnachadh dhoibh.*

¹⁰ *ghèdha.*

chéile, bhuail iad an long air grund; agus air sàthadh d'a toiseach sa' ghrund, dh'fhian e gun charachadh, ach bhriseadh a deireadh le aiumear nan tonn.

42 Agus b'i comhairle nan saighdearan gu marbhadh iad na prìosanaich, air eagal gu'n snàmhadh neach sam bith dhiubh a mach, agus gu rachadh iad as.

43 Ach air do'n cheannard-ceud bhi toileach Pòl a theasairginn, chum e air ais o'n comhairle iad, agus dh'àithn e dhoibh-san d'am b'aithne snàmh, *iad féin* a thilgeadh sa' chuan air tùs, agus dol a mach air tìr:

44 Agus do chàch dh'àithn e, cuid diubh *dhòl* air clàraibh, agus cuid eile air *mèiribh briste* do'n luing: agus mar sin tharladh gu'n deachaidh iad uile tèaruinte gu tìr.

CAIB. XXVIII.

1 An déigh an long-bhrisidh thug an sluagh borb aoidheachd gu suairce do Phòl. 5 Cha do chiùrradh a làmh le nathair nimhe a lean rithe. 8 Shlànuich e mòran eucaile san eilean. 11 Ghabh iad an turus chum na Ròimhe. 17 Chuir Pòl an cèill do na h-Iudhaich aobhar a theachd do'n Ròimh.

AGUS an uair a thèarnadh iad, thuig iad an sin gu'm b'e Melita ainm an eilein.

2 Agus nochd an sluagh borb caoinheas nach bu bheag dhuinn: oir air fadadh teine dhoibh, ghabh iad ruinn uile, air son an uisge a bha ann, agus air son an fhuachd.

3 Agus air do Phòl dorlach bhioran a thional, agus an cur air an teine, thàinig nathair nimhe mach as an teas, agus shàs i 'na làimh.

4 Agus an uair a chunnaic an sluagh borb a' bhéisd an crochadh r'a làimh, thubhairt iad r'a chéile, Gu cinnteach is mortair an duine so, do nach fuiling dioghaltas bhi beò, ged theasairgeadh o'n fhairge e.

5 Agus air dhasan a' bhéisd a chrathadh dheth anns an teine, cha d'fhulaing e dochann sam bith.

6 Ach bha iadsan a' feitheamh c'uin a dh'atadh e, no a thuiteadh e sìos marbh gu h-obann: ach an uair a dh'fheith iad uime fhada, agus nach fac iad dochann sam bith a' teachd air, chaochail iad an inntinn, agus thubhairt iad gur Dia e.

7 Agus bha mu thimchioll an àite sin fearann aig prìomh-dhuine an eilein, d'am b'ainm Publius, a ghabh ruinean agus a thug rè thrì làithean aoidheachd dhuinn gu càirdeil.

8 Agus tharladh gu robh athair Phublius 'na luidhe gu tinn le fiabhrus¹, agus gearrthach fola: air do Phòl dol a teach

d'a ionnsuidh, rinn e urnuigh, agus air dha a làinhan a chur air, leigheas se e.

9 Agus an uair a rinneadh so, thàinig mar an ceudna muinntir eile a bha euslan san eilean d'a ionnsuidh, agus leighiseadh iad:

10 Muinntir mar an ceudna a thug mòr-urram dhuinn; agus an uair a dh'fhalbh sinn, chuir iad na nithe sin leinn a bha feumail *duinn*.

11 Agus an déigh thrì mìosa sheòl sinn ann an luing o Àlesandria, a chaith an geamhradh san eilean d'am bu shuaith-eantas Castor agus Polluc.

12 Agus an uair a chaidh sinn air tìr² aig Siracuse, dh'fhan sinn an sin trì làithean.

13 Agus air seòladh dhuinn timchioll as a sin, thàinig sinn gu Regium: agus an ceann là 'na dhéigh sin shéid a' ghaoth á deas, agus thàinig sinn an t-ath là gu Puteoli:

14 Air dhuinn bràithrean fhaotainn an sin, chuireadh impidh oirnn leo fantuinn seachd làithean maille ri u: agus mar sin thriall sin chum na Ròimhe.

15 Agus as a sin, air faotainn ar sgéil do na bràithribh, thàinig iad 'nar coinneamh gu Apii-forum, agus na Tri tighibh-òsda; agus an uair a chunnaic Pòl iad, thug e buidheachas do Dhia, agus ghabh e misneach.

16 Agus an uair a thàinig sinn do'n Ròimh thug an ceannard-ceud thairis na prìosanaich do cheannard an fhreiceadain: ach thugadh comas do Phòl a bhi leis féin³, maille ri aon saighdear a bha 'ga ghleidheadh.

17 Agus tharladh, an déigh thrì làithean, gu'n do ghairm Pòl maithean⁴ nan Iudhach an ceann a chéile. Agus an uair a chruinnicheadh iad, thubhairt e ri u, Fheara agus a bhràithre, ged nach d'rinn mise ni sam bith an aghaidh a' phobuill, no ghnàthanna nan aithriche, thugadh thairis mi a'm phrìosanach o Ierusalem do làmh-aibh nan Romhanach.

18 Muinntir an déigh dhoibh mo cheasnachadh, leis am bu mhiann mo leigeadh as, a chionn nach robh coire bàis sam bith annam.

19 Ach an uair a bha na h-Iudhaich a' labhairt an aghaidh so, b'éigin domh mo chùis a thogail gu Ceasar; cha'n e gu bheil coire sam bith agam r'a chur á leth mo chinnich.

20 Air an aobhar so uime sin chuir mi fios oirbhe, chum gu faicinn sibh agus gu'n labhrainn ribh: oir is ann air son dòchais Israeil a ta mi ceangailte leis an t-slabhraidh so.

¹ teasaich.

² air teachd tìr dhuinn.

³ far am bu toil leis.

⁴ uaislean, prìomh-dhaoine.

21 Agus thàbhairt iadsan ris, Cha d'fhuair sinne litriche sam bith á Iudea mu d' thimchioll, cha mhò a dh'fhoillsich no dh'innis aon do na bràithribh a thàinig, olc sam bitlì umad.

22 Ach bu mhaith leinn a chluinntinn uaitse ciod i do bharail : oir mu thimchioll na guè-chreidimh so tha fhios againn gu'n labhrar sgach àit 'na h-aghaidh.

23 Agus air suidheachadh là ris, thàinig mòrand'a ionnsuidh chum a cheithreanna; d'an do mhinich e rìoghachd Dhé, a' deanamh fianuis uimpe, agus a' cur impidh orra thaobh nan nithe a bhuineas do losa, araon á lagh Mhaois, agus as na fàidhibh, o mhoch-thrath gu feasgar.

24 Agus chreid cuid na nithe a labhradh, agus cha do chreid cuid eile dhiubh.

25 Agus air dhoibh bhi an aghaidh a chéile, sgaoil iad, air do Phòl aon fhocal a ràdh, Is maith a labhair an Spiorad naomh tre'n fhàidh Esaias, r'ar n-aith-richibh,

26 Ag ràdh, Imich chum a' phobuill so, agus abair, Le cluinntinn cluinidh sibh,

agus cha tuig sibh; agus le faicinn chi sibh, agus cha'n aithnich sibh¹.

27 Oir a ta cridhe a' phobuill so air fàs reambar, agus tha iad a' cluinntinn gu trom² le'n cluasaibh, agus chaog³ iad an sùilean; air eagal gu faicheadh iad le'n sùilb, agus gu'n cluinneadh iad le'n cluasaibh, agus gu'n tuigeadh iad le'n cridhe, agus gu'm pilleadh iad agus gu'n slànuichinn-sa iad.

28 Uime sin biodh fhios agaibh-sa, gu'n do chuireadh slàinte Dhé chum nan Cinn-each agus éisdidh iadsan.

29 Agus an uair a thubhairt e na briathra so, dh'imich na h-Iudhaich rompa, agus bha mòr-reusonachadh⁴ aca eatorra féin.

30 Agus dh'fhan Pòl dà bhliadhna iomlan 'na thigh-màil⁵ féin, agus ghabh e ris na h-uile dhaoineibh a thàinig d'a ionnsuidh,

31 A' searmonachadh rìoghachd Dhé, agus a' teagasg nan nithe a bhuineas do'n Tighearna Iosa Criosd, leis an uile dhàn-achd, gun toirmeasg.

¹ cha léir dhuibh.

² mall.

³ dhruid.

⁴ mòr-dheasboireachd.

⁵ thigh-réidh.

LITIR AN ABSTOIL PHOIL

CHUM NAN

ROMHANACH.

CAIB. I.

1 Mhol Pòl a dhreuchd do na Romhanaich, agus dh'innis e a thogradh gu teachd d'an ionnsuidh. 16 Ciod e soisgeul Chriosd, agus an fhìreantachd a ta e a' foillsachadh. 18 Tha fearg aig Dia ris gach uile ghné peacaidh. 21 Ciod iad peacanna nan Cinn-each.

POL seirbhiseach Iosa Criosd, a ghair-meadh 'na abstol a chuireadh air leth¹ chum Soisgeil Dé,

2 (A roimh-gheall e le 'fhàidhibh féin anns na sgrìobtuiribh naomha.)

3 Mu thimchioll a Mhic Iosa Criosd ar Tighearn, a rinneadh do shìol Dhaibhidh, a réir na feòla;

4 A dhearbhadh² bhi 'na Mhac do Dhia le cumhachd, a réir Spioraid na naomh-achd, tre aiseirigh o na marbhaibh;

5 Tre an d'fhuair sinne gràs agus abstol-achd chum umhlachd a' chreidimh am na asg nan uile chinneach air sgàth 'ainme-san;

6 Na measg am bheil siblse mar an ceudna air bhur gairm le Iosa Criosd:

7 Chum nan uile a ta san Roimh, air an gràdhachadh le Dia, air an gairm 'nan naoimh: Gràs gu robh dhuibh-se, agus sìth³ o Dhia ar n-Athair, agus o'n Tighearn Iosa Criosd.

8 Air tùs, tha mi toirt buidheachais do m' Dhia tre Iosa Criosd, air bhur son-sa uile, do bhrìgh gu bheil bhuir creidimh iomraideach air feadh an domhain gu léir.

9 Oir is e Dia m'fhianuis, d'am bheil mi a' deanamh seirbhis le m' spiorad ann an soisgeul a Mhic, gu bheil mi gun sgur a' deanamh luaidh⁴ oirbh,

10 A ghnàth a' guidhe ann am urnuighibh, (nam feudainn a nis fa-dheoidh air aon chor le toil Dé turus soirbheasach fhaotainn,) ri teachd do 'ur n-ionnsuidh-sa.

11 Oir a ta deidh⁵ agam air sibhse fhaicinn, ionnus gu pàirtich mi tiodhlac àraidh spioradail ribh, chum bhuir neart-achadh;

12 Sin ri ràdh, chum gu faigh mi comh-fhurtachd annaibh-sa⁶, tre chreidimh a

¹ sgaradh.

² dh'orduicheadh

³ sìothchaint.

⁴ iomraidh.

⁵ togradh

⁶ narann ribhsce.

chéile, bhuir creidimh-sa, agus mo chreidimh-sa.

13 Agus cha'n àill leam, a bhràithre, e bhinn aim-fhios duibhse gu'n do chuir mi romham gu minic teachd do 'ur n ionnsuidh, (ach bhacadh mi gus a so,) chum gu faighinn toradh éigin 'nur measg-sa fós, mar am measg nan Cinneach eile.

14 Oir a ta mi fo fhiachaibh araon do na Greugaich, agus do na daoineibh borba, araon dhoibh-sa a ta glic, agus dhoibh-sa a ta neo-ghlic.

15 Uime sin, mheud 's a ta an comas domh, tha mi ullamh chum an soisgeul a shearmonachadh dhuibh-se mar an ceudna a ta san Ròimh.

16 Oir cha'nà leam-sa soisgeul Chriosd: oir is e cumhachd Dhé e chum slàinte do gach neach a chreideas, do'n Iudhach air tùs, agus mar an ceudna do'n Gheugach.

17 Oir a ta fìreantachd Dhé air a' foillseachadh ann tre chreidimh gu creidimh: mar a ta e sgrìobhta, Bithidh am fìrean beò tre chreidimh.

18 Oir a ta fearg Dhé air a foillseachadh o nèamh an aghaidh gach uile mhi-dhiadhaidheachd, agus eucoir dhaoine, a tha bacadh¹ na fìrinn ann an neo-fhìreantachd:

19 Do bhrìgh gu bheil an ni air am feudar fios fhaotainn a thaobh Dhé follaiseach anna-san²; oir rinn Dia follaiseach dhoibh e.

20 Oir riamh o chruithachadhan t-saoghail a ta a nithe-san nach feudar fhaicinn, eadhon a chumhachd sìorruidh agus a Dhiadhachd, air am faicinn gu soilleir, air dhoibh bhi so-thuigsinn o na nithibh a rinneadh; chum gu biodh³ iad gun leithsgeul aca:

21 Do bhrìgh 'nuair a b' aithne dhoibh Dia, nach d' thug iad glòir dha mar Dhia, agus nach robh iad taingeil, ach gu'n d'fhàs iad dìomhain 'nan reusonachadh féin, agus gu'n do dhorchaidheadh an cridhe amaideach.

22 Ag ràdh gur daoine glìce iad féin, rinneadh amadain diubh:

23 Agus chaochail⁴ iad glòir an Dé neo-thruillidh gu dealbh a rinneadh, agus ri eunlaith, agus ainmhidhibh ceithir-chosach, agus bhéisdibh snáigeach.

24 Uime sin thug Dia thairis iad mar an ceudna, tre ana-miannaibh an cridhe féin, chum neòghloine, a thoirt easurraim d'an corpaibh féin eatorra féin:

25 Muinntir a chaochail fìrinn De gu bréig, agus a thug aoradh agus a rinn seirbhis do'n chreutair nì's mò na do'n Chruithear, a ta beannaichte gu sìorruidh. Amen.

26 Air a shon so thug Dia thairis iad do ana-miannaibh gràneil: oir chaochail eadhon am mnàin an gnàthachadh nàdurra chum a' ghnàtha a ta an aghaidh nàdur:

27 Agus mar an ceudna na fìr, air tréigsinn doibh gnàthachadh nàdurra na mnà, loisgeadh iad le'n togradh d'a chéile, fìrionnaich ri fìrionnaich ag oibreachadh gràneileachd⁵ agus iad a' faotainn dìolthuarasdail an seacharain anna féin, mar bu chòir.

28 Agus amhuil mar nach bu taitneach leo eòlas Dé a chumail, thug Dia thairis iad do intinn mhi-chéillidh, a dheanamh nithe nach robh iomchuidh:

29 Air dhoibh bhi air an lìonadh do'n uile eucoir, striopachas, olc, shannit, mhì-run: làn do fharmaid, do mhòrtadh, do chonnsachadh⁶, do cheilg, do dhroch-bheusaibh⁷; 'nan luchd-cogarsaich,

30 'Nan luchd-anacaint⁸, 'nan luchd-fuath air Dia, 'nan luchd-tarcuis, uaibhreach, 'nan luchd-ràiteachais⁹, 'nan luchd-cumadh uile, eas-ùmhail do phàrantaibh,

31 Eu-céillidh, 'nan luchd-brisidh coimh-cheangail, gun ghràdh nàdurra, do-réit-eachaidh, neo-thruacanta:

32 Muinntir d'an aithne ceartas Dé, (gu bheil iadsan a ni an leithide sin do nithibh toillteannach air bàs, *gidheadh* cha'n e mhàin gu bheil iad féin 'gan deanamh, ach a ta mar an ceudna tlachd aca do'n mhuinntir a ni iad.

CAIB. II.

1 Iadsan a ta peacachadh, ged tha iad a' cronachadh so an daoineibh eile, cha'n urrain iad an leithsgeul féin a ghabhail, 6 agus is lugha gu mòr na sin a dh'fheadas iad dol as o cheart-bhreitheanas Dé, mà's Iudhaich no Cinneich iad.

UIME sin a ta thu gun leithsgeul, O a dhuine, co air bith thu a tha toirt breth: oir an uair a tha thu toirt breth air neach eile, tha thu ga d' dhèidhtidh féin; oir thusa a tha toirt breth, tha thu deanamh nan nithe sin féin.

2 Ach a ta fios againne gu bheil breitheanas Dé a réir fìrinn, an aghaidh na muinntir a tha deanamh an leithide sin.

3 Agus an saoil thusa so, O a dhuine, a tha toirt breth orra-san a ni an leithide sin, agus a ta 'gan deanamh thu féin, gu'n téid thu as o bhreitheanas Dé?

4 No 'n dean thu tarcuis air saoihbreas a mhaithais, agus 'fhoighididh, agus 'fhad-flulangais, gun fhios bhi agad gu bheil maithas Dé ga d' threòrachadh chum aithreachais?

5 Ach a réir do chruais agus do chridhe neo-aithreachail, a ta thu càrnadh¹⁰ suas feirge dhuit féin fa chomhair là na feirge,

¹ cumail.

² nam measg.

³ ionnug gu bheil.

⁴ dh'atharraich.

⁵ an ni sin a ta mi-chiatach.

⁶ chomhstri.

⁷ an-amèineachd, eascaoinachd.

⁸ Nan luchd cùl-chàineadh.

⁹ bostail.

¹⁰ tasgaidh.

agus foillseachaidh ceart-bhreitheanais Dé;

6 A bheir do gach aon a réir a ghníomh-ara;

7 Dhoibh-san a ta le buanachadh gu foighidneach ann an deadh obair, ag iarraidh glóire, agus urram¹, agus neo-bhàs-mhorachd, a' bheatha inbhaireannach:

8 Ach dhoibh-san a ta conspoideach, agus nach 'eil ùmhal do'n fhìrinn, ach a ta ùmha do'n eucoir, diom agus fearg;

9 Amhghar agus teanntachd air gach anam duine a ta deanamh uilc, do'n Iudhach air tùs, agus mar an ceudna do'n Gheugach:

10 Ach glóir, agus urram, agus sìth, do gach duine a ni maith, do'n Iudhach air tùs, agus do'n Gheugach mar an ceudna:

11 Oir cha'n 'eil spéis aig Dia do phearsa seach a chéile.

12 Oir a mheud as a pheacaich gun an lagh, sgrìosar iad gun an lagh; agus a mheud as a pheacaich fuidh an lagh, dìtear iad leis an lagh;

13 (Oir cha'n iad luchd-éisdeachd an lagha a ta nam fireanaibh am fianuis Dé, ach bithidh luchd-deanamh an lagha air am fireanachadh².)

14 Oir an uair a ta na Cinnich aig nach 'eil lagh, a thaobh nàduir a' deanamh nan nìthe a ta san lagh, air dhoibh-san a bhi gun lagh tha iad nan lagh dhoibh féin:

15 Muinntir a ta nochdadh obair an lagha sgrìoblta 'nan cridheachaibh, air bhi d'an coguis a' deanamh fianuis leo, agus an smuaintean eatorra féin gan agairt, no a' gabhail an leithseil³.)

16 San là anns an toir Dia breth air nìthibh uaigneach dhaoine, a réir mo shoisgeil-sa, tre Iosa Crìosd.

17 Feuch, goirair Iudhac dhiot-sa, agus tha thu cur dòigh san lagh, agus a deanamh uail⁴ á Dia;

18 Agus is aithne dhuit a thoil, agus a ta thu a' dearbhadh nan nìthe⁵ a's fearr, air dhuit bhi air do theagasg as an lagh,

19 Agus a ta thu dòchasach gur ceann-ùil⁶ thu féin do na doill⁷, solus dhoibh-san a ta an dorchadas,

20 Fear-fòghluim do dhaoineibh neo-eagnaigh, fear-teagaisg do leanabaibh, aig am bheil samhlahd an eòlais agus na fìrinn a ta san lagh.

21 Thusa uime sin a ta teagasg neach eile, nach 'eil thu ga d' theagasg féin? thusa a ta searmonachadh gun ghoid a dheanamh, am bheil thu ri goid?

22 Thusa tha 'g ràdh gun adhaltrannas a dheanamh, am bheil thu deanamh adhaltrannais? thusa le'n gràin ìodhola⁸, am bheil thu ri naomh-ghoid?

23 Thusa a ta deanamh uail as an lagh, an tabhair thu, le briseadh an lagha, eas-urram do Dhia?

24 Oir a ta airm Dhé a' faotainn toibh-eim do 'ur taobhsa am measg nan Cinn-each, mar a ta e sgrìobhta.

25 Oir a ta tairbhe gu fìrinneach anns an timchioll-ghearradh, ma ghleidheas tu an lagh: ach ma's fear-brisidh an lagha thu, tha do thimchioll-ghearradh 'na neo-thimchioll-ghearradh dhuit.

26 Uime sin, ma ghleidheas an neo-thimchioll-ghearradh⁹ fireantachd an lagha, nach measar a neo-thimchioll-ghearradh-san mar thimchioll-ghearradh?

27 Agus nach dìt an neo-thimchioll-ghearradh thaobh nàduir, a ta a' coimh-ionadh an lagha, thusa a tha tre'n litir agus tre'n timchioll-ghearradh a' d' fhear-brisidh an lagha?

28 Oir cha'n Iudhach esan, a tha mar sin o'n leth muigh; agus cha'n e sin an timchioll-ghearradh, a tha gu follaiscach san fheoil.

29 Ach is Iudhach esan, a tha mar sin san taobh a stigh¹⁰; agus is e sin an timchioll-ghearradh a tha sa' chridhe, agus san spiorad, cha'n ann san litir aig am bheil a chliù cha'n ann o dhaoineibh, ach o Dhia.

CAIB. III.

1 Sochair nan Iudhach; 3 nach do chaill iad: 9 gidheadh dh'fhàg an lagh shìos iad mar an ceudna thaobh peacaidh. 20 Uime sin cha'n 'eil feòil air bith air an saoradh tre'n lagh. 28 ach a ta na h-uile air an saoradh tre chreidimh a mhaìn.

CIOD e uime sin barrachd an Iudh-aich? no ciod e tairbhe an timchioll-ghearraidh?

2 Is mòr sin air gach dòigh: air tùs, do bhrìgh gur ann riu-san a dh'earbadh briathra¹¹ Dhé.

3 Oir ciod e sin ged nach do chreid cuid? an dean am mi-chreidimh-san fìrinn Dhé gun éifeachd?

4 Nar leigeadh Dia: ach biodh Dia fìor, agus gach duine 'na bhreugaire; a réir mar a ta e sgrìobhta, Chum gu bi thu ceart ann ad bhriathraibh, agus gu'n toir thu buaidh 'nuair a bheirear breth ort.

5 Ach ma mholas ar n-eucoir-ne fireantachd Dhé, ciod a their sinn? am bheil Dia eucorach a tha deanamh dioghaltais? (tha mi a' labhairt mar dhaine.)

6 Nar leigeadh Dia: no cionnus a bheir Dia breth air an t-saoghal?

7 Oir ma ta fìrinn Dhé tre mo bhréig-sa air a meudachadh chum a ghloire-san; c'ar son a ta mise air mo dlùteadh mar pheacach?

¹ onoir.

² air an saoradh, air an glanadh o chionta.

³ a' gabhail tlachd do na nìthibh.

⁴ fear-seòlaidh.

⁵ dallaidh.

⁶ dealbhan.

⁷ esan a tha neo-thimchioll-ghearrta.

⁸ san ionad fhòlaichte.

⁹ oracla.

8 Agus c'ar son nach dean sinn olc, chum gu'n tig maith as? (mar a labhrar gu toibheumach umainne, agus mar a thubhairt cuid gu bheil sinn ag ràdh,) *muinntir* d' am bheil an dteadh a réir ceartais.

9 Ciod uime sin? am bheil barrachd againne? cha'n 'eil air aon chor: oir dhearbha sinn roimhe gu bheil araon na h-Iudhaich agus na Cinnich uile fo pheacadh;

10 Mar a ta e sgriobhta, Cha'n 'eil ionracan ann, cha'n 'eil fiù a h-aon:

11 Cha'n 'eil neach *ann* a thuigeas, cha'n 'eil neach *ann* a tha 'g iarraidh Dhé.

12 Chlaon iad uile *as an t-slighe*, tha iad uile mi-tharbhach; cha'n 'eil neach a tha deanamh maith, cha'n 'eil fiù a h-aon.

13 Is uaigh flosgailte an sgòrnach; labhair iad cealg le'n teangaibh; tha nimh nan nathracha nimhe fo 'm bilibh.

14 Aig am bheil am beul làn do mhallachadh agus do sheirbhe:

15 Tha an cosan luath a dhòrtadh fola:

16 Tha léir-sgrios agus truaighe 'nan slighibh:

17 Agus slighe na sìthe cha b'aithne dhoibh:

18 Cha'n 'eil eagal Dé fa chomhair an sùl.

19 A nis tha fhios againn ge b'e nithe a ta'n lagh a' labhairt, gur ann riu-san a ta fuidh 'n lagh a tha e 'gan labhairt: chum gu druidear gach uile bheul, agus gu'm bi an saoghal uile air fhaotainn ciontach am fianuis Dé².

20 Uime sin cha bhi feòil air bith air a fireanachadh³ 'na fhianuis-san, tre oibribh an lagha: oir *is ann* tre an lagh a ta eòlas peacaidh.

21 Ach a nis tha fireantachd Dhé air a foillseachadh as eugmhais an lagha, a' faotainn fianuis o'n lagh agus o na fàidhich;

22 Eadhon fireantachd Dhé tre chreidimh Iosa Crìosd, do na li-uile, agus air na h-uile a chreideas; oir cha'n 'eil eadar-dhealachadh ann:

23 Oir pheacaich na h-uile, agus tha iad air teachd gearr⁴ air glòir Dhé;

24 Air dhoibh bhli air am fireanachadh gu saor le a ghràs, tre an t-saorsa a ta ann an Iosa Crìosd:

25 Neach a shònraich Dia 'na ìobairt-réitich, tre chreidimh 'na fhuil, chum 'fhìreantachd fhoillseachadh le maithneas nam peacanna a chaidh seachad, tre fhad-fhulangas Dé;

26 A dh'fhoillseachadh, *tha mi ag ràdh*, 'fhìreantachd-san san àm a ta làthair;

chum gu'm biodh e cothromach, agus gu'm fireanaicheadh e an ti a chreideas ann an Iosa.

27 C'ait uime sin *am bheil* uail? Dhruideadh a mach i. Ciod e an lagh *leis an do dhruideadh a mach i?* *an e lagh* nan oibre? Cha'n e; ach tre lagh a' chreidimh.

28 Tha sinn uime sin a' meas gu bheil duine air fhìreanachadh tre chreidimh as eugmhais oibre an lagha.

29 An e Dia nan Iudhach a mhàin e? Nach e mar an ceudna Dia nan Cinnich? Gu deimhin nan Cinneach mar an ceudna:

30 Do bhrìgh gur aon Dia, a dh'fhìreanaicheas⁵ an timchioll-ghearradh o chreidimh, agus an neo-thimchioll-ghearradh tre chreidimh.

31 Am bheil sinn uime sin a' cur an lagha an neo-bhrìgh tre'n chreidimh? Nar léigeadh Dia: ach a ta sinne a' daingneachadh⁶ an lagha.

CAIB. IV.

1 Mheasadh creidimh Abraham dha mar fhìreantachd, 10 mun do thimchioll-ghearradh e. 13 Tre chreidimh a mhàin shealbhach e fèin agus a shlioch an gealladh. 16 Is e Abraham athair nan uile dhaoine a ta creidsinn. 24 Bithidh ar creidimh-ne mar an ceudna air a mheas dhuinn mar fhìreantachd.

CIOD ma ta a their sinn a fhuair ar n-athair Abraham a réir na feòla?

2 Oir ma dh'fhìreanaicheadh Abraham le oibribh, tha aobhar uail aige, ach cha'n ann a thaobh Dhé.

3 Oir ciod a ta an sgriobtuir ag ràdh? Chreid Abraham Dia, agus mheasadh sin da mar fhìreantachd.

4 A nis do'n ti a ni obair cha'n ann mar ghean-maith⁷ a mheasar an tuarsadal, ach mar fhiachaibh.

5 Ach do'n ti nach dean obair, ach a ta creidsinn anns an ti a dh'fhìreanaicheas an duine mi-dhiadhaidh, measar a chreidimh mar fhìreantachd.

6 Amhuil mar a ta Daibhidh a' cur an cèill beannachadh an duine sin d'am meas Dia fireantachd as eugmhais oibre, *ag ràdh*,

7 Is beannaichte iadsan a fhuair maithneas 'nan euceirtibh, agus aig am bheil am peacanna air am folach.

8 Is beannaichte an ti nach cuir an Tighearn peacadh as a leth.

9 Am bheil ma ta am beannachadh so teachd air an timchioll-ghearradh a mhàin, no mar an ceudna air an neo-thimchioll-ghearradh? Oir tha sinn ag ràdh gu'n do mheasadh creidimh do Abraham mar fhìreantachd.

² a tha. ³ buailteach do bhreth Dhé, buailteach do dhìteadh Dhé. ⁴ saoradh, glanadh.

⁵ fa dheirad, a dheidh-laimh.

⁶ a shaoas, a ghairmeas glan.

⁷ a' neartachadh.

⁸ mar fhuibhor.

10 Cionnus ma ta a mheasadh *dha* e ? An ann an uair a bha e san timchioll-ghearradh, no san neo-thimchioll-ghearradh ? Cha'n ann san timchioll-ghearradh, ach san neo-thimchioll-ghearradh.

11 Agus fhuair e comhar an timchioll-ghearraidh, seula fireantachd a' chreidimh a bha aige san neo-thimchioll-ghearradh, chum gu'm biodh e 'na athair aca-san uile a ta creidsinn san neo-thimchioll-ghearradh, chum gu measadh fireantachd dhoibh-san mar an ceudna :

12 Agus 'na athair an timchioll-ghearraidh dhoibh-san nach 'eil a mhàin do'n timchioll-ghearradh, ach mar an ceudna a ta 'g imeachd ann an ceumaibh a' chreidimh ar n-Athar Abraham, a bha aige san neo-thimchioll-ghearradh.

13 Oir cha b'ann tre'n lagh a thugadh an gealladh do Abraham no d'a shìol, Gu'm biodh e 'na oigrlre air an t-saoghal, ach tre fhìreantachd a' chreidimh.

14 Oir ma ta iadsan a bhuineas do'n lagh 'nan oighreachaibh, tha creidimh air a dheanamh dìomhain, agus an gealladh gun bhrìgh :

15 A chionn gu bheil an lagh ag oibreachadh feirge : oir far nach 'eil lagh, cha'n 'eil an *sin* briseadh lagha.

16 Uime sin is ann o chreidimh a ta 'n oighreachd, ionnus gu'm biodh i tre ghràs : chum gu'm biodh an gealladh daingean do'n t-sìol uile, cha'n ann a mhàin dhoibh-san a bhuineas do'n lagh, ach mar an ceudna dhoibh-san a bhuineas do chreidimh Abraham, neach is e ar n-athair-ne uile,

17 (A réir mar a ta e sgrìobhta, Dh'ord-uich mi thu a'd' athair mhòran chinneach), 'na làthair sa anns an do chreid e, eadhon Dia, a ta beothachadh nam marbh, agus a ta gairm nan nìthe sin nach 'eil idir ann mar gu'm biodh iad ann :

18 Neach an aghaidh dòchais a chreid an dòchas, chum gu'm biodh e 'na athair mhòran chinneach ; a réir mar a dubh-radh, Mar so bìthidh do shliochd.

19 Agus air dha gun bhì anmhuinn an creidimh, cha do chuir e an suim gu robh a chorp féin a nis marbh, air dha bhì timchioll ceud bliadhna dh'aois, no maibhe bronn Shara :

20 Agus cha do chuir e an amharus gealladh Dhé le mi-chreidimh ; ach bha e làidir an creidimh, a' toirt glòire do Dhia :

21 Agus bha làn-deimhin aige, an ti a thug an gealladh, gur comasach esan air a choimhlionadh.

22 Agus uime sin mheasadh so dhasan mar fhìreantachd.

23 A nis cha b'ann air a shon-san 'a mhàin a sgrìobhadh, gu'n do mheasadh so dha ;

24 Ach air ar son-ne mar an ceudna, d'am measar e, ma chreideas sinn annsan a thog suas Iosa ar Tighearn o na marbhaibh,

25 A thugadh thairis air son ar ciontaidh, agus a thogadh suas a nis air son ar fireanachaidh.

CAIB. V.

1 *Air dhuinn bhì air ar saoradh o chionta peacadh tre chreidimh, tha sìth againn ri Dia, agus gairdeachas ann an dòchas : 8 do bhrìgh gu'n d'fhuair sinn réite tre fhuil Chrìosd, nuair bu naimhde sinn, is mò gu mòr na sin a shaorar sinn a nis air dhuinn an réite fhaotainn.*

UIME sin air dhuinne bhì air ar fireanachadh¹ tre chreidimh, tha sìth againn ri Dia, tre an Tighearn Iosa Crìosd :

2 Tre'm bheil againn mar an ceudna slighe gu dol a steach tre chreidimh chum a' ghràis so anns am bheil sinn 'nar seasamh, agus a ta sinn a' deanamh gairdeachais an dòchas² glòire Dhé.

3 Agus cha'n e so a mhàin, ach a ta sinn mar an ceudna a' deanamh uail ann an trioblaidibh, do bhrìgh gu bheil fios againn gu'n oibrich trioblaid³ foighidin ;

4 Agus foighidin, dearbhadh⁴ ; agus dearbhadh, dòchas :

5 Agus cha nàraich an dòchas, do bhrìgh gu bheil gràdh Dhé air a dhòrtadh a mach ann ar cridheachaibh, tre'n Spiorad naomh a thugadh dhuinne.

6 Oir air dhuinne bhì fathast gun neart, ann an àm iomchuidh bhàsaich Crìosd air son nan daoine neo-dhiadhaidh.

7 Oir⁵ is gann a dh'fhuilingeas duine bàs air son duine chothromaich ; ach theagamh gu'm biodh aig neach éigin do mhisnich eadhon bàs fhulang air son duine mhaith.

8 Ach a ta Dia a' moladh a ghràidh féin duinne, do bhrìgh an uair a bha sinn fathast 'nar peacaich gu'n d'fhuiling Crìosd bàs air son.

9 Is mò gu mòr⁶ uime sin, air dhuinn a nis bhì air ar fireanachadh tre 'fhuil, a shaorar⁷ tridsan o fheirg sinn.

10 Oir ma 'se air dhuinn bhì 'nar naimhdeibh, gu'n d'rinneadh réidh ri Dia sinn tre bhàs a Mhìc ; is mò gu mòr, air dhuinn bhì air ar deanamh réidh, a shaor ar tre a bheatha sinn.

11 Agus cha'n e mhàin *sin*, ach a ta sinn a' deanamh gairdeachais an Dia, tre ar Tighearna Iosa Crìosd, tre an d'fhuair sinn a nis an réite.

12 Uime sin mar a thàinig peacadh a

¹ saoradh, glunadh o chionta.

² carhsa, dùil.

³ àmhghar.

⁴ fìtreachadh, fèin-fhiosrachadh.

⁵ A nis

⁶ Is mòr is mò.

⁷ thèarnar, shàthalar.

steach do'n t-saoghal tre aon duine, agus bàs tre'n pheacadh; mar sin mar an ceudna thàinig bàs air na h-uile dhaoinibh, do bhrìgh gu'n do pheacaich iad uile¹.

13 Oir gus an lagh, bha peacadh anns an t-saoghal: ach cha chuirear peacadh à leth dhaoine far nach 'eil lagh.

14 Gidheadh, rioghaich am bàs o Adhamh gu Maois, eadhon air an dream nach do pheacaich a réir coslais eas-umhlachd Adhaimh, neach is e samhladh² an ti ud a bha ri teachd:

15 Ach cha'n ann mar an cionta, a tha'n saor-thiodhlac. Oir ma fhuair mòran bàs tre chionta aoin, is mò gu mòr na sin a tha gràs Dhé, agus an tiodhlac troimh ghràs a ta tre aon duine, Iosa Crìosd, pailte do mhòran.

16 Agus cha'n ann mar tre aon duine a pheacaich³, mar sin a tha'n tabhartas: oir bha am breitheanas tre aon chionta, chum dìtidh: ach a ta'n saor-thabhartas o mhòran chiontaibh chum fìreanachaidh.

17 Oir ma's e as tre chionta aon duine, gu'n do rìoghaich am bàs tre aon, is mò gu mòr na sin a rìoghaicheas iadsan, a gheibh pailteas gràis, agus tabhartais na fìreantachd, ann am beatha tre aon, eadhon Iosa Crìosd.

18 Uime sin mar tre chionta aoin duine⁴ a thàinig breitheanas air na h-uile dhaoinibh chum dìtidh, is amhuil sin mar an ceudna tre fhìreantachd aoin⁵, thàinig an saor-thiodhlac air na h-uile dhaoinibh chum fìreanachaidh na beatha.

19 Oir mar tre eas-umhlachd aoin duine a rinneadh mòran 'nam peacaich, is amhuil sin tre ùmhlachd aoin duine a nìhear mòran 'nam fìreanaibh.

20 Ach thàinig an lagh a steach, chum gu meudaicheadh an cionta: ach far an do mheudaicheadh am peacadh, bu ro mhò a mheudaicheadh gràs:

21 Chum as mar a rìoghaich am peacadh chum bàis, mar sin gu'n rìoghaicheadh gràs tre fhìreantachd chum na beatha maireannaich, tre Iosa Crìosd an Tighearn.

CAIB. VI.

1 Cha'n fheud sinn ar beatha a chaitheadh am peacadh: oir a ta sinn marbh dha mar tha 'm baisteadh a' dearbhadh. 12 Na biodh rìoghachadh aig a' pheacadh nì's mò, 18 do bhrìgh gu'n d'thug sinn sinn-féin thairis do sheirbhis na fìreantachd.

CIOD ma ta a their sinn? Am buanaich sinn am peacadh, chum gu meudaichear gràs?

2 Nar leigeadh Dia: cionnus a dh'

fheudas sinne a ta marbh do'n pheacadh, ar beatha a chaitheadh nì's faide ann?

3 Nach 'eil fhios agaibh, a mheud againn as a bhaisteadh ann an Iosa Crìosd, gu'n do bhaisteadh chum a bhàis sinn?

4 Air an aobhar sin dh'adhlacaidh sinn maille⁶ ris tre'n bhaisteadh chum bàis: ionnus mar a thogadh Crìosd suas o na marbhaibh le glòir⁷ an Athar, mar sin gu gluaiseamaid-ne mar an ceudna ann an nuadhachd beatha.

5 Oir ma chaidh ar suidheachadh mar-aon ann an coslas a bhàis, bithidh sinn mar an ceudna air ar suidheachadh ann an coslas 'aiseirigh.

6 Air fhios so a bli againn, gu bheil ar seann duine air a cheusadh maille ris, ionnus gu'm biodh corp a' pheacaidh air a sgrios, chum á so suas nach deanamaid seirbhis do'n pheacadh.

7 Oir an ti a fhuair bàs, rinneadh saor e o'n pheacadh.

8 A nis ma fhuair sinn bàs maille ri Crìosd, tha sinn a' creidsinn gu'm bi sinn beò maille ris mar an ceudna:

9 Air dhuinn fios a bhi againn air do Chrìosd éirigh o na marbhaibh, nach bàsaich e nì's mò; cha 'n 'eil tighearnas aig a' bhàis nì's mò air.

10 Oir a mheud gu'n d' fhuair e bàs, is ann do'n pheacadh a fhuair e bàs aon uair a mhàin: ach a mheud gu bheil e beò, is ann do Dhia a ta e beò.

11 Mar sin mar an ceudna measaibh-sa gu bheil sibh féin gu deimhin marbh do'n pheacadh, ach beò do Dhia tre Iosa Crìosd ar Tighearna.

12 Air an aobhar sin na rìoghaicheadh am peacadh ann bhur corp bàsmhor, air chor as gu'n tugadh sibh ùmhlachd dha 'na anamiannaibh.

13 Agus na tugaibh bhur buill nan armaibh euceir⁸ do'n pheacadh: ach thugaibh sibh féin do Dhia, mar dhream a ta beò o na marbhaibh, agus bhur buill 'nan armaibh fìreantachd do Dhia.

14 Oir cha bhi aig a' pheacadh tigh-earnas oirbh: oir cha'n 'eil sibh fuaidh 'n lagh, ach fuaidh ghràs.

15 Ciod uime sin? am peacaich sinn, do bhrìgh nach 'eil sinn fuaidh 'n lagh, ach fuaidh ghràs? Nar leigeadh Dia.

16 Nach 'eil fhios agaibh, an ti d'an toir sibh sibh féin mar sheirbhisich chum ùmhlachd, gur seirbhisich sibh do'n ti d'an dean sibh ùmhlachd; ma's ann do'n pheacadh chum bàis, no do ùmhlachd chum fìreantachd.

17 Ach buidheachas do Dhia, an déigh dhuibh a bhi 'nur seirbhisich do'n pheac-

¹ ann-san san do pheacaich na h-uile.

² samhachas, comh-choslas, dealbh.

³ tre aon pheacadh.

⁴ tre aon chionta.

⁵ tre aon fhìreantachd..

⁷ cumhachd.

⁶ mar-aon.

⁸ eucorach.

adli, gu'n d'thug sibh o bhur cridhe ùmh-lachd do'n chumadh teagaisg sin d'an d'thugadh sibh thairis¹.

18 Air dhuibh ma ta bhi air bhur deanamh saor o'n pheacadh, rinn sibh seirbhis do'n fhìreantachd.

19 Tha mi labhairt mar dhuine, air son amhuinneachd bhur feòla-sa: oir mar a thug sibh bhur buill mar sheirbhisich do neòghloine, agus do euceart chum euceirt, amhuil sin a nis thugaibh bhur buill mar sheirbhisich do'n fhìreantachd, chum naomhachd.

20 Oir an uair a bha sibh 'nur seirbhisich do'n pheacadh, bha sibh saor o'n fhìreantachd.

21 Air an aobhar sin ciod an toradh a bha agaibh an sin anns na nithibh sin, a ta nis a' cur nàire oirbh? oir is e crìoch nan nithe sin am bàs.

22 Ach a nis air dhuibh bhi saor o'n pheacadh, agus 'nur seirbhisich do Dhia, tha bhur toradh agaibh chum naomhachd, agus a' chrìoch a' bheatha mhaireannach.

23 Oir is e tuarasdail a' pheacaidh am bàs: ach is e saor-thiodhlac² Dhé a' bheatha mhaireannach, tre Iosa Crìosd ar Tighearna.

CAIB. VII.

1 *Cha 'n 'eil aig an lagh cumhachd os ceann duine ni's faide na's beò e.* 4 *Ach tha sinne marbh do'n lagh;* 7 *gidheadh cha'n 'eil an lagh 'na pheacadh,* 12 *ach naomh, ceart, agus maith, &c.*

NACH 'eil fhios agaibh, a bhràithre, (oir is ann riù-san d'an aithne an lagh a ta mi labhairt,) gu bheil tighearnas aig an lagh air duine, am fad is beò e?

2 Oir a' bhean a ta pòsda ri fear, tha i ceangailte leis an lagh r'a fear am fad is beò e: ach ma gheibh a fear bàs, tha i fuasgailte o lagh a fir.

3 Uime sin am feadh is beò a fear, ma phòsar i ri fear eile, goirear ban-adhalt-ranach dhi: ach ma gheibh a fear bàs, tha i saor o'n lagh sin, air chor as nach ban-adhalt-ranach i, ged robh i aig fear eile.

4 Air an aobhar sin, mo bhràithre, tha sibhse mar an ceudna marbh do'n lagh tre chorp Chrìosd; ionnus gu'm biodh sibh pòsda ri fear eile, *eadhon* ris-san a thogadh o na marbhaibh, chum gu'n tugamaid toradh a mach do Dhia.

5 Oir an uair a bha sinn san fheòil, bha miannan nam peacanna, tre'n lagh, ag oibreachadh ann ar buill³, chum toradh a thoirt a mach gu bàs.

6 Ach a nis tha sinn air ar deanamh saor o'n lagh, air dlia sin a bhi marbh⁴ leis an do chumadh sinn; chum gu'n deanamaid

seirbhis ann an nuadhachd spioraid, agus cha'n ann an seanachd na litreach.

7 Ciod uime sin a their sinn? am bheil an lagh 'na pheacadh? Nar leigeadh Dia. Ni h-eadh, cha b'aithne dhomh peacadh, ach tre'n lagh: oir cha bhiodh eòlas agam air sannt, mur abradh an lagh, Na sanntaich⁵.

8 Ach air do'n pheacadh fàth⁶ a ghlac-adh tre'n àithne, dh'oibrich e annam gach uile ghnè an-tograidh: oir as eugmhais an lagha bha am peacadh marbh.

9 Oir bha mise beò as eugmhais an lagha uair-éigin: ach air teachd do'n àithne, dh'ath-bheothaich am peacadh, agus fhuair mise bàs.

10 Agus an àithne a dh'orduicheadh chum beatha, fhuaradh dhomh-sa chum bàis i.

11 Oir air do'n pheacadh fàth a ghlac-adh tre'n àithne, mheall e mi, agus le sin mharbh e mi.

12 Air an aobhar sin tha'n lagh naomh; agus a ta an àithne naomh, agus cothromach, agus maith.

13 Uime sin an d'rinneadh an ni sin a bha maith, 'na bhàs domh-sa? Nar leigeadh Dia. Ach am peacadh, chum gu faicteadh⁷ gur peacadh e, ag oibreachadh bàis annam-sa, leis an ni sin a ta maith; chum tre'n àithne gu'm fàsadh am peacadh ro pheacadh.

14 Oir a ta fhios againne gu bheil an lagh spioradail: ach a ta mise feòlmhor, air mo reiceadh fuidh'n pheacadh.

15 Oir an ni a ta mi deanamh, cha taitneach leam e: oir an ni a b'àill leam, cha'n e a ta mi a' deanamh; ach an ni a's fuathach leam, is e sin a ta mise a' deanamh.

16 Uime sin ma tha mi deanamh an ni nach b'àill leam, tha mi 'g aontachadh leis an lagh, gu bheil e maith.

17 A nis ma ta cha mhise ni's mò a tha deanamh so, ach am peacadh a tha gabhail còmhnuidh annam.

18 Oir a ta fhios agam, annam-sa, (sin ri ràdh, ann am fheòil,) nach 'eil maith sam bith a' gabhail còmhnuidh: oir tha'n toil a làthair maille rium, ach *dòigh sam bith* chum maith a dheanamh cha'n 'eil mi faotainn⁸.

19 Oir cha'n 'eil mi deanamh⁹ am maith bu mhiann leam: ach an t-olc nach b'àill leam, is e sin a ta mi a' deanamh.

20 A nis ma tha mi a' deanamh an ni nach b'àill leam, cha mhise ni's mò a ta deanamh so, ach am peacadh a tha gabhail còmhnuidh annam.

21 Uime sin tha mi faotainn lagha, 'nuair

¹ *ris an do chomh-chumadh sibh, a thugadh dhuibh.*

² *ghibht.*

³ *ballaibh.*

⁴ *air dhuinn bàsachadh do'n ni.*

⁵ *miannaich.*

⁷ *leigeadh ris.*

⁹ *ni'n deanam.*

⁶ *cothrom.*

⁸ *ni faigheam.*

a b' àill leam am maith a dheanamh, gu bheil an t-olc a làthair agam.

22 Oir a ta tlachd agam an lagh Dhé, a réir an duine an taobh a stigh:

23 Ach tha mi faicinn lagha eile a m' bhuill a' cogadh an aghaidh lagha m' inntinn, agus ga m' thoirt am bruid do lagh a' pheacaidh, a ta ann am bhuill.

24 Och is duine truagh mi! cò a shaoras mi o chorp a' bhàis so?

25 Tha mi toirt buidheachais do Dhià¹, tre Iosa Crìosd ar Tighearna. Uime sin, tha mise féin leis an inntinn a' deanamh seirbhis do lagh Dhé; ach leis an fheoil do lagh a' pheacaidh.

CAIB. VIII.

1 *Tha iadsan a ta ann an Crìosd, agus a' caitheadh am beatha a réir an Spioraid, saor o dhìteadh. 5 Cìod an cron a thig o'n fheòil, 14 agus cìod am maith a thig o'n Spiorad; 17 agus cìod e bhì 'nar cloinn do Dhià; 19 dream aig am bheil, roimh na h-uile nithe, déidh air an saorsa, &c.*

AIR an aobhar sin cha'n 'eil a nis dìteadh sam bith do'n dream sin a tha ann an Iosa Crìosd, a tha gluasad² cha'n ann a réir na feòla, ach a réir an Spioraid.

2 Oir shaor lagh Spioraid na beatha, ann an Iosa Crìosd, mise o lagh a' pheacaidh agus a' bhàis.

3 Oir an nì nach robh an comas do'n lagh a dheanamh, do bhrìgh gu robh e anmhunn tre'n fheoil, ag cur a Mhic féin do Dhià an coslas feòla peacaich, agus 'na iobairt air son peacaidh, dhìt e am peacadh san fheòil:

4 Chum gu'm biodh fireantachd an lagha air a coimhlionadh annainne, a tha gluasad cha'n ann a réir na feòla, ach a réir an Spioraid.

5 Oir an dream a ta a réir na feòla, tha an aire air na nithibh sin a bhuineas do'n fheòil; ach an dream a ta a réir an Spioraid, air na nithibh sin a bhuineas do'n Spiorad.

6 Oir an inntinn fheòlmhor is bàs i; ach an inntinn spioradail is beatha agus sìth³ i:

7 Do bhrìgh gur naimhdeas an inntinn fheòlmhor an aghaidh Dhé: oir cha'n 'eil i ùmhal do lagh Dhé, agus cha mhò a tha'n comas di bhì.

8 Uime sin cha'n urrainn iadsan a tha san fheòil Dia a thoileachadh.

9 Ach cha'n 'eil sibhse san fheòil, ach san Spiorad, ma tha Spiorad Dhé a' gabhail còmhnuidh annaibh. A nis mur 'eil Spiorad Chrìosd aig neach, cha bhuin e dha.

10 Agus ma tha Crìosd annaibh, tha'n corp marbh gu deimhin a thaobh peacaidh; ach is beatha an spiorad a thaobh⁴ fireantachd.

11 Ach ma tha Spiorad an ti a thog Iosa o na marbhaibh a gabhail còmhnuidh annaibh, an ti a thog Crìosd o na marbhaibh, beathaichidh e mar an ceudna bhur cuirp bhàsmhor-sa, tre a Spiorad-san a ta còmhnuidh annaibh.

12 Uime sin, a bhràithre, tha sinn fo fhiachaibh, cha'n ann do'n fheòil, chum ar beatha a chaitheadh a réir na feòla.

13 Oir ma chaitheas sibh bhur beatha a réir na feòla, gheibh sibh bàs: ach ma mharbhas sibh tre'n Spiorad gnìomhara na colla, bithidh sibh beò.

14 Oir a mheud 's a ta air an treòrachadh le Spiorad Dhé, is iad mic Dhé.

15 Oir cha d'fhuair sibh Spiorad na daorsa a ris chum eagail; ach fhuair sibh Spiorad na h-uchd-mhacachd, tre an glaoth⁵ sinn, Abba, Athair.

16 Tha an Spiorad féin a' deanamh fianuis maille r'ar spiorad-ne, gur sinn clann Dhé:

17 Agus ma's clann, is oighreachan; oighreachan air Dia, agus comh-oighreachan maille ri Crìosd: ma 'se is gu'm fuiling sinn maille ris, chum gu glòraichear sinn maille ris mar an ceudna.

18 Oir tha mi a' measadh nach airidh fulangais na h-aimsir a ta làthair bhì air an coimheas ris a' ghloir a dh'fhoillsichear annainn.

19 Oir a ta dùil dhùrachdach a' chruthachaidh⁶ a' feitheamh ri foillseachadh cloinne Dhé.

20 Oir chuireadh an cruthachadh fo dhìomhanas, cha'n ann le 'thoil, ach trìd-san a chuir fo dhìomhanas e;

21 An dòchas gu'n saorar an cruthachadh féin fòs o dhaorsa na truallidheachd, gu saorsa glòrmhor cloinne Dhé.

22 Oir a ta fhios againne gu bheil an cruthachadh uile⁷ ag osnaich, agus am péin gu léir, mar mhnàoi ri saothair, gus an àm so:

23 Agus cha'n e so a mhàin, ach sinn féin mar an ceudna, aig am bheil ceud thoradh an Spioraid, tha eadhon sinne ag osnaich annainn féin, a' feitheamh ris an uchd-mhacachd, eadhon saorsa ar cuirp.

24 Oir is ann le dòchas a shaorar sinn: ach dòchas a chithear, cha dòchas e: oir an nì a ta an duine faicinn, c'ar son a bhios dòchas aige ris?

25 Ach ma tha dòchas⁸ againn ris an nì nach 'eil sinn a' faicinn, feithidh sin gu foighidneach ris.

26 Tha an Spiorad féin mar an ceudna a' deanamh còmhnaidh le ar n-anmhuinn-eachd: oir cha'n aithne dhuinn cìod a ghuidheamaid mar bu chòir dhuinn; ach a ta an Spiorad féin a' deanamh eadar-

¹ ghràs Dhé. ² a' siubhal, ag imeachd.

³ sìothachaint. ⁴ tre, air sgàth.

⁵ éigh, gairm.

⁷ gach uile chreutair.

⁶ a' chreutair.

⁸ sìth.

ghuidhe¹ air ar son le osnaibh do-labhairt.

27 Agus is aithne dhasan a ta rannsachadh nan cridheachan ciod i inntinn an Spioraid, do bhrìgh gu bheil e a' deanamh eadar-ghuidhe air son nan naomh a réir *toil Dé*.

28 Agus a ta fhios againn gu'n comhoibrich na h-uile nithe chum maith, do'n dream aig am bheil gràdh do Dhia, eadhon dhoibh-san a ghairmeadh a réir a rùin.

29 Oir an dream a roimh-aithnich e, roimh-orduich e iad mar an ceudna *chum bhi* comh-chosmhùil ri iomhaigh² a Mhic, chum gu'm biodh esan 'na cheud-ghin am measg inòrain bhràithre.

30 Agus an dream a roimh-orduich e, ghairm e iad mar an ceudna: agus an dream a ghairm e, dh'fhireanaich e mar an ceudna: agus an dream a dh'fhireanaich e, ghlòraich e mar an ceudna.

31 Ciod uime sin a their sinn ris na nithibh sin? Ma tha Dia leinn, cò dh'fheudas bhi 'nar n-aghaidh?

32 An ti nach do chaomhain a Mhac féin, ach a thug thairis e air ar son-ne uile, cionnus maille ris-san nach toir e mar an ceudna dhuinn gu saor na h-uile nithe?

33 Cò a chuireas coire sam bith á leth daoine taghta Dhé? *Is e* Dia a dh'fhireanaicheas³.

34 Cò a dh'iteas? *Is e* Crìosd a fhuair bàs, seadh tuilleadh fòs, a dh'èirich a rìs, agus a ta air deas làimh Dhé, neach a ta mar an ceudna a' deanamh eadar-ghuidhe air ar son-ne.

35 Cò a sgaras⁴ sinn o ghràdh Chrìosd? an dean trioblaid, no àmhghar, no geurleanmhuinn, no gorta, no lomnochduidh, no cunnart, no claidheamh?

36 (A réir mar a ta e sgrìobhta, Air do shon-sa mharbhadh sinn rè an là; mheasadh sinn mar chaoraich chum marbhaidh.)

37 Ni h-eadh, ach anns na nithibh sin uile tha sinn a' toirt tuilleadh agus buaidh, trid-san a ghràdhaich sinn.

38 Oir a ta dearbh-bheachd agam, nach bi bàs, no beatha, no aingil, no uachdaranachda, no cumhachda, no nithe a ta làthair, no nithe a ta ri teachd,

39 No àirde, no doimhne, no creutair sam bith eile, comasach air sinne a sgaradh o ghràdh Dhé a ta ann an Iosa Crìosd ar Tighearn.

CAIB. IX.

1 Tha Pòl doilich air son nan Iudhach. 7 Cha b'iad sìochd Abraham uile clann a' gheallaidh. 13 Tha Dia a' deanamh tròcair air an dream a's toil leis.

21 Feudaidh an cumadair an ni a's àill leis a dheanamh ris a' chrìadh.

A TA mi a' labhairt na fìrinn ann an Crìosd, cha dean mi breug, (air bhi do m' choguis a' deanamh fianuis domh san Spiorad naomh:)

2 Gu bheil doilgheas mòr orm, agus cràdh air mo chridhe an còmhnuidh.

3 Oir ghuidhim mi féin a bhi dealaichte⁵ o Chrìosd, air son mo bhràithre, mo luchd-dàimh a thaobh na feòla:

4 A ta 'na Israelich; d'am buin an uchd-mhacachd, agus a' ghloir, agus na coimhcheangail, agus tabhairt an lagha, agus seirbhis Dhé, agus na geallanna;

5 D'am buin na h-aithriche, agus o'm bheil Crìosd a thaobh na feòla, neach is e Dia os ceann nan uile, beannaichte gu sìorruidh. Amen.

6 Cha'u e gu bheil focal Dhé gun éifeachd. Oir cha'n Israelich iadsan uile a ta o Israel:

7 Agus ni mò do bhrìgh gur sìochd do Abraham iad, a ta iad uile 'nan cloinn: ach, Ann an Isaac ainmichear do shìol.

8 Is e sin ri ràdh, Cha'n iad clann na feòla clann Dhe: ach is iad clann a' gheallaidh a mheasar mar shìol.

9 Oir is e so focal a' gheallaidh, A réir an àm so⁶ thig mi, agus bithidh mac aig Sara.

10 Agus cha'n e mhàin so, ach Rebeca mar an ceudna 'nuair a thoirrheadh i o aon, eadhon Isaac ar n-athair-ne;

11 (Oir mun do rugadh na naoidheana, agus mun d'rinn iad maith no ole, chum gu'm biodh rùn Dé a réir an taghaidh seasmhach, cha'n ann o oibribh, ach o'n ti a ghairmeas:)

12 A dubhradh rithe, Ni an neach a's seine seirbhis do'n neach a's òige.

13 A réir mar a ta e sgrìobhta, Ghràdhaich mi Iacob, ach dh'fhuathaich mi Esau.

14 Ciod a their sinn ma ta? *Nar leigeadh Dia.*

15 Oir a ta e ag ràdh ri Maois, Ni mi tròcair air an neach air an dean mi tròcair, agus gabhaidh mi truas do'n neach d'an gabh mi truas.

16 Uime sin cha'n ann o'n ti leis an àill, no o'n ti a ruitheas, ach o Dhia a ni tròcair.

17 Oir a ta an sgrìobtuir ag ràdh ri Pharaoh, Is ann chum na crìche so féin a thog mi suas thu, chum gu'm foillsichinn mo chumhachd annad, agus chum gu'm biodh m'ainm iomraideach air feadh na talmhainn uile.

18 Uime sin ni e tròcair air an ti a's àill leis, agus an ti a's àill leis cruaidhichidh e.

¹ guidhe.

² dealbh.

³ a shaoras, a ghairmeas glan o chionta.

⁴ dhcalaitheas.

⁵ malluichte, air mo dheanamh

a'm' mhallachadh.

⁶ Air an àm so.

19 Their thu ma ta rium, C'ar son a ta e ma seadh a' faghail croin? oir cò a chuir an aghaidh a thoile?

20 Ni h-eadh ach, O a dhuine, cò thusa a ta tagradh an aghaidh Dhé? An abair an ni a chumadh ris an ti a chum e, C'ar son a rinn thu mi mar so?

21 Nach 'eil cumhachd aig a' chriadh-adair¹ air a' chriadh, ionnus gu'n deanadh e do'n aon mheall aon soitheach chum urrainn², agus soitheach eile chum eas-urraim.

22 Ciod ma's e, air bhi do Dhia toileach 'fhearg a nochdadh, agus a chumhachd a dheanamh aithnichte, gu'n d' fluilinn³ e le mòr fhad-fhulangas soithiche na feirge air an ulluchadh chum sgrios:

23 Agus chum gu'n deanadh e aithnichte saobhbreas a ghloire air soithichibh na tròcair, a dh'ulluich e roimh-làimh chum ghloire,

24 Eadhon sinne a ghairm e, cha'n e inèadh do na h-Iudhaich, ach mar an ceudna do na Cinnich.

25 Mar a ta e ag ràdh mar an ceudna ann an Hosea, Goiridh mi mo phobull diubh-san nach robh 'nam pobull domh; agus bean ghràdhach dh'ise nach robh ghràdhach.

26 Agus tarlaidh, anns an ionad san dubhradh riu, Cha sibh mo phobull-sa; an sin gu'n goirear Clann an Dé bheo dhiubh.

27 Tha Esaias mar an ceudna ag éigh-each mu thimchioll Israeil, Ged tha àir-eamh chloinn Israeil mar ghlaineamh na fairge, is fuigheall a thèarnar.

28 Oir crìochnaichidh e an obair, agus gearraidh e goirid i an ceartas⁴: do bhrìgh gu'n dean an Tighearn obair ghoirid air an talamh.

29 Agus mar a thubhairt Esaias roimhe, Mur fàgadh Tighearn nan sluagh sìol ag-ainne, dheantadh sinn mar Shodom, agus bhitheamaid cosmhuil ri Gomorrah.

30 Ciod a their sinn ma seadh? Gu'n d'ràinig na Cinnich, nach robh a leantuinn fireantachd, air fireantachd, eadhon an fhìreantachd a ta o chreidimh:

31 Ach cha do ràinig Israel, a bha leantuinn lagha na fireantachd, air lagh na fireantachd.

32 C'ar son? A chionn nach ann o chreidimh, ach mar gu'm b'ann o oibribh an lagha a dh'arr iad i: oir thuslich iad air a' chloich-thuislidh sin;

33 Mar a ta e sgriobhta, Feuch, cuiream ann an Sion clach-thuislidh, agus carraig oibheim: agus gach neach a chreideas ann-san, cha chuirear gu nàire e.

1 Tha an sgriobtuir a' nochdadh an eadar-dhealachaidh a ta eadar fireantachd an lagha, agus a' chreidimh; 11 agus nach cuirear a h-aon do na h-Iudhaich, no do na Cinnich sin uile a chreideas, fuidh amhbadh.

ABHRAITHRE, is e dùrachd⁵ mo chridhe, agus m' urnuigh ri Dia air son Israeil, gu'm biodh iad air an tearnuadh.

2 Oir a ta mi deanamh fianuis doibh, gu bheil eud⁶ aca thaobh Dhé, ach cha'n ann a réir còlais.

3 Oir air dhoibh bhi aineolach air fìreantachd Dhé, agus ag iarraidh am fìreantachd féin a chur air chois, clia do strìochd⁷ iad do fhìreantachd Dhé.

4 Oir is e Crìosd crìoch an lagha, chum fìreantachd do gach neach a chreideas.

5 Oir a ta Maois a' cur an céill na fìreantachd a ta o'n lagh, eadhon, An duine a ni na nithe sin, gu'm bi e beò leo.

6 Ach mar so a ta an fhìreantachd a ta o chreidimh ag ràdh, Na abair ann do chridhe, Cò théid suas air nèamh? (sin r'a ràdh a thoirt Chrìosd a nuas;)

7 No, Cò a thléid sìos do'n doimhne? (sin r'a ràdh, a thoirt Chrìosd a ris air ais o na marbhaibh:)

8 Ach ciod a ta i ag ràdh? Tha 'm focal am fagus duit, ann do bheul, agus ann do chridhe: 'se sin focal a' chreidimh a tha sinne a' searmonachadh,

9 Ma dh'aidicheas tu le d' bheul an Tighearn Iosa, agus ma chreideas tu ann do chridhe, gu'n do thog Dia o na marbhaibh e, gu'n saorar thu.

10 Oir is ann leis a' chridhe a chreidear chum fireantachd, agus leis a' bheul a dh'aidichear chum slàinte.

11 Oir a ta an sgriobtuir ag ràdh, Ge b'e neach a chreideas ann-san, cha nàraichear e.

12 Oir cha'n 'eil eadar-dhealachadh eadar an t-Iudhach agus an Greugach: oir an t-aon Tighearn a ta os ceann nan uile, tha e saobhir do na h-uile a ghairmeas air.

13 Oir ge b'e neach a ghairmeas air ainm an Tighearna, tèarnar e.

14 Ach cionnus a ghairmeas iad airsan anns nach do chreid iad? agus cionnus a chreideas iad anns an ti air nach cual iad iomradh? agus cionnus a chluinmeas iad gun searmonaiche?

15 Agus cionnus a ni iad searmoin, mur cuirear iad? mar a ta e sgriobhta, Cia sgiamhach cosa na muinntir sin a ta searmonachadh soisgeil⁸ na sìthe, a ta toirt sgéil aoibhneich air nitheibh maithe?

¹ fear deanamh shoithiche creadh. ² onoir.
³ gu'n do ghiùlain. ⁴ fireantachd.

⁵ lan toil. ⁶ teas-ghràdh.
⁷ ghéill. ⁸ soisgeulachadh.

16 Ach cha robh iad uile ùmhail do'n t-soisgeul. Oir tha Esaiaas ag ràdh, A Thighearn, cò a chreid ar n-aithris-ne'?

17 Uime sin, is ann o éisdeachd a thig creidimh, agus éisdeachd tre fhocal Dé.

18 Ach a ta mi ag ràdh, Nach cual iad? Chuala gu deimhin, chaidh am fuaim air feadh gach tìre a nach, agus am briathra gu iomallaibh an domhain.

19 Ach a ta mi ag ràdh, Nach robh fios aig Israel? Air tùs, tha Maois ag ràdh, Cuiridh mi eud oirbh le Cinneach nach 'eil 'nan Cinneach, agus le Cinneach neo-thuigseach cuiridh mi fearg oirbh.

20 Ach a ta Esaiaas ro dhana, agus a ta e ag ràdh, Fhuaradh mi leo-san nach d'iarr mi; dh'fhoillsicheadh mi dhoibh-san nach d'fhiosraich air mo shon.

21 Ach ri Israel a ta e ag ràdh, Shìn mi nach mo làmhnan rè an là gu h-ìomlan ri potull eas-ùmhail agus a labhras a'm' aglaidh.

CAIB. XI.

1 Cha do thilg Dia Israeil uile uaith. 7 Thaghadh cuid, ged chruaidhicheadh a' chuid eile. 16 Tha dòchas mu'n ath-philleadh. 18 Cha'n fheud na Cinnich uaill-thàir a dheanamh orra; 26 oir tha gealladh gu'n tèarnar iad.

A TA mi ag ràdh ma seadh, An do thilg Dia a phobull uaith? Nar leigeadh Dia. Oir is Israeleach mise féin mar an ceudna, do shliochd Abraham, do thréibh Bheniamin.

2 Cha do thilg Dia uaith a phobull a roimh-aithnich e. Nach 'eil fhios agaibh ciod e a ta an sgrìobtuir ag ràdh mu Elias? cionnus a ta e a' deanamh eadar-ghuidhe² ri Dia an aghaidh Israeil, ag ràdh,

3 A Thighearn, mharbh iad t'fhàidhean, agus leag iad sìos t'altairean; agus dh'fhàgadh mise a'm' aonar, agus tha iad ag iarraidh m'anama.

4 Ach ciod a ta freagradh Dhé ag ràdh ris? Dh'fhàg mi dhomh féin seachd mìle fear, nach do lùb an glùn do dhealbha Bhaail.

5 Agus mar sin mar an ceudna tha san àm so a làthair fuigheall a réir taghaidh a' ghràis.

6 Agus ma's ann tre ghràs, cha'n ann o oibribh nì's mò; no cha ghràs gràs nì's mo. Ach ma's ann o oibribh, cha'n ann o ghràs á sin suas: no cha'n obair á sin suas obair.

7 Ciod ma seadh? An nì sin a ta Israel ag iarraidh, cha do ràinig e air; ach ràinig an taghadh air, agus chaidh a' chuid eile a dhalladh:

8 Mar a ta e sgrìobhta, Thug Dia dhoibh spiorad na suaine, suilean chum nach faic-eadh iad, agus cluasan chum nach cluin-

eadh iad, agus an là an diugh.

9 Agus a ta Daibhidh, ag ràdh, Biodh am bord mar ribe, agus mar inneal-glacaidh, agus mar cheap-tuislidh, agus mar dhiol-thuarasdail dhoibh:

10 Biodh an suilean air an dorchachadh, chum nach faic iad; agus crom-sa andruim an còmhnuidh.

11 A ta mi ag ràdh uime sin, An do thuislich iad ionnus gu'n tuiteadh iad? Nar leigeadh Dia: ach tre an tuiteam-san tha slàinte air teachd chum nan Cinneach, chum iadsan a bhrosnuchadh gu h-end.

12 Ma's e an tuiteam-san saoihbheas an domhain, agus an lughdachadh saoihbheas nan Cinneach, cia's mò na sin a bhitheas an lànachd?

13 Oir is ann ribhe a ta mi a' labhairt, a Chinneacha; do bhrìgh gur mi abstol nan Cinneach, tha mi toirt urraim do m' dhreuchd³:

14 Ma dh'fheudas mi air chor sam bith mo choimh-fheòil a bhrosnuchadh gu h-eud, agus gu'n tearuinn mi dream àraidh dhiubh.

15 Oir ma's e an tilgeadh-san air falbh réiteachadh an domhain; ciod e an ath-ghabhail, ach beatha o na marbhaibh?

16 Oir ma ta an ceud-thoradh naomh, tha am meall *naomh* mar an ceudna: agus ma ta an fhreumh naomh, *tha* na geuga *mar sin* mar an ceudna.

17 Agus ma tha cuid do na geugaibh air am briseadh dheth, agus gu bheil thusa, a bha a'd' chrann-oladh fiadhaich, air do shuidheachadh 'nam measg, agus maille ri u' faotaim comhairt do fhreimh agus do reamhrachd a' chroinn-oladh;

18 Na dean uaill an aghaidh nan geug: ach ma nì thu uaill 'nan aghaidh, cha tusa a dh'iomchaires an fhreumh, ach an fhreumh thusa.

19 Their thu uime sin, Bhreiseadh dheth na geuga, chum gu suidhicheadh mise 'nan àit.

20 Ro mhaith; air son am mi chreidimh bhriseadh iadsan dheth, agus a ta thusa a' seasamh tre chreidimh. Na bi àrd-inntinneach, ach fo eagal.

21 Oir mur do chaomhain Dia na geuga nàdurra, *biodh eagal ort* nach caomhain e thusa mar an ceudna.

22 Feuch uime sin maitheas agus geur-cheartas Dé: geur-cheartas d'an taobh-san a thuit; ach do d' thaobh-sa, maitheas, ma bhuanacheas tu 'na maitheas; agus mur buanaich, gearrar dheth thusa mar an ceudna.

23 Agus suidhichear iadsan mar an ceudna, mur buanaich iad 'nam mi-chreidimh: oir a ta Dia comasach air an suidheachadh a ris.

¹ na chual e uaimhe

² a' tagradh.

³ oifig.

24 Oir ma ghearradh thusa as a' chrann-oladh a bha fiadhaich a thaobh nàduir, agus gu'n do shuidhicheadh ann an deadh chrann-oladh thu an aghaidh nàduir; cia mòr a's mò ua sin a shuidhichear na *geuga* nàdurra 'nan crann-oladh féin?

25 Oir cha b' àill leam a bhràithre, sibh-se bhi aineolach air an run-diomhair so, (chum nach biodh sibh glic 'nur barail féin,) gu'n do tharladh doille ann an cuid do Israel, gus an tig iomlaineachd nan Cinneach a steach.

26 Agus mar sin bithidh Israel uile air an tèarnadh¹: mar a ta e sgrìobhta, Thig am Fear-saoraidh o Shìon, agus tionndaidhidh e mi-dhiadhachd o Iacob:

27 Oir is e so mo chomhcheangal riu, nuair a bheir mi air falbh am peacanna.

28 Thaobh an t-soisgeil, is naimhdean iad air bhur sonsa: ach a thaobh an taghaidh, *tha iad* gràdhachtaiche air son nan aithriche.

29 Oir a ta tiodhlacan agus gairm Dhé gun aithreachas.

30 Oir mar a bha sibhse roimhe so eas-ùmhail do Dhia, ach a nis a fhuair sibh tròcair tre am mi-chreidimh-san:

31 Amhuil sin a ta iadsan san àm so eas-ùmhail², chum tre bhur tròcair-sa gu'm faigh iad tròcair mar an ceudna.

32 Oir dhruid Dia iad uile ann am mi-chreidimh³, chum tròcair a dheanamh air na h-uile.

33 O doimhne saoi bhris araon gliocais agus eòlais Dé! Cia do-rannsachaidh a bhreithneais, agus do-lorgachaidh a shlighean!

34 Oir cò aig an robh fios inntinn an Tighearna, no cò bu chomhairleach dha?

35 No cò thug dha air tùs, agus a làn-diolar a ris dha e?

36 Oir is ann uaithe-san, agus trid-san, agus air a shon-san *a ta* na h-uile nithe: dha-san *gu robh* glòir gu sìorruidh. Amen.

CAIB. XII.

1 Is còir do thròcair Dhé sinne aomadh gu Dia a thoileachadh; 3 cha chòir do dhuine sam bith meas tuilleadh as maith bhi aige dheth féin; 6 ach is còir do gach aon feitheamh air an dreuchd sin, a dhearbhadh ris. 9 Tha gràdh, agus mòran do dhleasdanais eile air an iarraidh uainn.

AIR an aobhar sin guidheam oirbh, a bhràithre, tre thròcairibh Dhé, bhur cuirp a thoirt 'nam beo-iobairt, naomh, thaitnich do Dhia, *ni a's* e bhur seirbhis⁴ reusonta.

2 Agus na bithibh air bhur cumadh ris an t-saoghal so: ach bithibh air bhur cruth-atharrachadh tre ath-nuadhachadh

bhur n-inntinn, chum gu'n dearbh sibh ciod i toil mhaith, thaitneach, agus dhiongmhalta sin Dhé.

3 Oir a ta mi ag ràdh, troimh a' ghràs a thugadh dhomh-sa, ris gach neach 'nur measg, gun smuaineachadh *uime féin* ni's àirde na 's còir dha smuaineachadh; ach smuaineachadh am measarrachd⁵, a réir mar a roinn Dia ris gach neach tomhas a' chreidimh.

4 Oir mar a ta mòran bhall againn ann anaon chorp, agus nach e'n t-aonghnìoml⁶ a th'aig gach ball;

5 Amhuil sin ged tha sinne 'nar mòran, is aon chorp ann an Crìosd sinn, agus is buill sinn gach aon fa leth d'a chèile.

6 Uime sin air bhi do thiodhlacaibh againn, eadar-dhealaichte⁷ a réir a' ghràis a thugadh dhuinn, ma's fàidheadaireachd, *deanamaid fàidheadaireachd* a réir tomhais a' chreidimh:

7 No ma's frithealadh, *thugamaid aire* d'ar frithealadh; no an ti a theagaisgeas, *thugadh e aire* d'a theagasc;

8 No an ti a bheir earail⁸, *thugadh e aire* d'a earail: an ti a roinneas an *déirc*, *roinneadh e i* an treibldhireachd⁹; an ti a riaghlas, *deanadh se e* le dùrachd; an ti a ni tròcair, *deanadh se e* gu suilbhir.

9 Biodh bhur gràdh gun cheilg. Biodh gràin agaibh do'n ole, dlùth-leanaibh ris an ni a tha maith.

10 *Bithibh* teo-chridheach d'a chèile le gràdh bràthaireil, ann an urram a' toirt toisich gach aon d'a chèile:

11 Gun bhi leasg ann an gnothuichibh: dùrachdach¹⁰ 'nur spiorad; a' deanamh seirbhis do'n Tighearna:

12 A' deanamh gairdeachais an dòchas: foighidneach an trioblaid; maireannach ann an urnuigh:

13 A' comh-roinn ri uireasbhuidh nan naomh; a' gnàthachadh aoidheachd.

14 Beannaichibh an dream a ta deanamh geur-leanmhuinn oirbh: beannaichibh, agus na mallaichibh.

15 Deanaibh gairdeachas maille riu-san a ta ri gairdeachas, agus caoidh maille riu-san a ta ri caoidh.

16 Bithibh a dh'aon rùn¹¹ d'a chèile. Na biodh bhur cion air nithibh àrda¹², ach cuiribh sibh féin an comh-inbhe riu-san a ta iosal. Na bithibh glic 'nur barail féin.

17 Na iocaibh ole air son uile do dhuine sam bith. Ulluichibh nithe ciatach am fianuis nan uile dhaoine.

18 Ma dh'fheudas e bhi, mheud 's a ta e'n comas duibh, bithibh an sìth ris na h-uile dhaoinibh.

¹ slànuchadh.

² cha do chreid iadsan.

³ eas-umhlachd.

⁴ aoradh.

⁵ stùaim.

⁶ obair, oifig.

⁷ eagsamhuil.

⁸ comhairle.

⁹ aon-fhillteachd.

¹⁰ beothail, faobharach.

¹¹ inntinn, toil.

¹² Na bithibh àrd-inntinneach.

19 *A chàirde* gràdhach, na deanaibh dioghaltas air bhuir son féin, ach thugaibh àit do'n fheirg: oir a ta e sgriobhta, Is leam-sa dioghaltas; iocaidh mi, tha an Tighearn ag ràdh.

20 Uime sin ma bhios do nàmhaid ocraich, thoir biadh dha; ma bhios e tart-mhor¹, thoir deoch dha: oir le so a dheanamh carnaidh tu eibhle teine air a cheann.

21 Na tugadh buaidh ort leis an olc, ach thoir-sa² buaidh air an olc leis a' mhaith.

CAIB. XIII.

1 *Umhlachd, agus dleasdanas eile a's còir dhuinn* chur an gnìomh do uachdaranaibh. 8' *Se gràdh coimhlionadh an lagha.* 11 *Tha geòcaireachd, agus nìsg, agus oibre an dorchadais ro neo-chubhadh do am an t-soisgeil.*

BIODH gach anam³ ùmhal do na h-àrd-chumhachdaibh. Oir cha'n 'eil cumhachd ann ach o Dhia: agus na cumhachdan a ta ann, is ann le Dia⁴ a dh'orduicheadh iad.

2 Air an aobhar sin ge b'e air bith a chuireas an aghaidh a' chumhachd, tha e cur an aghaidh orduigh Dhé: agus iadsan a chuireas 'na aghaidh, gheibh iad breitheanas⁵ dhoibh féin.

3 Oir cha'n 'eil uachdarain 'na aobhar eagail do dheadh oibribh, ach do dhroch oibribh. Uime sin, am miann leat bhi gun eagal an uachdarain ort? dean am maith, agus gheibh thu cliù uath.

4 Air is esan seirbhiseach Dhé chum maith dhuit. Ach ma ni thu an t-olc, biodh eagail ort; oir cha'n ann gu diomhain a tha e giùlan a' chlaidheimh: oir is e seirbhiseach Dhé e, 'na dhioghaltair feirge air an ti na olc.

5 Uime sin is éigin bhi ùmhal, cha'n ann a mhàin air son feirge, ach mar an ceudna air son coguis.

6 Oir, air an aobhar so, tha sibh mar an ceudna a' toirt cise dhoibh: oir is iad seirbhiseich Dhé iad, a' sior-fheitheamh air an ni so féin.

7 Air an aobhar sin thugaibh do na h-uile⁶ an dlighe féin: càin dhasan d'an dlighear càin, cìs dhasan d'an dlighear cìs, eagail dhasan d'an dlighear eagail, agus urram dhasan d'an dlighear urram.

8 Na biodh fiacha sam bith aig aon neach oirbh, ach a mhàin a chèile a ghràdhachadh: oir an ti aig am bheil gràdh do neach eile, choimhlion e an lagh.

9 Oir an ni so, Na dean adhaltrannas, Na dean mortadh, Na goid, Na dean fianuis bhréige, Na sanntaich; agus ma tha àithne sam bith eile ann, tha i air a

cur sìos gu h-aithghearr fo 'n fhocal so, Gràdhach do choimhearsnach mar thu féin.

10 Cha dean gràdh lochd do choimhearsnach: air an aobhar sin is e an gràdh coimhlionadh an lagha.

11 Agus so, air dhuibh fios na h-aimsir a bhi agaibh, gur mitchid dhuinn a nis mosgladh o chodal: oir a ta ar slàinte nis ni's faigse na 'nuair a chreid sinn.

12 Tha cuid mhòr do'n oidliche air dol seachad⁷, tha an là am fagus: uime sin cuireamaid dhinn oibre an dorchadais, agus cuireamaid umain armachd⁸ an t-soluis.

13 Gluaiseamaid gu cubhaidh mar anns an là; cha'n ann an ruidhteireachd⁹ agus am misg, no an seòmraidheachd agus am macnus, no an aisth agus am farmad.

14 Ach cuiribh umaibh an Tighearn Iosa Criosd, agus na dcanaibh ulluchadh air son na feola, chum a h-ana-mhianna a choimhlionadh.

CAIB. XIV.

1 *Cha'n fheud daoine tàir a dheanamh, no chèile a dhiteadh air son nìthe coimhdheis: 13 ach bhi faicilleach gun oillheum a thoirt seachad; 15 oir dhearbh an t-abstol gu bheil sin mì-cheadwichte, le iomadh reuson.*

GABHAIBH ris an neach a ta anmhunn¹⁰ sa' chreidimh, ach cha'n ann chum deasboireachd amharusach.

2 Oir a ta aon a' creidsinn gu'm feud e na h-uile nìthe itheadh: ach a ta esan a ta anmhunn ag itheadh luibheanna.

3 Na deanadh esan a ta 'g itheadh, tàir airsannach 'eil ag itheadh; agus na tugadh esan nach 'eil ag itheadh, breth air an ti a dh'itheas: oir ghabh Dia ris.

4 Cò thusa a ta toirt breth air seirbhiseach duine eile? d'a mhaighstir féin seasaidh, no tuitidh e: seadh, cumar suas e; oir is comasach Dia air a chumail 'na sheasamh.

5 Tha meas aig neach air là¹¹ thar là: agus tha meas aig neach eile air gach là mar a chèile. Biodh làn-dearbhadh aig gach duine 'na inntinn féin.

6 An ti aig am bheil suim do'n là, is ann do'n Tighearn a tha suim aige dha; agus an ti aig nach 'eil suim do'n là, is ann do'n Tighearn nach 'eil suim aige dha. An ti a ta 'g itheadh, is ann do'n Tighearn a tha e 'g itheadh, oir tha e toirt buidheachais do Dhia; agus an ti nach 'eil ag itheadh, is ann do'n Tighearn nach ith e, agus bheir e buidheachas do Dhia.

7 Oir cha'n 'eil a h-aon againn beò dha

¹ iotmhor.

² beir-sa.

³ gach neach.

⁴ fuidh Dhia.

⁵ dìteadh.

⁶ do gach neach.

⁷ tharuinn.

⁸ éilidh.

⁹ anabhar.

¹⁰ lag.

¹¹ suim aig neach do là.

féin, agus cha'n 'eil a h-aon againn a' bàsachadh dha féin.

8 Oir ma's beò dhuinn, is ann do'n Tighearn a tha sinn beò: agus ma's bàs duinn, is ann do'n Tighearn a tha sinn a' bàsachadh: uime sin ma's beatha no bàs dhuinn, is leis an Tighearn sinn.

9 Oir is ann chum so a fhuair Crìosd bàs, agus a dh'éirich e, agus a tha e beò a ris, chum gu'm biodh e 'na Thighearn air na beothaibh agus air na marbhaibh.

10 Ach c'ar son a ta thusa a' toirt breth air do bhràthair? no c'ar son a ta thusa a' deanamh tarcuais air do bhràthair? oir seasaidh sinn gu léir am fianuis caithir-breitheanaidh Chrìosd.

11 Oir a ta e sgrìobhta, *Mar* is beò mise, a ta an Tighearn ag ràdh, lùbaidh gach glùn dhomh-sa, agus aidichidh gach teagadh do Dhia.

12 Air an aobhar sin bheir gach aon againn cunntas uime féin do Dhia.

13 Uime sin na tugamaid breth air a chéile nì's mò: ach gu ma fearr leibh a' bhreth so thoirt, gun aobhar-tuiteam no oibheum a thoirt do bhràthair.

14 Oir a ta fhios agam, agus is dearbh leam anns an Tighearn Iosa, nach 'eil ni sam bith neòghlan dheth féin: ach do'n ti a mheasas ni sam bith neòghlan, dhasan a ta e neòghlan.

15 Ach ma bhios doilgheas air do bhràthair air son bìdh, a nis cha'n 'eil thu a' gluasad a réir a' ghràidh. Na sgrìos¹ le d' bhìadh esan air son an d'fhuiling Crìosd bàs.

16 Air an aobhar sin na labhrar olc mu bhuir² maith.

17 Oir cha bhìadh agus deoch rìoghachd Dhé, ach fireantachd, agus sìth, agus aoibhneas san Spìrad naomh.

18 Oir ge b'e ni seirbhìs do Chrìosd anns na nithibh so, tha e taitneach do Dhia, agus tha e dearbhtha do dhaoibh.

19 Uime sin leanamaid na nithe a bhios chum sìthe³ agus na nithe a bhios chum togail suas a chéile.

20 Na sgrìos obair Dhé air son bìdh. Gu deimhin tha na h-uile nithe glan; ach is olc do'n duine sin a dh'itheas le h-oibheum.

21 Is maith an ni gun fheoil itheadh, no fìon òl, no *ni air bìth a dheanamh* leis ann faigh do bhràthair tuisleadh no oibheum, no leis an deanar lag e.

22 Am bheil creidimh agad? Biodh e agad dhuit féin am fianuis Dhé: Is beannichte an duine sin nach dìt e féin anns an in sin a mheasas e ceaduichte.

23 Ach esan a ni eadar-dhealachadh⁴ tha e air a dhìtheadh ma dh'itheas e, a

chionn nach ann o chreidimh a tha e ag itheadh: oir gach ni nach 'eil o chreidimh, is peacadh e.

CAIB.XV.

1 Is còir dhoibh-san a tha làidir giùlan leo-san a ta amhunn. 2 Cha'n fheud sinn sinn féin a thoil-eachadh, 3 oir cha d'rinn Crìosd sin, 7 acli gabhail r'a chéile, mar a rinn Crìosd ruinn uile, 9 arson ris na h-Iudhaich agus ris na Cinnich.

UIME sin is còir dhuinne a ta làidir, giùlan le amhunn-eachd na muinntir sin a ta lag, agus gun sinn féin a thoil-eachadh.

2 Toilicheadh gach aon againn a choimhearsnach g'a mhaith chum a thogail suas.

3 Oir cha do thoilich eadhon Crìosd e féin; ach a réir mar a ta e sgrìobhta, Thuit toibheum⁵ na muinntir sin a thug toibheum dhuit ormsa.

4 Oir ge b' iad nithe air bith a sgrìobhadh roimh so, is ann chum ar teagaisg-ne a sgrìobhadh iad; chum tre fhoighidin agus comhfhurtachd nan sgrìobtuir gu'm biodh dòchas⁶ againne.

5 A nis gu tugadh Dia na foighidin agus na comhfhurtachd dhuibh-sa bhi dh'aon inntinn a thaobh a chéile, a réir Iosa Crìosd:

6 Chum gu'm feud sibh a dh'aon inntinn, agus le aon bheul glòir a thoirt do Dhia, eadhon Athair an Tighearna Iosa Crìosd.

7 Uime sin gabhaibh-sa r'a chéile, eadhon mar a ghabh Crìosd ruinne, chum glòire Dhé.

8 A nis a ta mi ag ràdh, Gu robh Iosa Crìosd 'na mhinisteir an timchioll-gearraidh air son firinn Dé, chum geallanna nan aithriche a dhaingneachadh:

9 Agus chum gu'n tugadh na Cinnich glòir do Dhia air son a thròcair: a réir mar a ta e sgrìobhta, Air an aobhar so aidichidh mi thu⁷ am measg nan Cinnich, agus seinnidh mi ceòl do d' ainm.

10 Agus a ris a ta e ag ràdh, Deanaibh gairdeachas, a Chinneacha, maille r'a phobull-san.

11 Agus a ris, Molaibh an Tighearn, a Chinneacha uile, agus thugaibh cliù dha, a shlòigh uile.

12 Agus a ris a ta Esaiàs ag ràdh, Bithidh freumh Iese ann, agus an ti a dh'éireas suas chum uachdaranachd bhi aige air na Cinnich, annsau cuiridh na Cinnich an dòchas.

13 A nis gu'n lìonadh Dia an dòchais sibhse do'n uile aoibhneas agus shith⁸ ann an creidsinn, chum gu'm bi sibh pailt ann an dòchas, tre chumhachd an Spìoraid naomh.

¹ cuir am mugha. ² ur. ³ a stìtras chum sìochaint. ⁴ a ta fuith amharus. ⁵ masladh.

⁶ dùil, earbsa. cliù dhuit.

⁷ aidicheam dhuit, bheircam. ⁸ shìochaint.

14 Agus a ta cinnt agam-sa féin do 'ur taobh-sa, mo bhràithre, gu bheil sibhse lan do mhaithreas, air bhuir lìonadh leis an uile eòlas, agus comasach mar an ceudna air a chèile a chomhairleachadh¹.

15 Gidheadh, a bhràithre, sgriobh mi do 'ur n-ionnsuidh leis an tuilleadh dānadais, an càileigin, mar gu cuirinn an cuimhne sibh, air son a' ghràis a thugadh dhomh-sa o Dhia.

16 Ionnsu gu'm bithinn a'm' mhinisteir aig Iosa Criosd do na Cinnich, a' frith-ealadh soisgeil Dé, chum gu'm biodh tabhartas² nan Cinneach taitneach, air a naomhachadh leis an Spiorad naomh.

17 Uime sin tha aobhar uail agam tre Iosa Criosd, anns na nithibh sin a bhuineas do Dhia.

18 Oir cha bhi dānachd agam labhairt air a' bheag do na nithibh sin, nach d'oibrich Criosd leam, chum na Cinnich a dheanamh ùmhal am focal agus an gnìomh.

19 Le cumhachd chomharan agus mhìorbhuilean³, le cumhachd Spioraid Dé; ionnsu o Ierusalem agus mu'n cuairt gu Iliricum, gu'n do làn-shearmonaich mi soisgeul Criosd.

20 Seadh, mar sin bha ro dhéidh agam air an t-soisgeul a shearmonachadh, cha'n ann san ionad san robh Criosd air ainmeachadh, chum nach togainn air bunait neach eile:

21 Ach a réir mar a ta e sgriobhta, Chi iadsan ris nach do labhradh uime; agus tuigidh iadsan, nach cuala.

22 Uime sin mar an ceudna chuireadh gu minic bacadh orm o theachd do 'ur n-ionnsuidh-sa.

23 Ach a nis do bhrìgh nach 'eil agam ionad nì's mò anns na crìochaibh so, agus gu bheil mòr-thogradh agam o cheann mòrain bhliadhnacha teachd do 'ur n-ionnsuidh-sa;

24 Ge b'e uair a thrialas mi do'n Spàinn, thig mi do 'ur n-ionnsuidh-sa; oir tha dùil agam sibhse fhaicinn san dol seachad, agus bhi air mo thoirt air m' aghaidh leibhse chum an ionaid sin, ma bhios mi air tùs an càileigin air mo lìonadh le 'ur comhludair-sa.

25 Ach a nis tha mi dol gu Ierusalem, a' frith-ealadh do na naomhaibh.

26 Oir bu toil leo-san ann am Macedonìa, agus ann an Achaia, comh-roinn àraidh a dheanamh ris na naomhaibh bochda ta ann an Ierusalem.

27 Bu toil leo gu deimhin agus tha iad fo fhiachaibh dhoibh. Oir ma rinneadh na Cinnich 'nan luchd comhpairt d'an

nithibh spioradail-san, is còir dhoibh ministreileachd a dheanamh dhoibh-san sna nithibh a bhuineas do'n choluium⁴.

28 Uime sin air dhomh so a chrìoch-nachadh, agus an uair a sheulaicheas mi an toradh so dhoibh, gabhaidh mi do 'ur taobh-sa⁵ do'n Spàinn.

29 Agus a ta fhios agam, air dhomh teachd do 'ur n-ionnsuidh-sa, gu'n tig mi ann an lànachd bcannachaidh soisgeil Criosd.

30 A nis guidheam oirbh, a bhràithre, air sgàth an Tighearna Iosa Criosd, agus air son gràidh an Spioraid, gu'n dean sibh gleachda⁶ maille rium-sa ann an urnuighibh air mo shon ri Dia;

31 Chum gu saorar mi uatha-san nach 'eil a' creidsinn ann an Iudea; agus chum gu'm bi mo sheirbhìs air son⁷ Ierusalem, taitneach do na naomhaibh:

32 Chum gu'n tig mi do 'ur n-ionnsuidh-sa le h-aoibhneas tre thoil Dé, agus gu faigh mi suaimhneas maille ribh.

33 A nis gu robh Dia na sìthe maille ribh uile. Amen.

CAIB. XVI.

1 Thug Pòl ordugh do na bràithribh fàilte chur air mòran; 17 agus chomhairlich e dhoibh aire a thoirt do'n mhuinntir a ta togail connsaich agus a toirt oibhheim: 21 agus an dèigh iomadh beannachd chrìochnaich e le breith-buidheachais do Dhia.

THA mi ag earbadh ribh⁸ Phebe ar piuthar, a ta 'na searbhanta do'n eaglais a tha ann an Cenchrea:

2 Chum gu'n gabh sibh rithe anns an Tighearn, mar is cubhaidh do naomhaibh, agus gu'n dean sibh còmhnaidh rithe anns gach gnòthuch anns am bi feum aice oirbh: oir rinn i féin còmhnaidh ri mòran, agus rium-sa mar an ceudna.

3 Cuiribh fàilte air Priscila agus Acila mo chomh-oibrichean ann an Iosa Criosd:

4 (Muintir a leag sìos am muineal féin air son m'anama-sa: d'am bheil a' toirt buidheachais cha'n e mhàin mise, ach mar an ceudna eaglaisean nan Cinneach uile.)

5 Mar an ceudna cuiribh fàilte air an eaglais a tha 'nan tigh-san. Cuiribh fàilte air Epenetus a's ionmhuinn leam-sa, neach is e ceud thoradh Achaia⁹ do Criosd.

6 Cuiribh fàilte air Muire, a rinn saoth-air mhòr air ar son-ne¹⁰.

7 Cuiribh fàilte air Andronicus agus Iunia mo luchd-dàimh agus mo chomh-phriosanaich, a tha cliùiteach am measg nan abstol, agus a bha ann an Criosd romham-sa.

¹ theagasc.

² ofrail. iobairt.

³ Le comharaibh agus mìorbhuilibh treuna.

⁴ fèidmhor.

⁵ bluir ròd-sa.

⁶ spairn.

⁷ thaobh.

⁸ Molam dhuibh, carbam ribh.

⁹ Asia.

¹⁰ air bluir son-sa.

8 Cuiribh fàilte air Amplias a's ionmhuinn leam-sa san Tighearn.

9 Cuiribh fàilte air Urbanus ar comh-oibriche ann an Criosd, agus air Stachis fear mo ghràidh-sa.

10 Cuiribh fàilte air Apelles a tha dearbhta ann an Criosd. Cuiribh fàilte orra-san a tha do *theaghlach* Aristobulus.

11 Cuiribh fàilte air Herodion mo charaid. Cuiribh fàilte orra-san do *theaghlach* Narcisuis, a tha san Tighearn.

12 Cuiribh fàilte air Triphena agus Triphosa, *mnàid* a tha saoi-threachadh san Tighearn. Cuiribh fàilte air Persis a's ionmhuinn leam, bean a shaothraich gu mòr anns an Tighearn.

13 Cuiribh fàilte air Rufus a tha taghta san Tighearn, agus air a mhàthair agus mo mhàthair-sa.

14 Cuiribh fàilte air Asincritus, Phlegon, Hermas, Patrobas, Hermes, agus air na bràithribh a tha maille riu.

15 Cuiribh fàilte air Philologus, agus Iulia, air Nereus, agus a phiuthar, agus Olimpas, agus na naoimh uile a tha maille riu.

16 Cuiribh fàilte air a chéile le pòig naoimh. Tha eaglaisean Chriosd¹ a' cur fàilte oirbh.

17 A nis guidheam oirbh, a bhràithre, comharaichibh iadsan a tha togail roinnean² agus a' toirt oibbheim, an aghaidh an teagaisg a dh'fhòghluim sibh; agus seachnaibh iad.

18 Oir cha'n 'eil an leithide so a' deanamh seirbhis do 'ur Tighearna Iosa Criosd, ach d'am broinn féin; agus a ta

iad le briathraibh mìlse agus le mìodal a' mealladh cridheacha na muinntir sin a ta neo-lochdach³.

19 Oir a ta bhuir n-ùmh-lachd-sa⁴ air teachd chum nan uile *dhaoinè*. Uime sin a ta mise a' deanamh gairdeachais do 'ur taobh-sa: g'edheadh b' àill leam sibhse bhì glic chum a' mhaith, ach aon-fhillte thaobh an uile.

20 Agus bruthaidh Dia na sìthe⁵ Satan fo 'ur cosaibh gu h-aithghearr. Gràs⁶ ar Tighearna Iosa Criosd *gu robh* maille ribh. Amen.

21 Tha Timoteus mo chomh-oibriche a' cur fàilte oirbh, agus Lucius agus Iason agus Sosipater, mo luchd-dàimhle.

22 Tha mise Tertius, a sgrìobh an litir so, a' cur fàilte oirbh san Tighearn.

23 Tha Gaius, a tha toirt aoidheachd dhomh-sa agus do'n eaglais uile, a' cur fàilte oirbh. Tha Erastus stiùbhard a' bhaile a' cur fàilte oirbh, agus Cuartus bràthair.

24 Gràs ar Tighearna Iosa Criosd *gu robh* maille ribh uile. Amen.

25 A nis dhasan a tha comasach air sibhse a dhaingneachadh, a réir mo shoisgeil-sa, agus searmonachaidh Iosa Criosd, (a réir foillseachaidh an rùin-diomhair, a bha am folach o thoiseach an domhain,

26 Ach a dh'fhoillsicheadh a nis, agus tre sgrìobtuiribh nam fàidhean, a réir àithne an Dé bhith-bhuain, a tha air a dheanamh aithnichte do na h-uile chiunich chum ùmh-lachd a' chreidimh.)

27 Do Dhia a tha mhàin glic, *gu robh* glòir tre Iosa Criosd gu sìorruidh. Amen.

¹ eaglaisean Chriosd (uile.)

² sgaradh, aimkreite, chonnsaichean.

³ nach 'eil olc.

⁵ sìothchaint.

⁴ cliù bhuir n-ùmh-lachd-sa.

⁶ Deadh-ghean.

CEUD LITIR AN ABSTOIL PHOIL

CHUM NAN

CORINTIANACH.

CAIB. I.

1 An déigh fàilte agus breith-buidheachais, 12 dh'earalaich an t-abstol na Corintianaich, agus chronuich e iad air son an aimkreite. 18 Sgrìosaidd Dia gliocas nan daoine eagnuidh le amaid-eachd searmonachaidh, &c.

POL a ghairmeadh gu bhì 'na abstol do Iosa Criosd, tre thoil Dé, agus Sostenes ar bràthair.

2 Chum eaglais Dé, a ta ann an Corinthus, chum an dream a tha air an naomhachadh ann an Iosa Criosd, air an gairm *gu bhì* 'nan naoimh, maille riu-san uile a tha gairm air ainm ar Tighearna Iosa Criosd anns gach àit, an *Tighearna-san*,

agus ar *Tighearna-ne*:

3 Gràs dhuibh-se, agus sìth o Dhia ar n-Athair, agus o'n Tighearn Iosa Criosd.

4 Tha mi toirt buidheachais do m' Dhia a ghnàth do 'ur taobh-sa, air son gràs Dhé a thugadh dhuibh-se ann an Iosa Criosd;

5 Air son gu'n d'rinneadh saoi-bhir leis-san sibh anns gach uile nì, anns gach ùrlabhradh, agus anns gach eòlas:

6 A réir mar a dhaingnicheadh fianuis Chriosd annaibh;

7 Ionnus nach 'eil sibh an déigh-làimh ann an tiodhlac sam bith; a' feitheamh ri foillseachadh ar *Tighearna Iosa Criosd*

8 Neach mar an ceudna a dhaingnich-

cas sibh gus a' chrìch, *chum gu'm bi sibh* neo-lochdach ann an là ar Tighearna Iosa Criosd,

9 Tha Dia firiuneach, leis an do ghairmeadh sibh chum comh-chomuinn a mhic Iosa Criosd ar Tighearna.

10 A nis guidheam oirbh, a bhràithre, tre ainm ar Tighearna Iosa Criosd, gu'n labhair sibh uile an t-aon ni, agus nach bi roinnean! 'nur measg; ach gu'm bi sibh ceangailte r'a chèile gu dìongmhalta ann an aon inntinn, agus ann an aon bharail².

11 Oir nochdadh dhomh-sa, a bhràithre, m'ur timchioll-sa, leo-san a *tha do theaghlach* Chloe, gu bheil comhstri³ 'nur measg.

12 A nis a ta mi ag ràdh so, gu'n abair gach aon agaibh, Is le Pòl mise⁴; agus is le Apollos mise; agus is le Cephas mise; agus is le Criosd mise.

13 Am bheil Criosd air a roinn? an e Pòl a cheusadh air bhur son? no an ann an ainm Phòil a bhaisteadh sibh?

14 Tha mi toirt bùdheachais do Dhia, nach do bhaist mi aon agaibh, ach Crispus agus Gaius:

15 Air eagal gu'n abradh neach, gu'n do bhaist mi a'm ainm féin.

16 Agus bhaist mi mar an ceudna teaghlach Stephanais: a thuilleadh air so, cha'n fhios domh an do bhaist mi aon neach eile.

17 Oir cha do chuir Criosd mi a bhaisteadh, ach a shearmonachadh an t-soisgeil; cha'n ann an gliocas fòcail, chum nach cuirteadh crann-ceusaidh Chrìosd an neo-bhrìgh.

18 Oir a ta searmonachadh a' chroinn-cheusaidh 'na amaideachd dhoibh-san a chaillear; ach dhuinne a shaorar, is e cumhachd Dhé e.

19 Oir a ta e sgrìobhta, Sgrìosaiddh mi gliocas nan daoine glìce, agus cuiridh mi air cùl tuigse nan daoine tuigseach.

20 C'àit am bheil an duine glìc? c'àit am bheil an sgrìobhaiche? c'àit am bheil deasboir an t-saoghail so? Nach do rinn Dia gliocas an t-saoghail so amaideach?

21 Oir an uair, ann an gliocas Dé, nach b'aithne do'n t-saoghal, tre ghliocas, Dia, bu toil le Dia le amaideachd an t-searmonachaidh iadsan a thèarnadh⁵ a ta creidsinn.

22 Oir a ta na h-Iudhaich ag iarraidh comhara, agus a ta na Greugaich a' sir-eadh gliocais:

23 Ach a ta sinne a' searmonachadh Chrìosd air a cheusadh, 'na cheap-tuislidh do na h-Iudhaich, agus do na Greugaich 'na amaideachd;

24 Ach dhoibh-san a ta air an gairm, araon Iudhaich agus Greugaich, Criosd cumhachd Dhé agus gliocas Dhé:

25 Do bhrìgh gur glìce amaideachd Dhé na daoine, agus gur treise anmhuinneachd Dhé na daoine.

26 Oir chi sibh féin bhur gairm, a bhràithre, nach iomadh iad a ta glìc a thaobh na feòla, nach iomadh cumhachdach; nach iomadh uasal a ta air an gairm:

27 Ach ròghnuich Dia nithe amaideach an t-saoghail so, chum gu'n cuireadh e nàire air na daoineibh glìce; agus ròghnuich Dia nithe anmhunn an t-saoghail, chum gu'n cuireadh e gu nàire na nithe cumhachdach;

28 Agus nithe an-ualas an t-saoghail, agus nithe tarcuiseach ròghnuich Dia, agus na nithe nach 'eil ann, chum gu'n cuireadh e na nithe a ta ann, an neo-bhrìgh:

29 Ionuss nach deanadh feòil sam bith uail 'na fhianuis.

30 Ach naithe-san a ta sibhse ann an Iosa Criosd, neach a rinneadh dhuinne le Dia 'na ghliocas, 'na fhìreantachd, 'na naomhachd, agus 'na shaorsa:

31 Ionuss, a réir mar a ta e sgrìobhta, An ti a ni uail, deanadh e uail anns an Tighearn.

CAIB. II.

1 Chuir Pòl an céill ged nach 'eil a shearmonachadh ann an oirdheirceas cainnte, 4 no ann an gliocas dhaoine; 5 gidheadh gu bheil e a' co-sheasamh ann an cumhachd Dhé, agus a' toirt barrachd air gliocas an t-saoghail agus air cumhachd dhaoine.

AGUS an uair a thàinig mise do 'ur n-ionnsuidh-sa, a bhràithre, cha b'ann le oirdheirceas cainnte, no gliocais a thàinig mi, a' cur an céill duibh teisteis Dhé.

2 Oir chuir mi romham gun eòlas a ghabhail⁶ air ni sam bith 'nur measg, ach air Iosa Criosd, agus esan air a cheusadh.

3 Agus bha mi 'nur measg ann an anmhuinneachd, agus ann an eagal, agus am mòr-chrìth.

4 Agus cha robh m'fhocal agus mo shearmonachadh ann am briathraibh-milse⁷ gliocais dhaoine, ach ann an làudearbhadh an Spioraid, agus a' chumhachd:

5 Chum gu'm biodh bhur creidimh-sa cha'n ann an gliocas dhaoine, ach an cumhachd Dhé.

6 Ach gidheadh tha sinn a' labhairt gliocais am measg nan daoine iomlan: ach cha'n e gliocas an t-saoghail so, no uachdarana an t-saoghail so, a théid an neo-bhrìgh:

¹ easaonachda, sgaraidh.

² bhreth.

³ comsachadh.

⁴ Is deisciobul do Phòl mise.

⁵ a shaoradh, a shlànachadh.

⁶ aithne a bhi

agam.

⁷ tairngeach, drùiteach.

I. CORINTIANACH, II. III.

7 Ach tha sinn a' labhairt gliocais Dé ann an rùn-dìomhair, a' *ghliocais* sin a *bha* folaichte, a dh'orduich Dia roimh an t-saoghal¹ chum ar glòir-ne:

8 An gliocas nach b'aithne do aon neach do uachdaranaibh an t-saoghail so: oir nam b'aithne dhoibh e, cha cheusadh iad Tighearn na glòire.

9 Ach a réir mar a ta e sgrìobhta, Cha'n fhaca sùil, agus cha chuala cluas, agus cha d'fhàinig ann an cridhe duine, na nithe a dh'ulluich Dia dhoibh-san aig am bheil gràdh dha.

10 Ach dh'fhoillsich Dia dhuinne *iad* le a Spiorad féin: oir tha an Spiorad a' rannsachadh nan uile nithe, eadhon nithe doimhne Dhé.

11 Oir cò an duine d'an aithne nithe duine, ach do spiorad an duine a ta ann? mar sin cha'n 'eil fios aig neach sam bith air nithibh Dhé, ach aig Spiorad Dhé.

12 A nis fhuair sinne, cha'n e spiorad an t-saoghail, ach an Spiorad a ta o Dhia; chum gu'm biodh aithne againn air na nithibh sin² a thugadh dhuinn gu saor o Dhia.

13 Nithe mar an ceudna a ta sinn a' labhairt, cha'n ann am briathraibh a theagaisgeas gliocas dhaoine, ach am *briathraibh* a theagaisgeas an Spiorad naomh; a' coimhneas nithe spioradail ri nithibh spioradail³.

14 Ach cha ghabh an duine nàdurra ri nithibh Spioraid Dé: oir is amaideachd leis iad; agus cha 'n'eil e'n comas da eòlas a ghabhail *orra*, do bhrìgh gur ann air mhodh spioradail a thuigear⁴ iad.

15 Ach bheir an duine spioradail breth air na h-uile nithibh, gidheadh cha 'n'eil e féin fo bhreth duine sam bith.

16 Oir cò d'am b'aithne intinn an Tighearn, agus a theagaisgeas e? ach tha intinn Chrìosd againne.

CAIB. III.

1 *Tha baine ionchuidh air son cloinne.* 3 *Tha strì agus aimhréite 'nan comhara cinnteach air imtinn fheòlmhor.* 7 *Cha'n 'eil anns an ti a shuidhicheas, agus anns an ti a dh'uisgicheas, ach neo-ni.* 9 *Is comh-obrichean ministèire an t-soisgeil do Dhia.* 11 *'Se Chrìosd an t-aon bhunait.*

AGUS, a bhràithre, cha'n fheudainn-sa labhairt ribhse mar ri *daoineibh* spioradail, ach mar ri *daoineibh* feòlmhor, amhuil ri naoidheanaibh ann an Chrìosd.

2 Bheathaich mi le baine sibh, agus cha'n ann le biadh: oir fathast cha b'urrainn sibh a *ghabhail*, agus a nis féin cha'n urrainn sibh.

3 Oir a ta sibh fathast feòlmhor: oir a thaobh gu bheil fearmad 'nur measg, agus

strì, agus aimhréite, nach 'eil sibh feòlmhor, agus ag imeachd mar dhaoine?

4 Oir an uair a ta neach ag ràdh, Is le Pòl mise; agus neach eile, Is le Apollos mise; nach 'eil sibh feòlmhor?

5 Cò e ma seadh Pòl, agus cò e Apollos, ach ministèirean tre'n do chreid sibh, eadhon mar a thug an Tighearn do gach aon?

6 Shuidhich mise, dh'uisgich Apollos: ach 'se Dia a thug am fàs.

7 Uime sin ma seadh, cha'n 'eil anns an ti a shuidhicheas no anns an ti a dh'uisgicheas, brìgh sam bith; ach ann an Dia a ta toirt an fhàis.

8 An ti a shuidhicheas, agus an ti a dh'uisgicheas, is aon iad: agus gheibh gach aon a dhuais féin, a réir a shaothair féin.

9 Oir is comh-luchd-oibre do Dhia sinne: is sibhse treabhachas⁵ Dhé, *is sibh* aitreabh Dhé.

10 A réir gràis Dé a thugadh dhomh-sa mar fhear-togail aitreabh glic leag mi am bunait, agus a ta neach eile a' togail air, ach thugadh gach neach an aire cionnus a thogas e air.

11 Oir bunait⁶ eile cha'n urrainn duine sam bith a leagadh⁷, ach *am bunait* a leagadh a *cheana*, eadhon Iosa Crìosd.

12 A nis ma thogas neach air a' bhunait so, òr, airgid, clacha luachmhor, fiodh, feur, connlach;

13 Nithear obair gach aoin duine follaiseach: oir nochdaidh an là i, do bhrìgh gu'm foillsichear i le teine; agus dearbhaidh an teine obair gach aoin, ciod is gnè dhith.

14 Ma dh'fhanas obair neach sam bith a thog e air, gheibh e duais.

15 Ma loisgear obair neach sam bith, fuilgidh e call: ach saorar e féin; gidheadh mar tre theine.

16 Nach 'eil fhios agaibh gur sibh teampull Dhé, agus gu bheil Spiorad Dé, na chòmhnuidh annaibh?

17 Ma thruaillias neach air bith teampull Dhé, sgrìosaidd Dia an ti sin: oir a ta teampull Dhé naomh, agus is sibhse e.

18 Na mealladh neach air bith e féin: ma shaoileas neach air bith 'nur measg e féin bhi glic san t-saoghal so, biodh e 'na amadan, chum gu'm bi e glic.

19 Oir is amaideachd aig Dia gliocas an t-saoghail so: oir a ta e sgrìobhta, Glacaidh e na daoine glìce 'nan innleachdaibh féin.

20 Agus a ris, Is aithne do'n Tighearn smuainte nan daoine glìce, gur dìomhain iad.

¹ roimh na linnibh. ² fios nan nithe sin againn. ³ a' mìneachadh nithe spioradail am briathraibh spioradail. ⁴ brùthnichear, mhothaichear.

⁵ tuathanachd. ⁶ bunachar, bonn. ⁷ a chur.

21 Uime sin na deanadh neach air bith uailh á daoinibh: oir is leibhse na h-uile nithe:

22 Ma 'se Pòl, no Apollos, no Cephas, no an saoghal, no beatha, no bàs, no nithe a ta làthair, no nithe a ta ri teachd; is leibhse iad uile;

23 Agus is le Crìosd sibhse; agus is le Dia Crìosd.

CAIB. IV.

1 Cìod a am meas a bhùineadh do dhaoineibh bhì aca air ministearibh. 7 Cha 'n 'eil againn ni air bith ach na fhuair sinn. 9 Na h-abstoil 'nam ball-amhairc do'n t-saoghal, do ainglibh, agus do dhcoineibh, 13 mar shal agus anabas an t-saoghail; 15 gidheadh is iad ar n-aithriche ann an Crìosd, 16 agus bu chòir dhuinn an leantuinn.

BIODH a shamhuil so do mheas aig B duine dhinne, mar mhinistearibh Crìosd, agus mar stiùbhardaibh¹ rùnadh-mhair Dhé.

2 Os bàrr iarrar ann an stiùbhardaibh, gu faighear neach dileas.

3 Ach agam-sa is ro bheag an ni gu'n tugadh breth orm leibhse, no le breitheanas duine: seadh, cha 'n 'eil mi toirt breth orm féin.

4 Oir cha'n fhios domh ni sam bith do m' thaobh féin; gidheadh cha'n 'eil mìle so air m'fhìreanachadh: ach is e an Tigh-earn an tí a bheir breth orm.

5 Uime sin na tugaibh breth air ni sam bith roimh an àm, gus an tig an Tigh-earn, neach faraon a bheir gu soilleir-eachd nithe folaichte an dorchadais, agus a dh'fhoillsicheas comhairlean nan cridheachan: agus an sin gheibh gach neach cliù o Dhia.

6 Agus, a bhràithre, ghabh mi na nithe so a m' ionnsuidh féin, agus a dh'ionnsuidh Apollois ann an samhhladh², air bhuir sòpsa; chum gu fòghlumadh sibh uainne, gun bharrail a bhì agaibh air daoinibh os ceann na bheil sgriobhta, chum nach biodh a h-aon agaibh air a sheideadh suas air son aoin duine an aghaidh duine eile.

7 Oir cò tha deanamh eadar-dhealachaidh ortsa o neach eile? Agus cìod e a ta agad nach d'fhuair thu? a nis ma fhuair thu e, c'ar son a ta thu deanamh uailh mar nach faigheadh tu e?

8 A nis tha sibh sàitheach, a nis rinn-eadh saoiibhir sibh, rioghaich sibh as ar n-eugmhais-ne: Agus bu mhiann leam gu'm bu rìghre sibh, chum gu'm biodh-maid-ne 'nar rìghribh maille ribh.

9 Oir is i mo bharrail gu'n do chuir Dia simne na h-abstoil a mach mu dheireadh, mar dhream a ta air an orduchadh chum

bàis. Oir rinneadh sinn 'nar ball-amh-aire³ do'n t-saoghal, agus do ainglibh, agus do dhaoineibh.

10 Is amadain sinne air son Chrìosd, ach a ta sibhse glic ann an Crìosd: tha sinne lag, ach a ta sibhse làidir: a ta sibhse ann an nrram, ach sinne ann an eas-urram.

11 Gus an uair so féin, tha sinn araon ocrach, agus iotmhor, agus lomnochd, agus air ar bualadh le dornaibh⁴, agus gun aon àite-còmhnuidh seasmhach againn:

12 Agus ri saothair, ag oibreachadh le ar làmh-aibh féin: Air fulang anacainnt dhuinn, tha sinn a' beannachadh: 'nuair a gheur-leannar sinn tha sinn 'ga fhulang:

13 Air faghail toibheim dhuinn, tha sinn a' guidhe: rinneadh sinn mar shalachar an t-saoghail, mar anabas nan uile nithe gus an là'n diugh:

14 Cha'n 'eil mi a' sgriobhadh⁵ nan nithe so a chur nàire oirbh, ach mar mo chloinn ghràdhach a ta mi 'gur comhairleachadh.

15 Oir ged bhì⁶ deich mìle luchd teagaisg agaibh ann an Crìosd, gidheadh cha'n 'eil agaibh mòran aithriche: oir ann an Iosa Crìosd, ghin mise sibh troimh an t-soisgeul.

16 Uime sin guidheam oirbh, bithibh 'nur luchd-leanmhuinn ormsa⁷.

17 Chum na crìche so chuir mi Timoteus do 'ur n-ionnsuidh, neach a ta 'na mhac gràdhach dhomh, agus dileas san Tighearna, neach a chuireas an cuimhne dhuibh mo shlighean-sa a ta ann an Crìosd, a réir mar a ta mi teagasg anns gach àit anns gach eaglais.

18 A nis a ta cuid air an séideadh suas, mar nach tigin do 'ur n-ionnsuidh.

19 Gidheadh thig mi do 'ur n-ionnsuidh gu h-aithghearr, ma's toil leis an Tigh-earn, agus bithidh fios agam, cha'n ann air cainnt na muinntir a ta air an séideadh suas, ach air an cumhachd.

20 Oir cha'n ann am focal a ta rioghachd Dhé, ach ann an cumhachd.

21 Cìod is àill leibh? An tig mi do 'ur n-ionnsuidh le slait, no ann an gràdh, agus ann an spiorad na macantachd⁸?

CAIB. V.

1 A ta an duine neòghlan nì's mò 'na chùis-nàire dhoibh, na 'na aobhar gairdeachais. 7 Is còir an t-seann gheur-thaòis a ghlanadh a mach. 10 Is còir peacach ghràineil a sheachnadh.

THA e air aithris gu coitcheonn⁹ gu bheil neòghloine¹⁰, 'nur measg, agus a leithid sin do neòghloine, nach 'eil uiread

¹ luchd-frithealaidh air.

² coslas.

³ sealladh, speuclair.

⁴ do dhornaibh. ⁵ Nì'n sgriobham.

⁶ ma ta.

⁸ ceannasachd.

¹⁰ striopachas.

⁷ air m'eisimpleir-sa.

⁹ cumanta.

I. CORINTIANACH, V. VI.

as air ainmeachadh am measg nan Cinneach, gu'm biodh aig neach bean 'athar.

2 Agus a ta sibh air bhur séideadh suas, agus cha d'rinn sibh bròn mar bu chòir, chum gu tugtadh air falbh uaibh am fear a rinn an gnìomh so.

3 Oir gu deimhin air dhomh-sa bhi uaibh an corp, ach a làthair agaibh an spiorad, thug mi breth cheana, mar gu b'hiinn a làthair, air an neach a rinn so mar so;

4 An ainm ar Tighearna Iosa Crìosd, air dhuibhse, agus do m' spiorad-sa bhi cruinn an ceann a chèile, maille ri cumhachd ar Tighearna Iosa Crìosd,

5 A shamhuil so do dhuine a thoirt thairis do Shatan chum sgrios na feòla, chum gu'm bi an spiorad air a shaoradh¹, ann an là an Tighearna Iosa.

6 Cha 'n 'eil bhur n-uail maith: nach 'eil fhios agaibh gu'n goirtich² beagan do thaois ghoirt³ am meall uile?

7 Glanaibh a mach uime sin an t-seann thaois ghoirt, chum gu'm bi sibh 'nur meall nuadh, mar a ta sibh neo-ghoirtichte Oir a ta eadhon Crìosd ar n-uan càisge air iobradh air ar son.

8 Uime sin cumamaid an fhéil⁴, na b'ann le seann thaois ghoirt, no le taois ghoirt a' mhì-ruin agus an uile; ach le aran neo-ghoirtichte an tréibhdhireis agus na fìrinn.

9 Sgrìobh mi do 'ur n-ionnsuidh ann an litir, gun chomhludair a bhi agaibh ri luchd-neòghloine⁵.

10 Gidheadh cha'n ann gu h-uile ri luchd-neòghloine an t-saoghail so, no ri luchd-sainnt, no luchd-foireigne⁶, no luchd iodhol-aoraidh; oir an sin b'éigin duibh dol a mach as an t-saoghal.

11 Ach a nis sgrìobh mi do 'ur n-ionnsuidh, gun chomhludair a ghléidheadh, ma ta neach air bith ris an abrar bràthair 'na fhear-neòghloine, no sanntach, no 'na fhear iodhol aoraidh, no 'na fhear-anacaint, no 'na mhisgeir, no 'na fhear-foir-eigne, maille r'a leithid so do dhuine gun tìread as biadh itheadh.

12 Oir ciod e mo ghnòthuch-sa breth a thoirt orra-san a ta am muigh? nach 'eil sibhse a' toirt breth air an dream a ta stigh?

13 Ach a ta Dia a' toirt breth orra-san a ta an leth muigh. Uime sin cuiribh air falbh an droch dhuine sin as bhur meadhon féin⁷.

CAIB. VI.

1 Cha'n fheud na Corintianaich dragh a chur air am bràithribh le'n agairt chum lagha, 6 gu h-àraidh

an làthair nan ana-creideach. 9 Cha sealbhaich na neo-fhìreanaich rìoghachd Dhé. 15 'S iad ar cuirp buill Chrìosd, 19 agus teampuil an Spioraid naomh: 16 Uime sin cha'n fheudar an truall-cudh.

A M bheil a chridhe aig aon neach agaibh, aig am bheil cùis an aghaidh duine eile, dol fo bhreitheanas nan daoine eucorach, agus cha'n ann fo bhreitheanas nan naomh?

2 Nach 'eil fhios agaibh gu'n toir na naomh breth air an t-saoghal? agus ma bheirear breth air an t-saoghal leibhse, an e nach fìu sibh bhi 'nur breithibh air na cùisibh a's lugha?

3 Nach 'eil fhios agaibh gu'n toir sinne breth air ainglibh? cia mò na sin air nithibh a bhuineas do'n bheatha so?

4 Uime sin ma tha breitheanas⁸ agaibh mu thimchioll nan nithe sin a bhuineas do'n bheatha so, cuiribh 'nan suidhe chum breitheanas an dream a's lugha meas anns an eaglais.

5 Chum bhur nàire tha mi a' labhairt. An ann mar sin nach 'eil aon duine glic 'nur measg? nach 'eil fìu a h-aon a's urrainn breth a thoirt eadar a bràithre?

6 Ach a ta bràthair a' dol gu lagh le bràthair, agus so an làthair nan ana-creideach.

7 A nis uime sin a ta gu cinnteach lochd 'nur measg, do bhrìgh gu bheil sibh a' dol gu lagh r'a chèile: c'ar son nach fearr leibh eucor fhulang? c'ar son nach fearr leibh calldach a ghabhail?

8 Gidheadh a ta sibh a' deanamh eucor agus diobhail⁹, agus sin air bhur bràithribh?

9 Nach 'eil fhios agaibh nach sealbhaich luchd-deanamh na h-eucorach rìoghachd Dhé? Na meallar sibh: cha sealbhaich luchd-strìopachais, no luchd iodhol-aoraidh, no luchd-adhaltramais, no luchd-macnuis, no na daoine a ta ciontach do neòghloine mhi-nàdurra,

10 No gaduichean, no daoine sanntach, no misgeirean, no luchd-anacaint, no luchd-foireigne, rìoghachd Dhé.

11 Agus mar so bha cuid dibhse: ach a ta sibh air bhur n-ionnlad, ach a ta sibh air bhur fireanachadh ann an ainm an Tighearna Iosa, agus tre Spiorad ar Dé-ne.

12 Tha na h-uile nithe ceaduichte dhomh-sa, ach cha'n 'eil na h-uile nithe iomchuidh¹⁰; tha na h-uile nithe ceaduichte dhomh, ach cha chuirear mi fo chumhachd ni sam bith.

13 Tha am biadh airson na bronn, agus a' bhrù air son a' bhìdh: ach sgriosaidh Dia faraon so agus sud. A nis cha'n ann

¹ shàbhaladh, thèarnadh.

² geuraich. ³ gheur-thaois.

⁴ an fhéilid.

⁵ strìopachais.

⁶ reubainn, ana-cothrom.

⁷ as bhur cuideachd.

⁹ diùbhail.

⁸ caitliche-breitheanas.

¹⁰ ta' bhach.

do neòghloine a tha an corp, ach do'n Tighearn: agus an Tighearn do'n chorp.
14 Agus thog Dia faraon an Tighearn suas, agus togaidd e sinne suas tre a chumhachd féin mar an ceudna.

15 Nach 'eil fhios agaibh, gur iad bhur cuirp buill Chrìosd? uime sin an gabh mise buill Chrìosd, agus an dean mi buill striopaich dhiubh? Nar leigeadh Dia.

16 An e nach 'eil fios agaibh, an ti sin a tha ceangailte ri striopaich, gur aon chorp *rithe* e? Oir (a ta e ag ràdh,) bithidh dithis 'nan aon fheòil.

17 Ach an ti a tha ceangailte ris an Tighearn, is aon Spiorad *ris* e.

18 Teichibh o striopachas. Tha gach aon pheacadh a ni duine an leth muigh do'n chorp: ach an ti a ni striopachas, tha e peacachadh an aghaidh a chuirp féin.

19 An e nach 'eil fhios agaibh gur e bhur corp teampull an Spioraid naoimh *a ta annaibh*, a ta agaibh o Dhia, agus cha leibh féin sibh?

20 Oir cheannachadh le luach sibh: uime sin thugaibh glòir do Dhia le bhur corp, agus le bhur spiorad, a's le Dia.

CAIB. VII.

1 *Mu phòsadh.* 10 *Cha chòir do bhannaibh-pòsaidh bhì air am fuasgladh air bheag aobhair.* 18 *Is còir do gach duine bhì toileichte le a ghairm.* 25 *C'ar son is còir roghuinn a dheanamh do dhigheachd:* 35 *na reusoin air son am bu chòir pòsadh, no gun phòsadh.*

A NIS a thaobh nan nithe mu'n do sgrìobh sibh a m' ionnsuidh: *Is maith do fhear gun bheantuinn ri mnaoi.*

2 Gidheadh, chum striopachas *a sheach-nadh*, biodh a bhean féin aig gach fear, agus aig gach mnaoi a fear féin.¹

3 Thugadh am fear an deadh-ghean dlìgheach do'n mhnaoi; agus a' bhean mar an ceudna do'n fhear.

4 Cha'n 'eil comas a cuirp féin aig a' mhnaoi, ach aig an fhear: agus mar an ceudna cha'n 'eil comas a chuirp féin aig an fhear, ach aig a' mhnaoi.

5 Na cumaibh bhur dlìghe o chéile, ach le toil a chéile rè tamuill, chum sibh féin a thoirt do thrasgadh agus do urnuigh; agus thigibh cuideachd a ris, chum nach buair Satan sibh air son bhur neo-gheamnuidheachd.

6 Ach tha mi a' labhairt so mar ni cead-uite¹, agus cha'n ann mar àithne.

7 Oir bu mhiann leam gu'm biodh na h-uile dhaoine mar mi féin: gidheadh a ta a thiodhlac féin aig gach duine o Dhia, aig aon neach mar so, agus aig neach eile mar sud.

8 Uime sin a ta mi ag radh ris an dream nach 'eil pòsda, agus ris na bantrachaibh, Is maith dhoibh ma dh'fhanas iad eadhon mar a ta mise.

9 Gidheadh mur fheudar leo iad féin a ghleidheadh *geamnuiddh*, pòsadh iad: oir is fearr pòsadh na losgadh.

10 Agus dhoibh-san a ta pòsda tha mi ag àithneadh, *gidheadh* cha mhise, ach an Tighearn, gun a' bhean a dhealachadh r'a fear:

11 Ach ma dhealaicheas i, fanadh i gun phòsadh, no biodh i réidh r'a fear: agus na cuireadh am fear uaith *a bhean*.

12 Ach ris a' chuid eile a ta mise ag ràdh, cha'n e an Tighearn, Ma bhios aig bràthair sam bith bean ana-creideach², agus gu bheil i toileach còmhnuidh a ghabhail maille ris, na cuireadh e uaith i.

13 Agus a' bhean aig am bheil fear ana-creideach, agus gu bheil esan toileach còmhnuidh a ghabhail maille rithe, na cuireadh i uaipe e³.

14 Oir a ta am fear ana-creideach air a naomhachadh leis a' mhnaoi⁴, agus a ta a' bhean ana-creideach air a naomhachadh leis an fhear⁵: no bhiodh bhur clann neò-ghlan; ach a nis a ta iad naomha.

15 Ach ma dh'fhalbhas am fear ana-creideach, falbhadh e. Cha'n 'eil bràthair no piuthar fo dhaorsa 'nan leithidibh sin do *chàsaibh*: ach ghairm Dia sinne chum sithe.

16 Oir ciod am fios a ta agad-sa, O bhean, nach saor⁶ thu t'fhear? no ciod am fios a ta agad-sa, O fhir, nach saor thu do bhean?

17 Ach a réir mar a roinn Dia ris gach duine, mar a ghairm an Tighearn gach aon, mar sin gluaiseadh e: agus mar sin a ta mise 'g orduchadh anns na h-eaglaisibh uile.

18 An do ghairmeadh neach sam bith agus e timchioll-ghearrta? na deanar e neo-timchioll-ghearrta: an do ghairmeadh neach sam bith gun e bhi timchioll-ghearrta? na timchioll-ghearrar e.

19 Cha 'n 'eil éifeachd san timchioll-ghearradh, agus cha 'n 'eil éifeachd san neo-timchioll-ghearradh, ach *ann an coimhead àitheanta Dhé*.

20 Fanadh gach aon anns a' ghairm anns an do ghairmeadh e.

21 An do ghairmeadh thu a'd' sheirbhiseach⁷? na biodh suim agad dheth; ach ma dh'fheadas tu bhì saor, gu ma h-e sin do roghaim.

22 Oir an ti à ghairmeadh san Tighearn 'na sheirbhiseach, is duine saor an Tighearn e: mar an ceudna an ti a ghairmeadh

¹ mar chomhairle.

² mhi-chreideach, gun chreidinnh.

³ na fàgadh i e.

⁴ sa' mhnaoi.

⁵ san fhear.

⁶ slànuih, sàbhail.

⁷ a'd' dhaor-dglach, a'd' thràill.

I. CORINTIANACH, VII. VIII.

agus e saor, is e seirbhiseach¹ Chriosd e.
23 Cheannachadh air luach sibh; na bithibh 'nur seirbhisich do dhaoineibh.

24 A bhràithre, sin staid anns an do ghairmeadh gach neach, an sin fanadh e maille ri Dia.

25 A nis thaobh òighean, cha 'n 'eil àithne agam o'n Tighearn: gidheadh tha mi toirt breth², mar neach a fhuair tròcair o'n Tighearn gu bhi dileas.

26 Tha mi a' meas uime sin gu bheil so maith air son na teanntachd a ta làthair, a ta mi ag ràdh, gu bheil e maith do dhuine bhi mar sin.

27 Am bheil thu ceangailte ri mnaoi? na iarr fuasgladh. Am bheil thu fuasgailte o mhnai? na iarr bean.

28 Ach ma phòsas tu, cha do pheacaich thu; agus ma phòsas òigh, cha do pheacaich i: gidheadh, bithidh aig an leithidibh so trioblaid san fhèoil; ach tha mi 'gur caomhnadh.

29 Ach a ta mi ag ràdh so, a bhràithre, gu bheil an aimsir goirid sna bheil ri teachd: ionnus faraoon gu'm bi iadsan aig am bheil mnai, mar nach biodh mnai aca;

30 Agus iadsan a ta ri caoidh, mar nach biodh iad ri caoidh; agus iadsan a ta ri gairdeachas, mar mhuinntir nach 'eil ri gairdeachas; agus iadsan a ta ri ceannachd, mar dhaoine nach 'eil a' sealbhachadh;

31 Agus iadsan a ta gnàthachadh an t-saoghail so, mar dhream nach 'eil 'ga mhi-ghnàthachadh³; oir théid sgiamh⁴ an t-saoghail so seachad.

32 Ach b'àill leam sibhse bhi gun ro-chiuram. An ti nach 'eil pòsda, bithidh cùram nan nithe sin a bhuineas do'n Tighearn air, cionnus a thoilicheas e an Tighearn:

33 Ach an ti a ta pòsda, bithidh cùram nithe an t-saoghail air, cionnus a dh'fheudas e a bhean a thoileachadh.

34 Tha mar an ceudna eadar-dhealachadh eadar bean agus òigh: tha cùram oirre-sa nach 'eil pòsda mu nithibh an Tighearna, chum gu'm bi i naomh, faraoon 'na corp agus 'na spiorad; ach bithidh cùram air a' mhnai a ta pòsda mu nithibh an t-saoghail, cionnus a dh'fheudas i toil a fir a dheanamh.

35 Agus so tha mi a' labhairt chum bhur tairbhe féin; cha'n ann chum gu'n cuirinn ribe⁵ oirbh, ach a chum an ni sin a ta ciatach⁶, agus gu'm feitheadh sibh air an Tighearn gun bhuaireadh.

36 Ach ma shaoileas duine sam bith gu bheil e 'ga ghiùlan féin gu mi-chiatach

thaobh a mhaighdin, ma chaidh blàth a h-aimsir thairis, agus gur còir a dheanamh mar sin, deanadh e na's àill leis, cha'n 'eil e a' peacachadh: pòsadh iad.

37 Gidheadh, an ti sin a tha suidhichte gu daingean 'na chridhe, agus gun éigin sam bith air, ach aig am bheil cumhachd air a thoil féin, agus a chuir roimhe 'na chridhe a mhaighdean a choimhead, tha e a' deanamh gu maith.

38 Uime sin ma seadh, a ta an ti a bheir seachad am pòsadh i, a' deanamh gu maith; ach a ta an ti nach toir ann am pòsadh i, a' deanamh ni's fearr.

39 Tha a' bhean ceangailte leis an lagh rè na h-uine a's beò d'a fear: ach ma gheibh a' fear bàs, tha i saor gu pòsadh ri aon neach a's toil leatha; a mhàin anns an Tighearn.

40 Ach tha i ni's sona, ma dh'fhanas i mar sin, a réir mo bhrèth sa: agus is i mo bharail-sa⁷ gu bheil Spiorad Dhé agam.

CAIB. VIII.

1 Is còir fantuinn o bhàdheannaibh a dh'ìobradh do ìodholaibh. 8 Cha'n fheud sinn ar saorsa Chriosdaidh a mhi-ghnàthachadh, chum oibheim d'ar bràithribh; 11 ach is còir dhuinn ar n-eòlas a chiosachadh le gràdh.

ANIS a thaobh nithe a dh'ìobradh do ìodholaibh, tha fhios againn gu bheil eòlas againn uile. Ataidh an t-eòlas suas, ach bheir gràdh foghlum.

2 Agus ma ta aon duine a' saòilsinn gu bheil eòlas ni sam bith aige, cha'n aithne dha aon ni fathast mar bu chòir dha aithneachadh.

3 Ach ma thia gràdh aig duine sam bith do Dhia, tha esan⁸ air aithneachadh leis.

4 Uime sin, mu thimchioll itheadh nan nithe sin a dh'ìobradh do ìodholaibh, tha fhios againn nach ni air domhan ìodhol, agus nach 'eil Dia sam bith eile ann ach a h-aon.

5 Oir ged tha iad ann ris an abrar Dé, ma's ann air nèamh no air talamh, (amhuil mar a ta iomadh Dia, agus iomadh Tighearn ann.)

6 Gidheadh dhuinne cha'n 'eil ach aon Dia, an t-Athair, o'm bheil na h-uile nithe, agus sinne air a shon-sa⁹; agus aon Tighearn Iosa Criosd, tre am bheil na h-uile nithe, agus sinne trid-san.

7 Gidheadh cha'n 'eil an t-eòlas so anns na h-uile dhaoineibh: oir tha cuid le coguis thaobh an ìodhoil gus an àm so, ag itheadh a' bhùdh mar ni a dh'ìobradh do ìodhol; agus air d'an coguis a bhi an-mhunn, tha i air a salachadh.

¹ daor-òglach.

² bheiream mo bhrèth.

³ 'ga chaitheadh.

⁴ dreach, cumadh.

⁵ riabh.

⁶ cubhaidh, tlachdmhor.

⁷ tha mi cinnteach.

⁸ an duine so.

⁹ annsan.

I. CORINTIANACH, VIII. IX.

8 Ach cha mhol biadh sinn do Dhia: oir ma dh'itheas sinn, cha'n fheirrd sinn e; ni mò mur ith sinn, is misd sinn e.

9 Ach thugaibh an aire nach bi an comas¹ so a ta agaibh air aon dòigh 'na aobhar oilbheim do'n dream a ta lag.

10 Oir ma chi neach thusa aig am bheil eòlas a' suidhe chum bidh ann am team-pull iodhoil, nach neartaichear coguis an ti sin a ta lag chum na nithe sin a dh'ìobradh do ìdholailb itheadh:

11 Agus tre t'eòlas-sa an téid do bhràth-air lag am mugha², air son an d'fhuair Chriosd bàs?

12 Ach le peacachadh dhuibh mar sin an aghaidh nam bràithre, agus le an coguis amhunn a lotadh, tha sibh a' peacachadh an aghaidh Chriosd.

13 Uime sin ma bheil biadh aobhar oilbheim do m' bhràthair, cha'n ith mi feòil a chaidh, chum nach toir mi aobhar oilbheim do m' bhràthair.

CAIB. IX.

1 Nochd an t-abstol a shaorsa, 7 agus gu'm buineadh do'n mhinisteir bhi air a bheathachadh leis an t-soisgeul: 15 gidheadh d'a dheadh-ghean maith féin gu'n d'fhan esan o bhi costail dhoibh, 22 agus o oilbheum a thoirt do neach sam bith an cùisibh coimh-dheis.

NACH abstol mise? nach 'eil mi saor? Nach fhaca mi Iosa Chriosd ar Tighearn? nach sibhshe m'obair san Tighearn?

2 Mur 'eil mi a'm' abstol do dhaoineibh eile, gidheadh gu cìumteach tha mi dhuibh-se; oir is sibhshe seula m' abstolachd anns an Tighearn.

3 Is e so mo fhreagradh do'n dream a chuireas ceisd orm.

4 Nach 'eil againne comas³ itheadh agus òl?

5 Nach 'eil againne comas piuthar, bean-phòsda a thoirt leinn mu'n cuairt, amhuil mar na h-abstoil eile, agus bràithrean an Tighearn, agus Cephas?

6 No am bheil mise agus Barnabas a mhàin, gun chomas againn bhi saor o ob-air?

7 Cò a théid chum cogaidh uair air bith air a chostus féin? cò a shuidhicheas⁴ fion-lios, agus nach ith d'a thoradh? no cò a bheathaicheas treud, agus nach blais do bhainne an treud?

8 An ann mar dhuine a ta mi a' labhairt nan nithe so? no nach abair an lagh na nithe so mar an ceudna?

9 Oir a ta e sgrìobhta ann an lagh Mhaoin, Na cuir ceangal air beul an daimh a tha saltairt⁵ an arbhair. Am bheil cùram nan damh air Dia?

10 No nach ann gu h-àraidh⁶ air ar

son-ne a ta e ag ràdh so? gu deimhin is ann air ar son-ne tha e sgrìobhta: chum gur ann an dòchas is còir do'n treabhaiche treabhadh; agus a chum an neach a bhuailas ann an dòchas, gu'm bi e 'na fhear comhpairt d'a dhòchas.

11 Ma chuir sinne nithe spioradail dhuibh-se⁷, an ni mòr e ma bhuaineas sinn bhur nithe feòlmhor-sa?

12 Ma tha muinntir eile 'nan luchd-comh-pairt do'n chumhachd⁸ so thairis oirbh, nach mò is còir dhuinne bhi? Gidheadh, cha do chuir sinn an cumhachd so an cleachda; ach a ta sinn a' fulang nan uile nithe, chum nach cuireamaid bacadh air soisgeul Chriosd.

13 Nach 'eil fhios agaibh gu bheil iadsan a ta saothreachadh mu thimchioll nithe naomha, air am beathachadh o'n team-pull? agus iadsan a ta frithealadh do'n altair, gu bheil comh-roinn⁹ aca ris an altair?

14 Agus mar sin dh'orduich an Tighearn mar an ceudna dhoibh-san a ta searmonachadh an t-soisgeil, an teachd-an-tìr fhaotainn o'n t-soisgeul.

15 Ach cha do ghnàthaich mise a h-aon diubh so, agus cha do sgrìobh mi na nithe so, chum gu'n deantadh mar sin dhomh: oir b'fhearr dhomh am bàs fhaghail, na gu'n cuireadh neach air bith m'uaill an neo-bhrìgh.

16 Oir ged shearmonaich mi an soisgeul, cha'n 'eil aobhar uail agam: oir a ta éigin air a cur orm; seadh, is an-aobhinn domh, mur searmonaich mi an soisgeul.

17 Oir ma's ann gu toileach a ta mi deanamh so, tha duais agam: ach ma's ann an aghaidh mo thoile a tha ministreil-eachd¹⁰ air a h-earbsadh rium,

18 Ciod i mo dhuais ma seadh? eadhon so, chum 'nuair a ta mi searmonachadh an t-soisgeil, gu'n suidhichinn¹¹ soisgeul Chriosd gun chostus, chum nach mi-ghnàthaichinn mo chumhachd san t-soisgeul.

19 Oir ged tha mi saor o na h-uile dhaoineibh, gidheadh rinn mi mi féin a'm' sheirbhiseach¹² do na h-uile, chum gu'n cosnaim an tuilleadh.

20 Agus rinneadh mi do na h-Iudhaich mar Iudhach, chum gu'n cosnaim na h-Iudhaich; dhoibh-san a ta fuidh 'n lagh, mar dhuine fuidh 'n lagh, chum gu'n cosnaim iadsan a ta fuidh an lagh;

21 Dhoibh-san a ta gun lagh, mar dhuine gun lagh, (ged nach 'eil mi gun lagh do Dhia, ach fo lagh do Chriosd,) chum gu'n cosnaim iadsan a ta gun lagh.

22 Rinneadh mi dhoibh-san a ta an-

¹ a' chòir, an cumhachd.

² an sgrìosar, an caillleir do bhràthair lag.

³ cumhachd, còir.

⁴ phlannadhaicheas.

⁵ a' bualadh, a' briseadh.

⁷ annaibh-sa.

⁸ chomas.

⁶ gu h-uile.

⁹ comhpairt.

¹⁰ frithealadh, cùram.

¹¹ deanaim.

¹² a'm' thràill.

mhunn¹ mar *dhuine* anmhunn, chum gu'n cosnainn an dream a ta anmhunn: Bha mi san uile chruth do na h-uile, chum air gach uile dhòigh gu'n saorainn² cuid éigin.

23 Agus so tha mi a' deanamh air son an t-soisgeil, chum gu'm bi mi a'm' fhear comh-roinne dheth³.

24 Nach 'eil fhios agaibh iadsan a ta ruith anns a' bhlàr-réise, gu'n ruith iad uile, ach is aon duine a gheibh an duais⁴? gu ma h-amhuil a ruitheas sibhse, ionnus gu'n glac sibh an *duais*.

25 Agus a ta gach uile ghleachdair measarra anns na h-uile nithibh: a nis-a ta iadsan a' *deanamh sin* chum gu'm faigh iad crùn truaillidh; ach sinne *air son crùn* neo-thruaillidh.

26 Uime sin is amhuil a ta mise a' ruith, cha'n ann mar gu neo-chinnteach⁵: is amhuil a ta mi a' cur catha, cha'n ann mar neach a bhuaileas an t-athar:

27 Ach tha mi a' trom-bhualadh mo chuirp, agus 'ga chur fuidh smachd: air eagal air chor sam bith an déigh dhomh searmonachadh⁶ do dhream eile, gu'n cuirear mi féin air cùl⁷.

CAIB. X.

1 *Tha sacramainte nan Iudhach 'nan samhladh air ar sacramaintibh-ne, 14 agus am peanas mar rabhadh dhuinn iodhol-aoradh a sheachnadh. 21 Cha'n fheud sinn bhi 'nar luchd comh-pairt do bhord an Tighearna, agus dhiabhuil faraon, &c.*

OS bàrr, a bhràithre, cha b' àill leam sibhse a bhi aineolach, gu robh ar n-aithriche uile fuidh 'n neul, agus gu'n deachaidh iad uile troimh 'n mhuir;

2 Agus gu'n do bhaisteadh iad uile do Mhaois san neul, agus anns a' mhuir;

3 Agus gu'n d'ith iad uile an t-aon bhiadh spioradail;

4 Agus gu'n d'òl iad uile an t-aon deoch spioradail: (oir dh'òl iad do'n charraig spioradail sin a lean iad: agus b'i a' charraig sin Criosd:)

5 Ach le mòran diubh cha robh Dia toilichte⁸: oir sgriosadh san fhàsach iad.

6 A nis bha na nithe sin 'nan saimpleiribh⁹ dhuinne, chum nach miannaicheam-aid droch nithe, eadhon mar a mhiannaich iad-san.

7 Agus na bithibh-sa 'nur luchd-iodhol-aoraidh, mar a bha cuid diubh-san; a réir mar a ta e sgriobhta, Shuidh am pobull sìos a dh'itheadh agus a dh'òl, agus dh'éirich iad a chluicheadh.

8 Agus na deanamaid strìopachas, mar a rinn cuid diubhsan, agus a thuit *diubh* an aon là trì mìle fichead.

9 Agus na dearbhamaid¹⁰ Criosd, mar a dhearbhadh cuid diubh-san, agus a sgriosadh iad le nathraichibh nimhe.

10 Agus na deanaibh-sa gearan, mar a rinn cuid diubh-san gearan, agus a sgriosadh iad leis an sgriosadair¹¹.

11 A nis thachair na nithe so uile dhoibh-san mar eisempleiribh: agus sgriobhadh iad chum teagaisg¹² duine, air am bheil deireadh an domhain¹³ air teachd.

12 Uime sin an ti a shaoileas a bhi 'na sheasamh, thugadh e aire nach tuit e.

13 Cha do thachair deuchainn¹⁴ air bith ribh, ach ni a ta coitichionn¹⁵ do dhaoibh: ach tha Dia dileas, nach leig dhuibh bhi air bhur feuchainn thar bhur comas; ach a ni maille ris an deuchainn slighe dol as mar an ceudna, chum gu'm bi sibh comasach air a giùlan.

14 Air an aobhar sin, a mhuinntir mo ghràidh, teichibh o iodhol-aoradh.

15 Tha mi a' labhairt mar ri daoibh tuigseach: thugaibh-sa breth air an ni a ta mi ag ràdh.

16 Cupan a' bheannachaidh a ta sinne a' beannachadh, nach e comunn fola Criosd e? An t-aran a ta sinn a' briseadh, nach e comunn cuirp Criosd e?

17 Oir ged tha sinne 'nar mòran, is aon aran¹⁶, agus aon chorp sinn: oir a ta againn uile comh-pairt do'n aon aran.

18 Thugaibh fa' near Israel a réir na feòla: nach 'eil aca-san a ta 'g itheadh nan iobairt comh-roinn ris an altair?

19 Ciod a their mi uime sin? gu bheil brìgh air bith anns an iodhol, no gu bheil brìgh air bith san ni a dh'ìobradh do iodholaibh.

20 Ach *tha mi ag ràdh*, na nithe a ta na Cinnich ag iobradh, gur ann do dheamhnaibh a tha iad 'gan iobradh, agus nach ann do Dhia: agus cha b' àill leam comunn a bhi agaibh-sa ri deamhnaibh.

21 Cha 'n 'eil e an comas duibh cupan an Tighearn òl, agus cupan dheamhan. Cha 'n 'eil e an comas duibh comh-roinn a bhi agaibh do bhord an Tighearn, agus do bhord dheamhan.

22 Am brosuich sinn an Tighearn gu feirg? an treise sinn na esan?

23 Tha na h-uile nithe ceaduichte dhomh-sa, ach cha 'n 'eil na h-uile nithe iomcheuidh¹⁷: tha na h-uile nithe ceaduichte dhomh-sa, ach cha toir na h-uile nithe fòghlum.

24 Na iarradh neach air bith an ni sin a bhuineas dha féin; ach *iarradh* gach aon an ni sin a thig ri maith neach eile.

25 Ithibh gach ni a reicear am margadh

¹ lag. ² slàn-uichinn, tèarninn, sàbhalainn.

³ gu'm bi comh-pairt agam dheth maille ribhse.

⁴ geall. ⁵ mar neach nach 'eil am follais.

⁶ gairm a thoirt. ⁷ gu diùltar, gu tilgear mi féin.

⁸ cha do thaitinn mòran diubh ri Dia.

⁹ sgàilibh, samhachasaidh.

¹⁰ buaireamaid.

¹¹ mhilltear.

¹² rabhadh.

¹³ nan linn.

¹⁴ buaireadh, cruaidh-fheuchainn, dearbhadh.

¹⁵ cumanta. ¹⁶ bhuilinn.

¹⁷ tarbhach.

I. CORINT'IANACH, X. XI.

na feòla, gun cheisd air bith fheòraich air son coguis.

26 Oir is leis an Tighearn an talamh, agus a làn.

27 Ma bheir aon neach dhiubh-san nach 'eil 'nan creidich cuireadh dhuibh, agus gur toil leibh dol maille ris; ithibh gach ni a chuirear roimhibh, gun ni sam bith fheòraich air son coguis.

28 Ach ma their duine sam bith ribh, Dh'ìobradh an ni so do ìdholaibh, na ithibh, air a shon-san a nochd dhuibh e, agus air son coguis¹. Oir is leis an Tighearn an talamh, agus a làn.

29 Air son coguis, a ta mi ag ràdh, cha 'n i do *choguis* féin, ach *coguis* an neach ud eile: oir c'ar son a bheirear breth air² mo shaorsa-sa le coguis duine eile?

30 Oir, ma tha comh-pairt *bìdh* agam-sa tre ghràs, c'ar son a labhrar olc umam a thaobh an ni sin air son am bheil mi a' toirt buidheachais?

31 Uime sin cò aca dh'itheas no dh'òlas sibh, no ge b'e ni a ni sibh, deanaibh na h-uile nithe chum glòire Dhé.

32 Na tugaibh aobhar oibbheim do na h-Iudhaich, no do na Greugaich, no do eaglais Dé:

33 A réir mar a ta mise a' deanamh toile nan uile *dhaoine* anns na h-uile *nithibh*, gun bhi 'g iarraidh mo bhuannachd féin, ach *buannachd* mhòran, chum gu tèarnar iad.

CAIB. XI.

1 *Fhuair Pòl cron do na Corintianaich, gu robh nan coimhthionail am fir a' deanamh urnuigh, agus an cinn air an còmhachadh, agus am mnàil gun còmhachadh air an cinn: 17 agus do bhrìgh gu robh gu coitichionn an cruinneachadh cha'n ann chum maith, ach chum uile.*

BITHIBH-SA 'nur luchd-leanmhuinn Òrm-sa³, amhuil mar a ta mise air Crìosd.

2 A nis a ta mi 'gur moladh, a bhràithre, do bhrìgh gu bheil cuimhne agaibh ormsa anns na h-uile nithibh, agus gu bheil sibh a' coimhead nan orduighean, mar a thug mise dhuibh *iad*.

3 Ach bu mhiann leam fios a bhi agaibh, gur e Crìosd ceann gach fir, agus gur e am fear ceann na mnà, agus gur e Dia ceant Crìosd.

4 Gach fear a ta deanamh urnuigh no fàidheadaireachd, agus folach air a cheann, tha e toirt eas-urraim d'a cheann.

5 Ach gach bean a ta deanamh urnuigh no fàidheadaireachd, gun fhòlach air a ceann, tha i toirt eas-urraim d'a ceann: oir is ionnan sin agus ged bhiodh i

air a bearradh.

6 Oir mur bi folach air ceann na mnà, bearrar i mar an ceudna: ach ma's grànnda⁴ do mhnaoi i bhì air a bearradh no air a lomadh, cuireadh i folach oirre.

7 Oir gun amharus cha chòir do fhear a cheann a còmhachadh⁵, do bhrìgh gur e ìomhaigh agus glòir Dhé: ach is i a' bhean glòir an fhir.

8 Oir cha'n 'eil am fear o'n mhnaoi, ach a' bhean o'n fhear.

9 Agus cha do⁶ chruthaicheadh am fear air son na mnà, ach a' bhean air son an fhir.

10 Uime sin is còir do'n mhnaoi cumh-achd⁷ a bhi aice air a ceann, air son nan aingeal.

11 Gidheadh, cha'n 'eil am fear as eugmhaish na mnà, no a' bhean as eugmhaish an fhir anns an Tighearn.

12 Oir mar a ta a' bhean o'n fhear, is amhuil sin a ta 'm fear tre'n mhnaoi mar an ceudna: ach is ann o Dhia a ta na h-uile nithe.

13 Measaibh annaibh féin: am bheil e ciatach do mhnaoi urnuigh a dheanamh ri Dia gun fhòlach *air a ceann*.

14 Nach 'eil nàdur féin a' teagasg dhuibh, ma bhios gruag fhada air fear, gur nàr dha e?

15 Ach ma bhios gruag fhada air mnaoi, is glòir dhi e: oir thugadh a gruag dhi air son còmhdaich⁸.

16 Ach ma bhios neach air bith connspaideach, cha'n 'eila leithid sin do ghnàthachadh againne, no aig eaglaisibh Dhé.

17 A nis anns an ni so a ta mi cur an céill *duibh*, cha mhol mi *sibh*, do bhrìgh gu bheil sibh a' teachd an ceann a chèile, cha'n ann chum an ni a's fearr, ach an ni a's miosa.

18 Oir air tùs, 'nuair tha sibh a' cruinneachadh an ceann a chèile san eaglais, tha mi cluinntinn gu bheil roinnean⁹, 'nur measg; agus tha mi an cuid 'ga chreidsinn.

19 Oir is éigin saobh-chreidimh¹⁰ a bhi eadaraibh, chum gu'n deanar follaiseach an dream a ta dearbhta 'nur measg.

20 Uime sin an uair a thig sibh an ceann a chèile do aon àit, cha'n e sin suipeir an Tighearn itheadh.

21 Oir ithidh gach aon air tùs a shuipeir féin, agus a ta neach ocraich, agus neach eile air mhisg.

22 An e nach 'eil tighean agaibh chum itheadh agus òl anna? no am bheil sibh a' deanamh tàire air eaglais Dé, agus a' nàrachadh na muinntir aig nach 'eil? Ciod a their mi ribh? Am mol mi sibh anns a' *chùis* so? cha mhol.

¹ coimh-fhios, coinsiens.

² dhìtear.

³ air m' eisempleir-sa. ⁴ grànna. ⁵ fhòlach.

⁶ nìor.

⁷ 'se sin r'a ràdh folach, a lèigèil fhaic-

inn gu bheil i fo chumhachd a fir.

⁸ folaich.

⁹ eas-aonachda, sgaraidh.

¹⁰ saobh-bharailean, éiricheadh.

I. CORINTHIANACH, XI. XII.

23 Oir fhuair mise o'n Tighearn an ni mar an ceudna a thug mi dhuibh-sa, Gu'n do ghlac an Tighearn Iosa aran, anns an oidhche an do bhrathadh e:

24 Agus air tabhairt¹ buidheachais, bhris se e, agus thubhairt e, Gabhaibh, ithibh; is e so mo chorp-sa, a ta air a bhriseadh² air bhuir sonsa: deanaibh so mar chuimhneachan ormsa³.

25 Agus air a' mhodh cheudna an cupan, an deigh na suipeir, ag ràdh, Is e an cupan so an coimhcheangal⁴ nuadh ann am fhuil-sa: deanaibh-sa so, cia minic as a dh'òlas sibh e, mar chuimhneachan ormsa.

26 Oir cia minic as a dh'itheas sibh an t-aran so, agus a dh'òlas sibh an cupan so, tha sibh a' foillseachadh bàis an Tigh-earna gus an tig e.

27 Uime sin, ge b'e neach a dh'itheas an t-aran so, agus⁵ a dh'òlas cupan so an Tighearna gu neo-iomchuidh, bithidh e ciontach do chorp agus do fhuil an Tigh-earna.

28 Ach ceasnuicheadh⁶ duine e féin, agus mar sin itheadh e do'n aran so, agus òladh e do'n chupan so:

29 Oir ge b'e dh'itheas agus a dh'òlas gu neo-iomchuidh, tha e 'g' itheadh agus ag òl breitheanas dha féin, do bhrìgh nach 'eil e a' deanamh aithne air corp an Tighearn⁷.

30 Air a shon so *tha* mòran 'nur measg lag agus tinn, agus tha mòran 'nan codal.

31 Oir nan tugamaid breth oirnn féin, cha tugtadh breth oirnn.

32 Ach an uair a bheirear breth oirnn, tha sinn air ar smachdachadh leis an Tighearn, chum nach bitheamaid air ar dteadh maille ris an t-saoghal.

33 Uime sin, mo bhràithre, 'nuair a thig sibh an ceann a chéile chum itheadh, fan-aibh r'a chéile.

34 Agus ma bhios ocras air aon neach, itheadh e aig an tigh; chum nach tig sibh an ceann a chéile gu breitheanas⁸. Agus cuiridh mise gach ni eile an ordugh 'nuair a thig mi.

CAIB. XII.

1 *Tha* tiodhlacan spioradail iomadach thaobh gnè, 7 gidheadh a ta iad uile gu tairbhe, 8 agus chum na crìche so air an toirt air caochladh dòigh: 12 chum a réir mar a ta buill a' chuirp nàdurra uile chum maise, 22 agus seirbhìs an aoin chuirp; 27 mar sin gu bitheamaid-ne d'a chéile, a dheanamh suas cuirp dhìomhair Chrìosd.

A NIS a thaobh *thiodhlaca*⁹ spioradail, a bhràithre, cha'n àill leam sibh bhi aineolach.

2 Tha fios agaibh gu robh sibh 'nur Cinnich, air bhuir tarruing gu ìodholaibh balbha, a réir mar a threòraicheadh sibh.

3 Uime sin tha mi toirt fios duibh, nach abair duine sam bith a tha labhairt o Spiorad Dhé, gu bheil Iosa malluichte; agus nach urrainn duine sam bith a ràdh gur e Iosa an Tighearn, ach tre an Spiorad naomh.

4 A nis tha eadar-dhealachadh thiodhlaca ann, ach *cha'n' eil ach* aon Spiorad ann.

5 Agus tha eadar-dhealachadh frithealaidh¹⁰ ann, gidheadh *cha'n' eil ach* aon Tighearn ann.

6 Agus tha eadar-dhealachadh oibreachaidh ann, ach is e an t-aon Dia, a tha ag oibreachadh nan uile *nithe* anns na h-uile.

7 Ach a ta foillseachadh an Spioraid air a thoirt do gach neach, chum tairbhe.

8 Oir do aon duine tha focal a' ghliocais air a thoirt leis an Spiorad; agus do dhuine eile focal an eòlais leis an Spiorad cheudna;

9 Do neach eile creidimh leis an Spiorad sin féin; do dhuine eile tabhartas leighis tre an Spiorad cheudna;

10 Do neach eile oibreachadh mhìorbhuile; do neach eile fàidheadaireachd; do neach eile aithneachadh spiorad; do neach eile *iomadh* gnè theangadh; agus do neach eile eadar-mhìneachadh theangadh.

11 Ach na nithe sin uile tha an t-aon Spiorad ceudna ag oibreachadh, a' roinn ris gach aon fa leth a réir mar is àill leis.

12 Oir mar is aon an corp, agus mòran do bhuill¹¹ aige, agus a ta uile bhuill an aoin chuirp sin, ge h-iomadh iad, 'nan aon chorp; mar sin a ta Crìosd.

13 Oir tre aon Spiorad bhaisteadh sinn uile do aon chorp, ma's Iudhaich sinn no Greugaich, ma's daor no saor sinn; agus thugadh deoch r'a h-òl duinn uile chum aoin Spioraid.

14 Oir cha'n aon bhall an corp, ach mòran.

15 Ma their a' chos, Do bhrìgh nach mi an làmh, cha'n ann do'n chorp mi; nach 'eil i do'n chorp air a shon sin?

16 Agus ma their a' chluas, Do bhrìgh nach mi an t-suil, cha'n ann do'n chorp mi; nach ann do'n chorp i air a shon sin?

17 Nam *bìodh* an corp uile 'na shùil c'ait am *bìodh* a' chlaisteachd? Nam *bìodh* e uile 'na chlaisteachd, C'ait am *bìodh* an fhàile¹²?

18 Ach a nis shuidhich Dia na buill gach aon diubh sa' chorp, mar bu toil leis.

19 Agus nam *bìodh* iad uile 'nan aon bhall, c'ait am *bìodh* an corp?

20 Ach a nis *tha iad* 'nam mòran bhall, ged nach 'eil ann ach aon chorp.

eadar corp an Tighearna agus *bìodh* eile.

⁸ chum dìtidh. ⁹ nithe. ¹⁰ mhìnistireileachd, dhreuchd. ¹¹ bhallailh. ¹² boladh.

¹ breith.

² air a thabhairt.

³ chum cuimhne ormsa.

⁴ tiomnadh.

⁵ no.

⁶ dearbhadh.

⁷ deanamh eadar dhealachaidh

I. CORINTIANACH, XII. XIII. XIV.

21 Agus cha'n urrainn an t-sùil a ràdh ris an fàimh, Cha'n 'eil feum agam ort: no a ris, ann ceann ris na cosaibh, Cha'n 'eil feum agam oirbhe.

22 Ach gu ro mhòr nì's mò tha na buill sin do'n chorp, a's anmhuinne¹ a thaobh coslais, feumail.

23 Agus air na buill sin do'n chorp a's lugha urram 'nar measg-ne, tha sinn a' cur an tuilleadh urrainn; agus na buill sin dhinn a's lugha maise, tha aca sin gu ro mhòr an tuilleadh maise.

24 Oir air na buill mhaiseach againn cha'n 'eil uireasbhuidh: ach rinn Dia an corp a chomh-chumadh r'a chéile, air dha an tuilleadh urrainn gu mòr a thoirt do'n chuid air an robh uireasbhuidh:

25 Chum nach biodh eas-aonachd air bith sa' chorp; ach gu'm biodh ant-aon chùram aig na buill d'a chéile.

26 Agus ma dh'fhuilgeas aon bhall, conu'h-fhuilgidh na buill uile: no magheibh aon bhall urram, ni na buill uile gairdeachas maille ris.

27 A nis is sibhse corp Chrìosd, agus is buill sibh fa leth.

28 Agus chuir Dia dream àraidh san eaglais, air tùs abstola, san dara àit fàidhean, san treas àit luchd-teagaisg, a ris mìorbhuilean, 'na dhéigh sin tabhartais leighis, luchd-cuideachaidh, uachdaranachda, iomadh gnè theangadh.

29 Am bheil na h-uile 'nan abstolaibh? Am bheil na h-uile 'nam fàidhibh? Am bheil na h-uile 'nan luchd-teagaisg? Am bheil na h-uile 'nan luchd-deanamh mhìorbhuile?

30 Am bheil aig na h-uile tabhartais leighis? An labhair na h-uile le teangaibh? An dean na h-uile eadar-theangachadh?

31 Ach biodh miann dùrachdach nan tiodhlacan a's fearr oirbh: agus gidheadh tha mise a' nochdadh dhuibh slighe a's ro fhearr.

CAIB. XIII.

1 Cha'n 'eil brìgh sam bith anns na tiodhlacaidh uile, d'am feabhas, as eugmhais a' ghràidh: 4 cliù a' ghràidh, 13 agus a bharrachd air dòchas agus creidimh.

GED labhairinn le teangaibh dhaoine, agus aingeal, agus gun ghràdh² agam, tha mi a'm' umha³ a ni fuaim, no a'm' chiombal a ni gleangarsaich.

2 Agus ged robh agam fàidheadaireachd, agus ged thuiginn na h-uile rùna-dìomhair, agus gach uile eòlas; agus ged bhiodh agam gach uile ghnè creidimh, ionnus gu'n atharraichinn sléibhte, agus mi gun ghràdh agam, cha'n 'eil annam ach neo-ni.

3 Agus ged chaitlìnn mo mhaoin uile chum na bochdan a bheathachadh, agus ged bheirinn mo chorp chum a losgadh, agus gun ghràdh agam, cha'n 'eil tairbhe sam bith dhomh ann.

4 Tha an gràdh fad-fhulangach, agus caoimhneil; cha ghabh an gràdh farnad; cha dean an gràdh ràiteachas⁴, cha'n 'eil e air a shéideadh suas.

5 Cha ghiùlain se e féin, gu mi-chiatach, cha'n iarr e na nithe sin a bhuineas da féin, cha'n 'eil e so-bhrosnachaidh chum feirge, cha smuainich e ole sam bith,

6 Cha dean e gairdeachas san eucuir, ach ni e gairdeachas san flùrinn:

7 Fuilgidh⁵ e na h-uile nithe, creididh e na h-uile nithe, bithidh sùil⁶ aige ris na h-uile nithibh, giùlainidh e na h-uile nithe.

8 Cha téid an gràdh air cùl a chaoidh: ach ma's fàidheadaireachda ta ann, théid iad air cùl; ma's teangaidh, sguridh iad; ma's eòlas, cuirear air cùl e.

9 Oir a ta eòlas againn ann an cuid, agus tha sinn ri fàidheadaireachd ann an cuid.

10 Ach an uair a thig an ni a ta iomlan, cuirear air cùl an ni sin nach 'eil ach ann an cuid.

11 'Nuair a bha mi a'm' leanaban, labhair mi mar leanaban, thuig mi mar leanaban, reusonaich⁷ mi mar leanaban: ach air fàs domh a'm' dhuine, chuir mi na nithe leanabaidh air cùl.

12 Oir tha sinn a' faicinn san àm so gu dorchta tre ghloin⁸; ach an sin chi sinn aghaidh ri h-aghaidh: san àm so is aithne dhomh ann an cuid; ach an sin aithnichidh mi eadhon mar a ta aithne orm.

13 Agus a nis fanaidh creidimh, dòchas⁹, gràdh, na trì nithe so; ach is e'n gràdh a's mò dhiubh so.

CAIB. XIV.

1 Mhol Pòl fàidheadaireachd, 2 agus thug e urram dhi roimh labhairt le teangaibh, 6 le cosamhlachd air a thoirt o innealaibh-ciùil: 12 is còir an gnàthachadh faraon, chum togail suas na h-eaglais, 22 mar a' chrìoch sin gus an d'orduicheadh iad.

LEANAIBH gràdh, agus biodh mòr-mhiann¹⁰ tiodhlaca spioradail oirbh, ach gu ma mò bhur togradh gu'n deanadh sibh fàidheadaireachd:

2 Oir an ti a labhras ann an teangaidh choimhich¹¹, cha'n ann ri daoineibh a labhras e, ach ri Dia: oir cha'n 'eil neach sam bith 'ga thuigsinn; ged tha e anns an Spiorad a' labhairt rùna-dìomhair.

3 Ach an ti a tha deanamh fàidheadaireachd, tha e a' labhairt ri daoineibh chum teagaisg¹², agus chum earail, agus chum comhfhurtachd.

4 An ti a ta labhairt an teangaidh

¹ laige. ² seirc. ³ phrais. ⁴ féin-uail.

⁵ còmhdaichidh, folaichidh. ⁶ dòchas, earbsa.

⁷ smuainich. ⁸ ann an sgàthan.

⁹ earbsa.

¹⁰ choighrich.

¹² foghlaim, togail suas.

I. CORINTHIANACH, XIV.

choimhich, tha e 'ga theagasg fein¹: ach an ti a ni fàidheadaireachd, tha e teagasg na h-eaglais.

5 Bu mhaith leam gu labhradh sibh uile le teangaibh, ach b'fhearr leam sibh a dheanamh fàidheadaireachd, oir is mò an ti a ni fàidheadaireachd, na an ti a labhras le teangaibh, mur eadar-theangach e², chum gu faigheadh an eaglais foghlum.

6 A nis, a bhràithre, ma thig mi do 'ur n-ionnsuidh a' labhairt le teangaibh, ciod an tairbhe a ni mi dhuibh, mur labhair mi ribh am foillseachadh, no an eòlas, no am fàidheadaireachd, no an teagasg?

7 Air an dòigh cheudna na nithe gun anam a ni fuaim, ma's pìob no clàrsach, mur dean iad eadar-dhealachadh nam fuaimibh, cionnus a thuigear an ni a sheinnear air a' phìob no air a' chlàrsach?

8 Oir ma bheir a' ghall-tromp fuaim neo-chinnteach uaipe³, cò a dli'ulluicheas e fèin chum a' chatha?

9 Is amhuil sin sibhse, mur labhair sibh leis an teangaidh briathra so-thuigsinn, cionnus a dh'aithnichear an ni a labhrar? oir is ann ris an athar a labhras sibh.

10 Tha, feudaidd e bi, an uiread do ghuthannaibh⁴ san t-saoghal, agus cha'n 'eil a h-aon diubh gun bhlagh⁵.

11 Uime sin, nur tuig mi brìgh a' ghutha, bithidh mi do'n ti a labhras, borb⁶; agus *bithidh* an ti a labhras, borb dhomh-sa.

12 Mar sin mar an ceudna sibhse, do bhrìgh gu bheil dèigh agaibh air *tiodhlac-aibh* spioradail, iarraibh sibh fèin a thoirt barrachd chum foghlum⁷ na h-eaglais.

13 Uime sin, an ti a labhras ann an teangaidh *choimhich*, guidheadh e gu'n deanadh e eadar-theangachadh.

14 Oir ma ni mise urnuigh ann an teangaidh *choimhich*, tha mo spiorad a' deanamh urnuigh, ach tha mo thuigse neo-tharbhach.

15 Ciod ma seadh? ni mi urnuigh leis an spiorad, agus ni mi urnuigh leis an tuigse mar an ceudna: seinnidh mi leis an Spiorad, agus seinnidh mi leis an tuigse mar an ceudna.

16 No 'nuair a bheannaicheas tu leis an spiorad, cionnus a their an ti, a tha ann an àit an duine gun fhòghlum, Amen ri d' bhrèith buidheachais, o nach aithne dha an ni a ta thu ag ràdh?

17 Oir gu deimhin a ta thusa toirt buidheachais gu maith, gidheadh cha'n 'eil an neach eile air a theagasg⁸.

18 Tha mi toirt buidheachais do m'

Dhia, gu bheil mi a' labhairt le teangaibh tuilleadh na sibh uile:

19 Ach b'fhearr leam cùig focail a labhairt san eaglais le m' thuigse, chum gu teagaisginn daoine eile mar an ceudna, na deich mìle focal ann an teangaidh *choimhich*.

20 A bhràithre, na bithibh-sa 'nur leanabaibh an tuigse: gidheadh, ann am mì-run⁹ bithibh 'nur leanabaibh, ach ann an tuigse bithibh 'nur daoine foirfe.

21 Tha e sgrìobhta san lagh, Labhairidh mi ris a' phobull so ann an teangaidh eile, agus am bilibh eile: gidheadh an dèigh sin uile cha'n èisd iad rium, tha an Tighearn ag ràdh.

22 Uime sin a ta teanganna *coimheach* 'nan comhara, cha'n ann do'n dream a ta creidsinn, ach dhoibh-san a ta mi-chreideach: ach a ta fàidheadaireachd cha'n ann air an son-san uach 'eil a' creidsinn, ach air an son-san a tha creidsinn.

23 Uime sin ma chruinnicheas an eaglais uile san aon àit, agus ma labhras iad uile le teangaibh *coimheach*, agus gu'n tig dream a ta gun fhòghlum a steach, no daoine mi-chreideach, nach abair iad gu bheil sibh air a' chuthach¹⁰?

24 Ach ma ni iad uile fàidheadaireachd, agus gu'n tig duine gun chreidimh a steach, no neach a ta gun fhòghlum, cronuichear¹¹ e leis na h-uile, agus bheirear breth air leis na h-uile:

25 Agus mar sin a ta *nithe* folaichte a chridhe air am foillseachadh; agus mar sin, air dha tuiteam air aghaidh, ni e aoradh do Dhia, ag aithris¹² gu bheil Dia gu firinneach annaibh-sa.

26 Ciod e sin ma ta, a bhràithre? 'nuair tha sibh a' teachd an ceann a chèile, tha salm, tha teagasg, tha teangadh, tha foillseachadh, tha eadar-theangachadh, aig gach aon agaibh. Deanar na h-uile nithe chum foghlum¹³.

27 Ma labhras aon neach ann an teangaidh *choimhich*, labhradh dithis, no air a' chuid a's mò triuir, agus sin an dèigh a chèile; agus deanadh a h-aon eadar theangachadh.

28 Ach mur bi eadar-theangair ann, fanadh e 'na thosd san eaglais; no labhradh e ris fèin, agus ri Dia.

29 Labhradh dithis no triuir do na fàidhibh, agus thugadh a' chuid eile breth.

30 Ach ma dh'fhoillsichear *ni* do neach eile a tha 'na shuidhe, biodh an ceud *dhuine* 'na thosd.

31 Oir feudaidh sibh uile fàidheadair eachd a dheanamh gach aon an dèigh a

¹ 'ga thogail fèin suas.

² mur eadar-theangach neach.

³ uaithe.

⁴ chainnibh, chànanibh.

⁵ bhrìgh, seadh.

⁶ fadhaich, chàbarra.

⁷ togail suas.

⁸ air fhòghlum.

⁹ droch-mhèin, etc.

¹⁰ air mìl-chèill, air bhoile.

¹¹ spreagar, comhairlichear.

¹² a' foillseachadh.

¹³ togail suas.

chéile, chum gu faigh na h-uile fòghlum, agus na h-uile comhfhurtachd.

32 Agus a ta spiorada¹ nam fàidhean ùmhail do na fàidhibh.

33 Oir cha'n e Dia *ughdair* na mi-riagh-aill², ach na sìthe, mar ann an eaglaisibh nan naomh uile.

34 Biodh bhuir mnàì 'nan tosd sna h-eaglaisibh; oir cha'n 'eil e ceaduichte dhoibh labhairt; ach *is còir dhoibh* bi ùmhail, mar a ta an lagh mar an ceudna ag ràdh.

35 Agus ma's miann leo nì sam bith fhòghlum, feòraicheadh iad d'am fearaibh féin aig an tigh e: oir is mi-chiatach do mhnaibh labhairt san eaglais.

36 An ann uaibhse thàinig focal Dé a mach? no an ann do 'ur n-ionnsuidh-sa a mhàin a thàinig e.

37 Ma shaoileas duine sam bith³ gur fàidh, no gur duine spioradail e féin, aicheadh e na nithe a ta mise a' sgrìobhadh do 'ur n-ionnsuidh, gur iad àitheantan an Tighearna.

38 Ach ma tha neach sam bith aineolach, biodh e aineolach.

39 Uime sin, a bhràithre, biodh ro-thogradhagaibh air fàidheadaireachd a dheanamh, agus na bacaibh labhairt le teangaibh.

40 Deanar na h-uile nithe gu deadh-mhaiseach, agus a réir orduigh.

CAIB. XV.

1 O aiseirigh *Chrìosd*, 12 dhearbha an t-abstol gu'n éirich sinne, an aghaidh na muinntir sin a tha 'g aicheadh aiseirigh na colla: 21 Toradh, 35 agus dòigh na h-aiseirigh, 51 agus caochladh na muinntir sin a gheibhear beò air an là dheireannach.

OS bàrr, a bhràithre, tha mi cur an cèill dhuibh an soisgeul a shearmonaich mi dhuibh, ris an do ghabh sibhse mar an ceudna agus anns am bheil sibh 'nur seasamh;

2 Troimh mar an ceudna am bheil sibh air bhuir tèarnadh, na chumas sibh gu daingean⁴ an nì a shearmonaich mi dhuibh, mur do chreid sibhse gu dìomhain.

3 Oir thug mi dhuibh air tùs an nì a fhuair mi mar an ceudna, Gu'n d'fhuair Crìosd bàs air son ar peacanna a réir nan sgrìobtuir:

4 Agus gu'n d'adhlàiceadh e, agus gu'n d'éirich e a ris air an treas là a réir nan sgrìobtuir:

5 Agus gu facas e le Cephas, 'na dhéigh sin leis an dà fhear dheug.

6 'Na dhéigh sin, chunncas e le tuilleadh as cuig ceud bràthair air aon àm; d'am bheil a' chuid a's mò beò gus a nis, ach a ta cuid *dhiubh* 'nan codal.

7 'Na dhéigh sin, chunncas e le Seumas; agus a ris leis na h-abstolaibh uile.

8 'Nan déigh uile chunncas leam-sa e mar an ceudna, mar neach a rugadh ann an an-àm.

9 Oir is mi a's lugha do na h-abstolaibh, neach nach fiù abstol a ghairm dhìom, do bhrìgh gu'n robh mi a' geur-leanmhuinn eaglais Dé.

10 Ach tre ghràs Dé tha mi an nì a ta mi⁵: agus cha robh a ghràs, a *bhuilich-eadh* orm, gun bhrìgh; ach shaothraich mi nì's pailte na iad uile; gidheadh cha mhise, ach gràs Dé a bha maille rium.

11 Uime sin cò air bith iad *dhinne*, mise no iadsan, is ann mar so tha sinne a' searmonachadh, agus is ann mar so a chreid sibhse.

12 A nis ma shearmonaichear Crìosd gu'n d'éirich e o na marbhaibh, cionnus a ta cuid 'nur measg-sa ag ràdh, Nach 'eil aiseirigh nam marbh ann?

13 Ach mur 'eil aiseirigh nam marbh ann, ni mò a dh'éirich Crìosd.

14 Agus mur d'éirich Crìosd, gu deimhin *is* dìomhain ar searmoin-ne, agus *is* dìomhain bhuir creidimh-sa mar an ceudna.

15 Seadh fhuaradh sinne 'nar fianuisibh bréige air Dia; do bhrìgh gu'n d' rinn sinn fianuis a thaobh Dhé, gu'n do thog e suas Crìosd: neach nach do thog e suas, mur éirich na marbh.

16 Oir mur éirich na marbh, ni mò a dh'éirich Crìosd:

17 Agus mur d'éirich Crìosd, *tha* bhuir creidimh-sa dìomhain; tha sibh fathast ann bhuir peacaibh.

18 Mar sin mar an ceudna tha an dream a choidil ann an Crìosd, cailte.

19 Ma's anns a' bheatha so a mhàin a tha dòchas againn ann an Crìosd, is sinn a's truaighe do na h-uile dhaoimibh.

20 Ach a nis tha Crìosd air éirigh o na marbhaibh, agus rinneadh an ceud thoradh dhiubh-san a choidil deth.

21 Oir mar is ann tre dhuine *thàinig* am bàs, is ann tre dhuine *thig* aiseirigh nam marbh mar an ceudna.

22 Oir mar ann an Adhamh, a ta na h-uile a' faghail a' bhàis, is amhuil sin mar an ceudna a nìthear na h-uile beò ann an Crìosd.

23 Ach gach uile dhuine 'na ordugh féin: Crìosd an ceud thoradh, 'na dhéigh sin iadsan a's le Crìosd aig a theachd.

24 An sin *bithidh* a' chrìoch dheireannach, 'nuair a bheir e suas an rìoghachd do Dhia, eadhon an t-Athair; 'nuair a chuireas e as do⁶ gach uile uachdaranachd, agus gach uile ùghdarras, agus chumhachd.

¹ tiodhlaca spioradail. ² eas-orduigh, tuairgne.

³ Ma tha duine sam bith cinnteach.

⁴ ma ghlèidheas sibh air chuimhne.

⁵ is mi an nì a's mi.

⁶ a chuireas e sìos.

I. CORINTIANACH, XV.

25 Oir is éigin gu'n rioghaich e, gus an cuir e a naimhdean uile fo a chosaibh.

26 Sgriosar an nàmhaid deireannach, am bàs.

27 Oir chuir e na h-uile nithe fo a chosaibh, Ach an uair a ta e ag ràdh gun do chuir e na h-uile nithe fuidh, is ni follais-each gu bheil esan a chuir na h-uile nithe fuidh, an leth muigh *dhethe* so.

28 Agus an uair a chuirear na h-uile nithe fuidh, an sin bithidh am Mac féin fo 'n tí a chuir na h-uile nithe fuidh-san, chum gu'm bi Dia 'na uile anns na h-uile.

29 No ciod a ni iadsan a bhaistear air son nam marbh, mur éirich na mairbh air aon dòigh? c'ar son na seadh a bhaistear iad air son nam marbh?

30 Agus c'ar son a ta sinne an gàbhadh gach uair?

31 Air bhuir gairdeachas-sa¹ a tha agam ann an Iosa Criosd ar Tighearn, tha mi faghail a' bhàis gach là.

32 Ma chòmhraig² mi mar dhuine³ ri fiadh-bheathaichibh ann an Ephesus, ciod i mo thairbhe, mur éirich na mairbh? itheamaid agus òlamaid, oir am màireach gheibh sinn bàs.

33 Na meallar sibh: truailidh droch chomhludard⁴ deadh bheusa.

34 Dùisgibh chum fireantachd⁵, agus na deanaibh peacadh; oir cha'n 'eil eòlas Dé aig cuid: chum bhuir nàire tha mi a' labhairt so.

35 Ach their neach éigin, Cionnus a dh'éireas na mairbh? agus ciod a' ghnè cuirp leis an tig iad?

36 Amadain, an ni sin a chuireas tu, cha bheothaichear e, mur bàsaich e *air tùs*:

37 Agus an ni a chuireas tu, cha'n e an corp a bhitheas a ta thu cur, ach gràinne lom, feudaidd e bi do chruithneachd, no do *sheòrsa* éigin eile:

38 Ach a ta Dia a' toirt cuirp dha mar bu toil leis, agus do gach uile shìol a chorp féin.

39 Cha'n aon fheòil gach uile fheòil: ach a *ta* feòil air leth aig daoinibh, agus feòil eile aig ainmhidh, feòil eile aig iasgaibh, agus feòil eile aig eunlaithibh.

40 Agus a ta cuirp nèamhaidh ann, agus cuirp thalmhaidh: gidheadh a ta glòir air leth aig na *corpaibh* nèamhaidh, agus glòir eile aig na *corpaibh* talmhaidh.

41 Tha aon ghloir aig a' ghréin, agus glòir eile aig a' ghealaich, agus glòir eile aig na reultaibh; oir a ta eadar-dhealachadh eadar reult agus reult thaobh glòire.

42 Agus is ann mar sin a *bhios* aiseirigh nam marbh. Cuirear ann an truailidh-

eachd e; togar ann an neo-thruaillidh-eachd e.

43 Cuirear e ann an easurram, togar ann an glòir e: cuirear ann an amhuinneachd e, éiridh e ann an cumhachd:

44 Cuirear e 'na chorp nàdurra, éiridh e 'na chorp spioradail. Tha corp nàdurra ann, agus corp spioradail.

45 Agus mar so tha e sgriobhta, Rinn-eadh an ceud dhuine Adhamh 'na anam beò, ant-Adhamh deireannach 'na Spiorad a bheothaicheas.

46 Gidheadh cha'n e an ni spioradail a *bha* ann air tùs, ach an ni nàdurra; agus 'na dhéigh sin an ni spioradail.

47 An ceud duine o'n talamh, talmhaidh: an dara duine, an Tighearn o nèamh.

48 Mar an *duine* talmhaidh, is amhuil sin iadsan a *tha* talmhaidh: agus mar a ta an *duine* nèamhaidh, is ann mar sin iadsan a *ta* nèamhaidh.

49 Agus mar a ghiùlain sinn ìomhaigh⁶ an *duine* thalmhaidh, giùlainaidh sinn mar an ceudna ìomhaigh an *duine* nèamhaidh.

50 A nis so a ta mi ag ràdh, a bhràithre, nach feudar le feòil agus fuil rioghachd Dhé a shealbhachadh; ni mò a shealbh-aicheas truailidheachd neo-thruailidh-eachd.

51 Feuch, tha mi a' labhairt ni dìomhair ribh; Cha choidil sinn uile, ach caoch-laidhear sinn uile,

52 Ann an tiota⁷, am priobadh na sùl, ri *guth na* trompaid deireannaich, (oir séididh an trompaid,) agus éiridh na mairbh neo-thruailidh, agus caochlaidhear sinne.

53 Oir is éigin do'n *chorp* thruailidh so neo-thruailidheachd a chur uime, agus do'n *chorp* bhàsmhor so neo-bhàsmhor-achd a chur uime.

54 Agus an uair a chuireas an *corp* truailidh so neo-thruailidheachd uime, agus a chuireas an *corp* bàsmhor so neo-bhàsmhorachd uime, an sin coimhlonar am focal a ta sgriobhta, Shluigeadh suas am bàs le buardh.

55 O bhàis, c'ait am bheil do bhuaidh? O uaigh, c'ait am *bheil* do bhuaidh?

56 *Is* e am peacadh gath a' bhàis; agus *is* e neart a' pheacaidh an lagh:

57 Ach buidheachas do Dhia, a tha toirt dhuinne na buadha, tre ar Tighearna Iosa Criosd.

58 Uime sin, mo bhràithre gràdhach, bithibh-sa daingean, neo-ghluasadach, a' sìor-mheudachadh ann an obair an Tigh-earn, air dhuibh fios a bhì agaibh nach

¹ a' ghairdeachas air ùr sonsa.

² chog mi, chuir mi cath.

³ a réir gnàtha dhaoine.

⁴ droch chòmhradh

⁵ gu ceart, gu cubhaidh.

⁶ drath, dreach, coslas.

⁷ platha, mionaid.

I. CORINTIANACH, XVI.

'eil bhur saothair diomhain anns an Tigh-earn.

CAIB. XVI.

1 *Ghuidh Pòl air na Corintianaich fuasgladh air uireasbhuidh nam bràithre bochda ann an Ierusalem; 10 mhol e Timoteus; 13 agus an dèigh chomhairlean càirdeil, 19 chrìochnaich e an litir le iomadh fàilte.*

ANIS a thaobh an tionail air son nan naomh, mar a dh'orduich mi do eaglaisibh Ghalatia, mar sin deanaibh-sa mar an ceudna.

2 Air ceud là gach seachduin, cuireadh gach aon agaibh ni leis féin anns an ionmhas¹, a réir mar a shoirbhich leis, chum nach bi tionail r'an deanamh 'nuair a thig mise.

3 Agus an uair a thig mi, cò air bith iad a mholas sibh le 'ur litricibh, cuiridh mi iadsan a ghiùlan bhur tabhartais gu Ierusalem.

4 Agus ma's iomchuidh mise a dhol mar an ceudna, théid iadsan a'm' chuid-eachd.

5 Agus thig mi do 'ur n-ionnsuidh-sa, 'nuair a théid mi troimh Mhacedonia: (oir tha mi dol troimh Mhacedonia:)

6 Agus feudaidd e bi gu'm fan mi, no eadhon gu'n caith mi an geamhradh maille ribh, chum gu'n toir sibh air m'aghaidh mi, ge b'e àit d'an téid mi.

7 Oir cha'n àill leam bhur faicinn a nis san dol seachad; ach tha dùil agam fan-tuinn ré tamuill maille ribh, ma leigeas an Tighearn dhomh.

8 Ach fanaidh mi ann an Ephesus gu Cuingeis.

9 Oir dh'fhosgladh dorus mòr agus éifeachdach dhomh-sa, agus tha mòran eascairdean² ann.

10 A nis ma thig Timoteus, feuchaibh gu'm bi e gun eagal maille ribh: oir tha e a' saothreachadh ann an obair an Tighearna, mar a ta mise.

11 Uime sin na deanadh neach sam bith

tàir air: ach thugaibh air aghaidh e an sìth, chum gu'n tig e a m' ionnsuidh-sa: oir tha sùil agam ris maille ris na bràithribh.

12 Mu thimchioll ar bràthar Apollois, ghuidh mi gu dùrachdach air teachd do 'ur n-ionnsuidh-sa maille ris na bràithribh: ach cha b'i a thoil air chor sam bith teachd san àm so; ach thig e 'nuair a gheibh e àm iomchuidh.

13 Deanaibh faire, seasaibh gu daingean sa' chreidimh, bithibh fearail³, bithibh làidir⁴.

14 Biodh bhur n-uile nithe air an deanamh le gràdh.

15 Agus guidheam oirbh, a bhràithre (o's aithne dhuibh teaghlach Stephanais, gur iad ceud thoradh Achaia, agus gu'n d'thug siad iad féin chum frithealaidh do na naomhaibh:)

16 Gu'm bi sibh ùmhal d'an leithidibh sin, agus do gach aon a ni obair agus saothair maille ruime.

17 Tha mi subhach ri teachd Stephanais, agus Fhortunatus, agus Achaicuis: oir rinn iad suas an ni sin a bha dh'uireasbhuidh do 'ur taobh-sa.

18 Oir thug iad suaimhneas⁵ do m' spiorad-sa, agus d' ur spiorad-sa: uime sin biodh meas agaibh air an leithidibh sin⁶.

19 Tha eaglaisean na h-Asia a' cur fàilte oirbh. Tha Acula agus Priscila, maille ris an eaglais a tha 'nan tigh, a' cur mòr-fhàilte oirbh anns an Tighearn.

20 Tha na bràithrean uile a' cur fàilte oirbh. Cuiribh-sa fàilte air a chéile le pòig naomh.

21 Fàilte uamsa Pòl le m' làimh féin. 22 Ma tha neach sam bith nach gràdh-ach an Tighearn Iosa Crìosd, biodh e 'na Anatema Maranata⁷.

23 *Gu robh gràs an Tighearna Iosa Crìosd maille ribh.*

24 Mo ghràdh-sa maille ribh uile ann an Iosa Crìosd. Amen.

¹ taisgeadh gach aon agaibh làimh ris ann an stòr.

² luchd cur an aghaidh an t-soisgeil.

³ duineil.

⁴ neartaichibh sibh féin.

⁵ fois.

⁶ aithnichibh an leithide sin.

⁷ biodh e malluichte gu bràth.

DARA LITIR AN ABSTOIL PHOIL

CHUM NAN

CORINTIANACH.

CAIB. I.

1 *Thug an t-abstol Pòl misneach do na Corintianaich an aghaidh thrioblaid thaobh na comhshurtachd agus an fuasglaidh a thug Dia dhasan 'na vile thrioblaidibh féin, 8 gu sonruichte 'na chunnart*

san Asia: 12 agus ghairm e an coguis-san, agus a choguis féin chum fianais gu'n do shearmanaich e an soisgeul gu tréibhdhìreach, &c.

POL, abstol Iosa Crìosd tre thoil Dé, agus Timoteus, ar bràthair, chum

II. CORINTIANACH, I. II.

eaglais Dé a ta ann an Corintus, maille ris na h-uile naoiinn a ta ann an Achaia uile :

2 Gràs dhuibhse, agus sìth ¹ o Dhia ar n-Athair, agus o'n Tighearna Iosa Crìosd.

3 Beannaichte *gu robh* Dia, eadhon Athair, ar Tighearna Iosa Crìosd, Athair nan tròcair, agus Dia na h-uile chomhfhurtachd ;

4 A tha toirt comhfhurtachd dhuinne 'nan n-uile àmhghar², chum sinne bhi comasach air comhfhurtachd a thoirt dhoibh-san a ta ann an àmhghar sam bith, tre a' chomhfhurtachd leis ann bheil sinn féin a' faotainn comhfhurtachd o Dhia.

5 Oir mar a ta fulangais Chrìosd³ pailt annainne, is amhuil sin a ta ar comhfhurtachd-ne mar an ceudna pailte tre Chrìosd.

6 Agus ma tha sinn fuidh àmhghar, *is ann* air son bhuir comhfhurtachd agus bhuir slàinte-sa, a tha air a h-oibreachadh le sibh a dh'fhulang nam fulangas ceudna, a tha sinne a' fulang : no ma's comhfhurtachd dhuinn, *is ann* chum bhuir comhfhurtachd agus bhuir slàinte-sa.

7 Agus a ta ar dòchas daingean do 'ur taobh-sa, do bhrìgh gu bheil fios againn, mar a ta sibh 'nur luchd-comhaird do na fulangasaibh, gu'm *bi sibh* mar an ceudna do'n chomhfhurtachd.

8 Oir cha b'àill leinn, a bhràithre, sibhse bhi ain-fhiosrach mu thimchioll ar n-àmhghair a thachair dhuinne san Asia, gu'n do bhruthadh sinn gu romhòr thar ar neart ionnas gu robh sinn fuidh amharus eadhon mu'r beatha :

9 Ach bha againn binn⁴ ar bàis annainn féin chum nach biodh againn dòigh annainn féin, ach ann an Dia a dhuiseas na mairbh :

10 Neach a shaor sinne o bhàs co mòr, agus a ta 'gar saoradh : anns ann bheil ar dòchas gu'n saor e sinn fathast :

11 Air dhuibhse bhi a' co-oibreachadh le chéile ann an urnuigh air ar son-ne, chum gu tugar buidheachas le mòran air ar son-ne, á leth an tiodhlaic a thugadh dhuinne, tre mhòran.

12 Oir is e so ar gàirdeachas-ne, fianuis ar coguis, gur ann an aon-fhillteachd⁵ agus an tréibhdhìreas diadhaidh⁶, agus cha'n ann an gliocas feòlmhor, ach ann an gràs Dé, a chaith sinn ar beatha san t-saoghal, agus gu h-àraidh do 'ur taobh-sa.

13 Oir cha'n 'eil sinn a' sgrìobhadh nithe sam bith eile do 'ur n-ionnsuidh-sa, ach nan nithe a ta sibh a' leughadh⁷, no a ta

sibh ag aideachadh, agus a ta dùil agam a dh'aidicheas sibh gus a' chrìoch ;

14 Amhuil mar a dh'aidich sibh an càil, gur sinne bhuir gàirdeachas, mar *is* sibhse mar an ceudna ar *gàirdeachas-ne* ann an là an Tighearna Iosa.

15 Agus anns a' mhuighin so b'àill leam-sa teachd do 'ur n-ionnsuidh air fùs, ionnus gu faigheadh sibhse ath-ghràs⁸.

16 Agus gabhail uaibhse⁹ gn Macedonia, agus teachd o Mhacedonia a ris do 'ur n-ionnsuidh-sa, agus a bhi air mo thoirt air m'aghaidh leibhse san t-slighe gu Iudea.

17 Uime sin an uair a chuir mi so romham, an do ghnàthaich mi eutruimeachd¹⁰? no an ann a réir na feòla a ta mi cur romham, na nithe a ta mi a' cur romham, ionnus gu biodh agam seadh, seadh, agus cha'n eadh, cha'n eadh?

18 Ach *mar a ta* Dia fìrinneach, cha b'e ar còmhraidh ribhse seadh, agus cha'n eadh?

19 Oir Mac Dhé Iosa Crìosd, a shearmonaicheadh 'nur measg-sa leinne, *eadhon* leam-sa, agus *le* Siluanus, agus *le* Timoteus, cha robh e 'na sheadh agus 'na cha'n eadh, ach ann-san bha seadh.

20 Oir geallanna Dhé uile ann-san *is* seadh iad, agus ann-san *is* Amen iad, chum glòire Dhé do ar taobh-ne.

21 A nis an ti a dhaingnicheas sinne maille ribhse ann an Crìosd, agus a dh'ung sinn, *is e* Dia :

22 Neach mar an ceudna a chuir seula oirme, agus a thug dhuinn geall-daingnich¹¹ an Spioraid ann ar eridheachaibh.

23 Ach a ta mi a' gairm Dhé mar fhianuis air m'anam¹², gur ann chum sibhse a chaomhnadh nach d'fhàinig mi fathast gu Corintus.

24 Cha'n e gu bheil againne tighearnas air bhuir creidimh-sa, ach is luchd-cuid-eachaidh sinn do 'ur n-aobhneas : oir is ann tre chreidimh a sheasas sibh,

CAIB. II.

1 *Air do Phòl an reuson a chur an cèill air son nach d'fhàinig e dh'ionnsuidh nan Corintianach, 6 dh'iarr e orra maitheanas agus comhfhurtachd a thoirt do'n duine a dhruicheadh a mach leo as an eaglais, 10 eadhon mar a thug e féin mar an ceudna maitheanas da, air son 'fhuir-aithreachais.*

ACH chuir mi so romham annam féin, A gun teachd a ris fo dhoilgheas do 'ur n-ionnsuidh.

2 Oir ma ni mise doilich sibhse, cò e ma ta ni subhach mise, ach an ti air an do chuireadh doilgheas leam?

3 Agus sgrìobh mi an ni so féin do 'ur

¹ sìothchaint.

² thrioblaid.

³ fulangais air son Chrìosd.

⁴ breth.

⁵ sìompluidheachd.

⁶ an tréibhdhìreas a's mò ; tréibhdhìreas Dé. Gr.

⁷ a's aithne dhuibh.

⁸ ath-thiodhlaic.

¹⁰ iontuas.

¹² an aghaidh n'anama.

⁹ dol bhuir rathad-sa.

¹¹ earlas.

II. CORINTIANACH, II. III.

n-ionnsuidh, chum air dhomh teachd, nach cuirteadh doilgheas orm leis a' mhuinntir sin o'm bu choir dhomh aoibhneas fhaotainn, air dhomh bhi muinghinneach asaibh uile, gur e m'aoibhneas bhuir *n-aoibhneas* uile.

4 Oir á trioblaid mhòir agus cràdh cridhe, sgrìobh mi do 'ur n-ionnsuidh le iomadh deur; cha'n ann chum gu'm biodh doilgheas oirbh, ach chum gu'm biodh fios agaibh air a' ghràdh a ta agam gu ro phailte dhuibh.

5 Ach ma thug neach sam bith aobhar doilgheis, cha do chuir e doilgheas ormsa, ach an càil; chum nach cuirinn ro uallach oirbh uile.

6 Is leoir d'a leithid sin do dhuine am peanas so, a *leagadh* air le mòran.

7 Ionns air an làimh eile, gur mò is còir dhuibh maitheanas agus comhfhurtachd a thoirt *da*, air eagal gu'm biodh a leithid so do dhuine air a shlugadh suas le anabarra doilgheis.

8 Uime sin guidheam oirbh, gu'n daing-nicheadh sibh *bhuir* gràdh dha.

9 Oir is ann chum na crìche so a sgrìobh mi do 'ur n-ionnsuidh, chum gu'm biodh fios bhuir dearbhaidh agam, am bheil sibh ùmhail anns na h-uile nithibh.

10 Ge b'e neach d'an toir sibh maitheanas ann an ni sam bith, bheir mise mar an ceudna: oir ma thug mise maitheanas ann an ni sam bith, ge b'e d'an d'thug mi am maitheanas, is ann air bhuir sonsa *a thug mi e*, am fianuis¹ Chriosd;

11 Air eagal gu faigheadh Satan an cothrom oirm le 'chuilbheartachd: oir cha'n 'eil sinn aineolach air 'innleachd-aibh.

12 Os bàrr, 'nuair a thàinig mi gu Troas chum soisgeul Chriosd *a shearmonach-adh*, agus a dh'fhosgladh dorus dhomh leis an Tighearn,

13 Cha robh fois agam ann mo spiorad, do bhrìgh nach d'fhuair mi Titus mo bhràthair: ach air gabhail mo chead diubh, dh'imich mi o sin do Mhacedonia.

14 A nis buidheachas do Dhia, a ta ghuàth a' toirt oirne buadhachadh ann an Criosd, agus a ta foillseachadh *deadh* fhàile 'eòlais féin leinne anns gach àit.

15 Oir tha sinne do Dhia 'nar fàile cùbhraidh Chriosd, anns an dream a thearnar², agus anns an dream a sgrìos-ar³:

16 Do'n aon dream *tha sinn* 'nar bolt-rach bàis chum bàis; agus do'n dream eile, 'nar boltrach beatha chum beatha: agus cò a *ta* foghainteach chum nan nithe so?

17 Oir cha 'n 'eil sinne mar mhòran, a thruailleas focal Dé: ach mar o thrèibh-dhìreas, ach mar o Dhia, tha sinn a' labhairt am fianuis Dé ann an Criosd⁴.

CAIB. III.

1 *Air eagal gu'n cuireadh luchd-teagaisg brèige as a leth gu robh e deanamh uail gu dìonhain, nochd Pòl gu robh gràsa nan Corintianach 'nan aobhar molaidd d'a mhinistireilachd.* 6 *Air so chomh-shin e ministirean an lagha, agus an t-soisgeil r'a chèile,* 12 *agus dhearbhr e gu'n robh a mhinistireilachd-san ro òirdheirc.*

AN tòisich sinn a ris air sinn féin a mholadh? no am bheil feum againn, mar aig dream àraidh, air litrichibh molaidd do 'ur n-ionnsuidh-sa, no air *litrichibh* molaidd uaibh?

2 Is sibhe ar litir-ne a ta sgrìobhta 'nar⁵ cridheachaibh, air a h-aitlmeachadh agus air a leughadh leis na h-uile dhaoineibh:

3 *Air dha bhi follaiseach* gur sibh litir Chriosd, a fhrithéaladh leinne, a tha air a sgrìobhadh cha'n ann le dubh, ach le Spiorad an Dé bheò; cha'n ann air clàraibh cloiche, ach air clàraibh feòlmhor a' chridhe.

4 Agus tha a leithid so do dhòchas⁶ againne tre Chriosd a thaobh Dhé:

5 Cha'n e gu bheil sinn foghainteach uainn féin chum ni sam bith a smuain-eachadh⁷ mar uainn féin: ach is ann o Dhia *a ta* ar foghainteachd;

6 A rinn sinne mar an ceudna 'nar ministereibh foghainteach an tionnaidh nuaidh⁸; cha'n ann do'n litir, ach do'n Spiorad: oir marbhaidh an litir, ach bheir an Spiorad beatha.

7 Ach ma bha ministireilachd⁹ a' bhàis, ann an sgrìobhadh air a ghearradh¹⁰ air clachaibh, glòrmhor, ionns nach b'urrainn clann Israeil amharc gu geur air gnùis Mhaois, air son glòire a ghnùise, a chuireadh air cùl;

8 Cionnus nach mò na sin a bhios ministireilachd an Spioraid glòrmhor?

9 Oir ma *bha* ministireilachd an dithigh glòrmhor, is ro mhò na sin a bheir ministireilachd na fireantachd barrachd ann an glòir.

10 Oir eadhon ann a rinneadh glòrmhor, cha robh glòir sam bith aige sa' chàs so, thaobh na glòire a tha toirt barrachd.

11 Oir ma *bha* an ni a chuireadh air cùl glòrmhor, is ro mhò na sin *a ta* an ni a bhuanicheas glòrmhor.

12 Uime sin do bhrìgh gu bheil againn a shamhuil so do dhòchas¹¹, tha sinn a' cleachdadh mòr-dhànachd¹² cainnte.

13 Agus cha 'n 'eil sinn mar Mhaois, *a* chuir folach air 'aghaidh, chum nach

¹ am pearsa.

³ a chaillear.

⁵ ann ar.

² shlànuichear.

⁴ nu Chriosd.

⁶ dh'earbsa.

⁷ a mheas, a rcusonachadh.

¹¹ earbsa.

⁸ a' choimhcheangail

⁹ fhrithéaladh.

¹⁰ ghràbhaladh.

¹² shoilleirachd.

II. CORINTIANACH, III. IV. V.

amhairceadh clann Israeil gu gcur gu crìch an nì a chuireadh air cùl.

14 Ach dhalladh an inntinn: oir gus an là'n diugh ann an leughadh an t-seann-tiomnaidh¹, tha'm folach ceudna a' fannuinn gun atharrachadh, nì a chuireadh air cùl ann an Crìosd.

15 Ach eadhon gus an là'n diugh 'nuair a leughar Maois, tha am folach air an cridhe.

16 Gidheadh 'nuair a philleas e chum an Tighearna, togar am folach dheth.

17 A nis is e an Tighearn an Spiorad sin: agus far am bheil Spiorad an Tighearna, tha saorsa an sin.

18 Ach air bhi dhuinne uile le aghaidh gun fhòlach, ag amharc mar ann an sgàthan air glòir an Tighearna, tha sinn air ar n-atharrachadh chum na h-ìomlaigh² ceudna, o ghloir gu glòir, mar le Spiorad an Tighearna.

CAIB. IV.

1 Chuir Pòl an cèill gu'n do shearmonaich e an soisgeul le dìchioll agus ann an trèibh-dhìreas; 6 agus cionnus a dh'òibrich na trìoblaidean agus an geur-leanmhuinn a dh'fhuiling e air a shon, chum clùì cumhachd Dhé, 12 agus chum maith na h-eaglais.

UIME sin, air do'n mhinistireileachd so bhi againn, a réir mar a fhuair sinn tròcair, cha'n 'eil sinn a' fannachadh³:

2 Ach chuir sinn cùl ri nithibh folaichte na nàire⁴, gun sinn bhi a' siubhal ann an ceilg, no a' truailleadh focail Dé, ach le foillseachadh na firinn, 'gar moladh féin do choguis nan uile dhaoine ann an sealladh Dhé.

3 Ach ma tha ar soisgeul-ne folaichte⁵, is ann dhoibh-san a ta caillte⁶ tha e folaichte:

4 Anns an do dhall dia an t-saoghail so inntinn na dream nach 'eil 'nan creidich, air eagal gu'n dealraicheadh orra solus soisgeil ghloirmhoir Crìosd, neach a's e ìomhaigh Dhé.

5 Oir cha'n 'eil sinne 'gar searmonachadh féin, ach Iosa Crìosd an Tighearn; agus sinn féin 'nar seirbhisich dhuibhse air son Iosa.

6 Oir is e Dia a thubhairt ris an t-solus soillseachadh a' dorchadas, a dhealraich ann ar cridheachaibh-ne, a thoirt soluis eòlais glòire Dhé, ann an gnùis Iosa Crìosd.

7 Ach a ta an t-ionmhas so againn ann an soithichibh creadha, chum gu'm bi òir-dheirceas a' chumbachd o Dhia, agus cha'n ann uainne.

8 Tha sinn fo thrioblaid air gach taobh, gidheadh cha'n 'eil sinn ann an teannt-

achd⁷; tha sinn ann an ioma-chomhairle, gidheadh gun sinn ann an eu-dòchas;

9 Air ar geur-leanmhuinn, gidheadh gun sinn air ar trèigsinn; air ar tilgeadh sìos, gidheadh gun sinn air ar sgrios;

10 A' giùlan a ghnàth bàsachaidh an Tighearna Iosa mu'n cuairt, anns a' chorp, chum gu biodh beatha Iosa mar an ceudna air a deanamh follaiseach ann ar corp-ne.

11 Oir tha sinne a ta beò, a glnàth air ar toirt chum bàis air son Iosa, chum gu biodh mar an ceudna beatha Iosa air a deanamh follaiseach 'nar feoil blàs-mhoir-ne.

12 Uime sin tha bàs ag oibrcachadh annain-ne, ach beatha annaibh-sa.

13 Air dhuinn an spiorad creidimh sin féin a bhi againn, a réir mar a ta e sgriobhta, Chreid mi, agus uime sin labhair mi: tha sinne a' creidsinn mar an ceudna, agus uime sin tha sinn a' labhairt;

14 Air dhuinn fios a bhi againn, an ti a thog suas an Tighearn Iosa, gu'n tog e sinne suas mar an ceudna tre Iosa, agus gu'n cuir e 'na làthair sinn maille ribhse.

15 Oir tha na h-uile nithe air bhuir sonsa, chum gu biodh an gràs a tha saobhir-tre bhuidheachas mhòran, ro phailte chum glòire Dhé.

16 Uime sin cha'n 'eil sinn a' fannachadh, ach ged thruailleair ar duine o'n leth muigh, gidheadh tha an duine o'n leth stigh air ath-nuadhachadh o là gu là.

17 Oir a ta ar n-àmghar eutrom, nach 'eil ach rè sealain⁸, ag oibreachadh dhuinne trom-chudthrom glòire a ta ni's ro anabharraich agus sìor-mhaireannach;

18 Air dhuinn bhi ag amharc cha'n ann air na nithibh a tha r'am faicinn, ach air na nithibh nach 'eil r'am faicinn: oir tha na nithe a chithear, àimsireil; ach tha na nithe nach faicear, sìorruidh.

CAIB. V.

1 Chuir Pòl an cèill gu'n robh e an dòchas glòire sìorruidh, agus le suil rithe, agus ris a' bhreith dheireannaich, a' deanamh dìchill air deadh choguis a chòimhead; 12 cha'n ann chum gu deanadh e bàsd as féin a thaobh so, 14 ach mar neach a fhuair beatha o Crìosd, a ta e dìchiollach chum a bheatha a chaitheadh do Crìosd a mhàin.

OIR a ta fios againn, nan sgaoilteadh o chèile-ar tigh talmhaidh a' phàill-iuin so, gun bheil againn aitreabh o Dhia, tigh nach do thogadh le làmhaibh, sìorruidh anns na nèamhaibh.

2 Oir a ta sinn ri osnaich an so, a' miannachadh bhi air ar n-eudachadh⁹ le ar tigh o nèamh:

¹ na seann-tiomnaidh.

² an dealbha, an riochda.

⁴ a' mhasaidh, na h-eas-onoir.

³ a' lagachadh.

⁵ fo fhòlach.

⁷ cumhainneachd.

⁹ clutù-cudachadh, còmhachadh.

⁶ a tha 'gan sgrios féin.

⁸ tiota, mìonaid.

II. CORINTIANACH, V. VI.

3 O air dhuinn bhi air ar n-eudachadh, nach faighear lomnocld sinn.

4 Oir tha sinne a tha anns a' phàillium so ri osnaich, air dhuinn bhi fuidh uallach: cha'n e air son gu'm bu mhiann leinn bhi air ar rùsgadh, ach air ar n-eudachadh, chum gu bi bàsmhorachd air a slugadh suas le beatha.

5 A nis an ti a dh'oibrich sinne chum so féin, is e Dia e, a thug dhuinne mar an ceudna geall-daingnich¹ an Spioraid.

6 Uime sin tha sinn a ghnàth deadh-mhisneachail, air dhuinn fios a bhi againn am feadh a ta sinn aig an tigh sa' choluinn, gu bheil sinn air choigrich o'n Tighearn:

7 (Oir a ta sinn a' gluasad² a réir creidimh, agus cha'n ann a réir seallaidh.)

8 Tha deadh mhisneach againn, agus bu ròghnuiche leinn gu mòr bhi air choigrich as a' choluinn, agus a bhi làthair maille ris an Tighearn.

9 Uime sin a ta sinn a' deanamh ar dìchill, chum cò aca bhios sinn a làthair no air choigrich, gu'm bi sinn taitneach dhàsan.

10 Oir is éigin duinn uile bhi air ar nochdadh an làthair caithir-breitheanais Chriosd; chum gu faigh gach neach na nithe a rinn e sa' choluinn, a réir an nì a rinn e, ma's maith no olc e.

11 Uime sin, air dhuinn fios a bhi againn air uamhas an Tighearna, tha sinn a' cuir impidh air daoibh; ach a ta sinn follaiseach do Dhia, agus tha dòchas againn mar an ceudna gu bheil sinn air ar deanamh follaiseach ann bhur coguisibh-sa.

12 Oir cha 'n' eil sinn 'gar moladh féin a ris dhuibhse, ach a ta sinn a' toirt fàth³ uail dhuibh do ar taobh, chum gu bi freagradh agaibh dhoibh-san a tha deanamh uail ann an gnùis, agus cha'n ann an cridhe.

13 Oir ma tha sinn a dh'easbhuidh céille, is ann do Dhia: agus ma tha ar ciall againn, is ann duibh-sa.

14 Oir a ta gràdh Chriosd 'gar co-éig-neachadh, air dhuinn breithneachadh mar so, ma fhuair a h-aon bàs air son nan uile, gu'n robh na h-uile marbh;

15 Agus gu'n d'fhuair e bàs air son nan uile, chum iadsan a ta beò, nach biodh iad á so suas beò dhoibh féin, ach dhàsan a dh'fhuiling am bàs air an son, agus a dh'érich a ris.

16 Uime sin, cha'n aithne dhuinne á so suas aon duine a réir na feòla: seadh, ged b' aithne dhuinn Criosd a réir na feòla, gidheadh a nis cha'n aithne dhuinn e nì's mò.

17 Uime sin ma tha neach sam bith ann

an Criosd, is creutair nuadh e: chaidh na seann nithe seach, feuch, rinneadh na h-uile nithe nuadh.

18 Agus is ann o Dhia a ta na h-uile nithe, neach a rinn sinne réidh ris féin tre Iosa Criosd, agus a thug dhuinn ministreil-eachd na réite;

19 Eadhon, gu robh Dia ann an Criosd, a' deanamh an t-saoghail réidh ris féin, gun bhi a' meas an cionta dhoibh; agus dh'earb e ruinne⁴ focal na réite.

20 Uime sin is teachdairean sinn air son Chriosd, mar gu cuireadh Dia impidh leinne: tha sinne a' guidhe oirbh as uchd⁵ Chriosd, bithibh réidh ri Dia.

21 Oir rinn e esan do nach b'aithn peacadh, 'na iobairt-pheacaidh air ar sonne; chum gu bitheamaid air ar deanamh 'nar fireantachd Dhé annsan.

CAIB. VI.

1 Gu'n do dhearbh Pòl e féin 'na mhinisteir firinneach do Chriosd, araon le earailibh, 3 agus le ionracas a bheatha, 4 agus leis gach gnè trioblaid agus maslaidh fhulang gu foighidneach air son an t-soisgeil: 10 umpa so labhair e gu dàna riu, a chluinn gu robh a chridhe fogsailte dhoibh.

UIME sin tha sinn mar chomh-oibrich-ean leis-san, a' guidhe oirbh, gun sibh a ghabhail gràis Dé an diombanas:

2 (Oir a ta e ag ràdh, Ann an àm taitneach dh'éisd mi riut, agus ann an là slàinte rinn mi comhnadh leat: feuch, a nis an t-àm taitneach; feuch, a nis là na slàinte.)

3 Gun bhi toirt aobhair oibheim air bith ann an aon nì, chum nach faigheadh a' mhinistireil-eachd⁶ mì-chliù:

4 Ach anns gach nì 'gar dearbhadh féin mar mhinisteiribh Dhé, ann am mòr-fhoighidin, ann an àmhgharaibh, ann an uireasbhuidh, ann an teamntachdaibh,

5 Ann am buillibh, ann am prìosanaibh, ann an luasgadh o àit gu h-àit, ann an saothair, ann am faire, ann an trasgaibh,

6 Ann am fìor-ghloine, ann an eòlas, ann am fad-fhulangas, ann an caoimheanas, anns an spiorad naomh⁷, ann an gràdh gun cheilg,

7 Ann am focal na firinn, ann an cumhachd Dhé, le airm na fireantachd air an làimh dheis agus chlì,

8 Tre urram agus cas-urram, tre mhi-chliù agus dheadh-chliù: mar mhealltairibh, gidheadh firinneach;

9 Mar dhream nach aithnichear, gidheadh air am bheil deadh aithne; mar dhream a ta faghail a' bhàis, gidheadh feuch, tha sinn beò; mar dhream a smachdaichear, agus gun am marbhadh;

10 Mar dhream a ta brònach, gidheadh

¹ carlas. ² a' gluasad, ag imeachd, a' ciùthal. ³ cothrom. ⁴ chuir e annainne. Gr.

⁵ air son, an àit. ⁶ ar' ministreil-eachd, [ar'] fithcaladh.

⁷ leis an Spiorad.

II. CORINTIANACH, VI. VII.

a ghnàth a' deanamh gàirdeachais; mar *dhaoinè* bochda, gidheadh *a ta* deanamh mòrain saoi bhir; mar *dhaoinè* aig nach 'eil ni sam bith, gidheadh a' sealbhachadh nan uile nithe.

11 Tha ar beul-ne fosgailte dhuibhse, O a Chorintianacha, tha ar cridhe air a dheanadh farsuinn.

12 Cha'n 'eil sibh ann an cumhannachd annain-ne, ach tha sibh ann an cumhannachd ann bhur n-innibh féin.

13 A nis mar ath-dhioladh san ni sin féin, (tha mi a' labhairt mar ri m' chloinn,) bithibh-sa farsuinn mar an ceudna.

14 Na cuing-cheanglar gu neo-chothromach sibh maille ri mi-chreidich: oir ciod e caidreabh na fireantachd ri neo-fhireantachd? agus ciod e comunn an t-soluis ris an dorachdas?

15 Agus ciod an réite a ta aig Criosd ri Belial? no ciod i cuid a' chreidich, maille ri ana-creideach?

16 Agus ciod a' cho-réite a ta aig teampull Dé ri h-iodholaibh? oir is sibhse teampull an Dé bheò; a réir mar a thubhairt Dia, Gabhaidh mise comhnuidh ann-ta, agus gluaisidh mi 'nam measg; agus bithidh mise a'm' Dhia aca-san, agus bithidh iadsan 'nan sluagh agam-sa.

17 Uime sin thigibh a mach as am meadhon, agus dealaichibh *riu*, tha an Tighearn ag ràdh, agus na beanuibh ris an ni neòghlan; agus gabhaidh mise a m'ionnsuidh sibh,

18 Agus bithidh mi a'm' Athair dhuibh, agus bithidh sibhse 'nur mic agus 'nur nigheanaibh dhomh-sa, tha an Tighearn uile-chumhachdach ag ràdh.

CAIB. VII.

1 *Dh'eorailich Pòl na Corintianach chum gloine beatha, 2 agus chum an inntinn bhì aca dhàsan a ta aige doibh: 3 air eagal gu saoilteadh gu'n robh e cur so an amharus, chuir e an cèill doibh meud a' chomhfhurtachd a fhuair e 'na thrioblaidibh, o'n sgeul a thug Titus dha air an bròn diadhaidh.*

UIME sin, a mhuinntir mo ghràidh, air dhuinn na geallanna so bhi ag-ainn, glanamaid sinn féin o gach uile shalachar feòla agus spioraid, a' coimhlionadh naomhachd ann an eagal Dé.

2 Gabhaidh ruinne: cha d'rinn sinn eucoir air aon duine, cha do thruaill sinn aon duine, cha do mheall sinn aon duine.

3 Cha'n ann chum bhur dididh a ta mi a' labhairt so: oir thubhairt mi roimh, gu bheil sibh ann ar cridheachaibh-ne chum bàsachadh maille *ribh*, agus a bhi beò maille *ribh*.

4 *Is mòr mo dhànachd cainnte do 'ur taobh-sa, is mòr m' uail as bhur leth:*

lìonadh le comhfhurtachd mi, tha mi thar tomhas aoibhneach ann ar n-uile àmhghar-ne.

5 Oir an uair a thàinig sinn gu Macedonia, cha d'fhuair ar feòil fois sam bith, ach bha sinn fuaidh àmhghar air gach taobh; an leth am muigh *bha* còmhraig, an leth a stigh *bha* cagal²:

6 Ach Dia a bheir comhfhurtachd dhoibh-san a tha air an leagadh sìos, thug e comhfhurtachd dhuinne le teachd Thituis:

7 Agus cha'n e le a theachd-san a mhàin, ach mar an ceudna leis a' chomhfhurtachd a fhuair esan uaibhse, 'nuair a cluir e an cèill duinn bhur dian-thogradh, bhur caoidh³, bhur teas-ghràdh dhomh-sa; air chor as gur mòid a rinn mi gairdeachas.

8 Oir ged chuir mi doilgheas oirbh leis an litir, cha'n 'eil aithreachas orm; ged bha aithreachas orm: oir tha mi faicinn gu'n do chuir an litir sin doilgheas oirbh, ged nach *d'rinn i so* ach rè tamuill.

9 A nis tha gàirdeachas orm, cha'n ann air son sibh a bhi doilich, ach gu robh sibh doilich chum aithreachais⁴: oir bha doilgheas oirbh air mhodh diadhaidh, chum nach tigeadh call oirbh ann an aon ni do ar taobh-ne.

10 Oir oibrichidh am bròn diadhaidh aithreachas chum slàinte do nach gabhar aithreachas: ach oibrichidh doilgheas an t-saoghail bàs.

11 Oir feuch, an ni so féin doilgheas diadhaidh bhi oirbh, ciod e meud an dùrachd a dh'oibrich e annaibh, seadh, *ciod* an glanadh oirbh féin⁵, seadh, *ciod* an ro dhiom, seadh, *ciod* an t-eagal, seadh, *ciod* an dian-thogradh, seadh, *ciod* an t-eud, seadh, *ciod* an togradh dioghltais? anns gach ni dhearbha sibh sibh féin bhi glan sa' chùis so.

12 Uime sin ged sgrìobh mi do 'ur n-ionnsuidh, cha b'ann air a shon-san a rinn an eucoir, no air a shon-san air an d'rinn-eadh an eucoir, ach a chum gu foillsicht-eadh dhuibh ar cùram-ne mu'r timchioll-sa am fianuis Dé.

13 Uime sin fhuair sinn comhfhurtachd air son bhur comhfhurtachd-sa: seadh, bu ro mhò a rinn sinn gairdeachas, air son gairdeachais Thituis, do bhrìgh gu'n d'fhuair a spiorad suaimhneas uaibhse uile.

14 Oir ma rinn mi bòsd⁶ sam bith ris-san asaihbh-se, cha'n eil nàire orm; ach mar a labhair sinn na h-uile nithe am fìrinn ribhse, is amhuil sin a fhuaradh fìrinnear ar bòsd asaihbh-se ri Titus.

15 Agus a ta dùrachd a chridhe-san n'is pailte do 'ur taobh-sa, air dha bhi a' cuimhneachadh bhur n-ùmhachd uile, mar a

¹ dealbhaibh.

² uamhunn.

³ bròn.

⁴ athorachadh inntinn.

⁵ an saoradh, an leith-sgeul.

⁶ uail, mor-dhuil.

II. CORINTIANACH, VII. VIII. IX.

ghabh sibh ris le h-eagal agus ball-chrith.

16 Uime sin tha gairdeachas orm gu bheil dànachd agam asabh anns gach ni.

CAIB. VIII.

1 Bhrosnuich Pòl na Corintianaich gu tional seirceil a dheanamh air son nan naomh bochda ann an Ierusalem, le eisempleir nam Macedonach, 7 le moladh an dian-thograidh a bha aca fèin roimh, 9 le eisempleir Chrìosd, 14 agus leis an tairbhe spioradail a thigeadh dhoibh fèin o'n tabhartas sin.

ANIS, a bhràithre, tha sinn a' toirt fios duibh air gràs Dé, a thugadh do eaglaisibh Mhacedonia:

2 Eadhon gu'n robh, ann am mòrdhearbhadh àmhghair, pailteas an aoibhneis, agus doimhne am bochduinn, ro phailte chum saoihbheis am fialuidh-eachd¹.

3 Oir (tha mi toirt fianuis,) gu robh iad uatha fèin toileach a réir an comais, seadh, uath an comas:

4 A' guidhe oirne gu dùrachdach, gu'n gabhamaid an tiòdhach, agus comh-roiun an fhrithealaidh do na naomhaibh.

5 Agus cha'n ann mar a shaòil sinne², ach thug siad iad fèin air tùs do'n Tighearn, agus 'na dhéigh sin dhuinne a réir toil Dé:

6 Air chor as gu'n do chuir sinn impidh air Titus, a réir mar a thòisich e roimh, mar sin gu'n crìochnaicheadh e annaibh-sa an gràs³ sin fèin mar an ceudna.

7 Uime sin mar a ta sibh pailte anns gach uile ni, ann an creidimh, ann an ur-labhradh, agus ann an eòlas, agus ann an uile dhìchioll, agus ann bhuir gràdh dhuinne, bithibh pailte anns a' ghràs so mar an ceudna.

8 Cha'n 'eil mi a' labhairt⁴ so mar àithne, ach a thaobh dùrachd dhaoine eile, agus a dhearbhadh tréibhdhireas bhuir gràdh-sa.

9 Oir is aithne dhuibh gràs ar Tighearna Iosa Crìosd, ged bha e saoihbhir, gidheadh gu'n d'rinneadh bochd e air bhuir sonsa chum gu biodh sibhse saoihbhir tre a bhochduinn-san.

10 Agus anns an ni so tha mi toirt mo chomhairle: oira ta so tarbhach⁵ dhuibhse, a thòisich roimh, cha'n e mhàin air deanamh, ach air a bhi togarrach o cheann bliadhna.

11 A nis air an aobhar sin coimhlionaibh an gnìomh⁶; ionnus mar a bha sibh ullamh chum na toile, mar sin gu'm bi sibh ullamh chum coimhlionaibh as na bheil agaibh.

12 Oir ma bhios air tùs inntinn thoileach ann, gabhar ris a réir mar a ta aig neach,

agus cha'n ann a réir nan nithe nach 'eil aige.

13 Cha'n ann chum gu'm biodh socair aig daoine eile, agus àmhghar agaibh-sa.

14 Ach a thaobh co-cheartais, chum san àm so nis gu'm bi bhuir pailteas-sa 'na choimhleasachadh air an uireasbhuidh-san, agus mar an ceudna chum gu'm bi am pailteas-san 'na choimhleasachadh air bhuir n-uireasbhuidh-sa, air chor as gu'm bi co-cheartas eadaraibh;

15 A réir mar a ta e sgrìobhta, An ti a thionail mòran, cha robh anabarr aige: agus an ti a thionail beagan, cha robh easbhuidh air.

16 Ach buidheachas do Dhia, a chuir an cùram dùrachdach sin fèin do 'ur taobh-sa ann an cridhe Thituis.

17 Oir gu deimhin ghabh e ris an impidh; ach air dha bhi ni bu togarraiche, chaidh e d'a thoil fèin do 'ur n-ionnsuidh.

18 Agus chuir sinne maille ris am bràthair, aig am bheil a chliù san t-soisgeul, feadh nan eaglaisean uile:

19 (Agus cha'n e so a mhàin, ach thaghadh e leis na h-eaglaisibh mar an ceudna mar chompanach turuis dhuinne, leis an tiòdhach so a fhrithealadh leinne chum glòire an Tighearna sin fèin, agus chum foillseachaidh bhuir n-intinn ullamh-sa.)

20 A' seachnadh so, nach tugadh neach air bith mi-chliù dhuinne thaobh a' phailteis so a fhrithealadh leinne:

21 Air dhuinn bhi solarachadh nithe ciatach, cha'n e mhàin am fianuis an Tighearna, ach mar an ceudna am fianuis dhaoine.

22 Agus chuir sinn maille riur ar bràthair, a dhearbhadh sinn gu minic dùrachdach am mòran do nithibh, ach a nis ni's ro dhùrachdaiche, a thaobh an ro earbsa ta aige⁷ asaibh-sa.

23 Ma dh'fhiosraichear ni sam bith mu Thitus, is e mo chompanach-sa e, agus mo chomh-oibriche do 'ur taobh-sa: no mu thimchioll nam bràithre, is iad teachdairean nan eaglaisean, agus glòir Chrìosd.

24 Uime sin nochdaibh dhoibh-san, agus am fianuis nan eaglaisean, dearbhadh bhuir gràdh-sa, agus ar n-uailh-ue do 'ur taobh.

CAIB. IX.

1 Dh'innis Pòl an reuson air son, ged b'aithne dha mòr-thogradh nan Corintianach, an do chuir e Titus agus na bràithre roimh-laimh d'an ionnsuidh g'am brosnachadh gu déire a thoirt gu pailte, do bhrìgh gur gnè shùol-chuir iad, 10 a bheir bàrr pailte dhoibh fèin.

OIR a thaobh frithealaidh do na naomhaibh, is neo-fheumail dhomhsa sgrìobhadh do 'ur n-ionnsuidh.

¹ an daonnachda.

² a bha dòchas againne.

³ tiòdhach.

⁴ Ni'n labhram.

⁶ an deanamh.

⁵ iomchubhaidh.

⁷ agam.

II. CORINTIANACH, IX. X.

2 Oir is aithne dhomh togarrachd bhur n-intinn, as leth am bheil mi deanamh¹ uail as aibh-sa ris na Macedonaich, *ag ràdh*, Gu robh Achaia ullamh o cheann bliadhna; agus bhrosnuich bhur n-eud-sa ro mhòran.

3 Gidheadh chuir mi na bràithre do 'ur n-ionnsuidh, air eagal gu'm biodh ar n-uail-ne as aibh dhomhain sa' chùis so; chum mar a thubhairt mi, gu'm biodh sibh ullamh:

4 Air eagal ma thig na Macedonaich maille rium, agus gu'm faigh iad sibhse neo-ullamh, gu'm bi nàire oirne, (gun a ràdh oirbhe,) á dānadas na h-uail so.

5 Oirne sin bhreithnich mi gu'm b'fheum-àil impidh chur air na bràithribh, iad a dhol air tùs do 'ur n-ionnsuidh-sa, agus bhur tabhartas, air an do labhradh ribh roimh, a dheanamh deas, chum gu'm biodh sin ullamh, mar thiodhlac², agus cha'n ann mar ni a dh'aindeoin.

6 Ach so a ta mi *ag ràdh*, An ti a chuireas gu gann, buainidh e gu gann mar an ceudna; agus an ti a chuireas gu pailte, buainidh e gu pailte mar an ceudna.

7 *Thugadh* gach duine seachd a réir rùin a chridhe; na b'ann an doilgheas, no le h-éigin: oir is toigh le Dia an neach a bheir seachd gu suilbhir.

8 Agus is comasach Dia air gach gràs a dheanamh ro phailte dhuibh-se, chum air dhuibh anns gach uile ni làn leoir a bhi acaibh a ghnàth, gu'm biodh sibh pailte chum gach deadh oibre.

9 A réir mar a ta e sgrìobhta, Sgaol e a *chuid*; thug e do na bochdaibh: mairidh³ fhìreantachd a chaoidh.

10 A nis an ti a bheir sìol do'n fhear-cuinn⁴, agus arau chum bidh, gu tugadh e agus gu meudaicheadh e bhur curachd-sa, agus gu tugadh e do thoradh bhur fìreantachd fàs.)

11 Air dhuibh bhi air bhur deanamh saobhair anns gach uile ni chum gach uile thabhartais, ni a dh'oibricheas leinne breith-buidheachais do Dhia.

12 Oir a ta fìrthealadh na seirbhis so, cha'n e mha'n a' leasachadh uireasbhuidh nan naomh, ach a ta e mar an ceudna pailte tre mhòran breith-buidheachais do Dhia;

13 (Air dhoibh bhi, tre dhearbhadh an fìrthealaidh so, a' toirt glòire do Dhia air son bhur n-ùmhachd do shoisgeul Chrìosd a réir bhur n-aidmheil, agus air son bhur tabhartais fhialuidh⁴ dhoibh-san, agus do na h-uile *dhaoineibh*;

14 Agus tre an urnuigh air bhur son-sa, aig am bheil mòr-dhéidh oirbh air son gràis

Dé a ta ro phailte annaibh.

15 Buidheachas do Dhia air son a thiodh-laic do-labhairt⁵.

CAIB. X.

1 An aghaidh nan abstol bréige, a bha deanamh tàir air anmhuinneachd a phearsa agus air a làthaireachd chorpóra, chuir Pòl an cèill an neart agus an t-ùghdarras spioradail sin leis an d'armaicheadh e an aghaidh cumhachdan a naimhdean uile, &c.

A NIS tha mise féin Pòl a' guidhe oirbh, tre mhacantas agus shéimheachd Chrìosd, neach air dhomh a bhi làthair a ta isal 'nur measg, ach air dhomh a bhi uaibh a ta dàna oirbh:

2 Ach tha mi ag iarraidh oirbh a dh'ath-chuinge, gun sibh a thoirt orm an uair a bhios mi làthair, bhi dàna, leis a' mhuinghin⁶ leis an saoillear mi bhi dàna an aghaidh dream àraidh a tha toirt meas oirne, mar gu bitheamaid ag imeachd a réir na feòla.

3 Oir ged tha sinn ag imeachd⁷ anns an fheòil, cha'n ann a réir na feòla ta siun a' cogadh:

4 (Oir ar n-airm chogaidh cha'n fheòlmhor iad, ach cumhachdach o Dhia chum daingnichean a leagadh:

5 A' tilgeadh sìos reusonachaidh, agus gach ni àrd a dh'àrdaicheas e féin an aghaidh eòlais Dé, agus a' toirt am braighdeanas gach smuain chum ùmhachd Chrìosd:

6 Agus dioghaltas ullamh againn r'a dheanamh air gach uile eas-ùmhachd, 'nuair a chomhlionar bhur n-ùmhachd-sa.

7 An amhaire sibh air nithibh a réir an coslais? ma tha dòchas⁸ aig aon neach as féin, gur le Crìosd e, smuainicheadh e so a ris uaith féin, mar is le Crìosd esan, gur le Crìosd sinne mar an ceudna.

8 Oir ged dheanainn càil-eigin ni's mò dh'uail as ar cumhachd-ne, (a thug an Tighearna dhuinn chum fòghluim⁹, agus cha'n ann chum bhursgrìos-sa,) cha bhiodh nàire orm:

9 Chum nach measar mi mar gu'm bithinn a' cur eagail oirbh le litriclibh.

10 Oir a ta a litrichean, (tha iad-san ag ràdh,) cudthromach agus làidir, ach a ta a làthaireachd chorpóra anmhunn¹⁰, agus a chaint àireil.

11 Smuainicheadh a leithid sin do dhuine so, mar a ta sinne ann am focal tre litriclibh, agus sinn as làthair, mar sin gu'm bi sinn ann an gnìomh air dhuinn a bhi làthair.

12 Oir cha'n 'eil a dhànadas¹¹ againne sinn féin a chur an àireamh, no a choimeas ri dream àraidh a mholas iad féin:

¹ an deanam.

² ghean-maith.

³ do'n t-sìoladair.

⁴ dhaonnachdaich.

⁵ do-chur an cèill.

⁶ mhisnich, urrasachd.

⁷ gluasad, siubhal.

⁸ carbsa.

¹⁰ lag.

⁹ fogail suas.

¹¹ a mhisnich.

II. CORINTIANACH, X. XI.

ach air dhoibh-san bhi 'gan tomhas féin eatorra féin, agus 'gan coimeas féin riu féin, cha'n 'eil iad glic.

13 Ach cha dean sinne uaill á nithibh a tha thar ar tomhas, ach a réir tomhais, na riaghailt¹ a roinn Dia dhuinne, eadhon tomhas a ruigeas oirbhse.

14 Oir cha'n eil sinne 'gar sìneadh féin thar ar tomhas, mar nach ruigeamaid sibhse; oir thàinig sinn eadhon do 'ur n-ionnsuidh-sa², le soisgeul Chrìosd:

15 Gun sinn a bhi deanamh naill á nithibh a ta thar ar tomhas, eadhon a saoth-airibh dhaoine eile; ach a ta dòchas againn, 'nuair a mheudaichear bhur creidimh-sa, gu faigh sinn farsuinneachd gu pailte annaibh a réir ar riaghailt-ne,

16 Chum an soisgeul a shearmonachadh anns na h-ionadaibh an taobh thall duibhse, agus cha'n ann chum uaill a dheanamh ann an riaghailt duine eile, á nithibh a ta ullamh a cheana.

17 Ach an ti a ni uaill, deanadh e uaill anns an Tighearn.

18 Oir cha'n e an ti a mholas e féin a tha ionmholta³, ach an ti a mholas an Tighearn.

CAIB. XI.

1 Tre ro mheud cùraim Phòil do na Corintianaich, thòisich e dh'aindeoin ri e féin a mholadh; 5 dh'innis e nach robh e a bheag goirid air na h-abstòil bu mhò, 7 gu'n do shearmonaich e an soisgeul dhoibh gu saor, 13 agus nochd e nach robh e a bheag a dheidh-làimh air an luchd-oibre cealgach sin, thaobh aon sochair a bhuineadh do'n lagh, &c.

B'FHEARR leam gu'n giùlaineadh sibh beagan le m' amadeachd; agus da rìreadh giùlainibh leam.

2 Oir a ta mi eudmhor umaibh le h-eud diadhaidh; oir rinn mi ceangal-pòsaidh eadar sibh agus aon fhear, chum bhur cur mar òigh fhìor-ghloin an làthair Chrìosd.

3 Ach a ta eagal orm, air dòigh sam bith, mar a mheall an nathair Eubha le a cuilbheartachd, mar sin gu'n truaillear bhur n-inntinn-sa o'n aon-fhillteachd a ta ann an Crìosd.

4 Oir nan deanadh an neach a thig, Iosa eile a shearmonachadh nach do shearmonaich sinne, no nam faigheadh sibhse spiorad eile, nach d'fhuair sibh, no soisgeul eile ris nach do ghabh sibh, dh'fheadadh sibh gu maith giùlan leis.

5 Oir is i mo bharail-sa nach robh mi a bheag goirid air na h-abstolaibh a b'àirde.

6 Ach ged tha mi neo-fhòghluimte ann an cainnt, gidheadh cha'n 'eil mi mar sin ann an eòlas; ach rinneadh sinn làn-fhollaiseach anns na h-uile nithibh 'nur measg-sa.

7 An d'rinn mi cionta le mi féin isleachadh chum gu'm biodh sibhse air bhur n-àrdachadh, no a chionn gu'n do shearmonaich mi soisgeul Dé a nasgaidh dhuibh?

8 Chreach mi eaglaisean eile, a gabhail tuarasdail uatha, chum seirbhis a dheanamh dhuibhse.

9 Agus an uair a bhia mi làthair maille ribhse agus uireasbhuidh orm, cha do leig mi mo throm air duine sam bith: oir leasaich na bràithrean, a thàinig o Mhacedonia, m'uireasbhuidh: Agus anns na h-uile nithibh choimhid mi mi féin o m' throm a leigeadh oirbhse, agus coimhididh.

10 Mar a ta firinn Chrìosd annam, cha chumar an uaill so uam ann an crìochaibh na h-Achaia.

11 C'ar son? An ann a chionn nach 'eil gràdh agam dhuibh? Tha fios aig Dia.

12 Ach an ni a ta mi deanamh, ni mi fathast e, chum gu toir⁴ mi air falbh cion-fàth⁵ uatha-san le'm bu mhiann cion-fàth fhaotainn, chum anns an ni as am bheil iad a' deanamh uaill, gu faighear iad eadhon mar sinne.

13 Oir is ann d'an leithidibh sin a ta abstola bréige, luchd-oibre cealgach, 'gan cur féin ann an cosamhlachd abstola Chrìosd.

14 Agus cha'n iongantach sin: oir cuir-e ar Satan féin an cruth⁶ aingil soille.

15 Uime sin cha ni mòr e ged chuirear a mhinistirean mar an ceudna ann an cruth mhinistirean na fireantachd; aig am bi an crìoch dheireannach a réir an oibre.

16 A ta mi ag ràdh a ris, Na measadh aon neach gur amadan mi; no fòs, gabhaibh rium mar amadan féin chum gu'n dean mi beagan uaill asam féin.

17 An ni a ta mi a labhairt, cha'n ann a réir an Tighearna, a ta mi 'ga labhairt, ach mar gu b'ann gu h-amadeach anns an dàdanas uaille so.

18 Do bhrìgh gu bheil mòran a' deanamh uaill a réir na feòla, ni mise uaill mar an ceudna.

19 Oir giùlainidh sibh gu toileach le amadanaibh, do bhrìgh gu bheil sibh féin glic.

20 Oir fuilgidh sibh ma bheir neach an daorsa sibh, ma dh'itheas⁷ neach sibh, ma bheir neach bhur cuid dhibh, ma dh'àrdaicheas neach e féin, ma bhuaileas neach air an aghaidh sibh.

21 Tha mi a' labhairt a thaobh eas-urr-aim, mar gu'm bitheamaid anmhunn: ach, ge b'e ni anns am bheil neach air bith dàna, (tha mi a' labhairt gu h-amadeach,) a ta mise dàna ann mar an ceudna.

¹ riaghail.
³ dearbha.

² thugaibh-sa.
⁴ gearr.

⁵ colthrom.
⁷ chlaoidheas.

⁶ riochd.

II. CORINTIANACH, XI. XII.

22 An Eabhruidhich iad? *mar sin tha* mise mar an ceudna: An Israelich iad? *mar sin tha* mise mar an ceudna: An sliochd do Abraham iad? *mar sin tha* mise mar an ceudna:

23 Am ministeirean do Chrìosd iad? (tha mi a' labhairt mar dhuine mi-chéillidh,) a ta mise os an ceann *san ni so*: ann an saothairibh nì's pailte, ann am buillibh nì's ro mhòl, am prìosanaibh nì's trice, am bàsaibh gu minic.

24 Fhuair mi na h-Iudhaich cùig uairean dà fhichead *buille* ach a h-aon.

25 Ghabhadh le slataibh orm tri uairean, chlachadh mi aon uair, dh'fhuiling mi long-bhriseadh tri uairean; là agus oidheche bha mi san doimhne:

26 Ann an turasaibh gu minic, ann an gàbhadh airmhichean, ann an cunnartaibh fhear-reubainn, ann an cunnartaibh o m' chinneach *fèin*, ann an cunnartaibh o na Cinnich, ann an cunnartaibh sa' bhaile, ann an cunnartaibh san fhàsach, ann an cunnartaibh san fhairege, ann an cunnartaibh am measg bhràithre breugach²;

27 Ann an saothair agus sgìos³, am fairibh gu minic, ann an ocras agus tart, an trasgaibh gu minic, am fuachd agus an lornochduidh.

28 A bhàrr air na nithibh a ta an leth muigh, an ni a ta teachd orm gu lathail, ro clùram nan eaglaisean uile.

29 Cò a ta lag, agus nach 'eil mise lag? cò a ta faotainn oilbheim, agus nach 'eil mise a' losgadh?

30 Ma's èigin domh uail a dheanamh, is ann as na nithibh a bhuineas do m' anmhuinneachd a ni mi uail.

31 Tha fios aig Dia, eadhon Athair ar Tighearna Iosa Crìosd, a tha beannaichte gu sìorruidh, nach 'eil mi deanamh brèige.

32 Ann an Damascus chuir nachdaran a' phobuill fuidh Aretas an rìgh, freiceadan air baile nan Damascereach, an rùn mise a ghlacadh:

33 Ach tre uinneig leigeadh sìos ris a' bhalla mi ann an clabh, agus chaidh mi as a làmhaidh.

CAIB. XII.

1 Chum abstolachd a mholadh, ged fheudadh Pòl uail a dheanamh as a thaisbeinibh iongantach, 9 gidheadh is fearr leis uail a dheanamh as anmhuinneachd; 11 fhuair e cron doith a chionn gu'n d'èignich iad chum na h-uaille dùmhain so.

GU deimhin cha'n 'eil e iomchuidh dhomh-sa uail a dheanamh: ach thig mi chum seallanna agus taisbeana an Tighearna.

2 B'aithne dhomh duine ann an Crìosd

leithir bliadhna deug roimh so, (ma's anns a' choluinn, cha'n fhios domh; no as a' choluinn, cha'n fhios domh: aig Dia a ta fios;) a leithid sin do dhuine thogadh clum an treas nèamh.

3 Agus b'aithne dhomh a leithid sin do dhuine, (ma's anns a' choluinn, no as a' choluinn, cha'n fhios domh: aig Dia a ta fios;)

4 Gu'n do thogadh suas e gu pàrras, agus gu'n cual e briathra do-labhairt, nach feud duine a labhairt⁴.

5 Ma' leithid sin do dhuine ni mi uail: ach asam fèin cha dean mi uail, mur *dean mi* a m' anmhuinneachdaibh⁵.

6 Oir ged b'àill leam uail a dheanamh, cha bhi mi a' m' amadan; oir labhraidh mi an fhìrinn: gidheadh a ta mi a' cumail orm fèin, air eagal gu'm bi meas aig duine dhiom thar mar a ta e 'gam fhaicinn, no a' cluinntinn umam.

7 Agus air eagal gu'm bithinn air m' àrdachadh thar tomhas, tre ro-mheud nan taisbean, thugadh dhomh sgolb san fheoil, teachdair Shatain chum gu'm buaileadh e mi⁶, air eagal gu'm bithinn air m' àrdachadh thar tomhas.

8 Air a shon so ghuidh mi an Tighearn tri uairean, gu'n imicheadh so uam.

9 Agus thubhairt e rium, Is leoir mo ghràs-sa dhuit: oir a ta mo chumhachd air a dheanamh foirfe ann an anmhuinneachd. Uime sinn is ro tholiche a ni mi uail á m' anmhuinneachdaibh, chum gu'n gabh cumhachd Chrìosd còmhuidh orm.

10 Uime sin tha mi gabhail tlachd ann an anmhuinneachdaibh, am maslaibh, ann an uireasbhuidhlibh, ann an geur-leam-mhuinnibh, ann an teanntachdaibh⁷ air son Chrìosd: oir an uair a ta mi lag, an sin a ta mi làidir.

11 Rinneadh a'm' amadan mi le uail a dheanamh; dh'èignich sibhse mi: oir bu chòir dhomh bhi air mo mholadh leibhse: oircha robh mi bheag sam bith fo na h-abstolaibh a's àirde, ged nach 'eil annam ach neo-ni.

12 Gu deimhin dh'oibrichheadh comharan abstoil ann bhur measg-sa anns gach uile fhoighidin, ann an comharaibh agus an iongantasaibh, agus an cumhachdaibh⁸.

13 Oir cìod an ni anns an robh sibh ni bu lugha na eaglaisean eile, mur e nach do leig mi fèin mo throm oirbh? thugaibh maithanas dhomh san eucoir so.

14 Feuch, a ta mi ullamh a nis an treas uair gu teachd do 'ur n-ionnsuidh; agus cha chuir mi mo throm oirbh; oir cha'n e bhur cuid a tha mi 'g iarraidh, ach sibh fèin: oir cha 'n 'eil e mar fhuachaibh air

¹ thar tomhas.

² fallsa, mealltach.

³ sgìos agus briseadh-cridhe.

⁴ nach urrainn duine a labhairt.

⁵ laigsibh.

⁶ chum gabhail le dornaibh orm.

⁷ trioblaidibh, aindeisibh.

⁸ gnìomharaibh cumhachdach.

II. CORINTIANACH, XII. XIII.

a' chloinn ionmhas a chruinneachadh fa chomhair nam pàrantan, ach air na pàrantaibh fa chomhair na cloinne.

15 Agus is ro'thogarrach a ni mise caith-eadh, agus a chaithear mi air son bhur n-anama-sa, ged mar is ro phailte a ta gràdh agam dhuibh, gur lugha bhur gràdh-sa dhomh.

16 Ach biodh e mar sin, nach do chuir mi trom oirbh: gidheadh air dhomh bhi innleachdach, ghlac mi le seòltachd sibh.

17 An d' rinn mise tre aon neach dhuibh-san a chuir mi do 'ur n-ionnsuidh buannachd dhibh?

18 Ghuidh mi air Titus *dol do 'ur n-ionnsuidh*, agus chuir mi bràthair maille ris: an d' rinn Titus buannachd dhibh? nach do ghluais sinn san aon spiorad? agus anns na h-aon cheumaibh?

19 A ris, am bheil sibh a' saòilsinn gu bheil sinne gabhail ar leithsgeil ribh? tha sinn a' labhairt am fianuis Dé ann an Crìosd: ach *a ta* an t-iomlan, a chàirde, chum bhur fòghluim-sa¹.

20 Oir is eagal leam, air dhomh teachd, nach faigh mi sibh mar is miann leam, agus gu faighear mise dhuibh-se mar nach bu mhiann leibh: air eagal gu'm bi connsachadh, farmad, fearg, comhstri, cùl-chàineadh, cogarsaich, àrdain², ceann-airce 'nur measg:

21 Air eagal an uair a thig mi a ris, gu'n islich mo Dhia mi 'nur measg, agus gu dean mi caoidh air son mòrain do'n dream a pheacaich a cheana, agus nach do ghabh aithreachas do'n neòghloine, agus striopachas, agus mhacnus a rinn iad.

CAIB. XIII.

1 *Bhagair Pbl cumhachd 'abstolachd an aghaidh pbeach cruaidh-mhuinealach: 5 agus chomhairliche d'hoibh an creidimh a dhearbhadh, 7 agus am beatha a' casachadh mun tig e: 11 chomh-dhùin e an litir le earail choitichionn agus le h-àrn-ugh.*

IS i so an treas uair a ta mi a' teachd do 'ur n-ionnsuidh: am beul dithis no triuir do fhianuisibh bithidh gach focal seasmhach.

2 Dh'innis mi cheana, agus tha mi roimh-làimh ag innseadh dhuibh, mar gu'm bithinn a làthair an dara uair; agus a nis air dhomh bhi as bhur làthair, tha

mi a' sgrìobhadh chum na dream a pheacaich roimh so, agus chum chàich uile, ma thig mi a ris, nach caomhain mi:

3 O tha sibh ag iarraidh dearbhaidh air Crìosd a' labhairt annam-sa, neach do 'ur taobh-sa nach 'eil annhunn, ach a ta cumhachdach annaibh.

4 Oir ged cheusadh e tre anmhuinn-eachd, gidheadh a ta e beò tre chumhachd Dhé: oir a ta sinne mar an ceudna annhunn ann-san, gidheadh bithidh sinn beò maille ris tre chumhachd Dhé do 'ur taobh-sa.

5 Ceasnaichibh sibh féin, am bheil sibh sa' chreidimh; dearbhaibh sibh féin: nach aithne dhuibh sibh féin, gu bheil Iosa Crìosd annaibh, mur daoine a chuireadh air cùl³ sibh?

6 Ach tha dòchas agam gu'm bi fhios agaibh nach daoine a chuireadh air cùl sinne.

7 A nis tha mi guidhe air Dia gun sibhse a dheanamh uile air bith; cha'n ann chum gu'm faicear sinne bhi dearbhta, ach chum gu'n deanadh sibhse an ni sin a ta maith⁴, ged robh sinne mar dhaoine a chuireadh air cùl.

8 Oir cha'n urrainn sinn ni air bith a dheanamh an aghaidh na fìrinn, ach air son na fìrinn.

9 Oir tha sinn subhach an uair a tha sinn féin annhunn, agus sibhse làidir: agus tha sinn a' guidhe so mar an ceudna, sibhse bhi dìongmhalta.

10 Is ann uime so a sgrìobh mi na nithe so *do 'ur n-ionnsuidh* air dhomh bhi as bhur làthair, chum air dhomh bhi làthair nach bithinn garg, a réir a' chumhachd a thug an Tighearna dhomh chum fòghluim⁵, agus cha'n ann chum sgrios.

11 Fa dhèidh, a bhraithre, slàn leibh: bithibh dìongmhalta⁶, bithibh subhach, bithibh a dh'aon inntinn, bithibh sìochail; agus bithidh Dia a' ghràidh agus na sìthe⁷ maille ribh.

12 Cuiribh fàilte air a chéile⁸ le pòig naoimh.

13 Tha na naoimh uile a' cur beannachd do 'ur n-ionnsuidh.

14 Gràs an Tighearna Iosa Crìosd, agus gràdh Dhé, agus comh-chomunn an Spioraid naoimh, *gu robh* maille ribh uile. Amen.

¹ bhur togail suas.

² àrd inntinneachd, atmhoircachd.

³ daoine neo-dhearbhta.

⁴ ciatach.

⁶ foirfe, iomlan.

⁸ Altaichibh beatha a chéile.

⁵ togail suas.

⁷ sìothchaint.

GALATIACH.

CAIB. I.

1 *Tha iongantas air Pòl gu'n do thréig na Galatianaich ean agus an soisgeul cò luath: 8 agus mhalluich e an dream sin a shearmonaicheas aon soisgeul eile ach na shearmonaich e féin; 11 dh'fhòghluim e'n soisgeul cha b'ann o dhaoineibh, ach o Dhia, 13 agus nochd e ciod a ghné duine bha ann mun do ghairmeadh e.*

POL abstol, (cha'n ann o dhaoineibh, no tre dhuine, ach tre Iosa Crìosd, agus tre Dhia an t-Athair, a thog suas e o na marbhaibh.)

2 Agus na bràithrean uile a tha maille rium, chum eaglaisean Ghalatia:

3 Gràs duibh, agus sìth o Dhia an t-Athair, agus o ar Tighearn Iosa Crìosd,

4 A thug e féin air son ar peacanna, chum gu'n saoradhe sinn o'n droch shaoghal a ta làthair, a réir toille Dé agus ar n-Athar-ne:

5 Dhàsan gu robh glòir gu saoghal nan saoghal. Amen.

6 Is iongnadh leam gu'n d'atharraicheadh¹ sibh co luath uaith-san a ghairm sibh tre² ghràs Chrìosd, gu soisgeul eile:

7 Ni nach soisgeul eile; ach a ta dream àraidh gur buaireadh, le'n àill soisgeul Chrìosd a thilgeadh bun os ceann³.

8 Ach nan deanamaid-ne, no aingeal o nèamh, soisgeul eile a shearmonachadh dhuibh ach an soisgeul a shearmonaich sinne dhuibh, biodh e malluichte.

9 Amhuil mar a thubhairt sinn roimh, a ta mise ag ràdh a nis a ris mar an ceudna, Ma shearmonaicheas neach sam bith soisgeul eile dhuibh, ach an soisgeul a ghabh sibh, biodh e malluichte.

10 Oir am bheil mi nis a' cur impidh air⁴ daoineibh, no air Dia? no am bheil mi 'g iarraidh daoine a thoileachadh? oir nam bithinn fathast a' toileachadh dhaoine, cha bhithinn a'm sheirbhiseach aig Crìosd.

11 Ach a ta mi toirt fios duibh, a bhràithre, an soisgeul a shearmonaicheadh leam-sa, nach ann a réir duine a ta e.

12 Oir cha b'ann o dhuine a fhuair mi e, ni mò a theagaisgeadh dhomh e, ach tre fhoillseachadh Iosa Crìosd.

13 Oir chuala sibh mo chaithe-beathas⁵ san aimsir a chaidh seachad, ann an creidimh nan Iudhach, gu'n d'rinn mi thar tomhas geur-leanmhuinn air eaglais

Dé, agus gu'n d'fhàsaich mi i:

14 Agus gu'n d'fhàinig mi air m'aghaidh ann an creidimh nan Iudhach thar mòran do m' chomh-aoisibh am measg mo chinnich féin, air dhomh bhì ni bu ro eudmhoire mu ghnàthannaibh mo shiinsir-eachd.

15 Ach an uair a b'ì deadh thoil Dé, a sgar o bhroinn mo mhàthar mi, agus a ghairm mi tre a ghràs,

16 A Mhac féin fhoillseachadh annam⁶, chum gu searmonaichinn e am measg nan Cinneach; air ball cha do chuir mi comhairle ri feòil agus fuil:

17 Ni mò chaidh mi agus gu Ierusalem, chum na muinntir sin a bha 'nan abstol-aibh roimham; ach chaidh mi gu Arabia, agus a ris thàinig mi air m'ais gu Damascus.

18 An déigh sin an ceann thri bliadhna, chaidh mi suas gu Ierusalem, a dh'fhaicinn Pheadair, agus dh'fhan mi maille ris cùig làithean deug.

19 Ach neach air bith eile do na h-abstolaibh cha'n fhaca mi, ach Seumas bràthair an Tighearna.

20 A nis anns na nithibh a ta mi a' sgrìobhadh dhuibh, feuch, an làthair Dhé, cha'n eil mi deanamh bréige.

21 'Na dhéigh sin thàinig mi gu crìoch-aibh Shìria agus Chìlicia;

22 Agus cha robh eòlas orm a thaobh m' fhaicinn aig eaglaisibh Iudea, a bha ann an Crìosd:

23 Ach a mhàin chual iad, An ti anns an àm a chaidh seachad a bha 'gar geur-leanmhuinn, gu bheil e nis a' searmonachadh a' chreidimh a bha e a' sgrìos roimh so⁷:

24 Agus thug iad glòir do Dhia air mo shon-sa.

CAIB. II.

1 *Chuir an t-abstol an cèill c'uin a chaidh e suas gu Ierusalem, agus c'ar son nach do thimchioll-ghearradh Titus. 11 Chuir e'n aghaidh Pheadair, agus dh'imis e dha a reuson, 14 c'ar son a ta e féin, agus muinntir eile, a tha 'nan Iudhaich, a' creidsinn gu'm bì iad air am fireanachadh tre chreidimh ann an Crìosd, agus cha'n ann tre oibribh.*

AN sin, an ceann cheithir bliadhna deug, chaidh mi a ris suas gu Ieru-

¹ gu'n d'thugadh thairis.

² chum.

³ fhiaradh, chlaon-thruaillleadh.

⁴ a' cur m'carbasa á.

⁵ mo ghiùlan.

⁶ leam.

⁷ uair-eigin.

salem, maille ri Barnabas, a' toirt Thituis leam mar an ceudna.

2 Agus chaidh mi suas a réir foillseachaidh, agus chuir mi an céill dhoibh an soisgeul a ta mi a' searmonachadh am measg nan Cinneach, ach ann an uaighnidheas dhoibh-san d'an robh meas, air eagal air chor sam bith gu'n ruithiun, no gu'n do ruith mi an diomhanas.

3 Ach cha b'éigin do Thitus féin a bha a'm' chuideachd, bhi air a' timchioll-ghearradh, ged bu Ghreugach e:

4 Agus sin air sam bhráithre bréige a ghoid a steach¹ 'nar measg, a thàinig a steach an uaighnidheas² a dh'fhaicinn ar saorsa, a ta againn ann an Iosa Crìosd, chum ar toirt fo dhaorsa.

5 Do nach do ghéill sinn eadhon rè uaire; chum gu'm buanaicheadh³ fìrinn an t-soisgeil maille ribhse.

6 Ach o'n dream sin, a mheasadh gu'm bu ni éigin iad, (cìod air bith a bha iad roimh, cha 'n eil suim ann domh-sa: cha'n eil meas aig Dia do phearsa duine,) oir iadsan a mheasadh *gu'm bu ni éigin iad*, cha do phàirtich iad le'n còmhraidh bheag sam bith rium-sa.

7 Ach air an làimh eile, 'nuair a chunn-aic iad gu'n d' earbadh soisgeul an neo-timchioll-ghearraidh rium-sa, mar a dh'earbadh soisgeul an timchioll-ghearraidh ri Peadar;

8 (Oir an ti a dh'oibrich gu h-éifeachd-ach⁴ ann am Peadar chum abstolachd an timchioll-ghearraidh, dh'oibrich e gu cumhachdach annam-sa mar an ceudna chum nan Cinneach:)

9 Agus an uair a thuig Seumas, agus Cephas, agus Eoin, a tha air am meas 'nam puist⁵, an gràs a thugadh dhomh, thug iad dhomh-sa agus do Bharnabas deas làmh a' chomuinn; ionnus gu rach-amaid chum nan Cinneach, agus iad féin chum an timchioll-ghearraidh.

10 A mhàin b'àill leo gu'm bitheamaid cuimhneachail air na bochdaibh; ni mar an ceudna a bha ro-thoil⁶ agam féin a dheanamh.

11 Ach an uair a thàinig Peadar gu Antioch, sheas mi 'na aghaidh as an eudan, a chionn gu'n robh e r'a choireach-adh.

12 Oir roimh do dhream àraidh teachd o Sheumas, dh'ith e biadh maille ris na Cinnich: ach an uair a thàinig iadsan, chaidh e a thaobh agus thearbaidh se e féin, air eagal na muinntir a bha do'n timchioll-ghearradh.

13 Agus rinn na h-Iudhaich eile gnùis-mhealladh maille ris mar an ceudna;

ionnus gu'n d'thugadh Barnabas mar an ceudna a thaobh le'n cluain⁷.

14 Ach anuair a chunnaic mise nach do ghluais iad gu tréibhdhireach⁸, a réir fìrinn an t-soisgeil, thubhairt mi ri Peadar 'nam fianuis uile, Ma tha thusa, a tha a'd' Iudhach, a' caitheadh do bheatha a réir nan Cinneach, agus cha'n ann a réir nan Iudhach, c'ar son a ta thu 'g éigineachadh nan Cinneach am beatha chaitheadh mar na h-Iudhaich?

15 Air dhuinne *atha 'nar n-Iudhaich* a thaobh nàduir, agus cha'n ann 'nar peac-aich do na Cinnich,

16 Fios a bhi againn nach 'eil duine air fhìreanachadh o oibribh an lagha, ach tre chreidimh Iosa Crìosd, chreid sinne féinn ann an Iosa Crìosd; chum gu'm bitheamaid air ar fhìreanachadh o chreidimh Chriosd, agus cha'n ann o oibribh an lagha: oir o oibribh an lagha, cha bhi féil sam bith air a fhìreanachadh.

17 Ach air dhuinn bhi 'g iarraidh bhi air ar fhìreanachadh tre Chriosd, ma gheibhear 'nar peacaich sinn féin, *am bheil*, uime sin, Crìosd 'na mhinisteir peacaidh? Nar leigeadh Dia.

18 Oir ma thogas mi a ris suas na nithe a leag mi, tha mi deanamh ciontach dhìom féin.

19 Oir a ta mise tre'n lagh marbh do'n lagh, chum gu'm bithinn beò do Dhia.

20 Tha mi air mo cheusadh maille ri Crìosd: gidheadh a ta mi beò; ach cha mhise, ach Crìosd a ta beò annam: agus a' bheatha a ta mi nis a' caitheadh san fhéil, tha mi ga caitheadh tre chreidimh Mhic Dhé, a ghràdhach mi, agus a thug e féin air mo shon.

21 Cha'n 'eil mi a' cur gràis Dé an neo-bhrìgh⁹: oir ma tha fìreantachd tre'n lagh, is ann gun aobhar a fhuair Crìosd bàs.

CAIB. III.

1 Dh'fhèdraich an t-abstol cìod a dh'aom na Galatianaich *gus an creidimh a thrèigsinn*, agus dòigh a chur san lagh. 6 Tha'n dream a tha creidsinn air am fhìreanachadh, 9 agus air am beannachadh maille ri Abraham: 10 dhearbhaidh Pol so le ìomadh reison.

OA Ghalatianacha amaidheach, cò a chuir druidheadh oirbh, ionnus nach biodh sibh ùmhail do'n fhìrinn, d'an robh Crìosd air a nochdadh gu soilleir¹⁰ fa chomhair bhuir sùl, air a cheusadh 'nur measg?

2 So a mhàin b'àill leam fhòghlum naibh, An ann o oibribh an lagha a fhuair sibh an Spiorad, no o éisdeachd a' chreidimh?

¹ a thugadh steach os ìosal. ² os ìosal.
³ fanadh. ⁴ gu bhrioghmhor.
⁵ postaibh. ⁶ ro-thogadh.

⁷ gnùis-mhealladh, ceilg. ⁸ san t-slighe dhrìch. ⁹ air cùl.
¹⁰ gu dealbhach.

3 Am bheil sibh co amaideach *as sin*² air dhuibh tòiseachadh san Spiorad, am bheil sibh a nis air bhuir deanamh foirfe leis an fheadhail?

4 An d'fhuiling sibh na h-uiread sin do nithibh gu domhain? ma's *ann* da fìreadh gu domhain.

5 An ti uime sin a tha frithealadh dhuibh an Spioraid, agus ag oibreachadh mhìorbhuile 'nur measg, an ann tre oibribh an lagha, no tre èisdeachd a' chreidimh *a ni e so*?

6 Amhuil mar a chreid Abraham Dia, agus a mheasadh sin dha mar fhìreantachd.

7 Uime sin biodh fhios agaibh an dream a *tha* do'n chreidimh, gur iad sin clann Abraham.

8 Oir air fhaicinn roimh do'n sgrìobtuir gu'm fìreanaicheadh Dia na Cinnich tre chreidimh, shearmonaich e an soisgeul roimh-làimh do Abraham, *ag ràdh*, Beannaichear na h-uile Chinnich annad-sa.

9 Uime sin tha an dream a *tha* do'n chreidimh, air am beannachadh maille ri Abraham, fìor-chreideach.

10 Oir a mheadh 's a ta do oibribh an lagha, tha iad fo'n mhallachadh; oir a ta e sgrìobhta, *Is* malluichte gach neach nach buanaich¹ anns na h-uile nithibh a ta sgrìobhta ann an leabhar an lagha chum an deanamh.

11 Ach *is* ni follaiseach, nach fìreanaichear neach sam bith tre'n lagh am fianuis Dé: oir, Bithidh am firean beò tre chreidimh.

12 Agus cha 'n 'eil an lagh o chreidimh: ach, An duine a ni iad gheibh e beatha amta².

13 Shaor Crìosd sinne o mhallachadh an lagha, air dha bhì air a dheanamh 'na mhallachadh air ar son: oir a ta e sgrìobhta, *Is* malluichte gach aon a chrochar air crann:

14 Chum gu'n tìgeadh beannachadh Abraham air na Cinnich tre Iosa Crìosd; ionnus gu faigheamaid gealladh an Spioraid tre chreidimh.

15 A bhràithre, tha mi a' labhairt mar dhuine; ged nach bi ann ach coimhcheangal³ duine, ma tha e air a dhaingneachadh, cha chuir neach air bith air cùl e, agus cha chuirear nì sam bith ris.

16 A nis is ann do Abraham a thugadh⁴ na geallanna agus d'a shìol. Cha'n abair e, Agus do shìolaibh, mar gu'm biodh e *labhairt* mu mhòran; ach mar mu aon, Agus do d' shìol-sa, neach a's e Crìosd.

17 Agus a ta mi ag ràdh so, nach fheudar gu'n cuir an lagh, a thugadh an ceann

cheithir cheud agus dheich bliadhna fìchead 'na dhéighl, an coimhcheangal an neo-bhrìgh, a dhaingnicheadh roimh le Dia ann an Crìosd, ionnus gu'n cuireadh e an gealladh air cùl.

18 Oir ma's ann o'n lagh a *ta* an oighreachd, cha 'n 'eil i nì's mò o'n ghealladh: ach thug Dia gu saor i do Abraham tre ghealladh.

19 C'ar son uime sin a *thugadh* an lagh? thugadh e air son eusaontais, gus an tìgeadh an sìol, d'an d'rinnadh an gealladh; air orduchadh le ainglibh an làimh eadar-mheadhonair.

20 A nis an t-eadar-mheadhonair, cha'n ann air son aoin a *ta e* 'na eadar-mheadhonair; ach is aon Dia.

21 Uime sin am bheil an lagh an aghaidh gheallanna Dhé? Nar leigeadh Dia: oir nam biodh lagh air a thabhairt a bhiodh comasach air beatha thoirt uath, gu deimhin is ann o'n lagh a bhiodh fìreantachd.

22 Ach dh'fhàg an sgrìobtuir na h-uile *dhaoinè* diunte sa' pheacadh, chum gu'n biodh an gealladh tre chreidimh Iosa Crìosd air a thoirt dhoibh-san a ta creidsinn.

23 Ach mu'n d'fhàinig an creidimh, choimhheadh sinn fo 'n lagh, air ar druideadh a steach chum a' chreidimh, a bha gu bhì air fhoillseachadh.

24 Uime sin b'e an lagh, ar n-oid-fhòghluim⁵ *g'ar treòrachadh* gu Crìosd, chum gu bitheamaid air ar fìreanachadh tre chreidimh.

25 Ach air teachd do'n chreidimh, cha'n 'eil sinn nì's mò fuidh oid-fhòghluim.

26 Oir is sibhse uile mic Dhé tre chreidimh ann an Iosa Crìosd.

27 Oir a mheadh agaibh 'sa bhaisteadh do Chrìosd, chuir sibh umaibh Crìosd.

28 Cha'n 'eil Iudhach no Greugach, cha'n 'eil saor no daor, cha'n 'eil fìrionn no boirionn⁶ ann: oir is aonsibh uile ann an Iosa Crìosd.

29 Agus ma's le Crìosd sibh, is sibh sìol Abraham gun amharus, agus is oighreachan sibh a rèir a' gheallaidh.

CAIB. IV.

1 Bha sinn fuidh'n lagh, gus an d'fhàinig Crìosd, mar a ta an t-oighre fuidh a thuiteir gus an tig e gu h-aois. 5 Ach shaor Crìosd sinn o'n lagh: 7 uime sin cha'n 'eil sinn 'nar seirbhisich nì's faide dha. 14 Chuir Pòl an cuimhne dhoibh an deadh-ghean d'asan, agus a dheadh-rùn fèin dhoibh-san.

ANIS a ta mi ag ràdh, am feadh a bhios an t-oighre 'na leanabh, nach 'eil eadar-dhealachadh sam bith eadar e

¹ fan. ² leo. ³ cunradh, cùmhnant.

⁴ labhradh, rinneadh.

⁵ ar maighstir-sgoile.

⁶ bainionn.

agus seirbhliseach, ged is e Tighearn nan uile;

2 Ach a ta e fo luchd-coimhid¹, agus fo luchd-riaghlaidh gu teachd na h-aimsir a dh'orduich an t-athair.

3 Agus mar an ceudna sinne, 'nuair a bha sinn 'nar leanabaibh, bha sinn an daorsa fo chleud fhòghlum an t-saoghail:

4 Ach an uair a thàinig coimhlionadh na h-aimsir, chuir Dia a Mhac féin uaith, a ghineadh o mhnaoi, a rinneadh fuidh'n lagh,

5 Chum gu'n saoradh e iadsan a bha fuidh'n lagh, ionnus gu faigheamaid-ne uchd-mhacachd na cloinne.

6 Agus do bhrìgh gur mic sibh, chuir Dia Spiorad a Mhic féin ann bhur cridheach-aibh, ag éigheach, Abba, Athair.

7 Uime sin cha seirbhiseach thu ni's mò, ach mac; agus ma's mac, is oighre mar an ceudna air Dia tre Chrisod.

8 Gidheadh, an uair nach b'aithne dhuibh Dia, rinn sibh seirbhis dhoibh-san nach 'eil 'nan dèe thaobh nàduir.

9 Ach a nis air dhuibh Dia aithneachadh, no mar is fearr a dh'fheudar a ràdh, bhi air bhur n-aithneachadh le Dia, cionnus a ta sibh ag ath-philleadh chum nan ceud-thoiseach annhumun agus bochd², d'am miann leibh bhi a ris fo dhaorsa?

10 Tha sibh a' coimhead làithean, agus mhìosan, agus aimsirean, agus bhliadh-nan.

11 Tha eagal orm do 'ur taobh gu'n do chaith mi gu dìomhain mo shaothair oirbh.

12 Guidheam oirbh, a bhràithre, bithibh mar a ta mise; oir a ta mise mar sibhse: cha d'rinn sibh eucoir sam bith orm.

13 Tha fhios agaibh gu'm b'ann tre amhuinneachd na feòla, a shearmonaich mi dhuibh an soisgeul air tùs.

14 Agus air mo bhuaireadh a bha ann am fheòil, cha d'rinn sibh tarcuais, agus cha do ghabh sibh gràin diom³; ach ghabh sibh rium mar aingeal⁴ Dé, mar Iosa Chrisod.

15 Ciod e ma seadh⁵ an sonas sin a bha agaibh? oir a ta mi deanamh fianuis duibh, nam bu chomasach e, gu'n spionadh sibh a mach bhur suilean féin, agus gu'n tugadh sibh dhomh-sa iad.

16 Uime sin an d'rinneadh nàmlaid duibh dhiom, air son mi dh'innseadh na firinn duibh?

17 Tha iadsan eudmhor umaibh, ach cha'n ann gu maith; ach b'àill leo sinne dhruideadh na mach, chum gu'm biodh sibhse eudmhor umpa féin.

18 Ach is maith a bhi eudmhor ann an

ni maith a ghnàth, agus cha'n e mlàin an uair a ta mise a làthair maille ribh.

19 Mo chlann bheag, air am bheil mi a ris ri saothair, gus an dealbhar Criosd annaibh,

20 B'àill leam bhi nis a làthair maille ribh, agus mo ghuth a chaochladh, oir a ta mi fuidh amharus umaibh.

21 Innsibh dhomh, sibhse le'm miann bhi fo'n lagh, nach cluinn sibh an lagh?

22 Oir a ta e sgriobhta, gu robh aig Abraham dithis mhac; aon ri banoglaich⁶, agus am mac eile ri mnaoi shaoir.

23 Agus esan a bh'aige ris a' bhanoglaich, ghineadh a réir na feòla e; ach esan a bh'aige ris a' mhnaoi shaoir, tre ghealladh.

24 Na nithe so is samhlaidh iad⁷; oir is iad so an dà choimhcheangal⁸; aon diubh o bheinn Shinai, a ta a' breith chum daorsa, a's i Agar.

25 Oir is i Agar beinn Shinai ann an Arabia, agus tha i a' comh-fhreagradh do Ierusalem a tha nis ann, agus tha i fo dhaorsa maille r'a cloinn.

26 Ach a ta an Ierusalem a ta shuas saor, agus is màthair dhuinn uile i.

27 Oir a ta e sgriobhta, Dean gairdeachas, a bhean neo-thorrach⁹ nach 'eil a' breith cloinne; bris a mach agus glaodh, thusa nach 'eil ri saothair: oir is lion-mhoire clann na mnà aonaranaich¹⁰, na na mnà aig am bheil fear.

28 A nis, a bhràithre, is sinne, mar a bha Isaac, clann a' gheallaidh.

29 Ach mar a rinn esan a rugadh a réir na feòla, san àm sin geur-leanmhuinn air-san a rugadh a réir an Spioraid, is amhuil sin a ta nis mar an ceudna.

30 Ach ciod a ta an sgriobtuir ag ràdh? Tilg a mach a' bhanoglach agus a mac: oir cha bhi mac na banoglaich 'na oighre maille ri mac na mnà saoire.

31 Uime sin, a bhràithre, cha sinne clann na banoglaich, ach na mnà saoire.

CAIB. V.

1 Bhrosnuich an t-abstol na Galatianaich gu seasamh nan saorsa, 3 agus gun an timchioll ghearradh a ghnàthachadh: 13 ach roghuinn a dheanadh do ghràdh, ni a's e coimhlionadh an lagha: 19 chuir e sìos oibre na feòla.

UIME sin seasaibh gu daingean ann an t-saorsa leis an d'rinn Criosd saor sinn, agus na bithibh a ris air bhur cuibhreachadh le cuing na daorsa.

2 Feuch, a ta mise Pòl ag ràdh ribh, ma thimchioll-ghearrar sibh, nach bi tairbhe air bith dhuibh ann an Criosd.

3 Oir a ta mi a ris a' deanamh fianuis

¹ thuiteiribh. ² annhumun, uireasbhuidheach.

³ cha do chuir sibh càl ris. ⁴ theachdair.

⁵ C'ait am bheil.

⁶ mnaoi dhaoir, ban-tràill.

⁷ asda so tha ni eile r'a thuigsinn.

⁸ chumhlant.

⁹ sheags, gun sliochd.

¹⁰ trèigte.

do gach uile dhuine a thimchioll-ghearr-
ar, gu bheil e mar fhiachaibh air an lagh
gu h-ìomlan a choimhlionadh.

4 Cha'n 'eil taibhe sam bith ann an
Criosd dhuibhse¹ a ta air bhuir firean-
achadh tre'n lagh; thuit sibh o ghràs.

5 Oir a ta sinne tre'n Spiorad a' feith-
eamh ri dòchas fireantachd o chreidimh.

6 Oir ann an Iosa Criosd, cha'n 'eil éif-
eachd² sam bith ann an timchioll-ghearr-
adh, no ann an neo-thimchioll-ghearradh,
ach ann an creidimh a dh'oibricheas tre
ghràdh.

7 Is maith a ruith sibh; cò a bhac sibh
o bhi ùmhal do'n fhùirinn?

8 Cha d'fhàinig an impidh so o'n ti a
ghairm sibh.

9 Goirtichidh³ beagan do thaois ghoirt
am meall uile.

10 Tha muinghin agam asaibh san
Tighearn, nach bi sibh dh'aon dòigh air
atharrachadh inntinn: ach an ti a ta cur
dragha oirbh, giùlainidh e a bhreithean-
as, cò air bith e.

11 Agus mise, a bhràithre, ma shear-
monaicheas mi fathast an timchioll-
ghearradh, c'ar sou a nìhear fathast
geur-leanmhuinn orm? an sin bhiodh
oibheum a' chroinn-cheusaidh air a chur
air cùl.

12 B' fhearr leam gu'm biodh iadsan a
ta cur mi-shuaimhneis⁴ oirbh eadhon air
an gearradh uaibh⁵.

13 Oir, a bhràithre, ghairmeadh chum
saorsa sibh; a mhàin na deanaibh an
t-saorsa 'na cion-fath do'n fheòil, ach le
gràdh deanaibh seirbhis d'a chèile.

14 Oir tha an lagh uile air a choimh-
lionadh ann an aon fhocal, eadhon an so,
Gràdhaidhidh tu do choimhearsnach mar
thu féin.

15 Ach ma bhios sibh a' teumadh agus
ag itheadh a chèile, thugaibh aire nach
claoidhear le a chèile sibh.

16 A ta mi ag ràdh ma seadh, Gluais-
ibh⁶ sa spiorad, agus cha choimhlion
sibh anamian na feòla.

17 Oir a ta an fheòil a' miannachadh an
aghaidh an Spioraid, agus an Spiorad an
aghaidh na feòla: agus a ta iad sin an
aghaidh a chèile; ionnus nach faigh sibh
na nithe bu mhiann leibh a dheanamh.

18 Ach ma theòraichear leis an Spior-
ad sibh, cha'n 'eil sibh fuidh⁷ n lagh.

19 A nis tha oibre na feòla follaiseach,
a's iad so, Adhaltranas, strìopachas,
neò-ghloine, macnus⁸,

20 Iodhol-aoradh, fuidheachd⁹, naimh-

deas, connsachadh, co-fharpuis⁹, fearg,
comhstri, aimlireite, saobh-chreidimh¹⁰.

21 Farnad, mortadh, misg, ruidhteir-
eachd¹¹, agus an leithide sin: mu bheil mi
ag innseadh dhuibh roimh-làimh, mar a
dh'innis mi dhuibh a cheana mar an ceud-
na, nach seallbaich iadsan a ni an leith-
ide sin rioghachd Dhé¹².

22 Ach is e toradh an Spioraid gràdh,
aoibhneas, sìth, fad-fhulangas, caomhal-
achd, maithneas, creidimh¹³,

23 Macantas¹⁴, stuaim: an aghaidh an
samhuil sin cha'n 'eil lagh.

24 Agus iadsan a's le Criosd, cheus iad
an fheòil, maille r'a h-an-tograibh agus a
h-ana-miannaibh.

25 Ma's beò dhuinn san Spiorad, gluais-
eamaid san Spiorad mar an ceudna.

26 Na bithcamaid déidheil air glòir
dhiomhain¹⁵, a' brosnachadh a chèile, a'
gabhail farmaid r'a chèile.

CAIB. VI.

1 Dh'iarr Pòl air na Galatianaich buntainn gu
sèmh ri bràthair a thuistich, 2 agus uallach a
chèile a ghàlan, 6 bhì tabhartach d'an luchd-
teagaisg, 9 agus gun sgèitheachadh do mhaith a
dheanamh: 12 nochd e ciod gus am bheil iadsan
a ta searmonachadh an timchioll-ghearraidh.

A BHRAITHRE, ma ghlacar neach
ann an coire air bith gu h-obann,
sibhse a ta spioradail, togaibh suas a
shamhuil sin do dhuine ann an spiorad
na macantachd¹⁶; a' toirt aire dhuist féin,
nach buairear thu mar an ceudna.

2 Giùlainibh uallacha¹⁷ a chèile, agus
mar sin coimhlionaibh lagh Chrìosd.

3 Oir ma shaoileas duine gur ni éigin e
féin, gun bhì ann ach neo-nì, tha e 'ga
mhealladh féin.

4 Ach dearbhadh gach neach 'obair
féin, agus an sin bithidh aobhar gaird-
eachais¹⁸ aige d'a thaobh féin¹⁹ a mhàin,
agus cha'n ann a thaobh neach eile.

5 Oir giùlainidh gach neach²⁰ uallach féin.

6 Comh-roinneadh an neach a ta air a
theagasg san fhocal, ris an neach a ta 'ga
theagasg, anns na h-uile nithibh maithe.

7 Na meallar sibh; cha deanar fanoid
air Dia: oir ge b'e ni e shìol-chuireas
duine, an ni ceudua buainidh e.

8 Oir an ti a chuireas d'a fheòil féin,
buainidh e o'n fheòil truaillidheachd;
ach an ti a chuireas do'n Spiorad, buain-
idh e o'n Spiorad a' bheatha shuthainn.

9 Agus na sgèitheamaid do mhaith a
dheanamh: oir ann an àm iomchuidh
buainidh sinn, mur fannaich²¹ sinn.

10 Uime sin a réir mar a ta cothrom²¹
againn, deanamaid maith do na h-uile

¹ rinneadh Criosd gun taibhe dhuibh.

² brìgh, neart.

³ Gearraidhidh.

⁴ dragha.

⁵ air an gearradh as bhuir coimh.

⁶ siubhlaibh, imichibh.

⁷ mì-nàire.

⁸ buidsachas.

⁹ comortus.

¹⁰ éiriceachd.

¹¹ anabharr, grècaireachd, craos.

¹² rioghachd Dhé mar òighreachd.

¹³ frìnn.

¹⁴ ciùineas.

¹⁵ earraghlòir.

¹⁶ a' chiùineis.

¹⁷ callacha.

¹⁸ uall.

¹⁹ ann féin.

²⁰ lagaich.

²¹ fàth.

EPHESIANACH, I.

dhaoinibh, ach gu h-àraidh dhoibh-san a ta do theaghlach a' chreidimh.

11 Tha sibh a' faicinn meud na litreach a sgrìobh mi dhuibh le mo làimh féin.

12 A mheud le' m miann iad féin a thaisbeanadh gu sgiamhach san fheòil, tha iad 'gur n-èigneachadh chum bhi air bhuir timchioll-ghearradh; a mhàin chum nach deantadh geur-leanmhuinn orra air son crann-ceusaidh Chrìosd.

13 Oir cha'n' eil iadsan féin a tha air an timchioll-ghearradh a' coimhead an lagha: ach is àill leo sibhse bhi air bhuir timchioll-ghearradh, chum as gu dean iad uail ann bhuir feòil.

14 Ach nar leigeadh Dia gu deanainn-sa uail ach ann an crann-ceusaidh ar Tighearna Iosa Crìosd, tre'm bheil an

saoghal air a cheusadh dhomh-sa, agus mise do'n t-saoghal.

15 Oir ann an Iosa Crìosd cha'n' eil èifeachd air bith ann an timchioll-ghearradh, no ann an neo-timchioll-ghearradh, ach ann an cruthachadh¹ nuadh.

16 Agus a mheud 's a shiubhlas a réir na riaghailt so, sìth orra, agus tròcair, agus air Israel Dé.

17 O so a mach na cuireadh neach sam bith dragh orm; oir a ta mi giùlan chomharan an Tighearna Iosa ann mo chorp.

18 A bhràithre, *gu robh* gràs ar Tighearna Iosa Crìosd maille ri bhuir spiorad. Amen.

¹ creutair.

LITIR AN ABSTOIL PHOIL

CHUM NAN

EPHESIANACH.

CAIB. I.

1 *An deigh fàille, 3 agus breith-buidheachais air son nan Ephesianach, 4 labhair Pòl mu thaghadh, 6 agus uchd-mhacachd thaobh gràis, 11 ni a's e an fìor-thobair o' m bheil slàinte a' chinne-daoine a' sruthadh, &c.*

POL, abstol Iosa Crìosd tre thoil Dé, chum nan naomh a ta ann an Ephesus, agus nan creideach ann an Iosa Crìosd:

2 Gràs dhuibh, agus sìth o Dhia ar n-Athair agus o'n Tighearn Iosa Crìosd.

3 Beannaichte *gu robh* Dia, eadhon Athair ar Tighearna Iosa Crìosd, bheannaichte sinne leis gach uile bheannachadh spioradail ann an *ionadaibh* nèamhaidh¹ ann an Crìosd:

4 A réir mar a thagh e sinne ann-san, mun do leagadh bunait an domhain, chum gu'm bitheamaid naomha, agus neo-choireach 'na làthair-san ann an gràdh:

5 A roimh-orduich sinne chum uchd-mhacachd na cloinne tre Iosa Crìosd dha féin, a réir deadh-ghean a thoile.

6 Chum cliù glòire a ghràis, tre an d'rinn e sinne taitneach² ann a *Mhac* gràdhach: 7 Anns am bheil againne saorsa³ tre 'fhuil-san, maitheanas nam peacadh, a réir saoihbheis a ghràis;

8 Anns an robh e ro phailt dhuinne san uile ghliocas, agus thuigse:

9 A dh'fhoillsich dhuinn rùn-diomhair a

thoile, a réir a dheadh ghean féin a rùn-aich e ann féin:

10 Chum ann am frithealadh coimhlionaidd nan aimsir, gu'n cruinnicheadh e ann an aon na h-uile nithe ann an Crìosd, araon *na nithe* a ta air nèamh agus *na nithe* a ta air talamh, *eadhon* ann-san:

11 Anns an d'fhuair sinne mar an ceudna oighreachd, air dhuinn bhi air ar roimh-orduichadh a réir rùn an tì a ta 'g oibreachadh nan uile nithe a réir comhairle a thoile féin;

12 Ionns gu'm bitheamaid-ne, a chuir air tùs dòchas ann an Crìosd, chum cliù a ghloire-san.

13 Anns an do chuir sibhse mar an ceudna *dòchas*, air dhiubh focal na fìrinn a chluinntinn, *eadhon* soisgeul bhuir slàinte: neach an deigh dhuibh creidsinn ann, chuireadh seula oirbh le Spiorad naomh sin a' gheallaidh,

14 Neach is e geall-dainguich⁴ ar n-oighreachd-ne, *gu teachd* saorsa na seilbhe a cheannachadh⁵ chum cliù a ghloire.

15 Uime sin air cluinntinn domh-sa mar an ceudna bhuir creidimh-sa anns an Tighearn Iosa, agus bhuir gràdh do na naoimh uile,

16 Cha'n' eil mi a' sgur⁶ do bhi toirt buidheachais air bhuir son, a' luadh oirbh ann am urnuighibh;

17 Gu'n tugadh Dia ar Tighearna Iosa

¹ nithibh nèamhaidh.

² tre an do nochd e dhuinne mòr dheadh-ghean.

³ fuasgladh.

⁵ dh'fhuasgladh.

⁴ earlas.

⁶ Nì'n sguiream.

Criosd, Athair na glòire, spiorad gliocais agus foillseachaidh¹ dhuibh, ann an eòlas air-san²;

18 Stiùlean 'ur n-inntinn bhi air an soillseachadh, chum fios a bhi agaibh ciod e dòchas a ghairme-san, agus ciod e saoihbheas glòire 'oighreachd-san anns na naomhaibh,

19 Agus ciod e ro-mheud a chumhachd do ar taobh-ne a ta creidsinn, a réir oibreachaidh a thréun neirt;

20 A dh'oibrich e ann an Criosd, 'nuair a thog e o na marbhaibh e, agus a chuir e 'na shuidhe air a dheas-làimh féin e anns na *h-ionadaibh* nèamhaidh,

21 Gu ro àrd os ceann gach uile uachdaranachd, agus cumhachd, agus neirt, agus tighearnais, agus gach ainme a dh'ainmichear, cha'n e mhàin sant-saoghail so, ach san *t-saoghal* ri teachd mar an ceudna:

22 Agus chuir e na h-uile nithe fuidh a chosaibh, agus thug se e gu *bhi* 'na cheann os ceann nan uile nithe do'n eaglais,

23 A ta 'na corp aige, lànachd an ti a ta lionadh nan uile *nithe* anns na h-uile.

CAIB. II.

1 *Le bhi coimheas r'a chèile ciod a bha sinn thaobh nàduir, 5 agus ciod a tha sinn thaobh gràis, 10 chuir Pòl an cèill gun d'rinneadh sinn air son dheadh oibre; agus air dhuinn bhi air ar tòirt am fagus tre Chrìosd, 11 nach còir dhuinn ar beatha a chaitheadh mar Chlunnich, 19 ach mar luchd aoin bhaile ris na naoimh, agus mar theaghlach Dhé.*

A GUS sibhse *bheothaich* e, a bha marbh ann an euceartaibh agus ann am peacaibh;

2 Anns an do ghluais³ sibh sna h-amannaibh a chaidh seachad, a réir gnàtha⁴ an t-saoghail so, a réir uachdarain⁵ cumhachd an athair, an spioraid a tha nis ag oibreachadh ann an cloinn na h-easumhlachd:

3 Ann measg an robh againn uile mar an ceudna ar caithe-beatha roimh so, ann an ana-miannaibh ar feòla, a' deanamh toil na feòla, agus nan smuainte⁶; agus bha sinn a thaobh nàduir 'nar cloinn na fèirge, eadhon mar chàch.

4 Ach Dia, a ta saoihbhir ann an tròcair, air son a mhòr-ghràidh leis an do ghràdhach e sinn,

5 Eadhon air dhuinn a bhi marbh ann am peacaibh, chomh-bheothaich e sinn maille ri Criosd; (le gràs tha sibh air bhur tèarnadh⁷);

6 Agus chomh-thog, agus chomh-

shuidhich e sinn ann an *ionadaibh* nèamhaidh ann an Iosa Criosd:

7 Chum gu'n foillsicheadh e anns na linnibh ri teachd saoihbheas ro phailt a ghràis, ann an caoimhneas d'ar taobh-ne tre Iosa Criosd.

8 Oir is ann le gràs a ta sibh air bhur tèarnadh, tre chreidimh: agus *sinn* cha'n ann uaibh féin; *is e* tiodhlac⁸ Dhé e:

9 Cha'n ann o oibrich, chum nach deanadh neach air bith uail:

10 Oir is sinne 'obair-san, air ar cruthachadh ann an Iosa Criosd chum dheadh oibre, air son an d'ulluich Dia roimh-làimh *sinn*, chum gu'n gluaiseamaid anna.

11 Uime sin cuimhnichibh, air dhuibh a bhi san aimsir a chaidh thairis 'nur Cinnich san fheòil ris an abrar an neo-thimchioll-ghearradh leo-san d'an goirear an timchioll-ghearradh làmh-dheanta san fheòil;

12 Gu robh sibh san àm sin as eugmhais Chrìosd, 'nur coimhich do chomh-fhlaitheadh⁹ Israel, agus 'nur coigrich do choimh-cheanglaibh a' gheallaidh, as eugmhais dòchais, agus gun Dia anns an t-saoghal:

13 Ach a nis ann an Iosa Criosd, tha sibhse a bha roimh so fad o làimh, air bhur tòirt am fagus tre fhuil Chrìosd.

14 Oir is esan ar sìth-ne, a rinn aon *dhinn* araon, agus a bhris sìos balla meadhonach an eadar-dhealachaidh;

15 Air dha an naimhdeas a chur air cùl tre 'fheòil féin, *eadhon* lagh nan àith-eanta, a *chuireadh* sìos ann an orduighibh, chum gu'n deanadh e ann féin do dhithis aon duine nuadh, *mar sin* a' deanamh sìthe:

16 Agus gu'n deanadh e réidh faraon iad ri Dia ann an aon chorp tre a' chranncheusaidh, air dha an naimhdeas a mharbhadh le sin;

17 Agus thàinig e agus shearmonaich e sìth¹⁰ dhuibhse a bha am fad, agus dhoibhsan a bha am fagus.

18 Oir trid-san tha araon slighe againn gu dol a steach tre aon Spiorad chum an Athar.

19 A nis uime sin, cha'n 'eil sibh ni's mò 'nur coigrich agus 'nur coimhich, ach 'nur luchd aoin bhaile ris na naomhaibh, agus 'nur muinntir-teaghlach Dhé;

20 Agus tha sibh air bhur togail suas air bunait nan abstol agus nam fàidhean, air bhi do Iosa Criosd féin 'na *chloich*-chinn na h-òisinn;

21 Anns am bheil an aitreabh uile,

¹ taisbeanaidh.

² chum esan aideachadh.

³ Anns an robh sibh ag imeachd. ⁴ gnàthachaidh.

⁵ prionnsa.

⁶ na h-inntinn, a' cluridhe.

⁷ slànuchadh, saoradh, sàbhaladh.

⁸ saor-thabhartas.

⁹ chomh-chomunn.

¹⁰ sìothachaint.

ceangailte gu ceart r'a chèile, a' fàs suas chum bhi 'na teampull naomh san Tigh-earn :

22 Anns am bheil sibhse mar an ceudna air bhur comh-thogail suas chum bhi 'nur tigh-còmhnuidh do Dhia tre an Spiorad.

CAIB. III.

1 *Rinneadh an rùn-dìomhair, 6 gu'm biodh na Cinnich air an saoradh, fhoillseachadh do Phòl; 18 agus thugadh an gràs dhàsan sin a shearmonachadh: 13 dh'ìarr e air na Ephesianach gu iad a dh'fhanmachadh air son a thrioblaid-san.*

AIR an aobhar so, tha mise Pòl a'm' phrìosanach Iosa Crìosd, air bhur sonsa, a Chinneacha;

2 O chuala¹ sibh mu fhrithealadh gràis Dé, a thugadh dhomh-sa air bhur sonsa²:

3 Gu'n d'rinn e aithnichte dhomh tre fhoillseachadh³ an rùn-dìomhair, (mar a sgrìobh mi roimh gu h-aithghearr,

4 Leis am feud sibh, air dhuibh a leughadh, m'èolas ann an rùn-dìomhair Chrìosd a thuigsinn;)

5 Nì, ann an linnibh eile, air nach d'thugadh fios do chloinn nan daoine, mar a ta e nis air fhoillseachadh d'a abstolaibh naomha agus d'a fhàidhibh tre an Spiorad;

6 Gu'm biodh na Cinnich 'nan comh-òighreachaibh, agus 'nan comh-chorp, agus 'nan luchd-comhpairt d'a ghealladh-san ann an Crìosd, tre an t-soisgeul:

7 Air an d'rinneadh mise a'm' nìhinisteir, a réir tiodhlaic gràis Déa thugadh dhomh, a réir oibreachaidh éifeachdaich a chumhachd-san.

8 Dhomh-sa, a's lugha na'n ti a's lugha do na naomhaibh uile thugadh an gràs so, saoihbheas Chrìosd, nach feudar a rannsachadh, a shearmonachadh am measg nan Cinneach;

9 Agus gu'n deanainn soilleir do na h-uile *dhaoibh*, cìod e comunn an rùn-dìomhair sin, a bha folaichte ann an Dia o thoiseach an t-saoghail, a chruthaich na h-uile nithe tre Iosa Crìosd;

10 Chum gu'n deantadh aithnichte nis do na h-uachdaranachdaibh, agus do na cumhachdaibh ann an *ionadaibh* nèamhaidh, leis an eaglais, gliocas eagsamhuil⁴ Dhé,

11 A réir an rùn shiorruidh⁵ a rùnaich e ann an Iosa Crìosd ar Tighearn:

12 Anns am bheil againn dànachd agus slighe gu dol a steach ann am muinghin tre a chreidimh-san.

13 Uime sin tha mi ag iarraidh nach lagaich sibh á leth-mò thrioblaiden-sa air bhur son, ni a's e bhur glòir-sa.

14 Air an aobhar so tha mi a' lùbadh

mo ghluine do Athair ar Tighearna Iosa Crìosd,

15 Air an ainmichear an teaghlach uile air nèamh agus air talamh,

16 Gu'n deònaicheadh e dhuibh a réir saoihbheas a ghloire, bhi air bhur neartachadh gu treun⁶, tre a Spiorad-san anns an duine an leth stigh;

17 Ionnus gu'n gabh Crìosd còmhnuidh ann bhur cridhe tre chreidimh; chum air dhuibh bhi air bhur freumhachadh, agus air bhur stéidheachadh⁷ ann an gràdh,

18 Gu'm bi sibh comasach maille ris na naomhaibh uile, air a thuigsinn cìod e leud, agus fad, agus doimhne, agus àirde;

19 Agus air gràdh Chrìosd aithneachadh, a chaidh thar gach uile eòlas, chum gu'm bi sibh air bhur lìonadh le uile làn-achd Dhé.

20 A nis dhàsan d'an comas na h-uile nithe a dheanamh gu h-anabarrach ro phailt, thar gach ni a's urrainn sinne iarraidh no smuaineachadh, a réir a' chumhachd a ta 'g oibreachadh gu h-éifeachdach annainn,

21 Dhàsan gu robh glòir anns an eaglais tre Iosa Crìosd, air feadh gach uile linn, gu saoghal nan saoghal. Amen.

CAIB. IV.

1 *Dh'earlaich an t-abstol na Ephesianach chum aonachd; 7 agus chuir e an cèill gu'n d'thug Dia chum na crìche so tiodhlacan eagsamhuil do dhaoibh, 13 ionnus gu'm biodh 'eaglais air a togail, 16 agus gu'm fàsadh i suas ann an Crìosd.*

UIME sin, tha mise prìosanach an Tighearn. a' guidhe oirbh gu'n ghluais⁸ sibh gu cubhaidh do'n ghairm leis an do ghairmeadh sibh;

2 Leis gach uile irioslachd inntinn agus mhacantas, le fad-fhulangas, a' giùlan le chèile ann an gràdh;

3 A' deanamh dìchill air aonachd an Spioraid a choimhead ann an ceangal⁹ na sìthe.

4 *Is aon chorp agus aon Spiorad a ta ann*, amhuil mar an ceudna a ghairmeadh sibh aum an aon mhuinghin bhur gairme;

5 Aon Tighearn, aon chreidimh, aon bhaisteadh,

6 Aon Dia agus Athair nan uile, a tha os ceann nan uile, agus tre na h-uile, agus annaibh-sa uile.

7 Ach thugadh gràs do gach aon againn, a réir tomhais tiodhlaic Chrìosd.

8 Uime sin a ta e ag ràdh. Air dol suas da an àrd, thug e bruid am braighdeanas, agus thug e tiodhlacan do dhaoibh.

9 (A nis gu'n deachaidh e suas, cìod e ach gu'n deachaidh e air tús sìos gu ionadaibh iochdarach na talmhainn?)

¹ Ma chuala.

² d'ur taobhsa.

³ thaisbean.

⁴ ionadach-gnèitheach.

⁵ A réir roimh-shuidheachaidh nan linn.

⁶ le cumhachd.

⁸ imich, siubhail.

⁷ bonn-shuidheachadh.

⁹ comh-bhann.

10 An ti a chaidh sìos, is e sin féin e a chaidh suas mar an ceudna gu ro àrd os ceann nan uile neamh, chum gu'n lìonadh e na h-uile nìthe.)

11 Agus thug e dream àraidh gu bhì 'nan abstolaibh; dream eile, gu bhì 'nam fàidhibh; agus dream eile, gu bhì 'nan soisgeulaichibh; agus dream eile, gu bhì 'nan aodhairibh¹, agus 'nan luchd-teagaisg;

12 Chum na naoimh a dheasachadh² chum oibre na ministreileachd, chum togail suas cuirp Chrìosd:

13 Gus an tig sinn uile ann an aonachd a' chreidimh, agus eòlais Mhic Dhé, chum duine iomlain, chum tomhais àirde lànachd Chrìosd:

14 Chum as nach bi sinn á so suas 'nar leanabaibh, air ar tonn-luasgadh, agus air ar giùlan mu'n cuairt leis gach uile ghaoith teagaisg, le cleasachd dhaoine, agus seòltachd cealgach, leis am bheil iad gu h-innleachdach ri feall-fholach chum meallaidh:

15 Ach a' labhairt na fìrinu ann an gràdh, gu'm fàs sinn suas anns na h-uile nìlìbh chluige-san³, a's e an ceam, eadhon Crìosd:

16 O'm bheil an corp uile, air a cheangal gu ceart, agus air a dhlùthachadh tre an nì sin a tha gach alt a' toirt uaith, a réir oibreachaidh éifeachdaich ann an tomhas gach buill, a' faghail fàs cuirp, chum a thogail féin suas ann an gràdh.

17 So uime sin a ta mi ag ràdh, agus a' guidhe am fianuis an Tighearna, gun sibh a dh'imeachd á so suas mar a ta na Cinnich eile ag imeachd, ann an dìomhanas an inntinn féin;

18 Aig am bheil an tuigse air a dorchachadh, air dhoibh bhì 'nan còimhich do bheatha Dhé, thaobh an aineolais a ta anna, tre chruas an cridhe:

19 Muinntir, air dhoibh am mothachadh a chall, a thug iad féin thairis do mhìnaire⁴, chum gach uile neò-ghloine chur an gnìomh le cìoras.

20 Ach cha d'fhòghluim sibhse Crìosd mar so;

21 O chuala⁵ sibh e, agus o theagaisgeadh leis sibh, mar a ta an fhìrinn ann an Iosa:

22 Gu'n cuir sibh dlùibh, thaobh a' cheud chaithe-beatha, an seann duine, a tha truailidh a réir nan ana-miann cealgach;

23 Agus gu'm bi sibh air bhur n-ath-nuadhlachadh ann an spiorad bhur n-inntinn;

24 Agus gu'n cuir sibh umaibh an nuadh-dhuine, a tha air a chruthachadh a

réir Dhé am fireantachd agus am fìor-naomhachd.

25 Uime sin, air dhuibh a' bhreug a chur uaibh, labhraibh an fhìrinn gach neach r'a choimhearsnach: oir is buill sinn d'a chéile.

26 Biodh fearg oirbh, agus na peacaichibh: na luidheadh a' ghrian air bhur corr-uich:

27 Agus na tugaibh àit do'n diabhul.

28 An ti a ghoid, na goideadh e nì's mò: ach gu ma fearr leis saothair a dheanamh, ag oibreachadh an nì a ta maith le a làmhaidh, chum gu'm bi aige nì r'a phàrteachadh ris an neach air am bheil uireasbhuidh.

29 Na tigeadh cainnt thruailidh air bith mach as bhur beul, ach an nì sin a ta maith chum deadh-fhòghluim, ionnus gu'n toir e gràs do'n luchd-éisdeachd.

30 Agus na cuiribh doilgheas air Spiorad naomh Dhé, leis an do chuireadh seula oirbh gu là na saorsa.

31 Biodh gach uile sheirbhe, agus corr-uich, agus fearg, agus gàrrthaich⁶, agus toibheum⁷ air an togail uaibh, maille ris gach uile mhì-run.

32 Agus bithibh caomhneil teo-chridheach d'a chéile; a' toirt maitheanas d'a chéile, eadhon mar a thug Dia maitheanas dhuibh-se ann an Crìosd.

CAIB. V.

¹ An dèigh earailen coitichionn chum gràidh, 3 chum striopachas a sheachnadh, 4 agus na h-uile neò-ghloine, 7 gun chomhludair a chumail ri daoineibh aingidh, 15 imeachd gu faicilleach, 18 agus bhì air an lìonadh leis an Spiorad, 22 labhair Pòl mu dhèasdanasaibh fa leth.

UIME sin bithibh-sa 'nur luchd-leanmhuinn air Dia, mar chloinn ghràdhach;

2 Agus gluaisibh ann an gràdh, eadhon mar a ghràdhach Crìosd sinne, agus a thug se e féin air ar son, 'na thabhartas agus 'na òbairt deadh-fhàile do Dhia.

3 Ach na biodh striopachas, agus gach uile neò-ghloine, no sannt, uiread as air an ainmeachadh 'nur measg, mar is cubhaidh do naomhaibh:

4 No draosdach⁸, no còmhradh amaid-each, no bao-shùgradh, nìthe nach 'eil iomchuidh: ach gu ma fearr leibh breithbuidheachais.

5 Oir a ta fios agaibh air so, nach 'eil aig fear-striopachais air bith, no aig neach neò-ghlan, no aig duine sanntach, (a tha 'na fhear iodhol-aoraidh,) oighreachd ann an rioghachd Chrìosd agus Dhé.

6 Na mealladh neach air bith sibh le briathraibh dìomhain: oir air son nan

¹ buachaillibh. ² a dheanadh iomlan, a cheangal gu dìomhail r'a chéile.

³ ann san. ⁴ mhacnus.

⁵ Ma chuala.

⁷ anacainnt.

⁸ graosdachd, cainnt shalach.

nithe sin tha fearg Dhé a' teachd air cloinn na h-eas-ùmhachd.

7 Na bithibh-sa uime sin 'nur luchd-comhpairt riu.

8 Oir bha sibh uair-éigin 'nur dorchadas, ach a nis tha sibh 'nur solus san Tighearn: gluaisibh mar chloinn an t-soluis;

9 (Oir a ta toradh an Spioraid¹ anns an uile mhaithreas, agus ionracas, agus fhìrinn;)

10 A' dearbhadh ciod an ni a tha taitneach do'n Tighearn.

11 Agus na biodh comh-chomunn agaibh ri oibribh neo-tharbhach an dorchadais ach gu ma fearr leibh an cronachadh.

12 Oir is gràineil eadhon r'an innseadh leis an t-solus: oir gach uile ni a ni soilleir, is solus e.

13 Ach a ta na h-uile nithe a tha air an cronachadh, air an deanamh follaiseach leis an t-solus: oir gach uile ni a ni soilleir, is solus e.

14 Uime sin a ta e ag ràdh, Mosgail, thu-sa a tha a'd' chodal, agus éirich o na marbh-aibh, agus bheir Crìosd solus duit.

15 Feuchaibh uime sin gu'n gluais sibh gu faicilleach, cha'n ann mar amadain, ach mar dhaoine glie,

16 Ag ath-cheamach³ na h-aimsir, do bhrìgh gu bheil na làithean olc.

17 Air an aobhar sin na bithibh-sa neo ghlic, ach a' tuigsinn ciod i toil an Tighearn.

18 Agus na bithibh air mhìsg le fion, anns am bheil anabarr; ach bithibh air bhur lìonadh do'n Spiorad:

19 A' labhairt ribh féin⁴ ann an salm-aibh, ann an laoidhibh, agus ann an dàn-aibh spioradail, a' seinn agus a' deanamh ciùil 'nur cridhe do'n Tighearn:

20 A' toirt buidheachais a ghnàth air son nan uile nithe do Dhia, eadhon an t-Athair, ann an ainm ar Tighearna Iosa Crìosd;

21 Air dhuibh bhi ùmhal d'a chéile ann an eagal Dé.

22 A' mhnà, bithibh ùmhal do 'ur fear-aibh féin, mar do'n Tighearn.

23 Oir is e am fear ceann na mnà, eadhon mar is e Crìosd ceann na h-eaglais: agus is esà Slànuighear a' chuirp.

24 Uime sin, mar a ta'n eaglais ùmhal do Chrìosd, mar sin biodh na mnà d'am fearaibh féin mar an ceudna anns gach ni:

25 Fheara, gràdhaichibh bhur mnà féin, eadhon mar a ghràdhaich Crìosd an eaglais, agus a thug se e féin air a son;

26 Chum gu naomhaicheadh, agus gu'n glanadh e i le ionnlad an uisge tre an fhocal.

27 Chum gu'n cuireadh e 'na làthair féin i 'na h-eaglais ghloirmhoir, gun smal, gun phreasadh⁵, no ni air bith d'an leithidibh sin; ach chum gu'm biodh i naomh, agus neo-lochdach⁶.

28 Is amhluidh sin is còir do na fearaibh am mnà féin a ghràdhachadh, mar an cuirp féin: an ti a ghràdhaicheas a bhean, tha e 'ga ghràdhachadh féin.

29 Oir cha d'thug duine air bith riamh fuath d'a fheòil féin; ach altrumaidh agus eiridnidh⁷ e i, eadhon mar a ta an Tighearn a' deanamh do'n eaglais:

30 Oir is buill sinn d'a chorp, d'a fheòil, agus d'a chnàmhaibh-san.

31 Air an aobhar so fàgaidh duine 'athair agus a mhàthair, agus dlùth-leanaidh e r'a mhnà, agus bithidh an dithis 'nan aon fheòil.

32 Is dìomhaireachd mhòr so: ach tha mi a' labhairt mu Chrìosd agus an eaglais.

33 Gidheadh, thugadh gach aon agaibh-sa fa leth gràdh d'a mhnà, amhuil mar dha féin; agus feuchadh a' bhean gu'n toir i urram d'a fear.

CAIB. VI.

1 *Dleasdanas cloinne d'am pàrantaibh, 5 agus sheirbhiseach d'am maighstiribh. 10 Is cogadh ar beatha, 12 cha'n ann a mhnà an aghaidh fola agus fèda, ach mar an ceudna an aghaidh naimh-de spioradail. 13 Airm a' chrìosdaidh, 18 agus cionnus is còir an gnàthachadh.*

ACHLANN, bithibh ùmhal do 'ur pàrantaibh féin san Tighearn: oir a ta so ceart.

2 Thoir urram⁸ do t' athair agus do d' mhàthair, (is i so a' cheud àithne le gealladh.)

3 Chum gu'n éirich gu maith dhuit, agus gu'm bi thu fad-shaoghalach air an talamh.

4 Agus aithriche, na brosnuichibh bhur clann chum feirge: ach togaibh⁹ iad ann an oilean agus ann an teagasg an Tighearna.

5 A sheirbhiseacha, bithibh ùmhal do 'ur maighstiribh a réir na feòla, le h-eagal¹⁰ agus crith, ann an tréibhdhreas bhur cridhe, mar do Chrìosd:

6 Cha'n ann le suil-sheirbhis, mar dhream a ni toil dhaoine, ach mar sheirbhisich Chrìosd, a' deanamh toil Dé o'n chridhe;

7 Le deadh thoil a' deanamh seirbhis, mar do'n Tighearn, agus cha'n ann do dhaoibh:

8 Air dhuibh fios a bhi agaibh, ge b'e maith air bith a ni aon neach, gu'm faigh e an ni so féin o'n Tighearn ma's saor no daor e.

¹ an t-soluis.

² os ìosal.

³ A' fuasgladh.

⁴ 'nur measg féin, r'a chéile.

⁵ chasadh.

⁷ guillaichidh.

⁹ altrumaidh.

⁶ gun ghò.

⁸ onoir.

¹⁰ fàiteheas.

EPHESIANACH, VI.

9 Agus a mhaighstirean, deanaibh-sa na nìtle ceudna dhoibh-san, a' leigeadh dhìbh bagraidh: air dhuibh fios a bhi agaibh gu bheil blur maighstir fèin air nèamh mar an ceudna, agus nach 'eil gnùis-bhreth maille ris.

10 Fa dheoidh, mo bhràithre, bithibh làidir san Tighearn, agus ann an neart a chumhachd-san.

11 Cuiribh umaibh uile armachd Dhé, chum gu'm bi sibh comasach air seasamh an aghaidh cuilbheirtean an diabhuil.

12 Oir cha'n 'eil sinn a' gleachdadh a mhàin ri fuil agus feòil, ach ri uachdar-anachdaibh, ri cumhachdaibh, ri riaghlairibh dorchadais an t-saoghail so, ri aingidheachd spioradail¹ ann an ionad-aibh àrda².

13 Uime singlachaibh do 'ur n-ionnsuidh uile armachd Dhé, chum gu'm bi sibh comasach air seasamh an aghaidh a' bhuairidh san droch là, agus air dhuibh na h-uile nìthe a dheanamh, chum seasamh.

14 Seasaibh uime sin, air bhi do 'ur leasraidh air an crioslachadh³ le fìrinn, agus uchd-éididh na fireantachd⁴ umaibh;

15 Agus ulluchadh soisgeil na sìthe mar bhrògan agaibh air bhuir cosaibh;

16 Thar gach uile nì, a' glacadh do 'ur n-ionnsuidh⁵ sgéithe a' chreidimh, leis am bi sibh comasach air uile shaighde⁶ teinteach an droch Spioraid a mhuichadh.

17 Agus glacaibh clogaid na slàinte, agus claidheamh an Spioraid, nì a's e focal⁷ Dhé:

18 A' deanamh ùrnuigh a ghnàth leis gach uile ghnè ùrnuigh agus asluchaidh san Spiorad, agus a' deanamh faire chum an nì so fèin maille ris gach uile bhuanachadh, agus ghuidheadh air son nan naomh uile;

19 Agus air mo shonsa, chum gu toir-ear⁸ dhomh comas labhairt, le fosgladh mo bheòil ann an dànachd, chum gu foillsich mi rùn-dìomhair an t-soisgeil;

20 Air son am bheil mi a'm' theachdair ann an geimhlibh: chum gu labhair mi gu dàna uime, mar is còir dhomh labhairt.

21 Ach a chum gu'm bi fhios agaibh-sa mar an ceudna air na nithibh a bhuineas dhomh-sa, agus ciod a tha mi a' deanamh, foillsichidh Tichicus, bràthair gràdhach agus ministèir fìrinneach san Tighearn, na h-uile nìthe dhuibh:

22 Neach a chuir mi do 'ur n-ionnsuidh air son an aobhair so fèin, chum gu'm biodh fios nan nìthe a bhuineas duinne agaibh, agus gu'n tugadh e comhfhurtachd do 'ur cridhe.

23 Sith gu robh do na bràithribh, agus gràdh maille ri creidimh, o Dhia an t-Athair, agus an Tighearn Iosa Crìosd.

24 Gu robh gràs maille riu-san uile a ta gràdhachadh air Tighearna Iosa Crìosd ann an tréibhdhireas. Amen.

¹ droch spioradaibh.

³ criosrachadh.

² nèamhaidh.

⁴ an ionracais.

⁵ chugaibh.

⁷ briathar.

⁶ ghathan.

⁸ tiubhrar.

LITIR AN ABSTOIL PHOIL

CHUM NAN

PHILIPIANACH.

CAIB. I.

1 Chuir an t-abstol an cèill a bhuidheachas do Dhia, agus a ghràdh do na Philipianaich, air son toraidh an creidimh, agus an comhairt 'na fhulangas: 9 rinn e ùrnuigh a ghnàth ri Dia gu'm fasadh iad ann an gràs: 12 nochd e an tairbhe a fhuair creidimh Chrìosd o fhulangas-san ann an Ròimh.

POL agus Timoteus, seirbhisich Iosa Crìosd, chum nan naomh uile ann an Iosa Crìosd, a tha ann am Philippi, maille ris na easbuigibh¹ agus ris na deaconaibh²;

2 Gràs duibh agus sìth o Dhia an Athair, agus o'n Tighearn Iosa Crìosd.

3 Tha mi toirt buidheachais do m' Dhia gach uair a chuimhniceas mi oirbh,

4 A ghnàth ann am uile ùrnuighibh air bhuir sonsa uile, le gàirdeachas a' deanamh guidhe,

5 Air son bhuir comh-roinn do'n t-soisgeul, o'n cheud là gus a nis;

6 Air dhomh bhi dearbhta as an nì so fèin, eadhon an ti a thòisich deadh obair annaibh, gu'n coimhlon e i gu là Iosa Crìosd:

7 Eadhon mar is còir dhomh so a smuaineachadh umaibh uile, do bhrìgh gu bheil sibh agam ann mo chridhe, agus gu bheil sibh uile 'nur luchd comh-roinn do m' ghràs-sa, araon ann mo gheimhlibh, agus ann an seasamh air son, agus ann an daingneachadh an t-soisgeil.

¹ luchd-coimhid.

² luchd-frithealaidh, foirfeachaibh.

PHILIPIANACH, I.

8 Oir is e Dia m'fhlìanuis, cia mòr mo dhéidh oirbh uile, aun an innibh Iosa Criosd.

9 Agus a ta mi a' guidhe so, gu'm biodh bhuir gràdh-sa air a mhendachadh nì's mò agus nì's mò ann an eòlas, agus ann an uile thuigse:

10 Chum gu'n dearbh sibh na nithe a's fearr¹; chum gu'm bisibh tréibhdhireach, agus gun tuisleadh² gu là Chriosd;

11 Air bhuir lìonadh le toraibh na fir-eantachd, a tha tre Iosa Criosd chum glòire agus cliù Dhé.

12 Ach is àill leam, a bhràithre, fios a bhi agaibh, na nithe a tharladh dhomh-sa, gur mò a dh'éirich leo an soisgeul a chur air aghaidh:

13 Ionnus gu bheil mo gheimhlean-sa ann an Criosd iomraideach anns an lùch-airt uile, agus anns gach àit eile;

14 Agus gu bheil mòran do na bràithre-bh san Tighearn a' gabhail misnich o m' gheimhlibh, leis an tuilleadh mòrdhànachd a' labhairt an fhocail³ gun eagal.

15 Tha cuid gu dearbh a' searmonachadh Chriosd tre fharmaid agus strì, agus cuid eile tre dheadhail.

16 Tha aon dream a' searmonachadh Chriosd tre chonnspoid, cha'n ann gu tréibhdhireach, a' saòilsinn àmhghar a chur ri m' gheimhlibh-sa:

17 Ach an dream eile o ghràdh, air dhoibh fios a bhi aca gu'n do chuireadh mise gu seasamh air son an t-soisgeil.

18 Ciod ma'ta? gidheadh air gach aon cltor, co aca is ann an coslas a mhàin, no da rìreadh, tha Criosd air a shearmonachadh; agus air a shon so tha mise a' deanamh gairdeachais, seadh, agus ni mi gairdeachas.

19 Oir a ta fhios agam gu'n tig so chum slàinte⁴ dhomh-sa tre bhuir n-ur-nuigh-sa, agus tre fhrithealadh Spioraid Iosa Criosd,

20 A réir mo ro-dhùil⁵, agus mo dhòchais, nach cuirear nàire orm ann an ni air bith, ach leis an uile dhànachd labhairt, mar a ghnàth, gu'm bi Criosd a nis mar an ceudna air àrdachadh a'm' chorp-sa, ma's ann tre bheatha no tre bhàs.

21 Oir dhomh-sa bli beò is e sin Criosd, agus bàs fhaotainn⁶ is buannachd dhomh so.

22 Ach ma's beò dhomh san fheòil, 's e so toradh m' oibre: ach ciod d'an deanainn roghainn, cha'n fhios domh.

23 Oir tha mi air mo theannachadh eadar dhà ni, air dhomh bhi togarrach

air siubhal, agus bhi maille ri Criosd; oir is e so a's ro fhearr:

24 Gidheadh, 's e mi dh'fhantuinn san fheòil a's feumaidhe dhuibh-se.

25 Agus air dhomh bhi cinnteach dheth so, tha fhios agam gu'm fuirich mi agus gu'n còmhnuich mi maille ribh uile, chum bhuir cur-sa air bhuir n-aghaidh, agus chum gairdeachais a' chreidimh⁷:

26 Chum gu'm gi bhuir gairdeachas nì's pailte ann an Iosa Criosd do m' thaobh-sa, air son mi bhi a rìs a làthair maille ribh.

27 A mhàin caithibh bhuir beatha gu cubhaidh do shoisgeul Chriosd: chum co aca a thig mi agus a chi mi sibh, no a bhios mi as làthair, gu'n cluinn mi mu 'ur timchioll, gu bheil sibh a' seasamh gu daingean ann an aon spiorad, le aon inn-tinn, a' gleacadh le chéile air son creidimh an t-soisgeil;

28 Gun gheilt⁸ ann an ni sam bith oirbh o bhuir naimhdibh: ni a ta dhoibh-san 'na chomhara cinnteach air sgrios, ach dhuibh-se air slàinte, agus sin o Dhia.

29 Oir thiodhlaiceadh⁹ dhuibh-se air son Chriosd, cha'n e mhàin creidsinn ann, ach mar an ceudna fulang air a shon;

30 Air dhuibh an comhrag ceudna bhi agaibh a chunnaic sibh annam-sa, agus a tha sibh a nis a' cluiuntinn a bhi annam.

CAIB. II.

1 Dh'earalaich Pòl na Philipianaich chum aonachd agus irioslachd inntinn, le eisempleir isleachaidh agus àrdachaidh Chriosd; 12 chum iad a dhol air an aghaidh gu cìramach ann an slighe na slàinte, ionnus gu'm biodh iad 'nan solus do'n t-saoghal aingidh, 16 agus nan comhfhurtachd dhàsan an abstol-san.

UIME sin, ma tha comhfhurtachd air bith ann an Criosd, ma tha sòlas air bith gràidh, ma tha comh-chomunn air bith an Spioraid, ma tha truas¹⁰ air bith agus tròcair;

2 Coimhlionaibh mo ghàirdeachas, gu'm bi sibh a dh'aon inntinn, a dh'aon ghràdh, a dh'aon toil, a dh'aon bhreithueachadh¹¹.

3 Na deanar aon ni tre chonnspoid, no tre ghloir dhìomhain, ach ann an irioslachd inntinn measadh gach aon gur fearr neach eile na e féin.

4 Na seallaibh gach aon air na nithibh sin a bhuineas da féin, ach gach aon air na nithibh a bhuineas do dhaoibh eile mar an ceudna.

5 Uime sin biodh an inntinn cheudna annaibh-sa, a bha ann an Iosa Criosd:

6 Neach air bhi dha ann an cruth Dhé,

¹ a tha eadar-dhealaichte.

² gun bhi 'nur n-aobhar oilbheim.

³ focail (Dé.)

⁵ m'càrsa.

⁴ saorsa.

⁶ fhagail.

⁷ chum cur air aghaidh bhuir creidimh agus bhuir gairdeachais.

⁸ namhas, eagal, ghorag.

⁹ thugadh gu saor.

¹¹ tiom-chridheachd.

¹⁰ toirt aire do'n aon ni.

nach do mheas e 'na reubainn e féin bhi comh-ionann ri Dia:

7 Ach chuir se e féin ann an dímeas¹, a' gabhail air féin cruth seirbhisich, air a dheanamh ann an coslas dhaoine:

8 Agus air dha bhi air fhaghail ann an cruth mar dhuine, dh'írosalaich se e féin, agus bha e ùmhail gu bàs, eadhon bàs a' chroinn-cheusaidh.

9 Air an aobhar sin dh'àrdaich Dia e gu ro àrd mar an ceudna, agus thug e dha ainm os ceann gach uile ainme:

10 Chum do ainm² Iosa gu'n lùbadh gach glùn, do *nithibh a ta* air nèamh, agus do *nithibh a ta* air thalamh, agus do *nithibh a ta* fo 'n talamh;

11 Agus gu'n aidicheadh gach teangadh gur e Iosa Crìosd an Tighearn, chum glòire Dhé an Athar.

12 Uime sin, a mhuinntir mo ghràidh, mar a bha sibh ùmhail a ghnàth, cha'n e a mhàin a'm' làthair-sa, ach nì's ro mhò as mo làthair, làn-oibrichibh bhur slàinte féin le h-eagal agus ball-chrith.

13 Oir is e Dia a dh'oibrichneas annaibh, araon an toil agus an gnìomh³ a réir a dheadh-ghean féin.

14 Deanaibh na h-uile nithe gun ghearn⁴, agus gun deasboireachd:

15 Chum gu'm bi sibh neo-choireach, agus neo-chronail⁵, 'nur cloinn do Dhia, neo-lochdach, an meadhan ginealaich fhiair agus chrosda⁶, measg am bheil sibhse a' dealrachadh mar lòchrain sholuis san t-saoghal;

16 A' cumail a mach⁷ focail na beatha; chum gu'n dean mise uail ann an là Chrìosd, do bhrìgh nach do ruith mi gu dìomhain, agus nach do shaothraich mi gu dìomhain.

17 Seadh agus ma dh'ìobrar mi air ìobairt agus seirbhis fhollaiseach bhur creidimh-sa, tha aoibhneas orm, agus tha mi a' deanamh gàirdeachais maille⁸ ribhse uile.

18 Air an dòigh cheudna biodh aoibhneas oirbh-se, agus deanaibh gàirdeachas maille rium-sa.

19 Ach a ta dòchas agam anns an Tighearn Iosa, Timoteus a chur gu goirid do 'ur n-ionnsuidh, chum gu'm bi mise mar an ceudna ann an deadh mhisnich, air dhomh fios fhaotainn ciod is cor dhuibh-se.

20 Oir cha'n 'eil duine air bith agam comh-ionann intinn *ris-san*, air am bi cùram nan nithe a bhuineas dhuibh-se gu dùrachdach.

21 Oir tha na h-uile ag iarraidh nan nithe a bhuineas doibh féin, cha'n iad na

nithe a bhuineas do Iosa Crìosd.

22 Ach is aithne dhuibh a dhearbhadh-san, mar mhac d'a athair, gu'n d'rinn e seirbhis maille rium-sa anns an t-soisgeul.

23 Uime sin tha dùil agam esan a chur do 'ur n-ionnsuidh air ball, co luath as a chi mi ciod is cor dhomh féin.

24 Ach tha earbsa agam anns an Tighearn, gu'n tig mi féin do 'ur n-ionnsuidh gu h-aithghearr mar an ceudna.

25 Gidheadh mheas mi gu'm b'fhcmail Epaphroditus mo bhràthair, agus mo chomh-oibriche, agus mo chomh-shaighdear, ach bhur teachdair-sa, agus an ti a fhrithheil do m'uireasbhuidh, a chur do 'ur n-ionnsuidh.

26 Oir bha déidh mhòr aige oirbh uile, agus bha e làn tuirse, do bhrìgh gu'n cuala sibhse gu'n robh e tinn.

27 Agus gu deimhin bha e tinn fagus do'n bhàs: gidheadh rinn Dia tròcair air; agus cha b'ann airs an a mhàin, ach ormsa mar an ceudna, chum nach biodh doilgheas air muin doilgheis orm.

28 Uime sin bu togarraiche a chuir mi do 'ur n-ionnsuidh e, chum air dhuibh fhaicinn a ris, gu'm biodh aoibhneas oirbh, agus gu'm bu lughaid mo dhoilgheas-sa.

29 Air an aobhar sin, gabhaibh ris san Tighearn leis an uile aoibhneas, agus biodh meas mòr agaibh air an leithidibh sin:

30 Do bhrìgh, air son oibre Chrìosd, gu robh e dlùth do'n bhàs, agus nach robh suim aige d'a bheatha⁹ féin, chum gu'n deanadh e suas uireasbhuidh bhur seirbhis-sa do m' thaobh-sa.

CAIB. III.

¹ Thug Pòl rabhadh do na Philipianach iad bhi air am faicill o luchd-teagaisg brèige an timchioll-ghearraidh; ⁴ nochd e gu bheil aige féin tuilleadh aobhair na aca-san, earbsadh á fireantachd an lagha; ⁷ nì gidheadh mheas e mar aolach agus chail chum Iosa Crìosd agus 'fhireantachd-san a chosnadh.

OS bàrr, mo bhràithre, deanaibh gairdeachas san Tighearn. Gu deimhin cha leasg¹⁰ leam-sa na nithe ceudna a sgriobhadh do bhur n-ionnsuidh, ach dhuibh-se tha so tèaruinte¹¹.

2 Bithibh air bhur faicill o mhadraibh, bithibh air bhur faicill o dhroch luchd-oibre, coimhidibh sibh féin o'n chomh-ghearradh.

3 Oir is sinne an timchioll-ghearradh, a ta deanamh aoraidh do Dhia san Spiorad, agus a' deanamh gàirdeachais ann an Iosa Crìosd, agus nach 'eil a cur muinghin san fheadil:

¹ dh'fholamhuich se e féin.

² ann an ainm.

³ an deanamh.

⁴ mhonmhor.

⁵ glan, neo-thruaillidh.

⁶ tharsuing

⁸ maraon.

¹⁰ chruaidh, doilich.

⁷ os àird.

⁹ anam.

¹¹ sàbhailta.

4 Ged dh'fheudainn-sa mar an ceudna muinghin bhi agam san fheòil. Ma shaoileas aon neach eile gu'm feud e muinghin a chur san fheòil, is mò *na sin a dh'fheudas mise* :

5 Air mo thimchioll-ghearradh air an ochdamh là, do chinnreach Israeil, do thréibh Bheniamin, a'm¹ Eabhruidheach do na h-Eabhruidlich ; a réir an lagha, a'm² Phairiseach ;

6 A thaobh eud, a' deanamh geur-leanmhuinn air an eaglais ; a réir na fireantachd a ta san lagh, neo-choireach.

7 Ach na nithe a bha 'nam buannachd dhomh, mheas mi iad sin 'nan call air son Chriosd.

8 Seadh gun amharus, agus tha mi a' meas nan uile nithe 'nan call, air son ro òirdheirceis³ eòlais Iosa Chriosd mo Thigh-earna : air son an d' fhuiling mi call nan uile nithe, agus tha mi a' meas gur aolach iad chum gu cosnain² Chriosd,

9 Agus gu faighear ann-san mi, gun m'fhìreantachd féin agam, a ta o'n lagh, ach *an fhìreantachd* sin a ta tre chreidimh Chriosd, an fhìreantachd a ta o Dhia tre chreidimh :

10 Chum eòlas a bhi agam airsan, agus air cumhachd 'aiseirigh-san, agus air comh-chomunn 'fhuilangais, air bhi dhomh air mo chur ann an coslas crutha r'a bhàs³ ;

11 Dh'fheuchainn am feudainn air aon chor teachd chum aiseirigh nam marbh.

12 Cha'n e gu'n d'ràinig mi cheana, no gu bheil mi cheana foirfe : ach tha mi a' leantuinn, dh'fheuchainn am faigh mi greim do'n ni sin féin air son an do ghabhadh greim dhiom le Iosa Chriosd.

13 A bhràithre, cha'n 'eil mi a' meas gu'n do ghlac mi greim : ach aon ni *a ta mi a' deanamh*, air dhomh na nithe a ta air mo chùl a dhì-chuimhneachadh, agus bhi 'g am shineadh féin chum nan nithe a ta romham,

14 Tha mi a' dian-ruith dh'ionnsuidh a' chomhara, chum duaise⁴ àrd-ghairme Dhé ann an Iosa Chriosd.

15 Uime sin, mheud dhinne 's a ta dìongmhalta, biodh an inntinn so againn : agus ma tha sibh ann an ni sam bith air atharrachadh inntinn, foillsichidh Dia an ni so féin duibh.

16 Gidheadh, an ni air an d'ràinig sinn a cheana, gluaisemaid a réir aoìn riaghailt, bitheamaid a dh'aon iuntinn.

17 A bhràithre, bithibh-sa le chéile 'nur luchd-leanmhuinn ormsa, agus thugaibh an aire dhoibh-san a tha gluasad air an dòigh sin mar a ta sinne 'nar n-eisempleir agaibh.

18 (Oir a ta mòran a' gluasad, mu'n dubhairt mi gu minic ribh, agus mu'n bheil mi nis, eadhon a' gul, ag ràdh ribh, gur naimhdean iad do chrann-ceusaidh Chriosd :

19 D'an deireadh bhi air an sgrios, d'an dia am brù ; agus aig am bheil an glòir 'nan nàire, aig am bheil an aire air nithibh talmhaidh.)

20 Oir a ta ar caithe-beatha-ne⁵ air nèamh, an t-ionad as am bheil dùil againn fòs ris an t-Slànuighear, an Tighearn Iosa Chriosd ;

21 A chruth-atharraicheas ar corp diblidh, chum gu'n deanar e comh-chosmhuil r'a chorp glòrmhor féin, a réir an oibreachaidh leis am bheil e comasach air na h-uile nithe a chur fo cheannsal féin.

CAIB. IV.

1 O chomhairlibh mionaideach, 4 chaidh an t-abstol air aghaidh chum earailean coitchionn ; 10 nochd e cionnus a rinn e gairdeachas air son an talhartais dha, agus e 'na luidhe am prìosan ; 19 agus chrìochnaich e le h-urnuigh agus beannachdaibh.

UIME sin, mo bhràithre gràdhach agus air am bheil mo dhéidh, m'aoibhneas agus mo chrùn, seasaihb mar so gu daingean san Tighearn, a mhuinntir mo ghràidh.

2 Tha mi a' guidhe air Euodias, agus tha mi a' guidhe air Sintiche, iad a bhi dh'aon inntinn san Tighearn.

3 Agus tha mi ag iarraidh ortsa mar an ceudna, a chompanaich dhileis, dean còmhnaidh ris na mnàibh sin a rinn saoth-air maille rium-sa san t-soisgeul, maille ri Clemens, agus a' chuid eile do m' chomhoibrichibh, aig am bheil an ainmean ann an leabhar na beatha.

4 Deanaihb gairdeachas san Tighearn a ghnàth : a ris a ta mi ag ràdh, Deanaihb gairdeachas.

5 Biodh bhur measarrachd⁶ follaiseach do na h-uile dhaoinibh. *Tha'n* Tighearn am fagus.

6 Na biodh ro-chùram ni sam bith oirbh : ach anns gach uile ni le h-urnuigh agus asluchadh maille ri breith-buidheachais, biodh bhur n-iarttuais air an deanamh aithnichte do Dhia.

7 Agus coimhididh sìth Dhé, a ta thar gach uile thuigse, bhur cridhe agus bhur n-inntinn ann an Iosa Chriosd.

8 Fa dheoidh, a bhràithre, ge b'e nithe ta fìor, ge b'e nithe ta urramach⁷, ge b'e nithe ta ceart, ge b'e nithe ta fìor-ghlan, ge b'e nithe ta ion-ghràidh⁸, ge b'e nithe ta ionmholtas ; *ma tha* deadh-bheus⁹ air bith ann, ma *tha* moladh air bith ann, smuainichibh air na nithibh sin.

9 Na nithe sin araon a dh'fhòghluim,

¹ ro phrìsealachd.

² gur e mo bhuanachd.

³ air mo dheanamh a réir a bhàis.

⁴ gill.

⁵ giùlan, conbharsaid.

⁶ cothrom, ciùineas.

⁷ ciutach. ⁸ a ta gràdhach, càirdèil. ⁹ subhailc.

PHILIPIANACH, IV.

agus a ghabh sibh, agus a chual agus a chunnaic sibh annam-sa, deanaibh : agus bithidh Dia na sìthe maille ribh.

10 Ach rinn mi gàirdeachas gur mòr san Tighearn do bhrìgh gu'n d'ath-ùraicheadh nis fa dheireadh bhur cùram uman-sa; ni mar an ceudna anns an robh sibh cùramach, ach cha robh cothrom agaibh.

11 Cha'n e gu bheil mi a' labhairt¹ a thaobh uireasbhuidh: oir dh'fhòghluim mi, ge b'e staid am bheil mi, bli toilichte.

12 Is aithne dhomh bhi ìosal, agus is aithne dhomh mar an ceudna pailteas a mhealtuinn: anns gach àit, agus anns na h-uile nithibh theagaisgeadh mi, araon a bhi sàthach agus ocrach, araon pailteas a shealbhadh agus uireasbhuidh fhulang.

13 Is urrainn mi na h-uile nithe a dheanamh tre Chrìosd, a neartaicheas mi.

14 Gidheadh, is maith a rinn sibh gu'n do chomh-phàirtich sibh ri m' thrioblaid.

15 Agus a nis biodh fhios agaibh-sa, a Philipianacha, ann an toiseach an t-soisgeil, nuair a dh'fhàg mi Macedonia, nach do roinn eaglais air bith rium-sa,

thaobh tabhairt agus gabhail, ach sibhse a mhàin.

16 Oir eadhon ann an Tesalonica chuir sibh aon uair agus a ris a m' ionnsuidh leasachadh do m' uireasbhuidh.

17 Cha'n e gu bheil mi ag iarraidh tabhartais: ach a ta mi ag iarraidh toraidh a bhios pailte chum bhur cunntais-sa.

18 Ach a ta mi sealbhachadh nan uile nithe, agus tha pailteas agam: lìonadh mi, air dhomh na nithe fhaotainn o Epaphroditus a *chuireadh* uaibh-sa, fàile deadh-chùbhraidh², iobairt thaitneach, anns am bheil tlachd aig Dia.

19 Ach leasaichidh mo Dhia-sa bhur n-uireasbhuidh uile, a réir a shaoibhreis ann an glòir, tre Iosa Crìosd.

20 A nis do Dhia agus ar n-Athair-ne *gu robh* glòir gu saoghal nan saoghal. Amen.

21 Cuiribh fàilte air gach uile naomh ann an Iosa Crìosd. Tha na bràithrean a tha maille rium, a' cur fàilte oirbh.

22 Tha ua naoimh uile a' cur fàilte oirbh, gu h-àraidh iadsan a tha do theaghlach Cheasair.

23 Gràs ar Tighearna Iosa Crìosd *gu robh* maille ribh uile. Amen.

¹ Ni h-e gu'n labhran.

² fàile deadh-bholaidh

LITIR AN ABSTOIL PHOIL

CHUM NAN

COLOSIANACH.

CAIB. I.

1 An dèigh fàilte chur air na Colosianaich, thug Pol buidheachas do Dhia air son an creidimh, 7 dhaingnich e teagasg Epaphraiss, 9 ghuidh e gu'm biodh an gràs air a mheudachadh, 14 chuir e an cèill cò e am fìor Chrìosd, 21 agus thug e misneach dhoibh gu gabhail ri Crìosd.

POL abstol Iosa Crìosd tre thoil Dé, agus Timoteus ar bràthair

2 Chum nan naomh agus nam bràthar dileas ann an Crìosd, a tha ann an Colose: Gràs *gu robh* dhuibh, agus sìth o Dhia ar n-Athair, agus o'n Tighearn Iosa Crìosd.

3 Tha sinn a' toirt buidheachais do Dhia, agus Athair ar Tighearna Iosa Crìosd, a' sìor-dheanamh ùrnuigh air bhur son-sa;

4 O chuala sinn iomradh bhur creidimh ann an Iosa Crìosd, agus *bhur* gràidh do na naomhaibh uile;

5 Air son an dòchais a ta air a thasgaidh fa 'ur comhair air nèamh, air an

cuala sibh iomradh roimh ann am focal firinn an t-soisgeil:

6 A thàinig do 'ur n-ionnsuidh-sa, mar anns an t-saoghal uile; agus a tha toirt toraidh uaith, mar a *ta* e *deanamh* mar an ceudna 'nur measg-sa¹, o'n là anns an cuala sibh e, agus san d'fhuair sibh eòlas air gràs Dhé ann am firinn.

7 A réir fòs mar a dh'fhòghluim sibh o Epaphras ar comh-sheirbhiseach gràdhach-ne, a tha air bhur son-sa 'na mhinisteir dileas do Chrìosd;

8 A chuir an cèill dhuinne mar an ceudna bhur gràdh-sa anns an Spìorad.

9 Air an aobhar so, cha'n 'eil sinne mar an ceudna a' sgur o'n là a chuala sinn e, do dheanamh ùrnuigh air bhur son-sa, agus a ghuidheadh gu'm biodh sibh air bhur lìonadh le eòlas a thoile, san uile ghliocas agus thuigse spìoradail;

10 Chum gu'n ghluaisidh sibh gu cubhaidh do'n Tighearn chum gach uile thoileachaidh², a' toirt toraidh uaibh san uile

¹ annaibh-se.

² chum a thoileachadh sna h-uile nithibh.

dheadh obair, agus a' fàs ann an còlas Dé;

11 Air bhur neartachadh leis an uile neart a réir a chumbachd ghlòrmhoir-san, chum an uile fhoighidinn agus fhad-fhuil-angais maille ri gairdeachas.

12 A' tabhairt buidheachais do'n Athair, a rinn sinne iomchuidh chum bhi 'nar luchd-comhaird do oighreachd nan naomh san t-solus:

13 A shaor sinn o chumbachd an dorchadais, agus a dh'atharraich sinn chum rioghachd Mic a ghràidh-san:

14 Anns am bheil againn saorsa tre 'fhuil-san, eadhon maitheanas nam peacadh:

15 Neach a's e Ìomhaigh¹ an Dé neo-fhaicsinnich, ceud-ghin a' chruthachaidh uile²:

16 Oir is ann leis-san a chruthaicheadh na h-uile nithe a ta air nèamh, agus a ta air talamh, faicsinneach agus neo-fhaicsinneach, ma's àrd-chaitheirichean iad, no tighearnais, no uachdaranachda, no cumhachda; is ann leis-san agus air a shon-san a chruthaicheadh na h-uile nithe:

17 Agus tha esan roimh na h-uile nithibh, agus trid-san tha na h-uile nithe a' comh-sheasamh.

18 Agus is e ceann a' chuirp, eadhon na h-eaglais: neach a's e an toiseach, an ceud-ghin o na marbhaibh; chum gu'm biodh aige àrd-cheannas anns na h-uile.

19 Oir b'e deadh thoil an Athar, gu'n còmhnuicheadh gach uile iomlanachd annsan;

20 Agus gu'm biodh na h-uile air an deauamh réidh ris féin trid-san, air dha sìth a dheanamh tre fhuil a chroinn-cheusaidh-san; trid-san, a ta mi ag ràdh, ma's nithe iad a ta air talamh, no nithe a ta air nèamh.

21 Agus sibhse a bha uair-éigin 'nur coimhich, agus 'nur naimhdibh ann bhur n-inntinn thaobh dhroch oibre, nis rinn e réidh ris féin.

22 Ann an corp 'fheòla féin tre'n bhàs, chum sibhse a chur naomha, agus neo-lochdach, agus neo-choireach, 'na làthair-san:

23 Ma dh'fhanas sibh anns a' chreidimh bunaiteach³ agus daingean, gun bhi air bhur n-atharrachadh o dhòchas an t-soisgeil, a chuala sibh, agus a shearmonaicheadh do gach uile chreutair a ta fuidh nèamh; air an d'rinneadh mise Pòl a'm' mhinisteir.

24 Tha mi nis a' deanamh gairdeachais ann am fhulangasaibh air bhur sonsa, agus a' coimhlionadh mheud 's a ta dhéigh-làimh do àmhgharaibh Chrìosd

ann am fheòil, air son a chuirp-san, eadhon na h-eaglais:

25 D'an-d'rinneadh mise a'm' mhinisteir, a réir stiùbhardachd Dhé a thugadh dhomh air bhur son-sa, a choimhlionadh focail Dé;

26 Eadhon an rùn-diomhair a bha folachte o na linnibh, agus o na ginealach-aibh a chaidh seachad, ach a nis a tha air fhoillseachadh d'a naomhaibh-san:

27 D'am bu toil le Dia fhoillseachadh ciod e saoihbreas glòire an rùn-diomhair so am measg nan Cinneach; neach a's e Crìosd annaibh-san, dòchas⁴ na glòire;

28 Neach a ta sinne a' searmonachadh, a' toirt rabhaidh do gach duine, agus a' teagasg gach uile dhuine anns an uile ghliocas; chum gu nochd sinn gach uile dhuine 'na làthair-san iomlan ann an Iosa Crìosd:

29 An ni chum am bheil mise mar an ceudna a' saoihtreachadh, a' deanamh sbairn a réir 'oibreachaidh-san, a tha 'g oibreachadh annam gu cumhachdach.

CAIB. II.

1 Dh'earalaich Pòl na Colosianach a bhi bunait-each ann an Crìosd, 8 agus a bhi air am faicill o bheul-aithrisibh-diomhair, 18 o aoradh do ainglibh, 20 agus o dheas-ghnàthachaidh an lagha, nithe a chrìochnaicheadh ann an Crìosd.

OIR b'aill leam fios a bhi agaibh ciod e meud mo chòmhaig air bhur sonsa, agus air son na dream a ta ann an Laodicea, agus air son a mheud nach fhaca m'aghaidh anns an fheòil:

2 Ionnuis gu'm faigheadh an cridhe sòlas, air dhoibh bhi air an dlùth-cheangal r'a chèile ann an gràdh, agus chum uile shaoibhreis an làn dearbh-bheachd tuigse, chum eòlais⁵ rùn-diomhair Dhé, eadhon an Athar, agus Chrìosd;

3 Anns am bheil uile ionmhais a' ghliocais agus an eòlais folachte.

4 Agus so a ta mi ag ràdh, air eagal gu mealladh neach air bith sibh le briathraibh tairngeach⁶.

5 Oir ged tha mi uaibh san fheòil, gidheadh a ta mi maille ribh san Spiorad, a' deanamh gairdeachais⁷, agus a' faicinn bhur n-orduigh, agus seasmhachd⁸ bhur creidimh ann an Crìosd.

6 Uime sin mar a ghabh sibh do 'ur n-ionnsuidh an Tighearn Iosa Crìosd, gluaisibh ann:

7 Air dhuibh bhi air bhur freumhachadh agus air bhur togail suas annsan, agus air bhur daingneachadh sa' chreidimh, a réir mar a theagaisgeadh sibh, a' meudachadh ann le breith-buidheachais.

8 Thugaibh an aire nach dean neach

¹ coslas, riochd.

² stéidhichte.

³ nan uile chreutair.

⁴ muinghin.

⁵ aithmheil.

⁷ aoibhneis.

⁶ seòlta, drùiteach.

⁸ daingneachd.

air bith foinneart oirbh¹ tre fheallsanachd² agus mealltaireachd dhìomhain, a réir beul-aithris³ dhaoine, a-réir ceud-thoiseacha an t-saoghail, agus cha'n ann a réir Chrìosd:

9 Oir annsan tha uile iomlanachd⁴ na diadhachd a' gabhail còmhnuidh gu cor-porra.

10 Agus tha sibhe coimhionta annsan, neach a's e ceann gach uile uachdaranachd agus chumhachd;

11 Anns am bheil sibh mar an ceudna air bhur timchioll-ghearradh leis an timchioll-ghearradh nach d'rinneadh le làmh-aibh, ann an cur dhibh cuirp pheacanna na feòla, le timchioll-ghearradh Chrìosd:

12 Air dhuibh bhì adhlaichte maille ris ann am baisteadh, anns am bheil sibh mar an ceudna air bhur togail suas maille ris tre chreidimh oibreachaidh Dhé, a thog suas esan o na marbhaibh.

13 Agus sibhe a bha marbh⁵ 'nur n-euceartaibh agus ann an neo-thimchioll-ghearradh bhur feòla bheothaich e maille ris, a maitheadh dhuibh nan uile euceart;

14 A' dubhadh a mach làmh-sgrìobhaidh nan orduighean do ar taobh-ne⁶, a bha 'nar n-aghaidh, agus thug e as an t-slighe i, air dha a sparradh ri a chrann-ceusaidh-san:

15 Air dha uachdaranachdan agus cumhachdan a chreachadh⁷, rinn e ball-sampuill diubh gu follaiseach, a' deanamh buaidh-chaitheirm os an ceann tre'n chrann ud féin.

16 Uime sin na tugadh aon neach breth oirbh air son bith, no dìbhe, no thaobh là féille, no gealaich nuaidhe, no shàbaide:

17 A ta 'nan sgàile air na nithibh a ta ri teachd; ach is le Crìosd an corp.

18 Na mealladh aon neach bhur duais uaibh le irioslachd thoileil⁸, agus aoradh do ainglibh, a' foinneadh a steach gu dàna chum nan nithe⁹ nach fac e, gu dìomhain air a shéideadh suas le 'inntinn fheòlmhoir féin;

19 Agus gun an ceann a chumail, o'm bheil an corp uile, air dha bhì air a bheathachadh tre altaibh agus bhann-aibh, agus air a dhùth-cheangal r'a chéile, a' fàs le fàs Dé.

20 Uime sin na fhuair sibh bàs maille ri Crìosd o chend-thoiseachaibh an t-saoghail, c'ar son, mar dhaoine a ta beò san t-saoghal, a tha sibh fuidh orduighibh,

21 (Na bean ri, na blais, na làimhsich;

22 Nithe a théid uile a neo-ni le'n gnàthachadh,) a réir àitheantan agus

teagasga dhaoine?

23 Nithe gun amharus aig am bheil samhhladh gliocais ann an aoradh féin-thoile agus irioslachd, agus mi-chaoimhnadh a' chuirp, cha'n ann an urram sam bith chum sàsachaidh na feòla⁹.

CAIB. III.

1 Nochd Pòl do na Colosianaich c'ait an còir dhuinn Crìosd iarraidh: 5 Chomhairlich e dhoibh an ana-mianna fèdmhor a chlaoidh, 10 an seann duine chur dhuibh, agus Crìosd a chur umpu; 12 dh'earalaich e iad chum seirce, is irioslachd, agus iomadh dhleasdana is eile.

UIME sin na dh'éirich sibh maille ri Crìosd, iarraidh na nithe a ta shuas, far am bheil Crìosd¹⁰ na shuidhe aig deas làimh Dhé.

2 Suidhichibh bhur n-aighe air na nithibh a ta shuas, agus cha'n ann air na nithibh a ta air an talamh.

3 Oir a ta sibh marbh, agus tha bhur beatha folaichte maille ri Crìosd ann an Dia.

4 'Nuair a dh'fhoillsichear Crìosd, neach a's e ar beatha-ne, an sin bithidh sibhse mar an ceudna air bhur foillseachadh maille ris ann an glòir.

5 Uime sin claidhibh¹¹ bhur buill a ta air an talamh, striopachas, neòghloine, fonn-collaidh, ana-mianna, agus sannt, ni a's iodhol-aoradh;

6 Nithe air son am bheil fearg Dhé a' teachd air cloinn na h-eas-ùmhachd,

7 Anns an robh sibhse mar an ceudna a' gluasad uair-éigin¹², 'nuair a bha sibh a' caitheadh bhur beatha 'nam measg¹³.

8 Ach a nis cuiribh-sa uaibh na nithe so uile; fearg, corruich, mì-run, toibheum, cainnt shalach as bhur beul.

9 Na deanaibh breug d'a chéile, do bhrìgh gu'n do chuir sibh dhibh an seann duine maille r'a ghnìomharaibh,

10 Agus gu'n do chuir sibh umaibh an duine nuadh, a tha air ath-nuadhachadh ann an eòlas, a réir ìomhaigh an tì a chruthaich e.

11 Far nach 'eil Greugach no Iudhach, timchioll-ghearradh, no neo-thimchioll-ghearradh, duine borb¹⁴, Sitanach, daor no saor: ach is e Crìosd na h-uile, agus anns na h-uile.

12 Uime sin cuiribh-sa umaibh, (mar dhaoine taghta Dhé, naomha agus ion-mhuinn,) innigh¹⁵ throcaire, caomhalachd, irioslachd inntinn, macantas¹⁶, fad-fhul-angas;

13 A' giùlan le chéile, agus a' maith-eadh d'a chéile, ma tha cùis ghearrain aig

¹ còhartach dhibh. ² fhòghlum saoghalta.

³ teagasg dhaoine o làimh gu làimh.

⁴ lànachd. ⁵ a bha gabhail romhainn.

⁶ fhaobhachadh, chur as an armaibh.

⁷ dhèanach. ⁸ 'ga shàthadh féin sna nithibh.

⁹ ach gun fheum sam bith chum sàsachaidh na feòla. ¹⁰ marbhaibh.

¹¹ roimh.

¹² amta.

¹³ fialhaich, barbarra.

¹⁴ tiom-chridhe.

¹⁵ ciùineas.

neach an aghaidh neach: mar a thug Crìosd maitheanas dhuibhse, mar sin deanaibh-sa mar an ceudna.

14 Agus thar na nithibh so uile, *cuiribh umaibh gràdh*¹, ni a's e coimhcheangal na foirfeachd.

15 Agus biodh sìth Dhé a' riaghladh ann blur cridhe, chum am bheil sibh mar an ceudna air bhur gairm ann an aon chorp; agus bithibh taingeil.

16 Gabhadh focal Chrìosd còmhnuidh annaibh gu saoi bhir san uile ghliocas, a' teagasg agus a' comhairleachadh a' chéile le salmaibh, agus laoidhibh, agus dànaibh spioradail, a' deanamh ciuil do'n Tighearn le gràs ann bhur cridhe.

17 Agus gach ni air bith a ni sibh ann am focal no ann an gnìomh, deanaibh *iad* uile ann an ainm an Tighearna Iosa, a' toirt buidheachais do Dhia, eadhon an t-Athair trid-san.

18 A mhnà, bithibh ùmhal do 'ur fear-aibh féin, mar is cubhaidh, anns an Tighearn.

19 Fheara-pòsda, gràdhaichibh *bhur* mnà, agus na bithibh searbh² 'nan aghaidh.

20 A chlann, bithibh ùmhal do 'ur pàrant-aibh anns na h-uile nithibh: oir a ta so taitneach do'n Tighearn.

21 Aithriche, na brosnuichibh bhur clann *chum fèirge*, air eagal gu'n caill iad am misneach.

22 A sheirbhiseacha, bithibh ùmhal do 'ur maighstiribh a réir na feòla, anns na h-uile nithibh; cha'n ann le seirbhis-sùl, mar dhream a ta toileachadh dhaoine, ach ann an tréibhdhìreas³ cridhe, ann an eagal Dé:

23 Agus ge b'e air bith ni a ni sibh, deanaibh o bhur cridhe e, mar do'n Tighearn, agus cha'n ann do dhaoineibh;

24 Air dhuibh fios a bhi agaibh, gu'm faigh sibh o'n Tighearn duais na h-oighreachd: oir is ann do'n Tighearn Crìosd a tha sibh a' deanamh seirbhis.

25 Ach an ti a ni eucoir, gheibh e toillteanas na h-eucorach a rinn e: agus cha'n 'eil leth-bhreth ann.

CAIB. IV.

1 *Chuir Pòl impidh air na Colosianaich bhi dùrachdach ann an urnuigh, 5 agus ghlasad gu glic thaobh na muinntir sin nach 'eil fathast air teachd chum fìor eòlais Chrìosd. 10 Chuir e fàilte orra, agus ghuidh e gach uile ghnè soirbheis doibh.*

AMHAIGHSTIREAN, thugaibh do 'ur seirbhisich an ni sin a tha ceart agus cothromach, air dhuibh fios a bhi agaibh, gu bheil agaibh féin maighstir mar an ceudna air nèamh.

2 Buanaichibh ann an urnuigh, a' deanamh faire innte le breith-buidheachais;

3 Ag urnuigh mar an ceudna air ar sonne, chum gu fosgladh Dia dhuinn dorus na h-ùr-labhaird, a chur an céill⁴ rùindiomhair Chrìosd, air son am bheil mise ann an cuibhreachaibh:

4 Chum gu foillsich mi e, mar is còir dhomh labhairt.

5 Gluaisibh ann an gliocas thaobh na dream sin a ta an leth muigh, ag athcheannach⁵ na h-aimsir.

6 Biodh bhur còmhraidh a ghnàth ann an gràs⁶, air a dheanamh blasda le salann, chum gu'm bi fhios agaibh cionnus is còir dhuibh gach neach a fhreagairt.

7 Foillsichidh Tichicus, bràthair gràdhach, agus ministèir dileas, agus comhsheirbhiseach san Tighearn, gach ni dhuibh mu m' thimchioll-sa:

8 A chuir mi do 'ur n-ionnsuidh clium na criche so féin, gu'm biodh fios bhur staide-sa aige, agus gu'n tugadh e comhfhurtachd do 'ur cridheachaibh.

9 Maille ri Onesimus, bràthair dileas agus gràdhach, a tha dhibh⁷ féin. Ni iad aithnichte dhuibh na h-uile nithe *a tha* an so.

10 Tha Aristarchus mo chomh-phriosanach a' cur fàilte oirbh, agus Marcus, mac peathar do Bharnabas, (mu 'n d' fhuair sibh àitheanta; ma thig e do 'ur n-ionnsuidh, gabhaibh ris;)

11 Agus Iosa, ris an abrar Iustus, muinntir a tha do'n timchioll-ghearradh. 'S iad sin a mhàin mo chomh-oibrichean chum rioghachd Dhé, a bha 'nan comhfhurtachd domh.

12 Tha Epaphras, a tha dhibh féin, seirbhiseach Chrìosd, a' cur fàilte oirbh, a ghnàth a' deanamh sbàirn dhùrachdaich air bhur son ann an urnuighibh, chum gu seas sibh foirfe, agus coimhlionta ann an uile thoil Dhé.

13 Oir tha mi deanamh fianuis dha, gu bheil aige mòr theas-ghràdh dhuibh-se, agus dhoibh-sa a tha ann an Laodicea, agus do'n mhuinntir a tha ann an Hierapolis.

14 Tha Lucas an léigh gràdhach, agus Demas a' cur fàilte oirbh.

15 Cuiribh fàilte air na bràithribh a tha ann an Laodicea, agus air Nimphas, agus air an eaglais *a tha* 'na thigh.

16 Agus an uair a leughar an litir so 'nur measg-sa, thugaibh fa'near gu'n leughar i ann an eaglais nan Laodiceanach mar an ceudna; agus gu'n leugh sibhse cuideachd *an litir* o Laodicea.

17 Agus abraibh ri Archipus, Thoir an aire do'n mhinistireachd a fhuair thu san Tighearn, gu'n coimhlion thu i.

18 Fàilte uam-sa Pòl le m' làimh féin. Cuimhnichibh mo chuibhreacha. Gràs *gu robh* maille ribh. Amen.

¹ seirc, carthannachd.

² garg.

³ aon-fhillteachd.

⁴ a labhairt.

⁵ a' fuasgladh.

⁶ le gràs, gràsail.

⁷ uaibh.

TESALONIANACH.

CAIB. I.

1 *Thug Pòl fios do na Tesalonianaich co chuimhneachail as a bha e orra anns gach àm, ann am breith-buidheachais agus iurruigh air an son; 5 agus mar an ceudna co dhearbhta 's a bha e do fhlirinn, agus do thréibhdhíreas an creidimh, agus an iompachaidh ri Dia.*

POL, agus Siluanus, agus Timoteus chum eaglais nan Tesalonianach, a tha ann an Dia an t-Athair, agus anns an Tighearn Iosa Crìosd: gràs duibh, agus sìth o Dhia ar n-Athair, agus o'n Tighearn Iosa Crìosd.

2 Tha sinn a' toirt buidheachais do Dhia a ghnàth air bhur son-sa uile, a' toirt-ionraidh oirbh ann ar n-urruighibh-ne;

3 A' cuimhneachadh gun sgar obair bhur creidimh, agus saothair bhur gràidh, agus foighidin bhur dòchais 'nar Tighearn Iosa Crìosd, am fianuis Dé, agus ar n-Athar-ne:

4 Air dhuinn fios a bhì againn, a bhràithre gràdhachte le Dia, air bhur taghadh-sa¹.

5 Oir cha d'fhàinig ar soisgeul-ne do 'ur n-ionnsuidh-sa ann am focal a mhàin, ach mar an ceudna ann am cumhachd, agus anns an Spiorad naomh, agus ann am mòr làn-dearbhadh; mar is aithne dhuibh ciod a' ghnè dhaoine bha annainn 'nur measg air bhur sonsa.

6 Agus rinneadh sibh 'nur luchd-leann-mhuinn oirnne, agus air an Tighearn, 'nuair a ghabh sibh ris an fhocal ann am mòr-àmhghar, le h-aobhneas an Spioraid naomh:

7 Ionnsu gu robh sibh 'nur n-eisempleiribh² dhoibh-san uile a tha creidsinn ann am Macedonia, agus ann an Achaia.

8 Oir uaibhse chaidh fuaim focail an Tighearna mach, cha'n ann a mhàin ann am Macedonia agus ann an Achaia, ach mar an ceudna anns gach àit, tha bhur creidimh ann an Dia air a sgaoileadh a mach, ionnsu nach 'eil feum air sinne a labhairt ni air bith.

9 Oir a ta iad féin a' foillseachadh mu

ar timchioll-ne, ciod a ghlè dol a steach a bha againn do 'ur n-ionnsuidh-sa, agus cionnus a phill sibh chum Dhé o' iodhol-aibh, a dheanamh seirbhis do'n Dia bheò agus fhìor,

10 Agus gu feitheamh r'a Mhac o'n àmh, a thog e suas o na marbhaibh, eadhon Iosa o shaor³ sinne o'n fheirg a ta ri teachd.

CAIB. II.

1 Chuir Pòl an cèill cionnus a chaidh an soisgeul a shearmonachadh do na Tesalonianaich, agus ciod an dòigh air an do ghabh iad ris. 17 Thug e reuson seachad e'ar son a bha e co fhada uatha, agus mar an ceudna e'ar son a ta nis a thogradh co mòr r'am faicinn.

OIR is aithne dhuibh féin, a bhràithre, ar dol-ne a steach do 'ur n-ionnsuidh, nach robh e ann an dìomhanas:

2 Ach fòs air dhuinn fulang roimh, agus an déigh ar maslachaidh ann am Philipi, mar is aithne dhuibh, bha dànachd againn ann ar Dia-ne soisgeul Dé a labhairt ribhse ann am mòr-ghleachd⁴.

3 Oir cha robh ar n-earail-ne o mheall-taireachd, no o neòghloine, no ann an ceilg:

4 Ach mar a mheasadh sinne le Dia iomchuidh gu'm biodh an soisgeul air earbsadh ruinn, is amhuil sin a labhra-maid, cha'n ann mar dhream a tha toileachadh dhaoine, ach Dhé, a tha dearbhadh ar cridheacha.

5 Oir cha do ghnàthaich sinn uair air bith briathra mìodalach, mar is aithne dhuibh, no leithsgeul saintt; 's e Dia ar fianuis:

6 Nì mò dh'iarr sinu urram⁵ o dhaoineibh, no uaibhse, no o dhaoineibh eile, ged fheudamaid ar trom a leagadh oirbhse, mar abstola Chrìosd.

7 Ach bha sinn caomh 'nur measg-sa, amhuil a dh'altrumas⁶ banaltrum a clann féin:

8 Mar sin, ar bhì dhuinne ro dheidheil oirbhse⁷, bu toileach leinn cha'n e mhàin soisgeul Dhé a phàirteachadh⁸ ribh, ach mar an ceudna ar n-anama féin do bhrìgh gu robh sibh ro ionmhuinn leinn.

¹ air bhur taghadh-sa le Dia.

² samhlachasaibh. ³ a shaoras.

⁴ maille ri gleachda mòr.

⁵ glòir.

⁶ dh'eiridneas.

⁷ ro dhcothasach umaibh-se.

⁸ a chomh-roinn.

I. TESALONIANACH, II. III.

9 Oir is cuimhne leibh, a bhràithre, ar saothair, agus ar sgios-ne: oir air dhuinn bhi ri h-obair a dh'oidhche agus a là, chum nach cuireamaid trom air neach sam bith agaibh, shearmonaich sinn duibh soisgeul Dé.

10 Is fianuisean sibhse, agus Dia, cia naomha, agus cia cothromach¹, agus neo-lochdach a ghiùlain sinne sinn féin 'nur measg-sa a ta creidsinn:

11 Mar is aithne dhuibh cionnus a dh'earailich sinn, agus a thug sinn comhfhurtachd, agus a chuir sinn impidh air gach aon agaibh fa leth, (mar a n' Athair d'a chloinn.)

12 Gu'n gluaiseadh sibh gu cubhaidh do Dhia, a ghairm sibh chum a rioghachd agus a ghloire féin.

13 Uime sin a ta sinne mar an ceudna a' toirt buidheachais do Dhia gun sgur, do bhrìgh 'nuair a ghabh sibh ri focal Dé a chuala sibh uainne, gu'n do ghabh sibh ris cha'n ann mar fhocal dhaoine, ach, (mar is e gu fìrinneach,) focal Dé, a tha 'g oibreachadh gu h-éifeachdach annaibh-sa a ta creidsinn.

14 Oir rinneadh sibhse, a bhràithre, 'nur luchd-leanmhuinn air eaglaisibh Dhé, ann an Iudea, a tha ann an Iosa Crìosd: oir dh'fhuiling sibhse na nithe ceudna o bhur luchd-dùthcha féin, mar a dh'fhuiling iadsan o na h-Iudhaich:

15 A chuir arach an Tighearn Iosa, agus am fàidhean féin gu bàs, agus a rinn geur-leanmhuinn oirne; agus nach 'eil a' toil-eachadh Dhé, agus a tha'n aghaidh nan uile dhaoine:

16 A tha bacadh dhinne labhairt ris na Cinnich, chum gu'm biodh iad air an tèarnadh², chum sir-lionaidh suas am peacanna: oir thàinig an fhearg orra mu dheireadh³.

17 Ach air dhuinne, a bhràithre, bhi air ar dealachadh uaibhse rè tamuil bhiig am pearsa, ach cha 'n ann an cridhe, is ro mhòid a rinn sinn dìchioll air bhur n-aghaidh fhaicinn le mòr-thogradh.

18 Uime sin bu mliann leinn teachd do 'ur n-ionnsuidh, (eadhon leam-sa Pòl,) uair no dhà: ach bhac Satan sinn.

19 Oir cìod e ar dòchas-ne, no ar n-aobhneas, no ar crùn-uaille? nach sibhse féin e am fianuis ar Tighearna Iosa Crìosd aig a theachd?

20 Oir is sibhse ar glòir-ne agus ar n-aobhneas.

CAIB. III.

1 Dhearbh Pòl a mhòr-ghràdh do na Tesalonianach, le Timoteus a chur d'an ionnsuidh chum an neartachadh agus comhfhurtachd a thoirt doibh, agus

le a ghairdeachas 'nan deadh ghiùlan, 18 agus le urnuigh a dheanamh air an son.

AIR an aobhar sin, an uair nach b'urr-ainnsinn cumail oirnn féin ni b'fhaide, bu taitneach leinn bhi air ar fàgail 'nar n-aonar am baile na h-Aithne:

2 Agus chuir sinn Timoteus ar bràthair agus ministèir Dhé, agus ar comh-oibriche ann an soisgeul Chrìosd, chum sibhse a dhaingneachadh, agus comhfhurtachd a thoirt duibh mu thimchioll bhur creidimh;

3 Chum nach gluaiseadh⁴ neach air bith agaibh leis na trioblaidibh so; oir a ta fhios agaibh féin gu'n d'orduicheadh sinn a dh'ionnsuidh so.

4 Oir gu deimhin, an uair a bha sinn maille ribh, dh'innis sinn duibh roimh-làimh, gu robh sinn gu àmhghar⁵ fhulang; eadhon mar a thachair, agus is aithne dhuibh.

5 Air an aobhar so, 'nuair nach robh mise comasach air cumail orm féin ni b'fhaide, chuir mi a dh'fhaghal fios mu 'ur creidimh, air eagal air chor sam bith gu'n do bhuair am buaireadair sibh, agus gu'm biodh ar saothair-ne dìomhain.

6 Ach a nis an uair a thàinig Timoteus uaibhse do ar n-ionnsuidh-ne, agus a thug e deadh sgeul duinn mu bhur creidimh agus bhur gràdh, agus gu bheil cuimhne mhaith agaibh oirne a ghnàth, a' miannachadh gu mòr sinne fhaicinn, amhuil a ta sinne mar an ceudna sibhse fhaicinn.

7 Uime so, a bhràithre, fhuair sinne comhfhurtachd do 'ur taobh ann ar n-uile àmhghar agus theinn, tre bhur creidimhsa:

8 Oir a ta sinne beò a nis, ma sheasas sibhse gu bunaiteach san Tighearn.

9 Oir cìod am buidheachas a dh'fheudas sinn iocadh do Dhia as bhur leth-sa, air son an aobhneis sin uile leis am bheil sinn ri gairdeachas do 'ur taobh am fianuis ar Dé-ne,

10 A dh'oidhche agus a là a' guidhe gu ro dhùrachdach gu faiceamaid bhur n-aghaidh-sa, agus gu leasaicheamaid uireasbhuidh bhur creidimh?

11 A nis gu deanadh Dia féin, eadhon ar n-Athair, agus ar Tighearna Iosa Crìosd ar slighe-ne a threòrachadh do 'ur n-ionnsuidh-sa.

12 Agus gu tugadh an Tighearn oirbh fàs agus bhi ro phailt ann an gràdh d'a chéile, agus do na h-uile dhaoinibh, mar a ta sinne dhuibhse;

13 Chum gu daingnich e bhur cridheacha neo-choireach ann an naomhachd am fianuis Dé, eadhon ar n-Athar-ne, aig

¹ h-ionraic; ² slànuchadh.

³ gus a' chuid a's faide.

⁴ ghuaisfeadh.

⁵ trioblaid.

teachd ar Tighearna Iosa Crìosd maille r'a naomhaibh¹ uile.

CAIB. IV.

¹ Chuir Pòl impidh air na Tesalonianaich dol air an aghaidh anns gach uile ghné dhiadhachd, 6 am beatha a chaitheadh gu naomha agus gu cothromach, 9 a chéile a ghràdhachadh, 11 agus an gnothuichean féin a leantainn gu sàmhach.

OS bàrr ma ta, a bhràithre, cuireamaid a dh'impidh agus a dh'athchuinge oirbh tre'n Tighearn Iosa, mar a fhuair sibh uainne cionnus is còir dhuibh imeachd, agus Dia a thoileachadh, gu meudaicheadh sibh mar sin nì's mò agus nì's mò.

² Oir a ta fhios agaibh ciod iad na h-àitheantan a thug sinne dhuibh tre'n Tighearn Iosa.

³ Oir is i so toil Dhé, eadhon bhur naomhachadh-sa, sibh a sheachnadh strìopachais:

⁴ Gu'm b'aithne do gach aon agaibh a shoitheadh féin a shealbhadh ann an naomhachd, agus ann an urram²;

⁵ Cha'n ann ann am fonn ana-miannach, mar a ni na Cinnich aig nach 'eil eòlas air Dia:

⁶ Gun neach air bith a dheanamh eucoir no mealltaireachd sa' chuis air a bhràthair; do bhrìgh gur e'n Tighearn a ni dìoghaltas air an uile leithidibh sin, a réir mar a dh'innis sinne mar an ceudna duibh roimh, agus a rinn sinn fianais.

⁷ Oir cha do ghairm Dia sinne gu neòghloine, ach gu naomhachd.

⁸ Uime sin an neach a ni tàir, cha'n ann air duine tha e deanamh tàir, ach air Dia, a thug dhuinne a Spiorad naomh féin.

⁹ Ach a thaobh gràidh bràthaireil, cha'n 'eil feum agaibh mise a sgrìobhadh do 'ur n-ionnsuidh: oir a ta sibh féin air bhur teagasg o Dhia gràdh a thoirt d'a chéile.

¹⁰ Agus gu deimhin tha sibh a' deanamh so thaobh nam bràthar uile, a tha ann am Macedonia gu h-iomlan: ach guidheamaid oirbh, a bhràithre, sibh a mheudachadh nì's mò agus nì's mò;

¹¹ Agus gu'n dean sibh bhur dìchioll a bhi ciùin, agus bhur gnothuiche féin a dheanamh, agus saothreachadh le 'ur làmhaidh féin, (amhuil a dh'àithn sinne dhuibh);

¹² Chum gu'n gluais sibh gu cubhaidh thaobh na muinntir sin a ta 'n leth muigh, agus nach bi uireasbhuidh ni sam bith oirbh.

¹³ Ach cha b'àill leam, a bhràithre, sibh a bhi aineolach thaobh na muinntir sin a tha 'nan codal, chum nach dean sibh bròn, eadhon mar dhaoine eile aig nach 'eil dòch-as.

¹⁴ Oir ma chreideas sinn gu'n d'fhuair Iosa bàs, agus gu'n d'éirich e ris, amhuil sin mar an ceudna an dream a choidil ann an Iosa, bheir Dia maille ris.

¹⁵ Oir so a ta sinn ag ràdh ribh ann am focal an Tighearna, nach bi againne a tha beò agus a dh'fhàgar gu teachd an Tighearna, toiseach orra-san a tha 'nan codal.

¹⁶ Oir thig an Tighearn féin a nuas o nèamh le àrd-iolaich³, le guth an àrd-aingil, agus le trompaidh Dhé: agus éiridh na maibh ann an Crìosd air tùs:

¹⁷ An déigh sin, sinne a bhios beò agus a dh'fhàgar, togar suas sinn maille riusan anns na neulaibh, an còdhail an Tighearna san athar: agus mar sin bithidh sinn gu sìorruidh maille ris an Tighearn.

¹⁸ Uime sin thugaibh comhfhurtachd d'a chéile leis na briathraibh so.

CAIB. V.

¹ Chaidh an t-abstol air aghaidh ann an labhairt mu theachd Chrìosd gu breitheanas, 16 thug e iomadh comhairle seachad, 23 agus chomh-dhùin e an litir.

ACH mu thimchioll nan aimsirean agus nan àm cha'n 'eil feum agaibh-sa, a bhràithre, mise a sgrìobhadh do 'ur n-ionnsuidh.

² Oir a ta sàr fhios agaibh féin gu'n tig là an Tighearna mar ghaduic le sin oidhche.

³ Oir an uair a their iad, Sith agus tèaruinteachd, an sin thig sgrìos obann orra, mar shaothair air mnaoi thorraich; agus cha téid iad as.

⁴ Ach cha'n 'eil sibhse, a bhràithre, san dorchadas, ionnus gu'm beireadh an là sin oirbh mar ghaduiche.

⁵ Is sibhse uile clann an t-soluis, agus clann an là: cha'n ann do'n oidhche, no do'n dorchadas sinn.

⁶ Uime sin na coidleamaid mar dhaoine eile; ach deanamaid faire agus bitheamaid stuama⁴.

⁷ Oir an dream a choidleas, is anns an oidhche a choidleas iad: agus an dream a tha air mhìsg, is anns an oidhche tha iad air mhìsg.

⁸ Ach bitheamaid-ne a tha do'n là stuama, a' cur oirnn uchd-éididh a' chreidimh agus a' ghràidh, agus mar chlogaid, dòchas⁵ na slàinte.

⁹ Oir cha d'orduich⁶ Dia sinn chum feirge; ach chum slàinte fhaotainn tre ar Tighearna Iosa Crìosd,

¹⁰ A fhuair bàs air ar son, chum co aca is faireach no codal dhuinn, gu'm bith-eamaid beò maille ris.

¹¹ Uime sin thugaibh comhfhurtachd d'a chéile, agus togaibh suas gach aon a chéile, eadhon mar a ta sibh a' deanamh.

¹ maille r'a ainglibh naomha.

² onoir.

³ gair.

⁴ measarra.

⁵ earbsa.

⁶ cha do shonraich.

12 Agus guidheamaid oirbh, a bhràithre, aithne bhi agaibh air an dream a tha saothreachadh 'nur measg, agus a tha os bhur ceann san Tighearn, agus a tha 'gur comhairleachadh;

13 Agus meas mòr a bli agaibh dhiubh ann an gràdh air son an oibre. Bithibh sìochail 'nur measg féin.

14 A nis guidheamaid oirbh, a bhràithre, thugaibh rabhadh dhoibh-san a tha mi-riaghailteach, thugaibh comhfhurtachd dhoibh-san a tha lag-chridheach, cumaibh suas iadsan a ta anmhunn¹, bithibh foighidneach a thaobh nan uile dhaoine.

15 Feuchaibh nach loc neach olc air son uile do dhùine sam bith; ach leanaibh-sa a ghnàth an ni a ta maith, araon do 'ur taobh féin, agus a thaobh nan uile dhaoine.

16 Deanaibh gàirdeachas a ghnàth.

17 Deanaibh urnuigh gun sgar.

18 Anns gach uile ni thugaibh buidheachas; oir is i so toil Dé ann an Iosa

Criosd do 'ur taobh.

19 Na mùchaibh an Spiorad.

20 Na deanaibh tàir air fàidheadair-eachd.

21 Dearbhaibh na h-uile nithe: cumaibh gu daingean an ni sin a ta maith.

22 Seachnaibh gach uile choslas uile.

23 Agus gu deanadh Dia na sìthe féin naomha sibh gu h-iomlan; agus *gu deònaicheadh Dia* gu'm bi bhur n-uile spiorad, agus anam, agus chorp air an gleidheadh gu neo-choireach, gu teachd ar Tighearna Iosa Criosd.

24 *Is* firinneach an 'Ti a ta 'gur gairm, neach mar an ceudna a ni e.

25 A bhràithre, deanaibh urnuigh air ar son-ne.

26 Cuiribh fàilte air na braithribh uile le pòig naomh.

27 Tha mi a' sparradh oirbh á h-uchd an Tighearna, gu'n leughar an litir so do na bràithribh naomha uile.

28 *Gu robh* gràs ar Tighearna Iosa Criosd maille ribh. Amen.

¹ deanaibh cùl-taice dhoibh-san a ta lag.

DARA LITIR AN ABSTOIL PHOIL

CHUM NAN

TESALONIANACH.

CAIB. I.

1 *Thug Pol fios do na Tesalonianaich air an deadh bharail a ta aige mu'n creidimh, an gràdh, agus am foighidin; 5 agus ghnàthaich e reusona chum comhfhurtachd a thoirt doibh fo'n geur-leanmhunn, gu h-àraidh o cheart-bhreitheanas Dé.*

POL, agus Siluanas, agus Timoteus, chum eaglais nan Tesalonianach, ann an Dia ar n-Athair, agus anns an Tighearn Iosa Criosd:

2 Gràs *gu robh* dhuibh, agus sìth o Dhia ar n-Athair, agus o'n Tighearn Iosa Criosd.

3 Tha e mar fhiachaibh oirne buidheachas a thoirt do Dhia a ghnàth air bhur son-sa, a bhràithre, mar is cubhaidh, do bhrìgh gu bheil bhur creidimh a' fàs gu ro mlior, agus gu bheil gràdh gach aoin agaibh uile a' meudachadh d'a chéile:

4 Ionns gu bheil sinne féin a' deanamh uaille asaihb-sa ann an eaglaisibh Dhé, air son bhur foighidin agus bhur creidimh ann bhur n-uile gheur-leanmhunnibh agus àmhgharaibh a tha sibh a' fulang:

5 *Ni a ta* 'na chomhara follaiseach air ceart-bhreitheanas Dé, chum gu measar gur airidh sibhse air rìoghachd Dhé, air son am bheil sibh a' fulang:

6 Do bhrìgh gur ceart an ni do Dhia, àmhghar iocadh dhoibh-san a ta cur àmh-

ghair oirbh;

7 Agus dhuibhse a ta fo àmhghar, fois maille ruinne, 'nuair a dh'fhoillsichear an Tighearn Iosa o n-èamh, maille r'a ainglibh cumhachdach,

8 Ann an teine lasarach, a' deanamh dioghaltais air an dream aig nach 'eil eòlas air Dia, agus nach 'eil ùmhal do shoisgeul ar Tighearna Iosa Criosd.

9 Muinntir air an deantar peanas le sgrios sìorruidh o làthair an Tighearn, agus o ghlòir a chumhachd.

10 'Nuair a thig e gu bhi air a ghlòrachadh 'na naomhaibh, agus chum gu'n deantar iongantach e anna-san uile a ta creidsinn san là sin, (do bhrìgh gu'n do chreideadh ar fianuis-ne 'nur measg-sa.)

11 Air an aobhar so, tha sinne mar an ceudna a' deanamh sìr-urnuigh air bhur sonsa, chum gu meas ar Dia-ne gur airidh sibhse air a' ghairm so, agus gu'n coimhlion e uile dheadh-ghean a mhaithis, agus obair a' chreidimh le cumhachd:

12 Chum gu'm bi ainm ar Tighearna Iosa Criosd air a ghlòrachadh annaibh-sa, agus sibhse ann-san, a réir gráis ar Dé-ne, agus an Tighearna Iosa Criosd.

CAIB. II.

1 *Is àill le Pòl gu'm buanaicheadh na Tesalonianaich san fhìrinn ris an do ghabh iad: 3 nochd e*

II. TESALONIANACH, II. III.

gu'm bi claoanadh o'n chreidimh ann, 9 agus gu'm foillsichear an t-ana-criosd roimh theachd là an Tighearna.

ANIS guidheamaid oirbh, a bhràithre, thaobh¹ teachd ar Tighearna Iosa Criosd, agus ar comh-chruinneachaidh-ne d'a ionnsuidh,

2 Gun sibh bhi gu h-ealamh air bhuir crathadh² 'nur n-inntinn, no fo bhuair-eas³, le spiorad, no le focal, no le litir, mar uaine, mar gu'm biodh là Chriosd am fagus.

3 Na mealladh neach sam bith sibh air aon chor: oir cha *tig an là sin* mur tig air tús tréigeadh-creidimh, agus *mur* foillsichear duine sin a' pheacaidh, mac an sgrios;

4 A tha cur an aghaidh agus 'ga àrdachadh féin os ceann gach nì ris an abrar Dia, no d'an deanar aoradh⁴; ionnus mar Dhia gu bheil e 'na shuidhe ann an team-pull Dhé, 'ga nochdadh féin gur Dia c.

5 Nach cuimhne leibh, air dhomh bhi fathast maille ribh, gu'n d'innis mi na nithe so dhuibh?

6 Agus is aithne dhuibh ciod a tha bacadh uis e bhi air fhoillseachadh 'na àm féin.

7 Oir a ta rùn-dìomhair na h-ain-diadhachd ag oibreachadh cheana, a mhàin⁵ agus an toirair air falbh an ti a ta nis a' bacadh⁵.

8 Agus an sin foillsichear an t-aingidh sin, a chlaoidheas an Tighearna le anail⁶ a bheoil féin, agus d'an cur e as le dealradh a theachd:

9 *Eadhon esan*, aig am bheil a theachd a réir oibreachaidh Shatain, maille ris an uile chumhachd, agus chomharaibh, agus iongantasaibh breugach,

10 Agus maille ri uile mhealltaireachd na h-eucorach anutasan a chaillear; a chionn nach do ghabh iad gràdh na fìrinn, chum gu tearuineadh iad.

11 Agus air a shon so cuiridh Dia treun-oibreachadh meallaidh d'a ionnsuidh, ionnus gu'n creid iad a bhreug:

12 Chum gu'm bi iad uile air an dìteadh, nach do chreid an fhìrinn, ach aig an robh tlachd ann an eucor.

13 Ach a ta e mar fhiachaibh oirne buidheachas a thoirt do Dhia a ghnàth air bhuir sou-sa, a bhràithre, ionnmhuinn do'n Tighearna, do bhrìgh gu'n do thagh Dia sibh o thùs chum slàinte, tre naomhachadh an Spioraid, agus creidsinn na fìrinn:

14 Chum an do ghairm e sibh tre ar soisgeul-ne, chum sibh a dh'fhaotainn

glòire ar Tighearna Iosa Criosd.

15 Uime sin, a bhràithre, scasaibh gu daingean, agus cumaidh na teagasgan a thugadh dhuibh, co dhiubh is ann le focal, no le ar litir-ne.

16 A nis gu'n tugadh ar Tighearna Iosa Criosd e féin, agus Dia, eadhon ar n-Athair-ne, a ghràdhaich sinn, agus a thug *dhuinn* solas sìorruidh, agus dòchas maith tre ghràs,

17 Comhfhurtachd do 'ur cridhe-sa, agus gu daingnicheadh e sibh anns gach uile dheadh fhocal agus ghniomh.

CAIB. III.

1 *Dh'iarr Pòl urnuigh nan Tesalonianach air a shon féin; 3 chuir e an cèill meud an earbsa a tha aige asda; 5 ghuidh e Dia as an leth; 6 thug e iomadh comhairle orra, gu h-àraidh iad a sheachnadh dìomhanais agus droch cuideachd.*

FA dheoidh, a bhràithre, deanaibh urnuigh air ar son-ne, chum gu'n ruith focal an Tighearna, agus gu'm bi e air a ghlòrachadh mar ann bhuir uneasg-sa;

2 Agus chum gu saotar sinne o dhaoineibh mi-reusonta agus olc: oir cha'n ann aig na h-uile a ta creidimh.

3 Ach a ta an Tighearna dileas, a dhaingnicheas agus a choimhideas o'n olc⁷ sibh.

4 Agus a ta earbsa againn san Tighearna do 'ur taobh-sa, gu bheil sibh araon a' deanamh, agus gu'n dean sibh na nithe a tha sinn ag àithneadh dhuibh.

5 Agus gu seòladh an Tighearna bhuir cridheacha chum gràidh Dhé, agus chum foighidinn Chriosd⁸.

6 A nis àithneamaid dhuibh, a bhràithre, ann an ainm ar Tighearna Iosa Criosd, sibh féin a dhealachadh ris gach uile bhràthair a tha 'g imeachd gu mi-riaghaileach, agus cha'n ann a réir an teagaisg a fhuair e uaine.

7 Oir a ta fhios againn féin cionnus is còir dhuibh ar lorg-ne leantuinn: oir cha do ghiùlain sinne siun féin gu mi-riaghaileach 'nur measg;

8 Nì mò a dh'ith sinn aran duine sam bith a nasgaidh; ach le saothair agus au-shocair, a dh'oidhcte agus a là ri h-obair, chum nach cuireamaid ar trom air aon agaibh;

9 Cha'n e nach 'eil comas⁹ againn, ach a chum gu'n deanamaid sinu féin 'nar n-eisempleir dhuibh-sc, gu ar leantuinn.

10 Oir an uair a bha sinn maille ribh, thug sinn an àithne so dhuibh, nur àill le neach obair a dheanamh, gun e dh'itheadh *bìdh*.

11 Oir tha sinn a' cluinntinn gu bheil

¹ trid.

² fo uideal.

³ mhaoin, ghioraig.

⁴ a ta urramach.

⁵ a mhàin an nì a ta cur bacadh a nis bacadh e gus an toirair air falbh e.

⁶ spiorad.

⁷ o'n droch spiorad.

⁸ fèitheamh gu foighidneach ri Criosd.

⁹ ughdarras, cèir.

I. TIMOTEUS, I.

daoine àraidh ag imeachd gu mi-riaghailteach 'nur measg, nach 'eil a' deanamh oibre sam bith, ach a' gabhail gnothuich ri nithibh nach buin doibh.

12 A nis tha sinn a' toirt àithne d'an leithidibh sin, agus ag earail orra tre ar Tighearn Iosa Criosd, le saothreachadh gu ciùin, gu'n ith iad an aran féin.

13 Agus sibhse, a bhràithre, na sgèithichibh do dheanamh maith.

14 Agus ma ta neach sam bith nach toir ùmhlaichd do ar focal-ne tre au litir so, comharaichibh esan, agus na biodh comh-

luadar agaibh ris, chum gu'm bi nàire air-

15 Gidheadh na measaibh e mar nàmhaid, ach thugaibh comhairle air mar bhràthair.

16 A nis gu'n tugadh Tighearna na sìthe e féin sìth dhuibhse a ghnàth air gach aon chor. *Gu robh* an Tighearn maille ribh uile.

17 Fàilte uamsa Pòl le mo làimh féin, ni a's e an comhara anns gach uile litir: mar so tha mi a' sgrìobhadh.

18 Gràs ar Tighearna Iosa Criosd *gu robh* maille ribh uile. Amen.

CEUD LITIR AN ABSTOIL PHOIL

CHUM

THIMOTEUIS.

CAIB. I.

1 *Tha an t-ordugh a thugadh do Thimoteus 'nuair a chaidh Pòl do Mhacedonia, air a chur an cuimhne dha. 5 Mu thimchioll feum dlìgheach an lagha, 11 agus gairm Phòil gu bhì 'na abstol; 28 agus mu thimchioll Himeneus agus Alcesander.*

POL abstol Iosa Criosd, a réir àithne Dhé ar Slànuighir, agus an Tighearna Iosa Criosd, *neach a's e* ar dòchas; 2 Chum Thimoteuis m'fhìor mhic anns a' chreidimh: Gràs, tròcair, agus sìth o Dhia ar n-Athair, agus o Iosa Criosd ar Tighearn.

3 Mar a dh'iarr mi ort fantuinn ann an Ephesus, 'nuair a chaidh mi do Mhacedonia chum gu'n tugadh tu ordugh do dheam àraidh gun atharrachadh teagaisg a thoirt uatha;

4 Agus gun aire a thoirt do sgeulachdaibh, agus do shloinntearachd neo-chrìochnaich, a bheir aobhar do cheisdibh, nì's mò na do fhòghlum diadhaidh, a tha tre chreidimh: *dean mar sin.*

5 A nis is e a's crìoch do'n àithne gràdh á cridhe glan, agus á coguis mhaith, agus á creidimh neo-chealgach:

6 Nìthe air do dhream àraidh claonadh uatha, chaidh iad a thaobh chum diomhanais caimnte;

7 A' miannachadh bhì 'nan luchd-teagaisg an lagha, agus gun iad a' tuigsinn cìod a ta iad ag ràdh, no cìod iad mu'm bheil iad a' toirt cinnte.

8 Ach tha fhios againn gu bheil an lagh maith, ma ghnàthaicheas neach gu dlìgheach e:

9 Air do fhios so a bhì aige, nach ann do dhuine fìreanach a dh'orduicheadh au lagh, ach do dhaoineibh neo-dhlìgheach agus eas-ùmhla, dhoibh-san a ta mi-dhiadhaidh agus do pheacaich, do dhaoineibh mi-naomha agus neo-chràbhach, do

luchd-marbhaidh aithriche agus do luchd-marbhaidh mhàithriche, do luchd-mortaidh,

10 Do luchd-strìopachais, do luchd anamiana mi-nàdurra, do luchd-goid dhaoine, do bhreugairibh, do luchd-eithich, agus ma tha nì sam bith eile a tha'n aghaidh teagaisg fhallain,

11 A réir soisgeil ghlòrmhoir an Dé bheannaichte, a dh'earbadh riut-sa.

12 Agus a ta mi a' toirt buidheachais do Iosa Criosd ar Tighearn, a neartaich mi, do bhrìgh gu'n do mheas e mi dìleas, 'gam chur sa' mhinistreileachd;

13 A bha roimh a'm' fhear-labhairt toibheim, agus a'm' fhear geur-leann-mhuinn, agus a'm' dhuine eucorach. Ach fhuair mi tròcair, do bhrìgh gu'n d'rinn mi so tre aineolas, ann am mi-chreidimh:

14 Agus bha gràs ar Tighearna thar tomhas ro phailte *dhomh*, maille ri creidimh, agus ri gràdh a ta ann an Iosa Criosd.

15 Is fìor an ràdh so, agus is airidh e air gach aon chor air gabhail ris, gu'n d'èinig Iosa Criosd do'n t-saoghal a thèarnadh pheacach; d'am mise an ceud-fhear.

16 Gidheadh, air a shon so fhuair mi tròcair, chum gu'm foillsicheadh Criosd annam-sa air tús an uile fhad-fhulangas, mar shaimpleir¹ dhoibh-san a chreideadh ann, an déigh so, chum na beatha maireann-aich.

17 A nis do'n Rìgh shiorruidh, neo-thruaillidh, neo-fhaicsinneach, do Dhia a ta mhàin glic, *gu robh* urram agus glòir, gu saoghal nan saoghal. Amen.

18 An àithne so tha mi ag earbsadh riut, Thimoteuis a mhic, a réir nam fàidhead-

¹ shamhlachas.

I. TIMOTEUS, I. II. III.

areachd a rinneadh umad roimh so, chum trid-san gu'n cogadh tu deadh chogadh;

19 A' coimhead creidimh agus deadh choguis; ni air do chuid do dhaoineibh a chur uatha, rinn iad long-bhriseadh thaobh a' chreidimh.

20 D'am bheil Himeneus agus Alecsander; muinntir a thug mise thairis do Shatan, chum le'n smachdachadh gu'm fòghlumadh iad gun toibheum a labhairt.

CAIB. II.

1 Nochd Pòl gur còir urnuigh agus breith-buidheachais a ghnàthachadh air son nan uile dhaoine. 9 Cionnus is còir do mhnàibh bhì air an sgeadachadh: 12 cha 'n 'eil e ceadaichte dhoibh teagasg a thoirt uatha.

THA mi ag iarraidh uime sin, roimh na h-uile nithibh, gu'n deanar athchuinge, urnuighean, eadar-ghuidhe, agus breith-buidheachais air son nan uile dhaoine:

2 Air son rìghrean, agus air son nan uile a tha ann an ùghdarras: chum gu'n caith sinn ar beatha gu foisneach agus gu sìochail, anns an uile dhiadhachd agus chiatachd.

3 Oir tha so maitl agus taitneach am fianuis Dé ar Slànuighir:

4 Neach leis an àill na h-uile dhaoine bhì air an tèarnadh¹, agus iad a theachd chum eòlas na firinn.

5 Oir is aon Dia a ta ann, agus aon eadar-mheadhonair eadar Dia agus daoine, an duine Iosa Crìosd;

6 A thug e féin 'na éiric² air son nan uile, mar fhianuis ann an àm iomchuidh:

7 Chum an d'orduicheadh mise a'm shearmonaiche, agus a'm' abstol, (tha mi a' labhairt na firinn ann an Crìosd, cha 'n 'eil mi a' deanamh³ bréige,) a'm' fhear-teagaisg nan Cinneach ann an creidimh agus ann am firinn.

8 Uime sin is àill leam na fir a dheanamh urnuigh sgach àit, a' togail suas làmhha naomha gun fheirg, gun amharus:

9 Air an dòigh cheudna, na mnà a chur eudaich iomchuidh umpa, 'gan sgeadachadh féin le nàisneachd agus stuaim: cha'n ann le casadh an gruaige, no le h-òr, no le neamhnuidibh, no le culaidhibh luach-mhor;

10 Ach, (mar is cubhaidh do mhnàibh a tha 'g aideachadh diadhachd,) le deadh oibrìbh.

11 Fòghlumadh a' bhean ann an ciùineas leis an uile ùmhlachd.

12 Ach cha 'n 'eil mi a' ceadachadh⁴ do mhnai teagasg a thoirt uaipe⁵, no

ceannas a ghlacadh air an fhear, ach i bhì 'na tosd.

13 Oir is e Adhamh a chruthaicheadh air tùs, agus 'na dhéigh sin Eubha.

14 Agus cha b'e Adhamh a mhealladh, ach air do'n mhnai bhì air a mealladh, bha i sa' chionta.

15 Gidheadh tèarnar i tre bhreith cloinne, na bhuaicheas iad ann an creidimh, agus ann an gràdh, agus ann an naomhachd, maille ri stuaim.

CAIB. III.

1 Ciod iad na buaidhean a's còir bhì air na h-easbuigibh, agus air na deaconaibh, agus air an mnàibh: 14 agus c'ar son a sgrìobh Pòl na nithe so gu Timoteus. 15 Mu thimchioll na h-eaglais, agus na firinn beannaichte a ta air a teagasg iunte.

IS ràdh fìor so, Ma tha togradh aig aon duine chum dreuchd easbuig⁶, tha e miannachadh deadh oibre.

2 Uime sin is còir do easbuig bhì neo-lochdach, 'na fhear aoin mhnà, faireil, ciallach⁷, deadh-bheusach, fialuidh⁸, ealamh gu teagasg;

3 Gun bhì 'na phòitear⁹, gun bhì buailteach, gun bhì déidheil air buannachd shalaich; ach macanta, neo-thuasaid-each¹⁰, neo-shanntach;

4 'Na dhuine a riaghlas a thigh féin gu maith, aig am bheil a chlann fo smachd maille ris an uile shuidheachadh-inntinn¹¹;

5 (Oir mur aithne do dhuine a thigh féin a riaghladh, cionnus a ghabhas e cùram do eaglais Dhé?)

6 Gun bhì 'na nuadh-chreideach, air eagal, air dha bhì air atadh le h-uabhar, gu'n tuit e ann an dìteadh an diabhail.

7 Is còir dha mar an ceudna deadh theistear bhì aige uatha-san a ta 'n leth muigh; air eagal gu'n tuit e ann an scainnil¹², agus ann an ribe an diabhail.

8 Mar an ceudna is còir do na deaconaibh¹³ bhì suidhichte, gun au teangadh bhì leam leat, gun bhì cionail¹⁴ air mòran fìona, gun bhì déidheil air buannachd shalaich,

9 A' cumail rùn-dìomhair a' chreidimh ann an coguis ghloin.

10 Agus biodh iadsan mar an ceudna air an dearbhadh an toiseach; agus an sin gnàthaicheadh iad dreuchd deacoin¹⁵, air dhoibh bhì air am faghail neo-choir-each.

11 Is amhuil sin is còir do na mnàibh¹⁶ bhì suidhichte, gun bhì 'nan luchd-tuail-

¹ slànuchadh, saoradh.

³ ni'n deanam.

⁵ uaithe.

⁷ crìonna, stuama.

⁹ trom air fìon

² luach-saoraidh.

⁴ ni'n ceadachdam.

⁶ oifig fir-coimhid.

⁸ daonnachdach.

¹⁰ neo-charroideach.

¹¹ chudthromachd, fhonnmoireachd.

¹² aithis.

¹³ do'n luchd-frithealaidh.

¹⁴ ceistcùil, déidheil.

¹⁵ fritheilteachd iad.

¹⁶ d'am mnàibh.

eis¹; *ach bhi measarra, ionraic sna h-uile nithibh.*

12 Bìodh na deacoin² 'nam fir aoin mhnà, a' riaghladh an cloinne, agus an tighe féin gu maith.

13 Oir an dream a ghnàthaich dreuchd deacoin gu maith, tha iad a' cosnadh deadh cheum dhoibh féin, agus dànachd mhòr sa' chreidimh, a tha ann an Iosa Crìosd.

14 'Tha mi a' sgrìobhadh nan nithe so a d' ionnsuidh, an dòchas teachd gu grad a d' ionnsuidh:

15 Ach ma ni mi moille, chum gu'm bi fhios agad cionnus is còir dhuit thu féin a ghiulan ann an tigh Dhé, ni a's e eaglais an Dé bheò, post agus stéidh-dhaingnich² na firinn.

16 Agus gun amharus is mòr rùn-dìomhair na diadhachd: dh'fhoillsich-eadh Dia san fheòil, dh'fhìreanaicheadh e san spiorad, chunncas le ainglibh e, shearmonaicheadh e do na Cinnich, chreideadh ann air an t-saoghal, ghabhadh suas e chum glòire.

CAIB. IV.

1 *Roinh-innis Pòl gu'n téid daoine anns na h-aimsiribh deireannach air seacharan o'n chreidimh: 6 agus chum nach biodh Timoteus a dheidh-laimh 'na dhleasdanas, thug e comhairlean eag-samhuil air.*

ANIS a ta an Spiorad ag ràdh gu soilleir, anns na h-aimsiribh deireannach³ gu'n tréig dream àraidh an creidimh, a' toirt aire do spioradaibh mealltach, agus do theagasgaibh dheamhan;

2 Tre cheilg bhreugairean⁴, air bhi d'an coguisibh air an losgadh le iarunn dearg;

3 A' toirmeasg pòsaidh agus ag iarraidh bidheanna a sheachnadh, a chruthaich Dia chum an gabhail maille ri breith-buidheachais leosan a ta creidsinn, agus aig am bheil eòlas na firinn.

4 Oir is maith gach ni a chruthaich Dia, agus cha'n ion ni sam bith a dhiùltadh, a ghabhar le breith-buidheachais:

5 Oir a ta e air a naomhachadh le focal Dé agus le h-urnuigh

6 Ma chuireas tu na nithe so ann cuimhne do na bràithribh, bithidh tu a'd' dheadh mhinistear do Iosa Crìosd, air t'altrum suas ann am briathraibh a' chreidimh, agus an deadh theagaisg, air an do ghabh thu eòlas⁵:

7 Ach diùlt sgeulachda mi-dhiadhaidh shean bhan, agus cleachd thu féin chum diadhachd.

8 Oir a ta an cleachda corporra tarbh-

ach chum beag nithe; ach a ta'n diadhachd tarbhaich chum nan uile nithe, aig am bheil gealladh na beatha a ta làthair, agus a chum teachd.

9 Is ràdh firinneach so, agus is airidh e air gach aon chor air gabhail ris.

10 Oir is ann uime so a ta sinn an dà chuid ri saothair, agus a' fulang maslaidh, do bhrìgh gu bheil dòchas⁶ againn san Dia bheò, neach a's e Slànuighear nan uile dhaoine, gu h-àraidh nan creideach.

11 Aithn agus teagaisg na nithe so.

12 Na deanadh duine sam bith tarcuais air t'òige; ach bi thusa a'd' eisimpleir⁷ do na creidich, ann am focal, ann an caithe-beatha, ann an gràdh, ann an spiorad, ann an creidimh, ann am fìorghloine.

13 Gus an tig mi, thoir an aire do leugh-airiachd, do earail, do theagasg.

14 Na dearmad an tiodhlac a ta annad, a thugadh dhuit tre fhàidheadaireachd, maille ri leagadh làmh na seanaireachd ort.

15 Smuainich air⁸ na nithibh sin; thoir thu féin gu tur dhoibh, chum gu'm bi do theachd air d'aghaidh follaiseach do na h-uile.

16 'Thoir aire dhuit féin, agus do d' theagasg; buanaich anna: oir le so a dheanamh, saoraidh tu aron thu féin, agus iadsan a tha 'g éisdeachd riut.

CAIB. V.

1 *Riaghailtean a's còir a leantuinn ann an cronachadh. 3 Mu bhantrachaibh. 17 Mu shean-airibh. 23 Comhairle do Thimoteus mu thimchioll a shlàinte, &c.*

NA garg-chronaich seanair, ach cuir impidh air mar athair, agus air na h-òig-fhìr mar bhràithribh;

2 Na mnà aodsa mar mhàithrichibh, na mnà òga mar pheathraichibh, maille ris an uile fìor-ghloine.

3 Thoir urram do bhantrachaibh a' tha 'nam bantrachaibh da rìreadh.

4 Ach ma tha bantrach air bith aig am bheil clann no oghachan, fòghlumadh iad air tùs bhi dleasdanasach 'nan tighibh féin, agus ath-dhiol a thoirt d'am parant-aibh: oir a ta so maith agus taitneach am fianuis Dé.

5 A nis cuiridh ise a ta 'na bantraich da rìreadh, agus air a fàgail 'na h-aonar, a dòchas ann an Dia, agus buanaichidh i a là agus a dh'oidhche ann an athchuingibh, agus ann an urnuighibh.

6 Ach ise a tha caitheadh a beatha am macus⁹, air dhi bhi beò, tha i marbh.

7 Uime sin àithn na nithe so dhoibh, chum gu'm bi iad neo-lochdach.

¹ luchd-càineadh.

² burair.

³ na h-aimsiribh ri teachd.

⁴ a' labhairt bhreug ann an cùilg.

⁵ air an d'ràinig thu.

⁶ carbsa.

⁷ shamhlachas.

⁸ Gabh cùran do.

⁹ gu sòghail

I. TIMOTEUS, V. VI.

8 Ach mur dean duine solar air son a chuideachd féin, agus gu h-àraidh air son muinntir a theaghlach, dh'àicheadh e'n creidimh, agus is miosa e na ana-creideach.

9 Na gabhar bantrach san àireamh a bhios fuidh thri fheachd bliadhna dh'aois, a bha 'na mnaoi aoin duine,

10 Air am bheil teistean¹ a thaobh dheadh oibre; ma dh'oil² clann, ma thug i aoidheachd uaipe, ma dh'ionnlaid i cosa nan naomh, ma dh'fhoir i air luchd-àmhghair, ma lean i gu dìchiollach gach deadh obair.

11 Ach diùlt na bantrachan òga: oir an uair a dh'fhàsas iad mear an aghaidh Chrìosd, is miann leo pòsadh;

12 Muinntir a ta fuidh dhiteadh, a chionn gu'n do thréig iad an ceud chreidimh.

13 Agus os bàrr, fòghlumaidh iad bhi dìomhanach, a' dol mu'n cuairt o thigh gu tigh; agus cha'n e mhàin dìomhanach, ach mar an ceudna gabhannach, agus a' gabhail gnothuich ris na nithibh nach buin doibh, a labhairt nithe nach bu chòir dhoibh.

14 Is àill leam uime sin na màin òga a phòsadh, iad a bhreith cloinne, a stiùradh an tìghe, agus gun chion-fàth air bith a thoirt do'n eas-caraid labhairt gu toibheumach.

15 Oir a ta cuid a cheana air dol a thaobh an déigh Shatain.

16 Ma tha aig creideach no aig bancreideach bantrachan, foireadh iad orra, agus na biodh an trom air an eaglais; chum gu'n dean i cabhair orra-san a tha 'nam bantrachaibh da rìreadh.

17 Meas gur airidh na seanairean a riaghas gu maith air urram dubailte, gu h-àraidh iadsan a tha saothreachadh san fhocal agus anns an teagasg.

18 Oir a ta an sgrìobtuir ag ràdh, Na ceangail beul an daimh a tha saltair³ an arbhair: agus, Is airidh⁴ an t-oibriche air a thuarasdal.

19 Na gabh casaid an aghaidh seanair, ach le dithis no triuir do fhianuisibh.

20 Iadsan a tha peacachadh cronaich an làthair nan uile, chum gu'n gabh càch eagal mar an ceudna.

21 Tha mi a' sparradh ort am fianuis Dé, agus an Tighearna Iosa Crìosd, agus nan ingeal taghta, gu'n coimhid⁵ thu na nithe so, gun aon a chur roimh neach eile, gun ni air bith a dheanamh le claon-bhreth.

22 Na leag do làmh gu h-obann air duine sam bith, agus na biodh comhpairt agad do pheacaibh dhaoine eile: coimhid

thu féin glan.

23 Na h-òl uisge ni's mò, ach cleachd beagan fiona air son do ghòile, agus t'an-mhuinneachd mhinic.

24 Tha peacanna cuid do dhaoinebh follaiseach roimh-làimh, a' dol rompa chum breitheanaïs; agus tha *peacanna* dhream àraidh⁶ gan leantuinn.

25 Mar an ceudna tha deadh oibre *cuid* follaiseach roimh-làimh; agus na *h-oibre* a ta air ghleus eile, cha'n fheadar am folach.

CAIB. VI.

1 *Mu dhleasdanas sheirbhiseach: 3 Cha chòir comunn bhi againn ri droch luchd-teagaisg. Is buannachd mhòr an diadhachd. 10'Se gaol an airgid freumh gach uile. 11 Cìod is còir do Thimoteus a sheachnadh, agus a leantuinn.*

MEASADH a' mheud 's a ta fuidh 'n chuing 'nan seirbhisich, gur airidh am maighstirean féin air an uile urram; chum nach faigh ainm Dhé, agus a theagasg toibheum.

2 Agus iadsan aig am bheil maighstirean creideach, na deanadh iad tarcuais orra, air son gur bràithrean iad: ach gu ma fearr leo seirbhis a dheanamh *dhoibh*, do bhrìgh gu bheil iad creideach agus ionmhuinn, 'nan luchd-comhpairt do thiodhlac a' ghràis. Na nithe so teagaisg agus earailich.

3 Ma bheir aon neach atharrachadh teagaisg uaithe, agus nach aontaich e do bhriathraibh fallain, eadhon do bhriathraibh ar Tighearna Iosa Crìosd, agus do'n teagasg, a ta réir na diadhachd:

4 Tha e uaibhreach, gun eòlas aige air ni sam bith, ach e as a chèill m' thimchioll cheisdean, agus bhriathar-chonnsachadh⁶, o'n tig farmad, comhstri, ana-caint, droch amharusan,

5 Fiar-dheasboireachd dhaoine aig am bheil intinnthruaillidh, agus as eugmhais na fìrinn, a' meas gur buannachd⁷ an diadhachd: dealaich ri an leithidibh sin.

6 Ach is buannachd mhòr an diadhachd maille ri toileachas-intinn.

7 Oir cha d'thug sinn ni air bith *leinn* do'n t-saoghal so, agus is soilleir nach urrainn sinn ni sam bith thoirt as.

8 Uime sin air dhuinn biadh agus eudach a bhi againn, bitheamaid toilichte leo sin.

9 Ach an dream le'n àill bhi beartach, tuitidh iad ann am buaireadh, agus ann an ribe agus ann an iomadh anamian amaideach agus cinrail⁸, a bhàthas daoine ann am milleadh agus ann an sgrìos.

10 Oir is e gaol an airgid freumh gach uile: ni am feadh a mhiannaich dream

¹ fianuis.

³ bualadh.

⁴ fù.

² thog i suas.

⁵ ghleidh.

⁶ strì mu fhoclaidh.

⁷ tairbhe.

⁸ dàibhalach, dosgaimneach, dochannach.

II. TIMOTEUS, I.

àraidh, chaidh iad air seacharan o'n chreidimh, agus throimh-lot siad iad féin le iomadh cràdh.

11 Ach thusa, O òglaich Dhé, teich o na nithibh sin: agus lean fireantachd, diadhachd, creidimh, gràdh, foighidin, ceannsaichd.

12 Còmhraig deadh chòmhrag¹ a' chreidimh, gabh greim do'n bheatha mhaireannaich, chum mar an ceudna an do ghairmeadh thu, agus dh'aidich thu deadh aidmheil an làthair mhòran fhianuisean.

13 Tha mi a' sparradh ort ann am fianuis Dé, a bheothaicheas na h-uile nithe, agus *am fianuis* Iosa Crìosd, a rinn fianuis air deadh aidmheil an làthair Phiontiuis Philait;

14 Thu choimhead na h-àithne so gun smal, gun lochd, gu teachd ar Tighearna Iosa Crìosd:

15 Nì, 'na àmaibh féin, a dh'fhoillsicheas an ti ta beannaichte, agus a mhàin cumhachdach, Rìgh nan rìgh agus Tighearn nan tighearna;

16 Neach 'na aonar aig am bheil neo-bhàsmhorachd, a ta 'na chòmhnuidh san

t-solus dh'ionnsuidh nach feudar teachd; neach nach faca duine sam bith, agus nach mò dh'fheudas e fhaicinn: dhasan *gu robh* urram agus cumhachd sìorruidh. Amen.

17 Thoir àithne do na daoineibh a ta saoiibhir sau t-saoghal so, gun iad a bhi àrd-inntinneach, agus gun dòchas a chur ann an saoiibhreas neo-chinnteach, ach anns an Dia bheò, a tha toirt duinn nan uile nithe gu saoiibhir r'am mealtuinn:

18 Iad a dheanamh maith, iad a bhi saoiibhir ann an deadh oibribh, ealamh gu roinn², comh-pàirteach;

19 A' tasgaidh suas doibh fein deadh bhunait fa chomhair an àm ri teachd, chum gu'n dean iad greim air a' bheatha mhair-annaich.

20 O Thimoteuis, coimhid an nì sin a dh'earbadh riut, a' seachnadh faoin-chòmhradh mhi-naomha, agus comh-chogadh eòlais d'an toirear³ gu breugach an t-ainm sin⁴.

21 Nì air bhi do dhream àraidh ag aidmheil, chaidh iad air seacharan thaobh a' chreidimh. Gràs *gu robh* maille riut. Amen.

¹ Cuir deadh chath.

² easguidh a thoirt an cuid uatha.

³ tiubhrar.

⁴ i. e. ainm eòlais.

DARA LITIR AN ABSTOIL PHOIL

CHUM

THIMOTEUIS.

CAIB. I.

1 Gràdh Phòil do Thimoteus: 5 an creidimh tréibh-dhireach a bha ann an Timoteus féin, agus 'na mhàthair agus 'na shean-mhàthair. 6 Chuir e ìmpidh air tìodhlac Dhé a bha ann a dhùsgadh suas.

POL abstol Iosa Crìosd tre thoil Dé, a réir geallaidh na beatha, a tha ann an Iosa Crìosd.

2 Gu Timoteus mo mhac gràdhach: Gràs, tròcair, agus sìth¹ o Dhia an t-Athair, agus o Iosa Crìosd ar Tighearn.

3 Tha mi toirt buidheachais do Dhia, do'm bheil mi a' deanamh seirbhis o m' shìnsiribh le coguis ghloin, gu bheil agam cuimhne ortsa a ghnàth a là agus a dh'oidheche ann am urnuighibh;

4 Air dhomh bhi ro thogarrach air thusa fhaicinn, a' cuimhneachadh do dheur, chum gu'm bi mi air mo lìonadh le gàird-eachas;

5 'Nuair a chuimhniceas mi an creidimh neo-chealgach a tha annad-sa, a

chòmhnuidh air tùs a'd' shean-mhàthair Lois, agus a'd' mhàthair Eunice: agus is deimhin leam a tha annad-sa mar an ceudna.

6 Air an aobhar so a tha mi cur an cuimhne dhuit, thu dh'ath-bheothachadh tìodhlaic Dhé, a tha annad tre chur mo làmh-sa ort.

7 Oir cha d'thug Dia dhuinne spiorad na geilt; ach *spiorad* a' chumhachd, agus a' ghràidh, agus na h-inntinn fhallain.

8 Uime sin na gabh-sa nàire do fhianuis ar Tighearna, no dhìom-sa a phrìosanach: ach biodh do chuid agad do àmhghar an t-soisgeil, a réir cumhachd Dhé;

9 A shaor² sinne agus a ghairm *sinn* le gairm naomh, cha'n ann a réir ar n-oibre, ach a réir a rùn féin, agus a ghràis a thugadh dhuinne ann an Iosa Crìosd, roimh thoiseach an t-saoghail;

10 Ach a dh'fhoillsicheadh a nis troimh theachd ar Slànuighir Iosa Crìosd, a chuir as do'n bhàs, agus a thug beatha agus neo-

¹ sìothchaint.

² thèarunn.

II. TIMOTEUS, I. II.

bhàsmhorachd chum soluis, tre an t-soisgeul;

11 Chum an d'orduicheadh mise a'm' shearmonaiche, agus a'm' abstol, agus a'm' fhear-teagais nan Cinneach:

12 An t-aobhar air son am bheil mi mar an ceudna a' fulang nan nithe so: gidheadh cha'n 'eil nàire orm: oir a ta fhios agam co ann a chreid mi, agus is dearbh leam gu bheil esan comasach air an nì sin a dh'earb mi ris a choimhead fa chomhair an là sin.

13 Cum gu daingean samhladh fìrinneach nam briathar fallain, a chuala tu uam-sa, ann an creidimh agus ann an gràdh a ta ann an Iosa Crìosd.

14 Coimhid an taisgeach maith sin a dh'earbadh riut, tre an Spiorad naomh, a tha chòmhnuidh annainn.

15 Tha fhios so agad, gu'n do phill iad-san uile a tha san Asia uam-sa; d'am bheil Phigellus agus Hermogenes.

16 Gu'n tugadh an Tighearn tròcair do theaghlach Onesiphorus; oir is minic a thug e sòlas dhomh-sa, agus cha do ghabh e nàire do m' shlabhraidh.

17 Ach an uair a bha e san Ròimh dh'iarr e mach mi gu dìchiollach, agus fhuair e mi.

18 Gu deònaicheadh an Tighearn dhàsan gu'm faigh e tròcair o'n Tighearn san là sin: agus a ta sàr-fhios agad, cia lion nithe anns an d'rinne e frithealadh dhomh-sa ann an Ephesus.

CAIB. II.

1 Chuir Pòl impidh air Timoteus a ris a bhi seasmhach agus buan-mhaireannach, agus deasdanas fìor-oglaich an Tighearna chur an gnìomh, leis an fhocal a roinn gu ceart, agus faoin-chainnt mhi-dhiadhaidh a sheachnadh. 17 Mu Himeneus agus Philetus.

UIME sin bi-sa, a mhic, làidir anns a ghràs a ta ann an Iosa Crìosd.

2 Agus na nithe a chuala tu uam-sa am measg mhòran fhianuisean, earb thusa na nithe sin féin ri daoineibh fìrinneach, a bhios iomchuidh daoine eile a theagasg mar an ceudna.

3 Fuiling thusa uime sin cruaidh-chas, mar dheadh shaighdear Iosa Crìosd.

4 Cha dean neach sam bith a leanas an cogadh e féin a ribeadh¹ ann an gnòth-uichibh na beatha so: chum gu'n toilich e an tì a thagh e gu bhi 'na shaighdear.

5 Agus mar an ceudna ged nì fear air bith sbairn, cha chrùnair e mur dean e sbairn² gu dligeach.

6 Is coir do'n treabhaiche a shaoith-richeas air tùs, comh-roinn fhaotainn do'n toradh.

7 Smuainich air na nithibh a ta mi ag

ràdh; agus gu tugadh an Tighearna dhuit tuigse anns na h-uile nithibh.

8 Cuimhnich gu'n do thogadh o na marbhaibh Iosa Crìosd, do shìol Dhaibhidh, a rèir mo shoisgeil-sa;

9 Air son am bheil mise a' fulang mar fhear droch-bheirt, *eadhon* gu geimhlibh; ach cha'n 'eil focal Dé ceangailte.

10 Uime sin tha mi ag iomchar nan uile nithe air son nan daoine taghta, chum gu'm faigh iadsan mar an ceudna an t-slàinte a tha ann an Iosa Crìosd, maille ri glòir shiorruidh.

11 Is ràdh fìor so, Ma bhàsaicheas sinn maille ris, gu'm bi sinn beò mar an ceudna maille ris:

12 Ma dh'fhuilgeas sinn, rìghichidh sinn mar an ceudna maille ris: ma dh'aicheadhas sinn e, àicheadhaidh esan sinne mar an ceudna.

13 Mur creid sinne³, gidheadh tha esan a' fantuinn fìrinneach; cha'n 'eil e'n comas da e féin àicheadh.

14 Cuir na nithe sin an cuimhne dhoibh, a' cur sparraidh orra an fianuis an Tighearna, gun iad a bhi connasachadh mu fhoclaibh anns nach 'eil tairbhe sam bith, ach a thilgeas bun os ceann an luchd-éisdeachd.

15 Dean dìchioll air thu féin a nochdadh dearbhta do Dhia, a'd' shaothraiche, nach ruig a leas nàire a ghabhail, a' roinn focal na fìrinne gu ceart.

16 Ach seachainn faoin-chainnt mhi-naomha; oir theid iad air aghaidh chum an tuilleadh mi-dhiadhadh.

17 Agus ithidh am focal mar chnàmhuinn; d'am bheil Himeneus agus Philetus;

18 Muinntir thaobh na fìrinne a chaidh air seacharan, ag ràdh gu'n deachaidh an aiseirigh cheana seach; agus a ta tilgeadh creidimh dream àraidh bun os ceann.

19 Gidheadh, a ta bunait Dhé a' seasamh daingean, aig am bheil an seula⁴ so, Is aithne do'n Tighearn an dream sin a's leis. Agus, Gach neach a tha 'g ainm-eachadh ainm Chrìosd, tréigeadh e eucoir.

20 Ach ann an tigh mòr cha'n e mhàin gu bheil soithichean òir, agus airgid, ach mar an ceudna *soithiche* fiodha, agus creadha⁵; agus cuid diubh chum urrainn, agus cuid eile chum eas-urraim.

21 Uime sin ma ghlanas neach e féin uatha so, bithidh e 'na shoitheach chum urraim, air a naomhachadh, agus iomchuidh chum féim a' mhaighstir, deas chum gach uile dheadh oibre.

22 Teich uime sin o ana-miannaibh na h-òige: ach lean fireantachd, crecidimh,

¹ a chur an sàs.

² gleachda, strì.

³ Ged nach 'eil sinne fìrinneach.

⁴ sgrìobhadh.

⁵ criadha.

gràdh, sìth, maille riu-san a ta gairm air an Tighearn o chridhe glan.

23 Ach seachainn ceisdean amaideach agus neo-fhòghluimte, air dhuit fios a bhì agad gu'n tog iad connsaichean¹.

24 Agus cha'n fheud òglach an Tighearn bhì conspoideach; ach ciùin ris na h-uile dhaoinibh, ealamh chum teagaisg, foighidneach,

25 Ann an ceannsachd a' teagasg na dream a sheasas 'na aghaidh; dh'fheuchainn an toir Dia uair air bhith aithreachas dhoibh, chum aidmheil na firinn.

26 Agus air mosgladh dhoibh gu'n téid iad as o ribe an diabhail, aig am bheil iad air am beò-ghlacadh chum a thoile.

CAIB. III.

1 *Thug Pòl rabhadh do Thimoteus mu thimchioll nan amanna ri teachd; 6 dh'innis e cò iad naimhde na firinn; 10 chuir e 'eiseimpleir fèin roimhe, 16 agus mhol e na sgrìobtuire naomha.*

ACH biodh fhios so agad, gu'n tig anns na làithibh deireannach² aim-sire cunnartach.

2 Oir bithidh daoine fèin-spéiseil, sanntach, ràiteachail, uaibhreach, toibheumach, eas-ùmhail dophàrantaibh, mi-thaing-eil, mi-naomha,

3 Gun ghràdh nàdurra, 'nan luchd brisidh coimhcheangail, tuailleasach, neogheamnuidh, borb, gun ghaol do'n maith,

4 Fealltach, ceann-laidir, àrdanach, aig am bheil bàrr gràidh do shàimh na ta aca do Dhia;

5 Aig am bheil coslas diadhachd, ach a ta 'g àicheadh a cumhachd: o'n leithidibh sin tionndadh-sa³ air falbh.

6 Oir is ann diubh so a ta 'n dream sin a dh'èalaidheas⁴ a stigh do thighibh, agus a bheir leo am braighdeanas mnà shuarach air an uallachadh le peacaibh, air an iomain le iomadh gnè ana-mianna,

7 A' sìr-fhòghlum, agus gun chomas doibh gu bràth teachd chum eòlais na firinn.

8 Agus mar a chuir Iannes agus Iambres an aghaidh Mhaois, mar sin tha iadsan a' cur an aghaidh na firinn: daoine aig am bheil inntinn thruaillidh, gun tuigse thaobh a' chreidimh.

9 Ach cha téid iad ni's faide air an aghaidh: oir bithidh am mi-chiall follaiseach do na h-uile dhaoinibh, mar a bha am mi-chiall-san mar an ceudna.

10 Ach a ta làn-fhios agad air mo theagasg-sa, mo ghnè beatha, mo rùn, mo chreidimh, m' fhad-fhulangas, mo sheirc⁵, m' fhoighidin,

11 Mo gheur-leanmhuinnibh, m' fhuilangais a thàinig orm ann an Antioch, ann

an Iconium, ann an Listra; ciod e meud nan geur-leanmhuinn a ghiùlain mi: ach asda uile shaor an Tighearn mi.

12 Seadh, fuilgidh iadsan uile leis an àill am beatha a chaitheadh gu diadhaidh ann an Iosa Criosd, geur-leanmhuinn.

13 Ach fàsaidh droch dhaoine agus mealltairean ni's miosa agus ni' s miosa, a' mealladh, agus air am mealladh.

14 Ach buanaich thusa anns na nithibh a dh'fòghluim thu, agus air an d' rinn-eadh thu dearbh-fhiosrach⁶, air dhuit fios a bhì agad cia uait a dh'fòghluim thu iad;

15 Agus o bha thu a'd leanabh gu'm b' aithne dhuit na sgrìobtuire naomha, a tha comasach air do dheanamh glic chum slàinte, tre'n chreidimh a ta ann an Iosa Criosd.

16 Tha an sgrìobtuir uile air a dheachdadh le Spiorad Dé, agus tha e tarbhach chum teagaisg, chum spreige, chum leasachaidh, chum oilein ann am fireantachd:

17 Chum gu'm bi òglach Dhé coimhlionta, làn deas chum gach uile dheadh oibre.

CAIB. IV.

1 *Chuir Pòl ìmpidh air Timoteus a dhleasdanas a dheanamh leis an uile chùram agus dhìchioll; 6 Thug e cinnte dha gu bheil a bhàs fèin am fè-gus; 9 is àill leis e theachd gu grad d'a ionnsuidh, agus Marcus a thoirt leis, agus nithe araidh eile mu'n do sgrìobh e d'a ionnsuidh.*

THA mi a' sparradh ort uime sin am fianuis Dé, agus an Tighearna Iosa Criosd, a bheir brèth air na beothaibh agus air na marbhaibh, aig a theachd dealrach, agus ann a rìoghachd:

2 Searmonaich am focal, bi dùrachdach ann an àm agus ann an an-àm; spreig⁷, cronaich, earailich leis an uile fhad-fhulangas agus theagasg.

3 Oir thig an t-àm anns nach bi fulang aca air teagasg fallain: ach air do chluas-aibh tachasach bhì aca, carnaidh iad suas dhoibh fèin luchd-teagaisg a réir an ana-mianna;

4 Agus tionndaidh iad an cluasan o'n fhirinn, agus iompachear iad chum sgeulachda faoine.

5 Ach dean thusa faire anns na h-uile nithibh, fuiling cruaidh-chas, dean obair soisgeulaiche, coimhlion⁸ do mhinistireil-eachd.

6 Oir tha mise nis gu bhì air m'òbradh, agus tha àm mo shiubhail am fagus.

7 Chòmhraig mi an deadh chòmhrag, chrìochnaich mi mo thurus⁹, ghléidh mi an creidimh.

¹ tuasaidean. ² làithibh ri teachd. ³ pill-sa. ⁴ ghuideas. ⁵ ghràdh. ⁶ a dh'earbadh riut.

⁷ tagair, dearbh. ⁸ thoir làn dearbhadh air. ⁹ mo choimhlìong, mo réis.

II. TIMOTEUS, IV.

8 O so mach taisgear fa m' chomhair crùn fireantachd, a bheir an Tighearn, an breitheamh cothromach, dhomh sau là ud: agus cha'n ann dhomh-sa a mhàin, ach dhoibh-san uile mar an ceudna, leis an ionnuihm a theachd-san¹.

9 Dean do dhìchioll air teachd a m' ionnsuidh gu luath:

10 Oir thréig Demas mi, air dha an saoghal so a ta làthair a ghràdhachadh, agus chaidh e do Thesalonica; Crescens do Ghalatia, Titus do Dhalmatia.

11 Tha Lucas 'na aonar maille rium. Gabh Marcus agus thoir leat e: oir tha e feumail domh-sa chum na ministreilcachd.

12 Ach chuir mi Tichicus gu h-Ephesus.

13 An fhalluing a dh'fhàg mi ann an Troas aig Carpus, 'nuair a thig thu, thoir leat, agus na leabhraichean, ach gu h-àraidh na meambrana².

14 Rinn Alesander an ceard-umha iomadh olc orm: gu tugadh³ an Tighearn dha a réir a ghnìomhara:

15 Bi thusa mar an ceudna air t'fhaicill uaidh, oir chuir e gu mòr an aghaidh ar briathar-ne.

16 Aig mo cheud fhreagradh cha robh aon neach leam, ach thréig na h-uile mi: nar agrar orra e.

17 Gidheadh, sheas an Tighearn làimh rium, agus neartaich e mi; chum triom-sa gu'm biodh an searmonachadh air a làn-fhoillseachadh⁴, agus gu'n chluinnadh na Cinnich uile e: agus shaoradh mi á beul an leòmhain.

18 Agus saoraidh an Tighearn mi o gach uile dhroch obair, agus gleidhidh e mi chum a rioghachd nìamhaidh féin: dha-san *gu robh* glòir gu saoghal nan saoghal. Amen.

19 Cuir fàilte air Prisca, agus air Acula, agus air teaghlach Ouesiphorus.

20 Dh'fhan Erastus ann an Corintus: ach dh'fhàg mi Trophimus gu tinn ann am Miletum.

21 Dean dìchioll air teachd roimh'n gheamhradh. Tha Eubulus, agus Pudens, agus Linus, agus Claudia, agus na bràithrean uile a' cur fàilte ort.

22 *Gu robh* an Tighearn Iosa Crìosd maille ri d' spiorad. Gràs maille ribh. Amen.

¹ fhoillseachadh-san.

² parchments. Sasg.

³ bheir.

⁴ air a dheanamh aithneichte, air a choimhlionadh.

LITIR AN ABSTOIL PHOIL

CHUM

THITUIS.

CAIB. I.

1 C'ar son a dh'fhàgadh Titus ann an Crete. 6 Cìod na buadhanna is còir bhì orra-san a thaghar 'nam ministreibh. 11 Is éigin beòil droch luchd-teagaisg a dhruideadh: 12 cìod a' ghnè dhaoine a tha anna.

POL seirbhiseach Dhé, agus abstol Iosa Crìosd, a réir creidimh¹ dhaoine taghta Dhé, agus aidinheil na fìrinn a ta réir diadhachd:

2 Ann an dòchas na beatha maireannach, a gheall Dia do nach comasach² breug a dheanamh, roimh chruthachadh an t-saoghail³;

3 Ach dh'fhoillsich e 'fhocal féin, ann an àm iomchuidh tre shearmonachadh, a dh'earbadh rium-sa, a réir àithne Dhé ar Slànuighir:

4 Chum Thituis mo dhearbhb mhic féin a réir a' chreidimh choitchionn: Gràs, tròcair, agus sìth o Dhia an t-Athair, agus o'n Tighearn Iosa Crìosd ar Slànighear.

5 Air a shon so dh'fhàg mi thu ann an

Crete, chum gu'n cuireadh tu 'n ordugh na nithe a dh'fhàgadh gun deanamh, agus gu'n suidhicheadh tu seanairean anns gach baile, a réir mar a dh'àithn mise dhuìt.

6 Ma tha neach sam bith neo-lochdach, 'na dhuine aoin mhnà, aig am bheil a chlann creideach, nach 'eil fuidh mhi-chliù thaobh ana-caitheimh, no eas-ùmh-al:

7 Oir is còir do easbuig a bhì neo-choir-each, mar stiùbhard Dhé; gun bhì féin-thoileil, no feargach, no òlmhar, no buailteach, no cionail air buannachd neòghloin;

8 Ach aoidheil, déidheil air daoinibh maith, ciallach, cothromach, naomh, measarra;

9 A' cumail an fhocail fhìorgu daingean, a réir teagaisg, chum gu'm bi e comasach le teagasg fallain, araon earail a thabhairt, agus an dream a sheasas 'na aghaidh a chur as am barail.

10 Oir a ta mòran ann a tha mi-riaghl-

¹ air son creidimh.

² aithne.

³ roimh amanna nan linn.

ailteach, a labhras gu dìomhain, agus a tha 'nam mealltairibh, gu h-àraidh iadsan a tha do'n timchioll-ghearradh:

11 Muinntir a's còir am beul a dhruideadh, dream a tha tionndadh thighean iomlan bun os ceann, a' teagasg nan nithe nach còir, air ghaol buannachd shalaich.

12 Thubhairt neach àraidh dhiubh féin, eadhon fàidh dhiubh féin, *Is breugair-ean a ghnàth na Cretich*, droch fhiadhbheathaichean, builg mhall.

13 Tha an fhianuis so fìor: air an aobhar sin cronaich¹ gu geur iad, chum gu'm bi iad fallain sa' chreidimh;

14 Gun bhi toirt aire do fhaoin-sgeulachdaibh Iudhach, agus do àitheantaibh dhaoine, a thionndaidheas o'n fhirinn.

15 Oir gu deimhin tha na h-uile nithe glan do'n dream a ta glan: ach dhoibhsan a ta salach, agus mi-chreideach, *cha 'n 'eil* aon ni glan; ach tha an inntinn agus an coguis² féin air an salachadh.

16 Tha iad a' gabhail orra eòlas a bhi aca air Dia; ach ann an oibribh tha iad 'ga àicheadh, air dhoibh bhi gràiveil, agus easumhal, agus a thaobh gach deadh oibre as eugmhais tuigse³.

CAIB. II.

1 *Comhairlean air an tabhairt do Thitus araon mu thimchioll a theagaisg agus a chaithe-beatha.*

9 *Mu dhleasdanas sheirbhiseach, agus mar an ceudna mu dhleasdanas nan uile Chrìosduidh.*

ACH labhairt thusa na nithe a thig ri teagasg fallain:

2 *Eadhon* na daoine aosda⁴ bhi aireach, suidhichte⁵, measarra, fallain sa' chreidimh, ann an gràdh, ann am foighidìn:

3 Mar an ceudna na mnàì aosda *bhi* 'nan giùlan mar is cubhaidh do naomhachd, gun bhi 'nan luchd-tuailleis, gun bhi trom air fìon, bhi 'nan luchd-teagaisg air nithibh maithe;

4 Chum gu'n teagaisg iad na mnàì òga bhi ciallach, gràdhach air am fearaibh, gràdhach air an cloinn,

5 *Bhi* eagnuidh, geamnuidh, fantuinn aig an tigh, *bhi* maith, ùmhal d'am fearaibh chum nach faigh focal Dé mi-chliù.

6 Cuir impidh air na daoineibh òga mar an ceudna, iad bhi ciallach.

7 Anns na h-uile nithibh⁶ gad nochdadh féin ann ad eisempleir dheadh oibre: ann an teagasg *a' nochdadh* neo-thruaillidheachd, suidheachadh inntinn, tréibhdhreis,

8 Cainnt fhallain nach fheudar a dhùteadh; chum gu'm bi nàire air an neach a ta 'nur n-aghaidh, a chionn nach 'eil droch ni sam bith aige r'a labhairt um-aibh.

9 *Earailich* seirbhiseich bhi ùmhal d'am

maighstiribh féin, agus an deadh-thoil-eachadh anns na h-uile nithibh: gun bhi a' labhairt 'nan aghaidh;

10 Gun bhi a' ceileachadh aon ni d'an cuid, ach a' nochdadh gach uile dheadh thairisneachd; chum gu'n dean iad teagasg Dhé ar Slànuighir maiseach anns na h-uile nithibh.

11 Oir dh'fhoillsicheadh gràs slànteil Dhé do na h-uile dhaoineibh,

12 A' teagasg dhuinn gach mi-dhiadhadh agus ana-mianna saoghalta àicheadh, agus ar beatha a chaitheadh gu stuama, gu cothromach, agus gu diadhadh anns an t-saoghal so làthair;

13 Air dhuinn sùil a bhi againn ris an dòchas bheannaichte sin, eadhon⁶ foillseachadh glòire an Dé mhòir, agus ar Slànuighir Iosa Crìosd:

14 A thug e féin air ar son, chum gu'n saoradh e sinn o gach aingidheachd, agus gu'n glanadh e dha féin sluagh sonruichte, eudmhor mu dheadh oibribh.

15 Na nithe so labhair, agus earailich, agus cronaich leis an uile ùghdarras. Na deanadh duine sam bith àith ort.

CAIB. III.

1 *Tha Titus air a sheòladh le Pòl, araon mu thimchioll nan nithe a bhuineadh dha theagasg, agus nach buineadh; 10 is àill leis e chur cùl ri luchd saobh-chreidimh: 12 an dèigh so, dh'innis e dha an t-àm, agus an t-àit anns am b'àill leis e theachd d'a ionnsuidh; agus mar sin chrìochnaich e.*

CUIR an cuimhne dhoibh bhi ùmhal do uachdaranachdaibh agus do chumhachdaibh, freagarrach do luchd-riaghlaidh, ullamh chum gach uile dheadh oibre.

2 Gun olc a labhairt mu neach air bith, bhi neo-thuasaideach, min, a' taisbeanadh an uile cheannsachd do na h-uile dhaoineibh.

3 Oir bha sinne féin uair-éigin eu-céillidh, eas-ùmhal, air seacharan, a' deanamh seirbhis do iomadh gnè do anamaibh agus do an-toilbha, a' caith-eadh ar beatha ann am mì-run agus am farmad, fuath-thoilteannach, agus a' toirt fuath d'a chéile.

4 Ach an uair a dh'fhoillsicheadh caoimhneas agus gràdh Dhé ar Slànuighir do dhaoineibh,

5 Cha'n ann o oibribh fireantachd a rinn sinne, ach a réir a thròcair féin shaor⁷ e sinn, tre ionnlad na h-ath-ghineamhuinn, agus ath-nuadhachadh an Spioraid naomh:

6 A dhòirt e oirne gu saoi bhir, tre Iosa Crìosd ar Slànuighear;

7 Chum ar dhuinn bhi air ar fireanach-

¹ sprèig.

² coimh-fhios, coinsiens.

³ mi-giùleuda, neo-ìomchuidh chum gach deadh oibre.

⁴ na seanairean.

⁵ fonnmhor.

⁶ agus.

⁷ thearùnn, shlànuiach.

adh tre a ghràs-san, gu'm bitheamaid air ar deanamh 'nar n-oighreachaibh a réir dòchais na beatha maireannaich.

8 Is fíor an ràdh so, agus is àill leam thu thoirt dearbh-chinnte air na nithibh sin, chum gu'm biodh iadsan a chreid ann an Dia, cùramach air toiseach a bhi aca ann an deadh oibribh: oir tha na nithe so maith agus tarbhach do dhaoibh.

9 Ach seachainn ceisdean amaideach, agus sloinnteachd, agus conspoidean, agus connasachadh mu'n lagh; oir tha iad gun tairbhe agus dìomhain.

10 Duine a ta 'na shaoibh-chreideach¹, an dèigh na ceud agus an dara comhairle diùlt:

11 Air do fhios bhi agad gu bheil a leithid sin do dhuine air a chur bun os

ceann, agus gu bheil e a' peacachadh, air dha bhi air fhéin-dhiteadh.

12 'Nuair a chuireas mi Artemas a d'ionnsuidh, no Tichicus, dean dichìoll air teachd a m' ionnsuidh gu Nicopolis: oir is ann an sin a chuir mi romham an geamhradh a chaitheadh.

13 Tha Senas am fear-lagha agus Apollos air an aghaidh san t-slighe gu dùrachdach, chum nach bi ni air bith dh'uireasbhuidh orra.

14 Agus fòghlumadh ar muinntir-ne mar an ceudna deadh oibre a dheanamh gu dùrachdach fa chomhair ghnàthachadh feumail, chum nach bi iad neo-tharbhach.

15 Tha'n dream a ta maille rium uile a' cur fàilte ort. Cuir fàilte orra-san le'n ionmhuinn sinne sa' chreidimh. Gràs maille ribh uile. Amen.

¹ eiriceach.

LITIR AN ABSTOIL PHOIL

CHUM

PHILEMOIN.

CAIB. I.

1 *Is subhach le Pòl bhi cluinntinn mu chreidimh agus ghràdh Philemoin: 9 air am bheil e 'g iarraidh maithneas a thabhairt do Onesimus a sheirbhiseach, agus gabhail ris a ris gu cairdeil.*

POL, prìosanach Iosa Criosd, agus Timoteus ar bràthair, chum Philemoin a's ionmhuinn leinn, agus ar comh-shaothraiche,

2 Agus chum Aphia ionmhuinn, agus Archipuis ar comh-shaighdear, agus chum na h-eaglais a ta ann do thigh:

3 Gràs gu robh dhuibh, agus sìth o Dhia ar n-Athair, agus o'n Tighearn Iosa Criosd.

4 Tha mi a' toirt¹ buidheachais do m' Dhia, a' sìr-thoirt luaidh ort-sa ann am urnuighibh,

5 Air dhomh bhi cluinntinn mu d' ghràdh, agus chreidimh, a tha agad a thaobh an Tighearna Iosa, agus a thaobh nan uile naomh;

6 Chum gu'm bi comh-chomunn do chreidimh éifeachdach ann an aidmheil an uile mhaith a tha annaibh ann an Iosa Criosd.

7 Oir tha subhachas ro mhòr agus comhfhurtachd againne ann do ghràdh-sa do bhrìgh gu bheil innigh² nan naomh air faotainn suaimhneis³ tromhad-sa, a bhràthair.

8 Uime sin ged fheudainn bhi ro dhàna

ann an Criosd chum an ni a ta fionchuidh àithneadh dhuit-se,

9 Gidheadh is fearr leam air son gràidh impidh chur ort⁴, air bhi dhomh mar Phòl aosda, agus a nis mar an ceudna a'm' phrìosanach air son Iosa Criosd.

10 Guidheam ort air son mo mhic Onesimuis, a ghin mi ann am gheimhlibh:

11 Neach a bha uair-éigin neo-tharbhach dhuit-se, ach a nis a tha tarbhach dhuit-se agus dhomh-sa:

12 Neach a chuir mi air ais: uime sin gabh-sa ris mar ri m' innigh féin.

13 Neach bu mhiann leam a chumail maille rium féin, chum gu'n deanadh e frithealadh dhomh ann ad àite-sa, ann an gheimhlibh an t-soisgeil:

14 Ach as engmhais t'inntinn-sa cha bu toil leam ni sam bith a dheanamh; chum nach biodh do mhaith-sa mar gu b'ann a dh'aindeoin, ach o d' thoil féin.

15 Oir theagamh gur ann air a shon so a dh'fhàg e thu⁵ rè tamuill, chum gu'm faigheadh tu e gu sìorruidh;

16 Cha'n ann a' so suas mar sheirbhiseach, ach os ceann seirbhisich, 'na bhràthair gràdhach, gu h-àraidh dhomh-sa, agus nach mò na sin dhuit-se, araon anns an fheòil, agus anns an Tighearn?

17 Uime sin ma mheasas tu mise mar fhear comh-roinne, gabh ris-san mar rium féin.

¹ Bheiream.

² cridhe.

³ fois.

⁴ guidheadh ort.

⁵ a dhealaicheadh e uait

18 Agus ma rinn e eucòir ort, no ma dhligheas e' mi sam bith dhuit, cuir sin as mo leth-sa.

19 Sgrìobh mise Pòl le m' làimh féin e, agus dìolaidh mi e: ged nach 'eil mi ag ràdh riut, gu'n dlighhear leat thu féin os bàrr dhomh.

20 Seadh, a bhràthair, faigheam gàird-eachas do d' thaobh san Tighearn: dean suaimhneach mo chridhe san Tighearn.

21 Air dhomh bhi earbsach a d' ùmh-lachd sgrìobh mi a d' ionnsuidh, oir tha

fhios agam gu'n dean thusa mar an ceud-na ni's mò na a ta mi ag ràdh.

22 Ach maille ri so ulluich mar an ceud-na fardoch air mo shon: oir tha dòchas agam, tre bhur n-urmuighibh-sa, gu'n toirear² mi dhuibh.

23 Tha Epaphras mo chomh-phrìosan-ach ann an Iosa Crìosd,

24 Marcus, Aristarchus, Demas, Lucas, mo chomh-luchd-oibre, a' cur fàilte ort.

25 Gràs ar Tighearna Iosa Crìosd gu robh maille ri bhur spiorad-sa. Amen.

¹ ma tha e am fàciabhb.

² deònuicear, tiodhlacair.

LITIR AN ABSTOIL PHOIL

CHUM NAN

EABHRUIDHEACH.

CAIB. I.

1 Tha Crìosd a thàinig o'n Athair anns na h-amaibh deireannach so, 4 ni's mò na na h-aingil, arsan thaobh a phearsa agus a dhreuchd.

DIA, a labhair o shean¹ gu minic, agus air iomadh dòigh ris na h-aithrichibh leis na fàidhibh,

2 Labhair e anns na làithibh deireannach so ruinne tre a Mhac, a dh'orduich e 'na oighre air na h-uile nithibh, tre'n do chruthaich e fòs na saoghal.

3 Neach air bhi dha 'na dhcalradh a ghloire-san, agus 'na fhior iomhaigh² a phearsa, agus a' cumail suas nan uile nithibh le focal a chumhachd, 'nuair a ghlan e ar peacanna troimh féin, shuidh e air deas làimh na mòrachd anns na h-àrd-aibh:

4 Air dha bhi air a dheanamh ni's ro òirdheirce na na h-aingil, mheud 's gu'n d' fhuair e³ mar oighreachd ainm bu ro fhearr na iadsan.

5 Oir cò do na h-aingil ris an dubhairt e uair air bith, Is tu mo Mhac-sa, an diugh ghin mi thu? agus a ris, Bithidh mise a'm⁴ Athair dha-san, agus bithidh esan 'na Mhac dhomh-sa.

6 Agus a ris, 'nuair a tha e a' tabhairt a' cheud-ghin a steach do'n t-saoghal, a ta e ag ràdh, Agus deanadh uile aingil Dé aoradh dha.

7 Agus a thaobh nan aingeal a ta e ag ràdh, Neach a ta deanamh 'aingle 'nan spioradaibh⁴, agus a mhinistirean 'nan lasair theine.

8 Ach ris a' Mhac a ta e ag ràdh, Tha

do righ-chainthir, a Dhé, gu saoghal nan saoghal; is slat-rìoghail ro chothromach slat do rìoghachd-sa:

9 Ghràdhaich thu fireantachd, agus thug thu fuath do aingidheachd; uime sin dh'ung Dia, do Dhia-sa, thu le oladh aoibhneis os ceann do chompanacha.

10 Agus, Leag thusa, a Thighearn, bun-aite na talmhainn air tùs; agus is iad na nèamha oibre do làmh:

11 Teirgidh iadsan, ach mairidh tusa: agus fàsaidh iad uile sean mar eudach;

12 Agus fillidh tu iad mar bhrat, agus caochlaidhear iad: ach is thusa an ti ceudna, agus cha'n fhàilnich do bhliadhnachan.

13 Ach cò do na h-ainglibh ris an dubhairt e uair air bith, Suidh air mo dheas-làimh, gus an cuir mi do naimhde 'nan stòl-chos fo d' chosaibh?

14 Nach spiorada frithealaidh iad uile, air an cur a mach chum frithealaidh dhoibh-sa a bhios 'nan oighreachaibh air slàinte?

CAIB. II.

1 Is còir dhuinn bhi ùmhal do Chrìosd, 5 agus sin do bhrìgh gu'n d'aontaich e ar nàdur-ne a ghabhail air féin, 14 mar a bha sin feumail.

UIME sin is còir dhuinn an ro thuilleadh aire a thoirt do na nithibh a chuala sinn, air eagal uair sam bith gu'n leigeanmaid ruith leo.

2 Oir ma bha am focal a labhradh le h-ainglibh seasmhach, agus gu'n d'fhuair gach uile bhriseadh agus eas-ùmh-lachd dìol-thuarasdal dlìgheach;

¹ anns na h-amaibh a chaidh seachad.

² dhcalbh, riochd.

³ uiread ni's fearr na na h-aingil as a fhuair e.

⁴ a theachdairean 'nan gaothaibh.

EABHRUIDHICH, II. III.

3 Cionnus a théid sinne as, ma ni sinn dimeas air slàinte co mòr, a thòisich air tùs air bhi air a labhairt leis an Tighearn, agus a rinneadh dearbhta dhuinne leo-san a chual e;

4 Air bhi do Dhia a' deanamh comh-fhianuis leo, araon le comharaibh agus le h-iongantasaibh, agus le feartaibh eag-samhla,¹ agus le tiodhlacaibh an Spioraid naoinh, a réir a thoile féin?

5 Oir cha do chuir e fo cheannsal nan aingeal an saoghal ri teachd, mu'm bheil sinn a' labhairt.

6 Ach rinn neach fianuis ann an ionad àraidh, ag ràdh, Ciod e an duine gu'n cuimhniceadh tu air? no mac an duine gu'n fiosraicheadh tu e?

7 Rinn thu e rè tamuill bhig ni's isle na na h-aingil; chrùn thu e le glòir agus le h-urram, agus chuir thu e os ceann oibre do làmh;

8 Chuir thu na h-uile nithe sìos fuidh a chosaibh. Oir ann an cur nan uile nithe fuidh dha, cha d'fhàg e ni air bith gun chur fuidhe. Ach a nis cha'n 'eil sinn a' faicinn nan uile nithe fathast air an cur f' a cheannsal.

9 Ach chi sinn Iosa, a rinneadh ré ùine bhig ni b'isle na na h-aingil, chum tre ghràs Dé gu'm blaiseadh e bàs air son gach uile dhuine, tre fhulang a' bhàis air a chrìnachd le glòir agus le h-urram.

10 Oir b'iomchuidh dhasan, air son *am bheil* na h-uile nithe, agus tre'm *bheil* na h-uile nithe, ann an tabhairt² mhòr-an mliac chum glòire, ceannard an slàinte a dheanamh foirfe tre fhulangas-aibh.

11 Oir a ta araon an ti a naomhaicheas, agus iadsan a naomhaichear, uile o aon: air an aobhar sin cha nàr leis bràithrean a ghairm diubh,

12 Ag ràdh, Cuiridh mi t'ainm an céill do m' bhràithribh, ann am meadhon na h-eaglais seinnidh mi clùid dhuit.

13 Agus a ris, Cuiridh mi mo dhòchas ann. Agus a ris, Feuch mise, agus a' chlànn a thug Dia dhomh.

14 Uime sin, mheud gu bheil aig a' chloinn comh-roinn do fheòil agus do fhuil, ghabh esan mar an ceudna roinn diubh sin; chum tre'n bhàs gu'n claidh-eadh e esan, aig am bheil cumhachd a' bhàis, 'se sin, an diabhul;

15 Agus gu'n saoradh e iadsan a bha tre eagal a' bhàis ré am beatha uile fo dhaorsa.

16 Oir gu deimhin cha do ghabh e *nàdur* nan aingeal air³ ach ghabh e siol Abrahaim air.

17 Uime sin b'fheumail da anns na h-uile nithibh bhi air a dheanamh cos-

mhuil r'a bhràithribh; chum gu'm biodh e 'na àrd-shagart trócaireach agus dileas ann an nithibh a thaobh Dhé, chum réite a dheanamh air son pheacanna an t-sluaigh:

18 Oir a mheud gu'n d'fhuiling e féin, air dha bhi air a bhuairleadh, is comasach e air cabhair a dheanamh orra-san a ta air am buairleadh.

CAIB. III.

1 *Is mò Criosd na Maois: 7 uime sin mur creid sinn annsan, bithidh sinn nì's toillteanaiche air diogh-altas na Israel cruaidh-chridheach.*

UIME sin, a bhràithre naomha, a ta 'nur luchd-comhairt do'n ghairm nèamhaidh, thugaibh fa' near Iosa Criosd, abstol agus àrd-shagart ar n-aidmheil;

2 A bha dileas dhasan a dh'orduich e, amhuil a bha Maois mar an ceudna 'na thigh-san uile.

3 Oir mheasadh gu'm b'airidh an *Ti* so air glòir bu mhò na Maois, mheud gu bheil tuilleadh urraim aig an neach a thog an tigh, na aig an tigh féin.

4 Oir tha gach uile thigh air a thogail le aon éigin; ach an ti a thog na h-uile nithe, *is e* Dia.

5 Agus gu deimhin *bha* Maois dileas 'na thigh-san uile mar sheirbhiseach, chum fianuis air na nithibh sin a bha gu bhi air an labhairt an déigh sin;

6 Ach Criosd mar Mhac os ceann a thighe féin: agus is sinne a thigh-san, ma chumas sinn dànachd, agus gàirdeachas an dòchais, gu daingean gus a' chrìoch.

7 Uime sin, mar a ta an Spiorad naomh ag ràdh, An diugh, ma chluinneas sibh a ghuth,

8 Na cruaidhichibh bhur cridhe, mar anns a' bhrosnachadh, ann an là a' bhuaireidh san fhàsach:

9 Far an do bluaire bhur n-aithriche mi, agus a dhearbhadh iad mi, agus a chunnaic iad m'oire ré dhà fhichead bliadhna.

10 Uime sin bha diom orm ris a' ghinealach sin, agus thubhairt mi, Tha iad a ghnàth air seacharan 'nan cridhe; agus cha do ghabh iad eòlas air mo shlighibh-sa.

11 Ionnsu gu'n d'thug mi mo mhionnan a'm' fheirg, Nach téid iad a steach do m' shuainhneas.

12 Thugaibh an aire, a bhràithre, air eagal gu'm bi ann an aon neach agaibh droch cridhe mi-chreidimh, ann an tréig-sinn an Dé bheò.

13 Ach earailichibh a chéile gach aon là, am feadh a ghoirear An là 'n diugh dheth; air eagal gu'n cruaidhichear neach air bith agaibh tre nhealltaireachd a' pheacaidh.

¹ iomadh-ghnèitheach.

² treòrachadh.

³ cha do ghabh e greim do na h-aingilbh.

14 Oir rinneadh sinne 'nar luchd-comh-pairt do Chrìosd, ma chumas sinn toiseach ar muinghin gu daingean gus a' chrìoch;

15 Am feadh a theirear, An diugh, ma chluinneas sibh a ghuth, na cruaidhichibh bhur cridhe, mar anns a' bhrosnuchadh.

16 Oir air do dhream àraidh chluinntinn, bhrosnuich iad: ach cha b'iadsan uile a thàinig a mach as an Eiphit le Maois.

17 Ach cò ris a bha diom air rè dhà fhichead bliadhna? *nach ann* riu-san a pheacaich, muinntir d'an do thuit an coluinnean anns an fhàsach?

18 Agus cò iad d'an d'thug e a mhionn-an nach rachadh iad a steach d'a shuaimhneas¹, ach dhoibh-san nach do chreid²?

19 Mar so chi sinn nach b'urrainn iad dol a steach air son mi-chreidimh.

CAIB. IV.

1 *Tha fois nan Crìosduidhean air a faghail tre chreidimh.* 12 *Cumhachd focail Dé.* 14 *Tre ar n-àrd-shagart Iosa Mac Dhé, a bha fuaidh thrioblaidibh, ach saor o pheacadh,* 16 *is còir dhuinn, agus feudaidd sinn dol gu dàna chum caithir nan gràs.*

UIME sin biodh faitheas³ oirnn, air eagal air bhì do ghealladh dol a steach d'a shuaimhneas air fhagail *againn*, gu'n tigeadh aon neach agaibh⁴ a dhéidhlàimh air.

2 Oir shearmonaicheadh an soisgeul duinne, amhuil a *rinneadh* dhoibh-san: ach cha robh tairbhe dhoibh anns an fhocal a chaidh shearmonachadh, do bhrìgh nach robh e air a mheasgadh le creidimh anns an dream a chual e.

3 Oir tha sinne a chreid a' dol a steach do shuaimhneas, amhuil a thubhairt e, Mar a thug mi mo mhionnan a'm' fheirg, Nach téid iad a steach do m' shuaimhneas: ged bha na h-oibre crìochnaichte o thoiseach an t-saoghail.

4 Oir labhair e ann an ionad àraidh mu'n t-seachdamh là air an dòigh so, Agus ghabh Dia fois air an t-seachdamh là o 'oibribh uile.

5 Agus anns an *ionad* so a ris, Cha téid iad a steach do m' shuaimhneas.

6 Do bhrìgh uime sin gu'n tuigear uaithe so gu'n téid dream àraidh a steach ann, agus nach deachaidh an dream, d'an do shearmonaicheadh e air tùs, a steach air son am mi-chreidimh;

7 A ris, tha e suidheachadh là àraidh, ag ràdh ann an Daibhidh, An diugh, an déigh aimsir co fhada; mar a theirear, An diugh, ma chluinneas sibh a ghuth, na cruaidhichibh bhur cridhe.

8 Oir nam biodh Iosua⁵ air toirt suaimhneis dhoibh, cha labhradh e an déigh sin mu là eile.

9 Uime sin dh'fhàgadh fois *fa chomhair* sluaigh Dhé.

10 Oir an ti a chaidh steach d'a shuaimhneas-san, ghabh esan tàmh o 'oibribh-san, amhuil a *ghabh* Dia o 'oibribh féin.

11 Deanamaid dìchioll uime sin air dol a steach do'n t-suaimhneas sin, air eagal gu'n tuit aon neach a réir eisempleir cheudna a' mhi-chreidimh⁶.

12 Oir *tha* focal Dé beò agus cumhachdach, agus nì's géire na claidheamh dà fhaobhair air bith, a' ruigheachd eadhon chum eadar-sgaraidh an anania agus an spioraid, agus nan alt agus nan smear, agus a' toirt breth air smuaintibh agus rùnaibh⁷ a' chridhe.

13 Agus cha'n 'eil creutair sam bith nach 'eil follaiseach⁸ na làthair-san: ach *a ta* na h-uile nithe lomnochd, agus fosgaile do shùilibh an ti d'am feum sinn cunntas a thabhairt⁹.

14 Do bhrìgh uime sin gu bheil againn àrd-shagart mòr, a chaidh a steach do na nèamhaibh, Iosa Mac Dhé, cumamaid gu daingean *ar* n-aidmleil.

15 Oir cha'n 'eil àrd-shagart againn nach 'eil comasach air comb-flulangas a bhì aige ri ar n-anmhuinneachdaibh; ach a bhuairleadh sna h-uile nithibh air an dòigh cheudna ruinne, *ach* as eugmhais peacaidh.

16 Thigearmaid uime sin le dànachd gu rìgh-chaithir nan gràs, chum gu faigh sinn tròcair, agus gu'n amais sinn air⁹ gràs chum cabhair ann an àm feuma.

CAIB. V.

1 *Ughdarras agus urram sagartachd ar Slànuighir:* 11 *mairnealachd 'nan eòlas air a chronachadh.*

OIR tha gach uile àrd-shagart, air a thoirt o mheasg dhaoine, air orduchadh air son dhaoine ann an nithibh a thaobh Dhé, chum gu'n toir e suas araon tìodhlacan agus ìobairtean air son pheacanna:

2 Neach a ta a comasach air truas a ghabhail ris an dream a ta aineolach, agus air seacharan: do bhrìgh gu bheil e féin mar an ceudna air a chuairteachadh le h-anmhuinneachd:

3 Agus air a shon so, is còir dha ìobradh air son pheacanna, mar as leth an t-sluaigh, is amhuil sin as a leth féin mar an ceudna.

4 Agus cha glabhadh aon duine an t-urram so dha féin, ach an ti a ta air a ghairm o Dhia, mar *bha* Aaron:

5 Is amhuil sin, cha do ghlòraich Crìosd e féin, gu bhì air a dheanamh 'na àrd-shagart; ach an ti a thubhairt ris, Is tu mo Mhac, an diugh ghain mi thu.

¹ fois. ² a bha eas-ùmhail. ³ eagal.
⁴ dhuinn. ⁵ Iosa. ⁶ eas-ùmhachadh.

⁷ breithneachaidh. ⁸ ris an bhicil ar gnothuch-ne.
⁹ gu'm faigh sinn.

6 A réir mar a ta e ag ràdh mar an ceudna ann an *ionad* eile, *Is* sagart *thu* gu sìorruidh a réir orduigh¹ Mhelchise-deic.

7 Neach ann an làithibh 'fheòla, an déigh dha urnuighean agus athchuingean, maille ri h-àrd-éighich agus deuraibh, iòbradh suas do'n tì a bha comasach air a shaoradh o'n bhàs, agus dh'éisdeadh ris thaobh an nì roimh an robh eagal air².

8 Ged bu Mhac e, dh'fhògluime e ùmh-lachd o na nithibh a dh'fhuiling e:

9 Agus air dha bhi air a dheanamh foirfe, rinneadh e 'na ùghdar slàinte shìorruidh dhoibh-san uile a bhios ùmhla dha;

10 Air a ghairm le Dia 'na àrd-shagart, a réir orduigh Mhelchise-deic;

11 Mu'm bheil mòran againn r'a labhairt, agus cruaidh r'am mineachadh; do bhrìgh gu bheil sibh mall 'nur n-éisd-eachd.

12 Oir ged bu chòir dhuibh a réir na h-aimsir bhi 'nur luchd-teagaisg, tha feum agaibh gu'n teagaisgeadh neach dhuibh a ris ciod iad ceud-thoiseacha bhriathar³ Dhé; agus tha sibh air teachd chum *na h-inbhe* sin, gur mò a ta bainne dh'uir-easbluidh oirbh na biadh làidir.

13 Oir gach neach a ta gnàthachadh bainne, tha e neo-theòmadh⁴ air focal na fireantachd: oir is naoidhean e.

14 Ach is ann do dhaoineibh foirfe a bhuineas biadh làidir, aig-am bheil an ceud-faidh, tre ghnàthachadh fada, air an cleachdadh ri eadar-dhealachadh a chur eadar maith agus olc.

CAIB. VI.

1 *Chuir Pòl impidh air na Eabhruidhich, gun iad a thuitteam air an ais o'n chreidimh; 11 ach bhi seasmhach, 12 dìchiollach, agus feitheamh gu foighidneach ri Dia, 13 do bhrìgh gu bheil esan ro fhìor agus cinnteach 'na ghealladh.*

UIME sin air fàgail duinn ceud-thoiseacha teagaisg Chrìosd, rachamaid air ar n-aghaidh chum foirfeachd; gun bhi ris a' suidheachadh bunait aithreachais o oiribh marbha, agus creidimh thaobh Dhé,

2 *Bunait* teagaisg nam baisde, agus leagaidh nan làmh, agus aiseirigh nam marbh, agus breitheanais shìorruidh.

3 Agus nì siun so, ma cheadaicheas Dia.

4 Oir is eu-comasach an dream sin a chaidh aon uair a shoillseachadh, agus a bhlaic an tiodhlac nèmhaidh, agus a rinn-eadh 'nan luchd-comhpairt do'n Spiorad naomh,

5 Agus a bhlaic deadh fhocal Dé, agus cumhachdan an t-saoghail ri teachd⁵,

6 Agus a thuit air falbh, ath-nuadhach-

adh chum aithreachais: do bhrìgh gu bheil iad a' ceusadh Mhic Dhé a ris dhoibh féin, agus 'ga chur gu uàire fhollais-ich⁶.

7 Oir an talamh a dh'òlas a steach an t-uisge a tha teachd gu minic air, agus a bheir uath luibheanna iomchuidh do'n dream leis an saothraichear e, gheibh e beannachadh o Dhia:

8 Ach an talamh sin a bheir uath droighionn agus drisean *tha* e air a chur air cùl, agus fagus do mhallachadh; d'an deireadh bhi air a losgadh.

9 Ach is dearbh leinn nithe a's fear mu'r timchioll-sa, a mhuinntir ionmhuinn, agus nithe a tha dlùth do shlàinte, ged tha sinn a' labhairt mar so.

10 Oir cha'n 'eil Dia mi-chothromach, gu'n dì-chuimhnichheadh e obair agus saoth-air bhur gràidh, a nochd sibh a thaobh 'ainme-san, am feadh gu'n d'rinn sibh frithealadh do na naomhaibh, agus gu bheil sibh a' frithealadh.

11 Agus is miann leinne gu'n dean gach aon agaibh an dùrachd ceudna a nochdadh, chum làn-dearbhaidh an dòchais gus a' chrìoch:

12 Chum nach bi sibh leasg, ach 'nur luchd-leanmhuinn orra-san, a tha tre chreidimh agus fhoighidhin a' sealbhachadh nan geallanna.

13 Oir an uair a thug Dia gealladh do Abraham, do bhrìgh nach feudadh e mionnau a thoirt air neach bu mhò, thug e mionnan air féin.

14 Ag ràdh, Gu fìrinneach, beannaichidh mi gu mòr thu⁷, agus nì mi ro lionmhor thu.

15 Agus mar sin an déigh dhasan feitheamh gu foighidneach, fhuaire e sealbh air a' ghealladh.

16 Oir gu deimhin bheir daoine mionnan air an neach a's mò: agus dhoibh-san is crìoch air gach uile chomhsachadh mionnan chum daingneachaidh.

17 Uime sin air bhi do Dhia toileach air neo-chaohluidheachd a chomhairle fheuchainn nì's pailte do oighreachaibh a' gheallaidh, dhaingnich e le mionnaibh e:

18 Chum tre dhà nì neo-chaohluidheach, agus an *robh* e eu-comasach gu'n deanadh Dia breug, gu'm biodh againne comhfhurtachd làidir, a theich chum di-dein gu greim a dheanamh air an dòchas a chuireadh romhainn:

19 Nì a tha againn mar acair an anama, araon cinnteach agus daingean, agus a theid a steach do'n ionad sin a ta'n taobh stigh do'n bhrat-roinn,

20 Far an deachaidh an roimh-ruith-fhear a steach air ar son-ne, *eadhon* Iosa,

¹ coslais. ² thugadh fuasgladh dha o eagal.

³ oracla. ⁴ neo-iùlmhar. ⁵ na tinn ri teachd.

⁶ a' deanamh ball-magaidh dheth.

⁷ a' beannachadh beannaichidh mì thu. Gr.

a rinneadh 'na àrd-shagart gu siorruidh a réir orduigh Mhelchisedeic.

CAIB. VII.

1 *Is sagart Iosa Criosd a réir orduigh Mhelchisedeic; 11 agus mar sin n'is ro òirdheirce na na sagairt a tha do orduigh Aaroin.*

OIR b'e am Melchisedeic so righ Shaleim, sagart an Dé a's ro àirde, neach a choinnich Abraham a' pilltinn o àr' nan righrean, agus a bheannaich e;

2 Da'n d'thug Abraham eadhon deachamh do'n uile: neach a's e air tùs, air a eadar-theangachadh, righ na fireantachd, agus 'na dhéigh sin mar an ceudna, righ Shaleim, 'se sin, rigl na sìthle;

3 Gun athair, gun mhàthair, gun sinn-sireachd, gun toiseach làithean, gun deireadh beatha aige; ach air a dheanamh cosmluil ri Mac Dhé, tha e fantuinn 'na shagart gu siorruidh².

4 A nis thugaibh an aire cia mòr an duine so, da'n d'thug eadhon am prìomh-athair³ Abraham an deachamh do'n chreich.

5 Agus gu deimhin iadsan do chloinn Lebhì, a tha faotainn na sagartachd, tha àithne aca deachamh a thogail o'n t-sluagh a réir an lagha, sin r'a ràdh, o'm bràithribh féin, ged thàinig iad a mach á leas-ràdh Abraham:

6 Ach an ti nach 'eil air a shloinneadh uatha-san, fhuaire deachamh o Abraham, agus bheannaich e esan aig an robh na geallanna.

7 Agus gun agadh sam bith, beannaichear an ti a's lugha leis an ti a's fearr.

8 Agus an so tha daoine a gheibh bàs a' faotainn deachaimh: ach an sin an ti aig am bheil fianuis gu bheil e beò.

9 Agus mar a dh'fheudas mi ràdh, fhuaradh ann an Abraham deachamh o Lebhì féin, a thogas an deachamh:

10 Oir bha e fathast ann an leasràidh 'athar, an uair a choinnich Melchisedec e.

11 A nis nan tigeadh foirfeachd tre shagartachd nan Lebhithach, (oir is ann r'a linn a thugadh an lagh do'n t-sluagh,) cìod am feum a bha air sagart eile éirigh a réir orduigh Mhelchisedeic, agus nach biodh e air a ghairm a réir orduigh Aaroin?

12 Oir air do'n t-sagartachd bhi air a h-atharrachadh, is éigin an lagh bhli air atharrachadh mar an ceudna.

13 Oir an ti air an labhrar na nithe sin, buinidh e do thréibh eile, do nach d'rinn aon neach frithealadh aig an altair.

14 Oir is soilleir gur ann o Iudah dh'éirich ar Tighearn, treubh air nach do labhair Maois ni air bith thaobh sagartachd.

15 Agus tha e fathast n'is ro-shoilleire, am feadh gu'n d'éirich sagart eile a réir coslais Mhelchisedeic,

16 A rinneadh 'na shagart, cha'n ann a réir lagha àithne theolmhoir, ach a réir cumhachd beatha gun chrìoch.

17 Oir tha e deanamh fianuis, Gur sagart thu gach linn a réir orduigh Mhelchisedeic.

18 Oir gu deimhin tha an àithne roimhe air a cur air cùl, air son i bhi anmhuun agus neo-tharbhach.

19 Oir cha d'rinn an lagh ni sam bith foirfe, ach rinn toirt a steach dòchais a's fearr e; tre'm bheil sinn a' teachd am fagus do Dhia.

20 Agus a mheud nach d'rinneadh sagart deth gun mhionnaibh;

21 (Oir rinneadh sagarta dhiubh-san as eugmhais mhionnan: ach dheth-san le nionnaibh, tre'n ti a thubhairt ris, Mhionnaich an Tighearn, agus cha ghabh e aithreachas, Is sagart thu gu siorruidh, a réir orduigh Mhelchisedeic:)

22 Is cò mor as sin a rinneadh Iosa 'na urras air coimhcheangal a's fearr.

23 Agus bha gu deimhin mòran diubh-san 'nan sagartaibh, do bhrìgh gu'n do bhacadh dhoibh leis a' bhàs bhi maireann:

24 Ach an duine so, do bhrìgh gu mair e gu siorruidh, tha sagartachd neo-chaochluidheach aige.

25 Air an aobhar sin, tha e mar an ceudna comasach air an dream a thig a dh'ionnsuidh Dhé trid-san a thèarnadh gu h-ìomlan⁵, do bhrìgh gu bheil e beò gu siorruidh gu eadar-ghuidhe a dheanamh air an son.

26 Oir bha shamhuil sin do àrd-shagart iomchuidh dhuinne, a bha naomh, neo-lochdach, neo-thruaillidh, air a dhealachadh⁶ o pheacachaibh, agus a rinneadh n'is àirde na na n'eamha;

27 Nach feum gach là mar na h-àrd-shagairt ud iobairtean thoirt suas, air tùs air son a pheacanna féin, agus an déigh sin air son pheacanna an t-sluaigh: oir rinn e so aon uair, san àm a thug se e féin mar iobairt.

28 Oir tha an lagh a' deanamh àrd-shagarta do dhaoineibh aig am bheil anmhuinneachd; ach focal nam mionnan a bha an déigh an lagha, a' deanamh àrd-shagairt do'n Mhac, a tha air a dheanamh iomlan⁷ gu siorruidh.

CAIB. VIII.

1 *Le sagartachd siorruidh Criosd tha sagartachd Lebhithach Aaroin air a cur air cùl: 7 agus an coimhcheangal àimsireil a rinneadh ris na sinn-siribh, le coimhcheangal siorruidh an t-soisgeil.*

ANIS is e so suim nan nithe a labhair sinn: Tha shamhuil sin do àrd-shag-

¹ mharbhadh.

³ àrd-athair.

² a ghnàth, rè a bheatha.

⁴ tiomnadh.

⁵ a shlànuchadh gus a' chuid a's faide, gu siorruidh, air a sgaradh.

⁷ air a choisrigeadh.

art againn, a tha air suidhe air deis righ-
chaitheach na mòrachd anns na nàml-
aibh;

2 Ministear nan ionad naomha, agus an
fhìor phàillium, a shuidhich an Tighearn,
agus cha bu duine.

3 Oir tha gach uile àrd-shagart air ord-
uchadh chum tiodhlacan agus iobairtean
a thoirt suas: uime sin b'èigin gu'm biodh
aig an duine so mar an ceudna ni èigin
r'a thabhairt suas.

4 Oir nam biodh e air thalamh, cha
bhiodh e 'na shagart, do bhrìgh gu bheil
sagairt ann a tha tabhairt suas thiodhlac
a réir an lagha:

5 Muinntir a tha deanamh seirbhis le
samladh agus sgàile nan nithe nàmh-
aidh, a réir mar a dh'orduicheadh do
Mhaois le Dia 'nuair a bha e air tì am
pàillium a chur suas. Oir feuch, (a ta e
ag ràdh,) gu'n dean thu na h-uile nithe
réir an t-samplair a nochdadh dhuit san
t-sliabh.

6 Ach a nis fhuair e ministereachd a's
ro fhearr, e mheadh gu bheil e mar an
ceudna 'na eadar-mheadhonair air coimh-
cheangal a's fearr, a chaidh dhaingneach-
adh air geallaibh a's fearr.

7 Oir nam biodh an ceud choimhcheang-
al sin gun uireasbhuidh¹; cha'n iarraidh
àit do'n dara coimhcheangal.

8 Oir, a' faotainn croin doibh, a ta e ag
ràdh, Feuch thig na làithean, (tha an Tighearn
ag ràdh,) anns an dean mi coimh-
cheangal nuadh ri tigh Israeil, agus ri tigh
Iudah:

9 Cha'n ann a réir a' choimhcheangail a
rinn mi r'an aithrichibh, anns an là a rug
mi air làmh orra chum an treòrachadh a
mach á talamh na h-Eiphit; do bhrìgh
nach d'fhan iad ann am choimhcheangal,
agus chuir mise suarach iadsan, tha an
Tighearn ag ràdh.

10 Oir is e so an coimhcheangal a ni mi
ri tigh Israeil an déigh nan làithean ud,
tha an Tighearn ag ràdh; Cuiridh mi mo
reachdan nan imtinn, agus sgrìobhaidh
mi iad air an cridheachaibh: agus bithidh
mi a'm' Dhia dhoibh, agus bithidh iadsan
nan sluagh dhomh-sa.

11 Agus cha teagaisg iad gach aon a
choimhearsnach, agus gach aon a bhràth-
air, ag ràdh, Gabh eòlas air an Tighearn:
oir bithidh eòlas aca uile orm, o'n neach
a's lugha gus an neach a's mò dhiubh.

12 Oir bithidh mise tròcaireach d'an
euceartaibh, agus am peacanna agus an
aingidheachd cha chuimhnich mi ni's
mò.

13 Am feadh a ta e ag ràdh, *Coimh-
cheangal* nuadh, rinn e'n ceud *choimh-
cheangal* sean. A nis an ni a ta aosda

agus air fàs sean, tha e fagus do dhol as
an t-sealladh.

CAIB. IX.

1 *Tha Pòl a' mìneachadh nan iobairt fuidh 'n lagh,
agus gach gnàthachaidh a bha 'nan cuideachd;
11 tha iad gu mòr thaobh feobhais goirid air fuil
agus iobairt Chrìosd.*

BHA ma seadh gu dearb aig a' cheud
phàillium orduighean² a thaobh
seirbhis Dé, agus naomh-ionad saoghalta.
2 Oir dheasaicheadh an ceud phàillium,
anns an robh an coinnleir, agus am bòrd,
agus aran na fianuis, ris an abrar an t-ionad
naomh.

3 Agus an taobh a stigh do'n dara roinn-
bhrat, am pàillium ris an abrar an t-ionad
a's ro naomha;

4 Anns an robh an tùisear òir, agus àire
a' choimhcheangail air a còmhachadh³
mu'n cuairt le h-òr, anns robh a' phoit òir
anns an robh am mana, agus slat Aaron
a bha fo bhlàth, agus clàir a' choimh-
cheangail;

5 Agus os a ceann, cheruban na gloire,
a' cur sgàile air caithir na tròcair; mu
nach urrainn sinn a nis labhairt fa leth.

6 A nis an uair a bha na nithe so air an
cur an ordugh mar so, chaidh na sagairt a
ghnàth a steach do'n cheud phàillium, a'
coimhlionadh seirbhis Dé:

7 Ach do'n dara pàillium chaidh an t-àrd-
shagart 'na aonar a steach aon uair sa'
bhliadhna, cha b'ann as eugmhais fola, a
thug e suas air a shon féin, agus air son
seacharain an t-sluaigh:

8 Air bhi do'n Spiorad naomh a' nochd-
adh so, nach robh fathast an t-slighe chum
an ionaid bu ro naomha air a foillseach-
adh, am feadh a bha an ceud phàillium
fathast 'na sheasamh:

9 Nì a bha 'na shamhladh do'n aimsir a
ta làthair, anns an robh araon tiodhlacan
agus iobairtean air an toirt suas, nach
robh comasach air an tì a bha deanamh
na seirbhis sin a dheanamh coimhlionta,
thaobh a choguis,

10 An t-seirbhis a bha mhàin ann am
biadhaibh agus ann an deochaibh, agus
ann an iomadh gnè ionnlaid, agus deas-
ghnàthachaidh a thaobh na feòla, a chuir-
eadh mar uallaich orra gu àm an leasach-
aidh.

11 Ach air teachd do Chrìosd 'na àrd-
shagart nan nithe maithe a bha ri teachd,
tre phàillium bu mhò agus bu dìongmhalta,
nach d'rinneadh le làmhaidh, sin r'a ràdh,
nach robh do'n togail so;

12 Agus cha b'ann tre fhuil ghabhar
agus laogh, ach tre 'fhuil féin a chaidh e
steach aon uair do'n ionad naomh, air dha
saorsa shiorruidh fhaotainn dhuinne.

¹ lochd, chron.² reachdan.³ folach.

13 Oir ma ni fuil tharbh, agus ghabhar, agus luathre aighe air a crathadh air an dream a bha neòghlan, an naomhachadh chum glanaidh na feòla;

14 Cia mòr a's mò ni fuil Chriosd, a thug e féin suas tre'n Spiorad shiorruidh¹ gun lochd do Dhia, bhur coguis-sa ghlanadh o oibribh marbha chum seirbhis a dhean-amh do'n Dia bheò?

15 Agus air a shon so is esan eadar-mheadhonair an tiomnaidh-nuaidh², ionnus tre fhulangas a' bhàis, chum saorsa³ nan euceart a bha fuidh 'n cheud thiomnadh a chosnadh, gu'm faigheadh iadsan a ta air an gairm gealladh na h-oighreachd shiorruidh.

16 Oir far am bheil tiomnadh, is éigin bàs an tiomnaidh-fhir a bhi ann mar an ceudna.

17 Oir a ta tiomnadh daingean an déigh bàis dhaoine: ach cha 'n 'eil brigh sam bith ann am feadh a ta'n tiomnaidh-fhear beò.

18 A réir sin, ni mò bha'n ceud *thiomnadh* air a choisreagadh⁴ as eugmhais fola.

19 Oir an uair a labhradh gach uile àithne réir an lagha ris an t-sluagh uile le Maois, air dhia fuil laogh agus ghabhar a ghabhail, maille ri h-uisge, agus oluinn scarlaid⁵, agus hisop, chrath e iad araon air an leabhar agus air an t-sluagh uile,

20 Ag ràdh, 'Si so fuil an tiomnaidh⁶ a dh'àithn Dia dhuibh.

21 Os bàrr, chrath e mar an ceudna an fhuil air a' phàillium, agus air soithichibh na naomh-sheirbhis uile.

22 Agus is beag nach 'eil na h-uile nithe air an glanadh le fuil a réir an lagha; agus as eugmhais dòrtaidh fola cha 'n 'eil maitheanas r'a fhaotainn.

23 B'fheumail uime sin gu'm biodh samhlaidh nan nithe a ta sna nàmhaidh air an glanadh leo so; ach na nithe nàmhaidh féin le iobairtibh a b'fhearr na iad so:

24 Oir cha deachaidh Criosd a steach do na h-ionadaibh naomha làmh-dheanta, nithe a ta 'nan samhlauchas air an fhìor ionad; ach do nàmh féin, chum a nis e féin a nochdadh ann am fianuis Dé air ar son-ne:

25 No fòs chum e féin iobradh gu minic, mar a théid an t-àrd-shagart gach bliadhna steach do'n ionad naomh, le fuil nach leis féin.

26 (Oir mar sin b'éigin gu'm fulaing-eadh e⁷ gu minic o thoiseach an t-saoghail;) ach a nis dh'fhoillsicheadh e aon uair ann an deireadh an t-saoghail⁸, chum

peacadh a chur air cùl tre e féin iobradh.

27 Agus amhuil a ta e air orduchadh do dhaoineibh bàs fhaotainn aon uair, ach 'na dhéigh so breitheanas:

28 Mar sin thugadh Criosd suas aon uair a thoirt air falbh peacanna mhòran, ach an dara uair as eugmhais peacadh foillsichear e dhoibh-san aig am bheil sùil ris, chum slàinte

CAIB. X.

1 Anmhuinneachd iobairtean an lagha. 10 Thug iobairt cuirp Chriosd, a thugadh suas aon uair, peacadh gu shiorruidh air falbh. 19 Earail chum an creidimh a ghleidheadh gu daingean, le foighidín agus buidheachas.

UIME sin, air bhli aig an lagh sgàile nithe maithe ri teachd, agus cha'n e fìor-choslas⁹ nan nithe féin, cha 'n 'eil e comasach dha an dream a thig d'a ionnsuidh a chaoidh a dheanamh coimhlionta leis na h-iobairtibh sin, a bha iad a' toirt suas o bhliadhna gu bliadhna a ghnàth.

2 Oir an sin nach sgureadh iad do bhi 'gan toirt suas? do bhrìgh nach biodh aig luchd deanamh na naomh-sheirbhis tuilleadh coguis air bith peacadh, air dhoibh bhi aon uair air an glanadh.

3 Ach anns na h-iobairtibh sin nithear ath-chuimhneachadh air na peacaibh gach bliadhna.

4 Oir cha 'n 'eil e'n comas gu tugadh fuil tharbh agus ghabhar peacanna air falbh.

5 Uime sin ag teachd dha do'n t-saoghal, a ta e ag ràdh, Iobairt agus tabhartas cha b'àill leat, ach dh'ulluich thu corp dhomh-sa:

6 Ann an iobairtibh-loisgte, agus ann an iobairtibh air son peacadh cha robh tlachd agad:

7 An sin thubhairt mise, Feuch tha mi a' teachd, (ann an rola an leabhair tha sud sgrìobhta orm,) chum do thoil-sa a dheanamh, O Dhé.

8 Air dha a ràdh roimh sin, Iobairt, agus tabhartas, agus iobairte-loisgte, agus iobairt air son peacadh cha b'àill leat, agus cha robh do thlachd anna, (a tha air an toirt suas a réir an lagha;)

9 An sin thubhairt e, Feuch, a ta mi a' teachd a dheanamh do thoil-sa, O Dhé. Tha e cur air cùl a' cheud ni, chum gu'n daingnich e an dara ni.

10 Leis an toil so tha sinne air ar naomhachadh, tre toirt suas cuirp Iosa Criosd aon uair.

11 Agus tha gach uile shagart a' seasamh gach là, a' frithealadh agus a' toirt suas nan iobairt cheudna gu minic, nithe

¹ tre'n spiorad naomh.

² a' choimhcheangail nuaidh.

⁴ air a dhàingneachadh.

³ suasglaidh.

⁵ corcuir.

⁶ a' choimhcheangail.

⁷ b' fheumail e dh'fhuilang.

⁸ nan linn.

⁹ fìor-dhealbh.

do nach 'eil e'n comas a chaidh peacanna thoir air falbh:

12 Ach an duine so, an déigh dha aon iobairt a thoir suas air son peacaidh, shuidh e a chaidh tuilleadh air deas làimh Dhé;

13 A' feitheamh o sin suas gus an cuirear a naimhde 'nan stòl-chos fo 'chosaibh.

14 Oir le aon iobairt riun e chaidh foirfe iadsan a ta air na naomhachadh.

15 Agus tha an Spiorad naomh mar an ceudna a' deanamh fianuis duinne air na nithibh so: oir an déigh dha ràdh roimh,

16 Is e so an coimhcheangal a ni mi ri an déigh nan làithean ud, tha an Tighearn ag ràdh, Cuiridh mi mo reachdan 'nan cridhe, agus sgrìobhaidh mi iad air an intinn:

17 Agus am peacanna agus an eucearta cha chuimhnich mi ni's mò.

18 A nis, far am bheil maitheanas nan nithe so, cha 'n 'eil tabhartas¹ air son peacaidh ann ni's mò.

19 Uime sin, a bhràithre, do bhrìgh gu bheil dànachd againn chum dol a steach do'n ionad a's naomha tre fhuil Iosa,

20 Air slighe nuaidh agus bheò a choisrig e dhuinne, tre'n roinn-bhrat, sin r'a ràdh, tre 'fheòil féin:

21 Agus do bhrìgh gu bheil againn àrd-shagart os ceann tìghe Dhé,

22 Thigemaid an fagus le cridhe fìor, ann an làn dearbh-bheachd a' chreidimh, le ar cridheachaibh air an crath-ghlanadh, o dhroch coguis, agus le ar cuirp air an nigheadh le h-uisge glan.

23 Cumamaid gu daingean aidmheil ar dòchais gun chlaonadh, (oir is fìrinneach an ti a gheall:)

24 Agus thugamaid an aire d'a chéile chum ar brosnachadh gu gràdh, agus gu deadh oibribh:

25 Gun bhi leigeadh dhinn sinn féin a chruinneachadh an ceann a chéile, mar is gnàth le dream àraidh; ach a' comhairleachadh a chéile: agus gu ma mòid a ni sinn so, gu bheil sibh a' faicinn an là a' tarruing am fagus.

26 Oir ma pheacaicheas sinn do ar toil féin an déigh dhuinn eòlas na fìrinn fhaotainn, cha'n fhàgar tuilleadh dhuinn iobairt air son peacaidh,

27 Ach dùil eagalach ri breitheanas, agus fearg-theinnteach, a sgrìosas na h-eascairdean.

28 An neach a rinn tàir air lagh Mhaois, bhàsaich e gun tròcair, fo dhithis no thriuir do fhianuisibh:

29 Cia mòr is mò² na sin am peanas a shaoileas sibh air am measar esan toilt-eanach, a shaltair fo 'chosaibh Mac Dhé,

agus a mheas mar ni mi-naomha fuil a' choimhcheangail, leis an do naomhaicheadh e, agus a rinn tarcuis air Spiorad nan gràs?

30 Oir is aithne dhuinn an Ti a thubhairt, Is leam-sa an dioghaltas, agus bheir mi dioladh uam, tha an Tighearn ag ràdh: agus a ris, Bheir an Tighearn breth air a shluagh.

31 Is ni eagalach tuiteam ann an làmh-aibh an Dé bheò.

32 Ach biodh ath-chuimhne agaibh air na làithibh a chaidh seachad, anns an d'fhuiling sibh, an déigh dhuibh bhi air bhuir soillseachadh, gleachda mòr fulangais³;

33 Ann an cuid, am feadh a rinneadh sibh 'nur ball-amhaire⁴, araon tre mhaslaibh agus thrioblaidibh; agus ann an cuid, am feadh a rinneadh sibh 'nur companaich dhoibh-san ris an do bhuineadh mar sin.

34 Oir bha comh-fhulangas agaibh rium-sa ann am gheimhlibh, agus ghabh sibh le luath-ghair ri creachadh bhuir maoin, air dhuibh fios a bhi agaibh annaibh féin gu bheil agaibh air nèamh maoin a's fearr, agus a ta maireannach.

35 Uime sin na tilgibh uaibh bhuir muin-ghin, aig am bheil mòr dhiol-thuarasdal.

36 Oir a ta feum agaibh air foighidin; chum an déigh dhuibh toil Dé a' dheanadh, gu'm faigh sibh an gealladh.

37 Oir fathast seallan beag, agus an ti a ta ri teachd thig e, agus cha dean e moille.

38 A nis bithidh am fìrean beò tre chreidimh: ach ma philleas neach sam bith air ais, cha bhi aig m'anam-sa tlachd ann.

39 Ach cha'n 'eil sinne do'n dream sin a philleas air an ais chum-sgrìos; ach do'n dream a chreideas, chum tearnaidh an anama.

CAIB. XI.

1 Ciod e creidimh. 6 As eugmhais ereidimh cha'n 'eil e'n comas duinn toil Dé a dheanamh: 7 deadh thoradh a' ghràis sin anns na h-aithrichibh o shean.

A NIS is e creidimh brìgh nan nithe a r'ì'm bheil dòchas, dearbh-chinnt⁵ nan nithe nach faicear.

2 Oir is ann tre so a fhuair na sinnsirean deadh theistean.

3 Tre chreidimh tha sinn a' tuigsinn gu'n do chruthaicheadh na saoghail tre fhocal Dé, air chor as nach d'rinneadh na nithe a chithear do nithibh a bha r'am faicinn.

4 Tre chreidimh thug Abel suas do Dhia iobairt ni b' fhèrr na Cain, tre an d'thugadh teistean dha gu'n robh e 'na fhìrean, air bhi do Dhia a' deanamh fian-

¹ ofrail, iobairt.

² truime, miosa.

³ cath mòr àmhghara.

⁴ ball-àbhacais.

⁵ dearbhadh, dearbh-shoilleir.

uis d'a thiodhlacaibh: agus tre sin, air dha bhi marbh, tha e fathast a' labhairt.

5 Tre chreidimh dh'atharraicheadh Enoch chum nach faiceadh e bàs; agus cha d'fhuaradh e, do bhrìgh gu'n d'atharraich Dia e: oir roimh 'atharrachadh thugadh fianuis da, Gu'n do thaitinn e ri Dia.

6 Ach as eugmhais creidimh cha'n 'eil e'n comas a thoileachadh: oir is éigin do'n ti a thig a dh'ionnsuidh Dhé a chreidsinn gu bheil e ann, agus gur e an Ti e a bheir duais do'n dream a dh'iarraas e gu dìchiollach.

7 Tre chreidimh air do Noah rabhadh fhaotainn o Dhia mu thimchioll nithe nach robh idir r'am faicinn, agus eagal a ghabhail, dh'ulluich e àire chum tearnaidh a theaghlaich; tre'n do dhìt e an saoghal, agus rinneadh e 'na oighre air an fhìreantachd a ta thaobh creidimh.

8 Tre chreidimh, 'nuair a ghairmeadh Abraham gu dol a mach do ionad a bha e gu fhaotainn an déigh sin mar oighreachd, fhreagair e; agus dh'imich e mach gun fhios a bhi aige c'àit an robh e dol.

9 Tre chreidimh bha e air chuairt ann an tìr a' gheallaidh, mar ann an tìr choimhich, a' gabhail còmhnuidh ann am pàillunaibh maille ri h-Isaac agus Iacob, comh-oighreachan a' gheallaidh cheudna.

10 Oir bha suil aige ri baile aig am bheil bunaitean, air am *bheil* Dia 'na fhear-dealbhaidh agus 'na fhear-togail.

11 Tre chreidimh mar an ceudna fhuair Sarah féin neart gu sliochd a ghabhail 'na broinn, agus rug i leanabh an déigh dhi dol thar aois *cloinne*, do bhrìgh gu'n do mheas i gu'n robh esan fìrionnach a thug an gealladh.

12 Uime sin ghineadh o aon a mhàin, agus esan ionnan agus marbh, sliochd mar reulta nèimh thaobh lionmhoireachd, agus mar a' ghaineamh air tràigh na fairge do-àireamh.

13 Fhuair iad so uile bàs ann an creidimh, gun na geallanna¹ fhaotainn, ach air dhoibh am faicinn fad o làimh, (agus an làn-chreidsinn,) ghabh iad riu, agus dh'aicidh iad gu'm bu choigrich agus luchd-cuairt air an talamh iad féin.

14 Oir an dream a ta ag ràdh nan nithe sin, tha iad a' nochdadh gu soilleir gu bheil iad ag iarraidh dùthcha.

15 Agus gu fìrinnach nam biodh iad cuimhneachail air an *dùthaich* sin, as an d'thàinig iad a mach, dh'fheudadh iad àn iomchuidh fhaghail air pilleadh:

16 Ach a uis tha déidh aca air *dùthaich* a's fearr, eadhon *dùthaich* nèamhaidh:

uime sin cha nàr le Dia, gu'n goirear an Dia-san dheth: oir dh'ulluich e dhoibh baile.

17 Tre chreidimh dh'ìobair Abraham, air dha bhi air a dhearbhadh, a *mhac* Isaac; agus thug an ti a fhuair na geallanna suas 'aon-ghin *mhic*;

18 Ris an dubhradh², Ann an Isaac goir-eaer do shliochd:

19 A' meas³ gu'm bu chomasach Dia air a thogail eadhon o na marbhaibh; o'n d'fhuair se e eadhon ann an cosamlachd.

20 Tre chreidimh bheannaich Isaac Iacob agus Esau mu thimchioll nithe a bha ri teachd.

21 Tre chreidimh bheannaich Iacob, ag faghail bàis da, dithis mhac Ioseph; agus rinn e aoradh, a' *leigeadh a chudthrom* air bàrr a bhata.

22 Tre chreidimh rinn Ioseph, ri àm faghail a' bhàis da, iomradh air dol a mach chloinn Israel; agus thug e àithne mu thimchioll a chnàmh.

23 Tre chreidimh an uair a rugadh Maois, dh'fholaicheadh e trì mìosan le phàrantaibh, do bhrìgh gu'm fac iad gu'm bu leanabh tlachdmhor e; agus cha robh eagal orra roimh àithne an rìgh.

24 Tre chreidimh air teachd gu h-aois do Mhaois, dhiùlt e bhi air a ghairm 'na mhac do nighinn Pharaoh;

25 A' ròghnachadh àmhghar fhulang maille ri sluagh Dhé, roimh shòlas a' pheacaidh a mhealtuinn rè seal;

26 A' meas gu'm bu mhò an saoihbreas masladh Chriosd na ionmhais na h-Eiphit: or bha suil aige ris an luach-saoithreach⁴.

27 Tre chreidimh thréig e'n Eiphit, gun eagal a bhi air roimh chorruih an rìgh: oir bha e làidir 'na iuntinn, mar neach a bha faicinn an ti a ta neo-fhaicsinneach.

28 Tre chreidimh ghléidh e a' chàisg, agus an dòrtadh fola, chum nach beanadh an ti a sgrìos na ceud-ghin riu-san.

29 Tre chreidimh chaidh iad tre a' mhuir ruaidh, mar tre thalamh tioram: ni 'nuair a thug na h-Eiphitich ionnsuidh air a dheanamh, bhàthadh iad.

30 Tre chreidimh thuit ballacha Ìericho, an déigh bhi air an cuairteachadh rè sheachd làithean.

31 Is ann tre chreidimh nach do sgriosadh Rahab an striopach maille riu-san nach do chreid, 'nuair a ghabh i ris an luchd-brathaidh an sìth.

32 Agus ciod tuilleadh a their mi? oir theirgeadh an ùine dhomh ann an labhairt mu Ghideon, Bharac agus Shampson, agus Iephtah, Dhaibhidh mar an ceudna, agus Shamuel, agus na fàidhibh:

33 Muinntir tre chreidimh, a cheannsaich rioghachdan, a dh'oibrich fireant-

¹ na nithe a ghealladh.

² Mu'n dubhradh.

³ A' reusonachadh, a' breithneachadh.

⁴ duais.

achd, a fhuair geallanna, a dhruid beoil leomhan,

34 A mhùch neart teine, a chaidh as o fhaobhar a' chlaidheimh, o anmhuinn-eachd a rinneadh uearthmor, a dh'fhàs treun ann an cath, a chuir air theicheadh armailte nan coimheach.

35 Fhuair mnàin am maibh air an togail a ris gu beatha; agus chràidh-phianadh dream eile, gun iad a ghabhail ri saorsa; chum gu faigheadh iad aiseirigh a b' fhearr.

36 Fhuair dream eile deuchainn do fhanoidibh, agus do sgiùrsaibh, seadh fòs, do gheimhlibh agus do phrìosan.

37 Chlachadh iad, shàbhadh as a chéile iad, bhuaireadh iad, chuireadh gu bàs leis a' chlaidheamh iad: chaidh iad mu'n cuairt 'nam fògaraidh ann an croicnibh chaorach agus ghabhar, ann an uireas-bhuidh, ann an trioblaidibh, ann an cràdh;

38 (Dream air nach b'airidh an saoghal; a' dol air seacharan ann am fàsaichibh, agus air sleibhtibh, agus ann an uamhaibh agus ann an slochdaibh na talmhainn.

39 Agus air dhoibh so uile deadh theist-eas fhaotainn tre chreidimh, cha d'fhuair iad an gealladh:

40 Air do Dhia ni éigin a's fearr a sholar dhuinne, ionnus nach b-eudh iadsan air an deanamh foirfe as ar n-eugmhais-ne.

CAIB. XII.

1 Earail chum bhi bunaiteach ann an creidimh, foighidin, agus diadhachd. 2 Moladh an Tìom-naidh-nuaidh os ceann an t-seann-tìomnaidh.

UIME sin, air dhuinne bhi air ar cuairteachadh le neul co mòr do fhianuisibh, cuireamaid dhinn gach leth-trom, agus am peacadh a ta gu furas ag iadhadh umainn, agus ruitheamaid le foighidin an réis¹ a chuireadh romhainn.

2 Ag amharc air Iosa, ceannard² agus fear-criochnaich ar creidimh, neach air son an aoibhneis a chuireadh roimhe, a dh'fhuiling an crann-ceusaidh, a' cur na nàire an neo-shuim, agus a shuidh air deis righ-chaitheach Dé.

3 Uime sin thugaibh fa' near esan a dh'fhuiling a shamhuil sin do ana-cainnt o pheacaich 'na aghaidh féin, air eagal gu'm bi sibh sgith agus lag ann bhur n-inntinnibh.

4 Cha do sheas sibh fathast gu fuil, a' cathachadh an aghaidh peacaidh.

5 Agus dhìchuimhnich³ sibh an earail a ta labhairt ribh mar ri cloinn, A mhic, na cuir suarach⁴ smachdachadh an Tighearn, agus na fannaich⁵ nuair a chronaichear leis thu:

6 Oir an ti a's ionmhuinn leis an Tigh-earn, smachdaichidh se e, agus sgiùrsaich e gach mac ris an gabh e.

7 Ma ghiùlaineas sibh smachdachadh, tha Dia a' buntuin ribh mar ri cloinn: oir cò am mac nach smachdaich an t-Athair?

8 Ach ma tha sibh as eugmhais smachdachaidh, d'am bheil na h-uile 'nan luchd-comhpairt, an sin is clann diolain sibh, agus cha chlann *dligheach*.

9 Os bàrr, bha againn aithriche thaobh na feòla, a smachdaich sinn, agus thug sinn urram dhoibh: nach mò gu mòr is còir *dhuinn* bhi ùmhail do Athair nan spiorad, agus a bhi beò?

10 Oir gu deimhin smachdaich iadsan sinn rè beagann do làithibh a réir an toile féin⁶; ach esan chum ar leas, ionnus gu'm bitheamaid 'nar luchd-comhpairt d'a naomhachd.

11 Ach cha mheasar smachdachadh air bith am feadh a ta e làthair sòlasach, ach doilgheasach: gidheadh, 'na dhéigh sin bheir e uaith toradh sìochail na fireantachd, do'n dream a ta gu *dligheach* air an cleachdadh ris.

12 Uime sin, togaibh suas na làmhnan a ta air tuiteam sìos, agus *neartaichibh* na glùine laga;

13 Agus deanaibh cos-cheuma dìreach do 'ur cosaibh, air eagal gu'm bi an ni sin a ta bacach air a thionndadh as an t-slighe; ach gu ma mò bhiodh e air a shlànachadh.

14 Leanaibh sìth maille ris na h-uile dhaoineibh, agus naomhachd, ni as eugmhais nach faic neach air bith an Tigh-earn:

15 A' toirt an ro aire, air eagal gu'n tig neach sam bith a dhéidh-làimh air gràs Dé⁷; air eagal air fàs suas do fhreimh seirbhe sam bith, gu'n cuir e dragh oirbh, agus le so gu'm bi mòran air an salachadh:

16 Air eagal gu'm bi fear striopachais ann, no neach mi-naomha sam bith mar Esau, a reic air son aoine ghreim bìdh⁸ còir a cheud-bhreithe⁹.

17 Oir a ta fhios agaibh 'nuair a b'àill leis an déigh sin am beannachadh a shealbhachadh, gu'n do dhiùltadh e: oir cha d'fhuair e aithreachais, ged dh'iarr se e gu dùrachdach le deuraibh.

18 Oir cha d'fhàinig sibh chum an t-sleibh ris am feudtadh beantuinn, agus a bha losgadh le teine, no chum duibhre, agus dorchadais, agus doininn,

19 Agus fuaim na trompaid, agus guth nam briathar, ionnus gu'n do ghuidh an dream a chual e nach labhairteadh am focal riu tuilleadh:

20 (Oir cha b'urrainn iad an ni sin a chaidh àithneadh dhoibh iomchar, Agus

¹ a' choimhliong. ² ùghdair.

³ An do dhìchuimhnich?

⁴ an neo-shuim, an neo-phris.

⁵ lagaich.

⁶ mar bu taitneach leo.

⁷ gu'n clann neach sam bith o ghràs Dé.

⁸ lòn.

⁹ a chòir-bhreithe.

ma bheanas fiù ainmhidh ris an t-sliabh, clachar e, no cuirear sleagh a mach troimhe.

21 Agus bu co uamhasach an sealladh, as gu'n dubhairt Maois, Tha eagal ro mhòr agus crith orm:)

22 Ach tha sibh air teachd gu sliabh Shioin, agus gu caithir an Dé bheò, an Ierusalem nèamhaidh, agus cuideachd do-àireamh do ainglibh,

23 Gu làn-choimhthional agus eaglais nan ceud-ghin, a tha sgrìobhta na nèamhaibh, agus gu Dia breitheamh nan uile, agus gu spioradaibh nam firean air an deanamh foirfe,

24 Agus gu Iosa eadar-mheadhonair a' choimlicheangail nuaidh, agus chlum fola a' chrathaidh, a tha labhairt nithe a's fearr na *fuil* Abeil.

25 Thugaibh an aire nach duilt sibh esan a ta labhairt: oir mur deachaidh iadsan a tha dhiùlt an ti a labhair o *Dhia riu* air thalamh, is lugha gu mòr na sin a *théid* sinne as, ma thionndaidheas sinn air falbh uaithe-san a ta *labhairt* o nèamh:

26 Neach aig an do chrath a ghuth an talamh an sin: ach a nis gheall e, ag ràdh, Aon uair eile fathast crathaidh mi cha'n e an talamh a mhàin, ach nèamh mar an ceudna.

27 Agus a ta *am focal* so, Aon uair eile, a' ciallachadh atharrachaidh nan nithe sin a ghabhas crathadh, mar nithe a rinn-eadh, chum gu fanadh na nithe nach gabh crathadh¹.

28 Uime sin air dhuinne ròghachd fhaotainn nach feudar a ghluasad, biodh againn gràs², leis an dean sinn seirbhis gu taitneach do Dhia, le h-urram agus eagal diadhaidh:

29 Oir a ta ar Dia-ne 'na theine dian-loisgeach.

CAIB. XIII.

1 Comhairlean eagsamhla chum seirc, 4 chum caithe-beatha chiataich, 5 chum sannt a sheachnadh, 7 chum bhì dheasdanach do luchd-searmonachaidh an t-*soisgeil*, 9 bhì air ar faicill o theagasgaibh coimheach, 16 deirce thoirt seachad, 17 bhì ùmhal do uachdaranaibh, 18 urnuigh a dheanamh air son an abstoil. 19 An comh-dhànadh.

FANADH gràdh bràthaireil *agaibh*.
2 Na dearmadaibh aoidheachd a thoirt do choigrich; oir le so thug dream àraidh aoidheachd do ainglibh gun fhios doibh.

3 Bithibh cuimhneachail orra-san a tha ceangailte, mar gu'm biodh sibh ceangailte maille riu; agus air an dream a tha fulang anshocair, mar mhuinntir a tha sibh féin mar an ceudna anns a' choluinn.

4 Tha'm pòsadh urramach anns na h-uile³, agus an leabadh neo-shalach: ach air luchd-striopachais agus adhaltrannais

bheir Dia breth.

5 *Biodh bhur* caithe-beatha gun sannt; agus bithibh toilichte leis na nithibh a tha làthair agaibh: oir thubhairt e, Cha'n fhàg, agus cha tréig mi am feasd thu.

6 Ionns gu'm feud sinn a ràdh gu dàna, Is e'n Tighearn m' fhear-cuideaclaidh, agus cha'n eagal leam aon ni a dh'fheudas duine dheanamh orm.

7 Bithibh cuimhneachail air bhur cinn-iùil, a labhair ribh focal Dé: leanaibh an creidimh-san, a' beachdachadh air crìch an caithe-beatha:

8 Iosa Criod an dé, agus an diugh, agus gu sìornuidh an ti ceudna.

9 Na bithibh air bhur giùlan mu'n cuairt le teagasgaibh eagsamhla coimheach: oir is maith an ni an cridhe bhì air a dhaigneachadh le gràs, cha'n ann le biadhaibh, nithe nach d'thug tairbhe do'n dream a ghnàthaich iad.

10 Tha altair againne, dheth nach 'eil còir aca-san a bheag itheadh, a tha deanamh seirbhis do'n phàillion.

11 Oir a ta cuirp nan ainmhidhean sin, aig am bheil am fuil air a toirt a steach air son peacaidh do'n ionad naomh leis an àrd-shagart, air an losgadh an leth muigh do'n champ.

12 Uime sin chum gu'n deanadh Iosa an sluagh a naomhachadh le 'fhuil féin, dh'fhuiling e mar an ceudna an taobh a muigh do'n gheata.

13 Air an aobhar sin, rachamaid a mach d'a ionnsuidh-san an taobh a muigh do'n champ, a' giùlan a mhaslaidh-san.

14 Oir an so cha'n 'eil againn baile a mhaireas, ach a ta sinn ag iarraidh aoin a ta ri teachd.

15 Uime sin trid-san thugamaid suas iobairt buidheachais do Dhia a ghnàth, 'se sin, toradh ar bilean, a' toirt molaidh d'a ainm.

16 Ach na dì-chuimhnichibh maith a dheanamh, agus comhroinn a thoirt uuibh: oir a ta an leithide sin do iobairtibh taitneach do Dhia.

17 Bithibh ùmhal do 'ur cinn-iùil, agus thugaibh géill doibh: oir tha iad ri faire air bhur n-anamaibh, mar mhuinntir d'an éigin cunnatas thoirt uatha: chum gu'n dean iad e le gairdeachas, agus cha'n e le doilgheas: oir tha so neo-tharbhach dhuibh-se.

18 Deanaibh urnuigh air ar son-ne: oir is dòigh leinn gu bheil deadh choguis againn, air dhuinn bhì toileach ar beatha a chaitheadh gu cubhaidh anns na h-uile nithibh.

19 Ach is mòid a ghuidheam oirbh so a dheanamh, chum gur luathaid a dh'aisigear mise dhuibh.

20 A nis gu deanadh Dia na sìthe, a

¹ nach feudar a chrathadh.

² deanamaid greim do ghràs. ³ am measg nan uile.

SEUMAS, I.

thug air ais o na marbhaibh ar Tighearn Iosa, àrd-bhuachaill nan caorach, tre fhuil a' choimhcheangail shiorruidh,

21 Sibhse coimhlionta anns gach uile dheadh obair, chum sibh a dheanamh a thoile-san, ag oibreachadh annaibh an ni a ta taitneach 'na làthair-san, tre Iosa Crìosd; dhasan *gu robh* glòir gu saoghal nan saoghal. Amen.

22 Agus guidheam oirbh, a bhràithre, sibh a ghlùlan focal na h-earalach; oir

sgriobh mi gu h-aithghearr do 'ur n-ionn-suidh.

23 Bìodh fhios agaibh gu'n do chuir-eadh ar bràthair Timoteus air a chomas; maille ris-san, ma thig e gu goirid, chi mi sibh.

24 Cuiribh fàilte orra-san uile a tha 'nan cinn-iùil duibh, agus air na naoimh uile. Tha muinntir na h-Eadailt a' cur fàilte oirbh.

25 Gràs *gu robh* maille ribh uile. Amen.

LITIR CHOITCHIONN AN ABSTOIL

SHEUMAIS.

CAIB. I.

1 Is còir dhuinn gairdeachas a dheanamh fuidh thrioblaid, 5 gliocas iarraidh o Dhia, 13 agus ann ar deuchainnibh gun sinn a chur ar n-an-mhuinneachd no ar peacanna as a leth-san, 19 ach gu'm bu fearr leinn bhì ùmhal d'a fhocal.

THA Seumas seirbhiseach Dhé, agus an Tighearn Iosa Crìosd, a' cur beannachd chum an dà thrèibh dheug a tha air an sgapadh o chéile.

2 Mo bhràithre, measaibh mar an uile ghàirdeachas 'nuair a thuiteas sibh ann an iomadh gnè dheuchainnean¹;

3 Air dhuibh fios so bhi agaibh, gu'n oibrich dearbhadh bhur creidimh foighidin.

4 Ach biodh aig an fhoighidin a h-obair dhìongmhailta féin, chum gu'm bi sibh dìongmhailta agus iomlan, gun uireasbhuidh ni sam bith.

5 Ma tha aon neach agaibh a dh'uireasbhuidh gliocais, iarradh e o Dhia, a bheir do gach neach gu pailt, agus nach dean maoidheamh²; agus bheirear dha e.

6 Ach iarradh e le creidimh, gun bhi fuidh amharus sam bith: oir an ti a tha fuidh amharus, is cosmhail e ri tonn na fairge a shéidear le gaoith, agus a tha air a luasgadh a null agus a nall³.

7 Oir na saoilèadh an duine sin gu'm faigh e ni air bith o'n Tighearn.

8 Tha fear na h-inntinn dùbailte⁴ neo-sheasmhach 'na uile shlighibh.

9 Deanadh am bràthair a tha ìosal gairdeachas 'na àrdachadh:

10 Ach an duine saobhir, na ìsleachadh: do bhrìgh mar bhlàth an fheoir gu'n téid e seachad:

11 Oir air éirigh do'n ghréin le dian-theas, crìonaidh i am feur, agus tuitidh a bhlàth, agus théid maise a dhreach am mugha⁵: is amhuil sin mar an ceudna a

sheargas an duine saobhir 'na shlighibh.

12 Is beannaichte an duine a ghiùlaineas buaireadh: oir 'nuair a dhearbhar e, gheibh e crùn na beatha, a gheall an Tighearn do'n dream a ghràdhaicheas e.

13 Na abradh neach sam bith 'nuair a bhuairear e, Tha mi air mo bhuaireadh le Dia: oir cha chomasach Dia a bhuaireadh le h-olc, ni mò a bhuaireas e neach sam bith.

14 Ach tha gach duine air a bhuaireadh, 'nuair a thairngear, agus a thàlaidhear⁶ e le 'ana-miann féin.

15 An sin air bhì do'n ana-miann torrach, beiridh e peacadh: agus air do'n pheacadh bhi air a chrìochnachadh, beiridh e bàs.

16 Na bithibh air bhur mealladh, mo bhràithre gràdhach.

17 Tha gach uile dheadh thabhartas, agus gach uile thiodhlac iomlan o'n àirde, a' teachd a nuas o Athair na soillse, maille ris nach 'eil atharrachadh, no sgàile tionndaidh.

18 O 'thoil féin ghin e sinn le focal na firinn, chum gu'm bitheamaid 'nar gnè cheud-toraidh d'a chreutairibh.

19 Uime sin, mo bhràithre gràdhach, biodh gach duine ealamh chum éisdeachd, mall chum labhairt, mall chum feirge:

20 Oir cha'n oibrich fearg duine fireantachd Dhé.

21 Uime sin cuiribh uaibh gach uile shalachar, agus anabharr mì-ruin, agus gabhaibh do bhur n-ionnsuidh le macant-as⁷ am focal a tha air a shuidheachadh annaibh, a tha comasach air bhur n-an-aman a thearnadh.

22 Ach bithibh-sa 'nur luchd chur an gnìomh an fhocail, agus na b'ann 'nur luchd-éisdeachd, a mhàin, 'gur mealladh féin.

¹ bhuairean.

² nach cuir nàire.

³ chuirge agus uaithe.

⁴ fear an dà inntinn.

⁵ théid as do mhaise a dhreach.

⁶ bhrèugar, ribear.

⁷ ceannasachd.

23 Oir ma tha neach air bith 'na fhear-
éideachd an fhocail, agus cha'n ann 'na
fhear-deanamh *d' a réir*, is cosmhail e ri
duine a tha 'g amharc air 'aghaidh nàd-
urra féin ann an sgàthan:

24 Oir bheachdaich e air féin, agus
dh'imich e roimhe, agus dhì-chuimhnich e
air ball cìod an coslas duine a bh'ann féin.

25 Ach ge b'e bheachdaicheas gu dùr-
achdach air lagh dìongmhailta na saorsa,
agus a bhuanacheas *ann*, gun e bhi
'na fhear-éideachd dearmadach, ach 'na
fhear-deanamh na h-oibre, bithidh an
duine so beannaichte 'na dheanadas.

26 Ma shaoileas neach air bith 'nur
measg gu bheil e diadhaidh, gun bhi cur
sréin r'a theagaidh, ach a' mealladh a
chridhe féin, is dìomhain diadhachd an
duine so.

27 'Si so an diadhachd fhìorghlan agus
neo-shalach am fianuis Dé agus an Athar,
dilleachdain agus bantracha fhiosrachadh
'nan trioblaid, *agus* neach 'ga choimhead
féin gun smal o'n t-saoghal.

CAIB. II.

1 *Cha'n 'eil e comh-fhreagradh d'ar n-aidheil
chrìosdaidh suim a bhi' againn do dhaoineibh
saoibhir agus tàir a dheanamh air ar bràithribh
bochda; 13 is mò bu chòir dhuinn bhì seirceil
agus trèaireach: 14 agus gun uail a dheanamh
à creidimh far nach 'eil oibre, &c.*

MO bhràithre, na biodh agaibh creid-
imh ar Tighearna Iosa Crìosd, *Tigh-*
earna na glòire¹, maille ri gnùis-bhreth².

2 Oir ma thig a steach do 'ur coimh-
thional duine air am bheil fainne òir, ann
an eudach dealrach, agus gu'n tig a
steach mar an ceudna duine bochd ann an
eudach suarach³;

3 Agus gu'n amhaire sibh le meas air
an duine sin air am bheil an deadh thrusg-
an, agus gu'n abair sibh ris, Suidh thusa
an so ann an àit inbheach⁴; agus gu'n
abair sibh ris an *duine* bhochd, Seas
thusa an sin, no suidh an so fo stòl mò
chos:

4 Nach 'eil sibh mar sin leth-bhretheach
annaibh féin, agus nach d'rinneadh sibh
'nur breitheamhaibh dhroch smuainte?

5 Eisidibh, mò bhràithre gràdhach, nach
do thagh Dia bochdan an t-saoghail so,
saoibhir ann an creidimh, agus 'nan oigh-
reachaibh air an riochadh, a gheall e
dhoibh-san a glràdhaicheas e?

6 Ach thug sibhse masladh do'n bhochd.
Nach 'eil na daoine saoibhir ri an-tigh-
earnas oirbh⁵, agus 'gur tarruing gu
caithrichibh-breitheanais?

7 Nach 'eil iad a' toirt toibheim⁶ do'n

ainm òirdheirc⁷, a dh'ainmichear oirbh?

8 Ma choimhlionas sibh an lagh riochail
a réir an sgrìobtuir, Gràdhaich do choimh-
earsuach mar thu féin, is maith a ni sibh:

9 Ach ma ni sibh leth-bhreth air daoine-
ibh, tha sibh a' deanamh peacaidh, agus
tha sibh air bhur fàgail shìos leis an lagh
mar a luchd-brisidh.

10 Oir ge b'e neach a choimhideas an
lagh uile, agus a thuislicheas ann an aon
*àithne*⁸, tha e ciontach do'n iomlan.

11 Oir an ti a thubhairt, Na dean adh-
altrannas, thubhairt e mar an ceudna, Na
dean mortadh. A nis ged nach dean thu
adhaltrannas, gidheadh ma ni thu mort-
adh, rinneadh fear-brisidh an lagha dhìot.

12 Gu ma h-amhluidh siu a labhras sibh-
se, agus gu ma h-amhluidh a ni sibh, mar
iadsan air an téid breth a thoirt le lagh na
saorsa.

13 Oir gheibh esan breitheanas gun
tròcair, nach d' rinn tròcair; agus ni tròc-
air gàirdeachas an aghaidh breitheanais.

14 Cìod an tairbhe, mò bhràithre, ged
their aon neach gu bheil creidimh aige,
agus gun oibre bhi aige? an urrainn
creidimh a thèarnadh?

15 Ma bhios bràthair no piuthar lom-
nochd, agus a dh'uireasbhuidh teachd-an-
tìr lathail;

16 Agus gu'n abair neach agaibh-sa riu,
Imichibh an sìth, bithibh air bhur garadh,
agus bithibh air bhur sàsachadh: gidh-
eadh nach toir sibh dhoibh na nithe sin a
tha feumail do'n chorp; cìod an tairbhe
ta ann?

17 Is amhuil sin creidimh mar an ceud-
na, mur bi oibre aige, tha e marbh, air
dha bhi leis féin.

18 Ach a ta neach àraidh ag ràdh, Tha
creidimh agad-sa, agus tha oibre agam-
sa: nochd dhomh-sa do chreidimh as
eugmhais t'oibre⁹, agus nochdaidh mise
dhuit-se mò chreidimh le m' oibribh.

19 Tha thu creidsinn gu bheil aon Dia
ann; is maith a ni thu: tha na deamhain
a' creidsinn mar an ceudna, agus tha iad
a' crìothnachadh.

20 Ach, O dhuine dhiomhain, an àill
leat fios fhaotainn, gu bheil creidimh as
eugmhais oibre marbh?

21 Nach deachaidh ar n-athair Abraham
fhìreanachadh le oibribh, 'nuair a thug e
suas a mhac Isaac air an altair?

22 Nach léir dhuit gu'n do chomh-oib-
rich creidimh le 'ghnìomharaibh, agus
gu'n d'rinneadh creidimh iomlan le oib-
ribh?

23 Agus choimhlionadh an sgrìobtuir
a ta ag ràdh, Chreid Abraham Dia, agus

¹ creidimh glòire ar Tighearna Iosa Crìosd.

² meas air pearsa seach a chéile.

³ salach.

⁴ urranach.

⁵ a' deanamh fòirneart oirbh, 'gur sàrachadh.

⁶ masladh.

⁷ urranach.

⁸ bhrìscas aon phonc.

⁹ le t' oibribh-sa.

inheasadh sin da mar fhìreantachd: agus ghoireadh caraid Dé dheth.

24 Chi sibh uime sin gu'm fireanaichear duine le oibrìbh, agus cha'n ann le creidimh a mhàin.

25 Amhuil sin mar an ceudna, nach robh Rahab an strìopach air a fireanachadh le oibrìbh, 'nuair a ghabh i ris na teachd-airibh, agus a chuir i mach air slighe eile iad?

26 Oir mar a ta an corp marbh as eugmhais an spioraid, mar sin mar an ceudna tha creidimh marbh as eugmhais oibre.

CAIB. III.

1 Cha chòir grad-bhreth a thoirt air daoine eile, no an cronachadh gu ladurra; 5 ach is mò is còir dhuinn srian a chur r'ar teangaidh, ball beag, ach a ta 'na h-inneal cumhachdach chum mòr-mhaith agus olc a dheanamh 13 tha'n dream sin a tha fìor ghlic ciùin agus sìochail, gun tui, gun strì.

MO bhràithre, na bithibh 'nur mòran mhaighstirean¹, air dhuibh fios a bhì agaibh gu'm faigh sinn an tuilleadh breitheanaidh.

2 Oir ann am mòran nithe tha sinn uile ciontach. Mur 'eil duine ciontach ann am focal, is duine iomlan an ti sin, comasach mar an ceudna air srian a chur ris a' chorp uile.

3 Feuch, tha sinn a' cur shrian am beul nan each, chum gu'm bi iad ùmhail dhuinn; agus tionndaidh sinn an corp uile mu'n cuairt.

4 Feuch mar an ceudna na longa, ged tha iad co mòr, agus ged shéidear iad le garbh-ghaothaibh, gidheadh tionndaidhear² mu'n cuairt iad le stiùir ro bhig, ge b'e taobh³ gus am miann leis an stiùrad-air.

5 Is amhuil sin is ball beag an teangadh, agus ni i mòr-uail⁴. Feuch, cia meud an connadh a lasas teine beag!

6 Agus is teine an teangadh, saoghal do aingidheachd: mar sin tha an teangadh air a suidheachadh am measg ar ball, ionnus gu'n salaich i an corp gu h-iomlan, agus gu'n las i cùrsa an naduir⁵; agus i fèin air a lasadh o ifrinn.

7 Oir a ta gach uile ghnè fhiadh-bheathachiche, agus eunlaith, agus nithe snàig-each⁶, agus nithe san fhaierge, air an ceannsachadh; agus cheannsaicheadh iad leis a' chinne-daoine:

8 Ach cha chomasach do dhuine air bith an teangadh cheannsachadh; is olc do-chasgaidh i, làn do nimh marbhtach.

9 Leatha-sa tha sinn a' beannachadh Dhé, eadhon an Athar; agus leatha-sa tha sinn a' mallachadh dhaoine, a rinn-eadh a réir cosamhlachd Dhé.

10 As an aon bheul tha beannachadh agus mallachadh a' teachd a mach. Mo bhràithre, cha chòir do na nithibh so bhì mar so.

11 An cuir tobar a mach as an aon sùil uisge milis agus searbh?

12 Am feud craobh-fhìge, mo bhràithre, dearcan oladh a thoirt uaipe? no a' chraobh-fhìona, figean? mar sin cha'n fheud tobar sam bith sàile agus uisge milis a thoirt uaithe araon.

13 Cò a ta 'na dhuine glic agus aig am bheil eòlas 'nur measg? nochdadh e à deadh chaithe-beatha, 'oibre fèin le ceannsaichd gliocais.

14 Ach ma tha eud searbh agus comhstri agaibh 'nur cridhe, na deanaibh uail, agus na deanaibh breug an aghaidh na fìrinn.

15 Cha'n ann o'n àirde tha 'n gliocas so a' teachd a nuas, ach tha e talmhaidh, collaidh, diabhluidh.

16 Oir far am bheil farmad agus comhstri, an sin tha buaireas⁷, agus gach uile dhroch ghnìomh.

17 Ach a ta an gliocas a tha o'n àirde air tús glan, an déigh sin sìochail, ciùin, agus so-chomhairlich, làn do thròcair agus do dheadh thoraibh, gun leth-bhreth agus gun cheilg.

18 Agus tha toradh na fireantachd air a chur ann an sìth do luchd-deanamh na sìthe.

CAIB. IV.

1 Is còir dhuinn cathachadh an aghaidh saintt, 4 neo-mheasarrachd, 5 uabhair, 11 cùl-chàineadh, agus breth ghrad mu dhaoinibh eile; 13 agus gun bhì ro carbsach a soirbheas ann ar gnothuichibh saoghalta, &c.

CIA as a ta coganna agus còmhraça a' teachd 'nur measg? nach ann as a so, eadhon o bhur n-ana-miannaibh, a tha cogadh ann bhur ballaibh?

2 Tha sibh a' miannachadh, agus cha'n 'eil agaibh: tha sibh a' marbhadh, agus a' dian-shanntachadh, agus cha'n 'eil e'n comas duibh ni fhaotainn: tha sibh a' cathachadh agus a' cogadh, gidheadh cha'n 'eil agaibh, do bhrìgh nach 'eil sibh ag iarraidh.

3 Tha sibh ag iarraidh, agus cha'n 'eil sibh a' faotainn, do bhrìgh gu bheil sibh ag iarraidh gu h-olc, chum gu'n caith sibh e air bhur n-ana-miannaibh.

4 Adhalarannacha, agus a bhan-adhalarannacha, nach 'eil fhios agaibh gur naimhdeas an aghaidh Dhé cairdeas an t saoghail? ge b'e air bith neach uime sin leis an àill bhì 'na charaid do'n t-saoghal, tha e 'na naimhaid do Dhia.

5 Am bheil sibh a' smuaineachadh gu

¹ fhear-teagaisg.

² àird.

³ iompaichear.

⁴ ràiteachais.

⁵ triall na beatha, cuairt an domhain.

⁶ nathraiche.

⁷ an-riaghailt.

bheil an sgrìobtuir gu dìomhanach a' labhairt? Tha an spiorad¹ a tha chòmh-nuidh annainn a' togairt² gu farmad.

6 Ach bheir e gràs a's mò uaitli: uime sin a ta e ag radh, Tha Dia a' cur an aghaidh nan uaibhreach, ach a' toirt gràis dhoibh-san a ta iriosal.

7 Uime sin ùmhlaichibh sibh féin do Dhia; cuiribh an aghaidh an diabhail, agus teichidh e uaibh:

8 Dlùthaichibh ri Dia, agus dlùthaichidh e ribh: glanaibh *bhur* làmhan, a pheac-acha, agus glànaibh *bhur* cridhe, sibhse aig am bheil an intinn dhùbailte³.

9 Bithibh ann an àmhghar, agus deanaibh caoidh, agus gul: biodh *bhur* gàire air a thionndadh gu bròn, agus *bhur* n-aobhneas gu tuirse.

10 Irioslaichibh sibh féin an fianuis an Tighearn, agus àrdaichidh e sibh.

11 Na labhairbh olc mu chéile, a bhràithre. An ti a tha labhairt uile m'a bhràthair, agus a' toirt breth air a bràthair, tha e labhairt uile mu'n lagh, agus a' toirt breth air an lagh: ach ma tha thu toirt breth air an lagh, cha'n fhear-coimhlionaidh an lagha thu, ach breitheamh.

12 Tha aon fhear-tabhairt lagha ann, a's urrainn saoradh agus sgrios: co thusa a tha toirt breth air neach eile?

13 Imichibh a nis, sibhse a ta ag ràdh, Théid sinn an diugh no màireach gus a' leithid so do bhaile, agus fanaidh sinn an sin rè bliadhna, agus ni sinn ceannachd⁴, agus gheibh sinn buannachd:

14 'Nuair nach 'eil fhios agaibh ciod a *tharlas* air a' mhàireach: oir ciod i *bhur* beatha? is deatach i a chithear tè ùine bhig, agus an déigh sin a théid as an t-seall-adh.

15 An àit gu'm bu chòir dhuibh a ràdh, Ma's toil leis an Tighearn, bithidh sinn beò, agus ni sinn so, no sud.

16 Ach a nis tha sibh a' deanamh uaille as *bhur* ràiteachas féin: is olc gach uile shamhuil sin do uail.

17 Uime sin dhasan d'an aithne maith a dheanamh, agus nach dean e, is peacadh e dha.

CAIB. V.

1 *Tha aobhar aig daoineibh aingidh saoiibhir eagal a bhì orra roimh dhìoghallas Dé. 7 Bu chòir dhuinn bhì foighidneach a réir eisempleir nam fàidhean, agus Iob; 12 mionnan a sheachnadh; 13 urnuigh a ghnàthachadh ann an anshocair, agus saim a sheinn ann an socair, &c.*

IMICHIBH a nis, a dhaoine saoiibhir, deanaibh gul agus caoidh air son *bhur* n-àmghar a tha teachd oirbh.

2 Tha *bhur* saoihbreas air truailleadh,

agus *bhur* n-eudach air itheadh leis an leomann⁶.

3 Tha *bhur* n-òr agus *bhur* n-airgiod air meirgeadh; agus bithidh am meirgsan 'na fhianuis 'nur n-aghaidh, agus ithidh i *bhur* feòl mar theine: thaisg sibh ionmhas fa chomhair nan làithean deireannach.

4 Feuch, tha tuarasdal an luchd-oibre⁶, a bhuaìn sìos *bhur* n-achaidh, ni a chumadh uatha leibhse le féill, ag éigheach: agus tha glaothaich na muinntir a bhuaìn, air dol a stigh chum cluasa Tighearna nan sluagh.

5 Chaith sibh *bhur* beatha ann an sògh air thalamh, agus bhà sibh mear; dh'alt-rum sibh *bhur* cridheacha, mar ann an là a' mharbhadh⁷.

6 Dhìt agus mharbh sibh am firean⁸, agus cha'n 'eil e cur 'nur n-aghaidh.

7 Uime sin, a bhràithre, bithibh foighidneach gu teachd an Tighearna. Feuch, feithidh an treabhaiche⁹ ri toradh luachmhor an talmhainn, agus fanaidh e gu foighidneach ris, gus am faigh e an ceud uisge agus an t-uisge deireannach.

8 Bithibh-sa foighidneach mar an ceudna; socraichibh *bhur* cridheacha: oir tha teachd an Tighearn am fagus.

9 Na deanaibh gearan an aghaidh a chéile, a bhràithre, chum nach dìtear sibh: feuch, tha am Breitheamh 'na sheasamh aig an dorus.

10 Gahbaidh, mo bhràithre, na fàidhean, a labhair ann an ainm an Tighearna, 'nan eisempleir air anshocair fhulang, agus air foighidin.

11 Feuch, measar sona leinn iadsan a dh'fhuilingeas. Chuala sibh iomradh air foighidin Iob, agus chunnaic sibh crìoch an Tighearna; gu bheil an Tighearna ro thiom-chridheach¹⁰ agus tròcaireach.

12 Ach roimh na h-uile nithe, mo bhràithre, na tugaibh mionnan, aon chuid air nèamh, no air an talamh, no air aon mhionnan eile: ach gu'm b'è *bhur* còmh-radh Seadh, seadh, agus Cha'n eadh, cha'n eadh; air eagal gu'n tuit sibh ann an ditedh.

13 Am bheil neach sam bith fo thrioblaid¹¹ 'nur measg? deanadh e urnuigh. Am bheil neach sam bith subhach? seinn-eadh¹² e sailm.

14 Am bheil neach sam bith tinn 'nur measg? cuireadh e fios air seanairibh na h-eaglais; agus deanadli iad urnuigh os a cheann, 'ga ungadh le h-oladh ann an ainm an Tighearna:

15 Agus slànuidhidh urnuigh a' chreidimh an t-euslan, agus togaidh an Tigh-

¹ Am bheil an spiorad?

² miannachadh.

³ dhà'fhillte.

⁴ marsandachd.

⁵ an reudan, mhiad chrìon.

⁶ nam buanaiche.

⁷ an àir.

⁸ an t-ionracan.

⁹ an tuathanach.

¹⁰ ro iochdnuhor.

¹¹ a' fulang uile.

¹² canadh.

I. PEADAR, I.

earn suas e; agus ma rinn e peacanna, maithear dha iad.

16 Aidichibh *bhur* lochdan d'a chéile, agus deanaibh urnuigh air son a chéile, chum gu'n tearnar¹ sibh: tha mòr-éifeachd ann an urnuigh dhùrachdaich an fhèin.

17 Bu duine Elias aig an robh comh-aighe ruinne, agus ghuidh e gu dùrachdach gun uisge bhi ann: agus cha d'fhàinig uisge air an talamh rè thri bliadhna agus

shè mìosan.

18 Agus rinn e urnuigh a rìs, agus thug nèamh uisge uath, agus thug an talamh a mach a thoradh.

19 A bhràithre, ma théid aon neach agaibh-sa air seacharan o'n fhùrinn, agus gu'n iompaich neach e;

20 Biodh fhios aige, an duine a dh'iomp-aicheas peacach o sheacharan a shlighe, gu'n saor² e anam o bhàs, agus gu'm folaich e mòran pheacanna.

¹ slànuchear.

² tèaruinn.

CEUD LITIR CHOITCHIONN AN ABSTOIL

PHEADAIR.

CAIB. I.

1 *Bheannaich Peadar Dia air son a ghràsa iomareach spioradail; 10 nochd e nach naidheachd ùr slàinte tre Chrìosd, ach nì mu'n robh fàidheadaireachd o shean: 13 agus a réir sin chuir e ìmpidh orra am beatha a chaitheadh gu diadhaidh, do bhrìgh gu bheil iad a nis air an nuadh-bhreth le focal De.*

PEADAR abstol Iosa Crìosd, chum nan coigreach a tha air an sgapadh tre Phontus, Ghalatia Chapadocia, Asia, agus Bhitinia,

2 A thaghadh a réir roimh-eòlais Dhé an Athar, tre naombachadh an Spioraid, chum ùmhlachd, agus crathadh fola Iosa Crìosd: Gràs agus sìth gu robh air am meudachadh dhuibh-se.

3 Gu ma beannaichte gu *robh* Dia agus Athair ar Tighearna Iosa Crìosd, neach a réir a mhòr-thròcair, a dh'ath-ghin sinne gu beò-dhòchas, tre aiseirigh Iosa Crìosd o na bhaibh,

4 Chum oighreachd neo-thruaillidh, agus neo-shalaich, agus uach searg as, a tha air a coimhead sna nèamhaibh dhuibh-se,

5 A tha air bhur coimhead le cumhachd Dhé tre chreidimh chum slàinte, a tha ullamh r'a foillseachadh san aimsir dheireannaich:

6 Nì anns am bheil sibh a' deanamh mòr-ghàirdeachais, ged tha sibh a nis rè ùine bhig, (ma's feumail e,) fo thuirse tre iomadh buaireadh.

7 Chum gu faighear dearbhadh bhur creidimh, nì's luachmhoire gu mòr na òr a théid am mugh¹, ged dhearbhar le teine e, chum cliù, agus urrainn, agus glòir aig foillseachadh Iosa Crìosd;

8 D'am bheil sibh a' toirt gràidh, ged nach faca sibh e; agus ged nach 'eil sibh a nis 'ga fhaicinn, air dhuibh bhi creidsinn ann, tha sibh a' deanamh mòr-

ghairdeachais le h-aoibhneas air dol thar labhairt, agus làn do ghlòir:

9 A' faotainn crìche bhur creidimh, eadhon slàinte *bhur* n-anama:

10 Slàinte mu'n d'fhiosraich na fàidhean, agus mu'n d'rinn iad geur-rannsachadh, muinntir a rinn fàidheadaireachd mu'n ghràs a *bha gu teachd* do 'ur n-ionnsuidh-sa;

11 A' rannsachadh ciod i, no ciod a' glinè aimsir a bha Spiorad Chrìosd annta-san a' foillseachadh², 'nuair a rinn e fianuis roimh-laimh air fulangasaibh Chrìosd, agus a' ghlòir a bha gu'n leantuinn.

12 Muinntir d'au d'fhoillsicheadh, nach b'ann doibh féin, acli dhuinne a fhritheil iad na nithe a tha nis air an cur an cèill duibh leo-san a shearmonaich an soisgeul duibh, leis an Spiorad naomh a chuireadh a nuas o nèamh; nithe air am miann leis na h-ainglibh beachdachadh.

13 Uime sin crìoslaichibh leasraidh bhur n-inntinn, bithibh measarra, agus biodh dòchas dìongmhalta agaibh as a' ghràs³ a bheirear dhuibh aig foillseachadh Iosa Crìosd;

14 Mar chloinn ùmhal, gun bhi 'gur comh-chumadh féin ris na h-ana-miannaibh, a bha agaibh roimh ann an àm bhur n-aìneolais:

15 Ach a réir mar a ta esan a ghairm sibh naomh, bithibh-sa naomha mar an ceudna 'nur n-uile chaithe-beatha:

16 Do bhrìgh gu bheil e sgrìobhta, Bithibh-sa naomha, oir a ta mise naomh.

17 Agus ma ghoireas sibh air an Athair, a bheir breth a réir oibre gach neach, gun chlaon-bhàigh ri neach seach a chéile⁴, caithibh aimsir bhur cuairt an so le h-eagal⁵:

18 Air dhuibh fios a bhi agaibh nach do

¹ neo-nì.

² ciallachadh.

³ sùil gus a' chrìch agaibh rìs a' ghràs.

⁴ gun urram do neach seach a chéile.

⁵ faichteas.

shaoradh sibh le nithibh truailidh, *mar a ta* airgid agus òr, o bhur caithe-beatha dìomhain, a thugadh dhuibh o bhur sinn-sreachd;

19 Ach le fuil luachmhoir Chrìosd, *mar a fhuil* Uain gun chron, gun smal:

20 Neach gu deimhin a roimh-orduich-eadh roimh chruthachadh an t-saoghail, ach a dh'fhoillsicheadh anns na h-aimsiribh deireannach air bhur sonsa;

21 Muinntir trid-san a ta creidsinn ann an Dia a thog esan o na marbhaibh, agus a thug glòir dha, chum gu'm biodh bhur creidimh agus bhur muinghin ann an Dia.

22 Do bhrìgh gu'n do ghlan sibh bhur n-anama le ùmhlaich a thoirt do'n fhirinn tre'n Spiorad, chum gràidh neo-chealgaich do na bràithribh; *feuchaidh gu'n* toir sibh gràdh d'a chèile a cridhe glan gu dùrachdach:

23 Air dhuibh bhi air bhur n-ath-ghineamhuin, cha'n ann o shìol truailidh, ach neo-thruailidh, le focal an Dé bheò, agus a mhaireas gu sìorruidh.

24 Oir *tha* gach uile fheòil mar fheur, agus uile ghlòir dhaoine mar bhlàth an fheoir. Seargaidh am feur, agus tuitidh a bhlàth dheth:

25 Ach fanaidh focal an Tighearna gu sìorruidh. Agus is e so am focal a shearmonaicheadh dhuibh-se anns an t-soisgeul.

CAIB. II.

1 Chomhairlich Peadar luchd-aidmheil na creidimh an aghaidh mì-sheircealach, 4 nochd e gur e Crìosd am bunadh air am bheil iad air an togail; 11 ghuidh e orra fantuinn o ana-niannaibh feòlmhor, 13 agus bhi ùmhla do uachdaranaibh.

UIME sin a' cur uaibh gach uile mhi-ruin, agus gach uile mhealltaireachd, agus chealg, agus fharmada, agus gach uile ana-cainnt,

2 Mar naoidheana air an ùr-bhreith, iarr-aibh bainne fìor-ghlan an fhocail, chum as gu fàs sibh leis;

3 Ma's e as gu'n do bhlais sibh¹ *gu bheil* an Tighearn gràs-mhor.

4 A' teachd d'a ionnsuidh-san, *mar gu* cloich bheò, a dhiùltadh gu deimhin le daoineibh, ach air a taghadh o Dhia *agus* luachmhor;

5 Tha sibhse mar an cendna mar chloch-aibh beò, air bhur togail suas 'nur tigh spioradail, 'nur sagartachd naomh, chum ìobairte spioradail a thoirt suas, taitneach do Dhia tre Ìosa Crìosd.

6 Uime sin a ta so mar an ceudna air a chur sìos anns an sgrìobtuir, Feuch, cuiridh mi ann an Sìon prìomh chlach-òise² thaghta, luachmhor: agus an ti a chreideas ann³, cha chuirear gu nàire e.

7 Dhuibh-se uime sin a chreideas, *tha* e⁴ luachmhor⁵: ach dhoibh-san tha eas-ùmhla, a' clach a dhiùlt na clachairean, rinneadh ceann na h-òise dìth,

8 Agus clach-thuislidh, agus carraig oilbheim, *dhoibh-san* a thuislicheas air an fhocal, air dhoibh bhi eas-ùmhla, chum mar an ceudna an d'orduicheadh iad.

9 Ach is ginealach taghta sibhse, sagartachd rioghail, cinneach naomh, sluagh sonraichte⁶; chum gu'n cuireadh sibh an céill feartan⁷ an ti a ghairm á dorchadas sibh chum a sholuis iongantach féin:

10 Nach *robh* uair-éigin⁸ 'nur sluagh, ach a nis is sibh sluagh Dhé: dream nach d'fhuair tròcair, ach a nis a tha air faotainn tròcair.

11 A mhuinntir mo ghràidh, guidheam oirbh, mar choigrich agus luchd cuairt, sibh a sheachnadh ana-mianna feòlmhor, a tha cogadh an aghaidh an anama;

12 Air dhuibh deadh chaithe-beatha bhi agaibh am measg nan Cinneach; chum an àit olc a labhairt umaibh mar luchd mì-ghnìomh, gu'n dean iad o bhur deadh oiribh a chi iad, Dia a ghlòrachadh ann an là an fhiosrachaidh.

13 Uime sin bithibh-sa ùmhla do gach uile riaghailt⁹ dhaoine air son an Tighearna: ma's ann do'n rìgh mar an ti a's àirde inbhe;

14 No do uachdaranaibh mar do'n mhuinntir a chuireadh uaith chum dioghaltais air luchd-deanamh an uile, ach chum cliù dhoibh-san a ni maith.

15 Oir is i toil Dé gu'n cuireadh sibhse le deadh dheanadas tosd air aineolas dhaoine amaideach:

16 Mar dhaoine saor, agus gun *bhur* saor-sa a ghnàthachadh mar bhrat-folaich do'n olc¹⁰, ach mar sheirbhisich Dhé.

17 Thugaibh urram do na h-uile dhaoine. Gràdhachibh na bràithre. Biodh eagla Dé oirbh. Thugaibh urram do'n rìgh.

18 A sheirbhiseacha, *bithibh* ùmhla do 'ur maighstiribh maille ris an uile eagla, cha'n e mhàin dhoibh-san a tha maith agus ciùin, ach mar an ceudna dhoibh-san a tha ana-mèineach¹¹.

19 Oir a ta so cliù-thoilteannach, ma dh'iomchaireas neach sam bith doilgheas air son coguis a thaobh Dhé, a 'fulang gu h-eucorach.

20 Oir ciod an t-aobhar molaidd *a ta* ann, ma's e an uair a ghabhar oirbh air son bhur cionta, gu'n giùlain sibh gu foighidneach e? ach ma's e 'nuair a ta sibh a' deanamh maith, agus a' fulang *air a shon*, gu'n giùlain sibh e gu foighidneach, *tha* so taitneach, do Dhia.

¹ Do bhrìgh gu'n do bhlais sibh.

² clach-òisinn àraidh. ³ a dh'earbas aisde.

4 i. ⁵ na urram. ⁶ dileas, àraidh.

⁷ subhailcean, buaidhean, cliù.

⁸ roimh.

⁹ ordugh, shuidheachadh.

¹⁰ do mhi-run.

¹¹ reasgach, crosda.

I. PEADAR, II. III.

21 Oir is ann a dh'ionnsuidh so a ghairm-eadh sibh: do bhrìgh gu'n d'fhuiling Criosd mar an ceudna air bhur son¹, a' fàgail eiseimpleir agaih², chum gu leanadh sibh a cheumanna:

22 Neach nach d'rinn peacadh, ni mò a fhuaradh cealg 'na bheul:

23 Neach, 'nuair a chàineadh e, nach do chàin a ris; 'nuair a dh'fhuiling e, nach do bhagair; ach a dh'earb e féin ris-san a bheir breth cheart:

24 Neach a ghiùlain ar peacanna e féin 'na chorp féin air a' chraun, chum air dhuinn bhì marbh do'n pheacadh³, gu'm bitheamaid beò do fhìreantachd: neach le a bhuillibh-san a tha sibh air bhur tearnadh.

25 Oir bha sibh mar chaoraich a' dol air seacharan; ach philleadh sibh a nis chum Buachail agus Easbuig⁴ bhur n-anama.

CAIB. III.

1 *Theagaisg Peadar dleasdanas bhan agus fhear-pòsda d'a chèile; 8 dh'earail e na uile dhaoine chum aonachd agus gràidh, 14 agus geur-leanmhuinn fhuilang: 19 Chuir e mar an ceudna an cèill sochairan Chrìosd do'a t-seann saoghal.*

MAR an ceudna, a mhnà, *bithibh* ùmhal do 'ur fearaibh féin, chum ma tha dream air bith eas-ùmhal do'n fhocal, gu'm bi iadsan mar an ceudna, as eugmhais an fhocail, air an cosnadh le deadh chaithe-beatha nam ban.

2 'Nuair a bheachdaicheas iad air bhur caithe-beatha gheamnuidh maille ri h-eagal.

3 Na b'i bhur brèaghachd, figheadh an fhuilte agus a' cur oir oirbh, agus dheadh thrusgan umaibh, a' bhrèaghachd sin o'n leth muigh:

4 Ach duine folaichte a' chridhe, ann an neo-thruaillidheachd spioraid mhacanta agus chiùin, ni a tha ro luachmhor ann an sealladh Dhé.

5 Oir b'ann mar so a rinn na mnà naomha o shean, aig an robh am muinghin ann an Dia, iad féin breagha, air dhoibh bhì ùmhal d'am fearaibh féin;

6 Amhuil a thug Sarah ùmhlachd do Abraham, a' gairm tighearna dheth: d'an nigheana sibhe am feadh a ni sibh gu maith, agus gun gheilt oirbh le h-uamhas sam bith.

7 Mar an ceudna, fheara, gabhaibh-sa còmhnuidh maille riu a rèir eòlais, a' tabhairt urraim do'n mhnai mar an soith-each a' annhuinne, agus mar mhuinntir a tha 'nan comh-oighreachaibh air gràs na beatha; chum nach cuirear bacadh air bhur n-urnuighibh.

8 Fa dheòidh, *bithibh* uile a dh'aon iuntinn, biodh comh-fhuilangas agaih

r'a chèile⁵, gràdhaichibh a chèile mar bhràithre, *bithibh* truacanta, càirdeil.

9 Na locaibh olc air son uile, no càineadh air son càinidh: ach 'na aghaidh sin, beannaichibh; air dhuibh fios bhi agaih gur ann a dh'ionnsuidh so a ghairmeadh sibh, chum gu'n sealbhaicheadh sibh beannachadh mar oighreachd:

10 Oir ge b'e le'm b'ail beatha a ghràdhachadh, agus làithean maithhe fhaicinn, cumadh e a theaghadh o olc, agus a bhllean o labhairt ceilg.

11 Seachnadh e olc, agus deanadh e maith; iarradh e sìth, agus leanadh e i.

12 Oir *tha* sùilean an Tighearn air na fireanaibh, agus a chluasa fosgailte r'an urnuigh: ach *tha* gnùis an Tighearn an aghaidh na muinntir a ni olc.

13 Agus cò e a ni olc oirbh ma bhios sibh 'nur luchd-leanmhuinn air an ni⁶ sin a ta maith?

14 Ach eadhon ma dh'fhuilingeas sibh air sgàth fireantachd, is sona sibh: agus na biodh fiamh an eagail-san oirbh, agus na bithibh mi-shuaimhneach;

15 Ach naomhaichibh an Tighearn Dia ann bhur cridheachaibh: agus *bithibh* ullamh a ghnàth chum freagradh a thoirt, maille ri ceannasachd agus eagal, do gach uile dhuine a dh'iarras oirbh reuson an dòchais a tha annaibh:

16 Air dhuibh deadh choguis a bhi agaih: chum, 'nuair a tha iad a' labhairt uile 'nur n-aghaidh mar luchd-mi-ghnìomh, gu'n gabh iadsan nàire, a tha toirt toibheim do 'ur deadh chaithe-beatha ann an Criosd.

17 Oir is fearr, ma's e sin toil Dé, sibh a d'fhuilang air son maith a dheanamh, na air son olc a dheanamh.

18 Oir dh'fhuiling Criosd féin aon uair air son pheacanna, am firean air son nan neo-fhirean, (chum gu'n tugadh e sinne gu Dia,) air dha bhi air a chur gu bàs san fheòil, ach air a bheothachadh tre an Spiorad:

19 Leis an deachaidh e mar an ceudna, agus an do shearmonaich e do na spioradaibh ann am prìosan;

20 A bha o shean eas-ùmhal, 'nuair a dh'fheith fad-fhuilangas Dé aon uair ann an làithibh Noah, am feadh a bha àirc 'ga h-ulluchadh, anns an robh beagan, sin r'a ràdh, oclid anaman, air an tèarnadh tre uisge.

21 Tha am baisteadh, mar shamhlachas a tha comh-freagradh dha so, (cha'n e cur dhinn sal na feòla, ach freagradh deadh choguis thaobh Dhé,) nis 'gar tearnadh-ne, tre aiseirigh Iosa Criosd:

22 Neach air dha dol gu nèamh, a tha

¹ air ar son-ne.

² againn.

³ air ar saoradh o pheacaibh.

⁴ fir-còmhaid, fir amhaire thairis.

⁵ bithibh iochd-mhor r'a chèile.

⁶ an Ti.

air deas làimh Dhé, air do ainglibh, agus do uachdranachdaibh, agus do chumhachdaibh bhi air an cur fo 'cheannsal-san¹.

CAIB. IV.

1 *Dh'earail Peadar luchd-aidmheil na creidimh gu sgar do pheacadh o eisempleir Chriosd, agus do bhrìgh gu bheil a' chrìoch dheireannach a' dlùth-thèanadh oirm: 12 agus thug e comhfhurtachd dhoibh an aghaidh geur-leanmhuinn.*

UIME sin, o dh'fhuiling Chriosd air ar son-ne san fheòil, armaichibh-sa mar an ceudna sibh féin leis an inntinn cheudna: oir an ti a dh'fhuiling anns an fheòil, sguir e do pheacadh;

2 Chum nach caithheadh e fuigheall 'aimsir anns an fheòil, a réir ana-mianna dhaoine, ach a réir toile Dé.

3 Oir is leoir dhuinn a' chuid a chaidh seachad do aimsir ar beatha gu toil nan Cinneach a dheanamh, 'nuair a shiubhail sinn ann am macnus², ann an ana-miannaibh, ann an anabharra fìona, ann an geòcaireachd³, ann am poiteireachd, agus ann an ìodhol-aoradh an-dligheach⁴:

4 Nì anns am bheil iad a' gabhail iongantais, do bhrìgh nach 'eil sibhsa a' ruith maille ri anns an neo-mheasarrachd cheudna gun tomhas, a' labhairt uile *umaibh*:

5 Muinntir a bheir cumntas dhasan, a tha ullamh gu breth a thoirt air na beothaibh agus air na marbhaibh.

6 Oir is ann chum na crìche so a shearmonaicheadh an soisgeul dhoibh-san a tha marbh mar an ceudna, chum gu'n tugtadh breth orra a réir dhaoine san fheòil, ach gu'm biodh iad beò a réir Dhé san Spiorad.

7 Ach a ta crìoch nan uile nithe am fagus: uime sin bithibh measarra⁵, agus deanaibh faire chum urnuigh.

8 Agus roimh na h-uile nithibh biodh agaibh teas-ghràdh d'a chéile; oir cuiridh gràdh foalach air mòran pheacanna.

9 Thugaibh aoidheachd d'a chéile gun ghearan.

10 A réir mar a fhuair gach aon an tiodhlac, *mar sin* deanaibh frithealadh d'a chéile, mar dheadh stiùbhardaibh air gràs eagsamhuil Dé.

11 Ma labhras neach sam bith, *labhradh e* mar bhrithraibh⁶ Dhé; ma tha neach sam bith ri frithealadh, *deanadh se e* mar o'n chomas a bheir Dia *dha*; chum gu'm bi Dia air a ghlòrachadh anns na h-uile nithibh tre Iosa Chriosd: dhasan gu robh glòir agus cumhachd gu saoghal nan saoghal. Amen.

12 A mhuinntir mo gnràidh, na biodh iongantais oirbh thaobh na deuchainn

theintich, a thlig oirbh chum blur dearbhadh, mar gu'n tarladh nì-éigin neo-ghnàth-ach dlùibh:

13 Ach do bhrìgh gu bheil sibh 'nur luchd-comhairt do fhuilangasaibh Chriosd, deanaibh gairdeachas; chum mar an ceudna, ann an am foillseachaidh a ghlòire, gu'n dean sibh gairdeachas le h-aobh-neas ro mhòr.

14 Ma mhaslaichear sibh air son ainme Chriosd, *is sona sibh*; oir a ta Spiorad na glòire, agus Dhé a' gabhail comhnuidh oirbh; d'an taobh-san gu deimhin tha e faotaim toibheim, ach do 'ur taobh-sa tha e air a ghlòrachadh.

15 Ach na fuilingeadh aon agaibh mar mhortair, no *mar* ghaduiche, no *mar* fhear droch-bheirt, no mar neach a ghabhas gnothuch ri nithibh nach buin da.

16 Gidheadh ma *dh'fhuilingeas duine* mar Chriosduidh, na biodh nàire air; ach thugadh e glòir do Dhia as a leth so.

17 Oir *thàinig* an t-àm anns an tòisich breitheanas aig tigh Dhé: agus ma thòiseicheas e againne, ciod is crìoch dhoibhsan a tha eas-ùmhail do shoisgeul Dé?

18 Agus ma's ann air éigin a thèarnar am firean, c'àit an taisbein an duine mi-dhiadhaidh agus am peacach e.féin?

19 Uime sin, an dream a dh'fhuilingeas a réir toile Dé, earbadh iad an *anama ris-san* ann an deanamh maith, mar ri Cruith-ea dileas.

CAIB. V.

1 *Chuir Pradar ìmpidh air na seanairibh treud Dhé a bheathachadh; 5 air an òigridh bhi ùmhail, 8 agus orra uile bhi stuama, faireil, agus daingean sa' chreidimh; 9 agus cur an aghaidh ar namhaid an-ìochdmhoir an diabhuil.*

NA seanairean a ta 'nur measg tha mi ag earail, air bhi dhomh féin a' m' sheanair mar an ceudna, agus a' m' fhianuis air fulangasaibh Chriosd, agus mar an ceudna a' m' fhear comhairt do'n ghlòir sin, a tha gu bhi air a foillseachadh:

2 Beathaichibh treud Dhé a tha 'nur measg, a' gabhail cùraim *dheth*, cha'n ann a dh'aindeoin, ach gu deònach; cha'n ann air son buannachd shalaich, ach le h-inntinn ealamh;

3 Nì mo mar thighearnaibh os ceann oighreachd *Dhé*, ach mar dhream a tha 'nan eisempleiribh do'n treud.

4 Agus an uair a dh'fhoillsichear an t-àrd-bhuachail⁷, gheibh sibh crùn na glòire nach searg as.

5 Mar an ceudna, a dhaoine òga, bithibh ùmhail do na seanairibh: seadh, bithibh uile ùmhail d'a chéile, agus bithibh air bhur sgeadachadh le h-ìrioslachd: oir

¹ a mharasglachd, a, smachd.

² trisealachd.

³ craos.

⁴ gràineil.

⁶ oracla.

⁵ stuama.

⁷ an t-àrd-aodhaire.

II. PEADAR, I.

tha Dia a' cur an aghaidh nan uaibhreach, a' cur a' toirt gràis dhoibh-san a tha iriosal.

6 Uime sin irioslaichibh sibh féin fo làimh chumhachdaich Dhé, chum as gu'n àrdaich e sibh ann an àm iomchuidh:

7 A' tilgeadh bhur n-uile chùiram¹ air-san; oir a ta cùram aige dhibh.

8 Bithibh stuama, deanaibh faire; do bhrìgh gu bheil bhur namhaid an diabhl, mar leomhan beuchdach, ag imeachd mu'n cuairt a' sireadh cò a dh'fheudas e shlugadh suas.

9 Cuiribh-sa 'na aghaidh, air dhuibh bhi daingean sa' chreidimh, agus fhios a bhi agaibh gu bheil na fulangais cheudna air an coimhlionadh ann bhur bràithribh, a tha san t-saoghal.

10 Ach gu deanadh Dia féin nan uile

ghràs, a ghairm sinne chum a ghlòire shiorruidh tre Iosa Crìosd, an déigh dhuibh fulang rè ùine bhig, iomlan sibh; gu daingnicheadh, gu neartaicheadh, gu socraicheadh e sibh.

11 Dhasan gu robh glòir agus cumhachd, gu saoghal nan saoghal. Amen.

12 Le Silvanus bràthair dileas, (a réir mo bharrail-sa,) sgrìobh mi do 'ur n-ionnsuidh² gu h-aithghearr, a' teagasg, agus a' deanamh fianuis, gur e so fìor-ghràs Dhé, anns am bheil sibh 'nur seasamh.

13 Tha an eaglais ann am Babilon, a thaghadh maille ribhse, a' cur fàilte oirbh, agus Marcus mo mhac.

14 Cuiribh fàilte air a chéile le pòig ghràdh. Sìth gu robh maille ribh uile a tha ann an Iosa Crìosd. Amen.

¹ ro chùiram.

² thugaibh.

DARA LITIR CHOITCHIONN AN ABSTOIL

PHEADAIR.

CAIB. I.

1 Chum luchd-aidmheil na creidimh a dhaingneachadh an dòchas meudachaidh gràis Dé, 5 chuir Peadar impidh orra le creidimh agus deadh oiribh, an gairm a dheanamh cinnteach: 12 bha e cùramach mu so chur an cuimhne dhoibh, do bhrìgh gu robh fios aige a bhàs bhi 'm fagus.

SIMON Peadar, seirbhiseach agus abstol Iosa Crìosd, dhoibh-san a fhuair an creidimh luachmhor ceudna ruinne, tre fhìreantachd ar Dé agus ar Slànuighir¹ Iosa Crìosd:

2 Gu robh gràs agus sìth air am meudachadh dhuibh, tre eòlas Dé, agus Iosa ar Tighearna,

3 A réir mar a dheònuich a chumhachd diadhaidh-san dhuinne na nithe sin uile a bhuineas do bheatha agus do dhiadhachd, tre eòlas an tì sin a ghairm sinn chum glòire, agus deadh-bheus²:

4 Tre an d'thugadh dhuinn geallanna ro mhòr agus luachmhor, chum d'an trid-san gu'm biodh sibhse air bhur deanamh 'nur luchd-comhairt do nàdur na diadhachd, air dhuibh dol as o'n truaillidheachd a ta anns an t-saoghal tre ana-miann.

5 Agus a thuilleadh air so³, air deanamh an uile dìchioll duibh-se, cuiribh ri 'ur creidimh, deadh-bheus⁴; agus ri deadh-bheus, eòlas;

6 Agus ri h-eòlas, stuaim⁵; agus ri stuaim, foighidin; agus ri foighidin, diadhachd;

7 Agus ri diadhachd, gràdh bràthaireil; agus ri gràdh bràthaireil, seirce⁶.

8 Oir ma bhios na nithe so annaibh, agus pailte, bheir iad oirbh gun bhi leasg, no mi-thorrach ann an eòlas ar Tighearna, Iosa Crìosd.

9 Ach an tì aig nach 'eil na nithe sin, tha e dall, agus gearr-sheallach, a' dìchuimhneachadh gu'n do ghlanadh e o a sheann pheacaibh.

10 Uime sin, a bhràithre, deanaibh tuilleadh dìchill chum bhur gairm agus bhur taghadh a dheanamh cinnteach: oir ma ni sibh na nithe so, cha tuit sibh a chaoidh:

11 Oir mar sin frithealar gu pailt dhuibh slighe a steach do rìoghachd shiorruidh ar Tighearna agus ar Slànuighir Iosa Crìosd.

12 Uime sin cha dearmad mi na nithe so ghnàth-chur an cuimhne dhuibh, ged is aithne dhuibh iad, agus ged tha sibh air bhur daingneachadh san fhìrinn a làthair.

13 Ach tha mi a' meas gur còir, am feadh a ta mi sa' phàilliuin⁷ so, sibhse a bhrosnuchadh le 'ur cur an cuimhne:

14 Air dhomh fios a bhi agam gur fagus dhomh àm cur dhiom mo phàilliuin so, amhuil a dh'fhoillsich ar Tighearna Iosa Crìosd dhomh.

15 Ach ni mise dìchioll, chum an déigh dhomh siubhal, gu'm bi agaibh-sa gnàth-chuimhne air na nithibh so.

¹ fìreantachd Dé agus ar Slànuighir.

² subhaile, cruadail.

³ chum na crìche so.

⁴ cruadal.

⁶ gràdh, carthanachd.

⁵ measarrachd.

⁷ phòthan.

II. PEADAR, I. II.

16 Oir cha do lean sinne faoin-sgeul-achda a dhealbhadh gu h-innleachdach, 'nuair a chuir sinn an céill duibh cunh-achd agus teachd ar Tighearn Iosa Críost, ach rinneadh sinn 'nar suil-fhianuisibh air a mhòrachd-san.

17 Oir fhuair e o Dhia an t-Athair urram agus glòir, 'nuair a thàinig a' shamhuil so do ghuth d'a ionnsuidh o'n ghlòir òir-dheirc¹, Is e so mo Mhac gràdhach-sa, anns am bheil mo mhòr-thlachd².

18 Agus chuala sinne an guth so a thàinig o nèamh, 'nuair a bha sinn maille ris air an t-slabh naomh.

19 Tha againn mar an ceudna focal fàidheadaireachd a's cinntiche; d'am maith a nì sibh aire a thoirt, mar do lèch-ran a tha toirt soluis uaidh ann an ionad dorchda, gus an soillsich an là, agus an éirich an reult-mhaidne 'nur cridheachaibh:

20 Air dhuibh fhios so a bhi agaibh air tùs, nach 'eil fàidheadaireachd air bith do'n sgrìobtuir o thogradh dhaoine féin.

21 Oir cha d'thàinig an fhàidheadaireachd a réir toil duine o shean: ach labh air daoine naomha Dhé, mar a sheòladh iad leis an Spiorad naomh.

CAIB. II.

1 *Roimh-innis Peadar mu thimchioll luchd-teagaisg bréige, a nochdadh am mi-dhiadhachd, agus an sgrios a thig araon orra féin agus air an luchd-leamhuinn, 7 o'n saorair daoine diadhaidh, mar a shaoradh Lot á Sodom, &c.*

ACH bha fàidhean bréige mar an ceudna am measg an t-sluaigh, amhuil a bhios luchd-teagaisg bréige 'nur measg-sa, dream a bheir a steach an uaighidheas saobh-chreidimh³ milteach, eadhon ag àicheadh an Tighearn a cheannaich iad, agus a bheir sgrios obann orra féin.

2 Agus leanaidh mòran an slighean millteach tre am faigh slighe na fìrinn m-chliù.

3 Agus tre shannt nì iad ceannachd oirbh le briathraibh mealltach: dream nach 'eil am breitheanas a nis o chian a' deanamh moille, agus cha'n 'eil an sgrios a' turr-chodall⁴.

4 Oir mur do chaomhain Dia na h-aingil a pheacaich, ach air dha an tilgeadh sìos do ifrinn, gu'n d'thug e thairis iad gu bhi air an coimhead ann an slabhraidhibh dorchadais, fa chomhair breitheanais;

5 Agus nach do chaomhain e an seann saoghal, ach gu'n do shaor e Noah an t-ochdamh pearsa, searmonaiche fireant-achd, air dha an dile⁵ a thoirt air saoghal nan daoine mi-dhiadhaidh;

6 Agus a' tionndadh caitriche Shodoim agus Ghomorah gu luathre⁶, gu'n do dhìt e le léir-sgrios iad, gan deanamh 'nam ball-sampull⁷ dhoibh-san, a bhiodh mi-dhiadhaidh an déigh sin;

7 Agus gu'n do shaor e Lot am firean, a bha fo champar⁸ le caithe-beatha neo-ghloin nan aingidh:

8 (Oir chràidh an t-ionracan sin, agus e gabhail còmhnuidh 'nam measg, 'anam fireanta o là ga là, le bhi faicinn agus a' cluinntinn an gnìomharan an-dligheach:)

9 Is aithne do'n Tighearn na daoine diadhaidh a shaoradh o bhuaireadh, agus na daoine eucorach a choimhead gu là a' bhreitheanais chum peanas a dheanamh orra:

10 Ach gu h-àraidh iadsan a leanas an fheòil ann an ana-miann na neo-ghloine, agus a nì tàir air uachdaranachd: Air dhoibh bhi an-dàna, féin-thoileil, cha'n eagal leo ana-cainnt a thoirt dhoibh-san⁹ a tha ann an àirde-inbhe:

11 An uair nach toir aingil a's mò ann an neart agus ann an cumhachd, casaid thobheumach 'nan aghaidh¹⁰ am fianuis an Tighearn.

12 Ach iadsan, mar aimhidhean nàdurra eu-céillidh, a rinneadh gu bhi air an glacadh an sgrios, air dhoibh bhi labhairt gu toibheumach mu na nithibh nach tuig iad, sgriosar iad 'nam truaillidheachd féin;

13 Agus gheibh iad tuarasdal na h-euceirt, mar dhream a mheasas mar shubh-achas sògh¹¹ san là: is smala iad agus aobhar-maslaidh¹², a' gabhail toileachas-inntinn 'nam mealltaireachd féin, am feadh a ta iad air cuirmibh¹³ maille ribh;

14 Aig am bheil an sùilean làn do adhaltrannas, agus do nach 'eil e'n comas sgar do pheacadh; a' mealladh anama neo-shuidhichte; aig am bheil an cridhe air a chleachdadh ri gnìomharaibh sanntach; clann nam mallachd:

15 A thréig an t-slighe dhìreach, agus a chaidh air seacharan, a' leantuin slighe Bhaalaim mhic Bhosoir¹⁴, a ghràdhaich duais na h-eucorach;

16 Ach a fhuair achmhasan air son 'aingidheachd: oir labhair an asal bhalbh le cainnt duine, agus thoirmisg i mi-chiall an fhàidh.

17 Is tobair gun uisge iad so, neoil air an iomain le iom-ghaoith; fa chomhair am bheil duibhre¹⁵ an dorchadais air a thasgaidh gu sìorruidh.

18 Oir an uair a labhras iad briathran atmhor¹⁶ dìomhanais, meallaidh iad tre ana-miannaibh na feòla, tre mhacnus¹⁷,

¹ àrd-urramaich.

² le'm bheil mi làn-toilichte.

³ dò-bharailean.

⁴ clò-chodal. ⁵ dìlinn, tuil.

⁶ tuath.

⁷ 'nam 'samhlachas.

⁸ air a shàrachadh.

⁹ olc a labhairt umpa-san.

¹⁰ breth-mhaslach an aghaidh a chèile.

¹¹ deadh-ghleus, deadh-theachd-an-tìr.

¹² ainmha, sal.

¹³ fèisdibh.

¹⁴ Bheoir.

¹⁵ cèd.

¹⁶ uaidhreach.

¹⁷ thrutseileachd.

II. PEADAR, II. III.

iadsan a chaidh gu glan¹ as uatha-san a tha caitheadh am beatha ann an seacharan:

19 A' gealltuinn saorsa dhoibh, agus gun annta féin ach tràilleann na truailidh-eachd: oir ge b'e ni le 'm buadhaichear air duine, do'n ni sin féin tha e air a chur fo dhaorsa.

20 Oir an déigh dhoibh dol as o shalch-araibh an t-saoghail, tre eòlas an Tighearn agus an t-Slànuighir Iosa Crìosd, ma bhios iad a ris air an ribeadh annta, agus air an cur fo ghéill, tha an deireadh aca nì's miosa na an toiseach.

21 Oir b'fhearr dhoibh gun eòlas a bhi aca air slighe na fireantachd, na, an déigh a h-eòlas fhaotainn, pilleadh o'n àithne naomh a thugadh dhoibh.

22 Ach thachair dhoibh a réir an t-sean-fhocail fhìrinnich, Phill am madadh air ais chum a sgeith féin; agus, A' mhuc a chaidh nigheadh, chum a h-aoirneagan² san làthaich³.

CAIB. III.

1 *Thug Peadar cinnte do luchd-aidmheil na creidimh mu theachd Chrìosd chum breitheanais, an aghaidh luchd-fanoid; 8 thug e rabhadh do dhaoine mì-dhiadhaidh o fhad-fhoighidìn Dé, iad a ghreasadh an aithreachais: 12 chuir e mar an ceudna an cèill am modh air an sgriosar an saoghal so.*

AN dara litir so, a mhuinntir mo ghràidh, tha mi a' sgrìobhadh do 'ur n-ionnsuidh⁴ a nis; annta le *chéile* tha mi⁵ a' brosnachadh bhuir n-imtinn fhìorghloin le 'ur cur an cuimhne:

2 Chum gu'm bi sibh cuimhneachail air na briathraibh a labhradh roimh leis na fàidhich naomha, agus air ar n-àithne-ne, abstola an Tighearn agus an t-Slànuighir:

3 Air dhuibh fhios so bhi agaibh air tùs, gu'n tig anns na làithibh deireannach luchd-fochaid⁶, ag imeachd a réir an anamian féin.

4 Agus ag ràdh, C'àit am bheil gealladh a theachd? oir o choidil na h-aithriche, tha na h-uile nithe a' fantuinn mar a bha iad o thoiseach a' chruthachaidh.

5 Oir tha iad aineolach air so da'n deoin, gu'n robh na nèamha ann o chian, agus an talamh 'na sheasamh as an uisge, agus anns an uisge, tre fhocal Dé:

6 Tre'n deachaidh an saoghal a bha'n sin ann a sgrios, air teachd do'n dlìnigh air.

7 Ach tha na nèamha agus an talamh a tha nis ann, leis an fhocal sin féin air an tasgadh suas, agus air an gleidheadh fa

chomhair teine air cheann là a' bhreitheanais, agus sgrios dhaoine ain-diadhaidh.

8 Ach, a mhuinntir mo ghràidh, na bithibh-sa aineolach air an aon nì so, Gu bheil aon là aig an Tighearn mar mhìle bliadhna, agus mìle bliadhna mar aon là.

9 Cha'n 'eil an Tighearn mall a thaobh a gheallaidh, (mar a mheasas dream àraidh moille,) ach tha e fad-fhulangach do ar taobh-ne, gun toil aige dream sam bith a bhi cailte, ach na h-uile *dhaoine* theachd gu h-aithreachas.

10 Ach thig là an Tighearn a marghad-ùiche san oidhche; anns an téid na nèamha thairis le toirm mhòir, agus *anns* an leaghl na dùile le dian-theas; agus bithidh an talamh mar an ceudna, agus na h-oibre a ta air, air an losgadh suas.

11 Uime sin do bhrìgh gu'm bi na nithe so uile air an sgaoileadh as a chéile, ciod a' ghnè dhaoine bu chòir a bhi annaibh, ann an caithe-beatha naomh, agus diadhaidh,

12 Le sùil a bhi agaibh ris, agus luathachadh⁷ chum teachd là Dhé, anns am bi na nèamla, air dhoibh bhi re theine, air an sgaoileadh o chéile, agus anns an leaghar na dùile le dian-theas?

13 Gidheadh tha dùil againne ri nèamhaibh nuadha agus talamh nuadhl, a réir a gheallaidh, anns an còmhnuich fireantachd.

14 Uime sin, a mhuinntir ionmhuinn, o tha dùil agaibh ris na nithibh sin, dean-aibh bhuir dìchioll chum gu faighear leis-san ann an sìth sibh, gun smal agus neo-lochdach:

15 Agus measaibh gur slàinte fad-fhulangas ar Tighearn; amhuil a sgrìobh ar bràthair gràdhach Pòl mar an ceudna do 'ur n-ionnsuidh, a réir a' ghliocais a thugadh dha;

16 Amhuil mar 'na litrichibh uile, a' labhairt annta mu na nithibh so: anns am bheil cuid do nithibh do-thuigsinn, a tha an dream a tha neo-fhòghlumta, agus neo-sheasmhach a' fiaradh, amhuil mar na sgrìobtuirean eile, chum an sgrios féin.

17 Ach sibhse, a mhuinntir mo ghràidh, o's aithne dhuibh na *nithe* so roimh-làimh, thugaibh aire air eagal air dluibh-se mar an ceudna bhi air bhuir tarruing air falbh le seacharan nan daoine ain-diadhaidh, gu'n tuit sibh o bhuir seasmhachd féin.

18 Ach fàsaibh ann an gràs, agus *ann* an eòlas ar Tighearn agus ar Slànuighir Iosa Crìosd. Dhasan gu robh glòir a nis agus gu sìorruidh⁸. Amen.

¹ car tamuill bhig. ² a h-aonairt, a h-cabradh.

³ sa' chlàbar. ⁴ sgrìobham chugaibh.

⁵ anns am bheil mi.

⁶ fanoid, sgeige.

⁷ gresadh, cabhag a dheanamh.

⁸ gu là na sìorruidheachd.

E O I N.

CAIB. I.

1 *Labhair Eoin mu phearsa Chrìosd, anns am bheil againn beatha mhaireannach, thaobh comh-chomuinn ri Dia; 5 ris an éigin duinn naomhachd beatha a chur, a dhearbhadh fìrinn a' chomh-chomuinn sin, chum gu'm faigheamaid cinnte air maithneas tre bhàs Chrìosd.*

AN ni a bha ann o thùs, an ni a chuala sinne, a chunnaic sinn le ar sùilibh, air an d'amhaire sinn, agus a làimhsich ar làmbha thaobh focail na beatha;

2 (Oir dh'fhoillsicheadh a' bheatha, agus chunnaic sinne i, agus tha sinn a' deanamh fianuis, agus a' cur an cèill dhuibh-se na beatha maireannaich ud a bha maille ris an Athair, agus a dh'fhoillsicheadh dhuinne:)

3 An ni a chunnaic agus a chuala sinn, tha sinn a' cur an cèill duibh-se, chum gu'm bi agaibh-sa mar an ceudna comunn ruinne: agus gu fìrinneach tha ar comunn-ne ris an Athair, agus r'a Mhac Iosa Chrìosd.

4 Agus tha sinn a' sgrìobhadh nan nithe so do 'ur n-ionnsuidh, chum gu'm bi bhur gairdeachas coimhlionta.

5 Agus is i so an teachdaireachd a chuala sinn uaith-san, agus a tha sinn a' cur an cèill dhuibh-se, Gur solus Dia, agus nach 'eil dorchadas air bith annsan.

6 Ma their sinn gu bheil comunn againn ris¹, agus sinn a' gluasad ann an dorchadas, tha sinn a' deanamh bréige, agus clta'n 'eil sinn a' deanamh na fìrinn:

7 Ach ma ghluaiseas sinn anns an t-solus, mar a tha esan san t-solus, tha comunn againn r'a chèile, agus glanaidh fuil Iosa Chrìosd a Mhic sinn o gach uile pheacadh.

8 Ma their sinn nach 'eil peacadh againn, tha sinn 'gar mealladh féin, agus cha'n 'eil an fhìrinn annainn.

9 Ma dh'aicheadas sinn ar peacanna, tha esan fìrinneach agus ceart, chum ar peacanna a mhaithheadh dhuinn, agus ar glanadh o gach uile neo-fhìreantachd.

10 Ma their sinn nach do pheacaich sinn, tha sinn a' deanamh breugaire dheth-san, agus cha'n 'eil 'fhocal annainn.

CAIB. II.

1 *Thug Eoin comhfhurtachd do luchd-aidmheil na creidimh an aghaidh peacaidh annhuinneachd.*

3 *'Se fìor-colas Dé 'aithcantan a choimhead, 9 ar bràithrean a ghràdhachadh, 15 agus gun ghaol a thoirt do'n t-saoghal.*

MO chlann bheag, na nithe so tha mi a' sgrìobhadh do 'ur n-ionnsuidh, chum nach peacaich sibh. Agus ma pheacaicheas neach air bith, tha fear-tagraidh againn maille ris an Athair, Iosa Chrìosd am fìrean:

2 Agus is esan an ìobairt-réitich air son ar peacanna agus cha'n e air son ar peacanna a mhàin, ach mar an ceudna air son peacanna an t-saoghail uile.

3 Agus le so tha fhios againn gur aithne dhuinn e, ma choimhideas sinn 'aithcantan.

4 An ti a their, Is aithne dhomh e, agus nach 'eil a' coimhead 'aithcantan, is breugaire e, agus cha'n 'eil an fhìrinn ann.

5 Ach ge b'e choimhideas 'fhocal, annsan gu deimhin tha gràdh Dhé air a choimhlionadh: le so is aithne dhuinn gu bheil sinn ann-san.

6 An ti a their gu bheil e fantuim annsan, is còir dha-san mar an ceudna gluasad, eadhon mar a ghluais esan.

7 A bhràithre, cha'n 'eil mi a' sgrìobhadh aithne nuadh do 'ur n-ionnsuidh, ach seann aithne, a bha agaibh o'n toiseach: is i an t-seann aithne am focal a chuala sibh o thùs.

8 A ris tha mi a' sgrìobhadh aithne nuaidh do 'ur n-ionnsuidh, ni a ta fìor ann-san agus annaibh-sa: do bhrìgh gu'n d'imich an dorchadas thairis, agus gu bheil a nis an solus fìor a' dealrachadh.

9 An ti a their gu bheil e san t-solus, agus a tha fuathachadh a bhràthar, tha e san dorchadas gu a nis.

10 An ti aig am bheil gràdh d'a bhràthair, tha e 'na chòmhuidh san t-solus, agus cha'n 'eil aobhar oilbheim air bith ann.

11 Ach an ti a ta fuathachadh a bhràthar, tha e anns an dorchadas, agus ag imeachd anns an dorchadas, agus cha'n aithne dha c'àit am bheil e dol, do bhrìgh gu'n do dhall an dorchadas a shùilean.

12 Tha mi a' sgrìobhadh do 'ur n-ionnsuidh, a chlann bheag, do bhrìgh gu bheil bhur peacanna, air an maithheadh dhuibh air sgàth 'ainme-san.

13 Tha mi a' sgrìobhadh do 'ur n-ionnsuidh, aithriche, do bhrìgh gu'm b' aithne dhuibh esan a ta o thùs. Tha mi a' sgrìobhadh do 'ur n-ionnsuidh, òganacha, do bhrìgh gu'n d'thug sibh buaidh air an droch aon. Tha mi a' sgrìobhadh do 'ur

¹ caidreabh againn ris.

n-ionnsuidh, a chlamh bheag, do bhrìgh gu'm b'àithne dhuibh an t-Athair.

14 Sgrìobh mi do 'ur n-ionnsuidh, aithriche, do bhrìgh gu'm b'àithne dhuibh an ti a ta ann o thùs. Sgrìobh mi do 'ur n-ionnsuidh, òganacha, do bhrìgh gu bheil sibh làidir, agus gu bheil focal Dhé 'na chòmhnuidh annaibh, agus gu'n d'thug sibh buaidh air an droch aon.

15 Na gràdhachibh an saoghal, no na nithe a ta san t-saoghal. Ma ghràdhachas neach air bith an saoghal, cha 'n 'eil gràdh an Athar ann.

16 Oir na h-uile a ta anns an t-saoghal, ana-miann na fèla, agus ana-miann nan sùl, agus uabhar na beatha, cha'n ann o'n Athair a tha iad, ach o'n t-saoghal.

17 Agus siubhlaidh an saoghal seachad, agus 'ana-miann: ach an ti a ni toil Dé, mairidh e chaoidh.

18 A chlamh bheag, is i an aimsir dheireannach a tha ann: agus mar a chuala sibh gu'n tig an t-ana-criosd, is ann mar sin a ta nis iomadh ana-criosd ann; o'm bheil sinn a' tuigsinn gur i 'n aimsir dheireannach a ta ann.

19 Chaidh iad a mach uainne, ach cha robh iad dhinn: oir nam biodh iad dhinn, gu deimhin dh'fhanadh iad maille ruinn: ach chaidh iad a mach, chum gu deantadh follaiseach iad, nach robh iad uile dhinn.

20 Ach tha agaibh-sa ungadh o'n ti naomh, agus is aithne dhuibh na h-uile nithe.

21 Cha do sgrìobh mi do 'ur n-ionnsuidh, do bhrìgh nach aithne dhuibh an fhìrinn; ach do bhrìgh gur aithne dhuibh i, agus nach 'eil breug air bith o'n fhìrinn.

22 Cò a tha 'na bhreugaire, ach esan a dh'àicheadhas gur e Iosa an Criosd? Is e so an t-ana-criosd, a tha 'g àicheadh an Athar agus a' Mhic.

23 Ge b'e neach a dh'àicheadhas am Mac, cha 'n 'eil an t-Athair aige: [ach an ti a dh'àicheadhas am Mac, tha an t-Athair aige mar an ceudna.]

24 Uime sin fanadh an ni sin annaibh-sa a chuala sibh o thùs. Ma dh'fhanas an ni a chuala sibh o thùs annaibh, fanaidh sibhse mar an ceudna anns a' Mhac, agus anns an Athair.

25 Agus is e so an gealladh a gheall e dhuinn, eadhon a' bheatha mhaireannach.

26 Sgrìobh mi na nithe so do 'ur n-ionnsuidh, mu thimchioll na dream a tha 'gur mealladh.

27 Ach tha an t-ungadh a fhuair sibh uaith-san, a' fantuinn annaibh: agus cha 'n 'eil feum agaibh gu'n teagaisgeadh aon neach sibh: Ach, mar a ta an t-ungadh so fèin 'gur teagasg mu thimchioll nan uile nithe, agus a ta e fìor, agus nach breug e, eadhon mar a theagaisg e sibh, fanaibh ann.

28 Agus a nis, a chlamh bheag, fanaibh ann-san; chum 'nuair a dh'fhoillsichear e, gu'm bi dànachd againn, agus nach bi nàire oirnn 'na làthair aig a theachd.

29 Ma tha fhios agaibh gu bheil esan fireanta, tha fhios agaibh gu bheil gach neach a ni fireantachd, air a bhreith 'uaith-san.

CAIB. III.

3 Chuir an t-abstol an céill gràdh iongantach Dhé dhuinne, le sinn a dheanamh 'nar cloinn dha fèin: 3 is còir dhuinn uime sin 'àitheantan a choimhead le h-urram, 11 agus mar an ceudna gràdh bràthaireil a bh' againn d'a chéile.

FEUCHAIBH, ciod a' ghnè ghràidh a thug an t-Athair dhuinne, gu'n goirt-eadh clann Dé dhinn! uime sin cha'n aithne do'n t-saoghal sinn, do bhrìgh nach b'aithne dha esan.

2 A mhuinntir mo ghràidh, a nis is sinne mic Dhé; agus cha 'n 'eil e soilleir fathast ciod a bhitheas sinn: ach a ta fhios againn, 'nuair a dh'fhoillsichear esan, gu'm bi sinn cosmhuil ris; oir chi sinn e mar a ta e.

3 Agus gach neach aig am bheil an dòchas so ann, glanaidh se e fèin, mar a ta esan glan.

4 Ge b'e neach a ni peacadh, tha e mar an ceudna a' briseadh an lagha: oir is e am peacadh briseadh an lagha.

5 Agus tha fhios agaibh gu'n d'fhoillsicheadh esan chum ar peacanna thoirt air falbh; agus cha'n 'eil peacadh sam bith ann-san.

6 Gach neach a dh'fhanas ann-san, cha dean e peacadh: ge b'e air bith a pheac-aicheas, cha'n fhac e esan, agus cha robh eòlas aige air.

7 A chlamh bheag, na mealladh neach air bith sibh: an ti a ni fireantachd is firean e, mar is firean esan:

8 An ti a ni peacadh, is ann o'n diabhul a ta e: oir tha an diabhul a' peacachadh o thùs. Is ann chum na criche so a dh'fhoillsicheadh Mac Dhé, chum gu'n sgriosadh e oibre an diabhul.

9 Ge b'e neach a ghineadh o Dhia, cha dean e peacadh: oir a ta a shìol-san a' fantuinn ann; agus cha'n 'eil e'n comas da peacadh a dheanamh, do bhrìgh gu'n do ghineadh o Dhia e.

10 An so tha clann Dhé, agus clann an diabhul follaiseach: Ge b'e neach nach dean fireantachd, cha'n ann o Dhia a tha e, no an ti nach gràdhaich a bhràthair.

11 Oir is i so an teachdaireachd a chuala sibh o thus, sinn a thoirt gràidh d'a chéile:

12 Cha'n ann mar Chain, a bha o'n droch aon, agus a mharbha a bhràthair: Agus c'ar son a mharbh se e? A chionn

gu'n robh 'oibre féin olc, agus oibre a bhràthar fireanta.

13 Na biodh ioghnadh oirbh, mo bhràithre, ged dh'fhuathaicheas an saoghal sibh.

14 Tha fhios againn gu'n deachaidh sinn thairis o bhàs gu beatha, do bhrìgh gu bheil gràdh againn do na bràithribh: an ti nach gràdhaich a bhràthair, fànaidh e ann am bàs.

15 Gach neach a dh'fhuathaicheas a bhràthair, is mortair¹ e; agus tha fhios agaibh nach 'eil aig mortair sam bith a' bheatha mhaireannach a' fantuinn ann.

16 Le so is aithne dhuinn gràdh Dhé, do bhrìgh gu'n do chuir esan sìos 'anam féin air ar son-ne: agus is còir dhuinne ar n-anama féin a chur sìos air son nam bràithre.

17 Agus ge b'e neach aig am bheil maoin an t-saoghail so, agus a chi a bhràthair ann an uireasbhuidh, agus a dhruideas a chridhe 'na aghaidh, cionnus a tha gràdh Dhé a' gabhail còmhnuidh ann-san?

18 Mo chlann bheag, na gràdhaicheamaid ann am focal, no ann an teangaidh; ach ann an gnìomh agus ann am fìrinn.

19 Agus le so is aithne dhuinn gu bheil sinn do'n fhìrinn, agus bheir sinn dearbhbheachd² do ar cridheachaibh 'na làthair.

20 Oir ma dhiteas ar cridhe sinn, is mò Dia na ar cridhe, agus is aithne dha na h-uile nithe.

21 A mhuinntir mo ghràidh, mur dìt ar cridhe sinn, tha dànachd againn a thaobh Dhé.

22 Agus ge b'e ni a dh'iarras sinn, gheibh sinn uaith e, do bhrìgh gu bheil sinn a' coimhead 'àitheantan, agus a' deanamh nan nithe a tha taitneach 'na fhianuis-san.

23 Agus is i so 'àithne-san, gun creideamaid ann an ainm a Mhic Iosa Crìosd, agus gu'n gràdhaicheamaid a chéile, mar a thug esan 'àithne dhuinn.

24 Agus an ti a choimhèdeas 'àitheantan-san, tha e gabhail còmhnuidh ann, agus esan ann-san: agus le so is aithne dhuinn gu bheil esan a' fuireach annainn, o'n Spiorad a thug e dhuinn.

CAIB. IV.

1 Thug an t-abstol rabhadh dhoibh gun iad a chreidsinn gach uile luchd-teagaisg a nì bàsd as an Spiorad, ach an dearbhadh le riaghailtibh a' chreidimh choitcheinn: 7 bhrosnuich e iad le h-ionadh reuson gu gràdh bràithaireil.

AMHUIINTIR ionmhuinn, na creidibh na gach uile spiorad, ach dearbhaibh na spioradan, an ann o Dhia a tha iad: do bhrìgh gu bheil mòran do fhàidhibh

briège air dol a mach do'n t-saoghal.

2 Le so aithnichibh Spiorad Dhé: gach uile spiorad a dh'aidicheas gu'n d'fhàinig Iosa Crìosd san fheòil, is ann o Dhia a tha e.

3 Agus gach uile spiorad nach aidich gu bheil Iosa Crìosd air teachd san fheòil, cha'n ann o Dhia a tha e: agus is e so spiorad sin an ana-crìosd, neach a chuala sibh e bhi teachd, agus a nis tha e cheana anns an t-saoghal.

4 A chlann bheag, tha sibh-se o Dhia, agus thug sibh buaidh orra-san; do bhrìgh gur mò esan a ta annaibh-sa, na esan a ta anns an t-saoghal.

5 Tha iadsan o'n t-saoghal: uime sin tha iad a' labhairt mu'n t-saoghal, agus tha'n saoghal ag éisdeachd riu.

6 Tha sinne o Dhia: an ti aig am bheil eòlas air Dia, éisdidh e ruinne; an ti nach 'eil o Dhia, cha'n éisd e ruinn. O so aithnichidh sinn spiorad na fìrinn, agus spiorad an t-seacharain.

7 A mhuinntir ionmhuinn, gràdhaicheamaid a chéile: oir is ann o Dhia tha'n gràdh; agus gach neach a ghràdhaicheas, ghineadh o Dhia e, agus is aithne dha Dia.

8 An ti nach gràdhaich, cha'n aithne dha Dia; oir is gràdh Dia.

9 An so dh'fhoillsicheadh gràdh Dhé dhuinne, do bhrìgh gu'n do chuir Dia aon-glin Mhic do'n t-saoghal, chum gu'm bitheamaid beò trid-san.

10 An so a ta gràdh, cha'n e gu'n do ghràdhaich sinne Dia, ach gu'n do ghràdhaich esan sinne, agus gu'n do chuir e a Mhac féin gu bhi 'na iobairt-réitich air son ar peacanna.

11 A mhuinntir ionmhuinn, ma ghràdhaich Dia sinne mar sin, tha e mar fhiach-aibh oirne a chéile a ghràdhachadh mar an ceudna.

12 Cha'n fhaca neach air bith Dia riannh. Ma ghràdhaicheas sinn a chéile, tha Dia 'na còmhnuidh annainn, agus tha a ghràdh air a choimhlionadh annainn.

13 O so is aithne dhuinn gu bheil sinne 'nar còmhnuidh ann-san, agus esan annainne, do bhrìgh gu'n d'thug e dhuinn d'a Spiorad.

14 Agus chunnaic sinn agus tha sinn a' deanamh fianuis, gu'n do chuir an t-Athair am Mac uaith mar Shlànuighear an domhain.

15 Ge b'e neach a dh'aidicheas gur e Iosa Mac Dhé, tha Dia 'na còmhnuidh ann-san, agus esan ann an Dia.

16 Agus fhuair sinn aithne air agus chreid sinn an gràdh a tha aig Dia dhuinn. Is gràdh Dia; agus an ti a tha fantuinn

¹ duin'-mharbhaiche.

² cinnteachd.

ann an gràdh, tha e 'na chòmhnuidh ann an Dia, agus Dia ann-san.

17 An so tha ar gràdh-ne air a dheanamh coimhlionta, chum gu'm bi againn dànachd ann an là a' bhreitheanais: do bhrìgh mar a tha esan, gur amhuil sin a tha sinne anns an t-saoghal so.

18 Cha'n 'eil eagal ann an gràdh; ach tilgidh gràdh dìongmhalta¹ an t-eagal a mach; do bhrìgh gu bheil pian san eagal: an ti a tha eagalach, cha d'rinneadh coimhlionta ann an gràdh e.

19 Tha gràdh againne dhasan, do bhrìgh gu'n do ghràdhaich esan sinne an toiseach.

20 Ma their neach, Tha gràdh agam do Dhia, agus fuath aige d'a bhràthair, is breugaire e: oir an ti nach gràdhaich a bhràthair a chunnaic e, cionnus a dh'fheudas e Dia nach fac e a ghràdhachadh?

21 Agus an àithne so tha againn uaith-san, An ti a ghràdhaicheas Dia, gu'n gràdhaich e a bhràthair mar an ceudna.

CAIB. V.

1 *An ti leis an ionmhuinn Dia, is ionmhuinn leis a chlan, agus coimhididh e 'àitheantan, a ta eutrom, so-choimhead do na creidich. 9 'Se Iosa Mac Dhé; agus tha e comasach air sinne a thearnadh, 14 agus air ar n-urnuighean, a ni sinn air ar son féin, agus air son muinntir eile, a fhreagairt.*

GE b'e neach a chreideas gur e Iosa an Crìosd, ghineadh o Dhia e; agus ge b'e ghràdhaicheas an ti a ghlin, gràdhaichidh e mar an ceudna an ti a ghineadh leis.

2 O so is aithne dhuinn gu bheil gràdh againn do chloinn Dé, 'nuair a ghràdhaicheas sinn Dia, agus a choimhideas sinn 'àitheantan.

3 Oir is e so gràdh Dhé, siun a choimhead 'àitheantan: agus cha 'n 'eil 'àitheanta-san trom².

4 Oir gach uile ni a ghinear o Dhia, bheir e buaidh air an t-saoghal: agus is i so a' bhuidh a bhuadhaicheas air an t-saoghal, eadhon ar creidimh-ne.

5 Cò an ti a bhuadhaicheas air an t-saoghal, ach esan a tha creidsinn gur e Iosa Mac Dhé.

6 Is e so esan a thàinig tre uisge agus tre fhuil, Iosa Crìosd; cha'n e tre uisge a mhàin, ach tre uisge agus fuil: agus is e an Spiorad a ni fianuis, do bhrìgh gur fìrinn an Spiorad.

7 Oir tha triuir a tha deanamh fianuis air nèamh, an t-Athair, am Focal, agus an

Spiorad naomh: agus an triuir sin is aon iad.

8 Agus tha triuir a tha deanamh fianuis air an talamh, an Spiorad, agus an t-uisge, agus an fhuil: agus thig an triuir sin r'a chèile ann an aon.

9 Ma ghabhas sinn ri fianuis dhaoine, 'si fianuis Dé a's mò: oir is i so fianuis Dé, a thug e mu thimchioll a Mhic.

10 An ti a chreideas ann am Mac Dhé, tha'n fhianuis aige ann féin: an ti nach creid Dia, rinn e breugaire dheth, do bhrìgh nach do chreid e an fhianuis a rinn Dia mu thimchioll a Mhic.

11 Agus is i so an fhianuis, gu'n d'thug Dia dhuinn beatha mhaireannach: agus tha a' bheatha so 'na Mhac.

12 An ti aig am bheil am Mac, tha beatha aige: an ti aig nach 'eil Mac Dhé, cha'n 'eil beatha aige.

13 Na nithe so sgriobh mi do 'ur n-ionnsuidh, a tha creidsinn ann an ainm Mhic Dhé; chum gu'm bi fios agaibh gu bheil a' bheatha mhaireannach agaibh, agus chum gu'n creid sibh ann an ainm Mhic Dhé.

14 Agus is e so an dòchas a ta againn ann-san, ma dh'iarras sinn ni sam bith a réir a thoile, gu'n éisd e ruinn.

15 Agus ma ta fhios againn gu'n éisd e ruinn, ge b'e ni a dh'iarras sinn, tha fhios againn gu bheil ar n-iarrtuis a dh'iarr sinn air againn.

16 Ma chi neach sam bith a bhràthair a' peacachadh peacaidh nach 'eil a chum bàis, iarraidh e, agus bheir e beatha dha, dhoibh-san nach 'eil a' peacachadh chum bàis. Tha peacadh chum bàis ann: a thaobh sin, cha'n 'eil mi ag ràdh³ gur còir dha guidheadh.

17 Is peacadh gach uile eucoir: agus tha peacadh ann nach 'eil a chum bàis.

18 Tha fhios againn ge b'e neach a ghineadh le Dia, nach peacaich e; ach an ti a ghineadh o Dhia, coimhididh se e féin, agus cha bhean an droch aon ris.

19 Tha fhios againn gur ann o Dhia a tha sinne, agus tha'n saoghal uile 'na luidhe san olc.

20 Agus tha fhios againn gu'n d'thàinig Mac Dhé, agus gu'n d'thug e tuigse dhuinn, chum gu'm b'aithne dhuinn esan a ta fìor: agus tha sinne ann-san a ta fìor, ann a Mhac Iosa Crìosd. Is e so an Dia fìor, agus a' bheatha mhaireannach.

21 A chlan bheag, coimhidibh sibh féin o ìodholaihb. Amen.

¹ iomlan, foirfe.

² do-dheanta.

³ ni'n abram.

DARA LITIR AN ABSTOIL

E O I N.

CAIB. I.

1 *Chomhairlich Eoin do mhnaoi dirdheire àraidh agus d'a cloinn buanachadh anns a' chreidimh agus ann an gràdh Crìosdaidh, 8 air eagal gu'n cailleadh iad duais na h-aidmheil a rinn iad roimh; 10 agus gun ghnòthuch a bhì aca ris na mealltairibh sin nach toir fìor-theagasg Iosa Crìosd leo d'an ionnsuidh.*

AN seanair chum na ban-tighearna taghta, agus chum a' cloinne, a's ionmhuinn leam-sa anns an fhìrinn; agus cha'n ann leam-sa mhàin, ach leo-san uile mar an ceudna a ghabh eòlas air an fhìrinn;

2 Air son na fìrinn a tha 'na còmhnuidh amain-ne, agus a bhios maille ruinn gu bràth:

3 Gràs, tròcair, agus sìth gu robh maille ribh o Dhia an t-Athair, agus o'n Tigh-earn Iosa Crìosd Mac an Athar, ann am fìrinn agus ann an gràdh.

4 Bha gàirdeachas mòr orm, do bhrìgh gu'n d'fhuair mi cuid do d' chloinn-sa ag imeachd anns an fhìrinn, a réir mar a fhuair sinne àithne o'n Athair.

5 Agus a nis guidheam ort, a bhan-tighearn, cha'n e mar gu'n sgrìobhainn àithne nuadh a d'ionnsuidh, ach an àithne a bha againn o thùs, gun gràdhaicheamaid a' chilele.

6 Agus is e so an gràdh, gu'n imich-

¹ sibh.

² anns an do shaothraich sinn, air son an do shaoth-

eamaid a réir 'àitheanta-san. 'S i so an àithne, mar a chuala sibh o thùs, gu'n imicheadh sibh innte.

7 Oir tha mòran mhealltairean air teachd a steach do'n t-saoghal, nach 'eil ag aid-eachadh gu bheil Crìosd air teachd san fheòil. Is mealltair so agus ana-crìosd.

8 Thugaibh aire dhuibh féin, nach caill sinn¹ na nithe sinn a shaothraich sinn², ach gu faigh sinn làn-duais.

9 Ge b'e neach a bhriseas an lagh, agus nach fàn ann an teagasg Crìosd, cha'n 'eil Dia aige: an ti a dh'fhanas ann an teagasg Crìosd, tha araon an t-Athair agus am Mac aige.

10 Ma thig neach air bith do 'ur n-ionnsuidh, agus nach toir e an teagasg so leis, na gabhaibh e steach do 'ur tigh, agus na abraibh ris, Gu ma subhach dhuit³.

11 Oir ge b'e neach a their ris, Gu ma subhach dhuit, tha comhpairt aige d'a dhroch oibribh.

12 Air dhomh mòran a bhi agam r'a sgrìobhadh do 'ur n-ionnsuidh, cha b' àill leam sgrìobhadh le paipeir agus dubh; ach tha dòchas agam teachd do 'ur n-ionnsuidh, agus labhairt beul ri beul, chum gu'm bi ar gàirdeachas coimhlionta.

13 Tha clann do pheathar taghta a' cur fàilte ort. Amen.

raich sinn, a bhuannaich sinn, a bhuannaich sibh.

³ Gu'n soirbhichear leat.

TREAS LITIR AN ABSTOIL

E O I N.

CAIB. I.

1 *Mhol an t-abstol Gaius air son a dhiadhachd, 5 agus 'aoidheachd do'n fhìor luchd-teagaisg; 9 agus air an làimh eile rinn e gearan air gnàthachadh mì-chàirdeil Dhìotrepheis uaibhrich; 11 dh'inns e nach còir 'eiseimpleir-san a leantuinn; 12 agus thug e teistean sonraichte do'n deadh iom-aradh a bha aig Demetrius.*

AN seanair chum Ghaiuis ghràdhaich, a's ionmhuinn leam san fhìrinn.

2 A bhràthar ghràdhaich, 'se mo ghuidheadh thaobh¹ gach uile ni gu'n soirbhicheadh leat agus gu'm biodh tu

slàn, mar a ta soirbheachadh le t' anam.

3 Oir rinn mi gàirdeachas gu mòr 'nuair a thàinig na bràithrean, agus a rinn iad fianuis do'n fhìrinn a tha annad-sa², mar a ta thusa ag imeachd san fhìrinn.

4 Cha 'n 'eil gàirdeachas agam a's mò na bhi cluinntinn gu bheil mo chlànn ag imeachd san fhìrinn.

5 A bhràthair ghràdhaich, is dìleas a ni thu gach ni a ta thu deanamh do na bràithribh, agus do choigrich;

6 Muinntir a rinn fianuis air do ghràdh an làthair na h-eaglais: ma bheir thu air

¹ roimh.

² do t'fhìrinn-sa.

IUDAIS, I.

an aghaidh iad 'nan slighe mar is cubh-aidh do Dhia, is maith a ni thu :

7 Oir chaidh iad a mach air sgàth 'ainme-san, gun ni air bith a ghabhail o na Cinn-ich.

8 Uime sin tha e mar fhiachaibh oirne gabhail r'an leithidibh sin, chum gu'm bitheamaid 'nar comh-shaothraichibh do'n fhìrinn.

9 Sgrìobh mi¹ chum na h-eaglais : ach cha ghabh Diotrefes, leis am miann àrd-cheannas a bhi aige 'nam measg, ruinne.

10 Uime sin ma thig mi, cuiridh mi an cuimhne² 'oibre a ta e deanamh, a' bith-labhairt 'nar n-aghaidh le briathraibh aingidh³ : agus cha leoir leis sin, ach ni mò a tha e fèin, a' gabhail ris na brath-raibh, agus tha e a' bacadh na dream leis

am b'àill, agus 'gan tilgeadh mach as an eaglais.

11 A bhràthair ghràdhaich, na lean an ni a ta olc, ach an ni a ta maith. An ti a ni maith, is ann o Dhia a ta e ; ach an ti a ni olc, cha'n fhac e Dia.

12 Tha deadh theistas air Demetrius o na h-uile, agus o'n fhìrinn fèin : agus tha sinne *mar an ceudna* a' deanamh fianuis ; agus tha fios agaibh gu bheil ar fianuis-ne fìor.

13 Bha mòran agam r'a sgrìobhadh, ach cha'n àill leam sgrìobhadh le dubh agus peann a d'ionnsuidh :

14 Ach tha dòchas agam t'fhaicim gun dàil, agus labhraidh sinn beul ri beul. Sìth maille riut. Tha na càirdean a' cur fàilte ort. Cuir fàilte air na càirdibh air an ainm.

¹ Sgrìobhainn.

² cuimhnichidh mi.

³ naimhdeil, mì-runach.

LITIR CHOITCHIONN AN ABSTOIL

I U D A I S.

CAIB. I.

1 Bhrosnuich an t-abstol luchd-aidmheil na creidimh gu bhi bunaitheach : 4 Tha luchd-teasgaig brèige air teachd a steach 'nam measg chum am mealladh ; agus tha peanas ro cagalach air ulluchadh fa chomhair na muinntir sin, air son an droch theagaisg agus an caithe-beatha mhi-naomha, &c.

IUDAS seirbhis each Iosa Criosd, agus I bràthair Sheumais, chum na dream a tha air an naomhachadh le Dia an t-Ath-air, agus air an coimhead le Iosa Criosd, air an gairm :

2 Gu robh tròcair, agus sìth, agus gràdh air am meudachadh dhuibh-sa.

3 A mhuinntir ionmhuinn, air dhomh an uile dhìchioll¹ a dheanamh chum sgrìobhadh do 'ur n-ionnsuidh mu thimchioll na slàinte choitchionn², b'fheumail domh sgrìobhadh do bhuir n-ionnsuidh, 'gur n-earalachadh³ sibh a chathachadh gu dìchiollach air son a' chreidimh a thugadh aon uair do na naoimh.

4 Oir ghoid⁴ daoine àraidh a steach, a dh'orduicheadh roimh⁵ o shean chum an ditidh so, daoine mi-dhiadhaidh, a' tionndadh gràis ar Dé-ne gu macnus, agus ag àicheadh Dhé, a's aon Ùachdaran ann, agus ar Tighearna Iosa Criosd.

5 Uime sin is àill leam bhuir cur an cuimhne, ged bha fhios agaibh aon uair⁶ air so, cionnus an dèigh do'n Tighearn am pobull a shaoradh à tìr na h-Eiphit, a

sgrios e an dèigh sin an dream nach do chreid.

6 Agus na h-aingil nach do ghléidh an ceud inbhe, ach a dh'fhàg an àite-còmh-nuidh fèin, choimhid e ann an geimhlibh sìorruidh fo dhorchadas, fa chomhair breitheanais an là mhòir.

7 Amhuil a ta Sodom agus Gomorah, agus na bailte mu'n cuairt orra, a thug iad fèin thairis do striopachas air a' mhìod cheudna, agus a bha leantuinn feòla coimh-ich, air an cur suas 'nam ball-sampuill⁷, a' fulang dìoghaltais teine shìorruidh.

8 Mar an ceudna fòs tha an luchd-bruad-air⁸ sin a' salachadh na feòla, a' deanamh tàir air uachdaranachd, agus a' labhairt gu toibheumach⁹ air àrd-inbhibh.

9 Gidheadh cha do ghabh Michael an t-àrd-ingeal, 'nuair a chathaich e an aghaidh an diabhail, agus a rinn e deas-boireachd mu chorp Mhaois, dānadas air casaid thoibheumach a thoirt 'na aghaidh, ach thubhairt e, Gu cronuicheadh an Tighearn thu.

10 Ach tha'n dream sin a' labhairt gu toibheumach air na nithibh¹⁰ nach aithne dhoibh : ach na nithe sin a's aithne dhoibh air mhòd nàdurra, mar ainmhidhibh gun reusan, tha iad 'gan truailleadh fèin annta.

11 Is an-aobhin doibh ! oir dh'imich iad ann an slighe Chain, agus ruith iad gu togarrach ann an seacharan Bhalaaim air

¹ chabhadh.

² a' cur ìmpidh oirbh.

³ a sgrìobhadh roimh.

⁴ chumanta.

⁵ dh'eulaigh.

⁶ roimh.

⁷ 'nan samhachas. ⁸ luchd-bruadair nedghlan.

⁹ gu tòir-chainnteach, maslach.

¹⁰ labhairt uile mu na nithibh.

ghaol tuarasdail, agus sgriosadh iad ann an ana-cainnt cheannaircich Chore.

12 Is smala iad sin ann bhur cuirmibh gràidh, 'nuair a tha iad air cuirmibh maille ribh, 'gam beathachadh féin gun eagal: is neòil iad gun uisge, air an giùlan mu' u cuairt le gaothaibh; craobhan searg-mheasach, gun toradh; dà uair marbh, air an spionadh as am freumhaibh;

13 Garbh-thonna¹ na fairge, a sgeitheas an nàire féin mar chobhar; reulta seachranach, d'am bheil duibhre an dorchadais gu sìorruidh air a thasgaidh.

14 Agus rinn Enoch mar an ceudna, an seachdamh *pearsa* o Adhamh, fàidhead-aireachd orra sin, ag ràdh, Feuch, tha'n Tighearn a' teachd le deich mìle d'a naomhaibh²,

15 A dheanamh breitheanais air na h-uile, agus chum iadsan uile a tha mi-dhiadhaidh 'nam measg fhàgail ris, a thaobh an uile ghnìomhara mi-dhiadhaidh a rinn iad gu mi-dhiadhaidh, agus a thaobh an uile *bhriathar* cruaidhe, a labhair peacaich mi-dhiadhaidh 'na aghaidh.

16 Is luchd cànrain agus gearain an dream so, a tha 'g imeachd a réir an anamian féin; agus tha'm beul a' labhairt *bhriathar* atmhor³, agus iad a' gabhail iongantais⁴ do phearsaibh dhaoine air sgàth buannachd.

¹ Fiadh-thonna.

² le 'dheich mìlribh naomha.

⁴ a' toirt mòr-mheas.

³ uaibhreach.

17 Ach cuimhuichibh-sa, a mhuinntir mo ghràidh, na focail a labhradh roimh le abstolaibh ar Tighearna Iosa Criosd;

18 Mar a thubhairt iad ribh, gu'm biodh anns an aimsir dheireannaich luchd-fanoid, a ghluziseadh a réir an ana-mianna mi-dhiadhaidh féin.

19 'S iad sin an dream a sgaras iad féin o *chàch*, collaidh⁵, gun an Spiorad aca.

20 Ach air bhi dhuibh-se, a mhuinntir ionmhuinn, 'gur togail féin suas ann bhur creidimh ro naomha, a' deanamh urnuigh san Spiorad naomh,

21 Coimhidibh sibh féin ann an gràdh Dhé, le sùil ri tròcair ar Tighearna Iosa Criosd chum na beatha maireannaich.

22 Agus gabhaibh truas do dhream àraidh, a' deanamh eadar-dhealachaidh:

23 Agus tèarnaibh dream eile le h-eagal, 'gan spionadh as an teine; a' fuathachadh eadhon an eudaich air am bheil smal na feòla⁶.

24 A nis dha-san a tha comasach air bhuir gleidheadh o thuisleadh, agus *bhur* cur gu neo-lòchdach an làthair a ghlòire le h-aobhneas ro mhòr,

25 Do'n Dia a ta mhàin glic, ar Slàn-uirgear, *gu robh* glòir agus mòralachd, neart⁷ agus cumhachd, a nis agus air feadh nan uile linn. Amen.

⁵ nàdurra, feòlmhor.

⁶ a ta air a shalachadh leis an fheòil.

⁷ tighearnas, nachdaranachd.

TAISBEAN.

EOIN AN DIADHAIR.

CAIB. I.

1 Sgrìobh Eoin a thaisbean chum seachd eaglaisean, na h-Asia, a tha air an ciallachadh leis na seachd coimheiribh òir. 7 Teachd Chrìosd: 14 A chumhachd glòrmhor, agus a mhòralachd.

TAISBEAN Iosa Criosd, a thug Dia dha, a dh'fhoillseachadh d'a sheirbhisich nithe a's éigin teachd gu crìch ann an ùine ghearr; agus chuir a teachdair-eachd uaidh, agus le 'aingeal féin dh'fhoillsich e iad d'a sheirbhisich Eoin:

2 A rinn fianuis air focal Dé, agus air teistean Iosa Criosd, agus air gach ni a chunnaic e.

3 Is beannaichte an ti a leughas, agus iadsan a dh'éisdeas ri briathraibh na fàidh-eadaireachd so, agus a choimhidcas na nithe a tha sgrìobhta innte: oir tha'n t-am am fagus.

4 **E**GIN chum nan seachd eaglaisean a ta san Asia; Gràs dhuibh, agus

sìth o'n Ti a ta, agus a bha, agus a ta ri teachd; agus o na seachd spioradaibh a tha 'm fianuis a rìgh-chaithreach-san;

5 Agus o Iosa Criosd, an fhianuis fhìor, an ceud-ghin o na marbhaibh, agus nachdaran rìghre na talmhainn: Dha-san a ghràdhach sinn, agus a dh'ionnlaid sinn o ar peacaibh 'na fhuil féin,

6 Agus a rinn rìghre dhinn agus sagairt do Dhià agus d'a Athair-san; dhasan *gu robh* glòir agus cumhachd gu saoghal nan saoghal. Amen.

7 Feuch, tha e teachd le neulaibh; agus cli gach sùile, agus iadsan *mar an ceudna* a lot e¹: agus ni uile threubha na talmhainn caoidh air a shon-san: gu ma h-amhluidh bhithleas. Amen.

8 Is mise Alpha agus Omega, an toisach agus an deireadh, tha an Tighearn

¹ a thoimh-lot, a shàth e troimh.

ag ràdh, a ta, agus a bha, agus a ta ri teachd, an t-Uile-chumhachdach.

9 Bha mise Eoin, bhur dearbh-bhràthair, agus blur companach¹ ann an àmhghar, agus ann an rìoghachd agus am foighidin Iosa Crìosd, anns an eilean² ris an abrar Patmos, air son focail Dé, agus air son fianuis Iosa Crìosd.

10 Bha mi san Spiorad air là an Tigh-earn, agus chuala mi air mo chùlaobh guuth mòr, mar *guuth* trompaid.

11 Ag ràdh, Is mise Alpha agus Omega, an ceud neach agus an neach deireannach: agus Sgrìobh-sa ann an leabhar an nì a chì thu, agus cuir e chum nan seachd eaglaisean a tha san Asia; chum Ephesus, agus chum Smirna, agus chum Phergamais, agus chum Thiatira, agus chum Shardis, agus chum Philadelphia, agus chum Laodicea.

12 Agus thionndaidh mi a dh'fhaicinn a ghutha a labhair rium. Agus air tionndadh dhomh, chuunaic mi seachd coinnleirean òir;

13 Agus am meadhon nan seachd coinnleirean, *neach* cosmhuil ri Mac an duine, air an robh eudach a ràinig sìos gu 'shàilibh, agus crioslaichte³ le crìos òir mu 'chìochaibh.

14 Bha a cheann agus 'fholt geal mar oluinn ghil, mar shneachda; agus a shùilean mar lasair theine;

15 Agus a chosa cosmhuil ri umha⁴ fìor-ghlan, mar gu'm bitheadh iada' dearg-losgadh ann an àmhuinn; agus a ghuth mar thoirm mhòran uisgeachan.

16 Agus bha aige 'na làimh dheis seachd reultan: agus claidheamh gearr dà fhaobhair a' teachd a mach as a bheil: agus bha a ghnuis mar a' ghrian a' dealrachadh 'na làn neart.

17 Agus an uair a chunnaic mi e, thuit mi sìos aig a chosaibh an riochd mairbh: agus chuir e a làimh dheas orm, ag ràdh rium, Na biodh eagal ort: is mise an ceud neach agus an neach deireannach.

18 Is mise an ti a ta beò, agus a bha marbh; agus, feuch, tha mi beò gu saoghal na saoghal, Amen; agus tha iuchraiche ifrinn⁵ agus a' bhàis agam.

19 Sgrìobh na nithe a chunnaic thu, agus na nithe a ta ann, agus na nithe a bhitheas an déigh so:

20 Rùn-dìomhair nan seachd reultan a chunnaic thu ann am làimh dheis, agus nan seachd coinnleirean òir. Is iad na seachd reultan, aingil nan seachd eaglaisean: agus is iad na seachd coinnleirean a chunnaic thu, na seachd eaglaisean.

CAIB. II.

1 Cìod a dh'aitheadh do Eoin a sgrìobhadh chum aingile, (is iad sin, ministerean,) nan eaglaisean,

1 Ephesus, 8 Smirna, 12 Phergamais, 18 Thiatira: agus cìod a ta air a mholadh, no a fhuaradh uireasbhuidheach anna-san.

CHUM aingil⁶ eaglais Ephesus, Sgrìobh; Is iad so na nithe a ta an ti a tha cumail nan seachd reultan 'na làimh dheis, a tha 'g imeachd ann am meadhon nan seachd coinnleirean òir, ag ràdh;

2 Is aithne dhomh t'òibre, agus do shaothair, agus t'fhoighidin, agus nach urrainn thu giùlan leo-san a tha olc; agus gu'n do dhearbhu thu iadsan a their gur abstoil iad féin, agus nach eadh, agus gu'n d'fhuair thu iad breugach;

3 Agus gu'n do ghiùlain thu, agus gu bheil foighidin agad, agus air sgàth m'ainme-sa gu'n d'rinn thu saothair, agus nach d'thug thu thairis.

4 Gidheadh, tha *ni-éigin* agam a' d'aghaidh, do bhrìgh gu'n do thréig thu do cheud ghràdh.

5 Cuimhnich uime sin cia uaith a thuit thu, agus gabh aithreachas, agus dean na ceud òibre; no thig mi ort gu grad, agus atharraichidh mi do choinnleir as 'ait, mur gabh thu aithreachas.

6 Ach a ta so agad, gur fuathach leat òibre nan Nicolaiteach, nithe mar an ceudna a's fuathach leam-sa.

7 An ti aig am bheil cluas, éisdeadh e cìod a ta an Spiorad ag ràdh ris na h-eaglaisibh; Do'n ti a bhuadhaicheas bheir mise r'a itheadh do chraoibh na beatha, a tha ann am meadhon phàrrais Dé.

8 Agus chum aingil eaglais Smirna, sgrìobh, Na nithe so a ta esan ag ràdh, an ti a's e'n ceud neach agus an neach deireannach, a bha marbh, agus a tha beò;

9 Is aithne dhomh t'òibre, agus t'àmhghar, agus do bhochdainn, (gidheadh a ta thu beartach⁷), agus is aithne dhomh toibheum na muinntir a their gur Iudhaich iad féin, agus nach eadh, ach sìon-agog Shàtain.

10 Na biodh eagal ort roimh aon do na nìthibh sin a dh'fhuilingeas tu: feuch, tilgidh an diabhul cuid dhibh ann am prìosan, chum gu'n dearbhar sibh; agus bithidh àmhghar⁸ agaibh rè dheich làithean: bi-sa fìrinneach gu bàs, agus bheir mise dhuit crùn na beatha.

11 An ti aig am bheil cluas, éisdeadh e cìod a ta an Spiorad ag ràdh ris na h-eaglaisibh: An ti a bheir buaidh, cha chiurrar leis an dara bàs e.

12 Agus chum aingil na h-eaglais a ta ann am Pergamos, sgrìobh; Na nithe so a ta esan, aig am bheil an claidheamh gearr dà fhaobhair, ag ràdh;

13 Is aithne dhomh t'òibre, agus c'àit am bheil thu a' d'chòmhnuidh, eadhon far

¹ fear-comuinn.

² oilean, innis.

³ crioslaichte.

⁴ prais.

⁵ na h-uaigne, an t-saoghail ri teachd.

⁶ theachdair.

⁷ saobhair.

⁸ trioblaid.

am bheil caithir Shàtain: agus a ta thu a' cumail m' ainme-sa gu daingean, agus cha d' àicheadh thu mò chreidimh, eadhon anns na làithibh sin anns *an robh* Antipas 'na fhianuis¹ fhirinneach dhomh, a mharbhadh 'nur measg, far am bheil Sàtan 'na chòmhnuidh.

14 Gidheadh, tha beagan agam a'd' aghaidh, do bhrìgh gu bheil agad an sin an dream a tha cumail teagaisg Bhalaaim, a theagaisg do Bhalac ceap-tuislidh a chur roimh chloinn Israeil, chum nithe a dh'ìobradh do ìodholaibh itheadh, agus strìopachas a dheanamh.

15 Is amhuil sin a ta agad mar an ceudna an dream a tha cumail teagaisg nan Nicolaiteach, ni a's fuathach leam-sa.

16 Dean aithreachas, no thig mi a d'ionnsuidh gu grad, agus cogaidh mi 'nan aghaidh le claidheamh mo bheòil.

17 An ti aig am bheil cluas, éisdeadh e ciod a ta an Spiorad ag ràdh ris na h-eaglaisibh: Do'n ti a bhuadhaicheas bheir mi r'a itheadh do'n mhana fholuichte, agus bheir mi dha clach gheal, agus air a' chloich ainm nuadh sgrìobhta, nach aithne do neach air bith, ach do'n ti a gheibh i.

18 Agus chum aingil na h-eaglais a ta ann an Tiàira, sgrìobh; Na nithe so tha Mac Dhé, aig am bheil a shùilean mar lasair theine, agus a chosan mar umha fìor-ghlan, ag ràdh;

19 Is aithne dhomh t'òibre, agus do ghràdh, agus do sheirbhis², agus do chreidimh, agus t'fhoighidin, agus t'òibre deireannach; gu *bheil iad* nì's mò na do cheud oibre.

20 Gidheadh, tha agam beagan do nithibh a'd' aghaidh, gu bheil thu a' fulang do'n mhnaoi sin Isebel, a tha 'g ràdh gur ban-fhàidh i féin, mo sheirbhisich a theagaisg agus a mhealladh chum strìopachas a dheanamh, agus nithe a dh'ìobradh do ìodholaibh itheadh.

21 Agus thug mi dhi ùine gu aithreachas a ghabhail d'a strìopachas; agus cha do ghabh i aithreachas.

22 Feuch, tilgidh mi i ann an leabaidh, agus iadsan a tha deanamh adhaltrannais ri the ann an àmhghar mòr, mur gabh iad aithreachas d'an gnòmharaibh.

23 Agus marbhaidh mi a clann leis a' bhàs; agus bithidh fhios aig na h-eaglaisibh uile gur mise an ti sin a sgrùdas na h-àirnean agus na cridheachan: agus bheir mi do gach aon agaibh-sa a réir bhrù n-oibre.

24 Ach ribhse a ta mi ag ràdh, agus ris a' chuid eile ann an Tiàira, Mheud aig nach 'eil an teagasg so, agus do nach

b'aithne doimhneachda Shàtain, mar a their iad, cha chuir mi uallach eile oirbh;

25 Ach cumaibh gu daingean an ni a ta agaibh, gus an tig mi.

26 Agus an ti a bhuadhaicheas, agus a ghleidheas m'òibre gus a' chrìoch, dhasan bheir mi cumhachd os ceann uan Cinneach:

27 (Agus riaghlaidh e iad le slait iar-uinn: mar shoithichibh creadha brisear 'nam bloighdibh iad:) amhuil a fhuair mise o m'Àthair.

28 Agus bheir mi dha reult ra maidne.

29 An ti aig am bheil cluas, éisdeadh e ciod a ta an Spiorad ag ràdh ris na h-eaglaisibh.

CAIB. III.

1 *Tha aingeal eaglais Shardis air a chronachadh, 3 agus air earalachadh gu h-aithreachas. 8 Tha 'aingeal eaglais Philadelphia air a mholadh air son a dhìchill agus 'fhoighidin. 15 Tha aingeal eaglais Laodicea air a chronachadh a chionn nach robh e fuar no leth.*

AGUS chum aingil na h-eaglais a tha ann an Sardis, sgrìobh; Na nithe so a ta an ti aig am bheil seachd spiorada Dhé, agus na seachd reultan, ag ràdh; Is aithne dhomh t'òibre, gu bheil ainm agad, gu bheil thu beò, gidheadh a ta thu marbh.

2 Bì faireil, agus neartaich na nithe a ta làthair, agus a ta ullamh gu bàsachadh³: oir cha d'fhuair mi t'òibre coimhlionta am fianuis Dé.

3 Cuimhnich uime sin cionnus a fhuair agus a chuala tu, agus gléidh⁴, agus gabh aithreachas. Uime sin mur dean thu faire, thig mi ort mar ghaduiche, agus cha bhì fios agad ciod i an uair anns an tig mi ort.

4 Tha beagan ainmean agad eadhon ann an Sardis, nach do shalaich an eudach; agus imichidh iad maille rium-sa ann an *culaidhibh* geala: oir is airidh⁵ iad.

5 An ti a bheir buaidh, sgeadaichear e ann an eudach geal; agus cha dubh mi mach 'ainm á leabhar na beatha, ach aidichidh mi 'ainm-san am fianuis m'Àthar, agus am fianuis 'angle-san.

6 An ti aig am bheil cluas, éisdeadh e ciod a ta an Spiorad ag ràdh ris na h-eaglaisibh.

7 Agus chum aingil na h-eaglais ann am Philadelphia, sgrìobh; Na nithe so a ta an ti naomh ag ràdh, an ti fìor, an ti aig am bheil iuchair Dhaibhidh, an ti a dh'fhosgla, agus cha dùin neach air bith; agus a dhùineas, agus cha'n fhosgail neach air bith:

8 Is aithne dhomh t'òibre: feuch, chuir mi dorus fosgailte romhad, agus cha'n urrainn neach air bith a dhùnadh: oir a

¹ 'na mhairtireach.

² fhrìthealachd, mhinistireilcachd.

³ agus neartaich a' chuid eile a ta ullamh gu bàsachadh.

⁴ coimhid, cum gu teann.

⁵ fìu.

ta heart beag agad, agus ghléidh thu m'fhocal, agus cha d'áicheadh thu m'ainm.

9 Feuch, bheir mise *orra-san* do shionagog Shatain, (a tha 'g ràdh gur Iudhaich iad féin, agus nach eadh, ach a ta deanamh bréige,) feuch, bheir mise orra gu'n tig iad agus gu'n dean iad aoradh aig do chosaibh, agus gu'm bi fios aca gu'n do ghràdhaidh mise thu.

10 A chionn gu'n do ghléidh thu focal m' fhoighidin-sa, gleidhidh mise thusa mar an ceudna o uair a' bhuaireadh, a thig air an t-saoghal uile, a dhearbhadh na muinntir sin a tha 'nan còmhnuidh air an talamh.

11 Feuch, tha mi a' teachd gu grad: dean greim daingean air na bheil¹ agad, chum nach glac neach oir bith do chrun.

12 An ti a bheir buaidh, ni mi e 'na phost² ann an teampull mo Dhé, agus cha téid e ni's mò a mach as: agus sgrìobhaidh mi ainm mo Dhé air, agus ainm caithreach³ mo Dhé, *a's i* Ierusalem nuadh, a thig a nuas o nèamh o m' Dhia: agus sgrìobhaidh mi m'ainm nuadh féin air.

13 An ti aig am bheil cluas, éisdeadh e ciod a ta an Spiorad ag ràdh ris na h-eaglaisibh.

14 Agus chum aingil na h-eaglais ann an Laodicea, sgrìobh; Na nithe so a ta an Amen, an fhianuis dhileas agus fhirinneach, toiseach cruthachaidh Dhé, ag ràdh;

15 Is aithne dhomh t'òibre, nach 'eil thu aon chuid fuar no teth: b'fhearr leam gu'm bitheadh tu fuar no teth.

16 Uime sin do bhrìgh gu bheil thu meaghl-bhlàth, agus nach 'eil thu aon chuid fuar no teth, sgeithidh mi thu mach as mo bheul.

17 Do bhrìgh gu bheil thu ag ràdh, Tha mi beartach, agus air fàs ann an saoiibheas, agus gun fheum agam air ni sam bith; agus gun fhios agad gu bheil thu dòruinneach⁴, agus truagh, agus bochd, agus dall, agus lomnochd:

18 Comhairlicheam dhuit òr a cheannach uamsa, air a dhearbhadh san teine, chum gu'm bi thu saoiibhir; agus eudach geal, chum gu'n còmhdaichear thu, agus nach bi nàire⁵ do lomnochduidh follais-each; agus ùng do shùile le sàbh-shùl⁶, chum gur léir dhuit.

19 Mheud as is ionmhuinn leam, tha mi a' cronachadh agus a' smachdachadh; uime sin biodh agad-sa teas-ghràdh, agus dean aithreachas.

20 Feuch, tha mi a'm' sheasamh aig an dorus, agus a' bualadh: ma dh'éisdeas neach sam bith ri m' ghuth, agus gu'm

fosgail e'n dorus, thig mi a steach d'a ionnsuidh, agus gabhaidh mi mo shuipeir maille ris, agus esan maille rium-sa.

21 Do'n ti a bhuaidhaicheas bheir mi comas suidhe maille rium-sa air mo rìgh-chaithir, amhuil fòs a bhuaidhaich mise, agus a shuidh mi maille ri m'Athair air a rìgh-chaithir-san.

22 An ti aig am bheil cluas, éisdeadh e ciod a ta an Spiorad ag ràdh ris na h-eaglaisibh.

CAIB. IV.

1 Chunnais Eoin rìgh-chaithir Dhé ann am fàith-eanas. 4 Na ceithir seanaire fìchead. 6 Na ceithir bheathaiche làn do shùilibh air am beul-aobh agus air an cùlaobh. 10 Thig na seanairean sìos an crùn, agus rinn iad aoradh do'n ti a bha 'na shuidhe air an rìgh-chaithir.

AN déigh so dh'amhairc mi, agus, feuch, bha dorus fosgailte air nèamh; agus bha an ceud ghuth a chuala mi, mar *fhuaim* trompaid a' labhairt rium, ag ràdh, 'Thig a nìos an so, agus nochdaidh mise dhuit nithe a's éigin tachairt an déigh so.

2 Agus air ball bha mi san Spiorad: agus, feuch, bha rìgh-chaithir air a suidheachadh air nèamh, agus bha neach 'na shuidhe air an rìgh-chaithir.

3 Agus bha an ti a shuidh, r'a amharc air, cosmhuil ri cloich Iasper, agus Shardis: agus bha bogha-frois⁷ timchioll na rìgh-chaithireach mu'n cuairt, cosmhuil, r'a fhaicinn, ri Emerald.

4 Agus timchioll na rìgh-chaithireach mu'n cuairt bha ceithir chaithriche fìchead; agus air na caithrichibh chunnaic mi ceithir seanaire fìchead 'nan suidhe, air an sgeadachadh ann an cùlaidhibh geala; agus bha ac⁸ air an cinn crùn⁹ oir.

5 Agus chaidh a mach as an rìgh-chaithir dealanaich, agus tairneanaich, agus guthanna: agus bha seachd lòchrain⁹ theine a' dearg-lasadh am fianuis na rìgh-chaithireach, a's iad seachd spiorada Dhé.

6 Agus roimh an rìgh-chaithir bha fairge ghloine cosmhuil ri criostal: agus ann am meadhon na rìgh-chaithireach, agus mu'n cuairt do'n rìgh-chaithir, bha ceithir bheathaiche làn do shùilibh air am beul-aobh agus air an cùlaobh.

7 Agus bha an ceud bheathach cosmhuil ri leòman, agus an dara beathach cosmhuil ri laogh, agus bha aig an treas beathach aghaidh mar dhuine, agus bha an ceathramh beathach cosmhuil ri iolair ag itealach.

8 Agus aig na ceithir bheathaichibh, aig gach aon diubh fa leth, bha sè sgiathan mu'n cuairt da, agus bha iad làn do shùilibh an taobh a stìgh: agus cha do

¹ ris an nì.

² na charragh.

³ baile.

⁴ iarganach, ànighgarach.

⁵ gràineileachd.

⁶ fobhair-shùl, sùil-leigheas.

⁸ corona.

⁷ bogha-uisge.

⁹ lamps. Sasg.

sguir iad a là no dh'oidhche, ag ràdh, Naomh, naomh, naomh, an Tighearn Dia uile-chumhachdach, a bha, agus a ta, agus a bhihteas.

9 Agus an uair a thug na beathaiche sin glòir, agus urram, agus buidheachas do'n ti a bha 'na shuidhe air an righ-chaithir, a ta beò gu saoghal nan saoghal,

10 Thuit na ceithir seanaire fichead sìos an làthair an ti a bha 'na shuidhe air an righ-chaithir, agus rinn iad aoradh dha-san a ta beò gu saoghal nan saoghal, agus thilg iad sìos an cruin an làthair na righ-chaitheach, ag ràdh,

11 Is airidh¹ thusa, a Thighearn, air glòir, agus urram, agus cumhachd fhaotainn; oir cruthaich thu na h-uile nithe, agus air son do thoile-sa tha iad, agus chruthaicheadli iad.

CAIB. V.

1 *An leabhar air a sheulachadh le seachd seulaibh, 9 a b'airidh a mhàin an t-Uan a mharbhadh air fhosgladh: uime sin thug na seanairean cliù dha, agus dh'aicidh iad gu'n do shaor e iad le fhuil féin.*

AGUS chunnaic mi ann an làimh A dheis² an ti a shuidh air an righ-chaithir, leabhar sgriobhta san taobh a stigh dheth agus air a chùlaobh, air a sheulachadh le seachd seulaibh.

2 Agus chunnaic mi aingeal treun a' gairm le guth àrd, Cò a's airidh air an leabhar fhosgladh, agus air a sheulachan fhuasgladh?

3 Agus cha robh aon neach air nèamh, no air thalamh, no fuaidh'n talamh comasach air an leabhar fhosgladh, no sealltuinn air.

4 Agus ghuil mi gu mòr, do bhrìgh nach d' fhuaradh aon neach a b'airidh air an leabhar fhosgladh, agus a leughadh, no sealltuinn air.

5 Agus thubhairt aon do na seanairibh rium, Na guil: feuch, bhuadhaich an Leòmhán tha do thruabh Iudah, Freumh Dhaibhidh, air an leabhar fhosgladh, agus a sheachd seulaichan fhuasgladh.

6 Agus dh'amhairc mi, agus, feuch, ann am meadhon na righ-chaitheach, agus nan ceithir bheathaichean, agus ann am meadhon nan seanairean, Uan 'na sheasamh mar gu'm biodh e air a mharbhadh, aig an robh seachd adhaircean, agus seachd sùilean, a's iad seachd spiorada Dhé, a chuireadh a mach chum na talmhain uile.

7 Agus thàinig e, agus ghlac e an leabhar á deas làimh an ti a bha 'ua shuidhe air an righ-chaithir.

8 Agus an uair a ghlac e'n leabhar, thuit na ceithir bheathaichean, agus na ceithir

seanaire fichead sìos an làthair an Uain, agus aig gach aon diubh clàrsaichean, agus tùis-shoithichean òir làn do nithibh deadh-fhàile, nithe a's iad urnuighean nan naomh.

9 Agus sheinn iad òran nuadh, ag ràdh, Is airidh thusa air an leabhar a ghlacadh, agus a sheulachan fhosgladh, do bhrìgh gu'n do mharbhadh thu, agus gu'n do shaor thu sinne do Dhia le t'fhuil féin, as gach uile thréibh, agus theangaidh, agus shluagh, agus chiuneach;

10 Agus gu'n d'rinn thu rìghrean dhinn, agus sagairt do ar Dia: agus rìghichidh sinn air an talamh.

11 Agus dh'amhairc mi, agus chuala mi guth mhòran aingeal timchioll na righ-chaitheach, agus nam beathaichean, agus nan seanairean; agus b'e an àireamh deich mìle uair deich mìle, agus mìlte do mhiltibh;

12 Ag ràdh le guth àrd, Is airidh an t-Uan a chaidh mharbhadh, air cumhachd, agus saobhbreas, agus gliocas, agus neart, agus urram, agus glòir, agus moladh fhaotainn.

13 Agus chuala mi gach uile chreutair a ta air nèamh, agus air an talamh, agus fuaidh'n talamh, agus a ta air a' chuan, agus na h-uile nithe a ta anna, ag ràdh, Moladh, agus urram, agus glòir, agus cumhachd, gu robh dha-san a ta 'na shuidhe air an righ-chaithir, agus do'n Uan gu saoghal nan saoghal.

14 Agus thubhairt na ceithir bheathaiche, Amen. Agus thuit na ceithir seanaire fichead sìos, agus rinn iad aoradh dha-san a ta beò gu saoghal nan saoghal.

CAIB. VI.

1 *Fosgladh nan seula an ordugh, far am bheil fàidheadaireachd air a chur sìos mu thimchioll nithe gu deireadh an t-saoghail.*

AGUS chunnaic mi, 'nuair a dh'fhosgail an t-Uan aon do na seulaibh, agus chuala mi aon do na ceithir bheathaichibh ag ràdh, mar le fuaim tairneanaich, Thig agus faic.

2 Agus chunnaic mi, agus, feuch, each geal; agus bha aig an ti a shuidh air, bogha: agus thugadh dha crùn, agus chaidh e mach a' buadhachadh, agus chum gu buadhaicheadh e.

3 Agus an uair a dh'fhosgail e'n dara seula, chuala mi an dara beathach ag ràdh, Thig, agus faic.

4 Agus chaidh each eile mach, a bha dearg; agus thugadh cumhachd dha-san a shuidh air, chum sìth a thoirt o'n talamh, ionnus gu marbhadh iad a chéile: agus thugadh claidheamh mòr dha.

5 Agus an uair a dh'fhosgail e an treas seula, chuala mi an treas beathach ag ràdh, Thig, agus faic. Agus dh'amhairc mi,

¹ fu.

² air làimh dheis.

agus, feuch, each dubh, agus bha aig an ti a shuidh air, meidh¹ 'na làimh.

6 Agus chuala mi guth ann am meadhon nan ceithir bheathaichean agràdh, Tomhas cruithneachd air son peghinn, agus tri tomhasan eòrna air pheghinn; agus na dean cron air an oladh, no air an fhìon.

7 Agus an uair a dh'fhosgail e'n ceathramh seula, chuala mi guth a' cheathramh beathaich ag ràdh, Thig, agus faic.

8 Agus dh'amhairc mi, agus feuch each glas²; agus b'e ainm an ti a shuidh air, am Bàs, agus lean ifrinn³ 'na chuideachd: agus thugadh dhoibh-san cumhachd air a' cheathramh cuid do'n talamh, a mharbhadh⁴ le claidheamh, agus le gorta, agus le bàs⁵, agus le fiadh-bheathaichibh na talmhainn.

9 Agus an uair a dh'fhosgail e an cùig-eachd seula, chunnaic mi fuidh'n altair, anama na muinntir sin a mharbhadh air son focail Dé, agus air son na fianuis a chum iad:

10 Agus ghlaodh iad le guth mòr, ag ràdh, Cia fhad a bhitheas, O Thighearna naomh agus fhirinnich, gus an dean thu breitheanas, agus an diol thu ar fuil-ne orra-san a ta 'nan còmhnuidh ar an talamh?

11 Agus thugadh do gach aon diubh trusgana fada geala, agus chaidh a ràdh⁶ riu, iad a ghabhail fois fathast rè ùine bhig, gus am biodh an comh-sheirbhisich mar an ceudna, agus am bràithrean a rachadh a mharbhadh mar a chaidh iadsan, air an coimhlionadh.

12 Agus dh'amhairc mi 'nuair a dh'fhosgail e an seathadh seula, agus, feuch, bha crith mhòr talmhainn ann; agus dh'fhàs a' ghrian dubh mar shlaic-eudach ròin, agus dh'fhàs a' ghealach mar fhuil.

13 Agus thuit reulta nèimh air an talamh, mar a thilgeas craobh-fhìge a fìgean an-abaich, 'nuair a chrathar i le gaoith mhòir.

14 Agus chaidh nèamh thairis mar rola leabhair air fhilleadh air a chèile; agus dh'atharraicheadh gach beium agus eilean as an ionadaibh féin:

15 Agus dh'fhòlaich rìghre na talmhainn, agus na daoine mòra, agus na daoine saobhir, agus na h-àrd-cheannardan, agus na daoine cumhachdach, agus gach tràill⁷, agus gach duine saor, iad féin ann an uamhaibh agus ann an creag-aibh nam beann;

16 Agus thubhairt iad ris na sléibhtibh agus ris na creag-aibh, Tuitibh oirnne, agus folaichibh sinn o ghnùis an ti a tha 'na shuidhe air an rìgh-chaithir, agus o

fheirg an Uain:

17 Oir thàinig là mòr 'fheirge-san; agus cò a dh'fheudas seasamh?

CAIB. VII.

1 *Chuir aingeal seula air seirbhisich Dhè 'nan eudanaibh. 4 A'ireamh na muinntir a sheulaicheadh: 5 do threubhaibh Israeil fa leth àireamh shonruichte, 9 do gach cinneach eile cuideachd mhòr gun àireamh, a tha 'nan seasamh an làthair na rìgh-chaithreach, air an sgeadachadh ann an trusganaibh geala.*

AGUS an déigh nan nithe sin, chunnaic mi ceithir aingil 'nan seasamh air ceithir oisinnibh na talmhainn, a' cumail ceithir ghaothanna na talmhainn, chum nach seideadh a' ghaoth air an talamh, no air an fhairge, no air aon chraoibh.

2 Agus chunnaic mi aingeal eile ag éirigh o'n àird an ear, aig an robh seula an Dé bheò: agus ghlaodh e le guth mòr ris na ceithir aingil, d'an d'thugadh cumhachd cron a dheanamh air an talamh agus air an fhairge,

3 Ag ràdh, na deanaibh dochann do'n talamh, no do'n fhairge, no do na craobhaibh, gus an cuir sinn seula air seirbhisich ar Dé air clàraibh an eudain.

4 Agus chuala mi àireamh na dream a sheulaicheadh: ceud agus dà fhichead agus ceithir mìle, a sheulaicheadh do uile threubhaibh chloinn Israeil.

5 Do thréibh Iudah sheulaicheadh dà mhìle dheug. Do thréibh Reubein sheulaicheadh dà mhìle dheug. Do thréibh Ghad sheulaicheadh dà mhìle dheug.

6 Do thréibh Aseir sheulaicheadh dà mhìle dheug. Do thréibh Nephtalim sheulaicheadh dà mhìle dheug. Do thréibh Mhanaseis sheulaicheadh dà mhìle dheug.

7 Do thréibh Shimeoin sheulaicheadh dà mhìle dheug. Do thréibh Lebhi sheulaicheadh dà mhìle dheug. Do thréibh Isachair sheulaicheadh dà mhìle dheug.

8 Do thréibh Shabuloin sheulaicheadh dà mhìle dheug. Do thréibh Ioseph sheulaicheadh dà mhìle dheug. Do thréibh Bheniamin sheulaicheadh dà mhìle dheug.

9 An déigh so dh'amhairc mi, agus, feuch, sluagh mòr nach robh neach sam bith comasach air àireamh, do na h-uile chinnich, agus threubhaibh, agus shluagh-aibh, agus theangannaibh, 'nan seasamh an làthair na rìgh-chaithreach, agus an làthair an Uain, air an sgeadachadh le trusganaibh fada geala, agus pailm aca 'nan làmh-aibh;

10 Agus ghlaodh iad le guth àrd, ag ràdh, Slàinte do ar Dia-ne⁸ a ta 'na shuidhe air an rìgh-chaithir, agus do'n Uan⁹.

¹ toimhsean.

² uaine.

³ an uaigh.

⁴ chum marbhadh air a' cheathramh cuid do'n talamh.

⁵ plàigh bhàsmhoir.

⁶ a dubhradh.

⁷ duor-àglach.

⁸ o ar Dia ne.

⁹ o'n Uan.

11 Agus sheas na h-aingil uile timchioll na rìgh-chaitheach, agus nan seanairean, agus nan ceithir bheathaichean, agus thuit iad air an aghaidh an làthair na rìgh-chaitheach, agus riun iad aoradh do Dhia,

12 Ag ràdh, Amen: Moladh, agus glòir, agus gliocas, agus buidheachas, agus urram, agus cumhachd, agus neart *gu robh* do ar Dia-ne gu saoghal nan saoghal. Amen.

13 Agus fhreagair aon do na seanairibh, ag ràdh rium, Cò iad sin a ta air an sgeadachadh le trusganaibh fada geala? agus cia as a thàinig iad?

14 Agus thubhairt mi ris, A Thighearn, tha fhios agad-sa. Agus thubhairt e rium, Is iad so iadsan a thàinig á h-àmghar¹ mòr; agus nìgh iad an trusgain, agus riun iad geal iad ann am fuil an Uain.

15 Uime sin tha iad an làthair rìgh-chaitheach Dhé, agus a' deanamh aoraidh dha a là agus a dh'oidheche 'na theampull: agus gabhaidh an ti a tha 'na shuidhe air an rìgh-chaitheir còmhuidh 'nam measg.

16 Cha bhì ocras orra tuilleadh, no tart ni's mò; cha mhò a bhuailas a' ghrian orra², no teas air bith.

17 Oir beathaichidh an t-Uan a tha am meadhon na rìgh-chaitheach iad, agus treòraichidh e iad gu beò-thobraichibh uisge; agus tiormaichidh Dia gach deur o'n suilibh.

CAIB. VIII.

1 Nuair a dh'fhosgladh an seachdamh seula, 2 chaidh seachd trompaidean a thoirt do sheachd aingilbh: 3 Chuir aingel eile tùis maille ri urnuighibh nan naomh air an altair òir. 6 Shéid ceithir dhiubh an trompaidean, agus lean plàighean mòra an lorg sin.

AGUS an uair a dh'fhosgail e an seachdamh seula, bha tosd air nèamh mu thimchioll leth uaire.

2 Agus chunnaic mi na seachd aingil a sheas am fianuis Dé; agus thugadh dhoibh-san seachd trompaidean.

3 Agus thàinig aingel eile, agus sheas e aig an altair, agus tùisear òir aige; agus thugadh dha mòran tùise, chum gu'n tugadh se e³ maille ri urnuighibh nan uile naomh air an altair òir a *bha'n* làthair na rìgh-chaitheach.

4 Agus chaidh deatach na tùise suas maille ri urnuighibh nan naomh, o làimh an aingil, an làthair Dhé.

5 Agus ghlac an t-aingel an tùiseir, agus lion se e le teine an h-altarach, agus thilg e air an talamh e: agus bha guthanna, agus tairneanaich, agus dealanaich, agus crìth-thalmhainn ann.

6 Agus dh'ulluich na seachd aingil aig an robh na seachd trompaidean iad féin, chum an séideadh.

7 Agus shéid an ceud aingel, agus bha clocha-meallain⁴ ann, agus teine air an measgadh le fuil, agus thilgeadh air an talamh iad; agus loisgeadh an treas cuid do na craobhaibh, agus am feur glas uile.

8 Agus shéid an dara aingel, agus thilgeadh mar gu'm bu bheinn mhòr a' losgadh le teine anns an fhairge: agus dh'fhàs an treas cuid do'n fhairge 'na fuil:

9 Agus fhuair an treas cuid do na creut-airibh a bha anns an fhairge, aig an robh anam, bàs; agus mhillleadh⁵ an treas cuid do na longaibh.

10 Agus shéid an treas aingel, agus thuit reult mhòr o nèamh, a' dearg-lasadh mar lòchràn⁶, agus thuit i air an treas cuid do na h-aimhnichibh, agus air na tobraichibh uisge;

11 Agus is e an t-aimn a ghoirear do'n reult Burmaid: agus rinneadh an treas cuid do na h-uisgeachaibh 'nam burmaid; agus fhuair mòran dhaoine bàs leis na h-uisgeachaibh, do bhrìgh gu'n d'rinneadh searbh iad.

12 Agus shéid an ceathramh aingel, agus bhuailleadh an treas cuid do'n ghréin, agus an treas cuid do'n ghealaich, agus an treas cuid do na reultaibh; ionnus gu'n d'rinneadh an treas cuid diubh dorchas, agus nach do dhealraich an là rè an treas cuid dheth, no an oidheche air a' mhodh cheudna.

13 Agus dh'amhaire mi, agus chuala mi aingel⁷ ag itealaich ann am meadhon nèimh, ag ràdh le guth àrd, Is truagh, truagh, truagh, do luchd-àiteachaidh na talmhainn, air son guthanna eile trompaidean nan trì aingel a tha fathast gu séideadh!

CAIB. IX.

1 Air séideadh do'n chùigeadh aingel, thuit reult o nèamh, d'am bheil iuchair sluichd an dubh-aigein air a tabhairt: dh'fhosgail e an t-slochd, agus thàinig locuist cosmhuil ri scorpionaibh a mach. 12 Tha a' cheud truaighe air dol thairis. 13 Chaidh an seathach trompaide a shéideadh.

AGUS shéid an cùigeadh aingel a thrompaid, agus chunnaic mi reult a' tuiteam o nèamh chum na talmhainn: agus thugadh dha iuchair sluichd an dubh-aigein⁸.

2 Agus dh'fhosgail e slochd an dubh-aigein, agus dh'éirich deatach as an t-slochd, mar dheataich àmhuinn mhòir *theintich*; agus rinneadh a' ghrian agus an t-athar dorchas le deataich an t-sluichd.

3 Agus thàinig a mach as an deataich

¹ trioblaid.

² a thuiteas a' ghrian orra, a loisgeas a' ghrian iad.

³ gu'n ofraileadh se e.

⁴ cloich-shmeachd.

⁵ leus.

⁶ an t-sluic gun aigal, an t-sluichd an doimhne.

⁷ sgriosadh.

⁸ aon aingel.

air an talamh locuist; agus thugadh cumhachd doibh, a réir mar a tha cumhachd aig scorpionaibh na talmhainn.

4 Agus chaidh a ràdh riu gun iad a dheanamh dochainn¹ air feur na talmhainn, no air nì sam bith glas, no air craoibh sam bith; ach air na daoineibh sin a mhàin aig nach 'eil seula Dhé air clàr an eudain.

5 Agus thugadh dhoibh, cha'n e gu marbhadh siad iad, ach gu'm biodh iad air am pianadh ré chùig mìosa: agus bha am pian cosmhuil ri pein scorpion, 'nuair a bhuaileas e duine.

6 Agus anns na làitheibh sin iarraidh daoine am bàs, agus cha'n fhaigh iad e; agus bithidh déidh cha air bàsachadh, agus teichidh am bàs uatha.

7 Agus bha cruth nan locust cosmhuil ri h-eachaibh air an ulluchadh chum catha; agus bha air an cinn mar gu'm biodh cruin cosmhuil ri h-òr, agus bha an aghaidhean cosmhuil ri h-aghaidhibh dhaoine.

8 Agus bha folt orra cosmhuil ri folt bhan, agus bha am fiacra mar fhiacraibh leòmhann.

9 Agus bha aca uchd-éididhean, mar uchd-éididhean iarunn; agus bha fuaim an sgiathan mar fhuaim charbada mhòr-an each a' ruith chum catha.

10 Agus bha earbuill aca cosmhuil ri scorpionaibh; agus bha gathanna 'nan earblaibh: agus b'e an cumhachd daoine a chiurradh² ré chùig mìosa.

11 Agus bha rìgh aca os an ceann eadhon aingeal an dubh-aigein, agus 'se a's ainm dha san Eabhra, Abaddon, ach anns a' Ghréigis 'se a's ainm dha Apolion.

12 Chaidh aon truaighe thairis; feuch, tha dà thruaighe ri teachd fathast an déigh so.

13 Agus shéid an seathadh aingeal a thrompaid, agus chuala mi guth o cheithir adharcaibh na h-altair òir, a tha am fianuis Dé,

14 Ag ràdh ris an t-seathadh aingeal aig an robh an trompaid, Fuasgail na ceithir aingil a tha ceangailte aig an amhainn mhòir Euphrates.

15 Agus dh'fhuasgladh na ceithir aingil, a bha ulluichte fa chomhair uaire, agus là, agus mìosa, agus bliadhna, chum gu'm marbhadh iad an treas cuid do dhaoineibh.

16 Agus b'e àireamh armailtean a' mharc-shluaigh fichead mìle do dheich mìlthibh: agus chuala mi an àireamh.

17 Agus mar so chuunaic mi na h-eich anns an taisbean, agus iadsan a shuidh orra, aig an robh uchd-éididhean do theine, agus do h'iacin, agus do phronn-

usc³: agus bha cinn nan each mar chinn leòmhann; agus as am beoil thàinig a mach teine, agus deatach, agus pronnusc.

18 Leis na trì plàighibh so mharbhadh an treas cuid do dhaoineibh, leis an teine, agus leis an deataich, agus leis a' phronnusc, a chaidh a mach as am beoil.

19 Oir tha an cumhachda 'nam beull, agus 'nan earblaibh: oir bha an earbuill cosmhuil ri nathraichibh nimhe, agus bha cinn aca, agus leo sin nì iad dochann⁴.

20 Agus cha do ghabh a' chuid eile do na daoineibh, nach do mharbhadh leis na plàighibh sin, aithreachas do oibribh an làmh, ionnusc nach deanadh iad aoradh do dheamhnaibh, agus do dhealbhaibh òir, agus aigrid, agus umha, agus cloiche, agus fiodha; nach urrainn faicinn, no cluinntinn, no imeachd:

21 Agus cha mhò a ghabh iad aithreachas d'am mortaibh, no d'an druidheachd, no d'an striopachas, no d'an gadachdaibh.

CAIB. X.

1 Chunnac Eoin aingeal treun aig an robh leabhar fosgailte 'na làimh: 6 neach a thug mionnan airsan a tha beò gu sìorruidh, nach bi aimsir nì's mò ann. 8 Thugadh àithe do Eoin an leabhar a ghabhail agus itheadh.

AGUS chunnac mi aingeal cumhachd-ach eile a' teachd a nuas o nèamh, air a sgeadachadh le neul, agus bogha-frois⁵ air a cheann, agus 'aghaidh mar a' ghrian, agus a chosa mar phuist teine.

2 Agus bha aige 'na làimh leabhran fosgailte: agus chuir e a chos dheas air an fhaighe, agus a chos chli air an talamh,

3 Agus ghlaodh⁶ e le guth àrd, mar a bheuchdas leòmhann; agus an uair a ghlaodh e, labhair seachd tairneanaich an guthanna féin.

4 Agus an uair a labhair na seachd tairneanaich an guthanna féin, bha mi dol a sgrìobhadh: agus chuala mi guth o nèamh, ag ràdh rium, Seulaich na nithe a labhair na seachd tairneanaich, agus na sgrìobh iad.

5 Agus thog an t-aingeal, a chunnac mi 'na sheasamh air a' mhuir, agus air an talamh, a làmh gu nèamh,

6 Agus mhionnaich e air-san a tha beò gu saoghal nan saoghal, a chruthaich nèamh agus na nithe a ta ann, agus an talamh agus na nithe a ta ann, agus an fhaighe agus na nithe a ta innte, Nach bi aimsir ann nì's mò⁷.

7 Ach ann an làitheibh gutha an t-seachd-amh aingil, 'nuair a thòisicheas e air séid-eadh, an sin gu'm biodh rùn-diomhair Dhé air a chrìochnachadh, mar a dh'innis e d'a sheirbhisich na fàidhean.

¹ dochair, cron.

² a ghoirteachadh.

³ ghronu tal

⁴ cron.

⁵ bogha-uisge.

⁶ dh'èigh.

⁷ Nach bi'n aimsir ann fathast.

8 Agus labhair an guth, a chuala mi o nèamh, rium a ris, agus thubhairt e, Im-ich, glac an leabhran a tha fosgailte ann an làimh an aingil a tha 'na sheasamh air an fhaire, agus air an talamh.

9 Agus chaidh mi dh'ionnsuidh an aingil, agus thubhairt mi ris, Thoir dhomh-sa an leabhran: agus thubhairt esan rium, Glac, agus ith suas e; agus ni e do bhroinn searbh, ach bithidh e ann do bheul milis mar mhil.

10 Agus ghlac mi an leabhran á làimh an aingil, agus dh'ith mi suas e; agus bha e ann mo bheul milis mar mhil; agus an uair a dh'ith mi e, rinneadh mo bhrù searbh.

11 Agus thubhairt e rium, Is éigin duit a ris fàidheadaireachd a dheanamh am fianuis shlògh, agus chinneach, agus theanganna, agus rìghre lionmhor.

CAIB. XI.

1 Rinn an dà fhianuis fàidheadaireachd: 6 thugadh cumhachd dhoibh nèamh a dhruideadh, ionnus nach bi uisge ann: 7 ni am béisd cogadh 'nan aghaidh, agus marbhadh e iad: 8 luidhidh iad gun an adhlac, 11 agus an déigh thri làithean agus leth là éiridh iad a ris.

A GUS thugadh dhomh cuile cosmhuil a ri slait: agus sheas an t-aingeal, ag ràdh, Eirich, agus tomhais teampull Dhé, agus an altair, agus iadsan a tha deanamh aoraidh ann.

2 Ach fàg a mach a' chùirt a tha 'na taobh a muigh do'n teampull, agus na tomhais i, oir thugadh i do na Cinnich: agus saltraidh iad fo 'n cosaibh am baile: naomh rè dhà mhìos agus dhà fhichead.

3 Agus bheir mise cumhachd do m' dhithis fhianuissean, agus ni iad fàidheadaireachd rè mìle agus dà cheud agus trì fichead là, eudaichte ann an saic-eudach.

4 Is iad so an dà chrann oladh, agus an dà choinnleir a tha 'nan seasamh an làthair Dhé na talmhainn.

5 Agus ma chiurras neach air bith iad, théid teine a mach as am beul, agus claidhidh e an naimhdean: agus ma chiurras neach air bith iad, is éigin da bhi air a mharbhadh mar so.

6 Tha cumhachd aca so nèamh a dhùnadh, ionnus nach bi uisge ann, ann an làithibh am fàidheadaireachd-san: agus tha cumhachd aca air uisgeachaibh chum an tionndadh gu fuil, agus an talamh a bhualadh leis an uile phlàigh, co minic 's is toil leo.

7 Agus an uair a chrìochnaicheas iad am fianuis, ni am fiadh-bheathach² a dh'èir-eas as an t-slochd gun iochdar³ cogadh 'nan aghaidh, agus bheir e buaidh orra,

agus marbhadh e iad.

8 Agus bithidh an cuirp mharbha 'nan luidhe ann an sràid a' bhaile mhòir, ris an abrar gu spioradail Sodom agus an Eiphit, far mar an ceudna an do cheusadh ar Tighearn.

9 Agus chi cuid do na sluaghaibh, agus do threubhaibh, agus do theangannaibh, agus do chinnich, an cuirp mharbha rè thri làithean gu leth, agus cha léig iad an cuirp mharbha a chur ann an uaighibh.

10 Agus ni luchd-àiteachaidh na talmhainn gairdeachas os an ceann, agus bithidh iad subhach, agus cuiridh iad tidhlacan⁴ dh'ionnsuidh a chèile; do bhrìgh gu'n do phian an dà fhàidh so iadsan a bha chòmhnuidh air an talamh.

11 Agus an déigh thri làithean gu leth, chaidh Spiorad na beatha o Dhia a steach anna, agus sheas iad air an cosaibh; agus thuit eagal mòr orra-san a chunnaic iad.

12 Agus chual iad guth mòr o nèamh, ag ràdh riu, Thigibh a nìos an so. Agus chaidh iad suas do nèamh air neul; agus chunnaic an naimhdean iad.

13 Agus anns an uair sin féin bha crith mhòr thalmhainn ann, agus thuit an deicheamh cuid do'n bhaile⁵, agus mharbhadh seachd mìle pearsa sa' chrith-thalmhainn⁶: agus ghabh a' chuid eile eagal, agus thug iad glòir do Dhia nèimh.

14 Chaidh an dara truaighe thairis: feuch, thig an treas truaighe gu h-aithghearr.

15 Agus shéid an seachdamh aingeal a thrompaid; agus bha guthanna mòra air nèamh, ag ràdh, Rinneadh rìoghachdan an t-saoghail 'nan rìoghachdaibh do ar Tighearn, agus d'a Chrìosd-san; agus bithidh e 'na Rìgh gu saoghal nansaoghal.

16 Agus thuit na ceithir seanaire fich-ead, a bha 'nan suidhe air an caithrichibh am fianuis Dé, sìos air an aghaidh, agus rinn iad aoradh do Dhia,

17 Ag ràdh, Bheireamaid buidheachas duitse, O Thighearna Dhé uile-chumhachdaich, a ta, agus a bha, agus a bhith-eas; air son gu'n do ghabh thu do chumhachd mòr a d'ionnsuidh, agus gu'n do rìghich thu.

18 Agus bha fearg air na cinnich, agus thàinig t'fhearg-sa, agus àm nam marbh gu'n tugadh breth orra, agus gu'n tugadh tusa duais do d' sheirbhisich na fàidhean, agus do na naoimh, agus dhoibh-san air am bheil eagal t'ainme, do na big agus do na mòir, agus gu sgrìosadh tu iadsan a sgrìosas⁷ an talamh.

19 Agus dh'fhosgladh teampull Dé air nèamh, agus chunneas ann a theampull airc a' choimhcheangail: agus bha deal-

¹ a' chaitlhir.

² am béisd.

³ gun aigéal.

⁴ gihbtean.

⁵ chaitlhir.

⁶ leis a' chrith-thalmhainn.

⁷ thruailleas.

anaich, agus guthanna, agus tairneanaich, agus crith-thalmhainn, agus clocha meall-ain mòra ann.

CAIB. XII.

- 1 *Tha bean a bha sgeadaichte leis a' ghréin ri saothair-chloinne: 4 tha 'n dragon mòr dearg 'na sheasamh fa comhair, ullamh gus a leanabh a shlugadh suas. 6 'Nuair a dh'aiseadadh i, theich i do'n fhasach. 6 Chog Michael agus 'aingil an aghaidh an dragon.*

AGUS chunncas iongantas mòr air nèamh, bean air a sgeadachadh leis a' ghréin, agus a' ghealach fuidh a cos-aibh, agus air a ceann crùn do dhà reult dheug.

2 Agus air dhi bhi torrach, ghlaodh i ri saothair-chloinne, agus bha i air a pian-adh chum a h-aisead.

3 Agus chunncas iongantas eile air nèamh, agus, feuch, dragon¹ mòr dearg, aig an robh seachd cinn, agus deich adhaircean, agus air a chinn seachd crùin.

4 Agus tharruing 'earball an treas cuid do reultaibh nèimh, agus thilg e iad chum na talmhainn: agus sheas an dragon fa chomhair na mnà, a bha ullamh gu bhi air a h-aisead, chum a leanabh a shlugadh suas 'nuair a bheireadh i e.

5 Agus rug i leanabh mic, a bha gus na cinnich uile a riaghladh le slait iaruin: agus thogadh a leanabh suas chum Dhé, agus chum a righ-chaitheach-san.

6 Agus theich a' bhean do'n fhàsach, far am bheil aice ionad air ulluchadh le Dia, chum gu'm biodh i air a beathachadh an sin rè mìle, agus dà cheud agus trì fich-ead là.

7 Agus bha cogadh air nèamh; rinn Michael agus 'aingil cogadh an aghaidh an dragon; agus chog an dragon agus 'aingil féin;

8 Agus cha d'thug iad buaidh, cha mhò a fhuaradh an àite ni's mò air nèamh.

9 Agus thilgeadh a mach an dragon mòr, an t-seann nathair sin, ris an abrar an diabhul agus Sàtan, a tha mealladh an t-saoghail uile: thilgeadh a mach e chum na talmhainn, agus thilgeadh a mach 'aingil maille ris.

10 Agus chuala mi guth mòr ag ràdh air nèamh, A nis tha slàinte agus neart, agus rioghachd ar Dé-ne, agus cumbhachd a Chrìosd air teachd; oir thilgeadh sìos fear-casaid ar bràithrean, a bha 'gan casaid an làthair ar Dé-ne a là agus a dh'oidhche.

11 Agus thug iad buaidh air tre fhuil an Uain, agus tre fhocal am fianuis-san; agus cha do ghràdhaidh iad an anama féin gu bàs.

12 Uime sin biodh gàirdéachas oirbh, O

a nèamha, agus oirbhse a tha 'nur còmh-nuidh annta. An-aobhin do luchd-àit-eachaidh na talmhainn, agus na fairge! oir thàinig an diabhul a nuas do 'ur n-ionnsuidh, agus fearg ro mhòr air, do bhrìgh gur fiosrach e nach 'eil aige ach ùine ghearr.

13 Agus an uair a chunnaic an dragon gu'n do thilgeadh e chum na talmhainn, rinn e geur-leanmhuinn air a' mhnaoi a rug an leanabh mic.

14 Agus do'n mhnaoi thugadh dà sgéith iolairè mòire, chum gu'n rachadh i air itealaich leo do'n fhàsach, chum a h-ionaid féin; far am bheil i air a h-altrum rè aimsir, agus aimsirean, agus leth-aimsir², o aghaidh na nathrach.

15 Agus thilg an nathair as a beul uisge mar thuil, an déigh na mnà, chum gu'n tugadh i oirre bhi air a giùlan air falbh leis an t-sruth.

16 Agus rinn an talamh còmh-nadh ris a' mhnaoi; agus dh'fhosgail an talamh a bheul, agus shluig e suas an tuil, a thilg an dragon as a bheul.

17 Agus bha fearg air an dragon ris a' mhnaoi, agus chaidh e dheanamh cogaidh ris a' chuid eile d'a sliochd, a tha coimhead³ àitheanta Dhé, agus aig am bheil fianuis Iosa Crìosd.

CAIB. XIII.

- 1 *Dh'éirich fiadh-bheathach as an fhairge le seachd cinn agus deich adhaircean: dha-san thug an dragon a chumhachd. 11 Thàinig fiadh-bheathach eile a nìos as an talamh. 14 agus thug e fa'n-ear dealbh bhi air a dheanamh do'n cheud fhiadh-bheathach, 15 agus gu'n deanadh daoine aoradh dha, 16 agus gu'n gabhadh iad a chomhara.*

AGUS sheas mi air gaineimh na fairge, agus chunnaic mi fiadh-bheathach⁴ ag éirigh suas as an fhairge, aig an robh seachd cinn, agus deich adhaircean, agus air 'adharcaibh deich crùin, agus air a chinn ainm toibheim⁵.

2 Agus bu chosmhuil am fiadh-bheathach a chunnaic mi ri leopard, agus bha a chosan mar chosaibh math-ghamhna, agus a bheul mar bheul leòmhain: agus thug an dragon a neart, agus a chaithir⁶, agus cumhachd mòr dha.

3 Agus chunnaic mi aon d'a chinn mar gu'm biodh e air a lotadh gu bàs; agus leighiseadh a lot⁷ bàsmhor: agus ghabh an talamh uile iongantas an déigh an fhiadh-bheathaich.

4 Agus rinn iad aoradh do'n dragon, a thug a chumhachd do'n fhiadh-bheathach: agus rinn iad aoradh do'n fhiadh-bheathach, ag ràdh, Cò a ta cosmhuil ris an fhiadh-bheathach? Cò a ta comasach air cogadh a dheanamh 'na aghaidh?

¹ uabheist. ² àm, agus amanna, agus leth-àm.

³ ghleidheadh. ⁴ béist.

⁵ ainmean Dia-mhaslachaidh.

⁶ a righ-chaithir

⁷ a chneadh.

5 Agus thugadh dha beul a' labhairt riithe mòra, agus thobheimh; agus thugadh cumhachd dha cogadh a dheanamh rè dhà mhìos agus dà fhichead.

6 Agus dh'fhosgail e 'bheul ann an toibheum an aghaidh Dhé, chum toibheum a thoirt d'a ainm, agus d'a phlàill-iun¹, agus do'n dream a ta 'nan còmh-nuidh air nèamh.

7 Agus thugadh dha cogadh a dheanamh an aghaidh nan naomh, agus buaidh a thoirt orra: agus thugadh dha cumhachd os ceann gach uile thréibh, agus theangaidh, agus chinich.

8 Agus ni iadsan uile, a tha 'nan còmh-nuidh air an talamh, aoradh dha, aig nach 'eil an ainmean sgrìobhta ann an leabhar beatha an Uain, a mharbhadh o thoiseach an t-saoghail.

9 Ma tha cluas aig neach air bith, éisd-eadh e.

10 Ma bheir neach air bith am braighdeanas, théid e féin am braighdeanas: ma mharbas neach air bith leis a' chlaidheamh, is éigin e féin bhi air a mharbhadh leis a' chlaidheamh. Is ann an so a ta foighidin agus creidimh nan naomh.

11 Agus chunnaic mi fiadh-bheathach eile ag éirigh as an talamh; agus bha aige dà adhairc cosmhuil ri uan, agus labhair e mar dhragan.

12 Agus tha e a' cur an gnìomh cumhachd a' cheud fhiadh-bheathaich uile 'na fhianuis, agus tha e toirt air an talamh, agus orra-san a tha 'nan còmh-nuidh ann, aoradh a dheanamh do'n cheud fhiadh-bheathach, aig an robh a lot bàsmhor air a leigheas.

13 Agus tha e a' deanamh chomhara mòra, ionnus gu bheil e toirt air teine teachd a nuas o nèamh air an talamh, ann am fianuis dhaoine.

14 Agus tha e 'a mealladh na dream a tha 'nan còmh-nuidh air an talamh, leis na comharaibh sin a thugadh dha a dheanamh an làthair an fhiadh-bheathaich, a' ràdh ri luchd-àiteachaidh natalmhainn, ìomhaigh a dheanamh do'n bheathach aig an robh an lot claidheimh, agus a bha beò.

15 Agus thugadh cumhachd dha beatha² a thoirt do ìomhaigh an fhiadh-bheathaich, ionnus gu'n labhradh ìomhaigh an fhiadh-bheathaich, agus gu'n tugadh e fa'near gu'm biodh a mheud as nach deanadh aoradh do ìomhaigh an fhiadh-bheathaich, air am marbhadh.

16 Agus tha e toirt air na h-uile dhaoine, araon beag agus mòr, saobhir agus daoibhir³, saor agus daor, comhara a ghabhail air an làimh dheis, no air clàr an eudain;

17 Agus nach feudadh neach sam bith ceannach uo reic, ach esan aig am biodh an comhara, no ainm an fhiadh-bheathaich, no àireamh 'ainme.

18 An so tha gliocas. An ti aig am bheil tuigse, àirmheadh⁴ e àireamh an fhiadh-bheathaich: oir is àireamh dufne e; agus is e 'àireamh sè ceud agus trì fichead agus sè.

CAIB. XIV.

1 An t-Uan 'na sheasamh air slabh Shìoin maille r'a chuideachd. 6 Tha aingeal a' searmonachadh an t-soigheil. 8 Tuiteam Bhabiloìn. 15 Foghara an t-saoghail agus cur a' chorrain ann. 20 Foghara agus preas-fiona feirge Dhé.

A GUS dh'amhairc mi, agus, feuch, Uan 'na sheasamh air slabh Shìoin, agus maille ris ceud agus dà fhichead agus ceithir mìle, aig an robh ainm 'Athar-san sgrìobhta air clàr an eudain.

2 Agus chuala mi guth o fhlaithneas, mar fhuaim mhòran uisgeacha, agus mar fhuaim tairneanaich mhòir; agus chuala mi fuaim chlàrsairean, a' deanamh ciùil le'n clàrsaichibh féin:

3 Agus sheinn iad mar gu'm b'òran nuadh e an làthair na righ-chaitreach, agus an làthair nan ceithir bheathaichean, agus nan seanairean: agus cha b'urrainn neach sam bith an t-òran sin fhòghlum, ach an ceud agus dà fhichead agus na ceithir mìle, a shaoradh⁵ o'n talamh.

4 Is iad so an dream nach do shalaich-eadh le mnàibh; oir is òighean iad: is iad so an dream a tha leantuinn an Uain ge b'e àit an téid e: shaoradh iad so o mheasg dhaoine, 'nan ceud thoradh do Dhia, agus do'n Uan.

5 Agus 'nam beul cha d' fhuaradh cealg; oir tha iad gun lochd⁶ an làthair righ-chaitreach Dhé.

6 Agus chunnaic mi aingeal eile ag iteal-aich ann am meadhon nèimh, aig an robh an soisgeal sìorruidh r'a shearmonachadh dhoibh-san a tha 'nan còmh-nuidh air an talamh, agus do gach uile chinneach, agus thréibh, agus theangaidh, agus shluagh.

7 Ag ràdh le guth àrd, Biodh eagal Dé oirbh, agus thugaibh glòir dha; oir thàinig uair a bhreitheanais: agus deanaibh aoradh dha-san a rinn nèamh, agus talamh, agus an fhaireg, agus na tobair uisge.

8 Agus lean aingeal eile, ag ràdh, Thuit, thuit Babilon, am baile mòr⁷ sin, do bhrìgh gu'n d'thug i air gach uile chinneach òl do fhìon feirge a strìopachais.

9 Agus lean an treas aingeal iad, ag ràdh le guth àrd, Ma ni neach air b' h aoradh do'n fhiadh-bheathach, agus d'a ìomh-

¹ tabernacul.

² bochd.

³ spiorad.

⁴ cumtadh.

⁵ cheannaicheadh.

⁷ a' chaitir mhòr.

⁶ gun smal.

aigh, agus ma ghabhas e a chomhara air clàr 'eudain, no air a làimh,

10 Olaidh esan do fhìon feirge Dhé, a tha air a dhòrtadh gun mheasgadh, ann an cupan 'fheirge-san; agus bithidh e air a phianadh le teine agus pronnusc, am fianuis nan aingeal naomha, agus am fianuis an Uain.

11 Agus bithidh deatach am péine-san ag éirigh suas gu saoghal nan saoghal: agus cha'n 'eil fois sam bith a là no dh'oidhche aca-san a ni aoradh do'n fhiadh-bheathach agus d'a ìomhaigh, no aig neach air bith a ghabhas comhara 'ainme-san.

12 An so tha foighidin nan naomh: an so tha'n dream a choimhideas àitheanta Dhé, agus creidimh Iosa.

13 Agus chuala mi guth o nèamh, ag ràdh rium, Sgrìobh, *Is* beannaichte na mairbh a gheibh bàs san Tighearn, á so a mach: Seadh, a ta an Spiorad ag ràdh, chum gu faigh iad fois o'n saothair; agus leanaidh an oibre iad.

14 Agus dh'amhaire mi, agus, feuch, neul geal, agus air an neul *neach* 'na shuidhe cosmhuil ri Mac an duine, aig an robh crùn òir air a cheann, agus corran geur 'na làimh.

15 Agus thàinig aingeal eile mach as an teampull, a' glaochadh le guth àrd ris an ti a bha 'na shuidhe air an neul, Sàth a steach do chorrann, agus buain: oir thàinig àm dhuib buain; oir tha foghar na tal-mhainn abuich.

16 Agus shàth an ti a bha 'na shuidhe air an neul, a chorrann san talamh; agus bhuaineadh an talamh.

17 Agus thàinig aingeal eile mach as an teampull a ta air nèamh, agus corran geur aige-san mar an ceudna.

18 Agus thàinig aingeal eile mach o'n altair, aig an robh cumhachd os ceann teine, agus ghlaodh e le glaoth àrd ris an ti aig an robh an corran geur, ag ràdh, Sàth a steach do chorrann geur, agus cnuasaich baguidean¹ fionain na tal-mhainn: oir a ta a fion-dhearcan làn abuich.

19 Agus shàth an t-aingeal a chorrann san talamh, agus chnuasaich e fionain na tal-mhainn, agus thèig e i ann am fion-amar mòr feirge Dhé.

20 Agus shaltradh am fion-amar an taobh a muigh do'n bhaile, agus thàinig fuil a mach as fion-amar, gu sréin nan each, feadh mhìle agus shè ceud stàid².

CAIB. XV.

1 Na seachd aingil leis na seachd plàighibh deireannach. 3 Oran na muinntir a bhuaidhaicheas air an

fhiadh-bheathach. 7 Na seachd soithiche làn do fheirge Dhé.

AGUS chunnaic mi comhara eile air nèamh, mòr agus iongantach, seachd aingil aig an robh na seachd plàighean deireannach; oir anna so tha fearg Dhé air a coimhlionadh.

2 Agus chunnaic mi mar gu'm b'fhaire ghlòine, air a measgadh le teine; agus iadsan a thug buaidh air an fhiadh-bheathach, agus air 'ìomhaigh, agus air a chomhara, agus air àireamh 'ainme, 'nan seasamh air an fhaire ghlòine, agus clàrsaiche Dhé aca.

3 Agus tha iad a' seinn òrain Mhaois³ òglaich Dhé, agus òrain an Uain, ag ràdh, *Is* mòr, agus *is* iongantach t'òibre, a Thighearna Dhé uile-chumhachdaich; *is* ceart agus *is* fìor do shlighean-sa, a Rìgh nan naomh.

4 Cò air nach biodh eagal romhad, O Thighearn, agus nach tugadh glòir do t'ainm? oir *is tusa* a mhàin a ta naomh: oir thig na h-uile chinnich, agus ni iad aoradh ann do làtlair; do bhrìgh gu bheil do bhreitheanais air an deanamh follaiseach.

5 Agus an déigh so dh'amhaire mi, agus, feuch, dh'fhosglaidh teampull pàilliun na fianuis air nèamh.

6 Agus thàinig a mach as an teampull na seachd aingil, aig an robh na seachd plàighean air an sgèdachadh le lion-eudach glan agus dealrach⁴, agus air an crioslachadh⁵ mu'n uchd le criosaibh òir.

7 Agus thug aon do na ceithir bheathaichibh do na seachd aingil seachd soithichean òir, làn do fheirge an Dé a ta beò gu saoghal nan saoghal.

8 Agus lìonadh an teampull le deataich o ghloir Dhé, agus o 'chumhachd-san; agus cha b'urraim neach sam bith dol a stigh do'n teampull, gus am biodh seachd plàighean nan seachd aingeal air an coimhlionadh.

CAIB. XVI.

1 Dhòirt na h-aingil a mach an soithiche làn do fheirge: 6 Na plàighean a tha leantuinne air sin. 15 Thig Crìosd mar ghaduiche: is beannaichte iadsan a ni faire.

AGUS chuala mi guth mòr as an teampull, ag ràdh ris na seachd aingil, Imichibh, agus taomaibh soithiche feirge Dhé air an talamh.

2 Agus dh'imich an ceud aingeal, agus thaom e a shoitheach air an talamh; agus dh'éirich droch neasgaid nimhneach air na daoimibh sin aig an robh comhara an fhiadh-bheathaich, agus orra-san a rinn aoradh d'a ìomhaigh.

3 Agus thaom an dara aingeal a shoith-

¹ triopuill.

² i. e. an t-òchdamh cuid do mhìle fearainn.

³ chan iad laoidh Mhaois.

⁴ geal.

⁵ air an criosrachadh.

each san fhaire; agus rinneadh i mar fhuil *duine* mhairbh: agus fhuair gach anam beò bàs anns an fhaire.

4 Agus thaom an treas aingeal a shoitheach anns na h-aimhnichibh agus anns na tobraichibh uisge; agus rinneadh iad 'nam fuil.

5 Agus chuala mi aingeal nan uisgeacha ag ràdh, Is cothromach thusa, O Thigh-earn, a ta, agus a bha, agus a bhitheas, do bhrìgh gu'n d' thug thu breth air an dòigh so:

6 Oir dhòirt iadsan fuil naomh agus fhàidhean, agus thug thusa dòibh fuil r'a h-òl; oir is toillteanach iad.

7 Agus chuala mi neach eile o'n altair ag ràdh, Seadh, a Thighearna Dhé uile-chumhachdaich, is fìor agus cothromach do bhreitheanais.

8 Agus thaom an ceathramh aingeal a shoitheach air a' ghréin; agus thugadh *cumhachd* dha daoine a phiaudh le h-ain-teas teine.

9 Agus bha daoine air an losgadh le teas mòr, agus thug iad toibheum do ainm Dhé, aig am bheil cumhachd air na plàighibh sin: agus cha d'rinn iad aithreachas, chum glòir a thoirt dha-san.

10 Agus thaom an cùigeadh aingeal a shoitheach air rìgh-chaitheir an fhiadhbheathaich; agus rinneadh a rìoghachd dorch; agus chagainn *daoine* an teanganna tre phléin,

11 Agus thug iad toibheum¹ do Dhia nèimh air son am pianta agus an creuchda, agus cha do ghabh iad aithreachas d'an gnìomharaibh.

12 Agus thaom an seathadh aingeal a shoitheach air an amhainn mhòir Euphrates; agus thiormaicheadh a h-uisge, chum gu'n nulluicheadh slighe rìghrean na h-àirde n ear.

13 Agus chunnaic mi *teachd* a mach á beul an dragoin, agus á beul an fhiadhbheathaich, agus á beul an fhàidh-bhréige, trì spiorada neòghlan, cosmhuil ri losg-uinn.

14 Oir is iad sin spiorada dheamhan, a' deanamh chomhara, a tha dol a mach chum rìghre na talmhainn, agus an domhain uile, gu'n cruinneachadh chum catha là mhòir sin an Dé uile-chumhachdaich.

15 Feuch, a ta mi a' teachd mar ghaduiche. Is beannaichte esan a ni faire, agus a ghleidheas 'eudach, chum nach imich e lomnochd, agus nach faic *daoine* a nàire.

16 Agus chruinnich e iad r'a chéile chum ionaid ris an abrar san Eabhra, Armagedon.

17 Agus thaom an seachdamh aingeal a

sloitheach san athar²; agus thàinig guth mòr a mach á teampull nèimh, o'n rìgh-chaitheir, ag ràdh, Tha e deanta.

18 Agus bha guthanna, agus tairmean-aich, agus dealanaich ann; agus bha crith mhòr talmhainn ann, nach robh a leithid ann o bha daoine air an talmh, a samhail do chrith-talmhainn co mhòr.

19 Agus bha am baile mòr³ air a roinn 'na trì earrannaibh, agus thuit bailtean nan cinneach: agus thàinig Babilon mhòr an cuimhne an làthair Dhé, a thoirt di copan fìona fraoich 'fheirge⁴.

20 Agus theich gach uile eilean as, agus cha d'fhuaradh na beannta.

21 Agus thàinig clacha-meallain mòra⁵ a nuas o nèimh air daoineibh, *gach clach* co throm ri talann: agus thug daoine toibheum do Dhia, air son plàigh nan clacha-meallain; oir bha am plàigh-san ro mhòr.

CAIB. XVII.

1 *Tha bean air a sgeadachadh le purpur agus scar-laid, agus copan òir 'na làimh, 'na suidh air an fhiadhbheathach, 5 neach a's i Babilon mhòr, màthair nan gràineileachd. 9 Eadar-mhìneachadh nan seachd ceann, 12 agus nan deich adhaircean.*

A GUS thàinig aon do na seachd aingil aig an robh na seachd soithichean, agus labhair e rium, ag ràdh rium, Thig an so; noclaidh mi dhuit bràitheanas na striopache mòire, a tha 'na suidhe air mòran uisgeacha:

2 Ris an d'rinn rìghre na talmhainn striopachas, agus aig an do chuireadh luchd-àiteachaidh na talmhainn air mhìsg le fion a striopachais.

3 Agus thug e leis mi anns an spiorad do'n fhàsach: agus chunnaic mi bean 'na suidhe air fiadh-bheathach air ghath scar-laid, làn do ainmibh toibheim⁶, air an robh seachd cinn agus deich adhaircean.

4 Agus bha a' bhean air a sgeadachadh ann am purpur, agus ann am scar-laid, agus air a deanamh breagha le h-òr, agus clachaibh luachmhor, agus neamhmuidibh, agus copan òir aice 'na làimh, làn do ghràineileachd agus do neò-ghloine a striopachais.

5 Agus air clàr a h-eudain bha ainm sgrìobhta, RUN-DIOMHAIR, BABILON MHOR, MATHAIR NAN STRIOPACH AGUS GHRAINEILEACHDA NA TALMHAINN.

6 Agus chunnaic mi a' bhean air mhìsg le fuil nan naomh, agus le fuil fhianuis-ean⁷ Iosa: agus an uair a chunnaic mi i, ghabh mi iongantas le h-iongantas mòr.

7 Agus thubhairt an t-aingeal rium, C'ar

¹ masladh.

² a' chaitheir mhòr.

³ aidhear.

⁴ 'fheirge ro gharg.

⁵ cleich-shneachd mhòr.

⁶ Dia-mhaslachaidh.

⁷ mhairtireach.

son a ghabh thu iongantas? Innsidh mise dhuit rùn-dìomhair na mnà, agus an fhiadh-bheathaich a tha 'ga giùlan, air am bheil na seachd cinn agus na deich adhaircean.

8 Am fiadh-bheathach a chunnaic thu, bha e, agus cha 'n 'eil e ann; agus éiridh e suas 's sìochd an dubh-aigein¹, agus théid e am mugha²: agus gabhaidh luchd-àiteachaidh na talmhainn, (aig nach 'eil an ainmean sgrìobhta ann an leabhar na beatha o thoiseach an t-saoghail,) iongantas, 'nuair a chi iad am fiadh-bheathach³ a bha, agus nach 'eil, agus a bhitheas ann⁴.

9 An so a ta an inntinn aig am bheil gliocas. Na seachd cinn is seachd sléibhteann iad, air am bheil a' bhean 'na suidhe.

10 Is seachd rìghrean iad mar an ceudna: tha cùig *dhiubh* air tuiteam, agus a ta h-aon ann: cha d'fhàinig am fear eile fathast; agus an uair a thig e, is éigin da fantuinn rè ùine bhig.

11 Agus am fiadh-bheathach a bha, agus nach 'eil ann, is esan an t-òchdamh, agus tha e o'n t-seachdnar, agus théid e am mugha.

12 Agus na deich adhaircean a chunnaic thu, is deich rìghrean iad, nach d'fhuair rioghachd fathast, ach a ta faotainn cumhachd mar rìghrean rè aon uaire maille ris⁵ an fhiadh-bheathach.

13 Tha aca sin aon inntinn, agus bheir iad an neart agus an cumhachd do'u fhiadh-bheathach.

14 Ni iad sin cogadh an aghaidh an Uain, agus bheir an t-Uan buaidh orra: oir is esan Tighearna nan Tighearna, agus Rìgh nan Rìgh; agus *tha* an dream a tha maille ris, air an gairm, agus air an taghadh, agus dileas.

15 Agus tha e ag ràdh rium, Na h-uisgeachan a chunnaic thu, far am bheil an strìopach 'na suidhe, is slòigh, agus coimhthionail, agus cinnich, agus teanganna iad.

16 Agus na deich adhaircean a chunnaic thu air an fhiadh-bheathach, bheir iad sin fuath do'n strìopaich, agus ni iad fàs i, agus lomnochd, agus ithidh iad a feòil, agus loisgidh iad i le teine.

17 Oir chuir Dia 'nan cridhe a thoil a choimhlionadh, agus a bhi dh'aon chomhairle, agus an rioghachd a thoirt do'n fhiadh-bheathach, gus an coimhlionar briathran Dhé.

18 Agus is i a' bhean a chunnaic thusa, am baile mòr⁶ sin, a tha rioghachadh⁷ os ceann rìghre' na talmhainn.

CAIB. XVIII.

1 *Thuit Babilon: 4 thugadh àithne do phobull Dé imeachd aisde: 9 rinn rìghre na talmhainn, 11 maille ris na ceannaichibh agus na maraichibh, bròn air a son: 20 rinn na naoimh gàirdcachas air son breitheanais Dé oirre.*

A GUS an dèigh nan nithe so chunnaic mi aingeal eile teachd a nuas o nèamh, aig an robh cumhachd mòr; agus dhealraich an talamh le 'ghlòir.

2 Agus ghlaodh⁸ e gu làidir le guth mòr, ag ràdh, Thuit, thuit Babilon mhòr, agus rinneadh i 'na h-àite-còmhnuidh dheamhan, 'na prìosan⁹ do gach spiorad neòghlan, 'na h-ionad cumail do¹⁰ gach eun neòghlan agus fuath-mhor.

3 Oir dh'òl na h-uile chinnich do fhion feirge a strìopachais, agus rinn rìghre na talmhainn strìopachas rithe, agus rinneadh saoihbhir ceannaichean na talmhainn le pailteas a sògha¹¹.

4 Agus chuala mi guth eile o nèamh, ag ràdh, Thigibh a mach aisde, mo phobull, chum nach bi sibh comhpairteach d'a peacaibh, agus nach faigh sibh *cuid* d'a plàighibh;

5 Oir tha a peacanna air ruigheachd¹² suas gu nèamh, agus chuimhuich Dia a h-eucearta.

6 Thugaibh ath-dhiol di mar a dhiol ise ribh, agus thugaibh dhi a dhà uiread, a rèir a h-òibre: anns a' chupan a lion i, lionaibh a dhà uiread di.

7 A mheud as a ghlòraich si i féin, agus a chaith i a beatha gu sòghail, co mòr as sin thugaibh dhi do pheanas agus do bhròn: oir a ta i ag ràdh 'na cridhe féin, Tha mi a'm' shuidhe a'm' bhan-righinn, agus cha bhantrach mi, agus cha'n fhaic mi bròn.

8 Uime sin ann an aon là thig a plàigh-ean, bàs, agus bròn, agus gorta; agus loisgear i gu tur le teine: oir is neartmhor an Tighearna Dia a bheir breth oirre.

9 Agus ni rìghre na talmhainn, a rinn strìopachas agus a chaith am beatha gu sòghail maille rithe, gu' agus caoidh air a son, 'nuair a chi iad deatach a losgaidh,

10 A' seasannh fad as, tre eagal a peanaais, ag ràdh, Mo thruaighe, mo thruaighe! a' chaithir mhòr¹³ sin Babilon, a' chaithir threun sin! oir ann an aon uair thàinig do bhreitheanas.

11 Agus ni ceannaichean na talmhainn gu' agus caoidh air a son; oir cha cheannaich neach sam bith an bathar¹⁴ ni's mò.

12 Bathar òir, agus airgid, agus chlach luachmhor, agus neamhuidean, agus lìon-eudaich ghrinn, agus phurpuir, agus

¹ as an t-sìochd gun iochdar.

² sgrìosar e.

³ am béist.

⁴ gèidheadh a ta ann.

⁵ san aon uair ris.

⁶ a' chaithir mhòr. ⁷ a'g am bheil uachdaranachd.

⁸ dh'èigh.

¹⁰ 'na h-eunadan.

¹² air leantainn.

¹⁴ am marsantachd, an earradh.

⁹ gainntir.

¹¹ a sàimhe.

¹³ am baile mòr.

shìde, agus scarlaid, agus gach uile ghnè fhiodha thine, agus gach uile ghnè shoithiche do ibhori¹, agus gach uile ghnè shoithiche do fhiodh ro luachmhor, agus do umha, agus do iarunn, agus do mhar-mor,

13 Agus canal, agus nithe deadh-fhàile, agus oladh-ungaidh, agus tùis, agus fìon, agus oladh, agus min mhin², agus cruith-neachd, agus ainmhidlean, agus caoraich, agus eich, agus carbadan, agus tràilleán, agus anama dhaoine.

14 Agus dh'imich na toraidh, air an robh mòr dhèidh t'anama, uait, agus dh'imich na h-uile nithe annasach agus maiseach uait, agus cha 'n fhaigh thu iad ni's mò.

15 Seasaidh ceannaichean nan nithe so a rinneadh saoihbhir leatha, am fad, air eagal a peanais, a' gul agus a' caoidh,

16 Agus ag ràdh, Is truagh, am baile mòr sin, a bha air a sgeadachadh le lìon-eudach grinn, agus purpur, agus scarlaid, agus a bha air a dheanamh breagha³ le h-òr, agus le clachaibh luachmhor, agus le neamhnuidibh!

17 Oir ann an aon uair thùgadh saoihbheas cò mòr gu neo-ni. Agus sheas gach uile long-mhaighstir⁴, agus gach uile chuideachd a theid air longaibh, agus na seòladairean, agus a' mheud 's a ni gnoth-uichean air faire, am fad,

18 Agus ghlaodh iad, an uair a chunnaic iad deatach a losgaidh, ag ràdh, Cò e am baile a's cosmhail ris a' bhaile mhòr so?

19 Agus thilg iad duslach air an cinn, agus ghlaodh iad, a' gul agus a' caoidh, ag ràdh, Is truagh, is truagh, am baile mòr sin, anns an d'rinneadh saoihbhir iad-san uile aig an robh longa air an fhaighe, tre a ghreadhnachas-san! oir ann an aon uair dh'fhàicheadh e.

20 Dean gairdeachas os a cheann, o a nèamh, agus sibhse abstola naomha agus fhàidhean: oir dhìol Dia sibhse air.

21 Agus thog aingeal treun clach mar chloich-mhuilinn mhòir, agus thilg e san fhaighe i, ag ràdh, Is ann mar so le neart a thilgear sìos am baile mòr sin Babilon, agus cha'n fhaighear e ni's mò.

22 Agus cha chluinnear annad ni's mò fuaim chlàrsairean, agus luchd-ciùil, agus fhìobairean, agus thrompadairean; agus cha'n fhaighear annad ni's mò fear-ceird, do ghnè ceirde sam bith; agus cha chluinnear fuaim cloiche-muilinn annad ni's mò;

23 Agus cha soillsich solus coinnle⁵ annad ni's mò; agus chluinnear annad ni's mò guth fear-bainne no bean-bainne⁶: oir b'iad do cheannaichean daoine mòra na talmhainn; agus le d'

dhruidheadh bha na h-uile chinnich air am mealladh:

24 Agus fhuaradh ann fuil fhàidhean, agus naomh, agus nan uile dhaoine a mharbhadh air an talamh.

CAIB. XIX.

1 *Tha Dia air a chliùthachadh, air son gu'n d'thug e breth air an strìopaich mhòir, agus gu'n do dhìol e fuil a naomh. 7 Banais an Uain, &c.*

AGUS an dèigh nan nithe so, chuala mi guth àrd mhòr-shluaigh air nèamh, ag ràdh, Aleluia; Slàinte, agus glòir, agus urram, agus cumhachd do'n Tighearn ar Dia-ne:

2 Oir is flor agus is cothromach a bhreitheanais; oir thug e breth air an strìopaich mhòir, a thruaill an talamh le a strìopachas, agus dhìol e fuil a sheirbhis-each fèin air a làimh.

3 Agus a ris thubhairt iad, Aleluia. Agus chaidh a deatach suas gu saoghal nan saoghal.

4 Agus thuit na ceithir seanaire fichead, agus na ceithir bheathaiche sìos, agus rinn iad aoradh do Dhia, a bha 'na shuidhe air an rìgh-chaitheir, ag ràdh, Amen; Aleluia.

5 Agus thàinig guth a mach o'n rìgh-chaitheir, ag ràdh, Molaihb ar Dia-ne, sibhse uile a's seirbhisich dha, agus air am bheil 'eagal-san, eadar bheag agus mhòr.

6 Agus chuala mi mar ghuth mòr-shluaigh, agus mar fhuaim mhòran uisgeacha, agus mar thoirm tairneanaich chumhachdaich, ag ràdh, Aleluia: oir a ta an Tighearna Dia uile-chumhachdach a' rioghachadh.

7 Bitheamaid aoibhinn agus deanamaid gairdeachas, agus thugamaid glòir dhasan: oir thàinig pòsadh an Uain, agus dh'ulluich a bhean i fèin.

8 Agus thugadh dhi gu'm biodh i air a sgeadachadh le lìon-eudach grinn, glan agus dealrach: oir is e an lìon-eudach grinn fireantachd nan naomh.

9 Agus thubhairt e rium, Sgrìobh, Is beannaichte iadsan a tha air an cuireadh gu suipeir-bhainne an Uain. Agus thubhairt e rium, Is iad so briathra fìrinneach Dhè.

10 Agus thuit mi sìos aig a chosaibh chum aoradh dheanamh dha: agus thubhairt e rium, Feuch nach dean thu e: is comh-sheirbhis-each dhuit fèin mise, agus do d' bhràithribh aig am bheil fianuis Iosa: dean aoradh do Dhia: oir is i fianuis Iosa spiorad na fàidheadaireachd.

11 Agus chunnaic mi nèamh air fhosg-ladh, agus, feuch, each geal; agus ghoir-

¹ fhiac-laibh elephant; ivory. Sasg.

² plàir mìn.

³ air dradh.

⁴ fhear-sliùraidh.

⁵ òichrain.

⁶ fir-bainne no mu-bainne.

eadh do'n ti a sluidh air Dileas, agus Fìor; agus ann am fireantachd tha e deanamh breitheanaïs agus cogaidh.

12 Agus bha a shùilean mar lasair theine, agus air a cheann bha mòran chrùn; agus bha ainm aige sgrìobhta, nach b' aithne do neach sam bith acli e fèin;

13 Agus bha e air a sgeadachadh le trusgan¹ tumta am fuil: agus is e'n t'ainm a ghoirear dheth, FOCAL DE.

14 Agus lean na h-armailtean a bha air nèamh e air eachaibh geala, air an sgeadachadh le lìon-eudach grinn, geal agus glan.

15 Agus as a bheil tha claidheamh geur a' dol a mach, chum gu'm buailleadh e na cinnich leis; agus riaghlaidh e iad le slait iarunn: agus tha e a' saltradh fìon-amair fraoich feirge² an Dé uile-chumhachdaich.

16 Agus tha aige air a thrusgan agus air a leis ainm sgrìobhta, RIGH NAN RIGH, AGUS TIGHEARNA NAN TIGHEARNA.

17 Agus chunnaic mi aingeal àraidh 'na sheasamh sa' ghrèin; agus ghlaodh e le guth àrd, ag ràdh ris an eunlaith uile, a bha 'g itealaich ann am meadhon nèimh, Thigibh, agus cruinnichibh sibh fèin chum suiper an Dé mhòir;

18 Chum gu'n ith sibh feòil rìghrean, agus feòil àrd-cheannard, agus feòil dhaoine cumhachdach, agus feòil each agus na muinntir a shuidheas orra, agus feòil nan uile dhaoine, araon shaor agus dhaor, araon bheag agus mhòr.

19 Agus chunnaic mi am fiadh-bheathach, agus rìghrean na talmhainn, agus an armailtean air an cruinneachadh, a dheanamh cogaidh an aghaidh an ti a bha 'na shuidhe air an each, agus an aghaidh 'armailt-san.

20 Agus ghlacadh am fiadh-bheathach, agus maille ris-san am fàidh-bréige a rinn miorbhuilean 'na làthair, leis an do mheall e an dream a ghabh orra comhara an fhiadh-bheathaich, agus iadsan a rinn aoradh d'a ìomhaigh. Thilgeadh iad sin 'nan dithis beò ann an loch teine a' dearg-lasadh le pronnus.

21 Agus mharbhadh a' chuid eile le claidheamh an ti a bha 'na shuidhe air an each, a thàinig a mach as a bheil: agus bha an eunlaith uile air an lìonadh le'm feòil.

CAIB. XX.

1 Satan ceangailte rè mhìle bliadhna. 5 A' cheud aiseirigh: 6 tha iad beannaichte aig am bheil cuid dhith. 7 Satan aris air fhuasgladh. 8 Gog agus Magog. 10 Thilgeadh an Diabhl do'n loch theine agus phronnuis.

A GUS chunnaic mi aingeal, a' teachd a nuas o nèamh, agus iuchair sluichd an dubh-aigein³ aige, agus slabhraidh mhòr 'na làimh.

2 Agus rug e air an dragon, an t-seann nathair nimhe sin, a's e an diabhl agus Sàtan, agus cheangail se e rè mhìle bliadhna;

3 Agus thilg se e do shlochd an dubh-aigein, agus dhùin e stigh e, agus chuir e seula air, chum nach mealladh e na cinnich tuilleadh, gus an crìochnaicheadh⁴ am mìle bliadhna: agus an dèigh sin, is éigin gu fuasgailear e rè ùine bhig.

4 Agus chunnaic mi rìgh-chaitheirichean, agus shuidh iad orra, agus thugadh breitheanas doibh: agus chunnaic mi anaman na muinntir d'an do chuireadh an cinn air son fianuis Iosa, agus focail Dé, agus nach d'rinn aoradh do'n fhiadh-bheathach, no d'a ìomhaigh, agus nach do ghabh a chomhara air clàr an eudain, no air an làmhaidh; agus bha iad beò, agus rìghich iad maille ri Crìosd rè mhìle bliadhna.

5 Ach cha d'ath-bheothaicheadh a' chuid eile do na mairbh gus an robh am mìle bliadhna air an crìochnachadh. Is i so a' cheud aiseirigh.

6 Is beannaichte agus is naomha an ti aig am bheil cuid anns a' cheud aiseirigh: orra so cha'n 'eil cumhachd aig an dara bàs; ach bithidh iad 'nan sagartaibh do Dhia, agus do Chrìosd, agus rìghichidh iad maille ris mìle bliadhna.

7 Agus an uair a chrìochnaichear am mìle bliadhna, fuasgailear Sàtan as a phrìosan,

8 Agus théid e mach a mhealladh nan cinneach, a tha ann an ceithir chearnaibh na talmhainn, Gog agus Magog, chum an cruinneachadh gu cath; muinntir a tha ann an àireamh mar ghaineimh na fairge.

9 Agus chaidh iad suas air leud na talmhainn, agus chuairtich iad camp nan naomh, agus am baile⁵ ionmhuinn: agus thàinig teine nuas o Dhia á nèamh, agus chuir e as doibh.

10 Agus thilgeadh an diabhl a mheall iad, san loch theine agus phronnuis, far am bheil am fiadh-bheathach, agus am fàidh bréige, agus bithidh iad air am pianadh a là agus a dh'oidhche, gu saoghal nan saoghal.

11 Agus chunnaic mi rìgh-chaitheir mhòr gheal, agus an ti a shuidh oirre, neach d'an do theich nèamh agus talamh o a ghuais; agus cha d'fhuaradh àite dhoibh.

12 Agus chunnaic mi na mairbh, beag agus mòr, 'nan seasamh am fianuis Dé; agus dh'fhosgladh na leabhraichean: agus dh'fhosgladh leabhar eile, eadhon

¹ falluing, eudach-uachdair.
² feirge ro gharg.

³ an t-sluichd gun aigeal.

⁴ an coimhliontadh.

⁵ a' chaitheir.

teabhar na beatha : agus thugadh breth air na mairbh as na nithibh sin a bha sgrìobhta sna leabhraichibh, a réir an gnìomhara.

13 Agus thug an fhainge uaipe¹ na mairbh a bha innte ; agus thug am bàs agus an uigh² uatha na mairbh a bha aunta : agus thugadh breth orra gach aon a réir an gnìomhara.

14 Agus thilgeadh am bàs agus ifrinn do'n loch theine : Is e so an dara bàs.

15 Agus ge b'e air bith nach d' fhuaradh sgrìobhta, ann an leabhar na beatha, thilgeadh e san loch theine.

CAIB. XXI.

1 Nèamh nuadh agus talamh nuadh. 10 An Ierusalem nèamhaidh, maille ri làn-mhìneachadh oirre : 23 cha' n' eil feum aice air grèin ; oir is i glòir Dhé a solus. 24 Tha rìghrean na talmhainn a' toirt an saoihbheas d'a h-ionnsuidh.

AGUS chunnaic mi nèamh nuadh, agus talamh nuadh : oir chaidh an ceud nèamh agus an ceud talamh thairis ; agus cha robh faire ann ni's mò.

2 Agus chunnaic mise Eòin am baile naomh, Ierusalem nuadh, a' teachd a nuas o Dhia á nèamh, air ullachadh mar bhean-bàinse air a sgeadachadh fa chomhair a fir.

3 Agus chuala mi guth mòr á nèamh a' ràdh, Feuch, tha pàillium Dhé maille ri daoineibh, agus nì esan còmhnuidh maille riu, agus bithidh iadsan 'nan sluagh dha, agus bithidh Dia féin maille riu, agus 'na Dhia dhoibh.

4 Agus tiormaichidh Dia gach deur o'n sùilibh ; agus cha bhi bàs ann ni's mò, no bròn, no éighich³, agus cha bhi pian ann ni's mò ; oir chaidh na ceud nithe thairis.

5 Agus thubhairt an tì a bha 'na shuidhe air an rìgh-chathair, Feuch, tha mi a' deanamh na uile nithe nuadh. Agus thubhairt e rium, Sgrìobh, oir tha na briathra so fìrinneach agus dìleas.

6 Agus thubhairt e rium, Tha e deanta. Is mise Alpha agus Omega, an toiseach agus an deireadh : bheir mi dha-san air am bheil tart, do thobar uisge na beatha gu saor.

7 Sealbhaichidh an tì a bheir buaidh na h-uile nithe ; agus bithidh mise a'm' Dhia dha-san, agus bithidh esan 'na mhac dhomh-sa.

8 Ach aig an dream sin a ta gealtach, agus mi-chreideach, agus graineil, agus aig luchd mortaidh, agus strìopachais, agus druidheachd, agus ìodhol-aoraidh, agus aig na h-uile bhrengairibh, bithidh an cuibhrionn anns an loch a ta dearg-

lasadh le teine agus pronnusc ; nì a's e an dara bàs.

9 Agus thàinig a m' ionnsuidh aon do na seachd aingil, aig an robh na seachd soithichean làn do na seachd plàighibh deireannach, agus labhair e rium, ag ràdh, Thig an so, nochdaidh mise dhuit a' bhean nuadh-phòsda, bean an Uain.

10 Agus thug e leis mi anns an spiorad gu beinn mhòir agus àird, agus dh'fheuch e dhomh am baile mòr⁴ sin, Ierusalem naomh, a' teachd a nuas á nèamh o Dhia,

11 Aig an robh glòir Dhé : agus bha a shoille⁵ cosmhuil ri cloich ro luachmhoir, mar chloich Iaspis, soilleir mar chrìostal ;

12 Agus bha balla mòr agus àrd aig, air an robh dà gheata dheug, agus aig na geataibh dà aingeal dheug, agus ainmean sgrìobhta orra, eadhon ainmean dà thréibh dheug chloinn Isracil.

13 Air an taobh an car, trì gheatacha ; air an taobh thuath, trì gheatacha ; air an taobh deas, trì gheatacha ; agus air an taobh an iar, trì gheatacha.

14 Agus bha aig balla na caithreach dà bhunait dheug, agus aunta-san ainmean dà abstol deug an Uain.

15 Agus bha aig au tì a labhair rium, cuile-shlat òir, chum gu'n tomhaiseadh e am baile, agus a gheatacha, agus a bhalla.

16 Agus tha am baile 'na luidhe ceithir-chearnach, agus tha 'fhad co mòr r'a leud : agus thomhais e am baile leis a' chuile-shlait, dà mhìle dheug stàide : is ionnan fad, agus leud, agus àirde dha.

17 Agus thomhais e a bhalla, ceud agus dà fhichead agus ceithir làmh-a-coille⁶, a réir tomhais duine, eadhon an aingil.

18 Agus bha a bhalla air a thogail do chloich Iaspis ; agus b'òr fìor-ghlan am bàile⁷, cosmhuil ri glòin shoilleir⁸.

19 Agus bha bunaitean⁹ balla a' bhaile air an deanamh sgìamhach leis gach uile ghnè chlocha luachmhor. Bu Iaspis an ceud bunait ; bu shaphìr, an dara ; bu chalcèdon, an treas ; bu emerald, an ceathramh bunait ;

20 Bu shardonics, an cuigeach ; bu shardiis, an seathadh ; bu chrisolit, an seachdamh ; bu bheril, an t-ochdamh ; bu topas, an naothadh ; bu chrisoprasus, an deicheamh ; bu hiacint, an t-aon deug ; bu ametist, an dara bunait deug.

21 Agus an dà gheata dheug bu dà neamhnuid dheug iad ; bha gach aon fa leth do na geataibh air a dheanamh do aon neamhnuid : agus b'òr fìor-ghlan sràid a' bhaile, mar ghloin shoilleir.

22 Agus cha'n fhaca mi teampull ann :

¹ uaihe.

³ glaothaich.

⁵ sholus, dealradh.

² ifrinn.

⁴ a' chathair mhòr.

⁶ bun-làmh.

⁷ a' chathair.

⁸ trid-shoilleach, tre'n dealraich an solus.

⁹ buinn, bunachair.

oir is e'n Tighearna Dia uile-chumhachd-ach, agus an t-Uan a's teampull da.

23 Agus cha'n 'eil feum aig a' bhaile air a' ghrèin no air a' ghealaich a dhealachadh ann: oir shoillsich glòir Dhé e, agus is e an t-Uan a's solus da.

24 Agus gluaisidh cinnich na muinntir sin a shaorar 'na sholus: agus bheir rìghre na talmhainn an glòir agus an urram d'a ionnsuidh.

25 Agus cha dhìnear a gheatacha san là: oir cha bhi oidhche an sin.

26 Agus bheirear glòir agus urram nan cinneach d'a ionnsuidh.

27 Agus cha téid air chor sam bith a steach ann ni air bith a shalacheas, no a dh'oirbicheas gràineileachd, no a ni breug: ach iadsan a mhàin a tha sgrìobhta ann an leabhar beatha an Uain.

CAIB. XXII.

1 Amhainn uisge na beatha, 2 craobh na beatha.

5 'Se Dia féin solus na caithreach. 9 Cha'n fhualaing an t-aingeal aoradh a dheanamh dha.

18 Cha'n fheadar ni sam bith chur ri focal Dé, no thoirt uaidh.

AGUS dh'fheuch e dhomh amhainn fhior-ghlan do uisge na beatha, soilleir mar chrìostal, a' teachd a mach á rìgh-chaitheir Dhé, agus an Uain.

2 Ann am meadhon sràide na caithreach, agus air gach taobh do'n amhainn, bha craobh na beatha, a' giùlan dà ghnè dheug thoraidh, agus a' toirt a toraidh uaipe gach uile mhìos; agus bha duilleadh na craoibhe chum leighis nan cinneach.

3 Agus cha bhi mallachd air bith ann ni's mò: ach bithidh rìgh-chaitheir Dhé agus an Uain innte; agus ni a sheirbhisich seirbhis da.

4 Agus chi iad 'aghaidh; agus bithidh 'ainm-san air clàr an eudain.

5 Agus cha bhi oidhche an sin, agus cha'n 'eil feum aca air coinnil, no air solus na gréine: oir bheir an Tighearna Dia solus doibh: agus rìghichidh iad gu saoghal nan saoghal.

6 Agus thubhairt e rium, Tha na briathra so dileas agus fìrinneach. Agus chuir an Tighearna, Dia nam fàidhean naomha, 'aingeal féin a nochdadh d'a sheirbhisich na nithe sin a's éigin tachairt gu h-aithghearr.

7 Feuch, tha mi a' teachd gu luath: is beannaichte an ti a choimhideas briathra fàidheadaireachd an leabhair so.

8 Agus chunnaic mise Eoin na nithe so, agus chuala mi iad: agus an uair a chuala agus a chunnaic mi iad, thuit mi sìos a deanamh aoraidh roimh chosaibh an aingil, a nochd na nithe so dhomh.

9 An sin thubhairt e rium, Feuch nach dean thu e: oir is comh-sheirbhisich dhuìt mise, agus do d' bhràithribh na fàidhean, agus dhoibh-san a choimhideas briathran an leabhair so: dean aoradh do Dhia.

10 Agus thubhairt e rium, Na seulaich focail fàidheadaireachd an leabhair so: oir tha an t-àm am fagus.

11 An ti a ni eucoir, deanadh e eucoir a ghnàth: agus an ti a tha salach, biodh e salach a ghnàth: agus an ti a tha 'na fhìrean, biodh e 'na fhìrean a ghnàth: agus an ti a tha naomh, biodh e naomh a ghnàth.

12 Agus, feuch, tha mi a' teachd gu h-aithghearr; agus a ta mo luach-saoithreach maille rium, a thoirt do gach aon fa leth, a réir mar a bhitheas a ghnìomhara.

13 Is mise Alpha agus Omega, an toiseach agus a' chrìoch, an ceud neach agus an neach deireannach.

14 Is beannaichte iadsan a ni 'aitheantasan, chum gu'm bi còir aca air craoibh na beatha, agus gu'n teid iad a stigh tre na geataibh do'n bhaile.

15 Oir an taobh a muigh tha madraidh, agus luchd-druidheachd, agus luchd-strìopachais, agus luchd-mortaidd, agus luchd ìodhol-aoraidh, agus gach neach a ghràdhaicheas, agus a ni breug.

16 Chuir mise Iosa m'aingeal a dheanamh fianuis duihbhe air na nithibh so anns na h-eaglaisibh. Is mise freumh agus gineal Dhaibhidh, an reult dhealach agus mhaidne.

17 Agus a ta an Spiorad agus a' bhean nuadh-phòsda ag ràdh, Thig. Agus abradh an ti a chluinneas, Thig. Agus an neach air am bheil tart, thigeadh e. Agus ge b'e neach leis an àill, gabhadh e uisge na beatha gu saor.

18 Oir tha mi deanamh fianuis do gach uile neach a chluinneas briathra fàidheadaireachd an leabhair so, Ma chuireas neach air bith ris na nithibh so, cuiridh Dia airsan na plàighean a tha sgrìobhta anns an leabhar so.

19 Agus ma bheir neach air bith o bhriathraibh leabhair na fàidheadaireachd so, bheir Dia a chuibhrionn-san á leabhar na beatha, agus as a' bhaile naomh, agus as na nithibh a tha sgrìobhta anns an leabhar so.

20 A ta an ti a tha toirt fianuis air na nithibh so ag ràdh, Gu deimhin a ta mi a' teachd an aithghearr. Amen. Seadh, thig, a Tighearna Iosa.

21 Gràs ar Tighearna Iosa Crìosd gu robh maille ribh uile. Amen.

ABBREVIATIONS AND MARKS.

A' for "an," the article; as, "a' bhean" *the woman*, for "an bhean."
 A' for "ag," sign of the pres. part. of verbs beginning with a consonant; as, "a' bualadh" *striking*, but "ag òl" *drinking*.
 A' for "ann" *in*; as, "a'd' cheann" *in thy head*, for "ann do cheann."
 A for "as" *out of*, marked with an acute accent; as, "á teine" *out of fire*.
 'Ar for "thar," *over, above*; as, "deich 'ar fhichead" *thirty*.
 B' for "bu" *was*; as, "b'e" *he was*.
 C' for "cia" *who, what*; as, "c'ait," *where? or in what place?* "c'uin" *when? or at what time?*
 D' for "do," *thy, thine*; as, "d'athair" *thy father*.
 D', dh' for "do," sign of the preterite tense of verbs; as, "an d'aidich e" *has he confessed?* "dh'aidich mi" *I have confessed*.
 Eabh. for "Eabhra" *Hebrew*.
 Eir. for "Eirionnach" *Irish*.
 'G for "ag," sign of the pres. part. of verbs; as, "ga dheanamh" *doing it*.
 G' for "gu" *to*; as, "g'a cheann" *to the end thereof*.
 M' for "mo" *my*; as, "m'anam" *my soul*.
 M' for "mu" *about*; as, "m'a cheann" *about his head*.
 'Na for "ann a" *in his*; as, "'na chridhe" *in his heart*.
 'Nan for "ann an" *in their*; as, "'nan tighibh" *in their houses*.
 'Nar for "ann ar" *in our*; as, "'nar dùthaich" *in our country*.
 'Nur for "ann bhur" *in your*; as, "'nur fearann" *in your land*.
 'Nuair for "an uair" *in the time, when*.
 'R for "ar" *our*; as, "o'r sinnsiribh" *from our ancestors*.

'R for "bhur" *your*; as, "le'r cead" *with your leave*.

R' for "ri" *to*; as, "r'ar guth" *to our voice*.
 San, sa', for "anns an," *in the*; as, "san àm" *in the time*; "sa' bhaile" *in the city*.

Sasg. for "Sasgonach," or "Sasonach," *English*.
 Sna, for "anns na" *in the*; as, "sna coilltibh" *in the woods*.

T' for "do" *thy*; as, "t'anail" *thy breath*.
 Before a vowel, *d*, the initial consonant of this pronoun, is changed into *t*; but *t*, the initial consonant of the verbs "téid, tig, toir," is retained in writing, though pronounced as *d*.

(\) Grave accent. Vowels marked with this accent are always sounded long; and such as are not, are generally sounded short.

(') Acute accent. When the vowel *e* is sounded like *e* in *scene*, or the Latin *æ* in *Phæbus*, as the Scotch pronounce it, it is commonly marked with this accent.

() Apostrophe. When there is an elision of one or more letters, it is usually marked with an apostrophe: thus, when the preceding word ends, or the following word begins, with a vowel, there is an elision of the possessive pronoun "a;" as, "le 'shùil" *with his eye*, for "le a shùil;" "call 'anama" *the loss of his soul*, for "call a anama." A few Gaelic words admit of a final vowel, or not, as the euphony requires it; as, "ait," or "aite," *a place*; "Tighearn," or "Tigh-earna," *Lord*; "naomh," or "naomha," *holy*; "fad," or "fada," *long*; "camp," or "campa," *a camp*: but as these final vowels are not essential to the words, their absence is not marked with an apostrophe.



